

曾正文全集

089.7

982

4

仿 古 字 版

會 文 正 公 全 集

總 目

第一冊
傳 年 文 詩 鳴原堂論文 孟子要略 奏 稿 手 書 第三冊 札 牘

批 日 讀 治 雜 家 家 嘉 附 大 榮 批 日 讀 治 雜 家 家 嘉 附 大 榮
牘 記 錄 書 語 錄 著 訓 書 鈔 言 事 錄 牘 記 錄 書 語 錄 著 訓 書 鈔 言 事 錄

世 界 書 局 印 行



3 1772 7691 6

凡例

一會文正公學問事功皆彪炳一代。謂之政治家可。謂之軍事家可。謂之文學家理學家亦無不可。得其一鱗一爪已足窺豹一斑。今彙刊全集則其彌中彪外。施於國。刑於家。修於身者。纖悉靡遺。而公之全面目見矣。

二市上印行公集者甚多。編次往往少有系統。而訛奪又十之八九。讀者病焉。今重加編定。別爲六類。類復分目。苟能依類閱讀。則條理秩然。而無凌雜之患矣。其訛奪之處亦多所補正。

三公生平所著書。統具於是。故謂之全集。至如編纂手鈔之書。如經史百家雜鈔十八家詩鈔之類。當另爲印行。性質不同。讀者之需要各異。故也。各就所需購備。亦曾及之一法耳。

四板式字體以及校勘種種均極注意。但仍當繼續改進。俾臻完善。以副讀者之雅意。

五書首撰有傳狀。公之平生可詳也。附有肖像。公之儀容可接也。印有真蹟手札。公之風度可見也。置此一書。無異與公共處於一堂。

六全集共分七類。一總類。二文學類。三學術類。四奏疏類。五函牘類。六修治類。七家書類。

民國二十五年六月編者識

仿古字版

會
國
藩
傳

世界書局印行

曾國藩傳

曾國藩。字滌生。號伯涵。湖南湘鄉人。曾氏自清初由衡陽遷湘。祖玉屏。以力田好善聞。父麟書。困苦於學。授徒自給。國藩九歲。畢五經。十五



讀周禮儀禮史記文選。二十三入縣學。次年。鄉試中式。會試不售。留京師。窮研經史。好昌黎韓氏之文。又明年。再報罷。貸百金過金陵。盡以購書。歸而誦習益勤。至道光十八年。成進士。改翰林院庶吉士。二十年。散館。授檢討。二十三年三月。大考二等。以侍講陞用。六月。充四川鄉試正考官。七月。補侍講。十二月。充文



淵閣校理。二十四年。轉侍讀。二十五年三月。充會試同考官。五月。遷詹事府右春坊右庶子。九月。轉左庶子。旋陞翰林院侍講學士。十二月。充日講起居注官。二十六年。充文淵閣直閣事。二十七年五月。大考二等。遇缺題奏。六月。擢內閣學士。兼禮部侍郎銜。二十八年。稽察中書科事務。二十九年正月。陞禮部右侍郎。八月。署兵部左侍郎。三十年正月。宣宗崩。文宗即位。國藩遵旨上疏議郊配廟祔禮。上深聽之。三月。又應詔陳言。疏曰。今日所當講求者。惟在用人。人才不乏。欲作用而激揚之。則賴皇上之妙用。有轉移之道。有培養之方。有攷察之法。三者不可廢一。臣觀今日京官辦事。通病有二。曰退縮。曰瑣屑。外官辦事。通病有二。曰敷衍。曰顛預。習俗相沿。但求苟安無過。不肯振作有爲。將來一遇艱鉅。國家必有乏才之患。今遽求振作之才。又恐躁競者因而倖進。臣愚以爲欲令有用之才。不出範圍之中。莫若使從事於學術。又必皇上以身作則。乃能操轉移風化之本。臣攷聖祖登極後。勤於學問。儒臣逐日進講。寒暑不輟。召見廷臣。輒與往復討論。當時人才濟濟。好學者多。康熙末年。博學偉才。大半皆聖祖教諭成就之。皇上春秋鼎盛。正符聖祖講學之年。臣請俟二十七月後。舉逐日進講例。四海傳播。人人向風。召見臣工。從容論難。見無才者。則勗之以學。以痛懲模稜罷輒之習。見有才者。則愈勗之以學。以化其剛愎刻薄之偏。十

年以後。人才必大有起色。此轉移之道也。內閣六部翰林院。爲人才薈萃之地。內而卿相。外而督撫。率出於此。皇上不能一一周知也。培養之權。不得不責成堂官。所謂培養。有數端。曰教誨。曰甄別。曰保舉。曰超擢。堂官於司員。一言嘉獎。則感而圖功。片語責懲。則畏而改過。此教誨不可緩也。榛棘不除。則蘭蕙減色。害馬不去。則騏驎短氣。此甄別不可緩也。嘉慶四年。十八年。兩次令部院各保司員。此保舉成案也。雍正間。甘汝來以主事而賞人。慶放知府。嘉慶間。黃鉞以主事而充翰林。入南齋。此超擢成案也。蓋嘗論之。人才譬若禾稼。堂官之教誨。猶種植耘耔也。甄別。猶去稂莠。保舉。猶灌溉也。皇上超擢。譬之甘雨時降。茁勃然興也。堂官時常到署。猶農夫日在田間。乃熟穡事。今各衙門堂官。多內廷行走之員。或累月不到署。自掌印主稿外。司員半不識面。譬之嘉禾稂莠。聽其同生。同落於畝畝之中。而農夫不聞。教誨之法無聞。甄別之例亦廢。近奉明詔保舉。又但及外官。不及京秩。培養之道。不尙有未盡者哉。頃歲以來。六部人數日多。或廿年不得補缺。終身不得主稿。內閣翰林院人數。亦三倍於前。往往十年不得一差。不遷一秩。而堂官多直內廷。本難分身入署。又或兼攝兩部。管理數處。縱有才德俱優者。曾不能邀堂官之顧。又烏能達天子之知。以數千人。近在眼前。不能加意培養。甚可惜也。臣愚欲請皇上稍爲酌量。每部須

有二三堂官不入內廷者。令日日到署。與司員相砥礪。翰林掌院亦須有不直內廷者。與編檢相濡染。務使屬官之性情心術。長官一一周知。皇上不時詢問。某也才。某也直。某也小知。某也大受。不特屬官優劣燦呈。卽長官淺深。亦可互見。旁考參稽。而入衙門之人才。同往來聖主之胸中。彼屬官者。但令姓名達於九重。不必陞官遷秩。而已感激無地。然後保舉之法。甄別之例。次第舉行舊章。皇上偶有超擢。則梗柵一陞。而草木之精神皆振。此培養之方也。古者詢事攷言。二者兼重。近來各衙門辦事。小者循例。大者請旨。本無才猷可見。莫若於言考之。而召對臣言。天威咫尺。不宜喋喋便佞。則莫若於奏摺考之。國家定例。內而九卿科道。外而督撫藩臬。皆有言事之責。各省道員。亦許專摺言事。乃十餘年間。九卿無一人陳時政得失。司道無一摺言地方利病。科道奏疏。無一言及主德隆替。無一摺彈大臣過失。一時風氣。不解其所以然。本朝以來。匡言主德者。如孫嘉淦。以自是規高宗。高鋹以寡慾規宣宗。皆優旨嘉納。糾彈大臣者。如李之芳。劾魏裔介。彭鵬。劾李光地。後四人皆爲名臣。至今傳爲美談。直言不諱。未有盛於我朝者也。皇上御極之初。特詔求言。而褒答倭仁之諭。臣讀之。至於抃舞感泣。然猶有過慮者。誠見皇 upper 求言甚切。諸臣紛紛入奏。或條陳庶政。頗多雷同。或彈劾大臣。懼長攻訐。臣愚願皇上堅持聖意。借奏摺爲考

覈人才之具。永不生厭。數之心。涉於雷同者。不必交議而已。過於攻訐者。不必發鈔而已。此外則但見有益。不見有損。今考九卿賢否。憑召見應對。考科道賢否。憑三年京察。考司道賢否。憑督撫考語。若人人建言。參互質證。豈不更爲覈實乎。此攷察之法也。奏入。諭稱其剴切明辨。切中事情。命百日後舉行日講。國藩旋條陳日講事宜。下部議。格不行。六月。署工部左侍郎。咸豐元年五月。署刑部右侍郎。十月。充順天武鄉試正考官。二年正月。署吏部左侍郎。六月。充江西鄉試正考官。旋丁母憂。回籍時。廣西洪秀全倡亂。進湖南。圍長沙。不克。攻湖北武昌。陷之。連陷沿江郡縣。江南大震。初。敵至長沙城南。穿地道。焚火藥。城崩入丈。以總兵瞿騰龍苦戰得完。然敵竟從容渡湘去。諸軍近萬人。但幸其去。莫敢問其踪跡也。十一月。乃命國藩會同湖南巡撫張亮基。辦理本省團練。搜剿土匪。時塔齊布尙以都司署撫標參將。國藩奏稱其奮勇耐勞。深得民心。並云。塔齊布將來如打仗不力。臣甘同罪。請旨獎敘。專令督隊剿敵。會秀全破金陵。逆流西上。皖鄂郡縣。相繼淪陷。上以國藩所練鄉勇得力。剿匪著有成效。諭令馳赴湖北。剿辦。國藩以爲賊所以恣意往來者。由長江無軍官扼禦故也。乃駐衡州。造戰艦。練水軍。勸捐助餉。四年二月。奏請將原任湖北巡撫楊健。從祀鄉賢。下部議處。尋議降二級調用。復督師東下。三月。與敵接戰岳州。四月。

又戰靖港。各軍相繼潰退。國藩立旗岸上。仗劍呼曰。過旗者斬。士皆繞旗旁下退。國藩憤甚。投水死。以救得免。乃有裁汰所部。添造戰船之議。未幾得旨革職。仍准專摺奏事。時國藩已遣守備楊載福知縣彭玉麟與塔齊布合擊於湘潭。大破之。復其城。敵退踞岳州。七月。國藩攻克之。燬其舟。敵浮舟上攻。再破之。遂與塔齊布水陸追擊。自城陵磯二百餘里。剿洗淨盡。賞三品頂戴。九月。復武昌漢陽。盡焚裏河敵舟。賞二品頂戴。署湖北巡撫。賞戴花翎。旋以國藩力辭。賞兵部侍郎銜。辦理軍務。毋庸署理。巡撫國藩建三路進兵策。奏言。江漢肅清。賊之回巢抗拒者。多集與國蘄州廣濟諸屬。自巴河至九江。節節皆有賊船。擬塔齊布由南路進攻與國大冶。湖北督臣派兵由北路進攻蘄州廣濟。臣由江路直下。與陸軍相輔爲進止。如所請行。國藩揚帆而下。連戰勝敵。蘄州敵來攻。再破之。會塔齊布復與國大冶。時敵以田家鎮爲巢穴。蘄州爲聲援。自州至鎮四十餘里。沿岸築土城。設礮位。對江轟擊。橫鐵鎖江上。以阻舟師。南岸半壁山富池口。均大股悍敵駐守。舟楫往來如織。國藩計欲破田鎮。當先奪南岸。十月。寧紹台道羅輝南大破之。半壁山克之。國藩部署諸將。分戰船四隊。一隊扼敵上進。一隊備爐翦椎斧。前斷鐵鎖。敵礮船護救。三隊圍擊之。沈二艘。敵不敢近。須臾鎔液鎖斷。敵驚顧失色。率舟遁。四隊駛而下。追及於鄔穴。東南風大

作舟不能行。圍而焚之。百里內外。火光燭天。陸軍自半壁山呼而下。悉平田鎮。富池口營壘。蘄州敵遁。是役也。斃敵數萬。燬其舟五千。遂與塔齊布復廣濟。黃梅。孔壠口。小池驛。上游。江面肅清。進圍九江。十二月。上以國藩調度有方。賞穿黃馬褂。並諸珍物。國藩遣水軍攻湖口。梅家洲。以通江西餉道。五年。敵竄武昌。分股乘夜。由小池口襲焚國藩戰艦。戰失利。越數日。大風復壞舟數十。國藩迺以其餘。遣署湖南按察使李孟羣。知府彭玉麟。及湖北布政使胡林翼。所帶陸軍。回援武漢。親赴江西。造船募勇。增立新軍。連破姑塘。都昌。進攻湖口。大敗之。七月。湖南提督塔齊布卒。國藩馳往九江。兼統其軍。八月。水軍復湖口。九月。補兵部右侍郎。六年。石達開竄江西。郡縣多陷。國藩馳赴省城。遣道員彭玉麟。統內湖水師。退駐吳城。以固湖防。同知李元度。回剿撫州。以保廣信。諸將分扼要地。先後復進。賢建昌。東鄉。豐城。饒州。連破撫州。樟樹。鎮羅溪。瓦山。吳城之敵。會同湖北援師。知縣劉騰鵬。同知曾國華等。大破之。瑞州。復靖安。安義。上高。自江西達兩湖之路。賴以無梗。七年正月。復安福。新淦。武寧。瑞昌。德安。奉新。軍聲大振。不一歲。石達開敗遁。江西獲安。國藩力也。二月。丁父憂。上諭賞假三個月。回籍治喪。俟假滿後。再赴江西。督辦軍務。尋固請終制。上諭俟九江克復。江面肅清。賞假令其回籍營葬。俾得忠孝兩全。國藩復奏稱江西各營。安謐。

如常。毋庸親往撫馭。並瀝陳才難宏濟。心抱不安。奉旨先開兵部侍郎缺。暫行在籍守制。江西如有緩急。卽行前赴軍營。以資督率。八年五月。命辦理浙江軍務。移師援閩。閩敵分股竄擾江西。國藩遣將員李元度破之。廣豐玉山。張運蘭復安仁。時國藩駐軍建昌。東南北三路皆敵。國藩計東路連城。敵勢已衰。閩事不足深慮。北路景德鎮。乃大局所關。又較南路信豐爲重。乃遣張運蘭攻景德鎮。道員蕭啓江追剿信豐之敵。九年。蕭啓江破之。南康克新城。墟池江敵巢。遂復南安。解信豐圍。敵竄湖南。將由粵黔入蜀。國藩隨檄蕭啓江馳赴吉安。援應湖南。張運蘭復景德鎮。浮梁縣。江西肅清。餘敵竄皖南。國藩奉命防蜀。行至陽邏。奉諭皖省賊勢日張。飭籌議。由楚分路剿辦。國藩回駐巴河。簡校軍實。因奏言。自洪楊內亂。鎮江克復。金陵逆首。凶餒久衰。徒以陳玉成往來江北。勾結捻匪。廬州浦口三河等處。疊挫我師。遂令皖北之糜爛日廣。江南之賊糧不絕。欲廓清諸路。必先破金陵。欲破金陵。必先駐重兵滁和。而後可去江南之外屏。斷蕪湖之糧路。欲駐兵滁和。必先圍安慶。以破陳逆之老巢。兼擣廬州。以攻陳逆所必救。進兵須分四路。南則循江而下。一由宿松石牌規安慶。一由太湖潛山規桐城。北則循山而進。一由英山霍山攻舒城。一由商城六安規廬州。南軍駐石牌。則與福建水師提督楊載福黃石磯之師。聯爲一氣。北軍至六

安州。則與壽州之師聯爲一氣。國藩請自規安慶。協領多隆阿綏靖鎮。總兵鮑超取桐城。署湖北巡撫胡林翼取舒城。荆宜施道李續宜規廬州。奏入。上是之。十年二月。陳玉成攻太湖。國藩分兵破之。旋因金陵大營分兵援浙。城中悍敵。大股出撲。統帥和春張國樞。以兵單敵衆。退守丹陽。旋皆戰歿。兩江總督何桂清。棄常州。奔上海。致蘇常連陷。勢甚蔓延。四月。上特命國藩馳赴江蘇。並先行賞加兵部尙書銜。署理兩江總督。六月。實授。以欽差大臣督辦江南軍務。七月。命皖南軍務。統歸國藩督辦。十一年。國藩進駐祁門。督飭楊載福。按察使彭玉麟。道員會國荃等諸軍。水陸夾擊。爲逐層掃蕩之計。先後復黟縣。都昌。彭澤。東流。建德。休寧。徽州。義寧。各城。悍敵數萬踞安慶。久不下。會國荃副都統多隆阿等圍之。陳玉成來援。諸軍擊走之。拔其城。敵無脫者。進復池州。鉛山。無爲。銅陵。及泥汊。神塘。河。運。漕。東關。各隘。十月。穆宗御極。加太子少保銜。令統轄江蘇。安徽。江西。浙江。四省軍務。巡撫提鎮以下。悉歸節制。國藩力辭。上不許。先是。敵圍杭州。國藩疊奉援浙之命。咨令太常寺卿左宗棠統軍入浙。檄按察使張運蘭副將孫昌圖等。水陸各營。均歸調度。以厚兵力。並撥給錢糧。釐金。以清所部積欠。因奏稱。左宗棠前在湖南。撫臣駱秉章幕中。贊助軍謀。兼顧數省。其才實可獨當一面。懇明降諭旨。令左宗棠督辦浙江全省軍務。上以浙江巡

撫王有齡及江蘇巡撫薛煥不能勝任。命國藩察看具奏。並迅速保舉人員。候旨簡放。國藩奏言。蘇浙兩省。羣賊縱橫。安危利鈍。繫於巡撫一人。王有齡久受客兵挾制。難期振作。欲擇接任之人。自以左宗棠最爲相宜。惟此時杭州被困。必須王有齡堅守於內。左宗棠救援於外。俟事勢少定。乃可更動。至江蘇巡撫一缺。目前實無手握重兵之人。可勝此任。查有臣營統帶淮揚水師之福建延建邵遺缺道員李鴻章。勁氣內斂。才大心細。若蒙聖恩擢署江蘇巡撫。臣再撥給陸軍。便可馳赴下游。保衛一方。奏入。上皆特如所請。復因杭州失守。奏陳補救之策。同治元年正月。命以兩江總督協辦大學士。國藩奏言。自去秋以來。疊荷鴻恩。臣弟國荃。又拜浙江按察使之命。一門之內。數月之間。異數殊恩。有加無已。感激之餘。繼以悚懼。懇求皇上念軍事之靡定。鑒微臣之苦衷。金陵未克以前。不再加恩於臣家。又前此疊奉諭旨。飭保薦江蘇安徽巡撫。復蒙垂詢閩省督撫。飭臣保舉大臣。開列請簡。封疆將師。乃朝廷舉措之大權。如臣愚陋。豈敢干預。嗣後如有所知。堪膺疆寄者。隨時恭疏入告。仰副聖主旁求之意。但泛論人。才以備採擇。則可。指明某缺。徑請遷除。則不可。蓋四方多故。疆臣既有征伐之權。不可更分黜陟之柄。風氣一開。流弊甚長。辨之不可不早。尋遣將擊走徽州荻港之敵。復青陽太平涇縣石埭。國荃會同水師。復巢縣含山。

和州並銅陵。屈雍家鎮裕溪口。西梁山四隘。弟貞幹復繁昌南陵。破敵二山魯港。上以國藩前奏情詞懇摯。出於至誠。不再加恩。而進國荃貞幹等職。國藩駐安慶督師。奏請仍建安徽省會於安慶。設長江水師提督以下各官。指授諸將機宜。以次規取皖南北府縣各城。國荃率師進圍金陵。蘇浙李秀成等分道來援。大小數十戰。力卻之。二年五月。復江浦浦口。克九江州。長江肅清。因淮南運道暢通。籌復鹽務。改由民運。奏請疏銷輕本保價杜私之法。三年正月。克鍾山。國藩令弟國荃會諸將合圍金陵。六月。金陵克復。生擒忠王李秀成等。掘戮洪秀全屍三日內。斃敵十餘萬人。全股殄滅。國藩紅旗奏捷。並稱洪逆倡亂粵西。於今十有五年。竊踞金陵。亦十一年。流毒海內。神人共憤。我朝武功之盛。超越前古。如嘉慶川楚之役。蹂躪僅及四省。淪陷不過十餘城。康熙二藩之役。蹂躪尙止十二省。淪陷亦第三百餘城。今粵匪之變。蹂躪竟及十六省。淪陷至六百餘城之多。實爲罕見之巨寇。卒能次第削平。剷除元惡。蔚爲中興之業。上覽奏嘉悅。諭曰。會國藩自咸豐四年。在湖南首倡團練。創立舟師。與塔齊布羅澤南等屢建殊功。保全湖南郡縣。克復武漢等城。肅清江西全境。東征以來。由宿松克潛山太湖。遞駐祁門。疊復徽州郡縣。遂拔安慶省城以爲根本。分檄水陸將士。規復下游州郡。茲大功告成。逆首誅鋤。由該大臣籌策無遺。謀勇

兼備。知人善任。調度得宜。會國藩著加恩賞。加太子太保銜。錫封一等侯爵。世襲罔替。並賞戴雙眼花翎。浙江巡撫會國荃。賞加太子少保銜。錫封一等伯爵。並賞戴雙眼花翎。將士錫爵進秩有差。時捻衆倡亂日久。徒衆數十萬。馬數萬匹。分合不常。颺忽無定。四年四月。欽差大臣科爾沁親王。僧格林沁。戰歿於山東曹州。聲勢日熾。命國藩赴山東一帶督兵剿辦。山東河南直隸三省旗綠各營。及地方文武員弁。均歸節制調遣。國藩將赴徐州督師。乃招集新軍。添練馬隊。檄調皖南鎮總兵劉松山。直隸提督劉銘傳。總兵周盛波。道員潘鼎新。諸軍會剿。五月。敵竄亳州雒河集。國藩駐臨淮關。遣兵擊走之。先後奏言。此賊已成流寇。飄忽靡常。宜各練有定之兵。乃足以制無定之賊。臣由臨淮進兵。將來安徽卽以臨淮爲老營。及江蘇之徐州。山東之濟寧。河南之周家口。四路各駐大兵。爲重鎮。一省有急。三省往援。其援軍之口糧火藥。卽取給於受援之地。庶幾往來神速。呼吸相通。時張總愚任柱牛洛紅及太平軍賴汶光。擁衆十萬。條分條合。八月。國藩遣劉銘傳敗之。潁州。敵東走曹州。國藩檄潘鼎新力扼運河。派軍馳赴山東助剿。敵不能渡運。遂南走徐州。踞豐沛銅山境內。九月。國藩遣潘鼎新等敗之。徐州。豐縣敵復竄山東。十月。周盛波劉銘傳敗之。寧陵扶溝。

敵竄。潘鼎新等敗之。復其城。任柱回竄沈邱。

將踞蒙亳老巢遣劉銘傳周盛波擊之。張總愚分股入鄆城。三月。劉銘傳廣西右江鎮總兵張樹珊敗之。潁州周家口。羣敵合踞濮范鄆鉅間。諸軍擊破之。張總愚趨單縣。任柱走靈璧。國藩駐徐州。修浚運河。以固東路。五月。遣諸將敗張會於泮河王家林。敗任會於永城徐州。敵自二月北竄。堅圖渡運。徘徊曹徐淮泗者兩月餘。迄不得逞。於是張總愚入豫。任柱入皖。國藩遣周盛波大破牛洛紅於陳州。敗任賴二會於烏江河。張樹珊敗之於周家口。牛張二會渡沙河而南。任賴二會亦竄渡賈魯河。國藩以前防守運河。粗有成效。必仿照於沙河設防。俾敵騎稍有遮攔。庶軍事漸有歸宿。定議自周家口下至槐店。扼守沙河。上至朱仙鎮。扼守賈魯河。因奏言。河身七百餘里。地段太長。不敢謂防務既成。百無一失。然臣必始終堅持此議。不以艱難而自畫。不以浮言而中更。以求有裨時局。自古辦流寇。本無善策。惟有防之。使不得流。猶是得寸則寸之道。俟河防辦成。則令防河者與遊擊者。彼防此戰。更番互換。庶足以保常新之氣。六月。遣劉松山宣化鎮總兵張詩日大破之於上蔡西華。敵由河南巡撫所派防軍沉地逸出東竄。河防無成。七月。遣劉松山提督宋慶大破之南陽新野。九月。劉銘傳潘鼎新破之鄆城。運防賴以無恙。時以國藩行師迂緩。謗議紛起。乃自陳病狀。上命國藩仍回兩江總督本任。以李鴻章代辦剿匪事宜。國藩請

開總督缺。以散員留營自效。不許。十一月回任。六年六月。授大學士。仍留兩江總督任。七月。授體仁閣大學士。九月。奏稱製造輪船。爲救時要策。請將江海關洋稅酌留二成。一成爲專造輪船之用。一成酌濟淮軍及添兵等事。從之。十二月。捻平。賞雲騎尉世職。七年四月。授武英殿大學士。七月。調直隸總督。十二月入覲。賜紫禁城騎馬。八年二月。查明積滯大窪地畝。應徵糧賦。請分別豁減。從之。三月。奏直隸刑案積多。與臬司張樹聲力籌清釐。甫有端緒。張樹聲見調任山西。請暫留一年。以清積案。諭曰。會國藩到任後。辦事認真。於吏治民風。實心整頓。力軌做習。著如所請。俾收指臂之助。一年之中。凡清結積案三萬餘件。又先後二次查明屬員優劣。開單具奏。得旨分別嘉勉降革。時直隸營伍廢弛。廷議選練六軍。命國藩將前定練軍章程。委籌經理。五月。國藩奏陳。一曰文法宜簡。一曰事權宜專。一曰情意宜洽。及免冒名頂替之弊。請敕原議各衙門覈議施行。復命國藩籌定簡明章程。奏報定議。國藩奏陳。試行果有頭緒。然後奏定簡明章程。允之。同治三年至九年正月。三屆京察。均蒙溫諭褒嘉。下部優敘。五月。通商大臣崇厚奏天津民人。因迷拐幼孩。有牽涉教堂情事。法國領事豐大業。出言不遜。對官施放洋槍。百姓激忿。毆斃豐大業。焚毀教堂。上命國藩赴天津查辦。並諭以查有實據。自應與洋人指證明確。將匪犯按律懲辦。

以除地方之害。國藩奏言。各省打毀教堂之案。層見疊出。而毆斃領事洋官。則從來未有之事。即使曲在洋人。而外國既斃多命。不肯更認理虧。臣但立意不欲與之開釁。使在彼有可轉圜之地。庶在我不失柔遠之方。六月抵津。查詢仁慈堂空眼剖心。毫無實據。奏稱探生配藥。野番兇惡之族。尙不肯爲。英法乃著名大邦。豈忍爲此殘忍之行。以理決之。必無是事。況彼以仁慈爲名。而反受殘酷之謗。宜洋人之忿忿不平也。又奏誅爲首滋事之人。將辦理不善之天津府縣革職治罪。復諭以洋人詭譎性成。得步進步。若事事遂其所求。將來何所底止。是欲弭釁而不免啓釁也。如洋人仍有要挾恫喝之語。會國藩當力持正論。據理駁斥。庶可折敵釁而張國維。國藩復奏。中國目前之力。未便遽啓兵端。惟有委曲求全之一法。因陳時事雖極艱難。謀畫必須斷決。伏見道光庚子以後。辦理洋務。失在朝戰夕和。無一定之至計。遂至外患漸深。不可收拾。皇上登極以來。守定和議。絕無更改。用能中外相安。十年無事。津郡此案。因愚民一旦憤激。致成大變。初非臣僚有意挑釁。朝廷昭示大信。不開兵端。此實天下生民之福。以後仍當堅持一心。曲全鄰好。以爲保民之道。時時設備。以爲立國之本。二者不可偏廢。一時輿情大譁。責國藩畏葸辱國。威名重挫。八月。調兩江總督。國藩歷陳病狀。請另簡賢能。開缺調理。奉諭慰勉。十一月。命充辦理通

商事務大臣。十年。以楚岸淮南引地。爲川鹽所侵占。偕湖廣總督李瀚章。定議。與川鹽分岸行銷。奏請武昌漢陽黃州德安四府。專銷淮鹽。安陸襄陽鄖陽荊州宜昌荊門五府一州。暫行借銷川鹽。湖南巡撫劉崑請於永寶二府試行官運粵鹽。國藩復力陳二府引地。不便改運。部議皆如所請。十一年二月卒。年六十有二。清自道光以後。文酣武嬉。泄沓成風。國藩以公忠誠樸。爲天下倡。卽其居官治軍。亦粹然儒者氣象。咸豐十一年。作勸誠州縣營官委員紳士十六條。頒示於衆。勸誠州縣者曰。治署內。以端本。明刑法。以清訟。重農事。以厚生。崇節儉。以養廉。勸誠營官者曰。禁騷擾。以安民。戒煙酒。以儆惰。勤訓練。以禦寇。尙廉儉。以服衆。勤學問。以廣才。戒傲惰。以正俗。勸誠紳士者曰。保愚懦。以庇鄉。崇廉讓。以奉公。禁大言。以務實。擴才識。以待用。國藩文章精深博大。氣勢雄厚。自謂粗解文字。由桐城姚先生啓之。其閎肆之筆。實非姚鼐所及也。當時漢宋之爭最烈。國藩務調和二者。以爲義理考據詞章。不可缺一。其言曰。文之純駁。一視乎見道之多寡。以爲差。所謂見道多寡之分數何也。曰深也。博也。後之見道不及孔氏者。其深有差焉。其博有差焉。能深且博。而文復不失古聖之韻者。孟氏而下。惟周子之通書。張子之正蒙。醇厚正大。邈焉寡儔。許鄭亦能深博。而訓詁之文。或失之碎。程朱亦能深博。而指示之語。或失之隘。其他若杜佑

奠樞馬貴與王應麟之徒能博而不能深則文流於蔓矣。游揚金許薛胡之儔能深而不能博則文傷於易矣。由是有漢學宋學之分。斷斷相角。竊欲取二者之長。見道既深且博以爲文。復臻於無累。遊其門者如李元度張裕釗吳汝綸黎庶昌薛福成皆極文章之選。庶昌之言曰。相鄉會文正公出。擴姚氏而大之。並功德言爲一塗。絜攬衆長。轅歸掩方。跨越百氏。將遂席兩漢而還之三代。使司馬遷班固韓愈歐陽修之文絕而復續。豈非所謂豪傑之士。大雅不羣者哉。蓋自歐陽氏以來一人而已。又曰。會氏之學蓋出於桐城。固知其與姚先生之旨合而非廣。己於不可畔岸也。循姚氏之說。屏棄六朝駢麗之習。以求所謂神理氣味。格律聲色。法愈嚴而體愈尊。循會氏之說。將盡取諸儒之多識格物。博辨訓詁。一納諸雄奇萬變之中。以矯桐城末流虛車之飾。其道相資。無可偏廢。其所推崇。初非盜矣。時海禁初開。有志之士爭習西學。國藩首派學生赴歐西留學。肄習學藝。造就甚多。其學一歸之有用。後人尊之爲湘鄉派云。所著有求闕齋集。遺疏入。上震悼。輟朝三日。追贈太傅。照大學士例賜卹。予諡文正。入祀京師昭忠祠賢良祠。於湖南原籍。江寧省城。建立專祠。尋湖廣總督李瀚章。安徽巡撫英翰。署兩江總督何璟。奏陳國藩歷年勳績。李瀚章奏略云。國藩初入翰林。卽與故大學士倭仁太常寺卿唐鑑徽寧道何桂珍。講明程朱

之學。克己省身。得力有自。遭值時艱。毅然以天下自任。死生禍福。置之度外。其過人識力。在能堅持定見。不爲浮議所搖。用兵江皖。陳四路進攻之策。剿辦捻匪。建四面蹙賊之議。其後成功。不外乎此。英翰奏略云。自安慶克復後。國藩督軍駐紮。整吏治。撫瘡痍。培元氣。訓屬僚。若子弟。視百姓如家人。生聚教養。百廢俱舉。至今皖民安堵。皆國藩所留貽。一聞出缺。士民奔走。婦孺號泣。以遺愛而言。自昔疆臣。揚斌于成龍而後。未有若此感人之深者。何璟奏略云。咸豐十年。國藩駐祁門。皖南北十室九空。自金陵至徽州。入百餘里。無處無賊。無日無戰。徽州初陷。休祁大震。或勸移營他所。國藩曰。吾初次進兵。遇險卽退。後事何可言。吾去此一步。無死所也。賊至環攻。國藩手書遺囑。帳懸佩刀。從容布置。不改常度。死守兼旬。檄鮑超一戰。驅之嶺外。以十餘載稽誅之狂寇。國藩授鉞四年。次第蕩平。皆因祁門初基不怯。有以寒賊膽而作士氣。臣聞其昔官京師。卽留心人物。出事戎軒。尤勤訪察。一材一藝。罔不甄錄。又多方造就。以成之。安慶克復。則推功於胡林翼之籌謀。多隆阿之苦戰。金陵克復。又推功諸將。無一語及其弟國荃。談及忠親王僧格林沁。李鴻章。左宗棠。諸人。皆自謂十不及一。清儉如寒素。廉俸盡充官用。未嘗置屋一廛。田一區。食不過四簋。男女婚嫁。不過二百金。垂爲家訓。有唐楊綰。宋李沆之風。其守之甚嚴。而持之有恆者。

曰不誑語不晏起。前在兩江任內。討究文書。條理精密。無不手訂之。章程點竄之批牘。前年回任。感激聖恩。高厚。仍令坐鎮東南。自謂稍有息安。負疚滋重。公餘無客不見。見必博訪周諮。殷勤訓勵。於僚屬之賢否。事理之原委。無不默識於心。其患病不起。實由平日事無鉅細。必躬必親。殫精竭慮所致也。奉諭於安徽湖北省城。建立專祠。此外立功省分。並著准其一體建立專祠。伊次子附貢生會紀鴻。伊孫會廣鈞。均著賞給舉人。准其一體會試。會廣銓著賞給員外郎。會廣銓賞給主事。均俟及歲時分部學習行走。何璟李瀚章英翰摺三件。均著宣付史館。用示眷念勳臣。有加無已至意。尋賜祭葬。十二年。兩江總督李宗羲。奏請將國藩入祀江寧府上元縣江寧縣二學名宦祠。光緒元年。大學士直隸總督李鴻章。以國藩遺愛在民。請於保定省城。建立專祠。並附祀省城名宦祠。先後均允之。十五年。慈禧皇太后歸政。追念功績最著諸臣。各賜祭一壇。國藩與焉。十八年。河南巡撫裕寬。以國藩督師豫省。弟前任河道總督國荃。功德在民。請於河南省城。捐建一祠。合祀。詔如所請。子紀澤襲侯爵。

仿古字版

會文正公年譜

世界書局印行

曾文正公年譜

公諱國藩。字伯涵。號滌生。湖南湘鄉縣人。曾氏祖籍衡陽。國初有孟學公者。始遷湘鄉荷塘都之大界里。傳至元吉公。族姓漸多。資產漸殖。遂爲湘鄉人。元吉公之仲子曰輔臣公者。公之高祖也。曾祖諱竟希。諡贈光祿大夫。妣彭氏。諡贈一品夫人。祖諱玉屏。字星岡。諡封中憲大夫。累贈光祿大夫。妣王氏。諡封恭人。累贈一品夫人。考諱麟書。字竹亭。湘鄉縣學生員。諡封中憲大夫。累封光祿大夫。妣江氏。諡封恭人。累封一品夫人。仲父諱鼎尊。早卒。叔父諱驥雲。字高軒。以公官。賜封光祿大夫。星岡公以嘉慶戊辰年。遷居白楊坪。公兄弟五人。女兄弟四人。公則竹亭公之長子也。

〔辛未〕嘉慶十有五年公生。公生十月十一日亥時。時竟希公在堂。壽幾七十矣。是夜夢有巨蟒盤旋空中。旋繞於宅之左右。已而入室。庭踴踉良久。公驚而寤。聞曾孫生。適如夢時。大喜曰。「是家之祥。曾氏門楣。行將大矣。」宅後舊有古樹。爲藤所纏。樹已槁。而藤日益大且茂。矯若虬龍。枝葉蒼翠。垂蔭一畝。亦世所罕見者。

〔壬申〕嘉慶十七年公二歲。竟希公孝友敦篤。爲鄉里所敬。年七十。見曾孫。極欣愛之。

〔癸酉〕嘉慶十八年公三歲。公幼小時。狀貌端重。自初生至三歲。庭戶不聞啼泣聲。母江太夫人勤操作。恆不顧復。每日依祖母王太夫人紡車之側。花開鳥語。注目流眄。狀若有所會悟。王太夫人尤奇之。

〔甲戌〕嘉慶十八年公四歲。六月。妹國蕙生。

〔乙亥〕嘉慶二十年公五歲。冬十月。受學於庭。誦讀穎悟。竟希公益鍾愛之。

〔丙子〕嘉慶二十一年公六歲。公在家塾。以陳雁門先生爲公問字師。十月。竟希公薨。壽七十有四。葬西坑山。公哭泣甚哀。執喪若成人。

〔丁丑〕嘉慶二十二年公七歲。竹亭公粹然儒者。屢應童子試。未售。績學不怠。名其塾曰利見齋。課徒十餘人。訓誘專勤。公稟學於庭訓者。凡八年。

〔戊寅〕嘉慶二十三年公八歲。八月。妹國芝生。

〔己卯〕嘉慶二十四年公九歲。是年讀五經畢。始爲時文帖括之學。

〔庚辰〕嘉慶二十五年公十歲。五月。公弟國潢生。竹亭公笑謂公曰。『汝今有弟矣。』命作時文一道。題曰。『兄弟怡怡。』公文成。竹亭公喜甚曰。『文中有至性語。必能以孝友承其家矣。』

〔辛巳〕道光元年公十一歲。

〔壬午〕道光二年公十二歲。五月。公弟國華生。

〔癸未〕道光三年公十三歲。

〔甲申〕道光四年公十四歲。衡陽廩生。歐陽滄溟先生凝祉與竹亭公友善。常來家塾。見公所爲試藝。亟賞之。竹亭公請試以題。先生以共登青雲梯。命爲試律。詩成。先生覽而稱善曰。『是固金華殿中人語也。』因以女許字焉。是歲始從竹亭公至長沙省城。應童子試。八月。公弟國荃生。

〔乙酉〕道光五年公十五歲。竹亭公設館同族家塾。曰錫麟齋。公從受讀周禮儀禮成誦。兼及史記文選。

〔丙戌〕道光六年公十六歲。應長沙府試。取前列第七名。

〔丁亥〕道光七年公十七歲。

〔戊子〕道光八年公十八歲。九月。公弟國葆生。

〔己丑〕道光九年公十九歲。竹亭公設館石魚之百魯菴。公從。

〔庚寅〕道光十年公二十歲。九月。公季妹生。肄業於衡陽唐氏家塾。從事汪覺庵先生。公姊國蘭出閣適王氏。增名鵬遠。

〔辛卯〕道光十一年公二十一歲。公自衡陽還家塾。冬月。肄業本邑澗濱書院。山長劉元堂先生名象履。見公詩文。嘆賞不置。以爲大器。

〔壬辰〕道光十二年公二十二歲。竹亭公以府試案首。入湘鄉縣學。公從應試備取。以佾生註冊。試罷還居家塾。利見齋。

〔癸巳〕道光十三年公二十三歲。本年科試。入縣學。時公名子城。提督學政爲岳公鎮南。竹亭公年四十有三。應。

童試十七次始補生員。積苦力學。授徒家塾者二十年。至是深喜公之繼起。而早獲售也。十二月。歐陽夫人來歸。〔甲午〕道光十四年公二十四歲。肄業嶽麓書院。山長爲歐陽坦齋先生。公以能詩文。名噪甚。試輒第一。是科領鄉薦。中式第三十六名舉人。本科鄉試四書首題。疑是問。念思難見得思義。次題武王繼太王王季文王之緒。三題賢譽則巧也。聖譽則力也。由射于百步之外也。詩題賦得蕭得秋光入卷來。座主爲徐公雲瑞。許公乃安。房考官爲張公啓庚。十一月入都。是歲始見劉公蓉於朱氏學舍。與語大悅。因爲留信宿乃別。

〔乙未〕道光十五年公二十五歲。公寓長沙郡館。會試不售。留京師讀書。研窮經史。尤好昌黎韓氏之文。慨然思躡而從之。治古文詞自此始。

〔丙申〕道光十六年公二十六歲。會試再報罷。出都爲江南之遊。同邑易公作梅官隄寧知縣。因過訪之。由清江揚州金陵泝江而歸。公久寓京師。窘甚。從易公貸百金。過金陵盡以購書。不足則質衣裘以益之。比歸里。陳所購廿三史。竹亭公問所自來。且喜且誠之曰。爾借錢買書。吾不惜爲汝彌縫。但能悉心讀之。斯不負耳。公聞而悚息。由是侵晨起讀。中夜而休。泛覽百家。足不出戶者幾年。

〔丁酉〕道光十七年公二十七歲。公聞瀏陽文廟用古樂。詣瀏陽縣與其邑舉人賀以南等。諮考聲音律呂之源流。留兩月乃歸。適長沙。適劉公蓉與湘陰郭公嵩璫均在省城應試。相見懽甚。縱談今古。昕夕無間。閱月餘。始各別去。公妹國蕙出閣。適王氏。壻名待聘。十月。公生子。命名禎。第十二月。公謀入都會試。無以爲資。稱貸於族戚家。攜錢三十二緡以行。抵都中。餘三緡耳。時公車寒苦者。無以逾公矣。

〔戊戌〕道光十八年公二十八歲。正月入都門。寓內城西登輝堂。本科會試。欽派大總裁大學士穆彰阿公及朱公士彥吳公文鏗廖公鴻荃。欽命四書首題言必信。行必果。次題。萬物並育而不相害。道並行而不相悖。三題。頌其詩。讀其書。不知其人可乎。是以論其世也。是尙友也。詩題賦得泉細寒聲生夜壑。公中式第三十八名進士。房考官季公芝昌。同鄉中式者五人。寧鄉梅公鍾樹茶陵陳公源充。尤公至好。四月。正大光明殿覆試一等。殿試三甲第四十二名。賜同進士出身。朝政一等第三名。進呈宣宗。拔置第二名。五月初二日引見。改翰林院庶吉士。公少時器宇卓犖。不隨流俗。既入詞林。遂毅然有效法前賢。澄清天下之志。讀書自爲課程。編摩記注。分爲五門。曰

茶餘偶談。曰過隙影。曰饋貧糧。曰詩文鈔。曰詩文章。時有論述。不以示人。讀書務內自茲。亦性然也。中式後。更名國藩。八月請假出都。與凌公玉垣郭公嵩憲偕行。道出襄樊。舟次安陸。遇大風。鄰舟數十。鮮有完者。公舟獨無恙。十二月抵家。會氏自占籍衡陽以來。無以科名顯者。星岡公始督課子姪受學。賓禮文士。公遂以是年成進士。入翰林。星岡公年六十。健在。後公官至學士。堂上猶重慶。至侍郎。星岡公猶及見之。京朝官無及其盛者。公之以翰林歸也。親友踵門而賀。竹亭公治酒款客。比酒罷。星岡公語竹亭公曰。『吾家以農爲業。雖富貴毋失其舊。彼爲翰林。事業方長。吾家中食用。無使闕。以累其心。』自是以後。公官京師十餘年。未嘗知有家累也。

〔己亥〕道光十九年公二十九歲。正月。鄉里天行痘證大作。公季妹及子禎第皆染痘殤。季妹年十歲。禎第生甫十五日也。四月。公至衡陽。五月。公至耒陽。謁杜工部祠堂。遂至永興。有會記詩者。執贄願從事。公爲書勸之。以學。六月。還至耒陽。舟行出昭陽河。至清泉縣之泉溪市。還寓石鼓書院。數日乃抵家。議修譜牒。清查源流。八月。公由邵陽至武岡州。還至新化及安化縣之藍田市。十月。抵家。公妹國芝出閣。適朱氏。壻名詠春。公弟國華出繼叔父高軒公爲後。十一月初二日。子紀澤生。是日啓行北上。竹亭公高軒公送之長沙。十二月。由漢口行。次羅山縣。遇大雪。遂留度歲。是歲始爲日記。逐日記注所行之事。及所讀之書。名曰過隙影。公會試座師朱文定公士彥卒於位。

〔庚子〕道光二十年公三十歲。正月。由羅山啓行。至周家口。換車入都。寓宣武門外南橫街千佛菴。與同年陳公源充梅公鍾樹聯課爲詩賦。四月。移寓淀園掛甲屯。十七日。散館。欽命題正大光明殿賦。以裁用。用中懷永圖爲韻。詩題賦得人。情以爲田。取列二等第十九名。引見。授職檢討。是科散館。改部屬者二人。改知縣者三人。餘皆留館。六月。移寓菓子巷萬順客店。病熱危劇。幾不救。同寓湘潭歐陽小岑先生兆熊經理護持。六安吳公廷棟爲之診治。八月初。病漸減。始能食粥。九月。乃大愈。欽派順天鄉試磨勘官。十月。移寓達子營之關侯廟。與同年編修錢振倫同寓。十二月。移寓棉花六條胡同北路。竹亭公入都。公夫人歐陽氏。公弟國荃子紀澤從入都。

〔辛丑〕道光二十一年公三十一歲。正月。元日。入大內。隨班朝賀。嗣是歲以爲常。初十日。偕同鄉京官。至淀園。覲摺謝恩。爲湖南岳常澧各處被水。緩徵借給籽種。去歲大西洋英吉利國兵陷定海。宣宗命大學士琦善往廣軍。

查辦是月報英吉利攻破沙角礮臺直逼虎門上通諭中外授奕山爲靖逆將軍隆文楊芳爲參贊大臣琦善革職閏三月竹亭公出都還鄉五月梅公鍾樹在都病故公爲經理其喪委曲周至六月管理長沙府會館事益陽胡公源達卒公作誄詞輓之七月皇上御門侍班善化唐公鑑由江寧藩司入官太常寺卿公從講求爲學之方時方詳覽前史求經世之學兼治詩古文詞分門記錄唐公專以義理之學相助公遂以朱子之書爲日課始肆力於宋學矣八月移寓繩匠胡同北頭路東十月充國史館協修官二十八日偕同鄉京官遷摺謝恩爲岳州水災蠲免錢糧公寓書善化賀公長齡自陳其所學所志十一月十五日公長女生後適湘潭袁氏婿名秉楨公弟國荃肄業京寓公爲之講課

〔壬寅〕道光二十二年公三十二歲公益致力程朱之學同時蒙古倭仁公六安吳公廷棟昆明何公桂珍寶公擄仁和邵公懿辰及陳公源充等往復討論以實學相砥礪其爲日記力求攻過多痛自刻責之言每日必自記錄是爲日課每月中作詩古文若干篇是爲月課凡課程十有二條一日主敬二曰靜坐三曰早起四曰讀書不
二五曰讀史六曰謹言七曰養氣八曰保身九曰日知所亡十曰月無忘所能十一曰作字十二曰夜不出門是
春英吉利洋船駛入鎮江沿江諸城多不守和議成後乃退出海口七月公弟國荃出都公送之都門外蘆溝橋
以詩爲別有句云「辰君平正午君奇屈指老沉真白眉」公弟國潢生庚辰歲國華生壬午歲國荃字沅甫也
〔癸卯〕道光二十三年公三十三歲三月初十日上諭正大光明殿致試翰詹欽命題如石投水賦以陳善聞邪
謂之敬爲韻烹阿封卽墨論詩題賦得半窗殘月有鷺啼欽定一等五人萬青黎殷壽彭張芾蕭長城羅敦衍公
列二等第一名十四日引見奉旨以翰林院侍講升用五月考試筮六月欽命公充四川正考官以趙楫副之七
月公第二女生公出都行至保定府病暑不能食扶病而行閏七月行至西安李公星沅時爲陝西巡撫延之暑
中治醫藥數日病漸愈卽啓入蜀八月初四日抵成都接准吏部咨文已於七月十五日補授翰林院侍講之缺
具呈四川總督寶興公代表奏謝恩摺是科四川鄉試首題不知言無以知人也次題體羣臣也子庶民也三題人
有不爲也而後可以有爲詩題賦得萬點蜀山尖揭曉得士宋文親等六十二名副榜十二名如例九月二十一
日由成都回節十一月二十日抵都門覆命充文淵閣校理公居京師四年矣宦况清苦力行節儉而遇窮困及

有疾病死亡者。助資必豐。四川差竣。得俸千金寄家。爲鏡遺族姻之用。

〔甲辰〕道光二十四年公三十四歲。正月。陳公源克之妻易安人病卒於京師。其子遠濟甫生一月。公攜之宅中。僱乳媪飼養之。以次女許字之。二月。侍班於文淵閣。贊經筵大典。三月二十四日。移寓前門內。碾兒胡同。西頭路北。四月。考試差。五月初十日。奉上諭。翰林院自侍講以下。詹事府自洗馬以下。每日召見二員。公於二十日。召見勤政殿。派充翰林院教習庶吉士。八月。新寧江公志源以公車留京師。因郭公嵩燾求見公。江公素以任俠自喜。不事繩檢。公與語。市井瑣屑事。酣笑移時。江公出。公目送之。回顧嵩燾曰。「京師求如此人才不可得。」旣而曰。「是人必立功名於天下。然嘗以節義死。」時承平日久。聞者或駭之。江公自是遂師事公。二十八日。公第三女生。後適羅氏忠節公澤南之子。各兆升。九月。分校庶常館。十二月初七日。上御門。轉補翰林院侍讀。公作字初學顏柳帖。在詞垣兼臨褚帖。於詩則五七古學杜韓。近體專學杜。而於蘇黃之古詩。溫李之近體。亦最爲致力。還書家中。訓勉兄弟。以立志有恆爲本。作五箴以自警。一曰立志。二曰居敬。三曰主靜。四曰謹言。五曰有恆。公子紀澤是歲入家塾。塾師爲長沙馮樹棠先生。卓懷。

〔乙巳〕道光二十五年公三十五歲。三月。欽派會試同考官。簽分第十八房。薦卷六十四本。中式周士炳等十有九人。是科湖南中式八人。皆長沙府籍。貴州中式之黃輔相與姪彭年二人。原籍醴陵。而狀元爲蕭錦忠。朝元爲孫鼎臣。去秋鄉試。南元爲周壽昌。亦於是科入翰林。公時管理長沙郡館事。題名之日。公爲聯語云。「同科十進士。慶榜三名元。」蓋佳話也。五月初二日。上御門。公升授詹事府右春坊庶子。次日具摺謝恩。召見公於勤政殿。六月。轉補左庶子。夏間癘疾發。至秋微愈。自是以往。癘疾恆作。以至老年。未得全瘳也。九月。公弟國潢國華入都。二十四日。上御門。升授翰林院侍講學士。次日具摺謝恩。召見。宣宗時每歲舉行御門之典。至四五次。京朝官缺多。以其月簡放。示爵人於朝。與衆共之之意。合肥李公鴻章。本年家子也。中甲辰科舉人。是年入都會試。受業公門。公大器重之。十月初十日。皇太后萬壽。十五日。願恩詔於太和殿。公祖父父母。以公官。皆封中憲大夫。恭人。十一月。唐公鑑乞假回湖南。公爲校刻其所著學案小識一書。十二月十二日。補日講起居注官。二十二日。充文淵閣直閣事。公名位漸顯。而堂上重慶門。祚鼎盛。公每以盈滿爲戒。自名其書舍曰求闕齋。其說云。「求闕於他

事而求全於堂上也。同鄉京官及公車在都門者，遇疾患窮窘之事，恆有求於公。公嘗謂銀錢則量力仗助，辦事則竭力經營，人莫不稱厚焉。

〔丙午〕道光二十六年公三十六歲。公與弟國潢國華相砥厲於學，有如師友。爲國華納貢入監，應順天鄉試。五月，考試差。九月十八日，公第四女生，後適湘陰郭氏。郭公嵩燾之子，名剛基，夏秋之交，公病肺熱，僦居城南報國寺，閉門靜坐。攜金壇段氏所注說文解字一書，以供披覽。漢陽劉公傳瑩精考據之學，好爲深沈之思，與公尤莫逆。每從於寺舍，兀坐相對竟日。劉公謂近代儒者，崇尚考據，做精神費日力而無當於身心，恆以詳說反約之旨，交相勸勉。寺前有祠一所，祀崑山顧亭林先生。十月，公在寺爲詩五首贈劉公，以明其志之所嚮。公嘗謂近世所學者，不以身心切近爲務，恆視一時之風尚以爲程而趨之，不數年風尚稍變，又棄其所業，以趨於新。如漢學宋學，詞章經濟，以及一技一藝之流，皆各有門戶，更迭爲盛衰，論其原皆聖道所存，苟一念希天下之譽，校沒世之名，則適以自喪其守，而爲害於世。公與劉公傳瑩討論務本之學，而規切友朋，勸誠後進，一以此意爲兢兢焉。公在京所爲詩古文，不自存錄，隨時散佚。是冬以後，乃稍檢而存之。公弟國華應鄉試未售，仍留京肄業。公弟國潢賣覃恩誥命南歸。十月二十一日，領同鄉京官，具摺謝恩。爲湖南瀕湖圍田水災，奉旨蠲緩錢糧。湖南水災，迭奉恩旨。至是初用公名領銜奏事。十一月，聞祖妣王恭人之訃，請假兩月，設次成服。恭人歿以九月十八日，壽八十八歲。十二月，葬湘鄉二十四都木兜衝。

〔丁未〕道光二十七年公三十七歲。三月，稜寓南橫街路北。四月二十七日，奉旨考試翰詹，欽命題遠候賦，以脩閣下民當厥德爲韻。君子慎獨論，詩題賦得操身於德。公名列二等第四名。五月引見，奉旨記名遇缺題奏。賞大卷綬二件。六月，奉旨升授內閣學士，兼禮部侍郎銜。次日遞摺謝恩，召見勤政殿。欽派考試漢教習閣卷大臣。取士咸寧官學教習黃文璧等十三名。景山官學劉紹先等十五名。宗學郭嵩燾等十五名。覺羅官學崔斌等三十名。八旗學張春第等四十八名。七月，公弟國荃以府試案首，入湘鄉縣學。十月，欽派武會試正總裁。中式楊登魁等六十四人。又派殿試讀卷大臣。凡武進士弓矢技勇，上親閱之。派大臣及兵部尚書侍郎等侍班。十月二十日，領同鄉京官，具摺謝恩。爲沅澧一帶水災，奉旨蠲緩錢糧。十二月初九日，又遞摺謝恩，爲三廳收數，緩征屯田。是

歲山東河南亢旱。盜賊蜂起。兩省大吏。交部嚴議。欽差柏葰陳孚恩前往捕賊平之。李公鴻章郭公嵩燾李公宗羲均以是科成進士。

〔戊申〕道光二十八年公三十八歲。正月初八日。領同鄉京官。具摺謝恩。爲上年水災借給籽種。二月二十四日。子紀鴻生。漢陽劉公傳瑩移病歸籍。公爲文以送之。七月。公弟國荃科試一等。補廩膳生。九月十四日。領同鄉京官。具摺謝恩。因水災奉旨撫卹。十八日。欽派稽查中書科事務。公官至卿貳。名望漸崇。而好學不倦。其於朝章國故。如會典通禮諸書。尤所究心。又采輯古今名臣大儒言論。分條編錄。爲曾氏家訓長編。分修身齊家治國爲三門。其目三十有二。公嘗謂古人無所云經濟之學。治世之術。壹衷於禮而已。秦文恭公五禮通考。綜括天下之事。而於食貨之政稍缺。乃取鹽課海運錢法河堤各事。鈔輯近時奏議之切當時務者。別爲六卷。以補秦氏所未備。又探國史列傳。及先輩文集。中誌狀之屬。分門編錄。條分近代學術。用桐城姚氏之說。以主理考據詞章三者爲目。依彙輯之。星岡公病風痺踰年。公令弟國華出都。還湖南。十月。聞劉公傳瑩以病卒於家。公設位哭之。爲墓志一篇。家傳一篇。刻石寄其家。劉公所著述無成編。獨於金氏孟子集注考證中。搜得朱子所編孟子要略一書。公爲校刻行於世。二十三日。領同鄉京官。具摺謝恩。本年水災之區。奉旨蠲緩錢糧。公官京師十年。俸薄不給於用。取資稱貸。及官侍郎。每歲以其所得俸銀數十兩。爲高堂甘旨之奉。兼以周族戚之貧者。

〔己酉〕道光二十九年公三十九歲。正月初九日。率同鄉京官。具摺謝恩。爲災區借給籽種。二十二日。奉旨升授禮部右侍郎。次日。具摺謝恩。召見。上嘉勉焉。公勤於供職。署中辦事無虛日。八日。一至淀園。該班奏事。有事加班。不待期日。在部司員。咸服其條理精密。三月十四日。值班召見。三十日。又召見。每有奏對。恆稱上意。禮部翰林院詹事府署中。皆有土地祠。祠皆祀先儒韓愈。禮部之祠。復有孔子木主。胥吏相沿。莫知所自。公取水主焚化。而爲文以祀韓子。辯正其謬。夏督修長沙府會館。旋又修湖廣會館。位置亭榭。有紆餘卓犖之觀。八月初二日。奉旨兼署兵部右侍郎。二十五日。欽派宗室舉人覆試闈卷大臣。九月十七日。欽派順天鄉試覆試闈卷大臣。十月初四日。欽派順天武鄉試校射大臣。武鄉試分四圍。王大臣分較。公所較中式者五十二名。二十六日。率同鄉京官。具摺謝恩。爲水災奉旨蠲緩錢糧。是歲東南各省。大水民飢。江南浙江湖北均展期。九月。舉行鄉試。湖南賊匪李沅

發倡亂於新寧。戕官據城。分擾黔粵邊境。粵逆亦從此萌芽矣。先是江公忠源在籍擒獲會匪雷再浩。遂以知縣揀發浙江。署秀水縣事。辦理賑災及保甲。甚得民譽。公聞新寧之亂。恐匪黨尋仇及江公之家。遂致書江公。勸其棄官以赴家難。未幾而賊黨潰竄。江公家亦無損焉。十一月十五日。聞祖考星岡公之訃。請假兩月。設位成服。星岡公之卒。以十月初四日。壽七十有六歲。葬於八斗衝。遷王恭人之柩附葬。十二月十一日。孝和睿皇后升遐。公以禮部職任所在。不俟假滿。即日入內供辦。其署中他事。仍不與聞。

〔庚戌〕道光三十年公四十歲。正月十四日。宣宗成皇帝升遐。殊諭遺命四條。其中無庸郊配。無庸廟祔二條。文宗嗣位。諭令臣工詳議具奏。十五日。奉穆孝和睿皇后梓宮於漪春園。十六日。諭臣下議行三年喪禮。二十三日。召見。咨以大禮。二十六日。上諭太和殿頒登極詔書。二十七日。王大臣九卿集議。覆奏郊配廟祔二事。公專摺具奏。稱。遺命無庸廟祔一條。攷古準今。萬難遵從。無庸郊配一條。不敢從者有二。不敢違者有三。疏對甚晰。時恭遇登極覃恩。加一級。請封三代。皆封榮祿大夫。公以本身妻室應得封典。懇封叔父母。二月初二日。內賜遺念衣一件。玉佩一事。是日奉穆大行皇帝梓宮於圓明園正大光明殿。初六日。奉上諭。待邸會國藩所奏。頗有是處。其餘京堂及科道等所奏。各紆己見。殊少折衷。各摺均著發還。欽此。初七日。召見。公奏對甚詳。上益嘉之。初八日。奉上諭。九卿科道。有言事之責者。得用人行政一切事宜。皆得據實直陳。封章密奏等因。欽此。三月。公遞應詔陳言一摺。奏稱。用人行政。二者并重。然凡百庶政。著有成憲。未可輕議。今日所當講求。惟在用人一端。人才有轉移之道。有培養之方。有政察之法。三者不可廢一。皇上春秋鼎盛。與聖祖仁皇帝講事之年相似。請俟二十七日後。舉行逐日進講之例。亦請廣開言路。借臣工奏章。以爲考核人才之具。疏入。奉上諭。禮部侍郎會國藩奏陳用人之策。朕詳加披覽。剴切明辨。切中情事。深堪嘉納。連日左副都御史文瑞大理寺卿倭仁通政使羅惇衍等。各陳時事。朕四降旨褒嘉。其通政副使王慶雲鴻臚寺少卿劉良駒及科道等摺。分別准行交議。如該侍郎摺內所請保舉人才。廣收直言。迭經降旨宣示。諒各大小臣工。必能激發天良。踴予郵治。惟稱日講爲求治之本。我聖祖仁皇帝登極之初。卽命儒臣逐日進講。寒暑無間。朕紹承丕業。夙夜孜孜。景仰前徽。勉思繼述。著於百日後。舉行日講。所有一切應行事宜。著各該衙門查例。詳議以聞。欽此。初四日。奏入春以來。兩澤稀少。農田待澤孔殷。請設壇祈禱。

以迓和甘。而慰民望一摺。十二日。孝和睿皇后升祔。覃恩。公呈請本身妻室封典。十五日。公弟國潢入都。相見極歡。時以職務繁劇。不遑兼顧家事。悉以屬公弟經理。十九日。下淀園。恭送孝和睿皇后梓宮。奉安昌陵。四月初四日。奏陳日講事宜。補前摺所未備。凡十四條。其於講官員數。進講之地。所講之書。陳講之道。以及講官儀節體制等事。皆詳考聖祖御製文集。會典與國史。列傳各書。先定大概規模。於贊助聖學之中。寓陶成人才之意。猶前疏中之指也。十二日。宣宗成皇帝升配。覃恩。加二級。請封三代光祿大夫。公以本身妻室應得封典。馳封叔父母。十七日。欽派會試。覆試。閣卷大臣。十九日。移寓買家胡同南頭路西。二十九日。欽派朝考。閣卷大臣。是科入館選者五十八人。是月。湖南新寧賊督李沅發就擒。檻送京師。斬之。上年收復新寧。巡撫馮公德馨奏報李逆死於亂軍中。春間李逆復出。馮德馨遽聞遣戍。詔以駱秉章爲湖南巡撫。五月初二日。公第五女生。後殤。十四日。在署考試各省優貢。時奉旨令部院九卿。各舉賢才。公疏薦五人。奏稱李棠階以學政歸家。夔夔蕭然。品學純粹。可備講帷之選。吳廷棟不欺屋漏。才能幹濟。遠識深謀。可當大任。王慶雲閎才精識。腳踏實地。可膺疆宇之寄。嚴正基洞悉民隱。才能濟變。江忠源忠義耿耿。愛民如子。六月初四日。奉旨兼署工部左侍郎。十四日。欽派朝考。拔貢。閣卷大臣。是科取士二百餘人。七月。公弟國棟以縣試案首。入湘鄉縣學。年二十三歲。與公入學之年同。公每縮部務。悉取則例。博綜詳考。準以事理之宜。事至剖斷無滯。其在工部。尤究心方輿之學。左圖右書。鉤校不倦。於山川險要。河漕水利。諸大政。詳求折中。八月十一日。召見。詢以工部職務。公奏對詳悉。移時乃退。二十一日。欽派考試。國子監。學正。學錄。閣卷大臣。取士五十名。引見記名者二十人。九月十八日。恭送宣宗成皇帝梓宮。奉安慕陵。欽派梓宮前恭捧冊寶大臣。二十四日。饗奠禮畢。禮部堂官各加二級。二十五日。具摺謝恩。次日。皇上駐蹕秋蘭行宮。諭隨扈各員。均加一級。十月。回鑾。奉旨兼署兵部左侍郎。十一月三十日。領同鄉京官。具摺謝恩。爲水災州縣。蠲緩錢糧。十二月二十二日。禮部奏元旦禮節。殊批嚴飭禮部堂官。分別交部議處察議。尋奉旨。准予抵銷處分。是年夏間。廣西賊匪大起。巨股數十。六月。逆首洪秀全與其黨楊秀清。蕭朝貴等。起於桂平縣之金田。邨。爲數最衆。且悍。詔以向榮爲廣西提督。起用林則徐爲欽差大臣。馳赴廣西督剿。以前雲南提督張必祿督師會剿。廣西巡撫鄭祖琛革職。既而林文忠公則徐卒於道。張武壯公必祿至潯州亦卒。詔以李星沅爲欽差大臣。以周天爵署廣

西巡撫

〔辛亥〕咸豐元年公四十一歲。正月初十日。領同鄉京官。具摺謝恩。爲上年災區借給籽種。十四日上祇謁慕陵。行初周年禮。禮部堂官悉從。公奉旨派留署辦事。二月。上諭廣州副都統烏蘭太馳往廣西。幫辦軍務。二十六日。公弟國潢出都還湖南。粵西賊勢益熾。三月。上命大學士賽尚阿爲欽差大臣。前赴廣西督師。以都統巴清德副都統達洪阿爲之副。初九日。公奏簡練軍實。以裕國用一摺。奏稱天下大患。一在國用不足。一在兵伍不精。近者廣西軍興。紛紛徵調。該省兵額。竟無一足用者。他省可推而知。當此餉項奇絀。惟有量加裁汰。痛加訓練。庶餉不虛糜。而兵歸實用。謹鈔錄乾隆增兵。嘉慶道光減兵三案進呈。疏入召見。嘉其切中時弊。諭以俟廣西事定。再行辦理。疏留中。十四日。禮部奏請以宋臣李綱從祀孔子廟廷。時福建巡撫徐繼畲原奏稱李綱所著書。有周易傳論語說二種。公復查得綱所著中興至言建炎類編乘閒志預備志各書。文淵閣著錄者。梁溪集建炎時政記二種。奉旨准其從祀。在先儒胡安國之次。四月二十六日。公奏敬陳聖德三瑞。預防流弊一摺。維時上孜孜求治。在廷臣僚。鮮以逆耳之言進者。廣西軍事日棘。賽尚阿公以端揆大臣。出而督師。中外驚懼。公意欲爲人臣者趨尙骨鯁。培其風節。養其威稜。遇有事變。乃可倚之以折衝捍患。不至長苶退縮。公所陳多切直之語。疏入時。恐犯不測之罪。上諭曾國藩條陳一摺。朕詳加披覽。意在陳善責難。預防流弊。雖迂腐欠通。意尙可取。朕自即位以來。凡大小臣工章奏。於國計民生。用人行政諸大端。有所補裨者。無不立見施行。卽數陳理道。有益身心者。均著置左右。用備省覽。其或筆礙難行。亦有駁斥者。亦有明白宣諭者。欲求獻納之實。非徒沽納諫之名。豈遂以毋庸議三字置之不論也。伊所奏。除廣西地利兵機。已查辦外。餘或語涉過激。未能持平。或僅見偏端。拘執太甚。念其意在進言。朕亦不加斥責。至所論人君一念自矜。必至喜諛惡直等語。頗爲切要。自維藐躬德薄。夙夜孜孜。時存檢身不及之念。若因一二過當之言。不加節取。采納不廣。是卽驕矜之萌。朕思爲君之難。臣亦當思爲臣之不易。交相咨儆。坐言起行。庶國家可收實效也。欽此。公是疏得奉覆旨。時稱盛事焉。是月李文恭公星沅卒於軍。五月。詔授鄒鳴鶴爲廣西巡撫。十八日。唐公鑑入都。召見十餘次。極眷儒晚遇之榮。二十六日。公奉旨兼署刑部左侍郎。次日。具摺謝恩。并以前疏激直。未獲咎戾。具申感激之意。六月。賽尚阿公抵桂林。疏調江公忠源隨營差遣。江公方

丁憂在籍。應調赴湘。烏蘭太公一見而極重之。留於幕府。每事必諮焉。復委募楚勇五百人助勦。是爲湖南鄉勇出境勦賊之始。公前官翰林時。與倭仁公唐公鑑。輩講學。逐日記注。中輟數年。劉公傳瑩爲公書齋額曰養德齋。身繇縣穆穆之室。至是公乃仿程氏讀書日程之意。爲日記曰縣縣穆穆之室日記。其說曰。一自戒懼而約之。以至於極中。而天地位。此縣縣者由動以之靜也。自謹獨而精之。以至於極和。而萬物育。此穆穆者由靜以之動也。由靜之動。有神主之。由動之靜。有鬼司之。始終往來。一以貫之。每日自課以入事。曰讀書。曰靜坐。曰屬文。曰作字。曰辦公。曰課子。曰對客。曰復信。觸事有見。則別識於其眉。八月。欽派順天鄉試搜檢大臣。公兼攝刑曹。職務繁委。值班奏事。入署辦公。蓋無虛日。退食之暇。手不釋卷。於經世之務。及在朝掌故。分彙記錄。凡十有八門。大學士琦善公在新疆辦理番案得罪。欽差大臣薩迎阿公前往查辦。奏請將琦善交刑部治罪。奉旨遠聞。閏八月。琦善至京師。入刑曹。欽派軍機大臣三法司會審。琦善自寫供摺千餘言。謂由薩迎阿之陷害。在廷諸公。亦頗咎薩公原奏之過。時薩公代琦善當任。未旋京邸。會審之際。琦善爭辯不已。軍機章京邵懿辰駁詰供詞十九事。諸公不之省。乃議傳薩公所隨帶查辦之司員四人。赴法堂與琦善對訊。至有議反坐者。公獨曰。一琦善雖位至將軍。然既奉旨查辦。則研鞫乃其職分。司員職位雖卑。無有傳入廷尉與犯官對質之理。若因此得罰。將來大員有罪。誰敢過問者。且諭旨但令會審琦善。未聞訊及司員。必欲傳訊。當奏請奉旨然後可。一爭之甚力。詞氣抗厲。四坐爲之悚動。其事遂已。廣西逆匪竄陷永安州城。僑僑王號。賽尙阿公督師由桂林進勦。二十一日。上御門。聞永安失守之警。督兵將帥。皆奉旨申飭。二十六日。禮部考送軍機章京。二十九日。刑部考送軍機章京。九月初一日。領同鄉京官。具摺謝恩。爲水災州縣。豁免錢糧。十月十二日。欽派順天武鄉試大主考。以沈公兆霖爲之副。是科中式武舉一百六十六名。十七日。試竣覆命召見。十一月初三日。監視郊壇開工。十九日。領同鄉京官。具摺謝恩。爲新寧縣經兵亂。奉旨蠲免錢糧。與倉穀之未完者。又因武陵等州縣水災。蠲緩錢糧。十二月十八日。公奏備陳民間疾苦一摺。奏稱國貧不足患。惟民心涣散。則爲大患。知前之急務。其大端有三。一曰銀價太昂。錢糧難納。二曰盜賊太衆。良民難安。三曰冤獄太多。民氣難伸。其時銀價昂貴。朝野均以爲苦。宣宗會飭部院衙門。各省督撫。議變通平價之法。公疏於再盜賊清獄訟二條。請申諭外省。思所以更張之。其平銀價一條。卽於次日續遞銀錢并用章

程一摺。奏稱十年以來。中外巨工。奏疏言錢法者。不爲不多。臣之所深服者。惟吳文鎔劉良駒朱燾三疏。謹就三臣原奏。參以管見。擬章程凡六條。并鈔錄吳文鎔等原疏。進呈御覽。奉旨交戶部議奏。二十六日。監視慕陵。道開工。是歲公選錄古今體詩凡十八家。又選錄古文詞百篇。以見體要。

〔壬子〕咸豐二年公四十二歲。正月二十四日。奉旨兼署吏部左侍郎。次日具摺謝恩。二月十九日。隨履謁慕陵。是月廣西永安州賊竄出。官軍大挫。總兵官長瑞等四人陣亡。賊撲攻桂林省城。都統武壯公烏蘭太追賊至將軍橋陣亡。江公忠源之軍。初與烏公偕。至是回籍。益募楚勇赴桂林防勦。三月初二日。奉宣宗成皇帝永安地宮。上行虞祭禮回鑾。初七日。奉神牌升稍。頒恩詔於太和門。初八日。率同鄉京官。遞摺謝恩。爲豁免屯丁實欠。欽派會試搜檢大臣。十一月。警報至都下。奉旨烏蘭太向榮。交部嚴加議處。賽尙阿交部議處。公赴部會議。以軍務關係重大。議處罪名。宜從重者。不當比照成例。會議罷後。公專摺奏請從嚴議處。詔改從寬典焉。十八日。禮部奏請以宋臣韓琦從祀孔子廟廷。二十七日。奉旨派恭送太廟冊寶。三十日。公第六女生。後字衡山。壽氏。壻名緝縲。歐陽夫人之兄柄銓入都。是時粵匪猖獗。河工未合。京畿亢旱。人情驚瀾。上詔求直言。內閣學士勝保上疏失檢。交部嚴議。部議降三級調用。公奏請特旨寬免勝保處分。以廣言路一摺。上納用焉。疏留中。四月初一日。宣宗成皇帝升配。詔禮部諸臣各加一級。廣西省城解圍。賊竄陷全州。入湖南境。掠民船將浮湘而下。江公忠源以楚勇破之於養衣渡。五月。賊竄陷道州。六月十二日。欽命充江西鄉試正考官。次日遞摺謝恩。附片奏請試竣後。賞假兩月。回籍省親。公自己亥之冬。入都供職。十有餘年。由翰林七遷至侍郎。眷遇甚隆。中閒星岡公袁老疾病。屢思乞假歸省。於勢未得。至是得江西試差。乃請假回籍。殊批允之。二十四日。馳驛出都。二十九日。過河間府。吳公廷棟權守河間。相見於途。次七月十三日。道過宿州。周公天爵方引病在籍。以函約公相見於旅舍。縱談今古。自夜寢旦乃別去。二十五日。行抵安徽太和縣境。小池驛聞訃。江太夫人於六月十二日薨逝。公大慟。改服薨喪。取道黃梅縣。覓舟未得。乃乘小舟渡江。至九江府城。雇舟溯江西上。賊於六月由道州竄出。陷桂陽州。是月陷郴州。由安仁醴陵下犯長沙省城。湖南各郡。舊有會匪。蠢焉思動。湘鄉尤多匪蹤。縣令朱孫貽緝洽甚勤。禮請邑中儒士羅公澤南李公續賓兄弟王公鑫劉公蓉等。團練鄉勇。加以訓練。而竹亭公以鄉老巨望。總其成。是時鄉團以湘

鄉爲稱首。八月十一日。公舟至黃州登陸。十三日抵武昌。常公大醇爲湖北巡撫來唁。公始知逆匪撲長沙之警。十四日由武昌啓行。十八日抵岳州。取道湘陰寧鄉。二十三日抵家哭殯。旋謁星岡公墓。逆賊大股均至長沙。官軍亦漸集。江公思源於南門外。近逆壘爲營。賊不得逞。詔以張亮基爲湖南巡撫。張公入守長沙。以左公宗棠入贊軍幕。九月十三日。江太夫人葬於下腰里宅後山內。賊用地道轟長沙城。官軍拒卻之。時承平日久。驟經兵亂。人心惶怯。僞言四起。雖未見賊之地。亦相率挈家驚走。公在家遇鄉里人。則教之以保守之方。鎮靜之道。賽尙阿公至長沙。奉旨逮問。以徐廣縉爲欽差大臣。督兵勦賊。十月長沙圍解。賊渡湘西竄寧鄉益陽。東出臨資口。大掠民船。竄湘陰。陷岳州。官軍數萬人。自長沙拔營追之。十一月。賊船蔽江而下。陷漢陽府城。張公亮基於賊退後。搜捕土匪甚嚴。留江公思源之楚勇二千人。駐省城防守。札委湘鄉羅澤南王鑫等招募湘勇千人。入省城防守。時巴陵匪徒晏仲武等作亂。江公思源以楚勇往討捕之。是月湖南巡撫奉上諭。前任丁憂侍郎會國藩籍隸湘鄉。於湖南地方人情。自必熟悉。著該撫傳旨。令其幫同辦理本省團練鄉民。搜查土匪諸事。伊必盡力。不負委任等因。欽此。十二月武昌省城失守。湖北巡撫常文節公大醇等殉難。十三日。公奉到寄諭。草疏懇請在家終制。并具呈請巡撫張公代奏。繕就未發。適張公專弁。以函致公。告武漢失守。人心惶恐。懇公一出。郭公嵩燾至公家力勸。出保桑梓。公乃燬前疏。於十七日起行。二十一日抵長沙。與張公亮基籌商。一以查辦匪徒爲急務。二十二日。拜摺敬陳團練鄉民。搜查土匪大概規模。且稱長沙省城兵力單薄。行伍空虛。不足以資守禦。因於省城立一大團。就各縣曾經訓練之鄉民。招募來省。實力操練。既足以資勦捕土匪。於防守省城。不無裨益。是摺奉硃批。知道了。悉心辦理。以資防勦。欽此。公又附片奏稱。臣在京供職十有四年。今歲歸來。祖父母之墓。已有宿草。臣母之葬。亦未盡禮。若遽棄庭闈。出而蒞事。萬分不忍。請俟賊氛稍息。團防之事。辦有頭緒。即當回籍守制。以遂烏私。維時羅公澤南領所招湘鄉練勇三營。已至省城。仿前明戚繼光束伍成法。逐日操練。公爲之酌定訓練章程。故疏中及之。其後良將輩出。實濫觴於此。瀏陽會匪煽亂。號曰徵義堂。其匪首爲周國瑜。聚黨逾萬人。江公思源以楚勇往。出其不意。一戰破平之。武昌陷後。詔授向榮爲欽差大臣。徐廣縉遠問。前湖廣總督程晉采草職。詔以張亮基署總督。又特命琦善爲欽差大臣。偕直隸提督陳金綬內閣學士勝保督兵馳赴楚豫之交。堵賊北竄。又以兩江總

督陸建瀛爲欽差大臣出省堵剿。

〔癸丑〕咸豐三年公四十三歲正月公在長沙督辦街團。委在籍江蘇候補知州黃廷瓚安徽候補知縣曹光漢編查保甲。以書函勸諭。不用公牘告示。又以書徧致各府州縣士紳。其大致以爲團練之難。莫難於集費。宜擇地擇人而行之。目前急務。唯在清查保甲。分別良莠。以除暴爲安良之法。遇有匪徒。密函以告。卽行設法掩拿。處辦庶幾省文移之煩。可期無案不破。其書中有不要錢不怕死二語。公所自矢者。一時稱頌之。十一日。張公亮基赴湖北署總督任。江公忠源從行。其楚勇留長沙者。江公忠濟劉公長佑接統之。二十二日。耒陽常寧報有匪徒嘯聚白沙堡。擾及嘉禾境。公調派劉長佑李輔朝帶楚勇五百。王鑫帶湘勇三百。二十五日啓行進剿。未至而常耒之匪。聞風先潰。適衡山縣境之草市土匪竊發。楚勇湘勇留衡山一戰平之。二月初三日。奉上諭。封疆大吏。翦除百惡。卽可保衛善良。著該督督撫等。認真查辦。并著會同在籍侍郎曾國藩體察地方情形。應如何設法團練。以資保衛之處。悉心妥籌辦理等因。欽此。十二日。公奏嚴辦土匪。以靖地方一摺。奏稱湖南會匪名目甚多。近年有司掩飾彌縫。任其猖獗。非嚴刑峻法。無以銷遏亂萌。時公於長沙城中魚塘口爲行轅。設審案局。委候補知州劉建德照磨嚴良峻承審。拿獲匪徒。立予嚴訊。用巡撫令旗。卽行正法。或卽斃之杖下。分別會匪教匪盜匪。及尋常痞匪名目。按情罪以處辦。公意純用重法。以除強暴。而殘忍嚴酷之名。在所不辭也。是疏入。奉硃批。辦理土匪。必須從嚴。務期根株淨盡。欽此。初賊之犯長沙也。調集各省兵勇數萬人。旣而追賊東下。其餘丁散勇逗遛湖南。或數十百人爲羣。出沒附近邨墟。遇湘水行船上。輒以兵差爲名。強封之而詐索其財。商旅畏憚。百物幾不通。公捕得強封民船之川兵三人。徑行斬決。梟示江干。由是游手斂迹。風帆暢行無阻。賊陷武漢兩城後。大掠民船數千艘。於正月初旬。括掠丁壯婦女數十萬人。驅入舟中。順流而下。旌旗蔽江。沿江城鎮皆失守。十一日。陷九江府城。十七日。陷安慶省城。二月初十日。攻陷江寧省城。將軍忠勇公祥厚總督陸公建瀛等殉難。賊遂據爲僞都。僞僞號。造宮殿。分其黨林鳳祥等北竄。二十一日。陷鎮江府。二十三日。陷揚州府。皆踞守之。向公榮總統各路兵勇十餘萬。追至金陵而城已陷。遂駐營城外。琦善公率領北方各路官兵。攻圍揚州。是爲江南江北兩大營。劉公長佑等旣破衡山土匪。餘黨竄入攸縣界。遂督勇追剿。而安仁縣土匪又起。劫獄燒官署。在籍候選知州張榮組帶

鎮軍勇數百。與楚勇會勤平之。江公忠源赴鄂。尋奉旨授湖北臬司。又奉旨令赴江南大營。幫辦軍務。江公上書於公。言今日辦賊之法。必合江楚皖各省。造戰船數百艘。調閩廣水師數千人。先肅清江面。而後三城可復。否則沿江各省。後患方長。公治水師之議。萌芽於是矣。湖北崇陽通城兩縣匪徒大起。聚衆數千人。江公領兵勇。於三月初旬。回南勦捕。公飭江忠濟帶所部楚勇。由平江前往會勦。初五日。劉公長佑楚勇回長沙。公亦飭其馳赴崇通會勦。三戰而匪徒殲焉。江公遂盡擊楚勇。下赴江南。省城所招湘鄉練勇千餘人。署巡撫潘公鐸議汰之。還鄉。公前調取三百餘人。以王鑫領之。勦土匪於衡永各屬。其留未汰者。操練無虛日。塔齊布公方署長沙營都司。志勇冠時。人鮮知者。公一見大奇之。委密捕巨盜數名。皆剋獲。三總諸殿元領辰勇數百人。亦經公所識拔。公委塔齊布兼管領辰勇。與湘勇合全操練。胆技精強。遂成勁旅。三月。潘公鐸具摺告病。駱公秉章仍奉旨署湖南巡撫。以四月十一日到任。奏委塔齊布署撫標中軍參將。各州縣捕送匪徒來省者漸多。嚴刑鞠訊。日有斬梟杖斃之案。前後所戮者二百餘名。湘中匪徒聞風斂迹。李公瀚章以己酉選拔朝考。出公門下。時署湖南益陽縣事。上書於公。勸以緩刑。公未之從也。安化縣屬藍田市。有串子會匪。聚衆謀亂。公飭湘鄉縣知縣朱孫貽以練勇往捕。擒百餘人。事乃解。桂東縣有江廣邊界匪徒竄入。城陷。公與駱公札委張榮組帶三廳兵勇往勦。又調候補道夏廷樾督湘勇七百餘人繼之。未幾桂東平。駱公增募湘勇一營。以監生鄒壽璋領之。歐陽夫人挈子女出都還湘。夫入之兄柄銓隨行。五月初三日抵長沙。尋歸湘鄉。公弟國葆募湘勇一營。駐紮長沙南門外。江公忠源奏請招練楚勇三千。赴江南助勦。奉旨允之。公因函致江公之弟忠濤忠淑與寶慶府知府魁聯。令招寶勇。湘鄉縣知縣朱孫貽令招湘勇。來省操練。然後遣赴大營。與江公舊部合成一軍。以壯其勢。江公以四月初七日。由鄂東下。行抵九江。值賊船數百。自金陵上竄。再陷安慶。直抵湖口。勢趨南昌省城。江公方駐守九江。十日。即馳至南昌。籌備防守。部署粗定。而賊抵城下。設法堵禦。賊不得逞。江公飛檄請援於湖南。湘中聞鄰省之警。人心惶恐。公初擬六月歸行小祥之際。而湘省官紳。并以公爲防守。公乃札張榮組駐營永州。王鑫駐營郴州。以防南路土匪。而調夏廷樾羅澤南以湘勇回省。適奉到寄諭。因金陵賊船駛赴上游。有回攻長沙兼擾南昌之語。有旨令各省督撫嚴防。并令公與駱公會籌防禦。駱公咨提督鮑超起豹調兵來省。并札飭所募寶勇湘勇三千人。留於省城聽調。六月十

二日公與駱公會奏辦理防堵事宜一摺。公又專摺奏稱搜拿土匪。隨時正法。省局委員添派候補知縣厲雲官審訊各案。粗有頭緒。臣母喪初周。擬回修小祥之禮。適聞粵匪回竄江西。臣應留省城。會籌防堵。不敢以事權不屬。且軍旅未嫻。稍存推諉。是日又與駱公會摺奏參長沙協副將清德。請旨革職。以儆疲玩。而肅軍政。又專摺奏保署撫標中軍參將塔齊布千總諸殿元。懇恩破格超擢。并稱該二人日後有臨陣退縮之事。即將臣一併治罪。附片特參副將清德性耽安逸。不理營務等款。請交部從重治罪。江忠淑募新寧勇千人。朱孫貽募湘鄉勇千二百人。均抵長沙。公檄江忠淑由瀏陽赴江西。朱孫貽由醴陵赴江西。夏廷樾郭嵩燾羅澤南以兵勇千四百人。由醴陵繼進。合計援江西兵勇三千六百人。是爲湘勇出境勦賊之始。二十二日公與駱公會奏撥派兵勇赴江西接勦一摺。湖南調各路兵勇防守省城者數千人。塔齊布公逐日抽調操閱。暑雨不輟。公亟獎其勤。提督鮑起豹至省城。而宣言盛夏操兵之非。由是營伍咸怨塔公以及於公。時復與湘勇爭釁。公所奏參之副將清德乃依附鮑起豹。而與塔齊布爲仇者。公前疏入。二十九日奉到上諭。塔齊布著賞給副將銜。諸殿元以守備補用。先換頂戴。以示獎勵。欽此。又奉上諭。會國藩奏請將性耽安逸。不理營務之副將革職治罪一摺。清德著革職拿問。交張亮基駱秉章訊明定擬具奏等因。欽此。由是兵伍益怨公矣。七月公以省城警防之事粗備。援江之師已成行。遂回籍省親。家居數日。復出至省垣。時新寧勇援江者。行抵瑞州。遇警而潰。至義寧復行招集以進。湘勇援江者。以七月十九日抵南昌。二十四日與賊戰小挫。陣亡營官謝邦翰易長幹羅信東羅鎮南四人。湘勇死者八十餘人。羅公澤南以諸生講學。湘人多從受業者。是役陣亡各員。皆羅公子弟也。賊攻南昌。屢以地道轟城。官軍堵之。江公忠源復以書致公。謂長江上下。任賊船游弋往來。我兵無敢過問者。今日之急。惟當先辦船礮。攻水上之賊。時郭公嵩燾在江公幕中。力阻水師之議。文宗寄諭各督撫。亦屢及之。公商之巡撫駱公。奏請勅調廣東瓊州紅單船。放出大洋。由崇明入江口。以擊賊於下游。調廣東內江快蟹拖罟船。由梧州府江拆灘水。過斗門。浮湘而下。出大江以收上下夾擊之效。長江水師之議。自此始。湖南營兵。與湘勇斷斷不洽。七月十三日。提標兵與湘勇械鬪。公但將湘勇棍責。八月初四日。永順協兵與辰勇械鬪。公咨提督請按治軍法。未行也。初六日永順協兵掌號執仗。至參將署。欲害塔齊布。公塔公匿菜園草中。以免。兵衆燬其房屋。旋出至公所館撫署側射圃中大譁。駱公步

出諭飭之。乃解。時有勸公據實參奏者。公曰。『爲臣子者不能爲國家弭亂。反以瑣事上瀆君父之聽。於心未安也。』二月中曾經奏請移駐衡寶二郡。就近剿辦土匪。遂定計移駐衡州以避之。因與駱公商調塔齊布領寶勇辰勇八百人。益以撫標兵。移駐醴陵。調鄒壽璋領湘勇駐瀏陽。以防江西之賊。調訓導儲玖躬所領湘勇一營。往郴州以防土匪。公弟國葆率所領湘勇上駐衡州。八月十三日。公具摺奏言湖南衡永郴桂各屬。爲匪徒聚集之藪。數月以來。聚衆爲亂。巨案疊出。臣即日移駐衡州。就近遣調。附片奏調委員厲雲官等隨往差遣。十四日。公由長沙起行。繞道湘鄉。抵家省親。以二十七日抵衡州府。先是南路土匪屢起。次第勦平。江西吉安府屬土匪大起。太和安福二縣失守。江公忠源派羅澤澤南以湘勇往勦。大破之。擒斬數千。克復兩城。餘匪潰竄湖南界。茶陵安仁皆不守。公乃調塔齊布以兵勇往勦。平之。王公鑫駐營郴州。聞江西援軍營官陣亡之信。欲回籍募勇。赴江西勦賊。以抒公憤。而復私仇。上書於公。詞氣慷慨。公嘉其義。札令來衡州面商以討賊之事。公言今日大弊。在於兵勇不和。敢不相救。而其不和之故。由於徵調之時。彼處數十。此處數百。東抽西撥。卒與卒不相習。將與將不相知。地勢乖隔。勞逸不均。彼營出隊。而此營袖手旁觀。或咳口而笑。欲以平賊。安可得乎。今欲掃除更張。非萬衆一心。不可。擬再募勇數千。與援江各營。合成一軍。交江公忠源統之。以平賊。八月二十二日。江西省城解嚴。竄陷九江府湖口縣。仍陷安慶省城。皆踞之。復分股上竄湖北。張公亮基以兵五千人。扼守田家鎮。賊至則大潰。江公忠源聞道馳援。戰不利。北屯廣濟。賊因上犯鄂渚。張公亮基奉旨調任山東巡撫。以吳文鎔爲湖廣總督。吳公者。公會試座師也。九月初由黔赴鄂。道出長沙。以書招公至省城相見。公以軍事方殷。未遑離次。吳公星馳赴任。時賊已陷黃州漢陽。北擾德安。南及興國湖南。岳州戒嚴。駱公秉章馳書與公謀防堵。公以茶陵安仁既平。札調塔齊布等軍。速赴長沙。并調援江之湘勇回援。二十七日。奉到上諭。長江上游。武昌最爲扼要。若稍有疎虞。則全楚震動。著駱秉章會國藩選派兵勇。并酌撥礮船。派委得力鎮將。馳赴下游。與吳文鎔等會合勦辦。力遏賊衝。毋稍延誤。欽此。十月初三日。奉上諭。會國藩團練鄉勇。甚爲得力。勦平土匪。業經著有成效。著酌帶練勇。馳赴湖北。所需軍餉等項。著駱秉章籌撥供支。兩湖督齒相依。自應不分畛域。一體統籌也。欽此。王公鑫募湘勇。初議欲爲援江諸軍復仇。旣而聞賊竄湖北之警。駱公因札令募勇三千。赴防省城。公見王鑫氣太銳而難專用也。旣爲書以戒之。又

函致駱公言兵貴精不貴多。新招之勇未經訓練。見賊易潰。且餉糧難繼。宜加裁汰。駱公未能用。維時羅公澤南由吉安率勇回湘。李公績賓分領一營。戰功卓著。又有楊虎臣康景微所帶湘勇二營。先後自江西回抵長沙。合以王鑫新募之勇。及所調兵勇。赴防省城者不下萬人。總督吳公到鄂。屢請援師。時又奉上諭。武昌情形萬分危急。著會國藩遵照前旨。趕緊督帶兵勇。駛赴下游會剿。以爲武昌策應等因。欽此。公商之駱公。議飭王鑫帶所招湘勇赴鄂。旋以賊船東竄。湖北解嚴。湘勇亦未北行也。公言今之辦賊。不難於添兵。而難於籌餉。不難於募勇。而難於帶勇之人。不難於陸戰。而難於水戰。江公忠源之守南昌也。派夏廷樾郭嵩燾在樟樹鎮製造木筏數十載。具砲於其上。擬衝賊船。俾甫成將發。而賊退出鄱湖。至是公亦於衡州仿造衝筒。既試之水面。鈍滯難用。乃買民船。改造礮船。二十四日。公具摺奏言武昌現已解嚴。臣暫緩赴鄂。并請籌備戰船。合力勦堵。該匪以舟楫爲巢穴。長江千里。任其橫行。欲加攻勦。惟以戰船爲第一先務。臣即在衡州試行趕辦。果有頭緒。卽親自統帶。駛赴下游。是疏奉硃批。所慮甚是。汝能斟酌緩急。甚屬可嘉。欽此。時廣東解江南大營餉銀。過長沙。公附片奏請截留四萬兩。以爲籌辦礮船。召募水勇之資。湘勇營制。以三百六十人爲一營。每營用長夫百四十人。合爲五百。公之選將領。以四科爲格。一曰才堪治民。二曰不畏死。三曰不急名利。四曰耐辛苦。公欲募成六千之數。合江公忠源舊部。足成萬人。甫立此議。江公遂奏請以公所練六千人。出省勦賊。奉上諭。湖北情形緊要。已有旨令江忠源暫留勦賊。著會國藩卽將選募之楚勇六千名。酌配礮械。籌雇船隻。由該侍郎督帶。駛出洞庭湖。由大江迎頭截勦。肅清江面賊船。想會國藩與江忠源必能統籌全局也。欽此。鄂中兵勇。前防田家鎮者。潰後或逃竄湘中。劫掠行旅。公捕得卽斬以徇。民賴以安。是月公致書湘鄉人士。議建忠義祠於縣城。祀援江陣亡營官四人。而以湘勇附祀焉。江公忠源回軍漢陽。奉旨授安徽巡撫。并諭令楚皖一體斟酌緩急。相機進勦。時賊已踞安慶。議建廬州爲省會。工部侍郎呂文節公賢基在籍辦理團練。賊自舒桐北竄。呂公迎勦陣亡。周文忠公天爵亦卒於家。江公見鄂賊甫退。皖事尤棘。力疾提師北趨廬州。行至六安病甚。十一月奉上諭。宋晉奏會國藩鄉望素孚。人樂爲用。請飭挑選練勇。雇覓船隻。順流東下。與江忠源水陸夾攻。速殄賊氛等語。現在安徽逆匪。勢甚披猖。連陷桐城舒城。逼近廬郡。呂賢基業經殉難。江忠源患病。皖省情形危急。總由江面無水師戰船。攔截追勦。任令賊踪往來自如。

以致逆匪日肆鴟張。該侍郎前奏亦曾籌慮及此。著即趕辦船隻墩位。并前募勇六千。由該侍郎統帶。自洞庭湖駛入大江。順流東下。與江忠源水陸夾攻。該侍郎忠誠素著。兼有胆識。朕所素知。必能統籌全局。不負委任也。欽此。前此寄諭。有肅清江面之語。各省亦苦賊踪懸忽。公壹以水師爲急。所造木筒。既不可用。水師舟艦。無人經見。卽爲此舉。相顧色賦。公日夜苦思。博採衆議。岳州營守備成名。標廣西候補同知褚汝航。知縣夏鑾等。先後奉委。抵公行轅。公留置戎幕。遂詢知拖罟長龍快蟹舢舨各船式。鳩集衡永工匠。依式製造。公研精覃思。不遺餘力。彭公玉麟。楊公載福。來營。公弟國葆。亟稱兩人之才。公拔而用之。廣西巡撫勞公崇光。委解墩二百尊。赴鄂。道出衡州。時田鎮防兵已潰。公因截留其墩位。并護解之。水手以備教練水師之用。公以湖南庫款不敷。提用。其募練之餉。特勸捐接濟。公選派員紳。設局於各州縣。不用官牘。以防抑勒。自刊軍功執照。用撫藩鈐印。自六品自九品。按資填給。常寧縣土匪起。縣城失守。公調千總周鳳山。公弟國葆。帶勇往勦。十一日賊竄踞傘泉洞。又調張榮組。儲政躬。帶勇會勦。十四日陷嘉禾。犯藍山。又竄踞道州之四庵橋。公又添調鄒壽璋。魏崇德。帶軍往勦。各營與賊戰。均有斬獲。而儲政躬之功爲多。公與巡撫駱公會奏。常寧土匪滋事。戕官。現已派勇往勦。率獲首犯各要一摺。二十六日。公具摺奏言。籌備水陸各勇。馳赴安徽會勦。而墩船水軍。一時未能就緒。前經奉旨。特派廣西右江道張敬修。購辦夷墩廣墩千尊。并帶工匠。自粵來楚。臣專候該道來楚。乃可成行。附片奏請設立水路糧臺。提用湖南酒米二三萬石。以資軍食。又附片奏請經手勸捐之款。准歸入籌餉新例。隨時發給部照。以免捐生觀望不前之弊。公前擬募陸勇六千。以付江公忠源統帶。尋奉旨。籌備水師。始建水陸萬人。大舉東征之計。先派江公之弟忠濬。帶勇一千名赴皖。公則經營戰艦。規造墩船二百號。雇民船二百以從。其後船行中流。陸兵則夾江而下。其規畫大局如是。庶事草創。經費繁巨。有求弗應。則與巡撫駱公書函往來。駱公委曲應副。漸以就緒。公嘗以蚊虻負山。商距馳河自況。又嘗有精衛填海。杜鵬泣山之語。蓋公之水師。爲肅清東南之基本。而是年冬間。最爲盤錯艱難之會矣。十二月初一日。委褚汝航至湘潭。分設一廠。監造戰船。其衡州船廠。委成名標監督之。船大者曰快蟹。次曰長龍。又購民間釣鉤船。改修以爲墩船。褚公又依式添造舢舨小艇數十號。兩廠之船。往來比較。互相質證。各用其長。潭廠所造。尤堅利矣。賊船回竄湖北。仍陷黃州。公致書於總督吳公。言今日南北兩省。且以堅守省會。

爲主必俟水師辦成乃可以言勦。湖北巡撫崇綸公奏參督臣開城株守奉旨切責。吳公乃出督師於黃。吳公遺書於公。其略云。「吾意堅守待君東下。自是正辦。今爲人所逼。以一死報國。無復他望。君所練水陸各軍。必俟稍有把握。然後可以出而應敵。不可以吾故。率爾東下。東南大局。恃君一人。務以持重爲意。恐此後無有繼者。吾與君所處固不同也。」公得書。深憂之。駭公乘章調羅澤南等湘勇二營。泝湘而上。會勦土匪。初十日抵衡州。公與羅公商榷兵事。更定陸軍營制。以五百人爲一營。每營四哨。每哨八隊。親兵一哨。六隊。火器刀矛。各居其半。每營用長夫百八十人。營官哨官。以至隊長勇夫薪糧。分毫悉經手定。刊立營制數十條。營規亦數十條。自此以後。湘勇轉戰遍於各省。亦依公所定規制行之。廣東協撥鄂餉七萬兩。委員解楚。道出郴桂。適永興土匪起。公乃令羅澤南帶勇迎護餉。勦捕土匪平之。公前奏一疏。於十六日奉到硃批。現在安省待援甚急。若必偏執己見。則太覺遲緩。朕知汝尙能激發天良。故特命汝赴援。以濟燃眉。今觀汝奏。直以數省軍務。一身克當。試問汝之才力。能平否乎。平時漫自矜詡。以爲無出己之右者。及至臨事。果能皆符其言甚好。若稍涉張皇。豈不貽笑於天下。著設法趕緊赴援。能早一步。即得一步之力。汝能自擔重任。迥非畏葸者比。言既出。諸汝口。必須盡如所言。辦與朕看。欽此。公於二十一日具疏。逐條陳明。其一起行之期。必俟粵東解礮到楚。稍敷配用。即行起程。其一黃州巴河。被賊踪占踞。必先掃蕩鄂境江面。乃能赴皖。其一武昌爲金陵上游。賊所必爭。目今宜力保武昌。然後可以進剿。其一臣所練之勇。現在郴桂一帶。勦辦土匪。不能遽行撤回。俟來年正月。船礮將齊之時。一併帶赴下游。其後一條。奏稱餉乏兵單。成效不敢必。唯有愚誠不敢避死而已。與其將來毫無功績。受大言欺君之罪。不如此時據實陳明。受畏葸不前之罪。疏入。奉硃批。成敗利鈍。固不可逆睹。然汝之心。可質天日。非獨朕知。若甘受畏葸之罪。殊屬非是。欽此。公又具摺奏稱。衡永郴桂一帶。尙有一股會匪。勦捕未畧。餘黨尙多。此股會匪。實爲湖南巨患。亦是巨經手未完之件。奉硃批。汝以在籍人員。能如是出力。已屬可嘉。著知會撫臣勦辦。或有汝素來深信之紳士。酌量辦理。亦可。欽此。公又因衡陽清泉兩縣。每用保甲。催征錢糧。民戶抗欠。則追比保甲。而保甲亦包攬爲姦。反置團防事於不理。公批飭兩縣。令但責成保甲稽查土匪。而催徵仍責之吏役。亦於是摺附片陳奏。奉硃批。此應亟改易者。著知照駁票章將改辦章程。速行覆奏。欽此。衡州府縣差役。人數甚多。詐索鄉閭。倚勢作威。公訪得惡差數

人誅戮之。不少寬貸。公於地方之事。知無不爲。意在鋤宄奸以安良善。不以侵官越俎爲嫌也。江忠烈公忠源自六安力疾入守廬州府。賊糾黨合圍數重。劉長佑江忠濬等。以楚勇往援。及各路援軍皆阻隔不得進。十二月十七日。府城陷。江公赴水死之。城中殉難者。不能悉紀。候補知府陳公源。兗知縣鄒公漢。勳死尤烈。陳公者。公同年友。鄒公者。亦公所推許也。船廠趕工。歲暮不息。成者過半。二十七日。公自衡州回籍省親。是年夏四月。賊黨林鳳祥自揚州掠衆北竄。陷滁州。踞臨淮關。復陷鳳陽府。遂北竄河南。陷歸德。撲開封省城。渡黃河。六月圍攻懷慶府。八月竄入山西。陷平陽府。復出至臨洛關。陷深州。九月陷天津府。踞靜海獨流二城。江南大營向公榮江北大營琦善公駐兩城外。圍攻經年。未得一戰。內閣學士勝保公率兵追林逆一股。轉戰數千。賊勢蹙忽。不可遏。欽差大臣直隸總督訥爾經額督兵。敢戰於懷慶。賊之竄山西。擾畿輔也。山西巡撫以下失守各員。與督兵之都統提鎮大員。多獲罪。詔授勝保爲欽差大臣。逮訥爾經治罪。特命惠親王爲奉命大將軍。科爾沁郡王僧格林沁爲參贊大臣。會兵進剿。賊勢少蹙。左都御史雷以誠募勇於揚州。舡收釐捐。以濟軍餉。各省釐捐始於此。

〔甲寅〕咸豐四年公四十四歲。正月初五日。公由家出抵衡州。督催船工。招募水勇。時湘中人未見水師。應募者少。乃招船戶水手。不怯風濤之民。用廣西礮勇爲之教習。快蟹船。用礮工廿八人。擄八人。長龍船。礮工十六人。擄四人。舡板船。礮工十人。每船用礮手數人。又另置艙長一名。頭工二名。舵工一名。副舵二名。其口糧較優。亦刊發營制一篇。吳文節公文鏐督兵於黃州。駐督堵城。亟攻黃州不下。賊焚燬堵城營壘。吳公力戰陣亡。賊船上犯。武昌戒嚴。十三日奉到初二日上諭。前因賊擾安徽。疊次諭令會國藩置辦船礮。督帶楚勇。由湖入江。與安徽水陸夾攻。本日據袁甲三奏。請令會國藩督帶兵勇船礮。由九江直赴安徽安慶。刻下賊數無多。或先復安慶。亦可斷賊歸路等語。廬州爲南北要衝。現在爲賊所據。必須乘其喘息未定。趕緊進剿。遏賊紛竄之路。會國藩製辦船礮。并所募楚勇數千人。此時諒已齊備。著即遵旨。迅速由長江駛赴安徽。會同和春宿濟水陸并進。南北夾攻。迅殲逆氛。以慰厘念。欽此。公既聞廬州失守。江公殉難。而探卒自鄂歸者。亦報黃州堵城之敗。公於時心愈迫矣。廿六日。船廠畢工。成快蟹四十號。長龍五十號。舡板百五十號。拖罟一號。以爲坐船。購民船改造戰船者數十號。僱民船百數十號。以載糧重募水勇五千人。分爲十營。其五爲正。其五爲副。每營置一營官。又設幫辦一人。在湘潭募

水軍四營。以褚汝航夏鑿胡嘉垣胡作霖爲營官領之。衡州募六營。以成名標諸殿元楊載福彭玉麟鄒漢章龍獻琛爲營官領之。二十八日自衡州起程。會師於湘潭。前後左右中營旂幟各用其方色。陸勇五千餘人。則以塔齊布周鳳山朱孫詒儲致躬林源恩鄒世琦鄒壽璋楊名聲及公弟國祿等領之。水路以褚汝航爲各營總統。陸軍以塔齊布爲各將先鋒。糧台設於水次。載米一萬二千石。煤一萬八千石。鹽四萬斤。油三萬斤。配砲五百尊。軍械數千件。子藥二十餘萬斤。需用之器物。應用之工匠。相隨以行。輜重民船。亦給予旂幟鎗礮。以助軍勢。合計員弁兵勇夫役一萬七千餘人。軍容甚盛。作討粵匪檄文一道。布告遠近。賊船上竄。仍陷漢陽。湖北按察使唐公樹義迎戰死之。賊上竄湖南境。二月初一日。岳州失守。初二日。公在衡山舟次。奏報東征起程日期一摺。并奏陳水陸營制糧台章程。大慨情形。并奏調署撫標中軍參將塔齊布未陽縣知縣陳鑑源平江縣知縣林源恩善化縣知縣李翰章等。隨同東征差遣。又附片代遞唐樹義遺摺一件。公之爲是役也。水陸并進。尤注重於水師。自上年叔爲戰船。每事躬自考察。材木之堅脆。縱橫之桀度。帆檣樓櫓之位。火器之用。營陣之式。下至米鹽細事。皆經於目而成於心。糧台設立八所。條綜衆務。曰文案所。內銀錢所。外銀錢所。軍械所。火器所。偵探所。發審所。採編所。皆委員司之。羅公澤南李公續賓湘勇二營。暫駐衡州。以防南路土匪。委知府張丞寶督辦捐局。以資接濟。時又奉到上諭。此時惟會國藩統帶徽船兵勇。迅速順流而下。直抵武漢。可以扼賊之吭。此舉關係南北大局。甚爲緊要。此時水路進剿。專恃此軍。該侍郎必能深悉緊急情形。兼程赴援等因。欽此。貴州候補道益陽胡公林翼應前總督吳公之調。帶練勇六百名。由黔赴鄂。軍抵金口。聞吳公陣亡。賊舟上犯。阻隔不能進。公商之巡撫駱公秉章。由湖南支給餉糧軍械。并飭令回軍會剿岳州之賊。王公鑫所招湘勇在長沙者。不用公所定營制。有自樹一幟之意。駱公札飭王鑫率所部先趨黃州。軍未發而賊已由岳州竄湘陰。上睨靖港市。援陷寧鄉。公舟師抵長沙。調陸路各營勤之。十五日。公具疏奏稱賊船上竄。東南大局。真堪痛哭。湖廣江皖四省。止有臣處一枝兵勇較多。每月餉需銀近八萬兩。專恃勸捐。以濟口食。現在湖南江西四川較爲完善。請旨飭派大員辦理捐輸。專濟巨軍之用。并言世小亂。則督兵較難於籌餉。世大亂。則籌餉更難於督兵。此次成師以出。已屬竭力經營。若復飢疲潰散。此後不堪設想。附片奏胡林翼諡勇暫令駐岳州附近地方。相機會剿。王鑫湘勇勤賊於喬口敗之。公所派陸營趙

煥聯儲致躬公弟國祿等分頭攻勦。儲公致躬擊破賊大隊於寧鄉。旋因追賊陣亡。賊敗潰下竄。公飭各營及戰船追擊之。二十四日。公與駱公會奏逆船上竄。派員前往分途截勦。連獲勝仗一摺。附片奏留胡林翼在楚勦賊。暫未能赴鄂。又附報官兵收復湘陰。乘勝追勦一片。於時奉到上諭。會國藩統帶帶船。想已啓行。著即兼程馳赴下游。迎頭截勦。此時水路進攻。專恃湖南帶船。遏其兇鋒。務須趕急前進。勿稍延誤。欽此。又奉到上諭。本日據青慶奏稱。探聞會國藩帶勇已距金口百有餘里。貴州道胡林翼隨同前來。現復退往上游。賊船聽忽上竄。急須出其不意。順流轟擊。該侍郎帶船。早入楚北。胡林翼何以退守。著會國藩飭知該道。迅速前進。毋稍遲延。等因。欽此。公迺專摺陳明胡林翼一軍未能赴鄂。留於湖南之由。并稱胡林翼之才。勝臣十倍。將來可倚以辦賊。胡公之軍回湖南境。崇陽通城各屬。土匪四起。賊由興國上竄。陷崇通二邑。匪黨大熾。公調胡公騎勇。由平江往勦。平江縣知縣林源恩帶勇繼之。胡公軍至通城。請援於公。公又令塔齊布周鳳山等帶勇往勦。賊退出岳州。王鑫湘勇先抵岳州。由蒲圻前進。公所派陸軍三營。亦抵岳州。公自統水軍進勦。三月初二日抵岳州。初五日。公由驛具摺奏稱。賊蹤全數退出南省。臣現駐岳州。搜捕湖汊餘匪。就近勦辦。崇通股匪。上游肅清。則馳赴下游。庶無彼此牽掣之患。又具奏訓導臣儲致躬屢著戰功。擬保以同知直隸州升用。該員衝鋒遇害。懇恩准照同知直隸州例議卹。陣亡之勇。目喻西林文。楊華英。均請一體議卹。以慰忠魂。附片奏在籍道員蔣徵藩捐助軍餉。請先提銀十萬兩。撥付臣營口糧。并請旨飭令該道員赴行營。總辦糧台事務。以期呼應較靈。是日公派戰船。搜捕西湖餘匪。衛千總鄒國彪。遇賊擲火。燒傷而亡。初七日北風大作。戰船及輜重船。在岳州湖畔者。漂沈二十四號。撞損數十號。勇夫多溺斃者。駱公乘章屢奉旨籌兵援鄂。駱公於二月內奏稱。湖南弁兵存數無多。歷次勦辦土匪。及此次所派追勦賊匪者。俱係巨與會國藩督飭士紳。招募自練之壯勇。較爲得力。該逆現竄湖南。鄂省情形較緩。擬俟南省勦辦事竣。臣即派兵馳往鄂省。跟蹤追勦。奉硃批。楚南之賊。明係分竄。現在湖北尙有多賊。會國藩帶船原爲肅清江面。但此時道路不通。暫可留在湖南勦辦。亦不能專待事竣。緩緩北上。楚南辦有頭緒。仍應速赴湖北。爲是會國藩素明大義。諒不致專顧桑梓。置全局於不問。北重於南。皖鄂重於楚南。此不易之局也。欽此。湖北賊勢方熾。武昌省城岌岌不保。公屢奉寄諭。飭令統領舟師。馳赴下游。諭旨又云。「此時得力舟師。專恃會國藩水上

一軍。倘涉遲滯。致令漢陽大股竄歸武昌。則江路更形阻隔。朕既以勦賊重任。付之曾國藩。一切軍情。不爲遙制。一等因。公啓行之初。派陸路勁軍。由崇通勦賊。欲以次掃盪。進援武昌。公自統水師。順流而下。既至岳州。遇風沈損各船。而王鑫湘勇之前進者。初八日抵半樓司。遇賊潰散。退回岳州。賊乘勝上犯。公弟國葆鄒壽璉楊名聲等營。在岳州者。皆潰退入城。賊撲城甚急。初十日。公急調礮船。齊赴岳州登岸擊賊。拔出城中各營。潰勇乘風南返。十四日泊長沙城外。賊船復上犯湘陰。公在衡州時。原任湖北巡撫楊健之孫楊江捐助軍餉銀二萬兩。公因奏請以楊健入祀鄉賢祠。奉旨交部議處。部議革職。奉旨改爲降二級調用。十五日駱公奏岳州官軍失利。省城現籌防勤情形。王鑫革職。留營効力贖罪。十八日。公具摺奏陳岳州陸軍敗潰。水師遇風壞船。力難應敵。恐戰船洋礮。反以資賊。遂乘風退保省城。皆由臣不諳軍旅。調度乖方。請交部治罪。附片奏船隻遇風沈損情形。鄒國彪傷亡請卹。又奏探明前路賊情一片。官軍在崇通者。屢獲勝仗。胡公林翼有初六日上塔市之勝。塔齊布公有十四日沙坪之勝。賊勢少挫。值賊船上竄。長沙戒嚴。公迺調胡林翼塔齊布兩軍旋省。委林源恩以平江勇扼守。防其南竄。二十二日。奏報崇通勝仗一摺。奏稱武昌以南等屬州縣。皆已爲賊所踞。臣本擬痛勦崇通一殺。即可直抵鄂省。以資救援。不謂岳州一敗。大股上竄。須酌撤通城之兵。回保長沙。此皆臣調度乖方所致也。公之回長沙也。竹亭公爲書以誡公。謂其築壘不堅。調軍太散。皆取敗之道。結陣之法。緝奸之法。皆宜加意講求。尤以早起早食爲要。自是以後。公每日未明而起。甫明而食。凡十餘年如一日。賊船竄踞靖港市復分股由陸路擾寧鄉。南及湘潭。二十七日。湘潭失守。賊於城外築壘自固。於湘水上游。掠民船數百號。豎立木城。以阻援師。二十八日。塔齊布公督軍馳至湘潭。奮攻賊營。大破之。連戰四日夜。斃賊數千人。官軍力戰殺賊之多。實自此役始。二十九日。公派水師五營。駛赴湘潭助勦。四月初一日。水師大破賊船於湘潭。陸軍攻賊壘。盡破之。初二日。公自督戰船四十號。陸兵八百人。攻賊於靖港市。西南風發。水流迅急。不能停泊。爲賊所乘。水勇潰散。戰船爲賊所焚。或掠以去。公自成師以出。竭力經營。初失利於岳州。繼又挫敗於靖港。憤極赴水兩次。皆左右援救以出。而是日水師適破賊船於湘潭。連日報捷。軍勢少振。初三日。水師盡燬賊所掠船。塔齊布公會各軍兜勦。屢破之。初五日。克復湘潭縣城。賊乃大潰。自粵逆稱亂以來。未受大創。湘潭一役。始經兵勇痛加勦洗。人人有殺賊之志矣。公之回長沙也。駐

營南門外高峯寺。湘勇屢潰。恆爲市井小人所詬侮。官紳之間。亦有譏彈者。公憤欲自裁者屢矣。公言古人用兵。先明功罪賞罰。今時事艱難。吾以義聲倡導鄉人。諸君從我於危亡之地。非有所利也。故於法亦有所難施。所以兩次致敗。蓋由於此。湘渾未捷之時。公與駱公會奏賊勢全注湖南。大局堪虞。請旨飭廣東貴州邊調兵勇來楚。協勦一摺。初十日。兵部火票遞到前摺。奉上諭。會國藩奏岳州水陸各軍接仗情形。并自請治罪一摺。此次岳州水軍。雖獲小勝。惟因陸路失利。以致賊匪復行上竄。會國藩統領水陸諸軍。調度無方。實難辭咎。著交部嚴加議處。仍著督帶師船。迅速進勦。克復岳州。即行赴援武昌。毋得再有延誤。欽此。又奉上諭。會國藩所統各勇。爲數過多。既須勦辦粵逆。又須搜捕土匪。即如所奏。有撥赴平江通城者。有撥赴臨湘蒲圻者。又有不能依限前進者。散布各處。照料既不能周。勦捕自難得功。一有敗衅。人無固志。似此何能力圖進取。此時肅清江面。專恃此軍。會國藩初次接仗。即有挫失。且戰船被風沈損多隻。何事機不順若是。現在湖北待援孔亟。會國藩以在籍紳士。若祇專顧湖南。不爲通籌全局之計。平日所以自許者安在。鮑起豹本係水師大員。何以不令督帶舟師。勦辦賊匪。是否不能得力。且該提督何以陸路亦未帶兵前進。著駱秉章查明具奏。欽此。十二日。公與駱公會奏官軍擊賊靖港互有勝負。賊由陸路攻陷湘渾。官軍水陸夾擊。大獲勝仗。巨股殲滅。克復縣城一摺。隨摺奏保塔齊布副將守備周鳳山同知褚汝航知縣夏鑾千總楊載禧文生彭玉麟哨官張宏邦訓導江忠淑八員。是役以塔齊布公爲功首。而水師立功。亦於是始著。公專摺奏靖港戰敗。水師半潰。實由臣調度乖方。請交部從重治罪。并請特派大臣。總統此軍。臣未赴部之先。仍當力圖補救。附片奏保塔齊布褚汝航等數員。可分水陸將領之任。奉上諭。屯聚靖港逆船。經會國藩親督舟師進勦。雖小有斬獲。旋以風利水急。戰船被焚。以致兵勇多有潰敗。據會國藩自請從重治罪。實屬咎有應得。姑念湘渾全勝。水勇甚爲出力。著加恩免其治罪。即行革職。仍趕緊督勇勦賊。帶罪自効。湖南提督鮑起豹自賊竄湖南以來。並未帶兵出省。疊次奏報軍務。僅止列銜會奏。提督有統轄全省官兵之責。似此株守無能。實屬大負委任。鮑起豹著即革職。所有湖南提督印務。即著塔齊布暫行署理。該部知道。欽此。又奉上諭。會國藩統領舟師。屢有挫失。此摺所陳紕繆各情。朕亦不復過加譴責。現在所存水陸各勇。僅集有四千餘人。若率以東下。誠恐兵力太單。該革員現復添修戰船。換募水勇。據稱一兩月間。當有起色。果能確有把握。

亦尙不難轉敗爲功。目下楚北賊蹤，由應山竄回德安，隨州之賊亦回武昌。是鄂省望援甚急，該撫等務當飭督水陸各軍，迅將此股敗竄之匪，殲滅淨盡，兼可赴援武昌，以顧大局。欽此。官軍既復湘潭，餘賊潰竄者，擒捕殆盡。賊船在靖港者，聞風下駛。岳州賊亦退出。公所造戰船，經岳州之損，靖港之敗，去其大半。旋委員於衡州湘潭設兩廠，續造船六十號，較前更加堅緻。長沙亦設廠重修百數十號，已潰之勇丁，不復收集。別募水陸兵勇數千人，每船增設哨官一員，調羅澤南李續賓帶所部湘勇回長沙，又委募增湘勇數營，將領立功者，獎拔保奏。潰散者革退更置。奏調水師弁兵於兩粵，廣西巡撫委知府李孟羣募水勇一千名，廣東派委總兵陳輝龍帶水師四百員名，礮一百尊，赴湖南會剿。規模重整，軍容復壯矣。通城賊南犯，林源恩帶勇堵之。公調江忠淑陳鑑源等，帶勇會剿破之。五月初八日，公具摺恭謝天恩，奏稱臣屢奉諭旨，飭令迅速東下，數月之久，未能前進，復多挫失，且愧且憾，是以籲請治罪。迺蒙皇上俯從寬宥，貸其前愆，期其後效。臣現將水陸各軍，嚴汰另募，重整規模，一俟料理完竣，即星夜遄征，誓滅此賊，以雪挫敗之恥。贖遲延之罪。又因前摺奉到批諭，有太不明白之語，附片覆陳湘潭寧鄉靖港三處賊蹤來去，官兵勝敗曲折情形，又附片奏請署提督塔齊布會師東下，出省剿賊。又奏稱臣係革職人員，此後出境勦賊，一切軍情，必須隨時奏報，請容臣專摺奏事，奉硃批，准汝單銜奏事。欽此。又奉上諭，曾國藩添募水陸兵勇，及新造重修戰船，既據奏稱已可集事，則肅清江面之舉，仍藉此一軍，以資得力。塔齊布胆識俱壯，堪任勦賊之任。著駱秉章即飭統領弁兵，迅速出境，會國藩與該署提督，共辦一事。尤應謀定後戰，務期確有把握，萬不可徒事孟浪。再致挫失等因。欽此。賊既退出湖南，旋復上犯，陷華容，踞岳州，分擾洞庭之西湖。十三日，陷龍陽。掠民船，攻常德府。十六日，陷澧之塔齊布公統帶兵勇三千，先赴岳州進剿。公乃調胡林翼與周鳳山李輔朝等，帶勇自益陽進勦常德，行抵龍陽，湖水驟漲，賊船乘水攻營。周鳳山等小挫。胡公林翼督各勇回益陽，改道繞赴常德。六月，船廠修造戰船畢工。廣東總兵陳輝龍到長沙，添造淺水拖罟二號。李孟羣所募廣西水勇千名，亦到長沙。與公所新募水勇，日夜操練，刻期進剿。漢陽之賊，於春初分股，泝漢水陷德安隨州。江漢城邑，大半殘破。湖北學政侍郎青巖入守武昌，署巡撫辜將軍台湧駐營隨州，署總督事賊於三月陷安陸府。四月陷荊門州。犯荊州府，將軍官文公遣兵擊卻之。賊竄陷宜昌府。五月復下宜都，竄枝江。由太平口南入洞庭，與西湖股

匪合。併陷澧州安鄉等城。青寧守武昌數月。城外賊蹤四布。糧盡援絕。乃率飢軍數千。突圍南出。就餉於長沙。賊遂陷武昌省城。公與駱公籌撥銀二萬兩。以賑鄂軍。資遣至荊州。青寧奉旨正法。台湧革職。詔以楊霽署湖廣總督。公水師既集。分三幫起碇。十三日先遣褚汝航等四營。擊檝而下。陸師則以塔齊布公之軍爲中路。駐營於新牆。胡公林翼等軍出西路。趨常德。江忠淑林源恩等。由平江進勦。崇通者爲東路。先後進勦。合計兵勇。數近二萬。賊聞官兵大至。遂退出常德澧州各城。將所掠船。盡築岳州。公以新牆兵力稍單。調派羅澤澤南等。以勇二千繼進。又調周鳳山等兵勇。齊赴岳州。二十二日。塔齊布公破賊於新牆。進逼岳州。晦日。水師破賊於南洋港。賊乃宵遁。七月初一日。官軍收復岳州。初三日。賊船數百來犯。水師力戰破之。初六日。公督水師後幫。由長沙起行。陳輝龍李孟羣率師繼進。十一日。公會駱公銜。馳奏水師克復岳州。越日。大股續至。復被水師痛勦。全數殲滅。南省已無賊蹤。一摺。隨摺奏保褚汝航夏鑾彭玉麟楊載福何南青五員。附片奏調浙江候補知縣龔振麟來楚。鑄造砲位。接濟舟師之用。又附片奏稱水師以造船置砲爲最要。出征船艦。不無漂擱。臣設衡州長沙兩處船廠。仍不停工。酌留水勇在長沙操演。預備接濟。請旨飭催兩廣督臣。趕緊解運夷砲數百尊來楚。以資攻勦。又附片奏報水師前後起行日期。并雇船載陸勇二千。以資護衛。奉硃批。覽奏稍慰朕懷。汝能迅速東下。藉此聲威。或可掃除武漢之賊。朕日夜焦盼。憂思彌增。護船陸勇。終恐未可深靠。欽此。又奉上諭。此次克復岳州。大獲勝仗。湖南逆蹤。業就肅清。江路已通。重湖無阻。卽著塔齊布會國藩會督水陸兵勇。乘此聲威。迅速東下。力擣武漢賊寨。以冀掃平羣醜。欽此。水師既克岳州。進破賊船於道林磯。十四日。賊船上犯。水師復破之於城陵磯。十五日。公抵岳州。十六日。馳奏水師疊獲勝仗。將犯岳之賊船。全數殲滅。一摺。隨摺仍奏保褚汝航等五員。陣亡哨官秦國長請卹。是日。公專摺請旨。飭部頒發部監執照。以速捐務。而濟要需。現在臣與提臣塔齊布水陸一軍。共計一萬三千餘人。月需餉銀六七萬兩。萬分焦灼。是以專差赴部。守領執照。水師乘風擊賊。船於城陵磯下。南風大作。官兵失利。總兵陳壯勇公輝龍游擊沙公鎮邦戰歿。褚公汝航夏公鑾等馳救。亦陣亡。戰船陷失者數十號。兵勇死傷者甚多。十八日。塔齊布公陸軍破賊於搗台。陣斬賊目會天養。二十一日。馳奏水師失利。陸軍獲勝。一摺。陣亡總兵陳輝龍道員褚汝航同知夏鑾遊擊沙鎮邦千總何若澧府經歷唐嶸均奏請卹。隨摺奏保陸營將弁童添雲周

岐山黃明魁三人并自請交部嚴加議處。其時水師營官道員李孟羣之父李愨肅公卿毅在湖北署臬司任內殉難。公附片奏報李卿毅殉難情形。請照臬司例賜卹。并稱其子孟羣忠勇奮發。思報仇殄逆。請留營勦賊。并請從權統領水師前營。以專責成。奉上諭。覽奏。曷勝憤懣。會國藩係在水路督戰。於陳輝龍出隊時。不能詳慎調度。可見水上一軍。毫無節制。卽治以貽誤之罪。亦復何辭。惟會國藩前經革職。亦不必交部嚴議。仍責令督飭水師將弁奮力。此時攻剿。斷不可因一挫之後。遂觀望不前等因。欽此。又奉上諭。李孟羣現在丁憂。著准其仍留軍營。帶勇勦賊。欽此。賊屯聚城陵磯者。爲數尙衆。諸公殿元等擊賊陣亡。二十六日賊黨大至。羅公澤南奮擊破之。二十八日湘勇由陸路進攻賊壘。二十九日水師燬賊船於城陵磯。賊大潰。閏七月初三日。勦奏岳州水陸官軍四獲勝仗。一摺。隨摺奏保知府羅澤南守備楊名聲千總唐得陞李榮華四員。陣亡都司諸殿元千總劉士宜請卹。奉上諭。塔齊布會國藩自帶兵以來。既未嘗遇敗而怯。定不致乘勝而驕。總宜於發速之中。持以慎重。則楚省賊蹤。漸可掃蕩。欽此。塔齊布公陸軍初二日攻破賊營十三座。殺賊二千餘人。李公孟羣楊公載福等。率水師以火焚賊船。乘勝攻擊。盡平沿江兩岸賊營。窮追二百里。至嘉魚縣境。賊潰下竄。公督水軍出江。進駐螺山。初九日。馳奏水陸兩軍大勝。賊巢盡平。大股賊一摺。隨摺奏保周鳳山李續賓何越瑛余星元滕國獻蕭捷三六員。附片奏調湖北藩司夏廷樾總理行營糧台。暫駐岳州。以資轉運。又附片奏稱新授四川臬司胡林翼才大心細。爲軍中不可少之員。請旨飭令該臬司管帶黔勇。酌撥他路兵勇。能自成一隊。隨同東征。知府羅澤南經江西撫臣咨調赴援。該員現帶湘勇。屢次大捷。獨當要隘。以寡勝衆。亦請隨同出境東征。免其赴援江省。賊之上犯也。嶺江城市村鎮。悉被殘掠。岳州城陵磯以下。築壘江岸。以圖抗拒。至是水陸屢捷。乘勢掃平。賊壘悉破。難民焚香跪道。以迎。公約束嚴明。秋毫不犯。解散脅從。撫卹瘡痍。軍抵湖北境。與將軍官文公總督楊公霈之軍。聲息漸通。奉上諭。塔齊布會國藩奏水陸官軍大獲勝仗。一摺。辦理甚合機宜。塔齊布著交部從優議敘。會國藩著賞加三品頂戴。仍著統領水陸官兵。直搗武漢。與楊霈所統官軍會合。迅掃妖氛。欽此。駱公秉章具摺奏稱東南形勝。利用舟楫。自逆賊掠取江湖舟楫。以數萬計。以致糜爛數省。兇鋒日張。官軍坐受其困。自奉明詔。籌備舟師。始有湘潭岳州諸大捷。疆圉危而復安。此舟師脅勦之明效也。會國藩所統水師船礮。本不爲多。接仗失利。所失不少。現在會國

藩整軍東下。通籌防勦大局。以船礮爲最要。現飭紳民設局。捐辦船礮。以固本省藩籬。而資大營接濟。又奏留胡林翼一軍。仍駐岳州。奉旨皆允之。賊之大股竄回武漢。而江岸支港。汎湖。尙有餘匪藏匿。崇陽賊數近二萬。蒲圻咸寧等縣之匪。倚崇陽爲巢穴。公與塔公籌商分路進剿。公督水軍搜勦。江賊船進扼金口。賊屢來犯。擊卻之。塔公督陸軍馳赴崇陽。連破賊卡。二十六日。破賊於半樓司。賊敗竄。塔公追勦。直抵崇陽。八月初四日。克復崇陽縣城。初九日。追擊賊於咸寧。破之。荊州將軍官文公所遣魁玉楊昌泗等。帶兵五千。會於金口。水陸併勢。復破賊於沌口。公於初四日駐軍嘉魚。馳奏水陸官軍疊獲勝仗。及現籌勦辦情形一摺。奉批諭。汝等自湘潭大捷後。屢次得手。有此聲威。豈可自餒。惟利在速戰。莫待兩下相持。師勞餉乏。大有可慮處。塔齊布不致爲崇陽一股本。牽制。方好。欽此。十一日。公進駐金口。十九日。馳奏崇陽克復。咸寧大獲勝仗。水師連日接戰獲勝一摺。又奏恭謝天恩一摺。奏稱。臣丁憂在籍。墨經從戎。常負疚於神明。不敢仰邀議敘。乃荷溫綸寵錫。慚悚交增。嗣後湖南一軍。再立功績。無論何項褒榮。概不敢受。奉硃批。知道了。殊不必如此固執。汝能國爾忘家。鞠躬盡瘁。正可慰爾亡親之志。盡孝之道。莫大於是。庸庸褻績。國家政令所在。斷不能因汝一請。稍有差池。汝之隱衷。朕知之。天下無不知也。欽此。胡公林翼軍至通城。因駱公奏留。遂回駐岳州。塔齊布公羅公澤南由咸寧北趨。擊破賊黨於橫溝橋。與公會於金口。而崇陽餘匪。仍聚攻縣城。陷之。公兼督水陸各軍。分途進剿。公與塔齊布公羅公澤南規畫進取。武昌之策。賊於城外洪山花園兩路。皆駐重兵。築堅壘。羅公自請攻花園一路。塔公攻洪山一路。二十一日。羅公破賊壘九座。塔公亦破洪山賊壘。水師破燬賊船五百餘號。二十二日。馳奏水陸續獲勝仗。現籌進兵武漢情形一摺。是日水軍奮擊賊船。焚燬殆盡。陸軍攻武漢城外賊壘。悉破平之。先後斃賊萬餘。二十三日。克復武昌省城。漢陽府城賊大潰。湖廣總督楊公霽軍漢陽以北。馳奏武漢克復大概情形。奉上諭。曾國藩等攻勦武漢情形。尙未奏到。塔齊布陸路官兵。此時諒與曾國藩水陸合爲一軍。著俟楊霽抵省後。商榷挑選精兵。水陸進剿。朕日盼捷音之至也。欽此。二十七日。公馳奏水陸大捷。武昌漢陽兩城。同日克復一摺。奏稱。臣等先後入城。鎮撫才黎。飛咨督督臣楊霽迅速渡江。妥籌進剿。隨摺奏保水軍營官道員李孟羣游擊楊載福守備蕭捷三。陸營將領知府羅澤南知縣李續賓都司彭三元守備唐得陞文生李光榮。并奏保荊州將領巴革都統魁玉總兵楊昌泗共十員。附

片奏稱軍務殷繁差遣之員不能不兼用丁憂降革之員從權辦理如果奮勉出力仍當懇請天恩一律保獎以收後效而勵戎行又具摺奏六七月以來水陸兩軍疊次勝仗已奏請將員弁勇兵保獎奉旨允准謹分爲三起先將第一單彙列并繕台各員晝夜辛勤經各營官開單請保臣等核實繕單恭呈御覽其武漢克復摺奉硃批覽奏感慰實深獲此大勝殊非意料所及朕惟兢兢自持仰天速救民劫也另有旨欽此奉上諭此次克復兩城三日之內焚舟千餘躡平賊巢淨盡運籌決策甚合機宜允宜立沛殊恩以酬勞勩會國藩著賞給二品頂戴署理湖北巡撫并加恩賞戴花翎塔齊布著賞穿黃馬褂并賞給騎都尉世職等因欽此又奉上諭楚省大局已定亟應分路進剿由九江安慶直抵金陵掃清江面應如何分兵前進如何留兵防守著楊需會國藩塔齊布妥籌商定即行具奏會國藩以殺賊自任必能謀定後戰計出萬全沿江剿賊之事朕以責之會國藩與塔齊布楚省防賊回竄及搜捕江北等處餘匪事宜朕以責之楊需務當協力妥籌不可稍存大意等因欽此武漢既克賊船在襄河者尙多奔出漢口以圖下竄公派魁玉楊昌泗帶兵進剿而楊載福等以水師舢板數十號泝流駛入漢口縱火焚賊船千餘號幾盡三十日馳奏水師搜剿襄河續獲大勝一摺奏稱戰船用力甚少成功甚多江漢上賊舟無幾從此一意東下無牽制之虞然臣細察大局有可慮者數端一在兵氣之散佚一在亂民之太多一則軍去湖口日遠軍火米銀輪轉爲難恐有缺乏潰散之患不能不熟慮而縷陳之附片奏請旨飭江西撫臣籌銀八萬兩廣東四川兩省各籌銀數萬兩迅解行營現因陸兵太單擬添募陸勇二千率以東下又附片奏鄂省克復以後查獲賊中僞文卷七月十八日城隍磯之戰賊會曾天養被殲情形前奏未及詳悉聲明又訊據賊供武漢賊情曲折一併聲明奉上諭會國藩等以勦賊自任雖當乘此機會急思順流而下以次攻復沿江諸城然須計出萬全謀定後戰方無挫衄之虞若能由九江安慶直抵金陵使長江數千里盡蕩妖氛則從征將弁朕必破格施恩以酬懋績欽此總督楊公需自德安入駐武昌時賊已退出黃州南則踞興國州北則屯聚蘄州廣濟仍以船爲巢穴公與楊公會商進剿分爲三路以塔齊布公統率湖南兵勇進剿興國大冶爲南路派提督桂明等領鄂省兵勇進剿蘄州廣濟等處爲北路公自督水軍浮江而下九月初七日馳奏統籌三路進兵分別水陸先後直搗下游一摺附片奏請諭飭陝西撫臣籌銀二十四萬兩解赴行營又片奏參都司成名標監造船工淨

開款項請革職查辦。是日又具摺彙保出力員弁兵勇第二單。奉上諭。會國藩等奏統籌三路進兵。直擄下游一摺。覽奏布置各情。甚合機宜。以長江大局而論。楚北上游。既已漸次肅清。則各路官軍。乘勝東趨。自成破竹之勢。但兵機移步換形。賊情亦詭詐百出。總須出奇應變。步步爲營。以免孤軍深入。方操勝算。其桂明一軍。較之楚南兵勇。強弱是否相當。倘彼強此弱。南岸被勦緊急。該逆必至伺隙北渡。該督等會否慮及。此次東下之師。關係大局轉機。務期成算在胸。相機籌辦。能制賊而不爲賊制。庶可次第廓清也。所請撥陝西餉銀。已諭知王慶雲照數籌撥。源源接濟矣。欽此。十三日。馳摺恭謝天恩。并奏陳奉命署理湖北巡撫。於公事毫無所益。於臣心萬難自安。臣統率水師即日啓行。於鄂垣善後事宜。不能兼顧。且母喪未除。遽就官職。得罪名教。何以自立。是以不敢接受關防。仍由督臣收存。公前奉上諭。會國藩雖係署任巡撫。而勦賊之事。重於地方等因。是摺未奏到時。奉上諭。會國藩著賞給兵部侍郎銜。辦理軍務。毋庸署理湖北巡撫。陶恩培著補授湖北巡撫。未到任以前。著楊鼎兼署。欽此。是摺奏到。奉硃批。朕料汝必辭。又念及整師東下。署撫空有其名。故已降旨。令汝毋庸署湖北巡撫。賞給兵部侍郎銜。汝此奏雖不盡屬固執。然官銜竟不書署撫。好名之過尙小。違旨之罪甚大。著嚴行申飭。欽此。又奉上諭。會國藩既無地方之責。即可專力進勦。但必須統籌全局。毋令逆匪南北分竄。方爲妥善。并隨時知照江皖各撫。及托明阿向榮等四路兜擊。以期直搗金陵。固不可遷延觀望。坐失事機。亦不可銳進貪功。致有貽誤。諒會國藩等必能兼權熟計。迅奏膚功也。欽此。水師楊公載福領戰船先行。公與李孟羣等繼進。南路陸營以十三日披營進勦。北路陸軍魁玉楊昌泗等以十七日拔營。十九日水師破賊於蘄州城下。二十一日。塔齊布攻克復大冶縣城。羅公澤南等克復興國州城。公舟次黃州。按行前總督吳文節公堵城營壘。於其殉難之處。爲文以祭之。詞甚哀厲。祭文稿今失。二十七日。公駐舟道士洲。馳奏陸軍克復興國大冶。水師在蘄州勝仗一摺。附片奏探明賊蹤。於田家鎮堅壘抗拒。橫江鐵鎖二道。擬先攻半壁山。奪其要隘。又具摺奏稱。臣自入鄂城以來。探訪輿論。僉謂武昌再陷之由。實因崇綸台瀆辦理不善。督臣吳文鎔忠勤憂國。殉難甚烈。官民至今思之。卽於前撫臣青馨亦尙多哀憐之語。無怨憾之詞。前任督撫優劣情形。以及年餘之成敗始末。關係東南大局。不敢不據實縷陳。又奏遵保出力員弁兵勇第三次彙單請獎一摺。奉上諭。蘄州賊勢尙衆。水師既經攻勦得手。何以桂明等陸路一軍。

未能趕到。會國藩經朕畀以勦賊重任。事權不可不專。自桂明以下文武各官。均歸節制。倘有不遵調遣。或遷延畏葸。貽誤事機者。卽著該侍郎專銜參奏。以肅戎行等因。欽此。是月奉旨。胡林翼調湖北按察使。楊載福補湖南常德協副將。羅澤南授浙江寧紹台道。均督勇勦賊。欽此。二十九日。蘄州賊船上犯。楊公載福彭公玉麟等縱火盡焚之。十月初一日。羅公澤南陸軍破賊於半壁山。奪其營柵。初四日。羅公澤南等大破賊於半壁山。殲賊逾萬人。初五日賊至。復擊破之。初七日。馳奏陸軍踏破半壁山賊壘。水師續獲勝仗一摺。陣亡員弁何如海石熾然徐國本請卹。附片專奏營官白人虎陣亡請卹。又片奏查明前湖北道員劉若珪殉難情形。請飭部議卹。又片奏軍中子藥。概係湖南支應。今全軍將出楚境。距湘省千數百里。請旨飭江西撫臣遴委幹員。籌款開局。監製火藥。鑄造鐵子鉛彈。解營接濟。是日具摺謝恩。賞兵部侍郎銜。附片陳明前摺未暑。署湖北巡撫新銜。奉批諭申飭。蒙恩寬宥。謹奏申謝。又代奏浙江寧紹台道羅澤南呈謝天恩。仍請留營勦辦賊匪。初八日。水師攻賊船於蘄州。繞出賊前。初十日。賊船退至田家鎮南岸。鐵鎖已爲陸營湘勇砍斷。楊公載福彭公玉麟督水軍。於十三日攻斷江中鐵鍊。舟師飛檣而下。至鄖穴縱火焚賊舟。適東南風大作。賊船四千五百餘號。皆盡伏尸萬數。田家鎮北岸之賊大潰。燬營而遁。十四日。馳奏陸路南軍大捷。斃賊萬餘。砍斷江岸鐵鎖。水師屢獲勝仗一摺。隨摺奏保李續賓彭三元普承堯三員。陣亡千總蕭世祥請卹。附片奏陳賊蹤逼擾。驛郵多梗。偵探難遣。文報難通。江皖各省。不克隨時知照。請旨飭軍機處。將江南北大營現在情形。及紅單船現泊何處。隨時示知行營。期通消息。奉硃批。獲此大勝。皆因汝等和衷共濟。調度有方。故能將士用命。以少擊衆。朕披覽之餘。感慰莫能言喻。仍另有旨。欽此。奉上諭。此次我軍陸路奪取半壁山。水師屢獲大勝。逆賊不敢復窺南岸。辦理甚爲得手。據奏北兵不甚得力。究竟桂明一軍。現在何處。何以未與南軍會合。著楊霽親督後軍。迅速前進。爲會國藩等後路聲援。不准稍有遷延。致滋貽誤等因。欽此。十四夜蘄州之賊。棄城竄去。水師追賊。船至九江城下。塔齊布公破陸軍。平南岸富池口賊壘。二十日與羅公澤南率師渡江而北。二十一日。公舟次田家鎮馳奏。官軍水陸大捷。燒燬賊船四千餘號。田家鎮蘄州兩處賊悉潰竄一摺。隨摺奏保副將楊載福同知彭玉麟道員羅澤南游擊普承堯水師將弁劉培元秦國祿孫昌國洪定陞八員。附片奏報水師前隊。追逐賊蹤。已至九江城外。陸軍卽日渡江。北岸進勦。又片奏臣等一軍。以

肅清江面。直搗金陵。爲主設該逆旁竄他縣。陸軍竟難兼顧。請旨飭各路帶兵大臣。及各省督撫。擇要堵禦。預防流賊之患。奉硃批。續獲此勝。皆因汝等籌畫盡心。朕甚廬念。欽此。又奉上諭。曾國藩塔齊布自岳州統師東下以來。沿江攻克城池。殲除醜類。所向克捷。皆由同心戮力。調度有方。節次披覽奏章。朕心實深欣慰。在事文武員弁兵勇。亦能人人用命。奮不顧身。尤堪嘉獎。欽此。陸軍渡江循北岸而下。二十六日。遇賊於蓮花橋。擊破之。二十八日。克復廣濟縣城。水師追擊賊船。二十六日。戰於九江城外。破之。十一月初一日。陸師破賊於雙城驛。初三日。破賊於夏新橋。初四日。克復黃梅縣城。初六日。馳奏蓮花橋勝仗。克復廣濟。及水師九江勝仗一摺。陣亡將弁蘇勝鄭沐李金樞請卹。附片預報黃梅勝仗。并陳桂明一軍。未能會剿緣由。又附片奏蘄州州判魏作霖殉難請卹。又片奏調湖南永州府知府張丞實來營添募湘勇。交該守管帶。以厚兵力。又附片奏報服闋日期。現在辦理軍務。在營釋服。是日具摺奏保克復武漢。及大冶與國蘄州各案。水陸兩軍出力員弁兵勇。共三百四十人。開單請獎。羅公澤南自黃梅拔營進剿。破賊於濯港。十一日。公馳奏雙城驛大河埔夏新橋勝仗。黃梅克復一摺。隨摺奏保周友勝余星元滕國猷三弁。陣亡千總王映軫請卹。附片奏濯港勝仗。又奏陳近日勦辦情形一摺。奏稱。九江賊船不多。我師兩次苦戰。未能大挫兇鋒。皆因兩岸賊營太多。水陸依護。抵拒甚力。我之水師。與陸軍隔絕。晝夜戒嚴。勞苦倍甚。并陳可恃者數端。可慮者亦數端。時疊奉諭旨。令湖北江西兩省派兵會剿。總督楊公霈派桂明一軍。留駐黃州。魁玉楊昌泗。隨同勦賊。蘄州以下。楊公霈自駐黃梅廣濟之間。江西派臬司惲光宸總兵趙如勝駐軍九江境上。皆奉旨歸公節制調度。又奉上諭。楊霈奏克復廣濟黃梅一摺。所敘進攻九江情形。似該郡賊黨尙復不少。塔齊布渡江而北。南岸官軍。卽不能得手。是江西陸路兵勇。殊不足恃。塔齊布仍須渡回南岸。倘南北兩岸專恃一塔齊布奔馳追勦。則湖北江西兩省官兵。豈不皆成虛設耶。欽此。十二日。塔齊布公羅公澤南等。破賊於孔隴驛。十三日。小池口賊遁去。十四日。水師焚賊船。蕩郡江面賊踪略盡。公卽日進駐九江城外。十五日。塔公陸軍抵小池口。水師擊破賊船。進泊湖口。賊踞守九江。堅不可下。十八日。陸軍渡江南岸。駐營九江南門外。二十一日。馳奏濯港孔隴驛小池口勝仗。蕩郡江面肅清。水師進扼湖口一摺。隨摺奏保朱南桂童蔭雲二員。附片奏參鄂軍管官李光榮所帶川勇擄掠滋擾。請革職訊辦。又片奏稱攻圍九江陸軍單薄。湖北臬司胡林翼識略

冠時已札飭帶勇二千駐防田家鎮就近飛調該軍來潯助剿。副將王國才都司畢金科樸實勇敢馭軍有法請撥帶勁旅。交臣調遣。皖省道員何桂珍知縣李沛蒼在六安等處帶勇防剿亦請歸臣調遣。請旨飭江西撫臣趙造攻具解交行營。均奉旨允准。又奉上諭。曾國藩塔齊布運籌決勝戮力同心麾下戰士率皆轉戰無前爭先用命。皆由曾國藩等調度有方。覽奏之餘實堪嘉獎。曾國藩著賞穿黃馬褂。並發去狐腿黃馬褂一件。白玉四喜搬指一個。白玉巴圖魯翎管一枝。玉靶小刀一柄。火鏢一把。交曾國藩祇領。以示優獎。欽此。賊踞九江湖口兩城。濬壕堅壘。結木簰於湖口城下。以阻官軍入湖之路。而別築石壘於梅家洲。水陸相倚。賊舟屯踞大姑塘。擾犯南康府。二十一日。羅公澤南湘軍渡江未畢。為賊所乘。回軍擊卻之。胡公林翼軍亦至。均駐九江城外。水軍登岸攻賊。屢破之。賊每乘夜驚營。水師亦徹夜戒嚴。十二月初一日。陸軍合攻九江城未克。初三日。馳奏水軍屢獲勝仗。陸軍圍信潯城。現籌攻勦情形一摺。陣亡將弁會獻成周福友羅嘉典請卹。奉上諭。我軍自肅清潯江。進扼湖口。以後。滿擬九江郡城乘勝可克。乃連日焚燬賊船。躡破賊壘。而該逆死黨仍負固堅守。殊屬兇悍。賊情變幻靡常。著曾國藩塔齊布相機籌畫。不可稍有孟浪。致誤事機。欽此。初六日。胡公林翼羅公澤南擊賊於梅家洲破之。水師乘勢攻破湖口木簰賊卡。初八日。童壯節公添雲因攻城受傷。卒於軍。初十日。水陸合攻湖口。賊營未克。十二日。水師舢板船駛入內湖。焚賊舟數十號。乘勝追逐。至大姑塘以上。賊復於湖口設卡築壘增柵。以斷其後。舢板船遂不得出。其在外江者。皆快蟹長龍諸大船。掉運不靈。賊以小艇乘夜來襲。戰船被焚者三十九號。餘皆追回九江大營。十四日。馳奏九江湖口水陸攻勦情形一摺。隨摺奏保劉國斌孫昌國二弁。陣亡參將童添雲暨兵弁葉楚南楊玉芳黃嶺南姜凌浩請卹。水師既退。集九江城外湖口之賊。分股渡江。踞小池口。皖賊復上犯鄂境。公派周鳳山陸營渡江攻勦小池口賊壘。大挫而還。公急調胡林翼羅澤南回援九江。駐營南岸官牌夾。二十五日。賊復以小艇夜襲水軍。放火焚戰船十餘號。公座船陷於賊。文卷冊牘俱失。公棹小舟。馳入陸軍。以免。調舟師悉泊南岸。與羅公澤南湘勇陸營緊相依護。糧台輜重各船皆退駛至鄒穴以上。戰艦亦多潰而上。泝者。公憤極。欲策馬赴敵以死。羅公澤南劉公容及幕友等力止之。三十日。馳奏水師在內湖三獲勝仗一摺。外江水師兩次敗挫一摺。奏稱。水師屢獲大捷。聲威尤震。自至湖口苦戰經月。忽有挫失。皆由臣國藩調度無方。請交部嚴加議處。水

師陣亡將弁史久立李允升李選衆沈光榮葛榮冊及座船弁兵劉盛槐等請卹。奉上諭。水師銳氣過盛。由湖口駛至姑塘以上。長龍三板各船。與外江師船隔絕。以致逆氛頓熾。兩次被賊襲營。辦理未爲得手。曾國藩自出兵岳州以後。與塔齊布等協力同心。掃除羣醜。此時偶有小挫。尙與大局無損。曾國藩自請嚴議之處。著加恩寬免。欽此。楊公載福留鄱穴養病。聞敗力疾而下。督戰船拒賊卻之。尋以病甚回籍。水軍在外江者。李公孟羣彭公玉麟與陸軍依岸而守。其入鄱湖者。營官蕭捷三段鑿器孫昌國黃翼升等領之。由是水師遂有內湖外江之分。是歲正月。科爾沁郡王僧格林沁及勝保公督兵破賊於獨流。二月。破賊於阜城。三月。賊由安徽分股竄山東。臨臨清州。四月。勝保公殲賊於臨清。僧王大軍克阜城。五月。賊陷高唐州。大兵圍之。江北。大兵。於去冬收復揚州。賊竄甌瓜州。是年二月。瞿威壯公騰龍陣亡於瓜洲。賊陷太平府。孫文節公銘恩死之。閏七月。江南官軍克太平府。江北督師文勤公琦善卒於軍。江寧將軍托明阿代其任。廬州陷後。皖北城邑多殘破。詔以福濟爲安徽巡撫。江南大營復遣提督和春以兵援皖。五月。克六安州。擒匪乘亂起於皖豫之交。副都御史袁公甲三督師駐臨淮關防。勦何公桂珍奉旨授皖南兵備道。道阻不得之任。袁公委以帶勇勦賊。駐於霍山。屢有功。欲西與楚軍會合。公亦疏調來營。阻於賊而不能達。

〔乙卯〕咸豐五年公四十五歲。正月。公駐羅澤南湘勇陸營中。賊既踞小池口。皖中大股續至。塔齊布公羅公澤南率勇渡江擊之。挫敗而還。賊以一股循江北岸上竄蘄州。一股竄犯廣濟。官軍潰退。總督楊公霽退駐漢口。又退守德安。賊至漢口。泝襄河大掠民船。武昌戒嚴。江漢之間紛擾矣。公派臬司胡林翼總兵王國才都司石清吉領兵勇六千餘人。先後回援武漢。李孟羣以戰船四十號。泝江上駛。以援蘄黃。初四日夜。東北風大作。巨浪撞擊水師老營戰船。在九江城外者。漂沈廿二號。撞損數十號。公迺飭外江礮船。全赴鄂省。扼紮金口。李公孟羣彭公玉麟領之。而於沔陽州境之新堤鎮。設立船廠。修補已損之船。添造舢板小艇。其陷入內湖之水師。聞老營被襲。及大風壞船之警。相率赴南昌。巡撫陳公啓邁給以口糧。撫而輯之。軍心漸定。公自督陸軍。急攻九江城。未克。賊屢出撲營。均擊退之。初五日。拜摺恭謝天恩。上年十二月奉旨賞穿黃馬褂等。并年終奉賞福字荷包銀錢銀錄食物等件。是日馳奏陸軍渡江挫於小池口。北岸賊蹤。大股上竄。并陳近日賊勢軍情一摺。奏稱。目前局勢可慮。

者多端。臣等一軍進止機宜。有萬難者。初入日。馳摺奏報。大風擊壞戰船。飭令全數赴鄂。並自陳辦理錯謬之處。一在武漢既克。未留重兵防守。一在九江未克。遽攻湖口。又遭風壞船。事機不順。目前籌辦之法。凡四條。其一在鄂省添修外江水師。以固荆湘門戶。其一飛飭鄂省兵勇。胡林翼等軍。先後回援武昌。其一擬親至南昌。修整內湖水師。其一圍攻九江之陸軍。有進無退。攻克潯城。仍當鼓行東下。直擄金陵。以雪積憤。又奏潯城賊出撲營。陸軍獲勝一摺。奉上諭。覽奏殊深懸系。所稱辦理錯誤之處。如水師衝入內河。以至聲勢隔絕。誠不免銳進貪功。至武漢收復。未留後路聲援一節。則其勢本有不及。水陸兩軍全數進剿。猶恐兵力單弱。若彼時即分防武漢。兵數愈少。刻下更不知如何棘手。曾國藩等既定直擄金陵之計。即著迅速設法。攻克九江。合軍東下。毋得再存顧慮。等因。欽此。十二日。公由九江啓行。十六日抵南昌。諭營官蕭捷三等撫輯衆心。委員設局製造礮位子藥。專供楚軍礮船之用。是爲楚師三局。派委員弁。回湘增募水勇。撥用江省所造長龍戰艦三十號。歸入楚軍。添造快蟹十餘號。又委在籍候選知府劉于濤。設立船廠。添造各船。署臬司鄧仁荃。總理船礮。支應各局。內湖水師。自成一軍矣。援鄂之師。胡公林翼一軍先發。抵鄂後駐軍沌口。石公清吉之軍繼行。王公國才一軍守領鈞項。猶駐九江城外。賊出撲營。塔公合擊破之。蕪州賊黨由富池口渡江南竄。踞興國通山崇陽通城咸寧各城邑。援陷殆遍。并援及江西武寧縣境。武昌戒嚴。陶公恩培入守武昌。飛書請援。公急調王國才一軍。取道武寧。轉戰而前。以爲之援。二十七日。馳奏九江陸軍勝仗。內湖水師重加整理情形。及調派鄂軍。先後赴鄂援剿情形一摺。附片奏江西臬司鄧仁荃。經理船礮等各要務。於秋審事件。勢難兼顧。江西臬司惲光宸。擬即調回本任。所帶之勇。歸九江鎮將居隆阿統轄。又片奏水師哨官萬瑞書乘賊匪襲營之時。撥捨糧臺銀兩。請旨飭湖南撫臣嚴肇正法。又奏保上年半壁山田家鎮蕪州廣濟黃梅五案出力員弁兵勇一摺。奏稱。武漢以下。復爲賊蹤往來之地。前此戰功。竟成空虛。可憤可憾。然事機之不順。調度之失宜。咎在臣等。而將士之勞勩。究不可沒。惟錄其既往之功。冀作其將來之氣。奉旨允之。又奉上諭。楚北賊氛復熾。於曾國藩等勦賊機宜。大有關係。此時惟有會合各兵。迎賊攻剿。使曾國藩塔齊布各軍。無腹背受敵之患。方爲妥善。欽此。二十八日。公在南昌派大小戰船六十餘號。進泊康山。賊在九江湖口及江西北岸小池口者。益浚壕增壘。守備益固。湖口之賊。由都昌竄陷饒州府。分犯樂平景德鎮祁門。

徽州。擾及贛信之境。公調派羅公澤南統帶湘勇三千。由南昌繞出湖東攻勦。又增募平江勇四千名。同出東路會勦。塔齊布公所轄陸營。在潯城外者。僅五千人。但主堅守。不復仰攻矣。水師至武昌。泊舟城外。連遇大風。復多沈損。乃上泊金口。以扼賊上竄。胡公林翼一軍。亦退駐金口。二月賊撲武昌省城。十七日城陷。巡撫陶文節公恩培死之。各軍馳援皆不及。二十七日。公馳奏統籌全局一摺。奏稱。臣來江省。已逾月餘。探悉各路賊情大略。論江楚皖三省全局。陸路必須勁兵四枝。水路須兵兩枝。乃足以資勦辦。江之北岸。自蕪水廣濟黃梅。以達於太湖宿松爲一路。自漢口黃蘄循江岸而下。達於小池口爲一路。南岸自九江以下。與國通山等屬爲西一路。湖口以下。至於皖南爲東一路。臣之水軍。已分爲兩枝。陸軍若再分。則立形單弱。謹就目前急務。及臣力所能辦者。分條陳奏。併聲明前月奏報。均未奉批諭。此次改由湖南繞出。荆州驛遞進京。附片奏稱。陽臨惟由壽州光固。以達於麻城黃州。不過八百餘里。請旨飭令袁甲三募勇五千。練成勁旅。馳出黃州。以通皖鄂聲息。以挽江北大局。又片奏水師大營。被賊襲燬之時。座船被奪。文卷全失。其所領部照監照。遺失數目。俟查明咨報。又片奏。臣軍萬餘人。餉道梗阻。請旨飭撥江西漕折銀兩。就近接濟。并請閩浙兩省。每月各籌銀二萬兩。解赴行營。是日又奏。恭謝天恩。寬免處分一摺。時袁公甲三奉旨革職來京。公所籌四路分兵勦辦之策。諭旨嘉之。亦未能行也。楊公需軍駐德安。賊復逼擾江漢各城邑。由岳家口僱桃鎮窺犯荊襄。荆州將軍官文公拒卻之。胡公林翼抵鄂後。擢授湖北藩司。尋奉旨署理湖北巡撫。水陸兩軍在金口者。爲數無多。而賊勢益熾。鄂軍在德安者。屢敗不振。餉尤絀。無所出。胡公與李公孟羣彭公玉麟王公國才等。竭力守禦。上游賴以稍安。江西新募平江勇至南康。公委幕中候選同知李元度管帶操練。因調戰船。前赴南康。令陸軍緊相依護。公言。此軍之起原。專爲肅清江面而設。陸軍所以護水營。九江湖口之挫失。皆以水師孤懸。與陸師遠隔之故。時塔公軍在潯城。羅公東勦廣饒。不得合併。三月。公在南昌登舟。督將弁操練。分起調赴南康。與平江勇水陸駐扼。使賊不得掠舟。來往湖中。十九日。羅公澤南一軍由貴溪進勦。二十日。擊賊破之。二十一日。克弋陽縣城。公兩奉旨統籌全局。二十三日。覆奏。謹陳水陸軍情一摺。奏稱。臣等一軍。水陸分爲四枝。回援武漢之師。距臣營在八百里外。江之兩岸。仍爲賊踞。欲以楚軍回勦武漢。其難有三端。一則潯郡爲長江腰膺。陸兵未可輕撤。一則內湖水師。乘此春漲。可以由湖出江。所慮在既出以

後孤懸無依一則金口水陸諸軍餉項缺乏若再添師前往更無可支撥恐餉匱而有意外之慮臣實乏良策惟有堅扼中段保全此軍以供皇上之驅策而已奉上諭行兵之道合則力厚分則力薄自師船陷入鄱湖賊匪再擾武漢廣饒一帶復有賊衆竄突該侍郎等水陸兩軍實有不能不分之勢該侍郎所謂千里馳逐不如堅扼中段所奏亦不爲無見當此上下皆賊總宜計出萬全勿以瀆戰失機勿以遲迴誤事一切機宜朕亦不爲遙制該侍郎不可因挫折之餘遂至束手無策仍當激厲軍士踴躍用命謀定後動勿負初心以副委任塔齊布攻勦九江近日情形未據奏及豈爲賊氛阻隔竟不能聲息相通耶并著隨時奏報以紓懸系欽此刑部侍郎黃公贊湯在籍公於上年奏請督辦江西勸捐至是計捐銀數四十餘萬兩公軍入江西後皆賴黃公箠捐銀兩接濟湖南協餉專撥供湖北金口之師公所請撥浙閩協餉以有警不時解到公乃議借運浙鹽行銷於江西湖南舊日淮南引地用鹽抵餉仍請以黃公贊湯總理鹽餉事務江西巡撫陳公啓邁與公謀調遣兵勇意見多不合餉尤掣肘萬載縣知縣李皓與其鄉團舉人彭壽頤以團事互相控劾公見彭壽頤賞其才氣可用札調來營差遣陳公乃收繫彭壽頤令臬司惲光宸嚴刑訊治之以是尤多齟齬二十三日賊竄陷廣信羅公澤南由弋陽追勦破之二十七日克廣信府城賊竄入浙江境公由南昌督水師進發駐吳城鎮四月初一日馳奏羅澤南陸軍克復弋陽一摺陣亡勇弁張以德易傳武喻能益請卹又奏陳湖北兵勇不可復用大江北岸宜添勁旅一摺奏稱自粵匪至鄂迄今不滿三載而全軍覆潰者五次小潰小敗不可勝數既潰之後仍行收集兵勇皆爲故常恬不爲怪宜變易前轍埽除而更張之請飭下湖北督撫另立新軍滌除舊習使江之北岸得兩路足恃之兵則不惟有益大局卽臣等水陸各軍亦有恃而不恐奉寄諭交湖廣總督楊霽署巡撫胡林翼辦理時鄂軍屯聚德安湘軍回援武漢者爲數無多公屢函致胡公林翼論東南大勢以武昌據金陵上游爲必爭之地宜厚集兵力以圖恢復楊公載福傷病在籍病稍痊湖南巡撫駱公秉章委令招募水勇又添造戰船赴鄂助勦李公孟羣補授湖北臬司胡公委令添募陸勇扼防金口餉械均仰給於湘中兵勢稍振是日又奏請撥浙引用鹽抵餉一摺奏稱賊踞金陵長江梗塞淮南鹽務片引不行奸民偷送賊中賤售於各岸江西湖南民間皆食私鹽方今餉項缺乏請旨飭撥浙鹽三萬引設法運銷於淮引口岸以濟軍餉之不足附片奏現當干戈擾攘招商領運爲難擬仍用勸捐

之法行之。請旨飭派在籍侍郎黃贊揚在江西臨江府屬樟樹鎮設局勸諭紳富。措資辦運。并請浙江學政侍郎萬青黎在浙督辦鹽運。江西道員史致謬萬啓琛協理西省鹽運。湖南鹽法道裕麟在籍知府黃廷瓚協理楚省鹽運。又將鹽餉章程。分條咨商戶部。并咨商浙江巡撫。及江西湖南湖北巡撫。戶部議准。既而賊氛大擾。未能暢行也。公又奏湖北在籍禮部主事胡大任。江西在籍禮部主事甘晉。并辦理臣軍糧台。未能赴部當差。請飭吏部查照辦理。是時南昌設立後路糧台。公委甘晉李瀚章綜理之。羅公澤南移軍勦賊於景德鎮。賊竄入徽州境。羅公乃移駐饒州。以圖湖口。十二日。公馳奏陸軍克復廣信郡城一摺。奏保羅澤南轉戰千里。謀深勇沈。常能從容鎮定。以少勝衆。請交部從優議敘。十三日。公由吳城進駐南康。派前隊戰船進泊青山。以攻湖口。十九日。賊由姑塘上犯。水師擊之挫敗。退泊火箴山。二十一日。水師焚賊船於馬家堰。於徐家埠。又追焚之於都昌城下。計百數十號。湖北與國崇通等屬。賊黨日熾。分股竄入江西境。陷踞義寧州。殺掠甚慘。五月初八日。公派水師搜剿賊船於都昌。十三日。水師擊賊船於青山破之。追奔至轅山以下。羅公澤南駐軍饒州。浙江巡撫檄調湘軍。往徽州會勦。未行而江西聞義寧之警。省城戒嚴。陳公啓邁亟調湘軍回南昌。羅公遂移軍而西。二十一日。公馳奏內湖水師。近日接仗情形一摺。附片奏臣前在江省吳城。近在南康。與臣塔齊布信息常通。九江與南康僅隔一廬山。因賊匪時時窺伺。晝夜巡防。臣等二人。不敢遠離營次。屢約以匹馬相見。而未能也。又稱羅澤南一軍。既須回省。則不能由都昌進剿湖口。東岸無陸兵。則水軍孤懸可慮。奉上諭。該侍郎等務當通籌大局。謀勇兼施。以副朕望。欽此。楊公載福督帶舟師。由岳州出大江勦賊於蒲圻。會紮金口。三十日。內湖水師擊賊於青山破之。奪回拖罟大船。并獲他船數等。拖罟即九江之敗所失座船也。六月初五日。湖南巡撫咨送萬瑞書到案。正法。十二日。馳奏水師勝仗。奪回拖罟大船一摺。陣亡外委蘇光彩請卹。公又專摺奏參江西巡撫陳啓邁劣蹟較多。恐誤大局一摺。奏稱。臣與陳啓邁同鄉同年。同官翰林。向無嫌隙。自共事數月。觀其顛倒錯謬。迥改常度。深恐貽誤全局。不敢不縷晰陳之。奉上諭。江西巡撫著文俊補授。未到任以前。著陸元煊署理。陳啓邁著即革職。按察使惲光宸先行撤任。聽候新任巡撫文俊查辦。該撫到任後。著即將會國藩所參各情節。逐款嚴查。據實具奏。不得稍有徇隱。欽此。十三日。公派水師攻賊於徐家埠。委知縣李錕帶陸勇會勦破之。燬船八十餘號。塔齊布公陸軍擊賊於新壩破

之十五日。水師攻賊卡於梅家洲。衝出卡外。戰船四號。陷於賊。兵勇傷亡數十人。羅公澤南軍至南昌。二十四日。拔營進勦義寧之賊。湖北德安府失守。楊霈退走襄陽。革職。官文公奉旨授湖廣總督。欽差大臣。都統西凌阿由河南赴湖北督師。以攻德安。二十七日。塔齊布公與公相見於青山營次。會商攻勦之策。七月初六日。馳奏潯城陸軍勝仗。水師在徐家埠獲勝。湖口小挫一摺。陣亡將弁黃明魁。洪建勛。李文田。請卹。附片奏潯郡陸營久無成功。日對堅城。頓兵糜餉。擬於七月。臣與塔齊布移駐青山。渡湖而東。會勦湖口。是亦大局旋轉之一策。又片奏新選湖北督糧道萬啓琛。現在樟樹鎮協理鹽餉事務。請暫緩赴任。羅公澤南陸軍抵義寧。初八日。破賊於梁口。十三日。破賊於乾坑。十四日。大破賊於鰲嶺雞鳴山。斃匪六千餘名。水師蕭捷三等破賊於鞋山。李元度率平江勇渡湖而東。十五日。擊賊於徐家埠。破之。羅公澤南陸軍攻賊營。大破之。十六日。克復義寧州城。十八日。湖南提督忠武公塔齊布卒於軍。十九日。公馳赴九江。陸營哭之慟。派副將周鳳山接統其軍。公親巡營壘。撫定其衆。派副將玉山等弁兵三百人。護喪至南昌。李元度擊賊於文橋。二十一日。李元度攻賊於蘇官渡。破之。二十三日。平江營與水師會攻湖口。破賊營數座。燒賊船幾盡。舟師駛出大江。仍回泊青山。是日。蕭節愍公捷三陣亡。平江勇攻下鐘山賊營未克。乃駐軍蘇官渡。周鳳山督軍會操。賊出撲營。力戰卻之。公在大營中。復督衆攻城未克。二十四日。馳奏提督塔齊布因病出缺。臣馳赴大營。料理喪事。兼統陸軍。拊循士卒。保此勁旅。請旨將提臣塔齊布交部從優議卹。准於湖南省城建立專祠。以慰忠魂。而洽民望。附片奏派廣東羅定協副將周鳳山統領全軍。旋獲勝仗。士氣猶銳。可無渙散之虞。又附片奏報義寧湖口水陸三路勝仗大略。當名將新失之際。而事機尙爲順利。軍威尙足自振。堪以仰慰聖懷。公於是日聞蕭捷三陣亡。卽帶陸勇數百名。馳赴青山。撫定水勇。二十五日。公回駐南康水營。札調彭玉麟來江西。督領內湖水師。二十七日。平江營擊賊於流澗橋。二十八日。燒賊柵於柘磯。八月初四日。賊撲平江營拒卻之。初七日。馳摺奏報羅澤南陸軍攻勦義寧。疊次大勝。克復州城。隨摺奏保羅澤南及李續賓李杏春唐訓方蔣益燧五員。又奏水陸兩軍攻勦湖口。疊獲勝仗。湖內賊船幾盡一摺。陣亡都司蕭捷三。請照副將例議卹。羅公澤南既克義寧。軍威振於南服。是時湖南四境皆有賊氛。兩粵匪徒攻陷郴州。逆斂尤盛。駱公秉章奏調湘軍。折回湖南剿賊。羅公由義寧策單騎謁公於南康舟次。指畫吳楚形勢。謂方今欲圖江皖。必

先復武昌。欲圖武昌。必先清岳鄂之交。定計率軍出崇通。以援武漢。公從其策。初八日。羅公渡湖。督平江勇攻湖口。下鐘山賊壘。未克。是日水師擊賊於梅家洲大敗。失戰船二十一號。其時江西之賊。惟存九江湖口兩城。梅家洲下鐘山兩壘未克。堅踞不可攻。羅公旋至南康。謂湖口水陸官軍。但當堅守。不宜數數進攻。以頓兵損威。仍當俟江漢上游攻勦有效。以取建瓴之勢。公又從之。飭水師勿事浪戰。抽調九江大營寶勇千五百人。併歸羅公統帶。由義寧進勦。十六日。羅公還義寧營。胡公林翼攻武昌未下。乃議先攻漢陽。由金口渡江。軍於麥山。進攻漢陽。楊公載福彭公玉麟。率水師進泊沌口。燬賊船數百號。南岸崇通各屬之賊。攻金口。李孟羣陸營。陸營大潰。德安賊黨回援漢陽。麥山陸營亦潰。惟沌口水師。屹然未動。胡公度不可攻。率水軍退駐新堤。以扼荆湘之路。委都司鮑超增募湘勇數千。以爲援。馳疏奏調羅澤南湘軍援鄂。公已令羅公由義寧拔營前進矣。二十一日。馳奏陸軍攻勦湖口勝仗。水師小挫一摺。奏稱。去年湖南水師靖港城陵磯之役。均因風順水利。不能收隊。以致挫敗。臣屢飭水營。不令順風開仗。乃各弁勇輕進。致蹈覆轍。請將營官吳嘉賓秦國祿等。分別撤革。陣亡千總葛維柱請卹。又奏調派羅澤南一軍。由崇通回勦武漢一摺。附片奏提臣塔齊布病故後。周鳳山新領全軍。尙爲奮勉。臣令其專意防守。不圖進取。又片奏派委員弁護送塔齊布靈柩回京。時長江梗塞。塔公之柩。由南昌取道長沙荊州以北也。公又專摺稟報安徽道員何桂珍在江北英山蘄水羅田等處。勦賊勝仗。附片奏稱蘄黃英霍當楚皖之交。匪黨最多。與粵逆勾結響應。何桂珍以二千餓疲之卒。轉戰於羣盜出沒之區。與地方紳民。以信義相孚。請旨飭令何桂珍督辦皖楚交界英山麻城各處團練。嚴清土匪。實於大局有益。公前奏調何公一軍。歸東征大營調遣。旣而阻於賊。不得合併。何公提一旅。崎嶇苦戰。屢立戰功。克英山蘄水兩城。斬賊目田金爵。而軍餼匱乏。皖中大府不之恤。專恃勸捐米麥。接濟軍食。頻遣探卒。閒關跋涉。抵公大營以求援。公爲縷陳其戰績十餘案。請旨授以團練之任。蓋欲設法以援之。而勢未能也。羅公澤南回義寧營。上書於公。申陳前議。公所調九江之寶勇。以參將彭三元都司普承堯領之。併湘勇各營爲五千人。劉公蓉在公幕中二年。至是亦從羅公軍赴鄂。二十七日。由義寧州拔營。直趨通城。彭公玉麟接公札調。阻於賊未能前。公因委劉于潯。暫統內湖水師。九月初三日。公至青山。巡視水陸各營。初五日。公駐屏風水營。具摺具保陸軍。克復廣信一案。水師肅清鄱陽一案。出力員弁兵勇。彙單

請獎。附片請飭浙江巡撫補解五月以後餉銀。又片奏羅澤南一軍。去臣營日遠。湖北撫臣胡林翼尙在江北。亦恐爲賊氛所隔。擬令羅澤南自行具摺奏報軍情。又奏稱。臣自抵江西。整理水師。已逾半年。師久無功。虛糜餉項。請交部嚴加議處。至助臣辦理軍務。實有勞績。不可泯滅者。侍郎黃贊湯督轉捐輸。力拯大局。南昌府知府史致諤支應軍需。候補知州李瀚章辦理糧台。權衡緩急。湖南巡撫駱秉章與其幕友同知左宗棠一力維持。接濟軍餉。照料船廠。知府彭玉麟保守金口。力能堅忍。主事胡大任勸捐濟餉。歷險不渝。知府黃冕造繳精利寶屬有用之才。除黃贊湯駱秉章未敢仰邀恩敘外。其史致諤等各員。擬請入義寧案內。開單保奏。奉上諭。曾國藩奏師久無功。自請嚴議。並保勞績較多人員等語。兵部侍郎曾國藩督帶水師。屢著戰功。自得九江。雖未能迅即克復。而鄱湖賊匪。已就肅清。所有自請嚴議之處。著加恩寬免。前刑部侍郎黃贊湯督辦捐輸。以濟軍餉。尤爲出力。著加恩賞戴花翎。欽此。初六日。公渡湖至蘇官渡。巡視陸營。留二日。還屏風營。羅公澤南進攻通城。初六日克之。賊大潰。十四日進克崇陽縣。二十三日。公馳奏羅澤南一軍。進剿獲勝。克復通城一摺。陣亡把總李懋勛請卹。附片奏。探明湖北撫臣胡林翼駐紮嘉魚縣大溪口。與羅澤南之軍。聲息可通。此後援鄂一軍。由胡林翼轉奏。又邊奉諭旨。保舉堪任總兵人員一摺。奏保副將楊載福周鳳山參將彭三元三人。湖南兵勇援鄂者。至牟樓司大潰。江壯節公志濟殉難。羅公澤南駐軍崇陽。派李公續賓等五營。進剿牟樓司。旋派彭公三元等營。進剿濠頭堡。二十四日。賊大股來犯。彭勤勇公三元李公杏春等陣亡。弁勇挫潰。二十六日。羅公督軍至牟樓司。擊賊破之。二十七日。奉到上諭。兵部右侍郎。著曾國藩補授。曾國藩現在督辦軍務。兵部右侍郎。著沈兆霖兼署。欽此。夏秋之間。黔粵匪徒侵擾湖南西南境。其東北岳鄂之交。賊勢正熾。公弟國潢國華皆治團練於鄉邑。公弟國荃考取是科優貢。亦辦鄉團。是月廣東匪徒自茶陵竄入吉安境。江西之西境又紛擾矣。十月初三日。羅公澤南大破賊於牟樓司。十三日。胡公林翼至牟樓司會商軍事。十七日。拔營進剿蒲圻。二十日。公具摺謝恩授兵部侍郎。又奏報羅澤南一軍。在濠頭堡敗挫。在牟樓司獲勝。陣亡參將彭三元知府李杏春將弁彭獻傑蕭觀山李光熾劉碧山請卹。奏稱此次軍情。應由楚省具報。緣彭三元係臣軍屢戰得力之將。未便沒其忠績。是以仍行奏報。附片奏稱臣前請於湖南省城。准塔齊布建立專祠。奉旨允准。應請以去年陣亡參將童蔭雲及彭三元入祠附祀。二十一日。羅公

澤南克蒲圻。轉戰而前。師銳甚。楊公載稱以水師破賊於金口。湖廣總督官文公至德安。接受欽差大臣關防。都統西凌阿督兵力攻德安府城克之。乘勝收復江北各城邑。官文公督各軍進逼漢陽。收集王國才李孟羣陸營兵勇兼轄之。與南岸楚軍爲犄角之勢。九江湖口陸營。數月無大戰事。賊亦不以大股來犯。水師泊紮青山屏風各岸。陸勇二營護之。公自駐屏風水營。不時巡視青山蘇官渡各營。壹意嚴防。不事進剿。而賊曾石達開由湖北崇通等處。糾合匪黨。竄入江西境。陷臨新昌縣。其在吉安境內匪徒。連陷安福分宜萬載等縣。與石逆合股。於是贛水以西。亂民響應。衆至十餘萬。瑞臨袁吉同時告警。署巡撫陸公元烜調兵援剿。日不暇給。乃抽調湖口陸勇回援西路。十一月初五日。九江賊出撲營。周鳳山擊卻之。初七日。湖口賊出撲營。李元度擊卻之。初十日。賊陷瑞州府。十一日。陷臨江府。攻撲袁州吉安二府。四郡屬邑。大半失守。省城戒嚴。維時江西官軍。西路則臬司周玉衡總兵阿隆阿一軍。援剿吉安。東路則道員耆齡遊擊遮克敦布一軍。防守饒州。其平江勇由湖口調回者。勦賊於瑞州。營官李錫劉希洛陣亡。勇遂潰散。陸公元烜復調耆齡遮克敦布之師回援。十五日。公調周鳳山九江軍回南昌。調水師防守省河。添調平江一營。駐紮青山。以護水師。十七日。九江賊撲營。周鳳山擊卻之。十八日。周鳳山拔營回省。二十日。湖口賊撲營。李元度擊卻之。二十一日。公具摺謝恩。寬免處分。又奏九江湖口陸師。青山水師。接仗情形一摺。又奏逆匪攻陷瑞州臨江。逼近省垣。急調周鳳山全軍。并抽撥水師。馳往堵剿一摺。分條奏目前布置情形。其一。江省腹地。別無重兵。不得不撤九江之軍。先其所急。其一。江西水軍單薄。抽調戰船。駛赴省河。防其東渡。其一。擬調羅澤南一軍。回駐通城。牽掣逆賊後路。亦可兼顧楚省。其一。擬留遮克敦布一軍。防守東北四府。庶錢糧有可徵之處。奏報有可通之路。凡四條。又聲明本年三月以後。奏報均由湖南馳遞。此次道途梗塞。仍由浙江馳驛呈遞。奉上諭。會國藩陸元烜著委籌兼顧。萬不可因有警信。張皇失措。徒使兵勇有調撥之煩。轉授賊以可乘之隙也。欽此。又奉上諭。石逆所帶賊黨雖多。一經羅澤南痛剿。即連次挫敗。可見兵力不在多寡。全在統領得人。會國藩等。著激勵在事文武。奮勉圖功。殄此巨寇。至九江一路。能否足資堵剿。倘有疏懈。不特江西內地堪虞。並礙長江大局。該侍郎等。不得顧此失彼。是爲至要。欽此。羅公澤南克咸寧縣大破賊於山坡。會師金口。進攻武昌。二十八日。大破城外賊壘。駐營於洪山。水師進泊沌口。三十日。賊陷袁州府城。彭公玉麟屢接公催調。

函牘。由衡州赴江西。值賊氛遍布。彭公聞關微服。徒步七百餘里。行抵南康。公見大喜。派領戰船。赴臨江扼剿。何文貞公桂珍駐軍英山。是月爲降人李兆受所戕。皖中大吏。不爲奏請議卹。公聞而深痛之。十二月初三日。九江賊出撲青山陸營。營官林源恩黃虎臣胡應元等擊卻之。賊既踞臨江。分股屯聚樟樹鎮。周鳳山回至南昌。初四日進擊樟樹鎮克之。劉于濤以水師毀賊之浮橋。初十日。周鳳山陸軍進剿新淦縣城。克之。十二日。馳奏九江湖口青山姑塘水陸接仗情形。陣亡千總呂國恩請卹。附奏瑞州勦賊殉難之知縣李錕劉希洛二員。請加贈知府銜議卹。又附報樟樹鎮勝仗一片。十九日。馳奏周鳳山一軍。會合水師。克復樟樹鎮。收復新淦縣城一摺。又具奏稟保陸軍。克復義寧攻勦湖口兩案。出力員弁兵勇。開單請獎。公每於軍事孔棘之際。獎拔有功。優卹死傷。二者必詳必慎。由是人心維繫。軍雖屢挫。氣不少衰。江西巡撫文俊公到任。賊攻吉安。臬司周公玉銜入城。堅守經月。請援甚急。周鳳山既克樟樹。收新淦。將赴吉安。慮賊復至。撥派八百人。回駐樟樹。以護水師。扼防南昌之西南路。是年正月。江蘇巡撫吉爾杭阿公克上海縣。僧王督軍殲滅連鎮之賊。擒賊酋林鳳祥。檻送京師斬之。河北肅清。二月。僧王攻克高唐州。賊竄焉官屯。官軍圍之。四月克之。山東肅清。官兵凱撤。七月。江南大營分兵克蕪湖縣。十月。安徽官軍克廬州府。皖鄂賊勢少衰。吉爾杭阿公督師攻鎮江未克。蘇州浙江湖北湖南皆於是年仿辦釐捐。以濟軍餉。浸及於川廣矣。

〔丙辰〕咸豐六年公四十六歲。正月。公駐南康水營。初二日。賊撲樟樹鎮。陸營挫潰。營官岳炳榮走豐城。劉于濤以水師擊賊船破之。初三日。周鳳山自新淦回援樟樹。遇賊於瓦山。擊破之。彭公玉麟水師至樟樹鎮。初七日。擊賊船破之。初九日。攻臨江賊壘。又破之。先是御史蕭浚蘭條陳江西軍務。公奉諭旨責問。又奉兼顧臨江及嚴扼九江之旨。公遂覆奏。縷陳各路軍情一摺。奏稱瑞臨切近省城。臣與撫臣文俊商令周鳳山一軍。先勦臨江之賊。湖口青山水陸存營。至爲單薄。九江之賊。日夜環伺。又有湖北興國土匪竄擾德安縣。去來無常。勉力支撐。深虞決裂。臣軍自岳州而下。水陸萬餘人。併爲一支。今則分調爲四五支。其得力之將。如塔齊布中道。羅澤南楊載福分往鄂省。不克合併。所以久困一隅。未能掃蕩羣醜。寸心焦灼。愧悚難名。江西西路四郡。賊蹤得擾。值冬春水落。贛水處處可涉。賊又於上游掠民船。兼造小艇。有東犯撫州。撲省城之勢。公飭令彭玉麟劉于濤以戰船往

來扼截。飭周鳳山一軍駐紮樟樹鎮。與水師戰船全力扼守。十八日青山陸營出隊擊賊於九江破之。二十二日馳摺奏報周鳳山分兵小挫。旋以全隊擊賊大勝。水師在樟樹三獲勝仗。附片奏報青山陸營同知林源恩都司黃虎臣等擊賊獲勝。請獎拔數人。歸案彙保。又奏楚軍在江西境內。每月需餉六萬有奇。而入款約有三端。一曰撥用漕折。二曰督辦捐輸。三曰借運浙鹽。今賊匪大勢全注江西。漕折難以催徵。捐輸不能措辦。鹽引無處銷售。來源俱竭。有坐困之勢。惟查江蘇上海縣商貨雲集。請旨飭令該省督撫轉飭道府等官。於上海抽釐。撥解臣營。專濟楚軍之用。臣軍無饑潰之虞。得專心於戰守機宜。不復以請餉之奏。屢瀆聖聰也。公於上年奏議借運抵餉。及鹽引到江時。賊氛大擾。不復行銷。江楚之交。文報梗阻。不能通者累月。賊圍攻吉安。外援不至。贛州周汝筠一軍來援。阻於泰和之賊。不得前。文俊公派邁克敦布率勇赴援。行至樂安。二十五日吉安府城失守。周貞恪公玉衡等死之。文俊公因令邁克敦布駐軍樂安。扼撫建之路。二十九日。青山水師擊賊於姑塘。挫失戰船六號。二月初五日。奉到上諭。文俊甫經到任。於該省地勢軍情。一時未能周悉。現當萬分棘手之時。倘布置稍疏。難免貽誤。曾國藩自抵江西。爲時已久。賊情亦所深悉。此時江西匪蹤。幾欲蔓延全省。既不能處處調兵。又不能顧此失彼。自應擇其最要之處。先爲攻勦。著曾國藩與文俊妥速會商。務籌全局。不可徒事張皇。亦不可專顧一處。軍情變幻靡常。大勢所關。應從何處下手。則身行在行聞者。必能擊其綱領。該侍郎與該撫酌度機宜。即著會同馳奏。以慰廬系等因。欽此。賊既陷吉安。大股東竄。江西官軍潰於樂安。賊撲犯撫州。建昌所屬城邑多失守。十四日撲樟樹營。周鳳山擊破之。十七日。大股撲營。周鳳山出擊之。挫敗。十八日。周鳳山出隊大敗營壘全陷。弁勇潰回南昌省城。人心大震。奪門奔走者。不可禁禦。或相踐以死。公亟棹舟赴省。途次聞警。飛調青山陸營赴南昌。調水師退紮吳城鎮。調李元度一軍由饒州繞回進勦撫州之賊。二十日。公至南昌。收集潰勇。暫統之。籌備守禦。撫定居民。人心稍安。時自鄂堵以南。達於梅嶺。賊蹤綿亙千數百里。衆號數十萬。公遣弁勇懷密函赴楚請援。多爲賊所截殺。不得達。湖南巡撫駱公秉章派委劉長佑蕭啓江等募勇分道赴援。劉公長佑由醴陵克萍鄉。蕭公啓江由瀏陽攻萬載。皆募死士。懷贖函牘。間行赴南昌。旬月而始達。公與文俊公會商軍事。意見甚協。廿一日。具摺會奏各路堵剿情形。并奏覆諭旨垂詢各件。奏稱江西全省贛水中分。以樟樹鎮最爲扼要。石逆久踞臨江。凶悍之賊。必萃

於此。意圖盡披枝葉。因我省會。至德安縣城。被賊竄踞。乃湖北新到之殺匪。既乃竄入武寧。併歸石逆。至周汝筠一軍。不能救援吉安。擬令其退守贛州。贛郡天然雄鎮。爲古來必爭之地。倘有疏虞。則兩廣湖南股匪。皆得以贛州爲巢穴。後患不可勝言。請旨飭廣東督撫。迅派兵勇數千。赴贛會同戰守。保此重鎮。顧全大局。又奏江西賊氛日熾。岌岌將殆。請旨飭湖北巡撫。速令羅澤南一軍。兼程來江援剿。又奏江西需餉甚迫。請旨飭江蘇督撫撥借上海關稅銀十萬兩。迅解江西。以濟眉急。又片奏臣國藩單舟晉省。途次聞周鳳山全軍挫敗之警。飛調湖口青山水陸各營。同回省城。以固根本。公又專摺奏謝年終恩賜福字荷包等件。又奏捐輸賞官人員。請給部照一摺。附片奏布政司銜羅澤南鹽運司銜李續賓。經湖北撫臣胡林翼奏請。給予二品三品封典。奉特旨允准。臣軍水陸員弁。奮勇出力。未經補缺者。實不乏人。請照羅澤南李續賓之例。容臣擇尤。照升階咨請封典。以示鼓勵。又片奏水師在姑塘小挫。請將營官陳炳元劉國斌參處。陣亡勇弁周華堂請卹。又奏知府李瀚章知縣黎福嘯張秉鈞三員。在營聞訃丁憂。該員等辦理巨軍。糧臺洵爲得力熟手。仍請留營營差。二十二日。賊陷撫州府。二十九日陷建昌府。分股由安仁萬年竄入徽州境。李元度帶平江勇由湖口拔營至饒州。與耆齡會軍駐守。公之調回青山諸軍也。南康府亦沒於賊。綜計是時。賊陷江西府城八。州縣城邑五十有奇。屢分股黨。南撲贛州。東擾廣信。文報往來。餉需轉運。僅贛饒一路可通。亦時有賊蹤焉。三月初一日。奏報周鳳山陸軍在樟樹鎮挫敗情形。請將副將周鳳山革職。營官岳炳榮黃玉芳分別參革。并自請交部議處。陣亡委員馬丕慶林長春李清華請卹。附片奏稱廣信一府。爲奏報進京。江浙轉餉之路。一有疏虞。四面梗塞。現調李元度一軍。由饒州繞回。進剿撫州。以保廣信。上年。尤江湖口水陸萬餘人。今全數撤回內地。前功盡棄。回首心傷。然舍此亦無他策。廣東援防贛州之師。請旨再飭催迅速來江。并請飭浙閩督撫嚴防竄越。公在南昌孤危之中。奏報軍情。每以贛州廣信爲急。是後全局之轉機。亦賴兩城之存也。初二日。賊犯吳城鎮。水師擊退之。初四日。彭公玉麟赴吳城水營。督領防剿。分派水師紮饒州南河。公又派戰船。分紮省河及市汊。扼截防守。又與巡撫文俊公調派駐省城之平江勇二千人。委侯選知府鄧輔綸同知林源恩帶領進剿撫州。又派周鳳山畢金科等帶勇隨往會剿。輔綸者臬司鄧公仁壘之子也。羅忠節公澤南攻武昌未克。親督隊進攻受傷。初八日卒於洪山營次。胡公林翼奏派李續賓接統湘軍。公回省

後收集陸軍。裁併訓練。每日巡視操場。既而出蹕營盤。雖嘗士民惶恐之際。從容鎮定。時以詩古文自娛。羽檄交馳。不廢吟誦。作陸師得勝歌以教軍士。於戰守技藝。結營布陣諸法。曲盡其理。弁勇咸傳誦之。十一日。鄧輔綸林源恩擊賊於羅溪。十二日。克進賢縣城。彭公玉麟擊賊於吳城。卻之。十四日。水師破賊於徐家埭。二十日。李元度克東鄉縣城。廿二日。鄧輔綸周鳳山等會軍於東鄉。公派都司黃虎臣帶勇三營。赴吳城鎮。會水師。廿三日。克建昌縣城。撫州賊撲東鄉。李元度林源恩等擊破之。二十四日。黃虎臣回軍南昌。二十五日。李元度等軍進紮江橋。以攻撫州。二十六日。馳奏陸軍。平江營在湖口。羅溪。勝仗。克復進賢縣城一摺。又奏吳城水師。三獲勝仗。并水師分布各處情形一摺。又奏報湖南援軍劉長佑等。克復萍鄉一摺。附片奏報賊分大股。竄至徽州婺源一帶。江西賊勢稍分。剿辦較易措手。又片奏正月廿一日。所奏摺片。未奉批諭。想因賊氛方盛。中途沈失。請飭軍機處鈔錄。寄交臣營。又專摺奏保樟樹新淦兩案水軍出力員弁。開單請獎。其陸軍後來潰敗。前功盡棄。應毋庸保。奏以示懲警。文俊公屢疏請援師。楚粵閩浙各省督撫。均奉寄諭。派撥兵勇。赴江西援剿。方江西之初警也。衆議請調羅公澤南軍回援。公函致胡公林翼。羅公澤南。謂東南大局。當力爭上游。亟望武漢速克。水陸東下。不欲其奔馳於崇通之郊。以援瑞臨也。及賊氛大熾。乃從衆議。奏調羅公湘勇馳回援剿。而羅公已傷亡。公弟國華奉竹亭公命。赴鄂請援師。胡公邊派知縣劉騰鴻。劉連捷。湘勇千五百人。同知吳坤修。彪勇七百人。參將普承堯。賈勇千四百人。交公弟國華總領之。以援江西。募勇夫懷蠟丸書。開行以達南昌。公始聞羅公之亡。鄂軍之來援矣。二十七日。李元度林源恩擊撫州賊壘破之。四月初二日。平江軍渡撫河。紮五里塘。進攻撫州未克。初四日。調派黃虎臣陸軍。又派劉于濬市汊水師。進攻瑞州。初八日。進攻未克。初九日。水師回泊市汊。黃虎臣勦奉新縣之賊小挫。回軍南昌。平江營連日攻撫州未克。湖南援軍劉公長佑等。攻萬載縣賊。以大股踞守不下。湘軍擊賊壘盡平之。二十日。劉于濬領水師克豐城縣。南昌省城附近各城邑。均陷於賊。建昌進賢東鄉豐城四邑。經官軍收復。而賊蹤猶往來不絕。二十一日。奏報李元度等軍。克復東鄉。破賊五營。圍攻撫州一摺。奏報黃虎臣等水陸兩軍。克復建昌。攻勦瑞州。奉新一摺。附片奏臣請撥上海關稅銀兩。經戶部議駁。臣等何敢再瀆。惟江西餉源已竭。補救無術。請旨仍飭江蘇省撫於上海稅項。籌撥銀十萬兩。以濟急需。又片奏稱吉袁臨瑞撫建等府之賊。凌濩堅守。近省各

縣亦有老賊踞守城池。蓋欲使省會成坐困之勢。目前勦辦之法。惟當力保廣饒。通蘇杭之餉道。先勦撫建。固閩浙之藩籬。其南路贛州必藉廣東之援。西路吉袁必藉湖南之援。請旨飭催廣東援兵。星馳踰嶺。保全贛州。不勝跂幸。又奏江西士民請建羅澤南專祠。以伸愛慕一摺。二十八日。楊公載福焚漢陽賊船幾盡。劉公長佑進軍袁州。蕭公啓江攻萬載。二十九日克萬載。進軍合攻袁州。耆齡公一軍防守饒州。賊屢犯境。公調派都司畢金科帶勇千人。紮營童子渡。以援之。建昌府城陷後。知府何斌團紳張家駒等招勇謀收復。公派委都司黃虎臣彭山。配訓導羅登等。帶勇三千餘名。馳往助之。五月初一日。楊公載福督水軍沿江下勦。破焚兩岸賊船。賊潰莫敢抵拒。初三日。水軍直抵九江城外。初四日回舟泝江旋鄂。公遣卒探知水軍江面之捷。函告楚軍各營。士氣爲之一振。撫州城賊踞守益堅。屢攻不克。建昌臨江之賊。各分股來援。城賊亦屢出撲營。李元度等均擊卻之。十二日。黃虎臣等軍至建昌。與何斌張家駒分途進攻。十三日。賊船犯吳城。彭公玉麟擊卻之。十五日。畢金科擊賊於由墩。破之。十九日。賊援撫州。李元度等渡河擊賊破之。二十三日。公馳奏官軍攻勦撫州情形一摺。又奏饒州防勦情形。及畢金科在饒州勝仗。奏稱畢金科身先士卒。驍勇冠倫。軍中稱爲塔齊布之亞。此次以少勝衆。請賞加勇號。又奏建昌官紳辦理防勦。並由省城撥兵會勦一摺。附片奏報水師劉于濬克復豐城。彭玉麟吳城勝仗。水師分紮要地。均尙得力。但無陸軍以輔之。祇能扼守。未能進勦。又片奏報湖南援軍已至袁州。湖北援軍已克咸寧而進。兩湖集厚力以相拯救。賊亦出死力。以相抗拒。臣等募長髮探卒。蠟丸隱語。以通消息。但能知其大略。而不能詳悉。浙江邊防孔亟。不暇議及援江。福建援軍。亦無入境確信。每念贛州天險必爭之地。非得厚援。終恐疏虞。懇恩飭下廣東督撫。迅撥兵勇。保守贛州。不獨江西之幸。亦廣東之先著也。公是時注意贛州。而兵力不及。續請援師。疏已三上矣。又奏江西城池淪陷甚多。凡在地方有守土防汛之責者。固應一律嚴辦。其中不無情有可原之人。如建昌府知府何斌。萬載縣知縣李吉言。宜春縣知縣錫榮。此三人者。實係失守案內。愧奮有爲之員。臣等責令襄辦一切。如果出力。再請寬免處分。黃虎臣等攻建昌未克。二十八日。福建援軍至建昌。副將陳上國張從龍領之。公調派參將阿達春帶勇赴饒州。與耆齡畢金科合軍防勦。公謂兵家以攻堅爲最忌。再三諭飭各營將領。勿徒事仰攻。以損精銳。而賊踞城壘。亦以堅守爲坐困我師之計。數月以來。無大戰事可紀。惟力支危局。以待援師。

而已。江西學政廉兆綸奏陳江西軍務。奏參臬司鄧仁莛物議沸騰。其子捐職知府鄧輔綸。本不知兵。不宜管帶兵勇。公遂札撤鄧輔綸解兵回省。周鳳山督勇攻撫州久未下。自請開道回湘招募舊部。以援江西。公批答許之。周鳳山遂由建昌取道於閩廣。繞回湖南。其在撫州之勇。併歸李元度林源恩兼轄之。六月初二日。建昌援賊大至。都司黃公虎臣陣亡。初五日。賊撲饒州。着齡畢金科阿達春軍皆敗潰。府城失守。公聞警。急調建昌六營。彭山峴羅萱李大雄胡應元等撤回撫州。仍調回南昌。學使廉兆綸方駐河口。公又與咨商奏調建昌城外官兵。撤赴贛信防守。其福建援師。在建昌者未撤也。十九日。彭公王麟帶水師收復南康府城。城荒不能守。乃回泊吳城鎮。畢金科回南昌整輯弁勇。仍赴饒州。公調派總兵居隆阿都司林葆帶勇會勦。二十二日。畢金科等力攻饒州。克之。公弟國華總領劉騰鴻普承堯吳坤修等軍。克威寧甯甯甯城四縣。轉戰而前。暑雨不息。進抵江西境。十八日克新昌。二十四日克上高。二十九日軍抵瑞州城外。其鋒銳甚。公聞上高之捷。急調彭山峴李新華滕加洪胡應元等帶勇四千。先後拔營。馳赴瑞州以迎之。南贛道汪報閏於春開勦賊泰和失利。退守贛州。多隆阿遮克敦布均以潰兵入城協守。賊來撲犯郡城。屢拒卻之。五月。廣東援軍抵贛州入守。是月出攻賊營。破平之。贛郡解嚴。三十日。馳奏撫州攻勦情形一摺。會勦建昌府城一摺。陣亡都司黃虎臣請卹。隨摺奏保李大雄胡應元江永和。三弁。又奏水師收復南康府城一摺。陣亡都司黃虎臣請卹。隨摺奏保李大雄胡應元江永和。三弁。等均有應得處分。惟以克捷迅速。請免議。陣亡將弁李鶴齡李選齡請卹。附片奏報福建援江兵勇。現到建昌者。已有二千六百人。湖北援師。已克新昌上高。兩湖聲息可通。廣東援師。已入守贛州。當可保全要郡。先是賊蹤四布。贛吉袁瑞聲息久不達於南昌。至是音問漸通。賊至江西以來。水師扼勦屢勝。賊不得逞。乃於吉袁瑞臨各處。造戰船。製攻具。乘夏水漲盛時。齊舉以趨南昌。於瑞河口。臨河口。塘頭。凌生米司。皆爲營壘。七月初一日。賊舟下。犯劉于濤以水師擊賊瑞河口。破之。湖北援軍抵瑞州。初二日。紮營西門外。初三日。拔瑞州之南城。公之遣軍迎援軍也。賊之大股擾犯省河西岸。屯壘於沙井。初四日。營官牟瀛萬泰胡應元李大雄滕加洪帶勇五營。渡河擊賊破之。初五日。援軍攻瑞州未克。水師擊生米司賊壘。賊潰走。初九日。彭山峴李新華拔營赴瑞州。瑞州城賊屢出撲營。援軍擊卻之。楚軍中以劉公騰鴻謀勇最著。公所派彭山峴牟瀛等帶勇四千人。委彭山峴總理營務。又

以訓導羅萱兼理各營營務。十五日軍抵瑞州。與援師會合。令羅萱與劉騰鴻合併爲營。以聯合江楚兩軍之勢。十七日。瑞州賊出撲營。江軍稍卻。劉騰鴻普承堯擊破之。公弟國華以暑月行師。得病甚重。棹小舟至南昌。見公。公爲之悲喜。吳公坤修偕至南昌。迎餉還瑞州。公與文俊公籌撥銀五千兩。以犒援軍。公弟國華留省養病。旬日漸愈。二十七日。瑞州賊出撲營。楚軍江軍合擊破之。彭公玉麟以水師擊賊於南康破走之。劉于濤水師擊臨河口賊船破之。二十八日。水師攻臨河口賊壘悉平之。饒州之復。都司畢金科。戰功最著。藩司耆齡揭參畢金科。公與文俊公商調藩司回省履任。委畢金科駐軍饒州防勦。楚軍既至瑞州。新昌上高仍爲賊陷。吳坤修率勇收復二邑。回勦奉新。爲援軍之游兵。是月有邊錢會匪。起於吉安建昌之界。勾結粵匪游勇。有衆千數百人。竄陷廣昌南豐新城。復竄貴溪縣境。建昌府官軍分途援勦。賊勢飄忽不可遏。八月初一日。賊大股援瑞州。城賊亦出撲營。官軍迎擊破之。初四日。瑞州軍擊賊壘破之。賊潰走。楚軍江軍立營始固。初七日。馳摺奏湖北援師進攻瑞州府城。江省派兵四千。前往會合。屢獲勝仗。江楚之路漸通。全局轉機。胥係乎此。奏保知縣劉騰鴻謀勇爲全軍之冠。參將普承堯同知吳坤修戰功卓著。請將該員等分別保獎。會國華係臣胞弟。未敢仰邀獎敘。又奏劉于濤水師在瑞河口臨河口勝仗。彭玉麟水師在南康勝仗。隨摺奏保劉于濤請賞戴花翎。又奏攻勦撫州勝仗一摺。附片奏請赦山西陝西兩省。每月各籌銀三萬兩。撥解至江西瑞州等處。專供兩湖援師之用。又奏虎字營哨長周萬勝私逃回籍。請赦湖南撫臣嚴奉正法。又奏奉諭旨咨催廣東提督崑壽赴江。南大營。并奏稱江西賊勢浩大。黨類衆多。刻下兵力不爲不厚。鏖戰不爲不苦。迄未能克復要郡。挽回全局。臣惟當壹意鎮靜。化大爲小。以安軍民之心。又具摺奏報贛州府城解嚴。并防守勦辦情形。實爲江省大局轉旋之一端。又奏查明吉安府陣亡及殉難文武員弁。請從優議卹。又附報瑞州勝仗一片。建昌城外官軍。設糧臺於新城縣。會匪竄陷新城。何忒率領兵勇援勦。在建昌者。惟存福建援軍。賊出犯營。閩軍擊卻之。江西練勇曰廣義營者。道員石景芬等領之。由廣信赴貴溪迎勦。會匪失利。匪徒大熾。由弋陽竄陷河口鎮及鉛山縣。撲廣信府城。吏民驚走。城爲之空。署知府沈公葆楨登陴固守。飛函請援於浙江總兵饒公廷選。方駐防玉山。率浙兵二千赴援。十五日。浙軍擊賊於廣信城外破之。賊潰走入徽州境。廣信以平。瑞州援賊既退。城賊猶時出犯。官軍皆擊卻之。吳坤修軍破賊於奉新。分軍

收復靖安安義二縣。公弟國華病痊愈。仍回瑞州營。公弟國荃在長沙招募湘勇千五百人。周鳳山既抵長沙。募勇千七百人。黃公冕夏公廷樾督領以行。由南路直趨吉安。是爲楚軍援江之第三支。黃公冕時奉旨放吉安府知府三十日。馳奏官軍攻圍瑞州。屢獲大勝。分軍出勦奉新。收復靖安安義二縣。隨摺奏保營務處彭山峴羅萱。將領萬泰滕加洪詹榮清黃純珍黃在玉七員。陣亡千總黃兆麟請卹。又具摺奏報邊錢會匪竄陷各屬。圍攻廣信府城。浙兵援勦解圍。奏稱近年以來。江西連陷數十郡縣。皆因守土者先懷去志。惟沈葆楨守廣信獨能申明大義。裨益全局。參將榮壽知縣楊昇千總胡再陸協同堅守。請分別保獎。其在新城殉難之官紳楊益諸葛槐馬長慶吳毓濬周光裔陳德亮陳濟之何彥琦八員名。均請優卹。何斌之妻薛氏及其女三人。僕婢八人。全家盡節。請旨旌表。仍請分別建祠立坊。以慰忠魂。又奏閩兵援勦建昌府前後獲勝情形。陣亡兵弁曾瑞英請卹。附片奏閩軍都司玉亮在建昌軍營病故。請照陣亡例議卹。又片奏請飭湖南撫臣籌撥硝磺火藥十萬斤。迅解來江。以資攻勦。又片奏臣營發審委員李沛蒼係何桂珍軍營差遣之員。因案革職。交部治罪。現在營中。實爲得力。懇恩免其治罪。留營當差。仍飭確具親供。咨皖定結。奉上諭。李沛蒼著准其免罪。仍留江西軍營。交會國藩差遣。欽此。九月初三日。公至瑞州。勞師巡視營壘。劉公騰鳩治軍嚴整。公深嘉獎之。李元度等軍圍攻撫州數月。大小五十餘戰。雖屢攻未克。而江西東路十餘州縣。賴以屏蔽無患。廣信饒州。通蘇杭之道。許灣河口。商販所集。餉需器械。賴以接濟。公飭誠平江各營。壹意堅守。且令其退紮十里之外。勿事進攻。李元度志在克城。未能從也。是月初二日。分軍攻勦近縣。初四日收復宜黃縣。初九日收復崇仁縣。撫州之賊。乃自城出撲營。復有援賊擾犯東鄉。至撫州。十七日大營爲賊撲陷。林公源恩等陣亡。李元度力戰突圍以走。崇仁賊勢愈張。南昌戒嚴。廣信建昌皆震。二十日。公由瑞州營還至南昌。咨留浙軍饒廷選駐防廣信。調李元度收集潰勇。扼守貴溪。以保河口。調吳坤修率勇赴廣信。吳坤修爲奉新紳民所留。未果往。二十七日。瑞州軍分勦南路賊。二十八日。賊出撲營。擊破之。連日與賊戰。皆破之。上高縣再陷。知縣傅自銘陣亡。十月初四日。瑞州分軍收復上高縣。初十日。軍回瑞州。遇賊擊破之。十一日。馳奏瑞州勝仗。收復上高一摺。陣亡知縣傅自銘守備詹榮清請卹。又奏撫州一軍被賊撲陷一摺。李元度調度失宜。請以知縣降補。殉難同知林源恩請賞加道銜。照道員例議卹。營官唐得陞耿光宣委員周尙桂。均

請從優議卹。附片奏請旨飭浙江撫臣咨行總兵饒廷選率得勝之師，仍駐廣信府城。臣等札飭李元度駐紮黃
溪，則河口商民可以復業。饒廷選一軍，仍可策應四路。於浙江兵力無損。於江西籌餉有益。又片奏新授吉安府
知府黃冕與前任湖北藩司夏廷楹，在湖南勸捐募勇，規復吉安。已革副將周鳳山懷樟樹挫敗之恥，亦欲另募
勁勇。力掃寇氛。兩軍合併，兵力較厚。臣等即飭徑搗吉安，取上游建瓴之勢。請飭額部照二千張，發交黃冕夏廷
楹勸辦捐輸，專濟此軍之用。歸巨虞臺臺報銷。又片奏江西捐輸，請照湖南章程，以制錢千六百元，抵銀一兩。俾
捐生踴躍樂輸。實於軍餉有濟。瑞州軍攻城未克，賊之出入接濟者，屢被各營截擊，仍不能絕。劉公騰、鳩等督率
弁勇夫役，毀瑞州之南城，築新壘二座，以勁兵五千人堅守。分調各軍，分途雕勦，以扼截賊援。吳坤修擊賊於奉
新，屢破之。撫州既敗，建昌之賊屢出撲營。江西兵勇，福建援軍皆潰。二十五日，大營失陷。閩軍副將陳上國等死
之。張從龍領閩兵退回杉關。新淦縣復陷於賊。劉于濤以水師再克之。是月，奉上諭：會國藩文俊自八月奏報瑞
州建昌勝仗之後，已及月餘，未見續報。前聞賊匪多回至金陵，而江西失陷各郡，尚無一處克復。據江浙各省奏
報，皆言金陵內亂，恐石逆不得志於皖楚，勢必竄入江西。該逆於諸賊之中，最爲凶悍。若令回竄江西，占踞數郡，
煽惑莠民，其勢愈難收拾。著會國藩等乘此賊心渙散之時，趕緊克復數城，使該逆退無所歸，自不難窮蹙就擒。
若徒事遷延，勞師糜餉，日久無功，朕即不遽加該侍郎等以貽誤之罪。該侍郎等何顏對江西士民耶。又聞石逆
開與章逆不睦，頗有投誠之意。倘向會國藩處乞降，應如何處置之法，亦當預爲籌畫。經權互用，以收實効。現在
仍將失陷各城，先圖攻克，使該逆無所憑藉，不敢退至江西。是爲至要。欽此。十一月初一日，劉公長佑、蕭公啓江
等力攻袁州克之。十三日，公弟國荃、周鳳山會克安福縣城。進攻克吉安。十七日，馳奏瑞州一軍屢次勝仗。現在新
修南北兩城，併力堅守。以爲西路官軍根本。以通江楚要路。并奏報吳坤修一軍在奉新勝仗。陣亡將弁王吉昌
請卹。又具摺奏贛州南安一路匪勢蔓延，兵勇戰守，漸形疲乏。贛南距省城千里而遙，路途多梗，實有鞭長莫及
之勢。仍請添調粵兵來江會勦。又奏建昌官軍挫敗，營壘被陷，閩兵退回本境一摺。陣亡副將陳上國與其殉難
員弁蘇廷美、伍連青、呂文煥、丁開第請卹。又奏報湖南援軍克復袁州一摺。又具摺覆陳江西近日軍情。奏稱石
逆若歸命投誠，當令其獻城爲質，乃爲可信。不敢貪招撫之虛名，弛防勦之實務。刻下瑞州奉新勦辦，尙爲得手。

周鳳山吉安之師。差稱勁旅。袁州新復。西路大有振興之機。水師則彭玉麟劉于濤均甚得力。惟撫建廉挫。東路空虛。惟管嚴飭諸將。克復數城。以副聖主拯民水火之意。奉殊批。爾等主見。甚屬允妥。勦撫固應並用。尤重先勦後撫。可隨時審其機宜好焉之。欽此。先是湖南巡撫駱公秉章奏稱侍郎會國藩招募鄉勇。屢著戰功。請加湘鄉縣文武學額。江西巡撫文俊公。奏保會國藩以同知選用。均奉旨允准。公於是日。具二摺恭謝天恩。又奏保饒州豐城等前後六寨出力員弁。彙單請獎一摺。陣亡員弁汪煥文趙德溶黃邦治請卹。附片奏彭澤都昌湖口鄱陽四縣。久陷賊中。其閒頗有忠義之士。抗節不屈。辦團殺賊。忠憤激發。不避艱險。請將該四縣出力紳董。開單保獎。袁州克復。賊竄樟樹鎮。聚黨日盛。劉于濤以水師攻戰連日。擊破之。畢金科駐防饒州數月。破賊於泥灣。又破賊於陶婆渡。又破賊於線州。鄱陽境內肅清。賊之初起。以飄忽見長。及去年再陷武漢。竄擾江西各府州縣。則堅壘峻據。以困官軍。兵勇仰攻。累月不下。官文公胡公林翼之師。攻武漢兩城。疊奉嚴旨督促。李公續賓楊公載福擊各路援賊。戡除幾盡。惟兩城未下。江西八府。惟南康賊衆不多。餘城則皆以悍賊數千守之。公在軍終日。凝然。奏牘書札。躬親經理。不假手於人。益治書史。不廢吟誦。嘗謂軍事變幻無常。每當危疑震撼之際。愈當徵心定慮。不可發之太驟。蓋其數年所得力者在此。所以能從容補救。轉危爲安也。二十二日。湖北官軍水陸大舉。克復武昌。漢陽兩城。乘勝東下江寧。將軍都與阿公總統馬隊。李公續賓總統步軍。楊公載福總統水軍。水陸並進。沿江賊黨。望風瓦解。二十四日。克武昌縣。二十五日。克黃州府。遂連克興國大冶蘄州蘄水四城。李孟羣王國才吞清吉等。以兵勇從將軍都公。十二月。克廣濟黃梅。水軍直抵九江。焚奪賊舟淨盡。江面肅清。合力以攻九江。李公續賓一軍八千人。屯九江城外。楊公載福率戰艦四百號。泊江兩岸。都公馬隊。益以副將鮑超之步軍三千六百人。扼小池口。兵威鼎盛。公由南昌至吳城鎮。巡視水師。十八日。馳至九江。迎勞諸軍。二十三日。馳奏湖南援師周鳳山等。克安福縣一摺。饒州防軍畢金科等。屢次勝仗。鄱陽縣境肅清一摺。江西水師劉于濤再克新塗。在樟樹鎮疊次勝仗一摺。隨摺奏保劉于濤。蔡康業二員。又奏保瑞州援軍出力員弁。開單請獎一摺。陣亡將弁潘河清李經元尚長。源唐梅拱李。上安彭益勝姚長青劉家全吳秀山向秀武請卹。附片奏臣馳赴九江。迎勞水陸各軍。見其軍威嚴肅。士氣樸誠。實爲不可多得之勁旅。請旨飭促山西陝西將每月協江之餉。解交湖北撫臣胡林翼經收。

專備九江大軍之用。其江西分駐各府兵勇，再請敕廣東督撫每月籌撥銀四萬兩，解交湖南撫臣駱秉章轉解江西各營。夏間，奉旨飭查鄧仁莖被參各款，是日具摺覆奏，請將臬司鄧仁莖交部嚴加議處，并陳明鄧輔綸帶勇原委。自公入南昌以來，軍務章奏，與文俊公會銜，均推公主稿。二十八日，公旋至南昌。是時楚軍在江西東路者，李元度貴溪一軍，畢金科饒州一軍，勢稍單弱，裁足自守。西路軍勢大振，瑞昌德安武寧建昌新喻永寧六縣城，先後收復。劉公長佐蕭公啓江等，進軍臨江府。南昌袁州兩郡，全境肅清。九江南康瑞臨吉安各屬邑，收復過半。賊勢益衰。湖北崇通一帶，疊經官軍勦克，仍爲賊蹤擾踞。王公鑫募勇一軍，曰老湘營，既勦平湖南南路各匪，巡撫駱公調令赴鄂，進勦通城崇陽通山咸寧等縣，皆破平之。是年三月，揚州復陷，托明阿陳金綬雷以誠均革職。欽差大臣都統德興阿接統江北大營，翁同書幫辦軍務，收復揚州。賊陷寧國府城，皖南大營，浙江戒嚴。鄧紹良率兵援之。四月，江蘇巡撫勇烈公吉爾杭阿陣亡。道員劉剛愨公存厚副都統勇節公綏蘭亦戰死。五月，江南大營失陷。向榮張國樞退走丹陽。六月，賊攻丹陽，張公國樞擊破之。七月，向忠武公榮卒於丹陽。八月，金陵賊內亂，賊酋楊秀清韋昌輝皆斃。石達開竄安慶，和春奉旨授欽差大臣，由皖北渡江，接統江南大營。

〔丁巳〕咸豐七年公四十七歲。正月公在南昌。初五日，吳公坤修克奉新縣城。畢剛毅公金科由饒州率軍勦賊於景德鎮，遇伏陣亡。十七日，奏報吳坤修一軍，疊獲勝仗，克奉新縣城，隨摺奏保吳坤修請以道員用，並保杜霖孔廣晉二員。陣亡勇弁陳有才余瑞林請卹。又奏報江西官軍克建昌武寧二縣。湖北援軍收復瑞昌德安湖南軍收復新喻永寧等縣城。附片奏九江南北兩岸水陸至二萬餘人之多。臣即日擬由瑞州前往九江，料理聯絡。惟現患目疾，請賞假一月。即在軍營調理。是日拜摺後，出至奉新督帶吳坤修一軍，赴瑞州扼紮府城東面。始合長圍，掘塹周三十里，以斷賊之接濟。西安將軍福興奉旨領兵千人，由浙江赴江西會勦。於是月抵南昌。二月初四日，公由瑞州回至南昌，會商軍務。初九日，仍還瑞州營。竹亭公以初四日薨於里第。十一日，卽至瑞州，公大勦仆地欲絕。次日，赴告南昌，及湘軍各營，設次成服。十六日，馳摺奏報丁憂開缺。奏稱：微臣服官以來，二十餘年，未得一日侍養親闈。前此母喪未周，墨經襄事。今茲父喪，未視含殮，而軍營數載，又功算而過多。在國爲一毫無補之人，在家有百身莫贖之罪。瑞州去臣家不過十日程途，卽日奔喪回籍。查臣經手事件，以水師爲一大端，提督

揚載福道員彭玉麟外江內湖所統戰船五百餘號。職位至二千餘尊之多。此非巨一人所能爲力。合數省之物力。各督撫之經營。揚載福等數年之戰功。乃克成此一枝水軍。請旨特派揚載福總統外江內湖水師事務。彭玉麟協理水師事務。該二人必能了肅清江面之局。並請飭湖北撫臣江西撫臣每月籌銀五萬。解交水營。以免飢潰。仍懇天恩。准臣在籍守制。稍盡人子之心。合家感戴皇仁。實無既極。抑或賞假數月。仍赴軍營效力之處。聽候諭旨遵行。江西巡撫文俊公派委督糧道李桓至瑞州營。李公續賓之弟續宜自九江馳赴瑞州。公二十一日。公與公弟國華自營啓行。二十九日抵里門。越數日。公弟國荃自吉安營奔喪回籍。湖南巡撫駱公秉章奏報公丁父憂一摺。奉上諭。該侍郎現在江西督師。軍務正當喫緊。古人墨經從戎。原可奪情。不令回籍。惟念該侍郎素性拘謹。前因母喪未終。授以官職。具摺力辭。今丁父憂。若不令其奔喪回籍。非所以遂其孝思。曾國藩著賞假三箇月。回籍治喪。并賞銀四百兩。由湖南藩庫給發。俾經理喪事。俟假滿後。再赴江西督辦軍務。以示體恤。欽此。三十日。具呈駱公請代奏報奔喪到籍日期。三月初一日。奉上諭。曾國藩奏丁憂回籍。請派員督辦軍務一摺。業經降旨賞假三箇月。回籍治喪。所有曾國藩前帶水師兵勇。著派提督銜湖北鄭陽鎮總兵楊載福就近統帶。廣東惠潮嘉道彭玉麟協同調度。所需兵餉。並著官文胡林翼文俊源源接濟。毋使缺乏。該侍郎假滿後。著仍遵前旨。卽赴江西督辦軍務。以資統率。欽此。安徽官軍。潰於桐城。皖北之賊大熾。官文公檄調李孟羣督軍援皖。二十六日。公具呈駱公請代奏謝恩賞假并銀兩。四月。賊酋陳玉成由安徽糾黨犯鄂境。蘄黃以北各州縣城皆擾。李公續宜由瑞州分軍回鄂。以擊賊。江西吉安臨江瑞州等府城。久攻未克。賊酋石達開率賊黨往來江楚境。爲城賊之援。駱公秉章檄調王鑫老湘營三千人。赴江西爲雕勦游擊之師。五月。石逆大股援吉安。王公鑫馳往奮擊。大破之。二十二日。公以假期將滿。具摺奏瀝陳下情。懇請終制。臣在京十四年。在軍五年。祖父父母先後見背。生前未伸一日之養。沒後又不克守三年之制。寸心愧負。實爲難安。臣恭閱邸鈔。大學士賈楨丁憂。皇上賞假六箇月。旋因賈楨奏請終制。奉旨允其所請。臣葬事未畢。懇照賈楨之例。在籍終制。閏五月。奉上諭。曾國藩奏瀝情。懇請終制一摺。曾國藩在江西軍營。聞丁父憂。前經降旨賞假三箇月。回籍治喪。俟假滿時。再赴江西督辦軍務。以示體恤。茲據該侍郎奏稱假期將滿。葬事未畢。籲准在籍終制。曾國藩本以母憂守制在籍。奉諭幫辦團練。當

賊氛肆擾。詔即能統帶湖南壯勇。墨經從戎。數載以來。戰功懋著。忠誠耿耿。朝野皆知。伊父會麟書。因聞水師。偶拙。又令伊子會國華帶勇遠來援應。尤屬一門忠義。朕心實深嘉尚。今該侍郎以假期將滿。陳請終制。並授上年賈楨奏請終制蒙允之例。覽其情詞懇切。原屬人子不得已之苦心。惟現在江西軍務未竣。該侍郎所帶楚勇。素聽指揮。當茲勦賊喫緊。亟應假滿回營。力圖報效。會國藩身膺督兵重任。更非賈楨可比。著仍遵前旨。假滿後。即赴江西督辦軍務。並署理兵部侍郎。以資統率。俟九江克復。江面肅清。朕必賞假。令其回籍營葬。俾得忠孝兩全。毫無餘憾。該侍郎殫心事主。即以善承伊父教忠報國之誠。當爲天下後世所共諒也。欽此。初三日。奉竹亭公葬於湘鄉廿四都周壁衝山內。丙山王向爲塋。李元度軍駐貴溪禦賊。屢有功。專弁詣公函商軍事。公復書謂江西軍務。刻不去懷。所以奏請終制者。實以奪情兩次。乃有百世莫改之誓。至其所自愧憾者。上無以報聖主優容器使之恩。下無以答諸君子患難相從之義。常念足下與雪芹皆有極不忘者。前因困守江西。賊氛環逼。雪芹之芒屨徒步。千里赴援。足下之力支東路。隱然巨鎮。鄙人自讀禮家居。回首往事。睽睽於辛苦久從之將士。尤睽睽於足下與雪芹二人。雪芹彭公玉麟字也。王公鑫擊賊於寧都州永豐縣境。皆大破之。六月初六日。公具摺恭謝天恩。請開兵部侍郎。署缺。又具摺。歷陳歷年辦事艱難竭蹶情形。臣處一軍。概係募勇。雖能素保官階。不能挑補寶缺。將領之在軍中。權位不足以相轄。大小不足以相維。臣居兵部堂官之位。而事權反不如提鎮。此其一端也。籌餉之事。如地丁漕折。勸捐抽釐。均須經地方官之手。臣職在軍旅。與督撫勢分主客。難以呼應靈通。此又一端也。臣辦團之始。仿照通例。刻木質關防。文曰。欽命幫辦團防查匪事務。前任禮部右侍郎之關防。四年八月。勦賊出境。湖南巡撫咨送木印一顆。文曰。欽命辦理軍務。前任禮部侍郎關防。五年正月。換刻。文曰。欽差兵部侍郎銜。前禮部侍郎關防。秋閒又換刻。文曰。欽差兵部右侍郎之關防。臣前後所奉寄諭。援鄂援皖。籌備船礮。肅清江面。外間皆未明奉諭旨。時有譏議。關防更換既多。往往疑爲僞造。如李成謀已保至參將。周鳳山已保至副將。出臣印札。以示地方官而不見信。反被詰責。甚至捐生領臣處實收。每爲州縣猜疑。號令所出。難以取信。此又一端也。三者其端甚微。關繫甚大。臣處客寄虛懸之位。又無圓通濟變之才。恐終不免貽誤大局。目下江西軍務。無意外之虞。無所容其規避。若果賊氛逼迫。當專摺馳奏。請赴軍營。不敢避難。若猶是平安之狀。則

由將軍福興巡撫着齡兩臣會辦。事權較專。提挈較捷。臣在籍守制。多數月。盡數月之心。多一年。盡一年之心。疏入奉。上諭。會國藩以督兵大員。正當江西喫緊之際。原不應遽請息肩。惟據一再陳請。情詞懇切。朕素知該侍郎並非畏難苟安之人。著照所請。准其先開兵部侍郎之缺。暫行在籍守制。江西如有緩急。即行前赴軍營。以資督率。此外各路軍營。設有需才之處。經朕特旨派出。該侍郎不得再行瀆請。致辜委任。欽此。王公鑫破賊於贛昌。又破賊於樂安。賊回竄吉安。周鳳山等軍敗績。胡公林翼督軍於黃州。擊賊連破之。王剛介公國才陣亡於黃梅。七月。楚軍攻克瑞州府城。劉武烈公騰鵬陣亡。着齡公檄調普承堯等移師會攻臨江府。八月初四日。王壯武公鑫卒於樂安營次。其老湘營一軍。以張運蘭王開化分領之。十四日。奉上諭。昨據給事中李鶴年奏。會國藩自丁父憂後。疊蒙賜金給假。褒獎慰留。此後墨經從戎。宜爲天下所共諒。豈容以終制爲守經。再三瀆請。請飭仍赴江西。及時圖報等語。軍務奪情。原屬不得已之舉。朕非必欲該侍郎即入仕途。然如該給事中所奏。亦可見移孝作忠。經權並用。公論自在人心。現在江西軍務。有楊載福統帶。雖無須會國藩前往。而湖南本籍。逼近黔粵。賊氛未息。團練籌防。均關緊要。該侍郎負一鄉重望。自當極力圖維。急思報稱。所有李鶴年原摺。著鈔給閱看。欽此。李公績宜引軍渡江。至黃州會鄂軍。克蕪水廣濟黃梅。擊小池口賊壘。破平之。湖北全境肅清。胡公林翼至小池口督諸軍。合攻九江。九月初八日。官軍水陸齊舉。克湖口縣城。攻破梅家洲賊壘。內湖外江水師始合。初九日。公具摺覆奏。臣兩奉諭旨。現在江西軍務。辦理得手。自可毋庸前往。湖南目下全省肅清。臣仍當暫行守制。如果賊氛不靖。應須團練籌防之處。屆時商之撫臣。奏明辦理。臣自到籍以來。日夕惶悚。欲守制。則無以報九重之鴻恩。欲奪情。則無以謝萬世之清議。惟盼各路軍事。日有起色。即微臣寸心。亦得以稍安。附片奏稱。此後不輕具摺奏事。前在江西經手未完事件。擬函致江西撫臣着齡。請其代奏。疏入。奉硃批。江西軍務漸有起色。即楚南亦就肅清。汝可暫守禮廬。仍應候旨。大臣出處。以國事爲重。抒忠即爲全孝。所云懼清議之訾。猶覺過於拘執也。欽此。十三日。楊公載福督水師。破小姑山賊卡。二十一日。克彭澤縣。拔其僞城。乘勝而下。連克望江東流。直抵安慶城外。進克銅陵縣。又拔其僞城二座。逐北千里。遂與定海鎮之紅軍船相接。紅軍船見楚師旗幟。大驚以爲利。楊公分銀米火藥。以餉下游船兵。皆大感服。仍率水師回泊湖口。自公在衡州。創立舟師。苦戰四載。至是克奏奇功。肅清江面之

勢成矣。胡公林翼以水面一軍。本自公建立。楊公載福彭公玉麟皆經公識拔於風塵之中。所統將弁皆公舊部。遂於二十四日在九江營次。馳奏起復水師統將。以一事權一摺。奉上諭。會國藩丁憂後。奏派楊載福總統內湖外江水師。彭玉麟協同辦理。業經明降諭旨。允其所請。朕因該侍郎懇請終制。情詞懇切。且江西軍務漸有起色。是以令其暫守禮廬等因。欽此。湘軍之攻吉安也。公弟國荃所部湘勇曰吉字營。夏間周鳳山之敗。公弟國荃方在籍。而吉字營獨全軍而退。保守安福。於是江西巡撫耆齡公奏請起復曾國荃治軍吉安。旋令總統吉安各軍。公居禮廬。倦念江西援軍。連失劉騰鴻王鑫二勁將。於國荃之行也。反覆訓誡。以和輯營伍。聯絡官紳。與夫攻戰之法。至數千言。并令辭總統之任。十日。公弟國荃抵安福。約會各軍。并集吉安城外。十一月。石達開糾賊黨由皖入江。犯湖口。李公續宜擊破之。賊由饒撫疾趨吉安。官軍合力迎擊。破賊於吉水縣之三曲灘。城圍遂合。十二月初八日。楚軍克臨江府城。劉公長佑因病回籍。其所部勇併歸蕭公啓江總統。而以劉公坤一分領之。進攻撫州。張公運蘭等進軍建昌府。於時江西西路。僅吉安九安兩城未復而已。公治軍五載。糧臺無定處。經涉三省。頭緒繁多。公於讀禮之次。酌擬報銷大概規模。於是月具摺咨江西巡撫附奏。奏稱。臣處一軍。未經奏派大員。綜理糧臺。亦無專司之員。始終其事。越境勦賊。用銀漸多。歷時既久。散漫難清。擬將水陸各軍。分爲數大款。在臣處領餉之月日。截清起訖。歸臣處報銷。至若經手人員。如同知陶壽玉。知府李瀚章。道員裕麟厲雲官。禮部員外郎胡大任甘晉等。經臣前後派委。分處江楚各省。俟江西軍務將畢。即飭該員等。爲臣辦理報銷事件。造冊送部。如有款目不符。著賠追繳之處。皆臣一身承認。不與該員等相干。請旨飭部核議施行。附奏報鄧輔輪捐造戰船。請敘一片。請注銷李新華捐案一片。是歲安徽之賊。與河南之捻匪相結。黨衆熾盛。安徽巡撫福濟罷職。以李孟羣署理巡撫。欽差大臣都統勝保與副都御史袁甲三均駐皖豫之交。督辦軍務。又以翁同書爲安徽巡撫。十一月。德興阿公克瓜州。張公國樞克鎮江府。

〔戊午〕咸豐八年公四十八歲。正月。公在星第卜宅兆。將謀遷葬。公過羅忠節公家。劉武烈公家。慰其老親。撫其孤子。又至劉公蓉家。小住二日。暢談忘倦。江西巡撫耆齡公奏委公弟國荃總理吉安攻勦事務。二月。行小祥禮。公弟國華除服。公與弟國華議立家廟。祀曾祖以下。置祭田四十六畝。廟中虔藏御賜衣物若干事。誥命十一軸。

祖考遺念衣履几硯宗器若干件。書籍數千卷。分條記注於簿。公之爲學。雅重禮典。國朝尙書徐公乾學讀禮通攷。秦文恭公蕙田更爲五禮通攷。二書皆公素所服膺。自上年奉諱家居以來。日取二書。昕夕研校。讀之數反。凡筵奠祭。必參攷古今。衷於至是而後已。三月。公弟國華出從軍於九江。李公績賓留之軍中。遇事諮之。戶部議覆東征一軍。水陸各營報銷規模。如公前疏中所擬。奉旨依議。公初行軍。糧臺設於水次。總屬於內銀錢所。公之回里也。彭公玉麟兼綜理之。公致書胡公林翼商立報銷局。又致書彭公玉麟籌撥卹銀數千兩。給內湖外江水師殉難員弁。及陸軍平江營殉難員弁之家。如林汝航夏鑾林源恩唐得陞白人虎伍宏鑑六人。尤公所加意。又如畢金科之在饒州。力戰死綬。李元度之駐貴溪。堅忍扼守。屢捍巨股。均以公不在軍中。賞與卹爲之缺然。公恆自謂負之。李元度軍駐貴溪兩年。賊酋石達開由江西竄入浙江之境。連陷城邑。胡公林翼奏保李元度。請旨飭令率所部平江勇前赴浙江。擇要扼守。以遏賊鋒。并由鄂省籌銀一萬兩以資之。從公所請也。四月初七日。水陸兩軍合攻九江府城。克之。屠戮無遺。二十日。蕭公啓江劉公坤一等。克復撫州府城。廿四日。張公運蘭王公開化等。克復建昌府城。賊悉竄入浙江境。將軍福興駐軍廣信。奉旨切責。以總兵周天受督辦浙江防勦事宜。尋詔和春兼督江浙軍務。李公績賓補授浙江布政使。既克潯城。軍威大振。浙人官都中者。奏請其移軍援浙。浙中官紳爭催其督師赴任。適逆酋陳玉成竄擾皖鄂之交。城邑多陷。勢方大熾。李公績賓率師回援。五月。擊賊於黃安麻城。克之。楚境以清。官文公胡公林翼會奏。統籌東征大局。先勦皖北。次及皖南。節節掃蕩。請以陸路軍事。專屬之。李績賓奉旨嘉獎。尋復奉旨。李績賓加巡撫銜。軍入皖境後。得專摺奏事。而調湘軍之在江西東路者。悉移師以援浙。五月二十一日。奉上諭。前因江西賊匪竄入浙江。恐周天受資望較淺。未能統率衆軍。復諭和春前往督辦。茲據和春奏現在患病未痊。刻難就道。東南大局攸關。必須聲威素著之大員。督率各軍。方能措置裕如。會國藩開缺回籍。計將服闋。現在江西撫建。均經克復。止餘吉安一府。有會國荃劉騰鴻等兵勇。足敷勦辦。前諭着齡飭令蕭啓江張運蘭王開化等。馳援浙江。該員等皆係會國藩舊部。所帶勇丁。得會國藩調遣。可期得力。本日已明降諭旨。令會國藩馳驛前往浙江。辦理軍務。著駱秉章卽傳旨。令該侍郎迅赴江西。督率蕭啓江等星馳赴援浙境。與周天受等各軍。力圖掃蕩。該侍郎前此墨誼從戎。不辭勞瘁。朕所深悉。現當浙省軍務喫緊之時。諒能仰體

朕意。毋負委任。何日起程。并著迅速奏聞。以慰廬念。欽此。二十五日。駱公秉章具疏奏稱。現在援江各軍將領。均前待郎曾國藩所深知之人。非其同鄉。卽其舊部。若令其統帶赴浙。則將士一心。於大局必有所濟。且江浙本屬澤國。利用舟師。楊載福彭玉麟兩軍。皆係曾國藩舊部。曾國藩統陸師赴浙。或從常山更造戰船。順流而下。或派船由長江入太湖。溯流而上。江南大軍。旣免後顧之虞。援浙陸軍。亦得戈船之助。其勇餉一項。擬由湖南每月籌解餉銀二萬兩。請旨飭下湖北撫臣胡林翼每月籌解銀二萬兩。專供曾國藩一軍之用。六月奉上諭。駱秉章奏分撥楚軍援浙。并請飭曾國藩統率前往。與前降諭旨。適相符合。每月籌解銀二萬兩。作爲援浙勇餉。實能統籌大局。不分畛域。著卽照辦。該侍郎兵力既精。餉需又足。必當迅奏膚功也。欽此。初三日。接奉諭旨。初七日。公治裝由家啓行。初九。過湘鄉縣城。十二日。抵長沙與駱公秉章左公宗棠會商軍事。刻木質關防。其文曰。欽命辦理浙江軍務。前任兵部侍郎關防。且札調派蕭啓江張運蘭王開化等湘軍。由江西撫建一路。披營進駐鉛山縣之河口鎮。公擬由水路東下。過九江登陸。會軍於河口。督師以赴浙。駱公派委主簿吳國佐管帶練勇千二百人。隸公麾下。公札令由陸路先赴江西。十七日。具摺恭報起程日期。並陳明進兵援浙之道。奉硃批。汝此次奉命卽行。足徵關心大局。忠勇可尙。俟抵營後。迅將如何布置進剿機宜。由驛馳奏可也。欽此。是日又會奏蕭啓江請假兩月。回籍一片。十九日。由長沙登舟。二十四日。行抵武昌。與胡公林翼會商進兵之路。籌餉之數。大營轉運糧臺報銷各事。留署中旬日。鄂省協餉二萬兩。亦奉旨允准飭撥。公素稱胡公才大心細。事無鉅細。虛衷商度。胡公亦悉心力代爲之謀。談議每至夜分不息。七月初三日。由武昌解纜。初四日。泊巴河。公弟國華李公續賓續宜彭公玉麟等。先後謁見於巴河。籌商陸營統領營官哨長。及隨營委員章程。兵勇行軍止營出隊之法。李公續賓派撥湘勇二營。以副將朱品隆唐義訓領之。隸公麾下。以爲親兵營。公與李公議改修湘鄉忠義祠。李公捐銀二千兩。公捐銀一千兩。以爲之倡。十一日。行抵九江府。致祭塔忠武公祠。楊公載福來見公。十二日。舟次湖口。彭公玉麟修建水師昭忠祠於石鐘山。祀楚軍水師之死事者。蕭公捷三以下弁勇夫役等。凡數千人。十五日。公至昭忠祠致祭。遍賞外江內湖水勇。爲錢二千二百餘貫。札調朱品隆唐義訓率所部勇。先行赴河口鎮。公之初出也。以肅清江面爲期。公自駐水營。設糧臺於水次。至是楚皖江面。以漸廓清。下游雖有賊踪。勢不得復逞。賊酋石達開由

江西竄擾浙閩邊界。所陷郡縣。不復踞守。漸成流寇之勢。公督師援浙。舍舟而登陸。治兵轉餉。均攻前規。設立報銷總局於湖口。札調李瀚章來江總理報銷局。清釐東征水陸各軍餉糈收發之數。分款核銷。設陸路隨營糧臺。派委喻吉三彭山。配帶勇數百以護之。武昌九江貴溪皆設轉運局。南昌省城設支應局。札委道員李元度知府王勳。綜理營務處。札委陸營管理銀錢所軍械所發審所。公牘案卷各員弁十有餘人。二十一日。舟抵南昌。與巡撫耆齡公會商軍餉。札撤前年江省所設楚軍支應職位子藥三局。以所餘硝磺火器之屬。歸於陸軍支領。撤遣李大雄滕加洪兩營。其上年在江西差委員弁。分別撤留。是時楚軍在江西者。張運蘭蕭啓江所領兩軍。已集於河口鎮。合以朱品隆等軍。共萬餘人。其劉公長佑一軍。經江西巡撫派委。由撫州移防杉關。李元度一軍。亦奏派由貴溪拔營援浙。賊既解浙江衢州之圍。由處州竄入福建。分股由浦城竄出二度關。圍攻廣豐玉山二縣。廣信戒嚴。李元度力守二城。擊賊卻之。尋接公札委辦營務處。以所部平江勇屬沈公葆楨權領之。二十四日。公由南昌解纜。泊瑞洪。江西水師道員劉于濤來見公。途次奉上諭。前因浙江軍務緊急。諭令曾國藩赴浙勦辦。現在衢州業已解圍。處州等府縣。亦相繼克復。境內餘匪。不難剋日肅清。惟閩省浦城崇安建陽松溪政和等處。賊勢蔓延。亟應趕緊勦辦。和春等現飭總兵周天培於援浙兵勇內。挑選精銳三千數百名。由龍泉一帶進勦。饒廷選帶漳州兵勇。亦馳往浦城。曾國藩業已奏報起程。著即以援浙之師。由江西鉛山直搗崇安。相機進勦。迅將閩省各匪。一律掃除。毋少延誤。欽此。又奉上諭。總兵李定泰前令幫辦和春軍務。此時周天受等會勦竄閩各匪。著總歸曾國藩調度。欽此。又奉上諭。署福建漳州鎮總兵周天受著加恩賞還提督銜。即著馳往福建。與周天培饒廷選張騰蛟等。分路進勦。俟前任侍郎曾國藩到後。即歸曾國藩調度。欽此。是月。胡公林翼丁母憂。解任回籍。詔宮文兼署巡撫事。八月初八日。公抵河口營。沈葆楨李元度來見。札各營營官支發勇糧。每日每名領銀一錢四分。夫糧每名一錢。畫一定制。楚軍在江西境內者。疊被鄉團截殺。多至數十百人。公出示曉諭各兵勇。嚴禁騷擾。又出示曉諭團練。禁毋得妄殺人。委員提各案證。訊鞫得實。按法處辦。十二日。馳奏遵旨援閩。擬即日由崇安進勦。并陳明現在賊情軍勢一摺。又奏報閩賊竄撲廣豐玉山兩縣官軍力戰獲勝。兩城解圍。擬即日由崇安進勦。自從軍以來。備嘗艱險。百折不回。臣丁憂回籍。該員以孤軍支柱東路。屢能以少勝衆。此次力保兩城。有裨大局。請賞加

按察使銜。并給勇號。陣亡弁勇易金榜李傳綸龔茂發張應龍龔拱綸李家純黃奎七名請卹。附片奏調游擊喻吉三隨營差遣。又奏此次由江入閩。應於廣信府城鉛山縣城設立糧臺。轉運米糧軍火等件。已劉委駐防廣信之九江道沈葆楨兼理。臣軍糧臺。并委在籍道員雷維翰經理鉛山水陸轉運。又札調李元度帶所部平江勇一營。隨臣赴閩辦理營務處。餘勇并交沈葆楨接管。留防廣信。札調王勳來營會辦營務處。又會奏九江府城建立提督塔齊布祠。湖口建立水師昭忠祠。臣在途次。經歷兩處。見其祠宇將次工竣。請勅下地方官。春秋致祭。又奏湘鄉縣城捐建忠義祠。彙祀陣亡員弁勇丁一摺。附片奏湖南補用知府李瀚章在臣軍糧臺。經手最久。該員現回廬州原籍。應令速來湖口水營辦理報銷。所請首奉旨允之。公弟國荃督各營攻克吉安府城。江西全省肅清。江西湖南巡撫會奏保會國荃。以知府遇缺即選。并加道銜。賊由福建邵武分股竄出鐵牛關。劉公長佑擊賊失利。爐溪金谿皆失守。賊竄陷安仁縣。十五日。公率軍移駐弋陽縣。調張運蘭回軍截剿。十九日。克復安仁縣。賊由萬年竄入饒州境。屯踞景德鎮。公調吳國佐會勦安仁之賊。吳國佐追賊於萬年小挫。幫辦營官劉本傑陣亡。二十四日。馳奏閩賊竄入江西。官軍克復安仁一摺。隨摺奏保道員張運蘭知府王文瑞二員。陣亡千總周玉田請卹。附片奏陣亡知縣劉本傑請卹。又片奏請旨敕四川督臣每月籌銀二萬兩。由湖北轉解行營。又片奏同知胡兼善在營病故。請卹。二十七日。公拔營赴雲際關。二十九日。行抵雙港聞警。駐營閩中之賊。分大股回竄新城縣。吉安餘匪。竄陷崇仁宜黃兩縣。撫州建昌兩郡戒嚴。公調張運蘭一軍。進勦新城。公改道南趨建昌。九月初二日。李元度請假回籍。劉公長佑擊賊於新城。大破之。賊退回閩境。崇仁宜黃股匪亦竄入閩境。初七日。公行抵金谿。聞新城大捷。初九日。抵建昌府駐軍城外。劉公長佑來見。公登麻姑山。周覽建昌形勢。高下遠近攻守之途。浚壕壘。委弁勇嚴守壘門。每夜親巡查之。委員弁專司更鼓。晨昏漏刻。毋得參差。委員分巡營壘附近數里之地。嚴禁賭博。及吸食鴉片之館。出示曉諭弁勇。嚴禁強索夫役。抑勒貨物。每日傳見哨長三人。察其材力能否。密爲記注。十三日。馳摺奏移師建昌。商籌撫建各府防勦事宜。擬從杉關入閩勦賊。附片請給捐生紀以鳳等執照。蕭公啓江假滿還江西。抵建昌大營。公調張運蘭一軍。由杉關進勦。蕭啓江一軍。由廣昌進勦。派吳國佐一軍。爲後路策應。時閩中賊氛方熾。官紳函牘迭至。催公赴援。而嶺路崎嶇難行。天雨不止。疾疫大作。不能速進。公弟國荃

克吉安後。撤遣所部之勇回湘。所統湖南援軍各營。亦先後遣回湖南境。自率所部勇千人。從公於建昌。二十六日。抵大營。公留其勇爲親兵。謂之護衛軍。其營官哨長。亦每日傳見數人。視其能者獎拔之。公弟國荃留營十餘日。李公瀚章由廬州應調來營。公核定在營委員夫役等薪水口糧章程。查核火器大小礮位。糧鎗鳥鎗等項。所食子藥多少輕重之數。爲表以記之。十月十一日。公弟國荃回湘。公送之行。以課子讀書爲屬。十六日。具摺奏保玉山廣豐守城案內。出力員弁。開單請獎。又馳奏調派官軍。分道入閩。并陳現在辦理情形一摺。附片奏報疾疫盛行。從前所未見。張運蘭蕭啓江吳國佐等軍。報病多者千數百人。少或數百人。臣亦不忍亟催其進。劉長佑一軍。積勞過深。患病尤衆。請移駐撫州調理。奉上諭。曾國藩奏辦理情形。朕亦不爲遙制。該侍郎惟當督飭將士。相機勦辦。探知何處有賊。卽由何處進剿。以期迅速。至建昌等屬。疾疫流行。各營兵勇。現多染病。著該侍郎妥爲拊循。俾得迅速調治。無誤軍行。欽此。李忠武公續賓公弟愨烈公國華於巴河相見。別後督軍入皖。八月克太湖潛山。九月克桐城舒城。兵勢甚銳。時廬州復陷。賊屯聚三河鎮。李公續賓督軍攻三河賊壘。是月賊酋陳玉成糾合大股援賊。連營圍之。官軍全覆。李公赴敵障亡。公弟國華及在軍員弁兵勇。從殉難者六千人。湘軍精銳殲焉。舒城桐城後路之軍。相率潰退。楚皖之間。大震。都興阿公由宿太進攻安慶之師。亦退屯鄂境。李公續宜撫定潰卒。屯於黃州。官文公奏請公移師援皖。奉寄諭。以江西援閩之軍。疾疫方盛。難以跋涉長途。詔起復胡林翼署理湖北巡撫。督辦軍務。以援皖北。是月。公編記浙江皖閩各省府州縣所屬山川阨塞。逐日記注。以爲常課。出示曉諭被賊州縣。流亡戶口。招集復業。十一月。公聞三河之警。悲慟填膺。減食數日。作母弟溫甫哀詞。專遣弁勇。開行入皖北。收覓骸骨。公核定大營閱視操練之期。每月逢三日。閱步箭刀矛之屬。逢八日。閱馬箭火器之屬。其時江西鄉團。猶有截殺楚勇之案。公作愛民歌一篇。令軍中習誦之。張公運蘭進軍福建邵武府。賊已悉數南竄。由汀州竄擾江西贛州南安之境。蕭公啓江軍至石城縣。值潮勇爲匪。擾亂縣境。蕭公捕討平之。皖北軍覆後。賊之在景德鎮者。乘勢益張。江西之兵進剿失利。公迺調蕭啓江勦江西南路之賊。調張運蘭回軍建昌。移勦景德鎮。與劉于濬水師會剿。二十六日。馳奏分調官軍。追剿閩省竄賊。移剿景德鎮股匪一摺。附片奏蕭啓江軍過石城。討捕潮匪一案。又奏探明賊蹤大略一片。胡公林翼營葬甫畢。馳至湖北接受關防。進駐黃州。拊循士卒。人心稍

安。劉公長佑因軍中多病。由撫州撤遣楚勇回籍。駱公章奏陳軍情緩急。請公由江援皖。奉上諭。皖北賊勢蹙。張楚省邊防喫緊。諒會國藩亦必有探報。此時閩省之賊已南趨拊泉。距江西漸遠。詔照駱乘章所請。令該侍郎移師赴皖。而留蕭啓江所部四千餘人防守江西。亦未始非權衡緩急之計。惟會國藩所部各軍多染疾疫。前奏尙須休息。且景德鎮尙有大股逆匪。隨剿隨進。亦非計日可到。著會國藩豫爲籌度。如果閩省兵勇足資勦辦。而江西邊境防勤有人。自以援皖省尤爲緊要。不獨廬州省城可收南北夾攻之效。卽上竄湖北之路亦可藉資堵扼。儻因汀州等處尙須兵力。一時不能移軍。或須俟景德鎮股匪殲除。再回楚北。亦著斟酌具奏。欽此。十二月十一日。公具摺覆奏。近日賊勢以皖江南北兩岸爲最重。皖南大山縣互。自山以北。久爲粵匪出沒之區。自山以南。現惟婺源縣景德鎮兩處有賊。皖北賊勢浩大。實倍甚於皖南。論大局之輕重。則宜併力江北。以圖清中原。論目前之緩急。則宜先攻景德鎮。保全湖口。臣已札張運蘭一軍。馳勦景德鎮。至福建之賊。爲數無多。其回竄江西者。已飭蕭啓江一軍。迅速追勤。奉硃批。所擬尙屬妥協。欽此。公又附片奏目疾。請假一月。在營調理。李公鴻章來謁於建昌。因留幕中。十五日。李元度假滿來營。王勳請假回籍。十七日。張公運蘭等軍至景德鎮。吳國佐遇賊軍敗。公批飭責之。令其撤營回湘。賊陷南安府城。蕭公啓江進軍攻之。張公運蘭擊賊於景德鎮。破之。是歲二月。和春公張公國樞克秣陵關。復進攻金陵。詔授何桂清爲兩江總督。前江西巡撫張芾督辦皖南軍務。駐徽州。七月。江南大營築長圍於金陵以困賊。九月。德興阿軍大潰於浦口。賊復陷揚州府城。及儀徵天長六合等縣。溫壯勇公紹原死於六合。張公國樞引兵渡江。克揚州。十月。擒匪李兆受。以天長歸順。更名世忠。十二月。戴武烈公文英鄧忠武公紹良勦賊於寧國府之黃池灣。先後陣亡。

〔己未〕咸豐九年公四十九歲正月公在建昌營。奉旨通籌全局。十一日。公具摺奏稱數省軍務。安徽喫重。江西次之。福建又次之。計惟大江兩岸。各置重兵。水陸三路。鼓行東下。勦皖南。則可以分金陵之勢。勦皖北。則可以分廬州之勢。北岸須添足馬步軍三萬人。都與阿李續宜鮑超等任之。南岸須添足馬步軍二萬人。臣率張運蘭等任之。中流水師萬餘人。楊載福彭玉麟任之。至江西軍務。分南北兩路。臣願與撫臣耆齡分任之。粵賊勾結擒匪。近來常以馬隊衝鋒。擬調察哈爾馬三千匹。募馬勇數千。擇平曠之地。馳騁操習。臣願竭數月之力。訓練成熟。皖

豫軍務。可期大有起色。附片請敕健銳營內外火器營。選派精練弓馬。曾經戰陣之員。咨送來營。并奏調翰林院編修郭嵩禧禮部主事李榕二員。又片奏江西南路防剿喫緊。暫難移師北行。請飭贛南總兵饒廷選帶兵來江。駐防南路。是日又奏陳明李續賓死事甚烈。功績最多一摺。又奏陳臣弟曾國華殉難之情形一摺。奉上諭。巡撫銜浙江布政使李續賓前在三河陣亡。業經降旨。優加褒卹。茲據曾國藩臚陳該員功績具奏。覽之益深悼惜。李續賓從軍數載。所向成功。及其見危授命。麾下將士。無一偷生。實有古名將之風。允宜垂諸信史。百世流芳。著將會國藩此奏。交國史館探入列傳。以示褒嘉。欽此。又奉上諭。曾國藩奏伊弟曾國華殉難情形一摺。候選同知曾國華在三河鎮殉難。嘗經降旨。追贈道員。從優議卹。該故員歷著戰功。一門忠義。著再加恩。賞給伊父曾驥雲從二品封典。以示褒嘉。欽此。同日又奉上諭。曾國藩奏遵籌全局。請添馬隊進取一摺。該侍郎統籌全局。意在併力大江兩岸。爲節節進剿之計。所見甚是。惟現在江西南贛等處。賊氛尙熾。該侍郎未能即日北行。俟南路稍鬆。再赴楚皖交界。籌辦大局。編修郭嵩禧現隨僧格林沁前赴天津。俟該處撤防。再降諭旨。主事李榕已令赴營差委。汝弟曾國華在三河陣亡。可嘉可憫。業經追贈道員。從優賜卹。該員之子。例有應得世職。本日復明降諭旨。賞給伊父曾驥雲從二品封典。以示褒獎。欽此。公作聖哲畫像記。圖畫昔時聖賢先儒三十三人。系之以說明。抗希古人之意。略依孔門四科。及近世桐城姚氏論學。以義理考據詞章三者。分門依類而圖之。官軍攻景德鎮小挫。分調駐防廣信之平江勇等營。赴鎮助剿。飭張運蘭等堅守營壘。與賊相持。軍心以安。蕭公啓江擊賊於南康縣大破之。克新城墟及池江賊壘。二月初三日。蕭公啓江等攻克南安府城。收復崇義縣城。賊酋石達開糾黨西竄。入湖南境。初四日。公在營中行大祥祭禮。初九日。奏報蕭啓江一軍勝仗。陣亡將弁龍復勝等十七名。請卹。又奏張運蘭一軍。攻勦景德鎮情形一摺。彙奏水陸各軍陣亡病故員弁何長庚等八十員名。開單請卹。又奏彙保新城安仁兩案。老湘營平江營出力員弁兵勇。開單請獎一摺。是日又具摺謝弟國華從優賜卹恩。又摺恭謝年終恩賞。附片奏鄧輔輪捐造船艦。請敘一案。經工部咨查何項工例。臣查江楚創造戰船。本係臣新立規模。並未仿照他省戰船成式。實無工例可援。仍請照前案議敘。奉硃批。著照所請獎勵。該部知道。欽此。十一日。公查核報銷七柱清單。公聞閩省已無賊擾。十二日。由建昌拔營。移駐撫州。李忠武公遺骨。經難民收得。負送大營。胡公林翼

遣弁覓得公弟愍烈公遺骨。而喪其元。公聞而益悲之。胡公委真弁先後斂送回湘。十五日公在途次馳摺奏報。蕭啓江一軍協同各勇攻克南安府城。現在引兵馳援信豐縣。江省南路可望肅清。隨摺奏保道員蕭啓江請加勇號。附片奏移軍撫州。距景德鎮較近。軍中聲息易通。又具摺恭謝天恩。并奏稱臣胞叔曾驥雲臣在侍郎任內。恭遇兩次軍恩。曾邀勲封至正一品光祿大夫。茲復溍荷襄嘉之典。誥軸則祇領新綸。頂戴則仍從舊秩。奉上諭。前因會國藩奏伊弟會國華殉難情形。曾經賞給會國華之父曾驥雲從二品封典。本日會國藩謝恩摺內。聲明曾驥雲曾邀勲封正一品封典等語。所有會國華之子會紀壽。著再加恩。俟及歲時。由吏部帶領引見。以示朕褒崇忠節。有加無已之至意。欽此。十六日。公至撫州。賃城內謝氏宅。以爲行館。蕭公啓江援勲信豐縣。力戰賊解圍去。賊之竄湖南者。連陷桂陽郴州各城邑。攻撲永州府。江西南境餘匪。相繼西竄。公迺調蕭啓江一軍。馳赴吉安府境。以爲湖南援應之師。駱公秉章亦奏調蕭啓江由間道回軍湖南。聽候調遣。自是南路軍餉。不復闕公慮矣。公以景德鎮之賊。久攻未克。委副將朱品隆游擊喻旨三知縣張岳齡縣丞凌蔭廷等。回湖南續招鄉勇四千人。赴撫州訓練。以備攻勦。二十七日。派委員弁巡查撫州城防。二十八日。具摺奏謝弟國荃保選用知府。加道銜恩。又奏報蕭啓江一軍。力解信豐城圍。現在飛調該軍。馳赴吉安。爲湖南援應一摺。陣亡將弁李先益李楚文黃龍光劉文友請卹。附奏添招練勇。即由江西添籌月餉一片。三月。朱品隆等所募鄉勇。先後抵撫州。公按日閱操。傳見各營哨官。時時訓飭之。十三日。張公運蘭擊賊於景德鎮。軍勢復振。劉公騰鴻領鄉軍駐防湖口。皖南之賊竄陷建德。劉公進勦陣亡。公調派平江勇千人。委知府屈蟠領之。以防湖口。二十六日。奏報景德鎮官軍兩月以來。攻勦情形一摺。陣亡將弁喻福慶易福陞等五十二員名。開單請卹。附片奏添募湘勇。在撫州教練。俟吉安防務稍鬆。即調派各營。合攻景德鎮之賊。又具摺奏謝會紀壽由吏部帶領引見恩。是月李武愨。公孟羣攻勦廬州陣亡。四月湖南永州解圍。賊以全股圍撲寶慶府城。公弟國潢治團練於鄉邑。湘勇從軍在外者。人懷家鄉之慮。公札飭各營官禁勇丁告假回籍。委員至衡州府城。坐探湖南賊勢軍情。三日一報。隨時函告各營以慰之。公出城閱視操演。其隊伍整齊者。亟犒賞以獎勵之。二十五日。拜發萬壽賀摺。專弁入都。二十七日。公弟國荃到撫州營。五月初九日。公與弟國荃設次行釋服禮。仿通禮中品官祭儀。而略變通以行之。初十日。派調湘軍之在撫州者。舊部

四營。新募者七營。爲數共五千八百人。公弟國荃總領之。赴景德鎮助勦。李公鵬章同往贊畫。二十二日。總兵饒公廷選來見公。二十六日。奏報楚軍進攻景德鎮。連獲勝仗。現在添軍助勦一摺。附片奏飭九江道沈葆楨赴本任。調總兵饒廷選接防廣信。又奏記名道編修李鴻章留營襄辦軍務。檄令會同國荃等督勦景鎮。又奏陳明服闋日期一片。公麾下各軍。悉赴景德鎮。其留防撫州者千數百人。皆本歸江省調度之營。藉公爲之鎮撫而已。六月初三日。禮部主事李榕來撫州見公。湖南賊圍寶慶久不解。蕭公啓江軍亦至寶慶。總督官文公奏。探知湖南賊勢將竄入蜀。請令公帶兵赴夔州一帶。擇要扼守。奉上諭。官文奏請飭會國藩迅赴夔州一摺。詳覽該大臣所奏各情。實爲通籌大局起見。本日已諭令有鳳派兵扼要嚴防。惟該省兵力。恐不能當此悍賊。會國藩前派蕭啓江帶兵援勦湖南。現在湖南喫重。此一軍自未能調回。此外如江西湖北等兵。素稱得力。着會國藩卽日統帶由楚江前赴四川夔州扼守。以據兩湖上游之勢。倘賊蹤竄至。卽可有備無患。至江西景德鎮之賊。尙未勦平。着會國藩斟酌情形。咨商耆齡。妥爲布置。俾得迅掃逆氛。不至顧此失彼。是爲至要。欽此。公弟國荃督軍至景德鎮。三戰皆獲勝。十四日克景德鎮。賊竄浮梁縣。十五日。公弟國荃張公運蘭等追擊賊於浮梁克之。賊潰入徽州境。江西全省肅清。十八日。復奏寄諭防蜀一摺。奏稱。臣所部兵勇。爲數無多。目下景德鎮攻勦之師。難以遽行抽動。若令由鄂赴蜀。應須兵力稍厚。乃可攜以入峽。維時湖廣寶慶賊勢猶盛。湘軍旣克景德鎮後。弁勇等思歸尤切。勢不能止。公迺調張運蘭引軍回湘。以援寶慶府。擬自率六千人。泝江西上至宜昌。駐軍扼湖廣之西路。二十二日。馳奏克復景德鎮及浮梁縣城。江西全省肅清一摺。奏稱。會國荃係臣親弟。不敢仰邀譏敘。隨摺奏保道員張運蘭王文瑞游擊任星元三員。陣亡都司李印典守備向其昌陳玉才高成春請卹。附片奏調張運蘭一軍。會勦寶慶。以副弁勇迫救桑梓之情。可期得力。臣擬先駐湖北宜昌等郡。如賊果入川。再行酌量前進。又奏保已革編修吳嘉賓前奏保升同知。經吏部核駁。請以內閣中書選用。并加五品銜。又片奏副將黃翼升復姓歸宗一案。二十入日。張公運蘭拔營回湘。公弟國荃率吉字中營。拔赴撫州。公飭調朱品隆等軍。由景德鎮拔營。取道湖口。渡江駐軍於小池口。七月初一日。公弟國荃至撫州。公作林君殉難碑記刊石。立于撫州城外林源恩殉難之處。以表其忠。初六日。奏報景鎮官軍。分兩路赴楚。拔營日期一摺。奏保蕭啓江一軍。南安信豐兩案出力員弁。開單請獎。附

片奏臣前在江西重整水師設立楚師子藥墩位三局歷時三載有餘始行裁撤請將該局員量予保獎公弟國荃以病留撫州數日初七日公由撫州啓行紳民酌酒於路以餞公行初十日公行抵南昌省城奉上諭現在江西全省一律肅清勦辦甚爲得力會國藩調度有方着交部從優議敘在事出力之道銜候選知府會國荃著以免選知府以道員用欽此李公續宜由黃州率軍回援湖南擊賊於寶慶城外大破之石達開竄入廣西境湖南解嚴公弟國荃病愈由撫州拔營回湘公弟國葆更名貞幹從軍於黃州胡公林翼奏留辦理軍事是月至撫州旋至南昌見公沈公葆楨見公於南昌十五日公登舟啓行李公瀚章馮章皆從十七日泊吳城鎮李公瀚章所設報銷總局在焉十八日核閱報銷清冊十九日泊湖口彭公玉麟楊公載福來見公棹小舟石鐘山下作湖口水師昭忠祠記彭公立石焉是月奉上諭該侍郎原摺所稱駐紮宜昌等處即可穩占上游但爲鎮守湖北起見尙未籌防屬省會國藩當熟思大勢應如何定計之處詳悉馳奏毋得遷延欽此又奉上諭會國藩雖先駐宜昌等處仍當偵探賊情如寶慶一帶未能遏其入川之路卽當親督兵勇赴蜀以便調度堵勦機宜未可遷延貽誤欽此又奉暫留兵勇赴徽州會勦之旨又奉酌撥兵勇留防江西之旨二十五日復奏四次諭旨一摺奏稱江西北路饒州有劉于濤一軍彭澤有普承堯一軍臣與耆齡熟商擬令饒廷選吳坤修各添置一軍或以留防本省或以助攻皖南臣所帶領人數無多不能抽撥赴皖亦不能酌留防江臣籌防全蜀斷不能遷延貽誤俟抵鄂後察看賊勢與官文胡林翼會商再行馳報是日又奏摺恭謝天恩交部優敘弟國荃以道員用公舟次湖口所調朱品隆唐義訓等營咸集駐營於江之兩岸觸暑多病公留湖口旬日令各營休息醫調八月初一日札調朱品隆等拔營由陸路赴鄂駐紮巴河公舟解纜溯江而上泊九江謁先賢周子墓十一日行抵黃州與胡公林翼相見於行館留七日而行公在舟中定每日靜坐讀書日課武昌門人張裕釗謁見公舟中公教以文詞甚詳途次奉到上諭官文奏皖省賊勢日張籌議由楚分路勦辦一摺皖省粵匪與捻匪勾結蔓延日甚官文以寶慶解圍敗賊悉數南竄川省已有備無患請飭會國藩緩赴川省暫駐湖口分軍四路進勦皖省所籌實於大局有益會國藩如已啓程赴鄂著與官文商酌如湖南大局已定川境可保無虞卽暫駐湖北調回湖南各軍爲分路進勦皖省之計等因欽此二十三日公至武昌省城與官文公會商軍事留旬日是月公弟國潢國荃遷葬竹亭公江

太夫人於台洲新塋。胡公林翼委公弟貞幹回湘募勇二營。赴鄂助剿。九月初三日。公由武昌解纜回黃州。與胡公林翼商籌進兵皖省之途。須分四路。循江而下者爲南二路。循山而進者爲北二路。胡公撥派兵勇十營。隸公麾下。初五日。至巴河登陸。駐陸營中。接見各營營官哨長。簡校軍實。胡公林翼至公營視師。十二日。馳奏邊奉諭旨。會商大略。由鄂省回駐巴河一摺。催調蕭啓江一軍。剋日前來。會師東下。副都統多隆阿攻克石牌賊壘。進規安慶。二十五日。公至黃州。留二日還營。李公鴻章奉旨授福建延建邵遺缺道。留公營幕中。不之任。兩淮賊氛肆擾。勝保翁同書督師屢失利。漕運總督袁公甲三奏請。以公一軍。由河南光固進剿。遏賊北竄。奉上諭。袁甲三等所慮。不爲無見。著官文會國藩胡林翼再行悉心籌酌。至此次官文等會籌大舉。關係全局利害。總須計出萬全。不妨稍遲時日。謀定後動也。欽此。十月初一日。核定馬隊營制章程。初二日。公弟國荃領所部吉字營勇至巴河。公弟貞幹領所招鄉勇至黃州。初八日。見公於巴河。十七日。會奏悉心籌酌一摺。奏稱。逆賊洪秀全踞金陵。陳玉成踞安慶。竊號之賊也。石達開竄擾楚粵。流賊之象也。皖豫諸捻。股數衆多。分合不定。亦流賊之類也。目前要策。必先攻安慶。以破其老巢。兼搗廬州。以攻其所必救。現擬四路進兵之局。第一路由宿松石牌以規安慶。臣國藩任之。第二路由太湖潛山以取桐城。多隆阿鮑超任之。第三路由英山霍山以取舒城。臣林翼任之。先駐楚皖之交。調度諸軍。兼籌轉運。第四路由商城固始以規廬州。調回李續宜一軍任之。湘勇久戰江濱。於淮北賊情地勢。不甚熟悉。能否繞出懷蒙以北。應俟李續宜到後。察看情形。再行奏明辦理。附片奏李續宜因母病請假歸省。先調該道所部各營回鄂。由北路進發。又具摺奏保員外郎胡大任道員厲雲官。請特旨記名簡放。以昭激勸。又附片請旨。飭浙江巡撫羅遵殿。月籌餉銀四萬兩。解交湖北糧臺。是日。公專銜奏保張運蘭等軍。克復景鎮。浮梁案內出力員弁。開單請獎。附片奏江西紳士劉錫綬報捐餉銀一萬兩。請照例給獎。又奏參將鄔世蓮復姓歸宗一案。又片奏報目疾未痊。兼患頭暈。請假一月。在營調理。奉上諭。會國藩著賞假一月。在營調理。該侍郎一路兵勇。既待另籌。而李續宜亦係獨當一面。復因母病給假。是四路中已有二路。急難進征。於皖北待援情形。實有緩不濟急之勢。至所稱先圖安慶。兼搗廬州等語。所籌尙屬周妥。但恐言之易而行之難。所有前諭派出一軍。取道光固潁州。繞出懷蒙以北之處。仍著官文會國藩胡林翼悉心籌酌辦理。欽此。二十四日。公督各營。拔營入皖。分

爲前後幫啓行。公弟國荃請假回湘。十一月初三日。公駐軍於黃梅縣。十三日。拔營進駐宿松縣。公統領步隊二十營。馬隊一營。派朱品隆、李榕總理營務處。蕭公啓、江張公運蘭兩軍。由湖南分途出境。援勦兩粵。公兩次奏調蕭啓江一軍。諭旨飭調張運蘭赴皖。均經廣西湖廣奏留。十九日。奏報入皖日期。一指奏稱蕭啓江、張運蘭兩軍均不調回。諭旨另籌一軍。繞赴淮北。由臣官文會奏辦理。前月通籌四路進勦之議。由公主稿。其後奏報各路軍情。多由胡公林翼主稿。公會銜而已。十二月。胡公林翼由黃州拔營進軍英山。公弟貞幹從之。公調派前幫十營。以朱品隆、李榕總領之。進駐太湖縣。派委彭山、岷總理營務處。公與營官講求堅壘浚壕之法。濠深丈有五尺。躬親巡視量度。雖風雪不避也。是月。公弟國潢、國荃遷葬星岡。王太夫人於大界新塋。江西巡撫着齡公調任廣東。公乃作畢君殉難碑記。刻石立於景德鎮。畢剛毅公陣亡之處。是歲。和春、秦奏劾德興阿罷職。江北、大營不復置師。詔和春兼轄之。周武壯公天培陣亡於浦口。勝保丁憂。陳請回京穿孝。以袁甲三爲欽差大臣。與南河總督庚長督辦軍務。攻克臨淮關。袁公駐守之。

〔庚申〕咸豐十年。公五十歲。正月。公在宿松大營。賊酋陳玉成大股。由安慶上犯小池驛。圍撲鮑超營甚急。公與胡公林翼調各營援之。飛札調蕭啓江一軍。馳回援皖。每遇寒風雨雪。沈霾陰噎之晨。則終日惶然。以前敵爲慮。二十五日。多隆阿鮑超大破賊於小池驛。二十六日。擊破賊壘七十餘座。克太湖潛山兩縣。城賊下竄。公叔父高軒公卒於家。蕭公啓江軍至長沙。駱公秉章派令援皖。公以陳逆敗退。皖軍解嚴。而蕭啓江一軍。疊奉旨令赴蜀。遂咨湖南止其前來。蕭公乃引軍由常德入川。是月。張公國樞攻克沿江賊壘。袁公甲三克鳳陽府城。而潁州府又爲賊所陷。石達開踞廣西之慶遠府。分擾湖南廣東邊境。二月初五日。聞高軒公訃。悲痛。目疾復劇。初六日。專摺奏謝年終恩賞。專差賣部監執照一百八十七張。歷年籌餉勸捐所餘者。具摺奏繳。附片報官軍大捷。擬分路進勦。目疾復發。又得臣叔父會驥雲病故之信。請假四十日。在營調理。初七日。公入宿松縣城。設次成服。設奠服衰。十有四日。公弟貞幹自太湖營來。就次成禮。官文、公、胡公林翼會奏小池驛大勝。克復太湖潛山兩縣。奉上諭。官文、胡林翼會國藩督師進勦。調度有方。著先行交部從優議敘。欽此。二十日。公改服還營。公每日黎明。卽出巡視營牆。按期閱視操練。雖羽檄交馳。而不廢書史。是月始輯錄經史百家雜鈔。以見古文源流。略師桐城姚氏

繇之意。而推廣之。李公續宜假滿到鄂。尋赴大營。張公國樞攻金陵。上下關賊壘。克之。皖南之賊。陷涇縣及廣德州。竄入浙江境。張公玉良由金陵大營。分兵援浙。二十七日。杭州省城陷。羅壯節公遵殿等死之。三月初一日。探明安慶城內賊蹤之強弱多寡。及城外賊壘拒守之形勢。定計攻之。初五日。李公續宜來見。籌度分兵進剿。議以公所部圍攻安慶。多隆阿公圍攻桐城。李公駐軍於青草壩。以爲援。鮑超傷病發。請假回籍。二十六日。公調所部吉字等營。拔赴安慶。是月。杭州將軍瑞昌公督駐防兵。堅守省城。賊攻之不下。提督張公玉良以援兵至。克復杭州省城。尋收復廣德州。賊竄陷建平。東壩。溧陽。糾皖南大股。萃於金陵。閏三月初五日。奏摺恭謝天恩。交部優敘。又奏景德鎮浮梁案內。保舉文員。邊部議分晰開單。聲明各員勞績一摺。十一日。會奏鄂皖軍情一摺。又奏保小池口擊破援賊。克復太湖。潛山三案出力員弁。開單請獎一摺。十四日。作何君殉難碑記。以立石於英山縣何文公殉難之處。二十二日。編經史百家古文雜鈔成。又約選四十八篇。以爲簡本。公寄書家中。以名其所居曰八本堂。其目曰讀書以訓詁爲本。詩文以聲調爲本。事親以得歡心爲本。養生以少惱怒爲本。立身以不妄語爲本。居家以不晏起爲本。居官以不要錢爲本。行軍以不擾民爲本。二十六日。李元度來見公。公派令綜理宿松大營營務處。二十七日。公弟國荃到營。公令督勇攻安慶。集賢關賊壘。左公宗棠自英山來見公。是月。賊攻陷江南大營。官軍潰走丹陽。張忠武公國樞陣亡。欽差大臣忠壯公和春受傷。卒於澨豐關。賊陷丹陽縣。攻常州府城。總督何桂清退走常熟。江浙戒嚴。詔令公傳旨。荆州將軍都興阿。馳赴江北。辦理軍務。四月。奉上諭。江浙安危。在於呼吸。會國藩現紮安慶。若與楊載福率領所部水陸各軍。迅由東流建德一帶。分勦蕪湖。並入寧境。以分賊勢。而顧蘇常。於東南大局。實有裨益。惟安慶賊勢頗衆。會國藩能否舍安慶而東下。著酌度情形。相機辦理。迅速奏聞。有人奏左宗棠熟悉形勢。運籌決策。所向克敵。現在賊勢披猖。東南蹂躪。請酌量任用等語。應否令左宗棠仍在湖南本籍。襄辦團練等事。抑或調赴該侍郎軍營。俾得盡其所長。以收得人之效。並着會國藩酌量辦理。欽此。初二日。羅壯節公靈柩。自浙歸宿松。公派隊迎護。尋與胡公林翼詣其家祭之。十三日。馳摺復奏。臣軍萬餘人。兵力單薄。若盡撤赴蕪湖。則桐城之師。不能獨立。左宗棠剛明耐苦。曉暢兵機。當此需才孔亟之時。無論何項差使。求明降諭。旨必能感激圖報。附片奏目疾未痊。肝氣復發。軍中又乏著名統將。擬調張運蘭一軍前來。以厚兵力。左公宗

崇留營中兩旬。昕夕縱談東南大局。謀所以補救之法。十八日。左公回鄉募勇。奉旨以四品京堂候補。襄辦軍務。二十日。公核定報銷稿案。賊攻陷常州府城。連陷蘇州省城。江蘇巡撫徐莊愨公有王死之奉。上諭。曾國藩規取安慶。頓兵堅城。即使安慶得手。而蘇常有失。亦屬得不償失。全局糜爛。補救更難。爲今之計。自以保衛蘇常爲第一要務。著官文曾國藩胡林翼熟商妥議。統籌全局等因。欽此。是時都中猶未聞蘇常已失。公接奉諭旨。咨商胡公林翼。稱蘇常業已失守。救援不及。據安慶各營。搜獲逆首陳玉成僞文。定於秋間。兩路大舉上犯湖北江西。欲合江西兩湖三省之力。防禦陳逆秋間大舉之狡謀。如能併力擊退。再行分兵駛赴下游。圖復蘇常也。又咨商江西湖南巡撫。賊由蘇州犯浙江。陷嘉興府。張玉良引兵退守杭州。奉旨。何桂清革職逮訊。以張玉良暫署欽差大臣。關防。總統江南諸軍。又奉上諭。曾國藩著先行賞加尙書銜。迅速馳往江蘇。署理兩江總督。欽此。又奉上諭。目下軍情緊急。曾國藩素顧大局。不避艱險。務當兼程前進。保衛蘇常。次第收復失陷地方。重整軍威。肅清醜類。朕實有厚望焉。欽此。是月。蕭壯節公翰慶奉調援浙。陣亡於湖州。蕭壯果公啓江卒於四川省城。胡公林翼奏請以左宗棠入蜀。接統湘軍。劉公長佑蔣公益澧克廣西慶遠府城。賊竄貴州境。五月初三日。拜摺恭謝天恩。署兩江總督。又馳摺復奏通籌全局。並辦理大概情形。奏稱。目下安慶一軍。已薄城下。關係淮南全局。卽爲克復金陵。張本。不可以遽撤。臣奉恩命。權制兩江。必須帶兵過江。駐紮南岸。以回吳會之人心。而壯徽寧之聲援。無論兵之多寡。將之強弱。職應南渡。不敢稍緩。擬於江之南岸。分兵三路。一由池州進規蕪湖。與楊載福彭玉麟水師。就近聯絡。一由祁門進圖懷陽。與張芾周天受等軍。就近聯絡。一分防廣信。以至衢州。與張玉良王有齡等軍。就近聯絡。臣函商官文胡林翼酌撥萬人。先帶起程。仍分遣員弁。回湘添募勁勇。趕赴行營。以資分撥。至於餉糈軍械。必以江西湖南爲根本。臣咨商兩省撫臣。竭兩月之力。辦江楚三省之防。布置漸定。然後可以言勦。又具摺奏請起用告養回籍道員沈葆楨。馳赴江西。仍辦廣信防務。附片奏陳察看海漕。兼保鹽場之利。又片奏請赦下湖南撫臣。迅催張運蘭一軍。取道江西至饒州一帶。聽候調遣。又奏委道員李元度馳赴湖南。另募平江新勇三千。與饒廷選之平江勇五營。合爲一軍。防勦廣信衢州一路。又片奏請設糧臺於江西。委江西藩司總辦。添委道府數員。幫同辦理。自咸豐三年。至十年五月。由臣分作三案。造冊報銷。自接受總督印務以後。卽由江西藩司報銷。以專責

成。而免牽混。另設江西通省牙釐局。遴委大員專管。此後江西錢漕。歸撫臣經收。以發本省兵勇之餉。牙釐歸臣經收。以發出境征兵之餉。疏入。奉上諭。會國藩奏統籌全局。並辦理大概情形。甚合機宜。即著照所擬辦理。胡林翼奏保之左宗棠一員。前已有旨。賞給四品京堂。令其襄辦會國藩軍務矣。欽此。又奉上諭。會國藩現署兩江總督軍務地方。均屬責無旁貸。所請調張運蘭一軍。本日已寄諭駱秉章。飭令該道。前赴該署督軍營。聽候調遣等因。欽此。公自奉到署兩江總督之旨。與胡公林翼函商兵餉大計。籌餉以江西爲本。籌兵以兩湖爲本。調餉起所部六千人。朱品隆唐義訓所領二千人。楊鎮魁所領千人。渡江而南。駐軍徽州之祁門。其圍攻安慶之師。堅壘不撤。攻勦之事。以公弟國荃任之。初六日。專弁遞萬壽賀摺。又專摺奏歷年軍需。支給官弁兵勇鹽糧等款。照例造冊分送部科核銷。自咸豐三年起。至六年十二月止。是爲報銷第一案。初九日。李元度回平江募勇。十五日。公登舟啓行。朱品隆等拔營。由陸路至華陽鎮渡江。期集於祁門。十六日。舟泊老洲頭。宿松紳民數千人。餞送於江干。十七日。馳奏欽奉諭旨。先行覆陳。並報起程日期一摺。又具摺奏預籌三支水師。俟皖南賊勢稍定。即行分途試辦。查淮揚場裏下河。產米最多。而鹽場爲大利所在。非於淮安急辦水師。造船購礮。實有岌岌不保之勢。欲克金陵。必先取蕪湖。欲取蕪湖。必於寧國另立一支水師。徧布固城南潯諸湖。與外江水師。爲夾攻之勢。蘇州既失。四面皆水。賊若阻河爲守。陸軍無進兵之路。欲攻蘇州。必於太湖另立一支水師。此三者皆目前之急務。如力不能兼。則先辦淮揚寧國二支。力仍不逮。則專辦淮揚一支。蘇省財賦之區。淪陷殆遍。若不設法保全。則東南之利盡失矣。附片奏保彭玉麟任事勇敢。勵志清苦。實有烈士之風。如須與辦水師。再行奏請簡派。湖南道員李瀚章廉正樸誠。遇事精核。請以道員改歸江西。遇缺簡用。與署藩司李桓會辦江西通省牙釐事務。又片請救下戶部。查明京倉米石存餘若干。咨行到臣。俾得斟酌緩急。設法籌辦。又奏調飭下游水師總兵吳全美李德麟所領師船。分扼狼山福山焦山瓜州一帶江面。與揚州陸軍聯絡。無任賊船得渡北岸。以保全裏下河爲主。又奏鄂省爲用兵之樞紐。據上游之形勢。全局攸關。一有疏虞。則南六省之奏報。不能達於京師矣。臣與都興阿分調數萬千人。撥餉數萬。湖北之力。甚形竭蹶。應請嗣後無再抽撥該省兵勇。俾官文胡林翼等。勉力支持。不蹈金陵覆轍。天下幸甚。二十日。李公瀚章赴江西辦理牙釐局。公行泊華陽鎮。彭公玉麟來見。二十一日。泊黃石磯。公弟國荃貞幹楊

公載福皆來見。公派委員弁察看皖南山路。二十三日。札江西糧臺支發銀數千兩。委守備成名標赴廣東購買洋礮。二十六日。飭諭巡捕門印簽押各員弁吏役。約以三條。一不許凌辱州縣。二不許收受銀禮。三不許薦引私人。凡六百餘言。二十七日。登陸行至東流。二十八日。至建德巡視普承堯營壘。接見各營哨官。是月。張玉良革職留營。以瑞昌公總統江南諸軍。江蘇巡撫薛煥駐上海。暫署兩江總督印務。松江府失守。官軍旋復之。六月初三日。公駐建德縣。馳摺奏安慶之圍。不可撤動。蓋取以上游制下游之勢。臣南岸一軍。先守徽寧要縣。暫不深入。庶免賊抄我後路之虞。至於地方公事。未可置爲緩圖。臣在皖南。駐紮行營。仍於安慶水次。設立老營。規模與行省衙署相似。歷年文卷。概存水次官署。委司道大員經管。其地方尋常事件。卽令代拆代行。緊要者。彙封送營核辦。此臣兼管地方。變通辦理之大概也。附片奏已革守備成名標請開復原官。又片奏水師各營。候補候選人員。請援照咸豐六年。奏准前案。各照升銜。給予封典。又片奏調四川萬縣知縣馮卓懷來營差委。又奏副將成發翔復姓歸宗一案。初四日。拔營啓行。初九日。途次奉到上諭。會國藩現已抽調兵勇萬人。由宿松進駐祁門。俟鮑超張運蘭李元度到後。卽行分路進兵。具見胸有成竹。謀定後戰。蘇省待援迫切。該署督惟當催令鮑超等迅速來營。會籌進剿。但能援師早到一日。卽早一日救民水火。實深殷盼。該督現統兵勇較單。未可輕率前進。宜加持重爲要。欽此。十一日。行抵祁門縣。各軍以次集。公調派擇要駐軍。十三日。派員專管地方案牘。其時文卷。日以繁多。迺仿照平時衙署章程。分別吏戶禮兵刑工六科。擇書吏收貯。彙歸安慶老營。十六日。奏報行抵祁門日期一摺。并奏陳鮑超張運蘭均難刻期至皖。左宗棠李元度新募之勇。則須七八月間。陸續前來。臣兵力過單。未敢輕進。又具摺奏稱楊載福彭玉麟本係臣之舊部。茲復奉旨歸臣調遣。自應欽遵辦理。惟軍情未可逸度。奏報不可太遲。楊載福統率水師。謀勇器識。度越諸將。所有江面戰守事宜。仍令該提督自行具奏。附片奏欽奉寄諭。徽寧等府本會國藩兼轄地方。該處軍務。卽由該署督督辦。自覺事權歸一。等因。臣查詢徽寧兩郡兵勇。不能得力。臣初到祁門。情形未熟。兵將未齊。未便接辦皖南軍務。張芾所部各軍。應暫由該副都御史統籌調度。是日又與官文公胡公林翼會奏。請令左宗棠督勇來皖一摺。維時張公芾在徽州被人糾劾。而左公宗棠會奉旨赴川省督辦軍務也。公治軍入載。轉戰兩湖江皖等省。與地方大吏。分主客之勢。至是兼任疆圉。百務填委。迺以安慶水次爲老

營設立行署。奏派大員總理地方文卷。札委銀錢所軍械所及發審所各員弁。刊發營制營規。訓飭各營將領士卒。刊發居官要語一編。訓飭僚吏。密札司道。舉劾屬員。札各營統領。舉劾營官哨弁。均得以密函上達。札飭道府州縣官。訪求地方利病。山川險要。留心所屬紳民之才俊。田野之樹畜。現前急應辦理事件。均用書函答覆。出示曉諭江南北士民。凡六條。其一禁官民奢侈之習。謂吳中民俗好筮。而遭禍之故。由於繁華。其二令紳民保舉人才。以兩江之才。足平兩江之亂。其三安插流徙。凡衣冠右族。經生大儒。與殉難死事之家。均令地方官加意存卹。貧乏者給予口食之資。其四求聞己過。凡己之過失。與軍中各弊端。許據實直告。其五旌表節義於行營。設立忠義局。委員採訪。詳覈事實。或由地方官彙報。或由該家屬親鄰徑稟。隨時彙案具奏。請建總祠總坊。其死事尤烈者。另建專祠專坊。以慰忠魂。而維風化。其六禁止辦團。軍興以來。各省各團練未聞守城殺賊之功。徒有斂費擾民之害。自後非其地。非其人。毋得擅自舉辦。其從前各處練丁。支領口糧者。概予裁撤。又出示曉諭軍營兵勇。嚴禁騷擾。三令五申。詞極剴切。接見守令各員。教之以廉靜爲體。以善聽斷爲用。雖軍事倥傯之時。而條理秩然不紊矣。二十日。公子紀澤來營省視。江蘇城邑。擾陷殆遍。避賊者羣集於上海。賊復陷松江。撲犯上海。薛公煥督官軍固守。賊之入浙江者。圍湖州。逼近杭州。分陷各屬城邑。皖南之賊。攻圍寧國甚急。官紳皆望公以赴軍援。公牘私函。至者日以十數。公以軍將未集。弗能遽進也。公之在營也。未明即起。黎明出巡營壘。閱操練。日中清釐文卷。接見賓僚。以其餘時。披覽書史。不使身心有頃刻之暇逸。嘗稱時局艱難。惟勞勤心力者。可以補救。前後數十年。治軍治官。雖嘗困苦危險之際。以至功名遂之時。不改其度焉。二十四日。奉上諭。兩江總督。着會國藩補授。並授爲欽差大臣。督辦江南軍務。欽此。七月初三日。馳奉諭旨。斟酌進兵。兼顧皖南軍務一摺。奏稱。臣自行抵祁門。後瑞昌王有齡迭次催臣援浙。張芾亦催撥兵赴援寧國。欽奉諭旨。飭臣斟酌辦理。臣以鮑超尙未旋鄂。張運蘭一軍。雖入江西境。又經撫臣毓科留防袁州。新軍未齊。統將未至。往返商辦。徒託空言。且待兵將齊集。察賊勢最重之處。疾趨而痛勦之。至徽寧兩處防軍。歷年取用浙餉。約計千萬。浙中恃爲長城。本省別無防守之師。一旦藩籬盡撤。任賊長驅。杭人慘遭浩劫。周天受張芾不能不任其咎。皖南地方遼闊。處處與江浙連毗。一片逆氛。幾無完土。惟係臣兼轄地方。自應力籌兼顧。如奉旨歸臣督辦。斷不能更顧浙江。又具摺奏保道員李鴻章。請簡授江

北地方實缺。與辦淮揚水師。附片奏江南河道總督奉諭旨裁撤。添設總兵一員。特保水師營官副將黃翼升請簡授淮揚鎮總兵一缺。又具摺奏湖南午江縣捐建忠義祠。彙祀陣亡員弁勇丁。請列入祀典。飭地方官春秋致祭。附片奏行營設忠義局。采訪江蘇安徽等省。歷年勦賊陣亡殉難官紳士女。隨時奏請。分別旌卹。茲以寧國縣殉難紳士程枚一家男女十人爲第一案。初七日。兵部火票。遞到補授總督諭旨。同日奉上諭。薛煥僻處海隅。兵力單弱。勦辦恐難辦得手。此時蘇常一帶。並無重兵攻勦。都與阿尙在英山駐紮。江北各軍。無人總統。深恐賊勢北趨。勦辦愈難措手。曾國藩現授爲欽差大臣。專權歸一。責無旁貸。大江南北。均應妥爲布置。着卽飛催左宗棠李元度鮑超張運蘭等到齊。由池州廣德分路進兵。規復蘇常。其江北一帶。尤爲緊要。應如何布置之處。並著先行籌畫。免至臨事周張。該大臣膺茲重任。務當統籌全局。迅掃逆氛。以副委任。欽此。初十日。置木匾於營門外。許軍民人等。投書言事。十二日。公拜發恭謝天恩一摺。奉硃批。脚數載軍營。歷練已深。惟不可師心自用。務期虛己用人。和衷共濟。但不可無定見耳。欽此。公又奏通籌全局一摺。奏稱。左宗棠李元度鮑超張運蘭均未到皖。頃聞竄杭之賊。回撲廣德州。城失守。寧國一城。羣賊環萃。勢孤援絕。目下皖南。危乎其危。臣軍調齊以後。須攻廣德。援寧國。不能繞越皖境。逕趨蘇常。上海嘉興相距愈遠。文報梗塞。實難兼顧。至江北軍務。迭奉諭旨。飭催都與阿馳赴揚州。迄今未能成行。以臣愚見。淮徐風氣剛勁。不患無可招之勇。但患無訓練之人。擬卽函商官文都與阿酌帶楚軍千人。先行馳往。到江北後。用楚軍之營制。練淮徐之勇丁。若得一二名將。出乎其閒。則兩淮之勁旅。不減三楚之聲威。臣力所能勉者。當勤懇以圖之。力所不逮。亦不敢欺飾。又奏保新授浙江溫處道李元度調補皖南道缺一摺。江浙賊氛大熾。紛紛請援於公。十四日。接奉派兵援勦寧國之旨。十五日。接奉由嚴州轉戰而東。赴援浙江之旨。十七日。接奉統帥南下。規復蘇常郡縣之旨。二十一日。接奉派兵救援浙省之旨。二十二日。馳奏覆陳四次諭旨一摺。奏稱。臣由皖南進兵。以急援寧國。急攻廣德爲要。力不能兼顧。則以專救寧國爲要。徽寧等屬。一片賊氛。皖南不安。臣軍且有岌岌不保之勢。何能屏蔽浙江。更何能規復蘇常。目下兵力未齊。上不能分聖主宵旰之憂。下不能慰蘇人雲霓之望。寸心負疚。惶悚無地。附片奏團練一事。實爲地方大弊。皖南嶺隘紛歧。若築礮設卡。尙可以資防守。在籍編修宋夢蘭衆論稱許。請賞加侍講銜。令其董勸紳民。興築礮堡。又片奏保安徽臬司

毛鶴賓堪勝江蘇藩司之任。又奏報江長貴收復廣德州城一摺。是日接奉上海危急。設法救援之旨。二十四日。張公運蘭到祁門營。二十八日。拔營由徽州旌德進解寧國。是月。薛公煥擊賊卻之。上海解嚴。張良玉攻嘉興不克。全軍敗潰。杭州戒嚴。賊陷金壇縣。周威毅公天孚等死之。賊殺戮極慘。京口將軍巴棟阿守鎮江府。派提督馮子材攻丹陽。八月初一日。公出至漁亭。巡視營壘。奉到上諭。張芾著卽來京。所有皖南軍務。統歸會國藩督辦。周天受著交會國藩參委。欽此。又奉上諭。薛煥片奏江南賊匪滋蔓難圖。惟以重兵直搗金陵。該逆必回顧根本等語。著會國藩體察情形。或卽先搗金陵。亦可牽制賊勢等因。欽此。公調派副將宋國永代領鮑超所部。彙字營一軍。進攻涇縣。以援寧國。李元度新募平江勇。行抵江西貴溪。公亟調來徽州會剿。初三日。馳奏張運蘭宋國永分路進兵日期一摺。附片奏上濟情形已鬆。臣軍未能卽圖金陵。又片奏杭城危急。浙省賊勢浩大。非數千人所能救全。必須左宗棠新軍到後。配足萬人。乃可赴杭援剿。駱秉章奉命督辦四川軍務。奏請左宗棠入蜀。湖南本省空虛。人心驚恐。左宗棠未克成行。懇恩敕令駱秉章暫緩入蜀。俾左宗棠星夜兼程來皖。合兩湖江西之全力。以救浙而攻蘇。或有補於萬一。初七日。李元度領軍到祁門。賊再陷廣德州。攻撲寧國府。初九日。朱威肅公景山陣亡。十二日。寧國府城失守。周忠壯公天受死之。於是周氏兄弟殉難者三人。十四日。李元度赴徽州。接辦防務。廿二日。鮑超到祁門。公飭令迅赴營中。公移駐祁門城北。廿三日。馳摺奏報援軍甫進。寧國府城被陷。徽州戒嚴。自請交部議處。鮑超遷延不如期抵營。請革去勇號。仍責令督軍進剿。道員廖士彥委解浙餉。聞警折回。以致寧國軍因飢敗潰。請卽革職。周天受捐軀殉節。查明另摺請卹。附片奏。歷陳身在皖南。心懸江浙。俟立腳稍穩。卽當分軍先趨蘇境。以符原議。又片奏。臣軍及皖南防軍。需餉甚鉅。所收江西牙釐。實多不敷。請旨飭江西每月撥解漕折銀五萬兩。以濟徽寧之防。陝西每月協解銀二萬兩。專發安慶一軍。三月之後。卽行截止。又以前奏奉到批諭。啓牖愚蒙。指示親切。附片覆陳。懷邊感激之忱。李元度率軍至徽州。賊以大股由績溪撲犯徽州。平江勇敗潰。原防官軍亦潰。廿五日。賊陷徽州府城。勢趨祁門。公飛調鮑超回軍漁亭。張運蘭回軍黟縣。以遏其鋒。左宗棠軍行抵南昌。公飛咨調赴樂平婺源之間。以防賊竄江西之路。是月。僧王軍敗於天津。都城戒嚴。勝保奏請飛召外援。鑾輿巡狩熱河。恭親王留守京師。九月初一日。公遣子紀澤赴安慶大營。由安慶回湘。爲書以訓之。初四日。李

公續宜率軍四營。至祁門。公聞都下之警。悲不自勝。初六日。馳摺奏稱。臣自恨軍威不振。甫接皖南防務。旬日之間。徽寧失陷。又聞夷氛內犯。憑陵郊甸。東望吳越。莫分聖主累歲之憂。北望襟陽。驚聞君父之變。且愧且憤。綉零如兩。應懇天恩。於臣與胡林翼二人中。飭派一人。帶兵北上。冀效尺寸之勞。稍雪敷天之憤。又奏報徽州失守一摺。自請交部議處。又咨呈恭親王文書一道。公與李公續宜籌商北援之舉。一切調度。李公留營旬日乃去。公又函致胡公林翼。作北援要議八條。尋以和議既成。奉上諭。皖南北均當吃緊之時。大臣等一經北上。難保逆匪不乘虛思竄。擾及完善之區。江西湖北均爲可慮。曾國藩與胡林翼均著毋庸來京。該大臣甫接皖南防務。連失兩郡。雖因餉絀兵單。究屬籌畫未密。著卽振作軍心。再接再厲。勿以一挫之後。卽損軍威。李元度謀勇兼優。此次失衄。殊屬可惜。人材難得。著卽迅速查明下落具奏。欽此。十六日。馳摺奏查明周天受殉節情形。請開復原官。從優賜卹。於寧國府建立專祠。周天受之胞弟周天培。周天孚。先後殉難。一門忠烈。請於四川本籍。建立三人祠宇。署皖南道福咸。寧國知府顏培文。宣城縣令王乃晉。副將朱景山。均請優卹。皖南道李元度。請革職拿問。徽州知府劉兆瓚等。請革職。陣亡同知童梅華。守備張斐文。二員請卹。附片奏請旨飭廣西藩司蔣益澧。率所部三千人。迅由江西。入皖會合左宗棠一軍。併力東征。又奏皖南北近日軍情賊勢一片。左公宗棠軍抵樂平縣。賊由安徽分股竄浙江。陷嚴州府城。十八日。接奉撥兵援救上海之旨。廿八日。接奉撥兵援救鎮江之旨。是月。賊攻撲鎮江府。巴棟阿馮子材拒卻之。都與阿公抵揚州。接辦江北軍務。十月初四日。馳奏統籌緩急機宜一摺。奏稱。臣處止左宗棠鮑超張運蘭三軍。尙爲得力。已有應接不暇之勢。皖南立腳未穩。於鎮江松江未能赴援也。附片奏報鮑超張運蘭會攻休寧縣勝仗。又片奏與辦淮揚水師。擬於上游先造戰船。請截留江西應解江北餉銀二萬兩。通融接濟。又摺奏查明江蘇金壇縣守城殉難官紳。總兵蕭知音。參將周天孚。知縣李准。紳董吳秉禮等七十三員。各開單請卹。於金壇縣建立總祠。彙祀各員。附片奏丹陽知縣方濬泰。陣亡請卹。又片奏請展緩江南江西各營將弁。舉劾年限。初九日。公出營至駱縣。查閱嶺路。十四日。祁門回營。十九日。賊由傘棧嶺竄入。駱縣失守。公飭祁門各營嚴守。二十日。鮑超張運蘭破賊於駱縣。賊退出嶺外。廣東韶州股匪竄入江西贛南。犯建昌。陷河口。連擄廣饒州各屬邑。左公宗棠軍至景德鎮。廿二日。分軍破賊於貴縣。克德興婺源二城。餘匪潰竄入浙境。廿六日。馳奏

休寧勝仗。歙縣克復一摺。隨摺奏保鮑超請加清字勇號。張運蘭請交部從優議敘。又保營官楊鎮魁。雲慶張玉田。余大勝。四員。附片奏鮑超營中副將宋國永。黃慶陳。由立請先拔補實缺。又奏已故統兵臬司蕭啓江。功績最多。懇恩賜諡。於湖南江西。建立專祠一摺。代奏新授淮揚鎮總兵黃翼升。謝恩一摺。附奏安徽學政邵亨豫。患病請開缺回籍一片。又奏參代理懷寧知縣莫祥芝一片。廿七日。左公宗棠到祁門營。與公商度軍事。留數日。回景德鎮。是月。張公玉夏克復嚴州府。多隆阿公大破賊於桐城。十一月初四日。賊陷建德縣。普承堯一軍敗潰。又陷東流縣。時譏借洋兵助勦金陵之賊。委洋商採米運天津。以代南漕。奉旨令公酌量具奏。初八日。公具摺覆陳。并陳明大西洋各國夷情。且云。款議雖成。中國豈可忘備。河道既改。海運豈可不行。日前借其力以助勦。濟運。得紓一時之憂。將來師其智以造礮製船。尤可期永遠之利。附片奏報建德失陷。及皖南北五日軍情。又片奏遵旨飭查安徽道員蕭盛遠。在和春軍營債事實蹟。請革職發往新疆。皖南鎮總兵陳大富。駐軍南陵縣。督率軍民。堅守數月。糧盡援絕。四面皆賊。楊公載福。率水師礮船。駛入魯港。破平賊壘。拔出陳大富全軍。及士民男婦十餘萬人。安置東流縣城。歡聲騰於江介。建德既陷。普承堯退走九江。賊分股一擾彭澤。湖口。都昌。一擾犯浮梁。鄱陽。景德鎮。彭公玉麟。以水師赴湖口。收集陸路潰勇。協守湖口。城得以完。十四日。分軍收復都昌。鄱陽。楊公載福。以水師收復東流。彭澤。左公宗棠。分軍收復浮梁。十七日。公派唐義訓一軍。克建德縣。公之接統徽防也。調取原防兵勇。以副將楊名聲領一軍。駐上溪口。副將王夢麟。程永年。領一軍。駐江灣。扼守東路。公調鮑超一軍。回祁門。賊撲陷上溪口。江灣各壘。兵勇潰退。公乃委提督江長貴。收集簡汰。以成一軍。十九日。北路之賊。踰嶺而入。廿日。鮑超回軍黟縣。與張運蘭軍合擊賊於盧村。大破之。是時皖南賊黨。分三大股。環繞祁門。欲以困公。一出祁門之西。至於景德鎮。一出祁門之東。陷婺源縣。復南竄玉山。一由祁門之北。越嶺南犯。直趨公營。盧村既捷。公乃調鮑超赴景德鎮。與左公宗棠合力堵勦。以保餉路。張公運蘭一軍。仍防黟縣。營其賊氛四逼。羽檄交馳。日不暇給。文報轉餉之路。幾於不通。旬有五日之間。危險萬狀。復值寒風陰雨。自治軍以來。以此時最爲棘迫之境矣。廿一日。雨霽。賊退出牟棧嶺外。軍心乃安。候選知府馮卓懷到營。公委令巡查皖南碉堡。廿八日。馳摺奏左宗棠一軍。在貴溪大捷。克德興婺源兩城。十日之內。轉戰三百餘里。實屬調度神速。將士用命。隨摺奏保王開化。楊昌濬。劉典等十

三員。又奏建德失守。旋經官軍克復。請將九江鎮總兵普承堯革職拿問。隨摺奏保唐義訓朱聲隆沈寶成黃惠清陳玉恆葉光岳六員。附片奏稱安慶合圍以來。江北則大戰於桐城。江南則鬪集於徽州。無非欲救援安慶。此次南岸之賊。分三大支。環繞祁門作大圍包抄之勢。欲斷臣之糧路。掣臣之軍勢。賊之狡謀。顯而易見。今西路大股未退。而各城均經收復。東路賊已南竄。北路之賊。曾受大挫。當不敢再來犯嶺。可望轉危爲安。此近日軍情之梗概。是月援賊至安慶。公弟國荃擊卻之。十二月十三日。具摺馳奏賊犯湖口。彭玉麟以水師保守。並派船克復都昌縣城。彭玉麟請旨交軍機處記名。遇有按察司缺出。請明簡放。隨摺奏保副將成發翔都司丁義方二員。陣亡勇弁李逢貴吳修霖請卹。又奏提臣楊載福水師。拔出南陵全軍。救全百姓十餘萬人。處之善地。楊載福出奇制勝。請賞賚荷包搬指等物。以示旌異。其出力將弁。由該提臣奏保。又奏官軍在贛縣廬村大捷。並迎勦小溪漁亭等處接仗情形一摺。又奏上溪口江灣兩處營盤失陷一摺。副將王夢麟程永年請革職。楊名聲已經參革。不准留營。另繕清單。開報上溪口江灣兩營陣亡員弁徐祚明等二十名。休寧黟縣陣亡傷亡將弁陳青雲等二十一名。水陸各營前後陣亡病故員弁張繼興等五十四名。請卹。附奏陳明皖南江西全局一片。前此賊氛環逼之時。有勸公移營江干。以與水師相附。或退入江西境。公雅不欲輕退。以播軍心。堅忍數十日。勢乃稍定。既而隆冬盛寒。各軍與賊相持。無大戰事。公自言精力漸衰。若不克自持者。然胸懷豁達。成敗生死。不復計較。故不生煩惱耳。浙江巡撫王公有齡奏調處州鎮總兵劉培元候選道金國琛赴浙差委。公奉寄諭。二十八日具摺覆奏劉培元現在湖南。能否赴浙。應由湖南撫臣酌核覆奏。金國琛現在安徽李續宜營中。綜理營務。不能馳赴浙江。又奏湖南官紳設立東征局。於本省釐捐之外。酌抽釐金。協濟皖南北兩軍之餉。凡鹽茶各商。抽收較多者。應仿照江西茶捐之例。給予獎敘。請飭部頒發執照。寄交湖南經收填用。附片奏湖南一省。向食淮鹽。自粵匪擾亂。運道梗塞。於是湖南盡食川私。本年川井被賊蹂躪。鹽價驟貴。臣在江西。曾奏借浙鹽抵餉。擬仿照成案。借運粵鹽。於湖南行銷。酌抽釐金。以抵淮課。猶不失爲兩江任內應籌之餉。請救下戶部。查照辦理。又奏請簡放九江鎮總兵一缺。又奏報近日江皖軍情一片。又奏桐城縣知縣杜滋銅陵縣知縣柴時霖開缺。改選教職一片。又奏臣駐祁門。距京較遠。部文到營太遲。諸多不便。應請飭下軍機處。凡遇臣處奏事。批摺發下之日。即將本日諭旨。隨同抄發。

又具摺奏采訪忠義第二案。官紳士民婦女共二百五十九名。附片奏報常州武進縣舉人趙起闔家男婦共三十二人。在常州府城殉難。陽湖縣職員曹禾守城傷亡。均請撫卹。并請建立趙起專祠。是爲第三案。是歲東南寇亂方劇。惟秦晉差安。其餘各行省征戰之事。紛不可紀。公職任崇高。控馭廣遠。章奏較多於前。嗣是循例奏案。不能悉紀矣。

〔辛酉〕咸豐十一年公五十一歲。正月。公在祁門營。初六日。賊由石埭縣分二股。一由大洪嶺竄入。一由大赤嶺竄入。直趨祁門。公老營單薄。人心震恐。居民驚走。初七日。提督江長貴擊賊於大洪嶺卻之。初八。公派唐義訓朱品隆出隊。擊賊於歷口破之。追勦出嶺。外城之內犯者殲焉。初九日。左公宗棠鮑公超合擊賊於洋塘大破之。賊竄屯下隅坂。鮑超引軍擊之。賊之在祁門東路者。竄擾江西之玉山鉛山。攻撲廣信府。內犯撫建之境。公札飭劉于濤防守撫州。黃鳴珂守建昌。魏喻義防守南昌省城。左公宗棠一軍。仍駐景德鎮。防勦婺源之賊。二十四日。馳奏左宗棠鮑超兩軍。扼守景德鎮。迭獲勝仗。會勦洋塘大捷一摺。又奏逆匪分犯大赤大洪二嶺。進撲祁門老營。官軍迎勦獲勝。追賊出嶺一摺。附單彙奏陣亡員弁周芸亭等三十六人請卹。附片奏報皖南江西賊勢軍情。又片奏請敕頒欽差大臣關防。并令箭旗牌等件。由江西遞至行營交領。二十六日。鮑超攻賊於黃麥鋪。左公宗棠分軍助勦。大破之。賊瀕江下竄。總兵陳大富收復建德縣。江西北路饒州九江境內肅清。是月公作解散歌一首。流布陷賊之境。於難民之久困賊中者。曲達其苦衷。士民讀之。莫不感泣。因此而自拔來歸者頗多。二月初八日。馳摺奏官軍擊賊黃麥鋪大捷。奏稱鮑超勇冠三軍。每戰必克。請以提督記名簡放。陣亡守備曹有餘請卹。附片奏逆匪李秀成一股。由廣信內犯。圍攻建昌府城。意圖竄江西腹地。陳玉成大股在皖北。亦須勁旅援勦。擬移駐東流建德。防堵下游池州各股。而抽出鮑超一軍。爲游擊之師。視其尤急者而應援之。是日具摺恭謝年終恩賞。初九日。張運蘭唐義訓朱品隆等。擊上溪口賊壘破之。進攻休寧。十一日收復休寧縣城。胡公林翼移營太湖。合圍安慶。賊酋陳玉成糾皖北大股犯霍山。總兵余際昌全軍敗績。賊遂陷英山縣。直趨湖北之蕪水。撲黃州府陷之。分陷德安隨州。武漢戒嚴。李公續宜奉旨授安徽巡撫。率軍回援鄂省。十七日。馳奏上溪口勝仗。克復休寧一摺。道員張運蘭請以按察使記名簡放。總兵朱品隆唐義訓請簡授實缺。并奏保葉光岳胡玉元朱聲隆李公選

馬志燧五員。附片奏報江楚軍情。江西撫州喫緊。省城震動。飛調鮑超一軍。由九江馳赴南昌。以固根本。臣因休寧新克徽州。可圖暫緩移營。仍駐徽境。當力攻徽郡。以通江浙之氣。而開米糧之路。二十三日。賊由樛根嶺竄入箬坑。撲副將沈寶成之營於歷口。其北路一股。由禾成嶺竄入。分擾各嶺路。二十四日。提督江長貴擊北路犯嶺之賊。卻之。二十五日。朱品隆援歷口。二十六日。會勦箬坑之賊。破之。左公宗棠由景德鎮移軍進勦婺源賊。分軍勦樂平竄賊。皆獲勝。賊大股繼至。左公駐軍樂平之境。三十日。賊竄陷景德鎮。總兵陳威肅公大奮陣亡。全軍挫潰。公所設轉運糧臺。在鎮德者。水師救護以免。是月。公於祁門修築碉堡。設局督工。公每日親出巡視。數旬而工畢。二月初三日。公由祁門拔營。初三日。駐休寧。調張運蘭唐義訓等軍九千人。集於休寧。分兩路進攻徽州。初五日。唐義訓軍進攻失利而潰。維時景鎮既失。祁縣休寧三縣四面皆賊。米糧接濟已斷。公軍有坐困之勢。公商之各軍統領營官。擬再力攻徽州。以圖克復。函致左公宗棠。鮑公超令其夾攻景鎮。十二日。公督各軍進攻徽州。不克。賊出迎戰。官軍敗退。夜還休寧。十三日。賊跟蹤來犯。公聞警憤甚。自書遺教二千餘言。寄家。誓有進而無退。諸將力勸公回祁門。公乃飭張運蘭朱品隆兩軍。堅守休寧。十八日。公回駐祁門。左公宗棠大破賊於范家村。駐軍於樂平縣。賊由景鎮來犯。左公迭擊破之。乘勝進勦。前後大獲大捷。計殺賊逾萬人。賊乃潰走。浮梁樂平一帶肅清。轉運道通。皖南軍氣稍伸矣。賊攻建昌撫州兩郡。皆堅守得完。賊乃西竄。陷吉安府。旋經官軍收復。二十日。賊陷瑞州府城而踞之。賊酋陳玉成由鄂竄皖。連陷黃梅宿松。以爲安慶城賊之援。二十三日。公亟調鮑超一軍。渡江援勦。多隆阿公截勦援賊於桐城懷南之境。大破之。賊悉竄踞集賢關。二十四日。奏報上月箬坑禾成嶺等處。擊賊勝仗一摺。又奏進攻徽州未能得手一摺。奏參營官總兵唐義訓副將沈寶成同知朱聲隆。其陣亡之副將葉光岳胡玉元千總梅魁員請卹。又奏報上月左宗棠一軍。分勦婺源樂平等處。先後接仗勝負情形一摺。陣亡游擊陳明南將弁陳石台趙玉蓮曾文清喻拔元陳正彪請卹。又奏報景德鎮失陷一摺。總兵陳大富力戰捐軀。請照總兵例。從優賜卹。并於南陵縣建立專祠。以表忠藎。而留遺愛。所部將弁田應科蕭傳科胡占鼇胡鳳雛熊定邦吳定魁羅廷材七員請卹。附片奏參婺源縣團紳余述祖黥縣知縣王峻婺源知縣申協煊均請革職。又片奏江皖軍情賊匪。約分四股。惟李秀成一股西竄。距祁門較遠。其三股環繞祁門。無日不戰。現已疊獲大勝。皖

南軍務日有起色。惟安慶官軍危急。已調派鮑超一軍馳援。臣亦即日拔營。移駐東流。就近調度。二十六日。公由祁門拔營。飭派張運蘭守休寧。朱品隆守祁門。江長貴沈寶成等分守嶺隘。暫輟進攻之謀。爲堅守之計。公自率親兵數百人以行。三十日。行抵建德縣。鮑超迎見。公。四月初一日。公行抵東流縣。按視鮑超霆字軍營。飭催渡江。會勘安慶援賊。初二日。馳奏左宗棠一軍大破賊於樂平。景德浮梁鄱陽等處。一律肅清。一摺。陣亡副將羅近秋。游擊史聿舟及其將弁李啓昭聶崇本張致和聶福申孫紹凱請卹。傷亡將弁趙克振周崇高楊清和請卹。隨摺保道員王開化知縣劉典二員。三品京堂左宗棠疊破巨股。振江皖之全局。勛績甚偉。御賞珍物。以示旌異。又附奏請將左宗棠改爲幫辦軍務。俾事權漸屬。儲爲大用。又附片奏移駐東流。援助江北。臣所統全軍。皆留徽州境內。布置防守。左宗棠一軍伺賊所向。跟蹤追剿。是日。又具摺彙保左宗棠一軍出力員弁。開單請獎。又具摺彙保鮑超一軍出力員弁。開單請獎。初四日。接奉欽差大臣關防。初七日。拜印開用。初八日。諭文案委員書吏。凡軍務地方公私函牘。分條呈送核閱。賊撲安慶官軍營。楊公載福派水師助守。多隆阿公連戰破賊。賊酋陳玉成遁走。其集賢關內賊壘十三座。公弟國荃掘長壕以困之。公弟貞幹移營菱湖以扼之。鮑公超率軍攻赤岡嶺賊壘。悍賊堅守不下。胡公林翼調副將成大吉一軍助剿。築礮台進逼賊營。日夜攻之。左公宗棠追擊賊於廣信府境。賊竄入浙江。陷金華府及所屬數城。瑞州踞賊分擾武寧義寧新靖安等縣。竄入湖北之境。五月初一日。鮑超成大吉合攻赤岡嶺賊壘破之。擒斬數千人。賊之由瑞州竄湖北者。分擾興國大冶通山崇陽等屬。初二日。胡公林翼調成大吉一軍。渡江剿之。鮑公超盡平赤岡嶺賊壘。擒斬賊目劉增琳。初三日。訊失律管營李金暘張光照於軍前斬之。徽州之賊犯傘棧嶺。竄陷黟縣。初五日。朱品隆江長貴等攻黟縣賊壘破之。收復縣城。初六日。張運蘭唐義訓等擊犯嶺之賊破之。初九日。諸軍進剿廬村賊壘破之。十三日。徽州之賊棄城遁去。十四日。張公運蘭率軍收復徽州府城。左公宗棠派軍擊敗竄賊於鄱陽縣。賊竄入浙境。胡公林翼自太湖拔營回鄂。省援剿。與公期相見於華陽鎮。公棹舟至香口候之。十五日。胡公來見。會議軍政。通籌大局。留三日。時胡公已病咯血。公則癘疾大作。如官京師時。十八日。馳奏鮑超成大吉圍攻赤岡嶺賊壘。悍賊悉數殲除。一摺。又隨摺奏保吳亮才周開錫。余大勝顏紹榮王衍慶李文益明吳伍華瀚曾昭仕蕭玉元十員。陣亡副將蘇文彪等三十二員。弁。開單請卹。又

奏江南鄉試。未能舉行一摺。附奏李金賜張光照正法一片。又奏代遞前太常卿唐鑑遺摺。奏請特旨賜諡。奉旨予諡確慎。十九日。公還東流營。左公宗棠由廣信回軍景德鎮。值池州之賊。竄陷建德縣。二十二日。左公分軍擊賊敗之。收復建德縣城。二十四日。札飭鮑超引軍擊勦宿松黃梅之賊。二十八日。馳奏逆匪犯嶺。襲陷黟縣。旋經官軍克復。并乘勝仗復徽州一摺。隨摺奏保臬司張運蘭總兵唐義訓副將婁雲慶知縣朱聲隆。奏參將袁國祥黃朝陞均革職。不准留營。又奏遵旨酌保屠戮訓升署皖南鎮總兵。江西知府姚體備以道員歸於安徽補用。卽令署理皖南道缺。又奏提督楊載福請假四月。回籍省親一摺。附片奏參霆營將弁鄭陽和等。分別降革。又片奏飭水師營官陳金鼐赴南贛鎮總兵任。又片奏陳江楚皖三省賊勢軍情。安慶賊糧垂盡。必須力爭此城。而後大局有挽回之望。金陵有恢復之期矣。六月初一日。公弟國荃攻菱湖兩岸賊壘。悉破平之。安慶城外賊營俱盡。福建汀洲股匪竄江西境。又將竄徽州。左公宗棠由景德鎮拔營赴婺源扼勦。賊犯祁門嶺路。朱品隆擊卻之。胡公林翼回駐武昌。派成大吉等擊賊破之。收復武昌所屬各城邑。初八日。奏水陸各軍陣亡病故員弁彙案請卹一摺。單開一百二十一員名。又奏皖南江西官軍克復黟縣建德等城。前後七案。出力員弁。開單彙保一摺。又具摺覆奏諭旨。飭令左宗棠一軍。應援浙江。臣查徽州一郡。羣賊環伺。防守爲難。景德鎮婺源縣皆皖浙扼要。戰守事宜。均賴左宗棠就近維持。該軍縱橫策應。七百餘里。以目下形勢而論。實不能分身赴浙。附片奏新授廣東按察使彭玉麟統帶水師。扼要駐守。暫難赴任。又片奏遵旨查參江西藩司張集馨革職。十三日。緝獲微防將弁黃勝林於軍前斬之。賊酋李秀成一股。擾逼南昌省城。公調鮑超一軍。渡江由九江進勦。十八日。馳奏欽奉諭旨。覆陳江西各路賊情。奏稱。江西之賊。凡五大股。其由皖境竄入者三股。惟李秀成一股。深入江西腹地。占踞瑞州。旁擾各屬。其由兩廣竄入者二股。五股之中。或分或合。頭緒迷離。并陳明斟酌緩急。調派援勦先後節次。以及飭調官軍籌防江西南路大略情形。附奏江楚皖三省戰守情形一片。又奏黃勝林正法一片。二十六日。左公宗棠分軍迎勦竄賊於德興縣境。破之。賊敗竄入浙境。七月初四日。江蘇巡撫薛煥委員賈送兩江總督關防。兩淮鹽政印信到營。初六日行禮拜印。公聞胡公林翼病甚劇。委弁至武昌饋藥。且問之。十一日。湖北官軍克復德安府城。賊酋陳玉成糾大股圍撲太湖縣。攻犯桐城圍師。多隆阿公擊卻之。十八日。馳奏彙報左宗棠一軍。五六兩月戰守

情形一摺。又奏覆陳恭親王奕訢等。奏請購買外洋船礮。實爲今日救時之急務。附奏請開現泊上海之輪船。由長江駛赴安慶。就近察看試用。令楚軍水師將弁預爲練習。俟明年購到洋船。庶收駕輕就熟之功。即與撫臣文報往來。數日可達。不致淹滯。請飭下江蘇撫臣薛煥。迅派幹員。押令上駛。以資演習。附片奏派委員弁。購買口外戰馬八百匹。請飭部查驗。免稅放行。又片奏五月由驛拜發摺片。逾期已久。未奉批諭。請查驛遞在何處沈失。照例辦理。又奏報江楚皖軍情一片。公弟國荃攻安慶城外石壘。盡拔之。賊以大股來撲營。公弟國荃堅守卻之。鮑公超軍渡九江進剿。賊退出瑞州。竄豐城。二十四日。鮑超引軍追擊於豐城西北岸。大破之。擒賊逾萬人。賊由撫州東竄。二十七日。公弟國荃擊援賊於城外。破走之。二十八日。專差奏報接印日期一摺。八月初一日。公弟國荃克安慶省城。賊黨殲焉。初二日。馳奏鮑超一軍。進援江西在豐城大獲勝仗一摺。奏稱。鮑超盛暑疊兵。所向克捷。立功最偉。請賞賚珍物。以示旌異。隨摺保朱國永。陳由立。黃慶等十七員。陣亡知州袁觀。豐都司殷雄。亮請卹。附片奏報克復安慶省城大概情形。稱楚軍圍攻安慶。已逾兩年。畫謀決策。皆胡林翼一人所定。卒得克此堅城。殲除悍賊。臣卽日前往部署。其詳細情形。另由官文。胡林翼。李續宜會銜具奏。初三日。多隆阿公克復桐城縣。初五日。楊公載福派水師克復池州府城。楊公謁辭回籍。初七日。公舟抵安慶。初八日。公與公弟國荃。貞幹入安慶省城。巡視城垣。安撫士民。治行館廨。搜擒降賊之知縣孫潤。於軍前斬之。多隆阿公分軍克舒城。宿松。黃梅等縣。初十日。馳報水師克復池州。進攻銅陵一摺。附片奏各營欠餉過多。請旨飭江西每月撥解漕折銀五萬兩。籌清欠餉。并請江西停解各省協餉。所有地丁入款。漕折釐稅。先清本省守兵。及臣處征兵欠餉。以免決裂之患。是日接奉批摺。及贊襄政務王大臣咨文。驚聞七月十六日文宗顯皇帝龍馭上賓。公慟哭失聲。自以十餘年來受上知遇。值四方多難。聖心無日不在憂勤。惕厲之中。現值安慶克復。軍務方有轉機。不及以捷報博玉几末命之懽。尤爲感慟無已。十一日。湖北官軍克廣濟縣。旋收復蘄州。蘄水等城。十二日。水師進克銅陵縣。十七日。賊撲浙江嚴州。府城失守。十八日。接奉哀詔。乃設次於安慶城中。率文武員弁。成服哭臨三日。日三哭。鮑公超追賊至撫州。賊竄貴溪。雙港。湖坊。河口一帶。與閩廣股匪合併。其數猶衆。鮑公追剿。連戰破之。十三日。大破賊於雙港。平賊壘八十餘座。擒斬萬餘人。二十三日。克鉛山縣。追剿河口賊。悉潰竄浙境。江西全省肅清。二十四日。湖北官軍克復

黃州府城二十六日。胡文忠公林翼卒於武昌。公聞胡公之卒也。悲悼不已。謂胡公赤心以憂國家。小心以事友。生苦心以護諸將。天下寧復有似斯人者哉。二十七日。專弁賈奏恭慰大孝一摺。官文公奏請以李續宜署湖北巡撫。奉旨。朝授湖北巡撫彭公玉麟補授安徽巡撫。毛公鴻賓補授湖南巡撫。九月初二日。公弟國荃督軍循江北岸而下。派道員劉連捷等進軍廬江縣。總兵黃翼升以淮揚水師順流下駛。初九日。公馳摺奏鮑超一軍追勦江西股匪於湖坊河口等處。大獲勝仗。克復鉛山縣城。江西全省一律肅清。陣亡將弁王友得王友勝等十一名。請卹。隨摺保譚勝達明與李文益劉玉堂等十一員。附奏稱提督鮑超轉戰三省。風馳電掣。驍勇罕匹。請旨授提督。實缺。其部將宋國永陳由立黃慶雲雲慶張玉田等。請授總兵。實缺。以示獎勵。又奏臣移駐安慶省城。酌派司道大員。分任責成一摺。附片奏張運蘭奉旨補授福建按察使。例應赴任。該司帶勇徽州。防勦喫緊。無人可以接辦。請俟軍務稍平。再請陛見。又奏報孫潤正法一片。十六日。公弟國荃克泥汊口賊壘。十九日。克神塘河賊壘。官文公會奏安慶克復情形。奉上諭。會國藩調度有方。著加恩賞加太子少保銜。欽此。又奉上諭。官文等另片奏會國荃等。於圍攻安慶時。智勇兼施。道員會國荃著賞加布政使銜。以按察使記名。遇缺題奏。並加恩賞穿黃馬褂。以示優獎。候選訓導曾貞幹著免選本班。以同知直隸州知州儘先選用。並賞戴花翎。等因。欽此。又奉上諭。官文等奏請將殉難道員予諡等語。候選同知會國華前在三河殉難。今其兄會國藩其弟會國荃曾貞幹率師勦賊。克復安慶。一門忠義。深堪嘉尚。會國華著加恩予諡。以彰忠烈。欽此。二十日。公弟國荃克復無為州城。二十一日。公作勸誠淺語十六條。營官僚屬委員紳士各四條。二十二日。查閱城上防守兵勇。巡視城堞及城外營壘。二十三日。公弟國荃克運漕鎮。時外洋輪船。由上海駛至漢口者漸多。上下往來。一日千里。奸商往往僱民船載貨。繫於其後。拖帶以行。藉免課稅釐金。亦或藉以資賊。公咨行通商衙門。稱鹽茶為貨稅大宗。餉源所賴。請照會上海洋商。毋得攬帶民船貨物。壽州總督苗沛霖亦捻匪之黨。前歲與李世忠先後受撫。督師勝保公疊次奏保。補授四川北道。加布政使銜。李世忠升任江南提督。幫辦軍務。苗沛霖與在籍辦團之員外郎孫家泰等為仇。率其黨圍攻壽州。巡撫翁同書屢出諭之。苗沛霖不退。孫家泰自殺。苗沛霖攻陷壽州。袁公甲三派李世忠以兵擊之。詔命公移得勝之師。分討苗逆。二十九日。公弟國荃克東關賊壘。前後所克城鎮。派軍扼守。乃還安慶。是月浙江

之賊陷紹興處州二府城。其餘州縣屬邑蹂躪殆遍。十月初一日。公弟國荃還至安慶。商定增募湘勇。直搗金陵之計。湖北官軍克隨州城。初三日。頒發捐輸章程。札派委員。按實填給。札飭水師營官嚴拿游勇。出示撫卹殉難員紳家屬。被難流亡之士民。招集復業。清釐房屋爭訟。左公宗棠軍至廣信。公調鮑超一軍。回皖進軍青陽。調朱品隆唐義訓等軍。進勦石埭。規復寧國。初六日。接奉遺詔。設次大行禮。公弟國荃回湘增募湘勇六千人。初十日。彭公玉麟至安慶見公。彭公時奉安徽巡撫之命。具疏力辭。十四日。公具摺奏陳湖北撫臣胡林翼忠勤盡瘁。勦績最多。乞飭付國史館。查照施行。又馳摺奏陳水陸各軍。克復銅陵縣無爲州運漕鎮。并沿江要隘三處。隨摺奏保王明山黃翼升李朝斌等二十員。附片奏官軍攻克運漕以後。本可直搗金陵。惟深入腹地。人數單薄。應令會國荃添募湘勇六千。替出各城防守之師。進勦蕪和。與下游都興阿一軍聯絡勦辦。易於得勢。又奏保知府陳澆補安慶知府一摺。附片奏前辦皖南軍務張芾所有文卷簿領。均因微郡失陷。燬焚無存。請免造報。又片奏稱軍興十載。凡地方查辦餽賊資糧。受僞官職之案。徒爲奸吏訟棍訛索之柄。江西新建縣候選通判程迪昌疊次以餽賊重罰。誣告善長。請將程迪昌革職嚴辦。以儆刁風。又片奏皖南督辦團練在籍編修宋夢蘭知府張韶南與其子張同生均以積勞病故。請卹。浙江杭州兩郡。久被賊撲。岌岌不保。公咨商左公宗棠由廣信進軍衢州。以援浙江。調派張運蘭防徽之軍。及江西東境防守之師。均歸左公調遣。江蘇官紳棲葆上海縣。十六日。錢公鼎銘由輪船赴安慶見公。痛哭以請援師。且呈遞官紳公函。謂吳中有可乘之機。而不能持久者三端。曰鄉團。曰槍船。曰內應。是也。有僅完之士而不能持久者三城。曰鎮江。曰湖州。曰上海。是也。公見而悲之。時餉乏兵單。楚軍無可分撥。與李公鴻章籌議。期以來年二月濟師。十八日。奉上諭。欽差大臣兩江總督曾國藩著統轄江蘇安徽江西三省。並浙江全省軍務。所有四省巡撫提鎮以下各官。悉歸節制。浙江軍務著杭州將軍瑞昌幫辦。並著曾國藩速飭太常寺卿左宗棠馳赴浙江。勦辦賊匪。浙省提鎮以下各官。均歸左宗棠調遣。欽此。廿六日。專摺奏謝天恩。加官保銜。又代奏弟國荃貞幹謝恩晉秩一摺。又奏謝弟國華奉旨予諡恩一摺。是月湖北全境肅清。官文調派成大吉等軍。進駐霍山。以規壽州。劉公蓉奉旨署四川布政使。十一月初二日。公巡視安慶城垣。度地擬建試院一區。令上下江分闈鄉試。既而不果。多隆阿公收復三河鎮。十四日。奉到節制四省之旨。旋又奉酌保封疆將帥人

才之旨。又奉察看江蘇巡撫薛煥浙江巡撫王有齡。能否勝任。據實具奏之旨。公自以任大責重。值時事之艱難。彌覺惕然。不敢自安。十六日。馳摺奏左宗棠一軍。定議援浙。請將廣信徽饒諸軍。統歸節制。以一事權。該處一切軍情。即由左宗棠自行奏報。以昭迅速。信郡錢糧。河口景德鎮釐金撥歸左宗棠經收。其防勦進止。均由左宗棠相機辦理。又具摺奏保江西署藩司李桓留辦糧臺。并請敕交軍機處記名。以藩臬兩司。遇缺題奏。又具摺奏保道員萬啓琛署理安徽按察使。李榕署理江寧鹽運道。均隨同駐安慶。籌辦善後事宜。附片奏新授衢州鎮總兵朱品隆現調令會合鮑超一軍。進攻寧國。暫難赴任。又片奏兩江政務殷繁。現在行營。一無成案可查。所有刑名錢穀。及鹽員武職補缺。與夫地方尋常事件。應由臣衙門循例具題者。請暫行展緩。抑或改題爲奏。以歸簡易。是日又奏水陸各軍。攻克赤岡嶺菱湖賊壘。克復安慶省城三案出力員弁。開單請獎一摺。又奏克復休寧黟縣及徽州府城迭次攻勦各嶺隘出力員弁。開單請獎一摺。又奏行營探訪忠義第四案。附片奏刑部主事柯鉞之母柯王氏罵賊殉難。請建專坊。又查明柯氏一門殉節者五名。列爲第五案。廿五日。奏辭節制浙省一摺。奏稱。臣自受任兩江以來。祁門被困。僅得自全。至於安慶之克。悉賴鄂軍之功。胡林翼籌畫於前。多隆阿苦戰於後。非臣所能爲力。江蘇乃職分應辦之事。尙無一兵一卒。達於蘇境。乃蒙寵遇非常。節制四省。自顧菲材。實難勝任。左宗棠之才。實可獨當一面。卽無庸臣兼統浙省。苟思慮所能及。才力所能及。必與左宗棠合謀。不分畛域。不必有節制之名。而後盡心於浙事也。又具摺覆奏查明蘇浙兩省撫臣優劣情形。奏參候補鹽運使金安清請卽革職。附片奏保道員李鴻章可膺封疆重寄。現在臣處統帶水軍。請酌撥陸軍數千人。駛赴下游。以資援勦。又奏保提督鮑超功績甚偉。請賞穿黃馬褂。以示旌異。又片奏常州一郡。士尙節義。多可用之材。就所知者。奏保周騰虎劉翰清趙烈文方駿讓華衡芳徐壽六員名。請量材錄用。二十六日。奉到大行頒賞遺念衣物一箱。公拜領行禮謝恩。浙江賊攻援徽州。左公宗棠派軍援勦。公調朱品隆回軍援徽。是月賊攻杭州。張忠壯公玉良陣亡。賊分陷寧波台州府城。二十八日。杭州省城失守。將軍忠壯公瑞昌巡撫王壯愨公有齡總兵饒莊勇公廷選等皆死之。十二月。鮑公超擊賊於青陽。屢破之。進攻縣城未克。張公運蘭病甚回籍。其弟運桂代領其軍守徽州。朱品隆軍至。擊賊破之。十七日。奏遵旨籌商苗沛霖勦撫情形。該練逆跡昭彰。斷無再撫之理。現在楚軍勦辦粵逆。難以同時并舉。

須俟廬州克復，與袁甲三臨淮之師聯絡，乃可併力勦苗。彭玉麟素統水師，舍舟登陸，用違其長。且江面太長，照料非易。該撫兩次奏請開缺，應請旨另簡大員接任皖撫，俾得仍領水師於南北大局。兩有裨益。又奉遵旨派員赴上海押解革員何桂清來京候訊一片。又奏保飽超一軍，攻克安慶賊壘，肅清江西全省。兩案出力員弁，開單請獎一摺。十八日恭接登極詔書，是日馳奏浙江省城失守，徽郡被圍，臣奉援浙之命，赴救莫及，請交部嚴加議處，謹通籌全局，力圖補救之策，分條陳奏。其一浙江全省惟衢州一府可以圖存。左宗棠一軍先固江皖邊防，再籌進剿。其一請救下閩浙督臣慶端速派勁旅，嚴守浦城，俾賊不得由閩境而竄江西。其一請調廣西臬司蔣益澧帶領所部五六千人，迅赴浙江，隨同左宗棠籌辦防剿。道員陳士杰帶勇馳赴安慶，聽候調遣，並請將該二員補授蘇浙兩省實缺。其一請飭下閩廣督撫粵海關閩海關，按月籌撥銀十三萬兩，解交左宗棠軍營。附片奏團練一法，不能勦大股悍賊，請將江南團練大臣裁撤。又奏左宗棠一軍，樂平建德德興等處大捷，出力員弁，彙案請獎。附片奏布政使銜道員王開化積勞病故，請照布政使例，從優賜卹予諡。奉旨予諡貞介。廿六日，朱品隆等大破賊於徽州。左宗棠分軍破賊於大鱗嶺，徽境肅清。廿七日，奉到上諭，會國藩奏奉節制江浙等四省軍務，瀝陳懇辭一摺，謙卑遜順，具見惻忱，真摯。有古大臣之風，深堪嘉尚。江浙軍情，本屬相關一氣，凡該大臣思慮所到，諒無不協力同心，相資爲理，節制一事，該大臣其毋再回辭。欽此。侍郎宋公晉奏請飭川楚江皖五省，會勦粵逆，詔公與官文李續宜等詳議。公會奏稱，增兵必先增餉，非一省所能爲力，必須二省合力籌畫，衆志一心，方於事有實濟。現擬咨商各省，詳議餉數。是月公弟國荃奉旨加頭品頂戴。左宗棠授浙江巡撫，沈公葆楨授江西巡撫。李公桓授江西藩司，暫署巡撫。彭公玉麟以兵部侍郎候補，詔公酌保皖撫。安慶復後，公至省城，招徠士人，修葺敬敷書院，每月按期課試，校閱文藝。其優等者捐廉以獎之。於嘉惠寒士之中，寓識拔才俊之意。皖中人士，莫不感奮。公札司道設立善後局，安撫遺黎，清查保甲，刊發勸誠淺語十六條，分設穀米局，及製造火藥子彈各局。委員司之。又設內軍械所，製造洋槍洋礮，廣儲軍實。委員查核民田，分別荒熟，其已墾者，暫令按畝出錢四百文，以助軍餉。謂之抵徵。除日派志義局委員協同街團紳士施放錢米，以賑飢民。是歲親王僧格林沁與兵部侍郎勝保，皆奉旨授欽差大臣督師勦辦捻匪。內閣學士毛昶熙，奉旨督辦河南團練。提督馮子材辦鎮江軍務。

以副都統魁玉爲幫辦。

〔壬戌〕同治元年公五十二歲。正月。公在安慶。初一日。內閣奉上諭。會國藩著以兩江總督協辦大學士。欽此。又奉上諭。會國藩節制四省。昨又簡授協辦大學士。其敷乃腹心。弼予郵治。朕實有厚望焉。欽此。初十日。奏遵旨保皖撫大員一摺。又奏再陳下情。力辭節制浙江軍務一摺。奏稱。圖浙之道。必以廣信爲運糧之路。以嚴州爲進兵之路。現在惟左宗棠一軍。不能遽遠於嚴州。必俟蔣益澧之軍到衢州後。兩路并進。取勢漸緊。所以規復浙江者在此。所以保全江西皖南者亦在此。至臣所以再三瀆陳。不願節制四省者。非因浙事旣已決裂。有緩過之意。實因權位太重。恐開斯世爭權競勢之風。兼防他日外重內輕之漸。機括甚微。關係甚大。又奏遵旨保李朝斌喻俊明任星元丁泗濱四員。堪勝水師總兵之任。附片奏前浙江巡撫羅遵殿殉難杭州。已奉旨賜卹。旋經御史高延祐奏請撤銷卹典。苛刻之論。殊欠公允。仍請從優賜卹。並將隨同殉難之家屬等。一併旌卹。以彰忠節。王有齡以糧盡援絕。見危授命。其在任時。疊被參劾。難保無身後之訾議。請併從優議卹。以爲死勤事者勸。又片奏參安徽巡撫翁同書釀成苗逆之禍。兩次失守。不能殉節。請旨革職議罪。不敢因其門第鼎盛。稍爲遷就。又片奏報徽郡解圍。及各路軍情大概。是日奉到諭旨。李續宜調安徽巡撫。嚴樹森調湖北巡撫。欽頌令箭令旗。王命旗牌到營。十一日。批飭江西藩司停止州縣官吏攤捐之案。公謂地方親民之官。必須令其曠然無累。然後可責之以民事。不至苛取民財也。十七日。公奉到協辦大學士之旨。公弟國荃授浙江臬司。蔣益澧授浙江藩司。陳士杰授江蘇臬司。鮑超補浙江提督。并賞穿黃馬褂。從公奏也。二十日。左公宗棠擊賊於開化縣破之。廿一日。新購外洋火輪船一號。到安慶。公出閱視。派委員弁管帶。配以兵勇。於江面試行之。二十二日。拜摺恭謝天恩。附片奏稱。自去秋以來。臣一門之內。疊荷殊恩。感激之餘。繼以悚懼。懇求於金陵未克以前。不再加恩於臣家。庶可以全保功名。永承聖眷。前此疊奉保薦督撫大員之旨。封疆將帥。乃朝廷舉措之大權。豈敢干預。疆臣既有征伐之權。不當分黜陟之柄。不特臣一人爲然。凡爲督撫者。辦之不可不早。所以預防朝廷外重內輕之漸。杜植私樹黨之端。庶幾紀綱彌肅。朝廷愈尊矣。賊竄吳淞口。上海告急。鎮江府城屢被賊攻撲。又分股渡江。撲江浦浦口官軍營盤。趙公景賢堅守湖州府城。一年有餘。糧援俱斷。文報亦梗阻不得達。大學士翁心存奏蘇中士民結團抗賊。望會國藩

如慈父母。請飭該大臣派一素能辦賊之員。馳往援剿。待耶宋公晉條陳恢復江南大略。是時公屢奉籌畫全局。派援江浙之旨。於是日具奏。浙江之事。必俟左宗棠進攻嚴州。蔣益澧進駐衢州。鮑超進抵寧國。乃有下手之處。江蘇之事。必先清江北。次及江南。現催李鴻章募練淮勇。酌撥湘軍數營。駛赴下游。察看情形。再行馳奏。江浙賊勢浩大。盡占富庶之區。財力與人數。皆數倍於官軍。不敢過求速效。以至債事。又奏徽州官軍勝仗。郡城解圍一摺。隨摺保奏張運桂朱品隆唐義訓劉松山等十三員。陣亡參將黃和鳴等四十六員名。開單請卹。附片奏鮑超一軍。在青陽大獲勝仗。陣亡弁勇唐泗和等十一名。請卹。又片奏江蘇紳士讓借洋兵勦賊之事。上海本通商之地。借洋兵以保守人財則可。若令勦蘇州金陵以代復中國之疆土則不可。蓋以現在攻城。我無助勦之師。將來克城。又無防守之師。專恃洋兵。洋人或見德而生怨望。不可不慮。維時上海已設立公局。會同洋人防守。公咨商巡撫薛煥言蘇州金陵非可以倖襲而得。目前權宜之計。祇可借兵防守。滬城尤當坦然以至誠相與。不可稍涉猜疑。致礙大局。其函致蘇州紳士言之尤詳。二十四日。奉到上諭。賊氛日熾。而該大臣等章奏寥寥。南服惓懷。殊深慮念。其如何通籌全局。緩急兼權。著將一切機宜。隨時馳奏。以紓懸系。欽此。李公鴻章募淮勇到安慶。公爲定營伍之法。器械之用。薪糧之數。悉仿湘勇章程。亦用楚軍營規以訓練之。撥湘勇數營以助之。兩省將卒。若出於一家然。公所教也。二十六日。咨嶺江各省督撫。商定長江通商章程。飭善後局查辦保甲。公自核定門牌團冊之式。是月。李世忠收復江浦浦口二城。賊糾捻匪圍攻潁州府。勝保公督師援之。彭公玉麟補授兵部右侍郎。二月初二日。公拜摺奏稱忝列戎行。奏報甚少。其所以輕便自守者。蓋亦有故。一則不輕奏謠傳之言。一則不輕奏未定之事。一則不輕奏預計之說。因此三者。遂蹈遲延之咎。臣忝非常之遇。倚任彌重。延訪更殷。嗣後擬十日奏事一次。有急則加班具奏。所有諭旨垂詢之件。謹分條詳覆。其一計會國荃楊載福張運蘭回營之期。其一李鴻章募練淮勇。二月可以成軍。擬由陸路馳至鎮江。其一攻搗金陵。必先清後路。腳跟已穩。而後可進。其一李續宜籌派兵勇。援潁州之路。其一左宗棠援剿浙江。必從衢嚴之間下手。其一上海籌借洋兵。以助防守之法。凡六條。飭安慶藩司核定釐金卡局支發軍餉坐支章程。初四日。閱視李公鴻章營勇及所部程學啟滕嗣林等營。多隆阿公大破賊於廬州城外。盡平賊壘。初五日。奉到上諭。會國藩奏瀝陳下情。遵保皖撫名摺片。具見該大臣慮遠思

深。實深嘉悅。已明白宣示。仍令該大臣節制四省矣。朝廷黜陟之權。原非封疆大吏所能侵越。第該大臣簡任綸扉。督師江皖。膺股肱心膂之寄。朕疇咨岳牧。延訪甚殷。該大臣圖濟時艱。不當稍有避嫌之見。方合古大臣知無不言之義。嗣後如有所知。不妨密封呈進。以備採擇。欽此。同日奉上諭。會國藩曉暢戎機。公忠體國。中外咸知。當此江浙軍務吃緊。生民塗炭。若非會國藩之惻忱真摯。豈能輕假事權。所有江南安徽江西浙江四省巡撫提鎮以下。仍歸會國藩節制。該大臣務當以軍務爲重。力圖攻勦。以拯生民於水火之中。毋許再行回辭。欽此。時又因三載考績之典。奉上諭。大學士湖廣總督官文久任封圻。虛懷延攬。於吏治戎行。均能整飭。著交部從優議敘。協辦大學士兩江總督會國藩督軍辦賊。勤勞罔懈。於江皖地方。疊復名城。戰功卓著。甄拔所部將士。賢能稱職。前經簡授協辦大學士。仍著交部從優議敘。四川總督駱秉章前在湖南巡撫任內。勦辦賊匪。不分畛域。其所薦舉人才。尤爲有裨實用。自升任川督。辦理丹稜股匪。及整頓地方。均能妥速。著加太子少保銜。用示嘉獎。欽此。初六日。專弁入都。寶奏登極賀表。初八日。張公運蘭假滿還皖。初九日。李公績宜抵任來見。公派提督成大吉等進軍回始。以援潁州。左公宗棠擊賊於遂安縣。大破之。克復縣城。初十日。拜發萬壽賀摺。專弁入都。又代弟國荃奏謝天恩一摺。十二日。馳摺奏安徽省城。仍宜設於安慶。前此改建廬州。係一時權宜之計。安慶處濱江適中之地。足資控制。至大江水師戰船千餘號。墩位三千餘尊。逐年積累。成此巨觀。事定之後。江防仍不宜撤。請專設長江水師提督一員。添設將弁額缺若干。均候吏兵二部詳覈議奏。附片奏江海雖同一水面。而風濤氣候各殊。楚軍水勇戰船。但可用之江面。未可以出重洋。臣料粵匪所掠江楚之民。必無遠能縱橫海上之事。又附片奏浙江衢河淺窄。不宜水軍。江西劉于濤水師專防本省汛地。不能赴浙援勦。又奏采訪忠義第六案。附片奏委員王敬恩請卹。十五日。公弟國荃至安慶。所募湘勇以次集於皖境。是日奉到上諭。江蘇布政使。著會國荃補授。卽赴新任。毋庸來京請訓。該員係兩江總督會國藩之弟。例應迴避。惟該省軍務緊要。需員辦理。著毋庸迴避。以資得力。欽此。又以李元度補授浙江臬司。二十二日。拜摺代弟國荃奏謝天恩。附片奏參新授臬司李元度請革職。交左宗棠差遣。又具摺分條奏報軍情。其一。會國荃募勇。已經抵皖。飭令進勦蕪縣含山一帶。其一。李鴻章帶勇擬會同會國荃攻勦江邊一路。衝過賊中。以期速達鎮江。其一。多隆阿進攻廬郡大捷。傷亡亦多。需稍事休息。再圖進取。其

一李績宜派兵援潁情形。由李績宜具奏。其一左宗棠勦賊大捷。克遂安城。由左宗棠詳報。其一援浙之軍。必須蔣益豐到後。乃能合力兜勦。其一湖州孤懸賊中。無路赴援。惟聞城中糴米。足支數月。或可保全。其一徽州解圍後。改令朱品隆接防郡城。派張運蘭老湘營爲游擊之師。其一上海有高橋蕭塘之捷。當可保全。馮子材仍守鎮江。凡九條。公出城巡閱新到之湘勇七營。二十四日。公弟國荃啓行。督軍沿江岸進勦。李公鴻章成軍八千人。擬潁江而下。傍賊壘衝過。以援鎮江。計未決。二十八日。上海官紳錢公鼎銘等籌銀十八萬兩。僱洋人輪船七號。駛赴安慶。以迎李公鴻章之師。定以三次載赴上海。是月。上海官紳借洋兵。連破賊於浦東。賊少卻。勝保公督兵援潁州解圍。三月初一日。札調張運蘭扼婺源白沙關。以防賊竄江西之路。初七日。鮑公超擊援賊於青陽城外。破之。初八日。李公鴻章領所部勇第一起三千人。由安慶附輪舟啓行赴滬。公拜摺奏謝京察從優議敘。又馳報李鴻章一軍改由輪船赴滬。啓程日期一摺。又馳摺奏稱東南寇氛。蔓延日久。生靈之塗炭深矣。臣受命兩年。無一兵達於蘇境。無一旅進攻寧國。左宗棠苦戰衢嚴。獨任其難。不克分兵往助。趙景賢困守湖州。堅貞蓋世。不克設法往援。徒有兼轄之名。並無統籌之實。倘蒙聖恩收回成命。俾臣稍釋神魂之震懼。尤感聖慈之曲盡矣。又查廣東一省。財力殷富。爲東南之冠。請特派大員。馳赴廣東辦理釐金。專供蘇浙皖三省之餉。附片奏浙江殉難提督饒廷選。請於廣信府建立專祠。又附片奏報各路軍情。又片奏新授河南歸德鎮總兵蕭孚泗。現在會國荃軍營。隨同進勦。記名總兵陳由立。經河南撫臣奏調。現在鮑超軍營。該二員仍留原營。均未便飭赴河南。十三日。公弟貞幹破賊於荻港。蕪縣三山夾等處。賊壘皆平。十四日。李公鴻章所部勇第二起。由安慶啓行。公派黃翼升附輪船赴上海。察看下游地勢賊情。李公績宜赴六安州督師。以規頹壽。十五日。公弟國荃破賊於望城岡。十六日。鮑公超克復青陽縣城。十八日。公弟國荃破賊於銅城關。十九日。克雍家鎮賊壘。二十日。克葉縣。舍山二城。二十一日。公弟貞幹克復繁昌縣城。二十二日。公弟國荃克復和州城。鮑公超連克石埭太平二縣城。左公宗棠勦賊於江山常山之境。連戰破之。二十三日。公弟國荃攻克裕溪口。二十四日。攻克西梁山。沿江北岸賊壘悉破。平之。公馳摺奏報青陽克復。隨摺奏保婁雲慶馮標等二十七員。陣亡將弁羅春鵬李遇春等十七員名。開單請卹。附片奏水陸各軍。破賊於荻港蕪縣三山等處。一律肅清。陣亡將弁劉照志王虞廷劉華泗三名請卹。又

片陳報皖浙各路軍情。又具摺覆奏江浙紳士請借洋兵。規復蘇常各屬城邑。臣謬膺重寄。治軍無狀。致使蘇省士民。迫於水深火熱之中。爲此不擇之呼籲。此皆臣之咎也。以目前之賊勢。度臣處之兵力。縱使洋人轉戰內地。實無大枝勁旅。與之會剿。尤爲可愧。請飭下總理衙門。照會洋人。定議於先。或不至責怨於後。又奏擬結普承堯罪名一摺。二十七日。公弟貞幹破賊於魯港。二十八日。鮑公超克復涇縣。公札鮑魁超派兵援湖州。三十日。公弟貞幹克復南陵縣城。李公鴻章全軍抵上海。奉旨署理江蘇巡撫薛煥授通商大臣。專辦中外交涉事件。詔以副都御史晏端書赴廣東辦理釐金稅務。是月。金陵賊黨渡江北竄。都與阿等軍擊破之。維時公統制各軍。公弟國荃循江北岸。至於和州。公弟貞幹循江南岸。至於南陵。彭公玉麟派水軍中江而下。助勦兩岸。是爲直搗金陵之師。李公鴻章領湘淮陸勇。佐以黃翼升淮揚水軍。突過賊境。是爲援勦蘇滬之師。大江以北。多隆阿公爲圍攻廬州之師。李公續宜有派員潁州之師。大江以南。鮑公超爲進攻寧國之師。張公運蘭等爲防勦徽州之師。左公宗棠爲規復全浙之師。十道並出。皆受成於公。公建節於安慶。居中控馭。廣轄數千里。此外如袁公甲三及李世忠淮上之師。都與阿公防江北之師。馮子材魁玉守鎮江之師。或不出自楚軍。或不歸公節制。均奉旨統籌兼顧。軍書輻湊。英彥風驅。上而朝端倚畀之隆。下而薄海想望之切。洵千載一時矣。四月初二日。張公運蘭等軍。克旌德縣城。初四日。公馳摺奏水陸各軍。克復北岸巢縣含山和州三城。奪銅城關雍家鎮裕溪口西梁山四要隘。隨摺奏保會止明黃潤昌等七員。附片奏報南陵克復。統計沿江兩岸。克城池九座。關隘五處。并報廬州寧國湖州等處軍情。又馳摺奏鮑超一軍。連破賊壘。克復石埭太平涇縣三城。陣亡將弁劉蘭桂等二十四員名。請卹。又奏遵查閩浙總督慶端事蹟一摺。初五日。水師進攻金柱關。初六日。公出閣湘勇操演。初七日。巡視穀米局火藥局。十五日。馳摺奏水陸各軍。會克魯港。陸師攻克南陵縣城。彭玉麟馳赴下游銅陵西梁山一帶。察看進兵形勢。又奏報徽州防軍。克復旌德縣城一摺。又奏江南鄉試。現難舉行。仍請展緩酌辦一摺。附片請開復余述祖革職處分。多隆阿公攻克廬州府城。賊潰走壽州。多公追擊大破之。賊首陳玉成自投壽州。苗帥霖縛獻勝保公軍前斬之。二十日。公弟國荃引軍渡江南岸。會合水陸各軍。克太平府城。二十一日。攻克金柱關東梁山賊寨。二十二日。

克復蕪湖縣城。水師進攻江岸賊壘。下抵大勝關。公核定賑廠章程。給與飢民錢米。毋或不均。出示曉諭城廂內外居民。綏輯約束。李公鴻章會洋兵收復青浦奉賢二城。三十日。奉到上諭。該大臣調度有方。深堪嘉尚。曾國荃等宣力戎行。連克要隘。洵足以褫賊魄而快人心。若不量予恩施。將何以昭激勸。頭品頂戴江蘇布政使曾國荃。著交部從優議敘。候選同知直隸州知州曾貞幹。著賞給迅勇巴圖魯名號。以示鼓勵。朝廷賞功罰罪。一秉大公。非獨有厚於該大臣也。該大臣惟嘗督飭曾國荃等乘勝進攻。盡殲醜類。同膺懋賞。毋再固辭。欽此。是月都興阿公軍破賊於揚州。李世忠逃擊竄賊。破之。江北肅清。浙江官軍收復台州府城。上海洋兵由海道收復寧波府城。浙東之賊少衰。皖北之賊。由河南竄入陝西境。陝中亂作。回民交訌。詔多隆阿移軍入秦。公與官文商留多公。部將石清吉等十營。防守廬州。五月初三日。公馳摺奏報水陸各軍。克復太平城蕪湖縣城。金柱關東梁山要隘。開單奏保王明山李成謀李朝斌等二十七員。附片奏保道員黃冕李瀚章趙煥聯等九員。前往廣東隨同晏端書辦理分卡。抽收釐金。又附片覆奏奉旨籌議江蘇巡撫宜駐鎮江。居適中之地。扼形勝之區。責成新任巡撫李鴻章辦理。又片奏結莫祥芝參案。留營差委。是日又具密摺覆陳勝保袁甲三辦理軍務優劣情形。請責成李續宜專辦安徽軍務。其時曾奉密諭。飭公籌議也。湖州失守。趙忠節公景賢被執不屈。其後死於蘇州。公弟國荃攻克大勝關稜陵關三汊河賊壘。會合水師。攻克頭關江心洲蒲包洲賊壘。遂進軍金陵城外。駐營雨花臺。初四日。鮑公超擊賊於寒亭管家橋等處。大破之。初五日。核減江西丁漕規費。永定章程。初十日。核定皖南茶引捐釐章程。出示曉諭茶商。期歸畫一。十三日。課試在皖委員。公弟國荃破賊於六郎橋。十五日。鮑公超破賊於抱龍岡。越敬亭山進攻寧國府。十七日。馳摺奏官軍水陸並進。迭復稜秣關江心洲等要隘六處。官軍駐金陵之雨花臺。附片奏報浙江徽寧等處軍情。並稱曾國荃軍進逼金陵。屯紮南面一隅。洪逆見憤不驚。無懼之意。此時宜以全力會辦江南先復財賦之區。則各處可以次期辦矣。又奏特參私行遠颺之將領。以肅軍紀。一摺。鮑超所部營官陳由立余大勝鄭陽和均保至總鎮。任意遠颺。請將該員等革職。并請赦下湖南撫臣。派員押回皖南原營。通諭各路軍營。不准輒留投效將弁。以懲跋扈之風。杜效尤之漸。附片密陳軍營積習。設法懲究。請將分統龔營宋國永授以總官實缺。又片奏查覆孺子材所部兵勇滋事情形。十九日。馳摺奏鮑超一軍。進攻寧郡。破賊於寒亭管

家橋等處。逆壘悉平。陣亡將弁鄧永福等十八員名請卹。附片奏准揚鎮總兵黃翼升統帶水師戰船。於本月十二日。駛過金陵。前赴鎮江上海一帶。請令其接署江南水師提督員缺。節制松滬各軍。又片參奏江西河口釐務委員向紹先弊混巧取。請即革職。又奏邊查克復沿江兩岸城隘。出力員弁六案。併保開單請獎一摺。二十日。出示曉諭江西通省軍民。札飭各府州縣。永定徵收丁漕畫一章程。二十三日。楊公載福假備回營。至安慶見公。尋出視水師於金陵。李世忠降衆幾數萬人。不領官餉。專兩淮鹽利。委員至安慶請餉。公籌撥軍火銀米以給之。世忠感悅。二十八日。拜發萬壽賀摺。又專奏代弟國荃貞幹恭謝天恩一摺。是月。李公鴻章收復南匯縣川沙廳。賊大股犯青浦嘉定。洋兵敗退。上海戒嚴。李公鴻章擊賊於虹橋大破之。松江圍解。滬防亦解嚴。李公屢奉移駐鎮江之旨。至是以上海軍務吃緊。遂奏請直攻蘇州。不復移軍矣。六月初三日。公與彭公玉麟修元臣余忠宣公墓。工畢詣墓前致祭。時皖省印委各務。懸缺以待人。乏員差委。公定以每日接見州縣佐雜三人。與之久談。而訓之以吏治。西洋兵既爲賊所敗。遂有調印度兵來滬大舉會剿之說。公接總理衙門咨文。深恐江浙士民。大遭蹂躪。慨然憂之。初六日。具摺覆奏。請勿裁撤南洋通商大臣之缺。改爲長江通商大臣。專辦瀕江四省中外交涉事件。所有廣東閩浙三省。卽由監督道員經理。又奏揀員署理安徽各府州縣之缺。開單呈覽。並附片奏稱安徽地方漸次克復。急須講求吏治。請救下吏部。於本年新進士拔貢兩班。掣籤分發之時。皖省多分十數員。庶幾正途較盛。氣象一新。又片奏上海賊氛四偃。李鴻章不能移駐鎮江。多隆阿統軍入陝。不克會剿金陵。并附陳鮑超曾國荃兩軍大概情形。又片奏新授甘肅臬司劉于溍在江西本省防務緊要。暫難赴任。又奏報江西紳商捐餉開單請獎一摺。公弟國荃擊援賊卻之。初十日。金陵大營營官張壯勇公勝祿擊賊陣亡。十五日。鮑公超攻克寧國府城。賊目洪容海以寧國縣城歸順。鮑公撫納之。因其衆收復廣德州城。公飭鮑超選留降衆二千人。其餘設法遣散。十六日。金陵賊大股撲營。公弟國荃擊退之。公咨覆總理衙門。力陳借印度兵助剿之爲害。宜設辭以謝之。二十二日。具摺奏稱洋人有另調印度兵來。秋間大舉之說。臣以此事函商左宗棠李鴻章二人。皆稱洋人未必果有其事。然既有所聞。宜由總理衙門。與在京公使。查詢確實。然後申大義以謝之。陳利害以勸之。如其不見聽。則須申明前議。進攻無助。勤之師。克城無防守之卒。吾方以全力與粵匪相持。不宜再樹大敵。惟當以謙退忠告。相

與不事猜疑。免生枝節。庶有忍有濟也。附片奏報寧國克復。及各路軍情。又片奏浙江失守。降賊之員林福祥劉齊昇米與朝請由左宗棠訊明正法。又片奏提督江長貴請假回籍葬親。所部各營暫令唐義訓兼轄。酌量遣散。以節餉需。又奏采訪忠義第七案一摺。附片奏陽湖休寧等縣紳士楊錫嘉汪念祖胡澤順等殉難情形。彙入第七案。分別請賜旌卹。是月。公次子紀鴻以縣試案首入學。七月初二日。馳摺奏金陵陸軍屢卻悍賊。陣亡總兵張勝祿請從優議卹。將弁劉永祥鄧蘭亭二員請卹。又奏飽超一軍圍攻寧國。克復府城詳細情形。出力員弁開單請獎。陣亡將弁馬勝奎楚訓武等十二員名請卹。附片奏賊目洪容海投誠。酌籌招納。又具摺奏查明江西被害州縣。蠲免錢糧分數。附片奏請恩旨豁免江西各州縣。歷年攤捐之款。俾州縣無賠累之虞。而民間無科勒之苦。吏治可臻上理。又附奏奉諭旨。擇保西北各省藩臬人員一片。又請展緩江南江西三省軍政一片。初四日。查閱輪船機器。初六日。李公續宜聞訃丁憂。公兼署安徽巡撫印務。李公以所部成大吉蕭慶衍蔣凝學毛有銘等軍。歸公調度。初十日。公馳摺奏安徽撫臣李續宜聞訃丁憂。請按照胡林翼丁憂之例。賞假數月。仍令回皖督理撫篆。附片奏報近日軍情梗概。又奏采訪忠義第八案。又奏請展緩江南武闡鄉試。又片奏楊載福更名岳斌。夏秋之間。暑雨失時。疾疫大作。各路軍營。多染疾病。皖南諸軍爲最甚。死亡甚多。浙江大營次之。金陵大營亦染疫病。皆暫事歇息。未遑攻勦也。十七日。左公宗棠擊賊於油埠破之。袁公甲三告病卸任。奉旨授李續宜爲欽差大臣。督辦安徽全省軍務。二十一日。公具摺代李續宜奏陳請假回籍治喪。仍請仿胡林翼之例。又請袁甲三暫緩交卸督師之任。附片奏接奉寄諭。飭查軍情。奏報袁甲三李續宜駐紮之處。路近而較速。臣奏報往返。取道湖北河南。道梗而較遲。茲聞呈前三次拜發摺片。以備查核。有無疎失之處。并陳明各路軍營疾病過多。未能進勦情形。袁公甲三委員押解已革鹽運使金安清等至安慶歸公訊辦。其李世忠全軍。歸公節制調遣。李公續宜奏報丁憂之疏未入。接奉督師之旨。李公病已逾月矣。是月奉上諭。該撫現丁母憂。著即在軍營穿孝。改爲署理巡撫。毋庸賞假回籍。欽此。又奉上諭。欽差大臣科爾沁博多勒噶臺親王僧格林沁著統轄山東河南全省軍務。並調度直隸山西兩省防兵。所有勦匪事宜。即著會商欽差大臣李續宜妥爲籌辦。等因。欽此。又奉上諭。勝保著以欽差大臣督辦陝西軍務。欽此。於是多隆阿公一軍。有旨令公酌量調度江北裏下河一帶。鎮江馮子材一軍。皆有旨

令公統籌兼顧矣。李公鴻章克復青浦城。分軍會洋兵渡海入浙江境。收復餘姚縣。蔣公益禮領湘勇五千人。由長沙啓行。取道江西以赴浙。八月初二日。出示諭鄉民捕蝗。初三日。李公續宜至安慶。苗帥霖退出壽州城。及正陽關。李公續宜派蔣凝學引軍入守壽州。蕭慶衍守霍邱縣。成大吉。毛有銘兩軍分守三河尖及固始縣。總兵王載勳留守六安州城。而自扶病回省城。見公商奏。力請回籍。擒匪犯潁州境。各軍連擊破之。十二日。馳奏疊奉諭旨。分條覆陳一摺。其一多隆阿一軍。援秦之局。中變回鄂。營駐紮南陽一帶。鄂豫秦三省交匯之處。爲游擊之師。其一裏下河之防。請責成都與阿嚴密防堵。現商令楊岳斌親赴下游。察看布置。又擬趕造太湖水師戰船。防勦蘇松。騰出黃翼升水軍。專防淮揚。以符原議。其一李世忠軍衆五六萬人。據有城池。自爲風氣。淮准鹽釐金之厚。勢難繩以法律。且其擊退賊股。功未可沒。擬姑循其舊。不設機心。不禁遏其利。不拒絕其求。但不甚資其力。亦不輕調其兵。暗銷其予智自雄之氣。將來或不至於決裂。其一李鴻章不能離滬。移駐鎮江。應責成馮子材耐苦堅守。不作出勦之計。凡四條。附片奏稱。曾國荃飽超左宗棠各營。皆因患病者多。未能攻勦。李續宜患病未痊。繼以衰毀。肌肉全瘦。若不令離營回籍。恐難速痊。是以該撫自奏陳情。未便勒阻。又奏籌辦廣德州受降事宜一摺。供容海降衆數萬。但令選留三千人。編立五營。餘皆資遣回籍。請給供容海游擊虛銜。其部下頭目等。請分別給予頂戴。附片奏豫省派員招募湘勇一節。請停止以節糜費。又片請旨飭江西循照前案。按月撥解漕折銀四萬兩。協濟徵餉需。又奏採訪忠義第九案。附奏烈婦焦王氏等稟案請旌一片。李公續宜陳情疏入。奉旨賞假百日。回籍假滿。仍出督師。以唐訓方署理安徽巡撫。袁公甲三仍留督防臨淮。廣德州降衆叛亂。供容海率其黨一萬人。自拔奔回寧國。二十九日。公馳奏遵旨查覆湖北撫臣嚴樹森被參各款一摺。附奏遵旨查覆江蘇巡撫薛煥被參各款一片。又因何桂清遠訊時。呈出司道公稟。請退守蘇州一節。奉旨飭將薛煥查文經等查明參辦。公具摺奏稱督撫權重。由來已久。司道以下。承迎風旨。不敢違拒。若此類者。無庸深究。疆吏以城守爲大節。不當以僚屬一言爲進止。大臣以心跡定罪狀。不必以公稟有無爲權衡。附片奏廣德州降衆復叛。現籌辦理情形。賊之大股。將併竄皖南。而鮑超張運蘭朱品隆等軍疾疫大作。張運桂已病故。左宗棠軍病者過半。曾國荃金陵營中染病者亦逾萬數。深恐羸卒不足以當強寇。皆由臣以菲材。妄竊高位。上千鬼神之譴。莫救厄運之災。中夜以思。

不勝焦灼。公每日以吏事軍事餉事文事分條分時以次清理。定爲日課。是月賊犯上海。李公鴻章力戰。破賊於七寶街。洋兵克慈谿縣。浙江官軍收復處州府。左公宗棠擊賊於龍游縣。大破之。閏八月初四日。定江西釐局章程。是時釐金收數漸減。公札飭各卡局委員比較每月收數。以增減爲優劣。十一日。葬柘城儒士方東樹戴鈞衡蘇厚子等六人。皆因亂未葬者。并爲立石。以表其墓。十二日。馳摺奏唐訓方暫署皖撫。仍應駐紮臨淮。接統袁甲三一軍。使楚皖官軍聯爲一氣。附片奏陳大江以南。疾疫盛行。寧國境內最甚。金陵徽州衢州次之。水師及上海蕪湖各軍。亦皆厲疫繁興。死亡相繼。鮑超一軍。死者數千。其猛將如黃慶伍華瀚等。先後物故。鮑超張運蘭楊岳斌皆染病甚重。皖南道姚禮備營務處甘晉則一病不起。天降大戾。近世罕聞。惡耗頻來。心膽俱碎。若被賊匪撲犯。戰守俱無把握。甚至欲逃走以待再振而不可得。臣自度薄德菲材。不足以挽厄運而支危局。請旨簡派在京親信大臣。馳赴江南。分重大之責任。挽艱難之氣數。庶幾補救於萬一。臣斷不敢稍存推諉。致誤戎機。奉上諭。朝廷信用楚軍。以會國藩忠勇發於至誠。推心置腹。倚以挽救東南全局。自諸軍進逼金陵。逆匪老巢。已成阱檻。惟以艱難時會。誠不易得。歷經寄諭。總以毋徒求效旦夕。惟當立足不敗之地。以俟可乘之機。矧茲疾疫繁興。各軍將士疫病之餘。詎忍重加督責。該大臣惟宜愈矢忠誠。拊循加意。使軍心益固。沴氣潛除。各營病疫將士。其各傳旨。優加存問。本應明降旨慰勞。誠以事關軍務。或恐人心疑懼。奸宄從而生心。賊人轉益張其兇餓。我國家深仁厚澤。二百餘年。當此艱危時勢。又益以疾疫流行。將士摧折。深虞墮士氣而長寇氣。此無可如何之事。非該大臣一人之咎。意者朝廷政事。多所闕失。足以上干天和。惟當齋心默禱。以祈全消沴戾。我君臣當痛自刻責。實力實心。勉圖覆救之方。爲民請命。以冀天心轉移。事機就至。天災流行。必無偏及。各營將士。既當其厄。賊中亦豈能獨無傳染。該大臣鬱憤之餘。未遑探詢。刻下在京。固無可簡派之人。環顧中外。才力氣量如會國藩者。一時亦實難其選。該大臣素嘗學問。時勢艱難。尤當任以毅力。矢以小心。仍不容一息稍懈也。欽此。公接奉此旨。讀之泣下。十七日。專差奏皖南加廣學額中額一摺。請獎徽州捐生一摺。報銷淮北課鹽一摺。二十日。蘇州賊大股援金陵。圍撲官軍營盤。賊結壘二百餘座。日夜環攻。弟國荃力戰禦之。鮑公超軍挫於新河莊。賊犯寧國府。鮑公入城拒守。二十三日。李公續宜啓行回籍。唐公訓方到任。二十四日。拜發萬壽賀摺。二十七日。馳摺奏陳皖北一帶。楚軍單

譚不能分撥李續宜所部將領五人才位相將難相統馭。並陳明苗沛霖詭譎多端，不易言撫，惟赦其罪而不貸其力，猶不失爲中策。附片奏報金陵寧國兩處軍營被賊大股撲犯，將領士卒皆爲病所苦，防守尙無把握。總由微臣德薄位尊，莫挽厄運之故，憂惶無已。又片奏臣軍前調黑龍江馬隊三百餘員名，隨同轉戰，屢有功績。因土水不宜抱病者多，應資遣回旗以資休息。是月蔣公益體軍至浙江，克復壽昌縣城。九月初一日，安徽藩司馬新貽奉旨暫統臨淮官軍。初六日，寧國縣城失守。十二日，公馳奏彙報各路軍情一摺。兩花臺營壘，賊以大股百道環攻。此金陵之可慮也。寧國之賊，欲由間道上犯江西。此寧國之可慮也。小丹陽之賊，由東壩拖過戰船，時圖出江。衝斷江中糧路。此水師之可慮也。河南捻匪竄擾鄂境，有取道皖北，回援金陵之說。而皖北各城空虛，深恐逆蹤闖入。此皖北之可慮也。現在調派各軍，移緩就急，力圖挽救。惟皖北地廣兵單，現調提督成大吉一軍，由三河尖馳赴英霍，相機防剿，仍請敕下多隆阿迅速東還，駐軍舒桐，兼顧皖鄂兩省。大局幸甚。附片奏報寧國縣城失守。徽州旌德兩城，首當其衝。唐義訓守徽州，朱品隆守旌德，兩處兵力皆單，未知能堅守否。又片奏江西省釐務數月以來，解數寥寥。藩司李桓總辦糧臺，兼管釐局，總理不善，已添委甘肅臬司劉千禧訪察商情，暑鹽道孫長絨專司月報，整頓積弊。臣統軍過多，欠餉太久，徒受攬江右利權之名，究無濟蘇皖飢軍之實。不能不力圖補救之法。又片奏查明葉湖水師營官黃國堯於咸豐八年，在廬郡陣亡情形，請從優議卹。時賊船過東壩者，分布回城南瀟諸湖，欲衝出大江。楊公岳斌力疾扼守金柱關。公派陸軍數營，往助防守。金陵之賊，環兩花臺官軍營盤，日夜猛攻，挾西洋開花礮，自空中擊下，呼聲動地。公弟國荃督軍苦守不退，面受槍子傷，血流交頤，仍裹劍巡營，以安衆心。公弟貞幹駐營江干，力戰以通饒運。大營軍火，賴以接濟。與賊相持兼旬。初五日，擊賊破之。十二日，擊賊又破之。攻撲之勢稍衰，都興阿派兵千八百人，渡江助守。公念湘軍疾疫之餘，繼以大股逼犯，恐局勢決裂。日夕旁皇，寢不安席者數旬。而江西協餉多掣肘。公益憂之。十四日，公作三字箴，其清箴字曰：「名利兩淡，寡欲清心。一介不苟，鬼伏神欽。」慎字箴曰：「戰戰兢兢，死而後已。行有不得，反求諸己。」勤字箴曰：「手眼俱到，心力交瘁。困知勉行，夜以繼日。」公言此十二語，當守以終身。遇大憂患大拂逆之時，庶以此免於尤悔耳。十八日，水陸軍合擊賊於金柱關，大破之。二十一日，連擊破之。燬賊船幾盡。金陵之賊，開地道用火藥轟官軍壘壁。公弟

國荃力戰拒破之。令軍士於營內掘隧以迎之。賊不得逞。李世忠攻賊於九嶽州。稟請分兵援金陵。公批札止之。二十七日。馳奏彙報軍情一摺。金陵寧國蕪湖金柱關戰守大概。并陳明調度各軍。有與前奏不符者。視乎各路緩急之形。又奏採訪忠義第十案。附片奏宿州二郎山練總馬維敏喬元功結寨禦賊。爲賊攻陷。殉難者二千餘人。請照陣亡例。賜卹建祠。以獎忠節。又奏績溪縣孝烈婦胡程氏請旌一片。是月。李公鴻章克嘉定縣城。賊復犯青浦。李公大破賊於四江口。滬防肅清。賊攻鎮江。馮子材破賊於湯岡。多隆阿公督師入陝西。十月初五日。公弟國荃擊賊大破之。俘斬數萬。自閏月二十日以後。賊三十餘萬。圍撲營盤。百計攻轟。公弟國荃苦守四十六日。至是大捷。賊乃解圍竄江北。十一日。唐公訓方啓行赴臨淮關。袁公甲三回籍。十二日。公馳摺奏水陸官軍迭獲勝仗。力保蕪湖金柱關要隘。賊舟存留無幾。江介肅清。陣亡副將郭明鼐請照提督例議卹。將弁供得勝王明元請卹。又摺奏毛有銘一軍。在潁州西路。迭破捻圩。毀其老巢。仍回駐皖豫邊境。奏片附報金陵撲營之賊解退。蕪湖等處地方穩固。前奏可慮者四端。今三患稍舒。所慮專在寧國一路。若能支持一月。新募之勇漸集。或能力遏凶氛。是日又具摺奏保鮑超一軍。疊克青陽石埭等四城。出力員弁。開單請獎。又奏保曾國荃一軍。疊克太平蕪湖等各城隘。出力員弁。開單請獎。附片奏稱案保所開之員。有隨後病故者。不及查核扣除。俾逝者得獎。榮以飾終。生者亦觀感而圖報矣。鮑公超軍在寧國府。賊擾灣沚。斷其糧路。公派陸軍。由繁昌南陵護陸運以接濟之。賊攻旌德縣。公咨商左公宗棠調所部王文瑞一軍援旌德。十七日。賊大股攻撲九嶽洲。李世忠之營。旋渡江北。竄十八日。張公運蘭離營至安慶。見公。公令其買舟回籍養病。其所部老湘營。以總兵易開俊劉松山分領之。朱品隆等軍。破賊於旌德。十九日。賊解圍去。湘軍在壽州正陽防守者。時爲苗練所殺害。僧王督師河南。奏請撫苗以勦擒。苗帥霖上書僧王。極詆楚軍之失。公察苗帥霖有意挑釁。恐其阻壞大局也。又因皖北兵單。賊方北竄。調蔣凝學一軍。移營而南。毛有銘蕭慶衍等軍。皆移駐廬州之境。以避苗練。卽以防皖境也。二十七日。馳摺奏縷陳金陵官軍苦守四十六日。力戰解圍情形。道員劉連捷等七十三員。開單請獎。陣亡副將倪桂等二百七員名。開單請卹。附片奏金陵援賊雖退。傷亡將卒太多。寧國旌德兩城。同時吃緊。自金陵以至徽州。地段太長。賊股太衆。皖北十餘城。毫無準備。實恐潰敗決裂。盡隳前功。仍請簡派大臣會辦諸務。稍分巨之責任。又片奏湘勇駐防壽州正

陽關。與苗練逼處太近。挑釁搆怨。無有已時。刻下皖北正苦無調防之兵。擬撤出蔣凝學一軍。並抽撥霍邱防兵。調防廬州巢縣一帶。以遂苗練之私。以成僧格林沁急欲滅擒之志。是日又具摺奏保張運蘭朱品隆唐義訓戰守徽州軍中出力員弁。開單請獎。附片奏張運蘭因病回籍。請旨將易開俊劉松山二員。授總兵實缺。以資鈐束。又奏請展緩三省查閱營伍之期。一摺。賊之竄江北者。攻和州。陷含山縣。二十八日。陷巢縣。公廼札留新募淮勇之張樹聲吳長慶等軍。暫緩赴滬。分守無爲州及廬江縣。調霍邱之湘軍。駐防舒城。公弟國荃派軍回守西梁山。尋又派軍紮東梁山。廣德州賊竄陷績溪縣。是月。浙東官軍。會洋兵收復上虞嵞縣新昌三城。江忠濬補授安徽布政使。十一月初一日。賊陷和州。初二日。唐義訓王文瑞收復績溪縣。初三日。旌德之賊。竄擾太平黟縣之境。直趨祁門。初四日。賊圍涇縣。易開俊引軍入城守禦。卻之。初七日。祁門縣失守。初八日。奉上諭。江蘇布政使曾國荃著賞給江綢黃馬褂料一件。小卷江綢袍料一件。白玉喜字翎管一枝。白玉柄小刀一把。曾貞幹著加恩以知府用。欽此。初十日。唐義訓王文瑞收復祁門縣城。賊回竄石埭。十二日。公馳奏彙報軍情一摺。江北含山巢縣和州失守。調度防剿。并陳明寧國各軍戰守情形。績溪旌德太平黟縣賊蹤。奏稱秋冬以來。羣盜如毛。南北環逼。前奏請多隆阿移師東剿。今則秦人方痛深水火。何敢瀆請。惟飭貴州提督江忠義統率所部赴皖防剿。大局幸甚。附片奏報祁門失守。又片奏撤回蔣凝學一軍。分防潁州霍邱兩處。調毛有銘蕭慶衍兩軍移駐舒城。以防賊上竄。是日又具摺奏保水師疊克沿江城隘。出力員弁。開單請獎。一摺。奏浙江省城失守時。潰走之副將陳步高等。訊明定擬。十八日。公弟靖毅公貞幹卒於軍。是日奉到以知府用之旨。公出城巡視鹽河。委弁勇修濠牆一百八十六丈。核定公程。十九日。水師破賊於三汊河。二十日。鮑超聞訃丁憂。公以寧國軍情緊急。批令在營穿孝。二十一日。公出城巡視城壕。二十二日。聞靖毅公之卒。公哭之慟。派弁赴金陵迎護其喪。二十七日。馳奏奉欽諭旨。分條覆陳一摺。其一。毛有銘蕭慶衍之軍。由舒城拔營。取道巢湖之南。進攻運漕鎮。其一。李世忠軍於九洲洲。此次賊竄北岸。該提督亦屢接戰。有所斬擒。惟賊股大衆未能堵截。其一。曾貞幹已於十八日病故。由臣德薄。殃及手足。其蕪湖要地。留防兵力尙厚。其一。洋將白齊文奉調赴援金陵。該將遷延不進。且毫無紀律。應由李鴻章將其懲辦。其一。查會賊李秀成蹤跡。其一。催李續宜請銷假回營六條。又奏旌德涇縣解圍。績溪縣祁門克復一摺。奏保

王文瑞王開琳等五員。陣亡總兵胡太旂。參將劉永勝。游擊張仁興。請卹。附片奏寧國一帶軍勢漸穩。鮑超丁母憂。請毋庸開缺。改爲署理。又摺奏結金安清汪燿奎參案。又奏采訪忠義第十一案。附片奏定遠縣總練陳鼎鼎等殉難請卹。賊自金陵解退後。其一股復由東壩拖過戰船。以圖出江。公所派水陸防軍。破之於護駕墩。燬賊船二百餘號。鮑公超擊賊於馬頭鎮楊柳鋪。大破之。是月。左公宗棠克復嚴州府城。李公鴻章克復常熟縣城。多隆阿公奉旨授欽差大臣。接受關防。勝保革職遠戍。十二月初五日。石埭賊竄陷青陽縣。朱品隆棄旌德不守。移勦青陽。初九日。靖毅公靈柩過安慶。公出迎。撫棺慟哭。入城受弔。初十日。水師擊三汊河賊壘。破之。蕭慶衍等會水師克運漕鎮。公調蔣燦學一軍。移駐舒城。十二日。具摺奏遵旨籌派水師將弁兵勇。演習輪船火器。奏保總兵蔡國祥。堪以統轄。參將盛永清等七員。堪以分領。又申明楚軍水勇。難以出洋。輪船配用楚勇。須堅守前議。但用之於江面。又摺奏賊由九洲洲分股上犯。李世忠一軍堵截。獲勝情形。請救下山西巡撫。將應解月餉。迅解該軍。以資接濟。陣亡副將程自有。汪德喜。知縣胡學詩。請卹。附片奏報各路軍情。又片奏調道員隋藏珠回營當差。是日。又具摺奏保李續宜所部成大吉。蕭慶衍等軍。援勦潁州霍邱出力員弁。開單請獎。又摺奏夏秋以來。厲疫繁興。將土官吏。墨疾而殞命者。殆以萬計。其中功績卓著者。九十六員名。彙案開單請卹。張運桂。黃慶伍。華瀚。沈寶成。周成南。五員。功績尤多。請從祀湖南昭忠祠。附片奏伍華瀚之父文生。伍宏鑑。於咸豐四年。在寧鄉陣亡。請卹。十三日。奉到上諭。會國藩一門忠義。不避艱險。兄弟均在行間。爲國宣勞。深爲嘉悅。不料會貞幹遽爾病故。覽奏曷勝悼惜。等因。欽此。又奉上諭。會貞幹自赴江南軍營。屢著戰功。朝廷早欲擢用。因會國藩再三懇辭。擬俟江寧克復後。從優獎勵。茲以力疾督戰。積勞病故。悼惜殊深。雖未經會國藩奏請給卹。而會貞幹係效力疆場。戰功卓著之員。着卽追贈按察使。卽照按察使軍營立功後病故例議卹。以示優異。欽此。十六日。公作季弟墓志一篇。二十日。靖毅公靈柩登舟回湘。公行遺奠禮。毛有銘一軍。進勦巢縣。芙蓉嶺小挫。宣城縣屬之金寶圩。爲賊所攻陷。殺掠甚慘。其練衆及難民之脫出者。公給銀米以賑之。編立營伍。安置於蕪湖縣。凡數千人。二十一日。公弟國荃擊賊於谷里村。六郎橋。破之。二十二日。蕭慶衍擊賊於銅城關。連破之。二十三日。青陽之賊。竄回石埭。二十四日。具摺代弟國荃。貞幹。奏謝天恩。二十五日。朱品隆軍收復青陽縣城。二十七日。覆奏欽奉諭旨。併案條陳一摺。其一

壽州撤回湘軍以後，苗練尙無據城以叛之迹。正宜推誠相待，無容派兵戍守。使反側者無以自安。其一李世忠驕亢任性，目前無甚扞格，將來或須示以檢制。其一楊岳斌軍守金柱關，以防東壩賊船。彭玉麟駐守裕溪口，以防巢湖賊股。戰爭方急，不能移劄下游江面。其一洋人用兵，其長處在械器精銳，步武整齊。其短處在口糧太重。若使官軍學習其法，恐未得其長而先圖增餉。其一金陵賊勢方強，未易言撫。至其自拔來歸，當禁約軍士，不得妄加殺戮，以導向化之路。凡五條。附片奏報水師攻三汊河。陸軍克運漕鎮，及金陵官軍勝仗。皖南各路軍情。又奏保湖南東征籌餉局出力官紳。開單請獎一摺。附片奏保江西補用道黃冕湖南署藩司譚世臨主持東征餉事。尤爲出力。請旨優獎。是月賊又由東壩拖過戰船，以窺蕪湖。於是賊船過東壩者，前後三起。是歲石逆擒匪糾合大股，迭犯湖北之西北境。官文公調楚軍擊退。全楚肅清。駱公秉章劉公蓉調派湘軍。大破賊首石達開於敘州之境。江公忠義勦賊於湖南廣西之境。毛公鴻賓檄調回湘。募楚勇萬人以援皖。都統富明阿幫辦江北軍務。吳公棠署漕運總督。

〔癸亥〕同治二年公五十三歲。正月。公在安慶。初二日。接奉年終賞福字荷包錢錄食物等項。再加賞壽字一張。賊大股圍攻涇縣。易開俊等守禦卻之。初五日。鮑公超馳援涇縣。初六日。擊賊大破之。初七日。賊解圍去。鮑公追擊破之。十二日。馳摺奏克復運漕鎮。進勦巢縣銅城閣。接仗情形。陣亡總兵彭星占。請優卹。將弁胡得勝。劉義勝。陳東祥。謝齊。傅呂鴻榜。李春生。請卹。附片奏報青陽收復。涇縣大捷。并搜獲僞文。蘇省大股有再犯江北。上窺皖楚之說。又具摺奏謝弟真幹贈卹恩。附片奏保葉兆蘭。委署皖南道缺。二十七日。馳摺詳報鮑超一軍。破賊於馬頭鎮。楊柳鋪。進援涇縣。大捷解圍。陣亡參將羅國才等六十七員。開單請卹。附片奏易開俊等保守涇縣情形。陣亡參將倪昌明等五十一員。弁。開單請卹。又片奏寧國金寶圩被賊攻破。蕪湖金柱關防守。難以鬆勁。九洲洲江面有賊船趕渡。臣嘗駛赴金陵。察看前敵。是日。又代奏江南提督李世昌。自請褫職。立功以贖勝保之罪。一摺。二十八日。公由安慶登舟啓行。二十九日。泊池州登岸。攬視池州形勢。是月。左公宗棠克復金華。紹興兩府城。揚溪龍游。蘭谿永康武義。浦江桐廬各縣。浙東肅清。二月初一日。賊犯金柱關。水陸官軍擊破之。賊逼近寧國府城。劉松山守禦卻之。鮑公超克西河賊壘。擊賊大破之。初二日。擊賊連破之。梅嶺馬家園小淮審麒麟山等處賊壘。

盡平。寧國近城百里之地肅清。初三日。賊撲九洲州。李世忠營盤失陷。賊渡江攻陷浦口城。公舟泊蕪湖。彭公玉麟來見公。初四日。公登岸按視蕪湖城守。行泊金柱關。楊公岳斌見公。初五日。公舟泊大勝關。楊公岳斌從。水師攻克灣沚賊壘。初六日。公登陸駐雨花臺大營。與公弟國荃按行各壘。傳見各將弁慰勞之。十一日。公還舟次。十二日。馳奏查閱沿江各軍。現抵金陵。恭報近日軍情一摺。十五日。奏謝年終恩賞一摺。年終密考一摺。學政加考一片。公坐舳板船。探視九洲州賊壘。回舟拆江按視三汊河營壘。石埭之賊。大股竄青陽。鮑公超引軍援勦。賊由建德竄擾江西彭澤鄱陽之境。太平縣賊竄入徽州境。擾及黟縣祁門。十五日。攻撲休寧縣城。又有浙江於潛昌化一股。亦竄入徽境。郡城戒嚴。左公宗棠派劉典一軍援徽州。十六日。公舟泊烏江。按視楊公岳斌水師老營扼守之處。賊大股撲犯金柱關。官軍水陸合擊。大破之於查家灣。賊乃卻退。渡江之賊。陷江浦縣城。十八日。公舟泊金柱關。入小河。巡視水陸各營。十九日。行視東西梁山防軍營盤。舟泊裕溪口。二十一日。換小舟入自裕溪口。按視運漕鎮無爲州軍營。二十三日。由神塘河出大江。回舟次。二十七日。舟次大通鎮。馳奏由金陵回皖。沿途查閱恭報近日軍情一摺。附片奏陳臣巡閱諸軍。詳觀賊勢。攬南北之形勝。察天人之徵應。竊以爲可懼者數端。可喜者亦數端。江岸難民。避居江心洲渚之上。死亡枕籍。蘇浙之田。多未耕種。賊無所掠食。壹意圖竄江西。窺皖浙已復之士。恐其變焉流賊。更難收拾。李世忠心跡難信。皆可懼之端也。金陵之賊。糧源已竭。賊居不耕之地。其勢必窮。無能久之理。東南要隘。多爲我有。水陸將軍頗能和衷。百姓仰戴皇仁。淪肌浹髓。久困水火之中。不聞怨咨之語。此皆可喜之端也。附片奏新授安徽臬司萬啓琛請暫緩入都陛見。又具摺稟報水陸各軍陣亡傷亡病故員弁一百八十九名。開單請卹。附片奏前祁門縣知縣唐洽。咸豐四年在任死節。請建祠祁門。又奏采訪忠義第二案。附片奏舒城練總章斌殉難請卹。并該團勇婦等百四十七人。二十八日。公回至安慶。公舟往來江中。見洲渚之上。皆難民所聚。編葦葦茅以爲廬。一不戒於火。延燒數里。相率露處。呼號求救之聲。至不忍聞。公以賊蹤蹂躪各處。無可安置之地。因札善後局委員譏賑卹之。是月。僧王擒拾。曾張落行斬之。劉公長佑由兩廣總督調任直隸總督。航海以北。達於畿疆。三月初二日。賊自江浦上犯。圍毛有銘劉連捷兩軍於石欄埠。公弟國荃派遣員彭毓橘等領軍三千餘人。上援無爲州。沈公葆楨調派江西各軍。扼守景德鎮樂平縣等處。防勦徽池竄賊。派委

同知王沐領軍進援徽州。初八日。公急調鮑超一軍。渡江而北。援石澗埠。初十日。蕪湖水陸各軍。克黃池賊壘。十一日。悉收內河要隘。毀賊舟楫盡。賊遁走金寶圩。深水丹陽一帶。金柱關防務解嚴。劉典王文瑞王沐會擊賊於徽州休寧境。大破之。十二日。馳摺奏鮑超一軍。大獲勝仗。攻克寧國近城諸要隘。陣亡參將李芳菲等二十六員。弁。開單請卹。又摺奏賊渡九嶽洲。李世忠營盤。及浦口江浦兩城失陷。請將李世忠革職。不准留營。并自請交部嚴議。附片鈔呈李世忠咨文二道。并稱李世忠前此曾立功績。此次力竭戰敗。亦足以雪物議。謂其通賊之誣。恐其懷疑生怨。激成他變。仍求明降諭旨。示以寬大。毋庸革職。仍准留營。獎其前功。責其後效。則恩出於朝廷。而怨歸於臣等。彼必感激圖報。不生疑貳。又片報皖南皖北近日軍情。奏稱江之南岸。徽州與江西同警。江之北岸。下游與上游同警。調度無方。竇深憂灼。又奏保王吉彭楚漢周惠堂譚勝達四員。堪勝水師總兵之任一摺。疏入。奉上諭。李世忠著加恩撤去幫辦軍務。免其革職。以示薄懲。欽此。十七日。蕭慶衍彭毓橘毛有銘劉連捷合擊賊於石澗埠。大破之。劉典王文瑞王沐克黟縣城。十八日。苗沛霖復叛。引其黨圍攻壽州。知州毛維翼堅守。十九日。賊大股圍攻廬江縣。二十一日。賊圍攻舒城縣。蔣凝學禦卻之。二十二日。朱品隆攻石埭之賊破之。髮捻大股。由湖北下竄。圍攻桐城縣。提督周寬世禦卻之。賊竄孔城鎮。合併大股竄六安州。二十四日。賊圍六安州。二十五日。劉公典擊賊於徽州破之。徽境肅清。賊悉竄歸浙江。江西之賊。擾及淳梁。沈公葆楨調回王沐一軍。勤之。二十七日。馳摺詳報蕪湖金柱關水陸各軍。累月苦戰情形。陣亡游擊姜固國等三十六員。弁。開單請卹。附片奏報皖南江西皖北湖北賊勢軍情。該逆蓄謀甚狡。無非欲掣動官軍之勢。以解金陵之圍。苗練叛迹大露。事變迭生。憂憤何極。又摺奏揀調夏員留皖補用。并請本科新進士。即用知縣一班。多發數員來皖。以資差委。附片奏保代理無爲州知州穆其琛堅忍鎮定。保守危城。厥功甚偉。請即補該州實缺。又奏采訪忠義第十三案。是月。李公鴻章克太倉州城。公弟國荃奉旨補授浙江巡撫。左公宗棠奉旨升授閩浙總督。兼署浙江巡撫。萬啓琛授江蘇藩司。馬新貽授安徽臬司。郭嵩燾授兩淮運司。李公鴻章奏陳公弟貞幹戰績。奉到上諭。曾貞幹著加恩照二品例議卹。并准其予諡。於本籍及死事地方。建立專祠。仍宣付史館。特予立傳。以彰忠藎。欽此。四月。公調鮑超劉連捷等軍。援六安。初二日。賊解圍東竄。鮑公引軍追擊之。初七日。鮑公超等陸軍彭公玉麟等水師。會克東關賊壘。初十日。克

銅城關。十二日。馳摺奏石澗埠廬江桐城舒城六安州先後解圍情形。隨摺奏保劉連捷毛有銘等六員。陣亡參將黃仁親等十一員弁請卹。附片報近日軍情。奏稱徽郡防兵單薄。是臣布置最疏之處。賊之竄鄧陽者。逼近淠梁江西之門戶可慮。皖北之賊。悉數東趨。并未西犯鄂疆。即屬大局之幸。現檄鮑超等進兵追擊。檄調蔣凝學毛有銘成大吉等。會師壽州。共討苗黨。是日又具摺奏江楚各省本淮鹽引地。被鄰私侵佔日久。非一蹴所能規復。察核現在情形。暫難改辦官運。又片奏在籍侍講呂錦文在寧國辦理團防捐輸。被參各款。查明覆奏。又奏采訪忠義第十四案。時都統富明阿駐軍江北。派委知府杜文瀾試辦官運淮鹽。行銷於楚岸。十八日。易開俊擊賊於涇縣破之。朱品隆擊賊於青陽破之。二十二日。具摺奏謝天恩。臣弟國荃補浙江巡撫。兄弟均當大任。受恩愈重。報稱愈難。請開浙撫一缺。以藩司效力行閒。附奏新授江蘇藩司萬啓琛呈請開缺一片。又弟貞幹奉旨加銜議卹。予諡建祠。專奏謝天恩。一摺。鮑公超等軍。克復巢縣城。公派李榕一軍。渡江而南援池州。二十三日。克建德縣城。二十四日。鮑公超等軍。克含山縣城。進克和州城。皖北之賊全退。二十七日。馳摺奏水陸官軍。會克東關銅城關兩隘。陣亡勇弁彭勝華曾彩雲胡德雲石大和請卹。附片奏報軍情。稱兵事遲鈍。半由餉需奇絀。鮑超毛有銘兩軍。均有餉匱逃散之事。臣治軍九年。不敢輕上請餉之奏。不欲以危詞上煩聖聽。又不欲以苦語渙散軍心。茲因有勇丁逃潰之案。不得不據實密陳。請於九江洋稅項下。月撥銀三萬兩。以濟皖餉。并請特派大員來南。稍分臣之責任。是日又具摺奏保雨花台解圍案內出力員弁。開單請獎。附片奏新授雲南迤東道黃冕。現辦東征籌餉局務。請緩赴任。并擬調該道來營。面商淮鹽事例。與運使郭嵩燾會籌釐政。又片奏鳳臺縣知縣蔡鏞苗練狀審。請卹。公之初任兩江也。奏撥江西漕折銀兩。以供徽寧防軍之餉。至是沈公葆楨奏留供江西本省防軍。經戶部議准。公既失此鉅款。於是籌餉之請。詞氣迫切。而請簡大臣以分責任之疏。已三上矣。公弟國荃破雨花臺賊壘。及金陵南門外石壘。共十座。皆堅壘也。調彭毓橘一軍。已回金陵大營。壽州知州毛維翼固守州城。兵少糧盡。堅守不懈。毛有銘蔣凝學兩軍赴援。營於九里溝。阻於捻匪未能進。皖南之地。經亂最久。人相食者數月。公聞之愀然自咎。常曰。一亂世而當大任。人生之至不幸也。是月。李公鴻章克崑山縣城。駱公秉章擒賊酋石達開斬之。粵逆自永安州起事。始封之五僞王者。至是盡斃矣。五月初三日。易開俊擊賊於涇縣破之。初五日。江北之

賊由九洲渡江而南。公謂成大吉周寬世兩軍進壽州。調李朝斌復水師趕赴上海。騰出黃翼升水軍。泝江入淮。以爲臨淮官軍之助。初七日。李榕軍援勦湖口縣。初十日。李朝斌水師東下浦口。扼截渡江之賊。賊大半不能渡。楊公岳斌以水師入浦口。收復江浦縣城。鮑公超劉連捷等陸軍沿江追勦。與水師夾擊。賊之未渡者。殲焉。伏尸數萬。江北肅清。十二日。馳摺奏報金陵官軍攻克雨花臺僑城及聚寶門外諸石壘。隨摺奏保總兵李臣典晏禮週等八員。又奏報水陸會克巢縣含山和州三城。隨摺奏保成發翔彭毓橋蕭慶衍等十員。陣亡參將陳邦榮等十二員弁請卹。附片奏報皖南江西軍情。壽州危急。調派水陸官軍援勦。勢恐不及。十三日。公弟國荃楊公岳斌彭公玉麟水陸會克下關草駁夾燕子磯賊壘。李朝斌成發翔劉連捷等軍攻克九洲賊壘。力戰大破之。殺賊二萬人。弁勇傷亡者亦二千人。十五日。攻克九洲。江面賊艦淨盡。鮑公超等陸軍渡江會攻金陵。公自奉肅清江面之旨。敕造舟師。至是十載。全功乃竟。長江上下一律肅清。公由安慶發銀一萬兩犒賞是役將卒。蕪湖陸軍吳坤修等擊賊破之。進收金寶圩。易開俊劉松山擊賊於涇縣破之。十八日。公弟國荃攻長干橋賊壘破之。二十三日。朱品隆擊賊於青陽連破之。二十六日。劉典王文瑞會江西官軍擊賊於陶溪渡破之。景德鎮鄱陽縣肅清。賊併歸湖口。二十七日。馳摺奏水陸各軍會克江浦浦口草駁夾燕子磯諸城壘。力破九洲一關。江面一律肅清。隨摺奏保及總兵喻俊明丁泗濱等二十六員。陣亡副將鄧桂芳胡俊友請卹。附片奏報皖南江西及壽州軍情。金陵城大賊衆。合圍不易。必須嚴斷接濟賊糧之船。請敕下總理衙門。照會西洋各國。不得於金陵城外停泊輪船。又摺奏鮑超一軍克寧國府與涇縣西河勝仗出力員弁三案併保。開單請獎。又摺奏保毛有銘一軍迭破穎西捻圩。會克運漕鎮出力員弁。開單請獎。附片舉劾江西釐局委員。江公忠義領楚勇至江西。由九江渡軍進勦湖口。是月。公與李公鴻章會奏請旨核減蘇州松江兩府太倉州浮糧。六月初二日。奉到上諭。會國藩奏爲伊弟國荃懇辭巡撫恩命。並會國荃奏懇收回成命。以開缺藩司專辦軍務各一摺。該大臣等受寵若驚。固辭恩命。洵屬至誠。而朝廷懋賞懋官。權衡悉當。現在軍事方亟。時局孔艱。凡在臣工。正宜龜勉效忠。共期宏濟。該大臣惟管督率會國荃忠誠報國。以副委任。正不必續辭朝命也。欽此。公子紀澤來安慶省公。江西官軍韓進春挫於岸塘湖口。賊勢復張。江公忠義與李榕軍力擊之。賊稍戢。鮑公超攻鍾山賊壘破之。回駐江干。軍人多病。未能進勦。

初四日。苗練陷壽州。知州毛公惟翼死之。成大吉駐守三河尖。周寬世毛有銘等退守六安州境。十二日。馳摺奏金陵圍師布置情形。壽州失陷。現圖補救之法。知州毛維翼亮節孤忠。請旨追贈道員。從優議卹。臣調度各軍。顧此失彼。請交部嚴加議處。道員蔣凝學提督成大吉赴救不力。請撤去升銜勇號。以示懲儆。又具摺奏請裁南洋通商大臣一缺。交各省督撫兼理。華商交涉事件。附片奏委員探買口外戰馬二千四百匹。請救兵部查驗免稅放行。十六日。石埭賊竄陷黟縣。十八日。劉公典等軍收復黟縣。賊退歸石埭。十九日。江公忠義與李榕軍擊賊於堅山破之。二十二日。專摺奏采訪忠義第十五案。附片奏歙縣殉難紳士程枚功請卹。并其家屬十人。二十七日。馳奏彙報各路軍情一摺。金陵城下。暫難合圍。皖南江西濱江濱湖一片逆氣。苗逆既破壽州。圍攻蒙城益急。韋長莫及。徒深憂灼。附片奏馬新貽遠在蒙城。勢方危急。其安徽臬司印務。委萬啓琛暫行署理。是月。李公鴻章克吳江縣城。毛公鴻賓升授兩廣總督。奏調張運蘭募勇赴粵。七月初三日。江公忠義等軍攻賊於湖口之文橋。克之。賊濱江下竄。江西全境肅清。郭公嵩燾奉旨賞三品頂戴。署廣東巡撫。李榕補授浙江鹽運使司。初八日。公弟國荃克印子山賊壘。十二日。馳奏彙報各路軍情一摺。其一羣賊援救金陵。則蘇常等處。或有可乘之機。其一張運蘭奉調入粵。原部老湘營。現分守寧國府涇縣兩城最要之地。未可掣動。應令該臬司另募新勇。其一太平石埭之賊。踰嶺竄入黟縣。王文瑞一戰克之。勦辦極速。其一江忠義李榕兩軍。勦平湖口之賊。即令由皖南進取東壩。其一李世忠一軍。近頗愧悟。斂抑。其與苗逆積怨甚深。若坦然相處。當不至別生枝節。其一周寬世蔣凝學成大吉毛有銘各軍。防守要害。難以掣動。此外實無勁旅可援蒙城。凡六條。附片奏黃翼升水師赴援臨淮。應令李朝斌接署江南提督印務。又片奏陝西巡撫英傑奏請籌撥陝省餉鹽一案。現在苗逆叛亂。淮河梗阻。鹽無可行之道。請無庸置議。又奏采訪忠義第十六案。歙縣殉難紳士汪士勳請卹。并其家屬。十七日。吳公坤修擊賊於雙斗門。破之。二十日。賊由江西下竄者。大股圍攻青陽縣。朱品陞力疾督軍苦守。二十七日。馳摺奏報湖口各軍。疊挫賊鋒。會克文橋賊寨。羣賊遁走。陣亡將弁張儀卿等十三名請卹。附片奏報金陵蕪湖青陽軍情。及淮甸水陸布置情形。又具摺奏保蕪湖金柱關水陸防守。攻克灣址黃池出力員弁。開單請獎。附片奏江西茶商。照辦落地稅。又奏參廬江知縣吳燮和革職一摺。三十日。公弟國荃攻上方橋賊壘克之。是月。李公鴻章攻克太湖賊營。進

軍蘇州。袁端敏公甲三卒於家。公編錄訓詁小記雅訓雜記。每日記錄數則。以爲常課。八月十一日。易開俊劉松山擊賊於涇縣破之。十二日。馳奏疊奉諭旨。覆陳一摺。奏稱。近淮諸軍扼要防守。難以調動。皖南各軍。援勦方亟。不能調赴淮上。李世忠一軍。調以勦苗。亦不可恃。俟皖南軍勢稍鬆。當另籌勁旅。馳往臨淮會勦。附片奏查獲武職周瑞知縣賈連城勾通苗逆。請革職訊辦。公弟國荃攻江東橋賊壘克之。十八日。賊襲攻寧國府。劉松山自涇縣回援破之。公調鮑超一軍。由金陵上援青陽。二十四日。易開俊擊賊於涇縣破之。二十七日。馳摺奏報金陵陸軍攻克上方橋江東橋諸壘。一律毀平。附片奏報青陽涇縣等處軍情。目下皖南羣盜如毛。幾與去年冬月相似。壽州苗黨凶餓復熾。周寬世成大吉蔣凝學毛有銘等勢均力敵。不相統屬。李續宜病勢日深。暫難東下。深恐軍志不齊。貽誤大局。請旨飭降調道員金國琛馳赴皖北軍營。綜理周寬世等四軍營務處。必能調護聯絡。無渙散之虞。又片奏上年奏派委員經理廣東釐金。仍應調回各原省當差。候補知縣丁日昌等。調回皖營。仍請酌予保獎。朱品隆苦守青陽縣城。凡三十八日。江公忠義一軍。所部道員席寶田一軍。李榕一軍。先後赴援。擊賊大破之。殺賊萬人。賊解去。併歸石埭太平一帶。自江面梗阻以來。湖南北借食川鹽粵鹽。江西借食浙鹽。兩淮引地皆失。至是江西肅清。公乃咨謀於諸悉鹽務之委員杜文瀾等。議復舊日引地。先行試辦官運淮鹽。行銷於江西一岸。核定西岸粟鹽章程。招商領運。是月。李公鴻章分軍克江陰縣城。左公宗棠克富陽縣城。調劉典王文瑞引軍回浙。進攻杭州。唐公訓方奉旨總辦皖北各軍。劉公蓉授陝西巡撫。九月初八日。易開俊擊賊於涇縣破之。十二日。馳摺奏朱品隆苦守青陽。援師大捷。立解城圍。陣亡將弁李殿華許和山等十六員。弁請卹。江忠義李榕朱品隆席寶田等開單保獎。附片奏報蒙城文報漸通。可期解圍。劉典回浙。徽州防兵單弱。鮑超軍至南陵。進規東壩。江忠義等分兵以攻石埭太平之賊。但使皖南各股。悉數驅除。則軍勢順矣。十九日。公弟國荃分軍克博望鎮賊壘。盡平之。二十二日。具摺奏陳京倉需米甚殷。邊照部議。悉心妥籌。并詳陳近年事勢。不得仍拘成例。擬將漕運鹽引二大政。變通辦理。附片奏請將道員黃冕留於蘇皖。經理漕政鹽務。又片報皖鄂軍情。維時黃冕至安慶。見公。稟請於皖省設立米鹽互市一局。招湖南米商。運米至皖。由皖設法運至上海。以達於天津。招兩淮鹽商。運鹽至皖。與楚中米商交易而退。是爲鹽漕二政變通之法。既而不果行。二十四日。公弟國荃攻克上方門高橋門土

山方山七薨橋等賊壘。凡二十餘座。二十五日。進克中和橋賊壘。二十七日。馳摺奏報寧國涇縣防軍迭獲勝仗。陣亡勇弁鄧光武雷國英請卹。又摺奏訊結已革總兵黃彬被參一案。公弟國荃克秣陵關僞城。於是金陵西南東南兩面往來之路已斷。官軍漸已合圍。是月奉到文宗御製詩文集二十八日。專摺奏謝天恩。石埭賊目古隆賢率衆投誠官軍。收復石埭太平二城。易開俊收復旌德縣城。彭公玉麟水師克水陽新河莊等賊壘。二十九日。歐陽夫人率眷屬到署。是月。擒匪竄擾湖北德安蕪黃之境。官文公調成大吉石青吉兩軍赴鄂援剿。十月初一日。彭公玉麟水師克滄溪長樂鎮賊壘。初二日。收復高淳縣城。初三日。易開俊收復寧國縣。蔣擬學成大吉收復。穎上縣。初六日。公弟國荃攻金陵城東賊卡五處。賊壘二十餘座。悉破平之。初七日。鮑公超會水師克東壩。十二日。馳摺奏金陵陸師疊克東南沿河八隘。並復秣陵關僞城。漸成合圍之局。又摺奏賊衆就撫。收復石埭太平旌德三城。請將降人古隆賢賞給虛銜頂戴。附片奏報淮上軍情。皖南水陸官軍攻克東壩。得此要隘。皖南可冀肅清。金陵蘇州攻勦之事。較有把握。又片奏查明石埭太平旌德寧國四縣。前後失陷原委。又摺奏保金陵一軍。迭克城隘。出力員弁六案。併保開單請獎。鮑公超軍克建平縣。收復溧水縣。派營官宋國永。招撫廣德州賊未下。江公忠義引軍回駐江西饒州境。十五日。公弟國荃領蕭慶衍等軍扼紮孝陵衛。偕王軍至淮北。苗帥霖衆潰走死。蒙城解圍。練黨瓦解。唐公訓方收復淮南各城邑。公核定楚岸皖岸稟鹽章程。刊發委員。招商辦運。二十七日。馳摺奏水陸官軍勦撫秦施。疊復水陽東壩等要隘。高淳溧水寧國建平四縣。現派鮑超扼守東壩。調各軍分守城隘。請將就撫之張勝祿等三人。賞給虛銜頂戴。附片報提督王明山丁憂回籍。是日。又具摺密陳彭玉麟戰績。并奏報金陵大營將領李臣典等四員。請補提鎮實缺。皖南經亂。凋殘特甚。收復後。公亟派員散賑貧民。每縣籌銀數千兩。採買耕牛籽種。頒給鄉農。民大感悅。流亡漸復。是月。李公鴻章克復蘇州省城。公奉旨交部從優議敘。李勇毅公績宜卒於家。江忠濬調四川布政使。十一月初五日。金陵官軍治地道轟城。未克。十二日。具摺彙奏李世忠一軍。迭破苗逆各圩。會克懷遠縣。請開復革職處分。附片奏報金陵城東百餘里內。一律肅清。賊之糧路已斷。長淮一帶。穎上正陽壽州下蔡均已收復。又摺奏保肅清皖北水陸出力員弁四案。併保開單請獎。又代奏提督楊岳斌。請回籍養親一摺。又具摺奏保員外郎范泰亨。御史周學濬。知府陳濬孫衣言。同知李鴻裔。知縣鄧瑤淦。

宗攝黎庶昌。訓導向師棟九員。皆學行修飭。可備任使。是日奉到上諭。兵部侍郎彭玉鹿著加恩。賞穿黃馬褂。以示優獎。欽此。從公奏也。十三日。金陵城賊出撲營。公弟國荃擊破之。十六日。賊於城外修築營壘。又擊破之。賊大股犯建平。陳水二城。官軍守禦卻之。公日課。於晡後披閱詩古文詞。讀誦經子一卷。時讀孟子書。分四條編記。一曰性道至言。二曰廉節大防。三曰抗心高望。四曰切己反求。二十七日。具摺奏水陸陣亡傷亡在營病故員弁。凡八百四十三員名。開單請卹。周萬俸曾正明二員。請從祀湖南昭忠祠。又摺奏安徽撫臣李續宜病故。錄其臨終遺書呈覽。以明忠憤悱惻之忱。附片奏報賊酋李秀成自蘇州逸出。已入金陵。官軍攻城獲勝二次。并調派各軍。嚴防江西邊境。又奏采訪忠義第十七案。附片奏定遠縣人陳鼎帶合族殉難。男婦七十六人。稟請分別旌卹。二十八日。接見安慶所屬各邑新入學生員七百餘名。是月。李公鴻章克無錫縣城。分軍入浙江境。克平湖嘉善海鹽等縣。十二月初二日。建多寶倉。積貯穀米。核定斂散章程。初十日。核定皖南開墾荒田章程。十二日。馳奏疊奉諭旨。分條覆陳一摺。其一查明李世忠在壽州下蔡。與提督陳國瑞爭功搆毀之案。其一查明蔣凝學收復正陽關時。與副將康錦文兵勇開礮誤傷之案。其一賊之大股。分屯梅墟。意在奪關上竄。飽超力扼東壩。暫不能進。取以合金陵之圍。其一周寬世軍調回安慶防守。毛有銘軍移駐皖南。作游擊之師。成大吉石清吉兩軍。現赴鄂省。或能撥赴陝西。應由官文調度。凡四條。又摺奏保江西肅清。青陽解圍。在事出力員弁。彙單請獎。附片奏陳明李世忠近日情狀。二十日。委員蔡國祥新造小輪船一號。成。公登船試行江面。二十七日。拜摺奏謝天恩。交部優敘。并奏陳近日軍情。賊之大股。圖犯江西。已飛咨左宗棠沈葆楨併力扼守。以保上游完善之區。金陵賊氣尙回。一時恐難速克。又摺奏保攻克九洲洲肅清江面水師出力員弁。開單請獎。附片奏總兵喻吉三請加提督銜。簡授寶缺。又摺奏訊明周瑞賈連城通苗一案。查無實據。應請無庸置議。是月。江誠恪公忠義卒於軍。唐公訓方經

〔甲子〕同治三年公五十四歲。正月。公在安慶。初六日。賊由寧國縣上竄。陷績溪縣。初九日。唐義訓引軍收復績溪。追賊於歙縣南境破之。賊竄遂安開化之境。勢趨江西。十二日。奏規復淮南鹽務一摺。奏稱江路肅清。運道暢行無阻。所有楚西各岸。力圖整理。而籌辦之難有二大端。一則鄰私浸灌太久。積重難返。不能驟禁。一則釐卡設

立太多。諸軍仰食。不能概裁。按今日時勢。仿昔年成法。惟有疏銷輕本保價社私四者。實力講求行之。以漸期於
課餉兩有裨益。附片奏報近日軍情。金陵城賊爲負隅死守之謀。其一股由寧國竄績溪。意在衝過徽州。直上江
西。又摺奏訊結貪鄙營私之將弁張祿等。請革職永不敘用。時蘇浙田荒未耕已久。官軍攻勦。收復大半。賊飢無
所得食。乃突竄徽浙之交。就食於江西。十七日。賊大股竄績溪。與遂安股匪分擾婺源玉山。遂竄廣豐鉛山一
帶。廣饒撫寇皆爲戒嚴。二十一日。公弟國荃攻克鍾山石壘。僞號天保城。遂調派各軍。分扼太平門神策門。城圍
乃合。二十七日。馳摺奏賊陷績溪。旋經收復。毛有銘一軍。由安慶渡江。計可抵徽。沈葆楨所派席寶田韓維春兩
軍。亦不到防。飭各軍扼要防堵。力保江西藩籬。附片奏江寧藩司萬啓琛應赴江北。督辦糧臺。安徽臬司英翰駐
蒙宿一帶。襄辦勦擒。請催馬新貽赴藩司任。委何璟署臬司一缺。附片奏陳李世忠近日情形。已交出五河縣城。
撤遣所部弁勇。發給餉鹽。資以回籍。不至再有滋擾。又片奏江楚米價昂貴。本屆湖南漕米。請仍解折色到部。就
近採辦。以歸簡易。二十八日。專奏恭謝年終恩賞一摺。年終密考一摺。學政聲名一片。是月。李公鴻章克宜與縣
城。左公宗棠克桐鄉縣城。都與阿公奉旨移防綏遠城。詔公揀派得力之員。接統其軍。河南髮捻股匪。竄擾湖北
之境。二月初三日。核定江寧七屬揚州儀徵等處鹽務章程。初九日。席寶田收復金谿縣城。十二日。馳摺奏金陵
官軍攻克鍾山僞城。遂合城圍。賊之外援將絕。糧米無多。唯是圍師不滿五萬。分布九十餘里。而賊衆數十萬。深
有窮寇奔突之虞。附片奏浙境股匪。覓食偷生。銳意上竄。絕不返顧。勢將蔓延江西腹地。窺伺撫建兩郡。標陽老
巢。新爲蘇軍所破。其黨歸併湖州。自上湖州賊數極多。若竄江西。毫無阻隔。防兵單薄。勢實可虞。又片奏臣所部
各軍。添募益多。將材益少。類皆樸謹自守之員。實乏統率一路之選。其都與阿所部一軍。請特簡大員接統。其水
師紅單船等。御由巨兼轄。酌量裁撤。以節糜費。十五日。喬公松年至安慶見公。接授巡撫關防。出防臨淮。賊退出
廣德州城。併入湖州。鮑公超進軍攻句容。江西之賊。竄擾撫建各屬邑。十八日。席寶田破賊於建昌城外。十九日。
李世忠委其部將王廷瑞陳自明二員。到安慶稟請交出各城。遣散所部。以三月爲期。公獎慰而遣之。二十七日。
具摺奏籌議江蘇安徽等省綠營額兵。經亂之後。散亡殆盡。已潰之卒。不准收伍。孱弱之兵。即予裁撤。弁員出缺。
停緩敘補。統俟軍事大定。乃復舊制。庶幾兵歸實用。餉不虛糜。又摺奏湖北防務正殷。提督江長貴請飭赴本任。

附片奏金陵城賊。放出老弱婦女萬餘人。爲節省米糧之計。湖州羣匪僑集。皆思上犯江西。以覓生路。江西撫建股匪人數實衆。請飭下閩粵兩湖。一體嚴防。免致變成流寇。又煩兵力。江忠義舊部。交江忠朝統帶。又片遵旨提訊江西知縣石昌猷一案。委派刑部郎中孫尙絨會審。又片奏保道員忠廉署理兩淮鹽運使。堪以勝任。又片奏李世忠呈請刻期遣散滁州等處兵勇。酌留千餘人。交總兵陳自明統帶。又與沈公葆楨會奏查參江西釐金委員萬永熙革職。是月。李公鴻章分軍克溧陽縣城。又克浙江嘉興府城。程忠烈公學啓受傷。旋卒於蘇州。程公初陷賊中。投誠後。經公弟國荃拔擢立功。蘇省之復。戰功爲多。左公宗棠攻克杭州省城。餘杭縣城賊。併入湖州。匪守不下。都與阿公領馬隊北上。富明阿公署江寧將軍。接辦揚州防務。派軍渡江會馮子材之軍。進攻丹陽。三月初五日。鮑公超攻破三岔賊卡。初七日。克句容縣城。初九日。克寶堰賊壘五座。周寬世軍中營官楊復成。侵吞軍餉。公親提訊得實。於軍前斬之。江西賊勢日衆。沈公葆楨奏請截留江西釐金。專充本省之餉。戶部議准。公接戶部咨文。深憂之。十二日。馳摺奏江西牙釐。仍應歸臣處經收。以竟金陵將蕪之功。附片奏報軍情。金陵城賊堅守不下。句容克復。賊之外援將盡。江西之賊。擾犯南豐新城廣昌之境。又摺奏結水師巡江釀命一案。又奏采訪忠義第十八案。十三日。浙江之賊。竄窺徽州。唐義訓毛有銘擊賊小挫。十四日。賊撲徽州城。官軍擊卻之。十五日。奉到上諭。協辦大學士兩江總督曾國藩督軍勦賊。節制東南數省。盡心區畫。地方以次削平。舉賢任能。克資羣力。著交部從優議敘。欽此。是歲京察行省督撫。奉優敘之旨者。曰官文。公曰駱公秉章。曰左公宗棠。曰李公鴻章。凡五人。十七日。唐義訓毛有銘兩軍。擊賊於楊村。官軍大挫。賊勢日熾。大股竄婺源。入江西境。公調朱品隆軍。馳援徽州。調鮑超軍回東壩。調周寬世金國琛兩軍。渡江進駐饒州之境。廿日。鮑公超收復金壇縣城。公既上江西牙釐一疏。詞氣抗厲。於是沈公葆楨亦奏請開缺。詔慰留之。戶部議以江西牙釐之半。撥歸金陵皖南大營。以其半留供本省之餉。公以是時金陵未克。江西流寇復盛。統軍甚多。需餉甚鉅。既恐餉匱。以致軍事決裂。又以握兵符。掌利權。爲時所忌。遂有功遂身退之志矣。二十五日。馳摺奏鮑超一軍。克句容縣。生擒二酋。毀五賊壘。隨摺奏保總兵馮標譚勝達唐仁廉等二十員。陣亡知府田芬參將陽茂泰等六員。請卹。附片奏徽州軍敗。遍地賊氛。前隊已竄江西。續至者絡繹不絕。金陵圍師。責成曾國荃經理。儼堅城幸克。卽由曾國荃彭玉麟楊岳斌三銜馳奏大

概以慰聖懷。陝西漢中髮捻各匪。竄犯鄂豫之境。圖解金陵之圍。江面上下。皆宜籌防。又片奏身患嘔吐眩暈之證。請假一月。在營調理。又片奏降補藩司唐訓方請假回籍省墓。又片奏浙江鹽運使李榕暫緩赴任。留營勦賊。又奏楊復成正法一摺。二十七日。專摺奏謝京察優敘恩。是日奉到寄諭。總理衙門奏撥輪船經費。改解京師一欸。爲銀五十萬兩有奇。先行撥解金陵軍營。以資散放。二十八日。核定淮北票鹽章程。是月。左公宗棠克武康德清石門三縣城。江西官軍克新城縣城。賊竄入福建邊境。陝西髮逆合捻匪竄湖北。成大吉擊賊於樊城破之。賊竄河南境。西安將軍忠勇公多隆阿卒於整屋營次。四月初三日。設立書局。定刊書章程。江南浙江自宋以來。爲文學之邦。士紳家多藏書。其鏤板甚精緻。經兵燹後。書籍蕩然。公招徠剞劂之工。在安慶設局。以次刊刻。經史各種。延請績學之士。汪士鐸莫友芝劉毓松張文虎等。分任校勘。初九日。彭公玉麟過安慶見公。旋赴九江防守。十二日。馳奏徽州防軍挫失。未能遏賊西竄。自請交部嚴加議處。唐義訓毛有銘分別革降。陣亡將弁金茂榮李祖祥等十三員名請卹。又摺奏鮑超一軍。克復金壇。隨摺奏保游擊張遇春一員。陣亡將弁鮑昌齡宋連陞王正禮請卹。又摺奏江北一律肅清。提督李世忠遣散部衆。次第交出全椒天長來安滁縣六合五城。呈請開缺。回籍葬親。懇恩准予開缺回籍。保全令名。所遺江南提督一缺。懇迅賜簡放。以重職守。附片奏接准戶部文稱湖北湖南四川江西廣東江蘇每月協供臣營之餉。爲數甚鉅。查核湖南一省。除東征局半釐外。無有奏定協解之欸。去夏奏撥江西洋稅。旋即退還廣東釐金。係臣所最抱疚之端。然本年僅解過九萬兩。江蘇釐金。係臣職分應籌之餉。本年亦僅解過三萬兩。四川湖北兩省。則並無協解巨臺之欸。戶部所指大省供餉。不知以何處奏咨爲據。遂疑臣廣攬利權。收支巨款。臣以庸愚。謬當重任。局勢過大。頭緒太多。論兵則已成強弩之末。論餉則久爲無米之炊。萬一竭蹶顛覆。亦何能當此重咎。懇恩飭將皖北軍餉。責成喬松年吳棠富明阿共籌之。其蕭慶衍毛有銘等數軍。原支鄂餉。請飭下官文嚴樹森一力供支。俾臣得少減謀餉憂灼之情。不勝大幸。又片奏報軍情。金陵一軍。開地道以攻城。傷亡弁勇近三千人。此時惟有嚴圍猛攻。力禁接濟之法。江西續竄入之賊。又將延擾腹地。髮捻巨股。突過隨棗。意在假道皖鄂。東援金陵。彭玉麟現赴上游。防扼江面。惟皖北兵單。空虛可慮。又片奏江西南康知縣石昌猷供詞支吾。請革職以憑嚴訊。十四日。丹陽之賊上竄。鮑公超截擊大破之。常州之賊。竄至徽州境。唐義

訓毛有銘金國琛擊破之。餘匪竄江西。十九日奉上諭。會國藩奏徽軍挫失。自請嚴議之處。著加恩寬免。欽此。又奉上諭。江南提督著李朝斌補授。江南水師提督著黃翼升補授。江南淮揚鎮總兵缺。著歐陽利見補授。欽此。二十七日。馳摺奏報。鮑超截擊丹陽之賊大勝。又奏蘇賊續竄徽州。官軍擊勦獲勝。擒斬解散。過其大半。附片奏稱。蘇浙羣賊。由徽上竄者。約分六起。第一起現踞江西之南豐。分竄福建汀州之境。第二起延擾於鉛山湖坊等處。第三起攻撲撫州。退踞許灣。第四起則爲徽軍所敗。入江境者人數無多。而廣德湖州各賊酋。尙有二起。圖犯徽境。併入江西。目下軍情。以江西爲最重。又摺奏請展緩江南本科鄉試。附片奏陳。臣於上月請假。現已期滿。病勢未能遽痊。惟湖北賊勢下竄。金陵圍師。江西羣賊。均在危疑震撼之際。已力疾強起。照常治事。是月。江西贛水以東。廣信撫州建昌寧都各屬。賊蹤遍擾。失陷十數城。江西官軍。浙江援軍。破賊於玉山。又破之於撫州城外。又破之於弋陽貴溪等處。而賊勢未衰。張公運蘭軍在廣東。奉旨飭赴福建臬司任。率勇至閩境防勦。李公鴻章克常州府城。揚州鎮江官軍。會克丹陽縣城。江蘇全境皆平。唯金陵未克。李公鴻章撥派劉銘傳等軍。進守句容東壩。公乃調鮑超一軍。循江而上。援勦江西。楊公岳斌奉旨督辦皖南江西軍務。劉公典幫辦軍務。李朝斌領太湖水師。攻湖州城外賊壘破之。李公鴻章委員解到上海餉銀二十二萬兩。公以其十三萬兩。解付金陵大營。以五萬兩給付鮑超軍營。以四萬兩留安慶糧臺。賊之竄湖北者。人數極衆。護軍統領貞恪公舒保陣亡。僧王擊賊於隨州破之。逆首洪秀全於二十七日服毒自斃。李秀成立其子福瑱堅守金陵。秘不發喪。雖城中賊亦不知也。五月初六日。專摺恭謝天恩。寬免嚴議。鮑公超軍由蕪湖拔營。上援江西。楊公岳斌領水師陸軍共萬人。援江西。初十日。來安慶見公。旋赴江西督勦。公派提督黃翼升接領水軍。扼攻金陵。十二日。馳摺奏浙江提督鮑超請假四箇月。回四川籍葬親。該軍將弁。即令楊岳斌統率以行。必可指揮如意。懇恩俯念鮑超苦戰功多。俾得成歸窆之禮。展烏私之誼。彌彰聖朝孝治之隆。附片奏報軍情。湖州廣德尙爲賊踞。江西省城戒嚴。調派水陸各軍。入省防守。鄂省髮捻下竄。距皖甚近。調李榕等軍。渡江北上防。疏入。奉上諭。會國藩奏帶兵大員。請假葬親一摺。已明降諭旨。命鮑超俟金陵攻克。江皖肅清。再行給假回籍。以遂孝思等因。欽此。十四日。奉到寄諭。令李鴻章會軍攻金陵。公即日具咨李公催之。十七日。鮑公超軍至九江。尋至南昌。與沈公葆楨商度防勦。所部一軍。由瑞州進勦。二十

二日。馳摺奏稱蘇常既克。本擬咨請李鴻章親來金陵會勦。前接李鴻章來文。言將士太勞。宜少休息。待湖州克後。再行撥兵助攻金陵等語。不知者。謂臣弟國荃貪獨得之美名。忌同列之分功。非臣兄弟區區報國之意。今幸欽奉睿諭。已恭錄具咨。加函催請。臣本欲前往金陵督勦。因皖中防勦喫緊。未可暫離。懇恩飭催李鴻章。速赴金陵。實爲至幸。二十七日。馳摺奏續奉諭旨。飛催李鴻章會勦金陵。前此奉撥輪船經費一項。已解到銀二十五萬兩。分撥各軍。轉瞬已罄。不敢謂籌餉之太少。而深悔募勇之太多。惴惴焉恐生他變。或誤大局。既望李鴻章統兵來助。尤望其攜餉以相遺也。并奏稱楊岳斌鮑超均赴江西。兵力極厚。改調周寬世一軍。令赴皖北。以防鄂省東竄之賊。擬令陳國瑞駐紮壽州。處淮南江北適中之地。爲游擊之師。仍當防守要區。嚴扼江面。以免掣動金陵全局。附片奏臣於前年。會請添設長江水師提督。旋經部臣議准。此次欽奉諭旨。李朝斌補授江南提督。自係李世忠所遺之缺。黃翼升所補水師提督。當係長江新設之缺。應請敕部撰擬字樣。新鑄印信。頒發來南。以昭信守。又具摺奏保鮑超一軍。疊克東壩壩甸容金壇三寨。出力員弁。彙單請獎。又奏報高淳溧水各城。水陸會攻克。復出力員弁。彙單請獎。二十八日。核定石昌猷案卷。江西道員周汝筠稟許石昌猷袒匪殺良一案。卷宗繁委。公親訊數次。委藩司馬新貽臬司何璟道員勒方琦。與奏委之郎中孫尙絨反覆研鞫。至是定案擬結。三十日。公弟國荃攻克龍騰子山陰堅壘。僞號地堡城。遂督軍日夜環攻。不少休息。是月。李公鴻章克浙江長興縣城。湖北擒匪竄擾英山霍山之境。楊公岳斌奉旨授陝甘總督。六月初八日。覆訊周汝筠石昌猷一案。十二日。馳摺奏稱。旬日以來。歷奉寄諭。殷殷指示。不外迅勦金陵及皖北江西兩路軍務。所有近日籌辦情形。分條詳覆。其一李鴻章平日任事最勇。進兵最速。此次會攻金陵。稍涉遲滯。蓋無避嫌之意。殆有讓功之心。其中外匪徒。仍有偷濟賊糧軍火之事。自合圖以來。搜查防範。何敢信其絕無疏瀹。唯當諄飭各營。加意嚴防而已。其一髮捻東趨。竄入英山境內。調派江南岸各軍。馳赴皖北。目下不能遠到。其一安慶人心震動。未可輕離。俟皖北稍安。即當前赴金陵。會商勦辦。凡四條。十六日。金陵官軍治地道成。轟陷城垣二十餘丈。公弟國荃督領將弁。衝殺入城。圍攻僞宮城。即日由驛入百里。馳報金陵克復大概情形。是夜攻克內城。搜殺三日。十九日。擒賊酋李秀成洪仁達。賊黨死者十餘萬人。公聞捷後。喜極而悲者。良久乃已。二十三日。會銜由驛六百里。加緊馳奏克復金陵全股悍賊。盡數殲滅。詳

細情形一摺。奏稱金陵一軍圍攻二載有奇。前後死於疾疫者萬餘人。死於戰陣者八九千人。令人悲憐。不堪回首。臣等忝竊兵符。遭逢際會。既慟我文宗不及目覩獻誠告成之日。又念生靈塗炭。爲時過久。惟當始終慎勉。掃蕩餘匪。以蘇子遺之困。而分宵旰之憂。此次應獎。應卹人員。另繕清單。籲懇恩施。二十四日。公由安慶登舟。由火輪船駛赴下游。泊於采石磯。二十五日。抵金陵大營。見諸將領慰勞之。親訊賊酋李秀成。札委眞弁。訪求咸豐三年賊陷時殉難眞紳遺骨。二十六日。奉到上諭。楊岳斌彭玉麟曾國荃馳奏克復金陵大概情形一摺。逆首洪秀全等以數十萬逆衆。久踞金陵。負隅死守。曾國荃等惟督兵圍攻。所部不滿五萬。兩載以來。將城外賊壘悉數掃盪。茲復以炎風烈日之中。傷亡枕藉之餘。併力猛攻。克拔堅城。非曾國藩調度有方。曾國荃及各將士踴躍用命。不能建此奇勳。披覽之餘。曷勝欣慰。此次立功諸臣。將僞城攻破。巨懸就擒。即行渥沛恩施。同膺懋賞。欽此。二十七日。公巡視金陵城垣地道攻入之處。按行城外各軍營壘。二十八日。軍士得洪秀全逆屍。昇之江干。公親驗而焚之。二十九日。奉上諭。本日官文會國藩由六百里加緊紅旗奏捷。克復江寧省城一摺。覽奏之餘。實與天下臣民同深嘉悅。此次洪逆倡亂於粵西。於今十有五年。竊據江寧亦十二年。蹂躪十數省。淪陷數百城。卒能次第蕩平。殄除元惡。該領兵大臣等。櫛風沐雨。艱苦備嘗。允宜特沛殊恩。用酬勞勩。欽差大臣協辦大學士兩江總督曾國藩。自咸豐三年。在湖南首倡團練。創立舟師。與塔齊布羅澤南等屢建殊功。保全湖南郡縣。克復武漢等城。肅清江西全境。東征以來。由宿松克潛山太湖。進駐祁門。疊復徽州郡縣。遂拔安慶省城。以爲根本。分檄水陸將士。規復下游州郡。茲幸大功告成。逆首誅鋤。實由該大臣籌策無遺。謀勇兼備。知人善任。調度得宜。曾國藩著加恩賞加太子太保銜。錫封一等侯爵。世襲罔替。並賞戴雙眼花翎。浙江巡撫曾國荃。以諸生從戎。隨同曾國藩勦賊數省。功績頗著。咸豐十年。由湘募勇。克復安慶省城。同治元二年。連克巢縣含山和州等處。率水陸各營。進逼金陵。駐紮雨花台。攻拔僞城。賊衆圍營。苦守數月。奮力擊退。本年五月。克鍾山石壘。遂合江寧之圍。督率將士鏖戰。開挖地道。躬冒矢石。半月之久。未經撤隊。克復全城。殄除首惡。實屬堅忍耐勞。公忠體國。曾國荃著賞加太子少保銜。錫封一等伯爵。並賞戴雙眼花翎。等因。欽此。其同案奉旨錫封者。提督李臣典一等子爵。蕭季泗一等男爵。均賞戴雙眼花翎。提督黃翼升張詩日等。總兵朱洪章熊登武等。按察使劉連捷等。凡百二十餘員。均奉旨獎敘。

其陣亡總兵郭鵬程王紹畿副將陳萬勝等十六員。奉旨優卹。皆公前疏所請也。同日又奉上諭。粵逆久踞江寧。負嵎抗拒。實爲從來未有之悍寇。此次水陸各軍。於溽暑炎蒸之際。猛力環攻。迅克堅城。悍黨悉除。渠魁縛。非會國藩運籌決策。督率有方。會國荃等躬冒矢石。鼓勇先登。未由建此奇功。成乃丕績。朝廷嘉悅之懷。實難盡述。除會國藩等已加恩錫封外。其出力員弁兵勇。並著查明保奏。俟旨施恩。發去銀牌四百面。著會國藩會國荃等擇其功績最著者。先行頒給。以勵戎行。欽此。同日又奉旨賞賚東南各路統兵大帥。及封疆大臣。普加異數。欽差大臣僧王官文公李鴻章楊公岳斌彭公玉麟駱公秉章鮑公超等。各有差。左公宗棠沈公葆楨等。有待也。是月。左公宗棠克孝豐縣城。蕭公孚泗聞訃丁憂。七月初七日。閱視金陵城北僞城僞壘。及官軍所開地道之處。派委道員龐際雲知府李鴻齋會訊李秀成。令其自書供詞。前後凡四萬餘字。初二日。李忠壯公臣典卒於軍。金陵之克。以李公爲戰功之首。公弟國荃勸惜之。初四日。周視金陵城垣。委員修築。定議裁撤湘勇。設善後局。撫卹難民。鮑公超擊賊於撫州許灣。大破之。殺賊四萬人。賊大潰。初六日。公親訊賊供。誅李秀成洪仁達洪仁發三名。初七日。馳摺奏洪秀全李秀成二賊會。分別處治。僞幼主洪福瑱查無實在下落。李秀成供詞。謹鈔送軍機處。以備查考。歷年以來。中外紛傳逆賊之寘。金銀如海。乃克復老巢。而全無貨物。實出意料之外。目下籌辦善後事宜。需銀甚急。爲款甚鉅。如撫卹災民。修理城垣。駐防備營。皆善後之大端。其餘百緒繁興。左支右絀。欣喜之餘。翻增焦灼。金陵之克。賊所造宮殿行館。皆爲官軍所燬。公乃於水西門內擇房屋稍完者。委員葺治。以爲衙署。幼逆洪福瑱遁走廣德。賊黨爭迎之。初十日。公設酒於城內。宴犒諸將領。十一日。鮑公超收復東鄉金谿兩縣城。十二日。江忠朝等克復崇仁宜黃兩縣城。江西東路賊勢稍衰。十三日。公札撤湘勇二萬五千人。留萬人防守金陵。留萬五千人。派委劉連捷朱洪章朱南桂等領之。以爲皖南北游擊之師。咨湖北湖南督撫。籌發撤勇欠餉。十六日。專摺奏謝天恩。錫封侯爵。并賚所獲僞金玉印三方。咨送軍機處。十七日。巡視江南貢院。委員修葺。出示曉諭士民復業。核定金陵房產章程。凡八條。二十日。馳摺奏福建陸路提督蕭孚泗聞訃丁憂。請開缺回籍。又摺奏一等子爵李臣典病故請卹。并將李臣典戰功。開列清單。錄呈御覽。請於江西之吉安府及安慶金陵建立專祠。附片奏李秀成業經正法。未及檣送京師。洪秀全戮尸焚化。未及傳首各省。又片奏保金陵各軍將領熊登武朱南桂張詩日

伍維壽朱洪章皆有獨當一路之才。請次第簡放提督實缺。現守寧國之總兵劉松山足以獨當一面。亦後起之將材也。又片奏近歲以來。但見增勇。不見裁撤。無論食何省之餉。所吸者皆斯民之脂膏。所損者皆國家之元氣。前此賊氛方盛。不得已而增募。以救一時之急。今幸大局粗定。因與臣弟國荃商定。將金陵全軍裁撤其半。鎮江馮子材之兵。全行裁撤。揚州富明阿一軍。暫難遽撤。軍與日久。各有厭苦兵閒之意。但使欠餉有著。當不至別生枝節。并陳明曾國荃克城之後。困憊病狀。姑在金陵調養。料理善後。臣即日回安慶一次。布置上游軍事。江西軍事得手。卽由楊岳斌主稿會奏。公拜摺後。登舟上泝。二十五日。舟泊銅陵夾。咨廣東督撫。停止釐金。還歸本省經收。札委錢鼎銘丁日昌等辦上海捐輸。分撥松滬釐金。以濟軍餉。鮑公超軍克復南豐縣。續克新城縣。招降數萬人。賊黨南竄南贛寧都。三郡戒嚴。浸及閩粵之境矣。二十七日。李公鴻章左公宗棠會克湖州府城。二十八日。公舟抵安慶。二十九日。馳摺奏廣東釐金一款。兩年以來。深資餽運。私衷耿耿。如負重疚。請旨飭下廣東督撫。截至本年八月止。毋庸再解。并請照一百二十萬兩之數。加廣該省鄉試文武永遠中額四名。以彰粵人急公之義。附片奏稱湘勇招募之初。選擇鄉里農民。有業者多。無根者少。但使欠餉有著。當可安靜回籍。昨奉諭旨。有挑補額兵一條。恐湖南之民。必不愿補三江綠營之額。臣以爲勇則遣回原籍。兵則另募土著。各返本而復始。庶經久而可行。至寄諭飭查洪福瑱實在下落。應俟查明續奏。又片奏補送李秀成供詞。又片奏報軍情。江西兵威大振。無須添派援軍。所慮者皖南之廣德。皖北之英霍。現在陳國瑞進剿麻城。英翰進紮商城。蔣凝學進紮英山。李榕調防桐城。布置尙密。但無大枝勁旅。痛加勦洗耳。是日具摺奏結周汝筠石昌猷一案。左公宗棠克安吉縣城。浙江全省皆平。李公鴻章派劉銘傳一軍。克復廣德州城。賊黨挾洪福瑱遁走寧國山中。是月。僧王由豫入楚。擊勦髮捻各匪破之。八月初一日。湖州廣德之賊。竄徽州南境。劉松山截擊破之。初三日。左公宗棠截擊竄賊於昌化淳安之境。大破之。斬賊目黃文金。初七日。唐義訓易開俊截擊竄賊於歙縣南境破之。初九日。易開俊擊賊大破之。十三日。馳奏欽奉諭旨。分條覆陳一摺。其一江寧省城賊踞最久。居民流亡尙未復業。委記名臬司黃潤昌趕緊興修貢院。庶冀士子雲集。商民亦可漸歸。其一駐防旗營。俟貢院工竣。以次修理。旗兵現存八百餘人。俟營房粗定。再議挑補足額。其一蘇皖兩省疆輿。跨越江淮。據御史陳廷經陳請變通畫江分省。臣以爲軍事吏事之興廢。

視疆吏之賢否。不必輕改成憲。其一楊岳斌應赴陝西新任。江西軍務。應令鮑超專顧北路。劉典席寶田王文瑞江志朝等分勦南路。不必另派督辦大員。其一皖北喫緊。飛催劉連捷等渡江防勦。凡五條。附片奏委道員龐際雲署江寧鹽巡道缺。仍飭辦善後局。又具摺奏保克復金陵陸軍出力員弁。開單請獎。陣亡傷亡病故員弁五百一名。開單請卹。附片奏稱臣自任兩江督師。東征數年。奏保積至二十二案之多。軍務倥偬。未及按名註考。懇請敕部。將巨軍報案。均照原單。一體註冊。又附片密奏大功粗立。臣兄弟及前後文武各員。均切竊殊恩異數。追思昔年患難與共之人。其存者。如李元度一員。獨抱向隅之感。其沒者。如江忠源何桂珍劉騰鵬畢金科四人。皆有私衷抱疚之端。謹略陳一二。懇請恩旨。十四日。易開後擊竄賊破之。十六日。唐義訓金國琛擊竄賊破之。餘匪挾洪福瑣竄入江西廣信之境。浙江官軍追擊之。十七日。專摺進呈安徽全省地圖。並長江圖說。奏稱知府劉翰清縣丞方駿謨淹雅詳慎。臣派委該二員。湖查詳繪。裝成全冊。恭呈御覽。賊圍撲英山縣。蔣凝學固守擊賊破之。劉連捷朱洪章朱南桂領湘勇萬餘人。渡江而北。公調派湘勇由桐城進勦英山。調派李榕王可陞何紹彩等軍八千人。由六安進援霍山。二十七日。馳摺代奏。臣弟國荃病勢日增。請開缺回籍調理。又摺奏湖州廣德敗賊。併犯歙南。官軍截勦屢勝。陣亡參將唐遠晏請卹。附片奏長江水師新定規模。應責成彭玉麟周歷巡察。區畫一切。其安慶善後事宜。札飭藩司馬新貽臬司何璟總兵喻吉三會同妥辦。又片奏報江西皖北軍情。調軍勦辦。并報定期起程。駐紮江寧舊治。又奏截停淮北餉鹽。規復粟鹽舊制一摺。是月。楊公岳斌赴贛州督師防勦。王文瑞克復粵都縣城。九月初一日。公由安慶登舟啓行赴金陵。初八日。舟抵金陵。黃公潤昌監修貢院工畢。初九日。公入城閱視貢院工程。初十日。入居署中。核定安徽全省丁漕徵收章程。是日奉到上諭。會國荃督兵數載。克復江寧省城。偉績豐功。朝廷甚資倚畀。第櫛風沐雨。辛苦備嘗。致病勢日見增劇。若不俯如所請。不足以示體卹。已明降諭旨。准會國荃開缺回籍。並發去人蔭六兩。以資調理。該撫其安心靜攝。善自保衛。一俟病就痊愈。即行來京。陛見以備倚任。所有江寧善後事宜。即著會國藩馳往江寧。斟酌機宜。妥籌辦理。欽此。同日奉到上諭。浙江巡撫著馬新貽補授。英翰著補授安徽布政使。安徽按察使著何璟補授。欽此。十一日。馳摺奏江南貢院修建工竣。已通飭各屬。出示曉諭。定於十一月舉行鄉試。兩江人士。聞風鼓舞。流亡旋歸。商賈雲集。請旨簡放考官。附片奏札飭江

西藩司趕辦江南殊墨卷各一萬八千套。定期解赴金陵。又片奏札調藩司萬啓琛回駐江寧。運司忠廉由泰州移駐揚州。湖北髮捻大股。圍英山城。蔣擬學堅守賊退。其一股趨太湖。劉連捷等軍至太湖。賊均退回湖北蕪水羅田之境。公札調朱南桂朱洪章二軍。駐宿松太湖。劉連捷一軍駐安慶。二十日。公弟國荃奉旨詣明孝陵致祭。江西浙江官軍。會擊竄賊於廣信府境。大破之。洪福瑱遁走石城。江西東境肅清。二十五日。席寶田軍追擒劫逆洪福瑱。送南昌斬之。二十六日。設發審局。二十七日。馳摺奏報官軍驅賊出境。全皖肅清。隨摺奏保易開俊唐義訓劉松山金國琛四員。又具摺奏續保彭玉麟水軍。王可陞陸軍。青陽溧水高淳東壩各案出力員弁。開單請獎。又奏續保江忠義席寶田兩軍。青陽案內出力員弁。開單請獎。是日。又具摺奏稱安徽界連楚北。自楚師入境。疊復郡邑。按敵捐錢。支應兵差。百姓苦之。安慶克復。停止敵捐。改辦抵徵。現在札飭一律開辦丁漕。所有從前收過抵徵項下。應專案作正報銷。二十八日。札派鄉試內外官員。是月。鮑公超擊賊於寧都州城外。大破之。州城解圍。賊潰竄閩粵境。江西全省皆平。左公宗棠奉旨錫封一等伯爵。鮑公超一等子爵。楊公岳斌由贛州回南昌省城。奏請回湘增募陸勇。赴甘肅勦辦。賊之竄廣東者。攻撲南雄州。其竄閩者。陷武平縣城。張忠毅公運蘭死之。賊遂逼擾汀州屬境。陷漳州府城而踞之。湖北髮捻大股。圍撲蕪水官軍營盤。石威毅公清吉陣亡。十月初一日。公弟國荃登舟回湘。公送之至采石磯乃還。初四日。公還署。初五日。專摺奏謝弟國荃開缺恩旨。又奏謝弟國華貞幹各加賞恩。初七日。考試督署書吏。李公鴻章委員解到上海協餉銀十七萬兩。支發江皖各路湘軍欠餉。公定議撤遣湘勇。什去八九。十二日。具摺代奏提督鮑超請假六箇月。馳回四川本籍。親營葬事。兼養傷病。令其部將宋國永婁雲慶分領霆營之衆。附片奏金陵遣撤勇丁。先後回籍。沿途安帖。并報皖鄂軍情。檄調劉連捷等軍。赴鄂援勦。調易開俊一軍。渡江而北。與李榕王可陞等爲後路策應之師。又奏采訪志義第十九案。附片奏安慶通判達凌阿在壽州殉難請卹。蘇州從九品蔣映杓訓導梅振鏞請卹。并其家屬十一人。十三日。奉上諭。現在江寧已臻底平。軍務業經蒞事。即着會國藩酌帶所部。前赴皖鄂交界。督兵勦賊。務期迅速前進。勿少延緩。李鴻章前赴江寧。暫署總督篆務。江蘇巡撫。著吳棠暫行署理。欽此。十七日。李公鴻章到金陵見公。公與商裁退楚軍。進用淮勇。檄調劉銘傳李鴻章等。引淮軍渡江而北。上援皖鄂。十九日。奉上諭。會國藩奏提督鮑超遵奉前旨。請假葬親

一摺。已明降諭旨。賞假兩月。回籍經理葬事矣。現在甘肅軍務未戡。新疆回匪日益蔓延。非得勇略出羣。如鮑超者。前往勦辦。恐難壁壘一新。著會國藩傳旨鮑超。令其俟假期一滿。卽行由川起程。出關勦辦回匪。其舊部兵勇。及得力將弁。準其酌量奏調。隨帶同行。從前回疆用兵。楊遇春卽係川省土著。立功邊域。彪炳旂常。鮑超務當督率諸軍。肅清西陲。威揚萬里。以與前賢後先輝映。該提督忠勇性成。接奉此旨。必卽遵行。以副朝廷委任。欽此。十二日。奏邊旨馳赴皖鄂交界。督兵勦賊一摺。奏稱。臣用兵十載。未嘗親臨前敵。自揣臨陣指揮。非其所長。此次擬仍駐紮安慶六安等處。派劉連捷等入鄂。聽候官文調遣。檄調淮勇兩軍。隨臣西上。更資得力。附片瀝陳才力竭蹶。難勝重任。楚軍出征過久。漸成強弩之末。不如淮勇之方銳。一俟皖鄂肅清。卽請開各缺。調理病軀。仍當效力行間。料理經手事件。如軍餉之報銷。撤勇之欠餉。安置降將部衆。區畫長江水師營汛。皆分內應了之事也。又摺奏請於江寧省城。建立昭忠祠。彙祀湘軍陣亡病故將士。附片奏廣東西釐金。全歸本省經收。唯留饒州景德鎮釐金之半。撥解祁門糧臺。以充皖南五軍之餉。二十五日。作修治金陵城垣缺口碑記一篇。立石於龍膊子山下。官軍攻入之虞。二十七日。奏報淮南鹽課徵收第一案。是月。僧王軍擊賊大破之。官文公喬公松年調派各軍。防勦招撫數萬人。餘賊竄德安。廣東賊陷嘉應州城大埔縣城。與閩省汀漳之賊。延擾凡數百里。左公宗棠移駐衢州。調派劉典等軍。分道入閩進勦。欽命劉琨典試江南。以平步青副之。十一月初一日。委員擇地修建昭忠祠。靖毅公祠。設工程局委員。監督工役。次第修復學宮。及羣祀祠宇。初三日。交卸總督關防。初五日。奉到上諭。皖省一律肅清。楚境餘賊。由黃孝寬德安一帶。逆數無多。楚軍可敷勦辦。會國藩無庸前赴安慶。亦無須交卸督篆。仍駐紮金陵。委籌調度。李鴻章現在入閩監臨。俟出閩後。仍回江蘇巡撫本任。欽此。初六日。詣貢院迎主考官入闈。初八日。前總督陸公建瀛遺骸。改棺重斂。公出城弔而祭之。初十作家訓四條。十七日。李公鴻章派弁送還總督關防。公接印回任。十八日。馳摺奏交卸督篆。遵旨仍回本任日期。奏稱鄂豫皖三省。均擒匪往來熟徑。劉連捷等軍。宜以黃州上巴河爲老營。派吳坤修料理營務。劉銘傳等宜以三河尖固始爲老營。派李鴻章料理營務。又摺奏續保克復金陵水陸各軍。隨營籌餉各員弁。彙單請獎。又片奏請敕部添鑄淮揚鎮總兵新印。頒發來營。又片奏國子監典籍錢繼文。前在金陵殉難請卹。二十二日。會考江南拔貢優貢。十二月初三日。馬公新貽過金陵。

見公。旋赴浙江任。初六日。李公鵬章還蘇州。十三日。奏疊奉諭旨。分條覆陳一摺。其前一前明孝陵勘估工程。目下無此鉅款。應稍緩籌辦。其一李秀成供詞。前有刪節之處。補鈔進呈。其一張國樑忠骸。訪求未得。其一江北糧臺。每月收銀不過五萬兩。酌解甘省及留供皖軍之數。其一池州知府范先諤調省察看。凡五條。附片奏保四品京堂胡大任。請旨簡用。又片奏雲南迤東道黃冕請開缺。又片奏知府范泰亨主事柯鉞。均在營績勞病故。請卹。是日又奏覆御史劉毓楠條陳淮北鹽務一摺。附請展緩江南武鄉試一片。十五日。鄉試揭曉。公入闈鈐榜。取士二百七十三名。二十八日。奏疊奉諭旨。分條覆陳一摺。其一勦辦捻匪。宜用淮勇。人地相宜。淮軍所用火器。須由水路運送河南。以周家口爲都會。其一西路軍務。宜先清甘肅。次及關外。楚勇離甘太遠。不如川勇較近。宜用川北保寧龍安兩府之人。與甘肅風氣不甚相遠。臣處餉項奇絀。不能協濟飽軍。其一楚勇必須多撤。金陵守兵。已裁去七千人。朱品隆唐義訓劉連捷等軍。應即先撤。庶騰出有用之餉。以濟西征之師。凡三條。附片奏覆陳何桂珍劉騰鵬畢金科三員忠績。請賜諡以表示來茲。是日又具摺奏請蠲免安徽州縣錢糧雜稅。并將各州縣克復年月。被擾輕重。分別開單呈覽。附片奏金壇溧陽丹陽宜興荆溪五縣。被賊蹂躪最甚。請豁免兩年錢漕。又片奏遞進江南鄉試題名錄。是冬捻匪由湖北襄陽竄擾河南之境。僧王督師追擊。連獲勝仗。而賊勢颯忽。不可制。福建之賊。踞漳州。左公宗棠督師入閩攻勦。

己乙丑。同治四年公五十五歲。正月。金陵昭忠祠成。初十日。公率僚屬致祭。十四日。具摺奏兩淮運使忠廉因病出缺。揀委道員李宗羲署理。請旨簡放。附片奏江南鄉試新中舉人。來江寧請咨者。隨時通融繕給咨文。以憑迅速起程會試。請敕禮部查照。又片奏壽春鎮總兵易開俊調援皖北就近赴任。又奏采訪忠義第二十案。附片奏石埭縣訓導朱彥昇請卹。并其家屬二十人。二十日。設粥廠。令湘勇煮粥。以食饑民。二十一日。拜摺專奏恭謝年終恩賞。又奏循例密陳文武考語一摺。三省學政聲名一片。又奏采訪忠義第二十一案。二月初三日。作江忠烈公神道碑。初八日。通飭委員。羅買積穀以備荒。十四日。具摺奏易開俊劉松山兩軍。堅守寧國涇縣出力員弁。開單請獎。并陳明應保之案。久未奏保。自請交部議處。又彙案奏參藐法滋事之將弁江發雲等。請革職訊辦。又摺奏上年奉撥輪船經費銀五十一萬餘兩。全數解清。彙入軍餉案內報部。二十日。核定收養貧民章程。議挑補綠

營弁兵章程。二十三日。前雲貴總督潘忠毅公鐸之柩。自雲南還葬。過金陵。公遣弁護送回籍。二十七日。專摺奏營中欠餉。遵照部議新章。發給餉票。准照實銀報捐請獎。又奏酌度江寧現在情形。城外龍江關西新關兩處。暫緩開關徵稅。俟商民復業。再行奏復舊制。附片奏江安兩省武營遺缺。請通融借補。札委工程局員。修葺江南鍾山書院。尊經書院。是月奉上諭。上年江寧克復後。會國荃因病陳請開缺回籍。當經降旨。令該撫病痊。即行來京陛見。迄今已及半載。該撫病體。當可漸次就愈。朝廷以該撫功績昭著。且年力盛強。正可借資倚任。著會國藩傳知會國荃。如病已就痊。即行來京陛見。現當勤求治理。需才孔亟之時。該撫慎勿遽萌功成身退之志。以副期望。欽此。彭公玉麟奉旨署漕運總督。吳公棠署兩廣總督。李公翰章授湖南巡撫。李公鴻章派提督郭松林等軍。由海道赴福建廈門助剿漳州之賊。楊公岳斌募湘勇五千成軍。由長沙啓行。赴甘肅。公方議裁撤湖南東征釐局。於是楊公奏請改爲西征局。充甘肅軍餉。貴州巡撫張公亮基。亦請以東征局餉協解黔中。三月十五日。奏通籌滇黔大局一摺。奏稱。行軍之道不一。而進兵必有根本之地。籌餉必有責成之人。謀滇者當以蜀爲根本。即以餉事。責之四川總督。謀黔者當以湘爲根本。即以餉事。責之湖南巡撫。湘蜀兩省物力有限。倘任滇黔之餉。則甘肅之餉。應責之江浙等省。不敢有所推諉。又奏福建汀漳道彭毓楸因病未能赴任。請開缺。奏片附李世忠前後捐助軍餉銀十五萬九千餘兩。請併入河南捐款。爲將來加廣中額之地。又附片奏湖南設立東征局。當時實由黃冕主持。因此大物招議。上年金陵倖克。臣即議定期裁撤東征局。湘中商民人咸知之。今楊岳斌請改供西征之餉。滇黔各省。亦指請協解。臣既奏停江廣釐金。而於桑梓獨食其言。且令黃冕專受其謗。有甚不安於心者。謹先事瀝陳。俟四月間。即專摺奏請裁停東征局務。另由江南籌解甘餉。俾湘民沾高厚之恩。臣亦稍釋隱微之疚。又片奏稱新疆之地。大漠苦寒。艱險異常。飽超威嚴有餘。恩信不足。倘出關以後。部曲離怨。必爲回衆所輕。一有挫失。全局震動。後人更視關外爲畏途矣。且甘肅未平。遽謀新疆。則後路之根本不穩。飽超歷年苦戰。臣豈忍忘其大功而摘其小過。惟有仰懇聖慈。飭令飽超隨同都興阿楊岳斌。先清內地。再行出關。不宜輕於一發。不獨飽超一軍爲然。自古有事塞外者。未有不慎於始謀者也。又片奏臣弟國荃病尚未痊。欽奉寄諭。已恭錄傳知。時有御史朱鎮奏參湖南兵勇在江南騷擾情形。請即遣散回籍。公於是札飭各軍。大加裁撤。在金陵者。僅存四營而

已二十五日。具摺奏續保攻克金陵水師員弁。開單請獎。附片奏彭玉麟固辭署漕運總督之任。并陳明擒匪魁忽。恐南入江境。調張樹聲一軍駐清江浦。調劉銘傳周盛波兩軍。由六安移防徐宿。時彭公玉麟已專奏力辭新任。而擒匪竄山東境。蔓延曹州洛寧一帶。徐州清江皆防寬越。吳公榮亦以防務留清江。未赴兩廣之任。二十七日。公登舟出江泊瓜洲。二十八日。登焦山。彭公玉麟從。二十九日。渡江登北固山。覽京口形勢。旋登金山回瓜洲。查閱鹽河工程。四月初一日。公抵揚州。運司李宗羲稟商鹽政釐務。設鹽棧於瓜洲之新河口。以利捆運。裁減江北釐卡。改定江北釐務章程。初三日。還金陵署。十五日。具摺奏黃翼升水師張樹聲准軍。已到清江防所。劉銘傳周盛波日內當抵邳宿之境。又摺奏前漕督袁甲三先經奉旨於臨淮建立專祠。旋因案撤銷。請仍准建復。附片奏皖南鎮總兵唐義訓開缺。以總兵劉松山道員金國琛辦理徵軍防務。該二員蒙恩授甘肅鎮道寶缺。并催令赴任。請暫留皖南。仍即以劉松山調補皖南鎮實缺。又片奏新授安徽臬司李宗羲暫留兩淮之任。整理鹽務。二十日。核定瓜洲鹽棧章程。二十一日。接奉廷寄。書公爵加稱曰毅勇侯。鮑公超回川後。所部霆字營。分爲兩軍。其一總兵婁雲慶領之入閩。其一總兵宋國永亦領之赴蜀。將率以出關也。入閩之軍。在上杭縣大韓。回向江西索餉。江西藩司孫長絨急發銀六萬兩。迎解於軍前。衆稍定。入蜀一軍。行至湖北金口登岸。譁瀆爲亂。竄陷咸寧縣。擾犯江西湖南邊境。李公瀚章調軍平之。公久慮霆營軍之有變。至是聞警。適是前疏所慮。爲之撫然。憂念不已。僧王追擊擒匪至於山東。日馳百數十里不息。擒匪勢亦蹙。即迭奉諭旨。以持重爲戒。公亦具密疏。請令僧邸一軍。稍休暇以養銳。疏未上也。二十四日。忠親王僧格林沁在曹州中伏陣亡。惟充豫之間。賊勢益張。遠近人心爲之惶駭。二十五日。公接見洋人。議江南通商事宜。是月。公與李公鴻章會奏。遵旨核減蘇松等屬浮糧一摺。鄭公敦謹奉旨授湖北巡撫。吳昌壽調河南巡撫。五月初一日。馳摺奏。疊奉諭旨。覆陳大略。其一鮑超霆營潰叛之故。固憚萬里長征之苦。實由積年欠餉之多。已飛咨鮑超迅赴鄂中。調停解散。檄調劉連捷等軍。南渡九江。咨彭玉麟調派水師。扼防江西。其一水師礮船。宜用於長江大川之中。若運河水窄岸高。斷難施展。高河與大江。船式迥殊。水性亦異。宜由山東河南撫臣另造舢舨。分防黃運兩河。則畿輔永無捻患。凡二條。附片奏稱金口霆營叛亂。容有別情。至婁雲慶一軍。在閩鼓譟。則係因饑生變。實無他故。臣不在江西。不能籌發欠餉。又明知霆營出關。

必將生變。不能及早奏請停調。至釀今日之禍。皆由臣區畫不善。恩信不孚。無可辭咎。容俟查明原委。自請嚴處。又代奏陝西臬司陳湜謝恩一摺。奏請應否陛見。初二日。奉到寄諭。令公出省。至淮徐一帶。督率水陸援軍。相機勦賊。初三日。公聞僧王陣亡之警。奉到上諭。欽差大臣協辦大學士兩江總督一等毅勇侯曾國藩著即前赴山東一帶。督兵勦賊。兩江總督著李鴻章暫行署理。江蘇巡撫著劉郁齋暫行護理。欽此。又奉上諭。曾國藩著即攜帶欽差大臣關防。統領所部各軍。星夜出省。前赴山東督勦等因。欽此。初五日。奉到寄諭一道。初七日。奉到寄諭二道。皆催公迅速啓程。初九日。馳摺奏遵旨前赴山東勦賊。歷陳萬難。迅速情形。金陵楚勇裁撤殆盡。僅存三千人。作爲護衛親兵。此外惟調劉松山寧國一軍。如楚勇不願遠征。臣亦不復相強。淮勇如劉銘傳等軍。人數尙少。不敷分撥。當酌帶將弁。另募徐州勇丁。以楚軍之規制。開齊兗之風氣。期以數月訓練成軍。此其不能迅速者一也。捻匪積年擄掠。戰馬極多。馳驟平原。其鋒甚銳。臣不能強驅步兵。以當騎賊。亦擬在徐州添練馬隊。派員前赴古北口。採買戰馬。加以訓練。此其不能迅速者二也。扼賊北竄。惟恃黃河天險。若與辦黃河水師。亦須數月。乃能就緒。此其不能迅速者三也。直隸一省。宜另籌防兵。分守河岸。不宜令河南之兵。兼顧河北。僧格林沁勦辦此賊。一年以來。周歷湖北安徽河南江蘇山東五省。臣接辦此賊。斷不能兼顧五省。不特不能至湖北也。即齊豫蘇皖四省。亦不能處處兼顧。如以徐州爲老營。則山東祇能辦兗沂漕濟四郡。河南祇能辦歸陳兩郡。江蘇祇能辦淮徐海三郡。安徽祇能辦廬鳳潁泗四郡。此十三府州者。縱橫千里。捨匪出沒最熟之區。以此責臣督辦。而以其餘責成本省督撫。則汛地各有專屬。軍務漸有歸宿。此賊已成流寇。飄忽靡常。宜各練有定之兵。乃可制無定之賊。方今賢帥新隕。劇寇方張。臣不能速援山東。不能兼顧畿輔。爲謀迂緩。駭人聽聞。殆不免物議紛騰。交章責備。然籌思累日。計必出此。謹直陳芻蕘。以備採擇。附片奏稱精力日衰。不任艱鉅。更事愈久。心膽愈小。疏中所陳專力十三府州者。自問能言之而不能行之。懇恩另簡知兵大員。督辦北路軍務。稍寬臣之責任。臣仍當以閒散人員。效力行閒。又摺奏保張樹聲補徐海道缺。吳世熊補淮揚道缺。僧王沒後。將軍國瑞革職留營。接護其軍。并護欽差大臣關防。軍心不固。公亟調劉銘傳一軍。赴濟寧以助之。李公鴻章調派道員潘鼎新領淮勇五千人。由輪船航海赴天津。以衛畿輔。是日奉到上諭。欽差大臣協辦大學士兩江總督一等毅勇侯曾國藩現赴山東一帶督

師勦賊。所有直隸山東河南三省旗綠各營。及地方文武官員。均著歸會國藩節制調遣。如該地方文武不遵調度者。卽由該大臣指名嚴參。欽此。尋又奉督率親軍。輕騎就道。兼程北上之旨。於時公定計撤退湘軍。進用淮軍。酌留金陵湘勇四營。增募千人。凡六營。委道員羅麓森等領之。以爲親兵。隨同北征。其餘湘軍在江南者。全行撤退回籍。十三日。馳奏欽奉諭旨。謹陳籌辦情形。并請收回成命一摺。奏稱。潘鼎新一軍。由輪船馳赴天津。可以壯畿輔之威。可以補臣迂緩之過。目前局勢似可無虞。至於節制三省。臣實不能肩此鉅任。卽才力十倍於臣者。亦不必有節制三省之名。并稱河北宜責成直隸總督另籌防兵。不宜調南岸之師。往來疲黃。疲於奔命。各省巡撫。亦宜另籌防兵。不可使勤撿之師。追逐千里。永無歸宿。反覆申明前疏之說。附片奏潘鼎新劉銘傳張樹聲周盛波等四軍。皆係淮勇。經李鴻章兄弟苦心訓練而成者。已調甘涼道李鶴章辦理行營營務處。請旨准開甘涼道缺。并令李鴻章之季弟李昭慶赴營差遣。又片奏鎮江揚州水陸防軍。撤遣已竣。所有原設糧臺。一併裁撤。另設報銷局。造冊報銷。又片奏咸豐三年。江寧城陷。將軍祥厚等殉難。布政使祁宿藻先在圍城中。積勞病故。已奉旨優卹。仍請將祁宿藻祀祀祥厚專祠。二十一日。公詣晉臣卞忠貞公祠。祠新葺成也。二十二日。李公鴻章至金陵。公交卸總督關防。二十三日。奉到上諭。會國藩懇辭節制三省之命。具見謙抑爲懷。不自滿假。該大臣更事既多。成效夙著。若非節制直東豫三省。恐呼應未能靈通。勿再回辭。欽此。二十四日。馳摺奏報交卸督篆。帶兵出省日期。并報撿匪回竄皖豫山東情形。漸熨。當無渡河北犯之慮。又摺奏保肅清皖南出力員弁。開單請獎。附片奏本年二月。提督鮑超委員赴口外探辦戰馬八百匹。今鮑超出關之行。已因兵變而中止。應請救下兵部。令此項馬匹。徑赴山東。解臣行營。俾資練習。又片奏裁撤湖南東征局。其湖南協甘之餉。由撫臣李瀚章酌籌協解。又具摺奏報淮南鹽課收數第二案。附片奏兩淮鹽課撥解京餉之銀五萬兩。請改解臣營。以應急需。又奏查得已故兩江總督陸建瀛遺骸。護送回籍。二十五日。公由金陵登舟。飭北征六營湘軍。卽日披隊啓行。其所撤遣各湘勇。委員押令悉數浙江西上。毋得停留。二十八日。公舟解纜渡江。彭公玉麟從。公與彭公核定長江水師章程。是月。唐義訓金國琛所部徽州防軍。索餉鼓譟。劉公長佐駐軍開州。督造防河戰船。左公宗棠克漳州府城。蘇省所派郭松林等軍。克漳浦縣城。福建全省皆平。賊寬廣東之境。劉公坤一奉旨授江西巡撫。閏五月初一日。公舟泊瓜洲。

初三日泊揚州。札委知府彭嘉玉辦理江寧糧臺。初八日抵清江浦。十一日馳摺奏擒匪南趨安徽。藩司英翰在雒河集被圍。調水師入洪澤湖。以達臨淮。調劉銘傳周盛波回援皖北。附片奏道員羅麓林委辦營務處。又片奏力辭節制三省。懇請收回成命。十二日札委淮揚道吳世熊辦理轉運糧臺。維時捻酋四入。曰張總愚。曰任柱。曰牛洪。曰賴文光。賴逆則粵匪之黨也。四股匪徒數十萬。馬數萬匹。分合不常。往來颺忽。官軍追逐。或求一戰而不可得。甚或委棄軍火粟馬以資賊。大河以南。淮漢以北。蹂躪數千里。公既奏定專辦十三府州。扼要駐軍。不事馳逐。其用湘淮各軍火器餉需。由水道轉運。以江南爲根本。以清江爲樞紐。沂淮潁而上者。達於臨淮關周家口。沂運河而上者。達於徐州濟寧州。治軍轉餉之規。與前此北方官軍迥殊矣。札撤徐州鎮總兵詹啓綸一軍。遣散回籍。出示曉諭淮北民圩。嚴緝奸匪。二十日劉松山軍到清江浦。二十一日馳摺奏羣賊全萃皖境。英翰突出重圍。以求援。壽春鎮總兵易開俊目疾增劇。擬親率湘軍赴臨淮駐紮。就近調度。派劉松山兼統易開俊之軍。臣初奏四省十三府州之地。安徽以臨淮爲老營。河南以周家口爲老營。江蘇以徐州爲老營。山東以濟寧爲老營。各駐重兵。多儲糧械。一處有急。三處往援。有首尾相應之象。無疲於奔命之虞。或可以速補邊。徐圖功效。至於目前諸將。劉銘傳潘鼎新均可獨當一面。張樹聲周盛波兩軍合當一面。劉松山易開俊合當一面。另派郎中李昭慶訓練馬隊。合以親王舊部。同爲游擊之師。又摺奏派委浙江運司李榕前赴濟寧承領國瑞交代事件。並迎提親王舊部軍馬。赴徐州調遣。飭潘鼎新一軍移駐濟寧。會同李榕料理接管。附片奏欽奉寄諭。陳國瑞劉銘傳曾有五關之案。飭臣斟酌。妥爲調派。現在劉銘傳援勘皖北。應令陳國瑞暫駐河南境。不宜共事一處。以杜諸軍內訌之漸。又片奏總兵陳國瑞優劣事蹟。請旨飭歸河南巡撫節制調遣。是日前摺遞回。奉到上諭。曾國藩因節制三省。任大責重。復懇請收回成命。具見謙抑之忱。第賊氛猖獗。時事孔艱。事權不專。則一切調度事宜。深恐呼應不靈。該大臣惟當力任艱鉅。與三省督撫。和衷籌畫。將此股賊衆。剋期殄滅。彼時三省軍務既平。自可毋庸該督節制。既爲其實。毋避其名。萬不可稍存過慮之心。再有續請。欽此。二十二日。公由清江浦登舟。換用淮船。二十六日。渡洪澤湖。二十八日。舟泊五河。馳摺奏皖境一片逆氛。非馬隊不足以制勝。請將寄諭。撥交河南之馬隊。一起凡四百九十六員名。調赴皖北助剿。附片申陳精力衰頹。軍勢單弱。尙未開總督兩江之缺。而更增節制三省之名。耿

歌寸衷。如負重笈。懇收回成命。但責臣以會辦勤捨。自當通力合作。不敢稍分畛域。如不蒙俞允。更當累疏。續陳不辭嚴譴。二十九日。公舟抵臨淮關駐營。是月。安徽雒河集解圍。賊竄河南許州境。湖北蔣凝學一軍。奉調赴甘肅。行至襄陽。譁潰。六月初六日。批總兵陳國瑞稟。凡二千餘言。稱其所能。而歷數其過失。申明禁約。凡三條。一曰不擾民。二曰不私鬪。三曰不梗令。詞旨嚴切。陳國瑞覆稟。未能遵公約束也。初八日。喬公松年來見公。初十日。出示曉諭亳州蒙城宿州永城四屬民圩。分別戕莠。擒送擒匪。赴軍營者。重賞。并委員會同州縣。嚴拏匪徒。就地懲辦。十二日。與喬公松年。馳摺會奏。援軍大捷。雒河解圍。附片專奏陳州府庫存銀二十萬兩。擬與江蘇安徽河南分撥各五萬兩。給付軍營。其李鴻章應得之餉。即就近撥發。劉銘傳等軍月餉。十三日。公移駐陸營。時淮水盛漲。各營多移淮南岸。以避水。公營在北岸。築堤以捍之。公弟國荃奉旨授山西巡撫。二十四日。奉到上諭。會國荃已簡授山西巡撫。會國藩當囑該撫。勉圖報效。作速赴任。勿以病辭。欽此。是月。賊西竄南陽襄陽一帶。七月初八日。馳奏欽奉諭旨。覆陳一摺。奏稱。雒河解圍以後。賊分兩路西竄。檄調劉銘傳全軍。馳赴周家口。添調馬隊以助之。山東撥交馬隊二起。係曹南新挫之餘。人馬俱疲。必須在徐州大加整理。細觀賊情。已成流寇。若賊流而官兵與之俱流。則節節尾追。著著落後。臣堅持初議。以有定之兵。制無定之寇。令劉銘傳駐周家口。張樹聲駐徐州。劉松山駐臨淮。潘鼎新駐濟寧。賊至則迎頭擊之。請敕下河南湖北督撫。於豫之鞏洛宛鄧楚之隨棗黃麻。各駐勁兵一枝。專重迎勦。不事尾追。庶幾漸有歸宿。且此賊有不甚似流寇者。蒙亳老巢田廬尚在。賊尚眷戀。既設法以遏其流。又擬查辦民圩。以清其源。謹將告示一道。鈔呈御覽。又摺奏徵休防軍。索餉譁謔。已飭查拏侵餉之營官。倡亂之勇丁。認真嚴辦。請將唐義訓金國琛交部議處。皖南道張鳳翥措置不善。先行撤任。并奏自請交部議處。附片奏委吳坤修署皖南道缺。又摺奏揚防凱撤。借用漕折銀兩。目前無款歸還。請旨敕部暫緩催提。又奏謝弟國荃授山西巡撫恩。并陳明近日病狀。未知現在是否痊愈。已恭錄諭旨。馳函家中。囑其勉圖報効。十五日。奉到上諭。會國藩身任統帥。責無旁貸。前經疊諭該大臣籌撥一軍。兼顧晉省。並令劉銘傳等軍。馳赴豫省北路。繞出賊前。防賊竄越秦晉之路。又令派撥馬隊。馳赴豫境助勦。復以賊出徐郡甚遠。令該大臣酌量前進駐紮。乃該大臣日久迄無奏報。於近來皖豫軍情。及各路如何布置情形。均未陳奏。歷次所奉諭旨。亦未答覆。實屬敷衍因循。

若欲藉此獲咎。冀卸節制三省仔肩。何以仰副朝廷倚任之重。該大臣公忠體國之心。何忍出此等因。欽此。十八日。公渡淮。按視劉松山老湘營。廿三日。巡視鳳陽府城行詣明陵。二十四日。馳奏欽奉諭旨。覆陳一摺。奏稱。周家口八面受敵。最爲扼要。劉銘傳將略較優。人數較多。故以周家口重任付之。至秦晉邊防五百餘里。實非該軍所能徧防。若令其西去。則無益於晉。而有損於豫。且湘淮各軍。不慣麵食。軍火礮械。輓運維艱。今河南等省用兵。全不講求轉運。糧械缺乏。莫肯盡力。頃在臨淮。檄委編修張錫嘯招募淮勇。專取能食麥麵雜糧之人。冀備他日。征勦西北之用。至於節制三省之命。臣已三疏回辭。自念賦性顛愚。卽一省已難專任。然受恩深重。雖數省亦當通籌。計擒匪可到之處。約有八省。皇上飭臣兼顧晉省。已在節制三省之外。而外閒之責。望尙不止。此臣何以堪此重任。又何能當此重咎。懇敕下九卿科道。八省督撫。會議勦擒事宜。各抒所見。恭請宸斷。定一不可改易之策。大局幸甚。至臣之不輕奏報。曾於同治元年。具奏陳明。迄今不改此度。若欲因此獲咎。以謝仔肩。則生平所志所學。斷不肯如此取巧。又摺奏徐州鎮總兵詹啓綸壽春鎮總兵易開俊均因病開缺。請旨簡放。以重職守。又摺奏總兵陳國瑞與已革總兵郭寶昌同爲親王軍翼長。曹南之役。未能救護主將。該總兵同罪異罰。補行糾參。請撤去幫辦軍務。革去黃馬褂。責令戴罪立功。以示懲儆。而觀後効。附片密陳前月給予陳國瑞批牘。及陳國瑞稟覆之詞。尙無誠心悔過之意。原牘均鈔送軍機處備查。又片奏保總兵董鳳高李祥和二員。請補徐州壽春兩缺。是日。公拜摺後。登舟啓行。赴徐州。二十六日。舟泊泗州。二十八日。登陸啓行。宿靈璧縣。三十日。宿宿州。是月。賊竄湖北。境。公弟國荃具摺辭山西巡撫之命。陳湜入都調授山西臬司。專辦防務。得專摺奏事。八月初四日。公抵徐州府。初八日。專摺奏查明寧國府宣城縣金寶圩殉難紳民。彙案開單。請分別旌卹。十六日。出城點驗馬隊。閱視操練。十七日。馳摺奏移駐徐州。整理馬隊。計馬隊已到徐州者。前後四起。飭營務處李昭慶等。認真挑選。編立隊伍。配齊器械。換補馬匹。其老病殘廢者。概行遣撤回旗。并奏報擒匪回竄皖境。調派各軍赴潁州會勦。附片奏稱。此次實收到戰馬七百七十七匹。管解各官。異常勞瘁。應請獎敘。二十四日。按視張樹聲淮軍營壘。二十八日。閱淮軍操陣法。是月。迭奉寄諭。令公移駐許州。節制皖鄂豫三省軍務。居中調度。揀任任柱牛洪賴文光由潁州陳州竄山東之曹州。張總愚一股。尙留屯南陽之境。九月初一日。馳摺奏劉銘傳一軍。迭獲勝仗。賊東竄曹州。趨重東路。

調徐州全軍赴山東會剿。調臨淮軍接防徐州。調周盛波移駐歸德。惟馬隊無多。久未辦成游擊之師。自問尙無破寇之術。附片奏金國琛所部勇丁鬪餉一案。尙未訊辦就緒。不能赴甘肅鞏秦階道之任。又片奏湖北軍務。請仍全歸官文節制調遣。初三日。核定馬勇營制營規。及馬步合隊章程。十五日。賊破辛家寨。徐州戒嚴。十九日。馳摺奏。接奉寄諭。欲令李鴻章親帶楊鼎勳等馳赴河洛。將豫西股匪撲滅。兼顧山陝門戶。而以吳棠署理兩江總督。李宗羲丁日昌遞署漕督蘇撫。飭巨函商。迅速覆奏。又奉寄諭。令鮑超馳赴河南。歸臣節制各等因。查近日賊勢東趨。距徐城不遠。當以全力專顧東路。已調郭松林楊鼎勳兩軍防勤沂海一帶。若李鴻章視師河洛。別無可調之軍。以帶赴西路。近聞閩粵兵威大振。髮逆窮蹙。若令鮑超改赴河南。實爲有益於豫。至李宗羲丁日昌權領封圻。未免嫌其過驟。數年以來。皇上求才若渴。於疆臣保薦人員。破格超遷。外間疑爲非常之才。責備吹求。於是臺諫彈劾生風。并歸咎於原保之員。若令循資漸進。少爲迴翔。則該員不至見妬於同僚。而言路亦不至仇視乎疆吏。實有裨於中外和衷之道。且廟堂之黜陟賞罰。非閩外諸臣所宜干預。今以督撫要缺。諭令臣等往返函商。尤覺非宜。因不俟李鴻章吳棠商定。直抒管見。附片奏報賊勢南趨。有回雉河老巢之說。張總愚一股已近湖北之境。是時陝西巡撫劉公蓉。爲御史陳廷經所劾。疏詞激切。獲譴甚重云。是月張總愚竄湖北境。回竄河南。福建官軍進克廣東鎮平縣。賊踞嘉應州城。左公宗棠奉旨節制廣東江西各軍。出境督剿。三省官軍合圍嘉應州。鮑公起新募湘勇一軍。赴江廣會剿。十月初九日。按視李昭慶所部馬隊步隊。飭令訓練成軍。以出爲游擊之師。十一日。馳摺奏。徐州官軍擊賊獲勝。賊仍竄山東。潘鼎新破賊於豐縣。回駐濟寧。附片奏賊所以注重山東者。以運河東岸平衍富饒。不似河南之荒瘠。臣所以注重東路者。以山東北鄰畿輔。天下之根本也。南鄰江蘇。湘淮各軍之根本也。霜降以後。水落冰堅。河防尤急。請赦下直隸督臣嚴冬春之防。祇可增兵。斷難減戍。若賊回竄。閉封以西。當調大枝游擊之師。赴豫會剿。附片奏保吉林協領春壽營總穆隆阿開復處分。又奏四川訓導屠煥章留營差遣。是時張總愚股匪。由鄭縣禹州東竄開封之境。任柱牛洪賴文光等股。由曹州西竄。與張總愚合股擾犯襄城舞陽。勢趨鄂境。三十日。馳摺奏擒匪西竄。周盛波在寧陵擊賊獲勝。劉銘傳在扶溝擊賊獲勝。現在賊勢謀擾湖北。檄飭徐州馬步各軍。分駐周家口。騰出劉銘傳一軍。爲游擊之師。不復拘泥十三府州之說。隨賊所向。跟蹤

追勦。李昭慶所領萬人。俟鞍馬齊備。即令馳赴河南。縱橫追勦。附片奏資遣吉林黑龍江察哈爾應撤官兵九百員名。起程回旗。參領三棟阿等病故請卹。又奏鄂軍辦指委員。前廣東臬司齡椿病故請卹。又片奏預籌鮑超一軍進兵之路。須以襄陽爲老營。由湖北糧臺。照料銀米軍火。是月。公讀左氏傳。記錄分類事目。十一月初七日。核定長江水師永遠章程及營制營規等。閱兩旬核畢。徐州銅山沛縣之境。有微山湖。出地一區。咸豐四五年間。山東曹州之民。因河水泛溢。避水南徙。佔居其地。其後來者益多。至數萬人。佔田浸廣。地方官因爲按畝徵稅充餉。號曰湖團。與沛縣居民屢有爭訟械鬪之案。捻匪東竄之時。與湖團相勾引。沛民詣公行轅控訴。公批飭嚴拿通捻之團民。訊明懲治。委員赴山東察看團民原籍之地。設法資遣回籍。二十七日。馳摺奏稱。捻匪全數西竄。本擬進駐周家口。因李昭慶一軍。鞍馬未齊。未能前進。又因銅沛湖團一案。與勦捻之事。大有關係。俟料理安插有緒。即當赴豫督勦。并奏粵中賊氛尙熾。悍黨數萬。竄陷嘉應州。鮑超已由贛州進勦。暫難改調赴豫。又摺奏訊明徽州團餉一案。分別擬結。并將兩軍十七營。全行遣撤回籍。附片奏前皖南道張鳳翥病故請卹。水師營官提督成發翔病故請卹。是月。張總愚竄湖北襄陽邊境。任柱牛洪等股。由光固竄安徽潁州邊境。旋竄入鄂。十二月初二日。湖北成大吉軍在麻城潰叛。捻匪乘之。江漢以北賊氛肆擾。蔓延數百里。十三日。按視張錫燦淮北新營。詳定長江水師營制事宜。二十五日。公子紀澤自金陵來營省視。二十八日。馳摺奏。兩路捻黨。全萃湖北。又有叛勇之變。檄調劉銘傳率軍援楚。又奏會議長江水師營制事宜。凡水師事宜三十條。營制二十四條。又摺奏遵旨查明河南巡撫吳昌壽總兵張曜等被參各款。又奏遵旨密查山東巡撫閻敬銘藩司丁寶楨被參各款。附片密奏稱山東河南居四戰之地。閻敬銘吳昌壽二人。軍務均非所長。而情形各自不同。謹鈔錄河南紳士原稟呈覽。是月。公批結沛縣湖團各案。將安分之唐團趙團等六團。留住徐州。通捻之王團刁團等。勒限撤歸本籍。出示曉諭士客各民安業。湖北襄樊之賊。張總愚一股。回竄南陽。是歲鄭公敦謹調戶部侍郎。李公鶴年授湖北巡撫。張公樹勳授直隸臬司。均未赴任。張公所部樹字營准勇。以其弟總兵張樹珊領之。

〔丙寅〕同治五年公五十六歲。正月。公在徐州營。初十日。專摺奏謝年終恩賞。派委劉松山率軍督遣王團刁團回山東原籍。十四日。馳摺奏酌撥現防徐州之馬隊二起。共計九百餘人。馳赴奉天省城。勦捕馬賊。聽候文祥朝

遣陷片奏調侍講學士謝秉璋來營襄辦軍務又片奏報湖北軍情喫緊。張總愚折回河南。有東竄之意。湖團撤遣事竣。即調李昭慶軍馳赴周家口。又片奏知縣向師棟在營病故。請卹。廿八日。謝銘傳軍克湖北黃陂縣城。賊竄河南。是月。左公宗棠督諸軍克復嘉應州城。鮑公超追剿竄賊。至大嶂嶺破之。招降二萬餘人。粵逆盡滅。東南底平。左公宗棠暫駐廣東境。籌辦善後。公弟國荃奉旨授湖北巡撫。李公鶴年調補河南巡撫。三十日。奉到上諭。刻下擒匪竄擾湖北邊境。防勦正當喫緊。會國荃素嫻軍旅。朝廷爲地擇人。正資倚任。且由湘赴鄂。相去甚近。著會國藩李瀚章即行知照該撫。迅速馳赴新任。力圖報稱。不得稍存推諉之念。有負屬望。欽此。二月初八日。馳摺奏結湖團歷訟案。剖別是非。平情論斷。不分土民客民。但分孰良孰莠。王團刁團業已全數徙去。安靜回籍。酌定善後事宜。飭地方官次第經理。一曰酌給錢文。以卹已逐之團。二曰設立官長。以安留住之團。三曰撥還田畝。以平土民之心。并請將罵賊殉難之團紳唐守忠唐錫彤唐振海三名。優卹建坊。以爲草莽效忠者勸。又具摺奏謝天恩。已知照臣弟國荃招募舊部。迅赴新任。又摺奏浙江衢州鎮總兵朱品隆河南歸德鎮總兵朱南桂均請開缺。又奏保總兵唐殿魁徐鸞二員。附片奏報視師山東起程日期。又片奏張樹聲經手營務。俟料檢完畢。即起程北上。赴直隸臬司任。又片奏陣亡總兵夏金標請卹。初九日。由徐州拔營啓行。十五日。宿鄆縣謁亞聖孟子廟。接見孟氏宗子孟廣均。是日馳摺奏報劉銘傳一軍援鄂。克復黃陂縣城。隨摺奏保劉銘傳及其營官唐殿魁劉盛藻等十九員。陣亡勇弁陳福祿張思聰李先道錢萬桂請卹。十六日。行次曲阜縣。謁至聖先師廟。見衍聖公孔祥珂。觀金絲堂彝器。謁復聖顏子廟。十七日。偕衍聖公孔祥珂出謁聖林。及述聖子思子墓。十八日宿兗州府。十九日。至濟寧州。丁公寶楨護理山東巡撫。來濟寧見公。二十一日。閱視濰鼎新一軍操演。二十八日。巡視運河泗水形勢。是月。牛供任柱頹文光由湖北竄河南汝寧。擾及潁州陳州境。張總愚一股。竄山東曹州。三月初五日。馳摺奏報張總愚大股東竄。調濰鼎新全軍堵勦。李昭慶軍來山東會勦。調徐州楊鼎勳軍護衛孔林。任穎等股。回竄皖豫之界。銳志東趨。劉銘傳周盛波合力勦辦。查捻逆西逼楚疆。東趨海岱。相去動三千里。馬步以數萬計。必須鮑超劉秉璋劉松山等。多成數路游擊之師。乃足以布遠勢。臣現駐濟寧。就近調度。東事定後。再行赴豫。又摺奏邊調鮑超一軍北來勦捻。請飭江西月解七萬兩。湖北月解二萬兩。江蘇月解二萬五千兩。專供鮑超霆營之餉。

請飭左宗棠劉坤一將江閩各軍分別遣撤。次第銷兵。以靖民氣。臣自抵臨淮。察看皖豫等省行軍。每以柴草細故。兵民成仇。因令各營發價購買。不得妄取絲毫。飽超所部。頗有騷擾之名。今籌定有著之款。於襄陽設糧臺。委員支應。俾得專精辦賊。且申明紀律。秋毫無犯。乃能軍民一氣。一以保全飽超之令名。一以拊循河南之赤子。關係甚重。二十一日。馳摺奏彙報山東近日軍情。濬鼎新李昭慶兩軍勦賊勝負情形。任穎等逆。續竄曹州之境。張逆屯於濮范之境。一片賊氛。劉銘傳周盛波兩軍追賊均抵東境。現在調派各軍。嚴扼運河。劉松山軍來濟寧會勦。陣亡將弁劉洪盛裴兆宏二十八員名。請卹。又摺奏報劉銘傳張樹珊兩軍在皖豫之境。勦賊獲勝。陣亡將弁胡鳳階劉得發請卹。附片奏東豫兩省車輛甚少。難於僱覓。派員前赴張家口採辦駱駝五百匹。來營應用。請飭部援照買馬成案。免稅放行。又附片瀝陳此股捻匪奔突六省。攻勦十年。久成流寇之證。中外論者。或輕此賊。以爲不足平。各路奏報。每多粉飾虛浮。或並無戰事。而開單請獎。臣受命勦賊。已滿十月。制寇之方。尙無把握。終夜以思。且憂且愧。願我皇上。弗輕視此賊。博儲將材。求爲可繼。稽核奏報。戒其勿欺。庶憑聖主朝乾夕惕之懷。以救中原火熱水深之危。又奏稱督師有年。損折將士甚多。凡嘗時未及奏報。漏未請卹之員弁。統計陣亡者一百四十四員名。傷亡七員名。病故者一百五員名。彙開清單。懇恩敕部分別議卹。以慰忠魂。是月。公弟國荃到湖北巡撫任。李公鶴年到河南巡撫任。捻匪由山東南竄淮徐之境。四月初三日。閻公敬銘來濟寧見公。初七日。馳摺奏報。捻匪自山東回竄。劉銘傳周盛波等軍追勦疊勝。并陳明濬鼎新一軍力戰。保全東境之功。山東官軍扼防運河之功。劉銘傳周盛波周盛傳竭力苦戰。冒險立功。容俟彙案請獎。附片奏賊勢南趨。劉松山回軍徐州。該處現有劉秉璋楊鼎勳等軍。尙爲聯絡。臣軍注重東路。不得不藉運河。以爲阻截之界。擬大加修浚。增堤置柵。以爲之防。拜摺後。與閻公敬銘登舟查勘運河。以至黃河。是日泊分水龍王廟。初九日。泊申家口。劉公長佑來舟次見公。十一日。渡河至張秋鎮。十二日回舟次。十三日登南岸。宿東平州。十五日。行抵泰安府。謁東嶽廟。十六日。登岱嶽。上至天柱峯。十九日。公回濟寧州。二十五日。馳摺奏捻匪張總愚牛洪一股。竄擾曹州徐州之交。任柱賴文光等一股。竄擾淮泗一帶。并陳湘淮各軍防勦情形。劉銘傳一軍。自去年臘月以來。馳驅四省。已飭該軍移赴濟寧。暫予休息。騰出濬鼎新軍。代爲游擊之師。附片奏查勘運河黃河布置防守情形。五月二十二日。馳摺彙奏劉秉璋

劉松山劉銘傳周盛波等軍與賊接仗獲勝情形。捻黨分股回竄。張總愚牛洪入豫。任柱賴文光入皖。飭潘鼎新周盛波爲一路。劉秉璋楊鼎勳爲一路。劉松山張詩日爲一路。分途馳擊。劉銘傳李昭慶兩軍分駐徐州濟寧。暫予休息。附片奏黃運兩河應畫分汛地。歸直隸山東督撫派兵設防。又擬查閱運河南路與工修築隄牆。是月公錄樸目雜記。分小學修齊禮兵經濟詩文。凡六門。六月初七日。行至嘉祥縣。謁宗聖會子廟。接見曾氏宗子曾廣蕭。公捐銀一千兩。以助祀產之資。初八日。出詣南武山宗聖林墓。初九日。回濟寧。十四日。馳摺奏擒匪西竄。官軍追勤情形。并稱中原平曠四通八達。此勤彼竄。不能大加懲創。擬自周家口以下。扼守沙河。周家口以上。扼守賈魯河。自朱仙鎮以北。至黃河南岸。無水可扼。擬掘濠守之。調派水師及劉銘傳等軍。分段設防。咨商河南安徽兩撫臣。調兵分守。至羣賊南竄。不出南汝光固黃州六安等處。則鮑超一軍。劉秉璋楊鼎勳等之淮軍。劉松山張詩日之湘軍。足敷勦辦。臣擬拔營東下。閱勘運隄。卽由運入淮。逕赴周口。附片奏防河之舉。地段太長。派劉銘傳潘鼎新張樹珊扼守朱仙鎮以下四百里之地。力任其難。自朱仙鎮以上。專資河南兵力。已咨請李鶴年暫駐汴梁。調回各軍。先辦防務。主守而不主勤。誠恐李鶴年蒙頓兵不進之譏。設將來河防不成。臣願獨當其咎。不與李鶴年相干。十五日。由濟寧登舟。行閱運河所修隄牆。二十五日。舟泊宿遷。登岸駐營中。時豫皖大水。淮流盛漲。微山南陽等湖。與運河連成巨浸。公深以民間飢溺爲憂。是月。擒匪在河南合股。既而張總愚牛洪西竄。劉松山張詩日截勤破之。任柱賴文光東竄。潘鼎新迎擊卻之。公弟國荃調派郭松林彭毓橘等軍。防守德安隨州。鮑公超軍行抵湖北蕪黃之境。七月初四日。馳摺奏報查閱運河隄岸情形。任賴股匪回竄東路。前奏扼守沙河之策。難遽與辦。現今劉銘傳周盛波潘鼎新赴東路馳勤。惟淮南北大水。爲數十年所未有。既自懷軍務毫無起色。又恐飢民失所。從賊偷生。則勤撫兩俱棘手。實深憂愧。初六日。由宿遷解纜。下泊楊莊。初七日。吳公棠來見公於舟次。運河隄決於高郵之清水潭二閘。浸輿化東台鹽城等縣之境。初八日。公換船入淮。初十日。渡洪澤湖。泊盱眙。十五日。舟次王家圩。大風。舟幾覆。水師舢板船覆者八號。弁勇死者五人。公言生平經歷江湖風波之險。道光戊戌之秋。在襄河遇風。咸豐甲寅三月。在岳州水軍遇風。并此爲三度矣。十六日。抵臨淮登岸駐營。二十二日。巡閱張錫鏞淮勇營。二十三日。公病暑。經證服藥。閱數日乃愈。自是以後。遇有疾病。公恆持勿藥之說。蓋其視生死之際。已

脫然矣。二十八日。馳摺奏潘鼎新一軍。迎勦獲勝。任賴一股。竄至賈魯河以西。仍擬扼防賈魯河沙河。杜其回竄。附片奏練過大風。委員知縣譚鼐舟覆。隕命請卹。又片奏報劉松山張詩日兩軍。在西華上蔡等處大捷。并自陳途中病狀。力疾西上。公拜摺後登舟行。伯懷遠縣。三十日。泊蒙城縣。是月。官文公奏請。以公弟國荃幫辦軍務。張總愚牛洪西竄南陽。劉松山與河南官軍宋慶等。追勦至新野鄧州南。召魯山之境。任柱賴文光竄襄城。以南。八月初一日。公由蒙城換小舟。泝渦河而上。派親兵由陸路先赴周家口。令韜重各船。致道泝淮上潁。以赴周口。初二日。泊雒河集。初四日。行抵亳州。初六日。由亳州登陸起行。初八日。行至陳州府。詣袁端敏公祠。初九日。至周家口營。十二日。馳摺詳報劉松山張詩日勦賊勝仗。奏稱。近年捻逆縱橫。從未大受懲創。此次湘軍奮擊。凶鋒頓戩。容查明彙案奏獎。附片奏患病未痊。請假一月。在營調理。又片奏任賴一股。久踞舞陽葉縣之交。有回竄東北之勢。張牛一股。亦聞有回竄之意。調派各軍堵勦。鮑超由汝寧北出迎勦。力扼東竄之路。劉銘傳等仍興修隄牆。分汛防守。以符初議。又附片奏。臣向辦保案。極爲矜慎。金陵克復。續保六案。疊准部咨駁斥。查取考語申覆。自應遵部議辦理。惟原保各統領。散處各省。行查爲難。懇恩俯念將士立功之苦。敕部准照原奏清單註冊。以爲奮勇立功者勸。劉銘傳等軍。修築賈魯河隄牆工竣。李公鶴年調官軍六營於朱仙鎮以北。開濠置守。准軍復分衆助之。浮沙壅塞。難於挑濬。時捻逆全股。由許州北竄。十六日。逼近汴梁。全股衝濠東竄。疾趨山東。二十三日。馳摺奏擒匪東竄。河防無成。檄調劉銘傳潘鼎新等赴山東追勦。附片奏。稱勦捻年餘。仍無成效。憂愧無極。請旨飭令李鴻章帶兩江總督關防。出駐徐州。與山東撫臣會辦東路。湖北撫臣曾國荃攜帶關防。移駐南陽。與河南撫臣會辦西路。臣現駐周家口。居數省之中。庶可聯絡一氣。呼吸相通。又片奏。稱防守沙河賈魯河本係策之至拙者。惟以流寇難制。不得已而出此下策。此次擒匪東竄。出於豫軍汛地。或不免歸咎於撫臣李鶴年。謹縷陳持平之論。懇恩暫予免議。以期和衷共濟。爲將來同心設防之計。又片奏。調浙江處州鎮總兵馬得順。帶所部馬隊。來豫勦捻。是日。又具摺奏。擒逆以蒙亳老巢爲歸宿。莠民勾引。居則爲民。出則爲捻。若商賈之遠行。恬不爲怪。臣於上年。遷委各員。查辦民圩。擒斬著名。積擒甚多。謹將蒙城亳州宿州阜陽四屬。已經正法之捻徒。彙單附呈。爲第一案。以後續獲。逐案彙奏。是月。擒匪竄漢運河。山東官軍堵禦卻之。回竄河南。左公宗棠調授陝甘總督。喬公松年調

陝西巡撫英翰公授安徽巡撫九月初四日李公鶴年來營見公初六日漕督張公之萬來營見公十三日馳摺詳報劉松山等在新野南陽等處迎剿張牛逆股迭次勝仗奏稱劉松山等聞豫軍宋慶被圍即日馳援及解圍後卽與宋慶聯絡一氣同心苦戰尤得師克在和之義又摺奏劉銘傳潘鼎新兩軍往來勦賊齊豫之境迭獲勝仗擒匪既不能逞志於東必仍狂竄而西檄令劉松山由扶溝迎勦鮑超由南陽進軍遮截西竄之路附片奏請續假一月在營調理是日又具摺奏彭玉麟所部水師報捐餉銀十萬兩請加廣衡州府縣學額附片奏彭玉麟報捐歷任應得養廉銀二萬餘兩不敢仰邀議敘十九日彭公玉麟來營見公是月擒匪由山東竄河南循河南岸至滎澤決河隄河南官軍堵塞之擒復南竄擒酋牛老洪死張總愚西竄陝汝遂入陝西商州境任柱賴文光仍竄山東疾趨濟縣攻撲運河山東官軍扼之李公鴻章出視師於徐州公弟國荃出視師於襄陽具疏劾官文公十月初九日喬公松年來營見公遂赴陝西任十二日英翰公來營見公十三日馳摺奏彙報軍情賊分東西兩路東路任賴逆股劉銘傳潘鼎新等追勦逆蹤盤旋於鉅鄆一帶西路張總愚一股已入陝西鮑超軍馳至陝州未及接仗又摺詳報劉銘傳潘鼎新在鄆城等處追勦勝仗又摺奏病難速痊請開協辦大學士兩江總督之缺並請另簡欽差大臣接辦軍務自以散員留營效力不主調度附片奏陳勦擒無效請將臣所得封爵暫行註銷以明自貶之義又具摺續報水陸陣亡病故員弁彙單請卹又附片密陳山東撫臣閻敬銘藩司丁寶楨澄清吏治講求軍務實際請開復處分又片奏李鴻章已帶印出省黃翼升回駐江寧藉資鎮撫十五日公子紀鴻來營省視十九日奉到寄諭一道詞旨嚴切催令速籌援軍以赴陝洛二十五日奉到上諭該大臣勦整風著積勞致病自係實情著再賞假一箇月在營安心調理欽差大臣關防著李鴻章暫行署理會國藩俟調理就痊卽行來京陛見一次以慰廬系朝廷賞功之典具有權衡該大臣援古人自貶之義請暫註銷封爵著無庸議欽此三十日任賴捻股由山東回竄陳州境公行營戒嚴調親軍出隊截勦是月公弟國荃出駐黃州十一月初二日馳摺奏報西路張逆深入秦境尙無回竄之說調鮑超一軍進剿紫關以援秦中東路任賴一股回竄河陽飭劉松山迅赴汝州遏其西竄之路附奏奉旨覆陳一片稱行軍太鈍精力日衰俟病體稍痊入都陛見自請辦捻不善之罪又片奏楊鼎勳張錫燝追勦任賴一股擒蹤直奔沙河以南劉松山仍由汝路進兵以力保黃河先顧山西

爲主。初六日奉到上諭。會國藩著回兩江總督本任。暫緩來京陛見。江蘇巡撫李鴻章著授爲欽差大臣。專辦剿匪事宜。欽此。十七日。馳摺奏酌籌西路軍務。鮑超一軍援秦。派委江蘇道員薛書常專辦靈糧臺。採辦軍米。又摺奏交卸欽差大臣關防。賚送徐州。交李鴻章祇領。欽奉諭旨。飭臣竟回本任。臣自度病體。不能勝兩江總督之任。若難營回署。又恐不免長難取巧之譏。請仍在軍管照料一切。維繫湘淮軍心。庶不乖古人盡瘁之義。附片奏刊用木質關防一顆。其文曰。協辦大學士兩江總督一等侯行營關防。又片奏任賴股匪奔擾信陽之南。將入鄂境。周盛波跟蹤追剿。現飭張樹珊拔隊追擊。劉銘傳軍疲勞太久。在周家口稍休。即行赴鄂。又檄調李慶昭全軍。由皖赴鄂。以收夾擊之效。又附密片奏保湘淮各軍將才。如道員劉盛藻總兵戴春林潘鼎立。提督章合才。均爲後起之選。前任大名道祝瑄編修張錫嘏皆文員中出羣之才。略陳品概。以備採擇。十九日。委員賈送欽差大臣關防。赴徐州營。二十八日。奉到上諭。會國藩請以散員。仍在軍營自效之處。具徵奮勉圖功。不避艱險之意。惟兩江總督責任綦重。湘淮軍餉。尤須會國藩籌辦接濟。與前敵督軍同爲朝廷倚賴。該督忠勤素著。且係朝廷特簡。正不必以避勞就逸爲嫌。致多顧慮。等因。欽此。是月。公弟國荃駐軍德安。湖廣總督官文公奉旨開缺。入都供職。欽差戶部侍郎譚公廷襄暫署總督。十二月初三日。馳摺奏欽奉諭旨。再陳下悃。仍請開兩江總督協辦大學士缺。附片奏任賴一股。竄擾孝感。鄂軍接仗獲勝。檄調劉秉璋與劉銘傳軍。合爲一路。探蹤追剿。又具摺保奏劉銘傳一軍。克復黃陂。并在濟寧雒河阜陽扶溝等處。戰功最偉。勞苦尤甚。五案併保。開單請獎。附片奏保吏部主事錢應傳在營效力。請加四品卿銜。十五日。奉到上諭。會國藩當仰體朝廷之意。爲國家分憂。豈可稍涉疑慮。回執已見。著即懷遵前旨。剋期回任。俾李鴻章得專意勦賊。迅奏膚功。等因。欽此。二十一日。馳摺奏遵旨回駐徐州。暫接兩江總督關防。臣病體未痊。仍懇另簡江督。而臣以散員效力行間。至中外交涉事件。素未講求。請旨令兩淮運司丁日昌護理通商欽差大臣關防。必能有裨時局。附片奏東路任賴一股。盤旋於六安之境。劉銘傳等追剿賊竄向鄂東一帶。西路薛逆渡過渭北。鮑超自請移師赴鄂。先勦東股。因檄令劉松山張錫嘏等。由潼關入秦。即在陝州設立糧臺。仍派薛書常管理。是日具摺奏江西南康縣查辦案内充公田產。分析辦竣。又奏保劉松山張詩日等軍。在西華上蔡新野等處大勝。稟案請獎。附片奏請酌提安徽丁漕。加該省兵勇之餉。又片奏前年

飭委遑同銜容闕前往西洋採辦機器百數十種均交上海製造局收用該員不避艱阻請予獎勵以昭激勸又片奏參安徽渦陽縣知縣沈濂革職是月楚軍淮軍集於湖北之境凡七萬餘人會勦任柱賴文光一股郭松林軍挫於德安總兵張壯勇公樹珊陣亡賊益張陝西官軍挫潰張總愚逼近西安省城喬公松年到陝後亟檄劉松山一軍入援關中公辦理擒匪一載有餘初立駐兵四鎮之議次設守扼兩河之策皆未久而改變其在臨淮搜擒蒙亳匪徒以絕擒之根株在徐州辦結湖團巨案以除擒之勾引劉銘傳劉松山潘鼎新三軍大小數十戰賊衆縱橫颯忽之勢實因以少衰是冬張逆入秦任穎入楚中原稍得息肩矣而是歲言路劾公辦理不善者有御史朱鎮盧士杰朱學篤等疏皆奉寄諭抄發御史穆緝香阿奏督師日久無功請量加譴責一疏奉上諭年餘以來會國藩所派將領馳驅於山東豫楚皖等省不遺餘力殲賊亦頗不少雖未能遽蕩全功亦豈貽誤軍情者可比該御史所奏著毋庸議欽此是後又有御史阿凌阿劾公驕妄各款亦奉旨辨斥公念權位所在衆責所歸惕然不敢安焉。

〔丁卯〕同治六年公五十七歲正月公在周家口營初六日起行赴徐州十三日過碭山境散錢二十六緡給飢民十五日公至徐州十九日接受兩江總督關防兩淮鹽政印信通商大臣關防與李公鴻章通籌西北大局二十一日馳摺奏報回駐徐州接篆日期附片奏賊在鄂中官軍有合圍之勢恐任穎一股續竄入秦鮑超一軍應留豫西攔截俟賊情定後再調赴秦又片奏彭玉麟報捐養廉銀兩奉旨查明子弟給予獎敘該侍郎力辭出於至誠懇如所請以遂其報效之誠二十九日奉到上諭會國藩既經接受兩江督篆所有察吏箠餉及地方應辦事宜均關緊要且金陵亦不可無勳望素著大員坐鎮著即回駐省城以資鎮攝該督公忠體國自當仰體朝廷倚畀之隆勉爲國家宣力一切軍情調度仍著李鴻章隨時咨商以資裨益欽此是月張公錫嘯在陝西陣亡鮑公超回軍襄陽擊賊於楊家垓大破之追勦至豐樂河復大破之殺賊萬餘人任穎捨股竄河南境李公鴻章奉旨授湖廣總督李公瀚章調授江蘇巡撫暫署湖廣總督劉公琨授湖南巡撫二月初三日李公鴻章拔營赴河南督師仍駐周家口初八日專摺奏謝年終恩賞又奏報軍需款目自咸豐三年起至金陵克復之日凡爲時閱十二年之久用款至二千一百三十餘萬之多分爲四案開列簡明清單照例報銷附片奏動用安徽抵徵一項

比例請銷。又片奏江忠義席寶田二軍餉銀歸入江西彙總造報。又片奏補發湘軍欠餉作爲第四案續報之款。又奏新授江蘇布政使丁日昌請暫緩陛見。十四日。馳摺奏。疊奉諭旨。移駐金陵。恭報起程日期。又摺奏上年奉旨。發交臣營差委各員。道員鍾文總兵沈宏富提督何紹彩分別發往各路差遣。附片奏道員祝堽應仍交李鴻章隨營差遣。又片奏甘肅道員金國琛請開缺終養。又片奏陣亡編修張錫燦請加恩其子。又奏陣亡總兵張樹珊請於周家口建立專祠。又摺奏彭玉麟水師營。鮑超霆軍。查辦滋事弁勇。十六日。由徐州啓行。至韓壯登舟。沿途查閱運河隄牆。二十二日。至清江浦。張公之萬來見公。二十三日。吳公廷棟來見公於舟次。方舟從公赴金陵。二十六日。查閱清水潭隄工。三十日。抵揚州。是月。任賴捨股東寬安徽境。回寬湖北東境。湘軍敗挫。彭忠壯公統橋陣亡於黃州。劉松山軍入陝西擊張逆一股連破之。三月初一日。公與宦文公相見於舟次。初二日。查閱瓜州鹽棧。初六日。抵金陵還署。金陵之民焚香於道以迎公。初十日。按視新修江寧學宮工程。十五日。劉公珉舟過金陵見公。二十日。馳摺報奏回省日期。并陳鄂東之賊向西北竄走。張逆在秦。與回逆合股。劉松山攻勦屢勝。尙有把握。附片奏酌撥軍餉。協解陝甘兩省。是月。鮑公超在襄陽傷病大作。公委員贛藥餽問之。左公宗棠赴陝甘任。行至湖北。接受欽差大臣關防。丁公寶楨補授山東巡撫。四月初七日。馳奏提督鮑超傷疾甚劇。請調直隸署提督婁雲慶南來接統霆軍。附片奏回任以後。通計餉需數目。入不敷出。且有萬不容緩之事。須行籌款者。如製造輪船。購買機器。湘軍入秦。淮軍在楚。多未發足軍餉。長江北岸擬添陸軍。以爲防運河隄壩。險工林立。均屬刻不容緩。請旨將江海關洋稅。應解部之四成。酌留二成。以濟要需。十六日。專摺奏謝京察從優議敘。又奏遵照新章。甄別勞績。州縣開單附呈。江南苦旱。公出禱雨於甘露神寺。二十四日。雨。是月。任賴捨股。由湖北寬河南南陽境。五月十六日。馳奏續查民圩。擒斬捻黨。開單奏結。嗣後歸地方官辦理。附片奏任賴逆股。有東趨之勢。本年天氣亢旱。農田枯坼。人心惶惶。皆由臣德薄。累及斯民。憂愧無地。且運河水涸。東路軍情可慮。又聞張逆有回竄出關之意。又摺奏本年鄉試。依限舉行。并兼行乙卯科武鄉試。又片奏保員外郎王家璧請以五品京堂。遇缺題奏。公連日步出禱雨。十九日。公詣靈谷寺取水。二十日。大雨。公籌銀四千兩。修復靈谷神祠。是月。任賴逆股由河南竄山東。越運河而東犯青州之境。奉到上諭。會國藩著補授大學士。仍留兩江總督之任。欽此。六月

初十日專摺奏謝天恩補授大學士。又摺奏鮑超傷病深重。懇請回籍養病。附片奏賊已渡運東寬。令黃翼升駐紮射陽湖。爲裏下河之防。又片奏江寧建立昭忠祠。其初專祀湘軍陸營將士。請并祀水師員弁。又摺奏本年鄉試。派學政鮑源深入闈監臨。又奏請展緩本年軍政。十八日。專摺奏江南北糧臺收支軍需各欸。分案開單奏銷。是月任賴逆股東竄登萊之境。李公鴻章劉公長佑建議。合四省兵力。合堵運河。就東境勦滅任賴一股。河南湖北兩省兵力。嚴扼潼關。毋令東竄。就關中勦除張總愚一股。英翰公疏請合兵嚴守膠萊河。倡賊於海隅。聚而殲之。七月二十九日。馳奏雲營將領公稟。不願隸雲慶部下。請將鮑超全軍撤遣大半。其餘令譚勝達等帶赴濟寧。歸李鴻章調理。并令雲慶另募新軍。以備防勦。又奏遵旨籌撥直隸賑災一欸。皖軍協餉一欸。并陳現籌興復淮壩。使水歸故道。以減淮揚水患。於清江設立導淮局。試辦挑濬。附鈔章程十六條。咨送軍機處。以備查核。附片奏籌撥本年大運銀兩。解交織造衙門應用。俟軍務平定。再議添撥。是月任賴股匪回竄。越濰河擾犯沂州境。竄擾贛榆海州沐陽之境。八月接到總理衙門公文。預籌換約事宜。公飭屬吏。悉心條議。擇其善者。具咨與函。崇派員弁。由滬入都呈覆。請增修金陵昭忠祠。祀江南殉難官紳。九月十八日。具摺奏甄別府縣等官。續奏采訪忠義第二十八案。附片奏水營記名提督馮標病故請卹。皖南殉難縣丞羅慶恩請卹。烈婦程胡氏請旌。是月海州捻股回竄山東境。十月初五日。公下闡典枝武鄉試。提督李朝斌會考。十九日。試竣。取中武舉一百五十七名。是月山東賊復竄贛榆。劉公銘傳追剿破之。陣斃捻首任柱。公弟國荃開缺回籍。十一月初三日。專摺奏報江南武闡鄉試事竣。初六日。專摺奏江北糧臺捐造船礮。用過銀數。循例報銷。又奏徐州善後局報銷。又摺奏揚州虹橋鄉殉難紳民婦女請旌卹。巡檢陸炳請卹。澄海營副將陶位中參將黃占魁出海捕盜遇害。請卹。十五日。馳摺奏遵旨預籌修約事宜。二十七日。劉公銘傳擊賊於壽光彌河大破之。擒斬數萬人。賊大潰。賴文光遁走。山東肅清。是月官文公署直隸總督。丁公日昌授江蘇巡撫。十二月初三日。奏查明本年江南北新漕。徵解實數。現在籌辦情形。又奏籌解明年協甘餉銀。又摺奏江寧省城。自咸豐三年淪陷。向榮和春等駐兵入載。陣亡之文武將弁。殉難之官紳士民。尙未建祠崇祀。實爲闕典。湘軍昭忠祠地基寬敞。因與僚屬議建三祠。中爲湘軍陸營。西爲湘軍水師。東爲金陵官紳。務使毅魄忠魂。萃於一處。其金陵官紳。綜舉約有六端。一曰咸豐三年城陷殉難之員。二曰

向榮和春營中陣亡病故之員。三曰江寧七屬殉難之紳。四曰江南大營援勦他處殉難之員。五曰鎮江揚州兩軍陣亡病故之員。皆附祀祠中。六曰滿漢婦女不屈而死者。別立貞烈祠祀之。懇飭令地方官一併致祭。實有裨於聖朝勸忠之道。附片奏霍邱縣殉難團紳李友張請卹。并其家屬五十一名。初十日。揚州官軍擒捻首賴文光斬之。餘黨迸散。東南蕩平。二十二日。奉上諭。大學士兩江總督一等毅勇侯曾國藩著加恩加賞一雲騎尉世職。欽此。是月張總愚捻股由陝西越黃河竄至山西境。東趨畿輔。是歲駱文忠公秉章奉旨以四川總督協辦大學士。尋卒於成都。李武壯公祥和在陝西宜川陣亡。

〔戊辰〕同治七年公五十八歲。正月初二日。接見西洋公使蒲安臣。十七日。專摺奏謝天恩。加賞世職。又摺奏謝年終恩賞。又奏年終密考學政聲名。又奏江蘇臬司李鴻裔請假。二十一日。定書局章程八條。又訓手民四條。委道員洪汝奎經理書局。汝奎僕陽劉公傳瑩之門人也。二十七日。核定長江水師未盡事宜。及水師補缺章程。是月張總愚捻股竄直隸境。擾犯保定。河間。天津各屬境。畿輔戒嚴。丁公寶楨督軍入援。駐固安。左公宗棠督軍追勦。駐天津。李公鴻章駐軍大名。李公鶴年英翰公皆引兵防河南北。二月十七日。劉公長佑過金陵見公。三月初五日。馳奏擬補長江水師各缺。并續陳未盡事宜十條。奏稱。衡州試辦水師之始。非有舊例可循。屢試屢變。漸推漸廣。今已奏定章程。著爲令典。不敢謂立法之盡善而無弊。所願數十年後。督撫提鎮隨時損益。遇事詳求。冀將材輩出。歷久常新。此則臣等所禱祀以求者也。又摺奏總兵張詩日病故請卹。并准加恩予諡。奉旨予諡勤武。公又奏上年江北冬漕。併歸海運。詳議海運章程十條。開單附呈。附片報江北漕糧起運實數。又片奏籌解甘餉分數。又附片奏陸營武職大銜。借補小缺。請敕部核議准行。又片奏保總兵王可陞章合才易致中三員。皆足勝專閫之任。二十日。作靈谷龍神祠碑記。二十八日。歐陽夫人至署。四月初一日。江南苦雨。公出詣神祠祈晴。李公瀚章調任浙江巡撫。初四日。過金陵見公。初七日。奏結霆營上年在襄陽鬧餉一案。查辦營官哨官。審明定擬。又奏上海鐵廠製造火輪船。及廣東艇船。仍須酌改營制。略仿西洋之法。擬會同丁日昌履勘查閱。再將外海水師章程。核議具奏。二十日。調驗船廠所造八團舢板。二十四日。由金陵登舟啓行。公子紀澤從。二十六日。至揚州查運庫。二十九日。登山觀蘇文忠公玉帶。爲詩紀之。旋登焦山。是月。直隸捻匪竄運河以東。分擾及山東東昌武定。

各屬境時河北水漲軍官因扼運河以困之閏四月初一日公舟泊丹陽初二日泊常州初三日泊蘇州省城留五日初八日出巡閱李朝斌大湖水師遂行赴上海丁公日昌從途次奉到上諭會國藩著授爲武英殿大學士欽此初十日行至上海駐鐵廠查閱輪船洋礮工程洋領事官白來尼等來見公十四日會奏撥解直隸軍餉並彙陳近年協撥陝甘軍餉情形又奏酌提制錢三十萬串由輪船解運天津請照銀價劃抵京餉附片奏上海舊存輪船兩號不能行駛外洋適有福建華福輪船來滬即令改調前赴天津以備巡防之用公專奏遵旨派員馳赴合肥催令劉銘傳銷假迅赴直隸山東軍營并瀝陳勦擒之師謀勇以劉銘傳爲最而勞苦疲乏亦惟銘軍獨甚念本年畿輔之警若非去歲先滅任賴一股大局不堪設想懇於寄諭中獎其勦謀而慰其勞苦則天語一字之褒勝於臣等函牘萬萬矣是日公拜摺後登舟查閱吳淞口狼山福山各營十五日由輪船回金陵署五月初八日專摺奏謝天恩附片奏提督黃翼升總兵歐陽利見所領水師已赴濟寧並查看山東河防提督劉松山添募湘勇飭湖南鹽局撥銀二萬兩以利進行六月十八日專摺奏江北水災賑濟銀數造冊報銷又奏李鴻裔病狀請開缺調理又摺奏總兵崑雲慶撤營事竣請開缺回籍養親附片奏保總兵譚勝達王衍慶二員又摺奏采訪忠義第二十九案附片奏已故總兵張運桂請附祀張運蘭專祠又奏常州殉難紳民史承簡等合族一百二十名請於郡城建史氏忠節專祠全椒縣知縣孟煊在任殉難請建專祠是月劉公銘傳赴直隸時湘淮各軍將領萃於三輔詔都與阿出視師於天津七月彭公玉麟經理長江水師事竣奏請開兵部侍郎之缺補行守制奉旨允之官軍會勦擒匪破平之張總愚走死直隸山東肅清李公鴻章以湖廣總督協辦大學士劉公銘傳封一等男爵封疆將領承恩賞各有差初十日奉上諭會國藩籌辦淮軍後路軍火俾李鴻章等克竟全功著交部從優議敘欽此揚州民與天主教堂鬧鬧公委藩司李宗羲運司李元華上海道應寶時提案會訊二十二日專摺奏前次有密疏一件未能慎密自請交部議處又摺奏東西捻股一律肅清湘淮各軍亟應趕緊裁撤以節餉需而蘇民困謹預籌經費爲撤勇之用又摺奏查明運河水誌情形又摺奏查報陣亡傷亡病故員弁彙單請卹附片奏河工道員潘鴻燾請卹又摺奏江寧府屬查出熟田試辦抵徵廿七日奉到上諭會國藩著調補直隸總督兩江總督著馬新貽調補欽此八月初六日專摺奏謝天恩一爲交部優敘一爲調任直隸德馨陞見附片瀝陳

丁憂兩次。均未克在家終制。從公十年。未得一展墳墓。瞻望松楸。難安夢寐。又稱勦擒無功。本疚心之事。而回任以後。不克勤於其職。公事多所廢弛。皆臣抱款之端。俟到京時。剴切具奏。十一日。作江寧昭忠祠碑記。十三日。上海船塢。造火輪船第一號成。駛至金陵。公登船試行。至采石磯。命名曰恬吉。取四海波恬。公務安吉之意。批發揚州教堂一案。具咨文呈報總理衙門。是月。李公鴻章奏凱撤勦捻官軍。惟留劉銘傳一軍。駐紮畿南之張秋鎮。又奏籌款修葺孔林。湘勇劉公松山軍從左公宗棠入奏勦辦回逆。九月初二日。奏報恬吉輪船工竣。并陳明上海機器廠籌辦情形。附片奏金陵善後局經用之款。請免造冊報銷。又片奏內江水師糧臺委員。船廠委員。彙案請獎。初十日。酌定湖北撤勇一案。十七日。核定外海水師章程。丁公日昌至金陵。會議揚州教堂一案。二十日。馬公新貽到金陵。二十六日。交卸關防印信。二十八日。公弟國濱來署。相見甚歡。大被同宿。縱談家鄉瑣事。以爲笑樂。又自書箴言六條贈之。是月。公與漕督河督。會奏築工漫水。漸入洪湖。會籌堵禦一摺。十月初五日。具摺奏報交卸日期。遵旨會商公事。暫緩啓程。又具摺奏請禁止川私行楚。收回淮南引地。以復舊制。而整隴綱。附片奏劉松山一軍。由江南協餉。請改道湖北襄陽轉解入秦。並稱臣交卸之際。應將經手事件。略爲結束。又摺奏原任廣西巡撫鄒鳴鶴在金陵殉節。請從優加卹。並准予諡。以彰忠節。又奏水師營副將柳壽田病故請卹。二十六日。李公鴻章赴湖廣任。過金陵見公。十一月初三日。專奏湘軍第五案軍需款目。造冊報銷一摺。奏稱。從事軍營。辦理報銷。中外吏胥。互相勾結。以爲利藪。此次臣嚴飭屬員。認定實用實銷四字。不准設法騰挪。不准曲爲彌縫。臣治軍十餘年。所用皆召募之勇。與昔年專用經制弁兵者。情形迥異。其有與部例不符之處。請敕部曲爲鑒諒。臣初無絲毫意見。欲與部臣違抗也。是摺奉旨著照所請。該部知道。欽此。是日。又具摺奏酌辦江蘇外海內洋裏河水師事宜十四條。請敕下李鴻章馬新貽丁日昌各抒所見。妥爲核議。並求部臣詳核。不厭駁詰。以期利多弊少。臣不敢因係初議之人。稍涉迴護。又摺奏江楚用兵太久。武職保舉太多。惟借補小缺一途。可以安置撤遣之將弁。謹將江南近年考試武舉章程六條。錄呈御覽。又摺奏江淮等屬。歷年墊應兵差。添設台站。頭緒紛繁。州縣交界。永無結算之期。實有妨於吏治。臣任兩江最久。惟此爲經手未完之件。現擬設法清釐。准仿照糧臺之例。開單報銷。仍按據金陵未克以前及既克以後年分。分別辦理。附片奏補發湘軍欠餉。歸案報銷。又片奏臣未交卸之事。兩

次接准造辦處來文俱稱移會兩淮監督。查兩淮祇有鹽政。并無監督之官。造辦處係內務府司員。與部院司官體制相同。行文督撫。應用堂官之印。請旨敕下該衙門。嗣後遇有傳辦要件。統歸內務府大臣行文。不宜逕由造辦處移會。以符定制。而杜弊端。又片奏報經手事竣。起程北上日期。初四日。公由金陵登舟起行。金陵士民焚香酌酒以餞送者。填咽街巷。於時歐陽夫人患欬喘甚劇。公長子紀澤留金陵侍疾。次子紀鴻從行。初八日。泊揚州。公弟國橫從公於揚州。乃別回湘。十三日。抵清江浦。十七日。由清江啓行。江寧將軍魁玉公出都赴任。謁公於途次。二十日。彭公玉麟從公於郟城境。乃別回南。三十日。渡黃河。宿齊河縣。丁公寶楨來見公。十二月初四日。行抵直隸境。公在途次每日按輿圖。稽查山川原委。尤詳考畿輔水利。隨時延訪官紳賢否。證以輿論而密記之。十三日。入都門。寓東安門外賢良寺。十四日。昧爽趨朝。見軍機大臣於朝房。召見於養心殿。奏對數十語。賜紫禁城騎馬。退朝謁恭親王於邸第。及軍機大臣文祥公等。十五日。遞摺奏謝天恩。召見。奏對十餘語。十六日。又召見。奏對語尤詳。移時乃出。時在廷諸臣。想望豐采。朝退之際。千官屬目焉。十八日。至內閣上任。接見侍讀中書各員。旋至翰林院上任。接見講讀學士以下各員。謁至聖廟及先儒韓文公祠。十九日。公訪塔忠武公宅。登堂見其母。厚餽之。二十日。移寓城南法源寺。二十四日。至內閣集議通商事宜。凡三日。二十八日。會奏議覆修約事宜一摺。二十九日。遞摺奏謝年終恩賞。

〔己巳〕同治八年公五十九歲。正月初一日。早朝捧慶賀表。從駕詣長信門行禮。天明皇上升殿受賀。公與朱公鳳標上階展表。太常寺司員宣讀表文畢。公與內廷諸臣行禮而退。初二日。始爲無愆室日記。條記密事。初五日。公訪倭仁公宅。因偕至內閣。醇郡王與大學士會議。奏陳機務六條。公手薰數千字。移時而成。初七日。趨朝奏事。初九日。至琉璃廠書肆。縱觀書籍。十五日。趨詣保和殿。侍賜宴。藩王。十六日。賜宴。廷臣於乾清宮。內監引入。皇上升座。倭仁公領備大學士尙書西向坐。公領漢大學士尙書東向坐。樂三闋。乃宴。倭仁公起奉爵御座。皇上遍賜大臣爵。樂三闋乃出。謝恩。頒珍賞物。十七日。具摺請訓。又遞摺奏略陳直隸應辦事宜。請酌調人才。以資差委。酌撥銀兩。以濟要需。直隸最大之政。在於練兵飭吏。次則河工。請留劉銘傳一軍。長作拱衛之師。再練萬人。使成勁旅。則畿輔不患空虚。民間疾苦。由於積獄太多。差徭太重。屬僚玩上虐民。當以嚴法重懲之。永定滹沱二河。常爲

民患亦宜大加疏濬。請敕下江蘇督撫。每月撥解銀三萬兩。稍資周辦。并開單奏調道員錢鼎銘陳彝知府李興銳知州游智開趙烈文知縣方宗誠金吳瀾及員外郎陳蘭彬八員召見。奏對數十語。皆疏中事也。退朝謁恭親王邸第。二十日出都。二十一日。巡視永定河堤工。二十七日。行抵保定府。二月初二日。接受直隸總督關防。長蘆鹽政印信。初八日。拜發到任接印日期一摺。附片奏試辦永定河工。請敕戶部借撥銀兩。趕修要工。初九日。送官文公入都。十三日。札飭永定河道及河工委員。擇日興工。十六日。閱直隸選練六軍操演陣法。時直隸營伍疲弱。劉公長佐爲總督時。邊部議於綠營弁兵中。挑選數千人。酌加練餉。至是已五年矣。十八日。作清訟事宜一編。爲四柱冊。通飭各州縣官。刻期清結積案。以爲課程。二十三日。具摺奏查明州縣積滯大窪地畝。分別豁減糧賦。又奏糧臺循案報銷一摺。三月初五日。刊發直隸清訟事宜十條。核定限期。功過章程十四條。初九日。三口通商大臣崇厚公來見。十四日。劉公坤一入都。過保定見公。直隸臬司張樹聲調山西臬司。新授臬司史念祖。詔公察看。十六日。摺奏直隸訟案最多。積壓未辦。臬司張樹聲情形較熟。清釐甫有端緒。請暫留本任。并鈔呈清訟事宜十條。又摺奏舉劾屬員。以飭吏治。又奏報上年搶修永定等河。用過銀數。二十八日。丁公日昌入都。過保定見公。史念祖到省。公派委綜理發審局。四月初一日。專摺奏報查勘永定河工合龍出省日期。是日啓行。初六日。驗收河工。初八日回署。十四日。奏報勘工回省日期。又奏直隸採訪節義第三案。十七日。粵南使臣黎峻等。過境見公。二十日。公子紀澤奉歐陽夫人到署。二十八日。郭公柏蔭入都。過保定見公。五月初四日。專摺奏劉松山軍在陝西宜君綏德兩處。有潰變之案。實因軍士久役思歸所致。該軍勦辦得力。銳氣未滅。未可遽議撤遣。初十日。楊公昌濬入都。過保定見公。二十一日。具摺奏稱近日內外臣工章奏。多主練兵不主養勇。當此全境救平。自不宜留勇隊於近畿。然目前練軍。實無化弱爲強之法。當參用東南募勇之意。仍須戶部籌撥餉。然後營務漸有起色。又摺奏永定河工合龍。請開復河員處分。附片奏報提用長蘆復價銀兩。以濟河工。并擬酌加歲修領款。二十二日。李公宗綏入都。過保定見公。二十三日。永定河復決口。六月初六日。作客座示僚屬箴言四條。定以每日傳見州縣二員。十一日。奏遵照部議。裁撤長蘆總商。以杜把持之弊。又摺奏永定河水暴漲。道廳各員搶護新工。竟於他處漫溢。請分別參辦。并自請交部議處。又奏提督朱南桂譚國泰病故。請卹。奏調瓊州總兵彭楚漢來直隸參委。

是月作李忠武公神道碑銘二篇。七月初一日。奏永定河漫口搶堵。未能合龍。擬緩期秋後。將挑濬中泓疏濬下口二事。認真籌辦。初四日。作勸學篇。示直隸士子。二十一日。奏酌議直隸山西河南三省毗連州縣會哨章程。二十四日。鄭公敦謹自山西入都。過保定見公。八月初六日。續查奏屬員。據實舉劾。二十七日。奏接准部咨。再行酌議練軍事宜一摺。奏請調南方戰將。以練北方新兵。擬於古北口增練千人。提督傅振邦領之。正定府增練千人。總兵譚勝達領之。保定府增練千人。以彭楚漢領之。附片奏劉銘傳一軍。護衛京畿。未可遽撤。該提督開缺回籍。其部將劉盛藻代領其軍。尙能勝任。毋庸另派統領之員。又片奏保道員蔣春元署永定河道。九月初四日。作湘鄉昭忠祠碑記。初六日。奏采訪節義第四案。十二日。核定直隸練軍章程。委知府李興銳查訪長蘆鹽務。二十一日。具摺奏試辦永定河挑濬中泓下口二法。核定工程。擬請停止攤捐。發給現銀。使廳汎無所藉口。以作兵弁夫役之氣。附片請撥長蘆運庫銀兩。以濬河工之用。二十三日。作唐確慎公墓志銘。十月初八日。作羅忠節公神道碑。初十日。奏啓行出省。勘河堤工。十二日。抵固安。巡視工程。驗收合龍。十三日。奏報勘工出省日期。並報循河勘驗下口。十七日。登舟順流而下。至天津府查勘鹽政。校閱洋槍及洋礮等隊。二十日。由天津啓行。二十三日回署。十一月初一日。奏酌議長蘆鹽政十條。又摺奏查明州縣災歉情形。分別蠲緩。以抒民力。大順廣一帶尤苦旱。恐須預籌賑濟。附片查工回省日期。又奏采訪節義第五案。十九日。具摺奏蘆綱億累日甚。宜減輕成本。以蘇商困。而保頹綱。酌議五條。又摺奏永定河漫口合龍。暨疏濬中泓下口。均屬穩固深通。請開復河員處分。又具摺奏邊旨察看臬司史念祖。請酌調刑名稍簡之省分。乃爲相宜。是月作王考星岡府君墓表。十二月十四日。奏銘軍將領劉克仁劉盛璋病故。請卹。二十四日。奏查明畿南各屬災歉較重。擬於來春。以貸爲賑。請於天津存儲項下。撥制錢十萬串。解至大名。預備散放。附片奏升任臬司錢鼎銘。請暫留大名道任。督辦賑貸。又摺奏濬泅河改道北流。已閱兩年。亟應設法修治。謹陳大概情形。請敕部核議。是歲公壹意清釐獄訟。遇重大之案。則親自鞠訊。每月數次。統計專摺奏結重案。及京控發交之件。前後凡五十餘疏。不能悉紀。公自到任以後。定以每日分時。清釐案牘。接見賓僚。吟覽經史詩古文。以爲日課。每月以暇時爲文一二篇。計成碑銘序記之屬。凡十餘篇。

〔庚午〕同治九年公六十歲。正月十六日。專摺奏年終密考。又奏永定河工撥借運庫銀兩。請於應解京餉項內。

照數扣還。二十四日。核直隸練軍馬隊章程。委陳蘭彬前往大名。助辦賑貸。是月劉忠壯公松山在甘肅攻勦回逆於金積堡陣亡。其兄子錦棠接領其軍。二月初二日。專摺奏謝年終恩賞。又奏直隸清理積獄。舊案陸續完竣。新案辦理就緒。計審結並註銷之案。四萬一千餘起。多年塵牘。爲之一清。請將勤奮之員。酌予獎勵。又奏州縣留支銀兩。請免提解四成。俾地方官有辦公之資。以爲振興吏治之助。又報直隸州縣。應付摺差款項。酌議報銷。二十一日。專摺奏謝京察從優議敘恩。又奏湘淮各軍。勦捻軍需第一案報銷。附片報洋鎗洋礮教練勇糧款目。附案請銷。又具摺奏提督劉松山宣力最久。忠勇邁倫。力攻回寨。受傷殞命。謹臚陳事蹟。請宣付史館。并於本籍建立專祠。三月初五日。出城詣劉孝子墓。及楊忠愍公祠。初十日。奏直隸留防兵勇。收支餉項。截數報銷。二十九日。奏報永定河凌汛安瀾一摺。又奏覆核部駁保案一摺。又奏采訪節義第六案。公自入春以來。屢患目光昏蒙。而治公牘。覽書史。未嘗少息。至是驗知右目已失明。於是閉目靜坐之時爲多。是月公子紀澤入都。赴廕生試。四月十一日。改定練軍馬隊步隊營制。十六日。奏試辦練軍。酌定營制。較照湘勇准軍營舊章。參酌增損。次第推行。又以官馬不如私馬。亦欲仿募勇章程。自養營馬。以冀練成勁騎。附抄呈步隊營制十條。馬隊營制六條。附片奏籌議口北三廳防務。是日公眩暈。病作甚劇。旬日漸平。二十一日。奏陳病狀。請假一月調理。二十五日。公子紀澤試竣。吏部帶領引見。奉旨以員外郎分部行走。簽分戶部陝西司。五月初八日。專摺奏謝子紀澤受員外郎恩。二十二日。奏病尙未痊。續假一月。又摺奏畿南賑貸。辦理事竣。各地方官賠累已甚。請免報銷。以示體恤。又摺奏保永定河工出力員弁。開單請獎。又奏采訪節義第七案。廿五日。奉上諭。會國藩著前赴天津。查辦事件。欽此。同日奉上諭。崇厚奏津郡民人。與天主教起衅。現在設法彈壓。請派大員來津查辦一摺。會國藩病尙未痊。本日已再行賞假一月。惟此案關係緊要。會國藩精神如可支持。著前赴天津。與崇厚會商辦理。匪徒拐迷人口。挖眼剖心。實屬罪無可逭。既據稱供牽連教堂之人。如查有實據。自應與洋人指證明確。將匪犯按律懲辦。以除地方之害。至百姓聚衆。將該領事毆死。並焚燬教堂。拆毀仁慈堂等處。此風亦不可長。著將爲首滋事之人。查拏懲辦。俾昭公允。地方官如有辦理未協之處。亦應一併查明。毋稍迴護。會國藩務當體察情形。迅速持平辦理。以順輿情。而維大局。原摺著鈔給閱看。欽此。先是天津境內屢有迷拐幼孩之案。并有剖心挖眼之謠。署天津知府張光藻擒

獲拐匪張拴郭拐二名嚴辦。旋有民團辜獲匪徒武蘭珍供出法國教堂之王三授以迷藥。由是津民與教民屢有爭鬪之事。三口通商大臣崇厚約法國領事官豐大業來署。提犯人對質。於時謗言四起。人情洶洶。豐大業在崇厚署中施放洋槍。崇厚亟起避之。豐大業忿而走出。過天津縣知縣劉傑。復用洋槍擊傷其家丁。津民見之者。遂毆斃豐大業。燒燬教堂等處。洋人及本地從教之民。男婦死者數十名口。此五月二十三日事也。二十七日。奉上諭。崇厚奏津郡民教起畔爭毆。自請治罪。并請將該地方官分別嚴議革職一摺。崇厚周家勳張光藻劉傑著先行交部分別議處。仍著會同藩於抵津後。確切查明。嚴參具奏。至迷拐人口匪徒。及爲首滋事之人犯。均着嚴拿懲辦。並會同崇厚澈底根究。秉公辦理。毋稍徇徇。欽此。二十九日。公稔陳一摺。奏稱。據天津鎮道來稟。武蘭珍所供之王三。業經弋獲。必須訊取確供。武蘭珍是否果爲王三所使。王三是否果爲教堂所養。挖眼剖心之說。是否憑空謠傳。抑係確有證據。此兩者爲案中最要之關鍵。從此兩層悉心研鞠。力求平允。乃可服中外之心。諭旨飭臣前往。仍垂詢臣病。臣之目疾。係根本之病。將來必須開缺調理。不敢以病軀久居要職。至眩暈新得之病。現已十愈其八。臣不敢因病推諉。稍可支持。即當前往。一面先派道員博多宏武等。迅速赴津。會同天津道府詳訊辦理。六月初一日。奉上諭。會同藩奏所稱案中最要關鍵等語。可謂切中事理。要言不煩。日內如可支持。即著前赴天津。會同崇厚悉心商辦。欽此。崇厚駐天津近十年。調停於民教之間。人頗譏之。事變之後。崇公出示解散。有嚴禁聚衆滋事之語。由是怨聲載道。崇公尋奉旨充出使法國大臣。其三口通商大臣。以大理卿成林署理。初四日。公將啓行。書遺教一紙。其略云。「余自咸豐三年募勇之初。自誓效命疆場。今年老病軀。危難之際。斷不肯吝於一死。自以負其初心。」初六日。由保定啓行。宿高陽縣。初七日。宿任邱縣。具摺奏報起程日期。并稱與崇厚往返函商。擬先將俄國誤傷之三人。及英美兩國之講堂。速爲料理。不與法國一併議結。以免歧混。初八日。奉上諭。此案起畔之由。因迷拐幼孩而起。總以有無確據爲最要關鍵。必須切實根究。曲直既明。方可另籌辦法。至洋人傷斃多名。若不將倡首滋事人犯懲辦。此事亦難了結。會同藩擬將俄國人命。英美講堂。先行結議。所見甚是。欽此。初十日。公至天津。津郡民團。舊有水火會名曰。人數甚衆。怨崇厚公之護教。咸望公至。必力反崇公之爲。公奉命之初。凡諸公條陳此事者。或欲藉津人義憤之衆。以驅逐洋人。或欲聯合俄英各國之交。以專攻法國。或欲參

効崇厚。以伸士民之氣。或欲調集兵勇。以爲應敵之師。公意在堅保和局。不與洋人構衅。以致啓兵端。其函致崇公。則稱有禍同當。有謗同分之語。既至津郡。出示曉諭士民。仍不獎其義憤。且亦有嚴戒滋事之語。由是津人以怨崇公者。怨公矣。公初至時。出令放告。投訴牒者數百人。查訊挖眼剖心。並無事實。而拐匪一案。牽到教堂之王三安三等。皆市井無賴。供詞反覆狡展。不能定案。公亦令委員暫予緩訊。以爲洋人轉圜之地。但飭緝拏天津滋事之民。由是都門士大夫中。譏議紛然起矣。十一日。接到法國洋官照會一件。係都中洋人。由總理衙門轉遞來津。詞氣尙順。十二日。英國洋人來見。十三日。美國洋人來見。十四日。內閣學士宋晉奏和局固宜保全。民心未可稍失。請布置海口防兵。兼婉諭各國。以爲解散約從之策。奉旨令公酌量辦理。據實奏聞。十六日。公咨覆總理衙門。爲洋人力辨挖眼剖心之誣。十八日。專摺奏報永定河南岸五工漫口。自請議處。并請河員處分。十九日。法國洋官羅淑亞來見。二十一日。崇厚來言洋人將大興波瀾。有以府縣官議抵之說。公峻詞拒之。二十二日。洋官羅淑亞復來。詞氣凶悍。又來照會一件。有請軍府縣官及提督陳國瑞抵命之語。二十三日。公將現在查辦情形。照復洋人。并駁詰之。是日。遂與崇厚公會奏。奏稱。王三雖經供認授藥武蘭珍。然且時供時翻。仁慈堂查出男女。無不被拐情事。至挖眼剖心。則全係謠傳。毫無實據。此等謠傳。不特天津有之。各省皆然。以理決之。必無是事。至津民所以生憤者。則亦有故。教堂終年局閉。莫能窺測。其可疑者一。中國人民。至仁慈堂治病。恆久留不出。其可疑者二。仁慈堂死人。有洗尸封眼之事。其可疑者三。仁慈堂所醫病人。雖親屬在內。不得相見。其可疑者四。堂中掩埋死人。有一棺而兩三尸者。其可疑者五。百姓積此五疑。衆怒遂不可遏。仰懇明降諭旨。通飭各省。俾知謠傳之說。多係虛誣。以雪洋人之冤。以解士民之惑。現在將天津道府縣三員。均撤任聽候查辦。又奏委丁壽昌署天津道。馬繩武署天津府。蕭世本署天津縣。又附片奏稱。洋人照會。挾制多端。請將知府張光藻。知縣劉傑二員革職。交刑部治罪。陳國瑞現在京城。請交總理衙門。就近查辦。公雅意不欲加罪於府縣。是日乃免徇崇厚之請。會奏。此疏拜發之後。公意痛悔之。病勢漸劇。二十四日。奉到上諭。有人奏風聞津郡百姓焚燬教堂之日。由教堂起有人眼人心等物。呈交崇厚收執。該大臣於奏報時。並未提及。且聞現已消滅等語。所奏是否實有其事。著會國藩確切查明。等因。欽此。又奉上諭。崇厚已派出使法國。自應及早起行。著會國藩體察情形。如崇厚此時可以交卸。

卽着來京陛見。以便卽日起程。通商大臣事務。着會國藩暫時接辦。俟成林到時。卽行交卸。欽此。二十五日。接洋人照會一件。仍執前說。二十六日。公照復洋人。仍駁詰之。是日奉到上諭。會國藩崇厚奏查明天津滋事大概情形。另片奏請將天津府縣革職治罪等語。均已照所請。明降諭旨宣示矣。此次陳奏各節。固爲消弭弊端。委曲求全起見。惟洋人詭譎性成。得步進步。若事事遂其所求。將來何所底止。是欲弭衅。而仍不免起衅也。欽此。公前疏力辦洋人之誣。又陳五可疑之端。意在持平立論。內閣鈔發奏稿。文理不全。鄙人士見之。謂公偏護洋人。遂以詆崇公者。詆公矣。責問之書。日數至。公惟自引咎。不欲以自明也。崇厚公每日一來行館。力主府縣議抵之說。公方在病中。置不答。崇厚乃馳奏法國勢將決裂。會國藩病勢甚重。請由京另派重臣。來津辦理。二十八日。公覆陳論旨垂詢之件。奏稱焚燬教堂之日。衆目昭彰。若有人眼人心等物。豈崇厚一人所能消滅。其爲誘傳。已不待辨。至迷拐人口一節。實難保其必無。臣前奏請明諭。力辦洋人之誣。而於迷拐一節。言之不實不盡。誠恐有礙和局。現在焚燬各處。已委員興修。王三安三該使堅索。已經釋放。查辜凶犯一節。已飭新任道府辜獲九名。拷訊黨羽。惟羅淑亞欲將三人讒抵。實難再允所求。府縣本無大過。送交刑部。已屬情輕法重。彼若不擬搆衅。則我所斷不能允者。當可徐徐自轉。彼若立意決裂。雖百請百從。仍難保其無事。崇厚與洋人交涉已久。應請留津會辦。暫緩來京。又奏稱。中國目前之力。實難遽起兵端。惟有委曲求全之法。諭旨所示。弭衅仍以啓衅。確中事理。且佩且悚。外國論強弱。不論是非。若中國有備。和議或稍易定。現今銘軍全隊。拔赴滄州一帶。稍資防禦。臣自帶兵以來。早矢効命疆場之志。今事雖急。病雖深。此心毫無畏顧。不肯因外國要挾。盡變常度。抑臣更有請者。時事雖極艱難。謀畫必須決斷。伏見道光庚子以後。辦理夷務。失在朝和夕戰。無一定之至計。遂使外患漸深。不可收拾。皇上登極以來。外國盛強如故。惟賴守定和議。絕無改更。用能中外相安。十年無事。津郡此案。愚民憤激生變。初非臣僚有意挑衅。倘卽從此動兵。則今年卽能倖勝。明年彼必復來。天津卽可支持。沿海勢難盡備。朝廷昭示大信。不開兵端。實天下生民之福。惟當時時設備。以爲立國之本。二者不可偏廢。臣以無備之故。辦理過柔。寸心抱疚。而區區愚慮。不敢不略陳所見。是日接奉寄諭。亦云張光藻劉傑交部治罪。已屬過當。若在津正法。萬難允准等因。二十九日。奉到上諭。據崇厚奏稱會國藩觸發舊疾。病勢甚重。朝廷實深廬系。此案關係頗大。該督抱忿甚劇。恐照料

或有未周。已諭令丁日昌星速赴津。幫同辦理。又以丁日昌航海前來。須在旬日以外。先派毛昶熙前赴天津會辦。惟該國兵船業已到津。意在開衅。不可不預爲防範。已諭令李鴻章帶兵馳赴畿疆。俟旨調派等因。欽此。又奉上諭。曾國藩奏遵旨覆陳一摺。另片所陳。善全和局。以爲保民之道。豫備不虞。以爲立國之本。甚屬曲中事理。卽著該督堅持定見。悉心經理。用全大局。欽此。七月初五日。毛公昶熙至天津。隨帶侍講吳元炳刑部員外郎劉錫鴻總理衙門章京陳欽憚祖貽四員。公一見。皆歎異。以爲難得之才。初七日。奏報永定河南岸五工。續漫成口。再請議處。英國洋官威妥瑪來天津。毛公昶熙約洋官會議。既集。陳欽按理抗辯。侃侃而談。洋人不能詰。羅淑亞猶執前說。徑行回京。崇厚亦奏疏自請入都陛見。初九日。公與毛公會奏羅淑亞回京緣由。請中外一體堅持定見。并將連日在津會議問答情形。咨報總理衙門。又奏請將福建船局購辦京米。截留二萬石。存儲津郡。以備李鴻章軍營及劉銘傳全軍之用。時李公鴻章督軍至潼關。馳摺奏稱洋人照會內稱。天津府縣幫同行兇。主使動手等語。所聞得自何人。所查得有何據。必須將府縣如何幫同主使證據交出。由中外大員會同提集。當堂質訊。乃可以成信讞。而服衆心。如果該府縣等有實在重情。亦不能曲爲寬貸。十二日。奉上諭。羅淑亞無理要挾。所請府縣抵償一節。萬無允准之理。已傳諭錢鼎銘將張光藻等解赴天津。并令曾國藩等取具該府縣等親供。以期迅速了結。欽此。十三日。奉上諭。崇厚著卽來京。三口通商大臣。著毛昶熙暫行署理。欽此。丁日昌奉旨啓行北上。馳摺奏稱。自古以來。局外之議論。不諒局中之艱難。然一唱百和。亦足以熒聽而撓大計。卒之事勢決裂。國家受無窮之累。而局外不與其稱。反得力持清議之名。臣每讀書至此。不禁痛哭流涕。現在事機緊急。守備則萬不可缺。至於或戰或和。應由宸衷獨斷。不可爲衆論所搖。又稱。百姓紛紛聚衆。地方官不能認真彈壓。過誤似亦不輕。十六日。奉上諭。該使臣非理之求。斷難遷就。而於近情之請。必當趕緊辦理。以示誠信。此時如將下手滋事之犯。按律懲辦。則洋人自不至節外生枝。再歸咎於府縣等因。欽此。十九日。公奏奉諭旨。檄催劉銘傳赴直隸統帶銘軍。並陳明江面水師。與洋面不同。彭玉麟楊岳斌在籍情形。因及捍禦外侮。徐圖自強之法。二十日。奉上諭。軍機大臣呈遞直隸按察使錢鼎銘稟函。不勝詫異。張光藻劉傑以奉旨治罪人員。卽使患病屬實。亦應在天津聽候查辦。乃該革員等。一赴順德。一赴密雲。捏病遠避。尙復成何事體。朝廷令該革員赴津。實曲示保全之意。乃皆不

能體會。置身事外。曾國藩率行給假他出。實屬不知緩急等因。欽此。二十三日。奉上諭。近來內外臣工。往往遇事機緊急。徒事張皇。迨禍患略平。則又泄沓成風。爲目前苟安之計。即使創立戰守章程。而在事諸臣。奉行不力。有名無實。遂使朝廷深謀遠慮。均屬具文。似此因循成習。何時可冀自強。何時可平外患。宵旰焦憂。無時或釋。欽此。二十五日。劉傑到案。丁公日昌到天津。即日懸賞。勒限緝拿兇犯。二十六日。奉上諭。該督到津後。統籌全局。次第辦理。其中委曲求全。萬不得已之苦衷。在稍違事理者。自無不諒。刻下府縣一層。堅持定見。當可就我範圍。如能將爲首滋事。及下手之人。嚴拏務獲。訊取確供。按律議抵。大局似可釐定。欽此。二十七日。張光藻到案。三十日。公與毛公會奏。已革天津府縣到津日期一摺。奏稱該員自六月十六日撤任。即行請假。臣見其本無大過。故允其所請。其後奉到諭旨。即飛檄催提。目下均已到案。頃接總理衙門來信云。有法國照會。言及該府縣主使證據。現飭同文館繙譯。應俟譯文寄津。按照所指情節。逐一質訊。再行取具親供。錄送核辦。至查拏凶犯。現已獲三十七名。仍嚴飭盡數弋獲。從嚴懲辦。以杜外患。八月初二日。總理衙門奏天津一案。與洋人照會來往辯論情形一摺。諭旨鈔寄。令公迅速緝兇。詳訊嚴辦。催取府縣親供。及早結案。兩江總督馬端敏公新貽粹過行刺。因傷出缺。初四日。奉上諭。曾國藩著調補兩江總督。直隸總督著李鴻章調補。欽此。初七日。公具摺恭謝天恩。并奏稱前在假期之內。馳赴天津。實因天津事情重大。不敢推諉。臣目病甚重。往來文件。難以細閱。幕僚擬稿。難以核改。江南庶政殷繁。若以病軀承乏。貽誤必多。目下津案未結。仍當暫留會辦。一俟奏結以後。即請開缺。安心調理。又特奏保刑部郎中陳欽在總理衙門當差多年。於中外交涉情形。洞悉本末。頃來天津。與洋人詳論。其辨才足以折服強悍。其誠心足以感動彼族。請以署理天津府知府。必收折衝禦侮之效。又奏江南月協直隸省餉銀。截數報銷。三口通商大臣成林到任。初九日。陳欽劉錫鴻丁壽昌等會訊府縣親供。十一日。公與毛公昶照丁公日昌覆訊該府縣親供。十二日。奉上諭。曾國藩奏瀝陳病目情形。請另簡賢能。畀以兩江重任一摺。兩江事務殷繁。職任綦重。曾國藩以老成宿望。前在兩江多年。情形熟悉。措置咸宜。現雖目疾未痊。但能坐鎮其間。諸事自可就理。所請另簡賢能之員。著毋庸議。仍著俟津案擬結。即著前赴兩江總督之任。毋再固辭。欽此。十四日。奏呈府縣親供。請交部核議。并稱拏獲滋事兇犯八十餘名。俟訊明再行會奏。十七日。毛公昶照回京師。十八日。奉上諭。此案

爲日已久。若不趕緊辦結。必致易生枝節。著李鴻章馳赴天津。會同督飭承審各員。認真研鞫。及早擬結。欽此。二十三日。公具摺奏陳審明天津案內第一批人犯。分別定擬。又奏咨送覆訊府縣供詞。并陳明該員解送刑部。恐難定限。又奏稱辦理遲延。自請交部嚴加議處。是日。劉公銘傳至天津。二十五日。李公鴻章至天津。二十七日。陳國瑞到案。二十八日。并已革天津府縣解部起程日期。呈鈔附陳國瑞供詞。附片奏稱府縣本無大過。張光藻尤著循聲。臣之初意。豈肯加以重咎。過聽浮議。舉措失宜。遽將府縣奏交刑部。此疏朝上。夕已悔憾無及。外間物議紛紛不平。此次該革員等入獄。誠恐洋人執臣原奏。欲得而甘心。則臣之負疚愈深。請敕刑部細核供詞。從輕定讞。以平天下吏民之情。臣亦稍釋隱憾。并申陳各省民教滋事實情。籌議預杜後患之法。二十九日。奏開缺臬司史念祖請授以實缺。并陳軍營保舉記名人員。現經部議新章。保至藩臬者。必先補道員。仍乞聖慈存記。每年於部章之外。特簡實缺數人。實振厲人才之道。又奏天津道周家勳開缺。請以陳欽補授天津道缺。又代奏提督劉銘傳恭謝恩賞一摺。九月初一日。奉上諭。陳國瑞所遞親供。既與津案並無干涉。毋庸再令總理衙門刑部覈辦。欽此。初三日。丁公日昌回江蘇任。初六日。公交卸關防印信。具摺奏報卸篆日期。又摺奏報閩省採辦京米十萬石。全數驗收。附片奏調前台灣道吳大廷隨至江南。綜理輪船操練事宜。刑部奏已革天津府縣二員。擬發往軍臺効力。十一日。奉上諭。張光藻劉傑均著從重改發黑龍江効力贖罪。以示懲警。欽此。是案刑部奏結。照例從重定擬。諭旨又以該員私往順德密雲逗留翫玩。再行從重也。是日奉上諭。經此次嚴辦之後。各直省地方。務當曉諭居民。安分守法。毋任再滋事端。遇有中外交涉事件。並須按照條約。持平妥辦。總期中外商民。彼此相安。以靖地方。欽此。十三日。奏續訊天津案內第二批人犯。分別定擬。附片奏署天津道丁壽昌攝篆已久。情形熟悉。措置裕如。請即補授天津道缺。并稱已保臬司劉盛藻與丁壽昌分領銘軍。皆司道中難得之才。亦請簡放道員實缺。公以本年壽六十。奉旨賜壽。由軍機處咨到。交御書勛高柱石匾額一面。御書福壽字各一方。梵銅像一尊。紫檀嵌玉如意一柄。蟒袍一件。吉綢十件。線緞十件。十六日。專摺奏謝天恩。又具摺奏遵旨赴任。懇請陞見。奏稱。臣前承乏江南。初無治狀。荷蒙獎勵。慚感交并。欲勉從後命。則病軀難供驅策。必致隕越貽羞。欲自遂初衷。則聖恩已極優容。何敢再三瀆請。揆諸古人鞠躬盡瘁之義。一息尙存。不敢稍耽安逸。附片奏刑部主事陳蘭彬有任重致

遠之志。不避艱險，仍擬帶至江南，講求防海製器操練輪船之事。又奏前次奏結人犯內，有穆巴一名，查無行兇實據，請予開釋。另將續獲施永一名，歸案正法，以示慎重人命之意。二十三日，由天津啓行入都。公子紀澤奉歐陽夫人并眷口，由運河南旋。公子紀澤從入都。二十五日入都門。二十六日，早朝召見於養心殿，奏對十數語。二十七日，又召見，奏對十數語。十月初一日，奉派入坤寧宮喫肉。初三日，張光藻劉傑來見。初六日，軍機大臣傳旨，催公赴江南任。初九日，遞摺請訓，傳宣召見，奏對十數語。初十日，朝賀萬壽聖節。十一日，公六十初度日，湖廣同鄉官設宴於會館，以爲公壽。十五日，啓行出都。十八日，次雄縣，藩司錢公鼎銘來見公。二十六日，抵濟寧州，登舟與眷口船相維南行。閏十月十三日，抵清江浦。十六日，泊揚州，查勘瓜洲鹽棧。二十日，行抵金陵，借寓巡道署。二十二日，接受關防印信。十一月初一日，專摺奏報接印日期。初三日，作家訓日課四條。一曰慎獨則心安。二曰主敬則身強。三曰求仁則人悅。四曰習勞則神欽。江蘇巡撫丁公日昌丁母憂開缺，張公之萬奉旨授江蘇巡撫。十一日，公奏派應寶時署江蘇藩司，并暫護巡撫印務。十七日，奉到上諭，曾國藩著充辦理通商事務大臣。欽此。二十二日，丁公日昌扶柩回粵，舟過金陵，公往弔於舟次。十二月初二日，專奏本年輪應查閱營伍，請展緩於明年舉行。又奏丹陽金壇兩縣，本年仍辦抵徵。又奏揚軍廳堤工報銷。十六日，奏籌撥湖南陝甘軍餉，分別起解，以資接濟。馬端敏公被戕後，兇犯張文祥即時擒獲，詔派漕督張之萬與將軍魁玉會訊。都下言官，累疏奏請推究主謀。欽命刑部尚書鄭敦謹前往金陵查訊。二十九日，鄭公抵金陵。

〔辛未〕同治十年公六十一歲。正月初三日，核江蘇水師續議章程。十二日，具摺奏欽奉諭旨，籌議海防江防事宜一摺。附片奏預籌日本通商條約章程。又摺奏陳河運艱難情形，請旨飭各督撫通籌運道全局，爲可久之規。附奏到任未久，請展緩文武密考一案。二十九日，公與鄭公敦謹奏結張文祥行刺一案，仍照魁玉張之萬原擬罪名定擬。附片覆奏犯供實無主使別情。二月初二日，專摺奏謝年終恩賞。又摺奏湘淮各軍勦捻軍需報銷第一二案。又摺奏接到部議，覆陳淮南鹽引，礙難增價情形。附片請停止場商內河鹽釐。十五日，監視張文祥正法。二十四日，具摺奏詳議河運章程。又奏已故督臣馬新貽請於本籍建祠，附報張文祥正法日期。是月安徽建平縣境，有土匪起，尋捕平之。歐陽夫人病疫，踰月乃愈。三月初六日，張公之萬來見公。十九日，專摺奏報南永州寶慶

二府引地。未便改運粵鹽。并陳明楚省引地。被川鹽侵佔太甚。請飭部核議。又續奏采訪忠義第四十三案。四月十四日。作江寧府學碑記。十六日。專摺奏年終密考學政聲名。又摺奏江寧府屬田地科則。仍未查清。仍辦抵徵。李世忠陳國瑞在揚州舟中鬪毆。江岸商民大譁。公派委瓜洲鎮總兵吳家榜候補道袁保慶查訊。是月。大學士文瑞公倭仁卒於位。五月初一日。李公瀚章出都。過金陵。見公。十一日。具摺奏結李世忠陳國瑞尋仇鬪毆一案。請將提督李世忠卽行革職。勒令回籍。交地方官嚴加管束。提督陳國瑞以都司降補。勒令速回原籍。不准在揚州逗留。二十日。作湖南文徵序。六月初二日。公攜酒就飲吳公廷棟之宅。吳公就寓金陵五年。居宅甚隘。年八十歲。足病不能行步。終日端坐一室。校書不輟。公每月必一再過訪。談論移時。公前官京師時。相與講學之友。歸然獨存矣。初八日。泛舟城北元武湖。回入秦淮。見商民稍復業。爲之欣然。時奉到文宗聖訓全部。十三日。專摺謝恩。又代遞在籍前任總督張亮基遺摺。又奏采訪忠義第四十四案。二十五日。作台州墓表。七月初三日。公與李公鴻章會奏派委刑部主事陳蘭彬江蘇同知容閔選聰穎子弟。前赴泰西各國肄習技藝。從前斌椿志剛孫家毅等。奉命游歷海外。親見各國軍政船政。皆視爲身心性命之學。中國當師倣其意。精通其法。查照美國新立和約。擬先赴美國學習。計其程途。由東北太平洋乘坐輪船。徑達美國。月餘可到。已飭陳蘭彬容閔二員。酌議章程。所需經費。請飭下江海關於洋稅項下。按年指撥。勿使缺乏。并請飭下總理衙門。將該員所議章程酌核。八月初一日。專摺奏湘淮各軍勦捻軍需報銷尾案。十二日。赴枝場大閱江寧省城督標兵四營。綠營選練新兵五營。留防湘勇二營。十三日。登舟出省大閱。十九日。至揚州校閱鹽捕二營。洋鎗礮隊二營。騎兵泰州泰興三江興化等五營。留防淮勇二營。二十一日。專摺奏報查閱營伍日期。二十八日。至清江浦閱清河漕標七營。淮揚鎮標九營。選練新兵一營。九月初三日。登陸啓行赴徐州。初八日。至徐州。閱徐州鎮標中軍營。城守營。蕭縣營。選練新兵二營。淮勇一營。十五日。回清江舟次。十九日。泊金山寺。二十日。舟入丹陽。閱鎮江營。江北營。甯南營。二十二日。至常州。閱常州營。孟河營。靖江營。二十六日。至常熟縣閱狼山福山鎮標二營。水師四營。登福山以望洋面。二十七日。詣周虞仲墓。先賢子游墓。二十八日。至蘇州省城。閱撫標兵三營。太湖二營。淮勇二營。十月初六日。至松江府閱提標八營。選練新兵二營。洋鎗隊三營。初七日。至上海查閱鐵廠輪船各式機器。洋領事官來見。十一日。至吳淞口。

閩吳松川沙南匯等八營。外海艇船六營。內洋八團。舳板五營。井閣輪船新陣鐵廠造成輪船四號。曰恬吉。曰威靖。曰操江。曰測海。皆公所命名也。十三日。乘威靖船。且操且行。十五日。改登測海船回金陵署。十一月初一日。專摺奏查閱營伍事竣。開單舉劾各營員弁。又奏遵籌協濟畿輔賑米。擬由江南撥解銀兩赴津。以便糴貨。又奏運河堤工報銷。初十日。奏報奧斯馬加國在滬換約事竣。金陵新修督署成。二十二日。移入署。二十九日。奏查明李世忠在籍情形。又奏派大員前赴安徽查辦天長縣令馮至沂自盡一案。十二月初八日。核定江蘇水師續議事宜。十六日。何公瓌調任江蘇巡撫。過金陵見公。二十二日。奏江蘇水師續議章程二十一條。又奏采訪忠義第四十五案。附片密保江寧鹽巡道孫衣言可備藩臬之選。公右目失明已兩年。見者咸以靜息爲勸。而公昕夕孜孜。未嘗倦怠。身體有不適。恆守勿藥之戒。視生死之際。彌覺怡然無累。生平以宋儒禮義爲主。而於訓詁詞章二途。亦研精覃思。不遺餘力。處功名之際。則師老莊之謙抑。持身型家。則尙禹墨之儉勤。是歲爲詩凡數首。爲文十餘篇。其自書日記。尤多痛自刻責之語。

〔壬申〕同治十一年公六十二歲。正月初二日。公訪吳公廷棟宅。暢談學業。語及邱鈔倭文端公遺疏。交口稱之。謂倘非自撰。不能抒寫其心中所欲言。因語昔年故交零落殆盡。黯然而別。十四日。值宣宗忌辰。公言道光三十年。供職禮部。聞遺命立太子之信。即時馳赴淀園。恭遞如意。途次聞升遐確耗。倉黃悲痛。今忽忽已二十三年。不堪回首。言已怆然。二十三日。病肝風動。右足麻木。良久乃復。自上年間。定以每日讀資治通鑑。隨筆錄其大事。以備遺忘。是日已至二百二十卷。因病輟筆。猶取宋元學案理學宗傳等書。披覽大意。自謂身心一日不能閒也。前河道總督蘇公廷魁亦蚤歲都門講學之友也。二十六日。公聞蘇公將過金陵。出城迎之。又病風動。舌蹇不能語。遂回署。旋愈。二十八日。蘇公廷魁至。見公。是日與李公瀚章會奏淮鹽運楚章程一摺。奏稱近年淮南銷引日疲。存鹽壅積。無術疏通。楚省引界。幾被川澧佔盡。今欲於積重難返之後。挽回一二。暫分疆界。復圖規復。俟滇黔肅清以後。仍還淮引之舊。公自肅清江面以來。首整鹽政。刊定章程。各岸設招商局。各省設督銷局。於瓜洲建總棧。商民稱便。八年之中。徵收課銀。凡二千萬兩有奇。公之在軍中也。公牘私函。皆親治之。不以假人。晚年多令幕友擬稿。公自核政而已。右目失明後。其最要者。猶不假人也。是月作劉忠壯公墓志。屬草稿三百餘字。遂成絕筆。其

日記自咸豐八年六月起。至於易簣之日。猶書前一日日記。未嘗間也。二月初二日。公方闕案牘。握筆而病作。遂止。病旋已。初四日午後。公乃散步西花園。子紀澤從。公連呼足麻。扶掖回書房。端坐三刻乃薨。是日戌時也。金陵微雨。天色陰慘。忽火光燭城中。江寧上元兩縣令驚出救火。卒無所見。見有紅光圓如鏡面。出天西南隅。良久漸微。江南士民巷哭。事聞。上震悼。輟朝三日。奉上諭。大學士兩江總督曾國藩學問純粹。器識深宏。秉性忠誠。持躬清正。由翰林蒙宣宗成皇帝特達之知。擢升卿貳。咸豐年間。創立楚軍。勤辦粵匪。轉戰數省。疊著勳勞。文宗顯皇帝。優加擢用。補授兩江總督。命爲欽差大臣。督辦軍務。朕御極後。簡任綸扉。深資倚任。東南底定。厥功最多。江寧之捷。特加恩賞。給一等毅勇侯。世襲罔替。並賞戴雙眼花翎。歷任兼圻。於地方利病。盡心籌畫。老成碩望。實爲股肱心膂之臣。方冀克享遐齡。長承恩眷。茲聞溘逝。震悼良深。曾國藩著追贈太傅。照大學士例賜卹。賞銀三千兩治喪。由江寧藩庫給發。賜祭一壇。派穆騰阿前往致祭。加恩予諡文正。入祀京師昭忠祠賢良祠。並於湖南原籍。江寧省城。建立專祠。其生平政蹟事實。宣付史館。任內一切處分。悉予開復。應得卹典。該衙門察例具奏。靈柩回籍時。著沿途地方官。妥爲照料。其一等侯爵。卽著伊子曾紀澤承襲。毋庸帶領引見。其餘子孫幾人。著何璟查明具奏。俟朕施恩。用示篤念忠良至意。欽此。何公環奉旨署兩江總督。馳奏臚陳勳績一摺。何公旋至江寧。受篆。馳奏查明子孫。詳晰覆陳一摺。李公瀚章英瀚公先後具疏臚陳事蹟。四月廿八日。奉上諭。據何璟英翰李瀚章先後臚陳曾國藩歷年勳績。英瀚李瀚章並請於安徽湖北省城。建立專祠。又據何璟遵查該故督子孫。詳晰覆報。披覽之餘。彌增悼惜。曾國藩器識過人。盡瘁報國。嘗湘鄂江皖軍務棘手之際。倡練水師。矢志滅賊。雖屢經困阨。堅忍卒絕。曾不少渝。卒能萬衆一心。削平逆寇。功成之後。實畏小心。始終罔懈。其薦拔賢才。如恐不及。尤得以人事君之義。忠誠克效。功德在民。允宜疊沛恩施。以彰忠盡。曾國藩著於安徽湖北省城。建立專祠。此外立功省分。並准其一併建祠。伊次子附貢生曾紀鴻伊孫曾廣鈞均著賞給舉人。准其一體會試。曾廣銓著賞給員外郎。曾廣銓著賞給主事。均俟及歲時。分部學習行走。何璟英翰李瀚章摺三件。均著宣付史館。用示旌念勳臣。有加無已至意。欽此。公弟國潢聞訃。自長沙馳至金陵。臨喪率公子紀澤紀鴻扶柩回籍。五月二十日。公之喪抵長沙省城。六月十四日。出殯於南門外金盆嶺之陽。劉公坤一尋奏請於江西省城建祠。奉旨允准。其明年二月。

李公鴻章奏天津郡紳士沈兆滢等聯名稟請。建已故督臣專祠。以資報饗一摺。奉旨著照所請。該部知道。欽此。公之爲學。其大綱宗。略見於所作王船山遺書序。而備見於聖哲畫像記。自登第以還。於學無所不窺。九經而外。諸子百氏之書。靡不規得要領。其於莊子史記漢書資治通鑑明史文獻通攷五禮通攷數種。尤篤好不厭。治之三反。平生爲詩古文辭。雅不欲存藪。應手散佚。公子紀澤等料檢手澤。門人李鴻齋黎庶昌等。爲蒐輯於知故之家。凡得詩四卷。文十二卷。其存官署者。批諭奏章。凡百二十卷。政蹟批牘二十四卷。書札六十卷。其存家中者。日記三十四卷。尺牘五十卷。家書二十八卷。皆公親手蹟也。在京師時。著有茶餘偶談若干卷。久佚。又爲曾氏家訓長編。其成者。朱子小學一卷。冠禮長編一卷。歷朝大事紀數卷。藩部表一卷。鈔輯鹽漕河工水利賦役成案各若干卷。餘則臚列序目。未有成編。選錄十八家詩鈔三十卷。出都以後。治軍臨官。不廢書史。著有孟子四類編左氏分類事目禮記章句校評樸目雜記周官雅訓雜記各若干卷。選錄經史百家雜鈔分十一類。爲二十六卷。又爲古文簡本二卷。鳴原堂論文二卷。晚年衰病。猶日從事於經史。爲論語言仁類記一卷。易象類記一卷。通鑑大事記未成書。又選錄古詩之得閒逸意者。自陶淵明至陸放翁。大家爲六家詩鈔。亦未克成書。門人王定安輯錄公所爲經史評註。爲師訓彙記若干卷。又掇公平生言行。爲求闕齋弟子記四十卷。同治十三年八月十三日。歐陽夫人薨。十一月初五日。公子紀澤等。改葬公於善化縣湘西平塘伏龍山之陽。乾山巽向。爲塋。奉夫人樞合葬。黎庶昌爲編年譜。記公行事。迺書其後曰。「年譜非古也。近世刊刻前賢專集。乃必爲年譜一編。以攷訂其所作詩文之先後歲月。蓋本孟子誦詩讀書。論世知人之意。固無傷於稽古之雅。國朝阿文成公年譜。累數十百卷。可謂至多。其所紀載。則奏案與其政蹟爲詳。吾師曾文正公蓋世忠勳。薄海宗仰。身沒之日。知與不知。得公楮墨者。莫不私什襲以珍之。公鏤板以傳之。所在風行。爭以先覩爲快。竊恐數十載後。流風漸遠。見聞異辭。而於當日事蹟原委。或無資以質證。亦門人故吏之責也。不揣固陋。按據近年所親記。彙紀其大略。自道光中葉以還。天地干戈。廟堂咨傲。二十有餘年。人才之進退。寇亂之始末。洵時事得失之林。龜鑑所在。而我公所以樹聲建績。光輔中興者。或籌議稍迂。而成功甚奇。或發端至難。而取效甚速。或任人立事。爲衆聽所駭怪。而徐服其精。或爲國忘軀。受萬口之詆訾。而所全實大。凡若此類。不敢忽焉。官牆笑富。何敢妄云窺見。惟後世讀公書者。諒亦有取於此云。」

仿古字版

會文正公文集

世界書局印行

曾文正公集重編序

清代二百七十年。以古文名家者凡十數。而以桐城之方望溪姚姬傳。陽湖之惲子居爲尤著。望溪委曲詳盡。惟未能免時文氣。姬傳簡潔矣。而苦於才薄而巔促。子居力能自振。因胎息周秦之故。致不免有破碎之譏。是三子者。固已雄視一代矣。然不能無缺憾焉。嘉道以後。則以仁和龔定盦。湘鄉曾滌生爲巨擘。龔氏天才特絕。又有學以輔之。文則老莊史漢。以及釋氏之楞嚴華嚴。無不鎔冶於一爐。惜乎年命短促。未底於大成也。曾氏初從事乎桐城。後乃自樹一幟。其法度謹嚴。足方軌於方姚。而雄邁之氣則過之。洵乎清代古文之殿。且亦爲清代古文之冠矣。惟譏姬傳錄古文存贈序。熙甫集中多無謂之壽序。所言固已當已。然於己集。則贈序壽序。仍纍纍滿幅。豈所謂能言者固未必能行耶。此之失言。吾人不能不爲會氏諱也。會氏以功業文章。彪炳一世。又享高壽。故人多誦習其文。其集刊本甚夥。而文則參差多寡不一。愛讀會氏文者。不能無遺憾。此編彙集衆本。重加編次。分上下二編。上編爲文。共一百五十四篇。下編爲詩。計三百首。於會氏之作。略具於是矣。會氏堅苦卓絕。百折不撓。卒能成其功業。今日讀其文。猶想見其爲人。而當茲國難叢集之日。讀是編者。有志之士。尤

足以自鏡焉。是爲序。

中華民國二十四年十二月十日。紹興王緝塵識於海上梓廬。

曾文正公文集目錄

順性命之理論	一	經史百家簡編序	一八
君子慎獨論	二	鳴原堂論文序	一九
烹阿封卽墨論	三	王船山遺書序	二〇
原才	四	衡陽彭氏譜序	二一
召誨	五	日慎齋詩草序	二二
五箴弁序	六	國朝先正事略序	二四
立志箴	六	重刻茗柯文編序	二六
居敬箴	六	湖南文徵序	二七
主靜箴	七	雲槩山人詩序代季師作	二九
謹言箴	七	錢選制藝序	三一
有恆箴	七	鈔朱子小學書後	三一
紀氏嘉言序	七	書歸震川文集後	三三
武會試錄序	九	書扁鵲倉公傳	三四
錢港歛先生制藝序	〇	書學案小識後	三四
黃仙嶠前輩詩序	一	書王雁汀前輩勃海圖說後	三六
謝子湘文集序	二	書周忠介公手札後	三七
朱慎甫遺書序	三	書儀禮釋官後	三八
歐陽生文集序	四	經史百家雜鈔題語	三九
孫芝房侍講芻論序	七	大澗山房詩題語	四〇

孟子要略跋	四〇	朱心垣先生五十六壽序	七七
跋衍聖公孔恭愷公墓志銘刻本	四二	田崑圃先生六十壽序	七九
復許孝廉振禕書	四二	朱玉聲先生七十三壽序	八一
復李觀察鴻裔書	四三	王翰城刺史五十壽序	八三
與朱太學孔揚書	四七	王蔭之之母壽序	八四
復陳太守寶箴書	四七	江小帆之母壽序	八五
加復黎刺史庶昌書	五〇	何傳巖先生七十壽序	八七
致劉孟容書	五一	郭璧齋先生六十壽序	八九
答劉孟容書	五四	金殿珊先生六十壽序	九一
復劉孟容書	五七	黃矩卿師之父母壽序	九二
答吳廣文敏樹書	六一	文小南之父七十生日壽詩序	九四
送郭筠仙南歸序	六二	何母廖夫人八十生日詩序	九五
送謝吉人之官江左序	六三	黎樾喬之兄六十壽序	九七
送周苻農南歸序	六五	曹頴生侍御之繼母七十壽序	九九
送陳岱雲出守吉安序	六七	楊母張孺人七十壽序	一〇〇
送唐先生南歸序	六八	曹西垣同年之父母壽序	一〇二
送江小帆同年視學湖北序	七〇	王靜菴同年之母七十壽序	一〇三
送劉君椒雲南歸序	七二	孫鼎菴先生六十壽序	一〇四
易問齋之母壽詩序	七三	江岷樵之父母壽序	一〇六
陳岱雲太守爲母生日讌集賓僚詩序	七五	陳仲鸞同年之父母七十壽序	一〇七
唐鏡海先生七十生日同人寄懷詩序	七六	季仙九師五十壽序	一〇九

求嗣齋記	一一
新甯縣增修城垣記	一一
槐陰書屋圖記	一四
養晦堂記	一六
湘鄉縣賓興堂記	一七
聖哲畫像記	一九
畢君殉難碑記	二四
林君殉難碑記	二六
湖口縣楚軍水師昭忠祠記	二八
何君殉難碑記	二九
箴言書院記	三一
修治金陵城垣缺口碑記	三三
靈谷龍神廟碑記	三三
金陵軍營官軍昭忠祠記	三四
金陵湘軍陸師昭忠祠記	三七
金陵楚軍水師昭忠祠記	四〇
湘鄉昭忠祠記	四二
江甯府學記	四四
補侍講缺呈請謝恩狀癸卯八月初四日	四六
討粵匪檄	四七
祭韓公祠文	四九

祭湯海秋文	五一
歲暮設奠告王考文	五一
正月八日王考生辰告文	五一
丁卯四月求降雨澤告辭	五三
廣東嘉應州知州劉君事狀	五三
書何母陳恭人事	五六
漢陽劉君家傳	五八
萬寅軒先生家傳	五九
歐陽氏姑婦節孝家傳	六二
湖北按察使趙君神道碑銘	六四
江忠烈公神道碑銘	六六
羅忠節公神道碑銘	六九
李忠武公神道碑銘	七三
李勇毅公神道碑銘	七六
隨州李君墓表	七九
錢塘丁烈婦墓表	八〇
桃源縣學教諭孫君墓表	八一
武昌張府君墓表	八四
翰林院庶吉士遵義府學教授莫君墓表	八五
鄧湘皋先生墓表	八七
戶部員外郎彭君墓表	八九

大界墓表	一九二
台洲墓表	一九五
海甯州訓導錢君墓表	一九七
新甯劉君墓碑銘	一九九
母弟溫甫哀詞	二〇一
吳君墓志銘	二〇四
彭母曾孺人墓志銘	二〇六
余安人墓志銘	二〇七
陳岱雲妻易安人墓志銘	二〇八
新化鄒君墓志銘	二一〇
單縣典史張君墓志銘	二一一
前海甯州知州長沙李君母黃宜人墓志銘	二一二
適朱氏妹墓志	二二三
滯妹碑誌	二二四
荆門州學正郭君墓銘	二二五
善化夏母楊宜人墓志銘	二二五
祖四世元吉公墓銘	二二七
國子監學正漢陽劉君墓志銘	二二八
錢塘戴府君墓志	二二九

崇仁謝君墓志銘	二二二
劉母譚孺人墓志銘	二二二
湘陰郭府君墓志銘	二二三
誥封光祿大夫曾府君墓志	二二五
劉君季霞墓志銘	二二八
季弟事恆墓志銘	二三〇
閩浙總督季公墓志銘	二三一
仁和邵君墓志銘	二三五
張君樹程墓志銘	二三七
苗先籠墓志銘	二三八
唐確慎公墓志銘	二四一
歐陽府君墓志銘	二四三
翰林院侍讀學士丁君墓志銘	二四五
郭依永墓志銘	二四七
羅君伯宜墓志銘	二四九
甯津龐君墓志銘	二五一
遵義黎君墓志銘	二五三
劉忠壯公墓志銘	二五四

會文正公文集

順性命之理論

嘗謂性不虛懸。麗乎吾身而有宰。命非外鑠。原乎太極以成名。是故皇降之衷。有物斯以有則。聖賢之學。惟危惕以惟微。蓋自乾坤奠定以來。立天之道。曰陰與陽。靜專動直之妙。皆性命所彌綸。立地之道。曰柔與剛。靜翕動闢之機。悉性命所默運。是故其在人也。綱緼化醇。必無以解乎造物之吹噓。真與精相凝。而性卽寓於肢體之中。含生負氣。必有以得乎乾道之變化。理與氣相麗。而命實宰乎賦畀之始。以身之所具言。則有視聽言動。卽有肅乂哲謀。其必以肅乂哲謀爲範者。性也。其所以主宰乎五事者。命也。以身之所接言。則有君臣父子。卽有仁敬孝慈。其必以仁敬孝慈爲則者。性也。其所以綱維乎五倫者。命也。此其中有理焉。亦期於順焉而已矣。請申論之。性渾淪而難名。按之曰理。則仁義禮智德之賴乎擴充者。在吾心。已有條不紊也。命於穆而不已。求之於理。則元亨利貞誠之貫乎通復者。在吾心。且時出不窮也。有條不紊。則踐形無虧。可以盡己性。卽可以盡

人物之性。此順乎理者之率其自然也。時出不窮。則泛應曲當。有以立吾命。卽有以立萬物之命。此順乎理者之還其本然也。彼夫持矯揉之說者。譬如柳以爲桮棬。不知性命。必致戕賊仁義。是理以逆施而不順矣。高虛無之見者。若浮萍遇於江湖。空談性命。不復求諸形色。是理以愒恍而不順矣。惟察之以精。私意不自蔽。私欲不自撓。惺惺常存。斯隨時見其順焉。守之以一。以不貳自惕。以不已自循。慄慄惟懼。斯終身無不順焉。此聖人盡性立命之極。亦卽中人復性知命之功也夫。

君子慎獨論

嘗謂獨也者。君子與小人共焉者也。小人以其爲獨而生一念之妄。積妄生肆。而欺人之事成。君子懷其爲獨而生一念之誠。積誠爲慎。而自慊之功密。其閒離合幾微之端。可得而論矣。蓋大學自格致以後。前言往行。既資其擴充。日用細故。亦深其閱歷。心之際乎事者。已能剖晰乎公私。心之麗於理者。又足精研其得失。則夫善之當爲。不善之宜去。早晝然其灼見矣。而彼小人者。乃不能實有所見而行其所知。於是一善當前。幸人之莫我察也。則趨焉而不決。一不善當前。幸人之莫或伺也。則去之而不力。幽獨之中。情僞斯出。所謂欺也。惟夫君子者。懼一善之不力。則冥冥者有墮行。一不善之不去。則涓涓者無已時。屋漏而懷如帝天。方寸而堅如金石。

獨知之地。慎之又慎。此聖經之要領。而後賢所切究者也。自世儒以格致爲外求。而專力於知善知惡。則慎獨之旨晦。自世儒以獨體爲內照。而反昧乎卽事卽理。則慎獨之旨愈晦。要之明宜先乎誠。非格致則慎亦失當。心必麗於實。非事物則獨將失守。此入德之方。不可不辨者也。

烹阿封卽墨論

夫人君者。不能偏知天下事。則不能不委任賢大夫。大夫之賢否。又不能偏知。則不能不信諸左右。然而左右之所譽。或未必遂爲蓋臣。左右之所毀。或未必遂非良吏。是則耳目不可寄於人。予奪尤須操於上也。昔者齊威王嘗因左右之言而烹阿大夫。封卽墨大夫矣。其事可略而論也。自古庸臣在位。其才蒞事則不足。固寵則有餘。易譏覆餗。詩廣鵜梁。言不稱也。彼既自慙素餐。而又重以貪鄙。則不得不媚事君之左右。左右亦樂其附己也。而從而譽之。譽之日久。君心亦移。而位日固。而政日非。己則自矜。人必效尤。此阿大夫之所爲可烹者也。若夫賢臣在職。往往有介介之節。無赫赫之名。不立異以徇物。不違道以干時。招之而不來。麾之而不去。在君側者。雖欲極譽之。而有所不得。其或不合。則不免毀之。毀之而聽。甚者削黜。輕者督責。於賢臣無損也。其不聽。君之明也。社稷之福也。於賢臣無益也。然而賢臣之因毀而罷者常也。賢臣之必不阿事左右以求取容者又

常也。此卽墨大夫之所爲可封者也。夫惟聖人賞一人而天下勸。刑一人而天下懲。固不廢左右之言而昧兼聽之聰。亦不盡信左右之言而失獨照之明。夫是以刑賞悉歸於忠厚。而用舍一本於公明也夫。

原才

風俗之厚薄。奚自乎。自乎一二人之心之所嚮而已。民之生庸弱者。戢戢皆是也。有一二賢且智者。則衆人君之而受命焉。尤智者。所君尤衆焉。此一二人者之心向義。則衆人與之赴義。一二人者之心向利。則衆人與之赴利。衆人所趨。勢之所歸。雖有大力。莫之敢逆。故曰。撓萬物者莫疾乎風。風俗之於人之心。始乎微而終乎不可禦者也。先王之治天下。使賢者皆當路在勢。其風民也。皆以義。故道一而俗同。世教既衰。所謂一二人者。不能不聽命而蒸爲習尙。於是乎徒黨蔚起。而一時之人才出焉。有以仁義倡者。其徒黨亦死仁義而不顧。有以功利倡者。其徒黨亦死功利而不返。水流湮。火就燥。無感不讐。所從來久矣。今之君子之在勢者。輒曰。天下無才。彼自尸於高明之地。不克以己之所嚮。轉移習俗。而陶鑄一世之人。而翻謝曰。無才。謂之不誣可乎。否也。十室之邑。有好義之士。其智足以移十人者。必能拔十人中之尤者而材之。其智足以移百人者。必能拔百人中

之尤者而材之。然則轉移習俗。而陶鑄一世之人。非特處高明之地者然也。凡一命以上。皆與有責焉者也。有國家者。得吾說而存之。則將慎擇與共天位之人。士大夫得吾說而存之。則將惴惴乎謹其心之所嚮。恐一不當而壞風俗。而賊人才。循是爲之。數十年之後。萬有一收其效者乎。非所逆睹已。

召誨

賢與不肖之等奚判乎。視乎改過之勇怯以爲差而已矣。日月有食。星有離次。其在於人。言有尤。行有悔。雖聖者不免。改過什於人者。賢亦什於人。改過伯於人者。賢亦伯於人。尤賢者。尤光明焉。尤不肖者。怙終焉而已。人之生氣。質不甚相遠也。習而之善。既君子矣。其有過。則其友直諫以匡之。又有友焉。巽言以挽之。退有撻。進有旌。其相率而上達也。奚禦焉。習而之不善。既小人矣。其有過。則多方文之。爲之友者。疏之則心非而面諛。戚之則依阿苟同。憚於以正傷恩。其相率而下達也。奚禦焉。茲賢者所以愈賢。而不肖者愈不肖也。吾之友有某君者。茲余曰。子與某相好不終。是子之失德。子盍愼諸。又有某君。茲余曰。聞子之試於有司。則嘗以私干人。是大不可。二子者之言。卒聞之。若不遜於吾志。徐而繹之。彼無求而進。逆耳之言。誠敬我也。既又自省吾之過。其大者視此。或倍蓰。而其多或不可枚數。

二子者。蓋舉一隅也。人苦不自知耳。先王之道不明。士大夫相與爲一切苟且之行。往往陷於大戾。而僚友無出片言相質礪者。而其人自視恬然。可幸無過。且以仲尼之賢。猶待學易以寡過。而今曰無過。欺人乎。自欺乎。自知有過。而因護一時之失。展轉蓋藏。至蹈滔天之姦。而不悔。斯則小人之不可近者已。爲人友而隱忍和同。長人之惡。是又諧臣媚子之亞也。書曰。有言逆於女心。必求諸道。有言遜於女志。必求諸非道。余故筆之於冊。以備觀省。且示吾友。能爲逆心之言者。

五箴并序

少不自立。荏苒遂泊。今茲蓋古人學成之年。而吾碌碌尙如斯也。不其感矣。繼是以往。人事日紛。德慧日損。下流之赴。抑又可知。夫疾疾所以益智。逸豫所以亡身。僕以中才而履安順。將欲刻苦而自振拔。諒哉。其難之歟。作五箴以自創云。

立志箴

煌煌先哲。彼不猶人。藐焉小子。亦父母之身。聰明福祿。予我者厚哉。棄天而佚。是及凶災。積悔累千。其終也已。往者不可追。請從今始。荷道以躬。與之以言。一息尙存。永矢弗諼。

居敬箴

天地定位。二五胚胎。鼎焉作配。實曰三才。儼恪齋明。以凝女命。女之不慈。伐生戕性。誰人可慢。何事可弛。弛事者無成。慢人者反爾。縱彼不反。亦長吾驕。人則下女。天罰昭昭。

主靜箴

齋宿日觀。天雞一鳴。萬籟俱息。但聞鐘聲。後有毒蛇。前有猛虎。神定不懼。雖敢予侮。豈伊避人。日對三軍。我慮則一。彼紛不紛。馳驚半生。曾不自主。今其老矣。殆擾擾以終古。

謹言箴

巧語悅人。自擾其身。閑言送日。亦攬女神。解人不誇。誇者不解。道聽塗說。智笑愚駭。駭者終明。謂女賈欺。笑者鄙女。雖矢猶疑。尤悔既叢。銘以自攻。銘而復蹈。嗟女既耄。

有恆箴

自吾識字。百歷及茲。二十有八載。則一無知。曩者所忻。閱時而鄙。故者既拋。新者旋徙。德業之不常。日爲物遷。爾之再食。曾未聞或愆。黍黍之增。久乃盈斗。天君司命。敢告馬走。

紀氏嘉言序

士之修德。祇行。求安於心而已。無欲而爲善。無畏而不爲不善者。此聖賢

之徒中有所得而不惑者也。自中智以下。不自能完其性之分。大抵不勸不趨。不懲不改。聖人者因而導之。以禍福之故。如此則吉。不如此則凶咎。使賢者由勉以幾安。愚者懼罰而寡罪。故易稱餘慶餘殃。書戒惠迪影響。先王所以利民。其術至已。自秦氏以力征得天下。踵其後者。率小役大。弱飼彊。彊橫之氣充塞。而聖哲與奸宄同流。轉於氣數之中。或且理不勝氣。善者不必福。而不善者不必抵於禍。於是浮屠氏者。乃乘其閒而爲輪迴因果之說。其說雖積惡之人。立悔則有莫大之善。其不悛者。雖死而有莫酷之刑。民樂懺悔之易。而痛其不經見之慘虐。故懼而改行。十四五焉。今夫水無不下也。而趵突泉激而上升。火無不然也。而鹽井遇物不焚。燭至則滅。彼其變也。戾氣感而祥降。順氣感而災生。亦其變也。君子之言福善禍淫。猶稱水下火然也。道其常者而已。常者既立。雖有百變。不足以窮吾之說。是故從乎天下之通理言之。則吾儒之言不敝。而浮屠爲妄。從乎後世之事變人心言之。則浮屠警世之功。與吾儒略同。亦未可厚貶。而概以不然屏之者也。河間紀文達公。博覽彊識。百家之書。靡不辨其原而竟其歸。所著闕微草堂筆記五種。考獻徵文。搜神志怪。衆態畢具。其大旨歸於勸善懲惡。崇中國聖人流傳之至論。亦不廢佛氏之說。取愚民易入者。委曲剖晰。以聳其聽。海以內。幾家置一編矣。宛平徐春泉大令。好之尤篤。擇

其彌精而足以警世者。別錄一帙。名曰紀氏嘉言。其無關於勸懲者。則皆闕而不入。梓人畢役。以授國藩讀焉。世風日漓。無欲而爲善。無畏而不爲不善者。不可得已。苟有術焉。可以驅民於醇樸。而稍遏其無等之欲。豈非士大夫有世教之責者事哉。今余盜食天祿。會不能絲毫補救於斯世斯民。觀徐君之汲汲於此。其使余增愧也。

武會試錄序

道光二十有七年。秋九月。武會試外圍既畢事。兵部臣以內場考官。請上命臣國藩。偕臣王慶雲。司其事。伏念臣楚南下士。至陋極愚。仰荷聖慈。逾格由翰林游陟卿陪。負乘之占。夙夜兢惕。復膺簡命。承乏於茲。益用廩廩。如不克勝。謹偕臣慶雲。悉心核閱。取士如額。恭繕試錄。進呈御覽。臣例得颺言簡端。臣聞宋臣張舜民之言曰。自古守邊選將。未必專以攻戰爲事。要在精神折衝而已。臣嘗深繹其言。若廉藺在趙。強秦不敢加兵。魏尚守雲中。匈奴不敢南牧。及夫衛霍三明之徒。亦威稜四際。所在立功。彼其名將之精神。足以震懾萬里之外。而人主之求將。亦以精神感而召之。所謂戰勝廟堂者也。自唐宋以後。招致將才。不可必得。乃按圖而索驥。於是有武舉之科。有武學之額。有賜及第出身之目。宋慶皇間。定武舉以策爲去留。弓馬爲高下。祿利之途一開。爪牙之士。稍稍驥首。元明以來。循是不廢。

然上以名求下之人。因襲是名而巧弋之。其以弓馬得者。不過挽彊引重。市井之麤材。而以策試中者。亦皆記錄章句。瑣瑣無用之學。故論者謂人才之興。不盡由於科目。理固然也。我朝定鼎以來。威燁無外。自虎賁宿衛。入旗禁旅。往往有熊羆不二心之臣。肩比而鱗萃。而各行省山澤猛士。又羅之以科舉。所以儲采干城之選。至周且當。顧循行既久。向之所謂市井挽彊。記錄無用者。多亦儻乎其中。而臣之所職。又惟校此。默寫孫吳之數行。無由觀其內志外體。與其進退翔舞之節。而欲使韜鈴之材之必入於此。不遺於彼。臣誠不敢以自信。獨念聖天子神武震爍。臣等憑藉寵光。亦足增長剛氣。而以精神與多士相感召。庶幾廉藺魏尚之輩。或出於此。區區之忱。不勝至願。傳曰。同明相照。同氣相求。雖不能必。志之而已。

錢港猷先生制藝序

自吾有知識以來。見鄉之老成夙學。篤於文律者。恆困頓無以自拔。或終身不得當於行省有司之試。而其所教之子若弟。往往分沾餘技。飛騰遠化以去。及吾來京師。究詢四方魁桀特達之士。其先世多亦不遇。始謂不闕不亨。不誦不信。理則然矣。既深求其故。抑匪直爾也。制藝試士既久。陳篇舊句。盜襲相仍。有司者無以發覆而鉤奇。則巧爲命題以困之。乖割乎經文。鈔析乎片語。由是爲文者。有鉤聯之法。有補轉之方。有仰逼俯侵之

患名目既繁。科條日密。雖過百人之智。窮十年之力。猶不能洞悉其數。卻及其徹於心而調於手。而齒已日長。少時英光銳氣。稍稍衰減矣。而子若弟之濡染焉者。自其未冠。已別開簡易於纖仄曲徑之中。使其才得以自騁。故前者難而因者易。勢固爲之也。予與烏程錢君崙仙。同舉進士。同出江陰季公之門。官詞曹也。同居於僧舍。使蜀中也。先後同持文柄。閱出其尊甫港肱先生遺藁示予。又知兩家庭訓。所歷之艱苦曲折。同者十得八九。而不合者蓋寡焉。予之蒙陋於家大人之學。百不承一。卽崙仙文鳴一時。視先生之孤詣覃思。要亦不無少遜焉。故敘先生之文而發其例於此。庶使有銜文之責者。知所措意也夫。

黃仙嶠前輩詩序

古之君子。所以自拔於人人者。豈有他哉。亦其器識有不可量度而已矣。試之以富貴貧賤。而漫焉不加喜戚。臨之以大憂大辱。而不易其常器之謂也。智足以析天下之微芒。明足以破一隅之固識之謂也。器與識及之矣。而施諸事業有不逮。君子不深譏焉。器識之不及。而求小成於事業。未矣。事業之不及。而求有當於語言文字。抑又未矣。故語言文字者。古之君子所偶一涉焉。而不齒諸有亡者也。昔者嘗怪杜甫氏。以彼其志量。而勞一世以事詩篇。追章琢句。篤老而不休。何其不自重惜若此。及觀昌黎韓

氏稱之。則曰流落人間者。太山一豪芒。而蘇氏亦曰。此老詩外。大有事在。吾乃知杜氏之文字。蘊於胸而未發者。殆十倍於世之所傳。而器識之深遠。其可敬慕。又十倍於文字也。今之君子。秋豪之榮華。而以爲喜。秋豪之摧挫。而以爲慍。舉一而遺二。見寸而昧尺。器識之不講。事業之不問。獨沾沾以從事於所謂詩者。與日而綴一字。抵莫而不安。毀齒而鉤研聲病。頭童而不息。以啞嚅蹇淺之語。而視爲鐘彝不朽之盛業。亦見其惑已。松滋黃仙嶠先生。質直而洞豁。泊然聲利之外。觀察於滇南。吏剔其奸。民宣其隱。於古人所謂器識事業者。亦既近而有之。間以其餘。發爲詩章。又能棄故攬新。約言豐義。而先生會不以自鳴。退然若無以與於古者。人之度量相越。爲閔爲隘。爲謙爲盈。不可一二計也。國藩既受而卒讀。因爲擇其尤善者得若干首。俾錄而存之。世有終其身以治詩自名。而志趣或未廣者。觀先生此編。亦將內慙而有以自擴也夫。

謝子湘文集序

嗚呼。士生今世。欲有所撰述。以庶幾古作者之義。豈不難哉。自束髮受書。則有事舉子帖括之業。有司者割截聖人之經語。以試其能。偏全虛實。斷續鈎聯之際。錄有律。黍有程。而又雜試以詩賦經義策論。其爲品目。固已不勝其繁矣。而一二才桀之士。既挾羣藝以應有司之求。又別進慕乎古。

之能文者。以降其兼勝無已之心。於是乎目欲弁視。耳欲四聽。傲精而費日。終不能達於古人之庭者。比比而是也。古之爲文者。其神專有所之。無有俗說靡言。肴其意趣。自有明以來。制義家之治古文。往往取左氏。司馬遷。班固。韓愈之書。繩以舉業之法。爲之點。爲之圓。圍以賞異之。爲之乙。爲之鐵。圍以識別之。爲之評。注以顯之。讀者圍於其中。不復知點圍評乙之外。別有所謂屬文之法也者。雖勤劇一世。猶不能以自拔。故僕嘗謂末世學古之士。一厄於試藝之繁多。再厄於俗本評點之書。此天下之公患也。將不然哉。將不然哉。南豐謝君子湘。與予同歲舉於鄉。又同登於禮部。其羣藝見采於有司者。固已薈絕與人人異。自君之生。予嘗見聞而內敬之矣。既歿。而其弟出君所爲古文示予。又知其志之可敬也。蓋以流俗之墮於所謂一再厄者。而以君之所得較之。其爲踰越。可勝量哉。於是爲序而歸之。因道其通患。以慨夫末世承學之難焉。

朱慎甫遺書序

劉陽朱君文焯所爲書。曰易圖正旨者一卷。曰五子見心錄者二卷。曰從學雜記一卷。文集一卷。嘉道之際。學者承乾隆季年之流風。襲爲一種破碎之學。辨物析名。梳文櫛字。刺經典一二字。解說或至數千萬言。繁稱雜引。遊衍而不得所歸。張己伐物。專抵古人之隙。或取孔孟書中心性仁義

之文。一切變更故訓而別創一義。羣流和附。堅不可易。有宋諸儒。周程張朱之書。爲世大詬。閒有涉於其說者。則舉世相與笑譏唾辱。以爲彼博聞之不能。亦逃之性理空虛之域。以自蓋其鄙陋不肖者而已矣。朱君自弱冠志學。則已棄舉子業。而惟有宋五子之求。斷絕衆源。歸命於一。自六經之奧。百氏雜家有利用之言。無不究索其終。折衷於五子。家貧。負母渡湖。招徒授學。取其入以爲養。養則獨腴。身有錢色。或勸以稍易其途。從事於時世。所謂辨物梳文櫛字之學者。足以傾賊耳目。植朋廣譽。君笑曰。吾於科目。且棄而背之矣。其又屑覬彼邪。卒以不顧。日抱遺訓。以自鑄其躬。繩過無小。克敬以裕。闔然至死而不悔。嗚呼。君之於學。其可謂篤志而不牽於衆好者矣。惜其多有放佚。如大易粹言。春秋本義。三傳備說諸篇。今都不可見。其僅存者。又或闕殘。難令完整。其易圖正旨。推闡九圖之義。與德清胡渭寶應王懋竑氏之論不合。山居僻左。不及盡睹。當世通人成說。小有歧異。未爲額也。予既受讀終篇。因頗爲論定。以證鄉人。知觀感焉。

歐陽生文集序

乾隆之末。桐城姚姬傳先生彙善爲古文辭。慕效其鄉先輩方望溪侍郎之所爲。而受法於劉君大槐。及其世父編修君範。三子既通儒碩望。姚先生治其術益精。歷城周永年書昌爲之語曰。天下之文章。其在桐城乎。由

是學者。多歸衡桐城。號桐城派。猶前世所稱江西詩派者也。姚先生晚而主鍾山書院講席。門下簪籍者。上元有管同異之。梅會亮伯言。桐城有方東樹植之。姚瑩石甫四人者。稱爲高第弟子。各以所得傳授徒友。往往不絕。在桐城者。有戴鈞衡存莊。事植之久。尤精力過絕人。自以爲守其邑先正之法。禮之後進。義無所讓也。其不列弟子籍。同時服膺。有新城魯仕驥。絮非。宜與吳德旋仲倫。絮非之甥。爲陳用光碩士。碩士既師其舅。又親受業姚先生之門。鄉人化之。多好文章。碩士之羣從。有陳學受蓺叔。陳溥廣敷。而南豐又有吳嘉賓子序。皆承絮非之風。私淑於姚先生。由是江西建昌。有桐城之學。仲倫與永福呂璜。月滄交友。月滄之鄉人。有臨桂朱琦。伯韓。龍啓瑞。翰臣。馬平。王錫。振定甫。皆步趨吳氏。呂氏。而益求廣其術於梅伯言。由是桐城宗派。流衍於廣西矣。昔者。國藩嘗怪姚先生典試湖南。而吾鄉出其門者。未聞相從以學文爲事。既而得巴陵吳敏樹南屏。稱述其術。篤好而不厭。而武陵楊彝珍性農。善化孫鼎臣芝房。湘陰郭嵩燾伯琛。澱浦舒燾伯魯。亦以姚氏文家正軌。違此則又何求。最後得湘潭歐陽生。生吾友歐陽兆熊小岑之子。而受法於巴陵吳君。湘陰郭君。亦師事新城。二陳。其漸染者多。其志趨嗜好。舉天下之美。無以易乎桐城姚氏者也。當乾隆中葉。海內魁儒畸士。崇尚鴻博。繁稱旁證。考核一字。累數千言不能

休別立幟志。名曰漢學。深擯有宋諸子義理之說。以爲不足復存。其爲文尤蕪雜寡要。姚先生獨排衆議。以爲義理考据詞章三者不可偏廢。必義理爲質。而後文有所附。考据有所歸。一編之內。惟此尤兢兢。當時孤立無助。傳之五六十年。近世學子。稍稍誦其文。承用其說。道之廢興。亦各有時。其命也歟哉。自洪楊倡亂。東南荼毒。鍾山石城。昔時姚先生撰杖都講之所。今爲犬羊窟宅。深固而不可拔。桐城淪爲異域。旣克而復失。戴鈞衡全家殉難。身亦歐血死矣。余來建昌。問新城南豐兵燹之餘。百物蕩盡。田荒不治。蓬蒿沒人。一二文士。轉徙無所。而廣西用兵九載。羣盜猶洶洶。驟不可爬梳。龍君翰臣又物故。獨吾鄉少安二三君子。尙得優游文學。曲折以求合桐城之轍。而舒燾前卒。歐陽生亦以瘵死。老者牽於人事。或遭亂不得竟其學。少者或中道夭殂。四方多故。求如姚先生之聰明早達。太平壽考。從容以躋於古之作者。卒不可得。然則業之成否。又得謂之非命也耶。歐陽生名勳。字子和。沒於咸豐五年三月。年二十有幾。其文若詩。清嶺喜往復。亦時有亂離之慨。莊周二。逃空虛者。聞人足音。蹙然而喜。而况昆弟親戚之警效其側者乎。余之不聞桐城諸老之警效也久矣。觀生之爲。則豈直足音而已。故爲之序。以塞小岑之悲。亦以見文章與世變相因。俾後之人。得以考覽焉。

孫芝房侍講芻論序

咸豐九年三月。善化孫芝房侍講鼎臣。以書抵余建昌軍中。寄所爲芻論。屬爲裁定。凡二十五篇。曰論治者六。論鹽者二。論漕者三。論幣者二。論兵者三。通論唐以來大政者七。論明賦餉者一。其首章追溯今日之亂源。深咎近世漢學家言。用私意分別門戶。其語絕痛。明年四月。復得芝房書。則疾革告別之詞。而芝房以三月死矣。旣爲位而哭。且以書告仁和邵君懿辰。於是爲敘諸簡首。而歸諸其孤。蓋古之學者。無所謂經世之術也。學禮焉而已。周禮一經。自體國經野。以至酒漿塵市。巫卜繡橐。天鳥蠱蟲。各有專官。察及纖悉。吾讀杜元凱春秋釋例。歎邱明之發凡。仲尼之權衡萬變。大率兼周之舊典。故曰。周禮盡在魯矣。自司馬氏作史。猥以禮書與封禪平準竝列。班范而下。相沿不察。唐杜佑纂通典。言禮者居其泰半。始得先王經世之遺意。有宋張子朱子。益崇闡之。聖清膺命。巨儒輩出。顧亭林氏著書。以扶植禮教爲己任。江慎修氏纂禮書綱目。洪纖畢舉。而秦樹禮氏遂修五禮通考。自天文地理軍政官制。都萃其中。旁綜九流。細破無內。國藩私獨宗之。惜其食貨稍缺。嘗欲集鹽漕賦稅國用之經。別爲一編。傳於秦書之次。非徒廣己於不可畔岸之域。先聖制禮之體之無所不賅。固如是也。以世之多故。握槩之不可以苟。未及事事而齒髮固已衰矣。往者漢

陽劉傳瑩葉雲。實究心漢學者之說。而疾其單辭碎義。輕窄宋賢。閱嘗語余。學以反求諸心而已。泛博胡爲。至有事於身。與家與國。則當一一詳核焉。而求其是。考諸室而市可行。驗諸獨而衆可從。又曰。禮非考据不明。學非心得不成。國藩則大韙之。以爲知言者徒也。未幾。葉雲卽世。臨絕。爲先令處分後事。壹秉古禮。國藩旣銘其墓。又爲家傳。麤道漢學得失主客之宜。藏諸劉氏之祔。君子之言也。平則致和。激則召爭。辭氣之輕重。積久則移易世風。黨仇訟爭。而不知所止。曩者良知之說。誠非無蔽。必謂其釀晚明之禍。則少過矣。近者漢學之說。誠非無蔽。必謂其致粵賊之亂。則少過矣。芻論所考諸大政。蓋與顧氏江氏秦氏之指爲近。彼數子者。固漢學家所奉以爲歸者也。而芝房首篇譏之已甚。其果有剖及毫釐千里者耶。抑將憤夫一二鉅人長德。曲學阿世。激極而一鳴耶。芝房之志大而銳進也。與葉雲同。其卒也。寄書抵余。以告永訣。亦與葉雲同。其自芻論外。別有詩十卷。文十一卷。河防紀略四卷。著書之多。與葉雲異。而其博觀而慎取。則同。其嫉夫以漢學標揭也。亦同。而立言少異。余故稍附評論。以明不忍死友之義。亦以見二子者之不竟其志。非僅余之私痛也。

經史百家簡編序

自六籍燔於秦火。漢世掇拾殘遺。徵諸儒能通其讀者。支分節解。於是有

章句之學。劉向父子。勘書祕閣。刊正脫誤。稽合同異。於是有校讐之學。梁世劉勰。鍾嶸之徒。品藻詩文。褒貶前哲。其後或以丹黃識別高下。於是有評點之學。三者皆文人所有事也。前明以四書經藝取士。我朝因之。科場有勾股點句之例。蓋猶古者章句之遺意。試官評定甲乙。用硃墨旌別其旁。名曰圈點。後人不察。輒仿其法。以塗抹古書。大圈密點。狼籍行閒。故章句者。古人治經之盛業也。而今專以施之時文。圈點者。科場時文之陋習也。而今反以施之古書。未流之遷變。何可勝道。惟校讐之學。我朝獨爲卓絕。乾嘉間巨儒輩出。講求音聲故訓。校勘疑誤。冰解的破。度越前世矣。咸豐十年。余選經史百家之文。都爲一集。又擇其尤者。四十八首。錄爲簡本。以詒余弟沅甫。沅甫重寫一冊。請余勘定。乃稍以己意。分別節次。句絕而章乙之。閒亦釐正其謬誤。評隲其精華。雅與鄭並奏。而得與失參見。將使一家昆弟子姪。啓發證明。不復要塗人而強同也。

鳴原堂論文序

常棣爲燕兄弟之詩。小宛爲兄弟相戒以免禍之詩。而皆以脊令起興。蓋脊令之性最急。其用情最切。故常棣以喻急難之誼。而小宛以喻征邁努力之忱。余久困兵閒。溫甫沅浦兩弟之從軍。其初皆因急難而來。沅浦堅忍果摯。遂成大功。余用是獲免於戾。因與沅弟。常以暇逸相誠。期於夙興

夜寐無忝所生。爰取兩詩。眷令之旨。名其堂曰鳴原堂云。

王船山遺書序

王船山先生遺書。同治四年十月刻竣。凡三百二十二卷。國藩校閱者。禮記章句四十九卷。張子正蒙注九卷。讀通鑑論三十卷。宋論十五卷。四書易詩春秋諸經稗疏考異十四卷。訂正譌脫百七十餘事。軍中鮮暇。不克細紬全編。乃爲序曰。昔仲尼好語求仁。而雅言執禮。孟氏亦仁義並稱。蓋聖王所以平物我之情。而息天下之爭。內之莫大於仁。外之莫急於禮。自孔孟在時。老莊已鄙棄禮教。楊墨之指不同。而同於賊仁。厥後衆流歧出。載籍焚燒。微言中絕。人紀紊焉。漢儒掇拾遺經。小戴氏乃作記。以存禮於什一。又千餘年。宋儒遠承墜緒。橫渠張氏乃作正蒙。以討論爲仁之方。船山先生注正蒙數萬言。注禮記數十萬言。幽以究民物之同原。顯以綱維萬事。弭世亂於未形。其於古昔明體達用。盈科後進之旨。往往近之。先生名夫之字而農。以崇禎十五年舉於鄉。自覩是時朝政。刻覈無親。而士大夫又馳驚聲氣。東林復社之徒。樹黨伐仇。頽俗日敝。故其書中黜申韓之術。嫉朋黨之風。長言二歎。而未有已。既一仕桂藩。爲行人司。知事終不可爲。乃匿迹永郴衡邵之間。終老於湘西之石船山。聖清大定。訪求隱逸。鳩博之士。次第登進。雖顧亭林李二曲輩之艱貞徵聘。尙不絕於廬。獨先生

深閼固藏。邈焉無與。平生痛詆黨人標榜之習。不欲身隱而文著。來反唇之訕笑。用是其身長邈。其名寂寂。其學亦竟不顯於世。荒山敝榻。終歲孳孳。以求所謂育物之仁。經邦之禮。窮探極論。千變而不離其宗。曠百世不見知。而無所於悔。先生沒後。巨儒迭興。或攻良知捷獲之說。或辨易圖之鑿。或詳考名物訓詁音韻。正詩集傳之疏。或修補三禮時享之儀。號爲卓絕。先生皆已發之於前。與後賢若合符契。雖其著述太繁。醇駁互見。然固可謂博文約禮。命世獨立之君子已。道光十九年。先生裔孫世全。始刊刻百五十卷。新化鄧顯鶴。湘臬。實主其事。湘潭歐陽兆熊。曉晴。贊成之。咸豐四年。寇犯湘潭。板毀於火。同治初元。吾弟國荃。乃謀重刻。而增益百七十二卷。仍以歐陽君董其役。南匯張文虎。嘯山。儀徵劉毓崧。伯山等。分任校讐。庀局於安慶。歲事於金陵。先生之書。於是麤備。後之學者。有能秉心敬恕。綜貫本末。將亦不釋乎此也。

衡陽彭氏譜序

吾少時讀家譜。曾子十五世孫據。以關內侯。避王莽之亂。南遷爲南州諸會之祖。私怪據事蹟。不見於他書。舊譜於何取徵。後讀歐陽文忠公集。見其答曾子固書。亦以關內侯據爲疑。引史例以諷之。乃知吾曾氏本據爲始遷之祖。相沿且千歲。由來舊矣。歐陽公譜牒之學。號爲精密。然其所著

唐宰相世系表。於巨族既推其本源。出於某帝某王。又歷敘漢世名賢。如琅邪王氏。已稱出周靈王子晉之後。而又敘王吉王駿之系。蘭陵蕭氏。已稱出帝嚳之後。而又敘蕭何望之之系。相承不絕。如屈伸指而數庭樹。略無參稽猶豫之辭。公嘗譏司馬遷不能闕疑。後人又譏歐陽氏不善闕疑。所謂目能見千里而不能自見其睫也。君子慎度身世。信諸心則蒙大難。決大計而不懼。未信諸心。則雖坦途而不肯輕試。其於臨文。亦若是焉可耳。衡陽彭雪琴侍郎。以諸生從戎。十有三載。肅清長江。克名城以百計。瘞巨寇於金陵。當其提挈飢軍。出入鋒鏑。誓不與此賊同戴三光。天下稱爲烈士。及夫勳勞日著。朝廷授爲安徽巡撫。授爲漕運總督。皆屢疏固辭不拜。退然若漆雕之內不自信。卒不輕於一試。又何慎也。同治四五年間。東南大定。侍郎與其宗長老。修訂彭氏家譜。彭氏本貫江西之泰和。至明世有曰聲揚者。始遷於衡。其後入傳。曰步南者。肇修譜牒。我朝康熙中再修之。道光十三年。侍郎之考贈光祿君三修之。及是四次修纂。族之材俊子弟。奮迹師中。積功累伐。珥貂相望。簪紱雲興。皆著於錄。彭氏日益光大矣。其系表斷自聲揚公。凡前世達人。暨同姓異望之顯者。別爲一編。不與本宗相淆。蓋凜凜乎闕疑之誼云。國藩之先世。亦自江西遷居衡陽。至明季更遷湘鄉。而祠廟今尙在衡。與彭氏擊柝相聞。墟煙相接。曩者不揆愚陋。

嘗慨然欲重訂家譜。述其可知者而差其可疑者。區爲別錄。不求盡合於歐會大儒。但求慊於吾心。久困兵閒。未遑執簡。感侍郎急於先務。故爲之序以答其請。因抒余之夙懷。

日慎齋詩草序

李生春甫。余癸卯典試蜀中所得士也。時生方少貌玉立。文似韓慕廬。脩然塵盞之表。心賞之。勸以讀書希古而別。而生侍老親疾。累年不應禮部試。丁未爲百韻詩貽余。余賦詩報之曰。不見李生今四載。我有情懷浩如海。又曰。汝曹報國好身手。似我蹉跎已老醜。思之。抑勸之也。庚戌春正月。生入都來見。遂成進士。官翰林。余大喜。壬子夏。散館改官刑部。余重惜之。生愜愜不自得。余持節江西。生以詩送行。有惘然若失意。既聞。以同知之任滇中。會天下多故。久不得生消息。不數年。聞生官知府。奉使徵餉。遇賊不屈死矣。余大慟。淚如雨下。其門人韓西舫孝廉。以生滇中詩集。並毀於賊。搜羅散佚。得十之五。由吳春海太史寄余屬爲序。余何言。烏虜。天賦生以穎異之資。復予生以清華之選。其待生不可謂不厚。乃乍予之而乍奪之。使之鬱伊無繆激。而爲一官萬里之行。夫以生之才。中外皆可自效。使天益其年。以富其學。其建樹當可想見。卽其詩之所詣。當不僅若此。然死者。人所不免。犯敵捐軀。與老死牖下。其輕重固自有別。而絕不意生之死。

之慘毒如是。且並其詩殉之。亦零落無存。而僅僅掇拾於風霜兵燹之餘也。悲夫。回憶癸卯識生後。以詩倡禱。而今已矣。莊叟曰。身非女有。此天地之委形也。生既浩然長往矣。何有於身後之名。然則余爲生悲。並悲及生之詩。亦達士之所笑也。雖然。莊論達矣。而亦未盡也。如生忠魂英魄。歷劫不化。當如睢陽爲厲以殺賊。非泯泯以沒者。况夫朝廷恤之。門人思之。有增秩之文。有延世之賞。有遺集之刻。以永其傳。均有身盡而我不與之俱盡者在。生亦可以含笑九京也夫。

國朝先正事略序

余嘗以大清達人傑士。超越古初。而紀述闕如。用爲歎憾。道光之末。聞嘉興錢衍石給事儷吉。仿明焦竑獻徵錄。爲國朝徵獻錄。因屬給事從子應傳。寫其目錄。得將相大臣循良忠節儒林文苑等凡八百餘人。積二三百卷。借名人之碑傳。存名人之事蹟。自別京師。久從征役。而此目錄冊者。不可復睹。同治初。又得鄢陵蘇源生文集。具述其師錢給事於徵獻錄之外。復節錄名臣爲先正事略。於是知錢氏頗有造述。不僅鈔纂諸家之文矣。又二年。而得吾鄉李元度次青所箸先正事略。命名乃適與錢氏相合。前此二百餘年。未有成書。近三十年中。錢氏編摩於汴水。次青成業於湖湘。斯足徵通儒意趣之同。抑地下達人傑士。其靈爽不可終闕也。自古英哲

非常之君。往往得人鼎盛。若漢之武帝。唐之文皇。宋之仁宗。元之世宗。明之孝宗。其時皆異材勃起。俊彥雲屯。焜燿簡編。然考其流風所被。率不過數十年而止。惟周之文王。暨我聖祖仁皇帝。乃閱數百載。而風流未沫。周自后稷。計五世。集大成於文王。而成康以泊東周。多士濟濟。皆若秉文王之德。我朝六祖一宗。集大成於康熙。而雍乾以後。英賢輩出。皆若沐聖祖之教。此在愚氓亦似知之。其所以然者。雖大智莫能名也。聖祖嘗自言年十七八時。讀書過勞。至於咯血而不肯少休。老耄而手不釋卷。臨摹名家手卷。多至萬餘。寫寺廟扁榜。多至千餘。蓋雖寒峻。不能方其專。北征度漠。南巡治河。雖卒役不能踰其勞。祈雨禱疾。步行天壇。并醴醬齏鹽而不御。年逾六十。猶扶病而力行之。凡前聖所稱至德純行。殆無一而不備。上而天象。地輿。厯算。音樂。考禮。行師。刑律。農政。下至射。御。醫。藥。奇門。壬遁。滿蒙。西域。外洋之文書字母。殆無一而不通。且無一不創立新法。別啓津途。後來高才絕藝。終莫能出其範圍。然則雍乾嘉道累葉之才。雖謂皆聖祖教育而成。誰曰不然。今上皇帝嗣位。大統中興。雖去康熙益遠矣。而將帥之乘運會。立勳名者。多出一時章句之儒。則亦未始非聖祖餘澤。陶冶於無窮也。如次青者。蓋亦章句之儒。從事戎行。咸豐甲寅乙卯之際。與國藩患難相依。備嘗艱險。厥後自領一隊。轉戰數年。軍每失利。輒以公義糾劾罷

職論者或咎國藩執法過當。亦頗咎次青在軍。偏好文學。奪治兵之日力。有如莊生所譏。挾策而亡羊者。久之。中外大臣。數薦次青緩急可倚。國藩亦草疏密陳。李元度下筆千言。兼人之才。臣昔彈劾太嚴。至今內疚。惟朝廷量予褻省。當時雖爲吏議所格。天子終右之起家。復任黔南軍事。師比有功。超拜雲南按察使。而是書亦於黔中告成。聖祖有言曰。學貴初有決定不移之志。中有勇猛精進之心。未有堅貞永固之力。次青提兵四省。屢蹶仍振。所謂貞固者非邪。發憤著書。編編立就。亦云勇猛矣。願益以貞固之道持之。尋訪錢氏遺書。參訂修補。矜練歲年。慎褒貶於鑑錄。酌羣言而取衷。終成聖清鉅典。上躋周家雅頌。誓誥之林。不尤足壯矣哉。

重刻茗柯文編序

武進張大令式會。將重刻其會祖王父臬聞先生茗柯文集。而以寫本示余。屬爲之序。蓋文章之變多矣。高才者好異不已。往往造爲瑰瑋奇麗之辭。倣效漢人賦頌。繁聲僻字。號爲復古。會無才力。氣勢以驅使之。有若附贅懸疣。施膠漆於深衣之上。但覺其不類耳。敘述朋舊。狀其事蹟。動稱卓絕。若合古來名德至行。備於一身。譬之畫師寫真。衆美畢具。偉則偉矣。而於其所圖之人。固不肖也。吾嘗執此以衡近世之文。能免於二者之讖。實鮮蹈之者多矣。臬聞先生編次七十家賦。評量殿最。不失銖黍。自爲賦亦

恢闕絕麗。至其他文。則空明澄澈。不復以博奧自高。平生師友。多超特不世之才。而下筆稱述。適如其量。若帝天神鬼之監臨。褒譏不敢少益。何其慎歟。自考據家之道既昌。說經者專宗漢儒。厭薄宋世義理心性等語。甚者詆毀洛閩。披索疵瑕。枝之蒐而忘其本。疏之逐而遺其源。臨文則繁徵博引。考一字。辨一物。累數千萬言不能休。名曰漢學。前者自矜創獲。後者附和偏說。而不知返。君子病之。先生求陰陽消息於易。虞氏求前聖制作於禮。鄭氏辨說文之諧聲。剖晰毫芒。固亦循漢學之軌轍。而虛衷研究。絕無陵駕先賢之意。萌於至隱。文辭溫潤。亦無考證辨駁之風。盡取古人之長。而退然若無一長可恃。意其蘊蓄者厚。竭而蔽之。能焉而不伐。斂焉而愈光。殆天下之神勇。古之所謂大雅者歟。張氏之先兩世。賢母撫孤課讀。一日不能再食。舉家習爲故常。孝友艱苦。遠近歎慕。自粵賊縱橫。東南糜爛。常潤等郡。室廬蕩然。張氏之窮約。殆有甚於疇昔。書籍刻板。皆摧燒不復可詰矣。余昔讀張氏諸書。既欽其篤行。茲重覽茗柯文編。樂其復顯於世也。乃忘其陋而序之。

湖南文徵序

吾友湘潭羅君研生。以所編纂湖南文徵百九十卷示余。而屬爲序其端。國藩陋甚。齒又益衰。奚足以語文事。竊聞古之文。初無所謂法也。易書詩

儀禮春秋諸經。其體勢聲色。會無一字相襲。卽周秦諸子。亦各自成體。持此衡彼。畫然若金玉與卉木之不同類。是烏有所謂法者。後人本不能文。強取古人所造而摹擬之。於是有所謂法者。後人本不能文。人心各具自然之文。約有二端。曰理。曰情。二者。人人之所固有。就吾所知之理而筆諸書。而傳諸世。稱吾愛惡悲愉之情。而綴辭以達之。若割肺肝而陳簡策。斯皆自然之文。性情敦厚者。類能爲之。而淺深工拙。則相去千百千萬。而未始有極。自羣經而外。百家著述。率有偏勝。以理勝者。多闡幽造極之語。而其弊或激宕失中。以情勝者。多悱惻感人之言。而其弊常豐縟而寡實。自東漢至隋。文人秀士。大抵義不孤行。辭多儷語。卽議大政。考大禮。亦每綴以排比之句。閒以婀娜之聲。歷唐代而不改。雖韓李銳志復古。而不能革舉世駢體之風。此皆習於情韻者類也。宋興既久。歐陽會王之徒。崇奉韓公。以爲不遷之宗。適會其時。大儒迭起。相與上探鄒魯。研討微言。羣士慕效。類皆法韓氏之氣體。以闡明性道。自元明至聖朝。康雍之閒。風會略同。非是不足與於斯文之末。此皆習於義理者類也。乾隆以來。鴻生碩彥。稍厭舊聞。別啓涂軌。遠搜漢儒之學。因有所謂考據之文。一字之音訓。一物之制度。辨論動至數千言。曩所稱義理之文。淡遠簡樸者。或屏棄之。以爲空疏不足道。此又習俗趨嚮之一變已。湖南之爲邦。北枕大

江。南薄五嶺。西接黔蜀。羣苗所萃。蓋亦山國荒僻之亞。然周之末。屈原出於其間。離騷諸篇。爲後世言情韻者所祖。逮乎宋世。周子復生於斯。作太極圖說通書。爲後世言義理者所祖。兩賢者。皆前無師承。創立高文。上與詩經周易同風。下而百代逸才。舉莫能越其範圍。而况湖湘後進。沾被流風者乎。茲編所錄。精於理者蓋十之六。善言情者約十之四。而駢體亦頗有甄采。不言法而法未始或紊。惟考據之文。蒐集極少。前哲之倡導不宏。後世之欣慕亦寡。研生之學。稽說文以究達詁。箋禹貢以晰地志。固亦深明考據家之說。而論文但崇體要。不尙繁稱博引。取其長而不瀦其偏。其猶君子慎於擇術之道歟。

雲漿山人詩序

代季師作

自韓愈氏有言。懽愉之詞難工。窮苦之音易好。歐陽公效之。亦稱詩必窮而後工。後之論者。大率祖述其說。以謂宮音和溫。難於聳聽。商音悽厲。易以感人。故盛世之巨公。其詩歌往往不及衰世之孤臣逐客。而廟堂卿相。例不能與窮巷憔悴專一之士。角文藝之短長。數十年來。人人相與。持是說而不變。所從來久已。芝昌嘗究觀詩教之終始。竊獨以爲未必然也。鄭氏所撰三百篇譜。大氏成周盛時。賢人有位之作爲多。東遷以降。王迹旣熄。詩亦替矣。西漢蘇李。東漢班張。號爲能詩。亦當兩京全盛之日。李唐之

世詞人百輩。累迹而興。然世所稱爲四唐者。雖愚者亦知有初盛而貶中晚。蓋聲音之道。與政相通。國家鼎隆之日。太和充塞。庶物恬愉。故文人之氣盈而聲亦上騰。反是則其氣歛而聲亦從而下殺。達者之氣盈矣。而志能斂而之內。則其聲可以薄無際。而感鬼神。窮者之氣既歛。而志不克。剴然而自申。則甕牖窮老而不得一篇之工。亦常有之。然則謂盛世之詩。不敵衰季。卿相不敵窮巷之士。是二者。殆皆未爲篤論已。吾師長白宮保相國光。輔聖主二十餘年。智深而量遠。果決而閒定。暇日以所爲詩二冊見示。芝昌受而讀之。簡肅清夷。不名一能。篇帙不繁。而行役之作。屢從之章。生平政蹟。略備於斯。抑有詩史之遺意。其於六朝唐宋諸家。若合衆金以融一冶。而鑄爲重器。觀者但知器之良。而忘其所采。爲誰氏之金也。於時皇清承平。已二百祀。重熙累洽。遐邇禔安。跂行喙息之倫。莫不茹仁踐義。時會可謂極隆。而吾師入總百揆。出領三輔。門生故吏。吐哺延接。天憲出內。曹司白事。手批口答。日以百計。而乃從容揮斥。時從事於吟咏。若行所無事者。才分之優絀。什百千萬。如此其遠也。觀吾師所際之時。與夫詩之所詣。而後知曩之宗韓歐之說者。亦所謂察其一。未睹其二者哉。讀既竟。因附陳微義。識於簡端。用質知言者焉。道光二十有七年九月某日。門人季芝昌謹序。

錢選制藝序

乘椎輪於金根玉輅之旁。夫人以爲陋矣。服草衣卉服於袞冕繡裳之朝。夫人以爲悖矣。甚哉時之不可已也。泥橈而山樛。夏葛而冬裘。適時則貴。失時則損。昔馮唐終身不遇。而曰文帝好老而臣尙少。武帝好少而臣已老。豈曰非材。如不遇時何。矧夫習制藝以弋取科名。而有不附聲比貌。求合時宜者乎。雖然。趨時之道。豈一端哉。天下之事。其始蓋有一二巧者。標新領異。以臧羣聽。其次則能者慕效之。又其次則拙者剽竊之。慕而效之。是謂風氣。剽而竊之。是謂流弊。不數十年。而昔之新且異者。將厭棄矣。則又有巧者移易之。又數十年。而亦厭棄矣。人情賤同而思異。物窮則變。自古然也。故善趨時者。貴先時。不貴後時。場屋之文。何獨不然。國家以制藝取士。二百年來。爲體屢遷。乾隆嘉慶之際。學者研鍊經義。負聲振采。醜郁葩華。道光初年。稍患文勝。詞豐而義寡。梳蠟其外。而塗泥其中者。往往而有。於是。有志者。慨然思以易之。刊其支蔓。矯以清真。當其始出。若撥霧而見山。厭肥膩而飲太羹也。而今已二十年矣。諺曰。城中好高髻。四方高一尺。城中好廣眉。四方成半額。自往者標爲清真之目。近乃頗事佻巧。拋棄詩書。或一挑半剔。以爲顯。排句疊調。以爲勁。抑之無實。揚之無聲。所謂歷久而厭棄者。其不然乎。所謂物窮則變者。其將在茲乎。善趨時者。當以此

時。振翔翔之骨。發鏗訇之響。鎔經史而鑄偉詞。揆以好異之人情。驗以將變之風氣。吾知其必有合也。僕不敏。嘗欲采近科墨。彙爲一帙。以爲趨時者先聲之道。人事熾劇。卒鮮休暇。同年錢君崙仙。頃出茲編見示。據新汰弊。先得我心。苟有能者慕效。則風氣從此移易。錢君其巧者與。抑吾又有說焉。風氣者。必變者也。而規矩者。不變者也。今夫斲木爲輿。軫方以象地。蓋圓以象天。可規可葺。可水可懸。可量可權。而後出而合轍。深衣之制。袂圓以應規。曲袷如矩。以應方。兼以應直應平。而後非奇袤之服。制藝之有規矩。先輩蓋詳言之。錢君此選。奇正濃淡。不名一能。要其引繩削墨。其有悖於前人之程式者。鮮矣。苟舍是而別求先時之巧。是猶行遠者有說輻之占。製錦者之不得要領也。將可乎哉。

鈔朱子小學書後

右小學三卷。世傳朱子輯。觀朱子癸卯與劉子澄書。則是編子澄所詮次也。其義例不無可訾。然古聖立教之意。蒙養之規。差具於是。蓋先生之治人。尤重於品節。其自能言以後。凡夫灑掃應對飲食衣服。無不示以儀則。因其本而利道。節其性而不使縱。規矩方圓之至也。既已固其筋骸。劑其血氣。則禮樂之器。蓋由之矣。特未知焉耳。十五而入太學。乃進之以格物。行之而著焉。習矣而察焉。因其已明而擴焉。故達也。班固藝文志所載小

學類皆訓詁文字之書。後代史氏率仍其義。幼儀之繁闕焉不講。三代以下。舍佔畢之外。乃別無所謂學。則訓詁文字要矣。若揆古者三物之教。則訓詁文字者。亦猶其次焉者乎。仲尼曰。行有餘力。則以學文。繪事後素。不其然哉。余故錄此。編於進德門之首。使彙弟子姓。知幼儀之爲重。而所謂訓詁文字。別錄之居業門中。童子知識未楛。言有刑。動有法。而蹈非彝者。鮮矣。是編舊分內外。內編尙有稽古一卷。外編嘉言善行二卷。采掇頗淺近。亦不錄云。

書歸震川文集後

近世綴文之士。頗稱述熙甫。以爲可繼會南豐王半山之爲之。自我觀之。不同日而語矣。或又與方苞氏並舉。抑非其倫也。蓋古之知道者。不妄加毀譽於人。非特好直也。內之無以立誠。外之不足以信後世。君子取焉。自周詩有崧高烝民諸篇。漢有河梁之詠。沿及六朝。錢別之詩。動累卷帙。於是。有爲之序者。昌黎韓氏。爲此體特繁。至或無詩而徒有序。駢拇枝指。於義爲已侈矣。熙甫則不必錢別而贈人以序。有所謂賀序者。謝序者。壽序者。此何說也。又彼所爲。抑揚吞吐。情韻不匱者。苟裁之以義。或皆可以不陳。浮芥舟以縱送於蹶淅之水。不復憶天下有曰海濤者也。神乎味乎。徒詞費耳。然當時頗崇茁軋之習。假齊梁之雕琢。號爲力追周秦者。往往而

有。熙甫一切棄去。不事塗飾而選言有序。不刻畫而足以昭物情。與古作者合符。而後來者取則焉。不可謂不智已。人能宏道。無如命何。藉熙甫早置身高明之地。聞見廣而情志闊。得師友以輔翼所詣。固不竟此哉。

書扁鵲倉公傳

司馬遷敘述扁鵲倉公。具詳病者主名。及診脈之法。藥齊之宜。繁稱數十事。累牘不休。余嘗求之。非有義也。周官醫師。食醫。疾醫。瘍醫。獸醫之屬。隸於冢宰。魯陽伏陰。節宣補救。亦宰世者之所有事。爲良醫立傳。無所不可。要以略著大指。明小道之不可廢。與日者龜策諸傳相附。據一二事以爲類足矣。繁稱奚爲者。夫執技以事上。名一能以濟人。此小人之事也。大人者。德足以育物。智足以役衆。彼誠有所擇。不宜於此。津津也。若遷實通方術而藉以自矜其多能。斯又淺者徒也。

書學案小識後

唐先生撰輯國朝學案。命國藩校字付梓。既畢役。乃謹書其後曰。天生斯民。予以健順五常之性。豈以自淑而已。將使育民淑世而彌縫天地之缺憾。其於天下之物。無所不當究。二儀之奠。日月星辰之紀。氓庶之生成。鬼神之情狀。草木鳥獸之感。若灑掃應對進退之瑣。皆吾性分之所有事。故曰。萬物皆備於我。人者。天地之心也。聖人者。其智足以周知庶物。其才能

時措而咸宜。然不敢縱心以自用。必求權度而絜之。以舜之濬哲。猶且好問好察。周公思有不合。則夜以繼日。孔子。聖之盛也。而有事乎好古敏求。顏淵。孟子之賢。亦曰博文。曰集義。蓋欲完吾性分之一源。則當明凡物萬殊之等。欲悉萬殊之等。則莫若卽物而窮理。卽物窮理云者。古昔賢聖共由之軌。非朱子一家之創解也。自陸象山氏以本心爲訓。而明之餘姚王氏。乃頗遙承其緒。其說主於良知。謂吾心自有天。則不當支離而求諸事物。夫天則誠是也。目巧所至。不繼之以規矩準繩。遂可據乎。且以舜。周公。孔子。顏。孟之知如彼。而猶好問好察。夜以繼日。好古敏求。博文而集義之勤如此。况以中人之質。而重物欲之累。而謂念念不過乎。則其能無少誣耶。自是以後。沿其流者百輩。間有豪傑之士。思有以救其偏。變一說則生一蔽。高景逸。顧涇陽氏之學。以靜坐爲主。所重仍在知覺。此變而蔽者也。近世乾嘉之閒。諸儒務爲浩博。惠定宇。戴東原之流。鉤研詁訓。本河間獻王實事求是之旨。薄宋賢爲空疏。夫所謂事者非物乎。是者非理乎。實事求是。非卽朱子所稱卽物窮理者乎。名目自高。詆毀日月。亦變而蔽者也。別有顏習齋。李恕谷氏之學。忍嗜欲。苦筋骨。力勤於見迹。等於許行之並耕。病宋賢爲無用。又一蔽也。由前之蔽。排王氏而不塞其源。是五十步笑百步之類矣。由後之二蔽。矯王氏而過於正。是因噎廢食之類矣。我朝崇

儒一道。正學翁與平湖陸子。桐鄉張子。闕諛辭而反經。確乎其不可拔。陸桴亭。顧亭林之徒。博大精微。體用兼賅。其他鉅公碩學。項領相望。二百年來。大小醇疵。區以別矣。唐先生於是輯爲此編。大率居敬而不偏於靜。格物而不病於瑣。力行而不迫於隘。三者交修。采擇名言。略依此例。其或守王氏之故轍。與變王氏而鄰於前三者之蔽。則皆釐而剔之。豈好辯哉。去古日遠。百家各以其意自鳴。是丹非素。無術相勝。雖其尤近理者。亦不能饜人人之心。而無異辭。道不同。不相爲謀。則亦已矣。若其有嗜於此而取途焉。則且多其識。去其矜。無以聞道自標。無以方隅自囿。不爲口耳之求。而求自得焉。是則君子者已。是唐先生與人爲善之志也。

書王雁汀前輩勃海圖說後

書孔氏疏云。堯時青州。當越海而有遼東。杜氏通典云。青州之界。越海分遼東。樂浪。二韓之地。西抵遼水。而胡氏湄曰。漢武所開樂浪。元菟二郡。乃古嶠夷之地。嶠夷。羲和所宅。朝鮮。箕子所封。皆應在青州域內。不僅遼東而已。據此數說。則禹時青州。踰海而兼營州之地。理若可信。齊召南氏所謂勢固自然者也。前明遼東都指揮使。隸於山東布政司。明初遼東土子。尙附山東鄉試。厥後以渡海之艱。改附順天。而遼東各州衛。隸於山東。則終明之世不改。蓋亦猶上古之青州。兼轄營州云爾。我朝定宅燕京。與明

代同而遠左爲陪都重地。則與前明之二州二十五衛。視同羈縻者。輕重迥別。故勃海之襟帶。旅順之門戶。視前世尤加慎焉。雁汀先生之意。欲於隍城石島之間。駐水師將領一員。登州金州。南北兼巡。內以防盜匪之狙伏。外以懾夷人之闖入。可謂謀慮老成。操之有要者已。道光二十九年。御史趙東昕。建登州設立水師之議。宣宗成皇帝下其事。令兵部軍機處會議。當事者以迹近更張。格而不行。國藩時承乏兵部。頗知旅順要隘。宜別置嚴鎮。而不知康熙年間。有嵩祝請登州水師。巡哨金州。鐵山之說。亦遂附和。未遑他議。今觀先生圖說所載實錄各條。知國家機務尤大者。列聖廟謨。皆已籌及之。苟能推行而變通。則收功不可紀極也。故述前說以互證。亦以志余不學之取焉。

書周忠介公手札後

往余讀史忠正公集。見其乙酉四月十九日遺書五通。又廿一日絕筆一紙。其言至深痛。不可終讀。蓋視楊忠愍公獄中家書。猶或過之。乾隆四十二年。我高宗皇帝。命摹勒史公絕筆於揚州梅花嶺祠壁。而楊公手書。亦於邇歲摹刻於京師松筠菴祠中。忠臣志士。或鬱屈於一時。其精光終將大顯於世。不可得而闕也。門人潘生伯寅。頃以周忠介公被逮時手札視余。乃與前楊後史。若出一轍。雖號爲三仁。殆無愧色。世多疑明代誅鋤搢

紳而怪後來氣節之盛。以爲養士實厚使然。余謂氣節者亦一二賢臣倡之。漸乃成爲風會。不盡關國家養士之薄厚也。當忠介吳中就逮之時。其駢首殉難之五人者。顏佩章等皆市人。周文元則輿隸耳。彼豈嘗邀朝廷一日之參養。而且慷慨赴義如彼。况乎士大夫有綱常風教之責者哉。

書儀禮釋官後

侍郎胡君季臨。重刻其會祖王父樸齋先生所著儀禮釋官。寄示國藩。屬爲識於簡端。余嘗從皇清經解中得讀此書。蠹識崖略。先生治禮崇信鄭氏。而於鄭說之歧誤者。亦不苟爲附和。如燕禮宜以膳宰爲主人。而辨注釋爲宰夫者之非。司官卽周禮之宮人。而指注比於小宰者之失。左右正卽僕從之官。若書之左右攜僕。詩之膳夫左右。而證注中稱樂正。僕人正者之謬。特牲士有私臣而歎。注謂士無臣者之疏。其說旣允矣。至於曲證旁通。往往卽一事而洞見本原。先王之制禮也。因人之愛而爲之。文飾以達其仁。因人之敬而立之。等威以昭其義。雖百變而不越此兩端。先生以爲士喪旣夕二篇所言。甸人管人。夏祝。商祝。冢人。卜人。隸人。途匠之屬。皆公家之臣。來執事者也。又以爲諸侯之官其爵。必降等於天子。聖人別嫌明微之意。寓乎其閒。使周之諸侯。遵而守之。何至有僭越而置六卿稱縣公者。由前之說。則臣下之喪。君旣臨其小斂。又遣官助其百役。有若家人

骨肉。愴惻纏綿。由後之說。則侯國之百職庶司。不敢毫髮僭擬於天王。恩誼之篤如彼。名分之嚴若此。此皆禮之精意。祖仁本義。又非僅考核詳審而已。儀禮一經。前明以來。幾成絕學。我朝鉅儒輩出。精詣鳩編。迭相映蔚。而徽州一郡尤盛。自婺源江氏永。崛起爲禮經大師。而同邑汪氏紱。休甯戴氏震。亦皆博洽。爲世所宗。其後歙縣金氏榜。後氏廷堪。竝有纂述。無慙前修。先生世居績溪。與諸儒地相比。時相接。其入國史儒林傳。列於江氏。汪氏之女。而哲孫培翬。又能紹其家學。箸儀禮正義。薈萃羣言。衷於至當。徽州爲朱子父母之邦。典章文物。固宜非他郡所敢望。而胡氏世傳禮教。故家文獻。縣延無替。亦足使篤古之士。低徊而興慕也。

經史百家雜鈔題語

姚姬傳氏之纂古文辭。分爲十三類。余稍更易爲十一類。曰論箸。曰詞賦。曰序跋。曰詔令。曰奏議。曰書牘。曰哀祭。曰傳誌。曰雜記。九者。余與姚氏同焉者也。曰贈序。姚氏所有而余無焉者也。曰敘記。曰典志。余所有而姚氏無焉者也。曰頌贊。曰箴銘。姚氏所有余以附入詞賦之下編。曰碑誌。姚氏所有。余以附入傳誌之下編。論次微有異同。大體不甚相遠。後之君子。以參觀焉。

村塾古文。有選左傳者。識者或譏之。近世一二知文之士。纂錄古文。不復

上及六經。以云尊經也。然溯古文所以立名之始。乃由屏棄六朝駢儷之文。而返之於三代兩漢。今舍經而降以相求。是猶言孝者。敬其父祖而忘其高會。言忠者。曰我家臣耳。焉敢知國。將可乎哉。余鈔纂此編。每類必以六經冠其端。涓涓之水。以海爲歸。無所於讓也。姚姬傳氏撰次古文。不載史傳。其說以爲史多。不可勝錄也。然吾觀其奏議類中。錄漢書至三十八首。詔令類中。錄漢書三十四首。果能屏諸史而不錄乎。余今所論次。采輯史傳稍多。命之曰經史百家雜鈔云。

大潛山房詩題語

山谷學杜公七律。專以單行之氣。運於偶句之中。東坡學太白。則以長古之氣。運於律句之中。樊川七律。亦有一種單行票姚之氣。余嘗謂小杜。蘇黃皆豪士。而有俠客之風者。省三所爲七律。亦往往以單行之氣。差於牧之爲近。蓋得之天事者多。若能就斯塗而益闡之。參以山谷之倔強。而去其生鏗。雖不足以悅時目。然固詩中不可不歷之境也。省三用兵。亦能橫厲捷出。不主故常。二十從戎。三十而擁疆寄。聲施爛然。爲時名將。惟所向有功。未遭挫折。蔑視此虜之意多。臨事而懼之念少。若加以悚惕戒愼。豪俠而具斂退氣象。尤可貴耳。余覽其詩卷既畢。因題數語以勸勉之。

孟子要略敘跋

朱子所編孟子要略。自來志藝文者。皆不著於錄。朱子經義考。亦稱未見。實應王白田氏爲朱子年譜。謂此書久亡佚矣。吾亡友漢陽劉某雲傳。始於金仁山。孟子集注考證內搜出。復還此書之舊。王氏勤一生以治朱子之業。號爲精核無倫。而不知要略一書。具載金氏書中。卽四庫館中諸臣。於金氏集注考證。爲提要數百言。亦未嘗道及此書。蓋耳目所及。百密而不免一疏。事之常也。觀金氏所記。則朱子當日編輯要略。別爲注解。與集注間有異同。金氏於人皆有所不忍。章云要略注尙是舊說。姚應問曰。章云要略注文微不同。今散失既久。不可復覩。某雲僅能排比次第。屬國藩校刻。以顯於世。抑猶未完之本與。然如許叔重五經異義。余隱文尊孟辨之類。皆煙晦數百年矣。一旦於他書中刺取。掇零拾墜。遂復故物。則此書之出。安知不更有人焉。蒐得原注以補今日之闕乎。天下甚大。來者無窮。必有能篤耆朱子之書。罔羅以彌遺恨者。是吾某雲地下之靈。禱祀以求之者也。

孟子之書。自漢唐以來。不列於學官。陸氏經典釋文。亦不之及。而司馬光晁說之之倫。更相疑詆。至二程子始表章之。而朱子遂定爲四書。既薈萃諸家之說。爲孟子精義。又采其尤者。爲集注七卷。又剖晰異同。爲或問十四卷。用力亦已勤矣。而茲又簡擇爲要略五卷。好之如此其篤也。蓋深造自得。則夫泳於心而味於口者。左右而逢其原。參伍錯綜。而各具條理。雖

以國藩之蒙陋讀之。亦但見其首尾完具。而不復知銜決顛倒之爲病。則其犁然而當於人人之心可知已。國藩既承亡友劉君遺令。爲之排定付刻。因頗仿近思錄之例。疏明分卷之大指。俾讀者一覽而得焉。大賢之旨趣。誠知非未學所可幸中。獨未知於吾亡友之意。合邪否邪。死者不可復生。徒使予茫然四顧而傷心也夫。會國藩又識。

跋衍聖公孔恭愨公墓志銘刻本

漢碑載乙瑛、韓勅、史晨數人者。有功於孔林甚鉅。而史君二碑。旣載其請祠之章。又敘其饗禮之盛。其補牆垣、治瀆井、種梓守冢諸績。至屢書不一書。功亦夥矣。此碑載恭愨公本以聖人之胃。而具有功孔林。又百倍於前哲。若更得善篆隸者。大書重刻。異世流傳。豈僅與史君輩比烈哉。

復許孝廉振禕書

去冬接奉惠書。久未裁復。頃又辱手簡。伏審侍闈曼福。纂著日精。至以爲慰。此間軍事。自徽甯失後。局勢過促。地小無舞袖之方。夢中無伸足之處。十二月。曾軍敗挫。建、東、都、鄱、浮、彭、六邑同失。祁門老營。孤懸被困。幸左、鮑將黃逆擊退。甫慶更生。僞侍王李世賢一股。又陷樂平、景鎮。斷我後路。塞我糧源。現已檄左、鮑兩軍。夾擊景鎮。而老營抽兵。力攻徽州。若二者能一處得手。庶米糧可通。不使三萬軍士。盡陷重險之中。撫建股匪。深入腹地。

本擬檄鮑公由省城援剿。因景鎮之變。不能不先援老營。聞樟樹已失。不知瑞臨得保無恙否。珂鄉罹水火久矣。劫數猶未滿耶。來示詢及古文之法。僕本無所解。近更荒淺。不復厝意。古文者。韓退之氏。厭棄魏晉六朝駢儷之文。而返之於六經兩漢。從而名焉者也。名號雖殊。而其積字而爲句。積句而爲段。而爲篇。則天下之凡名爲文者。一也。國藩以爲欲著字之古。宜研究爾雅說文。小學訓詁之書。故嘗好觀近人王氏段氏之說。欲造句之古。宜倣效漢書文選。而後可。矻俗而裁僞。欲分段之古。宜熟讀班馬韓歐之作。審其行氣之短長。自然之節奏。欲謀篇之古。則羣經諸子。以至近世名家。莫不各有匠心。各具章法。如人之有肢體。室之有結構。衣之有要領。大抵以力去陳言。翼翼獨造爲始事。以聲調鏗鏘。色蘊不盡爲終事。僕學無師承。冥行臆斷。所辛苦而僅得之者。如是而已。自頃羣賊逼處。無日不在危機駭浪之中。偶一展卷。都無意緒。不足仰報故人。勉惜分陰。以光絕業。瞻企不盡。

復李觀察鴻裔書

接初三日手書。藉審台候綏愉。醇修日密。公餘讀書。日有常課。欣慰無已。承詢虛實。譬喻異詰等門。屬以破格相告。若鄙人有所祕惜也者。僕雖無狀。亦何敢稍懷吝心。特以年近六十。學問之事。一無所成。未言而先自愧。

親。昔在京師。讀王懷祖段茂堂諸書。亦嘗研究古文学家用字之法。來函所詢三門虛實者。實字而虛用。虛字而實用也。何以謂之實字虛用。如春風風人。夏雨雨人。上風雨實字也。下風雨則當作養字解。是虛用矣。解衣衣我。推食食我。上衣食實字也。下衣食則當作惠字解。是虛用矣。春朝朝日。秋夕夕月。上朝夕實字也。下朝夕則當作祭字解。是虛用矣。入其門無人門焉者。入其閨無人閨焉者。上門閨實字也。下門閨則當作守字解。是虛用矣。後人或以實者作本音讀。虛者破作他音讀。若風讀如颯。雨讀如籲。衣讀如裔。食讀如嗣之類。古人會無是也。何以謂之虛字實用。如步。行也。虛字也。然管子之六尺爲步。韓文之步有新船。輿地之瓜步邀笛步。詩經之國步天步。則實用矣。薄。迫也。虛字也。然因其叢密而林曰林薄。因其不厚而簾曰帷薄。以及爾雅之屋上薄。莊子之高門懸薄。則實用矣。覆。敗也。虛字也。然左傳設伏以敗人之兵。其伏兵卽名曰覆。如鄭突爲三覆以待之。韓穿帥七覆於敖前。是虛字而實用矣。從。順也。虛字也。然左傳於位次有定者。其次序卽名曰從。如荀伯不復從。豎牛亂大從。是虛字而實用矣。然此猶就虛字之本義而引伸之也。亦有與本義全不相涉。而借此字以名彼物者。如收。斂也。虛字也。而車之輪名曰收。賢。長也。虛字也。而車轂之大穿名曰賢。畏。懼也。虛字也。而弓之淵名曰畏。峻。高也。虛字也。而弓之柱

弦處名曰峻。此又器物命名。虛字實用之別爲一類也。至用字有譬喻之法。後世須數句而喻意始明。古人祇一字而喻意已明。如駿良馬也。因其良而美之。故爾雅駿訓爲大。馬行必疾。故駿又訓爲速。商頌之下國駿厖。周頌之駿發爾私。是取大之義爲喻也。武成之侯衛駿奔。管子之弟子駿作。是取速之義爲喻也。臝牛百葉也。或作毗。或作毗。音義並同。牛百葉重疊而體厚。故爾雅毛傳。皆訓爲厚。節南山之天子是毗。采芣之福祿臝之。是取厚之義爲喻也。宿夜止也。止則有留義。又有久義。子路之無宿諾。孟子之不宿怨。是取留之義爲喻也。史記之宿將宿儒。是取久之義爲喻也。渴欲飲也。欲之。則有切望之義。又有急就之義。鄭箋雲。漢詩曰。渴雨之甚。石苞檄吳書曰。渴賞之士。是取切望之義爲喻也。公羊傳曰。渴葬。是取急就之義爲喻也。至於異詁云者。則無論何書。處處有之。大抵人所共知。則爲常語。人所罕聞。則爲異詁。昔郭景純注爾雅。近世王伯申著經傳釋詞。於衆所易曉者。皆指爲常語。而不甚置論。惟難曉者。則深究而詳辨之。如淫。訓爲淫亂。此常語。人所共知也。然如詩之既有淫威。則淫訓爲大。左傳之淫刑以逞。則淫訓爲濫。書之淫舍楛牛馬。左之淫芻蕘者。則淫當訓爲縱。莊子之淫文章。淫於性。則淫字又當訓爲贅。皆異詁也。黨。訓鄉黨。此常語。人所共知也。然說文云。黨。不詳也。黨字从黑。則色不詳。乃是本義。方言

又云。黨。智也。郭注以爲解寤之貌。鄉射禮侯黨。鄭注以爲黨旁也。左傳何黨之乎。杜注以爲黨所也。皆異詁也。展。訓爲舒展。此常語也。卽說文訓展爲轉。爾雅訓展爲誠。亦常語。人所共知也。然儀禮有司展羣幣。則展訓爲陳。周禮展其功緒。則展訓爲錄。旅獒時庸展親。則展當訓爲存省。周禮之展犧牲。展鍾。展樂器。則展又當訓爲察驗。皆異詁也。此國藩講求故訓。分立三門之微意也。古人用字。不主故常。初無定例。要之各有精意。運乎其間。且如高平曰阜。大道曰路。土之高者曰冢。曰墳。皆實字也。然以其有高廣之意。故爾雅毛傳於此四字。均訓爲大。四牡孔阜。爾雅既阜。火烈具阜。阜成兆民。其用阜字。俱有盛大之意。王者之門曰路。門寢曰路。寢車曰路車。馬曰路馬。其用路字。俱有正大之意。長子曰冢子。長婦曰冢婦。天官曰冢宰。友邦曰冢君。其用冢字。俱有重大之意。小雅之將羊墳首。司烜之共墳燭。其用墳字。俱有肥大之意。至三墳五典。則高大矣。凡此等類。謂之實字。虛用也可。謂之譬喻也可。卽謂之異詁也。亦可。閣下現讀通鑑。司馬公本精於小學。胡身之亦博極羣書。卽就通鑑異詁之字。偶一抄記。或他人視爲常語。而已心以爲異。則且抄之。或明日視爲常語。而今日以爲異。亦姑抄之。久之。多識雅訓。不特譬喻虛實二門可通。卽其他各門。亦可觸類而貫徹矣。

與朱太學孔揚書

來函具悉。所論轉注。謂戴氏專以訓詁解轉注。義有未盡。誠爲確論。至謂會意之老。形聲之考。焯然已知。而疑許氏合此二字爲轉注者。爲失之贅。則竊以爲不可。許君固非絕無可議者。惟指考老爲轉注。則在不可議之列。尊意履本訓踐。其所爲踐之具者爲轉注。是以虛用者爲本訓。實用者爲轉注。凡古今文字。何字不可虛實兩用。如履字以實用者爲本訓。而羽獵賦之屨般首。則虛用矣。烏字以實用者爲本訓。而魯頌之松栢有烏。則虛用矣。推之衣巾冠帶。皆實字也。而孟子之衣褐。周禮之中車。史記之冠玉。月令之帶弓。則虛用矣。宮室門戶。皆實字也。而爾雅之大山宮小山。左傳之復室其子。公羊之無人門焉者。漢書之王嘉戶殿門。則虛用矣。將循履字之例。概以虛者爲本義。實者爲轉注乎。抑有時以虛者命爲轉注乎。曩常譏戴段二家。以一部爾雅。全目爲轉注。以五百四十部首。全目爲轉注。以爲何必六書。祇此一書足矣。今來函所述。庭訓其病殆亦近之。不佞竊不自揆。謬立一說。篤守許氏考老之指。以謂老者。會意字也。考者。轉注字也。部首之可指數者。如聲部。饜部。畫部。眉部。蕒部。筋部。稽部。縶部。寢部。重部。老部。履部。飲部。鹽部。弦部。西部。皆轉注之部也。凡形聲之字。大抵以左體爲母。以右體之得聲者爲子。而母字從無省畫者。凡轉注之字。大抵

以會意之字爲母。亦以得聲者爲子。而母字從無不省畫者。省畫則母字之形不全。何以知子之所自來。惟好學深思。精心研究。則形雖不全。意可相受。如老字雖省去匕字。而可知考耄等字之意。從老而來。履字雖省去舟文。而可知屨屐等字之意。從履而來。橐字雖省去豕字。而可知囊橐等字之意。從橐而來。縹字雖省去夢字。而可知寤寐等字之意。從縹而來。推之聲、爨、畫、眉、等部。莫不皆然。其曰建類一首者。母字之形模尙具也。其曰同意相受者。母字之畫省而意存也。抑又有進者。轉注之字。其部首固多會意者矣。亦有不盡然者。如鹽從鹵。監聲。形聲字也。而所屬監驗等字。仍不害其爲轉注之字。歛從欠。會聲。形聲字也。而所屬之獸。仍不害其爲轉注之字。至於酉者。象形字也。本不得目爲轉注之部。特以酉字之才。不足以統所屬之字。似應別立酒部。而於醞、釀、醕、醋、醇、醴、等字。增曰從酒省。昱聲。從酒省。襄聲。從酒省。壽聲。昔聲。享聲。离聲。云云。乃與全書義例相合。蓋此等字。本不僅胚胎於酉字。實由酒字貫注而來。斯又許君所未指爲轉注。而不害其爲轉注者也。此說蓄諸鄙心。歷有歲年。聞語朋輩。疑信參半。以生平於小學。致力甚淺。不敢有所造述。因來函陳義頗堅。輒復貢其膚末。以相質證。

復陳太守寶箴書

四月二十七日接惠書。弁寄大文一册。知台從去歲北行。以途中染疾。就醫歷下。正月之杪。乃達京師。是時鄙人適已出都。未及相見。爲悵。閣下志節嶙峋。器識宏達。又能虛懷取善。兼攬衆長。來書所稱。自吳侍郎以下。若徐君張君方君。皆時賢之卓然能自立者。鄙人器能竄薄。謬蒙崇獎。非所敢承。前以久點高位。頗思避位讓賢。保全晚節。赴闕以後。欲布斯懷而未。能得其方。亦遂不復陳請。又盛引古義。力言不可遽萌退志。今已承乏此間。進止殊不自由。第恐精力日頹。無補艱危。祇速謗耳。大著粗讀一過。駭快激昂。有陳同甫葉水心諸人之風。僕昔備官朝列。亦嘗好觀古人之文章。竊以自唐以後。善學韓者。莫如王介甫氏。而近世知言君子。惟桐城方氏姚氏。所得尤多。因就數家之作。而考其風旨。私立禁約。以爲有必不可犯者。而後其法嚴而道始尊。大抵剽竊前言。句摹字擬。是爲戒律之首。稱人之善。依於庸德。不宜褒揚。盜量。動稱奇行異徵。鄰於小說誕妄者之所爲。貶人之惡。又加愼焉。一篇之內。端緒不宜繁多。譬如萬山旁薄。必有主峯。龍衮九章。但挈一領。否則首尾銜決。陳義蕪雜。茲足戒也。識度會不異人。或乃競爲僻字。繆句。以駭庸衆。斷自然之元氣。斯又才士之所同蔽。戒律之所必嚴。明茲數者。持守勿失。然後下筆造次。皆有法度。乃可專精以理。吾之氣。熟讀而強探。長吟而反覆。使其氣若翔翥於虛無之表。其辭跌宕。

岩俊邁而不可以方物。蓋論其本。則持戒律之說。詞愈簡而道愈進。論其末。則抗吾氣。以與古人之氣相翕。有欲求太簡而不得者。兼營乎本末。斟酌乎繁簡。此自昔志士之所爲。畢生斲斲。而吾輩所當勉焉者也。國藩粗識塗徑。所作絕少。在軍日久。舊業益荒。忽忽衰老。百無一成。既承切問。略舉所見。以資參證。別示種煙之弊。及李編修書膏腴地畝。舍五稼而種罌粟。不惟民病艱食。亦人心風俗之憂。直隸土壤瘠薄。聞種此者尙少。若果漸染此習。自應通飭嚴禁。但非年豐民樂。生聚教訓。亦未易以文告爭耳。

加復黎刺史庶昌書

正封函間。又接二月十六日手書。汲汲以修名不立。志事無成爲懼。有屈正則陶士行之風。良堪敬仰。至以建樹無聞。遽用皇皇。殊太早計。三十三歲。甫及壯年。古來如顏子立德。周郎立功。賈生立言。均在少壯。然千古會有幾人。其餘賢哲代興。樹立宏達。大抵皆在四十以後耳。以仲尼之聖。而不惑。亦待四十。今來示以惑之甚。急思祛疑。似聞道更思早於魯叟。斯可謂大惑也。三史通鑑。次第卒業。爲學之大基已立。若能精進不懈。博覽而約守。資深而居安。終有灑然自得。渙然冰釋之日。殆非他人所能共喻。至於朝夕升斗之謀。則丁中丞道出此間。當一與之熟商。此等亦有命運。大囊之說。頗省記否。國藩又啓。

致劉子孟容書

去歲辱惠書。所以講明學術者。甚正甚詳。而於僕多寬假之詞。意欲誘而進之。且使具述爲學大指。良厚良厚。蓋僕早不自立。自庚子以來。稍事學問。涉獵於前明本朝諸大儒之書。而不克辨其得失。聞此間有工爲古文詩者。就而審之。乃桐城姚郎中鼐之緒論。其言誠有可取。於是取司馬遷班固。杜甫。韓愈。歐陽修。曾鞏。王安石。及方苞之作。悉心而讀之。其他六代之能詩者。及李。杜。蘇。軾。黃。庭。堅。之徒。亦皆泛其流而究其歸。然後知古之知道者。未有不明於文字者也。能文而不能知道者。或有矣。烏有知道而不明文者乎。古聖觀天地之文。獸。迹。鳥。跡。而作書契。於是乎有文。文與文相生而爲字。字與字相續而成句。句與句相續而成篇。口所不能達者。文字能曲傳之。故文字者。所以代口而傳之千百世者也。伏羲能深知經緯三才之道。而畫卦以著之。文王周公。恐人之不能明也。於是立文字以彰之。孔子又作十翼。定諸經以闡顯之。而道之散列於萬事萬物者。亦略盡於文字中矣。所貴乎聖人者。謂其立行與萬事萬物相交錯。而曲當乎道。其文字可以教後世也。吾儒所賴以學聖賢者。亦藉此文字以考古聖之行。以究其用心之所在。然則此句與句續。字與字續者。古聖之精神語笑。胥寓於此。差若毫釐。謬以千里。詞氣之緩急。韻味之厚薄。屬文者一不慎。

則規模立變。讀書者一不慎。則鹵莽無知。故國藩窳。謂今日欲明先王之道。不得不以精研文字爲要務。上古盛時。聖君賢相。承繼熙洽。道德之精。淪於骨髓。而學問之意。達於閭巷。是以其時。雖置兔之野人。漢陽之游女。皆含性貞。爛吟詠。若伊萊。周召。凡伯。仲山甫之倫。其道足文工。又不待言。降及春秋。王澤衰竭。道固將廢。文亦殆殊已。故孔子覩獲麟。曰。吾道窮矣。畏匡。曰。斯文將喪。於是慨然發憤。修訂六籍。昭百王之法戒。垂千世而不刊。心至苦。事至盛也。仲尼既歿。徒人分布。轉相流衍。厥後聰明魁傑之士。或有識解撰著。大抵孔氏之苗裔。其文之醇駁。一視乎見道之多寡。以爲差。見道尤多者。文尤醇焉。孟軻是也。次多者。醇次焉。見少者。文駁焉。尤少者。尤駁焉。自荀揚莊列。屈賈而下。次第等差。略可指數。夫所謂見道多寡之分數。何也。曰深也。博也。昔者孔子贊易以明天道。作春秋以表人事之至當。可謂深矣。孔子之門有四科。子路知兵。冉求富國。問禮於杜史。論樂於魯伶。九流之說。皆悉其源。可謂博矣。深則能研萬事微芒之幾。博則能究萬物之情狀。而不窮於用。後之見道不及孔氏者。其深有差焉。其博有差焉。能深且博而屬文。復不失古聖之誼者。孟氏而下。唯周子之通書。張子之正蒙。醇厚正大。邈焉寡儔。許鄭亦能深博。而訓詁之文。或失則碎。程朱亦且深博。而指示之語。或失則隘。其他若杜佐。鄭樵。馬貴與。王應麟之

徒能博而不能深。則文流於蔓矣。游揚金許薛胡之儔。能深而不能博。則文傷於易矣。由是有漢學宋學之分。斷斷相角。非一朝矣。僕竊不自揆。謬欲兼取二者之長。見道既深且博。而爲文復臻於無累。區區之心。不勝奢願。譬若以蚊而負山。盲人而行萬里也。亦可哂已。蓋上者仰企於通書正蒙。其次則篤耜司馬遷韓愈之書。謂二子誠亦深博。而頗窺古人屬文之法。今論者不究二子之識解。輒謂遷之書憤懣不平。愈之書傲兀自喜。而足下或不深察。亦偶同於世人之說。是猶觀盤詰之聾牙。而謂尙書不可讀。觀鄭衛之淫亂。而謂全詩可刪。其毋乃漫於一概而未之細推也乎。孟子曰。君子所性。雖大行不加焉。雖窮居不損焉。僕則謂君子所性。雖破萬卷不加焉。雖一字不識無損焉。離書籍而言道。則仁義忠信及躬皆備。堯舜。孔孟非有餘。愚夫愚婦非不足。初不關乎文字也。離書籍而言道。則道猶人心所載之理也。文字猶人身之血氣也。血氣誠不可以名理矣。然舍血氣。則性情亦胡以附麗乎。今世雕蟲小夫。既溺于聲律續藻之末。而稍知道者。又謂讀聖賢書。當明其道。不當究其文字。是猶論觀人者。當觀其心所載之理。不當觀其耳目言動血氣之末也。不亦誣乎。知舍血氣無以見心理。則知舍文字無以窺聖人之道矣。周濂溪氏稱文以載道。而以虛車譏俗儒。夫虛車誠不可。無車又可以行遠乎。孔子歿而道至今存者。賴

有此行遠之車也。吾輩今日苟有所見而欲爲行遠之計。又可不早具堅車乎哉。故凡僕之鄙願。苟於道有所見。不特見之。必實體行之。不特身行之。必求以文字傳之後世。雖曰不逮。志則如斯。其于百家之著述。皆就其文字以校其見道之多寡。剖其銖兩而殿最焉。於漢宋二家。構訟之端。皆不能左袒。以附一闕。於諸儒崇道貶文之說。尤不敢雷同而苟隨。極知狂謬。爲有道君子所深屏。然默而不宣。其文過彌甚。聊因足下之引誘。而一陳涯略。伏惟憫其愚而繩其愆。幸甚幸甚。

答劉子孟容書

孟容足下。二年三辱書。一不報答。雖槁木之無情。亦不翹置若此。性本懶怠。然或施於人人。豈謂施諸吾子。每一伸紙。以爲足下意中欲聞不肖之言。不當如是已也。輒復置焉。日月在上。唯足下鑒之。伏承信道力學。又能明辨王氏之非。甚盛甚盛。蓋天下之道。非兩不立。是以立天之道。曰陰與陽。立地之道。曰柔與剛。立人之道。曰仁與義。乾坤毀則無以見易。仁義不明。則亦無所謂道者。傳曰。天地溫厚之氣。始於東北而盛於東南。此天地之盛德氣也。此天地之仁氣也。天地巖凝之氣。始於西南而盛於西北。此天地之尊嚴氣也。此天地之義氣也。斯二氣者。自其後而言之。因仁以育物。則慶賞之事起。因義以正物。則刑罰之事起。中則治。偏則亂。自其初而

言之。太和綢繆。流行而不息。人也。物也。聖人也。常人也。始所得者鈞耳。人得其全。物得其偏。聖人者。既得其全。而其氣質。又最清且厚。而其習。又無毫髮累。于是曲踐乎所謂仁義者。夫是之謂盡性也。推而放之。凡民而準。推而放之。庶物而準。夫是之謂盡人性。盡物性也。常人者。雖得其全。而氣質拘之。習染蔽之。好不當則賊仁。惡不當則賊義。賊者日盛。本性日微。蓋學問之事。自此興也。學者何。復性而已矣。所以學者何。格物誠意而已矣。格物則剖仁義之差等。而鑿晰之。誠意則舉好惡之當於仁義者。而力卒之。茲其所以難也。吾之身。與萬物之生。其理本同一源。乃若其分。則紛然而殊矣。親親與民殊。仁民與物殊。鄉鄰與同室殊。親有殺。賢有等。或相倍蓰。或相什伯。或相千萬。如此其不齊也。不知其分而妄施焉。過乎仁。其流爲墨。過乎義。其流爲楊。生於心。害於政。其極皆可以亂天下。不至率獸食人不止。故凡格物之事。所爲委曲繁重者。剖判其不齊之分焉爾。朱子曰。人心之靈。莫不有知。此言好惡之良知也。曰。天下之物。莫不有理。惟於理有未窮。故其知有不盡。此言吾心之知有限。萬物之分無窮。不究乎至殊之分。無以洞乎至一之理也。今王氏之說曰。致良知而已。則是任心之明。而遂曲當乎萬物之分。果可信乎。冠履不同位。鳳凰鴟鴞不同棲。物所自具之分殊也。瞽瞍殺人。臯陶執之。舜負之。鯀堙洪水。舜殛之。禹郊之。物與

我相際之分殊也。仁義之異施。卽物而區之也。今乃以卽物窮理爲支離。則是吾心虛懸。一成之知於此。與凡物了不相涉。而謂皆當乎物之分。又可信乎。朱子曰。知爲善以去惡。則當實用其力。務決去而求必得之。此言仁義之分既明。則當畢吾好惡以旣其事也。今王氏之說曰。卽知卽行。格致卽誠意工夫。則是任心之明。別無所謂實行。心苟明矣。不必屑屑於外之迹。而迹雖不仁不義。亦無損於心之明。是何其簡捷而易從也。循是說而不辨。幾何不胥天下而浮屠之趨哉。堯舜禹湯文武周公孔子之學。豈有他與。卽物求道而已。物無窮。則分殊者無極。而格焉者無已時。一息而不格。則仁有所不熟。而義有所不精。彼數聖人者。惟息息格物。而又以好色惡臭者竟之。乃其所以聖也。不如是。吾未見其聖也。自大賢以下。知有精粗。行有實不實。而賢否以次區焉。國藩不肖。亦謬欲從事於此。凡倫類之酬酢。庶務之磨礪。雖不克衷之於仁。將必求所謂藹然者焉。雖不克裁之於義。將必求所謂秩然者焉。日往月來。業不加修。意言意行。尤悔叢集。求付一物之當其分而不可得。蓋陷溺者深矣。自維此生。縱能窮萬一之理。亦不過窺鑽奇零。無由底於逢原之域。然終不敢棄此而他求捷徑。謂靈心一覺。立地成聖也。下愚之人。甘守下愚已耳。智有所不照。行有所不豫。故常鋅焉。不敢取彼說者廓清而力排之。愚者多柔。理有固然。今足下

嶼起僻壤。迺能求先王之道。開學術之藪。甚盛甚盛。此真國藩所禱祀以求者也。此間有太常唐先生。博聞而約守。矜嚴而樂易。近著國朝學案一書。崇二陸二張之歸。闢陽儒陰釋之說。可爲深切著明。狂瀾砥柱。又有比部六安吳君廷尉。蒙古倭君。皆實求朱子之指而力踐之。國藩旣從數君子後。與聞未論。而淺鄙之資。兼嗜華藻。篤好司馬遷。班固。杜甫。韓愈。王安石之文章。日夜以誦之。不厭也。故凡僕之所志。其大者蓋欲行仁義於天下。使凡物各得其分。其小者。則欲寡過於身。行道於妻子。立不悖之言。以垂教於宗族鄉黨。其有所成與。以此畢吾生焉。其無所成與。以此畢吾生焉。辱知最厚。輒一吐不悖之言。非敢執塗人而斷斷不休如此也。

復劉孟蓉書

十二月初。接八月二十六日惠書。及繹禮堂記。敬承與居康勝。勤學不倦。所居疑在蓬島之間。置身若在周秦以前。非泊然冥營。觀物深窺。翫希聲而友前哲。殆未足語於此。研究三禮。洞澈先王經世宰物之本。達於義理之原。遂欲有所撰述。以覺後世之昏昏。甚盛甚盛。欽企何窮。國藩亦嘗粗涉禮經之藩。官事繁冗。莫竟其業。所以沮滯而不達者。約有數端。蓋禮莫重於祭。祭莫大於郊廟。而郊祀裸獻之節。宗廟時享之儀。久失其傳。雖經後儒殷勤修補。而疎漏不完。較之特性。少牢饋食兩篇。詳略迥殊。無由窺

見天子諸侯大祭。森嚴之典。軍禮既居五禮之一。吾意必有專篇細目。如
威元敬氏所紀各號令者。使伍兩卒旅。有等而不干。坐作進退。率循而不
越。今十七篇獨無軍禮。而江氏永。秦氏蕙田所輯。乃僅以兵制。田獵。車戰。
舟師。馬政等類當之。使先王行軍之禮。無緒可尋。國之大事。在祀與戎。而
古禮殘闕若此。則其他雖可詳考。又奚足以經綸萬物。前哲化民成俗之
道。禮樂並重。而國子之教。樂爲專精。樂之至者。能使鳳儀獸舞。後聖千載。
聞之忘味。欲窺聖神制作。豈能置聲樂於不講。國藩於律呂樂舞。茫無所
解。而祿算之學。有關於製器審音者。亦終身未及問津。老鈍無聞。用爲竅
取。夫不明古樂。終不能研窮古禮。國藩之私憾也。郊廟祭儀及軍禮等殘
缺無徵。千古之公憾也。是皆用以自沮而不達者也。所貴乎賢豪。非直博
稽成憲而已。亦將因其所值之時。所居之俗。而創立規制。化裁通變。使不
失乎三代制禮之意。來書所謂苟協於中。何必古人。是也。然時俗亦有未
易變者。古者祭祀必有主婦。聘饗亦及夫人。誠以在宮雍雍。在廟肅肅。妃
匹有篤恭之德。乃足以奉神靈而理萬化。所謂有關雝麟趾之精意。而後
可行周官之法度也。自陽侯殺繆侯。而大饗廢夫人之禮。後世若以主婦
承祭。則驚世駭俗。譏爲異域。然全行變革。則又與采蘋采蘋諸詩之精義
相悖。古之宮室。與後世異。議禮之家。必欲強後代之儀節。就古人之室制。

如明史載品官冠禮。幾與儀禮悉合。不知曰東房西墻曰房。內戶東曰址。明世固無此官室也。然稍師儀禮之法。則堂庭淺陋。必有齟齬而難行者。誠得好學深思之士。不泥古法。亦不輕徇俗好。索之幽深。而成之易簡。將率然有當於人心。國藩於昏喪祭三禮。亦頗思損益。鍊水書儀。紫陽家禮。纂訂一編。以爲宗族鄉黨行習之本。守官少暇。不克斟酌時俗之中。卒未能從容爲之。斯亦自沮而不達之一端也。閣下山居靜篤。將爲禮經發微。及或問等書。何不先取此三禮。撰著鴻篇。使品官庶士。可以通行。用今日冠服拜跪之常。而悉符古昔仁義等殺之精。倘亦淑世者所有事乎。來書又以文章欲追歐陽公輩而與之並。而願有大於此者。將決然而棄去。抑兩利而俱存。就鄙人而下取舍。國藩竊維道與文之輕重紛紜。無有定說久矣。朱子讀唐志。謂歐陽公但知政事與禮樂。不可不合而爲一。而不知道德與文章。尤不可分而爲二。其譏韓歐裂道與文以爲兩物。措辭甚峻。而歐陽公送徐無黨序。亦以修之於身。施之於事。見之於言。分爲三途。夫其云修之身者。卽叔孫豹所謂立德也。施之事見之言者。卽豹所謂立功立言也。歐公之言。蓋深慕立德之徒。而鄙功與言爲不足貴。且謂勤一世以盡心於文字者。皆爲可悲。與朱子譏韓公先文後道。譏永嘉之學。偏重事功。蓋未嘗不先後同符。朱子作讀唐志時。豈忘歐公送徐無黨之說。癸

病之若是哉。國藩之愚以爲事功之成否。人力居其三。天命居其七。苟爲無命。雖大聖畢生。皇皇而無濟於世。文章之成否。學問居其三。天質居其七。秉質之清濁厚薄。亦命也。前世好文之士。不可億計。成者百一。傳者千一。彼各有命焉。孔子以斯文之將喪。歸之天命。又因公伯寮而謂道之行廢由命。孟子亦以聖人之於天道。歸之於命。然則文之興衰。道之能行能明。皆有命焉。存乎其間。命也者。彼蒼尸之。吾之所無如何者也。學也者。人心主之。吾之所能自勉者也。自周公而下。惟孔孟道與文俱至。吾輩又法孔孟。固將取其道與文而弁學之。其或體道而文不昌。或能文而道不凝。則視乎性之所近。苟秉質誠不足與言文。則已閣下。既自度可躋古人。何爲舍此而他求哉。若謂專務道德。文將不期而自工。斯或上哲有然。恐未必果爲篤論也。僕昔亦有意於作者之林。悠悠歲月。從不操筆爲文。去年偶作羅忠節。李忠武兄弟諸碑。則心如廢井。冗蔓無似。乃知暮年衰退。才益不足副其所見矣。少壯真當努力。光陰邁往。悔其可追。姻丈於上年六月改葬。行述未蒙寄到。若果爲銘章。必不足稱盛意。南屏亦已衰頽。其游衡疑之說。果踐約否。筠仙修通志之議。事甚浩博。未易卒業。近又喪其愛子。憂懷何以自遣。寒門已嫁四女。三家未生子。郭氏女生子而早寡。感愴無涯。內人失明之後。諸病叢集。醫藥相尋。家婦亦多病。次兒於元日得舉。

一子。差爲忻慰。賤軀粗適。惟目光日蒙於花鏡之上。又加一花。看字尙如隔煙霧。直隸終年亢旱。去秋未種菽麥。今歲夏收失望。疆吏對此。如坐鍼氈。公私子子。都無好懷。南望故鄉。恨不得屏棄百事。從閣下一豁襟抱也。略布近狀。不宣。

覆吳廣文敏樹書

三月初旬。奉復一函。諒已達覽。旋接上年臘月惠書。并大著詩文全集各五十部。就審履祺康勝。無任企仰。大集古文。敬讀一過。視昔年僅見零篇斷幅者。尤爲卓絕。大抵節節頓挫。不矜奇辭奧句。而字字若履危石而下。落紙乃遲重絕倫。其閒適之文。清曠自怡。蕭然物外。如說釣。雜說。程日新傳。屠禹甸序之類。若翺翔於雲表。俯視而有至樂。國藩嘗好讀陶公。及韋白。蘇。陸。閒適之詩。觀其博攬物態。逸趣橫生。栩栩焉神愉而體輕。令人欲棄百事而從之遊。而惜古文学家少此恬適之一種。獨柳子厚山水記。破空而遊。并物我而納。諸大適之域。非他家所可及。今乃於尊集數數窺之。故編中雖兼衆長。而僕視此等尤高也。與歐陽篠岑書中。論及桐城文派。不右劉姚。至比姚氏於呂居仁。譏評得無少過。劉氏誠非有過絕輩流之詣。姚氏則深造自得。詞旨淵雅。其文爲世所稱誦者。如莊子章義序。禮箋序。復張君書。復蔣松如書。與孔撝約論禘祭書。贈撝約假歸序。贈錢獻之序。

朱竹君傳。儀鄭堂記。南園詩存序。縣莊文集序等篇。皆義精而詞俊。夔絕塵表。其不厭人意者。惜少雄直之氣。驅邁之勢。姚氏固有偏於陰柔之說。又嘗自謝爲才弱矣。其論文亦多詣極之語。國史稱其有古人所未嘗言。鼎獨扶其微而發其蘊。惟亟稱海峯。不免阿於私好。要之方氏而後。惜抱固當爲百年正宗。未可與海峯同類而弁薄之也。淺謬之見。惟希裁正。

送郭筠仙南歸序

凡物之驟爲之而遽成焉者。其器小也。物之一覽而易盡者。其中無有也。郭君筠仙。與余友九年矣。卽之也溫。挹之常不盡。道光甲辰乙巳。兩試於禮部。留京師。主於余。促膝而語者。四百餘日。乃得盡窺其藏。甚哉。人不易知也。將別。於是爲道其深。附於回路贈言之義。而以吾之忠効焉。蓋天之生材。或相千萬。要於成器以適世用而已。材之小者。視尤小者則優矣。苟尤小者。琢之成器。而小者不利於用。則君子取其尤小者焉。材之大者。視尤大者。則絀矣。苟尤大者。不利於用。而大者琢之成器。則君子取其大者焉。天賦大始。人作成物。傳曰。人不天不因。天不人不成。不極擴充。追琢之能。雖有周公之才。終棄而已矣。余所友天下賢士。或以德稱。或以藝顯。類有以自成者。而若筠仙。躬絕異之姿。退然深貶。語其德。若無可名。學古人之文章。入焉既深。而此外猶若鉏鋤而不安。其無所成者。與匠石斲方寸。

之木。斤之削之。不移瞬而成物矣。及乎裁徑尺之材。以爲榱桷。不閱日而成矣。及至伐連抱之榱桷。爲天子營總章太室之梁棟。經旬累月而不得成焉。其器愈大。就之瘡艱。淺者欲以一概律之。難矣。且所號爲賢者。謂其絕拘攣之見。曠觀於廣大之區。而不以尺寸繩人者也。若夫逢世之技。智足以與時物相發。力足以與機勢相會。此則衆人之所共覩者矣。君子則不然。赴勢甚鉞。取道甚迂。德不苟成。業不苟名。艱勤錯在。遲久而後進。銖而積。寸而累。既其純熟。則聖人之徒。其力造焉而無扞格。則亦不失於令名。造之不力。歧出無範。雖有瓌質。終亦無用。孟子曰。五穀不熟。不如莩稗。誠哉斯言也。筠仙勸哉。去其所謂扞格者。以蘄至於純熟。則幾矣。人亦病不爲耳。若夫自揣既熟。而或不達於時軌。是則非余之所敢知也。

送謝吉人之官江左序

吾湘鄉當乾隆時。人才殷盛。鄧筆山爲雲南布政使。羅九峯爲禮部侍郎。而謝薌泉先生爲御史。三人者。皆起家翰林。而御史君名震天下。是時和坤柄國。聲張勢厲。家奴乘高車。橫行都市。無所憚。御史君巡城遇焉。捽之出而鞭之。火其車於衢。世所稱燒車御史者也。其後二十餘年。御史君之子果堂。以河南縣令卓薦召見。上從容問曰。汝卽燒車御史之子乎。不數月。遷四川知府。又十餘年。而謝吉人邦鑑。復以進士出爲江南縣令。吉人。

御史君之孫。而知府君之弟之子也。將之官。其常所酬酢者。或爲詩送之。吉人乃索予爲序。而乞言以糾其不逮。於是拜手告曰。子今長人矣。四封之內。尊無與二。堂上頤指。堂下趨者百人。所識窮乏。仰而待命。設館以延賓友。貌敬而情離。卽有不善。彼所謂趨者。待命者。貌敬者。或知之而不諫。或諫焉而不力。吾以其身巍然。處於衆人之上。而聰明識量。又誠越而倍之。前有唯。後有諾。於是予聖自雄之習。囂然起矣。而左右之人。又多其術以誣我。內之傲者曰勝。外之欺者曰衆。茲其所以舛也。昔者宓子賤治單父。孔子曰。子何施而衆悅。對曰。此地民有賢於不齊者五人。不齊事之而稟度焉。皆教不齊所以治人之道。孔子歎曰。其大者。乃於此乎有矣。魯使樂正子爲政。孟子曰。好善優於天下。東漢龐參爲漢陽太守。先候隱居任棠。棠不與言。但以薤一大本。水一盃置戶屏前。抱兒孫伏戶下。參會其意。曰。水者。欲吾清也。拔大本薤。欲吾擊彊宗也。抱兒當戶。欲吾開門恤孤也。故古人之學。莫大乎求賢以自輔。小智之夫。矜己而貶物。以爲衆人卑卑。無足益我。夫不反求諸己。而一切掩他人之長而蔑視之。何其易與。詩曰。國雖靡止。或聖或否。民雖靡盬。或哲或謀。或肅或乂。謂求賢而終不能得者。非篤論也。今震澤宰左君青峙。吾湘鄉之賢者也。任俠而不矜。諧事而不計利害。子往試求之。必有所以益子者。友仁以彊德。利器以善事。既以

上繩祖武。又以紹諸鄉先輩之徽。無棄爾輔。貞于爾輻。青峙。子之輔也。抑吾聞江南爲仕宦鱗萃之邦。或因青峙而得盡交其賢士大夫。是尤余所望也。

送周若農南歸序

天地之數。以奇而生。以偶而成。一則生兩。兩則還歸於一。一奇一偶。互爲其用。是以無息焉。物無獨。必有對。太極生兩儀。倍之爲四象。重之爲八卦。此一生兩之說也。兩之所該。分而爲三。殺而爲萬。萬則幾於息矣。物不可以終息。故還歸於一。天地絪縕。萬物化醇。男女構精。萬物化生。此兩而致於一之說也。一者陽之變。兩者陰之化。故曰一奇一偶者。天地之用也。文字之道。何獨不然。大籍尙已。自漢以來。爲文者莫善於司馬遷。遷之文。其積句也皆奇。而義必相輔。氣不孤伸。彼有偶焉者存焉。其他善者。班固則毗於用偶。韓愈則毗於用奇。蔡邕。范蔚宗以下。如潘陸沈任等比者。皆師班氏者也。茅坤所稱八家。皆師韓氏者也。傳相祖述。源遠而流益分。判然若白黑之不類。於是刺議互興。尊丹者非素。而六朝隋唐以來駢偶之文。亦已久王。而將厭宋代諸子。乃承其敝。而倡爲韓氏之文。而蘇氏遂稱曰。文起八代之衰。非直其才之足以相勝。物窮則變。理固然也。豪傑之士。所見類不甚遠。韓氏有言。孔子必用墨子。墨子必用孔子。不相用。不足爲孔

墨由是言之。彼其於班氏相師而不相非明矣。耳食者不察。遂附此而抹
撥一切。又其言多根六經。頗爲知道者所取。故古文之名獨尊。而駢偶之
文。乃屏而不得與於其列。數百千年。無敢易其說者。所從來遠矣。國家承
平奕禩。列聖修禮。右文。碩學鴻儒。往往多有。康熙雍正之間。魏禧。汪琬。姜
宸英。方苞之屬。號爲古文專家。而方氏最爲無類。純皇帝武功文德。壹邁
古初。徵鴻博以考藝。開四庫館以招延賢儒。天下翕然。爲浩博稽核之學。
薄先輩之空言。爲文務闕麗。胡天游。邵齊燾。孔廣森。洪亮吉之徒。蔚然四
起。是時郎中姚鼐。息影金陵。私淑方氏。如碩果之食。可謂自得者也。沿
及今日。方姚之流風。稍稍興起。求如天游齊燾闕麗之文。闕然無復有
存者矣。聞者。吾鄉人凌君玉垣。孫君鼎臣。周君壽昌。乃頗從事於此。而周
君爲之尤可喜。其才雅贍有餘地。而奇趣迭生。蓋幾於能者。夫適王都者。
或道晉。或道齊。要於達而已。司馬遷。文家之王都也。如周君之所道。進而
不已。則且達於班氏而不爲韓氏所非。又不已。則王都矣。周君以道光乙
巳成進士。選翰林院庶吉士。值皇太后萬壽。天子大孝。錫類臣下。得榮其
親。將奉誥命以歸覲。出所爲文示余。余乃略述文家原委。明奇偶互用之
道。假贈言之義。以爲同志者勸。嗟乎。區區而以文字相討論。是則余之陋。
而不賢者識小之類也。

送陳岱雲出守吉安序

道光二十五年十一月日長至。翰林編修茶陵陳君。奉命出守吉安。明日入謝。上曰。禮官章上。汝妻與請旌表有諸。卽頓首敬謝。臣源克妻。蒙恩旌表孝行。其可旌奈何。則隱約情事。具對十一。上嘉歎。所以尉敕良厚。陳君出。涕泣告人。天子乃能省源克家事。源克何以報。先是陳君嘗大病。妻易安人。傾死力營救。最後到臂和藥飲君。君病瘳而安人遽疾。又數月而生子。子生彌月而安人卒。余昔銘其墓。所稱憂勞積劇。焉可支者也。既歸喪。陳君之母語其親戚曰。是善事我。又有功陳氏先祖。語鄉人亦如之。鄉人上其行有司。以達於禮官。禮官章上不數日而陳君有吉安之命。於是陳君益不自克。且曰。吾有君親殊恩。妻又貰我死。吾負三不報。其何以酬。向人輒吁歎日夜。噉然內疚。亡何將出國門。國藩乃進而稱曰。子之方寸幾矣。抑未知所持也。夫忠孝者。每事而迹之。則日不勝。要惟行吾心之不得已者斯可矣。民之初。蓋有不忍於其所生。先王制爲事親之禮。溫清而定省。疾則嘗藥。諫則號泣。因人之情而爲文達之。其於事君也亦然。父母者育我。天者先父母而生我。君者後天而成我者也。有不忍忘本於父母者。而後愛身以及子姓。有不忍忘本於天者。而後愛吾君以及人民庶物。故入而供弟子之職。出而力王家。勤民事。非直好爲觀美。內有所激發。不得

已而爲之者也。先王之教既熄。人不能自道於道。乃始慕名號而從事其中。則漠無所動。脩髓以養親。而非必中有所愛。蹴踏以覲君。而非必中有所敬。及其居官。朝令曰編保甲。夕令曰興水利。復常平。擇名號尤美者而張之。漫不省其所以然。外之標識如彼。內而隳壞如此。故名目者。所以喪人之良心而墮凡事也。仲尼曰。人而不仁。如禮何。言本心既亡。不堪以文爲塗附之也。賢者思以易之。獨宜求諸心之不得已者耳。盜賊公行。不得已而立保甲。旱澇饑饉。不得已而興水利。常平行之不合。不得已而思亟思亟問。必盡善而後已。鏗而不舍。靡物不斷。古有刳臂療病而立應者。彼迫於無可如何。其神固已深入金石矣。今或浮慕奇行。而以號於衆曰。吾將效刳肉故事。要名之念熾於中。責效之情流於外。則臨事必不爲。爲之且不應。然則子欲上不負君親。下不愧令妻。可以知所從事矣。吾辱相知重。他無可言者。至離合之故。則別繫以詩。

送唐先生南歸序

古者道一化行。自卿大夫之弟子。與凡民之秀。皆上之人。置師以教之。於鄉有州長黨正之儔。於國有師氏保氏。天子既兼君師之任。其所擇大抵皆道藝兩優。教尊而禮嚴。弟子攝衣趨隅。進退必慎。內以有所憚而生其敬。外緝業以與其材。故曰師道立而善人多。此之謂也。周衰。教澤不下流。

仲尼千諸侯不見用。退而講學於洙泗之間。從之遊者如市。師門之盛。振古無儔。然自是人倫之中。別有所謂先生徒衆者。非長民者。所得與聞矣。仲尼既沒。徒人分布四方。轉相流衍。吾家宗聖公傳之子思孟子。號爲正宗。其他或離道而專趨於藝。商瞿授易於馯臂子弓。五傳而爲漢之田何。子夏之詩。五傳而至孫卿。其後爲魯申培。左氏受春秋。八傳而至張蒼。是以兩漢經生。各有淵源。源遠流歧。所得漸纖。道亦少裂焉。有宋程子朱子出。紹孔氏之絕學。門徒之繁。擬於鄒魯。反之躬行實踐。以究羣經要旨。博求萬物之理。以尊聞而行知。數百千人。聚乎彬彬。故言藝則漢師爲勤。言道則宋師爲大。其說允矣。元明及我朝之初。流風未墜。每一先生出。則有徒黨景附。雖不必束脩自上。亦循循隔坐。應唯敬對。若金。許。辭。胡。陸。稼。書。張念芝之儔。論乎其德。則闐然。諷乎其言。則犖然而當理。考乎其從遊之徒。則踐規蹈矩。儀型鄉國。蓋先王之教澤。得以僅僅不斬。頑夫有所忌而發其廉恥者。未始非諸先生講學。與羣從附和之力也。詩曰。風雨如晦。雞鳴不已。誠珍之也。今之世。自鄉試禮部試舉主而外。無復所謂師者。閒有一二高才之士。鈎稽故訓。動稱漢京。聞老成倡爲義理之學者。則罵譏唾侮。後生欲從事於此。進無師友之援。退犯萬衆之嘲。亦遂卻焉。吾鄉善化唐先生。三十而志洛閩之學。特立獨行。詬譏而不悔。歲庚子。以方伯內召。

爲太常卿。吾黨之士三數人者。日就而考德問業。雖以國藩之不才。亦且爲義理所薰蒸。而確然知大閑之不可踰。未知於古之求益者何如。然以視夫世之貌敬舉主。與厭薄老成。而沾沾一得自矜者。吾知免矣。丙午二月。先生致仕得請。將歸老於湖湘之間。故作師說一首。以識年來嚮道之由。且以告吾鄉之人。苟有志於強立。未有不嚴於事長之禮。而可以成德者也。

送江小帆同年視學湖北序

今天下郡縣牧民之吏。大抵以刑強齊之耳。任蚩蚩者自爲喙息。喜怒一不顧問。至其犯法。小者桎梏。大者棄市。豪強者漏網。弱者糜爛。苟以掩耳目而止。原國家所以立法之意。豈爾爾哉。蓋亦欲守土者。日教民以孝弟仁義之經。不率而後刑之。其率教而有文者。則以進於學。使者而登之庠序。既登之矣。則以授於校官。而常飭之。故古者。飲射讀法。在今日。則守令之職。而今之學政也者。不過因文藝以別羣士之優劣。因士之優劣以知守令教民之勤惰。故巡撫者。天子所使。以察守土者。養民之善與否也。學政者。天子所使。以察守土者。教民之善與否也。承平既久。法意寢失。郡縣有司。不知三物爲何事。而教民之任。獨以責之學政與校官。而所謂校官者。類多衰疾晚暮之徒。其祿不足自贍。往往與學官弟子。爭錐刀之末。不

時不克助宣教化。或轉鉅言以蔽學政之耳目。彼學政者。孤懸客寄於一行省之中。守土者皆貌敬而神拒之。日懣精於文字。而角機智於千百詭弊之場。而欲以餘力教民以仁義孝弟之經。其不亦難矣哉。然則如之何而可。弊之除也。先其甚者。利之興也。先其易者。其可矣。自功利之說。中於膏肓。學者求速化之方。束髮而做精於制藝。窮老而不休。六經至不能舉其篇目。何有於他書。今欲稍返積習。莫若使之姑置制藝。而從事經史。獎一二博通之士。以風其餘。於覆名扁試之外。別求旁搜廣采之術。凡郡縣莫不有書院。大率廩給其才者。而絀其不能者。名曰膏火。所以濟學校之不及也。學政下車之始。則牒各縣令曰。明年吾視某縣學。當以某經試士。能背誦否。某史試士。能言否。其爲我播告偏隅。咸使知之。牒校官曰。吾按臨之始。每縣當選諸生廿人說書。有不至。惟女罰。及其按郡。招諸生來前。果使背誦某經。說某史某卷。大指能誦說者。予以書院之廩資。尤能者倍之。三之。尤能者。牒送省會之書院。亦倍其廩資。其不能者。廩生削其餼。附生懲辱之。每縣試以三四人。則餘者懼矣。自六經外。如史漢莊騷說文水經文選。宋五子及杜韓歐蘇曾王專集之屬。每縣使習一部焉。歲試使習者。科試則易之。覆名試以制藝。以彰朝廷之公令。面試說書。以鳴使者之私好。二者竝行而不悖。皆善矣。則拔而貢之成均。使彼邦之人。曉然知吾

好博通之才。庶幾由文以劔本。舉一以勸百。然後孝弟仁義之教。可以漸而興也。乘傳所經之地。有書院焉。則入而詔諸生以大義。彼邦有搢紳多聞者。則禮而薦之。爲郡縣書院之長。於是其亦可以樹之風聲矣。同年友江君小帆之視湖北學也。所以講求職思者甚備。余乃別思一搜采之術。無啓弊之竇。而有補教之旌者。於是。以彋彋之說進焉。

送劉君椒雲南歸序

聖人之異於衆人者。安在乎。耳目口鼻。心知百體。皆得其職而已矣。天生夫人也。耳職聽。而目職視。口體職言動。心職思。非所聽而濫焉。非所視而淫焉。於官爲不法。可以視窮者。而吾弗能盡焉。可以聽達者。而吾弗能盡焉。於官爲不稱。其於口體心思也亦然。不稱者才絀。不法者知而好之。罪又甚焉。聖人者。不軌不耳。不度不目。其自一室之米鹽。推而極於天下之大。鬼神之幽。離於人倫。殺於萬事。凡視聽所宜晰無不晰。凡言動所宜審無不審。凡心思所宜條理無不條。而理之。使夫一身得職。而天地萬物各安其分。以位以育。以效吾之官司。所謂踐形者也。周公之所以爲周公。孔子之所以爲孔子。其不以此也哉。今之君子之爲學者。吾惑焉。耳無真受。衆耳之所傾亦傾之。目無真悅。衆目之所注亦注之。奸視而回聽。言不道而動不端。無過而非焉者。曹好所在而不之趨焉。則不相實。異矣。爲考

據之說者曰。古之人。古之人。如此則幾。彼則否。爲詞章之說者曰。古之人。古之人。如此則幾。彼則否。起一強有力者之手口。羣數十百人蟻而附之。朝記而暮誦。課迹而責音。竭己之耳目心思。以承奉人之意氣。會不數紀。風會一變。蕩然漸滅。又將有他說者出。爲羣意氣之所會。則又焦神悴力而趨之。鈞是五官百骸也。不踐聖人之形而逐衆人之好。疲一世以奔命於庸夫之毀譽。竟死而不悔。可謂大愚不靈者也。漢陽劉君椒雲。湛深而敦厚。非其視不視。非其聽不聽。內志外體。一準於法矣。而所以擴充官骸之用。又將推極知識。博綜百氏。以求竟乎其量。余猶懼其敝身心以役於衆好也。於其別也。書是以貞之。然余固亦頗涉前二說者之流。而奔命於衆好之場者。又因以自砭焉。

易問齋之母壽詩序

古者以言相贈處。至六朝唐人。朋知分隔。爲錢送詩。動累卷帙。於是別爲序以冠其端。昌黎韓氏。爲此體尤繁。閒或無詩而徒有序。於義爲已乖矣。元明以來。始有所謂壽序者。夫人之生。飢食而渴飲。積日而成年。苟不已。必且增至六十七十。又不已。則至大耋期頤。彼特累日較多耳。非有絕特不可幾之理也。胡序之云。而爲此體者。又率稱功頌德。累牘不休。無書而名曰序。無故而諛人以言。是皆文體之詭。不可不辨也。道光乙巳六月。爲

易柳恭人七十誕辰。嗣君閔齋郎中。徵求士大夫之詩。至數十篇。而屬余爲序其簡端。問齋其能辯文體者矣。余讀諸君詩。知恭人事。贈君□□先生。豈非所謂代有終者哉。初先生以長且賢。理家事無劇易。必躬佔畢之業。稍棄矣。恭人來歸。一代任焉。米鹽凌雜。不復關白。先生由是得專精舉子業。嘉慶戊午舉於鄉。戊辰遂成進士。蓋內顧無憂。壹志以底於成。恭人之力也。先生官陝西。恭人以舅姑春秋高。留侍養。不隨之官所。既而太夫人就養秦中。恭人又留治家務。既而先生移官山東。恭人仍留里居。計先生宦遊三十餘年。而恭人僅一入秦。再之山東之鄒。不過三年耳。婦人類以從官爲榮。鄉里齷齪。不足自適。一旦朱幘翟裼。稱爲命婦。入則鼎食。出則武夫前呼。侍女如雲。此常情所最稱意。恭人恬然不以爲榮。獨習勞居僻鄉。爲先生經畫家政。敗御敝革。儲以待用。甘麤糲以自菲。歲時親戚。承問無缺。藥餌餘糧。全活貧弱下戶。躬操作以率先子婦。此其識有過人者。以視擁象輿。以命婦自炫。頤使侍婢。俯仰如神者。其賢否當有辨也。詩人之祝女子曰。無非無儀。易此。而以才能自詡。則於道爲悖矣。如恭人者。所事不出閨闈。所行不越庸德。獨其相夫以發名成業。而不慕從官之榮。此有人所難能。而其他蓋可知矣。余故揭其大者。著於篇。若其稱述懿行。頌禱繁祉。則諸君之詩實詳。故不及云。

陳岱雲太守爲母生日讌集賓僚詩序

易曰。雷出地奮。先王以作樂崇德。蓋古者雖有艱大阨塞。聖人窮力畢精。削除荒顛。人心夷悅。而後作樂以宣幽滯。譬若春雷奮發。而秋冬之沈痼。蔽塞於地中。固已久矣。故曰。患難所以開聖。憂勞所以興國。古之通義也。至夫賢達之起。卿大夫之家。莫不以然。其初類有非常之撼頓。顛蹶戰兢。僅而得全。疾疾生其德術。荼蘖堅其筋骨。是故安而思危。樂而不荒。如彼其自克也。豈偶然哉。茶陵陳岱雲太守。成童而喪父。事無巨細。壹操於母。劉太恭人家。故微也。又多奇閔。藥醫不絕於室。期功之喪。不絕於門。櫛無縷。盜無儲者。數數然也。方太守就傳於外。天盛寒。家惟二衾。一實以棉。一單衾耳。太恭人不忍子以窶凍爲人所詬。強以棉衾予太守。而自以單衾擁二幼子。太守不忍母寒而已。獨溫。則虛衾而終不御。太恭人亦終不以酷窮。而令子廢學。居無何。太守以進士通籍爲翰林。而家之艱於謀食如故。而太恭人之勤約自刻亦如故。道光二十四五年。天子以海氛初靖。亟思振興吏治以修內。而攘外特簡近臣以守要郡。乙巳仲冬。太守用是有吉安之命。明年。量移廣信。於是祿入稍豐。寢寢怡裕矣。其年十一月。爲太恭人六十生日。太守開閣饗客。韻以絲竹。本省之僚屬。所部之士民。與他邦之客游茲土者。凡若干人。爲詩歌上壽者。凡若干篇。乃書抵京師。屬國

藩序之。夫陽不可盈。樂不可極。故禮主靜而樂主反。勝則流矣。太守思前者慈母支持之艱。與今者天子簡用之重。將必有穆然深念者。是則承歡之大者歟。

唐鏡海先生七十生日同人寄懷詩序

善化唐太常先生。以道光丙午致仕還湘。明年年七十矣。五月七日。寔初度之辰。六安吳君廷棟。始爲寄懷詩。略寓詩人戩穀俾臧之義。既而師宗竇君堉。及其君某君皆踵爲之。凡得詩若干首。大抵惜繼見之不可常。頌長者之多禮。先生之姊子黃君兆麟。與其弟倬。命國藩爲之序。竊嘗觀古之君子。其載德而荷道者。必有人焉。帥而掖之。而後後者有所階而進。必有人焉。輔而翼之。而後前者有所託而傳。水非水而不續。人非人而不承。蓋桐鄉張考夫先生之與。則有凌淪安。何商隱。沈石長諸子爲之附。太倉陸道威先生之起。則有盛聖傳。陳確菴。江蘗園諸子爲之與。二先生之爲道。至寂寞也。而諸子者。相從於太羹元音之際。殆於邈世不見。稱而無怨。彼各有其志爾。唐先生之內召爲太常卿也。以道光庚子。僦屋於內城之西南。分聽事四之一。爲讀書之室。裒得周尺之步。廣半步耳。自國藩之修候。或月一至。或再二至。未嘗不見先生手一編。危坐其中。它人見者亦然。此所謂寂寞者非邪。民之情。好聲利而惡澹泊。淺者趨死祿仕。深者博文。

多藝。獨取浮譽。亦足以降其好勝之私。先生爲外吏二十年。蕭然無資積以自存。既當世之所謂迂闊。而其爲學也。又惟自洽其身心之急。或不沾沾於文藝之短長。以故士之驚才技而競聲稱者。亦罕過而勤焉。而吳寶諸君子。獨相尋於澹泊。究道而考德。夙參而莫造。既其違離。而作爲詩歌以抒懷想。斯豈曩者凌淪安何商隱。及沈盛陳江之疇邪。何其篤也。自明代以來。年齒至五十以上。則人多爲詩以祝之。諛媚殆於亡等。又有所謂壽序者。余昔書歸有光文集。已痛詆其陋。其他則又不足譏。今諸君子既舍聲利而別有所尙。而其爲詩。又約旨斂辭。頌無盜量。豈不本末並茂。不與人人同科者哉。於是畢讀而序之。世有達於文體之君子。庶終覽焉。

朱心垣先生五十六壽序

於余爲兄弟行。結交最少。久而彌摯者。屈指無幾人也。則有若朱嘯山富春。於余爲父執。又早器余。余愛慕而不敢侮者。亦無幾人也。則有若姻伯心垣先生嘯山。爲先生冢嗣。其交余也。先生實令之也。先是先生與家嚴君同學。互相掖重。兩家世好。既篤重之。以婚姻。故余知先生特詳。前歲丙申。先生年五十。嘯山謀稱觴。乞余以言侑爵。先生曰。是何爲者。傳曰。恆言不稱老。今吾方託堂上之蔭。將不以禮處我乎。抑以諛詞誣我乎。且古者下壽六十。今吾猶未也。固請不獲。又數年。嘯山舉於鄉。偕余北上。從容謂

曰。吾父所以固辭頌禱者。善則歸親。義不得專也。今吾欲勾子文。爲寒門作家慶圖。使吾父上有以承祖父母懽。下有以自娛。而卽以爲吾父壽可乎。余曰。可。昔董召南隱居孝義。昌黎韓子。爲詩紀其事。姚氏三瑞堂。世以孝稱。東坡亦作詩美之。今君欲以娛重闈者。娛其親。是孝子等而上之之義也。賢哉。吾不能以詩壽先生。請觀陳君家天倫之樂。以娛先生之志。今夫科名宦達。豈以寵身。亦借以顯揚之資也。先生以第一人補弟子員。再躡場屋。遂棄舉業。其天懷恬淡。視青紫不值一呷耳。乃其督課子姪。則銳意進取。惟恐後時。討論史事。旁及制藝書學。皆得竅郤。而勸以法度。在先生。豈徒欲弋取時榮哉。不過欲博膝下之懽。使老人聞之曰。阿孫才。今試已列前茅矣。阿孫能。可以與賢書選矣。因而鼓舞後進。怡然忘老。此其可娛者一也。君家田園。足以自給。先生周視原野物土之宜。稻粱之外。雜時嘉蔬。種秫二頃。穫以釀酒。名曰延齡。殺雞佐之。但以奉親。不以勸客。有餘則度置焉。門外方塘。廣可百畝。旁置小艇。宜釣宜網。當春種魚。秋則取之。以強半供甘旨。其他則請所與子姓醉飽。波及羣下。其可娛者又一也。君家早歲頗有外侮。自先生綜家政。敬宗收族。祖免以下。一視同仁。閭里細民。強梗者鋤之。不肖者勸之。貧無告者周卹之。竭力之所勝而不德焉。比來一境恬然。曩時箕舌之怨。雀角之爭。皆以澹消。而高堂喜齒。亦得晏安。

無患。其可娛者又一也。抑聞之。夫妻好合。兄弟既翕。父母其順矣。先生早占炊臼。續以鸞膠。不聞有遇虐後母之事。非刑于之道乎。方鳳台先生之以計借入都也。先生曰。予弟行役。不可以勞門閭之望。丈夫何憚萬里哉。乃杖策送弟北征。而衛以俱返。不賢而能之乎。邇年以來。弟姪能文者。先生爲之延師課讀。肄武者。爲之料量魚服竹閉之具。使之皆得成名。以故牀第之間。秩如也。昆弟翼翼如也。寢門之內。訢訢如也。此甚可娛者一也。又先生熟於形家之言。往爲大母卜佳城。備極勞瘁。終乃永臧。今腰腳尙健。暇則陟層嶺。披蒙茸。裹糧而從一奚。遊覽既審。歸而告於堂上曰。某水某山。大人所經歷也。有佳兆。當貴至徵侯。某宅某田。大人所鈞弋之所也。居之後必昌。因與指畫形勢。兼誦撼龍疑龍之經。而堂上亦傾聽不倦。或佯諾之。微笑其幻渺。此亦可娛之一端也。夫天倫之樂。豈有形哉。日用優游之地。行之而不著。習矣而不察。道路傳爲盛談。或油然而興感。而當境者行其心之所安。視爲固有。而不足怪。以先生之德之遇。凡所謂可以自娛。卽以娛親者。皆已自得之而自忘之。不知此中真樂。雖三公不足以易也。卻老延年之道。有進於此者乎。嘯山歸述吾言。酌而祝焉可也。嘯山拜曰。善。遂書以爲之序。

田崑圃先生六十壽序

道光某年月。爲我年伯崑圃先生六十初度。其嗣君敬堂同年。句余以文爲壽。且曰。古者稱壽不必攬揆之辰。壽人以序。抑非古也。然震川歸氏望溪方氏嘗爲之。是或有道焉。余曰。然。壽序者。猶昔之贈序云爾。贈言之義。粗者論事。精者明道。旌其所已能。而蘄其所未至。是故稱人之善。而識小以遺鉅。不明也。盜而飾之。不信也。述先德而過其實。是不以君子之道。事其親者也。爲人友而不相勸以君子者。不忠也。今子所以壽親者。於意云何。敬堂曰。吾父固好質言。凡生平庸行。衆人所恆稱道者。不足爲君述。吾父早歲以課徒爲業。迄今幾四十年。嘗曰。塾師鹵莽塞責。誤人子弟不淺。吾不敢也。戊戌。雨公幸成進士。選庶常。吾父書來戒。以初登仕版。勿輕干人。於戲。安得此有道之言乎。蓋自秦氏燔羣籍。教澤蕩然。漢武帝始立五經於學官。使諸生各崇本師。置博士。舉明經。而聖言乃絕。而復續。明太祖以制藝取士。竝立程朱之義。使天下翕然尊尙。而聖賢之精蘊。始照灼於幽明。二君者。蓋見夫學校之不可復。故定爲功令。使人以此爲祿利之徒。而陰以崇儒術而闡大義。由今言之。明聖道於煨燼之餘。而炳若日星。表宋儒之精理。使僻陋下士。皆得聞道者。不得不歸功於二君。然使人人以詩書爲干澤之具。援飾經術而蕩棄廉恥者。又未始非二君。有以啓之也。今世之士。自束髮受書。卽以干祿爲鵠。惴惴焉恐不媚悅於主司。得矣。又

挾其術以釣譽而徼福。祿利無盡境。則千人無窮期。下以此求。上以此應。學者以此學。教者以此教。所從來久矣。百步之矢。視其所發。差若毫釐。謬以千里。振古君子多塗。未有不自不干人始者也。小人亦多塗。未有不自千人始者也。今先生之誠子。首在不輕于人。則平日之立教。所謂不誤人子弟者。概可知矣。出處取與之間。士大夫或置焉不講。而鄉里老師耆儒。往往以教其家。繩其門徒。吾父課徒山中。亦有年所。每戒小子。輒曰。儉約者不求人。與先生辭旨略同。而吾黨郭君雨三。亦得父訓以成名。當交相。越勉。力求所以自立者。以圖無忝所生。不然。先生不欲誤人子弟。而吾輩一離膝下。乃反自誤其身。日愒月玩。委棄而不克自振。終且不免於千人也。吾言不足以重先生。而猶不敢諛詞欺吾友。是或爲先生之所許乎。敢以爲長者壽。

朱玉聲先生七十三壽序

天可補。海可填。南山可移。日月既往。不可復追。其過如颺。其去如矢。雖有大智神勇。莫可誰何。夸父之追。魯陽之揮戈。陶士行之惜陰。有以哉。有以哉。余與朱堯階以道光十年。論交於長沙。當時相見恨晚。會幾須臾。遂閱一終。一星終矣。前歲戊戌。余乞假旋里。值玉聲先生七十誕辰。堯階以壽親之文見屬。余忻然不辭。遷延未報。一諾三年。甚哉。光陰之遷流。如此其

足畏也。人固可自暇逸哉。以余玩愒時日。有言不踐。學問不加進。而堯階不務顯揚之實。徒欲以祝史微言娛親志。二者均非先生之所許也。何足以爲先生壽。雖然。吾與堯階交舊矣。不可不略抒固陋。表先生之闡修。以徵其所以延齡之由。以下將來無量之祉。以慰吾堯階。以勸吾堯階也。蓋先生則可謂不自暇逸者矣。先生少失怙。既冠。又失恃。家故貧。破屋數椽。兄弟謀折產。先生以其稍完者付諸昆。而指其隙地一弓自予。去之賈。不數年。致千金。已而散去。又如是。又散去。屢裕屢絀。晏如也。先生有嫂早寡。窮不能自存。乃爲之謀生計。撫孤兒。終節婦之世。無衣食慮。復出資爲之表其節。聞於有司。與其大母。弁建總坊。尤慷慨好義。宗族中有不能自贍者。飲之必給。有沒不能終葬具者。周之必無缺禮。子姪有游惰無常職者。掖之培之。視其材。必俾有成。他如聯族譜。建支祠。治祖塋。置祭產。凡事關本原之大者。經之營之。有廢必舉。有初必終。故其所以屢絀者。人皆知之。爲其急公也。爲其義也。其所以屢裕者。人或不知。傳曰。民生在勤。勤則不匱。先生之所爲。常致充盈。綽綽有餘者。勤而已矣。不自暇逸而已矣。計自少壯以迨今日。拮据飄搖。幾無虛日。今夫天恢恢大圓。終古磨旋。今夫山終古常峙。海終古常流。其盛大而生物不測。由其不貳。不貳故不息。不息故久。夫人也。亦若是焉矣。守其樸者完其素。勞其力者貞而固。戶樞不敝。

磨鐵不銹。胥是道也。以先生之不自暇逸。而得康強逢吉。又何疑乎。又何疑乎。余與堯階相友以心。相砥以道義。今堯階幸得啜菽飲水。承歡膝下。而余一官匏繫。既不能拾遺補闕。有絲毫裨益於時。又不能歸侍晨昏。又不得奉板輿以迎養。余自是有羈旅之感矣。風有陟岵之章。雅有四牡之什。皆以行役在外。瞻懷門閭。孔子曰。父母之年。不可不知也。願吾堯階。佩玦管。調滑甘。愛光陰如拱璧。舞綵服如嬰兒。由是而後。先生樂孫會之蕃昌。欣琴瑟之靜好。耄耄期頤。怡然忘老。則堯階庶不負讀書之志。不忝於盛德大業耳。君子進德修業。欲及時也。時乎時乎。事親者。可或忽乎。此所以勸堯階以慰堯階。而卽以爲先生壽者爾。

王翰城刺史五十壽序

古無生日之禮。顏氏家訓稱江南風俗。是日有供頓聲樂。蓋此禮始於齊梁之間。後世自貴逮賤。無不崇飾。開筵稱壽。習以爲典。癸卯夏。王君翰城。將出牧冀甯。卽於是秋五十壽辰。同人或謀祝之。翰城曰。非古也。其友人曾國藩亦曰。非古也。雖然。子將別矣。不可無以贈。子蓋古者四十而仕。五十服官政。服政云者。爲大夫以長人。布政得自專也。古者建官無冗。立法無繁。故人靡不專。而事靡不理。後世天下之事。萃於六曹。六曹之屬。無慮千計。法令日密。吏胥便之。每事至吏。以意討例。官則睨吏意以行。吏頤

使則官可之。吏目止則官否之。屬官所左。卿長亦左之。事無定見。惟衆之隨。故近日服官得專政者。內惟樞府。外惟牧令。樞府數人。或意見各歧。則得專者。尤莫如牧令也。牧令朝行一政。朝及於民。福民則我實福之也。殃民則我實殃之也。然牧令或不賢。往往不自爲政。上則伺大府之喜怒。下則時胥徒之向背。雖欲自尊而有所不能。翰城讀書四十餘年。今以服政之日。爲天子之刺史。吾知其能自尊矣。夫爲刺史而得自尊。而不爲大府與胥徒箝制者。豈徒然哉。其殆必有所以矣。翰城勉乎哉。他日聞有供頓聲樂。躋堂而稱壽者。必天子所付託刺史之百姓也。子行矣。吾以是贈。卽以爲祝焉。

王蔭之之母壽序

壽序。非古也。明歸太僕數鄙之。而數爲之。以爲崑山之俗。張此尤盛。閭巷之士。狃於習而不求其說。立言者。雖知其事微薄。而不忍拒孝養者之請。牽率以從事。宜也。當是時。吾同年王君蔭之。以其母黃太安人之壽。屬予爲序。云。蔭之知言者也。不宜循世俗故事以娛其親。仲尼曰。麻冕。禮也。今也純。儉。吾從衆。積習染人。甚於丹青久矣。雖爲父母者。亦皆以生日爲慶。以文字道其生平爲祥。人子因而順之。不亦可乎。先是贈君琴雅先生之棄養。蔭之與其仲氏皆未冠。季尙毀齒耳。內而饋粥零雜。外而官租私進。

皆太安人推畫之。贈君以諾名。鄉里宿負。故無券主者。以是馳賁。太安人曰。夫子信者也。是固然無疑。立貨別業。盡償之。贈君疾革。命曰。雖飢寒。毋令吾兒廢學。家故微也。又歲經水潦。益流落。太安人力支之。卒不令諸子遷業。初服舅姑之服。繼服夫之服。哀毀至矣。皆節以禮。喪女子者四。喪子婦者五。悲傷之餘。亦以禮裁之。蓋蔭之之爲余述者如此。易曰。地道無成而代有終。方贈君。願命諱諱。豈必後嗣果自成立。今蔭之通籍。爲天子近臣。文章爾雅。率諸弟子姓。爲醇樸之學。所謂代終非邪。國家以大器儲詞臣。不殺之以吏事。使之優游成德。以養公輔之望。至深厚也。以國藩之不肖。謬廁斯任。無足言矣。如蔭之者。要當博觀約守。仔肩天下。而後無忝是職。不然。彼太安人時時稱贈君之末命。以相申儆者。豈徒在祿仕通顯也哉。歐陽公之母。常述父訓以教子。卒爲有宋名臣。彼何人也。吾何畏彼哉。蔭之誠能日進不怠。太安人當益顧之適志。怡然忘老矣。余承蔭之之命。終不敢以世俗之義爲長者誦也。於是爲道其大焉者。

江小帆之母壽序

古者設科有目。如漢曰賢良方正。曰直言極諫。曰軍謀宏遠。曰淳厚質直。唐曰秀才。曰明經。曰進士。曰明法。曰明字。曰明算。若此者。不一其稱。惟人主之所欲。而因時命名。所謂目也。明初盡革前制。取士止進士一科。則有

科而無目矣。既成進士。天子親策於廷。臨軒唱策。分甲授職。一甲止三人。曰狀元。榜眼。探花。制所定也。士大夫稱爲鼎甲。云。進取之途既隘。天下魁傑瑰璋之士。莫不甘心於專科。盜腕以求所謂鼎甲者。而巴蜀滇黔。西南萬里。或數百年而不得一人。蓋其難也。慈父母之於子。總角則祝之。而令子順孫。承歡堂上。亦無先於此者。至於今五百年矣。同年友江君小帆。故吾楚郴人也。徙居四川之大竹。道光戊戌。以第三人及第。四川之鼎甲。自小帆始。而小帆退然貶抑。矜躬不足。問之曰。母教也。余曰。何如。則盡述太安人之賢。及贈君春湖先生之德。而再誦焉。且曰。吾母今年六十矣。吾子爛古文義法。其爲我銓次太安人懿行。略仿今世之壽敘。而益以箴言勸余。使吾母懽慰。而吾亦奉以爲事親之則可乎。余曰。可。蓋江氏之自楚而蜀。家微矣。贈君之與昆弟析居。僅受田三畝耳。而折價宿負者略半。贈君力貧績學。授讀鄉里。稍佐饔飧。太安人蒔蔬藝菽。以精潔羞舅姑。而以其惡者自御。小帆兒時。嘗隨太安人鋤豆於北原。拾木棉於西澗之陂。每語及此。未嘗不太息祿養之已晚也。嘉慶庚申辛酉之閒。四川遭教匪之亂。鄉鄰依堡砦以居。賊來恃堡爲固。賊去還家事耕作。太安人提挈子女。裹糗糧。與贈君奔竄於風雨谿谷之中。其事尤艱阻。卒以無恐。小帆既官編修。太安人就養京師。而贈君道卒長安。哀毀之餘。毫髮盡禮。與前服舅姑

之服略同。計太安人數十年中。困於貧。厄於兵。顛沛於喪事。而亦以勞矣。傳所謂動心忍性。生於憂患。其不信然邪。士大夫由科第通籍。大抵先人茹其辛。而後人食其報。如小帆之掇取魏科。三持文衡。以詞賦受聖主特達之知。豈可不知其所自邪。自古舉士之法。未有三百年不變者。帝不沿樂。王不襲禮。物窮則易。固其理也。經義取士。亦已久矣。識者多謂帖括道卑。難收得人之效。小帆勉旃。益務通經達用。使天下後世。謂偉人某某者。未嘗不出制義之科也。既以塞辨者之口。又有以慰高堂無窮之望。事親之則。不當如是乎。太安人聞之。其必不訾吾言矣。遂書以爲壽。

何傅巖先生七十壽序

國藩讀詩至常棣之篇而歎曰。旨哉。仁人之言也。朋友平居宴樂。有急則掉臂不顧。兄弟天性也。非至不仁。可以手足而胡越乎。同年友何君丹谿。官編修。其兄璜谿。官武昌同知。兄弟相敬愛。至篤無已。他日余謂丹谿曰。子之親。未耄也。二君者。皆不迎養。於義謂何。則告曰。吾大父母之棄養。吾父七齡耳。實依兩世父以生。世父長曰晴瀾。次曰雲巖。吾父曰傅巖。事兩兄維虔。謀必咨。出必告。有財必歸之。有疾侍藥。必躬至。以身禱。雲巖世父下世。事寡嫂尤恭。今吾父母之不肯就養官所。徒以長兄寡嫂在耳。余聞之悚然。當吾世而猶有巖於弟道如此者乎。又二年。而所謂長兄寡嫂者。

相繼逝。璜谿執期之喪既除。因卓薦入見天子。遂乞假南歸。躬迎二親。養於武昌官舍。又明年丙午春。爲傅巖先生及張太恭人七十誕辰。同年生謀所以壽者。屬余爲頌禱之言。丹谿曰。子毋效世俗人。世俗所爲壽序。至陋而非古。子但略述吾親實行。使吾昆弟子姓有所法而向善。而吾親亦將顧而忘老足矣。勿虛諛也。余曰。子之親云何。曰。吾父年十八。補縣學生。嘉慶癸酉。以選拔貢入成均。凡試於鄉。十六役不得售。異時苗匪寇鄰。縣世父率鄉勇出堵賊。吾父守城。書檄調遣。胥出一手。事平。縣令暨監司適主鄉試闈事。欲因以私報。力謝之。教人以立品敦倫爲先。前後從遊千餘人。課徒所得餘金。則盡刊印世所傳感應篇註案者。以勸愚民。吾母以不逮事舅姑爲恨。事夫之兄如嚴上。事姒婦如姑。蓋體吾父友恭之誠如此。古者大功同財。自秦人子壯出分。後世沿以爲俗。兄弟有視如塗人者矣。而爲之婦者。伺其夫之旨而加刻焉。片語之隙。荆棘叢生。累世不能泯其嫌。夫一木之枝。或榮或悴。常也。而常人之情。睹他人之榮。則以爲分隔。於己無與。睹兄弟之榮。以其切近。則相妬。相妬則爭。而榮者之視悴者。漠然而疏。望望焉。若將浼己。蓋三物之教不行。而俗之偷也久矣。先生以次子嗣仲兄後。顧不冒隨二子之官終。不令己獨榮而兄與寡嫂獨落莫。此其足以激薄俗爲何如。而其用心之仁厚。豈有極哉。余爲揭其大者。俾璜谿

兄弟守此無怠。則先生與太恭人所以娛老者。或亦在此。卽以爲長者壽可也。

郭壁齋先生六十壽序

莊子曰。木以不材自全。雁以材自保。我其處材不材之間乎。旨哉斯言。可以壽世矣。雖然。抑有未盡也。此其中有天焉。魁岸之材。有深自韜匿者。去健羨。識止足。天乃使之馳驅後先。殫精竭力。而不能自怡。有銳意進取者。天或反阨之。使之蓄其光采。以昌其後。而永其年。迹似阨之。實則厚之。材鈞也。或顯而吝。或晦而光。非人所能自處也。天也。我年伯壁齋先生。天之處之。殆厚矣哉。先生少讀書。有大志。旣冠。補博士弟子員。旋以優等食餼。屢躋場屋。貢入成均。試京兆。仍紉權當陽校官。數月。儒術濟濟。翕然景從。其居鄉也。外和而中直。不惡而人畏之。優伶雜劇。至不敢入境。諺曰。桃李無言。下自成蹊。直其表而影曲者。吾未之聞也。先生孝友。可以施於政。尊行可以加入。課徒而得。與校而士慕。附處于鄉。而不肖知勸。此天予以有用之材也。使得所藉手。舞長衷而回旋。其展布當何如。顧乃蹭蹬棘闈。連不得志。前歲乙未。恭遇覃恩。臣僚得榮其親。維時先生之家。嗣觀亭前輩。旣由翰林官。西曹兩世。封贈如例。而先生猶以有事秋試。遷延不得請。於是先生橐筆鄉闈。十餘役矣。從遊之士。得其口講指畫。或皆扶搖直上。而

觀亭前輩昆仲。皆得庭訓而翔步詞林。後先輝映。獨先生黜抑良久。曾不一騁騏驥之足。固可解乎。夫以先生之德之能。於科名何與輕重。其達觀內外。何嘗不睨青紫如糠粃。然終不自畫。誠欲有所白於時。而又惡夫庸庸者。一蹶而不復振。乃借恬退之名。以文陋而售其巧。故思有以厲之耳。以志則如彼。以遇則如此。此豈盡有司之咎哉。蓋所謂天也。天者。可知而不可知。無可據而自有權衡。崑山之玉。鄧林之大木。生非不材也。貢之廊廟。非不貴也。鑿之琢之。尋斧縱之。剖其璞。傷其本。向之潤澤而輪困者。蕩然無餘。天欲厚之。則不如韞於石而光愈遠。叢之豐草之中。而蔭愈廣。而枝愈著。向使先生假鴻漸之羽。激昂雲路。敷歷中外。詎不快於志而裨益於時。而所發既宏。所積漸薄。天與於前。或靳於後。精神有時而竭。福蔭有時而單。是亦琢玉斲木之說也。謂能優游林泉。頤神彌性。如今日也乎。謂能澤流似續。光大門閥。如今日也乎。本年某月。先生六十壽辰。次嗣君雨山。與余爲同年友。謬相知愛。將稱觴介壽。屬余以言侑爵。吾聞君子之事親也。可以無所不至。獨稱其親之善。則不敢盜詞以鄰於誣。君子之於友也。可以無所不至。道揚世德。則不敢虛述以近於諛。余悉先生嘉言篤行。稔矣。今欲敷陳盛美。頌禱龐祺。深懼其諛也。故不具論。第論天之生材。此豐彼嗇。大有權衡。以徵先生所以延年受祉之由。亦使觀亭前輩昆仲。知

今日之蜚聲騰實。其鬱積者。有自非一朝一夕之故也。欽念哉。欽念哉。小子竊祿於朝。蓋吾父之涸迹名場。撼頓不得伸。亦有年矣。持是以思。則先生之緝熙純嘏。天之厚之。正未有艾耳。質之先生。或以斯言爲不謬耶。

金殿珊先生六十壽序

往余讀韓退之符讀書城南詩。私怪彼不以聖賢之道教子。而誘之以公卿祿位。何其陋也。既伏思之。古今之所以設科取士。何爲也哉。豈不欲得明先王忠孝之道而力行之者。與之共天位乎。道莫備於羣經。故漢唐重明經之選。而明及我朝。皆以經義試士。操其文以券其行。庶幾忠孝之彥之或出乎此。是上之人。法固未嘗不良。而意固未嘗不美。卽爲人父母者。冀其子以文行上達於朝廷。斯亦天理人情之至。然則退之之志。其亦未可深譏矣。世衰而俗敝。應舉者不揆君公求士之本義。苟以獵取浮榮。少壯而違父母之養。窮老而不歸。眈眈於王畿勢要之場。未仕則發憤忘家。既仕則迎妻子與共安樂。而父母以衰晚之年。與子婦幼孫曠隔。音書闕疏。享封誥之虛名。受枯寂寒飢之實禍。雖疾病厄苦。不忍告聞。以恐其子。而爲子者。冥然不以介懷。方藉口於趙苞賊母。溫嶠絕裾之義。夫彼既起棄其親。尙何有於君國。本先撥矣。國家亦安貴此喪失良知之人。而歲舉數千百輩。以糜無窮之祿糈哉。故吾嘗曰。朝廷以忠孝求士。未爲失。而士

之應之。大相悖也。父母以仕宦望子。未爲失。而子之於親。大相悖也。噫。此豈細故也哉。吾鄉金殿珊先生。官翰林十載。宦況絕迫隘。力貧節用。歲寄少資以佐甘旨。既奉父諱。哀毀滅性。服闋矣。依母徐太夫人。不復欲仕。久之。嗣君可亭侍講舉於鄉。徐太夫人強先生攜子北上。乃僕被獨行。留賢配楊恭人養姑維謹。道光戊戌。可亭以第二人及第。先生曰。兒輩幸有立吾親老矣。卽告養歸。與其弟承歡左右。晷刻不離於戲。先生其可謂無負朝廷之求。無忝父母之所期者矣。歲丁未。爲先生六十壽辰。先歲。可亭以陝甘學使任滿受代。乃書告國藩曰。僕將以瓜代之際。乞假省親。幸蒙天子錫類之恩。得捧誥軸歸獻堂上。吾父母誕辰。洗爵上壽。子若敘述吾意。使吾親歡娛而盡醺。貺莫大焉。乃別紙述先生官侍御。直聲震世。家居訓課生徒。周卹族黨。恭人歛歲。購婢賑窮。豐歲。擇配遣之。諸善行甚悉。余都不具論。獨著其拳拳愛親之意。俾可亭守此而不失。使吾鄉後進應舉之士。知舍此則悖乎朝廷之本義。雖得之。不足爲榮。庶以救末俗之偷。而國藩守官八年。不克歸侍晨昏。又以誌余之抱慚。而不能自克也。先生及恭人聞之。儻冒爲盡一觴乎。

黃矩卿師之父母壽序

國家歲值大慶。必推恩羣下。褒及所生。而吾師昆明少司馬黃公。以乙巳

覃恩得封我。太公通奉大夫。太母太夫人。越二年丁未。太公壽八十。太母亦七十有四。是歲春初。天子以海內清晏。太和翔洽。必有人瑞以潤色休嘉。詔問一二品大臣。有親年八十以上者。有司以聞。於是協揆維縣陳公。司馬江甯何公。倉場侍郎新城陳公之母。司空濱州杜公之父。及吾師之父母。竝以遐齡。上徹天聽。賚勞有差。其三月。爲太公攬揆之辰。黃公稱觴京邸。以揚家慶。而銘君恩。門下士相與言曰。陳何諸公。僅有母。杜公僅有父。因其所慶。或觸所卹。獨吾師以名儒位九列。而二親大年。實敬不衰。計德度祉。當世無雙。吾輩宜以文紀其盛。且遙致私忱於太公。若鞠臚奉舉者。乃以諉國藩。國藩伏思。自宋景濂以壽文入集。厥後踵爲之者。大抵甄敘行能。終以諛頌。雖以歸有光方苞之博通。不能洗此陋習。夫無故而敘述人之生平事蹟。與無故而貢人以譽。二者皆達於文者之所譏也。惟因事而致其敬。相與爲辭。以示不忘。則古多有之。其爲辭也。貴約而韻。質而不蔓。君子尙焉。吾師自總角以遠服官。壹秉庭訓。其初入學。則督之以討源之功。先本而後華。及視學四川。無日不面戒之弊。孔之難塞。士之十拔而虞一失。官京朝。無時不寓書而申儆之。富貴之靡常。職思之不可須臾隕。故吾師仕卿貳而不驕。年五十而恂恂有弟子之色。未始非庭闈警敕之所致也。今太公太母。歸然爲天下大老。親見其子爲聖主所毗。道德文

章冠冕人倫。其娛樂蓋可度而知。而吾輩出門下者。獨據其教子之大節。爲之祝詞。以託於因事致敬之義。此固吾師所深願。諒亦太公所許而不甚數者已。於是及門各獻祝辭。而國藩爲之唱。且爲序之。詩曰。

我皇膺運。膏流滂博。誕降醇耆。龐眉僕僕。實育公孤。陳何與杜。維我黃公。有恃有怙。怙也園綺。特則孟桓。帝褒厥德。天露有溥。春迴南詔。日永長安。仙醞三爵。僚寮同懽。

文小南之父七十生日壽詩序

道光二十有七年五月上旬。爲衡山荻堂文先生七十生日。嗣君小南。以農部入贊樞垣。先二歲。迎養京師。至期。將觴賓於邸第。以博堂上一日之懽。於是鄉之人官輦下者。各爲詩篇。以致頌禱。奚斯歌魯。麥邱獻齊。幼之祝長。與下之祝上。其誼一也。旣成冊。以授國藩而屬序焉。竊嘗維人之所。以久視於世。大端有二。一者所踐甚厚。居能移氣。傳所稱取精多。用物宏。亦自足。延歷歲年。彼得之天焉者也。一者履孝蹈友。至行純備。其精力不使敝於亡等之欲。其惠氣所迓。亦自以貞於永久。此古守身之君子。所從事者也。外是二者。則滔滔凡民。天下皆是。賢焉以生。懵焉以長。積日既多。亦不得不謂之修齡。要之無譏焉耳。先生總角孤露。公私赤立。非自營不得晏食。非自憤不得就學。其所踐之不厚。而不克一日爲賢焉。以生之凡。

民亦可知矣。先生茹艱漬苦。痛繩於學。奉母之教。事有命。雖大不濡。過有救。雖細不貳。既而餽於學官。貢於成均。母王太宜人每告人曰。吾寡居四十年。所堪報地下者。有子克家耳。方贈君琴臺翁之棄養。先生甫四歲。有弟二齡耳。先生既續學發名。而弟鬱悒不得伸。又以脫略損資產。及其逝也。先生盡償其責。恤其廢。而再以己子嗣焉。由此觀之。所謂履孝踏友。至行純備者。非邪。洪範曰。不協於極。不罹於咎。皇則受之。曰。予攸好德。女則錫之福。如先生之孝友純備。豈直不協吉。不罹咎之謂哉。殆所稱好德。而宜錫以福者矣。然則先生迪嘉離祉。而小南之食報無涯。又何疑哉。國藩固亦凡民之賢焉。生。懵焉長者。因緣際遇。忽不自知所踐之已厚。塵埃擾擾。做精從欲。每覩先生之容。未嘗不內慙而興企也。故於鄉人之爲祝詩。輒爲推明致此之由。又以卜方來享年之未有屆。爲序其略如此。亦別爲詩以附於後。詩曰。

昔我婦翁。衡之歐陽。屢道先生。宜表宜坊。我來日下。實交哲嗣。修謁長者。淵乎玉粹。強圉之歲。星煥南弧。下燭蘭兒。明映中樞。大斗分頒。衆賓醉止。各攜祝辭。用介繁祉。

何母廖夫人八十生日詩序

道光二十有七年六月上旬。吾鄉道州何母廖夫人八十生辰。官太保文

安公之良配也。先期鄉之人語國藩曰：子夙陋明季文士。遇人生日，輒以諛詞相溷。爲不達於屬文之律。既聞其說矣。竊聞古者因事致敬。則相與爲辭。以篤不忘。魯侯作閼宮。奚斯有頌。晉獻文子成室。張老有禱。施之少者。有冠禮三加之辭。施之老者。有祝鯁祝噎之誼。及敦彝款識。亦往往祈以永命萬年。蓋前以表德音。後以敕方來。詩人之教也。今太和翔洽。人瑞蕃臻。而夫人以淳樸之德。克享遐齡。鄉之人相與作爲祝辭。託諸因事致敬之義。不亦可乎。國藩曰：其可。雖然。君子於其所尊敬。不敢爲盜量之語。故詩人戩穀俾臧諸篇。其稱之也質。其祈願也無奢。今吾人欲託茲義。則摛辭之斂侈。可勿審諸。蓋夫人之歸何氏。家微也。文安公陋巷孤貧。貿力以食。晝而授徒。宵而自繩於學。春而出。長至而不歸。家中有無。壹委夫人。夫人綴崎緝斷。公私井井。厚其親。以及其所愛。無或不豐。堅忍其身。以及其子。無或不膏。嘗學生二子。越三日而檢兒出汲。卽子貞編修。與其仲弟也。又嘗負兒入山採薪。竹萌拂左目。迄亦廢視。艱窮之境。殆非人履。而夫人泰然。無不自得。迨文安公及第。以命服迎之入都。而守約帥初不變。既而公位尙書。天子倚如柱石。屢司文柄。門下士且盈千。編修昆季。先後列甲乙科。諸孫蔚然興矣。而夫人卒帥初不變。非布衣不御。非粗糲不甘。蓋余得之見聞者如此。夫稱述艱難。以慰膺者而飭無窮。君子之義也。貢人

以諛而長盜志。亦非君子所宜出也。以文安公創業之勛。而夫人承之。之不易。推察受福離祉之由。亦豈惟型吾鄉哉。雖風天下可矣。然則撰擬祝詩。附諸古義。以博長者之娛。而與編修昆季相劭勉者。宜在於此。不得在彼。於是鄉之人。各賦一詩。別繪爲冊。而國藩和之。且次其語而爲之序。詩曰。

九疑南輿。有濂一谿。在宋嘉祐。大賢所栖。閱祀七百。閔儒纘烈。光輔聖清。爲天喉舌。雖是閔儒。遭家未肥。舒屯倚困。爰有淑妃。宛宛女宗。亦班亦姪。百槃在賞。曰甘如蜜。台星雖閔。婺女孔明。暉澤四獲。宜曜宜康。亦有似君。三館之特。開閣觴賓。以聲母德。有酒如池。有羞孔時。四筵盡醕。各補笙詩。

黎樾喬之兄六十壽序

國家歲逢大慶。嘉與臣下。既褒揚其所生。又令私其尤感者。得推己所宜膺之封。以勲封之。所以廣仁播誼。至無已也。道光二十五年。皇太后七十萬壽。天子大孝錫類。凡一命以上。無不得曲展私親。吾鄉黎樾喬侍御。既榮其先人。因謝己所宜膺者。勲封其伯兄梅村先生。爲中憲大夫。兄嫂爲恭人。明年。函錦軸齎至其家。又明年。梅村君六十生日。侍御謀所以篤兄歡者。乃放蘇氏兄弟以詩相壽之義。自爲一篇。以寓祈禱。又鈞鄉人之老於文者。各賦一章。爲老人光悅。既繪冊以授國藩。而命序焉。且言曰。吾兄

天性樸誠。少依王父。嫻篤幼儀。王父棄養。雖非也。哀毀如成人。及事二親。雖老也。愛慕如嬰兒。親有所欲。不以貧而不致。諸弟有所求。不以瑣而不謀。與人無賢愚。一飲以和。里有爭搆。一諭以理。初若難釋。徐亦枝開節解。怙然各退。故自家之子姓。鄉鄰之衆寡。無不沐其誠。服其直。所之亦之焉。有役則趨焉。吾嫂陳恭人。祇順幼恭。羣女師慕。蓋侍御爲余述者如此。近世以來。士大夫相與爲縣遁之言。縣遁者。設與之論東方。則泛稱西事以應之。又變而之北。或變而之南。將東矣。則詭辭以遁之。虛縣其語。而四無所薄。終不使其機牙。一相抵觸。友朋會合。咨寒而問暄。同唯而共諾。漠然不能相仁。臣下入告。則擇其進無所拂。退無所傷者言之。一有不妥。終不敢言。一時率爲孤懸。善遁之習。背怨向利。所從來深已。往者辛丑壬寅之際。海國不恬。侍御日夜憂維。傾智倒慮。思效片語以補萬一。國藩頗感其誠。又嘉其直。今卽侍御所稱梅村君者。觀之。以里巷雀鼠之小怨。無關於己之端。且竭誠以行直道如此。况於身有言責。而目擊艱大者乎。昔司馬相如讓巴蜀之民。不能急公冒義。而歸咎於父兄之教不先。然則侍御慷慨樸質之風。亦可知其所自來矣。君之仁於鄉者如彼。教其弟子以施於邦國者又如此。其造福於物。蓋未有量。豈論區區一身之康強久視者哉。余嘗侍御之壽。其兄有道。既推明其所以。而因以旁及乎薄俗之不可常。

使覽者有警焉。

曹穎生侍御之繼母七十壽序

往余讀後漢書列女傳。竊怪范氏自誇體大思精。而不達於修史之義。蓋司馬氏創立紀傳。以爲天地之所以不做者。獨賴有偉人焉。以經緯之。故備載賢君賢相。瑰智瑋材。謂若而人者。皆以倫次乾坤。法戒來葉。而范氏乃取數女子廁其閒。於經世之旨何與焉。且其所載。如桓孟之流。皆門內庸行。無絕特可驚之迹。抑又不足述。私蓄此疑久矣。既而思之。天下者。合億萬家以成天下者也。一家之中。男職外。女職內。其輕重略相等。而女子所處。往往有艱難迫隘。處之曲當。卽日用飲食之恆。雖神聖當之。不能越乎其軌。然則婦女有可稱述。固不宜聽其幽隱而不彰。則范氏立篇之意。誠亦不爲無見也。同年友曹穎生侍御之繼母李太恭人。未笄而歸贈公禹川先生。歸五年而寡處。贈公之仕江西。旅臺如癩。其沒也。責負如山。太恭人盡徹服御。壹償宿逋。既歸櫺。堂上老姑年八十矣。欲以夫喪入告。則重傷姑心。乃詭稱遷官遠郡。外則箴說侍姑。內則推胸茹痛。其視侍御兄弟。戒敕而違嚴。逾所生者倍焉。願望而慰喜。逾自得者倍焉。侍御爲詞臣。無日不厲以本原之學。官諫垣。巡視輦轂。無日不申傲之。以君恩之不易。案牘之不可以漫慮。國藩嘗卽是求之。豈所謂門內庸行無絕特可驚者。

邪。抑艱難迫隘。處之曲當。神聖不能越其軌者邪。今年春。爲太恭人六十七生日。鄉之後進年家之子。相與作爲。祝詩以致祈禱。而命國藩序其端。末世稱誦女史好道。其奇特者。或有割臂徇身之事。駭人聽觀。而苦節之婦。貞持數十年。冰蘖百端。兢兢細務。反不得與彼激烈者。速一日之聲譽。參觀竝論。久暫難易。較然可辨。自范氏創立女傳。厥後晉魏諸史。皆踵爲之。率以奇特相勝。苟以新耳目而止。而門內庸行。恭儉劬苦。反或置而不道。使高者慕義。而過激常者無稱。而不知勸。而後知范氏之識。猶有見於古聖人正家之大原。而未可深爲譏議也。余既承同人之屬。爲叙述其匡略。而因以明夫至庸至難之道。不事畸異。爲修史傳列女者訓焉。

楊母張孺人七十壽序

予既與湘潭袁漱六編修爲篤古之交。又申之以婚姻。於是通知其內外戚好。與其賢懿長者之行。歲在戊申某月。爲編修之妻之母楊母張孺人七十生日。編修來告曰。往予家居。歲時慶燕。則鞠脰捧觴爲尊者壽。今官挂朝籍。而外姑既耄。不克前獻一會。於心喟焉。擬爲詩一章。遙展私忱。祝其彊飲彊食。深長難老。使妻之兄弟歌之。以侑其親。子如隲余。則請爲叙述作詩之意。而併致之。對曰。敬諾。編修遂言曰。外姑。吾邑張顧堂先生之孫。幼隨祖父汾州。同知任。張故巨室也。年二十。歸我外舅武陵楊介亭先

生先生之父雲齋公官邳州知州。外舅姑竝侍官所。邳州君之爲政。掣鉅釐。細秋豪必躬。傾身從公。凡私家之務。外焉委之介亭先生。內焉委其賢配劉太宜人。而外姑實贊襄之矣。外姑賞姑之勞。伐夫之劬。先衆手而作。後一家而息。飲饌旨甘。非親調不以進。囊筐瑣雜。非手鑄不以告。由是闔署疏戚。必是之爲倚。僕婢必是之爲服。邳州君既罷官。家湘潭。旋捐館舍。介亭先生以哀毀得心疾。或旬歲不省人事。而劉太宜人亦以年邁羸弱。不時病作。外姑兩侍湯藥。夙嚴莫戒。既煩且殆。未幾而太宜人棄養。介亭先生亦貞疾不瘳。沈廢二十餘年。外姑飾性篤終。畢慮自支。自藥餌以及諸奇珍產。凡可以衛夫之病。亡所不致。自己身以及子女之者。凡所以損家之故。亡所不齎。蓋其行誼之稱於人者。大率類此。國藩窺觀世祿之家。習佚崇奢。安坐而不事事。其端多起於婦人。孺人以張氏之子。室於楊氏。張氏屢葉承明。青赤之綬數十。孺人祖父皆爲外吏。叔父經田巡撫貴州。憇田守衢州。憇田官教諭。而楊氏以宰相尙書之後。華轂高蓋。世不絕人。孺人內外名家。履豐薦盛。其勢宜日卽驕靡。乃惇謹樸懿。壹法乎貧薄遠慮者之所爲。可謂秉心塞淵。較然拔乎塵滓者也。其膺多福。不亦宜乎。編修之爲是詩。亦頗表其履泰思約之德。而推原其壽康之由。故余爲敘述大凡。亦以忝居婚媾之末。欲使吾家女子。聞此風範。知所效法焉。

曹西垣同年之父母壽序

予自道光乙未。以公車應禮部徵。卽與同年友曹君西垣相善。時則有若鄭君敦謹。鄒君振杰。金君樹榮。王君永時。鄧君庭栴數輩。皆朝夕聚處。醉飽驩虞。意氣丰盛。明年各報罷歸去。又二年戊戌。予成進士。假歸一載而後還朝。西垣亦再返再上。不常處京師。然予與西垣未嘗而歲而不相遇。在京師未嘗五日而不見。見未嘗不深語。未嘗偶有射志也。夫人情多溺於所同。而蔽其所不見。與野人道巖廊纓紱。則茫然而駭。與世祿之子語米鹽艱苦之事。則倦聽而思臥。予與西垣皆貧士也。自先世忠厚之積。田家耕織之勩。閭里歲時問遺之狀。兩家大率相類。故常抵掌稱道。彌瑣細而彌津津焉。西垣之稱其親壽樓先生也。以爲勤無隙休。儉無毛棄。推讓舅弟。卻肥而取瘠。教督孫子多苛而少寬。稱其母柳太孺人也。以爲奉事舅姑。勺水必親嘗。鞠育五子。寸縷必手製。皆與吾父母之行若合符契。以是西垣於諸同年中尤昵好矣。竊嘗慨夫世之馳逐於名位者。營營焉而未自有已時。予豈不知其指歸謂何。方寸之口。一日之需無幾。七尺之軀。一歲之靡無幾。不必名位而後能給也。而人皆曰。爲榮親計。夫親之所賴於子者。定省甘旨。疾痛苛癢。請席請衽。亦不必名位而後能給也。求而不得。遠遊遲歸。而父母之年加老焉。至於衰髦而心思一見其子。而口不言者。

往往然也。人坐不察耳。國藩竊祿冒利。去家十年。卽西垣羈留京輦。亦越七載於茲。此又吾兩人所每懷內疚。而未敢須臾忘者也。歲在戊申。西垣以教習宗室子弟期滿。天子用爲縣令。將歸覲其親。適直先生及太孺人六十壽辰。同年鄭鄒諸君。咸爲詩贈送。而屬國藩序之。予乃追朔夫歷年之交契。因概論事親之道。在此不在彼者。以勸西垣。安居而弗出。而誌予之愧焉。霽樓先生及柳太孺人聞之。其亦陶然而盡一觴也夫。

王靜菴同年之母七十壽序

國藩嘗讀孝經。竊歎仲尼所備之孝。與今之爲人子者之從事。則不侔矣。其言自天子以至庶人。其爲道各不同。蓋古者諸侯世國。大夫世家。士之子恆爲士。農之子恆爲農。貴有常尊。賤有定等。是以人各安其分而事其親。而無敢妄干。後世以制科爵人。或布衣且莫而至公卿。於是人子感恩以祿仕尊其親。而父母亦惟恐其子終身庶人。而亟望其進取。微幸躁競之徒。皆得藉口於榮親之說。此今之言孝。與古之道。異者一矣。經又曰。立身行道。顯名於後世。古之所謂名者。有孝悌之實。達乎州巷。播乎上下。稱其內行。無虧焉爾。後世輕德術而右文藝。雖有會閔之行。不敵帖括之工。之馳譽速也。一藝之能。一文之善。至薄也。而國人稱願。父母亦嘉許焉。否則聞譽不著。父母不忻。此今之言孝。與古之道。異者二矣。居今之日。而悖

俗從古。不藉祿與名而悅其親者。雖賢者有所不能。賢者之異於衆人。獨能於祿與名之外。別敦古人之至行。以自力於門以內而已。同年友王君靜菴。惇樸而愿懿。自其少時。聞望已傾輩流。既成進士。官水曹。所謂祿與名。亦既兼得。而其內行肫焉。常若不足。奉母楊太宜人。在官夙閤而莫勤。言警而行揚。每食。母以將子。子以慈母。未嘗不展轉盪劬。每寢。未嘗不再三周察。爲予稱太宜人德。自相夫教子。以及娣姒僕婢。澣濯刀匕之微。未嘗纖末而不述。言及贈君東堂先生之遺事。未嘗不嗚噎。語太宜人少歲飢寒黽勉之狀。未嘗不茹喟無窮也。余以是敬之。處今之世。競逐於聲利之場。而其所事。豈合乎孝經之道。固吾靜菴之自厲乎。抑太宜人之敕於子。而施於家者。有以軼乎恆俗萬萬矣。今歲十一月。爲太宜人七十生日。同人多爲祝詩。屬國藩敘其端。余以素欽靜菴之至行。不敢以未識陳長者之前。因慨論夫古今言孝之變。以勸靜菴。亦以自策於隱微焉。

孫鼎菴先生六十壽序

程子有言。科舉之學。不患妨功。但患奪志。蓋學者之始業於制舉之文也。未嘗不稽經辨義。求肖於聖人之言。以得有司之一當。其志猶射者之在鵠。無惡於君子也。其後熏心仕宦。外以印綬饜其心目。內習一切苟得之術。猶挾寸餌以釣巨魚。既得則弁其綸竿而棄之。曩時稽經辨義之志。乃

大爲纍纍若若者之所奪。此先儒所用爲慨然也。通州孫鼎菴先生。早學而績文。其於六經之蘊。百氏精義之說。亦既轍其庭而據其席矣。乃屢應舉而不售。十進於省試。五上於春官。僅而得償。一似汲汲於科舉者。及其既得。則絕意仕宦。去之唯恐晚焉。其所求者。正鵠反身之道。而所棄者。紛華溺心之場。是豈非志定不奪之君子。軼於末流萬萬者哉。人之意量相去。什伯千萬。至不齊也。鈞是試於科目也。或爭榮一時。儉以攫取富貴。或謀慮深遠。爲積累無窮之計。各蓄所懷。若背馳焉。先生之先人。自高祖以下。兩世成名進士。官中外各有聲。先生念非發憤特達。則無以趾前美而啓後光。於是既自繩於學。復篤敎其子。先日出而與。後雞鳴而息。寢有誠食有警。迨甲午歲。與嗣君蘭檢學士。同舉於鄉。而刻厲不改。既而學士官詞曹。屢操文柄。門下士以百數。而先生猶不改。又數年。以甲辰得雋禮部。投絨歸去。高臥林下。宜可少弛矣。而自繩以課孫者。卒帥初而不改。窺其意。以爲不得有司者之甄采。終無以驗吾學之果成與否。而子弟少年桀驁之氣。非繩之以帖括繁重之業。終無以內於程範。而上紹累葉詩書之澤。於此見先生之意量爲何如。豈與夫尋常試於科目者。比竝而論短長哉。今年十月。爲先生六十年生日。同人各爲祝詩。彙書成帙。屬國藩序其端。余與學士同登乙科。又忝翰林後輩。幼承庭訓。聞家大人之論。急於科舉。

而澹於仕宦者。又與先生之識趣相類。故撥其大者著於篇。冀以博長者之歡娛。若其刑於家而式於鄉。醇德穆行。所以昭令問而膺多福者。雜見於同人詩歌中。非甚緒要。遂不及云。

江岷樵之父母壽序

道光二十有九年春正月。吾友江君岷樵。以縣令之官浙江。將行。告別於常所交知。其色若歎焉。內疚。或問之曰。得百里而長之。以子之才。行子之志。天下之至裕也。吳越湖山。天下之至怡也。而子歎焉。疚者。何也。岷樵曰。古者。學而入官。非以官學也。吾智術短淺。無以澤人。一負疚。吾父今歲年齒七十。吾母六十七矣。舍晨昏之養。而從事簿書。其或不職。又諠之羞。二負疚。抱此二者。吾奚以自克。於是交知感其意。既以言贈別。又別爲歌詩。致祝於封翁一峯先生。與陳太孺人。願長者眉壽無替。以尉薦遊子孺慕之心。既編次成冊。乃屬國藩序其端。蓋先生之少。則貧乏甚矣。無田以爲賴。乃授徒而內其執贖之儀。口敝而手疲。昕警而夕戒。終歲之入。以十之六。仰事堂上。而中分其四半。以爲俯畜之需。半以急鄉里之義舉。邑中立賓興會。以贍寒士省試之資。行鄉約以殲妖賊之反側。皆先生發之。其赴義也。蹈人之所不敢爲。而其自奉也。極世之所不能堪。太孺人承闕緝匱。壹秉夫志。或累歲食粥。而舅姑甘旨甚渥也。國藩與岷樵知好以來。爲余

稱述者數數矣。人情莫不耽逸而惡勞。饜富貴而羞貧賤。至學道之君子。不然。或忍飢甘凍。寔於原顏。而其中坦然。有以自愉。或峨冠曳綬。呵前衛後。而憂思展轉。若日夕不能自安者。彼各有其志也。南面而君一邑。息動而雷震。頤指而風行。僕從一怒。百姓重足。識者固當自惕。不當自憚。而浙水東西。自辛壬海上之役。創夷未復。有司者。又刮其脂而吮其血。譬若醫者。撫積瘵之人。有不覺頰而思所振之。豈情也哉。岷樵自被命以後。詎賢而訪友。思其不逮。而虞其墮職。惴惴焉內疚無已。此與先生之安貧自樂。其志趣同耶。否耶。吾聞岷樵之需次入京師也。先生屬曰。吾不願女。以美官博封誥。無使百姓唾罵吾夫婦足矣。如此。見君子之教子。視世俗相去何如。而岷樵所以娛親而養志者。宜何道之從哉。諸君子之爲詩。依於古人。戢穀難老之誼。所以祝禱先生。與太孺人。至周且厚。余乃略述先生平日學道之意。以期岷樵之篤信而謹守。而因以博長者之鑒。凡居官而言養親者。覽吾斯文。亦將有所興起焉。

陳仲鸞同年之父母七十壽序

天之生賢人也。大氏以剛直葆其本真。其回枉柔靡者。常滑其自然之性。而無以全其純固之天。卽幸而苟延。精理已銷。恆榦僅存。君子謂之免焉而已。國藩嘗采輯國朝諸儒言行本末。若孫夏峯。顧亭林。黃梨洲。王而農。

梅勿菴之徒。皆碩德貞隱。年登耄耋。而皆秉剛直之性。寸衷之所執。萬夫非之而不可動。三光晦。五岳震。而不可奪。故常全其至健之質。躋之大壽。而神不衰。不似世俗孱懦。豎子。依違孺忍。偷爲一切。不可久長者也。同年生陳君仲鸞。與余交十餘年。每相與議論。平生慷慨不撓。或品第當世人倫。意所不可。睥睨譏切。無所復忌。同人或謂仲鸞居吏部曹司。身處卑冗。更事未深。宜其嚮嚮不訕。若移置要地。稍稍練習文法。亦且破觚而爲圓矣。旣而仲鸞果以考第。入直軍機。而憲直發憤。芒角森然。會不減其曩者之舊。吾乃私怪生民剛直之性。其稟之有厚有薄。未可以一概度量也。聞輒與仲鸞語。家世之詳。及太公太母之行。仲鸞爲余言。封翁蔭召先生。生而伉爽。屢經艱險。履之如夷。遇人有心所不許。雖豪貴人。必唾棄之。卽心之所許。雖孤賤卑賤。必引而翼之。愈窮阨。愈禮敬與鈞。自親族州閭。皆服其誠信。遠近紛難。就之決遣。凡所論斷。久而輒應。封母高太恭人。祇順悖篤。尊尙節義。蓋皆有剛直之風。然後知仲鸞之激烈不阿。雖受性獨厚。亦其稟之庭闈者。歲漸月染。涵濡之久。而不自知也。人固視乎所習。朝有嬖嬰之老。則羣下相習於詭隨。家有骨鯁之長。則子弟相習於矩矱。倡而爲風。效而成俗。匪一身之爲利害也。今年八月。爲先生暨太宜人七十七生日。年家之子。同官之良。咸稱觴仲鸞之邸第。作爲詩篇。以祝難老。屬國藩爲

之序。余乃略述平昔與仲鸞言論大指。以著先生之節概。因推國初諸儒。以剛直而享大年者。爲先生致善禱之誼。亦使世之君子。聞之而有所警焉。

季仙九師五十壽序

粵以庚子之年。建寅之月。我仙九夫子大人。奉命視學浙江。門弟子等。攜侯芭之酒。薦顯父之蒲。恭饒於國門之外。清風在道。與從無譁。擊節而歌。林木鏗其振韻。刺船一去。海濤起而移情。是歲九月。爲夫子五秩壽辰。乃復謀郵陳皇邸。遙慶龐褱。以祝史之微言。希君子之善禱。奚斯頌魯。麥邱祝齊。斯事雖細。不可闕也。獨是二首六身。乃藝林之陳語。交梨火棗。亦仙界之浮詞。使徒侈說長生。撥張繁祉。比附陀移之國。揣侔兜率之天。文勝則史不其諛矣。若第羨聲華之盛。誇遭遇之隆。則無雙之譽。久齊聲於許慎。稽古之力。宜蔑視夫桓榮。中朝大官。咸詢以今事古事。海內英彥。早仰爲經師人師。醜縷稱揚。抑又贅矣。夫葆真純固。當推其致此之由。美意延年。要識其本原之量。毋諛毋贅。請得而言。今夫連抱之材。經雪虐風饕而成用。步光之劍。因千辟萬灌而稱神。從古至今。偉人畸士。莫不劬勞撼頓。忍性動心。何者。精神以磨鍊而強。智慮以艱危而邃。夫子承廉吏之門風。屬紹庭之多故。揚太尉代傳清德。朱仲卿家靡餘財。昔橋蔭之尙依。已曩

空之欲取。既而槐花強踏。桂樹初攀。跋浪南圖。出門西笑。陸生遠適。鳩鶴之品。望斯高。伯樂難逢。驊騮之霜。蹶屢蹶。由是以吳中才士。爲國子先生。黃甲看人。青氈作客。守生涯於麤繪大布。嘗世味於朝齏莫鹽。開筐而觀。殘羹多於做服。借車而出飛埃。盛於同雲。蓋至壬辰年。以第二人及第。而前此之抑塞屈蟠。非一日矣。然且不概於心。彌貞於道。刀無厚而善藏。玉有輝而待賈。此我夫子之歷練也。若夫雙騶稱娛。四牡旣征。采東岱之琳。民傳南宮之衣鉢。藥籠儲於江右。竹箭采於會稽。英蕩持衡。旋回舞袖。斯固時人所震盪。今昔所同矜也。而夫子翺翺如畏。髦髦殫思。巨眼澄空。初心辛苦。魚龍夜冷。燒銀燭以照遺珠。桃李春開。灑金壺而濡甘露。其於外也。砥節首公。樹聲示肅。潁川文學。能爲執俎之容。魯國諸生。半在門牆之內。修明雅術。實竭勳勞。今春去浙之前二日。猶指鬢髮示國藩曰。昔校士臨淄。猷爲靡盬。既勤三載。遂見二毛。異時歸自浙東。此旣旣者殆皓然矣。鞅掌獨賢。周詩有北山之什。苞苴不竭。漢使無南越之裝。此我夫子之靖共也。聖朝廷試詞臣。數年一舉。夫子再登上考。游陟崇階。蘇頌爲文。書史防其脫腕。相如作賦。天子幸其同時。中外人士。亦旣傾風而仰鏡。企采而翹華矣。而乃進思退思。大讓小讓。下問不恥。多聞闕疑。懼書馬之訛。慎覓雌之辯。早朝罷則陳書徧覽。夜漏深而吟事方酣。一字未安。較輜銖於同

輩。片長必獎。假毛羽於後生。推之石奮家風。過路馬而必軾。晏嬰儉德。衣狐裘而累年。此我夫子之敬慎也。昔者崔邠側帽。潘岳奉輿。母養之隆。稱爲盛事。彼皆鄰於寵飾。未必篤於屬離。我夫子行不違仁。恩能錫類。感枯魚之銜索。諒有賴之在河。陟帖載瞻。萬里而白雲無極。循陔言采。三春而愛日常暉。曩者瞻依。今茲孺慕。殊恩旣被。令問斯皇。朱壽昌五十之年。效萊子而添綵戲。衛尚書八座之母。有中丞以問起居。敦牟卮匱。龍爲炙而玉爲酒。嬾星卿月。前有輝而後有光。猶復喜懼交深。形聲密察。幾同廁隴之親繆。無改菽水之昔歡。此我夫子之孝思也。夫瑞玉常堅。蘊蓄者久也。戶樞不敝。勤動者恆也。慎戒必恭。聖有謨訓。大德必得。古有明徵。準斯四者。可以言壽矣。國藩醉翁門下之人。補闕春官之士。良苗不實。有負煙鋤。庸櫟非材。會經月斧。金丹許換。共絳帳以聆音。玉署叨陪。乃霓裳之同詠。遙想錦樹山高之地。黃花酒熟之天。籌添望海之樓。弧設重雲之會。官吏黎收而拜。門人繼屬而來。習瓠葉者五百人。祝靈椿以八千歲。何其盛也。繫匏有職。負笈難從。徒瓦奏而桴宣。莫捧觴而僕爵。區區此志。能不懷哉。道阻且長。溯洄在西湖之水。光遠有耀。蒨蔚瞻南極之星。鋪張洪算。彤飾龐祺。知有能者。匪所許矣。

求闕齋記

國藩讀易至臨而喟然歎曰。剛侵而長矣。至於八月有凶。消亦不久也。可畏也哉。天地之氣。陽至矣。則退而生陰。陰至矣。則進而生陽。一損一益者。自然之理也。物生而有耆欲。好盈而忘闕。是故體安車駕。則金輿鑣衡。不足於乘。目辨五色。則黼黻文章。不足於服。由是八音繁會。不足於耳。庶羞珍膳。不足於味。窮巷甕牖之夫。驟膺金紫物。以移其體習。以蕩其志向。所盜扼而不得者。漸乃厭鄙而不屑御。旁觀者以爲固然。不足訾議。故曰。位不期驕。祿不期侈。彼爲象箸。必爲玉杯。漸積之勢然也。而好奇之士。巧取曲營。不逐衆之所爭。獨汲汲於所謂名者。道不同。不相爲謀。或貴富以飽其欲。或聲譽以厭其情。其於志盈一也。夫名者。先王所以驅一世於軌物也。中人以下。蹈道不實。於是爵祿以顯馭之。名以陰驅之。使之踐其迹。不必明其意。若君子人者。深知乎道德之意。方惡名之既加。則得於內者日浮。將恥之矣。而淺者譁然驚之。不亦悲乎。國藩不肖。備員東宮之末。世之所謂清秩。家承餘蔭。自王父母以下。並康彊安順。孟子稱父母俱存。兄弟無故。抑又過之。洪範曰。凡厥庶民。有猷有爲有守。不協於極。不罹於咎。女則錫之福。若國藩者。無爲無猷而多罹於咎。而或錫之福。所謂不稱其服者歟。於是名其所居。曰求闕齋。凡外至之榮。耳目百體之耆。皆使留其缺陷。禮主減而樂主盈。樂不可極。以禮節之。庶以制吾性焉。防吾淫焉。若夫

令聞廣譽。尤造物所靳予者。實至而歸之。所取已貪矣。况以無實者攘之乎。行非聖人而有完名者。殆不能無所矜飾於其間也。吾亦將守吾闕者焉。

新甯縣增修城垣記

道光二十有七年秋八月。襟人李世德雷再浩。爲亂於湖南之新甯。有司檄遠近。有能禽賊。予白金五百兩。於是吾友江忠源。岷樵應募。部鄉兵縛賊送官司。取所謂五百金者。歸獻堂上。爲太公壽。太公曰。長吏以賞罰驅民。矯而不受。是墮上之信也。資人之力而專其利。是矜己之廉也。信墮。無以馭衆。廉刑。無以立身。二者有一。將必不可。吾邑城垣傾圮久矣。若捐此金以興修。官必嘉之。衆必和之。衆與而功易集。城完而民得安枕。此十世之勳也。岷樵從太公言。乃歸金於官。而上其議。長寶道兵備使者楊公。聞之大悅。亦輸助五百金。知寶慶府事某公。知新甯縣事某公。各捐若干金。以助役。邑之士夫耆長。亦鼓舞輸財。爭先輦運。兵事之後。刻日興工。人人如鷲鳥之願治其巢也。大抵天下行省所隸。各有邊區。與他省所隸相際。去會垣動以千里。往往萬山叢薄。歧徑百出。奸人亡命。嘯聚其中。伺隙而爲變。捕之此則逃之彼。鳥鼠奔竄。不可窮詰。或攻破山城。據爲窟穴。輒以號召叛徒。聲生勢長。相望也。若鄖陽際陝西。湖廣之交。南贛際江西。福建

之交。以前明原傑王守仁之才。經略數年。僅而得安。而南山老林際三省之交。嘉慶教匪之役。喪師糜餼。乃至不可勝計。新甯亦山國也。實處湖南廣西之交。匪人煽結。卵育其間。瞰蕞爾之山城。而欲據而有之。屢屢矣。往在道光十六年。藍正樽以一亡賴揭竿竊發。幾欲墮城而殺守吏。會不一紀。李世德雷再浩踵而逞命。豈不以下邑孤遠。城郭不完。有以誨盜而起亂萌哉。如又不從而修葺之。數歲以後。餘孽復滋。將思一逞於我。此垣墉之卑窳者。可長恃之以爲晏然乎。於是岷樵以二十八年二月舉工。先治城之四門。有樓歧然而高。有闔儼然而堅。赤白煥然而改其舊。遂次第興築。雉高於前者幾尺。培而厚者幾尺。補缺垣若干丈。增睥睨若干都。計土工幾千幾百。石工幾千幾百。金木之工幾千。費錢幾百萬。以二十九年某月畢役。自是有可守之險。寇賊不敢規以爲利矣。岷樵之來京師也。屬余敘其顛末。俾後之守土者。不時繕治。無苟毀成功云。

槐陰書屋圖記

吾師江陰季先生。自名其寢舍曰槐陰補讀之室。而屬人爲之圖。圖成於道光癸卯之夏。時先生方官內閣學士職。思簡易曰補讀云者。以爲績學不夙。仕優而後補之。謙退之詞也。是年冬。先生視學安徽。三年還朝。則已掌吏部。或攝戶部。又督漕於潞河。釐鹽於天津。蕩滌田賦。積虧於兩浙。庶

政倥偬。刻無暇晷。閒遂有巡撫山西之命。於是先生手圖而告國藩曰。吾昔名吾居室而圖之也。將以讀吾書也。今五六年閒。腐精於案牘。做形神於車塵馬足。曩之不逮。竟不克補。則今之悔。又果可補於後日乎。子爲我記之。志吾疚焉。國藩嘗覽古昔多聞之君子。其從事文學。多不在朝班而在仕宦遠州之時。雖蘇軾黃庭堅之於詩。論者謂其汴京之作少遜。不敵其在外者之殊絕。蓋屏居外郡。罕與接對。則其志專。而其神能孤往橫絕於無人之域。若處京師浩穰之中。視聽旁午。甚囂而已矣。尙何精詣之有哉。我朝大儒林興。號爲邁古。然如睢州湯公。儀封張公。江陰楊公。高安朱公。臨桂陳公。合河孫公。數賢人者。大抵爲外吏之日多。宦京朝之日少。卽在京朝。其任職也專。其守法也簡。亦常日有餘光。人有餘力。今六部科條之繁。既三倍於百年以前。而先生之所歷。或一身而兼數職。一歲而更數役。每夕丑初趨離宮。待漏盡午而後返。曹官白事判牘。莫夜不休。又以其閒賓接生徒。宴會寮友。伺隙以求終一卷焉而不可得。視數賢人者之處京朝時。勢固不侔矣。此先生所用爲憮然也。今者先生持節山西。政成而神暇。盡發遺編以補素願。蓋將與數賢人者。角其實而爭其光。而國藩忝竊高位。乃適蹈先生之所疚。往者不可償。來者不可必。故略述時事。令異世官朝籍者有考焉。

養晦堂記

凡民有血氣之性。則常翹然而思有以上人。惡卑而就高。惡貧而覲富。惡寂寂而思赫赫之名。此世人之恆情。而凡民之中。有君子人者。常終身幽默。闐然深退。彼豈生與人異性誠。見乎其大。而知衆人所爭者之不足深較也。蓋論語載齊景公有馬千駟。曾不得與首陽餓孳。絮論短長矣。余嘗卽其說推之。自秦漢以來。迄於今日。達官貴人。何可勝數。當其高據勢要。雍容進止。自以爲材智加人萬萬。及夫身沒觀之。彼與當日之廝役賤卒。汚行賈豎。營營而生。草草而死者。無以異也。而其間又有功業文學。獵取浮名者。自以爲材智加人萬萬。及夫身沒觀之。彼與當日之廝役賤卒。汚行賈豎。營營而生。草草而死者。亦無以異也。然則今日之處高位而獲浮名者。自謂辭晦而居顯。光氣足以自振矣。曾不知其與眼前之廝役賤卒。汚行賈豎之營營者。行將同歸於斲盡。而豪毛無以少異。豈不哀哉。吾友劉君孟容。澁默而巖恭。好道而寡欲。自其壯歲。則已泊然而外富貴矣。既而察物觀變。又能外乎名譽。於是名其所居曰養晦堂。而以書抵國藩爲之記。昔周之末世。莊生閔天下之士。澁於勢利。汨於毀譽。故爲書戒人以闇默自藏。如所稱董梧宜僚壺子之倫。三致意焉。而揚雄亦稱炎炎者滅。隆隆者絕。高明之家。鬼瞰其室。君子之道。自得於中。而外無所求。飢凍不

足於事畜而無怨。舉世不見是而無悶。自以爲晦。天下之至光明也。若夫奔命於烜赫之途。一旦勢盡意索。求如尋常窮約之人而不可得。烏覩所謂高明者哉。余爲備陳所以。蓋堅孟容之志。後之君子亦觀省焉。道光三十年歲在庚戌冬十月。

湘鄉縣寶興堂記

自古開國之主。以武功龕定禍亂。而繼體蒙業之君。恆以文德致太平。如漢如魏。如宋如陳。如拓拔魏如高齊。如唐如明。其第二世嗣爲帝者。皆諡曰文。我朝龍興遼瀋。太祖以神武肇基。其製造國書。右文布化。郊廟齋戒。諸大典。多成於太宗文皇帝之世。蓋武以開之。文以守之。干戈方興。未遑雅教。非其志有未逮。亦其時會有不得兼者也。咸豐二年。粵賊洪楊之徒。旣已踰嶺而北。由湖湘而犯江漢。長驅東下。入金陵而據之。遂北寇河朔。東躡瀛碣。西擾汾晉。中原糜沸。我湘鄉寶興始興義旅。轉戰於兩湖。江西。廣西。廣東。河南。安徽諸行省。所在破敵克城。聲威烜然。號曰湘勇。湘勇之名聞天下。一時宿將。如羅忠節公。王壯武公。李君續寶兄弟。蕭君啓江。劉君騰鵬。趙君煥聯。蔣君益澧。及余弟國荃輩。皆以仁勇爲士卒所親附。歷久而不渝。蓋武功之懋。非他州縣所可望。而及秦漢稱山西出將。考之安定。天水。隴西諸郡。會不能敵今日之一縣。可謂盛矣。其官斯土者。則有朱侯

孫誥。唐侯逢辰。黃侯醇熙。賴侯史直。又皆一時賢俊。有循良之績。與邦人
士講求吏治將略。互相稱美。訥合無間。同明相照。同氣相求。何其翕應者
與。咸豐癸丑。唐侯臨莅茲邑。倡捐助餉。練勇防堵。越二年。申詳大憲。奏請
增廣文武學額。聖恩加增。永爲定額。人爭頌唐侯之功不衰。是年天下士
會試於禮部。湘鄉獨無人赴部應試。唐侯喟然曰。湘鄉之武。非無文也。今
或無一士與於春官之試。豈余之不德。不足以與文教歟。抑軍興久而生
事絀。公車之欲北者。不足於資歟。於是捐金若干。買七都田六十二畝。爲
賓與公費。又勸諭士民。捐買田宅若干。以子午卯酉年租。入爲會試旅費。
寅申巳亥年租。入爲鄉試途費。辰戌丑未年租。入爲歲科試卷費。置興賓
堂。擇廉正者經紀之。立條明約。既簡既堅。以期久遠。自唐世長吏設賓主。
陳俎豆。備管絃。行鄉飲酒禮。歌鹿鳴之詩以餞士。差具前古興賢之義。今
猶略存其法。獨不得與計吏偕。士或起白屋。無所資藉。則剗廉捐義。媿爲
一切。苟以集事無匱乏。枉吾尺以求一日之直。彼有所迫而然也。湘鄉山
邑。多狷介自守之士。唐侯禮賢惠衆。所以愛士者甚重。則士之所以自待
者。愈不得輕。入無仰事俯畜之累。出無金盡裘敝可憐之色。搏心壹志。以
道於君子之道。而委蛇以隱射乎有司者之程度。境裕而神暇。事半而功
倍。然猶有失焉者。蓋什而不能以一二耳。方今大難削平。弓矢載囊。湘中

子弟忠義之氣。雄毅不可遏抑之風。鬱而發之於文。道德之宏。文章之富。將必有震耀寰區。稱乎今日之武功。而又將倍焉蓰焉者。余雖衰鈍。尙庶幾操左券於此。請以右券責之。

聖哲畫像記

國藩志學不早。中歲側身朝列。竊窺陳編。稍涉先聖昔賢魁儒長者之緒。駑緩多病。百無一成。軍旅馳驅。益以蕪廢。喪亂未平。而吾年將五十矣。往者吾讀班固藝文志。及馬氏經籍考。見其所列書目。叢雜猥多。作者姓氏。至於不可勝數。或昭昭於日月。或煙沒而無聞。及爲文淵閣直閣校理。每歲二月。侍從宣宗皇帝入閣。得觀四庫全書。其富過於前代所藏。遠甚。而存目之書。數十萬卷。尙不在此列。嗚呼。何其多也。雖有生知之姿。累世不能竟其業。况其下焉者乎。故書籍之浩浩。著述者之衆。若江海然。非一人之腹。所能盡飲也。要在慎擇焉而已。余既自度其不逮。乃擇古今聖哲三十餘人。命兒子紀澤。圖其遺像。都爲一卷。藏之家塾。後嗣有志讀書。取足於此。不必廣心博覽。而斯文之傳。莫大乎是矣。昔在漢世。若武梁祠。魯靈光殿。皆圖畫偉人事蹟。而列女傳亦有畫像。感發興起。由來已舊。習其器矣。進而索其神。通其微。合其莫。心誠求之。仁遠乎哉。國藩記。

堯舜禹湯。史臣記言而已。至文王拘幽。始立文字。演周易。周孔代興。六經

炳箸。師道備矣。秦漢以來。孟子蓋與莊荀並稱。至唐韓氏。獨尊異之。而宋之賢者。以爲可躋之尼山之次。崇其書以配論語。後之論者。莫之能易也。茲以亞於三聖人後云。

左氏傳經。多述二周典禮。而好稱引奇誕文辭。爛然浮於質矣。太史公稱莊子之書皆寓言。吾觀子長所爲史記。寓言亦居十之六七。班氏閱識孤懷。不逮子長遠甚。然經世之典。六藝之旨。文字之源。幽明之情狀。粲然大備。豈與夫斗筭者。爭得失於一先生之前。姝姝而自悅者哉。

諸葛公當擾攘之世。被服儒者。從容中道。陸敬輿事多疑之主。馭難馴之將。燭之以至明。將之以至誠。譬若御駑馬登峻坂。縱橫險阻而不失其馳。何其神也。范希文司馬君實。遭時差隆。然堅卓誠信。各有孤詣。其以道自持。蔚成風俗。意量亦遠矣。昔劉向稱董仲舒王佐之才。伊呂無以加。管晏之屬。殆不能及。而劉歆以爲董子師友所漸。會不能幾乎游夏。以予觀四賢者。雖未逮乎伊呂。固將賢於董子。惜乎不得如劉向父子而論定耳。

自朱子表章周子二程子張子。以爲上接孔孟之傳。後世君相師儒。篤守其說。莫之或易。乾隆中閔儒輩起。訓詁博辨。度越昔賢。別立微志。號曰漢學。擯有宋五子之術。以謂不得獨尊。而篤信五子者。亦屏棄漢學。以爲破碎害道。斷斷焉而未有已。吾觀五子立言。其大者多合於洙泗。何可議也。

其訓釋諸經小有不當。固當取近世經說以輔翼之。又可屏棄羣言以自隘乎。斯二者亦俱譏焉。

西漢文章如子雲相如之雄偉。此天地逾勁之氣。得於陽與剛之美者也。此天地之義氣也。劉向匡衡之淵懿。此天地溫厚之氣。得於陰與柔之美者也。此天地之仁氣也。東漢以還。淹雅無慙於古。而風骨少隳矣。韓柳有作。盡取揚馬之雄奇萬變。而內之於薄物小篇之中。豈不詭哉。歐陽氏會氏。皆法韓公。而體質於匡劉爲近。文章之變。莫可窮詰。要之不出此二途。雖百世可知也。

余鈔古今詩。自魏晉至國朝。得十九家。蓋詩之爲道廣矣。嗜好趨向。各視其性之所近。猶庶羞百味。羅列鼎俎。但取適吾口者。嗜之得飽而已。必窮盡天下之佳肴。辨嘗而後供一饌。是大惑也。必強天下之舌。盡效吾之所嗜。是大愚也。莊子有言。大惑者終身不解。大愚者終身不靈。余於十九家中。又篤守夫四人者焉。唐之李杜。宋之蘇黃。好之者十有七八。非之者亦且二三。余懼蹈莊子不解不靈之譏。則取足於是終身焉已耳。

司馬子長網羅舊聞。貫串三古。而入書頗病其略。班氏志較詳矣。而斷代爲書。無以觀其會通。欲周覽經世之大法。必自杜氏通典始矣。馬端臨通考。杜氏伯仲之閒。鄭志非其倫也。百年以來。學者講求形聲古訓。專治說

文多宗許鄭。少談杜馬。吾以許鄭考先王制作之源。杜馬辨後世因革之要。其於實事求是一也。

先王之道。所謂修己治人。經緯萬彙者何歸乎。亦曰禮而已矣。秦滅書籍。漢代諸儒之所撿拾。鄭康成之所以卓絕。皆以禮也。杜君卿通典。言禮者十居其六。其識已跨越八代矣。有宋張子朱子之所討論。馬貴與王伯厚之所纂輯。莫不以禮爲疏疏。我朝學者。以顧亭林爲宗。國史儒林傳。褒然冠首。吾讀其書。言及禮俗教化。則毅然有守先待後。舍我其誰之志。何其壯也。厥後張蒿菴作中庸論。及江慎修戴東原輩。尤以禮爲先務。而秦尙書蕙田。遂纂五禮通考。舉天下古今。幽明萬事。而一經之以禮。可謂體大而思精矣。吾圖畫國朝先正遺像。首顧先生。次秦文恭公。亦豈無微旨哉。桐城姚鼐姬傳。高郵王念孫懷祖。其學皆不純於禮。然姚先生持論闕通。國藩之粗解文章。由姚先生啓之也。王氏父子。集小學訓詁之大成。復乎不可幾已。故以殿焉。

姚姬傳氏言學問之途有三。曰義理。曰詞章。曰考据。戴東原氏亦以爲言。如文周孔孟之聖。左莊馬班之才。誠不可以一方體論矣。至若葛陸范馬。在聖門則以德行而兼政事也。周程張朱。在聖門則德行之科也。皆義理也。韓柳歐曾。李杜蘇黃。在聖門則言語之科也。所謂詞章者也。許鄭杜馬。

顧秦姚王。在聖門則文學之科也。顧秦於杜馬爲近。姚王於許鄭爲近。皆考據也。此三十二子者。師其一人。讀其一書。終身用之。有不能盡。若又有陋於此而求益於外。譬若掘井九仞而不及泉。則以一井爲隘。而必廣掘數十百井。身老力疲。而卒無見泉之一日。其庸有當乎。

自浮屠氏言因果禍福。而爲善獲報之說。深中於人心。牢固而不可破。士方其佔畢咿唔。則期報於科第祿仕。或少讀古書。窺著作之林。則責報於毀邇之譽。後世之名。纂述未及終編。輒冀得一二有力之口。騰播人人之耳。以償吾勞也。朝耕而暮穫。一施而十報。譬若沽酒市脯。喧聒以責之。貸者又取倍稱之息焉。祿利之不遂。則傲倖於沒世不可知之名。甚者。至謂孔子生不得位。沒而俎豆之報。隆於堯舜。鬱鬱者以相證慰。何其陋歟。今夫三家之市。利析鎔銖。或百錢逋負。怨及孫子。若通闡貿易。環貨山積。動逾千金。則百錢之有無。有不暇計較者矣。富商大賈。黃金百萬。公私流衍。則數十百緡之費。有不暇計較者矣。均是人也。所操者大。猶有不暇計其小者。况天之所操尤大。而於世人豪末之善。口耳分寸之學。而一一謀所以報之。不亦勞哉。商之貨殖同時同。而或贏或絀。射策者之所業同。而或中或罷。爲學箸書之深淺同。而或傳或否。或名或不名。亦皆有命焉。非可強而幾也。古之君子。蓋無日不憂。無日不樂。道之不明。己之不免爲鄉人。

一息之或懈。憂也。居易以俟命。下學而上達。仰不愧而俯不怍。樂也。自文王周孔三聖人以下。至於王氏。莫不憂以終身。樂以終身。無所於祈。何所爲報。己則自晦。何有於名。惟莊周司馬遷柳宗元三人者。傷悼不遇。怨悱形於簡冊。其於聖賢自得之樂。稍違異矣。然彼自惜不世之才。非夫無實而汲汲時名者比也。苟汲汲於名。則去三十二子也遠矣。將適燕晉而南其轅。其於術。不益疏哉。

文周孔孟。班馬左莊。葛陸范馬。周程朱張。韓柳歐會。李杜蘇黃。許鄭杜馬。顧秦姚王。三十二人。俎豆馨香。臨之在上。質之在旁。

畢君殉難碑記

自楚軍之興。忠武公塔齊布。實始以勇名天下。楚人剽悍者。率低首塔公。亦豔稱雲南畢君。塔公每臨敵。負鎗挾弓矢。又令二卒。樹長矛。執曳馬繩。竿以從。其爲器也。四。畢君每臨敵。負鎗腰五十矢。又令卒手蛇矛。持八尺刀以從。其爲器也。亦四。塔公躍馬騰馳。瞋人追從。從輒返鞭之。畢君怒馬直穿賊陣。戒後者無得妄從我。人亦自不敢從也。畢君名金科。字應侯。雲南臨沅人。以征開化苗匪。功敘藍翎外委。署臨沅鎮標外委。咸豐四年。隨副將王國才赴湖北軍營。破賊於天門丁司橋。累敘至花翎都司。十一月。國藩檄令隨塔公攻圍九江。明年正月。賊犯武昌。王國才回軍援鄂。畢君

遂爲塔公所留。其後塔公物故。畢以驍勇冠犇軍。逆會石達開之寇江西也。連陷瑞州臨江等八府。數十州縣。畢君所至。常陷陳克捷。旋爲他部牽率失利。終不得獨錄其功。自九江奉檄而南。以五年十二月破賊於樟樹鎮。明年二月。軍敗失之。自南昌而東。以六年五月。破賊於饒州之章田渡。六月。郡城陷失之。畢君自痛爲他部所累。益發憤。募死士。再入饒州。誓衆曰。今日上岸破賊。不捷。吾不復歸舟矣。一鼓克復府城。饒之耆黎婦孺。見聞者與不見聞者。皆曰。畢君功也。由是賞加呼爾察巴圖魯名號。補臨沅鎮都司。升用游擊。名譽大振。而忌君者。日以次骨。飛謀薦謗。迭相汚染。君提千餘人。當四戰之地。索餉不至。又惡忌者出己上。中夜鬱鬱不自得。常思立奇功以自旌異。會徽池之賊大至。歲暮。士有飢色。有司者責君。能破景德鎮軍。食可圖也。君以正月二日出師。初四日。驟攻景德鎮。入市。乃無一賊。別挈十人。搜剿後街。賊蜂起。從卒亡七人。傷三人。君縱橫擊刺。踐血而出。最後。賊以噴筒環攻君於王家洲。隕焉。年二十五歲耳。閱十有八日。前從傷卒三人者。收得遺屍。又三載。咸豐九年。予弟國荃破賊景德鎮。憑弔畢君殉難之所。而壯士則既死矣。功名之際。有天有人。在己者獨足恃哉。於是伐石以表遺蹟。聲之銘語。俾行路歌之。以永饒人之思。銘曰。

橫目蚩蚩。同出一冶。衆雌無雄。誰是健者。塔公首出。次乃畢君。軀幹雖小。

陳安之倫。匹馬斫陣。萬夫莫當。人心之賊。一矢或傷。內畏媚嫉。外侮強寇。進退靡依。忍尤叢詬。鬱極思伸。矯首翫天。徒飛無翼。或墜於淵。淵則有底。憤則無已。萬代千齡。哀此壯士。

林君殉難碑記

嗚呼。自余倡率楚師。轉戰荆揚二州之域。其閒相從死事者。不可勝道。或貞白無他。誓不相背棄。而慷慨一瞑。志不得少伸。名不耀於當世。愛之而莫能收焉者。尤可悲也。林君源恩。字秀三。四川達州人。道光丁酉科拔貢生。癸卯順天鄉試舉人。咸豐元年。選湖南平江縣知縣。二年。粵賊洪楊之屬圍長沙。其冬。瀏陽匪徒爲亂。明年春。通城匪徒爲亂。三縣者。皆與平江壤接。君詰姦守隘。如防禦水。截然不得蟄盜。江忠烈公才君之爲。既保奏以同知直隸州補用。又以書播告士友。道林君堪軍旅也。會國藩治舟師。檄君募平江勇五百人。以從。四年三月。賊自鄂中南犯。君禦之平江九嶺。果大捷。同官有忌君者。功不得敘。又別撫他事中之。君悒悒。內不能堪。而口獨重滯。嘗發憤。欲一廷辨宿戒。設辭甚具。至則爲衆所嚙害。卒不得發。或反引咎自責。是歲十月。追隨國藩於九江軍次。造次欲有所申理。亦不竟白也。明年春。檄君治湘軍糧臺。歸自廣信。又治塔軍門忠武公糧臺。又佐理鄱湖水師營務。十一月。又攝理陸軍於廬山之麓。姑塘之南。而江西

巡撫文公聞君賢。飛檄調至南昌。付以所募之平江營者。君在廬山。與一二武人爲儔。折節內交。武人益不孫。慢辭侵侮。或稱書生跬步矍矍焉。知戰事。君既痛其獷。又口重滯。卒無以折之。獨夜歎曰。丈夫壹死強寇耳。終不返顧矣。及至南昌。領新軍。乃稍自喜。是時劇賊石達開犯江西。連陷八府五十餘州縣。六年丙辰三月。李元度次青。率師自湖口南來。君與鄧輔綸。彌之。自南昌而東。兩軍會於撫州。疊戰皆捷。人心始定。賊亦糾合列郡醜類。更番擗戰。我軍輒卻之。又至。又大創之。疲極不得休息。秋九月。分軍出攻崇仁。宜黃。適會援賊大至。君竟以十七日戰敗。死之。始君嘗誡其下曰。好相保。吾與若。共命於茲也。至是。衆知君不屈。相從死者三百餘人。君歿二載。咸豐八年四月。官軍克復撫州。又明年。國藩師次於此。弔君殉難之所。尋逝者之白骨。巍然其不可復識矣。於是爲立石以表遺蹟。綴以銘詩。以告於不知紀極之世之一二君子。以達余之耿耿。銘曰。

胡古胡今。強吞弱伏。佞者刀楯。訥者魚肉。文吏賊深。武夫悍激。訥者避之。負牆屏息。忽入戰場。萬馬辟易。士固難料。理固難推。災祥顯晦。孰孰其機。昔聞人述。言出君口。我不知戰。但知無走。平生久要。臨難不苟。大信不盟。堅可鏗金。燒俗所侮。鬼神所斂。精魂遠矣。北斗帝鄉。遺骨莫辨。蔓草茫茫。有欲求之。環此石旁。

湖口縣楚軍水師昭忠祠記

咸豐八年七月。國藩將有事於浙江。道出湖口。廣東惠潮嘉道彭君雪琴。方庀局鳩工。建昭忠祠於石鐘山。祀楚軍水師之死事者。告余具疏上聞。八月疏入。報可。明年七月。國藩將有事於四川。再過湖口。則祠工已畢。祀營官蕭節愍公捷三以下若干人。後楹祀勇丁若干人。其東爲浣香別墅。前曰聽濤眺雨之軒。後曰芸芍齋。齋後傳以小亭。曰且閒亭。亭下有小池。度梁而南。穿石洞東出。曰梅塢。迤西少陟山曰鎮江亭。其西絕高曰觀音閣。閣外曰魁星樓。僧徒居之。又西曰坡仙樓。刻蘇氏石鐘山記。其上憑高望遠。吐納萬景。一草一石。煥然增新矣。當楚軍水師之初立也。造舟始於衡陽。大戰始於湘潭。其後克岳州。下武昌。大破田家鎮。今福建提督楊君厚菴。與雪琴暨諸君子。喋血於狂風巨浪之中。燔逆舟以萬計。轉戰無前。可謂至順。其後官軍深入彭蠡之內。賊乘水獗。大塞湖口。遏我舟使不得出。於是水師有外江內湖之分。內者守江西。外者援湖北。騷然若割肝膽而判爲楚越。終古不得合弁。至咸豐七年九月。攻克湖口。兩軍復合。蓋相持三年之久。死傷數千人之多。僅乃舉之。方其戰爭之際。礮震肉飛。血瀑石壁。士飢將困。窘若拘囚。羣疑衆侮。積淚漲江。以求奪此一關而不可得。何其苦也。及夫祠成之後。裸薦鼓鐘。士女瞻拜。名花異卉。旖旎嗽瑤。江色

湖光呼吸萬里。曠然若不復知兵革之未息者。又何樂也。時平安樂。雖賢者不能作無事之響。時乎困苦。雖達者不能作違衆之驪。欣人心之喜戚。夫豈不以境哉。吾因是而思夫豪傑用兵。或敝一生之力。擲千萬人之性命。以爭尺寸之土。不得則鬱鬱以死者。甯皆憂斯民哉。亦將以境有所迫。而勢有所劫者然也。若夫喜戚一主於己。不遷於境。雖處富貴賤貧。死生成敗而不少移易。非君子人者。而能庶幾乎。余昔久困彭蠡之內。蓋幾不能自克。感彭君新構此祠。有登臨覽觀之美。粗爲發其凡焉。

何君殉難碑記

嗚呼。軍興十載。士大夫君子橫死者多矣。獨吾友何君丹畦。尤深痛不忍聞。自近古以來。未有行善獲禍。如是之烈者也。豈不悲哉。君以咸豐四年五月。由翰林院侍講。上書房行走。出爲安徽徽甯池太廣兵備道。時則安慶暨濱江府縣。淪沒賊中。廬州新立行省。亦陷於賊。副都御史袁公軍臨淮。提督和公。巡撫福公。軍廬州。君當之官。不克南渡。袁公欲資君以兵。西會楚師。福公亦具疏。留君江北。檄君募勇出征。公私匱乏。沮傷百端。最後得二百餘人。率之以西。至霍山。徵集潰兵團勇三千餘人。推誠獎勵。遂以十月二日。大破捻匪李兆受於城東。追至麻埠。又五日。至流波磴。檄商城固始團練堵其北。金家寨團丁禦其東。而自率所部遏其西。捻黨恟懼。李

兆受與馬超江等相繼投誠。挺散脅從。遠近大悅。環三四縣。皆輸豬雞糗糧金錢之屬。聲終宵不絕。先是。大府帥檄君救援廬江。檄未至而城先陷。至是。奉被劾革職之命。軍士懷不能平。雖百姓亦惘惘也。方楚師之出岳州而東也。克武昌。下黃州。破田家鎮。水陸電邁。席卷千里。其後塔齊布羅澤南兩軍。由黃梅南渡。以圍九江。賊循北岸而上。復陷蘄黃。竄武漢。自長淮以南。天柱內外。所在蜂屯。君以孤軍流離。西與楚師不相聞。東與廬州大府隔絕。朝不謀夕。嚙指誓衆。五年正月。進攻蘄水。克之。又分軍克復英山。又殲劇賊田金爵。大府帥以君西征有效。疏令留駐英山。君出師至是。凡八閱月。僅支見銀三百兩。士卒及民團相從者。增至三千人。又益以李兆受新降之衆。無以爲食。居無帳幕。雨無薪木。村郭無居民。遠近無援。傷亡無以爲卹。始十人賦麪一斤。繼而削減半之。既又半之。而賊來益盛。日提飢卒。轉戰不得休。五月十二日。軍敗。徒行泥淖中。鄉民或哀而進食。君雖強自振厲。然慮甚。瘠瘁發體。氣亦少餒矣。李兆受者。故反側持兩端。感君忠勤。不忍遽背負。絕糧既久。怪君無以活之。意望甚。又同時降人馬超江爲匪徒所殺。怨官不能捕誅以抵罪也。則大戚。議爲超江復仇。設位受弔。捻黨畢集。於是安徽河南兩省。皆以兆受復叛入告。而縣令亦懸賞購兆受頭千金。兆受益不自安。匍伏詣君。自陳無他。君撫慰稍稍綏定矣。會

大府帥有密書抵君。教以圖翦叛賊。毋後人。發爲兆受所得。遂陽爲置酒高會。而伏兵戕君於英山之小南門。遺骸殘燬。同遇難者四十七人。咸豐五年十一月初三日也。君諱桂珍。字丹畦。雲南師宗人。道光甲午科舉人。戊戌進士。翰林院編修。丙午。提督貴州學政。旋晉侍講。入直上書房。數抗疏陳軍事得失。推本君德。又采朱子真西山大學之說。傳以己意。引申條列。手繪成帙。隨疏奏進。君之意。嘗以爲聖人者。無不可爲。功無不可就。獨患人不自克。不能竭其心與力之所竟耳。及君出而莅事。飢餓經年。而百戰不息。儻所謂自克者耶。竭吾心與力而不遺者耶。卒其獲禍如是之烈。而或不免身後之餘責。然則爲善者。何適而不懼哉。咸豐十年。國藩屯軍江北。詢君患難馳驅之所。乃立石英山。綴以銘詞。俾來者有考焉。銘曰。飢寒逼身。難顧廉恥。聖主不能安其民。慈母不能撫其子。况於揭竿烏合之徒。亡命歸誠之始。倏順忽逆。朝人暮豕。封豕負塗。積疑張弧。踞牙鉤爪。瘞我閔儒。赤舌燒城。死有餘議。羣毀所歸。天地易位。悠悠之口。難可遽勝。我銘諸石。少待其定。上訊三光。下訊無竟。

箴言書院記

國藩以道光戊戌。通籍於朝。湘人官京師者。多同時輩流。其射策先朝。耆年宿望。凋散略盡。而少詹事益陽胡雲閣先生。獨爲老師祭酒。鄉之人。就

而考德稽疑。如幽得燭。衆以無隕。而詰嗣潤之。亦以編修。趾美名父。迴翔館閣。今兵部侍郎湖北巡撫。海內稱爲官保胡公者是也。少詹君晚而纂弟子箴言十四卷。國藩實嘗受而讀之。自灑掃應對以暨天地經綸。百家學術。靡不畢具。甄錄古人嘉言。衷以己意。辭淺而指深。要使學者自幼而端所習。隨其材之小大。董勸漸摩。徐底於成而已。竊嘗究觀夫天之生斯人也。上智者不常。下愚者亦不常。擾擾萬衆。大率皆中材耳。中材者。導之東而東。導之西而西。習於善而善。習於惡而惡。其始曠焉。無所知識。未幾而騁者欲。逐衆好。漸長漸貫。而成自然。由一二人以達於通都。漸流漸廣。而成風俗。風之爲物。控之若無有。鑿之若易靡。及其既成。發大木。拔大屋。一動而萬里應。窮天人之力。而莫之能禦。先王鑒於此。欲民生蚤慎所習。於是設爲學校以教之。琴瑟鐘鼓以習其耳。俎豆登降以習其目。詩書諷誦以習其口。射御投壺以習其筋力。書升以作其能。而郊遂以作其恥。故其高材。則道足濟天下。而智周萬彙。其次亦不失爲圭璧自飭之士。賈生有言。習與正人居之。不能毋正。猶生長於齊。不能不齊言也。其不然歟。侍郎自開府湖北以來。卽以移風易俗爲己任。自部曲之長。郡縣之吏。暨百執事。片善微長。不敢自暴。而褒許隨之。曰。爾之發見之微。而善端宏大。不可量也。或有過差。方圖蓋覆。譴亦及之。曰。此猶小眚。過是。誅罰重矣。與其

新。不苛其舊。表其獨。不遺其同。上下兢兢。日有課。月有舉。當世推湖北人。才極盛。侍郎則曰。吾先人箴言中。育才之法如此。吾詎能繼述。直什一耳。咸豐十年。侍郎治鄂。六載矣。功成而化洽。又以一湖之隔。吾教成於北。而反遺吾父母之邦。其謂我何。於是建箴言書院。將萃益陽之士。而大淑之。置良田以廩生徒。儲典籍以饋孤陋。寬其涂轍。而嚴其教條。崇實而黜華。賤通而尚介。循是不廢。豈惟一邑之幸。卽漢之十三家法。宋之洛閩淵源。於是乎在。後有名世者出。觀於胡氏父子。仍世育才。肫肫之意。與余小子。慎其所習之說。可以與矣。

修治金陵城垣缺口碑記

道光三十年。廣西賊首洪秀全等作亂。咸豐三年二月十日。陷我金陵。據爲僞都。官軍圍攻。八年不克。十年閏三月。師潰。賊勢益張。有衆三百萬。擾亂十有六省。同治元年五月。浙江巡撫臣曾國荃。率師進攻金陵。三年六月十六日。於鍾山之麓。用地道克之。是歲十月。修治缺口。工竣。鑿石以識其處。銘曰。

窮天下力。復此金湯。苦哉將士。來者勿忘。

靈谷龍神廟碑記

龍於古不列祀典。國有大水。智者不禱。或有旱暵。圭璧祈禳。亦不及之。漢

世儒者以龍能興雲致雨。乃別四時方色爲象。土禹繪績。有禱輒應。其後五龍九龍之堂。侵作祀事興矣。國家褒崇龍祀。祭式祝號。一準王儀。自京師黑龍潭。暨各行省。皆立廟虔奉。甘澤時降。人蒙其蔭。金陵省治之東。有泉曰八功德。水出於鍾山之陽。靈谷之寺。舊有龍神祠。屢獲嘉應。泊兵興祠燬。壇宇蕩然無存。同治六年。自春徂夏。數月不雨。崇禱之術既窮。國藩乃與布政司李君宗義。督糧道王君大經。鹽巡道龐君際雲。先後求諸靈谷之神。四祈而四效。旋叩而立應。最後甘霖滂沛。圻壤膏流。槁苗勃興。嘉蔬蒼蔚。陂澤旁匯。魚鼈謹泳。歲仍有秋。民用康樂。於是乃相與重構斯廟。以報賽而妥靈。焚燎堅致。黜聖無華。取足巖禱獻之儀。酌質文之衷而已。蓋金陵自六代以來。號爲名都。梵宇琳宮。震耀今古。勳威甲第。湧殿飛甍。往往數千百年。遺構尙存。獨至粵賊洪楊之亂。掃地剷除。無復一椽片瓦之留遺。卽靈谷寺屢興屢廢。行無似此次之漸盡者。今龍神廟轟立基緒。而全寺之踵修。名蹟之興復。不知更待何年。易稱龍爲乾德。萬物資始。厥施甚普。自今以往。意者百工雲興。日新月盛。將盡還承平之舊乎。斯固守土之吏所寤寐誠求者也。

金陵軍營官軍昭忠祠記

嗚呼。軍興以來。死事者多矣。而金陵尤爲忠義之所萃云。咸豐二年十二

月。賊陷武昌。漢陽。掠取巨舟萬數。二年正月。蔽江東下。連陷九江。安慶。蕪湖各城。遂破金陵。據爲僞都。城中官紳。與駐防之軍民。並及於難。當是時。天子已命尙榮爲欽差大臣。自湖北逐賊而東。至則城陷已逾旬日。又繼陷鎮江。揚州兩府。而都統琦善。亦以欽差大臣由河南進至揚州。自是後。廣西元從諸軍駐金陵者。號爲江南大營。北來新集諸軍駐揚州者。號爲江北大營。鎮江別屯一軍。則金陵分兵駐之。與揚州之師。相爲犄角。未幾。揚州之賊。分支北竄河南。直隸。金陵之賊。分支西竄江西。湖北。而鎮江之賊。破我營壘。別有粵人爲亂。攻陷上海。其冬。北軍克復揚州。儀徵。臺賊移據瓜洲。四年。督師琦公卒。托明阿接統北軍。五年。江蘇巡撫吉爾杭阿克復上海。移師圍攻鎮江。六年春。南路賊陷甯國。北路賊復陷揚州。托明阿罷職。德興阿接統北軍。旋克揚州。其夏。巡撫吉公戰沒於高資。金陵大營亦陷。督師尙公。退守丹陽。已而病卒。朝廷命和春爲欽差大臣。而命張國樞爲總統。七年冬。南軍克復鎮江。北軍同日克瓜洲。八年。南軍築長圍以困金陵之賊。北軍大挫於浦口。賊陷江浦。天長。儀徵。揚州。六合。張國樞北援揚州。克之。九年。德興阿劾罷。江北不復置帥。以江南大帥兼轄。十年正月。張國樞克九袱洲。二月。皖南羣賊。攻陷杭州。江南遣張玉良援杭。克之。三月。賊破建平。東壩。溧陽。羣萃金陵。攻陷大營。我師潰奔常州。蘇州繼陷。

是後馮子材等堅守鎮江。都興阿等堅守揚州。數年無恙。蓋自咸豐癸丑以迄庚申。耳目衆著之事。大略如此。其餘南軍攻取旁近郡縣。若太平。蕪湖。丹陽。溧水。溧陽。高淳。句容。屢克屢陷。不常。其得失。或北援揚州。江浦。警報朝聞。南師夕渡。而城外賊壘。濱江要隘。亦無月不事攻戰。擲千百性命。以爭尺寸之土。當時中外盛稱江南勁旅。聲威出北軍上遠甚。諸路告急。金陵往往分兵四出援剿。其致敗亦終以此。始至之秋。卽遣虎嵩林馳援上海。既又遣和春赴援廬州。寧國失守。則遣鄧紹良自浙援之。數年。鄧君戰亡。又遣鄭魁士繼之。賊圍衢州。則遣周天受等援浙。賊入延建。又濟師以援閩。近者數百里。遠者二三千。孤軍轉鬪。累月不歸。餽餉乖時。忍饑赴敵。膏塗原野。莫相收卹。而金陵之賊。見我軍遠征者多。居守者少。營壘空虛。炊煙日滅。晝夜謀所以覆我者。咸豐六年。大營失陷。正坐壘闕兵單之故。最後十年之役。則長圍已成。汎地愈廣。我軍分兵救浙。不能遽返。而自浙回竄之賊。皖南江北之賊。十道竝進。乃一發而不可禦。將士方冀合圍之後。犂穴擒渠。策勳有期。不意倉皇潰敗。有如沙飛河決。蕩折南奔。死亡不可勝數。其僅有存者。張玉良收集餘燼。以攻嘉興。以守杭州。至明年。杭城再陷。而金陵大營八萬人者。蕩然無復留遺矣。當諸將屯駐秣陵。向公榮。張公國樞。最負重望。其餘智者竭謀。勇者殫力。亦豈不切齒圖功。思

得當以報國。事會未至。窮天下之力而無如何。彼六七僞王者。各挾數十萬之衆。代興迭盛。橫行一時。而上游沿江千里。亦足轉輸盜糧。及賊勢將衰。諸會次第僵斃。而廣封駮豎。至百餘王之多。權分而勢益散。長江旣清。賊糧漸匱。厥後楚軍圍金陵。兩載而告克。非前者果拙而後者果工也。時未可爲。則聖哲亦終無成。時可爲。則事半而功倍也。皆天也。旣克三載。同治六年之冬。乃建昭忠祠於蓮花第五橋。祀先後死事者同堂而異室。其中一室。祀三年二月江甯初陷時守城殉難之員。其東一室。祀三年至十年城外大營傷亡之員。其西一室。祀城內及江甯七屬紳士。而外郡紳士死於此者。亦與焉。又東一室。祀金陵將領出援各路。死於甯國及浙江等處者。又西一室。祀鎮江及揚州死事之員。鎮江本金陵所分之軍。揚州亦與金陵一體。其後又歸南軍兼轄故也。工旣竣。粗爲記其梗槩。至於歷年戰爭。良將猛士之勞。攻牢保危之策。將具於國史。茲不復備述云。

金陵湘軍陸師昭忠祠記

同治三年六月旣望。大軍克復金陵。國藩至自安慶。犒勞士卒。見吾弟國荃。面顏焦萃。諸將枯瘠。神色非人。蓋盛暑攻戰。晝夜暴露城下。半月而未息。余旣驚痛而撫慰之。乃徧行營壘。周視所開地道。覽戰爭之遺蹟。彭君毓楨。劉君連捷。蕭君孚泗。朱君南桂。相與前導而指示曰。某所某將盡命

處也。某所賊困我之地也。諸所君不備述。吾弟又太息而縷述之。弟之言曰。自吾圍此城。壯士多以攻堅而死。賊於城外環築堅壘數十。大者略與城埒。攢以小營。障以長塙。甃石如鐵。掘塹如川。牢不可拔。我軍以元年五月之初。始克江甯鎮。三叔河。大勝關各壘。二年五月。李臣典等克雨花臺。及南門各壘。劉連捷等會同水師克九洲。中關。下關各壘。其江東橋之壘。則陳湜等於八月克之。上方門。高橋門。七甕橋。土山。方山各壘。則蕭慶衍。蕭孚泗等於九月克之。是時朱南桂亦克博望鎮。趙三元等亦克中和橋。株陵關。至十月。克解溪。隆都。湖墅。而東南剗削略盡。三年正月。彭毓橘。黃潤昌等。乃克鍾山高壘。賊所署爲天保城者也。每破一壘。將士須臾隕命。率常數百人。回首有餘慟焉。其穿地道以圖大城者。凡南門一穴。朝陽至鍾阜門三十六穴。篝火而入地。崖崩而窟塞。則縱橫聚葬於其中。賊或穿隧以迎我。薰以毒煙。濯以沸湯。則趨者倖脫。而慙者就殲。最後神策門之役。城陷矣。而功不成。龍膊之役。功成矣。而死傷亦多。於是歎攻堅之難。而逝者之可憫也。毓橘之言曰。我軍薄雨花臺。未幾疾疫大行。兄病而弟染。朝笑而夕僵。十幕而五不常爨。一夫暴斃。數人送葬。比其反而半瘡於途。近縣之藥既罄。乃巨艦連檣。徵藥於皖鄂諸省。當是時也。羣醫旁午。而僞王李秀成等大至。援賊三十萬。圍我營者數重。我軍力疾禦之。一夕。築

小壘無數。障糧道以屬之。江賊益番休迭進。蟻傳環攻。累箱實土以作櫓。楫挾西洋開花轂。自空下擊。子落則石裂鐵飛。多掘地道。屢陷營壁。凡苦守四十五日。至冬初而圍解。軍士物故殆五千人。會有天幸。九帥獨免於病。日不交睫者月餘。而勤劬如故。雖鎗傷輔頰。血漬重襟。猶能裹創巡營。用是轉危而爲安。靖毅公則病後過勞。竟以不起。九帥者。軍中舊呼國荃之稱。靖毅者。吾季弟貞幹諡也。連捷之言曰。李會解圍去後。率衆渡江。連陷江浦。和州。含山。巢縣。皆我軍新取之城。得而復失。九帥乃分兵守西梁山。遣連捷與彭毓橘輩。救援江北。既解石澗埠之圍。破運漕銅城關之賊。遂偕水師。連收四城。江北大定。劇賊益衰。然我衆死者。亦不可勝數也。南桂之言曰。方金陵官軍圍困之際。同時鮑超之軍。亦困於甯國。水師亦困於金柱關。金柱關者。水陽江及羣湖所自出。蕪湖之藩衛也。九帥乃分兵守東梁山。而遣南桂與朱洪章。羅洪元輩。力扼此關。夾河而與之上下。亂流而相攻。卯而戰。酉而不休。水營捷。陸營或挫。一夕數起。一餐屢輟。凡七閱月而事稍定。百里內外。白骨相望。時聞私祭夜泣之聲。天下之至慘也。於是國荃與諸將並進。稱曰。此軍經營安慶。翦伐沿江諸城。凋喪尙少。獨至金陵而死於攻。死於守。死於疾疫。死於北援巢和。南援蕪湖。太平。乃籌計而不能終。今存者。幸荷國恩。封賞進秩。而沒者抱憾無窮。雞鳴山下。有

賊造府第一區。若奏建昭忠祠。春秋致祭。庶以慰忠魂而塞吾悲耳。國藩具疏上聞。制曰可。黃君潤昌。爰董其事。取有冊可稽者。造神主一萬一千六百三十有奇。無冊者姑闕焉。甫歷三載。楹棟枉橈。牆宇敝墜。同治六年。省中僚友集議。廓而新之。基扃固護。籩豆有嚴。國藩乃追敘所聞於諸君者。而系以詩章。用備樂歌。詩曰。

人無貴賤。天壽賢愚。終歸於死。萬古同塗。死而得所。身殄魂愉。六朝舊京。逆豎所都。濯征十載。莫竟天誅。嗟我湘人。銳師東討。非祕非奇。忠義是寶。下誓同袍。上盟有昊。昊天藐藐。成務實難。祚我百順。阨我千艱。狂寇所噬。刈人如菅。殄厲乘之。積醜若山。偉哉多士。夷險一節。萬死靡他。心堅屈鐵。鑿彼巧偷。守茲貞拙。縷血所藏。后土長熱。卒收名城。獲醜擒王。寵賁冥漠。千嶺馨香。新廟孔赫。彝學將將。天子之錫。烈士之光。

金陵楚軍水師昭忠祠記

咸豐九年。今侍郎彭公玉麟。建水師昭忠祠於湖口。既刻石敘述戰事。又屬余爲之記。維時湖口以下。長江千里。皆賊地也。其明年。金陵官軍潰敗。蘇浙淪陷。國藩奉命總制兩江。乃議設淮揚水師一軍。以黃君翼升統之。又二年。議設太湖水師一軍。以李君朝斌統之。厥後兩君者。皆沿江遶海。以達於蘇松常州諸內河。而上游吳楚之交。惟彭公與總督楊公岳斌之

師羅列如故。咸豐十一年。克復安慶。同治元年。下蕪湖。金柱關。及東西梁山。二年。克九嶽洲。三年。遂克金陵。而蘇州省會。及所屬郡縣。以次廓清。水師皆有力焉。余憫死事者之多。於是又奏建昭忠祠於金陵。以妥將士之靈。蓋自湖口而下。賊中無復大隊。礮船與我角逐水上。然我衆臨敵授命者。往往不絕。若乃高城巨壘。千礮狙伏。陸軍進攻。水師和一。一堞未攀。駢尸山積。或連朝環擊。卒不能下。或創殘滿目。僅收一柵。甚者如九嶽洲之役。攻勦三四日。瀕耗二千人。唱凱於公庭。飲泣於私舍。又或支河小港。扼守要隘。賊以短兵鎗彈。迫我舟師。前者屢僵。後者堅拒。終不得少移尺寸。又或倉卒赴援。內洋行師。如福山之役。輕舟顛簸於海濤颶風之中。須臾沈溺以數百計。此皆耳目昭著。其餘邂逅捐軀。夷傷而不振者。不可勝數也。今東南大定。已逾五年。長江別立經制。水師將士。新故更代。優游無事。欲問數年前戰爭之迹。已罕能言其狀者。况更溯十載以前。若揚公之縱橫江上。出入鋒鏑。以摧方張之寇。彭公之芒屨徒步。以赴江西之急。又孰能道其彷彿。安樂之時。不復好聞危苦之言。人情大抵然與。君子之存心也。不敢造次。忘艱苦之境。尤不取狃於所習。自謂無虞。禮俗政教。邦有常典。前賢猶因時適變。不相沿襲。况乎用兵之道。隨地形賊勢而變焉者也。豈有可泥之法。不敝之制。今之水師。蓋因粵賊之勢。立一時之法。幸底於

成耳。異日時易勢殊。寇亂或興。若必狂於前事。謂可平粵賊者。即可概平天下無窮之變。此非智者所取任也。惟夫忠臣謀國。百折不回。勇士赴敵。視死如歸。斯則常勝之理。萬古不變耳。其他器械財用。選卒校技。凡可得而變革者。正賴後賢。相時制宜。因應無方。彌縫前世之失。俾日新而月盛。又烏取夫顛己守常。姝姝焉自悅其故迹。終古而不化哉。今朝廷開方略之館。戰功將著於信史。不復備述。麤述殉難者之慘。使來者恍然起敬。又因推論兵家之變化無常。用破吾黨自是之見。庶久而知所做畏云。

湘鄉昭忠祠記

咸豐二年十月。粵賊圍攻湖南省城。既解嚴。巡撫張公亮基。檄調湘鄉團丁千人。至長沙備防守。羅忠節公澤南。王壯武公壽等。以諸生率千人者。以往。維時國藩。方以母憂歸里。奉命治團練於長沙。因奏言團練保衛鄉里。法當由本團贖金養之。不食於官。緩急終不可恃。不若募團丁爲官勇。糧餉取諸公家。請就現調之千人。略仿戚元敬氏成法。東伍練技。以備不時之衛。由是吾邑團卒。號曰湘勇。三年春。平土寇於衡山。破逆黨於桂東。其夏。粵賊圍江西省城。國藩募湘勇二千。楚勇千人。羅忠節公輩。率之東援。初戰失利。營官謝邦翰。易良幹等殉難。湘勇之越境剿賊。將領之力戰捐軀。實始於此。余聞而悼之。議立忠義祠於縣城。祀湘人與於南昌之難。

者。其冬。余奉命籌備舟師。乃募湘勇水陸萬人。明年。率之東討。岳州之役。陸兵敗挫。雖旋有湘潭之捷。而湘士中燬。旣而整軍再出。羅公暨李忠武公續賓。率湘勇以從。於是大雋於岳州。克武漢。下蘄黃。破田家鎮。復江西。弋陽。信州。甯州。又以其閒。由江還鄂。掃蕩枝縣。再克武昌。昌省會。咸豐五六年閒。羅李湘勇之名震天下。而王壯武公與劉武烈公騰輝。蕭壯果公啓江。暨巡撫蔣公益澧。皆提湘勇征戰湖北。江西。廣西。廣東等省。所在有聲。然羅公。王公。劉公。遂以六七年閒。先後徂謝。而將士傷亡者。滋益多。前所議建之忠義祠。規制隘庳。不足以嚴典祀。咸豐八年秋。國藩乃與李公具疏會奏。請立昭忠祠於湘鄉。令有司春秋致祭。天子許之。吾邑軍士。沒有餘榮已。未幾而舒城三河之難作。李公殉節。部下死者。殆六千人。國藩私憂。以謂湘中士氣。恐不復振。其後李公之弟勇毅公續宜。重輯部曲。轉戰皖北。張忠毅公揮蘭。及唐總戎義訓輩之師。轉戰皖南。而吾弟國荃。遂以湘士克復安慶金陵兩省。蔣公暨楊公昌濬。亦用湘人平浙江。伐福建。張忠毅公。亦戰沒於閩。東南數省。莫不有湘軍之旌旗。中外皆歎異焉。其西北諸道。則提督劉君松山。追逐擒匪於河南。山東。直隸。征叛回於陝西。甘肅。而按察使陳君湜。防守山西。其西南諸道。則蕭壯果公率師入蜀。而巡撫劉公蓉。屢平蜀寇。總督劉公嶽昭。暨諸湘軍。又自蜀而南入黔。西入滇。

一縣之人。征伐徧於十八行省。近古未嘗有也。當其負羽遠征。乖離骨肉。或苦戰而授命。或邂逅而戕生。殘骸暴於荒原。凶問遲而不審。老母寡婦。望祭宵哭。可謂極人世之至悲。然而前者覆亡。後者繼往。蹈百死而不辭。困阨無所遇而不悔者。何哉。豈皆迫於生事。逐風塵而不返與。亦由前此死義數君子者爲之倡。忠誠所感。氣機鼓動而不能自己也。君子之道。莫大乎以忠誠爲天下倡。世之亂也。上下縱於亡等之欲。姦僞相吞。變詐相角。自圖其安而予人以至危。畏難避害。曾不肯捐絲粟之力以拯天下。得忠誠者起而矯之。克己而愛人。去僞而崇拙。躬履諸艱而不責人以同患。浩然捐生。如遠游之還鄉而無所顧悸。由是衆人效其所爲。亦皆以苟活爲羞。以避事爲恥。嗚呼。吾鄉數君子。所以鼓舞羣倫。歷九州而戡大亂。非拙且誠者之效與。亦豈始事時所及料哉。今海宇纒安。昭忠祠落成有年。而邑中壯士。效命疆場者。尚不乏人。能常葆此拙且誠者。出而濟世。入而表里羣材之興也。不可量矣。又豈僅以武節彪炳寰區也乎。

江甯府學記

同治四年。今相國合肥李公鴻章。改建江甯府學。作孔子廟於冶城山。正殿門廡。規制纒備。六年。國藩重至金陵。明年。荷澤馬公新貽。繼督兩江。廣續成之。鑿泮池。建崇聖祠。尊經閣。及學官之廨宇。八年七月工竣。董其役。

者。爲候補道桂嵩慶。暨知縣廖綸。參將葉圻。旣敕旣周。初終無懈。冶城山顛。揚吳宋元。皆爲道觀。明日朝天宮。蓋道士祀老子之所也。道家者流。其初但尙清靜無爲。其後乃稱上通天帝。自漢初不能革秦時諸時。而湄陽五帝之廟。甘泉泰一之壇。帝皆親往郊見。由是聖王祀天之大典。不掌於天子之祠官。而方士奪而領之。道家稱天。侵亂禮經。實始於此。其他鍊丹燒汞。采藥飛昇。符籙禁呪。徵召百神。捕使鬼物。諸異術。大率依託天帝。故其徒所居之宮。名曰朝天。亦猶稱上清紫極之類也。嘉慶道光中。宮觀猶盛。黃冠數百人。連房櫛比。鼓舞毗庶。咸豐三年。粵賊洪秀全等盜據金陵。竊泰西諸國緒餘。燔燒諸廟。羣祀在典與不在典。一切毀棄。獨有事於其所謂天者。每食必祝。道士及浮屠弟子。并見摧滅。金陵文物之邦。淪爲豺豕窟宅。三綱九法。掃地盡矣。原夫方士稱天以侵禮官。乃老子所不及料。迨粵賊稱天以恫羣神而毒四海。則又道士輩所不及料也。聖皇震怒。分遣將帥。誅殛凶渠。削平諸路。而金陵亦以時戡定。乃得就道家舊區。廓起宏規。崇祀至聖。暨先賢先儒。將欲黜邪慝而反經。果操何道哉。夫亦曰隆禮而已矣。先王之制禮也。人人納於軌範之中。自其弱齒。已立制防。灑掃沃盥有常儀。羹食肴醢有定位。綏纓紳佩有恆度。旣長則教之冠禮。以責成人之道。教之昏禮。以明厚別之義。教之喪祭。以篤終而報本。其出而應

世則有士相見以講讓。朝覲以勸忠。其在職則有三物以興賢。入政以防淫。其深遠者。則教之樂舞。以養和順之氣。備文武之容。教之大學。以達於本末。終始之序。治國平天下之術。教之中庸。以盡性而達天。故其材之成。則足以輔世長民。其次亦循循繩矩。三代之士。無或敢遁於奇袤者。人無不出於學。學無不衷於禮也。老子之初。固亦精於禮經。孔子告曾子。子夏述老。聃言禮之說至矣。其後惡末世之苛細。逐華而悖本。斷自然之和。於是矯枉過正。至譏禮者。忠信之薄。而亂之首。蓋亦有所激而云然耳。聖人非不知浮文末節。無當於精義。特以禮之本於太一。起於微眇者。不能盡人而語之。則莫若就民生日用之常。事爲之制。修焉而爲教。習焉而成俗。俗之旣成。則聖人雖沒。而魯中諸儒。猶肆鄉飲大射禮於冢旁。至數百年不絕。又烏有窈冥誕妄之說。淆亂民聽者乎。吾觀江甯士大夫。材智雖有短長。而皆不屑詭隨以徇物。其於清靜無爲之旨。帝天禱祀之事。固已峻拒而不惑。孟子言無禮無學。賊民斯興。今兵革已息。學校新立。更相與講明此義。上以佐聖朝。匡直之教。下以闢異端。而迪吉士。蓋廩廩乎企嚮聖賢之域。豈僅人文彬蔚。鳴盛東南已哉。

補侍講缺呈請謝恩狀

癸卯八月
初四日

新補翰林院侍講充四川正考官會國藩。爲呈請代奏恭謝天恩事。八月

初三日。接到知會。轉准吏部咨。稱七月十五日。奉旨。會國藩准其補授翰林院侍講。欽此。竊國藩楚省菲材。山鄉下士。西清待漏。慙四術之多疏。東觀校書。尤三長之有忝。本年三月初十日。廷試翰詹。猥以蕪詞。下邀藻鑑。列置優等。授翰林院侍講。沐殊寵之逾恆。俾遷階以不次。旋於六月二十一日。奉命充四川鄉試正考官。溫綸再捧。寸衷之惶悚彌深。使節初持。萬里而馳驅未已。迺復荷高深之寵。俾真居侍從之班。愧屢沐夫鴻施。會無墜露輕塵之報。惟勉勤乎蛾術。益凜臨深履薄之思。所有國藩感激下忱。理合呈請代奏。叩謝天恩。謹呈。

討粵匪檄

爲傳檄事。逆賊洪秀全。楊秀清。稱亂以來。於今五年矣。荼毒生靈。數百餘萬。蹂躪州縣。五千餘里。所過之境。船隻無論大小。人民無論貧富。一概搶掠罄盡。寸草不留。其擄入賊中者。剝取衣服。搜括銀錢。銀滿五兩而不獻賊者。卽行斬首。男子日給米一合。驅之臨陣向前。驅之築城濬壕。婦人日給米一合。驅之登陣守夜。驅之運米挑煤。婦女而不肯解腳者。則立斬其足。以示衆婦。船戶而陰謀逃歸者。則倒抬其屍。以示衆船。粵匪自處於安富尊榮。而視我兩湖三江被脅之人。曾犬豕牛馬之不若。此其殘忍慘酷。凡有血氣者。未有聞之而不痛憾者也。自唐虞三代以來。歷世聖人。扶持

名教。敦敘人倫。君臣父子。上下尊卑。秩然如冠履之不可倒置。粵匪竊外夷之緒。崇天主之教。自其僞君僞相。下逮兵卒賤役。皆以兄弟稱之。謂惟天可稱父。此外凡民之父。皆兄弟也。凡民之母。皆姊妹也。農不能自耕以納賦。而謂田皆天王之田。商不能自賈以取息。而謂貨皆天王之貨。士不能誦孔子之經。而別有所謂耶穌之說。新約之書。舉中國數千年禮義人倫。詩書典則。一旦掃地蕩盡。此豈獨我大清之變。乃開闢以來。名教之奇變。我孔子孟子之所痛哭於九原。凡讀書識字者。又烏可袖手安坐。不思一爲之所也。自古生有功德。沒則爲神。王道治明。神道治幽。雖亂臣賊子。窮凶極醜。亦往往敬畏神祇。李自成至曲阜。不犯聖廟。張獻忠至梓潼。亦祭文昌。粵匪焚郴州之學宮。毀宣聖之木主。十哲兩廡。狼藉滿地。嗣是所過。郡縣先燬廟宇。卽忠臣義士。如關帝岳王之凜凜。亦皆汚其宮室。殘其身首。以至佛寺道院。城隍社壇。無廟不焚。無像不滅。斯又鬼神所共憤怒。欲一雪此憾於冥冥之中者也。本部堂奉天子命。統師二萬。水陸並進。誓將臥薪嘗膽。殄此凶逆。救我被擄之船隻。拔出被脅之民人。不特紓君父宵旰之勤勞。而且慰孔孟人倫之隱痛。不特爲百萬生靈報枉殺之仇。而且爲上下神祇雪被辱之憾。是用傳檄遠近。咸使聞知。倘有血性男子。號召義旅。助我征勦者。本部堂引爲心腹。酌給口糧。倘有抱道君子。痛天主

教之橫行中原。赫然奮怒。以衛吾道者。本部堂禮之幕府。待以賓師。倘有仗義仁人。捐銀助餉者。千金以內。給予實收部照。千金以上。專摺奏請優敘。倘有久陷賊中。自拔來歸。殺其頭目。以城來降者。本部堂收之帳下。奏授官爵。倘有被脅經年。髮長數寸。臨陣棄械。徒手歸誠者。一概免死。資遣回籍。在昔漢唐元明之末。羣盜如毛。皆由主昏政亂。莫能削平。今天子憂勤惕厲。敬天恤民。田不加賦。戶不抽丁。以列聖深厚之仁。討暴虐無賴之賊。無論遲速。終歸滅亡。不待智者而明矣。若爾被脅之人。甘心從逆。抗拒天誅。大兵一壓。玉石俱焚。亦不能更爲分別也。本部堂德薄能鮮。獨仗忠信二字。爲行軍之本。上有日月。下有鬼神。明有浩浩長江之水。幽有前此殉難各忠臣烈士之魂。實鑒吾心。咸聽吾言。檄到如律令。無忽。

祭韓公祠文

維年月日。具官某。謹以清酒庶羞。致祭於先儒昌黎韓子之神。維先生之明德。宜祀百世。文人學子。皆所喻頤。而禮典所載。獨配享先師孔子西廡。他無特祀。國藩前官翰林院詹事府。皆有先生祠堂。今承乏禮部。亦祀先生於官署之西北隅。而皆稱曰土地祀。國藩履任之日。敬謹展謁。乃神像之旁。有先師孔子之木主。儼然在焉。竊以土地之稱。非經非訓。古者。惟天子得祭天地。諸侯則社以祭。士大夫以下。成羣立社。多者二千五百家。或

百家以上。小者二十五家。蓋土爰稼穡。民生所賴。凡食毛踐土者。皆得祭以報功。義固然也。自唐以下。有城隍之祀。世傳張說所爲祭文。及李陽冰碑記。舊已。今天下。由京都以至行省郡縣。皆立廟以妥城隍。原易有城復于隍之占。禮有八蜡水庸之祭。高壘深池。以捍民患。推社之義而爲之立祀。理亦宜之。獨土地之祀。不可究其從始。國藩所居之鄉。或家立一神。或村置一廟。大抵與古之里社相類。而京師官署。尤多有土地祠。往往取先代有名德者祀之。先生之生。未嘗莅官禮部。今歿已千年。所謂神在天上。如水之在地中。無所不際。而謂僅妥侑於一署之內。丈室之中。如古所稱社公云者。亦以黷慢甚矣。若先師孔子。則先生所誦法終身者也。先生嘗羨顏氏得聖人以爲依歸。若深自歎恨。不得與於弟子之列。而無知者。乃位孔子於尊容之旁。先生若果陟降在茲。其必蹙然不安也。國藩瞻禮之餘。詢諸胥吏。舉不辨其由來。舊例。春秋以蕭薌奉祀先生。國藩亦且循沿習之常。以致吾欽嚮之私。惟於孔子之位。措置失宜。則不敢須臾蹈故。懼于大戾。謹奉木主。蒸香焚之。既敬告所以。因爲之詩歌。使工歌以入聲。冀先生之神。安休於此。不腆之誠。庶爲歆鑒。詩曰。

皇顛造文。萬物咸秩。尼山纂經。懸於星日。衰周道窮。踵以秦灰。繼世文土。莫究根芽。炎劉之興。炳有揚馬。沿魏及隋。無與紹者。天不喪文。蔚起巨唐。

誕降先生。掩薄三光。非經不效。非孔不研。一字之愜。通於皇天。上起八代。下垂千紀。民到於今。恭循成軌。予末小子。少知服膺。朗誦遺集。尊靈式憑。濫廁秩宗。載瞻祠宇。師保如臨。進退維僂。位之不當。宣聖在旁。大祀躋僊。前哲所匡。我來戾止。神其安佑。敬奠椒漿。式告來葉。

祭湯海秋文

赫赫湯君。倏焉已陳。一呷之藥。拯我天民。豈不有命。藥則何辜。死而死耳。知君不悔。道光初載。君貢京朝。狂名一鼓。萬口囂囂。春官名揭。如薰斯標。奇文驟布。句驚字梟。羣兒苦誦。自暝達朝。上公好士。維汪與曹。大風噓口。吹女羽毛。舐筆樞府。有銛如刀。儕輩力逐。一虎衆徠。曹司一終。稍遷御史。一鳴驚天。墮落泥滓。坎坎郎官。復歸其始。羣雀款門。昨鼃之市。窮鬼噴沫。婢歎奴恥。維君不羞。復乃不求。天脫桎梏。放此詩囚。伐肝蕩肺。與命爲仇。被髮四顧。有棘在喉。匪屈匪阮。疇可與投。忽焉狂走。東下江南。秦淮夜醉。笙吹喃喃。是時淮海。戰鼓殷酣。洮夷所躡。肉阜血潭。出入賊中。百憂內慘。寅歲還朝。左抱嬌娥。示我百篇。兒女兵戈。三更大叫。君泗余哦。忽瞠兩眸。曰余乃頗。瀝膽相要。斧門拞鎖。嗟余不媚。動與時左。非君謬尋。誰云逮我。王城海大。塵霧滔滔。惟余譜子。有隙輒遭。聯車酒肆。袒肩載號。煮魚大嘍。宇內兩鬢。授我浮邱。九十其訓。韓悍莊誇。孫卿之醜。慶義鬪文。百合逾奮。

俯視符充。其言猶糞。我時譏評。君會不愠。我行西川。來歸君母。一語不能。君乃狂罵。我實無辜。詎敢相下。骨肉寇讐。朋遊所訝。見豕負塗。或張之弧。羣疑之積。衆瘖生膚。君不能釋。我不肯輸。一日參商。萬古長訣。吾實負心。其又何說。凡今之人。善調其舌。君則不然。喙剛如鐵。鋒棱所值。人誰女容。直者棄好。巧者興戎。昔余痛諫。君嘉我忠。會是不察。而丁我躬。傷心往事。淚墮如糜。以君毅魄。豈曰無知。鬼神森列。吾言敢欺。爵子一滴。庶撼我悲。

歲暮設奠告王考文

嗚呼。維我王考。神馭徂賓。赴音來止。今越五旬。嗟我王考。令德淵爍。體秉純剛。內含貞淑。往在戊歲。小子南旋。扶依驪戲。左右盂盤。亥年歸朝。載違色笑。行履過差。辟咎無詔。十年京國。官繫私牽。轉蓬浮徙。莫傍本根。吾皇錫類。褒封父祖。志養則虧。虛榮奚補。三載寢疾。侍藥不躬。遂淪慈照。允蹈鞠凶。我父我母。潛焉在疚。小子雖頑。不懲罪悔。疇昔提耳。彝訓猶存。十墮一守。痛懇難論。歲將更始。時物遷變。敬薦庶羞。祇希僂見。尙饗。

正月八日王考生辰告文

嗚呼。王考棄養。二月有奇。音容緬邈。豈復可追。疇昔笑聲。千山震裂。今則無聞。厚地藏熱。游子遠宦。萬里關山。葬不執紼。斂不憑棺。期服去位。古有行者。竊祿不歸。拘牽苟且。上春初吉。敬遇誕辰。敢蠲嘉旨。用薦苾芬。爰循

國典。遂釋齊衰。在天靈爽。儻獲惠來。尙饗。

丁卯四月求降雨澤告辭

自客歲之仲秋。歷冬春而孟夏。閱八月而不雨。嗟羣生之凋謝。哀江南之黎庶。困兵燹以十霜。邑何民而不尋。野何土而不荒。慶中興於甲子。甫得脫乎兵戎。悉敝賦而北伐。又杼柚之屢空。逮丙寅之夏末。高郵罹乎災凶。運隄滄其潰決。沒六縣於波中。漲泗沂與淮湖。縉千里爲澤國。飽人肉於蛟魚。烏鳶下而爭食。嗟赤子其何辜。實百官之不職。會水患之未平。又旱災之相偪。麥有秋而失望。稻有種而不入。千村聚而皇皇。老幼環而悲泣。痛蚩蚩者無罪。罪乃在於疆臣。完無德而竊位。上干怒乎百神。或屋漏之隱隱。或秕政之不仁。將舉錯之失當。抑冤獄之未申。宜躬被乎離罰。胡移禍於吾民。爰致齋而惕厲。叩蒼昊而陳詞。審余身之有咎。甘百死而不辭。爲斯民而請命。冀歲事之無虧。沛甘霖而溥降。膏百穀以蕃滋。萬彙蔚而回春。農民忻而相告。今不慮乎旱饑。後無傷乎秋澇。感神惠之孔時。終傾誠而圖報。

廣東嘉應州知州劉君事狀

會祖永昌。皇贈武功將軍。祖開泰。康熙甲午科舉人。皇贈武功將軍。父文燦。雍正甲辰科武進士。山東兗沂鎮總兵。君諱廷枏。字讓木。河間獻縣人。

縣學廩生。乾隆四十五年舉於鄉。五十二年丁未成進士。時大學士和坤當國。有中貴人與君同里同姓來告曰。相國知子。欲一燕見。能往。吾導子。詞曹可致也。君謝不能。卒以知縣歸班候選。嘉慶二年。謁選。得廣東信宜縣。明年之官。五年。攝惠州河源縣事。河源藍阿和。博羅陳爛展四。永安會鬼六。聚徒煽亂。君至縣三月。卽擒阿和。且請於惠州知府伊秉綬。及總督吉慶曰。陳會不靖。時日久矣。今阿和就擒。翦其左翼。賊所負恃。以羅浮山爲窟耳。若裹糧入山。窮力四捕。陳會可弋也。不聽。後二年。遂有陳爛展四。會鬼六之亂。總督欽猷死。知府擬遣戍。而君以前請。得不坐。六年。量移潮州揭陽縣。揭亦劇邑也。莠民何阿常。李阿七。倡爲天地會。聯八十餘鄉。分爲兩股。各二萬人。君單騎赴賊中。以編查保甲爲名。暗圖其山川形勢。出入門戶。夜宿賊巢。示以不疑。八年正月二日。率兵討阿常。賊徒七千人。屯於赤巖頭。我兵截五百。去賊五里而營。夜聞吹螺四面。衆譁曰。賊至矣。君令曰。敢動者死。於奔中設子母礮。佐以鳥鎗。近則發擊之。驛人與火。闐無聲影。賊不知虛實。竟引去。旦日。率所部登山。適會他軍亦至。乘勝追奔。焚賊三巢。阿常投首。阿七聞之。益糾餘孽。謀再舉。君從健卒六十餘人。四晝夜。馳行九百里。追及長樂。擒之。其年八月。又擒海盜姚阿麻。於是。有送部引見之命矣。大抵嶺以南。物產蕃阜。風氣殊於中土。諸洋互市。環貨日至。

奸民逐利。起徒手至百萬者。往往而有。奇技妖物。旁出不窮。乾嘉之間。淫侈亡等矣。猶有不逞之徒。乃爲盜賊以自恣。小者劫奪。大者叛亂。窮則入海亡命。爲吏者莫敢誰何。苟以諱飾偷安。羣盜無憚。日以充斥。故君官廣東。所至以緝捕爲先。而大吏亦倚君如左右手。引見之命既下。大吏以捕務孔棘。留不得行。又二歲。勦獲潮陽鄭阿明。陸豐李崇玉。乃行。阿明會匪衆號四萬人。崇玉海盜。號二萬也。入見。以功升知州。歸。復任揭陽。十四年。徙知南海縣。是時兩廣總督百公齡。治尙威猛。懲刈奸宄。夜半。召君入密室。告曰。吾欲有所縛。子能之乎。君曰。何也。百公曰。洋商吳阿三。阿三者。大猾。資積巨萬。多干國紀。君歸。寅夜部勒胥役。不告所之。曰。從余行。余曰。取之。曰。斬。斬之。至。破門擒阿三。比還署。關說者數輩。賂金三萬。至雞鳴。增五萬。平明十萬。不可卒致。阿三於法。張保之寇海也。自嘉慶初年始也。後與其黨郭學顯內噬。學顯來降。保亦思歸義。首鼠進退。百公欲遣使納降。君請行。百公曰。多與爾衛。辭曰。彼真降。使者無害。其僞也。雖衛何益。從二僕。棹小舟。徑至海口。賊數百艘。交刃成列。保出。衆叱曰。跪吾王。曰。吾天子命吏。豈屈若曹。且編民之不得。何王也。卽晚保曰。吾以女爲海上豪傑。乃效匹夫。怒目恐人。劉某畏死者。不來此矣。保立起揖君。卽屏左右。因語之曰。十年來粵中巨寇。若藍阿和。何阿常。鄭阿明之屬。海盜若姚阿麻。李崇

玉。今有存焉者乎。保默然曰。亡有。然今且奈何。崇玉以殺掠平民之故。尙伏天誅。况保縱橫海上十餘年。殺二總兵。一參將。三游擊。罪在不宥。今棄衆內首。則魚肉耳。曰。汝何慮之淺也。朝廷奔包海外。荒蕪萌生。削逆育順。以勸來者。猶懼不繼。若革面自效。不訾之慶也。學顯貸死。有明徵矣。且智莫大於知幾。行莫虧於食言。禍莫酷於殺已降。女視劉某。豈誘人傲功者哉。吉之與凶。在此須臾。保再拜曰。謹受教。乃拉送君歸。七日而張保障。十九年。補嘉應州知州。噓枯養瘠。相濡以澤。二十四年。攝廉州知府。簡法阜施。一如嘉應。君子於是知君之爲政。又能視地強弱。以時其威愛也。嘉慶二十五年。年六十八以卒。子六人。曰鳳翹。曰一士。曰鳳翼。曰書年。今官翰林院編修。曰逢年。曰其年。今官翰林院庶吉士。謹具歷官行義。牒付史館。俾傳循吏者采覽焉。

書何母陳恭人事

恭人陳氏。道州何文安公之第三子婦。吾友子敬同年紹祺之配也。文安公家訓謹嚴。內外執業。各有常程。箕帚槃盂。皆有定位。閨門之內。肅若朝廷。廖夫人刻勵儉勤。終身不御紈綺。恒豆之奉。敲薄等於寒門。凡醢醢菹脯。酒餌漿醴之屬。皆率婦輩躬自治之。手營而口授。不徵諸市。不假諸僕婦。然諸婦或出外州華族。往往不中程度。獨陳恭人道州舊姻。推髻布裙。

爲之益勤。其德益善。舅姑亦益愉懌。以謂巨室而不失儒士之風。卽家之
祥也。道光二十三年。子敬以舉人就職知縣。援例選雲南廣通縣。旋改江
蘇同知。又以知府調歸浙江。補台州府。保升道員。署糧儲道。咸豐十年二
月。粵賊入浙圍杭州。子敬時方奉使至江蘇。眷屬寓清泰門。先是。恭人生
子輒不育。有女子子三人。子敬旣以仲兄子慶治爲嗣。諸妾又生子慶銜。
慶熙。慶全。城破。恭人乃屬家人而詔之曰。主人遠出。吾遭此變。何氏名門。
男女長幼。義不可爲賊辱。遂先縛二子沈於池。外孫女二歲。捱吭喫之。旋
引一繩。與外姻朱孺人。同時自經。無幾何。援兵四至。賊衆驚遁。老僕柳春
自外歸。見慶治腦後。被斫六創。其妻邢氏。被割兩耳。而皆未死。諸妾避入
民舍得免。所沈二子慶銜。慶熙者。池中水淺。亦俱無恙。兩自經者。朱孺人
氣絕。而恭人解救得生。蓋縊二時許而不殊。自言有兩紅燈前導。忽見天
日而醒。略無所苦。由是遠近歎異。或曰。恭人半生長齋誦經禮佛。茲其效
也。或曰。孝友之門。禍將攬而常解。堅確之德。遭物不懼。莊生所謂骨節與
人同。而犯害與人異。其神全也。杭州寇退。子敬返自江蘇。外而征繕。以佐
軍府。內而補苴。以甯穉弱。旦而劬。宵而不休。夏而疾。秋而不瘳。於是引病
投劾。挈家還湘。卜居於長沙之東鄉。藝稻而豢魚。善鄰而訓子。恭人亦菲
食敝衣。相與拮据。以保遲暮。子敬旣逝。恭人則兼綜內外。賓祭之供。耕讀

之業。囊篋鎔錄之故。造次紛乘而不眩。齒逾七十而不知疲。鄉之人以是服其恪也。同治十年九月無疾而終。去杭州城陷之時。十有二年矣。軍興以來。橫死者多矣。臨難而倖脫者。亦恆有之。獨何氏一門。慷慨就義。而俱獲生全。陳赫人事尤近於神異。赫人之夫之兄子貞先生。告余以狀。因爲述其梗概。其他懿行。不備論云。

漢陽劉君家傳

余旣銘劉君椒雲之墓。其兄子世墀。復寓書抵余。季父之行義。蒙甄敘大凡。其爲學之次第。不幸遺書未成。世墀之愚。不可驟曉。其孤世圭尤幼。卽他日長大。終無以窺尋先人甘苦。季父執友。莫篤先生。先生若哀吾昆弟。卽別爲家傳。鑄諸家牒。所以不死季父而貺我劉宗。益厚無已。蓋椒雲之學之自得於中者。有不可瀑諸文字者矣。其致功之迹。國藩實親見之。而親討之。稱述以詔其諸子。吾之職也。始椒雲嘗治方輿家言。以尺紙圖一行省所隸之地。墨圍界畫。僅若牛毛。縣以圓圍。府以叉牙。交錯成圍。不爲細字識別。晨起指誦曰。此某縣也。於漢爲某縣。此某府某州也。於漢爲某郡國。凡三四日而熟一紙。易他行省亦如之。其於字書音韻。及古文家之說。亦皆刺得大指。其後益及天官推算。日夜欲求明徹。銳甚。適會喪父。勞憂致疾。乃稍稍自惜。慨然有反本務要之思矣。竊嘗究觀夫聖人之道。如

此其大也。而歷世令辟。與知言之君子。心奉程朱氏爲歸。豈私好相承以然哉。彼其躬行良不可及。而其釋經之書。合乎天下之公。而近於仲尼之本旨者。亦且獨多。誠不能違人心之同然。遽易一說以排之也。自乾隆中葉以來。世有所謂漢學云者。起自一二博聞之士。稽核名物。頗拾先賢之遺而補其闕。久之。風氣日敝。學者漸以非毀宋儒爲能。至取孔孟書中心性仁義之字。一切變更舊訓。以與朱子相攻難。附和者既不一察。而矯之者惡其恣睢。因並蔑其稽核之長。而授人以詬病之柄。皆有識者。所深憫也。椒雲初從事於考據。卽已洞知二者之弊。旣更憂患之餘。尤自斂抑。退然若無以辨於學術也者。默識而已矣。於是。以道光二十八年二月。棄其所官之國子監學正。決然歸去。以從政於門內。積其謹以嚴父母之事。以達於凡事。無所不嚴。積其誠以推及父母之所愛。若所不愛。無不感悅。其又不合。則考之禮經。覈之當世之會典。以權度乎吾心自然之則。必三審焉而後已。病中爲日記一編。記日日之細故。自責絕痛。將卒。又爲遺令。處分無憾。蓋用漢學家之能綜核於倫常日用之地。以求一得當於朱子。後之覽者。可以謂之篤志之君子邪。抑猶未邪。國藩爲發其擇術之意。旣告其諸子。亦與異世承學者質證焉。

葛寅軒先生家傳

先生諱大賓。字興森。號寅軒。葛姓先世。自蘇州徙居湖南。遂爲湘鄉人。會祖世珍。祖生霞。父長祜。世有隱德。先生幼而端重。動止異於常兒。長而益自檢制。終日危坐。言笑不妄。盛夏不袒。焚香把卷。默識恬吟。性耐劇飲。雖醉不亂。或久無酒。終亦不索。怡然若有以自得也。乾隆之末。海內文人。以靡麗辯博相高。昆明錢南園侍御澧。獨以剛方立朝。視學湖南。以正誼篤行風楚之人。所取率多端士。先生既受知於錢公。補縣學生員。益折節自繩。跬步必衷於古訓。學徒游其門。則先教之以忠孝大節。下至飲食起居。出處語默。取與豪釐。各有法式。從則貞吉。違則恥辱。至不得齒於人。聽者往往汗下。常稱錢公及其師湘潭朱聲越之學行。以勉其門人弟子。弟子高第者。我先大夫竹亭公。及陳君道著籍最早。晚歲又得黃君星平。鄒君魯道。皆登甲科。知名於時。各秉師說。以教授鄉里。傳嬗廣續。篤守矩矱。吾鄉風氣淳古。士人循循。不敢僭越禮法。以自放其亡等之欲。論者以爲淵源一本於先生。彼南面民上司政教之柄。其流風餘韻。得比於一諸生。被人之深且久。如此者。會幾人哉。先生四歲喪父。哀毀若成人。年十三。值父忌日。出主以祭主。動仆地。粉面剝落。脫去葛字。微露周字。蓋木工飾周姓廢主爲之者也。先生痛哭引咎。告墓易主。卜日乃祭。事寡母左孺人也。鉅細必躬。疾必嘗藥。生徒有醵。必歸以獻。嘗隆冬獨坐心動。急自館所馳歸。

入門。數呼母。母方與仲兄負棺後院。聞聲趨出。而屋後山忽頽。壓坐席破碎。里之人以謂先生誠孝之所感也。母沒。勺飲不入口者五日。既葬。衰服終其身。腰以下無復存寸縷。服闋。每祭必泣。盡哀以爲常。兄弟五人。既分居矣。逋負纍纍。無以自存。先生則請於母。復同居如初。卽有所入。絲髮不以自私。兄弟沒。則比其喪。無子。爲之立後。羣從諸婦。各受職業。室以大和。道光二年。朝廷開孝廉方正之科。有司舉先生應詔。或勸之一詣京師謁選。先生曰。是可以躁求耶。十二年壬辰十月二十九日。卒於家。春秋七十有一。配左氏。前卒。時先生年才三十有奇。終身不更娶。子二。長榮蔭。早沒。次榮館。孫三。封泰。先晉。封梁。孫女二人。其一歸吾弟國華。會孫鎮堡。鎮嶽。先晉縣學生員。後其世父榮蔭。先生命也。篤慎而好學。積善之報。殆將於是在乎。

前史官會國藩曰。人之品類。至不齊也。唐代設科取士。名目繁多。宋司馬光請開十科以求賢。其目至爲賅簡。今世官人專出於進士之一途。蓋有科而無目矣。會典所著。特科有三。曰博學鴻詞。曰經學。曰孝廉方正。鴻博科再開。經學科一開。當時皆稱得人。孝廉方正之科。詔開六七次。而由之以踐歷顯仕者特少。或舉天下而無一人赴部應試者。則何也。豈朝廷所以旌別此科。其法有未善與。抑有司者漫不矜慎。舉非其人與。以相鄉言

之道光初元舉先生咸豐初元舉羅君澤南。未可謂都非其人也。夫誠得其人。在上者固當思所以致之耳。彼膺斯舉者。豈汲汲哉。

歐陽氏姑婦節孝家傳

節母蔡氏。生三歲而室於歐陽。事玉光府君。家微也。姑劉孺人。端嚴匡勸。無所假借。節一朝之食。分之二日。併三人之事。責之一手。舉家事精麤劇易。壹委節母。不以任何問他人。節母則先雞鳴而興。豫其未至。後斗轉而息。補其闕遺。箕拘無塵。井汲無濡。半米寸薪。必珍必戒。諸婦嬖次第入門。節母躬其難者。讓其易者。自親舍及衆私室。衣垢則澣之。綻裂則補綴。初不問其所自來。羣從子女。寒則衣之。飢則慈以甘飴。就溷浴爲之潔除。羣從或忘其母而母節母。節母亦忘其非己出也。乾隆三十年乙酉。舅席珍府君卒。明年玉光以毀死。劉孺人大戚。節母於時年二十有八。長子惟本甫三歲。少者成材未期耳。入則泣血柴立。茹藥自盟。出則抱子奉姑。怡聲鹽。益屏去華飾。先姑意之未發而從事。約其口與體。以及其孤子女。無所不約。勤其力以率其妯娌。與其子姓。傭奴各有專職。土無寸曠。人無晷暇。俛拾仰取。賓祭有經。豬雞肥碩。蔬果怒生。方節母事姑之初。歲入穀二十石。逮姑之暮年。穀近千。而惟本讀書屬文。試於郡縣有聲矣。年二十七歲而卒。婦蔡氏亦以節著。

節婦蔡氏。少歸歐陽惟本。節母之家婦也。乾隆四十二年戊戌歲大饑。節婦將嫁。其父輔世貧不能具禮。宗族或助之。結褵之資。凡得錢三千有奇。父爲裝遣之。節婦陰返其錢。置稗薦中而繫鑰匙其端。父歸而室無見糧。引鑰則錢在焉。泣曰。孝哉吾女。留此以活我也。惟本沒時。節婦亦二十八歲。由是捐棄萬事。壹從節母。求所以事祖姑。劉孺人之法。黎明。劉孺人與節母執笄侍左。節婦自右約之。及盥。節母奉水。節婦奉漿。及食。婦具饌。母侑之。及寢。三世聯牀。聽於無聲。劉孺人卽怒。節母負牆竦懼。節婦從容改爲。以適厥指。卽疾病。婦煮藥。母嘗而後進。夜則番宿遞侍。衣不解帶。一夕。節母起。墮牀折脇二骨。節婦號泣。就援之。母戒屏息。無令劉孺人得聞知也。劉孺人晚而喪明。手足痿痺。挽輿日遊庭中。節母肩前。節婦肩後。其後劉孺人九十而終。節母且六十矣。二脇骨者。竟無恙。其後二十餘年。盜入室劫母衣。刃傷節婦指及肘。創甚。亦不醫。而竟無恙。論者以爲孝徵。神或相之云。道光九年。節母沒。實年九十有六。二十三年。節婦沒。實八十有二。其前五年。歲在己亥。均旌表節孝如例。

前史官會國藩曰。節婦之孫女子四人。次二者歸於我外舅福田先生。篤行君子也。數爲余誦述兩世事狀。余昔官禮部。見各行省題旌婦女。凡烈婦殉夫者。別具一疏。高宗皇帝常下詔非之。不予旌表。以爲行不貴苟難。

也。然未俗士論。往往以矯激卓絕之行爲難。觀歐陽姑婦之節。亦似庸行無殊絕者。而純孝兢兢。事姑至六十年五十年之久而不渝。天下之至難。孰踰是哉。

湖北按察使趙君神道碑銘

君諱仁基。字厚子。號悔廬。武進趙氏五世祖恭毅公申喬。戶部尙書。清正有大節。爲世名臣。恭毅次子鳳詔。官太原知府者。君高祖也。曾祖諱枚。廩膳生員。舉孝廉方正。祖匯。增監生。考鍾書。舉人。豐縣訓導。兩世皆以君貴。贈朝議大夫。妣楊氏。惲氏。皆贈恭人。君少而端視。矩行。恆言無誑。年十三。居王考之喪。哀禮周至。父老驚歎。毗陵故文獻之邦。名儒相望。君出而從訓導。君於豐縣。趨庭問業。歸而造請。里巷耆宿。若李君兆洛。陸君繼輅。吳君育。周君儀。疇輩。咸從捧手。稽經講藝。穆然如笙磬之克諧。其學既大進。譽望亦翕翕日隆。以試於有司。則連蹇而不得一當。久之。嘉慶丙子。乃北上。應順天鄉試。未歸。而遭母惲恭人之喪。又五年。再試順天。未歸。而又遭父訓導君之喪。君性篤孝。兩丁大故。不克親視含殮。平生以爲至痛。又以壯年喪元配高淑人。復喪繼配錢淑人。復喪其長子鑄。客遊湖北。子身浮寄。塊然若委枯枝於大澤。廢興不復厝意。蓋自道光五年舉於鄉。六年以進士官知縣。而君年且近四十。人世紛華之念。洗除盡矣。初仕爲江西宜

春縣旋補崇仁縣知縣。調安徽涇縣知縣。既又署懷甯縣事。所至判決帶獄。感格凶頑。齋禱於深室。而四境時雨立應。道光十三年。捕獲桃源決河奸民陳端。優詔褒勉。賞戴花翎。以直隸州升用。明年。補滁州知州。召見便殿。宣宗嘉之。歸任滁州六安州。甫歷數月。卽升平陽府知府。在晉數月。又升江西南贛兵備道。君感荷恩知。益思有以自靖。名捕椎埋盜鑄。鹽梟大猾。窮追而擒治之。禁止鴉片。約堅條明。是時天子方申嚴詔。拒絕西洋。而英吉利窺天津。陷定海。割香港。寇廣東省城。君綜理南安糧臺。晨夜憂勞。自傷無裨於時。而海氛日棘。往往被酒泣下。或力疾繞室旁皇。適奉升湖北按察使之時。閱十八日而卒。實道光二十一年六月十九日也。春秋六十有二。君既再失偶。最後娶方淑人。子熙文某官。烈文某官。女三人。適增生李嶽生。候選主事周騰虎。烏程縣知縣陳鍾英。孫六人。咸豐六年十月某甲子。葬於荆溪之東山。所箸書有江水論一卷。雜文一卷。歌詩曰幽棲集。登樓集等者。凡七卷。和陶詩一卷。詞一卷。君中懷淡定。中歲頻遭憂戚。泊然不知窮通得喪之於己何與。自詩篇外。若無一足關其慮。自獎誘後進外。若無一堪自愉樂者。論者疑其超曠忘世。及海上事起。乃獨鬱鬱不能終日。豈有大志者。常頽然不易測耶。抑中年悲感。晚節一觸而不自克耶。匪可詳已。銘曰。

達人離垢。遺棄萬事。聖人忘身。不忘拯世。迹若相反。義乃相成。趙公落落。衷道而行。積困始亨。將大厥施。方駕而稅。誰實尸之。有子克家。志充行俯。天右勞臣。永錫來許。

江忠烈公神道碑銘

公諱忠源。號岷樵。新甯江氏。曾祖登佐。太學生。祖獻鵬。父上景。歲貢生。母陳太夫人。生子四。公其長也。少而豁朗英峙。以縣學附生。選爲道光十七年丁酉科拔貢生。旋中是科鄉舉。久客京師。以大挑得教職。與會國藩。陳源克。郭嵩燾。馮卓懷。數輩友善。嘗從容語國藩。新甯有青蓮教匪。亂端兆矣。既歸二年。而復至京。余戲詰公。青蓮會匪竟如何。何久無驗也。公具道家居時。陰戒所親。無得染彼教。團結丁壯。密繕兵仗。事發。有以禦之。逮再歸。而果有雷再浩之變。公部署夙定。一戰。破焚其巢。誘賊黨縛再浩磔之。湖廣總督上其功。賞戴藍翎。以知縣用。公入都謁選。又語國藩。前事雖定。而大吏姑息。不肯痛誅餘黨。難猶未已。踰年。而復有李沅發之變。又踰年。而廣西羣盜蠡起。洪秀全。楊秀清之徒出。大亂作矣。公爲縣令。浙江歲餘。咸豐元年。丁家艱歸。大學士寶尙阿公。督師廣西。馳疏調公赴粵。既至。則大爲副都統烏蘭泰公所寶敬。事無巨細。必再諮而後行。人無疏戚貴賤。必察公意嚮而薄厚之。敘公之勞。請擢同知直隸州。換戴花翎。公亦竭誠

贊畫募楚勇五百人助戰。湖南鄉勇出境討賊。自此始也。烏公慷慨負氣。與提督向公榮積有違言。公以書曉譬烏公。禮下之已甚。冀感動向公。卒不能得。逮圍賊於永安。復代爲一書抵向公。力諫圍師缺隅之說。請合圍而盡殲之。又不能得。因引疾歸。歸而永安賊出。大敗官軍。遂至桂林。公聞警。募勇倍道赴援。將終佐烏公以平嶺表。未至而烏公陣沒。自是獨領一隊。賊中往往指曰江家軍矣。既解廣西之圍。旋大捷於蓑衣渡。賊不得掠舟而北。衡永以安。賊攻長沙。公與力爭南門。天心閣築堅壘。據要害。長沙以完。賊之渡洞庭而東也。實惟咸豐二年十月之杪。旌旗帆檣蔽江而下。公痛時事之益壞。怨吾謀之不見納。悵然不復欲東。巡撫張公亮基亦奏公留守湖南。是冬。破賊曰晏仲武於巴陵。剿平徵義堂會匪於瀏陽。明年春。署湖北按察使。翦叛民劉立簡於通城。膺陳北斗於崇陽。皆以疲卒千餘。盪寇數萬。天子褒歎。由是有幫辦江南軍務之命。公拜疏將赴金陵。中途聞廣濟宋關佐爲亂。移師討之。事甫定而朝廷命公速救鳳陽。不數日。而江西巡撫檄公速援南昌。公曰。金陵鳳陽。雖有朝命。然殘破之區。效遲而事易。江西雖無朝命。然完善之士。禍急而事難。吾當先其難者。遂挈師由九江。踔四百里。森入南昌。翼日賊至。則設施略備。上下恃以無恐。賊晝夜環攻。闕地十道。分擾旁郡。以眩我謀。終不得窺公方略。凡九十餘日而

圍解。上嘉公功。賞二品頂戴。賜翎管班指諸物。厥後田家鎮失利。上疏自劾。詔旨雖許鑄四級。然旋有安徽巡撫之命。又詔公楚皖一體。當相緩急。爲去留。不必拘於成命。蓋聖主倚公辦賊。不復中制。而海內企踵喁喁。亦咸知非公莫屬也。公以爲武昌差足自保。廬州新立行省。危在旦夕。法宜經營淮南。以分吳楚賊勢。遂拜疏自鄂之皖。曠雨而行。將卒終歲奔命道病。公亦病。至六安。病甚。六安吏民遮道請留。不許。昇疾竟達廬州。部分未定。而賊大至。公設策應敵。一如守長沙南昌時。而城無見糧。藥鉛罄竭。元從之士不滿千人。諸軍屯四十里外。觀望莫救。公弟忠濬自楚來援。爲賊所梗。咫尺不得通問。公病益困。不食數日矣。城陷。發憤投水死。咸豐三年十二月十七日也。春秋四十有二。越八日。募人入賊中。負公尸以出。事聞。天子震悼。追贈總督。賜祭葬。命廬州及湖南江西皆立專祠。褒公三代如其官。予諡忠烈。咸豐五年。劉公長佑聞關歸公喪新甯。六年某月。葬於某里某山。公弟三人。仲卽忠濬。以兵事積功至道員。歷官安徽四川布政使。次忠濟。戰功最偉。殉難岳州。予諡壯節。次忠淑。縣學附生。保敘知府。夫人陳氏無子。以弟子孝椿爲嗣。妾楊氏。公既沒。而生子孝棠。國藩昔與公以學行相切礪。文宗御極。薦公以應求賢之詔。公嘗疏請三省。造舟練習水師。又嘗寓書國藩。堅囑廣置礮船。肅清江面。以弭巨禍。其後國藩專力水

軍幸而有成。從公謀也。自公之薨。忠潛等數乞余文。表公墓道。大義相許。神人共鑑。余其敢讓。軍興以來。死事者多矣。或邂逅及難。而倖廁忠義之林。何可勝道。當公赴江西之急。有詔令至金陵。及赴廬州之急。有詔且留楚中。宜可少安。以惜有用之身。而公必蹈危地。甘死如飴。但求無疚於神明。豈所謂皎然不欺者耶。嗚呼。忠已。余既揭其用兵始末。乃竝述他行義聲之銘詩。用告異世治國聞者。銘曰。

儒文俠武。道不竝張。命世英哲。乃兼厥長。惟公之興。頽俗實匡。明明如月。肝膽芬芳。有師鄧君。有友鄒子。臥病長安。朝夕在視。亦有會生。燕南旅死。謀歸三喪。反葬萬里。兩以躬致。義泣鬼神。近古之俠。孰與比倫。作宰吳越。風教露餐。秀水振饑。翼民以長。蘇其枯槁。衣以文襪。儒吏之風。竝時無兩。蘊此兩美。風雷入懷。砰然變化。陰鬪陽開。宜哉大難。重奠九垓。半駕而稅。天乎人哉。楚師東征。倏逾十秋。三十萬人。金甲貔貅。死者半之。白骨蒿邱。人懷忠憤。如報私仇。千磨百折。有進無休。終瘞元惡。盡復名城。天河盪穢。海宇再清。公創其始。不觀其成。九原可作。慰以茲銘。

羅忠節公神道碑銘

公諱澤南。字仲嶽。號羅山。湘鄉羅氏。咸豐四五年間。公以諸生提兵破賊。屢建大勳。朝野歎仰。以爲名將。而不知其平生志事。裕於學者久矣。公之

學其大者以爲天地萬物。本吾一體。量不周於六合。澤不被於匹夫。虧辱莫大焉。凜降衷之大原。思主靜以研幾。於是乎宗張子。而著西銘講義一卷。宗周子。而著人極衍義一卷。幼儀不慎。則居敬無基。異說不辨。則謬以千里。於是乎宗朱子。而著小學韻語一卷。姚江學辨二卷。嚴義利之閑。窮陰陽之變。旁及州域形勢。百家述作。靡不研討。於是乎有讀孟子劄記二卷。周易本義衍言若干卷。皇輿要覽若干卷。詩文集八卷。其爲說雖多。而其本躬修以保四海。未嘗不同歸也。始公家世貧甚。會祖王父日阮。王父拱詩。皆以公貴。贈通奉大夫。父嘉旦。公沒後。賞加頭品頂戴。會祖王母蕭氏。王母賀氏。母蕭氏。皆贈夫人。公少就學。王父屢典衣市米。節縮於家。專餉於塾。年十九。卽藉課徒。取貲自給。喪其母。又喪其兄。旋喪王父。十年之中。連遭期功之戚。十有一嘗。以試罷徒步夜歸。家人以歲饑不能具食。妻以連哭三子喪明。公益自刻厲。不憂門庭多故。而憂所學不能拔俗而入聖。不恥生事之艱。而恥無術以濟天下。其後年踰三十。乃補學官附生。逾四十。乃以廩生舉孝廉方正。假館四方。窮年級級。與其徒講論濂洛關閩之緒。瘖口焦思。大暢厥旨。未幾。兵事起。湘中書生。多拯大難。立勳名。大率公弟子也。咸豐二年。粵賊攻圍長沙。縣令召公練鄉勇。以備不虞。省城解圍。明年春。巡撫張公亮基。檄公帶勇至長沙。維時國藩奉命督治團練。因

與公講求東伍技擊之法。晨夕訓練。擊土寇於桂東。擒逆黨於衡山。其夏賊圍江西省城。乃益募湘勇二千。輔以新甯之勇。鎮筸之兵。檄公赴援南昌。湘軍越境討賊。自此始矣。既解南昌之圍。復破賊於安福。歸及衡州。殲土匪於永興。四年春。湖北之賊。大舉南侵。官軍失利於岳陽。克捷於湘潭。提督塔齊布公。追賊至岳州。余檄公與李公續賓佐之。公搃大橋以遏其衝。凡七戰而羣賊潰。岳州平。乘勝逐北。連復三縣。將攻武昌。公手一圖。就余決策。師出兩路。以塔公進洪山一路。而自請攻花園一路。當其堅者。如其策。果克武昌。漢陽兩城。賊既東奔。追及於興國。大膊於田家鎮。公提卒二千。禦數十倍之寇。蹙之江濱。墜石墜崖死者萬計。而水師亦斷橫江鐵鎖。燔賊舟數千。當是時。公名震天下。前此累功保至道員花翎。至是有甯紹台道之命。加按察使銜。既而引兵北渡。克廣濟。黃梅。賞葉晉鏗額。巴圖魯名號。又引兵南渡。攻圍九江。進規湖口。賊堅守不可遽下。適會水師分兵入宮亭湖。江上之軍不利。而湖北諸軍屢敗。賊自黃梅長驅西上。武昌再陷。公太息深憂。歎世變之未已也。益討部衆而申儆之。或解說周易以自遣云。時別賊陷饒州。弋陽。公入江西援勦。大戰弋陽。克之。賊陷廣信。又戰信州。克之。又以其閒。收復德興。景德鎮。東路甫定。而義甯復陷。公軍渡湖漢而西。至則示形杭口。而暗進鼇嶺。屯高峯以瞰敵。設三伏以要之。四

戰而賊大燿。義甯既克。有詔加布政使銜。公以書抵國藩。具論吳楚形勢。欲取九江湖口。法當先圖武昌。欲取武昌。便當先清岳鄂之交。於是馳疏。以公回援武漢。朝廷嘉焉。遂略通城。克崇陽。挫輿於蒙頭堡。大捷於蒲圻。將達武昌。巡撫胡文忠公。歡迎勞問。凡事咨而後行。城外賊壘。鏟除略盡。殄滅有緒矣。公以霧中搏戰。中鎗子傷創甚。咸豐六年三月初八日。卒於軍。春秋五十。事聞。天子震悼。照巡撫例。賜卹。二子皆賞給舉人。三省建立專祠。予諡忠節。公在軍四載。論數省安危。皆視爲一家骨肉之事。與其所注西銘之指相符。其臨陣審固。乃發。亦本主靜察幾之說。而行軍好相度山川脈絡。又其講求輿圖之效。君子是以知公之功。所蓄積者夙也。非天幸也。配張氏。誥封夫人。妾周氏。子兆作。配胡氏。兆升。配會氏。國藩第三女也。余與公以學行相勸。又相從於金華。申之以婚姻。迺撫其大節。銘諸墓道。銘曰。

漸車之澗。積潦縱橫。崇朝卽涸。卷勢收聲。大江西來。其源萬里。澤溥實區。不矜厥美。無本者竭。有本者昌。羅公淵默。所蓄孔長。洞徹天人。潛睇往聖。一物未康。終虧吾性。提師苦戰。荆揚二州。斧彼凶豎。爲民復讐。矯矯學徒。相從征討。朝出麀兵。暮歸講道。洛閩之術。近世所捐。姚江事業。或邁前賢。公憤其趨。既辨其詭。仍立豐功。一雪斯恥。大本內植。偉績外充。茲謂豪傑。

百世可宗

李忠武公神道碑銘

公諱續賓。字迪庵。湘鄉李氏。湘軍之興。威重海內。創之者羅忠節公澤南。大之者公也。咸豐三年。賊圍江西省城。國藩募湘勇三千往援。公隨忠節公以行。初至失利。右營主者戰沒。公代領其衆。自是忠節公將中營。公將右營。所向有功。在江西克復太和安福。歸至湖南。克復永興。明年。粵賊犯岳州。忠武公塔齊布率師禦之。余檄忠節公與公助之。所部僅千人耳。賊衆數十倍。塔公控其東。湘軍扼其西。盛暑鏖兵。出奇制勝。凡兩旬而岳州平。轉戰而北。連下三城。八月。進攻武昌。漢陽克之。十月。大戰於田家鎮。破之。田家鎮者。江流盤折逼隘之處。其南岸爲半壁山。峭壁斗絕。賊以鐵鎖橫江。萬舟翔集。氣銳甚。公手刃怯卒三人。士皆殊死戰。連破賊壘。而水師亦乘機斷鐵鎖。焚賊舟。好事者至摩崖以紀績。公前以累功。保至直隸州知州。至是記名以知府用。賞給擊勇巴圖魯名號。旋有安慶府之命矣。先是湖南水師中。江而下。陸師趨江之南岸。湖北陸師趨江之北岸。南軍屢捷。羣寇蜂屯北岸。於是公輩引兵北渡。掃蕩廣濟黃梅之賊。既又南渡。會攻九江郡城之賊。城堅不可遽下。又議分兵先勦湖口梅家洲之賊。無何。累攻不克。水師失利。北軍撓敗。金陵逆渠。益縱羣凶西上。武昌漢陽再陷。

南軍孤立潯陽。國藩以爲大戚。公亦深憂之。痛世亂之靡有屆也。五年二月。信州告警。公與忠節公自潯馳援。迭克廣信府城。及弋陽等四縣。東路甫定。遂建西援武昌之議。大捷於義甯。小挫於通山。下崇陽。略通城。毗羊樓峒。擣蒲圻。撥咸甯。次第戡定。乃以十一月杪。師次武昌。巡撫胡文忠公林翼大喜。事無巨細。惟忠節公與公言是聽。忠節絮持大綱。其戰守機宜。胥公主之。公含宏淵默。大讓無形。稠人廣坐。終日不發一言。遇賊則以人當其脆。而已當其堅。糧仗則予人以善者。而已取其贏者。士卒歸心。遠近慕悅。咸豐六年二月。忠節公中鎗不起。公接統全軍。衆志愈厲。圍平城外。悍賊之壘。卻劇寇石達開來援之衆。周城掘塹。引江水入湖。困以長圍。十一月。再克武昌。漢陽。天子偉其功。賞加布政使銜。記名以按察使用。未幾。提兵而東。再薄九江。九江賊會林啓榮者。堅忍得衆。內與小池口湖口梅家洲諸城首尾相掇。外與皖廬之賊互爲聲援。公旣掘長塹多圍罅。又分軍援勦江北。舟載奇兵。夜襲湖口之背。遲明。水師至而陸軍伏發。立克兩城。事聞。拜浙江布政使。明年四月。卒克九江。殄滅無遺。天下快之。賞穿黃馬褂。加巡撫銜。公每建一功。晉一秩。數省官民。歡抃稱道。若寵榮之在躬。或歌誦戰狀多爲樂。傳播中外。浙人仕京朝者。疏請敕公東兵以救浙難。而胡文忠公以皖中糜爛。請留公軍圍皖而固鄂。天子許之。公乃整旅入

皖。踰月。連下潛山。太湖。桐城。舒城。四縣。師次三河。毀賊九壘。而逆會陳玉成等。四面來援。截我糧路。我軍銳氣日蹙。師少而半饋。公力戰終日。自度事不可爲。夜半。怒馬陷陳。死之。咸豐八年十月初十日也。諸將堅守營壘。又三日而俱敗。又六日而桐城守兵亦敗。前後死者。殆六千人。無苟活者。疏入。文宗震悼。手詔曰。惜我良將。不克令終。尙冀其忠靈不昧。他年生申甫。以佐予也。追贈總督。湖北。江西。安徽。湖南。立祠。予諡忠武。賞騎都尉。兼一雲騎尉世職。公之先人。世有令德。曾祖本桂。祖詩白。皆以公貴。贈榮祿大夫。父登勝。公沒後。特恩加封光祿大夫。曾祖妣張氏。賀氏。王氏。祖妣戴氏。母蕭氏。皆封一品夫人。公端凝敦篤。愛人不尙美言。而意溢於色。色餘於辭。雖他軍之將士。逃難之流民。皆歸之若父兄。聞其死。哭之皆慟。至不忍聞。同治二年。朝廷遣官賜祭。三年。克復金陵。推恩有功之臣。賞二等輕車都尉世職。配謝夫人。子三。其二殤亡。光久欽賜舉人。引見。賞六部員外郎。又以兼襲二世職。併爲男爵。孫二人。某某。咸豐九年。葬公於湘鄉。四十三都黃牯冲。星子山之陽。同治八年某月某日。改葬某鄉某山。丐余文其墓道之碑。余旣羸敝戰績。乃兼述其懿德。而系以銘。銘曰。

器有洪纖。因材而就。次者學成。大者天授。嶽嶽李公。表裏完好。匪琢匪追。動合大道。羅公講學。遠紹洛閩。公分其細。握衣恂恂。出而禦寇。戎馬艱辛。

入而問道。克己求仁。誰侮誰尤。責躬獨厚。胸劈衆流。會不出口。負重含汗。浩如山藪。險趨人先。利居衆後。豈無贏財。不阜我私。不忍己飽。而人獨飢。分餉諸軍。蘇槁噓飢。返自潯陽。少憩武昌。將請於朝。覬親還湘。王事有嚴。離局匪遑。斯願不遂。茹涕闔傷。遣將分兵。助我東征。擇良而予。出以至誠。四分五剖。精銳星散。自攜部曲。疲羸居半。損己濟物。近古無倫。終焉師殲。以仁隕身。行類大愚。乃動鬼神。公功久著。爛若三辰。德或不顯。考此銘文。

李勇毅公神道碑銘

公諱續。字克讓。號希菴。兄弟五人。忠武公諱續。實次居四。公其季也。余既銘忠武公之墓。茲不復具其家世。公少好深湛之思。強探力索。洞徹幽微。師事羅忠節公澤南。常以躬行不逮爲恥。咸豐二年。羅公募勇援救江西。公遂參軍事。以功累晉知縣同知。賞戴花翎。而名顯不顯。六年冬。湘軍再克武昌。漢陽。巡撫胡文忠公奏公有勞。特爲兄續實所掩耳。有詔以知府選用。賞加道銜。既而隨兄圍攻九江。明年。以事省。余瑞州軍中。遂偕諸將圍攻瑞州。會皖北羣賊。上竄蘄黃。公乃自瑞挈千七百人。回救湖北。師至黃州。與胡文忠公弁轡謀野。周覽形勢。自巴河。蘄水。廣濟。黃梅。六戰破賊壘無算。遂會克小池口。由是公之威名。與忠武公差頡頏矣。公率所部既集九江。忠武公乃得以其閒分兵克復湖口。連下彭澤。小孤。梅家洲諸

城公又以偏師卻湖口之賊。禦竄陷麻城黃安之寇。忠武公乃得專力破滅九江。皆公之助也。湖北事已大定。胡文忠公以皖中久困水火。奏請敕忠武公廓清皖北。而留公以固楚疆。天子亦南憂江淮。絕重李氏昆季矣。無幾何而有舒城三河之變。忠武公殉難。將士死者六七千人。天驚地岌。公在黃州。哀迫之際。經緯萬端。入則損食悲咽。出則拊循積卒。思鄉者遣歸。願留者編伍。哺粟賜衣。接以溫語。差討諸將之罪。而簡用其良。部署麤定。適胡文忠公以母喪奉詔起復。相與申儆簡練。而湘軍復振。明年夏。劇賊石達開竄擾湖南。圍攻寶慶。公時新奉荆宜施道之命。統兵自鄂援湘。朝廷壯之。師抵長沙。進自資水之西。四戰而解寶慶之圍。圍中官軍三萬。與飢困之民。一時得蘇。衆聲大和。論功賞加布政使銜。當是時。余與胡公方議併力規取安慶省城。余弟國荃。與將軍多隆阿。分圍安慶。桐城。公自湖南東還。駐軍兩路之中。曰青草橋者。大敗逆會陳玉成於挂车河。布陳之廣。近世罕聞。旋拜安徽按察使。十一年。又有安徽巡撫之命。公具疏。以謂逆會圖解安慶之圍。悉銳西竄。必犯湖北。以攻我之所必救。湖北爲衆軍根本。臣宜提師回援。不能遽受皖撫之事。比公馳抵武昌。而賊已犯黃州。德安。兩府五縣。其別賊自江西至者。又陷興國。大冶等縣。公經營七月。始將列城恢復。安慶亦藉以告克。而胡公薨於位。文宗亦晏駕。人音遏矣。

今上嗣位。褒安慶功。賞穿黃馬褂。調補湖北巡撫。既又命移撫安徽。公初蒞安慶。繼駐六安。屢奉密詔。以苗沛霖叛服無常。詢問勦撫機宜。公覆疏。謂苗沛霖官至道員。公犯不韙。圍撫臣於壽州。陷其城。屠其衆。乃復詭言求撫。此豈足信。不過假稱反正。號召近縣。養成羽翼。若正彼叛逆之名。人人得而誅之。而寬其黨羽。使爲我用。彼勢日孤。終成禽耳。天子韙之。公又以時解潁州之圍。克霍邱之城。綏撫各圩。陰散逆黨。選任賢吏。安民墾田。功績漸彰矣。詔授爲欽差大臣。而公適聞訃。丁母憂。不克受事。朝廷命仍署理巡撫。三疏陳謝。始奉命賞假百日。回籍治喪。公既以苦思邁病。徹夜不寐。夙患咯血。至是增劇。歸里後。六奉詔旨起復。墨經視師。公以哀慕未忘。而嬰疾轉篤。請假四十日調養。既而與疾就道。又請假四月。奔開巡撫之缺。朝廷鑒其至誠。所請未嘗不許。而以淮南事棘。又未嘗不敦促上道。詔召相銜。至冬初。再疏自陳病狀。公亦自知不起。遂以同治二年十月二十八日卒於家。春秋四十有一。敕照總督例賜卹。三省建立專祠。予諡勇毅。配彭氏。子光英。特賞直隸州知州。同治三年某月某甲子。葬某處某山。八年某月某甲子。改葬某山。公與忠武公皆負重名。淡於榮利。昆弟同之。忠武好蓋覆人過。公則嫉惡稍嚴。忠武戰必身先。驍果鎮密。公則規畫大計。而不甚校一戰之利。至其臨陣。百審一發。發無不捷。成功一也。余不許

敘戰狀而略述公言以綴之銘銘曰。

凡戰有機。鬼神翕闔。靜如山寒。終日闐寂。動若電飛。百霆齊擊。蓄勢宜久。氣懣宜停。此公之言。吾耳所聆。凡公勳績。好謀乃成。博籌多算。終格神明。匪直戰事。學道亦然。精思力踐。誠可達天。立功雖偉。公不自賢。立德未竟。實志九泉。我銘昭之。永詔萬年。

隨州李君墓表

道光二十六年某月。隨州李君年八十四。考終於里第。其兄之子戶部主事樹人。聞赴京師。將去。官持喪。余往弔語之曰。於古期功之喪。仕者去職。總之喪。士不得應舉。今子之歸。禮也。樹人曰。豈以爲禮。致吾哀爾。且泣曰。叔父葬有日。既埋石幽宮。維墓道當別立碣。將揭其行義。以示來者。敬以屬先生。則爲余縷述。一一甚詳。樹人事余甚敬。又以禮請。余其可辭。惟君受性剛介。於事無所不敢。凡所力任。必自於公。或私於己。豪毛不以措意。人所愈憚。當之愈勇。嘉慶初。川楚教匪蠱起。漢沔荆襄。蹂躪殆遍。隨州之西有環潭者。巨鎮也。賊將大掠而窟之。君戒鎮家出一人。負薪一束。執長竿籠一炬。臨水雁列。竟夕焚薪。火光亙六七里。賊不敢渡。隨以不陷。近村有田。久沒於水。吏責賦於比鄰。民絕苦之。君徧哀諸司。乞蠲無田之賦。竟以得請。其他施於鄉者稱是。是故邑有舉也。非其倡不興。里有爭也。非其

解不息其貴盛也。人皆稱願之。其疾皆奔。視其沒也。哭之皆哀云。李氏世居隨州。家微也。君少與其兄某。發憤力學。自度終無以大其門。乃去爲賈。累致千金。一以資兄宦學。不問。久之。乃爲兄納金縣官。得除爲丞。稍遷至雲南嵩明州知州。而君亦以武學生入資爲都司。於是諸子翩翩。文學仕進。寢昌大矣。君諱某。字某。會祖某。祖某。皆不仕。考某。以嵩明君貴。誥封奉直大夫。子二人。長某。以嵩明君得子遲。與爲嗣。後遂不還。次某。孫某某。自嵩明君之沒二十年。君撫諸孤。恩勤備至。樹人之官京師。君一資之。如資其兄。其視兄子。不知其非己子。其視己子。不知其非兄之子也。嗚呼。自衆人論之。彼施於鄉者博矣。自知道者觀之。獨其施於家者。不可能耳。不可能也。則亦不可朽也。

錢塘丁烈婦墓表

道光二十有七年十月。錢塘丁士元圖其五世祖妣烈婦周安人之墓道。又譜其世系。述其節行。踵吾門而告曰。士元之五世祖妣周氏。南疆釋史。曾以綴之列女傳者也。實以順治初殉難。今二百載矣。維塋域有下窆之石。不克宣刻事蹟。暴諸道路。懼終將晦。且無以與救世世子孫。先生天下之夙於文。如不余戾。請爲文揚之墓。是寵施吾族而厚吾先世以不朽也。國藩禮辭不獲。則謹次丁氏之系。烈婦之畸行。與聖朝旌顯幽微之義。

有顛有委。以激懦者。其語曰。丁氏之別子。居山陰者曰際龍。世農也。其元孫曰瑞南。始爲買杭州。是爲烈婦之夫。烈婦生而篤孝。其母患心痛絕急。或稱海上方。指血和藥可立已。烈婦則盡刺十指。劑血以進。病良已。瑞南既貿遷於杭。家中有無。一仰烈婦。裁冗而緝匱。贏事而縮食。秩如也。順治三年。我大清兵下紹興。土賊乘閒四出焚掠。烈婦挈二子奔竄。賊數規之。烈婦度終不得脫。乃以二子付族屬之老成者。曰。以累若襁歸兒父。吾不可爲賊辱。遂自投水。賊追救之。不殊。凡三縶乃絕。年二十有三歲。瑞南在杭。聞難奔焉。三日矣。尸不腐。蚊蚋不集。其卒以六月四日。天盛暑也。瑞南悼妻之義死。痛土賊之獸心。曰。孰不可居。又奚爲於故里。遂占籍杭州。前烈婦所挈竄之二子。長曰聘賢。季曰茂卿。至是聘賢始爲錢塘人矣。其後百有數載。至乾隆十四年。孫可學上其事於朝。乃蒙恩予旌表。又數載。以可學官某官。贈烈婦爲安人。凡九十載。至道光二十五年。烈婦之裔孫士元。以進士入翰林。丁氏寢寢昌大矣。維明季之亂。匹夫匹婦。蹈死如歸者。所在多有。而食祿者。往往孺忍不決。或偷活無幾時。旋亦周章就斃。等死也。血氣之軀。非必久長不敝之物也。彼獨須臾不審耳。人固有斷不可不慎之須臾。如烈婦之光顯。豈須臾也哉。亦且長久焉爾。

桃源縣學教諭孫君墓表

君諱葆恬。字劭吾。孫氏善化人。祖繩武。歲貢生。考先振。舉人。直隸隆平縣知縣。隆平君無子。有兄曰先捷。縣學附生。晚而生君。乃兼以後隆平君。禮律所稱。一子承二祧者也。君生貴重。兩翁絕憐之。不欲苦以學業。君曲承歡意。進則奉漿疾趨。嬉游無度。退則顓顓自救。鑽仰羣書。本末交修。既治且篤。年十七。補諸生。中式嘉慶己卯科舉人。於是贈翁始知君之學之勤。人之所不見也。道光六年。以大挑選桃源縣學教諭。始至。學官弟子。或丙夜踏門。曰。願有謁也。君訶禁立絕諸生。相戒惕息不敢近。君稍稍引進。矜其不能。有某生才而無檢。提學使者。將除其名。君召而數之曰。若以惡聞於一縣。今當痛自艾。埽地自新則生。蹈故則否。生頓首謝不敢負。學使者亦竟不黜生。又有數十人。以錢糧浮收。訴縣令於上官。刻碑縣門。頗劫持之。冀薄斂以寬民力。縣令大怒。將名捕致之法。君從容開說。仆碑弛獄。久之壹解。縣令邵君。以事罰富人錢二十萬。輸於學官。陰以乞君。君別藏之。及以憂去官。召諸生使具狀。出錢予之。貫則朽矣。在桃源九年。大計卓異。例以知縣赴部謁選。君曰。今日令長。豈得行其志者。吾上有老親。又奚爲於選人。道光二十一年四月某甲子卒官。春秋四十有八。卒後三年。君之子鼎臣。芝房。以道光乙巳科進士。改翰林院庶吉士。君以覃恩。晉贈儒林郎。又二年。次子頤臣。以丁未科進士。改兵部主事。又三年。今上卽位。晉贈

奉直大夫。明年。子觀。臣中式咸豐辛亥科舉人。又明年。以宣宗升祔恩。晉贈中憲大夫。是時粵匪洪楊諸逆。方犯湖南。聯巨艦浮江而東。荆揚鼎沸。芝房及其兩弟。歸自京師。又二年。頤臣。觀臣。相繼淪逝。又明年。咸豐丁巳十二月某甲子。君之配桂太恭人卒。死喪頻仍。家稍替矣。太恭人孝恭任淑。處變不驚。鎮筭有卒。譁戕其長官。濱沅州縣。洵洵東徙避亂。流賊有自通城竄長沙者。家人亦烏徙避之。太恭人晏然守靜。不爲訛言震駭。卒以無事。方從官桃源學署。贈翁縣學。君實在養。每晨興。君布席。太恭人進饌。贈翁年幾九十。與子婦爲辭讓者再。太恭人執玉賓。賓恆有嬰兒之色。見之者不知其娶婦生孫。子已登科也。太恭人之沒後。君十有六載。咸豐九年二月某甲子。芝房奉母合葬於赤江先塋。先事屬友人曾國藩表其墓。國藩因循未卽爲。而芝房不幸死矣。始君以樸學冲襟。未竟其施。士林惜之。又頤臣。觀臣。以才子早世。又益惜之。至芝房秉父之訓。立朝有風節。著書廩廩近古矣。復以憂死。每加惜焉。君子小人。知與不知。所共悼痛者也。且所謂天者。何也。高高者與人世迴絕。其好惡固當大異於人。不可究詰耶。抑食報有時。遲之又久而後大定耶。以君之積善教子。芝房之所成立。如此卓卓。而猶不克顯。則將來所謂大定焉者。又必其盡如人意。而祚之無已乎。於是爲鑿諸石。揭諸墓道。以俟夫異時觀化人者取驗焉。

武昌張府君墓表

君諱以誥。字兢安。號經圃。湖北武昌人。生而祗慎鞠躬。容儀兀兀。與人無
疏戚。必先遂其所好。而後己。以聽之。所遇和順。則曰。彼實宥我。余非能善
此。不順。或有曲難隱抑。則曰。我之咎也。彼何罪。卽非禮相加。尤不肖。益泊
然避之。卽嚴事我。尤卑賤。尤磬折。與之鈞等。遠近從之者。泊未嘗見其有
所齷觸拂戾也。曾祖斯錕。祖維滄。國子監生。考本用。歲貢生。廣濟縣學訓
導。訓導君旣以能文鳴於時。生二子。長曰以謨。成嘉慶戊辰進士。君以少
子承父兄之業。折節力學。尤善爲制舉之文。每搆一篇。目營四海。精鷲九
天之上。不可得而究也。徐而洗心冥默。若無可言。往往鑿險鉤深。歸諸平
淡。無有寃聲曼色。坐是屢擯於有司。君亦不少變。以求速化。其爲之益勤。
自七經孟子。下逮有宋諸儒者之說。莫不鑽研。以是澤其文。訓其徒友。亦
以是行之於宗族鄉黨。里有貧不能舉婚喪者。別差等周之。宿負逋租。無
多寡壹蠲之。乞人有強暴者。羣乞擁之山中。將椎殺之。一人寤曰。此張某
家墓地也。張公長者。無以訟事汚累長者。相與徙之他所。主者果大困。於
是識者歎君之德。感及頑族矣。道光四年八月望日。以疾卒。春秋六十有
三。配余孺人。子二。善鏞。縣學生。善準。歲貢生。孫成。縣學生。裕銘。裕鈞。縣學
廩生。裕鎮。裕釗。道光丙午舉人。諸子孫皆以文行紹其家學。而裕釗賢而

能古文。日昌大不可量。君以道光十七年三月壬辰葬於大冶縣杉木橋東之張家山。凡二十二歲。咸豐九年。裕釗致父之命。乞余表其墓。自制科以四書文取士。強天下不齊之人。一切就瑣瑣者之繩尺。其道固已隘矣。近世有司。乃並無所謂繩。無所謂尺。若閉目以探庾中之豆。白黑大小。惟其所值。士之蓄德而不苟於文者。將焉往而不黜哉。余爲述一二。以彰君之懿行。亦深譏當世君子。有衡文取士之責者。尙知警焉。

翰林院庶吉士遵義府學教授莫君墓表

君諱與儻。字猶人。一字傑夫。貴州獨山人。先世居江南上元縣。有名先者。明弘治時。從征都勻苗。因留守家焉。三傳至如爵。累官游擊。君高祖也。祖嘉能。考強。州學附生。兩世皆以君貴。敕封文林郎翰林院庶吉士。妣皆封孺人。君少隨兄與班。讀書發聞。兄沒。持期服。不與有司之試。旋以州學廩生。中嘉慶三年舉人。明年己未成進士。改翰林院庶吉士。爲紀文達公及洪編修亮吉所器異。六年。散館。改知縣。署四川茂州事。徙鹽源縣知縣。縣俗富人好買無征之田。貧人鬻產。售九存一。仍輸全賦。久輒逃亡。君按籍責賦富人。而賞其隱占之罪。河西有寧遠子稅所。府隸橫征。君上言稅所非經病民。得裁去。木裏喇嗎左所有山。產銀銅。郡守徇奸民之求。請布政司符縣開礦。君持不可。上狀。以爲木裏喇嗎去鹽源且二千里。朝廷特羈

糜之非真利其土也。彼土莠糧不足於食。朝定開廠。暮聚萬人。運夫倍之。不幸鑪礦寡耗。衆散爲盜。非土司受其殃。則吾蜀承其敝。且奸民所呈地圖。開礦去左所經堂甚遠。今得左所人訊之。銅礦得十分二銀者。卽經堂山也。貪小利。賈大覺。事誠不便。大吏趨君狀。檄君往左所覆勘。春暮。鏟雪而行。至則礦山者。果在其經堂右。其衆嚴兵以待。旣瞻君貌。又聆溫語。乃皆解甲羅拜。謝使君幸奠我居。世世不敢忘。行事縣令入土司境。戶率錢二百五十。雜市雞豚百物。居有供。行有餽。君盡御其物。又懸之禁。比還。老幼遮道獻酒。其會項克珠。進銅佛爲壽。填咽苦不得前。由是舉治行卓異。政以大成。充甲子科鄉試。同考官。以父憂去職。服闋。母張太孺人年七十餘矣。遂以終養請。凡事母十有四年。入則牽衣索棗。聽於無聲。出則生徒雲從。多文而粟。旣除母喪。吏部檄之復起。君北行至襄陽。歎曰。吾壯也。猶不能枉道事人。今能老而詭隨耶。立歸。請改教職。選遵義府學教授。遵義之人。習聞君名。則爭奏就而受業。學舍如蠡房。又不足。乃僦居半城市。日暮進諸生而詔之。學以盡其下焉者而已。上焉者。聽其自至可也。程朱氏之論。窮神達化。乃不越灑掃應對日用之常。至六藝故訓。則國朝專經大師。實邁近古。其僑易惠氏。書閻氏。詩陳氏。禮江氏。說文註釋有段氏。王氏父子。蓋未嘗隔二宿不言。言之未嘗不津津。聽者雖愚滯。未嘗不怡如旱。

苗之得膏雨也。久之。門人鄭珍。與其第五子友芝。遂通許鄭之學。充然西南碩儒矣。道光二十一年七月二十二日卒官。春秋七十有九。將絕。戒曰。貧不能歸葬。葬吾遵義可也。其明年十二月二日。葬縣東青田山。配唐氏。繼配李氏。子九人。希芝。次塲。次方芝。州學增生。秀芝。友芝。辛卯科舉人。庭芝。拔貢生。瑤芝。生芝。州學附生。祥芝。湖南候補縣丞。女七人。孫十一人。曾孫五人。君所爲書有二。南近說四卷。仁本事韻二卷。詩文雜稿。爲族子攜至廣西佚去。友芝掇輯。編爲四卷。友芝又別記君言行。爲過庭碎錄十二卷。旣葬。十有八年。友芝以書抵國藩。乞爲文表其墓。當乾隆之季。海內矜言考據。宗尙實事求是之說。號曰漢學。嘉慶四年。仁宗親政。大興朱文正儀徵阮文達。以巨儒爲會試總裁。是科進士。如姚文田。秋農。王引之。伯申。張惠言。臬聞。郝懿行。蘭皋。皆以樸學播聞中外。科目得人。可云極盛。君於是時。寂寂無所知名。及君出而爲吏。恩信行於異域。退而教授。儒術興於偏陬。校其所得。與夫同年生之炳炳者。孰爲多寡。未易遽定也。余爲表章一二士之孤行。而憂無和者。可自壯也。

鄧湘臬先生墓表

先生新化鄧氏。諱顯鶴。字子立。晚歲學成。遠近稱爲湘臬先生。先生自甫擢科名。卽已厭薄仕進。愼然有志於古之作者。與同里歐陽紹洛。礪東。以

詩相厲。客游燕齊淮揚嶺南。所至悲愉抑塞。一寓於詩。齟齬刺怪。過之使平。終歲顛顛。誓不履近人之藩。而又恥不逮古人。每有篇什。輒就礪東。與相建覆。引繩落斧。剖晰毫釐。書問三反。或終不得當。交嘲互訟。神囚形瘁。已而空極得通。則又互慰大歡。以爲解此者。天下之至豪也。先生以嘉慶九年甲子科舉於鄉。道光六年。大挑二等。官甯鄉縣訓導。凡十有三年。引疾歸。其遺外時榮而有事箸述。與礪東略同。然礪東持律矜嚴。體勢稍褊。先生則披瀾益壯。跌宕昭彰。礪東牆宇自峻。與人少可。先生則闡揚先達。獎寵後進。知之惟恐不盡。傳播之惟恐不博。且久。用是門庭日廣。而纂述亦獨多。詩歌所不能表者。益爲古文辭。以彰顯之。其於湖南文獻。搜討尤勤。如饑渴之於食飲。如有大譴隨其後。驅迫而爲之者。以爲洞庭以南。服嶺以北。旁薄清絕。屈原賈誼。傷心之地也。通人志士。仍世相望。而文字放佚。煙鬱不宣。君子懼焉。於是搜訪濱資郡縣名流佳什。輯資江耆舊集六十四卷。東起灘源。西接黔中。北匯於江。全省之方輿略備。鉅製零章。甄采略盡。爲沅湘耆舊集二百卷。徧求周聖楷楚寶一書。匡謬拾遺。爲楚寶增輯考異四十五卷。繪鄉邨經緯圖。以詔地事。詳述永明播越之臣。以旌忠烈。爲寶慶府志百五十七卷。武岡州志三十四卷。衡陽王夫之明季遺老。國史儒林傳。列於冊首。而邦人罕能舉其姓名。乃旁求遺書。得五十餘種。

爲校刻者百八十卷。瀏陽歐陽文公元全集久佚。流俗本編次失倫。爲覆
審補輯若干卷。大儒周子權守邵州。錄其微言。副以傳譜之屬。爲周子遺
書若干卷。所至釐定祀典。褒崇節烈。爲召伯祠從祀諸人錄一卷。朱子五
忠祠傳略考證一卷。五忠祠續傳一卷。明季湖南殉節諸人傳略二卷。嗚
呼。可謂勤矣。蓋千秋者。人與人相續而成焉者也。惟衆人甘與草木者伍。
腐而腐耳。自稍有智識。卽不能無冀於不朽之名。智尤大者。所冀尤遠焉。
人能宏道。無如命何。或碌碌而有聲。或瓌材而蒙詬。或佳惡同時同位同
而顯晦迥別。或覃思孤詣而終古無人省錄。彼各有幸有不幸。於來者何
與。先生乃舉湖南之仁人學子。薄技微長。一一撥拾而光大之。將非長逝
者之所託命耶。何其厚也。先生生於乾隆四十二年十二月十六日。卒於
咸豐元年閏八月二十五日。春秋七十有五。會祖元臣。祖勝達。父長智。妻
曹氏。仁厚淑慎。里黨欽之。妾何氏。子二。琳廩貢生候選訓導。前卒。琮。道光
丁酉科拔貢生。癸卯科舉人。父歿後一月。以毀終。女子子三人。孫四。光黼。
光緇。光紱。光組。會孫大程。自先生以名儒篤行昌其家。羣從子姓。皆孝友
力學。兄子璠。尤賢而能文章。先生之書。其不係於湖南文獻者。又有南邨
草堂詩鈔二十四卷。文鈔二十卷。易述八卷。毛詩表二卷。校勘玉篇廣韻
札記二卷。自訂年譜二卷。璠皆敬謹弄藏。其未刻者。皆寫定可傳於世。先

生內行完粹。教澤在人。瑤所爲行狀甚詳。茲故不著。獨著其治詩之精。與其有功於鄉先哲者。揭於墓道。以式鄉邦而訊異世。

戶部員外郎彭君墓表

君諱永思。號兩峯。世居湖南長沙。少而峻整自將。忱恂鎮栗。訥訥如不能語。事至則剖晰毫釐。枝分縷解。辨窮萬變而斷以片言。長老往往驚異。以爲吏才。天所授也。年三十二。以嘉慶五年庚申舉於鄉。十四年己巳成進士。卽用知縣。明年。署雲南嵩明州知州。斷獄八百。民譽翔洽。徙補楚雄縣。楚雄故附郭劇邑。君至。一以治嵩明者治之。訟牒入。立判紙尾。期以某日質訊。出則聽民遮道自言。停輿研鞫。前者辭窮。後者大畏。或就逆旅。操筆定讞。且判且詰。決遣如神。尤善爲離參之法。離參者。如欲知豆價。則先以麥問甲。次以稻問乙。次以粱問丙。離其事。異其人。而旁參之。然後進退以定豆價。百不失一。君用此術多奇中。他人效之。亦不能得民情僞也。大吏以君旣政成。常使兼聽鄰縣之訟。大姚有薛繼賢者。殺人獄成。省中覆覈。則詭辭翻異。問官數易爰書。數十易終不能決。君訊之七晝夜。卒以參鞫其子。乃得情實。論決如律。某官解餉銀至省。發封則失銀而得數石。以獄屬君。君察石有蟲齧痕。非道途閒物。因問輦運之卒。甯覺馱負。左右敲平。頗憶敲側。始何日乎。卒對某日。過某店。始覺右敲。君自省返楚雄。挾此獄

與卒與石俱行。途中雜采羣石較之皆不類。至某店得石與蟲齧者類。一鞠而伏。遂抵旅店。主人於法。五侯神者。不知所起。淫祀也。士民與江西客商爭祀。搆訟數十年。君以贖祭宿獄。終無已時。令昇神像至縣庭。取筆判八字曰。爾像不滅。訟端不絕。立飭吏卒。碎而毀之。兩造相顧愕眙而散。蓋君之明而能斷。類如此。嘉慶十七年。大姚令上變告。烏龍口有衆數千。囂聚爲亂。郡守夜召君問策。君立與區畫。草數書抵旁縣。戒勿輕動。遣數人僞與賊暱者。風使解散。而潛發輕兵掩捕。擒七十人。罪數人而事定。於是遠近又歎君才堪濟變也。在滇六年。凡三署大姚。四署廣通。兩署南安州。再爲鄉試同考官。上官方以治行卓異薦君。而君以父命。不樂久爲吏。遂援例改就京職。官戶部員外郎。貴州司行走。兼管廣東司。議蠲逋賦。釐定鹺政。多所匡贊。道光二年丁家艱。歸。自是山居二十載。養母教子。收族振貧。祭田義渡。凡諸善舉。皇然如有失而急圖之。陶然與販夫農父相狎。自忘其爲宰官之身。人亦忘之。亦愈敬之。道光二十二年八月二十一日以疾卒。春秋七十有四。曾祖從美。祖必化。馳贈奉直大夫。考勝桂。誥封奉政大夫。以五世同堂。獲旌於朝。祖妣氏范。妣氏黃。皆封宜人。君之配黃恭人。以賢孝特爲舅姑所倚。嘗一從夫雲南官舍。而未及從宦京師。凡綜理彭氏家政。七十餘年。敕始茲終。內外秩秩。室靡棄物。里無違言。似婦有先亡

者。叔早逝者。撫其諸子。女公早寡者。撫其孤甥。曲有恩紀。齒逾八十。猶箠鐙紡績不倦。同治元年閏八月二日告終。蓋九十有六矣。子申甫。道光乙未科舉人。候選通判。婦陶氏。安化文毅公女也。女三。皆適士人。孫樹森。同治甲子科舉人。志本。序本。豐本。孚本。孫女十二。申甫以道光壬寅九月某甲子。葬君於長沙之文家段蓮花台。同治壬戌閏八月某甲子。葬恭人於木魚山。墳壠相望。約二百步而近。屬國藩表其墓。於是敘述大節而綴以銘。銘曰。

流水不腐。古傳斯語。賢侯之明。積勤所補。壽母之壽。本諸勞苦。居上而逸。天所不許。降福者天。宰天者人。治獄陰德。恆大厥門。科名廣續。有子有孫。更千萬禩。長裕後昆。

大界墓表

王考府君以道光二十九年十月四日棄養。倏歷二十三年。當初葬時。吾父以書抵京師。命國藩爲文。紀述先德。揭諸墓道。國藩竊觀王考府君威儀言論。實有雄偉非常之概。而終老山林。曾無奇遇重事。一發其意。其型於家。式於鄉邑者。又率依乎中道。無峻絕可驚之行。獨其生平雅言。有足垂訓來葉者。敢敬述一二。以示後昆。府君之言曰。吾少耽游惰。往還湘潭市肆。與裘馬少年相逐。或曰高酣寢。長老有譏以浮薄。將覆其家者。余聞

而立起自責。貨馬徒行。自是終身未明而起。余年三十五。始講求農事。居枕高嶺山下。壠峻如梯。田小如瓦。吾鑿石決壤。開十數畝而通爲一。然後耕夫易於從事。吾昕宵行水。聽蟲鳥鳴聲。以知節候。觀露上禾顛以爲樂。種蔬半畦。晨而耘。吾任之。夕而糞。庸保任之。入而餼豕。出而養魚。彼此雜職之。凡菜茹手植而手擷者。其味彌甘。凡物親歷艱苦而得者。食之彌安也。吾宗自元明居衡陽之廟山。久無祠宇。吾謀之宗族諸老。建立祠堂。歲以十月致祭。自國初遷居湘鄉。至吾曾祖元吉公。基業始宏。吾又謀之宗族。別立祀典。歲以三月致祭。世人禮神傲福。求諸幽遐。吾以爲神之陟降。莫親於祖考。故獨隆於生我一本之祀。而他祀姑闕焉。後世雖貧。禮不可墮。子孫雖愚。家祭不可簡也。吾早歲失學。壯而引爲深恥。既令子孫出就名師。又好賓接文士。候望音塵。常願通材宿儒。接迹吾門。此心乃快。其次老成端士。敬禮不怠。其下汎應羣倫。至於巫醫僧徒。堪輿星命之流。吾屏斥之。惟恐不遠。舊姻窮乏。遇之惟恐不隆。識者觀一門賓客之雅正。疏數而卜家之興敗。理無爽者。鄉黨咸好。吉則賀。喪則弔。有疾則問。人道之常也。吾必踐焉。必躬焉。財不足以及物。吾以力助焉。鄰里訟爭。吾嘗居間以解兩家之紛。其尤無狀者。厲辭詰責。勢若霆摧。而理如的破。悍夫往往神沮。或具尊酒通殷勤。一笑散去。君子居下。則排一方之難。在上。則息萬物。

之蠶。其道一耳。梓梁道途廢壞不治者。孤嫠衰疾無告者。量吾力之所能。隨時圖之。不無小補。若必待富而後謀。則天下終無可成之事。蓋府君平昔所恆言者如此。國藩既稔聞之。吾父暨叔父。又傳述而告誡數數矣。府君諱玉屏。號星岡。聲如洪鐘。見者憚懾。而溫良博愛。物無不盡之情。其卒也。遠近感啼。或涕泣不能自休。配我祖妣王太夫人。孝恭雍穆。娣姒欽其所爲。自酒漿縫紉。以至禮賓承祭。經紀百端。曲有儀法。虔事夫子。卑謙已甚。時逢愠怒。則竦息減食。甘受折辱。以迴眷睞。年逾七十。猶檢校內政。絲粟不遺。其於子婦孫會。羣從外姻。童幼僕媪。皆思有惠逮之。權量多寡。物薄而意長。閱時而再施。太夫人道光二十六年九月十八日卒。春秋八十。葬於木兜沖。其後三年。而府君卒。春秋七十有六。葬於八斗沖。遷太夫人之柩附焉。其後十年。爲咸豐九年己未十二月。均改葬於大界。府君之先六世祖曰孟學。初遷湘鄉者也。會祖曰元吉。別立祀典者也。祖曰輔臣。考曰竟希。會祖妣氏曰劉。祖妣氏曰蔣。曰劉。妣氏曰彭。以國藩忝竊祿位。府君初馳封中憲大夫。後累贈爲光祿大夫大學士兩江總督。祖妣初封恭人。後累贈爲一品夫人。聖朝推恩。追而上之。竟希公累贈光祿大夫。妣彭氏。亦贈一品夫人。府君生吾父兄弟三人。仲父上台早卒。季父驥雲無子。以吾弟國華爲嗣。孫五人。軍興以來。惟國潢治團練於鄉。四人者皆託身

兵聞國華貞幹沒於軍。國藩與國荃遂以微功列封疆而膺高爵。而高年及見吾祖者。咸謂吾兄弟威重智略。不逮府君遠甚也。其風采亦可想已。會孫七人。元孫七人。凡茲安居足食。列於顯榮者。緊維祖德是賴。於是敘其大致。表於斯阡。今後嗣無忘彝訓。亦使過者考求事實。知有衆徵。無虛笑云。

台洲墓表

嗚呼。惟我先考先妣。既改葬於台洲之十三年。小子國藩始克表於墓道。先考府君諱麟書。號竹亭。平生困苦於學。課徒傳業者。蓋二十有餘年。國藩愚陋。自入歲侍府君於家塾。晨夕講授。指畫耳提。不達則再詔之。已而三覆之。或攜諸途。呼諸枕。重叩其所宿惑者。必通徹乃已。其視他學。儻亦然。其後教諸少子亦然。嘗曰。吾固鈍拙。訓告若輩。鈍者不以爲煩。苦也。府君既累困於學政之試。厥後挈國藩以就試。父子徒步。橐筆以干有司。又久不遇。至道光十二年。始得補縣學生員。府君於是年四十有三。應小試者十七役矣。吾曾氏由衡陽至湘鄉。五六百載。會無人與於科目秀才之列。至是乃若創獲。何其難也。自國初徙湘鄉。累世力農。至我王考星岡府君。乃大以不學爲恥。講求禮制。賓接文士。教督我考府君。窮年磨厲。期於有成。王考氣象尊嚴。凜然難犯。其責府君也尤峻。往往稠人廣坐。壯聲訶

斥。或有所不快於他人。亦痛繩長子。竟日嗚嗚。詰數愆尤。閒作激宕之辭。以爲豈少我邪。舉家聳懼。府君則起敬起孝。屏氣負牆。踖踏徐進。愉色如初。王考暮年大病。痿痺瘖啞。起居造次。必依府君。暫離則不怡。有請則如響。然後知夙昔之備責府君。蓋望之厚而愛之篤。特非衆人所能喻耳。咸豐二年。粵賊竄湘。攻圍長沙。府君率鄉人修治團練。戒子弟講陣法。習技擊。未幾。國藩奔母喪回籍。奉命督辦湖南團練。明年。又奉命治舟師。援勦湖北。府君僻在窮鄉。志存軍國。初令季子國葆募勇討賊。既又令三子國華。四子國荃募勇北征鄂。東征豫章。屢有成效。而府君遽以咸豐七年二月四日棄養。閱一年而國華殉難於三河。又四年而國葆病歿於金陵。朝廷褒卹。弁予美諡。而國藩與國荃遂克復安慶。江甯兩省。雖事有天幸。然亦賴先人之教。盡驅諸子執戈赴敵之所致也。初國藩以道光閒官京師。恭遇覃恩。封王考暨府君。皆爲中憲大夫。祖妣暨先母皆爲恭人。逮咸豐閒。四遇覃恩。又得封贈三代。皆爲光祿大夫。妣皆一品夫人。今上嗣位。四遇覃恩。又以戰績。兄弟謬膺封爵。於是會祖府君儒勝。王考府君玉屏。暨府君皆封爲大學士。兩江總督。一等侯爵。會祖妣氏彭。祖妣氏王。先妣氏江。仍封一品夫人。嗚呼。叨榮至矣。江太夫人爲湘鄉處士沛霖公女。來嬪會門。事舅姑四十餘年。饘爨必躬。在視必恪。賓祭之儀。百方檢飭。有子男

五人。女四人。尺布寸縷。皆一手拮据。或以人衆家貧爲慮。太夫人曰。某業讀。某業耕。某業工賈。吾勞於內。諸兒勞於外。豈憂貧哉。每好作自強之言。亦或諧語以解劬苦。咸豐二年六月十二日疾卒。九月二十二日。葬於下要里宅後。府君以七年閏五月初三日葬於周壁冲。至九年八月某日。并改葬於台洲之貓面腦。府君有弟二人。仲曰上台。年二十有四而沒。府君視病年餘。營治醫藥。旁皇達旦。季曰驥雲。推甘讓善。老而彌恭。無子。以國華爲之嗣。後府君三年而沒。女四人。其二先卒。其二繼逝。諸子今存者。惟國藩與國潢國荃三人。諸孫七人。曾孫七人。於是略述梗概。以著先人懿德。垂蔭無窮。而小子才薄能鮮。忝竊高位。兢兢焉。惟不克負荷。是懼云。

海甯州訓導錢君墓表

君諱泰吉。字輔宜。號警石。先世本何氏。明洪武中。有依海鹽錢翁鞠育者。遂承錢姓。厥後徙居嘉興。代有聞人。至文端公而益大。文端公諱陳羣。以侍郎予告。特加刑部尙書。晉贈太傅。君曾祖也。祖汝懋。早卒。本生祖汝恭。安慶府同知。父復。大興縣知縣。君少而苦學。潛心孤往。從兄曰儀吉者。字衍石。博通羣籍。早有高名。君事之。師友之閒。兄弟常以純儒相勉。蓋自弱冠後。遠近已盛稱嘉興錢氏。二石云。衍石以翰林改官戶部。擢御史給事中。久處京師。其後客游廣東汴梁。君則以廩貢爲海甯州訓導者。近三十

年。與給諫君離多合少。而書問叢沓。咨詢學術。勤逾數千言。自周秦諸子。馬班羣史。許鄭詁訓。杜馬典章。洛閩之淵源。唐宋名賢之詩古文辭。以及目錄。校讎。金石。書畫。方志。雜說。一孔半枝。無所不詢。蓋亦無所不辨。或獻一疑而詰難十返。或尙論前哲。評騭時流。雜以嘲詼鄙諺。窮極理趣。故二石家書。蔚然天下之至文也。給諫晚而搜刻經說。刊正譌謬。君自中年。卽好校古書。假人善本。及先輩評點之冊。寫而注之眉端。如史記前後漢書。晉書。集韻。元文類。禮記集說等編。皆勘校數周。一字之外。旁求衆證。嘗著曝書雜記。以發其凡。嘉慶中。海內猶尙考據之說。尊漢而黜宋。先博覽而後躬行。獨桐城姚氏鼐。恪守程朱。孤行不惑。宗主義理。不薄考據。而二石風指。乃與姚氏相近。其論文亦頗法姚氏。嘗稱以爲字體故訓者。漢儒之小學也。曲禮少儀者。宋儒之小學也。二者皆扶植基本。而宋重明倫。於道爲尤尊。兄弟相與修飭人紀。誦述先德。給諫輯廬江錢氏藝文略。君則纂清芬世守錄。皆表一門之懿行。以播芳馨。而詒典則。先是文端公嘗進呈其母畫冊。高宗賜題十詩。發還原冊。并書清芬世守四字。逮文端公致仕還鄉。高宗寄賜冊卷詩篇。累數千首。君纂輯此錄。具載君臣廣和。曠古無倫。又紀錢氏十餘世翰墨。及名公鉅儒題詠。上以著祖宗文獻之盛。下以勸後人孝友於弗替。其敘軼事。述彝訓。懇懇乎懼來葉之遺墮。有味哉其

言之也。咸豐庚申辛酉之際。粵賊縱橫浙中。君展轉播遷。最後由江西以達安慶。國藩乃獲與相見。以飄泊兵閒。偷得骨肉完聚也。則爲之破顏一喜。語及世事滄桑。邱墓成毀不可知。則又盡焉以悲。其明歲同治二年十一月廿日。卒於安慶旅舍。將沒。猶以先世文字之責。未能及身整理爲恨。足以知其志之所存已。君配胡氏。誥封恭人。子二。長炳森。道光甲辰舉人。出爲冢兄學源後。前卒。次應溥。以拔貢官吏部主事軍機處行走。加四品卿銜。君以子貴。累封朝議大夫。女六人。孫七人。孫女三人。君所箸又有學職禾人考。海昌備志。甘泉鄉人稿。亂後板燬。僅有存者。古今才智之士。常思大有爲於世。其立言常雄駿自喜。若文章不求雄駿而但求平澹。德業不求施於世。而但求善於一身一家。此殆非知者愉快事也。其無所不能之才。斂之又斂。彌晦焉而彌愉快。則其自得於中者必大矣。夫自得之學。惟君其庶幾哉。

新甯劉君墓碑銘

君諱時華。字廷材。號寶泉。先世自江西徙湖南之新甯。曾祖有義。祖儒禹。府學增生。父世貴。太學生。家貧。爲商賈。化居以自給。君生有至性。不忍其父久勞市廛。乃跪請曰。大人宜少休。兄學且有成。弟弱。兒願代父勞而服賈矣。遂遊資於江漢之間。量物度時。廣取而節用。後人而往。先人而歸。家

用阜康。親以大悅。父病。在視終宵。醫者言痰鹹可生。淡則死。君輒以手承。痰嘗之。味淡。因大哭。父沒。母亦前卒。則推其所以事父者。以事繼母。歸自武昌。繼母不憚。長跪自陳。遲歸之咎。繼母病。服勞達旦。營治藥物。必自其手。不自他人。繼母沒。則推其所以事親者。以事長兄。而蓄季弟。兄病。調護年餘。兄卒。弟後卒。則又推恩。以恤其孀。以鞠其孤子。厥後兩家孤兒皆成立。兩孀皆旌表於朝。壽皆七十八十。弟泣頌君之德。不敢忘云。新甯山邑也。僻在楚南黔粵之交。巨嶺層巒。穹窿雜襲。鬱撓而不得少舒。自古未聞偉人傑士。出於其間。亦乏甲乙科策。居民治生纖嗇。有唐魏之風。獨君與江太公一峯。輕財好義。不屑屑於自殖。江君之子諡忠烈者。仕至安徽巡撫。而君之子蔭渠。令爲直隸總督。並有勳伐。爲時名臣。蓋褊陋之俗一變。而山川之氣昌矣。當君初賈異縣。頗求饒益。以娛親心。旣而經紀有方。智足以擴其業。利足以仁其三族。所得資財。隨手散去。豈以濟物爲功。息耗都不訾省。鄉里除道成梁。捐金錢。惟恐不贍。施藥療疾。惟恐不周。嘗遇益陽大水。買小舟拯百人。藁葬數百人。新甯大饑。鎮鄰里親舊粟。日半升。全活無算。又嘗修育嬰堂。建忠義節孝祠。皆縣中前此所無。自君創之。城東北有義塚。歲歲常以冬春培其隄坐。而植其仆碑。城南有義塾。器物缺乏。常於君家取給焉。人或謂君歲入幾何。施諸人者什七。而自謀不及什三。

後將難繼。何不頗買田宅。爲子孫稍立基業。君笑謂家有薄田。自足供疏食。焉用多爲。吾以人情爲田。以培養土類爲種。耕不計年。穫不計世。庸詎知留貽子孫者。不更大乎。逮君沒而門內鼎興。君子四人。長名長佑。卽蔭渠也。以拔貢生歷官廣西巡撫。兩廣總督。直隸總督。加兵部尙書銜。次長佐。某官。次長伸。長健。某官。孫某某。曾孫永祚。永祺。天子褒長佑功。贈君暨君之祖父。皆爲光祿大夫。君配鄭氏。暨祖妣某氏。妣李氏。會氏。皆爲一品夫人。蓋君言於是果驗。爲善之報。抑何捷也。鄭太夫人恭儉寬仁。悉秉夫教。媿婦娣婦。寡居敬之。終身有恩。紀君卒。以道光三十年六月十四日。壽六十有一。太夫人先三日卒。壽五十有九。是歲十二月某甲子。合葬新甯西鄉楊溪村之鸞嶺。昔道光丁未戊申間。江忠烈公嘗爲余稱道蔭渠之賢。兼述其世德。及蔭渠入京聞親之訃。求余文銘其墓。展轉兵閒。久疏文字。越今十有七年。始得表而銘之。銘曰。

舉世奔利。獨行抱義。庸言庸德。感格天地。外救飢溺。內撫諸孤。仁心難隱。百憂一愉。孰云不顯。在幽彌馨。孰云無報。如影隨形。神覲在室。奇福在庭。卽君崛起。爲國干城。削平寇亂。鼎祭鐘銘。自天錫寵。褒榮先隴。夫彝之南。萬山環拱。我表其阡。來者欽竦。

母弟溫甫哀詞

咸豐五年十月。賊目僞翼王石達開。引其黨自湖北通城竄入江西。別有廣東匪徒曰周培春。葛耀明。關志江者。自湖南茶陵州竄入。與石逆相聚於新昌縣。周培春等投歸石逆部下。願爲前驅。石逆授之僞職將軍。總制軍師旅帥之類。兩逆黨者。合併爲一。江西亂民從之如歸。贛水以西。望風瓦解。十一月初十日。攻陷瑞州府。明日。陷臨江。晦日。袁州繼陷。遂圍吉安。明年正月二十五日。陷之。余徽副將周鳳山。率九江之師入援。二月十八日。軍敗於樟樹鎮。而撫州建昌兩府。以是月之季。相踵淪沒。國藩躬率水陸諸軍。自湖口入援。而南康又沒於賊矣。九江自爲賊踞如故。凡江西土地。棄之賊中者。爲府八。爲州若縣若廳五十有奇。天動地岌。人心惶惶。訛言一夕數驚。或奔走奪門相踐死。楚軍困於江西。道閉不得通鄉書。則募死士。蠟丸隱語。乞援於楚。賊亦益布金錢。購民間捕索楚人致密書者。殺而榜諸衢。前後死者百輩。無得脫免。吾弟國華。溫甫。自湘中間關走武昌。乞師。以拯江西。於是與劉騰鵬。峙衡。吳坤修。竹莊。曾承堯。欽堂。率五千人以行。而巡撫胡公奏請。以溫甫統領軍事。出入賊地。盛暑鏖兵。凡攻克咸甯。蒲圻。崇陽。通城。新昌。上高六縣。以六月三十日。銳師翔於瑞州。由是江西。湖南。始得通問。而溫甫亦積勞致疾矣。七月十六日。棹小舟昇疾至南昌。兄弟相見。深夜愔愔。喜極而悲。涕泣如雨。弟疾寢劇。治之多方。不效。至

九月乃痊。復還瑞州營次。瑞州故有南北兩城。蜀水貫其中。劉騰鵬軍其南。溫甫與曾承堯軍其西北。賊於東隅通外援。市易如故。七年正月。予率吳坤修之師。自奉新至東路。始合長圍。掘塹周三十里。溫甫則大喜。吾攻此城。久不舉。今茲事其集乎。不幸遭先君子大故。兄弟匍匐奔喪。入里門。宗族鄉黨。爭來相弔。亦頗相慶慰。國藩得拔其不肖之軀。復有生還之一日。溫甫力也。溫甫既出嗣叔父。以咸豐八年二月。降服期滿。復出抵李君續賓廸菴軍中。李君與溫甫爲婚姻。益相與講求戎政。晨夕諮議。是時九江新破。強悍深根之寇。一掃刮絕。李君威名聞天下。又克麻城。蹶黃安。喋血皖中。連下太湖。潛山。桐城。舒城。四縣。席全盛之勢。人人自以無前。師銳甚。溫甫獨以爲常勝之家。氣將竭矣。難可深恃。時時與李君深語。悚切。以警其下。亦以書告予。盱上。竟以十月十日軍敗。從李君殉。難廬江之三河鎮。嗚呼痛哉。曩吾弟以新集之師。千里赴援。摧江西十萬之賊。而無所頓。今以皖北百勝之軍。萃良將勁卒。四海所仰望者。而壹覆之。而吾弟適丁其厄。豈所謂命耶。常勝之不足深恃。吾弟之智。既及之矣。而不肯退師。以圖全。營壘以十三夜被陷。而吾弟與李君。以初十之夕。併命同殉。又不肯少待。以圖脫免。豈所謂知命者耶。遂綴詞哭之。詞曰。

鱣鱣我祖。山立絕倫。有蓄不施。篤生哲人。我君爲長。魯國一儒。仲父早世。

有季不孤。恭惟先德。稼穡詩書。小子無狀。席此慶餘。粲粲諸弟。雁行以隨。吾詩有二。午君最奇。挾藝千人。百不一售。彼麤穢者。乃居吾右。抑塞不伸。發狂大叫。雜以嘲諷。萬花齊笑。世不吾與。吾不世許。自謂吾虎。世棄如鼠。相舛相背。逝將去汝。一朝奮發。仗劍東行。提師五千。往從阿兄。何堅不破。何勁不摧。躍入章門。無害無災。壘篋鼓角。號令風雷。昊天不弔。鮮民銜哀。見星西奔。三子歸來。弟後季父。降服以禮。匝歲告闋。靡念苞杞。出陪戎幄。匪辛伊李。既克潯陽。雄師北邁。剡潛剡桐。羣舒是嘒。豈謂一蹶。震驚兩戒。李既山頽。弟乃梁壞。覆我湘人。君子六千。命耶數耶。何辜於天。我奉簡書。馳驅嶺嶠。江北江南。夢魂環繞。叩慟抵昏。西悲達曉。莽莽舒廬。羣凶所窟。積骸成岳。孰辨弟骨。骨不可收。魂不可招。崢嶸廢壘。雪漬風飄。生也何雄。死也何苦。我實負弟。茹恨終古。

予於道光甲辰寄諸弟詩有云。辰君平正午君奇。屈指老坑真白眉。辰君謂弟澄侯。生庚辰歲。午君謂溫甫。生

壬午歲。老坑即坑甫也。

吳君墓志銘

吾邑吳君榮楷。既以道光辛丑成進士。將之官浙江。乃手其先人狀請曰。吾父母棄養十二年矣。窶窶之事。粗已安吉。尙未有以銘幽室。子其爲我銘之。固辭不獲。按狀。先生姓吳氏。諱文深。字致遠。湘鄉人。曾祖文章。祖太若。父振世。皆以愿謹稱。家故饒。振世公既老。攜資客遊常德。先生從之行。

留明遠翁家居。明遠先生兄也。常德去湘鄉千餘里。逾二年而振世公卒。鄰里無行者。利其有。率衆闖然至喪次。叫囂隳突。雜以胥役。先生雞斯徒跣。擊胸如壞牆。號泣向衆曰。孤兒在此。環顧無功。總之戚。無密友幹僕。若輩不哀吾喪而迫人於難。是可忍乎。且胥役何爲者。孤兒請以泣血濺縣官之庭矣。衆瞠視各鳥獸散。乃部署喪事。從容扶櫬歸相。時先生年十六歲也。既歸。事母益謹。然家益落。遂與明遠翁經營生計。惟母養特豐。他則皆從儉約。久之。復稍裕。吳氏自鼎革後。譜牒散佚。先生力爲倡修。特徵詳核。數年而成。既又倡修家祠。明遠翁捐基地數十畝。先生竭力締構。夫其拮据漂搖之際。旁午未遑。而能敬宗收族。先其大者。可謂知本矣。道光某年某月某日卒。年八十有四。葬某縣某里某原。配宋孺人合葬焉。宋孺人少先生十餘歲。既來歸。尤耐艱劬。振世公之客常德。孺人不逮事也。逮事姑。曲意承歡。如恐失之。性好卹窮困。鄰婦紡績無資。則罄所有給之。先是明遠翁常外出。有子名榮林者。絕穎異。先生擇師督讀。視猶己子。遂以成立。爲名諸生。已而榮楷兄弟皆從之受業。孺人之視榮林也。不以爲姪也。以爲師也。邑人咸謂先生之教子。孺人實贊之二云。某年月日以疾卒。年六十有一。子二人。長榮楫。邑庠生。次卽榮楷。孫光煦。邑庠生。次某。次某。女孫七人。銘曰。

少而禦侮豪強伏。長而克家宗族睦。耄而韜光訥且樸。訥乎樸乎。黑而黝者福乎。斧之蘂之。舟之方之。夫子之協琴瑟以將之。宰樹青青。有桐有梓。我銘諸石。以妥泉宮。以昌其孫子。

彭母會孺人墓志銘

天道五十年一變。國之運數從之。惟家亦然。當其隆時。不勞而坐獲。及其替也。憂危拮据。而無少補救。類非人所爲者。昔我少時。鄉里家給而人足。農有餘粟。士世其業。富者好施與。親戚存問。歲時餽遺繼屬。自余遠遊以來。每歸故里。氣象一變。田宅易主。生計各蹙。任卹之風日薄。嗚呼。此豈一鄉一邑之故哉。王姑彭孺人。吾祖之伯姊。其冢婦。又吾姑也。兩世之好。視他戚尤厚已。王姑之未嫁也。事吾曾祖王父母。以孝聞。既適彭宜仁先生。相夫敬克厥愛。無片言稍忤。自吾成童以後。王姑已五十餘。其堂上舅姑。八十有奇矣。每見王姑。奉甘旨。未嘗不潔。議酒食。未嘗不豫。大而課讀勸農。未嘗不營慮。小而廁臉灑掃。未嘗不躬親也。蓋余所見賢母。無如王姑勤者。早歲物產殷饒。內奉菲薄。外圖豐潔。比年以來。稍稍緜絀矣。己亥秋。余將入都供職。走辭王姑。視其庭除。氣象不侔。憫其愈勤。又驚其衰。爲之泣。王姑亦泣。蓋心知其不可復見。而哽咽不能言也。竟以次年春卒。豈不悲哉。王姑生乾隆二十九年甲申十一月十七日。卒於道光二十年庚子。

三月二十三日。壽七十有七。葬湘鄉二十四都西坪山陽首辛趾乙。子三人。長慶齡。予姑夫也。先孺人二年卒。次慶吉。次慶也。好學能文。孫六人。毓耒。毓楷。毓橘。毓椿。毓杖。毓麓。女一。孫女一人。銘曰。

懿我王姑。旣莊以孀。佩管舟鱗。德容棣棣。勛哉夫子。儷光脩鳩。五十餘載。无途有終。曷瘁厥躬。言育我鞠。無恥我壘。實繁旨蓄。離離令問。匪爾伊遙。貽澤之蔭。何幽不喬。南山聿萃。宰樹青青。弗騫弗拜。萬代千齡。

余安人墓志銘

攸縣余世校。客京師五年。聞母訃。將奔喪。以銘墓之文來請。且曰。世校生不能侍槃匱。歿不能視含斂。是罪人也。先生幸。次吾母淑行。以光幽室。按狀。安人姓譚氏。衡山舉人昌明之孫。廣西巡檢禹門之女。七歲喪母。事繼母以孝聞。適攸別駕余君。君山瀑順衷和。翼翼如也。久之。別駕君之漢陽分府任。以家事屬安人。時堂上舅已棄養。姑老矣。諸子弱小不識事。安人謀初越終。鉅細必躬。祭必虔奉。免薨必時。委諸子於學。朝而饜饔。禮師。夕而課男。旋課女。課畢而紡績。而經營錢布。如是者十餘年。而精力衰矣。道光辛丑某月某日。以疾卒。春秋六十有七。以某年某月某日。葬某縣某里某原。子四人。長世柄。次卽世校。廩貢生。次世芳。次生春。縣學生。女一。孫九人。某某。世校之入都也。安人拊其背而戒之曰。去去強飯。鄉里齷齪。終不

得進取。京師文物殷鱗。賢士大夫繹繹如繁星。汝往勸哉。名自可致。學可染人。道德有軌塗可循。而青紫可拾也。往矣。勿吾念。今世校雖不得爵位。而業日進。聲聞日敷。謂非安人之教哉。嗚呼。可謂知其大者已。是宜銘。銘曰。

維車有輔員於輻。維矢有房利於鏃。維壺有賢。維家之福。光光別駕。亦載其贄。悻悻碩人。既詒斯肆。雖則詒肆。無儀以無蹟。無蹟於山。曰巢於巔。口卒瘞。兮手復脫。鳳之雛。兮谷之遷。不得反哺。兮涕漣漣。銘幽表淑。兮千萬年。石不爛。山不蹶。

陳岱雲妻易安人墓志銘

道光二十四年正月。陳君岱雲喪其配易安人。則大戚。哀益於禮。已而謂國藩曰。子知吾之哀乎。吾祖自康熙間。由茶陵徙長沙。六世百餘年。今其存者五人。吾門祚之衰可知也。吾父之沒。至今十六年。而死亡相繼。凡十三役。吾母之不能一日以歡可知也。吾妻從宦五年。既沒而斂。求衾衣無一完者。吾之貧可知也。人之居此世者。謂何。吾欲不過哀得乎。則又曰。吾妻之賢。子宜有所知。請爲銘。余曰。然。固知之。蓋安人卒之前一歲。陳君嘗大病。余朝夕存問。備得安人侍疾狀。他日。又得陳君所述。以是頗詳。陳君之病。凡三閱月矣。安人單憂極瘁。衣不解帶者。四十餘日。凡可以自致者。

無弗致也。久之。則禱於室神。求促其身之齡。以益夫壽。猶不應。六月丙戌。乃割臂和藥以進。當是時。安人之母弟易光蕙。及陳君之友三數人者。皆在。惶愕不知所爲。國藩則仰天歎曰。陳氏累世。賴以不墜者。獨此人耳。而有他乎。然已無可奈何。明日。疾乍平。則皆訝。光蕙覘安人衣袖血蹟。稍廉得之。不敢以詢。又數日。疾漸瘳。乃詢之。安人曰。其有之。此不幸事耳。勿復言。傷病者心也。道微俗薄。舉世方尙中庸之說。聞激烈之行。則訾其過中。或以罔濟尼之。其果不濟。則大快奸者之口。夫忠臣孝子。豈必一一求有濟哉。勢窮計迫。義不反顧。效死而已矣。其濟天也。不濟於吾心。無憾焉耳。安人本醴陵人。居長沙。處士昌綱之孫。歲貢生履元之子。以孝謹特爲父母所愛。生二十二歲矣。而難其適。有王秀才者。自負知人。謂歲貢君曰。茶陵陳某。神仙人也。卽擇壻。不可失此子。今貧不能衣食。數年後。當爲達官。不者。且挾吾目也。是時陳君之元配沒二年矣。旣歸陳。不逮事舅。以事其父者敬姑。而以其母者致愛焉。以是得姑歡。凡修所職。皆衷於大體。無鉅細必慙。詩曰。何有何無。龜勉求之。茲可謂賢矣。况有至行。足感神明者哉。安人生於嘉慶某年月日。年三十有一。生子男二人。長遠謨。次遠濟。生四十日而安人卒。女一人。將以某年某月某日。歸葬於某縣某鄉某原。余旣重其諱。乃先期銘之。以激懦者。亦少塞陳君之悲。陳君名源。克。今爲翰

林院編修纂修國史也。銘曰。

民名有天惟所洽。燾我以生託其下。子道臣道妻道也。以義擎天譬廣廈。其柱苟頽無完瓦。自今無以身代者。有一於此雙蓋寡。憂勞積劇焉可支。天之所隕非人尸。既修淵短誰敢訾。銘茲大節貞厥垂。有他淑行以類推。

新化鄒君墓志銘

君諱與愚。字子哲。鄒姓。先世由江西再遷至湖南新化居焉。有瑁玉者。以選拔貢生。官永明縣教諭。是生祖詢。縣學生。於君爲高祖。曾祖某。祖某。皆不仕。父某。家貧。客遊陝西紫陽。族子有先家於是者。遂因其戶籍。補紫陽縣學廩膳生。生二子。長與魯。次卽君。君生數歲而廩膳君卒。依母會氏力食僅存。痛繩於學。年十六。仍補縣學生。二十五。舉道光庚子陝西鄉試。甲辰。再上公車。不第。歎曰。吾不得祿。餓死無所損。然如吾母何。益發憤不歸。日刻錢以食。爲文務極思。同業者或不能究其指。明年乙巳二月。疾作。不得與禮部試。竟以六月九日卒於京師。年三十耳。君性慤直。糾友之違。盡言無異。有餽以財。辨義無小。非其義。卻之無大。安貧若天性。然庚子赴省試。其師陳僅資之金。君盡以金奉母。而自囊錢八百。負布被徒步露宿。行千里。僅益敬之。僅故爲紫陽令。見君文。奇之。憐愛如親戚。月繼米贍其家。久之。僅徙官他縣。移君家就養官所。而別以資贈君之京師。君且死。泣曰。

吾負大恩未報命也。遂絕。既卒。其友人江忠源職其後事。其從兄子律歸其喪紫陽。將立其兄子隆岱爲嗣。而國藩買石先事爲銘。銘曰。是人非蚓。生世實艱。爰有狷者。伯夷是班。有投以幣。擲棄如菅。或泰於取。負恩如山。恩不果酬。母不終將。又寡厥配。厥氏維黃。僅遺子息。天其俾臧。吾言可信。納芬於藏。

單縣典史張君墓志銘

君諱鼎五。字薌陞。世居浙之蕭山。會祖朝琮。直隸通永道。祖文瑞。山東青州府海防同知。考學斯。廣東主簿。主簿君兄弟三人。長偉山。次滌三。皆不仕。滌三以子湘崖官汀州知府故。贈官如其子。主簿君官粵。噤不一施。遽卒。君時五歲耳。依母童安人。萬里返葬。孤貧赤立。斬焉自修。久之。乃遊楚。依從兄黃陂令湘崖。湘崖由楚徙豫。三遷而官汀州知府。君壹從焉。居亡何。荆梁教匪蠱起。蹂躪三省。兵餉糜萬萬。朝廷議民有輸金縣官。得除爲吏。嘉慶四年。君由是官山東署沂水縣丞。補單縣典史。單故多豪右。素慢易。尉君抑桀扶危。峻拒干謁。傷恤獄囚。痛與糞除。漉其污溼。而時其凍餓。後三十年。君退歸。囚有疏紹興者。途遇君。匍伏叩頭。君錯愕。囚曰。某單縣人也。清獄之惠。不敢忘。宦單十年。歎曰。尉所得爲者。吾既爲之矣。吾所欲爲者。豈尉謂哉。聞竟移病歸。而山東舊僚酷慕君。累書招致。乃復薄遊齊。

魯傳客淮泗之間。至七十二歲。始杜門不出。又一紀。乃考終云。君於孝友。若趨利。然初喪父。童安人撫之。積勳僅存。內外無倚。寒飢力學。夙興。母鬻級。君負薪。恐傷母手。盡拔芒刺。然後之塾。或竟日無所得炊。母子對泣。已而互慰。汀州君以事牽連被劾。君營護奔告。凡四晝夜。行千餘里。卒脫汀州君。於是人人翕然。伏君之內行也。道光壬寅十月四日卒。配陳安人。祇順敦儉。見者師效。子男子三人。長錫戊。浙江鄉試舉人。次百揆。以一甲進士通籍。爲翰林院編修。次百衢。殤。女子三人。長適某官。某次適某官某。次適某。孫某某。百揆之舉於鄉。與余同年。相善也。以某年月日葬君某縣某原。來徵銘。銘曰。

折榘作桷。蒿作梁。大小易位。今古傷。有嘉一尉。仁且彊。皓首卑栖。不得曠。身之乖時。遭厥子。愼終下。臧魂藏此。我最其行。垂孔軌。萬千億年。無壞毀。

前海甯州知州長沙李君母黃宜人墓志銘

宜人。善化黃君孝職之子。長沙李君天錫之婦。救贈奉直大夫。熙臣府君之妻。而浙江海甯知州象昺之母也。海甯之爲良吏。楚之賢者。與浙東西之士庶。莫不知聞。而海甯君曰。非吾之能。繫吾母之勳。宜人之歸李氏。家微也。歲入不足自贍。贈君則奔走。以取給大府之從事。郡縣吏之賓客。裘而往。葛而不歸。朔而寓書。再晦而不達。如是以爲恆。宜人挈鉅省。細壹不

假人。督二子入學。晨有責。夕有程。就傳之所需。不足。則貨田宅資之。海甯以選拔貢生。廷試爲縣令。每獄成。宜人則詢曰。毋已寃乎。族黨有來官所者。則曰。毋貧乎。卽有平反。而餽飲厚。則宜人喜。卽無所平反。或餽飲稍廉。則慍見於色。故海甯之發名樹績。雖贈君亦嘗曰。宜人之力也。海甯以道光戊戌。奉贈君之喪歸葬。宜人雖老。習勤不改。又六年。甲辰正月六日。年七十二以卒。卽以其年某月日。葬某鄉某原。有子二人。長象晟。先十年卒。次卽海甯。孫六人。某某。會孫二人。某某。宜人以道光十四年。册立孝全皇皇后。恩勅封孺人。卒後一年。皇太后七十萬壽。天子推恩錫類。迺得誥贈宜人。又二年。乃諡余文其幽。將追事焉。末世稱述列女。好道其奇特者。異則異矣。而難爲式也。方贈君客遊四方。每出屬曰。上吾父。每下吾子。以付女。及宜人侍姑疾。三年無絲毫異志。舅病大漸。贈君自客遠歸。越夕而遭喪。大慟不知所爲。而宜人於附身之具。已夙嚴矣。夫其教子也。如彼。而其事親又如此。此殆庸行。無足標絕者。幼然而難可幾矣。銘曰。洞庭之南。有賢刺史。龜食筮祿。葬母於此。誰與銘者。澧水會氏。深刻大書。以詔無止。

適朱氏妹墓志

適朱氏妹。吾父之第三女子也。與而病痾。父母恐不寘于壻。特慎許人。年

二十二矣。友人某告余曰。聞若爲女弟。擇所歸。有朱氏子詠春。愿而敦。訥而慈愛。必得佳婿。莫良此子。國藩卜之。吉。請於父母而嫁與之。道光十九年十月也。是歲國藩以初廁詞臣。乞假家居。而朱氏之諸昆。亦適有舉於鄉者。兩家父母大父母各無恙。里人頗稱門祚之盛。親迎之夕。姻婭族黨會者數百人。越三日。內無長幼。皆以爲賢。外無戚疏。皆以爲祥。比及反馬之期。則舅姑之所職者。悉以委決新婦。妹故明慧。粗解書數。條分件布。咸有節文。由是遠近謂朱氏有賢幹婦矣。二十六年丙午。以產難卒。凡春秋二十有九。室於朱者八載。有子一人某。卽於九月某甲子。葬於某縣某里某山。吾姊妹四人。季者早殤。二長者竝窮約。不得怡。獨朱氏妹所處稍裕。而少邁痼疾。又離婉厄以死。何命之不淑也。妹卒以八月晦日。不踰月而吾祖母棄養。國藩竊祿京朝。發一家書。而兩遭期功之喪。又何痛也。於是泣識其略。使詠春追埋諸幽。且敘其內外家之系。而聲以銘詩。以宣吾悲。銘曰。

有女會姓聖爲宗。父班泮水祖辟雍。兩世大夫帝褒封。母江夫人勅且恭。鞠茲惠質艱厥從。嬪朱其先國比莒。納夫方軌轡如組。君舅鎮湘鄉所舉。銘者母兄滌生父。濫屬朝官無寸補。

滿妹。吾父之第四女子也。吾父生子男女凡九人。妹班在末。家中人稱之滿妹。取盈數也。生而善詭。旁出捷警。諸昆弟姊妹竝坐。雖黠者不能相勝。然歸於端靜。笑罕至。矧。道光十九年正月晦日。以痘瘍。明日。吾兒子楨第相繼亡。妹生於世十歲。兒三歲也。卽日瘞諸居室之背。高嶺山之麓。吾母傷弱女與冢孫。哭之絕痛。聞命諸子曰。二殤之葬也。無碑以識之。卽墳夷級陵。誰復省顧者。國藩敬諾。亡何。繫官於朝。公有執私有孀。久不得卒事。越八年。而適朱氏妹徂逝。以其新悲。觸其夙疚。愴然不自知。何以爲人也。於是粗述一二。遺家人植石墓北。且綴之辭。使有垂焉。銘曰。

荆門州學正郭君墓銘

物有初阜。或嗇其終。有秘於後。而窳其躬。陶公之山。潛蟠卅載。雙雞雲興。吐騰滄海。持鐸再徇。當陽荆門。祁祁學子。如飢授飧。刑獄有箴。扇仁孔永。胡德之遐。光不長炳。入龍岡下。斑竹原中。埋我銘語。載奠幽宮。

善化夏母楊宜人墓志銘

宜人。甯鄉縣學士楊君開梅之孫。處士應灼之女。善化馳贈奉直大夫夏君諱某之子。媿。贈奉直大夫諱某之配也。宜人在家。則溫恭孝。豈偏獲於親。擇所宜歸。莫良夏氏。旣歸。事舅馳贈君。及姑劉太宜人。逆志而籌之。未

命而赴之。甘旨之調。不躬不進。贈君前所配黃宜人者。已早卒。僅遺一女。有兄與嫂亦卒。遺三子。贈君又仍歲多病。家無鉅細。壹委宜人。宜人共潔祭祀。斟藥禮醫。裁贏補紉。公私井井。視前女如己女。不敢毫末替焉。視己子如從子。不敢毫末加焉。督諸子之學。日省而月稽。師塾之饌。豐倍其室。就試於有司。出必戒。反必詰。其見錄也。悅而不盜。其黜也。救而不怒。以是諸子皆底於成。道光十七年。次子家泰舉於鄉。又三年庚子。長子家鼎舉焉。又三年癸卯。季子家升繼之。又二年乙巳。家泰登名於禮部。主政於吏部。值皇太后七十聖節。天子大孝錫類。遂得覃封。褒封兩世。而家鼎亦以是年。充景山官學教習。蓋自贈君之歿。至是二十年。中間郡縣行省之試。獲雋者無歲無人。而婚嫁喪紀之役。亦薦至不絕。皆宜人一心營治。而亦以勞肆甚矣。道光二十六年八月十九日。以疾卒。春秋六十有八。卽以其年十二月某日。葬於甯鄉黃花塘鳳形山之陽。有子男六人。長次卽家鼎。家泰。又次家豫。太學生。又次家謙。早卒。又次卽家升也。又次家賁。出嗣從祖兄弟萬程後。女二人。長適蔣。前卒。次適侯。孫男十二。降服孫二人。孫女八。曾孫女二人。宜人寬仁周摯。救困如焚。深達大義。不徇私愛。疾篤願言曰。寄語鼎兒。泰兒。努力當官。無以家爲念。以二子時在京師也。將奔喪。以銘屬國藩。越二年。乃銘之。而追內諸幽。銘曰。

祀恪賓周。別氏維夏。承馥遠牟。踵興達者。宛宛女宗。亦大其間。迪將多子。竝騁天衢。諸孤遺經。十年手澤。影其羣起。下報我特。報以吾職。不告實勞。職之靡負。厥伐斯高。鑄於樂石。千世其牢。

祖四世元吉公墓銘

道光歲戊申。家叔父爲太高祖考妣署祠宇。其明年。又爲修其墳域。乃郵書於京師。命國藩記其源委。國藩於公爲六世孫。公之行事不盡悉。謹按家乘。及傳聞於祖父者。以表於公之墓道。公諱應貞。字元吉。遷湘四世祖也。少貧。手致數千金產。室廬數處。盡以予其子。而自置衡邑之澁塘灣田四十畝以老焉。公沒後。子孫歲分其租以爲常。至嘉慶歲丁巳。家祖及族長尊三。以彰二公糾族之人。議積一歲之租。以爲公清明之祀。今所置圳上之田是也。家叔父所修祠宇在焉。而澁塘灣之田。族之人。又於嘉慶壬申。議永爲公祀田矣。獨公之墓未修。族衆憂之。家叔父乃慨然任之。糾工不一月。竣。距公沒時。已八十餘年矣。公生於康熙甲戌年二月廿三日辰時。沒於乾隆甲申年八月十五日巳時。配劉太孺人。生於康熙乙亥年三月十二日未時。沒於乾隆甲申年三月初二日子時。合葬於湘鄉大界鄉羅家屋場後之陽。子六人。長楚材。次輔臣。次文炳。次明德。次兼山。次容若。國藩乃公次子輔臣公之元孫也。銘曰。

昔公創業源遠流長。服疇食德。寢熾而昌。菴龍鬱積。有耀其光。千秋宰樹。終焉允臧。

國子監學正漢陽劉君墓志銘

道光二十有八年九月十八日。吾友漢陽劉君卒於家。年三十有一。踰月。訃至京師。國藩爲位哭於舍旁道院。途徧告諸友。皆相弔。哭有失聲者。明年某月某日。葬於某里某山。劉氏先隴之次。國藩乃爲銘。伐石於都下。寓舟浮江。以達於漢。既不及事。則追而埋諸墳之趾。君之爲學。其初熟於德。清胡渭。太原閻若璩。二家之書。篤嗜若渴。治之正反。既與當世多聞長者游。益得盡窺國朝六七鉅儒之緒。所謂方輿六書九數之學。及古號能文詩者之法。皆已規得要領。采名人之長義。與己所考證。雜載於書冊之眉。旁求秘本鉤校。朱墨竝下。達旦不休。久之。稍損心氣。又再喪婦。遂疾作。不良食飲。君自傷年少羸弱。又所業繁雜。無當於身心。發憤歎曰。凡吾之所爲學者。何爲也哉。舍孝弟取與之不講。而旁驚瑣瑣。不以慎乎。於是痛革故常。取濂洛以下切己之說。以意時其離合而反覆之。先是君官國子監學正。薄有祿入。而婦翁鄧氏資之數千金。歲益饒給。至是盡反。金鄧氏而移疾罷官。將家居。食力以爲養。蓋浩然自得。以歸。歸未數月而奄。及於死。可哀也。始君之歸。嘗語國藩。沒世之名不足較。君子之學。務本焉而已。吾

與子儼精於讐校。費日力於文辭。以中材而謀兼人之業。儼倅於身後。不知誰何者之譽。自今以往。可一切罷棄。各敦內行。沒齒無聞。而誓不復悔。國藩敬諾。其後君歸。果龜勉孝恭。族黨大悅。規畫家政。條議廳具。而君遽卒。命之永。不永。不足憾。獨其事親從兄之志之美。且堅。而不克竟其事。茲其可悲者也。而國藩之無似。不克踐死別之約。以一塞故人地下之望。此又余所深恥而切痛者也。君諱傳瑩。字椒雲。曾祖良琨。祖方仍。世有隱德。父正柏。以君官封徵仕郎。母葉氏。封孺人。始娶湯。繼娶陳。皆前卒。終娶鄧氏。君之反婦家金。鄧贊成之。無子。以兄子世圭嗣。君之學業。其考核載於書冊之眉者。與其詩古文皆不以刊布。惟搜得朱子所輯孟子要略一書。國藩爲校刻行於世。修君志也。銘曰。

竝吾之世。江漢之濱。有志於學者一人。其體魄藏於此土。其魂氣之陟降。將游乎在天諸大儒之門。敢告三光。幸照護乎茲墳。

錢塘戴府君墓志

錢塘少司馬戴君。既葬其親。資政府君王太夫人。六年。未有以聲諸幽。乃以命其友會國藩。國藩爲譜其系。述其行。紀其恩遇。因及其息。以識其葬。其系曰。周植湯。後於宋。幽王時。宋公諡戴後。遂以公族爲氏。聖與德。扶經闡教。襲爲通儒。傳至南唐。安爲銀青光祿大夫。上柱國。諡忠恭。子奢。始居

新安之隆阜。孫處居上溪口。仍世爲儼人。至明崇禎間。有一笑者。仕浙江都指揮經歷。子孫遂爲錢塘人。會祖永莖。祖承儼。考佳瓊。兩世皆封朝議大夫。朝議君生四子。長道亨。鄉試爲舉人。次道立。議敘府同知。次道泰。府君諱道峻。字升甫。其季也。王太夫人考曰通泗。贈奉直大夫。其門族自爲風氣。杭人甲乙目之。其行曰。府君綜洽羣書。不以一疏自域。不與橫目之民爭利。不與逆撻者校曲直。改葬長兄之墓。迎主於家。而時其祭。從父墓崩。易棺而遷葬。又葬其姊之夫。又葬其師之無主後者。少嗜碑碣。繼耆古扇。聚以千計。老耆古金泉刀布幣。兼收博考。既寄於三者。乃冥於萬物。陶然自娛。不爲執必。凡譽毀窮通。有亡壹等。齊之終其身。不以關於慮也。太夫人操作暇豫。而供具倍於衆手。御下無甚色。而僕婢肅然。嫁衣燬於火。而無戚容。將死而無哀語。其恩遇曰。府君既補學官弟子。七試於鄉。而七黜。以子熙貴。敕封儒林郎。誥封朝議大夫。既沒而熙躋卿貳。國恩例晉資政大夫。太夫人初封安人。繼贈恭人。亦例晉夫人。其息曰男子三人。長卽熙。以翰林三直南書房。再視廣東學。累官至兵部右侍郎。次曰煦。府學生。明天官算術。次曰燾。議敘府同知。女子四人。皆歸士族。孫十一人。有恆府學生。以恆之恆。縣學生。可恆。如恆。果恆。其恆。斯恆。所恆。自恆。爾恆。孫女三人。會孫三人。兆登。兆春。兆衡。會孫女一人。其葬曰。太夫人卒於道光十五年。

年四月十八日。年六十七。明年九月十七日。葬於西湖之三台山麓。越七歲。道光二十二年三月十七日。而府君卒。春秋七十有三。卽以其年十二月十一日。穿太夫人之域而合葬。旣固旣處。永貞無紀。銘曰。

錢王湖濱有一士。十年內廷書畫史。會使嶺南萬里行。又坐樞府統九兵。是爲府君之令子。實奉老親葬於此。旣葬六載。吾爲銘。下告誰何。上日星。

崇仁謝君墓志銘

君諱廷恩。字拜賡。姓謝氏。少則貧甚。讀書裁盡論語。遽去而之農。又之商。南入閩。西入蜀。逐物貴賤。轉徙常贏。嘗與鄧氏俱爲賈。主計者誤以金六百入君。君密歸其金。而戒主計者更易簿記。鄧氏由是厚德君。遠近布聞。人人爭欲相倚助矣。亦有天幸。所居恆獲。累致巨萬。爰輒散之。爲縣建義倉。構廩四十二間。貯穀萬六百石。捐金凡千三百斤。建育嬰堂。捐金二千兩。家置宗祠。捐穀若干斛。郡縣立羣祀廟。捐錢若干緡。學官於新進生。例取束修之資。新進生或貧乏無所出。則又爲捐四百萬錢。君弱冠孤寒。蝟蝟赤立。商賈所入。盡委義舉。苟利於人。不以絲毫自爲顧計。苟力所能。劬勞百於人。不辭也。自太守縣令。爭欲致君。君終不一私謁。邑有大役。長官杖任。羣目相屬。君亦不以他人規我。稍爲辟縮。蓋行之五十載。靡財不可算。而君年亦七十矣。先是崇仁有黃洲橋。屢修屢毀。以資用浩博。莫敢大

與。至是君出任之。錐石鎔金。堰水淘沙。衆匠束手。叩君計畫。橋成。廣一丈九尺。袤四十七丈。費白金六萬而強。以七十二歲而經始。四載而畢。畢工二載而君卒。壽七十有七。道光二十一年九月廿四日也。祖亮彌。考上許。並贈中憲大夫。君以急公聞於朝。議敘巡檢候選。又以子貴。贈中議大夫。配周氏劉氏。皆贈淑人。子蘭階。候選州同。蘭生進士工部郎中。蘭英優貢生。蘭墀刑部員外郎。蘭齲縣學生。女五人。孫男子十二人。女子九人。以某年某月日。葬於某鄉某原。既葬之幾歲。蘭墀屬予爲銘而追事焉。銘曰。民之豐約。有尸在天。彼富而吝。終或餒焉。貧而能施。積乃如山。徒手十載。富埒周公。一毫匪義。神鑒厥衷。聚有神監。散有天視。利濟宏多。人天駢喜。佔畢豈久。僅盡魯論。因心之矩。察其經綸。光儀既整。奕世承福。載厥徽猷。以愧儒服。

劉母譚孺人墓志銘

國藩不肖。幸得內交於當世之通才碩學。仁人君子。不爲不多。而莫夙於里中劉蓉孟容。諳亦莫隆焉。以是瀑於人。人亦瀑之。以謂兩人者。天下之至愛也。自余挂名朝籍。待罪六官。去父母之邦。十有四年。孟容之中屢儀度。不可接於吾之目。其語笑不可際於吾之耳。僅以書問勞遺。然且闊絕。或望甚私。怨喁喁。咸豐二年六月。先太夫人棄養。孟容亦以五月二十八

日喪母。國藩匍匐來歸。兩人者相遇於縣門。斬焉對泣。自傷老大。又離凶
疚。而是時粵中途賊。方渡湖而北。聯巨艦數十里。旌旗蔽江。譎言雷動。其
後遂破漢陽。陷武昌。明年。又殘九江。掠安慶。入江甯揚州。而據之。烽火達
於淮徐。天下震駭。國藩以天子命。治團練於長沙。挾孟容以俱出。苦語窮
日夜。相與悲憤追憶。誠不意世變遽已。抵此。患氣之積。有自來也。五月辛
亥。孟容將葬母於樂善里。竟仲山之陽。乃不敢自致。謹致其太公之命曰。
四方多難。而陵谷有不可知。汝既獲私於會君。葬有日。宜從會君謀。所以
識其葬者。遂督銘。銘曰。

譚有淑妃。衛姜之媿。仍世不墮。名媛紹之。來室於劉。莫逮先姑。繼姑曰謝。
投溫承愉。胡洪胡瑣。室事敦我。未匱先防。有置無頗。夫子人傑。是名振宗。
畸以平劑。如羽諧宮。廣賚窮民。鄉亭大悅。身無華御。終年補綴。魚菽尸祭。
蠲簋必躬。孝婦篤敬。遂與天通。篤生五子。長其蓉也。徑歸淵騫。吾見亦寡。
二仲竝塲。化爲黃土。次葬次蕃。膠駕如舞。三女婉婉。皆嫁士人。兩孫葩茁。
玉立振振。長曰培基。幼者培屋。女孫惟四。不書誰某。乾隆辛亥。託生十月。
六二春秋。返其大宅。受形之初。萬邦太和。畢命之歲。天地干戈。生死盛衰。
難究難詳。感慨泐銘。以詔茫茫。

湘陰郭府君墓志銘

君諱家彪。字春坊。郭氏。湘陰人。生而溫約夷愉。與人無競。不苟爲和。翁亦不爲介。介踔異之行。卒然投之事變。若不克辨。其是非曲直也者。及夫羣疑劫劫。徐出一言折之。關開節解。風生冰釋。雖強辯者。常默然而內自詘也。曾祖遇傑。贈奉直大夫。祖熊。貢生。誥贈奉直大夫。考詮。世。縣學生。世父世遵。縣學廩膳生。世遵無子。以諸子家噉爲嗣。早世。乃復以君爲嗣。家故饒贍。諸父豪宕好施。或日費數十萬錢。無所惜。君亦夷然。不爲有亡顧慮。親故假貸。每盈其意。或他人相稱貸要君。一言爲質。及期。責償於君。輒量償之。又急。則又旅歸之。歲中爲人理宿逋。率三四役。久之。往往不歸。則毀其約契。會歲大稔。家以中圯。君故夙於澹泊。豐約不以易其度。布衣糲食。蕭然自得。益務濟人。廣儲方藥。病者踵門求乞。手劑與之。自尋常草木。馬勃牛溲。以至丹砂鍾乳。千歲之苓。尙方之棧。諸奇珍物。可致與不可。卒致無所不蓄。蓋亦無所不施。其尤貧者。輔以羞餌。使人日再問焉。疾革。躬三問焉。君沒後。里人劉氏言之。涕泗交頤也。君生以乾隆五十九年八月廿四日。沒以道光庚戌二月十六日。春秋五十有七。配張安人。少君二歲。以道光己酉七月十六日。先君沒之七月而卒。春秋五十有四。張安人柔婉懿恭。既篤既靜。長沙舉人正旭之孫。永州府儒學訓導鵬振之子。自在其室。以逮爲婦爲母。莫不訓式。始時家噉有婦吳氏。早寡而卞急。姑張太

安人。性亦嚴厲。積不相善。張安人既嗣爲後。恭以事嚴姑而卑以承姪婦。先姑之意。以隆其奉。以推及於姪婦小姑。無所不隆。詘己之身。以薄其給。以達於己之子若女若婦。無所不薄。上尉下薦。內外融融。閭里親族無少長。皆歎以爲不可及。觀其諸子貴盛。皆領首歎以爲宜。其沒也。哭之皆哀。有餘云。子嵩燾。道光丁未科進士。改翰林院庶吉士。咸豐二年。以救援江西功。聖恩特授編修。崑燾。道光甲辰恩科舉人。宗室官學教習。國子監助教。崑燾。縣學生。候選訓導。其季曰先穉。早殤。孫六人。咸豐二年壬子歲三月十四日。嵩燾與其弟。奉君之喪。葬於湘西善化楊梅山之原。張安人祔焉。又三年。歲在乙卯。國藩乃敘而銘之。銘曰。

我有執友。翰林郭君。至交金石。天下莫不聞。昔歲在戊。赴告親喪。徵我銘刻。用識幽藏。會幾須臾。歲星周半。大地戈鋌。東南塗炭。我以喪歸。墨經卽戎。葬不極禮。遂不協從。惟郭氏阡。在嶽之麓。雲合峯環。龜著竝敷。不肖之嘆。郭宗之祥。詩於堅石。以奠茫茫。

誥封光祿大夫會府君墓志

咸豐七年二月初四日。我顯考會府君卒於湘鄉里第。春秋六十有八。男國潢。國葆。謹視含斂。男國藩。降服男國華。自江西瑞州軍營聞訃。男國荃。自吉安軍營聞訃。皆奔喪來歸。天子廣錫類之仁。賜銀四百兩。經理喪事。

閏五月初三日癸未卜葬於二十四都周璧衡山內。從形家言。丙山壬向。去先世舊廬六里而強。去梁江新宅八里而近。國藩少長至冠。未離親側。讀書識字。皆我君口授。自竊祿登朝。去鄉十有四年。逮待罪戎行。違晨昏者又五年。府君之至言懿行。不可得而盡識。僅從季父驥雲所。拉問近事。而昆弟子姓。諸姑姊妹。亦稱述音容。往往而悉。其述府君侍先大父疾病。至難能矣。道光二十六年八月。大父病瘳瘳。動止不良。明年冬。疾益篤。暗不能言。卽有所需。以頤使。以目求。卽有苦。蹙額而已。府君朝夕奉事。常先意而得之。夜侍寢處。大父雅不欲頻頻驚。而他僕殊不稱意。前後搜益數。一夕六七起。府君時其將起。則進器承之。少間。亦如之。聽於無聲。不失分寸。嚴寒大溲。則令他人啓移手足。而身翼護之。或微沾污。輒滌除。易申衣。拂動甚微。終宵惕息。明日。則季父入侍。奉事一如府君之法。久而諸孫孫婦。內外長幼。感化訓習。爭取垢污襦袴。澣濯爲樂。不知其有臭穢。或挽簞輿游戲庭中。各有常程。大父病凡三載有奇。府君未嘗得一安枕。愈久而彌敬。是時府君年六十矣。吾會氏家世微薄。自明以來。無以學業發名者。府君積苦力學。應有司之試。十有七。始得補縣學生員。不獲大施。則憤教督諸子。國藩以進士入翰林。七遷。而爲禮部侍郎。歷官吏部。兵部。刑部。工部侍郎。遭逢兩朝。推恩盛典。褒封三世。會祖諱竟希。誥贈光祿大夫。

會祖妣彭氏。誥贈一品夫人。祖諱玉屏。累贈光祿大夫。祖妣王氏。累贈一品夫人。府君諱麟書。字竹亭。誥封中憲大夫。疊晉榮祿大夫。光祿大夫。妣江氏。誥封一品夫人。小子非材。微府君厚澤。曷克成立。以蒙茲光顯。於是泣述一二。弁列刻系屬。敬銘諸幽。若其懿德純行。宜傳不朽者。將以俟諸知言君子。銘曰。

西望新居。東望舊廬。此焉適中。羣山所都。我先人之靈。其尙妥於斯而永於斯乎。嗚呼。

男五人。國藩配歐陽氏。國潢監生候選縣丞。配汪氏。國華監生。卽補同知。出繼叔父驥雲爲嗣。配葛氏。妾歐陽氏。國荃優貢生同知職銜。配熊氏。國葆縣學生。配鄧氏。

女四人。長適王鵬遠。次適王家儲。壻先卒。次適朱氏。先卒。壻朱麗春。季女殤。

孫八人。紀澤二品廕生。配賀氏。紀梁聘魏氏。紀鵠聘郭氏。紀渠聘朱氏。紀瑞聘汪氏。紀官聘歐陽氏。紀湘聘易氏。紀焜聘王氏。孫女九人。

先大夫以咸豐七年丁巳五月。葬周壁冲。至九年己未八月十六日癸丑。改葬於二十九都台洲之貓面臘。自丁巳九月。男國荃復出治軍於吉安。至戊午六月。男國藩復出治軍於浙江。皆以墨經卽戎。而男國華降服期。

滿從軍皖北。竟殉難於廬江之三河鎮。至己未五月。諸子服闋。而男國潢亦治團練於鄉。男國葆亦從軍於湖北。歲月不居。人事遷變。輒因改葬。補記一二。俾後有考焉。男國荃附記。

先妣江夫人。生於乾隆乙巳年十一月初三日申時。春秋六十有八。咸豐壬子年六月十二日卯時。沒於梁江新宅。原厝宅後山內。己未八月同日。改葬於此。與先大夫共一塋域。國荃又記。

劉君季霞墓志銘

君諱蕃。字季霞。吾友劉蓉孟容之弟也。國藩治團練於長沙。提水師自巴陵至九江。及入江西。屯軍南康。孟容皆展轉相從。三年奔走。夷險共之。季霞常以其太公之命。省孟容於軍中。出則美意相迎。諷勉其兄。歸則傳會吉語。慰安其父。咸豐四年三月。岳州官軍失利。賊犯甯鄉。季霞聞關至長沙。存問孟容。孟容方以疾先歸。其六月。孟容將率舟師渡洞庭而北。季霞復送至省垣。明年八月。又自其家二千里。視孟容於南康。中途聞羅君澤南。督師至義甯州而西。將掃蕩岳鄂之交。規復湖北。孟容亦分領湘右軍。從羅君俱西也。季霞與兄會於牟樓峒。時我師遠來。新有濠頭堡之敗。士氣初復。料簡糧仗。稍與休息。賊據蒲圻縣。得以其暇。益築堅壘。完守備。十月十七日。我師進營白石鋪。以蒲圻南門地險而逼。不利仰攻。乃繞道出

公安賊抵城西。駐軍鐵山。湖北巡撫胡君林翼。以師來會。二十一日辛亥。分四路進攻。賊阨險立柵。穿塹數重。鎗礮環擊不可近。聞出悍賊。揚旗跳盪。自辰至午。相持不決。軍勢少卻。季霞從兄督戰。進曰。事急矣。賊將乘我。遂棄所乘馬。獨步而前。賊遽奔之。季霞發鎗斃二賊。又鞭卒之少退者一。賊伏下田。發鎗中傷季霞仆地。孟容昇其弟歸營。而自麾衆禦之。短兵確鬥。驍將銳卒。傷亡數十人。賊亦大創。我軍乘間舉火。燔其木柵。煙焰蔽天。五壘齊破。是夕。遂破蒲圻縣。克之。孟容還營。視其弟創在臍旁。氣息僅屬。撫之大慟。季霞徐曰。兄勿爾。命也。語訖而絕。春秋二十有五。事聞。諭旨追贈知縣。照例賜卹。季霞事兄。致嚴以順。而風韻各異。孟容於士類。揚清激濁。而季霞不置臧否。孟容稍立崖岸。別白是非。鮮所假借。而季霞脫去畦封。眼無一語。款誠相接。其臭如蘭。以是人樂近之。劉氏世居湘鄉之四十都。近歲兵事方殷。有司分都團練。季霞部勒鄉人。獨嚴整。喪歸自蒲圻。族之少長。遠近之耆德。學徒。與羈者。團結之丁壯。會葬送死。哭者至數千人。如喪親戚。然後知其得衆。宿將不及也。咸豐八年 月 日甲子。葬於樂善里之王湖嶺。配孔氏。國子監學錄廣璠之女。生女一人。無子。以孟容子培屋爲嗣。銘曰。

元二之厄。兵氣崢嶸。方州大府。鼠卻狐驚。提戈殺賊。年少書生。厥少維何。

星終兩紀。溫玉刻菘。翔翔文史。事親從兄。辟咎而詔。仗劍出門。海飛龍嘯。蕭首之山。故壘嵯峨。一儒奮臂。永奠山河。位豈在大。齡豈在多。我銘斯石。萬代不磨。

季弟事恆墓志銘

同治元年十一月十八日丙寅。我季弟歿於金陵軍中。逾月。喪過安慶。國藩設次哭奠如禮。遣之反葬。弟名國葆。字季洪。後更名貞幹。字事恆。少則落落自將。脫去町畦。視人世毀譽。及書史褒譏。不不甚厝意。不隨衆爲疑信。時或詰難參伍。大破羣惑。嘗應縣試及學政試。再冠其曹。已而厭薄舉業。不肯竟學。咸豐三年。國藩奉詔討賊。召募水陸諸軍。季弟挈六百人以從。提督楊載福。侍郎彭玉麟。始皆客季弟所爲僚佐。季亟薦此二人。爲英毅非常器。己願下之。四年三月。岳州兵敗。季又亟白諸將無罪。己願獨坐之。其後揚彭二人。果以水師雄視東南。而諸將亦次第登用。撥取高官大名。獨季弟黯黯歸去。築室紫田山中。閉門絕人事。身與世若兩不相收。八年十月。母弟國華戰歿三河。季則大慟。誓出殺賊。以報兄仇。而雪前恥。鄂帥胡文忠公。方廣求將材。命季分領千人。自黃州建旆而東。十年正月。連克太湖潛山。三月始與叔弟國荃會師以圍安慶。十一年八月。克之。明年。爲今皇帝元年。弟以正月師次三山。三山者。宣池羣賊四萃之區。軍入

援絕寇十倍我。乃以計招降三縣義民之陷賊者。嶼嶼而屬使之。得四千人。編伍約法。用破魯港。克繁昌。下南陵。蕪湖。而國荃亦以是時。克東西梁山。徇和州當塗。奪采石。兄弟復會師。進薄金陵之雨花臺。江東久虐於兵。疹疫繁興。將士物故相屬。弟病亦屢瀕於危。定議假歸養疾。適以援賊大至。強起戰守。四十六日。賊退而疾甚不可復治矣。季弟初以功敘儒學訓導。加國子監學正銜。克復安慶。晉秩同知。賞戴花翎。厥後連克繁昌三縣。天子雖以國藩前有辭賞之奏。猶特賜迅勇巴圖魯名號。至大破援賊。晉階知府。命下而弟不及見矣。事聞。遂追贈按察使。照軍營病故例議卹。詔書謂朝廷早欲擢用。特以國藩懇辭。留以有待。嗚呼。聖主之於臣家。恩寵不訾。獨惜國家欲大用吾弟。與吾弟欲得當以報國。兩相須於微莫之中。而卒不克少待以竟厥志。嗚呼。茲所謂命焉者非耶。季弟生以道光八年九月二十日。春秋三十有五。會祖諱竟希。妣彭氏。祖諱玉屏。妣王氏。父諱麟書。妣江氏。二代皆封光祿大夫。妣皆一品夫人。配鄧氏。先弟十月卒。兄弟五人。自仲氏國潢外。四人者皆從事戎行。季無子。以國潢子紀渠嗣。同治二年某月某日甲子。葬於某里某山之陽。輒敘次事狀。繫以銘語。以寫吾哀。銘曰。

智足以定危亂。而名譽不並於時賢。忠足以結主知。而褒寵不逮於生前。

仁足以周部曲。而妻孥不獲食其德。識足以祛羣疑。而文采不能伸其說。嗚呼予季。缺憾孔多。天平人乎。歸咎誰何。矢堅貞而無怨。儻彌久而不磨。

閩浙總督季公墓志銘

公諱芝昌。字雲書。號仙九。姓季氏。道光之末。咸豐之初。公以正卿內知樞密。外督封疆。朝廷亟以大事相屬。而公矍然自以爲不足。海內賢士亦第宗其文章。而若忘其政事之美。公於文裁量完密。宮徵鏘鳴。當世歎爲臺閣夷憚之音。而又忘其營度之苦。至其身世備歷諸艱。則知者尤少也。季氏世家江陰。公會祖諱愷。祖諱熙。歲貢生。累葉窮約。至考諱麟。字晴郊者。始以拔貢舉人。官鉅鹿縣知縣。嘉慶十四年。公侍王父從鉅鹿君於官所。又迎婦於衛輝。婦翁爲王蘇儕。嶠以翰林出守大郡。兩家皆科第名宦。政聲溢於河朔。寢寢光大矣。無何歲貢君卒於鉅鹿。鉅鹿君坐不身捕妖民。褫職。遣戍新疆。踰年沒於戍所。公所生長子既殤。又殤一女。又殤次子。而鉅鹿君有官逋。簿貢益急。籍家產輸之。官親知不相省錄。胥吏侵侮。殆無人理。厥後以道光元年。舉順天鄉試。三年。考取國子監學正學錄簿。宦京師。生事日絀。蓋至十二年。成一甲三名進士。而公之困厄。餘二十載矣。既以巍科改翰林院編修。明年散館。則大爲宣宗所褒。御書魁字於卷之傳別。而大臣亦自登公首選。旋又以大考翰詹列高等。簡授山東學政。任滿

還京。充戊戌會試同考官。明年己亥。大考。復列高等。奉使江西主考。浙江學政。累遷至內閣學士。兼禮部侍郎。由是舉朝慕公。遇合之隆。臺省耆宿。交口稱公詩賦。以調勉後進。儕輩斂衽。皆以爲不及。高才未達。皆傳鈔而模範之。雖天子亦以君臣文字契合。爲足樂也。公在浙。丁母憂。道光二十三年。服闋入都。與考試差。翼日。召對。宣宗嘉歎公文。以謂他人竭蹶。喘汗有不能到。汝則沛乎有餘。譬之於射。汝穿楊百中矣。語畢。大笑。公且感且悚。退而以不失鶴名其齋。是歲。擢禮部吏部侍郎。督學安徽。公益兢兢。恐無以育才厚俗。上負主知。二十六年。受代還朝。明年。充會試知貢舉。殿試讀卷官。經筵講官。衡文之事。無役不從。四方學徒。翰林新進。輻輳造門。請業。而上察公忠謹廉介。可任艱鉅。不復欲以校文角藝相屬。蓋科目取士既久。至爭聲律一字之得失。而置軍國於不問。宣宗晚歲。遠覽唐季明末之陋。卹焉思有以易之。亦預憂治安之不可深恃也。二十八年。命公爲倉場侍郎。是冬。命偕定郡王載銓。查辦長蘆鹽務。及天津所屬倉庫。二十九年。命偕大學士耆英。查詢東南兩河冗員浮費。又命公馳赴浙江。釐剔鹽務。清查倉庫。凡政有奸弊叢雜。輒屬公梳扶而廓清之。公晝夜稽覈。不吳不揚。盡得要領。而於人無所乖迕。使浙未返。有詔簡授山西巡撫。甫至晉。又內召。爲軍機大臣。三十年。宣宗升遐。與諸王大臣受遺輔政。文宗繼序。

益欲以艱大付公。會廣西軍興。南服不靖。遂命公總督閩浙。公鉤校官書。發舊牘。與新事雜治。廢寢忘食。未幾疾作。陳請開缺。勿許。咸豐二年。病益劇。屢疏乞退。溫旨慰留。最後十一月。詔許回籍調理。三年正月。返蘇之常熟家焉。二月。金陵淪陷。賊乃日熾。公聞之大痛。自以朝廷重臣。出徂海疆。不能濟弱扶傾。副聖主倚畀之意。而時事糜爛。又不克力疾強起。以效尺寸。往往獨夜悲泣。或爲詩歌以鳴積鬱。至咸豐六年。而得偏痺之症。十年。蘇常失陷。挈家北渡。又聞九月旋園之變。益憂憤內傷。不復可支矣。是歲十一月三十日。薨於通州。春秋七十。自公之貴。三代皆贈光祿大夫。如公官。會祖妣趙氏。祖妣趙氏。妣史氏。皆贈一品夫人。妻王夫人。妾郭恭人。皆前卒。妾吳氏。公沒後。自裁以殉。旌表如例。子念貽。道光庚戌進士。翰林院編修。加四品卿銜。女二人。長適翰林院編修陳彝。次適鉅野縣知縣張彭年。孫綸全。邦楨。會孫厚堃。厚基。厚鏗。公卒時。渴葬通州城東。同治四年八月十八日。始卜葬於江陰長山南麓。當公在閩引疾。方怪宏才若彼。重任如此。何遽謙讓勇退。及歸田數載。而憂國乃更甚於當官之時。而當世之自以爲能。負荷非常者。覆轍相屬。乃不忍聞。然後知君子歆然之抱。誠不易量度哉。嗚呼。是可銘已。銘曰。

兩社貞卜。實啓季宗。世闕休德。集於我公。十韜一灑。積塞乃通。發爲宏篇。

藻火笙鐘。輪軒四出。使節落旄。冥索章句。盡拔其豪。靡幹不采。何埴不陶。天子曰咨。時有屯蹇。道有平頗。著在前典。良臣幹之。天迴斗轉。斂此鴻文。謀奠乾坤。入筦天樞。出帥海濱。鋤奸詰蠱。萬緒交紛。每沉彌恭。若虛若無。讓賢避位。長往江湖。心摧形瘁。與世同臞。我貢春官。出公門下。斯鑄斯銘。或躍於冶。岱宗云頽。有隕如瀉。紀績埋幽。用詔來者。

仁和邵君墓志銘

位西仁和邵氏。諱懿辰。與國藩交二十餘年矣。咸豐十年二月。賊入杭州。五日而復。七月。位西訪余祁門軍次。語余以城破時。盡室陷賊中。賊退。乃挈家東徙紹興。老母考終。羸得盡禮。欲乞師以援兩浙。不果。遂別去。明年十一月。杭州再陷。位西之妻余恭人。二子順年。順國。轉徙滬上。余聞而迎致之安慶。順年語余以城破時。盡室饑困。其父磨家人出避。圖延宗祀。亦詭詞自稱將出。遂泣別不復相聞。國藩心知位西烈士也。必不苟免。其家固知之。以無定問。不敢發喪。同治三年二月。杭州克復。順年奔哭。周詢具得三日不食。罵賊遇害狀。實以十一年十二月朔日。殉難。於是始除次執喪。赴告遠近。浙江巡撫上其事。天子下詔褒卹。然後知親在則避。親沒則死。賢者遭難。如是其不苟也。位西之學。初以安溪李文貞公。桐城方侍郎爲則。擯斥近世漢學家言。爲文章。務先義理。不事縵色繁聲。旁徵雜引以

追時好。厥後以舉人仕京師。爲內閣中書。刑部員外郎。入直軍機處。與上元梅會亮伯言。臨桂朱琦伯韓數輩游處。博覽國故朝章。其文益奧美盤折。亦頗采異己之說。自廣。詢訪高才秀士。折節造請。交譽互證。酣恣而不厭。狎習而彌虔。然位西性故。躔直。往往面折人短。以謂書籍所無。公何得漫爾。不應再糾焉。猶不獲三諫焉。無間新故。疏咸貴賤時否。一切蹙頞相繩。人不能堪。終以此取戾於世。大學士琦善公在獄。嘗發十九事難之。大學士賽尙阿公視師廣西。手疏七不可諱之。諸公貴人病其附直。由是鬪焉。不得安其位。咸豐四年。坐濟甯防河無效。吏議鑄職。位西旣罷歸。則大覃思經籍。纂箸尙書通義。孝經通義。詩古文若干卷。飢餓圍城之中。猶箸禮經通論。誦聲鏘然。徹於巷外。亂後。僅得禮經一卷。文三十餘首。刻之淮安。蓋不能什之一二。餘則散佚矣。位西之曾祖王父寶勤。王父又會。父宗贄。本生父鳳儀。世箸清德。有兄懿藩。早喪。無子。以順年後之。有女二人。順年歸自杭州。未得父尸。大痛遘疾。同治四年六月十三日。沒於金陵。余恭人少而刲股療親。晚而事姑有聲。旣痛其夫。又悲其子。七月十二日亦卒。嗚呼傷已。國藩於是命順國。與其婿鄭興儀。具位西衣冠。葬之西湖二龍山。以余恭人及順年。順年之妻伊氏。前死賊中。至是亦以衣冠祔葬。銘曰。

城有時而爲湖。海有時而成田。物固有非常之變。烏可以常理測彼昊天。善不必福久矣。會不自夫子而始然。懲東南之大戾。仁聖與螻蟻而同捐。箸述盡其蕩盡。僅弔煨燼之殘編。文之精者不復存。存者又未必果傳。獨其耿耿不磨之志。與日星而長懸。魂無遠而不之。魄則依妻子以全。庶上爲神祇所許。而下爲百世學者之所憐。

張君樹程墓志銘

君諱善準。字樹程。號平泉。晚更自號愚公。武昌張氏。考諱以誥。國藩嘗表其墓。既許其世矣。君孕育前徽。出入造次。不離古先之訓。既補縣學生員。以制舉之文。震耀於時。主學政者每嗟賞之。舉以爲羣士式。君顧不以自憙。獨有志於樸學之塗。篤好浚儀王氏困學紀聞。崑山顧氏日知錄二書。刪取其要。別爲一編。手寫數通。亟繹而不厭。博覽而彌深。前所謂舉業者。漸高簡而不諧於衆。遂爲歲貢生以終。與之遊者。但見其於科目仕宦。窮通得喪。豐約毀譽。泊乎未有以干其慮也。及聞時政安危。賢不肖進退。當否。乃憂之樂之。如其家事。則相與忱焉起敬。粵賊之起。賢人君子。往往殉難。或闔門同盡。君聞輒悼痛。語及卓行奇節。則泫然泣下。如喪周親。一夕篝燈讀書。忽甚悲失聲。舉家驚起。趨視。君方手一編。顧曰。有傳胡巡撫祭李帥文至者。余讀之。不覺哀而一號耳。胡巡撫者。益陽胡文忠公林翼。李

帥者。湘鄉李忠武公續賓。時方戰沒三河。天下所共傷也。自是兵事利鈍。家人相戒。不敢以聞。閭里過從。相與遣懷望治。道吉語以忘憂。君一接以恭謹。遇耆長。怡聲酬對。如恐傷之。自敵以下。褒能獎善。溫溫致敬。終不以有故而加慢。姻好或有患難疾疢。早夜省視。匍匐護持。時其有無而周濟焉。人咸謂君爲慈惠之師。緩急可倚杖矣。然君性實剛介。嫉惡如讐。深恨昏墨之吏。暨士人居家。嘗財利與賈豎競錙銖者。以謂天下大亂。端由此輩。意不快。則昌言誅責。唾而斥之。或以書抵友朋。其語絕痛。又嘗戒其子裕釗。汝才薄。慎無求仕。苟仕。慎無爲身家謀。居民上而贖貨。是穿窬也。神不福矣。聞者凜凜然。後知君之德。不得僅以仁厚名也。同治三年十二月十日卒於家。春秋六十有九。所著有史學提要續編六卷。妻金氏。秉禮習勞。儉而澤物。子二人。長裕鏞。次卽裕釗。舉人。積學能文。女子二人。孫幾人。某某。某年月日。葬君於某縣某山。裕釗來徵銘。銘曰。

訥訥哲人。斯須繩矩。遇事激發。剛亦不吐。慟恤忠良。有涕如雨。譏貶姦負。有舌如斧。能好能惡。是謂至仁。邈然物外。未侵一塵。樊口之南。重湖之濱。藏骨黃壤。垂範千春。

苗先篋墓志銘

君諱夔。字先篋。蕭甯苗氏。自幼讀書。卽異常童。不好爲科舉文藝。而竊嗜

六書形聲之學。讀許氏說文。若有夙悟。精研而力索。滯解而趣昭。已又得顧處士炎武音學五書。慕之彌篤。曰。吾守此終身矣。年二十餘。卽纂毛詩韻訂。繼又纂廣籀一書。授徒窮鄉。制藝試帖之屬。不中有司程度。學子稍稍引去。君益冥心孤往。子焉寡儔。閒之。河閒城外得漢時君子館博。又得開元瓦於獻王墓旁。私獨欣喜。以爲神者餉我。以慰寂寞。久之。道光十年。縣令王君聞而敬異。聘君主講翼經書院。明年。爲學使沈侍郎維鎬所知。舉辛卯科優貢生。高郵大儒王氏念孫父子。聞君之說禮。先於君。遂與暢論音學源流。由是譽望日隆。督學使者。爭欲致之幕下。與共銜校。初隨編修汪君振基。衡文山西。繼隨祁文端公籟藻。衡文江蘇。所至甄拔宿儒。周覽山水。又以其暇。編摩撰述。從事於其所謂聲韻之學。道光二十一年。祁公還京師。乃贖金刻君所著說文聲訂若干卷。說文聲讀表七卷。毛詩韻訂十卷。建首字讀一卷。君以爲許叔重遺書。多有爲後人妄刪。或附益者。乃訂正說文聲類八百餘事。顧氏音學所立古音表十部。宏綱已具。然猶病其太密。而戈麻旣雜西音。不應別立一部。於是併耕清及蒸登於東冬二部。併歌戈於支脂部。定以七部。彙括羣經之韻。書出。識者歎其精審。又數年。侍讀馮君譽驥。視學山東。國藩薦君偕往。役未畢而先歸。於是君亦齒衰而倦游矣。道光之末。京師講小學者。卿貳則祁公。及元和吳公鍾駿。庶

僚則道州何紹基子貞。平定張穆石舟。晉江陳慶鏞頌南。武陵胡焯光伯。光澤何秋濤願船。君既習於祁公。又與諸君傾抱寫誠。契合無間。子貞嘗命工圖己及石舟及君三人貌。蓑笠而處田間。蓋三人者。皆同年優貢。又皆有逸士之風。謂宜與負耒者伍也。君既泊然無營。暇則徒步造訪諸君。與辨論前世音學。暨近人江戴段孔諸家部分之多寡。意指之得失。褒譏亭決。窮日夜不倦。聞亦過余劇談。歸自山東。余從容問東土亦有擘究說文者乎。有得見吾子箸述者乎。曰。有之。何以知之。曰。吾書中有自稱夔按云者。東人稱引及焉。會不知夔之爲誰氏名也。則相與拊掌大笑。君徐又曰。吾家有憇僮。昨者日晏。吾責豎子何不具食。僮輒報以錢物罄矣。欲以何具。吾柔聲謝之。僮乃不遜竟去。吾今方躬治爨耳。則又相與大笑。蓋君處困約。有以自怡如此。他日。君又語余曰。吾窮於世久矣。甘之若飴。死無所恨。獨平生箸書。尙有數種未及刊刻。不能無耿耿於懷。自余咸豐初出京。展轉兵閒。至同治七年。重入都門。昔之與君遊者。十人蓋八九死。君之嗣子王璞來。告君以咸豐七年五月初七日逝矣。春秋七十有五。抱君所箸書曰說文聲讀考者。曰集韻經存者。曰韻補正者。曰經韻鉤沈者。述君遺命。謂當送國藩觀覽。且以銘墓之文相屬。君且死。戒其子必葬我衆書叢中。其子乃擇君生平尤嗜之書。納諸棺中以徇。嗚呼。斯亦篤古之徵已。

銘曰。

視以多歧而瞽。聽以雜奏而聾。技之精者。不能兩工。苦思專壹。可與天通。課形而得聲。勘異而得同。黜陟百世。惟許君是崇。胡學之旁達。而遇之不豐。抱此孤賞。永奠幽宮。

唐確慎公墓志銘

公諱鑑。號鏡海。唐氏先世自江西豐城。徙居湖南之善化。四傳至諱煥者。以舉人官至山東平度州知州。公之祖也。生子仲冕。以進士即用知縣。官至陝西布政使。公之父也。平度君以子貴。誥贈通奉大夫。配李氏。譚氏。俱封夫人。譚夫人沒而葬於山東之肥城。布政君及配甯夫人。皆踵葬肥城。公以父命。徙籍山東。故又爲肥城人焉。少而邁異精勤。嗜學如渴。以廩生入貲爲臨湘縣訓導。嘉慶十二年舉於鄉。十四年成進士。改翰林院庶吉士。又二年。授職檢討。又六年。補浙江道監察御史。充甲戌科會試同考官。戊寅科順天鄉試同考官。坐論淮鹽引地一疏。吏議鑄級。以六部員外郎降補。會宣宗登極。詔中外大臣。各舉所知。諸城劉文恭公鑲之薦公。由是有廣西知府之命。厥後再爲平樂府知府。一爲安徽徽甯池太廣道。量移江安十府糧道。拜山西按察使。遷貴州按察使。擢浙江布政使。遷江甯布政使。數歷於外。蓋二十年。其守平樂也。亭平民搖之獄而解其仇。屢磔劇

盜境內肅然。是時布政君解組東歸。僑居金陵。公聞母病。卽引疾去官。省親江南。既遭內外之艱。皆北葬肥城。廬墓讀禮。服闋。以例仍發廣西。再守平樂。道光十二年。廣東湖南生搖爲亂。公出防邊圉。內讖奸宄。往來富川。賀縣。安撫熟搖。獸擾而兇蓄之。設立五原學舍。延師教讀。羣搖大悅。檢郡中煽亂者。譚于先等十餘人。立斬以徇。而賞其脅從千餘。火其名籍。一無所問。其按察貴州也。平反疑獄。歸美令長。曰。非吾能正之。某縣尹來省。自易之耳。其在江甯。拯災修廢。百度畢張。時總督陶文毅公樹寢疾。公代行使院政事。文牘如山。賓僚填咽。味爽而勤職。丙夜而不休。忘寢輟餐。形神交瘁。而言者乃劾其多病近藥。廢閣公事。又雜撫他端。以相訾毀。朝廷遣使者按問。率無左驗。宣宗知公端謹。一切弗論。忌者或憚其方嚴。未幾。內召爲太常寺卿。道光二十年四月也。公潛研性道。宗尙洛閩諸賢。所至以是救其躬。亦以牖於人。亦時時論箸。以垂於後。在翰林時。箸有朱子年譜考異。省身日課。畿輔水利等書。在廣西著讀易反身錄。居喪著讀禮小事記。官平樂時。延納人士入署。親與講授。設立義塾。誨誘寒畯。官貴州時。亦如之。官江甯亦如之。及入爲九卿。又著易牖。學案小識等書。扶掖賢俊。倡導正學。時如今相國倭仁良峯侍郎。吳廷棟。竹如侍御。寶埴。蘭泉。何文貞。公桂珍輩。皆從公考德問業。國藩亦追陪几杖。商榷古今。觀其陋室危坐。

精思力踐。年近七十。斯須必敬。蓋先儒堅苦者。亞時賢殆不逮也。已而致仕南歸。主講金陵書院。文宗踐阼。有詔召公赴闕。凡進對十有五次。中外利弊。無所不罄。諭旨以其力陳衰老。不復強之服官。令還江南。矜式多士。公至金陵。學徒益盛。以賊犯湖南。急欲歸展先塋。咸豐三年。乃自浙還湘。卜居於甯鄉之善嶺山。深衣疏食。泊然自怡。晚歲著讀易識。編次朱子全集。別爲義例。以發紫陽之蘊。十一年辛酉正月十八日疾卒。春秋八十有四。其家函封遺疏。郵寄東流軍中。國藩以聞。天子軫悼。予諡確慎。配王氏。楊氏。皆封夫人。前卒。無子。以弟子爾藻嗣。女四人。適某某。孫男三人。某某。孫女三人。某年月日。葬公某縣某鄉某山。又八年。國藩始追爲之銘。銘曰。俗學徇時。行與名釣。孰捐其華。而練其要。唐公翼翼。與世殊趨。懼明戒旦。篤信程朱。有識其隘。或調以迂。浩然不顧。履我康衢。顯皇初政。詔徵國老。造膝前陳。嘉謨要道。願致吾君。上躋軒昊。進退以禮。斂茲宏抱。宦遊所至。我求童蒙。晚居京國。羣彥景從。何才不育。有金皆銘。以善善善。借之大同。播此芬嶺。昭示無窮。

歐陽府君墓志銘

先生諱凝祉。初名鼂。晚易今名。字福田。歐陽氏先世。自江西北徙居衡陽。曾祖天鼎。祖心璣。父順源。并有清德。會祖妣氏劉。治家嚴肅。祖妣氏蔡。妣氏

蔡均以節孝旌表於朝。國藩所作歐陽氏姑婦節孝家傳者也。先生生三歲而孤。恪遵母訓。跬步必謹。母或戒之。無觸忤人。卽終身不以言色加人。或戒以慎無耽酒。卽沒齒不近杯勺。稍長。嶷然自厲於學。不假董督。日俾月增。旣入爲學官弟子。旋補廩膳生。遠近歸仰。交幣迎致。適館課徒。凡四十年。主講蓮湖書院者。又十年。門下生箬籍數百人。其高第者。與之稽經講藝。兼及救躬之道。成物之方。其不帥教。則訶求饋責。屏斥門牆之外。初雖怨望。後常悔憾自愧。不爲良師所齒。從之游者。恆守繩矩。雖垂老而憚之如初。先生疏於治生。臨財則辨別精密。若將浼焉。一歲中學徒束修之資。不足自給。往往隨事散去。少以孤童。爲叔父成材所養。晚節竭力贖之。宗祀不足於資。先捐金以成之。議爲衡陽裁減錢漕浮費。有啖以利而尼其事。峻辭卻之。事成而合邑德之。其它人事問遺。率常謝絕。人謂先生少貶其節。可致饒裕。先生獨謂取舍有義。神明難欺。吾心所不許者。天道亦不與也。道光末。以歲貢生候選訓導。同治初。誥封奉直大夫。配邱氏。誥封宜人。子二人。柄銓廩貢生候選訓導。柄鈞光祿寺署正。女子二。長者歸於國藩。次適彭治官。孫六人。定果湖北候補同知直隸州。定赫候選縣丞。定枚府學生員。定樞。定楨。定幹。孫女五人。曾孫二人。同治八年五月初九日疾卒。春秋八十有四。自七十以後。不復授徒遠方。家居課孫。細字鈔書。講

論不倦。同治六年。歲在丁卯。孫定枚入學爲附生。先生以嘉慶丁卯入學授室。至是六十年矣。乃用昔者成婚之日。燕客受賀。遠近歎美。夫婦既皆八十。而先生之伯兄八十有五。暇輒過從。相與道幼時瑣語。以爲歡。自詡爲家門之祥。人亦祥之。夫其孝友雍雍。敦善不息。殆所謂無忤於天人者。復奚憾於其死邪。嗚呼。可銘也已。銘曰。

衡西兩世。貞節之門。實生令德。孝子孝孫。上承慈訓。下啓後昆。位豈須顯。身蹇道尊。名豈須震。多士崇信。小叩大鳴。甄陶羣儔。獎誘自寬。壇宇自峻。七十碩師。還山娛老。耄而從兄。推梨讓棗。亦有孫會。質文完好。金籟匪貴。一經是寶。家有休徵。英彥輩興。門有上瑞。和氣薰蒸。其休其瑞。人世同稱。若考隱德。吾銘可憑。

翰林院侍讀學士丁君墓志銘

君諱善慶。字伊輔。號養齋。丁氏世居清泉之白沙里。幼孤。從母劉太淑人。育於外王父劉文恪公家。自少而好惡欣戚。不主於己。惟母志之。從長亦加之。終身亦如之。久處京師。寄籍宛平。由順天府學生。中式道光壬午科舉人。明年癸未成進士。選翰林院庶吉士。散館授編修。其歷階爲國子監司業。詹事府右中允。左中允。右庶子。翰林院侍講學士。其任職爲國史館總纂。庶常館提調。文淵閣校理。奏辦院事。日講起居注官。其使事爲戊子

科貴州鄉試正考官。辛卯科廣東鄉試正考官。乙未科會試同考官。其秋順天鄉試同考官。丙申以後。迭爲廣西學政。君雖閭然自救。無所矜異。宣宗嘗從容問翰林中。孰爲篤學。曹文正公舉君以對。天子旣異之。在廷名卿耆德亦多稱歎。以爲令僕之器。歲月可冀。君以母老懷思鄉里。歸自廣西。遂解官養親於長沙。早歲事母。執爨必躬。浙米必潔。至是益加謹焉。母或加餐輒喜。述諸人。以爲至幸。或有饋賜。輒豐其好貨。端篋而將之。或體中不適。則憂皇如不終日。或意有不懌。則長跪引咎。旣解乃起。或將他適。則先於其所往。百物畢齎。所欲立應。室無纖埃。庭無高語。一身肅戒。舉家兢兢。宦游餘財。爲其弟口口所耗。君則經營置產。以覆弟短。而悅母心。舅氏劉若珪。謫官遠戍。君又傾其前產。以贖舅罪。而慰母於地下。蓋畢生孺慕。自順親外。不知天地更有何事也。母沒數年。而廣西寇賊大起。咸豐二年秋。攻圍長沙。君矢死堅守。寓書其弟曰。城陷。弟收吾骨於桂樹旁井中矣。日夜令其子馴。巡警周垣。馴以勞致疾。妻蔡氏。刲股療之。不愈。遂卒。君乃曰。兒致身衛國。婦刲肉救夫。吾門之祥也。吾母幸而考終。吾身若家。皆可殉難。尙何惜哉。賊退。則趣治戰船。以濟水師。立共武社。使諸生與衆練卒。肄習火器。事上。議敘加三品銜。論者謂謹厚如君。乃能臨危應變如是。爲不可測也。同治八年六月十五日卒於家。春秋八十。其年十一月十六

日葬於北關外洪山渡饗堂坑莊山之陽。會祖某。祖某。父某。皆贈中憲大夫。會祖妣氏某。祖妣氏某。贈恭人。妣氏劉。累封恭人。晉贈淑人。旌表節孝。配陶氏某。配周氏。妾呂氏。生子剛。早卒。乃以弟之子驊爲後。妾廖氏。生子際。女六人。孫四人。焯。煥。焯。焯。皆驍出。煥復出爲剛後。女孫二人。君之學。詳於治經。尤嗜易春秋。著有左氏兵論。主講嶽麓書院二十餘年。以洛閩正軌。陶鑄羣弟子。亦頗參陰德感應之說。警發愚蒙。生徒翼翼。無敢軼踰法度。庶幾以身教者。銘曰。

不斲不蘄。不揭己以爲崇。公以校士。毅以卽戎。勇以辭祿位。而誠以啓羣蒙。皆以仁孝爲之本。本立而用自不窮。老成逝矣。康此幽宮。

郭依永墓志銘

依永。名剛基。一名立篋。姓郭氏。吾友筠仙中丞嵩燾之子。而國藩之第四女壻也。少而羸弱。善病。就學數歲。猶戒其師無過督責。年十四五。筠仙奉命巡撫廣東。依永從親於南海使院。遜志研求。學以大進。其後從親還湘。益有慕乎古人述作之林。自場屋經義律賦試帖。以至唐人楷法。名家繪畫。皆窺其藩而究其趣。而於古近體詩。爲之尤勤。同治七年。以試藝冠其曹。補縣學生員。父兄或詔以專事科舉之業。而於詩姑輟焉。依永以爲志廣塗遠。安能敦敦獨事舉業。退輒矯首長吟。叢稿滿室。有龍光輔樹棠者。

老僧東林者。年皆六十。與爲忘年交。時時相從。倡和不厭。或騎駿馬。挾一僮。薄暮游古寺。覓句以歸。用是自適。依永之詩。嗟峨蕭瑟。如秋聲夜起。萬夔傷懷。又如閱盡陵谷千變。了知身世之無足控搏者。長老皆怪名門少年。不應有此。東林亦嘗詰之。依永則自謂吾每爲詩。百感中來。不可遏抑。竟以同治八年十二月四日病卒。年才二十有一。會祖某。祖某。皆以筠仙貴。誥贈榮祿大夫。會祖妣氏某。祖妣氏某。妣氏陳。皆誥贈一品夫人。子二本舍。本謀。女生月餘而殤。疾革。援例爲員外郎。同治九年某月某甲子。將以品官禮葬於某縣某山。嗚呼。衰齡而哭子。仁慧而不壽。皆人世所謂不幸。然聖賢有遭之者矣。豈天之所可否。與人閒所稱善惡禍福。其說絕不類邪。抑人事紛紜萬變。造物者都不訾省。一任其殃慶顛倒。漫無區別邪。天人感應之故。自昔久無定論。依永之生。其詩已頗知一得喪。齊彭殤之旨。今其既死。殆將沛然而大學矣。於是述吾所聞。爲之銘辭。以質幽遐。亦塞筠仙之悲。銘曰。

吾聞君子之畏天命。有如孝子之事庭闈。苟遭禍譴。敬受不疑。恭若申生。順若伯奇。又聞道家之言。與化推移。縱心任運。有若委衣。雖宗旨之各別。要安命而無違。覽依永之詩篇。似多見道之詞。胡含愁而鬱鬱。豈其中有不自持。修德之報或爽。雖神聖不能測其微。主之人者。爲吾能爲。主之天

者吾安敢與知等死生於晝夜。信長短之有涯。存者抑情而復禮。逝者奠魄而永綏。

羅君伯宜墓志銘

君諱萱。字伯宜。湘潭羅氏處士某某之孫。吾友候選內閣中書汝懷研生甫之子也。少而穎特。旁通。鈇聞庭訓。多所開解。咸豐四年。國藩率師自岳州。逐賊東下。強挈君以俱東。是歲克武昌。破田家鎮。攻九江。舟師不利於湖口。明年。國藩至南昌。重立水軍。進屯南康。視陸師於湖口。弔忠武公塔齊布於潯陽。君展轉相從。跬步必偕。余或口占書疏。君輒操筆寫錄。或危急之際。君甘心同命。而外則美言相溫。諸將或輕重不得。輒爲之通懷。使各當其意以去。又明年。羣寇環集。江西陷沒五十餘城。諸軍多壞散。乃授卒三千人。令君領之赴敵。初戰建昌。繼攻撫州。既又會擣瑞州。君之躬臨行陣。自此始也。其後湖南援師四至。江西稍稍解嚴。君以久役。請急還湘。國藩亦以咸豐七年。丁憂去職。君既暫脫兵閒。則假館以課學僮。製造詩詞。以酬勝侶。作蠅頭細字。以與古人校離合於豪芒。負篋走場屋。以競得失於有司。漠然若不知有世變者。未幾。駱文忠公秉章。檄辦湘潭團練。劉總兵培元。招至鼎澧。又招至衡州。與謀軍事。君稍規大計。不肯久留。自浙西旋。省余於安慶。又省其從兄逢元於當塗軍次。亦不欲久居。會所親黎

福疇沒於涇縣。君遂護其喪。及其孤嫠以歸。同治二年。廣東巡撫郭公嵩
燾。招君至粵。屬以創立水師。君又遜謝而歸。每歸。從事文藝。與諸生比肩
就秋試。如初。久之。佐某君治威信軍。又自領一隊。曰威震軍。防禦粵賊。事
定散去。蓋自是君亦倦遊。不復有意於兵事矣。七年冬。記名按察使黃君
潤昌。征苗貴州。要君偕行。君慨然曰。是足與有爲。吾所敬也。吾不可以已。
八年正月。至黔。師比有功。遂克鎮遠府衛兩城。道員鄧君子垣。提督榮君
維善。兩軍來會。迭克關寨。欲遂由施秉以達於黃平。氣銳甚。師至小壺谷
驛。以道隘籌深。爲賊所困。君與文武將弁十八人者皆死。三月二十二日
也。嗚呼。君之於戎事。亟就之。亟去之。天於君之勳名。若成之。若吝之。乃卒
不得一當。而委骨於荒徼絕壑之中。果何爲邪。儻所謂命焉者非邪。事聞。
諭旨照按察使陣亡例賜卹。贈太常寺卿銜。世襲雲騎尉。恩騎尉罔替。君
幼有夙慧。二歲能識風。翦兩字。自真草法書。古文詩辭。以至科舉之業。俱
有義法。既入學。爲優行生。從軍累歲。殺功至同知直隸州。加知府銜。其論
吏治軍政。皆貫徹古韻而不戾於時。向使得守一官。統一軍。與當世之成
名者校。何渠不如邪。然終不得藉手以一伸其志。此君子有陶鑄人才之
責者之咎。國藩所以內疚而尤惜之也。銘曰。
孰推焉而屢起。孰尼焉而屢止。孰予以飛躍之資。而不假以升斗之水。出

躍馬而橫戈。入稽經而誦史。亦何慊乎時賢。胡亨於彼而屯於此。終效命於蠻陬。長賣志其何已。蓋憐才者之悲。而竊位者之恥。

甯津龐君墓誌銘

君姓龐氏。諱朋。字君錫。以字行。更字百朋。先世有自昌黎。遷河間之甯津者。遂爲甯津縣人。大考復還。考自誠。皆以君子際雲貴。誥贈通奉大夫。祖妣孫氏。妣李氏。皆贈夫人。君少而篤行。劬學。事父母存得其歡心。沒能盡禮。有兄四人。以父命析居。君所應得資產。皆擇取劣下者。又稍稍推其所。以全友愛。讀羣經及諸子書。能得要領。手錄口誦。鏗鏘疲敝。而自勉不衰。尤著宋儒程子朱子之說。顧躬行何如。不爲空論。屢試輒黜。最後儀徵吳文節公。視學直隸。乃識君以爲績學之士。擢置上策。補邑增生。君既不屑爲速化之術。不得以其所學。暴之於世。則擇後生雋穎有志之才。鍛厲而淬濯之。范成其器。出君門下者。率有聞於鄉里。而君之子秉彝。訓被知於有司。通籍而仕者二人。當咸豐癸丑之歲。粵匪渡河北。竄畿輔。被擾。運河以西。郡縣騷動。咸欲團結鄉勇。各固境圉。君建議。阻運河而守。可省勁兵數萬。籌畫垂定。會鄰邑爽約。計以不行。然甯津終得保全者。資君所訓練鄉兵萬人之力。由是遠近人知君。不獨學優行高。又有應變戡亂之略也。際雲仕京師。仕熱河。數迎養。君耽於田園之樂。到官所。未幾輒復旋里。

年七十有六。以咸豐九年己未三月初五日卒於家。同治九年庚午。誥贈通奉大夫。如其子際雲官。娶同邑宋氏。專靜煦愿。天性儉勤。事舅姑事夫里之人。稱曰賢婦。教成其子。服官中外。所在著績。人曰太夫人之誨實然。稱爲賢母。以子際雲貴。累封夫人。就養揚州。逾月。終於揚州公廡。實同治九年十一月初八日。壽九十。距通奉公卒時。十有一年矣。子三人。際詔力耕不仕。際威舉人。官戶部主事。際雲由翰林改官刑部。以軍功。擢江南鹽巡道。權兩淮都轉鹽運使司。女子二人。適楊惠琇。李萬倉。孫二人。作森。澤鑾。孫女十人。嫁者七人。先是江蘇巡撫丁公之母某太夫人。將以九十生日稱觴。先一日而卒。際雲在揚州。亦將以十月十四日肆筵娛賓。爲母宋太夫人壽。而太夫人先六日卒。江南之人。皆謂兩太夫人德稱其福。而微以不得旅進祝嘏爲歎。夫壽至九十。有賢子孫。此人閒所不多觀。兩太夫人可以無憾。豈藉一二日之宴樂。以爲榮觀哉。獨國藩重奉朝名。蒞兩江。疏陳衰年多疾。不任艱劇。不宜久點高位。既不得請。則私恃友朋之同官江南者。匡余之不逮。而共底於治。今丁龐二君。先後以母憂去職。或南踰嶺嶠。或北歸燕薊。於余心不能無離別之愴爾。際雲於咸豐丁未。考覈羅官學教習。庚戌。考國子監學正。余皆閱取其文。故執摯於余。又館余家。教余子者數年。同官江南亦數年。爲余言通奉公太夫人之德甚悉。將以

明年扶柩還里。豫來乞銘。銘曰。

通奉之阡。祔者夫人。孝視其事親。共視其事舅。行視其身。學視其所尊。慈惠感人。視諸其鄰。種德斂福。視其子孫。其永不朽。視茲銘文。

遵義黎君墓志銘

君諱愷。字雨耕。晚自號石頭山人。遵義黎氏。會祖國柄。祖正訓。廩貢生。考安理。舉人。山東長山縣知縣。長山君二子。長曰恂。字雪樓。雲南大挑縣知縣。君其次也。雪樓厚重寡言。氣蓋一世。君則個儻通易。周覽羣書。兄弟間自爲師友。長山君少遭不造。備歷艱險。既見二子之成。乃大歡慰。二子翼翼趨承。食必佐餼。饋必奉漿。應唯猶嬰兒也。嘉慶十八年。逆賊林清等倡亂。內煽京師。外起滑縣。河南北山東直隸震動。時長山君仕山東。雪樓侍於官所。譎言四起。或告於貴州曰。長山破矣。縣令殉城死矣。雪樓殉父矣。親屬都無存者。僅存兩孺子。漂轉吳楚。闖去矣。君於時。奉母楊太宜人在家。聞則北望號痛。請於母。刻日戒途。赴山東之難。至長山。則闔門故無恙。傳者妄也。由是遠近以孝歸之。君曰。父兄得全。幸也。庸有稱乎。雪樓之自桐鄉以憂歸也。家居十五六年。君晨夕造請。進止雍雍。語或不合。亦敬應之。而徐理之。終無所忤。雪樓嘗病喉痺。絕言與食。君午夜禱於宗祏。泣曰。我不及兄。兄不可死。必死者。請以我代。喉亦旋愈。其敬嫂也。如嚴其兄。其

訓羣從。如教其子。蓋歷久而不改。至其終身。亦卒不少懈。居京師。有友會某之喪。新尸樽屬。雖其兄亦畏惡不敢近。君就舉而斂之。必恪必躬。見者感歎。君少而善病。長山君雅不欲強之學。而博涉多通。窺見百家要指。以縣學生中式道光乙酉科舉人。十五年乙未。大挑二等。補貴陽府開州訓導。二十二年十二月辛卯。以疾卒官。春秋五十有五。卒之日。囊無十金之蓄。士無識不識。莫不惜君之位。不稱其德。又不獲耆壽以昌其教澤也。嗚焉。若有憾於天地。至其孝友篤行。饜於人人之心者。則誠服而更無遺憾。然則君之自省。與後之論世者。亦可以無憾已。君配張氏。妾吳氏。劉氏。子四人。庶燾。咸豐辛亥科舉人。庶蕃。壬子科舉人。候選知州。庶昌。以諸生獻策闕廷。天子褒嘉。特授知縣。候補直隸州知州。庶誠。女五人。皆適士族。孫四人。孫女五人。咸豐七年四月。葬君於河西小青欄林。其後閱十五年。庶昌乞余追爲之銘。銘曰。

賢聖盛業。豈貴高名。其道甚邇。事親從兄。穆穆碩儒。黔南之特。韜斂英奇。以修內則。聞變趨庭。萬里戴星。禱疾身代。感徹百靈。胡誠不格。何施不普。化被梟獍。澤以甘雨。生徒濟濟。飭爾五常。白華孔絜。馨我膠庠。亦有賢嗣。文行竝卓。埋石茲邱。永貞喬嶽。

君諱松山。字壽卿。少而沈雄豁達。通曉家人生事。親長稱譽。以謂足昌吾門。咸豐壬子癸丑之間。粵賊度嶺北犯。圍長沙。陷武昌。吾邑二三賢俊。召募丁壯。激揚家聲。毅然有討賊之志。君實隸王壯武公鑫部下。號曰老湘營。轉戰湖南北江西諸省。歷有名績。王公既沒。則從張忠毅公運蘭。戰於江西饒信諸郡。追餘寇於閩邊。別擊逆黨於廣東廣西。才望日彰。超越輩流矣。咸豐十年。余檄老湘軍及鮑超之師。防勦宣歙。攻牢保危。喋血二年。始克徽州甯國兩府。張忠毅以疾歸里。君乃與易紫橋。分領老湘營之半。自持樞柄。堅守甯國涇縣等城。屢卻巨敵。以底於江浙大定。同治四年。國藩奉命攻討捻賊。捻賊者。始於安徽河南。而蔓延於秦楚燕齊者也。其叛亂稍後於粵匪。而梟悍略同。其步隊少於粵匪。而驍騎逾萬。剽疾過之。湘中士卒。憤戰江濱。未習車騎。馱運之勞。不樂北征。獎之而不勸。痛之而不服。君獨感奮請前。部卒不願北渡者。殺數人而事定。師至臨淮。易紫橋病歸。定安謹按公此文係壬申歲正月作屬稿僅三百餘字病發報筆距易紫橋時僅數日耳文雖未完不敢輕廢謹依元稿錄出以見珍重手澤之意

仿古字版

會文正公詩集

世界書局印行

曾文正公詩集目錄

四言

題楊忠愍公二疏手草……………一

題易公筠亭遺像……………一

五古

雜詩九首……………一

里胥……………三

送吳榮楷之官浙江三首……………四

題錢崱仙同年慈竹平安圖二首……………五

寄懷劉孟容……………五

題周小邨前輩塞外課經圖……………六

地用莫如馬二章思賢也……………七

題龍九詩……………七

贈李生……………七

西征一首呈李石梧前輩……………八

留侯廟……………八

柴關嶺雪……………九

廢邱關……………九

岱雲同年喪妻爲此詩譬之……………九

寄弟……………一〇

乙巳春聞謝戴醇士前輩畫竹……………一〇

請醇士前輩畫竹歸貽樹德堂題詩一首……………一

又贈筠仙一幅……………一

送王子壽歸荊州五首以高步追許由爲韻……………一

送陳岱雲出守吉安……………二

丙午正月二日作……………三

題箕谷圖……………四

送王孝鳳之雲南卽題其尊人松菊圖……………四

題錢崱仙蠶燭修書圖……………四

題孫君采芝圖二首……………五

謝陳慶覃侍御……………五

小池……………六

茲晨……………六

失題……………六

題泛海圖……………六

秋懷詩五首……………七

謝薛曉嵐……………七

送舒伯魯……………七

劉寔詩……………八

送莫友芝……………一九

題彭旭詩集後即送其南歸二首……………二〇

丁未六月廿一為歐陽公生日集邵二喜齋分

韻得是字……………二〇

送黎樾喬侍御南歸五首……………二二

題季仙九師采蘭菡菊圖……………二二

題朱伯韓詩集後十首……………二三

送黃恕皆使秦中……………二四

北堂侍隱圖為姚吏部題二首……………二四

題陳氏五世鄉賢遺像……………二五

韓齋為孔舍人題……………二五

桐陰消暑圖為史吏部題……………二五

題苗先麓峯鏡訂韻圖……………二六

袞閣草堂圖為潘博士題……………二六

陶太常小像……………二七

會合詩一首贈劉孟容郭伯琛……………二七

王母方太夫人詩……………二八

贈李眉生……………二八

題俞蔭甫羣經平議諸子平議後……………二九

謂王王秋徐州見贈之作……………二九

伎求詩一首……………三〇

七古

謝疊山賣卜研為劉太守題……………三一

送凌九歸……………三一

送楊春皆歸……………三一

題毛西垣詩集後即送之歸巴陵五首……………三一

題顧南雅先生畫梅應何子貞……………三三

傲奴……………三三

瑣瑣行戲簡何子敬乞醃菜……………三四

反長歌行……………三五

題畫蘭三首應田敬堂同年……………三五

贈何子貞前輩……………三六

題唐鏡海先生一圖……………三六

感春六首……………三八

為何大令題明趙忠毅公鐵如意……………三九

喜筠仙至即題其詩集後……………四〇

六月二十八日大雨馮君樹堂周君苕農郭君

筠仙方以試事困於場屋念此殆非所堪詩

以調之……………四一

苕農既和余詩而三子者皆見錄於有司乃復

次韻……………四一

題明陳忠愍公雪聲堂魏為唐觀察樹義作……………四二

題醇士前輩爲溟生師畫竹疊前韻	四二	答李生	五五
謝岷樵	四三	題唐本說文木部應莫邱亭孝廉	五六
移居偶成	四四	贈吳南屏	五七
陳慶置詩鈔題辭三首	四四	游金山觀東坡玉帶詩	五七
題紅詩課戲題一詩於後	四五	五律	
書朱皋亭家傳後	四五	早起憶九弟二首	五八
送周文泉大令之官城武	四六	得郭筠仙書並詩卻寄六律	五八
送陵十一歸長沙五首	四七	寄弟三首	五九
送謝果堂前輩歸江南	四八	獨出	六〇
題王少鶴製砧課讀圖	四九	訪苗先麓	六〇
丙午初冬寓居報國寺賦詩五首	四九	懷劉蓉	六〇
謝李生三首	五〇	歲暮雜感十首	六〇
次韻戴醇士邵蕙西見過	五一	桂湖五首	六一
題平谷山莊圖	五一	至日二首	六一
題王麓屏扁舟歸養圖二首	五一	雨	六一
書嚴太守大關賑糶詩後	五二	送吳英樾之官浙江兼簡魏黃生大令三首	六三
送黎越喬侍御南歸	五二	送鄧伯昭兼簡家伯醇秀才三首	六三
題張石舟煙雨歸耕圖	五三	莫過竹如	六三
太學石鼓歌	五三	東鄰杜氏義塾	六四
題朱伯韓侍御之尊人詩卷手蹟	五四	送王少鶴	六四
題簷笈谷圖	五五	送金竺虔之官閩中	六四

七律

歲暮雜感十首……………六四
 寄郭筠仙浙江四首……………六五
 三十二初度次日書懷……………六六
 憶弟二首……………六六
 漫興……………六六
 聞客話里中近事……………六七
 元戎……………六七
 溫甫讀書城南寄示二首……………六七
 早發沔縣遇雨……………六七
 初入四川境喜晴……………六七
 梓潼道中有懷馮樹堂陳岱雲……………六七
 早發武連驛憶弟……………六八
 三十三生日三首……………六八
 國士橋……………六九
 哭少時同學某……………六九
 送妹夫王五歸五首……………六九
 酬九弟四首……………七〇
 贈梅伯言二首……………七〇
 夜直苦寒……………七〇

吳宮黃病中屬市鹿尾……………七一

臘八日夜直……………七一

失題四首……………七一

丁未六月七日考試漢教習試院作二首……………七二

武會試闈中作……………七二

送孫芝房使貴州二首……………七二

書邊襄石詩集後二首……………七二

送梅伯言歸金陵三首……………七三

酬李芋仙二首……………七三

次韻何廉昉太守感懷述事十六首……………七三

讀吳南屏送毛西垣之卽墨長歌卽題其集……………七五

五絕

讀李義山詩集……………七六

七絕

入陝西境六絕句……………七六

題畫竹次醇士前輩韻二首……………七七

送唐鏡海先生九首……………七七

壬戌四月沅弟克復葉縣和州舍山等城賦……………七七

詩四首……………七七

沅甫弟四十一初度……………七八

曾文正公詩集

四言

題楊忠愍公二疏手草

古孰無死。會不可班。輕者鴻毛。重者泰山。楊公正氣。充塞兩閒。遺文妙墨。深播人寰。馬市一疏。聲振薄海。更擊賊臣。五奸十罪。心追逢比。身甘蒞臨。取義須臾。歸仁千載。翩翩諫草。猶存手藁。古柏擎空。似枯彌好。鬱此英風。輔以文藻。長有白虹。燭茲瓌寶。

題易公筠亭遺像

昔歲在丑。喆人西遊。我作挽辭。比許文休。馬磨既甘。不競不絀。亦有月旦。胸剖九流。東崖奉親。朝戲綵舞。暮歸讀書。羣言藻斧。鄉闈屢試。爨無完桐。文章憎命。淚灑秋風。不於其躬。迺祚其子。濯濯芳蘭。芥拾青紫。弓冶不墮。載述先芬。瞻言遺像。永播青塵。

五古

雜詩九首

早歲事鉛槧。傲兀追前軌。張網挈陳維。登山追岷嶮。述作窺韓愈。功名鄙侯儼。三公涉如梯。萬金睨如屣。腸胃鬱千奇。不敢矜爪觜。稍待蘭蕙滋。烈

芬行可喜。豈期揭鴛鴦。駘前驅不踰咫尺。滔滔大江流。年光激若矢。春秋三十
一。頽然亦如此。染絲不成章。橘遷化爲枳。壯盛百無能。老蒼真可恥。樗散
吾所甘。多是鬻毛裏。

西山何鬱鬱。白日馳昭昭。六街淨如練。雙闕凌神霄。沈沈府中居。員井鏤
瓊瑤。果臝周四角。窗霧濛鮫綃。公子盛文藻。九陌鳴金鑣。羣從袂成幄。掠
風馬颯颯。紅燭舞絳雪。會宴皆金貂。朝餐羅鯖鯉。晚衙拂笙簫。今夕既相
酢。明日還見招。天高地則厚。何事不逍遙。

手戰不烘熨。足跣不趨徑。問我何自苦。我歌君且聽。激湍無駐波。止水光
凝凝。棖棟與構櫨。豈曰非天定。東蒿代虹梁。於道未爲稱。朝菌濡濃露。天
天不及暝。適意一須臾。骨朽猶詬病。可憐繁華子。醉夢幾時醒。炫妝豈無
服。自媒羞妾媵。已矣吾何營。閉戶覽明鏡。

傷禽悲弦聲。遊魚驚月影。丈夫貴倔強。女子多虛警。強弧有時弛。夷塗有
時梗。颶風揚海濤。潮平已復靜。君子別有憂。衆人恐未省。

霜落萬瓦寒。天高月浩浩。美人在何許。相思心如擣。我昔覲美人。對面如
蓬島。神光薄軒墀。朱霞蕩初曉。彩鳳儀丹霄。顧視無凡鳥。意密恩還疏。微
誠不敢道。貽我彤管煒。粲今希世寶。可憐金屋恩。長門闕秋草。謠詠日以
多。覬閱會不少。寵眷難再得。蛾眉行衰老。區區抱私愛。夜夜祝蒼昊。

天雞鳴半夜。六合未清曉。烏鵲鳴向晨。羽毛誇矯矯。一旦金丸驚。戢翼暗百鳥。鷓鴣疏惡聲。萬方憂集蓼。青蠅鳴棘樊。繆彰復虛鼎。閒鳴百無補。嗟爾秦吉了。蠖蝨草閒鳴。亂人徒擾擾。

入門忽怳怳。出門復皇皇。嗟我素心人。各在天一方。庸夫厭鼎食。藟士謀糟糠。奔走徧天下。歸去仍空囊。秋老江湖闊。何以慰淒涼。勿勞我之思。我今足稻粱。所憂非所職。所樂殊未央。日暮登高邱。四顧何茫茫。落葉東南飛。孤雁西北翔。思君不得覩。慘澹詠斯章。

松柏翳危巖。葛藟相鉤帶。兄弟非它人。患難亦相賴。行酒烹肥羊。嘉賓填門外。喪亂一以聞。寂寞何人會。維鳥有鷦鷯。維獸有狼狽。兄弟審無猜。外侮將予柰。願爲同岑石。無爲水下瀨。水急不可磯。石堅猶可磕。誰謂百年長。倉皇已老大。我邁而斯征。辛勤共羸糲。來世安可期。今生勿玩愒。誰能烹雋燕。我願燎桑薪。誰能釣巨鼈。我願理其綸。南瀾芼蘋藻。可以羞神鬼。大材與小辨。相須會有因。嗟余不足役。豈謂時無人。

里胥

牛羊忽竄突。郵社雜喧阗。昨聞府牒下。今見里胥來。召募赴戎行。羽檄馳如雷。後期不汝宥。行矣胡遲迴。老嫗捶胸哭。哭聲亦何哀。龍鍾六十餘。伶仃惟一兒。弱小不識事。黃犢母之隨。筋力儻可食。或免一家飢。薄命不足

惜兒去傷永離。老嫗泣未闌。老翁跪致辭。王事亦云棘。婦人那得知。螻蟻穴寸土。自荷皇天慈。天威有震疊。小人敢疑猜。貧者當敵愾。富者當輸財。便當遣兒去。不勞火急催。所媿無酒食。與吏佐晨炊。貧者勉自效。富者更可悲。隸卒突兀至。誅求百不支。積積紈袴子。纍纍飽鞭笞。前卒貪如狼。後隊健如犛。應募幸脫免。傾蕩無餘貲。吁嗟朝廷意。兵以衛民爲。守令慎其柄。無使胥吏持。此輩如狐鼠。羣羣肆恣睢。聊爲逾人徇。敢告良有司。

送吳榮楷之官浙江三首

讀書三十年。今來始一試。自抱輪困材。構廈隨所置。世人苦寒儉。舞裒先擇地。斤削不能遷。罌盎各自器。君子儲百用。多藏如列肆。深厲與淺揭。所向皆如志。君本青雲士。摩空排健掖。置之承命廬。枚馬當偃幟。才多厭聞散。翩然去作吏。方今清華秩。駢拇僅云備。不如膺專城。張弛從吾意。觀魚莫結網。網過酷於餌。洽絲莫求多。緒多亂神智。聖朝淪洽恩。陬滋實蘄被。可憐蚩蚩氓。惇惇還好義。願君愷弟思。隨時勞撫字。

西湖吾未到。夢想若遇之。荷花夏如海。當春萬柳垂。秋月隨潮湧。暮霽天無涯。三百六十寺。嵐翠渺迷離。君去事幽討。抉剔發天倪。餘慳收昔遁。奇賞獲新知。朝餐吸山綠。暮雨張水嬉。尋碑嗅梅蘂。獨往無人隨。政成無一事。風流方在茲。懷抱一如彼。江山復如斯。此樂可持贈。寄我千首詩。

鄉閭昔相從。殷勤託詩酒。再來長安道。舟車並攜手。如今飄曠遠。脫然絕
窠臼。少年尙意氣。崢嶸各自狂。風塵飽所諳。蒼然皆老醜。激湍亦已平。真
氣充戶牖。相見無藩籬。灑落眞吾友。昨夜秋風來。嫋嫋涼生柳。念子當乖
離。旁皇如失守。萬族各有營。歡聚焉可久。意趣苟無違。秦越如左右。後會
知何年。今茲歲在丑。

題錢崙仙同年慈竹平安圖二首

冉冉南山竹。柯葉互檀欒。上有一片雲。下有九畹蘭。清風相戛擊。虛碧鳴
秋寒。玲嶠走鞭散。抗衡勁節干。養成兩雛鳳。文彩何珊珊。高枝足棲宿。芳
實供朝餐。歸昌忽采律。言振九霄翰。引吭發鈞奏。俯視失鸞鸞。卻顧箕管
谷。依舊青琅玕。年年託美蔭。歲歲祝平安。

紅塵日夜深。遊子思無已。倦鳥有時還。桑弧有時弛。我有山中廬。僅籬夾
綠水。修竹倚大椿。重重互幡纒。發條播芳蕤。清陰亦何美。依戀會有因。庶
往恭桑梓。殷勤寸草心。區區方在此。

寄懷劉孟容

清晨采黃鞠。薄莫不盈襖。寧知弟昆好。忍此四年別。四年亦云已。萬事安
可說。昔者初結交。與世固殊轍。垂頭對鐙火。一心相媚悅。炯然急難情。熒
熒光不滅。漣濱一揮手。南北音塵絕。君臥湘水湄。辟人苦扁鵲。懷璧誤一

投。已遭官長劓。我作燕山囚。衾襪冷如鐵。塵土塞中腸。經旬聞嘔泄。夢魂
五往還。邂逅在蟠嶼。君魂畏豺虎。我魂阻蛇蠍。明年會長沙。對牀殊咄咄。
可憐郭生賢。日夜依我闥。三子展殷勤。五旬恣猖獗。自從有兩儀。無此好
日月。決渠東西流。人事有蹉跌。當時別江干。懸知成久闊。郭生從我行。再
踏長安雪。東蒿貢廊廟。塗丹強作闥。磬松因澗底。千歲老不屈。行藏一以
歧。會合焉可必。知君障汚塵。憎我逐煩熱。摧蘭擣作糝。本馨固難奪。皇天
造羣倫。位置各成列。煌煌帝者都。峩峩集勳閱。前庭充組主。後闥煖清瑟。
大馬疾如飛。高車如電掣。陋巷時騎過。牆震窗紙裂。而我支肘眠。麀臚兀
頑劣。視蔭呼晚飯。終年會不缺。癡兒亦肯堂。四齡已饕餮。所愧偷太倉。無
異哀窮乞。羨君老巖阿。閒味甘於蜜。嗟哉趣豈殊。所處良不一。坦蕩觀皇
途。轉側思家室。永懷素心人。悠悠難具述。

題周小邨前輩塞外課經圖

肉食多亨途。通儒邁百閔。時蹇心匪乖。身窮道未寤。周君信奇孩。天機苦
捷敏。昔歲乘青驄。羣飛畏秋隼。偶被金丸驚。可憐翠羽隕。十年遼海行。九
月邊風緊。銅雀夢觚榭。鐵衣錦纈純。自信茲遊豪。甘受世人哂。日日抱叢
書。森森如束筍。吾道儻欲東。獨善良不忍。此邦盛球琳。多士紛籥篳。斧斤
試一施。穀率聊可引。弟子初反車。先生大倒囷。文園張百旃。經畝接千畛。

但期道傳薪。未要歸載租。昨者唱刀環。塞外回文軫。勝事告友朋。餘味足
咄吮。方今柄師儒。華秩半卿尹。虎觀車如龍。辟雍市如蜃。會看招旌旆。且
須嚴鞮鞞。稽古榮復榮。吾言非蠢蠢。

地用莫如馬二章思賢也

地用莫如馬。越險思驍騰。豈無汗血種。相求亮未會。萬鍾繼稟粟。千金
釣膺。隆儀苟一闕。市駿休漫稱。

人用莫如龜。幽室能廢燭。告猶儻見從。外侮敢余毒。從短翻棄長。惜哉支
牀足。良無藻梲登。不如塗泥辱。

題龍九詩

李唐盛聲律。初響鏗華鐘。逮及下衰時。切切鳴寒蟲。扶輿發朝氣。百彙曜
麟龍。缺月夜騰光。不與東昇同。秋霜入科木。色黯蒿與蓬。文章說心腑。本
不從竄隆。能者自植立。餘子靡隨風。孰於衆音颯。玉振開羣聾。君才美無
度。大圭宜廟中。君詩如春融。秋爽亦自工。肉好用爲賢。琢刻生芒鋒。南
韶斐然作。山水滌襟胸。雜什多未芼。略可芟龐茸。要道與不舍。金木隨所攻。
且況力冝窮。奧阼辨西東。終然到聖處。今古誰雌雄。

贈李生

生名嗣元。是科四川十九名。余在闈中。最賞其文。揭曉來謁。別神清似郭
鶴仙。愈傾愛之。看書亦不少。真美才也。年廿二歲。因作古風一首。贈之。云

岷山萬仞雪。太古人迹稀。中有窈窕谷。綠蕙芳以菲。幽芬亦已鬱。賞識方

庶幾。澗邊棘荆滿。山上春草肥。託根亮同地。豈辨誰是非。地亦不能易。香亦不能飛。忽逢荷樵子。采擷盈裳衣。臨風再三嗅。俯仰情依依。由來有臭味。不必崇知希。

西征一首呈李石梧前輩

我昨賦西征。熾熾實朱夏。烈日焚八荒。息影無寸暇。孱體甘所侵。炎威冑少倡。一病罹百艱。煩煎竟日夜。夙昔傷勁弓。聞弦神已怕。豈志事呻吟。誓儀任嘲罵。瘧疫難指名。熱寒互壇謝。粒食經旬辭。況能問燔炙。帶月方首塗。參橫未云罷。顛簸筍輿中。磋磨破腰胯。奴子蒼黃詢。庸醫再三詫。猛然肆進攻。云當一戰霸。惡莠雖已鋤。良苗亦失稼。隔日嘻其疲。無復平生咤。皮皴面有窪。耳聾氣愈下。慘澹過潼關。沈昏渡清灊。赫赫李中丞。觥觥范韓亞。老羸臥三邊。犬羊敢狙詐。聞我至驪山。材官百里迓。秋雨長安邸。征鞍庶一卸。旅魄頗飄搖。公來百慰藉。遣僕炊香粳。呼童伺館舍。徵醫未辭頻。饋物不論價。古韻暖於春。美言甘於蔗。我魂稍稍旋。望蜀仍命駕。裹藥充篋筐。買鉛養嬰姪。漸覺身能輕。如馬脫韁韉。吾固慶生存。衆雖亦嗟訝。燕譽多親知。艱難少姻婭。永媿夫子賢。高情壓蒿華。賤子不足裨。西人實沾化。

小智徇聲榮。達人志江海。咄咄張子房。身名大自在。信矣齊與梁。幾人飽
載醢。留邑茲巖疆。亮無懷壁辜。國仇亦已償。不退當何待。鬱鬱紫柏山。英
風渺千載。遺蹤今則無。仙者豈予給。揭來瞻廟庭。萬山雪皚皚。赤日巖中
生。照耀金銀彩。亦欲從之遊。惜哉吾嬾怠。

柴關嶺雪

我行度柴關。山光驚我馬。密雪方未闌。飛花浩如瀉。萬嶺堆水銀。乾坤一
大冷。走獸交橫奔。凍禽竄荒野。揮手舞巖巔。吾生此瀟灑。忽憶少年時。牽
狗從獵者。射虎層冰中。窮追絕壁下。幾歲馳虛名。業多用途寡。久逸筋力
頹。回頭淚盈把。

廢邱關

項王西入關。叱咤何雄哉。鼻息撼山岳。號令如轟雷。分茅割大地。駕馭英
雄才。大王既立後。三將還西來。降臣剖符竹。洪度方洞開。廢邱亦善地。百
里闢蒿萊。桓桓章將軍。屹屹魏虎材。奸豎主帷幄。大將終疑猜。望夷不足
惜。此類良可哀。行人一長歎。萬壑悲風迴。

岱雲同年喪妻爲此詩譬之

陳君喪厥妃。善憂世無有。情至生幻機。有夢造王母。紫殿何言言。衆星挂
戶牖。穆滿翔其旁。方朔戲其後。陳某蟣蝨臣。昧死訴左右。彼有何德功。鶴

鷄到白首。此獨何罪辜。生世不少久。剜肉補其天。於德未爲醜。食貧八九年。辛勤足梁筍。何孽之難逭。斬刈如惡莠。王母反袂泣。倉皇頗怩忸。方朔踰躑出。曰余不執咎。衆生自生滅。非神有官守。高秋金氣肅。萬葉同衰朽。朝落非獨殤。夕脫非獨壽。皇天了不知。無人司薄厚。不見狼臙女。蓬頭雙足垢。一生不洗面。媚夫稱佳偶。亦有綠林豪。掠人如雞狗。堂前妖姬舞。堂下鬼妾走。彼雖得僧老。於君意可否。此雖中道捐。名聲極萬口。令妻果然令。何必在駘着。惡妻不可言。牀第森械杻。陳君翻然覺。再拜謝善誘。歡喜不復愁。逢人但索酒。

寄弟

昔我初去家。諸弟各弱小。阿季髡兩髦。覷人眸子瞭。後園偷棗栗。祿升極木杪。叔也從之求。揖我謂我矯。分甘一不均。戰爭在毫杪。余時輕別離。昂頭信一掉。老弟沉童騃。樂多愁憂少。瞥然成大秋。光陰如過鳥。世味一飽嘗。甘心厭荼蓼。夢裏還鄉國。溝涂苦了了。朝企恆抵昏。夕思或達曉。君詩忽見慰。迴此肝腸繞。生世非一塗。處身貴深窈。衆萬奔恬愉。聖賢類悄悄。二陸盛掀張。鶴唳悲江表。夷齊爭三光。豈不在餓殍。我今寄好語。君聽其勿藐。一願先知命。再願耐撻撻。

乙巳春闈謝戴醇士前輩畫竹

余少淪賤貧。學書等畫墁。中歲偷太倉。誤爲金紫紳。文字雖所攻。淺嘗不能半。邇來又十年。拋棄如土炭。豈謂選佛場。謬來事襄贊。列仙盛瀛洲。腰魚何璀璨。禁院局重振。沈沈宵桂觀。鏤戶無一營。馳箋鬪豪翰。蘸藍掃秋葉。斯須復堆案。衆雖亦好事。奔命極雨汗。戴嵩聖雲孫。三絕天所歎。干謁填其廬。鐵門說三換。場來困棘闡。逢人句脫腕。爲余寫新竹。風筠兀繚亂。呵壁呼老可。笞察何足算。我雖不解畫。耆古頗知岸。但得琴中趣。何必工抑按。爲報青琅玕。徵詩庶一粲。

請醇士前輩畫竹歸貽樹德堂題詩一首

孔翠閉雕籠。失羣忤本性。懷我如玉人。三旬闕賓敬。老醇今鄭虔。支離頗自聖。余爲揚其波。畫詩極輝映。寫此貽君子。持將作寶鏡。筠以喻其文。幹方晚節勁。桃李漫紛紛。語君勿與競。物外求交知。塵中闕幽覓。

又贈筠仙一幅

人生有乖隔。咫尺成關山。我心日百轉。從來輪石頭。日吾語戴侯。君在張李闌。爲君畫新竹。幽澹不容攀。我家雙谿上。萬竹圍沙灣。涼夜幽篁裏。月冷水潺潺。行攜子偕隱。鹿豕相往還。詩名滿天地。蹤迹混榛菅。

送王子壽歸荊州五首以高步追許由爲韻

冠組墮塵海。與世日滔滔。豈知魯連子。脫身美遯逃。十輩蝸與鷺。跳踉不

能高。黃鵠冥一舉。大地如秋毫。

揮鞭拾科名。咄嗟踏天路。四十非不彊。萬卷非無具。尋直如可期。須臾得少駐。側聞馮潛郎。龐眉守故步。

盛年窟鬪輸。結客頗支離。負米半天下。有婦愁朝炊。詩名滿湖海。持是欲安之。菰中一漁笠。懷哉不可追。

天人互轉旋。時勢有虎鼠。結交貴結心。寧當變寒暑。可憐拙匠斤。繆被纒人許。一杯君強醺。無人解觴汝。

皇明燭八極。小范臥西川。嗟君老從事。招招豈無舟。廢興難可道。時來不自由。投竿欲強起。何代無馬周。王君嘗爲林少穆制軍幕府從事

送陳岱雲出守吉安

有序在文集

驪駒且莫喧。我歌始一放。憶昔初逢君。漢濱俯高浪。同拾春官策。天門躡闕閱。射策干羲軒。挾神一何王。君唱我斯于。躡履星辰上。雙鳥不分飛。短翎實所傍。借屋兩頭居。嬉遊不可狀。六月寒瓜肥。嚼冰滌府藏。劈半持作冠。狂呼極跌宕。秋雨催歸人。膏車各南向。長沙掛君廬。入門刪三讓。拜母升後堂。排筵倒家釀。明歲同還朝。百扶接居巷。朝餐或來過。夕渴還相訪。閭學商米鹽。經綸說魚醬。驅驢駕雞棲。似狗頗茁壯。有飢例宜塵。無衣安用術。我道夫子賢。世人或嘲謗。世人病我頑。夫子憐其誑。袍笏雖支離。貌

卑心則亢。平生企高。盡力微不自量。樹德追孔周。拯時儼葛亮。又兼韓歐
技。大言足妖妄。夫子不予譏。和高越初唱。洽比三四年。爲懼亦云暢。卯歲
夏之中。九門盛炎瘴。君實罹其災。一病月三望。毒熱轟外疆。客瘡兀中脹。
有婦賢日勤。籲天事供養。背分苟令涼。饋進冀缺餉。剜肉補其天。有神實
克相。緊我相扶持。計窮屢怏怏。國工吳如竹與鄭如小。小調齊妙心匠。鬼錄不見
收。人謀信可仗。由來福與禍。茫茫自天貺。時月無幾何。中饋遽死喪。我時
匍匐救。倉皇事擗擋。黃口抱呱呱。稽首別總帳。移巢翼其兒。室毀子無念。
良人匪頑石。焉能缺懷愴。傾家營奠齋。淚河送反葬。我謂君已愚。稽經懼
失當。君謂情自纏。誰超六塵障。展轉彌再期。病貧互摩盪。南望閭尸饗。儲
糧不盈盎。推腸與蹙眉。萬端欲誰諒。一朝被殊恩。千憂始滌蕩。士窮守艱
危。時來類放曠。爲君述前塵。在莒慎無怠。報恩不在他。立德乃可尙。丈夫
要努力。無爲苦惆悵。

丙午正月二日作

蹉跎三十五。聞道其既晚。去日良已富。來程亮復遠。自從伊閩亡。大道閉
元機。有誓不識珠。賣珠事驕蹇。微數陳豆籩。小知辨蜨蠅。迂腐譏淵騫。空
疏訕商偃。前者激波瀾。後者恣鬪狠。大江日滔滔。衆人死婉婉。誰能抱孤
芳。寂寥守舊碗。通經不達時。失身下豬圈。嗟予局與聞。亦不工啗噉。非仁

不敢祖。非義豈嘗本。所學誠流俗。攀躋但分刺。不挂高明眼。讖評月少損。民各有依倚。吾寧變愚悞。文字局緘臙。經綸在房栢。浩蕩冠蓋場。一心自嘉邈。聊用陳區區。夢魂庶謐穩。

題篋谷圖

大雅卽高詠。耽隱青山岑。手折筇管枝。鏗爲琅玕音。松風石壁高。箐霧林罪深。幽幽人不知。獨鶴明孤心。

送王孝鳳之雲南卽題其尊人松菊圖

累世無咎繇。寃民塞九縣。數罟危衆魚。吞舟不加讎。王叟邦之良。溫恭少側弁。獄吏一牽連。秋毫忤雷電。田甲時見陵。馬遷莫相援。盆底無昊天。荷戈出摩甸。萬里蒲蠻道。征人淚如霰。廿載餐氈糜。衣無故時線。回首望家山。柴桑信所戀。老松儻無念。叢菊向誰綯。有子鏗華鐘。蜚聲震金殿。武庫羅其胸。干將思一剗。誓上緹縈書。不乘長卿傳。一麾首滇南。征心已如箭。預想王坦之。初覲懷祖面。抱持至膝上。悲喜集一見。萬事如浮雲。滄海日千變。獨有骨肉離。重逢真可羨。明歲唱刀環。懽聲若雷忙。歸食武昌魚。比鄰張高宴。鳳詔喧里閭。純孝迴天眷。不學朱壽昌。徒登獨行傳。

題錢崑仙難燭修書圖

腐叟音塵煙。千載無完史。斷代自班生。鉅觀破大體。茂先賞三志。編摩或

索米舊書留蠹玃。但爲吳生詆。數賢不足珍。餘外況靡靡。聖代盛文章。羣
英蠟前軌。殷鑒曩成編。唐經今繼美。磊磊南董倫。影纓足幡纒。錢子邦之
良。弱冠捋金紫。涇渭原胸中。袞袞極筆底。朝踏東華路。柴車等敗屣。夜歸
南窗下。椽燭照大几。一字褒幽潛。片言殛姦宄。曲直在豪端。誰能矜爪觜。
我亦載筆臣。大詔久復馳。三載糜官錢。飢塵亦莫洗。披圖聊粲然。作詩一
洒取。

題孫君采芝圖二首

孫君名葆恬字劭吾善化人嘉慶己卯舉人道光
六年以大挑選桃源縣學教諭芝房侍壽之父也

衆羽工飛鷲。先生獨摧挫。十載桃花源。寒飈屢告破。古木發深彈。從來拒
俗和。采葑晞殷頌。餐英補楚些。自擷二秀芝。窮年振寒餓。豈謂人事乖。悠
悠卽長臥。撥草求長生。無靈欲誰那。長是拜畫圖。千秋聆咳唾。
少室吾黨英。儲能實完好。韶齒殊不廉。閒偷仙人棗。航海探琪花。踟躕踏
三島。根本良已深。衆芳信在抱。言采幽蘭歸。種作階前草。上有竹修修。下
有清風埽。竹節寒逾堅。貞心永難老。風暖扇餘馨。繁香滿穹昊。

訓陳慶覃侍御

赤水沈元珠。千年暉象罔。君子迴深眷。翻然辱旌獎。馬走那解詩。鉤章事
鹵莽。秋蟬挂高柳。風過自成響。豈意師曠聰。偏聽發謬賞。維君堅高壘。無
人敢掉鞅。筆端一縷香。百靈通胎蠻。方今隆棟穹。伊巫擁天仗。巢燧無闕

遺無處著。蝨疆以茲得雍容。閒吟寄慨慷。有書亦盈牀。有沽亦盈盎。六宇自冥冥。緘塵莫予網。請君拊鑿石。予亦擊堯壤。

小池

屋後一枯池。夜雨生波瀾。勿言一勺水。會有蛟龍蟠。物理無定資。須臾變衆竅。男兒未蓋棺。進取誰能料。

茲晨

茲晨曷不樂。端念良自尤。自吾有爪鬣。半啄匪躬謀。俯視見后土。仰視見光浮。關門赫婢僕。雄長如諸侯。專精事羹飯。餘政及乾餼。兵後物力絀。平世生齒稠。人人似我飽。實重黃屋憂。吾皇惕味爽。彼相爭前籌。聖者自危厲。愚者自優游。大哉六合內。人類難等儔。

失題

西山一夜雨。秋風入庭除。清晨展書坐。脩然樂有餘。天宇一何廓。蕩蕩真吾廬。煖煖夸毗子。守隘無曠居。衆鱗爭坳潦。鬣鬣安得舒。豈知逃閒寂。放蕩得尾閭。吾樂正如此。君樂復何如。

題泛海圖

昔我權瓜州。金焦望域峽。靈山咫尺閒。不得窮巉巖。還家述遊蹤。高堂一笑莞。江湖險可吁。泛海況不難。撫摩慰驚魂。頓腳呼盤瓊。由來慈母心。除

夷最所據。孝廉本儒衣。文章富編剡。胡爲涉遐思。浮海窮胡鬻。有母足慈悲。奉佛信慈憫。共道洛伽巖。實惟仙藥產。神人渡迷津。福汝能簡簡。虔禱或有憑。孝思本無限。圖此塞寸誠。靈心聊結撰。何知妄與真。雲濤紛滿眼。

秋懷詩五首

木葉下如雨。西風吹我衣。天地氣一肅。回頭萬事非。虛舟無抵忤。恩怨召殺機。年年絆物累。俯仰鄰詬譏。終然學黃鵠。浩蕩滄溟飛。

蟋蟀吟西軒。商聲方茲始。小人快一鳴。得時亦如此。大澤藏蟄龍。嚴冬臥不起。明歲澤九州。功成返湫底。君道惡多言。喧囂空復爾。

吾愛邵夫子。

謂仁和
邵懿辰

古之三益者。鑿鑿攻我瑕。不隨世人啞。薄俗尊文章。吾

亦事苟且。赫赫揚子雲。未途裂於瓦。再拜謝儂人。斤斧行可捨。

城頭昨宵月。今夕虧其圓。丈夫矜小節。一缺誰復全。蝸廬抱奇景。高視羲皇前。蒼蠅隲尺璧。江漢難洗蠲。馬融頌西第。今爲時所憐。

吾友劉孟容。遺我兩好書。三年不報荅。幽怨今何如。深山闕大寶。光氣塞州閭。樊英履壇席。名業箕斗虛。補天儻無術。不如且荷鋤。

酬薛曉韻

大谷闕幽蘭。由來習霜雪。摧挫彌歲年。歲隳減昔悅。本性誠未移。芬芳詎可滅。時物一爲遭。適爲吳人擷。會合亦有宜。廢興固難說。旁有荷樵子。殷

勤事奉嶺。出山嗅懷裏。餘馨亦未輟。臭味良有然。非渠獨明哲。
風騷難可熄。推激惟建安。參軍信能事。聲裂才亦殫。寂寞杜陵老。苦爲憂
患干。上承柔澹思。下啓碧海瀾。茫茫望前哲。自立良獨難。君今抱古調。傾
情爲我彈。虛名播九野。內美常不完。相期蓄令德。各護凌風翰。

送舒伯魯

神駒秉清峻。墮地峻無前。男兒志萬里。亦在華妙年。舒生吾楚儁。結髮疲
丹鉛。內外承嘉蔭。託根魁斗躔。迎婦范陽府。結客彌幽燕。遂來窟京輦。滿
月彎鳴弦。謂言拾高策。如撥牀頭錢。人事有奇偶。虎鼠非吾權。文章不賦
媚。例爲時世捐。芝蘭合鋤刈。朝菌香徹天。可憐壯夫志。摧撼終不遷。時時
造我闔。屏慮商詩篇。高吟動厚地。幽思縱重淵。維桑古有敬。況此接才賢。
昨來忽告別。歸意何翩翩。寢門疏定省。冑爲世網牽。一鳴不稱意。脫去如
鷹鷂。趙孟等閒事。難者參與騫。馬走蝨此閒。歲月逐風顛。謀歸百不勇。送
女聊自鑣。

劉安詩

新甯江君忠源。予之執友也。數爲予稱其邑孝子劉安者。道光丁
未。安年齒六十。江君求予以詩揚其行。爲老人光悅。且以風里人。
夫甄采時德。作獨行傳之長編。史氏之任也。嘉善而懲不能。勸一

而勵百亦士大夫有風俗之責者事也。故爲之詩歌。遠貽劉安。安名某。字某。實縣學生。

金峯萬山嶽。劉安巢山椒。邦人所寶禮。與山兩嵒嶮。天窮苦無告。孤露初及髻。傾家樹四壁。馬磨風蕭蕭。朝餐或恥益。夕飲恒賭瓢。子衿式學省。童冠各在招。束脩斂薄少。歲穫償糞穢。上堂奉甘滑。入室馨脂膏。一噎三啜摩。一食再溫劬。蒸梨或忤志。捐斥無寬條。嬰兒抱酷愛。畢世非一朝。白日不東返。孝養隨瞥飄。所餘楮與楮。傍身而瓊瑤。觸時卽子卯。有實如春潮。仰供不知飭。俯畜安能饒。舉家浩鵝雁。妻餒兒號宵。維安不鹵莽。長短與量料。綉箴教補裂。呼粥權息囂。鄉鄰敬其誼。百里無飛鴉。長官式其賢。唾息不敢驕。噫乎血氣倫。報本義所要。人紀有乖沸。茲實懸之杓。惠迪經所訓。物理亮非遙。感歎遂成詠。庶以風鄙饒。

送莫友芝

豪英不地囿。十九與偏邦。斬崖撥叢棘。往往逢蘭茝。黔南莫夫子。志事無匹雙。萬書薄其服。廿載幽窮鄉。今年偶作劇。射策來都堂。青鞵側破帽。日繹書賈坊。邂逅一相見。揖我謂我臧。劉郎吾庸敬。好事迷短長。炙酒頰君頰。亦用沾我腸。微瀾時激引。稍稍觀濤江。可憐好手眼。不達時溫涼。果然被捐斥。鋤刈不成芳。誰能尼歸駕。飄若驚鴻翔。我時走其廬。深語非淺商。

次及蓼莪痛。老淚何浪浪。嗟余亦心性。內刺不能降。賓然拜牀下。十分肅
老龐。關山有乖隔。人事不可詳。萬里共日月。肝膽各光芒。作詩勸歲莫。亦
以勤劉郎。劉郎謂
某雲

題彭旭詩集後卽送其南歸二首

日日送歸客。情抱難爲佳。老彭復去我。內撫焉所偕。往予初遇子。睇眄無
等儔。鷹眼迴高秋。勢不甘塵埃。自言困鄉國。橫被口語猜。絳侯畏牘背。田
甲欺死灰。脫身來洛下。稍攝驚魄回。風波一震薄。萬事何有哉。雄篇勿枉
我。峻句何崔嵬。險拔肝膽露。憂患才地開。終然達紫氣。幽獄難可理。男兒
要身在。百忤寧足摧。臨歧不知報。努力乾深杯。

大雅淪正音。箏琶實繁響。杜韓去千年。搖落吾安放。陪寮差可人。風騷通
胖蠻。造意追無垠。琢辭辨僞疆。伸文掇作縮。直氣摧爲枉。自僕宗陪公。時
流頗忻嚮。女復揚其波。拓茲疆宇廣。大道闢榛蕪。中路生罔雨。辱夫阻半
途。老大迷歸往。要當志千里。未宜局尋文。古人已茫茫。來者非吾黨。並世
求人難。勉旃各慨慷。

丁未六月廿一爲歐陽公生日集邵二寓齋分韻得是字

讌飲非吾欣。十招九不起。豈不耽羣歡。未諳諾與唯。今日飲邵侯。婆娑辦
一喜。多因坐上賓。可人非俗子。梅安伯
言名世姿。蕭然紅塵裏。蟬蛻三十年。

萬事如脫屣。獨留文章性。貞好無遷徙。頗獎歐陽公。時時挂牙齒。後者開會王。前追韓與史。自愛持此論。斯文有正軌。二三邦國英。風流相依倚。持斤向老鼻。郢門欲成市。邵侯宏其披。崢嶸見爪觜。時作好事人。排蕩詩酒理。長安三月雨。炎威力一弛。洗醜招近局。衆賓稍填委。尙想老醉翁。茲辰實攬揆。展圖拜光儀。焚香追無始。餒饑初在管。良琴復動耳。跌宕宇宙閒。嚶嚶亦未已。鄙人實昏頑。百非盡一是。麋鹿生野性。謬來絆金紫。紛華一蕩穢。精光半銷毀。常恐道未聞。殞身同螻蟻。苦緬六一公。終古長不死。名位匪絕人。所貴不關彼。作詩謝邵侯。梅癸竝送似。

送黎樾喬侍御南歸五首

原六首其六
係七古見後

時歲善逾邁。煩惱無少舒。秋色滿大地。良朋還去予。十年聚京輦。竝頭相响濡。深言洞金石。密意安綦綯。傾歡酌家釀。燈火照狂愚。不能久依倚。脫棄如驚鼻。民生各自令。進止非人圖。物自持其末。吾自敦其初。高秋天萬里。浩蕩一春鉏。

平生秉微抱。志與詩騷親。孤音裂肝膈。劃然震乾坤。持用告庸子。舉世褒不聞。先生有妙鼻。容吾揮一斤。賞妍越恆理。逐臭詫奇芬。高歌切哀玉。吹我上青雲。多譽墮盛德。雖然豈不仁。文章事微薄。在物未爲珍。秋豪較得失。老死相斷斷。從今覓根本。破硯吾欲焚。

萬歲行滔滔。後水逐前水。今古數達官。河沙不可紀。生存勢薰天。死去飽
螻蛄。達人計深長。誓不欲穰祗。嗟余本野性。邂逅絆金紫。尺寸無功能。高
明畏神鬼。雷同溷太倉。或恐損廉恥。倦羽企歸風。余亦行休矣。筐筍鋪松
秧。從君萬山裏。

逆夷昔爛漫。兵甲禦南東。殺人飼蛟鱷。大海爲之紅。君時卽我謀。雪涕向
蒼穹。夜半草萬言。朝奏甘泉宮。道謀復旁午。羣策雜昭曩。聖擇有姑舍。神
斷自天聰。自獻雖不效。義憤侔賈終。事往一回首。人各發舊蒙。所貴中無
疚。焉計達與窮。

洞庭天下闊。清傑橫大字。中有兩佳人。乃是淵騫伍。湖北字赤雲。南曰孟
容甫。厥氏同劉宗。神明本漢祖。實惟吾友生。交期徹肺腑。乖隔漫關河。夢
魂奔越苦。朝憶便成昏。夜思或達午。此土臥深山。靜氣卻豺虎。君去儻尋
求。夙餒還一吐。物外得真遊。方寸能歌舞。

題季仙九師采蘭執菊圖

靈儀耀德輝。昌期偶一造。翺羽時倦飛。丹穴仍高蹈。吾師生民傑。瑩粹邁
珪璋。文章養其原。木雞極啄菹。詩老昔采風。滇海丞英髦。聖皇豁四聰。惇
樸信所勞。文軫馳西南。武庫職旌纛。夷然鎮廟堂。羣士息浮躁。秋月照琴
心。忽理思歸操。東籬菊正肥。南陔蘭可采。翩然謝綦簪。巾車已復膏。小子

秉孱薄。門牆備灑掃。近隨漫十年。未洗緇塵眊。稻梁逼旅懷。詩禮荒庭誥。
賦詩鑄此心。搖搖如植翫。

題朱伯韓詩集後十首

以才難不其然有亦未易識二語爲韻

雞鳴足朝莫。陰晴終不開。高秋戰寒夜。四壁轉風雷。有客投明月。驚顧非
凡胎。古人亦已矣。吾猶及此才。

稂莠驕復驕。桃李闐無言。堂堂魏長史。畫籌壁上觀。丈夫有深意。出手無
俗彈。恆沙閱人面。相識良獨難。

明珠伏濁浪。能媚不能流。頌人力如虎。折節師溫柔。肝腸自骯髒。面目自
伊優。再拜問君子。此可言詩不。

金陵昔蝕血。裂皆激瘡痍。事過付東風。杳杳如故時。豈非吾輩恥。痛鉅不
可思。三更荷戈起。四閭夜何其。

東家老鼻祖。詔我三百篇。造詞如日月。萬古趨新鮮。竊人者無恥。自得斯
爲賢。鄙夫目論爾。君謂然不然。

吾子如春陽。照臨列枯朽。我亦無所知。我亦無所有。頗好感事詩。善歌敵
矇眊。歲晚脣又乾。君須濡我酒。

吾國有狂生。白眼善揮斥。謂益陽馬駘稱子賢無朋。許予曰頗亦。中途生波瀾。生

死長乖隔。青山一抔土。永埋壯士魄。

桂林天下秀。生才雅且毅。有美王與龍。虎視令人畏。謂馬平王錫振。臨桂龍啓瑞。誰道儒誤身。等閒拾富貴。平津老封侯。君今齒尚未。

甚矣吾其衰。百思今廢置。平生所好賢。支離背時利。明鏡承食漿。干將不一試。天高帝闈嚴。薦達談何易。

舉世禮邱軻。貌尊非心卽。草元二千年。今無一人識。思之復思之。粒粟開入極。君試騰汗漫。我當借羽翼。

送黃恕皆使秦中

輦轂蜂房聚。萬人局閉牢。脫身得出走。塵鞅方一逃。黃君吾黨彥。閨默謝羣囂。持節下關隴。太華秋氣高。西北收功實。自古產英髦。聖朝枋儒術。土室始深韜。三徵臥不起。四字爛天褒。張呂去云久。餘緒猶可縈。丹穴鳳所都。累葉無凡毛。猗蘭豈不馥。所貴采擷勞。三洗人天眼。往觀大海濤。括盡波底蚌。明月終在遭。先民有遺紹。邂逅入甄陶。歸來謝天子。亦用誇吾曹。爲己辨繁輔。與世置夔臯。

北堂侍膳圖爲姚吏部題二首

脫葉辭喬柯。迴旋依舊碗。行役有乖違。梓桑終繾綣。姚君虞舜裔。純行亞珪瓊。伯瑜陳采服。下堂自婉婉。一從通朝籍。鄉關日已遠。浮雲有東西。遊子不得返。

樹蘭服衆芳。誰能忘根本。爰圖聖善容。慰此深愛悃。嘉魚初在烹。新筍欲盈橐。不惜求取勞。但虞珍膳損。魏闕身事羈。南陔歸夢穩。移孝出忠勳。邂逅還補袞。

題陳氏五世鄉賢遺像

純皇撫九有。至文耀天樞。詔舉明經士。四皓來于予。介休薦梁竇。江南顧與吳。陳公實稱首。人中見騶虞。峩冠長太學。魯國始一儒。洪河無近脈。崑山玉所都。三朝襲令緒。四世表其閭。緊維聖舜胄。家聲自古初。義門翕惇穆。太邱世簪裾。門風不復墜。繼踵踐天衢。金籙澤易軌。君子席詩書。瞻言禮遺像。杖几如可趨。聊表先民軌。一爲薄俗模。

韓齋爲孔舍人題

西京大雅淪。斯文日凋敗。天不喪周孔。使人續警效。韓子與中原。聖言始有賴。孤竅吐雄奇。金聲塞兩戒。時於蕙蘭室。中出蛟龍怪。迴首視齊梁。有作頗衰憊。一從茲塗鬪。來者方雲會。豪彥仍響臻。歐曾得兩大。聖清炳昌運。方姚實孤邁。魯突有雲孫。耆古百無懈。齋被奉烝嘗。但下昌梁拜。大書榜其室。夙莫見著蔡。誰云千載遙。神理與鍼芥。湜期漫親炙。相夷等自鄼。桐陰消夏圖爲史吏部題

炎曦灼大地。蠕蚊同烹煎。有生奔未利。擾擾不遑安。史君靜者流。置身巢

燧閒。綠天展珍簟。桐葉生虛寒。煮茶激清吹。拂箔迴微瀾。客來戒不報。塵事莫相干。頗亦哀老子。佳眠未渠闌。

題苗先麓寒鐙訂韻圖

大雅久淪歇。正音委榛蕪。永明肇四聲。稍變周漢模。開皇集八士。牙曠相飾揄。夜半晝綱紀。韻學茲權輿。承襲一千載。權莽成康衢。韓公頗好古。枉轍六經腴。放者騁遊騎。斂者如轅駒。進退失所持。不得返皇初。有宋盛文藻。才老信狂夫。陳生與晚明。秉燭照幽墟。勝廣驅除畢。沛下風雲趨。聖清造元音。崑山一鳩儒。中天懸日月。堂堂燭五書。上追召陵交。千載若合符。斯文有正軌。來者何于于。江戴揚其波。段孔入其郛。苗髯最晚出。匯爲衆說都。精思屈鬼膝。高論揖唐虞。鬻熊咬入夢。薪火耀天樞。神光不可熄。長夜一鐙孤。風雪交四壁。橫膏校殘書。人謂髯何憊。髯謂吾自娛。自我與髯友。大海禮閒鷗。時洗箏笛耳。一聽秦青謳。物外有真知。肝鬲助歌歛。愛髯不忍別。作詩寫區區。

養閒草堂圖爲潘博士題

浩浩市聲沸。塵霧如驚濤。中有澹定人。萬事渺秋毫。家世東山舊。諸謝各清高。末行濯德輝。九天一羽毛。豈謂迴風勁。修路滯將翺。乾坤豈不大。一笑解天弢。四時足休息。靜極思作勞。時攜桑輿友。物外得佳遨。脫帽談虞

夏。生理寄獨醪。歸來對虛室。風日淡相遭。老鶴傍人睡。羣雞正喧嘈。

陶太常小像

江波少還態。耆宿日凋零。豈知永嘉末。吾猶及老成。乾嘉昔云盛。錢王蔚典型。傳經孟喜鄰。問字子雲亭。各奉本師說。森然啓門庭。先生時少壯。樂敦接芳馨。曾從大匠鼻。揮斧動神靈。跌宕五十載。數輩倚聲名。踏破九州莎。依舊還天廷。後生仍好事。快覩先民程。飄然好須鬢。圖此歲星精。柏寢話疇昔。緒論吾嘗聆。瞻言詠斯篇。一寄思古情。

會合詩一首贈劉子孟容郭伯琛

咸豐五年秋
月南康舟次

東風吹片雲。嘉客來千里。喘如竹筒吹。厲公蹇然喜。朋僚雜迎笑。吾亦倒吾屣。各自被其魂。告曰某在此。傾衿語晨夜。爛漫不知止。上言離別長。歲月弦脫矢。下言兵事殷。成敗真夢耳。江漢天下雄。三年宅蛇豕。王師有蹴踏。戈船照清泚。掀浪煮黿鼉。洪濤染爲紫。長驅下蘄黃。鐵鎖沈江底。羣龍水中生。怒螳車下死。英英塔與羅。威名讐南紀。倚嘯嚮廬閒。天戈欲東指。人事有變遷。由來不可擬。鬼火夜灼天。壞雲壓高壘。龍驤付一炬。韓壁僅可抵。偕行竟無衣。存足乃無履。夜半飢腸鳴。大聲震江水。厲公不知羞。恬然矜爪觜。謂言多難時。從來福所倚。在莒義不忘。圖南風漸起。稍稍召驚魂。時哉可歸矣。世論自悠悠。水膚生瘡痂。困窮念本根。風雨思君子。艱難

復相逢。得非天所社。回首廿年前。志亢聲亦侈。憂患閱千變。返聽觀無始。老夫苦多須。須多老可鄙。二子苦無髭。無髭亦可恥。自乏諧俗韻。不關年與齒。貞松無春競。歲晏行可俟。作詩誌會合。亦用砭窳咎。

王母方太夫人詩

凡響無異材。爨餘得佳桐。衆卉競春華。歲寒彰貞松。坤德无咎譽。非儀兩不蒙。熒然違閔凶。高義古所崇。中材利行之。綽楔留芳蹤。卓哉賢母德。激烈乃過中。別嫌謹錙銖。年高茲益恭。至性無矯揉。情摯超凡庸。無所爲而爲。乃與神明通。有孫立朝端。蹇蹇蓋匪躬。乃知玉泉流。璇源已冲融。白嶽黃山間。靈氣鬱蔥蔥。明靈永不泯。奕世揚休風。

贈李眉生

倦翮復南翔。重眺鍾阜煙。舊遊多環萃。羣卉正芳鮮。謂可擴吾襟。孤懷乃悄然。非材竊祿位。俯仰慚高天。術業一無成。浩浩送流年。竄情常廢事。識閩或蔽賢。多病無安食。多悔少佳眠。無德居高明。衆鬼瞰瑕罅。無學臻衰耄。但爲時所鑄。誰言所遇順。撫衷百慮煎。勤子來存訪。至論探九淵。鬱塞乃過我。神困難爲妍。人世多乖迂。圓一缺常千。羲娥驅童叟。舉世惜華顛。天命誠足畏。愁思且當捐。

青松生危巖。獨立向清視。風韻曷韶咸。交柯蟠龍象。逸氣干層霄。瀟灑謝

塵埃。廟廊構瓌材。羣工共嗟賞。虹梁皎朱曦。天門信蕩蕩。豈知咫尺閒。歧路多迴枉。挽來不能寸。推去或千丈。託根倚峻巖。植基固不廣。孤高招烈風。薄俗甯足仗。蒼穹富雨露。百昌日夜長。大鈞一轉旋。悱惻神所獎。聊究莊生旨。齊物尋影響。行止皆有待。還以咨罔兩。

題俞蔭甫羣經平議諸子平議後

聖祖曠千禩。微言久歇絕。六籍出燔餘。諸老抱殘缺。尙賴故訓存。歷世循舊轍。從宋泊有明。軌途稍歧別。皇朝襲四術。衆賢互標揭。顧閻啓前旌。江

戴紹休烈。迭與段與錢。王氏尤奇傑。大儒起淮海。父子相研悅。謂高郵王懷祖先生念孫及其

子文簡。子史及羣經。立訓堅於鐵。審音明假借。王氏精於古音謂字義多從音出課虛

釋癡結。王氏每於句詞相同者取彼釋此謂之句例旁證通百泉。清辭皎初雪。王氏立訓必

昔人望文生訓或一字而引數十證其反。又戒不得增字以釋經皆係從虛處領會九原如有知。前聖應心折。俞君一何偉。陸步

履證明乃誦者必曲揚其說使人易曉。

追曩哲。盡發高郵奧。擔囊破其鑄。君昔趨承明。鳳鸞與頑頤。輶車騁嵩洛。

康衢誤一跌。子雲宦不達。草元更折節。文園芟天葩。經神供清醴。龐言頗

觚排。諸子亦梳扶。復從羣賢後。森然立縣蘿。嗟余老無成。撫衷恆惻惻。閱

才不薦達。高位徒久竊。茲編落吾手。吟覽安可輟。

訓王王秋徐州見贈之作

戒徒事秋蒐。理權及淮甸。塵埃正紛拏。邂逅接英彥。乖離七易霜。天遣更

相見後車攜嘉客。同馳彭城傳。輕颺素襟。名論迥深眷。自云尋絕學。除軌約三變。僑居蒸水陽。親知斷游燕。閉戶自高歌。寒宵百慮戰。羣聖下窺瞰。憂喜相慶晤。盡扶諸經心。始知老儒賤。探篋出新編。照座光如電。說易燭大幽。箋書祛衆眩。旁及莊生旨。抵巇發英眊。大雅久不作。小知各自衒。漢宋互嘲譏。餘炎更相煽。遲君紹微言。豪芒辨素絢。高揭姬孔情。洪曦消積霰。湖湘增景光。老懷亦忻忭。

乞求詩一首

論紀綱
紀綱

善莫大於恕。德莫凶於妒。妒者妾婦行。瑣瑣奚比數。己拙忘人能。己塞忘人遇。己若無事功。忌人得成務。己若無黨援。忌人得多助。勢位苟相敵。畏偏又相惡。己無好聞望。忌人文名著。己無賢子孫。忌人後嗣裕。爭名日夜奔。爭利東西驚。但期一身榮。不惜他人污。聞災或欣幸。聞禍或悅豫。問渠何以然。不自知其故。爾室神來格。高明鬼所顧。天道常好還。嫉人還自誤。幽明叢詬忌。乖氣相廻互。重者裁汝躬。輕亦減汝祚。我今告後生。悚然大覺悟。終身讓人道。會不失寸步。終身祝人善。會不損尺布。消除嫉妒心。曾天零甘露。家家獲吉祥。我亦無恐怖。右不

知足天地寬。貪得宇宙隘。豈無過人姿。多欲爲患害。在約每思豐。居困常求泰。富求千乘車。貴求萬釘帶。未得求速償。既得求勿壞。芬馨比椒蘭。馨

固方泰岱。求榮不知饜。志亢神愈怵。歲燠有時寒。日明有時晦。時來多善緣。運去生災怪。諸福不可期。百殃紛來會。片言動招尤。舉足便有礙。戚戚抱殷憂。精爽日凋瘵。矯首望八荒。乾坤一何大。安榮無遽欣。患難無遽慕。君看十人中。八九無倚賴。人窮多過我。我窮猶可耐。而况處夷塗。奚事生嗟憤。於世少所求。俯仰有餘快。俟命堪終古。會不願乎外。右不求

七古

謝疊山賣卜研爲劉太守題

青花一片瑩寒泉。中有毅魄務蒼天。大宋河山滄桑改。孤臣心事金石堅。當年賣卜建陽市。麻衣血洗流成淵。吞炭不復容三擊。下簾何曾索一錢。稠父宋父弔鸚鵡。東川西川泣杜鵑。豈知歷劫冰霜後。尙留人世文字緣。辰陽太守亦可憐。老抱石兄喜欲顛。三年膜拜憫忠寺。萬里攜將書畫船。書生癡絕例如此。稱先道古口流涎。不如堯桀兩忘去。日摩頑石支頭眠。

送後九歸

白日杲杲黃埃飛。君胡少住遽言歸。萬族由來各有託。借問君心何處著。自言暫歸奉晨昏。溫席不暖還出門。丈夫生世會有適。安能側身自踟躕。南箕北斗徒虛名。東走西顧知何益。磬折已覺素心違。璞獻况逢俗眼白。要將萬舞誇輝光。肯爲兩言求恩澤。皇天畀我非不豐。平生長策能固窮。

一飽那爭雞鶩食。萬事從付馬牛風。君家才望人所豔。兄弟縱橫兩龍劍。霜鬣豐教長板蹶。雲藻終向天庭披。卽今歸去慎勿稽。歲時努力謀鹽齏。綵衣好娛老萊母。椎髻尙有梁鴻妻。我亦屢尋還鄉夢。年年送人頗自諷。送君無酒爲君歌。楊花如海奈愁何。

送揚春皆歸

去年同送蕭郎歸。心如風幡亂掀簸。今君告歸亦何遽。臨別無言但兀坐。君才捷敏非尙儔。早時羣書讀已破。堆案細字如毫毛。擲筆新詩成咳唾。揭來燕市騁逸足。聊隨鴛鴦爭芻莖。出門百錢買犢車。入戶一編旋蟻磨。虛牝擲金古所悲。五年長安竟坎坷。剖瓠作尊何所容。種柏傍石終不大。首途雖舛心愈雄。懷寶空奇時難貨。嗟余昏懦百無能。與世趨起動得過。忽逢良友相鑄磨。有似酒狂得史佐。隔日一見歡未闌。鼓缶鳴箏唱復和。削除巉嶮得平夷。厭見俗氛揚壚堞。可憐俠氣干層雲。時有忠言驚四座。一麾從此帳分離。萬事何當付嬾惰。方今廊廟搆羣材。搜林剔穴行可賀。看君形容不易凋。願此芒刃豈終挫。明年仍騎瘦馬來。滿面還受緇塵灑。

題毛西垣詩集後卽送之歸巴陵五首

伐木截兩端。半作犧尊半溝壑。南鄰北里輕薄兒。昨日薰騰今冷落。巨屨小屨天所區。焉能屑屑齊笑惡。勸君把酒持雙螯。百年爛醉拚嬉遨。不學

陋儒談狗曲。修潔整巾徒碌碌。

歐君

謂小

昔言鄉國彥。汝與吳先生

謂南

皆狂狷。看汝織古得新機。惜哉弋時

無急箭。獨抱質缶辭雕鑿。世人皆憎我獨羨。金盤銀釀有時灰。得不垂顧
竄與蠱。

朝誦幽通賦。夕吟顯志篇。咄哉此子頗聞道。煩毒迷惑劇可憐。古來騷人
都如此。君亦苦語相糾纏。日月瀟灑百蟄蘇。老抱幽憂胡爲乎。

長羨江頭白髮翁。扁舟如瓦飄西東。船頭得魚船尾煮。穉子哈哈老婦聾。
王稅早輸百無事。從古不遇打頭風。君家正臨洞庭水。一飽弄舟樂何底。

舍此他求真左矣。

我生乾坤一贅人。逐衆轉徙如飛蚊。袞袞臺省無相識。紛紛時事了不聞。
門外車馬何隱鱗。獨立階下看浮雲。君今歸哉涉千里。我方塵土無窮已。

題顧南雅先生畫梅應何子貞

詩老餐冰老更臞。傾身謀醉一錢無。忽然嚼梅供大噉。笑吐滿紙森模糊。
當時酒徒相饋餉。

本寫贈張獨父
子貞從張乞得

至今遺墨何清腴。平陵公子亦好事。巧偷豪

奪無罪辜。時將巨障補空壁。已覺暗香來座隅。長安一雪寒切膚。冷官瑟

縮同圍爐。開眼忽到西湖上。四更殘月孤山孤。我聞繪事通草隸。此語自
古誰云誣。何君作書妙天下。生吞百虎心膽麤。世人只解傳旆蠟。獨能養

氣真吾徒。莫言書畫直小道。不到聖處甯堪娛。吁嗟詩老不可作。君雖抱此徒區區。

傲奴

君不見蕭郎老僕如家雞。十年咎楚心不攜。君不見卓氏雄資冠西蜀。願使千人百人伏。今我何爲獨不然。胸中無學手無錢。平生意氣自許頗。誰知傲奴乃過我。昨者一語天地暎。公然對面相勃僞。傲奴誹我未賢聖。我坐傲奴小不敬。拂衣一去何翩翩。可憐傲骨撐青天。噫嘻乎。傲奴安得好風吹汝朱門權要地。看汝倉皇換骨生百媚。

瑣瑣行戲簡何子敬乞醃菜

瑣瑣復瑣瑣。謀道謀食無一可。大人天矯如神龍。細人局蜷如螺贏。皇皇百計營齋鹽。世間齷齪誰似我。既不學虎頭食肉飛將軍。又不能駝峯犀筋醉紅裙。長將野蔬說奇錯。春筍秋芋評紛紛。吾鄉芋最美拙妻嘲訕婢子笑。可憐先生了不聞。苦思鄉國千里月。夢想牀頭一甕雲。君家醃菜天下知。忍不乞我賑朝饑。丈夫豈當判畛域。仁者況可懷鄙私。炯炯子心天所許。堂堂此理君莫疑。忽憶條侯理入口。黃頭銅山竟僵掙。功高七國安如山。錢布九州浩如蕪。當時鼎烹會親賓。後日饑腸作牛吼。今我與子俱不材。懷抱傾筐倒篋開。取與廉惠兩無猜。青天白日森昭回。不醉不飽胡爲哉。

反長歌行

馮樹堂三十初度有汲汲顯影之憂故爲詩以廣之得失靡常驚名無極繁稱雜奏歸之於正道云

羲和驅日如驅豕。鞭之不行汗流泚。頃刻奔馳過百年。老盡世人渠獨喜。
渠獨喜。我甯愁。已拚一老百無取。馮夫子。我歌君莫鄙。柏梁銅爵安在哉。
盜跖唐堯俱朽矣。北翁得馬知何祥。臧穀亡羊定誰是。平原轉眼成蒿邱。
華屋隔宵生荆杞。上蔡黃狗空歎嗟。洛陽銅駝百遷徙。萬事支離那可論。
吾生得失亦如此。卻笑張毅空飾文。更憐單豹強治裏。修衷修瀑皆虛名。
老向人前矜爪觜。君看從古軒赫人。一半名場夸毗子。今晨令閭傾王侯。
明日枯齒飽蝸蟻。銘功誅德千萬言。可信人閒有真史。馮夫子。我歌君且
起。君今三十胡皇皇。浮名驅君不自止。頻嗟短景難少延。便得長春甯足
恃。世閒自有清淨業。日往月來了無累。人迹不到禽不來。萬年廢井養秋
水。

題畫蘭二首應田敬堂同年

淺紅生綃一尺半。描金蘭葉光爛爛。不知誰氏書畫船。遺作君家錦繡段。
時棄時取了無憑。花若有情花亦歎。有客對此三沈吟。一夜魂飛洞庭深。
故鄉蘅杜知我心。

洛陽三月天如銀。楊花浩浩愁殺人。美人璇閣弄鸚鵡。傷心不敢當青春。
獨對盆蘭訴幽怨。再拜且爲花寫真。腕輕著花只嫌瘦。釧重放葉難爲伸。

簾外雙雙蝶蝶舞。羨汝自在好要身。閣筆下階傍花立。臨風三嗅馨香位。
田郎田郎似我癡。反鎖衡門走賓館。三年啖蔗未曾甘。九畹藝蘭行腹肚。
不願舉國揚芬芳。但願同心通悃款。晨書小楷眼欲花。午睡醒來日已斜。
從容讀書還煮茶。

贈何子貞前輩

以紙索子貞作字久
不見償許遠之也

九嶷山水天下清。中有彥者何子貞。大謫老謀不自白。世人誰解此縱橫。
入法道卑安足數。君獨好之如珉珉。終年磨墨眼不眯。終日握管意未平。
自言簡箋通性道。要令天地佐平成。怡神金鯽朝吹浪。失勢怒猊夜擣營。
同心古來亦有幾。俗耳乍入能無驚。可憐四十好懷抱。空使九州播書名。
嗟我波瀾頗莫二。知而不爲真不智。捧心恥與時爭妍。畫足久爲聖所棄。
行當就子更柱弦。可能爲吾倒筐筥。去年一諾今未償。舊迹已陳誰復記。
世閒萬事須眼前。須臾變態如雲煙。煩君一揮清我室。驅逐毒熱無煩煎。
高堂巨壁蛟龍走。鄙夫白晝敲枕眠。

題唐鏡海先生一圖

十月戎行圖

生世不能學夔皋。裁量帝載歸甄陶。猶當下同郭與李。手提兩京還天子。
三年海國困長鯨。百萬民膏餒封豕。諸公密勿既不減。吾徒迂疏尤可恥。

岱宗夫子唐太常。今日儒林有正軌。宗傳久已追廉伊。餘事猶堪作牘起。昨來示我戎行圖。回首軍興今一紀。九疑南去山連天。八排獠猺多於蠅。祿升鼉伏巢穴繁。青絲白馬風塵駛。籌邊樓下雲屯營。臨賀嶺前雨注矢。先生獨出當九關。磨鍊衆心作高壘。千穢齊震雷破山。萬馬不嘶月如水。先生兀坐了不驚。秉燭從容讀書史。大儒意趣未可量。小醜羸豪安足齒。功成行賞不自言。羞與駑駘較尺咫。我覽此圖發長歌。可憐黃髮今皤皤。四海息兵無一事。先生且住安樂窩。

五原學舍圖

大兒垢膩衣短襖。小兒蓬頭語更吃。生長搖戶習繩行。不識詩書定何物。昨者縣門鼓如雷。太守如父從天來。走章馳檄到山寨。要與蠻俗辨頸顛。皇天於人何厚薄。未必蠻犵皆不才。一朝得與冠裳會。青天始見雲霧開。鼉結公然被儒服。笑言啞啞歡且哈。山南伐石千指碎。山北挽木萬牛回。縮版登登日復夜。取次學舍高崔嵬。五原便同石渠閣。百丈似築通天臺。銅鼓蘆笙雜弦誦。衣冠俎豆何文哉。但願使君長世世。坐看槃瓠成瓌材。豈期文翁難久借。至今蜀國有餘哀。披圖卻憶十年事。富川風物落酒杯。方今聖人舞干羽。薄海懷柔不用武。會崇我丈比桓丁。立使殊方變鄒魯。三老五更古所尊。嗚呼此事非小補。何時虎觀擁皋比。我亦執經走廊廡。

感春六首

奉君以象白猩猩之異味。青琴碧玉之妖姬。子復漠然不我與。我今寸意當訴誰。散髮狂歌非鬪醉。枯株兀坐未是癡。手撮黃塵障河決。自有幻想非人知。城南海棠已爛放。牡丹如霧行離披。如此青春忍不賞。直待白髮甯可追。

今我不歡子不悅。攜手天街踏明月。西南白氣十丈長。銳頭突尾射天狼。東方狗國亦已靖。復道羣鼠舞伊涼。徵兵七千赴兗隴。威稜肅厲不可當。國家聲靈薄萬里。豈有大輅阻虜螳。立收烏合成齋粉。早晚紅旗報未央。嗚呼天意正如此。小儒不用稽災祥。

男兒讀書良不惡。乃用文章自束縛。何子吳南朱伯韓西不知羞。排日肝腎困錐鑿。河西別駕酸到骨。昨者立談三距躍。老湯海秋語言更支離。萬兀千

搖仍述作。丈夫求志動涓莘。蟲魚篆刻安足塵。買馬杜韓無一用。豈況吾輩輕薄人。

明珠二百斛。江湖三十年。徧求名劍終不得。耳聞目見皆鈍鉛。聞道海外雙龍劍。神光夜夜燭九天。珍氣妖星不敢嚮。橫斬蛟鱷血流川。天子寶之無倫比。列置深殿閬風前。千金萬金買玉匣。火齊木難嵌中邊。元臣故老重文學。吐棄劍術如腥膻。如今君王亦薄恩。缺折委棄當何言。

蕩蕩青天不可上。天門雙嶠勢吞象。豺狼虎豹守九關。厲齒磨牙誰敢仰。
羣鳥啞啞叫紫宸。惜哉翅短難長往。一朝孤鳳鳴雲中。震斷九州無凡響。
丹心爛漫開瑤池。碧血淋漓染仙仗。要令惡鳥變音聲。坐看哀鴻同長養。
上有日月照精誠。旁有鬼神瞰高朗。

太華山頂一虬松。萬齡千代無人蹤。夜半霹靂從天下。巨木飛送清渭東。
橫臥江干徑十里。盤坳上有層雲封。長安梓人賦一見。天子正造咸陽宮。
大斧長繩立挽致。來牛去馬填坑澁。虹梁百圍飾玉帶。螭柱萬石攢金鐘。
莫言儒生終齷齪。萬一雉卵變蛟龍。

爲何大令題明趙忠毅公鐵如意

君不見天啓初載國步頻。逼迫英彥如束薪。龍章鳳姿膏斧蹟。狐鳴梟噪
騰要津。大璫滔天不足道。羣小羅拜馬頭塵。執笏無因殛元惡。請劍未許
梟佞臣。觥觥趙公天所鑒。年年磨鐵影隨身。世事萬端不稱意。惟有此鐵
還可入。誓將衷椎擊逆豎。休教鑄錯汚君親。星光燦燦趨朝夜。霜氣稜稜
拜疏晨。一回摩挲一灑淚。寸心如石腸如輪。高皇有靈尙來鑒。小臣此志
何由伸。一朝荷戈西出塞。辜負白鐵悔因循。茄花枯盡委鬼滅。可憐明社
亦荆榛。二百年來餘此物。萬劫不做唯精神。世人蠢蠢寶珠玉。如君乃獲
希世珍。老鐵耐寒終得主。豈有正氣長鬱煙。請君雪夜倚闌看。金精上瀛

撼星辰。

喜筠仙至卽題其詩集後

昌黎聖者徂不作。嗚呼吾意久寥廓。郭生近出還峻嶒。腸胃森然起邱壑。古來文士非羸阨。各有雄心戰墳索。自尋世界鍼孔中。別聞九州造城郭。袁叔曹尙安可論。囊兒沿聲膽已薄。丈夫舉步驥兩龍。豈有趨起躡人腳。我方僵踣瘖不前。君能踐之道斯託。憶君別我東南行。挽袂牽裾事如昨。五年奔走存骨皮。龜坼硯田了無穫。時時音問相照臨。語言雖甘意緒惡。豈知今日還相逢。席地帷天共一酌。紛紛蠻觸爭上疆。誰能買閒事笑謔。解顏一覲豈尋常。百歲忽如掃秋籜。衆木有知草有心。殊性異涂那可度。昨夕之炭今晨冰。轉煖回寒在焱霍。弓影構似公成真。箭鋒失機善相避。葛亮書說雖貴和。屈原平生莫量鑿。趨同造獨良難兼。攘詢約尤詎非樂。方今帝舜明四聰。朱虎夷夔弁高爵。大鐘土鼓相和鳴。文字秋霜起廉鏡。號呼朋侶趨上旒。聊可示強孰云弱。嗟余瞽者迷嶽塵。不殖十年得毋落。欲張漢幟標新軍。要盟不從誰寫諾。獨者無倚同者羞。心之簸搖欲何著。智小謀大姬所懲。偏有狂夫百不作。移山愚叟無日休。填海寃禽有時涸。屠龍大噉願已虛。哆口如箕且一嚼。老筠老筠子視余。謬志誕言豈堪藥。閉門引竅號五噫。欲與秋蟲鬪方略。宇宙空曠時日寬。安用出膏自燔灼。

忽憶元和奇蠹翁。會合聯吟兩鳴鶴。雲龍相逐終不能。海南江東各飄泊。
彼之賢俊尙如斯。我今警頑當何若。與君辦醉千億場。誰道人間有紕錯。
六月二十八日大雨馮君樹堂周君苻農郭君筠仙方以試事困於

場屋念此殆非所堪詩以調之

墨雲壓城眞欲摧。銀河倒瀉天如篔。我巢倉皇變澤國。嗟爾三子嘻可哈。
孔鸞欲爭雁鷺食。貪饕豈得逃天災。矮簷埤危小於盜。拳曲裁足容頸顛。
上雨旁風忽衝突。蟄蟲有戶安能坏。脫屣漂流不可覓。筆於茶臼何有哉。
馮君枯坐但閉目。急溜洒面不會開。周侯仰天得畫本。倚牆絕叫添喧阗。
郭生耐寒苦索句。飢腸內轉鳴春雷。卻笑羣兒薄心膽。瑟縮歌啣良足哀。
丈夫守身要偏強。雖有艱阨無愁猜。我今高臥舒兩膝。深簷大棟何恢恢。
白日鼾聲答雷雨。殘滴初歇清夢回。甘眠美食豈非慶。又聞逸樂生禍胎。
數君健強齒尙未。正可磨鍊筋與髓。明朝日晴各轉鬪。老罷戰罷還歸來。
爲君廣沽軟腳酒。泥污不洗且銜杯。

苻農既和余詩而三子者皆見錄於有司乃復次韻

王師四出枯朽摧。築城如鐵黃土篔。公然一戰收全勝。笑言啞啞何歡怡。
文章有時奏奇績。不信五鬼能作災。諸君運命頗磨蝎。可憐顛頓愁眉顛。
年年力戰略城邑。不分上國士一坏。卻願羣公無寸效。封侯起第何難哉。

李廣旗亭遭醉罵。衛青幕府排雲開。今朝背城偶自奮。一呼振臂何轟隆。
皇天亦助昆陽捷。亂飛屋瓦奔雲雷。稍雪平生三北恥。一洗往日千悲哀。
但令蠶食得小補。休曉雞肋生疑猜。神龍卷舒在勺水。綽綽進退真宏恢。
韻士飲河但解渴。貪泉未到車先回。要將廉退式鄉國。坐看合浦還珠胎。
菟裘他年儻可老。林壑休息舒脾膈。不然崇階借尺木。崢嶸富貴還鼎來。
升沈變遷不可必。今日一樂聊千杯。

題明陳忠愍公雪聲堂硯爲唐觀察樹義作

人閒尤物天所隘。豪奪巧偷生災怪。尙書老硯差復尤。流落君家足一快。
區區石耳烏足珍。重談勝朝可深喟。金陵已破汀州摧。桂林孱王甚矣憊。
書生短褐陳老謀。欲傾南溟洗兩戒。西走臨賀東珠江。剗身莫醫六州瘵。
已聞餘燼飄煙埃。復道妻孥餒杻械。丈夫首斷心不懲。賤妾癡兒況足芥。
袁粲狹巷猶塵槽。張巡孤城已粉壞。可憐此硯隨忠魂。未了多生文字債。
文豹已燬皮尙存。笑倩後人爲肥疥。不須更道夢中緣。已覺英靈接警效。
阿翁作吏今龔黃。惜哉老嵒亦翻鐵。君今撫硯勘楹書。世守櫝龜安敢懈。
惠然何日持示余。我見石兄或三拜。

唐君得此硯於桂林其尊人於清遠舟中夢陳忠愍道及之因名所居曰夢硯齋

題醇士前輩爲溟生師畫竹壘前韻

鎖院重深春爛漫。聖壁潭潭古所埒。盡收羣彥歸樊籠。有似神駒遭繫絆。

戴侯健者胸宇宏。足迹略經九州半。苦著書畫拚金錢。頗睨蟬貂等塗炭。
錢唐夫子今儒宗。藻火虎雖賴翊贊。兩賢分吸西湖光。東壁交輝北斗燦。
亦有繪事追宣和。豈徒宏文敵貞觀。頃來巨卷寫風篁。欲學湖州贈內翰。
斷枝零葉不整齊。但覺清風拂書案。試院經今五百年。文字何止千牛汗。
前水後水但東之。萬事悠悠良可歎。獨有名墨長流傳。壽世不隨星霜換。
故知雨露濡李桃。不如風雲生肘腕。我今老硯久荒蕪。圖史拋如秋籜亂。
外文內節兩無稱。蠹齋班行誰比算。誓將歸牧竹石閒。不管世途有陵岸。
戴侯畫牛有家法。何不謾筆試一按。尙書早兆調燮幾。我亦願歌南山祭。

謝岷樵

市廛交態角一鬩。朝爲沸湯莫冰凍。江侯爾豈今世人。要須半左與伯仲。
漢上鄒生獵者徒。臥病長安極屢空。謂鄒導養難絕三彭仇。惡讖欲尋二
豎夢。君獨仁之相掖攜。心獻厥誠匪貌貢。執役能令賤者羞。感物頗爲時
人誦。丈夫智勇彌九州。守愚常抱漢陰甕。不學世上輕薄兒。巧笑人前事
機弄。昔我持此語馮生。謂馮沈飲深飮豈辭痛。郭生酒後猶激昂。謂郭往往
新篇發嘯諷。君今勁節盤高秋。況有詩句驚萬衆。喜用一章已恢奇。猶嫌
伏轅受羈鞅。頃來脫我珍瓊瑤。輒以錦囊無殺縫。我今塵海久淪胥。方寸
迷蒙足霧縹。乃知貧賤眞可歡。富貴糜身百無用。因君寄語談天客。狂夫

小言或微中。但教毛羽垂九天。未要好風遽吹送。

鄒與愚字柳谿。新化人。客居陝西興安。道光庚子。舉陝西鄉試。家酷貧。而自守嚴。不苟取。今年大病京師。不得與禮部試。醫藥雜役。皆岷樵躬之。急難之誼。吾見亦罕。予既爲此詩。後十日而與愚死。予與岷樵及與愚之族兄子律三人者。爲經紀其後事。秩然可以無悔。將以七月歸其喪興安。岷樵蓋有終始者。子律字春生。亦篤士。六月十二日附記。

移居偶成

前人栽藤後人看。我年於藤未及半。前人種竹青成林。舞影窗月清我心。況有丁香海棠樹。堆砌牡丹亂無數。霜風但遣枯枝立。春光猶遲隔年度。獨立何必念芳菲。正肅氣與天地遇。此身今古如脫屣。人得人弓等閒耳。冰霜百物半摧藏。掃除一室吾安事。轉眼花開春事新。四座唯延澹蕩人。讀書養性聊爲樂。日可招要梅子眞。

陳慶覃詩鈔題辭二首

魏王大瓠號豐碩。酌水盛漿百不適。丈夫身手豈不良。沈沒詩篇眞可惜。嗚嗚道古無一符。畫脂工夫竟何益。我昔鑠肝好苦言。今來百憂頗冰釋。誓將輟軫收哀彈。不唱君家行路難。

近聞西蜀甚陸梁。驅人大邑如驅羊。羣揭竿旌過都市。廣開林藪收畔亡。
新市下江頗竊發。左谿橫水還披猖。州家上名使家縱。昔我經過心繁傷。
太平風塵亦如此。胡不上書達天子。

虞舜藏弓蒼梧野。我家正渡南嶽下。眼看鄉井多譽髦。後周郭李皆健者。
何郎蒼老孫郎少。君合衆銅付一冶。楚人自古工語言。湘流到今悼屈賈。
編夫例縛文字禪。劍頭一吹眞粲然。後茲淵周杏農郭筠仙李梅生
何子真孫芝房皆同鄉人也

憩紅詩課戲題一詩於後

鉛山不作桐城迹。海內騷壇委寒灰。龍蟄虎潛斷吟嘯。坐令蚯蚓鳴驚雷。
憩紅先生頗好事。欲拓詩國疆土恢。號召英豪執牛耳。大蒐燕冀選龍媒。
走章馳檄遍都市。紛紛吟札如雲來。較量錙銖判殿最。豈有魚目還珠胎。
傾身愛才劇如命。酬字金帛布成堆。達官貴人不好士。先生此舉眞豪哉。
嗟余楚狂百無用。長安十載餐黃埃。作碑無錢枉自苦。乞米有帖長空回。
臣朔飢死侏儒飽。古來顛倒何足哀。偶然塗抹爲新句。畫眉深淺乖時裁。
鬢髻飄零有誰惜。錐刀角逐吁可咍。豚蹄果遂籌車祝。一笑取醉三百杯。

書朱臯亭家傳後

韓公會作董生行。坡老亦詠姚氏堂。末世文人苦辱陋。雖有行誼無由彰。
徽州太守萬夫特。承明一出腰銀黃。政聲今鄰趙張右。名翰昔在崔蔡行。

憶昨石渠同討論。稱引先德何琅琅。考亭絕學半庭訓。佩章奕葉仍作堂。孝經五齡誦在口。內則半編時相將。一朝老親蒙霧露。醫不能力巫難禳。妙年誠心破金石。午夜剗臂和羹湯。探丸何曾讓耆域。臥冰殆欲嗤王祥。誰言吳穹闊且遠。小叩大應如宮商。阿耶道躬既純固。阿兒行義宜褒揚。漢家本來重孝友。薄俗尤應式靡涼。豈謂虛舟藏大壑。空教幽獄埋寒鉞。獨留孤兒好頭角。神駒墮地不可當。逸足騰踏蓬島路。八載與我同趨蹌。昨年一麾出歙浦。南飢北渴永相望。白塔觚棱晨漠漠。黃山煙靄暮蒼蒼。懷人卻寄相思字。念祖仍徵述德章。前人艱危事我種。後人但識嘉蔭長。卽今楸枿貢天府。莫忘老幹在冰霜。

送周文泉大令之官城武

周侯爲政知者鮮。地小裏長自不展。早歲讀書如老鏡。堆案徧嘗盡百變。詞源一瀉不得休。往往巉巖雜婉孌。頻年大海泣遺珠。卅載湖南縮銅篆。本因名父求蕭威。始見分符來張緬。深藏干邪匿銛鉞。盡壞屏障通關鍵。閒官那暇自料理。時逢順風亦遷轉。由來赤令須老成。早有仁聲先流衍。東窮二酉緣礫崖。南入九嶷踏秋蘚。馬援舊愁惡氛惡。文翁新化善俗善。忍教蠻貊歎無孺。坐看獐獐來解辦。蘆笙銅鼓喧粵歌。苗婦秧童通繖繖。我亦自是湘中人。有賢不知嗟何淺。長安一見兩無猜。詎比尋常徒睥睨。

大開戶牖吐真氣。倒決江河放清辯。拘守咫尺聞苦自繩。我固儒酸君未免。方今要路爭騰馳。幾輩兼程獵華顯。高車大馬塵埃香。翠羽長纓腰腳輒。看君傲瀑猶網繪。長是敗茵策駑蹇。行囊賸有書滿箱。公廚會恐塵生甌。此去清風入濮曹。定知甘露灑青兗。誰云廉吏不可爲。須信夷途百無舛。陽城豈畏書殿考。卓茂終當膺首選。邇聞海國還喧咋。此邦幸未近兵燹。可憐疲民困科條。有如聚蠅遭蹂踐。豈無積弊含瘡痍。聊欲爬梳愈疥癩。枯魚在轍誰能久。惡草當門要須剪。知君不薄芻蕘陳。世俗但解筍蒲錢。明朝一別各東西。愁緒多於甕大醜。

送陵十一歸長沙五首

昨日微雨送殘秋。落葉東西隨水流。世間萬事皆前定。行止遲速匪自由。謀道謀食兩無補。祇有足迹徧九州。一杯勸君且歡喜。丈夫由來輕萬里。皇天陶鈞造萬器。甕盎蛭蠃巧安置。頗怪君材無不能。胸中多藏如列肆。刀光刺眼瞬不搖。小事癡騃大事智。吁嗟世事安可知。干將補履不如錐。螺蠹負青蟲。祝祝亦相似。眼見平地轟高臺。縮版登登無基址。王侯將相豈有種。時來不得商進止。君歸讀書更十年。看君白日上青天。

憾我不學山中人。少小從耕拾束薪。朝去暮還對妻子。殺雞爲黍會四鄰。世事癡蠶百不識。笑置詩書如埃塵。君歸自有青塘山。築室種樹莫言蠹。

如我自鏡猶可憎。非君誰復肯相偶。寂寞陋巷長叩門。三日一見開笑口。
常時徒步噉塵土。偶然驅車馬如狗。君此歸去慰門閭。我今留滯當何如。
送謝果堂前輩歸江南

我昔會讀知恥集。憾不追逐參翔翹。當時小人竊國柄。狐鳴梟噪何貪饕。
霍家奴子青油幟。夜半狹巷公嬉遨。一朝燒車震都市。驄馬御史真人豪。
至今朝士誦遺直。言之凜凜寒生毛。先生早聞過庭訓。豈有勁幹能枉撓。
謝諱泉先生名振定爲御史時會燒和珅家敗車旋以他事中傷落職嘉慶四年起復爲禮部主事今上嘗呼果堂爲燒車御史之子廿年作吏領畿赤。王事何

會怨賢勞。爲憐疲民困蹂躪。親撫積瘵勤肥搔。豫州豐碑吾所見。德政猶
傳萬口牢。復聞巴夔離結惡。十載邊陲苦繹騷。先生手草諭蜀檄。剗巢熏

穴黠龜號。殺賊自是書生事。成功屢蒙聖人褒。果堂討平四川夷匪賞戴花翎陳立餘威懾驪

冉。文翁雅化烝譽髦。方今時俗忌博譽。傲傲萬衆鋪醴糟。卻笑先生抱古

調。冥隨里耳同喧嘈。誰言夷途百無舛。未免奇數時一遭。大江東下日滔

滔。濁水沈珠不可撈。使君一去萬人哭。牽衣遮道何嗷嗷。蛾眉謠諑古所

惜。坐使斧柯終倒操。竭來長安談舊事。磨礱主角深自韜。削如太華立千

仞。絕頂秋隼下平泉。始知老輩尙嫖節。堪哂薄俗徒塵囂。嗟余昏頑大無

識。隨人俯仰如桔槔。頻蒙笑言藥狂齋。須臾便達旨與膏。昨者告別驚何

遽。歸心已似風中旄。逝將買山學耕釣。行且築室誅蓬蒿。世事凝聾不復

問典衣取酒樂陶陶。天空地闊網羅少。黃鶴一舉何其高。紛紛燕雀非吾曹。

題王少鶴須砧課讀圖

破屋荒園陰雨候。桐樹清陰向人覆。虢虢危巢烏鋪敷。風窗瑟縮鏗如豆。砧聲清切姊心悲。書聲啗胡姊淚垂。天乎汝此不自力。豈惟乃姊摧肝臆。二親魂魄長嗚咽。躍馬天街得路回。龍鍾老疾姊顏開。一笑迎門雪雙涕。此日當時互悲喜。當時荒園姊攜弟。此日安臚弟迎姊。鳳詔輝輝賁下泉。柳江春色煥雲煙。長途珍重難爲別。願且無忘在莒年。

丙午初冬寓居報國寺賦詩五首

閉門百慮叢憂煎。出門葛蔓相糾纏。苦被塵埃縛欲死。脫身來此親僧氈。老松大槐遮四徑。日月爲我生光妍。道人龍鍾五十七。黝深碧眼珍珠圓。烹茶煮餅時勤我。亦有山果堆初筵。豪脫對座不相管。兩家各有無言禪。泉夔稷契非吾事。休囚饑飽付皇天。

去年肺熱苦吟呻。今年耳聾百不聞。吾生卅六未全老。蒲柳已與西風鄰。念我識字殊珍少。錢思詎足燔精神。忽憶軒頤初考文。羣鬼唬夜天裂晨。斯高揚馬竝姦怪。召陵祭酒尤絕倫。段生晚出吾最許。勢與二徐爭嶙峋。惜哉數子琢肝腎。鑿破醇古趨囂囂。書史不是養生物。雕鑿例少牢強身。

我今日飲婆娑尙不樂。嗟爾皓首魚蟲人。

長安十月飛繁霜。西風落葉戛金商。道場隙地一千畝。頽垣破礎廢荒荒。
壞塔跛陀野狐噪。華楹漫德飢鼠忙。憶昔憲皇興作日。飛樓湧殿何巍昂。
外家恩澤敵田竇。祖師勢要凌侯王。三百年來變陵谷。龍象孱弱麤颯狂。
毗盧閣子今安在。向時鐵鳳蟠穹蒼。銅駝荆棘古所歎。今我何爲獨旁皇。
鼻涕垂頤不須管。況問人世滄與桑。

俗儒閣閣蛙亂鳴。亭林老子初金聲。昌平山水委灰燼。可憐孤臣淚縱橫。
東西南北轍迹遍。斷柯缺斧終無成。獨有文書巨眼在北斗。麗天萬古明
聲音。上溯三皇始地志。欲掩四子名。丈夫立言要須爾。擊甕拊缶烏足鳴。
嗟余孱退昏庸百不力。付與四海劉傳瑩。

劉郎三十廿蒿萊。荷蓀箸書真豪哉。郭生辭我還鄉國。東遊章貢噉紅埃。
跌宕江山要詩句。傾倒懷抱須尊壘。此閒頗似醺池寺。但少晁張蹇然來。
朝飢夕渴不可解。安得銀潢倒落注金杯。

謝李生二首

一別李生今四載。我有情懷浩如海。白日西下江水東。嗟余與女不相逢。
念女春秋正壯大。勳名邂逅能鼎鼎。三年五年伏不出。鏡中便恐改昔容。
丈夫自謀要深遠。求田莫問陳元龍。深山窮谷霜鏑老。何人拂拭青芙蓉。

曳尾不羨宗祏龜。孤豚不慕太廟犧。我今等閒爲世用。自憐骯髒百不宜。
海國披濤一萬里。天吳罔象相煨燬。聖主宵衣事展轉。小臣辱薄何能爲。
胸中不辨管與樂。囊中嘗少澆與耆。朝歎夕噫不自得。俛首長誦鵜梁詩。
孫生粲粲如刻苴。玉立偕女雙瓊瑤。同作二喬好夫婿。盛年咳唾干雲霄。
蜀山崢嶸蜀江闊。終有畸士光斗杓。文章不是救時物。揚雄司馬烏足驕。
男兒萬事須嘗膽。詎可僥倖呼盧梟。女曹報國好身手。看我嗟蛇已老醜。

次韻戴醇士邵蕙西見過

去年城南臥古剎。高秋萬葉聲鳴戛。病中強哦七字詩。欲調苦腸變甘滑。
樞府先生辱相和。神鬼雕鑿何桀黠。鏟除險語歸溫柔。痛與鄙人砭茁軋。
我時鄉夢正南飛。欲促歸裝理脂羶。奇章偉句不能報。自慙久暗蒼與蚩。
豈期歲序遽周遭。西風蕭蕭又愁殺。東烏西兔老鞭笞。鏡裏催人雙鬢鬢。
一賢忽來曠我懷。高論邱索窮九入。但得尊前賭歡笑。遑冀身後誰識察。
紛紛人海縛簪纓。汨汨天刑被髡削。何時卻隨兩閒鷗。摩空一盤萬里鷗。

題平谷山莊圖

十年京國踴朝鼓。九陌黃塵塞肝腑。已分喧囂儕市估。忽夢歸去釣湘煙。
洞庭八月水如天。沙鷗與我抵足眠。醒來依舊馬嘶櫪。車聲隆隆震牆壁。
始知樊籠困羽翼。開圖對此好谿山。萬重雲水一僧閒。清輝照我塵裏顏。

何日飄然輟芒屨。往尋盤山松下路。買鄰來傍半求住。

題王麓屏扁舟歸養圖二首

冷風融日作好春。吾子嘉遯逢茲晨。長安高蓋擁衢術。住者牛毛去者麟。平明趨衙莫退舍。日日入前伺喜瞋。誰識扁舟五湖外。尙有朝士梅子眞。漣水之頭資江尾。十年同違桑與梓。君去芒屨踏萬山。谷鳥崖花各歡喜。白頭老母迎門笑。傾身一拜兒歸矣。我今孺尼不知還。鰲鶴息壤猶在彼。

書嚴太守大關賑糶詩後

去年河北哀鴻愁。千里剝地境無毛。糶性瘞圭百不應。妻兒鬻食夫遁逃。吾皇慘惻軫飢溺。銀潢下灌傾恩膏。詔發內儲一百萬。拯置衽席蘇號咷。頗聞洪波有滲漏。蠹賊難防胥役饕。令我苦思循良吏。部勒仁政明秋毫。麗江太守今召父。噢咻赤子歸甄陶。政成蠻犵罷歌舞。跌宕滇海窮詩騷。竭來金門謁帝座。一編示我何桀鰲。賑糶兩章尤驚絕。風格欲與次山爭。旌旄大夫出疆得專擅。汲黯發粟史所褒。叔世議賑非細事。走章馳檄相訾謗。州家申求使家阻。民冊吏牘如山高。君能奮身拯水火。一破積習萬口牢。畫脂不是壯夫業。詩外有事眞賢豪。安得九州徧公等。撫摩萬衆離煎熬。作歌聊用勸來哲。下考莫晒陽城勞。

送黎樾喬侍御南歸

原六首前五首五古見前

驄馬鑿驪行如飛。幡然下馬賦歸去。諫草上付九重天。扁舟遙指三湘路。
先生素志在湖海。復欲蒼生歸陶鑄。十年風緡虎觀書。六載霜冷烏臺樹。
滄海鯨鯢浪正高。洪河蛟蜃秋尤怒。杜老窮年憂黎元。賈生伏闕陳時務。
虞廷自有龍夔在。朝士誰結巢由慕。長安風寒秋氣高。離筵酒暖日色暮。
共因去國惜歐九。私喜見幾繼疏傅。昭山樹古霜逾瘦。洞庭水深寒可渡。
定將蹤迹溷漁樵。猶有耕桑酬雨露。他年拂衣我歸來。爲訪先生嘉遯處。

題張石舟煙雨歸耕圖

靖陽老翁飢不死。四十年來噉書史。一朝悔悟思改弦。萬卷書拋如脫屣。
高車大馬謝羣兒。草服黃冠吾歸矣。朋知聚處頗相怪。問翁生涯欲何以。
東阡南陌一毛無。四海九州將安底。翁言少小睠夔臯。會對老蒼矜爪觜。
幾年束縛蠶在匡。數輩啣濡魚乞水。中散自憐七不堪。於菟但聞三見已。
閱世蠻觸多戰爭。策身臧穀無完美。逝將巖壑躬耕桑。不受邱軻老鞭箠。
軀體諒非百年物。夢魂倏在千山裏。煙雨濛濛插新秧。短架漣漣長鱸鮓。
泥飲邨農與酣嬉。招呼黃犢同臥起。翁言未終我已躍。此身不歸神先徙。
行趨神武挂衣冠。往尋谷口買鄰里。誰能皓首黃塵中。項短尻高不知恥。

太學石鼓歌

韓公不鳴老坡謝。世間神物霾寒灰。我來北雍撫石鼓。坐臥其下三裴徊。

周宣秉旄奠八柱。岐陽大狩鞭風雷。四山置罽而天布。羣后冠帶如雲來。
東征北伐盪殪穢。方召暉暉何雄哉。銘功鑄石告無極。欲鎮后土康八垓。
自從七國戰龍虎。荒荒王迹淪蒿萊。嬴顛劉蹶六代沸。把酒但勸長星杯。
陳倉流落一千載。霜鬢日。剝空黃埃。國子先生老好事。欲比郢鼎珍瓊瑰。
東都相公守右輔。始昇泮沼剡蒼苔。五季蝸蟻頗星散。司馬刺史初重恢。
是時十鼓嗟失一。拋棄不辨何山隈。博搜民間得異白。秦關復贖連城回。
宣和天子嚮儒雅。太清書畫千雲堆。詔移此石歸汴水。園橋觀聽何轟豗。
行填字鉤發光怪。照耀良岳金碧開。豈知六龍卒北狩。法物曾不獲凶災。
高車大牛輦萬貨。填坑咽谷驚三才。是鼓蒼黃亦北徙。重器始此蟠燕臺。
道園詩翁主太學。與舉百廢扶傾頽。中門兩楹與位置。華楹大棟增崔嵬。
承以磚壇護以檻。清陰四冪連疏槐。邇來春秋閱五百。光氣夜夜騰斗魁。
聖清文明邁巢燧。搜抉書契窮根芽。從臣技能半史籀。別作新鼓相追陪。
小儒昏鈍無所識。得從械櫜備條枚。細思物理窮顯晦。茫茫人事不可推。
作歌聊繼二公後。不羞駑蹇隨龍媒。

題朱伯韓侍御之尊人詩卷手蹟

異時河內初陸梁。誰其禦者朱與強。強公身死翦妖黨。殊恩稠疊旌國瘍。
朱公墨守一黑子。遮蔽懷衛如苞桑。時逾歲邁三十載。事過頗憶張睢陽。

吾皇繼序錄勳伐。詔祀名宦褒忠良。流芬遠韻不可量。遺墨始此瞻暉光。
詩律欲傳杜宗武。風徽略近元漫郎。公家袞師吾所友。向人繾綣好肝腸。
往時嬌養比苕玉。今日柯條還老蒼。諫章九門懾虎豹。文事四海知班揚。
阿季行能亦超越。輕收科第如掇筐。永慰老翁山下魄。九原一笑能軒昂。
近聞汴州赤大地。千里滌滌無罌糧。析骸易子都窮盡。公之舊部亦疏亡。
河北枯齒相枕藉。關西寇盜仍披猖。安得如結且千輩。散布都邑蘇瘡傷。
摩挲此卷三太息。聊表先正諒方將。

題蒼筤谷圖

我家湘上高嶺山。茅屋修竹一萬竿。春雨晨鋤劇玉版。秋風夜館鳴琅玕。
自來京華曬車馬。滿腔俗惡不可刪。洞庭天地一大物。一從北渡遂不還。
苦憶故鄉好林壑。夢想此君無由攀。嗟君與我同里社。誤脫野服充朝班。
一別蒼筤謝援鶴。十年臺省翔鸞鷺。魚須文笏豈不好。卻思鄉井長三歎。
錢塘畫師天所縱。手割湘雲落此閒。風枝雨葉戰寒碧。明窗大几生虛瀾。
簿書塵埃不稱意。得此亦足鐫疏頑。還君此畫與君約。一月更借十回看。

答李生

我年廿四登鄉貢。始與劉蓉相追陪。延津雙劍忽會合。深夜挂壁鳴風雷。
勳名自謂凌管樂。文采何曾怯鄒枚。豈知羲和鞭日月。頭上光陰火急催。

老劉偃蹇不稱意。酸寒一衿初受裁。我雖置身霄漢上。器小僅儕竚與壘。
立朝本非汲黯節。媚世又無張禹才。似驢非驢馬非馬。自憎形影良可咍。
中天廣殿鏡雲開。飛甍結搆要羣材。倦眼相徧天下士。焉知吾國有顏回。
李生年少風骨峻。驍騰汗血龍所胎。平地一朝能九仞。欲與老劉爭崔嵬。
萬里辭家來從我。如金受冶玉受鎚。斲輪祇有一心喻。獻璞翻爲兩足災。
世上升沈日千變。得失於我何有哉。朝來告別問何往。迎婦塞外祠高禰。
長安自是別離海。新婚便作錦繡堆。離情吉語雙愴怳。新詩妙句千瓊瑰。
我有一言生聽取。冰檠乃爲福之媒。富貴綺羅遭鬼瞰。憂患可以堅筋骸。
陳平終非貧賤客。王章莫忘辛苦懷。邊關十月雪黏天。勸生爲我盡一杯。

題唐本說文木部應莫邵亭孝廉

插架森森多於筍。世上何曾見唐本。莫君一卷殊瓌奇。傳寫云自元和時。
閻君此卷有何珍。流傳顯晦經幾人。君言是物少微識。殘牋黯黮不能神。
豪家但知貴錦裘。陋巷誰復復憐棊。中。黟縣令君持贈我。始吐光怪千星辰。
許書劣存二百字。古鏡一掃千年塵。篆文已與流俗殊。解說尤令耳目新。
乾嘉老儒耽蒼雅。東南巖段竝絕倫。就中一字百搜討。詰難蠡起何斷斷。
暗與此本相符契。古轍正合今時輪。乃知二徐尙鹵莽。詒誤幾輩空因循。
我聞此言神一快。有如枯柳措馬疥。我昔趨朝陪庶尹。頗究六書醫頑蠢。

四海干戈驅迫忙。十年髀肉消磨盡。卻思南閣老祭酒。舊學於我復何有。
安得曾天息櫓槍。歸去閉戶注凡將。

贈吳南屏

春霖颯沓天如篴。大麥苾邑小麥摧。愁顏彌月何曾破。故人飛檣從天來。
與君握別纔幾日。已見新火十鑽槐。當時洞庭醺別酒。乾坤戰伐正喧豗。
沅湘義軍參差起。十事欲成九事乖。英豪半藏蜀國血。大地徧種秦時灰。
卽今南紀風塵靖。亂後遺黎多眚災。荒村有骨餉狐貉。沃土無人鬪蒿萊。
筋力登危生理窄。斗粟誰買易嬰孩。三里誅求五里稅。關市或逢虎與豺。
謬領大藩二千里。瘡痍不救胡爲哉。羨君高臥君山頂。吞吐湖月無愁猜。
世味飽諳肱三折。長吟極望天四隤。招邀軒轅論古樂。漸被屈氏餞餘哀。
談經頗折巨儒角。手攜疇日照昏霾。翩然一葉忽東下。相見各憐雙鬢皤。
甯知滄桑閱百變。復此對持掌中杯。蒼天可補河可塞。祇有好懷不易開。
努力且謀千日醉。高談巢燧訖有郇。

游金山觀東坡玉帶詩

去歲歸飄拂金山。咫尺浮圖不可攀。今年又翦瓜洲渡。扶攜妙友陟孱顏。
簿領叢中困桎梏。脫身一試腰腳頑。微風蹙江衆皴靜。一抹橫吞東海寬。
耿耿樓觀今安在。無情瘦石空巖岈。六飛昔臨浮玉頂。御榻霄漢千龍盤。

兵火十年變陵谷。道場百畝荒榛菅。頽垣不見螭纏棟。荆扉無復獸齧環。
古佛負牆滲秋雨。雖僧無食號夜寒。獨餘蘇公舊法服。腰玉片片留人間。
緞佩流傳七百日。天章褒寵同錫鞶。舊玉帶有殘缺純廟赦內我懷蛾眉老尊
宿。朝知人海如鳳鸞。揚子江頭數來往。幾回愉樂幾悲酸。北去烏臺判死
別。南遷嶺表絕生還。東坡往來江上屢過金山准自湖州攝入烏臺磨蝎作災臆魁壯。荆
棘塞天行路難。差喜名山藏故物。長倚江月照忠肝。巴陵詩叟抱奇逸。齊
盟早歎風騷壇。斂板厭束淵明帶。談經時敲子夏冠。昨來省我鍾山麓。今
此東遊興未闌。扁舟更欲探甌越。誓窮人力發天慳。嗟余本志耽邱壑。羈
束塵鞅無由刪。江山自佳日自富。堪笑紛紛苦不閑。

五律

早起憶九弟二首

別汝經三月。音書何太難。夜長魂夢苦。人少屋廬寒。骨肉成飄泊。雲霄悔
羽翰。朝朝鳥鵲噪。物性固欺謾。

尙餘詞賦好。隨衆頌康哉。報國充無力。擎天別有才。寒雲迷雁影。遠道望
龍媒。百尺金臺矗。看君躡蹠來。

得郭筠仙書竝詩卻寄六律

展轉看書字。嗟君亦老蒼。昊天眞藐藐。白日故堂堂。與子相期事。窮年恐

不償。憂來聊飽食。吾壽會無央。

大雅悲淪歎。斯文久不尊。至情宜倔強。吾道有籬藩。仰首呼虞舜。狂歌答屈原。自非君子性。茲意固難論。

垂耳甘芻豆。儒冠信誤人。長爲羈旅客。嗟汝少年身。物極能思返。天心會好仁。鹿鳴歌旨酒。適適入君膺。

閒閒觀物化。耿耿究時喧。誼士羞要譽。廉夫重報恩。賈憎惟片語。求福實多門。種蕙怡幽獨。歸休勿復言。

昨來殊不適。日落獨登樓。西北看遼瀋。東南望海陬。蒼茫懷百代。浩蕩足千愁。晝肚思長策。嗟余肉食謀。

日日懷劉子。謂孟容時時憶郭生。仰天忽長歎。繞屋獨巡行。雲暗乾坤隘。風

來戶牖鳴。孤吟無與賞。寸憾浩縱橫。

寄弟二首

去年長已矣。來日尙云賒。身弱各相祝。家貧儻有涯。鄉心無住著。望眼久昏花。寥落音書闊。多疑驛使差。

咄咄延平劍。英英江夏黃。求聲方出谷。一別各他鄉。東下江河駛。南征道路長。汝儕身手健。看我鬢毛蒼。黃子壽彭年後起之秀予嘗命九弟與之納交

夢裏攜予季。亭亭似我長。三年不相見。一變安可量。神駿初銜轡。牽牛官

服箱。朝朝偷芋粟。知爾足奔忙。季弟今年十四歲。往年好食。粟煨芋。遊入偷竊。頑趣可掬。

獨出

匪直完裘好。今年故未寒。晚來還獨出。宇內一何寬。銜尾千人聚。高齧百馬攢。天街原蕩蕩。辟路亦非難。

訪苗先麓。苗精說文之學。著書四十年。一貧如洗。今年六十無子。

大隱東方朔。著書揚子雲。出門無所詣。落日一從君。倦鳥宜何集。閒鷗亦有羣。烹茶餘幾火。小燉愧殷勤。苗無僕從。親煮茶敬客。

懷劉蓉

我思竟何屬。四海一劉蓉。具眼規皇古。低頭拜老農。乾坤皆在壁。霜雪必蟠胸。他日余能訪。千山捉臥龍。

歲暮雜感十首

殘歲垂垂盡。暮塵逐逐忙。世人同一悔。匪我獨顛狂。身計嗟頻左。家山亦未忘。時猶憂世事。此志固荒唐。

殺氣行南紀。溫風轉北條。陽和迴地幹。神鬼助天朝。挾纊三軍舞。層冰萬里消。小臣長皦皦。無術贊唐堯。江浙去年大雪。京師今歲不甚寒。

堯皋無並育。天地詎終溫。此日咸陽市。當年上蔡門。風雲悲昔遇。霜露等深恩。聞道南山木。窮冬尚負暄。

壯幾耽經訓。艱難始一隅。力耕無近穫。陟古有通衢。茅塞由來久。蓬生且待扶。國讐猶未雪。何處著迂儒。

四山仙侶會。角逐事賡歌。日日爲詩祟。人人被墨磨。相從良可適。不樂復如何。尚有平生友。飄零在澗阿。

久矣劉生隔。孟容嗟哉信爾賢。才高防作聖。情極屢逃禪。歧路多臆魅。深山

足歲年。狂風能作劇。吹我墮君前。

阿弟光明者。阮甫愛兄心尙孩。良時無汝共。雅抱向誰開。難就陸雲業。多慙

許武才。皇都甯不笑。捨去竟何哉。

萬族求饒益。吾謀頗用疏。民生各心性。天道有孤虛。得俸堪加飯。無錢且

買魚。逐貧思作賦。才薄欲何如。

浩浩翻江海。爭奔且未闌。古來名利客。誰不到長安。獨立看參昴。橫天如

此寒。肯能尋冷淡。夜夜照簷端。

爆竹家家沸。兒時此味長。追歡斟綠螳。隨例祀黃羊。明日夔龍集。中天日

月光。八年吟舊句。回首但蒼茫。乙未年會作歲暮雜感詩十首

桂湖五首

新都桂湖。明揚升庵修撰故宅也。使旋過此。縣令張君宜亭。招飲

湖上。爲賦此詩。

遂別華陽國。歸程始此賒。翻然名境訪。來及夕陽斜。翠竹偃寒蜨。丹楓噪暮鴉。詞人云異代。臨水一咨嗟。

短城三面繞。淺水半篙寒。鳥過穿殘日。魚行起寸瀾。秋來樓閣靜。幽處地天寬。平昔江湖性。眞思老釣竿。

十里荷花海。我來吁已遲。小橋通野港。壞艇臥西陂。曲岸能藏鷺。盤渦尙戲龜。傾城遊女盛。好是采蓮時。

矮桂枝鉤裏。叢篁葉打頭。隄行皆仄徑。路斷得高樓。欄檻千迴錦。琉璃五色秋。落霞沈水底。綺散不能收。跨水一樓名沈霞閣

頗憶家山好。去鄉茲六年。此閒行樂地。小有洞庭天。點綴須人力。招尋信妙緣。使君殊不俗。把酒意茫然。

至日二首

久行忘節序。夙莫但奔忙。茲且卽長至。我征仍未央。寒雲低樹白。邊日際山黃。時觀南來雁。飄零不作行。

海市三年舶。河源八月槎。水衡勞頽晝。漆室足咨嗟。天步方長健。民饑亦有涯。燔柴崇大禮。靈貺正來賒。

雨

稍稍車塵隔。安閒一閉門。高歌亦未輟。驟雨方此喧。宿霧依城靜。低雲入

樹昏空庭。緒盛水。容易卽江邨。

送吳英樾之官浙江兼簡魏黃生大令三首

一第尋常事。服官方獨難。書生良短綫。世態自波瀾。被褐欲誰語。濫竽仍未安。無言堪汝贈。只是耐加餐。

大邑匪輕寄。斯民會可蘇。養魚防攪水。牧馬合求芻。兵甲連滄海。瘡痍正道塗。樂郊枯旱久。遲子一霑濡。

魏子好心事。相從與頗賒。與君聯肺腑。棄我各天涯。煙雨黔山道。風巖海國棧。東南彌萬里。吟望一長嗟。魏君與吳爲婿姻。謁選得貴州縣令也。

送鄧伯昭兼簡家伯醇秀才二首

萬里西風道。艱哉信爾行。力耕無半穫。寒日耐孤征。身世嗟杭葦。文章一覆枰。平生餘意氣。未惜爲君傾。

君家老癡叔。海內久詞宗。謂淵泉廣文。歲晚餐幽菊。空山倚冷筇。我今方速謗。茲味亦非濃。他日龐公榻。來尋物外蹤。

吾宗良大雅。老矣尙巖阿。六載長乖隔。百年能幾何。高明遭鬼侮。圭璧受沙磨。動忍由來事。無爲棄斧柯。

莫過竹如

維摩元未病。子祀空復疑。薄暮還相訪。經旬繫我思。深談四壁靜。交道一

鐙知天畢看西下。來歸亦未遲。

東鄰杜氏義塾

稍得塵埃隙。來茲一散襟。喧車闕四聽。時鳥送餘音。亦有邊韶顛。誰能季主尋。郵童休問字。剖璞方自今。

送黃少鶴

待爾雙雙至。春回又一年。開尊皆舊友。發篋半新篇。荔子紅時雨。芭且綠外天。江鄉好風景。話向酒杯前。

送金竺虔之官閩中

朋好翩翩去。君今傷此行。春風一杯酒。舊雨十年情。循吏平生志。神仙薄倖名。海隅氛正惡。看汝斫長鯨。

七律

歲暮雜感十首

芒屨鎮日踏春還。殘臘將更卻等閒。三百六旬同逝水。四千餘里說家山。緇塵已自沾京雒。羌笛何須怨玉關。爲報南來新雁到。故鄉消息在雲間。高嶺山下是儂家。歲歲年年鬪物華。老柏有情還憶我。天桃無語自開花。幾回南國思紅豆。會記西風浣碧紗。最是故園難忘處。待鶯亭畔路三叉。莽莽寒山匝四圍。眼穿望不到庭闈。絮飄江浦無人管。草綠湖南有夢歸。

鄉思怕聽殘漏轉。逸情欲逐亂雲飛。敬從九烈神君訴。遊子於今要換衣。
去年此際賦長征。豪氣思屠大海鯨。湖上三更邀月飲。天邊萬嶺挾舟行。
竟將雲夢吞如芥。未信君山刻不平。偏是東皇來去易。又吹草綠滿蓬蘞。
紛紛節候儘平常。西舍東家底事忙。十二萬年都小劫。七千餘歲亦中瘍。
蜉蝣身世知何極。胡蝶夢魂又一場。少昊笑儂情太寡。故堆錦繡富春光。
韶華彈指總悠悠。我到人間廿五秋。自愧望洋迷學海。更無清福住糟邱。
尊前瓦注曾千局。腳底紅塵卽九州。自笑此身何處著。笙歌叢裏合閒遊。
爲賦爲否兩踉蹌。搔首乾坤踏踏歌。萬事拚同駢拇視。浮生無奈繭絲多。
頻年蹤迹隨波瀾。大半光陰被墨磨。匣裏龍泉吟不住。問予何日斫蛟鼉。
舊雨會遺尺鯉魚。經年不報意何如。自從三益睽違久。學得五君世態疏。
碧樹那知離別憾。青鐙偏照故人書。殷勤護惜金鑪鴨。香火因緣付與渠。
擬學坡公鎖歲詩。花箋何處寄相思。陽和未老貂先敝。暖氣初回鳥竟知。
遊子情懷隨地遠。天家雨露及時施。小儒莫獻昇平頌。幸傍龍樓覩上儀。
蓼蓼歲鼓走輕雷。竹馬兒童綵戲纒。仙仗九重圍霧住。官花一萬鎖煙開。
迷離佳氣從空繞。不斷狂香拂面來。我比春風尤放蕩。長安日日騁龍媒。

寄郭筠仙浙江四首

一病多勞勤護惜。嗟君此別太匆匆。二三知己天涯隔。強半光陰道路中。

兔走會須營窟穴。鳩飛原不計西東。讀書識字知何益。贏得行蹤似轉蓬。
碣石逶迤起陣雲。樓船羽檄日紛紛。螳螂竟欲當車轍。臙髀安能抗斧斤。
但解終童陳策略。已聞王歙立功勳。如今旅夢應安穩。早絕天驕盪海氛。
無窮志願付因循。彈指人間三十春。一局楸枰虞變幻。百圍梁棟藉輪囷。
蒼茫獨立時懷古。艱苦新嘗識保身。自愧太倉糜好爵。故交數輩尚清貧。
向晚巖霜破屋寒。娟娟纖月倚檐端。自縉行篋殷勤覓。苦索家書展轉看。
宦海情懷蟬翼薄。離人心緒繭絲團。更憐吳會飄零客。紙帳孤鐙坐夜闌。

三十二初度次日書懷

男兒三十殊非少。今我過之詎足歡。齷齪挈鋌嗟器小。酣歌鼓缶已春闌。
眼中雲物知何兆。鏡裏心情只獨看。飽食甘眠無用處。多慙名字佞鸞鸞。

憶弟二首

無端繞室思茫茫。明月當天萬瓦霜。可惜良宵空兀坐。遙憐諸弟在何方。
紛紛書帙誰能展。豔豔鐙花有底忙。出戶獨吟聊妄想。孤雲斷處是家鄉。
忽憶他時裹水上。惡風半夜撼春雷。舟人捩舵聲同泣。客子扶牀面已灰。
仰荷皇天全薄命。信知浮世等輕埃。汝今歸去復何似。回首世途誠險哉。

襄陽遇風戊戌九月出都事弟
今年南歸亦由襄水陸武昌

漫興

今日今時吾在茲。我兄我弟儻相思。微官冷似支牀石。去國情如失乳兒。
見慣浮雲渾欲語。漫成詩句未須奇。徑求名酒一千斛。轟醉王城百不知。
聞客話里中近事

蓬萊清淺信推遷。回首鄉關事可憐。今日朝簪陪未秩。早時社鼓舞華筵。
陳平宰國無消息。庾信辭家有歲年。蹙蹙生涯非我里。滔滔四望極敷天。
元戎

大旆元戎喜起歌。舊時鼎鼐藉調和。豐貂長組朝金闕。駟馬瑯弓照塞河。
黃閣居然元老在。蒼生竟柰此人何。誰憐寂寞揚雄宅。獨抱繁憂臥薜蘿。
溫甫讀書城南寄示二首

十年長隱南山霧。今日始爲出岫雲。事業眞如移馬磨。羽毛何得避雞羣。
求珠采玉從吾好。秋菊春蘭各自芬。嗟我蹉跎無一用。塵埃車馬日紛紛。
嶽麓東環湘水迴。長沙風物信佳哉。妙高峯上攜誰步。愛晚亭邊醉幾回。
夏后功名餘片石。漢王鐘鼓撥寒灰。知君此日沈吟地。是我當年眺覽來。
早發沔縣遇雨

此身病起百無憂。敢爲艱難一怨尤。曉霧忽飛千嶂雨。西風已作十分秋。
近知地利眞堪恃。早信人謀不自由。昨日定軍山下過。蒼天一望故悠悠。
初入四川境喜晴

萬里關山睡夢中。今朝始洗眼矇矓。雲頭齊擁劍門上。峯勢欲隨江水東。
楚客初來詢物俗。蜀人從古足英雄。臥龍躍馬今安在。極目天邊意未窮。
梓潼道中有懷馮樹堂陳岱雲

複嶂七盤相約束。清流九曲與周遭。日高旌旆鳥蛇亂。秋老爪牙鷹隼豪。
北望幽燕天漠漠。東歸歲月水滔滔。江山如此知交隔。獨對菱花數一毛。
早發武連驛憶弟

朝朝整整駕趁星光。細想吾生有底忙。疲馬可憐孤月照。晨雞一破萬山蒼。
日歸日歸歲云暮。有弟有弟天一方。大壑高崖風力勁。何當吹我送君旁。
三十三生日三首

三十餘齡似轉車。吾生反反信天涯。白雲遠望千山隔。黃葉催人兩鬢華。
去日行藏同踏雪。迂儒事業類團沙。名山壇席都無分。欲傍青門學種瓜。
六載承明鑿秘書。河東一賦又吹嘘。多慙袞職無遺事。實藉文言有慶餘。
白壁出山終就琢。黃金擲谷總成虛。何時卻返初衣好。歸釣蒸谿縮項魚。

蒸水去吾家十里

苦飮風塵未息機。駑駘已絡紫金鞵。詩禪入悟無三昧。世路回頭有百非。
翁子少年原落拓。承官家世本清微。故山鷗鳥吾盟在。謂劉大會記江邊各
忍饑。

國士橋建城縣西

亂鴉呼噪若爲情。疲馬逡巡尙欲驚。遭遇一生容可再。艱難萬死竟無成。至今平楚風猶勁。終古寒流意未平。他日王孫知己感。可憐鐘室淚縱橫。

哭少時同學某

君嘗二試有司被黜以事憂。遂爲吏胥奇辱貧鬱以死。

少日低飛各羽翰。幾年茵溷不同看。竟緣無食填溝壑。終古銜羞在肺肝。蟻戰莫償三北恥。蠶僵更吐一絲難。寡妻弱子知何倚。雪虐風饕可耐寒。

送妹夫王五歸五首

飄然棄我卽山林。野服黃冠抵萬金。遶遶汚塵得少辟。茫茫歧路一長吟。梁鴻旅食妻孥共。蘇季貧歸憂患深。東去大江蘆荻老。皇天颯颯正秋霖。荆楚榷柁夾道栽。於人無忤世無猜。豈知斤斧聯翩至。復道牛羊爛漫來。金碧觚棱依日月。崢嶸大棟逼風雷。回頭卻羨曲轅轅。歲歲偷閒作棄材。高嶺山下草芊綿。去國蹉跎今六年。邨老半聞悲薤露。人間容易卽桑田。炎雲涼雨有翻覆。舞榭歌臺況變遷。莫訝榮枯無定態。君今猶守舊青氈。

王氏故室今貧矣

有齊季女吾弟行。操曰君家老孟光。會是弋鳧相勞饗。猶聞雛鳳已軒昂。秦嘉上計心情薄。王霸躬耕身世忘。織屨辟繻終古事。牛衣歲月卽羲皇。老弟三年困省門。寒山無律可回溫。由來命分政須爾。久信文章不足尊。

南雁乖違少書信。西風牢落對乾坤。因君傳語告予季。失馬亡羊莫更論。

酬九弟四首

違離予季今三載。辛苦學詩絕可憐。王粲辭家邁多患。陸雲入洛正華年。
輪轅塵裏鬢毛改。鼙鼓聲中筋骨堅。門內生涯何足道。要須嘗膽報堯天。
漢家入葉耀威弧。冬幹春膠造作殊。豈謂戈鋌照京口。翻然玉帛答倭奴。
故山豈識風塵事。舊德惟傳嫁娶圖。長是太平依日月。杖藜零涕說康衢。
杜韓不作蘇黃逝。今我說詩將附誰。手似五丁開石壁。心如六合一游絲。
神斤事業無凡賞。春草池塘有夢思。何日聯牀對鐙火。爲君爛醉舞僊僂。
辰君平正午君奇。屈指老沅真白眉。入世巾袍各骭髀。閉門諧謔卽支離。
中年例有妻孥役。識字由來教養衰。家食等閒不經意。如今飄泊在天涯。

澄侯以庚辰生
溫甫以壬午生

贈梅伯言二首

隘巷蕭蕭劣過車。蓬門寂寂似逃虛。爲杓不願庚桑楚。爭席誰名揚子居。
喜發綠成新引竹。仍磨丹覆舊讎書。長安挂眼無冠蓋。獨有文章未肯疏。
單緒眞傳自皖桐。不孤當代一文雄。讀書養性原家教。績學參微況祖風。
衆妙觀如蜂痔蜜。獨高格似鶴鴛空。上池我亦源頭識。可柰頻過風日中。

夜直苦寒

白虎西流朱鳥高。五更風利鷗鷗刀。勁寒戰栗通心曲。轆氣冰霜上口毛。
曠蕩青天如可對。折旋丹地敢辭勞。頻聞交戰呵金馬。暮入鐙廬炙凍毫。
吳宮黃病中屬市鹿尾

越舫迎來手指千。屋多不畏貯風偏。華鐙鄉話初長夜。藥碗吟愁欲雪天。
陽氣眉閒回病客。元精至後固崖仙。內廚斫取殷紅色。判費西清月放錢。
臘八日夜直

翻從官宿得閒時。仙掖深深晝掩帷。靜向古人書易入。寒偏今日酒堪持。
濃醴說獻宮中佛。晴雪看分禁裏墀。日暮武英門外望。井闌冰合柳枯垂。
失題四首

抽得閒身鶴不如。高秋酒熟鞠黃初。便驅天駟識途馬。歸釣江鄉縮項魚。
往日心情隨轂轉。今來身世似舟虛。不須更說知幾早。且喜塵緣盡剷除。
蚤用蠻煙日日催。側身周望重低徊。海濱膏血深無極。帳下笙歌自莫哀。
安得賈生時痛哭。可憐楊僕本庸才。投章欲問茫茫意。何處通天尚有臺。
金堤舊瀆高家堰。復道今年盛昔年。自古塵沙同浩劫。斯民塗炭豈前緣。
沈江欲禱王尊壁。擊楫誰揮祖逖鞭。大廈正須梁棟柱。先生何事賦歸田。
兩度歸帆汜上流。蕭蕭落水洞庭秋。送君此去風前酒。憶我當時月夜舟。
宏景舊居句曲洞。杜陵新卜浣谿頭。好栽修竹一千畝。更抵人閒萬戶侯。

丁未六月七日考試漢教習試院作二首

潭潭深院竊局牢。闕日溼雲作鬱陶。薄茗何曾解消渴。纖絺便欲等重袍。
高堂燕息尙如此。矮屋蜂屯母已勞。得失沈沈紛滿眼。世間人事等牛毛。
虞廷胄子肄聲律。漢室小侯齒辟雍。銀漢支流原博大。璧門追琢要從容。
師儒落落涉千載。鍼芥時時還一逢。明日鄧林斤斧入。可能澗底拔長松。

武會試闈中作

禁闈蓮漏已宵深。涼月窺人冨一臨。此地頻來從案牘。吾生何日得山林。
貌貅霧隱三更肅。河漢天高萬籟沈。火冷鐙青無箇事。可憐忙殺愛才心。

送孫芝房使貴州二首

妙年作賦動明光。又策星軺赴夜郎。文采邊陲瞻泰斗。儀容寸步中宮商。
沅湘過訪三閭廟。宛葉行經百戰場。定有新詩傳萬口。歸來吾與解奚囊。
六年陳迹吾能記。病骨秋風入劍關。會洗人天清淨眼。飽看巴蜀怪奇山。
君今巖壑搜羣玉。自有光芒照百蠻。不似老夫徒碌碌。崑岡一網手空還。

書邊陲石詩集後二首

鑄章琢句尋常事。激烈心情絕可憐。今日詞臣須頗牧。古來豪士出幽燕。
楊家忠義存三疏。孫相威名在九邊。莫藉文章追往哲。要憑肝膽報皇天。
苦憶荊州王仲宣。投簪浩蕩臥江天。三年促膝從予坐。四海低頭道子賢。

北李南何各壇坫。楓青塞黑與纏綿。因君更逐停雲想。望斷襄陽落照邊。

送梅伯言歸金陵二首

金門混迹髮蒼蒼。從此菴蒲歲月長。人世正酣爭奪夢。老翁已泊水雲鄉。
自繙素業衡輕重。久覺紅塵可憫傷。祇恐詩名天下滿。九州無處匿韓康。
徵君絕學冠寰瀛。又見文孫樹立宏。六葉弓裘傳柏枧。百年耆舊數宣城。
緬懷仁廟虛前席。盡訪鴻儒佐太平。豈獨當時能感激。至今臣子涕縱橫。

伯言宣城人著甫
柏枧山房詩文集

文筆昌黎百世師。桐城諸老實宗之。方姚以後無孤詣。嘉道之間又一奇。
碧海鼉蛙鯨掣候。青山花放水流時。兩般妙境知音寡。它日曹谿付與誰。

訓李芋仙二首

巴東三峽猿嘯處。太白醉魂今尙存。遂有遠孫通胎蠶。時吟大句動乾坤。
愛從吾黨魚忘水。厭逐人間蝨處禪。卻笑文章成底用。千篇不值一盤餐。
勁翻摩空故絕倫。吹噓會未出風塵。細思科第定何物。卻是饑寒解困人。
大道但期三洗髓。長途終遇九方歎。高秋一放脫羈去。看汝飛騰亦有神。

次韻何廉昉太守感懷述事十六首

域中哀怨廣場開。屈宋而還第二回。幻想更無天可問。牢愁甯有地能埋。
秦瓜鉤帶何人種。社櫟支離幾日培。大冶最憎金踊躍。那容世界有奇材。

慘澹兵戎春復秋。獨醪誰信遣千憂。戰場故鬼招新鬼。世事前漚散後漚。
馳逐幾同秦失鹿。劬勞祇愧魯無鳩。何時浩蕩輕鷗去。一舸鷗夷得少休。
二月長安春始歸。觚棱回首夢魂飛。宮鴉掠日槐陰瘦。廢馬嘶風柳絮肥。
東閣賜茶雙鳳闕。西郊扈蹕九龍旗。十年苦憶鈞天奏。老大眞憐未拂衣。
滄海橫流澤有鳩。微生偶出一當熊。千艘梭織怒濤上。萬幕笳吹明月中。
屠罷長鯨波尙赤。戰歸驕馬汗猶紅。誰知春晚周郎老。更與東皇乞好風。
鍾山祠廟巋然存。憑弔湖湘烈士魂。馬革裹屍男子志。鸞刀祭膊聖明恩。
弓旌夜動神依戶。簫鼓春祈福滿門。萬世遊人應指點。血殷篙眼古時痕。
潯陽江水接天長。良將新祠皎雪霜。半壁東南支柱石。數州士女薦馨香。
竟無耆壽追充國。猶有嘉名配武鄉。匹馬寸金都謝絕。三明何必數西涼。
山縣寒儒守一經。出山姓字各芳馨。要令天下消兵氣。爭說湘中聚德星。
舊雨三年精化碧。孤鐘五夜眼常青。書生自有不成量。地脈何曾獨效靈。
猿鶴沙蟲道竝消。誰分糞壤與芳椒。昨來皖水三河變。堪痛阿房一炬焦。
句踐池邊醪易醉。田橫墓上酒難燒。同袍才俊彫零盡。苟活人間只自嚙。
鶴原橫貫第三人。鶴唳華亭不復春。先軫歸元何日是。虞翻相骨本來貧。
科名久滯青雲路。身手難扶赤日輪。十一萬年香不滅。從渠擣麝作灰塵。
江雪湖波路幾千。壺頭歸葬事堪憐。鑄金叩叩終何益。埋玉深深不計年。

夜月一鉤涼蕙帳。春風十萬散榆錢。神靈甲馬如相助。莫遣愁人歎逝川。
盪觴初引一泓泉。流出蛟龍萬丈淵。從古精誠能破石。薰天事業不貪錢。
腐儒封拜稱詩伯。上策屯耕在硯田。巨海茫茫終得岸。誰言精衛憾難填。
幕府山頭對碧天。英英羣彥滿樽前。共扶元氣迴陽九。各放光明照大千。
短李迂辛雜嘲詼。箕張牛奮總安便。獨憐何遜今漂泊。望斷寒雲暮靄邊。
薇閣藤廳淡淡紅。多君知步五雲中。良緣彩鳳雙飛翼。慧業靈犀一點通。
典郡四旬書上考。闔門入口祀昭忠。災祥誰識天公意。休向西風泣路窮。
由來忠孝易通神。忉利華鬢識後身。石爛海枯終有盡。生天成佛豈無人。
關河庾信空蕭瑟。形影陶潛孰主賓。雞犬全家存帝所。淮南生計未全貧。
荒城風雪臥袁安。高節鴻才萬目看。嬾讀司空城旦法。會希柱後惠文冠。
出山馴雉網羅密。失水神龍變化難。猶有老梅嬌萼發。先從三界解春寒。
聖主中興邁盛周。聯翩方召斧公侯。神威欲挾雷霆下。大業常同江漢流。
藻火但聞山甫袞。桐廬豈有子陵裘。鳩鸞臺閣方新構。杞梓楹樁一例收。

讀吳南屏送毛西垣之卽墨長歌卽題其集

十載鄉園獨爾思。眼明今日見新詩。嘗憂大雅終將絕。豈意吾儕覩此奇。
木落千山初瘦削。風迴大海乍平夷。此中真意憑君會。持似旁人那得知。
人間骯髒一毛生。與子交期如弟兄。忽出國門騎瘦馬。去看東海掣長鯨。

放歌一弔田橫島。醜酒還臨樂毅城。併入先生詩句裏。干戈離別古今情。

五絕

讀李義山詩集

渺縣出聲響。奧緩生光瑩。太息陪翁去。無人會此情。

七絕

入陝西境六絕句十月一日

西風已謝朔風遒。客子勞勞且未休。行過嘉陵三百里。飛崖絕壁又秦州。

破曉七盤山上望。回看蜀國萬峯環。英雄割據終何有。陵谷滄桑事等閒。

南棧淮七盤嶺與朝天關最高

亂山合處響沈沈。古洞千年海椽深。獨臥藍輿初夢覺。時聞腳底老龍吟。

兩山忽合中如長虹名龍洞背下有洞可容數千人

忽憶老筠吾匹儔。謂郭大汨羅江上苦吟秋。未成嘉會方王貢。便恐才名駕

應劉。

江流日夜走荆襄。隴蜀由來四戰場。故壘無人談往事。空山有客弔斜陽。

入秦三十里爲百牢關關以東水皆東流入河關以西水皆西流入嘉陵江

七十二寒谿沒斷深。谿邊茅屋隔楓林。歸人正怯征衣薄。又聽山城響暮砧。

甯瓮州多山獨病涉俗名七十二道脚不乾

題畫竹次醇士前輩韻二首

森森鳳尾一時抽。滿地孫枝翠篠稠。老幹已凌霄漢上。曲江猶自憶遨頭。
列仙不比山澤臞。碧碗瓊漿事有無。更向禪宗參玉版。花豬竹鬣寫分吾。

送唐鏡海先生九首

六年高臥大江隈。萬里蒲輪驛吏催。京國諸儒齊額手。溫公新自洛陽來。
金殿從容道古今。高言字字印天心。鐘聲送出東華路。已報槐階轉午陰。
摹天繪日本難工。聖德何由測六龍。白髮老臣私贊歎。文如聖祖武高宗。
漳衛滔滔走帝都。堯封何事闕溝渠。廿年深究齊民術。一卷新呈水利書。
上相南征策衆材。軍容十萬轉風雷。書生卻進安民策。盜弄潢池事可哀。
泰岱高雲不可攀。會興霖雨在人閒。如今老去神功斂。祇就君王乞放還。
道德神仙各有謀。行藏雖一事難侔。功名不數神司諫。出處羞稱李鄴侯。
熙朝正學要匡扶。衆說紛紛各啓塗。歸語江南諸父老。太平天子好眞儒。
扮檢後進謬升堂。習習春風杖履旁。此後追陪何日是。鏡中吾亦鬢毛蒼。

壬戌四月沅弟克復巢縣和州含山等城賦詩四首

濡須塢裏漲春波。三月鶯囀氣正和。一騎雲飛新報捷。漢家收復舊山河。
碧血家家百草腥。荒郊五夜泣坤靈。將軍一掃陵陽道。便有遊人說踏靑。
半壁山前鐵鎖橫。當年諸將各聲名。卽今雖鑿西梁下。益信先皇萬里明。

師徽韓公二十霜。敢將裴令竝論量。諸君自有涪溪筆。看取穹碑日月光。
沅圃弟四十一初度

九載艱難下百城。漫天箕口復縱橫。今朝一酌黃花酒。始與阿連慶更生。
陸雲入洛正華年。訪道尋師志頗堅。慚愧庭階春意薄。無風吹汝上青天。
幾年橐筆逐辛酸。科第尼人寸寸難。一劍須臾龍變化。誰能終古老泥蟠。
廬陵城下總雄師。主將赤心萬馬知。佳節中秋平劇寇。書生初試大功時。
沅甫初在吉安統兵二萬八
年八月十五日克復府城

楚尾吳頭閩戰塵。江干無土著生民。多君龜定同安郡。上感三光下百神。
十一年八月初一日克復安慶欽
天監奏是日四星聯珠日月合璧

濡須已過歷陽來。無數金湯一剪開。提挈湖湘良子弟。隨風直薄雨花臺。
邈近三才發殺機。王尋百萬合重圍。昆陽一捷天人悅。誰識中軍血染衣。
平吳捷奏入甘泉。正賦周宣六月篇。生縛名王歸夜半。秦淮月畔有非煙。
河山策命冠時髦。魯衛同封異數叨。刮骨箭瘢天鑒否。可憐叔子獨賢勞。
左列鐘銘右謗書。人閒隨處有乘除。低頭一拜屠羊說。萬事浮雲過太虛。
已壽斯民復壽身。拂衣歸釣五湖春。丹誠磨鍊堪千劫。不藉良金更鑄人。
黃河餘潤沾三族。白下飢民活萬家。千里親疏齊頌禱。使君眉壽總無涯。
童穉溫溫無險讖。酒人浩浩少猜疑。與君同講長生訣。且學嬰兒中酒時。

甲子八月二十日。沅甫弟四十一生日。爲小詩十三首壽之。往在壬戌四月。沅弟克復巢縣和州含山等城。余賦詩四首。一時同人以爲聲調有似饒歌而和之。此詩略仿其體。以徵和者。且使兒曹歌以侑觴。國藩識。

仿古字版

會文正公鳴原堂論文

世界書局印行

序

縮地二千里。官爲尙書侍郎。兼古御史大夫中丞之號。跨州連郡。多者百餘城。少或五六十縣。監司郡守牧令。丞倅雜職數百人。武弁自提鎮以下。承命唯謹。賦稅刑獄軍謀。河工鹽漕黜陟。諸大政待之而決。又有賓從往來。屬僚請謁。雞鳴盥沐。整衣肅容。闈人持手版。第其先後。魚貫雁行以進。更十餘番。猶未畢。則辭以他日。他日復如此。退則吏抱文書。右手及額。左手下至腹。且行且捧。矜矜而入。分公私新舊。錯陳於几案之間。其緊要者。官乃審視而詳裁之。例行者。略一瞥。省署行而已。故今之督撫大吏。凡夫敷陳入告之詞。多倚辦於幕友。其不能親自吮毫搆思者勢也。然而充斯選者。率用刑名家言。規規循循。例案避處。分以文無害爲事。卽有勤求民隱。發憤爲雄。破除一切拘束者。輒格於部議而不能施行。蓋奏疏之難於美善兼盡也如此。我伯兄太傅文正公。當顯皇初政。以議大禮諫聖德諸疏。忠讜聞天下。及執兵符。開幕府於東南。東南之碩儒名彥。博辯洽聞之士。皆禮羅而珍儲之。其達者。滄膺將相。勳伐爛然。次亦以文學稱著於時。夫以宏通淹雅之才。論時政之得失。料軍情之勝負。出之以沈思眇慮。申之以修飾潤色。固無患其言之不工。意之不諧也。然公或初善之而卒易之。字點句竄。十不存一。豈與夫冥搜幽抉。顛頓專精之士。較勝負於文字哉。蓋才者天所賦也。識者練而精者也。人之聰明才力。不甚相遠。天下事變之來。往往出於智慧思慮之所不及。惟歷事久者。能守義理之常。以待時勢之變。故公之奏疏。不爲大喜過美之詞。亦不爲憂怵無聊之語。其論賊勢興衰。中外大局。一切將然未然之事。若燭照龜卜。不失毫髮。而謙謙仲掇。若不敢決其必然。而其後卒無不然。豈非識之加人一等哉。國荃少侍公京邸。從而問學。壯歲輟轉兵間。隨公馳逐。江西江南諸行省。賴聖天子威德。大功告蕪。兄弟荷蒙殊寵。惴惴焉懼以不才致罪戾。乞身歸里。公慮其昧所擇也。選古今名臣奏疏若干首。細批詳評。命之曰鳴原堂論文。國荃受而讀之。蓋人臣立言之體。與公平生得力之所在。略備於此。今歲王君鼎丞來湘。編公遺書。因出此篇。屬其校讎付梓。國荃行老矣。自慚荒謫。無補於時。追念往時與公從事於驚濤駭浪之中。出萬死不顧一生之計。以爭尺寸之土。曾不計後此尙有安閑之一日。今海內又安。公以考終。國荃亦能養疴林下。優游暇豫。與二三故舊。聯樽酒文字之歡。蓋非始念所及。此後

之讀公書者。知其人。論其世。其必徘徊往復而歎公之文章德業。與身世遭逢。爲均不可及云。同治十二年九月
湘鄉曾國荃敘。

序目

常棣爲燕兄弟之詩。小宛爲兄弟相戒以免禍之詩。而皆以脊令起興。蓋脊令之性最急。其用情最切。故常棣以
喻急難之誼。而小宛以喻征邁努力之忱。余久困兵間。溫甫沅甫兩弟之從軍。其初皆因急難而來。沅甫堅忍果
摯。遂成大功。余用是獲免於戾。因與沅甫常以暇逸相誠。期於夙興夜寐。無忝所生。爰取兩詩脊令之旨。名其堂
曰「鳴原堂」云。曾國藩記。

鳴原堂論文目次

匡衡戒妃匹勸經學威儀之則疏	一
賈誼陳政事疏	二
劉向極諫外家封事	一〇
劉向論起昌陵疏	一一
劉向論甘延壽疏	一三
谷永救陳湯疏	一五
耿育訟陳湯書	一五
劉安諫伐閩越書	一六
賈捐之罷珠厓對	一九
諸葛亮出師表	二〇
陸贄奉天請罷瓊林大盈二庫狀	二二
蘇軾代張方平諫用兵書	二四
蘇軾上皇帝書	二六
朱熹戊申封事	三六
王守仁申明賞罰以厲人心疏	四八
方苞請矯除積習與起人材劄子	五二
孫嘉淦三習一弊疏	五六

鳴原堂論文

臣銜戒妃匹勸經學威儀之則疏

漢書云。成帝即位。銜上疏戒妃匹勸經學威儀之則。是分爲三事也。姚選古文辭類纂題云。戒妃匹勸經學疏。則漏末一事矣。茲題從漢書。

陛下乘至孝。哀傷思慕。不絕於心。未有游虞弋射之宴。誠隆於慎終追遠無窮已也。竊願陛下雖聖性得之。猶復加聖心焉。詩云。『滂滂在疚。』言成王喪畢。思慕意氣未能平也。蓋所以就文武之業。崇大化之本也。以上總起。臣又聞之師曰。『妃匹之際。生民之始。萬福之原。』婚姻之禮正。然後品物遂而天命全。孔子論詩以關雎爲始。言太上者民之父母。后夫人之行。不侔乎天地。則無以奉神靈之統。而理萬物之宜。故詩曰。『窈窕淑女。君子好逑。』言能致其貞淑。不貳其操。情慾之感。無介乎容儀。冥私之意。不形乎動靜。夫然後可以配至尊而爲宗廟主。此綱紀之首。王化之端也。自上世以來。三代興廢。未有不由此者也。願陛下詳覽得失盛衰之效。以定大基。采有德戒聲色。近嚴敬。遠技能。以上戒妃匹竊見聖德純茂。專精詩書。好樂無厭。臣銜材騫。無以輔相善義。宣揚德音。臣聞六經者聖人所以統天地之心。著善惡之歸。明吉凶之分。通人道之正。使不悖於其本性者也。故審六藝之指。則天人之理可得而和。草木昆蟲可得而育。此永永不易之道也。及論語孝經。聖人言之要。宜究其意。以上勸經學。臣又聞聖王之自爲動靜周旋。奉天承親。臨朝饗臣。物有節文。以章人倫。蓋欽翼祇栗。事天之容也。溫恭敬遜。承親之禮也。正躬嚴恪。臨衆之儀也。嘉惠和悅。饗下之顏也。舉措動作。物遵其儀。故形爲仁義。動爲法則。孔子曰。『德義可尊。容止可觀。進退可度。以臨其民。』是以前民畏而愛之。則而象之。大雅云。『敬慎威儀。惟民之則。』諸侯正月朝覲天子。天子惟道德昭穆穆以視之。又觀以禮樂。饗禮乃歸。故萬國莫不獲賜祉福。蒙化而成俗。今正月初幸路寢臨朝。置酒以饗萬方。傳曰。『君子慎始。』願陛下留神動靜之節。使羣下得望盛德休光。以立基楨。天下幸甚。以上威儀之則。

三代以下，陳奏君上之文，當以此篇及諸葛公出師表爲冠，淵懿篤厚，直與六經同風。如「情欲之感，無介於儀容，宴私之意，不形乎動靜」等句，朱子取以入詩經集傳，蓋其立言爲有本矣。此等奏議，固非後世所能幾及。然須觀其陳義之高遠，著語之不苟，乃能平躁心而去浮詞。

賈誼陳政事疏

臣竊惟事勢可爲痛哭者一，可爲流涕者二，可爲長太息者六。後文可流涕者實僅一條，可爲長太息者實僅五條。各缺一條，殊不可解。若其他背理而傷道者，難徧以疏舉。進言者皆曰：「天下已安已治矣。」臣獨以爲未也。曰：「安且治者，非愚則諛，皆非事實。知治亂之體者也。」夫抱火厝之積薪之下而寢其上，火未及然，因謂之安，方今之勢，何以異此。本末舛逆，首尾衡決，銜決猶橫決也。古人言直皆曰縱，言橫皆曰衡。於事之忤亂無條理者，則橫字作去聲讀。如曰橫逆，曰洪水橫流是也。此處若作橫決，亦當讀爲去聲。國制搶攘，非甚有紀，胡可謂治。陛下何不壹令臣得孰數之於前，因陳治安之策，試詳擇焉。夫射獵之娛，與安危之機，孰急。使爲治勞智慮，苦身體，乏鐘鼓之樂，勿爲可也。樂與今同，而加之諸侯軌道，兵革不動，民保首領，匈奴賓服，四荒鄉風，百姓素樸，獄訟衰息，大數既得，則天下順治，海內之氣清和咸理，生爲明帝，沒爲明神，名譽之美，垂於無窮。禮祖有功，而宗有德，使願成之廟，稱爲太宗。此疏陳於文帝時，便謂文帝死後，廟號應稱太宗。足見當時風俗近古。上配太祖，與漢亡極，建久安之勢，成長治之業，以承祖廟，以奉六親，至孝也。以幸天下，以育羣生，至仁也。立經陳紀，輕重同得，後可以爲萬世治程。雖有愚幼不肖之嗣，猶得蒙業而安，至明也。以陛下之明達，因使少知治體者，得佐下風，致此非難也。其具可素陳於前，願幸無忽。臣謹稽之天地，驗之往古，按之當今之務，日夜念此至孰也。雖使舜禹復生，爲陛下計，亡以易此。以上魏岸夫樹國固必相疑之勢，樹猶立也。於京師之外，又樹立宗室多國，勢必相疑。下數被其殃。上數爽其憂，甚非所以安上而全下也。今或親弟謀爲東帝，親兄之子西鄉而擊。今吳又見告矣。親弟謂淮南厲王長，親兄之子謂齊悼惠王之子與居，皆謀反也。天子春秋鼎盛，行義未過，德澤有加焉。猶尚如是，况莫大諸侯權力且十此者乎。然而天下少安何也。大國之王幼弱未壯，漢之所置傅相方握其事。漢之諸侯王各有太傅有相，是天

子所置者。數年之後。諸侯之王。大抵皆冠。血氣方剛。漢之傅相稱病而賜罷。彼自丞尉以上。徧置私人。如此有異。淮南濟北之爲邪。淮南謂上文親弟謀爲東帝也。濟北謂上文親兄之子西向而擊也。此時而欲爲治安。雖堯舜不治。黃帝曰。『日中必變。操刀必割。』今令此道順而全安甚易。不肯早爲。已迺隨骨肉之屬而抗劉之。豈有異。秦之季世乎。夫以天子之位。乘今之時。因天之助。尙憚以危爲安。以亂爲治。假設陛下居齊桓之處。將不合諸侯而匡天下乎。臣又知陛下有所必不能矣。以上言數年之後諸侯王必爲變宜早爲之所假設陛下如曩時淮陰侯尙王楚。黥布王淮南。彭越王梁。韓信王韓。張敖王趙。黃高爲相。盧縮王燕。陳豨在代。令此六七公者皆亡。此六七人皆高祖之臣封王而叛者。當是時而陛下即天子位。能自安平乎。臣有以知陛下之不能也。天下淆亂。高皇帝與諸公並起。非有仄室之勢。以豫席之也。仄室之勢。猶日寸土半階之勢。席猶日憑藉也。諸公幸者。乃爲中涓。其次廬廬與僮同得舍人。材之不逮至遠也。高皇帝以明聖威武。即天子位。割膏腴之地以王諸公。多者百餘城。少者乃三四十縣。德至渥也。然其後七年之間。反者九起。陛下之與諸公。非親角材而臣之也。又非身封王之也。自高皇帝不能以是一歲爲安。故臣知陛下之不能也。以上言高帝時尙不能禁諸侯王之不反。然尙有可諉者。曰疏。臣請試言其親者。假令悼惠王王齊。元王王楚。中子王趙。幽王王淮陽。共王王梁。靈王王燕。厲王王淮南。六七貴人皆亡。此六七人皆高祖之子弟封王而叛者。當是時。陛下即位能爲治乎。臣又知陛下之不能也。若此諸王。雖名爲臣。實皆有布衣昆弟之心。慮亡不帝制而天子自爲者。慮音閩猶日大抵也大抵無不帝制自爲擅爵人。赦死罪。甚者或戴黃屋。漢法令非行也。雖行不軌如厲王者。令之不肯聽。召之安可致乎。幸而來至。法安可得加。動一親戚。古人稱父子兄弟日親戚。天下圖視而起。陛下之臣雖有悍如馮敬者。適啓其口。匕首已陷其胸矣。陛下雖賢。誰與領此。故疏者必危。親者必亂。已然之效也。其異姓負疆而動者。漢已幸勝之矣。又不易其所以然。同姓襲是迹而動。既有徵矣。其勢盡。又復然。殃禍之變。未知所移。明帝處之。尙不能以安。後世將如之何。屠牛坦一朝解十二牛。而芒刃不頓者。所排擊剗割皆衆理解也。至於鬪禱之所。非斤則斧。夫仁義恩厚。人主之芒刃也。權勢法制。人主之斤斧也。今諸侯王皆衆鬪禱也。釋斤斧之用。而欲嬰以芒刃。臣以爲不缺則折。胡不用之淮南濟北。勢不可也。言淮南王爲親弟。濟北王爲親兄子。尙不可用芒刃。况今同姓諸王。勢尤不可用芒刃矣。以上

言反迹已露。則難制之。宜卽早施以斤斧。臣竊迹前事。大抵彊者先反。淮陰王楚。最彊則最先反。韓信倚胡則又反。賁高因趙資則又反。陳豨兵精則又反。彭越用梁則又反。黥布用淮南則又反。盧縮最弱最後反。長沙乃在二萬五千戶耳。在讀如纒猶日僅也。功少而最完。勢疏而最忠。非獨性異人也。亦形勢使然也。曩令樊鄴絳灌樊鄴。三入皆姓周。勃封絳侯。終乃其封地之名耳。而史漢中多稱樊鄴絳灌。想當時暹稱如此。如今日稱塔羅揚彭耳。據數十城而王。今雖以殘亡可也。令信越之倫。列爲徹侯而居。雖至今存可也。然則天下之大計可知已。欲諸王之皆忠附。則莫若令如長沙王。欲臣子之勿菹醢。則莫若令如樊鄴等。欲天下之治安。莫若衆建諸侯而少其力。力少則易使以義。國小則無邪心。令海內之勢。如身之使臂。臂之使指。莫不從制。諸侯之君。不敢有異心。輻湊並進。而歸命天子。雖在細民。且知其安。故天下咸知陛下之明。割地定制。令齊趙楚各爲若干國。使悼惠王幽王元王之子孫。畢以次各受祖之封地。地盡而止。及燕梁他國皆然。其分地衆而子孫少者。建以爲國。空而置之。須其子孫生者而後君之。空而置之。謂存其國土。暫不封人。待其子孫生後乃封之。諸侯之地。其削頗入漢者。爲徙其侯國及封其子孫也。以數償之。諸侯之地。前頗有削而入漢者。猶今云入官也。仍當移徙界址。歸入侯國境內。待封其子孫時全數還之。一寸之地。一人之衆。天子亡所利焉。誠以定制而已。故天下咸知陛下之廉。地制壹定。宗室子孫。慮莫不王。猶云大抵無不王也。下無倍畔之心。上無誅伐之志。故天下咸知陛下之仁。法立而不犯。令行而不逆。賁高利幾之謀不生。柴奇開章之計不萌。細民鄉善。大臣致順。故天下咸知陛下之義。臥赤子天下之上。而安植遺腹。朝委裘而天下不亂。當時大治。後世誦聖。壹動而五業附。陛下誰憚而久不爲此。以上言發者。先反宜多建諸侯而分其力。天下之勢。方病大瘡。一脛之大幾如要。一指之大幾如股。平居不可屈信。一二指搐。身慮亡聊。身慮亡聊。言偶有一二蠢動。偏身大振。皆痛無聊賴也。失今不治。必爲痼疾。後雖有扁鵲。不能爲已。非徒病瘡也。又苦蹶齧。元王之子。帝之從弟也。今之王者。從弟之子也。惠王之子。親兄之子也。今之王者。兄子之子也。親者或亡分地以安天下。疏者或制大權以信天子。臣故曰非徒病瘡也。又苦蹶齧。可爲痛哭者此病是也。以上慮宗室諸侯地大生變。痛哭之一天下之勢。方倒縣。凡天子者。天下之首。何也。上也。蠻夷者天下之足。何也。下也。今匈奴嫚侮侵掠。至不敬也。爲天下患。至亡已也。而漢歲致金絮采繒以奉之。夷狄徵令。是主上之操也。天子共

貢。是臣下之禮也。足反居上。首顧居下。倒懸如此。莫之能解。猶爲國有人乎。非亶倒懸而已。亶與伯同。又類辟且病痺。夫辟者一面病。痺者一方痛。今西邊北邊之郡。雖有長籛。不輕得復。五尺以上。不輕得息。斥候望烽燧不得臥。斥遠也。候候伺也。斥候猶今之放哨者。將吏被介冑而睡。臣故曰一方病矣。醫能治之。而上不使。可爲流涕者此也。陛下何忍以皇帝之號。爲戎人諸侯。勢既卑辱而旣不息。長此安窮。進謀者率以爲是。固不可解也。亡具甚矣。臣竊料匈奴之衆。不過漢一大縣。漢之匈奴。南北二千里。東西五千里。而日不過抵漢一大縣。此賈生閭歷之發也。以天下之大。困於一縣之衆。甚爲執事者羞之。陛下何不試以臣爲屬國之官。以主匈奴。典屬國之官。專主外國事。後蘇武嘗爲之。行臣之計。請必係單于之頸而制其命。伏中行說而答其背。舉匈奴之衆。惟上之令。今不獵猛獸而獵田鼠。不擲反寇而搏畜兔。玩細娛而不圖大患。非所以爲安也。德可遠施。威可遠加。而直數百里外。威令不信。可爲流涕者此也。以上流涕者二資止言匈奴一事。今民賣僮者。爲之繡衣絲履偏諸緣。偏諸卽牙條。今之鬼子鬪于也。內之閨中。是古天子后服。所以廟而不寔者也。而庶人得以衣。婢妾白縠之表。薄紉之裏。纒以偏諸。偏諸卽縷子也。縷謂縫於衣之領緣也。美者繡繡。是古天子之服。今富人大賈。嘉會召客者。以被牆。古者以奉一帝一后而節適。今庶人屋壁得爲帝服。倡優下賤得爲后飾。然而天下不屈者。殆未有也。且帝之身。自衣阜綈。而富民牆屋被文繡。天子之后。以緣其領。庶人嬖妾緣其履。此臣所謂舛也。夫百人作之。不能衣一人。欲天下亡寒。胡可得也。一人耕之。十人聚而食之。欲天下亡饑。不可得也。饑寒切於民之肌膚。欲其亡爲姦邪。不可得也。國已屈矣。盜賊直須時耳。然而獻計者曰。毋動爲大耳。夫俗至大不敬也。至亡等也。至冒上也。進計者猶曰。『毋爲。』可爲長太息者此也。以上俗太奢侈冒上亡等太息之一。商君遺禮義。棄仁恩。并心於進取。行之二歲。秦俗日敗。故秦人家富子壯則出分。家貧子壯則出贅。借父耒鋤。慮有德色。言大抵有德色也。母取箕帚。立而諍語。抱哺其子。與公并倨。公舅也。孩婦與舅并倨。無禮甚矣。婦姑不相說。則反脣而相稽。其慈子嗜利。慈子嗜利。猶云溺愛貪利。不同禽獸者亡幾耳。然并心而赴時。猶曰盛六國。兼天下。功成求得矣。終不知反廉愧之節。仁義之厚。信并兼之法。遂進取之業。天下大敗。衆掩寡。智欺愚。勇威怯。壯陵衰。其亂至矣。是以大賢起之。威震海內。德從天下。翼之爲素者。今轉而爲漢矣。然其遺風餘俗。猶尙未改。今世以侈靡相競。而上無制度。棄禮義。捐廉恥。日甚。可謂

月異而歲不同矣。逐利不耳。利不耳。卽利吞耳。慮非願行也。慮非願行。猶云大抵不願行之是非也。今其甚者殺父兄矣。盜者剝寢戶之簾。奪兩廟之器。白晝大都之中。剽吏而奪之金。矯僞者出幾十萬石粟。賦六百餘萬錢。乘傳而行郡國。此其無行義之尤至者也。而大臣特以簿書不報。期會之間。以爲大故。至於流俗失世壞敗。因恬而不知怪。慮不動於耳目。猶云大抵不動於耳目。以爲是適然耳。夫移風易俗。使天下同心而向道。類非俗吏之所能爲也。俗吏之所務。在於刀筆筐篋。而不知大體。陛下又不自憂。竊爲陛下惜之。夫立君臣等上下。使父子有禮。大親有紀。此非天之所爲。人之所設也。夫人之所設。不爲不立。不植則僵。不修則壞。筦子曰。『禮義廉恥。是爲四維。四維不張。國乃滅亡。使筦子愚人也。則可。筦子而少知治體。則是豈可不爲寒心哉。秦滅四維而不張。故君臣乖亂。大親殃戮。姦人並起。萬民離叛。凡十三歲而社稷爲墟。今四維猶未備也。故姦人幾倖而衆心疑惑。豈如今定經制令。君君臣臣。上下有差。父子六親。各得其宜。姦人亡所幾幸。羣衆信上而不疑惑。此業一定。世世常安。而後有所持循矣。若夫經制不定。是猶渡江河亡維楫。維所以繫舟楫。所以行舟中流而遇風波。船必覆矣。可爲長太息者此也。以上四維未備。秦俗未解。太息之二。夏爲天子。十有餘世。而殷受之。殷爲天子。二十餘世。而周受之。周爲天子。三十餘世。而秦受之。秦爲天子。二世而亡。人性不甚相遠也。何三代之君。有道之長。而秦無道之暴也。其故可知也。古之王者。太子乃生。固舉以禮。使士負之。有司齊肅。端冕見之南郊。見於天也。過闕則下。過廟則趨。孝子之道也。故自爲赤子。而教固已行矣。昔者成王幼。在襁褓。召公爲太保。周公爲太傅。太公爲太師。保保其身。體傳傳之德。義師道之教訓。如三公之職也。於是爲置三少。皆上大夫也。曰少保。少傅。少師。是與太子寔者也。故乃孩提有識。三公三少。固明孝仁禮義。以道習之。遂去邪人。不使見惡行。於是皆選天下之端士。孝弟博聞有道術者。以衛翼之。使與太子居處出入。故太子乃生而見正事。聞正言。行正道。左右前後皆正人也。夫習與正人居之。不能毋正。猶生長於齊。不能不齊言也。習與不正人居之。不能毋不正。猶生長於楚之地。不能不楚言也。故擇其所養。必先受業。乃得嘗之。擇其所樂。必先有習。乃得爲之。孔子曰。『少成若天性。習貫如自然。』及太子少長。知妃色。則入於學。學者所學之官也。學禮曰。帝入東學。上親而貴仁。則親疏有序。而恩相及矣。帝入南學。上齒而貴信。則長幼有差。而民不誣矣。帝入西學。上賢而貴德。則聖智在位。而功不遺矣。帝入北學。上貴而尊爵。則貴賤

有等而下。不隲矣。陰同陰越也。帝入太學。承師問道。退習而考於太傅。太傅罰其不則。而匡其不及。則德智長而治道得矣。此五學者。既成於上。則百姓黎民化轉於下矣。及太子既冠成人。免於保傅之嚴。則有記過之史。徹膳之宰。進善之旌。誹謗之木。敢諫之鼓。警史誦詩。工誦箴諫。大夫進謀。士傳民語。習與智長。故切而不媿。化與心成。故中道若性。三代之禮。春朝朝日。秋暮夕月。所以明有敬也。春秋入學。坐國老執醬而親饋之。所以明有孝也。行以鸞和。步中采齊。趣中肆夏。所以明有度也。其於禽獸。見其生不見其死。聞其聲不食其肉。故遠庖廚。所以長恩且明有仁也。夫三代之所以長久者。以其輔翼太子有此具也。及秦而不然。其俗固非貴辭讓也。所上者告訐也。固非貴禮義也。所上者刑罰也。使趙高傅胡亥而教之獄。所習者非斬剗人。則夷人之三族也。故胡亥今日卽位。而明日射人。忠諫者謂之誹謗。深計者謂之妖言。其視殺人若艾草菅然。豈惟胡亥之性惡哉。彼其所以導之者。非其理故也。鄙諺曰。『不習爲吏。視己成事。』又曰。『前車覆。後車誡。』夫三代之所以長久者。其已事可知也。然而不能從者。是不法聖智也。秦世之所以亟絕者。其轍迹可見也。然而不避。是後車又將覆也。夫存亡之變。治亂之機。其要在是矣。天下之命。懸於太子。太子之善。在於早諭教。與選左右。夫心未濫而先諭教。則化易成也。開於道術智誼之指。則教之力也。若其服習積貫。則左右而已。夫胡粵之人。生而同聲。善欲不異。及其長而成俗。累數譯而不能相通。行有雖死而不相爲者。則教習然也。臣故曰。選左右早諭教最急。夫教得而左右正。則太子正矣。太子正而天下定矣。書曰。『一人有慶。兆民賴之。』此時務也。以上教太子一條。太息之三。却未揭明長太息字樣。凡人之智。能見已然。不能見將然。夫禮者禁於將然之前。而法者禁於已然之後。是故法之所用。易見。禮之所爲至難知也。若夫慶賞以勸善。刑罰以懲惡。先王執此之政。堅如金石。行此之令。信如四時。據此之公。無私如天地耳。豈顧不用哉。然而曰。禮云禮云者。貴絕惡於未萌。而起教於微眇。使民日遷善遠罪而不自知也。孔子曰。『聽訟。吾猶人也。必也使無訟乎。』爲人主計者。莫如先審取舍。取舍之極。定於內。而安危之萌。應於外矣。安者非一日而安也。危者非一日而危也。皆以積漸。然不可不察也。人主之所積。在其取舍。以禮義治之者。積禮義。以刑罰治之者。積刑罰。刑罰積而民怨背。禮義積而民和親。故世主欲民之善同。而所以使民善者或異。或道之以德教。或馭之以法令。道之以德教者。德教治而民氣樂。馭之以法令者。法令極而民氣哀。哀樂之感。禍福之應也。

秦王之欲尊宗廟而安子孫。與湯武同。然而湯武廣大其德行。六七百歲而不失。秦王治天下。十餘歲則大敗。此無他故矣。湯武之定取舍審。而秦王之定取舍不審矣。夫天下大器也。今人之置器。置諸安處則安。置諸危處則危。天下之情與器無以異。在天子之所置之。湯武置天下於仁義禮樂而德澤洽。禽獸草木廣裕。德被蠻貊四夷。累子孫數十世。此天下所共聞也。秦王置天下於法令刑罰。德澤亡一有。而怨毒盈於世。下憎惡之如仇讎。禍幾及身。子孫誅絕。此天下所共見也。是非其明效大驗耶。以刑罰與禮教層層比較。勸懲帶宜學問。不宜學秦。人之言曰。聽言之道。必以其事觀之。則言者莫敢妄言。今或言禮誼之不如法令。教化之不如刑罰。人主胡不引殷周秦事以觀之也。以上定取舍重德教。太息之四。亦未揭明長太息字樣。人主之尊。譬如堂。羣臣如陛。衆庶如地。故陞九級上級等也。廉遠地則堂高。廉側隅也。陞亡級。廉近地則堂卑。高者難攀。卑者易陵。理勢然也。故古者聖王制爲等列。內有公卿大夫士。外有公侯伯子男。然後有官師小吏。延及庶人。等級分明。而天子加焉。故其尊不可及也。里諺曰。『欲投鼠而忌器。』此善喻也。鼠近於器。尙憚不投。恐傷其器。況於貴臣之近主乎。廉恥節禮以治君子。故有賜死而亡戮辱。是以黥劓之辜不及大夫。以其離主上不遠也。禮不敢齒君之路馬。蹴其筴者有罰。見君之几杖則起。遭君之乘車則下。入正門則趨。君之寵臣。雖或有過。刑戮之辜。不加其身者。尊君之故也。此所以爲主上豫遠不敬也。所以禮貌大臣而厲其節也。今自王侯三公之貴。皆天子之所政容而禮之也。古天子之所謂伯父伯舅也。而今與衆庶同。黥劓剕答。僞棄市之法。僞與罵同。然則堂不亡陞乎。被戮辱者不泰迫乎。素與大同。廉恥不行。大臣無乃握重權大官而有徒隸亡恥之心乎。夫望夷之事。二世見嘗以重法者。投鼠而不忌器之習也。巨闢之。屢雖鮮。不加於枕冠。雖傲。不以首履。夫嘗已在貴寵之位。天子政容而禮之矣。吏民常俯伏以敬畏之矣。今而有過。帝令廢之可也。退之可也。賜之死可也。滅之可也。若夫束縛之。係縲之。縲謂以長繩係之也。輪之司寇。編之徒官。司寇小吏。晉罵而榜笞之。殆非所以令衆庶見也。夫卑賤者。習知尊貴者之一旦。吾亦乃可以如此也。非所以習天下也。非尊尊貴貴之化也。夫天子之所嘗敬。衆庶之所嘗寵。死而死耳。賤人安宜得如此而頓辱之哉。豫讓事中之君。智伯伐而滅之。稜事智伯。及趙滅智伯。豫讓斃面吞炭。必報襄子。五起而不中。人問豫子。豫子曰。『中行衆人畜我。我故衆人事之。智伯國士遇我。我故國士報之。』故此一豫讓也。反君事讎。行若

狗彘已而抗節。致中行出乎列士。人主使然也。故主上遇其大臣如遇犬馬。彼將犬馬自爲也。如遇官徒。彼將官徒自爲也。頑頓亡恥。莫胡結反詬亡節。廉恥不立。且不自好。苟若而可。故見利則逝。見便則奪。主上有欺則因而挺之矣。主上有惠則吾苟免而已。立而觀之耳。有便吾身者。則欺賣而利之耳。人主將何便於此。羣下至衆而主上至少也。所託材器職業者。粹於羣下也。俱亡恥。俱苟安。則主上最病。故古者禮不及庶人。刑不至大夫。所以厲寵臣之節也。古者大臣有坐不廉而廢者。不謂不廉。曰簠簋不飾。坐污穢淫亂男女不別者。不曰污穢。曰帷薄不修。坐罷軟不勝任者。不曰罷軟。曰下官不職。故貴大臣定有其罪矣。猶未斥然正以諍之也。尙遷就而爲之諱也。是時丞相相終侯周勃免就國。人有告勃謀反者。逮繫長安獄。故賈生以此譏之。故其在大譴大何之域者。聞譴何。則白冠鵲纓。盪水加劍。造請室而請罪耳。上不執縛係引而行也。其有中罪者。聞命而自弛。上不使人鑿而加也。其有大罪者。聞命則北面再拜。跪而自裁。上不使掉抑而刑之也。曰。子大夫自有過耳。吾遇子有禮矣。遇之有禮。故羣臣自意。矍以廉恥。故人矜節行。上設廉恥禮義。以遇其臣。而臣不以節行報其上者。則非人類也。故化成俗定。則爲人臣者主耳忘身。國耳忘家。公耳忘私。利不苟就。害不苟去。唯義所在。上之化也。故父兄之臣。誠死宗廟。法度之臣。誠死社稷。輔義之臣。誠死君上。守圍扞敵之臣。誠死城郭封疆。故曰。聖人有金城者。比物此志也。彼且爲我死。故吾得與之俱生。彼且爲我亡。故吾得與之俱存。夫將爲我危。故吾得與之俱安。夫滄彼也。左傳則夫致死焉。亦謂彼致死也。願行而忘利。守節而仗義。故可以託不御之權。不御之權。謂全授以權柄。不復制御之也。可以寄六尺之孤。此厲廉恥行禮誼之所致也。主上何喪焉。此之不爲。而願彼之久行。故曰。可爲長太息者此也。以上不挫辱大臣太息之五

奏疏以漢人爲極軌。而氣勢最盛。事理最顯者。尤莫善於治安策。故千古奏議。推此篇爲極唱。可流涕者少一條。可長太息者少一條。漢書所載者。殆尙非賈子全文。賈生爲此疏時。當在文帝七年。僅三十歲耳。於三代及秦治術。無不貫徹。漢家中外政事。無不通曉。蓋有天授。非學所能幾耳。

奏議以明白顯豁。人人易曉爲要。後世讀此文者。疑其稱名甚古。其用字甚雅。若倉猝不能解者。不知在漢時乃人人共稱之名。人人慣用之字。卽以稱名而論。其稱淮南濟北。如今日稱端華肅順也。其

稱匈奴。如今日稱英吉利也。其稱淮陰侯黥布彭越韓信張敖盧縮陳豨六七公。猶今日稱洪秀全李秀成石達開張洛利苗沛霖苗匪回匪也。其稱樊鄴絳灌。猶今日稱江塔羅李也。其稱郡國。猶今日府廳也。其稱傅相丞尉。猶今日稱司道守令也。又以用字而論。其用厝字。猶今日稱用置字也。其用庫字。猶今日用平字也。其用慮字。猶今日用大字也。其用執字。猶今日用勢字也。其用亡字。猶今日用無字也。其用亶字。猶今日用但字也。其用幾幸。猶今日用冀倖也。其用險字。猶今日用踰字也。其用懸字。猶今日用懸字也。由此等以類推。則當日通稱之名。通用之字。斷無不共喻者。然則居今日而講求奏章。亦用今日通稱之名。通用之字可矣。

劉向極諫外家封事

臣聞人君莫不欲安。然而常危。莫不欲存。然而常亡。失御臣之術也。夫大臣操權柄持國政。未有不爲害者也。昔晉有六卿。齊有田崔。衛有孫寧。魯有季孟。常掌國事。世執朝柄。終後田氏取齊。六卿分晉。崔杼弑其君光。孫林父甯殖出其君衎。弑其君剽。季氏入僭舞於庭。三家者以雍徹。並專國政。卒逐昭公。周大夫尹氏筦朝事。燭亂王室。子朝子猛更立。連年乃定。故經曰。『王室亂。』又曰。『尹氏弑王子克。』甚之也。春秋舉成敗錄禍福如此類甚衆。皆陰盛而陽微。下失臣道之所致也。故書曰。『臣之有作威作福。害於而家。凶於而國。』孔子曰。『祿去公室。政遠大夫。危亡之兆。』秦昭王舅穰侯及涇陽葉陽君專國擅勢。上假太后之威。三人者。權重於昭王。家富於秦國。國甚危殆。賴范雎之言。而秦復存。二世委任趙高。專權自恣。壅蔽大臣。終有閹樂望夷之禍。秦遂以亡。近事不遠。即漢所代也。漢興諸呂無道。擅用尊王。呂產呂祿席太后之寵。據將相之位。兼南北軍之衆。擁梁趙王之尊。驕盈無厭。欲危劉氏。賴忠正大臣絳侯朱虛侯等竭誠盡節。以誅滅之。然後劉氏復安。以上歷數權臣害國而以呂氏之亂引出王氏。今王氏一姓。乘朱輪華轂者二十三人。青紫貂蟬。充盈內。魚鱗左右。大將軍秉事用權。五侯驕奢僭盛。並作威福。擊斷自恣。行奸而寄治。牙亂也。寄。亦託也。行本好亂。而託爲爲治。身私而託公。依東宮之尊。假甥舅之親。以爲威重。尙書九卿。州牧郡守。皆出其門。筦執樞機。朋黨比周。稱譽者登進。忤恨者誅傷。游談者助之說。執政者爲之言。排擯宗室。孤弱公族。其有智能者。尤非毀而不進。遠絕宗室之任。不令得給事朝省。恐其

與己分權。數稱燕王蓋主。以疑上心。避諱呂霍而不肯稱。內有管蔡之萌。外假周公之論。兄弟據重。宗族磐互。歷上古至秦漢。外戚僭貴。未有如王氏者也。雖周皇父。秦穰侯。漢武安。呂霍上官之屬。皆不及也。以上極言王氏僭威物盛。必有非常之變。先見爲其人徵象。孝昭帝時。冠石立於泰山。仆柳起於上林。而孝宣帝卽位。今王氏先租墳墓在濟南者。其梓柱生枝葉。扶疏上出屋。根垂地中。垂嘗作番番與搖同。雖立石起柳。無以過此之明也。指明梓柱之徵。果爲王氏篡漢之兆。向之忠直出於至誠。故其道可以前知。讀至王劉不並立等語。至今如觀其階也之狀。如聞其嗚咽之聲。事勢不兩大。王氏與劉氏亦且不並立。如下有泰山之安。則上有累卵之危。陛下爲人子孫。守持宗廟。而令國祚移於外親。降爲卑隸。縱不爲身。奈宗廟何。婦人內夫家。外父母家。此亦非皇太后之福也。以上言王氏安則劉氏危。孝宣皇帝不與舅平昌樂昌侯權。所以全安之也。夫明者起福於無形。銷患於未然。宜發明詔。吐德音。接近宗室。親而納信。黜遠外戚。毋授以政。皆罷令就第。以則效先帝之所行。厚安外戚。全其宗族。誠東宮之意。外家之福也。王氏永存。保其爵祿。劉氏常安。不失社稷。所以褒睦外內之姓。子子孫孫。無疆之計也。如不行此策。田氏復見於今。六卿必起於漢。爲後嗣憂。昭昭甚明。不可不深圖。不可不蚤慮。易曰。『君不密則失臣。臣不密則失身。幾事不密則害成。』唯陛下深留聖思。審回幾密。覽往事之戒。以折中取信。居萬安之寶。用保宗廟。久承皇太后。天下幸甚。

奏疏惟西漢之文。冠絕古今。西漢前推賈誼。後推匡劉。賈誼以才勝。匡劉以學勝。此人人共知者也。余尤好劉子政。忠愛之忱。若有所甚。不得已於中者。足以貫三光而通神明。是故識精而不炫。氣盛而不矜。料王氏之必篡。思有以早爲之所。而又無誅滅王氏之意。宅心平實。指事確鑿。皆本忠愛二字。彌綸周浹而出。吾輩欲師其文章。先師其心術。根本固則枝葉自茂矣。

劉向論起昌陵疏

臣聞易曰。『安不忘危。存不忘亡。』是以身安而國家可保也。故聖賢之君。博觀終始。窮極事情。而是非分明。王者必通三統。明天命所授者博。非獨一姓也。孔子論詩。至於『殷士膚敏。裸將于京。』喟然嘆曰。『大哉天命。善

不可不傳於子孫。是以富貴無常。不如是。則王公其何以戒慎。民萌何以勸勉。『萌與毗同。力田之民曰毗。蓋傷微子之事周而痛殷之亡也。雖有堯舜之聖。不能化丹朱之子。雖有禹湯之德。不能順末孫之桀紂。自古及今。未有不亡之國也。昔高皇帝既滅秦。將都雒陽。感悟劉敬之言。自以德不及周。而賢於秦。遂徙都關中。依周之德。因秦之阻。世之長短。以德爲效。故常戰慄不敢諱亡。孔子所謂富貴無常。蓋謂此也。以上言自古無不亡之國。宜薄葬。以免後世之發掘。孝文皇帝居霸陵。北臨廁。意懷愴悲。懷願謂羣臣曰。『嗟乎。以北山石爲槨。用紵絮斷陳漆其間。豈可動哉。』陳。施也。以石爲槨。又以紵絮斷陳。而施漆於其間。沿吾鄉之以齏灰和漆封槨之日也。張釋之進曰。『使其中有可欲。雖錮南山猶有隙。使其中無可欲。雖無石槨。又何戚焉。』夫死者無終極。而國家有廢興。故釋之之言爲無窮計也。孝文寤焉。遂薄葬不起山墳。以上因國家有廢興。引出孝文薄葬之賢易曰。『古之葬者。厚衣之以薪。藏之中野。不封不樹。後世聖人。易之以棺槨。棺槨之作。自黃帝始。』黃帝葬於橋山。堯葬濟陰。邛隴皆小。葬具甚微。舜葬蒼梧。二妃不從。禹葬會稽。不改其列。殷湯無葬處。文武周公葬於畢。秦穆公葬於雍。橐泉宮。祈年館下。樽里中葬於武庫。皆無邛隴之處。此聖帝明王。賢君智士。遠覽獨慮。無窮之計也。其賢臣孝子。亦承命順意。而薄葬之。此誠奉安君父。忠孝之至也。夫周公。武王弟也。葬兄甚微。孔子葬母於防。稱古墓而不墳。曰丘東西南北之人也。不可不識也。爲四尺墳。遇雨而崩。弟子修之。以告孔子。孔子流涕曰。『吾聞之古者不修墓。』蓋非之也。延陵季子適齊而反。其子死。葬於贏博之間。穿不及泉。斂以時服。封墳掩坎。其高可隱。其高可隱。謂人隔墳而立。可隱肘也。不能遮蔽全身。不甚高耳。而號曰。骨肉歸復於土。命也。魂氣則無不之也。夫贏博去吳千有餘里。季子不歸葬。孔子往觀曰。『延陵季子於禮合矣。』故仲尼孝子。而延陵慈父。舜禹忠臣。周公弟弟。其葬君親骨肉。皆微薄矣。非苟爲儉。誠便於體也。宋桓司馬爲石槨。仲尼曰。『不如速朽。』秦相呂不韋集知略之士。而造春秋。亦言薄葬之義。皆明於事情者也。以上雜引聖哲薄葬之事。逮至吳王闔閭。違禮厚葬。十有餘年。越人發之。及秦惠文武昭嚴襄五王。皆大作邛隴。多其燻藏。咸盡發掘暴露。甚足悲也。秦始皇帝葬於驪山之阿。下錮三泉。上崇山墳。其高五十餘丈。周回五里有餘。石槨爲游館。游館以石爲甃。官別館於地下。人膏爲燈燭。水銀爲江海。黃金爲鳧雁。珍寶之藏。機械之變。棺槨之麗。宮館之盛。不可勝原。又多殺宮人。生埋工匠。計以萬數。天下

苦其役而反之。驪山之作未成。而周章百萬之師。至其下矣。項籍燔其宮室營宇。往者咸見發掘。其後牧兒亡羊。羊入其鑿。牧者持火照求羊。失火燒其藏櫛。自古及今。葬未有盛如始皇者也。數年之間。外被項籍之災。內罹牧豎之禍。豈不哀哉。是故德彌厚者。葬彌薄。知愈深者。葬愈微。無德寡知。其葬愈厚。邱隴彌高。官廟甚麗。發掘必速。由是觀之。明暗之效。葬之吉凶。昭然可見矣。以上歷言厚葬之禍。而合前段薄葬總一收。東周德既衰。而奢侈。宣王賢而中興。更爲儉宮室。小寢廟。詩人笑之。斯千之詩是也。上章道宮室之如制。下章言子孫之衆多也。及魯嚴公刻飾宗廟。嚴公卽魯莊公。莊公爲漢帝之諱。故班氏僕書避之多築臺園。後嗣再絕。春秋刺焉。周宣如彼。而昌魯秦如此。而絕。是則奢儉之得失也。以上芟言奢儉之得失。陛下卽位。躬親節儉。始營初陵。其制約小。天下莫不稱賢明。及徙昌陵。增埤爲高。埤與阜同。積土爲山。發民墳墓。積以萬數。營起邑居。期日迫卒。卒與葬同。功費大萬百餘。死者恨於下。生者愁於上。怨氣感動陰陽。因之以饑饉。物故流離。以十萬數。臣甚懼焉。昔與閔同以死者爲有知。發人之墓。其害多矣。若其無知。又焉用大。謀之賢知。則不說。以示衆庶。則苦之。苟以說愚夫。淫侈之人。又何爲哉。以上言昌陵功費太鉅。陛下慈仁篤美甚厚。聰明疏達蓋世。宜宏漢家之德。崇劉氏之美。光昭五帝三王。而顧與暴秦亂君。競爲奢侈。比方邱隴。說愚夫之目。隆一時之觀。違賢知之心。亡萬世之安。臣竊爲陛下羞之。唯陛下上覽明聖黃帝堯舜禹湯文武周公仲尼之制。下觀賢知穆公延陵樽里張釋之之意。孝文皇帝去墳薄葬。以儉安神。可以爲則。秦昭始皇增山厚藏。以侈生害。足以爲戒。初陵之標。宜從公卿大臣之議。以息衆庶。

首段言自古無不亡之國。近世奏議。不敢如此立言。至於結構整齊。詞旨深厚。皆漢文中之最便揣摩者。沅弟性情極厚。故見余之文氣篤厚。則嗜之如饑渴。然余謂欲求文氣之厚。總須讀漢人奏議二三十首。醞釀日久。則不期厚而自厚矣。

劉向論甘延壽疏

漢元帝時。陳湯甘延壽滅郅支單于。將論功封爵。匡衡石顯以爲湯與延壽。擅興師矯制。不宜加封。劉向上此疏爭之。

郅支單于囚殺使者吏士以百數事。暴揚外國。傷威毀重。羣臣皆閔焉。陛下赫然欲誅之意。未嘗有忘西域。都護延壽副校尉湯承聖旨。倚神靈。總百蠻之軍。搃城郭之兵。搃猶持之也。城郭。西域有城郭之國也。出百死。入絕域。遂蹈康居。康居。初臣服匈奴之國而後搆怨者。屠五重城。奉欽侯之旗。欽侯。匈奴之貴將。斬郅支之首。懸旌萬里之外。揚威昆山之西。掃谷吉之恥。谷吉。漢使至匈奴被殺者。立昭明之功。萬夷懼服。莫不懼震。呼韓邪單于與郅支已誅。呼韓邪單于與郅支單于相仇而先降漢者。且喜且懼。鄉風慕義。稽首來賓。願守北藩。累世稱臣。立千載之功。建萬世之安。羣臣之勳莫大焉。昔周大夫方叔吉甫爲宣王誅獫狁。而百蠻從。其詩曰。『嘽嘽焯焯。如霆如雷。顯允方叔。征伐獫狁。蠻荆來威。』易曰。『有嘉折首。獲匪其醜。』言美誅首惡之人。而諸不順者皆來從也。今延壽湯所誅震。雖易之折首。詩之雷霆。不能及也。論大功者。不錄小過。舉大笑者。不疵細瑕。司馬法曰。『軍賞不踰月。欲民速得爲善之利也。』蓋急武功。重用人也。吉甫之歸。周厚賜之。其詩曰。『吉甫宴喜。旣多受祉。來歸自鎬。我行永久。』千里之鎬。猶以爲遠。况萬里之外。其勤至矣。延壽湯旣未獲受祉之報。反屈捐命之功。久挫於刀筆之前。捐命謂捐棄軀命猶今言拚命也。刀筆謂文吏也。非所以勸有德厲戎士也。昔齊桓前有尊周之功。後有滅項之罪。齊桓公於僖十七年。滅項。君子以功覆過。而爲之諱行事。行事謂近事猶今稱曰近日成案也。貳師將軍李廣利。捐五萬之師。糜億萬之費。經四年之勞。而虜獲駿馬三十匹。虜與僮同。雖斬宛王毋鼓之首。猶不足以復費。復費謂償其所費也。其私罪惡甚多。孝武以爲萬里征伐。不錄其過。遂封拜兩侯三卿。二千石。百有餘人。今康居固強於大宛。郅支之號重於宛王。殺使者罪甚於留馬。而延壽湯不煩漢土。不費斗糧。比於貳師。功德百之。且常惠隨欲擊之烏孫。常惠大破匈奴。實用烏孫全圖五萬之兵。常惠不損隨護之耳。鄭吉迎自來之日。逐日逐王降漢。鄭吉迎之。猶皆列土受爵。故言威武勤勞。則大於方叔吉甫。列功覆過。則優於齊桓貳師。進事之功。則高於安遠長羅。常惠封長羅侯。鄭吉封安遠侯。而大功未著。小惡數布。臣竊痛之。宜以時解縣通籍。縣罪未竟也。猶今言案未了結也。解縣。遠結案而罷封也。除過勿治。尊寵爵位。以勸有功。

匈奴爲漢患百餘年。武帝用衛霍諸大將。殫竭天下財貨。興師數十年。卒不能大創之。元帝之世。陳湯甘延壽。矯詔發西域諸國之兵。禽滅郅支單于。由是漢世迄無邊患。實千古奇功。乃爲匡衡石顯所沮。久不褒。石顯

宦官佞幸。本不足責。匡衡以宰相名儒。而亦嫉妬若此。殊不可解。厥後陳湯屢次獲罪。谷永耿育上疏救之。漢書并錄三疏於湯傳中。百世而下。讀者猶爲嗚咽感歎。茲并錄之。以備循省。俾知有功之臣。必戰兢惕厲。以立於無過之地。而儒生處具瞻之地。尤不可不力持大體。鏘除媚嫉私衷。以匡衡爲鑒戒也。

谷永救陳湯疏

自劉向上疏後。延壽封蒙承侯。湯封關內侯。至成帝時。匡衡復奏湯前收康居財物。坐免官。又湯上書。言康居侍子非王子也。按驗實爲王子。湯下獄當死。谷永上此疏救之。

臣聞楚有子玉得臣。文公爲之仄席而坐。趙有廉頗馬服。馬服君趙將趙奢也。強秦不敢窺兵井陘。近漢有郅都魏尚。匈奴不敢南鄉沙幕。由是言之。戰克之將。國之爪牙。不可不重也。蓋君子聞鼓鼙之聲。則思將率之臣。竊見關內侯陳湯。前使副西域都護。忿郅支之無道。閔王誅之不加。策慮愒億。愒億憤怒之貌。義勇奮發。卒與師奔逝。橫厲烏孫。渡水日厲。橫厲猶橫行也。踰集都賴。都賴郅支城外之水名也。屠三重城。斬郅支首。報十年之遺誅。雪邊吏之宿恥。威震百蠻。武暢西海。漢元以來。征伐方外之將。未嘗有也。今湯坐言事非是。幽囚久繫。歷時不缺。執憲之吏。欲致之大辟。昔白起爲秦將。南拔郢都。北阮趙括。以纖介之過。賜死杜郵。秦民憐之。莫不隕涕。今湯親秉鉞。席捲喋血。萬里之外。喋血猶踐血。謂足踏血而行也。其字應作傑。不從口。薦功祖廟。告類上帝。介冑之士。靡不慕義。以言事爲罪。無赫赫之惡。周書曰。『記人之功。忘人之過。宜爲君者也。』夫大馬有勞於人。尙加帷蓋之報。况國之功臣者哉。竊恐陛下忽於鼓鼙之聲。不察周書之意。而忘帷蓋之施。庸臣遇湯。過待也。謂以庸臣之禮待過傷也。卒從吏議。使百姓介然有秦民之恨。介然猶耿耿非所以厲死難之臣也。

耿育訟陳湯書

前谷永上書。湯得免罪。復起爲從事中郎。後又得罪。謫徙敦煌。耿育上此疏訟之。

延壽揚爲聖漢。揚鉤深致遠之威。雪國家累年之恥。討絕域不羈之君。絕域之君。謂郅支單于也。繫萬里難制之

虜豈有比哉。先帝嘉之，仍下明詔，仍下謂頻下詔也。宣著其功，改年垂歷，傳之無窮。應是南郡獻白虎，邊陲無警備。會先帝痼疾，然猶垂意不忘。數使尙書賁問丞相，趣立其功。獨丞相匡衡，排而不予。封延壽湯數百戶。此功臣戰士所以失望也。孝成皇帝承建業之基，乘征伐之威，兵革不動，國家無事。而大臣傾邪，讒佞在朝。曾不深惟本末之難，以防未然之戒。欲專主威，排妬有功。使湯塊然被冤，拘囚不能自明。卒以無罪，老棄敦煌。正當西域通道，令威名折衝之臣。古人以衝車攻城，故能禦侮者，謂之折衝旋踵及身。復爲郅支遺虜所笑，誠可悲也。至今奉使外蠻者，未嘗不陳郅支之誅，以揚漢國之盛。夫援人之功，以懼敵。棄人之身，以快讒。豈不痛哉。且安不忘危，盛必慮衰。今國家素無文帝累年節儉富饒之蓄，又無武帝薦延梟俊禽敵之臣。薦延謂臣下薦遠而帝延納之也。梟俊謂梟雄俊傑之材，獨有一陳湯耳。假使異世不及陛下，尙望國家追錄其功，封表其墓，以勸後進也。湯幸得身當聖世，功曾未久，反聽邪臣鞭逐斥遠，使亡逃分竄，死無處所。遠覽之士，莫不計度，以爲湯功累世不可及。而湯過人情所有，湯尙如此，雖復破絕筋骨，暴露形骸，猶復制於唇舌，爲嫉妬之臣所繫虜耳。此臣所以爲國家尤戚戚也。

劉安諫伐閩越書

漢武帝初，閩越發兵，擊南越。南越上書告急。帝遣兩將軍將兵誅閩越。淮南王劉安上書諫之。

陛下臨天下，布德施惠，緩刑罰，薄賦斂，哀鰥寡，恤孤獨，養耆老，振匱乏，盛德上隆，和澤下洽。近者親附，遠者懷德。天下攝然，人安其生。攝者收斂之意，攝然猶安然也。自以沒身不見兵革。今聞有司舉兵，將以誅越。臣安竊爲陛下重之。越方外之地，鬻髮文身之民也。鬻古鬻字，不可以冠帶之國法度理也。自三代之盛，胡越不與受正朔。非強弗能服，威弗能制也。以爲不居之地，不收之民，不足以煩中國也。故古者封內甸服，封外侯服。侯衛賓服，蠻夷要服。戎狄荒服。遠近異勢也。自漢初定以來七十二年，吳越人相攻擊者，不可勝數。然天子未嘗舉兵而入其地也。臣聞越非有城郭邑里也。處谿谷之間，篁竹之中，習於水門，便於用舟。地深昧而多水險。中國之人，不知其勢阻，而入其地，雖百不當其一。得其地不可郡縣也。攻之不可暴取也。以地圖察其山川要塞，相去不過寸數，而閩

獨數百千里。險阻林叢，弗能盡著。視之若易，行之實艱。天下賴宗廟之靈，方內大甯。戴白之老，不見兵革。民得夫婦相守，父子相保。陛下之德也。越人名爲落臣，貢酎之奉，不輸大內。一卒之用，不給上事。自相攻擊，而陛下發兵救之，是反以中國而勞蠻夷也。且越人愚慧輕薄，負約反覆，其不用天子之法度，非一日之積也。一不奉詔，舉兵誅之。臣恐後兵革無時得息也。以上言閩越不宜用兵間者。數年歲比不登，民待賣爵鬻子，以接衣食。賴陛下德澤賑救之，得毋轉死溝壑。四年不登，五年復蝗，民生未復。今發兵行數千里，資衣糧入越地，輿輻而隄，領領卽嶺字。自貴州廣西廣東福建浙東皆共此嶺。古嶺內爲中國，嶺外爲百越。今之嶺內爲閩南江西浙西三省，嶺外則黔廣閩浙五省。挖舟而入水，行數百千里，夾以深林叢竹，水道上下擊石。林中多蝮蛇猛獸。夏月暑時，嘔泄霍亂之病，相隨屬也。曾未施兵接刃，死傷者必衆矣。前時南海王反，陛下先臣使將軍間忌將兵擊之。先臣淮南厲王長也，安之父，故稱先臣間忌人姓名也。以其軍降，處之上塗。後復反，會天暑多雨，樓船卒水居擊檣，未戰而病死者過半。親老涕泣，孤子號號，破家散業。迎尸千里之外，裹骸骨而歸，悲哀之氣，數年不息。長老至今以爲記。曾未入其地而禍已至此矣。臣聞軍旅之後，必有凶年。言民各以其愁苦之氣，薄陰陽之和，感天地之精，而災氣爲之生也。陛下德配天地，明象日月，恩至禽獸，澤及草木。一人有饑寒，不終其天年而死者，爲之悽愴於心。今方內無狗吠之警，而使陛下甲卒死亡，暴露中原，露瀆山谷，暴露謂骨露瀆謂血也。邊境之民，爲之早閉晏開，鼯不及夕。鼯音朝。臣安竊爲陛下重之。以上言軍士險巖死亡必多，不習南方地形者，多以越爲人衆兵強，能難邊城。能難邊城謂能爲難也。淮南全盛之時，多爲邊吏。臣竊聞之，與中國異。限以山高，人迹所絕，車道不通。天地所以隔內外也。其入中國必下領水。今關南之柳州河，江西之贛州河，皆領水也。此領水當指建昌河。廣信河言之。故下文言至餘干界中領水之山峭峻，礫石破舟，不可以大船載食糧下也。越人欲爲變，必先田餘干界中，積食糧，乃入伐材治船。邊城守候誠謹，越人有入伐材者，輒收捕焚其積聚。雖百越，奈邊城何。且越人懸力薄材，不能陸戰。又無車騎弓弩之用，然而不可入者，以保地險，而中國之人，不能其水土也。不能卽不耐也。猶今言不服水土，臣聞越甲卒不下數十萬，所以入之，五倍乃足。輓車奉饗者，不在其中。南方暑濕，近夏瘴熱，暴露水居，蝮蛇蠱生。蠱音整。毒也。疾瘴多作，兵未血刃，而病死者什二三。雖舉越國而虜之，不足以償所亡。臣聞道路言，閩越王弟甲弒而

殺之。甲以誅死。其罪未有所屬。陛下若欲來內。來同然。自同朝。謂招徠收餉之也。處之中國。使重臣臨存。施德垂賞。以招致之。此必播幼扶老。以歸聖德。若陛下無所用之。則繼其絕世。存其亡國。建其王侯。以爲畜越。此必委質爲藩臣。世共貢職。陛下以方寸之印。丈二之組。鎮撫方外。不勞一卒。不頓一戟。而威德並行。以上言越人易防且可就。今以兵入其地。此必震恐。以有司爲欲屠滅之也。必雉兔逃入山林險阻。雉兔逃謂如雉兔之驚而逃也。背而逃之。則復相羣聚。留而守之。歷歲經年。則士卒罷餉。食糧乏絕。男子不得耕稼樹種。婦人不得紡績織紙。丁壯從軍。老弱轉餉。后者無食。行者無糧。民苦兵事。逃亡者必衆。隨而誅之。不可勝盡。盜賊必起。臣聞長老言。秦之時。嘗使尉屠睢擊越。尉官也。屠睢姓名也。又使監祿鑿渠通竇。監官也。祿名也。越人逃入深山林叢。不可得攻。留軍屯守空地。曠日持久。士卒勞倦。越乃出擊之。秦兵大破。乃發適戍以備之。當此之時。內外騷動。百姓靡敝。行者不還。往者莫反。皆不聊生。亡逃相從。羣爲盜賊。於是山東之難始興。山東之難。謂秦二世時陳涉等作難。皆在太行山以東也。此老子所謂「師之所處。荆棘生之」者也。兵者凶事。一方有急。四面皆從。臣恐變故之生。奸邪之作。由此始也。周易曰。「高宗伐鬼方。三年而克之。」鬼方小蠻夷。高宗殷之盛天子也。以盛天子伐小蠻夷。三年而後克。言用兵之不可不重也。臣聞天子之兵。有征而無戰。言莫敢校也。如使越人蒙死徵侍。蒙死猶冒死也。徵幸。越人自知不能勝中國而徵求幸勝也。以逆執事之顏行。文穎曰。顏行猶雁行。鼎案。信陵君書請爲天下雁行頓刃。雁行者。相連而進。頓刃乃是居前當鋒刃也。顏行者。頓者。頓頸居前。行者若頓。與雁行義異。廝與之卒。有一不備而歸者。雖得越王之首。臣猶竊爲大漢羞之。以上言伐越之害。陛下以四海爲境。九州爲家。八藪爲圃。江漢爲池。生民之屬。皆爲臣妾。人徒之衆。足以奉千官之共。租稅之收。足以給乘輿之御。玩心神明。秉執聖道。負黼依憑玉几。南面而聽斷。號令天下。四海之內。莫不響應。陛下垂德惠以覆露之。使元元之民。安生樂業。則澤被萬世。傳之子孫。施之無窮。天下之安。猶泰山而四維之也。夷狄之地。何足以爲一日之間。而煩汗馬之勞乎。詩云。「王猶允塞。徐方既來。」言王道甚大。而遠方懷之也。臣聞之。農夫勞而君子養焉。愚者言而智者擇焉。臣安幸得爲陛下守藩。以身爲障蔽。人臣之任也。邊境有警。愛身之死而不畢其愚。非忠臣也。臣安竊恐將吏之以十萬之師。爲一使之任也。一使人便可鎮撫閩越。何必以十萬之師。僅代一使之任乎。以上言以德懷遠。不必用兵。

淮南王安收養文士。著淮南子。亦猶呂不韋好客養士。著呂覽一書也。此篇蓋亦八公輩所爲。陳義甚高。擗辭居要。無淮南子冗蔓之弊。而精警處相似。班史以載入嚴助傳中。與主父偃徐樂嚴安賈捐之諸篇并列。以見務廣窮兵之害。均爲有國者所當深鑒。後世如蘇子瞻代張方平諫用兵書。亦可與此數篇方軌並駕。

賈捐之罷珠厓對

賈捐之字君房。賈誼之曾孫也。武帝時。立儋耳珠厓郡。其後二十餘年。反者六次。昭帝五年。罷儋耳郡。并屬珠厓。至宣帝元帝時。珠厓反者又三次。帝欲大發軍討之。捐之以爲不啻擊。帝使王商詰問之。捐之以書對。

臣幸得遭明盛之朝。蒙危言之策。無忌諱之患。敢昧死竭卷卷。卷卷滄拳拳。亦作惓惓。臣聞堯舜。聖之盛也。禹入聖域而不僂。故孔子稱堯曰大哉。韶曰盡善。禹曰無間。以三代之德。地方不過數千里。西被流沙。東漸於海。朔南暨。聲教訖於四海。欲與聲教則治之。不欲與者不強治也。故君臣歌德。含氣之物。各得其宜。武丁成王。殷周之大仁也。然地東不過江黃。西不過氐羌。南不過蠻荆。北不過朔方。是以頌聲並作。視聽之類。咸樂其生。越裳氏重九譯而獻。此非兵革之所能致。及其衰也。南征不還。齊桓救其難。孔子定其文。以上言唐虞三代不務地廣以至平泰。與兵遠攻。貪外虛內。務欲廣地。不慮其害。然地南不過閩越。北不過太原。而天下潢畔。禍卒在於二世之末。長城之歌。至今未絕。以上秦務廣地而遠七。賴聖漢初興。爲百姓請命。平定天下。至孝文皇帝。閔中國未安。偃武行文。則斷獄數百。民賦四十。丁男三年而一事。本一年供役一次。因天下民多。故三年僅供一役也。事卽役也。時有獻千里馬者。詔曰。『鸞旗在前。屬車在後。吉日行五十里。師行日三十里。朕乘千里之馬。獨先安之。』於是還馬與道里費。而下詔曰。『朕不受獻也。其令四方毋求來獻。』當此之時。逸遊之樂絕。奇麗之賂塞。鄭衛之倡。微矣。夫後宮盛色。則賢者隱處。佞人用事。則諂臣杜口。而文帝不行。故諛爲孝文。廟稱太宗。以上文帝與民休息。不務遠略。至孝武皇帝。元狩六年。太倉之粟紅腐而不可食。都內之錢貫朽而不可校。乃探平城之事。平成高祖被圍之地。錄冒頓以來。數爲邊害。冒頓在。漢初最險。武帝欲報祖宗之仇。故與兵以伐匈奴。又兼用兵於西南北三地也。籍兵厲馬。因富民以擾服之。西連諸國。至於安息。東過碣石。以玄菟樂浪爲郡。北卻匈奴。萬里更起營塞。制南

海以爲八郡。則天下斷獄萬數。民賦數百。造鹽鐵酒榷之利。以佐用度。猶不能足。當此之時。寇賊並起。軍旅數發。父戰死於前。子門傷於後。女子乘亭郭。亭郭邊塞屯宿之所。猶今城上之更柵也。孤兒號於道。古文中五字句極少。此連用四句。聲調悲壯。可歌可泣。老母寡婦。飲泣巷哭。造設虛祭。想魂乎萬里之外。淮南王盜寫虎符。陰聘名士。關東公孫勇等。詐爲使者。是皆靡地秦大。征伐不休之故也。以上武帝好用兵。天下騷然。今天下獨有關東。關東大者。獨有齊楚。民衆久困。連年流離。離其城郭。相枕席於道路。人情莫親父母。莫樂夫婦。至嫁妻賣子。法不能禁。義不能止。此社稷之變也。今陛下不忍情情之忿。欲驅士衆。擠之大海之中。珠厓隔海。卽今之瓊州也。故曰擠之大侮之中。快心幽冥之地。非所以救助饑饉。保全元元也。詩云。『蠢爾蠻荆。大邦爲讎。』言聖人起則後服。中國衰則先畔。動爲國家難。自古而患之久矣。何况乃復其南方萬里之蠻乎。駱越之人。父子同川而浴。相習以鼻飲。與禽獸無異。本不足郡縣置也。顛顛獨居一海之中。顛顛與專專同。猶口區區也。霧露氣濕。多毒草。蟲蛇水土之害。人未見虜。戰士自死。又非獨珠厓有珠犀瑇瑁也。棄之不足惜。不擊不損威。其民譬猶魚鱉。何足貪也。臣竊以往者完軍言之。暴師曾未一年。兵出不踰千里。費四十餘萬萬。大司農錢盡。乃以少府禁錢續之。少府蓋帝之私錢。故曰禁錢。夫一隅爲不善。費尙如此。况於勞師遠攻。亡士毋功乎。求之往古則不合。施之當今又不便。臣愚以爲非冠帶之國。禹貢所及。春秋所治。皆可且無以爲。願遂棄珠厓。專用恤關東爲憂。

賈君房在當世有文名。故楊興曰。『君房下筆語言妙天下。』昔亡弟愨烈公溫甫好『語言妙天下』五字。尤好讀罷珠厓對。大抵西漢之文。氣味深厚。音調鏗鏘。迥非後世可及。固由其措詞之高。胎息之古。亦由其義理正大。有不可磨滅之質。韜也。如此篇及路溫舒尙德緩刑書。非獨文辭超前絕後。卽說理亦與六經同風已。

諸葛亮出師表

臣亮言。先帝創業未半。而中道崩殂。今天下三分。益州罷弊。此誠危急存亡之秋也。然待衛之臣。不懈於內。忠志之士。亡身於外者。蓋追先帝之殊遇。欲報之於陛下也。誠宜開張聖聽。以光先帝遺德。恢宏志士之氣。不宜妄自菲薄。引喻失義。以塞忠諫之路也。以上志義不可卑薄。宮中府中。俱爲一體。陟罰臧否。不宜異同。若有作姦犯科。

及爲忠善者。宜付有司。論其刑賞。以昭陛下平明之治。不宜偏私。使內外異法也。侍中侍郎郭攸之費禕董允等。此皆良實。志慮忠純。是以先帝簡拔以遺陛下。愚以爲官中之事。事無大小。悉以咨之。然後施行。必能裨補闕漏。有所廣益。將軍向寵。性行淑均。曉暢軍事。試用於昔日。先帝稱之曰『能』。是以衆議舉寵爲督。愚以爲營中之事。事無大小。悉以咨之。必能使行陣和睦。優劣得所也。親賢臣。遠小人。此先漢所以興隆也。親小人。遠賢臣。此後漢所以傾頽也。先帝在時。每與臣論此事。未嘗不歎息痛恨於桓靈也。侍中尙書長史參軍。此悉貞亮死節之臣也。願陛下親之信之。則漢室之隆。可計日而待也。以上言宮府內外視同一體。賢才尙可倚任。臣本布衣。躬耕於南陽。苟全性命於亂世。不求聞達於諸侯。先帝不以臣卑鄙。猥自枉屈。三顧臣於草廬之中。諮臣以當世之事。由是感激。遂許先帝以馳驅。後值傾覆。受任於敗軍之際。奉命於危難之間。爾來二十有一年矣。先帝知臣謹慎。故臨崩寄臣以大事也。受命以來。夙夜憂歎。恐託付不效。以傷先帝之明。故五月渡瀘。深入不毛。今南方已定。兵甲已足。當獎帥三軍。北定中原。庶竭驍鈍。攘除姦凶。興復漢室。還於舊都。此臣之所以報先帝而忠陛下之職分也。以上自敘生平志事。至於斟酌損益。進盡忠言。則攸之禕允之咎。以彰其慢。陛下亦宜自謀。以諍諫善道。察納雅言。深追先帝遺詔。臣不勝受恩感激。今當遠離。臨表涕泣。不知所云。以上總收一節。

古人絕大事業。恆以精心敬慎出之。以區區蜀漢一隅。而欲出師關中。北伐曹魏。其志願之宏大。事勢之艱危。亦古今所罕見。而此文不言其艱鉅。但言志氣宜恢宏。刑賞宜平允。君宜以親賢納言爲務。臣宜以討賊進諫爲職而已。故知不朽之文。必自襟度遠大。思慮精微始也。

前漢宮禁。尙參用士人。後漢宮中。如中常侍小黃門之屬。則悉用閹人。不復雜調他士。與府中有內外之分。大亂朝政。諸葛公鑒於桓靈之失。痛憾閹宦。故力陳宮中府中。宜爲一體。蓋恐宦官日親。賢臣日疏。內外隔閡也。公以丞相而兼元帥。凡宮中府中。以及營中之事。無不兼綜。公舉郭費董三人治宮中之事。舉向寵治營中之事。殆皆指留守成都者言之。其府中之事。則公所自治。百司庶政。皆公在軍中親爲裁決焉。

陸贄奉天請罷瓊林大盈二庫狀

右臣聞作法於涼。其弊猶貪。作法於貪。弊將安救。以上四句見左傳昭公九年。示人以義。其患猶私。示人以私。患必難弭。以上四句不知有所本否。故聖人之立教也。賤貨而尊讓。遠利而尚廉。天子不問有無。諸侯不言多少。百乘之室。不畜聚斂之臣。夫豈皆能忘其欲賄之心哉。誠懼賄之生人心。而開禍端。傷風教。而亂邦家耳。是以務鳩斂而厚其帑積之積者。鳩聚也。匹夫之富也。務散發而收其兆庶之心者。天子之富也。天子所作。與天同方。生之長之。而不恃其焉。成之收之。而不私其有。付物以道。混然忘情。取之不爲貪。散之不爲費。以言乎體。則博大。以言乎術。則精微。豈言天子理財之道。極大極精。亦何必撓廢公方。崇聚私貨。降至尊而代有司之守。辱萬乘以效匹夫之藏。虧法失民。誘姦聚怨。以斯制事。豈不過哉。以上言天子不蓄私財。今之瓊林大盈。自古悉無其制。傳諸耆舊之說。皆云創自開元。貴臣貪權。飾巧求媚。乃言郡邑貢賦所用。蓋各區分稅賦。嘗委之有司。以給經用。貢獻宜歸乎天子。以奉私求。元宗悅之。新是二庫。蕩心侈欲。萌祗於茲。迨乎失邦。終以鉅寇。記曰。『貨悖而入。必悖而出。』豈非其明效歟。以上言開元始置二庫。旋卽喪邦。陛下嗣位之初。務遵理道。敦行約儉。斥遠貪饕。雖內庫舊藏。未歸太府。而諸方曲獻。曲獻猶云私獻。不入禁闈。清風肅然。海內丕變。議者咸謂漢文卻馬。晉武焚裘之事。復見於當今。近以寇逆亂常。變與外幸。旣屬憂危之運。宜增警勵之誠。臣奉使軍營。出由行殿。忽覩右廊之下。勝列二庫之名。懼然若驚。不識所以。何則。天衢尙梗。天衢尙梗言世亂也。猶皇路清夷。言世治也。師旅方殷。瘡痍呻吟之聲。嗷昧未息。忠勤戰守之效。賞賚未行。而諸道貢珍。遽私別庫。萬目所視。孰能忍懷。以上言大盈未平。不宜遽私二庫。竊揣軍情。或生缺望。試詢候館之吏。公時奉使出外。故詢候館之吏。今之馳驅者。州縣皆至。公館迎候。兼探道路之言。果如所虞。果如所虞。卽果如所慮也。不作慮者。謂平仄馬蹄耳。積憾已懷。或忿形謗語。醜肆誣謠。頗含思亂之情。亦有悔忠之意。是知吐俗昏鄙。識昧高卑。不可以尊極臨。而可以誠義感。頃者大師初降。百物無儲。外扞兇徒。內防危堞。晝夜不息。迨將五旬。凍餒交侵。死傷相枕。畢命同力。竟夷大艱。良以陛下不厚其身。不私其欲。絕甘以同卒伍。輟食以昭功勞。無猛制而人不攜。懷所感也。無厚賞而人不怨。悉所無也。今者攻圍已解。衣食

已豐。而論讎方興。軍情稍阻。豈不以勇夫恆性。嗜貨矜功。其患難既與之同憂。而好樂不與之同利。苟異恬默。能無怨咨。此理之常。固不足怪。彼軍士怨讎之興。款款入情。婉婉動聽。此等處最不易及。記曰。『財散則民聚。財聚則民散。』唐諱民皆作人。各書多有未盡改者。豈非其殷鑒歟。聚怨難任。蓄怨終泄。其患豈徒民散而已。亦將慮有構姦鼓亂。干紀而強取者焉。以上言軍情。鬱怨恐生變亂。夫國家作事。以公共爲心者。人必樂而從之。以私奉爲心者。人必拂而叛之。故燕昭築金臺。天下稱其賢。殷紂作玉杯。百代傳其惡。蓋爲人與爲己殊也。周文之圍百里。時患其尙小。齊桓之圍四十里。時病其太大。蓋同利與專利異也。爲人上者。當辨察茲理。灑濯其心。奉三無私。以壹有衆。壹對二。有衆對無私。開後世借對之法。究不宜專。人或不率。於是用刑。然則宣其利而禁其私。天子所持以理天下之具也。捨此不務。而壅利行私。欲人無貪。不可得已。今茲二庫珍幣所歸。不須度支。是行私也。不給經費。非宣利也。物情離怨。不亦宜乎。以上言所以致離怨之由。智者因危而建安。明者矯失而成德。以陛下天姿英聖。儻加之見善必遷。是將化蓄怨爲銜恩。反過差爲至當。促殄遺孽。永垂鴻名。易如轉規。指顧可致。然事有未可知者。但在陛下行與否耳。能則安。否則危。能則成德。否則失道。此乃必定之理也。願陛下慎之。陛下誠能近想重圍之殷憂。追戒平居之專欲。器用取給。不在過豐。衣食所安。必以分下。凡在二庫貨賄。盡令出賜有功。坦然而布懷。與衆同欲。是後納貢。必歸有司。每獲珍華。先給軍賞。瓌異織利。一無上供。推赤心於其腹中。降殊恩於其望外。將卒慕陛下必信之賞。人思建功。兆庶悅陛下改過之誠。孰不歸德。如此亂則必靖。賊必平。徐駕六龍。旋復都邑。興行隆典。整輯禁綱。乘輿有舊儀。郡國有恆賦。天子之貴。豈當憂貧。是乃散其小儲。而成其大儲也。捐其小寶。而固其大寶也。舉一事而衆美具行之。又何疑焉。以上言轉弱爲福。改過散財。愆少失多。廉賈不處。塌近迷遠。中人所非。况乎大聖應機。固當不俟終日。不勝管窺願效之至。謹陳冒以聞。謹奏。

駢體文爲大雅所差稱。以其不能發揮精義。并恐以蕪累而傷氣也。陸公則無一句不對。無一字不諧。平仄無一聯不調。馬蹄而義理之精。足以比隆濂洛。氣勢之盛。亦堪方駕韓蘇。退之本爲陸公所取士。予瞻奏議。終身效法陸公。而公之剖晰事理。精當不移。則非韓蘇所能及。吾輩學之。亦須略用對句。稍調平仄。庶筆仗整齊。令人刮目耳。

蘇軾代張方平諫用兵書

臣聞好兵猶好色也。傷生之事非一。而好色者必死。賊民之事非一。而好兵者必亡。此理之必然者也。夫惟聖人之兵。皆出於不得已。故其勝也。享安全之福。其不勝也。必無意外之患。後世用兵。皆得已而不可。故其勝也。則變遲而禍大。其不勝也。則變速而禍小。是以聖人不計勝負之功。而深戒用兵之禍。何者。與師十萬。日費千金。內外騷動。殆於道路者七十萬家。內則府庫空虛。外則百姓窮匱。飢寒逼迫。其後必有盜賊之憂。死傷愁怨。其終必致水旱之報。上則將帥擁衆。有跋扈之心。下則士衆久役。有潰叛之志。變故百出。皆由用兵。至於與事首議之人。冥請尤重。蓋以平民無故。緣兵而死。怨氣充積。必有任其咎者。數句非僞者之言。亦失陳奏之體。是以聖人畏之重之。非不得已。不敢用也。以上傳言用兵。必有稍災自古人。主好動干戈。由敗而亡者。不可勝數。臣今不敢復言。請爲陛下言其勝者。秦始皇既平六國。復事胡越。戍役之患。被於四海。雖拓地千里。遠過三代。而墳土未乾。天下怨叛。二世被害。子嬰被擒。滅亡之酷。自古所未嘗有也。漢武帝承文景富溢之餘。首挑匈奴。兵連不解。遂使侵尋及于諸國。歲歲調發。所向成功。建元之間。兵禍始作。是時豈允旗出。長與天等。其春戾太子生。自是師行三十餘年。死者無數。及巫蠱事起。京師流血。僵尸數萬。太子父子皆敗。班固以爲太子生長於兵。與之終始。帝雖悔悟自克。而歿身之恨。已無及矣。隋文帝既下江南。續事夷狄。煬帝嗣位。此心不衰。皆能誅滅疆國。威震萬里。然而民怨盜起。亡不旋踵。唐太宗神武無敵。尤喜用兵。既已破滅突厥。高昌。吐谷渾等。猶且未厭。親駕遼東。皆志在立功。非不得已而用。其後武氏之難。唐室凌遲。不絕如綫。蓋用兵之禍。物理難逃。不然。太宗仁聖寬厚。克己裕人。幾至刑措。而一傳之後。子孫塗炭。此豈爲善之報也哉。武氏之禍。謂由太宗窮兵所致。亦非事實。由是觀之。漢唐用兵於寬仁之後。故其勝而僅存。秦隋用兵於殘暴之餘。故其勝而遂滅。臣每讀書至此。未嘗不掩卷流涕。傷其計之過也。若使此四君者。方其用兵之初。隨即敗衄。惕然戒懼。知用兵之難。則禍敗之興。當不至此。不幸每舉輒勝。故狃於功利。慮患不深。臣故曰。勝則變遲而禍大。不勝則變速而禍小。不可不察也。以上用兵勝者。亦有大禍。敗者。更不。必論昔仁宗皇帝。覆育天下。無意用兵。將士情偷。兵革朽鈍。元昊乘間。竊發西鄙。延安涇原麟府之間。敗者三四。

所喪動以萬計。而海內晏然。兵休事已。而民無怨言。國無遺患。何者。天下臣庶。知其無好兵之心。天地鬼神。諒其有不得已之實故也。以上仁宗雖用兵而民不怨。今陛下天錫勇智。意在富彊。卽位以來。繕治甲兵。伺候鄰國。羣臣百寮。窺見此指。多言用兵。其始也。觸臣執國命者。無憂深思遠之心。樞臣當國論者。無慮害持難之識。在臺諫之職者。無獻替納忠之議。從微至著。遂成厲階。既而薛向爲橫山之謀。韓絳效深入之計。陳升之呂公弼等。陰與之協力。師徒喪敗。財用耗屈。較之寶元慶歷之敗。不及十一。然而天怒人怨。邊兵背叛。京師騷然。陛下爲之旰食者累月。何者。用兵之端。陛下作之。是以吏士無怒敵之意。而不直陛下也。以上今日用兵而民怨之。尙賴祖宗積累之厚。皇天保佑之深。故使兵出無功。感悟聖意。然淺見之士。方且以敗爲恥。力欲求勝。以稱上心。於是王韶構禍於熙河。章惇造孽於梅山。熊本發難於渝瀘。然此等皆戕賊已降。俘纍老弱。困弊腹心。而取空虛無用之地。以爲武功。使陛下受此虛名。而忽於實禍。勉強砥礪。奮於功名。故沈起劉彝復發於安南。使十餘萬人。暴露瘴毒。死者十而五六。道路之人。弊於輸送。賞糴器械。不見敵而盡。以爲用兵之意。必且少衰。而李憲之師復出於洮州矣。今師徒克捷。銳氣方盛。陛下喜於一勝。必有輕視四夷。陵侮敵國之意。天意難測。臣實畏之。以上戰勝而銳氣方盛。兵無已時。且夫戰勝之後。陛下可得而知者。凱旋捷奏。拜表稱賀。赫然耳目之觀耳。至於遠方之民。肝腦屠於白刃。筋骨絕於餽餉。流離破產。鬻賣男女。熏眼折臂。自經之狀。陛下必不得而見也。慈父孝子。狐臣寡婦之哭聲。陛下必不得而聞也。譬猶屠殺牛羊。剝鬻魚鼈。以爲膳羞。食者甚美。死者甚苦。使陛下見其號呼於挺刃之下。宛轉於刀几之間。雖入珍之美。必將投筯而不忍食。而况用人之命。以爲耳目之觀乎。以上戰勝亦可哀。而不足喜。姚姪傳氏謂東坡此書是子虛烏有之事。方平並未入袁。蓋在黃州時聞承榮徐禧之敗。神宗悔痛。故追作是文。以發揮己意。其以屠殺膳羞爲譬。亦是黃州戒殺時議論也。國藩謂東坡好佛。以好殺喻讀兵。理自可通。惟首段言冥誦尤重。則失體耳。且使陛下將卒精強。府庫充實。如秦漢隋唐之君。既勝之後。禍亂方興。尙不可救。而況所在將吏。罷軟凡庸。較之古人。萬萬不逮。而數年以來。公私窘乏。內府累世之積。掃地無餘。州郡征稅之儲。上供殆盡。百官俸廩。僅而能繼。南郊賞給。久而未辦。以此舉動。雖有智者。無以善其後矣。且飢疫之後。所在盜賊。繼起。京東河北。尤不可言。若軍事一興。橫斂隨作。民窮而無告。其勢不爲大盜。無以自全。邊事方深。內患復起。則勝廣

之形。將在於此。此老臣所以終夜不寐。臨食而歎。至於慟哭而不能止也。以上兵弱餉絀盜賊將起且臣聞之。凡舉大事。必順天心。天之所向。以之舉事。必成。天之所背。以之舉事。必敗。蓋天心向背之迹。見於災祥豐歉之間。今自近歲日蝕星變。地震山崩。水旱癘疫。連年不改。民死將半。天心之向背。可以見矣。而陛下方且斷然不顧。與事不已。譬如人子得過於父母。惟有恭順靜思。引咎自責。庶幾可解。今乃紛然詰責奴婢。恣行箠楚。以此事親。未有見赦於父母者。故臣願陛下遠覽前世興亡之迹。深察天心向背之理。絕意兵革之事。保疆睦鄰。安靜無爲。固社稷長久之計。上以安二宮朝夕之養。下以濟四方億兆之命。則臣雖老死。禱壑。瞑目於地下矣。以上言察天心之向背與愛庶民。昔漢祖破滅羣雄。遂有天下。光武百戰百勝。祀漢配天。然至白登被圍。則講和親之議。西域請吏。則出謝絕之言。此二帝者。非不知兵也。蓋經變既多。則慮患深遠。今陛下深居九重。而輕議討伐。老臣庸懦。私竊以爲過矣。然人臣欲說於君。因其既厭而止之。則易爲力。迎其方銳而折之。則難爲功。凡有血氣之倫。皆有好勝之意。方其氣之盛也。雖布衣賤士。有不可奪。自非智識特達。度量過人。未有能勇於奮發之中。舍己從人。惟義是聽者也。今陛下盛氣於用武。勢不可回。臣非不知。而獻言不已者。誠見陛下聖德寬大。聽納不疑。故不敢以衆人好勝之常心。望於陛下。且意陛下他日親見用兵之害。必將哀痛悔恨。而追咎左右大臣。未嘗一言。臣亦將老且死。見先帝於地下。亦有以藉口矣。惟陛下哀而察之。

東坡之文。其長處在徵引史事。切實精當。又善設譬諭。凡難顯之情。他人所不能達者。坡公輒以譬諭明之。如百步洪詩。首數句設譬入端。此外詩文。亦幾無篇不設譬者。此文以屠殺陰差。喻輕視民命。以箠楚奴婢。喻上忤天心。皆巧於構想。他人所百思不到者。既讀之而適爲人人意中所有。古今奏議。推賈長沙陸宣公蘇文忠三人爲超前絕後。余謂長沙明於利害。宣公明於義理。文忠明於人情。吾輩陳言之道。縱不能兼明此三者。亦須有一二端明達深透。庶無格格不吐之態。

蘇軾上皇帝書

臣近者不度愚賤。輒上封章。言買鑿事。自知瀆犯天威。罪在不赦。席藁私室。以待釜鉞之誅。而側聽逾旬。威命不

至問之府司。則買鑿之事。尋以停罷。乃知陛下不惟赦之。又能聽之。驚喜過望。以至感泣。何者。改過不吝。從善如流。此堯舜禹湯所以勉強而力行。秦漢以來之所絕無。而僅有。顧此買鑿毫髮之失。豈能上累日月之明。而陛下翻然改命。曾不移刻。則所謂智出天下而聽於至愚。威加四海而屈於匹夫。臣今知陛下可與爲堯舜。可與爲湯武。可與富民而措刑。可與強兵而伏戎虜矣。有君如此。其忍負之。惟當披露腹心。捐棄肝腦。盡力所至。不知其他。乃者。臣亦知天下之事。有大於買鑿者矣。而獨區區以此爲先者。蓋未信而誅。聖人不與。交淺言深。君子所戒。是以試論其小者。而其大者固將有待而後言。今陛下果赦而不誅。則是既已許之矣。許而不言。臣則有罪。是以願終言之。臣之所欲言者三。願陛下結人心。厚風俗。存紀綱而已。以上總起篇首三百餘字。失之尤覺。漢唐制科對策。往往如此。今京曹奏疏。首段亦多浮詞。若督撫奏疏。宜就事論事。閒語不可太多。人莫不有所恃。人臣恃陛下之命。故能役使小民。恃陛下之法。故能勝伏強暴。至於人主所恃誰與。書曰。『予臨兆民。殫乎若朽索之馭六馬。』言天下莫危於人主也。聚則爲君臣。散則爲仇讎。聚散之間。不容毫釐。故天下歸往。謂之王。人各有心。謂之獨夫。由此觀之。人主之所恃者。人心而已。人心之於人主也。如木之有根。如鑿之有膏。如魚之有水。如農夫之有田。如商賈之有財。木無根則槁。鑿無膏則滅。魚無水則死。農夫無田則饑。商賈無財則貧。人主失人心則亡。此必然之理也。不可道之災也。其爲可畏。從古以然。苟非樂禍好亡。狂易喪志。孰敢肆其胸臆。輕犯人心乎。昔子產焚載書以弭衆言。賂伯石以安巨室。以爲衆怒難犯。專欲難成。而孔子亦曰。『信而後勞其民。未信則以爲厲己也。』惟商鞅變法。不顧人言。雖能驟致富強。亦以召怨天下。使其民知利而不知義。見刑而不見德。雖得天下。旋踵而亡。至於其身。亦卒不免。負罪出走。而諸侯不納。車裂以徇。而秦人莫哀。君臣之間。豈願如此。宋襄公雖行仁義。失衆而亡。田常雖不義。得衆而強。是以君子未論行事之是非。先觀衆心之向背。謝安之用諸桓。未必是。而衆之所樂。則國以又安。庾亮之召蘇峻。未必非。而勢有不可。則反爲危辱。自古迄今。未有和易同衆而不安。剛果自用而不危者也。以上傳言給人心以下。臚列失人心之事。今陛下亦知人心之不悅矣。中外之人。無賢不肖。皆言祖宗以來。治財用者。不過三司。使副判官。經今百年。未嘗闕事。今者無故又創一司。號曰制置。三司條例司。六七少年。日夜講求於內。使者四十餘輩。分行營幹於外。造端宏大。民實驚疑。創法新奇。吏皆惶惑。賢者則求其說而不可得。

未免於憂。小人則以其意度於朝廷。遂以爲謗。謂陛下以萬乘之主而言利。謂執政以天子之宰而治財。商賈不行。物價騰踊。近自淮甸。遠及川蜀。喧傳萬口。論說百端。或言京師正店。議置監官。藥路深山。當行酒禁。拘收僧尼。常住。減剋兵吏廩祿。如此等類。不可勝言。而甚者。至以爲欲復肉刑。斯言一出。民且狼顧。陛下與二三大臣。亦聞其語矣。然而莫之顧者。徒曰。『我無其事。又無其意。何恤於人言。』夫人言雖未必皆然。而疑似則有以致謗。人必貪財也。而後人疑其盜。人必好色也。而後人疑其淫。何者。未置此司。則無此謗。豈去歲之人皆忠厚。而今歲之人皆虛浮。孔子曰。『工欲善其事。必先利其器。』又曰。『必也。正名乎。』今陛下操其器而諱其事。有其名而辭其意。雖家置一喙。以自解。市列千金。以購人。人必不信。謗亦不止。夫制置三司條例司。求利之名也。六七少年。與使者四十餘輩。求利之器也。驅鷹犬而赴林藪。語人曰。『我非獵也。』不如放鷹犬而獸自馴。操網罟而入江湖。語人曰。『我非漁也。』不如捐網罟而人自信。善言事者。每於最難明之處。設譬喻以明之。東坡詩文。皆以此擅長。故臣以爲消讒隱而召和氣。復人心而安國本。則莫若罷制置三司條例司。夫陛下之所以創此司者。不過以興利除害也。使罷之而利不興。害不除。則勿罷。罷之而天下悅。人心安。興利除害。無所不可。則何害而不罷。陛下欲去積弊而立法。必使宰相熟議而後行。事若不由中書。則是亂世之法。聖君賢相。夫豈其然。必若立法不免由中書。熟議不免使宰相。此司之設。無乃冗長而無名。以上言不宜設制置三司條例司之官。智者所圖。貴於無迹。漢之文景。紀無可書之事。唐之房杜。傳無可載之功。而天下之言治者。與文景。言賢者。與房杜。蓋事已立而迹不見。功已成而人不知。故曰善用兵者無赫赫之功。豈惟用兵。事莫不然。今所圖者。萬分未獲其一也。而迹之布告天下者。若泥中之鬥獸。亦可謂拙謀矣。陛下誠欲富國。擇三司官屬。與漕運使副。而陛下與二三大臣。孜孜講求。磨以歲月。則積弊自去。而人不知。但恐立志不堅。中道而廢。孟子有言。『其進銳者其退速。』若有始有卒。自可徐徐。十年之後。何事不立。孔子曰。『欲速則不達。見小利則大事不成。』使孔子而非聖人。則此言亦不必用。書曰。『謀及卿士。至於庶人。翕然大同。乃底元吉。若逆多而從少。則靜吉而作凶。』今自宰相大臣。既已辭免不爲。則外之議論。斷亦可知。宰相人臣也。且不欲以此自污。而陛下獨安受其名而不辭。非臣愚之所識也。宰相人臣也。四句有傾軋王介甫之意。君臣胥胥。幾一年矣。而富國之效。茫如捕風。徒聞內帑出數百萬緡。祠部度五千餘人。

耳。以此爲術。其誰不能。以上言謀事貴於無迹。且遣使縱橫。本非令典。漢武遣繡衣直指。桓帝遣八使。皆以守宰
狼籍盜賊公行。出於無術。行此下策。宋文帝元嘉之政。比於文景。當時責成郡縣。未嘗遣使。及至孝武以郡縣遲
緩。始命臺使督之。以至蕭齊。此弊不革。故景陵王子良上疏。極言其事。以爲此等朝辭禁門。情態即異。暮宿州縣。
威福便行。驅迫郵傳。折辱守宰。公私煩擾。民不聊生。唐開元中。宇文融奏置勸農判官使。裴寬等二十九人。並攝
御史。分行天下。招攜戶口。檢實漏田。時張詵楊瑒皇甫璋楊相如皆以爲不便。而相繼罷黜。雖得戶八十餘萬。皆
州縣希旨。以主爲客。以少爲多。及使百官集議。都省而公卿以下。懼融威勢。不敢異辭。陛下試取其傳讀之。觀其
所行。爲是爲否。近者均稅寬恤。冠蓋相望。朝廷亦旋覺其非。而天下至今以爲謗。曾未數歲。是非較然。臣恐後之
視今。猶今之視昔。且其所遣。尤不適宜。事少而員多。人輕而權重。則人多不服。或致侮慢。以興爭
事少而員多。則無以爲功。必須生事以塞責。陛下雖嚴賜約束。不許邀功。然人臣事君之常情。不從其令而從其
意。今朝廷之意好動而惡靜。好同而惡異。指意所在。誰敢不從。臣恐陛下赤子。自此無甯歲矣。以上論遣使太多
至於所行之事。行路皆知其難。何者。汴水濁流。自生民以來。不如種稻。秦人之歌曰。『涇水一石。其泥數斗。且漚
且糞。長我禾黍。』何嘗曰。『長我粳稻耶。』今欲陂而清之。萬頃之稻。必用千頃之陂。一歲一淤。三歲而滿矣。陛
下遽信其說。且使相視地形。萬一官吏苟且順從。真謂陛下有意興作。上糜帑廩。下奪農時。隄防一開。水失故道。
雖食議者之肉。何補於民。天下久平。民物滋息。四方遺利。蓋略盡矣。今欲鑿空尋訪水利。所謂即鹿無虞。豈惟徒
勞。必大煩擾。凡所肇畫利害。不問何人。小則隨事酬勞。大則量才錄用。若官私格阻。並行黜降。不以赦原。若才力
不辦與修。便許申奏。替換。賞可謂重。罰可謂輕。然並終不言。諸色人妄有申陳。或官私誤與功役。當得何罪。如此
則妄庸輕剽。浮浪姦人。自此爭言水利矣。成功則有賞。敗事則無誅。官司雖知其疏。豈可便行抑退。所在追集老
少。相視可否。吏卒所過。雞犬一空。若非灼然難行。必須且爲興役。何則。格阻之罪重。而誤興之過輕。人多愛身。勢
必如此。且古陂廢堰。多爲側近冒耕。歲月既深。已同永業。苟欲興復。必盡追收。人心或搖。甚非善政。又有好訟之
黨。多怨之人。妄言某處可作陂渠。規壞所怨田產。或指人舊業以爲官陂。冒佃之訟。必倍今日。臣不知朝廷本無
一事。何苦而行此哉。以上論興水利自古役人必用鄉戶。猶食之必用五穀。衣之必用絲麻。濟川之必用舟楫。行

地之必用牛馬。雖其間或有以他物充代。然終非天下所可常行。今者徒聞江浙之間。數郡雇役。王荆公新法。惟雇役爲善政。當日諸君子亦爭之不已。厥後司馬溫公改雇役。仍爲差役。東坡又力爭之。雇役。猶今軍中雇募民夫。給與飯錢也。差役。猶今擲人營夫。不給錢文也。而欲措之天下。是猶見燕晉之棗栗。岷蜀之踴鷓。而欲以廢五穀。豈不難哉。又欲官賣所在坊場。以充衙前雇直。衙前猶差總之名也。凡縣有大役如運送官物錢糧之類。則責成衙前爲夫役之總。故宋時派充衙前者。鄉之富民。立即貧窮。韓魏公司馬溫公皆有疏論之。王荆公以坊場爲衙前之雇直。較之前此全不給錢者已稍優矣。雖有長役。更無酬勞。長役所得既微。自此必漸衰散。則州郡事體。憔悴可知。士大夫捐親戚。棄墳墓。以從官於四方者。宣力之餘。亦欲取樂。此人之至情也。若凋弊太甚。廚傳蕭然。則似危邦之陋風。恐非太平之盛觀。陛下誠慮及此。必不肯爲。且今法令莫嚴於御軍。軍法莫嚴於逃竄。禁軍三犯。廂軍五犯。大率處死。然逃軍常半天下。不知雇人爲役。與廂軍何異。若有逃者。何以罪之。其勢必輕於逃軍。則其逃必甚於今日。爲其官長。不亦難乎。近者雖使鄉戶頗得雇人。然至於所雇逃亡。鄉戶猶任其責。今遂欲於兩稅之外。別立一科。謂之庸錢。以備官雇。則雇人之責。官所自任矣。自唐楊炎廢租庸調。以爲兩稅。取大歷十四年應於賦斂之數。以定兩稅之額。則是租調與庸。兩稅既兼之矣。今兩稅如故。奈何復欲取庸。聖人立法。必慮後世。豈可於兩稅之外。別立科名。萬一不幸後世有多欲之君。輔之以聚斂之臣。庸錢不除。差役仍舊。使天下怨讟。推所從來。則必有任其咎者矣。又欲使坊郭等第之民。鄉戶均役。品官形勢之家。與齊民並事。其說曰。周禮田不耕者出屋粟。宅不毛者有里布。而漢世宰相之子。不免戍邊。此其所以藉口也。古者官養民。今者民養官。給之以田而不耕。勸之以農而不力。於是乎有里布屋粟夫家之征。而民無以爲生。去爲商賈。事勢當爾。何名役之。且一歲之戍。不過三日。三日之雇。其直三百。今世三大戶之役。自公卿以降。無得免者。其費豈特三百而已。大抵事若可行。不必皆有故事。若民所不悅。俗所不安。縱有經典明文。無補於怨。若行此二者。必怨無疑。女戶單丁。蓋天民之窮者也。古之王者。首務恤此。而今陛下首欲役之。此等苟非戶將絕而未亡。則是家有丁而尙幼。若假之數歲。則必成丁而就役。老死而沒官。富有四海。忍不加恤。以上論雇役。孟子曰。『始作俑者。其無後乎。』春秋書作邱甲。用田賦。皆重其始爲民患也。青苗放錢。自昔有禁。今陛下始立成法。每歲常行。雖云不許抑配。而數世之後。暴君

汧吏陛下能保之與。異日天下恨之。國史記之曰。青苗錢自陛下始。豈不惜哉。且東南買絹。本用現錢。陝西糧草。不許折兌。朝廷既有著令。職司又每舉行。然而買絹未嘗不折鹽。糧草未嘗不折鈔。乃知青苗不許抑配之說。亦是空文。只如治平之初。揀刺義勇。嘗時詔旨慰諭。明言永不戍邊。著在簡書。有如盟約。於今幾日。論議已搖。或以代還東軍。或欲抵換弓手。約束難恃。豈不明哉。買絹之初。本發見錢。後亦失信。揀刺義勇之初。本言永不戍邊。後亦失信。以諭王介甫放青苗錢之初。本言不許抑配。不久亦必失信也。東坡言事。或引古事以譬之。或引近事以譬之。取其易曉。縱使此令決行。果不抑配。計其間願請之戶。必皆孤貧不濟之人家。若自有贏餘。何至與官交易。此等鞭撻已急。則繼之逃亡。逃亡之餘。則均之保鄰。勢有必至。理有固然。今之領常平倉穀者。亦皆孤貧不濟之人。况宋領青苗錢。須還利錢乎。且夫常平之爲法也。可謂至矣。所守者約而所及者廣。借使萬家之邑。止有千斛。而穀貴之際。千斛在市。物價自平。一市之價既平。一邦之食自足。無操瓢乞丐之弊。無呈正催驅之勞。今若變爲青苗。家貸一斛。則千戶之外。孰救其飢。且常平官錢。常惠其少。若盡數收糶。則無借貸。若留充借貸。則所糶幾何。乃知常平青苗。其勢不能兩立。壞彼成此。所喪愈多。虧官害民。雖悔何逮。臣竊計陛下欲考其實。則亦必問人。知陛下方欲力行。必謂此法有利無害。以臣愚見。恐未可憑。何以明之。臣頃在陝西見刺義勇。提舉諸縣。臣嘗親行。愁怨之民。哭聲振野。當時奉使還者。皆言民盡樂爲。希合取容。自古如此。又以刺義勇時。民怨而帝不聞。諭青苗一事。亦民怨而帝不聞。不然。則山東之盜。二世何緣不覺。南詔之敗。明皇何緣不知。今雖未至於斯。亦望陛下審聽而已。以上論青苗錢。昔漢武之世。財力匱竭。用買人桑弘羊之說。買賤賣貴。謂之均輸。於時商賈不行。盜賊滋熾。幾至於亂。孝昭既立。學者爭排其說。霍光順民所欲。從而予之。天下歸心。遂以無事。不意今者此論復興。立法之初。其說尙淺。徒言徙貴就賤。用近易遠。然而廣置官屬。多出緡錢。豪商大賈。皆疑而不敢動。以爲雖不明言販賣。然既已許之變易。變易既行。而不與商賈爭利者。未之聞也。夫商賈之事。曲折難行。其買也先期而予錢。其賣也後期而取直。多方相濟。委曲相通。倍稱之息。由此而得。今官買是物。必先設官置吏。簿書廩祿。爲費已厚。非良不售。非賄不行。是以官買之價。比民必貴。及其賣也。筭復如前。商賈之利。何緣而得。朝廷不知慮此。乃捐五百萬緡以與之。此錢一出。恐不可復。縱使其間薄有所獲。而征商之額。所損必多。均輸。猶官運之鹽也。商稅。猶各卡。

之抽釐也。官饗多則釐稅少。自然之理。今有人爲其主牧牛牟者。不告其主。以一牛而易五牛。一牛之失。則隱而不言。五牛之獲。則指爲勞績。陛下以爲壞常平而言青苗之功。虧商稅而取均輸之利。何以異此。以上論均輸陛下天機洞照。聖略如神。此事至明。豈有不曉。必謂已行之事。不欲中變。恐天下以爲執德不一。用人不終。是以遲留歲月。庶幾萬一。臣竊以爲過矣。古之英主。無出漢高。酈生謀撓楚權。欲復六國。高祖曰。『善。趣刻印。』及聞留侯之言。吐哺而罵曰。『趣銷印。』夫稱善未幾。繼之以罵。刻印銷印。有同兒戲。何嘗累高祖之知人。適足以明聖人之無我。陛下以爲可而行之。知其不可而罷之。至聖至明。無以加此。議者必謂民可與樂成。難與慮始。故勸陛下堅執不顧。期於必行。此乃戰國貪功之人。行險徼幸之說。陛下若信用之。則是徇高論而逆至情。持空名而邀寶祿。未及樂成。而怨已起矣。臣之所願結人心者。此之謂也。以上言不宜堅執前說。結人心。止此士之進言者。爲不少矣。亦嘗有以國家之所以存亡。歷數之所以長短。告陛下者乎。夫國家之所以存亡者。在道德之淺深。而不在于強與弱。歷數之所以長短者。在風俗之厚薄。而不在于富與貧。道德誠深。風俗誠厚。雖貧且弱。不害於長而存。道德誠淺。風俗誠薄。雖強且富。不救於短而亡。人主知此。則知所輕重矣。是以古之賢君。不以弱而亡。道德不以貧而傷風俗。而智者觀人之國。亦必以此察之。齊至強也。周公知其後必有篡弑之臣。衛至弱也。季子知其後亡。吳破楚入郢。而陳大夫逢滑知楚之必復。晉武既平吳。何曾知其將亂。隋文既平陳。房喬知其不久。元帝斬郢支。朝呼韓。功多於武宣矣。偷安而王氏之蠶生。宣宗收燕趙。復河滄。力強於憲武矣。銷兵而龐勛之亂起。臣願陛下務崇道德。而厚風俗。不願陛下急於有功。而貪富強。使陛下富如隋。強如秦。西取靈武。北取燕薊。謂之有功可也。而國之長短。則不在此。夫國之長短。如人之壽夭。人之壽夭。在元氣。國之長短。在風俗。世有尪羸而壽考。亦有盛壯而暴亡。若元氣猶存。則尪羸無害。及其已耗。則盛壯而愈危。是以善養生者。慎起居。節飲食。導引關節。吐故納新。不得已而用藥。則擇其品之上。性之良。可以久服而無害者。則五藏和平而壽命長。不善養生者。薄節慎之功。遍吐納之效。厭上藥而用下品。伐真氣而助強陽。根本已空。僂仆無日。天下之勢。與此無殊。故臣願陛下愛惜風俗。如護元氣。以上言培養國脈不在富強。古之聖人。非不知深刻之法。可以齊衆。勇悍之夫。可以集事。忠厚近於迂闊。老成初若遲鈍。然終不肯以彼而易此者。知其所得小而所喪大也。曹參賢相也。曰。『慎無擾獄市。』黃霸

循吏也。曰「治道去泰甚。」或譏謝安以清談廢事。安笑曰。「秦用法吏二世而亡。」劉晏爲度支。專用果銳少年。務在急速集事。好利之黨。相師成風。德宗初卽位。擢崔祐甫爲相。祐甫以道德寬大。推廣上意。故建中之政。其聲翕然。天下仰望。庶幾正觀。及盧杞爲相。輒上以刑名整齊天下。馴致澆薄。以及播遷。我仁祖之御天下也。持法至寬。用人有敘。專務掩覆過失。未嘗輕改舊章。然考其成功。則曰未至。以言乎用兵。則十出而九敗。以言其府庫。則僅足而無餘。徒以德澤在人。風俗知義。是以升遐之日。天下如喪考妣。社稷長遠。終必賴之。則仁祖可謂知本矣。今議者不察。徒見其末年吏多因循。事不振舉。乃欲矯之以苛察。齊之以智能。招來新進勇銳之人。以圖一切速成之效。未享其利。澆風已成。且天時不齊。人誰無過。國君含垢。至察無徒。若陛下多方包容。則人材取次可用。必欲廣置耳目。務求瑕疵。則人不自安。各圖苟免。恐非朝廷之福。亦豈陛下所願哉。漢文欲用虎圈舊夫。釋之以爲利口傷俗。今若以口舌捷給而取士。以應對遲鈍而退人。以虛誕無實爲能文。以矯激不仕爲有德。則先王之澤。遂將散微。以上言用人宜求老成忠厚。不取新銳刻深。自古用人。必須歷試。雖有卓異之器。必有已成之功。一則使其更變而知難。事不輕作。一則待其功高而望重。人自無辭。昔先主以黃忠爲後將軍。而諸葛亮憂其不可以爲忠之名望。素非關張之倫。若班爵遽同。則必不悅。其後關羽果爲言。以黃忠豪勇之姿。以先主君臣之契。尙復慮此。而况其他。世嘗謂漢文不用賈生。以爲深恨。臣嘗推究其旨。竊謂不然。賈生固天下之奇才。所言亦一時之良策。然請爲屬國。欲係單于。則是處士之大言。少年之銳氣。昔高祖以三十萬衆。困于平城。當時將相羣臣。豈無賈生之比。三表五餌。人知其疏。而欲以困中行說。尤不可信。兵凶器也。而易言之。正如趙括之輕秦。李信之易楚。若文帝亟用其說。則天下殆將不安。使賈生嘗歷艱難。亦必自悔其說。用之晚歲。其術必精。不幸喪亡。非意所及。不然。文帝豈棄才之主。終讜豈蔽賢之士。至於晁錯。尤號刻薄。文帝之世。止於太子家令。而景帝既立。以爲御史大夫。申屠賢相。發憤而死。更法改令。天下騷然。至於七國發難。而錯之術亦窮矣。文景優劣。於此可見。大抵名器爵祿。人所奔趨。必使積勞而後遷。以明持久而難得。則人各安其分。不敢躁求。今若多開驟進之門。使有意外之得。公卿侍從。跬步可圖。其得者既不以微俸自名。則不得者必皆以沈淪爲恨。使天下常調。循資拔格者謂之常調。官舉生安。心恥不若人。何所不至。欲望風俗之厚。豈可得哉。選人之政。京官常須十年以上。薦更險阻。計析

毫釐。其間一事齟牙。常至終身淪棄。今乃以一人之薦舉而予之。猶恐未稱。章服隨至。使積勞久次而得者。何以厭服哉。夫常調之人。非守則令。員多闕少。久已患之。不可復開多門。以待巧進。若巧者侵奪已甚。則拙者迫怵無聊。利害相形。不得不察。故近來樸拙之人愈少。而巧進之士益多。惟陛下重之惜之。哀之救之。如近日三司獻言。使天下郡選一人。催驅三司文字。許之先次指射。以酬其勞。則數年之後。審官吏部。又有三百餘人。得先占闕。常調待次。不其愈難。此外句當發運均輸。按行農田水利。已據監司之體。各懷進用之心。轉對者望以稱旨而驟遷。奏課者求爲優等而速化。相勝以力。相高以言。而名實亂矣。惟陛下以簡易爲法。以清淨爲心。使姦無所緣。而民德歸厚。臣之所願厚風俗者。此之謂也。以上言不宜躡等用人不貴巖還。茲化厚風俗止此古者建國。使內外相制。輕重相權。如周如唐。則外重而內輕。如秦如魏。則外輕而內重。內重之失。必有姦臣指鹿之患。外重之弊。必有大國問鼎之憂。聖人方盛而慮衰。常先立法以救弊。國家租賦。總於計省。重兵聚於京師。以古揆今。則似內重。恭惟祖宗所以預圖而深計。固非小臣所能臆度而周知。然觀其委任臺諫之一端。則是聖人過防之至計。歷觀秦漢以及五代。諫爭而死。蓋數百人。而自建隆以來。未嘗罪一言者。縱有薄責。旋即超升。許以風聞。而無官長。無官長。猶云無上司也。今都察院之總憲副憲。雖稱臺長。亦非臺官之體。風采所繫。不問尊卑。言及乘輿。則天子改容。事關廊廟。則宰相待罪。故仁宗之世。議者譏宰相但奉行臺諫風旨而已。聖人深意。流俗豈知。擢用臺諫。固未必皆賢。所言亦未必皆是。然須養其銳氣。借之重權者。豈徒然哉。將以折姦臣之萌。而救內重之弊也。夫姦臣之始。以臺諫折之而有餘。及其既成。以干戈取之而不足。今法令嚴密。朝廷清明。所謂姦臣。萬無此理。然養猶以去鼠。不可以無鼠。而養不捕之貓。畜狗以防姦。不可以無姦。而畜不吠之狗。陛下得不上下念祖宗設此官之意。下爲子孫立萬世之防。朝廷紀綱。孰大於此。臣自幼小所記。及聞長者之談。皆謂臺諫所言。常隨天下公議。公議所與。臺諫亦與之。公議所擊。臺諫亦擊之。及至英廟之初。始建稱親之議。本非人主大過。亦無典禮明文。徒以衆心未安。公議未允。當時臺諫以死爭之。今者物論沸騰。怨讟交至。公議所在。亦可知矣。而相顧不發。中外失望。夫彈劾積威之後。雖庸人亦可以奮揚。風采消委之餘。雖豪傑有不能振起。臣恐自茲以往。習慣成風。盡爲執政私人。以致人主孤立。紀綱一廢。何事不生。以上言介甫之處。足以脅制臺諫。使不敢言執政私人等句。亦有傾軋之意。孔子。

曰：『鄙夫可與事君也與哉。其未得之也，患不得之。既得之，患失之。苟患失之，無所不至矣。』臣始讀此書，疑其太過。以爲鄙夫之患失，不過備位而苟容，及觀李斯憂蒙恬之奪其權，則立二世以亡秦。慮杞憂懷光之數其惡，則誤德宗以再亂。其心本生於患失，而其禍乃至於喪邦。孔子之言，良不爲過。是以知爲國者，平居必常有忘軀犯顏之士，則臨難庶幾有殉義守死之臣。苟平居尙不能一言，則臨難何以責其死節。人臣苟皆如此，天下亦曰殆哉。君子和而不同，小人同而不和，和如和羹，同如濟水。故孫寶有言：『周公上聖，召公大賢，猶不相悅，著於經典。兩不相損。晉之王導，可謂元臣，每與客言，舉坐稱善，而王述不悅，以爲人非堯舜，安得每事盡善。導亦敘衽謝之，若使言無不同，意無不合，更唱迭和，何者非賢。萬一有小人居其間，則人主何緣得以知覺。』臣之所謂願存紀綱者，此之謂也。以上存紀綱，存紀綱一節事實大小，議論亦淺，與前二條殊不相稱，不足平列爲三。臣非敢歷詆新政，苟爲異論。如近日裁減皇族恩例，判定任子條式，修完器械，閣習鼓旗，皆陛下神算之至明，乾剛之必斷，物議既允，臣敢有辭。然至於所獻三言，則臣之私見，中外所病，其誰不知。昔禹戒舜曰：『無若丹朱傲，惟慢遊是好。』舜豈有是哉。周公戒成王曰：『無若殷王受之迷亂，酗於酒德哉。』成王豈有是哉。周昌以漢高爲桀紂，劉毅以晉武爲桓靈。當時人君，曾莫之罪。書之史冊，以爲笑談。使臣所獻三言，皆朝廷未嘗有此，則天下之幸，臣與有焉。若有萬一似之，則陛下安可不察。然而臣之爲計，可謂愚矣。以螻蟻之命，試雷霆之威，積其狂愚，豈可屢赦。大則身首異處，破壞家門，小則削籍投荒，流離道路，雖然，陛下必不爲此，何也。臣天賦至愚，篤於自信，向者與議學校貢舉，首違大臣本意，已期竄逐，政意自全，而陛下獨然其言，曲賜召對，從容久之，至謂臣曰：『方今政令得失，安在雖朕過失，指陳可也。』臣卽對曰：『陛下生知之性，天縱文武，不患不明，不患不勤，不患不斷，但患求治太速，進人太銳，聽言太廣。』又備述其所以然之狀，陛下領之曰：『卿所獻三言，朕當熟思之。』臣之狂愚，非獨今日，陛下容之久矣，豈有容之於始，而不赦之於終。恃此而言，所以不懼。臣之所懼者，譏刺既重，怨仇實多，必將詆臣以深文，中臣以危法，使陛下雖欲赦臣而不得，豈不殆哉。死亡不辭，但恐天下以臣爲戒，無復言者，是以思之經月，夜以繼日，書成復毀，至於再三，感陛下聽其一言，懷不能已，卒吐其說，惟陛下憐其愚而卒赦之，不勝俯伏待罪，憂恐之至。

奏疏總以明顯爲要。時文家有典顯淺三字訣。奏疏能備此三字。則盡善矣。典字最難。必熟於前史之事蹟。並熟於本朝之掌故。乃可言典。至顯淺二字。則多本於天授。雖有博學多聞之士。而下筆不能顯豁者多矣。淺字與雅字相背。白香山詩。務令老嫗皆解。而細求之。皆雅筋而不失之率。吾嘗謂奏疏能如白詩之淺。則遠近易於傳播。而君上亦易感動。此文雖不甚淺。而典顯二字。則千古所罕見。

朱熹戊申封事

戊申爲宋孝宗淳熙十五年。朱子於時年五十九歲。前一年丁未。除公爲江西提刑。辭不允。戊申正月。又辭不允。三月啓行。在道再辭。趣公入對。六月召對於延和殿。公所面告孝宗者。語多切直。並面陳奏劄五件。旋除兵部郎官。以足疾辭。七月在道再辭江西提刑之任。遂除直寶文閣。管嵩山崇福宮。九月十月。復召公入對。十一月遂上此封事。

十一月一日。朝奉郎直寶文閣主管西京嵩山崇福宮臣朱熹。謹齋沐具疏。昧死再拜。獻於皇帝陛下。臣猥以庸陋。蒙被聖知。有年於此矣。而兩歲以來。受恩稠疊。有加於前。顧視輩流。無與爲比。其爲感激之深。固有言所不能諭者。然竊惟念狂妄之言。抵觸忌諱。雖蒙聽納。不以爲罪。而伏俟數月。未見其有略施行者。臣誠不自知求所以堪陛下非常之恩者。而未知其出也。是以慚懼。久不自安。不意陛下又欲召而見之。臣愚於此仰窺聖意。尤不識其果何謂也。以爲欲聽其計策。則言已陳而不可用。以爲欲加之恩意。則寵既厚而無以加。二者之間。未有所當。此臣之所以徘徊前卻。懇扣辭避。而不能已也。然而陛下猶未之許。則臣又重思之。前日進對之時。口陳之說。迫於疾作。而猶有未盡言者。蓋嘗請以封事上聞。而久未敢進。豈非陛下偶垂記憶。而欲卒聞之乎。抑其別有以乎。臣不得而知也。然君父之命。至於再下。而爲臣子者。堅臥於家。則臣於此。實有所未安者。其所深慮。獨恐進見之後。所言終不可用。而又徒竊誤寵。如前之爲。則臣之辭受。將有所甚難處。而終得罪者。是以輒因前請。而悉其所言以獻。九月十月。兩次召公入對。公再辭不欲進見。故此三行云云。以爲雖使得至陛下之前。所言不過如此。伏惟聖慈。幸賜觀省。若以其言爲是。而次第行之。則臣之志願。千萬滿足。退伏巖穴。死無所憾。萬一聖意必欲其來。

則臣亦不過求一望見清光而後懇請以歸而已。若見其言果無可取，則是臣之所學之陋。他無所有，政使冒進陛下，亦將何所用之。不若因其懇請而許其歸休，猶足兩有所全也。又況陛下之庭，侍從之列，方有造爲飛語，以中害善良，唱爲橫議，以脅持上下，其巧謀陰計，又有甚於前日之不思而妄發者。陛下無爲使臣輕犯其鋒，而復蹈已覆之轍也。以上自明其不入殿奏對而但陳封事之故，蓋臣竊觀今日天下之勢，如人之有重病，內自心腹，外達四肢，蓋無一毛一髮不受病者。雖於起居飲食，未至有妨，然其危迫之證，深於醫者，固已望之而走矣。是必得如盧扁華佗之輩，授以神丹妙劑，爲之滌腸滌胃，以去病根，然後可以幸於安全。如其不然，則病日益深，而病者不覺其可寒心，殆非俗醫常藥之所能及也。故臣前日之奏，輒引藥不瞑眩，厥疾不瘳之語，意蓋謂此，而其言有未盡也。然天下之事，所當言者不勝其衆，顧其序有未及者，臣不暇言。且獨以天下之大本，與今日之急務，深爲陛下言之。蓋天下之大本者，陛下之心也。今日之急務，則輔翼太子，選任大臣，振舉綱維，變化風俗，愛養民力，修明軍政，六者是也。臣請昧死而悉陳之。惟陛下之留聽焉。以上具列所陳之大要，臣之輒以陛下之心爲天下之大本者，何也。天下之事，千變萬化，其端無窮，而無一不本於人主之心者。此自然之理也。故人主之心正，則天下之事無一不出於正。人主之心不正，則天下之事無一得由於正。蓋不惟賞之所勸，刑之所威，各隨所向，勢有不能已者。而其觀感聞之風動神速，又有甚焉。是以人主以眇然之身，居深宮之中，其心之邪正，若不得而窺者，而其符驗之著於外者，常若十目所視，十手所指，而不可掩。此大舜所以有惟精惟一之戒，孔子所以有克己復禮之云，皆所以正吾此心，而爲天下萬事之本也。此心既正，則視明聽聰，周旋中禮，而身無不正。是以所行無不及，而能執其中。雖以天下之大，而無一人不歸吾之仁者。然邪正之驗著於外者，莫先於家人，而次及於左右。然後有以達於朝廷，而及於天下焉。若宮闈之內，端莊齊肅，后妃有關雎之德，後宮無盛色之譏，黃魚順序，而無一人敢恃恩私以亂常典，納賄賂而行請謁，此則家之正也。退朝之後，從容燕息，貴戚近臣，攜僕奄尹，陪侍左右，各恭其職，而上憚不惡之嚴，下謹戴盆之戒，無一人敢通內外，竊威福，招權市寵，以紊朝政，此則左右之正也。內自禁省，外徹朝廷，二者之間，洞然無有毫髮私邪之間，然後發號施令，羣聽不疑，進賢退姦，衆志成服，紀綱得以振，而無侵撓之患，政事得以修，而無阿私之失。此所謂朝廷百官，六軍萬民，無敢不出於正，而治道舉也。心一不正，

則是數者固無從而得其正。是數者一有不正，而曰心正，則亦安有是理哉。是以古先聖王，兢兢業業，持守此心，雖在紛華波動之中，悠悠獨肆之地，而所以精之一之，克之復之，如對神明，如臨淵谷，未嘗敢有須臾之意。然猶恐其隱微之間，或有差失而不自知也。是以建師保之官，以自開明，列諫諍之職，以自規正。而凡其飲食酒漿衣服，次舍器用財賄，與夫宦官宦妾之政，無一不領於冢宰之官，使其左右前後一動一靜，無不制以有司之法。而無纖芥之隙，瞬息之頃，得以隱其毫髮之私。蓋雖一人之尊，深居九重之邃，而凜然常若立乎宗廟之中。朝廷之上，此先王之治，所以由內及外，自微至著，精粹純白，無少瑕駁。而其遺風餘烈，猶可以爲後世法程也。以上言古聖王正心之法，陛下試以是而思之。吾之所以精一克復而持守其心者，果嘗有如此之功乎。所以修身齊家而正其左右者，果嘗有如此之效乎。官省事禁，臣固有不得而知者。然不見其形而視其影，不覩其內而占其外，則爵賞之濫，貨賂之流，閭巷竊言，久已不勝其籍籍矣。臣竊以是窺之，則陛下之所以修之家者，恐其未有以及古之聖王也。以上言修身齊家未能出於一正，至於左右便嬖之私恩，遇過當，往者淵覲說抃之徒，龍大嫺會覲張說王抃皆以近習而至，與相勢焰熏灼，傾動一時，今已無可言矣。獨有前日臣所面奏者，所面奏者即內侍甘昇也。雖蒙聖慈，委曲開譬，然臣之愚，終竊以爲此輩，但當使之守門傳命，供掃除之役，不當假借崇長，使得逞邪媚，作淫巧於內，以蕩上心。立門庭招權勢於外，以累聖政。而其有才無才，有罪無罪，自不當論。况其有才適所以爲姦，有罪而不可復用乎。且如向來主管喪事，欽奉几筵之命，遠近傳聞，無不竊笑。臣不知國史書之，野史記之，播於外國，傳於後世，且以陛下爲何如主也。縱有曲折，如前日所以諭諭臣者，陛下亦安能家置一喙，而人曉之耶。刑餘小醜，不比人類，願乃熒惑聖心，虧損聖德，以至此極，而公卿大臣，拱手熟視，無一言以救其失。臣之痛心，始者惟在於此。比至都城，則又知此曹之用事者，非獨此人，而侍從之臣，蓋已有出其門者。至其納財之塗，則又不於士大夫而專於將帥。臣於前日嘗輒以面奏，而陛下諭臣以爲誠，嘗深察而痛懲之矣。退而始聞陛下比於環列之尹，已嘗有所易置，乃知陛下固已深察其弊，而無所待於人言。然猶未能明正其罪，而反寵以崇資巨鎮，使即便安。此曹無知，何所忌憚，況中外將帥，其不爲此者無幾。陛下亦未能推其類而悉去之也。陛下竭生靈之膏血，以奉軍旅之費，本非得已，而爲軍士者，願乃未嘗得一温飽。甚者採薪織屨，撥拾糞壤，以度朝夕。其又甚者，至

使妻女盛塗澤。倚市門以求食也。怨詈謗讟。悖逆絕理。正有不可聞者。一有緩急。不知陛下何所倚仗。是皆爲將帥者。巧爲名色。頭會箕斂。陰奪取其糧賜。以自封殖。而行貨賂於近習。以圖進用。彼此既厭足矣。然後時以薄少。號爲羨餘。陰奉燕私之費。以嫁士卒。怨怒之毒於陛下。且幸陛下下一受其獻。則後日雖知其罪。而不得復有所問也。出入禁闕。腹心之臣。外交將帥。共爲欺蔽。以至於此。豈有一毫愛戴陛下之心哉。方望優謂朱子封事。雖明季揚左之慮。直致言。無以過之。當卽謂此等處耳。而陛下不悟。反寵暱之。以是爲我之私人。至使宰相不得議其制置之得失。給諫不得論其除授之是非。以此而觀。則陛下所以正其左右。未能及古之聖王。又明矣。以上言將帥賄賂近習。未能正其左右。且私之得名。何爲也哉。据己分之所獨有。而不得以通乎其外之稱也。故自匹夫而言。則以一家爲私。而不得以通乎其鄉。自鄉人而言。則以一鄉爲私。而不得以通乎其國。自諸侯而言。則以一國爲私。而不得以通乎天下。至於天子。則際天之所覆。極地之所載。莫非己分之所有。而無外之不通矣。又何以爲私哉。今以不能勝其一念之邪。而至於有私心。以不能正其家人。近習之故。而至於有私人。以私心用私人。則不能無私費。于是內損經費之入。外納羨餘之獻。而至於有私財。陛下上爲皇天之所子。全付所覆。使其無有私而不公之處。其所以與我者。亦不細矣。乃不能充其大。而自爲割裂。以狹小之。使天下萬事之弊。莫不由此而出。是豈可不惜也哉。以上言不應有私財。私人若以時勢之利害言之。則天下之勢。合則彊。分則弱。故諸葛亮之告其君曰。『宮中府中。俱爲一體。陟罰臧否。不宜異同。若有作姦犯科。及爲忠善者。宜付有司。論其刑賞。以昭陛下平明之理。不宜偏私。使內外異法也。』當是之時。昭烈父子。以區區之蜀。抗衡天下。十分之九。規取中原。以興漢室。以亮忠智。爲之深謀。而其策不過如此。可謂深知時務之要。而暗合乎先王之法矣。夫以蜀之小。而於其中。又以公私自分。彼此如兩國。然則是將以梁益之半。圖吳魏之全。又且內小人而外君子。廢法令而保姦回。使內之所出者。日有以賊乎外。公之所立者。常不足以勝乎私。則是此兩國者。又自相攻。而其內之私者常勝。外之公者常負也。外有鄰敵之虞。內有陰邪之寇。日夜夾攻而不置。爲國家者。亦以危矣。夫以義理言之。既如彼。以利害言之。又如此。則今日之事。如不早正。臣恐陛下之心。雖勞於求賢。而一有所妨乎此。則賢人必不得用。而所用者。皆庸謬儉巧之人。雖勤於立政。而一有所礙乎此。則善政必不得立。而所行者。皆阿私苟且之政。日往月來。養成禍本。而

貽燕之謀未遠。諱相之職不修。紀綱壞於上。風俗壞於下。民愁兵怨。國勢日卑。一旦猝有不虞。臣竊寒心。不知陛下何以善其後也。然則臣之所謂天下大本。惟在陛下之一心者。可不汲汲皇皇而求有以正之哉。以上三段皆言天下之大本。首在正心而去私。至於輔翼太子之說。則臣前日所謂數世之仁者。蓋以微發其端。而未敢索言之也。夫太子天下之本。其輔翼之不可不謹。見於保傅傳者詳矣。保傅傳見大戴禮。賈生政事疏所引最多。陛下聖學高明。洞貫古今。宜不待巨言而喻。然臣竊嘗怪陛下所以謂設東宮者。何其疏略之甚也。由前所論而觀之。豈非所以自治者。猶未免於疏略。因是亦以是爲當然而不之慮耶。夫自王十朋陳良翰之後。宮寮之選。號爲得人。而能稱其職者。蓋已鮮矣。而又時使邪佞薄庸闖劣輩。咸得參錯於其間。所謂講讀。聞亦姑以應文備數。而未聞其有箴規之效。至於從容朝夕。陪侍遊燕者。又不過使臣宦者數輩而已。皇太子睿性風成。閱理久熟。雖若無待於輔導。然人心難保。氣習易污。習於正則正。習於邪則邪。此古之聖王教世子者。所以必選端方正直道術博聞之士。與之居處。而又使之逐去邪人。不使見惡行。蓋嘗謹之於微。不待其有過而後規也。今三代之制。雖不可考。且以唐之六典論之。東宮之官。師傅賓客。既職輔導。而詹事府兩春坊。實擬天子之三省。故以詹事庶子領之。其選甚重。今則師傅賓客。既不復置。而詹事庶子。有名無實。其左右春坊。遂直以使臣掌之。何其輕且褻之甚耶。夫立太子而不置師傅賓客。則無以發其隆師親友。尊德樂義之心。獨使春坊使臣得侍左右。則無以防其戲慢嫺狎。奇袤雜進之害。此已非細事矣。至於皇孫德性未定。聞見未廣。又非皇太子之比。則其保養之具。尤不可以不嚴。而今日之官屬。尤不備。責任尤不專。豈任事者亦有所未之思耶。謂宜深詔大臣。討論前代典故。東宮除今已置官外。別置師傅賓客之官。使與朝夕遊處。罷去春坊使臣。而使詹事庶子。各復其職。宮中之事。一言之入。一令之出。必由於此。而後通焉。又置贊善大夫。擬諫官以箴闕失。王府則宜稍放六典親王之制。置賓客咨議。以司訓導。置長史司馬。以總衆職。妙選耆德。不雜他材。皆置正員。不爲兼職。明其職掌。以責功效。則其官屬已略備矣。陛下又當以時召之。使侍燕遊。從容啓迪。凡古先聖王正心修身平治天下之要。陛下之所服行而已有效。與其勉慕而未能及。愧悔而未能免者。傾倒羅列。悉以告之。則聖子神孫。皆將有以得乎陛下心傳之妙。而宗社之安。統業之固。可以垂於永久而無窮矣。此今日急務之一也。以上輔翼太子急務之一。至於選任大臣說。則

臣前所謂勞於求賢而賢人不得用者蓋已發其端矣夫以陛下之聰明豈不知天下之事必得剛明公正之人而後可任也哉其所以常不得如此之人而反容鄙夫之竊位者非有他也直以一念之間未撤其私邪之蔽而燕私之好便嬖之流不能盡由於法度若用剛明公正之人以爲輔相則恐其有以妨吾之事害吾之人而不得肆是以選掄之際常先排擯此等置之度外而後取凡疲懦軟熟平日不敢直言正色之人而揣摩之又于其中得以至庸極陋決然可保其不至於有所防者然後舉而加之於位是以除書未出而其物色先定姓名未顯而中外已逆知其決非天下之第一流矣此等語實甚懇直孝宗以其爲賢者而優容之耳故以陛下之英明剛斷略不世出而所取以自輔者未嘗有如汲黯魏徵之比顧常反得如秦檜晚年之執政臺諫者而用之彼以人臣竊國柄而畏忠言之悟主以發其姦也故專取此流以塞賢路蔽主心乃其勢之不得已者陛下尊居宸極威福自己亦何賴於此輩而乃與之共天下之政以自蔽其聰明自壞其綱紀而使天下受其弊哉夫其所以取之者如此故其選之不得而精選之不精故任之不得而重任之不重則彼之所以自任者亦輕夫以至庸之材當至輕之任則雖名爲大臣而其實不過供給唯諾奉行文書以求不失其窠坐資級如吏卒之爲而已求其有以輔聖德修朝政而振紀綱不待智者而知其必不能也下此一等則惟有作姦欺植黨與納貨賄以濁亂陛下之朝廷耳其尤甚者乃至十有餘年而後敗露以去然其列布於後以希次補者又已不過此等人矣蓋自其臺諫爲侍從而其選已如此其後又擇其尤碌碌者而登用之則亦無怪乎陛下常不得天下之賢材而屬任之也然方用之初亦曰姑欲其無所害於吾之私而已夫豈知其所以害夫天下之公者乃至於此哉陛下誠反是心以求之則庶幾乎得之矣蓋不求其可喜而求其可畏不求其能適吾意而求其能輔吾德不憂其自任之不重而常恐吾所以任之者之未重不爲燕私近習一時之計而爲宗社生靈萬世無窮之計陛下誠以此取之以此任之而猶曰不得其人則臣不信也此今日急務之二也以上選任大臣急務之一至於振肅紀綱變化風俗之說則臣前所謂勤於立政而善政卒不得立者亦已發其端矣夫以陛下之心憂勤願治不爲不至豈不欲夫綱維之振風俗之美哉但以一念之閒未能去其私邪之弊是以朝廷之上忠邪雜進刑賞不分士大夫之閒志趣卑污廉恥廢壞顧猶以爲事理之當然而不思有以振厲矯革之也蓋明於內然後有以齊乎外無諸己而後可以

非諸人。今官省之間。禁密之地。而天下不公之道。不正之人。顧乃得以窟穴盤據於其間。而陛下目見耳聞。無非不公不正之事。則其所薰蒸銷鑠。使陛下好善之心不著。疾惡之意不深。其害已有不可勝言者矣。及其作姦犯法。則陛下又未能深割私愛。而付諸外廷之議論。以有司之法。是以紀綱不能無所撓敗。而所以施諸外者。亦因是而不欲深究切之。且如頃年方伯連帥。自且如頃年以下二十二行。皆當時政事之大紊亂紀者。但未明指其姓名。今亦不能一一指出矣。嘗以有贓污不法聞者矣。鞠治未竟。而已有與郡之命。及臺臣有言。則遂與之祠祿。而理爲自陳。至於其所蔽匿作過之人。則又不復逮捕付獄。名爲降官。而實以解散其事。此雖宰相曲庇鄉黨。以欺陛下。然巨竊意陛下非全然不悟其欺者。意必以爲人情各有所私。我旣欲遂我之私。則彼亦欲遂彼之私。君臣之間。顏情稔熟。則其勢不得不少容之。且以爲雖或如此。亦未至甚害於事。而不知其敗壞綱紀。使中外聞之。腹非巷議。皆有輕侮朝廷之心。委贓之吏。則皆鼓舞相賀。不復畏陛下之法令。則亦非細故也。又如廷爭議配享。其間邪正曲直。固有所在。則兩無所問。而并去之。監司挾私以誣。郡守則不問其曲直。而兩皆罷免。監司使酒以凌。郡守亦不問其曲直。而兩皆與祠。宰相植黨營私。孤負任使。則曲加保全。而使之去。臺諫懷其私恩。陰拱不言。而陛下亦不之問也。其有初自小官擢爲臺諫。三四年間。趨和承意。不能建明一事。則年除歲遷。至極其選。一日論及一二武臣罪惡。則便斥爲郡守。而不與職名。從臣近典東畿。遠帥西蜀。一遭飛語。則體究具析。體究具析。皆宋時公牘字樣。猶今日憲究日查辦也。無所不至。及究析來上。而所聞不實。則言之者晏然亦無所訶。山陵諸使。鬻賣辟闕。煩擾吏民。御史有言。亦無行遣。而或反得超遷。御史言及畿槽。則名補卿列。而實奪之權。其所言者。則雖量加絀削。而繼以進用。從班之中。賢否猶雜。至有終歲緘默。不聞一言。以裨聖德者。願亦隨羣逐隊。排連僂補。其桀黠者。乃敢造飛語。立橫議。如臣前所陳者。而宰相畏其凶焰。反撓公議而從之。臺諫亦不敢聞於陛下。而請其罪。陛下視此紀綱爲何如。可不反求諸身。而亟有以振肅之耶。以上振肅紀綱急務之三綱紀。不振於上。是以風俗頹弊於下。蓋其爲患之日久矣。而漸中尤爲甚。大率習爲軟美之態。依阿之言。而以不分是非。不辨曲直爲得計。下之事上。固不既少忤其意。上之御下。亦不敢稍拂其情。惟其私意之所在。則千塗萬轍。經營計較。必得而後已。甚者以金珠爲脯醢。以契券爲詩文。宰相可啗。則啗宰相。近習可通。則通近習。惟得之求。無復廉恥。父詔其

子。兄勉其弟。一用其術。而不復知有忠義名節之可貴。其俗已成之後。則雖賢人君子。亦不免習於其說。一有剛毅正直守道循理之士。出乎其間。則羣議衆排。指爲道學之人。而加以矯激之罪。上惑聖聰。下鼓流俗。蓋自朝廷之上。以及閭里之間。十數年來。以此二字。禁錮天下之賢人君子。復如崇宣之間。所謂元祐學術者。崇宣謂北宋崇寧宣和之際也。時以司馬光蘇軾等爲元祐學術。立黨人碑以禁錮之。南宋亦禁道學。排擠詆辱。必使無所容措其身而後已。嗚呼。此豈治世之事。而尙復忍言之哉。又其甚者。乃敢誦言於衆。以爲陛下嘗謂今日天下幸無變故。雖有仗節死義之士。亦何所用。此言一播。大爲識者之憂。而臣知其有以必非陛下之言也。夫仗節死義之士。當平居無事之時。誠若無所用者。然古之人君。所以必汲汲以求之者。蓋以如此之人。臨患難而外死生。則其在乎世。必能輕爵祿。臨患難而能盡忠節。則其在乎世。必能不詭隨。平日無事之時。得而用之。則君心正於上。風俗美於下。足以逆折姦萌。潛消禍本。自然不至真有仗節死義之事。非謂必知後日當有變故。而預蓄此人以擬矯激。而尊寵之。是以綱紀日壞。風俗日偷。非常之禍。伏於冥冥之中。而一旦發於意慮之所不及。平日所用之人。交臂降叛。而無一人可同患難。然後前已擯棄流落之人。始復不幸而著其忠義之節。以天寶之亂觀之。其將相貴戚近幸之臣。皆已頓顙賊庭。而起兵討賊。卒至於殺身殲族而不悔。如巡遠果。則遠方下邑。人主不識其面目之人也。使明皇早得巡等而用之。豈不能銷患於未萌。巡等早見用於明皇。又何至真爲仗節死義之舉哉。商鑒不遠。在夏后之世。此識者所以深憂於或者之言也。雖以臣知陛下聖學高明。識慮深遠。決然不至有此議論。然每念小人敢託聖訓以蓋其姦。而其爲害至於足以深沮天下忠臣義士之氣。則亦未嘗不痛心疾首。而不敢以識者之慮爲過計之憂也。陛下視此風俗爲何如。可不反求諸身而亟有以變革之耶。此今日急務之第一也。以上變革風俗急務之四。至於愛養民力。修明軍政之說。則民力之未裕。生於私心之未克。而宰相臺諫失職也。軍政之未修。生於私心之未克。而近習得以謀帥也。是數說者。臣皆以極陳於前矣。今請卽民力之未裕而推言之。臣聞虞允文之爲相也。蓋取版曹歲入窶名之。必可指撥者。號爲歲終羨餘之數。而輸之內帑。願以其有名無實。積累掛欠。空載簿籍。不可催理者。撥還版曹。窶名猶今日款目。版曹今之戶部也。必可指者。猶今日有著

之款。不可催理者。猶今日無著之款。其爲說曰。內帑之積。將以備他日用兵進取不時之需。而版曹目今經費。已自不失歲入之數。聽其言誠甘且笑矣。然自是以來二十餘年。內帑歲入不知幾何。而認爲私貯。典以私人。宰相不得以式貢均節其出入。版曹不得以簿書句考其在亡。其日銷月耗。以奉燕私之費者。蓋不知其幾何矣。而曷嘗聞其能用此錢以易敵人之首。如太祖皇帝之言哉。徒使版曹經費闕乏日甚。督趣日峻。以至廢去祖宗以來破分良法。舊法州縣催理官物。已及九分以上。謂之破分。諸司亦在催。版曹亦置不問。貧民些少拖欠。亦得遷延。以待獨免。自會慶用事。始除此法。舊欠悉行拘催。而必以十分登足爲限。以爲未足。則又造爲比較。監司郡守殿最之法。以誘脅之。不復問其政教設施之得失。而一以其能剝民奉上者爲賢。於是中外承風。競爲苛急。監司明諭州郡。郡守明諭屬邑。不必留心民事。惟務催督財賦。此民力之所以重困之本。而稅外無名之賦。如和買折帛科。罰月椿之屬。尙未論也。其次則陛下所用之宰相。不能擇中外大吏。而惟徇私情之厚薄。所用之臺諫。不能公行糾劾。而惟快一己之愛憎。是以監司郡守。多不得人。而其賢者。或以舉職業忤臺諫。而遭斥逐也。至於監司太多。而事權不歸於一。銓法雖密。而縣令未嘗擇人。則又其法之有未善者。然其本正。則此等不難爲處。其本未正。則雖或舉此。臣恐未見其益。而反有害也。以上民力未裕。又嘗即夫軍政之不修而推之。則臣聞日者諸將之求進也。必先培植士卒。以殖私財。然後以此自結於陛下之私人。而祈以姓名。達於陛下之貴將。貴將得其姓名。即以付之軍中。使自什伍以上。節次保明。稱其材武。堪任將帥。然後具爲奏牘。而言之陛下之前。陛下但見其等級推先。案牘具備。則誠以爲公薦。而可以得人矣。今軍中士卒。稟保而後具奏。當時蓋有此例。咸豐十年。王有齡令軍中將士具呈公保。何桂清請免治罪。或亦倣其例與。而豈知其諧價輸錢。已若晚唐之債帥哉。只此一事。有耳者無不聞。有口者無不道。然以其門戶幽深。蹤迹詭秘。故無路得以窺其交通之實狀。是以雖或言之。而陛下終不信也。夫將者三軍之司命。而其選置之方。乖刺如此。則彼智勇材略之人。其孰肯抑心下首於宦官宮妾之門。而陛下之所以得爲將帥者。皆庸夫走卒。固不知兵謀師律之爲何事。而惟剋剋之是先。交結之是圖矣。理直而氣副。陛下不知其然。而猶望其修明軍政。激勸士卒。以疆國勢。豈不誤哉。以上軍政不修。然將帥之不得人。非獨兵卒之受其弊也。推其爲害之極。則又有以及乎民者。蓋將帥得人。則尺籍嚴而蓄儲羨。屯田立而漕運省。今

爲將帥者如此。則固無望其肯核軍實。而豐儲蓄矣。至於屯田則彼自營者。尤所不願。故朝廷不免爲之別置使者。以典治之。而屯兵之衆。資其撥遣。則又不免使參其務。然聞其占護軍人。不肯募其願耕者以行。而疆其不能者以往。至屯則偃蹇不耕。而反爲民田之害。使者文吏。其力蓋有所不能制者。屯田之衆。須由軍中撥交。屯田使者不得不令諸將參與其事。占護猶今言霸占祖護也。是以陛下欲爲之切。而久不得成也。屯田不立。漕運煩費。水路輸送日漕。陸路輸送日運。日轉。凡物皆然。不獨米糧也。諸州苗米。至或盡數起發。而無以供州兵之食。則加耗斛面之弊。紛紛而起。而民益困矣。又凡和買折帛科罰月椿之類。往往亦爲供軍之故。而不可除。若屯田立而所資於諸路者減。則此屬庶乎其皆可禁矣。今乃不然。則是置將之不善。而害足以及民也。以上置將不善而害民。因軍政不修而民力愈困。急務之五六。凡此數者。根株深固。枝葉廣闊。若不可以朝變而夕除者。然究其本。則亦在夫陛下之反諸身耳。聖心誠無不正。則必能出私帑以歸版曹矣。版曹不至甚闕。必能復破分之法。除殿最之科。以寬州縣矣。聖心誠無不正。則必能擇宰相以選牧守矣。擇臺諫以供刺舉矣。聖心誠無不正。則必能嚴宦官兵將交通之禁。而以選將屬宰相矣。宰相誠得其人。則必能爲陛下擇將帥以作士氣。計軍實。廣屯田。以省漕運矣。上自朝廷。下達州縣。治民典軍之官。既皆得人。然後明詔宰相。讓省監司之員。而精其選。重其責。又詔銓曹。使以縣之劇易。分爲差等。而常切詢訪之。天下之官吏。能爲縣者。不拘薦舉之有無。不限資格之高下。而籍其姓名。使以次補最劇之縣。果有治績。則優而進之。不勝其任。則絀而退之。凡州縣之間。無名非理之供。橫斂巧取之政。其泰甚而可去者。可以漸去。而民力庶乎其可寬矣。以上因言民力而推本於正心。則百弊皆除。實串乎大本之一。急務之四。至於屯田之利。則以臣愚見。當使大將募軍士。使者招遊民。各自爲屯。不相牽制。其給授課賞。罰政令。各從本司。自爲區處。軍中自有將校可使。不須別置官吏。使者則聽其辟置官屬三五人。指使一二十人。以備使令。又擇從官。通知兵農之務。兼得軍民之情者一員。爲屯田使。總治兩司之政。而通其奏請。趣其應副。又以歲時按行。察其勤惰之實。以行誅賞。如此則兩屯心競。各務其功。田事可成。漕運可省。而諸無名非理之供。橫斂巧取之政。前日有所不獲已。而未可盡去者。今亦可以悉禁。民力庶乎其益裕矣。此今日急務之五六也。以上因民力而論改屯田之政。凡此六事。皆不可緩。而其本則在於陛下之一心。一心正則六事無不正。一有人心私

欲以介乎其間。則雖欲億精勞力。以求正夫六事者。亦將徒爲文具。而天下之事。愈至於不可爲矣。故所謂天下之大本者。又急務之最急。而尤不可以少緩者。惟陛下深留聖意。而亟圖之。使大本誠正。急務誠修。而治效不進。國勢不疆。中原不復。仇敵不滅。則臣請伏鈇鉞之誅。以謝陛下。陛下雖欲赦之。臣亦不敢承也。以上歸於大本之正。總結上文。然又竊聞之。今日士大夫之論。其與臣不同者。非一。及究其實。則皆所謂似是而非者也。蓋其樂因循之無事者。則曰陛下之年。凌高。而天下亦幸無事。年凌高。而血氣不能不衰。天下無事。則不宜更爲庸人所擾。其欲奮厲而有爲者。則又曰祖宗之積憤。不可以不據。中原之故疆。不可以不復。以此爲務。則聖心不待勸勉而自疆。舍此不圖。則雖策厲以有爲。而無所向。望以爲標準。亦卒歸於委靡而已。凡此二說。亦皆有理。而臣輒皆以爲非者。蓋樂因循者。知聖人之血氣。有時而衰。而不知聖人之志氣。無時而衰也。知天下之有事。之不可以苟安。而不知天下無事之尤不可以少怠也。况今日之天下。又未得爲無事乎。且以衛武公言之。其年九十有五矣。猶箴儆於國。以求規諫。而作抑戒之詩。以自警。使人朝夕誦之。不離於其側。此其年豈不甚高。而其戒謹恐懼之心。豈以是而少衰乎。况陛下視武公之年。三分未及其二。而責任之重。地位之高。又有千百千萬於武公者。臣雖不肖。又安敢先處陛下於武公之下。而直謂其不能乎。且天下之事。非艱難多事之可憂。而宴安耽毒之可畏。政使功成治定。無一事之可爲。尙嘗朝兢夕惕。居安慮危。而不可以少怠。况今天下雖若未有目前之急。然民貧財匱。兵情將驕。外有疆暴之寇仇。內有愁怨之軍民。其他難言之患。隱於耳目之所不加思慮之所不接者。近在堂奧之間。而遠在數千里之外。何可勝數。追計其前。既未有可見之效。卻顧於後。又未有可守之規。亦安得遽謂無事。而遂以逸豫處之乎。以上數因循無事之說者。其思奮厲者。又徒知恢復之不可忘。頽情之不可久。然不知不世之大功。易立而至。微之本心。難保。中原之戎寇。易逐。而一己之私意。難除也。誠能先其所難。則其易者將不言而喻。不先其難。而徒僥倖於其易。則雖朝夕談之不絕於口。是亦徒爲虛言。以快天下之意而已。又况此事之失。已在隆興之初。不合遽然罷兵講和。遂使宴安耽毒之害。日滋日長。而坐薪嘗膽之志。日遠日忘。是以數年以來。綱維解弛。覺孽萌生。區區東南。事猶有不勝慮者。何恢復之可圖乎。故臣不敢隨例迎合。苟爲大言。以欺陛下。而所望者。則惟欲陛下先以東南之未治爲憂。而正心克己。以正朝廷。修政事。庶幾真實功效。可以馴至。而不至於

別生患害。以防遠圖。蓋所謂善易者不言易。而真志於恢復者。果不在於撫劍抵掌之間也。以上啟奮厲有爲之說者。論者又或以爲陛下深於老佛之學。而得其識心見性之妙。於古先聖王之道。蓋有不約而自合者。是以不悅於世儒之常談死法。而於當世之務。則甯以管商一切功利之說爲可取。今乃以其所厭。既鄙薄者。陳於其前。亦見其言愈多而愈不合也。臣以爲此亦似是而非之論。非所以進盛德於日新也。彼老子浮屠之說。固有疑於聖賢者矣。然其實不同者。則此以性命爲真實。而彼以性命爲空虛也。此以爲實。故所謂寂然不動者。萬理粲然於其中。而民彜物則無一之不具。所謂感而遂通天下之故。則必順其事。必循其法。而無一事之或差。彼以爲空。則徒知寂滅爲樂。而不知其爲實理之原。徒知應物見形。而不知其有真妄之別也。是以自吾之說而修之。則體用一原。顯微無間。而治心修身齊家治國。無一事之非理。由彼之說。則其本末橫分。中外斷絕。雖有所謂明徹靈通。虛靜明妙者。而無所救於滅理亂倫之罪。顛倒運用之失也。故自古爲其學者。其初無不似有可喜。考其終則。詖淫邪遁之見。鮮有不作。而害於政事者。是以程顥常闢之曰。『自謂窮神知化。而不足以開物成務。言爲無不周備。而實外於倫理。窮深極微。而不可以入堯舜之道。天下之學。自非淺陋固滯。則必入於此。是謂正路之榛蕪。聖門之蔽塞。闢之而後可與入道。』嗚呼。此真可謂理到之言。惜乎其未有以聞於陛下者。使陛下過聽髡徒誑妄之說。而以爲真有合於聖人之道。至分治心治身治人。以爲三術。而以儒者之學爲最下。則臣竊爲陛下憂此心之害於政事。而惜此說之布於來今也。如或未以臣言爲然。則聖質不爲不高。學之不爲不久。而所以正心修身以及天下者。其效果安在也。是豈可不思其所以然者。而亟反之哉。若夫管商功利之說。則又陋矣。陛下所以取之者。則以既斥儒者之道爲常談死法。而天下之務。日至於前。彼浮屠之學。又不足應之。是以有味乎彼之言。而冀其富國強兵。或有近效耳。然自行其說。至今幾年。而國日益貧。兵日益弱。所謂近效者。亦未之見。而聖賢所傳生財之道。理財之義。文武之怒。道德之威。則固所以爲富強之大。而反未有講之者也。豈不誤哉。今議者徒見老佛之高。管商之便。而聖賢所傳明善修身齊家治國平天下者。初無新奇可喜之說。遂以爲常談死法而不足學。夫豈知其常談之中。自有妙理。死法之中。自有活法。固非老佛管商之陋。所能彷彿其萬分也哉。伏惟陛下察臣之言。以究四說之同異。而明辨之。因循奮厲老莊管商。卽上文所駁之四說也。則知臣之所言。非臣所爲之說。

乃古先聖賢之說。非聖賢所爲之說。乃天經地義自然之理。雖以堯舜禹湯文武周公之聖。顏曾伯軻之賢。而有所不能違也。則於臣之言。與夫論者之說。其爲取舍從違。不終日而決矣。以上駁老佛管商蓋孝宗生平宗旨如此。抑臣於此又竊有感而自悲焉。蓋臣之得事陛下。於今二十有七年矣。而於其間得見陛下。數不過三。自其始見於隆興之初。固嘗輒以近習爲言矣。辛丑再見。又嘗論之。今歲三見。而其所言。又不過此。臣還方下土。田野之人。豈有積怨深怒於此曹。而固欲攻之以快己私也哉。其所以至於屢進不合而不敢悔者。區區之意。獨爲國家之計。而不敢自爲身謀。其愚亦可見矣。然自頃以來。歲月逾邁。如川之流。一往而不復返。不惟臣之蒼顏白髮。已迫遲暮。而竊仰天顏。亦覺非昔時矣。臣之鄙滯。固不能別有忠言奇謀。以裨聖德。而陛下日新之盛德。亦未能有以使臣釋然而忘其夙昔之憂也。則臣於此安得不深有感而重自悲乎。身伏銜茅。心馳魏闕。竊不勝其愛君憂國之誠。敢冒萬死。剝瀝肺肝。以效野人食芹炙背之獻。且以自乞其不肖之身焉。以上自傷其老。慮君以誠伏惟陛下哀憐財赦。而擇其中。則非獨愚臣之幸。實宗社生靈之幸。臣烹誠惶誠恐昧死再拜謹言。

此篇正文。一萬一百一十字。公之自注夾行書寫者。又二千九百一十四字。北宋之萬言書。以蘇東坡王介甫兩篇爲最著。南宋之萬言書。以公此篇。及文信國對策爲最著。文章則蘇王較健。義理則公較精。篇中約分四節。第一節言所以不上殿入對。而僅陳封奏之事。故第二節陳大本一端。第三節言急務六事。第四節辨駁當時士大夫四說。第三節所指各務。皆切中時政之得失。其憊直殆過於汲黯魏徵。其氣節之激昂。則方望溪氏以擬明季楊左者。庶幾近之。他人諫其事。公則格其心。他人攻君之失。公則並糾大臣近臣之過。第二節第四節所論。皆本其平日讀書學道。深造有得之言。實有諸己而後以獻諸君。初無一語取辦於臨時者。此非文士所可襲取也。惟過於冗長。似一筆書成。無修飾潤色之功。故乏勁健之氣。鏗鏘之節。其逐段夾行分注。以達未盡之意。似不可以爲訓。茲故置之不錄。第四節辨駁四說。似不宜屢入此篇之內。學古者不可不知。

王守仁申明賞罰以厲人心疏

據江西按察司整飭兵備帶管分巡嶺北道副使楊璋呈。『伏觀大明律內。該載失誤軍事條。領兵官已承調遣。

不依期進兵策應。若承差告報軍期而違限。因而失誤軍機者。並斬。從軍違期條。若軍臨敵境。託故違期。三日不至者斬。主將不固守條。官軍臨陣先退。及圍困敵城而逃者斬。此皆罰典也。及查得原擬直隸山東江西等處。征討流賊。陞賞事例。一人並二人爲首。就陣擒斬以次劇賊一名者五兩。二名者十兩。三名者陞實授一級。不願者賞十兩。陣亡者陞一級。俱世襲。不願者賞十兩。擒斬從賊六名以上至九名者。止陞實授二級。餘功加賞。不及六名。除陞一級之外。扣算賞銀。三人四人五人以上。其擒斬以次劇賊一名者。賞銀十兩均分。從賊一名者。賞五兩均分。領軍把總等官。自斬賊級。不准陞賞。部下獲功七十名以上者。陞署一級。五百名者。陞授一級。不及數者。量賞一人。捕獲從賊一名者。賞銀四兩。二名者賞八兩。三名者陞一級。以次劇賊一名者。陞署一級。俱不准世襲。不願者賞五兩。此皆賞格也。以上備述例載罰典賞格皆楊璋所引。賞罰如此。宜乎人心激勸。功無不立。然而有未能者。蓋以賞罰之典雖備。然罰典止行於參題之後。而不行於臨陣對敵之時。賞格止行於大軍征剿之日。而不行於尋常用兵之際故也。且以嶺北一道言之。四省連綿。盜賊淵藪。近年以來。如賊首謝志珊高快馬黃秀魁池大鬢之屬。不時攻城掠鄉。動輒數千餘徒。每每督兵追勦。不過遙爲聲勢。俟其解圍退散。卒不能取決一戰者。以無賞罰爲之激勸耳。合無申明賞罰之典。今後但遇前項賊情。領兵官不拘軍衛有司。所領兵衆。有退縮不用命者。許領兵官軍前以軍法從事。領兵官不用命者。許總統兵官軍前以軍法從事。所統兵衆。有能對敵擒斬功次。或赴敵陣亡。從實開報。覆勘是實。轉達奏聞。一體陞賞。至若生擒賊徒。鞫問明白。即時押赴市曹。斬首示衆。庶使人知警畏。亦與見行事例。決不待時。無相悖戾。如此則賞罰既明。人心激勵。盜賊生發。得以即時撲滅。糧餉可省。事功可見矣。具呈到臣。以上緣楊璋原呈卷查三省盜賊。二三年前。總計不過三千有餘。今據各府州縣兵備守備等官。所報已將數萬。蓋已不啻十倍於前。臣嘗深求其故。詢諸官僚。訪諸父老。采諸道路。驗諸田野。皆以爲盜賊之日滋。由於招撫之太濫。招撫之太濫。由於兵力之不足。兵力之不足。由於賞罰之不行。誠有如副使楊璋所議者。臣請因是爲陛下略言其故。盜賊之性。雖皆凶頑。固亦未嘗不畏誅討。夫唯爲之而誅討不及。又從而招撫之。然後肆無所忌。蓋招撫之議。但可偶行於無辜脇從之民。而不可常行於長惡怙終之寇。可一施於回心向化之徒。而不可屢施於隨招隨叛之黨。南贛之盜。其始也被害之民。恃官府之威令。猶可聚衆而與之角。嗚之於

官。而有司者以爲既招撫之。則皆置之不問。盜賊習知官府之不彼與也。與。敵也。左傳襄二十五年一與一。謂一人敵一人也。吾鄉諺語曰。个打个。史記龍且曰。吾平生知韓信爲人易與耳。謂易敵也。此與字之古義也。陽明云。不彼與。魯俗云。官府不敢惹他也。益從而讎。民不任其苦。知府官之不足恃。亦遂靡然而從賊。由是盜賊益無所畏。而出劫日頻。知官府之必將已招也。百姓益無所恃。而從賊日衆。知府官之必不爲己地也。夫平良有冤苦無伸。而盜賊乃無求不遂。爲民者困征輸之劇。而爲盜者獲犒賞之勤。則亦何苦而不彼從乎。是故近賊者爲之戰守。遠賊者爲之鄉導。虞城郭者爲之交援。在官府者爲之閭諜。其始出於避禍。其卒也從而利之。故曰。盜賊之日滋。由於招撫之太濫者此也。以上敘招撫太濫。夫盜賊之害。神怒人怨。孰不痛心。而獨有司者。必欲招撫之。亦豈得已哉。誠使疆兵悍卒。足以殲渠魁而蕩巢穴。則百姓之憤雪。地方之患除。功成名立。豈非其所欲哉。然而南贛之兵。素不練。類皆脆弱驕惰。每遇征發。追呼拘擣。旬日而始集。約束齋遺。又旬日而始至。則賊已捆載歸巢矣。或猶遇其未退。整賊廬而先奔。不及交鋒而已敗。以是禦寇。猶驅羣羊而攻猛虎也。安得不以招撫爲事乎。故凡南贛之用兵。不過文移調遣。以苟免坐視之罰。應名剿捕。聊爲招撫之媒。求之實用。斷有不敵。何則。兵力不足。則剿捕未必能克。勦捕不克。則必有失律之咎。則必征調日繁。督責日至。糾舉論劾者。四面而起。往往坐是而至於落職敗名者有之。招撫之策行。則可以安居而無事。可以無調發之勞。可以無戴罪殺賊之責。無地方多事不得遷轉之滯。夫如是。孰不以招撫爲得計。是故甯使百姓之荼毒。而不敢出一卒以抗方張之虜。甯使狐兒寡婦之號哭。顛連疾苦之無告。而不敢提一旅以忤反招之賊。蓋招撫之議。其始也。出於不得已。其卒也。遂守以爲常策。故曰。招撫之太濫。由於兵力之不足者此也。以上敘兵力不足。古之善用兵者。驅市人而使戰。收散亡之卒。以抗疆虜。今南贛之兵。尙足以及數千。豈盡無可用乎。然而金之不止。鼓之不進。未見敵而亡。不待戰而北。何者。進而效死。無爵賞之勸。退而奔逃。無誅戮之及。則進有必死而退有幸生也。何苦而求必死乎。吳起有云。『法令不明。賞罰不信。雖有百萬。何益於用。』凡兵之情。畏我則不畏敵。畏敵則不畏我。今南贛之兵。皆畏敵而不畏我。欲求其用。安可得乎。故曰。兵力之不足。由於賞罰之不行者此也。以上敘賞罰不行。今朝廷賞罰之典。固未嘗不具。但未申明而舉行耳。古者賞不踰時。罰不後事。過時而賞。與無賞同。後事而罰。與不罰同。況過時而不賞。後事

而不罰。其亦何以齊一人心。而作與士氣。是雖使韓白爲將。亦不能有所成。况如臣等腐儒小生。才識味劣。而素不知兵者。亦復何所冀乎。議者以南贛諸處之賊。連絡數郡。蟠據四省。非奏調狼兵。大舉夾攻。恐不足以掃蕩巢穴。是固一說也。然臣以爲狼兵之調。非獨所費不貲。兼其所過殘掠。不下於盜。大兵之興。曠日持久。聲勢彰聞。比及舉事。諸賊渠魁。悉已逃遁。所可得者。不過老弱。務從無知之民。於是乎有橫罹之慘。於是乎有妄殺之弊。班師未幾。而山林之間。復已呼嘯成羣。此皆往事之已驗者。臣亦近據南贛之精銳。得二千有餘。部勒操演。略有可觀。誠使得以大軍誅討之。賞罰而行之。平時。假臣等以便宜行事。不限以時。而惟成功是責。則比於大軍之舉。臣竊以爲可省半費。而收倍功。以上言不必調狼兵。但用南贛之兵。行大軍誅討之例。即可成功。臣請以近事證之。臣於本年正月十五日抵贛。卷查兵部所咨。申明律例。今後地方但有草賊生發。事情緊急。該管官司。即便依律調撥官軍。乘機勦捕。應合會捕者。亦就調發策應。但係軍情火速。差人申奏。敢有遲延隱匿。巡撫巡按三司官。即便參問。依律罷職充軍等項發落。雖不係聚草賊。但係有名強盜。肆行劫掠。賊勢凶惡。或白晝攔截。或明火持杖。不拘人數多少。一面設法緝捕。即時差人申報。合于上司。并具申本部。知會處置。如有仍前朦朧隱蔽。不即申報。以致聚眾滋蔓。貽患地方。從重參究。決不輕貸等因。題封欽依。備行前來。右八行錄兵部文欽依。今日欽遵。備行。今日行。知或曰。咨行移行時。以前官久缺。未及施行。臣即刊印數千百紙。通行所屬。布告遠近。未及一月。而大小衙門。以賊情來報者接踵。亦遂屢有斬獲一二人。或五六人。七八人者。何者。兵得隨時調用。而官無觀望掣肘。則自然無可推託逃避。思效其力。由此言之。律例具存。前此唯不申明而舉行耳。今使賞罰之典。悉從而申明之。其獲效亦未必不如是之速也。伏望皇上念盜賊之日熾。哀民生之日蹙。憫地方荼毒之愈甚。痛百姓冤憤之莫伸。特敕兵部俯采下議。特假臣等。令旗令牌。使得便宜行事。如是而兵有不精。賊有不滅。臣等亦無以逃其死。以上言申明律例。獲效必速。請頒令旗令牌。夫任不專。權不重。賞罰不行。以至於僨軍敗事。然後選重臣。假以總制之權。而往拯之。縱善其後。已無救於其所失矣。臣才識淺昧。且體弱多病。自度無足以辦此。行從陛下乞骸骨。苟全餘喘於林下。但今方待罪於此。心知其弊。不敢不爲陛下盡言。自請旗牌。恐人疑爲貪權。故又自明其脫屣名位之素志。陛下從臣之請。使後來者得效其分寸。收討賊之功。臣亦得以少遁死罪於萬一。

文章之道。以氣象光明俊偉爲最難而可貴。如久雨初晴。登高山而望曠野。如樓俯大江。獨坐明窗淨几之下。而可以遠眺。如英雄俠士。襦裘裘而來。絕無齷齪猥鄙之態。此三者。皆光明俊偉之象。文中有此氣象者。大抵得於天授。不盡關乎學術。自孟子韓子而外。惟賈生及陸敬輿蘇子瞻。得此氣象最多。陽明之文。亦有光明俊偉之象。雖辭旨不甚淵雅。而其軒爽洞達。如與曉事人語。表裏粲然。中邊俱徹。固自不可幾及也。玩弟之文筆。光明豁達。得之天授。若更加以學力。使篇幅不失之冗長。字句悉歸於精當。則優入古人之域。不自覺矣。

方苞請矯除積習自興起人材劄子

此疏爲乾隆二年所上。公年七十矣。公以康熙三十八年舉於鄉。四十五年成進士。時年三十九歲。因聞母病。未應殿試而歸。五十年。以戴名世之案。被逮入京。下獄。五十二年出獄。召入南書房。雍正間。屢遷至內閣學士。乾隆二年。擢禮部右侍郎。上此疏。

臣聞人臣之義。國爾忘家。君爾忘身。士大夫敦尙氣節。東漢以後。惟前明爲盛。居官而致富厚。則朝士避之若浼。鄉里皆以爲羞。至論大事。擊權姦。則大臣多以去就爭。臺諫之官。朝受廷杖。諫疏夕具。連名繼進。至魏忠賢播惡。自公卿以及庶官。甘流寬。捐腰領。受錐鑿炮烙之毒。而不悔者。踵相接也。雖曰激於意氣。然亦不可謂非忠孝之實心矣。惟其如是。故正嘉以後。國政偵於上。而臣節砥於下。賴以維持而不至亂亡者。尙百有餘年。以上言前明氣節之盛。臣竊見之本朝。敬禮大臣。優恤庶官。遠過於前明。而公卿大臣。抗節效忠者。寥寥無幾。士大夫之氣習風聲。則遠不逮也。臣少遊四方。所至輒問守土之吏之爲民利病者。無何而大病於民者。已列薦章矣。民所愛戴者。多因事罷黜矣。叩其故。則曰此富人也。非然。則督撫之親戚故舊也。非然。則善於趨承詭法逢迎者也。其罷黜者。則以某事忤某上官耳。間有貪殘而被劾。循良而得舉者。則督撫兩司中。必有賢者焉。而亦寥寥可數矣。以上言外官之積習。至於九卿乃九牧之倡。萬官庶事之樞紐也。督撫臺垣之條奏。特下九卿。必國體民生所繫。猶叩樹本。百枝皆動。而可或有差忒乎。以臣所聞見。凡下廷議。其爲督撫所奏請。則衆皆曰此某部某長官所交好也。或上方嚮用未敢駁正也。已而議上。則果謂宜從矣。其爲科道所條奏。則衆皆曰原議某所建也。其事某某所不

利也。已而饒上，則果謂必不可從矣。科道僚臺部議駁斥者多，此其後來更甚。同官中卽有持正，而力爭，各部院卽有心知其非，不肯畫題者，而其議之上達自若也。其保舉僚屬，半出私意，亦不異於外吏。但偏近鞏轂，耳目衆著，出於公道，尙可參半耳。以上言京官之積習，是以聖祖仁皇帝中年以後，灼知此弊，刑誅流錮，以懲姦貪，拔擢矜全，以勸廉吏，而親信清公樸實之人，世祖憲皇帝敬承此意，極力廓清，宵旰孜孜，惟務發外吏之欺蒙，破在廷之結習，十餘年間，少知畏法，而終未革心。蓋由營私附勢之習深，而正直公忠之人少也。我皇上至誠惻怛，諄諄開諭，可謂深切著明矣。而特旨薦舉，服在大僚，尙或引用富人，以便身家，在外督撫，多以報荒爲難，而州縣又以匿荒爲自安之計，其有不肖者，每遭歲歉，轉日夜徵比，以迫蹙貧民，冀邀蠲免，因緣爲利，此風不改，則皇上日夜憂勤於上，而治教禁令，不能不墮壞於冥昧之中，尙安望百度之皆登，實德之及下乎？以上言三聖整頓而積習未革，臣伏讀三年中前後諭旨，於臣所陳之積弊，亦既洞晰於聖心，而思有以矯革之矣。然所以矯革之者，則有本統焉。文武之政，非其人猶莫舉，而知人則哲，帝堯猶難之，治道之興，必內而六部都察院，各得忠誠無私，深識治體者兩三人，然後可以檢制僚屬，而防胥吏之姦欺，外而督撫兩司，每省必得公正無欲，通達事理者三四人，然後可董率道府，辦察州縣，以切究生民之利病，能如此者，乃有才有識有守，而幾於有德者也。雖數十人，數人不易得，況一旦而得數十人哉？然不如是，終不可以興道而致治。孟子云：猶七年之病，求三年之艾也。自古聖君賢主，未嘗借才於異代，亦惟我皇上勤心以察之，依類以求之，按實積久以磨礪之，信賞必罰，期以勸懲之耳。以上言爲政在於得人，知人之道有四端，所謂勤心以察之者，一則明辨部議會議是非之實也，凡一事之興廢，其利害常伏於數傳之後，故雖周公之聖，猶有仰而思之，夜以繼日，而未得者，況庸常之人，雜以私意，而揣摩瞻徇乎？而姦邪文法之吏，每能巧飾偏辭，變亂是非，言之鑿鑿，使觀者難辨，孔子所以惡佞之亂義，惡利口之覆邦家也。是以唐宋以來，凡廷議以宰相爲斷決之，以學士參議之，以給事中駁正之，自明中葉以後，姦相擅權，毒流天下，聖祖仁皇帝時，亦有以招撫籠賄，家累鉅萬者，賴聖明剛斷，同時罷黜，而自是以後，潔己自好者，皆以避權爲安，內閣擬票，雖有兩簽，從未有摘發部議之非，而奏請改議者，古者御史之外，別設給事中，專駁宰相成議，上及詔旨，而南宋以後，舊典寔廢，以故朱子屢數之，以臣所聞見，聖祖仁皇帝，世祖憲皇帝，暨我皇上，時有盡屏廷議。

而獨斷其行止者。命下必大服衆心。故臣愚以爲凡部議會議。有關於國體民生者。勿遽批發。必再三尋覽。以究其事理之虛實。意見之公私。微有所疑。必召平時聖心素信其忠誠無私。通達事理者。盡屏左右。每人而獨問之。參伍衆說。然後內斷於聖心。此卽虞舜好問好察。以輔其惟精惟一之學。而孔子所歎爲大智也。臣伏見皇上於部議從者十九。於九卿兩議。大抵從其列名衆多者。道路之口。頗有未協。聖心如天。或以爲主議者衆。必人心所同。而不知其實乃本部一二人之私意。或九卿中一二人之偏見。怯懦瞻徇者。明知其非。而不敢辨也。右觀察部議會議抑又聞用入之道。惟知之爲難。凡人之智識。必叩之而後知其材勇。必試之而後見其忠邪誠僞。必久與之習。而後得其真。太公望。文王之師也。武王用之。猶反覆窮究。相與問答者。凡數萬言。管夷吾。齊國之望。鮑叔牙所深知也。桓公用之。猶每事諮度。相與問答者。凡數萬言。武王問太公之語。見六韜。桓公問管仲之語。見管子。各數萬言。方今四海九州。萬事百度。皆總歸於六部。而決於卿貳五六人。每日文書到部。最少一二百件。苟一事之失其理。則姦心必滋於蠹吏。實害必被於兵民。即此五六人。皆至公至明。虛己和衷。日夜講求。尙慮其有失誤。而我皇上於六部卿貳中。灼知其才識。深信其忠誠者。凡幾人乎。古聖王用人。惟己必先勞於求賢。臣伏願皇上。惟盛暑嚴寒。宜安聖躬。不可過勞。外此少有餘閒。即延見廷臣。凡六部都察院奏事。披覽之下。微有所疑。卽召見問訊。使各陳所見。聽其言語。則明昧可知矣。觀其氣象。察其精神。則公正私曲。大略可見矣。卽有利口而飾爲抗直。邪媚而貌類恭敬者。以我皇上之至誠至明。久與之習。必有呈露於幾微。而不能自揜者矣。其餘京堂科道條陳。屢合事理。翰林敷奏。深當聖心者。亦宜慎選其人。俾輪班侍值。事有疑難。隨時召問。以習察其志行。而劑度其材能。至于大僚中。已爲我皇上所深信者。尤宜朝夕燕見。與議論天下之事。以窺究其底蘊。右觀察部院堂官果能忠誠無私。而又通達事理。則於同官百吏。皆能助皇上以檢察。而得其實矣。以上勤心以察之。所謂依類以求之者。天下惟君子與小人。性情心術。如冰炭之不相入。小人所悅。必諛佞側媚者。雖有才智。而爲國患更深。樸直清慎者。雖無才智。尙可奉公守法。竭力自效。是以周公立政之篇。所三致意者。惟勿用儉人。而求吉士。以勸相國家而已。所謂儉人諛佞。側媚而有才智者也。所謂勸相樸直。清正之士。雖才智不足。而率作策勵。尙可以有輔於庶政也。自古有君子而誤信小人者。斷無小人而能進君子者。故求賢之道。必以其類爲招。保舉舊例。臨時按品秩

資格俾各舉一二人。法本無愆。而人多難信。我皇上於在內之九卿。在外之督撫。深信其忠誠無欲者。必各有數人。伏願特下密旨。命盡舉所知。而別其才之所宜。然後考覆試驗。而次第用之。比之按資格以汎舉者。必爲得實。而聽請託利身家之結習。不禁而自除矣。以上依類以求之。所謂切實積久以磨礱者。自漢唐以後。雖仍六官之名。而職事多非周官之舊矣。而就今功令所宜秉承者。則吏部之職。非獨按籍呼名。循例黜陟也。其實在使請囑者。望風而自止。巧法者百變而難欺。戶部之職。非獨謹守管鑰。會計出納也。其實在明於萬貨滋殖之源。生民實耗之本。禮部雖奉行舊典。而事有特舉。必當酌古準今。可爲後法。且實清端直。無玷其官。兵部之實。在戢將校之驕氣。以綏靖兵民。消禍變于無形。以折衝萬里。此段立論太高。多不切於事實。今之兵部與將校並不相接。何能撤其驕氣。刑部之實。在時情罪之寬嚴。以砥維風教。辦四方之僞獄。以震懾職司。工部之實。在識海內山川之形勢。以知疏鑿之宜。覈水土人功之等差。以定工程之度。至於都察院之設。本以肅朝廷之綱紀。儆百吏之官常。劾中外文武之不法。而自副都御史郭秀排擊要人以後。郭秀參劾明彙名震中外五十年來。未聞力爭國家之大事。斥指大吏之非人者。不過掌行過文書而已。然則此職蓋幾於虛曠矣。伏願我皇上於都察院卿貳。必慎簡忠誠。而以明達者佐之。辨其材之所宜。而各責之以實。使日夜奮勵其僚屬。而隨時以進退之。則中材以上。咸自矜奮。數年以來。公正之風可作。而練達事理者亦漸多矣。以上切實積久以磨礱之所謂信賞必罰以懲勸者。凡中人之志行。多以獎進激勵而成。平時主部議者。不過正卿中一二人。主會議者。不過九卿中皇上所需用之數人。順從緘默者。長得自安。據理直言者。必遭忌嫉。積習爲常。所以靡靡日趨於瞻徇。而非果竟無人也。倘我皇上時時延見。一一考驗。忠詳者篤信之。明達者褒嘉之。懷私者廢斥之。庸昧者退罷之。則旬歲之間。勃然而興起矣。世宗憲皇帝於大計保舉之員。賊罪敗露。督撫降調。司道革職。條例甚嚴。而奉行不實。惟奉特旨。獨舉一人者。降調甚多。而督撫司道之計典無聞焉。蓋以所舉衆多。不能盡詰。而姑從寬貸耳。用此賂請陰行。舉劾顛倒。無所顧忌。若一依雍正六年定例。執法不移。則孰敢徇私任意以自累乎。自耗羨歸公以後。以下言州縣及京官資給宜優。與本段信賞必罰之意。不相聯貫。州縣之繁劇者。養廉至千數百金。猶不足延幕客。辦公事。在內諸司。雖蒙加俸一倍。猶不足以僦雇賃僕。秣馬供車。伏願通計天下之耗羨。及經賦所餘。詳加籌畫。必使州縣得備其公事。諸司得

贍其身家。然後一犯賊私。嚴法不貸。其聲績顯著者。則時賜全帛。進爵秩。而使久於其任。如此則凡爲吏者。皆得俯仰寡然。潔己以奉公。孰肯苟且行私。以自取終身之墜陷乎。以上借賞必罰以懲勸之信能行此四者。則忠良有恃以不恐。奸邪有術而難施。中外大臣。日夜孜孜以進賢退不肖爲己任。庶司百吏。皆知奉公守法。潔己愛民之爲安。數年之後。衆正盈庭。官守經法。民無佞心。雖大艱猝投。無難共濟。而況舉先王足民之大經。布前代屢驗之良法。尙何慮其阻撓廢格。縱私生事以擾民乎。至於民食既足。則當漸爲禮俗之防。官常既修。則當實講教士之法。內治既定。則興屯衛於邊關。設軍田於內地。使精神可以折衝。立制防於海嶠。謹治教於苗疆。使患消于未兆。皆宜次第修舉。而臣不敢以爲言。誠以積習不除。人材不足。官常不立。則爲之而必不可成。成之而必不可久也。凡所陳奏。皆臣五十年來所耳聞目見。確知其狀。不得入告聖明者。臣老矣。生世無幾時。如以臣言爲可用。伏望留臣此摺。以驗羣情。以考治法。時復賜覽。如用臣言。而無利於民。無益於國。雖臣死之後。尙可奪臣之爵命。播臣之過言。以示懲責也。昧死上陳。不勝悚息瞻企之至。謹奏。

望溪先生古文辭。爲國家二百餘年之冠。學者久無異辭。卽其經術之湛深。八股文之雄厚。亦不愧爲一代大儒。雖乾嘉以來。漢學諸家。百方攻擊。曾無損於毫末。惟其經世之學。持論太高。當時同志諸老。自朱文端楊文定數人外。多見謂迂闊而不近人情。此疏閱歷極深。四條皆確實可行。而文氣深厚。則國朝奏議中所罕見。況甫生平篤慕望溪。嘗欲疏請從祀孔廟。蓋將奉爲依歸。昔望溪於乾隆初。請以湯文正從祀聖廟。未蒙俞允。厥後道光三年。湯公果祔祀聖廟。而望溪之志行。幾與湯公相伯仲。躋之兩廡。殆無愧色。況甫知取法乎上。或亦慨然瞻古而思齊與。

孫嘉公並二習一弊疏

臣一介庸愚。學識淺陋。荷蒙風紀重任。乾隆元年。孫文定公進此疏時。爲左都御史。故曰風紀重任。日夜悚惶。思竭愚夫之千慮。仰贊高深於萬一。而數月以來。捧讀上諭。仁心仁政。愷切周詳。凡臣民之心所欲。而口不敢言者。皇上之心而已。皇上之心。仁孝誠敬。加以明恕。豈復尙有可議。而臣猶欲有言者。正於心無不純。政無不善之中。

而有所慮焉。故過計而預防之也。今夫治亂之循環，如陰陽之運行。坤陰極盛而陽生，乾陽極盛而陰始。事當極盛之際，必有陰伏之機。其機藏於至微，人不能覺，而及其既著，遂積重而不可返。此其間有三習焉，不可不慎戒也。以上總舉大意言治亂循環，伏其機甚微，主德清則臣心服而頌，仁政多則民身受而感，出一言而盈廷稱聖，發一令而四海謳歌。在臣民原非獻諛，然而人君之耳，則熟於此矣。耳與譽化，匪譽則逆，故始而匡拂者拒，繼而木訥者厭，久而頌揚之不工者亦絀矣。是謂耳習於所聞，則喜諛而惡直。上愈智則下愈愚，上愈能則下愈長。趨諛諂媚，顧盼而皆然，免冠叩首，應聲而即是。在臣工以爲盡禮，然而人君之目，則熟於此矣。目與媚化，匪媚則觸，故始而倨野者斥，繼而嚴憚者疏，久而便辟之不巧者亦忤矣。是謂目習於所見，則喜柔而惡剛，敬求天下之士，見之多而以爲無奇也，則高己而卑人，慎辨天下之務，闕之久而以爲無難也，則雄才而易事，質之人而不聞其所短，返之己而不見其所過。於是乎意之所欲，信以爲不踰，令之所發，概期於必行矣。是謂心習於所是，則喜從而惡違。三習既成，乃生一弊，何謂一弊？喜小人而厭君子是也。以上實指耳目心三習生一喜小人而厭君子之弊。今夫進君子而退小人，豈獨三代以上知之哉？雖叔季之主，臨政願治，孰不思用君子，且自智之君，各賢其臣，孰不以爲吾所用者必君子，而決非小人，乃卒於小人進而君子退者，無他，用才而不用德故也。德者，君子之所獨，才則小人與君子共之，而且勝焉。語言奏對，君子訥而小人佞諛，則與耳習投矣。奔走周旋，君子拙而小人便辟，則與目習投矣。即課事考勞，君子孤行其意，而恥於言功，小人巧而迎合，而工於顯勤，則與心習又投矣。小人挾其所長以善投，人君溺於所習而不覺，審聽之而其言入耳，諦觀之而其貌悅目，歷試之而其才稱乎心也。於是乎小人不約而自合，君子不逐而自離，夫至於小人合而君子離，其患豈可勝言哉？而揆厥所由，皆三習爲之蔽焉。治亂之機，千古一轍，可考而知也。以上言所以小人進而君子退之故，皆由三習有以引之，而不自覺。我皇上聖明首出，無微不照，登庸耆碩，賢才彙升，豈惟並無此弊，亦並未有此習。然臣正及其未習也而言之，設其習既成，則有知之而不敢言，抑或言之而不見聽者矣。今欲預除三習，永杜一弊，不在乎外，惟在乎心。故臣願言皇上之心也。語曰：『人非聖人，孰能無過。』此淺言也。夫聖人豈無過哉？惟聖人而後能知過，惟聖人而後能改過。孔子曰：『五十以學易，可以無大過矣。』大過且有小過可知也。聖人在下，過在一身，聖人在上，過在一世，書

曰：「百姓有過，在予一人」是也。文王之民無凍餒，而猶視以爲如傷。惟文王知其傷也。文王之易贖天人，而猶望道而未見。惟文王知其未見也。賢人之過，庸人不知。聖人之過，聖人不知。賢人不知，欲望人之繩愆糾繆，而及於所不知，難已。故望皇上之聖心自懷之也。危微之辨精，而後知執中難允。懷保之願宏，而後知民隱難周。謹幾存誠，返之已而真知其不足。老安少懷，驗之世而實見其未能。夫而後欲然不敢以自是，不敢自是之意，流貫於用人行政之間。夫而後知諫諍切磋者，愛我良深。則諛悅爲容者，愚己而陷之阱也。耳目之習除，而便辟善柔便佞之態，一見而若流。取舍之極定，而嗜好宴安功利之說，無緣以相投。夫而後治臻於郅隆，化成於久道。以上言惟聖人能自見其過，而臣君以不自是，不自是之根不拔，則雖斂心爲慎，慎之久而覺其無過，則謂可以少寬。勵志爲勤，勤之久而覺其有功，則謂可以稍慰。夫賢良輔弼，海宇昇平，人君之心稍慰，而欲少自寬，似亦無害於天下，而不知此念一轉，則嗜好宴安功利之說，漸入耳而不煩，而便辟善柔便佞者，亦熟視而不見，其可憎，久而習焉，忽不自知而爲其所中，則黑白可以轉色，而東西可以易位，所謂機伏於至微，而勢成于不可返者，此之謂也。是豈可不慎戒而預防之哉。書曰：「滿招損謙受益。」又曰：「德日新，萬邦爲懷，志自滿，九族乃離。」大學言見賢而不能舉，見不賢而不能退，至於好惡拂人之性，而推所由失，皆因於驕泰。滿與驕泰者，自是之謂也。以上極言自是之害，由此觀之，治亂之機，轉於君子小人之進退，進退之機，握於人君一心之敬肆。能知非，則心不期敬而自敬，不見過，則心不期肆而自肆。敬者君子之招而治之本，肆者小人之媒而亂之階也。然則沿流溯源，約言微義，惟望我皇上時時事事，常存不敢自是之心，而天德王道，舉不外於此矣。以上總言治亂原於君子小人之進退，而實根於不自是，語曰：「狂夫之言，而聖人擇焉。」臣幸生聖世，昌言不諱，故敢竭其狂瞽，伏惟皇上包容，而垂察焉。則天下幸甚。

乾隆初，鄂張兩相嘗國。蔡文勤輔翼聖德，高宗聰明天衷，如旭日初升，四海清明，每詔諭頌示中外，識者以比之典謨誓誥。獨孫文定公，以不自是，匡弼聖德，可謂憂盛危明，以道事君者矣。純廟御宇六十年，盛德大業，始終不懈，未必非此疏裨助高深，厥後嘉慶元年，道光元年，臣僚皆抄此疏進呈。至道光三十年，文宗登極，壽陽相國祁雋藻，亦抄此疏進呈。余在京時，聞諸士友，多稱此疏爲本朝奏議第一，余以其文氣不甚高古，稍忽焉。

之。近年細加紬繹。其所云三習一弊。凡中智以上。大抵皆蹈此弊而不自覺。而所云自是之根不拔。黑白可以轉色。東西可以易位。亦非絕大智慧。猛加警惕者不能道。余與沆弟忝竊高位。多聞缺言。所謂三習者。余自反實所難免。沆弟屬官較少。此習較淺。然亦不可不預爲之防。吾昆弟各錄一通於座右。亦小宛詩人邁征之道也。

鳴原堂論文後序

右鳴原堂論文兩卷。吾師湘鄉曾文正公選漢唐已來。迄於國朝名臣奏疏十七首。論述義法。以證其弟沅甫宮保者。宮保出示定安。命校讎刊之。敘曰。三代以上。人巨告誡其君。如禹皋伊周召之所作。載在尚書。尚已。彼皆聖賢之徒。禮道深而更事久。其陳義甚高。而可見諸施行。其指斥甚直。而必出之和平淵懿。不爲危言悚論。詭激抵觸之辭。其託意甚幽遠。而使讀者易曉。其切于世情。而達於時變也。仍必原本道德。不爲一切苟且僥倖之計。至於春秋內外傳所錄。訐譏讜言。篤厚深笑。猶有訓誥遺意。下逮戰國士。或爲廈詞隱語。譏訕笑詈。聳撼炫賦。同於俳優。其不幸者。觸怒人主。身蹈大戮。稱慕烈矣。說亦稍憚焉。自茲以降。敷陳之道。約分兩途。儒者拘牽文義。喜談上古。致君必曰堯舜。禮樂必俟百年。井田封建學校之制。累牘而不煩。世主習聞其迂。則以爲老生常談。而厭薄之。智才之士。度時之所能行。揣摩迎合。以售其縱橫富彊之術。往往輒驗。天下稍驚於功利矣。若夫漢之賈誼。唐之陸贄。宋之蘇軾。陳善責難。累數萬言。論是非則持其平。講制度則求其當。達閭閻顛連之隱狀。顯軍中倚伏之秘謀。高而不戾於今。卑而不違夫古。豈非敷奏之極軌哉。善乎。公之論文也。曰。必其平日讀書學道。深造有得。實有諸己。而後獻諸君。又必熟于前代事蹟。本朝掌故。乃爲典雅。嗚呼。斯言盡之矣。公所爲奏疏若干卷。其佳篇傳播人間。士大夫多能舉其詞。所選經史百家雜鈔二十六卷。另刊行世。是書卷帙不多。蓋猶黃河之濫觴耳。然荷循河而東。乘秋水。駕巨筏。以望於北海。洋洋乎包天地而涵古今。豈不更爲宇宙大觀也哉。同治十二年九月。門人東瀨王定安敘於長沙寓齋。

仿古字版

會文正公孟子要略

世界書局印行

序

凡孟子書二百六十章。朱子采入要略者八十五章。其不入者曰：孟子見梁惠王，王立于沼上，章。寡人之于國也，章。寡人願安承教，章。晉國天下莫強焉，章。孟子見梁襄王，章。莊暴見孟子，章。文王之囿，章。交鄰國有道，章。齊宣王見孟子于雪宮，章。人皆謂我毀明堂，章。王之臣有託其妻子，章。所謂故國者，章。湯放桀，武王伐紂，章。爲巨室，章。齊人伐燕，勝之，章。齊人伐燕，取之，章。鄒與魯鬪，章。滕小國也，章。滕小國也，竭力以事大國，章。（以上梁惠王篇）曰：仁則榮，章。尊賢使能，章。伯夷非其君不事，章。天時不如地利，章。孟子將朝王，章。前日于齊，王餽兼金一百而不受，章。孟子之平陸，章。孟子謂蚺臆曰，章。孟子爲卿于齊，章。孟子自齊葬于魯，章。沈同以其私問曰，章。燕人畔，章。孟子致爲臣而歸，章。孟子去齊，宿于晝，章。孟子去齊，尹士語人曰，章。孟子去齊，居休，章。（以上公孫丑篇）曰：滕定公薨，章。滕文公問爲國，章。有爲神農之言者，章。墨者夷之，章。周霄問曰，章。彭更問曰，後車數十乘，章。宋小國也，今將行王政，章。孟子謂戴不勝曰，章。不見諸侯，何義，章。戴盈之曰，章。陳仲子，章。（以上滕文公篇）曰：三代之得天下也，章。人有恆言，章。天下有道，小德役大德，章。桀紂之失天下也，章。居下位而不獲于上，章。伯夷辟紂，章。求也爲季氏宰，章。存乎人者，章。恭者不侮人，章。男女授受不親，章。君子之不教子，章。有不虞之譽，章。人之易其言也，章。人之患，章。樂正子從于子敖之齊，章。子之從于子敖來，章。不孝有三，章。舜生于諸馮，章。子產聽鄭國之政，章。君之視臣如手足，章。無罪而殺士，章。君仁莫不仁，章。非禮之禮，章。中也養不中，章。言人之不善，章。言不必信，章。養生者，章。博學而詳說之，章。以善服人者，章。言無實不詳，章。徐子曰，章。王者之迹熄，章。君子之澤，章。可以取，章。逢蒙學射于羿，章。西子蒙不潔，章。天下之言性也，章。公行子，章。匡章通國皆稱不孝，章。曾子居武城，章。儲子曰，章。齊人有一妻一妾，章。（以上離婁篇）曰：語云：盛德之士，章。堯以天下與舜，章。人有言至于禹而德衰，章。百里奚自鬻于秦，章。周室班爵祿也，章。政問友，章。政問交，際何心也，章。士之不託諸侯，章。政問不見諸侯，章。孟子謂萬章曰：一鄉之善士，章。齊宣王問卿，章。（以上萬章篇）曰：性猶杞柳也，章。生之謂性，章。何以謂義內也，章。羿之教人射，章。任人有問屋廬，子曰：章。小弁，小人之詩也，章。孟子居鄒，章。先名實者，章。五霸者，章。魯欲使慎子爲將軍，章。今之事君者

章。吾欲二十而取一章。丹之治水也章。君子不亮章。魯欲使樂正子爲政章。古之君子如何則仕章。教亦多術矣章。（以上告子篇）曰。行之而不著焉章。恥之于人大矣章。古之賢王章。孟子謂宋句踐曰章。待文王而後興者章。附之以韓魏之家章。以佚道使民章。霸者之民章。仁言不如仁聲章。舜之居深山之中章。人之有德懋術知者章。有事君人者章。伯夷辟紂章。易其田疇章。孔子登東山章。楊子取爲我章。柳下惠不以三公易其介章。有爲者譬若掘井章。伊尹曰。予不狎于不順章。詩曰。不素餐兮章。仲子不義章。孟子自范之齊章。食而弗愛章。齊宣王欲短喪章。君子之所以教者五章。道則高矣。笑矣。章。天下有道章。滕更之在門也章。知者無不知也章。不仁哉。梁惠王也章。春秋無義戰章。盡信書章。有人曰。我善爲陳章。梓匠輪輿章。舜之飯糗茹草也章。吾今而後知殺人親之重也章。古之爲關也章。身不行道章。周于利者章。好名之人章。不信仁賢章。不仁而得國者章。民爲貴章。仁也者人也章。孔子之去魯曰章。君子之厄于陳蔡之間章。貉稽曰章。賢者以其昭昭章。山徑之蹊間章。禹之弊章。齊飢陳臻曰章。逃墨必歸于楊章。有布縵之征章。諸侯之寶三章。益成括仕于齊章。孟子之滕館于上宮章。曾皙喟然曰章。由堯舜至于湯章。（以上盡心篇）都一百七十五章。孟子之書。自漢唐以來。不列于學官。陸氏經典釋文亦不之及。而司馬光晁說之之倫。更相疑詆。至二程子始表章之。而朱子遂定爲『四書』。既著萃諸家之說。爲孟子精義。又采其尤者。爲集注七卷。又割晰異同。爲或問十四卷。用力亦已勤矣。而茲又簡擇爲要略五卷。好之如此其篤也。蓋深造自得。則夫詠于心而味于口者。左右而逢其源。參伍錯綜而備其條理。雖以國藩之蒙陋。讀之亦但見其首尾完具。而不復知衝決顛倒之爲病。則其型然而當于人人之心。可知已。國藩既承亡友劉君遺令。爲之排定付刻。因頗仿近思錄之例。疏明分卷之大指。俾讀者一覽而得焉。大賢之旨趣。誠知非末學所可幸中。獨未知于吾亡友之意。合邪否邪。死者不可復生。徒使予茫然四顧而傷心也夫。曾國藩又識。

朱子所編孟子要略。自來志藝文者。皆不著于錄。朱氏經義考。亦稱未見。竇應王白田氏爲朱子年譜。謂此書久亡佚矣。吾亡友漢陽劉茶雲傳聲。始于金仁山孟子集注考證內搜出。復還此書之舊。王氏勤一生以治朱子之業。號爲精核無倫。而不知要略一書。具載金氏書。即四庫館中諸臣。于金氏集注考證爲提要數百言。亦未嘗道及此書。蓋耳目所及。百密而不免一疏。事之常也。觀金氏所記。則朱子當日編緝要略。別爲注解。與集注間有異。

同。金氏于人皆有所不忍章云。要略注尙是舊說。楊應問曰章云。要略注文微不同。今散失既久。不可復覩。葉雲僅能排比次第。屬國藩校刻。以顯于世。抑猶未完之本與。然如許叔重五經異義。余隱文尊孟辨之類。皆經晦數百年矣。一旦于他書中刺取。掇零拾墜。遂復故物。則此書之出。安知不更有人焉。蒐得原注。以補今日之闕乎。天下甚大。來者無窮。必有能篤著朱子之書。罔羅以彌遺恨者。是吾葉雲地下之靈。禱祀以求之者也。道光二十九年四月。潮鄉會國藩敘。

朱子語類五則 第一百五卷

先生因編孟子要旨云。孟子若讀得無統。也是費力。某從十七八歲。讀至二十歲。只逐句去理會。更不通透。二十歲以後。方知不可恁地讀。元來許多長段。都自首尾相照管。脈絡相貫串。只恁地熟讀。自見得意思。從此看孟子。覺得意思極痛快。亦因悟作文之法。如孟子嘗時固不是要作文。只言語說出來。首尾相應。脈絡相貫。自是合著如此。又曰。某當初讀自暴自棄章。只恁地鶴突讀去。伊川易傳云。『拒之以不信。絕之以不爲。』當初也匹似閑看過。因在舟中偶思量。比將孟子上下文看。乃始通串。方始說得是。如此亦溫故知新之意。又曰。『看文字不可恁地看過便道了。須是時復玩味。庶幾忽然感悟到得義理。與踐履處融會。方是自得。這箇意思。與尋常思索而得。意思不同。』(葉賀孫)

問孟子首章。是先剖判箇天理人欲。令人曉得其託始之意甚明。若先生所編要略。卻是要從源頭說來。所以不同。曰。某向時編此書。今看來亦不必。只孟子便直恁分曉示人。自是好了。時舉曰。孟子前面。多是分明說與時君。且如章首說。上下交征利。其害便至于不奪不壓。說仁義。便云未有遺其親後。其君。次章說賢者。便有此樂。不賢者便不能有此樂。都是一反一正。言其效驗如此。亦欲人君少知恐懼之意耳。曰。也不是要人君知恐懼。但其效自必至此。孟子之書。明白親切。無甚可疑者。只要日日熟讀。須教他在吾肚中。轉作千百回。便自然純熟。某當初看時。要逐句去看他。便但覺得意思促迫。到後來放寬看。卻有條理。然此書不特是義理精明。又且是甚次第底文章。某因熟讀後便見。自此也知作文之法。(潘時舉)

敬之問看要略見先生所說孟子皆歸之仁義如說性反以後諸處皆然曰是他見得這道理通透見得裏面本來都無別物事只有箇仁義到得說將出都離這箇不得不是要安排如此道也是離這仁義不得舍仁義不足以見道如造化只是箇陰陽捨陰陽不足以明造化問古人似各有所主如曾子只守箇忠恕子思只守箇誠孟子只守箇仁義其實皆一理也曰也不是他安排要如此是他見得道理做出都是這箇說出也只是這箇只各就地頭說不是把定這箇將來做如堯舜是少道理到得後來衣鉢之傳只說「人心惟危道心惟微惟精惟一允執厥中」緊要在上三句說會如此方得箇中方得箇恰好這也到這地頭當說中便說箇中聖賢言語初不是著意安排只遇着這字便說出這字也（葉賀孫）

因整要略謂孟子發明許多道理都盡自此外更無別法思惟這箇先從性看看得這箇物事破了然後看入裏面去終不甚費力要知雖有此數十條是古人已說過不得不與他理會到得做工夫時卻不用得許多難勇猛底人截直便做去（葉賀孫）

敬之問要旨不取杞柳一章曰此章自分曉更無可玩索不用入亦可卻是生之謂性一段難曉說得來反恐驕突故不編入（葉賀孫）

朱子文集一則 第四十六卷

答黃直卿書云前書所論大學兩條似未然如此則是「明德新民」其初且苟簡做一截到「止于至善」處又子細做一截也知至之至向來卻是誤作切至之至只合依舊爲極至之至然此至字雖與至善之至皆訓極字而用處不同至善是自然極至之至知至是功夫極至之至難作一例說也可試思之此義非獨熹不謂然以示季通諸人亦皆疑直卿不知何故作此見也病中看得孟子要略數章分明覺得從前多是衍說已略修正寫去此書似有益于學者但不合顛倒卻聖賢成書此爲未安耳大學諸生看者多無入處不如看語孟者漸見次第不知病在甚處似是規模太廣令人心量包羅不得也

真西山文集一則 第二十九卷

孟子要略後序云。太守陳侯既刊文公朱先生論語詳說于郡齋。又得孟子要略以示學者。曰。『先生之于孟子。發明之也至矣。其全在集注。而其要在此編。蓋性者義理之本源。學者必明乎此。而後知天下萬善皆由此出。非有假乎外也。』故此編之首曰性善焉。性果何物哉。曰五常而已矣。仁義者五常之綱領也。故論性之次曰仁義焉。心者性之主。不可以無操存持養之功。故論心爲仁義之次。事親從兄。天性之自然。而本心發見之尤切者也。故孝弟爲論心之次。仁義者人心之所同。而所以賊之者利也。學者必審乎義利之分。然後不失其本心之正。故義利爲孝弟之次。義利明矣。推之于出處。則修吾天爵而不誘于人爵。推之于政事。則純乎王道而不雜乎霸功。故義利之次。二者繼之。聖賢之學。循天理之正。所以盡其性也。異端之學。徇人欲之私。所以拂其性也。故以是終焉。先後次第之別。其指豈不甚明也哉。學者于集注求其全體。而于此玩其要旨焉。則七篇之義。無復餘蘊矣。雖然。學者之于道。豈苟知而已耶。昔嘗聞先生與其門人論輯此書之意。而誨之曰。『觀書不可僅過目而止。必時復玩味。庶幾忽然感悟。到得義理與踐履處融會。乃爲自得。』嗚呼。是又先生教人之要指也。予之刻此書也。豈苟然哉。侯以序引見屬。退惟未學。未能窺先生之門牆。故于侯之命雖不敢辭。而亦不敢以序自任也。故論次侯本語。系諸編末。爲朋友共講云。

朱竹垞經義考一則 第二百三十四卷

孟子要略（未見）真德秀序曰。（云云見上）按是序亦載劉燾雲莊集

王白田朱子年譜一則 第四卷考異第四卷

光宗紹熙三年壬子六十三歲。孟子要略成。語錄云云見上考異。云李本無。洪本附注除知靜江府之下。今立一條。要略又名指要。一名要指。蓋一書也。其書今不傳。故附載語錄。以見其概。

孟子要略目次

言人性本善欲存人心養性以復其初·····	一
論孝弟之道·····	七
嚴義利之辨·····	九
辯王霸之方明治道之要·····	一三
孟子尚論古人而自言其爲學要領·····	一七

孟子要略

一 言人性本善欲人存心養性以復其初

滕文公爲世子。將之楚。過宋而見孟子。孟子道性善。言必稱堯舜。世子自楚反。復見孟子。孟子曰。『世子疑吾言乎。夫道一而已矣。成鬲謂齊景公曰。『彼丈夫也。我丈夫也。吾何畏彼哉。』顏淵曰。『舜何人也。予何人也。有爲者。亦若是。』公明儀曰。『文王我師也。周公豈欺我哉。』今滕絕長補短。將五十里也。猶可以爲善。國書曰。『若藥不瞑眩。厥疾不瘳。』』集注云。孟子之言性善。始見于此。而詳具于告子之篇。然默識而旁通之。則七篇之中。無非此理。國藩謹按朱子編次要略一書。于每卷之首章必有數語發明大指。今其說不可得聞。然如此章集注之說。則要略之所以託始于此者。亦益可窺尋矣。

公都子曰。『告子曰。性無善無不善也。或曰。性可以爲善。可以爲不善。是故文武與則民好善。幽厲與則民好暴。或曰。有性善有性不善。是故以堯爲君而有象。以瞽瞍爲父而有舜。以紂爲兄之子且以爲君。而有微子啓。王子比干。今日性善。然則彼皆非與。』孟子曰。『乃若其情。則可以爲善矣。乃所爲善也。若夫爲不善。非才之罪也。惻隱之心。人皆有之。羞惡之心。人皆有之。恭敬之心。人皆有之。是非之心。人皆有之。惻隱之心。仁也。羞惡之心。義也。恭敬之心。禮也。是非之心。智也。仁義禮智。非由外繇我也。我固有之也。弗思耳矣。故曰。『求則得之。舍則失之。或相倍蓰。而無算者。不能盡其才者也。』詩曰。天生蒸民。有物有則。民之秉夷。好是懿德。孔子曰。爲此詩者。其知道乎。故有物必有則。民之秉夷也。故好是懿德。』

孟子曰。『人之所以異于禽獸者幾希。庶民去之。君子存之。舜明于庶物。察于人倫。由仁義行。非行仁義也。』曹交問曰。『人皆可以爲堯舜。有諸。』孟子曰。『然。』交聞文王十尺。湯九尺。今交九尺四寸以長。食粟而已。如何則可。』曰。『奚有于是。亦爲之而已矣。有人于此。力不能勝一匹雞。則爲無力人矣。今日舉百鈞。則爲有力人矣。然則舉烏獲之任。是亦爲烏獲而已矣。夫人豈以不勝爲患哉。弗爲耳。徐行後長者。謂之弟。疾行先長者。謂之

不弟。夫徐行者豈人所不能哉。所不爲也。堯舜之道。孝弟而已矣。子服堯之服。誦堯之言。行堯之行。是堯而已矣。子服桀之服。誦桀之言。行桀之行。是桀而已矣。』曰。『交得見于鄒君。可以假館。願留而受業于門。』曰。『夫道若大路然。豈難知哉。人病不求耳。子歸而求之。有餘師。』

告子曰。『性猶湍水也。決諸東方則東流。決諸西方則西流。人性之無分于善不善也。猶水之無分于東西也。』孟子曰。『水信無分于東西。無分于上下乎。人性之善也。猶水之就下也。人無有不善。水無有不下。今夫水搏而躍之。可使過頽。激而行之。可使在山。是豈水之性哉。其勢則然也。人之可使爲不善。其性亦猶是也。』

孟子曰。『人皆有不忍人之心。先王有不忍人之心。斯有不忍人之政矣。以不忍人之心。行不忍人之政。治天下可運之掌上。所以謂人皆有不忍人之心者。今人乍見孺子將入于井。皆有怵惕惻隱之心。非所以內交于孺子之父母也。非所以要譽于鄉黨朋友也。非惡其聲而然也。由是觀之。無惻隱之心。非人也。無羞惡之心。非人也。無辭讓之心。非人也。無是非之心。非人也。惻隱之心。仁之端也。羞惡之心。義之端也。辭讓之心。禮之端也。是非之心。智之端也。人之有是四端也。猶其有四體也。有是四端。而自謂不仁者。自賊者也。謂其君不能者。賊其君者也。凡有四端于我者。知皆擴而充之矣。若火之始然。泉之始達。苟能充之。足以保四海。苟不充之。不足以事父母。』

孟子曰。『人皆有所不忍。達之于其所忍。仁也。人皆有所不爲。達之于其所爲。義也。人能充無欲害人之心。而仁不可勝用也。人能充無穿踰之心。而義不可勝用也。人能充無受爾汝之實。無所往而不爲義也。』集注云。爾汝。人所輕賤之稱。人雖或有所貪味。隱忍而甘受之者。然其中心必有慚忿而不肯受之之實。人能卽此而推之。使其充滿無所虧缺。則無實而非義矣。語錄云。文公因沈儒之間。自謂注中因何解不分曉。謂實字當對名字說。不欲人以爾汝之稱加諸我。是惡爾汝之名也。然反之于身而去其無可爾汝之行。是能充其無受爾汝之實也。金氏集注考證云。履程按注中不分期者。謂舊說作誠實解也。然今注亦未大分曉。當從語錄之說。士未可謂以而言。是以言鈺之也。可以言而不言。是以不言鈺之也。是皆穿踰之類也。』金氏曰。此章要略注尙是舊說。國藩謹按此要略注之舊說。今不可詳。恐卽無受汝之實一節。金氏所謂舊說作誠實解者也。故備錄集注語錄及金氏之說于右。

告子曰：『食色性也。仁內也。非外也。義外也。非內也。』孟子曰：『何以謂仁內義外也。』曰：『彼長而我長之。非有長于我也。猶彼白而我白之。從其白于外也。故謂之外也。』曰：『異于張氏曰。異于二字疑衍。李氏曰。或有闕文。白馬之白也。無以異于白人之白也。不識長馬之長也。無以異于長人之長與。且謂長者義乎。長者之義乎。』曰：『吾弟則愛之。秦人之弟則不愛也。是以我爲悅者也。故謂之內也。楚人之長。亦長吾之長。是以長爲悅者也。故謂之外也。』曰：『耆秦人之炙。無以異于耆吾炙。夫物則亦有然者也。然則耆炙亦有外與。』

孟子曰：『富歲子弟多賴。凶歲子弟多暴。非天之降才爾殊也。其所以陷溺其心者然也。今夫辨麥播種而糲之。其地同。樹之時又同。淳然而生。至于日至之時。皆熟矣。雖有不同。則地有肥磽雨露之養。人事之不齊也。故凡同類者。舉相似也。何獨至于人而疑之。聖人與我同類者。故龍子曰。不知足而爲履。我知其不爲躄也。履之相似。天下之足同也。口之于味。有同耆也。易牙先得我口之所嗜者也。如使口之於味也。其性與人殊。若犬馬之與我不同類也。則天下何者皆從易牙之於味也。至于味。天下期于易牙。是天下之口相似也。惟耳亦然。至于聲。天下期于師曠。是天下之耳相似也。惟目亦然。至于子都。天下莫不知其姣也。不知子都之姣者。無目者也。故曰。口之于味也。有同耆焉。耳之于聲也。有同聽焉。目之于色也。有同笑焉。至于心。獨無所同然乎。心之所同然者何也。謂理也。義也。聖人先得我心之所同然耳。故理義之悅我心。猶芻豢之悅我口。』

孟子曰：『牛山之木嘗美矣。以其交于大國也。斧斤伐之。可以爲美乎。是其日夜之所息。雨露之所潤。非無萌蘖之生焉。牛羊又從而牧之。是以若彼濯濯也。人見其濯濯也。以爲未嘗有材焉。此豈山之性也哉。雖存乎人者。豈無仁義之心哉。其所以放其良心者。亦猶斧斤之于木也。且旦而伐之。可以爲美乎。其日夜之所息。平旦之氣。其好惡與人相近也者幾希。則其旦晝之所爲。有梏亡之矣。梏之反覆。則其夜氣不足以存。夜氣不足以存。則其違禽獸不遠矣。人見其禽獸也。而以爲未嘗有才焉。是豈人之情也哉。故苟得其養。無物不長。苟失其養。無物不消。』

孔子曰：『操則存。舍則亡。出入無時。莫知其鄉。惟心之謂與。』

孟子曰：『有天爵者。有人爵者。仁義忠信。樂善不倦。此天爵也。公卿大夫。此人爵也。古之人。修其天爵。而人爵從之。今之人。修其天爵。以要人爵。既得人爵。而棄其天爵。則惑之甚者也。終亦必亡而已矣。』

孟子曰：『欲貴者，人之同心也。人人有貴於己者，帝昀耳。人之所貴者，非良貴也。趙孟之所貴，趙孟能聽之。詩云：既醉以酒，既飽以德，言鮑平仁義也。所以不願人之膏粱之味也。令聞廣譽施于身，所以不願人之文繡也。』

孟子曰：『今有無名之指，屈而不信，非疾痛害事也。如有能信之者，則不遠秦楚之路，為指之不若人也。指不若人，則知惡之心不若人，則不知惡。此之謂不知類也。』

孟子曰：『拱把之桐梓，人苟欲生之，皆知所以養之者。至于身，而不知所以養之者，豈愛身不若桐梓哉？弗思甚也。』

孟子曰：『人之于身也，兼所愛，兼所愛，則兼所養也。無尺寸之膚不愛焉，則無尺寸之膚不養也。所以考其善不善者，豈有他哉？于己取之而已矣。禮有貴賤，有大小，無以小害大，無以賤害貴。養其小者為小人，養其大者為大人。今有場師，舍其梧槲，養其楸棘，則為賤場師焉。養其一指，而失其肩背而不知也，則為狼疾人也。飲食之人，則人賤之矣。為其養小以失大也。飲食之人，無有失也，則口腹豈適為尺寸之膚哉？』

公都子問曰：『鈞是人也，或為大人，或為小人，何也？』孟子曰：『從其大體為大人，從其小體為小人。』曰：『鈞是人也，或從其大體，或從其小體，何也？』曰：『耳目之官，不思而蔽于物，物交物則引之而已矣。心之官則思，思則得之，不思則不得也。此天之所以與我者。先立平其大者，則其小者不能奪也。此為大人而已矣。』國藩謹按：人性皆善本體也。存心養性以復其初工夫也。孟子之言大抵就本體指點而示人以致功之方。如滕文公章句性善者本體也。藥服敗者工夫也。公都子章非由外鍊者本體也。求則得之者工夫也。異于禽獸章幾希者本體也。存之者工夫也。曹交章可為堯舜者本體也。徐行後長者工夫也。人皆有不忍章四端者本體也。擴充者工夫也。自此以上十六章，皆可類推。自此以下各章，則歸重工夫一邊。朱子編輯之意既已不傳，而吾亡友劉君又不可作，竊以意妄闡次第如此。

孟子曰：『仁人心也。義人路也。舍其路而弗由，放其心而不知求，哀哉！人有雞犬放，則知求之，有放心而不知求，學問之道無他，求其放心而已矣。』

孟子曰：『養心莫善于寡欲。其為人也寡欲，雖有不存焉寡矣。其為人也多欲，雖有存焉寡矣。』

孟子曰：「大人者，不失其赤子之心者也。」

孟子曰：「形色天性也。惟聖人可以踐形。」

孟子曰：「萬物皆備于我矣。反身而誠，樂莫大焉。彊恕而行，求仁莫近焉。」

孟子曰：「盡其心者，知其性也。知其性，則知天矣。存其心，養其性，所以事天也。夭壽不貳，修身以俟之，所以立命也。」

孟子曰：「君子深造之以道，欲其自得之也。自得之，則居之安，居之安，則資之深，資之深，則取之左右逢其原。故君子欲其自得之也。」

王子墊問曰：「土何事？」孟子曰：「尚志。」曰：「何謂尚志？」曰：「仁義而已矣。殺一無罪，非仁也。非其有而取之，非義也。居惡在，仁是也。路惡在，義是也。居仁由義，大人之事備矣。」

孟子曰：「矢人豈不仁于函人哉？矢人惟恐不傷人，函人惟恐傷人，巫匠亦然。故術不可不慎也。孔子曰：里仁爲美，擇不處仁，焉得智？夫仁，天之尊爵也。人之安宅也。莫之禦而不仁，是不智也。不仁不智，無禮無義，人役也。人役而恥爲役，由弓人而恥爲弓，矢人而恥爲矢也。如恥之，莫如爲仁。仁者如射，射者正己而後發，發而不中，不怨勝己者，反求諸己而已矣。」

孟子曰：「君子所以異于人者，以其存心也。君子以仁存心，以禮存心。仁者愛人，有禮者敬人。愛人者人恆愛之，敬人者人恆敬之。有人于此，其待我以橫逆，則君子必自反也。我必不仁也，必無禮也。此物奚宜至哉？其自反而仁矣，自反而有禮矣。其橫逆由是也。君子必自反也。我必不忠，自反而忠矣。其橫逆由是也。君子曰：此亦妄人也已矣。如此則與禽獸奚擇哉？于禽獸又何難焉。是故君子有終身之憂，無一朝之患也。乃若所憂，則有之。舜人也，我亦人也。舜爲法于天下，可傳于後世，我由未免爲鄉人也。是則可憂也。憂之如何，如舜而已矣。若夫君子所患，則亡矣。非仁無爲也，非禮無行也。如有一朝之患，則君子不患矣。」

孟子曰：「愛人不親，反其仁。治人不治，反其智。禮人不答，反其敬。行有不得者，皆反求諸己，其身正而天下歸之。詩云：『永言配命，自求多福。』」

孟子曰：「舜發于畎畝之中，傳說舉于版築之間，膠鬲舉于魚鹽之中，管夷吾舉于士，孫叔敖舉于海，百里奚舉于市。故天將降大任于是人也，必先苦其心志，勞其筋骨，餓其體膚，空乏其身，行拂亂其所爲，所以動心忍性，曾益其所不能。人恆過然後能改，困于心，衡于慮，而後作，徵于色，發于聲，而後喻。入則無法家拂士，出則無敵國外患者，國恆亡。然後知生于憂患，而死于安樂也。」程子曰：「自舜發于畎畝以下，若要熟也，須從這裏過。」尹氏曰：「言困窮拂鬱能堅人之志，而熟人之仁，以安樂失之者多矣。國藩謹按：孟子之意，欲人明于窮通順逆，乃屈伸自然之常，但處安順者易以感痛致吝，處困窮者易以惕厲致福耳。朱子篇此章于要略首卷，意謂不仁者不可以久處，約能動忍困橫以處窮約，正其疆勉以存養本心也。自此以下各章，皆承疆勉以存本心之意。」

孟子曰：「無爲其所不爲，無欲其所不欲，如此而已矣。」

孟子曰：「無或乎王之不智也。雖有天下易生之物也，一日暴之，十日寒之，未有能生者也。吾見亦罕矣。吾退而寒之者至矣。吾如有萌焉，何哉？今夫弈之爲數，小數也，不專心致志，則不得也。弈秋，通國之善弈者也，使弈秋誨二人弈，其一人專心致志，惟弈秋之爲聽，一人雖聽之，一心以爲有鴻鵠將至，思援弓繳而射之，雖與之俱學，弗若之矣。爲是其智弗若與？曰：非然也。」

孟子曰：「仁之勝不仁也，猶水勝火。今之爲仁者，猶以一杯水救一車薪之火也，不熄，則謂之水不勝火，此又與于不仁之甚者也，亦終必亡而已矣。」

孟子曰：「五穀者，種之美者也，苟爲不熟，不如糞稗。夫仁亦在乎熟之而已矣。」

孟子曰：「自暴者，不可與有言也，自棄者，不可與有爲也，言非禮義，謂之自棄也。吾身不能居仁由義，謂之自棄也。仁，人之安宅也，義，人之正路也，曠安宅而弗居，舍正路而弗由，哀哉！」

孟子曰：「人不可以無恥，無恥之恥，無恥矣。」

孟子曰：「不仁者可與言哉，安其危而利其蓄，樂其所以亡者，不仁而可與言，則何亡國敗家之有？有孺子歌曰：『滄浪之水清兮，可以濯我纓，滄浪之水濁兮，可以濯我足。』孔子曰：『小子聽之，清斯濯纓，濁斯濯足矣，自取之也。』夫人必自侮，然後人侮之，家必自毀，而後人毀之，國必自伐，而後人伐之。」太甲曰：「天作孽，猶可違，自作

孽不可活。」此之謂也。」集注云。不仁之人。私欲固執。失其本心。故其顛倒錯亂。至于如此。又云。此章言心存則有以審夫得失之幾。不存則無以辨于存亡之著。禍福之來。皆其自取。國儲謹按。此章言不仁者。知覺昏迷。莫燭治亂之幾。夫子獨次要略首卷大旨發明人性本善。或爲氣拘物蔽。欲人強起存心以復本性。此章稍覺不類。不知何以闌入。姑闕疑以俟正焉。

一一 論孝弟之道

孟子曰。「人之所不學而能者。其良能也。所不慮而知者。其良知也。孩提之童。無不知愛其親也。及其長也。無不知敬其兄也。親親仁也。敬長義也。無他。達之天下也。」

孟子曰。「仁之實。事親是也。義之實。從兄是也。智之實。知斯二者弗去是也。禮之實。節文斯二者是也。樂之實。樂斯二者。樂則生矣。生則惡可已也。惡可已。則不知足之蹈之。手之舞之。」

孟子曰。「事孰爲大。事親爲大。守孰爲大。守身爲大。不失其身。而能事其親者。吾聞之矣。失其身而能事其親者。吾未之聞也。孰不爲事。事親。事之本也。孰不爲守。守身。守之本也。曾子養曾皙。必有酒肉。將徹。必請所與。問有餘。必曰有。曾皙死。曾元養曾子。必有酒肉。將徹。不請所與。問有餘。曰亡矣。將以復進也。此所謂養口體者也。若曾子則可謂養志也。事親若曾子者可也。」

孟子曰。「天下大悅而將歸己。視天下悅而歸己。猶草芥也。惟舜爲然。不得乎親。不可以爲人。不順乎親。不可以爲子。舜盡事親之道。而瞽瞍底豫。瞽瞍底豫而天下化。瞽瞍底豫而天下之爲父子者定。此之謂大孝。」

萬章曰。「舜往于田。號泣于旻天。何爲其號泣也。」孟子曰。「怨慕也。」萬章曰。「父母愛之。喜而不忘。父母惡之。勞而不怨。然則舜怨乎。」曰。「長息問于公明高曰。舜往于田。則吾既得聞命矣。號泣于旻天。于父母。則吾不知也。公明高曰。是非爾所知也。夫公明高以孝子之心爲不若是怨。我竭力耕田。共爲子職而已矣。父母之不我愛。于我何哉。帝使其子九男二女。百官牛羊。倉廩備以事舜于畎畝之中。天下之士。多就之者。帝將膏天下而遷之焉。爲不順于父母。如窮人所無歸。天下之士悅之。人之所欲也。而不足以解憂。好色人之所欲。妻帝之二女而

不足以解憂。富人之所欲。富有天下而不足以解憂。貴人之所欲。貴爲天子而不足以解憂。人悅之好色富貴。無足以解憂者。惟順于父母可以解憂。人少則慕父母。知好色則慕少艾。有妻子則慕妻子。仕則慕君。不得于君則熱中。大孝終身慕父母。五十而慕者。予于大舜見之矣。」

萬章問曰：「詩云：娶妻如之何，必告父母。信斯言也。宜莫如舜。舜之不告而娶何也？」孟子曰：「告則不得娶。男女居室，人之大倫也。如告則廢人之大倫，以懟父母，是以不告也。」萬章曰：「舜之不告而娶，則吾既得聞命矣。帝之妻舜而不告何也？」曰：「帝亦知告焉，則不得妻也。」萬章曰：「父母使舜完廩，捐階，瞽瞍焚廩，使浚井出，從而揜之。象曰：謨蓋都君，咸我績，牟牟父母，倉廩父母，干戈朕，琴朕，弣朕，二嫂使治朕棲，象往入舜宮，舜在牀琴。象曰：鬱陶思君爾，忼忼舜曰：惟茲巨庶，汝其于予治，不識舜不知象之將殺己與？」曰：「奚而不知也？象憂亦憂，象喜亦喜。」曰：「然則舜僞喜者與？」曰：「否。昔者有饋生魚于鄭子產，子產使校人畜之池，校人烹之。」反命曰：「始舍之，圉圉焉，少則洋洋焉，攸然而逝。」子產曰：「得其所哉，得其所哉。」校人出曰：「孰謂子產智？予既烹而食之，曰：得其所哉，得其所哉。故君子可欺以其方，難罔以非其道。彼以愛兄之道來，故誠信而喜之。奚僞焉？」金氏曰：「要亦自萬章曰：父母使舜完廩以下，至然則舜僞喜者與曰否，即下接君子可欺以其方，至奚僞焉，首去娶妻如之何二節，中去子產一節，履祥妄謂去子產一節，不若去象曰一段，此何止齊東野人之語，幾不可述于君子之口。况帝之妻舜，在其烝又不格，姦之後，此語既非事實，尤不當存。要略一書，晚年方出，此章去取似爲一書之珠。國語謹按，朱子編次此書之意，蓋擇其要者時時切己，謹察而欲凡讀孟子者皆反諸身而體驗之也。不然，以孔孟之經，任意去取，顛倒錯置，此佔畢庸夫所不爲，而謂朱子之賢爲之耶。即此章不錄首二節與子產一段，亦不過芟去繁文，尤便省覽耳。非有所去取于其間也。其存象曰一段，則以見聖人遭人倫之變而不失理之常。正欲存此語以爲處變之法。事之荒怪有無，蓋不足辨。仁山先生之論，似未嘗深究朱子之本意。今刻此書，悉載本章全文，而于首二節及子產一段，并乙以識之，以存朱子之舊云。」

桃應問曰：「舜爲天子，皋陶爲士，瞽瞍殺人，則如之何？」孟子曰：「執之而已矣。」曰：「然則舜不禁與？」曰：「夫舜惡得而禁之？夫有所受之也。」曰：「然則舜如之何？」曰：「舜視棄天下，猶棄敝屣也。竊負而逃，遵海濱而處，終

身訢然樂而忘天下。』集注云。此章言爲士者但知有法。不知天子父之爲尊。爲子者但知有父。而不知天下之爲大。蓋其所以爲心者。莫非天理之極。人倫之至。學者察此而有得焉。則不待計較論量而天下無難處之事矣。金氏曰。此章要略注文微不同。而集注爲明徑。國藩謹按。金氏謂要略注文微不同。不可考矣。所謂集注明徑者。今特錄于右。觀朱子以此章次娶妻章之後。益知其欲窮極人倫之變以爲處之者之法。設詞愈離奇。處之愈平常爾。金氏去取之說可無致疑已。

萬章問曰。『象日以殺舜爲事。立爲天子。則放之何也。』孟子曰。『封之也。』或曰。『放焉。』萬章曰。『舜流共工于幽州。放驩兜于崇山。殺三苗于三危。殛鯀于羽山。四罪而天下咸服。誅不仁也。象至不仁。封之有庠。有庠之人奚罪焉。仁人固如是乎。在他人則誅之。在弟則封之。』曰。『仁人之于弟也。不藏怒焉。不宿怨焉。親愛之而已矣。親之欲其貴也。愛之欲其富也。封之有庠。富貴之也。身爲天子。弟爲匹夫。可謂親愛之乎。』敢問或曰。放者何謂也。』曰。『象不得有爲于其國。天子使吏治其國。而納其貢稅焉。故謂之放。豈得暴彼民哉。雖然。欲常常而見之。故源源而來。不及貢以政。接于有庠。此之謂也。』

孟子曰。『君子之于物也。愛之而弗仁。于民也。仁之而弗親。親親而仁民。仁民而愛物。』

孟子曰。『道在邇而求諸遠。事在易而求諸難。人人親其親長其長。而天下平。』

孟子曰。『于不可已而已者。無所不已。于所厚者薄。無所不薄也。其進銳者。其退速。』

二 嚴義利之辨

孟子見梁惠王。王曰。『叟。不遠千里而來。亦將有以利我國乎。』孟子對曰。『王。何必曰利。亦有仁義而已矣。』王曰。『何以利吾國。大夫曰。何以利吾家。士庶人曰。何以利吾身。上下交征利。而國危矣。萬乘之國。弑其君者。必千乘之家。千乘之國。弑其君者。必百乘之家。萬取千焉。千取百焉。不爲不多矣。苟爲後義而先利。不奪不饜。未有仁而遺其親者也。未有義而後其君者也。王亦曰仁義而已矣。何必曰利。』

孟子曰。『雞鳴而起。孳孳爲善者。舜之徒也。雞鳴而起。孳孳爲利者。蹠之徒也。欲知舜與蹠之分。無他。利與善之

問也。」

孟子曰。「魚。我所欲也。熊掌。亦吾所欲也。二者不可得兼。舍魚而取熊掌者也。生。亦我所欲也。義。亦我所欲也。二者不可得兼。舍生而取義者也。生亦我所欲。所欲有甚于生者。故不爲苟得也。死亦我所欲。所惡有甚于死者。故患有所不辟也。如使人之所欲莫甚于生。則凡可以得生者。何不用也。使人之所惡。莫甚于死者。則凡可以辟患者。何不爲也。由是則生而有不用也。由是則可以辟患而有不爲也。是故所欲有甚于生者。所惡有甚于死者。非獨賢者有是心也。人皆有之。賢者能勿耳。一箪食。一豆羹。得之則生。弗得則死。噍爾而與之。行道之人弗受。蹴爾而與之。乞人不屑也。萬鍾則不辨禮義而受之。萬鍾于我何加焉。爲宮室之美。妻妾之奉。鄉黨之譽。得我與者。得我而爲之。是亦不可以已乎。此之謂失其本心。」

陳代曰。「不見諸侯。宜若小然。今一見之。大則以王。小則以霸。且志曰。「枉尺而直尋。宜若可爲也。」孟子曰。「昔齊景公田。招虞人以旌。不至將殺之。志士不忘在溝壑。勇士不忘喪其元。孔子奚取焉。取非其招不往也。如不待其招而往。何哉。且夫枉尺而直尋者。以利言也。如以利。則枉尋直尺。而利亦可爲與。昔者趙簡子使王良與嬖奚乘。終日而不獲一禽。嬖奚反命曰。「天下之賤工也。」或以告王良。良曰。「請復之。」彊而後可。一朝而獲十禽。嬖奚反命曰。「天下之良工也。」簡子曰。「我使掌與汝乘。謂王良。」良不可曰。「吾爲之。範我馳驅。終日不獲一禽。爲之詭遇。一朝而獲十禽。詩云。不失其馳。舍矢如破。我不貴與小人乘。請辟御者。且銜與射者比。比而得禽獸。雖若邱陵。弗爲也。如枉道而從彼何也。且子過矣。枉己者。未有能直人者也。」

景春曰。「公孫衍張儀。豈不誠大丈夫哉。一怒而諸侯懼。安居而天下熄。孟子曰。「是焉得爲大丈夫乎。子未學禮乎。丈夫之冠也。父命之。女子之嫁也。母命之。往送之門。戒之曰。往之女家。必敬必戒。無違夫子。以順爲正者。妾婦之道也。」居天下之廣居。立天下之正位。行天下之大道。得志與民由之。不得志獨行其道。富貴不能淫。貧賤不能移。威武不能屈。此之謂大丈夫。」圍囂謹按。此章亦剖別義利之最嚴者。妾婦之道。阿諛苟容。竊取權勢。利也。丈夫之事。直道而行。浩然無累。義也。故朱子編入此卷。

宋徑將之楚。孟子遇于石邱曰。『先生將何之。』曰。『吾聞秦楚構兵。我將見楚王。說而罷之。楚王不悅。我將見秦王。說而罷之。二王我將有所遇焉。』曰。『軻也。請無問其詳。願聞其指。說之將如何。』曰。『我將言其不利也。』曰。『先生之志則大矣。先生之說則不可。先生以利說秦楚之王。秦楚之王說于利。以罷三軍之師。是三軍之士樂罷而悅于利也。爲人臣者。懷利以事其君。爲人子者。懷利以事其父。爲人弟者。懷利以事其兄。是君臣父子兄弟。終去仁義。懷利以相接。然而不亡者。未之有也。先生以仁義說秦楚之王。秦楚之王悅于仁義。而罷三軍之師。是三軍之士樂罷而悅于仁義也。爲人臣者。懷仁義以事其君。爲人子者。懷仁義以事其父。爲人弟者。懷仁義以事其兄。是君臣父子兄弟。去利。懷仁義以相接也。然而不王者。未之有也。何必曰利。』

萬章問曰。『人有言。伊尹以割烹要湯。有諸。』孟子曰。『否。不然。伊尹耕于有莘之野。而樂堯舜之道焉。非其義也。非其道也。祿之以天下。弗顧也。繫馬千駟。弗視也。非其義也。非其道也。一介不以與人。一介不以取諸人。湯使人以幣聘之。囂囂然曰。『我何以湯之聘幣爲哉。我豈若處吠畝之中。由是以樂堯舜之道哉。』湯三使往聘之。既而幡然改曰。『與我處吠畝之中。由是以樂堯舜之道。吾豈若使是君爲堯舜之君哉。吾豈若使是民爲堯舜之民哉。吾豈若于吾身親見之哉。天之生此民也。使先知覺後知。使先覺覺後覺也。予天民之先覺者也。予將以斯道覺斯民也。非予覺之而誰也。思天下之民。匹夫匹婦。有不被堯舜之澤者。若己推而內之溝中。其自任以天下之重如此。故就湯而說之。以伐夏救民。未聞枉己而正人者也。況辱己以正天下者乎。聖人之行不同也。或遠或近。或去或不去。歸潔其身而已矣。吾聞其以堯舜之道要湯。未聞以割烹也。伊訓曰。天誅造攻自牧宮。朕載自亳。』

萬章問曰。『或謂孔子于衛主癩疽。于齊主侍人瘠環。有諸乎。』孟子曰。『否。不然也。好事者爲之也。于衛主顏雝由。彌子之妻。與子路之妻兄弟也。彌子謂子路曰。『孔子主我。衛卿可得也。』子路以告。孔子曰。『有命。孔子進以禮。退以義。得之不得。曰有命。而主癩疽。與侍人瘠環。是無義無命也。孔子不悅于魯衛。遭宋桓司馬。將要而殺之。微服而過宋。是時孔子當厄。主司城貞子。爲陳侯周臣。吾聞觀近臣。以其所爲主。觀遠臣。以其所主。若孔子主癩疽。與侍人瘠環。何以爲孔子。』

孟子曰：「莫非命也。順受其正，是故知命者不立乎巖牆之下。盡其道而死者，正命也。桎梏死者，非正命也。」
孟子曰：「口之于味也，目之于色也，耳之于聲也，鼻之于臭也，四肢之于安佚也，性也有命焉。君子不謂性也。仁之于父母也，義之于君臣也，禮之于賓主也，智之于賢者也，聖人之于天道也，命也。有性焉，君子不謂命也。」
孟子曰：「求則得之，舍則失之，是求有益于得也，求在我者也。求之有道，得之有命，是求無益于得也。求在外者，也。」

孟子曰：「君子有三樂，而王天下，不與存焉。父母俱存，兄弟無故，一樂也。仰不愧于天，俯不忤于人，二樂也。得天下英才而教育之，三樂也。君子有三樂，而王天下，不與存焉。」

孟子曰：「廣土衆民，君子欲之，所樂不存焉。中天下而立，定四海之民，君子樂之，所性不存焉。君子所性，雖大行不加焉，雖窮居不損焉，分定故也。君子所性，仁義禮智根于心，其生色也，晬然見于面，盎于背，施于四體，四體不言而喻。」

孟子曰：「說大人則藐之，勿視其巍巍然。堂高數仞，榱題數尺，我得志，弗爲也。食前方丈，侍妾數百人，我得志，弗爲也。般樂飲酒，驅騁田獵，後車千乘，我得志，弗爲也。在彼者皆我所不爲也，在我者皆古之制也，吾何畏彼哉。」
國藩謹按：右三章言內重則外自輕，亦必義利之介明，乃能見此。故朱子編入此卷。

魯平公將出，嬖人臧倉者請曰：「他日君出，則必命有司所之。今乘輿已駕矣，有司未知所之，敢請。」公曰：「將見孟子。」曰：「何哉？君所爲輕身以先于匹夫者，以爲賢乎？禮義由賢者出，而孟子之後喪踰前喪，君無見焉。」公曰：「諾。」樂正子入見曰：「君奚爲不見孟軻也？」曰：「或告寡人曰：『孟子之後喪踰前喪，是以不往見也。』」曰：「何哉？君所謂踰者，前以士，後以大夫，前以三鼎，而後以五鼎與？」曰：「否。謂棺槨衣衾之笑也。」曰：「非所謂踰也，貧富不同也。」樂正子見孟子曰：「克告于君，君爲來見也。嬖人有臧倉者，沮君，君是以不果來也。」曰：「行或使之止，或尼之，行止非人所能也。吾之不遇魯侯，天也。臧氏之子，焉能使予不遇哉？」

孟子去齊，充虞路問曰：「夫子若有不豫色然，前日虞聞諸夫子曰：『君子不怨天，不尤人。』」曰：「彼一時也，此一時也。五百年必有王者興，其間必有名世者，由周而來，七百有餘歲矣，以其數則過矣，以其時考之，則可矣。夫天未

欲平治天下也。如欲平治天下，當今之世，舍我其誰也。吾何爲不豫哉。」國藩謹披。色之不戴。若出于憂世之誠。則爲義。若有一毫謀己之私。則爲利。此聖賢內斷之心。辨于微茫之間者。

滕文公問曰：「齊人將築薛。吾甚恐。如之何則可？」孟子對曰：「昔者太王居邠。狄人侵之。去之岐山之下。居焉。非擇而取之。不得已也。苟爲善。後世子孫。必有王者矣。君子創業垂統。爲可繼也。若夫成功。則天也。君如彼何哉。疆爲善而已矣。」國藩謹披。此章言謀國之道。雖極危急存亡之秋。而義利之辨。尤不可忽。蓋子所稱正其誼不謀其利。明其道不計其功。正與此同旨。

孟子曰：「飢者甘食。渴者甘飲。是未得飲食之正也。飢渴害之也。豈惟口腹有飢渴之害。人心亦皆有害。人能無以飢渴之害爲心害。則不及人。不爲憂矣。」

孟子曰：「人有不爲也。而後可以有爲。」

孟子曰：「仕非爲貧也。而有時乎爲貧。娶妻非爲養也。而有時乎爲養。爲貧者辭尊居卑。辭富居貧。辭尊居卑。辭富居貧。惡乎。宜乎抱關擊柝。孔子嘗爲委吏。曰：「會計當而已矣。嘗爲乘田矣。曰：牛茁壯長而已矣。位卑而言高。罪也。立平人之本朝。而道不行。恥也。」國藩謹披。官卑而不能行道。尙能稱職者。則爲義。官尊而不能行道。但知苟祿者。則爲利。凡義利無定。在隨其所居之位所值之時。而公私枉直確有不可易之界易之鏡。所爲隨時變易以處中也。孟子七篇。于辭受取與出處進退之間。所以剖晰義利者。致詳。朱子此卷。採取略盡。昔亡友劉君于丁未戊申之年。實始講求精義之學。搜得朱子此書。宜其躍然而欣慰也。

四 辯王霸之方明治道之要

齊宣王問曰：「齊桓晉文之事。可得聞乎？」孟子對曰：「仲尼之徒。無道桓文之事者。是以後世無傳焉。臣未之聞也。無以則王乎？」曰：「德何如。則可以王矣。」曰：「保民而王。莫之能禦也。」曰：「若寡人者。可以保民乎哉？」曰：「可。」曰：「何由知吾可也？」曰：「臣聞之胡龔曰。王坐于堂上。有牽牛而過堂下者。王見之。曰：牛何之。對曰：『將以斃鐘。』王曰：舍之。吾不忍其斃鐘。若無罪而就死地。對曰：然則廢斃鐘與。曰：何可廢也。以牛易之。不識有

諸。』曰。『有之。』曰。『是心足以王矣。百姓皆以王爲愛也。臣固知王之不忍也。』王曰。『然誠有百姓者。齊國雖褊小。吾何愛一牛。卽不忍其殺鯨。若無罪而就死地。故以牛易之也。』曰。『王無異于百姓之以王爲愛也。以小易大。彼惡知之。王若隱其無罪而就死地。則牛幸何擇焉。』王笑曰。『是誠何心哉。我非愛其財而易之以牛也。宜乎百姓之謂我愛也。』曰。『無傷也。是乃仁術也。見牛未見羊也。君子之于禽獸也。見其生不忍見其死。聞其聲不忍食其肉。是以君子遠庖廚也。』王說曰。『詩云。他人有心。予忖度之。夫子之謂也。夫我乃行之。反而求之。不得吾心。夫子言之。于我心有戚戚焉。此心之所以合于王者何也。』曰。『有復于王者曰。吾力足以舉百鈞而不足以舉一羽。明足以察秋毫之末而不見輿薪。則王許之乎。』曰。『否。』『今恩足以及禽獸。而功不至于百姓者。獨何與。然則一羽之不舉。爲不用力焉。輿薪之不見。爲不用明焉。百姓之不見保。爲不用恩焉。故王之不王。不爲也。非不能也。』曰。『不爲者與不能者之形。何以異。』曰。『挾太山以超北海。語人曰。我不能。是誠不能也。爲長者折枝。語人曰。我不能。是不爲也。非不能也。故王之不王。非挾太山以超北海之類也。王之不王。是折枝之類也。老吾老以及人之老。幼吾幼以及人之幼。天下可運于掌。詩云。刑于寡妻。至于兄弟。以御于家邦。言舉斯心加諸彼而已。故推恩足以保四海。不推恩無以保妻子。古之人所以大過人者。無他焉。善推其所爲而已矣。今恩足以及禽獸。而功不至于百姓者。獨何與。權然後知輕重。度然後知長短。物皆然。心爲甚。王請度之。抑王興甲兵。危士臣。搆怨于諸侯。然後快于心與。』王曰。『否。吾何快于是。將以求吾所大欲也。』曰。『王之所大欲。可得聞與。』王笑而不言。曰。『爲肥甘不足于口與。輕煖不足于體與。抑爲采色不足視于目與。聲音不足聽于耳與。便嬖不足使令于前與。王之諸臣。皆足以供之。而王豈爲是哉。』曰。『否。吾不爲是也。』曰。『然則王之所大欲。可知已。欲辟土地。朝秦楚。莅中國。而撫四夷也。以若所爲。求若所欲。猶緣木而求魚也。』王曰。『若是其甚與。』曰。『殆有甚焉。緣木求魚。雖不得魚。無後災。以若所爲。求若所欲。盡心力而爲之。後必有災。』曰。『可得聞與。』曰。『鄒人與楚人戰。則王以爲孰勝。』曰。『楚人勝。』曰。『然則小國不可以敵大。寡固不可以敵衆。弱固不可以敵強。海內之地方千里者九。齊集有其一。以衣服入。何以異于鄒敵楚哉。蓋亦反其本矣。今王發政施仁。使天下仕者。皆欲立于王之朝。耕者皆欲耕于王之野。商賈皆欲藏于王之市。行旅皆欲出于王之塗。天下之欲疾其

君者。皆欲赴愬于王。其若是。孰能禦之。』王曰。『吾憚不能進于是矣。顧夫子輔吾志。明以教我。我雖不敏。請嘗試之。』曰。『無恆產而有恆心者。惟士爲能。若民則無恆產。因無恆心。苟無恆心。放辟邪侈。無不爲已。及陷于罪。然後從而刑之。是罔民也。焉有仁人在位。罔民而可爲也。是故明君制民之產。必使仰足以事父母。俯足以畜妻子。樂歲終身飽。凶年免于死亡。然後驅而之善。故民之從之也輕。今也制民之產。仰不足以事父母。俯不足以畜妻子。樂歲終身苦。凶年不免于死亡。此惟救死而恐不贍。奚暇治禮義哉。王欲行之。則盍反其本矣。五畝之宅。樹之以桑。五十者可以衣帛矣。雞豚狗彘之畜。無失其時。七十者可以食肉矣。百畝之田。勿奪其時。八口之家。可以無飢矣。謹庠序之教。申之以孝悌之義。頹白者不負戴于道路矣。老者衣帛食肉。黎民不飢不寒。然而不王者。未之有也。』

公孫丑問曰。『夫子嘗路于齊。管仲晏子之功。可復許乎。』孟子曰。『子誠齊人也。知管仲晏子而已矣。或問乎曾西曰。吾子與子路孰賢。曾西蹴然曰。吾先子之所畏也。曰。然則吾子與管仲孰賢。曾西蹙然不悅曰。爾何曾比予于管仲。管仲得君。如彼其專也。行乎國政。如彼其久也。功烈如彼其卑也。爾何曾比予于是。曰。管仲曾西之所不爲也。而子爲我願之乎。』曰。『管仲以其君霸。晏子以其君顯。管子晏子猶不足爲與。』曰。『以齊王由反手也。』曰。『若是則弟子之惑滋甚。且以文王之德。百年而後崩。猶未洽于天下。武王周公繼之。然後大行。今言王若易然。則文王不足法與。』曰。『文王何可當也。由湯至于武丁。賢聖之君六七作。天下歸殷久矣。久則難變也。武丁朝諸侯有天下。猶運之掌也。紂之去武丁未久也。其故家遺俗。流風善政。猶有存者。又有微子微仲王子比干箕子膠鬲。皆賢人也。相與輔相之。故久而後失之也。尺地莫非其有也。一民莫非其臣也。然而文王猶方百里起。是以難也。齊人有言曰。雖有智慧。不如乘勢。雖有鎡基。不如待時。今時則易然也。夏后殷周之盛。地未有過千里者也。而齊有其地矣。雞鳴狗吠相聞。而遠乎四境。而齊有其民矣。地不改辟矣。民不改聚矣。行仁政而王。莫之能禦也。且王者之不作。未有疏于此時者也。民之憔悴于虐政。未有甚于此時者也。飢者易爲食。渴者易爲飲。孔子曰。德之流行。速于置郵而傳命。當今之時。萬乘之國。行仁政。民之悅之。猶解倒懸也。故事半古之人。功必倍之。惟此時爲然。』此章朱子原本僅錄至而子爲我願之乎止。以下不錄。國藩謹按。朱子之意。特重在崇王黜伯。其

去後半。尤便省覽耳。竊意此章後半言乘勢待時。而歸重于行仁政。可見聖賢謀國。未嘗不顧時勢。而政之本原。悉依于王道。非同後世雜霸苟且一切藉口救時者之所爲也。今仍錄本章全文。而于爲我願之乎下乙以識之。以存朱子之舊。

孟子曰。『以力假仁者霸。霸必有大國。以德行仁者王。王不待大。湯以七十里。文王以百里。以力服人者。非心服也。力不勝也。以德服人者。中心悅而誠服也。如七十子之服孔子也。』詩云。『自西自東。自南自北。無思不服。』此之謂也。』

孟子曰。『言近而指遠者。善言也。守約而施博者。善道也。君子之言也。不下帶而道存焉。君子之守。修其身而天下平。人病舍其田而芸人之田。所求于人者重。而所以自任者輕。』

孟子曰。『人不足與適也。政不足閒也。惟大人爲能格君心之非。君仁莫不仁。君義莫不義。君正莫不正。一正君而國定矣。』

孟子曰。『離婁之明。公輸子之巧。不以規矩。不能成方員。師曠之聰。不以六律。不能正五音。堯舜之道。不以仁政。不能平治天下。今有仁心仁聞。而民不被其澤。不可法于後世者。不行先王之道也。故曰。徒善不足以及政。徒法不能以自行。』詩云。『不愆不忘。率由舊章。』邊先王之法而過者。未之有也。聖人既竭目力焉。繼之以規矩準繩。以爲方員乎。直。不可勝用也。既竭耳力焉。繼之以六律正五音。不可勝用也。既竭心思焉。繼之以不忍人之政。而仁覆天下矣。故曰。爲高必因邱陵。爲下必因川澤。爲政不因先王之道。可謂智乎。是以惟仁者宜在高位。不仁而在高位。是播其惡于衆也。上無道揆也。下無法守也。朝不信道。工不信度。君子犯義。小人犯刑。國之所存者幸也。故曰。城郭不完。兵甲不多。非國之災也。田野不辟。貨財不聚。非國之害也。上無禮。下無學。賊民興。喪無日矣。詩曰。天之方蹶。無然泄泄。泄泄猶沓沓也。事君無義。進退無禮。言則非先王之道者。猶沓沓也。故曰。責難于君。謂之恭。陳善閉邪。謂之敬。吾君不能。謂之賊。』鄒氏曰。此章言爲治者。當有仁心仁聞。以行先王之政。而君臣又當各任其責。自是以惟仁者至喪無日矣。所以責其君。自詩云。天之方蹶。至末。所以責其臣。國藩謹按。孟子七篇言君道者甚多。而莫要于修其身而天下平一語。言臣道者甚多。而莫要于大人格君心之非一語。朱子編次此卷。前三

章辨王霸之術不同。第四章言君道。第五章言臣道。此章及下規矩章兼言君臣之道。爲治之要。粗備于此矣。孟子曰。『規矩方員之至也。聖人。人倫之至也。欲爲君盡君道。欲爲臣盡臣道。二者皆法堯舜而已矣。不以舜之所以事堯事君。不敬其君者也。不以堯之所以治民治民。賊其民者也。孔子曰。『道二。仁與不仁而已矣。暴其民甚則身弑國亡。不甚則身危國削。名之曰幽厲。雖孝子慈孫。百世不能改也。詩云。『殷鑒不遠。在夏后之世。』此之謂也。』

五 孟子尚論古人而自其言爲學要領

孟子曰。『堯舜性者也。湯武反之也。動容周旋中禮者。盛德之至也。突死而哀。非爲生者也。經德不回。非以干祿也。言語必信。非以正行也。君子行法。以俟命而已矣。』

孟子曰。『禹惡旨酒而好善言。湯執中。立賢無方。文王視民如傷。望道而未之見。武王不泄譏。周公思兼三王以施四事。其有不合者。仰而思之。夜以繼日。幸而得之。坐以待旦。』

孟子曰。『堯舜性之也。湯武身之也。五霸假之也。久假而不歸。惡知其非有也。』

孟子曰。『伯夷目不視惡色。耳不聽惡聲。非其君不事。非其民不使。治則進。亂則退。橫政之所出。橫民之所止。不
忍居也。思與鄉人處。如以朝衣朝冠坐于塗炭也。當紂之時。居北海之濱。以待天下之清也。故聞伯夷之風者。頑夫廉。懦夫有立志。伊尹曰。何事非君。何使非民。治亦進。亂亦進。曰。天之生斯民也。使先知覺後知。使先覺覺後覺。予天民之先覺者也。予將以此道覺斯民也。思天下之民。匹夫匹婦。有不與被堯舜之澤者。若己推而內之溝中。其自任以天下之重也。柳下惠不羞汚君。不辭小官。進不隱賢。必以其道。遺佚而不怨。阨窮而不憚。與鄉人處。由由然不忍去也。爾爲爾。我爲我。雖袒裼裸裎于我側。爾焉能浼我哉。故聞柳下惠之風者。鄙夫寬。薄夫敦。孔子之去齊接淅而行。去魯曰遲遲吾行也。去父母國之道也。可以速而速。可以久而久。可以處而處。可以仕而仕。孔子也。』孟子曰。『伯夷聖之清者也。伊尹聖之任者也。柳下惠聖之和者也。孔子聖之時者也。孔子之謂集大成。集大成也者。金聲而玉振之也。金聲也者。始條理也。玉振之也者。終條理也。始條理者。智之事也。終條理者。聖之事

也。智譬則巧也。聖譬則力也。由射于百步之外也。其至爾力也。其中非爾力也。」

孟子曰：「聖人百世之師也。伯夷柳下惠是也。故聞伯夷之風者，頑夫廉，懦夫有立志。聞柳下惠之風者，薄夫敦。鄒夫寬，奮乎百世之上，百世之下，聞者莫不興起也。非聖人而能若是乎？而況于親炙之者乎？」

孟子曰：「仲尼不爲己甚者。」

禹稷當平世，三過其門而不入。孔子賢之。顏子當亂世，居于陋巷，一簞食，一瓢飲，人不堪其愛，顏子不改其樂。孔子賢之。孟子曰：「禹稷顏回同道。禹思天下有溺者，由己溺之也。稷思天下有飢者，由己飢之也。是以如是其急也。禹稷顏子易地則皆然。今有同室之人鬪者，雖被髮纓冠而救之可也。鄉鄰有鬪者，被髮纓冠而往救之，則惑也。雖閉戶可也。」

孟子曰：「子路人告之，以有過則喜，禹聞善言則拜。大舜有大焉，善與人同，舍己從人，樂取于人，以爲善。自耕稼陶漁，以至爲帝，無非取于人者。取諸人以爲善，是與人爲善者也。故君子莫大乎與人爲善。」

公孫丑問曰：「夫子加齊之卿相，得行道焉，雖由此霸王不異矣。如此則動心否乎？」孟子曰：「否。我四十不動心。」曰：「若是，則夫子過孟賁遠矣。」曰：「是不難，告子先我不動心。」曰：「不動心有道乎？」曰：「有。北宮黝之養勇也，不膚撓，不目逃，思以一毫挫于人，若撻之于市朝，不受于褐寬博，亦不受于萬乘之君。視刺萬乘之君，若刺褐夫。無嚴諸侯，惡聲至，必反之。孟施舍之所養勇也，曰：視不勝猶勝也。量敵而後進，慮勝而後會。是畏三軍者也。舍豈能爲必勝哉？能無懼而已矣。孟施舍似曾子，北宮黝似子夏。夫二子之勇，未知其孰賢，然而孟施舍守約也。昔者曾子謂子襄曰：『子好勇乎？吾嘗聞大勇于夫子矣。自反而不縮，雖褐寬博，吾不揣焉。自反而縮，雖千萬人，吾往矣。』孟施舍之守氣，又不如曾子之守約也。」曰：「敢問夫子之不動心，與告子之不動心，可得聞與？」告子曰：「不得于言，勿求于心；不得于心，勿求于氣，不得于心，勿求于氣，可。不得于言，不可。夫志，氣之帥也。氣，體之充也。夫志至焉，氣次焉，故曰：持其志，無暴其氣。」曰：「既曰志至焉，氣次焉，又曰：持其志，無暴其氣者，何也？」曰：「志壹則動氣，氣壹則動志也。」曰：「今夫蹶者趨者，是氣也，而反動其心，敢問夫子惡乎長？」曰：「我知言，我善養吾浩然之氣。」曰：「敢問何謂浩然之氣？」曰：「難言也。其爲氣也，至大至剛，以直養而無害，則塞于

天地之間。其爲氣也。配義與道。無是鉅也。是集義所生者。非義襲而取之也。行有不慊于心。則鉅矣。我故曰。告子未嘗知義。以其外之也。必有事焉。而勿正心。勿忘勿助長也。無若宋人然。宋人有憫其苗之不長而握之者。茫茫然歸。謂其入曰。今日病矣。予助苗長矣。其子趨而往視之。苗則槁矣。天下之不助苗長者寡矣。以爲無益而舍之者。不耘苗者也。助之長者。握苗者也。非徒無益。而又害之。『何謂知言。』曰。『鼓辭知其所蔽。淫辭知其所陷。邪辭知其所離。遁辭知其所窮。生于其心。害于其政。發于其政。害于其事。聖人復起。必從吾言矣。宰我子貢。嘗爲說辭。冉牛閔子顏淵。嘗言德行。孔子兼之曰。我于辭命則不能也。』然則夫子既聖矣乎。曰。『惡。是何言也。昔者子貢問于孔子曰。夫子聖矣乎。孔子曰。聖則吾不能。我學不厭而教不倦也。』子貢曰。『學不厭智也。教不倦仁也。仁且智。夫子既聖矣。』夫聖。孔子不居。是何言也。昔者竊聞之。子夏子游子張。皆有聖人之一體。冉牛閔子顏淵。則具體而微。敢問所安。曰。『姑舍是。』曰。『伯夷伊尹何如。』曰。『不同道。非其君不事。非其民不使。治則進。亂則退。伯夷也。何事非君。何使非民。治亦進。亂亦進。伊尹也。可以仕則仕。可以止則止。可以久則久。可以速則速。孔子也。皆古聖人也。吾未能有行焉。乃所願則學孔子也。』伯夷伊尹。于孔子若是班乎。曰。『否。自有生民以來。未有孔子也。』曰。『然則有同與。』曰。『有得百里之地而君之。皆能以朝諸侯。有天下。行一不義。殺一不辜。而得天下。皆不爲也。是則同。』曰。『敢問其所以異。』曰。『宰我子貢有若智。足以知聖人。好不至阿其所好。宰我曰。以予觀于夫子。賢于堯舜遠矣。子貢曰。見其禮而知其政。聞其樂而知其德。由百世之後。等百世之王。莫之能違。曰。自生民以來。未有夫子也。有若若。豈惟民哉。麒麟之于走獸。鳳凰之于飛鳥。泰山之于邱垤。河海之于行潦。類也。聖人之于民。亦類也。出乎其類。拔乎其萃。自生民以來。未有盛于孔子也。』

公都子曰。『外人皆稱夫子好辯。敢問何也。』孟子曰。『予豈好辯哉。予不得已也。天下之生久矣。一治一亂。當堯之時。水逆行。氾濫于中國。蛇龍居之。民無所定。下者爲巢。上者爲營窟。書曰。洧水警余。洧水者。洪水也。使禹治之。再掘地而注之海。驅蛇龍而放之。沮水由地中行。江淮河漢是也。險阻既遠。鳥獸之害人者消。然後人得平地而居之。堯舜既沒。聖人之道衰。暴君代作。壞宮室以爲汚池。民無所安息。棄田以爲園囿。使民不得衣食。邪說暴行。又作園囿汚池。沛澤多而禽獸至。及紂之身。天下又大亂。周公相武王。誅紂。伐之三年。討其君。驅飛廉于海隅。

而戮之。滅國者五十。驅虎豹犀象而遠之。天下大悅。書曰。『丕顯哉文王謨。丕承哉武王烈。佑啓我後人。咸以正無缺。』世衰道微。邪詭暴行有作。巨紘其君者有之。子弑其父者有之。孔子懼。作春秋。春秋天下之事也。是故孔子曰。『知我者其惟春秋乎。罪我者其惟春秋乎。』聖王不作。諸侯放恣。虞士橫議。楊朱墨翟之言盈天下。天下之言。不歸楊。則歸墨。楊氏爲我。是無君也。墨子兼愛。是無父也。無父無君。是禽獸也。公明儀曰。庖有肥肉。廄有肥馬。民有飢色。野有餓殍。此率獸而食人也。楊墨之道不息。孔子之道不著。是邪說誣民。充塞仁義也。仁義充塞。則率獸食人。人將相食。吾爲此懼。闕先聖之道。距楊墨。放淫辭。邪說者。不得作。作于其心。害于其事。作于其事。害于其政。聖人復起。不易吾言矣。昔者禹抑洪水而天下平。周公兼夷狄。驅猛獸而百姓甯。孔子成春秋而亂臣賊子懼。詩云。『戎狄是膺。荆楚是懲。則莫我敢承。』無父無君。是周公所膺也。我亦欲正人心。息邪說。距詖行。放淫辭。以承三聖者。豈好辯哉。予不得已也。能言距楊墨者。聖人之徒也。』

浩生不害問曰。『樂正子何人也。』孟子曰。『善人也。信人也。』『何謂善。何謂信。』曰。『可欲之謂善。有諸己之謂信。充實之謂美。充實而有光輝之謂大。大而化之之謂聖。聖而不可知之之謂神。樂正子二之中。四之下也。』萬章問曰。『孔子在陳曰盍歸乎來。吾黨之士。狂簡進取。不忘其初。孔子在陳。何思魯之狂士。』孟子曰。『孔子不得中道而與之。必也狂乎。狂者進取。狷者有所不爲也。孔子豈不欲中道哉。不可必得。故思其次也。』『敢問何如斯可謂狂矣。』曰。『如琴張。曾皙。牧皮者。孔子之所謂狂矣。何以謂之狂也。曰。其志嚮嚮然。曰古之人。古之人。夷考其行。而不掩焉者也。狂者。又不可得。欲得不屑不潔之士而與之。是狷也。是又其次也。孔子曰。過我門而不入我室。我不悞焉者。其爲鄉原乎。鄉原德之賊也。』曰。『何如斯可謂之鄉原矣。』曰。『何以是嚮嚮也。言不顧行。行不顧言。則曰古之人。古之人。行何爲踴躍踴涼涼。生斯世也。爲斯世也。善斯可矣。闕然媚于世也者。是鄉原也。』萬章曰。『鄉皆稱原人焉。無所往而不爲原人。孔子以爲德之賊。何哉。』曰。『非之無舉也。刺之無刺也。同乎流俗。合乎污世。居之似忠信。行之似廉潔。衆皆悅之。自以爲是。而不可與入堯舜之道。故曰德之賊也。』孔子曰。『惡似而非者。惡莠恐其亂苗也。惡佞恐其亂義也。惡利口恐其亂信也。惡鄭聲恐其亂樂也。惡紫恐其亂朱也。惡鄉原恐其亂德也。君子反經而已矣。經正則庶民興。庶民興則斯無邪慝矣。』國藩謹按。朱子猶次此卷卽

近思錄末卷論聖賢氣象之意。蓋學道而獨得于心。無與晤語。則尙友古人以發其志趣。若孔子見文子琴過。姬子夢。及論語微子篇中所論列是也。其後如莊周荀詢揚雄王通之書。亦往往抗論古人。評議當世。孟子七篇。尤數數稱述先民。朱子此卷采錄凡十二章。予常以類求之。有不盡于此卷者。如誦詩讀書知人論事一章。似可冠諸此卷之首。堯舜湯文見知聞知一章。似可殿于此卷之末。而朱子俱不甄錄。要略一書。久已佚亡。其注文不可考矣。而吾友劉君搜得此書。又不先補鑿顯幽逐章而爲之說。遂使末學窺仰無自。徒與孤陋之難也。悲夫。

朱子年六十三時。成孟子要略。其書今佚。幸此書注中。具載某章。入幾卷之幾。他日病愈。當依次編成。以復朱子之舊。戊申七月。劉傳瑩題金氏孟子集注考證後。

朱子所編孟子要略一書。原本久佚。傳瑩證于金仁山先生孟子集注考證內搜出。得復此書之舊。至是書顛末。詳見語類自著書門。文集答黃直卿書。戊申七月之季。漢陽通慶生傳瑩識。

#82

806063



仿古字版

曾文正公全集

▼曾國藩著

精裝四冊

實價二元

寄費掛號
三角九分

會文正公學問事功，皆炳彪一代，後人欽遲，本局特將其全集刊行於世。內容共分總類、文學、學術、奏疏、函牘、修治、家書七類。卷首撰有傳狀，公之生平可詳；附有肖像，公之儀容可接；購此一書，即可飽覽其一生作品。他如仿宋字版之清雅，校勘之精細，猶其餘事。

世 界 書 局 發 行

第二册

奏稿

仿古字版

會文正公奏稿

世界書局印行

會文正公奏稿目次

卷一

邊議大禮疏……………一
 應詔陳言疏……………三
 請設壇祈雨疏……………五
 條陳日講事宜疏……………六
 讜汰兵疏……………一〇
 讜覆李綱從祀文廟疏……………一二
 敬陳聖德三端預防疏警疏……………一二
 謝署刑部左侍郎恩疏……………一五
 備陳民間疾苦疏……………一五
 平銀價疏……………一七
 謝署吏部左侍郎恩疏……………一〇
 請寬勝保處分疏……………一〇
 謝放江西正考官恩摺……………一一
 請假回籍省親片……………一一
 敬陳團練查匪大概規模摺……………一一



奏稿目次

089.7
982
:2

附陳辦團稍有頭緒即乞守制片……………一二
 嚴辦土匪以靖地方摺……………一二
 會奏特參副將清德摺……………一四
 拏匪正法并現在幫辦防堵摺……………一五
 保參將塔齊布千總諸殿元摺……………一五
 請將副將清德交刑部治罪片……………一六
 移駐衡州摺……………一六
 暫緩赴鄂並請籌備戰船摺……………一七
 請截留粵餉籌備礮船摺……………一八
 籌備水陸各勇赴皖會剿俟粵省解礮到楚乃可
 成行摺……………一九
 請提用湖南漕米片……………三一
 請捐輸歸入籌餉新例片……………三一
 瀝陳現辦情形摺……………三一
 衡永一帶勦匪未畢摺……………三四
 釐正衡靖二縣保甲片……………三四
 報東征起程日期摺……………三五

一

代遞唐樹義遺摺片.....三六

請派大員辦捐濟餉摺.....三六

留胡林翼黔勇會剿片.....三七

賊蹤退出南省現駐岳州摺.....三七

請卹儲致躬等摺.....三八

岳州戰敗自請治罪摺.....三九

鄒國彪傷亡請卹片.....四〇

探明前路賊蹤片.....四一

報崇通剿匪勝仗摺.....四二

會奏湘潭靖港水陸勝負情形摺.....四三

靖港敗績自請治罪摺.....四八

保水陸統領各員片.....四九

恭謝天恩摺.....四九

覆陳湘潭寧鄉靖港勝敗情形片.....五〇

請提督塔齊布會合東下片.....五一

請單銜專摺奏事片.....五二

水師克復岳州南省已無賊蹤摺.....五二

調浙江龔振麟來楚造礮片.....五四

請催廣東續解洋礮片.....五五

水師前後起行日期片.....五五

水師疊獲大勝將犯岳賊船全數殲滅摺.....五六

請領捐照摺.....五八

水師失利陸軍獲勝摺.....五九

李卿毅請卹片.....六一

岳州水陸官軍四獲勝仗摺.....六一

岳州水陸大捷踏平賊營進紮螺山摺.....六五

請以夏廷樾總理糧臺片.....六七

胡林翼羅澤南隨同東征片.....六七

水陸官軍迭獲勝仗現在剿辦情形摺.....六八

謝三品頂戴恩摺.....七一

官軍克復崇陽戰勝咸寧水師迭次獲勝摺.....七一

水陸續獲勝仗現籌進兵摺.....七四

官軍水陸大捷武漢兩城同日克復摺.....七五

李宗棟等留營差委片.....七八

遵旨彙保員弁兵勇第一單摺.....七九

水師搜勦襄河續獲大勝摺.....八〇

查明賊目殲斃狀及賊中各情片.....八一

請飭江西等省籌解餉銀片.....八一

統籌三路進兵摺	八三
保案第二單摺	八三
請飭陝西解餉來營片	八四
謝恩仍辭署鄂撫摺	八四
陸軍克興國大冷水師斬州獲勝摺	八五
第三單保案摺	八七
擬先攻半壁山破賊橫江鐵鎖片	八八
續陳鄂省前任督撫優劣摺	八八
陸軍踏破半壁山賊營水師續獲大勝摺	九〇
請飭江西開局製造火藥鉛彈片	九二
白人虎陣亡請卹片	九二
劉若珪殉難請卹片	九三
謝兵部侍郎銜恩摺	九四
代奏羅澤南謝恩摺	九四
陸軍奪半壁山斫斷鐵鎖水師繞出賊前摺	九五
覆陳不克隨時知照江南片	九七
官軍攻破田家鎮逆船燒盡收復蘄州摺	九八
請飭各路帶兵大臣督撫擇要防堵片	一〇一
水師前隊已抵九江片	一〇一

抄呈賊中偽牘片	一〇一
武漢克復保案摺	一〇二
陸軍克廣濟縣水師九江獲勝摺	一〇二
固原提督桂明留駐黃州片	一〇四
魏作霖請卹片	一〇五
調張丞寶帶勇片	一〇五
陳明服闋日期片	一〇五
陸軍雙城驛大捷克黃梅縣摺	一〇五
水師小勝並陳近日剿辦情形摺	一〇八
羅澤南濯港勝仗片	一一〇
官軍濯港大捷潯郡江面肅清摺	一一〇
調胡林翼來潯助勦片	一一三
水陸屢勝圍信潯城摺	一一三
潯城逆黨兩次撲營均經擊敗摺	一一六
內河水師三獲勝仗摺	一一九
水師三次獲勝兩次敗挫摺	一二〇
謝賞穿黃馬褂等項恩摺	一二二
陸軍勦小池口賊並陳近日軍情摺	一二二
大風擊壞賊船並陳近日勦辦情形摺	一二四

潯城賊出撲營迎勦獲勝摺……………一二五

賊匪撲營官軍獲勝並近日軍情摺……………一二六

譚光宸回臬司任片……………一二八

請嚴拏哨官萬瑞書片……………一二八

遵旨保獎摺……………一二八

謝寬免處分恩摺……………一二九

統籌全局摺……………一二九

請令袁甲三練軍出黃州片……………一三一

陳明部照遺失片……………一三二

請江西閩浙協餉片……………一三二

謹陳水陸軍情摺……………一三二

陸軍攻勦弋陽克復縣城摺……………一三四

湖北兵勇不可復用摺……………一三六

請部撥浙引用鹽抵餉摺……………一三八

請大員總理鹽餉派員協理鹽運片……………一三九

派辦糧臺委員片……………一四〇

陸兵追勦廣信股匪克復郡城摺……………一四〇

水師近日接仗情形摺……………一四二

潯齊布羅澤南兩軍攻勦情形片……………一四四

水師勝仗奪回座船摺……………一四四

奏參江西巡撫陳啓邁摺……………一四五

潯城水陸兩軍接仗情形摺……………一四九

擬移潯軍會勦湖口片……………一五〇

萬啓琛留辦鹽餉局片……………一五一

湖南提督塔齊布因病出缺摺……………一五一

潯軍兩獲勝仗片……………一五二

水陸三路均獲勝仗片……………一五三

攻剿義寧克復州城摺……………一五三

水陸進攻湖口獲勝摺……………一五七

湖口陸營迭勝水師小挫摺……………一五九

調派羅澤南一軍由崇通回勦武漢摺……………一六一

派周鳳山接統潯軍片……………一六二

派員護送塔齊布靈柩片……………一六三

彙報何桂珍在江北勝仗摺……………一六三

請令何桂珍辦楚皖團練片……………一六五

克復廣信等案保獎摺……………一六六

請催浙江協餉片……………一六六

請令羅澤南奏報軍情片……………一六六

師久無功自請嚴議片	一六七
羅澤南一軍克復通城縣摺	一六八
鄂軍由胡林翼轉奏片	一六九
遵保堪勝總兵人員摺	一六九
羅澤南分勦崇陽彭三元殉難摺	一七〇
彭三元童姦雲祔祀塔祠片	一七二
謝補授兵部侍郎恩摺	一七三
謝寬免嚴議恩摺	一七三
九江湖水陸各軍接仗情形摺	一七三
新昌萬載逆匪攻陷瑞州臨江摺	一七五
九江湖水陸勝仗摺	一七七
李錕劉希洛等請贈卹片	一七九
報周鳳山軍克樟樹片	一八〇
水陸會克樟樹鎮及新淦縣城摺	一八〇
彙保義寧湖口兩案摺	一八一

卷一

疊奉諭旨縷陳各路軍情摺	一八三
周鳳山陸軍分兵小挫摺	一八四

黃虎臣等攻九江勝仗摺	一八六
請抽上海釐金片	一八六
會籌各路堵剿情形摺	一八七
單舟晉省途次聞警片	一八九
水軍先勝後挫請將營官參處片	一九〇
調羅澤南回援江西片	一九〇
請撥上海關稅片	一九一
謝年終恩賞摺	一九一
請頒給捐生執照摺	一九一
糧臺委員丁憂留營片	一九一
請給營員封典片	一九二
周鳳山陸軍回紮省垣摺	一九二
撫州失陷調回水陸各軍片	一九四
平江營克復進賢縣城摺	一九四
吳城水師勝仗摺	一九六
劉長佑援師克復萍鄉縣城摺	一九八
近日江省賊情片	一九九
分別保獎水師摺	二〇〇
官軍克東鄉縣城進勦撫州摺	二〇〇

克復建昌縣城摺	江西土民請建羅澤南專祠摺	江西近日軍情片	仍請撥上海關稅片	官兵攻剿撫州迭獲勝仗摺	饒州防剿勝仗摺	派兵赴建昌助剿摺	水師吳城勝仗克豐城縣片	陳明鄭省援兵協餉片	分別失守員弁處分片	官兵攻剿撫州迭獲勝仗摺	水師連勝收復南康府城摺	饒州失守旋經克復摺	建昌攻城黃虎臣陣亡摺	陳明各路援師片	贛州解圍并攻勦情形摺	湖北援師進攻瑞州府城摺	攻勦撫州疊獲勝仗摺	水師疊獲勝仗摺	專催崑壽赴江南并及江省軍情片	請撥山陝餉銀片	報瑞州援軍勝仗片	查明吉安殉難員弁請卹摺	圍攻瑞州收復靖安安義二縣摺	邊錢會匪圍攻廣信浙兵援勦解圍摺	閩兵援勦建昌府前後獲勝情形摺	請撥湖南軍火片	王亮病故請卹片	李沛蒼免罪留營片	瑞州一軍九月接仗情形摺	撫州老營被賊撲陷摺	請饒廷選仍駐贛信片	請頒部照交黃冕勸捐片	請捐錢照湖南成案片	贛南匪勢蔓延請添調粵兵摺	謝湘鄉加學額恩摺	謝弟國華以同知選用恩摺	江西近日軍情據實覆奏摺	
二〇二	二〇四	二〇五	二〇五	二〇六	二〇八	二一〇	二一一	二一二	二二三	二二四	二二五	二二六	二二八	二二九	二二〇	二二一	二二三	二二六	二二八	二二八	二二九	二二九	二三一	二三四	二三六	二三七	二三七	二三八	二三八	二四〇	二四二	二四三	二四三	二四四	二四四	二四八	二四九	二四九

瑞州奉新攻戰情形摺	二五一
建昌官軍潰退摺	二五四
湖南援師克復袁州府摺	二五七
饒州豐城等六案保獎摺	二五八
湖口等縣團紳請獎片	二五九
克復安福縣城摺	二五九
畢金科軍進剿勝仗摺	二六一
劉于溥水師疊次勝仗摺	二六二
附陳近日軍情請催各省協餉片	二六四
湖北援軍保獎請卹摺	二六五
查覆鄧仁堃被參各款摺	二六五
克復奉新縣城摺	二六九
官軍克建昌武寧兩湖軍收復各縣摺	二七一
目疾請假摺	二七四
報丁父憂摺	二七四
呈請代奏奔喪到籍日期摺	二七六
呈請代奏謝恩摺	二七六
歷陳下情懇請慈制摺	二七七
恭謝天恩并籲請開缺摺	二七七

歷陳辦事艱難仍懇終制摺	二七九
欽奉兩次諭旨覆奏摺	二八一
酌擬報銷大概規模摺	二八二
恭報起程日期摺	二八四
湖口建昭忠祠九江建塔齊布祠摺	二八四
湘鄉縣建忠義祠摺	二八六
廣豐玉山兩縣解圍摺	二八七
遵旨移師援閩摺	二八九
調李瀚章來江西片	二九一
調喻吉三隨營摺	二九一
設立轉運糧臺片	二九一
攻克安仁縣城摺	二九二
劉本傑陣亡請卹片	二九三
胡兼善病故請卹片	二九三
請四川協餉片	二九三
移師由杉關入閩摺	二九四
調派官軍分道入閩摺	二九五
各營患病情形摺	二九五
移軍勦景德鎮股匪摺	二九六

蕭啓江擒捕潮匪片.....二九六

陳明石逆情形片.....二九七

遵旨斟酌具奏摺.....二九七

目疾請假片.....二九九

通籌全局請添練馬隊摺.....二九九

李續賓死事甚烈功績最多摺.....三〇一

會國華殉難三河鎮摺.....三〇三

調饒廷選來江片.....三〇四

謝年終恩賞摺.....三〇四

謝會國華追贈優卹恩摺.....三〇五

蕭啓江在南康勝仗摺.....三〇五

張運蘭攻勦景德鎮情形摺.....三〇七

陣亡病故員弁彙案請卹摺.....三〇八

謝會驥雲賜封典恩摺.....三〇九

克復南安府城摺.....三一〇

移駐撫州片.....三一〇

會國荃保升道銜知府謝恩摺.....三一〇

信豐解圍調蕭啓江援湖南摺.....三一〇

江西添濟月餉片.....三一三

謝會紀壽及歲引見恩摺.....三一三

景鎮官軍攻勦情形摺.....三一四

新募楚軍來撫州教練片.....三一五

添兵助勦景德鎮摺.....三一五

調饒廷選防廣信片.....三一六

李鴻章留營襄辦片.....三一六

陳明服闋日期片.....三一七

覆陳防蜀緩急摺.....三一七

官軍攻克景德鎮及浮梁縣城摺.....三一八

調張運蘭會勦寶慶片.....三二〇

恭報兩路拔營日期摺.....三二〇

覆陳四次諭旨摺.....三二一

謝交部優敘恩摺.....三二三

會商大略摺.....三二三

遵旨悉心籌酌摺.....三二四

特保賢才請旨記名簡放摺.....三二六

請浙江協餉片.....三二七

李續宜請假片.....三二七

恭報入皖日期摺.....三二七

謝年終恩賞摺	三二七
目疾請假片	三二八
謝交部優敘恩摺	三二八
覆陳未能舍安慶東下請簡用左宗棠摺	三二八
調張運蘭來皖片	三一九
謝署兩江總督恩摺	三三〇
通籌全局並辦理大概情形摺	三三〇
請起用道員沈葆楨摺	三三一
察看海漕並保鹽場片	三三一
擬設江西糧臺及牙釐總局摺	三三一
催調張運蘭軍片	三三三
李元度另募新勇片	三三三
報銷歷年軍需摺	三三三
遵旨覆陳並報起程日期摺	三三四
預籌三支水師摺	三三五
彭玉麟統率水師李瀚章會辦牙釐片	三三七
請查京倉存米片	三三七
請毋分撤鄂軍片	三三八
飭吳全美師船赴防江北片	三三八

委籌辦理並酌擬變通章程摺	三三八
恭報行抵祁門日期摺	三四〇
皖南軍務暫時未便接辦片	三四一
請留左宗棠襄辦江皖軍務摺	三四一
遵旨調遣水師摺	三四二
斟酌進兵兼顧皖南軍務摺	三四三
與辦淮揚水師派員先往籌辦摺	三四五
黃翼升堪勝淮揚鎮總兵片	三四六
平江縣建忠義祠摺	三四七
行營采訪忠義第一案片	三四八
覆奏統籌全局摺	三四八
謝授兩江總督欽差大臣恩摺	三五〇
李元度調補皖南道摺	三五〇
欽奉四次諭旨覆陳摺	三五一
派宋慶蘭辦皖南團練片	三五三
收復廣德州片	三五四
保毛鴻賓任蘇藩片	三五四
恭報進兵日期摺	三五四
上海情形已鬆未能即圖金陵片	三五五

請駱秉章暫緩入蜀片……………三五五

援軍甫進寧郡被陷現籌堵剿摺……………三五六

皖南立腳稍穩即分軍先趨蘇境片……………三五七

欽奉訓飭懷遠覆陳片……………三五八

請撥江陝兩省協餉片……………三五八

覆奏勝保請飛召外援摺……………三五九

徽州被陷現籌堵剿摺……………三六〇

周天受殉節請卹摺……………三六一

皖南北近日軍情片……………三六一

請飭蔣益澧帶勇來皖片……………三六二

統籌緩急機宜摺……………三六三

金壇殉難官紳請卹摺……………三六四

會攻休寧勝仗片……………三六五

截留江西漕捐銀片……………三六五

展緩兩江營員舉劾片……………三六六

進攻休寧立復黟縣摺……………三六六

宋國永等請補竇缺片……………三六七

蕭啓江功績最多摺……………三六八

覆陳洋人助剿及採米運津摺……………三六八

查覆蕭盛遠竄蹟片……………三七〇

近日軍情片……………三七一

左宗棠軍克德興婺源摺……………三七一

建德失守旋經克復摺……………三七三

近日南岸軍情賊勢片……………三七四

水師保守湖口克都昌縣摺……………三七五

皖南江西全局片……………三七七

楊載福救拔南陵縣軍民摺……………三七七

上溪口江灣兩官失陷摺……………三七九

黟縣官軍勝仗摺……………三八〇

忠義局第二案摺……………三八二

覆陳劉培元金國琛能否赴浙摺……………三八二

湖南設立東征局請頒發部照摺……………三八三

近日軍情片……………三八四

請湖南借銷粵鹽片……………三八四

派署九江鎮總兵片……………三八五

請隨摺鈔發諭旨片……………三八五

官軍扼守景德鎮會剿洋塘大捷摺……………三八五

逆匪分犯大赤大洪二嶺迎剿獲勝摺……………三八八

近日江皖賊勢軍情片	三八九	收復徽州府城摺	四〇七
請頒關防片	三九〇	近日軍情片	四〇九
謝年終恩賞摺	三九〇	揀員署皖南鎮道摺	四〇九
官軍破賊黃麥鋪饒九境內肅清摺	三九〇	參鄧陽和等片	四一〇
擬移駐東流建德抽出靈軍片	三九一	覆陳左宗棠軍不能赴浙摺	四一〇
攻破上溪口賊巢進克休寧摺	三九二	留彭玉麟統水師營片	四一二
近日江楚軍情片	三九三	水陸員弁彙案請卹摺	四一二
官軍分剿婺源樂平大股竄匪摺	三九五	覆陳華祝三臚奏摺	四一二
嶺外逆匪竄撲西北兩路分剿大勝摺	三九五	近日三省軍情片	四一四
進攻徽州未能得手摺	三九七	左宗棠軍五六兩月戰守情形摺	四一五
景鎮失陷陳大富陣亡請卹摺	三九八	覆陳購買外洋船礮摺	四一六
江皖大局片	四〇〇	近日軍情片	四一八
官軍破賊樂平鄱景浮樂一律肅清摺	四〇〇	調上海輪船片	四一八
請將左宗棠改爲幫辦軍務片	四〇三	恭報接印日期摺	四一八
近日軍情片	四〇三	鮑超軍豐城大捷摺	四一九
官軍圍攻赤岡嶺賊壘悍賊殲除摺	四〇四	克復安慶省城片	四二〇
代遞唐鑑遺摺摺	四〇六	水師克池州府城摺	四二一
展緩江南鄉試摺	四〇六	撥江西漕折片	四二一
李金賜張光照正法片	四〇七	恭慰大孝摺	四二二

安徽省城酌派司道大員分任責成摺……………四二二

鮑超軍克鉛山縣摺……………四二二

請將鮑超等補實缺片……………四二五

留張運蘭在徽州軍營片……………四二五

歷陳胡林翼忠勤勳績摺……………四二五

克復銅陵縣無為州等處摺……………四二七

會國荃回湘募勇片……………四一九

請免徽軍前案報銷片……………四三〇

宋慶蘭等請卹片……………四三〇

謝賞加宮保銜恩摺……………四三〇

謝弟國荃貞幹升秩恩摺……………四三一

謝弟國華予諡恩摺……………四三一

左宗棠定議援浙節制諸軍摺……………四三一

李桓保升兩司摺……………四三一

揀員署安徽司道摺……………四三三

留朱品隆攻寧國片……………四三四

政題薦奏片……………四三五

力辭節制浙省各官摺……………四三五

查覆江浙撫臣及金安清參款摺……………四三六

保奏周騰虎等片……………四三九

苗沛霖應剿彭玉麟難離水營摺……………四四〇

浙省失守徽郡被圍通籌全局摺……………四四一

裁撤江南團練大臣片……………四四二

王開化請卹片……………四四三

卷二一

遵保皖撫大員摺……………四四五

欽奉恩諭再辭節制四省摺……………四四六

邊保水師總兵摺……………四四七

請優卹羅邊殿王有齡片……………四四八

近日各路軍情片……………四四八

參翁同書片……………四四九

謝協辦大學士恩摺……………四四九

金陵未克以前請不再加恩臣家片……………四五〇

議覆借洋兵剿賊片……………四五一

徽州解圍摺……………四五一

籌辦江浙軍務摺……………四五三

鮑超軍在青陽大捷片……………四五五

邊旨通籌全局摺	四五六	克復石埭太平涇縣三城摺	四七四
謝弟國荃補浙臬恩摺	四五九	克復巢舍和三城並銅城閘等隘摺	四七六
邊議安徽省城仍建在安慶摺	四五九	克復繁昌縣城摺	四七八
覆奏楚軍不能出洋片	四六一	近日軍情片	四八〇
劉于濤未能赴浙片	四六一	克復旌德縣城摺	四八〇
條陳近日軍情摺	四六一	克魯港要隘復南陵縣城摺	四八一
謝曾國荃升授蘇藩恩摺	四六四	克復太平蕪湖兩城摺	四八二
參李元度片	四六四	議覆王慶雲漕督兼巡撫原奏片	四八四
謝京察從優議敘恩摺	四六五	派員辦廣東釐金片	四八五
邊旨議覆請派員辦廣東釐金摺	四六五	官軍水陸並進疊克要隘駐軍雨花台摺	四八五
李鴻章軍攻由輪船赴滬摺	四六七	參革陳由立等摺	四八六
近日各路軍情片	四六八	邊查馮子材兵勇滋鬧情形片	四八七
旌卹饒廷選家屬片	四六九	近日軍情片	四八八
蕭孚泗陳由立留原營片	四六九	鮑超軍進攻寧郡剿平逆壘摺	四八八
籌議借洋兵剿賊摺	四六九	黃翼升署江南提督片	四八九
克復青陽縣城摺	四七一	謝弟國荃優敘貞幹加勇號恩摺	四九〇
荻港舊縣三山一律肅清片	四七一	議覆兼攝通商大臣摺	四九〇
近日軍情片	四七三	近日軍情片	四九二
查覆閩浙總督慶端事蹟摺	四七三	議覆調印度兵助剿摺	四九二

近日軍情片.....四九四

江西被害州縣蠲免錢漕分數摺.....四九五

金陵陸師勝仗張勝祿請卹摺.....四九六

克復寧國府城摺.....四九八

懇豁免江西歷案攤捐款項片.....四九九

童容海投誠片.....五〇一

安徽巡撫李續宜聞卦丁憂片.....五〇二

近日軍情片.....五〇二

代奏李續宜謝恩摺.....五〇三

查上次摺片並報近日軍情片.....五〇三

奉旨垂詢各路軍情分條覆奏摺.....五〇四

籌辦廣德州受降事宜分別遣留摺.....五〇七

近日軍情片.....五〇八

覆陳河南募勇另派統領片.....五〇八

查覆嚴樹森被參各情摺.....五〇九

查覆何桂清退守情形摺.....五一一

查覆薛煥吳煦參款片.....五二二

近日軍情片.....五二三

唐訓方駐紮臨淮摺.....五一四

請簡親信大臣會辦軍務片.....五一五

覆陳皖北軍情並察度苗練摺.....五一五

近日軍情片.....五一八

彙報軍情請調多隆阿軍回皖摺.....五一八

寧國縣失守片.....五二〇

江西釐務疲乏情形片.....五二一

彙報近日軍情摺.....五二二

水陸迭勝力保蕪湖金柱關摺.....五二三

近日軍情片.....五二六

陳明各軍應保之案片.....五二六

縷陳金陵各營苦守情形摺.....五二七

近日軍情仍請簡派大臣會辦軍務片.....五三一

張運蘭回籍養病片.....五三二

彙報各路近日軍情摺.....五三二

審明陳步高等潰走情形分別定擬摺.....五三四

祁門縣失守片.....五三五

撤回壽州正陽防兵片.....五三五

欽奉諭旨分條覆陳摺.....五三六

旌德涇縣解圍克復績溪祁門摺.....五三八

查明金安清汪曜奎參款擬結摺	五四〇
鮑超丁憂在營穿孝片	五四三
預籌選派員弁管帶輪船摺	五四三
軍營病故人員彙案請卹摺	五四五
李世忠在九洑洲戰守情形摺	五四五
近日軍情片	五四七
恭謝天恩摺	五四七
迭奉諭旨併案覆陳摺	五四七
東征局籌餉官紳請獎摺	五五〇
黃冕憚世臨有功東征片	五五一
近日軍情片	五五一
官軍攻克運漕並銅城關勝仗摺	五五二
謝會貞幹追贈按察使恩摺	五五四
近日軍情片	五五五
委署皖南道缺片	五五五
鮑超軍大獲勝仗涇縣解圍摺	五五六
涇縣守城陣亡員弁請卹片	五五七
代表李世忠請贖勝保罪摺	五五八
近日軍情並陳親赴金陵察看片	五五九

查閱沿江各軍並近日軍情摺	五五九
由金陵回皖沿途查閱並近日軍情摺	五六〇
沿途察看軍情賊勢片	五六一
祁門知縣唐治建祠片	五六三
鮑超軍克寧國近城要隘摺	五六三
近日軍情片	五六五
李世忠軍營失陷摺	五六六
蕪湖金柱關水陸防軍屢勝摺	五六七
保穆其琛補無爲州實缺片	五六九
揀調各員留皖委用摺	五七〇
近日軍情片	五七一
石澗埠六安州廬江等處戰守情形摺	五七二
覆陳淮鹽暫難改辦官運摺	五七四
近日軍情片	五七五
恭謝天恩遞陳下情摺	五七六
謝會貞幹予諡建祠恩摺	五七七
克復東關銅城關兩隘摺	五七七
近日軍情並陳餉絀情形片	五七九
金陵軍攻克石城石壘摺	五八〇

水陸會克巢和含三城摺	五八一	青陽援師大捷解圍摺	六〇三
近日軍情片	五八三	近日軍情片	六〇五
攻克江浦浦口九洲洲江面一律肅清摺	五八三	京倉需米照部議妥籌摺	六〇六
近日軍情片	五八六	近日軍情片	六〇八
覆陳金陵壽州軍情摺	五八七	寧國涇縣防軍勝仗摺	六〇九
覆陳南洋通商大臣無庸改設摺	五八九	查辦革鎮黃彬參款訊明擬結摺	六一一
同治元年下半年淮南徵課數目摺	五九〇	恭謝天恩摺	六一二
彙報各路軍情摺	五九一	金陵軍疊克八隘并復秣陵關摺	六一三
彙報近日各路軍情摺	五九二	古隆賢率眾投誠收復三縣摺	六一五
催調黃翼升赴臨淮片	五九三	近日軍情片	六一五
覆陳淮鹽不能赴陝片	五九四	聲明石太旌寧四城失陷緣由片	六一六
湖口防軍勝仗摺	五九五	克復水陽東壩等隘高淳等四縣摺	六一六
近日軍情片	五九六	李世忠軍破苗圩復懷遠縣摺	六一九
江西邊辦茶葉落地稅片	五九七	近日軍情片	六二〇
覆陳籌援臨淮摺	五九八	李續宜病故遺書代陳摺	六二〇
丙丁戊三綱淮北鹽課奏銷摺	六〇〇	近日軍情片	六二一
金陵軍攻克上方橋江東橋石壘摺	六〇一	欽奉諭旨覆陳四條摺	六二二
近日軍情並調金國琛回皖片	六〇二	恭謝天恩並陳近日軍情摺	六二四
調回派辦粵釐各員片	六〇三	淮南鹽運場運力籌整頓摺	六二五

近日軍情片	六二六	瀝陳餉絀情形片	六四五
官軍攻復績溪并在歙獲勝摺	六二七	東壩防軍截賊獲勝摺	六四六
覆陳李世忠情形片	六二八	徽州防軍截賊獲勝摺	六四七
攻克鍾山石壘金陵合圍摺	六二八	近日軍情片	六四八
近日軍情片	六三〇	力疾銷假片	六四九
覆陳接統揚防大員片	六三〇	謝寬免嚴議恩摺	六四九
遵旨籌議停補額兵摺	六三二	鮑超請假葬親摺	六五〇
近日軍情片	六三二	近日軍情片	六五〇
覆陳李世忠近狀片	六三三	邊旨會師籌剿金陵摺	六五一
江西牙釐請照舊經收摺	六三四	奉旨覆奏并陳近日軍情摺	六五二
近日軍情片	六三六	覆陳長江水師提督員缺片	六五三
克復句容縣城摺	六三六	覆陳金陵皖北江西各路軍務籌辦情形摺	六五四
請假調理摺	六三八	金陵克復全股悍賊盡數殲滅摺	六五五
近日軍情片	六三八	賊酋分別處治粗籌善後事宜摺	六五八
謝交部從優議敘恩摺	六三九	謝錫封侯爵恩摺	六六一
克復金壇縣城摺	六四〇	李臣典病故請卹摺	六六一
徽州防軍挫失摺	六四一	蕭孚泗丁憂開缺摺	六六一
李世忠開缺回籍摺	六四三	覆陳逆酋正法片	六六一
近日軍情片	六四四	近日軍情擬裁撤湘勇片	六六三

停止廣東釐金摺……………六六四

裁撤湘勇查供福瓊下落片……………六六五

近日軍情片……………六六六

奉旨分條覆陳摺……………六六七

金陵陸軍請獎請御摺……………六六九

保案請免注考語片……………六六九

繪呈安徽地圖並長江圖說摺……………六七〇

會國荃請開缺調理摺……………六七〇

湖州廣德敗賊犯歙官軍截勦屢勝摺……………六七一

近日軍情片……………六七三

彭玉麟不專駐安慶片……………六七三

截停淮北餉鹽設法整理以復舊制摺……………六七四

江南貢院工竣請放考官摺……………六七六

覆陳補行鄉試事宜片……………六七六

藩運兩司各回原駐片……………六七七

皖南北兩岸肅清摺……………六七八

報銷皖省抵徵摺……………六七九

謝賞會國荃人參恩摺……………六七九

謝賞雲騎尉及直隸州知州恩摺……………六八〇

近日軍情片……………六八〇

邊旨馳赴皖鄂交界督兵剿賊摺……………六八一

江寧省城建立湘軍昭忠祠摺……………六八二

江寧釐金各歸本省抽收片……………六八二

交卸督篆仍回本任摺……………六八三

欽奉諭旨分條覆陳摺……………六八四

查覆淮北鹽務摺……………六八五

范泰亨柯鉞請卹片……………六八六

胡大任請獎片……………六八七

黃冕請開缺片……………六八七

豁免皖省錢漕摺……………六八八

欽奉諭旨覆陳近日軍情摺……………六九〇

何桂珍等請予諡片……………六九一

補陳寧國涇縣保案摺……………六九二

報收輪船經費撥解銀兩摺……………六九二

江寧暫緩開關查案另籌辦貢摺……………六九三

通籌滇黔大局摺……………六九四

陳明請停湖南東征局片……………六九六

報李世忠捐餉銀數片……………六九七

錄寄諭傳知曾國荃片	六九七
彭玉麟辭漕督任片	六九八
覆奏劉銘傳等軍赴防摺	六九八
袁甲三請復建臨淮專祠摺	六九九
劉松山等緩赴甘肅片	七〇〇
李宗羲暫留運司任片	七〇一
疊奉諭旨覆陳摺	七〇二
陳明鑿營餉細情形片	七〇三
邊旨赴山東剿賊并陳明萬難迅速情形摺	七〇四
請另簡知兵大員督辦北路軍務片	七〇七
謹陳籌辦情形并請收回成命摺	七〇七
祁宿藻稱祥厚祠片	七〇八
調李鶴章辦理營務片	七〇九
恭報交卸督篆帶兵出省日期摺	七〇九
請飭飽營所買戰馬改解山東片	七一〇
裁撤湖南東征局片	七一〇
查勘陸建瀛殉節情形片	七一一
皖軍被困派兵援剿摺	七一一
再請收回節制三省成命片	七一二

賊聚全萃皖境先赴臨淮摺	七一三
請派陳國瑞赴河南片	七一四
派員迎提軍馬摺	七一四
調馬隊官兵赴皖北助剿摺	七一五
仍請收回節制三省成命片	七一六
欽奉諭旨覆陳摺	七一六
徵休防軍索餉譁擾現擬查辦摺	七一八
恭謝天恩并陳明曾國荃病未復元摺	七二〇

卷四

邊旨覆陳并請中外臣工會議剿捻事宜摺	七二一
補參陳國瑞摺	七二三
金寶圩團練殉難請卹摺	七二三
移駐徐州整理馬隊并陳近日軍情摺	七二四
銘軍疊勝信賊東竄現籌布置摺	七二五
奉旨覆陳近日軍情摺	七二六
近日軍情片	七二八
官軍疊勝該逆仍竄山東摺	七二八
籌商直隸河防片	七二九

寧陵扶溝等處勝仗摺……………七三〇

擬調鮑超會勦西路片……………七三一

疊奉諭旨覆奏摺……………七三二

會議長江水師營制事宜摺……………七三三

賊萃湖北派大軍援鄂摺……………七四四

查覆吳昌壽張曜參案摺……………七四四

查覆山西撫藩等參款摺……………七四七

酌撥馬隊馳赴奉天剿賊摺……………七五〇

近日軍情并將湖團分別撤留片……………七五一

向師棟病故請卹片……………七五二

請令劉秉璋襄辦軍務片……………七五二

查辦湖團酌籌善後事宜摺……………七五二

會國荃補湖北巡撫謝恩摺……………七五五

報啓行赴周家口日期片……………七五六

銘軍援鄂克黃陂縣城摺……………七五六

鮑超軍北來剿捻籌定餉項摺……………七五七

近日軍情暫駐濟寧就近調度摺……………七五九

彙報山東近日軍情相機調度摺……………七六一

銘樹兩軍在皖豫剿賊獲勝摺……………七六三

擒匪自山東回竄追勦獲勝摺……………七六四

擬於運河增隄置柵片……………七六七

曹徐淮泗剿捻勝仗摺……………七六七

查勘黃運情形片……………七六九

彙陳各軍近日追剿情形摺……………七六九

請分段扼防片……………七七一

彙報軍情檄調各軍防勦摺……………七七二

防守沙河賈魯河片……………七七三

任賴股匪回竄東路調兵分勦摺……………七七四

擒股西竄仍辦河防摺……………七七五

湘軍勦捻勝仗大略情形片……………七七六

湘軍迎勦張逆四獲勝仗摺……………七七六

請假一月片……………七七八

近日軍情片……………七七八

頂奏保案片……………七七八

擒股東竄河防無成現派軍追剿摺……………七七九

請飭李鴻章暫駐徐州調度軍務片……………七八〇

彙陳查辦民圩擒斬擒匪摺……………七八一

調馬德順來豫勦捻片……………七八二

湘軍在新野南陽勝仗摺	七八二	銘軍攻克黃陂等處五案併保摺	七九六
淮軍往來勦賊勝仗摺	七八四	暫回本任仍駐徐州並陳下悃摺	七九六
水師報捐請廣學額摺	七八四	近日軍情片	七九七
彭玉麟報捐歷任養廉片	七八五	陳明皖餉支絀片	七九八
續假調理片	七八六	出洋委員容閱請獎片	七九九
彙報近日軍情摺	七八六	回駐徐州接篆任事摺	七九九
病難速痊請開各缺仍留軍中效力摺	七八七	近日軍情並陳鮑超暫緩入秦片	七九九
請暫註銷舊秩片	七八八	彭玉麟懇辭獎敘片	八〇〇
淮軍勝仗詳細情形摺	七八八	報銷款目分四案開單摺	八〇〇
黃翼升回駐江寧片	七八九	安徽抵徵比例請銷片	八〇二
調鮑超劉松山兩軍分路援勦摺	七八九	補發湘軍欠餉作第四案續報之款片	八〇三
奉到諭旨先行覆陳片	七九〇	恭報自徐州起程日期摺	八〇三
近日軍情片	七九一	張樹珊在周家口建祠片	八〇四
酌籌西路軍務派員辦糶營軍米摺	七九一	張錫燦在陝西陣亡請加恩片	八〇四
欽奉諭旨覆陳摺	七九二	覆陳祝瑄被參一案摺	八〇五
刊用木質關防片	七九四	報回省日期並近日軍情摺	八〇六
近日軍情片	七九四	通籌酌解陝甘軍餉片	八〇六
欽奉諭旨再陳下悃摺	七九四	鮑超傷疾甚劇酌調大員統軍摺	八〇七
近日軍情片	七九五	奏撥二成洋稅銀片	八〇八

謝京察優敘恩摺……………八〇九

陳明天旱水涸及東西兩路軍情片……………八一〇

謝授大學士恩摺……………八一〇

鮑超懇請回籍養病摺……………八一〇

江寧昭忠祠合祀楚軍水陸營官片……………八一〇

臬軍分別撤留襄雲慶另募新軍摺……………八一〇

籌撥直隸安徽協款試辦導淮摺……………八一三

籌撥丁卯大運銀兩片……………八一四

甄別府縣等官摺……………八一五

烈婦程胡氏請旌片……………八一六

李朝斌本姓王氏請仍歸李氏片……………八一六

籌辦本年江北新漕摺……………八一七

預籌明年協甘餉銀摺……………八一八

江寧建立軍營官紳昭忠祠摺……………八一九

謝加恩賞世職摺……………八二〇

擬補長江水師各缺續陳未盡事宜摺……………八二一

陸營借補小缺請飭部核議片……………八二六

六年江北冬漕併歸海運詳議章程摺……………八二七

張詩日病故請卹摺……………八三〇

擬赴上海查閱鐵廠片……………八三〇

邊旨酌提制錢解津摺……………八三一

直隸陝甘協餉分別籌辦摺……………八三二

調閩省輪船赴津巡洋片……………八三四

謝授武英殿大學士恩摺……………八三五

水師赴防運河湘營添募新勇片……………八三五

張運桂附祀張運蘭祠片……………八三五

胡開泰正法片……………八三六

預籌撤勇經費摺……………八三六

查明運河水誌情形摺……………八三七

謝交部優敘恩摺……………八三八

謝調補直隸總督恩摺……………八三八

陳明服中帶兵未能終制片……………八三九

新造輪船摺……………八三九

黎庶昌留蘇補用片……………八四一

交卸暫緩起程摺……………八四二

請禁川私行楚收復淮南引地摺……………八四二

陝甘協餉歸湖北轉解片……………八四四

鄒鳴鶴請優卹摺……………八四五

湘軍第五案報銷摺	八四五	試辦撤留長蘆總商摺	八七八
酌議江蘇水師事宜摺	八四八	永定河漫口請參處各員摺	八七九
江淮等屬墊發兵差酌議辦理摺	八六一	永定河未能合龍片	八八〇
酌擬武職借補章程摺	八六三	再議練軍事宜摺	八八一
請傳辦要件統歸內務府大臣行文片	八六五	銘軍統領無庸更換片	八八三
恭報起程日期片	八六六	核辦永定河工程款項摺	八八三
謝賞朝馬恩摺	八六六	請撥中洪下口歲修銀兩片	八八五
略陳直隸應辦事宜摺	八六六	條陳長蘆鹽務摺	八八六
到任接印摺	八六八	秋收災歉未能種麥片	八九二
舉辦永定河工片	八六八	覆奏察看史念祖摺	八九三
留臬司張樹聲清理積訟摺	八六九	蘆網億累請減成本摺	八九三
舉劾屬吏摺	八七〇	報永定河合龍摺	八九七
果渠村估工摺	八七一	擬賑卹畿南災歉摺	八九八
勘永定河工起程日期片	八七一	陳澹沱河水患大概摺	九〇〇
驗收回省日期片	八七二	直隸清訟請獎摺	九〇二
覆陳劉松山湘軍情形摺	八七二	謝京察優敘恩摺	九〇三
覆議直隸練軍事宜摺	八七四	報銷勘驗軍需第一案摺	九〇四
報永定河合龍穩固摺	八七六	臚陳劉松山事蹟摺	九〇五
河工撥用長蘆復價片	八七八	報永定河凌汛安瀾摺	九〇七

試辦練軍酌定營制摺……………九〇七

籌議邊防片……………九一四

因病請假摺……………九一五

謝子紀滙員外郎分部恩摺……………九一六

續請病假摺……………九一六

報赴天津起程日期摺……………九一六

查明津案大概情形摺……………九一七

揀員署天津道府縣缺片……………九一九

請將天津府縣官交刑部片……………九一九

覆陳津事各情摺……………九二〇

覆陳津案各情片……………九二二

請留閩米存津片……………九二三

覆陳彭玉麟等出處江海異形片……………九二三

天津府縣到案日期摺……………九二四

謝恩并辭江督任摺……………九二六

請以陳欽署天津府摺……………九二六

訊取天津府縣親供摺……………九二七

審明津案各犯摺……………九二八

史念祖開缺差委摺……………九二九

報交卸日期摺……………九三〇

調吳大廷操練輪船片……………九三〇

謝恩賜壽摺……………九三一

恭請陛見摺……………九三二

調陳蘭彬江南差遣片……………九三二

報接印日期摺……………九三三

會議海運交米摺……………九三三

籌辦河運事宜摺……………九三五

覆陳淮南鹽價難增摺……………九三七

馬新貽本籍建祠摺……………九三八

議復楚省淮南引地摺……………九三九

李世忠陳國瑞尋仇互鬪奏請參處摺……………九四一

聖訓頒到謝恩摺……………九四三

代遞張亮基遺摺摺……………九四四

擬選子弟出洋學藝摺……………九四四

大閱軍竣摺……………九四七

續議江蘇水師事宜摺……………九四九


楚岸鹽引淮川分界行銷摺……………九五九

曾文正公奏稿

卷一

遵議大禮疏 道光三十年正月二十八日

奏爲遵旨敬謹詳議事。正月十六日。皇上以大行皇帝殊諭還命四條。內無庸郊配廟祔二條。令臣工詳議具奏。臣等謹於二十七日集議。諸臣皆以大行皇帝功德懿鑠。郊配既斷不可易。廟祔尤在所必行。直道不泯。此天下之公論也。臣國藩亦欲隨從衆議。退而細思。大行皇帝諄諄誥誡。必有精意存乎其中。臣下鑽仰高深。苟窺見萬分之一。亦嘗各獻其說。備聖主之博采。竊以爲還命無庸廟祔一條。考古準今。萬難遵從。無庸郊配一條。則不敢從者有二。不敢違者有三焉。所謂無庸廟祔一條。萬難遵從者何也。古者祧廟之說。乃爲七廟親盡言之。間有親盡而仍不祧者。則必有德之主。世世宗祀。不在七廟之數。若殷之三宗。周之文武是也。大行皇帝於皇上爲稱廟。本非七廟親盡可比。而論功德之彌綸。又嘗與列祖列宗同爲百世不祧之室。豈其弓劍未忘而烝嘗遽別。且諸侯大夫尙有廟祭。況以天子之尊。敢廢升祔之典。此其萬難遵從者也。所謂無庸郊配一條。有不敢從者二。何也。古聖制禮。亦本事實之既至。而情文因之而生。大行皇帝仁愛之德。同符大造。偶遇偏災。立頒帑項。年年賑貸。薄海含哺。粒我烝民。后稷所以配天也。御宇三十年。無一日之暇逸。無須臾之不敬。純亦不已。文王所以配上帝也。既已具合撰之實。而欲辭升配之文。則普天臣民之心。終覺不安。此其不敢從者一也。歷考列聖升配。惟世祖章皇帝係由御史周季琬奏請外。此皆繼統之聖人。特旨舉行。夏由上孚。吳眷下愜。民情毫無疑義也。行之既久。遂爲成例。如大行皇帝德盛化神。即使無例可循。臣下猶應奏請。況乎成憲昭昭。曷敢踰越。傳曰。君行意。臣行制。在大行皇帝自懷謙讓之盛意。在大小臣工。宜守國家之舊制。此其不敢從者二也。所謂無庸郊配一條。有不敢違者三。何也。壇壝規模。尺寸有定。乾隆十四年重加繕修。一甃一石。皆考律呂之正義。按九五之陽數。增之不能。致之不可。七廟配位。各設青幄。當初幄制闊大。乾隆三年量加收改。今則每幄之內。僅容豆籩七幄之外。幾乏餘



地。我大行皇帝慮及億萬年後。或議增廣平壇壝。或議裁狹平幄製。故定爲限制。以身作則。俾世世可以遵循。今論者或謂西三幄之南。尙可添置一案。暫爲目前之計。不必久遠之圖。豈知人異世而同心。事相沿而愈久。今日所不敢言者。亦萬世臣子所不敢言者也。今日所不忍言者。亦萬世臣子所不忍言者也。經此次殊諭之嚴切。盈廷之集議。尙不肯裁決遵行。則後之人又孰肯冒天下之不韙乎。將來必至修改基址。輕變舊章。此其不敢違者一也。古來祀典與廢不常。或無其祭而舉之。或有其禮而罷之。史冊所書。不一而足。唐垂拱年間。郊祀以高祖太宗高宗並配。後開元十一年。從張說議罷太宗高宗配位。宋景祐年間。郊祀以藝祖太宗真宗並配。後嘉祐七年。從楊敞議罷太宗真宗配位。我朝順治十七年。合祀天地日月星辰山川於大享殿。奉太祖太宗以配。厥後亦罷其禮。祀典攷議。乃古今所常有。我大行皇帝慮億萬年後。愚儒無知。或有援唐宋罷祀之例。妄行陳奏者。不可不預爲之防。故殊諭有曰。「非天子不議禮。」以爲一經斷定。則巍然七幄。與天長存。後世增配之議。尙且不許。罷祀之議。更何自而興。所以禁後世者愈嚴。則所以尊列祖者愈久。此其計慮之周。非三代制禮之聖人而能如是乎。大行皇帝以制禮之聖人自居。臣下何敢以尋常之識淺爲窺測。有尊崇之虛文。無謀事之遠慮。此其不敢違者二也。我朝以孝治天下。而遺命在所尤重。康熙二十六年。孝莊文皇后遺命云。「願於遵化州孝陵近地擇吉安厝。」當時臣工皆謂遵化去太宗昭陵千有餘里。之合祔葬之例。我聖祖仁皇帝不敢違遺命。而又不遵成例。故於孝陵旁近建暫安奉殿。三十餘年。未敢竟安地宮。至雍正初。始敬謹歲事。嘉慶四年。高宗純皇帝遺命云。「廟號無庸稱祖。」我仁宗睿皇帝謹遵遺命。故雖乾隆中之豐功大烈。而廟號未得祖稱。載在會典。先後同揆矣。此次大行皇帝遺命。惟第一條森嚴可畏。若不遵行。則與我朝家法不符。且殊諭反覆申明。無非自處於卑屈。而處列祖於崇高。此乃大孝大讓互古之盛德也。與其以尊崇之微忱屬之臣子。孰若以莫大之盛德歸之君父。此其不敢違者三也。臣竊計皇上仁孝之心。兩者均有所歎。然不奉升配。僅有典禮未備之歎。遽奉升配。既有違命之歎。又有將來之慮。是多一歎也。一經大智之權衡。無難立判乎輕重。聖父制禮而聖子行之。必有默契於粗微。不待臣僚擬議而後定者。臣職在秩宗。誠恐不詳不慎。皇上他日郊祀之時。上願成命。下願萬世。或者怵然難安。則禮臣無所辭其咎。是以專摺具奏。干瀆宸嚴。不勝惶悚戰慄之至。謹奏。

應詔陳言疏 道光三十年二月初二日

奏爲應詔陳言事。二月初八日。奉皇上諭令。九卿科道有言事之責者。於用人行政一切事宜。皆得據實直陳。封章密奏。仰見聖德謙沖。孜孜求治。臣竊維用人行政二者。自古皆相提并論。獨至我朝。則凡百庶政。皆已著有成憲。既備既詳。未可輕議。今日所當講求者。惟在用人一端耳。方今人才不乏。欲作育而激揚之。端賴我皇上之妙用。大抵有轉移之道。有培養之方。有考察之法。三者不可廢一。請爲我皇上陳之。所謂轉移之道何也。我朝列聖爲政。大抵因時俗之過而矯之。使就於中。順治之時。瘡痍初復。民志未定。故聖祖繼之以寬。康熙之末。久安而吏弛。刑措而民偷。故世宗救之以嚴。乾隆嘉慶之際。人尙才華。士鶩高遠。故大行皇帝斂之以鎮靜。以變其浮誇之習。而一時人才循循規矩準繩之中。無有敢才智自雄。鋒芒自逞者。然有守者多。而有猷有爲者漸覺其少。大率皆以畏蕙爲慎。以柔靡爲恭。以臣觀之。京官之辦事通病有二。曰退縮。曰瑣屑。外官之辦事通病有二。曰敷衍。曰顛覆。退縮者同官互推。不肯任怨。動輒請旨。不肯任怨是也。瑣屑者利析錙銖。不顧大體。察及秋毫。不見與耕是也。敷衍者裝頭蓋面。但計目前。剝肉補瘡。不問明日是也。顛覆者外面完全。而中已潰爛。章奏粉飾。而語無歸宿是也。有此四者。習俗相沿。但求苟安無過。不求振作有爲。將來一有艱鉅。國家必有乏才之患。我大行皇帝深知此中之消息。故亟思得一有用之才。以力挽頹風。去年京察人員。數月之內。擢臬司者三人。擢藩司者一人。蓋亦欲破格超遷。整頓積弱之習也。無如風會所趨。勢難驟變。今若遽求振作之才。又恐躁進者因而倖進。轉不足以收實效。臣愚以爲欲使有用之才。不出範圍之中。莫若使之從事於學術。漢臣諸葛亮曰。才須學。學須識。蓋至論也。然欲人才皆知好學。又必自我皇上以身作則。乃能操轉移風化之本。臣考聖祖仁皇帝登極之後。勤學好問。儒臣逐日進講。寒暑不輟。萬壽聖節。不許間斷。三藩用兵。亦不停止。召見廷臣。輒與之往復討論。故當時人才濟濟。好學者多。至康熙末年。博學偉才。大半皆聖祖教諭而成就之。今皇上春秋鼎盛。正與聖祖講學之年相似。臣之愚見。欲請俟二十七月後。舉行逐日進講之例。四海傳播。人人嚮風。召見巨工。與之從容論難。見無才者則勗之以學。以痛懲模稜罷輒之習。見有才者則愈勗之以學。以化其剛愎刻薄之偏。十年以後。人才必大有起色。一人典學於宮中。羣英鼓舞於天下。其幾在此。其效在彼。康熙年間之往事。昭昭可觀也。以今日之委靡因循。

而期之以振作。又慮他日之更張債事。而澤之以詩書。但期默運而潛移。不肯矯枉而過正。蓋轉移之道。其略如此。所謂培養之方何也。凡人才未登仕版者。姑不具論。其已登仕版者。如內閣。六部。翰林院。最爲蒼萃之地。將來內而卿相。外而督撫。大約不出此八衙門。此八衙門者。人才數千。我皇上不能一一周知也。培養之權。不得不責成於堂官。所謂培養者。約有數端。曰教誨。曰甄別。曰保舉。曰超擢。堂官之於司員。一言嘉獎。則感而圖功。片語責懲。則畏而改過。此教誨之不可緩也。榛棘不除。則蕙蘭減色。害馬不去。則騏驎短氣。此甄別之不可緩也。嘉慶四年十八年。兩次令部院各保司員。此保舉之成案也。雍正年間。甘汝來以主事而賈人參放知府。嘉慶年間。黃鉞以主事而充翰林。入南齋。此超擢之成案也。蓋嘗論之。人才譬之禾稼。堂官之教誨。猶種植耘耔也。甄別則去其稂莠也。保舉則猶灌漑也。皇上超擢。譬之甘雨時降。苗勃然興也。堂官常常到署。譬之農夫日日田間。乃能熟悉穡事也。今各衙門堂官多內廷行走之員。或累月不克到署。與司員恆不相習。自掌印主稿數人而外。大半不能識面。譬之嘉禾稂莠。聽其同生同落於畎畝之中。而農夫不問。教誨之法無聞。甄別之例亦廢。近奉明詔保舉。又但及外官。而不及京秩。培養之道。不尙有未盡者哉。自頃歲以來。六部人數日多。或二十年不得補缺。或終身不得主稿。內閣翰林院員數亦三倍於前。往往十年不得一差。不遷一秩。固已英才摧挫矣。而堂官又多在內廷。終歲不獲一見。如吏部六堂。內廷四人。禮部六堂。內廷四人。戶部六堂。皆直內廷。翰林兩學院。皆直內廷。在諸臣隨侍御圍。本難分身入署。而又或兼攝兩部。或管理數處。爲司員者。畫稿則匆匆一面。白事則寥寥數語。縱使才德俱優。曾不能邀堂官之一顧。又焉能達天子之知哉。以若干之人才。近在眼前。不能加意培養。甚可惜也。臣之愚見。欲請皇上稍爲酌量。每部須有三四堂不入直內廷者。令其日日到署。以與司員相砥礪。翰林學院。亦須有不直內廷者。令其與編檢相濡染。務使屬官之性情心術。長官一一周知。皇上不特詢問。某也才。某也直。某也小知。某也大受。不特屬官之優劣燦然畢呈。卽長官之淺深亦可互見。旁考參稽。而入衙門之人才。同往來於聖主之胸中。彼司員者。但令姓名達於九重。不必升官遷秩而已。感激無地矣。然後保舉之法。甄別之例。次第舉行乎。舊章。皇上偶有超擢。則榷柙一升。而草木之精神皆振。蓋培養之方。其略如此。所謂考察之法何也。古者詢事考言。二者並重。近來各衙門辦事。小者循例。大者請旨。本無才猷之可見。則莫若於言考之。而召對陳言。天威咫尺。又

不宜喋喋便候。則莫若於奏摺考之矣。國家定例。內而九卿科道。外而督撫藩臬。皆有言事之責。各省道員。不許專摺謝恩。而許專摺言事。乃十餘年間。九卿無一人陳時政之得失。司道無一摺言地方之利病。相率緘默。一時之風氣。有不解其所以然者。科道間有奏疏。而從無一言及主德之隆替。無一摺彈大臣之過失。豈君爲堯舜之君。臣皆稷契之臣乎。一時之風氣。亦有不解其所以然者。臣考本朝以來。匡言主德者。孫嘉淦以自是。規高宗。袁鏡以寡慾。規大行皇帝。皆蒙優旨嘉納。至今傳爲美談。糾彈大臣者。如李之芳。參劾魏裔介。彭鵬。參劾李光地。厥後四人皆爲名臣。亦至今傳爲美談。自古直言不諱。未有盛於我朝者也。今皇上御極之初。又特詔求言。而褒答倭仁之諭。臣讀之。至於怵舞感泣。此誠太平之象。然臣猶有過慮者。誠見我皇上求言甚切。恐諸臣紛紛入奏。或者條陳庶政。頗多雷同之語。不免久而生厭。彈劾大臣。懼長攻訐之風。又不免久而生厭。臣之愚見。願皇上堅持聖意。借奏摺爲考核人才之具。永不生厭。敷之心。涉於雷同者。不必交議而已。過於攻訐者。不必發鈔而已。此外則但見其有益。初不見其有損。人情狃於故常。大抵多所顧忌。如主德之隆替。大臣之過失。非皇上再三誘之使言。誰肯輕冒不韙。如藩臬之奏事。道員之具摺。雖有定例。久不遵行。非皇上再三迫之使言。又誰肯立異以犯督撫之怒哉。臣亦知內外大小羣言並進。卽浮僞之人。不能不雜出其中。然無本之言。其術可以一售而不可以再試。朗鑑高懸。豈能終遁。方今考九卿之賢否。但憑召見之應對。考科道之賢否。但憑三年之京察。考司道之賢否。但憑督撫之考語。若使人人建言。參互質證。豈不更爲核實乎。臣所謂考察之法。其略如此。三者相需爲用。並行不悖。臣本愚陋。頃以識禮一疏。荷蒙皇上天語褒嘉。感激思所以報。但憾識見淺薄。無補萬一。伏求皇上憐其愚忱。俯賜訓示。幸甚。謹奏。

請設壇祈雨疏 道光三十年二月初四日

奏爲農田待澤孔殷。亟請設壇祈雨。以迓天和。而慰民望。仰祈聖鑒事。竊惟民生以穡事爲先。國計以豐年爲瑞。本年年入春以後。兩澤較稀。現在節交立夏。正百穀播種之時。必大沛甘霖。方卜豐綬有光。近來京畿地方。晴多雨少。糧價漸增。並聞山陝一帶。均盼雨甚切。惟冀旬日間普霑甘樹。乃無亢旱之虞。因思豐北大工未竣。漕行或恐愆期。今歲河北各省收成。尤關緊要。我皇上軫念民依。無微不至。凡屬雨暘之時。若早蒙宵旰之廬懷。茲當東作

方輿彌殷望澤。聖主虔申祈禱。蒼穹定霈和甘。應請勅下各該衙門敬謹設壇。誠求膏雨。將見昊慈垂祐。而澍澤旁敷。草野臚歡。而倉箱有慶矣。臣愚昧之見。是否有當。伏乞皇上聖鑒。謹奏。

條陳日講事宜疏 道光三十年四月初四日

奏爲條陳日講事宜。補臣前摺所未備事。竊臣前於用人三策摺內。言及康熙年間日講之例。三月十一日奉諭旨。著於百日後舉行日講。所有一切應行事宜。著各該衙門察例詳議以聞。欽此。一查康熙年間例案。臣部及各衙門。俱已無存。而臣之初意。係於贊助聖學之中。陰寓陶成人才之意。原摺內所謂「其幾在此。其效在彼」者。尙未申明詳晰。今一切應行事宜。亦必求於人才有益。不徒務講學之虛名。謹參考會典及聖祖御製文集。國史列傳諸書。竭臣愚見。先定大概規模。補前摺所未備。請皇上再交各衙門覈議。務使精益求精。聖學人才。兩有裨益。方得實效。謹將臣所擬條款。臚列於後。

一、考定日講設官之制。謹按日講起居注官。現在滿洲十員。漢人十二員。臣考舊章。則日講官與起居注官。係屬兩項。非一項差使也。日講官。主執經入侍。每日進講。即宋時崇政殿說書之職也。起居注官。主典禮侍班。簪筆載記。即周時左史右史之職也。我朝順治十年。設立日講官。其時並無起居注之名。至康熙九年。復舉行日講。且創立起居注官。於是起居注官。即以日講官兼攝之。兩項差事。乃併爲一項矣。厥後康熙二十五年。停止日講。而起居注官。則未嘗廢。銜上日講二字。亦未裁去。雍正乾隆以來。相沿不改。其實所辦之事。乃記注侍班之事。日講二字。則有空銜而無實事也。今奉旨舉行日講。似須循名責實。二者分作兩項。於現在記注官之外。別添一項人。作日講官。以復順治及康熙初年之例。其現在之起居注官。祇於銜上裁去日講二字。其餘不改。以循雍正乾隆以來之例。庶名實相符。而於大朝成憲。皆不稍背云。

一、講官員數。謹按順治十二年。初設講官。選詞臣八人。不分滿漢。康熙九年。定設滿洲四員。漢官八員。厥後遞有增加。至十八員。二十六員不等。蓋以講官而兼記注之事。職務較繁故也。今既將講官與記注官分作兩項。似可循康熙九年之例。定爲滿洲講官四員。漢講官八員。

一、每日進講員數。謹按順治十二年。定以掌院學士率講官或二人或三人進講。康熙年間。每日進講之員。

無可查考。臣愚以爲進講之員太多，不免徒務虛文。謹擬每日以一人進講，不事旅進旅退，與尋常召見無異。庶講官擬定專一，得以悉心啓沃。皇上靜對臣工，聽其講論古今，亦得細察其精神器識，即可以陶冶人才矣。

一、講官應用何項人。謹按現在起居注官專用翰詹兩衙門之人。溯查康熙年間，勵杜訥以州同而轉講官，高士奇以中書而轉講官。當時取人，往往不限資格。又康熙十六年有滿洲講官，兼用小九卿之例。乾隆初年，有呈進講章，兼用科道之例。此次設立講官，似可援此二例，斟酌行之。臣之愚見，擬請除大學士、掌院學士及六部都察院職事較繁，無庸充補講官外，其餘內閣學士及九卿科道之由科甲出身者，准其與翰詹兩衙一體充補講官。庶取人之途較廣，而仍不違乎成例。

一、定保舉講官之法。謹按順治十二年初立講官，諭令大臣選詞臣、學問淹博者八人。既由臣下選擇，是保舉之法也。康熙年間講官由題本開列請簡，乾隆年間講官由引見擢用。至今相沿不改。臣思此次復設此官，仍須行選擇保舉之法焉。蓋保舉尙恐其濫，惟保舉講官，斷不至於濫。不特保人者十分慎重，即受保者自揣學問平庸，亦必不敢妄進以取戾也。求皇上於一二品大臣中，特旨派出四五人，令其各保數員，以備進講。此次所保之人，或升遷出參，將次缺員，又求特派四五人，令其各保數員進講。所保之人，必容止莊重，辭氣溫雅，又必兼熟通鑑會典二書，如不稱職，令其退出講筵，或根柢甚深，而口稍拙訥者，不妨保舉。

一、進講之地。謹按康熙年間進講之地，懋勤殿多，准十二年暫修宮殿，駕駐瀛臺，即在瀛臺進講。二十三年天氣嚴寒，即在暖閣進講。其餘或在郊外，或幸南苑，皆不輟講。是地可隨時遷移也。今奉諭旨便殿進講，皇上現御東書房，臣擬請即在東書房進講。以後或有遷移，臨時再降諭旨。

一、進講之儀。謹按康熙年間進講儀節，初入行三叩禮，侍立詣講案前進講。講畢，復行三叩禮。至十六年停止進講之三叩禮。臣今擬就此儀稍爲酌量，請即東書房言之。皇上升御牀西面，牀上恭設一橫几爲書案，置所講之書於案上。又設小几於室中，爲進講官之講案。時講官捧書入，陳於講案上，轉出案西，跪東北面一叩。興，復講案位，侍立宣講。講畢，復轉出案西，跪一叩。興，趨出。如遇聖駕不御東書房，所有皇上面南講官北面之處，有時限於地勢，再行臨時斟酌。謹照此儀，另繪一圖附呈。

一、進講之時。謹按康熙年間。尙未設立單機處。部院奏事。卽係大臣入對承旨。奏事既畢。然後講官入侍。自九年至二十年皆然也。二十一年。乃改於部院未啓奏之前。講官先入進講。遙想其時大約不過辰刻耳。今則時勢移易。較康熙年間迥有不同。康熙年間部院章奏不過數件。今則每日多至七八十件。康熙年間。各省章奏。聖祖省覽。直待夜分然燭之後。今則清晨裁定。宣諭軍機而批答。康熙年間引見人員甚少。今則逐日皆有引見。有此數者之不同。則每日早間聖躬亦煩勞矣。臣之愚見。擬請待引見以後。皇上萬幾已畢。御前大臣侍衛等皆已散直。日永神暇。然後講官進講。則有義理之悅。而無他務之擾。庶幾如聖祖讀書記中所謂「神理淵穆。怡然忘倦」云。

一、所講之書。謹按康熙年間所講之書。先四書。次尙書。次周易。次詩經。次通鑑。講通鑑之時。仍兼講四書。而順治年間。亦曾繙譯通鑑及大學衍義二書呈進。今臣聞聖學高深。諸經通鑑。講貫已熟。竊謂爲君之道。莫備於真德秀衍義。邱濬衍義補二書。真氏於用人之道。邱氏於理財治民之道。尤言之深切著明。頃給事中呂賢基曾以爲請。臣擬請講此二書。於今日時政。實有裨益。

一、陳講之道。謹按講官陳說。貴忠誠切直。尤貴明於本朝掌故。康熙十六年。諭講官宜進直言。毋有隱諱。二十一年。諭講官須有勸戒箴規之意。乃稱啓沃。又聖祖御製講官箴曰。「體之行。朕躬是力。載獻載替。爾職宜飭。」又曰。「誼貴勵翼。先正其心。爾苟勿欺。吐辭足欽。」釋此八句。則知切直者。未有不由於忠誠也。至於本朝掌故。則大經大法。實有超越前古者。若能於每日進講之時。將列聖至德善政。稱述一二條。不惟君臣之精神互相警發。而爲講官者。必熟於國家之典章。則凡會典及列朝聖訓。皆嘗時時研究。此中之磨厲人才。已不少矣。

一、覆講之法。謹按康熙十四年。諭。「日講原期有益身心。今祇講官進講。朕不覆講。日久將成故事。不惟於學問之道無益。亦非所以爲法於後世也。嗣後進講時。講官講畢。朕乃覆講。如此庶幾有裨實學。欽此。」臣思覆講之法。不過疑者講之。諛者辨之。非必逐句討論也。今講官講畢。應請皇上於疑難之處。俯加詰問。講官錯謬之處。仰承指示。若無疑可問。無誤可指。卽不妨默識深領。方爲可久之道。

一、纂成講書。謹按康熙年間講官撰成講章。分寫正副本。先期將正本進呈。其撰法先列經文。次列諸儒之說。次列講官推演之義。既講之後。又將講章編輯成書。今所傳四書解義。書經易經各解義是也。此次所講衍義及衍義補。真氏邱氏之書。本係臣下進講體裁。不必更撰講章。亦不必先期呈進矣。祇須於本日遞一摺片云。「臣某人今日進講第幾卷第幾頁。某句起某句訖。謹奏。」已爲簡當。至已講之後。仍須編輯成書。將來刊刻流傳。以昭聖學之盛。其編輯之法。先鈔真氏邱氏全文。次列講官敷陳之說。以能徵引會典者爲上。於既講後三日呈遞。俟發下之後。彙繕成帙。彙成三卷。進呈一次。抑臣又有請者。聖祖御製文集。中有講筵緒論二卷。凡八十五條。皇上聰明天縱。講筵觸發。間有緒論。敬祈發下。交講官編入。使臣等欽誦之餘。益加警惕。則興起多矣。

一、講官體制。謹按康熙年間。講官恩遇最爲隆渥。或賜詩篇。或賜邸第。或賞貂皮。或交部議敘。錫賚便蕃。非常之典。非臣下所敢議及也。至於體制所在。雖屬虛文。亦宜稍示優異。一得講官。雖編檢科道。皆得專摺謝恩。其兩帽坐墊。請照現在起居注官之例。朝賀班次。請照南書房翰林之例。至於春秋經筵侍班。宜在六部堂官之次。並隨至文淵閣賜茶。其科道充講官者。卽不派街道巡城差使。間有扈從之時。講官所用帳房。及一切應用物件。仍遵康熙十二年諭定章程。酌定數目。由內務府給與。

一、進講年數。謹按康熙進講。自九年至二十五年。凡十有七載。中間如三藩用兵。九省騷動。捐例常開。倉庫空虛。實有倍甚於今日者。而未嘗停講。蓋聖祖實由於此中深求政要。兼厲人才。非以此爲文章之娛也。湯斌之放江蘇巡撫。聖祖諭曰。「以爾久侍講筵。老成端謹。故特簡爾。」熊賜履之既沒。聖祖諭吏部曰。「賜履風學老成。爲講官多年。未嘗不以內聖外王之道。正心修身之體。直言講論。」當時偉人輩出。大抵多識拔於講筵之中。蓋侍學既久。故知之真也。皇上復舉舊章。伏願行之久遠。不可遽求速效。雖有偏災小警。不可停罷。漸濡漸久。風氣日振。臣前摺所謂十年以後。人才當有起色也。若舉行數載。或卽停止。雖於聖學無損。而固不能收百年樹人之效。區區之忱。尤在於此。伏乞聖鑒。

以上十四條。竭臣愚忠。羸定大概規模。其有不典不詳。求皇上飭交各衙門覈覆施行。謹奏。

議汰兵疏 咸豐元年二月初九日

奏爲簡練軍實以裕國用事。臣竊維天下之大患。蓋有二端。一曰國用不足。一曰兵伍不精。兵伍之情狀。各省不一。漳泉悍卒。以千百械鬪爲常。黔蜀冗兵。以勾結盜賊爲業。其他吸食鴉片。聚開賭場。各省皆然。大抵無事則游手恣睢。有事則雇無賴之人代充。見賊則望風奔潰。賊去則殺民以邀功。章奏屢陳。諭旨屢飭。不能稍變錮習。至於財用之不足。內外臣工。人人憂慮。自庚子以至甲辰。五年之間。一耗於夷務。再耗於庫案。三耗於河決。固已不勝其浩繁矣。乙巳以後。秦豫兩年之旱。東南六省之水。計每歲歉收。恆在千萬以外。又發帑數百萬。以賑救之。天下財產。安得不絀。宣宗成皇帝。每與臣下言及開捐一事。未嘗不咨嗟太息。憾宦途之濫雜。悔取財之非計也。臣嘗卽國家歲入之數。與歲出之數。而通籌之。一歲本可餘二三百萬。然水旱偏災。堯湯不免。以去年之豐稔。而江浙以大風而災。廣西以兵事而緩。計額內之歉收。已不下百餘萬。設更有額外之浮出。其將何以待之。今雖捐例暫停。而不別籌一久遠之策。恐將來仍不免於開捐。以天下之大。而無三年之蓄。汲汲乎惟朝夕之圖。而貽君父之憂。此亦爲臣子者所深恥也。當此之時。欲於歲入常額之外。別求生財之道。則搜括一分。民受一分之害。誠不可以妄議矣。至於歲出之數。兵餉爲一大宗。臣嘗考本朝綠營之兵制。竊見乾隆四十七年。增兵之案。實爲兵餉羸絀。一大轉關。請卽爲我皇上陳之。自康熙以來。武官卽有空名坐糧。雍正八年。因定爲例。提督空名糧八十分。總兵六十分。副將而下。以次而減。下至千總五分。把總四分。各有名糧。又修製軍械。有所謂「公費銀」者。紅白各事。有所謂「賞卹銀」者。亦皆取給於名糧。故自雍正至乾隆四十五年。以前綠營兵數。雖名爲六十四萬。而其實缺額常六七萬。至四十六年。增兵之議起。武職坐糧。另行添設。養廉公費。賞卹另行開銷。正項。向之所謂空名者。悉令挑補實額。一舉而添兵六萬有奇。於是費銀每年二百餘萬。此臣所謂餉項羸絀。一大轉關者也。是時海內殷實。兵革不作。普免天下錢糧。已經四次。而戶部尙餘銀七千八百萬。高宗規模闊遠。不惜散財。以增兵力。其時大學士阿桂卽上疏陳論。以爲國家經費驟加。不覺其多。歲支則難爲繼。此項新添兵餉。歲近三百萬。統計二十餘年。卽須用七千萬。請毋庸概增。旋以廷臣議駁。卒從增設。至嘉慶十九年。仁宗親帑藏之大絀。思阿桂之遠慮。慨增兵之仍無實效。特詔裁汰。於是各省次第裁兵一萬四千有奇。宣宗卽位。又詔抽裁冗兵。於是裁二千

有奇。乾隆之增兵。一舉而加六萬五千。嘉慶道光之減兵。兩次僅一萬六千。國家經費耗之如彼。其多且易也。節之如此。其少且難也。臣今冒昧之見。欲請汰兵五萬。仍復乾隆四十六年以前之舊。驟而裁之。或恐生變。惟缺出而不募補。則可徐徐行之。而萬無一失。醫者之治瘡癰。甚者必剜其腐肉。而生其新肉。今日之劣弁羸兵。蓋亦當量爲簡汰。以剜其腐者。痛加訓練。以生其新者。不循此二道。則武備之弛。殆不知所底止。自古開國之初。恆兵少而國強。其後兵愈多。則力愈弱。餉愈多。則國愈貧。北宋中葉。兵常百二十五萬。南渡以後。養兵百六十萬。而軍益不競。明代養兵至百三十萬。末年又加練兵十八萬。而孱弱日甚。我朝神武開國。本不藉綠營之力。康熙以後。綠營屢立戰功。然如三藩準部之大勦。回疆金川之殊烈。皆在四十六年以前。至四十七年增兵以後。如川楚之師。陝夷之役。兵力反遠遜於前。則兵貴精而不貴多。尤爲明效大驗也。八旗勁旅。互古無敵。然其額數。常不過二十五萬。以強半弼衛京師。以少半駐防天下。而山海要隘。往往布滿。國初至今。未嘗增加。今即汰綠營五萬。尙存漢兵五十餘萬。視八旗且將兩倍。權衡乎本末。較量乎古今。誠不知其不可也。近者廣西軍興。紛紛徵調外兵。該省額兵二萬三千。土兵一萬四千。聞竟無一人足用者。粵省如此。他省可知。言念及此。可勝長慮。臣聞各省之兵。稍有名者。如湖南之鎮筸。江南之壽春。浙江之處州。天下不過數鎮。裁汰之法。或精強之鎮不動。而多裁劣營。或邊要之區不動。而多裁腹地。或營制太破。歸而併之。或汛防太散。撤而聚之。是在兵部之精審。督撫之體察。未可鹵莽以從事耳。誠使行臣之說。缺出不補。不過六年。五萬可以裁畢。以一馬二步計之。每年可省餉銀一百二十萬。十年以外。於經費大有裨益。此項銀兩。不輕動用。督撫歲終奏解戶部。另行封存。專備救荒之款。永塞開捐之路。養兵爲民也。備荒亦爲民也。塞捐以清仕途。尤愛民之大者也。一分一毫。天子無所私利於其間。豈非三代公心。賢於後世搜括之術萬萬者哉。若夫訓練之道。則全視乎皇上精神之所屬。臣考本朝以來大閱之典。舉行凡二十餘次。或於南苑。或於西廠。或於蘆溝橋。玉泉山。天弧觀。御外藩從觀。軍容一肅。藩部破膽。自嘉慶十七年。至今不舉大閱者四十年矣。凡兵以勞而強。以逸而弱。承平日久。京營之兵。既不經戰陣之事。又不見蒐狩之典。筋力日懈。勢所必然。伏求皇上於三年之後。行大閱之禮。明降諭旨。早示定期。練習三年。京營必大有起色。外省營伍。勢難遽徧求。皇上先注意數處。物色將才。分布天下要害之地。但使七十一鎮之中。有十餘鎮可爲腹心。五十餘

萬之中。有十餘萬可爲長城。則緩急之計。隱然可恃。天子之精神一振。山澤之猛士雲興。在我皇上。加慈而已。昔宋巨龐籍。沈慶歷兵八萬人。遂以大蘇邊儲。明臣戚繼光。練金華兵三千人。遂以蕩平倭寇。臣書生愚見。以爲今日論兵。正宜法此二事。謹抄錄乾隆增兵。嘉慶道光減兵三案進呈。伏乞勅下九卿科道詳議。斯道甚大。臣鮮闕歷。不勝悚惶待命之至。謹奏。

議覆李綱從祀文廟疏 咸豐元年二月十四日

爲遵旨議奏事。內閣鈔出福建巡撫徐繼畲等奏請宋臣李綱從祀文廟一摺。奉硃批禮部議奏。欽此。查原奏內稱云云等語。臣等查歷代從祀諸儒。皆以德行純懿。有功經學者爲要。至我朝康熙年間。以宋臣范仲淹從祀。始於道德學問之外。兼取經濟非常之才。蓋聖門政事之科。原與德行文學並重。厥後雍正年間。以漢臣諸葛亮從祀。道光年間。以唐臣陸贄宋臣文天祥從祀。此四人者。皆經綸彌天壤。忠義貫日月。列於從祀鉅典。誠聖朝教忠之至意也。茲查李綱仕宋。歷官尙書左僕射。忠言讜論。定傾扶危。倉卒而守圍城。刺血以草奏疏。力排和議。躬佐中興。宋史稱其負天下之望。以一身之用舍。爲社稷生民安危。朱子稱其知有君父而不知有身。知天下之安危而不知身之禍難。屢瀕九死。而愛君憂國之志。終有不可奪者。可謂一世之偉人。史筆昭垂。洵爲千古定論。至其生平著述。爲該撫原奏所稱者。有易傳內外篇。論語詳說二種。原奏所未稱者。有中興至言。建炎類編。及乘閑志。預備志各種。今皆不傳。僅存其序於集中。其爲文淵閣所著錄者。惟梁谿集八十卷。及建炎時政記二種而已。臣等細觀其文集奏議。於政治得失。言之深切著明。純忠亮節。皎然不磨。核其品學經濟。實與諸葛亮陸贄范仲淹文天祥相等。自當一體從祀。以獎忠義。應如該撫等所請。准其從祀文廟西廡。在先儒尹焯之次。所有臣等核議緣由。是否有當。伏祈皇上訓示遵行。謹奏。

敬陳聖德三端預防流弊疏 咸豐元年四月二十六日

奏爲敬陳聖德。仰贊高深事。臣聞美德所在。常有一近似者。爲之濬。辨之不早。則流弊不可勝防。故孔門之告六言。必嚴去其大弊。臣竊觀皇上生安之美德。約有三端。而三者之近似。亦各有其流弊。不可不預防其漸。請爲我皇上陳之。臣每於祭祀侍儀之頃。仰瞻皇上。對越肅雍。跼步必謹。而尋常蒞事。亦推求精到。此敬慎之美德也。而

辨之不早。其流弊爲瑣碎。是不可不預防。人臣事君。禮儀固貴周詳。然苟非朝祭大典。難保一無疏失。自去歲以來。步趨失檢。廣林以小節被參。道旁叩頭。福濟麟魁以小節被參。內廷接駕。明訓以微儀獲咎。都統暫署。惠豐以微儀獲咎。在皇上僅予譴罰。初無苛責之意。特恐臣下誤會風旨。或謹於小而反忽於大。且有謹其所不必謹者。行禮有儀注。古今通用之字也。近來避皇上之嫌名。乃改爲行禮禮節。朔望常服。既經臣部奏定矣。而去冬忽改爲貂褂。御門常服掛珠。既經臣部奏定矣。而初次忽改爲補褂。以此等爲尋常。皆於小者謹其所不必謹。則於國家之大計。必有疏漏而不暇深求者矣。夫所謂國家之大計。果安在哉。即如廣西一事。其大者在位置人才。其次在審度地利。又其次在慎重軍需。今發往廣西人員。不爲不多。而位置之際。未盡妥善。姚瑩年近七十。曾立勳名。宜稍加以威望。令其參贊幕府。若泛泛差遣委用。則不能收其全力。嚴正基辦理糧臺。而位卑則難資彈壓。權分則易致牽掣。夫知之而不用。與不知同。用之而不盡。與不用同。諸將既多。亦既分爲三路。各有專責。中路專辦武宣大股。西路分辦泗鎮南太。東路分辦七府一州。至於地利之說。則欽差大臣。宜駐劄橫州。乃可以策應三路。糧臺宜專設梧州。銀米由湖南往者。暫屯桂林。以次而輸於梧州。由廣東往者。暫屯肇慶。以次而輸於梧州。則四方便於支應。而寇盜不能劫掠。今軍輿一載。外間既未呈進地圖。規畫全勢。而內府有康熙輿圖。乾隆輿圖。亦未聞樞臣請出與皇上熟視審計。至於軍需之說。則捐輸之局。萬不可開於兩粵。捐生皆從軍之人。捐資皆借湊之項。展轉挪移。仍於糧臺乎取之。此三者皆就廣西而言。今日之大計也。即使廣西無事。而凡爲臣子者。亦皆宜留心人材。亦皆宜講求地利。亦皆宜籌畫國計。圖其遠大。即不妨略其細微。漢之陳平。高祖不問以決獄。唐之房杜。太宗惟責以求賢。誠使我皇上豁達遠觀。同苛細節。則爲大臣者。不敢以小廉曲謹自恃。不敢以尋行數墨自取竭蹶。必且穆然深思。求所以宏濟於艱難者。臣所謂防瑣碎之風。其道如此。又聞皇上萬幾之暇。頗情典籍。游藝之末。亦法前賢。此好古之美德也。而辨之不細。其流弊徒尙文飾。亦不可不預防。自去歲求言以來。豈無一二嘉謨。至計究其歸宿。大抵皆以「無庸議」三字了之。間有特被獎許者。手詔以褒優仁。未幾而疏之萬里之外。優旨以答蘇廷魁。未幾而斥爲亂道之流。是鮮察言之實意。徒飾納諫之虛文。自道光中葉以來。朝土風氣。專尙浮華。小楷則工益求工。試律則巧益求巧。翰詹最優之途。莫如兩書房行走。而保薦之時。但求工於小楷者。閣部最優之途。莫

如軍機處行走。而保送之時。但取工於小楷者。衡文取士大典也。而考差者亦但論小楷。試律而不復計文義之淺深。故臣常謂欲人才振興。必使士大夫考古來之成敗。討國朝之學故。而力杜小楷試律工巧之風。乃可以崇實而黜浮。去歲奏開日講。意以人臣陳說古今。於黼座之前。必不敢不研求實學。蓋爲此也。今皇上於軍務倥傯之際。仍舉斯典。正與康熙年三藩時相同。然非從容召見。令其反覆辨說。恐亦徒飾虛文。而無以考核人才目前之時務。雖不可妄議。本朝之成憲。獨不可稱述乎。皇上於外官來京。屢次召見。詳加考核。今日之翰詹。卽異日之督撫司道也。甫脫乎小楷試律之間。卽與以兵刑錢穀之任。又豈可但觀其舉止便捷。語言圓妙。而不深究其真學真識乎。前者臣工奏請刊布御製詩文集。業蒙允許。臣考高宗文集刊布之年。聖壽已二十有六。列聖文集刊布之年。皆在三十四以後。皇上春秋鼎盛。若稍遲數年。再行刊刻。亦足以昭聖度之謙沖。且明示天下以敦崇實政。不尙虛文之意。風聲所被。必有樸學興起。爲國家任棟梁之重。臣所謂杜文飾之風。其道如此。臣又聞皇上娛神淡遠。恭己自怡。曠然若有天下而不與焉者。此廣大之美德也。然辨之不精。亦恐厭薄恆俗。而長驕矜之氣。尤不可以不防。去歲求言之詔。本以用人與行政并舉。乃近來兩次諭旨。皆曰「黜陟大權。朕自持之」。在皇上之意。以爲中無纖毫之私。則一章一服。皆若奉天以命德。初非自執已見。豈容臣下更參末議。而不知天視自民視。天聽自民聽。國家設立科道。正民視民聽之所寄也。皇上偶舉一人。軍機大臣以爲當。左右皆曰賢。未可也。臣等九卿以爲當。諸大夫皆曰賢。未可也。必科道百僚以爲當。然後爲國人皆曰賢。黜陟者。天子一人持之。是非者。天子與普天下人共之。宸衷無纖毫之私。可以謂之公。未可謂之明也。必國人皆曰賢。乃合天下之明以爲明矣。古今人情。不甚相遠。大率趨直者少。緘默者多。皇上再三誘之使言。尙且顧忌。濡忍不敢輕發。苟見皇上一言拒之。誰復肯干犯天威。如禮恩之貪贖。曹履泰之奸鄙。前聞物論紛紛。久之竟寂無彈章。安知非畏雷霆之威。而莫敢先發以取罪哉。自古之重直臣。非特使彼成名而已。蓋將借其藥石以折人主驕侈之萌。培其風骨。養其威稜。以備有事折衝之用。所謂「疾風知勁草」也。若不取此等。則必專取一種諧媚諛熟之人。料其斷不敢出一言以逆耳而拂心。而稍有鋒銳者。必盡挫其勁節。而銷鑠其剛氣。一旦有事。則滿廷皆疲荏沓泄。相與袖手。一籌莫展而後已。今日皇上之所以使賽尙阿視師者。豈不知千金之弩。輕於一發哉。蓋亦見在廷他無可恃之人也。夫

平日不儲剛正之士。以培其風骨而養其威稜。臨事安所得人才而用之哉。目今軍務警報。運籌於一人。取決於俄頃。皇上獨任其勞。而臣等莫分其憂。使廣西而不遽平。固中外所同慮也。然使廣西遽平。而皇上意中或遂謂天下無難辦之事。眼前無助我之人。此則一念驕矜之萌。尤微臣區區所大懼也。昔禹戒舜曰。無若丹朱傲。周公戒成王曰。無若殷王受之迷亂。舜與成王。何至如此。誠恐一念自矜。則直言日覺其可憎。佞諛日覺其可親。流弊將靡所底止。臣之過慮。實類乎此。此三者。辨之於早。祇在幾微之間。若待其弊既成。而後挽之。則難爲力矣。臣懇玷卿陪。幸逢聖明在上。何忍不竭愚忱。以仰裨萬一。雖言之無當。然不敢激切以沽直聲。亦不敢唯阿以取容悅。伏惟聖慈垂鑒。謹奏。

謝署刑部左侍郎恩疏 咸豐元年五月二十七日

奏爲恭謝天恩事。本月二十六日內閣奉上諭。刑部左侍郎王植未到任以前。著會國藩兼署。欽此。竊臣材本疏庸。識尤殘陋。無朱雲之廉正。徒學其狂。乏汲黯之忠誠。但師其戇。荷鴻慈之曲被。極聖量之優容。清夜默思。果有何德堪對君父。寸心自矢。要當竭愚以答生成。感激正深。悚惶無已。乃復仰荷恩綸。俾攝今職。實天良之難昧。聞寵命而若驚。惟有進思退思。無荒無怠。雖駑駘十駕。斷難收追風逐日之功。而鼇戴三山。豈不知厚地高天之德。所有微臣感激下忱。謹繪摺恭謝天恩。伏乞皇上聖鑒。謹奏。

備陳民間疾苦疏 咸豐元年十一月十八日

奏爲備陳民間疾苦。仰副聖主愛民之懷事。臣竊惟國貧不足患。惟民心渙散。則爲患甚大。自古莫富於隋文之季。而忽致亂亡。民心去也。莫貧於漢昭之初。而漸致久安。能撫民也。我朝康熙元年。至十六年。中間惟一年無河患。其餘歲歲河決。而新莊高堰各案。爲患極鉅。其時又有三藩之變。騷動九省。用兵七載。天下財賦。去其大半。府藏之空虛。殆有甚於今日。卒能金甌無缺。寰宇清謐。蓋聖祖愛民如傷。民心固結而不可解也。我皇上愛民之誠。足以遠紹前徽。特外間守令。或玩視民瘼。致聖主之德意不能達於民。而民間之疾苦不能訴於上。臣敢一一縷陳之。一曰。銀價太昂。錢糧難納也。蘇松常鎮太錢糧之重。甲於天下。每田一畝。產米自一石五六斗至二石不等。除去佃戶平分之數。與抗欠之數。計業主所收。率算不過八斗。而額征之糧。已在二斗內外。兌之以漕斛。加之以

幫費。又須去米二斗。計每畝所收之八斗。正供已輸其六。業主只獲其二耳。然使所輸之六斗。皆以米相交納。則小民猶爲取之甚便。無如收本色者少。收折色者多。即使漕糧。或收本色。而幫費必須折銀。地丁必須納銀。小民力田之所得者米也。持米以售錢。則米價苦賤。而民怨。持錢以易銀。則銀價苦昂。而民怨。東南產米之區。大率石米賣錢三千。自古迄今。不甚懸遠。昔日兩銀換錢一千。則石米得銀三兩。今日兩銀換錢二千。則石米僅得銀一兩五錢。昔日賣米三斗。輸一畝之課而有餘。今日賣米六斗。輸一畝之課而不足。朝廷自守歲取之常。而小民暗加一倍之賦。此外如房基如墳地。均須另納稅課。准以銀價。皆倍昔年。無力監追者不可勝計。州縣竭全力以催科。猶恐不給。往往委員佐之。吏役四出。晝夜追比。鞭扑滿堂。血肉狼藉。豈皆酷吏之爲哉。不如是則考成不及七分。有參劾之懼。賠累動以巨萬。有子孫之憂。故自道光十五年以前。江蘇尙辦全漕。自十六年至今。歲歲報歉。年年蠲緩。豈昔皆良而今皆刁。蓋銀價太昂。不獨官民交困。國家亦受其害也。浙江正賦。與江蘇大略相似。而民愈抗延。官愈窮窘。於是更有截串之法。截串者。上忙而預徵下忙之稅。今年而預徵明年之串。小民不應。則稍減其價。招之使來。預截太多。缺分太虧。後任無可復征。雖循吏亦無自全之法。則貪吏愈得藉口。魚肉百姓。巧誅橫索。悍然不顧。江西湖廣課額稍輕。然自銀價昂貴以來。民之完納愈苦。官之追呼亦愈酷。或本家不能完。則鎖拏同族之殷實者而賣之代納。甚者或鎖其親戚。押其鄰里。百姓怨憤。則抗拒而激成巨案。如湖廣之耒陽崇陽。江西之貴溪撫州。此四案者。雖閭閻不無刁悍之風。亦由銀價之倍增。官吏之淫收。差役之濫刑。真有日不聊生之勢。臣所謂民間之疾苦。此其一也。二曰盜賊太衆。良民難安也。廬鳳潁亳一帶。自古爲羣盜之藪。北連豐沛蕭碭。西接南汝光固。此皆天下腹地。一有嘯聚。患且不測。近聞盜風益熾。白日劫淫。捉人勒贖。民不得已而控官。官將往捕。先期出示。比至其地。牌保輒詭言盜遁。官吏則焚燒附近之民房。示威而後去。差役則訛索事主之財物。滿載而後歸。而盜實未遁也。或詭言盜死。斃他囚以抵此案。而盜實未死也。案不能雪。賊不能起。而事主之家已破矣。吞聲飲泣。無力再控。即使再控。幸得發兵會捕。而兵役平日皆與盜通。臨時賣放。泯然無迹。或反借盜名。以恐嚇村愚。要索重賄。否則指爲竊賊。火其居而械繫之。又或責成族鄰。勒令縛盜來獻。直至縛解到縣。又復索收押之費。索轉解之費。故凡盜賊所在。不獨事主焦頭爛額。卽最疏之戚。最遠之鄰。大者蕩產。小者株繫。比比然也。往者嘉

慶川陝之變。盜魁劉之協者。業就擒矣。太和縣役賣而縱之。遂成大亂。今日之劣兵蠹役。蒙盜縱盜。所在皆是。每
一念及。可爲寒心。臣在刑部見疏防盜犯之稿。日或數十件。而行旅來京。言被劫不報。報而不准者。尤不可勝計。
南中會匪。名目繁多。或十家之中。三家從賊。良民逼處其中。心知其非。亦姑且輸金錢備酒食。以供盜賊之求。而
買日夕之安。臣嘗細詢州縣。所以諱盜之故。彼亦有難焉者。蓋初往。有拒捕之患。解犯。有奪搶之患。層
層勒贖。道路數百里。有繁重之患。處處需索。解費數百金。有賠累之患。或報盜而不獲。則按限而參之。或上司好
粉飾。則目爲多事而斥之。不如因循諱飾。反得晏然無事。以是愈釀愈多。盜賊橫行。而良民更無安枕之日。臣所
謂民間之疾苦。此又其一也。三曰。冤獄太多。民氣難伸也。臣自署理刑部以來。見京控上控之件。奏結者數十案。
咨結者數百案。惟河南知府黃慶安一案。密雲防禦阿祥一案。皆審係原告得實。水落石出。此外各件。大率皆坐
原告以虛誣之罪。而被告者反得脫然無事。其科原告之罪。援引例文。約有數條。或曰申訴不實。杖一百。或曰騷
越進京告重事不實。發邊遠軍。或曰假以建言爲由。挾制官府。發附近軍。或曰挾嫌誣告本管官。發煙障軍。又不
敢竟從重辦也。則曰懷疑誤控。或曰訴出有因。於是收贖之法。有減等之方。使原告不曲不直。難進難退。庶可
免於翻控。而被告則巧爲解脫。斷不加罪。夫以部民而告官長。誠不可長其刁風矣。若夫告奸吏舞弊。告蠹役詐
贓。而謂案案皆誣。其誰信之乎。即平民相告。而謂原告皆曲。被告皆直。又誰信之乎。聖明在上。必難逃洞鑒矣。臣
考定例所載。民人京控。有提取該省案卷來京核對質訊者。有交督撫審辦者。有欽派大臣前往者。近來概交督
撫審辦。督撫發委首府。從無親提之事。首府爲同寅彌縫。不問事之輕重。一概磨折恫喝。必使原告認誣而後已。
風氣所趨。各省皆然。一家久訟。十家破產。一人沈寃。百人含痛。往往有纖小之案。累年不結。顛倒黑白。老死囹圄。
令人聞之。髮指者。臣所謂民間之疾苦。此又其一也。此三者皆目前之急務。其盜賊太衆。冤獄太多。二條求皇上
申諭外省。嚴飭督撫。務思所以更張之。其銀價太昂。一條。必須變通平價之法。臣謹據管見。另擬銀錢並用章程
一摺。續行入奏。國以民爲本。百姓之顛連困苦。苟有纖毫不得上達。皆臣等之咎也。區區微誠。伏乞聖鑒。謹奏。

平銀價疏 咸豐元年十一月十九日

奏爲貴錢賤銀。以平銀價。而甦民困事。臣於本月陳奏民間疾苦一疏。聲明銀價太昂。另摺具奏。思所以變通之。

竊惟十年以來。中外臣工。奏疏言錢法者。前後不下十餘人。皆思貴錢賤銀。以挽積重之勢。而臣所深服者。惟二十四年吳文鏞一疏。二十五年劉良駒一疏。二十六年朱燾一疏。此三疏者。皆奉旨交軍機大臣會同戶部議奏。戶部又交各省議覆。旋以外間覆奏議論不一。此事停閣不行。臣反覆思維。民生切害之痛。國計日絀之由。實無大於此者。謹就三臣原奏所及。參以管見。擬爲銀錢並用章程數條。伏候聖鑒。

一部定時價。每年一換也。凡民間銀錢之貴賤。時價之漲落。早晚不同。遠近亦異。若官收官放而不定一確鑿之價。則民間無所適從。胥吏因而舞弊。查吳文鏞原奏內稱。照各省時價。由藩司酌定。於開徵前十日。預示各屬。朱燾所奏與吳文鏞大略相同。惟稱多不過一千七百。少不過一千二百。稍示限制而已。劉良駒所奏。則以爲由部酌中定價。若捐輸案內。以制錢一千五百文。抵銀一兩之例。厥後戶部議覆奏。定每兩折錢一千五百文。核准在案。臣愚以爲時價可換二千。若驟改爲一千五百。以放兵餉。則譁然矣。應請部額定酌。每年一換。如現在時價一千九百文有奇。部改爲一千八百。則耳目不至乎大駭。而官民皆得以相安。明年時價稍平。則部價亦從而稍減。令各省每年奏報銀價。九月奏到戶部。酌定明年之價。於十月奏聞。求皇上明降諭旨。明年每銀一兩。抵制錢若干文。收之民者。不許加分毫。放之兵者。不許加分毫。窮鄉僻壤。賸黃徧諭。凡一悉糧串。田單契尾。鹽照。捐照等件。概將本年銀價刻入。海內皆知。婦孺共曉。堅如金石。信如四時。庶民不致生怨。胥吏不能舞弊也。其與官項全無交涉。市肆漲落與部價不符。仍置不問。至現在八旗搭放兵餉。每兩抵錢一千文。外省搭放兵餉。每兩抵錢千數百文不等。不足以昭畫一。應俟新章定後。概從每年所定部價。以免參差。

一京外兵餉。皆宜放錢也。查劉良駒原奏兵餉分成放錢。吳文鏞則言外省之兵。概放錢文。朱燾一摺。於兵餉尤爲詳細。其說以爲京營分建東西兩庫。東四旗兵赴東庫領錢。西四旗兵赴西庫領錢。外省之錢。則分道庫府庫存貯。省標城守之兵。由藩司支放。外標外營之兵。由藩司發帖。持向各道府廳州支領。臣愚以爲朱燾之說。實屬可行。凡兵丁領銀之後。皆須換錢而後適用。應請嗣後八旗兵餉。皆各平分一半。仍放銀兩一半。搭放錢文。其外省綠營。一概放錢。各州縣所收錢文。有道員處解存道庫。無道員處解存府庫。無知府處解存直隸州廳庫。由藩司發帖持向各處支領。庶錢無解省累重之煩。而兵丁無減平剋扣之苦。至駐防各兵。仍舊放銀。

以免紛更。

一、部庫入項。亦可收錢也。查戶部所收各項。惟井田科之旗租捐。納房之常捐。係京庫坐收之款。此外皆由各省解運來京。劉良駒原奏內稱。常捐銀兩。儘可收錢。朱燾奏內稱。長蘆銀價可解錢以充京餉。臣愚以爲不特此也。旗租銀兩。本係近京小民佃種。其所納皆係錢文。官爲易銀。轉費周折。不若卽令解錢入京。常捐大捐之銀。亦可酌收錢文。計此二項。每年可得百餘萬串。至於外省解京之款。如長蘆山東鹽課。儘可解錢進京。直隸山東地丁起運之項。亦可運錢。應令此二省督撫。每年各解錢百萬串入京。又令兩淮鹽運使。每年解錢二百萬串入京。合之京局鼓鑄之錢。共得六百餘萬串。足以資運轉矣。臣雖至愚。豈不知錢質笨重。搬運艱難。然不行天下至難之事。不足挽天下積重之勢。大利所在。未可以小小窒礙。輒畏難而苟安也。且較之滇黔之銅鉛。江廣之滯澀。難易相去懸遠矣。其解錢之官。須照銅員之例。量與津貼之費。務使毫無賠累。官兵稱便。共計幫費不過二三萬金。所失無幾。而所轉移者大矣。

一、地丁正項。分縣收錢也。凡出項莫大於兵餉。入項莫大於地丁。查吳文鎔劉良駒朱燾三臣摺內。皆極言地丁收錢之益。臣愚以爲當分縣辦理。如雲貴川廣閩蜀甘肅此七省者。本省之丁賦不足充本省之兵餉。初無起解之項。其地丁銀兩。應卽全數收錢。以省輻輳。此外各省除去存留及兵餉二項。尙有餘銀解運京庫協濟鄰省者。其地丁銀兩。應令一兩以下小戶。全數收錢。一兩以上大戶。銀錢各半兼收。不必按成指派。不必分析名目。使小民易知易從。其或慮收錢太多。不便起運者。州縣自行換銀解省。以備京款協款之用。

一、外省用項。分別放錢也。查各省廉俸工需役食等項。各日存留坐支之款。前吳文鎔劉良駒朱燾三摺。及戶部議覆一摺。皆言此項可全行放錢。應卽遵照辦理。至兩河經費。劉良駒朱燾及戶部三摺。皆言可搭成用錢。臣聞從前林則徐在汴工。目前陸建瀛在豐工。皆令遠近州縣輦錢到工。以防市價居奇。銀價驟跌之患。東河捐輸案內。曾令以錢報捐。是河工在在需錢。其理易明。應請嗣後南河每年解錢百萬串到工。於兩淮鹽課。江蘇地丁項下。各半分解。東河每年解錢五十萬串到工。於河南山東地丁項下。各半分解。一、量減銅運。以昂錢價也。查朱燾原奏內稱。暫停鼓鑄。一弛一張。庶錢重而價漸平。臣愚以爲鑄不可停。而運

不可不減。側聞雲南銅務洞老山空。民怨官困。滇銅不足。搜買外省。外省不足。偷買寶局。實有萬不能繼之勢。應請於六運中酌量停一二運。使雲南官民稍紓積困。其銅本一項。即可探買錢文。並可於鑄頭匠役。量加優恤。以期鑄造堅好。庶錢質日精。錢價日起。俟十年後。滇廠稍旺。再復六運。各停鑄之省。漸次開卯。務使天下官民皆知錢之可貴。而不知輦運之苦。則相安無事。庶不終受紋銀出洋之苦矣。

以上六條。皆就吳文鏞劉夏駒朱疇三臣奏議。參以鄙意。粗定規模。伏求飭下戶部妥議。鈔錄三臣原奏進呈。備聖明採擇施行。謹奏。

謝署吏部左侍郎恩疏 咸豐二年正月二十五日

奏爲恭謝天恩事。本月二十四日。內閣奉上諭。吏部左侍郎著會國藩兼署。欽此。竊臣材本疏庸。識尤淺陋。秩宗襄事。愧典禮之未嫻。司寇攝官。更刑名之莫晰。迺復仰荷恩綸。兼權吏部。自維愚昧。深懼弗勝。惟當勤慎自持。涓埃勉效。凡事必求其實。常存此冰淵惕厲之懷。片念不敢自欺。冀無負君父生成之德。所有微臣感激下忱。謹繕摺恭謝天恩。伏乞皇上聖鑒。謹奏。

請寬勝保處分疏 咸豐二年四月初五日

奏爲請寬處分。以昭特恩而廣言路事。本月初三日。吏部奏勝保撤回奏章處分一摺。奉旨照部議降三級調用。皇上於其條陳事務。意存諷諫。不加譴責。於其遞事撤回。有違定例。則特加謫罰。二者原並行而不悖也。惟念當此特詔求言之時。又值傳旨詰問之際。兩端雖不相涉。而其情實則相因。在聖意因其違例而示懲。在輿論疑其直言而獲咎。是適足以成勝保之名。而反有累於吾君之德。臣與勝保雖曾相識。而素非親善。此次條奏。臣尙未見邸鈔。第觀諭旨中所指各條。似亦懲直犯顏。無貪位保祿之見。即其所稱市井細民。私議主德者。經此次諭旨。一一剖晰宣示。亦足以息悠悠之口。而使士大夫盡釋前疑。曉然於民間訛言之不足信。是天實堅白。經磨涅而益彰。勝保此奏。正所以顯揚聖德。而靖絕浮言也。即使因他事獲咎。猶望曲賜矜宥。況即此奏而陷於大戾乎。臣昨在吏部見烏蘭泰向榮賽尙阿章職降級處分。皆蒙恩改而從輕。蓋恪遵定例者。部臣守法之常經。特從寬宥者。皇上用人之微權。臣之愚蒙。欲求皇上於勝保亦示以微權。稍寬處分。則凡進言者。皆感戴浩蕩之恩。而激發

忠義之氣。采納愈廣。而時艱可拯矣。是否有當。伏乞聖鑒。謹奏。

謝放江西正考官恩摺 咸豐二年六月十二日

奏爲叩謝天恩事。本月十二日內閣奉上諭。江西正考官著曾國藩去。欽此。竊臣秉質庸愚。未諳學術。會持衡於西蜀。又襄校於南宮。沐蒙養於兩朝。得幸躋乎九列。毫無報稱。時切悚惶。茲復仰荷恩綸。俾持文柄。自維淺陋。深懼弗勝。惟當以勤補拙。藉公生明。采楨榦於大邦。冀擷彭蠡匡廬之秀。竭愚誠於方寸。稍酬高天厚地之恩。所有微臣感激下忱。謹繕摺恭謝天恩。伏乞皇上聖鑒。謹奏。

請假回籍省親片 咸豐二年六月十三日

再臣自道光十九年來京供職。迄今十有四年。未經告假省親。又未能迎養。頃因粵匪竄入湖南。臣家鄰近衡陽。辦理團練。各鄉警懼。臣念切桑梓。烏鳶私情。日夜懸懸。茲幸仰沐天恩。奉使江西。伏查由江西袁州一路至臣家。程途不過八日。謹援上年呂賢基何彤雲之例。仰懇皇上天恩。賞假二十日。俾臣於九月發榜之後。回籍省親。合家沾戴皇恩。實無既極。如蒙俞允。臣卽由長沙取道湖北還京。不勝悚惕待命之至。附片請旨。

敬陳團練查匪大概規模摺 咸豐二年十二月二十二日

奏爲遵旨幫辦團練查匪事務。敬陳現辦大概規模。仰祈聖鑒事。本月十三日。准湖南巡撫咨稱。承准軍機大臣字寄。咸豐二年十一月二十九日奉上諭。前任丁憂侍郎曾國藩籍隸湘鄉。聞其在籍。其於湖南地方人情。自必熟悉。著該撫傳旨令其幫同辦理本省團練鄉民。搜查土匪。諸事務。伊必盡力。不負委任。等因。欽此。又於十五日接巡撫函稱。武昌省城被賊攻陷。聞信之下。不勝憤懣。賊勢猖獗如此。於大局關係匪輕。念我皇上宵旰南顧。不知若何焦灼。臣雖不才。亦宜勉竭愚忠。稍分君父之憂。卽於十七日由家起程。二十一日馳抵省城。與撫臣面商一切。相對感歎。伏惟聖諭團練鄉民一節。誠爲此時急務。然團練之難。不難於操習武藝。而難於捐集費貲。小民倚財爲命。卽苦口勸諭。猶遲疑而不應。若經理非人。更譁然而滋擾。非比嘉慶川楚之役。官給練費。不盡取之民也。臣此次擬訪求各州縣公正紳耆。以書信勸諭。使之董理其事。俾百姓知自衛之樂。而不復以捐費爲苦。庶幾有團練之實效。而無擾累之流弊。至聖諭搜查土匪一節。前月撫臣張亮基曾有一札。嚴飭各州縣查

拳土匪痞棍。令州縣力能捕者自捕之。力不能者專丁送信至撫臣署內。設法勦辦。現在各州縣遵札辦理。屢破巨案。業有成效。臣又以信諭紳耆。令其留心查察。本團之匪徒。斷不能掩本團紳耆之耳目。紳耆密告州縣。州縣密告撫臣。即日派人勦捕。可期無案不破。抑臣又有請者。逆匪既破。武昌凶餒益熾。如湖南安徽江西毗連之省。皆爲其所窺伺。長沙重地。不可不嚴爲防守。臣現來省察看。省城兵力單薄。詢悉湖南各標兵丁。多半調赴大營。本省行伍空虛。勢難再調。附近各省。又無可抽調之處。不足以資守禦。因於省城立一大團。認真操練。就各縣曾經訓練之鄉民。擇其壯健而樸實者。招募來省。練一人受一人之益。練一月有一月之效。自軍興以來。二年有餘。時日不爲不久。糜餉不爲不多。調集大兵不爲不衆。而往往見賊逃潰。未聞有與之鏖戰一場者。往往從後尾追。未聞有與之攔頭一戰者。其所用兵器。皆以大炮高槍遠透轟擊。未聞有短兵相接以槍鉞與之交鋒者。其故何哉。皆由所用之兵。未經練習。無膽無藝。故所向退卻也。今欲攻絃更張。總宜以練兵爲要務。臣擬現在訓練章程。宜參仿前明戚繼光近人傳籛成法。但求其精。不求其多。但求有濟。不求速效。誠能實力操練。於土匪足資勦捕。卽於省城防守。亦不無裨益。臣與撫臣熟商。意見相同。謹將現辦情形。敬陳大槩。伏乞皇上聖鑒訓示。謹奏。硃批。「知道了。悉心辦理。以資防勦。欽此。」

附陳辦團稍有頭緒卽乞守制片 咸豐二年十一月二十二日

再臣在京師十有四年。往年入京供職之時。臣之祖父母及父母皆在堂。今歲歸來。祖父祖母之墓。已有宿草。臣母亦沒。其時長沙尙未解圍。風鶴警報。晝夜驚惶。卽將母棺倉卒權厝。尙思另尋葬地。稍展孝思。臣父已老。久別乍歸。亦思稍盡定省之儀。今回籍未滿四月。遽棄庭闈。出而莅事。不特臣心萬分不忍。卽臣父亦慈愛難離。而以武昌警急。宵旰憂勞之時。又不敢不出而分任其職。再四思維。以墨經而保護桑梓。則可。若遂因此而奪情出仕。或因此而仰邀恩敘。則萬不可。區區愚衷。不得不預陳於聖主之前。一俟賊氛稍息。團防之事。辦有頭緒。卽當專摺陳情。回籍守制。烏鳶之私。伏乞聖上矜全。所有微臣下情。謹附片奏聞。硃批。「另有旨。欽此。」

嚴辦土匪以靖地方摺 咸豐二年十一月十一日

奏爲嚴辦土匪。以靖地方。恭摺奏聞。仰祈聖鑒事。正月初九日。准湖南巡撫咨稱。咸豐二年十二月三十日。奉上

諭。湖南籌辦撥兵募勇各事宜。即著責成張亮基潘鐸會同在籍侍郎會國藩妥爲辦理。欽此。又於二月初一日。准署理湖南巡撫咨稱。咸豐三年正月初三日奉上諭。朕思除莠即以安良。卽有會匪地方。亦莠民少而良民多。封疆大吏。惟當翦除百惡。卽可保衛善良。所有瀏陽攸縣各處匪徒。卽著該署督撫等認真查辦。並著會同在籍侍郎會國藩體察地方情形。應如何設法團練。以資保衛之處。悉心妥籌辦理。等因。欽此。仰見我皇上南顧焦慮。無時或釋。去年臣卽至省城。撫臣張亮基調撥湖南外營兵一千名。招募湘鄉練勇一千名來省防禦。至正月初間。粵匪東竄。武昌業已收復。長沙卽可解嚴。署督臣張亮基署撫臣潘鐸皆與臣商。所有留省之雲南河南各兵。卽行分別撤回。新舊招募之勇。亦卽分別裁汰。共留兵勇三千餘人。已足以資防守。卽聞有土匪竊發。亦足以資勦辦。至於團練一事。臣前摺略陳大槩。曾言捐錢斂費之難。近來博采輿論。體察民情。知鄉國有多費錢文者。亦有不必多費錢文者。併村結寨。築牆建礮。多製器械。廣延教師。招募壯士。常操技藝。此多費錢文。民不樂從者也。不併村落。不立礮堡。居雖星散。聞聲相救。不製旗幟。不募勇士。農夫牧豎。皆爲健卒。緩鋤竹木。皆爲兵器。此不必多費錢文。民所樂從者也。多費錢文者。不免於擾累地方。然以之禦粵匪。則仍不足。不必多費錢文者。雖未能大壯聲勢。然以之防土匪。則已有餘。今粵匪全數東下。各縣鄉團。專以查拏土匪爲主。臣是以剴切曉諭。令其異居同心。互相聯絡。不多費錢。不甚勞力。以冀百姓之鼓舞而聽從。湖南會匪之多。人所共知。去年粵逆入楚。凡入添弟會者。大半附之而去。然尙有餘孽未盡。此外又有所謂串子會。紅黑會。半邊錢會。一股香會。名目繁多。往往成羣結黨。嘯聚山谷。如東南之衡永郴桂。西南之寶慶靖州。萬山叢薄。尤爲匪徒卵育之區。蓋緣近年有司亦深知會匪之不可遏。特不欲其禍自我而發。相與掩飾彌縫。以苟且一日之安。積數十年應辦不辦之案。而任其延宕。積數十年應殺不殺之人。而任其橫行。遂以釀成目今之巨寇。今鄉里無賴之民。羣然而不靖。彼見夫往年命案盜案之首犯。常逍遙於法外。又見夫近年粵匪土匪之肆行。皆猖獗而莫制。遂以爲法律不足憑。官長不足畏也。平居造作謠言。煽惑人心。白日搶劫。毫無忌憚。若非嚴刑峻法。痛加誅戮。必無以折其不逞之志。而銷其逆亂之萌。臣之愚見。欲純用重典。以鋤強暴。但願良民有安生之日。卽臣身得殘忍嚴酷之名。亦不敢辭。但願通省無不破之案。卽勦辦有棘手萬難之處。亦不敢辭。署督臣張亮基署撫臣潘鐸。皆思嚴厲整頓。力挽頹風。時

時相與籌商。誓當盡除湖南大小各會匪。滌瑕去穢。掃蕩廓清。不敢稍留餘孽。以貽君父之憂。其匪徒較多之地。如東南之衡永郴桂。臣嘗往衡州駐紮數月。就近查辦。西南之寶靖各屬。臣嘗往寶慶駐紮數月。就近查辦。所至常帶兵勇數百。文武數員。以資勦捕之用。聯絡本地之鄉團。使之多覓眼線。堵截要隘。以一方之善長。治一方之匪類。可期無業不破。無犯不擒。此臣擬辦會匪之大槩情形也。至於教匪盜匪會匪事同一律。三者之外。又有平日之痞匪。與近時新出之游匪。何謂游匪。逃兵逃勇。奔竄而返。既無資可歸。無管可投。沿途逗留。隨處搶掠。此游匪之一種也。粵寇蹂躪之區。財物罄空。室廬焚燬。弱者則乞丐近地。強者則轉徙他鄉。或乃會聚醜類。隨從劫掠。此游匪之一種也。大兵紮營之所。常有游手數千隨之而行。或假充長夫。或假冒餘丁。混雜於買賣街中。偷竊於支應局內。迨大營既遠。展轉流落。到處滋擾。此游匪之又一種也。臣現在省城辦理街團。於此三種游匪。尤認真查拏。遇有形迹可疑。曾經搶掠劫盟者。即用巡撫令旗。恭請王命。立行正法。臣寓館設審案局。派委委員二人。拏獲匪徒。立予嚴訊。即尋常痞匪。如奸胥蠹役。訟師光棍之類。亦加倍嚴懲。不復拘泥成例。槩以寬厚爲心。當此有事之秋。強弱相吞。大小相侵。不誅鋤其刁悍害民者。則善長終無聊生之日。不敢不威猛救時。以求於地方有益。所有臣遵旨會商撥兵募勇各事宜。及現擬查辦匪徒規模。謹陳大概。伏求皇上訓示。至臣移駐衡寶各郡。容俟長沙辦有頭緒。另行專摺奏請。伏乞聖鑒。謹奏。硃批。知道了。辦理土匪。必須從嚴。務期根株淨盡。欽此。」

會奏特參副將清德摺 咸豐二年六月十一日

奏爲特參庸劣武員。請旨革職。以肅軍政。而儆疲玩事。竊惟軍興以來。官兵之退怯遷延。望風先遁。勝不相讓。敢不相救。種種惡習。久在聖明洞鑒之中。推原其故。總由平日毫無訓練。技藝生疏。心虛膽怯所致。湖南經去年賊匪圍城。堅守八十餘日之久。臣等懲前毖後。今年以來。諄飭各營將弁。認真操練。三入則臣等親往校閱。餘日則將弁自行操閱。惟長沙協副將清德性耽安逸。不遵訓飭。操演之期。該將從不一至。在署偷閒。養習花木。今春由岳州回省。旋至常澧一帶。查辦土匪。所過地方。雖經賊匪蹂躪之區。尙復需索供應。責令所屬備弁。購買花盆。裝載船頭。一切營務武備。茫然不知。形同木偶。現值粵賊窺逼江西。楚省防堵喫緊之際。該將疲玩如此。何以督率士卒。相應請旨。將長沙協副將清德革職。以勵將士。而振軍威。謹會同湖廣總督臣張亮基。恭摺參奏。伏乞皇上

聖鑒訓示謹奏。

竊匪正法并現在幫辦防堵摺 咸豐二年六月十一日

奏爲搜拿匪徒隨時正法并現在幫辦防堵恭摺奏聞仰祈聖鑒事竊臣奉命搜查土匪曾於二月十二日具奏巨寓館設審案局派委委員二人拿獲匪徒訊明定供即用巡撫令旗立行正法奏蒙聖鑒在案維時已派准陞同知前署石門縣知縣劉建德在局審案旋又添派准陞直隸州前任清泉縣知縣厲雲官輪流審訊自上年粵匪竄逼長沙各處搶劫之案層見疊出臣設局以來控告紛紛或簽派兵役緝拿或札飭紳士誦捕或著落戶族勒令限交或即令事主自行擒縛一經到案訊明立予正法計斬決之犯一百四名立斃杖下者二名監斃獄中者三十一名此外札飭各州縣擒拿匪黨實呈供摺批令無庸解省就地正法者不在此數又如安化藍田串子會匪前經札飭湘鄉縣知縣朱孫詒密往掩捕擒獲九十二名其陸續正法者俟結案後另摺會奏亦不在此數雖用刑稍過於嚴峻而地方頗藉以安靜臣受命來省將及半年辦理各案粗有頭緒六月十二日爲臣母喪初周年之期本擬奏明回籍敬修「小祥」之禮稍盡人子之心適聞粵匪分股回竄江西業於十八日逼臨南昌省城湖南與之壤地相接唇齒相依人心驚惶紛紛遷徙臣受恩深重明知賊逼鄰境斷不敢以事權不屬稍存推諉之見又何敢以軍旅未爛陰懷畏葸之心惟有殫竭愚忱晝夜不懈與撫臣襄辦一切或堅守省城或出堵要隘臣俱無所辭避除防堵事宜業經另摺會奏外謹附驛陳明伏乞皇上聖鑒謹奏 硃批「知道了欽此」

保參將塔齊布千總詣殿元摺 咸豐二年六月十一日

奏爲武臣堪膺重任恭摺保奏仰祈聖鑒事竊爲粵寇未滅土匪蠱起軍威不振餉項支絀當此之時求足以稍紓君父之憂者蓋莫先於得人而得一文臣尤莫如得一武將臣到省以來留心察訪大小將弁求其臨陣不怯爲士卒所信服者實難其人惟查有陞用游擊署撫標中軍參將事塔齊布忠勇奮發習勞耐苦深得兵心臣今年在省操練常用該游擊整頓營務臣每於三、八日校閱該游擊則日日常閱大約十日之中不過間斷二三日軍士皆樂爲之用又有准補千總武舉諸殿元精明廉謹膽勇過人管帶辰勇百人操練日久各有兼人之藝塔齊布統領辰勇與該武舉同心協力皆思盡忠報効謹將二人履歷開單進呈伏乞皇上天恩破格超擢當湖南

防堵喫緊之際。獎拔一人。冀以鼓勵衆心。如該二人日後有臨陣退縮之事。即將微臣一併治罪。除因案保敘各員。由撫臣另行會奏外。臣謹具奏密保區區愚忱。伏乞聖鑒。謹奏。

請將副將清德交刑部治罪片

咸豐二年六月十一日

再長沙協副將清德性耽安逸。不理營務。去年九月十八日賊匪開挖地道。轟陷南城。人心驚惶之時。該將自行摘去頂戴。藏匿民房。所帶兵丁。脫去號褂。拋棄滿街。至今傳爲笑柄。今春該將自岳州回省。旋至常澧一帶。查辦土匪。所過地方。雖經賊匪蹂躪之區。尙復苛索供應。責各屬備弁購買花盆。裝載船頭。臣到省半年。每逢三八之期。督率弁兵。齊集校場操閱。該將並未會到過一次。實出情理之外。臣面商撫臣駱秉章。函商督臣張亮基。本擬會參請旨。將該將革職。惟思此等惡劣將弁。僅予革職。不足蔽辜。現在逆匪圍逼南昌。湖南已調兵數百。擬往救援。臣兩次接江忠源書函。囑添募楚勇三千。現已次第募到。擬令陞任知縣朱孫詒及江忠源之弟江忠濬等管帶。於日內起行星馳赴援。湖南本省防堵。亦在十分喫緊之際。惟將士畏葸疲玩。已成錮習。勸之不聽。威之不懈。竟無可以激厲之術。相應請旨。將長沙協副將清德革職。解交刑部從重治罪。庶幾懲一儆百。稍肅軍威。而作士氣。臣痛恨文臣取巧。武臣退縮。致釀今日之大變。是以爲此激切之請。若臣稍懷私見。求皇上嚴密查出。治臣欺罔之罪。謹奏。

移駐衡州摺

咸豐二年八月十三日

奏爲微臣移駐衡州。恭摺具奏。仰祈聖鑒事。竊臣奉命查辦土匪。惟衡永郴桂尤爲匪徒聚集之藪。擬駐紮衡州。就近搜捕。曾於二月十二日。奏明在案。數月之間。四屬匪徒。屢次滋擾。如常寧有白沙堡之案。衡山有草市之案。永興有獅子寨之案。安仁有焚燒衙署之案。桂東有縣城失守戕害把總之案。宜章臨武有廣東匪徒滋擾之案。永明江華有廣西匪徒竄入戕害千總之案。均經次第撲滅。先後具奏。昨七月二十七日。又有廣東土匪竄入興寧縣城。經候補縣丞王鑫管帶鄉勇於二十九日收復。立即撲滅。尙未查明具奏。此外四屬中。聚眾倡亂搶劫拒捕。爲案甚多。未及一一上瀆聖聰。皆由上年粵匪經過衡永郴桂一帶。裹脅最衆。或久授僱職。或飽掠濟歸。以致勞民搆煽。甘心從逆。動輒貼粵匪之僞示。張太平之逆旗。甚至乞兒偷盜。三五成羣。亦敢倡言謀亂。毫無忌憚。若

非痛加誅鋤。隨時整頓。則禍患將無了日。臣前與撫臣熟商。曾調三廳兵數百。駐防永州一帶。札湘鄉勇數百。駐防郴桂一帶。臣擬即日移駐衡州。以便就近調遣。將現練之勇。酌帶前往。逐日操演。一聞土匪蠢動。立時掩捕撲滅。愈速則糜費愈少。即尋常痞匪劫盜。亦仍逐案懲辦。以期根株淨絕。四境安恬。至省城防堵事宜。江西與湖南交界之區。共有四路相通。北爲平江通義寧州之路。南爲茶攸通吉安府屬之路。中間二路。一爲瀏陽通瑞州上高。一爲醴陵通袁州萍鄉。現在瀏醴二路。已派兵勇防守隘口。北路去賊蹤尙遠。惟南路茶攸一帶。與吉安府屬之安福永新緊接。目下土匪竄擾吉安。茶攸去長沙較遠。去衡州甚近。臣到衡時。急宜設法堵禦。以防土匪勾引。乘虛竄入。商之撫臣。意見相合。其省城守備。經撫臣等悉心籌畫。尙屬布置周妥。堪以仰慰宸廑。所有微臣移駐衡州緣由。謹繕摺由驛三百里具奏。伏乞皇上聖鑒。謹奏。

暫緩赴鄂並請籌備戰船摺 咸豐二年十月二十四日

奏爲武昌現已解嚴。微臣暫緩赴鄂。并請籌備戰船合力堵剿。恭摺奏聞。仰祈聖鑒事。十月十七日。准湖南巡撫咨稱。承准軍機大臣字寄。十月初三日奉上諭。前因江西賊匪竄擾湖北。逼近武昌省城。當經諭令駱秉章會同藩派撥兵勇船隻。駛赴下游會剿。諒已遵照籌辦矣。現在台湧所帶官兵。及咨調江西官兵。未知何日趕到。武昌兵單。實恐不敷勦捕。會同藩團練鄉勇。甚爲得力。勦平土匪。業經著有成效。著即酌帶練勇。馳赴湖北。合力圍攻。以助兵力之不足。所需軍餉等項。著駱秉章籌撥供支。兩湖唇齒相依。漢黃一帶。尤爲豫省門戶。該撫等自應不分畛域。一體統籌也。將此由六百里諭令知之。欽此。遵旨。寄信前來。臣正具摺覆奏間。旋於二十日。又准湖南巡撫咨稱。承准軍機大臣字寄。咸豐二年十月初五日奉上諭。昨因武昌兵單。不敷勦辦。諭令會同藩即酌帶練勇。馳赴湖北。并著駱秉章籌撥軍餉。諒該撫等接奉諭旨。即遵照辦理矣。本日據江志源唐樹義馳奏。田家鎮兵潰之後。賊匪連陷黃州漢陽。賊船現又上駛。武昌被圍。現在收集殘兵。先援漢陽等語。武昌省垣。情形萬分危急。江志源尙須先赴漢陽。以圖收復。未能即抵武昌。現已諭令吳文鎔等。悉力堅守。并令台湧即日撥兵前往救援。第兵力仍虞單弱。著會同藩遵照前旨。趕緊督帶兵勇船隻。駛赴下游會剿。以爲武昌策應。所需軍餉等項。著駱秉章即設法供支。以資接濟。毋稍延誤。將此由六百里加緊諭令知之。欽此。遵旨寄信前來。臣前奉派兵

救援湖北之旨。即經函商撫臣派令候補知府張丞寶候選同知王鑫管帶湘勇三千。前赴湖北。尙未起行。又奉兩次諭旨。令臣親帶練勇前往。臣理應遵旨。即日起程。惟連日接准撫臣來函。及各處探報。均稱賊船於十月初五以後陸續開赴下游。近已全數下竄。漢陽府縣業經收復。江面肅清。武昌解嚴等語。據此。則援鄂之師。自可稍緩。因思該匪以舟楫爲巢穴。以擄掠爲生涯。千舸百艘。游奔往來。長江千里。任其橫行。我兵無敢過而問者。前在江西。近在湖北。凡傍水之區。城池莫不殘毀。口岸莫不蹂躪。大小船隻。莫不擄掠。皆由舟師未備。無可如何。兵勇但保省城。亦不暇兼顧水次。該匪大掠而去。總未大受懲創。今若爲專保省會之計。不過數千兵勇。即可堅守無虞。若爲保衛全楚之計。必須多備礮船。乃能堵勦兼施。夏間奉到寄諭。飭令兩湖督撫。籌備舟師。經督署張亮基造船運礮。設法與辦。尙未完備。忽於九月十三日。田家鎮失守。一切戰船礮位。盡爲賊有。水勇潰散。收合爲難。現在兩湖地方。無一舟可爲戰艦。無一卒習於水師。今若帶勇。但赴鄂省。則鄂省已無賊矣。若駛赴下游。則賊以水去。我以陸追。曾不能與之相遇。又何能痛加攻勦哉。再四思維。總以辦船爲第一先務。臣現駐衡州。即在衡城試行趕辦。湖南木料薄脆。船身笨重。本不足以爲戰艦。然就地興工。急何能擇。止可價買民間釣鉤小艦之類。另行改造。添置礮位。教練水勇。如果舟師辦有頭緒。即行奏明。臣親自統帶。駛赴下游。目下武昌無賊。臣赴鄂之行。自可暫緩。未敢因諭旨嚴催。稍事拘泥。不特臣不必遽去。即臣與撫臣商派援鄂之湘勇三千。亦可暫緩起程。行軍三千。月費將近二萬。南省雖勉強應付。鄂省實難於供支。不能不通盤籌畫。臣已咨明撫臣。飭令帶勇之張丞寶王鑫。無庸起行。如使礮船尙未辦齊。逆船仍復來鄂。則由臣商同督撫隨時斟酌。仍專由陸路先行赴援。斷不敢有誤事機。軍情變幻。須臾百出。如有萬分緊急之處。雖不奉君父之命。亦當星馳奔救。如值可以稍緩之時。亦未可輕於一行。虛糜餉項。所有微臣暫緩赴鄂。并籌備戰船緣由。恭摺由粵五百里復奏。伏乞皇上聖鑒訓示。謹奏。硃批。一所慮俱是。汝能斟酌緩急。甚屬可嘉。欽此。一

請截留粵餉籌備礮船片 咸豐二年十月二十四日

再籌備礮船。召募水勇。約需銀十餘萬兩。湖南藩庫。僅存銀三萬餘兩。實屬不敷供支。查有廣東解往江南大營餉銀十餘萬。現留長沙。因鄂省梗阻。未敢前進。臣咨商撫臣。即將此項截留四萬兩。作爲籌備礮船之費。其有不

數。由臣設法勸捐添湊。前七月間。諭旨令兩湖籌辦繳船。奉部撥粵餉二十萬兩。解赴湖北。作爲水師之需。不知此項會否運解到鄂。若尙未解到。將來廣東解鄂之款。即將前次預截之四萬兩劃清扣抵。兩湖辦船。本屬一氣。其用項自可歸併一款。如前項粵餉業已解鄂。應請旨飭下戶部查照。另撥四萬兩。補解大營。竇於公事有裨。謹附片具奏。硃批。戶部查照辦理。欽此。

籌備水陸各勇赴皖會剿俟粵省解繳到楚乃可成行摺 咸豐二年十一月二十六日

奏爲籌備水陸各勇馳赴安徽會剿俟右江道張敬修解繳到楚乃可成行恭摺覆奏仰祈聖鑒事。十一月二十三日。兵部遞到承准軍機大臣字寄。咸豐二年十一月十二日奉。上諭。本日據宋晉奏會國藩鄉望素孚。人皆樂爲效用。請飭挑選練勇。雇覓船隻。順流東下。與江忠源水陸夾擊。速殄賊氛等語。前因湖北緊要。諭令該侍郎督帶楚勇。駛出洞庭湖。迎頭截剿。旋據該侍郎奏稱。武昌現已解嚴。擬暫緩赴鄂。即在衡州趕辦戰艦。添置墩位。教練水師各等情。諒已辦有頭緒。現在安徽逆匪。勢甚披猖。連陷桐城舒城。逼近廬郡。呂賢基已經殉難。江忠源又復患病。暫住六安。不能前進。皖省情形。甚屬危急。總由江面無水師戰船攔截追剿。任令賊艦往來自如。以致逆匪日肆。鳴張。該侍郎前奏亦曾籌慮及此。著即趕辦船隻墩位。並將前募楚勇六千。由該侍郎統帶。自洞庭湖駛入大江。順流東下。直赴安徽江面。與江忠源會合。水陸夾擊。以期收復安慶。及桐舒等城。並可牽制賊匪北竄之路。現在廣東紅單船數十隻。計已由閩入江。又有艇船數十隻。均可備夾擊之用。該侍郎即忠誠素著。兼有膽識。朕所素知。諒必能統籌全局。不負委任也。將此由六百里加緊諭令知之。欽此。一遵旨寄信前來。竊自田家鎮失防以來。督臣吳文鎔撫臣駱秉章與臣往返函商。至十餘次。皆言各省分防。糜餉多而兵力薄。不如數省合防。糜餉少而力較厚。即與張芾江忠源函商。亦言四省合防之道。兼籌以剿爲堵之策。臣前月覆奏一摺。曾言舟師辦有頭緒。即由臣親自統帶。駛赴下游。是未奉此次諭旨之前。微臣之志。已思率師東下。一抒積憤矣。況重以新命委任。天語褒嘉。尤臣子竭誠效命之秋。敢不捐糜頂踵。急圖報稱於萬一。惟墩船一件。實有不宜草率從事者。臣前發摺後。即鳩工購材。試行造辦。造成樣船數隻。皆以工匠太生。規模太小。不足以歷長江之浪。不足以勝巨礮之震。近由撫臣處送到水師守備成名標一員。又由督撫臣處咨到廣東繪來之拖罟快蟹船式兩種。始細加詳

求。照快蟹式。重新製造。現已先造十號。更須添造二三十號。計必中官能載千餘斤。礮兩旁能載數百斤之礮。乃足以壯軍威。而摧逆賊。惟新造之舟。百物未備。雖日夜趕辦。亦難遽就。上油未乾。入水既虞其重纏。捨灰未固。放礮又慮其酥鬆。必須一月以外。乃可下河。至價買舊船。修改艙面。其用力稍省。其爲日自少。然至二三百號之多。亦須一月餘之久。蓋爲數過少。則聲勢太孤。賊衆之船未遇。我軍之心先怯。至拖罟船隻。本奉諭旨令兩湖督撫照式製造者。武昌現在照造。未知合用與否。衡州匠少技拙。現在尙未試造。前經奉旨特派之廣西右江道張敬修。帶有工匠。自粵來楚。若其到湘尙早。臣當令其趕辦。如其到湘太遲。亦不能以勢難遽成之拖罟。延刻不可緩之時。日此辦船之大略也。至於礮位一項。現在衡城僅有廣西解來之礮百五十尊。長沙新造之礮。雖有三百餘尊。除解往鄂省及存城防守外。可取備戰船之用者。已屬無幾。聞張敬修。遵旨購辦夷礮廣礮千尊。由韶州一帶來楚。臣專俟此項礮位前來。乃足以資配放特樂昌以上之河。上水不易。千斤以上之礮。搬嶺尤難。計該道到衡之期。卽徵臣辦船之事。亦將次就緒矣。至於募勇一事。前臣添募六千之信。係爲江忠源尙守江西言之也。旋奉帶勇六千之旨。係爲臣救援湖北言之也。厥後武昌解嚴。臣奏明暫不赴鄂。因飭江忠源之胞弟先帶楚勇千人赴皖。其餘五千之數。因舟師尙未辦齊。故陸勇亦未發往。今臣接奉此旨。陸勇已屬整備。而水勇尙無章程。計張敬修帶來之礮勇。與湖南新募之水手。亦須湊成四千人。乃可自成一隊。水陸兩軍合之。則兩相夾擊。分之。則各能自立。庶不致一遇大股。卽被衝散。統計船礮水勇三者。皆非一月所能辦就。臣北望宸極。念君父之憂勞。東望皖江。痛舒慮之危急。寸心如擣。片刻難安。而事勢所在。關係甚重。有不能草草一出者。必須明春乃可成行。且廣東購備之礮。張敬修雇募之勇。皆係奉肅清江面之旨而來者。臣若不督帶同行。則殊失皇上命臣統籌全局之意。亦非臣與吳文鏞等四省合防之心。臣之斟酌遲速。規畫大局。不得不一一縷陳。所有臣籌備水陸各勇赴皖會勦緣由。恭摺由驛六百里覆奏。伏乞皇上聖鑒訓示。謹奏。硃批。現在安省待援甚急。若必偏執己見。則太覺遲緩。朕知汝尙能激發天良。故特命汝赴援。以篤燃眉。今觀汝奏。直以數省軍務。一身克嘗。試問汝之才力。能平否乎。平時漫自矜詡。以爲無出己之右者。及至臨事。果能盡符其言甚好。若稍涉張皇。豈不貽笑於天下。著設法趕緊赴援。能早一步。卽得一步之益。汝能自擔重任。迥非畏蕙者比。言既出諸汝口。必須盡如所言。辦

與朕看。欽此。」

請提用湖南漕米片 咸豐二年十一月二十六日

再臣聞湖北以下沿江市鎮逃徙一空千里蕭條百貨俱無可買臣此次一出必須將米鹽油薪等物多爲儲備用船裝載卽以水次爲糧臺使兵勇無乏食之患庶無潰散之虞查本年湖南漕米雖有改征折色之議而州縣仍謹遵諭旨照舊征收相應奏明請旨准臣提用漕米二三萬石事關緊急臣一面具奏一面咨商督撫酌提傍水州縣之漕米趕緊交兌俟兌定後某縣實交若干石再行開單咨明戶部查照辦理謹附片奏聞 硃批「戶部知道用之於軍需固不爲浪費尤須迅速咨部勿稍含混欽此。」

請捐輸歸入籌餉新例片 咸豐二年十一月二十六日

再現在經費支絀民力艱難卽捐輸一事亦無裨益臣來衡兩月有餘僅勸捐錢二萬串有奇再三勸諭終不踴躍緣此次係開城工捐輸之局向例由城工門捐者須俟修城完畢後奏明議敘始給予吏部執照核計自上年之日起至發給部照之日止相隔常在三四年以外鄉民無知往往因部照未到疑經手者或有情弊故捐生愈觀望不前相應奏明請旨飭下該部查照此次臣經手由城工例報捐者仍准歸入籌餉新例之內由臣開單咨部隨時發給部照嗣後臣行營所至如湖北安徽等省准令臣隨處勸捐一例咨部仍隨時發給部照旨下南省紛擾士民情殷報效大約願給虛銜者多願授實職者少誠能如此通融辦理於朝廷之名器無損而於軍營之接濟不無小補伏乞聖恩俯准飭下該部查照辦理謹附片請旨 硃批「該部知道欽此。」

懇陳現辦情形摺 咸豐二年十二月二十一日

奏爲瀝陳現辦情形微臣愚見恭摺奏明仰祈聖鑒事竊臣前月覆奏赴皖援勦俟張敬修解職到楚乃可成行一摺於十二月十六日奉到硃批「現在安省待援甚急若必偏執己見則太覺遲緩朕知汝尙能激發天良故特命汝赴援以濟燃眉今觀汝奏直以數省軍務一身克當試問汝之才力能平否乎平時漫自矜詡以爲無出己右者及至臨時果能盡符其言甚好若稍涉張皇豈不貽笑於天下著設法趕緊赴援能早一步卽得一步之益汝能自擔重任迥非畏葸者比言既出諸汝口必須盡如所言辦與朕看欽此。」仰見聖諭諄諄周詳懇至見

臣之不事畏葸。而加之教誨。又慮臣之涉於矜張。而嚴爲懲誡。跪誦之下。感悚莫名。惟現辦之情形。與微臣之愚見。恐我皇上尙有未盡知者。不得不逐條陳明。伏候訓示。

一起行之期。必候張敬修解礮到楚。查張敬修在廣東購礮千餘尊。分爲十起。運解來楚。現在頭起業經到衡。僅八十位。其後九起。尙無信息。臣屢次咨催。又專差迎催。本月十六日。永興境內。又有匪徒。道路阻梗。實爲十分焦急。臣所辦之戰船。新造者九十號。改造者百餘號。合之雇載者共四百號。可於正月中旬。一律完畢。自興工之日起。統計不滯八十日。晝夜催趕。尙不遲延。惟礮位至少亦須八百尊。乃敷分配。前此欽奉諭旨。令廣東購辦礮位千餘尊。限三箇月解楚。計算正月之末。總可陸續解到。縱不能全到。稍敷配用。卽行起程。

一、黃州以下。節節有賊。水路往援之兵。不能遽達皖境。前兩奉援鄂之旨。命臣籌備礮船。肅清江面。後兩奉援皖之旨。命臣駛入大江。順流東下。直赴安徽等因。查現在黃州以下。節節被賊占據。修城濬壕。已成負嵎之勢。與前月情形。又已迥殊。若舟師東下。必須克服黃州。攻破巴河。掃清數百里江面賊踪。乃克達於皖境。此則萬難之事。微臣實無把握。萬一黃州巴河之賊。亦如揚州鎮江之堅守抗拒。則臣之到皖無期。現在安徽待援甚急。前次江忠源之威劉長佑帶楚勇千餘。自湖北前往。又令其胞弟江忠濬帶勇一千。自湖南繼往。又有滇兵一千。自湖南撥往。計湖南由陸路援皖之兵。已三千餘矣。臣奉命由水路前往。阻隔黃州一帶。何能遽行掃清。直抵安徽。目前之守候船礮。其遲緩之期有限。將來之阻隔江面。其遲緩之期尤多。晝夜焦思。誠恐有誤皖省大事。不能不預行奏明。

一、現在大局。宜堵截江面。攻散賊船。以保武昌。今年兩次賊舟上竄湖南。防堵耗費甚多。湖北江西亦各耗費數十萬。三省合力防堵之說。係臣駱秉章與臣函內言之。四省合防之說。係臣江忠源與臣函內言之。待南省船礮到鄂。卽與北省水師合力進剿。係臣吳文鎔與臣函內言之。是以臣前摺內聲敘。茲奉到批諭。一、今觀汝奏。直以數省軍務一身克當。試問汝之材力能平否乎。一、等因。臣自度才力實屬不能。而三臣者之言。臣以爲皆係切要之務。該逆占據黃州巴河一路。其意常在窺伺武昌。論目前之警報。則廬州爲燃眉之急。論天下之大局。則武昌爲必爭之地。何也。能保武昌。則能扼金陵之上游。能通兩廣四川之餉道。若武

昌不保。則恐成割據之勢。此最可憂者也。目今之計。宜先合兩湖之兵力。水陸並進。以勦蕪堵。不使賊舟回竄武昌。乃爲決不可易之策。若攻勦得手。能將黃州巴河之賊。漸漸驅逐。步步進逼。直至湖口之下。小孤之間。與江西安徽四省合防。則南服猶可支撐。臣之才力。固不能勝。臣之見解。亦不及此。此係吳文鎔駭乘章江忠源三臣之議論。然舍此辦法。則南數省殆不可問矣。臣此次東下。擬幫同吳文鎔照此辦理。前摺未及詳敘。故復續陳之。

一、臣所練之勇。現在郴州辦土匪。不能遽行撤回。湖南土匪。惟衡永桂郴最多。臣二月一摺。八月一摺。已詳言之。自駐紮衡州以來。除江西之匪。竄入茶陵安仁一起外。其餘本處土匪。竄撲常寧嘉禾藍山等縣城。及盤踞道州之四庵橋。經臣派勇隨處攻勦。先後撲滅。昨十二月十五日。又有一股竄入永興縣城。亦經派勇往勦。現在臣之練勇。在桂屬者。尚有千餘人。在郴屬者。八百人。昨十二日奉到諭旨。一會國藩著仍遵前旨。督帶船勇。速赴安徽江面。至湖南常寧一帶土匪。即責成駱秉章。迅即妥辦等因。目下桂屬正在搜捕之際。未便遽行更換。郴州永興正在危急之際。不能不星速進勦。且待船將辦齊。礙將到齊。再將各勇撤回。帶赴下游。如尙未勦畢。則由省城調兵。前來更換。

一、餉乏兵單。微臣竭力效命。至於成效。則不敢必。臣以丁憂人員。去年奏明。不願出省辦事。仰蒙聖鑒在案。此次奉旨出省。徒以大局糜爛。不敢避謝。然攻勦之事。實無勝算。臣係幫辦團練之人。各處之兵勇。既不能受調遣。外省之餉項。亦恐不願供應。雖諭旨令撫臣供支。而本省藩庫。現僅存銀五千兩。即起程一月之糧。尙恐難備。且賊勢猖獗如此。豈臣區區所能奏效。茲奉批諭。一平時漫自矜詡。以爲無出己之右者。及至臨事。果能盡得其言甚好。若稍涉張皇。豈不貽笑於天下。言既出諸汝口。必須盡如所言。辦與朕看。一等因。臣自維才智淺薄。惟有愚誠。不敢避死而已。至於成敗利鈍。一無可恃。皇上若遽責臣以成效。則臣惶悚無地。與其將來毫無功績。受大言欺君之罪。不如此時據實陳明。受長慮不前之罪。臣不爛武事。既不能在籍終制。貽議於士林。又復以大言僨事。貽笑於天下。臣亦何顏自立於天地之間乎。中夜焦思。但有痛哭而已。伏乞聖慈垂鑒。憐臣之進退兩難。誠臣以敬慎。不遽責臣以成效。臣自當殫竭血誠。斷不敢妄自矜詡。亦不敢稍涉退縮。

以上五條。皆臣據實直陳。毫無欺飾。伏乞皇上聖鑒訓示。謹奏。硃批。知道了。成敗利鈍。固不可逆睹。然汝之心。可質天日。非特朕知。甘受畏葸之罪。殊屬非是。欽此。」

衡永一帶勦匪未畢摺 咸豐二年十一月二十一日

奏爲衡永桂陽一帶尙有一股會匪。勦捕未畢。恭摺奏明。仰祈聖鑒事。竊照湖南上四屬土匪繁多。臣屢次具奏在案。十月二十七日。土匪竄入常寧縣城。經臣派令千總周鳳山。臣弟曾國葆。帶勇往勦。於初一日在泮泉地方開仗。斃賊二百餘人。十一月十四日。該匪竄入嘉禾縣城。十九日圍逼藍山縣城。派令候選訓導儲攻躬軍功魏崇德帶勇往勦。於二十四日在古城地方開仗。斃賊七百餘人。二十八日。竄據道州之四安橋。經臣派候選知府張榮組監生鄒壽璋及周鳳山儲攻躬等帶勇往勦。於十二月初八日。在教頭坪地方開仗。斃賊三百餘人。此三戰者。所獲旗幟大小一百餘面。及腰牌。僞示。令箭。逆書。圖記等件。一概解送衡州。臣逐件親驗。實是一股會匪。與金陵之粵匪相通。前在常寧率獲之要犯吳玉老十。解來衡州。臣親自研訊。亦稱此股會匪勾結甚多。其大頭目爲道州之何賤苟。自稱爲僞普南王。今年永州廣西兩次率獲。皆非正身也。其散頭目。則有唐定其霍德滔等。其巢穴則常寧之五洞。桂陽之白水洞。道州之岩頭村。寧遠之獺子山等處。勾結十餘州縣。到處發牌弔碼。入會者約四五千人。初八日教頭坪一戰。即殺斃長髮賊三人在內。十五日又有土匪四五百人。竄撲永興縣城。現經派勇飛速進勦。尙未查明。未知卽是此股分支竄擾否。統計常寧藍山道州雖經三次獲勝。斃斃千餘。而餘黨尙多。首犯何賤苟未獲。此股會匪實爲湖南之巨患。臣現函商撫臣。擬於臣出征之後。擇一賢幹之員。帶精壯兵勇千餘。駐紮衡州。隨時勦捕。無使其蔓延日盛。不可收拾。除俟商定委員。再行會奏外。臣奉命查辦土匪。於此股勦除未畢。是臣經手未完之件。不敢不據實陳明。伏乞皇上聖鑒訓示。謹奏。硃批。知道了。汝以在籍人員。能如是出力。已屬可嘉。著知會撫臣勦辦。或有汝素來深信之紳士。酌量辦理亦可。欽此。」

釐正衡清二縣保甲片 咸豐二年十一月二十一日

再臣到衡以來。率獲衡清二縣齋匪一案。會匪一案。齋匪聚於衡陽四十都等處。與永興祁陽之匪相通。現僅獲屈太岷陳青長等八人。會匪聚於清泉江東岸等處。與常寧之匪相通。起獲一簿。載明六十六人。現僅獲汪興生

許興千等五人。此二案蹤跡詭秘。堅不認供。未獲之犯尙多。亦是臣經手未完之件。今欲杜絕後患。必須保甲團總認真稽查。已入會者。縱不能盡獲。未入會者。猶可以漸少。復查衡清二縣保甲。近來專管包征錢糧。反置查匪事件於不問。推原其始。由於道光十五年前任衡陽縣沈治輕改章程。既未奏明。亦未稟知撫藩。輒將衡陽錢糧概歸保甲徵收。清泉亦隨同辦理。厥後弊端叢生。保甲弱者。則不勝墊賠之苦。強者則勾結蠹役。措票浮勒。甚至痞棍買充領票。訛索小民。淨收數倍。名曰包包保甲。以致保甲一項。專管催徵錢糧。而查團之事。置之不理。匪徒充斥。毫無稽察。實爲兩縣一大弊政。不可不急爲更改。查道光三十年九月。御史吳若準條陳積弊。言及催徵爲差役之責。詰盜爲保甲之責。欽奉上諭。一假催科爲名。擾及保甲。若不嚴行申禁。何以靖閭閻而肅吏治。著各督撫飭地方官。嚴行懲辦。等因。通諭在案。衡清二縣。尙未遵照更正。今會匪煽誘。不行查出送官者。將該團總保甲等一併嚴懲。如該縣因循不改。仍將錢糧事件擾及保甲者。亦即從嚴參處。除分咨及札飭外。相應奏明。請旨飭下督撫。嚴禁二縣保甲收餉之弊。實於團務大有關係。謹附片奏聞。殊批。一此應亟更易者。著知照駱秉章將改辦章程速行覆奏。欽此。」

報東征起程日期摺 咸豐四年二月初二日

奏爲恭報微臣起程日期事。竊臣於上年十一月二十三日。奉旨援勦皖省。迄今已滿兩月。曾經具奏一俟戰船辦齊。廣礮解到。卽行起程。兩次奏明在案。茲於正月二十六日。衡州船廠畢工。臣卽於二十八日。自衡起程。湘潭分造之船廠。尙未盡畢。臣到潭須耽閣數日。晝夜督辦。到長沙時。支領軍械數千餘件。搬運子藥二十餘萬。又須守催數日。卽行趨程長征。馳赴下游。臣所辦之船。拖罟一號。快蟹四十號。長龍五十號。三板艇一百五十號。皆仿照廣東戰艦之式。又改造釣鉤船一百二十號。履載輜重船一百餘號。所配之礮。借用廣西者一百五十位。廣東購辦者去年解到八十位。今年解到二百四十位。本省提用者一百餘位。所募之勇。陸路五千餘人。水師五千人。陸路各營編列字號。五百人爲大營。不滿五百者爲小營。水路分爲十營。前後左右中爲五正營。正營之外。又分五副營。正營旗用純色。副營旗用廂邊。陸路操練已久。差覺可用。水路召集太驟。尙無可恃。所備之糧。台帶米一

萬二千石。煤一萬八千石。鹽四萬斤。油三萬斤。軍中應需之器物。應用之工匠。一概攜帶隨行。合以陸路之長夫。隨下水路之雇船水手。糧台之員弁丁役。統計全軍約一萬七千人。臣才智淺薄。素乏閱歷。本不足統此大眾。然當此時事艱難。人心渙散之秋。若非廣爲號召。大振聲威。則未與賊遇之先。而士卒已消沮不前矣。是以與撫臣往返函商。竭力經營。圖此一舉。事之成敗。不暇深思。餉之有無。亦不暇熟計。但期稍振人心。而作士氣。卽臣區區效命之微誠也。至臣前摺。稱必待張敬修解職到楚。乃可起行。頃專弁自粵歸來。知張敬修爲粵省奏留。不能赴楚。續購之礮。亦不能遽到下游。賊勢急於星火。臣更不可少延矣。合併陳明。所有微臣起程日期。恭摺由驛五百里具奏。伏乞皇上聖鑒。訓示。謹奏。

代遞唐樹義遺摺片 咸豐四年二月初二日

再湖北按察使唐樹義於正月二十三日。在鄂省上游之鮎魚套殉難。當經手繪遺摺。遺伊子舉人唐炯賈赴鄂垣陳乞代奏。時因下游賊氛阻隔。鄂城門已封關。不能前進。唐炯聞關跋涉。赴臣行營。呈稱伊父力竭捐軀。有封就遺摺。懇爲代奏等情。臣查該臬司曾任二品大員。素著循聲。慨懷殉難。旣據伊子籲請。代遞遺摺。不敢壅於上聞。所有湖北按察使唐樹義遺摺一件。理合據呈轉達。謹奏。

請派大員辦捐濟餉摺 咸豐四年一月十五日

奏爲請旨特派大員辦理捐輸以濟軍餉事。竊臣於二月初二日。在衡山舟次。具報起行日期。恭摺奏明在案。其時臣但知督臣吳文鎔黃州接仗。官兵失利。近日連接北撫臣崇綸南撫臣駱秉章來函。知賊船已由濟陽上竄京口。及新隄等處。陸路兵潰散極多。水路之師。竟至全數潰散。唐樹義業已殉難。船隻礮械。盡爲賊有。東南大局。真堪痛哭。從此湖廣江皖四省。止有巨處一枝兵勇較多。若臣再有挫失。則後此更不堪設想。臣所以招練萬餘人。蓋欲以收渙散之人心。而作積弱之士氣。惟人數衆多。每月需餉銀近八萬兩。本省難盡供支。鄰省亦難協濟。專恃勸捐一途。以濟口食之需。但勸捐非有大員專辦。則長難避怨。無人肯獨任其責者。現在湖南江西四川。較爲完善之區。臣於此三省中。各擇官紳數人。湖南則擇署鹽道新授四川鹽茶道夏廷棧。翰林院編修郭嵩燾。江西則擇前任刑部侍郎黃贊湯。陞用知府郴州直隸州朱孫詒。四川則擇按察使胡興仁。前翰林院編修李惺。此

數人者。在官則素治民心。居家則素孚鄉望。應請旨飭諭。各該員辦理捐輸。以專濟巨軍之用。伏查上年戶部議准頒發職銜封典各執照。交各藩司填給。又議每省派捐監生。預將空名部監二照。發各藩司。轉發各州縣。此二事人所樂從。實爲勸捐良策。應請飭下戶部國子監印發空白執照四千張。內職銜照一半。監照一半。分派三省。其大小職銜。均勻搭配。及核減銀數。俱照原案辦理。以一千張封發巨軍營中。以一千張封發湖南交夏廷楹經收。以一千張封發江西交黃贊湯經收。以一千張封發四川交胡興仁經收。其部監各照未到之先。恭請特旨諄諭各該員先行籌辦。隨時解赴巨軍。不作別用。現在師過長沙。搜括省城庫項。僅供一月之需。撫臣駱秉章以此事晝夜焦灼。是以奏請川廣二省協濟巨軍。伏念臣此次成軍以出。已屬竭力經營。若因餉項不繼。飢疲潰散。則從此更無望矣。世小亂則督兵難於籌餉。世大亂則籌餉更難於督兵。臣於萬難設措之中。爲此接濟目前之計。伏乞聖慈垂鑒。特降諭旨。專飭諸臣認真督辦。不勝迫切待命之至。謹奏請旨。

留胡林翼黔勇會勘片 咸豐四年二月十五日

再貴州黎平府知府陞用道胡林翼。前經督臣吳文鎔奏調湖北差遣。該員自帶練勇六百名。由黔赴鄂。於正月下旬馳抵金口。適值黃州師潰。賊船上竄。該員所募黔勇係山民。不習水戰。又兼無餉無夫。無火藥鍋帳。不能前進。疊據該員具稟南撫臣暨臣行營。請支給口糧軍械在案。臣與撫臣函商派員解送火藥帳棚。撥銀二千兩往資接濟。臣擬先遣陸勇與該員會合援鄂。又值賊匪竄擾岳州湘陰。道路阻隔。委員仍行折回。臣思岳州一帶。既被賊擾。自當先攻克岳州。不使南北梗塞。方能全師東下。現擬札飭該員暫駐岳州附近地方。臣迅即東下。與該員督勇先行會勘。理合附陳謹奏。 硃批「知道了。欽此。」

賊蹤退出南省現駐岳州摺 咸豐四年二月初五日

奏爲賊蹤全數退出南省。微臣現駐岳州。搜捕湖汊。並就近勦辦崇通股匪。恭摺奏聞。仰祈聖鑒事。竊臣於二月二十四日。會同撫臣蔣分途勦賊。獲勝各情。由具報在案。自靖港寧鄉新康三路獲勝仗後。臣即傳令各陸營。馳赴湘陰。并派水師山西候補知府褚汝航。候補守備諸殿元。千總楊載福。文生彭玉麟四營。各帶水軍。齊赴湘陰。截勦賊聞。官兵水陸大至。當即退出湘陰。據褚汝航稟報。二十三日辰刻。探明西湖口賊船尙多。當派五品領頂

張宏邦等駛駕礮船迎擊。轟斃賊匪數十名。生擒唐興道等七名。燒燬賊船十餘號。諸殿元等三營。共奪獲賊船八隻。又據勇目黃忠等稟。在團山地方。奪獲賊船。砍斃礮賊匪二名。生擒賊匪蕭茂瑞等五名。泗水賊呂金富等三名。訊明正法。逆匪疊經懲創。全數竄逃。岳州亦已退出。臣前派之陸路各營。均於二十六七日。先後抵岳。分駐城鄉。搜捕餘匪。臣亦督帶水軍。於三月初二日。行抵岳州。查洞庭一湖。周迴近八百里。爲資湘沅澧諸大川所匯。小港支汊。紛歧至數十處。最易藏奸。全湖入江之所。名曰荆河口。上游爲監利荊州。其虎渡河等處。多與湖水相通。屢獲賊探。均供稱賊蹤。內則藏匿湖汊。外則竄伏荆河。俟我軍東下。再在上游滋擾等語。臣現駐岳州。多派哨船分巡。內則哨探湖中港汊。外則哨探荆河以上。必須逐處收查。上游肅清。然後一意東下。乃無後路邀截之虞。至陸路各軍。屢據稟報。崇陽通城先後失守。臣已札飭貴東道胡林翼前平江縣知縣林源恩。帶勇千餘。前往勦辦。若能趁臣在岳時。就近將崇通股匪辦有頭緒。則馳赴下游。庶無彼此牽掣之患。所有賊蹤。全數退出南省。微臣現駐岳州。搜捕湖汊。并就近勦辦崇通股匪各緣由。恭摺由驛五百里具奏。伏乞皇上聖鑒訓示。謹奏。

請卹儲政躬等摺 咸豐四年二月初五日

奏爲請將屢著戰功。衝鋒遏害之員。照擬保陞銜賜卹。以昭激勸。而慰忠魂事。竊臣前派兵勇於靖港寧鄉新康等處。勦賊獲勝。業經會奏在案。惟寧鄉一戰。督勇委員武陵縣學訓導儲政躬奮勇捐軀。將大股賊登時擊退。保全實多。當此土氣積弱之秋。非破格表章。不足以昭激勸。查該訓導自札調帶勇以來。屢立戰功。上年十一月。常寧土匪竄擾嘉禾藍山等處。臣調該訓導會勦。於二十四日抵藍山之古城。時賊衆千餘。圍藍山已六晝夜。該訓導甫至。即督勇目喻西林等。分路衝擊。共殺賊六百餘名。奪獲馬騾二十二匹。抬槍鳥槍各數十件。藍山股匪。即日蕩平。旋以道州四眼橋土匪滋擾。該訓導於十二月初八日。馳抵賊巢。時賊負嵎抗拒。各營兵勇相持莫進。該訓導立督喻西林等直前奮擊。追奔十餘里。殺賊百餘名。道州股匪亦平。此二案業經撫臣駱秉章奏明在案。本年二月。臣率師抵省。適逆賊已由岳州湘陰竄擾寧鄉一帶。距省止數十里。臣於十一日。派該訓導及各營馳往靖港橋口截勦。該訓導路聞賊竄寧鄉。即冒雪疾趨十餘里。於十三日未刻。先至寧鄉。派勇分門抄截。自帶親兵喻西林文生楊華英等直衝賊隊。由龍塘灣痛勦。衝入西門。又至北門。轉戰南門。突東城外一股橫截而出。該訓

導力竭遇害。身面受傷十餘處。楊華英喻西林等同時陣亡。此次該訓導以五百之勇。敵三千之賊。殲賊至數百名。而我兵喪亡止十八名。逆黨膽落氣奪。暮夜竄逃。寧鄉得以保全。賊遂不敢直犯省城。附近各州縣。皆獲安堵。寧鄉被擄難民千餘。因賊敗得以逃回。合邑感激。欲爲該訓導建立專祠。實屬功不可沒。前此藍山之捷。臣擬奏保該訓導。請以知縣升用。道州之捷。復擬保奏。請以同知直隸州升用。會與撫臣函商。因衡郴各屬勦平土匪。在事出力者甚多。擬俟會齊後恭摺一體保奏。不料該員遽爾殉難。奇功疊著。懋賞久稽。實堪痛惜。合無仰懇皇上逾格天恩。准照同知直隸州例議卹。其陣亡之勇員喻西林三次戰功。臣久擬奏保把總。亦請照把總例賜卹。文生楊華英均請一體議卹。用以昭激勸。而慰忠魂。所有懇照升銜賜卹緣由。理合專摺具奏。伏乞皇上聖鑒訓示。謹奏。

岳州戰敗自請治罪摺 咸豐四年二月二十日

奏爲岳州陸軍敗潰。水軍小勝。賊匪大股。全數上竄。現帶水陸各營。回保省城。請旨將臣交部治罪。仰祈聖鑒事。竊臣於三月初五日。在岳州舟次。具報西路搜查湖汊。東路勦辦崇通股匪。恭摺奏聞在案。維時臣已札飭貴東道胡林翼前平江縣知縣林源恩。前往平江防勦崇通賊匪。隨又派副將塔齊布守備周鳳山帶勇直擄通城。旋據林源恩會同平江縣知縣汪敬灝暨胡林翼等。先後稟報。初二初六兩日。與賊接戰。疊獲勝仗。前後共計殺斃賊匪千餘。陣斬僞副丞相林大旺。僞檢點陳六輔。僞司馬黃奇瑜。轟斃土匪僞王廖六胖等。及不知姓名黃衣紅衣賊目數十名。長髮賊數十名。奪獲抬槍鳥槍刀矛旗幟各數百件。賊匪連夜狂奔。由通城竄回崇陽。此二股均經撫臣會奏在案。又據塔齊布稟稱。初五日自岳起程。途聞聞白港地方有匪賊沿村擄掠。初七日督勇自石南橋進勦。斃賊四十餘人。生擒二十二名。奪獲器械旗幟號衣多件。初八日馳赴通城。收復縣城。此勦辦平通股匪疊獲勝仗之實在情形也。至岳州一城。前經撫臣札飭升用知府朱孫詒帶勇六百人在此追勦。又札升用同知王鑫帶勇一千餘人在此扼防。臣隨身又帶有陸勇一千六百人。兵力本不爲單薄。因崇通股匪過多。王鑫亦於初六日自岳起程。取道蒲圻繼進。初七日至臨蒲交界之牟樓司地方。適與賊遇。前鋒少挫。王鑫率勇踵至。殺賊百餘。賊衆僞敗。王鑫率勇窮追。忽大股賊匪分四面抄出。衆勇勢難抵禦。紛紛潰散。初八日。仍回岳城。初十日

早。賊大隊卽來犯岳。王鑫之勇。因新在牟橋敗歸。不能出隊開仗。時官軍僅二千人。朱孫詒所帶之南勇。先獲小勝。各營俱有斬獲。計斃賊百數十人。而賊集愈衆。東門外山岡約十里許。皆黃旗紅衣賊隊。布滿官軍見衆寡不敵。勢難抵禦。各營以次奔潰。竟不能止。惟監生鄧壽璋一營五百人。毫無驚怖。自辰至酉。血戰數時之久。賊衆數千人。層層圍住。各勇併力苦戰。更休迭進。卒得衝圍而出。殺賊極多。積屍滿地。我勇傷亡亦衆。各勇有退回城內者。賊匪卽乘勢圍城。周城三面。皆係賊隊。惟西南濱湖一門無賊。城內居民早空。無米無鹽。士卒已不食二日。勢極危險。臣當遣大小戰艦駛赴西門。開礮環擊。共斃賊百數十人。賊勢稍卻。各勇卽乘隙縫城而出。船上礮勇亦陣亡數人。此岳城陸路戰敗。水軍小勝之實在情形也。臣奉命赴下游會勘。舟次岳州之南洋港。原飭水陸各勇俱於岳州會齊。原擬俟各勇畢集。誓師東下。爲肅清江面之計。不料後幫陸勇二千。水勇二千。皆以阻風洞庭。不克依限抵岳。而前幫陸勇。又已先遣一千八百人至平通矣。臣隨身止有陸勇一千六百人。猝遇金口大股賊匪數萬來犯。遂至潰敗。陸路旣已失利。水軍亦無固志。初七大風以後。各船損壞。力難應敵。誠恐輕於一擲。或將戰船洋礮。盡以資賊。則臣之罪戾尤重。適因賊水陸大隊。全數南竄湘省。臣遂乘風上駛。退保省城。但冀保此船礮。留爲將來殄寇之資。則臣雖蒙恥獲罪。亦不敢惜。至臣奉命會勘。尙未出境。卽有此挫。皆由臣調度乖方所致。深負鴻慈委任。慚憶憂鬱。莫可名言。謹據實直陳。請旨將臣交部治罪。以昭大戒。不勝悚惶之至。謹奏。

鄒國彪傷亡請卹片 咸豐四年二月二十日

再三月初五日。有賊船扮作民船。在西湖經過。派令戰船前往查拏。開礮轟擊。奪獲三十餘隻。獲犯五十四名。其中有靖如邦襄陽人。供稱授僞職師帥。又張見三蒙百鮮。供係賊目。其餘或供認從賊。或實係客船。分別正法釋放在案。惟查拏之時。衆舟勇敢向前。賊以火球擲入我舟。適中入藥桶內。登時桶熱火燃。燒傷衛千總一人。鄒國彪。旋於初七日身故。又燒傷水勇十餘名。燒斃九名。初七日未刻。北風大作。湖中巨浪如山。臣之戰船。在陳陵磯守卡者。打沈五隻。撞損十餘隻。泊岳陽樓下者。打沈十一隻。撞損二十餘隻。中幫水師二營。及後幫陸勇二千。雇民船來岳者。在鹿角一帶。遭風飄沈戰船八隻。撞損者無數。水陸各勇爛斃者亦多。尙未確切查明。本擬在岳州大加修葺。旅因賊匪大股來犯。岳城內搬徙一空。城外四五十里。並無居人。所需工料。無從取辦。則賊之水陸兩

股上竄南省。不得已仍回省河。一面修理戰船。一面招集潰卒。嚴汰慎選。與撫臣力籌堵剿。除初五日被火燒斃之勇。初七日被風溺斃之勇。由臣照例給卹外。所有衛千總鄒國彪。因打仗受傷。二日身故。應請交部照陣亡例議卹。謹附片具奏。 硃批「何事機不順若是。另有旨。欽此。」

探明前路賊蹤片 咸豐四年二月二十日

再臣自去冬以來。常以重金募人。深入賊窠。偵探消息。迄今數月。回者寥寥。近有數人回營。及連日在岳探得賊情數端。謹開列附陳以聞。

一、陳陵磯之下四十里。名白螺磯。北隄內六十里。有襄河名朱家河。其地有土匪名張台元。於咸豐二年往從粵賊。去年曾經回籍一次。復去。在偽指揮費姓屬下。昨三月初二日。張台元乘輜回朱家河。自稱已封偽軍師。劫搶當舖七家。環圍五六十里。擄人船銀米罄盡。北省之沔陽州監利縣。皆係張台元滋擾失守。張台元新招之匪。不過數千人。而偽指揮費姓所屬。則老賊頗多。有窺伺華容澧州荊州之意。

一、賊在漢陽東門外築一曲尺土城。西門外築一圓土城。極堅極險。龜山頂上築一望樓。而漢陽所存之賊甚多。賊衆皆聚於漢口。有偽將軍賴姓守漢口。彭姓守漢陽。二月二十九日。賊大隊上竄。坐船至金口。由金口登陸。至咸寧蒲圻。初七在牟樓司開仗。初十日即至牟城開仗。

一、此次自漢口大隊上竄之賊。係偽丞相林姓總其事。又有偽十七指揮黎姓。十一指揮沈姓。又有偽侍衛李八。安仁人也。所帶賊衆前十一軍。六千餘人。中十軍。七千餘人。後六軍。一萬餘人。約計三萬餘人。湖南老賊居多。

一、崇陽土匪最多。有頭目廖姓。係本邑。屢次嚴拏之犯。上年從賊。今春廖姓至漢口。帶老賊六百。人至崇陽招集。崇通土匪已二萬餘人。該匪自誓必招滿三萬之數。現在胡林翼塔齊布等勦崇通之匪。與自金口竄岳岳竄湘之賊。另是一股。

一、賊在漢陽管水軍者。係偽翼王之兄弟。賊中稱爲「國宗兄」。其船旗以繡花呢別之。其有洋礮之船。以白旗別之。臣在岳時。探得下游之毛埠倒口金口。皆停泊賊船甚多。又探得西湖之明山團山。尙有賊船數十號。

本擬先清湖面。再行肅清江面。不料初七日大風壞船。初十日陸路戰敗。臣耿耿微忱。遂不能展布絲毫。實堪憤恨。初三日遣六十人至西湖巡哨。至今未歸。不知下落。現在賊船由臨資口入益陽河者。已有五六百號之多。

報崇通勦匪勝仗摺 咸豐四年三月二十二日

奏爲崇通勦匪續獲勝仗二次。恭摺奏報。仰祈聖鑒事。竊臣與撫臣先後札飭貴東道胡林翼。升用副將塔齊布。升用同知林源恩。千總周鳳山。軍功倪長誥。前往平江北路勦辦崇通股匪。初二日林源恩開仗獲勝。初六日胡林翼在上塔市開仗大勝。初七日塔齊布在江南橋開仗小勝。均經奏報在案。旋據胡林翼稟稱。十二日派黔勇二百人。塔齊布派楚勇五十人。放哨行至石水灣地方。距通城三十里。有賊二千餘人。先匿該處民房。蹤迹甚秘。忽於我兵路過之後。突起接仗。截住街口。層層圍逼。斷我兵歸路。黔勇奮力衝殺。斃賊匪五十餘人。搶出街口。賊匪大聚。黔勇整隊上山。施放槍礮。打斃賊匪二百餘人。刀矛並舉。又斃百餘人。又割尺餘長髮首級三十六顆。二三寸長髮四十二顆。奪獲僞春官副丞相熊僞司馬李大黃旗桿及風帽紅巾刀矛等件。又據塔齊布稟稱。十四日已刻。賊衆萬餘人。由沙坪一路進犯通城。我軍出隊迎勦。把總李松齡等帶兵由東路。把總郭煥瀆帶寶勇由西路。塔齊布自帶勇由中路迎殺賊匪。槍礮如雨。我兵伏地前進。及至近賊。三路兵勇始放槍礮。擊斃賊匪二百餘名。賊勢大敗。兵勇追奔十餘里外。又殺斃賊匪三百餘名。並殺斃執旗賊首二十餘名。生擒六十二名。正在撤隊之際。賊匪又分三路。約共三千餘人。由嶺上直趨城邊。儘先守備周鳳山。軍功倪長誥。藍翎千總唐得陞。分途堵截力戰。又殺斃執黃旗賊目二三十名。殺斃賊匪四百餘名。生擒七十餘名。賊匪紛紛遠竄。由已至申。鏖戰最久。奪獲大小黃旗刀矛槍礮賊衣賊帽紅巾數百件。賊轎一乘。騾馬十八匹。火藥槍子火箭甚多。各等因。伏查崇通兩縣。向爲匪徒嘯聚之區。自正月以來。居民畏賊。多已蓄髮。樂爲賊用。其旁近州縣。如通山蒲圻大冶興國咸寧嘉魚等屬。皆已爲賊所踞。官兵到境。無土人爲之嚮導。無米鹽可供買辦。人心之壞。實堪痛恨。自初六日胡林翼上塔市一戰。十四日塔齊布沙坪一戰。又有初二初七十二等日三戰。賊勢始就衰挫。人心亦漸有轉機。本擬再加兵勇二三千人。痛勦崇通一股。即可直抵鄂省。以資救援。不謂岳州陸勇一敗。金口大股之賊。全數上竄。不

特不能加兵。再勦崇通。且須酌撤通城之兵。回保長沙。此皆臣調度乖方。不諳軍旅所致。若仗皇上天威。岳州上駛之匪。攻勦得手。卽日下竄。則陸軍仍須由崇通一路痛加勦洗。乃能與鄂省文報相通。其崇通屢次獲勝。在事尤爲出力之員弁。可否開單保奏。出自皇上天恩。所有崇通勦賊續獲勝仗緣由。謹會同湖南巡撫臣駱秉章恭摺。由驛六百里馳奏。伏乞皇上聖鑒。謹奏。

會奏湘潭靖港水陸勝負情形摺 咸豐四年四月十二日

奏爲官軍擊賊靖港。互有勝負。賊由陸路攻陷湘潭。官軍水陸夾擊。大獲勝仗。巨股勦滅。克復縣城。恭摺由驛馳奏。仰祈聖鑒。竊逆賊大股。水陸并進。逼近省城。陸路之賊。先散踞岳州。湘陰各境賊船。分布臨資口樟樹港。喬口靖港等處。連日北風甚勁。大雨經旬。水軍不能進勦。水陸北路各賊。併聚泊靖港。港外環列戰船。堅築礮臺。爲負隅觀釁之計。三月二十四五日。狂飈稍息。臣會國藩飭水師各營。駛赴靖港。更番迭擊。上下往復。周而復始。共斃船中岸上之賊。約二百餘名。擊沈賊船三隻。燒賊火藥船一隻。賊詢知省城水陸防勦甚嚴。不敢闖入。思由陸路繞越寧鄉徑撲湘潭。臣會國藩先遣湘勇營官伍宏鑑魏崇德郭鴻齋率湘勇千八百人。扼要立營。防賊侵軼。並飭該營官。以賊勢方盛。宜謹守營壘。固無與戰。俟副將塔齊布兵到。再籌追勦。二十五日。賊分三股齊撲魏崇德等營。湘勇在營內施放槍礮。斃賊數十。既而大股賊匪麇聚。約分十餘路。四面圍逼。該勇等奮力衝突。殺賊百餘。賊來益衆。勢不可支。湘勇陣亡數百。遂紛紛潰敗。二十六日。塔齊布帶兵勇一千三百餘名。馳往援勦。賊已於是日卯刻捲甲疾趨。由間道直赴湘潭。塔齊布周鳳山等探知。亦即繞道前進。二十八日。馳抵湘潭縣城外四五里高嶺地方。賊前隊於二十七日已到。署湘潭縣知縣劉建德督帶團勇。於城外響水壩沙市嶺一帶地方堵禦。賊已由西路暗襲縣城。分遣死黨。四出擄掠民船。一在城北堅立木城。意圖阻遏援師。爲久駐計。塔齊布以該逆頻年猖獗。每用以守爲戰。反客爲主之法。若不及時速勦。俟賊營壘既定。攻克爲難。卽於二十八日未刻。同周鳳山督帶弁兵壯勇。分路進攻。賊營槍礮如雨。塔齊布令兵勇聞礮卽伏。礮止卽進。數伏數起。直逼賊營。各兵勇奮不顧身。闖入賊營。施放火箭火彈。殺賊五百餘名。燒斃無算。生擒三十餘名。奪獲賊馬六匹。抬槍鳥槍二十餘桿。火藥五桶。鉛彈三百斤。旗幟刀矛無數。木城全燬。臣等卽飭國子監學正銜候選訓導江忠淑帶楚勇一千三

百餘名。都司李輔朝帶楚勇八百名。守備張正揚帶鎮筵級靖兵丁五百名。先後繼進。復挑選得力水師五營。交委員候補知府褚汝航等管帶。駛往湘潭。乘逆賊甫擄民船尚未成列。迅速追勦。二十八夜。賊匪仍於原處豎立木城。二十九日卯刻。塔齊布周鳳山李輔朝等督飭兵勇分兩路進勦。賊分五路蜂擁而前。塔齊布等亦分五路迎敵。賊匪亡命猛撲。塔齊布手執大旗。麾各路兵勇奮勇向前。周鳳山嚴督後隊繼進。手刃臨陣退縮之勇七人。塔齊布與周鳳山縱橫血戰。立斬該逆僞統領先鋒六名。僞都督元帥三名。斃賊五百餘名。賊匪紛紛敗潰。各路兵勇躡蹤緊追。斃賊無數。仍將木城燒燬。奪獲紫金冠一頂。黃紅巾無數。賊馬數十匹。僞印一顆。抬礮四十八桿。旂幟刀矛無數。已刻始行收隊。兵勇甫回營造飯。賊忽分兩路前來撲營。塔齊布令兵勇僞退。誘賊逼近。從營後繞出。槍礮齊施。轟斃賊匪五百餘名。且退且殺。至嶺下塘邊。四面圍逼。賊匪無路逃竄。淹死不計其數。此三月廿八廿九兩日。塔齊布周鳳山督率陸路兵勇三獲大勝之實在情形也。委員褚汝航候選知縣夏鑾。千總楊載福。附生彭玉麟鄒世琦等。於二十九日。管帶水勇戰船。甫抵湘潭。賊匪已擄上游民船數百號。順流而下。四月初一日辰刻。褚汝航等督率各營水師。分隊進勦。長龍在前。三板在右斜出。載礮轟擊。夏鑾彭玉麟楊載福各選派勁勇。飛鷲快蟹。直撲賊船。賊匪聞礮還擊。火彈火箭齊發。烟燄迷漫。兵賊莫辨。該營官等飭令各勇。挽舵速據上風。施放火具。各隊分左右翼。飛駛繼進。礮斃紅衣賊目十數名。火器飛入賊船。遇船即著。頃刻延燒。逆賊情急。跳上小船。輒被兵勇擒斬。生擒長髮賊共一百二十餘名。大小船六十餘號。奪獲旂幟號衣黃巾黃馬褂槍礮刀矛火藥鉛子偽書名冊等件無算。戍刻。始行收隊。是日陸路之賊。仍在北城外高壘木城四座。塔齊布周鳳山督帶兵勇三路進勦。李輔朝帶楚勇在後接應。逆渠因連次敗北。盡選長髮老賊居先。分三路迎敵。塔齊布督率兵勇奮迅向前。身先士卒。誓不與賊俱生。兵勇感激思奮。併力鏖戰。往來衝突。殺斃長髮老賊約數百人。黃巾紅衣。狼藉道路。被逼溺斃者無算。後隊兵勇乘機拋擲火器。燒燬賊踞房屋。斃賊亦無算。生擒長髮老賊六十餘人。逆賊退至城根。兵勇三路合隊。盡銳衝殺。斃賊數百。焚燒木城四座。望樓一座。奪獲二百斤重大礮三尊。抬礮抬槍旂幟刀矛數百餘件。此又初一日水陸大獲勝仗之實在情形也。塔齊布以連日血戰。士卒頗勞。傳令暫歇一日。是夜四更。水路賊匪從上游燒放火船數隻。順流而下。小船載油燈無數。隨之。意欲驚擾我軍。兵勇乘坐三板。將賊所

放火船攔開。洄聚一處。任其自燒。各船無念。初二日辰刻。褚汝航等督率快船。擂鼓督戰。廣東外委羅管全。哨官張宏邦。區聯彪。呂勝等。齊施槍礮。繼以火箭火罐。焚燒賊船。羅管全生擒紅衣長髮賊目一名。哨官薛飛雄。外委施成任。把總陳武龍。何卓然等。連環攻擊。自辰至午。擊沈賊船八十餘隻。斃賊二百餘名。從九品區本昌。候補千總戴兆熊。分途燒斃紅衣賊目一名。登岸追獲賊馬一匹。復搶上賊船。奪獲偽前十一營師帥黃大旗一桿。紅緞風帽黃綾帽。逆匪名冊令旂等件。褚汝航親開大礮。轟斃紅巾賊匪十數名。長龍三板等船。鼓舞爭先。自午至申。又燒燬賊船二百餘隻。轟斃水陸賊船三百餘名。奪獲大小旗幟十五桿。生擒長髮老賊二名。逆船三十隻。米三百石。火藥四百斤。大小鉛子九桶。衣帽器械無算。營官彭玉麟。楊載福親坐三板小艇。往來督戰。礮聲如雷。湘波鼎沸。楊載福身受槍傷。尙復指揮鏖戰。自辰至酉。燒燬賊船三百餘號。燒斃紅衣長髮逆賊三百餘名。生擒長髮賊匪十三名。短髮賊匪四十餘名。著火之船。延燒岸上街市房屋。百里外遙見火光燭天。岸上之賊燒斃者。實亦無數可記。奪獲器械旂幟無算。潭城賊船。僅剩文昌閣上三十餘隻。餘悉燒燬淨盡。此初二日水師大獲全勝之實。在情形也。臣曾國藩以潭城逆賊被官軍水陸痛剿。專盼靖港之賊救援。亟應乘機攻剿。俾逆賊首尾不能相顧。明知水師可恃者。均已調赴湘潭。陸路各營除塔齊布。周鳳山兩營正在潭城勦賊。升用同知林源恩一營駐防平江。此外岳州寧鄉兩次失利。陣亡湘勇約七八百名。又淘汰遺散湘勇已千餘名。現存營者僅及千名。難期得力。而事機所在。又不敢不急切圖之。是日卯刻。親率大小戰船四十隻。陸勇八百。馳赴靖港上二十里之白沙洲。相機進剿。午刻西南風陡發。水流迅急。戰船順風。駛至靖港。不能停留。更番迭擊。逆賊在礮臺開礮。適中哨船頭桅。各水勇急落帆收泊靖港對岸之銅官渚。賊衆用小划船二百餘隻。順西風駛逼水營。水勇開礮轟擊。礮高船低。不能命中。戰船被焚十餘隻。隨風漂散。各水勇見勢不支。紛紛棄船上岸。或自將戰船焚燬。恐以資賊。或竟被逆賊掠取。臣曾國藩在白沙洲聞信。急飭陸勇分三路連撲靖港賊營。冀分賊勢。陸勇見水陸失利。心懷疑怯。雖小有斬獲。旋即卻退。臣曾國藩見水陸氣餒。萬難得手。傳令撤隊回營。此又初二日靖港勦賊失利之實在情形也。初三日。塔齊布偵賊在潭城窰灣地方高豎望樓。逆賊散處潭城總市。將由水路逃竄。知會水師。迅速兜剿。一面於辰刻分兵勇四路進撲城市。生擒賊匪十餘名。殺斃四十餘名。賊已退敗。忽已刻大雨如注。官軍繩藥均

涇。遂撤隊回營。該逆復蜂擁追來。兵勇折回截殺。署綏靖守備張萬邦單騎衝入賊隊。手刃數賊。登時陣亡。額外童添雲。四川咨記把總岳炳榮。向前搶護。各受重傷。塔齊布指揮兵勇。分投痛勦。賊仍敗退回巢。是夜四鼓。并賊所擄上游大船數百隻。駛至密灣城市。各賊紛紛上船。希圖乘風上竄。彭玉麟商同楊載福。即於初四日卯刻。督率兩營戰船。跟幫緊追。午刻行抵下攝司。賊船檣帆林立。彭玉麟楊載福分坐快蟹一隻。三板一隻先進。賊開槍礮抵拒。水勇開放大礮。轟斃賊匪百數十人。賊船四處散駛。彭玉麟楊載福乘勢急進。遇船即燒。船上馬匹及所擄財物極多。彭玉麟楊載福令衆勇毋許上船掠取。專射火焚船。是時北風甚勁。順風縱火。遇船即著。自卯至未。燒賊船六七百隻。長髮短髮。逐浪飄流。紅巾黃巾。隨波上下。其中船戶水手。難以分別搭救。岸赭水溫。同歸浩劫。事雖慘而功則奇。水戰火攻。未有痛快如此者。當燒船緊急時。逆賊拋衣登岸。折回潭城。管帶楚勇委員江忠淑偵知。商同署湘潭縣劉建德。覓熟悉本處路徑。已遷安徽從九王炳元。六品軍功武生黃德均。帶楚勇數十。悄悄伏潭城西北角。俟賊架梯出入時。即奪梯直上。楚勇嚴陣以待。實刻果見逆賊由西門緣梯而下。伏勇將賊衆砍斃。乘勢奪梯而上。登城大呼「官兵上城」。逆賊不辨我兵多少。倉猝緣城竄逸。該勇即將城門洞開。江忠淑帶勇直入縣城。塔齊布督帶兵勇。繼至分門搜勦。當斃長髮短髮二百餘名。生擒長髮六十餘名。內一賊腰牌上寫春官副待衛書士汪秉義。安徽人。一僞司馬王玉春。一僞司馬洪大貴。皆廣西人。一頭截胎金雙龍大紗帽。身穿黃緞馬褂。下穿紅緞繡龍腿褲。背負令旂。自稱五軍統領大元帥羅口音。似廣東人。問其名堅不吐實。桀驁萬狀。當即斬決。其日又搜獲身穿黃馬褂長髮十三人。以追賊在即。未及起解。概予斬誅。將該逆衣服剝下呈驗。奪獲大小黃旗一百零一面。大礮三尊。戰鼓三面。抬槍五十四桿。馬槍六十九桿。馬騾三十五匹。黃龍金帽二頂。火藥六桶。鉛子四桶。紅衣黃巾刀矛器械無算。此初四日水師追勦大獲勝仗。及初五日卯刻。克復城池之實在情形也。現在賊匪紛紛竄逸。有上竄者。有下竄者。有徑回靖港者。皆零星逃竄。不復成軍。已飭塔齊布等分投追勦。并札飭各道府州縣四處搜拿。管帶湘勇已革升用同知直隸州知州王龔。追賊至雲湖橋。殺賊四十二名。初六日。設伏於魯家壩。殺賊三百餘名。生擒二十餘名。又一股由淥口竄至醴陵縣界。約人數百。將竄入江西萍鄉。臣等飛咨江西撫臣。速飭堵勦。此次逆賊大舉南犯。多曾經百戰兇悍之徒。意圖竊踞湘潭。與靖港之賊。互爲首尾。倘不

及早撲滅。不獨省城孤注。難以圖存。衡永郴桂及兩粵匪黨。聞風響應。從亂如歸。東南大局。不堪設想。幸仗皇上威靈。八日之內。水陸十獲大勝。全股掃蕩。賊膽已寒。凱自賊中逃出者。皆云粵楚備髮老賊。及皖鄂新附賊黨。經此番屢次痛剿之後。相向痛哭。羣起怨尤。老賊惡新賊之不爲盡力。新賊疑老賊之暗洩軍情。彼此猜忿。初二初三兩日。敢回收隊後。在軍城分黨圍鬪。自相屠戮者。約計數百之多。皆臣等意想所不到。此次水陸痛剿。斃賊近萬。所獲器械旗幟無算。兇渠僞目。除陣斬外。或斃於水。或斃於火。爲數極多。被擄解散之人。約以萬計。逆賊實已聞風喪膽。現在靖港一股。亟應回軍勦辦。俟水陸兵勇調回。卽行相機攻剿。補用副將塔齊布忠義奮發。勇敢當先。士卒樂爲之用。通城勦賊。已獲大勝。此次復著奇功。實屬武員中傑出之才。前勦辦江西土匪竄至茶陵案內。請旨賞換花翎。以副將補用。尙未接准部覆。應仍請賞換花翎。加總兵銜。並賞給勇號藍翎。守備周鳳山。饒有膽略。深得士心。上年冬間。在常寧縣洋泉道州四安橋。本年正月在道州岩頭村。屢次帶勇勦匪。迭著奇功。擬以都司保奏。三月十四日。隨同塔齊布進勦崇通賊匪。大獲勝仗。此次奮勇當先。克獲全勝。應請旨以游擊升用。先換頂戴。並賞換花翎。委員山西升用知府卽補同知褚汝航。熟悉水戰情形。才優膽壯。調度有方。請旨免補同知。以知府歸原省。儘先補用。並賞加道銜。委員卽選知縣夏鑾。督勇力戰。膽識俱壯。應請旨以同知升用。先換頂戴。藍翎。千總楊載福。以陸路武弁管帶水師。被賊槍傷左肋右腿數處。裹創血戰。奮不顧身。陸續燒燬賊船四百餘隻。請以守備留於本省補用。並請賞換花翎六品軍功。附生彭玉麟。書生從戎。膽氣過於宿將。激昂慷慨。有烈士風。臣會國藩前在岳州派往西湖搜查賊船。該生帶水勇三十餘名。分坐兩小舟。周歷重湖。沿途搜剿。殺斃長髮賊匪三十餘名。奪獲賊船數隻。擬以縣丞府經保奏。此次力疾帶勇。猶會同楊載福親坐小船。焚勦賊船六七百隻。免致他竄。厥功甚偉。應請旨以知縣歸部。遇缺卽選。分帶水勇哨官張宏邦。奮勇當先。搶上賊船。生擒黃巾賊目。並焚燒賊船數十。身受重傷。應請旨以千總歸於廣東拔補。國子監學正銜候選訓導江忠淑。係前安徽撫臣江忠源胞弟。督帶楚勇首先登城。立將城池克復。甚合機宜。應請賞加五品銜。此外各員弁兵勇奮勇出力者尙多。俟卽核明勞績最著者。開列名單。籲請皇上恩施。加以鼓勵。陣亡員弁兵勇。俟該將等查明。分別奏請賞卹。庶才傑進用而廓清可期。拔擢有真而羣才競奮。所有水陸勝負實在情形。謹據實由驛馳奏。伏乞皇上聖鑒。訓示施

行。謹奏。

靖港敗績自請治罪摺 咸豐四年四月十二日

奏爲靖港戰敗。水師半潰。請旨將臣交部從重治罪。并現在急籌補救。籲請特派大臣總統此軍。恭摺奏祈聖鑒。事。竊臣自三月十四日回泊省河。二十四五等日。派水師勦賊靖港。兩獲勝仗。二十八。九。初一。初二。初三。初四等日。派水陸各營。在湘潭連獲大勝。殺賊近萬人。燒船千餘號。大股殲滅。克復縣城。現已會同撫臣。另摺具報。惟初二日。靖港水勇潰敗。實由微臣調度乖方。有不忍不直陳於聖主之前者。自去冬欽奉諭旨。速援皖鄂。兩省之盼。望既殷。微臣之求效愈急。而其辦理亦愈乖謬。臣之所以失者。約有數端。征戰之事。論膽技或兵不如勇。論紀律則勇不如兵。募勇萬餘人。必須有大員協同管帶。又須有文武員弁及得力紳士。一二百人節節統轄。乃足互相維繫。我皇上前次諭旨。卽已預慮及之。臣先時未能奏請大員幫同管帶。又未嘗多調文武員弁分布各營。每營僅一二官紳主之。紀綱不密。維繫不固。以致潰散。其謬一也。靖港之戰。臣因湘潭水陸大捷。意欲同時并舉破賊老巢。使賊首尾不能相顧。是日風大。順水太溜。進戰則疾駛如飛。退回則寸步難挽。遠賊舟來逼。礮船牽挽維艱。或縱火自焚。或間以資賊。戰艦失去三分之一。礮械失去四分之一。是日但知輕進之利。不預爲退敗之地。其謬二也。水勇無曾經行陣之人。不得已招集船戶水手。編派成軍。訓練未及一月。陸勇雖曾經訓練。亦須隨同久經戰陣之兵。接仗一二次。乃可期其得力。今驅未經戰陣之勇。驟當百戰兇悍之賊。一營稍挫。全軍氣奪。非真勇不可用。乃臣不審調習而試用之。故其謬三也。臣整軍東下。本思疾趨出境。乃該逆大舉南犯。臣師屢挫。鄂省危急。不能速援。江面賊氛。不能迅掃。大負聖主盼望殷切之意。清夜以思。負罪甚大。愧憤之餘。但思以一死塞責。然使臣效匹夫之小諒。置大局於不顧。又恐此軍立歸烏有。我皇上所倚以爲肅清江面之具者。一旦絕望。則臣身雖死。臣罪更大。是以忍恥偷生。一面俯首待罪。一面急圖補救。現在臣處一軍。除潰敗及汰遣外。水師僅留湘潭大勝五營。二千餘人。陸路僅存戰勝湘潭與留防平江之勇二千餘人。若率以東下。太覺單薄。而大小戰船。自洞庭。夔。夔。靖。港。退敗以後。存者須將修葺。失者仍須添造。臣前於二月初五。在湘潭時。察知水勇未必可恃。當卽咨商廣西撫臣勞崇光。代募曾經戰陣之水勇一千名。旋准咨覆已在潯。梧一帶如數招集。委知府李孟羣管帶。臣已

疊次咨催。令其迅速前來。又臣於三月初七在岳州遇風壞船。回省時即派人往衡州續造大快蟹船二十號。又准兩廣督臣葉名琛。咨稱現派總兵陳輝龍督水師二百六十名。解礮一百位。已於二月二十五起程前來。此時尙未見。到亦已咨催。合此三者。又將水手認真挑換。一兩月間。水師嘗有起色。但微臣自憾虛有討賊之志。毫無用兵之才。孤憤有餘。智略不足。仰累聖主知人之明。請旨將臣交部從重治罪。以示大公。并籲懇皇上天恩。特派大臣總統此軍。臣非敢因時事萬難。遂推諉而不復自任。未經赴部之先。仍當竭盡血誠。一力經理。如船隻已修。水勇可恃。臣亦必迅速駛赴下游。不敢株守片刻。所有微臣辦理錯謬。據實直陳。自請治罪。并請特派大臣緣由。恭摺由驛具奏。伏乞皇上聖鑒訓示。謹奏。硃批。另有旨。此奏太不明白。豈已昏憤耶。欽此。」

保水陸統領各員片 咸豐四年四月十二日

再方今東南大局。江南皖鄂半淪賊中。萬不足以有爲。必須兩廣湖南併力以成一軍。從上游建瓴而下。庶足以扼賊之吭。斷賊之餉。兩廣湖南之亟宜出師剿賊。此必不可易之局也。特微臣才疏識闇。用兵無術。終必貽笑大局。是以籲懇皇上特簡謀勇兼資之大臣。畀以水陸總統重任。實見此軍關係匪細。勝任爲難。非臣敢置身事外也。至分統水陸諸人。如副將塔齊布之忠勇絕倫。守備周鳳山之精練持重。貴州知縣徐河清之膽略優長。堪膺陸路統領分領之選。塔齊布周鳳山現在巨軍。徐河清現經臣與撫臣奏調在案。水勇惟兩粵最弱。必須粵中官紳統帶。方可駕馭得宜。查廣西臬司許祥光。右江道張敬修。皆夙諳水戰。素著健卒。製備火器。多而且精。該二員膽識過人。與現在巨軍之褚汝航。新經咨調之李孟羣。均堪膺水路統領分領之選。相應請旨飭令許祥光張敬修。各帶精勇礮械來楚。併入此軍。厚集其勢。以保東南之全局。倘蒙我皇上俯如所請。得謀勇兼優之大臣。主之於上。而以此數員者。分布其間。必能同心戮力。迅掃逆氛。臣雖身膺重罪。亦足少紓耿耿之忱。謹附片具奏。伏乞聖鑒。訓示遵行。謹奏。

恭謝天恩摺 咸豐四年五月初八日

奏爲恭謝天恩事。本年五月初二日。准湖南撫臣駱秉章咨稱。准兵部火票遞到咸豐四年四月二十三日內閣奉上諭。一會國藩親督舟師進剿。雖小有斬獲。旋以風利水急。戰船被焚。以致兵勇多有潰敗。據會國藩自請從

重治罪。實屬咎有應得。姑念湘潭全勝。水勇甚爲出力。著加恩免其治罪。卽行革職。仍趕緊督勇勦賊。帶罪自效。欽此。」又准撫臣咨稱。承准軍機大臣字寄。同日奉上諭。「駱秉章等奏官軍水陸獲勝。克復湘潭縣城。又會國藩奏靖港水師潰敗。自請治罪各一摺。已明降諭旨。將塔齊布等分別加恩。並將會國藩革職。仍責令帶罪自效。以贖前愆。會國藩統領舟師。屢有挫失。此摺所陳紕繆各情。朕亦不復過加譴責。現在所存水陸各勇。僅集有四千餘人。若率以東下。誠恐兵力太單。該革員現覆添修戰船。換募水勇。據稱一兩月間。當有起色。果能確有把握。亦尙不難轉敗爲功。目下楚北賊蹤。由應山竄回德安。隨州之賊。亦回武漢。是鄂省望援甚急。該撫等務當督飭水陸各軍。迅將此股敗竄之匪。殲滅淨盡。兼可赴援武昌。以顧大局。將此由六百里加緊諭知。駱秉章兼諭知塔齊布會國藩知之。欽此。」竊臣自上年十月十一日奉命帶勇援鄂。嗣後屢奉諭旨嚴催。飭令迅速東下。不准專顧桑梓。乃臣於正月由衡赴省。卽值賊舟上竄。賴寧鄉戰勝。驅逐出湖。臣率師追至岳州。又值該逆數萬人。大舉南犯。仰託皇上威福。湘潭水陸兩軍。大獲全勝。殲賊近萬。以本省言之。有岳州靖港之敗。有寧鄉湘潭之勝。臣之功罪。尙不相掩。以大局言之。武昌危急。不能赴援。江面逆氛。不能迅掃。奉命數月之久。而水師忽然半潰。戰船復多損失。上無以副聖主飭催之嚴。下無以應鄰省望援之切。臣所以誠惶誠恐。且愧且恨。無地自容。籲請治罪者此也。迺蒙皇上逾格。天恩俯從寬宥。仍令督勇勦賊。既曲貸其前愆。復勉期其後效。重申寄諭。訓示周詳。聞命之下。感激涕零。現在賊踪全竄。下游所有六溪口。倒口。金口等處支河小湖。藏泊船隻之所。皆被該匪占據。或於口門築造礮臺。兩岸修置土城。以陸路之賊守河干之船。爲抵死抗拒之計。臣此次整旅東下。喫緊固在水路。而制勝尤須陸軍。日內將陸勇嚴汰另募。又添用勁兵。以濟勇之不足。水師亦重整規模。廣東派來之兵。與廣西新招之勇。計於本月內。可以到省。衡州新造之船。與長沙重修之船。亦於出月初。可以竣工。一俟料理完畢。臣卽星夜遄征。誓殲此賊。以雪挫敗之恥。而贖遲延之罪。庶冀稍答高厚鴻慈於萬一。所有微臣感悚下忱。理合繕摺叩謝天恩。伏乞皇上聖鑒。謹奏。殊批。「知道了。欽此。」

覆陳湘潭寧鄉靖港勝敗情形片 咸豐四年五月初八日

再臣摺奉到硃批。「此奏太不明白。豈已昏憤耶。欽此。」臣竊自三月十四日回泊省河。卽有賊舟千餘。竄至梓

樹港喬口靖港一帶。因臣舟師在省。不敢直犯長沙。遂由西岸登陸。上竄寧鄉湘潭。意欲盡擄上游船隻。爲兩頭夾攻。困我省垣之計。臣於十三日。在湘陰途次。即飛調塔齊布周鳳山倪長誥等。由通城回省。旋於十八日遣魏崇德等。帶陸勇千八百人。由寧鄉陸路迎剿。二十一日二十五日。兩次遣水勇千餘人。至靖港水路堵剿。水路之師。二十一日小勝。二十五六等日大勝。殲賊百餘。陸路之師。二十五日始在寧鄉開仗。我軍挫敗。傷亡者五百餘人。塔齊布周鳳山等回省。即於二十六日渡湘而西。臣送至河干。囑其與魏崇德等合師堵賊竄湘潭之路。維時尙未知二十五日寧鄉已敗之信也。塔齊布等在途次聞信。即折回湘潭。二十八日以後。六獲大勝。前此會奏摺內已詳悉具報矣。水軍自兩次在靖港迎剿後。二十七日。仍回省河。聞湘潭失守之耗。二十八日。遣候選知府褚汝航等率五營水師二千餘人。往潭攻賊上游新擄之船。初一日以後。屢獲勝仗。亦經會奏在案。四月初二日。臣自率留省之水勇五營。陸勇八百。前往靖港。意欲同時並舉。破賊老巢。斷賊歸路。不料因風急水溜。纏挽難行。遂至敗壞。前此三月二十五日。嘗靖港水路獲勝之日。即寧鄉陸軍敗北之日。後此四月初二日。嘗靖港水陸挫敗之時。即湘潭水陸大捷之時。陸路竄潭之賊。係由湘西繞越而上。水路集潭之賊。係由上游擄船而下。均未由省經過。此賊蹤及用兵之曲折情形也。臣自靖港歸來。念船礮損失。不能遽修。武昌危急。不能趕救。憂憤之極。昏憤數日。搢內僅自陳紕繆。未能將上下勝敗異地同時之故。詳晰聲敘。誠如聖諭所謂「太不明白」。茲欽奉批飭。不敢不縷細覆奏。仰慰聖廬。謹奏。硃批。「知道了。欽此。」

請提督塔齊布會合東下片 咸豐四年五月初八日

再此次欽奉上諭。「著駱秉章塔齊布會國藩即督水陸兵勇。乘勝即行統兵東下。迅殄妖氛。欽此。」伏查靖港餘匪。業於四月初八九等日。全竄下游。岳州以上。現無賊蹤。署提督塔齊布即日先赴岳州。臣親帶水陸兵勇。出月初准赴岳州。自岳州以下。即出湖南地境。臣有援鄂之責。自應出境勦賊。撫臣駱秉章職任地方。難以出境。署提督塔齊布亦有地方專責。未敢遽赴外省。惟塔齊布與臣共事年餘。實見其忠勇絕倫。堪膺辦賊重任。曾經奏保在案。今同奉諭旨。統兵東下。該署提督自應會合遣征。無庸稍涉拘泥。殊守本省。其提督印務。應否派員護理。抑或帶印出省之處。伏候聖裁。謹附片請旨。硃批。「另有旨。欽此。」

請單銜專摺奏事片 咸豐四年五月初八日

再臣係革職人員。蒙恩飭令督勇自效。此後出境勦賊。所有一切軍情。必須隨時奏報。又疊奉諭旨垂詢。隨帶員弁人數。稟摺船隻數目。及通城勝仗。遵旨酌保數員。均應詳悉覆奏。前次挫敗。有應行參劾之員。此次水陸二軍。重定章程。亦擬奏求訓示。可否容臣專摺奏事之處。出自皇上天恩。微臣未敢擅便。謹附片請旨。殊批。著准汝單銜奏事。欽此。」

水師克復岳州南省已無賊蹤摺 咸豐四年七月十一日

奏爲水師克復岳州。越日大股續至。復被水師痛剿。全數殲滅。南省已無賊蹤。恭摺馳奏。仰祈聖鑒事。竊逆賊自復踞岳州。分股竄越西湖。攻陷龍陽。分陷常澧。嗣聞官軍大至。卽於六月初五六等日。駕駛船隻。退守岳州。東南門外添築土城木城二十餘座。新牆對河。及閣鎮市等處。四面設卡。折毀橋梁。爲負嵎久抗之計。臣等念賊舟累萬盈千。非舟師莫能制其死命。卽飭水師後營。兼營務處道銜山西卽補府褚汝航。副後營升用同知夏鑾。左營卽遷知縣彭玉麟。右營卽補守備楊載福。各帶水勇。合以先鋒嚮導等船。共計二千人。於十三日自省河頭幫起行。進泊鹿角。過賊上竄之路。時提臣塔齊布陸營駐紮新牆。分兵援常澧一帶。臣等因其兵力稍單。會調保升知府羅澤南帶湘勇一千。新授岳州府知府魁聯帶寶勇一千。先後會剿。復調周鳳山由常德馳至新牆。搭造浮橋。約期水陸並進。二十七日。褚汝航等進泊萬石湖。親駕小船。前往君山一帶。探明虛實。察看地形。見賊舟灣泊甚多。遂將小船前往誘敵。逆舟開砲抗拒。嚮導官藍翎軍功文生何南青奪獲賊船一號。擒賊五名。因天色已晚。仍回泊萬石湖。該營官等業已探明虛實。會商定計。以君山雷公湖等處。先須設伏。再用小艇。駛入南津港。誘賊出追。乘隙截擊。遂於二十八日。繪圖貼說。稟商臣等。二十九夜分五隊進兵。彭玉麟埋伏君山南岸。楊載福埋伏雷公湖上游。夏鑾及先鋒營由扁山直趨南津港。褚汝航隨後策應。又派何南青在新牆河口多張旂幟。作爲疑兵。午刻。夏鑾等舟行距港不遠。該逆出拒。我軍開礮一週。轉舵佯敗。該逆不敢出追。我軍轉頭開礮。彼此相持。突遣三板數隻。斜趨入港。賊遂蜂擁而出。三板又復佯卻。逆舟左右攻圍。忽楊載福雷公湖伏兵先起。抄賊之尾。彭玉麟君山伏兵繼起。攔賊之腰。褚汝航坐船亦到。併力合攻。擊沉賊舟數隻。中有大頭目身穿黃馬褂手執黃旗。被

我軍轟斃落水匪船。登時淆亂，狂竄下游，自相碰擊。我軍嚴鼓進追，燬沉賊船百餘號。轟斃爛斃賊匪約二百餘名。生擒六十二名，奪獲賊船大小三十四隻。鐵礮十二位，銅礮一位，抬槍四十桿，馬二十二匹，旗幟偽書無算。是夜各營暫泊君山東岸，南津港賊舟宵遁。初一日五鼓，各戰船駛至城下。見水陸之賊並空。褚汝航率水勇入城，安撫難民，踴毀賊營。此次三十初一等日水師獲勝，克復岳城之實在情形也。時各營水師分泊南津港君山一帶，仍刻刻戒嚴，防賊再犯。初二戌刻，探明下游有賊船駛至。該營官傳令各營，不許張燈，止暗點火香火繩。坐守礮側，將小舟設伏港口。大船分布湖心，預備迎敵。初三日卯刻，賊果蜂擁而來。我軍分五隊迎敵。先令嚮導官何南青先鋒蘇勝等誘敵。褚汝航率夏鑾由中路迎敵。彭玉麟領各船仍在左邊繞湖之西，遙抄其尾。楊載福領各船仍由右邊沿湖之東，斜擊其腰。該匪船駛過城陵磯，即遇嚮導官小船，意甚輕之。何南青繞湖佯走，逆船尾追。我先鋒艇退出，褚汝航夏鑾催各船齊進，槍礮兼施。趁北風稍逆，之字斜行，穿梭開礮，擊折該匪頭船之舵。該匪紛紛落水，其船遂爲我得。各勇爭握藤牌，跳船立斬賊首。復有大鈞鉤船，上坐戴紫金冠穿黃馬褂黃傘龍旗之賊目。我軍攢礮齊擊，各兵勇必欲得而甘心。該匪脫袍撲水，登時泗沒。彭玉麟由湖西抄尾而來，正遇大鈞鉤船數隻，扣篷迎敵。彭玉麟親點大礮，羣子散落。中賊十餘人，賊船即時紛亂，復拋擲火罐。卽中賊之火藥船，大煙突起，迷漫半湖。哨官把總孫昌國爭先跳入賊船，被賊還擲火包，身受重傷。左營各戰士，尤不稍退怯，反冒火衝煙，奮力追殺。鐵斃偽丞相一名，生擒三十五名。楊載福身坐三板艇，由湖東沿岸斜行，捷如飛鳥。初無礮聲，及近賊船，舉旗一招，衆礮齊響，斃賊十餘名。內有船插黃旗，身披黃袍之賊，執兵護衛者十餘人。招手相向，楊載福憤甚，手挺長矛，催船前進。登時刺殺。餘匪全行撲水，逆船遂爲所獲。楊載福微傷左臂，轉戰不休。事後查得黃袍之匪，爲汪得勝偽官丞相者也。該匪三路皆敗，自相仇殺，狂竄下游。褚汝航出入於濃煙巨浪之中，往來策應。督令大隊進追。由城陵磯螺山白螺磯等處，直追至臨湘縣對河，距岳州七十五里。時日已西沉，始行鳴金收隊。逆船三百四號，全軍覆沒。共計斬首二百七十二級，生擒長髮短髮一百三十四名，奪船七十六號，燒斃爛斃之賊，難以查悉。所獲號旗軍械，據褚汝航夏鑾開單呈繳。大小鐵礮二十五位，抬槍紅槍一百一十三桿，火藥二十八桶，鐵彈三十一桶，藥箭一匣，黃馬褂三件，黃繡花蟒袍二件，繡龍金花帽十三頂，大黃統傘三把，龍虎旗七面，令箭十

三枝。繡字炎三總制龍帽一頂。紫金冠一頂。紅旗號掛風帽三捆。鐵筒筆架等共四十一件。彭玉麟呈繳大小礮十七位。馬十四匹。大小黃旗六十餘面。紅黃號馬褂六十餘件。火箭一捆。龍袍二件。偽丞相大黃龍虎旗六面。子藥八桶。抬槍刀矛百餘件。楊載福呈繳黃旗號褂補子三捆。龍袍二件。大小礮十四位。抬槍鳥槍長矛短刀百餘件。火藥鉛子三桶。何南青呈繳偽秋官右丞相坐船一隻。米船二隻。號褂風帽一捆。槍礮刀矛九十六件。騾馬五匹。此次逆賊重踞岳州。被官軍擊退復集。老長髮悉銳來犯。意欲將我軍誘泊孤港。然後水陸夾攻。計甚狡毒。幸我師連捷。轟擊無遺。其由陸路同時來犯者。復經提臣塔齊布派都司彭三元諸殿元普承堯等。沿岸截剿。轟斃執黃旗賊目一名。餘匪百餘名。生擒四十五名。奪賊馬十四匹。賊船八隻。旗幟號令軍械二百餘件。水路敗竄上岸之賊。概經我軍截殺。此皆仰託皇上天威遠震。故能將士用命。大挫兇鋒。郡城克復。賊蹤遠竄。道銜山西即補府褚汝航總理營務。謀定後戰。膽識過人。應請免補知府。以道員歸部。儘先選用。升用同知。遇缺即選。知縣夏鑾。輕舟誘賊。乘勝力追。不避危險。應請以同知歸部。遇缺即選。並賞戴花翎。即選知縣彭玉麟。忠勇性生。氣吞兇逆。奮不顧身。應請加知州銜。並賞戴花翎。補用守備楊載福。手刃賊目。裹劍力戰。所向無前。應請以都司留於本省。遇缺即補。並請賞加勇號藍翎。軍功文生何南青。嚮導得力。洞悉賊情。應請以主簿歸部選用。其餘出力員弁兵勇。可否容臣等擇其尤爲出力者。核實開單保奏。出自皇上天恩。所有水師克復岳州。大股續至。復被水軍痛剿。全股殲滅各緣由。謹會同提臣塔齊布恭摺。由驛六百里馳奏。伏乞皇上聖鑒。訓示施行。謹奏。

調浙江龔振麟來楚造礮片

咸豐四年七月十一日

再逆賊占據長江三千餘里。擄掠民船數萬餘號。此次舟師進剿。即使處處得手。亦恐非數月半年所能殄盡。所有礮位一宗。必須廣爲儲備。且從前失陷城池。礮位皆爲賊有。現在克復岳州常德。將來克復武漢黃州。皆須多備礮位。乃足以資防守。除奏請飭催兩廣督臣續解夷礮數百尊外。查有浙江候補知縣龔振麟及其子龔之棠。精於造礮。自製鐵模。與洋礮無異。合無仰懇皇上天恩。飭下浙江撫臣飛調候補知縣龔振麟并其子龔之棠。迅速來楚。其曾經造成之大小鐵礮模。一并帶來。以資速鑄。臣等一面奏聞。一面咨商浙江撫臣黃宗漢。專差迎提。搬取鐵模等件。如蒙諭旨允准。飭調。其於舟師礮位之接濟。南北兩省各城之防守。均屬大有裨益。伏乞聖鑒。訓

示施行謹附片具奏請旨

請催廣東續解洋礮片 咸豐四年七月十一日

再查水師事宜。以造船置礮二者爲最要。船隻縱修造堅固。而風波間有飄失。戰陣不無損傷。數月之後。損失者必須添補。完好者亦須抽檢。若非早爲預備。隨時整理。直待全數破壞之時。衆船齊修。必至停兵待船。坐失機宜。臣國藩自洞庭遇風之後。卽於三月中旬。在衡州設廠續造新船六十號。自靖港敗退之後。又於四月下旬。在長沙設廠修理舊船百餘號。衡州廠工於五月之末完竣。長沙廠工於六月之末完竣。現雖整備各船。足資征剿。而兩處船廠。仍不停工。臣駱秉章與臣國藩悉心咨商。酌留戰艦十餘隻。兵勇數百餘人。在省河操演。如出征之船。偶有損壞。則由衡廠省河駕放好船。前往更換。庶源源接濟。無老師糜餉之患。至於礮位適用之品。最爲難得。此次蒙皇上屢降諭旨。飭令兩廣督臣葉名琛購備洋礮。爲兩湖水師之用。現已先後解到六百尊來楚。皆係真正洋裝。選驗合用之礮。湘潭岳州兩次大勝。實賴洋礮之力。惟原奉諭旨。購辦千餘尊。現止來六百尊。尙屬不敷分配。且江面非可遽清。水師尙須增添。尤須有洋礮陸續接濟。乃能收愈戰愈精之效。相應請旨飭催兩廣督臣。將應行續解之夷礮數百尊。趕緊分起運解來楚。於江面攻剿。大有裨益。謹附片具奏請旨。

水師前後起行日期片 咸豐四年七月十一日

再前經咨調廣西升用道李孟羣招募兩廣水勇一千名。於六月初六日。始到長沙。廣東續解之五起夷礮一百八十位。於六月十二日始行解到。山東登州鎮總兵陳輝龍到湘以後。新造淺水拖罟二號。於六月之末畢功。臣國藩卽於七月初六日。自省河起旋開行。鎮臣陳輝龍帶廣東水師弁兵四百餘員。李孟羣帶兩廣水勇一千名。亦於六月初八日等起行。均用湖南柁工水手人等攙配。約計前後兩幫水師。共四千餘人。又用陸勇二千。雇船隨水師以行。每遇戰船灣泊之處。卽用陸勇登岸紮營。以資護衛。現在水師前幫二千餘人到岳。已屢獲勝仗。臣國藩率後幫到岳。卽當會合痛剿。冀埽逆氛。以慰聖廑。所有水師前後起行日期。謹附片奏聞。 硃批。知道了。覽奏稍慰朕懷。汝能迅速東下。藉此聲威。或可掃除武漢之賊。朕日夜焦盼。憂思彌增。護船陸勇。終恐未可深靠。欽此。」

水師疊獲大勝將犯岳賊船全數殲滅摺 咸豐四年七月十六日

奏爲水師疊獲大勝將二次三次犯岳之賊船全數殲滅恭摺馳奏仰祈聖鑒事竊前幫水師於初一日克復岳州初三日大獲全勝業將各情形會奏在案初五日戌刻嚮導官何南青探知下游播鼓台一帶有賊船數百號恐復乘風上竄徹夜戒嚴初六日卯刻該營官等會議以北風甚勁與其坐待賊至不若迎其未至而擊之遂令左營彭玉麟右營楊載福前敵副後營夏鑾先鋒營蘇勝等二隊策應營務處褚汝航自領本營督陣未刻行至道林磯遙見逆舟蜂擁而來及我軍頭敵將到該匪一面開礮抗拒一面齊卸布帆俾泊老岸爲以逸待勞反客爲主之計左右兩營由西岸占上風攻擊左營戰艇駛近賊寨開礮數輪轉帆稍息右營連檣繼進開礮數輪亦轉舵稍息左營復進如此更番疊戰正副後營及先鋒營各船分兩翼包住併力向前浪激煙迷礮子如雨有持花筒燒賊者有將火罐遙擲賊船者有手握藤牌躍上賊船受傷者有以三板小艇逼近誘賊反被擊中者雖殺賊甚多而我軍傷亡亦衆鏖戰二時之久勝負未分時日將西墜北風大作下游賊艘仍復魚貫而上計停泊者續來者約賊舟五六百號而我軍船僅七十餘離南津港老營已逾六十里之遙士卒竟日未食若即鳴金收隊該匪必趁勢壓追有不堪設想者該營官等於進退兩難之中出萬死一生之策楊載福親駕三板艇穿入賊隊且戰且下約三里許繞賊之背截其來船轟沉湖北划子三號船上之賊紛紛墮水復親擲火罐火毬因風縱火自下而上連燒十數船下游續來之船始行退竄上游賊船回顧本營屯聚之處延燒已徧烈焰冲天倉皇失措賊隊遂亂彭玉麟見五彩畫龍三桅船知係賊目冒險衝入該匪攢礮轟擊兼放火箭彭玉麟頸後及左手右腋三處受傷哨官泰國長中礮陣亡彭玉麟猶裹劍力進竟奪其船船中收得龍袍龍帽上繡金字偽銜鋪陳華麗金碧燦煌乃僞北王章正之兄之坐船賊中稱爲「國宗兄」巨國藩前經密奏者也時褚汝航麾旗督戰攔腰截擊復過畫龍巨艦遂作擒賊擒王之計急起直追槍礮環擊該匪勢不能支上岸狂竄落水者無數其船遂爲所獲並獲僞印一顆查係僞承宣林姓坐船其裝飾與章逆之船相等夏鑾率哨官歐陽春往來衝擊槍斃僞十三檢點黎振輝該逆向眇一目屢次上犯湖南匪黨敗竄之時該逆猶持刀督戰竟被殲旃後營哨官守備羅管全把總呂鎮往來夾攻轟斃僞丞相會姓奪獲僞印一顆時各營奮力合攻上岸之賊如蟻緣牆撲水之賊如鳧

逐浪。餘皆自投烈燄。燒燬無遺。是日自未至戌。鏖戰數時之久。晚間仍在螺山對岸紮營。約計燒船四百餘號。其得脫者。僅數十號耳。斃賊約二千名。生擒百二十餘名。奪船二十餘號。內有長龍戰船一隻。大礮十四位。繡字北殿右四承宣金龍冠一頂。殿前正丞相龍帽一頂。功勳北殿右二承宣龍帽一頂。北殿右四承宣黃帽二頂。功勳南殿左一指揮帽一頂。功勳南殿左參護帽一頂。承宣將使紫金冠一頂。北殿承宣繡龍風帽二頂。各繡僞銜於冠上。五色繡紛。修麗無匹。內有十四龍金冠一頂。鑿金爲字。製尤僞妄。又黃緞傘三把。繡龍黃馬褂二件。黃羽絨馬褂一件。畫龍官扇六把。紅黃繡龍桌圍二件。龍袍二件。蟒袍一件。承宣補褂一件。團龍補服圓領袍一件。大紅緞鞋三雙。黃緞鞋一雙。承宣龍印一顆。丞相龍印一顆。印匣均用黃龍綉袱。裹以銀葉。其餘旗幟。號衣。紅巾。黃帽。抬槍。子藥。刀矛。馬匹之屬。合計千餘件。不能悉載。此初六日大獲全勝之實在情形也。巨國藩正議會揭飛報。於抵岳時拜發。隨於十五日已刻到岳。據各營官稟稱。十四日午初。該逆在城陵磯下游埋伏小划二百餘隻。匪黨皆上坡藏匿。其螺山對岸之夾洲一帶。灣船約千餘號。沿岸築有礮台。洋陵磯以上。一字排列戰船數十號。意欲以小艇誘我軍深入。然後伏舟齊起。迎頭抄尾。計甚狡毒。時提臣塔齊布陸營駐紮岳州北門五里外許。褚汝航先期稟商預伏。水陸夾擊。隨率楊載福彭玉麟夏鑾等魚貫而行。舟過城陵磯。該匪以爲中計。伏匪正欲上船抄尾。不期樹林內號礮一聲。提臣陸路伏兵四起。該匪紛紛上船。水軍分途迎擊。該伏匪復竄上坡。有陸兵截殺者。有亂擠落水者。該逆見伏船已破。心遂忙亂。我軍乘勢擠進。候補千總張世基然燒賊船一隻。時螺山一帶上駛之賊船。約一千五六百號。見火起。卽行折回。復被我軍攢燒。而該匪戰船猶橫阻江心。開礮抵拒。候補把總歐聯彪奮斬紅衣長髮老賊一名。右營哨官秦國祿復奪得快蟹賊船一隻。上有洋礮十一位。卽前此靖港敗仗所喪失者也。後營哨官羅管全手提長矛。躍入賊船。殺斃長髮賊數名。左營各哨官。併力拋擲火礮。延燒賊船十餘隻。褚汝航坐船與賊舟僅離尋丈。被一礮傷勇三人。立斃其二。各勇愈憤。開礮愈密。賊正思退。有藍油匪船一隻。上插大黃旗。載悍賊百許人。被我軍三板七號長龍四號。預礮圍擊。該匪紛紛撲水。僅贖七名。歐陽春見贖匪無多。急欲躍上賊船。被賊拋一火彈。反將我軍長龍船延燒。歐陽春等情急。勢欲撲水。各三板竭力搶救。而藍油匪船竟得乘空逃出。其餘賊船亦皆下竄。時已昏黑。未便窮追。水陸各營。均卽收隊。三更以後。水軍回泊南津港。總計

燒賊船三十餘號。奪賊船七隻。羸斃溺斃。斃約三四百名。生擒三十五名。此二次該逆從武漢下游分起上犯。誓爭岳州。仍處處埋伏。純用詐謀。幸仗皇上天威。屢戰屢捷。以少勝多。斃斃大頭目數名。將士非常奮勉。當酷暑。鏖戰之際。每出隊俱用長巾噴水。圍繞心窩。馳騁烈日之下。隨殲隨乾。辛苦萬狀。傷亡亦復不少。然士氣終不稍挫。營務處兼正後營道銜山西卽補府褚汝航躬親督陣。膽力俱壯。前次已保升道員卽選。此次應請賞加運司銜。副後營升用同知夏鑾。帶勇策應。甚合機宜。前次已保同知卽選。并請賞戴花翎。此次亦應請賞加運同銜。左營卽選知縣彭玉麟。裹創陷陣。誓不與賊俱生。前次已保同知銜。並請賞戴花翎。此次應請免選知縣。以同知歸部選用。右營升用守備楊載福。繞出賊後。乘風縱火。初六日之戰。甚得其力。前次已保都司卽選。並請賞加勇號。此次卽免補都司。以游擊留於本省。遇缺卽補。嚮道官監翎軍功何南青。偵探得實。前次以保主簿選用。此次請免選主簿。以布政司照磨歸部卽選。其餘出力員弁兵勇。請由臣等核其勞績最著者。開單籲懇皇上恩施。以示鼓勵。哨官六品軍功秦國長。前數次打仗出力。擬保千總。此次擊賊陣亡。深堪憫惻。合無仰懇皇上逾格天恩。准照千總例給卹。以作士氣。而慰忠魂。其各營傷亡兵勇。現飭查明。照律辦理。所有水師迭獲大勝各緣由。謹會摺由驛六百里馳奏。伏乞皇上聖鑒。訓示遵行。謹奏。

請領捐照摺 咸豐四年七月十六日

奏爲請旨飭部將前請部監執照頒發。以速捐務而濟要需。恭摺奏祈聖鑒事。竊臣於上年十一月二十六日附片具奏。請飭部查照。凡由臣經手援本省城工事例上捐者。仍准歸入籌餉新例之內。由臣開單咨部。隨時發給部照。此後臣行營所至。如湖北安徽等省。准令臣隨處勸捐。一例咨部。仍隨時發給部照。庶捐生不致觀望等情。於十二月十六日奉到硃批。該部知道。欽此。欽遵在案。嗣於本年二月十五日奏請江西四川湖南三省各派大員勸捐。仍照部定新章。預發空名執照。由各員填給。請飭部頒發空白部監二照。共四千張。以一千張封發江西。以一千張封發四川。以一千張封發湖南及臣管。當奉硃批。戶部速議具奏。欽此。迄今數月之久。尙未接准部文。六月二十二日。傳閱邸抄。本年三月初六日上諭。戶部奏遵議會國藩請頒發部監執照。派員勸捐軍餉一摺。著照會國藩所請。湖南卽派署鹽道夏廷樾。編修郭嵩燾。江西卽派前任侍郎黃贊揚。升用知府朱

孫詒。四川卽派按察使胡興仁。編修李愷。各就地方情形。妥爲勸諭。以濟會國藩所帶礮船軍需之用。並令各該督撫添派公正紳士。幫同地方官實力辦理。欽此。」恭讀之下。始悉臣前奏已蒙諭旨允准。因道途梗塞。迄未接准部文。亦未見頒到執照。現在臣與提臣塔齊布一軍。水陸共計一萬三千餘人。月需餉銀六七萬兩。湖南司庫久形支絀。卽奉諭協濟之川廣江西等省解款。亦屬無多。本省派員籌捐。又因換照無期。不甚踴躍。目下水陸兩軍。卽日出境剿賊。求一月之口糧。尙不可得。臣與提臣萬分焦灼。是以專差竇摺赴京師。令赴部守領前項執照。合無仰懇皇上天恩。飭部迅將部監執照共二千張。封給差兵領回。其江西四川各一千張。亦懇飭令設法封記。各該省。以便廣勸而濟要需。無任迫切禱企之至。再臣自上年八月移駐衡州。卽設局勸捐。凡捐虛銜者。俱借用湖南藩司城工例實收。捐實職者。俱借用籌餉事例實收。嗣蒙聖慈俞允。臣隨地勸捐。一俟各部換照。自長沙起行後。臣又將原奏自刻實收。一體發給各捐生收執。計自上年九月至本年五月。共捐過三百四十八名。現已造冊送部。仍將副實收彙繳。俟前項空白執照領到時。擬先將現捐各員如數填給。庶已捐者不稍留難。未捐者益臻踴躍。於軍餉不無裨益。合並陳明。所有專差請領執照緣由。理合專摺陳奏。伏乞皇上聖鑒。訓示遵行。謹奏。硃批。戶部速行查辦。欽此。」

水師失利陸軍獲勝摺 咸豐四年七月二十一日

奏爲水師失利。鎮道員弁同時陣亡。陸營旋獲大勝。恭摺奏聞。仰祈聖鑒事。竊初三初六十四等日。水師連獲勝仗。業經馳奏在案。臣國藩偕鎮臣陳輝龍於十五抵岳時。賊雖屢敗。尙盤踞城陵磯下游一帶。又將漢口賊舟數千。傾巢上犯。連檣數十里。出沒無常。陳輝龍卽欲親督廣東水師四百餘員。於十六日出隊進剿。臣國藩以大隊甫到岳州。必須相機漸進。囑緩其行。臣塔齊布亦勸其稍緩。陳輝龍謂自四月下旬到楚。因船礮未齊。坐糜餉項。至兩月之久。啓行後復守風耽閣。焦灼難名。急急殺賊自效。且水陸官軍宜先扼城陵磯。以固南省四川門戶。若不乘勝急剿。使賊占踞此地。剿辦愈難。其持論不爲無見。褚汝航夏鑾亦俱從慮。並請隨同進剿。臣國藩因陳輝龍在水師營伍四十餘年。老成練達。必能相機而行。且褚汝航等屢勝之將。每論戰守。皆合機宜。當不至於貽誤。是以未經阻止。是晚仍函商該鎮。囑以下游水急。進易退難。如遇南風。不必開仗。且沿江港汊。慮有埋伏。獲勝後

慎勿窮追等語。鎮臣函覆亦深以爲然。並知會提臣。預撥陸路兵勇策應。十六日辰刻。陳輝龍自坐拖罟督率所部前行。褚汝航夏鑾分坐戰船繼進。李孟羣尙未到。岳其前隊廣勇先到者。亦隨陳輝龍會剿。左營彭玉麟。右營楊載福。均酌撥長龍三板。藉作聲援。時風色尙平靜。行至城陵磯。正遇該逆出隊上犯。該鎮道等排陣合攻。鎗礮齊發。轟斃賊匪數十名。燬賊船數隻。賊卽下竄。游擊沙鎮邦礮船。乘勝跟追。陳輝龍見風勢愈大。卽插旗收隊。因恐沙游擊頭船有失。又復督催拖罟。趕往救護。船身重大。膠淺於旋渦激流之中。該逆見拖罟膠淺。卽時蜂擁而來。旋湖港伏船亦出。並潛由西岸逼進。而上。復有逆賊數百人。在岸上護縴夾攻。廣東弁兵之船。與廣西何越瑛等之船。均奔往救護。又被風橫吹而下。互相擁擠。鎗礮難施。當被賊船擁近。兵勇陷入重圍。不能進退。被賊戕斃多名。餘皆斃水逃生。陳輝龍沙鎮邦均卽陣亡。褚汝航等見陳輝龍危急。義不獨生。馳往拚救。無如賊勢益衆。我軍勢不能支。褚汝航手刃數賊。夏鑾與賊交鋒。均被重創。落水殉難。廣東署千總何若澧。廣西帶勇候選府經歷唐巖。一同遇害。惟時提臣陸營雖出隊至城陵磯。因隔港不能飛越。無從救援。各戰船有冒死突回者。賴前營及左右二營。以三板艇斷賊尾追。行至城陵磯。又得陸營接應。始獲保全。計陳輝龍一營船礮盡失。褚汝航夏鑾二營失去快礮四隻。三板六隻。李孟羣一營。失去快礮四隻。波山艇一隻。長龍二隻。三板四隻。惟彭玉麟楊載福完全無恙。此十六日水師失利之實在情形也。臣國藩與陳輝龍等經營數月。晝夜趕辦。每船器械。至百餘件之多。一旦損失將半。傷心隕涕。憤恨何言。十七日。收集散亡。點存礮械。一面飛催省城所造三板等船。以資添補。十八日卯刻。臣塔齊布親督陸營出隊。適逆匪三千餘人。由城陵磯舍舟登岸。思欲據險紮營。並分三股來撲。我軍亦分三股迎剿。臣塔齊布匹馬當先。兵勇奮力猛進。陣斬悍賊十餘名。該逆猶抵死抗拒。中軍參將玉山將自製火箭。親點數枝。延燒賊隊。賊勢稍卻。突有滿髮長髯大賊目。身穿青綳短衫。急起來犯。戳傷臣塔齊布坐馬。兵丁黃明魁用矛刺翻該逆。回矛相向。致傷右脅。衆兵一擁向前。登時砍斃。當奪大黃旗一桿。上書「秋官右正丞相」字樣。賊喪頭目。始行潰逃。其左右兩股。亦被我軍截殺四百餘名。該逆見中路已潰。猶欲佯敗。以圖合抄我軍中路之尾。我軍愈殺愈奮。呼聲震天。又斃賊匪三百餘名。賊始紛紛敗北。搶舟逃竄。復被我軍截殺。直追至擂鼓台地方。計共殲斃賊八百餘名。落水死者無數。奪獲軍械旗幟號衣三百餘件。生擒二十三名。此十八日陸路獲勝之

實在情形也。伏查山東登州鎮總兵陳輝龍自到湖南以來。造船製械。事事躬親。於水師事宜。實屬閱歷有得。每與臣等言及賊勢披猖。誓欲決一死戰。此次雖乘勝輕進。而忘勇奮發。大節克全。深堪憫惻。應請飭部照例議卹。保升道員。並加運司銜。褚汝航保升同知。並加運同銜。夏鑾自去冬到湖南。經臣國藩委令造船帶勇。屢挫逆鋒。湘潭大戰。岳州四捷。該員等之功焉多。此次又以救護鎮臣。奮勇捐軀。與敢不相救者迥別。可否請旨飭部照保奏升銜議卹之處。出自皇上天恩。廣東提標水師右營游擊沙鎮邦。大鵬協標右營署千總何若澧。候選府經歷唐際奮勇捐軀。均請飭部照例議卹。以作士氣。而慰忠魂。其餘陣亡弁兵。俟查明分別奏咨辦理。至十八日一戰。嘗欲逆方張之會。立挫兇鋒。人心大定。所有陸戰出力之永綬協把總童添雲。湘潭案內。已保藍翎守備。此次衝鋒突陣。所向無前。應請免補守備。以都司補用。並賞換花翎六品軍功。周岐山已保藍翎把總。此次殺賊最多。應請免補千總。以守備用。並賞換花翎。撫標兵丁黃明魁。湘潭案內。已保藍翎外委。此次陣斬賊目。身受重傷。應請免補外委把總。以千總儘先拔補。仍賞戴藍翎。其餘出力弁兵。可否容臣等核實開單請獎之處。出自皇上天恩。臣國藩雖無節制鎮臣之責。惟同辦一事。未能極力阻止。謀定後進。以致挫失。咎實難辭。應請旨交部嚴加議處。現在水陸關鑿。以城陵磯荆河腦爲扼要之區。如能防守謹嚴。則西可塞由荆入蜀之門。南可截由湖入湘之路。惟荆河以上賊蹤游奕不少。水師新挫。上下勢難兼顧。臣等惟有竭力籌維。扼守要隘。先清上游。以期殄逆氛。仰紓聖慮。所有水師失利。陸軍獲勝各緣由。謹會摺由驛六百里馳奏。伏乞皇上聖鑒。訓示遵行。謹奏。

李卿毅請卹片 咸豐四年七月二十一日

再臣國藩前經咨調廣西平樂府知府升用道李孟羣。招募廣西水勇一千名來楚協剿。曾經奏明在案。該道在廣西屢著戰功。深悉賊情。於六月初六日。督勇到省。其時適聞武昌再陷。該道之父李卿毅方署湖北臬司。即知其萬無生理。因道途梗塞。未得確信。不敢發喪。該道忠憤鬱結。焦急難名。晝夜趕辦船楫。以期迅速出征。爲報讎殄逆之舉。臣國藩於七月初六日起柩。該道即於初八日成行。十五日舟次萬石湖。據逃出家丁寇升來報。具述該署臬司殉難情形。該道始得發喪成服。十六日行抵岳州。赴臣國藩行營。具稟稱。一竊職父係河南光州舉人。由大挑分發四川。歷任長寧金堂華陽等縣知縣。在廬州知州任內。保送引見。簡放雲南臨安府知府。洊升今職。

本年正月。逆匪圍攻鄂省。職父兼署臬司。帶兵在保安門守禦。晝夜焦勞。鬚髮全白。嗣因餉盡援絕。時時以忠義激勵衆心。並請出糶倉穀。攻鑄京銅。人心賴以復固。五月內。寄來家信。有竭力待援。城亡與亡之語。嗣後賊匪攻圍日急。五月二十八日。官兵出城接仗失利。六月初二未刻。賊遂攻陷東門。其時有以撫鎮均已出城。勸令下城。隨出者。職父感憤涕零。誓以死報。從容回至行署。焚香冠帶。望闕叩頭。隨即遣散從人。投池盡節。父妾高氏。隨同殉難。特懇據情轉奏。請賜卹。以慰忠魂。再職慘遭大故。例應丁憂回籍。惟國難家難。憤激填膺。且武昌一日不復。父骨一日難收。惟有寢苦枕戈。隨同大軍進剿。以期奔喪收骨。返葬故里。惟是昏愁餘生。恐滋貽誤。懇將前營統領官另行遴委。俾得墨經從戎。竭誠自效。一等語。伏查湖北糧儲道署按察使司李卿毅。由縣令起家。歷著循聲。當餉盡援絕之時。以身殉城。克全大節。卽據伊子呈請轉奏。不敢壅於上聞。合無仰懇皇上天恩。准照臬司例賜卹。庶足以申明與城存亡之義。至李孟羣例應回籍丁憂。但該道忠勇憤發。爲軍中必不可少之員。况家國之讎。切迫思報。亦不忍一日置身於事外。應請旨飭令該道從權統領。以專責成。所有該署臬司殉難捐軀。及伊子留營剿賊各緣由。謹附片奏聞。請旨。

岳州水陸官軍四獲勝仗摺 咸豐四年閏七月初三日

奏爲岳州水陸官軍四獲勝仗。恭摺奏祈聖鑒事。竊前月十六日。水師失利。十八日。陸營全勝。業經馳奏在案。十九二十等日。風雨交加。未便出隊。二十一日黎明。臣塔齊布親督陸營進剿。派都司諸殿元。千總劉士宜從中路進攻。游擊周鳳山。都司彭三元。保升守備童重雲等分左右兩路抄截。其羅澤南所帶湘勇。擇地埋伏。以備應援。行至城陵磯。遙見該逆築有土城。諸殿元等奮往拋擲火罐。延燒賊壘帳棚。各勇踰溝撲牆。逆賊敗竄。正在跟追。詎該逆先在湖汊偷搭浮橋。見賊營火起。伏匪齊出。約二三千人。諸殿元劉士宜向前迎擊。兵力太單。其所帶士卒。多已卻退。左右兩路。以途徑紆迴。不能攢越應援。諸殿元力戰陣亡。劉士宜同時被害。臣塔齊布聞二將危急。揮軍往救。短兵相接。斃賊多名。湘勇突出橫截。賊勢稍卻。中路敗退之兵。始復回戈向前。轉敗爲勝。共殲賊百餘名。奪獲旗幟軍械數十件。湘勇割取首級十五顆。此二十一日開仗先挫後勝之實在情形也。二十五日申刻。探明逆黨萬九千人。由湖北悉銳來犯。各裹乾糧。意欲鏖戰數日。撲我陸營。仍爲上犯長沙之計。佔踞高橋地方。距

羅澤南等湘勇營十里。鳳凰山大營十四里。我軍徹夜巡防。二十六日卯刻。該逆首撲湘勇營盤。擁踞九塘領燒燬望樓。羅澤南督同保升府經歷李續賓等大呼衝突。直趨高嶺。陣斬僞「國宗」石姓。奪其黃纓大旗。長廣丈餘。賊始大潰。湘勇追至高橋。殺賊數十。時賊隊之別駐東嶺者。馳下救援。復經李續賓奮力擊退。又斃賊數十名。賊遂狂竄。其分撲鳳凰山大營者。數以萬計。臣塔齊布親督將弁。由中路先進。鎗礮齊施。斃賊至一二百名。猶抵死抗拒。及至刃斃執旗賊目。賊陣始亂。其左右兩路之賊。經周鳳山彭三元等出奇抄截。各勇愈戰愈力。賊之憤技。有所謂「螃蟹陣」者。常分十餘路圍繞抄襲。我軍亦分十餘路迎敵。無不以一當百。呼聲震天。約斃賊六百餘名。而山下又突出三騎。均著青縐短衣。勢極兇猛。膽敢招手直呼臣塔齊布之名。臣塔齊布應聲撲去。手刃其一。餘二賊下馬率衆紛逃。適羅澤南等亦追擊至此。會合併攻。又斃賊數十名。追賊過河乃止。溺斃不計其數。生擒三十五名。各路奪獲鎗礮器械。共數百件。馬二十一匹。此二十六日湖北新添悍賊二萬來岳。官軍大勝之實。在情形也。臣國藩帶來陸勇二千餘人。內臨武縣學教諭李原濬將親兵五百。署宜章營守備楊名聲將宜勇辰勇五百。從九品施恩寶將新田勇五百。外委黃三清將祁陽勇三百。署把總黃玉芳將常寧勇三百。皆坐船與水軍同行。原爲護衛舟師之用。駐泊南洋港與臣塔齊布陸軍相去約二十里。因陸路賊勢浩大。卽飭此二千人者。移紮鳳凰山大橋一帶。與各路陸兵聯營。故自二十一日以後。陸路添生力之軍。較前此兵力更厚矣。二十八日。臣塔齊布傳令直搗高橋賊壘。派羅澤南等攻其南。周鳳山等攻其北。親督彭三元普承堯等由中路先行。將近賊巢。該逆開礮拒敵。中路兵勇合攻。連斃數賊。正衝突間。大股續至。愈聚愈多。適羅澤南湘勇繞抄賊尾。奮登高阜。該逆後路受敵。立卽大潰。周鳳山之道州勇。楊名聲之宜章勇。暨各營均經趕到。併力齊攻。斃賊近百名。因慮有埋伏。暫駐高岡。以防回竄。且令搖旗誘賊。賊果拚命撲出。我軍猛進。前後圍攻。賊又敗潰。自辰至午。三撲三潰。力不能支。賊始全退歸巢。計共斃賊二百餘名。生擒十二名。奪軍械旗幟共六十餘件。馬騾三匹。此二十八日開仗獲勝之情形也。賊經兩次大挫之後。卽憤甚。欲大舉再一決戰。二十九日。分數大股來撲我軍。先燒附近民房。臣塔齊布正在出隊。突有騎馬賊四人撲近營壘。卽麾兵勇大呼迎擊。直添雲等奮力抵禦。殺賊十餘名。中路之匪。旋即敗退。右路之賊。約三四千人。周鳳山迎敵酣戰。適楊名聲之宜章勇黃玉芳之常寧勇趨來應援。殲斃騎

馬賊目二名。該逆見兵勇勢猛。其右路即與中路合併抵禦。又值岳州府知府魁聯帶楚勇由山後馳來。呼聲震林谷。該逆見各處皆有援應。遂相率潰逃。我軍追殺。鎗斃手執令旗賊目一名。殺賊三百餘名。其左路之賊。先從樹林中潛上。直踞山嶺。羅澤南據險以待。各勇靜伏不動。俟賊近前。突起開礮。刀矛猛進。斬賊近百名。各逆黨已潰。旋有別隊千餘人。吹角搖旗。分路來撲。李續賓等竭力堵禦。李原濬率親兵隨到。橫截中間。分抄賊尾。各勇併擊。鎗斃黃馬褂大旗賊二名。隨山嶺者不可勝計。約共殺賊有五百餘名。生擒二十三名。奪旗幟鎗礮刀矛馬匹無數。臣國藩以陸軍大戰。賊勢全注陸路。其水路必甚空虛。密飭各水軍乘隙進剿。右營楊載福爲前鋒。時左營彭玉麟養傷回省。暫解營務。因飛調湘陰汛千總題補永綬營守備蕭捷三來營署理。是時率戰船進攻。廣西升用道李孟羣亦派前營戰船策應。行近城陵磯。有逆船十餘號。往來馳突。冀以虛聲沮遏我軍。各營燭破詭謀。見船即擊。一擁而前。燒燬數船。賊皆墮水。我軍用小艇當先。風馳雨驟。東岸追至擂鼓台。西岸追至荊河腦。忽有伏兵兩起。從道林磯白螺磯兩岸擁出。希圖抄尾。我軍愈奮。轟擊無遺。哨官把總秦國祿鄧翼升等均深入賊巢。賊遂大潰。紛紛投江。共轟死二三百名。生擒十一名。溺死約五六百名。浮屍蔽江。各勇持矛攢刺。立即飄斃。計焚燒賊船二十餘號。奪獲賊船大小六十三號。內戰船三隻。洋礮十五位。旗幟號衣軍械子藥及僭逆違禁之物。合計數百件。內有織金團龍黃馬褂二件。製尤悖妄。此二十九日水陸大獲全勝之實在情形也。訊據生擒各犯。供稱是日悍賊均集陸路。留船之賊。每船僅六人。半係膽怯之弱賊。半係被脅之水手。一見我軍焚燒賊舟。即紛紛落水。雖有悍賊督之。不能禁止。故水路戰僅三時。而斃賊近千。陸路血戰六時之久。而斃賊不過五六百。然功則極大。自有此數次大戰。岳州應可保無虞矣。現在晝夜嚴防。水陸交資。各兵勇以數千之衆。當數萬兇猛之賊。酷暑鏖戰。踴躍用命。皆我皇上獎勵將士。感激思奮之所致。管帶湘勇委員羅澤南。行軍整暇。沉毅有謀。尤善審擇地勢。獨當大橋一面。扼守總隘。永興剿匪案內。已保知府。尙未接准部覆。此次仍請以知府儘先選用。並請賞戴花翎。藍翎千總舒宜章。營守備楊名聲。忠勇勤奮。紀律嚴明。應請免補守備。以都司升用。先換頂戴。已革臨武營千總唐得陞。迭次冒險衝鋒。最爲出力。湘潭剿賊案內。已保請開復原官。賞還藍翎。並加守備銜。此次應請以守備儘先補用。撫標兵丁李榮華。屢次執旗向前。殺斃賊目。應請以把總儘先補用。並賞戴藍翎。其餘水陸兩營員弁

兵勇。容臣等擇其尤爲出力者。開單請獎。出自天恩。升用都司諸殿元。謀勇兼優。騰暢軍務。臣國藩曾經專摺保奏。正資倚任。力戰捐軀。深堪矜憫。應請飭部從優議卹。千總劉士宜。請照例議卹。其陣亡兵勇。均卽查明照例辦理。所有二十一、二十六、二十八、九等日官軍水陸屢捷各緣由。謹會摺由驛六百里馳奏。伏乞皇上聖鑒。訓示遵行。謹奏。

岳州水陸大捷踏平賊營進紮螺山摺 咸豐四年閏七月初九日

奏爲岳州陸軍大捷踏平賊營十三座。水師踏盡沿江賊營。追賊至嘉魚縣境。大股殲滅。官軍進紮螺山。恭摺奏祈聖鑒事。竊前月二十一、二十六、二十八、九等日。水陸大勝。業經會奏在案。閏七月初一日。水師營務處升用道李孟羣親督戰船出隊。至城陵磯下游。該逆開礮抗拒。我軍轟擊數輪。賊卽敗走。我軍追至洲尾。該逆復駕拖罟來迎。卽前月十六陳輝龍失利被奪之座船也。李孟羣自坐三板攢礮環攻。擊斷拖罟中桅。該逆被礮子所傷。及桅折震壓。滾跌落水者約四五十名。正欲向前奪船。突有綠蔴賊舟數隻。齊來搶護。我軍近前施放火箭噴筒。燒船三隻。該逆駛竄下游。自放黃綠毒煙迷路。阻我追兵。日暮收隊。查點我軍僅陣亡一人。受傷二人。此初一日水師小勝之情形也。是日申刻。臣塔齊布以陸路賊駐高橋。距我軍十餘里。未悉其營壘曲折之形。因匹馬直赴賊營。周視途徑。是夕賊營明火達旦。往來不絕。知其意在逃竄。初二日巳刻。臣塔齊布傳令直撲賊營。派羅澤南等由東路進剿。周鳳山等由西路進剿。岳州府知府魁聯帶勇從後路接應。羅澤南李續賓李原濤等於未經接令之先。探知賊衆將遁。卽分三路並進。直抵高橋賊營。見賊營已空。每營僅數十賊。多張旗幟。虛放鎗礮。我軍撲入。燒燬賊營七座。盡奪其旗幟軍械。擒斬數十人。餘匪悉奔城陵磯一帶賊營。負隅自固。臣塔齊布帶同李續賓等直赴城陵磯。該逆正在出隊。約二萬人。彼此開礮互擊。相持約一時之久。我軍伏地前進。臣塔齊布策馬大呼。首先衝入。湘勇繼之。各兵勇一擁而前。適大雨如注。東南風驟作。賊營大礮。點放不然。我軍乘風猛撲。羅澤南周鳳山等分投合擊。踰溝越牆。頃刻之際。尸橫遍野。殲斃滿髮老賊及黃馬褂目多名。一營旣破。其五營同時踏平。雖竹籤數丈。壕溝兩重。我軍大呼躍入。助殺之聲。震動天地。該逆大亂狂奔。自相踐踏。我軍四路攢殺。直追至江岸。偃塌者不計其數。共踏燬賊營十三座。殲賊約二千名。生擒一百二十三名。逃散者又數千名。奪獲

驟馬六百餘匹。鎗礮旗幟刀矛鍋帳共二千餘件。此初二日陸軍大勝掃平葉賊之實在情形也。巨國藩嘗飭李孟羣親率前左右三營奮力追剿。該逆先開所擄民船而以戰船拒後。希圖抵敵。右營楊載福左營蕭捷三等由東西兩岸抄擊。李孟羣從中路進攻。該逆膽落驚竄。有棄舟登岸者。有情急撲水者。其前奪陳輝龍之拖罟座船。該逆鑿沉江心。推礮落水。然後狂奔。時已昏黑。但聞呼號之聲。愈去愈遠。是夕我軍暫泊擂鼓台下。初三日黎明分途進剿。先從荆河泝流而入。搜捕三十餘里。並無賊蹤。其東岸之旋湖港芭蕉湖道林磯鴨欄磯。西岸之觀音洲白螺磯陽林磯螺山夾洲一帶。港汊紛歧。逐一窮搜。生擒伏匪三十四名。踏平兩岸賊營九座。礮台三座。晚間大船駐泊螺山。分遣三板艇往下游進追。初四日五鼓揚載福蕭捷三及前營哨官千總何越珽把總鄧清等各乘勢追剿。行至倒口。見賊船二隻。上插白旗。從內港駛出。哨官李成謀開礮轟擊。遂奪其船。追至石頭關。哨官史久立生擒長髮賊四名。奪獲旗幟多件。追至六溪口。卽蒲圻崇陽河道入江之口也。時大股賊均已下竄。僅截斷尾船十餘隻。該逆施放數礮。爭上小划。棄船逃竄。概被我軍燒燬。聞口內上游賊舟尙多。卽深入搜剿。行二十餘里。見賊船紛紛開竄。我軍連環轟擊。立斃數十人。該逆棄船上岸。潛匿蘆洲。楊載福令各哨不許搶船。止許焚燒。凡燒船近百號。生擒十二名。奪旗幟號衣數百件。六溪口內之賊。剿洗無遺。三營弁勇。竟夕不寐。次早始回泊新堤。該市鎮商民。均薙髮迎接官軍。據稱逆黨屢挫後。逃竄幾及萬人。此初三初四等日水軍大勝。窮追二百里之實在情形也。伏查逆賊從常澧鮑掠歸來。占踞岳城環岳二十里。堅築土壘木城。至二十餘處。自荆河腦以下沿江灣泊賊船。連檣數十里。仍於兩岸分紮營壘。設立礮台。而螺山倒口六溪口等處。皆賊舟老巢。層層關鎖。沮我東下之師。自我軍克復岳城。水陸屢捷之後。又從湖北添集二萬人。悉銳上犯。於二十五日到岳。二十六二十八九等日。三次大戰。該逆兇鋒頓挫。臣等卽知其有逃竄之志矣。向來此賊將竄。往往故張虛聲。示以進戰之狀。幸我軍燭破詭計。一鼓而掃平之。是以賊之軍火器械旗幟馬匹。無一物得返歸者。又以水師併力窮追沿江二百里之賊巢。剿洗殆盡。西可塞由荆入蜀之路。南可固由岳入湘之門。稍紓宵旰焦勞於萬一。然臣等仍當慎之又慎。步步爲營。謹遵屢次訓諭。謀定後戰。不敢輕於一擲。現在巨國藩進紮監利縣屬之螺山。巨塔齊布亦卽日拔營前進。一面咨會荊州將軍官文多派兵勇。從大江西岸直下協助臣等一軍。並咨會兼署督臣楊霽由德安進

攻漢口之背。以圖克復鄂省。掃蕩逆氛。此次仰仗天威。將士用命。謹擇其尤爲出力者。酌保數人。升用遊擊周鳳山。分路抄截。屢撲賊營。應請免補游擊。以參將補用。已保府經歷李續賓堵截要隘。首先衝破賊營。江西安福剿賊案內。保升府經歷。並賞戴藍翎。尙未准接部覆。永與剿匪案內。擬保知縣。尙未出奏。此次請免選府經歷。以知縣選用。仍賞戴藍翎。守備銜藍翎千總何越。挺身先士卒。斃賊多名。廣西鬱林州剿匪案內。擬保守備。並請賞換花翎。未知曾否出奏。此次仍請以守備補用。並賞換花翎。長沙協千總余星元。實慶協千總滕國猷。直衝賊隊。奮勇爭先。均請以守備儘先補用。湘陰汛千總題補永綬。營守備蕭捷。三殺賊奮勇。冒險窮追。湘陰失守案內。應候查明參辦。現值用人之際。合無仰懇皇上天恩。俯准免其查參。以收後效。其餘水陸員弁兵勇。容臣等分別等第。酌核保奏。伏候恩施。所有官軍水陸大捷。踏盡賊營。追奔二百餘里。現在進紮螺山各緣由。謹會同湖南撫臣駱秉章恭摺。由驛六百里馳奏。伏乞皇上聖鑒。訓示遵行。謹奏。

請以夏廷樾總理糧臺片 咸豐四年閏七月初九日

再臣等水陸兵勇。合以長夫隨丁。約計一萬五千餘人。每月需餉銀六七萬兩。而每戰之賞項卹銀。船械之修葺。倣造。尙不在此數。款項既鉅。運送維艱。現在出境東下。步步前進。程途愈遠。轉輸愈遲。水路風信無常。尤難應手。必須派司道大員。專駐岳州。總辦糧臺。方足以資轉運。前經奏調前署湖北荆宜施道蔣徵藩。辦理糧臺。已奉旨諭允。欽遵在案。嗣因常澧被賊劫掠一空。該道所捐之制錢三十六萬串。尙未繳齊。急須設措。不及分身前來。查有新授湖北藩司夏廷樾。品正才優。精明幹練。熟悉兩湖情形。現值賊氛梗阻。無從到任。合無仰懇皇上天恩。飭令該藩司經理行營糧臺。暫駐岳郡。將來克復武昌。前赴新任。仍令兼司糧臺。以資接濟。庶大軍水陸東下。饋餉常充。是否有當。伏乞訓示。謹附片請旨。殊批。著照所請。欽此。

胡林翼羅澤南隨同東征片 咸豐四年閏七月初九日

再新授四川按察使胡林翼。係前督臣吳文鎔奏調赴岳之員。因道途梗阻。經臣國藩及撫臣駱秉章先後奏留湖南。委辦軍務。該臬司膽識絕人。威望夙著。所帶黔勇六百餘人。前在貴州黎平府任內。教練有素。屢著戰功。本年剿辦崇遠股匪。安化土匪。又收復常德郡城。所至皆懷民望。親奉諭旨。飭該臬司仍留湖南。軍營辦理防剿事。

務。仰見聖慮周詳。無微不至。惟南省現無賊蹤。臣等正在出境剿賊。該臬司才大心細。爲軍中萬不可少之員。相應請旨飭令該臬司管帶黔勇。酌撥他路兵勇。自成一隊。隨同臣等東征。於大局必能有濟。又臣等接准江西撫臣陳啓邁來咨。稱逆賊竄擾江西。亟待南省應援。請仍飭上年援江西之委員朱孫詒羅澤南。帶勇前往等因。伏查升用知府朱孫詒前經臣國藩奏派赴江勸捐。因未接准部文。尙未前往。現署寶慶府事。能否帶兵赴援。應由撫臣酌核。至升知府羅澤南現帶湘勇一千。與臣塔齊布聯營協剿。屢次大捷。多由該員獨當要隘。以寡擊衆之力。現已進紮螺山。正當剿辦喫緊之際。應請旨飭令隨同臣等出境東征。免其赴援江省。臣等非敢意存畛域。實因武漢爲東南必爭之區。理合全力併注。迅圖克復。目下水陸官軍尙嫌單薄。豈可更分兵力。致有顧彼失此之虞。所有該二員均請飭令隨同東征之處。謹附片奏聞請旨。

水陸官軍迭獲勝仗。現在剿辦情形摺。咸豐四年八月初四日

奏爲水陸官軍迭獲勝仗。水師現扼金口。俟陸軍剿辦崇陽後。卽會攻武漢。恭摺奏祈聖鑒事。竊自逆匪占據岳州以來。水陸疊戰月餘。挫敗一次。大勝十二次。克復城池。踏平賊營。追奔二百餘里。先後奏報在案。該逆竄回武昌以後。臣等本欲乘勝東下。直搗武漢。旣而再四熟商。陸路之賊。尙可崇陽大股。數逾二萬。卽自岳竄出者。分匿於臨蒲咸嘉等縣。山僻之區。亦恃崇陽爲巢穴。若不先剿崇邑。而遽下武昌。則恐後路牽掣。餉道中梗。終非萬全之策。水路則東有倒口六溪口黃蓋大治密泉等湖。西有襄河上通洪湖朱耳湖。下通沌口漢口。若非節節搜剿。則恐藏匿小舟。抄襲後路。亦非慎重之道。是以審度定計。陸路則臣塔齊布親往崇陽進剿。水路則臣國藩步步移營。遍搜支湖小河。然後扼險要。以蹙之。初十日探明黃蓋湖內之新店。尙存賊船數十號。有賊千餘人。右營升用游擊楊載福。左營水師守備蕭捷三等。親駕長龍三板。由倒口入湖。湖面寬廣百餘里。初更時。行至芑茅湖。距新店三里許。楊載福等將長龍船盡紮湖濱。各坐三板駛進。軍士悄寂。擊棹無聲。三更向盡。突放鎗礮。聲呼震天。該逆猝出不意。礮斃溺斃者無數。餘皆上岸狂奔。楊載福首衝賊隊。被賊回擲火包。舟覆落水。旋即躍上蕭捷三座船。大呼突陣。將賊船四十餘隻。登時燒盡。復奪船四隻。大礮一尊。旗幟軍械百餘件。十一日上岸搜捕餘匪。詢之士人。芑茅湖山後尙有賊船四隻。沅潭市有賊船二十餘隻。聶家市有賊船二隻。當卽飛駕三板往剿。賊聞大

軍猝至，圍然下竄。各船一概燒盡。黃蓋湖一路搜捕無遺。十二日，重搜大溪口。該處爲匪黨老巢。東通蒲圻，崇陽北通大冶，湖太乙密泉等湖。直達嘉魚。左營蕭捷三等搜剿北路。所過湖港村市，沿途搜伏，盡焚賊舟。直抵嘉魚縣城。綏輯難民。前營把總鄧清等搜捕東路。至車埠地方。遇賊船數十號。副哨官馮登開礮轟擊。該逆開鎗抵禦。傷我水勇一名。馮登奮登賊舟，殺賊數人。餘匪棄舟逃走。溺斃十餘人。內有數賊抵死拒敵。經馮登等縱火焚船。生擒三名。奪船七隻。米約四百石。逆書二十餘本。鎗礮旗幟百餘件。候補守備何越珽等別由車埠直抵黃龍團。又燒賊船十餘隻。奪獲數隻。該弁等正在沿湖搜剿。適遇署蒲圻縣知縣孫守信自帶練勇會同荊州將軍官文所派兵勇追賊至此。當即會商合剿附城大股。該逆約二千人。聞官軍至，即竄入崇陽。孫守信等入城安撫居民。各營水師始行收隊。回紮新堤。老營東岸之支湖小港，搜剿已遍。乃遣嚮導官何南青搜查西岸。裏河一律肅清。於是前左中三營水師遂乘勝直下金口。扼據險要。距武昌僅六十里矣。金口之東有淮山，西有大軍山，小軍山。兩岸對峙。關鎖謹嚴。爲水師必爭之地。下瞰武漢，如扼其吭。該逆不慮我軍之猝至，乃乘我大隊未齊之時，思欲伺隙撲營。奪回關隘。二十七日，賊從水陸兩路來犯。蕭捷三何越珽及中營把總秦國祿等嚴陣以待。各哨官分駕三板，往西岸大軍山下遏賊。上竄陸賊千餘人，先由淮山越嶺而來，直入金口市。冀誘我軍登岸，而以小艇突入。奪我戰船，隨有賊舟百餘號。分兩翼來抄。我軍三板亦分兩路迎擊。該逆受傷甚多，猶拚死不還。我軍併力圍攻。將該逆快船轟壞，並擊沉小船二十餘隻。哨官劉培元史久立奪船二隻。水賊始行敗走。岸上之賊，齊撲河干。鎗礮如雨。我軍長龍快礮排列江心。向岸開礮。轟斃黃旗賊目數名。前營水勇分二百餘人登岸，刀矛並舉，殺斃僞指揮一名。餘賊二十餘名。生擒八名。陸賊乃敗北回竄。鏖戰凡四時之久。我軍陸兵未至，水師大隊未齊，竟能以少勝衆。大挫兇鋒。此初十二等日搜剿湖匪及二十七日金口水師大勝之實在情形也。臣塔齊布既定親勘崇陽之策。念崇陽臨蒲三縣以牟樓司爲總隘之區。必駐紮老營於此。然後可以四面策應。遂於十二三等日督率各營由岳州先後拔營。馳赴牟樓。即選知府羅澤南率湘勇千人先行。十七日宿長安驛。十八日黎明，有賊千餘人乘我不備，搖旗吹角，分四路撲營。羅澤南令湘勇偃旗息鼓，佯爲無備也者，靜立以待。誘賊近營，突出抄尾。鎗礮刀矛猛進，賊衆大潰，追殺八十餘名。生擒三名。奪軍械子藥無算。追至五里外，因未晨餐，即行收隊。次日。

進紮半樓司。各營次第皆到。四川臬司胡林翼亦自體帶勇來會。臣塔齊布探明附近之半樓崗山岩險峻。爲赴崇第一關隘。遂派羅澤南於二十三日出隊。進剿該逆於崗尾盧家橋。紮立大營。外暨松木。內貫黃土。高踰數丈。中跨溪水。攔截隘口。搭蓋棚廠。我師於午後直抵賊穴。該逆竟以數百人守營。以數百人據兩山之上。搖旗抗拒。羅澤南分左右兩支。奮登山脊。分抄賊尾。自督弁勇。從中路進剿。踰溝冒刃。踏破賊營。墮若死者無數。追至百嶺。殺斃長髮賊八名。奪鎗鈹木礮數十件。棚廠概行燒燬。盧家橋之卡既破。賊衆悉集東偏守佛嶺之卡。佛嶺兩山高峻。半縷一縷。尤爲險絕。臣塔齊布急令都司普承堯帶兵勇前往助戰。二十四日巳刻。羅澤南督勇由佛嶺之西山山直攻賊巢。普承堯由佛嶺之東出西沖。監生蕭啓江由佛嶺之北出曹家沖。皆礮岩踰嶺。冒險而進。賊衆大潰。我兵追奔十五里。至雙港口乃止。共斃賊二十餘名。生擒二十八名。二日之內。東西兩卡皆破矣。崇陽首逆僑總制廖敬順。探知我兵大隊未進。在半樓峒者不及千人。乃自崇城調賊三千餘前來。二十六日辰刻。猝至半樓峒尾。四面環攻。黃旗紅衣。漫天蔽野。羅澤南令普承堯駐右沖口。以截佛嶺之賊。蕭啓江排列右山。以爲右翼。自率兵勇由中路迎剿。該逆亦分三路來攻。我軍堅陣不動。相持片時。猝令抬鎗隊十二人。近賊以誘之。賊亦持重不進。十二人者。佯敗而走。賊黨奔追。羅澤南振鼓馳突。呼聲震山谷。賊衆瓦解。我軍中路之兵。乘勝擁上山岡。追至盧家橋。約七里許。殺賊二百餘名。生擒十八名。內有僑軍師一名。旅帥二名。蕭啓江追右路之賊。圍入石山內。殺賊百餘名。生擒九名。內有旅帥三名。餘賊竄匿。巖若死者無算。此陸兵二十三。四連破賊卡。二十六日。半樓大獲勝仗之實在情形也。自有此數戰。崇陽股匪。業已膽寒。臣塔齊布親統大隊進攻。臣國璋現駐嘉魚。即日馳赴金口。一俟崇陽股匪。即當水陸並進。疾搗武昌。探明武漢賊黨。不過二萬餘人。自岳州大敗。人懷離心。臣等布告示於各路。投木牌於江中。解散脅從。量予錢米。近日自賊營。雜髮逃出。求路票回籍者。幾及四千人。又北路有署督臣楊霽之兵。西岸有魁玉楊昌泗之師。聲威大有可恃。然臣等仍當慎之又慎。不敢萌驕矜之志。不敢貪急遽之功。以期仰慰聖懷於萬一。所有水陸連獲勝仗。及現在勦辦情形。謹會同湖南撫臣駱秉章恭摺。由驛六百里馳奏。伏乞皇上聖鑒訓示。謹奏。硃批。一覽奏俱悉。此時非徒知謹慎所能了事。汝等自湘潭大捷後。屢次得手。有此聲威。豈可自餒。惟利在速戰。莫待兩下相持。師勞餉乏。大有可慮處。塔齊布不致爲崇陽一股。

率制方好。欽此。」

謝三品頂戴恩摺 咸豐四年八月十九日

奏爲恭謝天恩瀝陳下情事。本月初四日接准兵部火票。遞到咸豐四年閏七月二十日內閣奉上諭。「塔齊布會國藩奏水陸二軍。大獲勝仗一摺。辦理甚合機宜。會國藩著賞給三品頂戴。欽此。」竊臣辦理軍務。已逾半年。本識闇而才疏。實過多而功少。前歲丁憂回籍。奉諭幫辦團練。本應恭疏辭謝。因值武昌失守。不忍置身事外。是以出而襄辦。嘗經奏明不致仰邀議敘在案。去歲奉命援鄂皖。肅清江面。臣豈不知艱大之責。非臣愚所能勝任。祇以東南數省。大局糜爛。凡爲巨子。至此無論有職無職。有才無才。皆當畢力竭誠。以圖補救於萬一。遂自忘其愚陋。日夜焦思。冀收尺寸之效。然守制未終。臣之方寸。常負疚於神明。雖治軍數月。墨經素冠。尙如禮廬之舊。而奪情視事。此心終難自安。月前岳州之捷。皆臣塔齊布羅澤南楊載福等數人之功。微臣毫無勞績。荷溫綸之寵錫。祇慚悚之交。增刻下崇陽業經克復。陸軍由蒲咸北趨。卽日兩道夾攻。疾搗武漢。仰仗皇上天威。嗣後湖南一軍。或得克復城池。再立功績。無論何項褒榮。何項議敘。微臣概不敢受。伏求聖上俯鑒愚忱。使居憂之人。與在任者。顯示區別。不得一例希榮。是卽聖朝教孝之意。而皇所以成全微臣者更大也。倘藉皇上訓誨。辦理日有起色。江面漸次廓清。卽當據實奏明回籍。補行心喪。以達人子之至情。而明微臣之初志。庶出而討賊。入而守禮。公私兩盡。名義無虧。感戴高厚生成之德。益無旣極。所有微臣感激天恩。並瀝陳下情緣由。謹繕摺附驛具奏。伏乞皇上聖鑒訓示。謹奏。殊批。「知道了。殊不必如此固執。汝能國爾忘家。鞠躬盡瘁。正可慰汝亡親之志。盡孝之道。莫大於是。副庸褒績。國家政令所在。斷不能因汝請。稍有參差。汝之隱衷。朕知之。天下無不知也。欽此。」

官軍克復崇陽戰勝咸寧水師迭次獲勝摺 咸豐四年八月十九日

奏爲官軍克復崇陽旋在咸寧大獲勝仗。水師連日接戰情形。恭摺奏祈聖鑒事。竊陸軍前在傘樓峒屢破賊卡。水師搜剿各湖。戰勝金口。業經馳奏在案。八月初一日。逆黨千餘人。聚集崇蒲交界之分水坳。設卡抗拒。臣塔齊布先派升用參將周鳳山等攻破賊卡兩處。斃賊二十餘名。生擒五名。是夜議定分路進攻之策。派候選知府羅澤南。都司彭三元。普承堯等。由南路佛嶺桂口入。臣塔齊布親督周鳳山岳炳榮李新華等。由北路分水坳入。期

俱會於崇陽。初二日，羅澤南等行至少沙坪，見神橋有賊數百人扼險抵拒。其地高峯插天，惟半腸一線可通行。人賊用擗石滾木塞路，搭棚廠於峭壁之上。我軍審明形勢，彭三元等緣右山而上。候選知縣李續賓等緣左山而上，攀藤捫石，繞出神橋之下，以抄賊尾。羅澤南普承堯由中路進攻，直抵賊壘。賊黨敗退，我軍焚其棚廠，追殺十餘里，斃賊數十名。生擒十一名，奪獲大黃旗及軍械無數。並將賊目熊滿珠沈應隆住宅焚燬。申刻，進紮虎爪市。忽桂口之賊會合神橋敗賊，共千餘名，乘我軍營壘未成，揚旗吹角，分三路來攻。羅澤南等亦分三路埋伏，以待賊至。伏兵突出，逆黨驚竄，追過高山四重，斃賊千名。生擒九名。日暮收隊。次日在桂口沙坪一帶，遍歷山谷，搜剿餘匪。臣塔齊布率北路之師，初二日駐紮桂花樹，初三日即抵崇陽。距縣城里許，該逆二千餘人，分三路抗拒。我軍亦分三路衝擊，斬其前鋒。逆黨敗竄過河，半回縣城拒守。我軍一面飛渡窮追，一面圍城急攻。共殺賊百餘名。城上鎗礮如雨，滾木擗石，紛紛井下。兵勇多帶重傷，然屢勝之餘，人人皆以退縮爲恥。裹創前進，鏖戰四時。至日暮始行收隊。適署崇陽縣知縣鈕芳津會同荊州委員候補縣吳振鏞等帶勇千人前來會剿。初四日黎明，臣塔齊布復督將弁攻城。南路羅澤南等之兵亦至，探明賊勢，併駐西城。遂用聲東擊西之法，先攻東北二門，以分賊勢。選壯士二百人，埋伏城根。隨督大隊奮攻西門城上。賊連放鎗礮，拋擲瓦石。我軍傷亡雖衆，仍冒險力攻。旋用劈山大礮，轟破西門，一擁而入。前埋伏之二百人者，亦從北城根肉薄而登。四門截殺，凡斃賊約三百人。餘匪由東門過河逃走。又經追殺百餘名。生擒偽丞相金之亨等十一名。立將縣城克復。奪礮十位，拾鎗鳥鎗百餘件。馬二十四匹，綠緞大轎一乘，大黃傘四把，紫冠五頂，子藥旗幟刀矛無數。我軍傷亡亦六十餘名。緣因崇陽向爲亂民萃聚之藪，自鍾人傑以後，反者數起。今年賊目廖敬順據爲老巢，盤踞數月，資糧盡聚其中。悍賊數千，嬰城死守。又山路險峻，城小而固，故軍官傷亡較前諸戰獨多。雖餘匪潰竄，未能盡殲。然非兵勇奮不顧身，未易破此堅城也。臣塔齊布隨飭鈕芳津會帶荆勇駐城，搜捕餘匪。即於初六日，拔營前進蒲圻。派羅澤南等先赴咸寧。初八日，紮官塘驛。探明武昌賊黨八百餘人，從金牛地方招集崇陽逃匪，乘虛而入。踞城抗禦，阻遏大軍。殺斃團練首事及居民數十人。羅澤南等於初九日兼程疾進，已刻馳抵城下。賊從東門潰出，竄至十里外之官步橋。忽回駐要險，分路埋伏，以待我軍。羅澤南由西路進，彭三元普承堯由中路進，候選知縣李續賓由東路進。官軍繞出賊

伏之後賊技已窮。遂向北路逃竄。我軍攔途截殺。追奔十餘里。殺斃長髮賊八十餘名。生擒二十餘名。內有頭目二名。奪獲偽丞相黃帽一頂。大黃旗三面。上書「太平天國丞相劉」各等字樣。子藥號衣軍械無算。此陸軍克復崇陽旋在咸寧獲勝之實在情形也。水軍戰船自前月二十七日金口獲勝後。該逆不敢上犯。旋於初三四等日。已革副都統魁玉。總兵楊昌泗帶兵勇四千三百人來會。紮營金口之西岸。同知銜李光榮帶川勇千餘人亦至。紮金口之東岸。皆荊州將軍遣來協勤者也。初三日。右營游擊楊載福派哨官劉國斌王明三等六人。各乘三板。往下游探賊虛實。行至鹽關。兩岸有賊營。賊船約四五十隻。見哨船猝至。水陸出隊。開礮迎擊。中流水急。瞬息之間。我哨船已駛出賊營以下。賊以礮船並小划數十隻。蟻聚圍擊。我軍且敵且退。王明三殿後。賊礮攢攻。轟擱四十餘處。水勇帶傷二名。王明三竟履險不驚。直至賊划圍近。始將火彈連擲。延燒賊艙。船小人多。驚翻落水。餘划盡靡。遂得衝出重圍。初八日。楊載福偕清江營俞辰親往沌口巡哨。該逆見戰船甚少。分兩路來抄。我軍迎擊。鏖戰一時之久。轟斃二十餘名。逆黨已退。忽兩岸陸路賊突出千餘人。開礮來攻。魁玉楊昌泗飭派參將恆泰札勒罕等出隊。至沌口抵禦。擊斃穿黃衣賊目。殺賊十餘名。生擒六名。內有僞旅帥楊大順。餘賊撲水退竄。淹斃數十名。楊載福俞成仍督三板跟追。擊壞數船。始行收隊。初十日。李光榮帶川勇由東岸出隊。擬攻破袁家河賊營。以爲進剿地步。升用道李孟羣撥水師前營接應。李光榮行抵花園。見有木城三座。當將中左二座木城衝破。燒賊望樓二座。該逆敗走。李光榮正在追殺。忽右邊木城賊出。繞道包裏。李光榮等奮力血戰。殺出重圍。前營水師急往助陣。東岸沿江之賊乃退。而賊船數十。復由江東蜂擁而來。哨官禡登等擊壞賊船三隻。賊退下游。又沿西岸而上。李孟羣親自督追。見逆船中惟紅布帆蓬船二隻。五彩布蓬船二隻。爲最強悍戰船。攢礮擊。將紅布蓬船擊壞。並擊沉小划船十餘隻。賊始敗歸。我軍收回沌口。惟時魁玉楊昌泗率荊州兵勇由沌口渡河出隊。漢陽關上賊營二千餘人。突出迎敵。荆兵後隊尙未渡河。前隊卻退。李孟羣飛飭水師戰船近岸。開礮回擊。一面拔三板入沌口裏河。接渡荆兵。有黃旗駁馬賊目數名。首先撲至河邊。均被水勇擊斃。共斃賊百餘名。尸橫遍地。荆兵亦轉敗爲勝。該逆奔退回棗。此初三初八初十等日。水師接濟陸營迭次獲勝之實在情形也。臣國藩已於十一日進駐金口。臣塔齊布自崇陽咸寧沿途勦賊北來。雖明知餘匪未淨。太兵一過。仍虞嘯聚各縣。然武昌爲省會

重地。拔其根本。則枝葉自萎。勢不能兼顧小股。止得飛速進兵。直搗武漢。以圖迅復鄂垣。此次陸軍力破堅城。水師冒險深入。員弁英勇均甚出力。應請皇上天恩。容臣等擇尤保獎。其陣亡及受傷兵勇。均即查明照例辦理。所有陸營攻克崇陽戰勝咸寧及水路迭次獲勝各緣由。謹會同湖南撫臣駱秉章恭摺由驛馳奏。伏乞皇上聖鑒。訓示遵行。謹奏。

水陸續獲勝仗現籌進兵摺 咸豐四年八月二十二日

奏爲水陸續獲勝仗。現籌進兵。先後情形。恭摺奏請聖訓指授機宜事。竊陸軍攻克崇陽。戰勝咸寧。及水師迭勝。業經奏明在案。臣國藩察看牌洲對岸之新灘口。湖汊紛歧。縣五千餘里。上通荊襄沔陽。下通沌口漢口。其中如蔡店繫馬口侏儒山等處。均係賊巢。恐逆舟從內河駛出。抄襲我軍後路。是以酌留戰船六十餘號。水勇千餘人。駐守新灘口。以前署善化縣李瀚章總司其事。而臣國藩即以十一日進駐金口。十二日。乘小舟赴沌口。相度形勢。營務處李孟羣及各營官。皆率戰船隨往。魁玉楊昌泗所帶陸營。亦出隊往護。未刻行抵沌口。距賊船五里許。該逆不敢上犯。日暮歸來。登小軍山。遙望武漢賊營。歷歷在目。游擊楊載福等殿後。突有逆船數十來抄。我軍開礮迎擊。李孟羣率各船回舵策應。礮聲鼎沸。臣國藩倚山觀陣。見陸賊千餘。沿江來撲。我戰船以少半擊江中之船。以強半擊岸上之賊。礮多子窠。頃刻之間。尸橫徧地。岸賊敗退。逆賊亦即下遁。我軍追擊。於初更時收隊。此十二日水師獲勝之情形也。陸軍自咸寧大勝後。臣塔齊布率各營直趨省會。飭候選知府羅澤南。都司彭三元。普承堯等先行。十三日。探明橫溝橋地方聚賊六七千。意圖阻遏。並分伏兩旁。以圖抄尾。羅澤南及候選知縣李續賓帶湘勇分左右兩路前進。彭三元普承堯帶寶勇新化勇繞山之右。守備岳炳榮帶辰勇川勇以爲後應。有大黃旗賊目率賊衆來衝。湘勇盛戰。鎗礮雨下。陣斬大旗賊及紅巾賊十餘名。賊勢稍卻。踰橋而東。用鎗礮跨橋禦我。我軍亦攢礮進攻。各營涉水過河。賊勢大潰。追殺百餘名。賊之埋伏兩山者。復經分路搜剿。殺斃約二百餘人。伏尸滿谷。賊復由徐李鋪渡河屯聚山脊。使我軍不能仰攻。各勇大呼直上。殺賊數十名。賊又大潰。凡三奔三聚。窮追十餘里。彭三元從橋後抄出。普承堯從右山抄出。截殺逃賊。各數十名。餘賊狂奔。始行收隊。共生擒長髮四十三名。內有僞丞相潮姓江西人。龍冠黃馬褂。盤踞咸寧。肆毒甚久。百姓爭啖其肉。奪獲大小黃旗五十餘面。馬

十五匹。訊據賊供稱逆黨七千餘人。有自鄂省來者。有自崇陽來者。有自興國州來者。約於十二日會集金牛地方。擬攻撲咸寧。以拒官軍。不意行至橫溝橋。猝被痛勦等語。此十三日陸路全勝之情形也。十五日羅澤南等進紮紙坊。距鄂城六十里。十六日。臣塔齊布亦至。十七日。偕羅澤南同赴金口。與臣國藩會議進兵先後竊查逆黨盤踞武漢約共二萬餘人。自沌口以下。東西兩岸。水陸賊營密布。連日再四詳究。進攻武昌之路有三。一爲古驛路。由油坊嶺以達洪山。一爲新驛路。由湖堤以達坂橋。一爲沿江之路。由金口以達花園。進攻漢陽之路亦有二。一爲沿江之路。由沌口以達鸚鵡洲。一爲襄河之路。由蔡店以達西門。一由襄河建甌而下。臣等悉心定議。必以水師先勦江面。使武漢之賊消息隔斷。陸路則先攻武昌。後攻漢陽。臣塔齊布暫駐紙坊總要之區。遣羅澤南等由金口一路先攻花園賊營。然後由古驛路進攻洪山。至西岸沿江一路。則令魁玉楊昌泗等率荆兵進攻。一面咨明署督臣楊需夾攻漢陽之背。以期諸軍會合。迅復堅城。雖據稟崇陽餘燼復合。戕官據城。而陸軍單薄。暫時不及分兵回勦。俟攻克鄂城後。再行四路遣征。所有水陸獲勝。及武漢進兵先後各情形。謹會摺由驛馳奏。是否有當。伏乞皇上聖鑒。指示機宜。謹奏。

官軍水陸大捷武漢兩城同日克復摺 咸豐四年八月二十七日

奏爲官軍水陸大捷。踏平賊營十九座。燒船千餘號。武昌漢陽兩城同日克復。恭摺馳奏。仰慰聖懷事。竊水師自抵金口。陸營進紮紙坊。逼近武昌各六十里。定議進兵。先後次第。業經馳奏在案。八月二十一日。臣塔齊布由油坊嶺進發。過東北洪山總匯之區。臣國藩在金口定沿江三路齊下之策。湖南陸軍羅澤南等三千人。及荊州派來李光榮川勇千人。攻東岸花園賊營。魁玉楊昌泗四千三百餘人。攻西岸蝦蟆磯賊營。而水師從大江中路衝擊。使賊兩岸不能相顧。從來此賊守城之法。不守陣而守險。其精悍者不聚於城內。而堵於城外。往往扼險築壘。堅不可拔。花園外嶺大江。內枕青林湖。該逆立大營三座。掘深溝寬二丈。長約三里。引江水以達於湖。溝內周立木城。實以土沙。中開礮眼。溝外植二尺許木椿。交互連釘。椿外密布竹籤。環以荆棘。木城之內。又有磚城內濠。層層拒抗。其堅固幾與金川之石礮相等。安礮百餘尊。向江者阻我水師。向南者阻我陸軍。西岸蝦蟆磯賊營。其堅固亦與花園相等。賊船泊守兩營之下。水陸依護。臣等深慮此關不破。則各路均無可施手也。因與李孟羣等熟

商將水師各營分爲前後兩班。前班戰船從中流飛駛，衝過鹽關之下，直至鸚鵡洲。該逆不意我軍之猝出其後也。卽回船下救。我軍分兩翼自下抄撓而上。後班戰船復自上排轟而下。賊勢不支，紛紛落水。其悍賊數舟，風篷五綵，每戰冒死向前。巨國藩先日懸賞曰：「奪五綵篷者賞錢百千。」至是爭前奪取。秦國祿張啓基鄭沐等六人各得其一。餘賊撲水登岸。楊載福等縱火延燒。頃刻之間，鹽關二百餘號賊船，焚燬盡矣。東岸花園賊船見西岸已敗，相率晷逃。我軍攢攻悍者數舟，餘亦全數燒燬。羅澤南等攻花園之陸營，分爲三路同進。賊自木城開礮，子如雨點。我軍習戰已久，礮將發則伏地以避。子既落則蛇行以進。凡三伏三進，直逼賊營。候選知縣李續賓攻江邊之營，從竹籤木樁中踰溝直入。羅澤南攻湖邊之營，先燒營外賊棚百餘號，以斷賊之抄。尾隨奮力直入。李光榮及教諭唐訓方攻中路之營，同時躍入。諸勇或越高牆，或穿礮眼而入。賊衆大潰，縱火焚其營。而是時西岸魁玉楊昌泗率兵攻蝦蟆磯賊營，亦恰衝進土城，縱火焚之。賊衆逾牆四竄。竄出江者，被礮轟擊，竄入裏湖者，被魁玉沌口伏兵圍斃。尸橫遍野。兩岸焚營之火，與江中三百餘船之火，煙燄相合。天爲之赤，楊昌泗窮追直下。與水軍夾擊，復破鸚鵡洲賊營。計東岸陸軍殺斃千餘名，生擒四十七名。西岸陸軍割首級四百餘顆，生擒百餘名。江中擊斃者百餘名，搶登賊舟殺斃者六十餘名。焚死溺者不在此數。日已西墜，李孟羣尙不肯收隊。復督同楊載福等乘勝直下。凡沿江木柵，悉用大礮轟擊，多放火箭。又攻破漢關賊營一座，白沙金沙洲賊營二座。遂進攻鮎魚套口。縱火大燒賊舟，又數十號，叫殺之聲，與該逆號哭之聲相雜。江水爲沸，忽延燒其火藥大船，霹靂一聲。衆船皆飛，賊屍有自半空落下者。我軍亦傷亡十七人。遂收隊回泊沌口。此二十一日連破賊營九座，焚船五百餘號之實在情形也。前此七月十六日，象骨港之役，因賊划圍繞太多，我軍眩亂致敗。自後臣國藩遂陸續招募小划百五十號，以敵賊之所長。而輔我礮船之不足。是夜大軍收隊後，派王策勳小划二十餘號，前往劫營。連環放鎗，雖僅焚賊舟十餘號，而該逆時怕時開，船礮亂轟，徹夜不得休息。二十二日辰刻，三路進攻，仍如昨日之舊。李孟羣率前班先發，攻燒鮎魚套未盡之船。旋即西渡攻漢陽朝宗門土城。楊載福蕭捷三俞晟秦國祿等，仍衝過賊營，直下塘角。何越挺亦衝過賊營，直攻漢口兩城。賊礮羣子亂落江心，各哨官爭先逞長，以低頭避子爲恥。又以火毬不中賊膽爲恥。數舟旣然，火勢遂烈。其桀黠之賊，一面開礮抵拒，一面揚帆下竄。楊載福等急漿駛

追。翻出下竄賊船之前。曾不片刻。已近青山。又將該處輜重賊船焚燒。北風甚勁。挂帆歸來。見塘角三百餘號賊舟。火燄正殷。因傍西岸而上。又隨李孟羣入漢焚口內之船。兩岸火光上薄。紅衣黃旗。餘燼漂流。斷肢賊尸。與豬雞半死之畜。叫號沉浮。蔽江而下。腥臭不復可聞。李孟羣回軍攻擊漢陽。該逆於木柵內開礮拒敵。我軍轟擊愈緊。魁玉楊昌泗之兵。亦自上游轉戰而下。會合夾攻。將晴川閣下木柵大別山下木壘。悉數焚燬。殺賊數十名。生擒十二名。東岸之賊。自花園既破以後。又有鮎魚套近湖一營。傍江街口一營。我軍分兩路進剿。賊從中路迎敵。四川義勇湖南親勇新田勇。稍卻退。奔里許。李續賓帶湘勇由江邊折回。急援中路。破鮎魚套賊營兩座。縱火焚之。斃賊三百餘名。生擒四十二名。義勇親勇等。亦轉敗爲勝。焚燬附城賊營四座。此二十二日焚盡漢口塘角逆船。踏平兩岸賊營之實在情形也。自有此兩日大戰。省河上下。無一賊船。武漢城外。無一賊營。臣等知其萬無可守之理。不日營棄城他遁矣。二十三日卯刻。水陸各營。預備攻城武昌之賊。已於四更後潛開東北門逃竄。猶留悍賊數百。在西南城搖旗放礮。故作堅守之狀。漢陽城上亦然。我水軍及東路陸軍。用大礮向漢陽望山等門轟擊。而別遣壯士從僻處攀堞而登。舉火爲號。各營擁入。衆賊狂竄。截殺百餘人。生擒二十餘人。內有僞將軍陳昌貴。僞總制丁履之。立予正法。李孟羣自保安門緣城而入。徑奔其父李卿毅殉難之所。痛哭收骨。軍士爲之感泣。西岸漢陽城上之賊。方與水師連礮對擊。楊昌泗之兵勇已有南門梯繩而入。魁玉督帶各營。在西門外月湖堤一帶埋伏。該逆由西門奔赴蔡店。被我伏兵截斃。殲斃無數。生擒一百餘名。午未之間。兩城同時克復。臣塔齊布從油坊嶺而來。早知武昌東北洪山一帶爲陸路竄賊必由之地。預飭大隊四路埋伏。該逆不知我軍之猝至。前臨大敵。後逼危城。左近梁子湖。右隔陽孫湖。無路逃生。因分三路拚死抗拒。我軍亦分三路迎擊。臣塔齊布自營中路。指黃袍賊目數人。與親兵分刺取之。餘匪稍卻。兩路之賊皆退。遂向洪山之背大奔。我軍搶登山脊。乘勢追殲賊約五六百人。餘衆圍逼沙湖塘角灣地方。紛紛赴水。紅巾浮波。須臾即沒。湖汊淺處。賊尸塞滿。後至者踐尸而逃。行至中流亦皆漂溺。計溺斃一千餘人。我軍喊殺愈厲。聲振林谷。耳不忍聞。中有兒童數百人。先後奔投湖水。臣塔齊布目睹心傷。不覺泣下。因飭將弁大呼救小兒。不許投水。凡救活二百餘人。衆賊見小兒得救。遂長跪乞命。亦帶回七百餘人。分別斬決釋放。小兒則分置各營棚中。將查明籍貫而資遣之。此二十三日克復兩城大

勦洪山竄賊之實在情形也。二十四日。臣等二人。先後入城。履勘街道。撫綏子黎。該逆於大宅多置火藥。燃香其上。入者觸之。輒被轟燒。二十三日。城內發地雷火。燬三次。震斃數十人。二十四五。皆數處火起。市上門窗木器。片片摧碎。所擄各處幼童數千人。酷刑虐殺。戰敗之後。輒大加殺戮。以洩其憤。其慘毒如此。僞「國宗」丞相所居之署。拆神廟以裏。修柁木狼藉。一牀之費。可值千金。水陸兩軍。奪獲黃金三百餘兩。金冠龍袍。各百餘件。鍍錫鐵筒筆架。至二千餘具之多。其僭侈如此。該逆爲神人所共憤。二城收復。大股破滅。本屬意中之事。惟三日之內。焚舟千餘。蹋盡壘壘。每次縱火。輒遇順風。殺賊數千。而官軍傷亡。不滿二百人。湖南陸兵極薄。恰有北省兵勇助勦。西岸大隊扼洪山要路。不先不後。恰痛勦東北之竄匪。事機之順。處處湊泊。此則仗我皇上威福。天心篤祐。不特非臣等籌謀所能到。亦並非臣等夢想所敢期也。現已飛咨湖北巡撫兼署督臣楊霽。請其迅速渡江。鎮撫倉城。一面妥籌分路進勦事宜。廣西升用道李孟羣。忠孝鬱積。戰必身先。沉毅有謀。應請加按察使銜。并賞加勇號。候選知府羅澤南。候選知府李續賓。自岳州投營東下。常在各營之前。途中力戰。七次大勝。攻克花園壘。制賊之命。羅澤南應請記名。以道員用。李續賓應請以直隸州選用。賞換花翎。升用遊擊楊載福。永綏營守備蕭捷。三廉明愛士。膽力堅定。從下游逆擊而上。甚合機宜。楊載福請以參將補用。並加副將銜。蕭捷三請以都司升用。並賞換花翎。同知銜。文生李光榮。練勇殺賊。果敢有爲。應請以府經歷丞歸部。遇缺卽選。已革涼州副都統魁玉。高州鎮總兵楊昌泗。身先士卒。克復郡城。實屬奮勉出力。可否開復原官之處。出自皇上天恩。其餘出力員弁兵勇。容俟臣等核明勞績。開單保奏。仰候恩施。所有官軍克復武漢綠線山。謹會同荊州將軍官文。湖北巡撫兼署督臣楊霽。恭摺由驛六百里馳奏。仰慰宸廑。伏乞皇上聖鑒。訓示遵行。謹奏。硃批「覽奏感慰實深。獲此大勝。殊非意料所及。朕惟兢兢業業自持。卽天速救民劫也。另有旨。欽此。」

李宗涑等留營差委片 咸豐四年八月二十七日

再臣等自辦理軍務以來。凡管帶練勇襄辦糧臺。監製軍械。在在需員差遣。湖南候補正雜各員。現尙不敷委署。未能多調。前次因員弁過少。不能節節維繫。遂致挫失。曾於自請治罪摺內詳悉聲明。現在出境勦賊。營務愈繁。

需員愈衆。月前曾咨請撫臣駱秉章遴選州縣一員。佐雜三員。來營差委。臣塔齊布營中亦請員備用。撫臣因所請揀發未到。正在乏員之際。未准咨送。昨官軍克復通城咸寧等縣。經南撫臣駱秉章飛咨兼署督臣楊需委員守土。督臣轉咨南省。就近派員代理。而南撫臣仍以無員可派咨復。目下臣營造船運餉。接應子藥。均屬事浮於人。殊形拮据。昨於簾洲立設水卡。稽查民船。即苦無員可委。軍務吃緊。未便過於拘泥。致誤事機。是以周諮博訪。但使人才可用。卽不能不兼用丁憂降革之員。查有湖南候補府經歷丞李宗涼王誥。前清泉縣楊恩植。大挑教諭。唐訓方。均係丁憂人員。例應奏明。方准調用。臣因人地相宜。擬令李宗涼王誥管理軍械。楊恩植襄辦船工。唐訓方分帶練勇。又已革升用知府鳳凰直隸廳同知劉建德。候補從九署永明縣典史林周培。試用按照磨署道州吏目秦豫基。武舉署茶陵千總劉文煥。該革員等均因失城被革。劉建德署湘潭任內因衆寡不敵失守。旋即督帶鄉勇。隨同官軍克復縣城。林周培秦豫基。均先奉委出境。並未在城。惟因監犯被劫。疏於防範。致被議革。均無餘罪。劉文煥尙待查參。查該員弁等。官聲尙好。且係有用之才。是以調赴行營。劉建德委督船工。林周培秦豫基。接濟各營子藥。劉文煥幫帶新田練丁。又馬丕慶係寧鄉失守之員。尙待查辦。昨經南撫臣委令解餉來營。臣卽留營。令其稽查水卡。實因軍務乏人。不能不從權辦理。如果始終奮勉。仍當額懇逾格天恩。一律保獎。以收後效。而勵戎行。再前經廣西撫臣勞崇光代招水勇。奏委升用道李孟羣統帶來南。隨員中有已革同知銜廣西試用縣程桓生。平樂縣丞升用縣趙啓昫。因疏防土匪被議。此次咨遣來南。未知勞崇光會否入奏。臣塔齊布行營解餉之候補未入流賀宗瀾。亦係革員。辦事均甚勤奮。合無仰懇皇上天恩。飭下該部查照。准其仍留臣等營中差遣委用。謹附片奏聞。

遵省彙保員弁兵勇第一單摺 咸豐四年八月二十七日

奏爲欽遵迭次諭旨。彙保出力員弁兵勇。懇恩獎敘。仰祈聖鑒事。竊自賊窺常禮以後。數萬逆黨。盤踞岳州。六月二十七二十九等日。各營水師克復郡城。七月初三初六十四等日。江西鏖戰。燒船逾千。自十八至二十九日。陸路大捷四次。水陸並勝一次。闔七月初三日。遂將賊營二十二座。全數躡平。比之湘潭大捷。三倍過之。嗣後分途東下。陸軍克復崇陽。沿途大勝七次。水軍搜剿各湖。孤軍深入。戰勝六次。臣等屢次奏保。俱於摺尾。懇請將員弁

兵勇開單保獎。迭蒙皇上天恩允准在案。謹遵照諭旨核實保奏。分爲三起。自六月二十七至七月十八日三摺爲第一單。自二十一至二十九日爲第二單。自閏七月初二踏平賊營至八月十三止。水陸十餘戰。爲第三單。其糧臺各員。在省在營。經理子藥。至三十餘萬斤之多。千里轉輸。籌備銀錢。採辦鹽米。有江湖風波之患。有土匪梗阻之虞。晝夜辛勞。亦合仰懇天恩一體保敘。茲據各營官開單稟報。臣等再三覆核。將第一單酌定。續懇恩施。以獎屢勝之勞。而作將來之氣。其第二第三單。容俟核定。續行奏請。所有彙單請獎緣由。謹會同湖南撫臣駱秉章恭摺由驛具奏。伏乞皇上聖鑒。訓示施行。謹奏。

水師搜剿襄河續獲大勝摺 咸豐四年八月二十日

奏爲水師搜剿襄河續獲大勝。燒船千餘號。恭摺奏祈聖鑒事。竊自二十三日。官軍大戰武漢。燒賊船千餘號。克復兩城。鄂省上下二百餘里。大江已無賊踪。惟襄河之內。賊船尙多。襄河卽漢水。居民及船戶。皆稱爲「小河」者也。其正流上通安陸。襄陽。以達於興安漢中。其旁派則北枝通於德安。孝感。應城。南枝通於野湖。沙湖。以達於沔陽。荊州。該逆盤踞武漢之時。其國宗丞相相等。率老賊守城。而別遣輕悍之賊。在襄河南北擄糧。號令於賊。名曰「打先鋒」。誅求於民。名曰「催貢」。有船千餘號。屯駐蔡店。繫馬口。長江埠。侏儒山等處。游奕無常。近北枝者有署督臣楊需一軍堵剿。近南枝者可由侏儒山新灘口以出大江。前此臣國藩進紮金口之時。曾奏明留水師千餘人。駐防新灘口。蓋恐襄河賊舟由該處以抄襲我後路也。自八月十一日。雙保福炳二鎮。在仙桃鎮失利以後。賊舟愈多。其氣愈熾。二十三日。克復兩城。臣等卽擬分派水師入襄河口內。泝流搜剿。二十四日。探報賊舟千餘。已由蔡店順流而下。將衝出大江。與官軍決一死戰。魁玉。楊昌泗親至臣國藩舟次。自請督荆兵。攻防陸路。而請發水師迎而剿之。臣國藩卽派各營以大船。錯布漢口內外。而以三板。迅入迎擊。入僅數里。該逆已連檣而下。其前隊自楊林溝登岸者。約二千人。魁玉等令官兵佯退。楊昌泗及參將恆泰率兵勇自歸元寺繞至楊林溝。抄賊之尾。賊衆敗潰。適賊船雷轟而入。該逆開礮抵敵。以河身太窄。賊船太擠。不能迴旋取勢。該逆倉皇失措。時開時泊。倏進倏反。後船之礮。往往自擊前船之賊。喧嘩互詈。我軍乘隙逼入。將火毬火蛋。雜亂拋擲。聞以噴筒火箭。往來馳突。其兇悍之賊。雖能以火毬回擲我軍。而怯弱之賊。與被擄之水手。已紛紛覓水登岸逃竄。老賊持刀砍殺。不能禁

止竄至北岸漢口者。幸得脫免。竄至南岸漢陽者。輒被魁玉楊昌泗之兵截勦。殲斃無數。生擒二百餘名。斬首百餘級。陸軍收隊後。水師復乘勝追入。追及上游。有悍賊數舟。擲火包急撲。我軍各船。出入於濃煙烈燄之中。猝不及避。軍士傷亡十餘人。營官守備蕭捷三頭面手足俱受燒傷。楊載福等力前搶救。矛刺一賊墮水。焚悍者數舟。衆賊乃撲水大潰。自三更以後。賊船逃竄一空。我水軍既不放礮。亦不揚聲。惟各持火毯火蛋。每隔一船。輒擲一火。凡行二十餘里。至羅家墩地方。將賊船千餘號。悉數燒盡。四更始行收隊。臣國藩在鮎魚套。與漢水中隔大別一山。遙望火光自山後透出。照見江中波紋盡赤。屋瓦可數。比二十一二十二兩夜尤烈也。蓋緣漢水逼仄。乘賊船擁擠喧亂之時而擊之。又荊州陸路之兵。兩岸被害之民。亦乘間助而縱火。卽船戶被擄已久。怨極思歸。亦有自焚其船以逃者。皆若與水軍聯爲一氣。是以二十餘號戰船。用力甚少。成功甚多。自有此戰。襄河以內賊舟無幾。更酌留船隻。徧爲搜勦。從此壹意東下。無後路牽制之慮矣。然臣等細察大局。尙有可慮者數端。水師搶船太多。私匿藏貨。破城以後。水陸弁勇。各獲財物。頗有飽則思颺之意。又以岳州酷暑苦戰。保奏稍遲。頗生怨望。時出怨言。屢勝之餘。志驕氣溢。殊覺散佚。暗伏挫敗之機。此其可慮者一也。武昌竄出之賊。臣塔齊布洪山截勦。雖殲去四千。然逃者尙多。漢陽竄出之賊。則截勦無幾。現在逃出下游。蘄黃一帶。尙有數萬。自岳州以下。直至金陵數千里。久已淪爲異域。小民劫於兇威。蓄髮納貢。習爲固然。雖經諭令薙髮。而鄉民畏賊之暴。狐疑觀望。崇陽興國蘄州黃孝等處。亂民尤多。設官軍稍有挫衄。則四面皆賊。餉道易斷。此其可慮者二也。水陸兩軍。銀錢子藥。絲毫皆取給於湖南。此後去湘日遠。不特餉項支絀。勢難長久接濟。且千里以外。轉輸尤艱。軍火銀米。一有缺乏。軍士潰散。前功盡棄。此其可慮者三也。現在機勢大有可乘。臣等急思東下。以圖克復沿江諸城。然念三者步步艱難。又不能不熟思審度。縷陳於聖主之前。所有水師續獲大勝。并臣等籌慮各條。恭摺由驛馳奏。伏乞聖慈垂鑒。訓示施行。謹奏。

查明賊目殲斃狀及賊中各情片 咸豐四年八月二十日

再逆首盤踞武昌。以各衙署爲行館。僞文卷俱萃其中。鄂省克復後。臣等將賊中往來稟牘彙查。於逆謀頗得其詳。內有僞東王黃綾誥諭一幅。查悉據守武漢之賊。係僞國宗章以德石鳳魁僞副丞相黃再興等。前次犯岳之

賊係僞國宗章俊石鎮嵩。僞丞相曾天養。僞承宣張子明林紹璋等。而惟曾天養爲尤驍悍。調度皆出其手。去年破田家鎮破廬州。今年破黃州堵城。破岳常體等屬。皆曾天養爲一軍之主。七月十八日。城隍磯之戰。臣塔齊布恰與曾天養迎擊。該匪直呼塔齊布姓名。被親兵黃明魁奮矛戳斃。立碎其尸。餘賊大敗。曾天養係廣東惠州人。年六十許。獷悍深目。威令素行。於衆賊中善用兵者。自楊秀清外。推曾天養爲最。伏誅後。岳州之賊。及武漢之賊。爲之茹齋六日。臣國藩在螺山時。業已問之居民。屢訊賊供。俱與僞稟牘相符。臣等前奏言。七月初六日。水師哨官羅管全殺斃僞丞相曾姓。係據褚汝航來稟所云。其實初六日僅奪獲曾天養座船及龍冠黃袍等件。十八日黃明魁始殪其人也。曾天養沒後。脅從者始敢逃散。數以萬計。該匪關係賊勢盛衰。不敢不聲名更正。庶將來編纂方略。亦得據實備書。再查逆書中除僞天王及僞東西南北翼五王外。又有秦日綱由僞頂天侯封僞燕王。陳承瑤由僞天侯加封僞豫王。章俊章以德係章正兄弟。石鎮嵩石鳳魁則石達開兄弟。自水師前隊占踞金口後。章以德即託故先回金陵。昨二十三日石鳳魁黃再興等開城逃走。經臣塔齊布截殲。擊斃溺斃約三千人。訊問撈救之幼童二百餘名。內有從金陵隨首逆來鄂者。據供賊尸中凡手帶金鐲身穿黃馬褂者。卽係僞國宗丞相檢點指揮之屬。兵勇中先撈得金鐲七隻。越日往尋。不知鐲出何尸之手。亦不能辨認也。該逆初無逃意。二十一日僞國宗巡城。猶殺緹城逃賊數十名。在城頭望見官軍戰船。不避鎗礮。直衝下游。始驚亂失色。二十二日見城外賊營盡破。賊船盡燒。殺緹城者愈多。而逃者愈衆。遂相向號哭。二十三日卯刻。開城向東南逃竄。復恰與洪山官軍相遇。故得聚而殲旃。據守漢陽之賊。有僞丞相陸光祖。不知已就戮否。破賊必先擒首逆。我皇上亦必懸念及此。前奏未及詳備。今既細究各情。理合附片奏聞。

請飭江西等省籌解餉銀片 咸豐四年八月二十日

再臣等一軍屢蒙聖慈垂念。飭令江西廣東四川三省。解餉協濟。江西前後解到銀五萬五千兩。又在籍侍郎臣黃贊湯籌解捐項銀二萬兩。廣東解到銀六萬兩。均交湖南藩庫。由撫臣駱秉章撥解臣等軍營支用。四川頭批解銀四萬兩。係荊州將軍臣官文截留。經南撫臣將另款扣抵。奏明在案。二批解銀三萬兩。由西陽州繞道前來。現今尙不知行抵何處。俟其解到。可敷九月之用。惟十月以後。餉項尙屬無著。湖南省庫萬分支絀。現因陸兵太

軍擬再添二千人。又苦餉無所出。焦急難名。惟江西一省。物力較豐。道途較近。此軍之起。本爲四省合防而設。將來大軍下至九江湖口一帶。則江西之防亦可稍弛。合無仰懇皇上天恩。飛飭江西撫臣。不論何款。迅卽籌銀八萬兩。徑解臣等行營。以濟急用。至廣東四川二省。均懇飭諭該督撫各籌銀數萬兩。飛速解交臣等一軍。庶饋餉常繼。無待哺不給之虞。臣等不勝迫切待命之至。謹附片奏請旨。

統籌三路進兵摺 咸豐四年九月初七日

奏爲統籌三路進兵分別水陸先後直搗下游。恭摺奏請聖訓指授機宜事。竊自武漢克復後。襄河以內賊船。勢踞殆盡。江漢一律肅清。急應乘勝進剿。此次敗竄之賊。脅從解散。薙髮乞命。分途而同籍者。約二三萬人。逃赴下游。回踞薙髮再圖抗拒者。亦尚有數萬人。南岸之薙髮解散者。爲數尙少。其回巢抗拒者。多集於興國州。北岸之薙髮解散者。爲數極衆。其回巢抗拒者。多集於蕪州廣濟等處。而皆以水次爲老巢。以舟楫爲藏身之固。屢據探稟北岸之黃州府。南岸之武昌縣。均已收復。自巴河以下。經田家鎮道士嶺直至九江。節節皆有賊船。臣等現與兼署督臣楊霽商定。三路進兵。南路由臣塔齊布率湖南兵勇進攻興國大冶等處。北路由署督臣派令固原提臣桂明等率各營兵勇。進攻蕪州廣濟等處。水師由江路直下。楊載福彭玉麟率前幫先發。臣國藩督同李孟羣等率後幫繼進。俟抵黃州時。與陸路北軍一會。抵田家鎮富池口時。與陸路南軍一會。北軍行至廣濟。將入皖境。再與署督臣商定行止。南軍則須勦辦九江後。乃能渡江而北。以圖疾搗安慶。規復省會。該逆擄掠民船。以數萬計。經臣等一軍轟擊焚燒者。不及七千。各省官軍焚擊者。亦不過數千。下游現存之賊船。爲數尙復不少。九江以下。必當大戰數次。臣等惟有激勵士卒。步步整頓。以期廓清江面。仰慰聖懷於萬一。所有統籌三路進兵情形。謹會同兼署總督湖北撫臣楊霽恭摺由六百里驛馳奏。伏乞皇上聖鑒訓示。遵行。謹奏。 硃批。一。所籌甚是。卽照擬行。欽此。」

保案第二單摺 咸豐四年九月初七日

奏爲遵旨彙保出力員弁兵勇懇恩獎敘以昭激勸事。竊自本年六月二十七至八月十三等日。岳州水陸屢捷。欽奉六次諭旨。均准擇尤保獎。臣等悉心核定。分爲三起開單。其自六月二十七日至七月十八等日爲第一單。

業經具奏在案。茲將第二起彙單仰懇恩敘。伏查岳州水陸二十餘戰。自六月二十七至七月十四日。水戰功多。而十八日則陸營甚爲得力。自七月二十一至二十九日。陸戰功多。而二十九日則水陸並爲得力。自閏七月初二日至八月十三等日。水路則窮追。陸軍疊戰。均屬非常用命。臣等彙單請獎。因接仗太多。亦不能拘定以某日之功。屬某軍。惟據各營官開單保稟。臣等反覆核定。悉準至公。既不敢吝賞。亦不敢稍涉冒濫。惟冀就中選拔將才數人。或得偏裨之才數十人。以補異日疆場之選。則臣等區區所以仰答聖慈於萬一也。所有第二次彙單請獎緣由。謹會同湖南撫臣駱秉章恭摺由驛馳奏。伏乞皇上聖鑒。訓示遵行。謹奏。

請飭陝西解餉來營片 咸豐四年九月初七日

再臣等水陸進剿。斷不敢稍涉遲誤。惟慮餉項不能應手。卽有掣肘之虞。從前由南省半月解銀一次。目下省庫已竭。道途復遠。水路千餘里。風信靡常。又無專辦糧臺之大員。均由臣設法支持。深恐貽誤軍行。幸荷聖慈。慮念屢飭川廣江西協濟此軍。昨復奏請飭諭江省籌解十月分餉銀八萬兩。未知能應時解到否。此後深入賊地。必須有巨款以足敷兩三月之需。方敢放心前進。合無仰懇皇上天恩。飛飭陝西撫臣王慶雲籌銀二十四萬兩。派員徑解臣等行營。俾敷三月之用。臣等雖孤軍深入。亦有恃而不恐。不勝迫切待命之至。謹附片請旨。

謝恩仍辭署鄂撫摺 咸豐四年九月十二日

奏爲恭謝天恩再行瀝陳下情仰祈聖鑒事。本月十一日准兵部火票遞到咸豐四年九月初五日內閣奉上諭。一塔齊布曾國藩奏水陸大軍。同月克復武昌漢陽一摺。此次運籌決策。深合機宜。允宜立沛殊恩。以酬勞勩。曾國藩著賞給二品頂戴。署理湖北巡撫。並加恩賞戴花翎。欽此。一竊臣辦理戎務。過多功少。屢次陳奏在案。武漢克復。有提臣塔齊布之忠奮。有李孟羣羅澤南之謀略。有楊載福蕭捷三等之勇奮。故能將士用命。迅克堅城。微臣實無勞績。至於縱火多順風之時。西岸得荆兵之助。廿三勦洪山之賊。廿四燒襄河之船。事機之順。處處湊泊。則由我皇上憂勤所積。默挽天心。非臣籌謀所能及。尤無勞勩之可言。荷溫諭之褒嘉。祇慚悚以無地。至奉命署理湖北巡撫。則於公事毫無所益。而於私心萬難自安。有不得不瀝陳於聖主之前者。水師前幫業於初七日起行。沿途勘搜。已過黃州以下。臣率後幫亦擬卽日起行。鄂垣善後事宜。既不能一爲兼顧。轉瞬出鄂入皖。湖北巡

撫之關防。仍須委員贖回武昌。此所謂於公事毫無裨益者也。臣母喪未除。葬事未妥。若遂就官職。則外得罪於名教。內見譏於宗族。徵臣兩年練勇造船之舉。似專爲一己希榮徵功之地。亦將何以自立乎。上月謝恩摺內。申明前奏。不敢仰徵議敘。本月初九日。奉到硃批。『殊不必如此。回執』等因。欽此。臣亦知聖主垂念之殷。恐徵臣涉於好名之念。臣更歷憂患。屢經敗挫。又常奉聖諭。以好名爲誠。豈有漫不省察之理。願自維縲然素絲。遠縮符綬。大義虧損。何以臨民。康熙間奪情之案。李光地爲彭鵬所劾。干養志爲陸隴其所劾。載在國史。凜然可畏。揆之大防。返之方寸。均覺悚惶無已。此所謂於私衷則萬難自安者也。臣與督臣楊霽熟商。恐出境在即。關防交替。徒費展轉。是以不敢接受。仍由督臣將關防收存。並德懇皇上天恩。簡派賢員接任湖北巡撫。以重疆寄。俾臣得專力東征。感荷生存。實無既極。倘藉聖主如天之福。此後勤辦得手。廓清江面。不致隕越。則微臣供職之年尙富。受恩之日方長。斷不敢矯情要譽。上負聖慈諄諄之訓。所有微臣感激下忱。並瀝陳辭免署撫各情。謹繕摺附驛具奏。伏乞皇上聖鑒。訓示施行。謹奏。硃批。『覽。朕料汝必辭。又念及整師東下。暑撫空有其名。故已降旨令汝毋庸署湖北巡撫。賞給兵部侍郎銜。汝此奏雖不盡屬回執。然官銜竟不書署撫。好名之過尙小。違旨之罪甚大。著嚴行申飭。欽此。』

陸軍克與國大冷水師蕪州獲勝摺 咸豐四年九月二十七日

奏爲陸軍分途大捷。克復與國大冷水兩城。水師在蕪州大獲勝仗。恭摺由驛奏聞。仰祈聖鑒事。竊照水陸三路進兵。業經奏明在案。南路之師。臣塔齊布率湖南將弁。十三日自鄂省拔營。由武昌縣一路進剿大冷水之賊。署湖北提督佈克慎。副將王國才。揀發游擊阿達春從之。以行。候選道羅澤南。亦於十三日拔營起行。由金牛堡一路分剿與國州之賊。游擊彭三元。都司普承堯等從之。以行。北路之師。副都統魁玉。總兵楊昌泗等。於十七日拔營起行。回原提督臣桂明。已自楊店。先至黃州。水師前幫。於初七日起旋。二幫於十三日起旋。臣國藩於二十一日舟次黃州。與北軍一會。即飭魁玉楊昌泗於二十二日西出蕪水進剿蕪州之賊。此分路先後進兵之大略也。十七日。羅澤南等由金牛堡進至大冶縣。探聞逆匪知官軍兩路進剿。遂從田家鎮糾黨六千餘人。半由與國分抄大冶。堵拒武昌一路官兵。半踞與國州城。堵拒金牛一路官兵。羅澤南等。於二十日巳刻。馳抵與國境內之鹽埠頭。

地方急截大冶賊黨歸路。並禦與國之匪。使不得合爲一隊。該逆分三路來撲。有衆約三千人。黃旗徧野。羅澤南等登山審視。扼險排陣。如不欲戰者。然該逆馳下山岡。由田隴進撲我師。羅澤南彭三元由田隴中路進攻。普承堯由傍山左路進。候選直隸州李續賓由沿河右路進。四面圍抄。鎗礮刀矛並舉。呼聲震天。殲其前鋒數人。賊遂奔潰。半棄軍械而走。我軍追殺十里之遙。共斃賊三四百名。生擒五十三名。內有僞總制汪茂先僞師帥二名。旅帥四名。兩司馬八名。皆髮長尺餘。立即梟示。奪獲大小黃旗六十餘面。抬鎗鳥鎗百餘件。馬十二匹。子藥軍裝無算。該逆因我軍扼截要路。不能前赴大冶。是晚薙髮逃生者。十之四五。餘多回竄與國州城。二十一日五鼓。羅澤南等派隊大成。仍分三路前進。直薄州城。城外盤踞之賊。悉數狂竄。飛龍飛虎僞旗。及軍械子藥。皆委之而去。官軍由南門入。克復州城。搜獲僞知州胡萬智。爲賊中僞進士。力守州城。希圖再舉者。供詞狂悖。至死不悔。當即凌遲梟示。復捕獲餘匪二十餘名。就地正法。該知州保忠亦帶近鄉練勇。回城會同安撫難民。其大冶之賊。臣塔齊布於二十日由武昌縣拔營馳勦。二十一日已刻抵大冶城外之五里牌。該逆約四五千人。整隊來犯。臣塔齊布率湖南弁兵及阿達春等。由中路進。王國才等帶領雲南弁兵由南路進。佈克慎等帶領湖北弁兵在於北路埋伏。該逆勢甚猖獗。官兵鏖戰逾時。殺賊多名。尙抵死抗拒。臣塔齊布怒馬衝陣。將逆首立斬馬下。中路之賊。當即敗退。左右兩路亦隨奔潰。各路兵勇及埋伏之兵乘勝施放火箭火彈。燒燬賊營二座。煙燄迷漫。詎料敗竄之匪拚死復來。左路另有伏賊突起。臣塔齊布正在揚鞭督陣。忽被數匪撲來。刺傷坐馬。幸親兵數人立前刺取伏匪之悍者。四路短兵相接。賊復大潰。尸橫徧野。我軍由縣城北關追出南關。復分兵截賊之腰。共斃賊約一千餘名。奪軍械千餘件。驟馬二十七匹。餘賊爭橋過河遠竄。人數擁擠。橋忽折斷。墜橋死者近一百人。後至者爲追兵所逼。無路可逃。全數落水溺斃。又千餘名。與八月二十三日。洪山追賊入湖。層累踐踏。大致相似。各營生擒逆匪一百三十四名。因其擄掠姦淫肆毒已久。僅予梟首。不足蔽辜。概令剜目凌遲。以洩居民之憤。此陸軍二十一日。同時克復與國大冶兩城之實在情形也。各營水師分紮蘄州上游之蒜花壩道士墩漳源口一帶。十八日。探聞蘄州賊黨窺我水軍深入。距兩岸陸營在三四百里外。希圖乘隙來撲我水師。升用參將楊載福。候選同知彭玉麟等會商定計。與其待賊至而迎敵。不若及其未至而擊之。遂於十九日。督同千總秦國祿等。各帶長龍舢舨。自蒜

花塔出隊，行抵蘄州對岸。賊見我軍將近，將船百餘號，先行開出，放礮迎敵。並於高岸搖旗開礮，以護未開之船。我軍奮勇轟擊，該逆船勢不能支，卽行下竄。我軍分戰船一半，追赴下游，趨至距田鎮十五里之骨牌磯。先後燒燬三十餘號，轟斃賊匪無數。其一半則攻擊未開之賊船，該逆轟礮擲火，抵死抗拒。岸上賊復開礮助之。子如雨下。我軍習戰已久，俱以避子爲恥，愈擊愈奮。自午至酉，酣戰數時，始將未開之船六十餘號，一概燒盡。轟斃逆黨甚多。北岸陸軍未到州城，未能卽復。收隊回營，時已五更。計奪獲旗幟鎗礮，共數百件，而陣亡受傷者亦不少。此水師蘄州獲勝之實在情形也。伏查鄂省逆匪，以與國崇陽兩處之賊爲最兇悍。自去年田鎮失防，與國大冶，該逆久已踞爲老巢。上達崇通，下達九江，製造子藥，嘯聚黨羽，皆以與國爲總匯之所。該逆聞七月在鄂城開科取士，與國之人應試者最多。是以臣等於克復武漢以後，卽決計先勦與國大冶。茲幸仰仗皇上天威，兩城同日克復。惟礮斃溺斃，雖逾二千之多，而逃竄尙復不少。探得該逆畏南軍之勁，從下游渡竄北岸。於田家鎮多築土城，掘濠數重。又以木牌橫截江面，阻我舟師。分賊數千，踞守蘄州城內。亦於臨江一面，築壘安礮，拒禦水師。臣塔齊布督同羅澤南尙在南路痛勦餘匪。臣國藩現紮道土，狀相機審度。如果北岸之賊，負隅抗拒，仍當令南軍渡江會勦。以期一鼓殄除。仰慰宸廬。此次水陸二軍，分途獲勝，克復堅城，所有出力員弁兵勇，合無仰懇皇上天恩，准臣等擇尤保獎，以作士氣。其陣亡兵勇，亦卽查明照例辦理。所有陸軍分路大捷，克復兩城，並水師獲勝各緣由，謹會合湖廣督臣楊需恭摺，由驛六百里馳奏。伏乞皇上聖鑒訓示。謹奏。

第三軍保案摺 咸豐四年九月二十七日

奏爲遵旨彙保出力員弁兵勇，仰懇恩施，以昭激勸事。竊照水陸各軍，自岳州勦賊轉戰至金口一帶，大捷十餘次。欽奉六次諭旨，准將出力員弁兵勇，擇尤保獎。臣等悉心酌核，分作三起，開單請獎。每起多者百餘人，少者數十人。業經兩次彙奏，均奉恩旨，俞允。當卽恭錄行知。各將士無不感激思奮。本月十四日，復奉寄諭，「出力將士，尤須及時酌保，不可使有缺望。若能從九江安慶直抵金陵，使長江數千里盡蕩妖氛，則從征將弁，朕必破格施恩，以酬懋績。」欽此。臣等跪聆之下，仰見我皇上鼓勵戎行之至意，莫名欽佩。比卽傳知各將弁，傳諭各兵勇，莫不感頌皇上，懽聲雷動。茲將第三軍酌定，恭呈御覽。仰懇天恩，獎敘，以作士氣，而勵將來。查李孟羣所帶廣西水

勇。於閏七月初一日以後。始行開仗。是以列入此單。八月初三四等日。陸軍克復崇陽。大戰咸寧等處。亦卽彙入此單。不另具奏。所有第三次彙單請獎各緣由。謹會同南撫臣駱秉章恭摺由驛具奏。伏乞皇上聖鑒。訓示施行。謹奏。

擬先攻半壁山破賊橫江鐵鎖片 咸豐四年九月二十七日

正封摺間。適接探報。該逆於田家鎮江面橫安鐵鎖二道。相距約十數丈。鐵鎖之下。排列小划數十隻。以鎗礮護之。北岸築土城。多安礮位。專防我軍戰船。該逆屢次大敗之後。而氣力尙兇橫如此。殊堪痛恨。臣等擬先攻田鎮對岸之半壁山。奪其要隘。則鐵鎖一岸無根。當易拔去。理合附片陳明。謹奏。

縷陳鄂省前任督撫優劣摺 咸豐四年九月二十七日

奏爲博探公論。縷陳鄂省前任督撫優劣。恭摺奏聞。仰祈聖鑒事。竊臣國藩自入鄂城以來。撫恤遺黎。探訪輿論。據官吏將弁紳庶。僉謂武漢所以再陷之由。實因崇綸台勇辦理不善。多方貽誤。百姓恨之刺骨。而極稱前督臣吳文鎔忠勤憂國。殉難甚烈。官民至今思之。卽於前撫臣青麀。亦尙多哀憐之語。無怨恨之辭。蓋緣吳文鎔於上年九月十五日到鄂。卽刻接卸。未刻卽聞田家鎮兵敗之信。閩城逃徙一空。官弁倉皇無計。衆心渙散。吳文鎔傳集僚屬。誓必死守。卽日移居保安門城樓。隨身僅一僕一馬。無書吏幕賓。無親兵夫役。晝夜手治文卷。衣不解帶者兩月。由是人心稍定。潰兵稍集。賊匪仍退下游。不敢徑犯鄂垣。若堅守不懈。未始不可轉危而爲安。乃崇綸因偶懷私怨。輒劾奏吳文鎔安坐衙齋。閉城株守。其實該前督日夜住宿城樓。並未在衙齋少住片刻也。賊匪所恃以駭人者。全憑船隻之多。萬帆颺忽。千礮雷轟。官軍若無舟師。雖有陸兵數萬。亦熟視而無可如何。自上年田家鎮失防以後。吳文鎔江忠源二人。與臣往來書函。皆以籌辦水師爲第一要務。臣在衡州試造戰船。吳文鎔屢函執商。言造船配礮。選將習戰之法。精思研究。每函千餘字。忠盡之忱。溢於行間。臣愚竊嘆以爲不可及。其言湖北現僅雇小划擺江之類。不堪戰陣。必待臣處舟師辦就。駛至鄂中。始克會同進剿。亦係實在情形。乃崇綸茫焉不察。動稱礮船已齊。譏督臣畏葸不出。吳文鎔素性剛介。深以畏葸爲恥。遂發憤出征。以屢潰雜收之兵勇。新募未習之小划。半月不給之餉項。倉皇赴敵。又居者與出者不和。事事掣肘。遂使堵城之役。全軍潰敗。湖北府縣。相繼

淪陷。蓋未始非崇綸參劾傾陷有以致之也。尤可異者。當參劾之後。吳文鏐毅然出征。崇綸復率僚屬力阻其行。我皇上曾嚴飭其自相矛盾。迨堵城既敗。吳文鏐殉難。閩省軍民。人人皆知。而崇綸以不知下落入奏。不惟排擠於生前。更復中傷於死後。正月十九日。崇綸遣守備熊正喜至衡州一帶。催臣赴鄂救援。僞造吳文鏐之咨文。借用布政司之印信。咨內但稱黃州賊勢猖獗。並不言堵城已敗。督臣已死。種種詐僞。故作疑似之詞。無非謂吳文鏐未能殉難。誣人大節。始終妬害。誠不知其是何肺腸。臣國藩於九月二十一日。至黃州。二十二日躬詣堵城。察看當日營盤地勢。並祭吳文鏐之靈。細詢該處居民。言吳總督自到營以來。兩泥深數尺。日日巡行各營。激厲士卒。正月十五日。見賊踏營盤四座。知事不可爲。乃於雪泥之中。北向九叩首痛哭大呼曰。『無以仰對聖朝。』遂自投塘水而死。其塘去營門遠不過六七丈。土人言其平日之勤苦。臨終之忠憤。至今有流涕者。亦可見公道之不泯也。吳文鏐受三朝恩遇。爲督撫二十年。前此海塘潰決。尙且慷慨激烈。投海捐軀。豈有全軍覆敗。反肯懦弱偷生之理。幸賴聖明鑒照。優加卹典。賜予美諡。吳文鏐得雪斯恥。永銜感於九原。否則名節誣墮。雖死猶有餘憤矣。吳文鏐既沒。青巖幫辦軍務。崇綸又與之百端齟齬。求弁兵以護衛而不與。請銀兩以製械而不與。或軍務不使聞知。或累旬不相往還。青巖在長沙。時與臣言及崇綸之多方掣肘。台勇之坐視不救。輒爲之椎胸痛恨。怒皆欲裂。未知曾否入奏。大抵治軍譬如治家。兄弟不和。則家必敗。將帥不和。則軍必敗。一人而怨冒衆兄弟者。必非令子。一人而排擠衆將帥者。必非良臣。去年張亮基欲以全力防田家鎮。崇綸既阻撓而不合。繼又傾擠吳文鏐。旋又忌害青巖。皆使銜恨於地下。平心而論。鄂省前後潰敗決裂之由。不能不太息痛恨於崇綸也。自賊踞漢陽。漢口爲老巢。由是西至宜昌。北至德安。南犯湘省三次。攻陷岳常澧州。縱橫百餘州縣。蹂躪殆徧。虛舍蕩然。寸草不留。崇綸閉坐一城。置罔聞知。土匪擄掠。亦置不問。所失國家土地。並不一一詳奏。百姓之言皆曰。『青巖撫在此。尙有兵勇驅賊之擄掠。尙有告示憐民之疾苦。崇巡撫並告示而無之。全不恤我等爲大清之赤子矣。』積怨如此。我皇上優容臣下。僅予革職。崇綸稍有天良。當以一死圖報。乃六月初二日。武昌城陷。崇綸隨衆軍逃出。展轉偷生。反稱革職回京。已於前一日先出鄂城。呈請轉奏。身爲封疆大臣。無論在官去官。死難是其本分。卽不死。亦不妨明言。何必倒填月日。諱其城破逃生之罪。劾人則雖死而猶誣之。處己則苟活而故諱之。豈非無恥之尤。

者哉。臣自入湖北境內以來，目擊瘡痍，博訪輿論，莫不歸罪於崇綸。以年餘之成敗始末，關繫東南大局，不敢不據實縷陳。其應如何聲罪嚴究，聖主自有一定之權衡。微臣不敢擬議。所有博探公論，縷陳鄂省前任督撫優劣情由，恭摺附驛奏聞。伏乞皇上聖斷施行。謹奏。硃批：「另有旨。欽此。」

陸軍踏破半壁山賊營水師續獲大勝摺 咸豐四年十月初七日

奏爲陸軍踏破半壁山賊營水師續獲大勝恭摺由驛奏聞。仰祈聖鑒事。竊水師在蕪州獲勝，陸營克復大冶與國業經馳奏在案。查逆黨全力占踞田家鎮，自蕪州至該鎮四十餘里，沿江增築土城，安設礮位，江面用鐵鎖橫互，阻截舟師。其南岸之半壁山富池口，均令重兵駐守。兩岸之賊，舟楫往來，我軍欲破田鎮，必須先奪南岸。上年田鎮失防，因半壁山富池口爲賊所據，勢遂不支。故南岸爲必爭之地。臣等在鄂省時已經籌及，是以克復與國大冶後，即定議占踞半壁山富池口兩處。臣塔齊布於二十八日，自與國拔營進紮富池口。新授浙江寧紹台道羅澤南進紮半壁山。是夜宿挑港。初一早，整隊進發。羅澤南自帶湘勇九百，合以游擊彭三元、都司普承堯所帶寶勇九百名，派七成隊爲前敵，而以三成護輜重居中。升用直隸州李續賓帶湘勇九百，以三成護輜重前行，而以七成居後防賊抄尾。已刻行抵馬嶺坳，距半壁山賊營二三里。見該處孤峯峻峙，俯瞰大江，與田鎮諸山相雄長。上紮大營一座，小營四座，挖溝深丈餘，闊三四丈不等。引內湖之水環灌之。溝內豎立礮台木柵，溝外密釘竹籤木椿，其堅固與前次花園賊壘相埒。而地險過之。羅澤南等登高審度形勢，正欲紮營，賊忽以數千人來撲。其田鎮之賊，渡江助戰者，又數千人，藏匿民房者，亦紛紛突起，約共萬餘人。半壁山至馬嶺坳湖汊紛錯，惟兩隄可通行。我軍列陣以待，擬俟李續賓到後開仗。賊恃人衆，遽來搗戰。寶勇居左，向前迎敵，被害數名，諸勇盡退。羅澤南恐一潰之後，不可復救，自帶敢死之士數十人，匹馬衝去，奮力堵殺。賊衆退歸隄北。羅澤南復由右隄衝出，殺賊數人。藍翎千總何如海，手刃僑丞相一名，與六品軍功彭稱祥併力向前，從左隄殺出，斃賊數十名。突被高阜之賊，拋擲石塊，擊中何如海額端，登時陣亡。彭稱祥趕救，一同遇害。左隄湘勇亦稍卻退。羅澤南從右隄回馬，衝入左隄，督勇截住。賊衆愈殺愈多，礮子雨下，火箭噴筒交集，兇猛異常。我軍進則賊稍退，我軍卻則賊復前。如此者數十次。血戰三時之久，賊雖屢挫，尙併死抗拒。適李續賓帶湘勇後隊趕來救應，軍氣益振。羅澤南與候選

知縣李杏春從左隄衝進，李續賓從右隄衝進，殲數十名。賊衆大敗，乘勝直逼賊營。從木椿竹籬中踰溝而入，縱火焚燒，煙燄蔽空，焚斃以數百計。彭三元分途截殺，普承堯亦從右坳抄出，圍住賊營。各勇進至江岸，賊即登舟。我軍搶入舟中，殺斃近千人。江水盡赤，覆舟溺斃者亦不下千人。浮尸蔽江，僞秋官丞相林紹璋被湘勇追至舟邊，殺於馬下。賊懼我軍飛渡，自將浮橋折斷，生擒四十餘名。據供除林紹璋外，又有僞將軍陳姓，僞指揮彭姓，及僞官十數名，均已就戮。奪獲黃旗百餘面，馬三十餘匹。子藥軍裝無算，申刻收隊。查明各勇陣亡者計十三人。此初一日陸軍羅澤南等在半壁山大獲勝仗之實在情形也。水軍自十九日戰勝後，分紮漳源口之兩岸，與蘄州賊船相距二十餘里。二十九日辰刻，澄海營營官白人虎、定湘營營官段瑩器、駕戰船十餘號，往下游巡哨。風平水溜，忽近蘄城。該逆猝出船百餘號圍擊，澄海營被燒船一號，被擊破一號。我軍小挫，一面迎敵，一面轉舵回營。該逆見官軍卻退，遂乘東風大作，飽帆來追。凡尾追十餘里，乘勢上犯。直近老營，左營彭玉麟、右營楊載福親往救應。中營秦國祿、清江營俞晨、響導營孫昌國各率快蟹、長龍等大船盡出，逆風開鎗，排轟而下。哨官任星元、李陞、元飽超等，傍南岸而行，衝至蘄州以下之釣魚台，先包賊尾，然後逆擊而上。將賊船裹入中段，該逆先乘順風上犯，倉猝不能退轉。又見官軍上下圍抄，遂紛紛棄船登岸。我軍自上而下者，攢礮以擊登岸之賊，自下而上者，縱火燒釣魚台之賊船。是日上犯之船，悉數焚奪，無得脫者。計延燒賊船近八十號，奪得賊船大小四十六號。巨礮六十三位，抬鎗萬鎗，旗幟號衣子藥，僞書無算。白人虎因初時小挫，後得大勝，憤極戀戰，戍初猶未收隊。被岸上之賊，以抬鎗傷中額角，即夕殞命。當逆船來犯時，陸賊千餘人亦沿岸上撲，護衛水師之陸勇先派八十餘人放哨，突遇賊至，鼓勇格鬥，傷亡十餘人。各營始出隊救應，前任江西巡檢石熾然偕浙江監生徐國本、急稟請親勇十餘人奮往助戰。石熾然刺倒大旗賊目，復手刃六賊，乘勝進追。樹林內伏匪突出，石熾然徐國本同時遇害。賴大隊前往救應，水軍復向岸轟擊，始將陸賊擊退。此二十九日水軍先挫後勝之實在情形也。初一夜，該匪乘北風甚勁，前來驚我水營。以小划十餘，亂拋火球，而於北岸始放火箭。臣國藩以黑夜風厲，一經開動，必至自相撞擊，急傳令軍中曰：「船不開動者，該哨官立即奏保，其開動者立即責革。」各營堅壁不動，手持水甌，見火球落船，即時撲滅。該逆射火箭數百枝，僅燒一船，餘俱無恙。次日查明開動之船，僅十餘號。此外皆堅坐不動。此初

一夜大風驚營之實在情形也。伏查該逆自武漢敗竄。即全數防守田家鎮。蓋以南岸之大冶與國北岸之蕪州廣濟。向爲衆賊之淵藪。而田鎮與半壁山又實爲天然之關隘。故上游之賊。併萃於此。復自下游江皖。糾集滿髮老賊。來此拚拒。阻我東下之師。現在鐵鎖尚牢。繫江心兩岸賊衆。尙近四萬。計日內必須大戰數次。臣等謀定後發。斷不敢稍涉疏虞。此次與該逆爭此關隘。幸仗聖主天威。水陸獲勝。所有在事出力員弁兵勇。仰懇天恩。容臣等酌量保獎。以示鼓勵。至陣亡各員。除白人虎另片請卹外。藍翎千總何如海。自岳州以來。身經數十戰。爭先陷陣。奮勇被戕。合營皆爲痛哭。克復武昌案內。擬保守備。尙未出奏。應請從優照守備例賜卹。前任江西馬當司巡檢石燦然。膂力剛強。膽勇俱壯。因衆寡不敵遇害。碎首屠腸。死事最烈。應請飭部議卹。監生徐國本。襄辦營務。明敏勇敢。武昌案內擬保從九。尙未出奏。此次助陣捐生。尸首無獲。合無仰懇聖恩。即照從九例議卹。藉以昭激勸。而慰忠魂。所有水陸大捷各情。由謹會同湖廣督臣楊鼎恭摺由驛六百里馳奏。伏乞皇上聖鑒。訓示施行。謹奏。

請飭江西開局製造火藥鉛彈片 咸豐四年十月初七日

再臣等軍中所需子藥。前後用至數十萬斤之多。概係湖南省局支應。不特撫臣等竭力籌解。即委辦後路糧臺之保升道員裕麟。保升知府厲遺雲官等。均能設法預籌。或水路虞其阻滯。忽改陸路。或前批尙未起行。接辦後批。委官委紳。絡繹不絕。實屬勉力供支。無誤要需。惟目下全軍將出楚境。距南省千數百里。江湖阻隔。風行靡常。此後殊難應手。且南省供億經年。力量不繼。亦賴協濟於鄰封。湖北殘破之餘。竟難措辦。相應請旨飭下江西撫臣陳啓邁。遴委幹員。籌款開局。監製火藥。鑄造鐵子鉛彈。由湖口運解出江。就近接濟。庶可無誤軍行。俟江省子藥辦成。解到後。即可漸紓湖南省局之力。理合附片具奏。請旨。

白人虎陣亡請卹片 咸豐四年十月初七日

再澄海營官白人虎。籍隸華容。剛正嫉惡。本年三月十七日。首逆王光鼎丁生魁等。聚匪千餘人。逐官踞城。白人虎捐貲募勇。與生員白明月等。帶勇千餘往剿。及賊戰於萬庚市。殺賊七十餘名。白人虎右腿受傷。復手刃二十二賊。遂乘勝復收縣城。生擒匪目尹其正等。追賊至石首縣境之招商河。殲斃九十餘名。逆黨恨甚。旋於五月初二。分三路悉數來攻。衆寡不敵。縣城再陷。知縣宋昌期殉節。義勇死者七十八人。白人虎遂赴荊州兵請借李光

榮黃鵬程等援石首。並攻華容。十二日。白人虎先驅及賊。戰於板橋。殺匪千餘人。再復縣城。倡辦團練。經荊州將軍官文咨賞五品頂戴。未知曾否入奏。復剿捕巴陵陳家林土匪。殺催貢之匪目楊大連。易正清。生擒王光鼎之父。六月二十二日。逆船二百餘號。在九都焚掠。復帶勇剿斃五百餘名。燒船二十四號。旋於華容石首監利三邑交界之塔市驛。搜捕丁生魁家口殺之。義聲所倡。各團響應。該縣雖數月無官。而合邑士民咸奉白人虎爲依歸。土匪終不敢肆。卽粵匪往來荊州岳州之間。不敢多擾華容。亦賴白人虎保護之力。臣國藩札調來營。華容士民留之。嗣令其招集水勇。修理船廠。駐紮新灘口。以防襄河之賊。白人虎晝夜辛勤。自家運米二百石。以佐該營之用。所得公項銀兩。盡數分給士卒。其義俠廉正。均不可及。臣等方以國土期之。武昌克復案內。擬保守備。尙未出奏。遽力戰捐軀。深堪憫惜。該營官沒後。其部曲揮涕如雨。皆思爲之報仇。其義憤亦尙可用。合無仰懇皇上天恩。俯念該營官徒手倡義。功在地方。卽照守備陣亡例。飭部議卹。以示旌異。而慰忠魂。臣等爲激厲人心起見。是否。有當。謹附片奏聞。請旨。

劉若珪殉難請卹片 咸豐四年十月初七日

再臣克復武漢。卽派員查明殉難官紳下落。據已革湖北鹽法武昌道劉若珪家丁趙升呈稱。竊家主前在署黃州任內。值粵匪數萬來攻。孤城無援。遂至失守。當經投繯自盡。被衆家丁挽救復甦。時以荷延殘喘。爲恥。鬱鬱不樂。嗣經部議發遣。因道梗難行。粵匪復又上竄。鄂省戒嚴。奉崇巡撫札委巡守小東門。夙夜在公。不遑安息。原冀戴罪自效。稍贖前愆。不料六月初二日。省城再陷。家主感憤愈甚。卽在蛇山望闕叩頭。懸樹自盡。家丁見其情詞激烈。不敢勸救。又恐逆黨殘毀其尸。隨負至寓所後院煤房掩厝。用瓦礫標識。卽繞城躲避鄉間。昨大軍攻克武昌。家丁趨回原寓。查看家主尸身雖腐。面目如生。呈懇奏明請卹一等因。據此。當卽委員前往查驗無異。仍飭妥爲棺殮。搬回原籍。查看家主尸身雖腐。面目如生。呈懇奏明請卹一等因。據此。當卽委員前往查驗無異。仍飭前事爲效。憤不欲生。卒能一死殉城。克完初志。我皇上表章節義。凡獲譴之員。但能遂志捐軀。均獲加恩賜卹。此外鄉紳義勇。有因殺賊捐生者。雖一命未膺。猶蒙恩卹。屢奉通飭。欽遵在案。今劉若珪引義自裁。深堪憫憫。合無仰懇皇上逾格天恩。飭部議卹。以勵臣節。而慰忠魂。所有據呈請卹緣由。理合附片奏聞。請旨。

謝兵部侍郎銜恩摺 咸豐四年十月初七日

奏爲恭謝天恩。仰祈聖鑒事。九月二十七日。准兵部火票遞到咸豐四年九月十三日內閣奉上諭。一會國藩著賞給兵部侍郎銜。辦理軍務。毋庸署理湖北巡撫。欽此。一竊臣墨經從戎。毫無勞績。前荷恩綸。昇以封疆重寄。臣因母憂未除。義不忍遠縮符綬。且出境東征。於地方公務。尤難兼顧。是以具摺叩謝天恩。并辭巡撫之任。乃前摺尙未實到。即蒙聖慈垂念。體卹周詳。免其署理巡撫。俾臣內不虧於名義。外得效乎馳驅。凡私衷不敢上達之隱。無一念不在洞鑒之中。感泣涕零。莫可言諭。至頭銜之寵錫。尤慚悚之交增。未展寸功。叨司九伐。責任愈重。報稱愈艱。現在師抵蘄州。水路兩獲勝仗。又幸有半壁山之捷。擬即將田鎮老巢併力攻破。以便直搗下游。臣益當凜懍誓師。枕戈待旦。拯生民於水火。紓宵旰之憂勤。以期仰答高厚鴻慈於萬一。所有微臣感激下忱。謹繕摺附驛。叩謝天恩。伏乞皇上聖鑒。謹奏。硃批。知道了。欽此。

代奏羅澤南謝恩摺 咸豐四年十月初七日

奏爲據情代奏叩謝天恩事。據新授浙江寧紹台道羅澤南呈稱。一九月二十九日。在興國行營接奉行知。咸豐四年九月十五日內閣奉上諭。一浙江寧紹台道員缺著羅澤南補授。欽此。一竊羅澤南鄉中下士。才識迂愚。值粵匪擾及鄉閭。倡辦本邑團練。猥蒙保薦。由虞生候選訓導。嗣於勦辦桂東土匪案內。經湖南巡撫保擢知縣。上年六月。帶勇赴援江西。勦平吉安泰和股匪案內。經江西巡撫保升同知直隸州。留於江西補用。並請賞戴花翎。均未接奉部覆。十二月。勦平郴州永興土匪案內。經湖南巡撫保升知府。仍留湖南帶勇。奉旨交部議覆。亦未奉到部文。本年七月。岳州勦賊案內。奉旨。一羅澤南著以知府儘先選用。並賞戴花翎。欽此。一八月內克復武漢。奉旨。一候選知府羅澤南著記名以道員用。欽此。一自惟草茅寒賤。驟玷崇班。初無汗馬之勞。徒切濡鷄之愧。茲復渥荷恩綸。備員東浙。初登任版。遽躡監司。凡此非分之殊榮。實爲夢想所不到。捐糜頂踵。豈足云酬。惟有勉策駑駘。誓殲醜逆。蹈湯赴火。所不敢辭。庶冀稍答破格殊恩於萬一。除當設香案望闕叩頭外。呈懇代謝天恩。一等情。據此。查該道荷蒙超擢。例應叩謝聖恩。既據呈請代表。理合轉達天聽。惟現當勦辦喫緊之際。該道爲臣軍中萬不可少之員。不能卽赴新任。仍懇皇上天恩。簡員署理該缺。俾得併力東征。則感激益無涯矣。所有代謝天恩。並

請將該道留營勦辦各緣由。謹專摺附驛奏聞。伏乞皇上聖鑒。謹奏。硃批。羅澤南著仍留軍營。欽此。

陸軍奪半壁山砍斷鐵鎖水師繞出賊前摺

咸豐四年十月十四日

奏爲南路陸軍大捷斃賊約萬餘人。研斷江中鐵鎖。水師繞出賊前。屢獲勝仗。恭摺奏祈聖鑒事。竊前月二十九日。水師獲勝。本月初一日。陸軍大捷。業經馳奏在案。初二日。餘賊聚集湖汊。扛抬賊屍。忽出數千人。搖旗搦戰。寧紹台道羅澤南因各勇久戰力疲。不令出隊。臣塔齊布自與國拔營。本與羅澤南分爲兩路。羅澤南西往半壁山。臣塔齊布東往富池口。初一日。夜宿南村。初二日。行至軍山背。該逆分數股來撲。隨督參將周鳳山等奮力擊退。焚燒富池口賊營一座。即在軍山背落營。與羅澤南之營相去十餘里。中小河。初四日。臣塔齊布遣人搭造浮橋。以通兩營之路。羅澤南派隊接應。橋尙未成。忽逆黨千餘人。阻遏渡處。而江中賊船。忽以數千。人上坡。排列半壁山之左。北岸田家鎮之賊。渡江者又數千人。排列半壁山之右。其占踞舊壘之賊。亦皆搖旗出隊。羅澤南急登高阜瞭望。見僞官坐擁將台。高聲發令。龍旗黃傘。氣餒甚張。數路賊黨。約共二萬餘人。我軍以臣塔齊布之師。無橋可渡。僅羅澤南等湘勇實勇二千六百人。衆寡懸殊。軍士恒怯。臨時逃去三人。候選直隸州李續賓遣人飛馬追回此三人者。揮涕而手刃之。慷慨誓厲。人心始固。羅澤南與衆將士約曰。賊衆我寡。當以堅忍不發勝之。一即督勇駐紮高岸之左。李續賓駐高岸之右。游擊彭三元等排列江岸。都司普承堯等排列馬鈴山右坳。防賊反奔。賊衆屢次來撲。我軍突起大呼衝陣。連斃執旗賊目。餘衆盡靡。回奔半壁山舊營。該處孤峯拔起。惟後路有級可登。前瞰長江。下臨絕地。我軍乘勝追殺。飛上山嶺。逆黨無路可逃。被斃千餘人。從峭壁之上。橫墜而下。死者數千人。冒石挂樹。血肉狼藉。餘賊奔江覓船。我軍亦緣壁下擊。呼聲震山谷。有十餘舟。因人數過擠。自行沉溺。有數十舟。未及遽開。被我軍躍入。悉數撲水。即已開之船。亦戰慄不能鼓棹。我軍復用火彈火箭。縱橫延燒。即合營之長夫餘丁。亦各執械爭出。或一人殺十餘賊。平地血流。崖有殷痕。江之南岸。水皆腥紅。自湘潭岳州以來。陸戰數十次。未有斃賊如此之多者也。該逆大敗之後。賊船概歸北岸。我軍將南岸賊營盡數焚燬。遣壯士百餘。縱崖而下。將橫江鐵鎖六條。竹籠七條。盡行研斷。日暮收隊。是日。臣塔齊布亦隔港分擊。新獲頗多。忽有賊千餘人。自下游富池口沿岸而上。冀抄我軍之後。臣塔齊布親率將弁。回頭截擊。該逆敗竄江邊。亦被我軍追逼。溺斃百餘人。

與上游煽斃繼續而下。前此閏七月初二，城陵磯之役。八月二十三，炭山之役。九月二十一大冷之役。皆以追賊落水溺斃甚多。未有如此次之慘者也。是日浮橋始成。該逆經此大創。猶復積憤思逞。初五日。復從田家鎮渡江來犯。約三千餘人。意圖搶過浮橋。先撲巨塔齊布營壘。當率游擊阿達春守備李新華等先過浮橋迎擊。酣戰良久。羅澤南李續賓由左路出半壁山下。彭三元扼截江岸。普承堯據守馬鈴山一路。賊忽以千餘人搶過山岡。火球連擲。燒斃湘勇三名。前隊盡退。羅澤南奮力衝截。李續賓由山坡抄來。賊始敗潰。乘勝追至江邊。巨塔齊布亦已追至。兩軍夾攻。殺賊四百餘名。煽斃二百餘名。內有黃馬褂及黃龍風帽之賊四名。我軍仍列隊江干以俟。該逆見官軍盡赴下游。遂開船百餘號。從上游登岸轟擊。意欲徑撲羅澤南之營。幸彭三元等奮勇堵截。添派三成隊。登堤協剿。該逆復揚帆上行數里。至牛港磯對岸。蜂擁上坡。各勇亦沿江追擊數里。羅澤南等復從半壁山下游躡來援應。斃賊數十名。煽斃四五十名。焚賊船三隻。該逆始悉數敗歸。此初四初五陸軍大捷。斫斷鐵鎖之實。在情形也。訊據生擒賊供稱。初四日登將台指揮者。爲僞燕王秦日綱。憤岳州武漢之敗。率滿髮老賊。新來扼守田家鎮。初一日該逆泊舟彭塘觀陣。見官軍數止五六千人。意甚輕之。初四日挾全力來犯。冀以一股遏臣塔齊布之軍。使不得渡。以一股圍撲湘勇寶勇各營。不期大敗。初五日。輿憤極復仇之師。思一股先攻下游。誘我軍全隊下擊。別以一股從上游濟渡撲營。不圖屢戰屢敗。從此賊計已窮。不敢復窺南岸。而半壁山遂爲我軍所有矣。水師自二十九日大捷後。賊船灣泊蘄州城下。以岸上之鎗礮護之。我軍屢次誘擊。堅匿不出。臣國藩與各營官熟商曰。『蘄州賊船不過百餘。而牽綴我軍。不得直攻下游。初四初五半壁山大戰。我水師不能前往援應。此賊之詭計也。我留水師之少半與蘄州賊船相持。而以強半直衝下游。與半壁山陸軍相合。則不墮賊計之中。而賊船裹在中段。亦自無可逃矣。』初八日。左營彭玉麟。後營蕭捷三等。因移營之便。順攻蘄州之賊船。轟斃數千。賊始徧地逆船堅伏不出。惟岸上土城之礮。與船上之礮。兩層環擊。與我相持。官軍受傷亦多。哨官蕭世祥中礮殞命。鏖戰之際。釣魚臺下有逆船數十號開竄。我軍分船追剿。拋擲火彈。燒燬賊船二十餘號。奪獲二號。乘勝追下。遂進紮骨牌磯。衝過賊營之下十五里。初九日。復用小划誘賊出戰。而以大隊圍擊。蕭捷三營燒賊船八隻。各營共燒十餘隻。賊舟乃堅伏不出。然上下皆官軍戰船。該逆船裹入中段。大小不滿六十號。萬無久駐之理。遂以初

十夜。乘大風挂帆遁去。此初入九等日。水師迭勝。繞出賊船。逆船夜竄。之實在情形也。伏查該逆以東西梁山爲江南門戶。以田家鎮爲安徽門戶。併力與我爭此關隘。臣等定計先奪南岸之半壁山。次攻江面之船。然後合攻北岸之賊。茲幸仰託皇上天威。南岸業經奪取。北兵不甚得力。俟江面剿辦得手。即當調南兵渡江會剿。務期速破此關。庶退可以固守兩湖。進可以規復江皖。此次水陸鏖戰。將士用命。應請立沛恩施。以昭激厲。候選直隸州李續賓手刃逃勇。臨陣誓師。有名將之風。應請記名以知府用。並賞加勇號。升用游擊彭三元於全隊下擊之時。獨能力堵上游偷營之賊。進退有方。應請以參將升用。賈慶協都司普承堯。以少擊衆。膽力堅定。應請以游擊升用。先換頂戴。其餘出力員弁兵勇。仰懇天恩。俯准臣等擇尤保敘。以勵戎行。即補外委蕭世祥屢著戰功。武昌克復案內。擬保千總。此次奮勇捐軀。深堪憫惻。應請飭部從優照千總陣亡例議卹。所有陸軍奪取半壁山水師疊勝各緣由。謹會同湖廣督臣楊霽恭摺由驛六百里馳奏。伏乞皇上聖鑒。訓示施行。謹奏。硃批。『獲此大勝。皆因汝等和衷共濟。調度有方。故能將士用命。以少擊衆。朕披覽之餘。感慰莫能言喻。仍另有旨。欽此。』

覆陳不克隨時知照江南片。咸豐四年十月十四日

再臣於九月二十三日。在黃州行營。欽奉寄諭。『善隨時知照江皖各撫。及托明阿向榮等四路兜擊。以期直搗金陵。』等因。欽此。自應欽遵辦理。惟自岳州以下。久爲逆匪占踞。軍中信息。實有難於常通者。臣國藩自辦理軍務以來。於偵探文報二事。亦嘗認真講求。不敢稍涉疏忽。在衡州時。曾遣人探至安徽金陵一帶。及至本年五月始歸。又曾買船裝炭用重金雇人。放至下游。使賊擄去。以探彼中消息。前後放去炭船四隻。共擄去二十七人。現在逃回者止六人。餘或業遭殺害。或杳無音信。至遣人專探賊情。亦多遇賊被害。或被官兵盤拿。或被鄉團捆獲。皆因口音不符。即示以護票而不見信。前遣三人至江西。即被高安縣鎖拿。昨遣四人至安徽。又被英山縣鎖拿。雖經飛札飭放。而橫被拘戮者尙多。所遣探卒。現有數人未歸。此偵探之難也。武漢未復以前。臣營奏保。均專差送荆州交驛。三月內遣外委劉培元送摺赴荆。歸途被賊擄去。兩月始獲逃歸。嗣遣外委陳金鰲赴荆。復被土匪攔搶行李川資。僅以身免。凡被賊州縣驛站俱廢。往往迂道數日。中途忽又折回。八月初四日。克復崇陽。二十四日。大燒襄河賊船。相去將近一月。而臣報克復崇陽一摺。與督臣楊霽報襄河燒船一摺。同日奉到諭旨。緣一由

楊店發行。一由金口送荊州轉遞。遂至邊遠懸殊。此文電之難也。至與長沙通信緊要文件。均須專差前往。卽與半壁山陸營通信所過之地。居民尙著憂盈尺。使者疑畏。動輒迂迴數日。目下巨營摺報。仍須專人送至漢口。方能交驛。臣等深慮奏報不能迅速。上塵聖慮。然道途多梗。辦理實形竭蹶。至於金陵揚州各營通信。則須專差赴江西轉由浙江繞道前進。動須數月之久。前聞粵省紅單船已至東西梁山。不勝欣喜。頃聞忽又折回江浦。爲之疑慮。屢經查探。終未深悉其詳。合無仰懇皇上天恩。凡江南揚州各營。現在情形。及紅單船現泊何處。飭令軍機處於諭旨交寄之便。隨時示知一二。其安徽廬州等處。臣卽廣遣差探。時通消息。以期無誤軍事。所有江南不克隨時知照情形。理合附片陳明。謹奏。

官軍攻破田家鎮逆船燒燬復收蕪州摺 咸豐四年十月二十一日

奏爲官軍大破田家鎮賊防燒燬賊船四千餘號。田家鎮及蕪州兩處之賊。悉數潰竄。恭摺馳奏。仰祈聖鑒事。竊官軍與逆賊力爭田家鎮一關。初四初五等日。陸軍大戰。斫斷鐵鎖。奪占南岸。業經馳奏在案。該逆安置鐵鎖之法。與吳人成法不同。吳人於兩岸鑿石穿鐵。江中無物承之。故一處鎔斷。全鎖皆沉。該逆則節節小船承之。中用木簰三架承之。船與簰之頭尾。皆用大錨鉤於江底。鐵鉤四道。橫於船簰之上。以鐵碼鈐之。故雖南岸斫斷一節。而其餘數十節。仍牢鑿如故。自初六以後。該逆復將南岸一節。續行鉤聯。於半壁山下簰上安礮。船上置鎗。以防我舟師之進逼。簰上鋪沙。船中貯水。以防我火彈之延燒。自鐵鎖以上。皆賊之戰船。大小約三四十號。自鐵鎖以下。皆賊之民船。灣泊約六十里。大小約五千號。亦時放鎗礮。以助聲威。其北岸則於田鎮街外築一土城。長約二里。街尾爲吳王廟賊營一座。繫鐵鎖北岸之根。僞燕王秦日綱駐其中。街之上爲老鼠山賊營一座。又上爲磨盤山賊營一座。又上爲牛肝磯賊礮台一座。自牛肝磯下至吳王廟。長約六七里。皆密排礮眼。向江心轟擊。全力以防舟師。南岸自初四初五大敗之後。不敢復於半壁山上紮營。僅於山下十里富池口紮營三座。以護下游之賊舟。此該逆設防之實在情形也。我軍戰船。自初九日進紮蕪州之下。十二日遂進紮見峯背。去田家鎮僅九里。右營參將楊載福左營同知彭玉麟等密登南岸。至巨塔齊布及羅澤南營內。共商大舉破賊之策。楊載福彭玉麟歸船。傳知各營官哨官曰。『明日破賊。當分戰船爲四隊。第一隊專管斬斷鐵鎖。凡炭爐鐵翦大椎大斧之類。皆

備第二隊專管攻賊礮船。與之相對轟擊。第三隊俟鐵鎖開後。直追下游。大燒賊船。第四隊堅守老營。以防賊船冒死上犯。十三日辰刻。戰船出隊。臣塔齊布督同羅澤南。周鳳山等。率陸軍六千人。排列江之南岸。以助水師之聲威。該逆自牛肝磯礮台以下。直至吳王廟。盡銳抗拒。千礮環轟。子落如雨。我水師第一隊哨官劉國斌萬瑞書等。循南岸急築而下。一礮不發。徑赴半壁山下鐵鎖之前。賊以礮船開近救護。我軍第二隊環圍擊之。燒其快礮船二號。該逆不敵。復護鐵鎖。劉國斌等椎斷船上之鐵碼。船即自鎖下抽出。哨官孫昌凱繼以洪鑪大斧。且鏊且椎。須臾鎖斷。各三板飛槳駛下。該逆見官軍衝過鐵鎖。驚顧失色。即時旗靡衆亂。檣上放礮之賊。已駕小划而遁。下游賊舟。倉皇揚帆下竄。我軍三板追及。縱火焚之。楊載福等先夕與各哨官議曰。先燒在上者。則在下者開竄。遠矣。不如窮追數十里。從下游延燒而上。至是各哨船穿梭於千百賊船之中。迅如飛鳥。礮聲雷動。申酉之際。迨至三十餘里之武穴地方。乃縱火大燒。煙燄蔽天。仰託皇上威福。蒼穹默佑。是時東南風大作。賊舟不能下行。紛紛撲水。號哭浮沉。昏懵無知。或反攀戰船求救。輒被官軍刺斃。或緣登賊舟。賊亦抽刀斫之。不能相顧。其悍賊開竄下竄。或被勁風吹退。撞近南岸。陸路之軍。又從而縱火焚燬。其火藥大船最多。往往衝入重霄。碎板亂飛。當水軍衝過鐵鎖之時。臣塔齊布即督飭陸軍從半壁山飛馳而下。呼聲震天。與戰船礮聲相應。將近富池口。賊營二三里。該逆并不抵敵。出營大潰。尚有二三百人。逃竄不及者。全數追逐落水。陸軍與水勇爭前刺殺。縱火燒其營盤。自半壁山以至富池口中間沙洲數里。前此初四初五之戰。尚有千餘賊屍未收。至是焚溺半死之賊。復混雜於沙際水濱。殘骸堆積。斷肢漂流。目不忍睹。楊載福劉培元洪定陸李成謀等。見鄙穴以上焚燒略盡。鄙穴以下尚有賊船。復率十餘舟鼓棹窮追。又三十里。至龍坪。時已三更。凡燒船約四千餘號。百里內外火光燭天。皆該逆歷年所擄民船。同歸浩劫。楊載福至次日巳刻。始行歸隊。以竟日不食。積勞嘔血。各勇奪獲賊船至五百餘號之多。彭玉麟恐船隻太多。爭奪貽誤。又恐衆勇飽則思颺。將奪回之船。一并焚之。臣等一軍陸路殺賊之多。無過初四半壁山之戰。水路燒船之多。無有過於是日者。該逆舟楫被燬。無巢可歸。無糧可食。無子藥可用。遂於十三夜四更。自焚營壘而遁。此水師大破田家鎮賊防之實在情形也。至蘄州陸賊。雖與田家鎮之賊爲一。而兩路抗拒。各有頭目。踞田鎮之逆首。爲僞燕王秦日綱。僞國宗章俊等。踞蘄州之逆首。爲僞檢點曾鳳傳陳玉成等。

各有真賊數千。脅從數萬。田鎮之賊。力爭南岸之半壁山。南軍破之於前。水師焚之於後。蘄州之賊與北軍相持日久。本擬調羅澤南渡江會剿。因宝塔齊布兵力單薄。未敢分兵北渡。巨國藩屢飭魁玉楊昌泗等深溝高壘。暫守北岸爛泥灘一帶。十二日。都司楊名聲教諭唐訓方等。率護水師之二千人。移營柵欄山。十三日。田鎮鏖戰之時。蘄州賊忽出數千人來撲。揚名聲等督勇迎敵。接戰逾時。該逆忽從山左山後抄出一股。各營驚潰。陣亡四十餘人。營棚被燬。逆黨尾追。水師戰船。向岸開礮。轟斃大旗賊目數名。賊始退入蘄城。十四日。賊黨三千人。復偷搭浮橋。從牛馬坳來撲。魁玉等各營。別由東路菩提壩分股抄尾。並撲至曹家河劫搶糧米。營盤亦被焚燬。楊昌泗等分途抵禦。許廣藻李玉田等併力策應。始將該逆擊退。蘄州之賊。兩次上撲。北岸各軍。尙不知田鎮老巢已破。逆舟已焚。遂爾猖獗自恣。旋聞下游大敗。頓失所恃。遂於十四夜三更棄城而逃。竄往廣濟一帶。此北岸官軍雖挫。蘄州之賊聞敗逃竄之實在情形也。伏查該逆以田家鎮爲金陵咽喉。并力爭此關。臣等以兩岸山高。早經籌定。先攻南岸。然後合攻北岸。不圖鐵鎖一破。焚舟數千。不特田鎮之賊不戰自潰。卽蘄州乘勝之賊。亦膽破宵遁。此皆我皇上憂勤惕厲。上格天心。故能使風伯助威。祝融致命。且大戰數日。傷亡亦並無多。巨等實念不到此也。現已飛飭水師全隊乘勝進攻九江。巨塔齊布等卽由陸路前進。此次水陸將士非常出力。應請立沛破格恩施。以勸將來。副將銜升用參將楊載福。卽選同知彭玉麟。共定四隊進兵之議。衆船大戰。條理不亂。楊載福徹夜追賊。勞苦無比。應請記名以副將用。仍加總兵銜。彭玉麟將奪獲之船燒盡。禁貪息爭。紀律尤嚴。應請記名以知府用。並賞加勇號。浙江寧紹台道羅澤南。謀勇俱備。奪占半壁山。爲此次第一功績。應請賞加按察使銜。保升游擊。普承堯首先撲營。應請賞換花翎守備用。劉培元守備銜。千總秦國祿孫昌國。外委洪定陞。各帶本營戰船。奮勇衝陣。窮追下游四十餘里。劉培元武漢之役。身受重傷。擬保都司。尙未出奏。此次仍請以都司升用。並賞換花翎。秦國祿武漢案內。擬保都司。尙未出奏。此次仍請以都司卽補。並賞戴藍翎。孫昌國請以守備補用。洪定陞武昌之役。頭面受傷。擬保千總。尙未出奏。蘄州兩戰。最爲奮勇。此次請以千總卽補加守備銜。並賞戴藍翎。其餘出力員弁兵勇。仰懇天恩。容臣等開單保獎。以勵軍心。陣亡兵勇。查明照例辦理。所有官軍攻破田家鎮燒盡逆船

復收贛州各緣由。謹會同湖廣督臣楊鼎恭摺由驛六百里馳奏。伏乞皇上聖鑒。訓示遵行。謹奏。硃批。另有旨。續獲此勝。皆因汝等籌畫盡心。朕甚虛念。欽此。」

請飭各路帶兵大臣督撫擇要防堵片。咸豐四年十月二十一日

再逆賊經屢次大創。前後燬逆船。約計萬餘號。長江之險。我已扼其上游。金陵賊巢所需米石油煤等物。各路半已斷絕。逆船有滅無增。東南大局。似有轉機。然閱看賊中文卷。並細訊逃出各犯。知有頭目傷亡者無多。而兇悍亡命之黨。爲數實尙不少。臣等初慮江面不清。或成割據之勢。若剿辦得手。又慮江面一清。或成流賊之患。蓋水師一入皖境。燬其舟次之巢穴。失其飄忽之長技。分支四竄。乃事勢之所必至。臣等一軍。以肅清江面。直搗金陵爲主。設該逆旁竄他縣。陸軍竟難兼顧。應請旨飭下諸路帶兵大臣。及各省督撫。擇要堵禦。預防流賊之患。其不臨江之府縣。或爲該逆盤踞官軍所必爭之地。臣等亦必迂道往攻。斷不肯捨難就易。稍誤事機。理合附片陳明。謹奏。

水師前隊已抵九江片。咸豐四年十月二十一日

正封摺間。接據稟報水師前隊彭玉麟等十九日已追賊至九江。沿途續焚賊船百餘號。九江城外已無賊艦。城內賊亦無多。惟十三夜逃出賊戰船八號。尙泊九江之北岸。其田鎮蘄州之賊。概由北岸竄至黃梅孔壟驛一帶。巨塔齊布於二十日率羅澤南等渡江至田鎮巡北岸而下。擬至九江對岸。與水師一會。再行相機剿辦。理合附片奏聞。謹奏。

抄呈賊中僞牘片。咸豐四年十月二十一日

再水師奪獲僞燕王秦日綱座船。內有僞奏牘稟稿二冊。僞文卷無數。查悉秦逆於九月內經僞東王傳令專守田家鎮。與已革僞豫王胡以晃。僞佐天侯陳承鏞。僞國宗章俊石鎮崙。僞丞相羅大綱。黃再興等統帶賊衆。併力拒守。章以德石鳳魁黃再興係武漢逃出者。亦令帶罪協防。黃再興曾稟勸回九江。秦逆以僞東王迭次諭詰。田家鎮爲金陵咽喉。不許退行一步。現在踞安慶者爲僞翼王石達開。踞九江湖口者爲僞丞相何潮元羅瓊樹。僞指揮賴桂英等。其章以德石鎮崙。及僞指揮黃鳳岐。僞承宣吉志元。僞將軍梁修仁。陳文金陸錄

福等。則於初四初五等日伏誅。茲將僞稟奏鈔呈數件。以見賊中文案之大概。該逆僞憲書大月三十一日。小月三十日。並不置閏。不相符合。故用紅紙簽出。又據訊賊供。秦逆統帶老賊數千。脅從數萬。惟老賊被誅者見諸稟牘。餘皆隱匿不報。以諱其敗。故僞稟中言就戮者。爲數極少。合并附片陳明。謹奏。 硃批。覽奏均悉。鈔單留覽。欽此。

武漢克復保案摺 咸豐四年十一月初六日

奏爲遵旨酌保克復武漢與冶各城之出力員弁兵勇。懇恩獎敘。以勵軍心事。竊照水陸官軍於八月二十一二十二三等日攻克武漢。二十四搜剿襄河。掃平巢穴。各營官如李孟羣羅澤南楊載福等。當蒙優擢。其餘出力員弁兵勇。欽奉恩旨。著臣等查明保奏。嗣水師於九月十九日。在蕪州大獲勝仗。陸軍於二十日克復與國州城。二十一日克復大冶縣城。復奉諭旨。准將在事員弁兵勇。擇尤保獎。欽遵各在案。伏查武漢之役。血戰三日。夜踏營十九座。焚賊船千餘號。次日搜剿襄河。復焚船千餘號。共斃賊萬餘人。解散以數萬計。南路進剿與冶。蕩平賊寨。省府州縣城池。先後克復。水師復有蕪州之捷。各將士以寡擊衆。奮不顧身。實屬出力。我皇上俯念此軍關繫東南大局。迭沛恩綸。岳州保獎兩單。及自岳以下沿途十餘戰。保獎一單。均蒙俞允。各營無不同聲感頌。嗣因羅澤南特簡浙江道員。楊載福超擢常德副將。聖主用人。破除資格。各將士聽之餘。尤覺鼓舞奮興。爭先恐後。今將武漢與冶蕪州各戰之出力員弁兵勇。悉心酌核。開單共三百四十人。進呈御覽。伏乞天恩賞准。以作士氣。而勸將來。所有欽遵兩次諭旨。開單請獎緣由。謹會同湖廣督臣楊霽恭摺附驛具奏。伏乞皇上聖鑒施行。謹奏。

陸軍克廣濟縣水師九江獲勝摺 咸豐四年十一月初六日

奏爲官軍陸路在北岸蓮花橋大獲勝仗。克復廣濟縣城。水師在九江開仗獲勝。恭摺馳奏。仰祈聖鑒事。竊官軍大破田家鎮賊防。復收蕪州。業經馳奏在案。該逆自經痛勦後。蕪州之賊。爲僞檢點陳玉成等所統者。竄踞廣濟縣城。田家鎮之賊。爲僞燕王秦日綱所統者。竄踞黃梅縣城。及九江對岸之小池口等處。而僞冬官丞相羅大綱。又新自安徽帶滿髮老賊萬餘來援。亦分布黃梅境內各要隘。臣塔齊布督同羅澤南等陸軍。自田家鎮全數渡江。凡三日渡畢。繞至蕪州。二十五日進紮去蕪三十里之菩提壩。二十六日。羅澤南率後隊亦至。營壘未定。賊黨

已至蓮花橋，距我師五里，分兩路來撲。巨塔齊布派參將周鳳山等爲先鋒，自帶各營爲後勁。由北路迎擊，羅澤南列陣南路，以防抄尾。賊從北路沿途設伏，以輕騎搗戰，前隊交鋒，賊即佯敗，退至數里之遙，伏賊突起，蜂擁而來，鏖戰時許，前隊皆卻，賊衆返追，逾四五里，勢甚兇悍。巨塔齊布後隊踵至，匹馬衝截，陣斬大旗悍賊，各勇始回戈向敵，賊遂大潰。我軍乘勝追殺百餘名，忽北路之左，又有賊黨埋伏，冀圖抄集。巨塔齊布復督敢死之士，後左路，立斬黃衣騎馬僞官，殲賊無數，追不數里，該逆又回頭反撲，我軍愈進愈厲，該逆仍不能支，且戰且退。先後皆擊敗三次，羅澤南等在南路，中隔山岡，行十餘里，始聞北路開仗，小挫，急由山腰橫截而北，正值賊衆大敗之時，會合追剿，追至二十里外之朱雲鋪栗木橋地方，共計殺賊一千二百名，尸橫徧地。是夜賊入廣濟，五更候盡數逃竄，遺棄米穀軍械無算。二十八日，官軍復收廣濟縣城，嚴諭居民雜髮，此陸軍大捷，克復廣濟之實，在情形也。水師自十九日，前隊已抵九江，見江中之賊，僅戰船八號，惟兩岸營壘較多，因駐泊二套口，俟隙進剿。詎該逆見官軍猝至，兩岸營內賊衆頓集，併力固守。又自湖口趕來大小戰船，堅守江面，仍用陸路之賊，穩護江心之船。南岸則郡城老賊與湖口賊營相連，北岸即小池口秦日綱與羅大綱之黨，所共踞守者也。二十五日，營務處李孟羣偕各營帶船進剿，履勘形勢，見南岸九江城外設礮臺三座，附城泊大戰船六隻，雜船十餘隻，北岸小池口賊營三座，礮臺三座，江心沙洲營盤一座，高建望樓，密排礮位，洲尾有巨簞橫互數十丈，攔截江面，上環木城，安礮兩層，以大戰船數隻，雜船百餘隻護之。我軍兩路進發，兩岸之賊，開礮拒敵，子飛過江，我船衝出其下，直向木城攻擊，又循北岸鼓棹而還，岸賊呼聲震天。我軍若罔聞知，雖蒙礮雷轟，往來自如。凡斃岸賊百餘名，申刻收隊。此水師履勘賊營接仗獲勝之實在情形也。二十六日，李孟羣坐長龍船督陣，協同後營都司蕭捷三中營守備秦國祿清江營州同俞晟等，直抵九江城下，城上賊搖旗放礮，傍岸賊船亦同時轟擊，我軍冒險，仍衝出下游，回舵急攻，礮無虛發，賊衆紛紛墜水，立焚數船。該逆棄舟奔竄，焚其快蟹二隻，賊船十餘隻，岸上賊猶據牆開礮，我戰船竟沿岸而上，轟斃數十名，始竄入城中。李孟羣見南岸雖已得手，而北岸沙洲賊營甚固，簞上之木城，岸上之礮臺，傍簞之大船，傍岸之小划，層層依護，將欲攻奪其堅，必須由下游兜剿而上，乃復與各營順流而下，衝過七八里之遙，始行急槳回攻。該逆水陸攢礮，子落江心，密如撒豆。我勇受傷愈多，攻船愈厲，哨官蘇勝鄭沐等。

由下包抄。閱世慶等。砍悍賊落水。隨焚燒北岸賊船二十餘隻。惟快蟹屢燒不然。黃正良躍入賊舟。斷其舵槳。猶復拚死不退。麥保擊斃黃衣賊目。其陣始動。衆賊紛紛向內奔走。而木簾大船之賊。仍堅悍如故。李孟羣移船親自往攻。各哨隨之。誓必奪其大船。衆礮對轟。羣子亂落。濃煙蔽江。咫尺不辨旗幟。一巨子由李孟羣身旁飛過。擊中親兵骨折。旋又擊穿艙板。又中守備何越。斑右脚。船多穿孔。江波鼎沸。各船始暫停。以觀其變。該逆旋將下戰。船開動下駛。附以小划數隻。我軍竟不能奪之也。各船衝下過遠者。歸途單弱。蘇勝中礮殞命。鄭沐被戕落水。吳隆礮傷左腿。李金樑三板被礮擊沉。人船俱失。各哨官憤極。復力進轟擊。卒得追焚賊船七隻。奪回一隻。秦國勝至上岸與賊爭拖一划。人人奮怒。如報私仇。李孟羣因日暮戀戰。恐有挫折。飭令收隊。凡血戰四時之久。燒燬兩岸賊船四十餘隻。礮斃砍殺水陸賊匪五六百名。搶獲黃旗黃傘紅衣鎗礮子藥不計其數。而官軍傷亡亦殊不少。此二十六日水師苦戰大勝之實在情形也。伏查該逆水中屢次大敗。皆因民船太多。被我燒燬。頓失所恃。賊衆奔潰。此次民船甚少。純用大小戰船。抵死抗拒。又以兩岸及洲中營盤木簾。互相保護。局勢爲之一變。欲攻江中之船。必先破北岸之賊。欲攻北岸之小池口。必先破黃梅大河埔孔壠驛之賊。臣塔齊布督同諸陸軍。惟嘗攻克黃梅。掃蕩諸處。速至江岸。與水師會合夾攻。一俟勦辦得手。再行渡江會攻九江郡城。此次水陸將士均極用命。特懇天恩。容臣等擇尤保獎。以示鼓勵。守備銜千總蘇勝。把總鄭沐。六品軍功李金樑。由粵越楚以來。無戰不奮。均屬衝鋒敢死之士。武昌田鎮兩案。蘇勝擬保守備。鄭沐擬保千總。加守備銜。李金樑擬保藍翎外委。今俱力戰捐軀。深堪憫惜。合無仰懇皇上。逾格鴻恩。蘇勝鄭沐均請照守備例。李金樑照外委例。飭部議卹。以慰忠魂。其餘傷亡弁勇。查明照例辦理。所有陸軍克復廣濟水師大捷各緣由。謹會同督臣楊霽恭摺由驛六百里馳奏。伏乞皇上聖鑒。訓示施行。謹奏。

固原提督桂明留駐黃州片 咸豐四年十一月初六日

正封摺間。據報陸路官兵克復廣濟後。於十一月初一日。在離黃梅十五里之大河鋪地方。大獲勝仗。殺賊三千餘人。躡破賊營五座。係逆首羅大綱之黨。其開仗情形。即日縷晰奏報。現查黃梅縣。孔壠驛及江之小池口。悍賊尙多。日內當有數次大戰。臣等陸軍單弱。惟當步步謹慎。謀定後進。不敢稍涉大意。至固原提督臣桂明一軍。臣

國藩會與督臣商定咨令柱明駐紮貴州。以防賊由蕪水抄襲後路。是以該提督未能同赴下游會剿。緣奉兩次諭旨垂詢。謹附片陳明奏聞。

魏作霖請卹片 咸豐四年十一月初六日

再蕪州克復後。據州判魏作霖之子候選訓導魏孝儒呈稱。竊職父係四川成都府新都縣人。由廩貢生歷任忠州學訓導。後由海疆議敘。選授今職。於道光二十九年到任。本年九月內。奉魁部統楊總兵札委。親赴各鄉勸捐兵米。蕪州自被賊以後。居民市肆。焚掠已空。惟職父素得民心。採辦尙易。大兵到蕪。經月口糧。皆其籌濟。不期十月十四日。解米回營。值大股賊撲至。即與都司成恆帶兵出禦。至野塘背地方。職父奮力督勇。殺賊二名。該逆愈殺愈多。我軍寡不敵衆。職父身受矛傷。被賊圍去。執至蕪城。先挖雙目。繼以酷刑。職父罵不絕口。被支解而死。十五日。賊退。蕪民收拾殘骸。代爲殮厝。職時亦奉委在鄉探買米石。聞變痛不欲生。籲懇據情轉奏。等情。據此。伏查蕪州州判魏作霖。由教職擢任州佐。蒞蕪數載。士民愛戴。茲因罵賊被殺。慘遭屠戮。實堪憫惻。既據伊子具呈前情。臣等覆查無異。合無仰懇皇上天恩。飭部議卹。以慰忠魂。理合附片陳明。伏乞聖鑒。謹奏。

調張丞寶帶勇片 咸豐四年十一月初六日

再湖南永州府知府張丞寶。樸實勇敢。志切憂時。上年壬子歲。召對時。曾請殺賊自效。久邀聖鑒。臣國藩駐紮衡州。該守屢以從軍爲請。時方暑理衡永道。地方緊要。未便遽行奏調。茲道篆早經交卸。臣等出境勦賊。正在需員差委之時。昨已咨商南撫臣。飛調該守來營。將現在添募之湘勇左營交該守管帶。與羅澤南李續賓聯營進剿。行止相依。以厚兵力。所有調員帶勇緣由。理合附片陳明。伏乞飭部查照辦理。謹奏。 硃批。著照所請。欽此。

陳明服闋期日片 咸豐四年十一月初六日

再臣國藩於咸豐二年六月初出差江西。七月二十五日在安徽太湖縣途次。聞訃丁母憂回籍。本年十月二十五日。服闋。例應入京叩請聖安。茲臣辦理軍務。不及赴京。謹已遵制釋服。理合將服闋日期。附片陳明。謹奏。

陸軍雙城驛大捷克黃梅縣摺 咸豐四年十一月十一日

奏爲官軍在雙城驛大獲勝仗。迨至大河埔。踏燬賊營。旋在夏新橋大獲勝仗。克復黃梅縣城。恭摺馳奏。仰慰聖

懷事。竊照陸路官軍在蓮花橋獲勝。克復廣濟縣城。業經馳奏在案。該逆以黃梅一縣。爲湖北安徽江西三省總匯之區。必併力死守。拒我東下之師。僞燕王秦日綱率田家鎮大股。僞檢點陳玉成等率蕪州大股。僞丞相羅大綱率安慶新到大股。及太湖宿松小股。皆集於黃梅一縣。其守黃梅也。不守城而守險。不守一隅而分拒數處。以萬餘賊拒江岸之小池口。抗我水師。以數萬賊據城西二十里之大河埔。拒我陸軍。以萬餘賊安營北城之外。以數千賊往來孔壠驛如游擊之兵。與諸處相爲聯絡。賊營年二十以上者。謂之牌頭。二十以下者。謂之牌尾。十月三十日。賊將牌尾送入城內。牌頭岸賊。盡留大河埔營中。大河埔凡立營五座。其最大者二座。一在龍頭塞山上。一在古義豐縣廢城之南。小者三座。夾立於左右。深溝堅牆。木椿竹籤。與田鎮相似。臣塔齊布與羅澤南商用該處蓄髮之民。直入賊壘。探明情形。三十日。自廣濟拔營行三十里。駐紮荊州鋪。十一月初一日。已刻。進至雙城驛。離大河埔十里許紮營。率獲賊探僞將軍蘇政春一名。立予斬梟。賊乘我軍初至。營壘未定。率衆來撲。雙城驛地方中係田壠。廣數千畝。左右高峯森列。賊分三路而來。用聲東擊西之意。先以數千人排列於右路山嶺。搖旗搦戰。復以數千人伏於左路山岡之下。計乘我兵前進。從後抄尾。其由中路而進者。亦分三路。共二萬餘人。漫山遍野。旌旗蔽日。臣塔齊布與羅澤南急登高岡。審明形勢。亦分三路擊之。臣塔齊布率各標兵勇。及湘勇右營左營。居中路。以禦田壠之賊。周鳳山彭三元等率道州勇實勇辰勇出左路。以防岡下之伏。羅澤南率湘勇中營及湖北參將札拉罕等之兵勇八百。出右路。以禦山嶺之賊。右路賊吹角放鎗。迭次進撲。我軍以高阜難於仰攻。按兵不動。奮登山尖。賊衆反在其下。右路之賊先潰。左路周鳳山等亦奮登山岡。衝殺而出。岡下之伏賊亦潰。惟中路賊黨。排列溪岸。死守不退。鏖戰良久。我兵勇躍溪而過。刺取悍賊數名。右路之追賊者。漸繞出中路之後。該逆知抵敵不住。回旗狂奔。三路分追。呼聲震天。追至十里之遙。直逼大河埔賊壘。其守壘之賊。又從營內衝出。抵禦。賊亦回旗來撲。我軍因逐北太遠。隊伍稍亂。羅澤南等令按旗少息。待各路齊集。大呼直前。無不以一當百。將賊營五座。立時踏破。盡數焚燬。烟燄迷天。各路共斃賊約三千餘人。生擒九十四名。就地正法。奪獲旗幟馬匹軍械無算。該逆所聚之糧。亦皆爲我所有。此初一日戰勝雙驛城。追至大河埔。躡毀賊營之實在情形也。初二日。雨雪不能進兵。初三日。由雙城驛拔營。未刻抵黃梅城西四里之夏新橋駐紮。臣羅澤南與塔齊布率兵勇至城外。周

歷高岡審視形勢。以定進攻之策。黃梅城東南依山。高峯排列。一溪環繞城根。西面溝港錯雜。水深泥爛。惟二橋可渡。北面則高阜疊起。有險可據。焉攻城必由之路。賊於北門外紮大營三座。牆壁堅固。營外悉插梅花陷坑。深逾丈餘。布以地雷竹籤。冀陷我師。其精銳萬餘人。悉萃其中。西門紮小營一座。又拆民房磚石。將城增高數尺。滾木擋石。四面環布。誓相死守。以日暮不能進攻。焚西門外小賊營而歸。初四日辰刻。派參將周鳳山守備李新華帶道州勇攻西門。楊名聲呂克生黃玉芳等之勇助之。臣塔齊布率撫協各標兵。羅澤南率湘勇中左右三營。彭三元普承堯等率寶勇會攻北門。恆泰札拉率湖北兵勇助之。直逼賊壘。因二橋逼窄。恐過去爲賊所邀截。彭三元等列陣橋西以待。臣塔齊布與羅澤南繞北面溝港之中。擇涸處取道而入。賊衆萬餘人。排立營柵。搖旗放鎗。火箭疊施。東北隅林中。多設伏兵。圖抄我師之後。因與諸將議曰。一賊以逸待勞。以高拒卑。攻之未易得手。須以前茅仰擊。更番迭進。俟其少疲。後勁從而乘之。可立破矣。一乃以辰勇湖北兵勇紮東北隅岡上。防林中之伏。而使各營迭進擊之。鏖戰良久。臣塔齊布督同候補知府李續賓先進逼賊木柵。立斬大旗賊目數名。羅澤南與蔣益澧帶湘勇中左二營隨進。彭三元普承堯亦從西面越二橋而來。呼聲震天地。諸勇從柵門冒險躍入。縱火焚燒。賊勢大敗。辰勇湖北勇從東南而來。道州各勇從西南而來。是時魁玉楊昌泗亦率兵勇。由大河埔繼進。聞戰迅至。以爲後應。四面圍勦。賊見火起。倉皇無計。白營壘潰出。墮入陷坑者。以二千計。坑固深峻。又有木椿極銳。我師從坑上刺之。如刺死豚。宛轉哀號。鮮得脫者。遂乘勝直逼北門城根。城上之賊。鎗礮齊開。木石紛擲。賊之緣城而走者。反爲所擊。諸勇冒險追殺。連斃千餘人。尸填盈溝。水爲腥赤。城外餘賊。悉奔越城東南馬尾山。城中之勢。不能自固。諸勇或肉薄而上。或乘梯而登。入城復殺數百人。城內賊黨。遂從小南門化龍門縫城而出。亦奔東南山谷中。當登城之時。城上木石紛擲。我兵勇亦多傷亡。臣塔齊布頭受石傷。血流滿襟。即補千總王映軫躍馬救護。扶回營中。王映軫被城上礮傷落馬。匪黨執去。立遭戕害。諸將旋亦收隊。不復窮追。而賊黨已全數遠竄矣。是夜臣塔齊布仍裹劍巡行營壘。以安士卒之心。初五日。偕羅澤南等入城。安撫難民。諭令薙髮。此黃梅城西北大獲勝仗。克復縣城之實在情形也。現在賊之小股。下竄宿松太湖。其大股仍屯睡孔壠驛小池口。以圖盡力抗拒我師。臣國藩飛咨督臣楊霽。及提臣桂明。即日整隊東來。於梅濟交界之處。擇要紮駐。以堵西竄之路。臣塔齊

布頭傷已愈。卽日進搆小池口。與水師會合。先勦北岸。次清江面。然後渡江。以圖攻克九江郡城。此次官軍深入賊地。逆黨拚死來爭。我軍以寡擊衆。並不用虛聲奇計。專以硬紮集打。死仗爲能。士卒益加用命。守備銜千總周友勝。手執大旗。爭先陷陣。殺賊最多。應請以守備補用。賞換花翎。補用守備余星元。滕國獻。每戰衝鋒。不避矢石。均請免補守備。以都司補用。其餘出力員弁兵勇。容臣等核實保獎。仰候恩施。臨湘汛把總藍翎升用千總王映軫。屢立戰功。田鎮案內。擬保守備。茲因情切救援。帶傷落馬。被戕最慘。仰懇天恩。卽照守備例卹賜。以慰忠魂。此外陣亡兵勇。查明照例辦理。所有陸軍連捷克復黃梅縣城緣由。謹會同湖廣督臣楊霽。恭摺由驛六百里馳奏。伏乞皇上聖鑒。訓示施行。謹奏。

水師小勝並陳近日勦辦情形摺 咸豐四年十一月十一日

奏爲水師初一日開仗小勝。並附陳近日勦辦情形。恭摺具奏。仰祈聖鑒事。竊照前月二十五六等日。水師開仗情形。業經奏報在案。嗣據探報二十八日。江西戰船在姑塘地方被賊撲營。小有挫失。我軍水師防範愈嚴。十一月初一日。該逆用小划數十隻。及快蟹等船。水陸並進。前來撲營。左營彭玉麟。副左營劉培元。後營蕭捷三。及孫昌國。段瑩器等。出隊迎敵。李孟羣。駕長龍。隨後督陣。該逆甚爲洶湧。兩岸賊營。並木牌大船。三面礮子。密如驟雨。復以小划往來江中。欲圖抄襲。彭玉麟等督勇圍攻。轟斃賊匪無數。其小划敗退下竄。其戰船亦收近北岸。與陸賊營壘相依。各哨官銳意欲奪其快蟹。焚其木牌。鏖戰三時。卒不能奪。該逆兩岸礮台。牌上木城。攢礮相迎。各營兵勇被羣子中傷多人。彭玉麟坐船被礮傷者三人。因鳴金收隊回營。伏查我軍初到九江之時。僅見該匪大戰船八隻。旋在湖口趕來賊船百餘號。我師兩次苦戰。卒未能大挫凶鋒。皆因兩岸賊營太多。水陸依護。抗拒甚力。而我師與陸軍隔絕。孤懸大江。介處賊營之中。晝夜戒嚴。該逆每夜以火毬火箭。近岸拋擲。連日雨雪交加。師船泊中流。則爲風波所撼。泊岸邊則爲陸賊所撲。故日來水軍勞苦。有倍過於田鎮以上者。臣等細察近日勦辦情形。有可恃者數端。而可慮者亦有數端。凡覬軍事之勝敗。先視民心之從違。前此官兵有騷擾之名。賊匪有要結之術。百姓不甚怒賊。不甚懼賊。且有甘心從逆者。自今年以來。賊匪往來日密。搶劫日甚。升米尺布。擄掠罄空。焚燬廬廬。擊碎釜缶。百姓無論貧富。恨之刺骨。其自遭家難。既有劍深痛鉅之情。其追溯皇恩。遂有挾髓淪肌之感。

臣等一軍所到之處。民間焚香預祝。夾道歡迎。紮營之地。或送薪米。或送猪羊。蓄髮之民。願爲偵探。願爲嚮導。賊匪雖嚴刑禁殺。百姓不甚畏忌。猶殷殷輸誠於官軍。我國家深仁厚澤。二百餘年。不當此大亂之後。不知感人之心。一至於此。臣等適逢其會。而食其報。而今年兩湖三江。又皆年穀順成。豐收三倍。萬民樂業。翹首望治。視往年官兵過境。無物可供買辦。無人可爲嚮導者。氣象爲之一大變。此民心之可恃者一也。此軍初起。餉項支絀。幾有朝不謀夕之慮。自蒙我皇上殷勤垂念。飭令湖南供支。又飭諭四川廣東協濟。又飭江西陝西籌解鉅款。又頒發部監各照。臣等所請者。仰邀聖慈俞允。臣等所不及請者。亦蒙特旨飭催。今湖南江西捐項日形踴躍。陝西已解到六萬。四川又續報三萬。前此之餉無欠。臘月之項有著。軍士有飽騰之象。臣等鮮意外之慮。此餉需之可恃者一也。軍興以來。多意見不合。將卒不和。貽誤事機。臣等一軍勇逾萬餘。兵僅數百。其管帶之員。文職多擇取士紳。武職多拔取末弁。有夙昔之恩誼。無軍營之氣習。不特臣國藩臣塔齊布二人。親如昆弟。合如膠漆。即在事人員。亦且文與武和。水與陸和。兵與勇和。將與卒和。糧臺官與行間偏裨均無不和。全軍二萬人。幾如家人骨肉之聯爲一體。而無纖介嫌隙之生於其間。此臣等秉承聖訓。和衷共濟。亦可恃之一端也。江西水師。本可藉以協助巨軍。頃據德化縣知縣稟報。自前月二十八孤塘失利。退紮吳城。該匪水陸來撲。江省戰船四十餘號。盡被搶奪。旗幟礮械。皆爲所有。一等情。又據探報。該逆在安徽仿照我軍船式。新造戰船三十餘號。意圖西上拒禦官軍。一等情。該逆前次屢以民船致敗。自至九江。專用小划。夾護戰船。緊貼岸營。臣等方反覆籌思。不得所以破之之法。今又益以江西搶去之船。與安徽所造之船。賊燦益增。其氣益熾。若使屯据湖口。梗塞於鞋山孤城之間。內窺江西。外拒我軍。地形險隘。勢難遽下。我軍與江西咫尺隔絕。不能相通。其可慮者一也。陸路賊黨。北岸固多。而南岸亦復不少。屢據稟報。九江府城之賊。出撲總兵居隆阿營盤。湖口之賊。分竄饒州。臣等陸軍單薄。在南則不能顧北岸。渡北則不能顧南岸。卽欲渡江。亦須繞至上游。迂迴百餘里。三四日乃能渡畢。而該逆愈勦愈多。愈擊愈悍。我師皆長征之卒。無生力之軍。轉戰千里。筋骨勞苦。若更往來頻渡。卽令全不挫衄。亦恐疲於奔命。銷磨銳氣。其可慮者一也。軍事以練將爲最要。臣等一軍。皆招選鄉勇。本乏將弁。有有翹出之材。臣等不惜破格超保。儲爲將領。乃甄擇已久。求其獨當一面者。殊難其選。求其雖遇敗挫。乃能撐拄者。尤難其選。今水師營中楊啟

福以積勞致疾。何越珽以受傷出營。陸路諸將亦皆勇多謀少。設一遇敗挫。無驍事之領將以撐拄之。則恐潰散而無以自立。此又巨等隱以爲慮之一端也。目今之計。惟有力攻孔壠驛小池口之賊。紮營江岸。使水師所得依護。待督臣楊霽率水師黃梅後。北路足資堵禦。然後巨塔齊布與羅澤南全師渡江。以圖克攻潯郡。步步謹慎。不敢稍涉疏虞。以期仰副聖主委任之意。所有水師續獲小勝及近日勦辦情形。恭摺附驛具奏。伏乞皇上聖鑒。訓示施行。謹奏。

羅澤南濯港勝仗片 咸豐四年十一月十一日

正封摺聞。接據稟報。羅澤南等於初七日。由黃梅先行拔營。行二十里。至濯港地方。適逆首羅大綱率賊衆二萬餘人撲至。我軍分途迎擊。大獲全勝。殺賊一千四百名。俟各營到齊後。卽當馳勦孔壠驛一帶。除接仗情形。另摺詳晰具報外。合先行附奏。以慰聖廬。謹奏。

官軍濯港大捷潯郡江面肅清摺 咸豐四年十一月二十一日

奏爲官軍在濯港大捷。旋即攻破孔壠驛小池口賊營夜遁。水師焚燬艍船。潯郡江面肅清。現在進扼湖口。恭摺由驛奏聞。仰祈聖鑒事。竊陸軍踏破大河埔賊營。旋在夏新橋大捷。克復黃梅縣城。業經馳奏在案。自我師北渡後。該逆三次大敗。皆僞燕王秦日綱僞檢點陳玉成兩股居多。其僞丞相羅大綱率安慶新到之賊。尙盤踞孔壠驛小池口一帶。與潯郡之賊對江而營。使逆船得依岸久踞。老我水師。本月初七日。寧紹台道羅澤南督候選知府李續賓。參將彭三元。及游擊普承堯等。共四千人。拔營前進。行二十里。至濯港地方。突遇大股賊二萬餘人。由孔壠驛至。時彭三元普承堯尙未齊集。羅澤南登高審視。自駐西岡。令李續賓及教諭唐訓方等駐中岡。候選從九蔣益澧等駐東岡。濯港一小市。東面爲田壠。廣千餘畝。西面瀕池。長數里。水深岸峻。池外多湖汊。賊衆排立市北。搖旗擗戰。羅澤南自與此賊接仗以來。專用以靜制動之法。每交鋒對壘。賊黨放鎗數次。大呼數次。而我軍堅伏不動。如不敢戰。往往以此取勝。是以羅澤南仍飭諸軍堅伏不起。相持五六刻。該逆分一枝從田壠繞山撲我。東岡之師。一枝從湖尾撲我西岡之師。而由中路進者獨多。直逼岡前。我東岡之勇。一鼓而下。斃大黃旗賊數名。西岡諸勇。旋亦衝出。西路賊潰。分途追殺。中路悍賊鏖戰。良久。前者已死。後者不退。東西官軍。進至市前。漸抄中

路之尾。賊黨始三路同潰。進入濯港市內。斃賊四百餘名。逼溺市西池中者八九百人。賊尸積累。幾與半壁山相等。其大股循市南奔逃。我兵以衆寡難敵。不欲窮追。卓旗小駐。賊輒回馬擗戰。乃復追之。又駐則賊又擗戰。而又追之。如是者四五次。追至十里外之中路菴地方。沿途斃賊百餘人。其小股由湖汊之西逃者。湘勇分數隊往追。寶勇繼之。追及數里。有伏賊緣樹林中突出。勢甚兇猛。諸勇退卻。陣亡三名。李續賓等率勇由湖中橫隄抄過。湖邊之賊又潰。追殺百餘人。共斃賊約千四五百人。餘生擒八十五名。奪獲旗幟鎗械子藥無算。該逆自孔壠而來。中途猝遇我軍。解衣出戰。行李盡存市店。既敗之後。羅澤南等令堆積衣服。悉數焚之。故各勇一心追賊。無稍遲者。此初七日自黃梅拔營至濯港遇賊。大獲勝仗之實在情形也。初九日。臣塔齊布冒雪拔營。至濯港。十一日。雪霽。進駐白湖渡。偕羅澤南親至孔壠驛附近。審視形勢。孔壠南通小池口。東繞溪港。西則稻田萬頃。北去白湖渡十里。長隄一線。兩旁皆寒流泥淖。賊首羅大綱及偽丞相會姓賴桂英等。踞孔壠市中。東面憑水爲固。西南北三面環築土城。密安礮孔。搭蓋望樓。竹簽木椿。密釘無間。十二日。我軍八千人。全師進攻。以北路單隄太窄。不能布陣。乃至烏魚金壩。訪有小路可繞。賊棗之西南。因商定列陣之法。臣塔齊布帶各標及參將周鳳山。都司李新華之勇。從北路堤上入。羅澤南帶湘勇中左右三營。及參將彭三元。游擊普承堯之寶勇。教諭唐訓方之常勇。從西南烏魚壩分路而入。殺斃前隊賊匪數名。追至孔壠驛。賊見我兵三面環至。負牆施放鎗礮。子如雨下。其悍者出牆迎戰。勢甚兇猛。我軍奮不顧身。一擁而前。悍賊亦入牆抵禦。木石紛擲。鎗礮愈急。我軍跟蹤乘之。突入土城。或不由牆門。三四人以肩爲梯。互乘而入。其尤勇者。卓矛於地。一縱躍入。入土城者已多。而城外仍合成長圍。賊黨無處可逃。逼入東面寒流泥淖之中。溺死者以千餘計。奔入市中。被諸勇追殺者。近二千人。其餘或匿民樓。或緣登屋脊。拋擲瓦片。因縱火大燒。街市烟燄彌天。會西北風作。孔壠市中數百家須臾灰燼。諸勇環守。賊衆鮮得脫者。生擒長髮七十九名。內有右副丞相余福勝一名。總制陳姓雷姓二名。師帥軍帥十餘名。立予正法。此十二日。在孔壠驛大獲勝仗之實在情形也。臣國藩以孔壠既破。小池口之賊。必不能支。即飛飭水師進擊。升用道李孟羣。候選知府彭玉麟等。於十四日卯刻進攻。而小池口陸賊已於十三夜全數奔竄矣。餘賊爭駕小划南渡。我軍急起直追。賊划駛近南岸。岸上賊開礮護之。中營都司秦國祿。嚮導營守備孫昌國等。衝烟進擊。賊衆紛紛墮水。

擊沈賊划七八隻。傍岸賊船恐被包裹。開竄下游。我軍追擊。燒燬數號。見北岸洲尾大木簰一座。賊船十餘隻。遂回柁北攻。簰上賊鎗礮齊施。我軍冒死前進。船上之賊先逃。羸斃溺斃者。約近百名。哨官史久立劉瑞麟等。截擊下游賊船。使不得搶護木簰。用火彈百餘。乘風擲去。立刻燔盡。餘船皆燬。將復延燒洲上賊營一座。遂縱火徧燒小池口陸路賊營。烟燄蔽空。彭玉麟乘勝追至新港。又見大木簰一座。賊船數十隻。即揮旗圍擊南岸賊。礮子如雨。各哨船雷轟而前。斃黃旗賊目一名。賊遂披靡。簰上賊。亦登划奔竄。彭玉麟躍入賊簰。奪獲大礮十三位。尙有二千斤大礮。不能移動。遂縱火焚簰。岸上賊癡立毒罵。不能救護。此十四日水軍焚燒船簰。肅清潯江之寶在情形也。臣國藩卽於是夜泊紮九江城外。十五日。臣塔齊布亦至小池口水陸會合。該逆於西門出數百人。向江心施放鎗礮。李孟羣飭前營廣勇二百餘人。上岸追殺。各戰船復轟礮助之。賊始奔潰。廣勇連擲火球。燒燬龍開河木城一座。彭玉麟蕭捷三秦國祿劉培元俞晟等。遂率大隊。是日直下湖口。至扁擔夾洲邊。見有賊船大小四十餘號。分途圍擊。悉數燒燬。並燒草賊棚二座。追及鄱湖匯江之所。逆船悉泊湖口縣城下。有木簰三座。戰船數十號。民船近千號。搶去江西之戰船礮位。亦均攔截內河。見我軍驟至。遂將民船數十號開出下竄。我軍從中截擊。燒燬二十餘號。賊皆撲水。內有大紅船三號。輜重山積。概予燒訖。各營遂分泊口內。並口外之梅家洲八里江等處。緊扼要隘。此十五日水師獲勝。進紮湖口之實在情形也。連日據生擒之賊。與投誠之賊。共稱僞燕王秦日綱自黃梅大敗。竄往舒城。僞丞相羅大綱自孔壠大敗。卽日竄至小池口。率其死黨千餘。渡江。連夜奔至湖口。僞丞相林姓。現踞九江與湖口相犄角。將爲死守抗拒之計。臣塔齊布於郡城上游。渡江繞出南路。羅澤南於郡城下游。渡江將圍攻東路水路。扼截湖口。務使賊所搶奪江西船礮。全數兜剿。不許竄出大江。免遺後日無窮之累。三路痛殲。以期上復潯城。下清湖口。一制劇賊之命。此次水陸兵勇廓清摧陷。轉戰無前。補用守備朱南桂冒險衝陣。連撲賊營。應請免補守備。以都司補用。都司董添雲每戰摧鋒。不避矢石。武漢案內已保游擊。此次應請以參將升用。其餘出力員弁兵勇。請由臣等核明保獎。仰候恩施。其陣亡兵勇。查明照例辦理。所有陸軍濯港孔壠連次大捷。水師攻燒賊船。肅清潯江。進扼湖口各緣由。謹會同湖廣督臣楊霽恭摺由驛六百里馳奏。伏乞皇上聖鑒。訓示施行。謹奏。

調胡林翼來潯助剿片 咸豐四年十一月二十一日

再臣等一軍陸路實尙單薄北渡則不能兼顧南岸南渡則不能兼顧北岸曾經奏明在案屢欲添調兵勇然非實在得力之軍則無益而反有損是以加倍審慎現在由小池口南渡上則圍攻潯城下則勦辦湖口已屬不敷調遣而北岸宿望潯太等縣尤須有得力之員協勦方無顧此失彼之虞查湖北按察使胡林翼識略冠時所帶之勇曾經訓練臣國藩前與督臣楊霽往返咨商札飭該臬司帶勇二千駐防田家鎮外助大軍之聲援內固鄂省之藩籬中則搜勦匪黨以靖與冶蕪黃之餘孽酌留礮船以巡江楚接壤之河面該臬司接札後即馳至廣濟之鄖穴籌議設防事宜鄖穴去潯僅九十里臣等現圍攻九江陸兵太單因就近飛調胡林翼來潯助剿一俟克復郡城攻破湖口後再行飭回楚境駐防田鎮至北路黃梅太湖等縣鄂皖毗連北通舒廬東接宿望必須有重兵分布查鄂省有副將王國才都司畢金科樸實勇敢馭軍有法臣國藩咨商督臣楊霽即酌撥勁旅札飭該副將都司交臣等調遣擬俟鄂境肅清即由臣塔齊布督帶出境東征至皖省各員查有池寧太廣道何桂珍現帶勇千餘人督同章職知縣李沛蒼在六安等處防勦四品銜臧紆青亦帶勇至霍山疊准袁甲三函開該道等齊集英山俟臣等一軍入皖即可會合進勦等因在案今臣等攻破黃梅已逾半月而何桂珍臧紆青等尙無來會之信現值勦辦喫緊急須併爲一軍乃能呼吸靈通首尾相應擬即就近札調何桂珍李沛蒼臧紆青由英霍南出潛太併入此軍概歸臣等調遣合無仰懇皇上天恩飭諭鄂省之王國才等皖省之何桂珍等概入此軍歸臣等調遣其所帶之兵勇由臣等簡汰分別辦理庶兵力稍厚於大局更有裨益所有暫調臬司胡林翼來潯助剿及就近添調鄂皖各員緣由理合附片奏聞謹奏請旨

水陸屢勝圍信潯城摺 咸豐四年十二月初二日

奏爲湖口水師屢勝破賊大船陸軍圍信潯城焚燬賊壘並現籌攻勦情形恭摺奏祈聖鑒事竊陸軍在濯港孔壠連捷遂破小池口賊營水師肅清潯江進扼湖口業經馳奏在案逆黨被勦後僞丞相羅大綱奔踞湖口與現踞九江之僞丞相林鳳祥僞檢點林啓容等遙相犄角牽制我軍其小池口敗賊由彭澤渡江繞道赴潯者約近萬人增壘濬濠爲死守計湖口之賊自搶得江西戰船後聯檣結筏攔截內河東岸爲湖口縣城依據獅子山連

紮數營。西岸爲梅家洲。連紮二營。木城礮台。緊相依護。我水師左營彭玉麟。嚮導營孫昌國等。直紮湖口以內。前營李孟羣。後營蕭捷三。中營及各營戰船。分扼由湖出江之口。扁擔夾梅家洲及北岸之八里江一帶。層層鎖鑰。如犬牙之交錯。自十五接仗後。十六日李孟羣等復燒沿途未盡之船十餘隻。各營均派三板進攻。內河逆黨。水陸開礮抵禦。鏖戰逾時之久。焚其小划三十餘隻。轟斃岸賊數名。十七日。各營番休出隊。岸賊轟拒如故。我戰船衝鋒直入。擊斃多名。燒燬賊踞民房十餘間。收隊後仍泊原處。是夜賊於老岸添築土城二座。洲尾添築一座。又掘地窖藏人放礮。冀圖兩岸驚信水軍。十八日。各營入口。泝流攻擊。李孟羣率二百人。循大江南岸。攻其新營。其內河賊船。泊於湖口城下者。擱淺不動。惟岸賊開礮抵禦。各戰船駛近岸左。轟斃黃旗賊目一名。一面排舟江邊。開礮指擊。一面派勇登岸。助攻賊寨。數伏數起。爭先搶近。遂燒焚其新營二座。賊從地窖開鎗失火。又燒傷數人。時洲上一營之賊。已經退走。見我軍由後攻來。復分途抵拒。前營開放鳥鎗。斃賊十數名。賊遂大潰。洲尾之營亦燬。忽有數賊跪地乞降。我軍恐係詭計。不令近前。日暮收隊。各營受傷者。共十九人。此十六十七十八等日。水師屢捷。焚燬賊營之實在情形也。十九日卯刻。河口左右兩小營。賊忽撤退。李孟羣派勇立將空營燒盡。探係羅大綱。查知該二營賊欲投誠。故撤移城外賊營之後。然賊黨中竟有棄械直奔軍船求救者。概予免死。二十日夜二更後。風順水流。忽見上游火光冲天。礮聲雷動。該逆用小船百餘號。或二三隻一聯。或五隻一聯。堆積柴草。實以硝藥。灌以膏油。分十餘起。縱火下放。礮船隨之。兩岸出隊千餘人。呼聲鼎沸。兼放火箭火球。時彭玉麟孫昌國兩營之泊內河者。早經準備。屹然不動。李孟羣蕭捷三劉培元俞晟等。各駕三板迎擊。秦國祿段瑩器洪定陞等。繼進。撥開火路。將已然之船。用篙桿撐入中流。向空溜下。我戰船反迎火光而上。向岸賊開礮放箭之處。拚力攢擊。斃賊無數。且攻且追。追至木牌之側。忽又擁出火船數起。火藥不時轟發。我軍不爲驚擾。反疾趨而進。燒賊礮船十五六號。賊黨紛紛墮水。隨火船同付東流。當賊放火舟之時。天陰月黑。三更後月明如晝。該逆油葦之船。與我軍焚賊之船。火光照耀。秋毫無現。賊黨計窮。四更收隊。我軍一無所傷。此二十夜破賊火船百餘號之實在情形也。陸路官軍。自十五日與水軍會於小池口。十八日。巨塔齊布從上游琵琶亭渡江。次日。移營南門外。適湖北按察使胡林翼帶勇二千人馳至。分紮要隘。二十一日。羅澤南從下游白水港渡江。以期上下夾擊。是日晨刻。該逆

趁我軍尙未渡完突出數千人。由北門及小東門分路來撲。羅澤南一面派夫守護營帳。一面列隊迎擊。該逆揮旗搦戰。分三起埋伏。羅澤南督同候選知府李續賓。從九蔣益澧等。分途迎勦。時賊衆我寡。官軍殊死戰。殪其前鋒。賊遂敗退。伏賊繼進。移時又敗。羅澤南從寶塔灣進追。沿途趕殺百餘名。逼溺老鷓塘內者。約二百餘名。追奔十里之遙。其接渡之戰船。亦遂泝江而上。向岸轟礮斃賊甚多。軍功蔣葛梧係督臣楊需從漢川招撫者也。久在賊中。驍勇敢戰。臣等咨調來營。自帶精勇百人。矢志殺賊自効。是日追賊尤奮。匹馬衝突。行在羅澤南之前。焚燬城外賊營二座。追及九華門。門外賊營一座。尤爲堅固。各勇大呼撲入。拋擲火礮火球。斃賊無數。逆黨奔竄。聲若潰隄。詎該逆暗埋地雷於營內。延燒所及。烈燄轟騰。我軍之撲營者。猝被燒傷十餘人。敗賊之奔入北門者。城內賊目持刀督截。賊黨衝出。各勇見我軍前隊被燒。而賊衆回頭來撲。遂相率退奔。蔣葛梧率精勇十餘。急登小剋。被賊追擊落水。各營驍將追賊最猛者。陣亡三十餘人。羅澤南見大勝之後。有此小挫。卽勒馬小駐。揮令在後者無許續追。前者又無許再退。且駐且戰。回至岳師門外。我軍退則賊復尾追。我軍進則賊仍卻顧。如是者數次。羅澤南右臂及手指再受石傷。力薦諸勇衝進。斃賊十數名。賊衆盡靡。乃從容收隊。紮營白水港。各勇忍饑盡戰。帳房均未渡畢。夜間雨雪交加。多露立於風寒泥淖之中。此二十一日湘勇渡河未畢。開仗獲勝。焚躡賊營二座。實在情形也。二十七日。水師各營會合出隊。舟抵湖口城邊。見該逆於城下沙洲。密排巨木。橫繫筏纜數道。聯絡於對岸賊營之下。戰船數十隻。排列兩邊。開礮抵禦。子如雨密。各三板回舵收泊。示之以羈。別遣奮勇數舟。衝入賊隊。誘令出巢。該逆開船迎敵。各營遂揚帆疾進。攪礮聚攻。前隊三板。衝過賊艦之前。斫斷巨纜。乘勢轟擊。斃賊無數。該逆力不能支。紛紛斃水上岸。各船追逼直抵南岸洲尾。轟斃岸賊尤多。遂棄營內奔。惜陸兵未到。未踣其營。時上游忽有賊船救應。而依附營牆之下。木牌之旁。鎗礮更密。我軍從烟燄之中。搶入迎擊。斃賊約百餘名。燒其戰船二隻。賊營始全數敗回。傍晚收隊。各營陣亡七十餘名。帶傷四十餘名。二十八日。各營仍復出隊。岸賊見船至卽走。追殺多名。逆船堅匿不出。自此賊以舟師不敢拒敵。夜夜以陸師千餘。火箭火球。大呼驚營。我軍徹夜戒嚴。不敢安枕。此又二十七八等日水師鏖戰之實在情形也。伏查官軍自大破田鎮之後。私擬九江一郡。指日可破。不料陸軍北渡。掃蕩廣濟黃梅濯港孔壩一帶。轉戰六百餘里。奔馳二十餘日。而九江湖口兩處之賊。守備

日固。人數亦日增。迨十四日。水軍將潯城河下之船隻木筏盡數焚燬。二十以後。陸軍南渡。四面攻圍。而該逆尙能負固死守。其堅悍兇頑。實出意料之外。連日陸軍攻城。傷亡甚衆。因攻具未備。擬即先勦孤塘湖口之賊。翦其羽翼。水軍在湖口與賊相持。李孟羣之意。欲縱令賊船放出大江下游。免其內竄江西。分我兵力。彭玉麟之意。以爲賊奪江西。船礮縱之出江。其禍愈烈。必欲嚴扼此關。聚而殲諸鄱湖之內。俟陸軍到時。再行相機辦理。此次水陸兵勇。冒險深入。奮不顧身。籲懇天恩。由臣等擇尤保敘。以固士氣。藍翎千總曾獻成。藍翎把總周福友。藍翎外委羅嘉典。追賊過猛。力戰捐軀。深堪憫惻。應請飭部從優議卹。以昭激勸。而慰忠魂。傷亡兵勇。查明照例辦理。所有水師屢勝。破賊火船。陸軍圍逼潯城。焚躪賊營各緣由。謹會同湖廣督臣楊需恭摺由驛具奏。伏乞聖鑒。訓示施行。謹奏。

潯城逆黨兩次撲營均經擊敗摺 咸豐四年十二月十四日

奏爲潯城逆黨兩次撲營。均經擊敗。官軍分勦湖口。兩次皆捷。水師夾擊。焚賊解船。現仍拚力攻勦。恭摺奏祈聖鑒事。竊湖口水師破賊大船。陸軍圍逼潯城。焚踏賊壘。業經馳奏在案。潯城北枕大江。東北有老鸛塘白水港。西南有甘棠湖。西有龍開河。獨東南多山。焉姑塘入城要路。臣塔齊布率各營扼駐其上。該逆亦嚴防東南。其傾水之處。率將各路挖斷。其西門一路。雖未挖斷。而城外新壩。築有大營一座。木城數丈。列礮三層。倚龍開河以自固。二十六日。臣塔齊布親督兵勇。及胡林翼之騎勇。進攻西門。逼近賊壘。該逆設卡過堅。大礮數十。同時並發。我軍殊死戰。傷亡甚多。三進三卻。相持四時。不能攻入。遂行收隊。定議於本月初一日。四面合攻。臣塔齊布由新壩進攻西城。羅澤南等攻東門。胡林翼等攻南門。別遣副將王國才帶奮勇七百人。由舟次登岸。擬由九華門掩入。部譽已定。卯刻。臣塔齊布師抵城西。該逆連日夜加挖壕溝。寬深各三丈有餘。溝外樹立木柵。衆礮齊放。子若飛蝗。我軍毫不畏懼。三次撲柵欄。斃賊十餘人。奈地險而路曲。難以仰攻。參將童添雲攀堞而登。被礮擊穿胸膛倒地。各勇搶抬而出。該參將自湘潭以來。身經百戰。每次單刀陷陣。千人辟易。諸將皆服其驍悍。至是受傷過重。合營氣阻。延至初八日殞命。遊擊阿達春頸脖亦受鎗傷。各營過於勇猛。陣亡十餘人。帶傷至百餘人。胡林翼羅澤南等之分攻各門者。因城上鎗礮木石交施。屢次搶登。不能得手。傷亡亦百餘人。此二十六初一等日陸軍血戰攻

擄得城未破之實在情形也。臣等以江城窮寇死守。我軍攻具未備。不若舍堅而攻瑕。因商派胡林翼羅澤南及永州府知府張丞實。候選知府李續賓等。先攻湖口對岸梅州賊營。而調王國才及參將恆泰等。由小池口渡江與南軍合營。初五日。胡林翼羅澤南等拔營前進。王國才移紮巨塔齊布大營之旁。恆泰及參將札拉罕分帶兵勇七百人。尙在官牌夾江邊。未移近大營也。逆黨探知恆泰等人數單薄。初六日寅刻。突出二千人來撲孤營。官牌夾舊搭浮橋。爲我軍移營之用。賊衆過橋而西。恆泰麾兵力抵。斬大旗賊三人。自放火箭落橋。東賊隊之中。賊陣亂反奔。恆泰過橋力追。追及二里許。賊見人數過少。復挾大隊回撲我軍。火包亂擲。恆泰身面俱被燒傷。猶負痛力戰。且戰且退。仍回橋西。凡殺賊四十餘人。是日移營城之東南。與巨塔齊布等營相聯絡。初七日。逆黨四五千人。分數股出撲王國才之營。經王國才等擊退一股。而賊愈衆。勢將不支。巨塔齊布整隊往援。陣斬約近百餘名。賊遂分向城邊奔竄。我軍鼓勇跟追。直逼小東門。城上鎗子雨集。兵勇被傷數十人。巨塔齊布坐馬受傷。遂徒步督戰。諸軍愈擊愈奮。其進城不及之賊。約百餘人。盡爲我軍所殲。其尤驍勇者。從濃煙密子之中。大呼躍入月城。手曳一賊而出。揮刀斬之。賊遂閉門堅拒。時東北城隅。尙有一股敗歸。我軍從老鸛塘突出截尾。沿城趕殺約二三百名。迨至江邊。巨國藩復飭戰船。向岸指擊。斃逃賊百名。尸橫徧地。其自西城出者。另有千餘賊。攻撲居隆阿江西營盤。相持良久。巨塔齊布飛飭副將周鳳山等帶勇往援。一律擊退。斃賊二十餘名。此賊匪兩次出城撲營。初六小勝。初七大勝之實在情形也。胡林翼羅澤南分擄湖口之軍。於初六日已刻。行抵盃山。距梅家洲八里許。梅家洲之尾爲欄湖嘴。江省內河出口之西岸也。僞丞相羅大綱踞焉。湖口縣在東岸。僞翼王石達開其自安慶統衆來援者踞焉。該逆懼我舟師進擊內河之船。搜勦鄱湖之賊。於口內紮大木牌一座。小木牌一座。東岸縣外厚築土城。多安礮位。岸西立木城二座。高與城等。礮眼三層。周圍密排。營外木椿竹籤廣布十餘丈。較之武昌田鎮更爲嚴密。掘壕數重。內安地雷。上用大木橫斜搭架。釘鐵蒺藜其上。我盃山之軍。駐營甫定。派隊前進。胡林翼帶黔勇平江勇由洲東入。羅澤南帶湘勇及唐訓方鄒壽璋等由中路入。李續賓張丞實同蔣益澧等帶湘勇左右營從洲西入。賊衆負固不出。憑牆施放鎗礮。子如驟雨。我勇伏地以進。逼近壘前。去其竹木。以水潑其地雷。湘勇哨長葉楚南楊玉芳。黔勇哨長姜凌浩。從竹簽木椿中踰溝而前。直入賊營。以路窄人少。葉楚南楊玉芳姜

凌浩俱爲賊刃。諸勇抱憤。攻之愈力。日暮不願撤隊。終以地險不能入。初七日。方欲進攻。忽見梅家洲賊七八千人。分三路而進。兩路列洲之柳林中。一路由江邊繞出。蓋山石嘴。以攻我營之左腋。而大姑塘之賊。又以四千餘人。撲我蓋山大營之背。蓋欲誘我師進攻洲上。而姑塘之賊。得以乘其後也。胡林翼羅澤南等酌定。以湘勇右營左營禦山後之賊。湘勇中營黔勇營禦洲上之賊。賊之自獅子山來者。勢甚兇猛。蔣益澧自執大旗。向前抵禦。以各勇未齊。陣勢稍卻。李續賓率右營以進。短兵截殺。張丞實從後督之。斬悍賊十餘名。山後之賊大敗。追至兜口湖。賊復列陣以拒。相持一時。兩營分路圍勦。斃賊三百餘名。賊乃大潰。追奔十餘里。沿途殺賊近百名。至小湖而止。賊衆悉由湖汊淺處涉水而過。諸勇有踰汊奪賊旗幟者。洲上三路之賊。因見山後賊敗。不敢前進。羅澤南帶數百人直逼壘前。誘敵佯退數次。而賊終不進。未刻收隊。此胡林翼等分勦湖口兩次獲勝之實在情形也。水師之在湖口者。以內河狹窄。賊艦數十丈。橫互江心。艦側有礮船。艦外有鐵鎖箴籠。層層固護。兩岸營牆。百礮轟擊。皆以堅守此艦。百計攻之。終不能衝入。艦內傷亡愈多。軍心愈憤。初六日。聞陸軍一至。卽出隊夾攻。彭玉麟劉培元孫昌國之紮口內者。先抵木牌之下。前營李孟羣後營蕭捷三及秦國祿俞晟段瑩器洪定陞等。均從外江進口。攢礮環攻。賊艦環以木城。中立望樓。亦設鎗礮。計牌上與船中望樓。與兩岸賊礮四發。羣子噴落我軍。每傷一人。則拖入船艙。進擊如故。又傷。則又入艙。又進如故。終無一船退縮者。將其鐵鎖箴籠。立時斫斷。哨官劉國斌一礮轟中。牌上藥箱。巨烟轟發。響若山頽。牌已燃燒過半。而未燒之一面。賊仍開礮不絕。尤可異者。望樓之賊。屹立不動。直待全牌火滿。望樓傾倒。始自投烈燄。或沒身以緣牌底。良久乃自他處旋波以出。其很忍如此。我軍四旁長圍。各持一矛。專刺晷逃之賊。牌上賊二百五十六名。同歸一燼。無漏網者。牌後賊船。時猶負固犇拒。我軍分一技抄出。立燒大戰船六隻。民船二十餘隻。賊之登岸者。被李孟羣親兵截殺十餘名。羅澤南之陸勇擊殺亦衆。且放火助燒牌船。水陸相輔。是日血戰四時之久。燒斃溺斃礮斃之賊四百餘名。奪獲大礮十餘位。生擒一百一十三名。內有僞將軍梁國安。僞總制熊長易。僞司馬許學受。僞總制熊廷詔。陳經綸。皆牌上賊目。凶悍聚斃。全軍爲之一快。此初六日水師攻破木牌賊卡之實在情形也。伏查該逆上踞江城。下踞湖口。復分股盤踞大姑塘。疊擾南康府城。原圖牽制我師。使江西與湖口不能聯合一氣。臣等定議。先攻湖口。搜勦內河。使鄱湖之賊舟悉滅。

則潯城之外援益斷。今幸攻破木牌。去此大害。以後水師進攻。或易得手。此次陸軍攻城攻壘。水師攻牌攻卡。冒險摧堅。受子傷至四百餘名之多。而氣不少餒。藍翎守備劉國斌攻勦田鎮。首先衝開鐵鎖。擬保都司。尙未出奏。此次焚牌。又係首先衝入。身受子傷。藍翎守備孫昌國。隨同彭玉麟進紮口內。第一幫屢次進攻。身先士卒。月餘不眠。劉國斌孫昌國均請以都司卹補。並賞換花翎。其餘出力將弁兵勇。籲懇天恩。容臣等彙案保獎。以固士心。升用參將童添雲。自隨臣塔齊布出征以來。轉戰二千里。無戰不獲。身陷陣。其胞弟在湘潭陣亡。該將又因傷重殞命。合營皆爲痛哭。應請飭部照參將陣亡例從優議卹。以慰忠魂。把總葉楚南。田鎮案內。擬保守備。外委楊玉芳。六品軍功黃韻南。武生陳烈。田鎮案內。擬保把總。姜凌浩。崇陽捕勦案內。擬保把總。均未出奏。合無仰懇皇上天恩。葉楚南准照守備例議卹。楊玉芳黃韻南陳烈姜凌浩均照把總例議卹。以昭激勸。其餘陣亡兵勇。查明照例辦理。所有兩次擊敗潯城之賊。並湖口水陸夾擊。焚賊船。連日獲勝各緣由。謹會同湖廣督臣楊霽恭摺摺。驛六百里馳奏。伏乞皇上聖鑒。訓示施行。謹奏。

內河水師三獲勝仗摺 咸豐四年十二月二十日

奏爲內河水師三獲勝仗。恭摺馳奏。仰慰聖懷事。竊水師於十二日焚燒湖口卡內賊船。乘勝衝入內河。業經另摺具奏。蕭捷三段營器等。及各營長龍三板百二十餘號。挂帆上駛。行至大姑塘。尙無賊踪。卽行宿泊。十三日。上至平鳳地方。見賊戰船民船共二百餘號。突起擊之。該逆自恃在湖口卡內百里。不虞我軍之猝至也。大礮羣鎗。抵死抗拒。我軍先燒其民船。賊陣既亂。乃焚其戰舟。凡焚船二百餘號。奪獲三十五號。奪礮七十餘位。各三板自先日出隊。小艇不便宿食。至是始得一餐。十四日。該逆以前夕所搶我軍之船。冒爲官兵。自湖口駛上襲我內河之師。輔以小划百餘號。時蕭捷三段營器等已聞十二夜老營被燒之信矣。因約各哨寂靜以待。逆船撲近。衆礮齊發。羣子噴飛。該逆立刻敗下。紛紛斃水。擊沈燒去小划三板。共五十餘號。追至湖口。見該逆搭浮橋二道。舊卡一道。關鎖牢固。勢難衝絕。收隊回泊大姑塘以上。各營官以十三所搶民船。恐其累重爲賊所乘。至是盡數焚之。外既與九江大營隔絕。內又與江省遠離。銀兩子藥。俱無所出。不得已就取於南康。十九日入至吳城鎮。探悉逆匪由彭澤湖口而來者。約有數千人。竊據都昌縣城。築城挖壕。擄有大小船隻四百餘號。停泊縣河。裝載輜重。二

十六日。水軍各營官。在灌子口熟商。以都昌既有逆船竊踞。倘我軍一出。仍復滋擾。轉不能一律肅清。不如趁此時燒盡。因派定三板划船四十餘隻。營官蕭捷三孫昌國段瑩器賀虎巨鄧翼升親督之。於二十七日五更。即開行。並派熟悉河路之翟秉懋前往指引。是晨烟霧迷漫。嚴戒各船。不准放一礮。出其不意。突而襲之。已刻抵都昌縣。見逆船排於河面。大小數百號。黃旗飄拂。該逆尙未驚覺。各營蜂擁而前。鎗礮齊施。火球火箭並發。時值東南風。頃刻之間。火光貫日。將逆匪輻重船數百號。燒燬淨盡。賊匪擊死者。撲水死者。不計其數。生擒五十名。即時正法。餘匪奔入縣城。因無陸兵。不敢上岸窮追。師還路過雞公湖。有小划船三百餘號。各營官帶勇下水。概行燒盡。免爲賊有。此搜勦都昌河內大獲全勝之實在情形也。伏查水師自衝入內河。日夜辛勤。三獲全勝。搜洗鄱湖支河。勞勩可嘉。然冒險衝入。與外江水師相隔。疏失實甚。目下外江苦乏小船。即擬趕添民划。內河水師。飭令決戰衝出。兩面會勦。以期力破湖口一關。所有內河水師屢勝緣由。謹會同江西撫臣陳啓邁恭摺由驛馳奏。伏乞皇上聖鑒。訓示施行。謹奏。

水師三次獲勝兩次敗挫摺 咸豐四年十一月二十日

奏爲水師三次獲勝。兩次敗挫。恭摺馳奏。仰祈聖鑒事。竊水師攻破賊觚。陸軍在梅家洲獲勝。業經馳奏在案。初十日。胡林翼羅澤南等。銳意欲攻破梅家洲賊壘。負布袋囊土。人持火包。一擁而前。衝突於賊礮攢簇之間。前者雖傷。後者猶進。逼近賊牆。超躍而入。已入數十人矣。拋擲火包。誤傷同入之侶。以數人負送而出。在外者誤認爲敗退。適南頭一壘。賊隊衝出。西路官軍相率退奔。入壘者恐外隊挫失。亦即退出。奔潰至三四里之遙。始行卓旗駐立。迴軍與戰。該逆亦反奔。我軍追之更急。殺賊三十餘人。該逆遁入堅壘。回匿不出。水師自初六日攻破賊觚後。該逆連夜將大船鑿沈江心。竄以砂石。僅西岸留一隘口。攔以篋籬。初十日。陸軍攻壘之時。約水師同攻此卡。彭玉麟孫昌國蕭捷三等。督三板各船。斬纜衝入。焚其戰船三十餘號。民船三百餘號。斃賊約數百名。我軍受其隘口三面之礮。傷亡亦數十人。十二日。陸軍復攻賊壘。攻逼終日。以礮多壘堅。卒不能破。水師復衝入卡內。燬賊船三十餘號。民船約五十號。自是賊所奪江西戰舟。焚燒略盡。僅餘夾洲內十餘船。自湖口至姑塘四十里。賊艦肅清矣。此乃初十二日陸軍攻壘水師戰勝之實在情形也。營官蕭捷三段營器孫昌國等。欲肅清鄱湖以內。

遂乘勝追至姑塘以上從之者各營長龍三板百二十餘號皆輕便之舟勇銳之士揚帆內駛日暮不歸詎料該逆窺我軍小船衝入內河卽出小划二十餘號突出卡外圍我軍快蟹大船保升都司史久立首當其衝被圍良久船隻延燒力戰死之是夜三更該逆復用小划三四十號攢入老營燒我船隻兩岸賊數千火箭噴筒迷離施放呼聲震天我軍以內河百餘小船未歸無以禦之被焚大戰船九號小者數號雜色坐船三十餘號各勇狂於屢勝之餘變起倉卒快蟹長龍等船掛帆上駛李孟羣彭玉麟不能禁止次日悉回九江大營臣國藩聞信之下不勝憤懣戰船焚失雖屬無多而百餘輕捷之船二千精健之卒陷入鄱湖內河業被賊卡隔絕外江所存多笨重船隻運掉不靈如鳥去翼如蟲去足實覺無以自立副將楊載福自攻破田鎮後卽在武穴養病因飛調來營十七日力疾往下遊進剿行抵潯城十五里之張家洲頭賊船已分兩路上犯楊載福派哨官張榮貴陳金甌等由新河下擊自率各哨由老河下擊澄海營官何敷五亦由老河隨剿鏖戰良久該逆敗退下竄追至老灣其快蟹船貼靠北岸陸賊護之不能奪取礮斃賊數十名我軍哨官沈光雲陣亡張榮貴等自新河下者遇賊三板及小划約三十隻我軍九船勝之追至湖口縣繞出老河與楊載福會合兩路凡焚船二十六號奪船五號四更收隊此十二夜水師敗挫十七日進剿獲勝之實在情形也自十二夜水師失利後賊之凶燄頓長梅家洲之賊夜夜往撲胡林翼羅澤南等營賴併力堅守得挫凶鋒湖口之賊渡江上犯紮營九江對岸之小池口二十一日臣等派副將周鳳山渡江擊之四更渡畢黎明開仗該逆猝不及防踏平賊營一座殺賊百餘江邊一枝追出街外堤內一枝因搶奪馬匹衣物爲賊所乘先勝後挫被追七八里之遙臣等酌商以水師既陷於內河陸軍復挫於小池口遂調胡林翼羅澤南二軍由湖口回勦九江二十五日駐紮南岸官牌夾是夜三更潯城與小池口兩岸之賊各拾小划數十隻入江乘月黑迷漫攢入我軍船夾內火彈噴筒百枝齊放右營被燒戰船一隻各哨慌亂掛帆上駛臣國藩坐三板督禁黑夜不許開船江闊船多莫能禁止該逆已用小划數十將臣坐船圍住管駕官廣東把總劉盛槐李子成監印官安鄉縣典史潘兆奎文生葛榮冊陣亡文案全失臣國藩遂飭各戰船與羅澤南陸營緊相依護而遣人四出追回上駛之船黎明陸續歸隊復將賊船追擊奪回船三隻此二十一日陸軍先勝後挫二十五夜水軍復挫之實在情形也伏查水師自岳州以來屢獲大捷武漢田鎮聲威尤震自至湖口苦

戰經月。破簿焚船費盡氣力。賊舟所存無幾。詎意各營長龍三板。過於勇鷲。衝入內河。竟夜不歸。而外江老營。兩次爲該逆所偷襲。實堪憤恨。皆臣國藩調度無方所致。應請旨飭部將臣國藩交部嚴加議處。廣東保升藍翎把總劉盛槐。保升把總李子成。典史潘兆奎。請交部照例議卹。哨官保升都司史久立。奮勇忠直。爲國營所推服。請照都司例從優議卹。候補把總李允升。李選衆。或中敵陣亡。或燒傷殞命。均請交部議卹。藍翎軍功沈光雲。田鎮案內。擬保把總。尙未出奏。文生葛榮冊。襄辦勞勩。田鎮案內。擬保主簿。尙未出奏。籲懇天恩。沈光雲卽照把總例賜卹。葛榮冊卽照主簿例賜卹。其餘查明照例辦理。除內河水師屢獲勝仗。另摺奏報外。所有水師三勝兩挫緣由。謹會同湖廣總督臣楊霽。江西巡撫臣陳啓邁。恭摺由驛具奏。伏乞皇上聖鑒。訓示施行。謹奏。

謝賞穿黃馬褂等項恩摺 咸豐五年正月初五日

奏爲恭謝天恩。仰祈聖鑒事。咸豐四年十二月二十四日。准兵部火票遞到十二月初二日內閣奉上諭。一會國藩塔齊布。奏水陸官軍續獲大捷。肅清潯郡江面一摺。覽奏之餘。實堪嘉慰。會國藩着賞穿黃馬褂。並發去狐腿黃馬褂一件。白玉四喜撥指一箇。白玉巴圖魯翎管一枝。玉靶小刀一柄。火鏢一把。交會國藩祇領。又白玉四喜撥指一箇。白玉巴圖魯翎管一枝。玉靶小刀一柄。火鏢一把。交塔齊布祇領。以示優獎。一等因。欽此。二十六日。又准軍機處咨開。十一月二十六日。由內交出。年終奉賞福字荷包銀錢銀鏢食物等件。由驛遞到營。一當卽恭設香案。整鬪叩頭。先後祇領。竊臣等謬典戎行。毫無功績。荷生成之逾格。業甄敘之頻加。迺蒙疊沛恩綸。特頒寵賚。纓影孔雀。羽儀增玉管之輝。袖染鵝黃。華袞炫金英之色。筋容刀於琰琫。仗挾拾於破弦。重以天藻。親揮雲章。下賁。聲悅則錫從內府。珍羞則嘗自天廚。凡茲逾分之殊榮。實屬非常之異數。鵷鴻滋愧。鼉戴難勝。况當時局艱危。適拜殊恩。稠疊。恐事機之多拂。力不從心。念報稱之愈難。感尤思奮。臣等惟有同心戮力。竭慮殫精。切枕戈待旦之忱。以期仰答聖主鴻慈於萬一。所有臣等感激下忱。謹合詞附驛陳奏。叩謝天恩。伏乞皇上聖鑒。謹奏。

陸軍勦小池口賊並陳近日軍情摺 咸豐五年正月初五日

奏爲陸軍渡江勦小池口之賊。先勝後挫。北岸賊蹤大股上竄。並陳近日賊勢軍情。恭摺奏祈聖鑒事。竊官軍水師精銳二千。陷入鄱湖以內。被賊隔截。及內湖水師大捷。外江再挫情形。業經馳奏在案。二十九日。臣等以兩岸

之賊逼處水師新挫恐難自立商派李續賓蔣益澧等帶湘勇一千二百人從二套口渡江勦小池口之賊辰刻
竣畢恐湘勇輾轉疲勞難以取勝派羅澤南帶勇二百渡江接應臣塔齊布自率親兵數十人已刻渡江督之李
續賓蔣益澧從內隄入逼近賊壘鏖戰一時殺賊十餘名前鋒衝入賊營賊隊忽從營外一枝抄出蔣益澧左營
卻退江邊之賊復出數千橫截我師羅澤南從外隄往援將江邊賊衝退營內之賊愈出愈多李續賓等內隄一
支且戰且退臣塔齊布恰至躍入督陣湘勇回戈擊賊殺賊目二人數次逼入賊壘以野曠賊衆該逆從遠處大
圍包抄我軍以賊數太多衆寡莫敵後隊旗靡而前隊亦不能按陣臣塔齊布匹馬衝突羅澤南李續賓亦
迴馬力戰使悍賊不得窮追有黃馬褂三人各帶十餘賊直奔臣塔齊布馬前羣矛攢擗臣塔齊布直前斫一黃
馬褂賊落地而奪其馬又橫突而西二賊自皆落馬餘黨始靡而大隊賊自內隄出者尙窮追不止臣塔齊布念
悍賊所以苦追者止欲得一人而甘心也因麾令湘勇大隊沿江西馳而獨勒馬至北路鄉間自是賊衆不甚西
追羅澤南率湘勇收隊渡江餘賊北逐者臣塔齊布間刺殺一二賊終不敢逼日暮後始渡江歸營此二十九日
湘勇北渡遇賊萬餘先勝後挫之實在情形也伏查臣等陸軍在北則不能顧南岸在南則不能顧北岸久在聖
明洞鑒之中無如南岸濠城圍攻正在吃緊而北岸小池口之賊相逼已甚不得已分渡南岸之兵擊北岸之賊
士卒久勞隔江遠戰主客勢殊衆寡不敵致二十一二十九兩次挫衄調度失宜自憤自恨該逆自臘月十六日
由湖口分支來踞小池口二十五日大隊復至二十六日分千餘人上竄龍坪武穴二十八日李孟羣礮船在武
穴擊之又麾勇登岸力擊斃賊數十人餘衆敗回竟以三十日引大股賊三千人沿江上竄初一日竄至武穴初
二日至蘄州聲言直犯武漢至督臣楊需廣濟一軍臘月十二及二十四等日兩次敗衄聞二十九日又被該匪
撲營兵勇紛紛逃至蘄州一帶道路梗塞屢次差探未確不知督臣現駐何處黃梅廣濟股匪聞亦有四五千人
上犯與沿江之賊會於蘄州一併西竄目今局勢臣等一軍進止機宜有萬難者不得不爲我皇上陳之該逆大
隊上犯武漢鄂省兵勇難資抵禦意圖抄我後路斷我餉道若擄上游無數之民糾搶漢鎮新造之戰舟梗塞江
漢之間則大江千里上下皆賊臣等水軍裹於中段錢糧子藥來源已截水勇之心斷難自固若果重踞武漢西
窺荆襄南伺湘省防不勝防其可慮者一也若使臣等一軍回駐武漢則艱難百戰肅清江面一旦委而棄之竄

屬可惜。且臣等水師西旋九江。湖口之賊。勢必內犯江西。臣等此後軍餉。更難仰給於江省。且陷入內湖之戰。舟百餘。精銳二千。從此斷難衝出。與外江水師會合。年餘講求。練此精華。一旦置之無用之地。後日難以再振。其可慮者二也。陸軍屢勝之餘。士氣極盛。自至九江湖口攻城攻壘。傷亡健卒。多至數百人。銳氣挫損。若使一意前進。得勝仗數次。尚不難於振刷精神。再接再厲。若使回軍武漢。則兵勇之雄心先滅。加以遠道跋涉。消磨精氣。雖認真振厲。亦難作其方新之氣。其可慮者三也。臣等反覆籌思。進退兩難。現派李孟羣督帶礮船。至黃州一帶跟追。毋使上竄之賊。擄船下水。如果大股賊匪占踞武漢。水師當全軍回剿。陸兵亦當相機返顧。進止機宜。關係極大。此後餉項設措愈難。惟求我皇上指授方略。俾臣等得所遵循。不勝迫切待命之至。伏乞聖慈垂鑒。訓示施行。謹奏。

大風擊壞戰船並陳近日勦辦情形摺 咸豐五年正月初八日

奏爲大風擊壞戰船。飭令全數開赴上游。並陳近日勦辦情形。恭摺仰祈聖鑒事。竊江北賊匪上竄蕪黃。業經馳奏在案。正月初二日。臣等已飭李孟羣率三營戰船四十餘號。回救武漢。其大隊駐潯江者。欲全回武漢。則恐下游江面。仍爲賊有。欲堅扼潯江。則恐上游船少。不敷勦辦。正在進退兩難之際。忽於正月初四日。東北風大作。巨波排擊。終夜喧騰。初五日早。查點潯沈長龍三板二十二號。擊壞十四號。延至午刻。又破壞七號。其存者亦俱撞損漏裂。柁折纜斷。倉卒之間。祇得將壞船委棄。而令略好者七十餘號。全數開赴上游。直趨武漢。名爲速剿上犯之賊。實則修整已壞之船。臣國藩自二十五夜失去座船。暫駐陸營。本擬另辦一船。督飭水師。不圖逆黨上竄。既不能不分軍回剿。風波突起。又不能不全往修理。而自潯至漢數百里江面。將復爲賊所有。曷勝憤懣。細思臣等辦理錯謬之處。蓋有二端。武漢克復。當留重兵駐守。並當留戰船數十號。以爲後路聲援。茲因江漢無戰船。致該匪乘虛上竄。其失一。九江未破。遽攻湖口。冀通江西餉道。弁勇冒險輕進。致輕舟百餘號。陷入內河。一軍分爲兩截。外江無小舟。內湖無大船。頓形薄弱。其失二。至兩次被襲之後。更遭大風壞船。則又事機不順。出於意表者也。目前籌辦之法。謹條列具奏。伏乞聖慈垂鑒。

一、回救武漢之戰船。前後共百餘號。被風擊壞者多。其完好可戰者約不過四五十號。漢口若被賊踞。則修整

船隻當在金口以上。臣國藩會於沔陽新隄地方。設立船廠。現已飛飭李孟羣彭玉麟等。即在鄂堵紮營。在新隄整船。可以固荆襄之門戶。可以剿竄漢之新賊。第離臣大營太遠。而各船口糧銀兩。及修整破船之費。添造舢板之資。概無所出。應請旨飭下湖廣總督湖南巡撫迅籌餉銀。交李孟羣彭玉麟水營應用。

一、鄂省兵勇。臬司胡林翼。帶二千餘人。經臣等奏調來潯會剿。副將王國才。帶三千餘人。經督臣楊藩飭令來潯會剿。都司石清吉。帶千餘人。經督臣飭令在富池口設防。均在南岸。臣等聞賊從江北上竄之信。卽飛飭胡林翼石清吉。先後回援武昌矣。其王國才一軍。俟江西借撥餉銀後。探明鄂省確耗。再定進止。

一、水師陷入內湖者。皆三板長龍輕利之船。不便宿食。不能紮營。本擬俟春水生時。卽與外江水師併力攻出。今外江船壞。全回武漢。則內湖須添造大船。添募水勇。各小舟有所依附。乃能自成一軍。回鄂省之師船。有李孟羣彭玉麟經理。陷內湖之師船。無得力將領統之。各勇聞老營被燒。衣物全失。如鳥失巢。人無固志。甚不放心。臣國藩擬親至吳城等處。統轄此支水師。重加整頓。或竟至江省一次。將造船添募事宜。一一與撫臣陳啓邁面商妥籌。仍回大營。

一、陸軍各營。銳氣尙盛。現在圍攻九江。開挖地道。人人踴躍用命。若回軍武漢。則雄心頓滅。銳氣消磨。以後斷難復振。且湖口九江之賊。皆將內犯江西。有礙大局。昨經奏明在案。臣等定計月內設法破城。一俟內湖水師整理就緒。仍當鼓行東下。直搗金陵。該逆上竄武漢。攻我之所必救也。我軍下搗賊寨。亦攻其所必救。該逆縱復踞漢陽。我軍亦不肯輟轉回顧。聽其多方以誤我也。臣等自誓。有進無退。區區愚忱。竇欲一雪積憤。成敗利鈍。皆不敢計。

以上四條。係臣等目前辦法。及將來定局。是否有當。伏乞皇上聖鑒。訓示施行。謹奏。

潯城賊出撲營迎勦獲勝摺

咸豐五年正月初八日

奏爲賊匪出城撲營。官軍迎剿獲勝。恭摺奏祈聖鑒事。竊臣塔齊布陸軍自紮八里坡後。日夜圍攻潯城。逆匪堅匿不出。我軍於東城外半里許。濬開地道。而令得力兵勇一百四十名。帶同夫役二百名。紮營其上。別撥親兵百人。往來巡哨。本月初六日卯刻。逆黨千餘人。從大東門旁開洞門出城來犯。逆首羅大綱從小池口率悍賊二十

餘船渡江助戰。一撲開挖地道之營。一撲副將王國才之營。我軍之挖地道者。逆料賊必來犯。密排鎗礮以待。賊至寂然不動。待其撲近營邊。鎗礮齊發。轟斃帶隊之黃馬褂賊目一名。及隨賊數名。餘賊仍抵死不。臣塔齊布親率寶勇。及升用副將周鳳山之道州勇。馳往應援。衝殺十餘賊。追至大東門。逆黨半由洞門入城。半即繞城而上。被官軍鎗斃刺斃無數。城上礮子如雨。我軍亦傷亡十餘人。遂繞城追至沿江一帶。賊之分撲王國才營盤者。共分三路前來。該營連環開礮。賊不敢逼。逆黨遂以全力移撲周祿等營盤。王國才飭都司畢金科帶奮勇五百人。從後門潛出。抄周祿營盤之左。猝衝賊隊。殺斃十餘人。逆衆披靡。適各營援兵亦至。橫截之。該逆腹背受敵。狂奔不止。我軍追至鎖江樓。沿途趕殺。適臣塔齊布亦從東門繞出。併力追剿。逆黨爭舟回渡。人數擁擠。翻沈四船。溺斃近百人。羅大綱從岳師門入城。我軍奮追。爲城上鎗礮所格。午刻收隊。計斃斃溺斃共二百餘名。生擒二十一名。訊據供稱。羅大綱原紮小池口。屢催林啓容出撲官軍大營。林啓容懼不敢出。羅逆遂渡江助戰。約會城內之賊夾攻。現在敢奔入城等情。查羅大綱兇悍詭譎。因官軍堅扼濬城。急欲來撲。經此次敗挫。我軍銳氣愈振。日內仍當激勵三軍。併力攻剿。以殄兇鋒。所有逆黨出城撲營。陸軍迎擊獲勝緣由。謹會同江西撫臣陳啓邁恭摺由驛馳奏。伏乞皇上聖鑒訓示。謹奏。

賊匪撲營官軍獲勝並近日軍情摺 咸豐五年正月二十七日

奏爲賊匪撲營。官軍轟擊獲勝。並陳近日軍情。恭摺奏祈聖鑒事。竊陸軍初六日獲勝。水師被風壞船。全數開赴上游。業經馳奏在案。臣等以濬城一面臨江。兩面瀕湖。惟東門有陸路可入。逆賊負隅固守。攻之不克。因於東門外小嶺下紮下新營。開挖地道。冀轟破城垣。詎該逆業已偵知。於東門內深掘溝壕。添築子城。東門外增修木壘。暗通城內。自正月十四日以後。日以賊千餘。由木壘潛出。撲我新營。夜間復以火毬噴筒。拋擲營前。我軍穴地負土。日夜巡防。不勝其擾。臣塔齊布與諸將熟商。地道原以攻其無備。今該逆築子城掘內壕。備我甚嚴。攻之必難得手。不若乘其屢來撲營。設計陷之。遂於十八日停工。將新營器物。夜中運歸。俾以百人守之。營內暗藏地雷火。穢掩以茅草。賊衆果於十九日黎明。乘霧未收。於木壘中出賊千餘人。撲我地道新營。又於小東門出賊二千餘人。上平嶺。冀撲副將王國才之營。又於小池口渡賊二千餘人。由城北寶塔嶺潛伏松林。冀襲諸營之後。其來撲

我地道者，猝抵營前，守營之兵勇佯退，賊衆突入營中，徧擲火毯，一時地雷火礮齊發，燒斃賊匪二百餘人，賊衆敗潰。臣塔齊布督令參將彭三元、都司周岐山，率各營兵勇追襲其後，復殺斃賊匪四十餘人。其自平嶺來攻者，王國才率四川練丁禦之。浙江寧紹台道羅澤南遙見地道火起，帶領湘勇自東路直抵平嶺，斃賊八十餘名。安慶府知府李續賓自北路繞出平嶺之後，斃賊七十餘名。兩路夾攻，將賊包入中段，復斃賊數十名。迨至城根，賊衆遁入木壘，其伏於寶塔松林中者，羅澤南分湘勇往撲，斃賊目數名。王國才川勇從而乘之，斃賊百餘名。松林之賊，盡由老鸛塘奔入九華門，三路共斃賊四百餘名。生擒十二名，以我軍尚未晨餐，已刻收隊。此地道停工，設計陷賊大獲勝仗之情形也。水師之陷入內湖者，輕舟百餘，精卒二千，本向來所藉以衝鋒陷陣者也。然三板小艇，只利戰陣，不便宿食，皆另有座船，以資栖止，以備食具。一旦與老營隔絕，座船被燒，弁勇露處半月，饑凍備嘗，自臘月二十七，攻焚都昌賊船以後，開赴江西省河，撫臣陳啓邁給以口糧，優以犒賞，衆心始安。繼聞外江被風，戰船回鄂，老營之相離愈遠，內湖之軍心愈搖，幾有潰散之虞。臣國藩奏明馳至江省，親自統帶而安輯之，以三板艇不便宿食，與陳啓邁商定將江省現造之長龍三十號，先撥巨軍應用，又慮春夏水盛，江湖並漲，非巨艦不足，以壓浪而立營，擬再造快蟹大船十餘號，酌派員弁回楚，續招水勇，自成一軍，先將湖內支河賊踪勦滅淨盡。一俟鄱陽春漲，衝出湖口，擊破賊卡，以期與外江水師會合夾攻。此內湖水師重加整理之情形也。湖北副將王國才一軍，共三千餘人，前經奏明借撥江西餉項，探明鄂省確耗，再定進止。嗣經探得湖廣督臣楊滯，於初五日回至漢口，逆匪於初七日數百人竄入漢鎮，臣等即飛飭王國才回援武漢。又據探報逆黨勾結與國州徒匪，復行滋擾，並圖竄入江西武寧縣境內，撫臣陳啓邁與臣國藩熟商，王國才回鄂之師，若取道沿江一路，則賊卡太多，而米糧不便。若取道武寧山路，則免其蔓延江境，而繞出與國之背，勦辦亦易。復經札飭王國才由武寧與國勦洗回鄂。此湖北來粵會勦諸軍先後旋鄂之情形也。伏查臣等陸軍以轉戰千里，往返渡江，銳氣消挫，目今攻圍潯城，除出隊接仗外，臣塔齊布仍日日操練，以期蓄養英銳，振將乏之氣，而使之作新水師，一軍分爲兩截，惟有分投整飭，各自成軍，庶幾轉敗爲功，仍不墮屢勝之威。區區愚忱，但於士氣軍情細察其可用與否，縷晰入奏，以期仰慰宸廑於萬一。所有賊匪撲營誘勦獲勝，並陳近日軍務各緣由，恭摺由驛具奏，伏乞皇上聖鑒，謹奏。

輝光宸回臬司任片 咸豐五年正月二十七日

再江西臬司輝光宸自上年督帶兵勇。勦平武寧各屬逆匪。節經撫臣陳啓邁奏報在案。嗣於冬月移營九江。與鎮臣居隆阿合營。復奉疊次諭旨。歸臣等就近調遣。惟該臬司出征半年之久。本任事件。係糧道鄧仁莛代辦。現在造船鑄礮。及支應各局。均由鄧仁莛一手經理。其糧道本任事務已繁。又代辦臬司秋審事件。實難兼顧。撫臣陳啓邁與臣國藩熟商。目下九江帶兵大員不少。輝光宸所帶信新勇三百名。業經歸併居隆阿統轄。擬即檄調該臬司回任。釐辦秋審事件。俾鄧仁莛得以專辦造船鑄礮等要務。庶不致以叢脞滋誤。除陳啓邁自行具奏外。臣等有就近調遣之責。理合附片陳明。謹奏。

請嚴峯哨官萬瑞書片 咸豐五年正月二十七日

再上年臘月二十五夜。賊匪用小划百餘。燒襲水營。各戰船紛紛開動。其糧臺各所雇用民船。益覺倉皇失措。水手驚逃上岸。有全船無一人看守者。右營哨官萬瑞書竟敢至糧臺空船上撥搶銀兩。三十日。臣等飭令永州府知府張丞實至該哨官船上。搜出銀一千一百餘兩。正擬分別首從。嚴訊究辦。詎該哨官於初二日開船上駛。查該哨官久在水營出力。曾經咨保外委。田鎮破鎖。亦在應保之列。乃不自愛惜。喪心昧良。乘危亂之際。搶糧臺銀兩。實屬法無可貸。現在外江水師各營。業已全數遣回。武漢萬瑞書一船。或尙在武漢。或竟回湖南。均未可知。臣等遠隔九江。難遽峯獲。相應請旨飭下湖南巡撫臣駱秉章。在於水師營內。及湘陰原籍。嚴峯萬瑞書到案。即行正法。以肅軍令。謹附片具奏。請旨。

遵旨保獎摺 咸豐五年正月二十七日

奏爲欽遵五次諭旨。將出力員弁兵勇懇恩獎敘。以昭激勸事。竊照上年十月初一初四初五等日。陸軍踴躍破半壁山賊營。水師屢捷。十三日。水陸大破田家鎮。收復蘄州。二十八及十一月初一初四等日。陸軍克復廣濟黃梅。均經先後馳奏在案。管營羅澤南楊載福李續賓彭玉麟等。當蒙優擢。並各賞加勇號。其餘出力員弁兵勇。欽奉五次諭旨。准其核實保奏。仰候恩施各等因。當即恭錄轉行水陸各營。茲據各營官開單請獎前來。臣等覆覈無異。伏查自武漢以來。轉戰千里。軍士用命。無堅不破。可謂極順。自陸軍南渡攻圍潯城。而北岸黃梅廣濟蘄州等

屬復爲賊蹤往來之地。水軍精銳二千。陷入內河。外江老營兩次被襲。一次遭風。全數擊回武漢。而江面田家鎮道士嶽等處。復爲賊蹤往來之地。前此戰功。竟成空虛。可憤可恨。然事機之不順。調度之失宜。咎在臣等。而將士血戰十餘次。傷亡千餘人。其勞勩究不可沒。且營中賢愚不一。其詭滑者。見事勢稍拂。輒懷退志。其忠樸可恃之人。率皆前此力戰受傷之人。創痕未復。見事勢稍拂。愈憤極思戰。惟不沒其既往之功。乃益作其將來之氣。臣等謹遵五次諭旨。開單彙奏。籲懇天恩。俯如所請。以資激勸。所有彙單保獎緣由。恭摺附驛具奏。乞皇上聖鑒。訓示施行。謹奏。

謝寬免處分恩摺 咸豐五年二月二十七日

奏爲恭謝天恩事。本年二月十七日。承准軍機大臣字寄。咸豐五年正月二十日奉。上諭。一。會國藩自出岳州以後。均能與塔齊布等協力同心。掃防羣醜。此時偶有小挫。尙於大局無損。會國藩自請嚴議之處。著加恩寬免。一。等因。欽此。竊臣殺賊有心。治兵無術。上年十二月十二日。因水師乘勝攻入內河。泝流迎勦。欲淨洗鄧湖以內之船。該逆將隘卡加築。以致內外隔絕。被賊剗燒。襲老營。臣治軍年餘。當聲威稍振之後。忽有此挫。上廬宵旰之憂。勞調度乖方。罪無可逭。迺荷逾格天恩。寬免處分。皇上之鑒原愈摯。微臣之感激愈深。惟有殫竭血誠。力圖補救。或可稍贖愆尤。現在造船添勇。將次就緒。即當親督出湖。水陸痛勦。迅掃逆氛。冀仰答高厚鴻慈於萬一。所有微臣感悚下忱。理合繕摺叩謝天恩。伏乞皇上聖鑒。謹奏。

統籌全局摺 咸豐五年二月二十七日

奏爲統籌全局。將臣等一軍應辦事宜。分條馳奏。仰祈聖鑒事。竊正月十九日。用地雷轟斃賊衆。及內河水師重加整理情形。業經奏明在案。自後該匪未敢出城。二月十二日。逆賊約出千餘。分路來擾。四虞山脚。廣爲埋伏。我軍不動聲色。暗自隄防。該匪之兇悍者。一股進前猛撲。臣塔齊布分道抄去。賊衆敗竄。斃四十餘名。生擒十二名。當予凌遲梟示。屢接各路文報。及探卒稟報。臣等兩次所遣回李孟羣彭玉麟等。戰於正月初七初九。先後到鄂。共船以百三十餘號。分泊武昌城下。屢次開仗獲勝。北岸之賊。其由黃梅廣濟攻撲督臣楊需營盤。而上犯者。已於初七日竄至漢口。其由小池口武穴沿江岸而上犯者。初九日始竄至黃州。自黃州以下。各市鎮如巴河蘭

梁蘄州武穴隆坪等處。現均有賊盤踞。南岸初本無賊。北岸之賊分千餘人。由富池口南渡。至與國州擄人數千。攻陷與國通山崇陽通城等州縣。現尙分屯崇陽咸寧與國。時擾江西武寧境上。九江之賊。於新孺添築磚城。對岸小池口亦築磚城。爲死守抗拒之計。其在鄱湖以東者。湖口之賊。虐役鄉民。增高城堞。梅家洲大築土城。長逾三里。賊卡浮橋。至今未拆。上鋪木板。加以土石。都昌之賊。攻撲饒州。又有匪黨自東流建德而來。並集於饒州。分擾樂平石鎮街。屯聚於景德鎮。合計七八千人。又東竄祁門休寧。並有攻陷徽州之信。僞翼王石達開。僞丞相羅大綱。久踞九江湖口兩處。而饒州賊黨亦張羅大綱之旗幟。意將侵擾贛信。窺伺浙江各等情。此近日探報各路賊情之大略也。以湖北安徽江西三省全局論之。陸路須有勁兵四枝。水路須有勁兵兩枝。乃足以資剿辦。北岸自蘄水廣濟黃梅以達於太湖宿松。是爲內一路。自漢口黃州蘄州田鎮武穴濱江而下。以達於小池口望江縣。是爲外一路。南岸自九江以上與國通山崇陽武寧等屬。皆土匪勾結粵賊之淵藪。是爲西一路。自湖口以下由東流建德饒池徽寧四府。皆逆匪覬覦浙江之要途。是爲東一路。北岸之黃梅太湖前臨大江。後枕廬岳一山。綿互數縣。屏蔽舒廬。爲該逆必爭之地。南岸池州雖瘠區。而大通鎮殷家匯水陸交衝。南窺徽嚴。東障蕪湖。亦爲該逆必爭之地。故南岸以東一路爲最要。而西路次之。北岸以內一路爲最要。而濱江一路次之。此四路者。須陸兵四枝。缺一不可者也。水師自武昌以達湖口爲上一枝。自小孤山逾東南梁山以達太平采石爲下一枝。乃與紅單船相接。兩枝各自成軍。分段肅清。庶免首尾不顧。腹背受敵之患。亦缺一不可者也。今臣等水軍陷入鄱湖之船百餘號。回救鄂省之船百餘號。業已分爲上下兩枝。似有因禍得福之機。然內湖一軍。臣國藩來江整理。造船添勇。無難就緒。回鄂一軍。以被風擊壞之船。當將士疲勞之後。與漢口新竄之賊相持。臣等又不能分身前往統領。日夜懸念。每聞春風之怒號。則寸心欲碎。見賊帆之上駛。則繞屋徬徨。不知李孟羣等果能添置小船復振軍威否。至陸路須勁旅四枝。而臣等祇此一軍。欲分兩枝。則立形單弱。若欲常聚一處。而事勢所迫。有不得不分者。又不敢過於持重。致失機宜也。謹就目前之急務。度臣等力之所能辦者。分條布置。爲我皇上陳之。

一、現在賊竄饒州樂平。分擾景德鎮祁門徽州等處。所謂東路者也。爲江浙轉餉之路。亦爲奏報入京之路。關係大局非輕。臣等分派羅澤南統帶湘勇三千。由江西省城繞出湖東。攻竄饒州之賊。又與撫臣陳啓邁合募

平江勇四千同剿東路。俟饒郡克復。卽引兵直下。或趨景德鎮。或由建德進攻池州。此路有重兵。使安慶之賊大爲震動。則浙江之患可以少紓。臣等前摺所謂「賊攻我之所必救。我亦攻賊之所必救」也。

一、悍賊石達開等堅守九江。及對岸之小池口。臣塔齊布一軍。仍留五千人。穩駐潯郡。伺隙攻城。使賊不敢全數上竄武漢。亦不敢奔突他處。惟前次攻圍潯城。至萬五千人之多。兩次派胡林翼王國才回援鄂省者。六千餘人。此次派羅澤南馳剿饒州者。又三千人。存潯官軍過形單薄。俟籌添兵勇。續行具奏。

一、正月二十八日。臣國藩派水師船六十餘號。至康山地方駐紮。外防大江之賊。駛船入湖。內防饒州之賊。擄船出湖。其餘弁勇尙在江省修船。日內修完。大隊進紮南康青山一帶。其湖口賊卡浮橋既堅。鋪以木板。填以土石。人力難以遽破。俟春江盛漲。水陸并攻。卽當力破浮橋。衝出大江。

一、臣國藩來江已逾月餘。日內船隻修齊。卽駐紮鄱陽湖內。四處游緝。西近臣塔齊布九江一軍。聲息常通。東近羅澤南饒州一軍。調度亦便。兩軍相隔已在六百里外。全賴水師在湖中遞接信息。庶幾首尾相應。如東路攻勦得手。能至彭澤東流等處。將來水師出江。乃得所依護而無孤懸之患。

以上四條。就目前之急務。臣等力之所能行者。籌商辦理。是否有當。伏乞皇上聖鑒訓示施行。再臣等正月初五初八二十七日。三次奏報。均未奉到硃批。此次改由湖南饒出荊州驛遞進京。合併聲明。謹奏。

請令袁甲三練軍出黃州片 咸豐五年二月二十七日

再摺內言陸路須有四枝勁兵。臣等進剿饒州樂平。祇能辦南岸之東一路。其西一路與國崇通拊武昌之背者。已不能兼顧矣。至江之北岸。尤非臣等一軍所能爲力。然論中原之大勢。則江北重於江南。論此賊力爭長江堅守廬州之情。亦必須梅太舒桐一帶有一枝堅強可恃之兵。然後內可以克廬郡。外可以清江面也。此時江北縱不能籌備兩軍。亦斷不可不添置一軍。伏查鳳陽之臨淮關由壽州光固以達於麻城黃州。程途不過八百餘里。壽州光固雖屬兩省。而風俗略同。民氣強悍。自武備久弛。官兵怯弱。萬不得已而出於募勇之一途。則必擇其素所熟習者。訓練而用之。庶幾流弊較少。副都御史袁甲三在臨淮駐紮年餘。與壽州相隔咫尺。光固亦其桑梓之地。若令該副都御史招募二處之勇。練成五千勁旅。由麻城出黃州之背。不過十餘日可到。人地既熟。道途無梗。

出其不意。數而擊之。則蕪黃各屬可復。皖鄂兩省之氣可通也。舍此一策。更無他處可添。江北一軍。若徵調太遠。愈久則愈蔓延矣。臣國藩愚見。請旨飭下副都御史袁甲三招募壽州光固之勇。由麻城迅出黃州。以全江北大局。不勝至願。若袁甲三能至湖北。則上游李孟羣等之水師。即歸該副都御史統領。水陸相輔。尤有裨益。至臨淮關亦係要隘。現聞高唐運鎮勤辦。將次完畢。可否分撥北師南下防禦臨淮之處。出自皇上聖裁。微臣未敢擬議。所有謀增江北一軍。冀通皖鄂兩省聲息緣由。謹附片奏聞請旨。

陳明部照遺失片 咸豐五年二月二十七日

再上年十二月二十五夜。賊匪用小划燒襲老營。臣國藩座船亦被焚奪。文卷全失。當經奏明在案。其遺失部照。因清冊無存。未將數目查確。未經聲明。臣所請部照除江西湖南四川各領一千張外。臣行營實領祥字號一千張。當將癸丑年在衡州勸捐各生。填寫部照三百七十號。專差送衡。又於漢口設局。分撥部照。廣爲督勸。自文卷冊照全未至。倉卒無從查考。臣即專差至漢口分局。查覈冊籍數目。以憑續報。不料行至鄂省。而北岸之賊業已竄至漢口。捐局遷徙湖南。難遽查悉。計船上失去花翎照二張。藍翎照一張。各項職銜監照約二百餘張。除俟查明漢局簿冊。並行文各州縣詳查捐生領照號頭。核對再行咨部外。理合附片陳明。謹奏。

請江西閩浙協餉片 咸豐五年二月二十七日

再臣等一軍。曾經奏請江西湖南四川三省勸捐助餉。今賊匪占踞漢口。臣軍遠隔下游。糧道已斷。四川湖南之餉。不能運解來營。即去歲奏准陝西協餉下欠十二萬兩。亦不復能解至臣軍矣。僅恃江西一省捐項。臣等水陸萬餘人。殊不足以資接濟。相應請旨飭下江西撫臣陳啓邁在於四年漕折項下。每月酌撥銀兩。以濟臣軍。如江北添一枝勁兵。臣等奏准川陝之款。即可撥歸江北一軍應用。惟上游西通川陝。北通河南。來源尙廣。臣軍僅取給於江西。來源太隘。勢難久支。不揣冒昧。請旨飭下福建督臣王懿德。浙江撫臣何桂清。每月各籌銀二萬兩。解赴臣軍。俾兵勇口食不匱。免生他虞。臣等不勝迫切待命之至。謹附片具奏請旨。

謹陳水陸軍情摺 咸豐五年二月二十二日

奏爲謹陳水陸軍情遵旨覆奏仰祈聖鑒事。咸豐五年三月十四日。臣國藩在江西內河舟次。准兵部遞到承准

軍機大臣字寄二月十二日奉上諭「會國藩等前因戰船損壞全數開赴上游修理。又因陸軍銳氣尙盛仍欲鼓行東下。直搗金陵。原以逆匪上竄。牽制我師。若輟轉回顧。不但前功可惜。且恐兵勇之氣不能復振。是以諭令該侍郎等攻克九江。即合軍東下。惟現在賊踞漢口。漢陽武昌。情形關係緊要。設有疏失。該逆勢踞上游。我兵仍係腹背受敵。應如何設法協濟武昌。而于攻勦九江大局仍無妨礙。著會國藩等體察現在情形。或該侍郎帶兵自行前往。仍令塔齊布會同江西兵勇攻勦九江。務當統籌全局。斟酌辦理。楊需會國藩接奉此旨。即將如何籌辦情形。迅速具奏。以慰廬念」等因。欽此。又於三月十七日。兵部遞到承准軍機大臣字寄二月十四日奉上諭。「會國藩等進攻九江。連日不知勝負若何。或酌分陸軍。以救武昌東路。或再添派水師。沿江而上。協濟李孟羣等之師。使得進勦襄河。則上游可冀得手。於濤郡事機。亦有裨益。著卽妥爲籌酌。迅速奏聞」等因。欽此。伏查江西東路饒州廣信等處。被賊竄擾。安徽池州徽州等屬。賊勢狂猖。臣等酌派羅澤南帶兵前往廣饒一路進勦。業經奏明在案。目下臣等一軍分爲四枝。陸路兩枝。臣塔齊布駐紮九江。羅澤南分勦廣饒。相去已在六百里外。水路兩枝。臣國藩整理陷入內河之水師。駐紮鄱湖。李孟羣等同援武漢。屯紮金口。相去更在八百里外。兵合則力厚。分則力薄。陸軍之分。猶斟酌再三。而後析爲兩股。水軍之分。其初本無意於分也。自去臘十二日。輕舟百餘衝入內湖。被賊卡塞斷。遂與外江老營隔絕。猶冀內外夾攻。仍可合而爲一。自正月初三日。飭李孟羣等同援武漢。外江之船愈少。初五日。彭玉麟等因大風壞船。全數開赴上游。遂與內河一軍相去日遠。逮至武漢再陷。沿江兩岸數百里。復被賊踞。而金口水師與鄱湖一軍。乃不復可以遽合矣。今水陸各軍之在江西境內者。傷者平復。勞者休息。羸弱者汰遣。添換。仍可復去秋壯盛之氣。足以仰慰宸廑。惟金口一軍。與臣等相隔太遠。當轉戰積勞之後。值兩次敗挫。三次遭風之餘。以未經修整之船。禦武漢方張之賊。撐持數月之久。不得一日休息。此兵家之所大忌。而臣等之所以深爲慮者也。屢據稟報。彭玉麟等同漢之師。一面與賊接仗。一面修整破船。次第完好。湖南撫臣駱秉章復以百餘船前往接濟。差足重整軍威。而陸軍單薄。餉項缺乏。岌岌乎有潰散之虞。論天下之大勢。則武昌據金陵上游。爲古來必爭之地。論行兵之常道。則上下皆賊。而臣軍坐困中段。是亦決非萬全之策。是以臣等一聞武昌淪陷之信。卽再四籌商。思所以爲回勦之計。願回勦之策。有難言者。濤郡據長江之腰膂。宜有重

兵駐守其間。一經撤退。則九江湖口小池口之賊。皆肆然無所顧忌。內犯江西。上竄鄂岳。均不可知。軍士進則氣勝。退則氣歎。即勦辦得手。未知何日始能重至九江。其難一也。正月初八日一摺。言賊之上竄。不過意圖牽綴。使我軍回救耳。我軍鼓行東下。不爲其所掣動。賊攻我之所必救。我亦攻賊之所必救等語。其時未知上竄之賊。果至漢口與否。亦未知回救之船。即不可以復下也。今該逆不特攻陷武漢。而且窺伺襄樊。自金口以下。上下江面。皆爲賊踞。內河水師。若徒株守鄱湖。不出江面。則保護一隅。無濟大局。若乘此春漲。由湖出江。則不難於衝出湖口。而難於出江之後。一軍孤懸。四面無依。上不能遽合金口之水軍。下不能速勦安慶之賊艇。其難二也。湖南用兵已久。庫款既空。捐項亦竭。本年賊縱上竄。胡林翼王國才等之陸軍。李孟羣彭玉麟等之水軍。皆仰給於湖南。弁勇萬餘。嗷嗷待哺。有月餘未給餉者。有兩三月未給餉者。事機愈挫。來源愈斷。現在金口一軍口糧不繼。即有潰散之患。臣等欲再率六七千人前往。江西既難於供支。湖南更無可籌撥。大抵兵勇之積習。久住不戰。口糧尙可展緩。若有行役之苦。有戰陣之危。則不可一日而無餉。狡者藉詞鼓譟。樸者亦無鬪心。患有不可勝言者。其難三也。兼此三端。實乏良策。臣等調度乖方。上負皇上委任之意。下負蒼生企望之情。終夜以思。不覺泣下。刻下若分兵往鄂。則已無可再分矣。若臣等自行回勦。則須預籌兩月之餉。臣國藩上年曾奏請四川勸捐助餉。頃已札委前任湖南常寧縣知縣祥麟。兼程赴蜀守催餉銀十二萬兩。如此項有著。即可恃以爲回勦之用。若其無著。則姑駐江省境內。與其千里馳逐。卒以餉匱。而致意外之虞。又不如堅扼中段。保全此軍。猶得以供皇上之軀策。瞻望北闕。翹切待命。臣等微悃。萬言莫訴。所有近日軍情。遵旨覆奏緣由。理合繕摺馳奏。伏乞皇上聖鑒。訓示施行。謹奏。

陸軍攻勦弋陽克復縣城摺 咸豐五年四月初一日

奏爲陸軍攻勦弋陽。連獲大勝。克復縣城。恭摺馳奏。仰祈聖鑒事。竊饒州賊匪於三月初四。分股由樂平德興竄擾弋陽。先期由撫臣陳啓邁派委署撫州府知府林福祥帶兵防勦。暨與臣國藩商派赴饒勦匪之羅澤南統帶湘勇三千五百餘人。先至弋陽會勦各情。均經臣等及撫臣先後奏聞在案。緣廣信河口地方。商賈輻輳。財貨充牣。且係通浙江要區。爲逆賊所覬覦。林福祥等。前在石鎮街與賊相持。兵分力單。總未大挫賊鋒。嗣浙江游擊常

海在貴溪，接伏陣亡，賊勢尤張。臣等即飭羅澤南兼程前進，相機速剿。茲據羅澤南會同林福祥稟稱：「三月十九日，該道等由貴溪拔營駐宿水門埠。二十日，向弋陽進發。羅澤南與安慶府知府李續賓帶湘勇中右兩營爲前隊，候補從九蔣益澧帶湘勇左營，候補知縣唐訓方帶訓字營爲二隊。林福祥與趙如勝率捷勝軍爲三隊。前安福縣知縣文明偕藍翎千總戴正才伍連魁率實勇爲四隊。即選訓導鍾世楨率志同軍，候選通判程迪昌率安全軍爲五隊。合以六成隊迎敵，留四成隊保護輜重。前隊至大水橋，爲入弋陽城之要道。前多水田，無駐營之地。羅澤南方相度形勢，傳詢土人，突見賊三四千人，由五里亭揚旗吹角而下。李續賓即以右營堵截大水橋，羅澤南督帶中營，由橋北繞出陳家山上，翼抄賊後。且擇安營之處，不意該逆見我兵初至，營盤未築，復以四五百人列於陳家山下，瓦夕塘橋之南，又以四五千，由弋城北門而出，圍抄我營之尾。與五里亭之賊共爲三股，黃旗蔽野，呼聲震天。羅澤南飛飭蔣益澧唐訓方迅速來援。林福祥督諸軍繼之。堵北門一路之賊，賊之在陳家山瓦夕塘橋者，大隊扼住橋上，鎗礮排列，悍賊疊出，搦戰。羅澤南率中營湘勇拒之，堅與相持。如不欲戰，俟諸營畢至，往堵北門，然後以中營進攻，直逼橋上。鎗礮之後，繼以刀矛，斃賊二千餘名。賊潰，遂踰橋而南，追殺百餘人。竄入村莊者，以火焚之，死者不可勝計。餘賊俱由西門外之西江橋入城。先是賊於橋上砌一石門，僅容一人出入，原以防我師之進攻。至是我兵從後追之，賊衆擁擠，驟不能入橋門，墜水死者以數百計。生擒長髮十二名，內有偽總制程禮周稽老呂王富德，訊明立予正法斬梟。賊之在五里亭者，李續賓率右營由大水橋壘之。羅澤南從上截擊，殺斃百餘人。該逆見陳家山敗賊擁塞橋頭，無路可歸也，遂從五里亭之南，上竄江邊，右營乘之，追入湖汊，殺斃者百餘人。溺死者不可勝計。湖水爲赤。餘賊竄至西江橋，李續賓復督諸勇截之，生擒長髮賊十八名。賊之由北門出者，蔣益澧唐訓方先到，奮力抵禦。林福祥速督捷勝軍踵至，分數路圍剿。戴正才伍連魁鍾世楨程迪昌諸軍從而薄之，共斃斃百餘名。賊潰，追至北門城外。賊於城內復出大隊，衆寡不敵，我軍稍卻。賊衆來追，我軍返戈擊之。各營四成隊之護輜重者，亦皆執刃以逐，賊復大敗。追至城根，賊多溺死港中，生擒三十四名。內有偽將軍王姓一名。此二十日三路擊賊第一次大勝之實在情形也。羅澤南以軍未午餐，飭令收隊，急修營壘，以自固。詎料賊敗之後，復挾全力來撲。其由北門出者以萬計，直抵陳家山東大松林內，分三大股排列，一股之中。

復分數股。旗幟之多。衆目爲眩。李續賓以右營禦於松林之南。唐訓方副之。羅澤南以中營禦於松林之北。蔣益
禮繼之。各分數股以待。賊屢衝突。我軍屹然不動。乘其氣竭。一呼而進。殺斃大黃旗賊數十名。賊狂奔不止。乘勝
追之。溺斃港中者。以數百計。直抵北門之下。賊閉城以守。其由西門出者。約二三千人。林福祥督率捷勝軍實勇
志同軍安全軍堵之。踰橋奮擊賊。屢衝屢截。無敢越港者。追至西江橋。共殺斃賊數十人。生獲十五名。以日暮收
隊。此第二次截擊北門大股賊匪及西門堵勤獲勝之實在情形也。是日兩次鏖戰。分路圍剿。諸營無不以一當
百。殺斃焚斃溺斃之賊。不下三千餘名。奪獲旗幟軍裝無算。查點士卒。湘勇候補藍翎把總張以德。千總易傳武
喻能益。均受礮子傷殞命。兵勇亦傷亡數十名。二十一日五更。羅澤南督同李續賓蔣益禮唐訓方等攻西門。林
福祥督同文明戴正才伍連魁鍾世楨程迪昌等攻東門。廣信府知府袁詠錫亦自上游馳至。率同弋陽縣知縣
王蘭井力圍攻。該逆於二十日大敗之後。被擄之民。盡皆逃散。長髮亦多潰走。其在城者。猶閉城自固。湘勇先登。
諸軍繼之。擒獲長髮賊二百餘名。逃竄出城者復截斃三百餘名。內有僞指揮劉姓。僞總制余姓。及師帥八名。奪
獲僞盤龍冠金龍袍等件。黃旗五百餘面。大小鎗礮刀矛數百件。適署德安縣知縣劉希洛帶平江勇至。弋助剿。
亦沿途搜捕敗賊多名。訊據生擒賊犯。供稱弋陽有賊目檢點三人。長髮老賊三千餘人。浮梁樂平德興裏菴土
匪二萬餘人。將上攻河口廣信。以扼江浙咽喉之路。不意遽爲大兵所敗。逃遁各賊。多由北門而出。此二十一日
克復弋陽縣城之實在情形也。伏查廣信爲江西富饒之區。奏報必由之路。保全廣信。則內可以屏蔽撫建。外可
以進攻饒州。茲幸仰仗天威。弋陽股匪就殲。大挫兇鋒。卽當跟蹤追剿。肅清江西東路。以期漸逼皖境。所有此次
出力員弁兵勇。容臣等擇尤奏請獎敘。以資激勵。藍翎候補把總張以德。千總易傳武喻能益奮勇捐軀。懇恩飭
下兵部照陣亡例議卹。傷亡兵勇。查明照例辦理。所有連獲勝仗克復弋陽緣由。除江西撫臣陳啓邁另行奏報
外。恭摺由驛馳奏。伏乞皇上聖鑒。訓示施行。謹奏。

湖北兵勇不可復用摺 咸豐五年四月初一日

奏爲湖北兵勇不可復用。大江北岸宜添勁旅。敬陳管見。仰祈聖鑒事。竊查武漢兩城。三次淪陷。固由守禦不善。
而兵勇積習之壞。亦實有萬不可用者。蓋鄂中兩府一鎮。繁華甲於天下。督撫兩標之兵。習於淫侈偷惰已久。不

可用矣。自咸豐二年粵匪至鄂。迄今不滿三載。而全兵覆敗大潰者五次。其間小潰小敗。不可勝數。二年臘月初四日。粵匪以地道轟城破垣。逆旗猶未登城。而城內外兵勇已狂奔四竄。逃匿各縣。是爲第一次大潰。三年春間。署督臣張亮基等招復潰兵。添招練勇。擊粵匪於團風。剿土匪於通城廣濟。稍有起色。九月十三日。田家鎮失防。水陸兵勇同時棄甲回奔。是爲第二次大潰。其時臣函致前督臣吳文鎔。謂鄂省之兵。視奔潰爲故常。不宜再行收集。必須改弦更張。另募額兵。另招練勇。而後可以成軍。而後可以言戰。吳文鎔未及更改。即被崇綸參劾。倉卒出師。四年正月十五日。堵城之役。十三營均被蹋毀。將弁兵勇。盡數逃散。是爲第三次大潰。崇綸青巖等收復潰兵。并廣募湖南四川之勇。支持數月。餉盡援絕。六月初二日。奸細竊發。賊旗入城。青巖率兵勇奔赴湖南。沿途逃散大半。是爲第四次大潰。臣與提臣塔齊布等奉命東征。仰仗天威。幸復武漢。督臣楊霽復收潰兵。又招湖北河南之勇。新募兵勇。數近三萬。兵力不爲不厚。楊霽屢次奏報咨文。亦自敘其戰功之多。士卒之勁。意謂可簡練精銳。頓改舊規矣。不圖廣濟一敗。退至蘄水。又退至漢口。又退至德安棗陽。萬餘兵勇。或從之以行。或星散無歸。是爲第五次大潰。夫古今所以激勵軍士者。重賞以鼓好勝之心。嚴刑以誅奔潰之卒。故可用也。今湖北兵勇。既不好勝。又不畏刑。視潰散爲常行之道。恬然不以爲怪。若因循不改。其可笑更有甚於今日者。臣愚以爲宜變易前轍。掃其迹而更張之。凡標兵之欲求歸行伍者。一概不收。凡練勇之曾經敗潰者。亦不復用。大抵山僻之民。多獷悍。水鄉之民。多浮滑。城市多游惰之習。鄉村多樸拙之夫。故善用兵者。嘗好用山鄉之卒。而不好用城市近水之人。臣愚以爲欲另募湖北額兵。宜在襄陽鄭陽等屬。深山窮谷之中。招選寒苦力作之民。擇其英鷲者。編入兵籍。假以時日。而訓練之。與武漢德安等府。遠相隔絕。使向來之潰兵潰勇。浮游無歸者。不得改名而混入其中。然後可得一旅之勁兵。而免致虛糜數萬之餉。古之謀大事者。克一二名城。不以爲喜。得一二良將。數千精卒。則以爲大喜。失一二名城。不以爲憂。失一二良將。損傷數十壯士。則以爲憂。卽素稱精勁之師。或積勞而疲。或餉匱而散。或不和而驕蹇。則愈引以爲憂。今日湖北之事。省城不遽收復。尙不足患。惟通省無一勁兵精卒。乃爲無窮之患。雖謂他省之兵。幸而克復。而本省無強兵守之。亦終非可久之道。臣愚以爲湖北之急務。在於另募額兵。另招新勇。目前之收復鄂垣在此。異日之保守楚疆亦在此。效雖稍遲。而事屬至切。前者二月二十七日。臣具奏江北宜

添兩路勁兵。外一路沿江岸而下。內一路循巒嶽之麓。由蕪廣而出宿太。請旨飭下副都御史袁甲三募壽州光州之勇。出漢黃之背。不知我皇上已俞允否。如未蒙允准。則江北千里極爲空虛。無論江面不能清。武昌廬州不能復。即使微倖而肅清恢復。而流賊四散。旁出橫逸。截我後路。已清之江面。不旋踵而梗塞。已復之城垣。不旋踵而復失。去冬之舉。即前車之鑒。不可不早爲之所也。伏乞我皇上慮念南服。神算獨操。縱袁甲三不克西上。亦懇飭籓一枝勁旅。疾出黃州之背。並懇飭下湖北督撫。另立新軍。將前此潰兵潰勇。一概革除。盪滌舊習。重整軍威。使江之北岸。得兩路足恃之兵。可合可分。可內可外。不特有益於大局。即臣等南岸之陸兵。上下兩處之水師。亦皆得所憑藉。得所聯絡。有恃以不恐矣。所有請撤湖北兵勇另立新章。江北一岸。宜添勁旅緣由。恭摺附驛馳奏。伏乞皇上聖鑒。訓示施行。謹奏。

請部撥浙引用鹽抵餉摺 咸豐五年四月初一日

奏爲請撥浙引用鹽抵餉。以充軍用。以濟民食事。竊臣等一軍。水陸萬數千人。上游運道已斷。餉項缺乏。久在聖明洞鑒之中。二月間。奏請福建浙江兩省。協濟臣軍。嗣聞浙省因徽州戒嚴。難濟急需。閩省亦係積疲之區。難籌協款。惟奏請動撥江西四年漕折銀兩。稍紓眉急。特爲日甚長。爲數較巨。漕折一項。亦難久於供支。既處孤立之處。又有坐困之虞。欲捐則無可再捐。欲撥則無可指撥。中夜以思。良深焦灼。伏查國家歲入之款。鹽課爲一大宗。自賊踞金陵。長江阻塞。淮南鹽務。片引不行。場產堆積如山。而江西湖南無鹽可售。民憂淡食。淮南之鹽。奸民偷送賊營。粵匪賤售於各口岸。大獲其利。江西南路食粵私。北路食賊之私鹽。湖廣南路食粵私。西路食川私。東北亦食賊之私鹽。以國家富有之物產。不克設法行銷。自食之而自利之。而反資以爲賊之利。誠可惜也。伏查近年各路軍情。或以鈔抵餉。或以米抵餉。或以大錢抵餉。無非通融辦理。以濟銀兩之不足。臣等一軍。懇恩飭下戶部。撥給浙鹽三萬引。用抵餉銀。由臣招徠商富。自備場價。自備運腳。自行運至江楚兩省。而銷售之。以浙省之鹽斤。行淮南之引地。浙省正雜錢糧。邀恩豁免。惟綱正雜錢糧。則虛納而虛解。在戶部不以爲所撥者鹽也。仍令臣軍向鹽務衙門虛報納課。一憑批。即與撥銀無異矣。在臣軍不以爲所領者鹽也。仍令鹽務衙門向臣糧臺虛報解餉。一憑批。即與領銀無異矣。伏查上年江西缺鹽。經撫臣張芾陳啓邁先後奏請。借行浙鹽四萬引。是浙鹽

可行於淮南引地已有明證本年二月浙江撫臣何桂清咨明江西巡撫浙江各場存廠鹽斤尙多商人願源興等情願認辦浙鹽三萬引運赴江西行銷等語是浙場存鹽之富又有明證合無仰懇天恩飭下戶部准撥浙鹽三萬引聽臣設法自運自銷於淮引口岸以濟軍餉之不足不勝企幸如果運銷暢旺有裨軍食則可免鄰省協濟之艱可減民間捐輸之苦臣當續行奏請添引售銷如其行銷不暢流弊滋多臣亦必奏明停止臣爲請撥餉銀起見非爲變通鹽法起見倘其稍損於鹽務無益於軍餉臣權衡輕重斷不敢有片刻之回護絲毫之遷就也除運鹽條目縷晰咨商戶部外所有請撥浙引以鹽抵餉緣由恭摺具奏伏乞皇上聖鑒飭部迅速議覆施行謹奏 硃批「戶部速議具奏片併發欽此」

請大員總理鹽餉派員協理鹽運片 咸豐五年四月初一日

再臣奏請以鹽抵餉如蒙聖恩俞允則不難於到岸行銷而難於招商領運蓋緣東南數省現當干戈擾攘之時道路多梗人心驚惶殷實之家率多隱匿不出孰肯挾貨出爲鹽商西省去浙千有餘里楚省去浙二千餘里有風鶴之警有虧折之虞又孰肯挈數萬金之成本求不可必得之利若輕險之徒冒死逐利影射官鹽自作私梟臣又斷不敢招徠此輩以滋弊端招商一事殊屬不易臣之愚見欲仍以勸捐之法行之勸令地方紳富資助成本倡首領運庶票商可期踵至查在籍刑部侍郎臣黃贊揚上年奉旨派令在江西勸捐會同撫臣陳啓邁督勸至四五十萬之多官紳交孚物望允協若蒙聖慈諭令在於江西臨江府屬之樟樹鎮設局交該侍郎總理西楚兩岸鹽餉事務各屬紳富當可響應惟樟樹鎮以督銷爲主浙江督運事件仍須有大員綜理方昭慎重查前任浙江學政禮部侍郎臣萬青藜才優心細辦事穩實丁憂在浙未能回籍若蒙聖恩諭令在於浙江督辦鹽運事務必能與江西總局一氣呵成當此寇亂未平之際大小臣工或督兵或籌餉苟可自效皆當力竭血誠以圖涓埃之報况該侍郎等二人位望較崇夙懷忠悃每與臣往返函商常以受恩深重未能報稱爲恥如經理鹽務仿唐臣劉晏成法引用士人招集紳富悉心經畫自有利無弊至西楚兩省引地寬廣所有配引分運截角緝私等事非一二人所能督辦查江西有現署鹽法道之南昌府知府史致謬明而能斷候補道萬啓琛精細篤慎堪以協理西省鹽運事件湖南有總辦後路糧臺之署鹽法道裕麟辦理團練勸捐之候補知府黃廷瓚曾經臣等

奏保。堪以協理楚省鹽運事件。三萬引爲數無多。而微臣欲請二品大員兩人辦理。又請派兩省官紳道府四人分理者。蓋有治人無治法。得其人而董之。則軍餉可漸期充裕。而淮南數千里引地。爲賊私粵私川私侵佔者。可以反而爲官引之地。不得其人董之。則即此三萬引者。亦不免暗滋流弊。而仍無益於軍餉。是以與兩省官紳。反覆熟商。莫不謂以鹽抵餉之舉。必須多求實心任事者以經理之也。倘蒙飭部議准。合無仰懇天恩。飭下前任刑部侍郎臣黃贊湯。前任禮部侍郎臣萬青藜。總理鹽餉事務。并飭派史致諤等四人。協理兩省鹽運事件。於鹺政餉項。均有裨益。謹附片具奏。請旨。

派辦糧臺委員片 咸豐五年四月初一日

再湖北在籍禮部主事胡大任。係奉旨回籍。幫辦團練之員。自上年閏七月。在新隄起。卽隨同臣軍辦理沿江團練。辛勤督勸。頗著成效。武漢收復。委令在漢口勸捐。并辦理臣軍轉運糧臺。該司員深明大義。志在急公。本年賊竄漢鎮。於萬難措手之時。猶復拮据籌畫。接濟軍餉。又江西在籍禮部主事甘晉丁。憂服闋。應卽赴部。江西撫臣留該司員辦理捐輸事件。臣到西省。因陸軍兩枝。水軍一枝。相距太遠。必須於省城設立後路糧臺。支應三路糧餉軍火。方免缺乏之虞。嘗經會商撫臣陳啓邁。飭令甘晉與湖南候補直隸州知州李瀚章。綜理其事。該司員品端才裕。委管糧臺。藉資臂助。軍事方殷。難遽赴部當差。相應請旨。飭下吏部查照辦理。謹奏。硃批。吏部知道。欽此。

陸兵追剿廣信股匪克復郡城摺 咸豐五年四月十一日

奏爲陸兵追剿廣信股匪。疊獲大勝。克復郡城。恭摺馳奏。仰祈聖鑒事。竊饒州賊匪由樂平德興竄擾弋陽。謀攻廣信河口。臣等派委羅澤南林福祥等先後馳剿。克復弋陽情形。業經奏報在案。嗣據羅澤南等迭次稟報。二十一日克復弋陽後。餘匪竄踞興安北門外。民房街市。盡被焚燬。當以興安爲入廣信要道。不可不急爲撲滅。兼恐餘匪匿藏山谷。乘虛回撲。因留林福祥率帶諸勇。及德安縣知縣劉希洛所帶之平江勇暫駐弋陽。而羅澤南卽帶湘勇訓字營勇共三千五百人。由貴溪馳赴興安駐營城西十里。二十三日辰刻。抵興安城外。訪知該縣之賊。係另股由安徽婺源而來。冀與弋陽之賊。共攻廣信。並擄船百餘。將分股以掠河口。二十一日初至興安。是日我

兵破賊於弋陽。該逆尙未之知也。既聞弋賊大敗，與安股匪不及待，弋賊之來會，已於二十二日五鼓，由北門逃竄。被脅者仍徑回德興，凶悍者東上廣信，徑至府西三十里之坑口，大路口一帶。羅澤南率師入興安縣城，綏緝難民，搜擒餘匪，即以二十四日五鼓，由興安馳赴廣信。函商林福祥，由弋邑移駐興安，以爲我軍後路聲援。別令劉希洛帶平江勇八百，倍道前進，與湘勇合上廣信。此克復弋陽後，跟蹤追剿，收復興安，迅赴廣信之實在情形也。二十四夜，羅澤南駐大路口，探聞廣信郡城已於先一夕淪陷矣。蓋緣此股竄匪不下萬餘人，半係長髮老賊，星奔馳至，迅疾莫測。二十三日早，抵廣信，四面圍攻，城內施放鎗礮，奮力堵禦，賊不敢近。黃昏之際，大雨淋漓，鎗礮莫施，賊冒雨緣梯而上，攻陷郡城。羅澤南聞之憤甚，卽於二十五日，帶湘勇訓勇，馳三十里，辰刻抵廣信城西之烏石山。其地孤峰高聳，俯瞰一切，賊之出入，莫能隱遁。羅澤南駐營山下，飭安慶府知府李續賓營於山左，候選知縣唐訓方，從九蔣益澧營於山右，防賊數路夾擊。賊見我兵夾至，築壘未就，遽統大眾來撲。始於數千人由西門出，攻我軍之中營，繼由北門出，數千人爲一股攻右營，又以一股由南繞出，攻左營，訓勇營，黃旗滿谷，呼聲震天，勢極梟悍。我軍惟自整營盤，若不知賊之已至，相持二時之久，賊愈逼愈近，各營始整隊以出，排列山岡，不速與戰，俟賊屢衝力竭，然後振鼓而前，賊之強悍者，鏖戰良久，初無退志，諸勇立前斃大黃旗賊十餘名，賊稍卻，乘勝而進，賊大潰，追至城西，共擊斃八百餘名，髮長尺餘，內有穿黃馬褂髮鬚長八寸，不知是何賊目，其餘溺死城西池內，及焚死民房者無數，奪獲大小黃旗五十餘面，僞印六顆，大小鎗礮七十餘件。是日劉希洛帶平江勇自貴溪倍道前進，日暮來營助剿，此抵廣信後，痛斃獲勝之實在情形也。二十六日辰刻，我軍方欲整隊攻城，賊衆萬餘，忽分三路而出，又以數千人捲旗息角，埋伏於樹林深密之處，羅澤南登高瞭望，知賊伏所在，卽飭蔣益澧帶湘勇左營，隱伏右路之高岡下，劉希洛帶平江之勇，踞右路平岡，排陣以待，過賊不得徑逼右路。湘勇中右兩營及訓字營，飭令勿出營盤，誘賊近前，然後接戰，又派精銳之勇，約百餘人爲一隊，分途潛往截其埋伏之路。約俟大旂招展，四出齊應，賊之三路來者，於營前一里許，放鎗大呼來衝數次，見我兵不動，又自中止，旋又大呼相持已久，羅澤南知彼竭而我盈也，遂督湘勇中營，由中路出，唐訓方帶訓字營從中路之右出，李續賓帶湘勇右營從右路出，逼近賊前，賊鎗連施，我軍仍銜枚無聲，如是者又片時，大旗一搖，三營齊進，殺斃長髮悍賊千餘。

人劉希洛蔣益澧之勇皆從大路繞出。賊之藏伏樹林者亦爲我伏所襲。賊衆大敗。乘勝追勦。沿途殺斃者又千餘人。匿民房者燒之。墮池中者刺之。所奪黃旗鳥鎗刀矛不可勝計。諸路之賊四竄。其擁擠入城者。城上賊開放大礮。礮斃者皆入城擁塞之。賊我兵反一無所傷。賊遂閉城以拒。忽大雨如注。溝澮皆盈。城上礮不能開。我軍四面圍攻。植立兩中。無一退者。日暮收隊。防賊宵遁。暗使敢死之士四路巡邏。二十七日五鼓。飭令各營再行圍剿。諸勇奮躍登城。刺殺數百人。賊潰從東門逃出。又於鄉間捕勦四百餘人。克復郡城。安撫子黎弔恤文武殉難之員。被殺百姓。填街塞巷。目不忍睹。捐貲收瘞。招民復業。此廣信連日攻勦克復府城之實在情形也。接據探稟。賊於二十八日由玉山北門而遁。駐七都口。三十日入浙江開化縣之華埠。其地東近常山。北接婺源。西鄰德興。尙不知賊意之所向。羅澤南林福祥等暫駐信郡。審明賊蹤。觀釁而動。伏查該逆自饒州內犯江西。兼窺浙江。以大股占踞弋陽。抗拒官軍。以另股由興安徑撲廣信。扼浙之吭噎。而固皖賊之藩籬。其計狡毒已極。臣等二月具奏三省全局一摺。言南岸之東一路。須有一枝勁兵。蓋嘗籌慮及此。調羅澤南等東趨廣饒。漸逼皖境。茲幸仰仗天威。屢獲大勝。要郡堅城。三日克復。按察使銜寧紹台道羅澤南轉戰千里。審機度勢。謀深勇沈。每於未築營壘之際。猝遇賊至。常能從容鎮定。以寡勝衆。應請旨交部從優議敘。其餘出力員弁兵勇。容臣等擇尤保敘。以資激勸。廣信城陷時。殉難之文武各官。由江西撫臣查明請卹。除陳啓邁另行具奏外。所有疊獲勝仗克復廣信郡城緣由。恭摺由驛馳奏。伏乞皇上聖鑒訓示施行。謹奏。

水師近日接仗情形摺 咸豐五年五月二十一日

奏爲水師小挫一次。小勝二次。五月十三日大戰獲勝。恭摺奏祈聖鑒事。竊臣國藩於三月十三日。自江西省城登舟。在吳城駐紮半月。飭令前隊進紮南康府城。四月十三日。臣國藩移駐南康。前隊戰船進泊青山地方。南康之爲府。前有彭蠡。後有匡廬。背山面湖。去罐子口四十里。自罐子口而上。由都昌以達於饒河。爲東鄱湖。由縮溪以達於吳城。爲西鄱湖。自罐子口而下。直至府城。爲宮亭湖。自府城以下。爲土目屏峯。青山姑塘。鞋山等處。凡九十里。而至湖口縣。南康之與九江。中僅隔一廬山。山北爲潯郡。山南爲康郡。下游青山姑塘。及湖口對面之灰山。皆廬山之支麓也。我水師老營。駐泊南康。下則攻湖口之賊。冀欲力破此關。上則防都昌之賊。擄船而襲我後路。

四月十九日。青山前隊水軍蕭捷三鄧翼升孫昌國等。方在操演之際。該逆已由姑塘揚帆上犯。約礮船百餘號。小划數十號。雁列而來。其船亦皆快蟹長龍三板之類。長短大小。盡做我軍製法。槳枝之密。礮位之備。旗幟之鮮。明一一效法我軍。視賊之去年礮船無多。水戰較鈍者。迥不相同。我軍弁勇見之。不覺驚駭。與之接戰。礮礮數輪。該逆自西岸斜行而上。渡至東岸。我軍亦斜行東渡。排礮攢擊。鏖戰兩時。該逆忽出小划數十。沿西岸而下。將及青山。我戰船皆在東岸力戰。青山駐紮之所。僅有雇坐民船數號。例不出隊。致被焚奪。該營坐船既失。東岸戰舟。亦稍忙亂。無心戀戰。倉卒收隊。該逆追逐十餘里。我軍船駛回上游。至火鏡山紮泊。此九日水師三營接仗小挫之實。在情形也。二十一日。臣國藩以都昌尚有陸賊。恐其擄船來襲。有上下夾攻之患。派定湘營何啓長前往搜勦。二十二日。抵馬家堰。該逆匪裝運糧船隻百有餘號。見官軍忽至。揚帆疾走。各哨奮往力追。圍繞焚燒。無一存者。嗣至徐家埠。復燒賊船五十餘號。又至都昌城下。燒賊船一百餘號。何啓長偕護都司李逢春入城。諭令百姓薙髮。又上至土塘。燒賊船四十餘號。合計焚燒大小船三百有餘。皆該逆擄以運糧接濟湖口者。奪獲短刀十九把。生擒長髮五名。被焚溺水者數十名。二十四日。收隊仍泊南康。五月初八日。聞逆匪復在都昌擄船擄糧。又派孫昌國前往搜勦。燬船二十餘號。其新擄者呼百姓而還之。此都昌等處搜燒賊擄民船兩次小勝之實在情形也。五月十三日。我軍派船九十餘號。至青山一帶放哨。適值賊船自姑塘揚帆上犯。我軍停棹小泊。觀釁而動。該逆復用十九日之故智。自西岸斜上。渡至東岸。隊伍整齊。氣勢驍悍。我中營賀虎臣定湘營何啓長帶船三十餘號。渡至東岸迎敵。而留蕭捷三陳炳元鄧翼升三營各船於西岸。將欲抄賊之尾。該逆全力撲我東岸兩營。千礮對轟。力幾不支。哨船間有退者。賀虎臣何啓長揮旗苦戰。該逆稍卻。又見西岸各營來抄其尾。賊舟即回注西岸。攢礮對擊。鏖戰兩時之久。羣子雨落。傷賊約計三百人。西岸之賊敗北。東岸之賊亦敗。是日已刻。臣國藩聞下游接仗。鑒於四月十九日之失。派都司孫昌國及各營添派船六十號。馳往接應。風順水溜。片刻行三十餘里。當東岸賊敗之際。我接應之船恰至。該逆眩亂失措。我軍列礮環攻。追奔二十餘里。至鞋山以下。燒燬賊船三隻。始行收隊。此十三日衆船大戰獲勝之實在情形也。伏查該逆去年專恃民船數千。震眩耳目。其能戰者。不過戰船數十號。小划數百號而已。十月間。始聞其在安徽修造礮船。操習水戰。曾經巨等奏明在案。不謂數月之久。遽已

操練成熟，梟悍異常。爲我軍所驚駭。幸賴內湖水師，多久經戰陣之士，將弁屢受天恩，感激思報。十三日之戰，蕭捷三等慷慨誓衆，謂與該逆決一死戰。仰仗天威，倖獲全勝。所有出力員弁，懇懇天恩，容臣等擇尤保獎。傷亡兵勇，查明照例辦理。所有內湖水師，近日接仗情形，恭摺由驛馳奏。伏乞皇上聖鑒，訓示施行。謹奏。

塔齊布羅澤南兩軍攻勦情形片 咸豐五年五月二十一日

再五月初二日，准兵部遞到承准軍機大臣字寄，四月十四日奉上諭：「塔齊布攻勦九江，近日情形，未據奏及。豈爲賊氛阻隔，竟不能聲息相通耶？并著隨時奏報，以紓懸系。」等因。欽此。伏查臣國藩前在江省月餘，隔日與臣塔齊布通信一次，自至吳城南康，每日與臣塔齊布通信一次。九江與南康僅隔一廬山，臣等屢次約會，匹馬相見，因潯城之賊，時時窺伺，意欲撲我陸營。湖口之賊，時時窺伺，意欲撲我水營。故臣等皆不敢遠離營盤，雖相距僅數十里，而彼此不得會晤。兩地寸心，同深焦灼。潯城之賊，每次出隊撲營，臣塔齊布輒出隊邀擊，小有斬獲。斃賊數人，或數十人不等。近日賊船上游駛下者甚多，灣泊潯江，聲言大舉撲我陸營。臣塔齊布日夜嚴防，務保無虞。若能趁該逆出巢大戰，乘勢破賊，則尤所甚願也。至寧紹台道羅澤南一軍，自克復廣信府城後，聞賊匪大隊屯聚景德鎮，羅澤南馳赴景德追勦。該逆又由祁門婺源竄擾徽州等處。浙江巡撫臣檄調羅澤南往徽會勦。臣等以此軍去徽太遠，聲勢阻隔，餉道難通，飛飭羅澤南仍回都昌饒州，與水師會攻湖口。方擬俟羅澤南軍至湖口東岸，不特可與水師會合，並可與九江陸營聯爲一氣。三路合師，軍威無難復振矣。乃忽於十七日，准江西撫臣陳啓邁咨稱義寧州失守，省城震動，飛調羅澤南回省，以固根本等情。是羅澤南之師，仍不能由都昌進勦。湖口東岸，既無陸兵，則水軍之孤懸可慮。三路之會合無期，事機不順。虞虞牽掣，當二月調羅澤南赴饒州之時，實不料數月之久，尙未能繞出湖口也。所有臣塔齊布陸軍在潯晝夜嚴防，及羅澤南一軍不克會勦湖口緣由，理合附片具奏，仰慰聖廬。謹奏。

水師勝仗奪回座船摺 咸豐五年六月十一日

奏爲水師開仗獲勝，奪回拖罟大船，恭摺奏祈聖鑒事。竊四月十九日水師小挫，五月十三日大戰獲勝。業經奏報在案。五月三十日，賊船上犯，至姑塘青山一帶。我水師出隊迎敵。該逆從西岸魚貫而上，將近我軍，逆船斜渡。

東岸隊伍甚整。其領隊頭船係拖罟大船。巨國藩去年之座船。臘月廿五夜被賊划襲奪者也。其第二號係長龍花船。僞右十二承宣胡鼎文黃文奎李繼遠賊目三人者。均在此兩船中。揮旗督軍揚帆直上。礮聲如雷。意欲由東岸轉抄我軍之尾。我軍循西岸而下。一礮不發。千檠齊施。從逆風中駛至下游。將近賊船之末。乃渡向西岸。包抄賊尾。羣礮攢轟。子如驟雨。鏖戰兩時。賊後隊紛紛敗退。前隊數十船陣腳亦亂。我軍合長圍以包之。各將弁奮死力戰。必欲奪回拖罟大船。以雪積憤。該逆知難出重圍。即用三板數隻。將僞承宣胡鼎文等飛檣脫逃。而留僞功勳張百長於拖罟船上。與我苦戰。我軍四面環攻。船上五十餘賊。或撲水或中礮。須臾傷斃四十餘人。獨張賊凶悍異常。手持刀叉。身懷火彈。我軍搶登者。多被張賊殺傷。各哨官繞舟齊登。矛擗張賊落水。然後奪回拖罟大船。生擒長髮十六人。其第二號花船。亦同時奪獲外。又奪得三板三號。小划二號。奪大礮十八尊。方賊目胡鼎文等駕三板逃脫之時。我軍一面圍攻拖罟。一面追逐賊目。急礮排轟。羣子亂落。該逆紛紛斃水。計礮斃淹斃二百餘人。因天黑無月。卽行收隊。次早始回老營。查點我軍右營哨官蘇光彩中子陣亡。各勇傷亡十餘人。伏查水軍自去歲湖口失利以來。陷入內湖。各船與外江隔絕。水營卒與將離。兄與弟隔。小船之素附大船者。皆隔絕而不得相見。巨國藩特至江西造船添勇。另立新軍。方慮士氣已傷。難期再振。幸仗我皇上威福。兩次獲勝。奪回拖罟大船。積憤爲之稍申。軍心爲之一振。若使此軍果足自立。則扼斷長江之腰膂。上有金口水軍以擊其首。下有紅單戰船以擊其尾。二千餘里之江面。分爲三段勤辦。或有肅清之期。此次將弁兵勇踴躍用命。籲懇天恩。容臣等擇尤奏保。以昭激勸。保升外委蘇光彩力戰陣亡。請旨交部照例議卹。所有水師開仗大勝。奪回拖罟座船緣由。恭摺馳奏。仰慰宸廑。伏乞皇上聖鑒。謹奏。

奏參江西巡撫陳啓邁摺 咸豐五年六月十二日

奏爲江西巡撫陳啓邁劣跡較多。恐誤大局。恭摺奏聞。仰祈聖鑒事。竊惟東南數省。賊勢蔓延。全賴督撫得人。庶幾維持補救。轉危爲安。臣至江西數月。細觀陳啓邁之居心行事。證以輿論。實恐其貽誤江省。並誤全局。有不得不縷陳於聖主之前者。已革總兵趙如勝。係奉旨發往新疆之員。上年奏留江省効用。陳啓邁派令管帶戰船百餘號。水勇四千餘人。大小礮位七百餘尊。十一月初五。紮泊吳城鎮。一聞賊至。趙如勝首先逃奔。各兵勇紛紛歎

散。全軍覆沒。船隻燬械。盡爲賊有。其實賊匪無多。民間至今相傳。僅長髮九十餘人耳。聞風先逃。殊可痛憾。乃陳啓邁入奏之詞。則曰。『趙如勝奮不顧身。力戰終日。』其所失船數百餘。燬數七百。並不一一奏明。含糊欺飾。罔恤人言。又派趙如勝防堵饒州等處。正月間。敗逃三次。賊破饒州。陳啓邁含混入奏。不惟不加趙如勝之罪。並其原定新疆罪名。亦曾不議及。始終恬非袒庇。置賞罰綱紀於不問。已革守備吳錫光。係被和春參劾。奉旨正法之員。吳錫光投奔江西。籲求救全。陳啓邁奏留江西效用。倒填月日。謂留用之奏在前。正法之旨。在後。多方徇庇。虛報賊功。既奏請開脫罪名。又奏保屢次超升。又奏請賞給勇號。吳錫光氣質強悍。駕馭而用之。尚不失爲偏裨能戰之才。至其貪婪好淫。縱兵擾民。在南康時。軍中婦女。至百餘之多。過樵舍時。將市肆搶掠一空。實爲遠近紳民所同惡。而陳啓邁一力袒庇。顛倒是非。正月二十九日。吳錫光縱其麾下貴州勇。無故殺死龍泉勇一百八十七名。合省軍民。爲之不平。陳啓邁既不奏聞。又不懲辦。乃於武寧縣囚內。取他勇之曾經犯案者。假稱貴勇。縛而殺之。以掩衆人之耳目。而衆人愈積憤於吳錫光。道路以目矣。饒州之賊。屯聚於四十里街。三月二十八日。吳錫光攻勦饒州。僅殺賊數十人。此紳庶所共見共聞。而陳啓邁張皇入奏。謂克復尋郡。殺賊三千。焚船百餘。吳錫光與其子姪均保奏超升。卽素在巡撫署內管帳之胡應奎。亦隨摺奏保。義寧州之陷。實係與國崇通等處土匪居多。長髮尙少。吳錫光驕矜散漫。倉卒敗亡。並非有大股悍賊與之交鋒也。乃陳啓邁粉飾入奏。則曰。『疊戰竟日。殺賊千餘。』吳錫光薪水口糧。較別營獨多。且帶勇七百。支領八百人之餉。此陳啓邁所面囑司道總局者。乃入奏則曰。『係自備資斧。』種種欺飾。實出情理之外。自軍興以來。各路奏報。飾勝諱敗。多有不實不盡之處。久爲聖明所洞鑒。然未有如陳啓邁奏報之單情。幾無一字之不虛者。茲風不改。則九重之上。竟不得知外間之虛實安危。此尤可慮之大者也。臣等一軍。自入江西境以來。於大局則慚愧無補。於江西則不爲無功。塔齊布駐九江。防陸路之大股。臣國藩駐南康。防水中之悍賊。羅澤南克復一府兩縣。保全東路。此軍何負於江西。而陳啓邁多方掣肘。動以不肯給餉爲詞。臣軍前後所支者。用侍郎黃贊湯燬船捐輸銀四十餘萬兩。奏准浙折銀數萬。皆臣軍本分應得之餉。並非多支藩庫銀兩。卽使盡取之江西庫款。凡餉項絲毫。皆國家之餉也。又豈陳啓邁所得而私乎。乃陳啓邁藉此挾制。三次咨文。疊次信函。皆云不肯給餉。以此掣人之肘。而市己之恩。臣既恐無餉而兵潰。又

恐不和而誤事。不得不委曲順從。羅澤南克復廣信以後。臣本欲調之折回饒州都昌。以便與水師夾攻湖口。陳啓邁則謂之防景德鎮。又謂之保護省城。臣均已曲從之矣。旋又謂之西剿義寧。臣方覆函允從。而陳啓邁忽有謂往湖口之信。臣又覆函允從。而陳啓邁忽有仍調義寧之信。朝令夕更。反覆無常。雖欲遷就曲從。而有所不能。二月間。臣與陳啓邁面商。江西亦須重辦水師。造船數十號。招募千餘人。以固本省鄱湖之門戶。以作楚軍後路之聲援。庶與該撫正月之奏案相符。陳啓邁深以為然。與臣會銜札委河南候補知府劉于濤董理其事。業已興工造辦。忽接陳啓邁咨稱。江西本省毋庸設立水師。停止造船。等因。臣既順而從之矣。因另札劉于濤在市汊設立船廠。專供臣軍之用。忽又接陳啓邁咨稱。欲取廠內船隻。交吳錫光新募之水軍。一又飭令廠內續造十五號船廠委員。亦遵從之矣。迨船既造成。陳啓邁又批飭。不復需用。一條要船條不要船。條立水軍條不立水軍。無三日不政之號令。無前後相符之咨札。不特臣辦軍務。難與共事。即為屬員者。亦紛然無所適從。數年以來。皇上諭旨諄諄。飭各省舉行團練。類皆有虛名而鮮實效。臣所見者。惟湖南之平江縣。江西之義寧州。辦團各有成效。兩省奏牘。亦常言之。以本地之捐款。練本地之壯丁。屢與粵賊接仗。殲斃匪黨甚多。故該二州縣。為賊所深深恨。亦為賊所甚畏也。去年義寧州屢獲勝仗。捐款甚鉅。事後論功。陳啓邁開單保奏。出力者。不得保。捐貲者。不得保。所保者。多各署官親幕友。陳啓邁署中幕友陳心齋。亦得保升知縣。義寧州紳民怨聲沸騰。在省城張貼揭帖。謂「保舉不公。團練解體。賊若再來。該州民斷不捐錢。亦不堵賊」等語。陳啓邁不知後悔。悍然罔顧。迨四月間。賊匪攻圍州城。該州牧葉濟英疊次稟請救援。陳啓邁亦不撥兵往救。困守二十餘日。州城果陷。逆匪素恨團練。殺戮至數萬之多。百姓皆切齒於巡撫保舉之不公。致團散而罹此慘禍也。去年四月。塔齊布在湘潭大戰。獲勝。餘賊由靖港下竄岳州。其敗殘零匪。由醴陵竄至江西。萍鄉萬載等縣。並皆失守。萬載縣知縣李皓棄城逃走。鄉民彭才三等。或以馬送賊。或以米餽賊。冀得免其劫掠。賊過之後。舉人彭壽頤倡首團練。糾集六區。合為一團。刊刻條規。呈明縣憲。已蒙批准照辦。乃彭才三愚而多詐。謂餽賊可以免禍。謂團練反以忤賊。抗不入團。亦不捐貲。遂將團局攪散。反誣告彭壽頤反蒙豺狼恐釀逆案等語。縣令李皓受彭才三之賄。亦袒庇彭才三而誣陷彭壽頤。朦混通稟。該舉人彭壽頤恨己以剛正而遭誣。以辦團而獲咎。遂發憤訐告李皓棄城逃走。彭才三餽賊阻

團控訴各衙門。袁州府知府紹德深以彭壽頤之團練爲是。彭才三之餽賊爲非。嚴批將李皓申飭。巡撫陳啓邁批詞含糊。不剖是非。輿訟半年。案懸未結。今年正月。臣至江西省城。彭壽頤前來告狀。臣以軍務重大。不暇兼理詞訟。置不批發。而觀其所刊團練章程。條理精密。切實可行。傳見其人。才識卓越。慷慨有殺賊之志。因與陳啓邁面商。言彭壽頤之才可用。其訟事無關緊要。擬即帶至軍營効用。兩次咨商。陳啓邁堅僻不悟。不特不爲彭壽頤伸理寬曲。反以其辦團爲咎。不特以其辦團爲咎。又欲消弭縣令棄城逃走之案。而坐彭壽頤以誣告之罪。顛倒黑白。令人髮指。自粵匪肆逆。所過殘破。府縣城池。動輒淪陷。守土官不能申明大義。與城存亡。按律治罪。原無可寬。各省督撫因失守地方太多。通融辦理。寬減處分。亦常邀諭旨允准。即以本年江西而論。饒州廣信兩府失守。鄱陽興安等縣失守。陳啓邁通融入奏。寬減府縣各守令之處分。均蒙諭旨允准。此係一時權宜之計。朝廷法外之仁。並非謂守土者。無以身殉城之責也。該縣令李皓棄城逃走。陳啓邁能奏參治罪。固屬正辦。即欲寬減其處分。亦未始不可通融入奏。乃存一見好屬員之心。多方徇庇。反欲坐彭壽頤誣告之罪。此則紀綱大壞。臣國藩所爲反覆思之。而不能平也。鄉民劫於粵匪之兇威。或不敢薙髮。或不敢團練。或餽送財物。求免擄掠。名曰「納貢」。此亦各省各鄉所常有。其甘心從賊者。重辦可也。其愚懦無知者。輕辦可也。不辦亦可也。彭才三以財物餽賊。既經告發。陳啓邁自應酌量懲治。何得反坐彭壽頤以誣告之罪。使奸民得志。烈士灰心。頃於五月二十九日。陳啓邁飭令臬司惲光宸嚴訊。勸令舉人彭壽頤出具誣告悔結。該舉人不從。嚴加刑責。酷暑入獄。百端凌虐。並將鬻革參辦。在陳啓邁之心。不過爲屬員李皓免失守之處分耳。至於釀成冤獄。刑虐紳士。大拂輿情。即陳啓邁之初意。亦不自知其至此。臬司惲光宸不問事之曲直。橫責辦團之搢紳。以伺奉上司之喜怒。亦屬諂媚無恥。方今賊氛猶熾。全賴團練一法。以紳輔官。以民殺賊。庶可佐兵力之不足。今義寧之團。旣以保舉不公而毀之。萬載之團。又以訟獄顛倒而毀之。江西團練。安得再有起色。其於殘破府縣。縱不能督辦團練。亦須有守令莅任。以撫恤難民。而清查土匪。乃臣駐紮南康兩月。陳啓邁并不派員來城署理南康府縣之任。斯亦紀綱廢弛之一端也。臣與陳啓邁同鄉同年。同官翰林。向無嫌隙。在京師時。見其供職勤慎。自共事數月。觀其顛倒錯謬。迴改平日之常度。以致亘務紛亂。物論沸騰。實非微臣意料之所及。且下東南賊勢。江西湖南最爲喫重。封疆大吏。關係非輕。臣旣

確有所見深恐貽誤全局不敢不瑣敘諸事。瀆陳於聖主之前。伏惟宸衷獨斷。權衡至當。非臣下所敢妄測。所有江西巡撫陳啓邁劣跡較多。恐誤大局緣由。恭摺縷晰具奏。伏乞皇上聖鑒。訓示施行。謹奏。

潯城水陸兩軍接仗情形摺 咸豐五年七月初六日

奏爲潯城陸兵開仗獲勝。水軍在徐家埠獲勝一次。湖口小挫一次。恭摺馳奏。仰祈聖鑒事。竊水師前在姑塘獲勝。奪回坐船。業經奏明在案。六月十一日。據探潯城逆匪在於新瀾築礮台。龍開河泊有賊船四百餘隻。臣塔齊布於十二日。輕騎前往查看地方。新瀾之東爲甘棠湖。西爲龍開河。中間隄。約寬箭餘。該逆於新瀾街口。堅砌石卡。添修礮台。卡外壕溝二道。寬約丈餘。中引湖水注之。十三日。飭令升用副將周鳳山等。分帶道勇新田勇。明攻東門。爲聲彼擊此之法。各營兵勇。掩旂息鼓。於四更時。急赴西路。以攻新瀾。飭九江鎮后隆阿等。伏兵於三川嶺之左。候補守備長春伏兵於三川嶺之右。臣塔齊布親率參將彭三元。阿達春等。攜帶板片。搭造浮橋。搶過壕溝。時已五鼓。我軍一面搖折卡外木椿。一面拋擲火彈。延燒賊船二隻。賊衆驚覺。紛紛抗拒。攻未片時。城中之賊。隨亦擁出。約二千餘人。我軍開放連環鎗礮。斃賊雖多。該逆因恃水陸并拒。殊無怯意。天已將曉。臣塔齊布以我軍在於一線隄。分攻水陸。用力過苦。陸賊恃卡死抗。賊船更番來迎。彼逸我勞。勢難取勝。因令兵勇俾爲退走。該逆見我軍無多出。卡追襲。我軍且戰且走。誘過壕溝二道。地面稍寬。遂令嶺左伏兵起抄賊尾。嶺右伏兵同時並起。俾退之兵。回旗轉戰。鎗礮齊施。短兵夾擊。賊衆大潰。隄狹險。賊黨擁擠。爲壕所阻。約計擊斃三百餘名。墜壕溺湖者甚多。爭舟情急。覆船三隻。溺水之賊約近百人。升用副將玉山。都司畢金科等。先攜大礮。伏於龍開河上之水府廟。比見逆船退出。連礮環轟。亦斃數賊。彭三元。阿達春等。見水陸之賊均已披靡。乘勝撲卡。卡內賊礮子密如雨。彭三元右胸受傷。阿達春子傷左臂。天氣酷熱。均未晨餐。隨傳令收隊。將生擒之賊十三名。就地挖目凌遲。查點我軍陣亡四名。受傷二十餘人。撫標儘先守備黃明魁。提標外委李芳祥。均因撲卡傷亡。其周鳳山等。攻東門之賊。相持四時。亦於午刻收隊。此十三日。潯城陸兵大獲勝仗之實在情形也。臣國藩駐紮南康兩月有餘。下游湖口之賊。礮船甚多。上游都昌之賊。雖無礮船。而所擄民船小划。動逾百數。亦常有侵襲老營。上下夾攻之患。曾於四月二十二五月初八等日。派船前往都昌。搜洗賊舟。均經奏明在案。特以東岸無陸兵。故陸賊恣

撈刺船，終難淨盡。都昌之下，有徐家埠，去湖口六十里，爲僞監軍姜萬祥盤踞之所。催民納貢，誅求極酷。上游馬家堰有小河，直達徐家埠，爲各處奸民與賊通商之路。六月十二日，巨國藩派令水師中營賀虎臣酌帶長龍三板二十號，千總李逢春帶小划四十號，前往徐家堰搜捕賊巢，並派試用知縣李琨帶陸勇四百會剿。十三日寅刻，賀虎臣等由馬家堰駛入小河，所過木橋賊卡，折毀六座，已刻到埠。該逆以河身淺窄，我軍船難於轉旋，卽出陸賊三百人前來抗拒。李逢春帶水勇登陸迎剿，賀虎臣繼之，排鎗轟擊，斃賊二人。賊衆紛紛奔潰。我軍一面追逐，一面燒燬河下賊船，逐北數里。李琨所帶陸勇亦至，乘勝窮追，傷斃賊匪十餘人，生擒七人，焚燬僞監軍衙署一所，守棚望樓數座，僞聖糧櫃五處，焚燒賊船八十餘隻。水陸屯聚賊糧數千石，盡數燒燬，奪獲旗軍器械無算。次日，仍渡湖回南康大營。此十三日搜洗徐家埠賊巢，水陸獲勝之實在情形也。水師前幫自進紮青山以後，本擬俟陸勇東渡，會合進剿。六月十五日，各營派二十餘船，前往湖口探看賊營形勢，弁勇冒險貪功，衝出梅家洲賊卡。卡外賊船與卡內湖汊賊船齊出，我軍二十餘船，三面被圍，續到二十餘船，亦尙單弱，賊衆我寡，鏖戰兩時，適值南風大作，不能駛回，被賊圍去長龍一號，三板三號，千總洪建勛把總李文田同時陣亡。勇目五十餘人，有被擄遇害者，有斃水逃歸者。姑塘大隊，前往救應，該逆始畏怯反奔。日暮收隊，仍泊青山。此十五日弁勇衝湖口出賊卡，開仗小挫之實在情形也。伏查水師自至南康以來，與湖口悍賊四次接仗，兩勝兩挫，論船礮之精，戰陣之法，官軍實遠勝於賊。特該逆水戰，兩岸皆有陸賊護之，我軍兩岸皆無陸兵，水營孤立，終不宜冒險出卡，致涉疏虞。陸軍儘先守備黃明魁屢次打仗，奮不顧身，去歲岳州之役，僞秋官正丞相曾天養係其手刃。此次力戰陣亡，應請飭部從優議卹。水營藍翎千總洪建勛，把總李文田，五月兩次血戰獲勝，均擬開單奏保。此次衝鋒陣亡，均請飭部從優議卹。其餘傷亡弁勇，查明照例辦理。所有近日水陸接仗情形，謹繕摺由驛馳奏，伏乞皇上聖鑒，訓示施行。謹奏。

擬撥潯軍會剿湖口片 咸豐五年七月初六日

再臣國藩塔齊布自正月一別，不相見者半年。六月二十七日，約會於青山，言及頓兵江境，老師糜餉，上負主恩，下失民望，兩人愧憤交集，哽咽難言。刻下潯城之賊，時多時少，臣塔齊布之師，若分勦他處，則恐大營單薄，反爲

逆賊所乘若合聚一處則五千之衆久無成功日對堅城徒深焦灼而湖口水軍無陸兵以護之彼此俱不能得手。羅澤南進攻義寧。是否能仍折回湖口。正未可知。不得不思所變計。以求有濟於大局。擬於七月以內。臣塔齊布移至青山渡湖之東。會勦湖口。如能攻破此關。全局固有轉機。即不能遽破。亦當由彭澤而下。直趨建德東流。以期與下游池太之師聯爲一片。是亦大局轉旋之一策也。是否有當。伏乞聖慈指授機宜。俾有遵循。謹附片具奏請旨。

萬啓琛留辦餉鹽局片 咸豐五年七月初六日

再新選湖北督糧道萬啓琛。上年隨同在籍刑部侍郎臣黃贊湯。勸捐礮船軍餉。最爲出力。曾經奏奉恩旨。交部議敘。本年三月。臣國藩奏請借行浙引撥鹽抵餉。派萬啓琛協理西省鹽運事件。旋經戶部議覆。奉旨允准。亦在案。茲接據部文。萬啓琛新選湖北督糧道。例應即赴新任。惟查浙鹽充餉。事屬創舉。該道廉明詳慎。辦理易於就緒。欲改行奏派。一時實乏得力之員。相應請旨飭下吏部。萬啓琛在樟樹鎮總局協理鹽餉事件。暫緩赴湖北糧道之任。謹會同侍郎臣黃贊湯附片奏聞。謹奏。

湖南提督塔齊布因病出缺摺 咸豐五年七月二十四日

奏爲湖南提督塔齊布因病出缺。微臣馳赴九江大營。料理喪事。兼統陸軍。恭摺馳奏。仰祈聖鑒事。竊臣與提督塔齊布六月二十七日。在青山地方會晤。言及潯城未破。頓兵已久。憤恨同深。微臣之意。謂宜移師東渡。會勦湖口。掃蕩東流。建德一帶。長驅直下。期與下游蕪湖之師會合。塔齊布之意。謂自六月以來。攻城之具。增置完備。七月以內。即行大舉攻勦。誓當力破此城。以雪積憤。如環攻不破。七月底再行移師東渡。商酌已定。曾於七月初六日。附片具奏在案。其後塔齊布益廣置攻具。備雲梯數百。布袋四千。紮草人以緣城。結竹筏以渡水。各營弁勇。皆自備檣牌竹盔之屬。無一不齊。專俟月黑陰雨之夜。大舉攻城。臣在南康亦派平江勇三千餘人。渡湖之東。攻勦湖口。訂期十五以後。兩城同攻。水陸並進。不料七月十八夜。潯城陸營專弁飛報南康。言塔齊布於辰刻傳令出隊攻城。尙未出營。陡發氣脫之症。昏迷不醒。竟於午刻因病出缺。臣聞信之下。不勝悲愕。伏查提臣塔齊布純誠報國。忠勇絕倫。自其爲都司時。毅然有殺賊立功之志。上年蒙恩超擢提督。出師岳州。途次於左臂涅刺。忠心報

國四字。每戰匹馬當先。麾下士卒附從。輒麾之使後。不令出己之前。或他營被賊圍困。輒躍馬馳往救援。凡相度戰地。及察看賊營情形。嘗以單騎早晨獨往。不使將士得知。屢被賊衆狙伺追逼。從容禦之。臣以不宜冒險。迭次勸阻。諸將亦日日勸止。而塔齊布氣吞凶逆。不爲怯懼。屢領危險。常有奇緣。得免於難。湘潭之戰。被賊圍攻。縱身越牆得脫。崇陽黃梅兩次受傷。均以麾下易馬扶去得脫。小池口之戰。羣賊曳其馬尾。揮刀斫之。卒能縱橫衝突。轉敗爲功。賊中驚以爲神。而該提督雍容恬退。未嘗一語自伐其能。宅心仁厚。所得薪水銀兩。盡以犒賞士卒。或深夜呼兵勇與之絮語家事。親如父子。洪山之戰。圍逼賊衆瀕水。其中幼孩甚多。塔齊布大哭。立即傳令。不殺幼孩。救出數百人。資送回籍。紀律嚴明。不許兵勇騷擾民間。有違犯者。秋毫無懲。身歿之後。軍士百姓同聲悲泣。不獨巨軍失此名將。大損聲威。卽東南衆望所推。亦均恃爲長城之倚。遠近官紳。並深驚悼。臣於十九日馳赴九江陸營。照料該提督喪事。二十一日丑刻。送其靈柩出營。派副將玉山守備長春提標撫標官兵三百五十名。護送至江西省城。臣卽暫駐潯城。統領陸兵。拊循士卒。保此勁旅。仰慰宸廬。惟念提臣塔齊布出師二年。日夜憂勞。費志長逝。並無子嗣。家世清貧。上有老母。其兄弟三人。季弟去年陣亡。合無仰懇天恩。交部從優議卹。湘潭岳州之戰。保全湖南。爲功甚鉅。籲懇天恩。准於湖南省城建立專祠。以慰忠魂。而洽民望。其湖南提督遺缺。請旨迅賜簡放。以重職守。所有提臣塔齊布因病出缺。微臣馳赴九江料理喪事。兼統陸軍各緣由。恭摺由驛馳奏。伏乞皇上聖鑒。訓示施行。謹奏。

潯軍兩獲勝仗片 咸豐五年七月二十四日

再臣至九江陸營。因土氣傷沮。恐賊匪探知。前來撲營。嚴飭各營加意防守。二十一日丑刻。將塔齊布靈柩送出數里。卽歸營大加操演。會操甫畢。該匪自西門出隊搦戰。臣派廣東羅定協副將周鳳山統領全軍。督率將弁。出隊迎敵。都司岳炳榮率辰勇由東路前進。周鳳山率道勇督戰。鎗礮之後。繼以刀矛。該逆敗退。我軍追至新壩。傷斃賊匪六七十人。逼瀾湖水者十餘人。攀登賊船各勇。追擊沈船二隻。未刻收隊。查點我軍陣亡一人。受傷十餘人。幸獲全勝。二十四早。各將官告請奮勇。大舉攻城。銳氣百倍。已緣登矣。該逆擲燒全桶火藥。礮子瓦石如雨。傷亡數十人。雖未克攻破潯城。而將士忠憤有爲。殊屬難得。當統軍新易。人心危疑之際。得此二仗。此支勁旅。可無

續敵之虞足以仰慰宸廑謹附片奏聞。

水陸三路均獲勝仗片 咸豐五年七月二十四日

再前據寧紹台道羅澤南具稟。七月初八日。在義寧州之梁口。大獲勝仗。又據游擊蕭捷三等稟。七月十四日。水師在鞋山大獲勝仗。尙未具奏。臣卽於十九日前來九江陸營。旋於二十二三等日。疊據羅澤南稟稱。十三日在乾坑大戰。十四日在鸞嶺大戰。十五日在城西大戰。均獲全勝。十六日。克復義寧州城。又疊據統帶平江勇之李元度等稟稱。攻勦湖口之師。十五日在徐家埠接仗獲勝。十八日在文橋接仗獲勝。二十一日在蘇官渡大戰獲勝。各等因前來。當名將新失之際。而事機甚爲順利。仰託皇上威福庇蔭。巨軍聲威。尙足自振。除將水陸三路屢次獲勝情形。續行詳敘奏報外。謹附片先行具奏。仰慰聖懷。謹奏。

攻勦義寧克復州城摺 咸豐五年八月初七日

奏爲攻勦義寧州疊獲大勝。克復州城。恭摺馳奏。仰祈聖鑒事。竊義寧州城被賊攻陷。都司吳錫光陣亡。江省振動。飛調寧紹台道羅澤南統帶全軍。馳往勦辦。業經奏明在案。嗣據羅澤南疊次稟報。該道於六月二十四日自江省起程。七月初五日駐營義寧州之梁口地方。訪明州城形勢。及進兵之路。擬由四都高鄉迂道五十里。攻州西門。初八日辰刻。突報州城賊匪由梅嶺來撲。該道督同安慶府知府李續賓。候選縣丞蔣益澧。登山瞭望。見賊七八千人。屯聚抱子石之下。忽分兩支。一支循修江南岸而下。約四五千人。旌旂蔽野。漸逼營前。分作三路。排列岡阜。一支循左路山岡而下。約三千餘人。潛行林間。掩旂息鼓。以抄我營之後。其旂幟多係所奪州城兵勇之物。假冒團練。冀混官兵。其後路之埋伏者。復不一而足。該道等辨認清晰。飭李續賓帶湘勇右營。候選知縣唐訓方率訓字營三哨。從營後繞出山阜。爲奇兵而擊循山之賊。又令訓字營二哨。埋伏山阿。以備策應。該道親率湘勇中營。蔣益澧率左營。排列營前。爲正兵以擊沿江之賊。部署既定。按兵不動。示之以弱。相持一時。知賊氣已竭。中營左營。始揚旂振鼓。大呼而進。擊斃騎馬悍賊十餘名。賊敗。右營及訓字營三哨。悄從山後繞出。橫衝直突。此路之賊。原冀抄我之尾。不料我兵反抄其後。擊斃長髮悍賊八九名。此股亦敗。我軍奮力追殺。莫不一可當百。共計各路斃賊七八百名。屍填載道。賊之沿江而逃者。忽爲我軍繞前住截。信賊馮河而渡。水深浪急。溺斃無數。追逐

二十里前值一溪。羣賊爭渡。並拆斷橋板。以阻我師。因未午餐。始令收隊。生擒三十餘名。奪獲旂械子藥無算。時候補知府林懋勳帶勇駐紮對河之三都山上。聞賊攻梁口營盤。亦率所部及團勇循三都北岸而上。賊之浮江而過者。悉爲林懋勳兵勇阻截。殺斃多名。此初八日賊來梁口撲營迎勦獲勝之實在情形也。十一日。由梁口拔營迂道四都。十二夜駐高山之棋盤嶺。查該處入州有二道。一經杭口攻州城之西門擺爲正道。惟倚崖瀕水。勢難並進。一經乾坑度小南嶺。竇嶺攻州城之西門坑。爲閒道。南竇二嶺。各高二里許。從萬山中盤旋而入。牟賜馬道人皆視爲畏途。該道探聞小南嶺尙無賊踞。親率敢勇百人。同該州舉人李炎。攜土人爲嚮導。登小南嶺瞭望形勢。竇嶺雖高。其上猶可駐營。賊據之。則杭口一路。可以詭道橫截。我據之。則俯瞰州城。居高臨下。且我師不度南嶺而自四都以達棋盤嶺。已有由杭口直搗州西之勢。賊必注意杭口。而忽視竇嶺。則竇嶺可以乘虛而入。因與李續賓等定計。由竇嶺進發。十三日巳刻。飭中右兩營前進。輜重居中。左營訓字營居後。時聞賊來杭口者甚衆。知必乘我之後。密諭管帶左營蔣益澧待輜重盡行。卽整隊緊守乾坑隘口。賊來雖多。但守此隘。必不敢與我敵。卽小路之通杭口者。守此亦足以禦之。復飭知州銜候選知縣李杏春。候選從九蕭積仰與蔣益澧相爲援應。該道與李續賓前進。掩旂度小南嶺。從樹林中登竇嶺。守嶺之賊。不料我之猝至。駢臥亭上。驟見旂開。紛然四竄。我兵奮勇而上。斃賊百餘名。疾據其巔。該道方籌度營基。喜我之得據要地也。忽報賊果由杭口來撲。追至乾坑。以大股偪坑之左。精悍搗坑之右。又以賊二千人。由小路踞乾坑山脊以臨之。蔣益澧已先駐乾坑隘口。旂幟聞雜。林中賊莫測其虛實。唐訓方率訓字營登山以禦小路之賊。蕭積仰率左營後哨助之。蔣益澧率左右兩哨營先奮擊。先敗坑右之賊。其小路之賊。亦爲唐訓方蕭積仰衝敗。賊之精銳在此兩股。故中路賊雖衆而不敢前。李杏春乃率左營前哨衝出。中路賊亦敗。諸勇乘勝跟追。賊屢拒屢卻。斃賊六百餘人。屍遍山谷。生擒二十餘人。該道在竇嶺聞報。馳回救援。迨至棋盤營。見蔣益澧等已獲勝收隊。遂率各營同駐竇嶺。此十三日移營竇營後隊在乾坑接仗。大獲勝仗之實在情形也。竇嶺距州城僅七里。南面高踰四五里。左爲南嶺大山。蜿蜒而至城北之鳳凰山。爲州城之主峯。右爲雞鳴峯。其下卽西門擺。城外菁華之所聚也。蔣益澧駐嶺左防鳳凰山一路。唐訓方駐嶺右防雞鳴峯一路。竇嶺中支峯。上峻下平。可以四應。該道率中營駐之。其次嶺長而脊瘦。僅足搭一二棚。李

續賓率右營駐之。陣如長蛇。又前一峯高而銳。與鳳凰山相埒。搭望樓其上。賊之來蹤。莫能隱遁。左右有坑。坑深莫測。由嶺踰坑。一升一降。約二十餘里。烏道蠶叢。險踰蜀道。大軍駐此。賊來攻我甚難。我攻州城之賊。則有建瓴之勢。十四日辰刻。方擬進擣州城。詎意城內賊約數萬人。五更出隊。分五路而來。一從鳳凰山直抵南嶺大山。欲撲我左營。一從西門擺踞雞鳴峯。與左路鳳凰山之賊。如張兩翼。其中路由西門坑來者。則分三路。一由兩坑之會合處。跨嶺而上。直抵望樓之前。擣旂放鎗。以號召。兩翼之賊。一從坑左大路而上。多係精銳。直抵中右兩營之左。一埋伏坑右樹林中。冀攻中右兩營之右。布置周密。該道與李續賓登高審視。飭唐訓方攻右路。蔣益禮攻左路。別分數哨。擊右坑之賊。登雞鳴峯。分路以截右賊之尾。又分數哨。擊在坑之賊。依鳳凰山。以截左賊之尾。飭右營前中二哨。踞銳峯。以擊望樓下之賊。部署既定。嚴飭不可躁進。必俟各路賊已逼近。然後分路迎勦。時中路之賊。見我兵伏營不出。擣旂吶喊。愈倡愈前。左坑賊亦拋擲火箭火球。已及營盤。諸勇乃整隊大呼而出。賊抵敵不住。回旂奔走。我軍截之。斃賊數百。望樓下之賊。亦爲亂石所擊。蜂擁而退。墜崖死者。以數百計。乘勝追之。兩路之賊。卓旂於兩坑會合處。計誘我兵前進。不料復爲我所襲。上下夾擊。諸賊無路可逃。攀緣絕壁。登而復墜。及藏匿叢莽間者。皆爲我兵搜殺。約千餘人。屍填溪澗。水爲之赤。該道中路之兵。既已獲勝。擬循鳳凰山麓徑攻州城。因聞雞鳴山諸賊未潰。懼乘我後。中路兵遂先收隊。其左路之賊。依鳳凰山而來者。見左坑賊敗。我兵窮追。欲循山而下。以橫截之。而左坑之敗賊數百。先奮躍登山。冀與左路會合。併力堵禦。見左坑跟追之勇。亦捫石扳藤牽連而上。賊不能走。蔣益禮復率諸勇由南山大嶺橫過。直倡賊前。奮力相殺。又得左坑之勇。自下而上。以截殺之。賊遂望鳳凰山返奔。我勇追殺。斃賊近千許。餘悉逃入州城。其右路之賊。排列於雞鳴山者。見各路賊敗。諸勇窮追。不敢回城。惟踞峯巔以待。此峯極峭。我兵不能仰攻。以十數人誘之。賊乃循崖而下。徐度數峯。冀撲訓字營。唐訓方率勇奮力迎殺。賊以火球亂石。傷我兵數人。諸勇仍前奮力。殺斃悍賊數十人。賊敗。疾登峯頂。諸勇探升而上。思尋間道以分鈔之。賊畏包裹。反從峯側以走。諸勇更出峯上。賊氣亦餒。墜死峭壁者數百人。我兵復從雞鳴峯下循脊而上。分道鈔之。李續賓亦由雞鳴峯左繞道截之。賊無一脫者。殺斃跌斃者無數。未刻收隊。殺賊之多。未有如此役者。數路共計斃賊約五六千人。生擒二百七十餘名。中多長毛老賊。奪大小旗四百餘面。馬十餘匹。此

十四日鼇嶺數路分勦大獲勝仗之實在情形也。該道等既有此大勝。欲熟審形勢。進攻州城。十五日午後。飭蔣益澧率勇登營左之鳳凰山一帶。觀州城東北之路。唐訓方率勇登營右之雞鳴山一帶。觀州城西門擺之路。該道與李續賓由西門坑審視。復分登左右各山以望之。正擬歸營。不意賊疑搦戰。遽出大隊。以數千人立鳳凰山巔。擲木滾石。阻我左路。以數千人聚西門擺山坡。揚旂放鎗。阻我右路。其中路之西門坑。於兩山交互處。設卡三重。橫跨溪上。各高丈餘。外砌木石。內灌土沙。密排礮眼。以萬餘人守之。我師突與相遇。見日色將曛。進退未決。各營踴躍請戰。遂乘賊隊未整。急以擡鎗橫排卡外。連環施放。輕捷者援兩岸之峭壁以擊之。賊不料我速進。氣爲之奪。所設堵卡。皆一呼而破。死於火器刀矛者。以數百計。乘勝追至西門城根。將江邊賊壘悉數焚燒。左路鳳凰山之賊。見中路諸卡已破。不能自持。紛紛下竄。諸勇奮臨其巔。乘勝追殺。賊墜崖死者數百人。山上賊營。立時焚盡。右路雞鳴峯諸勇。見兩路並進。亦揚旂直下。訓字營繼之。賊之被截殺者。不下三百人。西門擺所設望台木城。一時灰燼。火光四起。賊無路可歸。俘沈修江中者。以千餘計。城中之賊。閉門死拒。先是南贛鎮總兵劉開泰帶兵分勦修江之南岸。十三日由黃沙橋移營湘洲。已函商該道。約期南北夾攻。是日正欲收隊。忽聞南岸礮聲震天。火箭噴筒交加。豬糞灘諸賊營。相繼火起。知劉開泰之兵已至。急遣親兵相與定約。於十六日五更出隊。劉開泰統帶各弁兵。由南岸渡河。該道督飭李續賓帶湘勇右營自雞鳴峯攻西門。唐訓方率訓字營。蔣益澧率湘勇左營攻北門。該道親率湘勇中營攻東門。又知府林懋勳先守南嶺彭姑要隘。防賊東竄。十五日亦自南嶺赴州。隨同攻勦。諸兵勇不顧礮石。四面圍攻。或乘梯而登。或肉薄而上。登時克復州城。殺斃長髮賊千餘名。生擒三百餘人。訊明正法。義寧被虜之民。七八百人。審明釋放。奪獲僞書僞印器械無算。敗匪乘夜散入各鄉。多爲團練格殺。或送營正法。此十五十六等日進攻獲勝。會同南岸官兵克復州城之實在情形也。餘匪由杭口一帶潛逃。現已督飭兵勇。嚴行追捕等情前來。臣伏查義寧居萬山之中。形勢險阻。地連湖北湖南。一隅不靖。三省戒嚴。自逆賊攻陷。憑險負固。日聚日衆。竄幸迅速克捷。江西湖南兩省。肘腋之禍已紓。而湖北崇通賊藪。亦已聞風膽寒。所有此次出力員弁。實屬奮勇爭先。出奇制勝。除劉開泰一軍由江軍撫臣另摺奏保外。按察使銜寧紹台道羅澤南。專善察看山勢。迂道數十里。力爭鼇嶺要隘。殺賊之多。與去年半壁山相等。前此克復廣信府。此次克復州城。並

關係數省大局。爲功甚偉。可否准加布政司銜。出自天恩。安慶府知府李續賓。樸誠勇敢。戰必身先。應請交軍機處記名。以道員請旨簡放知州銜。候選知縣李杏春。候選知縣唐訓方。均請以同知直隸州。不論雙單日。卽選。候補縣丞蔣益澧。請以知縣補用。並加同知銜。其餘出力人員。容俟詳察開單請獎。陣亡弁勇。查明分別辦理。所有攻勦義寧疊獲勝仗克復州城緣由。恭摺由驛馳奏。伏乞皇上聖鑒。訓示施行。謹奏。

水陸進攻湖口獲勝摺 咸豐五年八月初七日

奏爲水陸兩軍進攻湖口。疊獲勝仗。已入縣城。湖內賊船焚燒將盡。恭摺具奏。仰祈聖鑒事。竊鄱湖水師未能攻破湖口一關。必須東岸有陸兵夾攻。乃能得手。疊經奏明在案。七月十四日。賊船數十號。由鞋山分兩路來撲我青山水營。蕭捷三等伴爲弗知。堅泊不動。該匪東岸各船直趨沙灣。欲截我軍上流。其西路一股。已抵青山。礮子落我船頭。我軍排成一字。仍堅泊不動。直待賊船逼近。我船百餘號。一齊起旋。衆礮同轟。併力圍鈔。轟沈該逆舢板三隻。燬燒二隻。賊敗。振舵回奔。各營擊鼓揮旂。追近鞋山。賊忽回頭抵敵。我軍追擊在前者。停槳少待。復整全陣。轟沉賊船二隻。追至卓湖。又圍截賊船二隻。直追至上鍾山。凡四十里。因逼賊巢。日暮收隊。生擒賊十五名。奪礮七尊。旂幟刀矛多件。此十四日水師在鞋山接仗獲勝之實在情形也。陸軍欲攻湖口。必由徐家埠文橋蘇官渡等處。節節攻破賊卡。乃可規復湖口。七月十四日。候選同知李元度。江西候補知縣李錕。劉希洛等。帶平江勇三千餘名。由南康渡河。十五日。行至段家鋪。三道齊進。李錕繞出賊前。斷賊歸路。該匪踰嶺奔逃。礮斃五名。生擒三名。搜獲僞監軍旅帥等十一名。訊明正法。奪獲黃旂刀矛百餘件。十九日。李元度進至文橋。聞僞總制劉得勝。僞指揮張立旺與徐家埠敗賊。皆聚於此。李錕彭斯舉胡蓋南吳齊源等。分作四路包鈔。鈔逆開礮轟拒。我軍併力衝入。斃賊百四十餘人。生擒僞總制劉得勝等十一名。凌遲梟示。奪獲賊械尤衆。二十一日。進攻蘇官渡。中途探知湖口逆首僞承宣胡鼎文。親率悍賊千餘來撲。我軍三路迎勦。行至曹均橋。見賊馬三十餘匹。駐阜瞻望。彭斯舉卽令開礮。先斃一賊。又礮大旂賊四名。哨官丁峻。李慶雲。飛馬衝隊。手刃二人。各勇礮斃三十餘人。該逆退奔四五里。仍駐山坡。卓旂擱戰。彭斯舉丁峻等追及。鎗礮齊施。鏖戰一時。陣斬騎馬賊目僞總制蘇秀成。僞旅帥杜得勝等五名。斃賊百四五十名。該逆復退奔五里。至蘇官渡過堤。復駐山岡。卓旂擱戰。李錕。劉希洛各揮勇衝

殺哨官李錫發併力馳擊。追至三家市。陣斬穿黃馬褂賊一名。又斃賊百五六十名。尸橫道左。是日該逆三次卓旂駐隊。三次敗北。共追奔二十里。斃賊三百餘名。奪獲賊旂幟器械無數。此陸軍由徐家埠進攻文橋蘇官渡三戰獲勝之實在情形也。二十三日。李元度等拔營直趨湖口。劉希洛攻大嶺。段聲器繼之。彭斯舉攻黃土嶺。李錕攻小嶺。胡蓋南居後策應。三路並進。由大嶺入者。各哨爭先鼓勇。踰越險隘。殺賊守卡賊二十餘名。遂乘勝入城。其由小嶺入者。至西門外。於陷坑內見賊埋伏大礮。遂躍坑而過。奪其礮位。並將守門悍賊立時斫殺。由黃土嶺而入者。亦將守險之賊擊斃十餘人。餘衆潰散。我軍一擁齊登。立破馬房嶺賊營一座。拋擲火球。斃賊無算。餘賊覓船逃竄。我軍追殺。直抵湖壩。賊舟用礮回擊。傷我勇弁數十人。我軍抵死不退。用抬礮轟斃入船之賊多名。其城內賊營溝寬丈餘。鎗礮猛烈。各勇從礮烟中一躍而進。踏毀營牆。斃賊及蹂踐死者三百餘人。隨將城內火藥局糧局一概燒盡。烟焰蔽天。我軍既入湖城。踏平賊營二座。勇氣百倍。惟嶺湖下鐘山賊壘尙存。牆極堅固。地尤險峻。中藏悍賊千餘。我軍大呼躍近。連擲火毬。該逆亦以礮石火彈相擊。拒戰數時。殺賊百餘人。我軍傷亡數十人。是日水師各營亦抵湖口。北風甚勁。浪立如山。遙見陸兵已臨城下。皆奮勇直進。兩岸賊船向前迎敵。我軍開礮轟擊。逾時賊堅持不退。我船輪番出隊。衝過賊艘。夾擊圍攻。突進者數次。後營營官都司蕭捷三見賊兇悍。揮旂大呼陷陣。諸船隨之並進。意欲乘勝直下。不料下鐘山及梅家洲兩岸賊牆排礮齊發。蕭捷三中礮陣亡。我軍雖折一將。各營尤奮力向前。戰逾數時。逆船不敢抵敵。退紮賊牆之下。憑險負固。水陸死守。環而攻之。不能得手。適後營長龍船失火。賊意我軍荒亂。蜂擁而來。各營喜賊舟出巢。趁勢衝入。千礮齊發。羣槳如飛。頃刻之間。衝出賊卡。駛至大江之外。賊敗船亂。或逃出入里江。或竄入扁擔夾。或回泊下鐘巖賊牆之下。我軍環攻賊舟。近前拋擲火彈。將下鐘巖賊礮船二十五隻。立時燬爲灰燼。其民船裝載火藥者。亦皆燬滅。烟薄重霄。又令軍追入里江之賊。逐北二十里。薄晚水軍泊梅家洲。陸軍遂宿城內之月台山。通夕猶出數隊。驚擾賊營。二十四日。陸軍昇銅礮數尊。對下鐘山賊牆轟放。賊情窘迫。突開南門。出數百人。登山劫礮。我軍圍殺大賊。各勇預持草把。擬填壕破卡。賊忽以二股出禦。又殺其數人始退。我軍追近賊壘。亦爲逆礮所傷。是日水師見入里江賊船十餘隻上駛。復衝出卡外。追燒賊船三隻。紮泊八里江。此水陸兩軍會攻湖口直入縣城。蹋毀賊營。焚燒湖口賊船之實在情

形也。二十五日，李元度等以下鐘山賊卡急難攻克。我師接戰兩日一夜，精力已疲，遂仍紮離縣十二里之蘇官渡。水軍復出卡外游澤，見八里江僅有賊船，聞礮即遁，莫由追勦。因亦折回，分泊青山螺絲港等處。臣在九江陸營，聞湖口開仗，蕭捷三陣亡，即親帶陸勇四百名，馳抵青山。據水陸各營陸續稟報前來，伏查該逆久踞湖口，恃有下鐘山與梅家洲對峙，據險築卡，堅如石城。水軍經過，輒爲叢礮所擊，莫敢逼近。目下陸軍雖入縣城，水軍雖衝出大江，而兩岸賊牆未破，必須厚添勁旅，先奪下鐘山之卡，使梅家洲賊卡勢成孤立，然後水師紮出外江，乃操勝算。現復籌添陸兵，前往助勦。惟此次殺賊千餘名，受傷弁勇至二三百名之多，實屬勇敢出力，籲懇皇上天恩，容臣擇尤保敘，以示鼓勵。水師營官游擊銜湖南都司蕭捷三，去年在外江力戰數十次，沈毅擊勇，中礮殞命。使臣頓失指臂之助，深堪憫惻。本年內湖打仗屢勝，日夜以攻破湖口，肅清江面中段爲念，忠憤內蘊，疊擬起保副將，尙未出奏。可否飭部照副將例議卹，出自皇上逾格天恩，陣亡兵勇，俟查明另行辦理。所有水陸軍進攻湖口疊獲勝仗，已入縣城，燒燬湖內賊船緣由，恭摺由驛馳奏，伏乞皇上聖鑒，訓示施行，謹奏。

湖口陸營迭勝水師小挫摺 咸豐五年八月二十一日

奏爲水陸兩軍攻勦湖口，陸勇疊戰獲勝，水師小挫一次，小勝一次，恭摺具奏。仰祈聖鑒事。竊七月二十三、四等日，水陸兩軍會攻湖口，連日血戰大勝，已入縣城，踏破賊壘兩座，湖內逆船焚燒將盡等情。業經奏明在案。二十七日，聞賊由彭澤運來火藥船數隻，並戰船十餘隻，在流澌橋小河停泊。李元度派令胡蓋南、吳齊源帶勇焚勦。賊見我軍驟至，紛紛開駛。我軍連放擡槍，斃賊數名，復拋火球，焚其火藥船戰船數號。二十八日，探得離湖口五里之柘磯，與八里江遙對，有僞關一座，係僞點聖庫黃賊把守，征收船稅，屯匪數百名。派從九彭斯舉等馳往勦辦。該逆棄關上船逃竄，即將僞關署及附近賊巢一併焚洗，正欲收隊。忽下鐘山賊壘突出二三百人來援。我軍整隊迎擊，先刃悍賊一名，餘匪敗退。後路之賊，尙分數股，彭斯舉先衝迎頭一股，擒斬數名。適李錕、劉希洛之勇亦分擊鈔後之賊，殲滅多名。是日蘇官渡亦有賊撲老營，別伏數百人于山凹塘坳之間。李元度派兵先搜其伏，截賊歸路，飭胡蓋南從蘇官渡過壩，一擁而前，呼聲震天。賊敗退至五里橋，被我軍橫截，殺賊百餘人。追至大嶺，與彭斯舉之勇相合，遂結隊而旋。八月初三，探知安慶有賊千餘來援湖口。初四日辰刻，有騎馬賊二十餘

人帶賊數百來蘇官渡搗戰。黃旗蔽野，我軍出隊逾時，見賊已過壩距營百餘步。其埋伏山後者，賊數尤夥。密派吳齊源從間道鈔賊之後，度其將至，然後以大隊過壩迎擊，殲斃二賊，餘衆稍卻。我軍空壁馳入，大呼而進，手刃大旂賊五名，黃馬褂賊四名，搜出僞印照，知係僞總制秦加訓及僞旅帥功勳等。賊正敗走，而接應之賊拒戰一時，敗賊齊奔，是日共殺賊三百餘人，生擒十四名。羅澤南自義寧馳至南康，僅帶親兵六十人。臣飭其東渡湖口，督率平江勇痛加攻勦。初八日，約會水師，併攻下鐘巖賊壘。由黃土嶺大嶺小嶺分三路並進，經馬房嶺及舊城賊營二處，前爲我軍踏毀者，已復爲賊所踞。我軍分股搶登，武生鍾輔朝等首先躍入，奮連殺數賊，匪衆潰退。守下鐘山，我軍登嶺，焚其望樓，遂升月台山，昇礮輪轟賊寨，忽三百餘賊拚死衝出，登山奪礮。我軍併力截擊，手刃十餘賊。賊敗退回，各勇疾馳跟追，已及下鐘山營門，將乘勢衝入。賊閉門死拒，門外尚有三十餘賊未得入壁，悉爲我軍殲斃。此七月二十七、二十八等日，陸勇焚燒流澌橋賊船，柘磯僞關，及八月初四、初八等日，接仗獲勝之實。在情形也。初八日，陸路約會水師，併攻湖口，後幫五營各船開赴湖口，紮泊上鐘山。自二十三日，水軍大勝，賊船盡竄之後，該逆僅餘三十餘號。是日又在九江添來十餘號，分泊梅家洲兩岸。午刻南風大作，賊船約五十號，由兩岸衝上，開礮齊轟，抵敵逾時，因風急水流，船勢直趨下游。賊船進則包鈔我軍，我船進則流入賊卡。弁勇慌亂，遂各振舵回奔，而賊船已乘勢上追，各哨見賊逼近，或推礮入湖，擲水而遁，或擲火彈焚船登岸。間有殿後被賊圍困，力戰捐軀者，共失去長龍艍板二十一號。初九日，五鼓賊乘勝來撲我水軍，前幫之泊青山者，因一湖之隔，不及救應，後幫各營新敗之後，通夕巡邏，嚴陣以待賊至。我船排列一字，萬礮對轟，一時之久，賊揚帆返舵，佯爲退卻。我軍嚴立不動，賊船果復回駛，猛勇衝突。我軍各礮飽食羣子，愈擊愈奮，鏖戰三時，轟沈賊船二隻，落水死者以百計。始紛紛敗竄，追逐四五里收隊。此初八日，水師因風順失利，棄船多隻，貽誤事機。去年靖港城陵磯之敗，均因南風太大，不能收隊。臣諄諄戒飭，不許順風開仗，乃各弁勇不能遵守教令，致陷覆轍，殊屬輕進。該五營營官保升都司秦國祿，已革翰林院編修吳嘉賓，均撤去營官。秦國祿失船較多，並請旨即行革職。保升花翎都司孫昌國，藍翎把總何啓長，藍翎

縣丞賀虎臣。于次早撲營時。尙能奮勉堵剿。轟沈賊船。保全老營。應免其斥革。均請旨革去翎枝。暫留營官之任。以觀後效。其餘失事各哨。分別審辦。以示懲戒。哨官葛惟柱。五月十三三十等日屢戰獲勝。擬保千總。尙未出奏。此次力戰捐軀。請旨照千總例賜卹。所有水陸兩軍攻剿湖口。陸勇疊戰獲勝。水師小挫一次。小勝一次。緣由。恭摺馳奏。伏乞皇上聖鑒。訓示施行。謹奏。

調派羅澤南一軍由崇通回剿武漢摺 咸豐五年八月二十一日

奏爲調派羅澤南一軍。由崇通一帶回剿武漢。恭摺覆奏。仰祈聖鑒事。咸豐五年七月二十四日准兵部火票遞到承准軍機大臣字寄。七月初一日奉天諭。一。駱秉章奏湖南鄰省賊氛四逼。兵力不敷。請飭調回湘勇。以資防剿一摺。前因羅澤南一軍。爲賊牽制。未能即歸九江。諭令曾國藩等俟義寧辦得手後。即將該道調回。與該侍郎併力會剿。茲據駱秉章奏稱兩廣之賊。竄陷郴州東安等處。永州寶應一帶。處處緊急。楚北之賊。復窺伺平江等處。又有黔匪滋擾西路。該省兵勇既多調赴在外。復須防剿黔粵楚北江西五省之匪。不敷分布。必須羅澤南一軍。折回湖南防剿。自係實在情形。惟據陳啓邁奏現籌調集兵勇進攻武寧。已咨羅澤南等妥速攻剿。該道能否即折回湖南助剿之處。著曾國藩酌量現在情形。妥籌分撥。迅速具奏。至江省軍務。或先克九江。或先將鄱湖賊船掃除。仍著遵照前次諭旨。迅籌辦。將此由六百里加緊諭令知之。欽此。一。遵旨寄信前來。竊臣前于提臣塔齊布淪逝後。即飛函至義寧。令羅澤南來營面商大局。羅澤南得信。由義寧之杭口直至南康。連日熟商。勦辦事宜。上而武漢。下而湖口。皆東南所必爭之地。湖口截破。則扼長江之腰膂。使安慶賊舟不能與湖廣相通。武漢破。則雄據長江之上游。使金陵賊巢百貨皆絕其來源。而有日就窮蹙之勢。故論古來爭鬪奪要之道。則湖口之與武漢。其輕重亦略相等。而論目前形格勢禁之道。則必力爭武漢。而後可以保全鄰省。能保全完善之省。而後可規復被陷之區。羅澤南于二十九日抵南康。臣即飭令渡湖。帶親兵數十人。督率平江勇。于初八日攻勦湖口一次。仍以下鐘巖石壘過堅。未能遽破。恐頓兵日久。老我勁旅。羅澤南亦具稟數千言。規畫詳明。慨然以援鄂爲己任。遂決定回剿武漢之計。已于八月十六日自南康起程。由義寧進擣崇通一帶。西上武昌矣。伏查駱秉章原奏所稱鄰氛四逼者。西防黔匪。東防義寧。今義寧克復。黔匪亦靖。則東西兩路。均可弛防。惟南路有兩粵之土匪。

竄入永郴。北路有鄂賊之分枝。上犯岳郡。二者相衝。北路更爲喫重。今羅澤南一軍。由崇通橫截而出。仍自蒲咸掃蕩而下。則鄂賊不敢上犯岳州。是卽所以紓湘省北路之憂也。湖北一省。欽差大臣西凌阿總督官文。兩軍均在北岸。惟巡撫胡林翼一軍。向在南岸。近聞移師北渡。進紮漢陽。南岸極爲空虛。設武昌之賊逸出。由紙坊上犯蒲咸。則勾結蔓延。爲患方長。得羅澤南一軍。由崇通截出。直搗武昌。是又所以救鄂省南岸之疏也。臣反覆思維。權衡緩急。姑舍湖口而不攻。令羅澤南回勦武漢。取道較便。而所全較廣。羅澤南所統湘勇。僅三千六百人。臣又在九江陸營撥參將彭三元。都司普承堯。寶勇一千五百名。足成五千之數。其餉項由江西酌撥。漕折捐輸。銀兩。交該道親行賣帶。臣又咨札編修孟培楨。主事胡大任。王柏心等。在荊州勸捐。以資接濟。誓可無虞。缺乏。羅澤南一軍。將領多諳練。老成士卒。亦久征慣戰。回武漢以勦粵匪。則可。回湖南以勦土匪。則不可。方今東南大局。卽不能遽破金陵。犁庭而掃穴。亦當力爭江面。拊背而扼吭。湖南爲臣桑梓之邦。豈不思所以保全。特不力挽大局。則一鄉一邑。亦終無獨全之理。合無仰懇皇上天恩。飭下兩湖督撫諸臣。羅澤南一軍。不得調回湘省。其麾下五千人。亦不得分支調撥。致兵力單薄。難以圖功。一俟湘省北路肅清。武漢勦辦得手。臣仍飛調羅澤南前來會師。以圖進取。所有調派羅澤南由崇通回勦武漢緣由。恭摺由驛覆奏。伏乞皇上聖鑒。訓示施行。謹奏。

派周鳳山接統潯軍片 咸豐五年八月二十一日

再提臣塔齊布病故後。潯軍猝無統屬。臣札派廣東羅定協副將周鳳山統領全軍。七月二十一日該逆撲營。經周鳳山札率各營擊退。二十四日。督勇攻城。極爲出力。均已奏明在案。嗣二十六及八月初十日。周鳳山率各勇分路與賊打仗。連獲勝仗。查潯城一軍。除將寶勇千數百名撥歸羅澤南統帶會攻武昌外。尙有三千餘人。皆經塔齊布訓練已久。足稱勁旅。理合奏明請周鳳山統領。以一軍心。而資堵剿。惟塔齊布聲威炳耀。士卒親附。後來殊難爲繼。周鳳山新領此軍。臣飭令止重防守。不圖進取。現在江西境內。惟九江彭澤兩城。湖口梅家洲兩壘。被賊占踞。而我軍西扼潯城。東扼湖口。水師扼駐青山。如果三路防守嚴密。賊不能內犯一步。江省土地。均可不被蹂躪。所有派委周鳳山統領九江陸軍緣由。謹附片奏聞。 硃批。知道了。周鳳山既能統屬。仍應相機進取。欽此。

派員護送塔齊布靈柩片 咸豐五年八月二十一日

再前任九江鎮標後營游擊降補守備長春于咸豐三年五月防守江西省城身受重傷。不時舉發。請假醫治。半年未痊。經江西巡撫照例咨明兩江總督。准其回旗調理。正在候咨起程。本年二月。臣在江西。因九江乏員。差遣見該守備病愈。飭令前赴提督塔齊布軍營當差。七月。據長春稟稱。該守備父母年逾八旬。現接家信。知親弟長祥前在天津府獨流地方打仗陣亡。父母年老。家無承丁。懇乞俯念孤子。賞准回籍養親等情。適塔齊布病故。臣派湖南提標官兵三百五十名護送靈柩。正需委員沿途照料。長春告養回旗。臣即派定護送回京。并派府經歷喬宗岳。把總陶藻一同護送。相應請旨飭下該部該旗查照辦理。謹附片奏聞。

稟報何桂珍在江北勝仗摺 咸豐五年八月二十一日

奏爲道員何桂珍在江北攻剿英山蕪水羅田股匪。疊獲勝仗。謹稟前後稟報。補行具奏仰祈聖鑒事。竊臣于上年十月。奏調安徽道員何桂珍來營助剿。欽奉諭旨。飭催該道歸併臣等一軍。當即轉飭遵照。嗣因賊匪回竄。江路復梗。該道派委前署貴池縣知縣李沛蒼來營。稟商帶兵會合之路。李沛蒼中途遇賊。繞越漢口金口以上。馳赴江西。二月間。始到臣營。何桂珍在江北不能渡江。併入臣軍。即屯紮英山蕪水等屬。皖楚交界之處。與賊匪接戰十餘次。屢獲勝仗。常雇長毛探卒。渡江來臣遞送稟報。往往中途沈失。五月以後。續據該道補鈔英蕪各案。具稟前來。查該道係皖省之官。其勦賊在皖楚交界之地。又係奉旨調歸臣軍之員。理合將前後各戰摺敘入奏。仰慰聖懷。緣何桂珍去秋招集開化合肥等勇。勦辦豫省捻匪。降其頭目李兆壽馬超江等。即以投誠之豫勇三千名。歸李兆壽馬超江統帶。在于蕪英等縣。往來堵剿。正月初六日。該道由英山督率員弁兵勇。行抵羅田縣。適聞逆匪攻破蕪水之信。十七日。我軍抵蕪水之蔡家河。飭署桐城縣知縣任春和。代理太湖縣知縣葉業仕。率帶李兆壽馬超江之豫勇。安徽候補知縣劉兆彭。帶開化勇。懷寧縣知縣許垣。馮元。靈帶合肥勇。教諭李培帶英霍蕪水諸勇。十九日。分路進攻。殺賊二百餘名。乘勝破城而入。又殺賊五百餘名。出其不意。一鼓克復。此正月十九日。攻克蕪水縣城之一案也。二月初二日。英山縣稟報有太湖賊數千入境。該道率同任春和葉業仕。劉兆彭等帶勇往剿。時英城賊共五六千人。我軍分道齊進。奮力夾擊。安徽守備阿克敦亦帶兵繼進。賊翻山逃竄。追殺十餘

里斃賊千餘。生擒七十九名。旋聞蘄州土匪勾結逆賊數千。欲由蘄水蔡家河進撲羅田。二月初六日。飛調阿克敦等與合肥勇進攻。賊爲槍礮所傷。敗奔上山。我軍仰攻。賊全股撲下。殺賊四百餘人。相守一夜。次早賊遂奔潰。豫勇與開化勇跟蹤夾擊。追至蘄水縣之松柏坳。此二月初二英山城外擊賊獲勝。初六蘄水蔡家河擊賊大勝之二案也。後蘄賊復欲來撲英邑。該道飛調各勇趕回英山。二月十七日。賊聲言將攻太湖。該道知其詭計。專力扼守英城。嚴陣以待。賊果三路來攻。馬超江奮力急進。刺殺僞總制田金爵一名。田金爵爲蘄黃一帶巨魁。到處斂錢募丁。以助虐燄。自上年臘月。受僞東王印照。勾結匪黨數千。常有悍賊百餘隨之。以行。黃衣黃帽。乘坐綠轎。自該逆被殺。賊卽大敗。竄自彭家畈。屯踞山頭。我軍圍攻。賊敗分路竄逸。追二十餘里。直過大畈河。轟斃壩斃之賊。不下千人。滾崖落港者。死傷枕藉。生擒七十餘名。內有僞總制僞司馬二名。此十七日彭家畈戰勝殲劇賊田金爵之一案也。三月二十一日。探聞賊衆復聚蘄水。欲攻英山。爲田金爵復仇。該道于英蘄交界之陳家坂紮營。並分兵埋伏。聞賊由朱陽河蜂擁而來。我軍迎擊。殺三百餘人。追至數里外。忽見數處火起。知有匿賊。四路兜剿。斬首一百四十六級。生擒三十四名。嗣聞逆賊踞查兒山爲負隅之計。該道以賊匪恃險死拒。難以力爭。卽揚言由查兒山進攻。而潛師由雞鳴河進襲洗馬畈。相距二里。賊始聞知。我軍分爲三路。直搗巢穴。燬營三處。斃賊四百五十人。乘勝追賊過河。時大雨如注。我軍壩斃數人。斬馘及生擒賊匪共一百三十二名。五月初一日。蘄賊復糾約土匪萬餘。假冒鄉團。併集英城。該道親督光州勇暨任春和等諸勇迎擊。斃其頭目共十七人。殺賊無算。追至大畈河。擒斬過半。餘皆拋棄兵械。逃回蘄境。此三四五等月。在朱陽河。雞鳴河。大畈河擊賊獲勝之三案也。五月初六日。蘄賊復窺英境。該道親率光州合肥諸勇。駐城防守。並派任春和劉兆彭帶豫勇開化勇分防彭家畈大畈河等處。十一日。蘄賊萬餘。分路來撲。經豫勇開化勇擊退。十二日。該逆乘五鼓大雨。攻豫勇營壘。我軍拒戰逾時。殺賊多名。因李兆壽腿受刃傷。被賊圍困。豫勇扶掖潰圍而出。陣亡百餘人。時馬超江之勇亦敗。紛紛散回。該道聞報。帶勇出城接應。兼堵南口。任春和等亦繞出賊前。分路扼截。該道猝遇多賊來衝。馬被矛傷墜地。見賊衆我寡。勢難取勝。次日遂同英山縣知縣蘇秀槐飛調羅田各屬團練會剿。時賊已入城。我兵爲賊所隔。不能進攻。豫勇絕糧三日。散走過半。李兆壽已受傷。遂飭其督帶豫勇回籍。該道一面招聚散卒。一面號召諸路團練。計隨

營聽調者不下萬餘人。二十六日分數路由英山西南北三門進攻。該逆突圍而出。被我軍鎗斃千餘人。登時收復縣城。敗賊躍河逃竄。復截殺數百人。奪獲賊械無算。此五月十二日官軍小挫英山被陷。二十六日大獲勝仗。克復英山之二案也。伏查該道自正月以來。大小十餘戰。屢挫凶鋒。克復英山蕪水兩城。陣斬渠魁田金爵。勞績尤著。惟據前後稟稱。所帶各勇。從征半年。未給口糧。屢次血戰。不惟賞卹無費。甚至日鮮一飽。每勇日給白麵四兩。或兩日領米一升。該道與各委員。並有斷炊之事。迭派許垣。董業仕等分途勸捐米石。往往爲賊所阻。不得入城。必俟賊退。二千餘人。始得一飽。三月內曾分別遣散。五月間豫勇飢疲過甚。竟以小挫致潰等情。臣接閱之下。不勝感喟。何桂珍以二千疲勞之卒。當羣盜出沒之區。數月無餉。轉戰不休。在該道受恩深重。自當力圖報効。其從征員弁兵勇。勞苦倍于他軍。合無仰懇天恩。准臣擇尤保奏。以作士氣。抑或歸于各督撫保奏之處。伏候聖裁。所有何桂珍在江北攻勦英山蕪水羅田股匪疊獲勝仗緣由。理合彙案補行具奏。伏乞皇上聖鑒。訓示施行。謹奏。

請令何桂珍辦楚皖團練片 咸豐五年八月二十一日

再查蕪黃英霍。嘗皖楚之交。萬山迴互。匪黨最多。康熙年間。于成龍辦蕪黃之賊。驅除數年。斬夷無算。始就肅清。近年以來。南岸之大冶興國。北岸之蕪水蘄州黃梅廣濟。土匪尤衆。一經粵匪勾結。羣起響應。動滿數千。幸羅田麻城黃岡黃安等縣紳民。好團練殺賊。屢有成效。英山之民。亦多深明大義。敵愾同仇。該道何桂珍往來皖楚之界。已近一載。各屬紳耆。信義相孚。每遇匱乏之時。鄉里常以箠壺情軍。屢次勦賊獲勝。亦賴團練之力。微臣愚見。擬令何桂珍總辦該處團練。以皖省言之。太宿則莠民較多。英霍則良民較多。以鄂省言之。黃廣二蕪。則莠民較多。羅田麻城。則良民較多。此時辦法。練數縣之良民。殺數縣之莠民。用該處之錢。辦該處之事。目前能殺一著名之匪。將來大軍到日。卽少數百從賊之人。實屬裨益不淺。惟匪徒在楚境最多。而團練亦惟楚境之羅麻等屬。最爲可恃。合無仰懇天恩。飭下湖北安徽各督撫。轉飭何桂珍督辦羅田英山麻城等屬團練。嚴清楚皖各屬土匪。所需費用。准在各屬勸捐。俾該道有專責之事。而于大局亦有無窮之益。一俟武漢克復。羅澤南一軍勦賊東下。該道與之會合。仍可歸併巨軍。遵照前旨辦理。所有擬請何桂珍督辦楚皖交界團練緣由。謹附片具奏。請旨。

克復廣信等案保獎摺 咸豐五年九月初五日

奏爲遵旨奏保陸軍克復廣信及水師疊獲勝仗出力弁勇開列清單懇恩獎敘恭摺奏祈聖鑒事竊三月間賊踞弋陽分股竄興安經臣檄調寧紹台道羅澤南前往勦辦二十一日克復弋陽二十三日收復興安縣城聞賊已攻陷廣府羅澤南趕至郡城連日痛勦殺賊數千二十七日克復郡城均經臣奏明奉旨准將出力員弁擇尤保敘在案至水師屢次獲勝全湖肅清疊奉諭旨允准開單酌保除廣信案內江省會勦之在事員弁由江西巡撫另行請獎外謹遵旨核實保敘彙列清單懇恩恩施伏乞皇上聖鑒訓示施行謹奏

請催浙江協餉片 咸豐五年九月初五日

再臣二月間奏明閩浙兩省按月撥銀二萬兩接濟臣軍入夏以來閩省僅解銀二萬兩昨據督臣王懿德鈔摺咨會該省應撥餉銀業經奏明免其按月籌解浙江應解之款據撫臣何桂清覆奏于四月起每月由藩庫籌銀一萬兩運糧二庫合籌銀一萬兩委解接濟在案嗣據該省將四月分銀以一萬兩爲運鹽成本以一萬兩解到臣營稍紓眉急而五月以後報解之數尙無消息八月初五日何桂清爲協撥滇餉一案附片聲明江西軍餉無款可動現在籌議浙鹽運銷江右即以鹽課抵撥會國藩軍管餉需俟議定章程再行具奏等語該撫鈔片咨送前來伏查臣軍奏請借撥浙引用鹽抵餉至今已滿半年尙未運鹽到江將來能否銷行暢旺殊難懸揣若浙省再議行鹽撥餉則自定議之日以至銷售之日更屬遙遙無期而臣軍萬餘人嗷嗷待哺江省獨力難支中夜思維萬分焦灼浙江物力富饒迥非閩省支絀可比合再籲懇皇上天恩飭下浙江撫臣迅將五月以後未解餉銀如數源源補解俾此軍不以餉潰而致他虞感荷聖慈曷有涯極謹附片具奏不勝迫切待命之至謹奏

請令羅澤南奏報軍情片 咸豐五年九月初五日

再臣接據稟報金口南岸陸軍被該逆于八月初二日踹毀營盤署撫臣胡林翼北岸陸軍亦于初八日被逆匪踹毀營盤羅澤南援鄂之師計此時尙在崇通一帶若勦辦得手進至咸寧江夏等縣去臣營在八百里以外出入賊地信息難通羅澤南營中大小軍情若仍由臣處奏報往返耽擱動逾一月此時鄂事孔棘我皇上盼望捷報愈速愈妙胡林翼收集潰兵尙在江北能否與羅澤南文報常通不爲賊氛所隔正未可知微臣愚見擬令羅

澤南自行具摺。每遇開仗之後。迅速繕摺奏報。專差由間道送至荊州。或送長沙交驛馳遞。仰慰聖廬。較之由臣處轉奏。可期速到一月。伏查會典定例。司道原有奏事之責。近歲各路糧臺。均由司道專摺奏事。羅澤南統領一軍。尤應權宜辦理。如蒙俞允。請旨飭下羅澤南大小軍情。自行奏報。庶慰我皇上盼捷急切之意。謹附片請旨。

師久無功。自請嚴議片。咸豐五年九月初五日

再臣自抵江西。整飭水軍。本擬四五月間。水陸會剿。攻破湖口一關。緣義寧州失陷。羅澤南率師回救。不能赴湖口會剿。繼而與塔齊布面約。移師東渡。攻勦湖口。該提督又遽爾阻謝。後飭平江勇往攻湖口。二十三日水陸大戰。極爲得手。而下鐘山石壘。堅固異常。竟不能破。自辦理內湖水師。已逾半年。鄱湖以內。雖已一律肅清。而未能橫截江面。無裨于大局。轉瞬霜降。水涸。攻勦愈難。師久無功。餉項虛糜。應請旨將臣交部嚴加議處。惟臣調度乖方。咎無可辭。而助臣辦理軍務。實有勞績。不可泯迹者。亦不敢墮于上聞。侍臣黃贊湯自去歲督辦捐輸。已逾六十餘萬兩。孳孳勸輸。毫無抑勒。紳民爲之感動。其致臣書函有云。「軍務一日不竣。辦捐不日一息。」其致羅澤南書函有云。「如餉項緊急。則傾家破產。亦所不恤。」等語。實屬力拯大局。公爾忘私。南昌府知府史致譔。于九江廣信湖口等軍。支應諸件。晝夜叢冗。毫無貽誤。水軍所需子藥。動輒數萬。亦能措置裕如。綜理繁劇。舉重若輕。候補直隸州知州李瀚章。自去歲辦理糧臺。每于艱難挫折之際。逶迤經營。不激不隨。今年在江西與禮部主事甘晉應。付各路軍需。亦能權衡緩急。毫無浪費。至外江金口水營。正月初三日。李孟羣等赴援武昌。僅礮船五十餘號。初五日彭玉麟等赴援武昌。亦僅礮船八十餘號。尙有被大風損壞。舵折樁摧者。到武漢後。又復三次遭風。臣時深慮外江水師不克撐持。曾于奏牘內言之。賴湖南巡撫臣駱秉章。一力維持。接濟船礮。撥給餉項。添募水勇。俾金口水師危而復安。弱而轉強。以保湘省。即以衛大局。該撫署內幕友候選同知左宗棠。于外江水師。尤爲殷勤保護。一船一礮。一哨一勇。皆苦心照料。勞怨兼任。一面在長沙練操。一面發往鄂省。力挫水賊兇鋒。候補知府彭玉麟。于大風壞船之後。督率舟師。赴援武昌。其時賊勢方張。我軍氣餒。彭玉麟一面修整破船。一面鏖戰悍賊。與李孟羣同心協力。目不交睫。八十餘日。竟能保守金口。水軍復振。其堅忍之力。殊屬難得。禮部主事胡大任。自賊氛再犯武漢以後。在于新堤地方。勸捐助餉。安定民心。接濟軍火。歷艱險而不渝。現往荊州勸捐籌濟。

援鄂之師。前任知府黃冕專辦湖南礮局。前後造礮至六百餘尊之多。不特外江水師。借此大振軍威。即臣鄱湖亦提來礮位一百零二尊。其所造皆精練光瑩。與洋礮無異。所製竹筒炸彈之類。亦皆具有精心。利于攻勦。實屬有用之才。不敢不一一瀝陳于聖主之前。侍郎臣黃贊湯。巡撫臣駱秉章。受恩深重。自應竭誠報國。李孟羣職任兩司。亦不敢仰邀獎敘。其史致諤等以下各員。擬即歸入義寧州案內。開單保奏。籲懇恩施。所有徵臣師久無功。請交部屢議。及助臣軍勞績較多各緣由。謹附片具奏。請旨。

羅澤南一軍克復通城縣摺 咸豐五年九月二十二日

奏爲羅澤南一軍由義寧進勦獲勝。克復通城縣城。恭摺馳奏。仰祈聖鑒事。竊寧紹台道羅澤南克復義寧後。駐軍杭口。輕騎馳抵南康。與臣熟商。由崇通援勦武漢之策。八月十六日。復由南康起程回營。各情業經奏明在案。嗣據羅澤南稟報。八月二十七日。率湘勇五營。訓字營暨參將彭三元。游擊普承堯所帶之寶勇。次第由杭口拔營。九月初一日。抵通城界之南樓嶺下。阻兩二日。初四日。由嶺拔營。初五日。駐通城之東南山上。管帶平江勇五品銜。即選知縣李源濤。何忠駿。藍翎。即選知縣黃崇策。藍翎。千總方城等。亦于是日趕到。駐營通城之西南山上。賊之在通城者。初止四五千人。鍾姓賊首。自義寧敗後。懼我軍進攻崇陽。屯聚萬餘人于崇陽之桂口。嗣聞我軍進勦通城。亦于九月初四五等日。陸續來賊六七千人。于城之西門外山上。築大木城兩座。層布炮眼。深掘重濠。濠外竹籤木椿。縱橫密釘。冀以抗拒我師。該道駐營後。自帶勇敢之士數百人。沿城審視形勢。旋由城之西南登山瞭望。該逆見我軍無多。忽出大隊追襲。諸勇回旂擊之。殺斃騎馬賊目三名。生擒七名。賊敗歸壘。負固不出。初六日辰刻。方集各營會議進攻。部署甫定。平江勇分三路直撲城外賊壘。賊于壘中以大礮轟擊。該道急飭各營繼進。記名道李續賓率湘勇右營。候選訓導劉蓉率湘勇副右營。候補直隸州李杏春率湘勇副中營。攻城外賊營。與平江勇接應。該道率中營繼之攻城西北。參將彭三元。游擊普承堯。率寶勇與唐訓方率訓字營。蔣益澧率湘勇左營。攻城東南。值平江勇進勦喫緊。我軍乘之。殺斃當先悍賊數十人。乘勝奪入賊壘。縱火焚燒。壘中諸賊。悉由西北渡溪而奔。諸勇分路截殺。積屍溪中。水爲之赤。時城中各門皆閉。惟留北門通桂口之路。留西門通城外賊壘。壘中賊爲我勇所截。拚死逃竄。仍由西北二門奔入城中。諸勇奮力尾追。直逼城根。守城之賊。以磚石

下擊。我勇多受重傷。皆冒死奮勇而入。東南路諸勇亦攀援而上。將南門賓陽門拆開。各營之勇繼之而入。殺戮城中賊無算。城中之賊。挺而走險。盡從北門蜂擁而出。城門半啓。值我軍衝入。共相擁擠。賊踐死于墜城者甚多。我軍亦有爲賊踐傷者。該道見衆匪猶據城樓。以巨石拒抵。因飭各營分伏北門外之樹林中。俟賊大隊奔出。四路截殺。有未出者。我軍又退。俟其再出。而再殺之。如是者六七戰。城中賊盡。追至十餘里外。鮮得脫者。前後斬賊約三千人。內有等黃褂長髮賊數十人。生擒共三百五十餘名。奪獲大小旗幟百餘件。馬百餘匹。軍械穀米無數。隨訊生擒諸賊。供稱鍾姓賊首。因受湖北賊目僞諭。令其力守通城。逼我師北下。俾武漢之賊。得以徑窺岳州等語。狡竊已極。該道入城後。招撫難民。搜捕餘匪。待稍綏定。即行進剿崇陽桂口等情前來。臣伏查鍾逆自義寧敗後。防我師直取崇陽。即屯匪衆萬餘人于桂口。極力堵禦。嗣見我師先趨通城。復移桂口之賊。併力救援。經羅澤南諸軍痛剿。殺賊三千。一鼓克復。實足以寒賊膽。而奪崇陽桂口之氣。所有在事出力員弁。俟查明彙案請獎。以昭鼓勵。把總李懋勳首先登城。奮不顧身。以致陣亡。並請飭部從優議卹。陣亡各勇。查明照例辦理。所有克復通城縣城緣由。專摺馳奏。伏乞皇上聖鑒。訓示施行。謹奏。

鄂軍由胡林翼轉奏片 咸豐五年九月二十二日

再羅澤南由崇通回勦武漢。去。臣軍營漸遠。稟報往返。稽延動逾旬月。臣前請旨飭下羅澤南准令專摺自報軍情。業于九月初五日附片奏明在案。旋據探稟湖北撫臣胡林翼駐紮嘉魚之六溪口。係在大江兩岸。與羅澤南崇通之師。聲息可期常通。此後鄂省大小軍情。或由羅澤南奏報。或由撫臣胡林翼轉奏。臣即不復具奏矣。除分別咨行外。謹附片奏聞。硃批。已有旨歸胡林翼奏報。欽此。」

邊保堪勝總兵人員摺 咸豐五年九月二十二日

奏爲遵旨保舉堪勝總兵人員。恭摺具奏。仰祈聖鑒事。五月十五日。准兵部咨開。咸豐五年四月十二日。內閣奉上諭。各省保舉堪勝陸路總兵人員。現經用竣。著各該督撫於陸路副將內。即行遴選曉暢營務。堪勝總兵。酌保數員。送部引見。候朕記名。以備簡用。並著各路統兵大臣。於軍營副將內。察核保奏。其參將游擊都司守備各員。如有才能出衆。勇敢有爲者。該督撫大臣。一併核實開單具奏。欽此。」行令臣欽遵辦理等因到臣。伏查軍中

將領各有偏長。而足昇方鎮之寄者。頗難其選。臣接奉諭旨。詳加體察。查有總兵銜湖南常德協副將楊載福。廉明愛士。深得衆心。每戰衝鋒陷陣。賊黨披靡。湖南弁勇。所以奮發敢戰者。陸路賴塔齊布爲之倡。水路賴楊載福爲之倡。現經胡林翼奏明統領外江水師。又廣東羅定協副將周鳳山。紀律嚴明。與士卒同甘苦。每戰調派隊伍防賊鈔襲埋伏。現經臣奏明統領九江陸營。尙能和協將弁。力遏賊鋒。又保升參將彭三元。曉暢營務。爲士卒所悅服。前提臣塔齊布素加器重。現經臣派令隨羅澤南援勦武漢。此三人者。似皆足以勝總兵之任。所有遵旨保舉緣由。恭摺具奏。伏乞皇上聖鑒。訓示施行。謹奏。

羅澤南分剿崇陽彭三元殉難摺 咸豐五年十月二十日

奏爲羅澤南一軍分剿崇陽援賊。在壕頭堡獲勝一次。敗挫一次。參將彭三元等殉難。旋在牟樓峒接仗。續獲大勝。恭摺具奏。仰祈聖鑒事。竊羅澤南一軍。克復通城縣城。進攻崇陽情形。經臣奏明在案。當以羅澤南去臣軍營漸遠。附片聲明。嗣後湖北軍情。准令羅澤南專摺奏報。或由湖北撫臣轉奏。臣卽不復具奏矣。九月十四日。羅澤南督率諸軍。克復崇陽縣城一案。經該道就近稟明楚省各督撫。諒已專摺奏聞。茲復據該道稟稱。九月十七日。在崇陽聞湖南官兵進勦牟樓峒失利。退守岳州。該道懼賊乘勝上窺岳郡。直犯長沙。因派記名道李續賓。訓導劉蓉。知縣蔣益澧。直隸州知州唐訓方。游擊普承堯等。分率各勇。於十八日黎明。由崇陽拔營。十九日駐牟樓峒。以防禦西路上犯之賊。羅澤南與參將彭三元。知州李杏春等。暫駐崇陽。以資彈壓。擬卽兩路合攻蒲圻。適崇邑官紳。以僞總制楊萬年率敗賊七八百人。據梯木山爲老巢。騷擾壕頭堡地方。冀乘我師一去。復陷崇陽。稟請勦辦。羅澤南以壕頭堡離縣四十里。賊僅八百。可以一鼓殄滅。免貽後患。二十二日。派彭三元。李杏春往勦。行抵道口。突遇賊二百餘人。爲我師擊退。駐營塘泥嶺。二十三日。李杏春率湘勇前行。彭三元率實勇繼之。捫藤扳石。至梯木山。見賊二百餘人。搖旗放鎗。我勇分路追殺。斃賊數十名。縱火悉燒楊逆之宅。收隊循原而下。忽報僞翼王石達開帶悍賊六七千人。將至登山望之。黃旗漫野。喊聲震天。我軍分三路應之。左中兩路之勇。分途疾進。殺斃當先悍賊賊馮。諸勇或尾追。或腰截。戮屍徧地。右路松林內。黃旗愈集愈多。李杏春復馳馬登山。督勇整隊以俟。該逆爲山岡所隔。不知中路左路之賊已潰。揚旗吹角而至。勢甚凶猛。諸勇分路雕勦。連斃大旗悍賊八九名。賊

反走。彭三元督勇橫截之。殺賊尤衆。餘向白羊山奔投咸寧而去。日暮收隊。計三路斃賊八九百人。內有僞將軍僞指揮二名。奪獲僞印二顆。大小旗幟馬匹冠服無數。據生擒之賊供稱。僞翼王由金陵水路至武昌縣登岸。取道金牛。統賊二三十萬人。昨夜宿咸寧。今日交戰。係其前隊之賊等語。此彭三元等分兵勦壕頭堡初次接仗獲勝之實在情形也。二十四日。彭三元等擬拔營回崇陽。羅澤南亦以書促之歸。甫傳令間。倏聞翼賊大隊遽至。約二萬人。勢極兇惡。鎗礮火箭噴筒。連環施放。彭三元李杏春見衆寡不敵。飭諸勇不得輕進。擇隘堵截。賊衆奮至。與戰二三十合。彭三元左耳受礮傷。血流滿襟。猶率勇力戰如故。自卯至未。鏖戰五時之久。賊黨始退。前後斃賊約百餘人。二十五日。黎明。翼賊由咸寧率大股盡數趕至。崇陽土匪。又從而益之。將營盤三面圍攻。彭三元李杏春誓以身殉。各跨馬分路堵禦。相持二時之久。屢卻屢進。忽賊從後路繞入營盤。拋擲火球。勒馬回救。賊衆尾追。彭三元大呼衝突。手刃黃馬褂賊一名。遂爲羣賊刺於馬下。李杏春見彭三元已死。義不獨生。遂殉難。把總蕭馥山始終隨李杏春不離。爲賊所殺。其胞弟把總李光燦。居營守轡重。聞其兄遇害。亦死之。哨長守備銜候補千總彭獻傑。把總劉碧山。獨當一路。與賊力戰。及營中火起。猶執旗衝入賊中。同時死難。諸勇知無能爲。且戰且卻。整隊而歸。羅澤南在崇陽聞壕頭堡危急之信。於先一夕派李續賓率勇往援。又調蔣益澧由牟樓往援。二十五卯刻。復自率五成隊。疾馳救援。距營十里。見諸勇潰歸。已無及矣。因督隊排列山岡。賊不敢窮追。此壕頭堡突遇大股悍賊。參將彭三元等殉難之實在情形也。羅澤南回至崇陽。因與蔣益澧商議。我師分紮崇陽牟樓。兩路兵力皆單。新挫之後。不如仍合爲一。以固軍心。遂於是夜五鼓拔營。午刻抵牟樓峒。與李續賓劉蓉等。併爲一營。探知僞國宗章俊自鄂省率賊萬餘。由紙坊而上。二十四日。已至蒲圻矣。二十六日。羅澤南甫抵牟樓。方令傳餐。突報蒲圻賊大股來攻。羅澤南與李續賓登山瞭望。見賊屯聚峯頭。爲二大支。薄山而下踰田隴。旋分三支。直逼我營。是爲賊之正兵。一支捲旂息鼓。埋匿七里冲各山內。深藏不見。是爲賊之奇兵。冀誘我師禦其正兵。即以奇兵從後乘之。撲入營盤。羅澤南會各營商定。以我師自崇陽至者。久戰之後。疲於遠行。不令應敵。飭劉蓉擊田隴賊陣之腰。李續賓從左路石山抄田隴賊陣之尾。唐訓方以三哨當田隴之賊。以二哨搜賊營前山內之伏。普承堯之勇。令分二路。以搜七里冲諸山之伏。時壕頭堡新敗。收集之勇。各欲爭先出隊報仇雪憤。羅澤南許之。令其策應。

各路田隴賊見唐訓方人少銳意直前鎗礮火箭齊至我兵不動誘賊漸逼營前以擡鎗擊之繼以短兵鏖戰逾時賊不能支劉容率勇從中段截之賊亂反旗而走爲諸勇所包不得出賊之在後者回奔峯巔李續實已先繞至截殺之蔣益禮亦分路策應賊之正兵大敗其伏於山內者不知田隴之賊已敗急思出戰普承堯諸勇或繞出山巔或從山口分路殺入賊之奇兵亦敗分途追殺至十里之遙日暮收隊各路共殺斃九百餘名多係長髮老賊內有僞總制黃姓僞指揮李姓身懷僞印生擒七十餘名殺之以祭壕頭堡陣亡將士諸勇猶痛憾切齒爭啖其肉此牟樓峒續獲大勝之實在情形也羅澤南以壕頭堡兩營失利方思休息數日緩圖進剿得此勝仗士氣復揚擬稍加振厲卽當相機剋期會攻等情前來臣伏查壕頭堡餘匪無多羅澤南分兵勦洗覆巢殲賊已除後患不料僞翼王石達開大股由金牛間道猝至致遭挫衄良將賢員相繼淪喪誠堪憫惻至牟樓峒爲湖南接壤之區日前官軍潰退楚疆岌岌可危該道分軍扼要堵守或可重振軍威規復鄂垣保升參將彭三元忠勇明練屢著戰功克復通城案內擬保副將而九月二十四日臣遵旨保舉堪勝總兵人員一摺亦以彭三元曉暢營務足勝專閫之寄茲矢志殉節請旨飭部照副將例議卹以慰忠魂候補直隸州知州李杏春韜略熟諳深明大義通城案內擬保知府茲力戰捐軀請照知府例從優議卹其餘殉難各員守備銜候補千總彭獻傑把總蕭釗山李光燾劉碧山均請從優議卹陣亡勇目查明照例辦理其牟樓峒獲勝出力員弁由羅澤南彙案稟請獎敘所有分勦崇陽援賊接仗各緣由謹專摺馳奏再此次軍情應由楚省具報緣殉難彭三元係臣軍屢戰得力之將未便沒其忠績是以仍行奏報合併聲明伏乞皇上聖鑒訓示施行謹奏

彭三元童添雲附祀塔祠片 咸豐五年十月二十日

再保升參將彭三元向隸提臣塔齊布軍營戰功疊著爲塔齊布素所賞拔茲以兵單挫衄猶負傷血戰誓以身殉忠勇之概偏裨中實爲罕儔臣前奏請湖南省城爲塔齊布建立專祠欽奉諭旨允准並請以彭三元入祠附祀俾義烈幽靈乃得所依附益昭聖代褒節勸忠之意又參將童添雲隨塔齊布轉戰二千里每戰隻身陷陣去臘在九江受傷殞命合營皆爲痛哭經臣奏明請照參將例從優議卹亦蒙允准在案此次並請附祀塔齊布祠宇以慰忠魂合併陳明謹附片具奏請旨

謝補兵部侍郎恩摺 咸豐五年十月二十一日

奏爲恭謝天恩。仰祈聖鑒事。九月二十七日。准兵部火票遞到。咸豐五年九月初四日內閣奉上諭。兵部右侍郎著曾國藩補授。曾國藩現在督辦軍務。兵部右侍郎著沈兆霖兼署。欽此。竊臣賦性拘迂。謬膺重寄。親烽煙之不靖。元惡稽誅。愧軍旅之未嫻。愚忱徒抱。自水師半入鄱湖。重加整輯。頻煩摩壘之勞。難奪負嵎之險。已閱時而經歲。覺功少而過多。迺復滙荷溫綸。補授斯職。以本兵而司捷伐。任似負山。以薄植而履艱危。情深墮垣。臣惟恪遵訓飭。殫竭血誠。永獨矢夫冰心。稍申墜露輕塵之報。誓廓清乎江面。仰答高天厚地之恩。所有微臣感激下忱。謹專摺附驛馳奏。叩謝天恩。伏乞皇上聖鑒。謹奏。

謝寬免嚴議恩摺 咸豐五年十一月二十一日

奏爲恭謝天恩。仰祈聖鑒事。十月十九日。准兵部火票遞到。咸豐五年九月二十六日內閣奉上諭。曾國藩奏師久無功。自請嚴議等語。兵部侍郎曾國藩督帶水師。屢著戰功。自到九江。雖未能迅即克復。而鄱湖賊匪已就肅清。所有自請嚴議之處。著加恩寬免。欽此。竊臣自入內湖。整輯水師。意在攻破湖口。力扼長江中段。使上下游之賊。不得相通。區區微志。久在聖明洞鑒之中。乃五月初調羅澤南會攻湖口。旋以義寧赴援。不克前來。七月底調李元度環攻湖口。已復縣城。又以石壘未破。不克成功。前與塔齊布會晤之時。議將九江陸軍長驅東下。會合向榮蕪湖之師。而該提督倏爾淪謝。遂乏慨懷同志之人。近聞廬州克復之信。擬將內湖水軍衝出大江。會合和春北岸之師。而潯城陸軍撤入腹地。南岸又無依傍之處。機不遽順。謀不克成。累月曠時。師老餉匱。中夜以思。慚憤交併。自以調度無方。應獲嚴譴。乃蒙天恩曲宥。寬免嚴議處分。祗聆之下。感悚難名。臣惟有殫竭愚誠。激揚士氣。不敢偷安片刻。不敢浪費一錢。俾銳氣之常新。冀逆氛之速靖。庶以仰答高厚鴻慈於萬一。所有微臣感激下忱。謹專摺附驛馳奏。叩謝天恩。伏乞皇上聖鑒。謹奏。

九江湖口水陸各軍接仗情形摺 咸豐五年十一月二十一日

奏爲九江湖口水陸各軍接仗情形。恭摺具奏。仰祈聖鑒事。竊九江兵勇。自派副將周鳳山統領。七月八日。與賊接仗四次。均獲小勝。暨湖口水陸各營。八月會攻下鐘巖賊卡。各情業經分別奏明在

案。嗣九月二十七日二十一日。九江逆匪分股來撲。屢經我師擊退。迨十一月初五日。賊衆約二千名。由九江東北兩門。繞城行至八里坡高嶺地方。分爲六股。排列嶺之東西各三股。卓旗吶喊。西門亦出賊約三四百名。由楓樹灣前來。復有賊由南門湖內。用船登岸。撲我軍西面。周鳳山見賊黨四面圍至。出入成隊迎敵。以嶺東賊較多。派參將阿達春帶勇衝擊嶺東左路之賊。都司畢金科帶勇衝擊嶺東右路之賊。周鳳山親率都司滕國獻滕代清。千總張登雲。滕加洪。彭開科諸勇。衝擊嶺東中路之賊。另派都司李新華。周岐山帶勇。共擊嶺西三股。而令辰常兩營。迎擊西門一股。時九江鎮總兵居隆阿。亦派隊出擊湖內之賊。各路官兵分股迎擊。賊在八里坡正欲前行。經阿達春之勇。由右繞至。刀矛並舉。首先衝鋒。斃賊十數名。滕國獻率帶官兵亦至。鎗礮齊施。呼聲震谷。衝殺嶺東中路。畢金科之勇。亦由嶺東右路衝入。各斃賊數十名。賊敗。嶺東三股齊退。入東門樹林內。抗拒二時之久。我軍見城上鎗礮如雨。不敢近逼。周鳳山遂令阿達春等分股往湖邊鈔賊後路。賊見我兵抄襲。始行奔至北門江邊。欲乘船而逸。滕國獻乘勢追逼。賊上船不及。溺斃者計數十人。蓋嶺東之賊。係由小池口渡江而來。故敗後仍竄江邊也。時都司李新華。周岐山等帶勇在嶺西。各敵一股。殺賊數十名。奪獲旂械多件。賊敗退走入東門城上。大礮連轟。我軍遂不敢進。其西門賊一股。經守備岳炳榮等。辰勇分左右夾擊。各有斬獲。至南門湖內之賊。係大礮船四號。小划十餘號。已駛進甘棠湖。袁家嘴等處。上岸焚擄。經總兵居隆阿用礮轟沈大船一隻。小划二隻。擊斃溺斃之賊十餘名。賊敗。駛出湖外。時已申刻。各路依次收隊。是日共殺賊二百餘名。黃馬褂賊四名。溺斃尤多。此十一月初五日。九江陸軍勦賊大勝之實在情形也。初七初八。該逆復出城來犯。均經擊退。小有斬馘。湖口下鐘山賊黨。自屢創後。堅匿不出。十月底。三次來犯。用軍出隊追擊。飛奔回巢。皆未窮追。十一月初五六日。聞下游來援賊千餘人。添集鐘山。初七日巳刻。分五股來犯。直抵蘇官渡北岸。搖旗放鎗。同知李元度傳令鮑鏞。不許輕動。候賊氣已疲。遣守備牟瀛率右營。從馬影橋東路包抄。從九彭斯舉。率中營前營。從勞家渡西路截擊。知縣胡蓋南。訓導吳齊源。率左營。從中路直衝。三面兜勦。殺斃當先賊一名。賊退。追過五里橋。突起伏賊二百餘人。我軍衆礮抵敵。傷賊十餘名。逆首僞承宣。黃文金。騎馬衝陣。經投誠之蔣文煥等指認。遂令各哨圍擊。直取賊渠。該逆狂竄。迨至三家市。逆衆回匿下鐘山。我軍登大小嶺。各據山椒。磨勇焚其卡房。望樓七所。直逼下鐘巖石。

牆之下。又殺賊七名。逾時。見逆船從梅家洲渡賊至東岸。皆新到之賊。時已日晡。各營收隊捲塘而歸。詎黃文金復率衆來追。勢極兇悍。彭斯舉半瀛等分路衝截。往復十餘次。輒有斬馘。因日暮不敢戀戰。徐徐收至三家市。忽逆黨千餘人。傾巢尾追。各營且戰且退。至五里橋。我接應兵畢至。直衝向前。李元度催兵返鬪。彭斯舉半瀛等望見逆首黃文金。遂率擡礮指擊。該逆被轟落馬。賊衆拖曳。我軍乘勢反攻。立斬二十餘賊。奪旗三桿。逆黨奔潰。不復成軍。各營仍追至三家市。乘月收隊歸營。是日殺賊不過四十三名。礮傷不過數十名。而往返追逐。鏖戰竟日。該逆兇悍狡詐。殊難輕視。查點我軍受傷陣亡十一名。此十一月初七日湖口陸軍久戰獲勝之實在情形也。水師久駐青山。九月廿七日賊船五十餘號。竄至姑塘。我軍列陣禦之。與賊相持。該逆佯往東路敗退。我軍乘勢進攻。賊復分船開向西岸。鎗礮連施。時青山陸營亦已出隊。至姑塘。見匪船近岸。用擡鎗火箭轟射。賊不敢近。我船一齊駛近猛攻。賊始敗竄。將抵鞋山。我軍追擊。賊又回柁迎敵。我船分左右包鈔。賊復敗北。追至盔山。日暮收隊。是日礮傷賊匪甚多。我軍僅受傷三名。十月二十七日。賊船數十號。來至東岸螺絲山。申刻。各營會商恐逆船潛匿。二十八日。我軍前右兩營。循西岸。新中嚮導兩營。循東岸。均近鞋山中流灣泊。先派哨船巡探。該逆瞥見我軍哨船。兩岸出隊。我哨船且戰且走。引至鞋山。賊見我船陣勢嚴整。鎗礮猝發。即行敗走。右前兩營。由西岸尾追。風急水溜。頃刻追及。湖口賊忽回船拒戰。我軍因順風窮追。隊伍稍亂。勢少退卻。營官劉國斌往復苦戰。每戰一合。輒麾大船捲塘先退。小船殿後。右營長龍船一隻。因灘乾擱淺。不能駛回。被賊圍奪。退至鞋山東岸。二營近前接仗。擡礮助威。萬礮齊集。悍賊始振舵回奔。我軍又復尾追數里。日暮收隊。是日鏖戰四時。雖斃賊以百餘計。我軍亦傷亡三十餘人。此水師九月二十七日及十月二十八日接仗之實在情形也。據各營稟報前來。伏查周鳳山一軍。士卒新附。臣每飭其加意防維。相機進取。茲該逆以大股數路來犯。幸分投抵禦。大挫兇鋒。我軍士氣。爲之一振。湖口陸營。經李元度設計招降。離其黨羽。陸續投誠之僑官僑書。已七十餘人。此次逆首受傷。稍據積憤。臣惟有督飭各路。堅壁固守。伺隙而動。以期力破賊壘。戰亡兵勇。查明照例辦理。所有九江湖口水陸各軍接仗各緣由。恭摺馳奏。伏乞皇上聖鑒訓示施行。謹奏。

新昌萬載逆匪攻陷瑞州臨江摺 咸豐五年十一月二十一日

奏爲新昌萬載逆匪分股攻陷瑞州臨江。信近省城。急調副將周鳳山九江全軍馳往堵剿。並抽撥水師嚴防省河情形。恭摺馳奏。仰祈聖鑒事。竊臣迭接署江西巡撫陸元烺來咨。及官紳函稱。義寧股匪竄入新昌。安福股匪初竄分宜。繼陷萬載。十一月初十一等日。復分股將瑞州臨江兩府城池攻陷。江西候補縣李錕劉希洛。所帶之平江勇在瑞州與賊接仗。亦多傷亡。李錕劉希洛俱無下落。續調新授贛南道耆齡帶饒州防勇二千名回省防剿。並囑臣酌派楚師勁旅赴援等語。又據各路探報。李錕劉希洛俱已陣亡。並稱此次賊犯江西。實係僞翼王石達開僞豫王胡以冕僞翼丈黃姓僞丞相曾姓張姓率衆二三十萬人。大舉內犯。九月間。從安慶上竄湖北樊口登岸。取道金牛西上。九月二十五日。據頭堡之挫。參將彭三元等殉難。十月初五日。通城之挫。知縣李原濬等殉難。十五日。義寧之挫。總兵劉開泰殉難。此次瑞州之挫。知縣李錕劉希洛等殉難。係與石逆大股相遇。該逆往來於湖南江西三省交界之區。蹂躪猖獗。逆氛極惡。萬載股匪自湖南茶陵而來者。已與粵匪合而爲一。各等情。臣查石達開爲賊中著名驍悍之魁。上年在湖口與臣軍水陸接仗。詭計百端。卒挫我師。今乃大舉內犯。又附以茶陵股匪。自非厚集勁旅。不足以資堵剿。謹就臣愚見。調遣布置。分條具奏。伏乞訓示。

一、臣虞陸路兵勇。除羅澤南一軍。業經奏明調赴鄂省外。惟副將周鳳山九江一軍。久征慣戰。較爲得力。臣接瑞臨失陷之信。卽於十五日飛調周鳳山統帶全軍。前往堵剿。已於十八日自九江拔營。由江西省城進攻瑞州矣。臣亦知濬防喫重。不宜輕撤。奈石逆大股竄踞瑞州。恐其肆擾腹地。江省難以抵禦。臣處別無重兵。不得不先其所急。暫解九江之圍。後勦瑞臨之賊。

一、江省水師。係河南候補知府劉于濬統帶。八九月間。隨臣紮泊南康。後因茶陵股匪竄至安福。臣調劉于濬帶水師至吉安防堵。旋因萬載新昌先後竄陷。署撫臣陸元烺又調劉于濬至樟樹鎮防堵。今石逆大股攻陷瑞州。臣恐江西水軍過於單薄。又在青山楚軍水師內抽調賀虎臣一營。帶戰船三十號。駛赴省河。與劉于濬協同防守。梭巡上游。一帶無使該逆東渡。直薄省城。

一、羅澤南一軍。係兩湖巡撫奏調奉旨飭赴湖北剿賊。入楚以後。克復通城。克復崇陽。大捷牟樓峒。克復蒲圻。戰功屢著。茲石逆大股猝來。江西內郡。恐周鳳山一軍尙難迅速撲滅。江省官紳。皆思調羅澤南回江會剿。以

壯聲援。臣思湖北通城縣爲三省適中之地。與湖南之巴平。湖北之崇蒲。江西之義寧州。相去皆在百里內外。已飛飭羅澤南在於通城地方駐紮。俾石逆大股有所牽掣。顧忌不敢深入江西腹地。三省有急。可以兼顧。如周鳳山一軍不敷勦辦。再調羅澤南由義寧回江助勦。以爲後勁之繼。如瑞臨之賊。迅就撲滅。則羅澤南由通城回攻武昌。亦不過二百餘里。

一、贛南道耆齡督同游擊遮克敦布帶贛勇二千。在饒州防堵。聯絡紳團。屏障東北。深得民心。署撫臣調耆齡至吉安義寧等處防勦。饒州士民來臣營兩次。稟請該道留饒。以重東路之防。情詞至爲懇切。旋因瑞事愈急。署撫臣飛檄飭催耆齡令遮克敦布先帶贛勇一千。馳赴省城。今瑞臨并陷。九江重兵已撤赴省城。局勢大有變更。則遮克敦布之兵。自應仍回饒州。以嚴東北之防。查江省八九十月以後。土匪自湖南茶陵而來。粵逆自湖北通城而來。西邊吉袁瑞臨四府。並遭蹂躪。此時惟當防守東北。力保饒廣撫建四府。庶錢糧有可徵之處。奏報有可通之路。保全半局。冀以挽回全局。臣屢次函商署撫臣陸元愷。留耆齡久駐饒州。無庸調往他處。近又兩次咨商。請飭遮克敦布帶贛勇仍回饒州。防堵東路。以免疏虞。

以上各條。謹就目前情形。酌量布置。是否有當。伏乞皇上聖鑒。訓示指授機宜。再本年自三月以後。奏報均由湖南馳遞。此次臨江失陷。道途梗塞。奏報仍由浙江馳驛呈遞。合併聲明。謹奏。

九江湖口水陸勝仗摺 咸豐五年十一月十一日

奏爲九江陸軍拔營。賊乘間來攻。接仗獲勝。濬軍既撤。賊衆分撲湖口。青山陸營。我軍兩次大勝。恭摺具奏。仰祈聖鑒事。竊瑞臨兩府失陷。飛調副將周鳳山九江全軍。由省城馳往堵勦。業經奏明在案。臣料九江撤營之時。該逆必出城猛撲。既撤之後。該逆必合攻附近之青山陸營。與湖口陸營。均經諄飭嚴防。詎該逆探知周鳳山將於十八日拔營。十七日濬賊由東門約出八九百人。分股擾犯。我軍迎擊。賊退至城根。周鳳山戒勿遠追。將次收隊。賊又回敵。南門湖內。亦出賊划多隻。各營旋進旋伏。每追則賊退回。如是者數次。該逆忽前忽卻。意在罷勞我師。周鳳山與都司滕國獻畢金科商定分兵要截。遂帶勇由中路首先衝鋒。並調參將阿達春。都司李新華。帶勇由左路進勦。守備岳炳榮。千總黃玉芳。呂國恩。帶勇由右路進勦。分途鈔襲。伏兵齊起。沿途共殺賊二百餘名。呂國

恩亦受礮傷殞命。賊衆敗退入城。其時南門湖內賊划開礮拒戰。都司周岐山磨得陞帶勇由湖汶施放連環鎗礮。擊沈賊船二隻。斃賊十餘名。船隨駛出湖外。申刻收隊。查點兵勇。傷亡二十九名。此十七日九江陸軍拔營。賊乘間來攻。接仗獲勝之實在情形也。十八日。濬師既撤之後。濬賊千餘人。與湖口梅家洲之賊。三處聚集。大舉而犯湖口。李元度之營。二十日黎明。分七路來撲。其由山家市三股至蘇官壩者。爲賊之正兵。由酒坊嶺斜趨馬影橋者。爲賊之疑兵。由菱角塘勞家渡列三路直趨營前。兩岸者。爲賊之奇兵。合衆三千餘人。黃旂遍野。馬數十匹。往來衝突。我軍堅持不動。賊以正兵直犯蘇官壩。逼近營牆。燒更棚一座。左營開礮轟斃三賊。該逆仍悍立不退。李元度以賊氣方盈。戒勿輕動。賊之奇兵千餘人。愈逼愈近。時我軍於營前築兩甍。蓄水環護。以爲外壘。賊近甍首。盆涌而前。我軍隔港鎗礮輪轟。該逆不敢過甍。忽別股從下游躍馬揭衣而渡。搶近山巔。勢極兇猛。李元度令從九彭斯舉率各哨突從山下包鈔。知縣胡蓋南率左營分路圍截。前營各哨李大雄等。亦怒馬衝鋒。短兵相接。三路合擊。立將過港之賊殺斃二十餘人。奪馬三匹。逆黨斃水奔逃。彭斯舉等渡港跟追。甍上之賊亦敗。李元度遂率諸軍過橋。將大股正賊擊退。追至五里橋。適守備牟瀛。率右營遙從馬營橋包鈔而至。前後夾擊。殺賊二百餘名。賊之在甍隄者。猶轟礮抵禦。我軍奮力死戰。呼聲動地。陣斬騎馬賊十餘名。轟斃殺斃三百餘人。賊遂狂奔。不復成隊。我軍乘勝追殺。屍橫十餘里。填坑滿谷。直至山家市接應之賊。踵至。各營轟礮抵禦。迨合十餘次。彭斯舉率勇復繞路圍鈔。牟瀛胡蓋南各截一路。賊復大敗。追至大嶺黃土嶺。餘賊退奔入巢。其潛匿民房者。搜殺二十餘人。我軍捲塘收隊。仍分三路。振旅而還。是日礮賊約七百餘名。生擒十一名。奪獲號褂旗械四百餘件。此二十日濬湖賊衆合攻湖口大戰獲勝之實在情形也。青山陸營與湖口李元度之師。夾湖而軍。本以護衛水師。臣派同知林源恩。都司黃虎臣兩營。同駐該處。與水師相依。陸勇僅及千人。距九江四十里。前此專恃濬軍以爲聲援。自濬師既撤。青山陸營單薄無援。深以爲慮。二十日湖口戰勝之後。卽調軍功胡應元管帶平江勇六百人。渡湖合駐青山。以資堵禦。十二月初三日。九江小池口梅家洲三處之賊。約二千餘人。攻撲青山陸營。並舟四十餘號。同時上犯。賊之正兵。據姑塘蔡家嶺。其東一路。沿湖岸而上。西一路屯集廣信橋。黃旗漫山。勢甚兇猛。黃虎臣林源恩等商定各帶隊向穆家埂分途進剿。黃虎臣先敵廣信橋一股。濬派二百餘人。伏於左側松林內。約聞號

敵即行截殺。林源恩直趨蔡家嶺，別遣兩哨循湖岸繞出姑塘之背，廣信橋之賊見我軍猛進，列陣抵禦，號發松林內伏兵衝出，呼聲震天，包鈔賊尾黃虎臣合師圍勦，短兵相接，各勇冒死陷陣，銳氣百倍，殲斃悍賊四百餘名，內有僞先鋒謝姓，僞將軍鄧姓二名，餘賊狂奔，自相踐踏，我軍追及斃匪多名，林源恩方在蔡家嶺與賊相持，大呼登山，賊旋下嶺抵敵，我軍直衝而入，賊隊散亂，立斬騎馬賊二名，賊敗竄，又追殺十數名，胡應元扼守要口，見兩處賊敗，乘勢邀擊，亦殺數賊，計陸軍殺賊將及五百人，奪獲旗幟軍械六十餘件，是日逆舟上犯，辰刻已抵姑塘，我水軍戰船駛下，鎗礮輪轟，相持不決，陳炳元令各水營作爲敢退，俾賊尾追，誘至湖寬水深之處，回棹大戰，萬礮齊轟，約三時之久，該逆紛紛敗竄，我軍追奔三十餘里，至盃山，月出，始行收隊，此初三日青山水陸接仗，獲勝之實在情形也，據各營先後稟報前來，臣伏查九江湖口梅家洲小池口四處逆匪，分合靡常，善於避堅擊瑕，知我軍拔營倥偬，不暇迎敵，則先一日出偏師以渡我，知潯陽大營已撤，湖口青山兵勇單薄，則合全力以乘我，詭計百端，不可究詰，茲幸三次獲勝，潯賊不敢出巢內犯，或可保全江省之北路，陣亡藍翎千總呂國恩，請敕部從優議卹，傷亡兵勇查明照例辦理，所有九江陸軍拔營，賊乘間來攻，接仗獲勝，及湖口青山兩次大勝緣由，恭摺具奏，伏乞皇上聖鑒，訓示施行，謹奏。

李錕劉希洛等請贈卹片 咸豐五年十二月十二日

再江西前署宜春縣知縣李錕，前署德安縣知縣劉希洛，經前撫臣陳啓邁飭委管帶平江勇各一營，春間賊陷弋陽廣信，劉希洛帶勇八百名，隨同羅澤南往勦，克復兩城，李錕之勇則隨臣駐紮南康，五月令往勦洗都昌馬家壩一帶賊巢，七月望後，同知李元度進攻湖口，李錕劉希洛之勇均令同往，在段家鋪文橋蘇官渡等處，屢戰獲勝，七月二十四五等日，分路夾勦，攻破湖口縣城，該令等親冒礮石，屢著戰功，方冀再加歷練，可成勁旅，詎九月底茶陵土匪，肆擾吉安之永新安福萬載等縣，而義寧石達開股匪復竄踞新昌，署撫臣陸元煊迭次咨商，調李錕劉希洛之勇，由湖口先後馳赴援勦，旋因瑞州緊急，調往堵禦，紮營離城二里之高岡，十一月初十日，賊衆數千來犯，我軍迎擊，殺賊五六百名，生擒七十餘名，賊退駐十五里外，其夜新昌悍賊畢至，十一日黎明，賊萬餘人來瑞州，分五路撲營，劉希洛率把總李進發分途出勦，斃匪四百餘名，賊愈聚愈多，四面圍逼，劉希洛親執桴

鼓督陣。各勇鎗礮輪轟。繼以刀矛。自辰至申。血戰數時。火藥俱竭。劉希洛叱呼親勇。衝突賊陣數次。身受矛傷。血流被體。坐馬亦受傷倒地。棄馬步戰。手刃三賊。力竭遇害。李鋹亦被賊圍數時。以鎗礮前後抵禦。賊圍逼愈緊。拋擲火蛋。焚燒營盤。李鋹手劍突圍而出。率親兵數人。苦戰逾時。賊湧如潮。矛戟叢刺。亦力竭陣亡。伏查劉希洛李鋹均由拔貢舉人。署理江西知縣。素著循聲。臨危慷慨。忠勇可嘉。其殉難情形。業由陸元煊具奏。請旨優卹在案。惟該令等疊戰出力。均擬彙案保獎。尙未出奏。據劉希洛之家丁及李鋹之子李蔭雯來營具稟。理合據稟奏聞。可否將劉希洛李鋹各加贈知府銜之處。出自天恩。又據稟稱劉希洛之胞兄祁陽生員劉希懌。於咸豐四年七月在德安力戰陣亡。相應請旨飭部一併議卹。以慰一家之忠魂。而作全軍之士氣。謹附片具奏。請旨。

報周鳳山軍克樟樹片 咸豐五年十二月十二日

正封摺聞。接據省信。周鳳山一軍。於初四日在樟樹鎮大獲勝仗。踏平兩岸賊壘。殺賊千餘人。水師拆毀浮橋。盡燒賊船。立將樟樹鎮克復。日內進兵臨江府。勦辦大股賊匪等因。除查明開仗情形。詳細奏報外。合先附片。仰慰宸廑。謹奏。

水陸會克樟樹鎮及新淦縣城摺 咸豐五年十二月十九日

奏爲周鳳山一軍會合水師。大獲勝仗。克復樟樹鎮。旋收復新淦縣城。恭摺具奏。仰祈聖鑒事。竊水陸兩軍。攻克樟樹鎮。焚燒賊營賊船。臣甫得捷報。卽經附片先行奏聞在案。茲據周鳳山劉于濬等先後稟稱。十一月二十七日。周鳳山在江西省城探聞賊中籐牌手最爲凶悍。卽預製鈎連鎗。明定賞格。有殺斃籐牌手者。予以重賞。本月初三日。行抵臨江界。距樟樹鎮十五里。與水師劉于濬賀虎臣等會商。次早進剿。探知逆匪。於該鎮西南岸。紮營五座。高牆深壕。密釘竹簽。以拒陸師。對河東北岸。搭浮橋有賊營一座。兼築礮台。以抗水師。須分投夾擊。使賊首尾不能兼顧。庶可制勝。初四日黎明。周鳳山派都司滕國獻周岐山唐得陞李新華守備黃玉芳等。帶勇攻西路賊壘三座。參將阿達春。都司畢金科岳炳榮等。攻南路賊壘兩座。劉于濬與經歷賀虎臣。各帶師船分攻東北岸一股。水陸並進。該匪傾巢而出。約三四千人。周鳳山諸將奮勇當先。鎗礮刀矛。輪轟叢刺。疊戰數時。賊之籐牌手。驍勇善戰。急難取勝。周鳳山調鈎連鎗數隊。疾進破之。殺賊五六百人。賊衆奔潰。我軍追擊。擲放火彈火箭。立將

賊巢五座燒燬。又斃數百人。其藏匿民房者。未及窺搜。當於該鎮兩頭。縱火焚賊無數。餘匪突圍而出。由浮橋逃竄。我軍追至。匪衆皆覺水逃命。時東北岸一股。堅拒逾時。我軍僅有水師。無陸兵接應。劉于濤等與賊鎗礮對轟。急難攻破。令軍功李廷棟疾駕小划。首先登岸。用火彈噴筒。連賊營後路拋擲。登時火發。千總蔡康業李逢春率諸勇蜂擁衝入。賊寨營逃去。李逢春等搶登礮台。將守礮賊殺斃。奪礮三尊。立將賊營燒燬。餘賊或逃入村莊。或爭渡浮橋。當派千總余化南與賀虎臣等將戰船排成一字。連放鎗礮。對橋轟擊。該逆窮蹙。自相踐踏。死者不下百餘人。我水師立時斫斷浮橋。直衝而過。焚燒賊船百餘號。並奪新改之戰船數號。一併燒燬。賊之奔匿村莊者。陸軍又搜擒二十餘名。均卽正法。是日水陸共殲賊一千餘名。屍橫遍野。奪獲偽印旗幟軍械無算。此十二月初四日克復樟樹鎮。躡平兩岸賊壘。拆橋燒船之實在情形也。初八日。周鳳山行抵灌溪。聞新淦縣城有賊千餘人盤踞。該縣爲通撫州府及省城要道。若舍此徑勦臨江。恐賊由東岸竄擾。蔓延撫建。必須先克新淦。乃無後路牽制之虞。遂於初九日。約同水師星夜進攻。適臨江府知府史麟晉。署新淦縣知縣李作士。代理清江縣知縣金漢。帶勇會剿。我軍銜枚疾進。詎該逆聞風懼怯。卽於初十日黎明。在縣城四門放火。紛紛渡竄臨江。我軍跟蹤追擊。斃賊十餘名。水師拋擲火球。燒燬浮橋。亦斃賊多名。其登岸之賊。狂奔遠遁。我軍入城安撫居民。此初十日水陸各營會攻新淦收復縣城之實在情形也。臣伏查僞翼王石達開占據臨江府。匪黨分布瑞州新昌新淦奉新及袁吉各屬。又以精銳屯聚於樟樹鎮。扼省城之咽喉。意在蠶食腹地。窺伺省垣。且攻陷樟鎮未久。卽已仿造戰船。謀占上游。逆計實爲凶狡。周鳳山初統此軍。驟當大敵。臣深恐其難遽得手。茲幸先破樟鎮。次收新淦。仰仗天威。軍聲已振。刻下進攻臨江。臣飭其加意謹慎。勿因勝敵而驕。力求自固。以殲巨寇。此次水陸弁勇奮猛出力。籲懇皇上天恩。容臣擇尤彙保。以示鼓勵。傷亡各勇。查明照例辦理。所有水陸兩軍克復樟樹鎮。及收復新淦縣城緣由。恭摺馳奏。伏乞皇上聖鑒。訓示施行。謹奏。

彙保義寧湖口兩案摺 咸豐五年十一月十九日

奏爲遵旨彙保陸軍克復義寧州城。暨攻破湖口縣城出力員弁兵勇開單請獎。恭摺奏祈聖鑒事。竊七月間逆匪攻陷義寧州城。寧紹台道羅澤南督帶湘勇馳往堵剿。在梁口接仗獲勝。遂由間道至乾坑鬚嶺等處。連日血

戰。殺賊六七千名。克復州城。嘗將出力人員。奏請彙保。奉旨允准在案。又七月間。候選同知李元度等。由段家鋪文橋蘇官渡等處。與賊接仗。疊次獲勝。會同水軍。攻破湖口縣城。僅餘下鐘巖石壘未破。奏明請獎。亦奉諭旨准保在案。至江西湖南辦理軍務之官紳。如南昌府知府史致諤等七員。臣曾附片奏請歸入義寧案內。一併請獎。除禮部主事胡大任。金華府知府彭玉麟。業由署湖北撫臣胡林翼另案奏保外。茲據羅澤南等開單稟保前來。理合彙列清單。恭摺籲懇恩施。伏乞皇上聖鑒。訓示施行。謹奏。

疊奉諭旨。縷陳各路軍情摺。咸豐六年正月初九日。

奏爲疊奉諭旨。縷陳各路軍情恭摺覆奏。仰祈聖鑒事。竊臣疊次承准軍機大臣字寄。咸豐五年十一月二十四日奉上諭。御史蕭浚蘭奏江西省南北被擾。請擇要嚴防一摺。據稱在籍侍郎黃贊揚所帶兵勇。及會國藩營練勇四千名。皆駐紮固江鎮。僅顧吉安一面等語。著會國藩陸元烺體察情形。分布要隘。勿令竄匪四出滋擾。等因。欽此。臣伏查石埭開大股賊匪。由湖北竄入瑞臨。係在十一月初十以後。茶陵另股土匪。由湖南竄入吉袁。係在十月以前。其時臣並未調派兵勇前赴固江。黃贊揚專辦捐務鹽務。亦並無帶兵之事。假令固江鎮有此項兵勇。臣與陸元烺黃贊揚斷無不會摺馳奏之理。此該御史蕭浚蘭所奏傳聞失實者也。又准十月十二日奉上諭。臨江踞城之賊。亦應急籌分剿。現派兵勇。均係前往瑞州。尙未計及臨江。本日廉兆綸奏稱臨江竄匪。漫無制遏。裹脅日衆。尤恐其互相掎角。牽綴我軍。著會國藩陸元烺妥籌兼顧。等因。欽此。竊臣前調周鳳山一軍。飭令先攻瑞州。後勦臨江。以瑞州逼近省垣。僅百二十里也。厥後周鳳山至省。與陸元烺等熟商瑞臨在河之西。與省城尙有一水之隔。樟樹鎮在河之東。於省城尤爲肘腋之患。遂令瑞州不攻。改爲先攻樟樹。次勦臨江之策。迨屯復樟樹一鎮。新淦一縣。本可渡河以勦臨江矣。因吉安被圍緊急。司道等移文周鳳山。囑其赴援。以解吉安之圍。而臬司周玉衡。知府陳宗元。在吉安圍城之中。亦飛書請援于周鳳山。迫切待命。往返耽延。遂逾二旬。現臣與撫臣文俊函商省城爲根本之地。瑞臨爲切近之災。決計先勦臨江。無得以四處告警。東瞻西顧。徒延時日。此周鳳山一軍未克遽赴瑞州。與臣前奏不符之實情也。又奉上諭。會國藩現駐南康。存營兵勇。共有若干。能否嚴拒九江之衝。卽著妥籌布置。不可專顧一路。等因。欽此。伏查九江爲陸路入省之驛道。南康爲水路通省之總匯。青山距兩府城。各四十餘里。臣之水軍。久駐青山兩岸。皆以陸軍護之。實與九江呼吸相通。自周鳳山傳軍撤去之後。九江小池口湖口梅家洲四處之賊。日夜環伺。十一月二十日東岸湖口大戰。臘月初三日。西岸青山大戰。幸獲全勝。均經奏明在案。厥後又有土匪二千餘人。自湖北與國洲而來。竄據德安縣城。去來不定。聚散無常。

臣處青山老營防禦五處之賊。陸路存營之數。除江西協防兵勇。及湖口紳士捐勇外。不過二千九百人。水路存營之數。除撥赴省河。及分巡吳城外。不過二千三百人。兵力至爲單薄。而地形又覺散漫。此臣處勉力支撐之情形也。伏念臣軍自岳州而下。水陸萬餘人。合併一支。從未分散。去歲以來。陸軍分爲三支。羅澤南率援鄂之師。五千人爲一支。周鳳山接統塔齊布之舊部。四千人爲一支。李元度等率平江各勇三千人。爲老營之一支。水軍分爲兩支。武昌十營。楊載福所統者爲外江一支。鄱湖八營。臣新調彭玉麟來此統帶者。爲內湖一支。既已分而爲五矣。而李元度駐湖之東。又抽撥平江勇虎勇千餘人。駐紮西岸。是陸軍三支之外。又分一小支。外江則李孟羣帶船六十號。別入襄河。內湖則前撥船三十號外。頃臣又飭彭玉麟帶船三十號。馳赴臨江。是水師兩支之外。又分兩小支。愈分則人數愈寡。愈析則氣勢愈弱。其在湖北者。距臣八百餘里。在臨江者。距臣五百餘里。雖欲急圖合併。而勢有所不能。至于行軍之道。擇將爲先。得一將則全軍振興。失一將則士氣消沮。甲寅年秋冬之間。臣軍所以長驅千里。勢如破竹者。以陸路有塔齊布羅澤南。水路有楊載福彭玉麟諸人。軍中士卒。皆以塔羅楊彭爲法。沿江村市。亦知有塔羅楊彭之稱。故能旂旗生色。席卷無前。不幸塔齊布中道殞謝。而羅澤南楊載福彭玉麟三人者。又分往湖北臨江。不克遽聚一處。而後起之才。如周鳳山李續賓李元度數人者。又未知果能血戰。名仰邀恩。眷否。臣久困一隅。兵單將寡。寸心焦灼。愧悚難名。惟當督飭老營水陸嚴防五路之賊。一俟湖北臨江兩處勦辦得手。再圖會合。歸併一軍。掃蕩羣醜。以期仰慰宸廑于萬一。所有疊奉寄諭。縷陳各路軍情。恭摺由驛五百里覆奏。伏乞皇上聖鑒。訓示施行。謹奏。

周鳳山陸軍分兵小挫摺 咸豐六年正月二十二日

奏爲周鳳山陸軍分兵小挫一次。旋以全隊與賊接仗。大獲全勝。樟樹水師戰勝三次。恭摺馳奏。仰祈聖鑒事。竊周鳳山一軍。紮駐新淦。因吉安被圍。迫切請援。遲疑未定。撫臣文俊。與臣函商。以瑞臨逼近省垣。決計先勦臨江。業經奏明在案。當撫臣與臣往返函商之際。周鳳山未經奉札之前。陸軍在新淦縣。水軍在樟樹鎮。中隔七十餘里。兩軍不相聯絡。周鳳山因撥岳炳榮黃玉芳帶勇八百人。圍駐樟樹。護衛水師。二十八日到鎮。詎臨江之賊偵知官兵分支。人數單薄。遂于除夕元旦。由上游偷渡。悍賊四五千人。初二日寅刻。夾撲岳炳榮等之營。岳

炳榮隨塔齊布日久。素稱驍健。匹馬衝突十餘次。奈衆寡懸殊。漸退入營。該逆層層包圍。自卯至午。火藥罄盡。營盤被陷。鍋帳全失。士卒傷亡二百餘人。岳炳榮衝出重圍。奔至豐城。收輯餘勇。此陸軍分支。初二日挫衄之實在情形也。該逆乘勝直上新淦。冀撲周鳳山之大營。周鳳山聞警。亦率全軍折回樟樹。初三日與賊遇于瓦山地方。該處地勢寬敞。東有山嶺數處。下爲平原。西邊沿河長堤一道。隄內係大樹林。樹之左旁。民房頗密。該逆分爲六股。隄上二股。樹林四股。周鳳山傳令各營先據山嶺。紮住營盤。以高擊下。自督都司陳國猷率全科擊樹林之去。兩股。都司周岐山唐得陞擊樹林之右兩股。參將阿達春。都司李新華。擊隄上兩股。各營迎頭截尾。奮勇向前。六處逆賊。鎗礮火箭火毬。紛紛擲放。我軍奮不顧身。衝入賊隊。刀矛對擗。鏖戰逾時。共殺賊一千餘名。賊衆敗竄。沿河奔逃。各營奮力追勦。將二十里一路殲斃。又三四百名。逼入河中。溺斃者無數。生擒八十餘名。訊明正法。奪獲右拾承宣僞印一顆。黃馬褂多件。鎗礮刀矛旗幟。號衣各數百件。騾馬十四匹。凱據生擒賊犯供稱。此股賊匪四千人。內有長髮老賊一千五百餘名。皆係能戰好手。僞翼王石達開特調令過河打仗。歸右拾承宣張賊管帶。初三之戰。被我兵斬馘殆盡。脫逃得歸臨江者。實已無幾。此初三日陸軍在瓦山大戰獲勝之實在情形也。當初二日賊撲樟樹陸營之時。水賊亦有戰船順流而下。西岸又有陸賊二千人助之統帶。江軍水師。南河知府劉于濤派千總李逢春蔡康業擊江中之賊舟。余化南等擊東岸之陸賊。吳步黎等擊西岸之陸賊。旋見陸營火起。岳炳榮等陸兵失利。劉于濤自上戰船直前接應。喊聲雷動。分兩岸窮追。旋遇賊船大小三十五號。我軍四圍包裹。賊抵敵不住。紛紛斬斷礮索。棄船下水。溺死者不計其數。在船者盡被殲斃。奪得長龍賊船四號。燒燬三號。西岸賊築礮台二座。我軍齊礮攻擊。賊死守抗拒。劉于濤傳令有人奪一尊礮者。賞銀二十兩。弁勇奮不顧身。蜂擁登岸。各手刃數賊。奪大礮十一尊。火藥十餘石。僞印一顆。刀矛旗幟。號衣無數。此初二日劉于濤水軍獲勝之實在情形也。臣自初聞瑞臨二府失守之信。卽派賀虎臣戰船三十號。馳往與劉于濤水師同防河面之賊。旋聞賊在瑞臨峽江等處。隨地造船。恐我水軍單薄。又飭記名道彭玉麟帶二十餘船繼往。先後奏聞在案。彭玉麟初四日抵樟樹鎮。初七寅刻。賊用破舊大船。自上游放下。意圖衝動我營。而戰舟與小划繼之。彭玉麟督同都司孫昌國帶舢板十餘號前進。賊舟退卻。進逼臨江河口。賊之戰船民船數十號。岸上賊壘三座。以大礮抬鎗護之。我軍連環

專擊賊以小划抵敵。而其大者盡退入口內。挽繚上行。我軍盡奪小划。擊斃多賊。乘勝衝過賊壘。追入內河。搶賊糧船二隻。折毀浮橋。奪杉木千餘株。初九日。彭玉麟督同孫昌國賀虎臣至臨江河口。攻打賊壘。羣子如雨。斃賊甚多。該逆棄壘逃。退入城。各水勇登岸踏毀賊牆三座。望樓一座。此水師初七日兩次戰勝之實在情形也。伏查瑞臨袁州三府淪陷。吉安被圍。西路業已糜爛。省城與撫建各府。在贛水大河之東。久爲該逆所窺伺。幸去臘有樟樹之克。今春有瓦山之捷。賊匪兩次東渡。均被我軍擊敗。水師扼泊樟鎮。疊獲勝仗。東岸當可保全無虞。日內浮橋造成。陸師西渡。卽當激勵將士。迅克臨江。以慰聖主懷南服之意。所有陸軍分兵小挫。周鳳山全隊大勝。暨水師戰勝三次各緣由。恭摺由驛馳奏。伏乞皇上聖鑒。訓示施行。謹奏。

黃虎臣等攻九江勝仗片 咸豐六年正月二十一日

再臣駐紮南康。水師前隊紮泊青山。陸軍則黃虎臣等紮西岸之青山。李元度等紮東岸之湖口。防禦九江小池口湖口梅家洲四處之賊。兵數較寡。勉力支撐情形。兩次奏明在案。入春以來。黃虎臣等熟商與其株守老營。示之以虛弱。不如進攻九江。示之以不測。遂于正月十八日丑刻。分兩路進攻九江府城。都司黃虎臣。同知林源恩。率虎勇平勇由東路周家嶺進。武生黃之一由西路吳障嶺進九江。後營游擊曾昭麟帶官兵二百繼之。辰刻行抵東城。多方挑戰。該逆負嵎不出。黃虎臣飭哨官李大雄伏于左。詹永清伏于右。自帶小隊近前誘敵。飭哨官張淦同各勇作爲敗退。該逆始由小南門開壁而出。有自大東門鎚城而下。誘至路徑歧隘之處。黃虎臣督各弁回馬大戰。兩路伏兵衝出。勇氣百倍。該逆回奔。追至城根。奈城上礮石過多。僅斃二十餘賊。當東城接仗之時。西門之賊。出隊三百餘。由接官亭至鳳凰山。意圖鈔東路官軍之尾。黃之一自西突出。率弁勇衝入賊隊。短兵接殺。連斃三十餘賊。並殺僞十五軍副總制。收獲僞印一顆。賊遇潰散。乘勢直追。該逆復糾悍賊五百餘。賊船八號。水陸猛撲。我軍且戰且誘。作爲退走。俟與曾昭麟接應兵近。亦回旗大戰。奮不顧身。復入賊營。殺賊八十餘名。瀾水者不計其數。奪黃旗十四面。小鎗刀矛數十件。未刻收隊。此次兵勇僅及千人。進攻瀾水城悍賊。以少擊多。兩路均以伴敗取勝。可否獎拔數人歸于樟樹鎮案內彙保之處。出自天恩。理合附片奏報。謹奏。

請抽上海釐金片 咸豐六年正月二十一日

再臣軍在江西境內者萬一千人。每月需餉六萬有奇。而入款約有三端。一曰奉旨允撥之漕折。二曰黃贊湯督辦之捐輸。三曰借行浙引之鹽務。今賊匪大勢全注江省。西路四府蹂躪殆遍。漕折難以催徵。捐輸不能措辦。鹽引甫經到岸。無處銷售。三者來源俱竭。岌岌有可危之勢。臘月餉項。即係搭放鈔票一半。當此攻勦吃緊。口食不保。深恐飢疲潰散。大局決裂。而不可復振。查近年各處籌餉。惟抽取釐金。尙屬有利無弊。如揚州之仙女廟。浙江之北新關。及湖南湖北各市鎮行貨。抽釐接濟軍餉。均經奏明在案。目下賊氛逼近。無處可以抽辦。近省惟江蘇之上海縣。商賈雲集。貨物山積。並未抽取釐金。合無仰懇天恩。飭下該省督府。即飭上海道及府縣等官。曉諭紳民商旅。按貨抽釐。撥送臣處。專濟楚軍之餉。如蒙俞允。請旨敕下。現在浙江辦理釐務之前任杭嘉湖道顧椿。江蘇松江府知府袁芳瑛。駐紮上海專司其事。若得此項釐金。接濟臣營。不特現在江西境內之兵勇可以贍給。即將來羅澤南楊載福水陸兩軍。與臣會合。亦無虞餉項之缺乏。微臣才薄智疏。若得專心于職守。機宜不復以籌餉之事分縈憂慮。亦不復以請餉之奏屢瀆聖聰。感激天恩。曷有既極。所有上海抽取釐金。專濟楚軍餉項緣由。謹附片具奏。請旨。硃批。另有旨。欽此。」

會籌各路堵剿情形摺 咸豐六年二月二十一日

奏爲會籌各路堵剿情形遵旨覆奏。並請敕下廣東迅撥重兵防守贛州。恭摺仰祈聖鑒事。二月初五日。承准軍機大臣字寄。咸豐六年正月十七日奉。上諭。文俊奏江西各屬賊勢蔓延。請飭催兵撥餉一摺。已諭知葉名琛。柏貴。何桂清。趕緊籌款撥解。並諭知駱秉章。添調兵勇。速飭劉長佑出境應援矣。江西逆匪。久踞瑞州臨江。分擾袁州吉安各屬。賊勢披猖。人心惶惑。恐兵單餉絀。固係實在情形。文俊甫經到任。於該省地勢軍情。一時未能周悉。現當萬分棘手之時。倘布置稍疏。難免貽誤。曾國藩自抵江西。爲時已久。賊情亦所深悉。此時江西匪蹤。幾欲蔓延全省。既不能處處調兵。又不能顧此失彼。自應擇其最要之處。先爲攻勦。現在瑞州臨江袁州吉安四處。究竟何處賊情最爲凶悍。周鳳山一軍。既由新淦進兵。自應急勦臨江瑞州。以殄賊渠。周汝筠一軍。現阻泰和。尤應設法疏通。俾得迅抵吉安。劉長佑一軍。離楚後。應由何路進勦。方能扼要。著曾國藩即與文俊妥速會商。務籌全局。不可徒事張皇。亦不可專顧一處。軍情變幻靡常。大勢所關。應從何處下手。則身在行間者。必能挈其綱領。該

侍郎與該撫酌度機宜。即著會同馳奏。以慰廛念。至德安縣城據文俊奏稱。已被潯城賊匪竄踞。是否周鳳山全軍遠撤。致有疏失。抑或居隆阿等堵勦不力。致該逆復有竄出。此路一有疏懈。關係長江大局。該侍郎等近日如何布置。並著速行奏報。將此由六百里各諭令知之。欽此。一仰見聖主體懷南服。宵旰焦勞。指示機宜。燭見萬里。臣等欽佩之下。尤切悚惶。伏查江西全省。以贛水爲中路之經。上發于贛南二府。下達于鄱陽一湖。吉袁瑞臨。及極北之九南兩郡。皆在贛水與鄱湖之西。廣饒撫建。及省會寧都州。皆在贛水與鄱湖之東。一水中分。而兩岸州縣之多寡。地形之大小。蓋略相等。其袁州臨江二府之河。名曰袁江。至樟樹鎮而匯于贛河。樟樹鎮者。西近瑞臨。東接撫建。兩岸之關鍵。省城之咽喉。諭旨垂詢最要之處。臣等以爲此時形勢。實以樟樹鎮爲最要。臣國藩飭周鳳山陸軍彭玉麟水軍紮駐該鎮。臣文俊又調周尊彝林葆等之陸軍。劉于濤之水師。隨同駐紮。用全力扼守樟樹鎮。以保東岸。以衛省垣。前此正月初六日。周鳳山由新淦回駐樟樹鎮之時。本擬迅速西渡。進攻臨江。因搭造浮橋甫成。爲二十一日狂風所壞。而東岸無重兵扼守。又恐一經渡河。頓兵堅城之下。反增東顧之憂。此水陸嚴扼樟樹鎮未遽西勦之情形也。諭旨垂詢何處賊情最爲凶悍一節。查各路探報。並搜獲賊中文書。據稱金陵逆匪。由湖北通城入江境者。以僞翼王石達開爲首。僞檢點賴裕新攻陷瑞州。僞翼貴丈夏姓。僞豫王胡以晃。攻陷袁州。僞春官丞相張遂謀。夏官副丞相曾姓。先攻臨江。後攻吉安。粵東另股土匪。由湖南茶陵等處入江境者。以周培春人數爲最多。又有賊目葛耀明陳守鄧象盧縉等。均于瑞州投入石逆大股之中。賊目關志江陳檉槐等。均于臨江投入石逆大股之中。賊目王義潮劉夢熊分屯吉安泰和。亦已與石逆合併爲一。又據周鳳山等稟稱。吉安府城于正月二十五日失守。石賊于正月前赴吉安。二月初十日。復回臨江。分遣賊黨。攻圍贛州。又有鄂省新到之賊。及與國土匪。于二月初八日。攻撲武寧縣。臣等細心察看。石賊久據臨江。爲上下適中之地。凶悍之賊。必萃于此。南則窺伺贛州南安。以通兩粵之餘匪。北則踞守武寧新昌。以通九江之歸路。全勢注于江西。意圖盡披枝葉。困我省會。凶謀詭計。實可痛恨。此賊匪各路分布之情形也。諭旨垂詢劉長佑一軍。應由何路進剿一節。查劉長佑在楚追賊。至道州。因接札甚遲。正月十五。始回湖南省城。旋帶兵由醴陵前進。月餉不敷。起程稍遲。道途梗塞。尙無入江確信。臣等愚見。擬令劉長佑先攻袁州。俟克復後。卽由分宜新喻直下。與周鳳山一軍會合。以

攻臨江。不必先往吉安。恐孤軍深入。腹背受敵。東不能抵江西省。不能返湖南。文報不達。餉道不通。有進退維谷之患。此劉長佑酌籌一軍進剿之路也。至德安城被賊盤踞一節。上年臘月十七日。有瑞昌與國州土匪竄入德安縣城。賊目係武寧之葉至華。與國之劉宗魁劉大中。及炎九將軍林姓匪徒。約二千人。該縣與瑞昌毗連。賊蹤來去不常。聚散無定。春初僅騰數百人。正月十三日。全數竄出。嘯聚于瑞昌武寧之間。二月初二日。竄入武寧縣內。被該縣兵勇追剿四散。初八日。有湖北新到賊股。合之與瑞土匪。攻撲縣城。據湖北巡撫胡林翼專差咨稱。武昌城內出賊五六千人。竄往下游。恐入江西等語。不知攻撲武寧之賊。是否即武昌分出之股。此土匪先在德安。後竄武寧。併入粵匪之情形也。至周汝筠一軍設法疏通一節。查收獲僞文書內稱粵東賊目王義潮統賊萬餘。阻禦泰和。使周汝筠之師不得進援吉安。臣文俊前因其救援不力。曾經奏參摘去翎頂。另調游擊遮克敦布統率各勇四千。由樂安永豐一帶取道援吉。詎遮克敦布起程數日。即得吉安失陷之信。臣等即令遮克敦布扼駐樂安。屏蔽撫建。擬令周汝筠退回贛州。防守該府。贛郡天然雄鎮。爲古來必爭之地。倘有疏虞。則兩廣積年之零股。湖南郴州之餘匪。皆將以贛州爲巢穴。後患不可勝言。臣等一面飭令駐贛文武設法防禦。一面飭周汝筠折回郡城。協同環守。惟賊衆兵單。不得不急求外援。相應請旨飭下兩廣總督廣東巡撫。迅派兵勇三四千人。直赴贛州。會同戰守。保此重鎮。庶足顧全大局。除吉安失陷。文武殉難各情。另由臣文俊查明具奏外。所有遵旨會籌各路堵剿。並請撥廣東援兵防守贛州緣由。恭摺由驛六百里覆奏。伏乞皇上聖鑒訓示施行。謹奏。

軍舟進省途次聞警片 咸豐六年二月二十一日

再臣等自奉會籌軍務之旨。臣文俊函請臣國藩晉省面商一切。臣國藩以青山湖口水陸兩軍。外則關係長江大局。內則爲本省東北藩籬。未敢遽行抽身赴省。二月十八日。接據省信。樂安陸軍挫損。賊蹤已近撫州上游。十分緊急等語。不得已即于是日。單舟由南康起程赴省。十九日行至吳城鎮地方。接周鳳山十四日樟樹勝仗之信。二十日行四十里。又接周鳳山十七日勝仗。十八日大敗之信。係由彭玉麟專函飛稟。據稱周鳳山陸軍十四十七。連日血戰。俱幸獲勝。十八日賊黨數萬。層層圍逼。我軍疲勞過甚。衆寡不敵。全軍挫失。營盤亦被撲去等語。臣伏查我軍水陸全力扼守樟樹鎮。雖陸軍僅四千餘人。而勁旅已萃於此。一旦挫敗。所關極大。該逆若直犯省

城深爲可慮。臣國藩一面單舟晉省。會商城守事宜。一面飛調湖口青山水陸各軍。同回省城。以固根本。除勝敗各戰情形。另行具奏外。所有臣國藩單舟進省會商途次聞警緣由。謹附片奏聞。

水軍先勝後挫請將營官參處片 咸豐六年二月二十一日

再正月二十九日。青山水師赴下游姑塘一帶。測探水勢。猝遇賊船六十餘隻。由兩岸駛上。營官陳炳元等見賊開放鎗礮。亦將各船分兩岸抵敵。衆礮輪轟。傷賊約數十名。賊船紛紛敗退。我軍追剿。賊復回頭衝突。我軍亦回擊。賊又敗退。鏖戰數時。傷賊不少。忽哨官彭雲漢船礮炸裂。擊傷陣亡。各船遂撤隊收回。南風驟長。賊船乘勢來鈔。我軍且戰且走。因有舢板船在後。殘圍沙洲。賊用撓鉤搭往船艙。短兵相殺。諸哨駛回搶救。賊以多船包圍。哨官周華堂奮勇突陣。身被重傷。猶手擒長髮。互相投水。爲他賊所殺。別有三船。亦不能救出。失舢板船六號。傷亡三十餘名。伏查水師以南風爲大忌。蓋以順風順水。往則順而歸則逆。進則易而退則難。臣軍因南風致挫。先後已經五次。臣國藩諄諄誥誡。屢次嚴行札飭。此次各營擅違戒令。南風出隊。且各營哨並未會商。隊伍錯亂。未便因其挫損無多。稍事寬容。應即嚴加參處。營官藍翎知州銜選用知縣陳炳元。花翎補用游擊劉國斌。均請革去翎枝。留營以觀後效。陣亡把總周華堂。請救部議卹。傷亡弁勇。查明照例辦理。所有水軍出隊先勝後挫。請將營官參處緣由。附片具奏。伏乞聖鑒。訓示施行。謹奏。

調羅澤南回援江西片 咸豐六年二月二十一日

再石逆初陷瑞州臨江之時。臣等奏請羅澤南帶兵回剿。先後奉上諭。「俟武漢克復。酌量催調。」等因。欽此。現在賊氛日熾。爲軍興以來各省所未見。周鳳山等軍斷難翦滅。疊接胡林翼等來函。稱武漢之賊。堅守不出。我軍攻城。不與賊兵鬪。但與礮子鬪。傷亡甚多。攻堅良苦等語。是羅澤南在鄂。一時尙難得手。臣等伏思軍情有緩急。利害有輕重。兩害相形。則從其稍輕者。假令武漢功在垂成。亦斷不敢顧此失彼。墮賊牽綴之計。今旣勢難遽克。與其頓兵堅城。攻遙遙無期之湖北。又不如移師腹地。救岌岌將殆之江西。武漢兩岸。三萬餘人。即無羅澤南一軍。亦尙足敷防剿。江西省西南與湖南廣東接壤。若不迅速殄除。實係三省無窮之患。除臣國藩函商胡林翼等酌調湘勇回剿外。謹合詞陳懇請旨飭下湖北撫臣速令羅澤南兼程來江援剿。實有裨於大局。理合附片具奏。請

旨。硃批。「另有旨。欽此。」

請撥上海關稅片 咸豐六年二月二十一日

再江西餉項支絀。各省道路梗塞。惟江浙餉道可通。查上海縣商賈雲集。財物殷阜。關稅極旺。臣國藩昨奏請於該處抽取釐金。尙未奉到硃批。目下需餉甚迫。若待抽辦釐稅。實屬緩不濟急。合無仰懇天恩。敕下兩江總督江蘇巡撫。於上海關稅項下。借撥銀十萬。迅解江西。以濟眉急。如將來該處釐金。辦有頭緒。尙可扣還歸款。謹合詞附片具奏。請旨。硃批。「戶部速議。具奏。欽此。」

謝年終恩賞摺 咸豐六年二月二十一日

奏爲恭謝天恩。仰祈聖鑒事。咸豐六年正月十五日。准軍機處咨開。咸豐五年十一月二十七日。由內交出年終奉賞福字荷包銀錢。餼食物等項。由驛遞到營。當經恭設香案。望闕叩頭。祇領。竊臣猥以庸愚。謬司捷伐。愧慙尤之叢集。荷覆載之優容。迺以歲籥更新。復蒙恩膏特沛。親雲章之藻麗。福自天申。識寶氣之瑤煌。品徵夏貢。歡擊賜果。更頒珍饌。於天廚。瑞珎錫聲。共沐殊施。於內府。凡此非常之寵賚。實爲逾分之光榮。未靖烽煙。彌覺駒光之虛度。渥承雨露。倍驚鼇戴之難勝。臣惟有昕宵惕勵。殫竭血誠。以冀仰答高厚。鳩慈於萬一。所有微臣感激下忱。恭摺附驛馳奏。叩謝天恩。伏乞皇上聖鑒。謹奏。

請頒給捐生執照摺 咸豐六年二月二十一日

奏爲捐輸實官人員。開單彙奏。請旨敕部注冊。頒給執照。仰祈聖鑒事。竊臣咸豐三年奉命肅清江面。奏明隨地勸捐。其捐職銜者。業於請頒空白部監各照內。隨時填給。其捐實官者。例須專摺奏明。咸豐四年十二月二十五夜。大江襲營之役。臣之座船文察。全行遺失。所有衡州等處捐生履歷清冊。一併失去。遲延未及具奏。旋經行取各屬捐生。補送履歷前來理處。彙繕清單。請旨敕部注冊。即將應議敘頒發執照。遞交臣營轉發各捐生。祇領。至勸捐助餉。理應迅速獎敘。臣具奏遲延。請旨將臣交部照例議處。所有捐輸實官各員。開單請獎緣由。恭摺具奏。伏乞皇上聖鑒。訓示施行。謹奏。硃批。「戶部覈議具奏。單併發。會國藩著改爲交部察議。欽此。」

糧臺委員丁憂留營片 咸豐六年二月二十一日

再臣軍糧臺提調湖南補用知府李瀚章。委員湖北補用知縣張秉鈞。隨臣三年。管理軍餉。綜畫靡遺。勾稽詳慎。洵爲得力熟手。先後在營聞訃丁憂。又直隸藁城縣知縣黎福疇。在任丁憂。經臣調赴軍營。襄辦糧臺事件。現值軍務喫緊。該三員辦事妥協。應令留營當差。張秉鈞黎福疇聞訃之時。曾經回籍。經臣札調來營。李瀚章並未回籍。該提調綜理全局。實無他員可以替換。應請照上年臣奏留李孟羣成案。俾得終始其事。實於臣軍大有裨益。除該員丁憂日期。業由本籍及任所分別呈請咨部查核外。附片奏明。請旨敕下該部查照辦理。謹奏。硃批。該部知道。欽此。

請給營員封典片 咸豐六年二月二十一日

再軍營出缺。向例先儘在軍人員拔補。臣軍多係勇目出身。營中無缺可補。所有保至參游都守千把等官。均未補有實缺。文職由道府以至佐雜。亦未能赴選得缺。頃接胡林翼來咨。布政司銜羅澤南。鹽運司銜李續賓。以戰功尤著。請給予二品三品封典。欽奉特旨。允准在案。伏查臣軍水陸各營。打仗奮勇者。實不乏人。恭逢上年十月二十日。單恩慶典。該員等以未經補缺。不得仰被榮施。合無籲懇皇上天恩。准照羅澤南李續賓之例。容臣擇其尤爲出力者。照保舉之升階。咨部請給封典。其曾經告假回籍者。概不准給。俾在營之士卒。咸知戰陣無勇。不得爲幸。即在家之父兄。亦必互相訓誡。勸其立功。足以杜絕勇目紛紛告假回籍之陋習。於鼓勵戒行之道。實屬大有裨益。是否有當。謹附片具奏。請旨。

周鳳山陸軍回紮省垣摺 咸豐六年二月初一日

奏爲周鳳山陸軍在樟樹鎮大勝一次。先勝後挫一次。大敗一次。現已回紮省垣。恭摺具奏。仰祈聖鑒事。竊臣等因樟樹鎮爲四達之地。全力扼守。周鳳山連日接仗各情。業經附片奏聞在案。緣二月初八九日。探聞石達開由吉安回臨江。帶賊數千名。船二百餘號。屯踞永泰地方。十一二日。又探得臨郡賊匪由沙湖渡至東岸。欲分三路來襲等語。周鳳山因永泰沙湖皆距樟樹鎮三四十里。易進難退。該處東近荷湖大橋。前途新淦縣。復爲賊據。又可由小路繞至豐城來襲我後路。途徑歧雜。每日派人輪流巡哨。急圖進剿。嗣知橫梁荷湖兩處。各有賊三四千名。迨十三日。賊以數百人。至樟樹隄上。河邊兩路游探。經彭玉麟督率水勇擊退。河邊一股。礮斃長髮數名。陸軍繼

至。亦將塙上之賊擊退。周鳳山以該逆逼近我營。必須痛剿。十四日卯刻。派四成隊。紮大橋。以防荷湖之賊。兼顧老營。後路水師戰船。亦紮臨江河口。以遏賊船下竄。周鳳山親督五營。並約水師進剿橫梁。黎明行過樟鎮數里。至狗頸隄地方。見賊四股。約五千餘人。以一股紮河橋。一股紮隄左。兩股紮河邊沙洲。勢甚巖整。周鳳山急調大橋兵勇迎擊左路。自督諸軍堵擊橋上一股。彭玉麟見無賊船出河。又慮河邊之賊。包鈔隄上陸軍。腹背受敵。遂令水師登岸協剿。並以大礮轟擊。賊亦鎗礮連環施放。都司畢金科李新華各帶兵勇併擊。沙洲裏面一股賊合爲一。我軍奮勇前進。刀矛並舉。衝突數次。斃賊百餘名。賊猶抵死鏖戰。橋上之賊。被斬及爛斃者數十名。不能抵敵。遂亦回奔。我軍乘勢猛進。賊衆始敗。隄左一股。經都司周岐山唐得陞等擊斃。及追逼入水死者。約三四百人。賊亦同時敗潰。我軍會合沿途復追斬二百餘人。並斬騎馬賊目三名。直抵橫梁。該處於民房外。已先紮營三座。其內賊黨尙衆。敗賊至此。有窮奔免脫者。有竊入民房者。經我軍圍住。放火焚燒。羣屍屍骸。悉成灰燼。申刻收隊。荷湖之賊。因我軍扼守來路。亦未敢深入。是日奪獲大銅礮一尊。擡馬鎗刀矛二百餘件。號衣旗幟八十餘件。共殺賊七八百名。我軍陣亡四名。受傷四十餘名。此十四日接仗大勝之實在情形也。十六日。石逆率衆數萬過河。分據橫梁香溪一帶。周鳳山聞賊以全力來撲。預飭各營同心協剿。十七日辰刻。約水師分路馳擊。行過樟鎮。見賊約三千人。由狗頸隄斜入香溪。西路各營奮勇衝鋒。殘賊百餘。奪獲器械旗幟多件。此股已經敗退。隄上河邊。復有賊兩股。經彭玉麟督飭水師擊退。亦斃賊多名。我陸軍進逼香溪。猝遇賊之大股。香溪地勢寬敞。東有山坡。賊分四隊佔據。都司滕國猷周岐山帶勇由右衝擊。賊已敗退。正追殺間。山左復出賊一股。因守備岳炳榮。千總黃玉芳等。不能抵敵。滕國猷等。遂率右路之勇回隊。極力堵截。不料大股賊匪。由後峰擁而來。我軍鏖戰逾時。傷亡不少。此十七日先勝後挫之實在情形也。十八日早。周鳳山與彭玉麟商籌進攻。賊匪已四路前來撲營。當派七成隊迎擊。參將阿達春與畢金科周岐山唐得陞等。帶勇抵禦東北。李新華與都司林保。知縣周尊彝。帶勇抵禦西南。岳炳榮黃玉芳在後接應。時西路隄邊彭玉麟已派礮船幫擊。各營搖旗吶喊。奮力衝突。遙見樟鎮西南。及大橋東北面。有賊十餘股。畢金科周岐山等所擊東北之賊。業已回奔。其西南之賊。亦經李新華林保等衝擊。兩處各斃賊多名。維時西南逆賊。見東北賊敗。遂向我軍之外。繞冲東路。鈔在我軍之後。岳炳榮黃玉芳等力難

堵柱紛紛潰敗。逆賊乘勢緊逼。重重圍裹。致西南路各營。不能兼顧。轉爲大敗。傷亡兵勇幾近千人。營盤全失。糧臺委員前任寧鄉縣知縣馬丕慶。候選訓導林長春。候選府經歷李清華。罵賊捐軀。此十八日接仗大敗之實在情形也。據周鳳山先後稟報前來。臣等伏查該副將自臘月初四。克復樟鎮。本應乘賊不備。速攻臨江。乃顧慮東岸之賊。未敢急進。遠該逆已破吉安。各路悍賊。畢集樟鎮。勢遂不支。此次雖因連日血戰。疲憊之後。衆寡不敵。致遭挫衄。然該副將失機於前。貽誤於後。咎無可辭。廣東羅定協副將周鳳山。應請卽行革職。都司銜守備岳炳榮。應請革職。守備銜千總黃玉芳。應請革去守備銜。周鳳山。黃玉芳。仍留營效力。以觀後效。臣國藩奏派周鳳山。接統九江陸軍。保奏失實。請旨將臣國藩交部議處。至陣亡前任湖南知縣馬丕慶。請開復原官。照知縣例從優賜卹。雲南候選訓導林長春。湖南候選府經歷李清華。均請敕部從優議卹。傷亡兵勇。查明照例辦理。所有周鳳山陸軍在樟樹鎮前後開仗緣由。謹合詞恭摺具奏。伏乞皇上聖鑒。訓示施行。謹奏。

撫州失陷調回水陸各軍片 咸豐六年二月初一日

再臣國藩於二月十八日。自南康起行赴省。二十一日到城。與臣文俊會商防剿事宜。頃據探報。撫州府城於二十二日夜失陷。撫州與廣信接壤。難保不竄擾廣信。該府爲奏報進京。江浙轉餉之路。一有疏虞。四面梗塞。後患何堪設想。現調湖口李元度一軍。由饒州繞回。進剿撫州。以保廣信。調青山水師退紮吳城鎮。青山陸兵調赴省城。上年九江湖口水陸萬餘人。今全數撤入內地。長江之大局莫顧。東北之藩籬遽弛。前功盡棄。回首心傷。然腹地無兵可調。舍此亦別無他策。目下所望以挽回全局者。在內惟李元度一軍。在外惟羅澤南劉長佑二軍。袁臨之路久梗。劉長佑迄無入境確耗。其羅澤南一軍。及廣東防剿贛州之師。請旨再行飭催。迅速來江援剿。浙閩兩省。與廣東建昌毗連。請旨飭下該省督撫。嚴密防堵。以免竄越。至周鳳山一軍。現在省收集潰散。臣國藩暫行統轄。能否整理就緒。容俟續奏。所有近日各路軍情。要合附片奏聞。伏乞皇上聖鑒。指示機宜。謹奏。

平江營克復進賢縣城摺 咸豐六年二月二十六日

奏爲陸軍平江營兩路在湖口羅溪先後各獲勝仗。克復進賢縣城。恭摺馳奏。仰祈聖鑒事。竊候選同知李元度一軍。自湖口調赴饒州。保全東路。曾經會奏在案。湖南之平江縣。與江西之義寧州接壤。風俗強健。多經歷戰陣。

之士臣國藩上年招募平江勇，飭李元度練成一軍。臣文俊到任以後，又募平江勇二千餘人，飭派候選知府鄧輔綸、候補同知林源恩一同統帶，自周鳳山樟鎮失利以後，臣等二人熟商，將兩處平江勇併成一軍，共得六千餘人。李元度自饒州而來，鄧輔綸、林源恩自省城而往，約會於進賢東鄉等處，冀保全廣信，而規復撫建。先清省東之一路，方李元度自湖口拔營赴饒之時，逆黨探知消息，於二月二十二日，出先鋒馬七騎，近營窺探，我軍擊之，二十三日卯刻，逆黨復出千餘人，黃旗數百面，分三路來撲。我軍堅壁不動，俟其逼近橋壩，左營哨官賴準發轟擊，連斃三賊，落馬。營官彭斯舉、胡蓋南、牟憲、吳齊源等分三路鈔擊，殺賊六七十名。內黃馬褂騎賊一名，追至黃土嶺，逆首黃文、金勒馬督隊，各勇排礮指擊，傷其坐馬。各勇攢刃立斃。餘賊奔潰，追入湖口。沿途鎗礮傷賊約五六十名。午刻收隊，奪獲黃馬褂偽印官照軍械等件。我軍亦傷亡十二人。此二十三日李元度在湖口接戰獲勝之實在情形也。二十九日，李元度一軍行抵饒州。是時樟鎮新挫，撫州淪陷，饒屬之餘千萬年，皆有賊跡。贛南道着齡在饒州防堵，兵力單薄，人心震驚，遷徙幾空。恰值李元度之師自湖口東來，閩郡爲之欣慰，而餘千萬年之賊，雖去饒僅數十里，竟不敢直犯府城。臣等因飭李元度留駐饒州半月，而令鄧輔綸、林源恩自進賢一路前往東鄉，以圖會合進剿。三月初七日，鄧輔綸、林源恩自省城起行，臣等又派周鳳山帶本營勇八百前往助剿。十一日，行抵羅溪地方，該處左右皆湖，中惟一路，延亘二里，並行可二三人。方春水漲，隄石衝壞，險仄難行。實惟進賢要隘，爲賊所必爭之地。該逆排立湖岸，旂幟紛紛，礮聲四起。鄧輔綸、林源恩等督飭各營，直前迅行。馳過湖路，該逆分三路來撲。突於松林竄出千餘人，賊目手執大黃旗，招引衆匪，都司周岐山等帶領鳳字營，迎頭勦殺。隨有賊千餘人，由隄路鈔擊，點放火箭噴筒。鄧輔綸等派左營耿光宣、李晉發帶領五哨，沿隄截勦。李晉發亦足爭先，連躍數港，刺賊多名。旋有匪艇數十隻，駛至河畔，意圖鈔襲我軍右營。高漢、麥隨帶七哨，攔河擊退。繞至隄右截殺。鄧輔綸等督帶中營寶勇、都司畢金科接應後路。該逆力不能支，紛紛敗退。奔回進賢縣。我軍追擊十餘里，始行收隊。計共殺斃賊匪二百餘名，取首級六十八顆，奪獲旗幟、刀矛、藤牌、撞鎗六十二件。此十一日鄧輔賢等羅溪接仗獲勝之實在情形也。十二日黎明，林源恩督帶中營勇五隊當先，鄧輔綸領五隊繼之。左營耿光宣、右營高漢、麥分二翼以擊其傍。都司畢金科緊爲接應。周鳳山督率鳳字營嚴防河畔，恐賊由撫河而來襲我。

之後。布置已定。各營過行。離進賢縣城三里。卽有長髮賊數千。從林間蜂擁直前。勢甚凶猛。林源恩帶前隊疾馳迎擊。我軍士氣百倍。立砍斃長髮賊一百餘名。內僞參贊周姓一名。典糧一名。奪獲龍虎旗僞印等件。隨點放劈山大礮。及各排鎗。轟斃四十五名。該逆退奔。各哨急追兜擊。實勇隨同接應。復共殺斃八九十名。共獲旗幟刀矛二百餘件。鎗礮子藥無數。中營哨勇由西北角梯繩登城。殺守梁賊十餘人。燒燬望樓。大呼同進。耿光宣李進發由小路飛奔城下。繞至東門。正值該逆啓門潛逃。耿光宣攔入截擊。李進發手刃僞指揮一名。該逆抵死奪門爭逃。我軍復掩殺八十餘名。生擒僞司馬及真長髮三人。奪獲刀矛鎗礮旗幟百餘件。克復城池。右營高夢漢戴鑽亦從西門衝入。周鳳山畢金科由後路追入。各有斬馘。奪獲軍械甚多。前後共斃賊五六百名。追至二十餘里而還。縣令史昌壽帶勇隨同克復。卽飭料理善後事宜。安撫居民。諭令薙髮。此十二日進勦獲勝。克復進賢縣城之實在情形也。伏查省東撫建廣饒四府。皆以進賢爲咽喉必經之路。此次兩戰克復。東路漸有轉變。臣等現飭李元度自饒州起程。與鄧輔綸林源恩等會合。迅往撫州圖克郡城。所有陸軍平江兩路獲勝。克復進賢各緣。由恭摺由驛馳奏。伏乞皇上聖鑒。訓示施行。謹奏。

吳城水師勝仗摺 咸豐六年二月二十六日

奏爲吳城水師三獲勝仗。並各處水師分布情形。恭摺馳奏。仰祈聖鑒事。竊二月間樟樹鎮陸軍失利。臣國藩馳赴省城。將青山陸軍調至省垣。紮營城外。湖口陸軍調至饒州。以保東路。青山水師調至吳城。以防下游。業經奏明在案。水師於二十六日。行抵吳城湖口。賊船亦卽尾追而上。分泊於老爺廟堵磯等處。而德安建昌之土匪。與湖口梅家洲之老長髮。聯爲一氣。日夜耽耽。冀圖撲我水師。我水軍各營哨弁。驟與臣國藩相離。又與陸軍相離。值風鶴迭驚之時。虞水陸四面皆賊之地。未免中懷怯懼。臣等因調彭玉麟由樟樹馳赴吳城。以資鎮攝。三月初二日。彭玉麟尙未到防。有陸賊數百人。蜂擁而來。至吳城後河西岸搭造浮橋。賊船亦至河口之下。左營陳炳元右營鄧翼升。後營丁義方。以長龍船紮泊前河。前營親兵營各船。紮泊後河。而分舢板之半。由前河直下。包鈔賊船。以一半赴後河。攻勦陸賊。該匪見官軍直下。賊船遂退。竄堵磯。而陸賊排立望湖亭對岸。施放鎗礮。我軍以舟中之礮。擊岸上之賊。未能取勝。遂飭各水勇一躍登岸。揮旗直前。刺殺長髮十餘名。陸賊紛紛敗北。我軍窮追約

二十餘里。直至德安河口。奪獲軍械大轎等件。賊船之下竄者。水軍亦追逐十餘里。後河上通建昌縣。恐有賊划藏匿。復沿河上溯。將小划概行焚燒。此初二日水師登岸接仗。獲勝之實在情形也。初四日。彭玉麟抵吳城鎮。飭各營嚴密防範。十二日。有陸賊約千人。由涂家埠搭浮橋而來。至吳城上游。分股鈔出。彭玉麟派導左右三營舢板。至前河上游。攻擊陸賊。後營舢板紮駐後河。防下游之賊船。乃派長龍大船之勇。登岸陸戰。賊之至河干者。我軍舢板排礮齊發。轟斃賊十餘名。該逆無所遮蔽。遂退入隄內。鈔出直窺街市。我水勇初攻陸隊。已至街尾。與賊相遇。火器刃矛。兩相攻擊。數進數退。我軍突起直前。傷斃二十餘名。該匪敗北。追至小港之前。疊水而遁。我軍因後河陸賊尙多。未及窮追。後河股匪。見前岸已敗。亦即回窺。據生擒賊匪供稱。是日礮斃僑檢點周姓一名。該逆火箭噴筒。水老鳳等件甚利。係潮州之匪。新投賊營等語。此十二日水陸獲勝之實在情形也。彭玉麟以吳城水營之患。不患下游湖口之水賊。而特患德安建昌之陸賊。陸賊之來。係由涂家埠搭浮橋而過。必先清陸賊來路之源。我水軍始有安枕之日。並探得賊由奉新等處。擄來船隻百餘號。聚集涂家埠。意將水陸來撲我營。彭玉麟與各營熟商。涂家埠去吳城僅六十里。與其待賊來而應之。不如我先往而擊之。遂派後營嚮導營。駐守吳城。左右兩營前往涂家埠攻勦。十四日丑刻前進。飛檣疾行。午刻抵涂家埠。見賊浮橋二道。甚爲堅固。橋內灣泊賊船。約百餘號。我軍船一齊駛進。該逆用撞鎗抗拒。鏖戰逾時。我軍點放排礮。子如驟雨。賊勢稍卻。各勇一鼓衝入。砍斷錨本。篋纜折毀浮橋二道。賊見我軍衝過浮橋。將所擄船隻。急開往建昌河去。而每船有賊四五十人護衛。我軍乘勢尾追。賊之民船。不及我戰船之輕便。須臾追至。拋擲火彈。一船焚燬。衆賊驚慌。或被礮擊斃。或烈燄焚燒。或投水自盡。或登岸竄逃。我軍見賊大潰。極力窮追。約十餘里。建昌城縣之陸賊。分兩岸前來援應。我軍恐深入有失。漸次收隊。援應之賊。沿岸追趕。河仄岸高。不便攻擊。我軍船仍回至涂家埠。見河岸平坦。復開放排礮攔擊。陸賊轟斃數十人。賊復敗退。逃匿民房之內。時已黃昏。遂收隊夜回吳城。計燒賊船數號。奪獲二十餘號。生擒長髮二名。旗幟器械刀矛衣物甚多。此十四日至涂家埠折賊浮橋大獲勝仗之實在情形也。臣等伏查內湖水師。自去歲駐紮青山姑塘以來。東岸有湖口陸兵。西岸有青山陸兵。兩相依護。聲勢甚壯。一旦與陸軍遠隔。駐泊吳城。孤懸賊中。幾有防不勝防之慮。茲幸登岸陸戰。一次遂出迎擊。俱獲勝仗。從此應可堅駐該處。保障下游。自

吳城而外。臣等又分派都司金世蓮。府經歷賀虎臣。水師兩營。駐紮饒州。南河知府劉于潯。游擊劉國斌。水師兩營。駐紮市汊。把總何啓長一營。駐紮省河。相去均在三百里內。以防上游之賊。擄船衝出。外江之賊。駛船內犯。布置尙爲周密。理合一陳明。所有吳城水師三獲勝仗。並各處分布水師緣由。恭摺馳奏。仰慰宸廑。伏乞皇上聖鑒。訓示施行。謹奏。

劉長佑援師克復萍鄉縣城摺 咸豐六年二月二十六日

奏爲道員劉長佑統帶湖南援師。疊獲勝仗。克復萍鄉縣城。恭摺馳奏。仰祈聖鑒事。竊臣等於二月二十五。三月十四日。先後接據統帶湖南援師。即選道劉長佑稟稱。正月二十三日。由湖南省起程。馳赴醴陵營次。所部各營兵勇。分爲兩路。一由瀏陽進攻萬載。一由醴陵進攻萍鄉。二月初四日。劉長佑親督楚勇二千餘名。進紮萍鄉之黃花渡地方。因西南小路可鈔我軍之後。遂留守備黃三清之勇。暫駐醴陵。派都司田興恕。守備梁開國之勇。暫駐萍鄉之油塘鋪。初六日。往葡萄酒嶺相度營盤地勢。行抵離萍城十里之青山鋪。探報有賊數百。悉伏山後。劉長佑派守備梁開國。千總石有周前往偵邏。擊斃二十餘賊。忽城內擁出大股。約三四千人。分三路鈔來。梁開國石有周等且戰且誘。回至青山鋪。劉長佑率勇由中路迎擊。鎗礮齊施。刀矛並舉。該逆紛紛退向山坡。欲助左右兩路。併力來鈔我軍。百長許繼衡與黃三清祁勇由左路迎擊。百長李明惠等與田興恕虎威勇由右路迎擊。梁開國衝入賊隊。手刃紅衣賊目。許繼衡等復從松林截出。殺賊百餘名。左路敗退時。右路之賊。猶欲傍山來鈔我後。勇目沈宏福等不避矢石。衝上山頂。該逆勢蹙。多從懸崖墜斃。兩路直逼城根。城內賊復悉衆出。集計將乘我軍。軍返旗回擊。將賊隊衝爲兩段。復大敗之。計斃賊三百餘名。割級七十五顆。奪獲鎗礮旗幟刀矛無算。此初六日。在青山鋪與賊接仗獲勝之實在情形也。初七日。劉長佑飭令田興恕梁開國移營黃花渡。楚勇與黃三清祁勇進紮葡萄酒嶺。定於十一日進攻萍城。方於卯刻出隊。該逆已蜂擁前去撲營。劉長佑派百長李明惠等出擊左路。許繼衡等並黃三清祁勇出擊右路。殷開選等擊中路。見黃衣賊目於葡萄酒嶺峽撲來。鄭金華身先陷陣。鎗斃持令賊。而前隊猶死拒不退。劉長佑濟由路旁田隴橫鈔以出。該逆後隊敗退。首尾不能相應。黃衣賊目與匪衆迫欲退走。已被我軍前後裏圍。時左右兩路之賊。業經奔潰。因賊首被圍。回頭衝突。欲求救護。我軍分投截殺。田興

惡梁開國等俱至。該黃衣賊目被圍愈急。與其黨悉匿賀家民房。猶於牆壁鑽穴暗施鎗礮。並率老長髮百餘名。躍立屋上。拋擲磚瓦火彈。我軍百長李光祝唐三祚等。短兵直入。該逆放火延燒門壁。其冒火衝出者。悉被我勇截殺。黃衣賊目。脫卸衣帽。口咒數遍。撲火自焚。賊黨二百餘人。俱成灰燼。時各路之賊。知賊目被焚。心寒膽落。拋棄器械。鼠竄入城。我勇環攻逾時。飢乏收隊。是日約斃賊千數百名。生擒七十餘名。割首級三百八十顆。奪獲器械旗幟無算。劉長佑以該逆經此痛斃。自應乘勝進攻。迅圖克復。傳令次早攻城。四更時遙見城外火光四起。探報土匪逃散。該逆將城外各巢自行燒燬。勢將他遁。即乘月督隊前往。黃三清李明惠等由城西大路進攻。田與怒梁開國等由城北小路截出。該逆望風驚潰。自相踐踏。我軍一面追斃。一面入城安撫子黎。此十一日大獲全勝。十二日克復萍鄉縣城之實在情形也。其另一路之由瀏陽進攻萬載者。爲候選同知蕭啓江。把總楊恆陞兩營。二月初九日紮駐萬載之株樹潭。十一日察看地形。分布各隊。遙見株潭南岸有賊千餘。由樹林直趨平岡。又有賊千餘。繞出河邊。欲鈔我勇歸路。復有賊二千。由市口渡橋飛奔而來。繞出營盤之後。把總周崇高率四哨勇與平岡之賊相持。蕭啓江急馳平岡助戰。忽山下有賊千人。蜂擁而至。乃麾令軍功彭文德等併力抵住。而把總朱桂秋等亦馳至鈔擊。賊遂潰奔。蕭啓江率外委周友勝等由渡橋直趨市口。回顧營盤。適橋邊之賊已爲把總楊恆陞等從後追斃。蕭啓江復進逼山下之賊。楊恆陞亦張左右翼鈔之。賊被圍紛竄。我軍節節追逼。逃者無幾。逾時三路之賊。忽合撲營壘。守營之蕭啓江等。派三成隊從營中擊出。四面進感。該逆欲逃無路。塌水死者不可勝記。是日約斃賊千餘人。生擒五十餘名。此又瀏陽一路在萬載株潭接仗獲勝之實在情形也。劉長佑以萍鄉萬載之賊。均經痛斃。自應乘勝直取袁郡。惟萍萬兩邑。路徑紛歧。沿途市鎮均有賊據。猶恐我軍深入。賊或鈔出我後。致有顧此失彼之虞。仍擬分派各營。節節搜斃。一俟兩路會合。然後併攻袁州等語。先後稟報前來。臣等伏查萍萬兩縣。與湖南接壤。山路歧雜。最易藏奸。長髮土匪。勾聯一氣。若非步步廓清。即恐深入賊地。腹背受敵。已批飭劉長佑節節搜斃。庶免疏失。所有湖南援師。克復萍鄉緣由。恭摺由驛馳奏。伏乞皇上聖鑒訓示施行。再此案因道路梗塞。稟到稍遲。湖南巡撫。或已先行具奏。合併聲明。謹奏。

近日江省賊情片 咸豐六年二月二十六日

再二月二十三日。賊匪竄撲撫州。二十八日竄擾建昌。臣等方以廣饒二府爲慮。適李元度一軍自湖口來饒。而大股賊匪於二十六七等日。自萬年安仁竄至安徽之婺源祁門等縣。據各路探報。互有同異。或云該逆因金陵窮蹙。僞翼王石達開帶大股賊二三十萬人東下救援。或云廬州官軍攻勦桐城甚急。石逆回救安慶之集賢關。或又云石逆尙堅據臨江府城。派廣東新附之賊。下救金陵各等語。臣等伏查石逆現在何處。雖無確耗。而萬年安仁等處。實有賊二三十萬人經過。下竄婺源。此則人人共見。衆口一詞。臣國藩已飛函馳告向榮軍營。目下江西賊勢稍分。勦辦較易措手。臣文俊督飭司道。講求城守事宜。料理差爲完備。臣國藩收集潰散陸軍。裁併訓練。擬即派赴西路。攻克近省各屬。以冀肅清腹地。所有近日江省賊情。理合附片馳奏。仰慰聖主宵旰廬系之至意。謹奏。

分別保獎水師摺 咸豐六年二月二十六日

奏爲陸軍無庸保獎。水軍仍遵旨開單請敘。分別奏明。仰祈聖鑒事。竊臣等於上年十二月間。因水陸兩軍克復樟樹新隘。請將出力人員保奏。欽奉諭旨允准。凡在行間將弁。自應感激天恩。益圖報效。乃本年二月十八日。樟樹陸軍潰敗。以致賊黨蔓延。前功盡棄。除周鳳山岳炳榮等業經奏參革職。所有陸路員弁。應一概無庸保奏。以示懲警。而勵戎行。至水師三營。前在樟樹協勦屢勝。現在市汊吳城饒州等處駐防。經理有條。並無挫衄。自應遵照前旨。釋允保奏。爲此開單呈覽。籲懇鴻恩。俯准獎敘。於激揚士氣之道。實有裨益。謹分別具奏。伏乞皇上聖鑒。訓示施行。謹奏。

官軍克東鄉縣城進勦撫州摺 咸豐六年四月二十一日

奏爲官兵克復東鄉縣城。進勦撫州。破賊五營。並全軍渡河。連日圍攻撫城各情。恭摺馳奏。仰祈聖鑒事。竊二月十二日。鄧輔綸林源恩等克復進賢縣城。業經奏報在案。嗣據李元度稟稱。三月二十日。行抵安仁東鄉二縣交界之白港。遇有逆黨窺探。即派哨官賴準發等追擊。直至東鄉縣城。時僞監軍熊近光。僞軍師錢懷榮。在城盤踞。並有撫州新來之賊二百餘名。經賴準發等擊殺四名。生擒十一名。餘黨竄往撫州。適署東鄉縣令吳昉亦帶團勇趕到。因令入城安民。此三月二十日。李元度克復東鄉縣城之實在情形也。二十二日。鄧輔綸林源恩周鳳山等齊到東鄉。與李元度一軍會合。分紮南關外。共八千餘人。冀先規復撫州。撫郡之賊。聞官軍將至。調集醜類。希

圍抗拒。二十三日，僞指揮李逆率衆三四千人，分三路來犯。我軍出隊迎擊，哨官周友勝等奮力衝突，立殺悍賊數十名，僞官十餘名。該逆紛紛潰退，追至八里外之石橋。仆水者數百人，兵勇攢矛，溪水盡赤。逃匪之過橋者，營官彭大壽等窮追三十五里。適賊在民房解甲傳餐，兵勇圍勦，復殺三百餘名。當斬僞指揮李逆，褫其獅帽紅袍，並殺黃馬褂僞官一名。午刻收隊回營。查明鄧輔綸林源恩一軍，殺賊六百餘名。李元度一軍，斬賊三百餘名。共生擒一百七名，奪獲旗幟號衣軍裝無算，馬十六匹。此三月二十三日撫州之賊來撲東鄉。我軍迎勦，大獲勝仗。之實在情形也。廿五日進紮汀橋，距郡城十里。探知城河東岸有賊營數座，彭斯舉等察看地勢，遇賊來撲，斬獲十餘人。日暮歸隊，擬休息一日。大舉夾攻。二十七日卯刻，大霧迷漫，我軍行近賊壘，賊始知覺，中路林源恩首攻橫街口賊軍，該逆將民房數所，併爲一營，增立磚城木柵。左據大溪爲濠，右因小港爲塹，鹿角鐵菱，森立環布。隘口砌石成臺，留門置礮，勢極堅固。守備周友勝呂克生等偕勇直撲，鎗礮齊施。該逆從礮孔轟拒。我軍且撲且進，受礮傷凡數十人。各勇愈加憤勵，從礮石兩注之中，拔地刺而入。適放礮子落賊藥桶，賊中火起。各勇乘勢從礮門緣入，連殺百餘賊。又擲火彈中賊之藥局，烈焰衝霄，焚勦殆盡。橫街口一營既破，遂分攻正覺寺兩營。耿光宣李晉發等攻迤左一營，高夢漢督勇昇礮擊斃望樓之賊數人，立燬其樓。各勇躍入縱火，該營遂破。彭斯舉等攻迤右一營，斬關直入，亦縱火焚之。賊營只立兩門，緊閉千金閘，火起猝不得出，攀簷上屋，紛紛墮烈燄中。兩營相繼而破。維時左直街尙有一營餘賊，方欲逃入，不料已爲彭斯舉等所圍。先鋒唐廷健等拋擲噴筒，煙燄蔽空。林源恩陳大力高夢漢耿光宣等營及周鳳山之勇，左馳右突，圍礮立盡。又有河東灣一營，爲吳齊源彭大壽等繞道圍攻。該逆閉門轟礮死拒。哨官賴維發首從礮孔撲入，童梅華等各放噴筒，賊首疊疊然，從牆隙探望，數以千計。轉瞬火發，有緣樹顛自擲而死者，有跳牆外被刺而死者。文昌橋以東五營，一時盡被轟斃，殺斃爛斃燒斃，約共五六千人。生擒百餘人，奪獲三四百斤大礮五尊，銅礮子母礮各二尊，擡鎗刀矛旗幟號衣藤牌虎叉等物。一千四百餘件。查點我軍陣亡十六人，受傷百餘人。此三月二十七日在撫州勦賊連破五營之實在情形也。賊之在城內者，阻水爲固，以巨礮橫截文昌橋。我軍因移營南城外之千金坡，擬從上游搭橋過渡。四月初二日，李元度督勇縮搭浮橋，城內二三千賊分股來撲。一從清風門過河埋伏千金坡之樹林中，一出文昌橋鈔我後路。一

從五里塘對岸列陣阻截造橋之處。鄧輔綸派二營從右隄上鈔截。林源恩率勇迎擊中路。周鳳山從左邊隄上邀擊。平江中營右營等過港尾追。該逆紛紛退走。追至文昌橋畔。逆黨竄伏亭中。從石窗內開鎗抵禦。相持至四時之久。方鏖戰時。李元度念造橋難成。不若乘隙飛渡之爲先著。因令左營新中營用小划木筏先濟。各哨繼之。大半解衣裹水。不過兩時。卽已渡訖。其城東各營酣戰者。聞渡河之師已畢。始從文昌橋收隊。是日楚師直衝城下。與江軍夾河而營。次日。全軍畢渡。同紮五里塘。此四月初二日。在千金坡禦賊乘間潛渡之實在情形也。全軍既已渡河。卽可乘勢進攻。初四日定議。鄧輔綸等所部各營。攻南門清風門。周鳳山及寶勇等攻西門。李元度所部各營攻北門。均備長梯。以備乘墻而上。城上城下。鎗礮對放。斃賊約二百名。我軍受傷者亦有二百餘人。午後鼓勇復進。而大雨如注。火器盡溼。遂傳令收隊。初七夜分路襲城。以該匪準備嚴密。無隙可抵。初九日進紮西南隅。距城止半里許。該逆出城分撲。各營且紮且戰。殺賊七八十名。賊遂閉城拒守。是夜李元度等分隊攻城。輪班更替。次早逆匪傾巢而來。我軍短兵相接。自辰至午。酣戰三時。周鳳山親自衝鋒。唐得陞尤爲驍健。雖殺賊僅四百餘人。而迴合苦戰。誓死不還。兇悍實異尋常。我軍傷亡亦近百人。此四月初四初七初九初十等日夜在撫郡攻城。士卒奮勵之實在情形也。伏查元度自克復東鄉以來。步步爲營。與鄧輔綸林源恩之師會合。聲威頗壯。進信撫郡。連破賊營。晝夜環攻。士卒洵屬用命。惟城內悍賊堅守如故。而建昌瑞臨之匪。猶敢伺隙來援。臣等現派水陸兩營。扼紮李家渡地方。以絕逆黨應援之路。仍札飭各軍激勵士心。以期克復要郡。先清東路。所有克復東鄉縣城進剿撫州連破五營。並全師渡河。攻城獲勝各情。恭摺由驛奏聞。伏乞皇上聖鑒訓示施行。謹奏。

克復建昌縣城摺 咸豐六年四月二十一日

奏爲官軍水陸克復建昌縣城。旋復進攻瑞州奉新。未能得手。恭摺馳奏。仰祈聖鑒事。竊南康青山陸軍調省紮營城外。及吳城水師三次獲勝。均經奏明在案。臣等以水師無陸兵依護。恐致挫失。二月十五日。札調都司黃虎臣督帶三營馳赴吳城護助水師。相機攻勦建昌縣。陸軍至吳城鎮搜剿涂家埠等處。二十二日約會水師後營丁義方。嚮道營孫昌國。同往進攻建昌縣城。該縣西南兩門臨河。前營胡應元帶弁勇從下游渡河。黃虎臣李大雄帶各弁勇。從上游渡河。我軍半渡之時。賊匪分三路來迎。南門出賊約二千餘人。排別沙洲。西門出賊千餘人。

前抵河岸。東門出賊亦二千餘人。於隄上包鈔。欲截我軍之尾。勢均兇悍。黃虎臣派李耀南朱邦武等衝擊沙洲。胡應元帶勇進擊河岸。李大雄帶許志清等直攻隄上。水師亦聞礮轟擊。以壯聲勢。朱邦武奮不顧身。首先陷陣。手刃數賊。中鎗陣亡。各弁勇不稍怯退。發奮爭先。是時哨官許志清衝鋒奪陣。殺一賊目。並奪其馬。被他賊矛搠而墜。我軍幾不能支。黃虎臣與各營哨商曰。今日前有堅城。後有泗水。一退則全軍皆沒。不如併力進戰。幸而獲全。於是人人皆知背水之險。爭前血戰。適黃戴玉馳救。許志清得脫於難。須臾轉爲大勝。賊衆紛紛敗北。我軍追勦。殲斃約四百人。撲水溺斃者。不計其數。黃虎臣等勒馬縈迴。周城馳驟。指揮環攻。水師亦出旱隊協攻。該逆閉城抗拒。城上礮石。驟如雨下。火包火箭紛發。烈燄蔽空。我軍負傷雖衆。猶復拽樹梯城。至日暮始行收隊。回至二里半地方駐紮。黃虎臣以逆賊受此大創。衆已膽寒。卽與各營官計定。乘夜復攻。三更時攜帶火器前進。五更復抵城下。四面圍攻。李大雄首先登城。拋以火蛋。焚燒賊棚。各門亦先後齊登。賊突北門敗走。我軍一面追勦。一面窮搜城內餘匪。殺斃數十名。城上賊棚旣行燒燬。東門延燒民房。立卽撲救。在城安撫一日。仍卽收隊回省。此二十二三等日。在建昌大獲勝仗。克復縣城之實在情形也。四月初四日。復由省城派黃虎臣等營進攻瑞州府。派水師之駐市汶者。前往會勦。大雨如注。日夜不息。初六日。陸軍紮營距城十五里之祥符觀。黃虎臣帶勇百餘名。赴城下探視情形。猝遇騎馬賊首。亦帶匪百餘出哨。我軍向前衝擊。殺斃長髮及溺死者十餘名。初七日。進攻城垣。瑞州府分府等名城。中跨一河。四面環以深壕。該逆負嵎堅守。黃虎臣傳令伴爲退後。誘其出城。賊果由季順門突出數百人。勢甚兇猛。我軍奮力直前。殺賊三十餘人。斃黃旗賊目一名。正在鏖戰之際。大雨傾注。濠深逾丈。因收隊回營。初八日。知府劉于濤游擊劉國斌。自市汶帶領戰船。到瑞會合夾攻。該逆堅守如故。我陸軍無可施力。水軍泝流上擊。兩城及橋上。均置大礮。我軍深入轟擊。並放火箭。燒燬賊巢。賊礮三面俱發。我水師陣亡二人。受傷二十餘人。劉于濤黃虎臣等正商再攻之策。忽聞豐城一帶有賊乘虛下竄。水師因於初九日拔營回赴市汶。陸營亦於是日拔營回勦奉新縣。奉新距瑞郡六十里。黃虎臣欲乘賊不備。輕騎掩襲。督率弁勇。衝過南門木橋。攻破土壘。殺賊二十餘人。賊遂退入北門。我軍環繞城下。攻擊三時之久。傳令收隊。不意城內之賊。蜂擁而出。黃虎臣揮隊回敵。而我軍遠來飢困。主客勞逸。情勢迥殊。士卒小挫退奔。都司胡應元林保滕加洪等。極力

抵拒。連斃數賊。奪獲黃旗十餘面。賊始退回。查點我軍傷亡一百餘人。仍調回省城駐紮。此四月初八九日等攻勦瑞州奉新之實在情形也。臣等伏查近省郡縣。爲賊佔據。自應逐一勦除。以清肘腋之患。且大軍現攻撫州。尤宜勦勦各處。以爲牽制之計。惟逆賊慣技。長於堅守。而我兵勇單寡。又不能處處圍攻。建昌雖經克復。旋有賊蹤往來。現將各營調歸省垣。時加訓練。以期相機再勦。近省各屬。克復名城。廓清賊氛。所有克復建昌縣城後勦瑞州奉新各緣由。理合具摺馳奏。伏乞皇上聖鑒。訓示遵行。謹奏。

江西士民請建羅澤南專祠摺 咸豐六年四月二十一日

奏爲布政司銜道員羅澤南。在湖北陣亡。江西士民籲請建立專祠。以伸愛慕。恭摺具奏。請旨飭遵事。竊羅澤南自去秋克復義寧州之後。單騎來南康。與臣面籌進取之策。矢志廓清武漢。以圖會合水師。夾江而下。仍爲建瓴之勢。遂以八月十六日啓行。適往力破崇通蒲圻之賊。直擣武昌。臣國藩以其頓兵堅城。日久未下。恐師老挫衄。而江西寇氛孔棘。奏調羅澤南來援。於時道路梗阻。自正月以後。五次遣使赴鄂。迄無音耗。心中惶惑。至三月二十九日。始得胡林翼細字復書。則羅澤南已於月初受傷殉節矣。臣以正在用兵之際。恐損士氣。祕不告人。而江右士民。濟知消息。咸深痛悼。旋以公論。欲爲建立專祠。稟請前來。臣伏查羅澤南自咸豐三年正月。隨臣出辦團練。管帶湘勇。慨然有志殺賊。以拯時艱。經今四載。大小百數十戰。所向克捷。與江忠源塔齊布同時並起。而戰功則較兩人爲尤著。自岳州以至九江。雖水陸併進。與大隊齊驅。而獨當一面之處爲多。岳州之戰。羅澤南力扼大橋一路。崇通之戰。羅澤南力破半樓峒數壘。克復武漢之時。塔齊布羅澤南與各員并集。臣舟會議。羅澤南手出一圖。定南岸分爲三路。而花園堅壘。則自任攻之。田家鎮之役。羅澤南大戰半壁山。破南岸之賊營。而後可斷江中之鐵鎖。此羅澤南與人同功。而究不因人成事者也。若其功在江西者。咸豐三年六月。賊圍攻江西省城。羅澤南偕諸軍赴援。抵江後。獨勦吉安安福之賊。以數百勁旅。禦五千匪徒。旬日戡定。吉郡至刊刻詩文數卷。歌頌功績。五年三月。廣信之役。賊破府城甫及三日。羅澤南四戰克復。賊退之後。嚴禁兵勇入城。並禁土匪搶掠。百姓之逃難歸來者。但見家室依然。倉箱無急。相與感激。次骨。義寧州之戰。以三千人破數萬衆。居民尤詫爲神奇。是時腹地安謐。閭井晏然。無驚。遠羅澤南率師赴鄂。粵東新匪自茶陵入竄吉安。石達開自通城入陷瑞臨。曾不數月。

各屬糜爛。故江省士民深悔羅澤南去日。未得鑿留。而此日之籲請建祠。爲出中心之誠。輿論之公者也。臣又竊念羅澤南以窮苦諸生。砥學礪行。伏處授徒。咸豐元年。薦舉孝廉方正。亦未請咨赴京。其胸懷恬澹。不求聞達。概可想見。乃一旦仗義從軍。毅然以身許國。冒危險而不顧。及蒙聖恩。洊升監司。加銜落牧。賞賜勇號。賞戴花翎。彌覺受寵若驚。誓滅賊以報君恩。聞其彌留之際。殷殷以武漢未復爲憾。忠誠內蘊。久而彌篤。揆之有功德於民。則祀以死勤事則祀之義。實屬相符。合無仰懇天恩。准於江西地方爲羅澤南建立專祠。以裨臣節。而從民望。是否有當。伏乞皇上聖鑒。訓示施行。謹奏。

江西近日軍情片 咸豐六年四月二十一日

再逆首石達開或云下竄徽寧。或云回救安慶。或云仍據臨江府。探報不一。傳聞異詞。業經臣等於三月二十六日附片奏明在案。近來吉袁瑞臨撫建等府之賊。深濠密鐵。閉城堅守。近省之豐城奉新安義靖安建昌德安等縣。亦皆有兩廣老賊督率新附之匪。踞守城池。官兵不至之處。則擄糧催貢。民不堪命。官兵一往。則援賊四集。該逆詭計。蓋欲堅守各城。使我疆土日狹。餉源日竭。省會成坐困之勢。逆謀兇毒。實堪髮指。臣等悉心籌商。目前勦辦之法。惟當力保廣饒。以通蘇杭之餉道。先勦撫建。以固閩浙之藩籬。此江西本省之兵勇所能竭力以圖者。其南路贛州。則不能不藉廣東之援師。西路吉袁。則不能不藉湖南之援師。頃接據探稟。萬載已於四月十三日克復。又接劉長佑函稟。連日獲勝。漸逼袁郡。胡林翼亦派劉騰鴻普承堯等率勇四千來江援勦。仰託皇上威福。西路或有轉機。南路吉贛一帶。文報久梗。仰懇天恩。飭下兩廣督臣。檄催援兵。星馳踴躍。保全贛州。會勦吉安。不勝跂幸。至於江西軍務。臣等身在局中。見聞較確。其各處奏報之詞。前此或稱省會被圍。近日或稱真賊盡去。皆因賊蹤飄忽。道路阻塞。傳聞失實。在所難免。臣等忝廁軍旅。不敢過事張皇。亦不敢稍涉大意。理合將近日軍情續晰具奏。伏乞聖慈垂鑒。指示機宜。謹奏。 硃批。知道了。廣東已屢有寄諭。飭催魏壽帶兵進援矣。欽此。

仍請撥上海關稅片 咸豐六年四月二十一日

再臣等因江西餉項支絀。曾於二月二十一日附片奏懇天恩。飭撥上海關稅銀十萬兩。以濟眉急。茲准戶部咨稱。前件於三月十五日遵旨前議。本日奉旨依議。欽此。欽遵鈔錄原奏前來。臣等查戶部奏稱江西軍務吃緊。應

請飭下浙江巡撫將前撥未解銀三萬兩迅速籌解外擬請於該省無論何款再行速籌二萬兩解往江西以濟急需至上海關稅現在金陵鎮江揚州三處軍營皆取給於此尙不敷用江西請撥之款應無庸議等語既經奉旨依議臣等何敢再瀆惟江西自去冬以來入府數十州縣相繼失陷本省餉源已竭目下攻勦撫州之師及省城與各路水陸尙有二萬五千餘人欠發口糧兩月三月不等幾於咸豐四年夏間鄂省情形相似臣等補救無術竊不忍以此等情形上瀆九重之聽而大局攸關又不敢不以軍中事實陳訴君父之前浙江撥項雖照戶部奏定五萬兩全數撥解尙屬不敷散放况該省嚴衢一帶防務緊急恐一時不能全解惟上海商賈輻輳貨物駁羅中外交資稅務極旺雖本省三營於此取給而地利攸殊挹注較易尙可波及鄰封合無仰懇皇上天恩仍飭兩江督臣江蘇巡撫於上海關稅項下籌撥銀十萬兩迅速運解江西以濟急需不勝迫切待命之至謹附片具奏請旨 硃批「戶部速議具奏欽此」

官兵攻勦撫州迭獲勝仗摺 咸豐六年五月二十三日

奏爲四月十一日至五月初十日官兵攻勦撫州迭獲勝仗情形恭摺具奏仰祈聖鑒事竊官兵自三月下旬進勦撫州破賊五營並四月初旬圍攻各情業經具奏在案嗣據李元度會同鄧輔綸林源恩等陸續稟稱四月十一日探知建昌援撫之賊盤踞油墩等處派兵馳往截擊擒斬十六名十四日黎明賊傾巢來犯先撲左右二營分黨千餘排立隄上接應李元度親率中營馳進彭大壽從左路鈔襲賊後彭斯舉從右路直衝賊鋒該逆前後受敵力不能支奔赴水田斷港被官兵刺殺二百餘名港水爲赤各營直趨城下又刃賊七八十名是日周鳳山繞禦西門大股耿光宣李進發等截擊南門一路高夢漢迎擊隄上之賊陳大力迎擊隄下塘岸之賊均斬獲多名收隊後查點賊屍由營外至隄外共三百十六具而城下及港中溺斃者不與焉此十四日迎勦大勝之實在情形也十八十九二十等日賊均出隊搗戰我軍每出不意開礮殪賊賊不敢前二十一日水師定湘營在城外文昌橋轟礮攻城各營出隊夾攻該逆出城迎拒被礮轟斃十餘名追殺數名賊遂歸巢二十二日賊忽大舉來犯一從西門直撲中營爲正兵一從南門繞至清風門爲牽制之兵我軍捲旗埋伏潛襲賊後賊遂驚潰各軍併馳力擊傷賊二百餘名別股賊由文昌門至隄上各營追擊蕩盡及偪溺水中者約近百人是日自辰至午鏖戰

三時之久。我軍亦受傷八十餘名。陣亡三名。二十五日。賊仍出隊。先撲中營。以千餘人立陣隄上。以百餘人直偪壕邊。復分一股。從東門繞出隄上。我軍或伏民房。或伏叢林。或從隄內斜鈔。大礮對轟。刀矛交錯。血戰兩時。殲賊一百餘名。我軍受傷者十八人。二十六日。探知瑞林援賊三千。屯紮西津渡對岸。距北門僅五里。因派兵前往防勦。城內賊窺我軍出隊。緹城來撲。李進發身先陷陣。殺賊數名。受傷力戰。直抵城下。復斃賊多名。李元度見西北城空虛。督兵負梯進攻。該逆併力堅禦。胡蓋南吳齊源彭大壽周鳳山等。分路鏖戰。賊遂敗奔。傷斃計百餘名。我軍亦陣亡七名。受傷六十二名。二十七日。賊復出犯中營。親兵劉步鼇等殺賊四十餘名。其時沿隄另有伏賊突出。鄧輔綸派右營搜勦。火器環攻。追殺十餘股。此十八至二十七日接仗小勝。互有損傷之情形也。二十八日。城內賊由北門分二股繞出。一直冲隄上。一從隄下包鈔。對岸之援賊。亦趁勢分數起。渡河。希圖會合。其時耿光宣堵住上游。賊不得渡。彭斯舉彭大壽陳大力等。包鈔賊後。奮力衝殺。約斃三百餘名。餘賊折回河干。復被張應龍等追逼。礮水無數。對岸之賊。後船接渡。我軍百礮齊轟。下游水師又至。擊沈賊船十餘隻。約斃四五百人。拋棄刀矛旗幟。不計其數。二十九日。我軍復沿河堵奪。截獲賊船十餘隻。焚燬三隻。三更後。賊用小划偷渡。我軍排礮截之。並沈其船。三十日。我軍復過河搜勦。援賊追逐七八里。將河岸新築賊壘三座。盡行焚燒。奪獲帳房二十餘架。刀矛數捆。大小船四十餘隻。黃旗號褂百餘件。子藥十餘石。此二十八二十九三十日。截擊援賊。蹋毀營盤。迭獲勝仗之情形也。五月初一日。探知崇宜交界之棠埠地方。及相距十里之秋下地方。均有賊盤踞。希圖來援。初二日五鼓。派兵往勦。我軍出隊時。城內賊已偵知。辰刻傾巢出犯。專撲南門清風門。我軍力戰相持。兩時之久。迴合數十次。別隊從兩旁鈔住。殺賊百餘名。鎗傷二百餘名。賊終不退。我軍因見城內空虛。傳令負梯登樓。撲營之賊乃退。登陣擊鼓。百礮齊轟。我軍受傷二十餘人。賊之傷斃者亦以百數。初五日。賊復以全力撲我中營。我軍開礮轟斃大旗四賊。追至隄上。鎗礮對擊。傷斃之賊二百餘名。我軍帶傷亦五十餘人。收隊後探知崇宜援賊。復踞棠埠搭橋。至秋下嘯聚幾二千人。恐其乘閒入城。急派弁勇往擊。申刻行抵秋下。兵力已疲。兩旁伏賊鈔出。我軍遂至小挫。幸丁峻陳英等殿後。回追殺賊數人。乃得捲捲收隊。初七日。賊又出城直犯中營。李元度以中營最當賊衝。先期於賊之來路埋伏銅礮三尊。撥勇守護。賊近營牆。轟礮連斃數賊。賊遂奔回。初八日。賊又來撲中營。愈出

愈多。其由後路鈔出者，尤兇悍。我軍靜待數刻，始行出隊，併命對擊，傷賊殺賊，計一百數十名。追至城根，該逆暗設突門地孔，倏忽不見。城上礮子如雨。我軍陣亡九人，帶傷四十餘人。是日各營血戰，而都司唐得陞怒馬陷陣，尤爲諸弁所不及。初九日，賊又分股出犯。我軍傳令勿動，惟轟礮禦之。而北門忽出千餘賊，往西津一路迎接。援賊進城。我軍派隊截擊，賊仍退入北城。初十日黎明，秋下援賊二千人，糾合城內之賊，大舉來撲中營。從上頓渡來者，分三路馳至。從城內出者，亦分三路圍攻。直逼營前。港外及卡門，我軍分投迎擊。彭大壽大呼過港，唐得陞怒馬衝鋒。吳齊源童梅華李錫發陳增應等從港之上下游，分途圍殺。連斃凶悍大旗賊十餘人。賊遂奔潰。各勇追殺，計三百餘人。彭斯舉李卿雲帶兵從堰下過港，衝殺殲賊二百餘名。其援賊逃至上頓渡回棗者，被李錫發童梅華陳上進等且追且殺，屍橫遍野。其城內出犯之賊，仍回西北城。被彭斯舉耿光宣丁峻等轟擊，不成隊伍。其分犯江軍老營者，亦經林源恩等擊退。是日城內城外之賊，糾集來犯。兇猛異常。我軍奮勇直前，僅陣亡一人。受傷數人。殺賊五六百名。轟斃三四百名。生擒七名。奪獲大旗號褂二百餘件。擡鎗紅鎗刀矛二百六十餘件。此五月上旬接仗，及初十日大獲全勝之實在情形也。伏查李元度周鳳山督帶楚軍，鄧輔綸林源恩督帶江軍，自三月之季進剿，大小二十餘戰，惟五月初五日小挫一次。餘皆仰託天威，迭獲大勝。祇以該逆倚恃堅城，上排大礮。我軍屢偪城下，輒被轟傷，以致前後傷亡至八九百人之多。瑞臨援賊，源源不斷。郡城未能遽復。然賊雖愈剿愈悍。我軍仍愈戰愈憤。臣等時加激勵，誓當力復此城。先清東路，以挽大局。所有四月十一日至五月初十日，撫州攻剿各情形，理合據實縷陳，伏乞皇上聖鑒，謹奏。

饒州防勦勝仗摺 咸豐六年五月二十二日

奏爲饒州防剿迭次接戰，互有勝負，並五月十五日大獲勝仗情形，恭摺具奏，仰祈聖鑒事。竊饒州一郡，外防江皖，內障廣信，實爲江西東北之藩籬。自二月閒樟樹鎮失利，湖口東岸之陸軍撤赴撫州，青山西岸之陸軍撤赴省垣，都湖彭建之賊匪，虎視眈眈，常有窺伺饒州之意。吉南贛寧道着齡自調防以來，辦理諸務，俱臻妥善。惟部下兵勇，僅二千餘人，軍勢實形單薄。所辦鄉團，又皆未經戰陣，若無官兵維持，亦未足恃。臣等因派都司畢金科帶陸兵一千名，都司金世蓮候選知縣賀虎臣帶水師千人，前往饒郡，聽候該道調度，以資防剿。嗣據該道陸續

稟報。三月初旬。股匪屢犯鄧陽地境。疊經防兵團勇迎擊。俱有斬獲。十七日。賊合大股進犯十六都地方。圍首陳鴻烈。軍功趙德溶等。率勇出隊。斃賊五六十名。內有僞士十二。將軍張姓。金九。將軍汪姓。及僞總制等三人。該逆另股從後鈔襲。趙德溶力竭捐軀。士卒傷亡四十餘人。次日整隊復出。五更時用噴筒火彈焚燬賊民房。火光中時聞礮聲。逆烈乃賊所藏火器之局也。該逆不虞我軍猝至。火器被焚。倉皇回竄。我軍乘勝跟追。傷斃賊黨五十餘名。追逼落水死者百餘名。奪船十餘號。追至二十里外之黃家祠。始行收隊。此三月十七十八連日接仗之情形也。自此以後。該逆退屯都昌之張家嶺。鄧陽境內。爲之一清。然張家嶺與鄧湖鄰近。處處入寇。該道相度地勢。繪圖貼說。詳稱章田渡響水灘十六都三處。尤爲緊要。派撥陸勇水師。分屯扼守。仍規畫進取張家嶺之策。意在以剿爲堵。以戰爲守。其由省派去之都司畢金科千人者。則令駐紮童子渡。以與各營互相控制。正在調遣之際。而都昌湖口逆匪勾結彭澤南康之賊四千餘衆。於五月初六日。直撲十六都。該處團勇接仗失利。響水灘會同章田渡營馳往援剿。斃賊百餘名。我軍陣亡二十餘人。受傷十餘人。遂退至章田渡東岸。併力守禦。初九日。聞賊將自荻溪灘渡河來撲。營官康國器等出隊河干禦之。立將賊船擊沈。奪獲旗幟。斃賊二十餘人。我湯家嶺營內之勇。乘勢過河追剿。章田營之勇。亦渡河接應。伏賊突起。前隊失利。賊遂以大股圍包我接應之師。我軍見衆寡不敵。仍復渡回東岸。賊亦未敢追逼。惟前隊湯家嶺營各勇。未及回渡。傷亡百餘人。營盤陷失。此五月初六初九接仗挫損之情形也。自此西路要隘響水灘十六都章田渡三處。均被該逆佔踞。惟都司畢金科所部千人。駐紮童子渡。尙屬完全無恙。十四日。探得該逆於章田渡搭造浮橋。將撲我童子渡之營。畢金科意以我僅千人。賊數五倍。若待其四面圍攻。必難抵禦。不如中途截擊之。遂於十五日丑刻。出七百人進剿。留三成隊守營。行抵油墩地面。尙距章田十五里。聞該逆亦已整隊前來。畢金科飭令幫辦朱洪章哨長楊承英李正清等。帶勇一支。營前迎擊。又派千總龔廷貴哨長李克封黃興貴等。帶勇一支。隨後策應。而自督哨長李與隆呂紹全等。暨雲南兵歷隊。以防後面鈔襲。分撥後。未及三里。即遇黃馬褂騎馬賊老長髮約二千餘人。前來迎戰。朱洪章龔廷貴等。飭我兵開放鎗礮。轟斃騎馬賊數名。另率一隊。從逆賊後路鈔出。連斃悍賊多名。賊即潰敗。迄至我兵追逼近前。而該逆又竭力反噬。山後又鈔出伏賊一股。約四千餘人。浮橋上又添援賊一股。亦近千人。四面圍撲。勢甚猖獗。

畢金科督雲南兵暨哨長李興隆等奮力抵禦。鏖戰逾時。賊黨敗北。步步追殺。逼近河岸。即將浮橋折斷。該逆紛紛墜水。共擊斃長髮賊六百餘人。生擒二十四名。奪獲騾馬一百餘匹。大旗七十餘面。刀矛器械無數。此十五日畢金科由童子渡進剿大獲勝仗之情形也。伏查饒州一郡。西接都湖悍賊。北鄰皖南大股。防務極爲吃重。臣等以本省之兵。全力攻剿撫州建昌二府。僅撥水陸若干人。分防饒郡。兵力實屬單薄。贛南道耆齡到饒年餘。勸團撫民。籌捐練勇。百計經營。始臻妥善。此次該逆大股入寇。一戰大捷。人心爲之鎮定。然衆寡懸殊。隘口過多。仍須由省城添撥兵勇前往。始足以資防禦。都司畢金科自臣國藩咸豐四年奏調入營以來。每戰身先士卒。驍勇冠倫。軍中稱爲塔齊布以下一人。去臘攻破樟樹鎮。亦係首先陷陣。此次獨當一面。以少勝多。關係東北全局甚重。竊懇皇上天恩。賞加巴圖魯名號。其餘出力員弁兵勇。容臣等酌保數人。以勵戎行。而作士氣。陣亡弁勇。查明照例辦理。所有饒州防剿大獲勝仗各緣由。恭摺由驛馳奏。伏乞皇上聖鑒訓示施行。謹奏。

派兵赴建昌助剿摺 咸豐六年五月二十二日

奏爲建昌官紳辦理防剿。並由省城分撥兵勇三千餘人。赴建會勦各情。恭摺具奏。仰祈聖鑒事。竊建昌府城於二月二十九日失陷。其時路途梗阻。至三月二十五日。始接據該府何祚稟報。並據稟稱探得各屬賊匪。裹脅居多。不甚兇悍。冀欲艱難號召。次第收復。即會同丁憂在籍之安徽候補知府張家駒。籌辦口糧。招勇五百名。並札諭新城縣拔貢生楊希閔。招勇五百名。與游擊名謙分帶。於三月二十八日收復新城縣。因駐紮新城。再行招募。共得勇一千八百餘名。分派游擊名謙。署守備楊錦斌。管帶六百名。駐鳩門。拔貢楊希閔。把總劉興揚。管帶五百名爲中隊。駐下長港。前署守備吳瀛。外委趙金彪。管帶三百名。駐上長巷。該府與張家駒管帶四百餘名。輪赴各營調度。相機進剿。四月十五十八十九二十等日。疊次打仗。俱有斬獲。自是宜黃崇仁等處。援賊日增。城上之防禦日密。二十七日。城內之賊由東關出一千人。由南關出一千二百人。分隊至廟嶺地方搦戰。名謙楊錦斌分本營爲三隊。賊以右支衝我左隊。楊錦斌策馬大呼。兵勇應聲而出。殺賊數十名。賊遂敗退。繼以左支衝我中隊。右支之賊退而復進。名謙楊錦斌督率中左兩隊。奮力抵禦。殲賊數十名。並殲大旗賊目。賊隊自亂。我軍右隊從旁突進。殺賊百餘名。賊不能抵禦。兩支並退。逆首二人。提刀攔截。賊衆復回旗搦戰。我軍蜂擁而前。一以當百。刀矛

鎗礮各自爲戰。自辰至未。該逆三戰三北。紛紛回竄入城。統計斃賊四百餘人。奪獲器械百餘件。我軍傷亡二十餘人。此四月二十七日大獲勝仗之實在情形也。自此以後。賊愈壘城固守。堅伏不動。五月初五日。學政廉兆綸派廩生郭守謙帶廣信義勇一千二百名。何忭等派教諭袁英帶南豐勇五百人。均赴建郡。因約會各營分路進攻。名謙楊錦斌等紮南路之麻橋。楊希閔趙金彪等紮東北之萬家橋。郭守謙等紮西北之登高山。初六日偪城而陣。以鎗礮仰攻。斃賊二十餘人。一勇扒城殺賊五人。受傷而墜。初七日復議進攻。自辰至午。賊仍不出。忽聞西路有宜黃援賊千人將至。守備楊錦斌教諭袁英各帶兵勇馳往迎擊。該逆不虞官兵猝至。拋棄礮械而奔。我軍追殺一百餘人。餘賊奔踞山巔。我軍飢疲收隊。賊忽下山追逐。武生張榮燮扼住山口。楊錦斌回軍合擊。殺賊三十餘名。生擒五人。賊遂竄逸。此五月初六初七連日攻城並截擊逆援之實在情形也。臣等以建昌與撫州兩府相爲唇齒。能破建昌。則撫賊之右臂已斷。聲援益孤。或可迅速得手。而建昌之何忭張家駒等。當無兵無餉。羣情渙散之秋。尙能召集義旅。自成一軍。若非由省城另派兵勇助之。一旦挫敗。則官紳中更無敢出而任事之人。而廣信及南豐新集之勇。未可深恃。亦須有久經戰陣者列前行。以爲之倡率。於是商定派楚軍黃虎臣等二千三百人。益以九江鎮標兵勇千餘。共三千五百人。於五月初二日由省城馳赴建昌。十二日行抵該府。以張家駒前在安徽屢著戰功。即派該守總理營務處。與何忭會辦建昌防勦事件。合之該郡兵勇及廣信南豐之勇。統計建昌一軍不下六千五百人。與撫州大軍互爲聲援。氣勢頗覺雄厚。該逆堅忍頑悍。素以善守爲長技。臣等嚴飭張家駒等激勵士卒。晝夜環攻。務期力復名城。肅清東路。所有建昌府官紳辦理防勦。並由省城添撥兵勇會勦各緣由。理合恭摺馳奏。伏乞皇上聖鑒。訓示施行。謹奏。

水師吳城勝仗克豐城縣片 咸豐六年五月二十二日

再水師九營。惠潮嘉道彭玉麟帶四營。駐吳城防下游湖口之賊。記名道劉于濬帶二營。駐市汊防上游瑞臨之賊。又分撥二營駐饒州。一營駐省河。均經奏明在案。嗣據李元度等疊次稟請水師赴撫州會勦。臣等分撥饒州一營。省河一營。前赴撫州。水陸夾攻。而吳城及市汊上下游之防如故也。據劉于濬先後稟稱。豐城被賊佔踞。相逼太近。市汊終無安枕之日。必須克復豐城。而後上可以規取臨江。下可以保全市汊。四月初十日。督戰船至豐

城。十一十二連日鏖戰。十五十八。亦督隊轟擊。豐城一線大隄。我開礮則賊隱隄以避之。賊登隄則我排礮以擊之。終以無陸兵助。未能得手。二十日初更。乘月光未出。於豐城縣東西北三門。各派戰船放礮攻城。牽制賊匪。一面親督舢板十號。從西岸暗渡。派令千總李逢春萬元昌。右營徐安邦。豐城縣把總鮑世雄等。督帶哨勇登岸。各持火器。直撲南門外賊營。登時火起。賊即退走。我勇隨後追趕。復燒賊隄內營盤。並將四面戰船調齊轟擊。賊疑陸軍已至。前後夾擊。不敢駐足。悉往樟鎮上竄。擊斃殺斃約二三百人。克復縣城。旋督各勇搜捕城內城外。奪獲大礮鉛子鎗械百餘件。米五百餘石。分賞各勇。此劉于濤水師克復豐城之情形也。又據彭玉麟督同吳城水師四營。稟稱。五月十三日辰刻。有賊船四十餘號。偃息旗鼓。混稱民船。蜂擁上犯。將近望湖亭。開礮轟擊。時各營哨探已先後偵知。彭玉麟派定後營嚮導營走東路。由夾河包鈔。左右兩營走西路。由大河直下。比賊船已近。各帶船隻。分途而下。兩相攻擊。鏖戰逾時。約轟斃賊匪數十名。賊始敗退。我軍乘勝追趕。燒燬賊擄民船四隻。追三十里至德安河口。大浪風起。收隊回營。我軍無一傷損。此吳城水師迎勦獲勝之實在情形也。伏查水師各營。分駐要地。均尙得力。祇以西岸數百里。無一陸兵。水軍不能獨樹功績。劉于濤專用水師。克復豐城。籲懇天恩。准臣等酌保數人。以示鼓勵。所有水師近日開仗緣由。理合附片具奏。伏乞皇上聖鑒。謹奏。硃批。一賊先竄出。焉得謂克復。姑念其打仗奮勇。著准其酌保數人。欽此。」

陳明鄭省援兵協餉片 咸豐六年五月二十三日

再江西軍務除撫州建昌饒州三府。勦辦吃緊。各由專摺具奏外。至各省援兵。湖南援師。分兩路而來。南路係道員劉長佑統帶。由醴陵萍鄉以至袁州。屢獲勝仗。現已圍信都城。北路係同知蕭啟江。都司劉培元等管帶。由瀏陽以至株樹潭。四月二十九日。克復萬載縣城。軍威大振。湖北援師。係游擊普承堯。同知吳坤修。暨巨國藩之弟曾國華管帶。普承堯所帶之兵勇。則去年八月自九江派去。奏明隨羅澤南援勦鄂省者也。現經胡林翼派撥回援江西。業已克復咸寧蒲圻。擬由通城以達於義寧州。計兩湖援兵三路。共萬餘人。集厚力以相拯救。而賊亦出死力以相抗拒。凡江楚文報。自賊中經過。輒被殺害。臣等顧募長髮探卒蠟丸細字。作爲隱語。以通消息。但能知三路勝仗之大略。而不能詳悉何營何地。及鏖戰之情形也。至浙江援師。前經奏明派萬青藜前來廣饒等處援

勦厥後因寧國太平浙防孔亟不暇議及援江之事福建援師參將舒隆阿所帶之五百人已至河口鎮現調赴建昌府會勦副將張從龍所統之三千餘人尙無入境確信廣東援師蒙恩派重兵五六千人臣等亦屢次函咨陳詞懇切迄今未見援師未接回文每念贛州天險爲古來必爭之地非得廣東厚援終恐不免疏虞道途久梗呼救無從中宵念此魂夢屢驚合無籲懇皇上天恩飭下廣東督撫先撥一二十人星速踰嶺保守贛州先據上游俟大隊齊集再圖入援吉安不獨江西之幸亦廣東之先著也至各省協濟之餉浙江五月間解到銀二萬兩分撥各軍尙不敷抵換鈔票之用廣東之餉亦以道途梗阻尙無音耗所有鄰近各省援兵協餉理合附片縷晰陳明伏乞皇上聖鑒謹奏：硃批「另有旨欽此。」

分別失守員弁處分片 咸豐六年五月二十三日

再江西八府淪陷州縣失守至四十餘屬之多文武員弁有守土防汛之責者若不嚴行參辦則居官者不復知城守之重幾以國憲爲不足畏然使一律嚴辦則其中不無情有可原之人臣文俊擬逐一查明察其平日居官之賢否臨時被賊之情形分別輕重參辦恭候欽定因軍務旁午道途梗塞尙多不知下落之員一時未能訪察確實未及悉行入奏惟現在攻撫建袁州等府萬分吃緊之際中有一二守令艱難顛沛出而任事籌兵籌餉慨然以克復爲志者臣文俊與臣國藩再四熟商不得不假以事權作其愧奮之氣卽如建昌府知府何斌到任甫經月餘兵餉兩空無可藉手猝被淪陷卽赴各鄉糾合紳耆號召義旅竟能成軍以出圍攻郡城目下省城及贛信兵勇赴建會勦該守又赴新城等處籌捐錢米接濟軍餉萬載縣知縣李吉言於去冬城陷之後率舉人辛辰雲等招募鬪勇誓圖克復嗣同知蕭啓江在鐵山界防堵卑辭乞援遠援師入境大小十二戰李吉言自率鬪勇千人扼守株樹潭後路派其弟李審言隨同進勦屢次陷陣衝鋒攻克縣城所捐錢五萬餘串於給發鬪勇口糧外概接濟蕭啓江等援師餉項宜春縣知縣錫榮於候選道劉長佑援師入境以後竭力供支捐錢四萬餘串贍給楚師俾無缺乏目下建昌大兵雲集實自何斌劍其端萬載援師賴李吉言爲之主袁州援師賴錫榮爲之主此一府二縣者實屬失守案內愧奮有爲之員臣等責令襄辦一切如果始終出力再行奏請寬免處分除文武各員弁由臣文俊查明另行分別參奏外所有何斌李吉言錫榮現在建昌袁州出力之處謹合詞先行附奏伏

乞皇上聖鑒謹奏。

官兵攻勦撫州迭獲勝仗摺 咸豐六年六月三十日

奏爲五月十一日至六月十一日官兵攻勦撫州迭獲勝仗恭摺具奏。仰祈聖鑒事。竊官兵攻勦撫州。五月初十日以前迭獲勝仗各情形業經會奏在案。嗣據李元度會同鄧輔綸林源恩等陸續稟報。五月十一日賊分三支來犯楚軍中營。我軍豫伏礮位於濠外樹間出其不意礮斃數名各勇隨煙槍進賊仍死拒都司唐得陞從右手抄擊直薄城下互有殺傷賊遂從隄上橫過更犯江軍經各軍奮力擊退。十六日約會水陸夜攻四更時從文昌橋轟擊東北門其駐紮千金陂之礮船十號攻擊清風門及南門楚軍復於西城轟礮以分賊勢城內更鼓加嚴鎗礮不絕江軍之在清風門梯城而登者被火彈燒傷十一人遂於黎明收隊。十八日探得瑞臨援賊由棠埠秋溪進紮上頓渡對岸初列三營繼併爲一大營高壘深溝冀與撫賊爲犄角之勢因約會水師於十九日合攻辰刻楚江兩軍派哨馳抵渡口該逆列隊河干紅傘黃衣怒馬充斥所掠民船百餘號盡泊對岸我軍水師二十餘艘駛至礮斃數十賊賊遽敗退我勇斃水過河牽船接濟陸軍營官彭大壽等由上游徑渡童梅華等繼之哨官易祥泰等由下游過渡夏宏江等繼之同時飛渡千餘人該逆分股抵敵我軍鎗礮先轟刀矛續進斫倒悍賊數名賊始卻退仍復回禦是時我軍進易退難已成背水之勢人人拚命直逼賊壘彭大壽等從左手衝來劉體厚等從右門薄入立將賊壘蹋平賊從壘後狂竄我軍乘勝追殺合計礮斃四五百名偪溺百餘名逃散殆以千計奪獲黃旗百七十三面號褂四百餘件擡鎗刀矛藥鉛甚多此十九日冒險渡河踏破賊營壘之實在情形也。二十三日賊探知我軍開挖地道因出二百人傍城開濠並埋鎗礮以爲抵禦之計我軍出隊驅逐用大礮轟斃數名賊始繞城而入二十四夜用火箭噴筒前來驚營四更始盡擊退我軍旋於五更水陸夾攻千礮雷動該逆登陣死拒黎明收隊次日辰刻賊復分股出城一撲右營一撲中營經各營擊退二十七日我軍在懸轡嶺築一邊牆安礮俯擊城內賊出三百人奮力相爭我軍亦奮力迎擊互有傷亡而退六月初一日賊用全力來撲江軍我軍用銅炮排轟紛紛踏地仍堅忍不退其分犯楚軍者亦極強悍鏖戰兩時之久礮斃一百餘名我軍陣亡二人受傷四十餘人初三日省城解運大礮十尊到營是夜轟攻連日初四日水師營官金世蓮帶船十四號紮於

千金陂會合攻城。自晝至夜。水陸巨礮連聯不絕。聲如墮牆。城內震怖。初五日。城內遣散百姓七八百人。復出賊二百餘人。趁便劫掠。我軍出隊追擊。賊仍入城。我軍復排礮攻城。轟倒壕口。守陣者盡皆伏匿。我軍卽負梯薄城。賊又拚命死拒。隊長周芝芬。外委方鳴玉。中礮陣亡。受傷者十餘人。遂收隊罷攻。十一日。有賊數百由東岸來襲我軍。營官成章鑑先期防賊來犯。多削竹籤。暗釘兩岸沙草之中。賊至半爲竹籤所窘。連發礮轟斃二十餘名。賊黨稍退。或伏隄下。或匿樹間。少頃再進。復被礮斃十餘名。賊始飛遁。我軍尾追數里而還。此自五月二十三日。至六月十一日。水陸圍攻。迭獲勝仗之實在情形也。伏查撫州賊匪。嬰城拒守。又有瑞臨援賊相繼而來。經李元度等水陸夾攻。迭有斬獲。而相持兩月有餘。郡城尙未克復。自五月初十以後。惟十九日。渡河踏毀逆壘。殺賊最多。此外雖屢次報捷。我軍傷亡亦多。將士同深憤激。臣等更切悚慚。誓當力復此城。以清東路。所有五月十一日至六月十一日攻勦各情。理合據實繕陳。伏乞皇上聖鑒。謹奏。

水師連勝收復南康府城摺 咸豐六年六月二十日

奏爲水師連獲勝仗。收復南康府城。恭摺奏祈聖鑒事。竊南康府城爲江西全省水道之總匯。外接大江。內控鄱湖。爲古來舟師戰爭之地。去年臣國藩駐紮該府。及屏峯等處。水陸布置。尙無疏虞。自本年二月間。樟樹鎮官軍失利。將分駐青山屏峯之水師。調紮吳城。下游之賊。遂竄踞南康城中。不時乘間上犯。水軍統領惠潮嘉道彭玉麟督率各營。防勦兼施。四獲勝仗。疊經會奏在案。茲據該道稟稱。六月十一日。探有賊船上駛。因派後營營導營由東路包鈔。左右兩營由西路直下。麾旗向前。兩相攻擊。該逆潰竄。我軍尾追。礮轟其後。子落賊船。傷亡甚衆。順水順風。該逆揚帆而遁。十四日。賊復上窺。又經各營擊壞其船二隻。斃賊十餘人。此六月十一十四連日獲勝之情形也。旋探賊在南康一帶。迫脅民夫。修造戰船。因派各營分途往勦。長龍在前。舢板繼後。於十八日五鼓出隊。行抵老窰廟地方。焚賊艦六隻。賊卽下竄。維時風勁浪高。我軍暫行停息。風波稍定。將長龍分泊兩岸。各帶舢板。直赴南康城下。該逆嬰城拒守。我軍將礮口高擡。轟子入城。而沿岸堆積船料甚夥。一概焚燒。賊見城外火起。卽開東門逃竄。該道同營官鄧翼升孫昌國陳炳元丁義方庵水勇登岸進城。因水兵不慣陸戰。尾追十里而還。城內磚牆。爲賊撤毀熬硝。礮臺壘壘。將其硝廠船廠。一概蕩毀。此十九日收復南康府城之情形也。伏查南康地瘠

民貧。城內賊黨無多。水軍出其不意。即時收復。惟吳城水師。祇有四營。下游之賊。雖經懲創。前後兩河。尙有德安建昌之賊。截我後路。又無陸兵爲之犄角。故不敢守此荒城。祇得安撫居民。仍回吳城駐泊。每日派船十餘號。游繹郡城。以巡哨爲防守。所有善後事宜。臣等另籌陸兵與水師依護。庶足以資堵禦。所有收復南康府城緣由。理合由驛馳奏。伏乞皇上聖鑒訓示。謹奏。

饒州失守旋經克復摺 咸豐六年六月二十日

奏爲饒州失守。旋經克復。恭摺具奏。仰祈聖鑒事。竊饒郡防剿事宜。及五月十五日。大獲勝仗情形。業經會奏在案。臣等以此股賊匪。雖經懲創。而饒郡西通都湖。北接彭建。實爲羣賊之淵藪。四路可通。時虞窺伺。仍飭新任布政使耆齡督率水陸各軍。擇要扼防。相機攻擊。並添派參將阿達春。帶得勝軍五百名。前往應援。耆齡與各營商酌。擬以阿達春一軍。進紮童子渡。而令畢金科移營紮陶溪渡。會合贛營。併力守禦。初一日。探得都湖建德逆匪分三路內犯。已抵陳家嶺。畢金科等會商。亦分三路迎敵。初二日。平明。進至陳家嶺。畢金科奮勇當先。派千總龔廷貴督勇衝殺。殲斃長髮四百餘人。奪獲羸馬九匹。追及臥虎山。四面壁立。遙見密林中尙有伏賊四股。畢金科勒馬歷隊。毋許再追。該逆知我兵不入伏中。遂由山背鈔至陶溪渡。直襲贛勇營盤。須臾火起。被陷。贛營各勇。退屯四十里街。畢金科以陶溪營壘被陷。恐童子渡亦難孤立。帶勇暫退。紮北門外。此初二日接仗。互有勝負。兩營退紮之實在情形也。阿達春得勝軍到饒。四月初三日。方進紮四十里街。中途聞信。亦折回紮北門外。贛勇亦回屯府城。初四日。探聞該逆分竄景德鎮。知其爲聲東擊西之詭謀。議定贛營諸軍。力扼東路。阿達春畢金科防禦西路。相機進剿。水師則分布於祝君垵黃龍廟沿河一帶。旣防賊舟突入。兼爲陸路聲援。初五日。賊衆分五股來撲郡城。畢金科與得勝軍哨官朱光裕李鶴齡李錕齡等。分途迎敵。鏖戰二時。陣斬僞指揮張姓等四名。賊黨敗走。追不數里。忽分股鈔出。隊尾兩營。腹背受敵。贛勇之在茅園者。亦已敗退。賊衆由北門竄入。直出東門。各營紛紛潰散。沈燭者約二百人。得勝軍哨官藍翎千總李鶴齡與其弟把總李選齡回合衝擊。至六七次。被該逆重重包裹。偪入湖中。力竭陣亡。水師賀虎臣康國器兩軍。見事勢危急。督帶水勇登岸。畢金科率親兵百餘回擊。由高門進至東門。水勇登城。短刀相接。雜以礮石。殲賊三百餘名。該逆先勝後敗。狂奔出城。我師雖於收隊時轉

敗爲勝。然以傷亡過多。勞之過甚。亦未敢久駐城內。耆齡督率水師。泊於城河對岸。陸營亦分紮角山圩等處。旋與賀虎臣退至距饒三十里之表恩汛地方。此六月初五日。官軍挫衄。郡城失陷。並該司等移營退守之實在情形也。臣等以陸軍帳械全失。即飭畢金科馳回省城。重加整頓。迅圖克復。十八日。復自省駛赴饒州。因阿達春告病。乃另派都司林葆等協和營千人。而以九江鎮總兵居隆阿前往督同勦辦。十九日。師至表恩汛。與耆齡紮泊一處。該逆於城外紮營四座。一營黃龍廟。并於河邊立礮臺九座。阻我兵登岸之路。一營東門外。一營毛圍。防我軍鈔襲。一營北門外。以爲退步。尙有小營分布數處。堅壘深濠。竹籤鹿角。極爲周密。廿一日。耆齡等定大舉進攻之議。畢金科林葆兩軍。由角山圩進攻東路及北門。贛營由沙洲進攻西路及芝山。期於風頭山相會。水師金世蓮賀虎臣兩營。助攻東路。康國器助攻西路。廿二日。東路水師金世蓮等先抵黃龍廟。該逆槍礮齊施。火箭噴筒。形如驟雨。我軍幾不得進。各戰船飽食羣子。萬礮齊轟。哨官楊占鼇首先登岸。畢金科與林葆隨換小船。一躍而登。兵勇如牆繼進。奮力衝殺。火箭火礮。四面拋放。賊營火起。千總龔廷貴等堵截該處股匪。畢金科攻剿沿河礮臺。衝躡一座。各處潰散。遂合攻東門。該處悍賊畢萃。併力死拒。自卯至巳。尙未擊退。迄協和營繼進。水師亦捨舟登岸。環攻數重。始衝入賊營。奪獲鎗礮數十件。我兵進城。乘勢跟追。直信至大街。城中伏賊突起。三路鈔來。勢似潮湧。畢金科積前日之憤。乘新勝之氣。下馬怒戰。又值從九品楊玉輝帶守船丁勇前來助剿。連刺騎馬賊十一名。該逆將旗幟各物。拋棄墜城逃奔。計殺死及盡斃約五六百人。林葆等至茅圍繞出。會合追賊。共躡北門外及張王廟賊營。水師亦由祝君垠進躡去高門內教場賊營一座。維時居隆阿同赴東門。督勵將弁。追殺尤多。其自西路進者。康國器先帶礮船於高門上下開礮。故作攻撲之勢。城西之賊。稍稍分撤。往救耆齡督令守備羅玉祥等。分爲三隊。風飛登岸。賊之撤救高門者。回顧不及。濟勝軍水師及陸勇。乘機分道上城。先將其坐纛砍倒。剿散守城之賊。旋分爲二。一撲高門。一撲靈芝門賊營。縱火焚燒。賊膽驚落。遂大奔潰。分投追剿。自西城轉戰而出北門者。適與城外羅玉祥剿散芝山股匪之兵相遇。前後夾攻。殺賊無算。其奔逃不及者。紛紛竄匿東湖西湖。兩軍合併窮追。至風雨山收隊。武舉于宣等遙見援應之賊。自山後捲旗而來。計圖暗襲。我後各營嚴陣以待。賈其餘勇。併力追擊。復殺賊百餘。並燒道旁小營二處。通計江楚水陸各軍。殺賊千餘。生擒八十五名。先後解送省城。奪

獲旗幟四百一十面。鎗礮子藥驟馬無數。此二十二日克復饒州府城之實在情形也。伏查饒州一郡。捍禦鄱湖皖南之賊。東蔽廣信。南衛省垣。實維江省要區。特以逆蹤切近。無城可守。遂至屢復屢陷。該逆以善守爲長技。此次甫經半月。修築營壘礮臺至十餘座。爲堅悍不拔之計。幸我軍文武同心。憤激用命。一鼓克捷。保全東北籬籬。然近而鄱湖。遠而徽池。匪黨環視。仍厚積兵力。乃足以資防剿。此次酷暑疊戰。克復神速。所有水陸將弁。尤爲出力者。籲懇天恩。容臣等開單保獎。以示鼓勵。布政司着齡有專辦饒防之責。饒州府知府張澧翰鄱陽縣知縣夏燮。有地方之責。均有應得處分。惟克捷迅速。功過尙足相抵。應請免議。哨官李鶴齡請交部從優照守備例賜卹。李選齡請照千總例賜卹。陣亡弁勇。查明照例辦理。所有饒州失守各情。克復緣由。恭摺由驛馳奏。伏乞皇上聖鑒訓示施行。謹奏。

建昌攻城黃虎臣陣亡摺 咸豐六年六月二十日

奏爲官兵會剿建昌府城。連獲勝仗。恭摺具奏。仰祈聖鑒事。竊建昌官紳辦理防剿省城。分撥兵勇。應援各情。業經會奏在案。嗣據該府何忒在籍知府張家駒等稟稱。省兵黃虎臣等五月十二日到郡。與建昌兵勇更番派隊。分駐西南北三面。晝夜環攻。閩兵張從龍等。五月二十七、八等日。次第到郡。分駐東面。斷賊接濟。並派哨赴宜黃偵探。以防賊之應援。建昌城外民房櫛比。我軍分駐房內。開掘地道。派隊分段緣梯而登。該逆頑悍不出。平時城上並無旌旗。聲息俱寂。我軍於登高山設立望臺。俯視城中。不見一賊。忽然礮聲陡起。鉛子從山頂飛過。我軍約會進攻。賊匪了不接應。兵勇扛梯而進。飛擲火毬。則城上旗幟林立。號鼓雷鳴。鎗礮如雨。每垛用皮木箱滿盛磚石。傾筐而下。我軍受傷甚多。因之卻立。稍卻。則鎗礮頓息。每夜用鐵鍊木板。堆積棉花桐油。四面燃放號火。至四鼓漸熄。我軍即支梯飛聲而上。纔至梯巔。則木石鎗礮齊下。或傾倒火藥。往往跌墜陣亡。苦攻半月之久。未能得手。六月初一。探得宜黃援賊。自茅排地方。蠶擁而來。各營集議。派隊分守要隘。截擊外援。並堵城內出應之賊。是夜二鼓。南城內突出數百人。暗撲建昌營。經虎字營江永和帶勇橫截擊之。殲賊五十餘名。建昌營聞聲攔擊。又殲二十餘名。賊遂風竄入城。次日黎明。援賊忽分三路而來。一撲西門。一撲南門。一襲建昌營。併撲南門。突過虎字營地道之旁。營官黃虎臣大隊未至。率勇九人。挺矛邀擊。衝突過早。前面之賊爲其所殲。後股蜂擁攔刺。該營

官身受十餘傷。力竭捐軀。各營駐建昌者以黃虎臣爲衆望所歸。未成列而遇害。三軍之氣奪。幸本營哨官黃之一江永和。及外營營官李大雄。胡應元等聞信奔救。大隊齊出。於刀矛叢中。將黃虎臣屍首奪回。且踴且戰。憤氣百倍。該逆紛紛敗北。兔走烏飛。自相踐踏。廣義軍郭守謙等從登高山。直趨而下。聲震山谷。所向披靡。兩路共殺賊五百餘人。生擒二十三人。訊明正法。奪獲黃旗呢轎文卷衣服甚多。大小轍位十一尊。步隊追至二十里外。馬隊至三十里之規下。撤隊回營。建昌營守備楊錦斌另擊麻源之賊。分路鈔追。亦斃賊匪百餘名。生擒十六名。奪獲黃旗軍械八十餘件。此六月初一初二連日接仗獲勝之實在情形也。伏查建昌郡城之賊。偵探皆云。真賊不過千餘。乃環攻半月。該逆壘城拒守。寸步不出。較之撫州悍賊時出搦戰者。情形迥不相侔。此次截勦援賊。酣戰獲勝。軍心爲之一振。然黃虎臣爲數營領袖。遽爾殉難。亦屬得不償失。適因初五日饒州挫敗。臣等恐饒賊東援撫州。南犯省城。而建昌一隅兵力尙厚。遂將攻勦建郡之六營者。移駐撫州。撤回省城。以便調遣。都司黃虎臣樸實驚勇。前此克復建昌縣案內。擬保游擊。尙未出奏。此次力戰捐軀。應請照游擊例賜卹。營官藍翎把總李大雄。胡應元哨官江永和。均係建昌縣案內。克城先登之員。此次當黃虎臣初逝之際。俱能憤極力戰。轉敗爲勝。關係甚大。李大雄請以守備補用。胡應元江永和均請以把總卽補。並賞戴藍翎。陣亡弁勇。查明照例辦理。所有官兵會勦建昌疊獲勝仗緣由。理合具摺會奏。伏乞皇上聖鑒。訓示施行。謹奏。

陳明各路援師片 咸豐六年六月二十日

再福建援江兵勇三千一百人。現到建昌府者。已有二千六百人。屢接閩浙總督臣王懿德來咨。先派副將陳上國帶一千五百人。馳赴金陵。交向榮調遣。其餘兵勇。仍交副將張從龍。留於江西。攻勦建昌等因。鈔摺咨送前來。六月初五日。饒州失陷。臣等恐賊蹤竄擾廣信。擬俟陳上國閩兵過郡之便。截留防守廣信。咨明學政臣廉兆綸會摺具奏在案。今饒州業已克復。此項閩兵。卽無庸留防廣信。應令迅赴金陵。以資援勦。准查該副將等一軍口糧取之閩省。糧臺夫船取之江省州縣。雖經臣等札催。刻下尙未據報起程。至湖北援師由普承堯會國華等統帶來江。已於六月十八日克復新昌縣。二十四日克復上高縣。接據細字隱語書函。七月初旬。可至瑞州。從此兩湖聲息可通。大局嘗有轉機。廣東援師。接據稟報潮州鎮總兵壽山。於五月十九日至贛州入城。二十二日大獲

勝仗。贛郡防守尙嚴。當可保全要郡。仰慰宸廑。所有各路援師情形。理合附片奏聞。謹奏。

贛州解圍并攻勦情形摺 咸豐六年八月初七日

奏爲贛州府城解圍。並各屬勦辦情形。恭摺奏祈聖鑒事。竊贛州據江西上游。爲古來用兵者所必爭之地。又與粵東毗連。時有土匪滋事。本年正月。吉安失守。泰和繼陷。沿途文報不通。該郡一切軍務。傳聞異詞。六月間。廣東援師至贛。臣等附片奏聞在案。茲接據護南贛道汪報閩署南贛鎮總兵阿隆阿等。專差繞道贛文來省。據稱本年春間。泰和一帶。寇氛日熾。汪報閩帶領新城南康之勇三千餘名。文英牟角二營。官兵同往進勦。接仗失利。三月十二日。與國武進士韓進春至夏口地方。十五日。與泰和之賊戰於萬安武索一帶。大獲勝仗。擒斬頗多。並擊沈賊船三隻。十七日。該匪復四路來攻。我軍陸路失利。水軍不能獨支。韓進春一軍。退紮大湖江。汪報閩即帶餘勇回贛。適值署饒州營參將遮克敦布撫州戰敗之後。於寧郡收集兵勇到贛。三月二十二日。南康所屬之潭口地方。會匪滋事。將委員鄒慶雲戕害。數日之間。土匪四起。下游之長髮賊。又於二十五日破龍泉。於是潭口之賊。糾集大庾新城土匪。於四月初二日圍南康。塘江一帶之賊。於初四日破上猶。風鶴迭警。人心搖動。適汪報閩先期招募之湖南東嶺勇從崇義而來。十四日克復上猶縣。商借之嶺東南雄勇。從大庾而來。初九日。將新城土匪剿散。於是南康之勇。會合東嶺南雄各勇。連日攻勦金雞嶺李家山鏡壩壩。以及塘江潭口各處。贛州亦派兵勇來擊。先後六十餘戰。殺賊近萬。軍威日振。此東嶺南雄等勇。勦辦土匪得手之情形也。南贛界連楚粵。羣盜淵藪。連歲三省梭勦。不爲不多。無如黨羽甚繁。蔓延日廣。又復糾邀泰和萬安一帶之長髮賊。上竄贛州。四月十九日。韓進春在大湖江戰敗之後。各賊即分東西兩路。於二十九日。直薄贛城。兩岸紮營數十座。礮船數十號。在城北龜角尾地方停泊。復於上游擄取船隻。搭造浮橋。五月初三日。賊分東西兩路過河。徑撲城下。經兵勇出隊擒斬三百餘人。擊沈賊船七號。淹斃百餘人。餘匪潰回。迨追落水者尤多。由是賊鋒稍挫。連日未敢過河。南路陸賊。迭至扛道坪嶺上紮營。均經我軍擊敗。燬其營盤十五日以後。大雨河漲。湧金門一帶。水與雉堞相平。防守吃緊。適東嶺勇因南康缺糧。前來贛州就餉。即令該勇入城守堞。而廣東督撫奏調潮州鎮總兵壽山督兵勇一千五百名。來江助勦。於十六日攻破零都。十八日亦抵贛城。官軍援師日集。賊數亦日增。二十二日。東河賊匪會合。

南路賊萬餘。直撲東南兩門。各兵勇由南門出隊。鎗礮齊施。刀矛繼進。擒斬五百餘人。割級一百八十八顆。追逐落水。除漂失不計外。壅塞汊河。賊屍尙有六百餘具。並開放大礮。擊沈賊船。奪獲旗幟器械無數。其東岸嶺上營內各賊。亦由旱路逃往山後。我軍追逐。燬賊營十數座。此贛郡被圍二十二日接仗獲勝。東岸肅清之情形也。總兵壽山等與汪報閩熟商攻勦西河之策。欲趕造浮橋。則船隻不敷。且對岸賊礮甚多。難於措手。於是佯爲置之不理。令我軍分日出隊。或攻東南路之樓梯嶺湖裏塘。或攻正南路之南橋。或攻西南路楊梅渡老虎坑等處。至六月十七日乘其不備。仍令兵勇於各路誘戰。待至賊衆應接不暇之時。我軍千餘人。突出西門。乘船過河。直至對岸。一擁而登。先殺斃執旗賊目數人。並焚燬沿河賊營兩座。匪始退走。我軍分路鈔擊。上游楊梅渡等處之兵勇。亦各用竹筏木牌過河。上下夾擊。計擒斬六百餘名。割級三百八十五顆。奪獲大礮十一尊。擡鎗一百五十三桿。礮船三隻。又大小船隻三十餘號。晒平嶺上賊營二十餘座。餘匪即日逃遁。我軍追逐十餘里。次日搜捕。及鄉民捆送者。又得五十餘人。並將已受僞職之舉人劉效忠生擒正法。此六月十七日攻破西岸賊營。贛郡解圍之情形也。現據鄉民稟報。東河自贛城至興國得團勇數萬人。西河自贛城至八十里之沙地。均無賊蹤。北路自贛至夏口一百二十里。亦趕辦團練。一律薙髮。惟南路之賊。尙須迅圖攻勦。前經汪報閩稟明。廣東督撫臣准南令澳鎮總兵帶兵來江協勦。如能上下夾擊。則潭口一帶。當可指日蕩平。又前任按察司周玉衡之子候選同知周炎。先於四月二十八日。自備軍需錢二萬串。招集龍泉鄉勇二千餘人來贛。曾屢次出仗獲勝。嗣於六月間。因廣東和平之賊。竄入定南圍城。以致長寧安遠信豐一帶。時有警報。飭周炎帶勇前往信安長定一路。相機勦辦。各等因稟報前來。臣等伏查江西自吉安撫建並陷之後。贛州遠隔。南路道途梗阻。臣等每聞警報。寢饋不安。歷次陳奏。皆以此爲慮。該護道汪報閩就近稟請廣東督撫撥兵赴援。並接濟軍餉十餘萬。又有東嶺南雄南康等勇。及周炎招募之龍泉勇。先後協勦。藉以殄逆黨而保郡城。竇爲江省大局旋轉之一端。除俟查明尤爲出力人員。籲請保獎。傷亡弁丁。照例請卹外。謹據護南贛道汪報閩署南贛鎮總兵阿隆阿來文。附驛具奏。伏乞皇上聖鑒。再此案經汪報閩就近稟報廣東督撫臣。或已先行具奏。合並聲明。謹奏。

湖北援師進攻瑞州府城摺 咸豐六年八月初七日

奏爲湖北援師進攻瑞州府城。江省派兵四千前往會合。屢獲勝仗。江楚之路漸通。恭摺馳奏。仰祈聖鑒事。竊湖北援師克復新昌上高等縣。將至瑞州。業經附片具奏在案。嗣據探稟。候補參將普承堯。候補同知吳坤修。同知銜曾國華。候選知縣劉騰鴻。於七月初一二等日。先後抵瑞州府城外。初三初五等日。大獲勝仗。臣等因派湖南河溪營都司彭山。都司李新華。守備萬泰。李瀛等。率兵勇七營。四千人。於初九日自省起行。十五日馳抵瑞州。與援師相會合。自上高新昌以前接戰情形。均由湖北湖南撫臣具奏。既至瑞州城下。十五以前接戰情形。仍是細書隱語。略敘大概。十五以後。省兵已到。接戰情形稟報較詳。臣等謹據原稟。分別陳奏。六月三十日。援軍於距瑞州二十里之大山地方駐紮。七月初一日。率隊赴府城察看形勢。猝與城外賊遇。格殺數十名。生擒六名。初二日。移紮西門外。查瑞郡分建南北兩城。北曰官城。南曰民城。中夾一河。上有大橋一道。初三日。僞北王韋昌輝自臨江率黨三千餘人來援。我軍派定兩大支。以一支留河北攻勦城內之賊。以一支過河南列陣堵截外逆。使不得入。比章逆至。我軍之先過河者。已拔其南城。即從南城出勦。望見賊勢甚盛。儀從赫奕。奢僭非常。頭隊排刀手兇悍直前。劉騰鴻堅持不動。靜以待之。該逆三次猛撲。銳氣稍衰。我軍突起乘之。賊衆敗潰。我軍復從北岸渡兵。鈔其後尾。賊隊大亂。殲斃近五百人。獲僞王黃輪。繡傘金碗金盆各僭物。及銀錢甚多。章逆逃竄鄉間。是夜偷入城內。初五日。我軍大舉攻城。緣梯踏肩。肉薄而登。該匪鎗礮木石。同時并發。壯士多傷。未能得手。初九日。賊匪乘雨前來撲營。先犯吳坤修。彪勇營盤。我軍悄寂無聲。伴呼「天雨藥溼。何以禦敵。」賊悉銳撲至濠外。我軍點放。劈山大礮。飽食羣子。轟倒數人。各營鈔出截擊。賊黨敗潰。紛紛四竄。有不及進城者。追殺幾盡。十一十二兩日。賊復傾賊出犯。我軍相戒勿動。俟其疲乏。奮勇直前。殲賊甚多。追至偃城而還。此楚軍到瑞後。十五日以前。六次接仗獲勝之情形也。當楚軍初至瑞州之時。該逆方大舉撲犯省城。於省河之對岸數十里內。築立賊壘五六處。另詳水師奏中。其塘頭壘一壘。去省垣十里。而近逆旗。日來沙井搦戰。一河僅隔。臣等欲派兵勇迎接瑞州之援師。必先攻破沙井之賊壘。七月初四日。渡兵二千餘人進剿。派守備李瀛。義武營擊中路。守備萬泰把總胡應元兩營擊西路。守備李大雄。滕加洪兩營擊東路。如牆排進。直抵塘頭壘賊壘。該逆出營迎敵。未及片時。我西路兵已截斷其尾。營內逆黨。紛紛潰竄。前敵之賊。亦相繼敗退。踏破逆壘二座。奪獲大礮四尊。旗幟軍械無算。此初四日

進勦省河對岸賊壘獲勝之情形也。初九日。派新字營虎字營合四千人。前赴瑞州。十五日到郡。與鄂省援師相會。十七日。該逆以楚軍精強。未可輕犯。江軍稍弱。且新到。營壘未堅。遂出二千餘人。牽制楚軍。而以大隊六千人。猛撲新到江軍之營。江軍各營官議定。整隊以待。俟其切近。始行出擊。右路一股先至。直向平江營。胡應元帶隊沖出。中路繼至。李大雄出禦之。萬泰率九江營抵禦左路。義武得勝兩營。合鈔右路之後。回合數十次。右路退挫。義武營勇夫紛紛逃潰。幾至不支。都司李新華帶新字營虎字營馳出力堵。楚軍湘寶勇。馳至救援。各營先挫者。亦回旗轉戰。李大雄力衝中堅。賊即敗潰。勢如山頽。殺賊五百餘人。迫至城下。後者不及入城。逼入濠鏡。自相踐踏。城上火礮大礮。自相擊斃。餘皆鳥驚獸散。未得歸隊。此十七日江楚兩軍初合擊賊獲勝之情形也。二十七日。楚軍派三成隊出迎餉項。賊又分股來犯。西門三股。湘勇寶勇禦之。江軍各營懲十七日之小挫。堅壁不動。以觀楚軍之戰。湘勇寶勇鏖戰二時許。該逆抵死不還。膝加拱帶得勝軍策應寶營。胡應元策應湘營。又相持一時。未能取勝。李新華李大雄等。從東北鈔出。鎗礮兼施。刀矛並舉。聲震天地。賊衆大敗。江軍由北門追至西門。與湘寶各營會合。殺賊共五百餘人。餘衆狂奔入城。城上巨礮轟擊。煙塵蔽空。火箭石塊。驟如雨下。不及入城者自斃。約近百人。此二十七日接戰獲勝之情形也。伏查湖北援師。四月初間。自鄂省起行。追賊繞至長沙。旋復馳至江西。酷暑行軍。轉戰千有餘里。克復咸寧蒲圻崇陽通城新昌上高大縣。扼駐瑞州。以通兩湖之路。江西全局之轉機。胥係乎此。所有帶兵得力之員。應卽籲懇恩施。以示鼓勵。湖北補用參將普承堯。請以副將歸部。馮缺卽選。湖南候補同知吳坤修。請以知府。歸於湖南補用。同知銜曾國華。係臣國藩之弟。未敢仰邀獎敘。巨文俊查曾國華經其父曾麟書。因聞羅澤南傷亡。遣令馳赴湖北幫理營務。卽經湖北撫臣委帶湘勇兼統湘寶各營來江援勦。辛苦備嘗。戰功卓著。請以同知歸部。儘先選用。侯選知縣劉騰鴻。謀勇爲全軍之冠。請以直隸州歸於江西補用。並請賞加勇號。其餘出力員弁。仰懇鴻恩。容臣等擇尤開單保獎。以昭激勸。所有湖北援軍。已至瑞州。並派江軍赴瑞。會合疊獲勝仗各緣由。恭摺由驛馳奏。伏乞皇上聖鑒。訓示施行。謹奏。

攻勦撫州疊獲勝仗摺 咸豐六年八月初七日

奏爲六月十二日至七月十三日官兵攻勦撫州。疊獲勝仗。恭摺具奏。仰祈聖鑒事。竊官軍攻勦撫州。六月十二

日以前，疊獲勝仗。業經臣等會奏在案。嗣據李元度會同林源恩陸續稟報，六月十四日，楚軍擬於西南城根隄下築一新壘，以絕賊蹤，而挖隧道，以爲轟城之計。賊併力來爭，我軍抵陣衝鋒，殺賊四十餘名，殺黃旗賊目十一名。隄上之賊，復經江軍轟斃數十名。十六日五鼓，賊由文昌橋渡河，趨正覺寺。江軍派隊過河迎擊，賊忽分股直撲老營，又分股在楚軍對岸隄上挑戰。我軍分路迎勦，並乘勢夾攻，斃賊數十名。賊退復追，斬七名。二十日，楚軍定計仍於西南城隄上潛築新營，以便再掘隧道。夫役衆多，四更工竣。次日黎明，賊出城來爭，我軍豫安大礮八尊於新營之內，先出數十人搦戰佯敗，誘至牆邊，開礮轟斃三四十名。各營併力衝擊，追至城根，忽值狂風暴雨，遂各收隊。中有數十悍賊，衝風冒雨來撲新壘，復被劉長培等轟退。是日共計刃賊四十餘名，礮斃四十餘名。鎗傷尤多。二十二日，賊復來犯新壘，各營飛馳應援，刃賊三名，礮斃二十餘名。賊遂敗退。二十四日五更，賊復向新營大呼圍撲，營內靜守不動。迨各勇馳赴，一齊奮追，斃賊十餘名。其分股牽制江軍者，出清風門，沿隄來撲，復被斬獲二十餘名。此六月十四日至二十四日攻勦屢勝之實在情形也。七月初一日，探報僞翼貴丈黃玉崑僞承宣黃士福等，由臨江經崇仁，統賊七千餘人，冀圖與郡城悍賊內外夾攻。猛撲我軍老營，然後併力以西禦兩湖來援之師。是夕至上頓渡民房打館，我軍定議，於初二日五鼓，派隊馳勦，逆黨四千餘人，已於四更時潛伏卡外。我軍行抵該處，賊分三路包來。黃旗徧野，勢甚洶洶。周岐山胡得陞鄧國祥從左路鈔出，賊後彭大壽策馬涉水，衝賊之右。耿光宣吳齊源夾攻中路，斃賊二百餘人。賊遂奔潰。經周岐山彭大壽等怒馬窮追，沿途殺斃二百餘名。黃玉崑僅以身免。綠呢大轎，拋棄沙洲。當各軍乘勝追遠之時，城內突出二千餘賊，以數百人犯江軍，以數百人犯掘隄之新壘，以千人犯楚軍之中營。其犯中營者復分三路，直薄濠邊。經丁峻鍾朝輔黃兆麟等協力鏖戰，斃賊數十名。其犯新壘者，經劉長培督勇出營，立取大旗賊之首級。賊遂氣奪而奔，復被斬獲多名。其犯江軍者，由隄上包鈔右軍營盤。經呂克生雷福堯等堵擊，被斃數十名而退。是日自卯至午，鏖戰四時，計共殺賊五六百名。哀尸十餘里，殺僞官數名，生擒十四名，奪獲黃旗黃纛黃帽黃馬褂多件，軍器數百件。此初二日大破援賊之實在情形也。是夜逆黨仍聚上頓渡。次日，我軍派隊再往城中，賊黨窺營內空虛，傾城出犯，以兩支撲新壘，兩支撲楚軍之中營，兩支撲江軍營。經我軍分投迎擊，衆礮齊發，踏尸徧地。維時進勦上頓渡之軍，業已列陣市門。該

逆紛紛過河避遁。我軍亦卽收隊。初五日。賊分數支。出犯江楚二軍。而其撲新壘者尤悍。炎天燬熱。不便連開。我軍更番轟擊。計斃四五十名。每斃一人。新賊固然遠退。老賊持矛督後。兇狠異常。我軍用大隊衝之。斬十餘名。彼遂退去。是夜五鼓。我軍派隊埋伏民房。賊黨出城拒戰。李晉發呂克生耿光宣等中路誘之。伏兵從旁鈔出。鎗斃轟斃甚夥。賊遂鼠竄入城。初六夜。賊出百餘人來襲新壘。火箭噴筒。突入牆內。我營寂然不動。但指人影所在。轟礮指擊。天明視之。血痕殷地。此初三日初五日初六日等日夜接戰之實在情形也。初十日黎明。賊黨三四十人。出犯中營。我軍用礮擊斃數名。賊仍屹立不動。每開一礮。反進數步。相持兩時之久。周岐山彭大壽併力衝突。賊始退至隄邊。旋復猛撲新壘。緣新壘之中。開掘兩隊。賊黨偵知。特用全力圍逼。忽值大雨如注。我軍鎗礮皆不能然。賊遂撲入。迨吳齊源等率勇再進。賊已反客爲主。猥戰一時之久。不能奪回。計陣亡十三人。受傷八九十人。是夕我軍徹夜戒嚴。次早賊復大至。各營堅壁不動。待其疲乏。一擁而前。賊出不意。潰至隄根。我軍用排鎗併擊。每開一輪。輒進十餘步。如是數次。轟斃約二百餘名。又有埋伏民房之賊。亦經圍燒。死者疊疊。又有從別頭撲營之賊。被擊落水無數。是日我軍憤激。誓洒前恥。血戰半日。呼聲震天。計殲賊四百餘名。奪回五百斤大礮一尊。此初十日被賊撲去新壘。十一日復獲全勝之實在情形也。十三日寅刻。賊卽吹角出城。火光徧野。黎明時分。三路來犯。中左右三營。我軍先日趕築長牆於隄下。埋伏劈山礮。以俟逆黨。先踞營前山嘴。大礮轟倒八九名。羣子如雨。賊仍不退。其下堰來撲者。經理伏之礮排轟之。連斃十餘人。時督隊之賊。有黑白馬二匹。左突右衝。前後窺探。大隊皆受其指揮。突被礮轟落馬。馬遂狂奔。有數十黃旗。簇擁百餘人。拾以入城。於是各路之賊。皆喪氣而歸。收隊尙在辰初。其來也如潮湧。其去也如山墮。擊斃者必爲著名賊首無疑。是日賊黨數千人。出北門。過西津渡而去。有馬四五十匹。騎二十餘乘。婦女二百餘名。受傷之賊。用竹牀昇去。附近百姓。一概逃盡。據報稱人數在六千以上。悉赴瑞臨以禦兩湖之援師。由是撫州之賊數稍減。我軍久戰力疲。亦少資休息矣。伏查臨江援撫之賊。前經李元度等擊退三次。踣毀四營。受創不爲不重。今僞翼貴丈黃玉崑復率大股七千餘衆來援。氣勢浩大。民心軍心。一時大爲搖動。我軍竭力撐持。合計斬獲傷夷數在千名以外。惟初十日賊因探知地道所在。出其全力撲去新壘。小挫一次。餘益連獲勝仗。足以固士氣。而折逆鋒。目下兩湖援師已至。瑞州賊勢全注西路。臣等仍飭李元

度圍信撫城。力圖克復。以期肅清東路。歷次接仗。奮勇初終不懈者。續懇天恩。准臣等核保數人。其始勤終怠者。甄別數人。以昭激勸。所有六月十二日。至七月十三日。撫州攻勦各情。理合據實馳奏。伏乞皇上聖鑒。訓示施行。謹奏。硃批。知道了。著查明舉劾。欽此。」

水師疊獲勝仗摺 咸豐六年八月初七日

奏爲水師疊獲勝仗。恭摺馳奏。仰祈聖鑒事。竊江楚水師。分布各路。使水賊不致蔓延。先後收復豐城南康郡縣。業經陸續奏報在案。該逆自去冬今春。攻陷吉袁瑞臨等府。因水路不得逞志於我。遂於吉安臨江瑞州三府。修造戰船。于臨江鑄造礮位。又復煎硝製藥。採鐵鑄子。勒派鄉官。多設分局。議定秋間大舉。圍撲省城。上游瑞臨之賊船出而下竄。下游湖口之賊船入而上犯。冀圖困我水師於中段。六月二十五日。該逆於生米司築立賊壘。二十七八等日。於塘頭垓萬壽宮瑞河口築立賊壘。七月中旬。又於臨江河口築立賊壘。其在塘頭垓者。去省城不過數里。逆旗逼於沙井。一水僅隔。猖獗已極。七月初四。巨等派陸軍渡河攻勦。踏毀賊營。另於瑞州案內具奏。其在生米司瑞河口臨江河口者。深溝高壘。密排礮位。專擊官軍船隻。而護瑞臨賊舟爲衝出省河之計。七月初一日。賊由松湖帶戰船三十餘號。陸賊千餘。將抵瑞河口。該處經我軍先釘排樁。僅容一船出入。是日辰刻。江軍水師劉于濤。派李鴻泰等相機進勦。傍山迎敵。該賊船身笨重。甫近排樁。被賊軍哨官陳元勝唐書麟衝鋒直入。百礮轟擊。火器並舉。各哨船兩路分追。擊斃溺斃之賊各數十名。熊吉華管帶小划督勇登岸。殺斃陸賊多名。餘賊逃避山中。共燒燬賊匪大快蟹船二號。奪獲大戰船二號。舢板小划三號。大礮十二尊。子藥旗幟無數。其生米河沿之賊。被楚軍前營游擊劉國斌礮船。日夜轟擊。新附逆黨不肯入壘。因初一日水師有瑞河口之捷。初三初四陸軍有瑞州之捷。沙井之捷。賊衆膽寒。遂於初五夜棄營而遁。我軍追奪大礮四尊。火藥五十九桶。大小子彈鎗械旗幟尤多。此水師獲勝瑞河口及生米賊營逃遁之情形也。七月二十七日。記名道劉于濤親督守備李鴻泰李逢春蔡康業等營戰舟小划。前往臨江河口巡哨。該逆於南北兩岸。堅築礮台二座。外設浮橋。內闌木板。又於裏河爲連珠小礮台五座。劉于濤傳令往樟樹鎮會齊。派李逢春等船六號。竟上吉安河。以爲疑兵。派曹篤清等船六號。上前引賊。派黃金彪等緊傍北岸。以便入營放火。曹篤清至浮橋口門。彼此開礮。賊堅壁不動。我軍俾焉

膠棧回船退走。賊果擁出口門。乘勢追趕。我軍小划。隨即進口。一面斬斷浮橋。曹篤清等六船。一擁直前。李鴻泰左營各船。脚尾進剿。李逢春等從南岸上牆放火。黃金彪等從北岸上牆放火。謝鳳高張桂林之陸勇分投登岸。水陸夾擊。賊不能支。我軍將賊船圍在河心。進退無路。殺斃擊斃爛斃之船。約四百名。奪得大小戰船九號。大小礮位四十七尊。火藥礮子百餘石。大小黃旗五六十面。奪米煤船十三號。燒燬數十號。割取僞元帥王姓首級。僞印兩顆。二十八日。探得賊匪尙餘礮船五號。退守臨江城下。劉于濤派舢板船王炳等徑入內河。囑令見賊即退。暗派李逢春等帶陸勇。伏於南岸隄下。賊見我軍船少。果水陸來迫。我軍伴退隄下。伏兵忽起。賊船退敗。我軍回棹。返追。閩廷巨躍入賊船。鎗礮齊開。斃賊甚多。陸賊見事急。自上游厲水前來救援。我軍縱火焚賊划二十餘號。奪獲大礮六尊。煤米船十餘號。子藥十餘石。此二十七二十八日。劉于濤水師獲勝。掃除臨江河口賊壘之情形也。下游水師之駐紮吳城者。自六月收復南康之役。久未接仗。七月二十七日。惠潮嘉道彭玉麟帶後營嚮導。營赴下游巡哨。行九十里。已刻至南康。循東岸而下。遙見謝司塘逆旗招展。陸賊上犯。賊舟亦自西岸神靈湖列陣而出。彭玉麟率各營哨仍自東而下。將鈔尾而兜擊之。賊船遂趨而西。彼此橫列一字陣。對敵逾時。賊舟敗北。我師乘勝窮追。直至屏風。去吳城老營已隔一百三十里。捩舵收隊。行不數里。南風忽起。該逆見我軍遠來。勢乏。又見南風之不利於退師也。遂回棹返攻。極力猛撲。子如驟雨。我軍亦停棹對擊。礮煙蔽空。湖波大作。軍心搖惑。幾至不支。彭玉麟傳令大舟下棹。與之坐戰。陣腳稍定。各舢板亦回頭奮擊。銜枚無聲。千礮雷震。賊勢蹙復敗。我軍揚帆伴作欲追之勢。實則靜待以觀其變。待賊舟奔北。已逾二十里。始行捲塘收隊。五更乃抵老營。此吳城水師巡哨南康接仗之情形也。伏查江西水賊。以湖口逆舟最爲凶悍。而吉安臨江瑞州三處。造船鑄礮。各治水軍。以圖上下夾擊。因我省垣。譎謀毒計。深堪髮指。臣等派彭玉麟駐吳城以防湖口之賊。劉于濤駐豐城以防贛河臨江河。劉國斌駐市以以防瑞河。茲幸仰仗天威。數戰俱勝。奪獲礮位至六七十尊之多。從此瑞臨兩河賊舟。不足爲害。上游漸易肅清。記名道劉于濤自督帶水師以來。無戰不勝。以寡禦衆。士卒樂爲效命。德懇天恩。賞戴花翎。以示鼓勵。其麾下出力員弁。及彭玉麟麾下屢戰出力之員。可否容臣等核保數人。出自皇上天恩。傷亡弁勇。查明照例辦理。所有水師迭獲勝仗緣由。恭摺由驛馳奏。伏乞皇上聖鑒。訓示施行。謹奏。

專催崑壽赴江南并及江省軍情片 咸豐六年八月初七日

再臣等於八月初三日承准軍機大臣字寄七月十七日奉上諭。現在廣東赴援江西之兵。已有壽山謝焜孫福同等管帶。著卽飭令崑壽徑往江南丹陽軍營。藉資攻勦。該提督克復和平後。是否已由江西折回。改由海道前進。或已出粵境行抵江西。著葉名琛柏貴曾國藩文俊確探該提督現在何處。傳旨催令迅赴丹陽。毋稍延誤。至江西省各路援軍。漸次雲集。南康饒州兩府城已報收復。建昌撫州亦獲勝仗。大局當有轉機。且逆賊麇聚江南。則江西境內情形較鬆。曾國藩等務宜乘此機會。激勵將士。將臨江瑞州等府。次第克復。此次畢金科攻克饒州。尙能奮勇。著令隨勦隨進。毋得株守一隅。專待外省兵援。致稽時日。等因。欽此。臣等於七月十七日接贛州鎮道來文。尙無提督崑壽入境確信。茲欽奉諭旨。臣等卽恭錄咨明。專派把總曾耀坤繞道馳赴贛州。確探崑壽行營投交。催令迅赴丹陽。毋稍延誤。至江西賊勢之浩大。黨類之衆多。臣等於二月二十一日覆奏一摺。業已縷晰言之。厥後三月初間。逆首石達開竄擾皖南。帶去男婦三萬餘人。然所帶者多係江西新擄之民。非盡兩廣久從之賊。江西賊勢。仍未見其衰落。八郡名城。久被淪陷。南康雖經收復。尙無陸兵駐守。刻下贛州建昌饒州三府。各有兵勇數千。撫州瑞州袁州三府。各宿重兵。將近萬人。兵力不爲不厚。鏖戰不爲不苦。殺賊動以千計。自損動以數百計。不爲不多。而迄未能克復要郡。挽回全局。固由臣等調度之乖方。亦足見此賊以全力圍困江西。未嘗有一處之瑕隙。一日之鬆懈也。臣等查閱俘獲僞文。參核各處探報。賊首之在江西主持軍務者。自去年十一月至本年二月底。以僞翼王石達開爲主。三四月。以僞翼貴丈黃玉崑爲主。六七月後。以僞北王韋昌輝爲主。如九江之林啓容。瑞州之賴裕新。湖口之黃文金。皆著名劇賊。撫州之三檢點。建昌之張三和。袁州之李能通。雖不甚著名。亦復譎謀百出。堅悍異常。統計江西境內。廣西滿髮老賊。與廣東湖南新附之賊。約在四萬以外。本省甘心從逆之匪。約在三萬以外。而皖鄂兩省。上下往來之賊。不在此數。臣等忝列戎行。惟當壹意鎮靜。化大爲小。以安軍民之心。何敢稍涉張皇。然賊勢之多寡。軍情之輕重。亦當悉心考究。又何敢稍事含糊。反蹈譁飾之咎。所有專弁咨催提督前赴江南。及江西近日軍情。理合附片覆奏。伏乞皇上聖鑒。謹奏。 硃批。知道了。欽此。

請撥山陝餉銀片 咸豐六年八月初七日

再臣等本年因餉項支絀。先後奉請於上海抽釐者一次。請撥上海關稅銀者二次。均經江蘇督撫臣議駁。未得籌撥來江。廣東協款。亦以道路梗阻。不克解至。江省本省。則入郡淪陷。錢漕捐輸。無從措手。竭蹶情形。久在聖明洞鑒之中。欠餉愈久。兵勇愈疲。且亡者無卹銀。傷者無養銀。怨望之情。積而爲挾制之狀。勝仗不能加賞。敗挫亦難於言罰。臣等日夜焦灼。毫無良策。今幸湖北援師馳至瑞州。軍威爲之一振。然其欠餉已滿兩月零三日矣。若不急籌放給。則勁旅亦將變爲疲兵。此後安得復有振興之機。合無籲懇皇上天恩。敕下山西陝西兩省撫臣。每月各籌銀三萬兩。協濟江西。委員解至荊州。臣等派委大員。在於荊州府守候催提。解至瑞州等處。專供兩湖援師之用。儻有贏餘。分撥各營。稍補前數月之欠項。臣等爲保全勁旅挽回大局起見。迫切下忱。伏希聖慈垂鑒。謹附片具奏請旨。

報瑞州援軍勝仗片 咸豐六年八月初七日

正封摺間。接據稟報。八月初一日。瑞州賊匪。糾集臨江奉新安義武寧義寧等處之賊。約二萬人。猛撲官軍營盤。鏖戰四時。幸獲大勝。該匪欲困江西。必不使我與兩湖相通。瑞州乃其必爭之地。日內仍當有數次大戰。除查明初一日開仗情形。續行具奏外。理合附片先行奏報。仰慰宸衷。謹奏。

查明吉安殉難員弁請卹摺 咸豐六年八月初七日

奏爲查明吉安陣亡殉難文武員弁請旨從優議卹。恭摺奏祈聖鑒事。竊照吉安府城。於本年正月二十五日。被賊攻陷。業經臣文俊繕摺奏報。嗣臣等於三月二十六日。承准軍機大臣字寄。欽奉上諭。『文俊奏吉安失陷一摺。臬司周玉衡理問周恩慶遇害情形。著會同藩文俊確查。再降諭旨。其圍城文武如何下落。一併查奏。』等因。欽此。欽遵行局查明。詳辦在案。查吉安府城。於咸豐五年十一月二十日被圍。逆匪愈集愈多。百計圍攻。經臬司周玉衡督同道銜吉安府知府陳宗元。前任吉安營參將柏英。及在城文武員弁。登陴堅守。晝夜嚴防。十二月初八日。該逆用地雷轟塌西門月城。經周玉衡等督率士卒。奮勇堵截。立時捨築完固。斃匪多名。賊衆屢次用雲梯四面來攻。均爲我軍擊退。每次殺賊三四百名不等。並乘賊不備。開城出勦。迭有新擒。焚營多座。該逆匪衆數萬。圍攻益急。距郡周圍數百里外。皆爲賊踞。接濟阻絕。援兵久頓秦和。以致城中食用俱竭。勢雖十分危急。而

士卒齊心。不稍懈怠。詎本年正月二十五日。被賊復用地雷。轟塌城牆。逆衆拚死蜂擁衝入。周玉衡陳宗元柏英與同知銜吉安府通判王保庸。推升湖北興國州知州現任廬陵縣知縣楊曉昀。提舉銜推升知縣署吉安府經歷余焯。吉安府照磨胡瀚。吉安府教授余步蟾。准升知縣廬陵縣丞呂承恩。廬陵縣典史章德懋。國子監學正銜廬陵縣教諭李傳心。訓導吳襟浩。推升浙江處州鎮標右營游擊萬安營都司馬福壽。署吉安營守備揀發都司克什布。周玉衡之子江寧布政司理問周恩慶。六品軍功頂戴試用縣丞周知新。直隸候選訓導張滋。六品軍功頂戴浙江生員范雲程。六品軍功頂戴即補縣丞秦振元。准升清江縣知縣王見周。湖北舉人李鴻鈞。候補未入流孟國觀。陳宗元之子監生陳世濟。署興國營千總贛標左營候補把總武舉張捷。贛標中營署守備蔡元陞。署把總事外委李得魁。左營兼署把總事本營把總吳廷瑞。把總藍珩。外委千總鄺昌貴。後營把總戴文斌。外委黃萬成。吉安營千總謝明亮。額外劉起元。劉效熊。准發臨江營候補外委武生鄧家璧。已革准升德化縣知縣本任吉安府經歷歷林蔚。六品軍功頂戴王虎臣。直隸俊秀程虎炳。九品軍功頂戴秦登元。已革甘肅涼州鎮標外委千總韓衍彬。督兵力戰。奈寡不敵衆。均遭戕害。周玉衡陳宗元楊曉昀遇害尤慘。兵勇紳民。被戕甚多。時永豐縣縣丞候選知縣萬慶章在郡辦理支應局務。知城已失陷。將縣丞鈐記交家丁嚴義密藏身邊。囑令前赴鄰郡呈繳。該員即在府倉倉後投井殉難。茲據總局司道以迭據各該員家屬稟報。具詳請奏前來。臣等伏查吉安被圍。兩月有餘。逆衆數萬。百計攻撲。經在城文武悉力守禦。殲擒多賊。乃因城牆兩次轟塌。以致失陷。該員弁或臨陣捐軀。或從容殉節。大義凜然。該員弁等前次搶護缺口出力。曾經臣文俊奏奉硃批。一查明彙保欽此。一臣文俊當即逐加酌覈。臬司周玉衡擬請加布政使銜。陳宗元擬保以道員補用。柏英擬加副將銜。王保庸擬保以同知補用。楊曉昀擬保以知府升用。馬福壽擬保以參將用。周恩慶擬保以知州補用。周自新擬保以知縣補用。張滋擬保以知縣即選。范雲程擬保以從九品即選。秦振元擬保以知縣補用。王見周擬加同知銜。陳世濟擬保以從九品即選。黃萬成擬保以千總拔補。張捷魁擬保以千總補用。王虎臣擬保以府經歷即選。程虎炳擬保以從九品即選。秦登元擬保以從九品選用。林蔚擬請開復。准加知縣。韓衍彬擬請開復外委。正在覈辦。旋聞該郡業已失陷。是以未經出奏。合無仰懇逾格天恩。均照擬保官銜敕部議卹。余焯胡瀚余步蟾呂承恩章德懋李傳心吳

襟浩李鴻鈞孟國觀克休布蔡元陞李得魁吳廷理藍珩鄔昌貴戴文斌謝明亮劉起元劉效熊鄧家璧萬慶章俱請交部從優議卹。周玉衡久任贛南堵勦粵匪力衛邊疆素著聲威士民感戴並請於吉南贛三府各建專祠。陳宗元等均於吉安祠內附祀以慰忠魂而勵節義。除飭查各署殉難眷屬幕友姓名及兵勇名數另行辦理外所有查明吉郡陣亡員弁請卹緣由謹合詞恭摺具奏伏乞皇上聖鑒訓示施行謹奏。

圍攻瑞州收復靖安安義二縣摺 咸豐六年八月二十日

奏爲官軍圍攻瑞州屢獲大勝並分支出勦奉新收復靖安安義二縣恭摺馳奏仰祈聖鑒事竊照湖北援師自抵瑞州臣等派兵四千前往會合七月內屢獲勝仗業經具奏在案八月初一日僞指揮黃姓糾集臨江奉新安義武寧義寧各處逆黨併合城內大股號稱四萬四路擁至旗分五色排列山岡黃旗一股對我湘營紅旗一股對我寶營白旗藍旗二股對我省兵五營青旗及雜色鑲旗一股伏在樹林之間我軍派定隊伍靜以待之賊亦排立不動相持約一時許另有青旗一股從東北數里外風馳雨驟而來截我軍之後路排列山岡之賊呼聲震天直撲我軍待至濠外我軍一齊衝擊而賊勢浩大前者已殲後者不退黃旗已卻紅旗又至青旗一股更爲兇悍我湘營以數人翼蔽劈山礮俟其逼近則轟擊之退而又進又指擊之賊陣大亂棄甲狂奔有數百賊撲平江營者戀戰不退幾欲摩壘而入我軍以數營追逐敗賊而以二營迴鈔平江營前之賊之尾圍此數百逆匪於垓心千矛叢刺黃埃殷地官軍與賊隊混亂將不可辨悍賊露刃外向衝出重圍者近五百人殲斃者二百餘人其大隊分追敗賊馳逐奉新之西道分投擒斬橫屍遍野棄械塞塗窮追三十里而返訊據生擒賊供號稱四萬實二萬餘人廣賊數千極爲驍悍本日被殺約計千餘此八月初一日瑞城之匪與援賊合攻我營迎戰大勝之情形也赴援之賊一經敗潰即欲分歸各處初三日僞將軍石姓自九江來援勒令敗賊仍回瑞州於東北大路夾立營盤五座與城內之賊爲犄角欲斷我軍通省之路楚軍劉騰鵬普承堯與省兵營務處彭山配羅贊等商議援賊初敗其衆已餒石逆新到之援強之同戰志氣未一壁壘未堅宜速戰以挫之定以楚軍之湘後營寶中營自守營盤以防城內賊黨之出犯而以湘中營寶右營與省兵五營者往攻東北援賊之營劉騰鵬恐省兵不可深恃親率楚軍三百人者與之偕往初四日黎明出隊行未三里該逆蜂擁而至恃其衆倍於我大圍包鈔漸逼

漸近，悉銳以撲騰鴻之師。三百人者，植立如樹，不進不退，寂然無聲。該逆大呼動地，我軍不之應。火器如雨，亦不之應。待其撲近，乃發劈山礮，殪其執旗賊，稍卻，則三百人者植立如故。又近，又殪之。如是者凡六七次。賊氣稍沮，省兵得勝軍，躍馬衝陣，各營併力齊進。賊遂敗退，追至小橋。賊忽卓旗排立，我師斬其先鋒二名，追至牆下。賊又排立。劉騰鴻率三百人者繼至，乘勝一呼，破其大壘一座。火球齊擲，煙燄障空，各壘驚惶。又連破其四座。敗賊擁聚一處，我軍以一隊橫截之，紛紛四竄，追殺數里而還。方悍賊卓旗排立之時，城內之賊出撲官軍營壘。湘中營實右營飛馳回救，我進則賊卻，我稍暇賊則仍進，更番迴合。至三時之久，直待劉騰鴻與省兵五營者盡踏賊壘，追賊歸來。然後併力以擊城內之賊，始獲全勝。日暮收隊。此初四日城外續添援賊，我軍大獲勝仗，踏破賊壘之實在情形也。得此兩戰，軍心大定。援賊竄歸各處，省城之路無梗。江西兩湖遂獲疏通矣。初六日，我軍派隊渡河，禁南城之民與賊貿易，誅運送賊糧者五人。西門出賊千餘來爭，我軍迎擊，驅而敗之。初九日，賊出二三千人，分撲湘營寶營。劉騰鴻普承堯督隊堵擊，該逆反奔。河沿甚窄，遂徒步而涉，以趨南河。城干竹籤，賊之預防我軍者。至此反以自刺。南城先有伏賊千餘，突出來援，我軍乘勝涉水追之，矛擲港內，殲斃無數。十一日，北城出賊二千餘，撲省城兵各營。西門出賊四五千，分趨兩路。南城出賊千餘，護礮船而上。我軍亦分三路應之。劉騰鴻擊西南。普承堯擊西北。萬泰李大雄等擊北路。分道揚鑼，鎗礮並發。鏖戰三時，西南兩路相繼敗潰。北路之賊，望風亦退。十二日，賊又出數千來撲省兵各營。我軍出隊，施放連環鎗礮，斃賊百餘人。賊奔入城。午刻收隊，傳餐甫畢，又來犯。以千餘人出北路，牽制省兵各營，而出全隊近萬人，猛撲劉騰鴻之湘營。長髮悍賊蟻附壕外，火箭噴筒，迸落營中，帳棚屢然。即時撲滅，弁勇悄然不動，相持二時。該逆氣竭，湘營開壁馳之。賊遂大敗。如山潰河決，殲斃甚多。訊據生擒賊供，賊中聞劉騰鴻分兵出勦奉新，遂定計以全力攻撲湘營。自辰至午，出戰一次，以疲乏北路。另出一枝以牽綴之。其注意在專撲湘營。不料反爲所敗等語。此初六初七十一十二等日，接戰獲勝之情形也。嗣後逆匪常出搦戰，小有斬獲。廿六日，南城出城千餘，護礮船而上，抵湘營之對岸。北城西門出賊約二千，橫列隄上。撲省兵之營。劉騰鴻以礮轟南岸之賊，而令劉連捷劉芳貴由西南橫截之。省兵得勝軍出擊北路之賊，斃尤悍者十餘名。我軍亦傷數人。廿七日，奉新援賊復至瑞州。由南西門出五六千人，抵西北隅，向省兵衝突者爲第

一隊。其抵正西接應者爲第二隊。其橫布西南隅者爲第三隊。南城仍出賊千餘。護礮船以上牽制石鼓嶺之湘營。劉騰鵬令省兵各營靜鎮以待。以湘後竇中營直搗中堅。攻其第三隊。自帶親兵堵擊。南城并礮船一股。西路之隊先到。將賊之第二隊衝開。蹂踐田隴間。殺斃百餘人。第一隊已被我軍截斷。省兵開壁逐之。四圍包裹。桀者突圍而出。殺斃者近二百人。正追逐間。南岸賊忽徒涉來撲。分支堵之。一律敗退。此二十六二十七日連獲勝仗之情形也。前此七月下旬。官軍忽攻瑞州之時。上高新昌。又有賊徒佔據湖南之路復梗。臣等因於瑞州營內抽派候選同知吳坤修。率原帶之彪勇一千名。益以義武勇七百名。作爲游兵。回勘新昌上高。相機規復。奉新安義靖安等縣。四路雕勦。不惟斷瑞州賊援。且可掃除游匪。無令到處蔓延。民不聊生。吳坤修等於七月二十五日。重收復新昌縣。派員於二十八日。重收復上高縣。停留數日。搜捕餘匪。八月初八日。行抵奉新。夜半派隊渡河。至縣城北門外之獅子山。守城之賊。寂不聞聲。各勇急欲梯城而上。將近城頭。則火彈齊發。若預知者。我軍高踞獅山。對城輪放鎗礮。自寅至午。聲震山谷。正擬暫行休息。忽賊繞東城而出。獅山之麓。直撲我營。被我軍斃傷百餘人。十一日。安義援賊。約二三千人。分爲兩股。一股由正東撲義武營。一股排列東北山岡。我軍先擊山岡之賊。連斃數人。正東股匪。亦即卻退。兩路追殺。奪獲旗械三百餘件。斬賊百餘。生擒十七名。收隊不及一時。靖安援賊。又來數百人。亦被我軍圍殺。紛紛逃竄。十三日。吳坤修飭令守備李瀛等。堅守營壘。以防城內之賊。而自帶各勇。馳勦靖安。該逆探知。傾巢逃竄。當即窮追。截殺後隊甚多。即日收復縣城。十六日。復帶各勇。馳勦安義。先飭邑人余英。慶混入城內。約會被脅鄉兵。舉火爲號。我軍抵城。天尚未曙。銜枚渡河。由南門梯城而上。城內之火亦起。該逆倉皇失措。開北門而遁。屯聚王家橋。其他樹木叢雜。賊旗隱見。綿互數里。未幾。反戈來撲我軍。奮力直前。開礮連擊。該逆不能抵禦。盡氣狂奔。而民房尙有輜重。小車百餘兩。吳坤修恐各勇貪財。行伍散亂。縱火焚之。申刻進城。安民。次日仍返奉新。此吳坤修分勦奉新。擊散援賊。並先後收復安義靖安二縣之實在情形也。臣等伏查逆賊欲困江西。必先力爭瑞臨。瑞州城內。本集悍賊萬餘。又調各援賊。撲我營壘。初。一初四兩次大戰。關係全局甚鉅。所尤爲出力人員。應請立沛恩施。以示鼓勵。營務處湖南河溪營都司彭山。九江營守備萬泰。均請賞戴花翎。候選訓導羅萱。請以知縣歸部分班選用。仍加知州銜。守備銜千總滕加洪。請以都司歸於湖南。儘先補用。藍翎

把總詹榮請以守備歸於湖南。儘先補用。外委黃純珍貴在玉均請以藍翎把總歸於永州鎮標補用。外委黃兆麟建昌案內擬保千總。尙未出奏。此次奮勇捐軀。請敕部照千總例議卹。其餘傷亡弁勇。查明照例辦理。所有瑞州官軍屢獲大勝。並分支攻勦奉新克復安義靖安各緣由。恭摺由驛馳奏。伏乞皇上聖鑒訓示施行。謹奏。

邊錢會匪圍攻廣信浙兵援勦解圍摺 咸豐六年八月二十日

奏爲邊錢會匪竄陷建昌廣信各屬。並圍攻廣信府城。現經浙兵援勦解圍。各屬並未佔據。恭摺馳奏。仰祈聖鑒事。竊江西吉安建昌等處。向有邊錢會名目。以錢塗硃。描金爲字。地方官歷經查禁。而黨與已多。不能遏絕。漸巨勾結已革之游勇。新附之長髮。煽聚千餘人。滋事於吉安交界之區。臣等接據署廣昌縣朱國幹署廣昌營都司張騰霄稟報。七月十五日。探有會匪竄擾寧都州永豐縣連界之黃坡地方。官兵接仗失利。十八日。竄至該縣城西門外。典史周德耀之子從九周光裕抵禦陣亡。經張騰霄督帶弁兵紳勇攻破隔河賊壘。賊於二十日即竄下游南豐縣境。旋接建昌府何斌在籍知府張家駒稟報。南豐縣於十九日告急。當派閩兵及本處義勇前往會勦。援師未至。該縣已於二十三日失陷。賊多本地會匪。因四月間曾經率辦會首林雙桂。攻破城之日。屠戮甚慘。文武各官。俱無下落。先經張家駒諭該縣紳民。協力規復。收復之後。稟請豁免錢糧。衆心鼓舞。聲勢甚壯。賊遂於二十四夜棄城而去。竄往新城縣境。新城爲建昌府營糧臺所在。何斌恐有疏虞。即日帶領義勇七百名。馳往防護。仍調閩兵續往援應。不意二十四日。賊分三股。蜂擁入關。城廂內外。四面火起。在城之縣令諸葛槐。縣丞馬長。廠巡檢吳毓濬。在籍知府楊莖父子。同時殉難。何斌妻薛氏女三人。胞姪何彥漪。幕友陳德亮陳濟之。僕婢八人。全家盡節。無苟免者。該府何斌身被矛刺。死而復甦。兵勇昇至鷓門地方。不食二日。氣息僅屬。適續調援應之建昌一軍。閩兵五百前後趕到。該府帶同回縣。掩殺匪黨。遂於二十七日收復縣城。二十九日。賊由新城竄至廬溪縣境之長興嶺。即乘勢進城。知縣田彬外委林長延帶兵燒燬賊營一座。殺斃賊黨百餘。次日。賊由北門竄往貴溪。此會匪擾陷建昌各屬。並未佔據之實在情形也。復據貴溪縣令扎拉豐阿稟報。八月初三日。賊至貴溪四十里之杜灣。初四日。學政廉兆綸派令前皖南道石景芬。教職郭守謙等。各帶廣義勇。分投迎擊。先勝後敗。郭守謙陣亡。餘俱潰散。匪黨卽於是日進城。該縣招集鄉兵堵擊。賊旋紛紛東竄。由弋陽興安一帶行走。初七日。卽到鉛

山之河口鎮。焚燒房屋。擄掠船隻。聞該匪將分兩股。一竄鉛山縣城。一竄廣信府城。據署鉛山縣令陳汝楨稟稱。賊踞河口。爲境內山河所阻。初九日。尙未到城。旋據探報。該匪初十日突入鉛山。隨即竄出。徑奔郡城。此會匪擾陷廣信各屬。亦未久踞之實在情形也。復據署廣信府沈葆楨稟稱。該守先隨廉兆綸在河口籌辦軍餉。忽聞貴溪失守。因於初六日五鼓。單騎馳回府城。不但居民鋪戶。移徙一空。即兵勇胥役僕從。亦皆散去。當即飛函請駐防玉山之安義鎮總兵饒廷選就近赴援。初九日。饒廷選統帶浙兵二千。順流抵郡。十一日。賊亦營集城下。四門皆有賊蹤。饒廷選令開東北二門。出隊迎擊。殺賊百餘名。十二十三。復有斬獲。賊尙未退等語。臣等自聞貴溪之敗。廣信軍全數潰散。一面咨調玉山浙江之兵前來救援。一面飛檄撫州李元度之師抽撥馳勦。部署甫定。接據稟報。十五日。浙兵大獲勝仗。殲其渠魁。餘匪遂於是夜全行遁去。由興安竄往德興一帶。廣信之圍已解。河口亦無賊蹤。此會匪攻廣信府城。浙兵援勦解圍之實在情形也。臣等伏查此股會匪。初本不甚猖獗。即旬日之間。連擾數縣。亦實無兵勇與之拒禦。非杲由賊勢之兇悍。迨廣義軍潰於貴溪。於是逆猷遽張。裹脅愈衆。遂敢圍逼廣信。梗塞江省咽喉之路。大局幾不可問。幸知府沈葆楨先馳入城。得以豫請援師。與參將榮壽。知縣楊昇。千總胡再陞四人者。立志堅守。提調援師。保全要郡。實屬危而復安。沈葆楨係原任雲貴總督林則徐之甥。又係其女婿。講求有素。此次守城。吏民散盡。衙署一空。其妻亦同在危城。無僕無婢。躬汲爨具。壺漿以餉士卒。沈葆楨與楊昇等。徒步登陴。晝夜辛勤。兩年以來。江西連陷數十郡縣。皆因守土者先懷去志。惟汪報閩守贛州。沈葆楨守廣信。獨能伸明大義。裨益全局。除汪報閩歸於贛州案內奏請外。所有署廣信府知府沈葆楨。參將榮壽。知縣楊昇。千總胡再陞。及饒廷選所帶之出力員弁。可否容臣等分別保獎。抑或另將浙江援師歸於浙江撫臣保奏之處。伏候聖裁訓示。至新城在籍廣東知府楊莖。知州銜署知縣諸葛槐。縣丞馬長厥。州同銜極高司巡檢吳毓濬。從九周光裕。均請照陣亡例。從優賜卹。貢生陳德亮。監生陳濟之。何彥猗。均請照外委例賜卹。何弼一門殉難。其妻薛氏及其三女。均請旨敕部旌表。仍請分別官紳男婦。准於殉難地方。及各原籍。建祠立坊。僕婦照例附祀。以慰忠魂。監生陳廷弼。手刃二賊。身中五矛。越宿而蘇。城中紳士。惟該紳僅存。懇恩賞給六品翎頂。以昭激勸。此外新城及各縣殉難官紳。俟確切查明。續行具奏。失事各員弁。由臣文俊分別查辦。所有邊錢會匪竄陷各屬圍信廣信

浙兵來援府城圍解各情由。恭摺由驛馳奏。伏乞皇上聖鑒。訓示施行。謹奏。

閩兵援勦建昌府前後情形摺

咸豐六年八月二十日

奏爲閩兵援勦建昌府前後獲勝情形。恭摺馳奏。仰祈聖鑒事。竊官軍於六月初旬。會勦建昌府城。連獲勝仗。嗣因饒州告警。將省兵調回各情形。業經具奏在案。省兵調回之後。廣義一軍。亦經學政臣廉兆綸撤回廣信。其在建昌會勦者。惟有福建副將張從龍。護副將陳上國等所帶援師二千六百名。暨本府之兵勇千餘人。嗣據知府何斌。在籍知府張家駒暨張從龍等稟稱。閩兵扼府之東南。更番攻擊。以防賊之內出。本地義勇。在西北一帶。往還會哨。晝夜設伏。以杜賊之外援。復於南城逼近。築礮台二座。卽於其下開挖地道二處。爲明攻暗陷之計。六月三十日。賊從水關鑽出。突襲礮台。守台弁勇。短兵相接。殺斃執旗老賊多名。賊之後隊奔潰入城。張從龍等旋派守備吳景芳伍連青勇目莊廷禮各帶兵勇。分紮礮台前。後而身偕參將舒隆阿各帶精兵駐紮距城半里秋水圍地方。派建昌營千總楊錦斌等分探賊蹤。乘機截勦。自七月初旬以來。分兵馳赴二三十里外。堵截九次。屢有擒斬。逆援斷絕。賊首張三和陶文發俱經受傷。雖地道掘至城根。爲賊窺破。壅水灌注。然城中之賊。日益惶懼。勢甚窮蹙。正擬指日克復府城。不意十九日有邊錢會匪勾結逆黨。嘯聚數千人。竄擾南豐新城等縣。不得不商派閩師。並本地兵勇二千餘人。馳往縣屬。分途堵勦。此圍勦建昌正在得手。因會匪竄擾近縣郡城之圍稍弛之情形也。知府何斌以新城設立糧臺。親率兵勇前往防護。郡城軍務。交張家駒等辦理。維時城內之賊。見官軍紛紛調撥。計圍內外夾攻。撲我營壘。張家駒等探知。卽與張從龍陳上國商議嚴防。並籌截擊。二十七日。宜黃援賊。果分兩路而來。一由西南麻源偷撲張從龍後山。一由西路黃堂廟夾擊閩營之左。城內之賊。亦分三股而出。張從龍以山後賊至。揮軍出迎。先據山巔。立刺數賊。餘黨滾跌下山。自相踐踏。死者甚多。西路賊衆。經閩營分軍擊敗。復與西南之賊會合。張從龍躍馬指揮。刀矛齊進。賊遽逃竄入城。其出南門之賊。正思接應。經閩軍另枝截住。遂併股衝突。勢極兇悍。我軍迭聞連環鎗礮。該逆冒煙直撲而來。陳上國手刃一賊。將弁齊赴。先斬執大黃旗賊目。乘勝追北。其出東門者。經建昌隔岸兵勇截擊。其後。閩省興化泉州兩營。來攻其前次第敗竄。合計礮賊近六百名。閩營之功爲多。奪獲大旗幟鎗械五十餘件。此二十七日官兵分調他縣賊匪乘虛撲營擊勦獲勝之情形也。

二十九日賊復由東門渡河。武生張烈趙金彪會與化營迎擊。敗之。八月初一日復分兩路出城。官軍分頭夾擊。閩營外委曾瑞英奮勇爭先。中伏殞命。閩兵憤怒追擊。直逼南門城下。共殺斃三百餘人。生擒十一人。初三日黎明復傾巢出戰。爲官軍所敗。午後偷渡東岸。解運糧糈。復經東營兵勇擒斬數人。此又連日獲勝之情形也。臣等查建昌之賊。嬰城固守。閩師百道圍攻。該逆勢已不支。乃因邊錢會匪突起。大軍分調四出。即勾引外援。出城衝突。幸我軍連獲勝仗。足以塞賊膽而定人心。目下撤調外縣之師。已回郡城。臣等又派都司張大雄。道庫大使李照瑞帶贛標龍泉兵勇六百餘人。前往協勤。嚴飭各軍。誓必力破此城。以冀全局之轉。外委曾瑞英衝鋒殞命。請從優照把總例賜卹。以慰忠魂。其餘傷亡弁勇。查明照例辦理。所有閩兵援勤建昌前後獲勝情形。理合具摺馳奏。伏乞皇上聖鑒。訓示施行。謹奏。

請撥湖南軍火片 咸豐六年八月二十日

再臣等前因汀楚軍局火藥應用不敷。飛咨閩浙兩省。無論火藥硝磺。每省籌撥十萬觔。委解來江。以應急需。於本年正月間附片具奏。嗣准閩浙兩省。先後解到硝磺共五萬八千餘觔。分給藥局配製撥用。數月以來。所存無幾。臣等咨催閩浙兩省將短解硝磺。趕緊籌補。惟江西水陸兵勇。數近五萬。需用火藥甚鉅。一經缺誤。關係非輕。因思湖南境內。現已肅清。自可設法協濟。合無仰懇天恩。飭下湖南撫臣。無論火藥硝磺。籌撥十萬觔。迅速委解來江。以資防剿。臣等仍一面飛咨該省。先行撥解。謹附片具奏請旨。

王亮病故請卹片 咸豐六年八月二十日

再據統帶福建援兵延平協副將張從龍等稟稱。署興化協左營都司王亮。揀發到閩。即行調派出征。於咸豐六年五月二十四日。帶兵至江西建昌府援勤。六月十一日。進逼郡城東門。紮營圍攻截擊。逆賊屢次撲營。均經王亮率師擊退。連獲勝仗。晝夜督兵巡哨。不稍鬆勁。凡遇攻勤。無不勇往直前。嗣因積受寒熱。染患病症。仍力疾辦事。未嘗稍懈。詎於七月初五日。病勢增劇。醫藥罔效。在營病故。現將該故員身後事宜。妥爲料理。稟稱核辦等情。當經批據總局司道查議。具詳請奏前來。臣等伏查該故都司王亮。帶領閩兵來江援勤。圍攻建昌府城。屢獲勝仗。晝夜督兵巡哨。不辭勞瘁。以致積受寒熱。患病身故。殊堪憫惜。合無仰懇天恩。將已故署福建興化協左營都

司王亮敕部照軍營病故例議卹。以資激勸。理合附片奏聞。伏乞聖鑒訓示。謹奏。硃批。王亮著照軍營病故例議卹。欽此。

李沛蒼免罪留營片 咸豐六年八月三十日

再安徽已革署貴池縣知縣李沛蒼。於咸豐四年經撫臣福濟據署池州府龔培元揭報。以擅離職守奏參。奉上諭。著卽革職。交刑部治罪。欽此。嗣該革員在廬州具稟。前署貴池時。沿江賊匪肆擾。屢請撥兵未到。遂通報公出。就近赴金陵大營請兵。先見護理道員潘筠基。諭以應赴廬州大營稟商。旋經潘筠基稟請。留於寧國府幫辦巡防勸捐。有案可查。龔培元並不代爲聲明等語。後復經福濟奏奉上諭。著池州府龔培元著暫行解任。交福濟提同李沛蒼訊究確情。儒有被參誣揭情事。卽著加等治罪。欽此。適值道員何桂珍勦辦搶匪。該革員隨營差遣。臣國藩奏調何桂珍帶同李沛蒼來九江行營。襄辦軍務。該革員奉札先到。經臣留營當差。是以被參革訊之案。久懸未結。本年四月。李沛蒼呈請給假前往廬州。以憑質訊。而剖冤誣。臣以該革員承辦發審。經手案件甚多。一時未便更易生手。因飭員確切親供。由臣稜咨撫臣福濟。請其據供定案。旋據福濟函稱。該革員係特調人員。仍應由臣處奏留。臣伏查該員兩載以來。於發審事件。研鞠精詳。不辭勞瘁。實爲營中得力之人。合無仰懇天恩。免其治罪。留營當差。俾臣得收臂指之助。仍請敕下撫臣福濟。將李沛蒼親兵。就近傳龔培元訊明奏結。實出聖主鴻施。謹附片具奏請旨。

瑞州一軍九月接仗情形摺 咸豐六年十月十一日

奏爲瑞州一軍。九月接仗情形。及上高縣再被賊擾。旋即收復。恭摺馳奏。仰祈聖鑒事。竊瑞州一軍。八月二十七日以前。迭次勝仗。業經具奏在案。嗣據卽選副將普承堯。候選同知曾國華。候補直隸州劉騰鴻稟稱。二十八日。賊出西路搦戰。旋分股往北。向省兵營衝突。我軍實營湘中營出隊擊之。賊防實營之橫截也。仍退聚西路。官軍兩路夾擊。賊敗走。劉騰鴻昇墩叢伏樹林中。擊卻之。九月初二。劉騰鴻劉連捷由南城外直趨飛蛾亭。朱祖貴劉芳貴率實營由金川門入。時甫五鼓。飛蛾亭守卡之賊數百。均枕戈酣睡。我軍圍而殲之。燒濟賊之戶百餘家。初十日。賊由西門出隊。伏於城北田畔。省兵五營出隊擊之。賊卽敗走。方追殺間。田畔賊伏突起。迴合十餘人。鎗礮

對轟。傷亡相當。新保守備詹榮清腹中礮子。次日殞命。寶營朱祖貴劉芳貴出隊橫擊。賊陣潰亂。申刻收隊。十五日。西門出賊二三百人。護礮船上犯。北城出賊約二三千。意在撲省營兵壘。劉騰鴻派黃澤遠擊賊之正兵。自率後營由河岸趨西門橫擊之。早大礮堵擊賊船。瑞州城內。多廣東老賊。鎗礮最準。劉騰鴻亦以火器擅長。往往傷斃二三百名。而賊隊堅立不退。我軍有受傷者。亦堅立相持。未刻收隊。賊回頭搦戰。劉騰鴻之親兵素稱驍悍。莫不一以當十。刀矛摩戛有聲。賊遂紛紛奪路入城。此九月十五日以前接仗獲勝之情形也。巨國藩以九月初三日。赴瑞州軍營。二十日仍回省河。在瑞周視城垣。履勘各路。與各營官熟商。必須先斷南路臨江之接濟。而後可以困賊。自二十日後。連朝大雨。河水盛漲。賊之礮船。不時上衝石鼓嶺。擾湘勇各營之後。二十七日。普承堯會國華劉騰鴻等。因南路之陰岡嶺傳家墟等處。係臨江各賊接濟之藪。即飭黃澤遠劉連捷兩營往剿。二十八日。賊窺我分兵遠出。遂來撲犯老營。西門出賊二千。伏樹林中。南城賊數百。護礮船上衝營壘。劉騰鴻昇大礮至河岸。截擊賊船。普承堯率寶營擊樹林之伏。千礮萬鎗。聲如墮牆。積年悍賊。專以持久爲得計。直待傷斃數百。始紛紛鼠竄入城。二十九日。賊黨復出搦戰。與二十八之戰相似。特爲時更久。燈初。乃克收隊。三十日。賊復以戰船上犯。而陸賊數百。出南城外。縱燒民房。又二千餘人。出西北。縱燒民房。撲省兵之營壘。適黃澤遠劉連捷兩營前日出。勦陰岡嶺傳家墟者。自南路城來。南城之賊。即遁竄入城。會國華劉騰鴻分兩路飛趨西北。賊遂敗退。我軍追逼城下。已過小港。鎗礮對施。刀矛互進。城上礮子密如驟雨。我軍後背港水。無地可退。壹意噤聲力戰。賊知不能敵。全數奔退。此九月底三日苦戰之情形也。當我師之全集瑞州也。後路之新昌上高二縣。時有逆匪竄。前經吳坤修迴剿一次。而上高之賊。復來竄踞。知縣傳自銘招募壯勇五百。並請新昌縣令沈職添撥錦字營勇。協同勦辦。九月十六日。傳自銘正欲進剿。適有湖南侯選同知凌煌壽。帶領平江勇二千餘名來江。即商請同往上高協助。十七日。傳自銘凌煌壽率平江勇由北路進新昌。接魏大伸高祥霖兩營。由南路鈔擊。十八日。馳抵上高。逆匪大隊。由西門來撲。傳自銘會督平江勇。奮力出戰。魏大伸高祥霖由南路夾擊。鏖戰三時。我軍大勝。奪獲馬匹器械多件。不意又有臨江援賊數千。拚死堅拒。愈殺愈多。平江勇衆寡不敵。即時潰散。傳自銘手刃數賊。力竭陣亡。所有印信。交家丁呈繳藩庫。此上高縣接仗小挫之情形也。會國華劉騰鴻等。以上高爲瑞軍後路。不可令寇氛

梗阻。卽派黃澤遠朱租貴周福昆等三營二千人。於十月初三四等日。進勦上高。連獲勝仗。克復縣城。先後稟報前來。臣等伏查江西各府久陷。逆賊據城死守。堅不可拔。智窮力困。焦灼難名。然瑞州連接兩湖。扼據西路中段。但使此軍屹然不動。大局終有可轉之機。上高縣知縣傅自銘。上年到任。未及一月。卽已失守。此次募勇勦賊。勉殲前愆。力戰殉難。深堪憫惜。籲懇天恩。交部照知縣例從優議卹。新保守備詹榮清。應請照例賜卹。以慰忠魂。傷亡弁勇。查明照例辦理。所有瑞州一軍。九月各勝仗。及上高縣再被賊擾。旋即收復各緣由。恭摺馳奏。伏乞皇上聖鑒。訓示施行。謹奏。

撫州老營被賊撲陷摺 咸豐六年十月十一日

奏爲撫州一軍。分兵克復宜黃崇仁郡城。老營被賊撲陷。現在併紮崇仁。恭摺馳奏。仰祈聖鑒事。竊同知李元度林源恩分統江楚兩軍。圍攻撫州。屢獲勝仗。迭經具奏在案。自七月十三以後。僞翼貴丈黃玉崑率大隊以去。城中留廣賊不過三千餘人。不常出戰。戰亦小有斬獲。無甚勝負。我軍因四五月兩月。傷亡過衆。又以盛夏疊兵。熱溼鬱蒸。疾疫至千餘人之多。八月中旬。有邊錢會匪。隨同粵匪。自建昌竄擾廣信。臣等卽飭李元度等派撥數營。赴援廣信。行至流坊。適浙兵之駐防玉山者先到。將匪擊退。撫州兵勇。仍歸本營。李元度與林源恩商議。撫建之賊。以宜黃崇仁爲來路。取宜黃。則建昌之賊源可斷。取崇仁。則撫州之賊源可斷。此揜吭拊背之計也。因於九月初二日。分兵四營。先勦宜黃。初四日。五岳營舉人陳大力。帶兵先到城外。賊卽出城迎敵。被我軍轟斃刃斃十餘人。賊將望城返奔。陳大力督率哨官彭厚坤等。搶佔縣城東關之大通橋。斷賊入城之路。賊見歸路已絕。沿港斜趨。訓導郭式源率勇續至。復斃十餘名。賊竄南關。守備伍連魁知縣鍾世楨等。截殺二十餘名。知縣傅培峯。縣丞曾毓璋等。亦追殺十數名。陳大力簇擁入城。城內守賊紛紛向北關奪門而逃。卽將縣城收復。乘勝遂赴崇仁。崇仁有民城與官城。相間一河。中有大橋。其形勢與瑞州相似。賊踞城中。重關鐵鎖。繚以短垣。木石堆積。鐵鑿密布。百長鍾連升等。衝入橋邊。伏賊突出。短兵相接。身被重傷。守備劉長培率二哨。晝水過河。城上礮石並施。相持兩時之久。彭厚坤李富廷童梅華等。首先梯城。砍倒礮二賊。親兵羅順。高力開城門。各營蜂擁而入。殲賊百餘。賊黨由北門逃往臨江。復追殺數十名。查點城內積穀萬餘石。子藥數十石。火箭噴筒數十隻。知縣費兆鏞等。隨同

入城。此九月初四日收復宜黃。初九日收復崇仁之實在情形也。當我軍之分勦宜黃崇仁也。撫州之賊。無日不出城來犯。初六日。全隊來撲。犯江軍者。呂克生率八哨禦之。鎗傷百餘賊。五音營由懸鶴嶺至城邊。破屋鈔擊。犯楚軍者四股。約千餘人。連礮指擊。賊退伏樹林。另股三百人。踞左營之空壘。周岐山迎勦。李元嘉繼之。三進三誘。賊遂折回堰下。是日兩軍共傷賊三四百名。我師亦傷亡九十三人。初八日。大霧漫天。城賊分路來撲。一由清風門出至隄上。右護軍在卡上轟礮禦之。該逆敗竄。繞至南門。左護軍迎勦。營官耿光宣嚴督隊伍。且轟且進。礮煙與晨霧相迷。隨煙搶進。不期已近城根。耿光宣被城上礮子中腹穿體。登時陣亡。該營見管帶官殉難。愈憤不退。縱橫馳突。賊遂敗竄。其犯楚軍者。周岐山李元嘉出隊鈔截。該逆退近城隄。復進犯中營。李元度派丁峻迎擊。百礮對轟。賊之火箭雨集。我軍據卡不動。連斃大旗數賊。賊退。追擊傷斃者七八十人。哀尸滿地。我軍亦傷亡四十餘人。初九日辰刻。賊復出犯。盡萃於江軍之左營。蓋探知營官耿光宣新失故也。江軍衝出。交矛對壘。鎗礮已紅。挑水續之。良久。賊退。李進發等搜殺鎗斃一黃馬褂賊目。是夜賊驚江軍之左營。火彈噴筒。飛入牆內。我軍出兩哨潛鈔擊卻之。初十日。賊又撲江軍。以二百餘人。牽制楚軍。江軍出隊直衝。賊又敗潰。追上懸鶴嶺。鏖戰一時。楚軍派五哨應援。賊乃悉退。十一日。賊復來犯楚軍。礮斃三賊。江軍出隊轟擊。賊折入左右營舊地。周岐山三往三返。賊傷數十。賊遂潛伏已毀之民房。穴牆開礮。傷斃我軍七人。李元度率後哨從田隴斜截。賊黨驚奔。我師追擊。賊輒卓旗迴立。又擊又退。又復迴立。相持三時。始行收隊。此九月初六初八初九初十十一等日。賊窺我軍分勦崇宜連日撲營。迎擊獲勝之情形也。李元度等見賊踞屢挫。勢仍兇悍。我軍分兵出勦。老營實形單薄。商議退紮四五里許。江楚兩軍圍聚一處。又飛調宣黃崇仁之師。回保撫州老營。無如欠餉日久。各弁勇見宜黃可捐銀數萬兩。崇仁有賊積穀二萬餘石。遂欲據此二縣。以補舊欠。而籌新款。不肯回郡城老營。適有另股賊匪三千餘人。自景德鎮而來。竄擾萬年安仁。以至東鄉。勢將先抵許灣。即援撫州。李元度等。以許灣係捐局所在。軍資百物。取給於此。因派把總彭大壽曹錦榮等。帶八百人往守許灣。於是郡營之兵愈單弱矣。十六日。城賊大舉出犯。我軍迎擊。斃賊三十餘名。賊不退。亦不進。而援賊千餘人。從流坊過河。意圖夾擊官軍。李元度等急派鳳字營。及左護軍四哨往截。賊忽從下游近城處偷渡。水淺河寬。不能截住。援賊遂與城賊合犯江軍。李元度林源恩並都司唐

得陞。親自衝鋒。鏖戰竟日。殺傷相當。援賊一股進城。一股分擾河東。而省城道路遂梗。十七日。城賊出犯。先分三支。撲楚軍中營。經彭斯舉等擊敗。另支撲圍江軍。經唐得陞親兵擊敗。奪黃旗十四五面。斬首四十餘級。忽大股援賊。又從流坊過渡。合圍江軍。將附營民房。一律縱火。煙燄障天。火箭火彈。紛入營中。唐得陞躍馬衝突。手刃十餘賊。馳赴中營。入視林源恩。時右營已火起矣。林源恩曰。今日全營必陷。此吾死所也。誓不出。唐得陞不忍。林源恩獨死而已。獨生。遂麾親兵出壘。而囑其姪以報讎爲念。從容與林源恩同死。兵勇死事者。計三四百人。糧臺委員從九周尙桂等殉焉。李元度先率陳英吳修毅李昇平等往救林源恩。勢已無及。回營。則賊來愈多。四面合圍。李元度將聚軍裝縱火自焚。親兵挾之上馬。與陳英丁峻吳修毅李昇平鍾輔朝單綬福等併力突圍而出。因與都司周岐山定計。直趨崇仁。崇仁兩處。尙有左右兩營。志同竇勇軍。益以許灣彭大壽之師。計完好者。尙有七營。四千餘人。暫駐此處。招集潰散。重加整頓。以圖再振。此十七日。撫州老營被賊撲陷。併紮崇仁之實在情形也。現在撫州敗卒之回省者。收輯潰散。另編隊伍。其赴崇仁者。由李元度重加整頓。二十九三十等日。撫州大股前往撲營。均經力戰擊退。追奔二十餘里。據李元度等先後稟報前來。臣等伏查撫州一軍大小五十餘戰。除五月初五七月初九兩次小挫外。餘俱獲勝。三四大等月。各府之賊。萃於該郡。尙能肅清。東路外通江浙。內蔽省垣。惟此軍是賴。厥後傷亡過多。暑疫交臻。臣等慮其疲乏致挫。札飭全軍退駐七里岡。李元度志在破城。堅不肯退。九月克復宜黃崇仁兩縣。方期軍威更振。終可斷賊援而復名郡。不圖分兵太多。復值景德鎮另股援賊突至。遂致挫敗。即選同知李元度。調度失宜。請旨革去花翎同知。仍以知縣降補。至殉難之湖南補用同知直隸州林源恩。志憤填膺。見危致命。前在平江任內。倡團保境。力遏寇衝。自調赴大營後。每戰身先。應請賞加道銜。即照道員例賜卹。湖南即補都司唐得陞。樸誠驍勇。從容就義。有烈士風。應請照游擊例賜卹。副貢教諭耿光宣。忠勇廉明。前此擬保知縣。加同知銜。尙未出奏。應請照同知例賜卹。即選從九品周尙桂。請照縣丞例賜卹。以昭激勸。而慰忠魂。其餘陣亡兵勇。查明照例辦理。所有撫州一軍。分兵克復宜黃崇仁老營。被賊撲陷。現在併紮崇仁緣由。恭摺由驛馳奏。伏乞皇上聖鑒。訓示施行。謹奏。

請饒廷選軍仍駐廣信片 咸豐六年十月十一日

再臣等於九月十二二十四等日。疊奉諭旨。飭臣等派委大員。統帶兵勇。馳赴廣信。俟派兵到後。該郡肅清。饒廷選仍可回駐玉山等因。臣等當即朝派駐紮奉新之湖南候補知府吳坤修。統帶彪勇等營二千五百人。前赴廣信。咨明學政。及浙江巡撫在案。嗣據奉新安義靖安三縣紳士御史帥方蔚等稟稱。官軍一去。賊匪出而焚掠。更甚於前。民不堪命。懇留吳坤修一軍。勤辦奉新匪黨。解三邑之倒懸等語。具稟前來。臣等查奉新等三縣。距省皆在百里內外。既據紳民合詞懇留。自不宜調開此軍。以失民望。現在新駐崇仁一軍。尙可移緩就急。即札飭李元度由崇仁帶兵馳赴廣信駐防。以保江西之要郡。而固閩浙之藩籬。淮江西餉項。萬分支絀。久在聖明洞鑒之中。若此軍僅駐郡城。則不能設法籌餉。若令駐紮貴溪。則河口之商民可以復業。而七屬之錢漕可以徵收。於餉需大有裨益。合無籲懇天恩。敕下浙江撫臣。咨行總兵饒廷選。統率得勝之師。仍駐廣信府城。臣等即飭李元度之師。駐守貴溪。俾該府得趕緊徵收錢漕。以濟眉急。玉山去郡城僅八十里。同係江西境內。饒廷選之駐廣信。與駐玉山。無甚區別。萬一婺源開化等處有警。饒廷選仍可馳往策應。李元度即可移駐府城。是饒廷選之師並非堅守一郡。不能策應四路也。如此一轉移間。於浙江之兵力無損。而於江西之籌餉有益。是否有當。伏乞皇上聖鑒。訓示。謹附片具奏。請旨。

請頌部照交黃冕勸捐片 咸豐六年十月十一日

再新授吉安府知府黃冕。自奉特旨簡放之後。忠義奮發。於湖南勸捐募勇。急圖另集援師。規復吉安。會同奉旨。援江之前任湖北藩司夏廷樾。竭力籌辦。親赴常德湘潭等處。就江西之貿易湖南者。剴切勸導。以濟軍餉。疊接函稟。募勇一千五百名。訓練三月。諸務就緒。即日來江援勦。又已革廣東羅定協副將周鳳山。自與李元度會攻撫州。每懷樟樹鎮敗挫之恥。誓圖奮翼。澠池。以贖前愆。經臣國藩飭令繞道回楚。另募勁旅。以通兩湖之路。而伸忠憤之氣。嗣據節次來稟。該革將由福建廣東以達湖南。奔馳六千餘里。苦艱備嘗。五月自撫州啓行。至八月始抵長沙。稟商湖南撫臣。募勇千七百名。急欲馳赴江西。力掃寇氛。臣等與湖南撫臣駱秉章。往返熟商。周鳳山一軍。與黃冕夏廷樾新募之師。合併三千餘人。兵力較厚。即飭其徑搗吉安。取上游建瓴之勢。南通南贛。北接瑞袁。冀擊中而首尾皆應。如吉郡不能卽下。再行酌量調撥。惟該員等所募各勇。人數較多。口糧甚鉅。目前雖勉爲供

支將來實無可接濟。臣等伏思江楚兩省處處毗連。商賈仕宦互爲主客。久相親附。無復畛域之分。黃冕以湖南之紳而仕於江西。夏廷樾以江西之紳而仕於湖南。平日皆物望風孚。此次共辦援師。尤爲兩省士民所推重。若令該二員悉心籌捐。必可源源不竭。合無籲懇天恩。敕部頒發各項執照二千張。內監生照一千張。從九照八百張。封典翎枝及各職銜照二百張。遞至湖南。發交黃冕夏廷樾手。認真勸辦。專濟此軍之用。實於江西軍務大有裨益。如蒙俞允。此項執照所得銀兩。無論捐於何省。用於何軍。責成黃冕統歸。臣國藩糧臺報銷。以昭核實。是否有當。伏候訓示遵行。謹附片具奏請旨。

請捐錢照湖南成案片 咸豐六年十月十一日

再查江西捐輸章程。遵照籌餉事例。核減二成。以制錢二千作銀一兩。久經通行在案。惟地方糜爛。民力益形拮据。各屬捐輸。未能如前踴躍。臣等正擬奏請量爲變通。茲准湖南撫臣駱秉章咨開。咸豐五年十一月二十五日。戶部核議。該撫奏請將湖南省捐輸章程。照江南河南湖北等省於新例減二成外。仍以制錢一千六百文作銀一兩。俾士民樂效輸將。而軍餉可資接濟等因。奉旨依議欽此。臣等查江西與湖南境壤相接。而現在物力之困。做過之。合無仰懇天恩。准將江西捐輸亦照湖南成案。於新例減二成外。仍以制錢一千六百文抵銀一兩。庶與鄰省事例不致兩歧。而於本省籌捐可期應手。謹會同前任刑部侍郎臣黃贊湯附片具奏請旨。

贛南匪勢蔓延請添調粵兵摺 咸豐六年十一月十七日

奏爲贛南各屬土匪鄰匪勾結滋蔓。兵力不敷分剿。請旨敕下廣東督撫添撥勁旅接濟軍餉。以資剿洗。恭摺具奏。仰祈聖鑒事。竊照贛郡解圍。並各屬勦辦情形。業經臣等繕摺奏報。並咨行該鎮道會督諸軍。設法攻勦在案。茲據廣東潮州鎮總兵壽山。署贛州鎮總兵阿隆阿。護理吉南鎮寧道汪報聞。暨各府廳縣。先後咨稟。六月十九日起至二十五日。派撥兵勇分攻西南路之老虎坑。盤龍墟。馬坳等處股匪。並添撥田勇助勦。將該三處賊營先後攻破焚燬。殺賊三百餘人。餘匪逃散。二十六日。會撥江粵兵勇分剿沙河。口樓梯嶺之賊。均獲小勝。並於興國江口地方。擊沉賊匪米船三隻。淹斃匪黨三十餘人。奪獲匪船五隻。二十九日以後。分攻樓梯嶺沙河。口。盡眉龍沙石鋪。俱獲小勝。斬獲首級二十九顆。生擒八名。其南康之塘江一帶。亦經已革知府周汝筠進剿。連獲勝仗。道

路已通。七月初十日，探知南路來賊六七百人，捲旗息鼓，欲偷越西岸山背下竄。該鎮道即派兵分伏密林山坳以待。賊衆窺見，驚懼回竄。兵勇乘勢追殺，斬馘三十。我軍亦傷亡數人。該鎮道以官軍進剿南路，賊匪須先走十餘里，賊轉以逸待勞。於十三日派彪勇赴離城十里之高樓地方，分紮水陸兩營。自八月初間以後，連日分攻南路各匪，殲斃一千餘人，割取首級耳記九百餘件，焚燬下寨灘等處賊巢二十餘處。大南坑等處賊匪棚寨四十餘處。九月初四日，江粵各兵勇會出大隊，賈勇過河，將樓梯嶺賊巢焚燬，擊殺賊匪甚多。內有騎馬賊目三名，斬取首級一百三十七顆，髮長一二尺者居半。又耳記五十三件，奪獲大銅礮一尊，旗幟刀矛多件。初五日，攻剿從埠沙河嶺之賊，亦有斬獲。其樓梯嶺附近之砂石鋪大埠華林等，均爲賊藪。現籌剿辦，並令東莞勇及守備孔慶林所帶兵勇，留於南康縣協剿。會同該縣田勇，屢攻附近潭口之黎邊王村，殺賊千餘人。賊巢焚燬大半。武舉匡化隆等之勇，及續派彪勇廣勇進剿下游之賊。於武索大王廟大廖石華山並萬安縣城下，連獲勝仗，殺賊三百餘名。生擒四十餘名，奪獲賊船三隻，擊沉八隻，淹斃匪黨百餘人。又獲大礮二尊，烏槍旗械一百餘件。此贛郡連日分路攻剿之情形也。定南廳地方，於五月初六日，有贛東和平縣逆匪翟火姑率其黨與六七千，竄入廳境。初七日，圍攻廳城，愈聚愈衆，數至萬餘。經代理定南廳姚世恩會同把總歐陽劍督率兵勇居民，竭力固守。該逆攻撲二十餘次，幸兵民同心，屢次擊殺，統計斃匪七百餘人。二十八日，該逆由東門挖掘地道，轟倒城牆五丈餘。姚世恩等督飭兵民堵禦，殺賊四五十人，槍礮轟斃無數。立將缺口修築完固。我軍陣亡七名。該逆復在西南二門挖掘地道。姚世恩等察出，飭令兵勇破其地穴，殺賊十人。六月初八日，由府派往援剿之候選同知周炎帶龍南勇二千名，行抵廳境。姚世恩遂令各保鄉團協力助剿。逆匪分股屯聚天花寺地方。堵我援兵來路。十七日，周炎會同署橫岡營都司吉勒通阿督帶兵勇，並五戶村團勇，直入賊營，斃賊匪多名。餘匪敗退長橋地方。十九日，周炎進攻長橋，詎該逆先令黨與五路埋伏，突起襲擊。我軍失利。周炎將勇撤回龍南，設法整頓。再圖進剿。自援兵敗後，逆餒愈張，勾結鴉公墟天花寺土匪，約有數萬之衆。二十三日，圍攻橫岡營。時下歷司巡檢孫雲錦先期前往月子江一帶催收捐項，接濟軍餉。都司吉勒通阿外委趙雲龍督兵守禦，寡不敵衆，被匪撲入營內。兵勇傷亡多名。吉勒通阿等各受重傷，退紮巡腦地方。嗣經姚世恩等齊集各堡田勇，連日設法剿洗。七月初十日，該逆被

擊敗退。竄往信豐境內。廳城解圍。此定南廳被匪竄擾連日防剿之情形也。和平縣逆首瞿火姑之黨與陳芝蔴勾結土匪葉紹品李元古等。糾匪五千。竄擾安遠縣太平堡。經署安遠縣知縣張仁法。署把總李正禮帶領兵勇。於五月十七及二十三、四等日。迭次進剿。先後斃賊四百餘名。生擒三十餘名。二十六日。張仁法等。在石口墟遇賊接仗。乃另股賊匪。翻越山嶺。攻撲縣城。守城兵力無多。被匪攻陷。典史曹秉正受傷。經兵勇救出。在籍候補兵馬司吏目鄭家成。被匪逼脅自縊殉難。兵勇亦多傷亡。張仁法等。趕回救援不及。旋於六月二十四日。經張仁法添集團勇。合力攻剿。賊匪敗竄。當即收復城池。此安遠縣被匪擾陷旋經克復之情形也。五月二十五日。贛縣韓坊匪徒數千。竄入信豐縣之小坑月嶺。擾及竹絲河。適候選同知周炎帶勇赴援。定南廳路過信邑。該督縣吳秉衡即與周炎商派練勇一千五百名。吳秉衡又帶自募練勇八百名往剿。擊斃賊匪一百數十人。生擒二十七名。該匪敗退月嶺。六月初二日。該匪竄踞曾姓圍內。周炎又派勇一千七百名。隨同吳秉衡馳往圍攻。殺賊數十名。焚斃無數。餘匪敗散。周炎因定南待援甚急。即披營起程。旋有安遠賊匪。分股竄至信豐縣鳳凰墟。幸初七日。從九品孫福同帶領彪勇到縣。吳秉衡即與相商進剿。斃賊十餘名。賊始退踞韓坊一帶。孫福同押護餉銀赴郡。留勇數百在縣協剿。十四日。擊斃安息堡賊匪數十人。十八日。探聞韓坊之賊。愈聚愈衆。十九日。吳秉衡會同湯彪帶領彪勇。進攻韓坊賊巢。斃匪多名。餘黨四散。旋又探聞和平股匪嘯聚於定南之八十岡。有衆數萬。逼近信豐。而安息堡瀕瘠石等邊界。亦有和平安遠等處匪徒。越入境內。圍攻縣城。吳秉衡商令前任南康縣訓導熊福荪招募南康龍迴地方田勇二千名。與本縣團勇。合力援剿。屢獲勝仗。殺賊不計其數。割取耳記六十餘件。已追至離城二十里之新仁墟。因沿途節節有賊。尚未直抵縣城。此信豐縣被匪圍攻之情形也。六月初九日。安遠縣賊匪勾通粵逆二千餘人。竄入長寧縣西南等鄉肆擾。該縣知縣楊長杰會同署半角營都司藍蓉。率領弁兵田勇。於十二日往剿。斃賊十餘人。生擒四名。該逆退竄葛蒲墟。十五日。跟蹤追捕。該逆遁回廣東境內。各自散去。二十六七等日。該匪散而復聚。共三千餘人。竄擾古坑岡等村。七月初一日。蜂擁撲城。楊長杰等會同兵勇紳民。嬰城固守。開放槍礮。擊斃賊之簾牌手數人。施放火箭。燒燬賊營火藥二桶。賊勢稍卻。一面飛調各鄉田勇赴援。隨有北鄉廩生羅福基等帶練勇三百餘人。三堡紳士胡德貴等帶練勇一千餘人。先後來城。楊長杰等亦派勇出剿。

兩面夾攻。賊衆潰敗。追殺六十餘人。是日酉刻。該逆回旗來撲。我軍仍分兩路迎敵。鏖戰逾時。殺賊二十餘名。賊復敗退。乘夜逃遁。我兵追至河嶺地方。殲斃匪黨數十人。紳士劉士傑率勇沿途生擒賊目陳立謙等十六名。十四日。匪首謝滿石廣豐各率夥黨三十餘人。至縣屬牛門岡焚搶。楊長杰派兵三路進攻。殺賊四十餘人。生擒謝滿石廣豐正法。餘匪退咸水地方。我兵被傷三十餘人。二十日。藍蔭帶各堡壯勇。襲擊溪尾村賊營。殲斃五十餘名。二十一日。匪衆圍撲我營。經團勇奮力擊退。餘匪仍踞公平菖蒲二墟。勾結愈衆。須厚集兵力。方可擒渠掃穴。此長寧縣節次被擾之情形也。七月初一日。上猶縣營前之賊。竄至崇義縣杰壩地方。初二日。署崇義縣何允廉派勇往剿。兩獲勝仗。詎是夜蝸牛坳營盤失火自焚。合營驚潰。何允廉正在添募壯勇。初五日。探知賊匪由茶潭高灘兩路來撲縣城。何允廉卽與汛弁分投堵禦。而杰壩之賊。已由蝸牛坳徑抵北門。被城上兵勇擊斃多匪。該逆全股攻撲南門。城池遂陷。何允廉聞警馳回。已不能入城。只得退守密溪。趕緊招勇。以圖收復。此崇義縣城被擾失陷之情形也。上猶縣城亦被營前股匪攻撲。連挖地道兩處。轟塌城牆二十餘丈。經代理縣程烜。把總畢開錄等。會督兵勇。奮力堵禦。搶築完固。八月初六七等日。該逆又在西門外開挖隧道。並於各要路紮營。斷絕城中接濟。正在危急之際。經該縣紳士前任御史李臨馴。招募南康古樓堡田勇千餘名。又經汪報閩派委候補按察司知事章樹帶勇千餘名。同往救援。初九日抵縣。各鄉紳士亦帶團丁數千。前來協助。程烜等卽率兵勇。由東門出隊。內外夾攻。鎗礮疊擊。斃賊一百數十人。奪獲旗幟數十件。將東北一帶賊營。悉行焚燬。逆賊敗竄西街。我軍乘勝進攻。又轟斃匪黨數百人。奪獲五百劬大礮一尊。抬礮鳥槍數十桿。火藥鉛彈數十桶。賊船四十餘隻。敗匪竄往爛泥湖一帶。復被鄉團出奇邀擊。擒斬多名。是役鏖戰竟日。斃匪六百餘人。城圍遂解。我軍僅傷七名。此上猶縣剿匪獲勝解圍之情形也。粵都縣城。經候補同知潘毓瑞帶勇收復以後。堵禦鄰匪。迭獲大勝。搜捕伏莽。屢有殲擒。地方賴以無虞。龍南會昌二縣。及寧都州並瑞金石城等縣。亦均有粵匪土匪滋擾。幸俱隨時擊退。惟信豐被圍。崇義未復。應請速調大兵救援。各等情前來。臣等伏查贛州府城。雖已解圍。而南路之砂石鋪等處。賊匪尙未剪滅。南康縣塘江之路。雖已無阻。而潭口餘孽。亦未肅清。是贛郡兵勇。勢不能分顧外縣。其定南安遠信豐長寧崇義上猶等廳縣。均被鄰匪土匪。勾結滋擾。僅祇安遠克復。定南上猶解圍。此外各廳縣。或被賊圍攻。

或城池被踞。匪黨勾通誘脅。日見蔓延。兵勇戰守巡防。漸形疲乏。况各該處均係瘠苦之區。餉糈無多。勢難持久。若不趕調客兵協力剿洗。深爲可虞。無如省城兵力。本屬無多。並須兼顧廣信兩湖。福建援師。分屯瑞州袁州建昌三府。均值圍剿喫緊。難以抽撥。且贛南距省千里而遙。賊踞吉安。路途多梗。遞送文報。均係繞道而行。省中實有鞭長莫及之勢。臣等再四籌商。惟有仍請添調粵兵。以資會剿。合無仰懇天恩。敕下兩廣督臣。再行籌撥勁旅三四千名。隨同接濟餉糈。取道和平。徑趨定南等廳縣。會同本地兵勇。次第剿辦。務將各屬逆匪。殲除淨盡。倘敢匪逃回粵境。卽併力跟蹤。搜捕盡絕根株。庶免此峯彼竄。聚散靡常。防剿無已。洵於兩省邊界。俱有裨益。至署安遠縣知縣張仁法。署安遠汛把總李正禮。於城池被匪攻陷。雖因兵單餉絀所致。業已據報自行克復。尙知愧奮。第地方究已被擾。應請將張仁法李正禮均革職留任。辦理善後。以贖前愆。典史曹秉正請免置議。署崇義縣事義寧州州同何允廉。被匪竄撲入城。雖因賊分三路並進。堵禦難週。究屬防守不力。應請將何允廉先行革職。仍令留營攻剿。以觀後效。同城武弁及佐雜等官。俟查明係何員在任。有無奉委出境。再行核辦。除咨行該鎮道會督士卒。並飭令各屬實力攻剿防禦。並確查傷亡員弁兵勇。及殉難紳士。分別請卹外。所有贛南匪勢蔓延。請添調粵兵會剿緣由。理合恭摺附驛具奏。伏乞皇上聖鑒訓示。謹奏。

謝湘鄉加學額恩摺 咸豐六年十一月十七日

奏爲恭謝天恩。仰祈聖鑒事。竊臣接閱邸鈔。咸豐六年六月二十一日內閣奉上諭。一駱秉章奏請賞加湘鄉縣文武學額一摺。湖南在籍侍郎會國藩前經招募鄉勇一萬餘人。駐紮衡州。頗資捍衛。嗣後軍分水陸。克復武漢田鎮。屢著戰功。賊竄追湘潭等處。該紳勇截擊獲勝。地方得以保全。連年土匪竊發。亦賴該縣士民不分畛域。實力防剿。南路肅清。先後捐輸。數逾巨萬。洵屬踴躍急公。自應優加鼓勵。所有湘鄉縣學額。著於原額取進文童十五名外。加增三名。取進武童十二名外。加增三名。均作爲永遠定額。以示優獎。欽此。一竊臣於咸豐二年十二月奉命幫辦團練。卽邀同縣生員羅澤南劉蓉王鑫數人。至省招募湘勇千人。認真訓練。三年六月。與撫臣駱秉章熟商。復招湘勇二千。救援江西。均經奏明在案。是年冬間。臣駐紮衡州。疊奉諭旨。飭令援鄂援皖。籌備船廠。肅清江面。遂招募水陸弁勇。數逾萬人。雖概稱湘勇之名。實不盡湘鄉之籍。頻年以來。或在江西湖北隨征。或在本省

南路防剿。薄効涓埃之力。屢邀高厚之恩。計一縣之中。數年之內。文具保舉道府以下至州縣佐雜者數十人。武弁保舉參游以下至千把外委者數百人。悉荷恩旨。允而羅澤南李續賓均蒙賞加藩司之銜。錫以二品之封。在合縣諸人言之。已覺勞薄而賞厚。在微臣一身言之。尤爲功寡而過多。迺蒙闡澤宏敷。皇仁特沛。增文武三名之學額。寵錫溫綸。勵水陸萬衆之軍心。歡如挾纜。竈戴地而深知其重。蚊負山而不憚其難。臣惟有勉策駑駘。誓除醜逆。率湘中之子弟。永矢同袍同澤之忱。揚泮沼之芬芳。無忘獻誠獻囚之義。所有微臣感激下忱。謹繕摺恭謝天恩。伏乞皇上聖鑒。謹奏。

謝弟國華以同知選用恩摺 咸豐六年十一月十七日

奏爲恭謝天恩事。九月十四日。准兵部火票遞到八月二十七日內閣奉上諭。同知銜曾國華著以同知儘先選用。欽此。竊曾國華係微臣之胞弟。出繼叔父爲嗣。世守清門。家承儒術。惟標湖之麤涉。實軍旅之未嫻。本年三月。因聞羅澤南受傷。馳赴湖北軍營。經撫臣胡林翼派委管帶湘勇。兼轄各營。救援江西。同行如普承堯吳坤修劉騰鴻等。皆久歷戎行。夙諳將略。臣弟國華與之諮商。得所依倚。類因人而成事。敢貪天以言功。飭蒙皇仁。廣被寵錫。頭銜。仕版初登。遽分猷於五馬。恩綸特沛。如負重於六鼈。臣惟有督飭臣弟。共撓丹悃。念累世踐土食毛之義。欲全孝必思全忠。法古人臥薪嘗膽之誠。必有忍乃能有濟。明恥教戰。補拙習勤。冒鋒刃以先驅。效鉛刀之一割。庶冀仰答高厚鴻慈於萬一。所有微臣感激下忱。謹率同臣弟國華北向叩頭。恭謝天恩。伏乞皇上聖鑒。謹奏。

江西近日軍情據實覆奏摺 咸豐六年十一月十七日

奏爲江西近日軍情據實覆奏。仰祈聖鑒事。臣等於十一月初八日。承准軍機大臣字寄十月二十日奉上諭。曾國藩文俊。自八月三十日奏報瑞州建昌勝仗之後。已及月餘。而未見續報。昨據廉兆綸奏有探聞撫州官軍失利之語。與本日何桂清奏報相同。亦未見曾國藩等入奏。前聞賊匪多回至金陵。而江西失陷各郡。尙無一處克復。所有占據城池之賊。聞皆石黨與誘脅土匪爲之拒守。卽廣東新附匪徒。亦皆係石逆所糾集。與金陵逆黨尙未歸併。現據江浙各省奏報。皆言金陵內亂。楊逆已爲韋逆所殺。又聞楊逆被殺後。石逆不服。逃出金陵。洪逆

現懸重賞購其首級。可見石逆斷不肯再返金陵。金陵亦不肯更助石逆。昨又據福濟等奏。石逆現在安慶桐城一帶。其爲糾合黨與。自圖占踞。已可概見。現在福濟等已攻克巢縣與和州。不日即可進據安桐。而湖北沙口田鎮水陸兵勇。屢絕賊援。恐石逆不得逞志於皖楚。勢必竄入江西。該逆於諸賊之中。最爲兇悍。若令回竄江西。占踞數郡。煽惑莠民。其勢愈難收拾。著會國藩等乘此賊心渙散之時。趕緊克復數城。使該逆退無所歸。自不難窮蹙就擒。若徒事遷延。勞師糜餉。日久無功。朕卽不遽加該侍郎等以貽誤之罪。該侍郎等何顏對江西士民耶。又聞石達開係湖南拔貢。現因與韋逆不睦。頗有投誠之意。雖未必卽係確信。而竊覺思降。亦或事之所有。此輩狼子野心。原難輕議招撫。儻係向會國藩處乞降。應如何處置之法。或使先自立功贖罪。再邀重賞。亦當豫爲籌畫。經權互用。以收實效。現在仍將失陷各城。先圖攻克。使該逆無所憑藉。不敢退至江西。是爲至要。本日據何桂清奏請飭催候補同知吳坤修將所帶彪勇二千五百名。速赴廣信等語。此項壯勇。何以日久未到。著會國藩等查明。飭令該員迅速馳往。以便饒廷選回駐玉山。毋稍延緩。將此由六百里諭令知之。欽此。一臣等伏查賊首之在江西。主持軍務者。自上年十一月至本年二月底。以僞翼王石達開爲主。三四五月。以僞翼貴丈黃玉崑爲主。六七月。以僞北王韋昌輝爲主。曾於八月初六日。附片具奏在案。自韋昌輝在瑞州戰敗。竄回金陵。被楊秀清斥責。洪韋二賊。謀殺楊秀清。并誅其宗族黨羽。于是石達開自湖北洪山歸去。黃玉崑自江西臨江歸去。并赴金陵。謀爲楊秀清伸冤復仇。八月以後。江西軍事。卽係九江賊首林啓容主之。臣等正思趁此機會。克復數城。仰慰宵旰憂勤之意。不意九月中。撫州以分軍致挫。十月間。建昌以疲乏致潰。而拳獲賊中僞文。均稱石達開諭令諸賊。謹守江西。凡江西境內之賊。概未調赴下游。而下游之賊。反由景德鎮以赴援撫建。蓋安慶爲石逆舊踞之巢穴。江西爲石逆新踞之土地。諭旨所謂「石逆糾合黨與。自圖占踞。已可概見」。聖天子明見萬里之外。洵屬無微不至。臣等曷勝欽服。至石達開係湖南拔貢。頗有投誠之意。一節。查石逆係廣西潯州府桂平縣大梭村人。在金陵時。先據故明張侯第。後駐上江考棚。甲寅八月。踞守安慶。十一月。臣國藩師次九江。石逆與羅大綱同赴湖口救援。官軍被挫。乙卯春。武漢復陷。該逆往來蘄黃一帶。提調賊軍。十月由通城竄入新昌。招納廣東新附之匪。連陷江西數府。本年三月。下竄寧國蕪湖等處。七月初九。復由興國州上援武昌。爲李續賓之師所敗。現據各路探報。

石逆糾集匪黨十餘萬人。前往金陵。誓殺洪韋二賊。爲楊秀清報仇。以臣等愚見揆之。如果洪韋勝而石逆敗。則投誠乃意中之事。若其石逆勝而洪韋敗。則該逆挾詭詐以馭衆。假仁義以要民。方且飛揚自恣。未必遽有投誠之心。臣等曾檄諭九江賊目林啓容。令其歸順。又作僞文調瑞州賊目賴裕新令赴下游。均無成效。假令石違開自知大勢之已去。識天威之難犯。翩然歸命。稽顙投誠。則臣等招撫之法。當令其立功贖罪。獻城爲質。以大局言之。北岸安慶南岸九江。該逆之所必爭也。以江西言之。瑞州臨江爲根本。撫州吉安爲膏腴。亦該逆之所不肯輕棄也。能於此六城中獻一二城爲質。則可信其爲真心歸附。國初之施琅黃梧。近日之張國樑。成例具在。臣等立即奏懇鴻恩。糜以高位。優以厚祿。若不能獻城爲證。外稱歸義。內懷叵測。如阿睦爾撒納先降後叛之案。幾至不可收拾。臣等不敢貪招撫之虛名。弛防剿之實務。是否有當。伏乞訓示指授機宜。刻下瑞州奉新兩軍。疊獲勝仗。勦辦尙屬得手。周鳳山黃冕等之師。初赴吉安。差稱勁旅。袁州新復。西路大有振興之機。水師則彭玉麟駐下游之吳城鎮。劉于濬駐上游之樟樹鎮。均甚得力。惟撫建疊挫。東路空虛。臣等惟當嚴飭西路諸將。恪遵諭旨。先圖攻克數城。使該逆無所憑藉。仰副聖主矜懷南服。拯民水火之至意。所有江西近日軍情。恭摺據實覆奏。伏乞皇上聖鑒。訓示施行。謹奏。硃批「爾等主見甚屬允妥。剿撫固應并用。尤重先剿後撫。可隨時審其機宜。好爲之。欽此。」

瑞州奉新攻戰情形摺 咸豐六年十一月十七日

奏爲瑞州一軍十月接仗屢次獲勝。現在新修南北兩城。暨奉新接仗獲勝情形。恭摺馳奏。仰祈聖鑒事。竊瑞州一軍。九月接仗情形。并分兵克復上高縣城業經具奏在案。嗣據普承堯會國華劉騰鵬等稟稱。瑞州分兵兩營。於初四日克復縣城。尋獲知縣傅自銘尸首。安撫董黎。搜剿餘匪。擬於初十日回瑞州老營。是日卯刻。探報有賊數千。隔河浩蕩而至。紛分三支。一由河南。一由河西。一由河東。湘贛各營。商議朱祖貴敵河南之賊。黃澤遠敵河西。周福崑敵河東。而賊之從河西來者。因水深未能猝渡。又分而爲二。與河南河東兩支涉水急渡。黃澤遠見賊不從西面徑渡。乃分兵助朱祖貴周福崑。而自率親兵抄河東之賊之尾。該逆濟河甫畢。朱祖貴周福崑迎擊。賊背水而陣。死戰不退。黃澤遠自東旁抄前後圍逼。自辰至午。殺賊四百餘名。殞死無數。奪獲槍礮旗幟刀矛號褂

五百餘件。此分兵克復上高後。初十大戰獲勝之情形也。瑞州分南北兩城。中跨一河。北曰官城。南曰民城。鄂省援師初到瑞時。於七月初三日攻破南城。賊黨盡歸北城。然南路與臨江相通。賊中之接濟。頑民之貿易。猶以南城爲藏奸之藪。我軍屢赴南路搜剿。大小數十戰。終不能絕其接濟。自九月下旬。大雨漲河。浮橋衝斷。而南路之賊。日益猖獗。候補直隸州劉騰鴻與會國華普承堯等熟商。必須築堅壘於南岸。造極固之浮橋。而後南路之外援可斷。十月初八日。劉騰鴻於南岸修築新壘。拆取舊南城之磚石。搬移新營之前。有賊數百出而爭之。劉騰鴻先派隊伍埋伏於舊城之內。賊至遇伏。突起奮擊。賊奪橋而遁。後遁者數十名。曳水而渡。我軍小槍入水擊之。須臾皆斃。初九日辰刻。賊數百人抄省兵各營之後。經都司滕加洪守備李英雄擊退。午後。城內賊大股擁出。實二千餘人。滕加洪復與胡應元出隊迎擊。副將普承堯派寶勇分兩支而出。一從田壠抄賊之尾。一接應滕加洪等之軍。進退數合。賊不能支。卽行敗退。田壠之師。從中邀擊。逆黨大敗。退至樹林。當寶勇與賊鏖戰之時。劉騰鴻率親兵百餘名。至北門外牽制賊勢。與城門之賊。正爾相持。而大股賊之爲寶勇擊敗者。悉至其地。因劉騰鴻隊僅百餘人。二千餘賊。併力來撲。劉騰鴻令各勇植立不動。槍礮環擊。該逆雖衆。亦不敢犯。忽一騎馬賊目。揮衆前進。我軍劈山礮適中其胸。餘賊遂如鳥獸散矣。十一日。賊隊全出。我軍堅守不動。俟其稍進。各營會合齊出。將四面圍剿。以大劍之。該逆甫經接仗。卽逃回城根。我軍跟追。僅斃數名。賊遂全竄入城。我軍憤極。繞城仰攻。劉騰鴻攻南門。萬泰胡應元等攻北門。滕加洪李英雄攻東門。普承堯會國華攻西門。而往來接應北路。直逼城下。雲梯甫進。城上火彈礮石紛如驟雨。驍敢者多受重傷。自午至亥。未能得手。收隊時。已三鼓矣。各營官會商。多製長梯。廣儲稻草。添造擋牌。十八日。復大舉進攻。普承堯率寶勇二千。獨當前敵。直入壕內。拔其木椿竹筴。低頭於礮子亂石之中。相戒不復仰視。前者已死。後者繼進。傷者昇歸。昇者仍來苦戰。四時。城賊以全桶火藥傾下。燒斃過多。始傳命收隊。凡傷亡二百餘人。都司銜劉芳貴身受重傷。普承堯據地涕泣。矢以城不破。不肯還營。各弁勇強扶之以歸。此初入以後各仗獲勝。及十八日攻城未克之情形也。劉騰鴻以南路爲賊所力爭。每日派隊五成。排立南岸。而以其半修築新壘。高厚堅固。屹然如一石城。南工既畢。又於北岸石鼓嶺。就現在之營基。築一新城。派湘勇長夫四千餘人。併力興工。劉騰鴻與會國華晝夜監視。至十一月初旬。一律竣工。壘石爲基。移磚爲壁。環以雉堞。

排以槍眼。四門鞏固。閉以闌板。高皆二丈有奇。內濠深一丈。外濠倍之。崇墉屹屹。與瑞州之北城相隔二里有餘。寬廣不逮舊城。而堅實過之。自是賊之南城。折毀殆盡。而我軍南北兩城。占據上游。巋然新立。此劉騰鵠等因瑞州通江楚要路。特築新城之情形也。湖南候補知府吳坤修。管帶彪勇各營。駐紮奉新之甘洲地方。臣等前派赴廣信府防守。因三縣紳士稟留。仍令留駐奉新。業經具奏在案。旋因甘洲去城稍遠。近城之賊。焚劫奸淫。不堪言狀。紳民泣求進剿。九月三十日。吳坤修派彪左營。由東路六分橋進。彪右營義武營。由中路百尺橋進。長字營由西路烏嵐橋進。黎明起行。先紮距城五里外。吳坤修自率親兵登城北獅山。周覽城垣。復繞至南城。登岐嶺瞭望。該逆由南門出隊。蜂擁而來。當即渡河迎敵。且戰且退。佯作畏縮之狀。該逆逞志狂追。引至數里外。方卓旗回戰。彪左營全隊從東抄出。彪右營兩哨并義武營抵敵。中路長字營全隊禦西門之賊。槍砲先施。刀矛繼進。傷賊極多。而該逆知我距營較遠。難忍饑渴。計欲疲乏我軍。傾城而出。漫山遍野。進退數十回合。自辰至申。更番飲食。力戰五時。酉正始收隊。賊復以數千人尾追牽掣。俟其來既遠。我軍鼓勇撲回擊之。又斃數人。自來交鋒之久。以是日爲最。吳坤修因城賊四出窺擾。卽移紮近城之六分橋地方。十月初八日。賊來誘戰。堅忍不出。使其久立以勞之。初九日。復分數股直來撲營。吳坤修派彪左右營兩路衝出。長字營從左首遠包。義武營從右首遠包。賊卽敗退。轟擊無算。迨至城下而旋。十八日。各營派七成隊分作兩路。繞城五里外游擊。該逆亦分兩路來迎。彪右營長字營抵東南一股。彪左營義武營抵西北一股。賊匪愈戰愈多。兇狠已極。長字營官把總王吉昌奮勇逾恆。進退數十合。賊不能抵禦。卽退回南城。王吉昌接踵而至。意欲乘勝入城。該逆復從城中衝出。各勇稍卻。王吉昌殿後。被傷陣亡。彪右營長字營又合隊衝擊。殺賊無數。彪左營獨營西面。力戰尤久。營官千總吳修政衝鋒二十餘次。中賊火彈。身受重傷。是日我兵傷亡逾百。而斃賊三倍過之。此吳坤修在奉新屢戰獲勝之情形也。據普承堯會國華劉騰鵠吳坤修先後稟報前來。臣等伏查江西賊匪。以瑞臨爲根本。自鄂省援師抵瑞。該逆併力固守。堅不可拔。現在我軍新修南北兩城。亦以爲西路各軍之根本。如瑞城不能遽克。則留五千人守此新城。餘兵或分或合。可以調遣如意。把總王吉昌由湖南千里來援。自備口糧三四千金。前在新昌上高屢獲勝仗。後隨同進剿。奉新克復安義。均甚得力。此次力戰捐軀。應請照千總陣亡例從優賜卹。以慰忠魂。所有瑞州一軍。十月接仗。屬次

獲勝。現在新修南北兩城。暨奉新屢戰獲勝各緣由。恭摺由驛馳奏。伏乞皇上聖鑒。訓示施行。謹奏。硃批。知道了。王吉昌著照千總例議卹。欽此。」

建昌官軍潰退摺 咸豐六年十一月十七日

奏爲建昌官軍屢獲勝仗。十月二十五日挫敗。營壘被陷。闖兵退回本境各情形。恭摺馳奏。仰祈聖鑒事。竊建昌軍營八月間分兵救援南豐新城及郡營擊退援賊各情。業經奏明在案。嗣據副將張從龍陳上國琳潤等先後稟稱。自琳潤續帶闖兵抵建。與省城之贛兵龍泉勇合紮。北路建勇亦自新城回軍駐紮。西北兵力較厚。即於十五十六等日。會合四面。併力環攻。奈我軍當攻擊之際。賊匪了不接應。有欲扛梯而進。則礮子飛落如雨。兵勇即被槍傷。因之卻立。且每於我軍收隊之時。該逆窺視後隊人寡。即出數百人搦戰。我兵預先隄防。十七日。北路一軍回頭迎擊。大獲勝仗。二十一日。各營會合攻城。該逆突出南門。數百人衝抵營壘。我兵分道攔擊。殲賊十數名。西路黃家駒帶勇馳至。東路張家駒林士魁督兵勇。擄水截擊。該逆三面被圍。殺斃百餘。旗幟軍械橫棄遍野。紛紛踰垣逃避。退至城門。城內老賊閉門不納。仍驅出數百人回戰。又被火箭槍砲力擊敗之。二十三日。各營出隊。賊賊出數百人迎戰。我軍以槍砲斃紅旗賊目一名。匪黨十餘。該逆抵死不願。向前力拒。我軍各紮定陣。靜以持之。大礮環施。賊衆且拒且退。西北接應之兵勇。從旁橫擊而出。逆賊勢不能支。退入城內。二十四日。探知逆賊由東門出城取水。派兵勇三百名前往埋伏。賊至溪邊。號砲一響。伏兵齊起。刀矛殪其前鋒數人。拾礮繞旁擊敗之。二十五日。逆賊六七百人。開城搦戰。琳潤帶兵趨北門。張大雄李熙瑞名謙楊錦斌等各領隊而出。約各撥奇兵一隊。繞左右旁擊。正兵以大砲連環。并擊傷斃甚多。奇兵起而乘之。逆賊敗入城內。堅守不出。二十六日。琳潤張大雄圍攻如故。賊仍堅守不出。二十七日。琳潤令與化勇一人手執籐牌。躍入子城。斬取賊旗。誘賊出城。該逆果憤怒出城迎戰。我軍伏兵齊起。楊錦斌張大雄等從左右截出。逆賊紛紛敗散。追抵子城。相持兩時。與化營把總陳光陞被槍刺傷。猶自督兵奮擊。九月初二日。將邵武邇來之大礮礮對城轟擊。逆賊分路出戰。三百餘人。由中路直撲琳潤之陣。又出兩隊。由城左右包抄而來。琳潤令曾大升帶各兵詐退三十餘步。然後名謙張大雄等三路竝進。金鼓齊鳴。與槍砲之聲相應。傷斃賊匪百餘。我軍三面圍裏。城賊出而接應。始得逃出重圍。午後收

隊。我軍亦受傷多名。初五日。琳潤張大雄等復由東北進攻。名謙等由西北夾擊。逆賊出城迎禦。我軍左右包裹。該逆唯得力戰。以出重圍而已。劉取首級二十五顆。奪獲旗幟器械四十餘件。張從龍等以屢次攻戰。未能得手。由是重修攻具。重懸賞格。力圖大舉。九月十三日。四更出隊。趁月光將沈。負薪向南門堆積。扛梯西南城下。一面燒其檔門。千劔闌板。一面奮力扒城。該逆於門外築有護城短垣。暗伏牆內。我兵甫近。槍砲連施。扛梯西南城下。一面鋒直前。被長矛刺傷。扛梯有暨至城上。有未及扶立者。城上砲石紛紛雨下。火罐火包亂擲。我兵擋牌不能抵禦。又被傷數人。十九日。我軍出隊環攻之際。該逆於西門突出迎敵。我西路兵勇稍卻。南路大隊復出夾攻。連斃大旗老賊。衆賊奪屍。我兵捨入。疊進疊退。傷斃賊匪數十名。奪獲旗幟火藥刀矛等件。此八月下旬及九月上半月疊次攻勦獲勝之情形也。自九月十七日。撫州李元度之營被賊撲陷。賊之兇鋒頓長。建昌之局勢爲之一變。蓋緣建郡一軍。以閩兵三千人爲大宗。本府額兵。與新募各勇千餘人次之。自省城撥往之贛標兵龍泉勇六百又次之。臣等責成知府何栻。在籍安徽知府張家駒。綜理該郡軍務。其餘閩兵有主客之分。無統屬之權。七月底。新城之陷。何栻一門。入口殉難。該員傷病餘生。顛連萬狀。張家駒以本地紳士。籌餉募兵。任勞任怨。雖使心力交瘁。實亦呼應不靈。而省城庫款支絀。臣等竟不能籌備糧餉軍火。遠解建昌。該郡竭蹶情形。想在聖明洞鑒之中。至九月十七日。撫州營盤失陷。建郡與之毗連。唇亡齒寒。軍心不固。何栻等屢次稟請濟師。臣等以無大枝勁旅。可供調撥。深用焦灼。蓋建昌軍營岌岌危殆之勢。臣等寢食憂之。亦已意料及之矣。旋據何栻張家駒稟稱。自李元度崇仁之兵撤調黃溪。初七日。賊匪卽入崇仁。初十日。又陷宜黃。前僑監軍冷逆。於初九日入金谿。又於陷宜黃之後。擾及楓林神崗大雄關軍山。以信南豐。陷金谿之後。擾及黃獅渡高陂。以逼廬溪。建郡地界四五十里。如西路之澤泉茅排。北路之青泥石門。無不面面皆賊。何栻等計無所出。卽設爲雕剿之策。聞賊蹤擾近郡界。各營抽兵數百掩襲之。遠則五六十里。近則三四十里。晝夜而出。向曉而歸。南豐宜黃交界。搜剿一徧。人心藉資鎮定。十五日。探報宜黃出賊二千餘人。直抵岱七都。十七日。已信楓下。距郡城三十里。各營議定抽兵赴楓下迎勦。齎師夜出。建營署守備楊錦斌。偕世職崔思坤。引軍疾馳。天明已抵楓下。該逆正擬飯後撲城。零星四散。猝不及防。楊錦斌揮軍掩殺。該逆不及措手。緣崖逃竄。我兵勇躡追搜勦。響震山谷。斃賊百餘。顛撲殞命。及擄脅逃散者甚多。奪

護大旗袍械無數。追至魏嶺雲梯關收隊。此建營於危急之際。抽兵出勦。視下獲勝之情形也。何弼等以該逆爲崇宜勦敵。必不因此一挫。遂戰其鋒。仍囑各營面面戒嚴。連日派撥兵勇。四處離勦。二十一日。探稱楓林梗口裏塔壩一路。有逆匪七八千前來。張從龍派兵六百。馳往迎擊。候選同知黃家駒帶勇百名。爲之鄉導。張家駒自帶壯勇三百堵東路。張大雄率贛標兵勇三百爲接應。三更起程。夾岸而進。二十二日黎明。抵距城四十里之大安橋。與賊相遇。賊分三股。皆紛紛潰退。既殺傷百餘人。正待窮追。忽左右逆匪抄出山後。將我軍衝爲兩段。先勝後挫。共陣亡五六百名。被傷亦數十名。管帶漳勇之保舉把總蘇廷美力戰陣亡。前湖南長沙縣典史李廷耀。不知下落。南軍併由東岸紛紛敗退。張家駒張大雄接應兵至。截住敗卒。紮駐山頭。殺賊數十名。直抵河沿。賊衆卻退。我軍始得收隊。是日賊即撲至上湖橋下兩處。距郡城三十餘里。張從龍因南岸兵勇傷亡較多。銳氣少挫。即親督所部。扼駐廟嶺。立待與該賊死戰。張大雄連夜赴南岸助之。張家駒復調楊錦斌帶建營六百人。併往擊之。次日。迎賊復戰。賊漫山塞野而來。馬隊數百匹。橫直衝突。我軍分三路迎敵。張大雄楊錦斌身先士卒。奮力掩殺。將賊左右兩路擊敗。中路賊亦退走。追至十餘里。轟斃殺斃之賊。不計其數。奪獲驃馬不少。正待收軍。賊復掩至。如是數次。我軍更番疊進。戰至日中。城內之賊。探知外援已到。遍吹海螺。出城接應。我軍氣力稍懈。回顧營內有賊。衆志稍慌。隊伍稍亂。賊將馬隊。分兩翼馳驟包裹。將我軍困在垓心。署閩安協副將陳上國。截住南門之賊。我軍首尾不能相顧。東岸之勇。方待接應。而有賊千餘人。由田螺石突至。爲所牽制。北營之兵。方來助戰。而又有賊二千。從界山嶺撲來。從規下撲來。爲所牽制。時西北路官軍僅琳潤兵九百名。贛標守營兵一百名。及龍泉勇建營兵五百餘名而已。西北兩城內之賊。蜂擁而出。琳潤正分途迎擊。而南營敗卒紛紛由西奔回。琳潤知南軍失利。急於馳援。乃會同拔營。冀得全師以出。一面截殺北路之賊。一面移軍東行。時已申酉之際。南營張從龍張大雄楊錦斌始從重圍衝出。賊馬攢追。張從龍受傷投水。遇救始甦。張大雄手受矛傷。賊即撲殺而東。混戰逾時。我勇敗潰。副將陳上國督同管帶漳兵之守備伍連青。候補通判呂文煊。巡檢丁開第。併入漳營。在麻橋苦戰。內外之賊。併力交擊。二十五日。天色微明。營中火起。遂爲賊陷。陳上國呂文煊丁開第同時遇害。北軍福建兵勇退駐閩境之飛鷹自守。南軍郡營潰散甚多。贛營受傷。患病亦衆。令把總謝福麟帶回贛郡歸伍。張家駒率龍泉勇及

將弁由貴溪河口一路回省。此十月二十二二十四五等日建昌苦戰。營盤被陷之情形也。臣等伏查撫建兩郡輔車相依。撫營既陷。建營勢難孤立。加以師老力疲。餉項久缺。援賊新至。臺戰兩晝夜之久。遂致挫失。除福建各將弁應行賞罰。由閩浙總督奏明辦理外。所有護閩安協副將陳上國。深明大義。力戰之苦。遇難之貞。無愧大將風節。應請與同時遇害之把總蘇廷美。守備伍連青。通判呂文玠。巡檢丁開第。一併從優賜卹。以慰忠魂。其餘傷亡員弁兵勇。查明照例辦理。所有建昌軍潰。閩兵退回本境緣由。恭摺由驛馳奏。伏乞皇上聖鑒。訓示施行。謹奏。

湖南援師克復袁州府摺 咸豐六年十一月十七日

奏爲湖南援師克復袁州府城。恭摺馳奏。仰祈聖鑒事。竊湖南援軍圍攻袁州防勦萬載。臣等於三月二十六日具奏一次。旋因道路梗塞。稟報未能常通。所有袁州軍情。概由湖南撫臣奏報。茲於十一月初六初八等日。先後接據道員劉長佑。候補知府蕭啓江。游擊劉培元稟稱。自九月屢破援賊之後。袁城之賊十分窮蹙。旋於吉安糾合僞檢點傅逆。龍泉黃逆并安福賊。共萬餘。臨江賊數千。齊集分宜。設卡昌山。十月初三夜五更。前隊已到彬江。翌日。我軍出隊下浦以待。賊果三路至。遂分頭迎擊。又大敗之。至初七八。賊遂悉數駐紮合山。築立土城。深溝高壘。誓決死戰。劉長佑等飛書至萬載。調游擊田興恕一軍來袁州助勦。十三日迎擊援賊於下浦。賊潰轉守合山。巢窟十六日。蕭啓江田興恕等分三路進破合山賊巢。大獲全勝。賊連營二里。一炬焦土。斬奪無算。積聚概行燒盡。乘勢追逐。距分宜僅十五里。乃收隊。是夜分宜賊乃悉數遁去。二十三日。復有竄轉者。二十四日。劉長佑派隊會剿。收復分宜縣城。賊援自此絕矣。袁州之賊。計窮力盡。紛紛投誠。惟廣賊尙欲忍死以待。堅不肯降。我軍乘其內潰。連夜環攻。二十七日。賊目僞侍衛李能通。詣劉長佑軍中乞降。羣賊益無固志。十一月初一日。游擊劉培元率兵列陣楊家山。令哨官黃開甲莫有陞等伏於山下誘戰。城賊數千。由秀江橋蜂擁而來。我軍佯爲敗退。賊衆追來。黃開甲等率勇橫截。斃賊十餘。進而衝擊。又斃賊目二名。餘賊潰走。乘勢力追。城門下闌。賊衆大亂。未申之際。降賊俱供稱。城中賊束裝將遁。初更候。僞檢點黃逆果率數十賊由北門出。餘衆續出。我軍恐其竄向萍鄉。派隊堵禦。賊之出者。悉皆驚回。欲逃無路。我軍乃收隊暫避。暗伏各處。四更後。賊多絕城出者。我師併力攻之。蕭啓江率勇斬絕城之賊。而自奪其索繩。入急開北門以納諸勇。西門內應之賊。亦啓關以納劉長佑軍中之勇。賊悉

向東南冒死突出。我軍分路跟追。沿途勦殺。伏勇橫出追擊。俱往返百餘里。逃賊殄滅殆盡。城內投誠者二千餘。僞檢點亦經生擒。立將城池克復。該逆漏網無幾。各等情。稟報前來。臣等伏查江西入府淪陷。惟南康府聚賊無多。餘皆悍賊數千。悉力固守。堅不可拔。自湖南援軍圍攻袁州。吉臨等處之賊。盡銳以救袁城。遠鄂軍圍攻瑞州。又盡銳以救瑞城。互相援應。轉相灌輸。我之兵力已疲。而賊之負隅如故。臣等焦灼之餘。彌增慚悚。茲幸仰仗天威。袁州克復。一郡得手。全局或有轉機。除應保員弁。及安置降賊各事宜。由湖南撫臣詳細奏報外。所有袁州克復緣由。謹繕摺由驛馳奏。仰慰宸廑。伏乞皇上聖鑒。訓示施行。謹奏。

饒州豐城等六案保獎摺 咸豐六年十一月十七日

奏爲遵旨彙保克復饒州豐城等前後六案出力員弁。開列清單。仰懇恩施。恭摺奏祈聖鑒事。竊本年六月二十二日。克復饒州。所有在事出力員弁。當經奏請開單保獎。奉上諭。一准其擇尤保奏。以示鼓勵。欽此。一伏查饒州東蔽廣信。南衛省垣。實爲江西要郡。布政司耆齡自上年四月調赴該郡。部下兵勇僅二千人。防勦兼施。已逾一載。本年三月。復經臣等派都司畢金科帶陸兵一千名。都司金世蓮。候選知縣賀虎臣。帶水師一千名。前往饒州。隨同防禦。至六月初五日。該郡失陷。臣等復派都司林保。知縣黃振成。帶協和營一千名。以九江鎮總兵居隆阿。率本鎮之兵。督同勦辦。文武同心。調度合宜。兩旬之間。一戰而復。臣等仰體皇上微勞必錄之意。公同酌核開列清單。仰懇恩施。不敢稍涉冒濫。惟畢金科一軍。上年在九江樟樹鎮案內。奮勇逾常。奉旨准令保奏。林保黃振成一軍。上年克復義寧州案內。奉旨交臣等覆查保奏。此次均係兩案併保。人數較多。又卽用道劉于濤管帶水師。四月二十二日克復豐城。七月初一日攻破瑞河口。二十七八等日攻破臨江河口。奪獲砲船甚多。疊奉恩旨准予保獎。此次係三案併保。又廣東惠潮嘉道彭玉麟。所帶水師。收復南康案內。遵旨酌保數人。亦歸入此次彙列全單。恭候聖裁。至耆齡所轄員弁。六品軍功文生汪煥文。本年在章田渡追賊陣亡。軍功趙德溶。在陳家港殺賊被戕。卽補府經縣丞黃邦治。因出隊失跌身故。汪煥文請照訓導例。趙德溶請照把總例。黃邦治請照軍營病故例。仰懇天恩敕部。分別議卹。劉于濤所轄員弁。外委蕭棧。因巡哨落水淹斃。照陣亡例議卹。以慰忠魂。而作士氣。所有遵旨保奏克復饒州豐城等案出力員弁。理合具摺會奏。伏乞皇上聖鑒。訓示施行。謹奏。

湖口等縣團紳請獎片 咸豐六年十一月十七日

再鄱陽湖之東岸。湖口彭澤都昌鄱陽四縣。爲饒九南三府接壤之區。外濱長江。內臨大湖。東鄰皖南。池州各縣。久已陷於賊中。鄉民迫於兇威。蓄髮納貢。編充僞職。二年以來。幾若淪爲異域。而其間一二忠義之士。抵節不屈。變易名姓。避跡山林。或陰結壯士。密辦團練。以待官軍之至。咸豐三年。臣國藩駐紮南康。有湖口都昌紳士舉人袁英等來營請兵。情詞懇摯。分任嚮導偵探之責。自李元度師抵湖口後。該紳等辦團辦捐。任勞任怨。前後捐米一萬石。銀一萬五千餘兩。添募三營二千人。分駐鄱湖兩岸。兩月口糧。及製備軍械棚帳等件。共費二萬餘金。皆係取給捐款。該紳董等所合籌。本年二月。官軍撤營後。土匪復仇賊日。緝拿各紳士。家破無歸。生業蕩盡。內如袁英之子弟。遭屠謝庭芝之全家受戮。譚焱奎之父叔被戕。均係大兵未到之先。因辦團致觸叛怒。一門殉難。上年七月。官軍克復徐家埠。袁英胞兄袁蕃安子姪五人。均被賊擒。死事尤慘。曾經臣文俊遵旨查明復奏在案。方湖口駐軍之時。前翰林院編修吳嘉賓。與彭澤紳士劉文藻等。倡辦二十五都團練於程山廟地方。扼要設防。募勇六百人。捐餉五萬餘緡。兩次克復彭澤縣城。殺賊頗多。團勇隨勦者五六千人。在事紳耆。類皆自備資斧。跋涉經營。不避艱險。今春湖口撤營之後。彭澤各團練之家。屋宇被焚。貲財被掠。父母兄弟妻子。流離播越。尤可矜憫。據總局司道具詳請將各縣團紳。擇尤保獎。臣等正核辦間。復據鄱彭都湖四縣紳士。公同具稟。以鄉里被賊久據。片瓦無存。奸淫擄掠。民不堪命。願糾合四邑義憤之士。辦團殺賊。由鄱陽進勦都昌。由都昌規復彭湖。以助官軍。而雪私憤等情。臣等查江西被賊蹂躪之區。以四縣爲最久。其受害亦最深。該紳等忠憤激發。始終不懈。理合籲懇天恩。附案保獎。以勵團練。而策將來。除鄱陽陳鴻烈等。歸於此次饒州案內奏保外。所有都昌湖口彭澤三縣辦團紳士。謹開列清單。仰懇恩施。伏乞皇上聖鑒。訓示施行。謹附片具奏。請旨。

克復安福縣城摺 咸豐六年十一月二十二日

奏爲周鳳山等一軍疊獲勝仗。克復安福縣城。恭摺馳奏。仰祈聖鑒事。竊照新授吉安府黃冕。與前任湖北藩司夏廷楫。前任廣東羅定協副將周鳳山。共籌援師。進勦吉安府。業經臣等於十月十一日附片具奏在案。嗣准湖南撫臣駱秉章咨稱。派委臣國藩之弟曾國荃帶湘勇二千人。先發黃冕夏廷楫隨後繼進等語。曾國荃由

萍鄉入。周鳳山由萬載入。約定會攻安福。以趨吉郡。十一月十二日。周鳳山駐軍楓溪。距安福城四十里。次日五鼓。行至清溪。探報大嶺小嶺。伏有賊匪攔截。即派守備劉之能等自左路進攻。守備楊光福等自右路抄出。初及交鋒。賊即折回。我軍乘勢追北。殺賊數十名。奪獲黃旗馬匹槍礮等件。曾國荃亦於是日行至江口。遇賊。距安福尚三十餘里。登高瞭望。賊匪兩枝迤邐而來。曾國荃派都司陳光孚拒其右。蕭孚泗截其左。而自率隊伍禦於中路。有騎馬黃袍賊目六人突前。我軍植立不動。相距二丈許。該逆亦不復進逼。張開輯以劈山礮擬定。一發立斃二賊。奪馬與印。羣賊遂紛紛獸散。我軍三路抄追。殺斃二百餘賊。生擒十六人。窮追三十里。申刻即抵安福。克復縣城。周鳳山亦即入城安撫遺黎。搜勦餘匪。兩軍會合。均紮東門之外。此十三日兩路獲勝。同克安福縣城之情形也。嗣據探報稟稱。通吉安之東路大汾楓田等處。屯賊甚多。約有五六千人。約期來撲官軍營壘。十七日周鳳山等出隊分三路進兵。曾國荃派都司蕭孚泗等由中路進。周鳳山派守備劉之能等抄右路進。歐啓貴等抄左路進。該逆亦分三股迎敵。槍礮雷轟。自辰至午。我軍堅不可撼。該逆悉衆向右路衝突。哨官李發枝奮勇直前。刺取黃袍賊目一人。賊勢小卻。劉之能彭東貴何正旺等大呼齊進。刀矛摩厲。斃賊二百餘名。該匪敗竄。追過大汾河十餘里。奪獲旗幟繡帽龍袍槍械百餘件。生擒十一人。正擬移營進勦間。探得吉城永新來援賊千餘。屯集回江里田。并驅還安福。敗匪二千餘。竄至竹江青一帶。思據河以拒我軍。十九日。周鳳山率哨官劉之能楊光等由河東北分五枝。徑擊竹江青之賊。曾國荃率湘營由樓背洋口分三枝兜勦里田之賊。周鳳山行三十里。竹江青股匪已先遁矣。曾國荃偵知賊在洋口對河之千金壇山上。各弁勇赤身涉河。賊見我軍至。列一字陣於山腰。有黃袍賊目四人。擁隊前衝。又伏賊一枝。出隴中。大村。冀繞擊官軍之旁。藍翎都司蕭孚泗陳光孚禦中。左兩路。而張開輯偃旗蛇行。由右路抄出。賊伏之外。羣賊由山半乘高撲下。槍砲兼施。并放噴筒。我軍靜寂無聲。屹立不動。賊下山甫偃。我軍衝鋒擁進。賊勢稍卻。衆勇大隊趁之。羣賊奔竄。追殺五里。至橋東村。賊據石橋相拒。思俟伏賊之勝。卓旗回戰。不意官軍追騎奄至。刀矛相格。張開輯之伏兵已從右路抄出。伏賊之旁。中路之賊頓失所恃。首尾不能相應。遂大敗狂奔。我軍窮追。直至距營六十五里之固江亭子。始行收隊。奪獲洋槍砲械藤牌四百餘件。旗幟尤多。此十七十九日大汾里田兩次獲勝之情形也。據周鳳山曾國荃等稟報前來。臣等伏查吉安爲江西

膏腴之地。該逆悉力固守。與瑞臨撫州并重。茲幸克復安福。疊獲勝仗。乘此聲威。圍攻吉郡。或可迅速得手。成上
游建瓴之勢。以固南贛天險之區。所有周鳳山等一軍。克復安福各緣由。恭摺由驛馳奏。伏乞皇上聖鑒謹奏。

畢金科軍進剿勝仗摺 咸豐六年十一月二十二日

奏爲饒防一軍。進剿泥灣等處。疊獲勝仗。鄱陽境內肅清。恭摺奏祈聖鑒事。竊照饒州府城。自六月克復以後。防
剿各情。經臣等具奏在案。嗣據雲南臨沅鎮都司畢金科。升用都司林保等。先後稟稱。該逆屢次受創之後。糾集
都昌彭湖各處匪黨。八千餘人。盤踞鄱陽縣西北百餘里之泥灣一帶。奸淫焚掠。民不聊生。紳民紛紛來營請兵。
畢金科等熟商。該逆既萃各處之賊。盤踞泥灣。勢必撲犯郡城。與其使人薄我。不若我先薄人。遂定議於九月十
三日進剿。十四日至泥灣。十五日黎明。該逆約四五千人。分五股直撲我軍。畢金科等亦分五路迎敵。升用都司
林保拒中路。已革都司岳炳榮擊右路。畢金科派千總龔廷貴。把總朱洪章等分擊左路。而自率親兵迎頭衝殺。
鏖戰數時。該逆抵死不退。畢金科下馬大呼。衝入賊陣。岳炳榮由松嶺之旁包襲賊後。該逆首尾不能相顧。遂如
鳥獸散矣。我軍乘勝窮追。斃賊四百餘名。生擒十二名。奪獲旗幟刀矛馬匹無數。次日仍回老營。此十五日進剿
泥灣賊匪大獲勝仗之情形也。十一月十六日。探報前竄饒州之聶張二賊。由建德東流等處。各聚悍賊數千。與
新到李邱二賊目所帶匪黨。不日來犯官軍營壘。畢金科等籌商。以我軍僅二千人。而賊衆數倍過之。不可力戰。
但可智取。當派龔廷貴等五百餘人。於初更乘時暗潛赴陶溪渡。復派百餘人分布各路叢林埋伏。以作疑兵。十
七日。賊分兩路而來。一由陶溪渡。一由童子渡。塵土漲天。黃旗徧野。龔廷貴等前夕已至。由左路遠包。以防童子
渡之賊抄襲後路。朱洪章等由右路繞過山後橫出以截之。岳炳榮向前迎敵。而自率親兵接應。不逾時聞。龔廷
貴等已抄左路之賊之尾。朱洪章等亦將右路之賊截爲兩段。該逆分爲兩枝。殊死鏖戰。畢金科飭放號礮。叢林
中伏兵四起。呼聲雷動。畢金科縱馬衝突。各哨弁亦迴合力擊。無不以一當十。賊黨大敗。我軍兩路窮追。至臥虎
山青田埠兩處。始行收隊。礮斃及生擒共六百餘名。此十七日在陶溪渡大獲全勝之情形也。二十三日紳民稟
稱。該逆經痛剿之後。竄踞綠洲地方。催貢搜搶。民不堪命。畢金科以鄱境未清。終爲饒郡之患。且聞調湖口之賊
千餘。約期大舉入犯。遂於二十四日。派隊前進。二十五日黎明。甫抵綠洲三里。賊於望樓下點放信礮。偵探之

賊飛奔而退。畢金科登高瞭望。見賊處四面皆山。中橫一港。兩岸民房數百間。該逆已於兩路列陣而待。畢金科派龔廷貴由西路進。岳炳榮由東路進。而自伏中路。靜觀其變。方接仗時。民房之內。伏賊齊起。勢如潮湧。我軍四面受敵。幾不能支。龔廷貴等躍馬衝陣。斬大旗賊首一人。中路親兵突起衝擊。刀矛摩戛有聲。難以噴筒火箭。該逆紛紛敗北。畢金科截住橋頭。擒斬尤多。賊多揭衣渡港。我軍投鞭追之。至村後金龍橋。以山峻力疲。即行收隊。是日擊斃及生擒者。多係長髮老賊。我軍亦傷亡十餘人。此二十五日線洲接仗獲勝之情形也。臣等伏查饒州一郡。西接鄱湖。北隣皖南。爲羣盜出沒之區。畢金科等一軍僅二千人。臣等慮其單薄。常飭嚴守老營。不宜輕出。免致疏失。畢金科以紳民疊次籲請。遠出迎勦。以少勝多。鄱湖肅清。辦理尙屬得法。現仍飭其嚴加防守。以固藩籬。一俟鄂師進攻九江。即可調赴湖口。水陸會勦。所有饒防一軍。疊次進勦獲勝緣由。恭摺由驛馳奏。伏乞皇上聖鑒。訓示施行。謹奏。

劉于濤水師疊次勝仗摺 咸豐六年十二月二十三日

奏爲道員劉于濤一軍。再克新淦縣城。及在樟樹鎮疊獲勝仗。恭摺馳奏。仰祈聖鑒事。竊道員劉于濤一軍。駐紮樟樹鎮。屢次擊敗瑞河臨江河口賊船。克復新淦。爲上游之鎖鑰。疊次具奏在案。自十月以來。據劉于濤先後稟稱。九月之季。水軍至上游黃山。奪獲大木簾一次。至臨江城下。奪獲船砲二次。十月之初。焚勦茂林荷塘墟兩處賊卡者二次。擊敗樟樹鎮撲營之賊者一次。自撫州師潰。臨江之賊數日增。樟樹之警報頻聞。而新淦縣克復之後。未能分兵防守。復爲賊黨所踞。十月二十一日。劉于濤督帶戰船十五號。飛划十二號。晝夜前往襲之。派陸勇三百。隨船馳進。黎明抵縣。賊見我軍人數無多。城池新葺。竟敢負嵎固拒。蔡康業督廣勇攻北門。白天佑帶川貴勇攻南門。謝鳳高帶團勇攻東門。以分賊勢。西門濱江大河。砲船自河下轟擊。賊見四面受敵。於城上擲下大黃旗兩次。暫求解圍。即出投誠。我軍自前夕二更至酉刻。未得少息。收隊傳餐。因令百姓趕辦稻草。暗置門洞。裹以火藥噴筒射入。頃刻火起。城內鼎沸。西門亦放火延燒。槍砲乘之。聲震山谷。各勇梯足於肩。緣城而入。百姓跪稱賊已開南門逃走。其存者概係長髮。不辨是民是賊。遂出南門。追逐十餘里。奪得旗幟刀矛。入城安民。賊存米鹽食物。分給各勇。當劉于濤襲擊新淦之時。臨江之賊。乘虛來犯樟樹老營。從西岸突出。李逢春派船上下迎擊。管

帶彰武軍謝得龍吳攀魁等亦出隊衝鋒。廣勇川貴勇從隄內包裹。該逆三次回旗返戰。俱被我軍擊卻。適新淦之師從上游歸來。砲聲不絕。羣賊一律敗退。此二十二日再克新淦。次日樟鎮交仗獲勝之情形也。自袁州克復之後。袁城敗賊二三千。陸續至臨江。城內不納。在兩岸沙湖屯駐。撫州樂安復陷。有賊三四千。在東岸永泰屯駐。聲言約會二十四日來樟樹鎮圍撲官軍營盤。至期劉于濤派蔡康業帶廣勇。白天佑帶川貴勇。沿河直上。謝得龍帶彰武軍。謝鳳高帶團勇。由隄內包裹。專擊東岸之賊。水師轟擊江中。防賊西渡而相援。水師先至永泰。賊匿隄下。以避砲子。廣勇川貴勇衝鋒出戰。以人寡稍卻。後彰武軍團勇繼至。併力擊退。臨河口有賊數百。亦經礮船擊敗。二十五日。西岸之賊出二千餘來犯。劉于濤令陸軍暫緩出隊。砲船排列河口。連擊數賊。賊避匿隄裏。廣勇川貴勇分兩路抄襲。一人直前。刺取首逆。僞張指揮殪之。奪其大旗。賊盡敗退。我軍水陸登岸。追北十餘里。始行收隊。二十六日。賊匪出隊來犯。東西兩岸約共五六千名。水陸弁勇各告奮勇。登岸相持半日。勝負未決。劉于濤傳令收隊。飭弁勇登舟飽餐。賊仍站立兩岸不退。並車載千金重砲三四位。臨河施放。我軍飯畢。劉于濤麾旗登岸。我軍飽餓。勇氣百倍。賊黨亦自知餒腹。不可以久持。徐徐引退。我軍鼓譟乘之。殺賊二百餘。追北數里。賊由隄裏奔命四散。時已酉正矣。二十七日。賊復兩岸來犯。東岸之賊以鄉音與廣勇相約曰：「我願投誠助官軍。以攻西岸匪黨。」西岸之賊亦以鄉音相約曰：「我願投誠助官軍。以攻東岸匪黨。」我軍方推心待之。該逆忽放排槍傷官軍五人。各兵勇憤甚。登岸力戰。我猛進則賊退。我稍卻則賊又進。刀矛對舉。洞胸馘目。迴合十餘次。斃賊十餘。我軍亦傷亡數十人。二十八日。復出隊鏖戰。自辰至酉。更番迭進。賊衆皆百戰之餘。頑鈍凶狡。彼此互有殺傷。此二十四日以後五日苦戰之情形也。該逆以數日未受大挫。遂爲久騁之計。距我軍五里杜家村。一夜之中。築起砲台三座。用木桶架砌。中實以土。外挖深壕。十分堅固。官軍砲船連環攻擊。該逆即藏匿砲台之內。負固不出。樟樹鎮兩岸民房皆賊。時出時沒。多寡不定。劉于濤晝夜籌思。正不得所以破之之法。適臣等派康國器水軍前往濟師。二十九早至樟樹鎮。各營因驟添勁旅。歡忻鼓舞。康國器之水勇。尙未紮營。一擁登岸。劉于濤恐其初到不知地形。囑令紮駐河灘。派蔡康業帶水陸廣勇。與之同進。以禦中路。派白天佑川貴勇團勇分股包裹。派謝得龍帶彰武軍兩路接應。派署臨江都司羅玉祥帶本營兵前導。派戰船二十號牽制杜家村砲台之賊。小划上

下飛巡以迷賊目。留李逢春徐安邦水師兩營於樟鎮。以固老營。行抵大隄。望大小村莊黃旗徧插中。有大營盤二座。與杜家村砲台遙遙相對。該逆分五隊迎敵。馬隊當先。勢如潮湧。我軍初見恟懼卻退。劉于濤帶親勇督隊大呼。退奔者斬。白天佑卓旗停駐。彼此施放槍砲。噴筒火球。連環拋擲。相持不下。康國器昇小礮食以羣子。擊必命中。賊稍畏懼。劉于濤施放一窩峰火箭。賊遂潰敗。我軍乘勝追北。蔡康業匹馬衝突。圍攻賊營。縱火環燒。衣服錢米。堆積如山。同時火起。煙燄漲天。連日受傷之賊。與守營之賊。敗歸之賊。無一逃脫。兩營既焚。軍威大振。李逢春徐安邦亦即帶勇登岸。拆毀杜家村砲台三座。是日之賊。賊死於火。死於砲。死於刀矛者。約六百餘人。我軍受傷者甚少。二更後。該逆用民船紮成巨籬。上載枯草數百石。火藥十餘石。意欲衝燒水營。又被我哨船立刻擊散。此二十九日踴燬賊營及砲台之實在情形也。伏查道員劉于濤自督帶水軍以來。勸捐供支。不盡取之官帑。戰則身先。功則歸人。軍心民心。樂爲効命。此次臨江撫州之賊。兩面環伺。巨等深以衆寡不敵爲慮。該道以水陸二千之衆。拒兇悍三倍之賊。實屬謀勇兼優。記名道劉于濤。籲懇天恩。賞加巴圖魯名號。蔡康業驍勇尤著。懇請賞換花翎。以示鼓勵。其餘出力員弁。可否容臣等擇尤保獎。出自聖主鴻施。所有再克新淦縣城及樟樹鎮迭獲勝仗緣由。恭摺馳奏。伏乞皇上聖鑒。訓示施行。謹奏。

附陳近日軍情請催各省協餉片 咸豐六年十一月二十二日

再臣國藩於十二月初一日。由江西省河赴吳城鎮。與廣東惠潮嘉道彭玉麟商酌水師進剿事宜。連日接據署湖北提督楊載福。布政司銜李續賓函稟。武漢蕪黃大冶興國三府七州縣。於十一月底次第克復。楊載福督水師於十一月二十九日直抵九江。焚奪賊船殆盡。李續賓督陸師進剿南岸賊匪。於十二月初九日進攻九江府城。臣展閱之下。不勝忭慰。查外江水師。上年正月初五日。經臣國藩奏明飭赴湖北援剿。是時戰船或入內湖。或爲風損。僅存一百四十餘號。駛至武昌。今重來九江。陸續添至四百餘號。李續賓陸軍。係上年八月遵旨派赴湖北援剿。是時羅澤南李續賓所帶湘寶各營僅五千人。今重來九江。添至八千餘人。該二軍馳驅數省。轉戰三年。所向有功。而江寧將軍都與阿統帶之馬隊。亦由北岸以至小池口。臣國藩於十八日由吳城馳赴九江。迎勞諸軍。見其軍威嚴肅。士氣慷慨。自十二至十八日。環攻六晝夜。并未收隊。楊載福李續賓與都與阿聯絡契合。愛敬

交至。雖積勞之後，屢勝之餘，猶復日夕兢兢，衣不解帶，不特東三省馬隊忠勇可風，卽湘營與水師亦實爲不可多得之勁旅。惟是餉項匱乏，積欠口糧一百三十餘日，臣等前次奏請山陝兩省，每月各撥協餉三萬兩，恭奉恩旨，飭令酌解數月，現聞晉餉起解三萬兩，已有一萬到江，合無籲懇天恩，飭催山西陝西迅速籌解，概交湖北撫臣胡林翼經收，由水路解至九江，專濟北軍之用。至於江西各府，尙有分駐兵勇五萬餘人，舊欠無從補給，新歲尤難支持，合再瀝懇天恩，敕下兩廣督臣廣東撫臣，於該省無論何款項下，每月籌撥銀四萬兩，解至長沙，由湖南撫臣駱秉章轉解江西，以濟急需，能多發一日之餉，能多收一日効卒之用，能早克一處之城，能早收一處錢漕之利，臣等補苴無術，迫切瀆陳，不勝惶悚待命之至。除新到各軍接仗情形，另行查明續奏外，謹附片具奏請旨。

湖北援軍保獎請卹摺 咸豐六年十一月二十二日

奏爲遵旨酌保鄂省援師出力員弁，開單奏懇恩施，恭摺仰祈聖鑒事。竊照鄂省援師，經湖北撫臣胡林翼派來江援勤，四月初，自武昌起行，七月初一，馳抵瑞州，冒暑遠征，轉戰千里，克復咸寧蒲圻崇陽通城新昌上高大縣，又分兵圍攻奉新，克復安義靖安二縣。七月初三，擊敗僞北王韋昌輝之兵。八月初一初四，擊敗大股援賊二萬有奇。迭奉諭旨，准令擇尤奏獎。茲據各營開單稟報前來，臣等公同酌核，鄂省援軍湘勇寶勇彪勇六千人中，共保二百四十七名，其由省城往勦瑞州會江之虎字雄字九江等營三千五百人中，共保四十人。理合開具清單，叩懇鴻施，以勵戎行，而作士氣。至迭次陣亡將弁，藍翎把總潘河清，藍翎外委李經元，馮長源，唐梅洪，外委李上安，彭益勝，姚長青，劉家全，吳秀山，千總向秀武，均請交部從優賜卹。所有遵旨酌保鄂省援師出力員弁緣由，恭摺馳奏，伏乞皇上聖鑒，訓示施行，謹奏。

查覆鄧仁菴被參各款摺 咸豐六年十二月二十日

奏爲遵旨確查臬司鄧仁菴被參各款，據實覆奏，仰祈聖鑒事。六月初八日，承准軍機大臣字寄，咸豐六年五月二十一日奉上諭：「廉兆綸奏瀝陳江省實在情形一摺，逆匪竄擾江西，蔓延入府，前據會國藩等奏報克復建昌東鄉兩縣，而瑞州奉新尙未得手，撫州等府，猶爲賊踞，該侍郎等自應揀派委員，分投勦辦，乃據廉兆綸奏稱，

自省城派出之兵。以捐職知府鄧輔綸主之。該員年少輕脫。本不知兵。又非江西官員。伊父鄧仁堃係本省臬司。其子本不應與聞公事。現在帶兵萬餘。時將兩月。軍情重大。該省豈無妥員可派。何以令鄧輔綸管帶兵勇。設有疏虞。各將誰諉。著會國藩文俊接奉此旨。即將鄧輔綸撤回。另行揀派得力大員前往。會同李元度趕緊攻勦。毋許延誤。至臬司鄧仁堃兼署藩司糧道。錢漕各項。均係該員經手。據廉兆綸奏捐辦城壕各工。不能潔己遠嫌。致物議沸騰。怨聲載道。又令伊子鄧輔綸辦理軍務等語。現在軍餉支絀。臬司鄧仁堃如有營私舞弊情事。會國藩等近在省城。見聞較近。即著嚴密稽查。據實參奏。毋得稍有徇隱。即有未能勝任之處。亦著會國藩等奏明撤任。并據奏石逆下竄。賊勢漸鬆。各府大抵土匪。長髮賊甚少等語。土匪嘯聚。勦辦較易。正宜乘此機會。分路進勦。迅圖克復。著會國藩文俊亟籌勦辦。毋令該匪日久盤踞。是爲至要。將此由六百里諭令知之。欽此。一臣等接奉諭旨。當將鄧輔綸撤委。鄧輔綸交卸營務。七月初二日。自撫州起行回省。伏查上年十一月十日。瑞州臨江兩府同時失陷。江西省城震動。官紳會議。招募楚勇千餘人。防守省垣。分爲兩軍。曰捍衛軍。曰捍衛軍。又因平江勇隨同知縣劉希洛李錕在瑞州打仗。力戰兩日。義憤可用。令李進發重爲招輯。以其均係湖南籍貫。議以候選知府鄧輔綸權理營務。鄧輔綸堅辭不肯任事。鄧仁堃亦以其子未爛軍旅。不令其出冒鋒鏑。僅令點驗名冊。校看技藝。維時臣國藩駐紮南康。臣文俊尙在途次。十二月十六日。臣文俊抵任後。因查悉營伍散碎。通省并無大枝勁旅。深以爲慮。嗣接見鄧輔綸數次。見其局度安詳。心地明白。新到之平江勇。暨前此寶勇志同各軍。多與之同鄉熟識。情誼聯絡。因飭令總理營務。一面函商臣國藩。調曾任平江縣之同知林源恩來省。與鄧輔綸同統一軍。此札飭鄧輔綸帶勇之原委也。二月十八日。樟樹鎮官軍敗挫。臣國藩星夜進省。會籌一切。定議調李元度之四千餘人。自湖口饒州而來。鄧輔綸林源恩率四千餘人。自省城進賢而往。兩軍會合。號稱萬人。併力以攻撫州。曾於三月二十六日。克復進賢。摺內縷晰具奏在案。是撫州一軍。李元度轄其半。鄧輔綸林源恩共轄其半。并非鄧輔綸全主之也。自塔齊布淪謝之後。羅澤南李續賓等遵旨派赴湖北。周鳳山畢金科等。春初正駐樟樹。而江西各官。多以失守獲咎。維時實無妥員。可付以統軍之任。臣等豈不知軍情重大。思得將材以肩艱鉅。無如兵凶獸危。畏避者多。自任者少。即素稱賢員。談及戎事。則藉詞規避。不願以身試險。自七月初撤回鄧輔綸以後。江軍平江

勇。責成林源恩主之。厥後口糧缺乏。分兵出勦崇仁。援賊大至。於是有九月十七日之挫。林源恩唐得陞耿光宣先後陣亡。臣等亦竟無得力大員。可以另派。日夜焦慮。常以乏材爲慮。想聖主必能曲諒苦衷也。至廉兆綸奏鄧仁堃捐辦城壕各工。不能潔己。遂嫌一節。臣等於八月間傳集承辦城壕。經手銀錢各委員。飭令將工程做法用錢細數。逐條開報。據現在省城委員南康府同知張斌林。候選知府吳文瀾。鄧輔綸。前江蘇常州通判陳進修。暨各員等先後呈送清摺。內稱咸豐二年冬間粵匪竄擾長沙。江西籌辦防堵。鄧仁堃時在首府任內。創議於進賢順化等城外築建虛中礮台五座。其三座於二年臘月興工。三年三月畢役。其二座修築未畢。值三年夏間粵匪竄圍南昌。八月解圍後。續修完畢。其台基經排大木長椿。鋪以松板。壘砌麻石。濡米之粥。洋藤之水。融漿灌縫。俾無虛罅。下有開圈礮礮眼七門五門不等。中層二門三門不等。各輔以葫蘆槍眼數十箇。上列礮口。高建敵樓。又開鐵閘門。以便奇兵出入。此虛中礮台工程之大概如此。當賊圍省城之時。開掘地道。兩次轟塌城身三十餘丈。城內亦掘洞出外。仰擊天窗。基腳虛鬆。又坐塌十餘丈。解圍後。就塌陷之處。建造礮城。以護其外。分德勝門界內爲五段。章江門界內爲一段。每段大城膨裂。土牛傾卸。皆拆修而堅築之。其砲城則用木椿巨石。疊砌成台。開安砲洞十二。槍眼數十。內礮平石。上構走廊。其第二第三兩段畢工後。因雨多土漲。台身受損。四年五月。拆修一次。挑去礮土。換用紅石。開砌級坡。附建兵棚。此德勝門外六段砲城工程之大概如此。其培修全省大城。自三年十一月興工。各員分門承辦。地段有長短。工費有繁簡。畢事有早遲。城上築牆。一律增高培厚。拆砌鼓傾。外施兔耳。以繫擋牌。內安葫蘆。以作槍眼。高者砌砲台。低者挖砲池。池面鋪石。嵌灰。鑲嵌堅緻。開砌八字小洞。以鐵裏門。五垛置一兵棚。數十垛一官棚。每門建瞭台數座。官廳數所。又設柵欄川門。以嚴汛地。分礮礮各庫。以慎職守。外築護坡。內濬水門。各城大約相類。惟順化門傾卸拆砌較長。德勝門附建虛敵台一座。忠義祠一所。水審一區。比之各門工費爲多。此七門城身工程之大概如此。又於章江等門。添建砲城五座。章江門爲臨河險要之地。舊時月城單薄。三年賊退之後。乃於左角建立砲城。就舊壕之內下基深掘一丈六尺。始築實趾。釘椿鑿石。疊砌成台。左右各接造牛馬牆。覆以堅石。北建甕城。以障月城之外。開砌砲門。嵌安鐵菱。右留突門。以出游兵。內有生門。以通月城。其順化德勝二門。暨進賢門之東西各砲城。與章江門做法相似。牛馬牆長者八十丈。短者九八丈不等。又

於永和廣潤惠民三門。新建月城。巨石排砌。灌以糲漿。外安砲洞。內施懸閘。此砲城五座月城三座工程之大概。如此。咸豐四年十月。大城將畢。濠工始興。環城修浚。深各二丈有奇。用紅石鑲砌。泊岸護以巨椿。各門釣橋。砌成八字長墩。臨濠砲台。添砌護基。德勝門外。飛沙向與城齊。舊濠久被淤塞。此次加工挑挖。一律深通。其豫章溝西水關稽疑津等處。立閘引水。疊石爲隄。西城各門之外。瓦礫堆積。多成小阜。濠內之土。亦填於近岸。處處攔塞。砲路。此次逐段挑去。一律鏟平。此修濠平土工程之大概如此。各委員開摺呈報。并開列銀錢數目前來。據此。巨等悉心查核。周歷履勘。凡城守之道。攻者爲客。守者爲主。如果主強而客弱。則當開城迎擊。若其主弱而客強。則當閉門堅守。惟恐有一處之鬆懈。一穴之偷入。江西修理城垣。留突門五處。奇兵門五處。除大城門外。尚有十處。可以偷入。又砲洞各門。大者低頭可入。矮者短梯可登。實有防不勝防之慮。濠工石岸。平石疊砌者少。側石立砌者多。未能鑲培穩固。以致廣潤等門。畢工未久。卽有三處衝塌。重行修補之案。此皆辦理未甚合法者也。又查定例。修理工程。事前有勘估之員。事後有驗收之員。則承修者不得任意開報。昔癸丑八月。江西解圍之後。城外民房廟宇。十餘里。拆毀殆盡。磚石料木。堆積如山。取攜甚便。價值甚廉。收買紅石。每塊不過數文。至六十而止。青東麻石。每塊不過數十至二百而止。是時興工修城。若先行核實勘估。則物價之賤。共見共聞。承修者亦不敢互有低昂。乃當時未經勘估。畫一。致委員各自開報。多寡懸殊。進賢門之城垣。與德勝門埽口相等。長短相等。章江門則地段更短。乃進賢門僅用錢二千二百餘串。章江門則報至九千餘串。德勝門則報二萬餘串。又如委員陳敬修。承辦永和門之月城。并其城身。同係一段之功。同經一人之手。而開報兩摺。亦滋迷混。又各員或一面修工。一面勸捐。自捐自用。委員之賢愚不一。捐生之疑義斯起。原參摺內所稱物議沸騰。殆卽因此類而時有所聞。然在臬司鄧仁荃當時。但求城濠之速成。未暇遵勘估之定例。但求工料之堅實。未及防各員之浮領。究屬急於大端。略於小節。且自咸豐二年。賊犯長沙以來。江西風鶴震驚。已無固志。迨三年粵賊圍南昌。土匪擾吉安九饒等府。相繼淪陷。嗣是湖口南康。無時無逆舟。義武安建。無日無警報。鄧仁荃於三四兩年。烽煙擾攘之際。毅然獨以修城爲己任。不辭勞怨。不事苟簡。卒能完繕高堅。儼若金湯。搗石滾木。守具畢備。兵房官廳。各有定所。爲東南數省第一名城。自去冬七郡失陷。賊蹤常在百里內外。終不敢窺伺省垣。而兵民亦有恃以無恐。未始非新修此城之

功。臣等再四察訪。鄧仁莖綜理城工。謂不能防人浮冒。在所難免。謂不能潔己遠嫌。則實不至如此。諭旨垂詢鄧仁莖是否勝任。及營私舞弊一節。查鄧仁莖在江西十餘年。歷任南安廣信南昌等府。於山川之險易。民情之樸澆。鄉里之殷實瘠苦。一一洞悉本末。前在蜀省。久任州縣。刑案素所研究。雖閱歷過深。不免失之寬厚。而持心平慎。尙無不能勝任之處。自去歲八月。鄧仁莖兼署布政司。藩糧兩庫。一手經理。適值寇氛四擾。郡縣淪陷。錢漕無可徵收。鄰省無由協濟。而兩庫例應支放之款。紛至沓來。刻不容緩。按照部章。搭放鈔票。搭放大錢。猶不足以供給。於是設法騰挪。或暫發四成五成。或暫緩兩月三月。甚至兵精役食。屢催不應。公私拮据。怨望日生。遂疑鄧仁莖兼管兩庫。領款遲延。恐吏胥不無弊竇。而不知春夏數月。涓滴已竭。羅掘俱窮。臣等目擊時艱。不特無弊之可無。實亦無籌之可借。迨七月間。新任布政司耆齡接管藩庫。新任督糧道李桓接管糧庫。鄧仁莖不復經手銀錢。而各款之支絀如故。羣情亦坦然共釋矣。惟是鄧仁莖在江日久。承辦事件較多。營私市恩。在所不免。於營務及城上差使。好引用同鄉。及親族子弟。請託易行。俾門時開。復不能約束家丁。致滋物議。現有參革前任進賢縣知縣潘尊賢在。臣文俊處訐告各款。亦非盡出無因。相應請旨將江西按察使鄧仁莖交部嚴加議處。其城壕各工。臣等一面札飭布政使耆齡逐段驗收。將突門奇兵門酌量封閉數處。各委員摺報錢數。指明駁詰。如有確係浮冒者。再行從嚴參辦。除江西各府軍務業由臣等按月逐細奏報。暨潘尊賢稟揭之案。由臣文俊另摺奏聞外。所有遵旨確查臬司鄧仁莖被參各款。恭摺據實覆奏。伏乞皇上聖鑒。訓示施行。謹奏。

克復奉新縣城摺 咸豐七年正月十七日

奏爲吳坤修一軍疊獲勝仗。克復奉新縣城。恭摺馳奏。仰祈聖鑒事。竊湖南候補知府吳坤修。管帶鄂省援師。來至瑞州。分兵克復安義靖安。圍攻奉新。臣等擬調防廣信府城。經三縣紳士御史帥方蔚等具稟請留。均由臣等奏明在案。旋據吳坤修陸續稟稱。十一月初八日。探知建城之賊。將欲上犯安義。派彰武軍丁峻。長字營易桂修。彪中營滕代富等。馳往迎擊。初九日。賊匪撲城。安義把總藍占魁衝其前。彪營等自後策應。佯北誘賊。折回擊之。剽取首級者百有九顆。追奔二十餘里。保全安義縣城。吳坤修以我軍分隊往援。安義賊必乘虛攻撲。遂飛函瑞州。約會副將普承堯。於十一日來奉新助戰。該逆果於是日蜂擁而來。吳坤修掩旗息鼓。佯示以怯。該逆志得氣

驕。聲震山谷。適普承堯率所部六百人至。兩軍自武昌同來。親如手足。分軍數月。忽然相聚。歡忻鼓舞。奮勇百倍。該逆氣奪。鏖戰二時。賊黨大敗。其悍者回撲愈猛。擒斬愈多。十三日。賊復出搦戰。我軍堅忍不動。疲而擊之。刀矛摩戛。賊尸林積。追徧近城。吳坤修飭士衆少退。避城上之賊砲。該逆見我軍收回。以爲敗怯。悉力撲出。竇勇分枝包抄。勢如山壓。斃賊計在六百以外。官軍亦傷亡四十餘人。監餉外委余瑞林力戰殞命。二十一日。賊來誘敵。我軍力戰窮追。忽於樹林中衝出悍賊。官軍小退。傷亡近百。吳坤修念近營則賊勢愈猛。營壘且不能自保。立馬擣衆。與賊相搏。死者曳歸。後者復進。苦戰經時。賊旋敗竄。次日復戰。亦如之。二十三日。又戰。亦如之。二十四日。逆黨大舉來犯。我軍堅忍不出。俟其情歸。開壁逐之。勢如潮湧。賊遂大敗。自有此數日苦戰。士氣愈堅。賊餒漸落。奉新逆黨不敢復出。而下游之建昌安義警報日三四至。吳坤修於二十九日帶各營馳往安義救援。奉新城內之賊乘虛出犯。各營官守吳坤修堅立之法。排隊岡嶺。橫互數里。屹立如山。卒亦以此取勝。殺賊無算。此十一月苦戰屢勝之情形也。自二十一以後。吳坤修於營外修築長濠。立壩遏水。每遇賊衆我寡之時。利則前進。否則阻水自固。十二月初二三日。初十日。十八九二十等日。均與該逆接仗。賊強悍而多。吳坤修總守此法。自立於不敗。伺其隙而破之。該逆遂於瑞州邀來悍賊。於二十三日黎明。乘天大霧。來撲我營。我軍寂然不動。若漫無驚覺者。廣賊本以槍砲擅長。發必命中。是日與官軍連環對擊。自卯至申。鏖戰六時。除奪去賊尸受傷不計外。尙割取首級八十四具。從此賊膽已喪。堅閉不出。吳坤修料其不能固守此城矣。但以官軍淡薄。甫及三千。勦辦則有餘。圍攻則不足。乃嚴飭各鄉。趕辦團練。以相協助。賊在奉新肆虐已久。百姓恨之切骨。紳士御史帥方蔚等。督令比戶練丁。各持器械。二十七八九等夜。賊由南門出城。赴各鄉擄劫。頃刻之間。聚集團練數萬人。鳴鑼震天。賊知官軍方盛。團練又成。不敢復出城半步。聲息斷絕。始有逃遁之意。咸豐七年正月初五日。吳坤修派隊直逼城下。以火箭噴筒。焚其更樓。而以槍砲環擊。傳其三縣團練。盡夜環攻。使之不得休息。二更時。城上槍砲已稀。各營由北門獅子梯繩而上。縱火焚燒。該逆由西南兩門奔竄。列炬追殺。斃賊極多。三更時。克復奉新城池。藍翎把總陳有才手刃十餘賊。中砲殞命。初六七等日。各營及四鄉團練。遍搜山林民房。生擒老賊二百二十一名。竇勇追至大坵斬殺。及瑞州營內截擊者。均不在此數內。百姓恨之切齒。每生擒一賊。輒剖腸剥皮。置樹礫石。以雪其憤。見者無不

凜凜。此十二月力戰疊勝。及正月初五日克復奉新縣城之情形也。臣等伏查逆黨之在江西。專以堅守爲長策。自九江瑞臨等六府之外。又以全力守湖口。奉新二縣。蓋以湖口與九江爲唇齒。奉新與瑞臨爲犄角故也。吳坤修自抵瑞州。卽思先拔奉新。以翦瑞賊之羽翼。乃圍攻四月。大小五十餘仗。我兵傷亡至七百餘人。多尙賴團練協助。乃克奪此堅城。賊之兇很善守。實有出於情理之外者。湖南卽補知府吳坤修。自鄂省率援師而來。分兵獨攻。奉新所辦捐款。既以供其本軍。復能解濟省庫。實屬謀勇兼優。仰懇天恩。交軍機處記名。以道員請旨簡放。候選知縣杜霖。請免選本班。以直隸州知州。不論雙單月。遇缺卽選。藍翎卽選從九品孔廣晉。請免選本班。以知縣留於江西補用。其餘營中員弁團勇。暨隨同出力之地方各官。團練紳士。可否容臣等開單酌保之處。出自聖主鴻恩。藍翎把總陳有才。請旨飭部照守備例議卹。藍領外委余瑞林。請照千總例議卹。以慰忠魂。所有迭戰獲勝。克復奉新縣城緣由。恭摺由驛馳奏。伏乞皇上聖鑒。訓示施行。謹奏。

官軍克建昌武寧兩湖軍收復各縣摺 咸豐七年正月十七日

奏爲官軍兩克建昌。一復武寧。及湖北官軍收復瑞昌德安。湖南援師克復新喻永寧等縣城。恭摺彙奏。仰祈聖鑒事。竊查瑞州奉新。經臣等分派大兵圍攻。而由西迄北。至於九江中間。建昌武寧德安瑞昌等縣數百里間。均有逆黨盤踞往來。造爲瑞奉聲援。而建昌近接省城。武寧近接興國州。尤爲賊匪出沒嘯聚之區。吳坤修奉新一軍。亦只能兼顧安義靖安。不能遠及建昌武寧。十一月初六日。臣等由省派令千總張金璧帶九江兵。從九品段起樊俊帶團勇四百名。馳赴建昌圍剿。初六日。至老官嘴。探知小河口有賊數千人。初九日。抵三角湖。焚燬把卡賊船二隻。整齊隊伍。分四路直撲小河口老巢。賊亦分股迎敵。鏖戰兩時之久。未分勝負。親兵丁世昌周高升等拋擲火球十餘。適中賊隊。賊始敗退。跟蹤力追。殺斃溺斃四百餘名。陣斬守城之吳賊目。及來援之德安賊目。卽將建昌縣城克復。張金璧等帶勇旋省。嗣聞該縣仍被德安之賊竄踞。十二月初一日。臣等復派張金璧段起樊俊等。前往攻剿。探知離馬路口二十里之蔴藉。有賊千餘人。離蔴藉二十里之灘頭。有賊二千餘人。存城之賊。尙有千餘。張金璧等初二日行抵馬路口。適遇管帶平江勇投効之李元音。正擬進兵。而蔴藉灘頭之賊。聞風先遁。是夜我軍宿半邊花橋山一帶。初三日黎明。張金璧督同把總李華榮。從九品段起樊俊。及投効之李元音前進。賊

於距城八里之廖姓村迎敵。我軍四面兜擊，追至河邊。平江勇稍卻，賊衆猛追。張金璧等直前截之，賊黨潰亂，紛紛入城。我兵四面環攻，登山瞭望，賊旗已靡。親兵丁世昌、周高升等，首先登城，衝勇繼之，共斃賊五百餘名。生擒二十三名，奪獲黃袍、黃旗、旗幟五百餘件，騾馬三十一匹。此十一月初九日、十二月初三日兩次克復建昌之實。在情形也。又迭據代理武寧縣候補府經歷冒溶稟報：十月初八日，賊匪千餘，自紐絲嶺犯境，舉人柯芬管帶平江勇李述鑾駐紮橫路，預定前後夾攻之計。柯芬由東路潛繞賊後，李述鑾迎擊賊前行，至芭蕉地方，遇賊接仗。砲斃數賊，嶺嶺路狹，難以成列。我軍小卻，賊蜂擁直撲，勢幾不支。而柯芬一軍之抄出路口者，已襲賊背。賊倉皇回顧，爲我軍擊殺五十餘名。平江勇乘勢轉戰，呼聲震山谷。賊衆大潰，由旁峽分竄。又斃六十餘名，生擒三名，奪獲馬匹、旗幟、刀矛無算。查點兵勇陣亡六十五名，十八夜，賊復分股撲營。柯芬領大隊伏於嶺頭大軍之右，軍功黃量成督中營伏於嶺頭大營之左。張瑞嵐等伏於楊神坪，賊由清溪延山繞入，意圖抄襲。甫至楊神坪，張瑞嵐等伏兵出其不意，開砲轟擊，斃賊多名。其別路分進之賊，聞敗回竄嶺頭。左右伏兵齊出，追殺數里。賊多有顛崖墜澗死者。二十三日，賊目張佩五率黨千餘，由瑞昌王家鋪撲紫鹿嶺營。軍功羅燭予等帶勇先由僻路抄出賊後，教職黃先鐸等督隊迎勦，行至上莊，猝與賊遇，槍砲齊施，斃十餘賊。羅燭予等復從後截擊，賊盡棄械越嶺而逃。生擒張佩五，別股賊目柯定耀帶數百人由半腸山衝出，亦經羅燭予擊卻之。二十八日，賊衆四千人，由黃坊清溪港兩路入犯。柯芬與黃量成議分三路迎勦。賊盡銳撲左路，黃量成督勇殺斃大旗賊目一名。中右兩支乘勝衝出，四圍兜擊，斃賊百餘。三十夜，柯芬、黃量成偵知賊在路口，洪家源滋擾，分派隊伍，驀往圍勦，獲勝。十一月初一日，賊數千人由瑞昌之王家鋪竄入上莊一帶。經紫鹿嶺練勇迎擊，衆寡不敵，我兵小挫。初五日，賊忽間道由建昌之猴子崖竄至草坪，冒溶督帶存城義勇及團勇，又輔以童益彰之平江勇四百名。初七日，擊賊於潘墩港。斃賊十餘，乘勝直追，賊愈集愈衆。我兵被困，紛紛潰散。縣城涪羅兵火，陣燬不完。賊撲城下，冒溶等退紮去溪。與舉人劉馨翰招集潰勇，一面迅催橫路柯芬、黃量成之勇，一面飭各團派兵助勦。初十日，賊出千餘人，至石口渡焚劫。冒溶帶鄉勇二千餘名馳擊，柯芬、黃量成等橫路之勇繼進，適巨等飛調駐紮奉新之府經歷鄭奠管帶義武營先到，遇賊開仗，併力夾攻，斃賊百餘。居民積苦荼毒，怨恨入骨，或持木棍鋤鋤之屬助戰。瓦石攢擊如雨。

諸軍人人思奮。斬馘四五百名。逐北四十餘里。是夜我軍駐距城八里之羅塚。鄭奠因賊膽已寒。帶勇繞至西南山坡。千聲大呼。雜以槍砲。冒濬亦率勇從南路堵截。城內之賊。逃去大半。跌斃踐斃爛斃無算。僞檢點李同。僞將軍黃光。手刃諸賊。迄不能制。十一日卯刻。四面攻城。賊由東門竄出。皆爲鄉團擒殺。立復縣城。此十月初九十八等日屢獲勝仗。十一月初七日先勝後挫。兵單城陷。初十一大獲勝仗。克復縣城之實在情形也。又據布政使銜李續賓。自大冶與國稟報。追賊東下。十二月初六日。行次距瑞昌縣十里之亭子山。該逆聞風遁去。該縣署汛外委扈高發與紳耆率練勇抄擊。殲賊多名。生擒十二名。內有僞探花舒三峯。孰明正法。奪獲黃風帽黃馬褂多件。收復瑞昌縣城。李續賓一面進駐九江。一面派兵收復德安縣城。此十二月初五初六日鄂師抵蕪收復瑞昌德安之實在情形也。又據道員劉長佑稟稱。十一月二十日。探報新喻賊目僞將軍朱一點。率衆二千。勢將上竄。劉長佑派隊馳赴分宜。并催候選知府蕭啓江進屯洋橋。互爲聲援。二十三日三更。賊果悉衆來犯。一股進界首。一股進界橋。界首之賊抵離城五里白田地方。楚勇奮擊破之。界橋之賊。亦爲汪正準親勇及團練所敗。十二月初三日。劉長佑率楚勇及投誠李能通之義勇千名。由袁州赴分宜。朱一點退踞新喻。分股扼守寶山。初八日。我軍屯紮界首。是夜進勦寶山。李能通率衆先進。劉長佑隨後策應。寶山之賊。先嚴陣以待。李能通匹馬突陣。各勇鼓譟從之。賊遽敗退。我軍併力窮追。至離新喻縣城里許之大頭山。賊悉據山顛。義勇衝擊。賊猶拚死抵拒。候選知縣劉坤一。麾衆繞向山後。賊勢不支。乃敗入城中。義勇逐之而入。賊遂出東門。楚勇在城外邀擊。賊渡河欲斷浮橋。我軍一擁登橋。賊於對岸開放槍砲。正在相持。義勇從下游渡河。賊首尾受敵。始狂奔四竄。追殺百餘名。生擒五名。此劉長佑一軍克復新喻縣城之實在情形也。又據知府銜卽選同知趙煥聯稟報。奉湖南撫臣札飭。會商鄱縣各軍。先攻永寧。十二月初九日。派左右兩營進扼永新之橋頭。初十日。趙煥聯督中營越山而進。永寧外委呂宗標。蓮花廳照磨沈鶴鳴。隨帶兵勇助勦。探知寧新交界之泥湖坳。有逆黨設伏守隘。十一日。且探且進。該逆聞風遁去。未刻行抵渡陂營壘未定。礮頭賊目何逆。因乘我軍疲乏。掩旗息鼓。分三路來犯。趙煥聯分三路擊之。中路之賊先敗。左右同時奔潰。殲斃四十餘名。次日黎明。派隊往擊。賊竄入亂山中。尾殺十餘人。十三日。行抵縣城。我軍甫入南門。偵知賊伏城外五里之蕉碧村。趙煥聯率衆奮擊大破之。殺賊目二名。餘匪三百餘名。生擒

僑協理王起盛等。此趙煥聯一軍。克復永寧縣城之實在情形也。據各營稟報前來。臣等伏查咸豐五年冬間。瑞昌袁州相繼失陷。西路州縣多淪於賊。自去秋援軍來瑞。而兩湖之路始通。自袁州克復。鄂師抵蕪。而西路各屬以次恢復。目下南昌八屬。袁州四屬。一律肅清。南康四屬。已復其三。臨江瑞州吉安九江四府。亦各克復。二屬四屬不等。臣等仍當激勵諸將。規復府城。俟西路局勢大轉。即當分兵東路。掃蕩羣醜。以期仰慰宸廑。其武寧縣一案。可否容臣等酌保數人。伏候訓示遵行。所有官軍兩克建昌。一復武寧。及湖北官軍收復瑞昌德安。湖南援師克復新喻永寧等縣城各緣由。恭摺彙奏。伏乞皇上聖鑒。訓示施行。謹奏。

目疾請假摺 咸豐七年正月十七日

奏爲微臣現患目疾。懇恩賞假一月。在營醫調。恭摺奏祈聖鑒事。竊臣於上年十二月初一日。馳赴吳城九江各軍營。業經附奏在案。旋於二十八日回省。疊接稟報。南岸李續賓之師。於三十日與城賊援賊接仗。大勝。北岸續到之副將鮑超管帶三千六百人。於初五日接仗獲勝。踴毀小池口賊壘二座。目下九江南北兩岸。水陸馬步。至二萬餘人之多。聲勢浩大。事務繁多。臣即日擬由瑞州前往九江料理一切。庶可與湖北安徽聯絡一氣。惟現患目疾。竟日不能開視。合無籲懇天恩。賞假一月。即在瑞州九江軍營靜心調養。恭候訓示。除九江各戰情形。另行會摺詳報外。理合附驛具奏。伏乞皇上聖鑒。謹奏。

報丁父憂摺 咸豐七年一月十六日

奏爲微臣現丁父憂。恭摺馳報。仰祈聖鑒事。竊臣於正月十七日。自省河拜摺後。即馳至奉新。督帶候補知府吳坤修一軍。同赴瑞州。四面合圍。開掘長壕。斷賊接濟。二月初四日。回省一次。與西安將軍臣福興。巡撫臣文俊。晤商大局。初九日。仍來瑞州。十一日。接到家信。臣父誥封光祿大夫。曾麟書。於二月初四日病故。臣係屬長子。例應開缺丁憂。溯查臣自咸豐二年。奉命典試江西。奏奉恩准假歸省親。行至太湖縣。聞訃丁母憂。即由九江奔喪回籍。甫經百日。奉旨飭辦團練。時值武昌失守。數省震動。臣出而襄事。摺內聲明。俟大局稍轉。即當回籍終制。具奏在案。咸豐三年冬間。疊奉援鄂援皖。肅清江面之命。四年八月。摺內聲明。臣係丁憂人員。如稍立戰績。無論何項褒榮。何項議敘。微臣概不敢受。辦理稍有起色。即當奏明回籍。補行心喪等因。具奏亦在案。五年九月。蒙恩補授

兵部右侍郎。維時雖已服闋。而臣之私心。常以未得在家守制爲隱憾。今又遽丁父憂。計微臣服官二十年。未得一日侍養。觀闈。前此母喪。未能妥辦葬事。今茲父喪。未能躬視含殮。而軍營數載。又過多而功寡。在國爲一毫無補之人。在家有百身莫贖之罪。椎胸自責。抱痛何極。瑞州去臣家不過十日程途。即日遵制丁憂。奔喪回籍。一面由驛馳奏。恭候諭旨。臣之胞弟曾國華。出繼叔父爲嗣。現在瑞州軍營。即日交卸回里。丁本生降服憂。胞弟曾國荃。現在吉安軍營。亦應奔喪回籍。惟撫建大股賊匪二萬餘人。赴援吉安。連日與官軍大戰。屢屢獲勝仗。而我軍亦有傷亡。國荃之能否過歸。尙未可知。伏查微臣經手事件。以水師爲一大端。署提督楊載福駐紮九江。所統外江水師十五營。道員彭玉麟駐紮吳城。所統內湖水師八營。合計船隻五百餘號。職位至二千餘尊之多。此非臣一人所能爲力。臣在衡州時。僅奏明造船百六十號。岳州以下。雖陸續增添。而九江敗挫之後。則水師中衰。其時同援湖北者。僅船百餘號。賴彭玉麟力支危局。胡林翼楊載福重廓規模。而又有廣東督臣購運洋砲。湖南撫臣督率官紳。廣置船隻子藥。於是外江之水師始振。陷入鄧湖者。亦僅船百餘號。賴江西撫臣及總局司道竭力維持。增修船砲。籌備子藥。於是內湖之水師亦振。合四省之物力。各督撫之經營。楊載福等數年之戰功。乃克成此一枝水軍。臣不過因人成事。豈敢無其實而居其名。惟臣因事離營。內外水軍。或分歧而不定。相應奏明請旨。特派署提督臣楊載福總統外江內湖水師事務。惠潮嘉道彭玉麟協理外江內湖水師事務。庶幾號令歸一。名實相符。楊載福戰功最偉。才識遠勝於臣。彭玉麟備歷艱險。有烈士之風。伏乞聖恩。時加訓勵。該二人必能了肅清江面之局。仍請旨飭下湖北撫臣胡林翼。月籌銀三萬兩。江西撫臣文俊。月籌銀二萬兩。解交楊載福彭玉麟水營。俾此軍不以饑疲致潰。則不特爲攻勦九江湖口所必需。即將來圍攻金陵巡防長江。亦必多所裨益。此臣經手事件之大端也。自水師而外。惟湘勇係同縣之人。寶勇係久從之卒。於臣略有關係。現在李續賓之湘勇。駐紮九江。精勁樸實。隱然巨鎮。久在聖明洞鑒之中。劉騰鵬之湘勇。普承堯之寶勇。駐紮瑞州。嚴明勤謹。足當大敵。但使餉項稍敷。必能樹立功績。臣在軍中。亦無所益。即不在軍中。亦無所損。此外江西水陸諸軍。及各省援師。自去歲以來。皆由撫臣文俊與臣會商調遣。今臣丁憂開缺。應由西安將軍福興與撫臣會商辦理。近日洪楊內亂。武漢肅清。袁州奉新等處。克復數城。江西局勢。似有旋轉之機。惟臣猝遭父喪。苦塊昏迷。不復能料理營務。合無籲

懇天恩。准臣在籍守制。稍盡人子之心。而廣教孝之典。全家感戴皇仁。實無既極。抑或費假數月。仍赴軍營効力之處。聽候諭旨遵行。現在函商將軍福興。巡撫文俊。兩臣酌請一人。前來瑞州。撫循各營將士。臣拜摺後。即由瑞州奔喪回里。除俟抵家後。再行呈報外。所有微臣丁憂開缺緣由。理合由驛六百里馳奏。伏乞皇上聖鑒。訓示施行。謹奏。

呈請代奏奔喪到籍日期 咸豐七年二月二十日

爲呈請據情代奏。仰祈聖鑒事。竊國落在瑞州營次。聞訃丁憂奔喪回籍。業於二月十六日由驛馳奏在案。嗣經西安將軍福興。江西巡撫文俊。派令督糧道李桓。於二十日來至瑞州軍營。聯絡將領。拊循士卒。國藩將一切軍情。面爲述告。布政司銜李續賓。亦令其胞弟李續宜。由九江馳至瑞州。幫同照料營務。瑞州開挖長壕三十一里。於正月二十五日。興工晝夜催趨。二月十八日完竣。賊之接濟文報。均已斷絕。諒無他虞。國藩卽於二十一日。匍匐起行。二十五日。入湖南境。二十九日抵家。所有奔喪到籍日期。理合呈請據情代奏。伏乞皇上聖鑒。謹呈。

呈請代奏謝恩摺 咸豐七年二月二十六日

爲呈請據情代奏。恭謝天恩。仰祈聖鑒事。本年三月十一日。准湖南巡撫咨開。咸豐七年二月二十七日內閣奉上諭。駱秉章奏統兵大員。現丁父憂一摺。兵部侍郎曾國藩之父曾麟書在籍病故。該侍郎現在江西督師。軍務正當喫緊。古人墨經從戎。原可奪情。不令回籍。惟念該侍郎素性拘謹。前因母喪未終。授以官職。具摺力辭。今丁父憂。若不令其奔喪回籍。非所以遂其孝思。曾國藩著賞假三個月。回籍治喪。并賞銀四百兩。由湖南藩庫給發。俾經理喪事。俟假滿後。再赴江西督辦軍務。以示體卹。欽此。跪聆之下。感泣難名。當卽宣讀諭旨。祭告先靈。恭設香案。率領閭家大小。望闕叩頭。竊國藩才識庸劣。軍旅未嫻。數載從戎。過多功寡。觀烽煙之未靖。媿調度之無方。茲又遽遭大故。解職離營。方憂懼之交深。欲陳情而悚息。迺蒙皇上天恩。賞假三月。回籍治喪。并賞銀兩。經理喪事。凡臣子難言之隱。早在聖明體諒之中。不匱之恩。錫類罔遺於一物。非常之典。殊恩下賁於九泉。國藩惟有殫竭愚忱。勉圖報稱。戰戰兢兢。常懷履薄臨深之義。子子孫孫。永矢銜環結草之忱。所有國藩感激下忱。理合率同諸弟。呈請據情代奏。叩謝天恩。伏乞皇上聖鑒。謹呈。

瀝陳下情懇請終制摺 咸豐七年五月二十二日

奏爲瀝陳下情懇請終制仰祈聖鑒事。咸豐七年二月二十七日奉上諭。一駱秉章奏統兵大員現丁父憂一摺。兵部侍郎曾國藩之父曾麟書在籍病故。該侍郎現在江西督師。軍務正當喫緊。古人墨經從戎。原可奪情。不令回籍。惟念該侍郎素性拘謹。前因母喪未終。授以官職。具摺力辭。今丁父憂。若不令其奔喪回籍。非所以遂其孝思。曾國藩著賞假三個月。回籍治喪。并賞銀四百兩。由湖南藩庫給發。俾經理喪事。俟假滿後。再赴江西督辦軍務。以示體卹。欽此。一三月初一日奉上諭。一曾國藩奏丁憂回籍。請派員督辦軍務一摺。曾國藩丁父憂。前據駱秉章奏到。業經降旨賞假三個月。回籍治喪。假滿後著仍遵前旨。即赴江西督辦軍務。以資統率等因。欽此。一仰見我皇上深仁渥澤。既俯鑒臣子之隱。曲示矜憐。復不棄駑下之材。曲加器使。凡屬旁觀。猶爲感泣。矧在身受。能無奮興。惟微臣下情。有不敢不瀝陳於聖主之前者。臣通籍時。祖父父母皆無恙。在京十四年。在軍五年。堂上四人。先後見背。生前未伸一日之養。沒後又不克守三年之制。寸心愧負。實爲難安。前代及我朝奪情之案。被人彈劾者。層見疊出。而兩次奪情。則從古所無。臣到籍以來。輾轉思維。欲終制則無以報吾君高厚生成之德。欲奪情則無以報吾親恩勤鞠育之懷。欲再出從軍。則無以謝後世之清議。欲不出。則無以謝患難相從之軍士。進退狼狽。不知所裁。伏查近日軍務。我皇上不動聲色。芟夷大難。潛移默運。實已挽回十分之七八。以大局言之。河北供揚內亂。武漢肅清。水師精勁。迥非咸豐二三年氣象可比。以江西言之。西路克復十餘州縣。潯瑞吉臨。皆駐重兵。亦迥非上年春夏情形可比。自臣出營而後。又聞瑞州長濠日固。臨江四面合圍。吉安賊船焚燬一空。東路貴溪屢獲大捷。江西軍事。漸有起色。得將軍巡撫兩臣辦理裕如。添臣一人。未必有益。少臣一人。不見其損。臣恭聞邸鈔。上年大學士賈楨丁憂。皇上賞假六個月。令其回籍治喪。旋因賈楨奏請終制。又蒙諭旨允其所請。並指明御史鄒煥杰傳聞之誤。臣假期將滿。葬事未畢。合無籲懇天恩。援照賈楨之例。准臣在籍終制。感激鴻慈。永無旣極。微臣報國心長。治軍才短。守制之日有限。事君之日無窮。瞻望北闕。惶恐待命。所有瀝陳下情。懇請終制緣由。恭摺由驛五百里馳奏。伏乞皇上聖鑒。訓示遵行。謹奏。

恭謝天恩並籲請開缺摺 咸豐七年六月初六日

奏爲恭謝天恩。仍續請開缺。恭摺仰祈聖鑒事。咸豐七年閏五月十七日。兵部火票遞到閏五月初五日內閣奉上諭。一會國藩奏。懇請終制一摺。會國藩在江西軍營。聞丁父憂。前經降旨。賞假三個月。回籍治喪。俟假滿時。再赴江西督辦軍務。以示體卹。茲據該侍郎奏稱。假期將滿。葬事未畢。續准在籍終制。會國藩本以母憂守制在籍。奉諭幫辦團練。當賊氛勢擾皖鄂。卽能統帶湖南船勇。墨經從戎。數載以來。戰功懋著。忠誠耿耿。朝野皆知。伊父會麟書。因闡水師偶挫。又令伊子會國華帶勇遠來援應。尤屬一門忠義。朕心實深嘉尚。今該侍郎以假期將滿。陳請終制。并援上年賈楨奏請終制蒙允之例。覽其情詞懇切。原屬人子不得已之苦心。惟現在江西軍務未竣。該侍郎所帶楚軍。素聽指揮。當茲勦賊喫緊。假滿亟應回營。力圖報効。會國藩身膺兵重任。更非賈楨可比。著仍遵前旨。假滿後卽赴江西督辦軍務。並署理兵部侍郎。以資統率。俟九江克復。江西肅清。朕必賞假。令其回籍營葬。俾得忠孝兩全。毫無餘憾。該侍郎殫心事主。卽以善承伊父教忠報國之誠。當爲天下後世所共諒也。欽此。一微臣自顧何人。膺茲寵獎。非分之榮。惶悚無地。臣父吹竅効忠。旣蒙頒賜轉銀。復荷溫語褒嘉。當卽焚香祭告。宣讀諭旨。合家跪聆。感激涕零。伏念臣材識驕下。本乏寸長。而事會所乘。復多乖舛。自咸豐三年初奉援鄂。援皖之命。維時吳文鎔總督鄂中。係臣之座師。江忠源巡撫皖省。係臣所保舉。公義私情。望援孔切。書牘催促。皆助以忠義。期相共濟於艱危。不圖臣甫出師。而吳文鎔江忠源相繼殉難。臣亦旋有岳州之敗。靖江之挫。厥後憑仗天威。水陸東征。岳鄂蕪黃。長驅席卷。謂可成破竹之勢。不圖舟師挫於湖口。陸兵潰於北岸。遂有武昌再陷之變。五年秋間。九江南康水陸安穩。又分湘勇回援湖北。軍勢尚沛。然而有餘。不圖塔齊布羅澤南相繼淪謝。兩路悍賊。適於其時竄入江西腹地。局勢爲之大震。聲威亦爲驟減。六年困守江西。備極艱險。冬春之間。西路克復十餘州縣。漸有轉機。臣進駐瑞州。聞掘長壕。甫經合圍。不圖又有聞訃丁憂之耗。材智本極庸愚。事機復多不順。臣獨居深念。常恐稍分淺薄。終不能立功以報聖明於萬一。所爲閭自傷感者也。計湖南一軍。有功可言者。往年則陸路塔羅水路楊彭。久立聲勢。近年則李續賓力振湘軍。而劉騰鴻李元度亦有撐持堅忍之力。微臣因人成事。毫無功效。屢屢具奏在案。諭旨戰功懋著之褒。讀之惶悚流汗。在聖主善善從長。或姑爲過情之譽。以試將來。在微臣循名責實。又何敢掠人之美。以爲己有。至楚軍素聽指揮一節。查湖南練勇。昔年猶有見賊逃遁懷鄉思歸

之事。近則閩歷極久。膽氣皆壯。輕賊匪之伎倆。慕天家之官爵。以投營爲名利兩全之場。以戰陣爲日用常行之務。湘中勇夫赴江西湖北投効者。絡繹不絕。父缺子代。此往彼歸。較之臣初募練之時。風氣迥不相同。但使稍給口食。即可靜聽指揮。臣二月聞訃之初。亦慮將士相從日久。恐難驟離而他屬。自出營而後。各路安謐如常。吉安臨江。屢獲勝仗。將軍稽輿至瑞州視師一次。巡撫着齡遣員至瑞州犒賞一次。各營皆歡欣踴躍。樂爲用命。可見士無常親。惟撫馭者是親。不必楚人而後能用楚衆也。我皇上器使庸材。嘉矜并至。於有過宜罰之時。曲賜恕原。於無善可錄之中。曲加獎借。既荷溫語寵答。復蒙飭署兵部侍郎以資統率。臣伏念丁憂人員。未聞寶缺。寸心終抱不安。袁絳從事。明臣黃道周目爲凶醜不祥之人。況臣兩遭親喪。自度不祥之身。決非宏濟時艱。挽回大局之象。合無籲懇天恩。俯准開除兵部侍郎缺。感激皇仁。實無既極。除將微臣辦事艱難情形。同日另奏外。所有恭謝天恩。並籲請開缺緣由。恭摺由驛五百里馳奏。伏乞皇上聖鑒。訓示施行。謹奏。

瀝陳辦事艱難仍懇終制摺 咸豐七年六月初六日

奏爲瀝陳微臣辦事艱難竭蹶。終恐貽誤。籲懇在籍守制。恭摺奏祈聖鑒事。竊臣謬廁戎行。與聞軍事。仰蒙聖慈垂注。轉載恩深。凡有奏請。多蒙俞允。卽有過失。常荷宥原。遭逢聖明。得行其志。較之古來疆場之臣。掣肘萬端者。何止霄壤之別。惟以臣之愚。處臣之位。歷年所值之時勢。亦殊有艱難情狀。無以自申者。不得不略陳於聖主之前。定例軍營出缺。先儘在軍人員拔補。給予劄付。臣處一軍。概係募勇。不特參游都守以上。無缺可補。卽千把外委。亦終不能得缺。武弁相從數年。雖保舉至一二三品。而充哨長者仍領哨長額餉。充隊目者仍領隊目額餉。一日告假。卽時開除。終不得照綠營廉俸之例。長遠支領。弁勇互生猜疑。徒有保舉之名。永無履任之實。或與巡撫提督共事一方。隸人衙門。則挑補實缺。隸臣麾下。則長生缺望。臣未奉有統兵之旨。歷年在外。不敢奏調滿漢各營官兵。實缺之將領太少。大小不足以相維。權位不足以相轄。去年會籌江西軍務。偶欲補一千把之缺。必婉商巡撫。請其酌補。其隸九江鎮標者。猶須商之總兵。令其給予劄付。雖居兵部堂官之位。而事權反不如提鎮。此辦事艱難之一端也。國家定制。各省文武黜陟之權。責成督撫。相沿日久。積威有漸。督撫之喜怒。州縣之榮辱。進退繫焉。州縣之敬畏督撫。蓋出於勢之不得已。其奉承意旨。常探平心之所未言。臣辦理軍務。處處與地方官相交涉。

文武僚屬。大率視臣爲客。視本管上司爲主。賓主旣已歧視。呼應斷難靈通。防勤之事。不必盡謀之地方官矣。至如籌餉之事。如地丁漕折。勸捐抽釐。何一不經由州縣之手。或臣營抽釐之處。而州縣故爲阻撓。或臣營已捐之戶。而州縣另行逼勒。欲聽之則深虞事勢之窒礙。欲懲之則恐與大吏相齟齬。錢漕一事。小民平日本以杼收爲苦。近年又處積困之餘。自甲寅冬間。兩路悍賊。竄入江西。所在劫掠。民不聊生。今欲於未經克復之州縣。徵收錢漕。勸捐輸餉。則必有勁旅屯駐。以庇民之室家。而又或擇良吏以恤民隱。或廣學額以振士氣。或永減向日之俸收。或奏豁一年之正課。使民感惠於前。俾澤於後。庶幾履捐而不怨。竭脂膏奉公上而不以爲苦。然此數者。皆巡撫之專政。臣身爲客官。職在軍旅。於勸捐擾民之事。則職分所得爲。於吏治學額減漕豁免諸務。則不敢越俎代謀。縱欲出一體測詳明之告示。以儆官邪。而慰民望。而身非地方大吏。州縣未必奉行。百姓亦終難見信。此辦事艱難之一端也。臣幫辦團練之始。仿照通例。鑄刻木質關防。其文曰「欽命幫辦團練查匪事務。前任禮部右侍郎之關防」。咸豐四年八月。臣勤賊出境。湖南撫臣咨送木印一顆。其文曰「欽命辦理軍務。前任禮部侍郎關防」。九江敗後。五年正月。臣換刻「欽差兵部侍郎銜前禮部侍郎關防」。是年秋間補缺。又換刻「欽差兵部右侍郎之關防」。臣前後所奉援鄂。援皖。籌備船砲。肅清江面。諸諭。皆係接奉廷寄。未經明降諭旨。外間時有譏議。或謂臣係自請出征。不應支領官餉。或謂臣未奉明詔。不應稱欽差字樣。或謂臣曾經革職。不應專摺奏事。臣低首茹歎。但求集事。雖被侮辱而不辭。迄今歲月太久。關防之更換太多。往往疑爲僞造。釀成事端。如李成謀戰功卓著。已保至參將矣。被刑辱於芷江縣。出示以臣印札而不見信。周鳳山備歷艱辛。已保至副將矣。被羈押於長汀縣。亦出示以臣印札而不見信。前福建巡撫呂佺孫曾專函馳詢。臣印不符之故。甚至捐生領臣處之實收。每爲州縣猜疑。加之鞠訊。或以爲不足據。而勒令續捐。今若再赴軍營。又須另刻關防。歧舛愈多。憑信愈難。臣駐紮之省。營次無定。閒有部頒緊要之件。亦不徑交臣營。四年所請部照。因久稽而重請。六年所請實官執照。至今尙無交到確耗。此外文員之憑。武官之劄。皆由督撫轉交臣營。常遲久而不到。軍中之事。貴取信如金石。迅速如風。而臣則勢有所不能。斯又辦事艱難之一端也。茲三者其端甚微。關係甚鉅。臣細察今日局勢。非位任巡撫有察吏之權。決不能以治軍。縱能治軍。決不能兼及籌餉。臣處客寄虛懸之位。又無圓通濟變之才。恐終不免於貽

饒大局。凡有領軍之責者。軍覆則死之。有守城之責者。城破則死之。此天地之常經。古今之通義。微臣講求頗熟。不敢踰閑。今楚軍斷無覆敗之患。省城亦無意外之虞。臣赴江西。無所容其規避。特以所陳三端。艱難情形。既如此。而奪情兩次。得罪名教。又如彼。斯則宛轉縈思。不得不泣陳於聖主之前者也。臣冒昧之見。如果賊勢猖狂。江西危迫。臣嘗專摺馳奏。請赴軍營。以明不敢避難之義。若猶是目下平安之狀。則由將軍巡撫會辦。事權較專。提挈較捷。臣仍籲懇天恩。在籍終制。多守數月。盡數月之心。多守一年。盡一年之心。出自聖主逾格鴻慈。不勝惶恐待命之至。所有瀝陳辦事艱難。仍籲懇終制緣由。恭摺馳奏。伏乞皇上聖鑒。訓示施行。謹奏。

欽奉兩次諭旨覆奏摺 咸豐七年九月初九日

奏爲欽奉兩次諭旨。恭摺覆奏。仰祈聖鑒事。七月初一日。准兵部火票遞到。六月十九日奉上諭。前因會國藩以假期將滿。籲懇終制。當經諭令假滿後。即赴江西督辦軍務。並署理兵部侍郎。以資統率。原因該侍郎督辦有年。楚軍正資調度。墨經從戎。忠孝兩盡。茲據奏稱江西各營安謐如常。毋庸親往撫馭。並瀝陳才難宏濟。心抱不安。仍請開缺守制各等語。會國藩以督兵大員。正當江西喫緊之際。原不應遽請息肩。惟據一再陳請。情詞懇切。朕素知該侍郎并非畏難苟安之人。著照所請。准其先開兵部侍郎之缺。暫行在籍守制。江西如有緩急。即行前赴軍營。以資統率。此外各路軍營。設有需才之處。經朕特旨派出。該侍郎不得再行續請。致辜委任。欽此。九月初三日。准湖南巡撫咨稱。八月十四日奉上諭。一在籍侍郎會國藩前經降旨。准其暫行在籍守制。倘江西軍務緊急。或他省有需人之處。仍著候旨前往。昨據給事中李鶴年奏。會國藩自丁父憂。疊蒙賜金給假。褒獎慰留。此後墨經從戎。宜爲天下所共諒。豈容以終制爲守經。再三瀆請。請飭仍赴江西。及時圖報等語。軍務奪情。原屬不得已之舉。朕非必欲該侍郎即入仕途。然如該給事中所奏。亦可見移孝作忠。經權并用。公論自在人心。現在江西軍務有楊載福統帶。雖無須會國藩前往。而湖南本籍。逼近黔粵。賊氛未息。團練籌防。均關緊要。該侍郎負一鄉重望。自當極力圖維。急思報稱。所有李鶴年原摺著鈔給閱看。將此諭知駱秉章。著傳旨諭令會國藩知之。欽此。一臣初奉暫准守制之旨。因軍務未定。恐有後命。是以未及遽行覆奏。自七月以來。聞龍泉克復。吉安挫失之信。又聞克復瑞州府城。進賢縣城之信。頃又聞九江一軍攻克黃梅縣及小池口之信。仰託聖主威福。江西軍務

辦理得手。批諭飭令緩急赴營之處。揆度時勢。自可毋庸前往。茲復欽奉諭旨。飭臣在湖南本籍辦理團防。力圖報稱。聖主使臣以禮。因時制宜。跪聆之下。感悚曷勝。目下湖南全省肅清。臣當仍遵前旨。暫行守制。如果賊氛不靖。湖南告警。所有應須團練籌防之處。屆時商之湖南撫臣。再行奏明辦理。臣自到籍以來。日夕惶悚不安。自問本非有爲之才。所處又非得焉之地。欲守制則無以報九重之鴻恩。欲奪情則無以謝萬世之清議。惟盼各路軍事日有起色。仰紓宵旰之憂。即微臣恪守禮廬。寸心亦得以稍安。所有奉到兩次諭旨。恭摺由驛三百里覆奏。伏乞皇上聖鑒。訓示施行。謹奏。殊批。江西軍務漸有起色。即楚南亦就肅清。汝可暫守禮廬。仍應候旨。大臣出處。以國事爲重。抒忠卽爲全孝。所云懼清議之警。猶覺過於拘執也。欽此。」

酌擬報銷大概規模摺 咸豐七年十二月初七日

奏爲酌擬報銷大概規模。請旨飭部核議。恭摺奏祈聖鑒事。竊臣處一軍。未經奏派大員。綜理糧臺。亦無專司之員。始終其事。初在衡州造船募勇。冒昧從事。條理未精。厥後越境勦賊。用銀較多。歷時漸久。所募概係勇丁。將領多係紳士。官事非其所嫻。冊報聞有未備。而又與湖南湖北江西三省總局相交涉。有先在臣處糧臺領餉而後在他處支領者。有本在臣處領餉而他處亦時爲接濟者。又有由江援鄂。由鄂援江。忽分忽合。中間并無餉可領者。臣處辦理報銷。比他軍尤覺散漫難清。臣之愚見。擬將統轄較多者。分爲數大款。將臣處領餉之月日及他處領餉之月日。先行具奏。俾眉目清楚。起訖分明。庶免輻輳混淆之弊。亦無重複開報之虞。如塔齊布所統爲一款。該提督所帶道勇實勇等於咸豐四年二月在臣處糧臺支餉。其所帶撫標等兵仍在湖南省局支餉。在通城湘潭岳州皆係如此辦理。四年閏七月初二日。岳州賊退。塔齊布出境追勦。其所帶全軍應自閏七月初三日起。至五年七月二十日止。概由臣處糧臺報銷。二十一以後。卽歸入周鳳山款下接算。羅澤南所統爲一款。該員所帶湘勇。自咸豐二年臘月。隨臣同赴長沙。嗣後年餘。均在省局領餉。自四年閏七月初三日起。直至五年十一月二十八日。由江西抵湖北洪山之日止。應歸臣處糧臺報銷。其二十九日以後。卽應歸湖北總局報銷。楊載福所統水軍爲一款。該鎮自咸豐三年十一月衡州造船起。至五年正月初五日止。應歸臣處糧臺報銷。其因病離營後。再出統帶水軍。則由湖北湖南報銷。彭玉麟所統爲一款。該員自三年十一月衡州造船起。至五年五月由九江

赴援湖北。尙在臣轉運局支餉。擬截至四月三十日止。歸臣處報銷。五月初一日以後。則歸湖北總局報銷。是冬調赴江西。自十二月起至六年臘底止。仍歸臣處報銷。七年正月以後。則歸江西總局報銷。李孟羣所統爲一款。該司經臣咨調由廣西來楚。自四年六月初八到長沙之日起。至五年正月初三由九江赴援湖北之日止。應歸臣處糧臺報銷。此後則歸湖北報銷。李元度所統爲一款。該員自五年正月在南昌募勇起。至六年臘月三十日止。應歸臣處糧臺報銷。七年以後。則歸江西省局報銷。周鳳山所統爲一款。該將自咸豐三年九月勦辦常寧道州土匪。即在臣處支餉。自四年二月至五年七月。應併入塔齊布款下核算。自七月二十一接統導營全軍起。至六年九月上。應歸臣處糧臺報銷。其再由長沙募勇援勦吉安。則歸湖南江西報銷。以上七款。皆爲日較久。用銀較多。交涉各省。宜分別界限者也。此外水陸兩軍。營數尙多。或先分後併。或因敗撤遣。與各省並無交涉者。將來彙冊報部。不必先行預陳。又如李續賓蔣益澧前在臣軍年餘。擬即併入羅澤南款下核算。厥後該員等各統一軍。則歸湖北等省報銷。又如臣弟曾國華曾國荃或自武昌赴援瑞州。或自長沙赴援吉安。在臣處領餉甚少。應歸江西等省報銷。凡此皆出款之大概規模也。至若經手人員。臣在衡州時出入銀錢。多係自行經理。委員即補同知陶壽玉檢點帳目。四年二月至長沙。委員候補知府李瀚章管理收支事件。七月由岳州赴鄂。於長沙設立後路糧臺。派湖南即用道裕麟。湖北記名道厲雲官司其事。其水陸行營收支事務。則李瀚章及江南同知鄭德基主之。九月以後。於漢口設立轉運局。派禮部員外郎胡大任司其事。五年駐軍南康。於南昌設立後路糧臺。派禮部員外郎甘晉及李瀚章司其事。六年十二月。撤毀糧臺。自七年正月。起。歸併江西省局司道辦理。除鄭德基業經病故外。其裕麟厲雲官胡大任甘晉李瀚章陶壽玉六員。現在分處兩湖江西安徽四省。俟江西軍務將畢。即行設局。飭該六員爲臣辦理報銷事件。遵照定式造冊送部。大約水陸數年之餉糈。砲船各廠之經費。通共用銀在三百萬兩內外。勾稽尙易完竣。惟是該六員者。并非綜理。本無專責。自始至終。皆係窮窘之境。勸捐挪墊。委曲維持。或因敗挫逃散。奔走於危地。或因空乏屢空。受侮於弁兵。廉謹將事。艱苦備嘗。而九江一敗。又有燒劫餉船。遺失文卷之事。將來如有款目不符。著賠追繳之處。皆係臣一身承認。不與該六員相干。是否有當。謹擬大概規模。請旨飭下該部核議施行。理合具摺送交江西撫臣附奏。伏乞皇上聖鑒。訓示施行。謹奏。

恭報起程日期摺 咸豐八年六月十七日

奏爲恭報起程日期仰祈聖鑒事竊臣於六月初三日准湖南巡撫咨稱承准軍機大臣字寄五月二十一日內閣奉上諭「前因江西賊匪竄入浙江之常山開化圍逼衢州府城疊由江南徽州等處調撥援師馳往救援恐官軍無所統屬特加漳州鎮總兵周天受提督銜督辦浙江防勦事宜嗣因處州失守并攻陷金華所屬之永康武義二縣恐周天受資望較淺未能統率衆軍復諭和春前往督辦茲據和春奏現在患病未痊刻難就道東南大局攸關必須聲威素著之大員督率各軍方能措置裕如會國藩開缺回籍計將服闋現在江西撫建均經克復止餘吉安一府有會國荃劉騰鴻等兵勇足敷勦辦前諭著齡飭令蕭啓江張運蘭王開化等馳援浙江該員等皆係會國藩舊部所帶勇丁得會國藩調遣可期得力本日已明降諭旨令會國藩馳驛前往浙江辦理軍務著駱秉章即傳旨令該侍郎迅赴江西督率蕭啓江等星馳赴援浙境與周天受等各軍力圖掃蕩該侍郎前此墨經從戎不辭勞瘁朕所深悉現當浙省軍務喫緊之際諒能仰體朕意毋負委任何日起程并著迅速奏聞以慰廬念將此由六百里各諭令知之欽此」伏念浙江完富之區關繫東南大局賊勢方張亟應迅籌援勦遵即於初七日自家起程十二日抵長沙與撫臣駱秉章會商並一面飛飭蕭啓江張運蘭王開化等由撫建拔營進駐鉛山縣之河口鎮臣擬由水路至九江登陸過抵河口大營即便督率星馳赴浙蓋由湖南江西陸路赴浙與假道長沙程途遠近相同而夏令南風順水舟行較速且臣軍後路餉需轉運一切亦須與湖北督撫臣面相商榷庶期無誤師行臣才質凡陋頻年飽歷憂虞待罪行間過多功寡伏蒙皇上鴻慈曲加矜宥惟有殫竭愚忱勉襄事以求稍紓宵旰憂勤所有軍務一切俟行抵河口後再行詳悉陳奏理合將微臣起程日期恭摺由驛覆奏伏乞皇上聖鑒訓示施行謹奏 硃批「汝此次奉命即行足徵關心大局忠勇可尙俟抵營後迅將如何布置進勦機宜由驛馳奏可也欽此」

湖口建昭忠祠九江建塔齊布祠摺

奏爲湖口建立水師昭忠祠九江建立前提臣塔齊布祠請旨敕部核議恭摺奏聞仰祈聖鑒事竊臣國藩於咸豐三年在衡州製造戰船設立水師四年越境勦賊自湘潭以至九江焚燒賊艦萬餘事機甚順旋以湖口之挫

戰船半入內湖。半阻外江。其在外江者。由彭玉麟帶領。回援武昌。復經湖南撫臣製造船砲。交臣楊載福募勇。會同援鄂。苦戰兩年。再克武漢。湖北撫臣胡林翼綠營。恢廓外江水師。遂增至一十八營。其在內湖者。初僅戰船百零七號。臣國藩入南昌後。會同江西撫臣添置船礮。札調彭玉麟來江統帶。內湖水師亦增至二百餘舟。七年二月。臣國藩丁憂回籍。請旨特派臣載福總統外江內湖水師事務。彭玉麟協理。仰蒙聖恩允准。九月內。會同規取湖口。彭玉麟攻其內。臣楊載福攻其外。臣李續賓亦以陸師從山後抄擊。立將湖口克復。自是而逆舟之精銳略盡。九江之賊勢益孤矣。仰荷聖主威福。合三省之物力。成此一枝水師。上下三千里。舳艫不絕。旌旗相望。臣楊載福復進勦蕪縣一次。進勦蕪湖一次。肅清江面之局。大致粗定。惟是數年以來。弁勇出入於砲子如雨之中。挺身殉難。鬱爲國殤。合計陣亡傷亡。不下三千餘人。其有雖死而冊名偶遺。及大風覆舟而溺死。失火藥箱而焚死者。均不在此數中。臣楊載福與彭玉麟會商就湖口石鍾山上建祠一所。合祀水師陣亡各員弁勇丁。名曰「水師昭忠祠」。上以體聖主褒崇忠義之意。下以動各營觀感奮發之心。彭玉麟留防湖口。就近監修。分別正祀附祀。刊刻木主。依次列入。此湖口建立水師祠宇之原委也。前提臣塔齊布署湖南撫標守備時。已毅然有殺賊立功之志。湘潭一役。以千餘新集之師。嘗數萬方張之賊。楚軍之勇敢實倡於此。大局之轉機亦始於此。遽瀝荷聖恩。超擢提督。涅臂刺字。精忠報國。鏖戰岳州武昌大冶興國田家鎮廣濟黃梅等處。身先士卒。所向有功。祇以九江一郡。未能速下。忠憤填膺。鬱憂成疾。日對孤城。竟以身殉。本年四月。水陸諸軍克復九江。該處士民及在營弁勇。語及塔齊布當時遺憾。無不感歎流涕。異口同聲。公請建立專祠。并附祀陸師陣亡各員弁。以報功而示勸。已就城郡隙地。擇期興工。名曰「塔忠武公祠」。臣李續賓委員監修。其附祀之員弁勇丁。確切查明。刊刻木主。依次列入。此九江建立塔齊布祠宇之原委也。臣國藩欽奉諭旨。馳赴浙江。經歷九江湖口。見兩處祠宇俱已將次工竣。瞻拜爭趨。往來相屬。廣盛世褒忠之典。卜斯人向善之忱。伏思皇上眷念蓋臣。恩施逾格。凡茲効命疆場之士。悉本朝廷鼓舞而成。臣等不揣冒昧。籲懇天恩。赦下該部九江湖口兩祠宇。照各府昭忠祠之例。飭地方官春秋致祭。於聖朝褒忠勸善之道。或亦足以裨補於萬一。謹會同湖廣總督臣官文。湖北巡撫臣胡林翼。江西巡撫臣耆齡。恭摺附具奏。伏乞皇上聖鑒。訓示施行。謹奏。

湘鄉縣建忠義祠摺 咸豐八年八月十二日

奏爲湘鄉縣城捐建忠義祠。稟祀陣亡員弁勇丁。恭摺奏聞。仰祈聖鑒事。竊臣國藩於咸豐二年十二月奉旨幫辦湖南團防時。長抄解圍未久。撫臣張亮基札調湘勇千人。臣國藩率同羅澤南王鑫劉蓉羅信南數人。督帶湘勇赴省。仿照前明戚繼光之法。編束隊伍。練習膽技。嘗經縷晰奏明在案。三年二月。衡山土匪曹賊李躍搆亂於草市。派劉長佑王鑫前往勦滅。是爲湘勇殺賊立功之始。五月十八日。江西省城被圍。前安徽撫臣江忠源由九江入省。登陴守禦。飛書請援。臣國藩會商湖南撫臣。招募湘勇二千。楚勇一千。配以三廳兵八百人。赴江救援。其監護軍行者。則有夏廷樾郭嵩燾朱孫詒羅澤南。其管帶湘勇之員。則有謝邦翰易良幹羅信南康錦輝楊虎臣等。而羅澤南亦自帶一營。七月二十日。軍至南昌。二十四日。因進兵太銳。先勝後挫。謝邦翰易良幹及羅信南之弟羅信東等。同時陣亡。此湘勇出境勦賊。帶勇紳士力戰捐軀之始也。臣續賓時在謝邦翰營中。幫辦營務。謝邦翰沒後。遂接帶斯營。臣國藩時在衡州。聞援軍挫衄之信。倡議於湘鄉建立祠宇。祀謝邦翰易良幹及在江殉難之人。此後如有死事員弁。以次附祀。名曰忠義祠。四年冬間。祠工告竣。數載以來。湘勇援鄂。援江。援廣東。援廣西。幾無虛日。今臣國藩復奉命援勤閩浙。臣續賓奉命援勤皖豫。統計湘勇之出境征伐者。不下六七萬人。員弁勇丁之陣亡傷亡者。亦不下五千餘人。其間死事最著者。羅澤南盡節於武昌。王鑫盡瘁於樂安。劉騰鴻效命於瑞州。羅澤南奉諭旨於三省建立專祠。王鑫奉旨於兩省建立專祠。自應於本縣各建一祠。劉騰鴻奉旨於瑞州建立專祠。亦應推廣皇仁。建祠本縣。此外殉難各員。如李杏春宣勞最久。而勦名未彰。鍾近衡死綬最先。而卹典尙闕。及其他管官幫辦哨弁死難之人。或慷慨以赴敵。或力窮而就義。均應彙入總祠。上以體聖世喪忠之意。下以勵湘人觀感之誠。本年六月。臣國藩于役浙省。經過縣城。周覽舊立祠宇。規模狹小。附祀之主。無可安設。思欲稍加廓大。行次黃州。晤臣續賓商議。意見相同。臣等擬即倡捐銀兩。擇交邑紳。就四年所修之祠。添購基地。重加修葺。凡陣亡將領弁勇。分別正祀附祀。刊刻木主。依次列入。合無籲懇天恩。勅下部議。湘鄉縣所建忠義祠。俯准照各府昭忠祠之例。飭地方官春秋致祭。於聖朝褒忠勵節之道。或亦不無小補。所有湘鄉縣捐建忠義祠緣由。謹會同湖南巡撫臣駱秉章。恭摺附驛具奏。伏乞皇上聖鑒。訓示施行。謹奏。

廣豐玉山兩縣解圍摺 咸豐八年八月十二日

奏爲聞賊竄撲廣豐玉山兩縣。官軍力戰守禦。屢獲勝仗。兩城先後解圍。恭摺奏祈聖鑒事。竊浦城大股賊匪。於七月初十日。回竄廣豐縣五都地方。平江營管官守備彭大壽。候選知縣夏宏江等。與在城文武。一面稟請援師。一面分護堵禦。十一日黎明。前隊長髮老賊數百名。直犯縣城。彭大壽等派三成隊出城迎擊。賊稍卻退。已刻復繞東門山背而來。黃旗蔽山。喊聲震地。數次猛撲。猖獗異常。彭大壽等。以衆寡不敵。飭各勇堅守勿動。排列壕口。以槍礮轟之。待賊氣已疲。突出不意。出城奮擊。賊遂大潰。退三四里屯踞。未刻。候選道李元度。續派平江老左營都司銜守備童梅華。新左營千總張詩華。右營候選知縣郭式源。馳來救援。人心稍定。十二日辰刻。賊悉銳薄城。我師仍堅忍相持。未刻。分三門出隊奮擊。斃賊百餘名。陣斬乘坐紅呢大轎賊渠二人。我軍陣亡把總易金榜。李傳綸二員。十三四兩日。逆賊愈集愈衆。三面環攻。并於東南兩門。暨小北門外。近城房屋。加築牆壘。另立堅卡。圍開地道。又於大北門高嶺。時出大隊往來。放鎗發喊。十四日申刻。彭大壽等商定左營出三百人。排立北門嶺上。以拒北路援賊。右營前營湘勇營新左營。各挑奮勇。俱出小北門。直撲賊壘。賊列隊屋外。槍礮連施。右營冒險衝入。斃悍賊十餘人。賊仍退屋內堅拒。我軍抄過屋背放火。圍殺五六百人。燒斃無數。當將小北門外地道填塞。時北路接應之賊擁至。我左營之三百人者。奮力攔截。斃二十餘名。賊始敗潰。十五日黎明。彭大壽等商定新左營及前營。由大南門東門。左右兩營由北門。分門突出。用劈山礮轟斃守卡之賊。合力毀卡。奪關擁入。哨目彭學仕先鋒洪文杰。及各勇目。帶重傷者數名。猶復鼓勇繼進。賊遂不支。當將南門外賊壘四座焚燒。地道填塞。乘勝追擊。斃賊數百。奪獲旗械無數。隔河南岸之賊出援。亦經湘勇擊退。同時東門外之火已發。殺斃燒斃之賊。約二百餘名。生擒九名。賊遂向北逃奔。左營帶隊尾追一二里。餘賊奔過山背。是夕二鼓後。前營左營新營右營。各出五成隊。乘月色出城。分八支前進。放礮爲號。齊隊向前。破賊壘五座。餘賊越嶺狂奔。城圍立解。探聞浦城後至股匪。已至五都。五鼓時。復將守城之五成隊換出。直抵毛家村。拆毀浮橋。沿河列隊拒之。賊偵知有備。折回北去。不敢復窺廣豐。此十一日至十六日。廣豐縣城力戰解圍之實在情形也。其竄玉山縣者。十五日至十里塔前。搭浮橋渡河。候選道李元度率勇扼七里街口。該逆三次衝突。均經擊退。斃賊數十名。逼燭二十餘名。我勇追過浮橋遇

伏陣亡六人。酉刻賊忽分兩股從三里街河灘搶渡。李元度回軍逆擊。對河之賊。卽從七里街擁進。又分股直撲城下。李元度恐城中有失。乃帶隊入城。登陴守禦。飛調老中營武威軍奇兵彰武等營。陸續入城協守。十六日辰刻。賊圍西北兩門。另股登南門塔上。俯瞰城內。我軍開礮指擊。悍賊盡伏。三里街民房牆內。開挖地道。距城僅三四丈。十七日。我軍趕挖西門壕溝。該逆於牆中鑿洞轟礮。擊斃我勇二人。傷十九人。李元度懸賞選募把總劉斗寅等百餘人。直開西門。援屋而上。施放火箭噴筒。破卡三處。將賊踞各屋焚毀。生擒五賊。李元度在城上督戰。被抬礮子打傷左目之下三分。流血數升。暈絕撲地。半時始甦。時城外之賊。較官軍多至十餘倍。環城掘洞。鉞鋤之聲相聞。城中米糧缺乏。主將又復受傷。人心驚惶。其勢岌岌。李元度傳藥甫畢。裹創登城。激勵將士。安撫居民。飭各勇從城內自挖地洞。出城後橫繞城根。暗截賊之隧道。又從小西門起。至西北角上。趕築月城五十餘丈。高與城齊。日夜竭力抵禦。賊礮向城環擊。各營轟害者十一人。委員譏敘八品職銜監生李家純中礮殞命。百姓多被擊傷。十八日。賊出隊犯東門。彭奇兵營官丁峻帶隊出擊。各營派隊繼之。奇兵哨官龔茂發陣斬僞總制胡先祥一名。奪獲僞印僞官照及馬匹等件。逆黨大敗歸巢。又在西門四五丈外。民房紮卡之處。開挖地道。仍穴牆開槍。使人莫敢近。李元度復懸賞百金。選募劉斗寅等開城緣屋而上。將卡焚燬。燒斃挖隧之賊數十人。於土穴之中。賊黨退數丈。紮卡於北門外。添營七座。又從東門小港外。搭橋過渡。希圖四面合圍。二十日辰刻。賊在東北城添大小營壘二座。阻我常山來路。各營派五成隊出擊。丁峻帶彭奇營從東津橋包抄。屈蟠黎獻丁應龍等。從中路分進。搶近賊營。立將二壘踏毀。追擊里許。援賊大至。漫山遍野。不下二萬人。丁峻等督隊相持。迴合十餘次。黎獻等另從北門橫衝賊陣。刀矛相交。哨官張應龍彭飛熊龔茂發龔拱綸等乘勝深入。而賊來益衆。龔茂發龔拱綸中礮陣亡。張應龍彭飛熊各受重傷。張應龍旋亦身死。李元度見時已向晚。傳令收隊入城。查點各勇陣亡七人。受傷五十一人。二十一日黎明。賊在西城搭造望樓。有賊酋黃帽黃衣。登樓瞭望。我軍用兩劈山礮指擊。一發下之。是日衢州鎮總兵李定太自江山派寶勝勇千人來援。平江左營董梅華右營郭式源等亦自廣豐會同廣信府防勇祥字豫勝等軍來援。士氣愈壯。賊之凶鋒稍斂矣。二十二日。賊復於東北隅添營三座。常山來路已斷。李元度等以此路不可不通。令彭奇武威同字及兩中營。從東門出隊。直搗新紮之營。時近黃昏。賊不爲備。立將三

營竭盡。殺賊約二百餘名。奪獲旗幟六百餘面。正臺擊時。李元度見三里街一帶之賊。均往東城救應。遂潛飭水師登岸。將南門對河之街房焚燒。其地與三里街郭家洲賊館相連。風勁火烈。一律延燒。該逆撲救不及。勢甚慌亂。三更候燒及賊之火藥館。烟燄冲霄。聲如巨霆。各營乘勢開城出擊。連破大西門賊卡三處。賊不能支。盡棄行李輜重。狂竄德興一帶。我師黎明跟追。殺賊二百餘名。生擒四十七名。奪獲軍裝旗幟數百件。騾馬三十一匹。窮追三十里始行收隊。此十五日至二十二日玉山縣城力戰解圍之實在情形也。伏查廣玉兩城。當浙江福建江西三省之衝。與安徽之婺源。相距亦不過二百里。一有疏虞。則四省震動。候選道李元度以一軍分守兩城。身受鎗傷。苦戰旬日。卒能殺賊解圍。保全大局。李元度自衡州從軍以來。備嘗艱險。百折不回。上年臣丁憂回籍。該員以孤軍支住東路。屢能以少勝衆。此次力保兩城。較之上年之守貴溪。厥功尤偉。可否籲懇賞加按察使銜。並賞給勇號。其平江各營。可否擇尤保奏之處。出自天恩。陣亡之把總易金榜。李傳綸。龔茂發。張應龍。外委龔拱綸。八品職銜監生李家純。監生黃查。請旨飭部照各該員本職。從優議卹。以獎忠義。而勵將來。所有廣豐玉山兩城力戰解圍各緣由。理合恭摺由驛六百里具奏。伏乞皇上聖鑒。訓示施行。謹奏。

遵旨發師援閩摺 咸豐八年八月十一日

奏爲遵旨發師援閩。擬從崇安進剿。敬陳現在賊情軍勢。恭摺奏祈聖鑒事。竊臣自六月十六日長沙拜摺後。旋於二十四日行抵武昌。與督臣官文。撫臣胡林翼。籌商轉運事宜。七月初四日抵蘄水縣屬之蘭溪。晤巡撫銜浙江布政使臣李續賓。商調所部總兵銜副將朱品隆前營湘勇五百名。副將唐義訓諭字營湘勇五百名。隨同援剿。十二日抵湖口縣。與福建水師提督楊載福。布政使銜廣東惠潮嘉道彭玉麟定議。於該處設立轉運局。臣在湖口患病四日。二十一日行至南昌。與江西撫臣耆齡籌商進剿機宜。二十三日。疊據廣信探報。僞楊國宗帶大股賊數萬。從福建浦城竄出二度關。圍攻廣豐玉山二縣。廣信各屬戒嚴。臣卽於二十四日起程。馳援東路。途次承准軍機大臣字寄。七月初十日奉上諭。一本日據和春何桂清趙德徽奏福建情形危迫。請飭會國藩改道馳援一摺。前因浙江軍務緊急。諭令會國藩赴浙勦辦。現在衢州業已解圍。處州等府縣亦相繼克復。境內餘匪。不難剋日肅清。惟閩省浦城崇安建陽松溪政和等處。賊勢蔓延。亟應趕緊勦辦。和春等現飭總兵周天培於援浙

兵勇內挑選精銳三千數百名。由龍泉一帶進剿。饒廷選帶漳州兵勇。亦馳往浦城。曾國藩業已奏報起程。著即以援浙之師。由江西鉛山直搗崇安。相機進剿。迅將閩省各匪。一律掃除。毋少延誤。曾國藩赴浙援剿所需軍餉。著官文等仍遵前旨。由湖南北按月籌銀各二萬兩。解赴曾國藩軍營。以資接濟。將此由六百里各諭令知之。欽此。旋接准部咨七月二十日內閣奉上諭。和春奏浙江軍務平定。請旨可否毋庸赴浙等語。浙江被陷郡縣。經周天受督兵先後克復。全境漸就肅清。和春著毋庸前赴浙江。總兵李定泰前令幫辦和春軍務。此時周天受等會勦寬閩各匪。著總歸曾國藩調度。曾國藩未到以前。即歸慶端調度。欽此。又七月二十二日內閣奉上諭。周天受奏浙江軍務。將次完竣。擬即帶兵前往福建助剿等語。署福建漳州鎮總兵周天受著加恩賞還提督銜。即著馳往福建與周天培饒廷選張騰蛟等。分路進剿。俟前任侍郎曾國藩到後。即歸曾國藩調度。欽此。伏思浙境既已肅清。其自浦城竄犯廣豐玉山之僞國宗楊逆。復經官軍擊敗。竄往德興婺源一路而去。臣同日另摺具奏。其現擾閩境者。迭據探報。僞翼王石達開。尙屯踞崇安縣境之星村。婺源一帶地方。及建邵各屬。總兵周天培等。已入浦城。又據九江道沈葆楨。候選道李元度稟稱。訊據賊供。僞國宗楊輔清與石逆共帶賊黨十餘萬。楊逆先踞浦城。石逆自衢處敗竄入閩。窺犯延建等郡。本年五月內。楊逆仍假楊秀清僞號。自稱東殿。石逆妒之。互相仇殺。楊逆遂帶賊六七萬。棄浦城而出。犯擾廣豐玉山。分道而馳。石逆尙有七八萬衆。盤踞閩省各屬。未能測其所向。各等語。臣於八月初八日。行抵河口鎮。前奉諭旨。飭調之張運蘭蕭啓江兩軍。及臣在湖南帶出之吳國佐一軍。在湖北撥出之朱品隆等一軍。均已陸續到鎮。惟道員蕭啓江前經奏明給假兩月。目下尙未回營。伏查賊渠以石逆爲最悍。其誑煽莠民。張大聲勢。亦以石逆爲最譎。臣謹遵諭旨。即日親督兵勇。由鉛山入分水關。直搗崇安。由崇安而東北。可出小關仙霞嶺。仍趨廣豐玉山一路。以達於皖境。由崇安而南。約有三路。東路出建陽葉坊。以至延平府。西路出光澤龍湖。以至建寧縣。中路出麻沙羣白。而至將樂。則可達於汀州。而遁入廣東矣。現在暑督臣慶端駐紮延平。東路當可無虞。西路各境。在在與江西毗連。現經撫臣耆齡調派布政使銜江西候補道劉長佑一軍。由撫州移防新城爐溪。嚴扼杉關等隘口。或無回竄江西之慮。其或北歸皖省。併入賊黨。南回廣東。仍返老巢。均在意外。目前未與接仗。不能遽測其所之。俟抵崇安後。探確賊蹤。再行縷晰具奏。所有遵旨援

聞即日由崇安進兵。並現在賊情軍勢。恭摺由驛六百里馳奏。伏乞皇上聖鑒。訓示遵行。謹奏。硃批。覽奏均悉。欽此。」

調李瀚章來江西片 咸豐八年八月十二日

再湖南補用知府李瀚章。向在臣國藩軍營綜理糧臺。內方正而外圓通。辦事結實周詳。甚屬得力。咸豐五年。該員聞訃丁憂。經臣國藩附片奏留。迨六年十二月。裁撤糧臺。歸併江西省局。該員懇請回籍守制。臣國藩給咨令其回廬州原籍。旋聞安徽撫臣奏請留辦團防捐務。七年十二月。臣國藩奏明彙辦歷年報銷。李瀚章經手最久。應飭該員入局核辦。欽奉諭旨。飭部議准在案。臣糧臺前後委員。及一切文案。多存於湖口水營舟次。李瀚章文卷。尙存江西省城。相應請旨。飭下安徽撫臣。即飭該員迅來湖口水營。設立總局。辦理報銷事件。俟事竣後。令李瀚章仍回安徽。即留於臣續賓營中幫辦軍務。該員於軍情地勢。均所熟悉。臣等二人。皆得藉收臂指之效。理合附片陳明。伏乞聖鑒施行。謹奏。

調喻吉三隨營片 咸豐八年八月十二日

再湖北漢陽營中軍守備。儘先游擊喻吉三。前經廣西撫臣勞崇光奏調赴粵管帶水師。該游擊於咸豐四五等年。曾在臣營充當水師哨官。本年六月。臣至長沙。該游擊前來謁見。據稱廣西水師。早已招募成軍。由道員蔣益澧派員管帶。業著成效。可無須該員前往等語。臣以此次援浙。尙擬派設水師。以保錢塘江之險。該員原係水師出身。兼係臣之舊部。可期得力。遂與湖南撫臣商酌。札調該游擊隨營聽候差遣。理合附片陳明。請旨飭下兵部查照辦理。謹奏。硃批。知道了。兵部知道。欽此。」

設立轉運糧臺片 咸豐八年八月十二日

再臣軍除湖口設立轉運局外。目下由江入閩。自應於廣信府城鉛山縣城。設立糧臺。遴委大員。總司其事。以便轉運米糧軍火等件。查九江道沈葆楨。現在駐防廣信。臣已劄委兼理。臣軍糧臺。所有兩湖江西協濟之餉銀軍火。均由該道派員轉送。又查有運司銜前湖北荆宜施道雷維翰。前因告病開缺。病痊請咨後。旋丁父憂。該道籍隸鉛山。與閩屬崇安光澤等縣毗連。人地均所熟悉。現聞崇安等縣搬掠一空。米鹽均無購處。擬由廣信採辦米

石油鹽運至鉛山起岸。由該道督同地方官委解赴營。源源接濟。又候選道李元度。在玉山貴溪一帶防守兩年。於閩浙地勢要塞皆所洞悉。該道員自衡州以來。從臣最久。臣由鉛山進剿。已札調該道酌帶平江勇一營。隨臣赴閩。即令綜理營務處事件。其餘平江勇各營。并交九江道沈葆楨接管。留防廣信等處。又候選知府王勳。係已故道員王鑫之胞兄。向在王鑫軍營。兄弟協力。所向有功。臣在長沙。已札調王勳來營。與李元度會辦營務處。所有遴員綜理廣信鉛山糧臺。及辦理營務處各緣由。理合附片奏聞。伏乞皇上聖鑒。謹奏。

攻克安仁縣城摺 咸豐八年八月二十四日

奏爲閩賊分股回竄江西。擾入瀘溪金谿。屯踞安仁。官軍移師截剿。攻克安仁縣城。恭摺奏祈聖鑒事。竊臣軍攻道援閩。擬由崇安進剿。業於本月十二日在河口鎮馳奏在案。拜摺後。正在料理成行。疊接探報。邵武光澤之匪。分股萬餘人。竄出鐵牛關。直犯瀘溪。時候補道劉長佑分軍防守瀘界。初七日。迎擊獲勝。以追剿過遠。另股賊乘空撲營。遂至失利。該逆擾入瀘溪。初九日。竄入金谿。十一二日。分擾許灣鄧家埠一帶。十三日。竄入安仁。撫建饒廣處處戒嚴。臣以江西腹地。并巨軍後路所關。必須先行掃蕩。方可入閩。爰於十四日。飭調道員張運蘭。率老湘營自河口拔營往剿。臣亦於十五日。移駐弋陽。以便調度。張運蘭等。行抵貴溪。探報該逆將趨萬年樂平。歸併皖南。卽與候選知府王文瑞分爲兩支。橫截樂萬去路。賊遂折回安仁。踞城抗拒。臣於十七日。加派主簿吳國佐。帶義字營由弋陽馳往策應。并調平江營戰船及水師濟勝營。扼截安仁河面。使賊不能南渡。十九日。卯刻。張運蘭等折赴安仁。行抵青山鋪。命老湘營一二旗伏山之右。副湘營吉左營伏山之左。自率六旗。及侍勇。出中路誘賊。該逆登陣堅守。另以悍賊數千。埋伏城外。見官軍無多。徑犯中路。張運蘭鳴鼓爲號。伏兵從左右殺出。適王文瑞帶隊分三路馳至。我軍力戰。呼聲震天。該逆敗退入城。張運蘭等跟蹤追進。藍翎千總擬保守備周玉田暨外委李益和文春陽首先入城死之。逆黨閉關抗禦。矢石如雨。各勇遂從兩旁攀堞而登。縱火先燒民房。以斷街道。水師戰船。自南面轟擊。該逆無路可逃。城內伏尸山積。約斃四千餘賊。餘黨奪路狂奔。張運蘭等復出東北門。分路追殺。又斃賊約二千人。溺斃千餘。水師轟斃數百。生擒一百七十六名。奪僞印二十顆。僞官照十二張。驟馬百餘匹。綉袍綉帽旂幟軍械之屬數千件。內有綉龍紅呢轎一乘。爲向來所未見。吳國佐一支。因繞道包抄。於城破

後數刻始到。次日仍分路奮追。王文瑞等追二十餘里。殪賊無算。吳國佐追至萬年境內。尙未收隊。此十九日攻克安仁縣城之實在情形也。臣查該逆自閩竄出。牽制我軍。往來後路。飄忽無蹤。幸能獲殲。除訊據賊供。此股人數萬餘。係石逆前隊。僞經略楊在田所帶。逃去者不過二三千名等語。惟石逆是否尙在閩境。未得確探。如無另股竄出。臣擬改道由建溪入雲際關。至光澤進剿。延邵各屬。惟聞景德鎮尙有大股。果否內竄。撫臣尙未可知。臣嘗專視悍賊所在。以定趨向。按察使銜即選道張運蘭。從前路兜截。遲速攻剿。皆合機宜。可否賞加勇號。候選知府王文瑞。可否以道員歸部儘先選用。水陸各營出力員弁兵勇。可否擇尤保獎之處。出自天恩。陣亡擬保守備藍翎千總周玉田。請照守備陣亡例。飭部議卹。以慰忠魂。所有官軍移師回剿。攻克安仁縣城緣由。謹會同江西撫臣覺羅耆齡。恭摺由驛六百里具奏。伏乞皇上聖鑒。訓示施行。謹奏。

劉本傑陣亡請卹片

咸豐八年八月二十四日

正總摺間。接據吳國佐稟報。十九日追剿敗賊。二十日進紮中村地方。二十一日。行七十里。追過萬年。未及午餐。正與賊遇。各弁勇奮擊。殺賊百餘名。適另股接應賊至。我軍深入過遠。被賊包抄。傷亡五六百人。幫辦劉本傑。手刃數賊。力竭而亡。吳國佐力戰斷後。該逆不敢回追。仍竄樂平景德鎮而去。查同知銜即選知縣劉本傑。屢立戰功。此次追賊過猛。死事最烈。合無仰懇天恩。准照同陣亡例。飭部議卹。以慰忠魂。理合附片奏聞。伏乞聖鑒。謹奏。

胡兼善病故請卹片

咸豐八年八月二十四日

再花翎候選同知胡兼善。前年自桂東募勇攻勦龍泉。設計克復縣城。後隨已故道員王鑫。轉戰吉安撫州之間。又隨候選道張運蘭防守吉水。克復建昌及樂安各府縣城池。先後百餘戰。所向有功。本年七月內。以積勞兼受暑濕。至患瘧疾。八月初九日。在軍營病故。該員年甫二十五歲。膽識俱優。方冀更加歷練。爲國家有用之才。遽以病終。可爲憫惜。查該員於克復建昌樂安各府縣案內。經張運蘭稟保。以知府選用。可否仰懇天恩。准照知府軍營病故例。議卹之處。出自逾格鴻慈。謹附片具奏。伏乞聖鑒施行。謹奏。

請四川協餉片

咸豐八年八月二十四日

再臣現調各軍。計額勇一萬二千人。每月口糧及各員弁薪水。除兩湖各協濟二萬兩。江西奏明接濟蕭啓江添

募之營餉銀一萬七千餘兩外。尙不敷銀二萬餘兩。而臣弟曾國荃克復吉安。現擬酌調之營。尙不在此數中。閩浙皆被擾之區。難期饋餉。合無仰懇皇上天恩。敕下四川督臣王慶雲。按月協解臣軍銀二萬兩。由蜀江運至湖北。轉解前進。以期無誤軍行。目下江西全省肅清。數月後如可就近籌濟。臣即飛函告知四川督臣。止其續解。謹附片具奏。伏乞皇上聖鑒施行。謹奏請旨。

移師由杉關入閩摺 咸豐八年九月十三日

奏爲閩賊大股回竄江西新城。官軍移師建昌。由杉關入閩。恭摺奏祈聖鑒事。竊臣軍回勦安仁竄賊。克復縣城。擬改道由雲際關入閩。業於八月二十四日在弋陽縣馳奏在案。拜摺後。於二十七日拔營。二十九日行抵雙港。節據探報閩賊大股三萬餘人。回竄新城。道員劉長佑扼守隘口。連日苦戰。雖迭獲勝仗。而該逆愈來愈多。更番猛撲。又吉安城中。八月初十夜。乘大礮衝出追殺。未盡之賊。尙餘數百人。沿途裹脅。復聚至千餘人。連陷崇仁宜黃。兩縣令殉難。撫建各屬處處戒嚴。臣以撫建兩城收復未久。民心易於動搖。劉長佑一軍。兵力本不甚厚。其分防爐竈各營。曾於八月失利。堵禦閩賊大股。已慮難以支持。復聞崇宜之警。尤恐軍心不固。民間喧傳。石逆全股。希圖回竄。南城等縣。飛書請援。張運蘭亦稟請先救新城。臣遂令張運蘭率所部兼程馳進。臣亦改道南行。回顧建昌。途次接准江西撫臣咨開。八月十四日奉上諭。崇安之賊。竄出岑陽關。現在鉛山河口處處戒嚴。石逆又有竄往建寧爲回竄撫建之計。是江西軍情。亦形喫重。曾國藩已於七月二十一日。行抵江西省城。其前部蕭啓江之兵。已至廣信。著着齡飛咨曾國藩。飭令該道。亟籌堵勦。該侍郎迅即前進。探明賊勢。趨向何處。即往策應。是爲至要。欽此。石逆窺伺撫建之說。遂已上達宸聰。聖天子明見萬里。無微不照。臣督隊進行。初七日馳抵金谿。聞劉長佑大獲勝仗。自八月十九至九月初五等日。竭力痛勦。殲擒之賊。不下二萬人。奪獲騾馬至五百餘匹。賊仍由建寧一帶竄去。接見各團紳民。無不稱爲奇捷。鼓舞歡欣。現建昌邊界均已肅清。崇仁宜黃之賊。亦由南豐竄入閩境。臣於初九日抵建昌府城。擬將撫建寧都各府州防勦事宜。咨商江西撫臣。妥爲布置。即率師由杉關入閩。除劉長佑堵勦獲勝情形。應由江西撫臣奏報外。所有臣移師建昌改從杉關入閩緣由。恭摺由驛五百里具奏。伏乞皇上聖鑒。訓示施行。謹奏。

調派官軍分道入閩摺 咸豐八年十月十六日

奏爲調派官軍分道入閩。現在辦理情形。恭摺奏祈聖鑒事。竊臣稔師建昌。政由杉關入閩。業於九月十三日在建昌馳奏在案。十四日。札派張運蘭一軍。向杉關進剿順昌將樂之賊。派蕭啓江一軍。向廣昌進剿汀州寧化之賊。派吳國佐一軍。赴南豐廣昌石城一帶。擇要駐紮。以爲蕭啓江後路策應。分派已定。值大雨經旬。勇夫多病。二十四日。張運蘭始能拔營。蕭啓江前經奏明給假回籍。二十四馳抵建昌。卽於二十七八兩日分起拔營。吳國佐二十六日拔營。迭接閩省函咨。洋口順昌先後克復。順昌將樂尚有餘匪未淨。大股賊勢併注汀州。分擾寧化及江西之瑞金等縣。據蕭啓江稟稱。汀州寧瑞一府兩縣。賊勢浩大。復有千刀會匪。踞石城縣屬之迴龍砦。臣批飭蕭啓江先將石城會匪剿滅。再行進攻瑞金。俟江境一律肅清。然後進規汀州寧化。適准閩浙督臣王懿德緘商請派勁旅由邵武赴援汀州。並另撥一旅堵賊由汀回竄瑞金石城之路。與微臣意見不謀而合。查江閩交界。中隔大嶺。北自仙霞。南至武平。一嶺綿亙。殆逾千里。大關小隘。處處可通。現派張運蘭由北度嶺。蕭啓江由南度嶺。中間泰寧南豐等處。尙覺空虛。該逆仍可伺隙回竄。而二年以來。賊匪往返蹂躪。嶺內如建昌各屬。嶺外如邵汀各屬。邑井蕭條。百物蕩盡。今歲疾疫流行。居民鮮少。閩中田荒米貴。油鹽無從購買。且無現錢可換。臣駐紮建昌。一面防中路回竄之賊。一面轉運錢米等件。解赴蕭啓江張運蘭兩處。計臣一軍分爲三起。臣距蕭啓江四百餘里。距張運蘭三百餘里。而蕭張相距亦在五百里外。擬俟張運蘭將順昌將樂賊匪搜剿淨盡。歸併汀州一路。臣亦率後隊繼進。三軍先分後合。庶無此勦彼竄之虞。是否有當。伏求聖慈。指授機宜。所有調派官軍分道入閩緣由。理合恭摺由驛五百里具奏。伏乞皇上聖鑒。訓示施行。謹奏。

各營患病情形片 咸豐八年十月十六日

再現在建昌寧都各屬。疾疫流行。爲從來所未見。張運蘭一軍。前拔營之時。留八百人在建昌養病。啓行之後。又續病三百餘人。蕭啓江一軍。據開單稟報病者一千三百五十六人。吳國佐一軍。病者亦不下八百餘人。軍行數日。長夫病困。鍋帳子藥。沿途拋棄。輒遣勇丁回昇病者。兼拾棄物。以此節節遞延。實深焦灼。蕭啓江張運蘭等。平日忠勇奮迅。最爲出力。苟可勉強隨行。斷非肯託故逗留者。臣亦不忍催之。又道員劉長佑一軍。駐守新城。本擬

調赴建昌。俾臣得以督隊入閩。無後顧之慮。而該營積勞過深。患病尤衆。幾於十人而九。不復能以成軍。據稟新城無從覓取醫藥。懇請移駐撫州。稍資調理。已批令暫行赴撫。俟病勢痊愈。卽行回駐建昌。所有各營患病情形。理合附片陳明。伏乞聖鑒。謹奏。

移軍勦景德鎮股匪摺 咸豐八年十一月二十六日

奏爲分調官軍追勦閩省竄賊。並移勦景德鎮股匪。恭摺奏祈聖鑒事。竊臣抵建昌調派官軍。分道入閩。及各營患病情形。業於十月十六日恭摺馳奏在案。拜摺後。張運蘭一軍。行抵邵武府城。節據稟稱。順昌將樂。業已無賊。汀州寧化各城。次第收復。惟連城尙有餘匪。人數閩亦無多。大股逆賊。併趨江西之寧都各屬等語。接准閩浙督臣函咨。大略相同。又據蕭啓江及贛南道汪報閩先後稟稱。閩賊回竄江西者。約分三起。一起長髮。係石國宗統帶。一起花旗。大半皆南康萬安贛縣之匪。係何先鋒傳檢點統帶。一起廣碼。係羅都督盧檢點統帶。先竄瑞金會昌零都等縣。近則三縣皆已無賊。盡竄信豐及南安府界中。意在窺伺贛州。回竄廣東等語。又據劉于濤彭玉麟先後稟稱。景德鎮官兵。於十月二十八日失利。鱧魚山營壘被陷。賊氛日熾。恐其內犯贛信下游。東流縣復陷。恐其合景德鎮股匪。再竄湖口。擾及九江各等語。稟報到臣。伏查臣現駐建昌。東有福建連城之賊。南有信豐之賊。北有景德鎮之賊。以遠近言之。去臣營皆在五百里之外。以緩急言之。連城之賊。其數尙少。其勢已衰。閩事不足深慮。信豐之賊。或圖踞贛南。或謀竄楚粵。均屬可虞。然愈趨愈南。愈去愈遠。追逐不及。尙有長避官兵之意。景德鎮之賊。無論東犯贛信。西犯湖口。皆爲莫大之患。迭接湖廣督臣等函咨。自三河敗潰。安慶撤圍。大江北岸。業已防不勝防。若使南岸彭澤湖口復有蹉跌。則九江亦且岌岌可危。就大局而論。景德鎮情形。又較重於南路。江西撫臣耆齡亦兩次函咨。商請撥兵往援。適值汀州寧化肅清之後。張運蘭自閩折回。將赴寧贛。臣因調之馳回建昌。面商機宜。卽日令其赴景德鎮。與劉于濤會同勦辦。縱不能助江北之勢。但使保全饒州湖口。卽於九江兩岸。不無裨益。其信豐南安之賊。一面飛咨江西撫臣飭地方官認真防守。一面札飭蕭啓江跟蹤緊追。以冀痛加勦洗。不留餘孽。是否有當。理合恭摺由驛五百里具奏。伏乞皇上聖鑒。訓示施行。謹奏。

蕭啓江擒捕潮匪片 咸豐八年十一月二十六日

再前據蕭啓江稟稱。訪聞石城駐紮潮勇。恃衆騷擾。拆毀民房。搶奪財物。虜掠婦女。無所不至。並有暗通賊匪情事。當經批令密察實情。設法懲辦去後。茲據稟。該道行抵小松地方。所接石城縣紳民控告潮勇荼毒呈詞。不下數百紙。詢據石城縣知縣張銘。所稟情形與各紳民所控大略相同。並稱久思稟稱究辦。因恐激成事端。是以未敢妄動。蕭啓江即密諭各營。戒備入城。本擬誘致勇目。誅治首惡數人。其餘分別辦理。不意官兵入城時。潮勇隊目許朝金竟敢率黨持械抗拒。官兵分門並入。敗其前隊。許朝金猶敢踞守縣前典鋪。排列槍礮刀矛。轟擊格鬪。鏖戰經時。始將典鋪攻破。殲其凶黨。生擒許朝金及潮勇四十七名。搜獲賊旂多面。並於辮髮中搜出一太平天國一暗號。又於潮勇所住公館內。查出被虜婦女幼孩百餘人。隊目盧友道方赴鄉搶掠。亦經團衆捆送到縣。查潮勇通賊擾民。種種不法。均曰確有實據。地方紳民。無不切齒痛恨。許朝金盧友道應即立正軍法。以快人心。除札飭遵照。並令安撫居民。搜捕土匪外。理合附片陳明。伏乞聖鑒。謹奏。

陳明石逆情形片 咸豐八年十一月二十六日

再逆首石逆聞。狡悍爲諸賊之冠。本年三四月間。臣在本籍。聞石逆率賊十餘萬。竄擾浙江。八月初間。臣行抵河口。聞石逆屯踞崇安之婺源星村一帶。九月間。又聞該逆回竄新城。臣即馳至建昌。並將石逆蹤跡。先後馳奏在案。入冬以來。察看入閩出閩之賊。勢亂而無紀。氣散而不整。迥不似石逆往年情形。又據擒獲賊探。及賊中逃出之人。所供賊目。亦只有石國宗敦天燕何先鋒傅檢點羅都督盧檢點等名色。無有知石逆所在者。前此順昌洋口。僉稱石逆在內。近日瑞金信豐亦稱該逆在內。皆係謠傳。恫恍之詞。或云該逆已伏冥誅。或云中途薙髮潛逃。二說雖不甚確鑿。然大約石逆不在此股賊內。則事有可信。謹附片陳明。伏乞聖鑒。謹奏。

遵旨斟酌具奏摺 咸豐八年十一月十一日

奏爲遵旨覆奏。仰祈聖鑒事。竊臣分調官軍追勦閩省竄賊。並移勦景德鎮股匪。業將辦理情形。於十一月二十六日恭摺馳奏在案。二十八日。承准軍機大臣字寄。十一月十一日奉上諭。一。駱秉章奏楚軍失利。閩賊漸遠。請飭會國藩移師援皖一摺。李續賓一軍。進攻三河。全軍失陷。至今尙無下落。都興阿圍攻安慶之師。亦經撤回宿松一帶。皖北賊勢鴟張。楚省邊防喫緊。諒會國藩亦必有探報。此時閩省之賊。已南趨漳泉。距江西漸遠。若照略

乘章所請。令該侍郎移師赴皖。而留蕭啓江所部四千餘人防守江西。亦未始非權衡緩急之計。惟會國藩所部各軍。多染疾疫。前奏尙須休息。且景德鎮尙有大股逆匪。隨勦隨進。亦非計日可到。若會國藩預爲籌度。如果閩省賊匪。本省兵勇足資勦辦。而江西邊境。防勦有人。自以赴援皖省。尤爲緊要。不但廬州省城。可收南北夾攻之效。卽上竄湖北之路。亦可藉資堵扼。倘汀州寧化等處。尙須兵力。一時不能移軍。或須俟景德鎮股匪殲除。再回楚北。亦著斟酌具奏。將此由六百里諭令知之。欽此。一臣伏查近日賊勢。以皖江南北兩岸爲最重。皖南約分兩路。中隔大山。如彭澤之浩山。祁門之歷山。績溪之鄣山。以及黃山九華。皆此一山之所綿互。自山以北。如貴池銅陵。下至蕪湖當塗。濱江各屬。自咸豐三年以來。久爲粵匪出沒之區。自山以南。現惟婺源景德鎮兩處有賊。兩處之賊不除。則饒廣徽衢四府。時時可危。若能驅除兩處之賊。逐出山外。歸併江邊。則江浙兩省防務皆鬆。而皖南亦有「一條鞭」之勢。辦理較易得手。皖北約分兩路。中隔一湖。周圍四百餘里。名曰焦湖。自湖以南。如安慶無爲巢縣和合各屬。久爲粵匪盤踞之所。自湖以北。如廬州鳳陽以及淮北各屬。則粵匪與捻匪錯雜紛擾。幾至汗漫而不可收拾。則此都與阿之師。由石牌進攻安慶。勢趨江南。卽臣二年五月摺內所稱外一路者也。李續賓之師。由舒桐進勦廬州。勢趨江北。卽臣五年摺內所稱內一路者也。自十月中旬。三河桐城相繼挫敗。安慶撤圍。湘軍死者逾五千人。士氣大傷。逆氛日熾。皖北賊勢之浩大。實倍甚於皖南。遠十一月初。將軍都興阿總兵鮑超屢獲勝仗。湖廣督臣王文分派各軍防布要隘。撫臣胡林翼聞警起復。馳赴李續賓軍中。重加整頓。楚皖之交。人心漸定。而皖南自灣址黃池之變。戴文英鄧紹夏先後殉難。亦恐其悉力上竄。合景德鎮之股匪。擾及湖口。窺伺九江。以臣愚見。論大局之輕重。則宜併力江北。以圍清中原。論目前之緩急。則宜先攻景德鎮。以保全湖口。臣於前月二十六日奏明後。卽札張運蘭一軍。於臘月初二日。自建昌啓行。馳勦景德鎮。計十四五可以接仗。臣亦擬於正月初旬。移駐鄱陽彭湖等處。聯絡水師。先固南岸。屏蔽九江。與宿松都興阿等營。不過一江之隔。百餘里之遙。如果北岸有警。亦可就近策應。至諭旨垂詢閩省賊匪。江西邊防一節。查福建之汀州寧化。次第收復。僅連城有賊。爲數無多。臣前摺業經奏明。本省兵力當足以資勦辦。閩賊之回竄江西者。臣前次奏明。盡入信豐及南安府界中。頃接稟報。南安被圍。信豐之賊。亦尙未退。蕭啓江所部病勇新愈。臣已飭其迅速追勦。將來此股賊匪。或久

擾南贛。或分竄楚粵。蕭啓江一軍。或隨臣北行。或留防南路。應俟賊蹤既定。相機調遣。續行具奏。所有邊省斟酌具奏緣由。恭摺由驛五百里馳奏。伏乞皇上聖鑒。訓示施行。謹奏。 硃批。覽奏均悉。所擬尙屬妥協。欽此。」

目疾請假片 咸豐八年十二月十一日

再臣自咸豐六年卽染目疾。七年正月。奏明在案。兩載以來。迄未全愈。本年十月。聞三河桐城之挫。親友殉節者多。大局頓壞。憂鬱之餘。目光愈蒙。難於開視。相應奏明。懇恩賞假一月。卽在軍營調理。伏乞聖鑒。謹奏。

通籌全局請添練馬隊摺 咸豐九年正月十一日

奏爲邊省通籌全局。並陳近日軍情。仍請添練馬隊。以圖進取。恭摺奏祈聖鑒事。竊臣前調蕭啓江一軍。赴援贛南。張運蘭一軍。進攻景德鎮。並遵旨斟酌援皖事宜。於十二月十一日。恭摺馳奏在案。嗣承准軍機大臣字寄。咸豐八年十二月初八日奉上諭。王懿德奏請飭會國藩暫緩移師。留張運蘭一軍。保衛閩境一摺。會國藩援閩之師。前因所部兵勇。多染疾疫。暫駐建昌調度。徐圖拔隊。繼進。嗣值李續賓全軍失利。皖北賊勢披猖。經駱秉章奏請飭令該侍郎移師援皖。留蕭啓江所帶四千餘人防守江西。當經諭令會國藩。尙因汀州等處。尙須兵力。江西景德鎮。大股匪徒。尙未盡殲。未能卽日由楚入皖。令其斟酌情形具奏。茲據王懿德奏。接會國藩咨稱。擬率卽還道。張運蘭等軍。赴楚勦辦。該督以閩省賊熾。兵單。連城尙被占踞。接壤之饒州。寧都等府州。紛紛告警。專賴會國藩大軍。鎮定邊陲。其前部張運蘭一軍。已抵邵武。轄境正資協助。未可撤回。所奏亦係實情。著會國藩通籌大局。如閩省賊匪。滄頹援軍。卽將張運蘭一軍。暫留攻勦。與王懿德會商辦理。至湖北防堵。現已周備。惟皖南北粵。搶營集。有須兵力。而江西地方。尙有大股匪賊。該侍郎亦難舍近而圖遠。仍著斟酌調度可也。將此由六百里各諭令知之。欽此。臣才識短淺。何足以規畫全局。就近處數省而論。則安徽軍務最爲喫重。江西次之。福建又次之。皖南中界一山。皖北中隔一湖。兩路賊勢。臣前疏已詳悉具奏。近聞福建之賊。尙踞連城。江西之賊。竄入南安。贛州戒嚴。定南崇義相繼失守。以臣愚見。連城之賊。閩省兵力。應足了之。南贛之賊。人數尙多。悍者較少。非一枝客軍所能猝辦。必須本省兵力。輔以團練。方可徐起有功。惟安徽賊黨。其氛甚惡。其患方長。大凡官軍與賊。此消則彼長。彼消則此長。斷無中立之理。我能進而勦賊。則賊將竭力禦我。不暇他竄。我不能進而勦賊。則賊將乘隙

犯我。旁出四盜。皖南無進剿之師。則賊必東犯浙江。皖北無進剿之師。則賊必北犯齊豫。故就一隅觀之。則江西之南贛。福建之連城。均是賊黨。均須兵力。不可舍近而圖遠。就全局觀之。則兩利相形。當取其重。兩害相形。當取其輕。又不得不舍小而圖大。舍其枝葉而圖其本根。誠使大江兩岸各置重兵。水陸三路。鼓行東下。勦皖南則可分金陵之賊勢。即可紓浙江之隱憂。勦皖北則可分廬州之賊勢。即可紓山東河南之隱憂。方今湖北全省肅清。然與皖境處處緊接。防不勝防者。莫如湖北。據上游之勢。能制皖賊之死命者。亦莫如湖北。臣與官文胡林翼等熟商。就現在之兵力。稍加恢廓。北岸須添足馬步三萬人。都與阿李續宜鮑超等任之。中流現有水師萬餘人。楊載福彭玉麟任之。南岸須添足馬步二萬人。臣率蕭啟江張連蘭等任之。三道並進。夾江而下。幸而得手。進占十里。則賊蹙十里之勢。進占百里。則賊少百里之糧。即不甚得手。而上游之勢既重。即下游之賊不得不以全力禦我。其於金陵廬州兩大營。均足以抽釜底之薪。而增車外之輔。此邊旨通籌全局。宜併力大江兩岸之微意也。至臣處近日軍情。蕭啟江一軍。自石城拔營南赴粵都。據稟南贛各屬賊蹤蔓延。力難兼顧。臣批令專救贛州。以保要郡。不必旁顧他處。張連蘭一軍。自臘月十七日。馳抵景德鎮。十九日。吳國佐小挫一次。二十七日。張連蘭大勝一次。開仗情形。由臣另摺具報。贛州居江西之極南。景德鎮居江西之極北。相距千有餘里。臣駐建昌。距兩軍各五六百里。調度不靈。轉運不便。且兩處皆孤軍深入。賊衆兵單。日夜焦思。無師可濟。臣前次摺尾聲明。蕭啟江之軍。或留防南路。或隨臣北行。容俟續行具奏。近日詳加體察。顧此則失彼。顧南則失北。與其懸心兩地。不若專力一方。已咨商江西撫臣耆齡。請其另調勁軍。可勦南贛。兼辦團練。以散脅從。臣即專辦北路。調回蕭啟江一軍。歸併饒州彭湖等處。在江西則臣管北邊。耆齡管南邊。在皖楚則臣攻南岸。都與阿等攻北岸。地有分防。斯實無旁貸。師有定向。斯士無二心。免致到處牽掣。一無所成。此臣處近日軍情。擬調蕭啟江并赴北路之微意也。臣往歲在軍未聞賊匪能用馬隊。近聞粵匪常以馬隊衝鋒。搶匪則馬匹尤多。李續賓三河之敗。即係賊馬數千。爲湘軍向來所未見。昨吳國佐景德鎮之挫。亦爲賊馬所眩。今欲整頓陸軍。不得不添設馬隊。東三省馬隊。天下勁旅。根本所在。不敢多爲奏調。臣與湖北督臣撫臣斌商。擬由官文等奏調察哈爾馬三千匹。請旨飭上駟院押解來南。續毫一帶。有善騎之勇可募。名曰馬勇。應即添練新馬隊二千餘騎。與都與阿之舊隊相輔而行。於九江湖口等

處。擇平原曠野。馳騁而操練之。惟以南人而騎北馬。以勇丁而學弓箭。非倉卒所能奏效。臣願竭數月之力。朝夕講求。從容訓練。期於成熟而止。練成之後。以二千匹交江北。隸都與阿舒保麾下。以五百匹交江南。隸臣麾下。以壯步軍之氣。而寒賊黨之膽。餘剩馬匹。遊牧於黃州。鞍轡等具。設局於九江。以備隨時添補更換之用。仰仗皇上威福。茲事若成。皖豫等省軍務。可期大有起色。此添置馬隊。臣願自任教練之微意也。溯自咸豐六年。洪楊內亂。河北肅清。武漢再克。臣方慶幸。以爲大難計日可平。不謂遷延歲月。粵匪未清。捻匪復滋。餉項有日竭不支之勢。將士有久疲思退之心。若非奮發精神。變換局面。將有類乎古人所謂情氣歸氣者。不得不改弦更張。亟思所以振之。區區微忱。謹就近三省軍事。遵旨通籌全局。恭摺覆奏。伏乞皇上聖鑒。逐條訓示施行。謹奏。

李續賓死事甚烈功績最多摺 咸豐九年正月十一日

奏爲巡撫銜浙江藩司李續賓死事甚烈。功績最多。恭摺奏祈聖鑒事。竊臣於上年十月。聞皖北三河鎮官軍失利。比念李續賓剛烈性成。必已見危致命。惟相距過遠。未悉其死事情形。茲據其胞弟李續宜稟稱。李續賓自攻克濟太舒桐四縣後。遵旨進攻廬州。因三河鎮爲舒廬衝要。賊築僞城一座。堅壘九座。九月二十八日。進紮三河。十月初二日。親攻九壘下之。適粵逆陳玉成率大股賊。自六合廬江來援。捻逆張樂行率大股賊。自廬州來援。衆十餘萬。晝夜兼程。直趨金牛鎮。連城數十里。抄大軍後路。李續賓所部。除留防九江及舒桐外。隨征不過五千餘人。又攻壘血戰。銳卒損傷過多。遂飛調防兵策應。未及至而賊已來逼。初十日。派隊迎擊金牛鎮。戰樊家渡。已獲全勝。忽左路出賊數萬。乘霧來鈔。我軍迴戈返鬪。前後受敵。參將彭友勝。游擊胡廷槐。饒萬福等力戰死之。餘皆截阻不能歸營。李續賓自領親兵救應。而僞城之賊。復出與援賊相合。我軍四面被圍。初更時最後兩營。李續蕙彭祥瑞越壘衝出。於是賊踞其壘。斷我軍去路。或勸以突圍退保。無難再振。李續賓曰。「某在軍前後數百戰。每出隊卽不望生還。今日固必死此。有不願從死者。請各爲計。」各員弁皆跪泣曰。「某等願從公以死報國。不願去。」李續賓具衣冠望闕叩首。二鼓向盡。怒馬直出。赴悍賊林立處死之。臣胞弟曾國華及何忠駿何裕王揆一李續藝。吳立蓉。葛斛源等皆死之。而副將李存漢。道員孫守信。運同丁銳義等。猶督守孤壘。以俟桐城援兵。至十三日亥刻。子藥水米俱盡。孫守信等死之。十九日。賊攻桐城。李存漢趙友財謝嗣湘李景均等死之。桐城復陷。凡

湘軍員弁兵役。隨李續賓死者。近六千人。十一月。三河附近紳民。從賊中覓得李續賓尸骸。潛送霍山。迎至黃州。卽將返葬湘鄉。各等情稟報到臣。伏查李續賓戰績。自咸豐三年赴援江西。克復太和安福永興。有江西湖南奏報。四五兩年。攻克岳州武漢廣信等處。有臣國藩奏報。六七八等年。攻克武漢九江皖北各處。有官文胡林翼等奏報。各在案。此次死事之烈。官文等必詳奏請卹。惟臣與李續賓從事較久。相知頗深。有不得不瀆陳於聖主之前者。李續賓初援江西。爲謝夢章營中幫辦。嗣隨羅澤南征勦各處。循循弟子。退然若無所知。不自表異。人亦未有以異之。逮岳州大橋之戰。塔齊布獨稱湘勇白旗爲無敵。賊亦深畏白旗。白旗者。李續賓所部右營也。旣而田家鎮之役。以少勝衆。九江之敗。士卒多逃散。獨右營勇丁依依不去。然後衆稱其賢。得士心矣。猶復弱粥無能。轉戰江西岳鄂之間。經過州縣。不見一客。稠人廣坐。不發一語。自楚軍之興。人人皆以節烈相高。或涅臂自盟。或歃血共誓。慷慨陳詞。預相要約。李續賓獨默然深藏。初不預作激烈自許之言。然忠果之色。見於眉間。遠近上下。皆有以信其大節之不苟。臣所立湘勇營制。編隊立哨。略仿古法。計事受糈。皆有定程。行之旣久。各營時有變更。惟李續賓守法五年。始終不變。嘗謂臣曰。「立法者但求大段妥當。行法者嘗於小處彌縫。」臣初定湘營。餉項稍示優裕。原冀月有贏餘。以養將領之廉。而作軍士之氣。李續賓統營旣多。歷年已久。節省贏餘。及廉俸至數萬金。不寄家以自肥。概留備軍中非常之需。咸豐六年冬。曾寄銀五千兩於南昌。濟臣糧臺之急。七年冬。又寄銀萬兩至吉安。濟臣弟曾國荃一軍。又寄三千兩至貴溪。濟李元度一軍。此外贏餘銀兩。亦皆量力濟人。不忍他軍饑而已軍獨飽。往者故撫臣江忠源嘗論兵勇利病。勇則畛域不分。而患其蹤跡無定。此之所革。彼之所收。兵則尺籍有定。而患其界限太分。勝不相讓。敗不相救。兵則規矩較肅。而患其無陷陣剛猛之風。勇則銳氣較斬。而患無上下等威之辨。故用兵以和爲貴。用勇以嚴爲貴。李續賓馭下極寬。終年不見溫色。而弁勇有罪。往往揮涕而手刃之。甲寅十月。在田家鎮。新退怯之勇。臣奏牘稱其有名將之風。故刑人無多。而歲久無敢弛慢。至於臨陣之際。專以救敗爲務。以顧全大局爲先。遇賊則讓人禦其弱者。而自當其悍者。分兵則以強者予人。而攜弱者以自隨。或攜隨數次。弱者漸強矣。則又另帶新營以自隨。江楚諸軍。每言肯攜帶弱兵。肯臨陣救人者。前惟塔齊布。後惟李續賓。此次三河之敗。亦由所部強兵。分留湖北。分撥臣處。分防九江。分駐桐城。而多攜弱者以自隨。其仁厚在此。

其致敗亦未始不由乎此。此軍民所尤感泣不忘者也。臣昔觀李績賓厚重少文，百戰無挫，私心慰幸，以爲可躋中興福將之列，不意大難未夷，長城遽隕。督臣官文等具奏請卹，想蒙聖慈矜鑒。臣與李績賓同縣姻戚，不敢飾辭溢美，亦不敢沒其忠勳。謹就風昔所知，續陳宸聽，伏乞皇上聖鑒，飭付國史館查照施行。謹奏。

會國華殉難三河鎮摺 咸豐九年正月十一日

奏爲臣弟會國華殉難三河鎮，恭摺奏祈聖鑒事。竊臣自上年十月間皖北三河鎮之敗，即知臣弟會國華同時殉難。因道路遙遠，傳聞鮮據，專丁函詢李續宜及都與阿鮑超等處，又派人至舒城附近查訪，旋接各路先後函稟。三河營壘於十月初十日被圍，是夜二更後，李績賓怒馬赴敵死之。臣弟會國華與李績賓兒女姻親，又謀人之軍，義不可以獨生，亦衝騎赴賊中死之。同幕諸客如何忠駿、何裕王揆、李績藝、吳立蓉、萬斛源等，同時併殉。惟孫守信復堅守兩日，至十三夜，乃從容就義等情。溯查咸豐五年十月，翼賊石達開率衆由湖北通城竄入江西，勾結廣東匪徒周培春等，自湖南茶陵州竄入，與石逆會於新昌縣，連陷瑞臨、袁州三府。六年春，又陷吉安、撫建三府。臣所部諸軍，羅澤南既先赴湖北，周鳳山又敗於樟樹鎮，臣不得已率水師入援省城，而令李元度、陸軍進攻撫州。維時人心震驚，道路梗阻，楚軍不得通鄉書，因募死士蠟丸隱語，回楚乞救。賊亦懸賞購奸民捕殺，湖南致書者無一倖免。臣幾有岌岌坐困之勢。臣弟會國華馳赴武昌乞師，以救江西。經湖北撫臣胡林翼奏委國華統領普承堯、吳坤修、劉騰鴻各軍赴援，遂由咸寧蒲圻沿途迎勦，取道萬載，攻克新昌上高。兩月之間，連復六縣，遂圍瑞州。由是江西湖南始通音問，而國華積勞致疾，就醫南昌，與臣握手相見，悲喜交集。蓋以新募之衆，千里來援，節節攻打，摧江西十餘萬之賊，鏖戰於酷暑烈日之中，艱險備嘗，乃有此兄弟會晤之一日也。病痊，仍回瑞州督勦。七年正月，臣赴瑞州與國華定計合圍，掘長壕三十里，斷賊接濟。二月，丁父憂，弟兄奔喪回籍，厥後瑞城克復，尙未變國華原定之規模。臣叔父曾驥雲無子，以國華爲嗣。八年二月，降服期滿，四月，李績賓調赴湖北，奏明留營幫辦，相與講求戎政，晨夕商酌。國華性好讀史，頗懷大志，於古人艱危之境，反復推究其得失。平昔持論過高，臣恆誠之。近日議論軍事，漸歸於精細穩實，與李績賓兄弟意見多合。十月初九日，猶以家書寄臣，稱援賊屬至，各營意欲退保，國華與主帥堅持不退，二人謀合，必不爲衆說所播等語。豈料其發信之次日，卽爲致命。

之秋。而其堅持不搖之計。卽爲全軍併殉之機也。七年五月間。欽奉恩諭。有「會國華帶勇援應。一門忠義。實深嘉尚」之褒。跪讀之下。感激涕零。今幸臨危不苟。仰副聖慈。捐糜以報生成之德。在門戶亦足增榮。子弟得附忠義之林。在臣心更復何恨。特以臣叔父年齒日高。倚閭望切。孤姪曾紀壽幼稚無依。臣六載軍中。愆尤叢集。卽手足私愛。亦覺愧負良多。建昌去舒城千有餘里。兵力不能逮及。山川間隔。日月寢淹。骸骨未收。遺恨難雪。追思昔年。若無國華援救。臣無以至今日。臣軍無以圖倖全。卽江西亦無以轉危爲安。憫念微勞。不忍不瀆陳於聖主之前。至於例得卹典。應由湖北督臣撫臣彙案具奏。臣不敢妄爲乞恩。伏祈皇上聖鑒。訓示施行。謹奏。

調饒廷選來江片 咸豐九年正月十一日

再臣前摺聲明擬於正月初旬移駐鄱陽彭湖等處。比卽咨商江西撫臣耆齡。撥兵來建昌換防。頃准復函。以贛南方棘。無兵可撥。欲臣營駐建昌。兼防閩賊內竄等語。查南路防勦喫緊。而連城一股。經閩兵阻截。難保不回竄江西。且臣拔營北行。去蕭啓江一軍愈遠。聲息難通。目下有不能遽行移營之勢。自應暫留建昌。相機辦理。再查建昌寧都各屬。別無防兵。江閩交界。千里空虛。贛南鎮總兵饒廷選。帶兵在閩。前因患病未痊。經督臣王懿德另派豫祺接統連城諸軍。入春以來。饒廷選病體當已漸愈。該總兵係江西省地方官。曾奉旨歸臣調度。前守廣信衢州。著有成效。合無仰懇天恩。飭令饒廷選酌帶所部。前來江西。或駐紮寧都建昌。或卽赴贛州本任。應俟臨時酌奪。臣與耆齡往返函商。意見相合。如蒙飭調。則南路邊陲有備。兼可爲閩境聲援。所有臣軍暫緩移營。及請調總兵來江各緣由。理合附片陳明。伏乞皇上聖鑒。謹奏。

謝年終恩賞摺 咸豐九年二月初九日

奏爲恭謝天恩事。咸豐九年正月十三日。臣在建昌軍中。承准軍機處咨開。十一月二十七日。由內交出年終賞福字荷包銀錢銀錄食物等項。交兵部由驛馳遞等因。到臣當卽恭設香案。望闕叩頭祇領。竊臣屢渠謬典。豹略多疏。虛擲年華。空糜歲廩。神馳北極。正殷戀闕之忱。春滿東郊。忽荷自天之寵。奎章日麗。瞻轡畫以迎祥。宸翰星輝。備笑疇而賜綏。重以紫羅之佩。益切華袞之榮。赤仄朱提。傳內府金刀之式。黃封綠乳。分尙方玉食之珍。迭沛鴻施。重回鼇戴。臣惟有勉驅騫駕。迅掃狼烽。以期仰答高厚生成於萬一。所有微臣感激下忱。理合繕摺叩謝天

恩。伏乞皇上聖鑒。謹奏。

謝會國華追贈優卹恩摺 咸豐九年二月初九日

奏爲恭謝天恩。仰祈聖鑒事。竊臣弟會國華上年十月初十日在三河鎮殉難情形。業經臣專摺奏陳在案。昨准湖廣督臣官文恭錄咨會咸豐八年十二月十八日奉上諭。候選同知會國華著追贈道員。照道員例從優議卹。欽此。臣聞命之下。悲感難名。伏念臣弟國華。一介書生。滿腔熱血。鶴原急難。虎穴孤行。爲畫救趙之謀。會作乞秦之舉。轉戰千里。遠下六城。東道始通。西江無急。乃長圍之甫合。適銜卹以遄歸。梓里言旋。筠州亦克。嗣以降服期滿。重赴皖營。與李續賓共濟艱危。誓同患難。遠三河之失利。竟一蹶而偕亡。田橫之客俱從。先軫之元未返。幸邀恩卹。得備哀榮。贈秩監司。延光苗裔。魂招千里。淚滴九泉。昔荷「一門忠義」之褒。今切百世馨香之典。執干戈以衛社稷。聊據自靖之忱。聽鼓鼙而思將臣。渥荷非常之澤。闔門銜感。累葉增榮。臣仰沐殊施。愴懷同氣。志不忘乎溝壑。名已重於泰山。在胞弟黃壤有知。敢忘結草銜環之報。在微臣素餐無狀。永矢臥薪嘗膽之誠。所有感激下忱。理合繕摺附驛叩謝天恩。伏乞皇上聖鑒。謹奏。

蕭啓江在南康勝仗摺 咸豐九年二月初九日

奏爲蕭啓江一軍。在南康大捷。攻克新城壘及池江等處賊巢。現在馳救信豐。以期力解城圍。恭摺奏祈聖鑒事。竊臣於上年十一月。檄調蕭啓江由石城赴援贛州。業經奏明在案。接據該道稟報。本年正月初五日。行抵贛州。其時南康喫緊。兼署南安府周汝筠所帶各勇。不敷堵剿。遂於十六日抵南康。查探得前陷南安之賊。一支爲僞翼府宰制陳亨容傳忠信何名標。一支爲僞渠帥蕭壽鑽蔡次賢。一支爲僞尙書周竹岐李遇隆。一支爲僞軍略賴玉新黃玉發。一支爲僞承宣劉逸才張遂謀。衆至七八萬。希圖由南康直犯贛州。在新城壘地方築立僞城。開濠列柵。設望樓百餘座。占踞村莊二十餘里。其首逆則踞池江地方爲第二巢。傳聞石甕開尚在此路。勢甚披猖。十七日。蕭啓江抵賢女埔。因賊衆兵單。可以智勝。難以力取。遂傳令偃旗息鼓。商令管帶田勇之知縣周慶榕。府經歷周慶夏等。先行出隊誘賊。楚軍設伏待之。十八日出隊。銜枚疾走。埋伏赤石塘地方。周慶榕帶田勇三千。直逼新城壘。誘賊出巢。田勇者。贛南團練按田派出之勇也。賊素輕田勇。鳴角出隊。約六七萬人。漫山遍野。田勇開

槍數次。佯敗誘之。賊不虞楚軍之驟至也。猛追七八里。蕭啓江砲聲爲號。伏兵四起。先將去路截斷。前營參將梁萬貴。左營參將胡中和。奇勝軍都司黎得盛。由左路截擊。右營游擊毛治祺。後營知府劉嶽昭。新果營都司唐星照。由右路截擊。蕭啓江出親兵及中營游擊秦華祝。副果營縣丞戴齡。由中路迎擊。賊見楚軍旗號。天外飛來。敗後丟棄軍械。狼狽就戮。伏尸徧地。煙焰迷天。田勇亦乘勢截殺南岸之賊。該逆退過浮橋死踞。胡中和梁萬貴帥隊衝入。正酣戰鬥。忽到悍賊七八千。旂色鮮明。與前迥異。我軍殊死戰。賊又敗北。追過數里。接應賊復至。適我軍接應亦到。追過新城墟十餘里。踰麻布隴至小溪界。申刻分番收隊。往返九十餘里。除田勇斬獲不計外。楚軍斃賊二千餘名。生擒二百一十名。陣斬僞渠帥統戎檢點慶天侯指揮將軍之屬。搜獲僞印四十二顆。大小旂五百零八面。均解建昌老營。此十八日大獲全勝。攻克新城墟之實在情形也。二十日。蕭啓江進攻池江賊巢。諜報賊數甚少。恐有詭謀。行過麻布隴。列陣以待。蕭啓江自率數騎。登高瞭望。知賊有伏。傳令勿進。正收隊間。田勇在前者。忽蜂擁奔回。先是十八之勝。田勇奪獲賊賊最多。遂益放膽。是日集者約四萬人。與楚軍隊伍相間雜。田勇見賊即進。被賊轟斃二人。旋即返奔。伏賊四起。官軍隊伍。爲田勇所亂。該逆愈撲愈衆。胡中和毛治祺。劉嶽昭。黎得盛。唐星照。梁萬貴。秦華祝等。力戰斷後。槍斃殺斃二百餘賊。都司龍復勝。把總洪復勝等戰死。各路無兵接應。退至麻布隴。仍卓旗迴馬。衝擊數次。返追二里。斃賊百餘名。斬僞官二騎。賊始退奔。是役斃賊三百餘名。生擒十九名。奪僞印二顆。我軍亦陣亡二百六十四名。各將士憤欲再戰。二十二日。仍出伏麻布隴沿河一帶。而以二三旂誘賊。賊竟不出。僅出數百人。往來不定。我軍奮追。生擒三人而返。據供十八二十兩役。賊中死者甚多。蕭啓江等遂於二十四日再攻池江。仍埋小溪一帶誘賊。竟無影響。久之對岸村莊出四五千賊。捲旂而前。我軍進擊。轟斃多名。田勇亦到。賊黨奔逃。我軍離營太遠。遂未窮追。立將池江小溪鳳凰墟長江墟等處賊巢焚燬。敗賊均竄近南安府城一帶。正欲跟追。適接周汝筠函稟。信豐被圍數月。軍米告竭。岌岌可危。不能不先其所急。且信豐崇義未靖。遽以孤軍進逼南安。亦虞後路鈔截。蕭啓江遂飭周慶榕等。嚴紮新城墟要隘。而潛率所部。由龍迴一帶。馳赴信豐。西路總兵遮克敦布。現紮信豐北路。約定環攻。冀可迅解城圍。然後會合遮克敦布。進攻南安。庶兵力厚而無牽綴之慮。此二十日小挫。二十四日焚燬池江小溪鳳凰墟長江墟賊巢。及現援信豐之實在情形。

也。據蕭啓江節次稟報前來。臣查南安各屬。賊勢浩大。經蕭啓江設伏制勝。雖二十日小挫。旋即鼓勇進攻。該逆棄壘遁逃。其氣已奪。惟信豐官民。苦守圍城數月。若不竭力救援。何以勸守土之吏。且信豐崇義不能掃蕩。亦未便孤軍深進。臣現批飭如稟辦理。一俟解圍後。會合遮克敦布。再圍南安。庶勦辦更易得手。所有陣亡之都司龍復勝。藍翎把總洪復勝。陶泰益。歐得勝。朱源。魯再高。譚懷玉。蕭清元。把總謝明高。藍翎外委徐清貴。外委張連陞。余鳳山。蕭品南。李春元。章隆泉。謝仁。四陳高陞等十七員。應請飭部各照本職從優議卹。以慰忠魂。除飛咨湖南撫臣派兵從郴州各屬。以勦爲堵。合力夾擊外。所有十八日大捷。攻克新城。墟賊巢。二十日小挫。二十四日攻破池江等處賊寨。及現援信豐各緣由。理合會同江西撫臣耆齡。由驛六百里馳奏。伏乞皇上聖鑒。訓示施行。謹奏。

張運蘭攻勦景德鎮情形摺 咸豐九年二月初九日

奏爲張運蘭一軍攻勦景德鎮小挫兩次。大勝一次。現仍守隘相持。濟師助勦。恭摺奏祈聖鑒事。竊上年十二月。臣調張運蘭等進勦景德賊巢。節經奏明在案。該道等於臘月十五日。由樂平拔赴柳家灣。探得鎮賊三四萬人。與婺源賊相爲犄角。其鞏重屯集浮梁。悍賊盡聚鎮上。將各要路挖斷。築卡開濠。設望樓煙墩數十座。近鎮之上李村下李村。橫互二十里。皆踞爲巢。地勢散漫。港汊紛歧。進攻不易。十九日。道員王文瑞。主簿吳國佐。出隊由崖角嶺。吳開嶺兩路進攻。鎮之中路。張運蘭由黃泥嶺雞脚嶺兩路進攻。鎮之右路。派第五旂紮牛角嶺。堵截鎮之左路。行抵勝梅亭。見左路老鴉灘出賊千餘。當即迎擊。敗之。斃賊數十。追至下李村。騎賊復出迎戰。亦爲我軍所敗。忽景鎮及上李村小港。嚙回子墓各寨之賊。一擁皆出。約二萬人。下李村賊餒愈肆。守備扶正元等。力戰死之。王文瑞飛往接應。擊殺數十賊。賊肯敗退。而小港嚙回子墓兩股。斜抄將我軍圍困。守備何長庚等戰死。其時吳國佐兩營。爲老鴉灘伏賊所牽。首尾不能相應。張運蘭之營。又相距數里。派援之吉左營。正遇伏賊。鏖戰守備李冠羣等死之。賊遂直撲王文瑞所占山岡。都司朱寬義等力禦之。迨合十數次。併力衝突。殺賊數十名。守備朱正魁等皆沒於陣。幸吉左營接應。時已日暮。賊亦不敢進逼。二更收隊。是日斃賊四百名。副湘營陣亡四十八人。義字營九十四人。吉左營十二人。緣各營均出六成隊。賊蓋十倍於我也。自後雨雪泥濘。賊不敢出。二十七日。稍晴。張運蘭預派第五旂紮牛角嶺。六旂守湖角嶺。吉左營守崖角嶺。王文瑞派隊會同團勇。站立中左右三路。

高嶺。賊至則搖旗擊鼓以疑之。布置定後。張運蘭自率四旗。從雞脚嶺進攻上下李村。隨分一旗專斷浮梁。援賊約副湘營兩面包抄。行抵李村。該逆寂無聲響。旋見白旗搖漾。數十騎出站河岸。我軍渡河迎擊。賊已飛遁。良久寂然。申刻收隊。忽角聲四起。回視則賊隊已出萬餘。四路來撲。馬隊當先。我軍轉隊列陣。忽有賊目八騎。涉水衝來。中路勇砲擊一賊落馬。衆起逐之。入騎皆殪。張運蘭等遂乘勢分三隊過河衝擊。賊黨敗奔。旋復回拒。王文瑞等截擊包抄。呼聲震天。時第一旗已將浮梁。援賊擊敗。又從北路橫截而來。該逆棄械狂奔。伏尸枕藉。追至上下李村。賊遂棄巢而遁。縱火焚巢。追至鎮市。時已昏黑。兩雪交加。傳令收隊。是日破上下李村二寨。殲賊二千名。解散脅從千餘名。奪勞山礮八尊。陣斬僞指揮楊大鵬。郭正雲。張明萬。僞東殿後營將軍李正龍。鄧見光。陳金龍等。尸邊搜出僞照。自後我軍屢出。賊不敢動。本年正月十一日。復出大成隊進攻。列隊河岸。自辰至午。對面寂然。惟墩台上烽煙四起。浮梁來賊七八百。鎮賊亦出千餘。倚山排陣。馬隊隱約林間。我軍知有埋伏。申刻收隊。忽接探報。是日大股賊圍犯道員劉于濤。饒防各營。旋忽退去。始悟日中舉火者。調賊回鎮也。劉于濤一軍。距張運蘭等六七十里。而張運蘭派紮牛角嶺之第五旗人。止三百名。距老營又十六里。是日我軍趨鎮。藉解饒防之圍。而回鎮之賊。必從牛角嶺下經過。竟以萬餘賊來撲。嶺卡游擊王華國等出卡迎戰。賊來益多。遂回卡堅拒。王華國等血戰終夜。被賊撲去營卡。陣亡四十一人。張運蘭派第三旗往援。已無及矣。十二日辰刻。加隊馳援。將賊擊退。賊亦回鎮。不敢再犯。第三旗仍紮牛角嶺。堅守原卡。此十二月十九日小挫。二十七日大捷。正月十一夜小挫之實。在情形也。據張運蘭等稟報前來。臣查鎮賊狡猾異常。多而且悍。避我朝銳。擊我情歸。楚軍現紮柳灣。人止四千有奇。距鎮三十里。出隊六成進剿。則衆寡主客。勞逸饑飽之勢。既已懸殊。又爲地勢所阻。易進難退。劉于濤一軍。屢不得手。與張運蘭等相隔太遠。呼應不靈。而張運蘭王文瑞分紮要隘。備多而力益分。臣現添派九江道沈葆楨所統之平江前營。新中新左營。由玉山赴鎮。又調祥字營由弋陽赴鎮助剿。並批飭張運蘭等以靜待動。無庸遽出攻剿。徒傷精銳。除陣亡員弁。現已另片請旨賜卹。及劉于濤一軍。應由江西撫臣耆齡奏報外。所有楚軍攻勦景德鎮情形。恭摺由驛六百里馳奏。伏乞皇上聖鑒。訓示施行。謹奏。

陣亡病故員弁彙案請卹摺 咸豐九年二月初九日

奏爲水陸各軍陣亡病故各員弁彙案奏請恩卹。以慰忠魂事。竊照打仗陣亡。及因傷身故軍營病故各員。例應分別請旨賜卹。臣所部各軍除隨案請卹外。其道員王文瑞之副湘營。上年十二月十九日進攻景德鎮。陣亡候補守備何長庚等十九名。主簿吳國佐之義字營。同日攻景德鎮。陣亡藍翎都司張長清等八名。積勞病故訓導黎宗銘一名。道員張運蘭之老湘營。上年八月十九日克復安仁。陣亡外委李怡和等六名。積勞病故遇缺知縣劉開駒等六名。又上年十二月二十七日該營及吉左營攻景德鎮。陣亡藍翎都司朱華清等二十二名。道員蕭啓江之湘果營。上年攻建昌陣亡都司黃日勝等二名。積勞病故花翎都司蕭啓淮等三名。因傷病故藍翎外委徐萬春等二名。此皆現隸臣部下之營也。至臣七年丁憂回籍。水路死事人員。有漏未開報者。其派往廬州之水師。亦有陣亡未及議卹者。臣去年回營。紛紛來營稟請。自應一體補奏。邀請卹典。以廣皇仁。謹彙案繕具清單。謹懇天恩。飭部查照陣亡傷亡積勞病故例。分別議卹。以作士氣。而慰忠魂。是否有當。伏乞皇上聖鑒。訓示施行。謹奏。硃批。均照所請分別議卹。該部知道。單併發。欽此。

謝會驥雲賜封典恩摺 咸豐九年二月十五日

奏爲恭謝天恩。仰祈聖鑒事。竊臣弟會國華在三河鎮殉節。經臣奏報後。嗣准湖廣督臣恭錄咨會蒙恩優卹。復經臣於本年二月初九日專摺叩謝天恩在案。頃准兵部由驛遞回前摺欽奉硃批。另有旨。咸豐九年正月二十六日內閣奉上諭。會國藩奏伊弟會國華殉難情形一摺。候選同知會國華在三河鎮殉難。當經降旨追贈道員。從優議卹。該故員履著戰功。一門忠義。著再加恩賞給伊父會驥雲從二品封典。以示褒嘉。欽此。臣伏讀之下。感激涕零。竊念臣弟一介儒生。捐軀報國。荷蒙溫諭頻頒。殊恩疊被。既贈監司之職。復膺封典之榮。存沒均沾。哀感無既。伏查臣胞叔會驥雲。道光三十年正月二十七日恭遇軍恩。臣在侍郎任內加一級。會驥雲封從一品榮祿大夫。咸豐二年四月三十日恭遇軍恩。又以臣官加二級。得晉勳封正一品光祿大夫。茲復仰蒙錫類之仁。特荷褒嘉之典。臣已肅具家書。恭宣諭旨。誥軸則祗領新綸。謹拜此日九重之命。頂戴則仍從舊秩。不忘昔年兩次之恩。惟是隆施稠疊。報稱尤難。臣惟有竭盡愚忠。代臣弟彌未竟之天。代臣叔抒向日之忱。以期仰答高厚生成於萬一。所有微臣感激下忱。理合專摺附驛。叩謝天恩。伏乞皇上聖鑒。謹奏。

克復南安府城摺 咸豐九年二月十五日

奏爲蕭啓江一軍協同各勇攻克南安府城。現仍馳援信豐。恭摺奏祈聖鑒事。竊正月十八二十四等日。蕭啓江等攻克新城墟池江一帶賊巢。業經馳奏在案。蕭啓江本擬由龍迴間道先援信豐。再圖合攻南安。臣亦批飭令解信豐之圍。以勸守土之吏矣。因疊據生擒賊供。該逆自疊次痛殲後。退保南安。極爲惶恐。一夕數驚。紛紛逃走。等供。蕭啓江等以機會既有可乘。不若趁破竹之勢。直取南安。免致死灰復熾。遂親帥所部協同管帶田勇練勇之知縣周慶榕。縣丞周慶夏等。進紮青隴黃隴一帶地方。會攻郡城。二十九日。黃隴一路。距匪見官軍大至。即行逃竄。追殺十數名。三十日出隊。至三角嶺。遙望城中烟燄迷天。知賊中內亂。即派管官朱桂秋黎得勝胡中和劉嶽昭梁萬貴督隊會同練勇。進攻東北兩門。管官毛治祺秦華祝唐星照戴齡督隊會同田勇。攻勦城外各村賊館賊壘。南安原係兩城。北爲水城。中有一河之隔。逆黨初猶抗拒。見我軍銳氣百倍。礮斃二百餘名。復覓水進攻北城。該逆傾巢西竄。且戰且奔。我軍衝鋒過猛。登時陣亡七人。受傷九人。跟追數里。聞各村角聲四起。慮有埋伏。且時已申正。遂收隊。仍回黃隴餐宿。戒勿入城。二月初一。探報西北烽火相連。時有賊旂登山瞭望。疑賊故空此城。誘我深入。適大庾田勇旂長吳昌餘等在城外被虜。我軍窺破賊謀。且知城內米糧罄盡。亦欲待賊入城。再行圍勦。是夜陶張兩逆首。果率萬餘人回屯城內矣。正籌勦間。而信豐告急之稟疊至。欲赴援則南安功在垂成。欲不赴則信豐萬分危急。因定議初三日大舉攻勦。期以一鼓下之。是日巳刻。分數路進攻。賊亦分路迎敵。我軍槍砲刀矛噴筒火箭。同時並舉。陣斬悍賊二三百名。賊黨奔潰入城。我軍跟蹤而入。或攀堞而登。轉瞬間東北兩門。盡插官軍旂幟。賊仍由西門奪路奔逃。追擊二十里。伏尸疊疊。敗賊仍分兩路鼠竄。一由浮江西坑。一由義安內梁等處。皆係往粵之路。是日克復府城。除田勇練勇斬獲不計外。楚軍共斃賊六百餘名。生擒五十一名。奪獲馬騾旂幟軍械無數。我軍陣亡十八人。蕭啓江克城後。以信豐緊急。隨於初五日冒雨親率所部。取道龍迴赴援信邑。並派奇勝軍都司黎得盛留勇八百人駐守南安。會同周慶榕等搜捕餘匪。一面飛稜該管道府調集各勇堅守嚴防。此二月初三克復南安並馳援信豐之實在情形也。據蕭啓江稟報前來。臣查南安被陷數月。賊數十倍於官軍。幸仗聖主天威。各將弁及團勇力戰用命。自十八日埋伏取勝後。該逆膽落氣沮。屢次敗奔。攻克郡城甚

爲得手。又據稟報崇義縣城亦於正月二十五日克復。目下蕭啓江馳援信豐。解圍後。江西省南路可冀肅清。除管帶練勇田勇之周慶榕及各官紳等。應由撫臣耆齡奏報外。其楚軍出力員弁兵勇。合無仰懇皇上天恩。容臣擇尤保獎。以昭激勵。布政使銜即選道蕭啓江。久著戰功。老成果毅。緩急分合之際。皆洽機宜。可否賞加勇號之處。出自鴻恩。所有楚軍協同團勇克復南安緣由。謹會同江西撫臣耆齡恭摺由驛六百里馳奏。伏乞皇上聖鑒。訓示施行。謹奏。

移駐撫州片 咸豐九年二月十五日

再去冬今春以來。張運蘭一軍。進攻景德鎮。未甚得手。並聞鎮城日增。將由樂平繞鈔官軍後路。圍竄撫州。查建昌僻在東隅。駐建則不能兼顧撫州。駐撫則可以屏蔽建昌。正月下旬。臣即擬移駐撫州。因慮福建連城股匪內竄。是以未便移軍。昨准閩浙督臣來咨。連城已於正月初十克復。寧都建昌兩屬。可無回竄之虞。臣已於二月十二日。移紮撫州。相機調度。撫郡距景德鎮較近。即距蕭啓江南安一軍。亦較建昌稍近。南北兩路。聲息易通。除俟將景德鎮攻勦情形。另摺奏報外。所有巨軍移駐撫州緣由。理合附片奏聞。伏乞皇上聖鑒。謹奏。

會國荃保升道銜知府謝恩摺 咸豐九年二月二十八日

奏爲恭謝天恩。仰祈聖鑒事。竊臣接准湖南撫臣補行咨會克復吉安案內。彙奏請獎。奉上諭。一候選同知會國荃著免選本班。以知府儘先選用。並賞加道銜。欽此。一竊念臣弟國荃一介書生。未嫻軍旅。前因咸豐六年。逆匪竄擾江西。列郡淪陷。其時袁州一路。有湖南助勦之師。瑞州一路。有湖北乞援之師。而賊勢浩大。南路空虛。吉安一郡。尤上游必爭之地。江省兵單。未遑攻取。國荃與前任吉安府知府黃冕。稟商湖南撫臣建義。勸捐募勇。親率進攻。並經臣奏請空白執照二千張。籌捐濟餉。是年十月。師次吉安。連復數縣。七年二月。國荃丁憂回籍。六月。師復敗退。經湖南撫臣嚴檄迭催。墨經復出。紮進城下。趨挖長壕。經江西撫臣奏明總理。全軍圍攻兩載之久。上年八月。始克堅城。仰仗天威。幸摧逆敵。本屬因人而成事。詎敢貪天以爲功。迺蒙懋賞特頒。微勞必錄。榮紆銀印。忝居二千石之班。秩晉冰銜。滙荷九重天之賜。鴻慈逾格。鼇戴易勝。臣弟國荃克吉後。於十月內詣臣建昌大營。適聞三河之變。臣弟國華死綬。當即馳赴鄂皖。訪尋消息。倉皇歸里。月前擬束裝來營。又值逆匪竄擾。郴桂湖南防

勦喫緊。暫不及來。臣惟有諄飭臣弟。虔伸禮懃。勉效騫驅。切枕戈擊楫之忱。圖墜露輕塵之報。以期仰答高厚生。成於萬一。所有微臣感激下忱。理合繕摺附驛。叩謝天恩。伏乞皇上聖鑒。再前奉恩旨後。湖南撫臣漏未恭錄咨行。經臣緘詞。昨始補行咨會。是以拜摺稍遲。合併聲明。謹奏。

信豐解圍調蕭啓江援湖南摺 咸豐九年二月二十八日

奏爲蕭啓江一軍。力解信豐城圍。現在調赴吉安。爲湖南援應。恭摺奏祈聖鑒事。竊蕭啓江等克復南安後。旋即馳救信豐。經臣於二月十五日。奏報在案。初七日。該軍行抵離信豐二十里之大小窩地方。查探得城內官民萬餘人。糧食止支三日。賊黨盡屯城外。東門浮橋。已被水衝。惟吳家嶺浮橋。斷而復續。逆黨築壘。吳家嶺及石子嶺一帶。阻截援師。蕭啓江約會總兵遮克敦布於初八日進攻。傳令果後果右兩營。從右路進。果前果左兩營。從左路進。副果新果兩營。從中路進。蕭啓江自率中營接應。商令遮克敦布之飛虎勇。署南安府周汝筠之練勇。會同贛勇。先行誘賊出窠。楚軍偃旂息鼓。以待先攻吳家嶺。再攻北門。辰刻。賊果出隊抗拒。營官劉嶽昭等由右路沿河而進。悉力猛撲。連破賊壘四座。石子嶺之賊。蜂擁來助。又經左路胡中和率隊力戰。梁萬貴由左路之右。繼進。是時戴齡唐星照已由中路直搗吳家嶺下。蕭啓江見賊牆火起。知已得手。飛馳督勦。正塵戰間。而吳家村忽出賊萬餘。各執五色旗前來鈔截。各營乘勝壓之。直逼河岸。紛紛投水。浮尸蔽江。賊正無路可逃。忽大雨如注。官軍槍砲濕不能燃。窮賊拚命回撲。北門外之賊。一概回戈反鬪。混戰一時。斃賊數百。我軍亦陣亡九十六人。營官胡中和劉嶽昭戴齡均受矛傷。蕭啓江卓旗力禦。賊始大奔。雖因雨未及痛勦。而賊已膽落矣。初十日。分八路進勦。蕭啓江行至小溪橋。見西北一帶火起。知前隊已破賊營。呼聲震山谷。該逆奪渡奔逃。各營併力追殺。人馬死者無算。城內兵勇亦乘勢出擊。伏尸遍野。遮克敦布一軍。適當去路。斬馘尤多。楚軍斃賊二百餘名。生擒二十八名。敗賊悉往東路逃走。此初八日。疊戰獲勝。初十日。力解城圍之實在情形也。據蕭啓江等稟報前來。臣查信豐被圍三月有餘。力窮糧竭。經蕭啓江等馳救。會合遮克敦布等力戰解圍。計楚軍八日之內。克府城一。解縣圍一。死事至四百人之多。尙屬踴躍用命。除飛虎軍康勇贛勇及力守危城之信豐縣知縣錢蘭等咨請江西撫臣查明保獎外。其蕭啓江一軍。可否由臣併入南安克復案內保獎。以示鼓勵。陣亡之藍翎外委李先益李楚文。藍翎把

總黃龍光。外委劉文友。均懇天恩。各照本職從優議卹。以慰忠魂。連日接據咨報南安之賊。竄入湖南。連陷桂陽。宜章與寧永興等縣。及桂陽州。頻年以來。楚軍出勦江西湖北廣西貴州安徽等省。將士分布各路。本省空虛。該逆乘隙竄入。驟無應敵之師。殊形喫緊。臣已飛調蕭啓江一軍。馳赴吉安爲湖南援應。如賊犯安仁茶陵一帶。即行橫出截擊。以免蔓延。除飛咨湖南撫臣共籌防勦外。所有蕭啓江一軍。力解信豐城圍。及調赴吉安援應湖南各緣由。謹會同江西撫臣耆齡繕摺由驛五百里馳奏。伏乞皇上聖鑒。訓示施行。謹奏。

江西添濟月餉片 咸豐九年二月二十八日

再臣去臘因蕭啓江一軍援勦南贛。張運蘭一軍攻勦景德鎮。相去千有餘里。臣在中路。存營人數太少。倉猝無以應敵。因函商江西湖南兩省。添招兵勇三千餘人。所需口糧。即在江西設法籌措。江省欠餉疊疊。且前次奏明協濟。臣軍月餉一萬六七千金。本屬拮据萬分。撫臣耆齡深維大局。共濟時艱。昨准咨復。自本年二月爲始。再籌萬餘金。照兩湖章程。合成每月三萬兩之數。而所需槍礮子藥。仍於江省隨時取給。臣軍藉免空乏之虞。得以專力勦辦。足慰宸廑。理合附片奏聞。伏乞皇上聖鑒。謹奏。

謝會紀壽及歲引見恩摺 咸豐九年二月二十六日

奏爲恭謝天恩。仰祈聖鑒事。本年三月初八日。准兵部火票遞回臣謝恩前摺。奉硃批。「另有旨。欽此。」同日。並准遞到咸豐九年二月二十六日內閣奉上諭。「前因會國藩奏伊弟會國華殉難情形。當降旨賞給會國華之父會驥雲從二品封典。本日會國藩謝恩摺內。聲明會驥雲會勳馳封正一品封典等語。所有會國華之子會紀壽著再加恩。俟及歲時。由吏部帶領引見。以示朕褒獎忠節。有加無已之至意。欽此。」臣聞命之餘。感激無措。竊臣弟國華一身就義。闔宅銘恩。既邀錫類之仁。復蒙延世之賞。臣姪會紀壽年甫數歲。即荷溫綸。地望未崇。敢冀重申之命。天官引對。忝居任子之班。計舞象舞勺之匪遙。仰爲龍爲光。以在望。羽林逐隊。託餘蔭于孤露之中。角弁趨朝。瞻天威於五雲之上。在聖世發崇忠節。古今無以比其隆。在臣家感戴鴻施。存沒均不知所報。臣惟有教督臣姪。敦品讀書。勵名砥節。修文兼以肄武。全孝即以盡忠。庶期仰答高厚鴻慈於萬一。所有微臣感激下忱。理合專摺附驛。叩謝天恩。伏乞皇上聖鑒。謹奏。

景鎮官軍攻勦情形摺 咸豐九年三月二十六日

奏爲景德鎮官軍兩月以來攻勦情形恭摺奏祈聖鑒事竊張運蘭等進攻景德鎮本年正月二十三日以前接仗各情形業經馳奏在案二十八日各營約會進攻道員王文瑞率副湘營出右路黃泥嶺堵禦浮梁援賊張運蘭率親兵及平江前營由中路雞腳嶺進而以五旂出中路之右四旂出中路之左並派三旂六旂及吉左營平江新左營協同樂平各局團勇分守要隘以爲接應已刻抵鎮該逆堅閉不出我軍過河燒燬望樓二座並焚李村民房賊黨分支出撲各軍亦分途迎擊迴合十餘次殲斃百餘名吉左新左等營均出隘夾擊其時浮梁援賊復經王文瑞等擊退自午至酉鏖戰竟日收隊忽另股悍賊萬餘從栗樹山後面橫截歸路馬隊尤多我軍苦戰之後忽遇新賊路隘不能施展雖更番奮擊殺賊三百餘名而老湘營亦陣亡二百三十八人副湘營十人平江前營二十八人團勇十五人長夫十三人游擊喻福慶等弁力竭陣亡幫辦王開林等因歸途擁逼遂繞道從湘湖街回營臣以景德鎮地勢崎嶇難打行仗且自去冬皖北失利湘勇之士氣未復此次損傷三百皆係銳卒遂批飭張運蘭等少爲休息堅守隘口賊來則與決戰無庸輕出進攻庶致賊而不爲賊所致自後賊亦覆巢不出二月二十四日賊見湖角嶺要隘止紮祥字一營距張運蘭老營十餘里遂出隊陽攻各隘牽制各軍而以馬步隊萬餘人直撲祥字營守備劉勝祥竭力堅守張運蘭飛飭游擊朱紹輝文恆久馳往救應另派游擊楊虎臣都司張廣勝等截勦湖湘街援賊王文瑞及平江前營彭大壽新中營吳盡臣均出隊援勦其時吉左營都司朱寬義副將陳岳南平江新左營張詩華已從牛角嶺鈔擊賊後樂平團勇亦至營殲大旂賊目二名先鋒悍賊十餘名逆焰頗挫劉勝祥見援兵齊集即出營奮擊陣斬僞官六名奪僞印二顆僞照四張殺斃羣賊二百餘名該逆棄械狂奔自此軍威仍振三月十三日張運蘭等以各營休息月餘可試決戰遂分三支出隊進攻卯刻行近景鎮賊在望臺舉烽副將黃文友等將望臺焚燬伏賊四起張廣勝及游擊劉松山等迎擊大路之賊楊虎臣截擊浮梁援賊同知劉生瓌往來策應陳岳南朱紹輝等搜截栗樹山伏賊三路得手計斃賊百餘名斬賊目二名日暮收隊十六夜鎮賊忽舉火焚屋執炬北行僞作宵遁之勢旋即折回埋伏黎明時張運蘭王文瑞督隊往追一面查探虛實查悉該逆狡詐之謀嚴陣以待祥字營直入街口伏賊盡起酣戰逾時千總易執圭戰歿張運蘭等整

隊接應。賊雖數倍，亦不敢來撲。未刻大雨，遂各收隊。此正月二十八日、二月二十四日、三月三十七等日攻勦景鎮之實在情形也。據張運蘭等稟報前來，臣查鎮賊狡悍而多，地勢散漫，張運蘭等各營分紮要路，延袤二三十里，距劉干澇饒防各軍較遠，中隔一江，兩難救應。楚軍抵鎮後，損折六百餘人，衆寡懸殊，難遽得手。南安克復後，本擬調蕭啓江一軍從浮梁夾擊，又因郴桂告陷，回援湖南，目下情形只得扼要嚴防，觀勢而動。藍翎游擊喻福慶、藍翎都司易福陞等五十二員名，先後力戰捐軀，深堪憫惻，謹另繕清單，籲懇天恩俯准，各照本職從優賜卹，以慰忠魂。除劉干澇一軍應由江西撫臣詳晰奏報外，所有兩月以來攻勦景德鎮各情形，理合恭摺由驛五百里馳奏，伏乞皇上聖鑒，訓示施行，謹奏。

新募楚軍來撫州教練片 咸豐九年二月二十六日

再臣正月間因蕭啓江張運蘭兩軍相距太遠，老營空虛，又有進規皖南之議，遂行添募兵勇，於上次奏明在案。茲據總兵銜竹山協副將朱品隆游擊喻吉三、五品銜知縣張岳齡、同知銜布政司經歷凌蔭庭等，共募南勇三千五百餘人，均經陸續成軍，其游擊彭山、峴回南挑募之營兵四百、勇二百，及道員王勳添募之湘勇五百，則均經湖北撫臣咨留協助本省防務，所有新募各營，現皆隨臣駐紮撫州，親加教練，目下賊擾湖南，蔓延郴桂，蕭啓江一軍已由吉安馳抵茶陵一帶，江省吉袁各屬壤地毗連，均須預防回竄，是南路之賊情較北路之景鎮，其喫緊正復相等。一俟湖南賊勢稍鬆，卽當調派各營協攻景德鎮，理合附片奏聞，伏乞聖鑒訓示，再自婺源賊竄陷建德後，知府劉騰鶴進勦陣亡，彭湖均甚喫重，臣已派候選知府屈蟠帶領平江老中營千人，自撫州馳赴湖口協防，合併陳明，謹奏。

添兵助勦景德鎮摺 咸豐九年五月二十六日

奏爲楚軍進攻景德鎮逆稟，連獲勝仗，現在添兵助勦，恭摺奏祈聖鑒事。竊張運蘭一軍自正月二十八日至三月十七等日攻勦情形，業經馳報在案。三月二十日，張運蘭等攻入下李村，吉左營及祥字營接應，平江三營迎擊，回子墓之賊計共斃賊百餘名。二十八日，張運蘭王文瑞約水師夾擊，一由河面攻鎮，一進小河，攻回子墓賊牆，陸軍沿河護之，破賊卡數重，賊黨別出一路，直犯平江三營，迴合六七次，祥字營吉左營馳往策應，殺賊百餘賊。

始奔虜。已革皖南道石景芬率各團截擊。斃賊四百餘人。我軍亦陣亡十七人。自後屢次進攻。賊皆堅匿不出。四月二十四日。張運蘭王文瑞約會劉于濤。及水師遊擊任星元等。乘水漲進攻。將沿岸守卡賊轟斃無數。內有黃衣賊目五六名。惟街口堅卡數重難破。兼有一港之隔。二十八日復合諸營進攻。參將文瑞一軍專防河岸。石景芬督團丁分守各隘。我軍誘賊出卡。用劈山礮排轟。當者糜碎。立斃數十賊。賊遂敗奔。是日劉于濤等攻破西瓜洲賊壘。江楚兩軍互爲聲援。此三月二十日至四月二十八日。楚軍攻勦景鎮獲勝之情形也。疊據張運蘭等稟報前來。臣查鎮賊屢敗。勢已衰。各軍打仗。亦不爲不力。惟地勢散漫。路途紛歧。逆黨多而且穩。江楚兩軍相距數十里。呼應不靈。臣久欲濟師往勦。因湖南永寶被擾。防賊回竄。故未敢將撫州各營調出。致南路過於空虛。目下湖南賊蹤盡趨西路。卽派駐撫之湘前營強中營吉字營振字營岳字營護衛軍共五千八百人。於五月初九十一等日。分起拔營。助攻景鎮。交臣弟曾國荃督率以行。與張運蘭劉于濤等面商。進取機宜。總期迅掃逆巢。肅清江境。現駐撫州者。僅撫臣所募之昇字營六百餘人。又湘後營千餘人。蓋劉騰鴻兄弟之舊部。撫臣調赴撫州。交臣爲之整飭者也。除劉于濤一軍。由撫臣耆齡詳悉奏報外。所有楚軍連月進攻獲勝。及添兵助勦各緣由。謹繕摺由驛五百里馳奏。伏乞皇上聖鑒。訓示施行。謹奏。

調饒廷選防廣信片 咸豐九年五月二十六日。

再臣疊准江西撫臣耆齡來函。九江道沈葆楨。現擬飭赴本任。惟廣信係東路要郡。景德鎮尙未克復。防務不可稍鬆。須得名望夙著之大員。前往接辦。擬商調贛南總兵饒廷選赴廣信接防等因。查饒廷選現已由閩來江。臣前因寧都建昌各屬空虛。擬令該總兵駐守。又或酌量緩急。令赴贛南本任。均經奏明在案。茲查贛寧一帶。賊氛已遠。廣信地屬要區。自應先其所急。卽令該總兵率所部閩省兵勇。駐紮廣信。其信屬防兵。均歸節制。俟景德鎮克復。信防稍鬆。再行酌量辦理。所有現調饒廷選接防廣信緣由。理合附片陳明。伏乞聖鑒訓示。謹奏。

李鴻章留營襄辦片 咸豐九年五月二十六日。

再按察使銜記名道翰林院編修李鴻章。咸豐三年正月。奉旨隨同工部侍郎呂賢基。辦理安徽團防。嗣經提臣和春。安徽撫臣福濟。奏留軍營。襄辦一切。在事日久。懋著勤勞。七年九月福濟奏報該員丁父憂服闋。俟經手事

件料理完竣。給咨回京供職。欽奉諭旨。在案。該員皖管經手事竣。於上年冬間來江西省後。即欲回京。臣因該員久歷戎行。文武兼資。堪以留營襄辦。昨因添兵助攻景德鎮。檄李鴻章會同曾國荃等。前往督剿。理合附片奏聞。伏乞皇上聖鑒。謹奏。

陳明賑閩日期片 咸豐九年五月二十六日

再臣於咸豐七年二月十一日在江西瑞州軍營。聞訃丁父憂回籍。本年五月十一日服闋。例應入京叩請聖安。茲因辦理軍務。不及赴京。謹已遵制釋服。理合將服闋日期。附片陳明。謹奏。

覆陳防蜀緩急摺 咸豐九年六月十八日

奏爲奉到防蜀諭旨。恭摺覆奏。仰祈聖鑒事。竊臣添調五千餘人。協攻景德鎮。並商派總兵饒廷選換防廣信。業於五月二十六日馳奏在案。六月初五日。承准軍機大臣字寄。咸豐九年五月二十一日。奉上諭。『官文奏。『探知湖南賊衆。勢將入蜀。請飭曾國藩帶兵迅赴夔州一摺。逆首石達開竄擾湖南。大股萃於祁陽。與官軍相抗。復分竄邵陽新化武岡等州縣。據稱該逆蓄謀已久。欲逼志於四川。由湖南入蜀。道路分歧。若由資江沅江遠窺常德。則湖北之荆宜南郡俱危。或由辰沅走秀山西陽。或由黔中假道。皆可蔓延川境。湖北水陸各軍。全力施之於皖省。即再分撥。亦僅能近防洞庭常澧。不能再顧西路。』詳覽該大臣所奏各情。實爲通籌大局起見。本日已諭令有鳳派兵扼要嚴防。惟該省兵力。恐不能當此悍賊。曾國藩前派蕭啓江帶兵援剿湖南。現在湖南喫重。此一軍自未能調回。此外如江西湖北湖南四川等兵。均素稱得力。著曾國藩即日統帶。由楚江前赴四川夔州扼守。以據兩湖上游之勢。倘賊蹤竄至。即可有備無患。至江西景德鎮之賊。尙未勘平。據官文奏請。飭李定太守饒州。饒廷選守撫州。彭玉麟守九江。著曾國藩斟酌情形。咨商耆齡妥爲布置。俾得迅掃賊氛。不至顧此失彼。是爲至要。將此由六百里諭令知之。欽此。』仰見聖主思患預防。熟計兼權之至意。伏查臣部下除蕭啓江之五千人。援剿湖南外。其張連蘭之三千七百人。上年臘月。即調攻景德鎮。屈蟠之平江營千人。本年三月復調防湖口。昨派臣弟曾國荃帶五千八百人赴鎮協防。臣身邊並未留一卒一兵。撫州老營。惟湘後及昇字兩營二千餘人。均由省局發餉。不歸臣處調遣。聊假虛聲。以坐鎮要郡耳。曾國荃等抵鎮後。移營進逼。五月二十六二十八六月初二

等日。均獲勝仗。雖賊多且悍。能否即破堅巢。尙無把握。然兵屢添而愈多。營屢逼而愈近。以機勢而論。可期得手。今若攻圍入蜀。將楚軍全行撤退。則饒防僅劉于濤一軍。不能扼截東路。賊必乘虛內竄。北而彭澤湖口。南而撫州建昌。均慮難支。是未保將危之四川。先棄甫定之江西。臣函商巡撫着齡撫臣覆書。囑留朱品隆王文瑞屈蟠三千人。助攻景鎮。臣所部僅此數將。若留以防江。更難入蜀。再四思維。竇覺願此失彼。有礙大局。諭旨飭令。一李定太守饒州。饒廷選守撫州。彭玉麟守九江。一等因。查彭玉麟現紮湖口。尙可兼顧九江。饒廷選初赴廣信。係屬三省要區。礙難他調。李定太守防衢州。係屬浙省門戶。能否來江。應由撫臣着齡奏咨。俟一月以後。始可定局。景德鎮能否攻克。一月以後。亦可定局。目下尙當竭力攻勦。不宜徑退。以長凶鋒。此臣處一軍。難遽拔隊西行之情形也。自本年賊擾湖南。永祁被圍。湘勇在江西者。各懷內顧之憂。近日竇慶危急。距湘鄉不過百里。弁勇瞻顧身家。歸思尤切。徒以景德鎮喫緊。不准告假。一旦拔隊征粵。道經楚境。必且紛紛請假。勢難禁止。凡勇之弊。敗挫則不知歸伍。久征則常思還家。不獨湘勇爲然。各省均坐此弊。勇之不如額兵者在此。臣丁巳年奏疏。深以弁勇不能補都守千把實缺爲慮者。亦職此也。今攜湘勇直上夔州。水路三千餘里。風濤之惡。三峽之險。程途太遠。人地太生。竊恐弁勇未必樂從。即使多方開導。樂於西征。而粵賊現在湖南。號稱二三十萬。若果竄蜀。裹脅更多。臣以區區萬人入蜀。勦固不敷。防亦不足。孤軍客寄。傷亡難補。以勢度之。恐無裨於大局。若遵諭旨據兩湖上游之勢。則即臣現在之兵力。略加水師。駐紮宜昌等處。即可穩占上游。回湖廣之西門。若必徑趨夔州。則不以兼顧湖廣爲重。而以籌防全蜀爲重。不特蕭啓江一軍。必須調集同行。且當添調水陸。湊齊三萬人。乃可搆以入峽。此又由鄂赴蜀應俟兵力略厚之情形也。自軍興以來。川陝兩省。最爲完善。而蜀中財力雄厚。百物豐饒。木多足以立舟師。馬多足以備騎隊。尤爲逆黨所涎羨。我皇上瞻焉西顧。防患未形。狗屬刻不可緩之至計。惟景德鎮目下難遽抽動。及臣處兵力單弱情形。不得不縷陳於聖主之前。除景德鎮開仗情形。即日另行奏報外。理合恭摺。由驛六百里覆奏。伏乞皇上聖鑒訓示施行。謹奏。

官軍攻克景德鎮及浮梁縣城摺 咸豐九年六月二十二日

奏爲官軍攻克景德鎮及浮梁縣城江西全省肅清。恭摺奏祈聖鑒事。竊臣於五月十一日。派遣銜侯選知府會

國荃帶領五千餘人。助攻景德鎮。二十二日抵鎮。約會張運蘭等。移營雞腳嶺一帶。層層進逼。二十六日辰刻。營壘未成。賊出三大支。過河來撲。各營擄水鈔擊。殺賊百餘。逼壘無數。敗賊回巢。未刻浮梁援賊大至。僞楊國宗悉銳來犯。計二萬餘人。各營分三路截擊。鏖戰兩時。陣斬黃衣騎賊及先鋒賊十數名。賊始奔潰。經劈山礮截路排轟。擊斃溺斃約四五百名。我軍陣亡五人。帶傷四十五人。二十八日。賊復來犯。過河直撲老湘營。餘皆埋伏對河。我軍用鎗礮扼港迎擊。未刻賊氣已疲。始大呼衝出。殺賊百餘名。六月初二日。賊仍傾巢來撲。馬隊三四百匹。排列對河。而以一支犯老湘營。一支犯岳字營。張運蘭帶隊將賊擊退。直衝過河。與岳字營逼李村逆巢。窮追過猛。賊從旁路包鈔。我軍陣亡五十三人。都司李印典。守備向其昌。陳玉才均沒於陣。經朱品隆唐義訓蕭季泗等各營接應。回合數次。賊始大敗。自是三戰皆勝。圍逼愈緊。賊糧垂盡。知其不能久踞矣。適天雨江漲。劉于濤水師。與彭玉麟派來之水師游擊任星元。緊逼西瓜洲。晝夜轟攻。排牆倒壁。楚軍陸師派隊將湖湘街黃港滅家灣等處賊卡焚燒。斷賊接濟。署浮梁縣事柴維翰。亦帶團將半場街賊卡焚燬。賊益窮蹙。遂趕造火筒火船。圖襲下游水師。劉于濤等探知。嚴加準備。十三夜。賊果出火筒四十餘架。夾岸輔以陸賊。焚攻水師。我軍排礮對轟。楚軍亦出隊轟勦。兩岸之賊。擊斃甚多。血尸盈岸。賊計不行。十四日夕。水陸各營。施放噴筒火箭。風大火烈。延燒鎮市民房。該逆忙亂。遂於是夜子刻。乘黑潛溜。竄浮梁。會國荃親率參將張勝祿。游擊蕭季泗。都司周惠堂。副將朱品隆。知縣張岳齡等。由中路黃泥渡進。張運蘭親率參將文恆久。劉松山。朱紹輝。游擊王萬友。都司張廣勝。易開俊等。由左路李村半場街進。道員王文瑞。偕副將唐義訓。游擊朱寬義。藩經歷凌蔭廷。游擊喻吉三。游擊彭大壽。都司吳蓋臣。守備劉勝祥。張詩華等。由右路湖湘街進。一面焚燒各卡。斬賊追奔。十五日辰刻。抵浮梁縣。該城有一河之隔。賊搭浮橋。上下三道。礮船十餘號。轟護歸路。其殿後之賊。尚有數千未過浮橋。我軍窮追緊逼。溺尸滿河。賊用鎗礮扼橋。傷我弁勇十數人。守備銜高成春死之。抵敵良久。中路難進。城內忽出悍賊三四千人。回過浮橋。直衝中路。朱品隆張岳齡等。方分翼鈔擊。適左路張運蘭等。已追至下渡浮橋邊。右路王文瑞等。已追至上渡浮橋邊。劉于濤所派之江軍亦到。會國荃等。遂奮擊中路。立斃悍賊二百餘名。該逆自相踐踏。落水死者近千人。當即跟蹤入城。張運蘭從西門外鈔入。王文瑞從東門外鈔入。所有斷後悍賊。殄殲殆盡。已草皖南道石景芬。前浮梁縣

楊鍾。署浮梁縣柴維翰率浮樂各團勇。由東鄉追捕前來。隨同克復縣城。敗賊奔竄祁門建德一帶。我軍仍分三路追剿。追過縣城四十餘里。伏尸盈路。戍刻收隊。是日追逐七十餘里。斃賊二千餘名。生擒二百零七名。奪獲旂幟軍械之屬將二千件。楚軍陣亡四十九人。帶傷百三十餘人。此五月二十六二十八等日。疊獲全勝。六月十四五等日。攻克景鎮浮梁縣城之實在情形也。據張運蘭曾國荃等稟報前來。臣查景德鎮爲江西皖浙三省要衝。去臘派張運蘭帶領楚軍與劉于燾之江軍會剿。前後數十戰。互有勝負。楚軍陣亡至七百餘人之多。今幸濟師助勦。力戰成功。仰仗皇上天威。江西全省。一律肅清。除曾國荃係臣親弟。不敢仰邀議敘。及江軍出力人員。應由撫臣奏獎外。按察使銜即選道張運蘭治軍堅忍。艱險不渝。可否賞加布政使銜。候選道王文瑞。勇敢明練。候補游擊任星元。忠實勤能。可否均賞加勇號。其餘楚軍出力員弁。可否由臣擇尤保獎。以勵戎行。出自天恩。陣亡之都司李印典。守備向其昌陳玉才。守備銜千總高成春。請照各本職。從優賜卹。藉慰忠魂。所有官軍攻克景鎮逆巢。浮梁縣城江境肅清各緣由。恭摺由驛六百里馳奏。伏乞皇上聖鑒。訓示施行。謹奏。

調張運蘭會剿寶慶片 咸豐九年六月二十一日

再臣前奉防蜀寄諭。業將景鎮喫緊。難遽撤動。據寶慶覆奏在案。今幸景德鎮克復。情形又自不同。竊思防蜀之行。原係防湖南之賊也。儻能於湖南協力痛殲。豈不事半功倍。現在大股賊圍寶慶。湖北已派李續宜帶兵赴援。臣擬檄調張運蘭等一軍四千人。先行馳赴寶慶。併力會剿。在楚多殺一賊。卽入蜀少去一賊。乘景鎮得勝之氣。用弁勇迫救桑梓之情。或可得力。臣部署定後。卽由湖口武昌而上。或先扼駐宜昌等郡。使湘賊不敢渡江窺伺荆宜。以保湖北之西路。如賊果入川。再行酌量調齊蕭啓江張運蘭兩軍。督同赴蜀防剿。除兩路拔營各日期。續行馳報外。合先附片奏聞。伏乞皇上聖鑒。謹奏。

恭報兩路拔營日期摺 咸豐九年七月初六日

奏爲恭報兩路拔營日期。仰祈聖鑒事。竊臣自景鎮克復後。檄調道員張運蘭一軍回援寶慶。臣擬率各營先赴湖北宜昌等郡扼防。已於六月二十二附片具奏。並聲明兩路拔營各日期。續行馳報在案。茲據張運蘭稟報。已於六月二十八日。自景德鎮拔營。由南昌臨江袁州一路回湘。臣亦擬於初七日。自撫州拔營。由江西省城至湖

口汧江而上。所有前派往會攻景德之湘前強中護軍振字岳字五營。已飭令由饒州至湖口過江先赴小池口一帶等候。其吉字中營現來撫州。因令其由湘潭僱船至荊州取齊。除俟抵鄂後。察看各處情形。再行馳報外。所有兩路拔營各日期。恭摺由驛五百里具奏。伏乞皇上聖鑒。謹奏。

覆陳四次諭旨摺

奏爲欽奉四次諭旨。恭摺覆奏。仰祈聖鑒事。竊臣自撫州啓程。已將兩路拔營日期。專摺馳報在案。七月初九日。行至荏港途次。承准軍機大臣字寄。咸豐九年六月二十九日奉上諭。前因官文等奏湖南賊勢蔓延。意圖窺伺川省。當即諭令會國藩帶兵由湖北入川防堵。茲據該侍郎奏稱。楚軍進攻景德鎮。正在喫緊。難遽抽動。擬就現在兵力。駐紮宜昌等處。以固湖廣西門等語。自係熟籌江西湖北兩省大局起見。惟昨據著齡奏。景德鎮業經克復。江西軍務稍鬆。該侍郎應將景德鎮善後事宜。妥速辦理。酌留防兵。仍遵前旨。統帶所部兵勇。由楚赴川。至蕭啓江一軍。赴援湖南。該侍郎兵力較單。可至湖北與官文胡林翼商酌。撥兵帶往。以壯聲威。原摺所稱。駐紮宜昌等處。即可穩占上游。是但爲鎮守湖北起見。尙未能籌防蜀省。會國藩嘗熟思大勢。應如何定計之處。詳悉馳奏。毋得遷延。等因欽此。十一日在南昌省城。承准軍機大臣字寄。七月初二日奉上諭。會國藩奏攻克景德鎮。並浮梁城一摺。尤爲出力之張運蘭等。已降旨先行給獎。並將會國藩交部優敘。伊弟會國荃。以道員用矣。該侍郎檄調張運蘭一軍。先赴寶慶會剿。如能在湖南界內。將該逆協力痛殲。使其不至西竄。自與該侍郎入川無異。所恐賊勢散漫。路徑紛歧。未能攔截。會國藩雖先駐宜昌等處。仍當偵探賊情。如寶慶一帶。未能遏其入川之路。即當親督兵勇赴蜀。以便調度堵剿機宜。未可遷延貽誤。著會國藩仍遵前旨。俟到楚後。與官文等妥商進紮地方。並酌撥兵勇。以備帶往。設或賊犯四川。則蕭啓江張運蘭兩軍。皆可調赴防剿。該侍郎隨時酌辦可也。等因欽此。十三日承准軍機大臣字寄。七月初四日奉上諭。張芾奏。浮梁景德鎮敗匪。悉竄祁門邊境。請飭援師合剿。一摺。會國藩因江西肅清。調張運蘭一軍赴援湖南。該侍郎亦即日拔營由武昌前往宜昌等處。乃浮梁景德鎮敗匪。竟傾巢東竄。突至祁門邊界。延及箬坑禾沙坑口一帶。建德之軍。既隔於外。祁門之兵。復絀於內。徽州勢處甚迫。亟應由江西就近撥兵援應。會國藩能否暫留兵勇。前赴徽州。越境會剿。或以兵力

已單。須親自帶往湖北。則江西一省。必尙有可用之兵。著耆齡卽行抽撥勁旅。赴祁門一帶協勦。著該侍郎與該撫會同商辦。以免蔓延。等因欽此。二十日湖口縣途次。承准軍機大臣字寄。七月十二日奉上諭。前因涇梁景德鎮敗匪竄入祁門邊境。會諭知會國藩耆齡會商撥兵援應。茲據張芾奏。祁門竄匪業經擊退。惟石埭建德兩路喫緊。請飭景德鎮帶兵大員。移兵會勦。等語。現在祁門之匪。經副將余永椿等。並該處兵團。屢次擊敗。復竄入石埭之七都。勢甚猖獗。各營被圍數重。先後被陷。貴池青陽之賊。乘機蠢動。建德城賊。又傾巢撲營。情形極爲緊迫。亟應由江西就近撥兵援勦。會國藩如可酌撥兵勇。暫留江西。著卽飭令移紮建德。會同該處官兵。合力勦賊。其普承堯一軍。兩月來株守彭澤。並未出境援應。著耆齡飭令該總兵迅卽帶兵前往夾擊。等因欽此。仰見聖主明燭萬里。權衡緩急。訓示諄諄。委曲周詳。伏查江西雖全省肅清。而防務未可稍弛。南則防湖南贛東之賊。北則防皖南徽州之賊。前此江軍之在北路者。饒州有劉于濤一軍。彭澤有普承堯一軍。臣昨經過省城。撫臣耆齡與臣熟商。擬留饒廷選在江添領一軍。又令吳坤修出省另領一軍。皆防守北路九饒各屬。普承堯一軍。自建德敗挫。士氣未復。只能謹守彭澤。不能進圖皖境。其劉于濤饒廷選吳坤修三人。擬以二軍分防北邊。以一軍助攻皖南。稍濟徽州兵力之所不逮。至南路吉贛等屬。如係粵中小股來犯。本省兵力。足以禦之。如係贛廣大股回竄。仍須奏調蕭啓江一軍。攔頭迎勦。與湖南追勦之師。共收夾攻之效。至臣隨身所帶各營。人數無多。不特不能抽撥赴皖。並不能酌留防江。且商調湘後營之千六百人。攜以赴鄂。除江西分防布置。應由耆齡詳悉奏報外。此臣處兵單。不克分勦皖境之情形也。臣以初十日抵省。十七日至吳城鎮。十九日行抵湖口。與楊載福彭玉麟會晤。臣所設之報銷局各員。亦隨至湖口。其中有須覈爲核對者。約須三四日。乃能清釐就緒。前自景德鎮調來之朱品隆等五營。由饒州來至九江。途次感受暑熱。病卒甚多。紛紛請假醫調。溯查上年七月。張運蘭等軍冒暑過征。未得少休。厥後九十月間。疾疫大作。屢次陳奏。上煩聖慮。竟不能剋期入閩。今年鑒前此之失。不能不少與休息。已飭各營給假十日。多著給假半月。趕緊醫調。一俟暑病稍愈。卽當遵程西上。輜重病卒。概由水路。各營隊伍。仍由陸路。臣督率過行。由鄂入川。籌防全蜀。仰副皇上弭患未形之至意。斷不敢稍事遷延。致有貽誤。除俟抵鄂後。察看賊勢。與官文胡林翼會商。再行馳報外。所有欽奉四次諭旨。恭摺由驛五百里覆奏。伏乞皇上聖

鑿訓示施行謹奏。

謝交部優敘恩摺 咸豐九年七月二十五日

奏爲恭謝天恩仰祈聖鑒事。七月十一日准兵部遞到咸豐九年七月初二日內閣奉上諭。曾國藩奏官軍攻克景德鎮及浮梁縣城一摺。現在江西全省一律肅清。勦辦甚爲得手。曾國藩調度有方。著交部從優議敘。在事出力之道銜候選知府曾國荃。著免選知府。以道員用。等因欽此。當即恭設香案。望闕叩頭。伏念臣知識短淺。輒略未嫻。昔年暫帶水師。曾乏寸功之足錄。去歲重來江右。尤無成效之可言。臣弟國荃疊承恩惠。未報涓埃。迺蒙闡澤並頒。鴻施下逮。同拜九天之詔。寵賞絲綸。愧無百戰之功。勦齊璣玕。臣惟有督同臣弟。効奮騫驅。深求豹略。恆臥薪而嘗膽。冀捍患而禦災。庶以仰答高厚生成於萬一。所有微臣感激下忱。謹率同臣弟曾國荃繪摺附驛。恭謝天恩。伏乞皇上聖鑒。謹奏。

會商大略摺 咸豐九年九月二十日

奏爲欽奉諭旨。會商大略。由鄂省回駐巴河。恭摺覆奏。仰祈聖鑒事。竊臣行抵湖口。已將清釐報銷。休息病卒各情。馳報在案。在湖口小住十日。八月初一日。解纜出江。十一日行抵黃州。與撫臣胡林翼晤商一切。十八日由黃赴鄂陽邏。途次承准軍機大臣字寄。咸豐九年八月十三日。奉上諭。官文奏。皖省賊勢日張。籌議由楚分路勦辦。一摺。皖省粵匪與捻匪勾結。蔓延日甚。勝保圖攻懷遠。翁同書退守壽州。廬州以外。並無一旅之師。前此楚軍東下。復以深入失利。以致匪勢漫無牽制。肆意竄擾。官文以寶慶解圍。敗賊悉數南竄。川省已有備無患。請飭曾國藩緩赴川省。暫駐湖口。俟湖南大定。分軍四路。步步爲營。進勦皖省。所籌實於大局有益。曾國藩前奏尙在湖口清釐報銷。並休息病卒。此時如已起程赴鄂。著與官文商酌。如湖南大局已定。川境可保無虞。即暫駐湖口。俟調回湖南各軍。爲分路進勦皖省之計。設湖南敗匪尙未免有入蜀之虞。只可從緩酌量辦理。軍情變幻靡常。該大臣等近在鄰省。偵探較確。必能相機籌畫。力顧全局。至皖省糜爛已極。勝保自護城挫敗後。其勢不可復振。非由楚省派援。不能牽掣賊勢。該大臣等務須亟籌協勦。預爲布置。一俟湖南定局。即照所議。調撥水陸各軍。分路進勦。實深盼望。另片請飭催四川等省餉銀。已諭令各該督撫迅解。等因欽此。仰見皇上權衡大局。熟計

兼籌。尤以援皖爲急務。令臣等相機酌辦。虛衷委任。感悚曷勝。臣於八月二十三日。行抵武昌。晤商督臣宣文。維時探聞湘賊大股全竄粵西。前隊已趨義寧。距黔省邊界甚近。或由龍勝懷遠一帶入黔。以遂其竄蜀之謀。亦未可定。固不敢謂川境可保無事。此賊必無入蜀之慮。惟以道里計之。賊蹤離蜀。尙隔三千餘里。粵黔兩省。萬山叢雜。賊多食少。勢難遽達蜀境。查皖北粵捻各匪。蔓延日廣。南爲金陵蕪湖之援。北爲齊豫數省之患。自安慶至宿毫千餘里。人民失業。田廬蕩然。火熱水深。迫切待救。勝保翁同書兩軍。相隔既遠。兵餉并絀。東北各路亦無協勤之師。誠如聖諭。一非由楚省派兵馳援。不能牽掣賊勢。一官文胡林翼擬將援湘馬步各軍調回。分路進發。皖鄂接壤。途徑紛歧。上年李續賓銳意深入。連克四城。因兵數太少。有戰兵無守兵。有正兵無援兵。是以中道挫衄。今懲前此之失。須合全力圖之。多添一兵。得一兵之力。早辦一日。救一日之難。中原腹地。莫要於皖。生民苦厄。莫甚於皖。就大局緩急而論。臣自應回軍援皖。先其所急。以期速蘇民困。仰慰宸廑。臣於九月初三日。由武昌回駐黃州。下游四十里之巴河。簡校軍實。詳考入皖形勢。進兵須分四路。南則循江而下。一由宿松石牌以規安慶。一由太湖潛山以取桐城。北則循山而進。一由英山霍山以取舒城。一由商城六安以規廬州。南軍駐石牌。則可與楊載福黃石磯之師聯爲一氣。北軍至六安州。則可與翁同書壽州之師聯爲一氣。臣所部不及萬人。僅足自當一路。若將援湘之蕭啓江調回。則臣處可分爲兩支。若並將張運蘭調回。則臣處可分爲三支。一支之力。僅能會剿皖北。三支之力。則可專任皖南。臣於正月十一日。曾經縷晰具奏在案。此時湘事雖紓。邊防尙緊。臣擬酌留張運蘭一軍。協防湖南。咨調蕭啓江帶勇五千。先行來皖。相應請旨飭下湖南撫臣。檄催蕭啓江剋日來會同皖省各軍。陸續東下。以期廓清皖境。蕩平寇氛。除進勤事宜。另行會商馳報外。所有遵旨商籌全局。並回馳巴河各緣由。恭摺。由粵五百里覆奏。伏乞皇上聖鑒。訓示遵行。謹奏。

遵旨悉心籌酌摺 咸豐九年十月十七日

奏爲遵旨悉心籌酌恭摺覆奏。仰祈聖鑒事。竊咸豐九年九月二十八日。承准軍機大臣字寄。九月二十二日奉
上諭。一會國藩奏。遵旨籌勦皖匪機宜。現已由鄂回駐巴河一摺。皖省賊氛甚熾。必須楚師東下。方可掃蕩。會國
藩奏稱以兩軍循江而下。規取安慶桐城。兩軍循山而進。規取舒城廬州。各軍所部兵勇。自即照官文前奏。派撥

該侍郎獨任一路。尙擬將蕭啓江調回。派張運蘭留湘協防。但蕭啓江一軍已入粵西。現當桂林危急萬分。至恃此軍援應。急切未能調回。至湘中防堵。尙有兵勇可派。著該侍郎斟酌情形。即將張運蘭調取回鄂。亦可補蕭啓江之缺。再本日據袁甲三庚長奏。『現聞官文等籌議進兵勦辦皖逆。並議令勝保等於東北路截剿。惟勝保傳振邦兵力單弱。一經楚師大舉。深恐驅賊北竄。請飭由光州固始潁州一帶。繞赴北路進剿。』等語。會國藩所奏北路一軍。由商城前進。本去潁州不遠。惟須折赴六安。規取廬州。則蒙亳等處。已難兼顧。此時捻粵勾結。設因南路不支。竟圖北竄。恐傳振邦翁同書等。不能堵遏。袁甲三等所慮。亦不爲無見。著官文會國藩胡林翼再行悉心籌酌。所有東下四軍內。應如何派出一軍。取道固始光州。繞出懷蒙以北。與勝保等官軍會合南剿。俾逆匪不致北犯。是爲至要。袁甲三等原摺著鈔給閱看。至此次官文等會勦大舉。關係全局利害。總須計出萬全。不妨稍遲時日。謀定後動也。將此由六百里各諭令知之。欽此。』仰蒙皇上籌維全局。指示機宜。曷勝欽感。伏維自古辦竊號之賊。與辦流賊不同。勦辦流賊。法當預防以待其至。堅守以挫其銳。勦辦竊號之賊。法當翦除枝葉。併搗老巢。今之洪秀全據金陵。陳玉成據安慶。私立正朔。僞稱王侯。竊號之賊也。石達開等之由浙而閩而江而湖南而廣西。流賊之象也。官張諸捻之股數衆多。分合無定。亦流賊之類也。自洪楊內亂。鎮江克復。金陵逆首。兇箴久衰。徒以陳玉成往來江北。勾結捻匪。廬州浦口三河等處。疊挫我師。遂令皖北之糜爛日廣。江南之賊糧不絕。臣等竊以爲欲廓清諸路。必先攻破金陵。全局一振。而後江南大營之兵。可以分勦數省。其餉亦可分潤數處。欲攻破金陵。必先駐重兵於滁和。而後可去江寧之外屏。斷蕪湖之糧路。欲駐兵滁和。必先圍安慶。以破陳逆之老巢。兼搗廬州。以攻陳逆之所必救。誠能圍攻兩處。略取旁縣。該逆備多力分。不特不敢悉力北竄。齊豫並不敢一意東顧。江浦六合。蓋竊號之賊。未有不竭死力以護其本根也。現擬四路進兵。自江濱而北。第一路由宿松石碣。以規安慶。臣國藩親自任之。第二路由太湖潛山以取桐城。多隆阿鮑超等任之。第三路由英山霍山以取舒城。臣林翼親自任之。先駐皖楚之交。調度諸軍。兼籌轉運。第四路由商固以規廬州。調回李續宜一軍任之。袁甲三等原奏。恐驅賊北竄。請由光固潁州繞赴北路等語。查湘勇久戰江濱。於淮北賊情地勢。不甚熟悉。能否繞出懷蒙以北。應俟李續宜軍至固始後。察看情形。再行奏明辦理。至蕭啓江一軍。臣國藩前於奏明後。卽經檄調來鄂。嗣聞桂

林解圍。又經飛札催調。計日內當已由粵回湘。張運蘭一軍。經湖南撫臣派防郴州。該道久勞於外。適值防務稍紓。稟請給假三月。暫予休息。臣國藩與駱秉章皆經批准。難遽北來。應懇皇上天恩。仍飭蕭啓江來皖。俾臣等少收臂指之助。除俟各軍取齊。再行馳報外。所有遵旨悉心會籌緣由。謹合詞恭摺。由驛五百里覆奏。伏乞皇上聖鑒。訓示施行。謹奏。硃批「另有旨。欽此。」（摺內攻陳逆之所必救。旁硃批惟恐言之甚易行之甚難。李續宜軍至固始後。旁硃批誠恐緩不濟急。欽此。）

特保賢才請旨記名簡放摺 咸豐九年十月十七日

奏爲特保賢才。請旨記名簡放。以示鼓勵。而昭激勸。恭摺奏祈聖鑒事。竊維求才必試。以艱危。用人當責以實效。湖北軍務迭興。兵事餉事。惟在辦理得人。而得人於凋敝殘破之區。尤非易易。查有四品卿銜禮部員外郎胡大任。於咸豐三年。奉旨回籍。幫辦團練。四年閏七月。臣國藩率師入鄂。委辦捐輸轉運接濟軍餉。臣林翼於五年正月。由九江援鄂。胡大任同在籍紳士。倡率董勸。辦理釐金。奮勉出力。奏奉諭旨。以員外即用。並賞戴花翎。嗣復委辦荆沙牙帖釐金。計籌解錢五十餘萬串。七年三月。奏請加四品卿銜。俟軍務告竣。送部引見。聽候簡用。該員感激奮興。以後又籌解銀錢鉅萬。軍餉藉以接濟。查四年五年。賊屢上犯。全省糜爛。當烽煙四逼之時。紳民遷徙殆盡。胡大任獨能於萬難措手之際。奮不顧身。經營籌畫。不獨穩固軍心。實足激發士氣。蓋其沈毅果決。力濟時艱。悉本忠藎之誠。乃能任艱危而不變。歷險阻而不渝。此後責以事功。必收大用。該員前已奏明簡放。現在楚境肅清。給咨赴部。可否籲懇天恩。以四品京堂記名。遇缺題奏之處。出自逾格。鴻施。又鹽運使銜湖南湖北補用道厲雲官。咸豐三年四年。臣國藩委辦發審及糧臺事務。五年十月。臣官文臣林翼奏留鄂省。總理水陸各軍糧臺。七年三月。奏奉諭旨。免補知府。遇有湖南湖北道員缺出。儘先補用。並加鹽運使銜。該員勤慎廉明。每月軍餉三十餘萬兩。出入勾稽。絲毫不苟。加以採辦製造。晝夜辛勤。自留鄂以來。歷五年如一日。現在大軍東指。兵分則事愈繁。餉多則責愈重。必得辦理熟習之員。近本省籌畫度支。方使軍餉軍火。四應不竭。湖北征皖正當喫緊之際。擬請特恩將厲雲官交軍機處記名。遇有道員缺出。請旨簡放。俾得就近一手經理。更於軍務有裨。所有特保緣由。謹合詞恭摺具奏。伏乞皇上聖鑒訓示。謹奏。

請浙江協餉片

再湖北水陸各軍併力圖皖。鄂餉不敷供支。臣官文已於八月初五日附片瀝陳。欽奉諭旨。飭令四川陝西山西江西等省。各按月協濟臣國藩軍餉三萬兩在案。除江西按月撥解外。僅陝西報解一萬兩。四川山西並未報解。緣該督撫但知鄂中近年稍就寬裕。不知此次圖皖。人數甚衆。不敷甚鉅。臣等再四商籌。萬分焦慮。查浙江撫臣羅遵殿。前任鄂藩。通省出入款項。經手已久。其艱難情形。實所深悉。浙江完善之區。該撫公忠夙著。諒能勉力代籌。仰懇皇上天恩。飭下羅遵殿按月協撥援皖餉銀四萬兩。徑解湖北總糧臺。由臣官文分撥臣國藩軍中。同辦皖事。飢飽均分。不致稍有歧視。謹合詞附片具陳。伏乞聖鑒訓示。謹奏。

李續宜請假片 咸豐九年十月十七日

正繪摺聞。接據布政使銜荆宜施道李續宜稟稱。『日內料理由湘起程。帶勇回鄂。接家信。知伊母病篤。心緒已亂。』等情。臣等查該道胞兄李續賓殉難後。其母憂傷成疾。該道乞歸省視。自應給假。以示體卹。現今李續宜所部各營。先行回鄂。由商城固始一路進發。俟該道假滿來至楚豫之交。再由臣等相機調度。先期辦理。謹先附片奏聞。

恭報入皖日期摺 咸豐九年十一月十九日

奏爲恭報入皖日期。仰祈聖鑒事。竊楚軍分路援皖。臣由第一路循江而進。業於十月十七日會奏在案。拜摺後。卽於十月二十四日。由巴河拔營。十一月初三日行抵黃梅。小住八日。十三日進駐皖省之宿松縣。紮營東北門外。所有蕭啓江張運蘭二軍。遵旨均不調回。臣目疾醫調尙未痊愈。就現在兵力。勉強支持。進剿實虞不足。防守或尙可恃。除遵旨另籌一軍。繞赴淮北。由臣官文會奏辦理外。所有拔營入皖。進駐宿松緣由。恭摺由驛五百里馳奏。伏乞皇上聖鑒訓示。謹奏。

謝年終恩賞摺 咸豐十年二月初六日

奏爲恭謝天恩事。咸豐十年正月十九日。臣在宿松軍中。准湖廣督臣官文咨稱。『承准軍機處咨開。『九年十一月二十七日。由內交出年終賞福字荷包銀錢銀食物等項。交兵部由驛馳遞。』』等因。轉賣到臣。當卽恭設

香案。整闕叩頭祇頌。竊臣謬典厚渠。未爛豹略。愧涓埃之莫報。實兢惕之彌深。乃蒙宸翰遙頒。鴻恩下逮。值天子萬壽之年。錫皇極九疇之福。雲封錦軸。江淮之草木生輝。日麗奎章。蛇鳥之旌旗變色。加以雙魚劔佩。荷囊則錦燦七襄。百鹿呈珍。榆莢則金登三品。蓮分西液。杞采南山。頽尙方玉食之珍。甘流綠乳。噉禁籙瓊林之果。矢報赤心。臣惟有殫竭愚誠。講求戎政。以惜寸惜分之志。致己千己百之功。庶期仰答高厚。鳩慈於萬一。所有微臣感激下忱。理合專差恭摺叩謝天恩。伏乞皇上聖鑒。謹奏。

目疾請假片 咸豐十年二月初六日

再逆酋四眼狗陳玉成。於去歲上援太湖。前敵各軍禦之於小池驛。危險萬狀。至正月二十五六等日。疊獲大勝。踴乎賊壘七十餘座。克復太湖。濟山兩城。業經臣咨明督臣官文等會奏在案。目下擬分路進兵。惟臣於正月初間。肝氣作痛。目疾復發。頃得家信。臣叔曾驥雲病故。涕泣之餘。眼光益蒙。合無籲懇天恩。賞假四十日。仍在營次調理。所部各營。可飭令先赴前敵會剿。謹附片具奏。請旨。

謝交部優敘恩摺 咸豐十年閏二月初五日

奏爲恭謝天恩。仰祈聖鑒事。准督臣官文咨鈔咸豐十年二月十四日。內閣奉上諭。「官文胡林翼會國藩奏。官軍大破援賊。克復太湖城池一摺。會國藩督師進剿。調度有方。著先行交部從優議敘。」等因欽此。當即恭設香案。望闕叩頭。伏念臣才識迂拘。未諳方略。前此下游剽悍之賊。實有傾巢深入之虞。賴督臣官文。撫臣胡林翼。調度應機。副都統多隆阿。總兵鮑超等。驍勇善戰。皆同心以戮力。遂掃穴而摧堅。微臣本無尺寸之功。聖主不遺涓塵之助。恩榮特被。感愧獨深。臣惟有勉率偏師。力襄全局。矢憂勤於夙夜。策奠定於江淮。以期仰答高厚。鳩慈於萬一。所有微臣感激下忱。謹繪摺附驛。恭謝天恩。伏乞皇上聖鑒。謹奏。

覆陳未能舍安慶東下請簡用左宗棠摺 咸豐十年四月十二日

奏爲遵旨覆奏。仰祈聖鑒事。竊臣承准軍機大臣字寄。咸豐十年四月初一日奉上諭。「前因金陵大營。官軍不支。退守鎮江。當諭令會國藩等傳旨。令都與阿馳赴江北。將如何進取之處。悉心籌酌。茲據瑞昌王有齡奏。『上游悍賊。麇集金陵。鎮常處處喫緊。請飭會國藩會同楊載福。分勦蕪湖。並入寧境。以分賊勢。』等語。金陵大營。退

守鎮江軍威不振。而逆賊分踞句容溧水等處。圖犯蘇常。江浙安危。在於呼吸。會國藩現紮安慶。若楊載福率領所部水陸各軍。速由東流建德一帶。分勦蕪湖。並入寧境。以分賊勢。而顧蘇常。於東南大局。實有裨益。惟安慶賊勢頗衆。會國藩能否舍安慶而東下。著酌度情形。相機辦理。迅速奏聞。如該侍郎兵力不敷。未能前進。卽飭楊載福統領水師。進攻蕪湖。扼賊之吭。並與李德麟等梭巡江路。亦足以牽掣賊勢。是爲至要。一等因欽此。伏查臣軍共計一萬數百人。現正圍攻安慶。多隆阿一軍。現攻桐城。李續宜一軍。現駐青草塢。援應兩路。均屬喫緊之險。前奉寄諭。命臣等傳旨令都興阿酌帶馬步隊四五百人。馳赴江北。當經飛咨該將軍。並咨商督臣官文撫臣胡林翼。悉心籌酌。計都興阿之軍。須從皖北各營中抽調。兵力已不能不分。此刻安慶賊勢尙強。臣若盡撤以赴蕪湖。寧國。則桐城之師。不能獨立。該逆若再乘機上犯楚疆。必將應接不暇。臣處自蕭啓江張運蘭撥赴楚蜀後。不獨將領無獨當一面之才。且兵力亦太單薄。難當巨寇。目下賊勢全趨常蘇。如常州不支。斷非進攻蕪湖一著之所能牽綴。此臣軍不能舍安慶而趨蕪湖之實情也。諭旨又以「左宗棠熟習湖南形勢。戰勝攻取。調度有方。目下賊氣甚熾。兩湖亦所必欲甘心。應否令左宗棠仍在湖南本地。襄辦團練等事。抑或調赴該侍郎軍營。俾得盡其所長。以收得人之效。並著會國藩酌量辦理。」等因欽此。查左宗棠剛明耐苦。曉暢兵機。當此需才孔亟之際。或飭令辦理湖南團防。或飭赴各路軍營。襄辦事務。或破格簡用。藩臬等官。予以地方。俾任籌兵籌餉之責。均候聖裁。無論何項差使。惟求明降諭旨。俾得安心任事。必能感激圖報。有裨時局。除飛咨楊載福欽遵諭旨。迅巡下游江面。並俟都興阿成軍。由督臣官文主稿會奏外。所有遵旨覆奏各緣由。理合專摺由驛六百里馳奏。伏乞皇上聖鑒。訓示施行。謹奏。

調張運蘭軍來皖片 咸豐十年四月十三日

再臣目病迄未痊愈。每作字一二行。卽須閉目少停。閏三月中旬。肝氣復痛一次。本擬奏請回京調理。因皖北甫經進兵。未敢掣動大局。現在安慶各營。派記名總兵竹山協副將朱品隆。員外郎李榕爲統領。臣弟會國荃照料一切。宿松老營。派遣員李元度總理營務。雖可勉力支持。而臣以病軀將事。又乏著名統將。殊不足以當大敵。上年臣奏調蕭啓江張運蘭兩軍。未蒙俞允。蕭啓江現在援蜀。勢難調回。張運蘭駐防郴州。現尙無賊。臣已飛咨湖

南撫臣駱秉章商調該軍。如果軍事棘手。擬再奏調張運蘭一軍前來。以厚兵力。合先據實附陳。伏乞聖鑒。謹奏。

謝署兩江總督恩摺 咸豐十年五月初二日

奏爲恭謝天恩。仰祈聖鑒事。竊臣於本年四月二十八日。承准軍機大臣字寄。咸豐十年四月二十一日。奉上諭。『會國藩已有旨署理兩江總督。自應統帶各軍。兼程前進。』等因。欽此。臣雖尙未接准部文。將欽奉諭旨恭錄行知。聞命之下。謹已恭設香案。望闕叩頭謝恩。伏念臣從戎七載。未展一籌。旣無橫草之功。兼有采薪之患。迺蒙龍光曲被。虎節遙頒。膺九陞之殊恩。界兩江之重寄。鴻慈逾格。感悚難名。查江督統轄三省。兼理鹽政。河漕江防諸務。地大物衆。任重事繁。在平時已才力之難勝。况目下實艱危之尤甚。建業久淪爲異域。蘇常又失於崇朝。臣忝任兼圉。仍司九伐。祇自慚其棉薄。詎有濟於涓埃。惟國家多事之秋。豈臣子懷安之日。計惟有殫心奉職。嚙指誓師。攬轡而志澄清。盡收疆土。下車而問疾苦。速拯瘡痍。庶幾仰答高厚生成於萬一。除另摺陳報一切軍情外。所有微臣感激下忱。理合專摺附驛。叩謝天恩。伏乞皇上聖鑒。謹奏。

通籌全局並辦理大概情形摺 咸豐十年五月初二日

奏爲欽奉疊次諭旨。通籌全局。並辦理大概情形。恭摺覆陳。仰祈聖鑒事。竊臣於四月二十五日。承准軍機大臣字寄。咸豐十年四月十八日。奉上諭。『本日據喬松年奏。常州城外各營已潰。郡城被圍。無錫鄉間已有賊蹤。』等語。爲今之計。自以保衛蘇常爲第一要務。著官文會國藩胡林翼熟商妥議。統籌全局。即令會國藩統領所部各軍。赴援蘇常。或未能深入救援。亦可扼截江面。以杜北竄。』等因。欽此。四月二十八日。准官文咨開。『二十五日准軍機大臣字寄。四月十九日奉上諭。『現在常州岌岌可危。無錫又有賊蹤。可以徑犯蘇城。江南大局。幾同瓦解。會國藩接奉此旨。即統率所部兵勇。取道寧國廣建一帶。徑赴蘇州。相機兜剿。以保全東南大局。毋稍遲誤。』等因。欽此。』同日承准軍機大臣字寄。四月二十一日奉上諭。『本日據徐有壬許乃釗奏。『賊逼蘇州。和春受傷身故。張玉良在無錫一帶駐紮。請催各路援兵。』現在江南情形。萬分危急。亟待援兵速集。以冀挽回大局。會國藩已有旨署理兩江總督。自應統帶各軍。兼程前進。』等因。欽此。仰見聖主憐懷。南服移緩就急之至意。臣於四月二十二日。准張芾來函。『蘇州於十三日失守。』旋接王有齡咨函。『常州於初六日失守。無錫於初

十日失守。張玉良於十四夜回抵杭州。等語。接聞之下。駭憤莫名。竊以爲蘇常未失。卽宜提兵赴援。冀保完善之區。蘇常既失。則須通籌各路全局。擇下手之要著。求立腳之根本。自古平江南之賊。必踞上游之勢。建瓴而下。乃能成功。自咸豐三年金陵被陷。向榮和春等皆督軍由東面進攻。原欲屏蔽蘇浙。因時制宜。而屢進屢挫。迄不能克金陵。而轉失蘇常。非兵力之尙單薄。實形勢之未得也。今東南決裂。賊鋒益張。欲復蘇常。南軍須從浙江而入。北軍須從金陵而入。欲復金陵。北岸則須先克安慶和州。南岸則須先克池州蕪湖。庶得以上制下之勢。若仍從東路入手。內外主客形勢全失。必至仍蹈覆轍。終無了期。臣所部萬餘人。已進薄安慶城下。深溝固壘。挖濬長壕。若一撤動。則多隆阿攻桐城之軍。亦須撤回。卽英山霍山防兵。均須酌退。各路皆退。則軍氣餒而賊氣盛。不但鄂邊難以自保。卽北路袁甲三翁同書各軍。亦覺孤立無援。是安慶一軍。目前關係淮南之全局。將來卽爲克復金陵之張本。此臣反覆籌思。安慶城圍不可遽撤之實情也。臣奉恩命權制兩江。必須帶兵過江。駐紮南岸。以固吳會之人心。而壯徽寧之聲援。無論兵之多寡。將之強弱。臣職應南渡。不敢稍緩。現定於十日內拔營渡江。駐紮徽州池州兩府境內。擬於江之南岸分兵三路。第一路由池州進規蕪湖。與楊載福彭玉麟之水師就近連絡。第二路由祁門至旌太。進圖樑陽。與張芾周天受等軍就近聯絡。第三路分防廣信玉山。以至衢州。與張玉良王有齡等軍就近聯絡。目下安慶之圍。不可驟撤。臣函商官文胡林翼酌撥萬人。先帶起程。一面分遣員弁。回湘添募勁勇。陸續趕赴行營。以資分撥。約須七月方能到齊。八月方能進剿。此臣移師皖南。擬募新勇。分途勤辦之情形也。從前金陵大營。以蘇常爲根本。餉糈軍械。源源取給。故能支柱數年。臣今自皖南進兵。應以江南爲根本。昨據安慶營中盤獲逆首陳玉成。自金陵發來僞文。內稱「現派賊目楊輔青李秀成李世賢等。直取蘇常。再攻徽州。以竄江西。又擬派賊目吳如孝張樂行。由定遠壽州六霍。以竄湖北。四路大舉。」等語。蘇常已失。則該逆所稱各狡計。均屬意中之事。急須先事預防。湖南各軍。有官文胡林翼調度堵遏。諒可無慮。江西兵力單弱。實不足以折新勝之敵。禦百倍之賊。必須湖南勁旅。越境協防。湖南撫臣駱秉章素顧大局。爲聖主所深知。此次賊若窺伺江西。所有兵勇餉械。仍當借資湖南。臣等往返咨商。竭五六兩月之力。辦江楚三省之防。仰仗皇上威福。能待兵勇漸齊。布置漸定。然後賊衆始至。與之力戰。所以保固江西湖南者在此。所以規復安徽三吳者亦卽在此。目今賊

敵方熾。人心大震。但求立腳之堅定。無論逆氛之增長。此臣聞賊計大舉上。犯擬先防而後勦之情形也。臣才識短絀。夙乏遠略。姑就近處籌畫。略陳梗概。其松江等屬。是否尚存。蘇省文武。殉難若干。暨淮揚完區如何設法保全。應俟查明熟籌。陸續陳奏。其起程日期。亦俟另疏具報。謹將遵旨統籌全局。並辦理大概情形。先行繕摺。由六百里覆奏。是否有當。伏乞皇上聖鑒訓示。謹奏。

請起用道員沈葆楨摺 咸豐十年五月初三日

奏爲請旨起用告發回籍之道員。以固東防。而資熟手。恭摺奏祈聖鑒事。竊臣擬三路分兵進取。業經同日奏明。臣由徽池一路前進。賊必由衢廣等處。窺犯江西。爲牽制馳突之計。江西之東防。卽浙江之上游。亦卽福建皖南之關鍵。是衢廣一路。防兵最爲喫重。非得威惠素著之大員。不能得力。查告發按察使銜九江道沈葆楨。明而能斷。咸豐六年。在署廣信府任內。堅守郡城。保全東路。嗣蒙簡用監司。仍留防務。籌兵籌餉。吏長民懷。八年春。石逆自撫建傾巢竄浙。卒不敢直犯郡城。其後李元度守廣豐玉山。均因該道接濟得全。其去廣信也。士民遮道攀轅。來臣處遞呈請留者。凡十數次。該道以二親年老。又事多掣肘。力請告歸。現當時局艱難。聞該道雙親尙健。自應先國後家。共勵澄清之志。合無仰懇天恩。俯飭准下福建撫臣。傳諭該道。迅由本籍馳赴江西。由臣會商撫臣。委署理地方官。仍辦廣信防務。節制在防文武。將來再請簡補司道各缺。以期呼應靈通。於大局必有裨益。至該道器識才略。實堪大用。臣目中罕見其匹。謹會同江西撫臣毓科合詞附驛具陳。伏乞皇上聖鑒施行。謹奏。請旨。察看海漕並保鹽場片 咸豐十年五月初二日

再蘇常爲財賦之區。京倉根本所繫。一日不復。則海運無可漕之粟。重大之事。以此爲最。臣有地方之責。引領東望。憂心如焚。而遠隔賊氛。又若鞭長莫及。目下江蘇巡撫。想已簡放有人。若係駐紮江南。能與暑欽差大臣張玉良。力保松江上海。將來尙有辦漕之基。若係駐紮江北。能力保淮揚下河州縣。亦不失爲產米之區。臣移營南渡。卽當派員至松江淮揚兩處。緘商新任巡撫。察看海漕事件。兼保鹽場之利。謹先附片陳明。伏乞皇上聖鑒。謹奏。

擬設江西糧臺及牙釐總局片 咸豐十年五月初三日

再臣蒙恩簡署江督。與平時事勢不同。江南舊治。旣被久踞。皖南皖北。均屬殘破之區。目下蘇常新失。徧地賊氛。

幾無下手之處。自應以兩湖爲籌兵之源。而以江西爲籌餉之源。查臣自咸豐三年至今。均係自設糧臺。自辦報銷。以本無地方之責也。今擬札委江西藩司總辦糧臺。仍添委道府數員。幫同辦理。其自咸豐三年至十年五月。由臣分作三案造冊報銷。自臣接總督印務以後。卽由江西藩司衙門報銷。以專責成。而免牽混。至江西歲入之款。除錢糧外。專恃牙稅釐金。臣現咨商撫臣毓科仿照湖南章程。牙釐另設一局。遴委道府大員專管。不歸作藩司收款。復仿照湖北章程。督臣撫臣分辦牙釐錢漕。各臻踴躍。仍互相通融。互相稽考。以期無誤餉需。此後江西通省錢漕。應歸撫臣經收。以發本省綠營及各防兵勇之餉。通省牙釐。歸臣設局經收。以發出境征兵之餉。似此眉目分明。庶官吏各有職守。銀錢出入。滴簡歸源。杜絕影射浮冒諸弊。除酌派會辦糧臺及專司釐局各員。俟與撫臣商定。開單會奏外。所有現設江西糧臺及牙釐總局各緣由。理合附片陳明。伏乞皇上聖鑒。訓示施行。謹奏。

催調張運蘭軍片

咸豐十年五月初二日

再臣軍現止一萬六百人。不特兵力極單。而將領實乏。獨當一面之才。臣前札調布政使銜道員張運蘭一軍。業經附片奏明在案。目下渡江。由徽州兩路進剿。應請勅下湖南撫臣駱秉章。迅催張運蘭由湖南取道江西。至饒州一帶。聽候調遣。此外可徵之兵。可謂之將。容臣與兩湖江西督撫諸臣咨商檄調。隨時陳奏。謹附片具奏。請旨。

李元度另募新勇片

再按察使銜記名道李元度。向充臣軍營務處。現經撫臣王有齡奉旨。飭令赴浙。差委查該道舊帶之平江勇五營。早經交卸。業由饒廷選帶赴浙江。勦辦淳安股匪。該道若單騎往浙。無濟於事。臣處又別無兵可撥。現札委該道馳赴湖南。另募平江新勇三千人。與饒廷選之平江五營。合爲一軍。擬卽令防勦廣信玉山衢州一路。則資熟手。其沈葆楨如奉旨起用。亦令駐防該處。與李元度饒廷選三人連絡一氣。保障一方。於浙江則固上流之咽喉。於江西則保東北之重鎮。卽於福建皖南亦均有裨益。所有李元度無兵赴浙。另募新勇緣由。理合附片陳明。伏乞皇上聖鑒。謹奏。

報銷歷年軍需摺咸豐十年五月初六日

奏爲歷年軍需支給官弁兵勇鹽糧等款。查照例案。造具總散各冊。恭摺奏銷事。竊臣自咸豐三年節次欽奉諭

旨辦理軍務。所有水陸兩營軍需報銷。因與湖南湖北江西三省總局相交涉。恐有膠轕難清。經臣酌擬報銷大概規模。分爲數款。查明各營在臣處領餉月日。與他省領餉月日。劃清界限。於咸豐七年十二月內。在籍具摺。先行奏明在案。九年駐軍江西。設局辦理報銷。臣督同承辦各員。逐款稽核。計收到湖南湖北廣東四川陝西江西各省協濟餉銀。並臣行營勸辦捐輸等項。自咸豐三年起。至六年十二月底止。共收銀二百八十九萬一千四百九十五兩九錢二毫八絲。收湖南解到漕米二萬八千七百四十五石八斗一升四合三勺。收江南協濟米二萬五千八百二十斗六升九合。自咸豐三年九月起。至六年十二月三十日止。共發過官弁兵勇人等鹽菜馬乾。駝折夫價水腳工食等項銀二百六十六萬七千三百七十一兩六錢九分六釐三毫五絲九忽五微。口糧米三千七百九十九石五斗八升二合三勺。列爲初案報銷。尙應存軍需銀二十二萬四千一百二十四兩二錢三釐九毫三絲五微。米四萬九千九百四十九石五斗一勺。入於二案。舊管接續造報。合將支給兵勇鹽糧各正款。列爲初案。按照軍需例案。造具簡明總冊。分目細冊。蓋用安徽宿松縣印。除將各冊專差分送部科外。理合恭摺具奏。伏乞皇上聖鑒。敕部核銷施行。謹奏。

遵旨覆陳並報起程日期。摺咸豐十年五月十七日

奏爲欽奉諭旨。先行覆陳。並恭報起程日期。仰祈聖鑒事。竊臣奉命權督兩江。已將辦理大概情形。於五月初三日專摺馳奏在案。正在料理起程間。初八日承准軍機大臣字寄。四月二十九日奉上諭。『前因蘇常危急。疊次諭令會國藩帶兵迅速馳赴兩江總督署任。昨據巴棟阿李若珠等奏。『常州江陰相繼失陷。』本日復據瑞昌等奏。『蘇常於本月十三日失守。文武不知下落。請飭會國藩來浙督辦。』等語。覽奏實深憤懣。本日已降旨將張玉良革職留營。並命瑞昌總統各軍。江長貴幫同辦理軍務。薛煥暫署兩江總督矣。江南軍務。自和春身故。大營兵勇。全行潰散。不獨不堪任使。並且擾害民間。非有勁旅。不足掃盪賊氛。張芾派江長貴帶兵二千七百名。蕭翰慶帶兵四千名。周天受派劉仁福帶兵二千名。毓科派文瑞劉芳貴帶兵三千八百餘名。皆係赴援蘇常之軍。據瑞昌等奏。『江蘇潰散兵勇紛紛南下。』已諭令該將軍等飭張玉良截留。認真簡汰。惟賊勢飄忽異常。官兵能否抵禦。尙未可定。著會國藩即遵前旨。兼程前進。由浙赴蘇。會同瑞昌調度各軍。昨據張芾奏。『溧陽股匪復

陷建平。進犯寧國。此路如有梗阻。務當設法繞道前進。以免耽延。逆匪前撲鎮江。巴棟阿等尙能固守。江陰失陷。南北梗塞。昨已諭令李若珠調吳全美師船二百號。赴狼山福山。以通南北水路。本日復催令都興阿迅赴揚州。督辦江北軍務。並諭官文等。籌給會國藩都興阿軍餉矣。將此由六百里加緊諭令知之。欽此。仰見我皇上籌慮全局。備極憂勤。聞命之餘。寢食俱廢。連日與官文胡林翼商撥兵勇。安慶之圍業已奏明勿撤。臣所部萬人暫交臣弟會國荃留皖統帶。但於安慶圍師中。抽出記名總兵朱品隆。副將唐義訓之二千人從征。而飭臣弟另募二千。以補其缺。又於鄂師中咨調綬靖鎮總兵鮑超。霆字營五千。游擊楊鎮魁。禮字營一千。合之現駐宿松步隊。約共萬人。隨臣先行過江。又遵旨檄調開歸陳許道張運蘭一軍。並咨商湖南撫臣駱秉章。候補四品京堂左宗棠。在湖南募勇萬餘人。挑選將佐。配齊軍械。陸續由江西以達皖南。會合進剿。惟鮑超因傷疾稟發。於二月間奏准給假回蜀。計須六月。乃可趕到。張運蘭遠在郴州。計須七月。乃可趕到。左宗棠續募之勇。到皖更需時日。臣目下南渡。兵數甚單。統將未齊。應先駐紮祁門縣境。東以聯張芾。徽州之聲援。西以保江右。饒州之門戶。俟鮑超張運蘭趕到時。即令分赴徽寧蕪湖兩路。俟李元度五千人趕到時。即令由廣信赴浙蘇一路。計三人到營之期。先後不甚相遠。臣已於十五日自宿松起程。便道至安慶水師營次。與楊載福彭玉麟面商後。即由建德以趨祁門。倘下游軍情愈迫。鮑超等到營稍速。臣當隨時策應。不敢稍涉拘泥。所有奉到諭旨覆陳。並起程日期。恭摺由驛六百里具奏。伏乞皇上聖鑒訓示。謹奏。

預籌三支水師摺 咸豐十年五月十七日

奏爲預籌三支水師。俟皖南賊勢稍定。即行分投試辦。恭摺奏祈聖鑒事。竊臣自聞蘇州失守之信。即以京倉無漕爲慮。旋奉命署理江督。海漕係職分中事。日夜焦灼。猝無良策。曾於本月初三日。附片具奏在案。迄今又踰旬日。不知新任江蘇巡撫簡放何人。駐紮何地。其力能設法辦漕。以濟京倉與否。無從函商。查淮揚之裏下河。產米最多。而鹽場爲大利所在。若改爲就場征課。經理得宜。較之近年所入。可多得銀百萬兩以外。如果蘇松久陷。不能辦漕。或於裏下河辦米解京。或於鹽課中籌巨款實銀解京。專供京倉買米之用。亦足以濟權變而固根本。然欲保下河之米。場鹽之鹽。非於淮安多造戰艦。急辦水師。實有岌岌不可保之勢。昨准安徽撫臣咨到奏稿。亦以

保裏下河爲言。湖北撫臣胡林翼七次寄函，皆勸臣奏辦水師，以保鹽場。淮揚二郡，自古稱爲澤國。北有長淮，南有大江，中有洪澤邵伯高郵寶應諸湖，運鹽場人字茫稻諸河，巨浸支流，互相灌注，一片汪洋。若能造戰船二百餘號，多購洋礮，精選將弁，則不特可以保下河之米，場竈之鹽，亦且可以輔揚州之陸軍，使逆賊不敢北犯，助臨淮之陸軍，使川路不至梗塞。此淮揚水師急宜籌辦之情形也。賊之守金陵也，以安慶廬州爲犄角，以太平蕪湖爲護衛。蕪湖之南，有固城南漪丹陽石臼諸湖，上則通於寧國之水，陽江青弋江，西則止於東壩，掘東壩而放之，則可經太湖，歷蘇州，以達於婁江。古之所謂中江者也。蕪湖孤懸水中，賊匪守之則易，官軍攻之則難。是以五年血戰，不能得手，而黃池灣址屢次失利，皆以全無水師之咎。臣愚以爲欲克金陵，必須先取蕪湖，欲取蕪湖，必於寧國另立一支水師，循布固城南漪等湖之中，寧國水師攻其內，大江水師攻其外，如七年攻破湖口之例，庶幾蕪湖可克。而東西梁山，可期以次恢復。此寧國水師急宜籌辦之情形也。逆匪堅忍善守，各路奏報，皆有同辭。官軍圍攻屢年，往往因水路無兵，不能斷其接濟。從前武昌九江臨江吉安等城之拔，實亦舟師之功。居其少半，側聞紅單師船，體質笨重，非大江狂風，不能起碇，又不能接應陸戰，不能巡哨汊河，金陵所以久而無功，亦由水師一面，始終不得絲毫之助。今蘇州旣失，面面皆水，賊若阻河爲守，陸軍幾無進兵之路，城外幾無紮營之所。臣愚以爲欲攻蘇州，須於太湖另立一支水師。浙江無事，宜於杭州造船，浙江有警，亦宜於安吉孝豐等處造船。必使太湖盡爲我有，而後西可通寧國之氣，東可拊蘇州之背。而陸師亦得所依附。此太湖水師急宜籌辦之情形也。此三者，皆目前之急務。如力不能前，則先辦淮揚及寧國二支，如力仍不逮，則專辦淮揚一支。蓋蘇省財賦之區，淪陷殆徧，僅留下河之米，場竈之鹽，若不設法保全，則東南之利盡棄矣。臣自咸豐三年，奉旨辦理水師，閱歷頗久，而三處皆臣管轄之地，鹽漕皆臣應辦之事，義無可辭，責無可貸。頃已專丁至欽差大臣袁甲三軍營，函詢淮安等處，尙有木料可以造船者否。其寧國安吉，亦當派人前往察看木料之多寡，船工之難易。至礮位一宗，擬即日派員費銀至廣東購買洋礮五百尊，由大庾嶺過山，以達江西，而出湖口。又由英霍等縣過山，以達固始，而出長淮，計往返須五月有奇。程途雖遠，而期限必嚴。搬運雖艱，而志在必行。是否有當，伏乞聖慈詳明指示，屢據探報，逆首陳玉成欲由徽州竄擾江西，臣進駐徽境，與張芾一軍聯絡防勦，俟鮑超張運蘭及左宗棠新募之勇。

次第到齊。將皖南布置稍定。立腳穩。臣或輕騎馳赴淮安。監辦水師。或奏派大員赴淮辦理。屆時再行奏明。請旨遵行。所有預籌三支水師。俟皖南賊勢稍定。分投試辦緣由。恭摺馳奏。伏乞皇上聖鑒訓示。謹奏。

彭玉麟統率水師李瀚章會辦牙釐片 咸豐十年五月十七日

再治軍籌餉。均以得人爲要。查布政使銜廣東惠潮嘉道彭玉麟。管帶水師。身經數百戰。艱險備嘗。咸豐五年冬。江西各郡縣俱陷於賊。湖南北音問不通。該道帶礮船在鄂。由賊中間道來江。徒步七百里。遂令整理內湖水師。逐漸擴充。分攻各城。以次收復。至七年九月克復湖口。始與楊載福外江水師會合。現在協辦安慶。晝夜督戰。其任事勇敢。勵志清苦。實有烈士之風。臣至皖南後。察看寧國一帶。如須添辦水師。再行斟酌緩急。奏請簡派。又湖南儘先補用道李瀚章。廉正樸誠。吏事精核。咸豐三年。由湖南善化縣任使調赴臣營。襄辦糧臺。遇有戰陣。亦督隊指麾。七載以來。寵辱不驚。夷險一致。湖北撫臣胡林翼屢爲臣言。欲奏留鄂省。以備任使。臣處實有乏才之患。過江以後。兵數漸增。餉需尤迫。前經奏明派員專辦江西牙釐。接濟軍餉。該道隨營年久。於江省情形尤熟。擬派署江西藩司督糧道李桓。會同該道辦理通省牙釐事務。可期漸有起色。惟隔省人員。恐其呼應不靈。仰懇聖恩。將李瀚章改歸江西。以道員遇缺開單請簡。俾臣得收指臂之助。再聞皖南吏治久未整飭。臣行營所經。留心察看。如現在任州縣有不稱職。容臣揀員委署。若無安省合例之員。隨時奏明辦理。是否有當。謹附片具奏。請旨。

請查京倉存米片 咸豐十年五月十七日

再臣擬辦淮揚水師。保裏下河產米產鹽之利。查打造戰船。必須料厚工堅。不可借用民船漁划。遷就誤事。江北久被賊擾。木料想亦艱絀。約計赴粵買礮。赴淮安設廠。造船三百號。采買油鐵棕纜各具。自皖楚起程。以至船礮配齊下水之日。共須一年之久。駛至各河湖港汊。分別防剿。與賊接仗數次。立定腳根。然後梭巡鹽場。疏通引地。又須數月之久。果能在淮揚辦米解京。或辦買米之銀解京。屈指已在咸豐十二年矣。其十一年辛酉應辦之漕。尙屬毫無著落。功效太遲。憂灼實深。不知部臣另有變通之方。籌備京米否。然無論效驗之遲速。此事要在必行。仰懇皇上聖恩。寬臣期限。俾得辦成水師。庶鹽漕俱有把握。即防剿亦有裨益。仍懇勅下戶部查明京倉米石存餘若干。是否足支辛壬等年之用。咨行到臣。俾得斟酌籌辦。伏乞聖鑒訓示。謹附片具奏。

請毋分撤鄂軍片 咸豐十年五月十七日

再鄂省爲各路用兵之樞紐。自古有事於大江南北者。必爭此上游形勝。湖北但有重兵。卽足制賊死命。臣於九年正月十一日。曾經詳奏在案。此次臣過江兵單。而不敢撤動安慶一軍者。實因欲圖三吳。宜於上游厚集其勢。不敢專顧目前之私計也。然臣調去鄂兵。已分七千。都與阿帶赴揚州。又分數千人。兩處各撥餉數萬。湖北之力。甚形竭蹶。設愈分愈薄。鄂省一有疏虞。則南六省之奏報。不能達於京師矣。據探逆首陳玉成悉衆上犯。捻匪亦思竄突。鄂疆捍禦。良不易易。應請皇上俯念全局攸關。嗣後他處喫緊。無再抽發鄂省兵勇。俾官文胡林翼等得以勉力支持。不致蹈金陵大營覆轍。鄂省幸甚。天下幸甚。臣細察大局。苟有所見。不敢緘默。是否有當。伏乞聖鑒。謹奏。

飭吳全美師船赴防江北片 咸豐十年五月十七日

再欽奉寄諭。『江陰失陷。南北梗塞。昨已諭令李若珠調吳全美船師二百號。赴狼山福山。以通南北水路。』等因。欽此。臣查蘇常旣失。南岸沿江州縣。恐難自保。尤恐賊匪乘勢據船。徑渡北岸。其江北通州泰興各口內。河汊分歧。脈絡皆貫。一經闌入裏下河。卽無完土。此實目前至要至急之務。現在蕪湖上游江面。有楊載福彭玉麟水師。足資防剿。總兵吳全美李德麟全軍。皆可調赴下游。分扼狼山福山以至焦山瓜州一帶江面。與揚州陸軍就近聯絡。無任賊船偷渡江北。責成該鎮等總以防堵各江口。保全裏下河爲主。除一面飛飭該鎮等卽日起旋下駛外。理合附片具陳。伏乞皇上聖鑒訓示。謹奏。

妥籌辦理並酌擬變通章程摺 咸豐十年六月初二日

奏爲遵旨妥籌辦理。並酌擬變通章程。恭摺覆陳。仰祈聖鑒事。竊臣於五月十五日。由宿松起程。十七日於湖口縣境。專摺馳報在案。旋准軍機大臣字寄。五月初九日奉上諭。『本日有人奏。『安慶一城。經曾國藩水陸布置。連營圍困。賊已援絕勢窮。剋日可復。加寧建瓴之師。直搗金陵。急攻東壩。踞蘇之賊。必回顧巢穴。卽以援蘇之兵。乘勢夾攻。則蘇州可復。常鎮可圍。較之由長江取道赴蘇。似爲便捷。』各等語。蘇常爲東南財賦之區。且係數省咽喉。自應以急籌攻復爲上策。現在賊勢直趨湖杭。勢將糜爛兩省。尤爲刻不可緩。如果安慶一城。指日可復。正

不妨先復安慶。沿江而下。乘金陵賊衆空虛之時。直搗巢穴。一面調派援兵。併力夾攻蘇州。使賊首尾不能相顧。曾國藩既膺重任。責無旁貸。其安慶是否可以卽復。金陵是否可以進攻。不致牽制兵力。久頓堅城。抑或調派先解蘇常之危。均著酌量緩急。妥籌辦理。原摺著鈔給閱看。一等因欽此。十九日又准兵部火票遞回臣五月初三日具奏辦理大概情形一摺。奉上諭。曾國藩現在進兵安慶。已薄城下。驟難撤動。而蘇常一帶。望援孔亟。亦須帶兵過江。先固人心。所稱平江南之賊。必踞上游之勢。現擬駐紮徽池境內。分三路。一由池州進規蕪湖。一由祁門至旌太進圖深陽。一分防廣信以至衢州。俟湖南協防江西兵勇。布置妥協。約須八月。方能進剿各情。通籌全局。甚合機宜。卽著照所擬辦理。一等因欽此。仰見聖主明燭萬里。虛懷委任。欽悚莫名。臣疊次奏報。以安慶之圍。不可撤動。蓋取以上游制下游之勢。爲進攻蕪湖克復金陵張本。淮揚水師。要在必行。蓋取以北岸制南岸之勢。爲保護鹽漕。協勦江淮張本。連日准浙江撫臣王有齡函咨稱。蘇州各屬。多爲賊陷。又陷松江郡縣。太倉嘉定失而旋復。張玉良督兵萬餘。進攻嘉興。兩次獲勝。廣德州業經收復。統計浙省兵勇。現有大萬餘人。等語。是兵力已厚。有瑞昌等商籌調度。不獨杭城可保。浙省不至糜爛。且能由嘉興以漸圖蘇松。諭旨慮及賊勢趨杭一節。嘗不至上勞宸廬。至安慶一城。西南嶺江。有楊載福彭玉麟水師扼紮。東南倚山。有臣弟曾國荃陸軍扼紮。并令韋志俊協守。縱陽城外之接濟漸斷。城內之賊糧尙足。北面難挖長壕。東面尙未合圍。逆酋四眼狗毋妻宗族。皆在城中。秋間援賊必至。如能與多隆阿李續宜各軍。合力擊退。則城賊勢窮。可期得手。卽不能遽拔堅城。但使陳逆全股與安慶桐城官軍相持。亦足分下游之賊勢。紓蘇浙之兵力。諭旨垂詢安慶指日可復一節。應俟援賊戰退之後。乃能確有把握。再南岸三路進兵之說。臣前月兩奏。業已具陳其略。目今賊餒彌盛。占地愈廣。我軍挾全力以進攻。不患賊之逼我前。而患賊之鈔我後。故須廣布局勢。穩立腳根。適准王有齡函開。中路不宜遽進。深陽恐其驅賊南犯。臣擬俟左宗棠李元度鮑超張運蘭等。先後到齊。北路則直趨池州。南路則直趨廣德。中路則暫不深入。先守徽寧要縣。庶免鈔我後路之患。亦無逼賊南竄之虞。此臣注重安慶皖南。不敢先圖蘇常一隅之微意也。臣昨陳淮揚水師一摺。奉旨後。當卽奏派大員。先往籌辦。臣俟將皖南布置稍定。再行輕騎馳往監造。並督同藩司運司經理鹽漕。以期濟京倉而裕軍餉。頃復接奉四月二十日諭旨。曾國藩現督兩江總督。軍務地方。

均屬責無旁貸。一等因欽此。是地方公事。未可盡置之緩圖。臣在皖南。則於徽寧一帶。駐紮行營。在江北則於淮揚一帶。駐紮行營。仍於安慶水次設立老營。規模與行省衙署相似。臣前此歷年文卷。概存水次官署。後此地方文卷。亦歸水次官署。臣兩岸往來。均於安慶水師小住。免致蹤跡無定。案卷遺失。惟三省事務較繁。必有實任司道數員。隨同襄理。從前總督駐劄金陵。本有江寧藩司糧巡各道。同駐一處。每年督臣往淮揚駐紮數月。又有漕河鹽各屬。供其差遣。自咸豐三年以後。歷任督臣。因金陵賊踞。專駐常州。不復偶駐淮揚。亦不復經營江皖。殊非朝廷設官之本意。亦非近年通行之常例。臣思整復舊規。爲因時變通之法。擬請聖恩。飭派蘇藩司隨江蘇撫臣同駐一處。蘇臬司江寧糧道巡道隨臣同駐一處。聽臣酌量派委。其江寧藩司兩淮運司。仍駐揚州等處。分管丁漕鹽務。以專責成。臣赴淮時。就近督飭辦理。臣衙門文卷。遞寄安慶水次者。專委司道大員經營。其地方尋常事件。卽令代拆代行。緊要者彙封送營。以憑核辦。如此明定章程。俾各屬有所稟承。而地方公事亦不至久遠廢闕。此臣兼管地方。擬變通辦理之大概也。臣舟次阻風。於二十日行抵黃石磯。晤楊載福彭玉麟商籌添辦各船水師之法。二十七日抵東流。二十八日抵建德。其湖北調來之霆字各營。尙在北岸。連日南風過大。不能渡江。臣在建德略候數日。卽馳赴祁門駐紮。除到祁後續行奏報外。所有遵旨妥籌。並擬變通章程。恭摺由五百里覆奏。伏乞皇上聖鑒訓示。謹奏。

恭報行抵祁門日期摺 咸豐十年六月十六日

奏爲恭報行抵祁門日期。仰祈聖鑒事。竊臣於六月初三日。在建德縣行營。將妥籌辦理情形。專摺覆陳在案。拜摺後。卽於初四日由建德啓程。初九日善坑途次。承准軍機大臣字寄。五月二十六日奉上諭。一會國藩現已抽調兵勇萬人。由宿松進駐祁門。俟鮑超張運蘭李元度到後。卽由徽寧蕪湖廣信分路進兵。具見胸有成竹。謀定後戰。惟蘇州待援迫切。該署督惟當催令鮑超等迅速來營。會籌進剿。但能援師一日早到。卽早一日救民水火。實深殷盼。該署督現統兵勇較單。未可輕率前進。宜加持重爲要。一等因欽此。仰蒙宸慮周詳。聖慈愷側。無任欽感。臣冒雨進行。於十一日先抵祁門。所帶宿松馬步各營。及由安慶撥來之記名總兵朱品隆副將唐義訓兩軍。合兵四千餘人。皆隨臣到祁。扼要紮營。惟朱品隆積受暑溼。途間患病。請假醫調。未能同來。霆字各營。紆道較遠。

旬日內方可到祁。節次飛催鮑超張運蘭等。迅速來皖。據鮑超稟稱。五月十二日由夔州起程。適江水陡漲。峽內行舟維艱。略守數日。卽兼程由鄂赴營。張運蘭稟稱。本擬五月二十二日。由郴州拔營。因探報廣東花旗股匪。竄近宜章縣界。該處防勤喫緊。須接替有人。方能起行。各等語。是該鎮道等。均難剋期而至。左宗棠李元度新募之勇。則須七八月間。陸續前來。目下蘇省待援迫切。極欲一旅之師。相機進剿。以期速解倒懸。無如兵力過單。將領尤乏。恐不足以當大敵。自應謹遵聖慈指示。宜加持重。未可輕率前進。一俟鮑超張運蘭暨新募各勇。無論何軍先到。卽先行派撥前往援剿。以仰副我皇上隆懷南服。拯民水火之至意。所有行抵祁門日期。恭摺由五百里馳報。伏乞聖鑒訓示。謹奏。

皖南軍務暫時未便接辦片 咸豐十年六月十六日

再欽奉五月二十六日寄諭。昨有人奏。張芾等任賊長驅。以致大局決裂。現徵寧兵勇。尙有三萬餘名。若統歸會國藩節制。卽可簡其精銳。以資攻剿。不必專俟新募之勇。等語。張芾督統皖南軍務。於賊匪入浙。不能堵禦。各無可辭。徵寧等府。本會國藩兼轄地方。該處軍務。如併由該署督督辦。自覺事權歸一。惟地方遼闊。能否堵馭得宜。著會國藩於抵徽後。察度情形。奏明辦理。等因。欽此。仰見皇上嚴覈軍實。詳慎用人之至意。臣沿途接見官紳。留心訪問。皆謂張芾所部兵勇。近來甚不得力。周天受駐守寧郡。餉項久虧。軍心涣散。臣竊計該二郡兵勇。如果足資攻剿。則本年不至如此決裂。若其積習太疲。臣亦未能遽使用命。臣現駐祁門。距徽州近二百里。距寧國約五百里。初到此間。情形尙未深悉。且值徵寧吃緊之際。臣處兵將未齊。勢難前進。卽未便接辦皖南軍務。張芾所部各軍。應暫由該副都御史統籌調度。俟左宗棠張運蘭等新軍到皖後。再行悉心察看詳奏。請旨酌辦。合先附片覆陳。伏乞皇上聖鑒。謹奏。

請留左宗棠襄辦江皖軍務摺 咸豐十年六月十六日

奏爲請將四品京堂左宗棠。仍留臣會國藩軍營。共維江皖大局。恭摺覆陳。仰祈聖鑒事。竊臣等承准軍機大臣字寄。五月十六日奉上諭。四川軍務。關係緊要。本日據胡林翼陳奏各情。業經降旨令東純前往署理四川總督。並令暫時接辦軍務。曹澍鍾已令回籍終制矣。該撫所保之左宗棠一員。前已有旨賞給四品京堂。令其襄辦

會國藩軍務。若令督辦川省軍務。能否獨當一面。於大局有無裨益。即著委速籌商。如可勝任。即一面令該員迅赴川省。一面奏聞。再降諭旨。一等因欽此。仰見我皇上用賢無方。慎重軍務。虛懷若谷。下逮芻蕘。臣等曷勝感悚。伏查蜀省居長江之上游。形勢險固。財力豐饒。藍李各股匪。蔓延雖廣。究係初起之賊。烏合之徒。果得有威望者。爲川督。事權歸一。辦理裕如。即石逆亦不敢再萌窺伺。候補四品京堂左宗棠。前在湖南贊助軍事。肅清本境。克復鄰省。上年石逆大股竄湘。幫同撫臣駱秉章指揮調度。不數月間。遂收廓清之效。其才可以獨當一面。固已歷有明徵。雖其求才太急。或有聽言稍偏之時。措辭過峻。不無令人難堪之處。而思力精專。識量闊遠。於軍事實屬確有心得。前奉諭旨。命左宗棠襄辦軍務。該員感激國報。聞詔之日。即在湘募練五千餘人。選擇甚嚴。鉅細必躬。專俟秋間成軍。率以東下。今若改東師以西行。則臣國藩頓少一枝勁旅。恐不足當皖南之逆氛。而左宗棠獨往川省。亦恐人地生疎。或致呼應不靈。且以吳蜀之事論之。蜀省土匪倡亂。占地少而撲滅甚易。江皖狂寇披猖。占地多而掃蕩甚難。蜀爲鄂秦兩省之根本。吳爲京師及東南數省之根本。蜀有可籌之餉項。吳無可靠之協款。事勢既分難易。情形亦有重輕。不待智者而可決。左宗棠素知大局。勇敢任事。必不肯舍難而就易。避重而就輕。合無籲懇聖恩。俯念臣國藩襄助需人。仍令左宗棠督勇來皖。實於江楚等省。大有裨益。如將來蜀氛日熾。江南軍情稍鬆。再由臣國藩隨時酌量奏明。請旨定奪。臣等再四籌商。意見相同。謹合詞據實覆陳。是否有當。伏乞聖鑒。訓示施行。謹奏。

遵旨調遣水師摺 咸豐十年六月十六日

奏爲欽遵諭旨。調遣水師。恭摺覆陳。仰祈聖鑒事。竊臣於六月初二日。在建德縣行營。承准軍機大臣字寄。五月二十日奉。上諭。前據會國藩奏。剋期渡江。俟兵勇到齊。即分三路進兵。當經諭令照擬辦理。因思將來由池州蕪湖進攻金陵。必須水陸兼籌。方能得力。所有楊載福彭玉麟水師。均著歸會國藩調遣。此時楊載福攻破蠟磯賊巢。業已得手。著會國藩即飭令該提督與彭玉麟李德麟吳全美等師船。連爲一氣。進攻沿江賊巢。以牽賊勢。而壯聲威。將此由六百里諭令知之。欽此。臣查北岸安慶無爲和州各城。南岸池州蕪湖太平各城。皆濱臨大江。將來陸軍進攻金陵。沿江掃蕩。必藉水師夾勦之力。吳全美李德麟等師船。本駐魯港。現因下游吃緊。遵

旨將吳全美調往。前經臣飭李德麟全軍併赴狼山福山焦山瓜洲一帶。以資分布。於五月十七日附片具奏在案。厥後臣至黃石磯。李德麟前往謁見。因其餉需軍火缺乏。由臣借發銀五千兩。火藥二萬觔。俾利進行。所有蕪湖以上江面。臣即商令楊載福彭玉麟派營接防。目下蕪湖縣城未復。東西梁山未破。吳李三鎮下駛。後與上游相隔過遠。未易連爲一氣。至楊載福彭玉麟等。本係臣之舊部。第楊載福係在湖北領餉。彭玉麟係在江西領餉。臣自前年出統陸軍。久已水陸分途。不相爲謀。茲復奉命調遣水軍。自應欽遵辦理。查臣現駐祁門。距安慶江面已三百餘里。此後或進駐徽寧。或馳赴淮揚。距安慶近者數百里。遠或二千里。軍情瞬息變更。機宜固不可遙度。奏報尤不可太遲。若概由臣處轉奏。誠恐稽延貽誤。楊載福統率水師。身經數百戰。雖積勞致疾。身體稍弱。而謀勇器識。凌越諸將。其江面戰守事宜。似應仍令該提督會同彭玉麟妥辦。並由該提督自行具奏。以期秉承聖訓。無誤事機。所有遵旨調遣水師。仍由楊載福自行奏報緣由。繕摺覆陳。是否有當。伏乞皇上聖鑒訓示。謹奏。

摺酌進兵兼顧皖南軍務摺咸豐十年七月初三日

奏爲欽奉諭旨。斟酌進兵。暨兼顧皖南軍務。恭摺覆奏。仰祈聖鑒事。竊臣於六月十六日。業將行抵祁門日期。恭摺奏報在案。嗣於二十四日。承准軍機大臣字寄。六月十六日奉上諭。『瑞昌奏請催會國藩兼程赴浙一摺。據稱。』浙省援師及收集兵勇。除由張玉良調攻嘉興外。尙須分扼孝豐於潛嘉善等處。現在存兵無多。急盼援師。方能進規蘇州松江。聞會國藩已由東流抵徽。請飭兼程赴浙。會商進剿。』等語。已諭令該將軍。即將現有兵勇統帶。迅速起程。進取蘇松。不得稍涉觀望。惟該將軍兵力較單。亦屬實情。會國藩前奏。『於行抵徽州後。尙須待新募勇到。再行前進。』自爲持重起見。第蘇松常等府。均屬財賦之區。果能早爲規復。或可不至糜爛。著會國藩酌度情形。如所帶官軍萬人。合之瑞昌兵勇。足敷勦辦。即著星馳前進。將蘇州等府縣城池。速籌克復。不必再俟新勇。其如何取道浙中。以便與瑞昌面商各務。並著斟酌辦理。至張芾督辦皖南軍務。不能得力。前諭會國藩。『以徽寧本該督兼轄地方。如將該處軍務歸併辦理。自覺事權歸一。令於到徽後。察度具奏。』會國藩現已渡江。著仍遵前旨。即將能否兼顧之處。據實奏聞。將此由六百里加緊諭令知之。欽此。』又於二十七日。承准軍機大臣字寄。六月十五日奉上諭。『據會國藩奏妥籌辦法。所稱中路不宜遽進。深隄。恐其驅賊南犯。擬俟左宗棠

李元度飽超張運蘭等。先後到齊。北路則直趨池州。南路則直趨廣德。中路則暫不深入。先守徽寧要縣。庶免鈔我後路之患。自係老成持重之見。本日據薛煥奏。『松江府城於五月二十七日克復。現在會督兵團進攻青浦。』是蘇省軍情。漸有起色。若得該署督所派援軍分道並進。早與瑞昌等軍會合進剿。更可大振軍威。迅復各城。免致東南財賦之區。久遭蹂躪。該署督務當兼權緩急。毋得坐失機宜。是爲至要。』等因欽此。仰見聖謨廣運。籌畫精詳。曷勝欽悚。臣自行抵祁門後。浙江撫臣王有齡派道員孫觀前來。催臣赴浙。將軍瑞昌亦咨催臣由浙赴嘉興。而寧國被圍緊急。張芾屢函屬臣撥兵赴援。臣以所部萬人。內僅四千七百人。係久戰之士。其五千餘人。皆係新募之卒。未經見仗。不敢輕於一試。又以鮑超爲水所阻。尙未旋鄂。朱品隆患病未痊。不能帶隊。張運蘭雖入江南境內。撫臣毓科咨商暫留袁州。以防南贛之賊。臣以不援。則寧國有坐困之勢。赴援。則統將無可派之人。正在萬分焦灼。忽於六月二十九日接將軍瑞昌咨稱。『二十日賊逼杭州省城。當經調集各軍奮力擊退。據奸匪供稱。賊匪回竄徽寧。』等語。又接張芾函開。『寧國亦獲勝仗。協餉已於二十四日送入府城。』等語。臣前奏八月進剿。欽奉恩旨。俞允。今浙江逼城之賊。業經擊退。若鮑超等陸續到齊。寧國保全無急。當可與初次原奏相符。至進兵之路。凡浙中來信。皆勸臣先赴杭州。注重嘉興。凡江北來信。皆勸臣先攻池州。注重蕪湖。欽奉諭旨。飭臣斟酌辦理。以臣愚見。由杭嘉以至蘇州。處處阻水。兵從一路而入。必難得手。目下張玉良三萬餘人。頓兵一面。已屬失勢。若臣與瑞昌再以重兵繼之。愈覺窘束而不能施展。不特進兵蘇州。毫無把握。抑且地隘兵多。久必生變。臣現以統將未至。新軍未齊。若往返商辦。徒屬虛語。卽再三陳奏。亦託空言。且待兵將齊集。察賊勢最重之處。疾趨而痛剿之。屆時再行專摺詳奏。仰慰慈廑。諭旨垂詢。徵寧軍務。能否兼顧一節。臣前奉五月二十六日寄諭。『徽寧軍務。如併由該署督督辦。自覓事權歸一。著會國藩於抵徽後。察度情形。奏明辦理。』等因欽此。當將皖南兵勇。甚不得力。俟左宗棠張運蘭等到皖。再行詳細奏明。請旨酌奪緣由。附片具奏在案。茲復奉諭旨。催詢臣入徽境。已逾半月。留心察訪。張芾自成豐五年。籌辦徽池防務。屢挫賊鋒。使不至深入浙境。於大局不爲無益。惟所部各軍。紀律太寬。近日多住民房。或帶婦女。張芾於各嶺設卡之處。並未親出查閱一次。卽徽州城守之具。亦無預備。觀其軍心之懈。實已難期再振。周天受向以能戰著名。本年二月不能扼守廣德。致有杭州之變。三月不能扼

守建平。致有東壩之失。微寧兩防。歷年取用漸餉。約計千萬。浙中恃爲長城。故本省別無防守之師。一旦藩籬盡撤。任賊長驅。杭人慘遭浩劫。百物蕩盡。以故浙江官紳士民。莫不恨周天受貽誤大局。而張芾有督辦之責。亦當分任其過。諭旨以賊匪入浙。不能堵禦。張芾咎無可辭。臣固不敢爲之寬解也。臣與張芾在京素識。近來同歷戎行。書問常通。稔知該副都御史學養深沈。操行廉正。向爲老成宿望。惟治兵非其所長。用人或受朦蔽。應如何位置得宜之處。聖主自有權衡。非臣下所敢妄擬。已革提督周天受。貽誤浙省。情罪較重。惟從前打仗出力。現在寧郡被圍。尙能督率將士。忍饑困守。其胞弟周天培。亦以忠勳殉難。相應請旨。可否將周天受仍留臣營差遣。以觀後效。出自聖主派裁。至微寧池太等府。處處與浙江毗連。地方遼闊。袤延七八百里。一片逆氣。幾無完區。臣即謂募齊集。人數不滿三萬。正當狂寇壓境之時。不敢遂謂調度得宜。漸有起色。惟係臣兼轄地方。且目下駐師。將來進兵。皆不離乎皖南。自應力籌兼顧。責無旁貸。特是微寧兩防兵數尙衆。銅習已深。舊欠過多。新餉欠缺。不裁汰則口食無資。一裁汰則變態百出。辦理棘手。一言難罄。臣才力短絀。深懼弗勝。如奉旨歸併臣處督辦。臣兼顧皖南。即斷不能更顧浙江。區區微忱。不敢不縷陳於聖主之前。所有欽奉諭旨。斟酌進兵。及兼顧微寧軍務各緣由。謹繕摺由五百里具奏。是否有當。伏乞皇上聖鑒訓示。謹奏。

與辦淮揚水師派員先往籌辦摺 咸豐十年七月初二日

奏爲遵旨與辦淮揚水師。揀派大員。先往籌辦。並請簡授寶缺。恭摺具陳。仰祈聖鑒事。竊臣於五月十七日。奏請預籌三支水師一摺。奉上諭所稱。擬設淮揚水師。以保裏下河之米。各場鹽之鹽。兼輔淮揚陸軍。均屬目前要務。應即與辦。一等因欽此。查蘇省財賦之區。淪陷幾徧。僅留裏下河之米。各場鹽之鹽。若不設法保護。則東南之利盡棄。裏下河通泰各口。嶺江南之賊。時欲乘間北渡。即運河以內。如三汊河萬福橋邵伯鎮等處。均係裏河門戶。揚州一軍。兵力單薄。亦難處處置守。必須設立水師專營。上下梭巡。協力防勦。以輔陸軍所不逮。臣前奏聲呼江北須造戰船三百號。臣將皖南布置稍定。或輕騎馳赴淮安監造。或奏派大員赴淮辦理。欽奉諭旨允准。現在甫抵祁門。微寧軍情日緊。調募未齊。布置未定。暫難分身前往。而淮揚水師。關係重大。必須趕緊籌辦。該處久被賊擾。戰船所需木料及油鐵棕纜各具。聞俱短絀。事屬創始。締造維艱。非數月所能集事。臣已派都司成名標赴

廣東購買洋礮。約冬間可以回營。明春可以繞道出淮。應即遴委大員。先行馳往淮揚一帶。察度辦理。查有按察使銜福建延建邵遠。缺道李鴻章。自咸豐三年正月。在編修任內。奉旨派同前工部侍郎呂賢基。回皖辦理團防。在皖北軍營六年。歷著戰功。於淮揚情形。聞見較確。上年五月間。經臣奏赴江西軍中。會督兵勇。克復景鎮。浮梁。因其力辭保舉。是以未經奏獎。嗣隨臣周歷鄂皖各處。十月間。蒙恩簡授福建。缺道。臣因襄贊帶人。未令赴任。該員勁氣內斂。才大心細。與臣前保之沈葆楨二人。並堪膺封疆之寄。而李鴻章研覈兵事。於水師。尤所究心。擬請旨飭派該員前往淮揚。與辦水師。擇地開設船廠。由兩湖酌帶委員工匠。並由臣商令楊載福。彭玉麟。於水師營中。選派打仗得力之將弁。交該員帶往。以資練習。抑臣更有請者。江北水師。設立專營。一切餉需費用。尤鉅。聞江北糧臺。供給揚州陸軍。已形支絀。若水師經費。再由該臺籌給。誠恐力難兼顧。此項水師。兼爲保護鹽場。疏通引地而設。必水師辦成。鹽務方有把握。二者相輔而行。尤須一手經理。始則暫分鹽課之銀。供水師辦船辦礮之用。繼則全仗水師之力。爲淮鹽護場。護運之兵。李鴻章係隔省人員。呼應不靈。應請旨改授江北地方。實缺。乃可措手。倘蒙皇上天恩。破格擢授兩淮鹽運使。俾得整頓鹽課。以濟舟師之餉。實於鹽務軍務。兩有裨益。其現任運司喬松年。久任蘇省。才識卓著。早邀聖明洞鑒。或可另予簡擢之處。聖主自有權衡。非臣下所敢妄擬。凡與舉大事。必才與事相副。人與地相宜。李鴻章籍隸廬州。洞悉皖北及兩淮艱苦。於袁甲三王夔麟等。亦素相接洽。如奉旨允准。當飭該員束裝由臨淮繞道前進。臣俟皖南各軍到齊。立腳漸穩。規模漸定。明年再親赴淮揚。監造水軍。並督同該員等。辦理鹽漕各事宜。以期濟京倉而保重地。所有派員與辦淮揚水師。並請簡授實缺各緣由。繪摺馳陳。伏乞皇上聖裁訓示。謹奏。

黃翼升堪勝淮揚鎮總兵片 咸豐十年七月初二日

再臣於七月初一日。承准軍機大臣字寄。六月十八日奉。上諭。日本日據載垣等奏。遵旨會議。裁撤江南河道總督。添設總兵一員。請飭酌保。候旨簡放一摺。江南河道總督。既經裁撤。添設總兵一員。已明降諭旨。作爲淮揚鎮總兵。暫駐清江。俟軍務平靖。改駐揚州。清江地方。爲南北咽喉。最爲緊要。現在粵捻各匪。均未肅清。難保不再行窺伺。必須久歷戎行。深諳韜略之員。方堪勝任。著袁甲三會同藩各於所部將領中。詳加揀選。擇其才略素著。會

經出兵打戰。謀勇兼全者。酌保數員。迅速具奏。候旨簡放。以期防勦得力。等因欽此。仰見皇上慎重要地。博訪將材。莫名欽感。遵卽於楚軍水陸各將領中。逐加揀選。查有總兵銜直隸河間協副將黃翼升。湖南長沙縣人。咸豐元年。由協標兵丁出師廣西。三年六月。經臣調營管帶。嗣派充水師哨官營官。身經百戰。現帶管水師右營。協勦安慶。該員治軍嚴整。廉勤自矢。臣本擬奏派。與李鴻章同赴淮揚。管帶戰船。如蒙皇上天恩。簡授淮揚鎮總兵一缺。將來水師辦成。更易聯絡一氣。以保要區。查清江地方。衆流環匯。河湖襟帶。既有河標陸兵駐防。亦須水師相爲依附。乃可力遏寇氛。是否有當。伏乞聖主裁酌施行。所有遵保堪勝總兵緣由。謹附片覆奏。請旨。

平江縣建忠義祠摺 咸豐十年七月初三日

奏爲平江縣城捐建忠義祠。彙祀陣亡員弁勇丁。請旨列入祀典。恭摺具陳。仰祈聖鑒事。竊惟取義成仁。舍生之極軌。旌忠表烈。厲世之微權。我皇上褒崇節義。凡疆場殉難之員。莫不贈官廕爵。予諡建祠。其有一軍一邑。死事獨多。如湖口之水師。湖南之湘鄉。均蒙勅建專祠。列諸祀典。所以激勵人心。維持風化。洵屬無微不至。自粵逆倡亂以來。湖南士民。戰功特著。卽如平江一縣。當江鄂之衝。爲省垣之蔽。四鄰皆陷。一邑獨完。計自守界禦賊。出境荷戈。如湖北江西皖湖閩浙黔粵川中。凡屬楚軍。間多平勇。前後力戰。死事者約二千六百餘人。茲據統領平江營按察使銜浙江記名道李元度稟稱。一該縣本有忠義祠。附學宮之外。惟地位頗狹。不足以妥衆靈。咸豐六年。署知縣陳鳳舞勸捐籌款。詳准特建平江忠義祠。在武廟之右。工未及竣。該道上年假歸。復籌集捐費。因已成之局。完未竟之功。廓其規制。峻其垣墉。旁立官廳。後爲僧舍。所購祭田。歲可入租三百石。爲祭祀牲牢之用。遴派公正紳耆。輪流經理。以期垂久。祠之中龕。專祀曾任營官之贈太僕寺卿知府銜湖北候補同知直隸州何忠駿。贈總兵證壯節候補參將童添雲。五岳銜卽選知縣李原濬。從九黃錫宇四員。東西龕祀祀武生候補把總李傳綸等六十七員。東西廊祀祀陣亡勇目劉匯湘等二千五百五十三名。繕冊彙懇查照湘鄉忠義祠之例。奏請列入祀典。飭地方官春秋致祭。以安忠魂。而昭激勸。等情前來。臣覆查無異。合無籲懇天恩。勅部將湖南平江縣所建忠義祠。俯准照各府昭忠祠及湘鄉縣忠義祠之例。列入祀典。飭地方官春秋致祭。於聖朝褒忠勵節之道。實有裨益。除將名冊咨部外。所有平江縣捐建忠義祠緣由。謹會同湖南撫臣駱秉章。恭摺附驛具奏。伏乞皇上聖

鑒訓示施行謹奏。

行營采訪忠義第一案片 咸豐十年七月初三日

再江蘇安徽各省。歷年勦賊陣亡殉難官紳。因省垣失守。案卷被焚。未經隨時查辦者。計必不少。此次蘇常之陷。變起倉卒。其遇害官紳士女。尤不忍令其湮沒。臣奉命署理江督後。卽於行營設立忠義局。委員采訪。詳覈事實。兼考世系。出示徧行曉諭。或由司道具詳。或由府廳州縣彙報。或由該家屬徑稟。臣隨時具奏。請建總祠總坊。其死事尤烈者。另建專祠專坊。以慰忠魂。而維風化。茲據寧國縣紳士廩生周文古等聯名稟稱。一原任貴州都江通判程枚。現年七十四歲。原籍舒城縣人。因避寇寄居寧國縣方村地方。本年二月初二日。賊陷該邑。入村擄爲該員端坐。厲聲罵賊。媳女等矢志不屈。賊遂縱火圍燒。該員程枚。與其胞姪文重程星軫。女婿監生高俊。並第四媳程高氏。第五媳程高氏。第三媳程張氏。親女高程氏等。男婦七人。同時焚歿。其子文生五品軍功程耀。甫自外歸。集練撲救。奮身殺賊。連受重傷。旋因傷重殞命。該員之第二媳程高氏。與其孫文重程壇。亦於咸豐七年。在舒城原籍。罵賊被害。一各等情。稟懇請卹前來。臣查該員程枚子姪媳婦等。先後殉難共十人。忠孝節義。萃於一門。殊堪嘉憫。應懇聖恩俯准。敕部從優議卹。並分別旌表。以褒忠節。嗣後凡兩江殉義之官紳男婦。臣當按報之先後。隨時彙奏。卽以此次爲第一案。理合附片具陳。伏乞聖鑒施行。謹奏請旨。

覆奏統籌全局摺 咸豐十年七月十一日

奏爲欽奉諭旨。統籌全局。恭摺覆陳。仰祈聖鑒事。竊臣於七月初七日。奉准軍機大臣字寄。咸豐十年六月二十四日奉上諭。一前據曾國藩奏。一酌擬變通進兵章程。北路趨池州。南路趨廣德。中路先守徽寧。俟布置稍定後。卽親赴淮揚。籌辦鹽漕。一大江南北兼顧。統籌尙爲周妥。本日已明降諭旨。將曾國藩補授兩江總督。並授爲欽差大臣。督辦江南軍務矣。上海官軍自攻克松江以後。進攻青浦。惟薛煥倂處海隅。兵力單弱。勦辦恐難得手。瑞昌尙在浙省。張玉良收集潰軍。進攻嘉興。難獲勝仗。亦未收復郡城。此時蘇常一帶。並無重兵攻勦。前因李若珠已患痺疾。在北帶兵。未能得力。是以命都興阿馳往督辦。本日據該將軍奏稱。湖北無兵可撥。尙在英山駐紮。業經寄諭官文等。派撥精兵。刻卽馳往。惟都興阿未到以前。江北各軍。無人總統。深恐賊勢北趨。勦辦愈難措手。

會國藩現授爲欽差大臣。事權歸一。責無旁貸。大江南北。均應妥爲布置。著卽飛催左宗棠李元度鮑超張運蘭等到齊。由池州廣德分路進兵。規復蘇常。其江北一帶。尤爲緊要。應如何布置之處。並著先行籌畫。免致臨事周章。該大臣膺茲重任。務當統籌全局。迅掃逆氛。以副委任。將此由六百里諭令知之。欽此。仰蒙聖主委任至重。指示周詳。欽感之餘。殊深悚懼。臣自奉命署理江督。所籌進取規模。迭經詳晰奏報在案。茲諭旨飭催左宗棠等到齊。分路進兵。規復蘇常一節。查左宗棠之勇。選練未齊。聞須八月朔日。始由湖南起程。李元度擬於七月初帶勇由平江起程。尙未報行抵何處。鮑超因江水封峽。不能行舟。六月十六日始由夔州起程。張運蘭六月二十七日。行抵萍鄉。適江西撫臣毓科以南贛有警。札飭該軍暫紮袁州。尙未接臣後二次飛催來皖之札。屈指約計。李元度張運蘭鮑超等到徽。當在七八月間。左宗棠到徽。當在九月中旬。臣前奏由池州廣德進兵。維時廣德有江長貴扼守。我軍由此進攻。冀與嘉湖各軍聯絡。頃接張芾函稱。竄杭之賊。由安吉孝豐回撲廣德。該州城竟於七月初四日失陷。江長貴不知下落。賊必踞此要地。使皖浙之師。聲氣隔絕。又寧國被圍一月。雖經周天受督兵固守。而賊仍未退。接據探報。僞輔王楊七麻子帶池州之賊。將自北路往撲寧國。新破廣德之賊。將自南路往撲寧國。寧郡糧少援孤。竊恐周天受力難久支。軍情變幻。且夕不同。鮑超不能於六月趕到皖境。既與臣原奏不符。江長貴不能一日固守廣德。尤非臣意料所及。目下皖南固危乎其危。浙江亦防不勝防。臣軍調齊之後。須一攻廣德。一援寧郡。寧廣之間。又須有一枝重兵。往來策應。勢不能繞越皖境。而逕趨蘇常。此蘇常急難規復之實情也。諭旨又念上海兵力單弱。嘉興亦未收復一節。前准薛煥咨函。松江上海等處。水陸人數無多。欲白張玉良處分撥三千人。未知果調得勁旅否。臣相距過遠。援應不及。近因浙西多事。文報阻滯。雖彼此各致數函。均尙未接覆書。據探報僞忠王李秀成。帶領賊衆。由金陵往犯上海。頃聞松江復陷。上海舟師大挫。危迫殊甚。至張玉良嘉興一軍。與臣處信息罕通。但聞二十九日地道挖城。轟塌數丈。旋因賊衆堵禦。未能成功。又微聞將帥不和。文武不協。相持過久。恐生事變。臣新膺督師江南之命。本有統轄該軍之責。惟現值皖南陸危。勢不能舍近而圖遠。且廣德復陷。浙事日棘。臣與兩處文報。動多梗塞。此嘉興與上海暫難兼顧之實情也。諭旨垂詢江北一帶。如何布置一節。臣前於五月十七日奏飭總兵吳全美李德麟師船。全數下駛。駐泊焦山瓜洲等處。以通淮揚兩府之

氣而扼逆匪北渡之路。又於七月初三日奏派遣員李鴻章與辦淮揚水師。以護鹽場。而輔陸軍。無非爲力保江北起見。惟水師庀材鳩工。赤地新立。非數月所能就緒。臣俟皖南各城立腳粗穩。乃能繞道馳赴淮揚。亦非數月所能成行。側身東望。焦憤實深。都與阿送奉諭旨督辦揚州軍務。日夜焦灼。謀所以速行之法。官文胡林翼亦百計經營。謀所以資送之法。無如事多窒礙。迄不能就。不特三千勁旅。五月口糧。鄂省之力。一時難以撥付。卽弁勇之心。亦實不願遠行。蓋自湘省至揚州。繞道五千餘里。上遊一水可通。人多而氣聚。下遊百物昂貴。人少而勢孤。同一應募之勇。同一額定之糧。其願就鄂就皖。而不願赴揚州者。情也。勢也。以臣愚見。淮徐等處。風氣剛勁。不患無可招之勇。但患無訓練之人。擬卽函商官文都與阿等。酌帶楚師千人。先行馳往。仰慰聖懷。到江北後。用楚軍之營制。練淮徐之勇丁。嚴其禁約。寬其期限。李鴻章往辦水師。亦照此法行之。臣明年馳赴淮揚。亦照此法行之。餉絀而不改其常。戰敗而不變其度。期於有成而後止。若仗聖主洪福。得一二名將出乎其間。則兩淮之勁旅。不減三楚之聲威。此江北先行籌畫之微意也。臣素性愚拙。本無長駕遠馭之才。力所能勉者。惟思勤懇以收得尺得寸之功。力所不逮者。何敢欺飾以失願言。願行之義。除函商都與阿自行陳奏外。所有遵旨通籌全局緣由。謹繕摺由驛六百里覆奏。伏乞皇上聖鑒訓示。謹奏。

謝授兩江總督欽差大臣恩摺 咸豐十年七月十一日

奏爲恭謝天恩。仰祈聖鑒事。竊臣於七月初七日。准兵部火票遞到咸豐十年六月二十四日內閣奉上諭。兩江總督著曾國藩補授。爲欽差大臣。督辦江南軍務。欽此。一當卽恭設香案。望闕叩頭謝恩。伏念臣材質駑下。重違難勝。愧播篆於兼圻。未妥籌夫全局。迺荷絲綸疊沛。節鉞真除。拜三錫於師中。忝專征於闔外。處大江南北水火日深之地。值各路軍民雲霓望切之時。臣自願何人。謬兼斯任。親榮非分。惶悚莫名。惟是戡亂無才。分憂有志。凡微臣思力所能及。職分所應爲。益當殫竭血誠。勉圖補救。擬漢臣之二表。少副聖主高天厚地之恩。廣周雅之兩篇。願佐熙朝北伐南征之業。所有微臣感激下忱。理合專摺附驛。叩謝天恩。伏乞皇上聖鑒。謹奏。 硃批。知道了。卿數載軍營。歷練已深。惟不可師心自用。務期虛己用人。和衷共濟。但不可無定見耳。欽此。

李元度調補皖南道摺 咸豐十年七月十一日

奏爲皖南道員缺緊要請旨迅賜簡放以重職守事竊臣接據署徽寧道江南鹽巡道福成稟稱「奉浙江巡撫王有齡批示新放皖南道郭志融已於春間在蘇病故該署道久患痺症雖日就痊可精力尙未復元皖南道事務殷繁郭志融既已病故員缺未便久懸懇奏請另行簡放以重職守」等情前來臣查皖南道一缺自咸豐五年經部臣議定照台灣道之例如府縣委署參撤地丁漕糧等項應由藩司主政者命盜案件勘解審結應由臬司主政者概歸該道就近覆辦遇有緊要軍務並准專摺馳奏責任甚重相應奏明請旨迅賜簡放以重職守臣尙未接印所有本衙門案卷無從查閱聞皖南道缺向由督臣酌保請簡今臣駐軍徽州尤須得人相助爲理查有按察使銜新授浙江溫處道李元度血誠果毅練達戎機每遇艱危之際獨能貞固不搖前在江西疊著戰功皖南地勢講求亦熟仰懇聖恩可否卽以溫處道李元度調補皖南道缺於軍務地方均有裨益該道玉山守城案內蒙恩加按察使銜於此缺加銜之例亦屬相符如蒙俞允應俟廣信布置稍定卽令該道馳赴新任至江南鹽巡道福成臣已於六月初三日奏明調營欽奉諭旨著照所擬辦理該員現署皖南道應俟李元度到任後卽將福成調營差委所有皖南道缺緊要揀員請旨簡放緣由謹會同安徽撫臣翁同書恭摺馳奏伏乞皇上聖鑒訓示施行謹奏

欽奉四次諭旨覆陳摺 咸豐十年七月二十二日

奏爲欽奉四次諭旨恭摺覆陳仰祈聖鑒事竊臣於七月十四日承准軍機大臣字寄七月初一日奉上諭「周天受奏『旌德等處賊匪竄犯寧國郡城被圍急盼援師』一摺寧國爲江浙屏蔽倘有疎失則蕪湖等處之賊得與蘇常連絡勢難愈難著手會國藩已抵祁門著卽調派勁旅前往寧國與周天受內外夾擊藉解城圍其蘇常等屬應如何速籌進剿一俟飽超等到營並著卽行籌辦」等因欽此又於七月十五日承准軍機大臣字寄七月初三日奉上諭「王有齡奏『逆匪竄入於潛勢將內犯省城請飭該大臣迅速赴援』等語會國藩若由淳安嚴州轉戰而東先將此股逆匪勦除則皖浙可以保全然後進兵削平江蘇諸郡縣如會國藩尙未能督兵前往卽催調張遠蘭飽超等迅速到齊兼程前進以顧全局」等因欽此又於七月十七日承准軍機大臣字寄七月初五日奉上諭「龐鍾瑒奏『由浙至蘇必須先復吳江由滬至蘇必須先復崑山由江北至蘇必須由常

熟進兵。再由丹陽溧陽追躡其後。庶可殲除賊匪。請飭會國藩迅速統師南下。」等語。蘇常等郡縣被匪蹂躪。民團尙能殺賊。亟望官軍援剿。若任久陷賊中。恐民心易懈。賊守益堅。辦理愈難措手。著會國藩體察情形。應由何路進兵。迅圖規復地方。並將辦理情形。迅速具奏。至所稱「常昭兩縣捐餉已竭。請飭協濟。」等語。並著會國藩飭令該地方官。就附近完善之區。勸捐接濟。庶使民團踴躍。得以相機攻剿。該大臣務當統籌全局。迅掃逆氛。以慰朕望。」等因欽此。又於二十一日。承准軍機大臣字寄。七月初九日奉上諭。「據瑞昌等奏。於潛大股賊匪。疊陷臨安餘杭州縣。並由餘杭塘窰逼省垣。」雖經總兵劉季山一軍擊退。而省城兵勇。能守而不能戰。張玉良攻勦嘉興之軍。正在得手。亦難撤調。福建江西之兵。雖經催調。到尙需時。待援情形。自屬非常緊迫。著會國藩仍遵前旨。迅速取道入徽。即由淳安嚴州轉戰而東。先將此股逆匪撲滅。保全浙省。再圖規復江蘇諸郡。設或該大臣不能親往。亦須先派得力之兵。前往救援。以冀挽回大局。」等因欽此。仰見聖謨廣運。籌示精詳。曷勝欽感。臣於七月十二日。遵籌全局。摺內。業將寧國危急。廣德失陷等情。覆奏在案。伏查目下軍情。自以規復蘇常爲要。而由皖南進兵。必須能保寧國。能復廣德。乃有進兵東下之路。則必以急援寧國。急攻廣德爲要。二者力不能兼辦。則又以專救寧國爲要。然由祁門徽州而入寧郡。須分走旌德涇縣石埭等處。現已一片賊氛。必須節節掃蕩。以分賊勢。而清後路。則欲援寧郡。又以先勦旌德涇石埭三縣爲要。臣自聞寧國被圍之信。續撥銀五千兩。由張芾派弁轉解。因無路可達。中途折回。臣催調各軍。急切難求。日夜旁皇。莫知所措。茲幸接據鮑超稟稱。「已於七月初五日。行抵宜昌府。」張運蘭稟稱。「十一日。行抵江西省城。」李元度於十二日。亦抵江省。計七月底。均可趕到祁門。臣擬俟該鎮道等到齊。派鮑超率霆營六千。由黟縣以攻石埭。張運蘭率老湘營四千。由太平以攻涇縣。又飭李元度先往廣信。布置防務。仍由徽州旌德前進。必俟涇旌石三路肅清。直抵寧郡。然後臣軍之立腳始定。皖南之局勢始安。皖南安則浙江亦安。而蘇常亦有可圖。若使皖南不安。則臣軍且岌岌自保之不暇。又何能屏蔽浙江。更何能規復蘇常。臣之棉力。必俟八九月間。大戰數次。然後視打仗之利鈍。定入蘇之遲速。目下兵力未齊。上不能慰聖主宵旰之憂。下不能答蘇人雲霓之望。此臣之寸心負疚。惶悚無地者也。至龐鍾璪所稱由浙至蘇。先復吳江。此張玉良一路之事。必先克復嘉興。然後能達吳江。由滬至蘇。先復崑山。此薛煥一路之事。必先克

復松太。然後能進崑山。由江北至蘇。取道常熟。此李若珠一路之事。必先分兵過江。然後能趨常熟。此三路者。聞方自保之不暇。未必能遽圖進取。若臣軍南赴吳江。仍須由皖南下手。北赴常熟。仍須從淮揚下手。行軍本有次第。賊情時有變更。既難僥倖於不可必成之功。又豈敢臆斷於不可逆料之事。臣惟有嚴督皖南諸軍。速戰一日。速進一步。以期仰副聖廬。至常昭捐餉已竭。應飭該地方官勸捐妥辦。惟祁門距常熟等處。相隔過遠。文報不通。臣當札飭州縣。兼函商紳士。設法籌捐。以資接濟。至月前竄杭之賊。嘗經擊退。由原路退回。竄陷廣德。臣已迭次奏明。淳安嚴州現俱無事。臣自無庸分兵赴援。所有欽奉四次諭旨。恭摺由六百里覆奏。伏乞皇上聖鑒訓示。謹奏。

派宋夢蘭辦皖南團練片 咸豐十年七月二十二日

再承准軍機大臣字寄六月二十七日奉上諭。『現在各省舉行團練。皖南地方緊要。自應一律辦理。著會國藩察看情形。擇其諸練軍務。素繫人望者。酌保一員。迅速奏聞。候旨簡派。即令督辦皖南團練事宜。』等因。欽此。伏查團練本是良法。然奉行不善。縣官徒借以斂費。局紳亦從而分肥。賊至則先行潰逃。賊退則重加苛派。轉爲地方之弊政。臣自咸豐二年。奉旨辦團。初次摺內。即奏明自行練勇一千。是臣所辦者。乃官勇非團丁也。嗣後經過各省。從未見有團練能專攻一股。專守一城者。不過隨官兵之後。勝則貪財。敗則先奔。常藉口於工食之太少。而辦理歧異者。往往多給錢文。團丁所領之餉。與臣之官勇例價相同。且或有過之者。其取之民間。無非勸捐抽釐之類。是於團練已失其本義。於軍餉又大有妨礙。本年五月。臣奉命署理江督。即曉諭官民。團練之事。當擇地而辦之。擇人而辦之。蓋欲得其利。不得不去其弊也。茲復欽奉諭旨。舉行皖南團練。查皖南嶺隘紛歧。若築礮設卡。一夫當關。萬衆卻步。臣俟進兵後。擬委賢員。於徽寧各要隘。擇地築礮。以資防守。必須地方廉正紳士。會同督勸。過江以來。留心訪察。聞有丁憂在籍之翰林院編修宋夢蘭。徽州歙縣人。本年春間。賊由太平縣圖竄箬嶺。該員督帶練丁。協力嚴守。品行膽識。衆論翕然。相應請旨。飭派宋夢蘭辦理皖南團練事宜。會同委員。董勸各屬紳民。興築礮寨。其未經克復者。官勇攻勦。概不令團丁隨往。已經克復者。紳耆修礮。團丁從役。則庶可得其利也。如蒙俞允。可否將宋夢蘭賞加翰林院侍講銜。以示優異之處。出自皇上天恩。所有遵旨酌擬皖南團練人員。附片覆

陳伏乞皇上聖鑒訓示。謹奏。

收復廣德州片 咸豐十年七月二十二日

再正繕摺簡。准張芾函稱。『據江長貴來信。』廣德州城於十四日寅刻收復。賊向建平東壩深陽一帶竄去。』周天受來信。『寧廣仍爲賊阻。』又報探有賊二萬。由池州竄併石埭。』各等語。臣查廣德收復。暫由浙軍戍守。俟左宗棠新軍一到。卽由廣德先入蘇境。目下救援寧國。仍應由石埭涇旌三路前進。理合附片具陳。伏乞皇上聖鑒。謹奏。

保毛鴻賓任蘇藩片 咸豐十年七月二十二日

再承准軍機大臣字寄。六月二十三日奉上諭。『江蘇省垣陷後。藩司一缺。尙未簡放。有人。現在籌畫餉需。撫恤地方。俱關緊要。必得賢能素著。克理繁劇之員。方能勝任。著會國藩薛煥於所屬司道各員內。秉公簡擇。會同酌保二員。迅速具奏。候朕簡放。』等因欽此。查蘇省官員。多往上海。臣尙未接見。不能周知。江西各員。現多派有軍務緊要事件。欽奉諭旨。飭於所屬司道。秉公揀擇。查有安徽按察使毛鴻賓。樸實廉正。練習吏事。忠愛之忱。鬱於中而溢於顏面。昨經官文等會奏。請飭該臬司赴皖北總理楚軍營務。兼辦皖南北地方事宜。業荷恩准在案。臣前奏明江蘇藩司隨撫臣同駐。臬司隨臣同駐。欽奉寄諭。『臬司湯雲松已令幫同龐鍾璐辦理團練。飭臣酌量調派。』等因欽此。臣查湯雲松幫辦蘇屬團練。勢難繞赴臣營。如蒙皇上天恩。將毛鴻賓升授蘇藩。卽飭該司隨臣同駐一處。俾臣得專心軍務。而地方事件之應恪遵成法者。交毛鴻賓綜理。庶紀綱不至久弛。臬司湯雲松卽隨撫臣同駐一處。就近團練。一轉移間。實屬兩有神益。是否有當。伏乞聖裁。再祁門距上海過遠。文報隔絕。未及與撫臣薛煥會商。臣保一人。仍商令薛煥另保一人。冀與會保二員。諭旨相符。除移咨外。謹附片覆奏。請旨。

恭報進兵日期摺 咸豐十年八月初二日

奏爲恭報進兵日期。仰祈聖鑒事。竊寧國府城。圍困日久未解。臣俟各軍到齊。擬由涇旌石三縣。分路進援。各情業於七月二十三日覆奏在案。旋據布政使銜河南開歸陳許道張運蘭。於二十四日馳抵祁門。所部各營。除留防祁州兩隊。尙未報到外。其餘三千人。均陸續到祁。阻兩三日。於二十八日拔隊。由徽州進旌德。以援寧郡。又據

綏靖鎮總兵鮑超稟。已於七月十八日。自武昌開船東下。八月初旬必抵祁門。因飭令代統該軍之副將宋國永。先帶寔字營六千餘人。於八月初三日拔隊。由太平進攻涇縣。如鮑超日內趕到。即令赴營督率。無論涇城能否速下。均令張運蘭直赴寧國。速解郡城之圍。以安萬衆之心。其石埭池州。賊衆往來。時國內竄。現尚無得力大隊。可以派往。臣須暫駐祁門。兼籌扼守。李元度所部三千人。行抵江西貴溪縣境。緣皖南進剿喫緊。已改調來徽。再飭陸續進發。先清腹地。若欲規復蘇常。須待左宗棠一軍到皖。扼駐廣德。始能漸入蘇境。所有調派進兵日期。理合繕摺。由驛六百里具陳。伏乞皇上聖鑒。謹奏。

上海情形已鬆未能即圖金陵片 咸豐十年八月初二日

再承准軍機大臣字寄。七月十八日奉上諭。上海關係甚大。薛煥嬰城固守。專待援兵。會國藩相距較遠。兵將未齊。誠恐緩不濟急。著瑞昌王有齡張玉良迅速派員帶領精銳四五百人。前赴上海。竭力救援。據薛煥片奏。江南賊匪。滋蔓難圖。惟以重兵直搗金陵。該逆必回顧根本。等語。著會國藩體察情形。或即先搗金陵。亦可牽制賊勢。等因欽此。臣前聞上海被圍。正增焦急。旋准張芾鈔寄王有齡來函。一窺賊業經擊退。併股南趨。是上海情形已鬆。當能自保。至直搗金陵一節。臣本有此意。五六兩月。疊次奏報。皆注意專重金陵。亮蒙聖明鑒察。惟目前偏地賊氛。須鮑超張運蘭等節節攻勦。先解寧國之圍。左宗棠軍至廣德後。再添大隊。由宜興溧陽而入。庶可漸圖金陵。謹附片覆奏。伏乞皇上聖鑒。謹奏。

請駱秉章暫緩入蜀片 咸豐十年八月初二日

正封摺間。接准王有齡兩次咨函。張玉良嘉興大營。於七月二十三日。後路爲賊所包。遂至全軍潰退。張玉良受傷退至石門。賊復攻陷石門。距省甚近。杭城圍急。請分隊救援。等語。臣奉旨接辦皖南軍務。寧國被圍兩月。周天受困守孤城。屢次求援。臣亦屢次應允。現派鮑超張運蘭由涇旌兩路赴援。甫經拔隊成行。斷不能失信於寧國。而政援浙江。且浙省賊勢浩大。亦非三五千人所能救全。臣處別無大隊可撥。必須左宗棠新軍抵徽。配足萬人。乃可赴杭援剿。特駱秉章督辦四川軍務之命。奏明抽調湖南防兵。又奏請左宗棠入蜀。湖南官紳。因吳蜀兩處征調。本省空虛。人心驚恐。是以左宗棠遲遲未能成行。臣聞逆賊石達開尙在廣西。并聞久無其人。四川

縱或危亂。尚在半年以後。浙江之陸危。則在一月以內。卽皖南江西之安危。亦在三兩月之內。緩急情形迥殊。合無仰懇天恩。敕令駱秉章暫緩入蜀。湖南防兵。暫不抽動。俾左宗棠星夜兼程來皖。合兩湖江西官紳之全力。共救浙而攻蘇。或有補於萬一。臣冒昧干請。不勝惶恐之至。除會商張芾先派徽防各軍援浙外。謹附片具奏請旨。

援軍甫進寧郡被陷現籌堵剿摺 咸豐十年八月二十二日

奏爲巨軍甫經前進。寧國府城被陷。微郡戒嚴。現在籌辦堵剿情形。恭摺奏祈聖鑒事。竊張運蘭鮑超兩軍。由祁門進兵日期。業於初三日專摺馳報。並聲明鮑超尙未到營。暫令副將宋國永代統該軍在案。張運蘭於初八日帶隊行抵旌德。探聞涇縣之賊。竄距東岸岸長興。建平之賊。又乘虛竄襲廣德州。逆酋四眼狗竄匿寧國縣。該道防賊抄後。暫紮旌德。與宋國永一軍。東西援應。宋國永於初六日行抵長園。探聞石埭大股賊竄入鐵家嶺三叉嶺。所有徽軍原防太平甘棠之副將余永椿。參將袁國詳等。營盤被陷。宋國永卽派五營紮山口。兩營紮烏泥關。三營營前敵。初七日辰刻。見余永椿等潰兵及難民絡繹上擁。逆衆繞過太邑。約三四千人。直撲我營。營卽派隊迎戰。該逆紛紛潰退。初八九日宋國永督隊追賊至太平山口一帶。旋即進紮甘棠。分布各嶺。自廣德再陷。四眼狗踞寧國縣。賴裕新踞涇縣。僑輔王楊七麻子攻圍寧郡。八月初一以後。周天受與徽州祁門。文報不通。臣深爲焦急。飭張運蘭宋國永捲塘疾進。十六日忽接周天受十一日戌刻密書稱。「郡北四十里竹塘地方。副將朱景山營壘。於初九日申刻失陷。城北廟埠順勇營盤。於十一日失陷。城內糧藥俱盡。勢將不支。」等情。正在飛催馳援。十七日接探報。則寧郡已於十二日戌刻失守。旋據張運蘭稟稱。「有副將熊廷芳自寧郡潰圍。退至旌德。面稱十一日廟埠失利。糧路阻絕。城外尙有營壘十餘座。十二日於北門外出六成隊。互有殺傷。未刻大雨如注。火藥不燃。賊乘勢撲入。各營同時潰散。賊分踞我營。拋擲火器入城。周天受令百姓上城守禦。各隊兵勇開南門衝出千餘人。城池遂陷。周天受及道府以下各官。不知下落。」等語。伏查寧防兵勇近七千人。堅守七十餘日。屢經擊退賊匪。乃自七月底至八月初旬。陳揚古賴各逆目。四面圍至。糧盡援絕。軍心離散。一朝潰決。實堪痛惜。臣迭次奏明調募各軍。擬七月取齊。八月進剿。原冀速援寧郡。先解城圍。再圍進取。乃調募三月之久。尙未畢集。僅張運蘭三千人。於七月底來祁。祁門距寧郡五百餘里。張運蘭馳抵旌德。寧邑狗賊伺其右。涇縣賴賊阻其前。兵力過

軍勢難獨進。宋國永馳抵太平。因徽州有余永椿之勝。西路未清。二員尙非赴援不力。應免置議。李元度於八月十六日。帶平江勇三千抵徽。已在寧郡失事之後。暫令接辦徽防事務。鮑超於春間請假三月。乃六月則始由蜀起行。踰期已久。七月二十六日。自英山經過。至八月二十日。始到祁門。使該鎮如期抵營。督率進攻。即未必速解寧國。尙可以牽制悍賊。遷延貽誤。咎實難辭。姑念其苦戰六年。驍勇罕匹。相應請旨將綬靖鎮總兵鮑超革去勇號。以示薄懲。使責令督軍進剿。力圖克復。至浙江記名道廖士彥。本係周天受文案委員。飭令赴浙催餉。嗣浙省撥餉一萬。巨處撥銀五千兩。由張芾委該道協同營員護解餉銀。迅往接濟。該道深知寧郡危迫。原可乘寧邑無賊之時。輕賣間道速解至郡。乃沿途逗遛。復聞警折回。致寧軍因飢敗潰。尤屬長夏無能。應請旨將廖士彥即行革職。以示懲儆。臣甫經奉命接辦皖南軍務。兵將未齊。派援未至。寧郡即已失守。亦有應得之咎。併請旨將臣交部議處。寧郡之陷。已逾十日。周天受捐軀殉節。自無疑義。惟未接確實稟報。應俟專員查明。另摺奏請賜卹。其竹塘廟埠營盤被陷。及城陷之時。文武殉難員弁。亦俟查明。另案開單請卹。皖南鎮陳大富駐紮南陵。堅守半年。今寧國既失。南陵孤懸賊中。萬難獨守。臣已三次飛書。囑其自拔出城。潛至江邊。由水師接送上游。以圖再振。寧郡既失。嶺外各股悍逆。乘勝內撲。徽績祁駮。處處交警。臣仍駐扼祁門。飭李元度防守徽州。添派禮字及河溪等四營。駐紮績溪協防。張運蘭仍駐旌德。鮑超一軍。仍駐太平。堅守靜鎮。以伺逆賊之隙。飛催左宗棠新軍。倍道來援。共圖克復寧廣。進規蘇常。以慰宸廑。而符原議。所有援軍甫進。寧郡失陷。現籌布置各緣由。專摺由驛六百里具奏。伏乞皇上聖鑒訓示。謹奏。

皖南立脚稍穩即分軍先趨蘇境片 咸豐十年八月二十二日

再臣前奏通籌大局。不撤安慶之圍。以取上游之勢。調募兵勇。原擬七月取齊。八月進剿。冀從廣德一營。疾趨蘇境。庶幾以後之速。補前之遲。或可求諒於人。不料廣德再失。寧國又陷。八月將盡。兵將尙未畢集。不特不能救浙。圖蘇。並皖南亦岌岌可慮。上無以紓聖主宵旰之憂。下無以慰吳人雲霓之望。寸心愧憤。無地自容。然細察地勢。舍此別無下手之方。但使陳揚諸悍賊。盡來皖南。分救安慶。則於臣處雖日形竭蹶。於下游或稍得蘇息。亦臣之所至願。總之臣身在皖南。心懸江浙。財賦菁華之地。蹂躪日甚一日。即餉源日絀一日。生靈困苦。所不待言。聖主

軫念東南。臣何敢不以聖主之心爲心。蘇人痛深水火。臣何忍不以蘇人之患爲患。俟皖南立腳稍穩。卽當分派一路。先趨蘇境。以慰宸廑。而符原議。爲此懇情附片陳明。伏乞皇上聖鑒。謹奏。

欽奉訓飭懷遵覆陳片 咸豐十年八月二十二日

再臣於八月初五日。准兵部火票遞回恭謝天恩一摺。奉硃批。知道了。卿數載軍營。歷練已深。惟不可師心自用。務期虛己用人。和衷共濟。但不可無定見耳。欽此。仰蒙皇上啓牖愚蒙。指示親切。跪聆之下。感悚莫名。臣賦質迂拘。近年閱歷漸多。竊見兵興十載。而軍政吏治二者。積習未改。甚或日趨日下。何以挽回劫運。是以痛心疾首。深自刻責。與將士約。先求勿騷擾百姓。然後能殺敵致果。與官吏約。先求勿沽染壞習。然後能潔己奉公。臣以困勉自勵。亦以勸誡僚屬。而才智短絀。措施失當。誠恐有師心自用之處。茲奉聖諭。惟有敬謹省察。不敢師心。而務要虛心。以收集思廣益之效。勿存成見。而須有定見。貴審輕重緩急之宜。至與各省相交際。兩湖江西督撫四人。與臣水乳交融。實屬和衷共濟。足慰慈廑。浙江屢次請援。情詞迫切。臣旣不能自往。又不能撥兵。期望之極。未免疑怨。近日漸知臣兵力之薄。亦已坦然相諒。至江蘇撫臣暨各官紳。則但有期望。並無疑怨。每次請援之信。呼籲之聲。耳不忍聞。口不忍讀。臣忝竊高位。又竊虛名。但有自責自勵。求濟時艱。斷不敢稍存意見。上貽君父之憂。所有欽奉訓飭懷遵。感激下忱。附片覆陳。伏乞皇上聖鑒。謹奏。

請撥江陝兩省協餉片 咸豐十年八月二十二日

再臣自奉江督之命。久思奏請部撥鉅餉。因念時事艱難。各省窘絀。是以不敢具奏。仰勞聖慮。茲復接辦皖南軍務。合臣處楚軍與徽寧兩防原兵。共五萬餘人。月需三十餘萬兩。臣所收江西牙釐。七月分不滿九萬。不敷之數太多。江西係臣兼轄之省。自應循照部議。隨時通融商辦。至皖南徽防之餉。歷奉諭旨。江西每月協解八萬。近來僅解三萬。少或二萬。寧防之餉。歷奉諭旨。飭湖北湖南協濟。尙未解過一次。該三省庫藏支絀。皆臣素所深知。江西撫臣毓科。新膺疆寄。每思力顧大局。以報聖恩。無奈本省南北兩路用兵。入款日減。欠餉日多。京餉協餉皆難周轉。日夜憂灼。與臣謀裁江西之兵。以湊解京之款。湖北督臣撫臣。前數年籌餉最旺。本年因江浙路梗。蜀鹽不通。釐務迴不如昔。甚至安慶一軍。反向臣處索餉。臣本管無可籌之地。鄰省無實協之銀。皖南軍務。實難支持。合

無籲懇天恩。飭令江西每月將漕折銀。協解五萬兩。內三萬撥濟徽防。仍仿張芾之舊例。二萬兩撥濟寧防。以收目前之潰兵。仍懇聖恩。飭下陝西每月協濟銀二萬兩。解至湖北。交官文等專發安慶一軍。解三個月。卽行截止。臣具有天良。斷不肯妄行籲請。罔恤時艱。至湖南奉部撥解寧防之餉。臣遵旨自行嚴催。俟實在解到。再行奏聞。謹附片請旨。

覆奏勝保請飛召外援摺 咸豐十年九月初六日

奏爲欽奉諭旨。恭摺覆奏。仰祈聖鑒事。竊臣於八月二十六日。承准軍機大臣字寄。咸豐十年八月十一日奉上諭。『本日勝保奏。『夷氛逼近闕下。請飛召外援。以資夾擊。』一摺。據稱。『用兵之道。全貴以長擊短。逆夷專以火器見長。若我軍能奮身撲進。兵刀相接。賊之鎗礮。近無所施。必能大捷。蒙古京旗兵丁。不能奮身擊刺。惟川楚健勇。能俯身柔進。與賊相搏。逆夷定可大受懲創。請飭下袁甲三等。各於川楚勇中。共挑選得力者若干名。派員管帶。卽行起程。剋日赴京。以解危急。』等語。逆夷犯順。奪我大沽礮臺。占據天津。撫議未成。現已帶兵至通州以西。距京咫尺。僧格林沁等兵屢失利。都城戒嚴情形。萬分危急。現在軍營川楚各勇。均甚得力。著會國藩袁甲三等。各選川楚精勇二三千名。卽令鮑超張得勝管帶。並著慶廉於新募彝勇。及各起川楚勇中。挑選得力者數千名。卽派副將黃得魁游擊趙喜義管帶。安徽苗練。向稱勇敢。著翁同書傅振邦飭令苗帥驟選練丁數千名。派委委員管帶。均著兼程前進。剋日赴京。交勝保調遣。勿得藉詞延宕。坐視君國之急。惟有股盼大兵雲集。迅掃逆氛。同膺懋賞。是爲至要。將此由六百里加緊各諭令知之。欽此。』跪讀之下。神魂震越。痛憤無地。是日又聞徽州失守之信。旋又接勝保咨。敬悉聖駕巡幸熱河。臣既自恨軍威不振。甫接皖南防務。旬日之間。兩郡失陷。又值夷氛內犯。憑陵郊甸。東望吳越。莫分聖主累歲之憂。北望灤陽。驚聞君父非常之變。且愧且憤。涕零如雨。而以新軍敗潰。又不得不強顏撫慰。鎮定人心。鮑超一軍。自寧國失後。漸紮太平。自徽州失後。又令其回駐漁亭。以遏寇氛。欽奉諭旨。飭鮑超赴京交勝保調遣。竊計自徽州至京。五千餘里。步隊趨程。須三箇月乃可趕到。而逆夷去都城僅數十里。安危之幾。想不出八九兩月之內。鮑超若於十一月抵京。殊恐緩不濟急。若逆夷凶頑。猶豫相持。果至數月之久。則楚軍入援。豈可僅以鮑超應詔。應懇天恩。於臣與胡林翼二人中。飭派一人帶兵北上。冀效尺寸之

勞稍雪數天之憤。非敢謂臣與胡林翼二人遂能陷陣衝鋒。殺敵致果。特以受恩最深。任事日久。目前可帶湘鄂之勇。途次可索齊豫之餉。呼應較靈。集事較速。飽超雖號驍雄之將。究非致遠之才。兵勇未必樂從。鄰餉尤難應手。縱使即日飭令起程。而弁勇懷觀望之心。途次無主持之人。必致展轉濡滯。本年四月初五日。將軍都與阿奉馳赴揚州之命。卽於初十日拜摺起程。厥後因楚勇憚遠行之勞。途中虞餉項之缺。遷延至八月十九日。乃果成行。今若令飽超率師北上。卽再四嚴催。亦不免於遷延。度才審勢。皆懼無濟。如蒙聖恩於臣與胡林翼二人中。派一人督師北向。護衛京畿。則人數稍多。裨益較大。惟臣若蒙欽派北上。則當與左宗棠同行。皖南暫不能進兵。祇能退守江西境內。胡林翼若蒙欽派北上。則當與李續宜同行。皖北暫不能進兵。祇能退守湖北境內。俟該夷就撫之後。仍可率師南旋。再圖恢復皖吳。臣等雖均有封疆之責。而臣國藩本未接印。胡林翼尙有督臣經理。皆無交卸事件。一經派出。數日卽可就道。區區微忱。伏乞聖慈垂鑒。所有欽奉諭旨。恭摺由驛六百里加緊覆奏。伏乞皇上訓示施行。謹奏。

徽州被陷現籌堵勦摺 咸豐十年九月初六日

奏爲大股悍賊由績溪竄入徽州府城。猝被攻陷。現籌堵勦情形。恭摺奏祈聖鑒事。竊寧國郡失守案內。臣奏明僞英王陳玉成帶大股悍賊。屯踞寧國縣。旋經探確踞寧邑者。非陳玉成。乃僞侍王李世賢也。八月十八日。由胡樂司竄叢山關及樓下各隘口。皖南道李元度於十六日帶勇三千抵徽援防。聞叢山關告警。卽於十七日派肅字營二營。由績溪前進。十九日出隊。分兩路進勦。一走叢山關。一走樓下。各行五里許。而卽防兵勇已潰。肅字營營官同知童梅華督隊猛擊。賊敗。該營追出關外。伏賊突起。從嶺尖翻下。包抄我後。童梅華身受鎗傷。登時陣亡。弁勇傷亡百餘人。平字營將到樓下。各卡已被破數重。該營大呼衝陣。追至卡上。斃賊百餘。正酣戰間。聞肅字營失利而止。是夜間道趨回。賊乘勢竄過績溪。張運蘭嶺外旌德之軍。與李元度嶺內徽軍。中間已被賊隔斷矣。二十一日。張運蘭探知大股賊進踞楊溪一帶。派一二四旗從中邀擊。行五十餘里。望見賊卡整隊穩立。少頃。有黃衣騎馬賊十餘名。步賊數百。衝出街口。餘衆迤邐分路來撲。約二萬餘人。我軍鎗礮並施。鏖戰數時。斃賊馬數十匹。悍賊一千餘名。賊紛紛潰走。墜崖落澗死者無算。迫過板橋收隊。次日仍回旌德。臣因徽州賊勢浩大。李元度

兵力甚單，先由祁門抽派禮字河溪各營三千餘人，倍道馳援，飭於徽城外堅築濠壘，以靜制動。乃李元度以賊逼城下，逐日出隊搗戰，修築不及，又張芾於二十日由徽起程北上，兵勇率開口糧，力爲排解，糾結不清，營壘未成，賊已大至。二十四日僑侍王李世賢同擒天義通天義贊天義諸逆首，共帶四萬餘人，直撲徽城，更番誘戰。李元度親督各營出城接仗，自辰至午，斃賊數百，嶺後伏賊併出，抄我兩翼，衆寡不支。禮字河溪各營由西門大路退回休寧，李元度率平江四營入城固守，賊即跟蹤圍攻四門。因西門城垣坍塌，又無梁口，是夜三更乘陰雨黑暗，專攻此門，勢極危險。李元度身臥城頭，竭力堵禦，天明賊退。二十五日申酉之間，賊伏西門民房，鑿牆對城，施放火鎗，守陣弁勇站腳不住，賊衆即緣梯直上。李元度趕調各門隊伍來救，賊已四面扒城而入，府城遂陷。迄今十日，因賊氣隔阻，尙未聞李元度下落。臣自接李元度圍城中飛書求救，即調張運蘭由旌德入援，鮑超由太平入援，無如城大而圯，紳民搬徙一空，兵勇僅二千有奇，不敷分布，又係新募之卒，由湖南遠來，甫經到徽，竟不能支持數日，以待援師，實堪痛惜。臣調度無方，咎無可辭，應請旨將臣交部議處。現在各股悍賊盤踞徽郡休寧及嶺外旌涇太石各縣，有分竄浙江，上犯祁門之意，不得已檄調鮑超回駐漁亭，張運蘭回駐黟縣，以遏狂寇，而定人心。並咨商左宗棠迅督所部赴樂平婺源一帶，以防徽州竄江西之路，俟賊勢稍定，再行合力進剿。除查明徽城文武下落，並殉難員弁，再行彙報外，所有徽州失守，現籌堵剿各情，謹繕摺馳陳，伏乞皇上聖鑒訓示，謹奏。

周天受殉節請卹摺

咸豐十年九月十六日

奏爲查明提督周天受殉節情形，請旨賜卹，並徽寧在事人員分別陳奏，仰祈聖鑒事。竊寧國府城失陷，臣於八月二十三日奏報，聲明已革提督周天受，必已殉難。嗣據候補副將林保參將熊廷芳都司潘樑柱鄧在綸暨紳士湯敏等先後自寧國逃出，來至臣營，均稱：「八月十二日寧國城中糧米罄盡，已無生理。周天受囑各將弁帶兵勇自南門衝出，親策馬送之，將弁及道府各官跪請周天受出城，徐圖再振。周天受誓以身殉，不肯出城。黃昏時羣賊竄入，旋即遇害。」又據署皖南道福成之家丁宋林稟稱：「郡城破時，家主福成出戰於南門街上，遇賊身受二傷，呀哨宋林速行奔至祁門稟告總督行營，然後至泰州迎接眷口送京，旋即殉難。」等情。並據面稟稱：「寧國府知府顏培文宣城縣知縣王乃晉均已殉難。」臣伏查已革湖南提督周天受堅守七十餘日，援盡糧

絕。軍民愛戴。城破身殉。大節凜然。其胞弟周天培。去年在江北殉難。胞弟周天孚。本年七月十六日。在金壇殉節。亦係堅守孤城。力竭不屈。一門忠勳。貞烈可風。周天受應請開復原官。照提督例從優賜卹。並請於寧國府建立專祠。仍於四川省城及本縣建立周天受周天培周天孚三人祠宇。以褒忠義。而昭激勸。江寧巡道福咸所署皖南道缺。業已另放有人。猶復同守危城。效死弗去。應請與寧國府知府顏培文。宣城縣知縣王乃晉。與竹塘內營初九日殉節之永州營游擊副將朱景山。均照本職從優議卹。附祀周天受寧國祠內。以慰忠魂。其餘寧國文武員弁數十人。俟確切查明。續行具奏請卹。至徽州之陷。皖南道李元度躡擾懷諒。既不穩修營壘。又不堅守待援。僅守一晝夜而潰。貽誤大局。責無可辭。道銜徽州府知府劉兆璜。歙縣知縣羅德隆。徽州營參將文芳。身任地方。均有應得之咎。相應請旨將李元度革職拿問。以示懲儆。劉兆璜羅德隆文芳均行革職。其打仗不力之候補參將鎮右營游擊楊鎮魁。候補游擊蕭以德。守備鄒良佐。都司姚才立。均請革職。都司銜孔旭日。千總余大勝。管帶親兵。敢不歸隊。輕棄主將。請旨即行正法。以肅軍律。至十九日叢山關力戰陣亡之同知童梅華。二十四日力戰陣亡之守備張斐文二員。均請交部從優賜卹。其餘殉難官紳。查明續行奏咨辦理。所有提督周天受殉節情形。及徽寧在事人員。分別陳奏。伏乞皇上聖鑒。訓示施行。謹奏。

皖南北近日軍情片 咸豐十年九月十六日

再皖南軍務。近日因天雨連綿。飽超張運蘭兩軍。均未進兵。左宗棠於九月初五日。自南昌開船。亦因風雨阻隔。尚未據行抵樂平。其徽州休寧之賊。盤踞兩城。聲言以大股來犯祁門。臣處老營。兵力雖單。營壘尙堅。或可無虞。所慮者不由婺源以竄江西。卽由嚴州以竄浙江耳。皖北軍情。聞定遠官軍三四萬人。概行潰退。壽州六安。俱形喫緊。據探報逆首四眼狗。欲分軍兩大枝。包襲楚師之後。以解安慶之圍。計九十兩月。南北兩岸。俱有大戰。仰託聖主威福。若能大捷數次。痛挫凶鋒。度可振南服之軍威。卽可分兵北上。理合附片具奏。仰慰聖座。謹奏。

請飭蔣益澧帶勇來皖片 咸豐十年九月十六日

再自金陵師潰。嘉興復敗。下游羣賊。毫無瞻顧。全力上犯皖南。徽寧迭陷。岌岌可慮。皖北自定遠挫失。楚師亦有難支之勢。現經臣奏請諭旨帶兵北上。護衛京畿。如果奉旨派出。則抽撥北行。愈分愈單。不特不能規復皖南皖

北。並恐難以保全兩湖江西。日夜焦思。殊乏善策。查前任廣西布政使降補道蔣益澧。英勇果毅。饒有識略。往年隨臣勦賊。屢著戰功。現在廣西大股經湘粵官兵痛勦之後。繼以解散。已就蕩平。相應請旨。敕下廣西撫臣劉長佑。即飭蔣益澧率所部三千人。迅由江西入皖。會合左宗棠一軍。併力東征。以期共濟時艱。其餉項軍火。入江西後。即由臣處總糧臺支應。以利軍行。是否有當。謹附片具奏。請旨。

統籌緩急機宜摺 咸豐十年十月初四日

奏爲欽奉諭旨。統籌緩急機宜。恭摺具陳。仰祈聖鑒事。竊臣於九月十八日。承准軍機大臣字寄。八月二十九日奉。上諭。據薛煥奏。蘇省民團可用。惟無官兵爲之倡率。請飭曾國藩分撥精銳五六千人。統以謀勇兼全之大員。取道浙境。以達松江。得此生力軍。固守海隅。辦理較有把握。現在蘇省常昭已陷。上海岌岌。援兵不至。亦恐難支。著曾國藩酌量情形。速籌援救。是爲至要。等因。欽此。又二十八日。承准軍機大臣字寄。九月十三日奉。上諭。巴棟阿奏。蘇常大股逆匪。攻撲鎮江。請飭曾國藩迅速統師來南。會合進攻。三晝夜不退等語。江蘇自常昭失守以後。惟有鎮江一城。孤懸江岸。必須竭力保全。以爲進規蘇常之地。雖經巴棟阿等勉力支持。無如餉絀兵單。金陵之賊。亦有下竄之信。甚屬可慮。前閱曾國藩奏摺。知該大臣刻刻以蘇常爲念。鎮江倘有疎虞。則江南賊勢。連爲一片。異日進兵。更爲費手。著該大臣統籌兼顧。迅撥勁旅。馳往援救。務須設法保全。等因。欽此。臣查規復蘇常。分救鎮江上海。皆臣職分最要之事。亦臣志所欲爲。而不能卽副刻刻難安之事。仰荷聖慈。慮處指示方略。至再至三。欽佩之餘。彌增愧悚。臣前疊次奏明調募兵勇。由皖南取道入蘇。彼時微寧二府。廣德一州。皆向無急。擬入九月間。各軍齊集。即可分路進取。不料飽超張運蘭之師未至。而廣德再失。臣接防皖南十日。而寧國卽陷。李元度抵住八日。而徽郡休寧繼失。事機不幸。殊非臣始意所及。其故由於嘉興潰。而浙中無牽制之師。金壇常昭陷。而江左有長驅之勢。各股悍賊。無所顧忌。遂得全力上犯。阻我進兵之路。適值連旬霖雨。萬難進戰。賊分踞徽休兩城。並聲言抄撲祁門後路。臣正在竭力布置間。又聞夷逆竄逼京城。義應率師入衛。旁皇四顧。日夜憂憤。而皖賊之分竄浙江者。又迭陷嚴州淳安各城。浙江之衢州。江西之廣信。紛紛告急。屢接瑞昌王有齡咨函。

請臣分軍繞出浙境。與張玉良前後夾勦。又搜獲僞文逆首陳玉成。糾合李壽成各賊。由北岸廬六一帶上犯。楊雄青李世賢各賊。由南岸徽池一帶上犯。急救安慶之圍。計甚兇狡。查東流建德。昆連饒州景德鎮。賊若乘虛竄入。則江西大局。俱爲掣動。幸左宗棠一軍。於九月十五日行抵樂平。臣飛函商令暫紮該縣。如饒州有警。則赴西北截勦。如廣信有警。則赴東路截勦。先布遠勢。伺賊所向。而後應之。並飭鮑超張運蘭乘雨霽拔營進攻休寧。已於二十九日獲一勝仗。以目前情形而論。必須將各路防兵。安置稍穩。仍分一軍由開化華埠橫出。外則與張玉良等夾擊嚴州之賊。內則與鮑超夾擊徽州之賊。使之復退出嶺外。然後江西可保。浙省可安。而皖南之立腳可定。臣處止左宗棠鮑超張運蘭三軍。尙爲得力。已有接應不暇之勢。如奉旨派臣入援。則此三軍中必須抽出一軍。隨同北上。力量更單。臣之愚見。俟奉到批摺。若責令專謀皖吳。即將皖南設法經營。苟立腳粗穩。臣當於今臘明正。親率馬步數千。由皖北繞赴淮揚。就近與薛煥巴棟阿會合連絡。相機策應。仍一面嚴防江賊北竄之路。以維全局。而符原議。至由徽繞浙江以至松江。東有嚴州之賊。西有嘉興之賊。節節梗阻。實難繞越。薛煥勇略素裕。兵數雖少。嘗能力扼海隅。以待臣至淮揚時。商籌辦理。鎮江兵勇尙有萬餘人。江面又有吳全美李德麟艇船新往。果皆奮勇用命。似亦可爲數月之守。所有統籌緩急機宜各緣由。恭摺由驛五百里覆陳。伏乞皇上聖鑒訓示。謹奏。

金壇殉難官紳請卹摺 咸豐十年十月初四日

奏爲江蘇金壇縣被陷。查門守城殉難官紳。恭摺奏請恩卹。仰祈聖鑒事。竊據鎮江府知府帥榮光詳稱。一。金壇縣自四月初一日。復被大股逆匪圍攻。經駐守該縣前高州鎮總兵蕭如音。參將艾得勝周天孚。同知銜署金壇縣知縣李淮。督同總局董事吳秉禮等。激勵軍民。竭力抵禦。晝則開門接仗。夜則緹城卻營。數月以來。任賊百計環攻。堅守不退。屢募死士。潛出重圍。詣各大營求救。奈圍久援絕。藥盡糧匱。仍復搜括婦女釵環。以助餉需。剗削草樹根皮。以資民食。迨七月十六日。守備馬得勝。外委王文榮。率奇勝勇投入賊營。暗約川奮勇爲內應。是日大霧。川奮勇遂乘霧於北丹陽門。投布懸賊上城。當將周天孚戕害。並擊殺守梁百姓百餘人。城中兵勇潰亂。知縣李淮仍督同縣丞蕭騰龍。同知馮繼善。短兵巷戰。官董均經陣亡。其餘兵勇。遂帶同百姓。潰圍逃出。沿途經過該

逆營卡。復被截殺。其得至鎮江者。兵勇不過千餘。百姓僅六七百名。其陷在城內之官紳軍民男婦大小被屠戮者。約八萬餘名口。據金壇紳士馮肇蕃等連名具稟。並開具殉難官董清冊。請詳會奏前來。臣查金壇彈丸小邑。陷在四面賊巢之中。官紳兵民同心固守一百六日。殺賊無算。糧盡力竭。各以身殉。忠孝節義萃於一城。實屬可敬可憫。謹開列官紳銜名清單。仰懇聖恩。敕部查照各原銜。從優賜卹。其有處分者。並請開復原官。將來克復後。請於金壇建立總祠。專祀此案各員。以慰忠魂。其投賊之守備馬得勝。於金壇陷後。赴張運蘭旌德行營。謀爲內應。八月十六日。業經該道盤獲。訊明正法。五品藍翎外委王文榮。請旨革職。俟拏獲即行正法。其由金壇衝出之游擊朱正華等。念其固守已久。可否加恩寬免處分。出自天恩。所有金壇殉難官紳請卹緣由。恭摺具陳。伏乞皇上聖鑒。訓示施行。再江蘇撫臣薛煥。相隔過遠。未及會銜。合併聲明。謹奏。

會攻休寧勝仗片 咸豐十年十月初四日

再九月二十九日。鮑超張運蘭各軍。會攻休寧。鮑超於卯時出隊。行抵碭庭橋。飭余大勝唐仁廉張玉田鄭陽和。婁雲慶熊鐵生等。分路抄擊。踏毀賊卡三座。斃賊四五百人。乘勢追至城下。賊分股出東門。繞北門迎戰。復出一大股接應。婁雲慶抄其歸路。將賊截作兩段。余大勝等督隊圍殺。又斃七八百人。鮑超派兩營。憑高堡對城開礮。賊由南門衝出。鄭陽和等左右抄擊。又斃多賊。遂堅伏不出。張運蘭是日先派左右翼。及第六旗。穩紮潭口。以防旌太來路。令陳青雲劉松山。由南塘埭清左路。劉光明易開俊。由藍田埭清右路。該道自率中軍馬步。與諸將會於榔市。攻破馮家嶺賊卡一座。又進攻榔市賊卡。賊憑河拆橋踞守。藍翎千總朱得勝猛撲。中鎗死之。守備張添錫奮力直前。面中一傷。立將該賊刺倒。奪馬二匹。遂破第二卡。其卡前有兩壘一村。適劉光明易開俊。攻破龍源賊卡。大呼齊至夾擊。遂將村壘燬平。追至城邊觀音閣。斃賊三四百名。生擒十三名。解散脅從無算。日暮收隊而回。探聞僑輔王楊雄。青由池州至旌德。僑忠王李秀成。由青陽至太平。意圖救援。休欽。除飭該鎮道等。逼城緊攻。兼防後路。並蓄銳以擊援賊外。所有接仗獲勝情形。附片具陳。伏乞皇上聖鑒。謹奏。

截留江西漕捐銀片 咸豐十年十月初四日

再准部咨奉上諭。淮揚鎮總兵。著黃翼升補授等因。欽此。該員先奉寄諭。飭赴淮揚。管帶戰船。臣聞江北地

方木料短絀。因於江楚上游。設法先造船百餘隻。俟廣東洋礮購到。添募水勇。即令黃翼升管帶。候風由長江下駛。約計明春船礮配齊。臣嘗親往江北。督警防勦。並令福建遺缺道李鴻章。隨臣前往。黃翼升帶水師。由金陵賊中穿過。臣帶陸師由鳳陽繞越而行。均於淮揚會齊。惟此項礮船。專備淮揚協防之用。正苦製造無資。准江西撫臣毓科咨稱。遵奉諭旨。飭江省有清州縣。已捐集江北餉銀二萬兩。將解往署漕臣王夔麟糧臺交納。適值定遠軍潰。壽州六安被圍。委員無路繞越。臣思以江北之餉。辦江北之事。應請漕捐二萬。通融截留。以濟急需。除分咨查照外。附片具陳。伏乞皇上聖鑒施行。謹奏。殊批「依議辦理。惟明春汝帶兵親往淮揚。尙須臨時斟酌。欽此。」

展緩兩江營員舉劾片 咸豐十年十月初四日

再查江南江西兩省。咸豐五年屆當二年半薦舉。因各營官兵多在江寧鎮江廬州九江等處防勦。經前督臣治良奏請暫緩。俟軍務告竣。再行辦理在案。茲准江西撫臣毓科咨。『准部咨。『本年已屆二年半薦舉之期。』等因。惟賊匪現在粵東及皖浙江省滋擾。江西界連各屬。均應加意嚴防。各將弁斯時未便調考。請展緩。』前來。臣查蘇常淪陷。將弁多無下落。刻下皖南逆餒鴟張。急須籌辦堵勦。所有江南江西二省屆當二年半舉劾之案。應請仍展。俟軍務告竣。再行查辦。謹附片陳明。伏乞聖鑒訓示。謹奏。

進攻休寧立復黟縣摺 咸豐十年十月二十六日

奏爲進攻休寧。疊獲勝仗。大股援賊由牟棧嶺竄入黟縣。我軍迎勦大勝。立復黟城。追賊出嶺。恭摺具陳。仰祈聖鑒事。竊鮑超張運蘭進攻休寧。臣於十月初四日。已將僞忠王李秀成由青陽至太平。圍撲我軍後路各情。附片聲明在案。初二日鮑超移營西館。張運蘭移營迪祥湖。距休城皆十餘里。初四日賊四五千。欲由榔市撲迪祥營。張運蘭派隊出擊。陣斬僞將軍汪懷忠。及衝鋒賊百餘。鎗傷數百名。侍講銜宋夢蘭帶安勇協勦。亦多斬獲。初六日攻城。賊伏不出。探知徽州援賊。圍聚休東萬安街。與城賊相犄角。鮑超張運蘭會齊。於十五日出其不意。夾擊大破之。追十餘里。殺賊二千有奇。僞侍王李世賢。因休寧圍攻甚緊。由嚴州退徽州。十六日解子藥大礮進休城。十七日雲湘各營。乘勝攻之。北門出賊數千。張運蘭揮兵直前。鮑超督馬步左右包抄。殺賊千餘。復圍攻東門賊營。賊棄壘逃竄。斬馘殆盡。立燬賊壘二座。將弁兵勇受傷一百三十三名。陣亡八名。此十月初四至十七日。進攻

休寧縣城之實在情形也。僞忠王帶三萬餘人，由蘇州蕪湖而來，經過南陵時，提臣楊載福見賊大隊上犯，即飛函告臣預爲防備。十九日該逆約二萬人，突由半棧嶺竄入，圍解休寧之圍，斷鮑張兩軍之糧路，游擊趙廷貴受傷，駱嶺各防皆潰，賊遂由廬州闖入黟縣。二十日張運蘭先分老湘營二五旗迎勦小挫，午後鮑超派副將宋國永帶副中營後營右營禮前後並張運蘭各營趕至，迎頭痛擊，斃賊千餘，會同老湘營各旗，追入黟縣，立將城池克復，賊仍退踞廬村一帶。二十一日鮑超添派兩營，張運蘭添派各旗進勦，賊由廬村出隊而來，大戰於柏莊嶺，我軍十盪十決，賊衆大潰，狂奔出嶺，積屍遍山谷，生擒三百十八名，斃賊約四千餘人，都司楊雲貴守備鄭德亮射中僞檢點艾逆落馬，把總羅紫亭刺死僞丞相吳桂先，該把總旋亦受傷身死，訊據賊供，李秀成亦受傷而遁。此二十日二十一日大破半棧嶺股賊，克復黟縣之實在情形也。伏查僞侍王李世賢由嚴州回徽，僞輔王楊雄清穩踞旌德，環徽郡二百里，羣賊極多，而僞忠逆復由蘇常上援，竟欲攻破黟縣，直犯祁門，窺伺江西，計殊狡毒，我軍急馳百餘里，兩日之間，連獲大捷，驅出嶺外，實足寒賊膽而快人心，提督銜湖南綏靖鎮總兵鮑超，調度神速，前寧國失守案內，經臣奏參革去勇號，尚未奉到諭旨部文，可否仰懇天恩，另行賞加清字勇號，出自聖主鴻施，布政使銜河南開歸陳許道張運蘭布置周妥，擬請旨交部從優議敘，花翎參將湖南鎮算右營游擊楊鎮魁，於徽州失守案內，奏參革職，亦未奉到諭旨部文，擬請開復原官，毋庸開游擊原缺，副將銜儘先參將雲慶，擬請免補參將，以副將遇缺儘先即補，副將張玉田余大勝，均擬請賞加總兵銜，其餘在事出力員弁兵勇，可否准其開單，擇尤請獎之處，出自皇上天恩，除飭派三營嚴防半棧嶺，並飭鮑超張運蘭蓄銳以待，援賊圍攻休寧外，所有迭獲勝仗，並擊退大股悍賊各緣由，專摺由六百里馳陳，伏乞皇上聖鑒訓示，謹奏。

宋國永等請補實缺片 咸豐十年十一月二十六日

再鮑超所帶霆字各營，在鄂皖苦戰多年，此次調撥過江，攻勦休寧，連獲大勝，又勦敗黟縣大股援賊，立復城池，各營官多係著名驍勇，其已保升儘先班次者，日久未經選補，臣處亦無遺缺，可以請補，殊不足以示激勵，查有儘先副將侯補缺後，以總兵簡用之宋國永，此次擊退半棧嶺大股，即以該副將爲首功，總兵銜儘先副將黃慶陳，由立亦屬尤爲出力，仰懇聖恩，敕部將該三員先行拔補副將實缺，俾勵戎行，是否有當，伏乞訓示，謹附片具

奏請旨。

蕭啓江功績最多摺 咸豐十年十月二十六日

奏爲已故統兵臬司蕭啓江功績最多。據實奏懇加恩賜諡建祠。仰祈聖鑒事。竊布政使銜記名按察使蕭啓江統帶湘軍赴四川協剿。本年四月二十七日在營病故。經前四川督臣曾望顏奏奉上諭。蕭啓江著追贈巡撫銜。照軍營病故例從優議卹。以慰死事忠魂。等因欽此。仰蒙篤念盡臣恩施逾格。伏讀之下。欽感莫名。茲據記名總兵胡中和儘先副將蕭慶高何勝必候補同知王沐等自四川連名具稟。據稱。一記名臬司蕭啓江自咸豐三年奮袂從戎。隨李續賓攻擊郴州岳州武昌田家鎮等處賊匪。所向有功。五年江右寇熾。竄犯湖南。蕭啓江奉札募帶湘勇臬字營。九月攻復茶陵州。進援江西。克復萬載縣。六年十一月克復袁州府城。分宜縣城。十二月克復上高縣。七年二月大破賊於瑞州之陽岡嶺。進圍臨江。八月破石達開於天坪。十二月克復臨江府城。八年三月克復崇仁縣城。四月克復撫州府城。十月勦滅石城潮匪。招安脅從數百寨。九年二月克復南安府城。解信豐縣城之圍。八月追勦石達開股匪。收復東安興安靈川三縣。破賊於大溶江。九月初十日解桂林省城之圍。數年來身經數百戰。馳驅四省。所至克捷。本年帶勇入川。在營溘逝。實屬忘家忘身。盡瘁以歿。縷陳戰績。仰懇據情奏請賜諡。給予世職。並懇於湖南江西省城暨湘鄉縣城建立專祠。以慰忠靖。等情。具稟前來。臣等伏查記名臬司蕭啓江。情性果毅。平日粥粥若無能。及其臨敵決策。英鷲無前。年來江西失陷九江。蕭啓江一人獨克四府。厥功最偉。上年援湘援粵援蜀。一歲之內。奔走萬里。積勞身故。實堪憫惻。該部將胡中和等具稟陳請。臣等往返函商。意見相同。合無籲懇加恩賜諡。並於湖南江西省城及湘鄉原籍建立專祠。以表忠盡。出自逾格鴻施。至該部將等稟請給予世職之處。該臬司既奉特旨贈巡撫。從優議卹。照例應得蔭襲。毋庸更議。所有據情奏懇恩施緣由。謹合詞恭摺具陳。伏乞皇上訓示施行。謹奏。

覆陳洋人助剿及採米運津摺 咸豐十年十一月初八日

奏爲遵旨覆陳。仰祈聖鑒事。竊臣於十月二十五日。承准軍機大臣密寄。十月十一日奉上諭。本年秋間。噴噴兩國帶兵撲犯都城。業經換約退兵。俄羅斯使臣伊格那替業幅亦即隨後換約。該會見恭親王奕訢等。面稱。一

髮逆在江南等處橫行。請令中國官軍。於陸路給重兵進剿。該國撥兵三四百名。在水路會擊。必可得手。」又稱：「明年南漕運京。恐沿途或有阻礙。伊在上海時。有咪國商人及中國粵商。情願領價採辦臺米洋米運津。如今伊寄信上海領事官。將來洋船沙船。均可裝載。用俄咪旗幟。即保無虞。」等語。中國勦賊運漕。斷無專借資外國之理。惟思江浙地方糜爛。兵力不敷。勦辦。如借俄兵之力。幫同辦理逆賊。若能早平。我之元氣亦可漸復。但恐該國所貪在利。藉口協同勦賊。或格外再有要求。不可不思。患預防。佛耶西在京時。亦有此請。著會國藩等公同悉心體察。如利多害少。尚可爲救急之方。卽行迅速奏明。候旨定奪。至代運南漕一節。江浙地方淪陷。明歲能否辦理新漕。尙無定議。然漕糧爲天庾正供。自不可缺。該會所稱採辦運津之說。是否可行。應如何妥議章程。辦理之處。並著會國藩薛煥王有齡酌量情形。迅速具奏。將此由六百里各密諭知之。欽此。」具仰皇上聖慮周詳。馭夷之方。遠變之略。無微不至。欽服莫名。臣就俄會所陳二事思之。其請撥夷兵三四百名。助勦金陵髮逆一節。查大西洋噴噴咪各國。恃其船堅礮大。橫行海上。俄羅斯國都。緊接大西洋。所用船礮。及所習技藝。均足相抗。近始由重洋以通中國。該夷與我向無嫌怨。其請用兵船助勦髮逆。自非別有詭謀。康熙年間。進攻臺灣。會調荷蘭夾板船助勦。亦中國借資夷船之一證。惟長江二千餘里。上游安慶蕪湖等處。有楊載福彭玉麟之水師。下游揚州鎮江等處。有吳全奕李德麟之水師。臣現又在長沙吳城等處。添造師船。爲明年駛走淮揚之用。是皖吳官軍之單薄。在陸而不在水。金陵髮逆之橫行。亦在陸而不在水。此時我之陸軍。勢不能遽進金陵。若俄夷兵船卽由海口上駛。亦未能遂收夾擊之效。應請飭下王大臣等。傳諭該夷會。獎其效順之忱。緩其會師之期。俟陸軍克復皖浙。蘇常各郡後。再由統兵大臣。約會該會。派船助勦。庶在我足以自立。在彼亦樂與有成。佛耶西亦有此請。亦可獎而允之。許其來助。示以和好而無猜。緩其師期。明非有急而求救。自古外夷之助中國。成功之後。每多意外要求。彼時操縱失宜。或致別開嫌隙。似不如先與約定兵船若干隻。雇價若干。每船夷兵若干。需月餉若干。軍火一切經費若干。一一說明。將來助勦時。均由定海糧臺支應。庶可免爭競而杜弊端。至所稱咪商領價採米運津一節。江浙各郡縣。地方淪陷既多。明年新漕。勢難趕辦。咪商粵商。情願領價採辦台米洋米。由海道運至津沽。實亦權變之妥善。俄會既以此爲請。似卽可因而許之。除粵商採辦之米。應由該商自行經理。毋庸插用俄咪會幟外。所

有咪商採辦運津之米。亦請飭薛煥在上海就近與該商訂明。粵商領價。須取保戶。咪商則聽咪督經理。當可無誤。要需。爲時局計。似亦合此別無良策。伏乞聖明察酌行之。抑臣竊有請者。馭夷之道。貴識夷情。以大西洋諸夷論之。曠咭喇狡黠最甚。佛郎西次之。俄羅斯勢力大於曠咭。營與曠夷爭鬪。爲曠所憚。咪喇啞人性質醇厚。其於中國。素稱恭順。道光十九年。曠夷因鴉片肇釁之始。兵船闖入廣南省河。咪督曾於參贊大臣楊芳處遞稟。願爲居間調處。曠督義律。旋出親筆。有「只求通商。不討別情。」等語。是並煙價亦不敢索也。楊芳曾據以入奏。而不敢專主其議。會官軍燒搶洋行。誤傷咪夷數人。其事遂寢。而夷患遂熾。咸豐三年。賊踞金陵。聞咪督亦曾於向榮處託人關說。請以兵船助剿。未知向榮曾據以入奏否。曠咭兩夷犯廣東省城時。咪督未嘗助逆。上年天津擊敗夷船時。咪督即首先赴京換約。並無異詞。是咪夷於中國時有效順之忱。而於曠咭諸夷。並非固結之黨。已可概見。此次俄夷既稱咪商情願領價採米。似可即飭薛煥與咪督面訂章程。妥爲籌辦。庶幾暗杜俄夷見好中國市德咪夷之心。而咪夷知中國於彼毫無疑忌。或且輸誠而暱就於我。未可知也。此次款議雖成。中國豈可一日而忘備河道。旣改海運。豈可一歲而不行。如能將此兩事。妥爲經畫。無論目前資夷力以助勦濟運。得紓一時之憂。將來師夷智以造礮製船。尤可期永遠之利。區區愚慮所及。合併陳明。伏乞皇上聖鑒訓示。謹奏。

查覆蕭盛遠實蹟片 咸豐十年十一月初八日

再十月初四日。承准軍機大臣字寄。九月二十日奉上諭。「前因安徽廬鳳道蕭盛遠。在江南大營內。辦理文案。聲名平常。當將該員撤任。諭令薛煥查明實蹟奏參。本日據薛煥奏。『蕭盛遠性情稍傲。疎於交接。營中來往員弁。欲與識面者。投刺拜謁。往往託故不見。自此每招物議。此外並無實在劣蹟。』等語。朕聞蕭盛遠前在和春軍營。與已故提督王浚把持公事。納賄營私。以致軍心不服。金陵大營潰敗。實由於此。若如薛煥所奏。未免意存開脫。著會國藩再行嚴密訪查。據實具奏。」等因欽此。臣歷年來。在江楚辦理軍務。與江南大營相隔較遠。而隨時留心訪問。道員蕭盛遠聲名平常。早有所聞。茲奉諭旨飭查。臣復嚴密訪察。蕭盛遠係湖北書辦。隨和春由廣西至江南軍營。辦理文案。保至監司大員。軍中奏咨公牘。出其一手。其親信實非他員可比。前在廬州有和春與巡撫會保之員。蕭盛遠私自刪去。逮至金陵。此風尤甚。往往各營應保之人。開單轉有遺漏。合營未保之人。開單或

得混入江南將領。如王浚張玉夏李定太等。聞皆與蕭盛遠至好。均無卓著戰功。迭膺保摺。雖蕭盛遠之納賄營私。無實蹟可指。要其巧猾把持。已可概見。今和春戰敗身殉。蕭盛遠以一書辦出身。忝竊至此。猶得颯然偷生人世。律以謀軍僨事之咎。亦復何辭。可否請旨將前任安徽廬鳳道蕭盛遠。卽行革職。發往新疆。以爲軍營取巧干進者戒。出自聖裁。所有邊旨密查覆陳緣由。伏乞皇上聖鑒訓示。謹附片具奏。請旨。

近日軍情片 咸豐十年十一月初八日

再近日軍情。僞忠王李秀成。自牟棧嶺擊敗之後。已入休寧縣城。僞侍王李世賢仍踞徽州。僞輔王楊七麻子率黨攻撲建德。自十月二十六日以後。至十一月初二三日連鏖戰。初四日普承堯一軍敗挫。建德失陷。其另股賊匪自南贛竄出者。於十月二十五日擾陷德興。十一月初一日擾陷婺源縣。左宗棠一軍跟蹤追剿。於初一日克復德興。初三日克復婺源。賊中僞王四人。除僞英王四眼狗現在桐城。日夜大戰外。其三人皆在徽境二百里內。實覺防不勝防。勦不勝勦。仰託皇上威福。若皖南能再支持兩三月。則皖北安慶有必克之理。大局有必轉之機。除俟左宗棠普承堯將接仗細情。咨報到日。另行詳奏外。合將近十日大概情形。先行附片奏報。伏乞皇上聖鑒。謹奏。

左宗棠軍克德興婺源摺 咸豐十年十一月二十八日

奏爲廣東另股逆匪竄擾樂平貴溪地方。迭經官軍馳勦。大獲勝仗。連復德興婺源二城。恭摺具陳。仰祈聖鑒事。竊另股逆匪。自廣東韶州而來。竄擾南贛。圍逼建昌。占據湖口。均經江西撫臣毓科報奏在案。襄辦軍務候補四品京堂左宗棠一軍。前駐樂平。曾經臣附摺奏明。旋因西路有警。移駐景德鎮。探報南贛另股。由貴溪境內竄過安仁。有直撲饒景之勢。左宗棠派游擊王開琳知府王開來。分帶四旗兩營。由珠田大橋一帶。相機迎勦。十月二十日拔隊。行抵珠田。賊悉於十九夜竄往貴溪。二十一日我軍行六十里。至大坂。聞大股賊屯踞周坊丁家坊等處。相距二三十里。晝夜四鼓。派七成隊偃旗息鼓。乘月急馳。出賊不意。以攻搗之。行抵鶴嶺。離周坊三里許。賊尙不知我軍之至也。王開琳等遂分三路。翻山而進。該逆驚覺。搖旗迎敵。我軍奮勇直前。兩面伏兵并起。圍賊垓心。斃三四百人。賊拋棄旂幟軍械衣物甚多。我軍皆不之顧。正痛勦間。忽三馬橋富村各處。大股紛來。勢甚兇猛。喻

勝業丁長勝仍由中路排進。王明輝陳明南仍由兩路抄出。賊即大敗。我軍乘勝追殺七八里。斬馘四五百人。該逆敗過小河。復得丁家坊一股。與之合併。隔河猛抵。王開琳令各旗哨排整隊伍。對施鎗礮。另派哨勇由丁家坊上下小港。衝入中路。正兵過河。直搗賊巢。趙勝國右手被鎗子傷穿。猶忍痛陷陣。賊見我軍勢力更大。遂向高山奔竄。是日自周坊追至丁家坊。約二十里。自晨至夕。忍饑力戰。共斃賊二千數百名。生擒一百八十餘名。陣斬賊首僞檢點陳姓。僞元帥黃姓。僞丞相鄭姓多名。此二十二日進勦貴溪周坊等處。大獲勝仗之實在情形也。二十四日左宗棠接據探稟。周坊敗匪。已由弋陽方家墩竄至德興之黃柏塘地方。當即移飭王開化楊昌濬督帶中營及前後三營。前往迎勦。二十七日抵香墩。二十八日在太白司下河干架造浮橋。二十九日黎明。過河北至楓樹嶺。賊始知覺。遂由三路蜂擁而來。游擊羅近秋。都司黃少春。副將崔大光。各率親兵數十人。前往覘賊。立斬悍賊數十。各營大隊續至。謹呼陷陣。王開化楊昌濬率中營。列隊山岡。指揮策應。該逆驚潰。追殺十餘里。適老湘各營。亦於是日由弋陽界追賊而來。是夜四鼓。探知賊長勦思竄。王開化等會督各營進攻。直逼城下。賊見我軍旗幟。即由南門竄走。我軍乘勝追擊。一面入城安撫難民。查點各營受傷者僅十餘名。此十月二十九日十一月初一日。攻克德興縣城之實在情形也。賊由德興竄去。旋分兩路。一走海口。一走太白司。王開化督諸軍橫截太白司一路。老湘桂勇右營。亦躡蹤而至。初二日探知竄賊已陷婺源。初三日五鼓。諸軍整兵前進。辰刻行抵高砂。值賊在該村莊擄糧。我軍前隊馳追。斃賊百餘名。生擒十三名。旋督隊進攻城北城西兩面。賊出二千餘人。負城列陣。我軍兩路齊搥。賊潰入城。閉門死拒。諸將督勇奮力登陴。該逆即奪東南門逃走。兩門外河水環繞。賊奪橋而過。我軍兩面抄擊。並派隊由上游截渡攔橋。逼賊紛紛墮水。我軍乘勝過橋。追勦二十餘里。沿途尸骸枕藉。餘匪由開化竄去。此初三日克復婺源縣城之實在情形也。臣查左宗棠一軍。自移師景鎮。駐紮未久。一聞貴溪警報。分路調撥。或迎頭截擊。或跟蹤追勦。計十日之內。轉戰三百餘里。連克二城。使狼奔豕突之衆。喘息不得少定。實屬調度神速。將士用命。自此股勦敗後。即有池州小股撲陷建德。直犯浮梁景德鎮。亦惟左宗棠一軍。獨當其衝。左宗棠初立新軍。驟當大敵。晝而躍馬入陣。暮而治事達旦。實屬勤勞異常。惟係襄辦京堂大員。應如何優擢獎敘之處。出自聖裁。花翎卽選道王開化。請賞加按察使銜。候選訓導楊昌濬。請以知縣卽選。並加同知銜。賞戴

花翎候選訓導劉典。請以知縣選用。並賞加知州銜。花翎副將崔大光。請賞加總兵銜。暫革花翎游擊羅近秋。請開復原官。仍賞加參將銜。從九銜朱明亮張聲恆。均請以州同選用。並賞戴藍翎。花翎都司黃少春。請以游擊歸部推補。花翎游擊王開琳。請以參將歸部推補。花翎道銜街府王開來。請以道員即選。花翎參將睦金城。請仍以參將歸部。遇缺先補。守備銜千總董榮光。請以都司即補。花翎都司張志超。請賞加游擊銜。其餘出力員弁。可否准臣開單擇尤保獎之處。出自聖主鳩施。所有周坊德興婺源三次大獲勝仗。連復二城緣由。專摺由六百里馳陳。伏乞皇上聖鑒訓示。謹奏。

建德縣失守旋經克復摺 咸豐十年十一月二十八日

奏爲建德縣城失陷。旋經官軍克復。恭摺奏祈聖鑒事。竊池州之建德縣。自十年正月克復後。卽由江西巡撫派總兵普承堯統帶寶勇五千人。駐防該縣。臣於五月間率師渡江。經過建德。見其營壕柵卡。尙屬堅固。囑令賊若來撲。但宜堅守卡隘。不必出卡接仗。八九月間。又屢次批飭賊來撲。建德能堅守數日。臣卽由祁門派兵星馳救援。諄飭各在案。十月二十六二十九日。池州逆黨撲犯建德。普承堯派隊擊追。十一月初二日。寶勇出隊。微有斬獲。初三日寶勇接仗小挫。普承堯卽於是日酉刻。專人來祁門。稟請救援。臣於初五夜接信。卽調祁門老營親兵。令副將沈寶成星速往救。詎行至中途。已聞普承堯於初四早。未戰而潰。建德縣城失陷。普承堯退至彭澤。旋又退至湖口九江。該逆長驅直入。一股西犯彭澤湖口都昌。一股南竄鄱陽浮梁景德鎮。建德陷。則臣處奏報之路已梗。浮梁破。則糧餉之道亦斷。臣於十一日。派副將唐義訓帶祁門各營。馳勦建德。與沈寶成等會合前進。十七日行抵利步口。賊未知官軍之猝至也。十七日。三路出隊。唐義訓與陳玉恆葉光岳及馬隊。由西大路進。朱聲隆由東小路進。沈寶成黃惠清由東大路進。甫行十五里。賊卽列隊河州。而以馬隊扼拒各卡。我軍東西兩路。緣山而上。中路直前迎擊。礮斃騎馬悍賊數名。卡賊卽退。我軍兩路會合夾擊河州之賊。賊衆大呼衝陣。我軍寂靜不應。但以鎗礮轟擊。每進愈厲。山上各哨蜂擁而下。抄賊後路。前者見殺。後者墜壩。賊乃敗潰。退至三里街。唐義訓見賊伏街村。未便徑進。裹飯傳餐。仍分街口及街右街左三路同進。搜殺無算。忽見城內及壘中之賊齊出。我軍整隊排列河南。賊亦列隊河北。鎗礮對放。互有損傷。相持一時之久。忽有金盔馬賊入城。賊中礮落地。賊似慌亂。

我軍乘機渡水如牆而進。旁抄直壘。賊分股竄入城內。大股逃入西北壘中。朱聲隆沈寶成由南門追賊入城。賊向東門竄出。黃惠清馳至東門。攔截其前。朱聲隆等追躡其後。其西北賊卡。經唐義訓與陳玉恆葉光岳分哨循山上下。拋放噴筒火彈。賊壘立破。由卡間遁竄。卡隘而縻多人馬踐踏。尸橫山谷。東北攻城之軍。與西北攻壘之卒。各追殺十餘里。酉正收隊。回抵利步口。敗賊歸張家灘一帶。是役約共殺賊千餘名。生擒六十三名。奪獲騾馬一百六十一匹。鎗礮旗幟無算。據唐義訓等稟報前來。臣伏查皖南中隔一嶺。嶺內爲徽州各屬。嶺外爲池州東流建德各屬。建德一失。則臣與江濱安慶各路聲息不通。普承堯以五千之衆。在防十個月之久。不能堅守數日。以待援師。遺誤江皖大局。實堪痛恨。請旨將九江鎮總兵普承堯。卽行革職。奉聞。以肅軍律。總兵銜儘先副將唐義訓。應請交軍機處記名。遇有總兵缺出。請旨簡放。藍翎通判銜州判朱聲隆。請免選本班。以同知留於江蘇補用。總兵銜江西儘先副將沈寶成。請賞給正二品封典。湖南補用副將黃惠清。請賞加勇號。湖南補用參將陳玉恆。請以副將留於兩湖補用。參將銜選用游擊葉光岳。請以參將留於江蘇補用。其餘出力員弁。可否准臣擇尤保奏。出自皇上天恩。所有建德縣城失陷。旋經官軍克復緣由。恭摺由驛馳奏。伏乞皇上聖鑒。謹奏。

近日南岸軍情賊勢片 咸豐十年十一月二十八日

再自安慶合圍以來。僞英王陳玉成大戰於江北之桐城。僞忠王李秀成。僞侍王李世賢。僞輔王楊七麻子。萃聚於江南之徽州。無非爲救援安慶起見。此次南岸各賊。約分三大枝。環繞祁門。作大圍包抄之勢。其西一支。於初三日陷東流縣。初四日陷建德縣。初九日陷彭澤縣。十二日圍湖口縣。十三日陷都昌縣。分一小支於十二日陷浮梁縣。十三日陷鄱陽縣。其東一支。於十五日陷江灣王夔齡營盤。十六日陷上溪口楊名聲營盤。十九日陷荻蕩縣。其北一支。於十五日破禾成嶺而入。十七日破半棧嶺而入。十八日破新嶺而入。二十一日復竄漳嶺。實屬危險迭見。應接不暇。計祁門之東西南北四面皆賊。其中如十二至十七日。各路人報皆斷。仰託聖上威福。事機尙順。東流彭澤都昌鄱陽四縣。均經楊載福等水師。先後克復。湖口一城。爲江楚鎖鑰。經彭玉麟吳坤修水陸固守。幸保無恙。浮梁縣經左宗棠陸軍克復。建德縣經唐義訓率師克復。今西路大股。雖尙未退。而各城幸存。可壑轉危爲安。北路各嶺之賊。官軍十七日獲一小捷。二十日獲一大勝。賊膽已寒。當不敢再來犯嶺。惟東路之賊。據

報已由婺源南竄。其或由德興以犯河口。或由樂平以犯景鎮。均未可知。總之欲斷臣之糧道。掣臣之軍勢。以解安慶之圍。此則賊計狡謀。顯而易見者也。臣之老營。仍駐祁門。張運蘭仍防黟縣等處。抽出鮑超一軍。回顧景德鎮。與左宗棠會合堵戰。以保臣軍之糧路。以救江西之北邊。能否得手。尙未可知。目下舍此別無萬全之策。除各屬守城克城。暨各嶺各營戰事。另行專摺奏報外。所有近日南岸軍情賊勢。理合附片具陳梗概。伏乞皇上聖鑒。謹奏。

水師保守湖口克都昌縣摺 咸豐十年十一月十二日

奏爲逆匪撲犯湖口。經協理水師彭玉麟。趕集水陸各軍。併力擊勦。得保危城。並抽派師船。克復都昌縣城各情形。恭摺具陳。仰祈聖鑒事。竊自大股賊匪。十一月初四日。撲犯建德。普承堯一軍潰退。賊即長驅深入。連陷六縣。而官軍與賊所必爭之地。莫如湖口。與景德鎮兩處。景德鎮有左宗棠一軍駐紮。湖口則并無陸兵。僅有水師後營都司丁義方駐防該縣。自建德失守。臣卽派道員吳坤修帶團防營千餘人。馳赴湖口。保守名城。惠潮嘉道彭玉麟。一面派前營都司胡友勝。趕赴彭澤。隨同楊載福防勦。一面派左營副將成發翺。趕赴湖口。會同丁義方合力守禦。十二日賊撲彭澤。經楊載福水師擊退。賊仍率大股上竄湖口。離城十五里之馬影橋屯踞。是日彭玉麟自黃石磯赴援湖口。途次接據成發翺丁義方稟報。初九日竇營潰勇。紛紛逃至湖口。搶劫錢店。當率水勇沿街彈壓。將無管官統屬之勇。一概驅逐。查有寶護左營金殿安。中護軍營談開亮。護左營江必勝。前營劉吉慶等所帶之千餘人。尙屬安靜。當會商知縣及在城紳董。於二營中擇其精壯者。酌留五百人。每人日給米一升。分布城頭駐守。正慮城大兵單。適臣前派吳坤修之團防營。亦於是日趕到。沿途爲賊所截。把總李逢貴。六品軍功吳修霖。力戰陣亡。營官吳景星。熊煇。督率所部入城。當卽抽撥大礮數尊。配給子藥。分令寶營團防營陸師駐守東南兩門。以防山城。而成發翺丁義方自率水師。駐守西北兩門。以防水城。此初九日至十二日。水師收集陸軍協守湖口之情形也。十三日屯踞馬影橋之賊。擁衆萬餘。分四股直撲各門。均經守城各軍。併力轟擊。自卯至午。鏖戰四時之久。賊始卻退。湖口一城。係咸豐九年。彭玉麟督工新修。其南門因溝水浸腳。坍塌數丈。缺口趕修未成。申刻賊復分四份。昇長梯而至。前隊鎗礮。中隊短刀火毯。後隊馬賊。排列吶喊之聲。山谷皆震。其東西南三股先

進。對城開鎗。子如雨下。繼以木梯。如潮湧上。千總江必勝堵住南門缺口。千總吳景星堵住西面。千總談開亮堵住東面。鎗礮石子。環城齊下。悍賊迄不稍退。鋒擁扒城。丁義方見賊勢凶悍。率領哨官張三元黃發甲熊殿元楊雲輝彭大田等。各帶水勇。登陴助戰。熊烜煌金殿安劉吉慶等。往來擊殺。自申至酉。齊力抵禦。而城南缺口。已有悍賊數名。冒死登城。經江必勝手執大刀砍倒。突被賊匪洋鎗擊中頭顱。我軍急以大桶火藥。擲轟城下。斃賊無數。賊始退去。我軍開城追殺百餘人。奪獲木梯三百餘架。賊仍退踞三里街馬影橋等處。十四日彭玉麟周城閱視。慰勞將士。重加布置。午後諜知賊於村莊搜覓樓櫓。乘此日風雨。夜半復來扒城。當即飭令談開亮選帶十餘人。潛出偵伺。見賊負梯送三里街。談開亮出賊不意。繞出山凹。賊驚遁散。奪梯多件。是夜風雨益大。咫尺不辨。彭玉麟在城垣督飭各營。分頭梭巡。二更後見四山僻徑隱隱火光。遂漫空谷。自遠而近。各營哨皆兩立垛口。靜以待動。夜半雲暗天昏。陰風怒號。江濤激響。燈光慘澹。守至天明。各營派勇緹城哨探。至三里街各館及馬影橋賊巢。賊已遠遁。詢之民人。言該匪竟夜環伺。無隙可乘。五更倉猝竄去。此三十四日夜堅守。該逆宵遁之實在情形也。彭玉麟以賊遁不遠。防其回竄。一面函商皖南鎮總兵陳大富。由東流飛撥千五百人。協同吳坤修之團防營。委箠駐守。並探知另股賊匪。分竄都昌。於十四日抽派成發翺左營戰船二十一號赴援。成發翺於十五日趕至都昌城下。督飭各哨。排礮轟擊。城賊抵敵不住。我軍乘勝登岸。由大南門直追至城根。賊衆慌亂放火。開東北兩門而竄。立將縣城克復。此水師分營收復都昌之實在情形也。臣查湖口一城。爲江楚之關鍵。長江之腰膂。咸豐五六年間。賊目黃文金胡鼎文等。踞守該城。臣率水陸百計攻之。卒不能下。厥後七年九月。揚載福彭玉麟等。以血戰得之。至九年。議修新城。今冬甯經告竣。此次黃文金挾賊數萬。撲扼湖口。尙欲力爭此關。以報仇而逞志。經彭玉麟派撥將弁。星夜赴援。於倉皇無備之際。復能收集潰卒。水師登陴。聯絡陸兵。用以力捍危城。維持大局。洵足伐賊謀而壯軍威。布政使銜廣東惠潮嘉道彭玉麟。調度有方。蘊懇天恩。交軍機處記名。遇有按察使缺出。請旨簡放。副將成發翺。樸實果敢。擬請賞加勇號。游擊銜都司丁義方。膽識過人。部暑迅速。擬請以參將補用。並賞加副將銜。陣亡之把總李逢貴。六品軍功吳修霖。均請旨交部。照把總陣亡例。從優議卹。其餘在事出力將弁。可否准其開單。擇尤保獎之處。出自皇上鴻施。所有水師擊退大股逆匪。保守湖口。並克復都昌縣城各緣由。謹

會同江西巡撫臣毓科專摺由六百里馳陳伏乞皇上聖鑒訓示謹奏。

皖南江西全局片 咸豐十年十一月十二日

再臣在祁門賊分三大支四面環擾會於十一月二十八日附片具奏在案旬日以來賊之西支爲僞主將黃文金所帶者臣派鮑超一軍至景德鎮與左宗棠會剿賊自景德鎮退至石門洋塘一帶仍分賊黨黃萬興再擾建德林世發再擾彭澤即湖口之賊亦尙屯踞張家嶺一帶其東一支爲僞忠王李秀成所帶者由婺源開化竄至玉山攻撲縣城冬月晦日臘月朔日城中竭力防守未知能迅速解圍否其北一支爲李逆古逆所帶者十一月底屢次痛剿現尙未敢再犯仰託皇上威福能將西路黃文金一股大加懲創然後能分兵援應東路不深入江西腹地庶皖南軍務可期日有起色除各處開仗情形業既專摺另報外合將皖南江西全局附片具奏伏乞皇上聖鑒謹奏。

楊載福救拔南陵縣軍民摺 咸豐十年十一月十二日

奏爲提臣楊載福統帶水陸踏平賊壘拔出南陵全軍救全百姓十餘萬人恭摺具陳仰祈聖鑒事竊自蘇常失陷賊勢愈熾如寧國府城金壇南陵兩縣城均係官軍堅守被賊重重圍困自金壇寧國先後失陷南陵一邑孤懸賊中總兵陳大富竭力守禦糧盡援絕勢難久全臣鑒於金壇被害之慘恐南陵軍民又遭屠戮疊次密飭陳大富由間道衝出並咨提臣楊載福督派師船至江濱接應在案十一月二十九日據楊載福咨稱「南陵官軍向與寧國爲犄角自寧郡失守百姓扶老攜幼多歸北城陳大富一軍久困垓心已成孤注軍火口糧無由解濟而該軍忍飢固守必須趕緊設法救援庶免意外之變」惟該城四面皆賊悉心妥籌猝難入手正深焦灼適九月初雨連旬江水盛漲沿江小港均可行舟九月廿七日准陳大富密函知「賊勢趨重飢軍萬分危迫城中餓殍相望待援甚殷」因定計潛師往援而留彭玉麟水師圍攻安慶照料黃石磯老營九月廿九日楊載福親督數營礮船進攻樅陽探聞南陵城外四方賊壘層層密布淮北門一港可達魯港水程約計百里而近城一帶賊復夾港築壘踞守甚堅僅右邊沿港一綫之路必須陸師相輔方可進攻當就樅陽調出千總尹昌景章以琳各領本營步隊隨同礮船前進揚言往攻蕪湖十月初二日師次魯港即派總兵李成謀副將李濟清正右副中

二營扼紮港口。使蕪湖之賊不得截我軍出路。初三日督率各營進港。沿途見水面窄狹。度非步步爲營。賊必議我之後。當派參將楊占鼇領親兵後營。防守峨橋石碓。都司郭朋龍領親兵前營。防守小河窰地方。其黃木馬仁兩渡。有賊把卡。均經我軍擊退。遂派副將劉正隆率正後營駐紮。並令在月河口搭駕浮橋以待。又派游擊羅進寶率新前營扼堵倉前一帶。初四日卯刻。派陸軍登岸。依水師並進。港左壘賊見我軍掩至。出其不意。舢板開礮轟擊。賊遂蜂擁出撲。副將丁泗濱帶隊先登。副將何瑞祥率師繼進。奮力衝突。斃賊多名。乘勢將近邊一壘焚燒。該逆紛紛驚潰。因並港左數壘。概行焚燬。尹昌景率以琳領隊直攻港右。氣勢壯猛。該逆出壘列隊。未敢遽戰。我軍衝盪賊陣。尹昌景縱火燒賊數壘。逆衆敗潰。韋以琳帶隊沿岸進擊賊之另股。另尾橫抄。副將李朝斌領各船開礮轟擊。尹昌景率以琳並力衝殺。賊盡披靡。遂將港右十數壘一併焚燬。陳大富知北路援師已至。乘勢將東南西三門賊壘攻勦。一律掃平。追殺十餘里。斃賊不可勝計。奪獲旗幟鎗械甚多。南陵城圍以解。陳大富猶思趕緊繕完。力圖守禦。楊載福見賊雖暫退。水師萬難留駐。該逆必將復至。孤軍堅守。終成坐困之勢。因力勸陳大富同赴上游。拔出全軍。初五日會督水陸大隊。緩緩行走。百姓從者約十餘萬人。沿途如月河口罔灣峨橋及各處堤埂隘口。均經先飭各營搭駕浮橋。軍民得以通行無滯。高岡鋪雖有賊蹤。經我軍擊退。均不敢近。惟僞忠王李秀成率賊數千。並令蕪湖賊划百餘號。在小河及石碓地方。與親兵前後二營接仗。意圖截我師歸路。楊占鼇郭明齋極力堵禦。相持兩晝夜。賊猶不退。楊載福添派親兵左營及新前營助勦。將該股賊匪擊退。水陸軍民始得徐行出港。初八日回次三山夾暫駐。二十五日同抵黃石磯。十一月初三日。將該軍安插東流縣城。並與彭玉麟勉籌周卸。仍咨臣飭解口糧軍械。以濟急需。等因前來。伏查皖南鎮總兵陳大富駐守南陵。四面皆賊。城中米糧軍火罄盡。與金壇危困情形無異。該總兵忠勇奮發。與軍民團結一氣。力保危城。以待援師。經提臣楊載福統帶水陸節節布置。懸軍深入。立掃凶氛。拔出全軍。保護百姓十餘萬人。處之善地。一時歡慶之聲。流溢江表。實足以回人心而作士氣。楊載福氣韻沈雄。出奇制勝。可否籲懇天恩。賞賚荷包搬指等物。以示旌異。出力將弁。可否由該提臣擇尤奏保之處。均出自聖主鴻慈。除飭總糧臺撥解餉銀二萬兩。並帳房子藥接濟外。合將水師提臣楊出南陵全軍。安插東流各緣由。專摺由六百里馳陳。伏乞皇上聖鑒訓示。再此案臣曾函商楊載福自行具奏。楊

載福以水陸援應。上下奔馳。咨請由臣轉奏。又因道梗十餘日。文報不通。是以陳奏稍遲。合併聲明。謹奏。

上溪口江灣兩營失陷摺 咸豐十年十一月十二日

奏爲上溪口江灣兩處營盤失陷。現籌收集整理。恭摺具奏。仰祈聖鑒事。竊臣於九月底調集鮑超張運蘭兩軍。進逼休寧。分紮西館迪祥湖一帶。因上溪口江灣兩處。爲賊南竄之路。當於徽防內。調取凱迭勇義勇安健勇廣武軍吳勝軍果敢軍等營。飭令已革副將楊名聲。整理成軍。駐紮上溪口一帶。飭令副將王夢齡所帶夏勇協同副將程永年所帶汝州兵廣威勇各駐江灣一路。以資扼守。自十一月十四日。鮑超一軍。由西館撤退。前赴景德鎮之急。上溪口江灣兩處防營。頗形單薄。又無可以籌撥協守之兵。正深焦慮。旋於十七十八兩日。據報上溪口營盤。爲休寧城賊陷。江灣營盤。爲屯溪之賊撲陷。而婺源一路。警報迭至矣。據楊名聲稟稱。十一月十六日。賊匪分三路來犯。一由汪溪橋直撲頭敵營盤。一由石田小路橫抄廣武軍果勝軍之右。一由迴口租地山徑攻南岸各營。三路賊衆約有四五萬人。登山俯瞰。吶喊搖旗。我軍寂靜無譁。相持兩時之久。南岸一股。被果敢安勇兩軍。鎗礮環施。賊勢稍沮。旋即涉水過河。併力夾攻北岸營盤。都司譚加耀帶隊衝突。往返鏖戰。斬賊數百人。該逆抗拒。自辰至申。絕無退意。楊名聲俟其氣餒。正欲督帶馬隊。前往策應。不料該逆突出大股。繞街市之後。直撲凱勇小隊。千總胡明昭棄營而走。各營登時驚擾。楊名聲親堵壕邊。手刃二勇。衆心稍固。而北岸諸軍又被賊圍。楊名聲馳馬過橋接應。忽有騎賊五名。從後追逐。刀矛攢刺腰腿兩處。受傷墜馬落水。遇救獲生。而各營弁勇。傷亡過半。不敷守禦。持至酉刻。南北各營。先後失陷。此十六日上溪口營盤被陷之情形也。據王夢齡稟稱。十四日撲犯江灣之賊。被我軍擊退。十五日黎明。該逆大股傾巢而來。王夢齡即飭各軍。憑營固守。程永年親督守備馬登榮李金山。率領弁勇三百人。往來野戰。該逆始分三股。繼添四股。圍撲我營十餘次。經馬登榮李金山帶隊抄擊。相持至未刻。逆衆忽退二里餘。惟遠近山梁十數股。仍未收隊。王夢齡當令各軍趕緊造飯。以備飽騰再戰。賊忽分十數股。由遠山繞赴江灣村市。散紮街衢。復於村頭各處築卡。王夢齡即督帶馬登榮李金山回村鏖戰。該逆死力相持。馬登榮怒馬縱橫衝擊。忽被洋鎗打穿鼻梁。立時陣亡。外委鍾洪興與楊大榮亦歿於陣。李金山肚肋。又受矛傷。正鏖戰間。忽報賊衆各負門版。圍撲我營。鎗礮擊之不退。王夢齡恐營盤有誤。即帶隊回顧各營時。村後

街市火光燭天。重以木石堆卡。欲阻我軍迎擊之路。王夢齡卽諭各營奮勉出戰。時已交亥。賊仍重更換圍裹。不得已。密商程永年。督率各軍短刀巷戰。分路衝出。以圖再振。此十五日江灣營盤被陷之情形也。臣伏查江灣上溪口兩處。當祁門之東路。婺源之北境。一有疎失。則藩籬盡撤。賊得長驅以入江西境內。現在僞忠王李秀成大股卽由此路以犯江西。圍撲玉山縣城。已革副將楊名聲。候補副將王夢齡程永年。駐防數月。有險可扼。乃不能堅守待援。實屬怯懦無能。王夢齡程永年均應請旨卽行革職。不准留營。楊名聲係業經參革之員。亦不准留營。潰退兵勇。交署湖北提督江長貴收集整理。陣亡員弁。另繕清單。請旨交部議卹。其休寧黠縣各仗陣亡傷亡之將弁。暨水陸前後陣亡病故人員。一併開單。請旨分別賜卹。以慰忠魂。所有上溪口江灣兩處營盤失陷緣由。由驛馳陳。伏乞皇上聖鑒訓示。謹奏。硃批。王夢齡程永年均著革職。與前已參革之楊名聲。俱不准留營。單開之徐祚明等。均照所請。分別議卹。該部知道。單併發。欽此。

黠縣官軍勝仗摺 咸豐十年十一月十三日

奏爲黠縣官軍迭次擊退犯嶺股匪。并迎勦竄撲小溪漁亭之賊。大獲勝仗各情形。恭摺具奏。仰祈聖鑒事。竊僞忠王李秀成。於十月二十一等日。糾合大股。突犯牟棧嶺防。擾及黠縣。經鮑超張運蘭合軍痛勦。追出嶺外。於十月二十六專摺奏明在案。李逆敗後。卽繞入徽城。旋復於十一月十九日竄至婺源。二十八日竄至玉山。而牟棧各嶺之外。賊蹤時復麇集。狡計窺伺。圖犯祁門北路。臣飭參將楊鎮魁。游擊蔣信玉。分帶禮字前後兩營。協同參將張應超之百勝軍。合紮盧村。盧村者。去牟棧嶺十里。去黠縣二十五里。令其深溝高壘。如有嶺賊闖入。堅壁勿戰。飛報請援。以圖夾擊之勢。十一月十七日。逆目古隆賢。賴裕新。糾合大股。分三路突犯牟棧桐林二嶺。乘霧入卡。遠抄盧村諸營之後。楊鎮魁等。閉壁堅守。張運蘭派左翼黃萬友六旗。朱紹輝各六成隊。馳往援應。六旗從左路進。右翼從右路進。該逆拚命力抵。相持一時之久。適五旗亦來助勦。聲勢彌壯。禮字兩營百勝軍開壁齊出。與援兵併力猛擊。斃賊四五百人。賊由新嶺中山遁去。是日諸營獲勝。以賊遁未遠。戒備益嚴。十九日。嶺外添賊萬餘。直於盧村左側。築造兩壘。爲久踞以犯祁門之計。維時景德鎮危急。臣調鮑超全軍赴援景鎮。兩阻未能拔行。賊不知其尙在祁門也。因密派升用總兵副將宋國永。率霆字四營。河溪營之七成隊。并華字營黑龍江兩

馬隊馳赴黟縣。是日風雨交作，不能開仗。二十日辰刻，諸軍會合盧村老湘營右營黃萬友四旗劉松山陷陣，橫截賊爲兩段。二旗張添習六旗朱紹輝繞出半嶺，斷賊歸路。宋國永督霆字各營由盧村進攻兜勤。禮字兩營百勝軍兩馬隊前後一齊突出，爲擊爲抄，賊勢大潰。諸軍跟蹤追殺，賊屍遍野，血流成渠。餘匪紛竄狂奔，器械拋棄殆盡。歸路既斷，賊皆緣岩而遁。我軍追者，反出其前，墜岩冒樹，渙散哀號，逃出嶺外。此二十日諸軍合戰盧村，大獲勝仗之實在情形也。自是嶺外之賊，漸覺膽寒，不敢入犯，而休寧城中之賊，因飽超回，勦景鎮。張運蘭一軍駐葉村，步步逼犯。由藍田擾及小溪一帶，張運蘭見我軍益孤，賊勢益張，思所以懲創之。二十四日，派三旗易開俊由中路進，四旗劉松山沿山邊右路，五旗劉光明沿山邊左路，六旗朱紹輝由珠坑搜洗而進。未刻行至小溪，該逆分途擺列，愈聚愈多，鏖戰半晌。各村賊館如蜂房之齊出，劉松山見正路賊數甚厚，分兵往應。適六旗朱紹輝中軍張恆祥、左翼黃萬友均各帶隊趕到，賊見我軍大集，勢遂不支。各旗乘勝追殺，斃賊約三百人。我軍亦受傷數十名。把總賀元峯力戰陣亡。此二十四日張運蘭一軍，小溪獲勝之情形也。休城之賊，自小溪敗後，餘匪仍退踞藍田。其另股在鄧公橋一帶屯聚者，約衆萬人。探知自浙而來，與休賊互爲聲援，逼近漁亭一路。臣因飽超撤退以後，惟漁亭爲前敵最要之區，因令張運蘭派一二兩旗，宋慶蘭帶安勇兩營，又留霆字副中副後副左副右四營，合紮漁亭，以厚兵力。二十五日，有賊騎十餘，突至安營牆下，往返窺伺。經我軍擊斃二人，賊即遁去。二十六日，該逆合衆萬餘，徑犯漁亭，騎賊百餘，已駛至安勇壕外。霆字營將官婁雲慶會同副左副右副後三營，并湘勇二旗各派六成隊出擊。該逆見我軍猝至，堅踞大橋，整隊抗拒。副中副後二營衝鋒，副左副後二營接應。安勇由右邊山下，湘勇由左邊山下，兩路抄擊。該逆不能抵敵，奪命狂奔。我軍愈進愈奮，追至岩脚，殺斃僞宰相黃世瑠。僞宣傳吳斌生，僞將軍劉廣，僞指揮李逆四名，老賊千餘名，正追殺間，忽報上溪口之賊，從南路而犯。我軍自東路收隊回營，申刻南路賊衆萬餘，衝至營亭街口。霆字四營婁雲慶余大勝劉順隆熊鐵生會同一二旗張添習潘運璋陳青雲分路掩殺，追至牌嶺，日已向暮。副後營衝過牌嶺，追至當金街。該處山江險窄，只能魚貫而進，不能排隊衝擊。副後營哨官游擊銜儘先都司陳青雲守備胡克勝，衝入街內，遇伏陣亡。婁雲慶熊鐵生各督本隊，截殺伏賊數百名。更初收隊回營。此二十六日早擊休寧賊匪，暮擊上溪口賊匪之實在情形也。臣查黟縣官

軍十日之內。凡四大戰。其抽隊助打行仗者。遠至八九十里。近亦四五十里。風雨嚴寒。往返馳逐。實因賊股衆多。不能不東奔西救。爲變化莫測之象。仰祈聖主威福。有戰皆捷。盧村一役。該逆精銳殆盡。尤足以寒賊膽。而快人心。陣亡將弁。另行彙開清單。請旨交部議卹。所有駁縣各軍。迭次擊退犯嶺股匪。并迎勦竄撲小溪漁亭之賊。獲勝各緣由。理合專摺由驛馳奏。伏乞皇上聖鑒訓示。謹奏。

忠義局第二案摺 咸豐十年十一月二十八日

奏爲行營探訪忠義。分繕清單爲第二案。竊懇天恩。交部分別旌卹。仰祈聖鑒事。竊臣自奉命署理江督後。卽於行營設立忠義局。凡屬兩江境內。勦賊陣亡之官紳。並矢志不屈之士民婦女人等。派員在局。博加探訪。詳覈事實。並出示徧行曉諭。或由司道具詳。或由府廳州縣彙報。或由該家屬徑稟。臣隨時具奏。請建總祠總坊。其死事尤烈者。請建專祠專坊。前於七月初三日。附片奏明第一案。欽奉諭旨。著照所議辦理。等因。欽此。仰荷天恩。下逮。激勸彌昭。茲接委員陳艾等稟稱。自七月初設局以來。隨時探訪。查核事實。彙爲一冊。合計官紳殉節者共十七員。士民殉難者共一百八十三名。婦女殉難者共五十九口。經臣詳加查核。該官紳士女人等。或同仇敵愾。殺賊捐軀。或矢志潔身。臨危致命。洵屬深明大義。相應分繕簡明清單。竊懇天恩。俯准。交部分別旌卹。以裨忠節。除將事實清冊。咨部查核外。所有行營探訪忠義第二案。理合專摺具陳。伏乞皇上聖鑒訓示。謹奏。

覆陳劉培元金國琛能否赴浙摺 咸豐十年十一月二十八日

奏爲欽奉諭旨。恭摺覆奏。仰祈聖鑒事。竊臣於十二月初九日。承准軍機大臣字寄。咸豐十年十一月二十日奉。上諭旨。瑞昌王有齡奏。請飭總兵道員。赴浙差委。等語。浙江礮船勦賊。最爲得力。現擬籌款添造。以資防。勦。惟必須有大員統帶。處州鎮總兵劉培元。候選道金國琛。均於水師情形熟悉。該兩員係會國藩舊部。著卽迅。飭馳赴浙江。交瑞昌等差遣委用。俾統帶礮船。進攻嘉興逆匪。以爲規復蘇常之計。將此由六百里諭令知之。欽。此。臣伏查處州鎮總兵劉培元。咸豐四年。隸臣部下。管帶水師副左營。五年冬間。經湖南撫臣札飭。改帶陸軍。救援江西。協勦袁州吉安等處。九年二月。賊竄湖南。仍令改帶水師。防勦寶慶。巡查省河。該鎮現在湖南。能否馳。赴浙江。臣飛咨粵湖南撫臣。覆詰酌核覆奏。一面咨會瑞昌等。查照辦理。候選道金國琛。向在巡撫銜李續賓軍。

中辦理營務處。并未管帶水師。亦未隸巨部下。現在安徽按察司李續宜軍營。李續宜統領萬餘人。總持大綱。營務繁劇。均由金國琛綜理。間或分勦兩處。則金國琛分統一支。目下安慶桐城粵捻疊集。金國琛斷不能馳赴浙江。改帶水師。舍其長而用其短。前此浙事稍紓。瑞昌王有齡等奏。明以張玉良之師。來徽州境內會勦。近日僞忠王李秀成帶賊數萬。圍撲江西之玉山。連陷浙江之常山江山兩縣。且有竄擾衢州之信。臣與浙江文報不通。此時浙中喫緊。似又重在陸軍。而不在水師。所有欽奉寄諭。恭摺覆奏。伏乞皇上聖鑒。謹奏。

湖南設立東征局請頒發部照摺 咸豐十年十一月二十八日

奏爲湖南官紳設立東征籌餉局。辦有成效。應請仿照江西茶捐章程。頒發部照。隨時獎敘。恭摺會奏。仰祈聖鑒。事。竊湖南一省。向稱瘠苦之區。年來防勦本省。援應鄰封。兵勇分道四出。而餉需猶能爲繼。良由經理得人。取民有道。前此助勦江西。協濟黔粵。歲費百餘萬兩。久在聖明洞鑒之中。本年夏間。臣與左宗棠在湖南招募勇丁。數近二萬。餉項軍裝。爲款甚鉅。皆由湖南竭力協濟。得以從容集事。臣以一省之物力。只有此數。協助外省者日多。則供給本省者日少。此有所盈。則彼有所缺。本不欲再用湖南之餉。致蒙竭澤而漁之譏。無如添募勇丁。添製鎗礮。添造船隻。在在與湖南相交涉。不得不借資湘中之力。挹注皖省之師。爰與湖南撫臣熟商。札飭臬司裕麟。道員黃冕。鄭元璧等。會同藩司文格。在於長沙設立東征局。凡鹽茶貨物。酌抽釐金。於商民稅則所增無幾。而於本省釐務。兩不相妨。臣與官文。胡林翼等。所統各軍。同係東征之師。同值缺餉之際。議定東征局所籌餉項。以三分之一解江西糧臺。協濟皖南一軍。以三分之一解湖北糧臺。協濟皖北一軍。又會同遴派翰林院編修黃錫彤。員外郎郭徵嘯。候補道陶澂。知府彭汝琮。胡鏞貴。廷瓚。黃芳。知縣馮晟等。各官紳。設立分局。襄同辦理。本年七八月內。次第開局。臣以隔省籌餉。事涉煩難。未敢遽行入奏。九月間。夷氛內犯。該局官紳聞臣有帶兵入衛之奏。益復倡明大義。急湊東征之餉。上犒北上之師。由是規模漸定。衆情胥協。現已報解銀二萬五千兩。其在局製械造船。所費尤多。洵屬力拯時艱。著有成效。惟是另設一局。與本省抽釐不同。凡鹽茶各商。抽收較多者。應仿照江西茶捐之例。給與獎敘。合無籲懇天恩。飭部頒發執照二千張。內監生照一千張。從九照八百張。各色職銜封典翎枝。照共二百張。寄至湖南巡撫衙門。轉交東征局司道。經收填用。近歲以來。屢蒙我皇上諭旨。褒嘉湖南官紳。有裨

大局。今茲時事彌艱。猶能多方籌措。謀及皖吳之師。雖出自該局官紳報國微忱。亦足見聖主仁言感人之深。有以激發於不自已。所有湖南官紳設立東征籌餉局。請飭頒發部照緣由。謹會同湖廣總督臣官文。湖北巡撫臣胡林翼。前湖南巡撫臣駱秉章。署湖南巡撫臣翟誥。恭摺由驛馳奏。伏乞皇上聖鑒訓示。謹奏。硃批。著照所請。該部知道。欽此。」

近日軍情片 咸豐十年十二月二十八日

再近日軍情。西路僑定南主將黃文金一股。由景德鎮退至鄱建交界之石門洋塘等處。與左宗棠鮑超兩軍相持。兩水連綿。尙未開仗。東路僑忠王李秀成一股。十一月二十八日圍撲玉山。道員王德榜。都司顧雲彩等。登陣固守。十二月初五日解圍以去。其戰守詳細各情。應由江西撫臣主稿具奏。北路駱縣休寧及各嶺之賊。日內尙無窺犯情形。理合附片具奏。仰慰宸廑。謹奏。

請湖南借銷粵鹽片 咸豐十年十二月二十八日

再查湖南一省。除郴桂等十二州縣。向食粵鹽外。餘屬皆食淮鹽。額銷二十餘萬引。自粵匪滋擾。運道梗塞。淮鹽片引不行。於是湖南之民。盡食川私。官抽鹽釐。以助餉項。本年川井被賊蹂躪。鹽價驟貴。而鹽釐亦頓減。若不早爲變通。則淮引既斷。蜀私復梗。民間將有淡食之虞。國家尤失自然之利。惟有借銷粵鹽。尙可稍濟目前之急。咸豐五年。臣在江西會奏。請浙鹽抵作部撥之餉。欽奉諭旨。允准通行。至今兩省俱有裨益。此次借運粵鹽。應即援以爲例。浙鹽行至江西。僅玉山陸運八十里。餘皆一水可通。粵鹽行至湖南。僅宜章陸運九十里。餘亦一水可通。惟鹽以六百六十觔成引。臣初奏。請借運三萬引。粵鹽以一百五十四觔成引。臣此次應請借運十五萬引。俟試行有效。再行會同續奏。現與湖南撫臣往返熟商。擬仿照浙鹽成案。在於廣州設立督運局。由廣東湖南督撫遴員經理。在於長沙衡州設立督銷局。即由東征局司道經理。無論官運商運。由局發給護照。准赴廣東省河及高州惠州產鹽之地。概用民價探買。經過粵境及樂桂各埠引地。不准發賣。違者即以私論。鹽爲海濱大利。地不受寶。但患無地可銷。不患無產可售。但使不侵佔粵引地面。即於廣東之鹽務無損。於湖南之民食有益。而臣得借抽粵鹽之釐。藉抵淮綱之課。猶不失爲兩江任內應籌之餉。據東征局司道文格裕麟鄭元璧黃冕等會稟請

奏前來。合無籲懇天恩。敕下戶部查照。并飭廣東督臣撫臣轉飭運司及地方各屬。一體遵照辦理。是否有當。謹會同署湖南巡撫臣翟誥。附片具奏。伏乞皇上聖鑒訓示。謹奏。

派署九江總兵片 咸豐十年十二月二十八日

再前月逆匪攻撲建德。九江鎮總兵普承堯。以寶勇五千駐紮一年之久。不能堅守待援。棄營潰退。貽誤大局。經臣據實奏參。請旨將該總兵革職拿問在案。查該軍敗潰後。退至彭澤湖口。又退至九江。譁聚街市。經江西撫臣撥解餉銀三萬四千兩。清給欠餉。臣出示曉諭。將寶勇之精壯者。飭飽超挑選。另編入營。其疲弱者。資遣回籍。並派九江鎮後營游擊儘先副將萬泰。暫行署理九江總兵印務。以資彈壓。所有九江鎮總兵一缺。應請旨迅賜簡放。以重職守。理合附片具奏。伏乞皇上聖鑒訓示。謹奏。

請隨摺鈔發諭旨片 咸豐十年十二月二十八日

再臣駐紮祁門。距京較遠。且賊衆嘯集。常有道路梗塞之時。以致部文到營太遲。諸多不便。即如周天受請卹之案。久見邸報。尚未接到部文。米興朝交臣查辦之案。亦見邸報。尚未接到部文。又如皖南鎮之陳大富水師營之王明山陳金鼇。皆奉旨簡放總兵實缺。事在半年以前。至今未接部文。致臣無由行知該員。該員等亦無由具摺謝恩。實屬窒礙難行。相應奏明。請旨飭下軍機處。凡遇臣處奏事。奉有硃批。發下之日。即將本日諭旨。隨同硃批。一併鈔發。或摺中有保案卹案參案。請旨簡放之案。尤須速奉諭旨。乃能隨到隨行。是否有當。伏乞聖鑒訓示。謹奏。

官軍扼守景德鎮會勦洋塘大捷摺 咸豐十一年正月二十四日

奏爲官軍扼守景德鎮。疊獲勝仗。旋追賊至洋塘。會勦大捷。恭摺奏祈聖鑒事。竊襄辦軍務候補四品京堂左宗棠一軍。駐紮景德鎮。連克德興婺源二城。經臣於十一月二十八日奏明在案。左宗棠本擬由婺源進攻徽州。因接到巨函。知建德不守。普承堯一軍潰退。逆賊黃文金大股已竄饒州。連陷江西數縣。飛調各營由婺源回景德鎮。十一月十一日。探知賊已竄近離鎮五十里之視田街。即於鎮後馬鞍山一帶。修築營壘。并飭團紳方豐昌等。於鎮上之里市渡。趕造浮橋。十二日即遷道王開化。訓導楊昌濬劉典等。各帶親兵十餘人。過河至羅家橋洪源

等處。察看地勢。遇賊前鋒突至。王開化等按轡徐歸。方過浮橋。賊騎亦至。副將崔大光。用劈山礮轟斃騎賊數名。賊始卻退。探報賊之大隊。已逼浮橋縣城。隨飭各營循河岸繞出截勦。賊衆鼠伏不出。而伺官軍收隊後。竄陷浮梁縣城。十三日。令各營五更出隊。進攻浮梁之賊。分兵守里市渡及下游之西瓜洲。賊之踞羅家橋者。伺我軍隊伍上赴浮梁。即擁衆至對岸。先攻里市渡浮橋。復由中渡駛至西瓜洲。均經我軍擊退。浮梁之賊。亦即遁去。十四日。賊以千餘人列里市渡。以千餘人列中渡。其大隊直趨西瓜洲。踞淺過河。約渡至二千餘人之多。排陣如新月之式。比派中營由鎮中街出。前營游擊羅近秋由河街出。前總哨都司黃有功繼之。左營都司黃少春由後街出。後總哨都司李世顏繼之。中營先到。列隊洲頭。鎗礮排放。賊衆伏地不動。參將睦金城。千總章榮先。都司張志超。帶隊衝擊。賊復抵死拒敵。適羅近秋等由左右兩路抄出。王開化楊昌濬率親兵由中路繼進。賊大驚潰。望水狂奔。我軍泅水追殺。先鋒裨賊百餘。生擒數十名。溺斃者無算。其對岸之賊。復磨中渡以下數股。擁至河邊。輪放鎗礮。我軍亦分三層排列。劈山抬鎗。隔水轟擊。又值從九朱明亮。副將王明輝。參將丁長勝。亦各帶隊前來策應。賊見我兵層出不窮。遂翻山竄去。十六日。賊悉回竄洗馬橋珠田界牌等處。此賊匪初次至景德鎮。我軍力戰擊退。及收復浮梁縣城之實在情形也。左宗棠以賊之前股雖退。而黃文金大股必將復至。遂令老湘桂營堅扼婺源。前後兩總哨堅守浮梁縣城。又令楚軍四營於觀音閣至西瓜洲。沿河挖濠。修築水牆。嚴飭各營。日夜防守灘口。自浮城至朱村李邨四五十里間。輪流梭巡。廿三日。洗馬橋之賊。果回竄至羅家橋龍頭山一帶。廿四日。中渡葉家洲西瓜洲老虎灘金魚灘鮎魚山等處。各有賊數百。踞淺渡河。均經我軍擊退。是夜探報偽賊目黃文金。——即黃老虎。——率黨二萬餘。由湖口鄱陽竄至。二十五日。賊先出千餘人。列里市渡。由龍頭山出六七千人。至西瓜洲對面。層層排列。官莊以下直至鮎魚山。分爲五路。每路約三、四千人。旗幟滿山。騎賊數十。由老虎灘衝過。被桂勇轟退。各灘口均爲我軍力拒。鎗礮連施。賊衆披靡。傷斃多名。賊目李遠繼先以千餘人向葉家洲牽制我師。而大隊由上流高家灘過河。頃刻間。颺水而過者約三千餘人。未渡者不下萬餘。前數十騎由揚湖街大路直趨景鎮。丁長勝帶隊由李村捷徑迎擊。立斃騎賊三名。丁長勝身受矛傷。裹創血戰。副將陳明南從街內小路殺出。副將喻勝榮。游擊王開琳。從浮梁對面山內抄出。副將王明輝復帶隊趕到。右營後營亦各率隊伍。正路衝殺。三

面圍攻。愈戰愈猛。該逆大敗。反奔過河。我軍乘勝追擊。斃賊數百名。墮水死者不計其數。其另股賊攻浮梁縣城者。亦經李世顏等各潛奪獲木梯。保全堅城。據生擒賊供。是日陣斬僞指揮三名。二十七日。賊目黃文金擁衆復犯浮梁。又經我軍擊退。適巨匪綬靖鎮總兵鮑超。由祁門回援景德鎮。前隊已到。是夜四鼓。賊相率遁歸視田街曹家渡等處。此黃文金大股續犯景德鎮。官軍憑河堅守。力遏兇鋒之實在情形也。賊由景德退後。至鄱建交界之石門洋塘等處。與左宗棠鮑超兩軍相持。兩軍連綿。不能開仗。臣於上年十二月二十八日附奏在案。嗣左宗棠由右路進扼婺源橋。鮑超由左路進扼洋塘。該逆復從下游添集賊黨。嚮聚於洋塘對岸之雞公坡。并由謝家灘泥灣街一帶。層層築壘。聯絡二十餘里。我軍因雪雨阻河。未能出擊。而賊時由謝家灘躡淺過河。聯騎結隊。意圖潛撲鮑超營壘之後。正月初九日。左宗棠派令駐紮洋塘山北之四營游擊羅近秋等。排列雞公坡河邊。以護鮑營老營。并派桂勇楚右營列隊洋塘左邊。以防該逆由童家灘抄襲之路。鮑超自率所部由洋塘山左前進。一意專擊下游之賊。詎該逆潛入謝家灘。乘夜修搭浮橋三座。是日寅刻。出有悍賊數千。渡河而南。伏於村房。又有騎賊數百。領步隊數千。直趨謝家灘中路。其旁一支。由童家灘過河。明突暗抄。共分三路。復於謝家灘對岸山尖。密排賊隊。吶喊助勢。鮑超派寔中營副將陳由立。仁字營守備唐仁廉。寔副前營副將蘇文彪進攻中路。寔前營副將黃慶寔左營副將鄭陽和。河溪營游擊蕭以德進攻左路。以訓導伍華瀚華字營馬隊輔之。寔右營副將陳得勝。寔後營副將張玉田。進攻右路。以遊擊趙廷貴。川海營參領明興黑龍江馬隊輔之。寔分撥間。雞公坡之賊。過河徑襲老營。經陳得勝張玉田會合羅近秋等各隊。開放連環鎗礮。賊即敗退。我軍遂於謝家灘三路并進。該逆亦三路迎拒。鏖戰二時之久。賊勢不支。鮑超督飭各營乘勝猛擊。直抵浮橋。殺斃悍賊二千餘名。該逆奪橋而走。我軍追殺。擁擠燭斃之賊數百名。有過橋不及。墜水逃溺者。有逃竄下游過河。經任星元礮船擊斃者。賊之前隊。懼官軍追剿河北。已將浮橋斫斷。鮑超飭陳由立唐仁廉等。由淺灘分途過河。圍殺一時之久。賊屍山積。內有黃袍賊及紅袍賊百十餘名。斃死其中。我軍乘勢將謝家灘一帶賊壘。全行踏平。該逆後隊山岡之賊。突又層層來援。我軍愈戰愈奮。將賊衝爲數段。該逆狼奔不顧。日暮收隊回營。是日計斃賊四千餘人。溺斃逃散者不計其數。據生擒賊供稱。逆首林世發許茂才死於亂軍。黃文金身受重傷。奪獲鎗礮器械旂幟數千件。初十日黎明。鮑

逆會合左宗棠所部。出隊遠河。雞公坡之賊已踴躍宵遁。我軍追至鐵鏈港地方。該逆分兩路。一由建德回甌青陽。一歸併彭澤另股。飽起與左宗棠分派之營。跟蹤追剿。以清西路。左宗棠仍回駐景德鎮。稍休兵力。以防東路。此正月初九日。洋塘大獲勝仗之實在情形也。巨查逆首黃文金。爲著名梟悍之賊。自去年十一月撲陷建德。蔓延甌陽浮梁等縣。其時巨在祁門。三面皆賊。僅留景德鎮一綫之路。以通接濟。該逆盡銳攻撲。欲得甘心。賴左宗棠之謀。飽起之勇。以守則固。以戰則勝。用能大挫兇鋒。化險爲夷。洵足以寒賊膽而快人心。所有出力員弁。可否併入前案彙保。出自鴻施。陣亡之游擊周芸亭等三十員名。另繕清單。請旨交部從優議卹。以慰忠魂。所有官軍扼守景德鎮及追賊洋塘。會剿大捷各緣由。專摺由驛六百里馳奏。伏乞皇上聖鑒訓示。謹奏。

逆匪分犯大赤大洪二嶺迎勦獲勝摺 咸豐十一年正月二十四日

奏爲逆匪分犯大赤大洪二嶺。進撲祁門老營。官軍迎勦獲勝。追賊出嶺。恭摺奏祈聖鑒事。竊祁門西北兩路嶺隘紛歧。西路之大赤嶺。北路之大洪嶺。尤爲扼要。臣於去年十月內。闕視祁縣東北一帶嶺防。派副將唐義訓馳看祁西各嶺形勢。在於大赤嶺頭修築柵卡。並分防大小樛根樹。派撥祁門老營更番戍守。大洪嶺向有微防戍兵。近日提臣江長貴駐紮柏溪。更於大坦湘源兩處。節次設防。以固門戶。疊經嚴飭諸將。慎密扼守。正月初六日午未間。連接西北兩路探報。石埭大股賊匪。同日分扼二嶺。大洪嶺一股。都司曹貴迎擊受傷。退至長排。經江長貴派隊接應。該逆退伏嶺腳。時已昏暮。不能測其蹤跡。大赤嶺一股。副將黃惠清迎擊。傷亡弁勇多名。且戰且退。當夜折回祁門。賊已竄至歷口。臣以該逆兩路進犯。不利分擊。當俟其來撲時。堅守營壘。添調外援。爲夾擊之計。初七日探知大洪嶺之賊。經江長貴督隊擊退。防兵仍至嶺頭。堵塞卡隘。北路可保無虞。而大赤嶺竄入歷口之賊。乍前乍卻。探報歧異。臣以北路旣穩。於初八日辰刻。派副將唐義訓統領強中湘前及前左前右春宇等營。馳赴歷口一帶迎勦。詎我軍行至距祁二十里之石門橋。賊已距橋不遠。唐義訓與各營官登高瞭望。見白旗之匪約二千餘人。擁至橋外田壟。見官軍大至。排列未動。橋外山岡黃旗黑旗花旗諸逆。分三大股。約計四五層。遠山之外。遙望旗幟紛紛。不見其尾。唐義訓與各營官商派哨隊。分爲三路。以黃惠清一支伏於橋左山衝。以副將沈寶成。都司張遇春一支伏於橋右山後。唐義訓督同通判朱聲隆。當中的一路。排列橋頭及附近山上。以候選知縣

易潤壇督領接應各隊。分派甫定。揮令中路過橋。白旗之賊。徑由田壘猛撲而前。我軍鎗礮齊施。該逆後隊仍復搖旗大進。白旗賊拚命抗拒。戰約半時之久。我軍伏兵齊起。黃惠清由左路衝內突出。沈寶成張遇春由右路山後突出。易潤壇後隊繼至。左右兩路。均翻山包出。賊後。礮斃騎賊一名。殺悍賊數十名。唐義訓朱聲隆乘勢揮令猛進中路。賊勢不支。我軍一齊猛撲。聲振羣山。該逆且退且拒。各軍追殺。純從兩旁包抄。賊尸縱橫。冒林墜石。拋棄旗幟鎗械無算。窮追三十餘里。至武陵嶺外。距祁已五十里矣。酉刻收隊。回紮小路口。適前派駐防樺根嶺之震字營官馬復震亦來會合。初九日早。唐義訓率各軍出隊過嶺。仍分左右中三支并進。敗賊之回聚。歷口程村者。望見官軍掩至。驚潰而走。我軍追勦。直出赤嶺之外。是役計斃賊千餘名。生擒一百三十五名。陣斬賊首麟天豫古得金。復其僞印。奪獲旗幟二千一百餘面。鎗礮二百三十餘件。騾馬百零五匹。我軍傷亡百餘名。經唐義訓稟報前來。臣查此股逆匪。即去年十一月內撲犯牟棧嶺。竄踞盧村之賊。經我軍大加懲創。甫歷四十餘日。復敢直犯祁門。據生擒賊供。該逆謀知巨處官軍盡回勦景鎮一帶。祁門老營空虛。意欲攻我不備。計殊狡毒。此次擒斬渠魁。賊之器械。拋棄殆盡。足以寒逆黨而快人心。副將唐義訓與記名總兵朱品隆二人。由李紱賓部下調至巨處。樸實耐勞。心思靜細。口不言功。去年克復建德。及此次保全祁門。均能以少勝衆。所有出力將士。籲懇天恩。併入建德案內。開單請獎。陣亡各員。另摺懇請賜卹。以慰忠魂。所有逆匪分犯大赤大洪二嶺。進撲祁門老營。官軍迎勦獲勝緣由。理合專摺由驛馳奏。伏乞皇上聖鑒訓示。謹奏。

近日江皖賊勢軍情片 咸豐十一年正月二十四日

再祁門以北。係石埭太平古剎劉額各股賊匪。去冬以來。黟縣瀘亭及牟棧大赤諸嶺。屢次大戰。迭經陳奏在案。祁門以西。係此主將黃文金大股。自去冬內犯江西。所有湖口之守。景德鎮之防。洋塘之戰。亦經上年及此次分別奏報。現在賊退下隅。坂尚力拒。鮑超一軍。相持未決。祁門之東。係僞忠王李秀成大股。上年連陷皖南之江灣婺源。浙江之常山江山。本年正月圍攻玉山廣豐。廣信三城。均經官軍竭力堅守。解圍以去。現在竄至鉛山之吳坊陳坊等處。有入擾江西腹地之意。距巨祁門老營。相去六百里外。兵力實難兼顧。臣已飛咨江西撫臣飭劉于燾堅守撫州府城。飭黃鳴珂堅守建昌府城。並飛調魏喻義一軍。駐紮江西省城。預爲籌防。或可保全無虞。所有江

曉交界賊勢軍情。理合附片具奏。伏乞皇上聖鑒。謹奏。

請頒關防片 咸豐十一年正月二十四日

再上年八月。接准江蘇撫臣薛煥函稱。和春失事以後。所用欽差大臣關防。經許乃釗派員送至蘇州撫署。城陷之時。一併遺失。疆臣自行具奏。請旨另頒關防等語。臣之初意。本擬皖南稍有頭緒。即當馳赴淮揚。俟軍入蘇境。再行奏請關防。曾於十月初四日附片具陳。十一月初五日奉到硃批。「明春汝帶兵親往淮揚。尙須臨時斟酌。欽此。」仰見聖主權衡緩急。明燭萬里。今祁門三面皆賊。正在苦戰相持之際。臣斷不能舍此而遠赴他處。合無籲懇天恩。飭部頒給欽差大臣關防。並敕頒發令箭旗牌等件。由江西遞至皖南。交臣祇領。至臣能否親赴淮揚。應俟安慶克復後。斟酌情形。再行具奏。請旨。所有請頒關防緣由。理合附片具奏。伏乞皇上聖鑒訓示。謹奏。

謝年終恩賞摺 咸豐十一年二月初八日

奏爲恭謝天恩事。咸豐十一年正月二十三日。臣在祁門軍中。承准軍機處咨開。十一月二十日。由內交出年終賞福字荷包銀錢銀鏢食物等項。交兵部由驛馳遞。一等因到臣。嘗即恭設香案。望闕叩頭祇領。竊臣謬領東征。未戡南服。年華易擲。歲廩虛糜。神馳金鑰。方殷向日之忱。春到木蘭。忽荷自天之寵。奎章璀璨。妙入法以垂型。天語吉祥。綜九疇而錫福。重以雙魚迭佩。恩逾華袞之榮。百貝分頒。費溢俸錢之數。餅香風暖。飫甘而棗核同懷。粉潔雲敷。表素而蓮心共挹。式飲流酥之乳。兼嘗宜麥之珍。疊荷鴻施。莫名悚感。臣惟有借此分陰。勉圖寸進。託一人之有慶。矢每飯而不忘。庶冀仰答高厚生成於萬一。所有微臣感激下忱。理合繕摺叩謝天恩。伏乞皇上聖鑒。謹奏。

官軍破賊黃麥鋪饒九境內肅清摺 咸豐十一年二月初八日

奏爲官軍破賊於黃麥鋪等處。大股下竄。江西饒九境內。全數肅清。恭摺奏祈聖鑒事。竊自上年十一月。逆賊黃文金大股。由建德入犯江西。連陷數縣。左宗棠鮑超兩軍。堅守景德鎮。大戰洋塘各情。疊經奏報在案。鮑超從洋塘跟蹤追賊。至彭澤之下隅坂。左宗棠亦派楚軍四營。由右路馳追。駐紮小麥鋪地方。該逆勾結青陽銅陵援賊。二支仍踞建德縣城。大支盤踞金家村黃麥鋪一帶。意圖抗拒。復犯景德鎮。正月二十六日。鮑超商令皖南鎮總兵

陳大富、列隊建德、牽制城中之賊。而自率大隊，馳至黃麥鋪。賊見官軍突至，層層密排。山谷皆滿，不見其後。鮑超派霆左營副將鄭陽和、霆中營副將陳由立、馬隊訓導伍華瀚、楚前營游擊羅近秋、楚左營都司黃少春、霆右營副將陳得勝，由左路攻擊。又派霆前營副將黃慶、後營副將張玉田、前旗都司黃有功、後旗都司李世顏、黑龍江馬隊佐領明興、霆副前營副將蘇文彪，由右路攻擊。自率副將宋國、永唐、仁廉、蕭以德等，從中路進。賊見我軍尚未成列，遽來撲犯。漫山徧野，聲振萬壑。鮑超督飭各營三路齊進，鎗礮密施，刀矛並舉。鏖戰三時之久，賊陣稍動。我軍乘勢壓之，如牆而進，追奔四十里。愈戰愈奮，該逆有撲港淹死者，有懸岩跌斃者，尸檢徧野，血濺林谷。鮑超復令各營搜山，躡伏追至建德。適陳大富與水師萬化林會攻城賊，克復縣城。約共斃賊六千餘，淹斃跌斃逃散者，共計萬餘。生擒僞琳天福一名、僞鼎天侯一名、琳天侯一名、擎天裕將軍各一名、檢點三名、丞相二十二名、長髮老賊三百餘名。當即訊明正法，奪獲槍礮旗幟刀矛不可數計。據左宗棠鮑超先後咨報前來，臣伏查上年冬月以來，逆目黃文金從建德入犯江西，連陷數城，意在斷祁門之糧路，解安慶之重圍。賴前有景鎮之守，洋塘之捷，茲又於黃麥鋪獲此大勝。江西饒九等屬，全數肅清，轉危為安。實屬有裨全局。提督銜綬靖鎮總兵鮑超勇冠三軍，每戰必克，籲懇天恩，交軍機處記名。遇有提督缺出，請旨簡放。陣亡之守備曹有餘，請交部從優議卹。所有黃麥鋪破賊，再克建城緣由，恭摺由驛馳奏，伏乞皇上聖鑒訓示，謹奏。

擬移駐東流建德抽出霆軍片 咸豐十一年二月初八日

再僞忘王李秀成股匪，由廣信內犯，意圖竄擾江西腹地。臣於正月二十四日附片具奏在案。厥後李逆果圍建昌府城，晝夜環攻。安肅道劉于濬派兵救援。正月二十七、八、九等日，屢次開仗，尙與城中文報不通。無論能否解圍，而大股既入內地，則或犯南昌省垣，或犯瑞州臨江，皆不可不預爲之防。必須有大支勁旅，馳往援勦。庶江西完善之區，不至糜爛。又皖北四眼狗大股，勾結捻匪，四路狂竄。聞霍山官軍敗挫，准撫臣胡林翼函商臣處，派兵救援。北岸亦須有大枝勁旅，渡江援勦。庶安慶垂成之功，不至中棄。臣處兵力祇有此數。現在張運蘭一軍防勦徽州休寧之賊，左宗棠一軍防勦新犯婺源之賊。此外別無勁旅，可作他處援兵。萬不得已，臣當移駐東流建德，防堵下游池州蕪湖各股。而抽出飽超一軍，作爲游擊之師。或馳援江西腹地，或馳援皖北各路。視其尤急者而

應援之。或可少遏凶鋒。是否有當。理合附片具奏。伏乞皇上聖鑒訓示。謹奏。

攻破上溪口賊巢進克休寧摺 咸豐十一年二月十七日

奏爲官軍攻破上溪口賊巢。進圍休寧縣。克復城池。恭摺馳陳。仰祈聖鑒事。竊自上年八月。徽州失守後。該逆竄踞休寧縣城。經臣派霆字營老湘營屢次攻勦。漸可得手。適逆首黃文金一股。竄陷建德。連破五縣。擾入淳梁景德鎮。臣之糧道阻絕。不得已調鮑超統率各營回勦。僅留張運蘭老湘營。霆字四營。及編修宋夢蘭所帶安勇。駐紮漁亭等處。防堵徽州休寧之賊。南路上溪口自己革副將楊名聲潰敗後。無兵駐守。均經隨時奏明在案。臣以休寧不克。微郡既不可圖。即祁門亦終不甚穩。新年以來。屢據探報。該逆多聚上溪口。意欲抄截漁亭後路。撲犯祁門。正月十六日。曾飭張運蘭攻勦上溪口一次。逆衆敗退。以兵單未能駐守。詎該逆見我軍退後。復率大股。在於上溪口及河村石田小當等處。層層築壘。與休城屯堡之逆。互爲犄角。力抗我師。二月初七日。臣派記名總兵朱品隆率湘前等營。記名總兵唐義訓率強中等營。參將葉光岳率親兵營。由祁門前赴漁亭。會同張運蘭老湘營。進攻上溪口。令漁亭霆字四營。及宋夢蘭所帶安勇。約期列隊。牽制休寧城內之賊。初九日。湘前強中各營。由牌嶺當金街一路進。老湘營由李村凌村一路進。均約於上溪口會齊。老湘營行抵長豐江潭。即見上溪之逆。四山擺列旂幟。又於各大村房。設立埋伏。沿河兩岸。徧插地鏡。堅修重卡。張運蘭揮衆迎擊。刀矛并進。施放噴筒火箭。賊巢火起。一面將卡邊裝板。伏行刀砍。乃破重卡而入。三旗旗官易開俊。帶傷追至河干。百長廖定陞殺悍賊數名。賊遂大潰。時何村之賊。復出萬餘。過河迎敵。適湘前強中親兵各營。先破石田堅卡。乘勝而來。并至上溪。聲勢彌壯。大呼疾進。橫出腰擊。先將上溪口下面一帶賊壘燒燬。該逆紛竄狂奔。我軍沿河分兩路窮追。抵石田地。方又有賊營六座。合攻夾擊。火器齊施。遂將河村賊營。一併踏破。賊向小當敗走。該處復有伏賊。接應敗匪。回旗抗拒。朱品隆唐義訓等。揮令各軍。愈前愈奮。同知朱聲隆。從九禹志。連縣丞李公選。帶領後隊。一齊趕至。并將小當援賊。全行擊敗。沿途殺斃逆匪二千餘名。墮岩投水者。不計其數。生擒僞領天豫鄭逆。將軍洪天勝。檢點李德全等二十八名。髮賊八百四十餘名。解散難民。以數千計。奪獲僞印六十餘顆。驢馬百餘匹。旗幟器械無算。此二月初九日。攻破上溪口賊壘之情形也。是日漁亭霆營安勇亦出隊至藍渡一帶。亦將該處賊卡燒燬。直抵休寧。

縣城該逆負固不出。朱品隆、唐義訓、張運蘭等。次日會商。該逆經此番痛勦。城賊必已膽寒。急宜乘勝圍攻。十一日各營會抵城下。四面環攻。該逆但於城上轟放鎗礮。我軍亦用噴筒劈山礮對擊。傷斃城上悍賊多名。唐義訓復令朱聲隆、葉光岳、胡玉元等督帶馬隊。佯退河干。誘賊出城而猛撲之。該逆堅不敢出。我軍如牆而進。扒城及被礮子傷者。不下四百餘名。各營銳氣不爲少卻。誓欲拔此堅城。張運蘭、朱品隆等遂商定暫退。詰朝再來環攻。該逆見我軍圍勦甚猛。全股已於是夜三更時分路遁走。比及天明。各營追近城邊。業已退盡。當將休寧縣城收復。查視城上更棚五百餘座。均各完固。拋棄刀矛器械甚多。各軍以半分守各門。以半由屯溪朱郡一路追勦。此二月初九十一日攻克休寧縣城之情形也。臣查休寧之賊。踞城將及半載。牽綴我師。不能進取。賴上溪口一戰。連踏逆壘。大挫凶鋒。城逆膽寒。遂得一攻而克。仰仗聖主威福。士卒用命。布政使銜河南開歸陳許道張運蘭。平日苦心訓練。臨陣寓節制於奮猛之中。籲懇天恩。請交軍機處記名。遇有按察使缺出。請旨簡放。記名總兵朱品隆。唐義訓。熟於分合之法。勇而能靜。籲懇天恩。簡放總兵。竇缺。江蘇補用參將葉光岳。請免補各缺。以副將仍留江蘇。遇缺即補。湖南補用參將胡玉元。請免補本班。以副將仍留湖南補用。江蘇補用同知朱聲隆。請賞換花翎。候選縣丞李公選。請以知縣。不論雙單月。遇缺即選。並加同知銜。卽選從九禹志健。請免選本班。以府經歷留於江蘇。儘先補用。並加五品銜。其餘出力員弁。容臣擇尤彙奏請獎。受傷人數較多。俟醫調後。查明陣亡人員。另單請卹。所有攻破上溪口賊巢。克復休寧縣城緣由。恭摺由六百里馳陳。伏乞皇上聖鑒訓示。謹奏。

近日江楚軍情片 咸豐十一年二月十七日

再江楚軍情。僞忠王李秀成由廣信府內竄。圍攻建昌府城。撫州喫緊。江西省城亦爲震動。僞英王陳玉成由霍山內竄。直入蕪黃。湖北省城亦爲震動。臣擬自赴東流建德一帶。抽出鮑超一軍。援應兩處。會於二月初八日附片奏明在案。茲據劉于濬稟稱。建昌之賊。開挖地道。城中兵不滿千。危在呼吸。援師敗挫。賊蹤踰至撫州。等情。臣查撫建去省甚近。關繫甚大。已飛調鮑超一軍。由九江一帶馳赴江西省城。先顧根本。次援撫建。臣因休寧新克。徽州可圖。暫緩移營。仍駐徽州境內。惟鮑超之軍一動。祁門西路建德一帶。又將爲賊所踞。左宗棠之軍小挫一次。祁門南路浮梁一帶。亦恐爲賊所阻。臣惟有激勵將士。攻徽州以通浙江之氣。而開米糧之路。所有近日

軍情。理合附片具陳。伏乞皇上聖鑒。謹奏。

官軍分勦婺源樂平大股竄匪摺 咸豐十一年三月二十四日

奏爲官軍分勦婺源樂平等處大股竄匪。三次大捷。一次小挫。謹將先後接仗情形。恭摺奏祈聖鑒事。竊左宗棠一軍。自追賊洋塘。擊退黃文金大股後。卽回駐景德鎮。扼防東路。三月十七日。據左宗棠咨稱。僞侍王李世賢糾合大股逆匪。竄陷婺源。分踞清華街。左宗棠分派各營。相機防勦。親率中營繼進。二月初二日。飭老湘營右營拔行。初三日進紮傅村。探知清華之賊。分踞石嶺嚴田一帶。意圖由甲路分犯浮梁景德鎮。游擊王開琳與知府王開來。從九張聲恆朱明亮等計商。初六日進紮甲路扼之。是日黎明。各派八成隊。已刻抵甲路。甫築營壘。賊已由石嶺嚴田揚旗蜂擁而來。王開琳王開來會飭各營。嚴陣以待。午刻始令前旂由右路捲旂潛出。後旂由左路捲旂潛出。號鼓齊發。左右兩旂及侍壯勇由中路衝出。桂營右營繼之。賊於田壟中層層列陳抵敵。各營奮威衝殺。鏖戰一時。斃賊四五百名。賊始敗走。我軍乘勝力追。賊忽回頭猛抵。如是者數次。我軍陣斬騎賊二百餘名。步賊二千餘名。生擒百餘名。奪獲刀矛旂幟無算。是夕。賊退清華街。初七早。仍糾大股。徑撲甲路營壘。我軍奮擊卻之。據生擒賊供。一清華街之賊。實有四五萬人。專力攻撲甲路。直犯浮梁景德鎮。一王開琳等稟請加兵助勦。左宗棠飭游擊羅近秋。都司李世顏。各率所部。赴甲路助之。旋據探報。婺源之賊。已竄過中雲。初八日。左宗棠親率中左後三營。及前總哨馬隊營。進駐鯉魚橋。於是分駐甲路之八營。與左宗棠相距漸遠。首尾不能相顧。初九日。逆衆由石嶺分三支直趨甲路兩面。山林內層層埋伏。以萬餘人由中路搗賊。王開琳會商右營與前旂潛伏左邊山內。桂營與左旂潛伏右邊山內。自率侍壯勇及右後兩旂。分列正路。壠中之賊。張兩翼衝犯而來。我軍嚴陣不動。俟賊逼營。正伏齊出。殺賊四五百人。其後股悍賊。日夕揚旂紛來。復經我軍直撲旁抄。擊斃約千餘人。該逆大敗而走。伏賊亦盡縮退。此初六七暨初九等日。甲路兩次大勝。一次小勝之實在情形也。是日探報。婺源大股賊。已由中雲竄黃沙。入樂平界。如蠅如蟻。晝夜趨行。刻無停趾。左宗棠卽率中左二營。及前總哨移駐樂平之柳家灣。筋後營駐紮黃泥頭橫出截之。探報賊之前隊踞湧山。後隊踞董門沿溝一帶。是夜四更。派左營前總哨及順字營馬隊。由柳家灣左路進三汶。攻勦董門沿溝之賊。親率中營由柳家灣中路進分水嶺。攻勦湧山之賊。又調黃

泥頭後營之際，亦由中路繼進。十一日黎明，齊抵該處。始知湧山逆衆，甫於四鼓竄過。正擬躡蹤追勦，忽見下路逆匪漫山徧野，由沿溝湧山大路而來。我軍亟旆突出截之，賊不知官軍之所自來，蜂擁而至，並有零騎由旁路抄出，直奔左宗棠馬前。卽選道王開化，訓導劉典庵諸哨，從中左兩路衝出，守備史聿舟率所部躍馬而前，斜截旁路，守備蕭仁慈、千總張顯榮等，各帶隊奮威衝殺，賊始退卻。黃有功、黃少春、馬德順從沿溝兜勦而來，賊復大潰，追殺十餘里，斃賊近三千人，奪獲刀矛旗幟二千餘件，騾馬百餘匹，解散脅從極多。此十一日橫擊斃悍賊沿溝之賊，大獲全勝之實在情形也。是日羅近秋、李世顏兩營，甫抵甲路，忽後面之賊撲犯桂營，當經擊斃悍賊十餘人，前面之賊亦經老湘等營擊退。該逆連夜在徽州綵糾大股，以圖合圍我軍。十二日，賊黨大至，各營前後右三路四面皆賊。王開琳、王開來、張聲恆合前後右三旂，堵擊正路。朱明亮及左旂堵擊右路，羅近秋、李世顏堵擊後路。該逆三面併力直撲，更番迭進，勢殊凶猛。游擊陳明南大呼陷陣，手刃搖旂賊目三人，卽率所部橫躍入陣，往來盪決，賊衆盡靡，不虞中賊飛礮，登時陣亡。我軍少卻，王開琳等率各營極力堵截，並擊斃騎馬黃袍賊目一名，賊方併歸田壠，漸漸縮退。王開琳等以賊數愈增，包圍愈近，各營鏖戰數日，子藥米糧已無存留，共議全師出險之策。是夜三鼓，各營五成隊居前，輜重居後，黎明以五成隊排列，徐徐退出。十六日，乃全師邊景德鎮，共計先後陣亡五十餘人，受傷者百餘。此甲路一軍先大勝，後小挫之實在情形也。臣查李世賢股匪實有六七萬衆，狡悍過於他賊，經左宗棠一軍屢挫其鋒，雖甲路小有疏失，猶賴將士同心，全師出險，實屬進止有方。陣亡之藍翎參將銜湖南補用游擊陳明南，前於克復德興婺源案內，擬保花翎副將銜，該員樸實勇敢，忠義奮發，此次衝鋒殞命，實堪憫惻，應請照副將例賜卹，以慰忠魂。其同案擬保外委陳石台，擬保把總趙玉蓮，曾文清喻拔、元陳正彪，均照擬保各職請卹。所有官軍分勦婺源平大股竄匪三次大捷，一次小挫各緣由，理合恭摺具奏，伏乞皇上聖鑒訓示，謹奏。

嶺外逆匪竄撲西北兩路分勦大勝摺 咸豐十一年三月二十四日

奏爲嶺外逆匪竄撲西路歷口北路禾戍等嶺分投擊勦大獲勝仗恭摺奏祈聖鑒事。竊正月初六日，逆匪分犯大洪大赤二嶺，提臣江長貴擊退北路大洪嶺之賊，副將唐義訓擊退大赤嶺之賊。前經奏明在案。臣以西路歷

口。地當要隘。卽於祁門抽撥三營。駐防歷口。以副將沈寶成統之。二月二十三日。西路樺根嶺外之賊。破卡而入。竄至善坑。北路之賊。亦破禾戌嶺而入。江長貴親督將弁。由柏溪馳援堵禦。尙焉得手。西路善坑之賊。四出焚掠。二十五日圍撲歷口營盤。奮集河洲。約近萬人。并有騎賊百餘。扼據石橋。橫截我軍歸路。後面山林中旂幟密布。復有賊八九千人。自卯至午。迭次猛撲。各營將士。堅壁固守。不稍搖動。但以鎗礮擊之。斃賊多名。前者裹尸。後者繼進。臣於二十五日派記名總兵竹山協副將朱品隆。率湘前親兵等營。由祁門赴援歷口。賊聞援兵將至。解圍以去。二十六日黎明。朱品隆派同知朱聲隆。文童楊德霖。藍翎把總朱寶隆。率八哨由歷口之右翻山包繞而去。朱品隆自與沈寶成易潤壇楊鴻烈李公選。副將陳玉恆。都司張遇春。藍翎從九楊慶春。率十三哨由歷口之左。沿河夾擊而出。以副將胡暉堂。都司賀湘洲。守備喻賢能。各帶哨隊。伏後接應。朱聲隆等行距汪村二里許。正值賊匪大股前來。因整隊不動。賊已三次鼓噪。始麾各哨猛擊之。斃斃黃衣悍賊數名。斃而復進。我軍愈戰愈奮。賊且拒且走。正掩殺間。見汪村突出騎賊百餘。經我軍劈山礮擊中十餘人。又見村後山中。賊衆前來抵敵。適楊德霖朱寶隆已至山上。喊聲大震。朱品隆等將塘下陳田葉村各匪擊敗。亦追抵汪村。左右兩路。合而爲一。賊遂大潰。我軍乘勝追至樺根嶺。始行收隊。計斃賊九百餘名。生擒僞丞相宋先祥等三十七名。解散脅從以千計。奪獲騾馬四十七匹。旂幟五百餘面。敗賊悉遁嶺外。此二十五日朱品隆赴援歷口。二十六日會勦善坑。大獲勝仗之實。在情形也。北路犯嶺之賊。二十三日竄撲禾戌嶺卡。并分犯湘源楓樹嶺等處。江長貴親督游擊王金鼎江國林。守備達金龍等。馳往援應。已革副將羅承勳抵禦嶺卡。正在危急之際。見援兵大至。軍心始壯。適犯楓樹嶺之賊。經都司馬登富。守備達玉元二隊。由湘源老嶺脚兩路抄截。賊遂合股直犯禾戌。愈戰愈多。我軍併力衝殺。賊始敗退回巢。江長貴防其再逞。並慮其避實擊虛。分犯方干釣魚各嶺。因令達金龍並帶馬隊。星夜馳赴黠縣。一面設伏備援。以杜窺伺。旋據參將袁國祥稟報。是日已有股匪竄犯方干嶺。參將黃朝陞。都司謝永發俱已受傷。將潰。袁國祥分頭抵禦。鏖戰三時之久。生擒十一名。奪獲器械多件。當將該逆擊出嶺外。二十四日大霧彌漫。賊復分犯禾戌楓樹大洪三嶺。及湘源隘口。江長貴派王金鼎專顧左路。羅承勳專顧右路。自率親軍及游擊林耀龍等。掩旂息鼓。以觀其變。該逆於濃霧中。吶喊三次。蜂擁而至。我軍舉發號礮。伏兵齊出。火器斃賊甚多。適守備譚

加耀。千總張連芳率隊由嶺卡衝出。賊衆大奔。墮岩落洞。死者不計其數。其犯楓嶺之賊。亦經江國林張占元等擊敗。惟湘源一股。尤爲凶悍。分三路來撲。馬登富專壓右手山梁。馬懷珍扼堵左手山梁。相持兩時許。達玉元徐國春等從中路憑卡轟擊。斷其首尾。斃賊無算。其時都司曹貴亦由大洪嶺抄出策應。賊見我軍厚集。大潰出嶺。是日犯方干嶺之賊。經袁國祥與峯字禮字各營。併力擊退。犯釣魚嶺之賊。經黃勝林達金龍等擊退。此二十三二十四日。江長貴分頭擊退北路各嶺竄匪之實在情形也。臣查嶺外逆匪。屢違投謀。此次竄撲。口幸賴三營堅守。朱品隆援兵。得以從容策應。江長貴於賊竄各嶺時。尤能多方應變。悉合機宜。出力員弁。應卽附於前案保獎。以示鼓勵。所有西北兩路各軍。擊賊出嶺緣由。理合專摺馳奏。伏乞皇上聖鑒訓示。謹奏。

進攻徽州未能得手摺 咸豐十一年二月二十四日

奏爲官兵進攻徽州未能得手。恭摺奏祈聖鑒事。竊僞侍王大股賊匪。竄擾饒州一帶。祁門鉤道梗。勢將坐困。二月十二日。官軍攻克休寧。卽擬力攻徽州。以通浙江米糧之路。臣於十六日會附片具奏在案。侍講銜翰林院編修宋夢蘭。籍隸歙縣。尤欲力攻徽州。以保桑梓。十四日督帶安勇。由歙西繞至北鄉。將稠墅賊卡。富場賊館。勦洗一次。回駐江村。十九日。徽賊大股圍犯汪村。四面包抄。我軍鎗礮。驟不及施。騎賊復從旁繞出。將宋夢蘭頭額砍傷三處。顛暈馬下。經家丁扶救出圍。藍翎守備銜儘先千總梅魁員。見勢不支。勒馬殿後。賊衆大至。刀矛攢搦。梅魁員回鞭衝突。手刃二賊。力竭陣亡。此十九日汪村接仗之情形也。三月初二日。臣派祁門黠縣各防之兵九千餘人。齊集休寧。大舉攻徽。臣亦親赴休寧。就近調度。初四日。由休寧分兩路前進。西路以副將唐義訓爲主。副將沈寶成同知朱聲隆等輔之。是夜駐宿岩市街。北路以開歸道張運蘭爲主。副將婁雲慶參將楊鎮魁張應超等輔之。途次攻破潛口賊寨。斬馘百餘人。是夜駐宿潭木地方。初五日。西路唐義訓等營。由岩市前進。行過七里亭。登高瞭望。晒看地勢。城賊出北門搦戰。各哨不俟號令。衝過古虹橋。賊匪佯敗。我軍搶上山梁。馬賊數百騎。由右包抄。我軍前阻堅城。後隔河水。節短勢促。不能施展。適值驟雨如注。衣服火藥盡溼。騎賊皆用洋鎗乘我於危。遂至挫敗。營官副將葉光岳胡玉元力戰死之。弁勇傷亡二百餘人。北路婁雲慶等。因天雨收隊。馬賊百餘騎。分途包抄。我軍回鞭衝擊。且戰且退。轉塘收回。張運蘭令隊伍植立不動。俟馬賊全退。連環收歸。此初五月初次進

攻徽郡之情形也。初六日。各軍仍回休寧。稍爲將息。初十日。再進攻徽。專由北路行走。十二日。列隊於大李富場等處。賊亦負城排隊。相持竟日。無涼可乘。是夜唐義訓住宿槐塘。張運蘭住宿大里。賊於二更。忽出萬餘人。由西路包抄而來。焚村劫營。喊聲震天。湘營奮規。皆住營壘。不住民房。此次村房被燒。勇夫大驚。隊伍錯亂。槐塘村莊首先被燒。強中等營挫潰。淮旗官劉松山力戰時許。徐徐收隊。張運蘭雲慶等。見前村被燒。奔出村房。列隊山上。得以保全無恙。次日同回休寧。其祁門黠縣各軍。皆回原營。此第二次進攻徽郡之情形也。臣查徽郡之賊。雖有二三萬衆。其精悍者不過數千。本可力戰攻取。機緣不順。兩次未能得手。記名總兵儘先副將唐義訓。初次以號令不嚴。過橋輕進。二次以哨探不遠。被劫驚潰。均難辭咎。姑念平日謹慎。屢著功績。應請以游擊降補。副將沈寶成。請以游擊降補。同知朱聲隆。請以知縣降補。聊示懲儆。副將葉光岳胡玉元。均請交部從優賜卹。守備銜千總梅魁員。力願主將。奮勇捐軀。請從優照都司例賜卹。以慰忠魂。所有進攻徽州。未能得手各緣由。恭摺由驛馳奏。伏乞皇上聖鑒訓示。謹奏。

景鎮失陷陳大富陣亡請卹摺 咸豐十一年三月二十四日

奏爲景德鎮失陷。總兵陳大富等力戰殉節。請旨優卹。以勵忠貞。並水師力扼河道。救護糧臺軍械。恭摺具奏。仰祈聖鑒事。竊僞侍王李世賢一股。前在婺源清華街甲路等處。與左宗棠一軍相拒。左宗棠分出別部。在甲路小挫。退至黃港景德鎮。臣於另摺縷晰具奏。二月中旬。景德鎮十分喫緊。臣即飛檄皖南鎮總兵陳大富。迅率駐守建德之四千餘人。馳赴景鎮。會同左宗棠軍。相機防勦。二月十五日。自建德拔行。二十日抵景鎮防所。三月初三日。臣在休寧營次。接據左宗棠函稱。景德鎮於二月三十日失陷。該軍救援不及。幸於廿九日埽清岑丹街一帶賊蹤。打開一路。現已移駐樂平。等語。臣以景鎮失陷。祁門糧路斷絕。當檄鮑超一軍。急赴都陽一路。會合左宗棠之師。夾擊景鎮。其時文報梗塞。景鎮之附近一二百里。一片賊氛。失陷情形無從查悉。三月十四日。據糧臺委員湖北補用知府張秉鈞稟稱。二月二十九日。賊衆數萬。在牛角嶺柳家灣迴龍嶺三處潛匿。距鎮約三十里。總兵陳大富於是日辰刻出隊。至湖田渡河。未見賊蹤。仍復收隊。午刻馬賊百餘。由景鎮之南雙鳳橋竄至李村。步賊繼之。陳大富即督全軍。迎頭截擊。賊衆不戰而退。官軍追勦十餘里。三十日黎明。大霧迷漫。該逆趁霧先行。

偷過雙鳳橋。一伏於都司陳登科營壘之東。一伏於游擊胡鳳離營壘之南。陳大富待至霧散。督率大隊。躍馬當先。參將田應科隨其衝鋒。將過橋之賊。悉行擊退。詎該逆大股由景鎮之東面觀音閣抄出。我軍分頭截擊。隊伍稍散。而雙鳳橋之賊。即乘虛蜂擁而入。陳大富當先抵禦。正中礮子。穿過右乳。血染馬背。猶復裹創呼號。衆軍奮力攻擊。衆軍見主帥受傷。無心戀戰。賊復分途拚命抄襲。我軍應接不暇。未及收隊。賊已進營放火。陳大富負傷血戰。見營盤火起。下馬向北叩頭。跳入李村河殉節。其麾下將領。參將田應科。游擊蕭傳科。胡占鼈。都司胡鳳鳴。熊定邦。吳定魁。千總羅廷材等。亦皆躍馬赴敵。同時殉難。此二月晦日。景德鎮失事之實在情形也。臣自至皖南。於江西省城設立總糧臺。景德鎮設立轉運糧臺。派張秉鈞與同知王順會通判朱煥文經理。軍械子藥。概置舟次。以水師護之。三十日陸兵失利。商民紛紛擁至河邊。爭船競渡。騎賊已撲至西瓜洲。幸水師營官高寅哨官李廷忠。均在西瓜洲下之鵝頸灘。齊放大礮。賊不敢逼。張秉鈞與訓導王慶奎將軍裝坐船。開至西岸。即令護臺水師哨官謝洪春。何勝悅二哨。沿河開礮。保護軍裝民船。千有餘號。駛赴下游馬家灣。當與各營哨計議。分礮船爲前後中三路。護衛各船。於四更開行。駛至鳳岡。天尚未明。西岸之賊。鎗礮子如雨下。經水師往返轟擊。護出各船。天明至古縣渡。詢悉水師中營游擊任星元。會合內河水師營官蘇萬福。督率戰船。連日苦戰。使賊不能進搭浮橋。賊匪銳意欲成浮橋。冀圖圍我船隻。搶我軍火。兩岸十餘里。暨旗排陣。乘夜趕釘竹木密樁。上用板料搭架。中間尙未合攏。我軍既至。開放大礮。斃賊極多。該逆爭上浮橋。兩頭夾放鎗礮。民船傷亡者不下百數。擊沈者亦復不少。各船衝出浮橋缺口之後。賊見前隊戰船去遠。飛開快划趕至。經謝洪春楊榮炳督帶礮划三隻。拚命堵截。且戰且走。各船賴以保全。僅失去鉛子帳棚兩船。餘船軍器。均無損失。此水師保護軍裝。衝出賊卡之實在情形也。復據水師任星元稟。暨陳大富部下將官胡鳳鳴等具稟前來。大略相同。臣查皖南鎮總兵陳大富。以飢軍困守南陵。激勵將士。鎮撫軍民。逆匪四面環攻。閱時六月之久。屢挫凶鋒。孤城屹立。經提臣楊載福赴援解圍。拔出居民十餘萬衆。名將風節。傳播江表。此次景鎮督軍血戰。力竭捐軀。尤爲大節凜然。應請旨敕部照總兵例。從優議卹。並於南陵建立專祠。以表忠蓋。而留遺愛。所有景鎮失陷。總兵等力戰殉節。並水師救護軍火各緣由。理合恭摺具奏。伏乞皇上聖鑒訓示。謹奏。

江皖大局片 咸豐十一年二月二十四日

再臣自去冬以來。屢次奏報。均將江皖大局。附片陳明各在案。大約江皖之賊。分四大股。一曰定南主將黃文金。即上年十一月攻破建德。連陷六縣者也。經左宗棠扼之於景德鎮。鮑超破之於洋塘黃麥鋪。現聞該逆已赴援安慶矣。一曰僞右軍主將劉逆之黨。盤踞池州涇旌石埭等處。去年冬月破半棧嶺。本年正月破大赤嶺大洪嶺。二月破樟根嶺。皆係劉逆之黨。此股在嶺外。距臣軍最近。戰事最多。除三次大戰外。其零支小戰。皆未具奏。一曰僞侍王李世賢。即去年八月攻陷徽州者也。本年二月竄擾景鎮樂平一帶。左宗棠一軍。二月與侍逆大戰數次。該逆已敗潰風竄而去。鄱陽景德鎮浮梁樂平。一律肅清。容臣查明。另行具奏。一曰僞忠王李秀成。去年十月攻陷半棧嶺。經鮑超痛斃破之。十一月竄陷浙江之嚴州江山常山等處。本年正月攻圍廣信玉山廣豐。均以堅守得完。二月攻圍建昌撫州。亦以堅守得完。現聞竄至吉水永豐一帶。距祁門一千餘里。文報久梗。莫悉其詳。除李秀成一股。歷由江西撫臣奏報外。其餘三股。環繞祁門四面。幾於無路不梗。無日不戰。仰託聖主威福。疊獲大勝。各股悍賊。均已退竄。皖南軍務。日有起色。惟四眼狗救援安慶。夾攻官兵營盤。十分危急。現已調派鮑超一軍。由景德鎮馳援安慶。臣亦即日拔營。移駐東流。就近調度。除各處開仗情形。專摺奏報外。理合將江皖大局。附片陳明。伏乞皇上聖鑒。謹奏。

官軍破賊樂平鄱景浮樂一律肅清摺 咸豐十一年四月初二日

奏爲官軍大破賊於樂平。鄱景浮樂等處。一律肅清。恭摺奏祈聖鑒事。竊左宗棠一軍。二月內在湧山甲路等處。與僞侍王李世賢大戰數次。經臣專摺具報。三月內又大戰數次。侍逆敗績。鼠竄而去。鄱景浮樂等處。一律肅清。並經附片陳明大概情形在案。三月二十三日。接據左宗棠咨稱。前於二月十六日。全軍回駐景鎮。嗣據總兵陳大富於二十日抵鎮接防。即於是日拔營向鄱陽進發。師次鮎魚山。聞大股逆匪已由鄱陽古縣渡偷渡昌江。意圖合圍景鎮。二十四日移駐金魚橋。擊敗袁家灣擄掠之賊。二十六日又冒雨擊敗太園石板橋屯踞之賊。二十九日探報賊之後隊。由桃嶺范家墩頭窺聚砦丹街一帶。當派前左右後四營。及老湘兩旗。順字營馬隊。由庵前一帶進剿。行抵太園。適與賊遇。營官羅近秋首先衝入。黃少春躍馬繼至。選用知縣劉典率隊由右路進。即選道

王開化率隊由左路墩頭進。比右路至桃嶺。賊前隊尙踞庵前。追至范家村。賊大隊萬餘人。分兩支林立。我軍整隊堵擊。鎗礮連施。賊伏不動。適左路之軍。由墩頭過嶺。衝殺前來。截賊兩段。始紛紛潰竄。我軍合隊窮追至磬丹街。沿途踏毀賊巢五處。計殺悍賊三千餘名。陣斬僞謝天義黃勝才。燒天福李佳普等賊目百數十名。而奪其印。獲驟馬八十餘匹。旗幟礮械以數千計。解散脅從五六千人。此二十九日范家村大捷之情形也。是日往返八十里。晡間回營。方擬乘勝追剿。次第剪除。詎三十日賊由柳家灣湘湖街竄入。總兵陳大富血戰陣亡。景鎮淪陷。左宗棠所駐之金魚橋。三面皆賊。後路復斷。三月初一日。乃拔營移駐樂平。密調賊蹤。知僞侍王李世賢分遣賊黨。留踞景鎮。親率大股仍由古縣渡鳳岡一帶折回。意圖竄攻樂平。初五日。賊至桃嶺塔前一帶。初六日。各營三路進剿。兼防磬丹街之賊。比抵馬家橋。見賊隊排列十數層。旗幟林立。山谷皆滿。各營整隊前進。奮威衝殺。賊勢稍卻。漸向桃嶺縮退。我軍追至桃嶺。賊仍死拒。適見大驕賊目從山坳突出。滿髮悍賊百餘。各持洋鎗護之。營官黃少春麾健卒挺矛叢刺。立斃悍賊十餘人。該賊目棄驕而逸。獲其僞印二顆。一僞大佐將裨天義李尙陽。一黃勝祥也。賊衆大潰。我軍追至太園山口。賊復死拒。擬保藍翎外委熊清石中。礮陣亡。日晚收隊而還。計斃賊約三千名。生擒百數十名。拔出難民不計其數。奪獲旗幟器械千餘件。僞印百餘顆。初七日。探報景鎮之賊。一由柳家灣竄至湧山厚田等處。一由團嶺竄至龍珠蔡家等處。又於桃嶺修砌營壘。太園屯紮民房。初八日黎明。飭左營等由中路塔前進。右營等由左路進。老湘等營由右路龍珠進。比過塔前。賊卽列隊於桃嶺一帶。漫山徧野。蜂擁而來。中營左營左總哨右總哨自中路直撲。鏖戰多時。賊勢稍卻。旋有另股自兩邊山內。齊出包抄。正圍困間。適守備馬德順率馬隊橫截而來。前營老湘各營。亦由右路抄出。後營等由左路抄出。轉敗爲功。斃賊百餘。初十日早。有騎賊數名至橋南窺探。旋即退去。知大股必將續至。嚴飭各營靜鎮待之。仍分三路。聽中營發號出隊。留六營爲接應之兵。布置甫畢。賊大隊萬餘。白龍珠桃嶺一帶湧至。擺列山岡。并於附近村莊放火。意在搗我軍急戰。我軍按兵不動。午初始傳令飽餐。賊匪猛撲後營營盤。右營州同張聲恆率隊衝鋒。左營游擊黃少春。副將崔大光。從兩旁夾擊。賊仍抵死抗拒。前營桂營老湘各旗。兩路繼進。而中營及各總哨。亦迭出策應。賊見我軍愈戰愈厚。紛紛敗潰。前營營官擬保副將羅近秋。匹馬衝入賊陣。連刃紅衣賊目三人。忽右脅被洋鎗洞穿。登時陣亡。擬保

守備李啓昭、藍翎守備張致和、後總哨都司聶常本、外委聶福申、藍翎千總孫紹凱、均力戰陣亡。士心愈憤。奮威衝殺，窮追二十里。至龍珠始還。計斃長髮悍賊千數百名，奪獲刀矛旗幟器械千餘件。僞印五十餘顆。此三月初六初八初十等日，大戰獲勝之情形也。凱據生擒賊供稱：「僞京衛軍大佐將禔天義、李尙陽等，初六日大敗後，擬即退竄景鎮。僞侍王李世賢不許，調寬撲祁門。賊黨由天保塘藏家灣一帶折回，並挑選景鎮悍賊，親率以來，誓與官軍決一死戰。本日後隊尙未到齊也。」左宗棠以賊將復至，飭各營傍樂平縣城東南，加修外壕，周十餘里。令南鄉團練入城固守，以作疑兵。復引長田畝之水，塞堰爲壕，以陷賊騎。十二日賊之先鋒已逼外壕，是夜南鄉團勇渡河而歸。存城者僅二百餘名。比調前營四哨入城代守。西北一面，各營勾守外壕。十三日，賊股鬻至，距城營六七里，層層布陣，寬廣十餘里。可數者約四十餘處。旗幟林立，掩映山谷。登高瞭視，遠山炊烟縷縷，尙有伏賊未發也。各營憑壕植立，寂靜無聲。午刻，賊撲外壕，更番送至。官軍俟其逼近，排鎗轟擊，逆賊屢卻屢前。官軍再接再厲，相持自晝至夜。約斃賊數百名。樂平縣城坍塌已久，各營於礮石如雨之中，漏夜修砌，略具城形。而該逆環攻，徹夜不息。其城外民房，燒燬未盡者，賊伏其中。穴牆開礮，弁勇傷亡者多。屹立城頭，未敢少避。十四日，賊之大隊，漸由東北環趨紛撲西城。前營勇丁傷亡尤多。擬保副將丁長勝、擬保都司趙克振、易谷方等，挺立城頭，身負重創，勢殊危迫。王開化、劉典以西城地勢太逼，搶護殊難，請調各營齊越外壕，出賊不意擊之。計議甫定，王開化率隊由南門趨西路。王開琳率隊趨右路。左宗棠自與劉典趨中路。每賊一支，以官軍一隊當之。遇賊即斫，退者斬。未刻，各營齊抵壕邊。中路發號，各躍出外壕，大呼殺賊。賊駭愕不知所爲。我軍縱橫盪決，無不以一當百。擬保游擊史率丹、匹馬陷陣，忽被洋鎗洞中小腹，墜馬陣亡。各營將士，怒不可遏，橫衝側擊，愈戰愈奮。賊屍駢積道旁。各路追至高橋小溪，賊之人馬，自相蹈藉，擠斃溺斃者無算。正窮追間，忽大雨如注，繩藥盡溼，乃收隊而還。是役計斃賊約四五千。人陣斬紅袍黃袍賊目數十名，燒燬賊壘二十餘座。據生擒賊供：「僞侍王李世賢自陷景鎮後，即傳僞令犯祁門。初六日行至天保塘，調令折回，親率攻撲樂平。初十四兩敗。僞京衛軍大佐將李尙陽、幾爲官軍所獲。李世賢亦於十四日改裝潛遁。」此二十三賊匪圍城圍營，我軍開壁大戰獲勝之情形也。據左宗棠咨報前來。臣查僞侍王李世賢，自上年攻陷金陵營壘，繼陷徽州嚴州等處，凶燄尤張。此次竄擾景鎮樂

平鄱陽一帶。長圍近二百里。又破陳大富官軍。幾成燎原之勢。左宗棠一軍。前後轉戰三十餘日。大獲大捷。斬敵殆近二萬。洵足塞賊膽而快人心。陣亡之擬保副將羅近秋。請照副將例。從優賜卹。擬保游擊之史韋丹。請照游擊例。從優賜卹。並入祀湖南昭忠祠。擬保守備李啓昭。補用都司聶常本。守備張致和。外委聶福申。藍翎千總孫紹凱。均請照例賜卹。傷亡之擬保都司趙克振。擬保守備周崇高。把總楊清和。均請照例賜卹。以慰忠魂。按察使銜卽選道王開化。沈毅忠實。謀勇兼優。請賞加布政使銜。並請賞給該員父母祖父母兩代二品封典。知州銜知縣劉典。善審地勢。身先士卒。請以直隸州知州歸部遇缺卽選。並請賞戴花翎。襄辦軍務候補三品京堂左宗棠。去冬拒黃文金大股。今春破李世賢大股。解祁休之圍困。振江皖之全局。勛績甚偉。可否御賞撥指荷包等物。以示旌異。其餘出力文武員弁。可否准其擇尤保獎之處。出自聖主天恩。所有官軍破賊樂平。鄱景浮樂等處。一律肅清各緣由。專摺由驛馳奏。伏乞皇上聖鑒訓示。謹奏。

請將左宗棠改爲幫辦軍務片 咸豐十一年四月初二日

再候補三品京堂左宗棠。往年在湖南撫臣幕中。佐辦軍務。肅清本省。援剿鄰省。如江西湖北貴州兩廣。常由湖南重兵往援。屢奏大功。久在聖明洞鑒之中。上年奉旨襄辦巨處軍務。募勇五千餘人。馳赴江皖之交。方慮其新軍難收速效。乃去冬堵勦黃文金大股。今春擊退李世賢大股。以數千新集之衆。破十倍凶悍之賊。因地利以審敵情。蓄機勢以作士氣。實屬深明將略。度越時賢。可否籲懇天恩。將左宗棠襄辦軍務。改爲幫辦軍務。俾事權漸屬。儲爲大用之處。出自聖主鴻裁。理合附片具陳。伏乞皇上訓示。謹奏。

近日軍情片 咸豐十一年四月初一日

再自景德鎮樂平等處肅清。安慶危急。臣擬移駐東流援助江北。業於三月二十四日附片奏明在案。拜摺後。臣於三月二十六日自祁門拔營。四月初一日馳抵東流。鮑超於二十五日。自景德鎮拔營。初一日馳抵下隅坂。其所統全軍。擬卽日渡江。救援安慶。逆首四眼狗陳玉成。於三月十八日逼撲安慶。盤踞集賢關之內外。所有安慶官軍會國荃等各營。城賊撲之於前。援賊撲之於後。勢殊危急。幸自去秋以來。久已開掘長壕二道。有前壕以圍城賊。有後壕以拒援賊。現已相持十三日。仰託皇上威福。尙能堅守無恙。臣與官文胡林翼等熟商。賊以全力

救安慶。我亦以全力爭安慶。以多隆阿飽超兩軍。會勦集賢關之賊。李績宜亦派十營。回皖協勦。必須攻破狗酋。迅克安慶。大局乃有挽回之日。金陵乃有恢復之望。至徽州布置事宜。派令開歸道張運蘭守休寧。記名總兵朱品隆守祁門。湖北提督江長貴守柏溪。副將唐義訓等守漁亭。沈寶成等守歷口。參將楊正魁等守牟棧嶺。均囑以暫主堅守。不遽進勦。巨至東流僅帶五百人。以行。餘皆留防嶺內。其左宗棠一軍。自擊破僑侍王股匪後。現已跟蹤追剿。無論竄皖竄江。均當伺其所向而痛懲之。所有近日軍情。理合附片具陳。伏乞皇上聖鑒。謹奏。

官軍圍攻赤岡嶺賊壘殲除摺

咸豐十一年五月十八日

奏爲官軍圍攻赤岡嶺援賊四壘。悍賊悉數殲除。恭摺奏祈聖鑒事。竊逆首陳玉成。自三月十八日率黨回援安慶。候選道會國荃。會同水師。憑濠固守。賊不敢逼。旋經臣會國藩飛調總兵鮑超。臣胡林翼飛調副將成大吉。會合副都統多隆阿之軍。進逼集賢關外。陳逆畏懼。於四月初十日由馬踏石潛竄。留四壘於機外之赤岡嶺。以梗我師。臣官文胡林翼業已具摺奏報在案。茲准鮑超成大吉呈稱。四月十一日黎明。鮑超率中營副將陳由立。新中營副將顏紹榮。攻其頭壘。左營參將王衍慶。副左營參將劉順隆。後營副將張玉田。攻其二壘。右營副將陳得勝。副右營副將余大勝。仁字營參將王衍慶。攻其三壘。前營副將黃慶。副前營參將劉玉堂。攻其四壘。成大吉自率貞右營及發中營副將張運龍。列隊於集賢關中路。以防關內之賊。派武前營都司曾昭仕。武後營參將王名溍。搜剿集賢關以東。武中營參將胡以章。凱前營都司銜守備蕭玉元。凱後營都司銜守備吳亮才。搜剿集賢關以西。其關內十三壘。經會國荃作長濠圍之。該總兵等遂得專意攻此四壘之賊。詎料壘中皆係多年悍賊。官軍窺探。闕若無人。一近壘邊。則槍礮如雨。我軍奮怒。拔鐵填濠。四面猛撲。多被槍礮傷亡。迄不能前。時水師提督楊載福。飭水師助攻。亦有傷亡。湖北候補知州周開錫。與該總兵等籌商。遂環濠修築礮臺十座。傳令各營兵勇。晝夜輪流出隊。用槍礮環攻。誓不使一名漏網。二十四日成大吉將礮臺進逼賊之第四壘。對壘轟擊。至二十九日。我軍大礮將賊壘轟倒數丈。賊勢頓沮。然猶踞壘不出。五月初一日黎明。鮑超成大吉盡派各營。列隊四面圍定。又命吳亮才入壘傳呼。飭令脅從棄械出降。於是出降者數百人。該逆知勢已渙散。萬無生理。因皆乞降。該總兵等遂傳令各兵勇。以次入壘。悉數生擒。惟劉瑣琳踞第一壘。仍然抗拒。查點名數。三壘之賊。除先降之短髮三

百餘名釋放外。其長髮老賊共二千八百餘名。悉皆正法。其中有僞屈天豫賈仁富。僞傅天安李仕福。垂天義崇孔堂首逆三名。僞檢點將軍丞相指揮以下共一百八十五名。初二日。成大吉奉調拔營回援鄂省。鮑超仍圍攻劉瓊琳之壘。該逆卽於是晚三更後。驀衝出壘。分股逃竄。鮑超卽率馬步沿途追殺。至馬踏石溪河汎漲。賊不能渡。當經鮑超督率副將陳由立。游擊李文益。黑龍江西丹營總明興。知縣伍華瀚等。將全股六百餘名。悉數生擒。其分竄之股。沿河而下。意欲覓船偷渡。水師親兵右營營官彭楚漠。副右營營官趙三元。率水勇登岸兜剿。適有民船一隻。該逆二百餘人。棄馬登舟。哨官顏海仙飛檣趕到。一併生擒。其中有逆目僞雨天豫月天安。略天燕熊里先。丞相劉得勝。檢點周子龍。暨將軍等九十餘名。當卽正法。其逆首僞靖東主將劉瓊琳。就近解提。臣楊載福大營。訊明支解。并函首送臬安慶城外。呼城賊壘賊而告之。以塞逆膽。而快人心。又據楊載福咨鮑超成大吉咨呈。「劉瓊琳李仕福賈仁富朱孔堂等。均係廣西老賊。與官兵歷年接仗。每次首先衝鋒。九年踞守太湖。數月不下。十年二月。逆首劉瓊琳自安微渡江。充作先鋒。破我金陵圍師營壘數十座。連陷蘇常等郡邑。皆係該逆等爲首肆惡。」等因。臣等查粵逆自滋擾以來。雖屢經挫敗。然臨陣率新擄之衆。以當前敵。我軍所斬長髮老賊。至多不過數百名。本次陳逆見我大軍雲集。乘夜潛遁。而留此四壘於集賢關外。原欲牽制我師。且壘中係其平日第一枝悍黨。賊守可恃者。希冀憑堅久抗。以便糾合餘黨。復來解安慶之圍。不料四月十五日。陳逆自被多隆阿敗於挂車河。四壘之賊。雖甚驍悍。而孤守二十餘日。援絕勢窮。無計可脫。鮑超成大吉等。晝夜環攻。仰賴皇上天威。將土用命。殲除長髮老賊至四千名之多。實爲從來所未有。厥功甚偉。所有尤爲出力之都司銜守備吳亮才。請免補都司。以游擊儘先補用。賞換花翎。湖北補用知州周開錫。請免補知州。仍留湖北以知府儘先補用。並賞戴花翎。總兵銜儘先副將余大勝。請以總兵記名簡放。儘先副將顏紹榮。請加總兵銜。並賞給巴圖魯名號。副將銜儘先參將王衍慶。請以副將儘先補用。並請賞加巴圖魯名號。副將銜儘先參將李文益。請以副將儘先即補。儘先補用協領委營總明興。請加副都統銜。知州銜候選知縣伍華瀚。請以直隸州知州不論雙單月。遇缺卽選。松子關案內已保參將曾昭仕。請免補參將。以副將儘先補用。都司銜守備蕭玉元。請以都司儘先補用。並加游擊銜。其餘出力員弁。伏祈皇上天恩。准其擇尤保奏。其陣亡員弁。應開單請旨交部。從優議卹。以慰忠魂。所有赤岡

嶺圖攻賊量。殲除悍賊情形。謹會同大學士湖廣總督臣官文。安徽撫臣李續宜。恭摺由驛六百里馳陳。伏乞皇上聖鑒訓示。謹奏。

代遞唐鑑遺摺摺 咸豐十一年五月十八日

奏爲據情代遞遺摺。仰祈聖鑒事。竊臣於四月十三日。據原任太常寺卿唐鑑之子唐爾藻具呈到營。稱「其父唐鑑於正月十八日病故。年八十五歲。臨歿時諄屬我以無位之人。仰荷聖主恩遇最深。今當永訣。謹具遺摺。以鳴戀主之忱。惟籍隸山東。寄居湖南。求人代奏。均多未便。往年出京時。曾奉諭旨。仍回江南。此摺應交兩江督臣代爲遞奏。理合專丁赴營呈請代奏。」等情。并將正摺及草稿寶送前來。臣查二品銜前任太常寺卿唐鑑。由翰林院檢討。歷官至江南布政使。內轉太常寺卿。年老致仕。主講江南鍾山書院。咸豐元年。奉旨進京。召見十五次。皇上特旨褒嘉。以唐鑑品學兼優。器識安定。賞給二品銜。仍諭令回南。主講書院。咸豐二年。粵匪竄擾湖南。唐鑑念切廬墓。於三年正月回湘。服官三十餘年。父子皆位至藩司。而家無儋石。清苦異常。自少至老。好學不倦。著書二百餘卷。多心得實踐之言。近因時事日棘。每以聖主過於憂勞爲慮。此次所寄摺稿。臣審爲唐鑑親筆。字畫恭謹。詞意肫摯。以八十有五之年。嘗一息僅存之候。猶復瞻懷君國。洵屬神明不亂。忠愛可風。可否籲懇天恩。俯念前太常卿唐鑑宿學忠敬。特旨賜諡。出自聖主鴻施。所有代遞唐鑑遺摺緣由。附驛馳陳。伏乞皇上聖鑒訓示。謹奏。

展緩江南鄉試摺 咸豐十一年五月十八日

奏爲江南軍務未竣。本年辛酉科暨補行戊午科兩屆鄉試。未能舉行。恭摺奏祈聖鑒事。竊臣接准禮部咨稱「本部具奏辛酉科鄉試。各省能否依限舉行。並該考官赴省有無另行繞道行走。請旨飭查各省督撫體察情形。先期由驛奏明一摺。於咸豐十年十二月十六日奉旨「依議。欽此。」欽遵咨行查照辦理。」前來。臣查蘇皖兩省。現未克復。所屬各府州縣。亦多淪陷。科場爲掄才大典。未便草率舉行。九年間借用浙江貢院鄉試一次。現在浙中亦值多事之秋。本省尙難考試。江南豈能借辦。若託皇上威福。皖城早克。當奏請於安慶修造貢院。使上下江士子。萃試皖城。以遂觀光之願。所有本年辛酉科補行戊午科鄉試。體察現在情形。未能舉行之處。除咨會江

蘇安徽撫臣外。理合由驛恭摺具奏。伏乞皇上聖鑒。謹奏。

李金暘張光照正法片 咸豐十一年五月十八日

再和後營營官李金暘。經巨咨調來江。江西撫臣派援建昌。二月初十日見賊即退。十二日賊撲撫州。危急之際。該將不共謀防守。反行撤隊回省。旋經撫臣檄令防剿吉安。不能爲一日之守。以致府城失陷。潰走安福。折赴分宜。節節退縮。直至瑞州之大陽墟地方。四月初二日。全軍潰散。李金暘爲賊所擒。其部將張光照。逃至臨江府。及江西省指告李金暘率衆降賊。逮至四月十二日。李金暘自賊中逃出。赴省自首。堅稱被擒屬實。并無投逆情事。而力陳張光照未戰先逃。挾嫌污蔑等情。撫臣毓科因彼此各執一詞。關係重大。派委知縣夏燮等。將李金暘張光照二人。一并押解臣營審辦。臣督飭委員再四研鞫。李金暘前此本係賊黨。自湖南投誠之後。屢立戰功。并無反覆可疑之跡。此次被擒數日。即能自拔來歸。赴省投首。其非率衆降賊。尙屬可信。惟屢次失律。致府城淪陷。又復偷生賊中。實已法無可貸。張光照未戰先逃。誣陷主將。尤爲大千軍紀。即於五月初三日。按照軍法。將李金暘張光照一併處決。以肅軍令。而儆將來。理合附片具陳。伏乞聖鑒。謹奏。

收復徽州府城摺 咸豐十一年五月二十八日

奏爲逆匪竄犯各嶺。襲陷黟縣。官軍合力剿辦。旋即克復。并乘勝收復徽州府城。恭摺奏祈聖鑒事。竊官軍分駐祁溪休寧三縣。堅守嶺隘。去冬今春石埭太平之賊。屢次犯嶺。迭經奏報在案。臣移駐東流。賊疑嶺內空虛。欲合股竄擾祁溪。以斷我軍糧路。四月二十六七。五月初一等日。羣逆糾踞嶺外琅田美坑余溪等處。約二三萬之衆。揚言分五路犯嶺。五月初二日。賊由牟棧嶺蜂擁而入。該防所兵勢本單。署湖北提督江長貴飭令游擊王金鼎等守備張占元率隊往援。駐防漁亭之副將婁雲慶。亦統軍千餘往援。牟棧之賊方退。而樟嶺與方干二嶺外賊衆奮集。初三日辰刻。各大股賊衆分撲牟棧嶺方干嶺樟嶺。其犯牟棧者。賊數較少。原紮盧村之峯字禮字各營。及霆營援兵禦之。賊不敢近。其犯方干樟嶺者。各軍極力迎擊。頗有斬獲。忽值大雨如注。火藥難施。暫革副將參將銜袁國祥。身受矛傷。繞道退至漁亭。參將黃朝陞爲賊所包。亦即潰退。記名總兵降補游擊唐義訓迎戰正酣。奪獲賊械。正擬追逐出嶺。不知賊之分股繞襲後路。業已潛陷黟縣城池。唐義訓作偃月陣勢。捲塘收隊。繞回漁

亭老營。婁雲慶等之援半棧者。爲賊所隔。亦於是夕回至漁亭。卽原駐盧村之禮字峯字等營。亦因後路已斷。拔稜漁亭。由是駭賊中梗。東而休寧漁亭。西而柏溪祁門。四軍不能相通矣。江長貴卽飭軍駐西武嶺。以顧柏溪門戶。賊於陷駭之後。果糾衆竄至西武嶺下四五里地方。修築牆壘。并分駐四都古竹等村。意圖窺伺柏溪。進擾祁門。此五月初三日嶺賊入犯。駭縣失陷之情形也。初四日。西軍駐紮柏溪之提督江長貴。駐紮祁門之總兵朱品隆。東軍駐紮休寧之記名按察使開歸道張運蘭。駐紮漁亭之副將婁雲慶。唐義訓。四路商定。兩面夾攻。初五日。西路朱品隆率前營知縣朱聲隆。前新營知縣易潤壇。李公選等。江長貴督領王金鼎。張占元。游擊馬登雲。守備傅裔喜等。布列西武嶺上。分途前進。一面圍攻賊壘。一面抄擊村莊。各壘及各村踞賊。始猶拚命抗拒。我軍竭力猛進。賊不能支。棄壘而遁。其伏處各村之賊。亦敗走逃命。東路張運蘭派老湘營三旗兩翼。唐義訓。婁雲慶各率所部。由漁亭分三路進攻駭城。老湘營由中路進。婁雲慶率霆禮峯等營由右路進。唐義訓率強中等營由左路進。至距駭十里之石山橋。悍賊約二千餘。堅守二卡。老湘營先至。正在猛攻。唐義訓急令隊伍馳助。卽平賊壘四座。婁雲慶繼至。併力合擊。將賊卡拆毀。乘勝追殺。直至城邊。並將附城二壘。立刻攻破。我軍分段攻城。槍礮齊施。勇氣百倍。城賊驚慌。紛紛棄城遁走。比將縣城克復。隨齊隊伍跟追。敗竄餘孽。翻山越嶺而逃。不復成隊。合計斃賊二千餘名。奪獲旗械馬匹甚多。此初五日西軍攻剿西武嶺賊卡。東軍三路克復駭縣之情形也。其嶺外續至之賊。希圖復仇。分股竄踞半棧方干及樟嶺三處。初六日。唐義訓等仍分三路進兵。霆字禮字等營從右路剿半棧嶺。老湘營從中路剿樟嶺。強中營從左路剿方干嶺。賊之大股聚踞三都汪村。并於樟嶺口。外築卡數座。老湘營力擊三都之賊。唐義訓亦自左路往助。賊踞卡壘。希圖由嶺右潛出包抄。我軍分途奮擊。卽將卡壘概行踏毀。追至樟嶺之下。初九日。仍分三路進剿。賊衆盡併入盧村十都。占踞舊壘二座。添築新壘五座。守禦愈固。老湘強中營圍其五。霆營禮營圍其二。四面埋伏。先攻新壘。鏖戰甚久。賊黨死拒。經噴筒火箭燃著賊棚。奮力猛進。四新壘以次悉平。其一壘逃聚盧祠之內。我兵圍攻。生擒四百餘名。悉行斬誅。惟餘舊壘二座。正擬詰朝合攻。該逆等已於三更遁出嶺外。初十日。各軍跟追掃蕩。諸嶺一律肅清。徽郡之賊。聞風膽落。亦於十二十三日分兩路遁去。張運蘭帶隊至郡。搜殺餘賊。收復府縣兩城。唐義訓帶隊移駐休寧。此初六初九日大破賊壘。肅清嶺防。十四日

收復徽州之情形也。據各營稟報前來。臣查此次羣賊犯嶺。袁國祥黃朝陞堵剿不力。以致嶺防不守。賊得襲入黟縣。雖係賊衆兵單。究有應得之咎。暫革副將銜參將袁國祥。參將黃朝陞。均請卽行革職。不准留營。以示懲儆。記名按察使開歸道張運蘭。於餉竭兵疲之際。激厲軍心。挽回全局。調度有方。應如何優加獎勵之處。恭候聖裁。降補游擊之記名總兵唐義訓。於徽郡小挫之後。振作士氣。苦戰卻敵。應請開復原官。仍請升署皖南鎮總兵缺。由臣另摺具奏。總兵銜副將龔雲慶。請交軍機處記名。遇有總兵缺出。請旨簡放。知縣朱聲隆。請開復原官。以同知歸安徽補用。徽州府知府劉兆璜。歙縣知縣羅德隆。徽州營參將文芳。均請開復原官。其餘出力人員。籲懇皇上天恩。容臣擇尤保奏。陣亡員弁。查明開單。請旨交部議卹。所有賊竄各嶺。襲陷黟縣。官軍合剿。旋即克復。并收復徽州府城各緣由。恭摺由驛六百里馳陳。伏乞皇上聖鑒訓示。謹奏。

近日軍情片 咸豐十一年五月二十八日

再近日軍情。僑侍王李世賢一股。自三月在景德鎮敗退。卽竄至廣信一帶。左宗棠追至廣信。李逆竄入浙江。攻陷金華蘭谿等府縣。此次徽州敗退之賊。亦係李逆之黨。半逃浙江歸併大股。半逃寧國踞守下游。僑忠王李秀成一股。自竄入江西瑞州後。旁擾武寧義寧奉新靖安等處。近又竄入湖北之興國大冶武昌通山崇陽蒲圻等屬。裹脅日多。蔓延日廣。僑主將劉官方一股。四月之季。分支由建德擾及鄱陽。另支由樟嶺襲陷黟縣。竄鄱陽者。經左宗棠派隊擊退。陷黟縣者。經張運蘭等合力擊退。此大江南岸三大股之賊情也。其大江北岸各賊。如陳時永踞德安。賴文光踞黃州。暨各縣踞賊。均係僑英王四眼狗之黨。狗逆又新從南岸邀僑輔王楊輔清一股。及林紹璋黃文金二股。將於近日再攻桐城。救援安慶。臣處搜獲僑文數十件。各處賊股狂竄千餘里。無非欲分官軍之勢。解安慶之圍。現在胡林翼力疾回救鄂省。臣等往返熟商。以安慶賊糧垂盡。功虧一篑。必須力爭此城。而後大局有挽回之望。金陵有恢復之期。除各處戰守細情。專摺另報外。合將近日賊勢軍情。附片具奏。伏乞皇上聖鑒。謹奏。

揀員署皖南鎮道摺 咸豐十一年五月二十八日

奏爲遵旨揀員。署理皖南鎮道。并請飭部另預關防。恭摺奏祈聖鑒事。竊臣准兵部火票。遞到咸豐十一年四月

十一日奉上諭。安微皖南鎮總兵員缺。著會國藩揀選堪勝此任人員。奏請升署。欽此。查皖南四府一州。羣盜如毛。蹂躪殆遍。總兵統轄各營。必須熟於軍務。志勤篤實之將。方足以資鎮守。查有記名總兵唐義訓。戰功卓著。精實不浮。前次徽州小挫案內。奏請以游擊降補。此次克復黟縣。肅清諸嶺。收復徽郡。最爲出力。經臣另摺奏請開復原官。如蒙俞允。可否即將唐義訓升署皖南鎮總兵之處。出自天恩。又咸豐十年十一月三十日奉上諭。一翁同書奏。請將道員暨留署府篆。等語。新任徽州寧池太廣道程鈺。著暫留潁州府署任。所有徽寧池太廣道。著會國藩揀員署理。欽此。查有江西候補知府姚體備。由進士知縣分發江西。歷著循聲。上年經臣札調來皖。委辦營務處。器識恢宏。不憚艱險。現奉諭旨。飭臣保舉道府大員。該員堪膺斯選。合無籲懇天恩。將江西候補知府姚體備以道員歸於安微補用。如蒙俞允。即令署理徽寧池太廣道缺。於軍務地方。均有裨益。至皖南總兵印信。係陳大富在景德鎮遺失。皖南道印信。係福咸在寧國府遺失。相應請旨。敕部另鑄皖南鎮道關防各一顆。由驛遞至臣營。轉交該員等祇領。以昭信守。所有遵旨揀員署理皖南鎮道。并請另頒關防緣由。恭摺馳陳。伏乞皇上聖鑒訓示。謹奏。

參鄭陽和等片 咸豐十一年五月二十八日

再臣接據提督銜綬靖鎮總兵鮑超呈稱。一霽字左營營官總兵銜副將鄭陽和。任性妄爲。縱勇索開口糧。騷擾地方。其哨官副將鄧雲貴。守備蔣揖讓。管束不嚴。私放犯罪之勇。張貼匿名揭帖。均屬有干軍紀。應請將副將鄭陽和降爲藍翎守備。副將鄧雲貴。守備蔣揖讓。即行革職。均留霽營效力。以觀後效。一又據參將張應超稟稱。一都司鄭元超。因裁去營官。委以幫辦營務。輒敢違抗不遵。又復浮開勇數。應請將都司鄭元超。即行革職。不准留營。一各等情。到臣。伏查軍營積習。每因口糧不繼。動輒挾制上司。自應隨時嚴懲。以儆效尤。請旨將總兵銜副將鄭陽和。以藍翎守備降補。副將鄧雲貴。守備蔣揖讓。即行革職。均仍留霽營效力。以觀後效。都司鄭元超。即行革職。不准留營。仰副聖主整飭戎行之意。謹附片具奏。請旨。

覆陳左宗棠軍不能赴浙摺 咸豐十一年六月初八日

奏爲欽奉諭旨。恭摺覆陳。仰祈聖鑒事。竊臣承准軍機大臣字寄。咸豐十一年五月十八日奉上諭。一瑞昌王有

齡奏常山江山之賊繞赴衢州連陷龍游湯溪二縣及金華府城請飭催援師應救一摺據稱「賊匪自竄陷常山江山後另股竄踞壽昌縣城分股下竄均經兵練迎擊退回四月十六日該逆越過衢城十七十八十九等日龍游湯溪二縣及金華府城先後失守張玉良退守嚴州咨商左宗棠統師援浙」等語該逆以壽昌率制我師仍從江山一路繞竄而下以致三日之內連陷府縣三城猖獗已極其窺伺寧紹更在意中張玉良各軍不能得力藩司林福祥帶勇千名甫抵貴溪弋陽一帶已草道員李元度新募楚勇八九千人計方抵江西省城未能剋期趕到浙省情形萬分喫緊必須設法援應以顧大局前據曾國藩奏「左宗棠自擊敗李逆股匪現在伺其所向跟蹤追剿」目下該逆以全股深入浙境果能四面兜剿不難聚而殲旃左宗棠一軍屢獲勝仗聲勢頗壯即著統帶所部剋日起程應援浙江會同瑞昌等所派官兵將失陷城池次第收復以靖逆氣毋稍延緩」等因欽此仰見聖主慮念東南移緩就急之至計臣查左宗棠一軍四月間攻剿僞侍王大股直至廣信旋因池州之賊於四月十五再陷建德將竄擾鄱陽景德鎮鄱陽失則江西之腹地可危景德鎮失則祁門之糧路又梗各處紛紛告急臣亦迭次飛咨左宗棠不得已乃棄東路而回救西路四月之季由廣信冒雨遄返五月初七日行抵景德鎮維時適值嶺賊內犯駭縣被陷祁門建德兩路同警左宗棠至鎮後派九營由桃樹店進剿二十二日收復建德縣城而張運蘭等亦已克復駭縣收復徽州於是各路之軍心民氣為之一定惟徽郡衆嶺盤互羣賊環伺得之非易守之更難現今張運蘭守郡城唐義訓守休寧朱品隆守祁門而漁亭為徽休糧路所關尙無防守之兵其景德鎮為全徽咽喉之路臣屢次具奏以為宜駐重兵者也婺源縣為皖浙綰轂之區王有齡等前奏請旨飭駐重兵者也左宗棠兵僅七千能分為兩支斷不能分為三支能顧景德鎮即不能兼顧婺源漁亭連日往來籌商正苦不敷分撥而閩汀大股頭起二起由德興婺源上竄圖犯徽州左宗棠已於六月初一二日自統各營前赴婺源一面與張運蘭等約會夾擊閩汀之賊一面謀所以保守徽州兼保婺源饒景之策臣暫駐江濱照料北岸其徽嶺內外及饒州廣信各屬戰守事宜均賴左宗棠就近維持以目下形勢而論左宗棠實不能分身赴浙浙東賊勢浩大與江皖唇齒相依浙若不支其患先及于皖次及于江臣雖至愚亦知保浙即所以自保奈自鮑超北渡之後南岸僅恃左宗棠一軍縱橫策應七百餘里若并無此支活兵則張運蘭等孤懸嶺內糧路仍有必斷

之日。微郡終無能守之理。欲求保微之方。更無援浙之力。顧此則失彼。圖近則遺遠。再四籌思。且媿且悚。俟江西攻剿得手。或安慶克復。有兵可分。再與左宗棠力謀援浙。會銜具奏外。所有欽奉寄諭。暫難兼顧緣由。謹繕摺由五百里馳陳。伏乞皇上聖鑒訓示。謹奏。

留彭玉麟統水師營片 咸豐十一年六月初八日

再布政使銜廣東惠潮嘉道彭玉麟。奉旨補授廣東按察使。例應具摺謝恩。奏請陞見赴任。查該員統帶水師。扼要駐守。屏蔽江西。去年賊犯湖北。統軍上援鄂省。分派水營。羅列武漢德安黃州等處。上下策應。刻下攻剿喫緊。實屬萬不可少之員。且提臣楊載福現已請假回籍。如蒙俞允。彭玉麟之責任更重。尤難赴廣東新任。卽照例迎摺北上。由臣派員暫管。行無人可以接辦。相應奏明。請旨飭下兩廣督撫。將廣東按察使一缺。遴員署理。一面准臣行知彭玉麟俟軍務稍平。再行奏請陞見。臣爲軍營得人。攻剿喫緊起見。是否有當。伏乞聖鑒訓示。謹奏。

水陸員弁彙案請卹摺 咸豐十一年六月初八日

奏爲水陸各軍陣亡病故各員弁。彙案請卹。以慰忠魂事。竊查打仗陣亡。及因傷身故。軍營病故各員。例應分別請旨賜卹。臣所部各軍。自去冬以來。疊次與賊接仗。各員弁或力戰捐軀。或傷重殞命。以及積年立功。後在營病故。均屬殲於王事。殊堪憫惻。除隨案奏請議卹外。續經各營查明稟報前來。又查上年春間。南陵擊退賊匪。奉旨擇尤保奏。周天受以軍事倥傯。尙未出奏。遠十月。南陵解圍案內。總兵陳大富查明在事出力各將弁。呈請奏保。正在核辦間。詎景鎮失利。陳大富力戰陣亡。該營官田應科等七員。同時殉難。經臣具奏請卹在案。所有隨同陣亡之營哨各弁。均應照擬保官階議卹。相應彙繕清單。籲懇天恩。飭部查照陣亡傷亡積勞病故例。分別賜卹。以慰忠魂。而作士氣。是否有當。伏乞皇上聖鑒訓示施行。謹奏。

覆陳華祝三臚奏摺 咸豐十一年六月十八日

奏爲欽奉諭旨。恭摺覆陳。仰祈聖鑒事。六月初六日。承准軍機大臣字寄。五月二十四日。奉上諭。御史華祝三奏。上年秋間。廣東樂昌仁化之賊。由江西南贛分竄。寧都撫建廣信。連擾數十州縣。本年春間。玉山解圍。復由河口東鄉金谿圍攻撫建。由宜黃崇仁竄入臨江府屬之樟樹鎮新淦縣。攻陷吉安。圍撲袁州。占據瑞郡。頃聞奉

新靖安豐城以及新建之生米鎮等處。均有賊壘。窺伺省垣。錢糧釐金來源俱竭。各營欠餉至四五月之多。兵勇飢潰降賊。有李金賜者。率勇降賊。並且爲賊先驅。請飭會國藩速派勁兵。赴江西省城。並分投勦洗。等語。粵匪闖入江城。肆行竄擾。除樂平浮梁鄱陽等處肅清。已據會國藩奏報。玉山廣豐撫州建昌廣信等城解圍。吉安府城。新淦縣西。於失守後卽行克復。已據毓科奏報外。現在各屬匪蹤。尙未淨盡。會國藩統轄該省。且軍營餉需。全賴江西接濟。自應亟籌掃蕩。以免餉源告竭。南昌爲省垣重地。尤不可稍有疎失。著會國藩斟酌緩急。應如何派撥官軍。以及調撥江西原有官兵。應援江西省城。及將袁臨等處賊匪。分別勦洗之處。妥爲籌辦。毋任賊勢蔓延。副將李金賜。據毓科奏。派令援勦吉安。於龍王廟地方失利。退保安福。是否降賊。並著該大臣查明具奏。一等因欽此。仰見聖主籌慮全局。訓示周詳。曷任欽佩。臣查去冬以來。竄擾江西之賊。前後凡五大股。其由皖境竄入。自北而南者三股。一曰僞主將黃文金股匪。連陷建德鄱陽六縣。經左宗棠鮑超於洋塘擊退。一曰僞侍王李世賢股匪。連陷浮梁景鎮等處。經左宗棠於樂平擊退。此二股均未能深入江西腹地。一曰僞忠王李秀成股匪。正月初間連圍玉山廣信廣豐三城未破。又深入內地。圍建昌撲撫州。亦幸未破。三四月間。竄入崇仁樟樹鎮吉安峽江。并占踞瑞州府城。分擾奉新靖安武寧義寧各州縣。五月間。又竄入湖北之興國大冶蒲圻崇通等屬。此北三股也。其由兩廣竄入自南而北者兩股。一曰廣東股匪。其頭目有周姓許姓。上年十月由仁化樂昌闖入江境。圍攻信豐南豐建昌各城。連陷河口興安德興婺源。十一月初。經左宗棠攻克德安兩城。該匪遂歸併徽州賊黨。一曰廣西股匪。其頭目爲朱衣點彭大順等。本石達開之餘孽也。由廣西竄出湖南。經過南贛。陷福建之汀州。又由汀州回竄江西。蹂躪寧都建昌河口等處。其前隊已由婺源竄浙。後隊尙停留撫州屬境。此南二股也。五大股中。又分爲三支四支。忽分忽合。時南時北。是以蔓延日廣。頭緒迷離。御史華祝三奏摺所稱。去秋竄擾寧都撫建者。廣東周姓等一股也。今春由玉山撫建竄陷吉安瑞州者。僞忠王李秀成一股也。諭旨所指臣奏樂平鄱浮肅清者。僞侍王一股也。毓科奏撫建解圍。吉安新淦失而旋復者。亦僞忠王一股也。江西本臣統轄之區。臣營餉項全賴江西省接濟。自應力籌兼顧。義不容辭。臣處張運蘭江長黃朱品隆各軍。皆駐防徽境。斷難移動。左宗棠一軍。則久在江西之北境。援勦饒州廣信各屬。并未入皖。六月初旬。始以一半留江之景德鎮。一半移皖之婺源。保障五

六百里不能再顧他處。惟鮑超一軍爲皖江兩省游擊之師。二月間忠賊由建昌圍撫州。臣恐省垣震動。卽飭鮑超由湖口赴援省城。旋因撫建圍解。樂平危急。不得已調鮑超先救景鎮。不果入省。迨浮樂肅清。而皖北四眼狗大股。攻撲安慶圍師之背。勢更危險。臣移駐東流。不得已又調鮑超援勦集賢關之賊。五月初間。始將關外赤岡嶺賊四壘勦淨除盡。臣與胡林翼會商。令成大吉一軍回援鄂省。由武昌入興國大冶。鮑超一軍回援江西。由九江入武寧瑞州。鮑超於五月十五日自集賢關援營。行抵宿松。被紳民苦留。圍攻宿城。五日未能得手。正擬帶西行。而狗逆從兩岸邀僞輔王楊輔清及林紹璋黃金各股。將由桐城復援安慶。下游各軍思留鮑超仍駐北隊岸上游。九江南康各屬。亦紛紛稟報瑞昌之賊。分竄德安建昌境內。迫望援師。臣現檄催鮑超迅速南渡。由九江直搗建昌。先保江西省城。不復能兼顧安慶。冀可廓清腹地。仰慰宸廬。此臣斟酌緩急。派援江西之先後節次也。瑞州及各縣踞賊逼近南昌省會。前經撫臣毓科商留副將張運桂老湘營千人。并調遊擊劉勝祥一營。扼紮城外。會同江西省原有官兵協守。又有內河水師節節布扼。數月以來。省垣重地。尙無疎虞。又有劉于濤二千人。紮堵安義。竇後營千人。紮營生米丁峻二千人。駐守臨江。皆爲省垣西路屏蔽。此次鮑超由東北進。鄂軍由西北進。兩路夾擊。賊如敗遁。必不敢窺伺省城。但恐官軍追急。仍回竄吉安一路。臣擬飭南贛鎮總兵陳金鼈帶新募千勇。移駐吉郡。並添陸軍數百。撥水師兩營。以資控禦。所需勇餉。飭江西藩司於吉安地丁項下。按月劃提一萬兩。源源濟用。又飭贛南道李瀚章。固守贛城。以杜竄突。此又省城無虞。及南路籌防之大略情形也。至李金賜戰敗陷賊。旋即逃出。臣已訊明正法。於五月十八日附片具奏矣。所有遵旨覆陳各緣由。謹繕摺由五百里具奏。伏乞皇上聖鑒訓示。謹奏。

近日三省軍情片 咸豐十一年六月十八日

再近日各路軍情。皖南之徽州休寧黟縣婺源。俱幸平安。祁門嶺外之賊。六月初旬。連日犯嶺。朱品隆連日出隊擊之。初九以後。賊遂遠遁。皖北僞璋王輔王諸逆。從霍山越嶺圍攻太湖。四眼狗盤踞桐城之三塘埂。將夾攻多隆阿一軍。再撲安慶圍師之背。安慶城外。前次援賊營壘十八座。經會國荃於六月初一日全數踏平。將賊衆八千餘人圍殺淨盡。此次賊黨悉銳前來報仇。計日內必有大戰數次。倘蒙皇上威福。再行擊退。則城池可克矣。江

西之賊。西路僞忠王一股。分擾德安建昌。去省甚近。臣現派鮑超全軍往援。必可得手。東路朱衣點一股。蔓延金谿鉛山等處。本省無兵往剿。臣亦無兵派援。荼毒民生。深可焦慮。湖北之賊。南岸蒲圻咸寧崇通均已肅清。惟太冷與國未靖。先派成大吉一軍往剿。北岸德安黃州蘄州隨州等城。均尙爲賊所踞。與下游桐城霍山之賊。粘連一片。勦辦實屬不易。幸宦文胡林翼李續宜俱在鄂省。武漢根本之地。深固無虞。除戰守情形。專案另報外。合將三省軍情梗概。附片具陳。伏乞皇上聖鑒。謹奏。

左宗棠軍五六兩月戰守情形摺 咸豐十一年七月十八日

奏爲左宗棠一軍五六兩月戰守情形。恭摺彙陳。仰祈聖鑒事。竊太常寺卿臣左宗棠於五月間由廣信回駐景鎮。迎勦建德之賊。六月間分軍移駐婺源。迎勦閩汀股匪。業將大略情形於六月初八日奏報在案。先是池州逆首劉官方一股。竄入鄱陽視田街。距景德鎮僅六十里。五月初七日。聞左宗棠全軍至鎮。即夜遁走。左宗棠派左右營及老湘營。由桃樹店橫出擊截之。十七日至桃樹嶺。分路入桐樹嶺。遇賊前隊。副哨張曉林躍馬衝擊。立刃先鋒騎馬賊二人。後至之賊。仍蜂擁環刺。張曉林身受重傷。正危急間。各營自嶺馳下。賊衆即奪路狂奔。我軍躡蹤分追。斬辮髮悍賊百餘名。生擒三十餘名。是夜見山頭火光隱約二十餘里。知賊巢相去不遠。其地寸步皆山。徑險箐密。副將王開琳。游擊黃少春。州同張聲恆。會商分進。詎賊調官軍抄出。歸路將斷。即紛紛向建德後河宵遁。十九日黎明。派隊搜山。僅獲迷路之賊三十餘。及墜崖死者十餘人。馬數匹。二十一日追至建德三里街。又斬其落後賊數十。訊知劉逆遠遁。遂收復建城而還。此進勦建德。立時收復之情形也。惟時徽州甫復。後路空虛。婺源介皖浙江西三省之要衝。欽奉寄諭。飭巨派兵扼守。臣咨商左宗棠分軍移駐。左宗棠即飭王開琳老湘營二千五百人。及守備方雪昌新募勇五百人。留守景德鎮。而親率五營四總哨及桂勇馬隊各營。於六月初移駐婺源縣。該軍積勞之餘。病疫繁興。抵婺城後。正值酷暑炎蒸。不能不略爲休養。乃逆首賴裕新一股。糾合閩汀竄出。頭起股匪約二萬餘人。由常山晝夜過行。二十三日抵德興之白沙關。比飭四哨守城總兵銜副將崔大光。州同張聲恆。率兩營扼王瓜尖嶺。二十四日。賊前隊已踞德興之九都新建地方。距婺城止四十里。隨飭州同朱明亮率桂勇繼之。二十五日。賊後隊大至。布政使銜即選道王開化。訓導楊詠春。縣丞王室藩周覽地勢。擬以王瓜尖

下出中路爲正兵。而奇兵由小路搗新建。左宗棠又派中營哨長及前營鍾南英。左營黃少春。馬隊營馬德順。各率所部。二十六夜潛師悉起赴之。是夜三更。崔大光張聲恆由左路進。朱明亮由中路進。天甫明遇賊。朱明亮大呼陷陣。斬悍賊數人。旋有賊從兩旁松林內抄出。藍翎外委宋光隆陣亡。各勇稍卻。崔大光張聲恆突從左路繞出賊後。各營乘勢蹙之。斬賊數百。追及新建。王開化率中前左三營。會合進搗。賊已棄巢紛竄。由新建五里外鳧水渡河。忽見追軍從谷口馳出。盡棄器械而走。馬德順率馬隊衝之。賊分由兩岸高嶺攀躋而上。手與趾接。我軍從下擊之。墜崖落澗死者無算。追至五林。賊復回旂抗拒。千總李萬彪。都司蕭仁慈。首先衝撲。均帶重傷。猶手刃騎馬賊目。衆勇騰躍火陣。賊大敗。且追且殺。直至白沙關。共計斃賊一千一百餘名。生擒八十餘名。內有布天燕白倫鳳。因天福汪姓。及右四提牌余松林等賊目。解散以數千計。奪獲馬騾二十餘匹。所餘紅旂一股。仍向浙江開化華埠竄逸。德興婺源境內。一律肅清。此迎勦白沙關新建等處。大獲勝仗之情形也。據左宗棠咨報前來。臣查劉官方一股。由建德乘虛深入。圖竄江西腹地。幸左宗棠回援神速。力保景鎮要道。並追賊出嶺。收復建邑。至賴裕新一股。由江浙邊界內竄。欲陷婺源。以圖徽郡。計甚狡毒。不虞官軍據險以待。一敗不支。且新建之戰。以二千五百病疲之卒。當二萬餘悍悍之賊。猶能所向克捷。俾婺源城危而復安。於全局亦有裨益。其出力弁勇。仰懇天恩。准其擇尤併入樂平。大捷案內。分別優獎。以示激勸。所有左宗棠五六兩月戰守情形。謹繕摺由驛五百里馳報。伏乞皇上聖鑒訓示。謹奏。

覆陳購買外洋船礮摺 咸豐十一年七月十八日

奏爲遵旨籌議恭摺覆陳仰祈聖鑒事。竊臣承准軍機大臣字寄咸豐十一年五月三十日奉諭。前因恭親王奕訢等奏。法夷鎗礮現肯售賣。並肯派匠役教習製造。當諭令會國藩薛煥酌量辦理。本日復據奕訢等奏。請購買外洋船礮一摺。據稱。大江上下游。設有水師。中間並無堵截之船。非獨無以斷賊接濟。且恐由蘇常進勦。則北路必受其衝。據赫德稱。若用小火輪船十餘號。益以精利鎗礮。不過數十萬兩。至駕駛之法。廣東上海等處。可雇內地人隨時學習。亦可雇用外國人令其司舵司礮。其價值先領一半。俟購齊驗收後。再行全給。並稱。洋藥一項。如照所遞之單。征收華洋各稅四十五兩之外。於進口後。無論販至何處銷售。再由各該地方

官給予印票。仿照牙行納帖之例。每帖輸銀若干。如辦理得宜。除華洋各稅外。歲可增銀數十萬兩。此項留爲購買船礮。亦足裨益。一現在赫德已回天津。令其將船礮洋鎗價值。分晰開單呈遞。等語。東南賊氛蔓延。果能購買外國船礮。勦賊必能得力。惟各路軍餉不足。必須預籌銀款。以資購辦。奕訢等現擬於上海廣東各關稅內。先行籌款購買。俟將來洋藥印票稅收有成數。再行歸款。並給赫德劄文。令其購買。運到時即交廣東江蘇各督撫。雇內地人學習駕駛。著勞崇光著齡薛煥並傳諭毓清。即按照所奏。預爲籌計。其應酌配兵丁。并統帶大員。及陸路進攻各事宜。并著官文會國藩胡林翼先行妥爲籌議。一俟船礮運到。即奏明辦理。內患既除。則外國不敢輕視中國。實於大局有益。該督撫等務當悉心妥議。期於必行。不得畏難苟安。奕訢等摺。著鈔給閱看。一等因欽此。仰見皇上聖慮周詳。安內攘外之至意。臣查髮逆盤踞金陵。蔓延蘇浙皖鄂江西等省。所占傍江各城。爲我所必爭者有三。曰金陵。曰安慶。曰蕪湖。不傍江各城。爲我所必爭者有三。曰蘇州。曰廬州。曰寧國。不傍江之處。所用師船。不過舢板長龍之類。其或支流小港。岸峻橋多。卽舢板小划。尙無所施其技。斷不能容火輪船。想在聖明洞鑒之中。傍江三城。小火輪船儘可施展。然亦只可制水面之賊。不能剿岸上之賊。卽欲阻其北渡。斷其接濟。亦恐地。段太長。難於處處防遏。目下賊氛雖熾。然江面實鮮礮船。不能與我水師爭衡。臣去冬覆奏一疏。有云。金陵髮逆之橫行。在陸而不在水。皖吳官軍之單薄。亦在陸而不在水。一係屬實在情形。至恭親王奕訢等奏請購買外洋船礮。則爲今日救時之第一要務。凡恃己之所有。誇人以所無者。世之常情也。忽於所習見。震於所罕見者。亦世之常情也。輪船之速。洋礮之遠。在英法則誇其所獨有。在中華則震於所罕見。若能陸續購買。據爲己物。在中華則見憤而不驚。在英法亦漸失其所恃。康熙雍正年間。雲南銅斤未曾解京之時。皆給照商人採辦海外之洋銅。以資京局之鼓鑄。行之數十年。並無流弊。況今日和議既成。中外貿易有無交通。購買外洋器物。尤屬名正言順。購成之後。訪募覃思之士。智巧之匠。始而演習。繼而試造。不過一二年。火輪船必爲中外官民通行之物。可以勦髮逆。可以勤遠略。諭旨期於必行。不得畏難苟安。仰見聖主沈幾獨斷。開物成務。曷勝欽服。至於酌配兵丁。及統帶大員。應俟輪船駛至安慶漢口時。每船酌留外洋三四人。令其司舵司火。其餘卽配用楚軍水師之勇丁。學習駕駛。礮位亦令楚勇司放。雖不能遽臻嫺熟。儘可漸次教習。其統帶大員。卽於現在水師鎮將中遴選。臣與官

文胡林翼商定。屆時奏明辦理。惟期內地軍民。智者盡心。勇者盡力。無不能製之器。無不能演之技。庶幾漸靡奢興。仰副聖主深遠無窮之慮。所有遵旨籌議緣由。恭摺由驛覆陳。伏乞皇上聖鑒訓示。謹奏。

近日軍情片 咸豐十一年七月十八日

再近日軍情。皖北四眼狗糾合僞輔王璋王玕王等十餘萬衆。救援安慶。曾國荃一軍。但主堅守。不主迎勦。務使援賊與城中之賊。聲息不通。庶皖城可期克復。多隆阿一軍。糧路已斷。現擬由水路繞道接濟。皖南徽州六屬。除左宗棠在婺源擊退賴逆股匪。另摺具奏外。其餘各縣各嶺。均尙安靜。江西僞忠王一股。六月底竄至生米萬壽宮一帶。距省城僅三四十里。總兵鮑超率師赴援。賊衆仍逗瑞州奉新等處。閩汀一股。盤踞鉛山爐溪境內。廣信兵單。情形喫重。湖北南岸八屬。一律肅清。北岸德安府城。亦於十一日克復。上游已有轉機。若移得勝之師。併力下游。則安慶之克。尤有把握。理合附片略陳梗概。伏乞皇上聖鑒。謹奏。

調上海輪船片 咸豐十一年七月十八日

再王大臣等原奏內稱。「南省舊有洋船二隻。詢據赫德。則稱並非打仗之船。且已有一隻敗壞。是利器已廢。未免可惜。」等語。伏查前督臣於咪喇堅租得火輪船二隻。一名土只坡。一名可敷。其土只坡一隻。現泊上海黃浦江。供護餉護運之用。赫德所稱一隻敗壞。如果屬實。想即係名可敷者。聞此二船。頭尾兩旁。皆有轍位。若操練得人。未必不可用以打仗。現在邊省購置洋船。據原奏云。船礮配齊。須明年四月始到。臣擬先調現泊上海之土只坡輪船一隻。由長江上駛安慶一帶。就近察勘試用。督令楚軍水師將弁。預爲練習。俟明年洋船購到。庶易收駕輕就熟之功。惟臣處缺餉日甚。該輪船駛赴上游。弁勇工匠口糧。仍照向章。在於上海支領。其損壞輪船一隻。如可修理。亦令速修完好。駛赴安慶一帶。兩船一上一下。輪替更換。遇有軍務要件。臣與撫臣往返函商。數日可達。不致如現在文報阻滯。數月難通一信。相應請旨飭下江蘇撫臣薛煥。迅派幹員。刻日押令上駛。以資演習。是否。有當。伏乞聖鑒。訓示施行。謹附片具奏。

恭報接印日期摺 咸豐十一年七月二十八日

奏爲恭報徵臣接印日期。仰祈聖鑒事。竊臣於咸豐十年六月二十四日。欽奉諭旨。補授兩江總督。當即具摺恭

謝天恩。茲於十一年七月初六日。在安徽東流營次。准前署兩江督臣薛煥委署督標中軍副將富勒渾泰等。齎捧欽頒咸字十號兩江總督銀關防一顆。兩淮鹽政印信一顆前來。臣恭設香案。望闕叩頭。祇領任事。除地方一切政務。容臣次第查辦外。所有微臣接印日期。理合專差恭摺奏報。伏乞皇上聖鑒。再臣前於四月初四日。准兵部遞到欽頒咸字四百二十一號欽差大臣關防一顆。臣嘗於四月初七日。祇領開用。維時因聞總督關防將到。未及疏報。茲值履任之始。理合一併奏聞。又接印到任日期。例應恭疏題報。緣軍務倥偬。兼以皖豫道途多阻。所有書吏及文卷等項。概行折回上海。由浙江繞道行走。尙未到營。是以改題爲奏。合併陳明。謹奏。

鮑超軍豐城大捷摺 咸豐十一年八月初一日

奏爲鮑超一軍。進援江西。在豐城西北岸大獲勝仗情形。恭摺馳報。仰祈聖鑒事。竊僞忠王李秀成竄擾江西瑞州奉新等郡縣。蔓延甚廣。逼近省垣。經臣派記名提督綬靖鎮總兵鮑超督軍赴援。於六月十八日。奏明在案。鮑超於七月初三日。行抵九江。拔營前進。瑞州奉新靖安安義一帶踞匪。即聞風退去。由臨江過河。盤踞樟樹沙湖豐城一帶。綿互百餘里。鮑超於十九日。由瑞州拔赴豐城。過河兜勦。二十三日。行抵豐城對河。正在飭令各營。修築營壘間。據水師報稱。該逆業在樟樹搭造浮橋。於二十二日。過河。至西北岸。圍撲我軍後路。未刻離我營二十餘里。一帶放火。鮑超以兵士修築營壘。人馬疲乏。天色傍晚。未便出隊。二十四日。辰刻。該逆出大股。排列山岡。鮑超即飭總兵陳由立率霆正中營。副將顏紹榮率霆新中營。副將李文益率霆副右營。由中路進兵。總兵黃慶率霆正前營。副將王衍慶率霆正左營。副將劉玉堂率霆副前營。候選直隸州知州伍華翰率華字營馬隊。由左路進兵。以副將羅運昌。游擊剪炳南輔之。副將易昌煥率新右營。副將吳騰芳率新前營。副將熊鐵生率副後營。副都統銜委營總額外協領明興率黑龍江馬隊。由右路進。以副將馮標。副將段大貴輔之。又飭總兵宋國永。副將婁雲慶。游擊唐仁廉。副將張玉田。劉順隆等。由山後進。逆賊見我軍至。排列大隊。膽敢搖旗吶喊前來。交鋒鏖戰。一時之久。鮑超督飭各營分途齊進。鎗礮齊施。刀矛並舉。該逆抵敵不住。紛紛大敗。豕突狼奔。我軍追殺五十餘里。傍晚始行收隊。該逆尸橫遍野。血流成渠。其赴港赴河溺斃者。不計其數。約共斃賊七八千名。奪獲僞印六十顆。鎗礮刀矛旗幟馬騾不計其數。據擒賊供稱。僞忠王李秀成懼大軍之威。退去瑞州奉新等處。盤踞樟樹

豐城一帶。先分萬餘人竄擾撫州。二十三日在樟樹傳令。以僞豫王等挑悍賊二萬餘。一面圍攻豐城。一面直衝水師。僞忠王自率大隊。過河猛撲鮑超一軍。不料官兵精銳。抵敵不住。遂致大敗。等供。此七月二十四日在豐城西北大獲勝仗之實在情形也。臣查李秀成擁衆十萬。竄擾江西湖北連陷二十餘城。盤踞瑞州附近各州縣。數月於茲。意在斷我餉源。以急解安慶官軍之圍。鮑超督師進援。該逆聞聲先遁。至豐城西北岸。復被鮑超追及。經此番痛剿。洵足快人心而寒賊膽。記名提督。靖綏鎮總兵鮑超。盛暑鏖兵。所向克捷。積勞最久。立功最偉。可否籲懇天恩。賞資荷包摺指等物。以示旌異。出自逾格鴻慈。其在事尤爲出力之記名總兵宋國永。陳由立。黃慶。驍勇血戰。奮不顧身。均請賞加提督銜。總兵銜儘先副將聶雲慶。總兵銜兩江即補副將張玉田。總兵銜儘先副將馮標。均請以總兵記名。請旨簡放。副都統銜委營總額外協領明興。請先行拔補協領員缺。副將顏紹榮。李文益。易昌煥。吳騰芳。羅運昌。劉順隆。劉玉堂。段大貴。均請遇有副將缺出。儘先拔補。副將銜儘先參將熊鐵生。請以副將儘先補用。四川即補副將鮑濟學。四川即補游擊陳永康。均請遇有四川參將游擊缺出。先行拔補。游擊唐仁廉。請以參將儘先補用。並請加副將銜。候選直隸州知州伍華瀚。請以本班留於四川。儘先遇缺即補。並請賞加知府銜。其餘出力文武員弁。著有微勞。可否准臣擇尤請獎之處。出自天恩。陣亡之運同銜安徽候補直隸州知州袁觀豐。儘先都司殷雄亮。仰懇敕部從優議卹。以慰忠魂。除飭東渡贛河迅速追勦外。所有鮑超一軍進援江西。在豐城西北岸大獲勝仗緣由。謹繕摺由六百里馳奏。伏乞皇上聖鑒訓示。謹奏。

克復安慶省城片 咸豐十一年八月初二日

再正在繕摺間。接到統領安慶全軍即用道曾國荃稟稱。「八月初一日卯刻。官軍用地雷轟倒北門城垣。隊伍踰壕登城。該逆仍用鎗礮抵死拒敵。經我軍奮勇直前。立將安慶省城克復。殺斃長髮老賊二萬餘人。該逆情急。赴江內湖內燒水遁竄。又經水師截殺。實無一人得脫。其老弱婦女。暫時擒縛。俟訊明分別斬釋。四眼狗及僞輔王璋王玕王各股援賊。屯紮我軍後壕之外。當破城時。列隊遠望。其膽已落。漸漸退去。」各等情前來。臣伏查安慶省城。咸豐三年被賊陷踞。九載以來。根深蒂固。自去冬合圍至今。逆酋四眼狗迭次拚死援救。我軍苦守猛戰。卒得克此堅城。圍殺淨盡。軍輿十載。惟五年之馮官屯。八年之九江。此次安慶之賊。實無一名漏網。足以伸天討。

而快人心。至楚軍圍攻安慶。已逾兩年。其謀始於胡林翼一人。畫圖決策。商之官文與臣。並徧告各統帥。前後布置規模。謀勦援賊。皆胡林翼所定。除臣即日前往安慶部署一切。及詳細情形。另由官文胡林翼李續宜會銜具奏外。所有克復安慶省城大概緣由。謹附片馳陳。仰慰宸懷。伏乞皇上聖鑒訓示。謹奏。

水師克池州府城摺 咸豐十一年八月初十日

奏爲水師克復池州府城。現擬進攻銅陵。恭摺奏祈聖鑒事。竊安慶省城。於八月初一日。經水陸官軍克復。業經附片奏明在案。先是臣與福建水師提督楊載福會商。如安慶克復。即乘勢進圍沿江各府縣。初二日。提臣楊載福派總兵王明山黃翼升。率水陸各營。進攻池州。王明山即令趙三元帶副右營先發。而自率正前營及嚴定國之正左營。萬化林之副前營。唐學發之副左營。蔡定發之正中營。郭明鼈之親兵前營繼之。黃翼升率親兵營。並鄧萬林之右營。王東華之新左營。蔡東祥之後營。自安慶北岸載周萬俾所帶陸師東下。初五日寅刻。趙三元帶副右營先到。即繞城攻擊。萬礮雷轟。子如雨注。該逆猶以鎗礮抗拒。趙三元率水師奮勇登城。賊不能支。遂開西北門而遁。適王明山黃翼升率水陸各營趕到。截殺之賊甚多。立將該府城克復。奪獲鎗礮旗幟無數。現派韋志俊帶陸師四營守之。仍留水師二營相爲倚護。王明山黃翼升即日進攻銅陵。此初五日克復池州府城之實在情形也。臣查僞右軍主將劉官方。盤踞池州。與安慶相爲犄角。九年老窠。屢攻不破。內則堅守石埭太平。阻徽師進兵之路。外則上犯建德鄱陽。爲江西北邊之患。今幸克復安慶。而池州亦相繼而下。從此皖省軍務。當日有起色。足以仰慰聖懷。再桐城縣城。亦於初三日。經福州副都統多隆阿克復。其詳細情形。應由官文胡林翼奏報。所有八月初五日水師克復池州府城。現擬進攻銅陵各緣由。謹繕摺由驛六百里馳奏。伏乞皇上聖鑒訓示。謹奏。

接江西漕折片 咸豐十一年八月初十日

再臣於去年八月。接辦皖南軍務。奏請飭令江西每月協撥漕折銀五萬兩。解濟徽寧兩防軍餉。經部議准。奉旨遵行在案。目下安慶池州均已克復。南北兩岸。正須進兵之際。而各營欠餉至七八月之久。兵勇負債過多。裹糧無資。竟不能拔營成行。坐失事機。實爲可惜。合無籲懇聖恩。仍飭江西從八月起。每月將漕折銀批解五萬兩。作爲徽寧協餉。由臣分撥各軍積欠。至江西今年被賊竄擾。蹂躪甚廣。入款甚絀。屢據總局司道開呈缺餉清單。詳

請奏撥鄰餉前來。臣以現在各省皆窘。無可指撥。批令自行籌畫。不敢擅奏。惟江西係臣兼轄之地。亦未敢任其決裂。匿不上聞。相應請旨飭下該部查照。凡江西應撥之款。除京餉仍源源籌解。不敢稍遲外。此外浙江及各省協餉。一概停解。所有地丁入款。先清本省守兵欠餉。漕折釐稅。先清臣處征兵欠餉。俟局勢稍穩。入項稍紓。再行奏明辦理。所有續提漕折。及籌清欠餉各緣由。理合附片具陳。伏乞聖鑒訓示施行。謹奏。

恭慰大孝摺 咸豐十一年八月二十七日

奏爲恭慰大孝。仰祈聖鑒事。竊臣接准兵部咨稱咸豐十一年七月十八日奉上諭。一道光三十年皇祖宣宗成皇帝大享皇考。仍遵嘉慶二十五年成例。停止各省將軍。督撫。提鎮。藩臬。鹽關。織造等來京叩謁梓宮。今皇考大行皇帝在山莊升遐。恭奉梓宮回京。除熱河都統本在熱河。直隸總督已諭前來熱河叩謁梓宮外。其餘直隸各大員。俱不必前來。各路統兵大臣。及各省將軍。督撫。副都統。提鎮。城守尉。並盛京侍郎。奉天府尹。西北兩路將軍。大臣。及學政。織造。關差等。均不必奏請前來。致曠職守。各該大臣。將軍。督撫。提鎮等。受皇考深恩。惟當竭誠盡職。以期無負委任。不在儀節虛文也。將此通諭知之。欽此。一痛惟大行皇帝臨御寰宇。十有二年。無日不在戰兢惕厲之中。值時局之多艱。惟貞持以宏濟。聖德之憂勞。堅忍。蓋從古所未有。亦薄海所共知。廼事機之方轉。遽過密而與悲。臣以愚陋。忝膺重任。不克進兵金陵。大伸天討。即克復安慶。亦不獲早奏捷音。博玉几末命之歡。悲痛之餘。彌深愧憾。亟思叩謁梓宮。一展哀忱。欽奉諭旨。停止入謁。瞻望闕廷。神魂震愴。理合專弁進京。恭慰皇上大孝。伏冀節哀順變。珍重保衛。遠師訪落。小茲近法。世祖聖祖。仲齡繼序。七粵無驚。以答中外臣民之望。臣不勝哀戀懇切。伏乞皇上聖鑒。謹奏。

安徽省城酌派司道大員分任責成摺 咸豐十一年九月初九日

奏爲安徽省城酌派司道大員分任責成。恭摺奏祈聖鑒事。竊安慶克復以後。臣移駐省城。諸務紛集。無一司道大員分任其實。實有叢脞不勝之虞。查向來定例。隨總督駐紮江寧者。有布政使一員。糧道一員。鹽道一員。隨皖撫駐紮安慶者。有布政使一員。按察使一員。近因兩省淪陷。本缺各員。僑駐淮揚泗潁等處。臣忝任江督年餘。無司道一人相隨。雖佐雜微員。必須親自劄委。刑名錢穀。必須親自綜覈。不特體制不合。亦且精力難周。若不急爲

部署深慮親細務而誤大局再四籌思擬於安慶省城酌派司道數員分任其責如江寧布政使王夢齡現在署理漕運總督駐紮淮安應另派一人署理該缺隨臣同駐安慶管轄上游印委各員凡蘇省官員來營稟到者由該司查照班次酌量委用凡皖省官員距潁州太遠者升遷調署由該司權代詳辦又如安徽按察使張學醇現在駐紮臨淮聲息不通應另派一人署理該缺隨駐安慶管理安池徽等郡刑名驛傳事務又如江安糧道王朝綸現在代辦江北糧臺駐紮揚州應另派一人署理該缺隨駐安慶專管皖省七府漕糧事件該缺之職向章本管蘇糧三府皖糧七府也又如江寧鹽運道邢春第現未到任亦應另派一人署理該缺隨駐安慶專管淮鹽事件此四缺者分別署置庶幾職有專司思不出位臣得官盛任使之效庶幾專心軍旅用志不紛聞或馳赴各府巡察營務亦不至拋廢公事實於軍務地方兩有裨益理合先行具奏除俟遴選得人再將四缺陸續奏派署理請旨遵行外所有安徽省城酌派司道大員分任責成緣由恭摺附驛馳奏伏乞皇上聖鑒訓示謹奏

鮑超軍克鉛山縣摺 咸豐十一年九月初九日

奏爲鮑超一軍追剿僞忠王股匪於湖坊河口等處大獲勝仗克復鉛山縣城恭摺奏祈聖鑒事竊鮑超一軍在豐城西岸大獲勝仗臣於八月初二日具奏在案該逆退出豐城後大股盤踞白馬寨小塘墟西竹墟等處分股竄小江口大江口一帶鮑超於二十七日過河進剿白馬寨小塘墟一帶之賊沿山抄擊分途齊進該逆紛紛敗竄我軍連日追剿該逆前有另股圍攻撫州經撫州府知府鍾峻縣丞劉于浚暨圍城官紳登陴固守八月初四日鮑超一軍追至城下撫州之圍立解該逆望許灣大路而逃此豐城捷後全軍東渡追賊至撫州之情形也是七月下旬安慶援賊多而且悍臣調鮑超馳援江北該鎮於初五日兼程回援初十日行抵距省四十里之武陽渡始知安慶業已克復乃遂星夜折回於十四日再抵撫州查得該逆大股已竄往貴溪雙港湖坊河口一帶會合湖坊之花旂廣匪三股賊衆號稱二十餘萬蔓延數百里層層築壘意圖回竄并分股竄往弋貴廣信一帶鮑超於十五日自撫郡進兵冒雨進行二十日馳抵貴溪貴溪之賊聞風逃遁人心稍定二十二日五鼓鮑超率隊進剿卯刻行抵雙港該逆首僞忠王李秀成於先日由河口率衆至湖坊勾結孝天豫朱逆觀天燕童逆勤天福余逆享天祿黃逆井花旗廣匪等股整隊迎敵洶湧如潮鮑超飭宋國永顏紹榮王衍慶劉玉堂等由中路進

飭陳由立熊鐵生易昌煥明興等由左路進。飭黃慶吳騰芳翦炳南伍華瀚等由右路進。又飭葦雲慶劉順隆李文益等由東路抄擊。張玉田譚勝達唐仁康等由西路抄擊。五路齊舉。自卯至巳。鏖戰三時。該逆紛紛大敗。拋棄器械。翻山越嶺。奪命狂奔。我軍追殺六十餘里。該逆尸體相藉。沿途斃賊一萬餘名。墜巖落澗死者尤多。將雙港九思巖同田河田湖坊一帶賊壘七十餘座。全行踏平。生擒長髮老賊近二千名。內有保天安。豫天福。曉天燕。成天豫。頂天侯。中天侯。檢點。丞相。指揮。監軍。司馬等官。訊明正法。奪獲偽印一百四十一顆。鎗礮刀矛旂幟山積。追至河口。該處踞賊一併驅逐。即在河口駐宿。少爲休息。此二十二日掃清雙港湖坊河口等處。踞賊大獲勝仗之實。在情形也。是夜探馬回稱湖坊河口之賊。敗往鉛山者。皆盤踞於東門外三十里之梓墟一帶。意欲勾通城內之賊。抗拒官軍。四更初轉。鮑超率領馬步全軍。進攻鉛山。卯刻已抵城外。該逆於北門外堅築七壘。與城內之賊相爲犄角。猝見我軍之至。施放鎗礮。憑牆堵禦。鮑超飭令陳由立譚勝達分投攻壘。拔開鹿角。擁入濠邊。該逆鎗礮如雨。我軍勇氣百倍。一擁而登。先將左路賊壘踏平。旋將右六壘踏毀。壘中之賊。盡數殲除。各營乘勝揭水過河。分段攻城。賊於城上施開鎗礮。相持兩時之久。鮑超親執桴鼓。如牆併進。火箭然燒城內藥桶。賊衆慌亂。副將譚勝達即緣梯登城。該逆見勢不支。潛開東門逃走。我軍先登者。立開北門。迎各營一齊入城。登將鉛山縣城克復。追殺六十餘里。該逆屍橫遍野。生擒老賊八百餘名。奪獲偽印四十三顆。將梓溪一帶踞賊。全行勦洗。馬隊追過廣信。立解郡圍。此二十三日踏毀城外賊壘。克復鉛山縣城之實在情形也。伏查閩賊三起。與花旗廣匪。先後由建昌竄至廣信。盤踞雙港九思巖河口湖坊鉛山一帶。兩月有餘。蔓延極廣。又加僞忠王一股。由撫州回竄該處。併聚一路。聲勢浩大。經鮑超痛勦。兩日掃平賊壘八十餘座。克復鉛山縣城。周圍追擊二百餘里。風馳電掣。洵足彰天討而快人心。所有陣亡之花翎都司王友得。儘先都司黃友勝。儘先守備周有勝。守備銜千總趙勝武。千總封樂善。儘先把總高林芳。藍翎外委李安旺。方祥應。儘先外委鄒富友。蕭於成。周鳳祿等。力戰捐軀。深堪閔惻。應請旨交部從優議卹。以慰忠魂。尤爲出力之儘先副將譚勝達。請加總兵銜。并賞加巴圖魯名號。副都統銜協領明興。請以副都統記名簡放。并請賞加巴圖魯名號。儘先副將李文益。劉玉堂二員。均請賞加總兵銜。儘先副將王衍慶。熊鐵生二員。均請賞加總兵銜。知府銜四川卽補直隸州知州伍華瀚。請免補直隸州。以知府仍留四

川。遇缺卽補。并請賞加巴圖魯名號。知府銜湖北卽補直隸州知州鮑繼高。請免補本班。以知府仍留湖北。遇缺卽補。副將銜儘先參將李定貴。請免補參將。以副將儘先補用。并請賞加巴圖魯名號。副將銜儘先參將唐仁廉。剪炳南二員。均請以副將儘先補用。其餘出力文武員弁。籲懇天恩。容臣查明保獎。所有鮑超一軍。於湖坊湖口等處大獲勝仗。克復鉛山縣城各緣由。恭摺由驛五百里馳奏。伏乞皇上聖鑒訓示。謹奏。

請將鮑超等補實缺片 咸豐十一年九月初九日

再記名提督綬靖鎮總兵鮑超。驍勇罕匹。轉戰安徽湖北江西三省。所向克捷。本年正月。破黃文金大股於洋塘。四月。破劉玲琳大股於安慶。厥功甚偉。其部下各營官。如豐城案內隨摺請保加提督銜之記名總兵宋國永。陳由立。黃慶。請保記名總兵之婁雲慶。張玉田等。皆陷陣衝鋒。戰功卓著。此次克復鉛山縣城。連解撫州廣信兩郡重圍。當口糧久缺之候。行烈日驟雨之中。竭力奔馳。不得少休。未滿兩月。將江西腹地各賊。一律掃除。全省肅清。實屬勞苦功多。可否籲懇皇上特恩。將鮑超補授提督實缺。抑或另有恩獎之處。恭候聖裁。其所部之記名總兵宋國永。陳由立。黃慶。婁雲慶。張玉田等。均請以次補授總兵實缺。以示懋賞。而勵戎行。是否有當。伏乞聖鑒訓示。謹奏。

留張運蘭在徽州軍營片 咸豐十一年九月初九日

再布政使銜河南開歸陳許道張運蘭。奉旨補授福建按察使。例應具摺謝恩。奏請陛見赴任。查該司統帶湘勇駐紮徽州。逼近羣賊巢窟。刻下僞侍王股匪。在浙之嚴州。僞輔王股匪。在皖之寧國。距徽州僅二百里內外。防剿喫緊。張運蘭實屬軍中不可少之員。勢難令其卽赴福建新任。卽照例迎摺北上。由臣派員暫管。亦無人可以接辦。相應奏明。請旨飭下福建督撫。將福建按察使一缺。遴員署理。一面准臣行知張運蘭。俟軍務稍平。再行奏請陛見。臣爲軍營得人。攻剿喫緊起見。是否有當。伏乞聖鑒訓示。謹奏。

歷陳胡林翼忠勤勳績摺 咸豐十一年十月十四日

奏爲湖北撫臣忠勤盡瘁。勳績最多。恭摺奏祈聖鑒事。竊前湖北撫臣胡林翼。由翰林起家。洊歷外任。咸豐五年三月。蒙先皇帝特達之知。由貴州道員。不及半載。擢署湖北巡撫。當是時武漢已三次失陷。湖北州縣大半淪沒。

各路兵勇潰散殆盡。胡林翼坐困於金口洪山一帶。勞身焦思。不特無兵無餉。亦且無官無幕。自兩司以至州縣佐雜。皆遠隔北岸數百里外。一錢一粟。皆親作書函。向人求貸。情詞深痛。殘破之餘。十不一應。至發其益陽私家之穀。以濟軍食。士卒爲之感動。會湘勇自江西援鄂。軍勢日振。六年十一月。攻克武漢。以次恢復黃州等郡縣。論者以爲鄂省巡撫。可稍息肩矣。胡林翼不少爲自固之計。悉師越境。圍攻九江。又分兵先救瑞州。督撫之以全力援鄂。省自湖北始也。九江圍勦年餘。相持不下。中間石達開自江西窺鄂。陳玉成自皖北犯鄂者三次。胡林翼終不肯撤九江之圍。回救本省之急。或親統一軍肅清蘄黃。或分遣諸將驅歸皖豫。卒能克復九江。殺賊淨盡。爲東南一大轉機。尋功甫蒞。復奏明以全鄂之力。辦皖北之賊。迨李續賓覆軍於三河。胡林翼先以母喪歸籍。未滿百日。聞信急起。痛哭誓師。不入衙署。進駐黃州。論者又以李續賓良將新逝。元氣未復。但可姑保吾圍。不宜兼顧鄰封。胡林翼不以爲然。驚魂甫定。卽派重兵。越二千里。援解湖南寶慶之圍。援湘之師未返。又議大舉圍皖。是時臣國藩方奉入蜀之命。胡林翼留臣共圖皖疆。先滅髮匪。保三吳之財賦。雪鄂天之公憤。繪圖數十紙。分致臣與官文暨諸路將領。晝夜諮謀。十年春間。大戰於潛山太湖。相繼克之。遂定圍攻安慶之策。親駐太湖督勦。本年五月。回援鄂省。病中猶屢寄臣書。縷陳勿撤皖圍。力勸援賊之策。故安慶之克。臣前奏推胡林翼爲首功。此非微臣私議。蓋在事文武所共知。亦大行皇帝所洞鑒也。大凡良將相聚。則意見紛歧。或道義自高。而不免氣矜之過。或功能自負。而不免器識之偏。一言不合。動成水火。近世將材。推湖北爲最多。如塔齊布羅澤南李續賓都與阿多隆阿李續宜楊載福彭玉麟鮑超等。胡林翼均以國士相待。傾身結納。人人皆有布衣昆弟之歡。或分私財。以惠其室家。寄珍藥。以慰其父母。前敵諸軍。求餉求援。竭蹶經營。夜以繼日。書問餽遺。不絕於道。自七年以來。每遇捷報之摺。胡林翼皆不具奏。恆推官文與臣處主稿。偶一出奏。則盛稱諸將之功。而已不與焉。其心兢兢以推讓僚友。扶植忠良爲務。外省盛傳楚師協和。親如骨肉。而於胡林翼之苦心調護。或不盡知。此臣所自媿昔時之不逮。而又憂後此之難繼者也。軍興以來。各省皆以餉絀爲慮。湖北三次失守。百物蕩盡。乙卯丙辰之際。窮窘極矣。自荊州權鹽。各府抽釐。鄂中稍足自存。胡林翼綜覈之才。冠絕一時。每於理財之中。暗寓察吏之法。咸豐三年。部定漕米變價。每石折銀一兩三錢。而各省州縣。照舊淨收。加至數倍。鄂省竟有每石十數千者。上下因之交困。胡林

翼於七年春間。創議減漕。嚴裁冗費。先皇帝殊批獎諭。謂其不顧清面。祛百年之積弊。甚屬可嘉。統計湖北減漕一項。每年爲民間省錢一百四十餘萬串。爲帑項增銀四十二萬兩。又節省提存銀三十一萬餘兩。利國利民。但不利於中飽之蠹。向來各衙門陋規。臺局浮費。革除殆盡。州縣征收正課。不准浮取毫釐。亦不准借催科政拙之名。爲猾吏肥私之地。各卡委員。日有訓。月有課。批答書函。娓娓千言。以爲取民膽軍。使商賈皆知同仇而敵愾。是即所以教忠。多入少出。使局員皆知潔己而奉公。是即所以興廉。真白之士。樂爲之用。欺飾之徒。譴責亦重。故湖北瘠區。養兵六萬。月費至四十萬之多。而商民不疲。吏治日懋。斯又精心默運。非操切之術所得與也。自頃八月以來。安慶克復。江鄂肅清。方幸全局振興。便可長驅東下。不圖大功未竟。長城遽頽。湖廣督臣官文奏請將胡林翼敕部優卹。諒蒙聖慈矜鑒。臣與該故撫共事日久。相知頗深。咸豐四年曾奏稱胡林翼之才勝臣十倍。近年遇事諮詢。尤服其進德之猛。不敢阿好溢美。亦不敢沒其忠勳。謹將該故撫以死勤事大略情形。據實續陳。伏乞飭付國史館查照施行。胡林翼之子胡子勳。讀書敏慧。可否加恩之處。出自逾格鴻恩。所有湖北撫臣忠勤盡瘁緣由。恭摺附驛馳奏。伏乞皇上聖鑒訓示。謹奏。

克復銅陵縣無爲州等處摺 咸豐十一年十月十四日

奏爲水陸各軍。克復銅陵一縣。無爲一州。並攻奪沿江泥汊神塘河運漕鎮東關各要隘。恭摺奏祈聖鑒事。竊總兵王明山黃翼升等。克復池州府。進攻銅陵。臣於八月初十日具奏在案。八月十二日。王明山率水師正前營。並萬化林嚴定國唐學發郭明鼈蔡定發趙三元等六營。黃翼升率淮揚水師親兵營。並蔡東祥王東華鄧萬林等三營。暨柳壽田之內江親兵營。分載陸師周萬傳劉祥勝二營。自池州下勦。先派內江親兵哨船。於十一日將銅陵縣東北門外堤埂決開。我水軍即於決口駛入。是日巳刻。王明山督水師攻東門。黃翼升督水師與周萬傳等陸師攻西門。各軍相繼登城。殺賊近千人。餘匪由北門竄逃。遂於申刻克復。追勦十餘里。天晚收隊。奪賊糧千餘石。軍械鎗礮無算。派周萬傳等兩營陸師守之。仍留水師相爲倚護。此八月十二日克復銅陵縣城之實在情形也。先是安慶得手。桐城舒城廬江相繼收復。桐舒經副都統多隆阿分兵置守。廬江由臣處派兵扼守。臣查皖北形勢。惟濱江之無爲州。爲蕪湖金陵援賊所必經之路。利在速攻。使南北之氣中斷。攻無爲則須水陸并進。陸師

由廬江進。水師由泥汊口神塘河進。該逆先於泥汊神塘各紮石壘。以阻我水師進路。因派候補知府陳湜。記名總兵李寶賢。帶安慶陸師六千餘人。於九月初一日由廬江進。無爲。候補道劉連捷帶二千人。於初二日往守廬江。記名臬司曾國荃。帶親兵及蕭季泗彭萬全陸師兩營。密用礮船裝載。會同王明山帶外江水師。黃翼升帶淮揚水師。順流下駛。九月十五日抵泥汊口。登岸見賊壘高據口內。倚水爲險。礮眼層列。勢難仰攻。遂令陸師修壘。水師分紮要路。以鎗礮火箭火彈。近賊壘轟之。十六日曾國荃率親兵至楊家橋。黃翼升率礮船至鳳皇頸。開挖堤埝。該逆恐我軍合圍。斷其歸路。王明山蕭季泗等乘賊膽怯。徹夜轟打。賊遂於十六夜四更。向無爲州遁去。各軍追殺。並奪獲礮械甚多。弁勇受傷僅二三十人。十八日黃翼升由泥汊進。襲安黃姑閘。搜查白湖一帶餘匪。王明山曾國荃復帶水陸各營。進攻神塘河賊壘。賊以鐵練攔截河口。負嵎不出。王明山以大礮置兩岸。晝夜礮擊。十九日萬化林唐學發郭明鼇蕭季泗等。均帶隊直撲壘據。賊益不支。遂於二更時向無爲州遁去。我軍俘獲尤衆。此九月十六夜克復泥汊口。十九夜克復神塘河之實在情形也。神塘河克後。是夜王明山率水師尾追。乘勝進無爲州。節字智字等營陸師。亦坐船同進。二十日尙未黎明。均抵城下。先是無爲州賊目馬玉堂之妻子。在安慶城內。曾國荃執而不殺。以密諭招降之。馬玉堂感激投誠。其機已於十九日漏洩。僞項王朱玉堂之妻。在安意圖堅守州城。馬曾黨羽。在城中鬪亂。人聲鼎沸。我軍突至。因其內亂而攻之。賊遂大驚。王明山令節字智字兩營早隊。潛伏南門外。而自率萬化林唐學發等攻大東門。李朝斌李濟清張得友等攻小東門。王遠和郭明鼇等攻倉北門。萬礮雷轟。子如密雨。逆衆大潰。遂於北門竄出。水陸各營。登岸追擊。殺斃二千餘人。又入城搜殺五六百人。陳湜劉連捷等。亦率馬步大隊。從盛家橋而來。截勦竄賊。此九月二十日攻克無爲州城之實在情形也。無爲含山之交。有運漕鎮者。外嶺大江。內通巢湖。自咸豐三年後。賊糧皆聚於此。上而接濟安慶廬州。下而接濟金陵老巢。實爲南北之鎮鑰。僞巨王洪銜。僞佐將何雅林。帶五六千人。並李曾礮船數十號。在彼駐守。曾國荃偵知賊勢驚惶。二十三日會商王明山。派水師三營。泊黃維河。以遏巢湖出路。曾國荃自率親兵。偕黃翼升李朝斌鄧萬林等水師。進取運漕。並派蕭季泗張勝祿周惠堂彭萬全各隊坐船。隨水師繼進。未刻行抵該鎮。逆船數十號。與水師迎敵。鄧萬林李朝斌黃翼升等。排礮轟擊。賊勢少卻。鄧萬林同各師船飛槳而進。奪賊礮船十一號。焚燒

賊船數十號。船上之賊。見水奔竄。鎮上之賊。見水路賊敗。陸師登岸抄截。遂捲旗而退。各軍分途猛追。共殺斃淹斃賊近三千人。獲賊糧二千餘石。奪獲馬十餘匹。礮位軍械無數。餘賊向銅陵關一路而遁。二十九日。黃翼升與陳澁會商。派水陸各營。進取東關。賊衆傾巢出迎。水師以排礮轟擊。陸師列陳數里。鎗礮甫施。該逆大奔。不復歸壘。我軍併力抄殺。奪取石壘。獲礮位米糧甚數。此九月二十三日克復運漕鎮。二十九日克復東關之實在情形也。臣伏查江北之無爲州。與南岸之蕪湖相對。賊南踞金陵。則蕪湖在所必爭。北踞廬州。則無爲在所必爭。東關之險。運漕之富。尤該逆所恃以爲奧區。三國用兵時。於東關濶須口苦爭不休。卽此地也。茲幸仰仗天威。水陸各軍。旬日之間。連復兩城一鎮。要隘三處。殺賊甚多。從此廬州蕪縣三河踞賊。糧援路梗。勢必漸漸搖動。擬留陸軍九千。分守無爲運漕及蒼頭東關等處。深調淮揚水師數營。分布協守。可期穩固。所有尤爲出力之提督銜壽春鎮總兵王明山。擬請以提督記名。請旨簡放。淮揚鎮總兵黃翼升。擬請賞加提督銜。記名總兵萬化林李朝斌李濟清蕭季泗張勝祿。均請旨簡放總兵實缺。李朝斌并請賞加提督銜。總兵銜副將唐學發。請以總兵記名簡放。副將郭明鼈周惠堂。均請賞加勇號。候補參將彭萬全鄧萬林。均請免補參將。以副將遇缺卽補。鄧萬林并賞加勇號。擬保參將蔡東祥王東華。均請免補參將。以副將儘先推補。候補知府陳澁。請賞加道銜。五品銜卽選知縣彭椿年。請以同知直隸州知州留於江蘇補用。游擊郭松林程學啓。均請以參將遇缺卽選。都司倪桂。請以游擊遇缺卽選。守備伍維壽。請以都司遇缺卽選。其餘水陸出力員弁兵勇。可否由臣查明。開單奏獎。以示鼓勵。出自天恩。所有官軍連復銅陵縣無爲州及北岸沿江各要隘各緣由。繕摺由驛六百里具陳。伏乞皇上聖鑒訓示。謹奏。

會國荃回湘募勇片 咸豐十一年十月十四日

再水陸各軍。攻克無爲州。運漕鎮後。距江寧僅二百里。本可乘賊情驚惶之際。直搗金陵老巢。無如會國荃一軍。深入賊之腹地。得一處須守一處。現分守安慶縱陽廬江無爲運漕東關六處。人數尙嫌單薄。別無進取之兵。坐失機會。實屬可惜。應令會國荃趕緊回湘。添募六千人來皖。替守各城。抽出現在守兵。進剿蕪縣和州等處。冀與下游都興阿揚州之師。聯爲一片。庶勦辦易於得勢。理合附片陳明。伏乞皇上聖鑒。謹奏。

請免徵軍前案報銷片 咸豐十一年十月十四日

再前辦皖南軍務都察院左副都御史張芾於上年八月交卸時奏明徵池糧臺自咸豐八年正月月起至十年七月止收支總數並兵勇欠餉數目由原辦各員分款報銷在案。徽州府城旋於八月二十五日失陷。據原辦糧臺委員浙江補用道陳泰來前徽州府知府劉兆璜稟稱：「該臺向設徽城賊衆猝來夫役逃散冊籍重件勢難搬移。各委員或受傷被擄或隻身衝出。其文卷簿領等件未能保護出城。各款細數無憑造報請附奏。」等情前來。臣當以軍需報銷不容藉延。俟徽州克復查獲冊籍再行趕辦。本年五月間郡城收復灰燼之餘徧尋前失糧臺案卷實皆燬棄無存。查臣所派前皖南道李元度之兵於八月十七日抵徽州甫經八日郡城遽失實出意料之外。迨至倉皇城陷該委員等欲將冊籍救護出城勢所不能。今克復已經五月有奇。臣飭令再三搜尋片紙無獲。所有張芾督辦徵池軍務二二三兩案報銷細冊礙難慮造之處理合據實附陳伏乞皇上聖鑒。敕部查照。謹附片具奏。

宋夢蘭等請卹片 咸豐十一年十月十四日

再侍講銜督辦皖南團練翰林院編修宋夢蘭公正樸誠不避艱險因本籍徽境被害最慘帶勇協勦義憤填膺。本年二月間在休寧接仗頭額受重傷三處。臣於三月二十四日奏明在案。該員醫治未愈延至六月初七日因傷身故。又江西候補知府張韶南咸豐八年九月間經臣調營委辦糧臺四載以來竭力籌畫自去冬迄今春。祁休各營屢被圍困糧餉俱匱運道亦梗。該員設法騰挪接濟食米俾飢軍不至潰散實屬有裨全局。其子江西補用知縣張同生隨營辦理支應兩月之間該員父子先後以積勞病故殊堪憫惻相應請旨敕部將宋夢蘭照傷亡例從優議卹。張韶南張同生並照軍營病故例議卹以慰忠魂。再皖南各屬團練事宜應即責成暑皖南道姚禮備就近督辦合併聲明伏乞皇上聖鑒訓示。謹奏。

謝賞加宦保銜恩摺 咸豐十一年十月二十六日

奏爲恭謝天恩仰祈聖鑒事。竊臣接准兵部咨稱咸豐十一年八月二十五日內閣奉上諭：「會國藩調度有方著加恩賞加太子少保銜。」等因欽此。當即恭設香案望闕叩頭謝恩。伏念臣謬膺疆寄兼統師干。謂吳越之

上游。以皖城爲雄鎮。會同臣官文等熟籌圍剿。力禦外援。值一人訪落之昌期。復九載陸沈之重地。上託聖皇鴻福。下賴僚友同心。上謀以胡林翼爲先。苦戰以多隆阿爲最。如臣碌碌。何功可言。迺蒙鴻慈曲逮。寵錫頭銜。陪侍青宮。忝附前疑後丞之列。仰承丹詔。彌切臨深履薄之懷。臣惟有運籌習勤。投鞭勵志。勉己百己千之學。圖得尺得寸之功。庶冀仰答高厚生成於萬一。所有微臣感激下忱。理合繕摺叩謝天恩。伏乞皇上聖鑒。謹奏。

謝弟國荃貞幹升秩恩摺 咸豐十一年十月二十六日

奏爲恭謝天恩。仰祈聖鑒事。竊臣接准兵部咨開咸豐十一年八月二十五日。內閣奉上諭。『官文等另片奏。』會國荃等於圍攻安慶。智勇兼施。』道員會國荃著賞加布政使銜。以按察使記名。遇缺題奏。並加恩賞穿黃馬褂。以示優獎。候選訓導會貞幹。著免選本班。以同知直隸州知州儘先選用。並賞戴花翎。』等因。欽此。臣聞命之下。感悚莫名。當即恭設香案。率同臣弟國荃貞幹。望闕叩頭謝恩。伏念臣弟國荃。從征江楚。累擢監司。茲值聖主當陽。皖城告捷。溫綸渥被。寵兼師錫之三。章服榮加。吉協坤爻之五。臣弟貞幹。亦以微勞。遽膺懋賞。縮魚符而佐郡。戴翠羽以舒翹。同產三人。均乏涓埃之報。鴻師九陛。並霑雨露之恩。臣惟有督率臣弟等。益矢忠誠。共圖堵蕩。叶瓴壘以素凱。無忘汗馬之勤。荷戈殿以偕征。冀免濡鷄之刺。所有微臣感激下忱。理合繕摺。率同臣弟等叩謝天恩。伏乞皇上聖鑒。謹奏。

謝弟國華予謚恩摺 咸豐十一年十月二十六日

奏爲恭謝天恩。仰祈聖鑒事。竊臣接准兵部咨稱咸豐十一年八月二十五日。內閣奉上諭。『官文等奏請將殉難道員予謚等語。候選同知會國華。前在三河殉難。追贈道員。今其兄會國藩。其弟會國荃。會貞幹。率師勦賊。克復安慶。一門忠義。深堪嘉尚。會國華著加恩予謚。以彰忠烈。欽此。』臣聞命之下。感泣難名。當即恭設香案。望闕叩頭謝恩。伏念臣弟國華。夙抱愚誠。未嫻遠略。從戎兩載。乏虎頭食肉之容。殉難三河。遂馬革裹尸之志。荷蒙先皇帝予以蔭襲。贈以御銜。喪親父以榮封。許孤兒以入覲。至三至再。疊沐高天厚地之恩。有弟有兄。愧無隆露輕塵之報。茲因克復皖省。光賁泉臺。更邀逾格之鴻施。畀以易名之令典。河山無恙。重弔國殤。尋命之場。魂魄有知。永感聖主憐才之意。臣惟有督率同懷。誓殲醜類。餐冰厲節。運籌習勤。萬衆一心。同堅破釜沈舟之志。闔門百

口。共矢銜環結草之誠。所有感激下忱。理合繕摺叩謝天恩。伏乞皇上聖鑒。謹奏。

左宗棠定議援浙節制諸軍摺 咸豐十一年十一月十六日

奏爲左宗棠一軍。定議進援浙江。請將廣信徽州饒州諸軍。統歸節制。以一專權。恭摺奏祈聖鑒事。竊近年以來。江西屢被賊擾。粵閩之賊。由撫建北出而入浙皖。浙皖之賊。由信饒南竄而擾腹地。皆以廣信爲必經之路。本年三月七月。僞侍王李世賢。僞忠王李秀成。先後由江入浙。皆以廣信爲出奔之途。是欲保江西。宜於廣信設防。欲援浙江。宜從廣信進兵。必然之勢也。自紹興失守。杭州危急。臣等日夜憂皇。以浙境一日不靖。則江西一日不安。而大局亦終不能轉。屢次函商。謀所以救浙之策。無如地廣兵單。不敷分布。而浙中賊勢浩大。亦非數千人所能解救。臣國藩現令飽超一軍。由青陽前進。朱品隆一軍。由石埭前進。會勦寧國。欲以分掣浙中賊勢。第恐僞輔王悉衆堅守。勢不能遽拔寧郡之城。即不能少解浙江之阨。惟幫辦軍務太常寺卿臣左宗棠。久駐廣信。距賊較近。其平日用兵。取勢甚捷。審機甚微。近日屢與臣等書函。毅然以援浙爲己任。督臣慶端。撫臣王有齡。亦奏請左宗棠統軍入浙。臣等往返熟商。即請左宗棠督率所部。進援浙江。並將駐防徽州之臬司張運蘭。駐防廣信之道員屈蟠。駐防玉山之道員王德榜。參將顧雲彩。駐防廣豐之道員段起各軍。及副將孫昌國。內河水師。均歸左宗棠就近節制調度。兵力稍厚。運掉較靈。於援勦浙皖之時。仍步步顧定江西門戶。庶於三省全局有裨。左宗棠現駐廣信。距國藩安慶行營。相隔千餘里。若一入浙境。相去彌遠。聲息難通。遇有轉奏請旨之件。誠恐耽延貽誤。以後該處一切軍情。應由左宗棠自行奏報。以昭迅速。是否有當。伏候諭旨遵行。至其所部各營。與信防各軍。欠餉太多。難遽用命。臣等擬將信郡各屬本年錢漕。撥歸經收。以清廣玉各軍積欠。并將河口景鎮婺源盩金。撥歸徵收。以清左宗棠所部各營積欠。俟各軍整飭就緒。即行分途進發。內防外勦。進止遲速。均由左宗棠相機辦理。所有左宗棠一軍。定議援浙。暨廣信徽州饒州各軍。統歸節制。並自行奏報各緣由。謹合詞繕摺。由驛馳陳。伏乞皇上聖鑒訓示。謹奏。

李桓保升兩司摺 咸豐十一年十一月十六日

奏爲請留道員署理江西藩司。總辦糧臺。暫緩送部引見。並懇加恩獎勵。恭摺仰祈聖鑒事。竊臣國藩於上年四

月署理兩江總督。統兵進剿。欽奉諭旨。著令江西布政使總辦臣處糧臺。其時江西藩司。即係督糧道李桓署理。江西通省牙稅釐金。奉旨由臣國藩徵收充餉。又經奏派該署司李桓。會同贛南道李瀚章經理。嗣藩司張集馨到任。暫令李桓將糧臺交卸。本年春間。張集馨赴九江辦理通商事宜。又經臣國藩札派李桓。接辦糧臺。七月間。張集馨因案革職。又經臣等會奏。派李桓署理藩司。五月間。臣毓科遵旨保舉道府。以督糧道李桓等才猷出眾。據實奏保。八月廿二日奉旨。著吏部調取引見。等因。欽此。遵即轉行去後。茲據該署司李桓詳請給咨赴部。等情。臣等查按察使銜江西督糧道李桓。廉能勤敏。吏才精覈。咸豐五年。以道員揀發來江。旋授今職。在任七載。歷署藩臬兩司。皆值軍務紛煩。餉支絀之際。該員任勞任怨。竭蹶經營。卒能保全大局。於通省軍政之原委。錢漕之利病。屬吏之賢否。靡不深知。舉措合宜。輿論翕然。實爲江省必不可少之員。辦理糧臺釐局。詳慎出納。無誤要需。目下調派各軍。進剿皖江南北。亟須籌餉接濟。本年江西州縣大半被擾。民力拮据。所有額徵地丁漕米。不容藉詞蠲緩。臣等援照近年湖南北城。價徵收成案。飭令藩司嚴定章程。禁斷一切浮收規費。勒限徵解。以濟餉需。而紓民困。該署司實力奉行。百年積弊。痛加掃除。從此餉事吏事。可期日有起色。現值更張之始。條目繁多。整頓督催。必資熟手。除將丁漕減收新章。俟辦有頭緒。再行專案具奏外。相應請旨。仍留督糧道李桓署理江西布政司總辦糧臺。暫緩送部引見。並懇俯念該員在任日久。勞績最著。敕交軍機處。以江西藩臬兩司遇缺題奏。出自皇上逾格天恩。於軍務吏治。皆有裨益。臣等爲要缺需人起見。謹合詞附舉具陳。伏乞皇上聖鑒訓示。謹奏。

棟員署安徽司道摺 咸豐十一年十一月十六日

奏爲揀員署理安徽臬司。江寧鹽巡道兩缺。隨駐安慶。恭摺奏祈聖鑒事。竊臣於九月初九日奏明。擬於安慶省城。酌派司道數員。分任責成。奉旨依議。欽此。除江寧布政使。江安糧道兩缺。容臣另選賢員。請旨飭署外。查安徽按察使。向隨院撫駐紮安慶。該臬司張學醇。現署布政使。在泗州一帶。隨辦防勦。其臬司篆務。本係盧鳳道才宇和兼署。嗣才宇和告病。尚未據委。署有人。應遵旨由臣派員署理。隨駐安慶。責令籌辦該省善後事宜。查有按察使銜前任湖北督糧道萬啓琛。江西豐城人。咸豐五年。選授是缺。經臣奏留江西軍營。辦理濟楚餉鹽。六年。委赴浙省。招商督運。先後運鹽三萬五千餘引。嗣經浙江撫臣晏端書奏准留浙差委。又籌運餉鹽六萬七千餘引。統

計浙西兩局。該員經手征收鹽銀八十餘萬兩。十年正月。委赴江西會議鹽餉章程。旋奉旨留辦江西團練。本年八月。經臣調赴安慶。委辦牙釐總局。該員廉明幹練。敏而不浮。籌餉察吏。尤擅專長。合無籲懇天恩。將前任湖北督糧道高啓琛。留於蘇皖兩省。以道員請旨簡放。即令署理安徽按察使。於軍務地方。皆有裨益。又江寧鹽巡道邢春第。尚未到任。經臣奏准派員署理。查有江蘇候補道李榕。四川進士。由庶吉士改歸禮部主事。咸豐九年。經臣奏調軍營差遣。升員外郎。本年六月。於克復黟縣。建德出力案內。請留江蘇。以道員補用。奉旨允准。旋經吏部議駁。以知府分發省分補用。該員辦理。臣處營務。兩載以來。器識豁達。不憚艱險。現委辦善後局務。實心講求。可否仰懇天恩。准令江蘇候補道李榕。署理江寧鹽巡道缺。隨駐安慶。俾臣得收指臂之助。所有揀員署理。司道兩缺各緣由。謹會同安徽撫臣彭玉麟。江蘇撫臣薛煥。恭摺具陳。伏乞皇上聖鑒訓示。謹奏。

留朱品隆攻寧國片 咸豐十一年十一月十六日

再臣國藩承准軍機處贊襄政務王大臣字寄九月十八日奉上諭。『瑞昌王有齡奏。『衢防緊要。請飭總兵赴任防剿。』等語。總兵李定泰已派幫辦徐宿勦匪事宜。即須繞道赴徐。惟衢州防務喫緊。浙省並無統兵大員。可以前往接辦。著會國藩即飭新授衢州鎮總兵朱品隆。迅赴本任。統領衢防各軍。接辦防剿事宜。以便李定泰交卸起程。將此由六百里諭令知之。』等因欽此。仰見皇上權衡緩急。留意將材。曷勝欽悚。臣查浙江危急情形。在杭州寧紹而不專在衢州。欲拯浙江之危。宜以大隊直赴省垣。而不宜僅顧衢防。臣現擬左宗棠一軍。由廣信進兵。以救浙江之上游。鮑超一軍。由寧國進兵。以分浙中之賊勢。同日另摺具奏。想邀聖鑒。至朱品隆一軍。兵數不滿三千。只可依人而行。不能獨當一路。臣已令鮑超由山外徇池州進青陽。朱品隆由山內徇祁門進石埭。然後會合一路。以攻寧國。該二軍者。分支則互為聲援。缺一則不能獨進。一至寧國。去杭州僅二百餘里。必足以懾浙賊之膽。不必赴衢而後為救浙也。衢州自解圍以後。防務較鬆。閩浙督臣慶端奏明。即日赴三衢統兵督勦。李定泰似可抽身赴徐。不必待朱品隆前往接替。且朱品隆久帶湘勇。征皖數年。形勢熟諳。留皖則人地實為相宜。赴衢則統率難期得力。審度情勢。自以先赴寧國為妥。所有朱品隆會攻寧國。暫難赴衢緣由。理合附片覆奏。伏乞皇上聖鑒訓示。謹奏。

改題爲奏片 咸豐十一年十一月十六日

再兩江總督關防兩淮鹽政印信。已據委員於本年七月初六日交到。臣當將接印日期。恭摺奏報。其書吏及文卷等項進呈。漕臣王夢齡咨會奏明。改道航海至寧波。繞赴浙江行走各在案。臣查兩江統轄江安蘇三省地方。政務殷繁。又兼管兩淮鹽政漕河營制。多由臣衙門主政。必須詳查例案。核明准駁。不致遺漏舛誤。方昭慎重。刻下書吏文卷。因浙江路梗。尙未到營。從前辦過成案章程。此間一無所有。且蘇常等城未復。各衙門案卷亦不齊全。值此南北攻勦喫緊。籌兵籌餉。皆臣親自綜理。地方事件。尙難兼顧。所有刑名錢穀。鹽員補缺。武職補缺。營汛疎防。按期參劾。以及尋常事件。應由臣衙門主政。尙須具題者。均請暫行展緩。如係萬不可緩。即請改題爲奏。以歸簡易。統俟書吏文卷到日。江南軍務稍定。再行照例具題。除咨部查照外。謹附片陳明。伏乞聖鑒訓示。謹奏。

力辭節制浙省各官摺 咸豐十一年十一月二十五日

奏爲欽奉恩旨。歷陳下情。恭摺覆陳。仰祈聖鑒事。竊十一月十五日。准兵部火票。遞到十月十八日內閣奉上諭。一欽差大臣兩江總督曾國藩。著統轄江蘇安徽江西三省。并浙江全省軍務。所有四省巡撫提鎮以下各官。悉歸節制。浙江軍務。著杭州將軍瑞昌幫辦。並著曾國藩速飭太常寺卿左宗棠。馳赴浙江。勦辦賊匪。浙省提鎮以下各官。均歸左宗棠調遣。欽此。一同日承准議政王軍機大臣字寄。十月十八日奉上諭。一本日已明降諭旨。令曾國藩節制浙江全省軍務。並令江蘇安徽江西浙江巡撫提鎮以下各官。悉歸節制。該大臣自不能不統籌兼顧。况安慶克復。湖北江西將次肅清。自不至有顧此失彼之虞。著曾國藩即飭左宗棠帶領所部。兼程赴浙督辦軍務。浙省提鎮以下。統歸調遣。至都與阿在江北勦辦粵匪。袁甲二在皖北勦辦捻匪。遇有緊要軍務。已諭令該將軍會商曾國藩辦理。其江北皖北地方文武。該將軍等諒亦時有調遣之處。並著曾國藩諭令該文武等。仍遵都與阿等調遣。不得因已歸該大臣節制。於都與阿袁甲二派辦公事。稍涉玩視。是爲至要。一等因欽此。仰見聖主廬念東南。擇人任使之至意。跪讀之下。惶悚莫名。臣於未奉諭旨之前。業將左宗棠定議援浙。並節制廣信徽州各軍。會同江西撫臣毓科具奏在案。伏念臣自受任兩江以來。徽州失守。祁門被困。竭蹶之狀。屢見奏報。俾託聖主威福。僅得自全。至於安慶之克。悉賴鄂軍之功。胡林翼籌畫於前。多隆阿苦戰於後。並非臣所能爲。江蘇

各郡羣盜如毛。乃臣職分應辦之事。受命年餘。尙無一兵一卒達於蘇境。是臣於皖則無功可敘。於蘇則負疚良深。乃蒙皇上天恩。不責臣以無效。反令兼統浙江軍務。並四省巡撫提鎮以下。悉歸節制。此非常之寵遇。臣自顧非材。實難勝任。自九月以來。浙省軍情。日見危急。臣與毓科左宗棠等往復函咨。商謀援救。徒以地段太寬。兵力太薄。既須援浙。又須顧皖。又須保江。三者有并重之勢。一時乏兼全之策。直至十月下旬。始定議。左宗棠由衢州援浙。從正路以張軍威。鮑超由寧國援浙。從旁路以掣賊勢。大局所係。必應統籌。臣本末敢稍涉推諉。不必有節制浙省之名。而後盡心於浙事也。茲欽奉諭旨。令浙省提鎮以下。均歸左宗棠節制。事權更一。掣肘無虞。臣已咨催左宗棠迅速啓行。但以臣遙制浙軍。尙隔越於千里之外。不若以左宗棠專辦浙事。可取決於呼吸之間。左宗棠前在湖南撫臣駱秉章幕中。贊助軍謀。兼顧數省。其才實可獨當一面。應請皇上明降諭旨。令左宗棠督辦浙江全省軍務。所有該省主客各軍。均歸節制。即無庸臣兼統浙省。籲懇天恩。收回成命。在朝廷不必輕假非常之權。在微臣亦得少安愚拙之分。其浙省軍事。凡臣思慮所能及。才力所能及。必與左宗棠竭誠合謀。不敢稍存畛域。如因推諉而貽誤。即求皇上按律治罪。臣不敢辭。臣忝任江督。三省巡撫提鎮以下各官。例得節制。載之會典。著之敕書。各文武亦均恪遵憲章。不必更加申誡。至袁甲三都與阿各路軍情。謹當隨時商辦。其江北皖北地方。文武臣已嚴飭。仍歸該大臣等節制。不得稍涉玩視。大抵用兵之要。貴得人和。而不尙權勢。貴求實際。而勿爭虛名。臣惟當與各僚屬同心圖治。共濟艱難。以慰先皇在天之靈。上佐聖主中興之業。伏懇皇上俯鑒愚忱。允臣所請。不勝感激悚懼之至。所有欽奉恩旨。瀝陳下情各緣由。謹繕摺由六百里覆陳。伏乞皇上聖鑒訓示。謹奏。

查覆江浙撫臣及金安清參款摺 咸豐十一年十一月二十五日

奏爲遵旨查明江浙撫臣暨金安清勸捐各情。據實覆陳。仰祈聖鑒事。竊十一月十五日。承准議政王軍機大臣字寄。十月十六日奉。上諭。『有人奏請密查江浙撫臣能否勝任一摺。據稱。『薛煥王有齡曠日持久。捷報無聞。現在浙省四面皆賊。萬一杭城有失。上海豈能獨安。該撫等雖勢處萬難。亟宜謀勇兼資。力除凶敵。』等語。薛煥前在蘇州府任內。聲譽頗著。及升任上海道。辦理關稅及外國事宜。亦臻妥協。惟該省軍務正當喫緊。督帶兵勇。或恐非其所長。且前據有人奏。『該撫在上海偏隅自固。日享安富。又稱上海離城三十里。卽有賊壘。官吏奔競。

如常。各等語。如果屬實。卽不能勝此重任。浙撫王有齡。頗有才具。前任蘇藩時。雖尙能籌辦軍餉。惟於浙撫一缺。未知能否勝任。以上二員。均著曾國藩悉心察看。據實具奏。」等因欽此。同日又承准議政王軍機大臣字寄。十月十七日奉上諭。「本日又有人奏。浙省軍務不振。請另簡賢員督辦一摺。據稱。『瑞昌樸忠素著。惜無智謀。王有齡但知理財。不嫻將略。其所信任屬吏。多係貪鄙之徒。但以培克夤緣爲事。大將如張玉良等。擁兵觀望。動輒挾制。本年四月間。金華失守。張玉良督率兵勇。恣情搶掠。該將軍等一味優容。不敢申明軍律。』各等語。王有齡疊被參劾。其平日不協輿情。已可概見。著該大臣仍遵前旨。確切查明。迅速具奏。又有人片奏。『江蘇巡撫薛煥。娛情古玩。不理軍務。其總辦糧臺之金安清。聲名狼藉。特與薛煥拜認師生。任意侵蝕糧餉。』各等語。並著曾國藩一併秉公。確切查明。據實覆奏。毋稍徇隱。」等因欽此。又十一月二十日。承准議政王軍機大臣字寄。十月二十五日奉上諭。「茲有人奏。『江蘇巡撫薛煥。自到任後。株守上海。莫展一籌。且收買寶玩。性耽麴蘖。並將丁憂候補鹽運使金安清。違制保奏。派伊勸捐。金安清於通泰設局。煊赫奢侈。逐戶搜括。怨聲鼎沸。』又有人奏。『薛煥自辦理通商以來。廣通賄賂。時輦金銀。贈遺權貴。軍務則不復一城。吏治則不辦一事。浙江撫臣王有齡。不以克復爲事。惟以暴斂爲能。其捐輸之入。作爲三分。一濟軍餉。一充私囊。一爲交結餽遺之用。該撫籍隸福建。運金歸里。輿論譁然。』各等語。江浙軍務孔亟。全賴封疆大吏。實力整頓。方能維持危局。保衛地方。果如所奏情形。營私納賄。惟願身家。又安望其奠民生而埽賊氛耶。著曾國藩將所參薛煥王有齡金安清各款。彙入前參各款內。一併秉公嚴密詳查。據實覆奏。毋稍徇隱。原摺片著鈔給閱看。」等因欽此。又十一月二十二日。承准議政王軍機大臣字寄。十一月初五日奉上諭。「茲復有人奏。『金安清在泰州令人向伊捐資投效。方得差委。牟利者爭相賄賂。委員及職員生監奉委者。各至百數。四出需索。民不聊生。指指營私。富戶小民。均被勒派。』等語。裏下河地方。逼近賊氛。豈可復令劣員。肆虐居民。以致人心時虞搖動。著曾國藩嚴密確查。彙併前案。據實參辦。毋許稍涉徇隱。」等因欽此。仰見皇上慎重疆寄。整飭官方。曷勝欽悚。臣查王有齡前任蘇藩。其籌餉之才。爲遠近所推許。其年升任浙撫。適值金陵師潰。蘇常並陷之時。敗將逃兵。萃於浙省。以萬難整馭之卒。又素無統轄之權。時勢之難。亦爲遠近所共諒。然使另練親兵。裁汰疲卒。亦未始不可以主而制客。轉弱而爲強。王有齡不諳軍情。但

求速效。整理尙未就緒。卽催令進圖嘉興。且言嘉郡卽日可克。臣於去夏頗以爲慮。曾奏明嘉興師疲。恐生他變。厥後嘉興果敗。王有齡不能嚴參以治罪。嚴州賊退。又復冒奏以飾功。於是將領狎而生玩。兵勇敗而轉刁。遂成不可制之象矣。逮至本年。金華之失。鬻谿之陷。兵圍仇殺而不能究。弁勇搶掠而不敢問。諭旨所詢。動受張玉良等挾制。係屬實在情形。今則賊氛環逼。餉項久虧。卽使杭省幸而保全。而數萬敗軍。亦斷非王有齡所能管轄。自去夏以來。浙餉月帶三十餘萬。大率取之寧波紹興。輸將不爲不盡力。紳士不爲不竭誠。乃王有齡奏參團練大臣邵燦。立予罷黜。其下委紳數人。皆革職永不敘用。其所參者。並非軍旅之大端。但爭體制之末節。以致寧紹衆紳。各懷公憤。痛恨次骨。外間相傳有「杭兵不許守紹。紹餉不准入杭」之說。馴至紹郡淪陷。杭省圍困。皆由官紳水火之所致。諭旨所詢輿論譁然者。或由於此。近年蘇浙官場陋習。以夤緣鑽刺爲能。以巧猾譎詐爲才。王有齡起自佐雜微員。歷居兩省權勢之地。往年曾帶浙員赴蘇。去歲又帶蘇員赴浙。袒庇私黨。多據要津。上下朋比。風氣日敝。其委員派捐。但勒限以成數。不復問所從來。委員既取盈於公數。又欲飽其私囊。股削斂怨。勢所不免。諭旨所詢屬吏多貪鄙之徒。但以揅克夤緣爲事。證以臣之所聞。殆非無因。至鈔關摺內所稱「捐輸之入。作爲三分。一濟軍輸。一充私囊。一爲交結餽遺之用。該撫籍隸福建。運金歸里。」各等語。非弔查卷宗。明察暗訪。不能悉其底細。臣處相隔較遠。道途久梗。尙無所聞。此遵查王有齡之大略情節也。江蘇巡撫薛煥。前在蘇州府任內。頗著循聲。在上海道任內。辦理關稅及外國事宜。亦臻妥協。及擢任巡撫。駐紮上海。陸續募勇四萬餘人。每月糜餉二十餘萬。不能專辦一路之賊。江蘇所存地方。惟鎮江揚州兩處。尙據形勢。該撫未嘗親至兩郡一行。又不能多濟餉項。以聯聲援。上年夏間。薛煥奏請通飭各路。禁用廣勇。而該撫信任之。曾秉忠馮日坤等所部。多係廣勇。縱兵擾掠。商民怨憤。曾秉忠之勇。搶劫洋船。釀成巨案。馮日坤之勇。在金山圍殺紳首團勇多名。目無法紀。薛煥莫可如何。滬城紳民。旣畏賊蹤之環逼。又虞兵勇之肆掠。日夕驚惶。不獲安處。諭旨所詢帶勇非其所長。株守上海。莫展一籌。三十里外。卽有賊壘等語。臣之所聞。大約相符。自蘇常失陷。各縣鎮市。流離轉徙。萃於上海一隅。又爲西洋各國交匯之所。人民如海。財貨如山。中外商賈文武員弁。肩摩轂擊。晝夜喧闐。地少員多。人浮於事。每有差委。不能不由營求而得。或并無可派之差。亦謀爲位置之法。輒復添一捐目。給一委札。其官職較大者。如奏派

金安清總辦餉局。奏免前藩司蔡映斗。首府吳雲。失守罪名。且委吳雲總辦捐局。此數人素工應酬。不愜人望。其所援引之人。類多夤緣之輩。諭旨所詢官吏。奔競如常。殆即此類也。上海既繁盛異常。蘇州之書籍字畫。自賊中販買而出。亦充積市肆之中。薛煥設立書畫局。多延畫工。購買名蹟。諭旨所詢日享安富。娛情古玩者。與臣之所聞相同。至鈔示摺內所稱。「辦理通商以來。廣通賄賂。時輦金銀。贈遺權貴。」等語。風聞薛煥九年由臬司進京。途次有失銀之案。在京有覬覦之情。此外別無所聞。此邊查薛煥之大略情節也。丁憂候補鹽運使金安清。聰明過人。好覽書籍。惟矜銜督術。專工揣摩。其辦事廣設方略。終鮮成效。前因勸捐軍餉。款目未清。經袁甲三奏參赴皖覈算。展轉營求。始得奏派南北籌餉局。自通泰設局。大開幕府。煊赫奢侈。原參摺內所稱。「令人向伊捐資投效。方得差委。爭相賄賂。委員生監。各至百數。四出需索。民不聊生。胥役人夫。相望於道。或派捐富戶。關稅餽賂。即可免捐。或挾嫌誣指。一經傳押。必至破家。」等語。證以臣之所聞。多相符合。其有無侵吞實跡。非弔查簿數。不能確知。此邊查金安清之大略情節也。以上三員。皆與臣無一面之識。斷不敢稍涉瞻徇。上蔽聖聰。惟臣與蘇浙相距甚遠。音書梗阻。不能詳查參證。亦未敢以臆見概人之生平。金安清才略頗優。而物議最劣。應請旨即行革職。撤去籌餉差事。不准仍留蘇境。以靖民心。而息浮言。王有齡辦理杭城防務。尙費苦心。惟用人或尙巧滑。取財間有怨言。薛煥偷安一隅。物論繁滋。蘇浙財賦之區。賊氛正熾。該二員似均不能勝此重任。應否降革之處。出自聖主鴻裁。所有遵旨查覆緣由。謹專摺附驛具陳。伏乞皇上聖鑒。訓示施行。謹奏。

保奏周騰虎等片 咸豐十一年十一月二十五日

再臣本年疊奉諭旨。飭令保舉人才。茲又欽奉寄諭。令保封疆將帥。臣自愧無知人之明。無儲才之素。不足以仰答聖主謙冲之懷。惟經濟以歷練而成。人才以獎借而出。苟有所聞。即當搜羅薦達。造就焉他日之用。去年常州之陷。守土官吏皆去。該郡士民尙能嬰城固守。與賊鏖戰多日。城破之後。各村鎮團練拒賊。如無錫蕩口等鎮。至今尙與賊相持不懈。是其中必有二三賢智爲之倡率。臣聞該郡素尙節義。其士子多好讀書稽古。研究事理。臣所知者。有候選主事周騰虎。疎通知遠。識趣閎深。候選同知劉翰清。監生趙烈文。博覽羣書。留心時事。監生方駿謨。不求聞達。行誼卓然。藍翎六品銜監生華衡芳。識絃從九徐壽。研精器數。博涉多通。此數人者。若令閱歷戎行。

廓其聞見。必可有裨軍謀。蔚爲時望。自常州淪陷之後。諸人多已遠避。周騰虎在浙江。劉翰清在山東。方駿謨在河南。其餘尙在本籍。應請飭下各省撫臣。訪求咨遣前來。俟到臣營數月之後。臣悉心察看。再行出具考語。奏請皇上量材錄用。是否有當。謹附片具奏。請旨。

苗沛霖應勦彭玉麟難離水營摺 咸豐十一年十一月十七日

奏爲遵旨籌商苗沛霖勦撫情形。並彭玉麟現帶水師。難赴北路。請旨另簡賢員接任皖撫。恭摺奏祈聖鑒事。竊臣承准議政王軍機大臣字寄。咸豐十一年十月十六二十二三二十五等日。欽奉四次諭旨。以苗沛霖攻破壽州。勦撫情形。飭臣妥商辦理。除咨請湖廣督臣官文主稿。會同臣與李續宜彭玉麟四銜覆奏外。臣查苗沛霖藉受撫之名。行謀叛之實。已數年矣。朝廷假爵賞爲羈縻。而彼即竊威權以脅衆。臣以恩義相勸誘。而彼即挾詐術以要求。梟獍之性。非可感化。徒以長其兇鋒。養成尾大不掉之勢。今長淮上游險要。如霍邱壽州懷遠各城。三河尖正陽關各處。苗沛霖均分黨佔踞。且欲下窺臨淮。上吞潁州光固。人心洶懼。逆跡昭彰。斷無再撫之理。袁甲三兵單餉絀。力實不足制之。近亦以該練應勦而不應撫。專函徧商臣等。約會楚師。併力夾擊。且請彭玉麟馳赴潁壽。就近會辦。臣再四籌度。苗沛霖羽翼已成。巢穴已固。南勾粵逆。西通捻匪。一經進勦。羣兇之交必固。戰爭之日方長。現在楚師勦辦髮逆。暨難同時並舉。須俟攻克廬州以後。與袁甲三臨淮之軍。聯爲一氣。乃可併力勦苗。庶局勢順而兵力較厚。至彭玉麟身任皖撫。自應親往北路督勦。惟潁亳一帶。苗捻各股。縱橫布滿。爲撫臣者須有陸路馬步強兵。乃足以立國威而定民志。彭玉麟素統水師。並未帶有陸兵。亦未在陸路打仗。一旦舍舟登陸。似覺用違其長。潁壽雖原有兵勇。驕疲日久。殊難得力。若另行招募。戰守皆不可靠。若調撥別部。恩信又不相孚。且現在得力之軍。皆分防最要之地。卽抽撥亦不能多。彭玉麟隻身前往。於事何濟。况水師轉戰數年。蕭清上游千餘里。實賴楊載福彭玉麟二人。互相維持。楊載福現奉恩准。回籍省親。明春假滿回營後。或陸軍下勦金陵。楊載福彭玉麟兩人者。當一赴下江。一留上江。或賊匪回窺楚境。兩人者當一援鄂江。一防皖江。江面太長。實非一人所能照料。彭玉麟一離水營。馳援潁壽。陸路難收夾擊之效。水師實有挫失之虞。是以該撫兩次奏請開缺。臣未便勒阻。並爲緘商袁甲三勿再奏催。可否仰懇聖恩。俯念北路防勦。關係至重。另簡素統陸兵威望卓著之

員。接任皖撫。俾彭玉麟仍帶水師。於南北大局。兩有裨益。所有遵旨籌商苗沛霖應勦情形。暨彭玉麟離水營各緣由。謹專摺由驛覆陳。伏乞皇上聖鑒訓示。謹奏。

浙省失守徽郡被圍通籌全局摺 咸豐十一年十二月十八日

奏爲浙江省城失守。徽州被圍。通籌全局。力圖補救。恭摺條陳。仰祈聖鑒事。竊臣連日承准議政王軍機大臣字寄。咸豐十一年十一月十一十二二十四十六等日。欽奉四次諭旨。以杭州省城被圍緊急。飭催左宗棠統師援浙。當即欽遵恭錄。移催左宗棠迅速啓行。先是浙江之賊。恐我軍進援。爲先發制人之計。於十一月十四日分爲兩大股。由淳安開化竄出。二十二日至徽境之街口。二十六日至深渡。副將張運桂派隊迎擊。大捷一次。小挫一次。僞輔王楊輔清又率寧郡大股。分兩路內犯。欲取徽州休寧各城。二十七日僞成天安桂遊。率衆萬餘。竄休境之屯溪。署總兵唐義訓擊走之。二十八日。又竄篁墩。張運桂督軍迎勦獲勝。楊逆同各股悍賊。又由南路逕撲徽郡。我軍撤回守城。自十二月初二日後。徽州被圍甚急。張運桂率勇堅守。屢次出擊獲勝。賊於城外分布築壘。不少卻退。臣思徽郡。爲由浙入江皖第一重門戶。我與賊所必爭之地。因調總兵朱品隆出嶺之師。兼程回援。復函商左宗棠順道由徽發夾擊此股。再進嚴州以援浙省。准左宗棠咨稱。已派老湘七旗。及駐防玉山之仁右營。前赴華埠。直隸州知州劉典帶七營。前赴婺源。防勦竄逆。方冀各軍併力擊退徽賊。即乘勢入浙。乃接據江蘇撫臣薛煥咨稱。浙江省城已於十一月二十八日失守。又接署皖南道姚體備稟。浙江潰兵。紛紛來徽。據稱浙省文武大吏。殉難甚多。其水陸兵勇。約有六萬。除陣亡及降賊者外。尚有萬餘人。沿途又被逆匪截去多名。等語。臣疊奉援浙之命。赴救莫及。大局決裂。應請旨將臣交部嚴加議處。現在浙蘇兩省膏腴之地。盡爲賊有。窟穴已成。根柢已固。賊數號稱五十萬。潰勇亂民。裹脅日多。既得逞志於浙。勢必上竄皖南。內犯江西。以擾我後路。而分我兵力。東南大局。收拾愈難。臣謹就愚慮所及。妄思補救之策。爲我皇上一陳之條列於後。

一。浙東之金華嚴州紹興寧波台州處州等府。先後失守。温州被土匪竄陷。雖有收復之說。料難終保。惟湖郡與海寧州兩城尙存。然皆孤懸賊中。亦無倖全之理。綜計全浙。惟衢州一府。可以圖存。臣擬令各軍堅守衢州。與江西之贛信。皖南之徽州。爲犄角之勢。先據形勝。扼賊上竄之路。左宗棠應暫於徽衢信三府間。擇要駐紮。

相機調度。總須先固江西皖南邊防。保全完善之地。俟微圍既解。立脚漸穩。兵餉調齊。再籌分路進剿。

一。閩浙督臣慶端。聞已進駐建寧。查浙省各郡之賊。由分水淳遂內竄。則徽州婺源當其衝。由開化江常內竄。則廣信玉山當其衝。若由遂昌龍泉至浦城。而竄江西之鉛山。福建之光澤。則浦城當其衝。左宗棠以數千人。分防徽信兩路。斷難兼顧。閩防擬請旨。敕下慶端。速派勁旅。嚴守浦城。俾賊不得由閩境而犯江西。

一。浙省將軍巡撫司道各官。聞多殉節。容俟查明。詳晰具奏。應請旨。迅賜簡放。各缺。查有廣西按察使蔣益澧。志勇素著。上年經臣奏調。帶勇來皖。奉旨允准。旋准廣西撫臣劉長佑函稱。暫留蔣益澧會攻潯樞。現潯梧兩郡均已克復。粵西漸就蕩平。擬懇聖恩。於浙江藩臬兩司內。將該員蔣益澧調補一缺。飭帶所部五六千人。迅速赴浙。隨同左宗棠籌辦防剿。可收指臂之助。又江蘇按察使湯雲松。久病廢事。難期振作。可否請旨。飭令赴部引見。查有候選道陳士杰。湖南桂陽州人。由戶部小京官在籍帶勇。歷著戰功。洊升道員。所部桂勇精悍得力。可否請旨。即將陳士杰擢授江蘇臬司。飭令帶勇四千名。馳赴安慶。聽候調遣。出自逾格。鳩慈。現在蘇浙糜爛。人皆視為畏途。惟有選擇能戰之文員。補授兩省之實缺。庶可漸集事。

一。浙省兵勇。向恃寧紹為餉源。今既被賊踞。全省糜爛。無可籌畫。除福建援浙之師。應仍由閩省籌款接濟外。左宗棠所部。及衢州原有各軍月餉無出。亟應另籌協款。查廣東繁富之區。現臻安謐。擬懇恩飭下廣東督撫。粵海關按月協撥銀十萬兩。或由江西轉解左宗棠營。或由海道駛運上海。由臣轉解左宗棠營。並請飭下福建督撫。閩海關按月協撥三萬兩。交左宗棠轉發衢州各營。臣與撫臣毓科仍於地丁釐金項下。源源協濟。以資騰飽。

以上四條。均係目前急務。至如何進取機宜。臣當與左宗棠悉心籌商。隨時會奏。謹將浙江省城失守。微郡被圍。通籌全局各緣由。繕摺由六百里加緊馳陳。是否有當。伏乞皇上訓示施行。謹奏。

裁撤江南團練大臣片 咸豐十一年十二月十八日

再臣承准議政王軍機大臣字寄。咸豐十一年十月二十三日奉。上諭。前因軍務未竣。各省需員辦理團練。准大學士周祖培等所奏。以毛昶熙杜綱晏端書龐鍾璐王履謙桑春榮劉澤等。先後辦理河南等處團練。連日有

人奏。各省設立團練大臣。諸多弊竇。擾害閭閻。請仍責成地方官辦理。以一事權。等語。除杜翻現已回京。本日並將桑春榮劉繹團練大臣降旨裁撤外。其江北團練大臣晏端書。江南團練大臣龐鍾瑑。聞其辦理團練。未能振作。是否仍須該員等經理。抑或即可裁撤。著會國藩薛煥體察情形。迅速具奏。一等因欽此。臣伏查團練之法。只能防小支千餘之游匪。不能勦大股數萬之悍賊。其練丁口糧若太多。則爲募勇之價相等。不必僅以團名。若太少。則與兵勇之價迥殊。斷難得其死力。其團局經費。若取之於丁漕釐捐四者之中。則有礙督撫生財之道。若設法於丁漕釐捐四者之外。則更無絲毫措手之處。事權既無專屬。剛柔實覺兩難。晏端書之在江北。不設餉局。但勸各邑築圩自保。龐鍾瑑之在江南。激勸鄉民。俾知同儕敵愾之義。辦理極有斟酌。惟目下賊數太多。逆氛正熾。斷非團練所能奏功。應俟賊氣漸衰。大功將竣。兵勇凱撤之際。然後辦團。以善其後。庶幾有益無損。晏端書龐鍾瑑清操雅望。內任最宜。應請皇上天恩。撤去團練差使。仍飭回京供職。所有江南北應行團練之處。即責成地方大吏。督率官紳。妥爲經理。所有遵旨體察情形。覆奏緣由。謹會同江蘇巡撫臣薛煥。附片馳奏。是否有當。伏乞皇上聖鑒訓示。謹奏。

王開化請卹片 咸豐十一年十一月十八日

再布政使銜花翎副選道王開化。爲已故按察使銜晉贈布政使副選道王鑫之從弟。年甫十七。卽從王鑫勦平湖南南路各逆。以善戰聞。嗣分帶湘勇。勦江西臨江吉安撫建諸賊。戰功卓著。王鑫故後。王開化與現任福建按察使張運蘭。分統所部。旋以病假歸。上年左宗棠奉旨襄辦軍務。延其入軍。總理營務。入江皖後。連克德興婺源兩城。去冬勦僑主將黃文金股匪。今春勦僑侍王李世賢股匪。入夏勦劉官方股匪。復建德縣城。勦婺源德興竄匪。均獲大捷。王開化之力居多。夏間追賊過猛。感受暑熱。久患瘧痢。仍復力疾從征。抵贛信後。醫治罔效。旋即身故。查該員厚重沈毅。其用兵每能以寡擊衆。雖矢石如雨之中。意思安閒。不異平常。至其摧鋒陷陣。飄發電舉。實育不足喻其勇也。三月十四日樂平城外之戰。賊衆共四十餘起。如蟻如蠅。聯互十餘里。西門一路尤厚。僑侍王賊營所在也。左宗棠初擬自當西路。王開化當中路。老湘營當東路。約定同時奮擊。王開化忽急起躍馬而馳。自出西路。而密屬直隸州知州劉典。隨左宗棠共出中路。蓋以西路賊多。慮左宗棠犯此重險。而願以身當之耳。卒

之三路皆捷。李逆被重創。賊膽由此喪盡。望風潰逃。竄入浙江。竇由王開化西路血戰所致。該員轉戰入載。勞績最多。至其器識端偉。性行淑均。爲左宗棠所敬服。軍中皆倚賴之。時事方艱。良材倏殞。可勝痛惜。據左宗棠咨報。並請奏加優卹前來。可否仰懇皇上天恩。准將布政使銜卽選道王開化照布政使軍營立功後病故例。從優賜卹予諡。以示褒獎之處。出自逾格鴻慈。謹附片具奏請旨。

遵保皖撫大員摺 同治元年正月初十日

奏為遵旨保奏皖撫大員恭摺覆陳仰祈聖鑒事竊臣於咸豐十一年十二月二十五日承准議政王軍機大臣字寄十二月十二日奉上諭「彭玉麟奏瀝陳下情請開缺專意勤賊一摺安徽巡撫現在簡用乏人著會國藩於所屬司道大員內擇其長於吏治熟悉軍情者不必拘定資格秉公保奏一二員候旨簡放再前任吉南鎮守道沈葆楨前有旨令赴該大臣軍營查看保奏該員於現在時勢應如何任用之處即著迅速奏聞」等因欽此又於同治元年正月初五日承准議政王軍機大臣字寄咸豐十一年十二月二十日奉上諭「彭玉麟奏皖撫宜帶陸兵該撫難離水營仍懇准令開缺等語著即會同會國藩李續宜等籌商人才薦賢自代即由會國藩迅速奏聞候旨簡放提督楊載福請假回籍著會國藩催令該提督迅速回營如彭玉麟可以赴任庶水師不致無人統帶賈臻奏探聞廬州業已克復現在該郡情形若何並著查明迅速具奏」等因欽此又同日承准議政王軍機大臣字寄十二月十八日奉上諭「廬州儘已克復多隆阿一軍自必乘勝追剿著會國藩即飭令該將軍渡淮進擊彭玉麟李續宜亦可飭統率楚軍各員繞出賊前迎頭遏剿」等因欽此仰見我皇上慎重要區虛衷博訪欽悚曷任竊臣前因彭玉麟難離水營業於上年十二月十七日專摺馳奏並請簡員接任皖撫在案彭玉麟疊次奏陳不能赴任係屬實情已在聖明洞鑒之中臣前與官文函商本有奏請李續宜仍任皖撫之意緣鄂省關係極重一時難覓替人既恐上侵朝廷黜陟之權又慮轉貽鄂疆未靖之患是以前摺中未敢冒昧陳陳茲疊荷溫諭囑咨臣反覆籌度所屬司道大員內實無素統陸軍者可勝皖撫之任查有前任雲貴總督張亮基久任封疆艱險備嘗威望素著咸豐二三年間在湖南巡撫署湖廣總督任內籌辦防剿布置得宜輿論翕服湘勇之初招赴省城訓練實自張亮基發其端故楚軍將弁樂為之用該員籍隸徐州於穎亳宿蒙等處地勢民情亦甚熟習又與袁甲三兒女姻親足資聯絡至湖北撫臣李續宜上年九月曾自行奏請回皖撫本任該員忠勇沈摯一則感文宗顯皇帝超擢之恩一則抱伊兄李續賓三河之痛常思奮身而赴義不願就易而避難其所部成

大吉蕭慶衍蔣燦學各軍。皆在皖境。可否仰懇聖恩。於張亮基李續宜二員中。特簡一人。爲安徽巡撫。當於大局有裨。如簡授張亮基爲安徽巡撫。應請旨飭令在於湖南募勇數千。帶赴六安一帶。仍責成湖北專濟餉項。如簡授李續宜爲安徽巡撫。亦應請旨飭令先駐六安一帶。責成湖北專濟湘勇全餉。湖北有事。責成李續宜回顧鄂省全境。並請即以張亮基爲湖北巡撫。與督臣官文會辦一切。庶足保楚北最要之區。張亮基曾任總督。以之補授巡撫。於例稍有未符。但體制本不甚遠。人地實在相宜。或可通融辦理。沈葆楨迭經檄催。尙未到營。臣於上年十一月二十五日。附片覆奏。該員堪膺疆寄。欽奉諭旨。簡授江西巡撫。計可迅速赴任。至賈臻所奏探聞廬州克復。並無此事。僞英王陳玉成受金陵賊酋僞旨。向以皖北爲分地。安慶復後。該逆卽退守廬郡。於近城地方。大肆焚掠。多攜糧米入城。意圖死守抗拒。並分遣僞公天安陳姓。僞則天義梁成福。僞傑天義賴文光等。盤踞廬郡北鄉五十里埠。與城賊相犄角。多隆阿前隊方抵中派河。因廬境蹂躪過久。人煙稀少。軍糧無可採辦。仍須由鄂省解運。不免輾轉稽延。臣現與官文李續宜等。籌派委員。速行運濟。正月內必可進攻廬州。如廬城不復。勢不能繞赴淮北。救援潁州。除俟如何攻勦情形。再由官文等會銜馳奏。並飭催楊載福迅速回營外。所有遵旨保奏皖撫大員。恭摺由驛六百里覆陳。伏乞皇上聖鑒訓示。謹奏。

欽奉恩諭再辭節制四省摺 同治元年正月初十日

奏爲欽奉恩諭。再陳下情。恭摺仰祈聖鑒事。竊臣於去年十二月二十七日。准兵部火票遞回臣前奏。瀝陳下情。原摺。承准議政王軍機大臣字寄。咸豐十一年十二月十四日奉上諭。一。會國藩奏接奉節制江浙等四省軍務諭旨。瀝忱懇辭一摺。覽奏均悉。前因江浙等省。軍情喫緊。特諭會國藩統轄節制。以期事權歸一。可以通籌全局。茲據該大臣瀝陳各情。謂造制浙軍。不若以左宗棠專辦浙事。請收回成命。各等語。謙卑遜順。具見惻忱真摯。有古大臣之風。深堪嘉尙。惟左宗棠業已降旨。令其督辦浙江軍務。並准其自行奏事。江浙軍情。本屬相關一氣。凡該大臣思慮所到。諒無不協力同心。相資爲理。節制一事。該大臣其毋再固辭。一。等因欽此。臣自顧何人。仰蒙溫語褒嘉。委任專壹。跪讀之下。感悚莫名。臣自聞杭州失守後。業將力圖補救各情。於十二月十八日。條列具奏。目下浙省僅存衢州溫州湖州三府。及海寧州一城。溫州土匪紛集。恐難終保。湖州海寧州孤懸賊中。無兵赴援。亦

斷無倖全之理。總計全浙。惟衢州一府。可以圖存。然欲保衢州。必先守定江西廣信玉山。而後有運糧之路。欲復杭省。必由徽州以攻嚴州。而後有進兵之路。是圖浙之道。守衢與攻嚴。二者並重。闕一不可也。臣現飭兩江總糧臺籌撥餉精軍火。接濟衢防兵勇。並派員於玉山設立轉運局。飭令李定太統領衢防。堅守三月。以待援兵。至進攻嚴州。則專賴左宗棠一軍。必先掃清歙縣婺源之零股。攻克開化遂安之堅城。乃能達於嚴郡。目前兵力尙單。難遽深入。而賊焰方盛。亦斷不容我深入。計今歲春間。必在開遂歙婺一帶。戰爭不休。須俟廣西臬司蔣益澧一軍到衢後。衢嚴兩路。分途并進。庶幾貼脚漸穩。取勢漸緊。臣與左宗棠往返熟商。所以規復浙江者在此。所以保全江西皖南者亦在此。愚慮所及。舍此別無謀浙之方。惟當竭誠合謀。斷不敢稍存畛域。至於節制四省之名。仍懇聖恩收回成命。臣非因浙事既已決裂。預存諉過之意。倘左宗棠辦理毫無成效。臣當分任其咎。所以不願節制四省。再三瀆陳者。實因大亂未平。用兵至十餘省之多。諸道出師將帥聯翩。臣一人權位太重。恐開斯世爭權競勢之風。兼防他日外重內輕之漸。機括甚微。關係甚大。區區愚忱。仰祈聖明鑒納。無任惶悚懇切之至。所有欽奉恩諭。再陳下情緣由。謹專摺由驛具陳。伏乞聖鑒訓示。謹奏。

選保水師總兵摺 同治元年正月初十日

奏爲遵旨保舉水師總兵。仰祈聖鑒事。竊臣於上年五月間。准兵部咨咸豐十一年四月十三日內閣奉上諭。現在記名水師總兵人員。將次用竣。著兩江閩浙兩廣總督。於水師副將內。遴選堪勝水師總兵者。各保二三員。迅速送部引見。候旨記名。以備簡用。不得以無員可保。一奏塞責。其水師參將游擊各員。如有材藝出衆。可備器使者。並著核實保奏。毋拘資格。欽此。一轉行到臣。遵於所部水師各營將領中。詳加察看。未敢冒濫具奏。恐負朝廷慎簡將材之至意。茲查得現保提督銜以總兵儘先題奏之李朝斌。總兵銜儘先選用副將喻俊明。任星元。記名總兵丁泗濱。該四員或由行伍。或由勇目。皆自臣設立水師。卽隸部下。身經百戰。歷保今職。現均管帶水師一營。防勦蕪湖魯港及東西梁山一帶賊匪。臣細察該員等。在營多年。膽識俱優。勇敢沈著。實堪勝總兵之任。合無仰懇聖恩俯准。挨次簡放總兵。以勵戎行。目下防勦喫緊。實難循照常例。送部引見。俟蒙俞允簡用後。再由臣隨時酌量辦理。所有保舉水師總兵緣由。謹繕摺由驛馳陳。伏乞皇上聖鑒訓示施行。謹奏。

請優卹羅邊殿王有齡片 同治元年正月初十日

再上年二月間。浙江省城被陷。前撫臣羅邊殿殉難。經杭州將軍瑞昌奏奉上諭。羅邊殿官聲素好。到浙後頗能實心任事。著照巡撫例。從優賜卹。一等因欽此。維時臣駐軍宿松。適羅邊殿之子候選員外郎羅忠祐扶柩回籍。赴巨鹿。呈稱杭州被後。羅邊殿之妻徐氏。孀女陳羅氏。族孀姪婦周氏。及雇婦金梅氏。家丁顧斌均。同時殉節。經臣會同前湖北撫臣胡林翼。於五月初三日。據情奏懇旌卹。奉硃批。一已有旨。欽此。旋閣部鈔。御史高延祜奏參。奉旨將羅邊殿卹典撤銷。臣查浙省向來供給寧國一軍。恃以堵禦門戶。故省城久不設備。羅邊殿到任未及三月。方思整軍選將。自固邊防。乃大股賊即由寧國界內竄入。其各似難獨歸於該撫。及至城破身殉。妻女眷屬。相率就義。實堪矜憫。軍興以來。凡疆吏守城殉節。皆得迎靈卹典。卽浙省殉難紳民。亦先後查明議卹。獨邊殿孤忠盡瘁。未荷褒崇。臣竊惜之。該撫由進士知縣外任二十餘年。歷著循績。臣駐紮宿松。曾赴弔羅邊殿之家。見其家無長物。環堵蕭然。家屬衣食。不甚充裕。既歎其清操之過人。復欽其臨難之不苟。粵匪蹂躪。各省有守土之責者。才略有短長。戰守有利鈍。但能以死報國。卽已克盡人臣之道。不必更爲苛刻之論。高延祜一時憤激。持論殊欠公允。伏懇皇上查照先皇帝初次諭旨。仍飭將羅邊殿從優賜卹。並將隨同殉難之妻女姪婦及雇婦家丁。一併旌卹。以彰忠節。庶幾是非不淆。紀綱常振。至此次浙省再陷。臣處探聞。瑞昌王有齡均已殉難。與薛煥咨報相同。瑞昌忠勳最著。自必仰蒙恩卹。惟王有齡迭被參劾。臣於上月二十五日。覆奏摺內。聲明該撫辦理杭城防務。尙費苦心。茲以糧盡援絕。見危授命。臣斷不敢以一眚掩其忠節。該撫平昔苛派捐餉。嚴劾紳士。杭州之人。感其死守。紹興之人。恨其暴斂。難保無身後之訾議。應請聖主憫念時艱。表揚忠烈。並將王有齡俯賜優卹。爲封疆大臣以死勤事者勸。臣愚昧之見。是否有當。伏乞聖鑒訓示施行。謹附片具奏。

近日各路軍情片 同治元年正月初十日

再近日各路軍情。僑輔王楊七麻子攻圍徽州。環逼月餘。斷我餉道。張運桂老湘營一軍。堅守於內。朱品隆唐義訓二軍。援勦於外。臘月初八至二十六日。六次大戰。屢破屯溪岩市等處堅壘。至除夕止。運道已通。徽郡解圍。又另股賊從徽南馬金嶺而來。冀截官軍援郡之路。亦經左宗棠擊退。目下徽州全府肅清如常。左宗棠一軍因援

勦徽州。移駐婺源。分紮白沙龍灣等處。飽超一軍。進攻寧國。因羣賊窟聚青陽城內。不克遽破。又朱品隆回救徽州。不克會勦嶺外。是以中隔兩城。不能速援寧國。會國荃一軍。現在分守七處。應俟新軍募到。再行進攻。和州巢縣一帶。李鴻章一軍。現在趕緊募練。應俟二月齊集。再行駛赴鎮江上海一帶。除浙江軍情。另摺具奏。徽州戰狀。容日續奏外。所有各路軍事。頭緒繁多。理合附片。略陳梗概。伏乞皇上聖鑒。謹奏。

參翁同書片 同治元年正月初十日

再前任安徽巡撫翁同書。咸豐八年七月間。梁園之挫。退守定遠。維時接任未久。尙可推諉。乃駐定一載。至九年六月。定遠城陷。文武官紳。殉難甚衆。該撫獨棄城遠遁。逃往壽州。勢窮力絀。復倚苗沛霖爲聲援。屢疏保薦。養癰貽患。紳民忿憾。遂有孫家泰與苗練仇殺之事。逮苗逆圍壽。則殺徐立壯孫家泰。蒙時中以媚苗。而並未解圍。壽城既破。則合博崇武慶瑞尹善延以逼苗。而藉此脫身。苗沛霖攻陷城池。殺戮甚慘。蠶食日廣。翁同書不能殉節。反具疏力保苗逆之非叛。團練之有罪。始則奏稱苗練入城。並未殺害平民。繼則奏稱壽州官紳被害。婦女殉節者。不可勝計。請飭彭玉麟查明旌卹。已屬自相矛盾。至其上年正月。奏稱苗沛霖之必應誅勦一摺。早已膾炙人口。有「身爲封疆大吏。當爲朝廷存體制。兼爲萬古留綱常。今日不爲忠言。畢生所學何事。」等語。又云。「誓爲國家守此疆域。保此殘黎。」儼然剛正不屈。字挾風霜。逮至九月。壽州城破。翁同書具陳一摺二片。則力表苗沛霖之忠義。視正月一疏。不特大相矛盾。亦且判若天淵。顛倒是非。熒惑聖聽。敗壞綱紀。莫此爲甚。若翁同書自謂已卸撫篆。不應守城。則當早自引去。不當處嫌疑之地。爲一城之主。又不當多殺團練。以張叛苗之威。若翁同書既奉諭旨。責令守城。則當與效死。不當濡忍不決。又不當受挾制而草奏。獨宛轉而偷生。事定之後。翁同書寄臣三函。全無引咎之辭。廉恥喪盡。恬不爲怪。軍興以來。督撫失守。逃遁者皆獲重譴。翁同書於定遠壽州兩次失守。又釀成苗逆之禍。豈宜逍遙法外。應請旨。卽將翁同書革職拿問。赦下王大臣九卿。會同刑部議罪。以肅軍紀。而昭炯戒。巨職分所在。例應糾參。不敢因翁同書之門第鼎盛。瞻顧遷就。是否有當。伏乞皇上聖鑒訓示。謹附片具奏。

謝協辦大學士恩摺 同治元年正月二十二日

奏爲恭謝天恩。仰祈聖鑒事。竊臣接准兵部火票。遞到同治元年正月初一日內閣奉上諭。一會國藩著以兩江總督協辦大學士。欽此。一聞命。感激莫名。當卽恭設香案。望闕叩頭謝恩。伏念臣材識凡庸。謬膺重寄。從軍數載。功寡過多。前歲擢任兩江。至今無一將一兵。達於蘇境。下不克慰萬姓雲霓之望。上不克分九重宵旰之憂。雖寬政之俸數。實悚惶而無地。迺於聖皇御極之初。元歲履端之吉。特頒丹詔。協贊黃扉。仍領兼圻。並司九伐。自顧何人。膺茲殊寵。竊以大亂未平。金陵未復。正國家宏濟艱難之候。豈臣子濫邀異數之時。臣惟有殫竭愚忱。周咨忠益。當枕戈而待旦。期作楫而濟川。庶以仰答高厚鴻恩於萬一。所有微臣感激下忱。理合恭摺叩謝天恩。伏乞皇上聖鑒。謹奏。

金陵未克以前請不再加恩臣家片 同治元年正月二十一日

再密陳者。現在金陵未復。寇勢方張。軍事反覆無常。正恐利時少而鈍時多。臣忝膺重任。日夜憂惶。除浙江已陷。苗練已叛。難遽補救外。卽上而皖南江西。下而鎮江上海。亦俱有岌岌可危之勢。臣分內之事。尙未知成敗何若。乃自去秋以來。疊荷鴻恩。臣旣蒙賞加太子少保銜。又蒙飭諭節制四省。茲又拜協辦之命。臣弟國荃旣蒙賞穿黃馬褂。又蒙賞頭品頂戴。茲又拜浙江按察使之命。一門之內。數月之間。異數殊恩。有加無已。感激之餘。繼以悚懼。誠恐軍事一旦疏失。卽加倍譴責。猶有餘咎。臣本擬恭疏辭謝。以除授參政大典。料難收回成命。又以甫經兩次辭節制四省之權。不敢更疏瀆辭。近於矯情而釣譽。惴慄旁皇。不知所措。理合據實陳明。懇求皇上念軍事之靡定。鑒愚臣之苦衷。金陵未克以前。不再加恩於臣家。是卽所以保全微臣之功名。而永戴聖主之恩眷矣。又前此疊奉諭旨。飭臣保薦江蘇安徽巡撫。頃復蒙垂詢閩省督撫。飭臣保舉大員。開列請簡。封疆將帥。乃朝廷舉措之大權。如巨愚陋。豈敢干預。嗣後臣如有所知。堪膺疆寄者。隨時恭疏入告。仰副聖主旁求之意。但泛論人才。以備擇探則可。指明某缺。徑請遷除則不可。不特臣一人爲然。凡爲督撫者。皆不宜指缺保薦督撫。蓋四方多故。疆臣旣有征伐之權。不當更分黜陟之柄。在聖主虛衷訪問。但求投艱而邁大。不惜舍己而從人。惟風氣一開。流弊甚長。辨之不可不早。宜預防外重內輕之漸。兼以杜植私樹黨之端。其督撫有任可履者。不准遷延不到。亦不准他處奏留。庶幾紀綱彌肅。朝廷愈尊。是否有當。謹一併密陳。伏乞皇上聖鑒。謹奏。

議覆借洋兵勦賊片 同治元年正月二十二日

再臣欽奉寄諭。洋人之在滬者。恐不足恃。其與我和好。究竟惟利是圖。一有事機喫緊之時。往往坐觀成敗。若欲少藉其力。必至要結多方。有情理所斷不能從之處。昨因薛煥有據蘇省紳民呈稟。請借洋人剿賊之奏。當經從權諭令該撫熟計。以期無拂輿情。諒該大臣早能洞悉。洋人既不足恃。仍須該大臣酌派名將勁兵前往。方萬全無患。等因欽此。臣於上年臘月初四日接蘇州紳士潘曾瑋等信函。商借洋兵之事。臣比復函言。寧波上海皆係通商碼頭。洋人與我同其利害。自當共爭而共守之。蘇常金陵本非通商子口。借兵助勦。不勝爲笑。勝則後患不測。目前權宜之計。祇宜借守滬城。切勿遽務遠略。謂金陵蘇常可以倖覈。非徒無益而又有害。既已借兵守滬。則當坦然以至誠相與。虛心相待。不可稍涉猜疑。等語。函復該紳。並咨明撫臣薛煥在案。頃於正月十八日。又接潘曾瑋等函牘。業已設立公局。會同英法二國防守上海。惟又稱。洋兵調齊之後。勢難中止。不僅助守上海。並將助勦蘇州。等語。臣之愚見。借洋兵以助守上海。共保華洋人之財則可。借洋兵以助勦蘇州。代復中國之疆土則不可。如洋人因調船已齊。兵費太鉅。勢難中止。情願自勦蘇州等處。我中國當以情理阻之。婉言謝之。若該洋人不聽禁阻。亦須先與訂定中國用兵。自有次第。目前無會勦蘇州之師。即克復後亦難遽撥助守之師。事成則中國不必感其德。不成則中國亦不分其咎。英法二國素重信義。一一先與說明。或不因見德於我而反致生怨。是否有當。伏乞聖鑒訓示。除臣處守滬之兵。俟李鴻章到鎮。陳士杰到皖。另行續奏外。理合附片具陳。謹奏。

徽州解圍摺 同治元年正月二十二日

奏爲徽州被圍月餘。我軍內外夾擊。屢獲大捷。立解城圍。恭摺縷陳。仰祈聖鑒事。竊僞輔王楊輔清率衆圍徽。業於上年十二月十八日具奏。厥後破賊解圍。又於本年正月初十日附片略陳。並聲明咨日續奏戰狀在案。先是該逆大股。於徽城南北修築營壘。意在挑戰。張運桂督老湘營堅守。以靜制動。十二月初八日。密商各旗先擊南門賊營。斃賊甚多。又分出西北門誘賊過河。我勇佯退。俟羣賊追迫。齊出大隊。分三路進。猛戰半時。斬擒三四百名。鎗傷千餘名。初十日賊衆圍撲城外。一三三旗營牆。我軍埋伏夾擊。轟斃四五百名。是夜復選奮勇總城燒賊

踞房。傷賊無數。擒殺三十餘名。十六日城內外各營同時出攻北門賊壘。該賊憑牆死守。我軍奮勇齊進。一壘既破。各壘慌亂。連燬賊營五座。屍橫枕藉。無一得脫。南路援賊蜂擁而來。彼此猛撲。一二十次。斃悍賊四百名。生擒百餘。其擊敗之賊分股東趨。又與嚴州大股併竄屯溪及岩市街潛口一帶。以阻徽軍糧路。自初八至二十六日。運道阻塞。文報亦或通或梗。張運桂以圍困日緊。時時出城攻打。以接外援之氣。掘壕灌水。以防地道之謀。雪夜滅燈。露立堞口。以防扒城暗襲之計。二十日復令一二三旗傍城直上。四五旗沿河包抄。六七八旗及左右營營中布陣。餘皆留守城闔。我勇齊抵賊壘。施放火器。賊紛紛棄營而遁。傷傷約二百名。此徽州城內張運桂一軍戰守之情形也。朱品隆一軍前經奏明出攻石埭。與鮑超會勦寧國。自聞徽州之警。臣調令回軍入援。初八日進嶺。十三日馳至休寧。與署總兵唐義訓商援徽之法。以疏通糧路爲急。議定先勦屯溪。次勦潛口。岩市之賊。十七日兩軍齊赴屯溪。朱品隆自左路進。唐義訓自右路進。先破街口一卡。旋攻毀河邊四壘。斬賊約五百人。追賊溺斃者尤多。賊已退遁。是夜復回踞該處。十九日朱品隆設隊將石橋潛口賊巢節節掃盪。擒斬無算。二十二日辰刻。岩市大股直撲萬安街。是時官軍方派三營護糧赴徽。賊占萬安街則歸路已斷。朱品隆立派六成隊分路出擊。該逆先由左路抄入。朱聲隆迎敵破之。山後之賊。又換隊衝出。敗賊回旗並進。朱品隆督飭各營拚命力堵。幾不能支。適解米各營均回助戰。賊始卻止。唐義訓亦派隊援助。逐賊東去。殺斃約三百名。此朱品隆唐義訓兩軍援徽力戰之情形也。張運桂以岩市街被賊蹙踞。糧路不通。必須合力勦退。乃可固軍心而保要郡。密飭總兵黃萬友率左營及六七八旗出隊。間道馳赴休寧。會商朱唐兩鎮兜勦岩市之賊。二十四日辰刻抵休。連日風雨不息。二十日夜少霽。張運桂料詰朝必有大戰。遂派隊往潛口迎護糧藥。並遙爲策應。二十六日黃萬友唐義訓由潛口左路進。朱品隆由中路進。岩市之賊分路來撲。約二萬餘。排列五六層。分布三四里。朱品隆先從街口接仗。破堅卡而入。唐義訓黃萬友乘勝從街前後包抄。連燬賊壘十餘座。斬賊三千餘人。奪獲旗幟印憑驛馬糧米無數。楊逆受傷逃出。餘匪退向篁墩。追殺數里。天晚收隊。二十七日以後。大雪三晝夜。平地深四五尺。道路阻絕。人馬難行。該逆經此重創。無糧可據。遂於除夕冒雪向遂安淳安退去。徽城各門之賊亦於二十九三十日全行遁去。郡城解圍。此徽休各軍會勦岩市立解重圍之情形也。伏查僑輔王率五六萬悍衆。分布徽郡岩市屯溪各處。

又另股由績溪嚴州繼進。欲乘浙省全勝之勢。攻陷徽郡。由皖入江。計甚狡毒。仰荷皇上威福。將士用命。內守外援。連戰皆捷。二十六日諸軍會勦。尤能大挫兇鋒。左宗棠一軍。亦於二十六日在婺浙交界之大鱗嶺酣戰獲捷。遂使各路悍賊負創遠遁。微圍立解。全境肅清。實於大局有裨。各營於風雪嚴寒之際。奮力苦戰。著有微勞。總兵張運桂係臬司張運蘭之胞弟。因其兄抱病離營。代統其衆。調度得宜。應請賞加勇號。衢州鎮總兵朱岳隆請賞加提督銜。署皖南鎮總兵唐義訓請交部從優議敘。提督銜記名總兵劉松山。總兵朱紹輝劉光明。均請交部從優議敘。記名總兵黃萬友劉開俊。均請賞加提督銜。總兵銜副將葉明瑞賀國秀。均請以總兵記名簡放。副將銜參將張添習。請以副將儘先選用。總兵銜江西推補副將沈寶成。請以總兵記名簡放。記名總兵胡暉堂。請賞加勇號。遊擊朱步青。請以參將留於安徽。儘先補用。其餘出力員弁。可否容臣查明。擇尤請獎。張運桂所部將弁。陣亡四十四員。朱岳隆所部將弁。陣亡二員。另行開單。請旨飭部議卹。所有徽州各軍獲勝解圍各緣由。專摺由驛具陳。伏乞皇上聖鑒訓示。謹奏。

籌辦江浙軍務摺 同治元年正月二十二日

奏爲遵奉疊次諭旨。籌辦軍務。恭摺分晰覆陳。仰祈聖鑒事。竊咸豐十一年十二月十七日。奉上諭。『有人奏蘇常淪陷逾年。請亟圖克復等語。原摺所稱。左宗棠抵浙得勝後。移兵由嘉興進攻。另派一得力之將。由太湖進攻。加以薛煥由上海進攻。爲三路之兵。是否可以照行之處。著迅速妥籌辦理。』等因。欽此。又同治元年正月初九日。承准咸豐十一年十二月二十五日寄諭。『浙江省城失守。左宗棠已授浙江巡撫。刻下既已抵浙。著即會合閩師。分道進攻。毋令該逆久踞。曾國藩飭令鮑超進攻寧國。以便進窺浙省。爲左宗棠後路聲援。此時賊中悍匪。嚮聚杭城。蘇常守禦必懈。若能分兵直搗蘇常。便可由嘉湖以扼杭城之背。使該逆應接不暇。未始非出奇制勝之策。著會國藩薛煥酌度情形。妥籌辦理等因。欽此。』臣查杭州未失之先。左宗棠由徽境進援。中間節節爲賊所阻。尙未能速達杭州。更何能繞進蘇常。至杭州既失以後。左宗棠於十二月杪戰勝於徽浙交界之大鱗嶺。甫解徽郡之圍。擬由徽郡進攻嚴州。以扼杭省之皖。上以作衢州之蔽。目前謀浙之道。舍此別無長策。惟行軍自有次第。必須攻克開化遂安等城。乃有赴嚴之路。必須留守婺源華埠等處。乃無抄後之虞。臣於本月初十日。奏明

須俟蔣益澧一軍到衢。分路進攻。非過於持重。故事遷延也。實因賊數太多。佔地太廣。動輒以長圍困我。若非左宗棠直搗嚴州。恐衢州終困於長圍之中。若無蔣益澧續進常玉。恐左宗棠亦將困於長圍之中。反覆籌算。不得不審慎而出於此。至鮑超一軍。與賊搏戰於青陽城下。不能遽克。即使克復青陽。而尚有石埭涇縣等城。爲賊所踞。未能遽抵寧國。又安能進援杭湖。以臣所聞。蘇常之賊。守禦並未少懈。似尙無機可乘。縱有可圖之機。而左鮑兩軍。隔蘇常各八九百里。必經過江南十數縣有賊之地。前有堅城。後無糧路。將軍心之立潰。實寸步而難行。臣之愚見。必俟左宗棠圍攻嚴州。鮑超進抵寧國。浙事乃有下手之處。此籌辦浙江軍務之大略也。又正月初四日。承准十二月十七日寄諭。一鎮江逆匪疊聚。勢甚危急。都與阿雖經派兵赴援。一時未能擊退。昨據會國藩奏稱。擬派道員李鴻章統帶水軍。並陸軍六七千名。馳赴鎮江。已諭令照擬辦理。著官文會國藩迅速會商。如有可籌撥兵勇。即派委員統帶。交都與阿嚴密布置。一等因欽此。又正月初八日。承准十二月二十一日寄諭。一翁心存奏力保通泰克復蘇常。請飭派一素能辦賊之員。馳赴通泰。由江陰常熟進搗蘇常。宋晉則請飭都與阿選派勁旅。由常熟丹陽等處。分道進攻。並先期約會薛煥派員激勵義團。隨同勦賊。其單開各條。尤爲周密。即著會國藩都與阿薛煥按照所奏各情。悉心會商。會國藩能否派員前往。都與阿薛煥應如何會合進兵。均著迅速籌辦。以慰民望。以紓朕南顧之憂。至用人爲當務之急。翁心存等所稱。知府周沐潤。知縣劉郁賢。趙秉鏞。博士趙忠建等。其才是否足資任用。並著會國藩等確實查明。量材差遣。一等因欽此。又正月初九日。承准十二月二十六日寄諭。一都與阿奏進攻天長獲勝。並江寧逆援渡江一摺。都與阿所部水陸兵勇。本不甚厚。揚城實江北要區。會國藩自當通籌兼顧。聯絡聲勢。前諭令將江南北等處餉需。通籌協濟。並諭兩淮鹽務。派員整頓。諒已設法經理。若得此巨款。不必專仰給湖北江西餉項。自可裁汰疲弱。添募新勇。撥給都與阿統帶。以固揚防門戶。至上海關稅。每歲可得數百萬兩。尤爲餉源所自出。該大臣前奏派兵數千人助守。殊未籌及進攻之策。昨因諭會國藩統帶老勇八千名赴滬。以爲力保該大臣餉源起見。且可進規蘇常。現江浙偏地賊氛。江南只有鎮江一隅。爲進兵適中之地。該大臣前奏李鴻章水陸各軍。著迅速調撥布置。起程抵鎮後。即飛速馳奏。遲則此著又恐落後。該大臣身任統帥。事非越俎。亦無旁貸。不必稍避嫌怨。總期於事有濟。江浙等處軍務。朕惟會國藩是賴。所有一切布置。

情形。即著迅速覆奏。」等因欽此。又承准正月初七日寄諭。「現在賊勢趨重鎮江。而金陵蘇常各匪。復圖竄擾江北。李鴻章所統水陸各軍六七千人。如能早行趕到。不獨鎮城可資保衛。亦可壯江北聲勢。著會國藩催令該員。迅即起程。無稍遲緩。」等因欽此。臣查翁心存所奏。請臣派員馳赴通泰。乘虛由江陰常熟進搗蘇常。如或不能。則力保裏下河數百里沃壤。遏賊北趨。宋晉所奏。請都與阿派兵由靖江泰興分進江陰常州各條。均屬詳慎周妥。惟都與阿一軍。須先肅清江北。俾後路無牽制之虞。現聞天長六合均經克復。江北僅浦口江浦兩城。如即乘勢攻克。上可逼會國荃無爲運糧各軍之氣。下可聯袁甲三臨惟滁州各軍之援。則江北片段既成。根基既固。然後會合上下游。分路規取南岸。方不致凌躡無序。自古江南用兵。以鎮江爲險要。目前局勢。鎮江尤屬必爭之地。若圖金陵。則俟鮑超一軍攻克寧國後。由東壩禦陽進。而鎮江即出兵會之。若圖蘇常。則俟揚州一軍肅清江北後。由靖江泰興進。而鎮江亦出兵會之。是以臣前奏李鴻章統帶水陸。下駐鎮江。原爲將來進取地方。惟鎮江現有馮子材黃彬等軍。如果扼守得力。不須添換李鴻章或移駐通泰。或駛往上海。應俟該員抵鎮後。察看情形。再行具奏。其兩淮鹽務。亦可就近與喬松年設法整頓。但江運未通。未必即有鉅款可指。現催令該員趕緊募練。惟勇並酌撥湘軍數營。如有火輪夾板船可雇。即由水路前進。否則陸師緣北岸前進。二月杪當可成行。會國荃新募到。擬進攻巢縣和州一路。通下游鎮揚各軍之氣。仍固上游無葉一面之防。未便遠赴上海。顧彼失此。至上海鮑源所出。關係亦重。臣已另片陳明。聯絡洋人。協力守禦。或派陳士杰一軍赴滬。應俟陳士杰到皖。李鴻章到鎮以後。續行具奏。至松滬現有兵勇疲弱頗多。應酌加裁汰。以節糜費。而收實效。上海縣知縣劉郁膏深得民心。常州府知府周沐潤才略頗優。並知縣趙秉鎔紳士趙忠建等。均在下游。應交李鴻章察看任用。此籌辦江蘇軍務之大略也。臣才識素拙。仰蒙聖主信任之專。斷不敢稍避嫌疑。亦不敢坐失機宜。惟江浙賊勢浩大。盡占富庶之要區。廣收官軍之降卒。財力五倍。人數十倍。若非慎以圖之。不特蘇浙難克。即皖南江西且有疆土日蹙之虞。過求速效。以至僨事。轉非所以仰慰慈廬。所有遵旨籌辦江浙軍務緣由。專摺由驛覆陳。伏祈皇上聖鑒訓示。謹奏。

鮑超軍在青陽大捷片 同治元年正月二十二日

再鮑超一軍。十二月初進紮青陽城下。初七日該逆乘夜撲營。經我軍轟退。並伏兵追殺獲勝。初九日該逆分四路來撲。各營分路迎擊。斃賊數百。詎石埭太平大股賊援齊至。築壘十餘座。與城賊相犄角。十一日鮑超率馬步由東北門進剿。逆家列隊迎拒。鏖戰兩時。賊大敗。倚壘開放鎗礮。各營奮勇前進。穿過逆壘。橫衝賊隊爲數段。賊敗而走。我軍四面兜剿。當將東北門賊壘全行剗平。一股入城死守。一股往石埭大路逃去。鮑超督軍追殺十五里。擒斬二千餘名。總兵張玉田。副將唐仁廉力戰受傷。二十一日城外復添賊壘二座。二十二日鮑超督軍燬平之。惟青陽爲寧國最要門戶。該逆屢次敗衄。仍欲併力苦守此城。以梗我師攻寧之路。除飭鮑超設法攻取外。所有陣亡之守備唐泗和韓玉庭。千總余三友。把總黃明漢鄭崇友杜得勝周光元。璩大勝等有貴。外委王爲美鄧必勝等十一員。應請飭部照例議卹。附片具陳。伏乞聖鑒訓示。謹奏。

遵旨通籌全局摺 同治元年二月初二日

奏爲遵奉諭旨。通籌全局。恭摺覆陳。仰祈聖鑒事。同治元年正月二十四日。承准議政王軍機大臣字寄。正月十三日奉上諭。一會國藩左宗棠李續宜等。均負時望。卓著戰功。疊經先後簡任督撫。畀以重任。會國藩節制四省。左宗棠雖簡任浙撫。並諭以不必爲地方職守牽制。復因皖事孔亟。不得已以李續宜稜調皖撫。原冀合力通籌。力挽東南大局。現在江浙賊氣恣肆。亟應設法進兵。早圖恢復。拯生民於水火。前經會國藩等奏稱克復漕鎮無爲。方冀東征之師。可以直下江南。乃自去冬以來。該督撫等奏報甚稀。幾於月僅一至。而浙省嚴州紹興寧波杭州等府縣各城。迭次報陷。蘇省松江上海吳淞口等處。警報頻來。皖北則苗練與髮逆交乘。圍踞甚急。賊氛到處蔓延。日甚一日。朕以沖齡嗣位。荷蒙兩宮皇太后孜孜求治。舉賢任能。焦勞宵旰。日與議政王軍機大臣籌商軍務。每於該大臣等奏報到時。詳加披覽。一切規畫。輒深嘉許。言聽計從。想該大臣等勝算老謀。於大局必早有布置。惟賊氛日熾。而該大臣等章奏寥寥。南服睠懷。殊深廬念。現在會國藩募勇是否到營。李鴻章帶兵是否到鎮。鮑超進規寧國能否得手。多隆阿蔣凝學等軍。曾否分攻廬壽。楊載福何時可以銷假回營。與彭玉麟並圖東下。兵貴神速。東南之民。待救孔亟。而軍情變幻靡常。總宜趕緊辦理。其如何通籌全局。緩亟兼權。均著將一切機宜。隨時馳奏。以紓懸系。頴郡關北路之防。湖州府海寧州。前據該大臣奏稱。尙能堅守。上海爲餉源所自出。吳淞口

守禦尤要。曾國藩左宗棠李續宜等如何布置籌畫萬全之處。均着隨時分別迅速馳奏。毋再稽延。竇深股盼。將此由六百里加緊各諭令知之。欽此。一跪讀之下。悚惕實深。諭旨垂詢各條。臣於正月初十二十二兩次奏報。亦已粗陳梗概。惟以聖主信任之專。兩宮皇太后望治之切。而臣等章奏寥寥。幾於月僅一至。疎遲之罪。夫復何辭。臣忝列戎行。歷年以來。奏報甚稀。其所以輕輟自守者。蓋亦有故。一則不輕奏謠傳之言。如近日賈臻奏廬州克復。袁甲三奏巢縣克復。皆因無稽之探報。以爲入告之實據。又或賊蹤未近。預相震驚。輒以十萬二十萬具奏。尤足以惑軍心而誤大計。臣處向不憑探報入奏。不欲以謠傳之詞。淆朝廷之耳目也。一則不輕奏未定之事。凡大股悍賊之來。其始常危險萬狀。能堅忍支持。而後能漸臻安穩。如去歲黃文金之內犯。攻陷七縣。堅持三月。而臣僅彙作四次入奏。去冬徽州之被圍。苦戰九次。堅守彌月。而臣僅彙作兩次入奏。不欲以未定之狀。增朝廷之憂慮也。一則不輕奏預計之說。兵事成敗。難以逆料。咸豐八九年間。江南屢奏金陵指日可克。十年夏間。浙江屢奏嘉興指日可克。厥後皆不能踐言。臣初督兩江之時。奏稱由寧國進兵。可達蘇境。厥後寧國失守。至今不能踐言。臣深以爲恥。至近日內。臣章奏蒙鈔示臣處者。或稱援浙之師。可由嘉興直搗蘇州。或稱揚州之師。可由常熟進攻蘇州。皆不量兵餉兩窮之苦。而預擬萬不可成之計。臣不欲以預計之說入奏。非特慮大言之難踐。亦恐紛亂朝廷之規畫也。因此三者。每存敬慎之懷。轉蹈遲延之咎。前此文宗顯皇帝御宇。分任其職於封疆將帥。臣猶得以碌碌隨諸帥之後。循愚拙之常。茲值聖皇踐阼之初。微臣尤忝非常之遇。倚任彌重。延訪更殷。欽奉諄諭。自當變更前轍。隨時飛章入告。嗣後擬十日奏事一次。有急則加班具奏。所有此次諭旨垂詢之件。及正月歷奉寄諭垂詢諸事。謹分條一一詳對於後。

一會國荃新募之勇。據報正月二十前可以招齊。二十四日自湘起程。由水路東來。二月底可抵安慶。俟到安慶後。即令其進攻巢縣和州含山等處。能破此三城。則與下游六合揚州聯爲一片。毫無阻隔矣。楊載福本應於臘月銷假回營。因辰沅賊警逼近本地。官紳請楊載福代守乾州廳城。因此羈延至今。尙無起程確信。臣已三次飛催。囑其於二月回營。張暹蘭前因病離營。因徽州被圍。催令力疾就道。即日將抵安慶。可回微營矣。

一李鴻章一軍於臘底正月初招募淮勇五營。另撥湘勇數營。趕緊訓練。二月可以成軍。本擬由水路馳赴鎮江。

因民船不能直衝賊中。洋船又不肯雇載兵勇。不得已仍須從陸路行走。由巢縣和含賊中經過。前有堅城。後無糧路。亦極可危之道。應俟會國荃一面圍攻巢含。李鴻章一面傍城衝過。衝至和州以下。則出六合江浦以達於鎮江。毫無梗阻矣。

一。去年攻克無爲運糧東關等處。本可乘勝直搗巢縣梁山。進圖金陵。近日袁甲三一軍攻克天長六合江浦浦口。尤有直薄金陵之機。方今東南糜爛。臣等孰不思直攻老巢。擒渠掃穴。惟用兵之道。可進而不可退。算成必兼算敗。與其急進金陵。師老無功而復退。何如先清後路。腳根已穩而後進。所有進兵金陵之次第。以臣愚計之。多隆阿一軍。應俟攻克廬州而後可進。會國荃一軍。應俟攻克巢縣含山和州西梁山而後可進。袁甲三李世忠一軍。應俟會克廬州。守定六合而後可進。都興阿一軍。應俟守定揚州浦口而後可進。彭玉麟楊載福之水軍。應俟攻克裕溪口西梁山而後可進。欲拔本根。先剪枝葉。仍須計算各路游擊之師。數倍於金陵圍城之師。庶幾無撤回之虞。擬即以臣議商之袁甲三都興阿等。是否有當。恭候訓示遵行。

一。潁州圍城之賊。聞係捻匪與苗黨勾結。志在必得潁郡。與壽州霍邱爲犄角之勢。李續宜業經奏派成大吉蕭慶衍兩軍赴潁救援。據報於正月二十六日。自霍山起程。惟繞道固始。計程四百七十里。途次無米可買。恐到潁不能迅速。但求潁城堅守月餘。勝保救之於北。成大吉等援之於南。必可立解重圍。李續宜所部之兵。留三支駐守湖北。分防襄陽德安麻城等處。以兩支赴援潁州。以一支防守六安。此外親兵帶來安慶者。亦無幾矣。

一。謀浙之道。保廣信之糧路。以守衢州。保徽州之後路。以攻嚴州。舍此二者。別無良策。臣已兩次具奏在案。目下左宗棠駐紮開化境內。正月十七日在篁岸獲勝仗一次。二十日在馬金嶺等處獲大捷一次。即日進攻遂安等縣。係從衢嚴之間下手。惟徽州歙績二縣羣賊又復嚮聚。我方圖入浙境。賊乃圍犯江皖。春夏間必戰爭不休也。湖州海寧久無信息。鮑超圖攻青陽未下。不能遽及寧國之境。又豈能遙通湖州之信。昨奉寄諭。垂念趙景賢飭赴福建糧道之任。朝廷愛才之心。薄海巨民聞之。特無如音問難通。徒深憂灼。

一。江蘇軍務自寶山奉賢南匯川沙失守後。上海已岌岌可危。至今月餘。巋然幸存。蓋髮逆畏忌西洋。不致驟

樹大敵。而目下情勢。舍借助洋兵。亦實別無良策。臣於二十二日。曾經附片具奏。上海僻處東隅。論籌餉爲要區。論用兵則爲絕地。假使無洋人相助。髮匪以長圍裹我。官兵若少而弱。則轉瞬又成坐困之勢。若多而強。則不宜置此無用之地。再四思維。不得所以保全之法。擬仍借洋人之力。開誠布公。與敦和好。共保人財。將來果派何軍協同防守之處。應俟李鴻章到鎮。陳士杰到皖。再行察看。奏明辦理。

以上各條。均係近日諭旨下問之件。有業經具奏者。有未及詳陳者。理合一併臚舉。仰慰慈廬。伏乞皇上聖鑒訓示。謹奏。

謝弟國荃補浙臬恩摺 同治元年二月初十日

奏爲恭謝天恩。仰祈聖鑒事。竊臣接准湖廣督臣咨開咸豐十一年十月二十一日內閣奉上諭。官文會國藩奏水陸各軍。克復無爲州城。並乘勝攻克運漕河賊壘。勦辦甚屬出力。布政使銜記名按察使曾國荃。著賞給頭品頂戴。等因欽此。又接准兵部火票遞到同治元年正月初四日內閣奉上諭。浙江按察使著曾國荃補授。卽赴新任。毋庸來京請訓。欽此。其時臣弟國荃募勇在籍。臣於營次恭設香案。望闕叩頭謝恩。伏念臣弟國荃管帶楚師。隨同勦賊。疊邀懋賞。洊擢監司。上年克復無爲州城。奪回運漕各隘。仰託聖主之威。正席全盛之勢。事半功倍。豈敢言勞。遠襄錄於九重。迺躋榮於極品。茲復握荷溫綸。真除臬使。凡此非常之寵遇。實非夢想所敢期。臣弟國荃募齊新勇六千。已於正月二十三日。馳赴長沙。買舟東下。計日可抵安慶。臣惟有督率臣弟。申明軍律。整肅官方。執枹鼓以誓師。叶瓊篴而敵氛。盼盼原隰。願復國家土宇之常。世世子孫。永報高厚生成之德。所有微臣感激下忱。專差恭摺叩謝天恩。伏乞皇上聖鑒。謹奏。

邊議安徽省城仍建在安慶摺 同治元年二月十二日

奏爲遵旨籌議。恭摺覆陳。仰祈聖鑒事。竊臣承准議政王軍機大臣字寄咸豐十一年十二月初四日奉上諭。有人奏咸豐三年。賊陷安慶。並未據守。自周天爵等奏請改建省會於廬州。賊窺安慶無備。始圖占踞。遂致全皖糜爛。查安慶古稱重鎮。若省會改於廬州。非惟於皖南輟長莫及。亦距江較遠。無從設防。今幸安慶克復。應將安徽省城。仍建該府。並宜添設提督。統轄水陸各營。其江西九江鎮。卽就近籌新設安徽提督節制。查福建廣東兩

省均設有水陸提督。現在江防較海防喫緊。可否於該三省內裁併一缺。稜設安慶。則兵餉均無須另籌等語。賊匪據有長江之險。以致江皖糜爛。現在安慶克復。亟應整頓江防。所稱安徽省城。仍應建於安慶。巡撫藩臬如前駐紮。並設立提督。統轄水陸官兵。九江鎮併歸節制。則聲勢聯絡。江防更爲周密。均不爲無見。即著會國藩彭玉麟統科說現在地方軍務情形。悉心籌畫。會同妥議具奏。至所請於福建等省裁缺。以資稜設之處。應俟該大臣等覆奏到日。再降諭旨。一等因欽此。仰見皇上體懷南服。慎重江防之至意。臣查安徽一省。跨乎大江。江以北四府四州。江以南四府一州。安慶府城。處濱江適中之地。實爲形勢所必爭。咸豐三年。安慶城陷。江面悉爲賊有。千艘往來。飄忽莫測。官軍無一舟一筏。可以應敵。周天爵等請以省城改建廬州。係屬一時權宜。舍此亦別無自全之策。是年臘月。廬州復陷。官軍屯於郡北定遠一帶。於是合肥以南之州縣。盡淪於賊。而皖南中隔大江。賊氛徧布。文告梗阻。巡撫不復能過而問焉。咸豐四年。諭旨令徽寧等屬。暫歸浙江巡撫兼轄。廷臣因上疏請仿前明南贛鄭陽之例。設立皖南巡撫。文宗皇帝飭吏部核議。不設巡撫。而稍重皖南道之權。令其仿照臺灣道例。專摺奏事。另添皖南總兵一員。數載以來。皖南道一缺。例由兩江督臣保薦。皖南之錢糧刑名。不隸藩臬。奏報不歸巡撫。儼若另爲一省。而皖北撫藩等官。散處於潁壽臨淮泗州等處。幾無定所。公事廢閣。號令分歧。改建省城之弊。此其明證。現在安慶已復。江路疏通。欲辦蘇浙之賊。必自力圖皖南始。欲辦皖南之賊。必自守定安慶始。臣愚以爲宜如原奏所請。安徽省城仍應建於安慶。巡撫藩臬。如前駐紮。庶足以資控制。而一事權。至所稱設立提督。統轄水陸官兵。江西九江鎮就近歸安徽提督節制一條。查水師陸兵。判然兩途。猶耕織皆所以資生。而不能使一人而治兩業。安徽壽春鎮所轄。向係羣捻出沒之地。皖南鎮所轄。又係萬山叢雜之區。皆與江防毫不相涉。應請仍歸安徽巡撫節制。江西九江鎮所轄。如撫州建昌等處。距大江六七百里。亦係陸路專政。應請仍歸江西巡撫節制。該兩省巡撫。向兼提督銜。均應遵守舊章。無庸更改。至江防局面宏遠。事理重大。臣愚以爲應專設長江水師提督一員。目下大江水師。歸彭玉麟楊載福等統率者。船隻至千餘號之多。職位至二三千尊之富。實賴逐年積累。成此鉅觀。將來事定之後。利器不宜浪拋。勁旅不宜裁撤。必須添設缺額若干。安插此項水師。而卽以壯我江防。永絕中外之窺伺。其提督衙門。或立安慶。或立蕪湖等處。自提督而下。總兵應設幾缺。副參以至千把。各設幾

缺。暨分汛修艦各事。宜統俟諭旨允准之日。再由吏兵等部。詳覈議奏。臣等如有所見。亦必續行奏咨。略參未議。至俸薪口糧。修補船礮等項。當於長江酌留釐卡數處。量入爲出。不必另由戶部籌款。其福建廣東原設水師提督。似不必遽議裁缺。轉致疎防。所有遵旨籌議緣由。謹會同安徽巡撫臣李續宜。署江西巡撫臣李桓恭摺覆奏。伏乞皇上聖鑒訓示。謹奏。

覆奏楚軍不能出洋片 同治元年二月十二日

再臣承准議政王軍機大臣字寄。同治元年正月二十一日奉。上諭。逆匪於寧波河口。擄掠釣艇。沿海地方。均形喫緊。所有購買外國船礮。覈需銀八十萬兩。尙屬力所能辦。未可再事因循。現已由總理各國事務衙門。札飭赫德。赴滬商辦。並鈔錄單開船礮價值。飛咨上海等口。即著薛煥督飭該稅務司。將應購船礮軍械等。速爲購買。其船隻務須購覓兵船。不可以貨船信船充數。其駕駛輪船。應否雇用呂宋等國之人。以免臨時挾制。著薛煥商令赫德。相機辦理。至酌配兵丁。及統帶大員。著會國藩於水路官兵內。遴派得力鎮將並兵丁等。聽候調遣。一俟船礮購齊。卽行飭赴上海等處。以資防剿。等因。欽此。又正月二十三日奉。上諭。昨據總理各國事務衙門具奏。購買外國船礮。該大臣前奏稱。應行酌配兵勇。俟輪船到後。再行配用。現在上海應用外洋船礮。已催令迅速購買。卽著該大臣先行籌備。免致臨時貽誤。等因。欽此。仰見聖謨宏遠。思患預防。敢不欽遵辦理。惟查楚軍水勇。多係兩湖土著。距江近而距海遠。所用師船。不過長龍舳板快蟹之類。但能泛江。不能出洋。上年七月。臣覆奏摺內所稱。俟輪船駛至安慶漢口時。卽令學習駕駛。司放礮位。亦言用之於江面。非言用之於海中也。江與海雖同一水面。而風濤迥別。氣候各殊。自崇明出口。繞至上海。非熟習洋面之人。卽有寸步難行之勢。臣去年覆奏之後。尙未將學習輪船之說。宣示各營。蓋其囿於風土之習。既遷地而弗良。而其疑畏洋人之心。尙扞格而難入。今強之試登輪船。或可勸誘爲之。若強之遽出洋面。則難矣。髮匪所擄之人。多係江楚山民。以臣愚料之。必無遽橫縱海上之事。巨忝任江督。本有海疆之責。撥兵戡賊。亦分內之事。無如所部勇丁。並非生長海隅。勢難遽於重洋用武。不敢不據實覆陳。伏乞聖鑒訓示。謹奏。

劉于濤未能赴浙片 同治元年二月十二日

再記名按察使安邦道劉于濤一軍。前因杭州危急。經閩浙督臣慶端奏奉諭旨。調赴浙省援勦。浙省既失。尙屢次檄催。劉于濤具稟請示前來。臣查自江西至浙。中隔常玉一山。陸路八十里。過山之後。河小岸高。灘淺水急。利陸軍不利水師。劉于濤所部。現在並無陸軍。祇有水師。該員自咸豐五年。經臣會檄管帶水師。六七年間。水軍操練日精。威望日著。屢次苦戰獲勝。有功桑梓。屢後兼帶陸兵。不甚得力。上年秋間。臣以陸兵非其所長。檄令全數裁撤。專辦水師。且自會河以上。至三曲灘。水路六百餘里。責成劉于濤嚴防汛地。免致賊匪竄江。偷渡贛水以西。又蹈上年之覆轍。比時江西本省。並無一枝防兵。僅賴劉于濤水勇。率皆江西土著。留江則蕩輕就熟。可期指臂之功。赴浙則用短棄長。必無絲毫之補。慶端不知循河之淺窄。不宜水軍。而但催令抬船過山。拾礮過山。係屬毫無閱歷之言。所有劉于濤一軍。自應仍駐江西。分防河面。以資熟手。而保完區。除批飭遵照外。謹會同督江西撫臣李桓附片陳明。伏乞聖鑒。謹奏。

條陳近日軍情摺 同治元年二月二十二日

奏爲謹陳近日軍情。仰祈聖鑒事。竊臣於二月初二日。具陳各路軍情。嗣後每十日奏報一次。近復欽奉疊次寄諭。殷殷以上海鎮江廬州浙江寧國等處爲慮。飭催分路進兵。所有旬日軍情。謹分條具報如左。

一、會國荃募齊新勇。分立營頭。帶赴湖南省城。正月二十八日。卽先雇輕舟下駛。已於二月十五日抵皖。所募新營。亦次第將到。巨擬令於二十四日。率領各營進攻巢縣含山一帶。

一、李鴻章新募淮勇。暨調撥湘勇。均已募練成軍。惟因民船不能直衝賊中。洋船又不肯雇載兵勇。須由陸路前進。且須裹帶行糧。現已籌給銀米。卽令於三月初二日。自安慶起程。會同會國荃攻勦江邊一路。於巢縣和州含山三屬。但能攻克一城。仍以會國荃一軍圍攻他城。李鴻章卽傍城衝過。以期速達鎮江。

一、多隆阿一軍。進攻廬郡。自正月二十五至二月初四日之內。攻破東門外賊壘一座。西門得勝門傍城賊壘四座。焚燬賊卡四處。奪獲礮船貨船七隻。軍械馬匹甚夥。共計斃賊三千有奇。收降卒千餘人。惟官兵亦陣亡營官二員。弁勇近七十名。受傷者約以千計。不能不稍事休息。再圖進取。除一切詳細情形。由湖廣督臣官文具奏外。臣謹據來函所稱。略陳梗概。僞英王四眼狗堅守廬州。令苗沛霖與捻匪連和。西圍潁州。東援廬州。

頃據多隆阿搜獲苗營與狗逆僞函一件。苗沛霖又與捻首張落刑構衅。苗黨不得志於潁。必將以全力援廬。謹將原函鈔呈御覽。

一。撫臣李續宜於二月初九日。行抵安慶。與臣籌商一切。即將進駐六安。其派援潁州之成大吉蕭慶衍兩軍。已先後行抵固始。離潁州不過百餘里。援勤情形。由李續宜自行具奏。

一。左宗棠一軍。自正月二十日在馬金街獲一大捷。肅清開化後。初擬赴援衢州江山。繼因該兩處稍鬆。決意進攻遂安。嚴州蘭谿等處之賊。并力來援。聚於遂安城西之楊村一帶。二月初九日。左宗棠分三路進剿。大獲勝仗。殺賊近七千人。擒斬頭目百餘人。克復遂安縣城。聞僞侍王將圍衢州。左宗棠撥兵留守遂安。自率大隊進援衢州。其詳細戰狀。應由左宗棠自行奏報。

一。恭奉諭旨。垂詢蔣益澧赴浙較遠。是否必應守候。抑或別有勁旅可籌。目下兵勇不敷分布。實無別項勁旅。可以調派赴浙。乃須俟蔣益澧到後。始能合力兜剿。頃接蔣益澧來稟。尙須親赴廣東。索取餉銀。抵浙日期。殊難預定。深爲焦慮。

一。浙江湖州陷入重圍。久無信息。頃據江蘇候補知府趙炳麟稟稱。湖州沿城一二里。四面皆賊。音信迄不得通。二月初四初八等日。據吳淞辰舍各處探報。道員趙景賢尙在湖城。極力支持。屢次出城擊賊獲勝。並據鈔呈坊天豫曹逆勸趙景賢僞函。知該郡實尙無急。孤懸賊中。無路赴援。徒深憂憤。聞城中米糧足支五個月。或者可以保全。

一。徽州解圍後。績溪等處之賊。分踞歙縣東南四五十里外。時時窺伺郡城。臣以張運蘭一軍人數較多。政令朱品隆接防徽州。騰出老湘營五千人。爲游擊之師。本月十四日。石太股匪復竄入牟棧嶺。燒燬民房數處。逼犯歙城。十五日。老湘營馳往堵剿。甫抵漁亭。該逆仍退出嶺外。不敢深入。目前歙縣休歙發一帶。必不可少。此一枝游兵。朱品隆既換防徽城。即不能出嶺與飽超合力進剿。飽超久攻青陽。爲堅城所阻。不能遽抵寧國。終難擊動浙中賊勢。

一。上海於正月二十三。二月初四等日。有高橋蕭塘等處之捷。該城當可保全。鎮江爲江南必爭之地。欽奉二

月初三日寄諭。令馮子材仍守鎮江。無庸赴滬。臣已飛速行知該提督欽遵辦理。以上各條。皆疊奉諭旨垂詢之件。僅分晰條列。由驛五百里具陳。伏乞皇上聖鑒訓示。謹奏。

謝會國荃升授蘇藩恩摺 同治元年二月二十一日

奏爲恭謝天恩。仰祈聖鑒事。同治元年二月十六日。接准兵部火票。遞到二月初三日內閣奉上諭。江蘇布政使著會國荃補授。即赴新任。毋庸來京請訓。該員係兩江總督會國藩之弟。例應迴避。惟該省軍務緊要。需員辦理。無庸迴避。以資得力。欽此。維時臣弟國荃適自長沙馳抵安慶。當即率同恭設香案。望闕叩頭謝恩訖。伏念臣弟國荃隨征六載。未立寸功。疊蒙高厚之恩。尙乏涓埃之報。仍復渥荷恩綸。晉職藩司。有表率羣僚之責。吳下爲東南財賦之邦。臣弟愚蒙。懼弗勝任。現在皖北各屬。髮捻苗黨。三患並熾。臣弟所統新舊各勇。除分守六處外。尙有萬餘人。爲進剿之師。自應飭令攻取巢縣。含山。和州。西梁山等處。冀與袁甲三都與阿各軍。粘連一片。庶金陵有規復之期。大局有轉旋之勢。其江蘇藩司一缺。擬商之撫臣薛煥。仍飭吳煦署理。臣弟國荃暫不接印蒞事。俾地方與軍務各有責成。而免曠誤。所有微臣感激下忱。恭摺叩謝天恩。並附陳臣弟不克赴任緣由。伏乞皇上聖鑒。謹奏。

參李元度片 同治元年二月二十一日

再新授浙江按察使李元度。咸豐十年八月徽州失守案內。經臣奏奉諭旨革職。該員並不靜候審訊。擅自回籍。與浙江候補道鄧輔綸往返函商。求巡撫王有齡奏調赴浙。十一年二月初九日奉上諭。已革徽寧池太廣道李元度。著會國藩飭令前赴浙江。交瑞昌王有齡差遣委用。其應得罪名。仍著會國藩查辦。欽此。李元度並不具稟請示。即行募勇赴浙。名曰安越軍。旋於義寧案內。經官文奏奉諭旨。李元度著賞還按察使原銜。其失守一案。仍著會國藩訊明分別辦理。等因欽此。又於奉新瑞州案內。經統科奏奉上諭。李元度著賞加布政使銜。其徽州失守之案。應否免其查辦。仍著會國藩酌核具奏。等因欽此。查義寧奉新瑞州皆臣所統轄之地。均係賊匪先自退出。李元度並無打仗克城之事。臣所派鮑超一軍。與李元度同抵瑞州。亦未報會見一賊。曾接一仗。李元度屢報克復。冒稟邀功。實出情理之外。本年正月十四日。皇上棄瑕錄用。補授該員鹽運使。茲又擢授浙

江按察使諭旨令臣等轉飭該員奮勇立功以贖前愆。臣查該員李元度自徽州獲咎以後不候訊結而擅自回籍不候批稟而徑自赴浙於共見共聞之地並未見仗而冒稟克復種種悖謬莫解其故。臣所以遲回隱忍不遽劾奏者因其軍以安越爲名冀其顧名思義積愧生憤或能拚命救浙有裨時局也。乃李元度六月至江西八月抵廣信九月抵衢州節節逗遛任王有齡羽檄飛催書函哀懇不一赴杭救援是該員前既負臣後又負王有齡法有難寬情亦難恕。所有該員補授浙江鹽運使按察使及開復原銜均請飭部註銷仍行革職姑念其從軍多年積勞已久免其治罪交左宗棠差遣該員治軍一味寬縱多用親族子孫文理尙優帶勇非其所長其所部安越軍八千人臣當與左宗棠熟商或全行遣撤另派臣交部議處所有疊奉諭旨飭臣酌核查辦之處理合附片覆奏伏乞皇上聖鑒訓示謹奏。

謝京察從優議敘恩摺 同治元年二月初八日

奏爲恭謝天恩仰祈聖鑒事。竊臣准兵部火票遞到同治元年正月二十三日內閣奉上諭「協辦大學士兩江總督曾國藩督軍勦賊勤勞罔懈於江皖地方疊復名城戰功卓著甄拔所部將士賢能稱職經簡授協辦大學士仍著交部從優議敘」等因欽此。當即恭設香案望闕叩頭謝恩。竊臣材識凡庸謬膺重寄下不能慰兩江雲霓之望上不能分九重宵旰之憂無補涓埃徒深慚懼迺荷聖恩稠疊天語褒嘉以閩外之下臣登虞廷之上考重邀甄敘彌切悚惶。臣惟有慎簡將才廣求忠益勉己百己千之學收羣策羣力之功以冀仰答高厚深恩於萬一。所有微臣感激下忱謹繕摺叩謝天恩伏乞皇上聖鑒謹奏。

遵旨議覆請派員辦廣東釐金摺 同治元年二月初八日

奏爲遵旨議覆並請欽派大員督辦廣東釐金接濟浙江安徽江蘇三省軍餉恭摺馳陳仰祈聖鑒事。竊臣承准議政王軍機大臣字寄同治元年二月初五日奉上諭「前據官文奏議覆侍郎宋晉條陳湖北等省會籌東征請飭薛煥會議會論該撫等悉心妥籌尙未據會商覆奏茲據御史朱潮奏統籌東南大局一摺據稱「湖北等省全境肅清四川廣東亦抵安靖請飭湖北等省出師會勦四川廣東協餉兵事責之曾國藩餉事則派督撫大員一人督催各路征輸專司饋運」等語覽其所奏與現辦情形均屬不相符合。曾國藩節制江浙等四省已屬

不違兼顧。若再令總制湖北湖南福建兵事。則運籌決策。瞬息千里。亦恐緩急機宜。不能遙制。督撫辦理糧臺。從前乾隆年間。曾有是例。此專爲出師一路而言。若自兩楚下至閩省。相去數千里。即因督撫事權較重。專司饋運。亦恐呼應不靈。湖北湖南邊境。尙未解嚴。江西福建遠近鄰氛。自顧門戶。尙虞不足。豈能分兵會剿。四川軍務未靖。本省餉項。頗形支絀。廣東疊諭撥解左宗棠等軍餉。於數已屬不少。該御史所籌補救之方。尙不離書生之見。惟軍務至重。不妨兼聽並觀。以廣進言之路。且現在東南大勢。賊合而我分。兵單餉絀。動爲牽制。亦屬實在情形。著官文會國藩嚴樹森毛鴻賓沈葆楨慶端徐宗幹酌量情形。於軍務積弊如何挽救。其言是否可採。遇便覆奏。不必因有旨飭籌。稍涉遷就也。一等因欽此。仰見皇上好問察言。於剖析精微之中。仍寓虛衷博訪之意。臣維東南寇氛蔓延日久。皖南池寧二府。十室九空。人爭相食。皖北廬鳳等處。白骨蔽野。田地荒蕪。蘇浙兩省。蹂躪亦復相類。生靈之塗炭深矣。聖主之憂勞極矣。爲封疆將帥者。孰不思掃蕩遠寇。一解倒懸。况臣膺茲艱鉅。委任尤專。豈敢稍涉推諉。更分畛域。無如賊之占地過廣。殺數太多。臣之兵餉兩絀。才智太短。受命兩年。至今無一兵達於蘇境。圖皖年餘。亦迄無一旅進攻寧國。分內之事。不克自效。清夜以思。愧悚汗下。至浙江軍事。左宗棠苦戰奮嚴。獨任其難。臣不克分兵往助。趙景賢困守湖州。堅貞蓋世。臣不克設法往援。徒有兼轄之名。並無統籌之實。前此欽奉正月二十三日諭旨。仍令臣節制四省。毋許再行固辭。本不敢曉曉瀆奏。茲因御史朱潮奏請六七省兵事。責成一人。臣既懷大名不祥之懼。彌觸隱微抱疚之端。竊計蘇杭安徽。糜爛若此。以一人而辦一省之賊。無論如何大才。如何竭力。但覺其不足。不見其有餘。況以臣之愚陋。承乏兩江。時虞隕越。安能兼顧浙江。安能更及兩湖福建。該御史朱潮所稱數省兵事。責成一人之虞。固無庸議。倘蒙聖主鑒臣愚悃。並收回節制四省之命。俾臣專力本職。稍釋神魂之震懼。尤感聖慈之曲盡矣。至朱潮所稱四川廣東協餉。派大員一人督催饋運等語。其事雖難以盡行。其議則實有可采。上年侍郎宋晉五省會勘一疏。亦係兵餉通籌。與朱潮大致相同。臣查四川內患未平。本省支絀。自難協濟外省。即將來蜀城蕩平。尙當先協雲南之餉。不能遽及江浙之遠。惟廣東最號殷富。其財力爲東南之冠。其地勢亦宜供江浙之餉。天下之大利。除了漕正賦外。約有四宗。曰海關。曰鹽場。曰富戶勸捐。曰市鎮抽釐。他省或據其一。或據二三。惟廣東省兼四者而有之。而粵鹽一宗。行於江西湖南者。侵灌淮南之引地。

佔奪江蘇之大利。卽樂桂埠商孔廣縮一戶。七八年來。擁資百萬。他商之殷實。可以類推。官項之贏餘。亦可想見。而推諉因之全失。專課並未稍增。釐金一宗。如佛山韶關肇慶等處。著名繁富。咸豐十年間。巡撫耆齡於韶關後設一新卡。未及一年。收稅至五十餘萬。藩司周起濱議於肇慶府河設卡。每年亦得四十餘萬。此外鉅鎮大卡。不一而足。至於海關一宗。粵海稅項。遠出各口之上。捐輸一宗。粵東富室。亦非各省所及。斯中外所共見共聞者。若使經畫得宜。但於四宗之中。得其一宗。卽可養數萬之兵。勘浙江之賊。朔查庚申五月。臣奏請以江西之釐金。充臣營之軍餉。兩年以來。臣均賴此無飢潰之憂。似可援以爲例。合無籲懇天恩。采納朱潮之議。特派二三品卿一人。馳赴廣東。駐紮韶關。辦理通省釐金。專濟蘇浙安徽三省餉項。乾隆年間。新疆用兵。曾派大學士黃廷桂駐紮肅州。綜理兵餉。此次江浙軍務。較新疆尤爲重大。卽派六部卿貳。銜命使粵。專督釐餉。亦不爲過。如蒙俞允。臣當奏派賢員。熟悉釐務者。隨同星使。前赴粵東。設卡抽辦。韶關距江西甚近。臣嘗與該使臣往返函商。務使籌兵籌餉。一氣呵成。或紕或贏。隨時斟酌。廣東官紳有設立私卡者。使臣會同臣處奏參。州縣有暗中阻撓者。亦卽奏咨參撤。凡釐務所得之餉。先解浙江軍營。左宗棠新任微撫。無尺寸之完土。無涓滴之餉源。蔣益澧等到後。尤覺無米爲炊。若以廣東釐金濟之。則前此奏准之協浙月餉十萬兩。卽在此中抵除。其次則解安徽軍營。臣處如鮑超一軍。欠餉八個半月。曾國荃一軍。欠餉近九個月。徽州各軍。欠七個月。有奇。急思早得粵餉。一清積欠。李續宜添募新營。亦當另籌接濟。袁甲三久處窮困。亦應量爲津貼。方足以馭強將而撫飢軍。又其次則解江蘇軍營。聞上海出款太多。虧累甚鉅。鎮江揚州兩台。亟需另籌協餉。其廣東應解紅單艇船之費。亦可於此中抵除。由臣咨商韶關使臣。察各軍之緩急。定撥解之多寡。其運解之法。或由贛州送至江西轉解。或由輪船搭至上海轉解。均聽韶關使臣察酌辦理。其廣東本省應用之項。與夫京款協款。該省除正賦外。尙有海關鹽務捐輸三大宗。儘足以資周轉。不許挪移各卡釐金。以清界限。數載以來。部庫空虛。從無京餉解軍之事。若特簡京卿督辦粵餉。則與自京解出者無異。實惠及於士卒。利權操自朝廷。疆臣守其土地。不得私其貨財。於諭旨挽救積弊之道。或亦不無小補。所有遵旨議覆緣由。謹繕摺具奏。伏乞皇上聖鑒訓示。謹奏。

李鴻章軍改由輪船赴滬摺 同治元年二月初八日

奏爲恭報李鴻章一軍攻道赴滬。由水路起程日期。仰祈聖鑒事。竊道員李鴻章所部。湘勇淮勇。募練成軍。本擬三月初二日。拔隊啓行。取道巢縣含山和州一帶。前赴鎮江。臣於二月二十二日奏明在案。拜摺後正飭該員簡料起程。旋於二十八日。據江蘇紳士潘馥錢鼎銘等自滬來皖。稟稱上海一路。雖得英法各國撥兵協防。有高橋蘆塘之捷。而賊氛四逼。商旅不運。岌岌可危。已由滬局籌款十八萬兩。雇備輪船。陸續入江。來迎我軍。以期力保要地等情。臣查鎮江爲進兵形勝之區。上海爲籌餉膏腴之地。兩者並重。均不可稍有疎失。前因洋船不肯雇載兵勇。李鴻章一軍。擬由陸路續赴鎮江。實出萬不得已之計。臣以道路阻長。節節有賊。既憂輜重之難帶。又恐行程之太遲。欽奉二月十四。二十四日兩次寄諭。亦深以李鴻章陸行紆遲爲慮。茲據該紳士等與洋人商雇輪船來皖。經費既鉅。詞意尤摯。自宜先赴上海。以順輿情。已派數營於三月初七日登舟起行。李鴻章於初八日開行。不過四日可到。仍俟後至之船。循環裝載。分三起銜尾下駛。不滿一月。可以全隊到防。俟抵上海後。布置初定。李鴻章親至鎮江察看情形。應如何分兵防守之處。屆時奏明辦理。其李鴻章暨黃翼升所部水師。仍當由梁山金陵衝過賊中。乃可達於鎮江。俟起行有日。續行具奏。所有湘淮各營。改由水路起程。先赴上海緣由。恭摺由驛馳報。伏乞皇上聖鑒訓示。謹奏。

近日各路軍情片 同治元年二月初八日

再近日各路軍情。會國荃於二月二十四日由安慶馳赴下游。其所部各營。知府陳湜。總兵蕭孚泗等。於二十四日在運漕鎮獲一勝仗。擊敗銅城關之賊。破其浮橋。奪獲礮船七號。擒斬甚多。截逆首精天義何雅林於陣。俟會國荃到防再行進剿。左宗棠一軍。自克復遂安後。該逆復以一支圍攻遂城。一支由馬金嶺窺伺婺源。左宗棠派守遂安之王開來等於二十三二十七兩獲勝仗。又派劉典等四千人援勒馬金。臣亦派張運桂等四千人。會勒馬金嶺。遏賊由婺源竄江西之路。徽州朱品隆等各軍。時有賊黨犯嶺。防守尙屬嚴密。成大吉等援潁之師。已渡淮北。距潁城僅三十餘里。因後路苗捻混雜。良莠不分。尙須添兵防守浮橋。顧全歸路。乃敢放心前進。多隆阿圍廬州之師。鮑超攻青陽之師。日內俱尙平安。理合附片具陳梗概。仰慰宸廑。伏乞聖鑒。李鴻章一軍改由輪船駛赴上海。同日另摺具報。謹奏。

旌卹饒廷選家屬片 同治元年二月初八日

再浙江提督饒廷選在杭州苦守兩月有餘糧盡援絕城亡與亡業經閩浙督臣慶端奏奉諭旨從優議卹並入祀本籍昭忠祠在殉難地方建立專祠在案茲准江西撫臣沈葆楨函開正在本籍起程聞據饒廷選親兵陳大陞由杭州間道旋閩稟稱上年十一月二十八日杭州城陷饒廷選之妾方氏林氏在省寓聞警仰藥自盡其從弟守備饒廷杰饒廷夔在局運解軍裝飛騎急赴鳳山門力護主將乃馳至中途賊隊大至填塞街衢饒廷夔巷戰陣亡饒廷杰爲亂軍衝散旋於二十九日與副將繼興戰死於保叔塔下等語臣查饒廷選忠勇樸誠咸豐六年保守廣信府城厥功甚偉此次臨危授命伊弟伊妾亦於杭垣失陷之時相率殉難孤忠亮節萃於一門深堪嘉憫籲懇天恩俯准於廣信地方爲饒廷選建立專祠仍請教部將都司銜儘先補用守備饒廷杰饒廷夔照陣亡例從優議卹饒廷選之妾方氏林氏照例賜旌並與該守備等一併附祀饒廷選專祠以裨忠節理合會同江西撫臣沈葆楨附片陳請伏乞聖鑒訓示謹奏

蕭孚泗陳由立留原營片 同治元年二月初八日

再提督銜河南歸德鎮總兵蕭孚泗前經奉旨簡授今職並因歸德地方緊要飭赴新任提督銜記名總兵陳由立亦經前河南撫臣嚴樹森等奏奉諭旨飭赴河南軍營敢不欽遵辦理惟查蕭孚泗現帶所部隨同會國荃籌收葉縣含山等處陳由立現帶所部隨同鮑超圍剿青陽踞匪皖南北軍務正緊該二員扼守要地均屬萬難鬆勁之時若一經抽調則遷地弗良在豫省未必遽收成效而臨陣易將在皖省深慮盡棄前功實未便飭赴河南轉致顧彼失此相應據實附陳將蕭孚泗陳由立仍留於會國荃鮑超原營竭力圖報伏乞皇上聖鑒謹奏

籌議借洋兵勘賊摺 同治元年二月二十四日

奏爲遵旨籌議恭摺覆陳仰祈聖鑒事竊臣於同治元年三月初七日承准議政王軍機大臣字寄二月二十四日奉上諭「上海被匪窺伺勢不能不借洋人之力協同守禦會國藩亦會奏及至規復蘇浙失陷地方自應別籌良策前據薛煥奏稱江浙紳士殷兆鏞等呈請借助西兵規復蘇常各屬城池當以該紳士等情殷桑梓或非無見諭令薛煥酌度情形辦理茲據恭親王等奏稱江蘇紳士潘曾瑋帶同浙人龔橙復由滬航海來京訴稱鄉

蜀致洛。懇請信用英法等國官兵。速籌緝復。已諭令總理衙門。向各國駐京公使籌商。惟上海為洋人通商之地。信訪官屢有辭苦攻。內地賊匪。輒欲用外國兵力。接度洋人情形。雖不至遠有他慮。而軍行餉隨。一切供應之源。亦恐萬難措在。以該紳士等情詞懇切。固難重拂衷情。亦須顧全國體。此事是否可行。即著會同藩憲心籌。酌迅遠諮奏。一等因欽此。又奉三月初三日寄諭。一近復據英法兩國駐京公使聲稱。賊匪與洋人構衅。此時在滬洋人。請派幫辦官軍剿賊。並派師船駛往長江。協同防勦等語。洋人性情堅執。若因我兵單薄。借助於彼。勢必多方要挾。今該洋人與逆匪仇隙已成。清潁助勦。在我亦不必重拂其意。自應姑允所請。作為牢籠之計。至該兩國師船駛入長江。以後作何舉動。即著會同藩都與阿查探情形。分別隨時馳奏。如該洋人實係與逆匪尋仇。並無他意。則事機難得。該大臣等務當飭令沿江上下游師船。與該洋人聯絡聲勢。冀收速效。並當加意附循。使其樂於助順。毋令再為賊匪所誘。此實因勢利導。一時權宜之計。諒該大臣等定能悉心體會。妥為駕馭也。等因欽此。竊臣才識庸愚。謬膺重寄。受命二載。不能早籌一旅。達於蘇境。致蘇省紳士。迫於火熱水深。為此不擇之呼籲。皆臣治軍無狀之咎。誠使商借洋兵。即能救民之難。蓋臣之愆。豈非至願。然臣前此奏稱助守上海。則可助勦蘇常。則不可者。蓋亦有故。回紇助唐。收復兩京。當時亦賴郭李諸軍。挾與征戰。縱主兵未必優於客兵。要自有焉之主者。與之俱進俱退。偕作偕行。以今日之賊勢。度臣處之兵力。若洋人遽爾進攻金陵蘇常。臣處實無自勦之師。如其克復城池。亦尙難籌防守之卒。上游如多隆阿鮑超曾國荃諸軍。各當要地。萬難抽動。下游如李鴻章一軍。甫抵上海。新集之卒。祇堪自守。不能遠征。反覆籌維。竟無大枝勁旅。與之會勦。假使轉戰內地。但有西兵。而無主兵。則三吳父老。方遯王師。而慰雲霓之望。或親洋人。而生疑懼之情。至臣職分所在。賁有專歸。譬之人家子弟。應試科場。稍能成文。而倩人潤色。猶可言也。若既不能文。又不入場。徒倩鎗手頂替。則無論中式與否。而讒議騰於遠近。羞辱貽於父兄矣。臣所處之位。與報名應試者無異。專借西兵。與倩人頂替者無異。故他人但作事外之議論。而臣則當細思事中之曲折。既以借助外國為深愧。尤以無兵會勦為大恥。諭旨以洋人與逆匪仇隙已成。情願助勦。在我亦不必重拂其意。臣處搜獲偽文。亦知金陵洪逆詞意不遜。與洋人構衅甚深。在洋人有必洩之忿。在中國為難得之機。自當因勢利導。彼此互商。嘉其助順。聽其進兵。我中國初不千求。亦不禁阻。或乘洋人大

舉之際，我兵亦諸道並進，俾該逆應接不暇。八方迷亂，殆亦天亡孽逆之會也。惟地形有遠近，兵勢有次第，仍請飭下總理衙門照會英法公使，目前若進攻金陵蘇常，臣虞尙無會勦之師。庶幾定議於前，不致貽議於後。其或蕪湖梁山一帶，官兵戰守之處，恰與洋兵會合，臣當謹遵諭旨，加意拊循，務必相讓，敢必相救，不敢稍乖恩信。凡輕外國，上煩宸廑，所有違旨籌覆緣由，謹繕摺由驛馳陳，伏乞皇上聖鑒訓示，謹奏。

克復青陽縣城摺 同治元年二月二十四日

奏爲官軍擊退大股援賊，悉毀青陽逆壘，立將縣城克復，恭摺馳陳，仰祈聖鑒事。竊鮑超一軍，於上年臘月進駐青陽縣，薄城而營，四戰皆捷。本年正月二十二日，經臣附片奏報在案。二月十五日，鮑超飭劉順隆等先平西北門山嘴賊壘，濬治長壕，爲四面合圍計。城賊勢蹙，潛糾浙江死黨三萬餘衆，由南陵竄踞銅陵之順安鎮，延擄附近各鄉，進撲銅陵，冀分我軍之勢，以解青陽之圍。三月初四初五等日，銅陵守將周萬倬等出奇兵禦之，賊乃少卻。初六日，鮑超由青陽分軍，親率夜行，潛赴銅陵救援。初七日，遇賊於橫塘，令顏紹榮熊鐵生段大有三營攻中路，黃慶吳勝芳唐仁廉王衍慶陳得勝譚勝達六營攻南北兩路，又令明與伍華瀚各率馬隊從左右抄擊，賊恃衆悍，迎拒兩時。王衍慶陳得勝振臂一呼，陷陣而入，黃慶顏紹榮潛取小徑，繞襲賊後，伍華瀚唐仁廉明與譚勝達熊鐵生等分領馬步諸軍，四出盪決，衝賊數段，斬僞主將洪逆於陣，奪賊駭潰，仍向南陵而走。適周萬倬劉祥勝水師總兵唐學發亦率隊來會，各軍合力奮追，遂將橫塘碧山金山獨山川山西峯鋪隴岡東西王郵直至順安沿途百餘卡，二十六壘一律剷除，擒斬無算，俘獲賊酋尤多。此三月初七日擊退順安等處逆援之情形也。先是僞奉王古隆賢偵知鮑超分兵而北，陰結涇石太等縣悍賊數千，在青陽南門外豬鬃店地方增築九壘，將欲阻我之師，以逼糧路。伺我之瑕，以逞狡謀，乃結壘甫成，鮑超已振旅而環，遂於十五日督飭將士分九路齊進，古逆經帶龍旗老賊揮令各壘傾巢出敵，勢極猛鸞，我軍奮勇爭先，以一當十，明與伍華瀚以騎隊襲賊，賊懼，返巢仍復倚壘施槍，負固死拒。唐仁廉譚勝達於烟箬中，披開鹿角，躍過壕溝，磨軍直上，一壘旣破，衆賊盡亂，馮標堪雲慶三逆，雲慶三堂疎得勝馬勝奎段大有等乘勢薄之，不逾時而九壘悉平。古逆率餘匪遁往石埭，軍士追獲四十二里，始行收隊。此十五日攻毀豬鬃店逆壘之情形也。維時軍心愈壯，賊膽愈寒，鮑超知青陽南路旣平，利在

速攻以西門屬之婁雲文九和劉順隆李文益熊鐵生馮標等。以東門屬之黃慶譚勝達馬勝奎唐仁廉段大有等。以北門屬之王衍慶陳得勝翦炳南顏紹榮劉玉堂吳馨芳等。而以楊鎮魁張應超爲游兵。十六日天甫向曙。各營秣馬蓐食。銜枚疾進。將近城闕。城上萬礮雷轟。羣子雨集。附城卡壘中。亦以火器協力抵禦。諸將弁奕劍血戰。更番奮攻。志在必得。該逆自知不敵。急退入城。我軍毀壘填壕。進次城下。劉順隆熊鐵生掩盾自陔。擊礮先登。蒙軍乘之。盡洗城中羣孽。遂將縣城克復。總計先後數戰。寇賊近萬三千名。擒賊近千一百名。中有逆首僞游天義周得順。僞審天義金玩明。僞順天安余士林。僞容天福陳宗保。僞匡天福朱汶琪。僞佐天侯馬新凱。暨燕豫將軍丞相。各僞職八十六名。悉就擒縛。奪獲器械旗幟。難以數計。此十六夜各軍攻拔青陽之情形也。臣查青陽一城。淪陷十載。繫皖南之門戶。據江介之要衝。自上年定計剿辦以來。相持四月。踞守益堅。仰賴聖主威福。諸將用命。卒能掃蕩援賊。攻拔老巢。從此規取寧國。可分浙賊之勢。關繫頗大。厥功甚偉。浙江提督鮑超身先士卒。調度得宜。惟係專閫大員。應如何加恩之處。未敢擅擬。其堅忍苦戰之提督銜。記名總兵。甚雲慶。應請簡授總兵。實缺。並請賞給二品封典。甘肅涼州鎮總兵馮標。請賞加提督銜。記名副都統明興。請簡授副都統。實缺。總兵銜。儘先副將譚勝達。王衍慶。劉順隆。熊鐵生。陳得勝。顏紹榮。儘先副將唐仁廉。均請交軍機處記名。遇有總兵缺出。請旨簡放。劉順隆。並請賞給勇號。唐仁廉。並請賞給二品封典。記名總兵黃慶。宋國永。張玉田。均請賞給二品封典。儘先副將劉玉堂。李文益。段大貴。李定貴。蕭儀斌。蔡得勝。周有勝。均請賞加總兵銜。湖廣副將馬勝奎。儘先副將吳騰芳。文九和。翦炳南。均請以副將遇缺卽補。馬勝奎。吳騰芳。並請賞給勇號。卽補知府伍華翰。請賞給四品封典。副將銜四川卽補參將陳永康。請以副將仍留四川。遇缺卽補。儘先游擊段大有。請以副將儘先補用。其餘在事出力人員。可否由臣查明保獎。恭候訓示。飭遵。至陣亡將弁十七員名。相應另繕清單。請旨敕部從優議卹。所有官軍勦退援賊。攻復青陽縣城緣由。恭摺由驛六百里馳慰宸廑。伏乞皇上聖鑒訓示。謹奏。

荻港舊縣三山一律肅清片 同治元年二月二十四日

再三月初二日。蕪湖巨逆黃文金賴裕新等。糾黨二萬。突入荻港。延燒房屋。初四日。復分股竄陷舊縣。勢將下伺三山夾。初五日。水師李朝斌羅進賢兩營在營房背擊賊獲勝。遂率所部師船。駛上舊縣。會合萬化林。嚴定國水。

軍登陸襲賊。戰於街心。衆勇排礮環轟。賊負重創。悉向山後潰走。初六日。我軍乘勝進攻。亦多斬獲。該逆不敢躡卡。專事野掠。潛與荻港一股勾結。繫昌蕪湖魯港之賊。別圖竄伺。時曾貞幹陸師近駐三山夾。距蕪縣祇三十里。密諭各營堅壁以待。三二十四等日。賊果分道來犯。將謀大逞。曾貞幹即令曾正明率親兵馬隊會約諸營。及螃蟹磯水師。循江岸而進。一敗賊於洋夾沙。再敗賊於三華山。斬黃巾賊酋一名。紅旗悍目十餘名。殲獲百餘人。水師各營。在斗門教化渡兩處。擒斬亦多。賊始悉衆遠遁。荻港蕪縣三山等處。一律肅清。查此股逆黨倚順安爲犄角。作青陽之聲援。牽制之謀。亦甚狡毒。幸水陸各軍。各鋒戰守。徐剪其枝葉。卒拔其根本。實足使羣兇短氣。張我軍威。除仍飭嚴密守禦外。所有此次陣亡之藍翎都司曾渭賢柳成九。及上年九月間在三山陣亡之花翎游擊銜都司劉照志。藍翎外委王虞廷。應請敕部從優議卹。把總劉華泗擊賊過猛。登時陣亡。並請從優照千總議卹。謹附片具陳。伏乞聖鑒訓示。謹奏。

近日軍情片 同治元年二月二十四日

再近日軍情。李鴻章所帶頭批陸勇。已於三月初七日。馳赴上海。其二批於十四等日附輪船前往。三批即亦可成行。計四月初旬。全軍皆抵上海。淮揚鎮黃翼升乘坐輪船。先至下游。察看一次。回至安慶再行督帶水師全軍。乘風下駛。會國荃一軍十五日在巢縣之望城岡苦戰獲勝。十八日攻破銅城關賊壘。十九日攻破雍家鎮賊寨。二十日辰刻克復巢縣。午刻克復含山縣城。此外尚有裕溪口牛屯河西梁山三處賊寨。擬一面攻此三處。一面進圍和州。多隆阿一軍。日內未開大仗。處郡圍逼甚緊。聞將有四僞王大股由江浦上援。然巢含既克。賊已失勢矣。左宗棠一軍。與僞侍王大股轉戰於江西南境。聞賊有假道閩境。轉竄江西之意。深爲可慮。嶽州各軍近尙安謐。除銅城鎮雍家鎮巢縣含山各戰狀。另行續報外。理合附片具陳梗概。伏乞聖鑒。謹奏。

查覆閩浙總督慶端事續摺 同治元年四月初四日

奏爲遵旨查羽閩浙督臣慶端事。據實覆陳。仰祈聖鑒事。同治元年正月十七日。承准議政王軍機大臣字寄。正月初四日奉上諭。閩浙督臣慶端自閩浙警。卽飭督師援勦。屢次遷延弗進。迭經嚴加訓飭。諭令該督駐師浦城與左宗棠等軍聯絡。第恐該督未必得力。其於福建本省吏治官常。不能振作。早有所聞。併著會國藩詳加

訪察。如閩省督撫均屬未能勝任。卽行據實奏參。毋稍引嫌。致滋貽誤。並將能勝該省督撫之員。探訪確實。列名具奏。等因欽此。仰見皇上慎重疆寄。整飭官方。曷勝欽悚。臣與閩浙督臣慶端。素非相識。公事亦罕交涉。風聞其聲名平常。莫由得其實際。近日悉心博訪。大抵好諛惡直。專講私情。信任幕友屬吏數員。使據摺津。卽至奸狀畢露。猶復多方袒庇。其幕友之結爲心腹者。一曰山東卽補道章琛。前辦糧臺各營領餉。皆有折扣現數。現爲翼長。亦好收用私人。扶同作弊。一曰浙江運司莊煥文。巧伺意旨。求優缺者必出其門。一曰山東卽補府李蕪。辦理官糧鹽局。先銷私鹽。後及官鹽。稅私入囊。留官運一二分。報作正課。一曰四川成綿道鍾峻。甫出督署。卽據首府總領官票局。把持市價。忽起忽落。罔利無遺。該員至江西撫州任內。雖有守城之功。而不敵其闖幕之過。其屬吏之最善逢迎者。一曰候補道司徒緒。其父以銜遺死。聞訃開奠。卽免喪以弔頂謁客。慶端專摺留閩。奉旨駁斥。繼復留辦夷務。亦奉旨駁斥。始行回籍補制。去未幾時。又列明保。一曰署福州府陳謙恩。係前任吏部尙書陳孚恩之族弟。通省牙釐。歸其管權。贓累巨萬。該督每與首府謀事。司道莫得與聞。一曰候補道素金鑑。官局停止時。該道以局票抽換餉票。又以餉票抽換現錢。爲同事者所訐。該督屬令調停。絕不追究。此數員者。或幕或官。所處不同。而表裏爲奸。醜削斂怨。慶端或愛之而不察。或明知而故縱。屢經御史糾察。皆得彌縫開脫。諭旨詢其吏治。常不能振作。其故當由於此。近年以來。各省綠營廢弛。尺籍多虛。而以閩省爲最甚。聞邵武額兵千餘。幾無一名可點。汛地所懸弁缺。多係該處土棍充當。往往賄納洋錢百圓。卽可到任三數月。後別有納者。則又易之。閩中健將。羣推林文察爲最。往歲克復邵武。近歲克復汀州。皆獨力打仗。不避艱險。該督隨摺奏獎。掩抑其功。而優保記名道張啓煊。論者以爲賞罰顛倒。臣昔嘗聞閩翰林翼語及天下吏治。以閩省爲最劣。又見慶端歷次公牘。類皆支蔓無著。證以諭旨指詢之件。慶端似不勝封疆之任。可否簡畀賢員。赴閩履任。後將臣摺中所指各員。分別甄劾之處。出自聖主鴻裁。臣見聞殘陋。素相知者。實無堪勝該省總督之員。不敢冒昧薦達。合併陳明。所有遵旨查覆緣由。恭摺附驛馳奏。伏乞皇上聖鑒。訓示施行。謹奏。

克復石埭太平涇縣三城摺 同治元年四月初四日

奏爲鮑超一軍。連破賊壘。克復石埭太平涇縣三城。恭摺馳陳。仰祈聖鑒事。竊浙江提督鮑超。率所部擊退援賊。

攻拔青陽。臣於三月二十四日奏報在案。鮑超在青陽。息軍三日。休養士卒。料該逆立脚未定。利在速攻。自應先取石埭太平。以固徽州之防。繼取涇縣。以達寧國之路。二十日徧諭諸將士。裹飯傳餐。捲旗疾趨。次軍龍口。爲詰朝進攻計。二十一日。由龍口率隊前行。直抵石埭城壘。各賊始猶閉關死守。伏匿不出。鮑超飭令婁慶慶劉玉堂等攻西門。而以李文益一營佐之。黃慶熊鐵生等攻北門。而以顏紹榮一營佐之。劉順隆段大有等則向東門進。唐仁廉伍華瀚等則向南門進。馮標吳騰芳等則向小南門進。分軍爲五。霎時合圍。附郭諸壘穴牆施礮。向外猛擊。我軍伴卻數武。使賊少懈。突將火器環壘飛擲。燃及哨棚。各營乘賊駭亂之時。囊土填濠而進。刀矛攢刺。礮賊無算。悉踰十四壘平之。將冒刃衝出之賊。盡驅入城。城上矢石交下。猝不可近。奮勇猛撲數次。將弁頗有傷亡。婁雲慶李文益熊鐵生顏紹榮等。憤怒填臆。帶領衆軍士。各負片板。直薄城根。蕭信春身受數創。猶復往來衝突。奮力急攻。遂從西北二門。斬關而入。立復城池。該逆奪命奔逃。追擊二十里。殲斃五千有奇。俘獲近四百人。此三月廿一日攻克石埭縣城之情形也。石埭既復。賊愈惶懼。因糾合援賊二萬餘衆。由涇縣南陵而來。羣集於甘棠鎮。阻我師進路。二十二日。鮑超率馬步全軍。倍道馳往。遙見賊隊如蠅如蟻。密排十數層。勢甚梟悍。文九和黃慶吳騰芳等三營。先從中路進擊。劉順隆王衍慶劉玉堂陳得勝譚勝達段大有六營。分兩翼包抄。搏戰數時。該逆屢卻屢前。馮標伍華瀚唐仁廉明興楊鎮魁張應超等。忽由山後揚旗吹角。整隊齊出。衝動賊陣。不復成伍。盡棄甘棠賊壘十七座而逃。我軍悉力追逐。進薄太平縣西門。譚勝達文九和段大有等先毀高山四壘。引軍齊上。俯瞰城中。令衆勇以火箭環射。延燃藥局。烟燄蔽天。喊聲動地。賊即驚潰。遂啓東門。望涇縣大道而逸。當將縣城收復。各軍分投掩襲。一路積尸若阜。流血沒脛。俘獲之數。較石埭爲尤多。併擒僞主將徐國華。僞安天義蕭福勝。僞頂天福劉世民。僞望天侯徐應超。僞中天安何雲龍。及檢點參護等逆首三十七人。訊據供稱。僞奉王古逆。已爲亂軍衝散等語。此二十二日攻破甘棠收復太平縣城之情形也。先是鮑超進取青陽。正在圍攻未下。忽有僞佐將張遇春率衆萬餘。來營乞降。鮑超以勁敵在前。遽收降衆。恐生他變。諭令暫駐旌德之三溪。俟立功後再議。至是太平敗匪。遁出黃華嶺外。不滿七八千。將圍折入三溪。潛結張遇春之衆。竄併涇縣。乃行甫數里。見張遇春整隊而來。出賊不意。縱橫格鬥。賊大錯愕。望密箐叢莽中踰嶺急走。張遇春入山搜捕。殺賊三千。擒賊至八百餘名。

之多。古逆一殺。幾無子遺。時鮑超已回軍甘棠。既得張遇春獻捷之信。旋聞涇賊將由灣灘至鳳村上竄。二十七日。傳集各營。並張遇春降卒。成軍以進。將及鳳村。賊已聞風退遁。縮入灣灘。我軍知賊怯甚。奮勇疾馳。遂薄灣灘下寨。二十八日。鮑超先派張遇春擇險設伏。乃以所部八營。連環進擊。使出壘之賊。無或少休。煎炳南楊鎮魁劉順隆等。潛出左路。譚勝遠張應超梅仁富等。潛出右路。張遇春伏兵。突從後路如牆壓下。該逆惶遽失措。不能歸壘。唐仁廉馬勝奎率族縱馬。直擣中堅。盡破灣灘卡壘。躡賊尾追。至於城下。梅仁富先拔西門水涇。唐仁廉等隨毀東南土壘。一擁入城。登時克復。斬獲甚多。此二十三日新收降人。截擊太平餘逆。二十八日進復涇縣城池之情形也。臣查石壕太平南蔽踰歛涇縣。東達宣城。爲戰守所必爭。鮑超一軍。自拔青陽而後。仗聖主之威。席全勝之勢。未逾七日。連復三城。從此羣孽喪膽。蕃勦寧國。漸有把握。在事出力員弁兵勇。可否容臣彙入青陽一案。保獎之處。出自恩施。至力戰陣亡之將弁二十四員名。另繕清單。應請飭部從優議卹。所有官軍乘勝克復石壕太平涇縣三城緣由。謹繕摺由驛六百里具奏。伏乞皇上聖鑒訓示。謹奏。

克復巢舍和三城並銅城關等隘摺 同治元年四月初四日

奏爲水陸各軍。克復北岸巢舍山和州三城。並攻奪銅城關雍家鎮裕溪口西梁山沿江四要隘。恭摺馳報。仰祈聖鑒事。竊自逆匪分踞江岸以北。上援廬州。下衝金陵。全恃分布堅城。據守險要。以通上下之氣。而阻進兵之路。江蘇布政司曾國荃到防以後。與水營總兵李成謀。成發。翔等熟商。以爲欲制賊命。必先從巢縣下手。欲攻巢縣。必先從銅城關下手。因分撥陸隊。會合水軍。剋期進取。三月十五日。曾國荃自率十二營。由林台過河。以信巢縣東北一路。令劉連捷副後南後等營。赴望城岡堅修營壘。以扼巢縣正南一路。復令朱寬義朱惟堂朱洪章楊鎮南馬步各營助之。詎營牆甫築數尺。巢縣之賊。繞出田埂。分股來撲。我軍排陣迎戰。賊方少卻。把總鄭安盛張興富衝賊過猛。歿於陣中。朱洪章馳斬賊酋。劉連捷朱寬義等揮軍縱擊。斃賊四百有奇。餘悉潰走。我望城岡之營。駐紮既定。會國荃派原駐運漕之陳湜蕭孚泗周惠堂等。往約記名總兵成發。翔。帶內河師船。暨王東華蔡東祥等。帶淮揚師船。夾勦銅城關之賊。維時成發。翔先接數營。駛入清溪河。而親率所部。同淮揚後營蔡東祥。前營賴榮光。右營陳東友。中營陽利見。來會於銅城關渡口。十八日。議以水師攻關。東石壘。陸師攻關。西土壘。我軍齊

進。賊卽出拒。戰不逾時。成發翔陽利見帶隊登岸。繞壘大呼。衆勇抽刃環刺。遇者輒斃。賊乃棄壘散竄。石壘既破。土壘亦平。立將該鎮克復。銅城閣之前。則有雍家鎮。爲焦湖之鎖鑰。亦巢舍之外藩。水陸兩軍。謀於十九日乘勝進取。陳湜分制字營。趨鎮之南。蔡東祥及親兵營。分早隊趨鎮之北。仍以戰艦數十。密排水次。萬礮同轟。聲徹天半。適總兵李成謀。李朝斌。彭楚漢。羅進賢等。帶外江水師。由白馬嘴飛檣而來。分路登岸。四面環攻。岸上賊衆。悉遁入船。河中賊剌。悉擊入水。倖脫之賊。十不及一。此三月十五日。擊退望城岡竄賊。十八十九等日。攻復銅城閣。雍家鎮之情形也。先是雍家鎮一隘。尙在攻而未下。會國荃親率陸師。星夜渡河。已至巢縣之北。連營旂山鼓山。放望岡一帶。王東華水師。亦由清溪河進攻巢縣之東門外。至是成發翔陽利見各率礮刺。先後駛抵河下。併力奮攻。時至夜分。城上更鼓忽絕。城中烟燄橫飛。旋獲賊謀。訊供逆酋僞顧王吳于孝。僞封天義徐同江。恐巢北陸師進。而合圍。歸路已斷。焚屋焚糧。圍向含山脊通。會國荃急令劉連捷朱洪章朱寬義朱惟堂等營協同水師。於二十日辰刻會復城池。而自將張勝祿武明夏李臣典等十三營。及楊鎮南所部騎卒。三路跟追。縱軍截勦。伏尸數十里。乘勝馳抵含山城外。該城守賊。甫見敗賊之狂奔。旋駭官軍之踵至。聞風喪膽。不敢拒戰。相率竄奔。各軍遂入含山縣城。搜獲賊糧。逾二千石。撲殺餘匪。近三百名。會以日暮雨集。徹夜不停。次日駐軍少息。二十二日會國荃拔營疾進。行未中途。偵知巢舍漏網之三賊渠。收集醜黨。尙在鰓魚背過江。乃以偏師向鰓魚背。而以正兵進襲和州。逆首僞東天義劉淮久。僞侍天安尹賢瑞。未及糾衆交鋒。各營哨以火毬火箭環城壘而轟。乘賊譁亂。克城毀壘。立復和州。殺斃甚衆。得礮械米穀尤多。乘勝追賊至鰓魚背。合軍勦洗。江流盡赤。此二十日連復巢縣含山。二十二日克復和州之情形也。北岸要區。悉爲我有。所未得者。裕溪口而外。尙有西梁山爲第一重險。二十三日會國荃統全勝之師。循江而上。將與各水管共設攻取之謀。乃師次木橋鎮。忽遇零匪七八百衆。排列洲上。呼舟爭渡。卽派信字仁字嚴字三營。及馬隊一營。繞出洲前。圍而殺之。無一得脫。維時李成謀外江水師。成發翔內河水師。及蔡東祥等淮揚水師。早至西梁山。下水勇各執長炬。鏘斷截江鐵索。飛駕師船。環轟不下。比會國荃一軍馳至。見該處高山爲險。深溝高壘。礮眼層列。勢難仰攻。商令水師扼江面以擊賊船。陸師布長圍以困賊壘。籌商未定。適陳湜蕭孚泗亦引軍來助。具述彭毓楮周惠堂等於本日會同蔡東祥陳東友成俞卿等水軍。攻

裕溪口克之。瀆戰於江心洲。殺賊無算。賊向北岸下游而竄。乃知我軍在木橋鎮洲上圍殺一股。卽裕溪口遁出之賊也。是夜會國荃冒雨結營。逼壘而陣。另挑銳卒守要路。以杜旁竄。旋有數賊持書自投。詭稱賊目僞銳天義涂萬起。以偷渡南岸。餘願舉衆乞降。會國荃察知情僞。姑執之以觀其變。二十四日禱明。賊乘猛雨火器不燃。盡悉衆踰壘而出。向江州一路衝走。水師陸師爭起搏擊。該賊先有降約。後有退志。衆心紛亂。引頸受誅。尸積洲次。罕有脫者。遂奪取西梁山。撥軍駐守。此二十三日攻取裕溪口。進勦江心洲。二十四日旋克西梁山之情形也。臣伏查長江天壘。久爲賊踞。自進兵北岸以來。波旬之間。連克蕪含和州三城。並克要隘四處。西梁山古稱天險。該逆所恃。爲金陵門戶。茲以輕兵奪獲此關。實足伸天討而快人心。除會國荃不敢仰邀議敘外。此次尤爲出力之提督銜福建漳州鎮總兵李成謀。請交軍機處記名。遇有提督缺出。請旨簡放。提督銜浙江處州鎮總兵李朝斌。請交部從優議敘。綏靖鎮總兵李濟清。記名總兵成發。翎左光培。均請賞加提督銜。總兵銜副將彭楚漢。羅進賢。均請交軍機處記名。遇有總兵缺出。請旨簡放。儘先副將鄧萬林。請賞給二品封典。儘先副將何昌登。請賞給勇號。儘先游擊郭仕林。請免補游擊。以參將儘先選用。五品軍功戴德祥。請以千總儘先補用。並請賞戴藍翎。加守備銜。候補道劉連捷。請賞加按察使銜。提督銜記名總兵張勝祿。請交部從優議敘。副將蕭開坤。武明長。朱寬義。朱惟堂。均請交軍機處記名。遇有總兵缺出。請旨簡放。花翎副將蔡東祥。王東華。均請賞給勇號。花翎參將陳東友。賴榮光。均請以副將歸兩江補用。參將朱洪章。李臣典。楊鎮南。均請以副將儘先推補道銜。候補知府陳澠。請以道員歸部。遇缺卽補。花翎知府彭毓樞。請交軍機處記名。遇有道員缺出。請旨簡放。花翎游擊陽利見。請以參將儘先補用。並請賞加副將銜。花翎游擊銜都司成俞卿。請以游擊儘先補用。並請賞加參將銜。陣亡把總鄧安盛。張興富。請敕部從優議卹。其餘在事出力員弁。可否容臣開單奏獎。出自恩施。所有水陸官軍克復兩縣一州。攻奪沿江各要隘緣由。謹會同大學士湖廣總督臣官文。安徽巡撫臣李續宜。恭摺由驛具陳。伏乞皇上聖鑒訓示。謹奏。

克復繁昌縣城摺 同治元年四月初四日

奏爲大股賊衆窺撲三山。經官軍併力擊敗。乘勢攻克繁昌縣城。恭摺馳陳。仰祈聖鑒事。竊三月十三四等日。駐

防三山花翎同知直隸州曾貞幹一軍。迎擊竄匪。迭獲大勝。臣於二十四日附片具奏在案。僞匪王賴文鵬既被重創。遁入繁昌。復約該處踞賊僞佐將林有志。僞亞天豫吳大背等。於十八日糾黨八千餘人。乘夜嘯聚松林口。將謀再逞。十九日昧爽。由松林口分四路迤邐而來。一股出汪家橋。圍犯張唵所部唵字營。一股出月子橋。圍犯成東昂所部東字營。一股出木雞山。圍犯黃潤昌所部崑前崑後兩營。仍分另股從楓樹圩渡河。潛至老山一帶。冀襲諸營之後。曾貞幹升高瞭望。見附近村落。烟燄不斷。旌旗掩映。林谷間往來如織。或卻或前。乘該逆尙未備營。卽令黃潤昌成東昂張唵等。各出六成隊伍。分道馳勦。並令晏恭山恭字營。陶保堂保字營。抄出三華山麓。策應各營。兼備老山襲後之賊。未幾。賊隊齊至。更番迎撲。時值東北風盛。利在火攻。我軍以鎗礮環轟。火隨風狂。對陣眯目不能仰視。唵字崑字等營。先將賴林二逆乘勢擊卻。羣賊大亂。倉皇欲遁。逆渠吳大背猶恃老山伏賊未發。回轍轉門。驅衆向前。曾貞幹親率會正明葛東庭各營哨。驟馬而至。突入垓心。槍擊吳大背殪之。縱橫盪決。所向盡靡。諸路敗匪。先後潰至馬口地方。爭渡而溺者無數。二十日。曾貞幹諜知該逆退踞繁昌城內。不敢復議出戰。乘此有隙可圖。定計濟師以襲之。是晚漏甫二下。傳令黃潤昌成東昂胡基茂等。各撥兩哨。攜帶雲梯。偃旗息鼓。向松林口疾馳而進。會抵城下。令崑前營趨北門。崑後營趨東門。東字營趨西門。留南門一面。闕而不圍。以恭保險三營爲游兵。截擊南路逸出之賊。曾貞幹所帶湘恆營。及會正明親兵騎隊。設伏於松林口內。一應攻城之官軍。一防蕪湖之賊援。時至五更。我營束薪爲炬。火光突上。礮聲環逼。振撼城樓。城賊驚起。排列壕口。亦以火器下擲。相持未久。天已向曙。晏恭山陶保堂張唵等。正思引軍助戰。瞥見賴逆先率醜黨由南門拔關而遁。急回軍兜截。曾貞幹率會正明馬隊伏兵。齊夾夾擊。賴逆奪路向南陵涇縣竄走。維時薄城將士。愈攻愈奮。成東昂黃潤昌親冒矢石。從西北門女牆缺處。緣梯先登。徠升而上。衆軍一擁盡入。合力搜勦。林逆率敗殘餘匪。在亂軍中乘閒潰逃。遂於二十一日。克復繁昌縣城。計兩日之戰。擒賊三十四人。斃賊一千六百名。所獲礮械。不可數計。復查繁昌地處濱江。淪陷八載。上以屏障南陵。下以犄角蕪湖。此次屢挫逆鋒。攻克堅城。三山各營將弁。著有微勞。除曾貞幹係巨胞弟。不敢仰邀讓敘外。所有尤爲出力之兩江補用參將會正明。請賞給勇號。並請賞加副將銜。五品銜補用知縣黃潤昌。請免補本班。以同知直隸州知州補用。並請賞戴花翎。補用副將直勇巴圖魯晏恭山。請

賞加總兵銜。兩江補用參將陶保堂成東昂。均請賞加副將銜。參將銜兩江補用遊擊張陞。請以參將儘先補用。把總胡基茂。請以守備儘先補用。並請賞戴藍翎。其餘出力員弁兵勇。可否容臣查明彙案保獎。以昭激勸。所有擊賊獲勝。隨克繁昌縣城緣由。謹繕摺由驛六百里陳奏。伏乞皇上聖鑒訓示。謹奏。

近日軍情片 同治元年四月初四日

正封摺間。又接會真幹函稟。三月二十七日。水陸會同克復魯港要隘。蕩平石壘石卡。奪獲賊船賊礮甚多。三十日克復南陵縣城。其詳細戰狀。俟具稟到日。續行奏報。統計近日大江南岸。克復城池六座。關隘一處。北岸克復城池三座。關隘四處。均在萬壽前後半月之內。多隆阿圍攻廬州。狗逆固守不出。四面援絕。嘗易得手。左宗棠一軍。與僑侍王轉戰於常山江山一帶。十六十八二十二等日。屢獲勝仗。掃蕩賊壘無數。趙景賢久守湖州。歸然尚存。其三月初二日發出密信。求援甚迫。三月十三日發出密信。賊勢少退。情形稍鬆。臣飭催鮑超一軍。一面進圍寧國。一面派隊馳廣德。馳救湖州。又另派遊擊李楚材。帶千餘人。由績溪聞道援湖。二者有一處先到。或可保全湖州。理合將近日各路軍情。附呈梗概。伏乞皇上聖鑒訓示。謹奏。

克復旌德縣城摺 同治元年四月十五日

奏爲徽州防軍進攻旌德。擊走踞匪。遂將縣城克復。恭摺馳陳。仰祈聖鑒事。竊自提督鮑超一軍。連克青石太煙四縣以來。旌德與寧郡賊勢中斷。不能聯爲一氣。現駐徽州之福建臬司張運蘭。恐踞旌之賊。窮極思竄。竄走徽境。遂率所部相營。商同署皖南鎮總兵唐義順。派強中體後三營。以勤爲防。先發制之。三月三十日。張運蘭引軍出湯口。進攻廟首。諜聞賊在旌城。堅伏未動。並分股在三溪地方。往來哨探。謹備官軍。張運蘭知賊情震懼。乃集各營。偃旗息鼓。乘夜疾進。於四月初一日辰刻。行抵距城十里之跳生橋。先飭陳玉恆帶中右營。列旗兩岸。復分紆輪張聲。壯藩家麟。張兆輝。張遠恆各隊。作爲遊兵。以防賊由三溪抄我後路。仍親督諸將士。懸軍深入。一三三旗向北門。以唐義謨。蔣信玉。強禮等營應之。四五六旗向西門。以張運桂中左營應之。七八旗向南門。以彭先俊。楊道東中軍四壯應之。比及城闔。賊匿不出。張運蘭密遣前敵軍士。棄戈釋甲。偃臥道旁。故亂其伍。以誘戰。又從山後駐馬瞭望。遙見城賊。四五千衆。陣脚漸動。將欲伺隙出策。遂令攻北門之易開俊。葉明瑞。陳青雲。攻西門之

劉松山劉光明朱紹輝攻南門之黃委友賀國萬等。麾軍突起。排礮仰轟。競拔地鏡。躍壕直進。該逆惶急。繞城環走。飛石下擊。衆勇雖有傷亡。而奮力爭先。會不少卻。鼓聲礮聲。猛若疾雷。轟塌北門城牆丈許。西門城垛十餘處。張運桂冒烟突火。躬率士卒。蠲附而升。賊乃搶護壕口。急以火器死拒。我勇中槍而墜者四人。受傷甚多。張運蘭恐有挫失。暫令收軍。以俟詰朝進攻。初二日昧爽。各軍秣馬蓐食。再圖決戰。忽報城中之賊。受創膽落。悉數宵遁。一由烏嶺走寧國縣。一由梅嶺走竄寧郡。張運蘭入城捕殺餘孽。張運桂會合各旗營馳斬尾股。斃賊不少。解散脅從千餘人。搜獲米糧數百石。即將縣城克復。臣查旌德一城。山徑叢雜。攻守非易。饋運尤艱。此次孤軍進取。逾日告克。可以通徽寧之氣。而固石太之防。除將在事出力。及接仗陣亡之員弁兵勇。容臣查明。分別奏請獎卹外。所有徽州防軍克復旌德縣城緣由。謹繕摺由驛具奏。伏乞皇上聖鑒訓示。謹奏。

克魯港要隘復南陵縣城摺 同治元年四月十五日

奏爲水陸各軍會克魯港。旋分陸師。攻克南陵縣城。恭摺具陳。仰祈聖鑒事。竊官軍連下魯港一隘。南陵一城。臣於四月初四日。附陳梗概。聲明俟稟報到日。續奏戰狀在案。旋據選用同知直隸州曾貞幹稟報。繁昌既拔之後。諜知蕪湖賊援。潛在魯港。增黨屯糧。以圖抗拒。遂商同總兵李成謀。李濟清等。水陸並攻。爲日後進取蕪湖之地。三月二十六日。曾貞幹率湘恆營。及晏恭山陶保堂張唵黃潤昌陸師五營。進紮螃蟹磯之前。李成謀正右營。及左光培彭楚漢郭仕林水師三營。李濟清副中營。及羅進賢何昌登水師二營。分泊梟磯。並螃蟹磯之下。曾貞幹令各勇多備船筏。搭造浮橋。以濟陸兵。仍由江口決開堤埂。將彭楚漢所部舢板飛划。從決口盡駛入港。李成謀令戴德祥帶旱隊渡過南岸。與入港之礮船緊相倚護。二十七日。曾貞幹黃潤昌張唵引軍渡浮橋而進。專攻北岸賊壘。晏恭山引軍循魯港隄邊而進。陶保堂引軍循江邊大路而進。合攻南岸賊壘。李成謀督同各營官。在江面乘駕師船。轟擊水路之賊。彭楚漢復從港內率水勇飛槳而出。該逆腹背受敵。撲水死者甚衆。賊船百餘號。賊礮數百尊。悉爲我有。兩岸陸師見賊勢已挫。急向石壘石卡盡力奮攻。又得水師各營登岸來助。賊即潰退。立將三壘十餘卡。一律毀平。遂復魯港。餘匪悉向蕪湖竄走。魯港既克之後。所可下達蕪湖而上。蔽寧國者。止有南陵一縣。則亦以速取爲宜。二十九日。曾貞幹飛調分守魯港之黃潤昌張唵等。各率五成隊伍。由石苑渡河而南。仍

親率所部。並晏恭山陶保堂成東昂各營。出繁昌山路。整軍疾進。密約四更時分。各挾火具。會抵南陵城下。初。我軍之將攻魯港也。繁昌戍卒。抽調一空。曾貞幹以該處密邇南陵。恐賊伺隙而動。豫遣死士蓄髮易裝。先往南陵附城一帶。相度營基。暗插標識。復揚言大兵即日壓境。以攝賊心。賊多自危。不敢外竄。至是曾貞幹帶同馬步諸軍。乘夜猝至。薄城而營。萬炬齊燃。光燭數里。城賊倉皇驚起。疑我軍從天而下。一時呼聲登陴。紛如蠅旋。手頭及粟。火器不及燃發。曾貞幹揮令各營。環城施礮猛擊。逾時。豁然一聲。葺塌數丈。衆軍從城缺攀躋而入。縱橫擊刺。所向盡靡。賊乃擁至東門。望寧國一路而逃。卽於三十日卯刻克復南陵縣城。城中捕斬五百餘級。搜獲米穀礮械甚夥。臣查魯港爲蕪湖門戶。南陵亦寧郡藩籬。數日之間。相繼攻克。從此分道進兵。規取寧蕪。可無後顧之慮。在事員弁。著有微勞。可否彙入繁昌案內。容臣查明保獎之處。恭候聖裁。所有官軍會克魯港要隘。旋復南陵縣城緣由。謹繕摺白驛馳奏。伏乞皇上聖鑒訓示。再臣玉麟現在馳赴下游。駐紮銅陵。督帶各營。赴前敵西梁山一帶察看進兵形勢。合併陳明。謹奏。

克復太平蕪湖兩城摺 同治元年五月初二日

奏爲水陸各軍。渡江夾勦。克復太平府城。蕪湖縣城。並克金柱關東梁山各要隘。恭摺馳陳。仰祈聖鑒事。竊自逆匪竄踞金陵。以蕪湖爲屏障。以東西梁山爲鎖鑰。尤以金柱關之僞城爲關鍵。官軍旣克北岸之西梁山。賊於南岸三處。防守尤嚴。臣玉麟與曾國荃定計。必從金柱關入手。則蕪湖與金陵老巢。橫中截斷。賊勢乃孤。遂飭總兵李成謀。於四月初五日。會督各營師船。由鍼魚嘴駛進采石磯江口。焚船毀壘。率勇登岸。突薄金柱關僞城。萬礮轟擊。幾將得手。以東梁山賊援大至。整隊而還。臣等知該處地險城堅。非水陸併攻。不能制賊死命。乃將上游水師。悉調赴裕溪口以下。二十日會國荃率馬步十五營。自西梁山駕舟南渡。近逼金柱關下。沿隄結營。臣玉麟恐築壘未固。賊將擾我陸師。乃派李朝斌帶外江新右營。暨俞俊明任星元王吉內河水師三營。從上游奮攻。以躡賊後。派成發翔鄧萬林內河左右營。暨王明山萬化林郭明鼈唐學發外江水師四營。黃翼升陽利見陳東友張元龍成俞卿楊宏勝王東華蔡東祥淮揚水師八營。從下游環擊。以逼賊前。曾國荃立營旣定。料金柱關之賊。有水軍牽制。不暇顧及太平府一路。乃率各營哨潛分隊伍。捲旂疾馳。遙望賊在北門修卡。立即揮軍掩襲。斬卡突

進賊方駭走入城。閉關不及。我軍擁進北門。羣逆狂奔。驅出南門。截殺三百餘。遂復府城。蓋賊不料官軍越蕪湖而先攻金柱關。尤不料甫抵金柱。遽襲郡城。此四月二十日克復太平府城之情形也。是夜水師衆營。輪攻金柱關。並未收隊。二十一日王明山率外江四營。先赴下游鯁魚嘴一帶。臣玉麟親率成發翎李朝斌任星元王吉張元龍等。循隄周視。布壘若垤。中峙僞城。雄互數里。未易猝攻。旋又瞭見會國荃一軍。已繞出三汊河上泗渡。對河而陣。壘戰方酣。遂相率還營。分水師爲三隊。以一隊守定江路。以一隊衝入河內。直逼塔下。以一隊馳登陸。環城壘而轟。牆圯棟折。屋瓦皆飛。賊亦矢石如雨。蔽空而下。時近夜分。黃翼升李朝斌成發翎東草爲炬。指麾督戰。陽利見王吉帶同弁勇。蛇行而進。將越濠溝。外委王有章。中槍殞命。衆軍愈戰愈奮。羣以火箭飛射西門。哨樓賊於烈燄中衝突而出。各水勇躍上堤埂。短兵擊刺。積穢滿渠。即時攻復金柱關。而分撥黃翼升成發翎賴榮光蔡東祥張光泰王東華楊宏勝張元龍等數營。乘風上駛。往襲東梁山。時值會國荃陸軍擊退內河西岩之賊。引軍來助。甫將僞城及三汊河上駟渡數十壘。一律毀平。獲大礮二百七十餘尊。旗幟刀矛萬餘件。而諜者又報東梁山經黃翼升成發翎等一戰而下。已移軍進次蕪湖。此二十一日連克金柱關東梁山之情形也。先是蕪湖賊目陳星斗沈國萬陳太和王岳來等。經選用同知會貞幹秘令黃潤昌設法招撫。本有大兵臨境。舉衆內應之約。至是金柱關東梁山相繼攻拔。蕪賊已成孤注。正可乘其自疑而圖之。二十二日。會貞幹自率所部將領。及周萬俾劉祥勝新後祥後等軍。循江而進。偃壘立營。並會商李成謀決開隄岸。駛入小划。四面合圍。適黃翼升成發翎所統淮陽內河各水師。自金柱關乘勝飛檣而來。萬礮同轟。聲震天半。羣賊內亂。棄壘潰奔。圍而殺之。幾無脫者。城賊惶懼失措。悉向官徒門濮家店而逸。維時會國荃親督部隊。躡賊至戴橋地方。聞蕪湖已復。揣該縣逸出之賊。必折竄而東。一面令彭毓橘設伏於薛鎮渡口。一面以輕騎追及於賈家灣。乘賊半濟。突起奮擊。殺斃甚數。生擒二百餘名。賊乃轉走護駕墩。掠舟偷渡。李朝斌帶各哨舢板。自小花津橫出截之。薄暮鏖戰至三更。水師傷亡甚多。李朝斌不肯稍退。比及黎明。賊趨薛鎮渡口。適爲彭毓橘伏兵所敗。除繳斃溺斃外。生擒至七百五十餘名之多。釋放面有刺字者。餘皆駢誅。黃翼升擊賊於清水河。俘馘亦以千計。蕪湖東梁賊黨。漏網無幾。此二十二日克復蕪湖縣城。並追賊疊勝之情形也。王明山所帶四營之赴鯁魚口者。二十二日抵烏江鎮。該鎮對岸有烈山石

壘二座。斜對九墩洲爲犄角之勢。王明山帶各船渡江。逼壘攻擊。逾時壘中旗亂。我師各船分拍上下兩岸。俟賊出壘。登岸截擊。擒斬無算。立破堅卡。其九墩洲之上。又有大勝關賊壘一座。礮船設之。王明山環攻。遊壘未遽得手。萬化林將江中賊船。全行焚燬。壘賊大震。奪路狂奔。我軍四面蹙之。刻平遊壘。奪獲鎗礮極多。此又王明山等攻克太平以下兩卡之情形也。臣等伏查太平府屬。莫要於蕪湖一城。尤莫重於金柱關一隘。自攻奪此關。未逾三日。上下名城要隘。悉爲我有。從此全局一振。上而寧國。下而金陵。均有可乘之機。除會國荃會貞幹不敢仰邀議敘外。此次尤爲出力之員。相應繕具清單。懇懇恩施。以昭激勸。陣亡各將弁。俟查明另單請卹。其餘在事出力員弁兵勇。可否容臣等查明奏獎之處。恭候訓示遵行。所有水陸官軍。連克府縣兩城。沿江各要隘緣由。謹會同大學士湖廣督臣官文。安徽巡撫臣李續宜恭摺由驛六百里具奏。伏乞皇上聖鑒訓示。謹奏。

議覆王慶雲漕督兼巡撫原奏片 同治元年五月初二日

再臣承准議政王軍機大臣。字寄同治元年二月二十三日奉上諭。據王慶雲奏江北地當衝要。現在督撫分駐。鞭長莫及。請就近暫歸漕督辦理一摺。據稱自蘇常失陷。巡撫以下。駐紮上海偏隅。與江北各屬。道途中梗。而守令之升調。與夫錢穀刑名。仍須詳稟江蘇巡撫覈辦。輾轉需時。其公事之棘手。不問可知。會國藩統領全師。兼顧浙皖。恐不暇注意地方。都與阿等運籌軍務。於吏治民生。亦無暇講求。守令功過不明。何以整頓地方。保衛完善。現在南糧未能挽還。漕運總督公事無多。請頒給敕書。令其巡撫江寧布政司所屬地方。仍兼辦全漕事務。並於各屬適中之地。設爲省會。將江寧藩司。暫移江北。兩淮運司。兼辦江北刑名驛傳事件。與漕督藩司同駐一城地方。公務均歸漕督辦理。無須復歸江蘇統轄等語。著會國藩都與阿體察情形。悉心會議具奏。原摺著鈔給閱看。一等因欽此。臣王慶雲所奏。尙係咸豐十年。蘇省官紳紛紛來臣處。請兵設立水驛。專用輪船遞送文書。往返撫衙門文報常通。紀綱漸立。逮安慶克復以後。蘇省官紳紛紛來臣處。請兵設立水驛。專用輪船遞送文書。往返不過旬日。李鴻章抵滬以來。聲息不隔。呼應尤靈。凡總督衙門應辦事件。臣儘可照常管理。未敢將地方公務。概行廢閣。臣於上年十一月二十五日。覆奏摺內。即建議巡撫宜駐鎮江。欽奉諭旨。俞允嗣因蘇人以重價雇船來迎。李鴻章先赴上海。以答輿情。俟料理就緒。即當速移鎮江。以符原議。論江蘇之幅員。蘇州偏於南隅。淮安偏於

北隅。惟鎮江居適中之地。而又扼形勝之區。於軍務地方。兩者俱可攬其全綱。自應仍照舊制。責成新任撫臣李鴻章統籌兼顧。溯查咸豐四年。皖江南北。賊氛中斷。廷臣請設皖南巡撫。部議以窒礙而未行。該尚書王慶雲請改漕督爲江北巡撫。另設省會之處。事同一律。應請毋庸置議。所有遵旨會議緣由。謹會同江寧將軍臣都興阿附片覆陳。伏乞皇上聖鑒。謹奏。

派員辦廣東釐金片 同治元年五月初二日

再臣前奏請簡派大員督辦廣東全省釐金。解濟江浙軍餉。三月二十七日。奉寄諭。一廣東釐金。現派晏端書督辦。並諭令由海道前往。以期迅速。卽著會國藩遴委賢員。隨同赴粵辦理。一等因欽此。又三月二十九日。奉寄諭。一著齡奏交卸撫篆。調練籌餉一摺。該撫遵旨赴閩。亦專爲援浙起見。所議抽釐濟餉之處。自應准其試辦。惟同一江浙軍餉。同一廣東釐捐。而著齡辦之於始。晏端書籌之於後。一事兩歧。恐有事權不一之患。著晏端書恪遵前旨。迅由海道馳赴廣東。與勞崇光將一切釐金事宜。妥商籌辦。其江浙皖省之餉。與著齡援浙所需。應如何分別籌解。及歸併報銷之處。並著與會國藩著齡函商。妥議具奏。一等因欽此。仰蒙皇上俯念餉需緊迫。指示周詳。曷勝欽感。晏端書何日起程赴粵。尙未接其來信。抽釐經始之際。諸事紛繁。必須廉正明幹。熟悉釐務之員。隨同辦理。擬派在籍布政使銜江西即用道黃冕。江西贛南道李瀚章。察使銜記名道趙煥聯。補用道蔡應嵩。卽日馳赴韶關。創議規條。部署一切。又派湖南補用知府顏培鼎。前署江西廬陵縣丁日昌。前署江西餘干縣陶慶。仍隨同前往。分赴各卡。妥立章程。其廣東官員中。擬派糧儲道蔣志章。會商妥辦。虎門同知吳贊成。隨同經理。此九人者。類皆才識闊遠。條理精詳。總期滴歸歸公。無病於廣東商民。有益於江浙軍務。其如何分解之處。臣已函商晏端書。應由該副都御史於抵粵後。會商具奏。謹附片陳明。伏乞皇上聖鑒訓示。謹奏。

官軍水陸並進疊克要隘駐軍兩花台摺 同治元年五月十七日

奏爲官軍水陸並進。疊克秣陵關江心洲等要隘六處。圍逼金陵。駐軍兩花台。恭摺馳陳。仰祈聖鑒事。竊自水師陸師。渡江夾勦。攻克太平蕪湖兩城。江岸數隘。臣等於五月初三日。會奏在案。旋報丹陽鎮大股賊黨。因薛鎮戰敗。焚糧宵遁。江西藩司會國荃於四月二十八日。率所部各營。乘勝前進。破周村卡。遂駐江寧鎮之板橋地方。熟

察形勢。必從大勝關三汊河下手。陸師乃有運糧之路。水師乃有立營之所。然橫距三十里外。尙有秣陵一關。環水魏峙。金陵之雄鎮。亦大勝關之右輔也。賊備未嚴。是可襲而取之。五月初一日。曾國荃引軍馳抵關下。毀壘殺賊。轉戰無前。守關賊奮汪伍登尙彪蕭璧等。舉衆獻關。得驢馬二十一匹。收降卒四百餘人。餘悉解散。仍飛筋前隊十二營。進大定坊繞出三汊河後。緊逼大勝關。編木作橋。爲詰朝進攻計。初二日。曾國荃派撥軍士。先伏橋邊。而以後隊六營。捲旂疾進。將謀合圍。賊見我軍抄後。懼爲長圍所困。乘夜縱火。棄寨而走。公守敏字義字長勝等營。踰橋追襲。戮賊數百。遂奪大勝關三汊河兩壘平之。此五月初一二等日。攻復秣陵關大勝關三汊河之情形也。維時臣玉麟駐師金柱關。聞曾國荃懸軍深入。恐其爲賊所乘。急約提督王明山。率水師各營分載和州守卒。渡江策應。甫由烈山駛近頭關。適曾國荃亦於初三日昧爽整旅而來。薄關下寨。衆水勇於狂風巨浪中。排礮仰擊。無或少休。陸軍乘之。立拔頭關。過此以往。則爲江心洲。堅大石壘。倚洲雙鋒。對岸賊衆如麻。臣玉麟會同王明山。親督萬化林王吉成發翎郭明鼈唐學發陳百壽喻俊明彭楚漢等八營直逼洲次。飛礮入壘。賊亦穴牆還擊。羣子蔽天而下。士卒傷亡。裹尸更進。戰至日晡。各勇挾火具登岸。蛇行蘆葦中。偪壘縱焚。燎及蘆葦。一片火光。江面人聲。喧若鼎沸。我軍振臂齊呼。躍入賊牆。燒燼羣醜。撲火燭水。橫塞江流。賊船百餘艘。賊礮數百尊。悉爲我有。登岸水勇仍上師船。鼓槳飛行。並奪蒲包洲。遂泊金陵之護城河口。曾國荃由陸路倚設水師。驅軍直入偪紫雨花台。距城不及四里。城賊數來窺犯。輒行擊卻。此初三日連復頭關江心洲蒲包洲之情形也。臣等查金陵城大而堅。未易猝拔。前向榮和春等屯兵七萬。歷時八年。師老無功。此次水陸兵數僅逾二萬。雖濱江重險。先後攻奪。尙難遽爲仰攻之策。應俟會貞幹大營。多隆阿一軍。增調到防。再籌大舉。所有出力將弁兵勇。可否容臣等歸於太平蕪湖案內。擇尤保獎。出自恩施。所有水陸各軍。疊復沿江要隘。圍偪金陵緣由。謹會同大學士湖廣督臣官文。安徽撫臣李續宜由驛陳奏。伏乞皇上聖鑒訓示。謹奏。

參革陳由立等摺 同治元年五月十七日

奏爲特參私行遠颺之將領。請旨革職。以肅軍紀事。竊提督銜記名總兵福建延平協副將陳由立。前奉諭旨。飭赴河南軍營。嘗以圍攻青陽正緊。經臣奏留鮑超原營。隨同進剿。欽奉諭旨。允准轉飭欽遵在案。茲據鮑超呈稱。

該員留營以來。不知感奮。輒因上年有降補守備鄭陽和藉故告假。私往湖南投効。統帶多營之事。相形見絀。遂生缺望。竟與記名總兵余大勝先後託病請假。始在大通養病。旋赴湖北就醫。且甫離營次。即遣人潛誘哨弁。播惑軍心。相率颺去。現聞尙在湖南一帶。呈請將陳由立余大勝鄭陽和奏參。並將本年隨同陳由立颺去之李殿華等十六員。隨同余大勝颺去之吳太等九員。上年隨鄭陽和颺去之遊擊龍德亮等三十八員。一併參革等情前來。又疊准湖南撫臣毛鴻賓來咨。鄭陽和已令帶勇千餘。防守邊境。河南撫臣鄭元善來函。陳由立已行抵湖南。仍委令赴湘募勇三千各等因到臣。伏查該員陳由立起自勇丁。曾未數年。保至總兵。加提督銜。補授副將。實缺。職位不爲不崇。余大勝鄭陽和亦均保至總鎮。受恩不爲不渥。與鮑超相從。日以同甘共苦。乃並不具稟候批。因假離營。任意遠颺。實屬大干軍令。若不嚴行懲辦。則此風一開。以軍營爲傳舍之地。以投効爲遁逃之藪。流弊甚長。關繫極大。相應請旨將提督銜記名總兵福建延平協副將陳由立。記名總兵儘先補用副將余大勝。記名總兵降補守備鄭陽和一併革職。並請敕下湖南撫臣。撤去鄭陽和帶勇差使。查明陳由立余大勝等。均不許招勇立營。不許逗遛境內。派員押回皖南原營。責令立功自贖。其被誘颺去之李殿華吳太龍德亮等。受人指嚇。從寬免其參示。亦令回營效力。仍求皇上通諭各路軍營。於外來投効將弁。非有統兵大員移咨文件。概弗准留。庶可懲跋扈之風。而杜效尤之漸。除將陳由立副將劉付送部註銷外。理合恭摺具奏。伏乞聖鑒訓示。謹奏。

邊查馮子材兵勇滋鬧情形片 同治元年五月十七日

再臣承准議政王軍機大臣。字寄同治元年二月二十二日奉上諭。鎮江防勦。要關緊要。馮子材在鎮日久。熟悉地方情形。且逆匪屢次撲城。尙能抵禦。是以令其暫緩赴滬。仍留鎮江督辦軍務。若如海全所奏。馮子材於所存捐項。並不隨時支放口糧。以致兵勇譁然。揚言搶掠公署。尙復成何事體。都與阿駐紮江北。去鎮城甚近。自必確有所聞。前請將馮子材調赴上海。但云上海無帶兵之將。而於馮子材有褒語無貶詞。著都與阿將海全所奏各情。先行據實馳奏。若果如海全所奏。馮子材撫綏兵勇。未能帖服。即著據實指參。毋庸有所顧忌。知而不言。致滋貽誤。並著會同藩將鎮江兵勇滋鬧情形。及馮子材有無存錢不放情事。確切查明。另行據實具奏。等因欽此。臣遵即恭錄諭旨。咨由署江蘇撫臣李鴻章派員前往確切密查。茲准查復該委員常州府知府薛書常馳抵

鎮江。徧訪商民。余稱賒米搶掠。實係鎮營兵勇滋事。惟羣起爭奪之時。衆口譁噪。亦難保無江北兵勇在內。迨馮子材派兵查奪。海全袒護部下。派隊抵禦。彼此生隙。盡歸罪於江南兵勇。係屬實情。至都天廟盪金一項。經前後各委員收放。均屬有案可稽。該卡自上年十月起。全歸籌餉總局抽收。至十二月僅將貨捐一項。改歸馮子材派員經收。爲數寥寥。遂不逮總局全收之多。該兵勇未知底細。以爲同此一卡。前盈後絀。妄生猜疑。謂馮子材存錢不放。係屬隱度之詞。等因前來。臣復加察訪。自二月以後。鎮江餉缺如故。而兵勇亦未聞續有滋擾情事。則前謂統帥存錢不放。由於妄生狐疑。理尙可信。所有遵旨飭查緣由。理合據實覆陳。伏乞聖鑒。謹奏。

近日軍情片 同治元年五月十七日

再近日軍情自僑輔王揚七麻子退回寧國後。浙東之賊勢稍鬆。江西之邊防亦固。僑侍王尙在衢州一帶。左宗棠分兵留守開化馬金街。以固徽婺之防。親率馬步各營。赴衢勦辦。劉培元所部已由玉山入浙。仍俟蔣益澧大隊到防。方可由衢嚴兩郡分道而進。鮑超一軍。於初四日大獲勝仗。攻克寒亭管家橋等處。賊壘移營進紮。節節阻戰。尙距寧郡十餘里。據江蘇候補府趙炳麟稟稱。探聞湖州於五月初三日失守。鮑超以寧國賊勢重大。萬難抽兵援湖。李楚材問道赴援。不知何處梗阻。亦未趕到。臣一聞此信。且愧且憤。俟探明確實。續行具奏。曾國荃一軍由太平下逼金陵。本得建瓴之勢。惟該城前此數年。圍師七萬。此次兵僅萬餘。屯紮南面一隅。洪逆見憤不驚。似無懼之情。臣擬調多隆阿一軍。前往會剿。趁此軍威極盛之際。四面猛攻。當可得手。此時各省多故。處處須兵。臣愚謂宜以全力會辦江南。先復財賦之區。克一城有一城之利。拓一里取一里之財。究竟遠勝於他省。但使每年能解蘇漕百餘萬石。淮課數百萬兩進京。俾戶部稍資周轉。京師根本之地。有恃不恐。則各省可次第勦辦矣。俟函商官文多隆阿定議行之。除鮑超初四之捷。另行奏報外。理合附片具陳。伏乞聖鑒訓示。謹奏。

鮑超軍進攻寧郡勦平逆壘摺 同治元年五月十九日

奏爲鮑超一軍進攻寧郡。破賊於寒亭管家橋等處。諸壘悉平。恭摺馳陳。仰祈聖鑒事。竊浙江提督鮑超。統率馬步各軍。於四月二十五日。由青陽拔隊前進。甫抵清弋江。結筏東渡。諜報僑輔王楊逆糾衆十餘萬。堅守寧國府城。僑對王洪逆一股屯聚團山。圍犯蕪湖南陵等縣。僑衛王楊雄清一股踞紮寒亭獅子山。分擾梅家店管家橋。

一帶以阻進兵之路。鮑超知賊勢方盛，未可猝攫其鋒，乃於抱龍岡隔河布營，濬治牆壕，不遽出戰，以懈賊心。仍帶各營哨循山徑而入，勘明地勢。於五月初四日，先遣劉玉堂、吳騰芳二營，黃慶、唐仁廉、李文益三營，潛渡山岡，分道設伏。復飭周有勝、馬勝奎所部進薄寒亭，散布隊伍，誘賊出壘。鮑超親督將士，繞越翟村木瓜橋，涉淺過河，令總兵婁雲慶、劉順隆、王衍慶諸營突從左路進，以章志俊、志字四營繼之。令宋國、永譚勝、達熊、鐵生諸營突從右路進，以翦炳南、段大有兩營繼之。維時寒亭之賊，方以周有勝、馬勝奎孤軍深入，絕無後援，可吞而取也。遂出巢猛鬪，益逞梟悍。瞥見左右兩路大軍掩至，正在旁皇，卻顧乃附近村落中羣賊響應，擁衆齊出，排列山梁，數逾四萬。鮑超遂令顏紹榮、陳得勝、楊鎮魁等騰蹕而入，直搗中堅，縱橫盪決，將弁頗有損折。明與伍華瀚以騎隊抄出管家橋，先翦其右翼。宋國、永譚勝、達婁雲慶、劉順隆、王衍慶、熊鐵生等橫躍入陣，衝賊數段，不復成伍。適山岡後伏兵亦發，扼斷歸路。唐仁廉擒僞順天安楊民清，僞撫天福黎奉民於陣。馬勝奎周有勝乘勢搶過寒亭浮橋，徑取護橋二壘，毀之。賊乃負創驚潰，衆軍追襲二十餘里。將寒亭管家橋梅家店直至獅子山，賊館數十處，賊壘三十五座，同時踣平。一路斃賊六千有奇。楊雄清糾合零匪，遁回寧郡。臣查寧國一城，屏蔽蘇浙，爲賊與我所必爭之地。近日南岸連克數城，敗賊多萃於此，聞逆黨聚至二十萬之多。臣深以兵力單薄爲慮，自有此捷，則已復之數縣，賊或不暇復萌窺伺，而我軍節節進攻，圍逼郡城，亦漸有可乘之隙。除仍檄令速籌攻取外，此次陣亡將弁十八員名，另繕清單，應請敕部從優議卹。所有官軍擊賊獲勝，勘平寒亭管家橋等處逆壘緣由，謹繕摺由驛具奏，伏乞皇上聖鑒訓示，謹奏。

黃翼升署江南提督片 同治元年五月十九日

再臣欽奉寄諭，「署提督會秉忠於洙涇勤賊挫敗，本日已明降諭旨，將該員革職，飭令赴該大臣軍營效力。江南水師提督職任緊要，俟會國藩所派之帶兵大員到後，卽令接署，以資得力。」等因欽此。臣查江南營務廢弛，提督一缺，須有久歷戎行，威望素著之人，前往署理，方足以資整頓。查有提督銜已保記名提督淮陽鎮總兵黃翼升，樸實果敢，愛士耐勞，自咸豐十年七月間，經臣奏派與李鴻章共帶淮陽水師，蒙先皇帝簡授今職，屢著戰功。現在統帶師船，於本月十二日駛過金陵，前赴鎮江上海一帶，應遵旨令其接署江南水師提督員缺，松滬各

軍。悉歸節制。必能與李鴻章講求軍事。相與有成。是否有當。伏乞聖鑒訓示。謹奏。

謝弟國荃優敘貞幹加勇號恩摺 同治元年五月二十七日

奏爲恭謝天恩仰祈聖鑒事。竊臣於五月初一日。接准兵部火票遞到同治元年四月十六日內閣奉上諭。『會國荃等宣力戎行。連克要隘。洵足以褫賊魄。而快人心。頭品頂戴江蘇布政使曾國荃。著交部從優議敘。候選同知直隸州知州曾貞幹。著賞給迅勇巴圖魯名號。以示鼓勵。』等因欽此。臣當卽恭設香案。望闕叩頭謝恩。伏念臣同胞既翕。異數頻叨。曾籲金陵未克以前。不敢再邀渥澤。豈期玉陛酬庸之典。復蒙澤沛殊恩。錄毫末之微勞。命勳曹以優敘。勳庸公之迅奏。賜勇爵以嘉名。天語彌溫。臣心增懼。曾涓埃之莫報。實感悚以交并。臣惟有督飭巨弟等乘勝進攻。剋期會勤。勤以補拙。慎以圖功。集四七之將材。同收六代虎踞龍蟠之地。宣九重之恩德。一慰三吳水深火熱之民。所有微臣感激下忱。理合繕摺恭謝天恩。伏乞皇上聖鑒。謹奏。

議覆兼攝通商大臣摺 同治元年六月初六日

奏爲遵旨籌議恭摺覆陳仰祈聖鑒事。同治元年五月二十九日。承准議政王軍機大臣字寄五月十七日奉上諭。『前因薛煥熟悉外國情形。諭令以頭品頂戴。充辦理通商事務大臣。並經諭將洋人協勦諸事。會商新署巡撫李鴻章。妥爲經理。茲據薛煥奏。『南洋通商各口。事隸將軍督撫監督辦理。若專設大臣。統轄地方較多。鞭長莫及。事勢亦多格礙。該大臣稽察稅務。多屬具文。而一切辦公經費。以及書吏差役等項經費。均需添設。稽祿虛糜。於事無益。請卽裁撤。各歸本省督撫將軍經理。』並片陳。『長江通商。事屬創始。必需平時勦整隆重。乃能整服遠人。請於官文會國藩特簡一員。兼領其事。』各等語。南洋通商大臣。本係道光年間。經考英等議定設立。以爲交涉事件。在外商辦之計。迨英法各國公使駐京後。一切緊要之件。均由總理衙門辦理。其餘關稅事務。則由管關之監督道員。會同各國領事官經理。仍由該省將軍督撫稽察。已足以資控馭。上海雖爲各國匯集之所。而所設祇有領事官。若該道辦理得宜。巡撫妥爲稽察。則諸務已有責成。所請裁撤之處。洵爲因時制宜。欽差大臣。本係改爲兩江總督兼攝。會國藩威望遠著。爲外國人所嚮服。長江通商事務。由該大臣經畫。自能措置合宜。惟前因會國藩辦理軍務。在江面布置。昕夕不遑。若再任以通商事務。非所以事體諒。現在江面肅清。應如何妥爲

兼籌之處。卽著酌量情形。迅速具奏。薛煥所稱南省。宜以督撫兼領。其駐紮之地。須離洋人稍遠。辦理方可順手。保李鴻章駐鎮以後。能否兼顧無誤。曾國藩從前曾經議及。並著一併詳籌奏聞。等因欽此。仰見皇上循名責實。因時變通之至意。臣才識凡庸。於西洋通商事宜。尤未諳究。第就各省海口論之。則外洋之通商。正與內地之鹽務相同。通商係以海外之土產行銷於中華。鹽務亦以海濱之場產。行銷於口岸。通商始於廣東。由閩浙而江蘇而山東。以達於天津。鹽務亦起於廣東。由閩浙而江蘇而山東。以達於天津。通商之有五口大臣。三口大臣。猶鹽務之有兩淮鹽政。長蘆鹽政也。通商之有監督關道。猶鹽務之有運司鹽道也。通商之綜匯於總理衙門。猶鹽務之綜匯於戶部也。通商惟長江交易最廣。以漢口爲都會。亦猶鹽務惟兩淮引地最廣。以漢口爲都會也。今薛煥請裁南洋通商大臣。歸併地方。亦猶道光十年。陶樹請裁兩淮鹽政。歸併總督也。以南洋之廣。設一大臣。統轄江楚蘇浙閩粵六省數千里之遠。薛煥所稱鞭長莫及。誠屬實在情形。所有廣東福建浙江三省。應遵此次諭旨。卽由監督道員經理。將軍督撫稽察。已足以資控馭。至長江深入腹地。路遠事繁。臣竊以爲當分別辦理。自輪船入鄂以來。洋人蹤跡。幾徧沿江郡縣。或傳教於僻壤。採茶於深山。違一言而嫌隙遽開。牽一髮而全身俱動。關道以洋人恃其凶橫。而不敢誰何。督撫以洋務非其專責。而不肯深究。勢必至睚眦小忿。皆取決於總理衙門。道途太遠。後患孔長。且立法之初。當規久之計。柔遠之事。必擇專精之人。今日求一二精於洋務者。尙難其選。而謂此後數十年。沿江兩督四撫。一一求精於洋務者而爲之。豈可得哉。臣愚謂此缺似不可裁。宜改爲長江通商大臣。專辦濱江四省中外交涉事件。或駐鎮江金陵。或駐漢口九江。添設官屬書役若干。廉俸經費若干。應請敕下總理衙門。會同該部核議。其漢人洋人之大小詞訟。在甌在鄂之正子各稅。何者由通商大臣專決。何者歸總理衙門核辦。亦應與駐京公使熟議。其北洋三口通商。事同一律。均宜討論職掌。永定章程。區區愚見。蓋爲數省計久長。非爲一人圖推諉也。至兩江總督一缺。統轄三省文武。兼管漕河兩端。鹽務又其專責。卽在承平之際。幹濟之才。已覺竭蹶不遑。況以微臣迂鈍之質。又值髮逆糜爛之餘。夙夜憂懼。顛蹟實在意中。不敢因偶爾之戰勝。儻來之虛名。遂自忘其醜陋。軍務未竣之前。臣實不能兼辦通商事件。署撫臣李鴻章資望尙欠。軍事方殷。亦於洋務不甚相宜。伏求皇太后皇上曲賜鑒諒。臣等幸甚。倘蒙天恩。另設長江通商大臣。則所轄地方有關涉洋務

者。臣仍當悉心籌畫。公家之利。知無不爲。昔年兩淮鹽政未裁之前。江督亦有緝私督運之責。湖廣亦有查引督銷之責。今於通商。推其意以行之。官文總理於上游。臣則稽查於下游。不敢因別有專員。遂爾置身事外。上負聖主委任之意。所有遵旨迅速籌議緣由。恭摺由驛六百里覆奏。伏乞聖鑒訓示施行。謹奏。

近日軍情片 同治元年六月初六日

再近日軍情。嘉定青浦兩城。被髮逆巨股圍攻。洋兵力不能敵。退至上海。逆餒彌熾。李鴻章所派湘淮各勇。駐紮虹橋者。被髮逆四面圍襲。李鴻章親往援救。二十一日內外夾擊。獲大勝仗。惟賊氛環伺。李鴻章目下斷不能移駐鎮江。楊載福於二十三日到皖後。旋至舒城與李續宜會晤一次。再行駛往金陵。籌商戰守事宜。曾國荃圍金陵之師。於五月二十三日在雨花台獲勝一次。惟地面太寬。兵力太單。多隆阿又統兵入陝。不能踐東下會勘之約。近聞僑忠王蘇州大股。將援金陵。陸路孤軍深入。旁近無勁旅援應。頗爲可慮。而今年上游兩岸氣勢。百倍金陵。失此可乘之機。又成持久之局。尤爲可惜。鮑超一軍於十五日進攻寧國之抱龍岡等處。連平賊壘。獲一大勝。已逾敬亭山。三面圍逼寧國。賊多糧少。當可得手。除鮑超曾國荃兩處詳細戰狀。容臣彙案總報外。謹先附陳梗概。伏乞聖鑒。謹奏。

議覆調印度兵助剿摺 同治元年六月二十二日

奏爲遵奉諭旨。妥議具奏事。同治元年五月二十九日。承准議政王軍機大臣字寄。五月十七日奉。上諭。總理各國事務衙門奏。據崇厚函稱。詢據英國領事官吉必勒聲稱。青浦嘉定二城。髮逆大隊湧至。華爾察看情形。難以抵禦。現在退回上海休息。有另調印度兵來。秋間大舉之說。崇厚擬請許其與兵。約其助剿。以收有用之效。該王大臣等處及外國兵入內地攻剿。不特得一處代守一處。足爲中國腹心之患。即得一處焚燬一處。如嘉定青浦二城。亦實爲地方瘡痍之災。東南蹂躪不堪。何可再受外兵之擾。請飭曾國藩等於外國兵未到之先。激勵三軍。將蘇杭要地。先行收復。否則設法防範。或與印度兵同力合作。不致滋擾等語。借兵助剿之議。疊經曾國藩等先後覆奏。余稱有害無利。前因上海喫緊。英法兩國幫同戰守。是以姑示羈縻。未經阻止。該兩國與髮逆仇隙已深。若徑調大兵。分路進攻。翦除髮逆。固屬大快人心。惟若盡如嘉定青浦之勢。則利不償害。且恐守以西兵。運掉

不能由我。爲患曷可深言。現在江南之師。遠克名城。已成破竹之勢。曾國藩函致總理衙門。擬令黃翼升統帶水師。由松滬直入太滬。以爲通兵之路。甚合機宜。著該大臣。卽乘此聲勢。督飭各軍進逼金陵。迅圖克復。李鴻章將上海事宜布置後。亦卽趕赴鎮江。由句容一路會師進剿。兩路夾攻。可期得手。若金陵旣拔。則蘇常勢必瓦解。官軍可一鼓成功。各要地均爲我有。自可杜外國覬覦之心。卽屆時調兵前來。見我兵旣已得手。則無所更用彼力。自必廢然思返。萬一金陵尙難遽拔。而印度大隊已到。應如何豫籌兵勇。以備臨時會同攻取。不致授柄於彼之處。著曾國藩等會商妥議。總期防患未然。免致臨時失措。總理各國事務衙門原摺片。均著鈔給閱看。一等因欽此。六月初九日復奉五月二十五日寄諭。近聞洋人因官軍進取金陵。擬撥輪船前來助剿。好勝爭功。是其故態。若必待西兵會剿。將來攻克金陵後。必啓其輕視之心。該大臣等務當激勵各軍。乘此破竹之勢。進逼金陵。迅圖克復。毋令洋人以助剿爲名。轉致另生枝節。等因欽此。伏查咸豐十年十月。蒙先帝垂詢俄法兩國助剿之事。臣覆奏以爲當許其來助而緩其師期。本年三月。蒙諭旨垂詢英法兩國助剿之事。臣覆奏以爲同防上海則可。借攻內地則不可。洋人若先攻蘇常。臣處無會戰之師。若克復城池。臣處亦無派守之卒。定議於先。或不致責怨於後等情。奏明各在案。茲復欽奉諭旨。以印度兵來。秋間大舉。飭令會商妥議。臣函商左宗棠李鴻章等。據左宗棠復函云。青浦嘉定二處。髮逆營至。夷兵遽遁。夷人之畏長毛。亦與我同。委而去之。真情畢露。斷無起印度之兵。助剿此賊之事。島人借助剿爲圖利之計。借起兵爲解嘲之詞耳。兵頭縱有此意。國主未必允許。印度縱有兵來。其數未必能多。據李鴻章覆函云。官軍自二十一日虹橋大捷之後。洋兵待我兵敬禮有加。提督何伯來營會晤。詞意和順。然窺其中若有不足者。青浦嘉定之退。不免羞恚。自云須八月後調大英兵來。恢復青嘉。該提督始能回國。並無調印度兵來之說。臣查西人天性好勝。睚眦小忿。不肯甘休。青浦嘉定之挫。旣羞見侮於髮逆。尤慮見輕於天朝。其與兵前來報復。係屬意中之事。惟英法舊例。兵謀會議於衆國。兵費征斂於衆商。非一人所能爲主。青嘉一退之羞。不致遽觸大衆之怒。國主未必因此而大舉。商賈未必因此而加征。其兵數必不甚多。亦可懸揣而知。崇厚旣有所聞。似宜由總理衙門與駐京公使查詢確實。然後申大義以謝之。陳利害以勸之。中國之寇盜。其初本中國之赤子。中國之精兵。自足平中國之小醜。姑無論本年春夏。連克二十餘城。長江上下。

肅清三千餘里。髮逆無能久之理。吳越有可復之機。即使事機未順。賊燄未衰。而中華之難。中華當之。在皇上有自強之道。不因艱虞而求助於海邦。在臣等有當盡之職。豈輕借兵而貽譏於後世。此所謂申大義以謝之也。粵匪行徑。本屬無賴之賊。青嘉兩城。尤屬至微之事。英國若徵印度之兵。爲報仇之役。多調則勝之不武。少調則不勝爲笑。徒使印度軍士。支領英國之餉銀。蹂躪中國之土地。上不利於國主。下不利於英商。不如早議息兵。俾松甌免無窮之擾。卽英法省無窮之費。此所謂陳利害以勸之也。斯二者。總理衙門與駐京公使委曲商榷。如俱不見聽。則亦別無阻止之法。仍當先與議定西兵進攻內地。臣處無會勦之師。若克城池。臣處無派防之卒。區區鄙見。不得不重言申明。至於設法防範。殊乏良策。洋人語言不通。風俗迥異。彼以助我而來。我若猜忌太深。則無以導迎善氣。若推誠相與。又恐其包藏禍心。觀於漢口焚船等案。片言不合。戎事立興。嫌衅一開。全局瓦解。臣始終不願與之會勦者。蓋亦籌之至熟。與其合而復離。不若量而後入。倘我軍屯駐之處。彼亦不約而來。實備處此。臣當諄飭部曲。平日則言必忠信。行必篤敬。臨陣則勝必相讓。敗必相救。但有謙退之義。更無防範之方。吾方以全力與粵匪相持。不宜再樹大敵。另生枝節。庶幾有容有忍。宏濟艱難。愚慮所及。不審有當萬一否。所有遵旨妥議緣由。理合會同浙江撫臣左宗棠。江蘇撫臣李鴻章。恭摺覆奏。伏乞皇上聖鑒訓示。謹奏。

近日軍情片 同治元年六月二十二日

再近日軍情。鮑超圍寧國之師。初八初十等日。屢獲勝仗。十二日偪紮城根。十四日大戰全勝。殺賊極多。卽於十五日克復寧國府城。曾國荃一軍。派隊雕勦秣陵關等處。兩次獲勝。六月初六日。援賊數千。前來窺營。隔濠放鎗。各有傷損。未經交仗而退。聞援賊到金陵者。已有數萬。計秋間當有大戰。目下寧國已克。鮑超之兵。儘可援應金陵。無孤軍寡助之虞。堪以仰慰宸廑。多隆阿將赴陝西。慮金陵兵力太單。頃接官文多隆阿會咨。已調駐守廬州之石清吉十營。令其齊赴金陵。爲曾國荃一臂之助。今寧國已復。鮑超之全軍。足資游擊南岸之兵力。足敷調撥。石清吉十營。或可仍防廬州。不遽南渡。臣當與官文多隆阿函商妥辦。湖州失陷之後。聞城中被害。不過數百人。道員趙景賢尙未殉節。應俟查明實在下落。再行具奏。除寧國詳細戰狀。俟接到鮑超文牘。續行奏報外。謹將近

日各路軍情。附陳梗概。伏乞聖鑒。謹奏。

江西被害州縣蠲免錢漕分數摺 同治元年七月初二日

奏爲查明江西被害州縣。蠲免錢漕分數。及被劫各員。恭摺覆奏。仰祈聖鑒事。竊臣於上年十二月間。承准議政王軍機大臣字寄。咸豐十一年十一月十二日奉。上諭。『有人奏江省疊被賊擾。亟宜拊循一摺。據稱本年二月間。逆首李秀成率衆攻陷吉安等郡。逼近省垣。焚掠愈多。殺害愈慘。七月間。經會國藩調兵援剿。始將逆匪驅除出境。現在瘡痍未復。民困未蘇。亟應查勘被擾情形。分別蠲緩等語。著會國藩遴委公正大員。前往查勘。除完善地方。收成豐稔。仍照舊供輸外。所有殘破處所。及水旱災區。即著分別重輕。奏請蠲緩。以甦民困。另片奏本年七月間。逆賊竄踞豐城。鮑超統兵來援。豐城縣知縣哈爾噶尙阿不肯搭造浮橋。以致官軍不能徑渡。賊遂將附省鄉村市鎮。恣意焚殺。玩誤殃民。實堪痛恨。又南昌縣知縣周成民。當賊氛正熾。秋稼未登之際。該縣並不稍存體恤。即於七月二十二日。開征漕折。並創爲逐日加增之例。逾五日增錢若干。逾十日又增若干。逾半月一月。遞增幾至一倍。暮夜追呼。民不堪命等語。並著會國藩按照所參該二員劣蹟。確切查明。據實參辦。原摺片著鈔給閱看。欽此。』一遵即恭錄札行江西布政司。飭令會同臬司糧道查議詳核去後。茲據該司道李恆等兩次詳稱。查上年二月間。逆匪李秀成。由撫建竄陷吉安。佔踞瑞州。蔓延各屬。逼近省垣。旋經水陸各軍。併力攻剿。次第克復。驅賊出境。各屬嘗元氣未紓之際。復遭蹂躪。或被圍日久。紳民協力守城。或被擾甚寬。黎庶流離失所。又九江南康等府屬。上年夏間。有被水淹浸之處。田廬悉爲澤國。人民蕩析離居。凡茲受害之區。無論兵災水災。均堪憫惻。該司道等當即分飭各府委員查勘。並酌擬章程。請將被擾各州縣。應完十一年。及未完十年錢漕。量予蠲免。以期實惠及民。如縣城被大股重圍。若守二十日以外者。錢漕各免五分。或全免錢糧。如縣城雖被重圍。而守禦僅在二十日以內。或縣城被賊佔踞一月以上者。各免錢漕三分。如縣城被踞一月以內。及鄉村被擾雖久。而縣城未踞者。各免錢漕一二分。仍按受害之輕重。定免數之等差。其被水各縣。極重村莊。各免錢漕三分。次重各免二分。再次各免一分。以示體恤。各緣由。於上年九月間具詳。由臣批准照辦在案。此外賊所未到鄉村。及賊僅過而不留。或縣城旋失旋復。並未遭害各屬。應征錢漕。照常催徵。餉餉。不准冒濫請蠲。期災黎得沾實惠。而賦課不至空虛。庶於國計民生。兩有裨益。通飭各府。秉公確查。旋據各府督同州縣。將應蠲錢漕分數。呈報該司道

等。逐一核定。彙開清摺。詳細具奏。又查上年七月間。逆匪由瑞郡敗竄豐城縣河西地方。記名提督湖南綏靖鎮總兵鮑超。率師追剿。該逆渡河而東。將渡船騰筏。全行拆毀。由總糧臺飛飭前豐城縣知縣哈爾噶尙阿迅速搭造浮橋。以備我軍進剿。該前縣哈令。於上渡口地方。縮搭浮橋。河面寬闊。水勢湍急。搭橋將次完竣。突被狂風大漲折斷。橋木散失漂流。繼復另備船筏。晝夜造成。我軍東渡。趕辦稍遲。尙非有心抗違。又查南昌縣應徵漕米。從前原係十月開徵。嗣於軍興以後。迭奉各憲札飭提前趕辦。以濟餉需。上年七月間正值各軍勦賊得手。餉需萬緊之際。該前署縣周成民。開徵漕折。解濟餉需。其時各鄉早稻。俱已登場。花戶輸將。並無難色。至按限加價一節。緣江省各屬。每多疲玩。花戶應完錢漕。任催不納。是以向有酌量加價限期。實爲設法催科起見。該署縣係屬循舊辦理。並非創爲此例。妄行加增。亦無逐日遞增。及加至一倍之事。該署縣周成民已於另案奏參革職。應請毋庸置議各等情。先後具詳前來。臣詳加查覈。上年賊竄江西。二月入境。八月肅清。正值耕耘之際。農夫失業。加以夏末秋初。水災與兵禍相乘。鋒鏑餘生。轉徙無所。僅予緩征。尙不足以廣皇仁。自應分別蠲免。以蘇民困。該司道等所呈清摺。計被擾極重。蠲免五分三分者九縣。被擾次重。蠲免二分以下者十縣。被擾較輕。蠲免一分者四縣。被水尙輕。蠲免一分者五縣。及蘆洲一處。於遭害之地。確查豁免。而於完善之區。照舊催征。尙屬斟酌妥善。無瀝無遺。謹將原摺錄呈御覽。仰慰聖主視民如傷之意。其全案銀米細數。分年分款。另造冊結。由撫臣沈葆楨分別題奏。至前任豐城縣知縣哈爾噶尙阿。平日居官。不協輿論。此次於大軍追賊緊急之時。搭造浮橋。爲風浪所飄毀。遲久始成。致鄉村被害彌深。雖非有心玩誤。實屬不知緩急。應請旨卽行革職。以示懲儆。前任南昌縣知縣周成民。開徵漕折。解濟餉需。勒限嚴催。均係循照舊章。亦無逐日遞增之事。業經另案革職。應毋庸議。所有查明江西被害州縣。蠲免錢漕及被劫各員。恭摺附驛覆奏。伏乞皇上聖鑒訓示。再此案因展轉查詢。陳奏稍遲。合併聲明。謹奏。

金陵陸師勝仗張勝祿請卹摺 同治元年七月初二日

奏爲金陵陸師。屢卻撲營悍賊。損一良將。懇恩優卹。恭摺仰祈聖鑒事。竊江蘇藩司曾國荃一軍。在雨花台秣陵關等處。禦賊獲勝。臣於六月初六二十二等日。附陳梗概在案。先是曾國荃督軍東下。直逼金陵。以地曠兵單。添

調會貞幹所部各營駐三汊河江東橋一帶。傍水築壘。以保西路之糧道。仍派長勝副後吉後嘉字等營。移紮兩花台。以扼東路之要衝。五月十二十三等日。城壘各賊。乘我營寨未成。糾衆二萬。直前猛撲。傷營勇十數人。我軍先派馬步各隊。伏於山後。至是一聲鼓角。分左右兩翼抄出。朱洪章率同劉永祥衝入賊隊。劉玉春會昭禮揮兵盪擊。斬獲二百有奇。賊乃紛潰。劉永祥追躡騎馬賊酋。撲近石壘。中槍殞命。二十二日探報秣陵關之賊。擾及六郎橋一帶。大掠民糧。會國荃潛遣周日昇等。各率騎隊。出賊不意。邀截於朱門之外。賊見我軍猝至。列陣迎敵。周日昇胡長作率各騎自左路抄之。賊黨棄糧思遁。楊錕南又自右馳遶其後。縛賊數百。悉斬於陣。盡奪米穀。以給村民。自賊之數爲我敗也。闔城惶懼。飛書召援。有僞王宗李會。糾集悍黨。來自蘇州。於六月初六初十等日。兩次窺營。火器對轟。互有損傷。提督銜記名總兵張勝祿中洋槍子。洞穿左足。會國荃既惜傷一健將。而賊計甚狡。料數日內必有戰爭。豫飭各營密爲戒備。果於十六日城賊援賊。出四五萬人。分二十餘枝。以一枝向湘恆等營。以一枝向信義等營。以一枝向猛惠等營。以一大枝包過副後南後長勝公字敏字等十一營之後。而中路悍賊。猛攻兩花台一帶長壕。我軍堅守營牆。憑壕礮擊。傷斃極夥。賊竟裂旗裹尸。昇之而行。會不少卻。其犯公字敏字兩營者。已焚哨棚而進。其犯副後南後兩營者。亦將踰卡橋而登。劉連捷會昭禮劉玉春等見有黃衣騎賊。指揮督陣。猛擊羣匪。潛然巨礮。一發而殪。即乘羣賊靡亂之時。派隊出卡。併力掩擊。立解重圍。維時西南一路。賊勢方張。鄂蘭亭力戰死之。崔文田倪桂李金洲等。拔卡而出。馳斬二賊目。遂與劉連捷所派之隊。合軍追剿。計殲賊近二千人。擒賊逾二十名。凱據供稱是日之戰。實斃僞官數十。僞對王亦在其中。由是賊膽愈寒。軍心愈奮。會國荃正在冒雨修營。徐圍進取。乃寧國克後。餘匪逆竄金陵。嘯聚於雄黃鎮者。數又以二萬計。二十四夜勾合城中之賊。捲旗息鼓。謀襲我營。或以大隊分伏壕邊。或以另股抄出營後。天甫向曙。一齊揚隊直撲。猛惠公敬四營。易良虎易長約會豈凡王仕益凌有和崔文田蕭開印等。令各勇穴牆施礮。使不得近伺。賊稍懈。突出擊之。倉猝交鋒。返奔弗及。半就誅夷。而東路圍攻副後南後長勝等營之賊。亦經劉連捷劉玉春會昭禮朱洪章等引軍擊走。俘該無算。據會圍荃四次稟報前來。臣查該軍圍逼金陵。地大兵單。旁無應援。洪逆老奸巨寇。前與圍師八萬相拒。數年見憤不驚。此次以官兵爲數無多。常挑悍賊前來撲營。我軍苦戰苦守。盛暑盛兵。雖欠餉日久。將士尙能用命。

今時歷兩月。布置漸周。自守有餘。即可徐圖攻取。記名總兵張勝祿。謀勇兼備。轉戰湘鄂江皖。以達江蘇。五省數千里之遙。疊建殊勳。此次克復太平蕪湖寨內。擬保提督。未及開單彙奏。乃搶護營壘。猝中槍子。猶復負創強起。力籌攻守。不數日。因傷殞命。實堪憫惻。合無仰懇天恩。准將提督銜記名總兵圖爾古齊巴圖魯張勝祿。照提督陣亡例賜卹。並從祀湖南長沙府湘鄉縣各該處昭忠祠。俾奠毅魄。而作士氣。藍翎游擊劉永祥。擬保游擊儘先都司鄧蘭亭。應敕部均照游擊陣亡例議卹。以昭激勸。所有金陵悍賊撲營。疊獲勝仗。並將死士各員。分別請卹緣由。謹會同大學士湖廣督臣官文。繕摺由驛馳陳。伏乞皇上聖鑒訓示。謹奏。

克復寧國府城摺 同治元年七月初二日

奏爲官軍攻剿寧國疊挫賊鋒。乘勝合圍。遂將府城克復。恭摺馳陳。仰祈聖鑒事。竊浙江提督鮑超。督率各營。在抱龍岡等處。毀平賊壘。屢獲大勝。隨克寧郡。臣於六月初六二十二等日。兩次附陳梗概。聲明續報戰狀。在案。旋准鮑超先後來文。據稱僑輔王楊逆堅伏城中。正在繕修守具。一聞舉亭戰敗。卽糾逆黨四大股。繞城結壘。延互三十餘里。一曰僑保王。踞城東之夏家渡孫家埠。一曰僑天將。踞城南之綠錦鋪畢冲鋪。一曰僑八王。踞城北之圖山廟埠及洪村嶺。楊逆自與僑桂王。合股由城西之敬亭山連營至望城岡一帶。以圖力拒我軍。五月初十日。鮑超引軍進駐烏沙鋪。暫息士卒。周歷形勢。必自抱龍岡得手。而後可擊散賊黨。尤必從望城岡下手。而後可俯瞰賊巢。十五日。禱明。先令婁雲慶吳騰芳伍華瀚翦炳南等。潛出碑林岡。陳得勝唐仁廉明興馬勝奎等。潛出安宜口。會伏於望城岡後。而以韋志俊所部爲游兵。仍令宋國永周有勝王衍慶數隊。直取中堅。以誘賊。賊果輕我兵寡。直壓山岡而下。甫及交鋒。鮑超復令黃慶劉玉堂劉順隆等十營。張兩翼抄來。羣賊勢阻。將圖卻走。瞥見旗幟林立。掩映山谷間。以爲城南城北之賊。悉衆來援也。回鞭轉鬪。洶湧若潮。不意婁雲慶陳得勝等兩枝伏軍。突從山谷中騰蹕而前。衝賊數段。韋志俊率薛金榜等營。截斷賊後。宋國永周有勝等。揮軍乘之。短兵擊刺。遇者輒殪。逸出之賊。又爲明興伍華瀚騎隊追及。擒獲近五百人。殲斃逾八千名。遂破望城岡。並將抬龍岡安宜口碑林岡敬亭山十數村落。逆壘悉平。東南北三路賊衆。亦卽棄巢紛竄。退聚河西河東。此五月十五日。擊賊毀壘。進軍城下之情形也。該逆既受大創。略無鬪志。乘我未布長圍。陰結另股。三僑王列隊城根。並築堅壘於夏家渡石

橋之側。以爲負固自完之計。鮑超四次挑戰。匿不出巢。遂於六月初八日。統率馬步各軍。僞壘下寨。賊不能堪。由北城出萬餘衆。前來迎拒。我軍一擊敗之。初十日。賊復由南城出二萬餘衆。悉力撲犯。我軍再擊又敗之。十四日。僞循王魏超成。僞干王洪仁玕等。於南門胡盧山鱸魚山一帶列隊。冀襲我師。僞襄王劉官方等於北門廟埠圖山一帶列隊。希圖夾攻。而西門亦別出大股。靠壘爲陣。鮑超見賊已渡河。喜告諸將。彼有關心。吾乃可一逞也。遂飭婁雲慶馮標譚勝唐仁廉伍華鴻等。向北門進。張應超楊鎮魁段大有等。向西門進。宋國永黃慶明與李文益馬勝奎等。向南門進。而以韋志俊四營。趨南門之左。張遇春二營。趨南門之右。維時城賊壘賊。蜂擁出敵。我軍如牆併進。搏戰逾時。未遽得手。宋國永黃慶躍入陣中。縱橫盪決。先將中路一股擊敗。明與劉順隆截出。夏家渡石橋。遏賊歸路。賊旂漸亂。撲河返奔。馬勝奎李文益遂將石橋二壘踏毀。韋志俊張遇春亦自山腰斜衝而出。賊衆紛潰。將過浮橋。周有勝熊鐵生焚橋截住。幾無脫者。南門旣已獲勝。僞襄王一股。瞭見南路火發。遂棄廟埠圖山而遁。婁雲慶馮標唐仁廉奮力尾追。伍華瀚吳雲集從旁境突出乘之。適張應超楊鎮魁等。亦於西門告捷。削平附城三壘。三路整軍來會。集於小東門外。將沿河僱仆之賊。補刀殪之。十五日。楊輔清復出大東門。收合餘燼。爲背城借一之舉。鮑超率各軍驟進。勢如風雨。該逆一戰卽北。狂奔六十里。已近洪林橋矣。楊逆忽率馬賊二千餘人。回陣返撲。馬勝奎緊躡賊後。中槍而殞。將士亦多損折。鮑超令諸營徐列圍陣。將該逆人馬。并以大圍包之。環加剿洗。楊逆單騎脫去。從馬千餘匹。盡爲我有。城賊見楊逆一敗不返。倉皇失措。有議降者。有議戰者。有議閉城再守者。紛紜未定。我軍已自洪林橋收隊歸來。大呼直入東門。除跪降及老弱婦女外。一律斬雜無遺。立將府城克復。前後斃賊幾及二萬。生擒首目三百餘名。得大小礮位六十五尊。此六月十四日大戰全勝。十五日克復寧國府城之情形也。臣查寧郡一拔。則江浙之門戶已開。金陵之機勢漸緊。由是略取東壩。會剿下游。可無兵單之慮。浙江提督鮑超冒暑苦戰。屢復名城。厥功甚偉。惟係專閫大臣。應如何加恩之處。恭候聖裁。至此次尤爲出力人員。暨陣亡各將弁。相應分繕清單。懇乞恩施。以昭激勸。其餘在事出力員弁兵勇。容臣查明專案奏獎。所有官軍剿賊屢勝。攻克寧國府城緣由。謹具摺由驛六百里馳奏。伏乞皇上聖鑒訓示。謹奏。

懇豁免江西歷案攤捐款項片 同治元年七月初一日

再咸豐四年十一月。臣於水師勝仗摺內。奏稱百姓感戴皇恩。淪肌浹髓。我國家深仁厚澤。二百餘年。不啻此大亂之後。不知感人之深。一至於此等語。今倏忽又閱八年。每當寇賊非常之警。尤見民情愛戴之誠。卽至庚申夏秋。蘇常之失。海淀之變。而中外晏然。纖塵不驚。耕鑿如故。益嘆我朝人心之固結。殆爲亙古所未有。顧人心雖如此固結。而寇盜卒不能廓清。頻頒蠲緩之詔書。而民困未曾蘇息。屢下整飭之嚴旨。而吏事亦未振興。其故何哉。臣嘗反覆尋思。竊以爲民生之困。由錢漕浮勒之未革也。州縣之困。由攤捐款項之太多也。欲振民窮。須力除錢漕之弊。欲飭吏治。須盡豁攤捐之款。江西錢漕一事。臣與撫臣沈葆楨現方設法減征。應俟妥議章程。另案會奏。其攤捐一事。臣請爲皇上先陳其概。攤捐云者。從前虧空之款。無處彌補。則令州縣勻攤。以捐補之。目下需用之款。無虞籌給。則令州縣勻攤。以捐給之者也。目下需用之款。不過本省自捐自用。苟能另籌經費。卽可立停攤捐。從前虧空之款。則係奏明派攤。屢奉部文者。約有四款。一係道光二十五年。豁免案內。查出官墊民欠及攤補兵差經費等銀。一百二十二萬七千餘兩。經前撫臣陸元烺奏准部議。責成現任州縣。自二十九年六月起。分年攤補歸款。除已完外。未完銀九十六萬一千餘兩。一係道光二十八年。清查案內。查出因公挪缺銀三十萬三千餘兩。經前撫臣費開綬奏准部議。自三十年起。分作十二年。由巡撫司道府州暨優缺州縣。公捐銀十二萬兩。津貼瘠缺各縣歸補原挪之款。其餘銀十八萬三千餘兩。著落各該縣自行按年彌補。除已完並巡撫司道府州應捐不計外。各州縣共未完銀十八萬一千餘兩。一係咸豐元年。豁免案內。查出清查以前官墊民欠六十六萬七千餘兩。經前撫臣奏准部議。飭自咸豐二年六月初一日爲始。隨同上屆挪墊兵差銀兩。分年按限帶攤歸補。一係清查以後續墊民欠銀三十四萬三千餘兩。部議著落原挪州縣及各該管上司全數賠補。此四者。江西各屬奏派攤捐之由來也。往昔地方無事。年穀順成。各州縣於丁漕考成之餘。間有略解攤捐之款。迨軍興以後。地方蹂躪。民氣凋殘。按年額徵之正賦。非查辦蠲緩。卽徵解不前。所有應攤前項。道光二十五年豁免案內挪墊兵差。及二十八年清查挪缺等兩款。已覺完解寥寥。其咸豐元年豁免案內查出之清查前後挪墊兩款。更屬力難兼顧。綜計近年解攤款銀兩者。按限核計。不及十分之一二。且或於攤款少有所盈。反於正賦大有所絀。譬之盜鈴而掩耳。挖肉而補瘡。雖有攤捐之名。並無補苴之實。溯查嘉慶十八年十月十六日。奉上諭。直隸等十四省。清

查虧欠銀兩等項。節經各督撫等將彌補章程奏明辦理。此內除陝西一省。扣至本年四月限滿。是否全數完交。現尙未據奏到。又廣東省虧短銀兩全完。尙有未完穀石。亦據奏明分年彌補。朕思此項虧短銀兩穀石。各督撫奏定分限展限章程。責令州縣按限完交。而州縣籌補之法。仍不能不借資民力。現在直隸東三省。邪匪滋擾。其餘各省。亦閒有荒旱處。而民氣未紓。若州縣官藉彌補爲名。仍科斂於民。非所以休養生息也。著傳諭各該督撫等。即將此次虧欠銀穀。確數查明現已完解。實儲在庫者若干。其未完者若干。據實截數奏明。暫行停止彌補。一因欽此。當經前撫臣先福查明江西未完各款。截數奏明。暫停彌補。嗣後屢奉部催。並未報解分釐。迄今已五十年。是嘉慶諭旨之所謂暫停者。實無永停無異矣。然則道光年間攤補之款。又可期其有實收之日乎。至州縣之稍知自愛者。無不以攤捐爲大患。履一日之任。即有一日之虧。罷官以後。回籍尙有咨追。身沒之後。子孫尙須著賠。一經畧缺。受累無窮。其不肖者。則又借奏攤之名。爲朘削民膏之目。毫無益於國計。大有損於吏治。臣不揣冒昧。籲求聖主施浩蕩之恩。錫逾常之典。俯准將江西各州縣應攤前項各款。共未完銀二百一十五萬四千餘兩。概予豁免。俾閭閻無科勒之苦。州縣無賠累之虞。庶幾政肅令行。日臻上理。仰副我皇上惠愛黎元。勤求吏治之至意。倘託聖主鴻福。軍務漸竣。歲事豐稔。此後江西額賦。年清年款。何患部庫之不充。若虧後此按年之課。徒索前此紙上之債。亦復何補。如蒙恩旨諭允。臣當飭司再查各州縣已完及請免各細數。造冊送部查核。其本省需用之款。向由州縣攤出者。臣與撫臣當另籌一項。永禁攤捐。專案奏辦。緣奉諭旨以江西民困未蘇。飭臣查辦。謹一併附片瀝陳。伏乞皇太后皇上聖鑒訓示。謹奏。

童容海投誠片 同治元年七月初一日

再鮑超攻克寧郡後。派兵追剿敗匪。隨收復寧國縣城。現在進攻建平。尙未得手。並據呈稱有僞保王童容海。驍勇善戰。本係石達開死黨。上年由汀州入浙轉隸李秀成隊下。此次來援寧郡。屯衆數萬於孫家埠。與官軍未開一仗。旋遣人具稟乞降。稱與羣賊有隙。願取郡城。縛輔逆以獻。鮑超與之期約。許以自新。乃撫事未成。寧郡已克。童容海徑走廣德。於二十日襲取州城。又稟明鮑超。申言率衆六萬就撫。遠求回文。並聲明廣德州爲僞侍王分地。恐與浙賊有戰爭之事等語。由鮑超專差請示前來。臣檢查本年正月間。上海搜獲僞文童容海擅殺各酋十

餘人賊中猜忌已深。是其自投來歸。清尙可信。或不至再有反側。惟人數太多。後患孔長。已令鮑超酌留二千人。餘則全行遣散。未知該管重寇海果否。就我篋匱。如其撫事有成。則賊黨去一大支。皖南即可肅清。於大局不無裨益。寧邑與廣德建平。均在寧郡左近。呼吸相通。理合附片先陳梗概。伏乞聖鑒。謹奏。

安徽巡撫李續宜聞訃丁憂摺 同治元年七月初十日

奏爲安徽撫臣聞訃丁憂恭摺馳奏仰祈聖鑒事。竊臣於七月初九日准安徽撫臣李續宜咨稱。同治元年七月初六日。在六安州行營。接到家信。親母蕭氏於本年六月十六日。在湖南湘鄉縣原籍病故。該撫臣係屬親子。例應丁憂。飛咨臣代奏開缺。請旨另行簡放。其前代赴皖之記名提督成大吉蕭慶行。道員蔣凝學。毛有銘。副將王載駟等軍。歸臣節制調度。該撫臣卽回籍奔喪守制。等因前來。臣查李續宜天性純孝。內行敦篤。咸豐九年。因救援寶慶之便。回籍省親。其時母病沉重。瀝稟在家侍疾。因軍務緊急。經臣等催令勉強赴營。李續宜私心內疚。近日因自患咯血之症。尤時時慕戀雙親。或至終夜不寐。此次驚聞母訃。自應遵例丁憂回籍治喪。惟軍事方殷。該撫威望素著。關繫甚重。溯查咸豐八年。前湖北巡撫胡林翼在任丁憂。督臣王文奏請改留署任。欽奉諭旨。一胡林翼穿孝百日後。仍著署理巡撫。如須扶柩回籍。再行賞假兩箇月。俟軍務告竣。准其補行終制。一等因。欽此。維時湖北巡撫印務。係督臣王文兼署。臣現擬仿照辦理。已咨復李續宜將巡撫關防。派員齎送安慶省城。由臣暫行兼署。成大吉等軍。臣亦當悉心照護。妥爲調遣。惟兩淮剿撫事宜。頭緒紛繁。苗沛霖及各巨捻深長。李續宜之威。而良民各圩。又感其撫綏之德。皖北及鄂省之兵。多係該撫部下勦旅。實非他人所能接辦。臣事繁才短。深恐照料難周。貽誤大局。該撫臣奔喪一節。應否援照胡林翼丁憂之例。賞假數月。仍令回皖署理撫篆。抑或准其開缺守制。另行簡放安徽巡撫之處。恭候聖裁。所有安徽撫臣聞訃丁憂緣由。恭摺由驛六百里馳陳。伏乞皇上聖鑒訓示。謹奏。

近日軍情片 同治元年七月初十日

再近日軍情。曾國荃圍攻金陵之師。與賊相持。常有零股前來搦戰。小有擒斬。未開大仗。鮑超克復寧國之後。臣檄令進攻東壩高淳溧陽溧水句容一帶。作遠勢盤旋而來。然後屯駐於金陵之東北隅。與曾國荃相爲犄角。據

鮑超呈稱。軍士勞苦太久。疾病甚多。應請稍爲休息。再行進兵。其廣德州僞保王投誠一案。亦尙未辦理妥適。石清吉守廬州之十營。經官文等調令南渡。助剿金陵。商之李續宜另撥數營。接防廬州。臣意李續宜方以全力經營苗黨。自難分撥防廬之師。已咨復官文等。飭令石清吉仍守廬州。無庸南渡。乃李續宜籌辦苗黨。甫有頭緒。今忽聞卽丁憂。卽須回籍治喪。事機未順。波折尙多。殊深焦灼。袁甲三病狀近日不知何如。李續宜既須離營。應懇聖恩。飭留袁甲三駐紮臨淮。庶兩淮上下。不至過爾空虛。謹將近日各路軍情。附陳梗概。伏乞皇上聖鑒。謹奏。

代奏李續宜謝恩摺 同治元年七月二十一日

奏爲據情代奏。恭謝天恩。仰祈聖鑒事。同治九年七月二十日。准安徽撫臣李續宜咨開。兵部火票遞到七月初八日內閣奉上諭。一安徽巡撫李續宜著授爲欽差大臣。督辦安徽全省軍務。欽此。一竊續宜現丁母憂。例應奔喪。回籍守制。前經咨請代奏。開缺在案。茲奉諭旨。授爲欽差大臣。念國恩之彌重。未報涓埃。慟大故之遽攢。空懷梧捲。於臣爲不忠。於子爲不孝。憂傷惶悚。罔知所措。仍咨臣代陳下悃。叩謝天恩。請旨另賜簡放等因前來。臣查李續宜樸忠敦厚。威望素著。仰蒙聖主知人善任。畀以全皖軍事。惟該撫聞卽丁憂。臣於七月初十日。奏請賞假數月。回籍治喪。計此摺尙未到京。茲復渥荷溫綸。飭李續宜接授欽差大臣。關防。不受事則上負君恩。遽受事則內虧子職。該撫之憂皇失措。自是發於至情之不容已。前此胡林翼在湖北巡撫任內。勝保在欽差大臣任內。先後丁憂。均奉諭旨。賞假回籍治喪。此次李續宜事同一律。應仍籲懇天恩。賞假歸籍。俾得少伸哀慕之忱。其欽差大臣關防。是否照該撫所請。另簡知兵大臣。迅赴臨淮。督辦軍務。抑或飭令袁甲三力疾督師。暫緩交卸之處。恭候聖裁。所有據情代奏。恭謝天恩緣由。謹繪摺由驛六百里具奏。伏乞皇上聖鑒訓示。謹奏。

查上次摺片並報近日軍情片 同治元年七月二十一日

再臣於七月十九日接奉初二日寄諭。一現在會國荃等進攻金陵。作何布置。援賊僞集。有無動靜。深爲慮念。鮑超進攻寧國。已否克復。左宗棠久無報到。浙省情形若何。著會國藩探明奏聞。一又於二十日由撫臣李續宜咨到七月初八日寄諭。一寧國一城。何時克復。是否的實。鮑超一軍。作何調遣。著會國藩迅速具奏。一各等因。欽此。同日欽奉廷寄之件。其徑發臣營者未到。其由李續宜轉咨者先到。蓋李續宜奏報。往返多由徐宿臨安以達六

安。故路近而較速。臣處奏報。往返常由河南湖北以達安慶。故道梗而較遲也。寧國府城於六月十五日克復。臣於二十二日附片先奏梗概。旋於七月初二日具摺詳奏戰狀。不知中途果無疎失否。茲將上三次所奏摺片各件。開單呈覽。以備查核。至近日軍情。會國荃金陵一軍。自六月十六二十五日兩次大戰後。該逆未再出而搆戰。我軍亦因疾病過多。未能設法攻城。浙賊僞侍王李世賢大股。本欲與僞忠王同援金陵。因恐官軍直逼杭省。故以全力駐守金華龍游。以拒我師。左宗棠定於七月十二日拔營。進紮茶圩泉江兩處。劉培元進紮歸塘地方。規復龍游。蔣益澧一軍。分爲三軍。定於七月初九三十六等日。自長沙起行赴浙。鮑超一軍。因童容海投誠之事。人數太多。至今尙未辦妥。難遽拔營前進。臣本應移駐寧國。庶於金陵杭州徽州皆在三百里內外。既可聯絡一切。又可就近料理各賊目投誠事件。無如李續宜現丁母憂。卽須請假離營。臣當兼顧皖北六安一帶。不能移駐皖南。相隔太遠。調度不靈。深用焦慮。除洋人焚燒紅軍船一案。俟專員查明。另行覆奏外。謹將近日軍情。附片具奏。乞伏聖鑒。謹奏。

奉旨垂詢各路軍情分條覆奏摺 同治元年八月十一日

奏爲疊奉諭旨。垂詢各路軍情。分條覆奏。仰祈聖鑒事。竊臣近日以來。疊奉寄諭指示各路軍情。縷晰周詳。其中有臣職分應籌之事。亦有非臣力能兼顧之端。謹就聞見所及。勉竭愚慮。分條具陳。以備聖明參核。

一、多隆阿一軍。當四月十五日。初克廬州之時。臣本欲其會攻金陵。以會國荃由南岸進兵。先破大勝關。圍逼城南雨花臺一帶。以多隆阿由北岸進兵。先攻九洑洲。圍逼城北紫金山一帶。曾於五月十七日。附片具奏。意在先復江蘇財賦之區。以爲明年籌辦京漕之地。不料陝西告警。羽檄交馳。官文等奏請多隆阿率師援秦。而諭旨亦飭令先保陝西。臣雖覺金陵兵單。機會可惜。然以秦晉爲京師餉源所自出。未敢奏調多隆阿西援之師。轉而東征也。厥後粵逆回竄。秦事稍鬆。而漢回仇殺。望援仍切。欽奉六月初七初九日兩次寄諭。以多隆阿應於何地駐紮。飭臣與官文會商復秦。其時寧國已克。南岸兵力足敷調遣。臣先已附片奏明矣。因咨達多隆阿不必回顧蘇皖。或速剿陝省。或留駐河南。請其定計。由官文主稿覆奏。官文是否已奏。尙未准咨到摺稿。多隆阿旋於七月二十二日覆奏。想邀聖鑒。茲復欽奉七月十九日寄諭。一多隆阿一軍已阻於賊之南。不能赴

陝。卽著勝保督辦陝西軍務。多隆阿既可無須入陝。應於何處駐紮。著會國藩酌量調派。迅速具奏。又奉七月廿四日寄諭。多隆阿雷正綰等軍。祇令其剿辦南陽一帶賊匪。亮不久即可蕪事。以後多隆阿等軍。或須駐防廬郡一帶。或須赴江南會同進剿。均著會國藩酌量調度。迅速奏聞。各等因欽此。聖懷謙挹。殷殷下問。曷勝悚感。臣查多隆阿軍抵襄陽。由光化荆子關入秦。並不爲南陽之賊所阻。南陽賊股鄂軍金國琛等會剿解圍。亦尙不至爲楚疆之患。勝保此次奏報。殊未確實。致朝廷久經派定援秦之局。又復中變。雷正綰前隊已於十一日起行入關。多隆阿後幫亦於二十二日起行繼進。中途接奉改派之旨。不知從何處折回。若業抵秦境。則進退兩難。秦人雲霓之望。是否續請多隆阿留陝。臣尙不能懸揣。若多隆阿果回鄂境。則當遵旨駐紮南陽一帶。食鄂省之餉。擊豫省之賊。凡捻匪有竄入南汝兩府者。責成多隆阿攔截雕剿。痛勦數次。聲威必振。西可屏蔽秦中。不令粵捻續竄關陝。南可保障楚省。不令鄂北另籌防兵。北可聯絡鄭元善葉裕之師。東可聯絡蔣凝學頴州之師。誠爲一舉而數善皆備。剿捻以馬隊爲先。僧格林沁捷伐於豫東。多隆阿馳騁於豫西。當可肅清中原。有裨全局。至於防守廬州。石清吉本係多隆阿部將。不須該將軍親往駐守。圍攻金陵。鮑超已定由東向前進。不須該將軍遽往會剿。非謂江南不必添兵也。鄂豫秦三省交滙之區。不可無大枝勁旅。以爲游擊之師也。是否有當。恭候聖裁。

一、襄下河一帶。屢廬聖懷。江南之賊。若由常熟江陰偷渡北岸之靖江如皋通州海門等處。實屬防不勝防。前奉六月十四日廷寄。因都興阿奏難民分投襄下河。其情可疑。諭旨飭都興阿嚴密防範。飭臣實力稽察。不可使一賊偷渡江北。又奉六月十八日廷寄。鈔示潘祖蔭請防襄下河一片。諭旨飭令設法兼顧。又奉十九日寄諭。亦以「江北港汊紛歧。飭令臣與都興阿力籌守禦。襄下河毋稍疎失。」各等因欽此。仰見聖主矜念淮揚各屬。刻刻不忘。臣秉承睿謨。亦自兢兢在抱。惟戰船太單。地方太廣。鞭長莫及。徒切殷憂。頃又接李鴻章咨稱。據蘇州密探僞普王楊輔清自寧國敗回。僞護王陳坤書自揚州敗回。均來蘇城。與僞忘王商議。金陵危急。皖浙官軍分路進剿。上游已無路可竄。欲分大股由江陰福山楊林各口。窺竄江北。襄下河空虛之處。就食於完善之區。並先擄有商船一二百號。預勾江洋盜匪爲導引。乘間偷渡北岸等語。臣查楊輔清陳坤書兩股。及青

陽古隆翼等一殺。三支殺賊。窮無所之。思竄江北。係屬意中之事。李鴻章業已專奏具奏。請飭都與阿黃彬等嚴防。以巨愚耳。都與阿之兵力。只有此數。紅單船之勇丁。不甚可靠。其新調之紅單船四十號。據勞崇光咨。已在廣東省河。爲颶風所壞矣。是江北應防之要地。尙無專汛派防之水師。臣現咨商馮載福。囑其親赴下游。偏歷靖江如皋通州海門數百里江面。察看何處最衝。何處次衝。妥籌布置。又擬另辦太湖水師一軍。造船百六十號。防剿上海松江由嚴灣。以入蘇州。而騰出黃翼升水軍。專防淮揚裏下河一帶。以符原議。星夜趕辦。計四箇月。可以集事。目下太湖水師。尙未辦成。黃翼升不可離滬。所有裏下河之防。應請飭都與阿黃彬引爲專責。臣亦當力籌兼顧。仍請飭下僧格林沁吳棠。萬一賊竄裏下河。卽於清江浦嚴兵以待。此等賊殘股匪。不難一戰殲之。雖未必果有其事。而究當預備不虞。是否有當。恭候訓示。

一、李世忠一軍。前奉諭旨。歸臣節制調度。頃袁甲三告病開缺。又奉七月初八日寄諭。飭臣妥爲駕馭。又曾奉六月初四日密諭。一有人奏李世忠所克復城池。皆伊陪守。與陷於賊中無異。飭臣妥爲駕馭。使就範圍。一各等因欽此。臣查李世忠投誠之初。勝保奏明准帶一萬八千人。實數蓋近三萬。以降人而仍據其地。仍統其衆。當時辦法。本未妥善。近聞陸續招收。且增至五六萬之多。據有城池。自爲風氣。於長淮五河等設釐卡數處。於長江新河口設釐卡一處。各縣亦有卡局。所獲頗厚。又廣運鹽斤。自掘自賣。上侵公家之利。下爲商民之害。殊堪隱憂。然相沿已久。安之若素。今欲大振紀綱。繩以法律。勢必有所不能。且去冬今春。克復天長六合浦口江浦。擊退陳坤書股匪。於大局不爲無功。未可沒其勞。而遽議其後。臣擬姑循其舊。不設機心。整鹽之利。不加禁遏。偶有請求。亦不拒絕。前曾解濟軍火三批。米糧兩批。近又來請餉銀。卽當量力分潤。仰副朝廷寬厚之意。但不甚資其力。亦不輕調其兵。暗銷其予智自雄。非我莫屬之驕志。若欲收回國家利權。則須另籌巨款。按月供支。足以養彼之衆。乃能行吾之法。臣於本年三月。奏請廣東抽釐一案。聲明分濟袁甲三一軍。乃能撫馭降將。卽係指李世忠言之。將來袁甲三去位。臣節制此軍。亦專盼粵東之釐。作滁州之餉。聞晏端書到廣東後。竭力經營。事多掣肘。至今尙無頭緒。亦未報解分毫。若廣東釐金不能大有起色。則不特皖浙欠餉無出。卽李世忠一軍。亦終慮其決裂。區區愚慮。不敢不預陳其略。

一、鎮江一軍。前奉五月二十一日寄諭。飭臣統籌兼顧。頃又准馮子材咨到摺稿。恭錄諭旨。有一隨時稟請督臣會國藩指授機宜。以期萬全無失之訓。臣之愚陋。何足諳悉機宜。竊眷愈隆。悚惕無地。馮子材專員來皖。函商一切。臣覆函以鎮江餉絀兵單。只宜自守。不能出戰。待鮑超攻克東壩。深陽。深水。句容等處。屯駐金陵之東北。能與鎮江聯絡一氣。不爲賊氛所梗。屆時馮子材再行撥兵會剿。庶幾聲援四應。士氣勇奮。至署撫臣李鴻章。久有移駐鎮江之議。無如僞忠王糾率大股悍賊。常在松滬一帶。戰爭不休。前五月二十一日。虹橋之役。頃八月初二日。七寶街之役。我軍皆竭力血戰。始獲大捷。觀忠逆之志。似欲甘心於滬上。而洋人坐觀成敗。極難調護。以目下而論。李鴻章有萬不可離滬之勢。或俟太湖水師辦成。李鴻章即統水陸諸軍。由松滬進兵入蘇。亦屬因利乘便之法。所有鎮江防務。應始終責成馮子材耐苦堅守。不出出剿之計。拙謀淺慮。未審當否。以上四條。皆兩月內所奉諭旨。因事理重大。道途遙遠。籌畫難定。覆奏稍遲。理合併案具陳。伏乞聖慈垂鑒。逐條訓示。謹奏。

籌辦廣德州受降事宜分別遣留摺

同治元年八月十一日

奏爲籌辦廣德州受降事宜。分別遣留。恭摺仰祈聖鑒事。竊僞保王童容海率衆乞降。襲取廣德州城。臣擬酌留二千人。餘悉遣散。前於七月初二日。附片具奏在案。旋據鮑超來文。童容海既取州城。襲殺侍逆。所派守賊僞閻天義馬桂功。並收其衆。現在部下。一律薙髮。不止六七萬人。請多留降卒。立爲啓化營。以資攻剿。呈繳僞印三百五十八顆。僞官照九百五十二張。竄送來省。並轉據童容海自陳本係洪姓。因被脅所改。請即更正等情。臣以洪容海自拔來歸。應准復還本姓。惟所部過衆。不特野性難於撫卹。即餉項亦難於供億。因令挑留三千人。編立五營。餘則悉數遣散。飭直隸宣化鎮總兵宋國永。已革江西吉安府知府會詠。辦理遣散事件。各繳軍械。發給護照。並川資錢一千元。分遣回籍。竭力湊解錢三萬串。尙不知足敷遣資否。另製遣發被脅良民旗號。於降人中。擇明幹頭目。帶領由陸路分起行走。視各省人數多寡。或合數府爲一起。或合數縣爲一起。每起少者四百。多者不過千人。果能沿途約束嚴明。一無滋擾。俟該頭目等回營。准其錄用。酌予保獎。以結其心。當不至變生意外。至洪容海數年被擄。一旦自新。乃能計取堅城。襲殺守賊。力圖晚蓋。非假以虛名。恐不足以馭下。合無仰懇天恩。賞給降

將供容海游擊虛銜。其部下頭目王永虎范長根陶成有莫志祥汪維新李敦本等。均請賞給五品頂戴。熊正玉羅文來黃廣興蔣合麟朱大棟黃三元宣鴻猷洪鉅海洪潮海洪青海洪四海洪龍海洪虎海洪富海洪貴海洪華海洪晏海等。均請賞給六品頂戴。仍俟續有勞績。由臣分別奏保官階。使悔罪投誠者。知朝廷有倖邀之寬典。無顧惜之功名。則東南遠寇。或皆聞風知勸。瓦解冰消。於軍事不無裨益。如此起降衆辦理或有未妥。另生枝節。臣當隨時奏明。不敢稍存迴護。上煩宸廑。所有籌辦廣德州受降分別遣留緣由。恭摺具陳。伏乞皇上聖鑒訓示。謹奏。

近日軍情片 同治元年八月十一日

再近日軍情。金陵賊匪未撲官軍營盤。曾國荃因營中病勇過多。亦未進攻。鮑超克復寧國。已逾月餘。因童容海投誠之事。久未就緒。又疾疫流行。死亡相繼。尙未拔營。現值天氣稍涼。即當催令進兵。左宗棠在浙。亦苦營中患病者多。不能指揮如意。自七月十七日油埠一戰大捷後。二十一日與賊遇於青塘。斬首百餘。二十四日分兵進攻。家太平祝兩處。均未甚得手。僑侍逆李世賢。現在金華修城治濼。並調溫處之賊。萃於該郡。將爲死守之計。龍游縣城雖已檄調劉培元等軍進攻。該處地勢平衍。難以逼城立營。一時未能速下。蔣益豐一軍。七月十六日已入江西之萍鄉縣境。日內當可陸續抵浙。皖北苗沛霖之黨。曾稟明蔣凝學。願退出壽州正陽兩處。但求不報克復等情。似不至遽生他變。惟撫臣李續宜聞訃丁憂。病久未痊。不能治事。該撫前在六安患病。臣勸令請假醫調。李續宜恐勞聖廑。未敢具奏。茲於八月初三日行抵安慶省城。臣觀其衰毀之餘。肌肉全瘦。若不令其離營回籍。少伸孝思。恐難期其速痊。該撫於昨十九日具摺陳情。臣是以未經勸阻。理合一併覆陳聖聽。伏乞慈鑒。謹奏。

覆陳河南募勇另派統領片 同治元年八月十一日

再臣欽奉寄諭。陳由立到皖後。著曾國藩即將該革員及余大勝等分別審訊。嚴行懲辦。以肅軍令。惟陳由立所募之勇。亟須揀員前往湘省接辦一切事宜。豫省將領乏人。現無妥員可派。著曾國藩由皖營揀派熟悉湘楚情形。堪勝統帶之鎮將一員。及營哨各官。飭令速赴湖南接辦募勇事宜。飭赴河南以資防剿。一等因欽此。遵卽於臣部各軍。及鮑超所統鎮將中。逐一遴選。均無可獨當一面者。查有總兵楊朝林。久歷戎行。曉暢軍事。上年冬

間。准多隆阿保薦。堪勝統領之任者。楊朝林王可陞二人。臣比令王可陞統勇二千七百。現守蕪湖。聞楊朝林尙在鄂中。即經咨商湖北撫臣嚴樹森。轉飭赴湘接辦。陳由立募勇事宜。旋准河南撫臣鄭元善來函。有豫中已添李續燾一軍。兵力較厚。所請派員赴湘接統之處。應即停止等語。臣伏查李續燾所部。亦係湘勇。豫省既添此一軍。足資防剿。所有擬派楊朝林往湘接募成軍之處。自應停止。以節糜費。除咨嚴樹森查照。仍俟陳由立等到皖。審訊奏結外。理合附片覆陳。伏乞聖鑒。謹奏。

查覆嚴樹森被參各情摺 同治元年八月二十九日

奏爲遵旨查明湖北撫臣嚴樹森被參各情。恭摺覆陳。仰祈聖鑒事。同治元年三月十四日。承准議政王軍機大臣字寄。三月初一日。奉上諭。前因有人奏嚴樹森到豫撫任後。尙知講求吏治。惟督辦剿匪事宜。未臻盡善。復有人奏參嚴樹森有膽怯見偏。量狹性復等情。茲又有人奏皖師東下。倚全楚爲根本。楚撫關繫東南安危。非久歷戎行。深明將略者。萬難勝任。嚴樹森戰爭之事。實非所長。上年捻撲河南省城。該撫一籌莫展。豫中人人切齒。今移節湖北。安能望其出境滅賊。官文休休有容。故胡林翼得以宣勞盡力。嚴樹森性情剛愎。若官文待之如胡林翼。該撫必果於自用。萬一不和。楚事必致決裂。嚴樹森前在江夏隨州各任。聞警潛逃。一旦膺鄂撫重任。所統察屬兵勇。必將輕其品行。不遵調遣。上游無事。曾國藩始無後顧之憂。該撫無胡林翼之善謀。又無李續宜之敢戰。設布置稍疎。賊蹤闖入。曾國藩分兵不暇。安望有成。各等語。嚴樹森操守尙好。留意吏治。自蒞豫撫任後。尙無大過。而人言嘖嘖。諒非無因。特以辦事尙能認真。且任鄂有年。曾爲胡林翼保奏。是以簡調鄂撫。冀收駕輕就熟之功。若如所奏各節。是該撫非特不諳軍務。抑且不協輿情。任以封圻。殊於楚事未有裨益。現在曾國藩籌畫東征。必須後路策應有人。鄂皖連爲一氣。方能悉銳前行。不至瞻前顧後。關係大局。至爲緊要。該大臣於鄂中人材兵勢。見聞已稔。嚴樹森果否能勝鄂撫之任。抑僅長於吏治。他務非其所習。均著據實詳悉覆陳。毋稍徇隱。原摺著鈔給閱看。將此諭令知之。欽此。一仰見我皇上軫念東南。慎重疆寄。跪讀之餘。曷勝欽悚。湖北巡撫嚴樹森春間由豫還鄂。臣前此所聞。毀譽參半。近來細加詢訪。情形較確。大抵人非聖賢。難於求備。短長互見。乃士之常。在朝廷之用才。貴節取其所長。而糾察其所短。在臣子之自飭。貴勉其所已知。而增其所不能。嚴樹森之所短。在負

真自許。計較遲鈍。實氣則自命遠高。責人遠重。曾青麒麟。便事攻求。處人鮮留餘地。而人亦攻之甚力。計較既熟。則利害之。趨避之。難免。寶豐四年。嚴樹森在江夏知縣任內。湖北省城被圍。餉道不通。巡撫青翼奏委出城督糧。遠六月省城失守。嚴樹森以先期奉旨。在鄂勸捐。免其置議。五年在隨州任內。時督臣程德全駐軍。該州官兵失守。城陷。事後查時。王總督有逃幸襄陽之咎。而嚴樹森又奉有調團協剿之札。亦得奏明免議。厥後遇賊北竄。遂與嚴樹森保奏。嚴樹森亦有應議之案。而反與於保救之列。雖機緣所值。適有天幸。不由人謀。而識者因其平日計較之謹慎。遂疑此大徵幸而獲免。原奏所稱江夏隨州兩案。恐為僚屬所輕。始由於此。至其洩任湖南。後至撫臣省城。原奏以該撫守門自守。不敢出城一步。古法稱戰不足言守。尚有餘。嚴樹森自度新集之卒。未可深恃。與其出城控江。不如嬰城堅守。此蓋未可厚非。惟軍旅之事。必有毫無瞻顧之心。而後有一往直前之氣。嚴樹森於稱程成款。多設計較。則危急之時。難期堅定。功名之地。難泯矜爭。諭旨飭其不嫻軍務。原摺慮其不明將略。參之物論。亦均於此事未敢深信。茲其所短也。至嚴樹森之所長。亦多非時流所可及。才思警敏。精神完足。胡林翼綜理釐務。新政漕章。嚴裁各衙門陋規。台肩浮費。但持大綱。其節目周詳。經營初竊。多嚴樹森贊襄之力。遠胡林翼出省征剿。凡鄂民之疾苦。刑案之出入。州縣之積弊。皆由嚴樹森悉心察核。往往直接察佐。夜治文書。優瑣從公。達旦未寢。咸豐十年升任豫撫。沿途夫役到省。供應概不索之。州縣一洗從前惡習。其裁汰冗兵。參劾劣員。亦頗力求整頓。諭旨稱其操守尚好。留意吏治。自洩豫撫任後。尚無大過。足見聖明垂察之情。臣於咸豐九年。經過黃州。見胡林翼座右同官錄數冊。臚列州縣佐雜履歷。注載詳明。評語精當。知為嚴樹森手筆。聞其接見屬僚。詢訪一次。歷久不忘。胡林翼保薦人材。如閻敬銘。李宗。張建基等。皆嚴樹森之汲引。胡林翼晚年多病。專以薦賢報國為務。嚴樹森被其薦達。感名卿知己之恩。沐文宗不次之擢。戒除舊習。力爭上流。亦孜孜焉以崇上正人。扶持善類為己任。茲其所長也。官文休休有容。選臆共知。然昔之待胡林翼。事無大小。推賢讓能。多由撫署主政。今之待嚴樹森。資有淺深。軍政吏治。多由督署主政。原奏所稱嚴樹森性情剛愎。果於自用。或致決裂。以巨觀之。所慮當不在此。凡位偏則相忌。勢均則相疑。督撫同城。自昔鮮能和協而善終。為撫者。當任勞而不炫己之能。為督者。亦當讓善而曲盡人之長。庶幾相與有成。如嚴樹森之才。臣愚以為可勝鄂撫之任。若得皇上訓誨。常

如官文推誠相與。當可飭吏阜財。蒸蒸日上。東南用兵。鄂皖本屬一氣。呼吸相通。利害共之。如該撫別有劣蹟。鄂事或就墮壞。臣當隨時據實密陳。不敢稍涉徇隱。貽誤大局。所有遵旨查覆緣由。專摺由驛馳奏。伏乞皇太后皇上聖鑒訓示。謹奏。

查覆何桂清退守情形摺 同治元年八月二十九日

奏爲遵旨查明復奏。仰祈聖鑒事。竊臣接准部咨。同治元年五月初七日奉上諭。刑部奏據何桂清呈出司道公稟。請飭查辦等語。何桂清棄城逃避。罪名業經大學士會同刑部審擬具奏。惟據片稱該革員呈出司道公稟一件。係前任江蘇按察使查文經。前任江寧布政使薛煥。前任江南鹽巡道英祿。江安糧道王朝綸。於丹陽失守後。聯銜稟請。何桂清退守蘇州各情。該司道等均有地方之責。當常州危急之際。應如何幫同總督。竭力守禦。乃聯銜稟請退守蘇州。顯係見事危急。意在同逃。徐有王原參摺內。亦有何桂清率領地方官退避之語。若不從嚴查辦。何以肅軍律而飭官方。著會國藩李鴻章將該司道當時如何聯銜具稟。及如何退避各情形。據實查明具奏。其蘇常等處各逃官。一併查明參辦。殉難各員。並著查請議卹。以示勸懲。欽此。一臣比及咨商李鴻章。在於蘇境詳查。旋據通商大臣薛煥遞到節略一函。內鈔錄拜寄二件。奏稿二件。咨稿一件。據稱薛煥於咸豐九年十二月補授江寧布政司。奉旨飭令隨同何桂清辦理夷務。十年三月。奉命幫辦通商事件。閏三月初旬。由上海轉棹常州。奉旨飭令單銜奏事。二十四日。何桂清欽奉十八日密寄諭旨。至所稱薛煥應否豫飭來京。此旨殊屬非是。天津非議和之地。該大臣仍當飭薛煥迅赴上海。設法挽救。一等因欽此。薛煥旋於三十日拜疏起程。搢尾聲。即日前赴上海。相機酌辦。維時何桂清業已議定移駐蘇州。其司道公請之稟。係查文經主稿。迨何桂清批發後。亦係查文經簽批。轉咨薛煥。於四月十一日。撫臣徐有壬奏調薛煥回蘇。辦理防務。奉旨。著不准行。欽此。錄送各件。到臣營。臣伏查刑部奏請飭查司道四人中。惟薛煥官職最大。茲該大臣鈔送案據。前既奉有迅赴上海之旨。後又奉有不准回蘇之旨。則是理應離開常州之員。軍機處必有檔案可稽。其稟請移駐一節。係屬倚。豈非別有私圖。此外如查文經業已革職。臣奉五月二十六日密諭。另有交查事件。並祿業由吳棠奏參。以原品休致。王朝綸列銜在末。不過濶同畫諾。臣在外多年。忝任封疆。竊見督撫權重。由來已久。黜陟司道。榮辱

終身。風旨所在。能使人先事而逢迎。既事而隱飾。不特司道不肯違其情。卽軍民亦不敢忤其意。十年七月。嘉興大營將弁。聯名數十。具呈請留何桂清在蘇暫不解京。求臣轉奏。由王有齡移咨到臣。臣暗加察訪。不過親近軍中數人。並非合營皆知。是以未及代奏。而王有齡已兩次具奏。觀營員請留之呈。則司道請移之稟。蓋可類推。無庸深究。疆吏以城守爲大節。不宜以僚屬之一言爲進止。大臣以心迹定罪狀。不必以公稟之有無爲權衡。區區愚見。不審有當萬一否。除查文經交查之案。另行覆奏。蘇常等處逃官。由李鴻章彙案會參外。所有遵旨查明緣由。謹會同署江蘇巡撫臣李鴻章恭摺覆奏。伏乞聖鑒訓示。謹奏。

查覆薛煥吳煦參款片 同治元年八月二十九日

再臣前此承准議政王軍機大臣字寄三月十三日奉上諭。前因有人奏江蘇撫臣。不洽輿情。玩視軍務各節。當經疊諭會國藩查奏。旋據該大臣查明覆奏。與所參情節。大略相符。茲又有人奏薛煥肆意營私。於上海城內。開設書畫局。並與署藩司吳煦等。開設錢鋪。合夥販貨至各海岸。假商人字號。掩人耳目。該撫之兄薛煥。州縣鑽營。皆經其手。吳煦之子吳宗麟。氣餒均極薰灼。江蘇逃官。如吳雲李翰文等。薛煥無不包庇。爲之開脫。至於練總徐珮璋。土棍費玉曾。皆經降賊受僞職。而薛煥信任二人。保舉至道員都司。上海縣劉郁膏。循聲素著。薛煥意存嫉忌。未能盡其所長。各等語。著會國藩將所參各款。秉公詳查。據實具奏。毋稍徇隱。原摺著鈔給閱看。將此諭令知之。欽此。臣查薛煥性耽書畫。設局收買。臣於上年十一月查覆摺內。業經陳明。未敢稍爲隱諱。自被參後。此局早經停止。至於開設錢鋪。假商人之號。州縣鑽營。經薛煥之手。臣處尙無所聞。至開脫吳雲等之罪名。保舉徐珮璋等之官職。乃屬實事。現在吳雲已由李鴻章另案參劾。徐珮璋與其兄徐珮璠。前以團練得名。後以騷擾失望。久處賊中。形迹可疑。爲夏爲匪。亦復衆論紛歧。惟聞該前撫辦理蘇州內應事件。曾備銀數萬。由徐姓馬姓轉交蘇賊。原摺所稱徐費二人。受賊僞職。濟以火藥糧餉。或卽指此言之。劉郁膏雖非拯救時艱之才。而崇樸黜華。素負民望。該前撫未經薦達。嫉忌之說。或由斯起。臣竊以薛煥前爲巡撫。則百官之黜陟。軍務之興衰。措置稍乖。關係甚大。今僅爲通商大臣。無用人理財之責。事權已輕。關係較淺。其前此辦理未善之處。應否免予懲究。出自聖主鴻裁。至諭旨垂詢吳煦開設錢鋪。販貨至各海岸。暨其子吳宗麟。氣餒薰灼各情。又奉五月二十日寄諭鈔

示殷兆鏞原摺中列吳煦劣蹟。亦飭臣等查辦。臣查吳煦開設銀號。置買海船。牟利營私。係屬實情。臣與李鴻章久擬列款參奏。惟蘇藩關道二缺一時難得接替之人。又蘇常失陷以後。上海屢頌於危。吳煦聯絡洋人。保全要地。具有微勞。且其廣交洋商。厚結華爾。吳煦之進退。與華爾全軍。略有關係。華爾之向背。於英法各國略有關係。不得不周詳審慎。三思後行。除俟上海關道一缺。遴委得人。再將吳煦事蹟。會摺參奏外。理合將奉旨飭查薛煥各情。先行附片密陳。伏乞皇太后皇上聖鑒。謹奏。

近日軍情片 同治元年八月二十九日

再近日軍情。洪容海投誠以後。進剿建平。小挫而退。其部下頭目衆多。各爭雄長。中懷反側。洪容海不能彈壓。有僞目張得勝陶子高等。帶二萬餘人。投歸僞輔王楊七麻處。又有僞目朱大椒黃三元等。帶二萬餘人。在廣德州內亂。與洪容海自相仇殺。洪容海帶心腹萬餘人。奪門而出。投歸寧國。鮑超營次。廣德州遂仍爲賊所佔踞。鮑超仍照前議。令洪容海酌留三千人。編立五營。隨同官兵打仗。攻克廣德。以贖前愆。臣昨於十二日具奏此案。摺尾聲明。恐其另生枝節。今果有此一變。目下事局。尙未大定。是否更有波折。殊難預決。頃奉七月二十八日寄諭。以洪容海降衆六萬。不妨酌量多留。一惜諭旨。遲到半月。不及欽遵辦理。然招降之事。古無良策。必降將之才。足以統馭其黨。而後無反覆爭鬪之虞。又必官兵之氣。足以懾服降人。而後無幹弱枝強之患。今洪容海歸順之衆。雖較前數大減。然後患亦較少。臣尙不深以爲慮。臣之所憂慮者。現在楊輔清黃文金賴文鴻古隆賢等諸僞王。齎集於廣德建平一帶。又有已降復叛之張得勝朱大椒等。凶餓彌增。又據左宗棠咨僉侍王將由浙境赴援金陵。自寧國廣德決戰而往。羣賊將萃於皖南。而鮑超營中。疾疫大作。勇夫病者萬餘人。死者日數十人。張運蘭李品隆唐義訓各軍。亦十人而病其六七。張運蘭之胞弟張運桂。亦已病故。即去臘堅守徽州。苦戰得全者也。曾國荃金陵營中。病者亦逾萬數。皆由臣以非材。妄竊高位。上千鬼神之譴。莫救厄運之災。左宗棠軍中病者。亦復過半。每次出隊。不滿五成。若秋間有大股惡戰。深恐羸卒不足禦強寇。中夜縈思。不勝焦灼。至李鴻章奏洪首逆已移居蘇州。係屬謠傳。並無其事。此軍務最大關鍵。臣不敢不留心訪察。除俟洪容海投誠之事大定。另案續奏。暨張運桂等立功後病故各員。彙奏請卹外。謹將近日軍情。附陳梗概。伏乞皇太后皇上聖鑒。謹奏。

唐訓方社系淮糧 貞元三年閏八月十二日

奏爲督署淮三。接奉詔旨軍務。遵旨酌度。駐紮地方。恭摺聖陳。仰祈聖鑒事。竊臣奉准議政王軍機大臣守侍同治元年八月十七日奉旨。一李續宜奏。應陳袁凱。續懇賞假。回籍奉喪。一摺。已降旨。賞假百日。准其回籍。並令唐凱方督署安徽巡撫。暨該處善理。漢北藩司。吳。皖。省。專。道。雖就緒清。而於黃蒙院等處。餘匪屢次出沒。肆擾。且正陽關。壽州。各處。皆隸時時。完。亦。未。必。姑。且。就。撫。是。皖。北。軍。務。未。可。稍。緩。會。國。藩。節。制。四。省。軍。務。甚。繁。現。值。進。剿。全。凌。調。度。正。當。喫。緊。皖。北。關。係。緊。要。必。須。得。人。督。轄。俾。會。國。藩。得。以。專。意。東。征。據。李。續。宜。奏。解。唐。凱。方。久。屢。戎。行。熟。諳。戰。守。著。官。文。遠。前。赴。藩。司。前。赴。安。慶。接。督。安。徽。撫。篆。毋。稍。遲。緩。其。應。否。駐。紮。臨。淮。接。統。袁。甲。三。一。軍。之。處。並。著。會。國。藩。酌。量。具。奏。一。等。因。欽。此。仰。見。聖。主。懷。重。機。艱。慮。衷。博。訪。欽。悚。焉。任。臣。維。皖。北。形。勢。以。淮。水。爲。關。領。前。此。髮。匪。盛。於。淮。南。控。匪。擾。於。淮。北。袁。甲。三。駐。紮。臨。淮。跨。兩。淮。而。處。其中。上。年。秋。間。苗。沛。霖。攻。陷。壽。州。占。淮。西。之。數。城。據。上。游。之。津。要。袁。甲。三。勢。處。孤。危。旁。無。應。援。支。撐。實。屬。不。見。自。棄。和。鹽。州。次。第。克。復。而。髮。逆。歸。除。殆。盡。自。三。河。霍。邱。羣。圩。效。順。而。苗。黨。解。散。過。半。頃。苗。沛。霖。已。將。壽。州。正。陽。關。兩。處。退出。李。續。宜。令。蔣。凝。學。進。城。防。守。大。江。以。北。長。淮。以。南。業。經。一。律。肅。清。地。形。之。險。易。視。賊。勢。爲。轉。移。今。日。臨。淮。一。關。似。已。無。甚。緊。要。然。唐。訓。方。暫。督。皖。撫。仍。應。駐。紮。臨。淮。乃。足。以。資。控。制。李。續。宜。所。部。在。皖。境。者。約。分。五。枝。一。曰。安。肅。前。蔣。凝。學。進。次。壽。州。分。防。穎。壽。正。陽。關。三。處。一。曰。記。名。提。督。蕭。慶。衍。駐。軍。霍。邱。與。正。陽。三。河。尖。爲。犄。角。之。勢。一。曰。記。名。提。督。成。大。吉。一。曰。道。員。毛。有。銘。兩。軍。皆。駐。三。河。尖。附。近。之。望。岡。集。並。由。成。大。吉。分。撥。一。營。出。駐。河。南。之。固。始。縣。城。一。曰。總。兵。王。載。嗣。留。守。大。安。州。爲。各。軍。保。固。後。路。接。應。糧。械。淮。西。各。城。布。置。極。爲。周。密。若。唐。訓。方。近。駐。臨。淮。關。則。西。可。聯。絡。蔣。凝。學。壽。穎。之。師。東。可。聯。絡。吳。棠。清。江。之。師。南。可。聯。絡。石。清。吉。廬。州。之。師。與。李。世。忠。滁。州。之。師。而。北。路。亦。可。稍。助。僧。格。林。沁。之。聲。援。若。不。駐。臨。淮。則。中。段。空。虛。恐。徐。宿。毫。蒙。之。羣。捻。又。將。窺。伺。淮。南。關。係。甚。大。不。可。不。防。聞。唐。訓。方。擬。於。閏。八。月。中。旬。由。鄂。起。行。來。皖。俟。其。到。省。臣。當。與。之。熟。商。即。接。統。袁。甲。三。一。軍。汰。弱。留。強。听。咨。訓。練。楚。皖。各。軍。聯。爲。一。氣。庶。幾。防。剿。兼。施。首。尾。皆。應。是。否。有。當。伏。候。聖。主。裁。奪。救。下。唐。訓。方。妥。籌。辦。理。所。有。遵。旨。酌。度。緣。由。恭。摺。聖。陳。伏。乞。皇。上。聖。鑒。訓。示。謹。奏。

請簡親信大臣會辦軍務片 同治元年閏八月十二日

再大江南岸各軍疾疫盛行。臣於八月二十九日附片具奏在案。近日秋氣已深，而疫病未息。寧國所屬境內最勝。金陵次之。徽州衢州次之。水師及上海蕪湖各軍亦皆癘疫繁興。死亡相繼。鮑超一軍據初二日開單稟報。除已痊外。現病者六千六百七十人。其已死者數千。尙未查得確數。寧國府城內外尸骸狼藉。無人收埋。病者無人侍藥。甚至一棚之內無人炊爨。其軍中著名猛將如黃慶伍華瀚等先後物故。鮑超亦染病甚重。合營將領因其關係至大。一面稟明臣處。一面用舟送鮑超至蕪湖發病。張運蘭一軍駐紮太平旌德等處。病者尤多。即求一總稟之書識。送信之夫役亦難其人。張運蘭送其弟之柩至祁門亦自患病。尙難回營。皖南道姓體備至城外查閱一次。歸卽染病不起。臣派營務處四品卿銜甘晉至寧國一行。現亦染病回省。楊岳斌自揚州歸來亦抱重病。天降大戾。近世罕聞。惡耗頻來。心膽俱碎。若有大股賊匪撲犯寧國旌太等處。鮑超張運蘭兩軍不特不能出隊迎戰。並不能堅守城壘。不特不能堅守以待外援。並不能預逃以待再振。若撲犯金陵徽州亦深恐病者太多。戰守皆無把握。數年來千辛萬苦戰爭之土地。由尺寸而廣至數百里。倘有疎虞。何堪設想。若皖南藩籬一壞。則江西內地空虛。毫無足恃。與言及此。憂心如焚。而皖北苗捻兩患。時時可慮。袁甲三李續宜皆將回籍。唐訓方新來。諸事且萃於微臣一人之身。疾疫之災既如彼。責任之重又如此。臣自度薄德。不足以挽厄運。誰才不足以支危局。譬諸擔夫。力能負百斤者。增至百二十斤。則汗流而蹙。增至百五十斤。則倒路矣。臣力本不勝重任。今且增至數十倍之重。僣踣不足惜。倘遂貽誤大局。敢不祗懼。合無籲懇皇太后皇上天恩。簡派在京親信大臣馳赴大江以南。與臣會辦諸務。分重大之責任。挽艱難之氣數。臣具有天良。斷不敢稍存推諉。致誤戎機。今年軍事甫順。而疾疫流行。休咎之徵。莫可推測。中夜對天。准求德器。遠勝於臣者。主持東南大局。而臣亦竭力經營。而左右之。庶幾裨效於萬一。區區愚忱。伏乞聖慈。垂鑒訓示。謹奏。

覆陳皖北軍情並察度營練摺 同治元年閏八月二十七日

奏爲恭摺請旨恭摺覆陳。爾行聖鑒事。竊臣承准議政王軍機大臣字寄。閏八月十二日奉上諭。僧格林沁現統軍在並添派之翼長孟順。會同恆齡卓明河馬隊駐紮永城。一俟永亳一帶積潦漸消。道路可行。即行相機進

勦亳州擒巢。該擒等股迭經掃蕩。一經直搗老巢。勢必窮蹙。若令東西分竄。官軍移向各路往追。賊又繞路回巢。官軍又復回攻。必致往來周折。爲所牽制。此等情形。總當預爲籌畫。謀定後動。方免臨時互相推諉。貽誤事機。僧格林沁在夏邑。將由北路進兵。將來各路約齊會剿之時。賊如竄往北路。自應即由該大臣撥兵追剿。其賊竄西路。應由唐訓方撥兵追剿。賊竄東路。應由吳棠撥兵追剿。賊若南竄。即行三路合力追剿。均著各專責成。先期妥爲布置。毋得臨事觀望遷延。自干罪戾。其毛昶熙所部駐紮營寨等處勇營。併着僧格林沁酌量。隨同官軍。應由何路進攻。妥爲調遣。楚軍應由南路進攻。其西路賊竄。責令追剿。是否足敷分撥。有無窒礙難行之處。唐訓方暑理撫篆。甫蒞皖軍。於進兵情勢。未知能否洞悉。既據僧格林沁將督催楚軍進剿。擒巢各情。稜咨會國藩酌量調度。即着妥爲籌議。並爲駐紮額郡楚軍。道員蔣凝學是否堪以統帶。抑應添派得力提鎮大員督率之處。一併妥籌兼顧。並一面咨覆僧格林沁辦理。吳棠駐軍清淮。籌防裏下河一帶。於亳州東路。靈宿等處。亦恐相距稍遠。黃開榜派赴徐州代領田在田一軍。應令如何酌量進紮。袁甲三尙駐臨淮。其於亳捻東路防剿。應於吳棠等如何各分汛地。合力進攻之處。均當預爲籌定。總之各路責成。均須嚴密部勒。方能及時同心戮力。聲勢聯絡。著該大臣等會同詳悉商酌盡善。迅即奏聞。鄭元善現赴河洛。督辦西路勦匪。所統各軍。雖難即時撤回助剿。惟毫捻如由西北兩面竄走。均係豫境。即著鄭元善毛昶熙嚴飭各屬文武官紳。率領兵練。協同官軍。悉力防剿。如有賊由何路竄逸。不能實力堵禦。該地方官吏。與帶兵將領。厥罪惟均。苗沛霖反覆再三。其叵測情狀。天下聞知。目前歸正。仍恐其首尾兩端。第以勝保赴陝。失所據依。兼之畏懼楚師之威。始將壽州正陽等處。盡卡交出。姑且就我羈縻。僧格林沁以現當勦擒喫緊之際。勢宜恩威並用。示以不疑。用之勦賊。賊平之後。苗練勢孤。自必盡除。傲慢。且使苗練妥帖。則蔣凝學所領楚軍。便可專力與僧格林沁之軍合力。各由南北進剿。擒巢。以期得力。所籌自是不爲無見。此次苗沛霖因僧格林沁札諭該練。欲用之勦擒。乘機具稟申訴。揣其意一則欲借僧格林沁聲威。抑制李續宜撤去楚師。使彼得以逞志。一則欲借勦擒之名。冀僧格林沁奏准。仍復還其前次占踞之利藪。一面之詞。毫無情理。而陰鷲之謀。時流露於意言之表。苗沛霖如果能帶練勦賊。爲國出力。朝廷屢經明諭。賞其既往。予以自新。該大臣等何難待之坦白。盡釋猜嫌。但必須其實心實力。悔罪歸誠。有殺賊攻城之實據。方可加之。

信任。若仍心跡闇昧。或陽爲助勦。而仍與賊陰相結納。或第欲冒官練之名。以脅制民圩。希圖煽惑。漸成尾大不掉之勢。其居心行事。朝廷亦必洞見肺肝。諒該大臣等亦斷不以欲貸其力。稍涉遷就。致爲所惑。而忘後患。著僧格林沁會國藩等會同察度。妥議萬善。正陽等處釐卡。既已交出。卽該練等果隨同奮力勦賊。心跡已明。會國藩等並當籌給餉需。至壽州正陽關等處。利源所在。斷不得令該練等藉詞餉需。再圖侵佔。前次逆首陳玉成就擒壽州。其餘賊驍悍之衆。尙有二千餘人。苗沛霖收隸所部。現在會否遣散。其竄擾豫省南陽一股。擒逆內。有無此項陳逆餘黨。並著僧格林沁等查明具奏。等因欽此。一仰見聖謨闊遠。布置精詳。臣於二十一日接奉此旨。卽與撫臣李續宜再三商度。遠二十三日李續宜登舟起程。暑撫臣唐訓方恰到安慶。臣又與之熟商。如會勦亳州擒巢。楚軍應由南路進攻。其西路賊竄。責令楚軍追勦。諭旨垂詢是否足敷分撥。有無窒礙一節。查李續宜所部湘勇。在皖境者萬餘人。現在分守潁州壽州六安霍邱固始五城。又守三河尖正陽關兩隘。皆係最要之區。若再令分勦擒巢。則防守七處之兵。與進勦亳南之兵。皆嫌其單。湘軍素無馬隊。於追逐擒匪。本不相宜。若步軍太單。則更無把握矣。屢接官文函咨。石清吉防守廬州之十營。前已調去三營。今又欲再調三營。回援鄂省。並云髮匪自德安而下。欲由安慶境內。回援金陵。如果屬實。皖北腹地空虛。處處可慮。潁壽之湘勇。以分守七處而太單。廬州之防兵。以抽調六營而亦薄。更無餘力。可以進勦亳南。此楚軍不敷分撥。兼有窒礙之情形也。諭旨垂詢道員蔣凝學。是否可以統帶。抑應添派大員督率一節。據李續宜面稱蔣凝學與毛有銘同爲監司。成大吉蕭衍慶王載勳皆爲提鎮。勢位相侔。才智相等。彼此俱難統屬。至臣所部各軍。如楊載福鮑超張運蘭朱品隆諸統將。皆抱病未痊。現在皖南軍情。十分緊急。臣欲求一人支持危局。尙不可得。又安能另派大員。督率淮北勦擒之師。此類壽各軍。難相統馭之情形也。諭旨垂詢苗沛霖反覆叵測。察度妥議。一節。臣查苗沛霖詭譎多端。耳目最廣。聞凡李續宜難語苗部之密語。勝保參劾湘軍之微詞。苗沛霖皆得鈔其全稿。卽官劾苗之疏。廷寄馭苗之法。苗沛霖亦多錄其原文。蔣凝學等欲陽撫之而陰防之。固在苗沛霖計算之中。卽僧格林沁欲調苗勦擒。並欲調苗離巢。使楚軍得放心勦擒。亦未嘗不在苗沛霖計算之中。臣愚以爲欲苗之不猜疑。必在我者先有誠一不欺之道。欲苗之不反覆。必在我者先有堅定不變之謀。大抵馭苗之策有二。一曰勦。一曰撫。撫苗之策亦有二。一曰赦其

罪而不資其力。一曰資其力而予以權。凡夏圻之出財出力以從苗者。非心服也。彼挾朝命以臨之。不得已而爲所脅耳。自夏間黨羽離散。苗勢漸衰。今調之會勦擒。則必聽其招集舊部。號令羣圻。是予以威權矣。又必聽其廣收練糧。設立釐卡。是予以利權矣。今日養虎自衛。他日復欲縛虎歸柙。豈易言哉。臣愚以爲救其罪而不資其力。猶不失爲中策。於徵調之札。則吝之。使其號令不能遽振。於釐卡之事。則寬之。使其生計不至遽窮。情願假以利權。斷不予以威權。俾苗沛霖既服官軍之足以自立。又感疆臣之不與爭利。或可相安無事。若既欲資其力。又欲結其心。而又不予以威權利權。則斷無是理矣。此臣察度苗練。但用中策之微意也。至苗沛霖所收逆首陳玉成餘衆。會否遣散。是否混入南陽捨股之內。俟訪查明確。續行附奏。所有邊旨籌議緣由。謹會同署安徽撫臣唐訓方由驛覆奏。伏乞皇太后皇上聖鑒訓示。再此摺係與李續宜面商定議。李續宜奏明於二十六日起程回籍。因業經交卸。卽於二十三日起程。具咨請臣代奏。理合代爲聲明。謹奏。

近日軍情片 同治元年閏八月二十七日

再近日軍情。僞忠王由蘇州帶大股賊匪。上援金陵。屯踞城南谷裏村人字橋一帶。二十日撲官軍營壘一次。金陵將士多病。迄未稍愈。曾貞幹亦抱病未痊。殊爲可慮。逆首黃文金胡鼎文等。大股由東壩撲犯金寶圩。鮑超尙在蕪湖養病。宋國永在寧國代統其軍。派霆字四副營峯字兩營。於距城五十里之新河莊禦之。二十日始到。營壘未定。爲賊所乘。官軍小挫。退回寧國。探聞黃文金等逆將。自新河莊范寧郡之西。楊七麻等逆將。自建平縣撲寧郡之東。官軍病者太多。統將鮑超又不之營。張運蘭雖已於十七日帶病進城。而其部卒亦病莫能興。朱岳墜於十四日移守旌德。亦上下皆爲病所苦。防守尙無把握。大疫之後。遇此鉅寇。皖南全局。幾無一處可恃。總由微臣德薄位尊。莫挽厄運。五夜憂灼。悚皇無地。所幸左宗棠於前月之杪。疊獲大勝。蔣益澧於十四日克復壽昌。將來徽州有急。或可調蔣益澧就近救援。楊岳斌鮑超病皆漸愈。鮑超現發偏身瘡癩。邪症全除。擬於二十六七日回營。其軍縱有疏失。尙可徐圖整頓。仰賴皇上威福。猶當力籌挽救。定傾扶危。除金陵鎮國兩處接仗情形。續行具奏外。理合附片先陳梗概。伏乞皇太后皇上聖鑒。謹奏。

彙報軍情請調多隆阿軍回皖摺 同治元年九月十一日

奏爲彙報各路軍情。請旨敕調多隆阿一軍。回駐皖北。恭摺馳陳。仰祈聖鑒。竊僑忠王李秀成救援金陵。黃文金等股圍犯寧國各情形。臣於閏八月二十七日。附陳梗概在案。現計各路局勢。可慮者約有四端。李秀成率十餘萬賊。更番猛撲。兩花台營盤。自閏八月二十至九月初六。晝夜不息。洋槍洋礮。子密如雨。兼有開花炸炮。打入營中。驚心動魄。會國荃於二十九日。面受洋槍子傷。幸尙無礙。其得力部將倪桂。卽於是日中礮殞命。賊現多開地洞。百道環攻。並未少休。又據蔣益澧來稟。僑侍王李世賢於前月十四日。帶賊三四萬。由浙赴援金陵。我軍以病餘之卒。苦守十六日夜。疲乏已極。若再添侍逆一股。殊恐難支。此金陵之可慮也。胡黃諸逆之竄犯寧國者。自前月二十日。我軍小挫後。未遽攻撲。郡城盤踞於廟埠。仰賢圩油榨溝新河莊等處。綿互近百里。疊據逃出及擒獲匪黨。僉稱該逆不得遲於寧國。決計繞竄南陵青陽。上犯江西。目下各營病勇未痊。缺額未補。卽能竭力保守寧郡。而灣址無陸師駐防。該逆若由開道上趨。不能分兵堵截。此寧國之可慮也。小丹陽之賊。已由東壩拖過。戰船數百號。分布固城南漪各湖。時圖出江。我軍水師自湖口以至金陵。分防二千餘里。地段太長。兼以營哨弁勇病者過多。又新派李朝斌帶三營馳赴上海。兵以分而愈單。設賊船乘隙衝出。則江中糧路俱斷。此水師之可慮也。連日接湖北督撫臣飛咨豫省。大股髮捻。竄至德安隨州。分擾各屬。逆首馬融和卽上年竄踞德安。本年由潁入陝者也。訊據賊供。有取道皖境。回援金陵之語。自廬州克復以後。皖境各城空虛。一經逆蹤闖入。又將到處糜爛。此皖北之可慮也。此外如蕪湖金柱關等處。亦俱賊多兵寡。在在堪虞。顧可慮者雖有多端。而仰託皇上威福。似尙有可以挽救之機。前此疾疫盛行之際。臣於八月二十九閏八月十二日。兩次陳奏。軍中病狀。方虞鉅寇一至。全局瓦裂。今賊氛如此浩大。而支持業經兩旬。已非臣意料所及。從此竭力營救。當可勉撐危局。仰慰宸廑。於萬一。會國荃營中初三日。獲小勝仗一次。初五日。獲大勝仗一次。臣現飛調駐紮蕪湖之王可陞一軍。馳赴兩花臺。又咨調上海程學啓一軍。暫棄青浦。雇坐輪船。趕赴金陵。均幫助會國荃共守營濠。又咨調李世忠一軍。於龍潭石埠渡江。由孝陵衛北路而來。調鮑超一軍。與現駐旌德之朱品隆一軍。均由采石南路而來。兩頭夾擊。冀解重圍。此挽救金陵之拙計也。當羣賊甫集之時。鮑超卽力疾自蕪湖回營。二十七日。已抵寧國。竭力整頓。將病者傷者安置城內。簡選精銳。紮營城外。張運蘭全部。登陴主守。鮑超所部。出城主戰。初三日。在廟埠獲一勝仗。擬於

初六日發紮高祖山兼顧西河灣並等處。計日內必有數次惡戰。臣與浙江撫臣左宗棠函咨商調藩司蔣益澧一軍。由浙境馳赴皖南。與張運蘭會辦寧國防勦事宜。鮑超能於日內大破黃胡各賊。因爲至幸。若不能破賊。亦可拍出鮑超一軍。馳援金陵。而以蔣益澧接辦寧國軍務。至南陵爲內竄之路。鮑超已派總兵葉雲慶駐守該縣。其皖南之徽州池州祁門。江西之湖口景德鎮。巨吳沈葆楨亦均派兵防守各城。此挽救寧國之拙計也。至水師防務。楊岳斌病已漸愈。力疾督守金柱關。彭玉麟分巡灣沚蕪湖各要隘。臣又飭駐紮安慶之巡湖副中兩營。趕緊下隊。又飛調李朝斌三營。由上海折回金陵。該逆如敢衝出大江。合各營未病之船。尙可與之力戰。挫其兇鋒。仰仗聖主鴻福。或者化險爲夷。不至遽形決裂。惟皖北地廣兵單。臣前接鄂賊下趨之信。即調提督成大吉由三河尖馳赴霍山英山。相機防勦。現在安慶廬州兩府。料理城守事宜。一面截留李鴻章新募之淮勇五營。暫駐運漕鎮保守膏腴之地。而舒桐潛太一路。非有大枝勁旅。不足以資控扼。昨接勝保來咨。陝西省城業經解圍。附近逆巢。亦經掃蕩。又接官文李鴻章兩處來咨。已奏請多隆阿一軍回援東南。相應請旨飭下多隆阿迅速東還。駐紮舒桐。兼顧鄂皖兩省。大局幸甚。本年五六月間。臣屢思奏請多隆阿一軍。會勦金陵。因西事方棘。臣不敢獨擁重兵。是以欲奏而復止。欲吐而仍茹。屢蒙聖慈垂鑒。今則軍情萬緊。才智俱窮。不得不奏添大枝勁旅。保全已復之土地。如馬融和殷匪不果竄擾皖北。多隆阿回軍之後。或會勦金陵老巢。或會勦蒙亳捻匪。再行奏明。請旨定奪。除各營戰狀。俟守事大定。分案具奏。及應獎應卹人員。續行陳請外。所有各路軍情。謹繕摺由驛六百里馳陳。伏乞皇太后皇上聖鑒訓示。謹奏。

寧國縣失守片 同治元年九月十二日

正封摺聞。又接鮑超文稱。寧國縣城於九月初六日失守。該縣前派章志俊洪睿海兩降將守之。本屬不可深恃。而章志俊又因病就養蕪湖。該縣失陷。亦係意中之事。惟一縣既失。則藩籬已弛。現在徽州旌德兩城。首當其衝。守徽州者爲皖南鎮唐義訓。守旌德者爲衢州鎮朱品隆。兩處兵力皆單。朱品隆又久病未痊。缺餉過久。據稱旌德百物皆空。無可市買。並無零錢。可辦油鹽。驟遇大敵。深恐不克支持。臣現催調蔣益澧一軍來援徽州旌德。若兩城能如金陵寧國之堅守二旬。則救兵可至矣。該兩城如幸而保全。又恐該逆由績溪太平間竄窺犯江西。反

復籌思，殊無完策。臣前調朱品隆借鮑超援解金陵之圍，今旌德且恐不保，鮑超亦三面受敵，自不能抽出。馳救金陵，除寧國縣詳細戰狀，另行具奏外，理合附片陳明，伏乞皇太后皇上聖鑒，謹奏。

江西釐務疲乏情形片 同治元年九月十一日

再江西全省釐務，於咸豐十年五月奏明，充臣單餉，即經派委督糧道李桓，候補道李瀚章綜理。嗣於是年冬間，分爲兩局。下游南撫建廣饒九南七屬爲省局，由李桓經理。上游袁臨瑞吉南贛寧七屬爲贛局，由李瀚章經理。下游各府屬商販行釐，本年二月一律加成，兩起兩驗收數，自應較前倍增，乃近數月以來，總彙解數寥寥。計自四月至八月，安慶糧臺僅收到江西總彙銀二十二萬兩，錢四萬串。若除每月應解之漕折銀四萬兩，計此五個月中，連錢折算，僅解釐金四萬餘兩，每月七府釐金，不滿一萬，殊不可解。臣訪聞江西省商民，近日頗多怨言，究竟釐金雖已加抽，營餉未得實濟。前此批定贛局月解八萬，省局月解八萬，除去吳城湖口二卡，僅月貢省局六萬。當時賊氛在境，就釐金極衰之時，而立制，乃今年全境肅清，從無月解六萬之事。自河口景鎮樂平三卡，由臣撥歸浙江撫臣左宗棠抽收，饒州一卡，撥歸祁門糧臺買米支用。彼四卡抽收愈旺，而七屬各卡，報解愈少。目下彼四卡月收已過五萬，將來若收過六萬，則漕折中外通融，乃核其所得，不特不如湖北湖南之釐，而省局七屬各卡，全無應解之釐，總臺且有倒欠矣。臣提用江西釐金，尚不如東征局之數，並不如左宗棠經收景鎮河口樂平三卡之數。臣徒攬江右利權之名，全無供蘇皖飢軍之實。核藩司李桓總辦糧臺，兼管釐局，漫不經心，玩視餉務。如饒州一局，八月收冊，尙未送到，即據三四五六七八五箇月報到收冊，除以一半解祁門買米外，其一半劃解省省者，已有銀七千九百四十兩零，有錢九萬二千九百四十三兩零。即此饒卡業經解省之項，李桓亦未轉解交皖，同係近五箇月之專。饒州一卡，分半解省者，爲數反多，七屬各卡，全行解皖者，爲數反少。不知各卡是何弊竇，李桓是何居心。又如河口一局，本年四月以前，係已革同知向紹先經管，每月收數，至多不過五千餘兩。據左宗棠委同知錫經收，五月解銀一萬有奇，較前即增一倍。六七兩月，共解銀三萬有奇，較前並增至二倍。李桓果認真察訪，向紹先當早已撤返，乃於飭查之案，徇且多方袒護，僅請停委一年。經臣加重參奏革職。該司但圖見好屬員，不顧貽誤結需，殊屬大負委任。自李瀚章奏派赴粵辦釐，袁瑞臨三府歸併省局，該藩司事務較繁，臣已

添委甘肅臬司劉于濬訪察商情。并派署鹽巡道孫長絨專司月報。常川駐局。力圖整頓。重定規條。嗣後江西各局卡。上月收數若干。坐支局費若干。均限下月初三日繕成清摺。專差飛送省局。由孫長絨彙總單。專送臣營。贛局西屬。由署道王德固彙單驛遞臣營。臣每月派撥船赴省迎提釐餉。仿照湘省東征局之例。其本年八月奏定月解漕折四萬。臣亦按月派船迎提。所有釐卡大小委員。向由該總局委用黜陟。此後改絃更張。由臣隨時札撤。自皖派員赴江辦釐。以資互證而備觀摩。各卡每月報銷冊。該局員徑備一分申報。臣處商民有無怨言。亦由劉于濬按月稟報臣處。相應請旨。飭下江西署鹽巡道孫長絨常川駐局。甘肅臬司劉于濬體察商情。均與藩司會同辦理。臣統軍過多。欠餉太久。今歲疾疫盛行。醫藥無資。不得不整飭釐章。力求補救。外間皆知上海釐務不實不盡。不知江西釐金。疲乏若此。皆臣平日不能稽核申傲之咎。該司李桓經理不善。此次姑免參辦。數月後如仍前玩泄。即當從嚴參奏。並提訊經手員役。以懲積弊。理合附片陳明。伏乞皇太后皇上聖鑒。謹奏。

彙報近日軍情摺 同治元年九月二十七日

奏爲彙報近日軍情。恭摺馳奏。仰祈聖鑒事。竊金陵寧國各路軍情。臣於九月十二日。彙報梗概在案。嗣是僞侍王李世賢大股。亦由浙江趕至金陵。與僞忠王合力。晝夜猛撲。更番迭進。迄未休息。至九月十二日未刻。兩處地道。同時轟發。土石上飛。賊衆如牆並進。前者旣殲。後者復登。曾國荃督飭諸將。竭力堵禦。純用火球拋擲。間以槍礮搶險。三時。幸得堵禦缺口。擊斃悍賊極多。十三以後。賊斃少衰。白晝不甚環攻。夜間仍輪班逼撲。連紮百餘壘。於官軍營濠之外。相距不過二十丈。仍在開地道三處。據密探稱。俟兩夜發火轟裂。希圖一逞。自閏八月念日起。計堅守已滿一月。曾國荃所受洋槍子傷。左頰子出之處。雖未收口。右唇子入之處。業已結痂。軍心尙屬完固。大局可期平穩。惟前此病卒未痊。近日傷者亡者又添一千餘人。疲勞太久。損折彌多。若無大枝勁旅。從外夾擊。深恐難以解圍。此金陵一軍之大槪情形也。寧國賊目黃文金胡鼎文等。久盤踞於高嶺梅嶺油榨溝新河莊等處。時竄灣汜紅楊樹一帶。冀圖抄我糧道。張運蘭病未痊愈。堅守郡城之內。鮑超病體全愈。屯紮距郡二十里之高祖山。九月十八日。鮑超派隊搗賊。該逆亦排隊于仰賢圩新河莊。處處依傍港汊阻水自固。不敢過河與我接仗。鮑超前因病者太多。新愈者亦黃瘦無力。是以回營兩旬。未敢進兵。今見我之守禦日完。賊之怯情日露。即日擬

將高嶺梅嶺之賊。痛斃數次。以挫兇鋒。其前在寧國縣城失守者。爲降將韋志俊。洪容海兩部。鮑超現亦飭其收集潰散。重整隊伍。隨同進剿。此寧國各軍之大槪情形也。自閏月中旬。大股賊至。卽分僞護王陳坤書。猛撲金柱關。又分股上犯蕪湖。自東壩抬過之賊船。亦羣聚於金柱關上下。官兵守金柱者。陸兵僅羅逢元。朱南桂等四營。水軍僅彭楚漢。丁泗濱等五營。與賊相持月餘。衆寡懸殊。晝夜嚴防。羅逢元等。又分兵遠防龍山橋。梅塘嘴一帶。往返六十里。疲於奔命。羅逢元與朱南桂議。以苦守太久。不如渡河。勤之。九月十八日。與駐守蕪湖之周萬俤。吳坤修等營。由橋龍山暗渡。會合水師。齊進痛剿。陸師自青山山包抄而上。將羣賊蹙逼落水。溺斃極多。水師奪賊礮船五十餘號。從此賊舟無窺伺大江之慮。而內河之灣汊。三汊河亦均有官軍。戰船扼守。此水師及蕪湖金柱關陸軍之大槪情形也。至臣處調度。有與前次奏摺不相符合者。臣前調王可陞一軍。馳赴兩花台幫同防守。厥後王可陞帶三營。先赴金陵。留兩營仍防蕪湖。茲因蕪湖事勢已鬆。卽將兩營全行拔去。又前調上海之程學啓一軍。因駐防南渡要區。不能抽動。李鴻章擬調洋將漢兵之白齊文一軍。來援金陵。此事雖非臣所甚願。然亦未便卻其拯急之情。阻其圖功之念。都與阿未接臣咨。僅接會國荃一函。立派楊心純等千八百人。渡江協防。竇屬力顧大局。痛癢相關。前調浙江之蔣益澧一軍。旋接左宗棠復函。因日內正攻龍游湯溪兩城。功在垂成。礙難抽撥。他往。蔣益澧既不能棄湯溪而換防寧國。則鮑超亦不能棄寧國而先援金陵。徵兵千里之外。本難處處應手。至李世忠一軍。臣前咨調渡江。由孝陵衛北路而來。夾擊僞忠王一股。旋因該提督來文。有江防空虛。南賊分股北窺之說。臣卽飛咨止調。令其專防北岸九墩洲一帶。又因該提督來文。有挑選精壯萬餘。派員統援金陵之說。臣又咨令自行酌量。力難兼顧。則專防北岸。力能兼顧。則分援南岸。聽其自爲裁奪。此又微臣調度各軍。前後參差之情形也。至鄂省馬融和股匪。現聞將由應城一帶。回竄河南。或不至遽擾皖北。仰託聖主鴻福。先紓一面之患。除金陵十二日之戰。金柱關十八日之戰。俟接到稟牘。另行詳報。應獎應卹人員。續行奏辦外。所有彙報近日軍情。恭摺由驛六百里馳陳。伏乞皇太后皇上聖鑒。謹奏。

水陸迭勝力保蕪湖金柱關摺 同治元年十月十二日

奏爲水陸各營。屢獲勝仗。力保蕪湖金柱關要隘。恭摺馳陳。仰祈聖鑒事。竊自秋八月中旬。蘇杭羣賊。大舉內犯。

北漢金陵。高潛寧國。中犯蕪湖。金柱關。所有金柱關等處水陸防守。及九月十八日之捷。臣國藩已將大概軍情。兩次具奏在案。先是僞護王陳坤書等會。共擁衆四五萬。突入太平府之張公橋。圍犯金柱關。橫斷寧國金陵之氣。臣三營以該隘下達高淳溧水上通灣址蕪湖。爲中段第一關鍵。閏八月十三日。賊成發翎鄧萬林等。於各營中挑集未病礮勇三板十船。會合唐修己外江水師一營。王可陞周萬倬羅逢元朱南桂陸師敷營。禦賊於花津護駕墩。五戰卻之。退歸薛鎮。十八日。諜報賊以戰艦數百。由東壩拖壩而出。布滿固城南濱兩湖。臣玉麟親率王吉左光培等。各駕飛刳入湖迎擊。詎薛鎮之賊。節節延竄。潛約賊船。銜尾而西。環泊花津上壩渡之下。臣岳斌一聞此警。留羅進賢萬化林水軍於大勝壩。幫助金陵陸師。而自帶丁泗濱彭楚漢等五營力疾赴援金柱關。適羅逢元朱南桂等陸軍。先在姚老圩毀賊浮橋。獲勝一次。得此水陸依護。賊乃數日不敢過河。九月初五日。賊糾大股至龍山橋。先以排礮拒我師船。遂於淺流中結筏偷渡。朱南桂率三哨馳擊。戰無逾時。羅逢元帶隊突至。直搗核心。王明元力戰死之。朱南桂刺斜而入。截賊數段。縱橫掩殺。未及濟者。悉驅入河。不謂賊又增黨數千。倚河築壘。形若貫珠。以冀乘間再逼。初六日。賊以大隊進逼金柱關水營。各船齊開排礮。逆衆稍退。復合營帶親兵前營郭明鼐與副後營丁泗濱等。帶勇登岸。奮擊馳逐里許。鏖戰方酣。郭明鼐突被洋礮子打穿左喉。即時殞命。幸得丁泗濱等奮力衝突。殺退賊衆。搶護忠骸回船。初八九等日。朱南桂張定魁商令駐守蕪湖之周萬倬吳坤修等。各率新後團防等營。分巡查家灣梅塘嘴一帶。而於十二日。自率勇士。涉流而渡。盡焚隔河諸壩。擊斃數十人。羣賊始遁往魚壩。此閏八月十三至九月十三等日。水陸禦賊。晝夜嚴防之情形也。臣國藩時以金陵事急。向調守蕪湖之王可陞先拔三營。往援金陵。而調向守廬州之梁美材三營。填駐蕪湖。水師之由安慶下駛者。則有巡湖副中兩營。其由上海折回者。則有正前副右新右三營。兵數較增。可以一戰。於是諸將弁會商。十八日。水陸大舉。周萬倬帶所部並團防兩營哨。由查家灣渡河。朱南桂朱寬義帶吉左營。羅逢元帶振字營。由龍山橋渡河。會泗笑。以右營戰船扼橋下。兼分水勇登岸助陣。丁泗濱胡俊友率副後親兵。前營水師。由星子橋決堤駛入。攻城之後。蔡國祥嚴定國彭楚漢率巡湖正左親兵。右營水師。由三汊河攻城之前。唐修己分船守太平府。護定吉左振字老營。仍親帶礮划。同往三汊河會剿。天甫向曙。分道並進。遇賊於花山。兩鋒相交。喊聲雷動。鏖戰數時。賊不少

挫。周萬倬一騎當先。所向辟易。會泗美同團防兩營哨。橫躍入陣。刀矛環刺。賊不能支。且戰且走。朱南桂羅逢元帶隊從九山埂上壓下。朱寬義張定魁從九山左右兩路抄出。賊益震懼。不知所措。爭向上關渡紛紛竄遁。殊不料彭楚漢蔡國祥等。攻破三汊河釣魚台賊卡後。早與丁泗濱胡俊友唐修己嚴定國各水營。衝入上關渡。斫斷浮橋。賊船五十餘號。悉非所有。該逆猝見橋折舟沈。回戈轉鬪。聚軍合力圍殺。擐刃而死者半。撲河而溺者半。棄尸駢積。河水不流。自上關渡至龍山橋。聚賊不下萬餘。無一存者。奪馬三百餘匹。旗械倍之。此九月十八日。擊賊大勝之情形也。龍山橋上關渡之賊。雖一鼓翦除。而峯頭譙駕墩大小花津官圩青山等處。竄延百餘里。尙爲賊踞。臣玉麟復飭成發翊喻俊明水師。梁美材周萬倬吳坤修陸師。暨王可陞留守蕪湖之二營。於二十日進次馬音街。會約吉左振宇等營。及水師李朝斌楊友德李助發等十營。於二十一日裹飯傳餐。侵曉出隊。先用礮船渡陸師過三汊河。毀平峯頭數壘。王可陞梁美材等。即由中路搜勦官圩大龍口。朱南桂羅逢元等。復由右路搜勦青山。周萬倬吳坤修等。同水師逕取護駕墩。各水勇登陸焚橋。周萬倬等率隊直進。賊乃竄聚花津。我軍緊躡賊後。與賊搏鬪移時。周萬倬困入重圍。適王可陞梁美材等。由官圩聯騎衝至。李朝斌喻俊明等。率礮隊排擊水次。周萬倬立刃數賊。突圍躍出。面面夾攻。遂破花津兩岸堅巢。獲賊划七十隻。焚賊所擄聚之糧數萬石。各營還駐馬音街。而朱南桂羅逢元兩隊。亦盡洗青山踞賊以歸。二十三日。周萬倬王可陞等軍。冒雨巡哨。斃賊敗之。二十四日。風雨轉猛。至晚稍霽。議於次日攻洞湯象山之賊。王可陞梁美材遵陸而進。羅逢元朱南桂周萬倬吳坤修分兩翼傍河而進。李朝斌各水營自太平府東循堤而進。甫至小橋。忽見賊旂數十層。掩映林谷間。周萬倬率哨官洪得勝。梁營管入。往來盪擊。賊盡披靡。各欲圍而殲之。俄聞鼓角一聲。象山後突出大股。火機觸發。槍子萃飛。周萬倬見洪得勝中槍墜馬。馳救不及。輒復躍入賊陣。右膝受傷。裹創猛戰。幸王可陞帶隊來助。羅逢元朱南桂亦自洞湯援旋而至。合軍掩襲。旣焚象山賊館。並將采石磯另股賊援。悉驅出薛鎮。小丹陽一路。二十八日。成發翊喻俊明聞高淳賊船出石臼窰。聚泊小丹陽之背。以護新市鎮四壘。乃於二十九日。割會泗美右營堵守塘溝。窰亭左營定湖營進湖。賊船致壘殲賊。成發翊得船十二號。喻俊明得船二十八號。自是賊舟之由東端抬來者。存皆無幾。距蕪湖金柱關六十里內。無一賊矣。此九月二十一至二十九日。疊次勦賊獲勝之情形也。臣等查金

柱關一隘。與蕪湖輔車相倚。此次僞護王等既由陸路全力攻撲。復於東壩抬船過湖。圖竄出江。以截金陵諸營之糧路。安危得失。關係至鉅。幸仗天威。大彰捷伐。保全重險。江介肅清。足塞諸逆首併力一逞之心。諸將士苦戰五旬。始終不懈。可否俟金陵賊退後。容臣等彙案酌保。出自逾格鴻施。至花翎總兵銜儘先副將勝勇巴圖魯郭明鼐。忠勇性成。英毅罕匹。咸豐六年。投效水營。拔充哨官。七年。掃蕩蘄黃。肅清楚境。八年。克復九江府城。進攻安慶大通。從陽等處。十年。派充營官。攻破南陵賊圍。十一年。攻克安慶省城。收復池州。本年。攻打運漕。無爲東西梁山。及金柱關。蕪湖縣各要地。均屬異常出力。戰功最著。茲因登岸殺賊。中礙捐軀。實堪憫惜。合無仰懇天恩。追贈提督銜。卽照提督陣亡例議卹。以昭激勸。又花翎游擊銜都司洪得勝。擬保守備藍翎千總王明元。擊賊陣亡。並請敕部各照本銜。從優議卹。以慰忠魂。所有水陸各軍。迭獲勝仗。力保蕪湖金柱關要隘緣由。謹繕摺由驛六百里。合詞馳奏。伏乞皇太后皇上聖鑒訓示。謹奏。

近日軍情片 同治元年十月十一日

再近日軍情。北路金陵大營。自十二日地道轟發。我軍搶堵獲勝之後。賊氣稍衰。而日夜掘開地道。仍不少息。會國荃飭各營添修內牆內壕。又募死士乘夜突入賊營。塞其地穴。擒斬其首。又於內掘地道以迎之。前後凡破賊之地道七處。羣賊智盡能索。至十月初五日。出壕大戰。破賊壘數十座。僞忠王之精銳。損折極多。又撥賊數萬。回救太倉州。凶燄彌滅。仰託聖主威福。或可解圍以去。中路蕪湖金柱關等處。十八大捷以後。又有二十一二十九等日勝仗。賊船焚奪幾盡。守局穩固。臣已將詳細戰狀。同日另摺具奏。南路寧國府一帶。鮑超於二十一日出隊。小挫一次。該逆一面在上游與鮑超相持。一面在下游灣址方山等處。與水師相拒。初五日已渡過清弋江之西岸。梗塞鮑超之糧路。深恐其內犯南陵三山。由池州而竄江西。臣九月十二日摺內所陳。可慮者四端。今三患稍紓。可慮是專在寧國一路。若再支撐一月。新募之勇已到。病故之缺悉補。鮑超能出營痛勦。或可力遏賊氛。不令上竄。除詳細戰狀。另行續奏外。理合附片先陳梗概。伏乞皇太后皇上聖鑒。謹奏。

陳明各軍應保之案片 同治元年十月十一日

再臣欽奉九月二十一日寄諭。此時援逆麇集。務當激勵將士。竭力固守。所有出力各員弁。著會國藩隨時奏

請獎勵。以示固結士心。」等因欽此。臣查前經奏明。奉旨准保者。鮑超有克復青陽石埭涇太等城一案。曾國荃有克復蕪湖太平東梁金柱等處一案。茲已遵旨核定。開單請獎。此外應行奏獎者。張運蘭朱岳隆等軍。有去臘徽州守城一案。又有水師克復蕪太一案。向歸楊岳斌等請獎者。此次亦由臣處出奏。又有潁州解圍一案。應歸李續宜請獎者。此次亦由臣處代奏。統俟陸續開單。奏請恩施。惟鮑超等前開單內。隨後病故之員不少。近因戰守緊急。未將病歿人員。一一報明。臣處不及查核扣除。俾死者邀虛銜以飾終。生者亦觀感而圖報。理合一併陳明。伏乞聖鑒。謹奏。

縷陳金陵各營苦守情形摺 同治元年十月二十七日

奏爲金陵各營苦守四十六日。屢獲大捷。力解重圍。恭摺縷陳。仰祈聖鑒事。竊自閏八月下旬。金陵賊援大至。官軍堵剿迭勝。經臣四次具陳梗概。聲明續報戰狀在案。旋據江蘇藩司曾國荃稟稱。僞忠王李秀成。在蘇州大會羣首。以僞輔王楊輔清及黃胡賴等股。擾寧國。以僞護王陳坤書等股。由太平府窺金柱關。李秀成親率十三僞王。號稱六十萬衆。專注金陵。東自方山。西至板橋鎮。旗幟如林。層層排列。閏八月二十日。糾合城賊。直衝我營。尤趨重於東西兩隅。曾貞幹彭毓橘劉連捷張詩日熊登武朱林桂等縱軍兜擊。追賊於小河邊。斬級頗多。朱林桂搏戰方酣。中槍而殞。二十一日。城賊援賊同時並進。曾國荃令各營堅壁固守。俟其撲近花籬。突以排礮轟之。賊乃踉伏在地。礮聲絕而殺聲又起。日夜環伺。無或少休。二十二日。賊由東路攻後副南後等營。西路則犯湘恆恭字等營。曾貞幹方率晏恭山力戰西路一股。而賊已分黨二萬。逕趨洲上。抄出猛字諸營之後。曾國荃卽派蕭孚泗周惠堂王仕益倪桂李巨典崔文田凌有和楊錕南等。分路馳剿。賊爲負創卻走。倪桂與左傳貴大呼衝入。遇者輒殲。左傳貴馬蹶戰歿。賊遂擁衆回戈。留踞數千人於洲上。曾國荃以洲上關繫全軍糧路。我必所爭。乘夜急修十數壘。由曾貞幹撥兵駐之。又令劉連捷遣死士鎚牆出擊。殺賊數十。奪旗數百而還。二十三日。賊既攻我猛字各營。復昇巨礮轟東路營壘。并駕戰艦擊湖橋營卡。曾豈凡搶護炮臺。受傷幾危。而賊撲益猛。易良虎易良豹等正在悉力堵禦。適曾貞幹督隊而前。縱橫截殺。卽時剿退。仍一面會約羅進賢萬化林等。稜水師於藕塘護築新營。守定隄埂。而運道乃可無虞矣。二十五日。賊更以西洋火器。力攻東路之副後南後嘉字長勝吉後五營。而

圍信西路之仁嚴和智四營者。已歷六晝夜。彭毓麟張詩日熊登武李祥和曹仁美等料賊疲乏。躍出濠外。突破四壘。殺斃及擒獲者三百餘人。二十六七八等日夜。賊乃悉向東路偏營而陣。洋槍洋礮。驟若飛蝗。並於嘉字吉後副後營下。濟通地道。百計環攻。劉連捷朱洪章武明良吳光春曾昭禮等率同士卒。負牆露立。拋擲火球。礮賊無算。會國荃以病卒太多。弗耐久戰。因派李巨典譚防南後營汛地。二十九日。賊負片板。蛇行而進。直薄副後諸營。濠外開花礮。橫飛入營。烽燧蔽天。流星布地。羣賊齊聲大譟。東草填濠。芟芟欲上。武明良劉連捷吳光春各以長矛擊刺。前者拽尸。後者更進。會國荃見事勢危急。親率部將倪桂蕭開印前往策應。倪桂蕭斬悍目。轉戰無前。中礮死綬。會國荃亦爲飛子傷頰。血流交頤。仍裹劍上濠。以安軍心。此圍八月二十至二十九等日。督軍守禦獲勝之情形也。九月初一日。添賊一大枝。猛鷲無匹。諜者曰。僞侍王來自浙東。其撲東路各營者。恃有大援。攻吉後礮台益急。會國荃引軍馳救。力破賊衆。吳光春陳膺福乘勢將吉後營一段堵住。而王光勝劉大勝黃升富胡澤仁廖太仙等。已相繼傷亡。會國荃恐有蹉跌。乃留蕭開印守之。維時曾貞幹與諸將謀。東路地道甚近。會國荃又創口未平。不可不帶兵往助。遂飭黃潤昌王廷耀曾正明等堅守江東橋。三汊河大勝關諸營。自帶八哨疾趨而東。商令各營築塼內牆。濠以自固。自初一以至初四等日。我備愈嚴。賊計轉狡。若蠅若蟻。倏往倏來。多用箱篋實土。於中排砌濠邊。明防礮子於上。暗築地道於下。我軍之禦之也。先以火箭攢射。繼挑銳卒誘賊近濠。突出奮擊。幸得少挫其鋒。會國荃熟察形勢。惟西路賊陣散漫。西南地面遼闊。不如先發制之。派彭毓麟率張詩日熊登武李祥和劉湘南羅朝雲曹仁美等營。擊右路。蕭孚泗率張光明周惠堂曾良佐楊西平等營。擊中路。而以李巨典何玉貴成東昂陳壽武馮盛德朱平海趙清河黃東南等營。擊左路。初五日。齊隊出濠。諸道並進。戰不逾時。焚逆壘十二座。殲斃近三千人。壘中之賊。罕有脫者。我軍惟李巨典吳宗國負重傷。李正升劉德盛吳發遠等殉焉。餘尙無所損折。自此西南一隅。賊不敢復犯後濠矣。此九月初一至初五等日。節次堵殺獲勝之情形也。初六日以後。東路之賊。環逼如初。未嘗少懈。朱洪章劉連捷武明良蕭開印吳光春陳膺福等。且堵且戰。屢出焚賊。斃斃約七百餘名。我營亦折文喜才龍開義彭倫考劉再祥孫雲亭五人。幸有都與阿派楊心純等五營。臣由安慶派去之喻榮陞等四百人。先後赴援。而王可陞所部。亦先派三營。由蕪湖赴援金陵。兵數稍增。軍威頗振。無如主

客相搏。不數十武。節短勢險。仍不能出。大隊痛勦。而賊之舂鍤負土者。已及壕牆之下。十二日。瞥見西南一股。悉併東路。潛伏雨花台後。曾國荃知地道之將轟也。令各營慎以備之。不轉瞬而嘉字吉後兩營外一聲霹靂。煙燄上衝。石塊土塊。飛入天半。營牆各崩塌十數丈。賊即乘隙直上。萬弩齊發。排礮雷轟。踴躍爭先。呼聲動地。兩路悍黨。不下萬餘人。擁入壩口者。各有數千人。我軍寂然不動。扼住內壕。俟烟障一開。塵土落畢。武明良率各弁勇從嘉字營衝出。有朱洪章楊正彪彭毓橘李祥和劉湘南羅朝雲等爲之援。蕭開印胡萬清陳萬勝胡海萬戴明山吳光春陳膺福易光春暨各將弁從吉後營衝出。有蕭孚泗張光明周惠堂王可陞謝占春陽華坤楊心純等爲之援。亂刀交錯。併力搶險。陳得月陳敬廷張慈武周在遠劉安邦謝仁本周宗達胡榮祥王芳來鄭元標羅道明雷信義等死之。武明良蕭開印等憤怒填臆。忍死決戰。壩口以內。屠戮靡遺。壩口以外。諸賊渠。率旗督戰。更番向前。猛撲五六次。經我軍同出抄殺。賊之精銳。摧折無算。其地道之同時迸裂者。尚有副後一營。劉連捷麾軍勦退。侯永清張玉藻蕭錫珍李修祿李萼南劉星德劉泰合等死之。其各軍之同被賊圍者。尚有信字長勝義字堅字從字克字南後七營。李臣典楊玉輝羅雨春武交清何玉貴曾昭禮喻榮陞胡松江楊西平宋聲平等。從內擊出。曾貞幹率晏恭山成東昂朱平海馮盛德陳壽武等。從外擊入。賊亦敗走。是役也。殺賊近萬。誅僞德王及僞主將李蔡高范汪羅吉陳等酋。我軍陣亡不過百餘人。受傷者蕭開印吳光春李祥和胡萬清曾昭禮陳萬勝武義山張林芳而外。弁勇不過三百餘人。此九月初六至十二等日。搶救地道。力戰大勝之情形也。自有此捷。賊之氣燄稍衰。而設謀圖我。仍百出不窮。十三日。既從東路糾聚賊黨。別開地道。必欲甘心一逞。仍於西路決長江之水。淹往來之路。以冀絕我饋運。當經曾貞幹易良虎在高堰增修小營。分哨填紮。商令水師劉正隆賴榮光陳東友等。各帶舢舨數號。駐泊雙閣。與陸營相依護。重保一綫之路。以安萬衆之心。而東路之防。則有武明良派隊毀賊一壘一穴。蕭開印趙清河於十六夜。派隊破賊一壘一穴。十七二十一二等夜。劉連捷潛撥勇隊。各挾火具。焚賊二壘二穴。計三次。俘獲三十人。斬敵過五百人。曾國荃與諸將議制敵之策。尤莫若審賊所向。掘地數仞。隨而迎焉。二十四日。副後營劉連捷。令部卒就營外荷鋤開掘。不移時。而內外洞穿。適與賊遇。一刃迭制。聚而殲之。二十五日。蕭開印復穿一地道。熏以毒煙。灌以穢水。賊亦無一生者。次夜風雨交作。劉連捷伺賊無備。於四更時。帶胡俊

升楊致仁分三路冒雨出濠。襲破潛挖地道之三壘。俘斬數百。損我胡俊升楊致仁二人。越三日。劉連捷營中發士丈許。豁然開明。賊不得遁。盡遠於地道之中。蕭闈叩武明夏朱洪章等。約於三十夜。薄暈攻賊。蔣仲梅黃禮芳中賊流矢。並歿於陣。蕭闈叩催隊猛進。立踰堅壘二座。斬二百餘級。縛五十餘人。十月初一日。副後營擊開地道一處。初二日。會國荃中軍又擊臨地道一處。伐木作薪。堵塞洞口。賊乃無能爲矣。維時王可陞留防蕪湖之兩營。至是亦來入濠助守。會國荃見兵力愈厚。可決一戰。遂於初三四等日。乘賊惰伏。進拔十數卡。初四夜三更。會貞幹彭毓橘蕭孚泗偵知西路三。三河隔岸之賊。將圖宵遁。乃整勁隊分道並出。會國荃亦令李臣典朱洪章劉連捷劉蔚昌武明夏等。徑攻東路前敵四壘。以防雨花台及南門之賊。抄襲我軍之追賊者。天甫向曙。縱焚四壘。並賊逸出。悉就誅夷。而西南諸壘中。驟見東路火發。光燭霄半。益無固志。棄壘爭竄。適會貞幹率黃潤昌王廷耀步軍。同楊鈞南騎隊馳至。遂由善橋追賊至板橋周村一帶。彭毓橘蕭孚泗張詩日熊登武李祥和胡松江張光明周惠堂等步軍。及周日昇彭吉志朱雲章趙三元伍維壽等騎隊。亦追賊至南路牛首山一帶。自辰至巳。掃平賊壘數十處。擒賊近四百人。斃殿後悍賊約七千人。王可陞楊心純武交清何玉貴趙清河等軍。收勦敗匪。直出方山之西。詎南門外雨花台兩旁留守之賊。勾結城賊。齊出大股。截我歸路。幸劉連捷副後營並長字嘉字信字各營隊伍橫擊於左。易良虎會良佐楊西平羅朝雲晏禮週各營親兵。夾擊於右。賊始反奔。其在東路者。向南門繞城而遁。其在西南者。向秣陵關一路而遁。是日之戰。我軍小有傷折。而殺賊悉難以數計。此九月十三至十月初五等日。連破地道。乘勝解圍之情形也。臣查蘇浙諸賊首。大舉入寇。嚮聚金陵。意圖吞噬我營。合犯上游。計甚毒狡。仰賴聖主威程。將士同心。以病餘之孱兵。當非常之兇敵。苦守力戰。時閱四十六日。以寡禦衆。出死入生。卒能挽回危機。保全大局。在事文武。實著微勞。除會國荃會貞幹係臣胞弟。不敢仰邀議敘外。所有尤爲出力之按察使銜江西卽補道劉連捷等七十三員。謹先開單。伏乞恩施。以昭激勸。其餘出力人員。並水師員弁。容臣查明彙案奏獎。至副將倪桂等二百七員弁。均係立功後力戰陣亡。深堪憫惻。相應另繕清單。請旨勅部分別議卹。所有金陵各營。苦守四十六日。得解重圍緣由。謹會同湖廣總督臣官文。江蘇巡撫臣李鴻章。由驛六百里馳奏。伏乞皇太后皇上聖鑒訓示。謹奏。

近日軍情仍請簡派大臣會辦軍務片 同治元年十月二十七日

再近日軍情。金陵解圍。援賊雖退。而尙留悍賊在於秣陵關六郎橋等處。多築堅壘。層層布置。曾國荃以病者未痊。傷者太多。俟新募之卒到營。添補足額。再行出隊痛剿。目下仍飭各營嚴密防守。不少鬆懈。僞忠王李秀成回蘇之後。分黨留守金陵。並分股力攻九洲官營。圖犯江北。提督李世忠親赴九洲洲。十七十八十九等日。賊匪四面猛撲。李世忠竭力堵剿。幸獲保全。惟皖北廬州兵力不厚。而和含巢縣無爲舒桐等屬。處處空虛。臣寶琛以爲慮。寧國黃文金胡鼎文等巨股。於初五日渡過灣址。占踞西河。鮑超派宋國永於初八日攻勦西河之賊。未能得手。損折勇丁數百人。水路糧運。被賊梗塞。臣派員於繁昌南陵。多雇民夫。趕辦陸運。又派河北調來之何紹彩等營。由南陵前往援助。保護陸路。又自金陵出調王可陞五營。由蕪湖前往援助。冀通水路。總期能通運道。而後能保鮑超之營壘。能保營壘。而後能守寧郡之城池。別有賴古等股。攻圍旌德縣城。該城係衢州鎮總兵朱品陞駐守。十月初十日。賊薄城下。十二三日。猛撲兩次。十五日。官軍出城迎戰。敗挫一次。朱品陞以病勇太多。米糧太少。請援甚迫。臣調左宗棠由浙派來之王文瑞一軍。自南路休寧前進。調駐防蕪湖之周萬倬一軍。由北路涇縣前進。兩路救援旌德。不知趕得及否。今歲夏秋以來。疾疫大作。昔時勁旅。頓變孱軍。臣已三次具奏。閏月中旬而後。羣賊環伺。應接不遑。今幸仰託聖主威福。金陵解圍。忠侍兩僞王鼠竄而去。大局尙可支持。惟寧國與旌德同時吃緊。鮑超張蓮蘭朱品陞諸軍。病餘羸卒。萬難支撐。自金陵至徽州祁門八百餘里。地段大長。賊股太衆。加以皖北十餘城。毫無準備。臣反覆籌思。實恐潰敗決裂。盡隳前功。閏八月十二日。臣奏請簡派大臣來南會辦。仰蒙優詔慰問。未荷俞允。頃接嚴樹森來咨。有皖北各軍統歸臣處調度之奏。誠恐聖主親采外間浮僞之名。不察微臣竭蹶之狀。直待貽誤事機。再行陳奏。則已晚矣。查三年以前。江南欽差大臣一人。兩江總督一人。督辦微防一人。督辦寧防一人。管轄李世忠苗沛霖兩軍之欽差大臣一人。臣今一身所處。兼此五人之職。而又新添安慶池州等沿江十餘城。卽使才力十倍於臣者。已有顛蹶之患。况如臣之愚陋乎。合無籲懇皇上天恩。簡派大臣。與臣會辦諸務。縱不能復前此五人之舊。但能添一人二人。俾臣責任稍分。案牘稍簡。更得專精竭慮。圖報涓埃。除戰守詳細情形。另行具奏外。謹將近日常軍情。及微臣辦理竭蹶緣由。附片具奏。伏乞皇太后皇上聖鑒訓示。謹奏。

張運蘭回籍養病片 同治元年十月二十八日

再駐守寧國之福建按察使張運蘭病久未痊。臣已兩次陳奏在案。今歲疾疫之災。寧國尤酷。如皖南道姚體備。署寧國府知府福鳴。營務處四品卿銜甘晉。皆一入寧境。卽染病不起。人咸視爲畏途。惟張運蘭不避險難。抱病帶兵入城駐守。抵防以來。病亦日增。具稟自陳不支之狀。臣因其胞弟張運桂甫卒於軍。其左右幫辦文案者。物故至十六員之多。不待其稟請專假。卽批令迅速離營回籍養病。頃張運蘭已由安慶買舟歸里。所有該臬司部下湘勇十營。臣派提督銜記名總兵易開俊。提督銜記名總兵劉松山各統五營。分守寧國府涇縣兩城。惟此外八營。皆其比肩共事之員。官職相等。可否籲懇天恩。將易開俊劉松山簡放實缺總兵。俾足鈐束各營。亦使張運蘭得以安心調養之處。出自逾格鴻施。理合附片密陳。伏乞聖鑒。謹奏。

彙報各路近日軍情摺 同治元年十一月十二日

奏爲彙報近日各路軍情。請旨敕調江忠義移軍駐守皖北。恭摺馳陳。仰祈聖鑒事。竊自金陵援賊。經官軍擊退後。留守秣陵關。分攻九泐洲。並寧國旌德等處軍情。臣於十月二十七日。附陳梗概在案。嗣據諜報。僞忠王李秀成。並未回蘇。諸首死黨。多未遠颺。仍在秣陵關六郎橋一帶修壘堅持。俟僞侍王由東壩抬船過壩。卽分向金陵金柱關。以圖再逞。十月十七八等日。志逆之子。及僞章王對王數股。併趨九泐洲。一面圍李世忠各營。一面晝夜趕渡。先後衝過江浦口者五六萬人。曾國荃以南岸諸軍。節節牽制。北岸郡縣。處處空虛。抽撥周惠堂等兩營。搶扎西梁山。先顧濱江要隘。又商令李昭慶帶張樹聲五營。自蕪湖北渡。救無爲州產米之區。保皖南各營辦糧之路。臣亦飛調李續宜所部蕭慶衍八營。移駐廬州。毛有銘七營。移駐巢縣。部勒甫定。僞對王一枝直衝過李世忠各壘。從和州之青甸廟。斜趨而西。於二十七日。陷含山縣。二十八日。竄踞巢縣。十一月初一。撲陷和州。查巢縣西北。直達廬郡。西南近接無爲廬江等州縣。以入省垣。略一進步。全局俱震。張樹聲等五營。幸已冒雪渡江。駐紮無爲州。廬江一縣。亦截留上海新募吳長慶等四營。入城駐守。廬郡一城。僅有石清吉四營。亦截留唐訓方新募之何有能等三營協守。此外衝要之所。若店埠。若運漕。無兵扼防。臣所調李續宜部下之毛有銘一軍。尚在固始。蕭慶衍一軍在霍邱。現令齊集舒城。再行進兵。賊衆颺忽。誠恐著著落後。此賊竄江北辦理竭蹶之大概情形也。寧

國悍賊黃文金胡鼎文等。自蹶西河。斷我水路糧運。而僞輔王楊逆之衆。又時時聲東擊西。四出剽掠。臣所攻辦陸運。自三山夾以至南陵數十里內。尙無梗阻。自南陵以至寧國府城。到處阻賊。雨雪泥濘。艱於饋運。城內外各營將士。人人以缺米爲慮。十月十三日。賊乘張運蘭因病離營之際。大舉攻城。新任統將易開俊劉松山等。登陴守禦。礮石環擊。賊始解退。易開俊奉臣調援旌德之檄。十一月初三日。道出涇縣。適有寧邑另股。由晏公堂僞眉嶺兩路而來。圖襲涇縣城。橫斷徽寧之氣。易開俊督同駐涇各營。力戰卻之。飽超在高祖山屯營。雖多。分派過廣。小挫之後。未可遽議戰攻。前調之王可陞五營。及何紹彩四營。擬令分駐板橋黃麻渡。先保糧路。俟赴湘新募之七千人。陸續到皖時。再行分途痛勦。此寧國各軍。戰守艱滯之大槪情形也。其賴古諸逆之圖撲旌德者。直蕪城下。環攻不休。朱品隆於十月十五日。挫敗一次。十月十七日。小勝一次。十八十九等日。大勝兩次。毀平二十餘壘。賊始退聚九十等郡。旌德城幸得解圍。別有昌化廣德各賊黨。突陷績溪縣城。分窺歙境。駐守徽州之皖南鎮總兵唐義訓。會商左宗棠派援之王文瑞等營。於二十八九等日。分道馳擊。屢有斬擒。十一月初一日。王文瑞敗賊於臨溪。唐義訓敗賊於孔靈。初二日。合軍進攻績溪。克復縣城。而旌德境內之賊。復於初三日闖入太平縣。由焦村度雙阜二嶺。初六日。進踞黟縣之西遞地方。意在竄撲祁門。斷徽州之餉道。入江西之北境。此股雖非甚凶悍。而蹤跡甚疾。關繫極大。祁門爲臣數載經營之地。引領南顧。實用隱憂。此又旌德績溪太平黟縣等處之大槪情形也。臣竊計本年秋冬以來。羣盜如毛。南北環伺。非先保皖北完善之區。不能辦皖南之賊。自和州以上。直至蕪黃十數州縣。千里無兵。非有大枝勁旅。長駐廬州舒桐一帶。不特爲皖北無窮之憂。亦且貽鄂豫兩省之患。毛有銘蕭慶衍雖稱健將。才尙不足當此一路。李續宜病勢未痊。亦難遽來。多隆阿本約定進攻九墩洲。會勦金陵。既而改旆西征。臣早料其必有他變。夏間亦屢奏及之。旋於九月十二日。奏請多隆阿移師東還。詔旨臆切。未邀俞允。今則秦人痛深水火。聖主方眷顧西陲。何敢更爲再三之請。舍此則惟貴州提督江忠義。與安徽藩司江忠濬。誼本兄弟。又有伊兄江忠源遺愛在民。廬人至今頌之不衰。倘調至廬州舒桐之交。外事則令江忠濬主之。戰事則令江忠義主之。必能艱難共濟。屏蔽江淮。合無仰懇天恩。敕下江忠義統率現部三千人。馳赴皖北與江忠濬同駐廬境。俾已復之疆土。不至再就淪夷。大局幸甚。微臣幸甚。除各路戰狀。及應獎應卹人員。續行分案陳奏外。

所有近日軍情。謹繕摺由驛六百里馳報。伏乞皇太后皇上聖鑒訓示。謹奏。

審明陳步高等潰走情形分別定擬摺。同治元年十一月十一日

奏爲遵旨審明陳步高等潰走情形。分別定擬。恭摺奏祈聖鑒事。竊臣於本年六月間。准江蘇撫臣李鴻章咨解。由浙赴滬之副將陳步高貴廷芳二員到營。欽奉諭旨。著卽審明定擬具奏。嗣八月間。又准江蘇撫臣將吳再升一員併解來皖。先後均發交安徽善後局署司道等會同訊研。錄供詳辦。茲據訊取陳步高供稱。由廣西武宣縣武生。歷保花翎總兵銜。遇缺先選副將。咸豐十年遵調赴浙。隨同克復餘杭臨安平湖嘉善諸城。十二月管帶浙江新字營勇一千七百名。駐防嚴州。十一年六月。奏奉署理嚴州協副將。歷次勦賊獲勝。十月赴援省城。在候朝門搶築營壘。日與賊戰。歸提督張玉良統轄。十月十八日以後。歸元文榜統領。十一月二十八日。正在督隊進攻。遙見鳳山清波兩門火起。杭城失陷。是日率衆衝突。攻擊至夜。二十九日糧盡援絕。進退俱窮。憤不欲生。投水遇救。旋聞總兵元文榜等。俱在上海。收集潰勇。隨搭便船赴吳淞口。今奉押解到皖。封繳嚴州協關防一顆。呈具親供。靜候查辦。又據貴廷芳供稱。湖南武陵縣人。由行伍歷保花翎總兵銜。儘先補用副將。咸豐十年八月。帶勇防守新河莊。因寧國府城失守。衝圍就近赴浙。十二月奉委管帶水師礮船。駐防富陽桐廬嚴州一帶。十一年九月。邊檄赴援省城。十月初六日。船至錢塘江。歸張玉良統轄。十五日帶船至義橋勦賊。二十日回省。張統帥業已陣亡。改歸元文榜統帶。其時江邊陸營。盡爲賊陷。屢次攻勦。未能解圍。十一月二十八日。省城失陷。二十九日。蕭山賊來襲水營。竭力抵禦。水勇十損五六。舟中米糧已絕。因帶所存礮船。馳往海寧。詎意是夜風潮大作。長龍舢板一時盡覆。並被後潮撞擊。船隻均壞。隨至黃道門。探聞上海收集潰勇。遂於十二月初八日抵吳淞口。茲奉解皖審訊。應請從重治罪。又據吳再升供稱。湖南永綬廳人。由行伍歷保花翎記名總兵。矯勇巴圖魯。咸豐十年五月。帶勇進攻嘉興。駐防湖郡。十一年四月。調赴浙東。六月。攻克義烏。八月。移防諸暨。因兵勇不敷分布。商請回楚募募。稟奉巡撫允准。九月二十一日。將原帶勇丁移交林福祥接管。赴省請咨回湘。十月十一日。省垣事勢日迫。奉提督張玉良札。飭招集城外潰勇。以資戰守。維時糧餉軍裝。均無所措。人心渙散。不復成軍。十一月二十八日。杭城不守。力戰負傷。昏暈落水。遇救至滬。十二月滬城喫緊。奉飭募勇二百餘名。歷防吳淞高橋等處。本年三月積傷

感發交卸帶勇事件。今奉傳訊。以前在浙諸事。總屬救護不力。咎有應得。各等供前來。臣覆加審核。各該員雖非先事逃避。而律以謀人軍師。敗則死之之義。均屬罪無可逭。惟統將之與裨將。權任有輕重。科罪自有等差。陳步高貴廷芳二員。於上年十月。先後調援杭省。初歸張玉良統轄。繼歸况文榜統轄。省城淪陷。該將等均屬救援不力。徧查例案。並無赴援不力。裨將作何治罪明文。第統領張玉良雖已殉節。統將况文榜現在上海。帶勇緣李鴻章奏明。准其效力贖罪。統將既邀寬典。裨將自難重議。而陳步高曾署嚴州協篆。係有地方之責。貴廷芳一奔於寧國。再奔於杭州。竟以逃潰爲將領之常例。均未便稍涉輕縱。衡情定讞。陳步高貴廷芳二員。應比照左宗棠奏准之。馭起劉齊昂。發往新疆。效力贖罪。至吳再升一員。原帶勇丁。業於九月二十一日。交林福祥接管。逮十月十一日。奉張玉良檄重招潰卒。維時糧械無措。不能成軍。城陷同逃。厥各較輕。吳再升應發往軍台效力贖罪。是否允協。恭候聖裁。除陳步高繳到嚴州協關防。由臣咨送浙江外。所有邊旨。訊擬緣由。謹會同江蘇撫臣李鴻章。浙江撫臣左宗棠。恭摺具奏。伏乞皇太后皇上聖鑒訓示。謹奏。

祁門縣失守片 同治元年十一月十二日

再正封摺間。據署皖南道葉兆蘭稟稱。黟縣境內之賊。於十一月初七日。未刻。分數路抄入西武嶺。竄陷祁門縣城等情。查祁門居徽池兩府之中。爲糧臺轉運之所。該逆未逾四日。由太平黟縣突踞要地。蓄計甚狡。關係甚大。唐義訓王文瑞兩軍。自克復績溪。回軍徽郡。未知能否併力速攻。以圖克復。除續行詳奏外。合先附片陳明。伏乞聖鑒。謹奏。

撤回壽州正陽防兵片 同治元年十一月十一日

再前因苗沛霖練圩。擄殺尋蚌。臣擬撤去壽州正陽關湘勇。並抽出霍邱防兵。南防九墩洲上犯之賊。於十月二十七日。密陳大概。請旨遵行。現在賊由九墩洲衝過北岸。疊陷和含葉三州縣。軍情緊急。瞬息萬變。不及恭候諭旨。已將蔣凝學壽州正陽關各軍撤回。以五營守頰州。三營守霍邱。騰出毛有銘蕭衍慶所部。移駐舒城。以備葉縣上竄之賊。所遺壽正兩城要隘。即經函咨僧格林沁酌撥兵勇。前往接防。所有苗練各圩。既感僧格林沁撫馭綏餉之恩。又無湘軍偏處猜嫌之見。目下必不至另生枝節。或者感激恩奮。隨同僧格林沁竭力勤拚。亦屬意中。

之事。合再附片密陳。伏乞聖鑒。謹奏。

欽奉諭旨分條覆陳摺 同治元年十一月二十七日

奏爲欽奉諭旨。恭摺覆陳。仰祈聖鑒事。同治元年十一月二十四日。承准議政王軍機大臣字寄。十一月十五日。奉上諭。唐訓方奏九嶽洲逆黨。竄陷和州等處。廬郡喫緊。請留張德勝帶隊攻勦一摺。此次逆匪由浦口屯紮。後兩日間。迭陷三城。情形極爲緊急。巢縣距廬州甚近。石清吉所部。僅祇四營。自屬不敷守禦。該署撫新募楚勇。已抵蘇城。雖未經訓練。以之守禦。尙屬可用。諒已催提到廬。會國藩所調之蕭慶衍。毛有銘。已否前進。卽著催令。迅速前往廬郡。以資防禦。現在會國藩所部兵勇。迭次分撥。雨花台及堵禦徽寧等處。兵力未厚。都與阿素。顧大局。著派兵。泝江而上。節節會剿。毋任滋蔓。九嶽洲係李世忠之軍圍攻。何以致令賊匪竄出。是否不肯出力。抑或兵少賊衆之故。著會國藩等查明具奏。至巢縣之濡須口。和州之梁山。地處險要。是否未爲該逆佔踞。會國藩尤當設法保全。彭玉麟等水師。應酌量駛入巢湖。會合攻勦。其南岸蕪湖等處。爲會國藩大營後路。更應嚴加防範。著會國藩飭令水師。在江面梭巡。毋令逆賊偷渡。會貞幹已赴雨花台大營。蕪湖等處。防兵是否尙厚。甚爲懸系。刻下吳煦等所帶之常勝軍。計已行抵九嶽洲。務令將南岸之賊截住。竄出之賊。四路兜擊。迅拔各城。盡殲醜類。惟在該大臣等隨時相機。妥爲調度。至此次北竄逆匪。前據都與阿馮子材奏稱。忠侍各逆。糾黨七八萬。由金陵約同九嶽洲。踞匪北竄。而會國藩奏稱。忠逆已遁回蘇城。揆度賊勢。似南岸賊匪。擊敗輪船。擬入江攻勦九嶽洲。該處踞逆。知已無援。聞風先遁。以致乘虛竄入和州等處。故都與阿前奏有該逆均已離聚之說。若上下游官軍會同痛剿。必可擊散。倘怠待各逆。糾黨北竄。必須厚集兵力。方能制勝。著會國藩查明實在情形。會同都與阿富明阿。唐訓方。妥籌勦辦。此股北竄賊匪。究有若干。賊目何人。如何竄陷和州等處。各情。唐訓方所奏甚屬疏略。著會國藩查明具奏。李續宜自回湘後。已逾兩月。諭令毛鴻賓。迅催起程東下。並著會國藩函催。以資臂助。一等因欽此。跪讀之餘。無任欽悚。查南北兩岸軍情。臣於十一月十二日。業已彙陳大概。茲蒙聖主縷晰垂詢。無微不至。謹就近日軍務情形。一分條詳對如左。

一 恭奉諭旨。垂詢廬州守禦。及蕭慶衍等進兵一節。查渡江之賊。前隊在巢縣屯聚擄糧。其後隊於十一月初

九日竄聚漕運鎮。廬州城守之兵。前有石清吉四營。又截留唐訓方所部義字三營。足敷守禦。臣所調蕭慶衍八營。十四日已到舒城。毛有銘七營。二十日續到舒城。進兵之路。若走巢湖之北。由柘皋以至巢縣。則係用聚之地。軍無後繼。轉運維艱。若走巢湖之南。由無爲以進運漕。則係用寡之地。得水師相輔而行。較爲穩著。該二軍已於二十二三等日。由舒城拔赴無爲州。擬攻運漕以截巢縣後路。惟北路廬州柘皋一帶。尙少一枝勁兵。恐難得手。前疏請調江忠義一軍。伏懇鴻慈。俞允。庶皖北不至糜爛。

一、恭奉諭旨。飭令都興阿派兵會剿。並垂詢李世忠是否出力一節。查都興阿駐守揚州。自撥揚心純千八百人。赴援雨花台後。兵力已薄。且九洲湖北犯之賊。嚮聚於江浦浦口。可以上竄和州。巢谷。即可下竄揚州。裏下河。都興阿自宜專保揚防。不必兼顧上游。且中隔浦六等城。亦難出境會剿。此次賊竄北岸。係忠曾帶至金陵新渡之賊。非僅九洲洲舊踞之賊。一面圍撲李世忠營壘。一面衝過該營。繞越上犯。聞該提督部下。亦嘗接戰多次。屢有擒斬。外間因賊所經過數城數卡。皆係李世忠汛地。往來自如。無傷無礙。有疑其部下不肯出力者。并有更甚其詞者。臣皆付之不聞不問。大抵因分汛太廣。賊股太衆。以致未能堵截。該提督尙有數盜。具報力戰。屢次請獎。請卹之案。臣即日當爲彙案陳奏。

一、恭奉諭旨。垂詢濡須口梁山是否保全。并水師駛入巢湖一節。查裕溪口即古之濡須口。近爲彭玉麟駐札水師之地。業經會國荃抽撥周惠堂等兩營。分守裕溪口及西梁山兩處。水陸倚護。尙可保全。惟巢湖在巢縣之上。水師又在運漕之下。巢縣運漕兩處。旣爲賊踞。則舳板飛劫。均不能由賊中衝駛入湖。

一、恭奉諭旨。垂詢會貞幹赴雨花台後。蕪湖防兵。是否尙厚一節。查臣弟會貞幹自五月赴金陵大營。秋間盡病。閏月稍愈。本擬離營調養。適值援賊大至。力疾督戰。四十六日。解圍後。積勞病劇。遽於十一月十八日在營身故。皆由臣位高德薄。咎積災生。疫氣流於軍中。餘殃及於手足。所部十營。併隸會國荃統轄。尙慮力難兼任。臣擬親赴金陵察看一次。又以皖南北賊。倏方張。未敢輕離安慶。致令人心搖動。至蕪湖要地。有周萬俛吳坤修等營守之。金柱關有朱南桂羅逢元等營守之。防兵尙厚。仍時與楊岳斌水師截擊。渡河之賊。十一月初八十三十七十八等日。水陸俱獲小勝。會國荃以沿江要隘。恐有疏失。又從金陵分長勝兩營。赴龍山橋。嘉字一

營駐東梁山。俾作蕪湖之整授。而固金陵之後路。

一、恭奉諭旨。飭令長勝軍營截住南岸竄賊一節。查洋將白齊文常勝軍。於九月中旬定議。來援金陵。屢次愆期。厥後奏明十月十九日起程。吳煦先帶輪船兩隻。赴鎮江齊隊。乃白齊文索餉遲延。迄未入江。十一月十四日。在松江開城滋罵。十五日帶洋槍隊數十人。至上海毒毆楊方。刃傷其戚屬。搶奪洋銀四萬餘兩而去。如此跋扈橫行。毫無紀律。不特中國不能資其力以勦賊。亦爲外國之所公惡。應由李鴻章奏明。知會駐京公使。嚴行懲辦。

一、恭奉諭旨。查詢李秀成蹤跡。及北竄賊目何人一節。查偽忠王李秀成尙在金陵。前次所稱遁回蘇城。係屬謬報未確。業經續奏聲明在案。此股渡江賊目。爲僞章王對王及忠逆之子。據李世忠報實有八九萬人。現據巢縣者。爲僞對王洪春元。只有假冒官軍旗幟項帶之事。並無薙髮之說。確由金陵竄出。圖犯廬州安慶掣動南岸之兵勢。其九洲賊巢。現仍堅踞如故。該洲與金陵城賊。一葦可杭。朝夕往還。不至因無援而先遁。

一、恭奉諭旨。飭令函催李續宜起程東下一節。臣近因事機不順。日夜憂灼。其望李續宜回營。迫切之情。百倍於他人。惟見其病勢頗重。到籍以後。亦未痊愈。欲借百日之假。調養有用之身。正月初三日。假期已滿。現經兩次函催。無論能否病痊。屆期決當銷假東下。兼程履營。力圖報稱。

以上各條。謹就奉旨垂詢之件。分晰條對。由驛六百里馳奏。伏乞皇太后皇上聖鑒訓示。謹奏。

旌德涇縣解圍克復績溪祁門摺 同治元年十一月二十七日

奏爲旌德涇縣先後解圍。徽浙各軍。克復績溪祁門兩城。恭摺馳陳。仰祈聖鑒事。竊自逆匪攻犯旌德。分撲涇縣。官軍力解城圍。績溪旋失。旋復。賊由旌德之九十等都。繞竄祁門。臣於十一月十二日。略陳大槪。聲明續報戰狀在案。十月初八九等日。賊酋賴文鴻古隆賢等。自廣德寧國縣竄入旌德之六都。距城僅八九里。守城總兵朱品隆。簡病勇中之能戰者。禦賊於楊村。一戰卻之。十二日。賊分三大枝。攻撲東南北三城。而以一枝猛撲西門外胡暉堂之營壘。魚貫而進。直薄濠邊。洋礮洋槍。密如驟雨。胡暉堂督飭士卒。憑營穩擊。子藥將盡。朱品隆以該營戰久力乏。恐有疏失。遂率兩哨及朱步青所帶隊伍。衝出西門。入營助守。火器齊發。殲賊無算。賊乃愈攻愈猛。爭拔

花籬躍躍欲上。朱品隆令胡暉堂悉力守禦。仍自出營突陣。立斬騎賊四五人。從外夾擊。賊始反奔。其攻城之賊亦退。至數里外下寨。是夜賊又擁衆進攻。越兩日夜。竟無一刻休息。十五日朱品隆恐賊立營一定。糧路不通。遂派隊啓城出擊。鏖戰兩時。破賊三壘。而東北各門之賊捲地而來。忽以馬隊數百抄我兩翼。我軍小卻。且戰且走。賊勢遂若湧潮。攻我北門。斬卡蕪進。胡太旂劉永勝奮奪卡隘。力戰死之。急以全桶火藥擲賊。賊乃負創而退。十七日賊復大舉攻城。我軍因前一日小挫。未經出城迎戰。賊石外擊。傷賊頗多。十八日賊攜長梯數百架。擋牌數千張。將欲甘心一逞。朱品隆令洪德發帶隊由東門過橋牽制東路之賊。令易潤壇朱聲隆朱步青由西門排列城下。仍親率老營步卒。向大北門往來督陣。賊見我軍整隊齊出。悉銳來犯。朱品隆以火箭環射。焚賊擋牌。易潤壇朱聲隆朱步青等在西門搏戰方酣。忽見胡暉堂營中火光突起。恐有挫失。奮力一衝。截賊數段。胡暉堂乘勢出壘。猛擊賊目。羣賊一聞散走。而東門南門等股。經洪德發等縱橫盪擊。亦即紛紛駭潰。次日味爽。朱品隆登陣瞭望。知賊已懈。乃督諸將分路出擊。擒斬極多。毀平二十餘壘。賊向楊村轉遁。至九十等都。旌德遂於十九日解圍。方旌德之被圍也。臣調易開俊三營吳廷華二營。由寧郡往援。十一月初三日。馳抵涇縣。適吳廷華二營先一日入城。正在料量赴旌。旋報寧邑賊黨。由漕溪竄聚墳頭。初四日賊由晏公堂畫眉嶺分兩路而來。環攻涇縣。易開俊吳廷華各率所部。登陴守禦。賊但聞涇縣守兵極單。而不知援旌之軍。適集於此。倉皇遽遁。此十月十九十一月初四等日。旌德涇縣解圍之情形也。先是昌化踞賊葉逆陳逆等股。率黨數萬。於十月二十四五等日。陸續竄入績溪縣城。并在孔靈分築卡壘。意在阻絕旌德糧路。二十八日。皖南鎮總兵唐義訓率強中禮後震宇等營。會合左宗棠派援之王文瑞老湘七營。馳紮臨溪。途遇野掠零賊。縱軍擊之。小有斬獲。二十九日。賊以千餘衆犯我中路。我軍奮勦斃之。是夜孔靈一帶。烽燧蔽空。料有賊至。唐義訓王文瑞同議分道進攻。十一月初一日。唐義訓率所部專攻左路。王文瑞率所部攻中右兩路。行未半里。賊已蜂擁猝至。王文瑞飛筋前右後三旗。直前迎敵。左右兩翼。從外斜抄。而以親兵爲後應。號鼓齊發。兩鋒相交。揚海秦翼隆貴王明輝等。騰蹕而前。遇者輒殲。左翼羅瑞山。右翼郭德馨。從山坳抄出。陳清泰葛蘭世等。從山梁壓下。賊衆披靡。不復成伍。右路曾聚賢亦搜殺而來。會。斃賊尸駢林谷。殆以千計。其唐義訓一軍。進次孔靈。賊正出巢來撲。各營併力衝突。賊勢大沮。縮入村中。唐義

訓揮隊猛攻。連破村旁四壘。並毀堅卡五重。軍士入村勦捕。誅夷羣賊。唐義訓派強新一營。繞出雄路之後。天曉兩甚。與王文瑞會師於績溪城外里許。時至夜分。諜報賊將遁。唐義訓王文瑞令各營裹飯傳餐。嚮明出隊。則賊方出城紛走。我軍收復城池。一面躡賊尾追。直至叢山關而還。方唐義訓王文瑞進勦之時。而旌德之賊。已於初三日竄至太平。遂由焦村進雙阜二嶺。初六日。竄黟縣所屬之西遞地方。初七日。駐祁門之夏字兩營。在黟境之西武嶺迎戰。挫衄。賊已於初七日突陷祁門。維時唐義訓甫自績溪回軍。徽郡王文瑞回軍。革市。聞祁門之警。星夜馳援。業已無及。初九日。兩軍由漁亭進駐花橋。將以次日會攻祁城。賊不知大兵之驟至。圍城鼎沸。遂謀奔遁。我軍於初十日進復縣城。僅斬尾隊百餘人。而賊之前隊。早出赤嶺。從田家樂反竄石埭太平一路。此十一月初二初十等日。連克績溪祁門兩縣之情形也。臣查賴古諳賊酋。圖假徽境。就食江西。已非一日。乃不得遲於旌涇績溪數縣。而越繞祁門。蓄計至狡。關繫至鉅。幸仗聖主威福。將士用命。屢卻兇鋒。再復名城。除飭各營嚴行防禦外。此次尤爲出力之布政使銜卽選道王文瑞。可否交軍機處記名。以道員遇缺題奏。總兵銜湖南補用副將王開琳。總兵銜副將王品高。可否賞給勇號。副將銜參將蔣信玉。江西補用參將王華雲。可否以副將儘先推補。其餘在事出力人員。王文瑞一軍。可否由左宗棠保獎。唐義訓一軍。可否由臣酌獎之處。出自恩施。記名總兵胡太旂。安徽補用參將劉永勝。江蘇卽補游擊張仁興。擊賊陣亡。深堪憫惻。應請敕部從優議卹。所有旌德涇縣解圍。績溪祁門並復緣由。謹繕摺由驛六百里馳奏。伏乞皇太后皇上聖鑒訓示。謹奏。

查明金安清汪曜奎參款擬結摺 同治元年十一月二十七日

奏爲查明金安清汪曜奎二員。被參各款。分別擬結。恭摺仰祈聖鑒事。竊已革運使金安清。道員汪曜奎。承辦皖捐一案。及金安清另案參款。經前漕臣袁甲三奏。奉諭旨飭臣提營秉公查辦。旋准袁甲三派員帶齊卷宗。飭送金安清到省。復准勝保派員調取頴局捐冊。檄令汪曜奎來皖。先後均飭發安徽善後局司道。並添派委員。會同研訊。茲據訊取金安清分款供稱。原奏所列杭紹各卡續收七千八百串一款。即在三十萬串總數之內作收。如此款須另解。則總帳收數。應剔出七千餘串。至前後借墊歸還之項。咸豐九年十一月十二等月。漕督袁甲三攻克鳳陽。安徽巡撫翁同書到壽未久。飭令不拘何項。設法挪解。此兩月內收捐僅四萬四千串。解至六萬六千串。實

墊解二萬二千之多。係在杭城錢店借銀一萬兩。又向前浙江藩司徐宗幹借銀五千兩。不得不將次年續收捐項。陸續歸清。原奏所列吳丙齋等捐銀五千四百串一款。吳丙齋係蘇城第一燒酒業。人所共知。九年十一月革員開具清單。呈送袁營。即已註明燒酒業捐五千四百串。若有弊混。其時蘇城未陷。豈有不懼查究之理。且兩項捐數同報五千四百串。並無多寡。自係一項。惟改戶爲業。因事涉瑣屑。未便續稟聲明。其程二賢張聚泰二員。親供前節。實無捏飾。札查原辦蘇捐委員趙秉鎔。自明原奏所列南匯縣知縣鄧賢芬捐銀二千兩一款。實因指項挪解在先。收捐劃還在後。當蘇杭失守時。捐戶星散。如無此款指墊。安能湊解萬金。有前後統收統支數目。尤無絲毫含糊。原奏所列部照實收。盡在杭局被燬一款。當經報明浙江巡撫。咨部立案。該省司道府文據具在。其在前填用各照七百五十九張。底簿無存。是以號數無從開報。但記係典字刻字等號。至另案所參皖捐數十萬。解營不過十之一二。餘皆在杭湖上海販運絲茶一款。計先後解營二十七萬餘串。有翁撫院稟批可驗。續經袁大臣飭查各糧臺。備文申復。合之局用着賠二萬餘串。所有三十萬之數。已相符合。如果販運絲茶。商賈必有數十人。行棧必有十數處。京中既有所聞。上海咫尺之地。更難掩人耳目。應飭傳在滬絲茶各商。弔查歷年交易簿據。革員會否販運。無難立辨。又據汪曜奎供稱咸豐九年五月。奉都統勝保委赴江蘇收捐餉票。另派道員徐丹桂。知州張伯墳。在行營收捐。餉票三人分辦。彙造總冊。給歸潁州捐局。此原辦章程也。十年三月。奉漕督袁甲三札令撤局。曜奎將蘇收各餉清冊。並收捐捐票。用剩部照實收。於四月間。齋赴袁帥大營。當奉面諭。此案已歸勝大臣辦理。飭赴河南核算。適值江南賊氛正熾。曜奎聞蘇省原籍失陷。急欲折回。因將所解各項。備具文批。交委員白臨淮解送勝帥大營。此呈交清冊餉票部照。未經親赴情形也。五月。勝大臣還京。仍將此案移交袁營。惟時徐丹桂已故。曜奎與張伯墳均經先後回籍。該承吏僅將曜奎解到各項。移送潁局。未將徐丹桂張伯墳經手各捐。總彙入冊。以致餉票部照均不相符。迨袁大臣續調曜奎赴營核算。又因蘇省已失。驛路梗塞。札件並未接到。實非有意遷延。此奉參交部議處緣由也。十一年七月。曜奎由間道至上海。始悉袁帥續調之信。正在起程間。復得勝帥派弁催調之札。乃白海道渡天津。至直隸軍營。蒙諭此案於五月間奉旨交辦。飭即趕緊清算。無如底冊各卷。遠在潁局。無從核對。直至元年三月。曜奎隨隊至潁州。始於解圍後。會同局員孫駿猷調齊文卷。督飭原辦

承吏詳細查核。據檢出徐丹桂經捐清冊一本。用剩空白監照八十八套。籌餉實收五張。及常例實收九張。又張伯墳經捐抵撥七印內鍾殿選部撥。另將清冊一本。澈底清算。除已繳外。尙應補繳餉票銀四萬二千五百五十兩。此項餉票。由徐丹桂寄存親戚處。現已專人取到。解交頴局。並無短少。其原領各部照實收。亦逐款核對。捐出各數。與現繳各數相等。並無舛錯。惟監照一項。尙短五十七套。詢據該承吏面稱。張伯墳回籍時。知有用剩監照。並曜奎解還。截存各照根。擊鈞各實收。一併攜帶在身。原防遺失起見。詎原籍吳江縣失守。張伯墳陷入賊中。逃出後。旋即病故。一時實難查究等語。計短前項監照五十七套。應交餉票銀四千五百六十兩。曜奎未敢推諉。情願代賠。即經如數措繳頴局。此曜奎經捐部照餉票。均已清晰之原奏也。至已革運使金安清與曜奎素不相識。惟九年五月甫行試辦頴捐。因請領部照未到。奉文在金安清皖省捐局借用監照三百套。是年八月。領到部照後。即行備文移還。彼此清楚。毫無交涉。各等供詳請奏結前來。臣復檢齊案據。逐一詳查。該革員金安清承辦江浙皖捐。解過袁甲三翁同書。勝保三路軍營。共錢二十七萬七千餘串。又開銷局用錢二萬三千餘串。收解相符。另案所參解營十之一二。及上海等處販運絲茶。並經明查暗訪。委無其事。袁甲三原參供詞含混。計共六款。除在蘇杭所失印照實收咨部有案。杭卡續收之捐。及鄧賢芬繳款。均在已解營餉數內。無關弊竇外。程愷亭一款。書數較多。繳捐時託故推委。不能足數者。亦屬事所恆有。惟吳丙齋一款。查九年二月原開清摺。內列吳丙齋捐錢五千四百串。十年十月原開清單。內列燒酒各店捐錢五千四百串。顯係兩款。該革員化爲一款。張聚泰之捐。亦係化兩款爲一款。均屬有意含混。至江北籌餉經手各款。前經署漕臣吳棠奏派江安糧道王朝綸知府顧思堯。臣亦飭派兩淮運使喬松年。逐款行查。旋據查覆共收銀一百一十七萬五千五百餘兩。錢五十一萬九百餘串。又安南團練捐錢三萬九千七百餘串。均無虧短挪移情弊。其另案行賄賣捐賣差拜認師生等情。臣已於上年十一月二十五日。疏陳大概。維時輿論沸騰。即據所聞覆奏。聲明有無侵吞。非弔查簿據。不能確知。此次復經逐查簿據。並無侵吞重情。惟該革員經手銀錢。濫支濫應。物議紛滋。又或意存含混。實屬咎無可辭。業經奏參奉旨革職。應毋庸議。正項既無虧短挪移。原抄家產。例得給還。惟該計應行追繳之款。爲數甚鉅。江北一案。經吳棠奏賠局用銀一萬四千八百十二兩零。又練團練用錢二千九百五十二串七百二十五文。皖北一案。經袁甲三奏賠局

用錢二萬三千九百十三串八百文。原參片內謂局用卽於公費項下留支。不得開支正項。據金安清供則謂全案皆未請獎。尙無公費可收。是以稟明勝保先在正款內動支。其言尙爲近理。應酌改爲減半著賠。此外又有應賠鎗礮價銀二千兩。吳丙齋張聚泰兩戶捐款七千一百串。亦應責令賠出。統計應賠繳銀二款。一萬六千八百十二兩零。錢三款。二萬二千串零。未便任其懸宕。該革員泰州如皋上海三處貧財。前據委員查封。僅止數千兩。應將抄出物件。由江北糧臺一併變價備抵。其餘所短之數。仍勒令分限措繳。解交吳棠唐訓方兩處充餉。以重款項。至道員汪曜奎與金安清查無交涉事件。續准袁甲三來咨。並據潁州捐局送到底冊。該員前次經辦蘇捐款。短解監照等項。業已措齊餉票。如數清繳。應請開復降級。留任處分。一律辦結。所有遵旨查辦擬結緣由。恭摺覆陳。伏乞皇太后皇上聖鑒訓示。謹奏。

鮑超丁憂在營穿孝片 同治元年十一月二十七日

再寧國一帶。自王可陞五營紮定黃麻渡之後。糧路稍通。軍心漸穩。石埭太平皆爲賊踞。恐其再竄青陽。斷南陵涇縣之後路。糧運仍覺可慮。各營病故缺額。尙未募補足數。仍難大舉進攻。鮑超於十一月二十日。聞訃丁母憂。呈請給假奔喪。查武職提鎮大臣。在軍營勦賊者。向無回籍奔喪之例。况鮑超係獨當一面。又值寧國萬分吃緊之際。更未可輕離防次。應查照咸豐六年。江寧將軍福興在金陵大營。聞訃丁憂成案。卽在營旁賃屋穿孝二十七日。俟皖南軍務大定。由臣察酌情形。再行請旨准給假期。回籍營葬。以遂孝思。至鮑超本任浙江提督。可否懇恩循例。無庸開缺。改爲署理之處。出自聖裁。理合附片陳明。伏乞聖鑒訓示。謹奏。

預籌選派員弁管帶輪船摺 同治元年十二月十一日

奏爲遵旨籌辦。恭摺密陳。仰祈聖鑒事。竊臣等承准議政王軍機大臣密寄同治元年九月二十九日奉上諭。總理各國事務衙門。奏購買外國船礮。明春可到。請飭預派將弁水勇。以備演習。並請妥籌配派各摺片。購買外國船礮。近以勦辦髮逆。遂以巡哨重洋。實爲長駕遠馭。第一要務。會國藩前次覆奏。有駛到安慶漢口時商定奏辦之語。第俟該船駛到再行商辦。誠恐一時選派。難得其人。且停泊過久。難保洋人不另出主見。流弊不可不防。現在既據赫德之言。此項船礮。明春可到。其單內所稱輪船。應派官兵及礮手水手水師等兵。並船上當差甚苦。

須用健壯之人等語。雖較之上年所開之單，尙爲覈實。惟是否應如此酌派，殊難懸揣。官文曾國藩久轄南疆，見聞較稔，著卽相度機宜，參以赫德之言，悉心籌酌，將應用將弁兵丁水手礮手等人，於該船未到之先，一律配齊。俟輪船駛到，卽可上船演習，免滋疏弊。至酌留外國水手人等，多則經費太鉅，少則教導不敷，應如何辦理之處，並著屆時與稅務司等熟商妥辦。其赫德單內有水手用山東人，礮手用湖南人，水師兵用八旗人之語，自係爲膽氣壯實，又火器嫻熟起見，惟因地制宜，仍在官文曾國藩詳悉籌辦。務收實用，其應如何選派之處，卽著迅速具奏。總理各國事務衙門摺片各一件，赫德呈單一件，均著鈔給閱看。將此由五百里各密諭知之。欽此。一仰見皇上慮遠思深，先事豫籌之至意。臣等遵卽與侍郎彭玉麟、提督楊岳斌，往返密商。適值金陵寧國援賊大至，東壩拾來之賊船，散布寧太各湖，大港小汊，一片逆氣。水師上下防勦，數月以來，刻無暇晷。茲據楊岳斌、彭玉麟密覆前來，查有統帶巡湖管提督銜記名總兵蔡國祥，勇敢耐勞，久隸楚軍水師，歷著功績，而又籍屬廣東，易與洋人熟習，堪以統轄七船。又查有副將銜參將盛永清，參將袁俊，參將銜游擊歐陽芳、鄧秀枝、周文祥、蔡國喜，游擊銜都司郭得山，年力精壯，向歸蔡國祥節制，堪以各領一船。此外水手礮手兵丁等項，據赫德單內所開人數，分列多寡，尙合機宜。應如所請辦理。惟擬用山東湖南八旗人等，雖係因材器使，究嫌參雜不齊。臣國藩去秋覆陳一疏，有云輪船駛至安慶漢口時，每船酌留外洋三四人，令其司舵司火，其餘卽酌用楚勇，所有學習駕駛，司放礮位等事，應請卽由蔡國祥於所部弁勇中，豫爲派定，誘掖獎勵，以去其畏心，委任責成，以程其實效。始以洋人教華人，繼以華人教華人，既不患教導之不敷，又不患心志之不齊。且於長江各項水師，皆出自一家，仍可聯爲一氣。不過於長龍舢板數十營中，新添輪船一營而已。既見慣而不驚，且推放而皆準。抑臣等更有請者，兩湖水勇，能泛江不能出海，性之所習，遷地弗良，但可駛至上海，不能遽放重洋。本年二月間，經臣國藩據實陳明，旋奉寄諭，現籌購買船礮，本擬用於江面，並非施之海洋。仰荷聖謨闊遠，俯順物情，宣示軍中，咸知感激。倘蔡國祥經管之後，由楚勇而參用浙勇，參用閩粵之人，由上海而漸至寧波，漸至山東天津，亦未必終不可出洋巡哨。觀政海邦，惟目下一二年內，則須堅守前約，不令放洋。俾臣等不失信於將士，庶幾恩誼交孚，號令易行。區區愚忱，不得不重言申明。惟求聖慈鑒諒，所有遵旨籌辦緣由，謹會同兵部侍郎臣彭玉麟、福建水師提督臣楊岳斌，由驛

覆陳伏乞皇上聖鑒訓示謹奏。

軍營病故人員彙案請卹摺 同治元年十二月十二日

奏爲彙報軍營病故人員懇恩敕部議卹恭摺仰祈聖鑒事竊軍中打仗陣亡傷病身故各員臣於上年六月初八日奏乞恩施奉旨允准厥後徵兵四出續有死亡本年夏秋以來疾疫繁興數百里內軍營將士地方官吏嬰疾輒殞殆以萬計其中功績卓著未竟所用遽至徂謝者有九十六員名之多節據各該營稟請奏卹前來臣查該故員等禦侮折衝效命疆場又或勤勞撫字轉運軍儲均屬有功足錄一旦天降殄戾致令宿將循吏先後淪亡實堪憫惻相應繕具清單籲懇天恩敕部各照原職原銜在軍營立功後病故例從優議卹其張運桂一員去冬守徽州府城厥功最偉黃慶伍華瀚沈寶成周成南四員戰績較多均請從祀湖南原籍昭忠祠以彰忠蓋而資激勵除陣亡傷亡各員弁俟查明另辦外所有軍營病故人員彙請卹案緣由謹繕摺具陳伏乞皇上聖鑒訓示謹奏。

李世忠在九泖洲戰守情形摺 同治元年十一月十一日

奏爲賊由九泖洲分股上犯李世忠一軍節次堵戰獲勝情形恭摺彙報仰祈聖鑒事竊僞忠王李秀成等酋自兩花台解圍後即遣僞章王對王納王及忠逆次子糾黨渡至九泖洲圍撲官營李世忠於九月間早已偵探明確十月初即由滁洲赴九泖洲親駐前敵力籌防勦十月初十以後該逆陸續由下關渡至九泖洲散布蘆葦叢中帳棚馬匹絡繹北渡十七日分兩枝突出浦口進攻張大本營案李世忠正欲督隊往援忽有悍賊數千繞過前營洶洶而來負土束薪填濠欲進我軍連發槍礮殲賊頗衆賊爲少卻乃後隊續至者若蠅若蟻勢益兇猛李世忠出營突陣馳逐於礮火之中傷馬馬蹶步戰搏賊又折百餘級賊始遁去而張大本營外之賊亦負創撤退十八日賊仍猛犯張大本營又分七八千衆抄撲九泖洲倪文藻陳映登兩營層層密裹更番迭進維時李顯安楊玉珍劉長發吳文祥陳廣俊薛元誠等六營同被賊圍我軍各以排槍穩擊子藥既盡繼以磚石賊雖傷斃不少知我彼此不能相顧持長矛躍上營牆陳廣俊吳文祥各受矛傷督軍抵禦刃賊前鋒相持竟日卒不敢近十九日賊攻李顯安頭營及倪文藻陳映登諸營益急倪文藻陳映登堅壁不出俟賊近濠縱兵擊之互有損折李

顯安簡精銳衝賊陣。賊盡披靡。我軍乘勝掩襲。俘戮二百有奇。盛倡入江者無數。惟汪德喜率隊助戰。追近賊壘。渴伏死之。據擒賊供稱。諸賊會率八九萬人。分股搶渡。意在上趨和舍。直撲棗縣盧郡。以截楚師後路。下犯天長。來安六合數城。以伺裏下河要地。李世忠正飭各營嚴爲戒備。賊又於二十夜。冒雨至。一劫浦口張大本等營。一劫九洲李顯安倪文藻等營。天黑雨猛。火器不燃。軍士屏息露立。羣以刀矛外刺。薄營之賊。搜刃輒斃。賊乃轉攻程自有一營。牆圯數丈。駭駭欲上。程自有從牆缺處躍出。昏夜搏鬪。襲入核心。刀貫胸腹。移時殞命。由學詩搶護營盤。亦歿於陣。此十月十七至二十等日。九洲浦口被圍。力戰卻敵之情形也。二十一、二等日。賊攻南岸石埠橋營。晝夜不息。沿江連結八壘。並結筏橫互江心。二十四日。乘風雪渡江者二萬餘衆。旋由九洲竄出一股。至江浦以北。牽制小店各營。以大股傍營衝過。我營抽隊出擊。多有斬擒。駐守江浦之軍。出城夾勦。賊向西路和州一帶竄逸。二十五日。李世忠見西路喫緊。親駐江浦。派李顯爵楊玉珍蔡天福等。帶隊躡賊之尾。二十六日。昧爽。李顯爵等行至橋林。聞前日西竄之賊。尙有萬人。屯聚新店廟地方。我軍鼓行而進。猝與賊遇。李顯爵攻中路。楊玉珍蔡天福抄左右二路。橋林守將邱昌良撥軍助之。殺賊近二千名。生擒逾七百人。是夜江面賊船。銜尾爭渡。九洲洲燈火。徹宵不絕。傳言忠逆之子。率黨踵至。於二十八、九等日。過小店分隊撲營。悉力上竄。李世忠令朱元與由烏衣進勦。李顯爵由橋林折回。戰賊於小店。賊衆大潰。追擒數百。中有僞主將俞元和。僞合天安汪成玉。僞藍天福陳伯品三人。十一月初一日。李世忠親督楊玉珍曹玉良蔡天福等。自江浦馳赴小店。見該逆正在小店過隊西上。並排列旗仗。以備我軍。李世忠揮兵猛擊。衝開賊陣。截住未過賊隊五千餘人。適李顯爵朱元與亦自橋林來會。賊即駭奔。我軍分道追勦。直至湯泉鎮新店廟而還。此二十四以後。賊由江浦西犯和舍。官軍截勦。屢次獲勝之情形也。初六日。賊在石埠橋濱江增壘。守營將領何立香督隊毀平。壘中之賊。無一脫者。初九日。賊以全力來撲。環營築壘。圍攻數日。略無退志。李世忠乃令李顯發過江南援。十三日。何立香吳奎森從東面擊出。李顯發帶所部從西南兩面擊入。另派洋礮隊一枝。爲之援應。賊猶恃衆抗拒。猛鷲無匹。李顯發激厲將士。內外交攻。截賊數段。洋礮隊乘勢環轟。賊多不及歸壘。我軍搶過濠溝。斬卡直入。一壘既破。衆壘慌亂。遂將東面五壘。西南七壘。一律剷除。此又南岸石埠橋官軍踏毀賊壘之情形也。其北岸之賊。亦於十三日力撲浦口各營。

又於十四日進圍小店各營。均經諸將弁穩守穩戰。更得江浦營中撥兵來援。賊盡撤回西去。凡李世忠所守各城。各營。屹立賊中。堵剿兼施。均獲保全。疊准該提督咨報。並將山陝兩省欠解協餉。咨請奏撥前來。臣查李世忠一軍。扼守江北數城。分攻九洲賊壘。又防南岸石埠橋要隘。汛地過廣。此次賊渡北岸。雖未能遏其上竄。而血戰經月。路路喫重。卒能力保各城。屢挫逆氛。實屬功多過寡。惟該軍部卒甚多。缺餉已久。雖經臣籌濟銀米。卹位火藥等項。藉以稍固軍心。而積欠過鉅。終虞飢潰。所請協撥一欸。仰懇天恩。敕下山西撫臣將應解李世忠營月餉五千兩。按月迅解。以資接濟。陝西一省。軍事方殷。可否飭部另爲指撥之處。出自聖裁。至升用總兵副將汪德喜。知縣胡學詩。副將程自有。力戰陣亡。均請敕部從優議卹。所有官軍在九洲洲等處。節次堵截。獲勝原由。謹繕摺由驛六百里馳陳。伏乞皇上聖鑒訓示。謹奏。

近日軍情片 同治元年十一月十二日

再近日軍情。金陵大營堅守如常。北岸巢縣之賊。掠至殷家橋。運漕之賊。竄至湯家溝。十一月二十四日。撲近無爲州北門外。我軍出隊堵剿。金陵派援之劉連捷三營。恰至。賊即卻走。蕭慶衍毛有銘兩軍。亦於二十六七日。趕至無爲州。連日雨雪。尙未歸仗。南岸楊岳斌水師。於十九二十二等日。在三汊河奪舢板槍划二十餘號。二十七日。會同陸兵羅逢元等。攻破護駕墩兩岸逆壘。焚奪賊船二百餘號。僞侍王在東壩拾來之船。不復能逞志矣。周萬倬吳坤修兩軍。於二十七日。攻勦石埭及三不營地方。踹毀兩卡四壘。焚其輜重。金柱關蕪湖兩路。幸皆穩固。寧國鮑超一軍。於二十七日。進攻馬頭楊柳鋪之賊。大獲勝仗。踏毀賊館賊卡甚多。惜所募新勇未齊。不能乘勝痛剿。水陸糧路。仍有梗塞之虞。駐守涇縣之易開俊吳廷華等營。二十六日。擊賊於晏公堂。獲勝一次。二十七日。追賊於黃村。挫敗一次。六平石埭兩縣。賊踞如故。擾及陵陽鎮。初五日。撤入青陽縣城。臣現檄調朱品隆一軍。棄去旌德而移剿青陽縣城。以顧涇縣後路。未知能得手否。除各路戰狀。容再分案詳奏外。合先附陳梗概。伏乞聖鑒。謹奏。

恭謝天恩摺 同治元年十一月二十四日

奏爲恭謝天恩。仰祈聖鑒事。竊臣接准兵部火票。遞到同治元年十一月初八日內閣奉上諭。江蘇布政司會

國荃著賞江綢黃馬褂料一件。小卷江綢袍料一件。白玉喜字翎管一枝。白玉柄小刀一把。曾貞幹着加恩以知府用。一等因欽此。臣嘗卽恭設香案。望闕叩頭謝恩訖。伏念臣弟國荃親提戎旅。進薄堅城。幸承廟算周詳。白下之圍迅解。迺荷宮衣寵飾。黃中之美榮施。備邀文綺之輝煌。并拜殊珠之璀璨。英銜孔翠。戴若華而喜近天顏。采盜舟璫。撫鞞鞞而溫露聖澤。臣弟貞幹。擬以未秩。參佐戎機。效未著乎七禽。寵驟膺夫五馬。凡此恩華之渥被。實非夢寐所敢期。臣惟有督飭臣弟等。勉矢忠勤。力圖克復。作我士風雲之氣。全收六代江山。出斯民水火之中。共沐九天雨露。所有微巨感激下忱。理合繕摺恭謝天恩。伏乞皇太后皇上聖鑒。謹奏。

送奉諭旨併案覆陳摺 同治元年十一月二十七日

奏爲欽奉疊次諭旨。併案復呈。仰祈聖鑒事。竊自本年九月以來。南北兩岸。戰事日亟。臣歷奉寄諭。殷殷下問。有隨時詳奏者。亦有未及具覆者。茲就關涉軍務各事件。分晰條列。敬爲皇上陳之。

一、恭奉十一月初八日二十一日兩次諭旨。飭令壽州防兵。未可輕動。並垂詢苗練不至另生枝節。是否有把握。又奉十二月初三日寄諭。因袁甲三之奏。飭令派兵駐紮壽正二處。俾該練有所震懾。各等因。臣查前此苗帥霖之黨。擄殺湘軍。樵探勇夫。岬端漸開。其時僧格林沁正撫苗勦擒。給以餉項。苗黨則痛詆楚師。大肆簸弄。臣恐因勦撫之兩歧。致南北之不和。適值北岸和合。粟三城並陷。遂將壽正防軍。撤出騰挪。赴援。明示以坦然不疑。正冀其幡然自悔。當臣撤兵之際。實因廬粟變生倉卒。稜緩就急。亦未敢必苗練之不生枝節。現在事隔兩月。該練尙無據城以叛之跡。且觀其上撫臣唐訓方之稟。與鳳台知縣蔡鏗之函。均屬恭順近理。或者感僧軍撫馭之恩。無湘勇逼處之嫌。不至更生他變。此際若另行籌兵駐紮。陽撫陰防。使反側者無以自安。似不如推誠相待。無庸戍守。轉可省兵力。而免後患。如果反覆無常。逆迹萌著。臣與李續宜之兵。自度勦髮匪則不足。制苗練則有餘。不足深慮。

一、恭奉寄諭。以李世忠負其沈鷲之氣。既能束身歸命。總宜因材器使。化其桀驁。俾爲我用。又奉十一月二十一日諭旨。以李世忠之軍漫無稽察。恐其勢日形扞格。因而生心。嗣後相待李世忠。可仍照袁甲三之法。酌中辦理。以安其心。等因。朝廷撫馭降將。仁至義盡。臣自當仰體聖主不得已之苦衷。委曲求全。惟該軍投誠雖久。

舊習未改。李世忠頗驕亢任性。其部下尤恣橫無狀。擄鹽自售。場壩避其凶餓。設卡抽釐。商民視為畏途。與之相處最近者。下而都與阿一軍。上而楊岳斌曾國荃兩軍。均以與該軍交接爲苦。往往口角爭鬧。釀成命案。卽如本年九月間。臣將二起馬隊。遣回黑龍江。十月初六日。委營總那勒豐阿等。行過江浦縣。該軍卡員不准放行。毆斃及推水淹斃官一員。兵二名。盤費行李。全行失去。該西丹等投入揚州營中。稍加周卹。臣與都與阿均未敢深究。此次賊由九嶽洲渡江。外間頗騰物議。臣亦絕不吹求。全其體面。自袁甲三去位以後。臣分解餘軍餉銀二萬五千兩。火藥三萬五千斤。米三千石。及大礮子彈等項。陸續接濟。冀安其心。而策其力。惟該營餉項窮絀。臣不能按月供支。其摺鹽來上游售賣。亦未准免抽江釐。在該提督不無失望。目前雖無甚扞格。將來弁勇口角太多。恐不免激成事端。倘有萬難含忍之處。或須示以檢制。稍加懲究。臣當隨時奏明辦理。

一、恭奉十月十三日諭旨。旨詢楊岳斌彭玉麟二員中。能否派撥一員。駛赴下游江面。駐紮防勦一節。查本年八月十二日。臣與覆陳摺內。奏明楊岳斌親赴靖江如皋通州海門等處。察看一次。當因楊岳斌行次鎮江抱病而回。商令彭玉麟代之。又以金柱關告警。遂不果行。厥後兩岸水師。數月防勦。日不暇給。楊岳斌防守金柱關。以備東壩抬出之賊船。彭玉麟駐守裕溪口。以備巢湖竄出之賊股。且下自金陵。上至九江。節節皆有師船設防。上游方戰爭不息。實不能移紮下游江面。

一、恭奉九月二十六日。通飭諭旨。飭派都司以下武弁。學習外國兵法。臣雖未嘗親見洋人用兵。然聞其長處。約有二端。一曰器械精堅。二曰步伍整齊。其短處亦有二端。不紮營壘。不住帳棚。人數稍多。勢難合併一也。口糧太重。製器太貴。用兵稍久。國必困窮二也。善學者自須用其所長。去其所短。臣部各軍分駐皖境。距海尙遠。較之濱海華洋雜處者。風氣略近。樸實常勝軍之口糧太多。臣方深以爲非。若酌挑數人。馳赴上海寧波。恐未得洋人之長技。先染加餉之惡習。臣愚以爲有心學習。人不在多。人多而聚學。則學者圖增重餉。教者圖侵兵柄。人少而竊學。則一人可教什伯。十人可衍千萬。巫臣霸吳。其始不過一人。教射御之事。吳人破越。其始不過一客習泝泝之方。近聞撫臣李鴻章已派張遇春之勇。隨英國兵頭。教習炸礮。劉銘傳之勇。隨法國兵頭。教習洋槍。如吳步武槍礮。一一習熟。臣當函商李鴻章派員來皖。轉教臣軍。至外國火器。諸臻精巧。惟銅冒自來火

費錢有限。而妙用無窮。尤遠勝於中國引藥。有畏風畏雨之患。臣擬設法推廣。用之於烏槍抬槍諸器。現飭工臣試造。不知可期有成否。

一、恭奉十二月初一日諭旨。以英國公使信函副領事官。可至金陵城內。曉諭逆賊投誠。飭令酌辦一節。查金陵一城。表延百里之遙。盤踞十年之久。我軍分屯雨花台。僅扼城南。其東西北三面。並未合圍。詎能制賊死命。本年九月間。賊援大至。該逆雖屢受懲創。我軍亦迭有傷亡。且分僞對王納王等竄擾北岸。佔踞三城。目下僞忠王雖潛回蘇州。而金陵城外各營壘。布置嚴密。並不少懈。左宗棠雖攻克嚴州。而僞侍王一股。窺伺太平金柱。專圖進取。並不回援。至寧國楊黃諸營。與鮑超一軍相持。雖屢次添兵助剿。而糧道迄未通暢。各路賊勢。尙未窮蹙。遠冀其獻城乞降。酌理準情。未敢憑信。至自投來歸。不得妄加殺戮。臣亦嘗納降數次。未敢輕於屠殺。此次欽奉諭旨。尤當嚴禁軍士私取財物。申明約束。以導向化之路。

以上各條。皆係數月內奉旨垂詢飭辦之件。理合一條對。由驛六百里覆奏。伏乞皇太后皇上聖鑒訓示。謹奏。
東征局籌餉官紳請獎摺 同治元年十一月二十七日

奏爲湖南東征局。籌餉出力官紳。懇恩優給獎敘。仰祈聖鑒事。竊臣於咸豐十年七八月間。會同前湖南撫臣駱秉章。飭令藩臬兩司。暨道員鄧元璧黃冕等。在長沙省城。設立東征籌餉局。於本省釐務之外。另抽釐金。以三分之一解江西糧臺。協濟皖南一軍。以三分之一。解湖北糧臺。協濟皖北一軍。又派編修黃錫彤。員外郎郭徵篔。候補道陶枕。知府彭汝珠。胡鑄黃廷瓚黃芳。知縣馮晟各官紳。另設分局。襄同辦理。於十二月二十八日。奏奉硃批。著照所請行。欽遵飭辦在案。旋據該官紳等。添派公正紳士。分途籌辦。各州縣市鎮。一律舉行。計自咸豐十年八月開局之日起。截至本年六月底止。共抽收湘平銀一百九萬六千餘兩。錢三十萬二千餘串。先後解臺充餉。及回籍募勇製造軍械之用。在局人員。不遺餘力。著有微勞。據該總局司道。開列清單。請獎前來。伏查臣前年忝督兩江。正值金陵師潰。蘇皖兩省。幾無一片乾淨之區。祇有江西一省。略稱完善。力不能供億衆軍。乃湖南官紳。於本省釐金之外。又爲東征諸軍。特設一局。殫精竭慮。同濟艱危。舉辦未及二年。解款已逾百萬。自七月至今。續解又逾三十萬兩。維持全局。保固軍心。其中關係最鉅者。如上年六七月間。安慶援賊大集。餉項極絀。維

時江西境內賊陷吉瑞二府十餘縣。湖北境內賊陷黃德二府十餘縣。均不能解濟皖餉。賴東征局辦餉數萬。飛解安慶。軍心大定。克竟厥功。又如本年八月九月間。下游各軍。疾疫死亡。卒伍空虛。凡餉起。曾國荃彭玉麟周寬世等回湘添募之勇。不下二萬人。其費資皆取之於東征局。既取攜之甚便。乃挹注而不窮。乃如近月以來。皖北有和合巢縣之失。皖南有祁門石太之失。湖南撫臣毛鴻賓一聞警信。立商江忠義募勇萬人。星馳援皖。此舉辦成。費銀當在十萬內外。固由該撫臣不分畛域。力拯時艱。亦賴有東征釐局。能籌鉅款。乃成盛舉。萬一皖南決裂。尚有人數稍多。班次稍優。惟有德求破格鴻施。准照所請。以示優異。此外各臺局。概不敢援以爲例。所有東征籌餉局出力官紳。懇請獎敘緣由。謹會同大學士湖廣督臣官文。湖南撫臣毛鴻賓附驥具陳。伏乞皇太后皇上聖鑒訓示。謹奏。

黃冕輝世臨有功東征片 同治元年十二月二十七日

再湖南東征局襄辦各官紳。臣已奏懇鴻施。優加獎勵。而主持其事。最爲出力者。如布政使銜江西卽用道黃冕。自前年八月。創始設局。任勞任怨。鉅細不遺。又卸署湖南布政使鹽運使銜岳常澧道輝世臨。自去年九月。會辦局務。綜核精密。條理秩然。臣營每當萬窘之時。該局常能如期接濟。除去年六七月間。撥解鉅款。卒成安慶之功。本年八月九月後。添募諸軍。藉厚東征之力。臣已於前摺敘明外。其採辦穀米。製造槍砲。亦皆取之不盡。呼應極靈。又如火藥一項。局中原未製備。乃一聞金陵喫緊。江皖各軍。皆缺火藥。該二員稟商湖南撫臣毛鴻賓。借撥三十萬金。飛速分批起解。仍由東征局陸續製造。歸還他省。縱敦恤鄰之誼。斷不能如此踴躍。蓋其情切於救焚拯溺。其力遂能扶危定傾。在該司道等受國厚恩。雖竭慮殫精。非敢有所希冀。特徵臣忝竊高位。一家併荷寵榮。若以與臣分憂之人。不乞恩於聖主之前。於心實有未安。該司道等職分已崇。臣未敢率行擬保。所有布政使銜江西卽用道黃冕。鹽運使銜湖南岳常澧道輝世臨。應如何從優獎勵之處。出自聖主格外天恩。謹附片具陳。伏乞皇太后皇上聖鑒。謹奏。

近日軍情片 同治元年十二月二十七日

再近日軍情。北岸水陸各營。於十二月初九日。在運漕上游擊賊獲勝。初十日。彭玉麟水師攻毀三汊河賊壘。蕭慶衍陸軍攻克運漕鎮。悉焚賊寨。該賊無算。餘匪遁歸銅城關而去。十三日。毛有銘一軍。在東關小勝。一次二十日。在美蓉嶺敗挫一次。損鎮將數人。目下廬郡無爲。廬江各城。三河運漕西梁山裕溪口各隘。均有勁兵守定。臣又謂蔣凝學防守舒城。皖北或可無虞。會國荃金陵一軍。於十二月二十一早。攻襲谷里村朱門六郎橋三處賊巢。大獲勝仗。破賊壘十一座。擒斬三千餘人。皆忠逆布置。以護衛金陵老寨者也。金柱關蕪湖兩處。近無戰事。惟諜報待逆。又從東壩抬船西來。始終窺伺蕪湖要地。防務殊難鬆勁。寧國一路。十二月初五日。王可陞於馬港獲一勝仗。而小淮密尚爲賊踞。水路運道。仍被梗塞。會國荃派劉連捷三營。移駐三山。保全陸路糧道。鮑超及郡城涇縣各軍。堅守如常。池州一路。韋志俊於十八日進攻青陽。未能得手。現飭朱品隆督軍由池州繼進。倘能攻克青陽。則太平石埭等股。可冀次第掃蕩。徽州祁門一路。近日防守安謐。足慰宸席。除各路戰狀。及應行請卹人員。容臣查明續報外。合先附陳梗概。伏乞皇太后皇上聖鑒。謹奏。

官軍攻克運漕並銅城關勝仗摺 同治二年正月十一日

奏爲官軍攻克運漕鎮後。進剿葉縣小挫。旋在銅城關兩次獲勝。恭摺馳陳。仰祈聖鑒事。竊北岸官軍。攻克運漕鎮。臣國藩兩次具陳梗概。聲明續奏戰狀在案。嗣據各營稟報。僞對王一枝竄聚葉縣。分撲西梁山。經周惠堂節次督軍勦退後。遂踞運漕銅城關東關各隘。偵知無爲。州產米最富。守兵又單。於上年十一月二十四日。擁三千衆。撲近州城北門外。李昭慶率樹字等營。開城迎戰。會泗美帶水師右營。從新口河橫出擊之。適劉連捷亦自金陵來會。賊乃負劍卻走。越數日。臣國藩所調之蕭慶衍。毛有銘兩軍。先後馳至。議以毛有銘所部。嚴備葉縣東關之賊。蕭慶衍所部。專攻運漕銅城關之賊。十二月初九日。臣玉麟令右營定湘營師船。駛抵運漕上游二里許。渡蕭慶衍陸師過河築寨。未及盡濟。乃該鎮踞賊糾股突出。偪營而陣。圍裹數重。我軍在水次燃砲仰轟。仍分舢板數號。接渡後濟之軍。環起縱擊。殲獲頗衆。毛有銘正帶馬隊渡黃雒河。屢勘形勢。一聞運漕砲聲。飛騎助戰。賊知不敵。敗遁歸巢。初十日。我營修築既成。臣玉麟飭會泗美右營。喻俊明定湘營。設定陸師。向運漕自上攻下。親督成發翔左營。王吉嚮導營。唐敏義澄海營。向三汊河自下攻上。該處有三石卡。一大石壘。堅持街心。未易攻取。

成發翎帶飛划由水路進。王吉帶水勇登陸由北岸進。唐敘翁帶水勇登陸由南岸進。戰不兩時。遂斷浮橋。悉焚卡壘。賊之攔刃墮河而死者。不止數百人。臣玉麟自三汊河引軍西上。與會泗笑喻俊明遇。乃知大馬頭一橋二壘。亦就毀平。蕭慶衍督率馬步等營。四面縱火斬隘。直入縱橫鈔殺。立復蓮漕一鎮。乘勝躡賊。直至黃墩。誅斬無算。餘匪歸併銅城關而去。此十二月初十日。水陸各軍會克運漕鎮之情形也。運漕既復而後。毛有銘率親兵馬隊。回駐石澗埠。即於十三日。部勒各營。出哨東關。見賊對河列陣。正與會泗笑砲划往來拒敵。急派湘右營渡河夾擊。斬賊二三十級。賊仍縮入卡內。連日增黨修濠。堅伏不出。毛有銘知東關之未可遽圖也。不如逕取巢縣。以爲攻心之計。二十日。就各營中抽撥六成隊伍。越芙蓉嶺。迤邐前進。突有五千餘賊。在前面山岡。揚旗吹角。張兩翼鈔來。毛有銘隨令信中傳左傳右三營。禦左路。湘中湘右二營。禦右路。兩鋒相交。會不少卻。乃以馬隊橫掠賊陣。賊始披靡。我軍奮力薄賊。馳逐一里許。正思撤隊回營。詎林木間鼓聲忽起。巢縣悍賊擁擁而來。徑鈔信中傳右兩營。頃刻合圍。彭星占與諸弁勇左右馳突。裹入垓心。胡得勝陳祥東謝濟。偕呂鴻榜李春生等。力戰死之。彭星占憤怒填臆。負傷決戰。手刃數賊。並歿於陣。毛有銘飛飭湘中湘右傳左等營。合軍併擊。賊漸解退。比見劉毅勝。匹馬衝入。中槍而殞。該逆仍復回戈轉鬪。且卻且前。各軍以拾砲猛擊。殲斃前鋒數百人。乘賊隊散亂。爭相駭奔之際。遂奪獲彭星占尸骸而還。此二十日。毛有銘一軍。在芙蓉嶺擊賊小挫之情形也。其銅城關一路。賊於要衝築四卡。以阻我陸師。又築一水卡。以阻我舟師。蕭慶衍先於十四日。移軍黃墩張家渡。旋派營勇平渡口土壘。俾利戰艦駛擊。十九日。臣玉麟飭令喻俊明成發翎王吉唐敘翁等。攻破水旱諸卡。隨結小划爲橋。渡過陸師全隊。二十一日。蕭慶衍令趙太和率爲右營。郭鵬程率毅右營。攻陶家嘴第一壘。洪致祥率亨中營。胡發遠率強右營。攻陶家嘴第二壘。復令朱吉玉率爲右營。蕭恆書率爲前營。攻大甲村賊壘。仍自率貞中營。及劉長槐之元左營。爲各路策應。天甫向曙。諸道並進。賊正欲出壘迎拒。我軍已環逼濠邊。火器飛擲。燃及哨棚。衆勇於烈燄中。躍過濠溝。摩肩而上。一壘旣破。各壘盡亂。駢戮盈千。並斬僞安燕福之姓諸酋。水師亦分隊連毀沿隄數卡。乘勢進取岷山回逆壘。賊皆惶遽失措。踰濠欲遁。蕭慶衍麾軍直進。立焚二壘。擒斬尤多。遂繞出銅城關後。奮攻石壘。尋以賊援營集。相持未下。二十二日。蕭慶衍派趙太和朱吉玉蕭恆書劉長槐四營。於坵接該關之黃龍口地方。相

度營基。分隊移札。又派洪致祥胡發達郭鵬程三營。親帶真中一營。整軍以爲之備。不移時。而閩中羣賊。糾合陶家廠關門鎮銅城廟岸獅背新塘街五顯集百旺市東關各股。分三路來犯。蕭慶衍率各營縱兵鈔擊。小挫兇鋒。中路之賊。敗過閩口。左右兩路之賊。退聚閩後。蒙軍乘之。賊又從閩後出兩大股。一走閩西堤埂。一走岷山岡之東。蕭慶衍令蕭恆書朱吉玉培往東路。潛遣洪致祥郭鵬程趙太和等。分代黃龍口村內。而以劉長槐胡發達等隊。赴閩口誘賊。賊果輕我兵寡。蜂擁擠出。劉長槐胡發達斂軍佯退。俟賊撲過村口。伏兵突發。亂刃交刺。該逆無心接仗。衝出重圍。維時東岡一股。聞風竄遁。閩西一股。亦經水師擊走。我軍水師收隊。略有損折。此二十一二等日。蕭慶衍一軍進攻銅城閩毀壘獲勝之情形也。臣等查賊在巢縣。廣聚悍黨。距守數隘。意在紛竄皖北郡縣。冀解金陵之圍。此次克復運漕。進規銅城閩。苦戰兩日。尙屬得手。惟蕭慶衍毛有銘兩軍。不滿八千人。兵單賊衆。未能遽期掃蕩。現飭諸軍堅守各城隘。俟春水稍漲。再行水陸會剿。恢復要區。所有在事出力人員。擬請酌保數員。附入穎西勦擒案內。彙求恩施。外。總兵彭星占數年征勦。嚴明勇敢。艱險不辭。臨陣捐軀。深堪憫惻。應請照總兵立功後陣亡例。從優賜卹。都司銜藍翎守備胡得勝。藍翎守備胡義勝。陳東祥。藍翎千總謝濟。藍翎把總呂鴻榜。藍翎外委李春生。同時陣亡。并請敕部各照本職本銜。從優議卹。所有官軍攻克運漕。分道進戰。各緣由。謹會同大學士湖廣督臣官文。由驛六百里馳奏。伏乞皇太后皇上聖鑒訓示。謹奏。

謝會貞幹追贈按察使恩摺 同治二年正月十一日

奏爲恭謝天恩。仰祈聖鑒事。竊臣接准兵部火票。遞到同治元年十二月初六日奉。上諭。前因知府會貞幹擊退援賊後。降旨詢問該知府扎營何處。茲據會國藩覆奏。該知府自五月馳赴江陵大營。秋間患病。適值援賊大至。力疾督戰。解圍後。積勞身故等語。會貞幹自赴江南軍營。屢著戰功。朝廷早欲擢用。因會國藩再三懇辭。擬俟江寧克復後。從優獎勵。茲以力疾督戰。積勞病故。悼惜殊深。雖未經會國藩奏請給卹。而會貞幹係效力疆場。戰功卓著之員。著卽追贈按察使。卽照按察使軍營立功後病故例議卹。以示優異。欽此。一跪誦之下。感激涕零。適值會貞幹靈柩經過安慶。當卽宣告靈前。望闕叩頭謝恩。訖。伏念臣弟貞幹。秉質愚蒙。持躬介特。爲諸生時。不甚肄習舉業。頗究心搏力技擊之法。咸豐三年帶勇六百人。隨臣勦賊。旋以臣父年老回籍侍親。八年十月。因胞兄

國華殉難三河。蒙文宗皇帝屢降諭旨。褒卹有加。痛吳發憤。誓出殺賊。以雪兄仇。而報國恩。頻年以來。會克太湖。濟山安慶蕪湖。獨克繁昌南陵。疊蒙天恩。獎敘。聞望漸隆。而臣弟貞幹孤懷抑鬱。耿耿若不自得。常思別樹一幟。建立奇功。以分聖主宵旰之憂。一洗軍營因循之習。上年秋間。遽病。羣勸出營調養。適以援賊大至。力疾大戰。精神遽振。日夜不倦。臣方幸其病後耐勞。志定勝氣。人定勝天。或者別立尺寸之功。一償平生之願。不料其中道損折。齋志長終。精炯炯而不冥。神依依而戀闕。微臣位高德薄。殃及手足。慟惜之餘。彌增悚歎。而聖主優詔褒卹。若深鑒臣弟未白之衷。而曲體微臣難言之隱。此尤臣所闔門感戴。存歿霑戴者也。茲已素旆西旋。歸從先隴。結草之報。縱難索諸幽冥。敵愾之情。端有資於同氣。臣當督率臣弟國荃。益勵丹誠。誓除氛祲。戰兢以任艱鉅。忠信以涉波濤。庶慰季弟未竟之志。而答聖主非常之恩。所有感激下忱。謹率同江蘇布政使臣曾國荃恭摺叩謝天恩。伏乞皇太后皇上聖鑒。謹奏。

近日軍情片 同治二年正月十二日

再近日軍情。金陵大營。及金柱關蕪湖各防。堅守如常。均臻穩固。青陽賊衆。聞朱岳隆一軍。於二十二日趕到池州。卽於二十三日陸續遁歸石埭。十二月二十五日。官軍收復青陽縣城。駐兵守之。正月初九日。賊糾大股六七萬衆。窺犯涇縣。繞城築壘。分踞黃村大坑一帶。初四日。涇城守將易開俊吳廷華等。擊退撲城之賊。飽超於初五日。自寧國疾馳九十里。引軍來援。遂於初六日會攻附城賊壘二十餘座。悉破之。乘勝進兵黃村。又毀十數壘。斬馘盈萬。立解涇縣之圍。初七日。馳歸高祖山老營。而羣賊已僞集寒亭清弋江等處。勢將圍撲營盤。計日內必有數次大戰。北岸之賊。分踞和含巢絲東關銅城開等城隘。據守益堅。據搜獲僞文。稱僞忠王現赴蘇州。因常熟賊目周興隆駱國忠等投誠。忠逆調集羣賊。圍攻常熟。不久卽率二十萬衆。再犯江北。下擾揚州。上窺皖楚等語。雖未必果有其事。而屢次僞文。該逆銳意竄擾。大江以北。殊可深慮。除涇縣戰狀。再行詳奏外。合先附呈大概。伏乞皇太后皇上聖鑒。謹奏。

委署皖南道缺片 同治二年正月十二日

再皖南地方。賊蹤紛擾。徧地瘡痍。所有巡道一缺。撫字籌防。均關緊要。前署皖南道姚禮備。在任年餘。頗著勤勞。

與清愛戴。上年八月間。積勞病歿。維持寶訣道員程鈺。曾在潁州留辦善後事宜。未能動赴本任。亦有安徽候補道葉兆翼。勤幹廉明。長耐勞苦。官潁山縣。知縣帶勇出力。洵保今職。以之委替皖南道缺。尚堪勝任。臣與李紱宜商定。即經札委任事。遠暑指臣唐訓方莅皖。正需熟悉北路情形之人。帶赴臨淮。輟轉蕪商。遲久始克定議。該員葉兆翼。即於十月前赴皖。南署任視事。臣合會同。尋妥徵撫臣唐訓方附片陳明。至皖南道與皖南鎮總兵關防二顆。臣於咸豐十一年五月。奏請勅部鑄印頒發。欽奉諭旨允准。迄今未准到。理合一併催請。敕部速賜頒發。以昭信守。伏乞聖鑒訓示。謹奏。

鮑超軍大獲勝仗。涇縣解圍摺。同治二年正月二十七日。

寒爲鮑超一軍。破賊於馬頭鎮楊柳鋪等處。進援涇縣。立解城圍。恭摺詳報。仰祈聖鑒事。竊浙江提督鮑超。上年十一月二十七日。在楊柳鋪擊賊獲勝。及本年正月初六日。涇縣之捷。臣兩次赴陳。大抵在案。先是西河踞賊分擾小堆壩地方。與黃麻渡只一河之隔。鮑超以該處守兵單薄。水陸糧路可慮。乃督馬步數營。並何紹彩新訓二營。於上年十一月二十四日。馳赴黃麻渡會合王可陞防軍。誘賊過河。一擊敗之。旋報花旗廣匪六萬餘衆。由寧國縣進竄歙建廟。直至高橋楊柳鋪吳村馬頭鎮一帶。布滿賊館。自寧郡南至涇縣。北至鮑超營盤。被賊阻隔。即自高祖山老營以至清弋江南陵。亦幾爲賊氛所梗。鮑超以老營空虛。懼有挫失。遂自黃麻渡捲旗息鼓。振旅還援。遙見四面傳烽。煙燄紛起。謂知僞跟王藍逆一股。已對高祖山下寨。僞佑王李逆一股。已對清弋江下寨。另有賊騎數百。由寒亭高祖山塵壘而過。繞出鮑龍岡翼襲我營之後。鮑超既次清弋江。先派宋國永守定高祖山。二十七日。昧爽。勒各營徑從抱龍岡進。令周有勝正中營。王有慶正左營。萬守根正右營。孫得友華左營。攻中路。唐仁廉仁字營。劉天勝副後營。吳雲集春中營。羅國才寔後營。攻左路。譚勝達新右營。李文益新後營。洪容海啓化營。鄧雲貴寔前營。攻右路。賊恃衆悍。列陣來拒。旌旗一展。鼓音若雷。我軍以排槍輪擊。多有應聲而殪者。賊乃愈聚愈衆。密布長圍。傷我營哨數人。羅國才衝賊過猛。並陷於陣。鮑超旋令梁笑材王清泉萬鳳書劉順龍何紹彩唐友勝黃海青等營。自山岡後分兩枝鈔入。截賊數段。賊隊大亂。奪路竄奔。諸將士合力薄之。遂將歙建廟至楊柳鋪十數村落中城卡賊壘。一律平毀。追襲近六十里。殲賊近八千人。擒獲無算。此十一月二十七日。進攻馬頭

鎮楊柳鋪等處大勝之情形也。自有此捷。凡附近我營之高嶺梅嶺麒麟山各賊股。伏匿不出者經月。十二月二十五日。鮑超抽隊出勦。行次中途。以積潦未乾。泥淖盈尺。不利軍行而止。正月初一日。僞匡王秦王諸酋。糾合花旗股匪。竄入大坑黃村。進逼涇縣城南。包過城東。擄衆六七萬人。連營二十餘座。各村烟火相接。彌望皆賊。初四日。該逆架梯蒙絮。悉銳撲城。城中守將易開俊吳廷華等。率勇登陴。以木石下擊。賊始斂退。維時鮑超在萬祖山聞警。恐涇城不支。將貽寧郡後路之患。計莫如速往擊之。乃簡行隊疾馳九十里。初五日抵涇。入城少息。初六日五更時。裹飯傳餐。拔關齊出。先遣王衍慶鄧雲貴張遇春唐仁廉李文益唐得勝六營。蹶過山麓。分匿叢菁深路間。而以易開俊吳廷華所部。送爲之應。復令婁雲慶羅文安周德馨何文憲四營。依山而上。譚勝遠蕭凌雲洪容海陳開用四營。循河而上。鮑超督飭梁美材王清泉萬鳳書三營。暨黃海清孫得友騎隊。直前挑戰。羣賊爭相出巢。從山梁撲下。婁雲慶羅文安等。正當其衝。梁美材王清泉黃海清等。步馬競進。戰逾兩時。將弁多有損折。羅天順躍入重圍。被賊矛抉出右目。顛疊馬下。王清泉急率步卒。挾之而走。亦爲飛子所傷。約軍作退。引賊將近山麓。號鼓一聲。伏兵頓發。婁雲慶等回鞭轉鬥。面面夾擊。賊乃大敗。正欲歸壘。瞥見壘中火起。已爲譚勝遠等所破。我軍乘勝併進。盡掃羣壘。立解涇縣之圍。長驅三十餘里。遂入黃村。賊不虞官軍之驟至。有棄壘欲遁者。有閉壘死守者。我軍士擁至壘下。搶拔地縛。肉薄而登。又平十數壘。追二十里。至大坑。擊賊盈萬。初七日。鮑超自涇縣回軍。適西河之賊。據近寒亭高冠山老營。將圖乘虛一逞。南望旗幟蔽空。軍容甚盛。乃相顧錯愕曰。鮑超來矣。亦卽一翼敗走。此正月初六日。馳援涇縣之情形也。臣查寧國境內。徧地逆氛。鮑超以病餘之將。新補之卒。四出難進。得此兩戰。軍威可以復振。危局可以漸安。所有出力人員。可否酌給獎敘。以作士氣。出自聖恩。至參將羅國才等六十七員弁。均係前後力戰陣亡。相應另繕清單。請旨飭部各照原銜從優議卹。所有官軍在馬頭楊柳鋪大獲勝仗。並解涇縣城圍緣由。謹繕摺由驛六百里馳奏。伏乞皇太后皇上聖鑒。謹奏。

涇縣守城陣亡員弁請卹片 同治二年正月二十七日

再查守涇縣之總兵易開俊等。於上年冬月杪擊賊。先勝後挫。及正月初間。守城情形。臣已兩次略陳梗概。旋據先後稟報。寧國縣另股。於上年十一月二十一、二等日。由柿木鋪竄近涇縣東北。進踞潘村晏公堂一帶。距城僅

十五里。二十五日。易開俊商同吳廷華各營小隊。至三界鋪登高瞻望。但見旗幟隱約。人數不下二萬餘衆。卽於是夜遣死士潛往附近山岡。齊舉號火。撤夜擾賊。天甫向曙。吳廷華率所部兩營。會合葉明瑞陳青雲兩旗進攻潘村。以蕭章開馬蹇應之。易開俊親率三旗幟。趨晏公堂。王華國賀國楨率兩旗分路包鈔。鏖戰逾時。奮斬前鋒數百人。賊陣漸亂。且戰且走。而潘村之賊。亦經葉明瑞等擊退。吳廷華追過壩頭。葉明瑞陳青雲由晏公堂大路斜刺而來。會軍交擊。賊負重創。餘匪遁入黃村官莊一帶。易開俊以賊遁未遠。不速除之。終貽後患。二十七日。仍與吳廷華督率各軍。分道馳勦。略一交鋒。賊卽敗走。遂復黃村官莊。驅賊於十數里外。不料山坳伏發。遽斷歸路。敗賊回戈助戰。我軍困入垓心。易開俊搏關方酣。猝傷馬股。馬蹇墮地。賊以亂刃擬之。蕭章開大呼馳救。易開俊更騎突圍而出。將隊伍連環收歸。軍士已多傷折矣。二十八日。賊黨乘勢撲城。見城守禦謹嚴。相率退去。正月初三四等日。賊以大股環城奮攻。晝夜不息。競於矢石中駕梯而升。易開俊與吳廷華令守壕士卒。立斬數人。擊毀攻具。蕭章開曹勝義復潛出鈔賊。賊始歸巢。初六日。鮑超引軍來援。城中士氣益奮。易開俊與吳廷華亭食整隊。俟鮑超各營轉過山麓。引賊入伏。突出盪擊。俘斬其衆。既平附城諸壘。旋入黃村。痛加勦洗。俘執羣醜。兼獲賊糧而還。臣查涇軍七營。久與悍賊相持。十一月二十七日之挫。軍心震恐。卒能保全危城。遮護寧郡。洵屬有裨全局。所有節次陣亡之參將倪相明等五十一員弁。均堪憫惻。相應繕具清單。附於鮑超請卹單內。懇恩勅部一併從優議卹。以慰忠魂。合附陳請。伏乞聖鑒訓示。謹奏。

代表李世忠請贖勝保罪摺 同治二年正月二十七日

奏爲據情代奏。仰祈聖鑒事。竊臣接據江南提督李世忠函稱。恭閱邸報。得悉侍郎勝保被劾各款。欽奉諭旨。奉問交部治罪。查勝帥性好夸大。每於細行不知檢點。中外久有物議。今既據實揭陳。聖諭至爲嚴切。朝廷議罰。豈能曲示姑容。爲臣下者。均當以此爲鑒。何敢於清真罪當之中。妄參末議。但勝帥受先皇帝知遇。奉命討賊。時閱十年。身經百戰。籌辦皖豫兩省軍務。雖無成功。而其中羈縻駕馭。當局者煞費苦心。咸豐十年秋。京畿震動。幾至全局撼搖。特命勝帥總統援軍。力保畿輔。而外國撫議始成。皇上御極之初。勝帥因政柄下移。無以服衆。請皇太后親理大政。一擢孤忠。凜凜大義。昭彰此雖國家大臣職分所當爲之事。而勝帥之受恩圖報。不避嫌怨。亦於此

可見矣。前此世忠舉衆投誠。蒙勝帥拊循備至。老母年近七旬。幼子年甫十六。均賴保全。曾憶其奉旨回京。臨別諄切告誡。勉以竭力報國。無或隕越貽羞。世忠今日之渥荷殊恩。全家之悉蒙惠澤。至於斯極者。未嘗非勝帥之提撕激勸。獎掖以成之也。今中外衆口一轍。交章彈劾。大廷論法。自屬罪無可辭。第念其數載治軍。於無可寬宥之中。似尙有一線可原之處。且凡能任大權者。往往廣招物忌。此尤朝廷用人不可不察者也。世忠係在勝帥任內投誠。例應避嫌。可否代爲陳奏。儻蒙聖主法外施仁。准從寬議。請先將世忠暫行褫職。責世忠立功代贖。不效則併治世忠之罪。世忠自當竭盡心力。以期仰報國家。斷不致迄無成效。剴切上陳。不勝悚迫待命之至。等情。請奏前來。臣查勝係統兵大臣。革職遠治。豈容閩外下臣。一言瀆請。惟該提督李世忠係勝保招撫之人。此次籲陳私悞。自願立功代贖。臣亦何敢壅於上聞。理合據情附驛代奏。伏乞皇上聖鑒訓示。謹奏。

近日軍情並陳親赴金陵察看片 同治二年正月二十七日

再近日軍情。金陵寧國各營。穩守如常。太平石埭等股。全伏未動。宣城縣屬之金寶圩。於上年臘月二十日。被僞侍王率衆攻破。該圩練丁逃至蕪湖者數千。臣爲編營安插。調侍逆在圩中大掠米糧。仍圍窺伺蕪湖金柱關一帶。該兩處防務暫難鬆動。北岸無爲州原駐樹字五營。本係李鴻章新募之卒。現因救援常熟進攻崑太。兵力不敷。飛調樹字等營回滬。另撥韋志俊一軍。駐防無爲州城。蕭慶衍專顧銅城關一路。尙足堵禦。毛有銘專顧巢縣一路。實形單薄。又在六安州酌抽元中瑞左兩營助之。惟九洲洲江面。續有賊船百餘號。晝夜趕渡。據收獲僞文。賊欲先攻浦口江浦。以通進兵之路。臣恐前敵各防。未能穩固。亟須親往察看。通籌攻守事宜。此次拜摺後。即日由水路駛赴金陵及無爲州蕪湖金柱關等處巡視一次。往返約需月餘。安慶在城兵勇。尙有四千餘人。責成司道各員。權爲統率。誓可無虞。萬一巢縣踰匪。蓄意西竄。臣亦即兼程旋省。以資調度。而顧根本。所有軍務大概情形。併微臣親赴前敵察看緣由。理合附片陳明。伏乞皇太后皇上聖鑒。謹奏。

查閱沿江各軍並近日軍情摺 同治二年二月十二日

奏爲微臣查閱沿江各軍。現抵金陵大營。恭報近日軍情。仰祈聖鑒事。竊臣親赴前敵各軍。查閱營伍。曾於正月二十七日。附片陳明在案。次日自省起程。乘舟下駛。二十九初一兩日。行過池州大通。聞蕪湖金柱關軍情喫緊。

初三日趕至蕪湖。初四日周歷城壘。旋赴裕溪口。陪侍郎臣彭玉麟。由東西梁山駛赴金柱關。詢悉僞侍王連日撲犯該處。二十四日在薛鎮獲勝一次。初一日在梅塘背始戰小挫。旋獲大勝。初三日復獲勝一次。初五日巨行抵烏江水營。與提臣楊岳斌同至金陵之大勝關。初六入雨花台營盤。初七八等日。逐段查閱。均尙穩固。疊據探報。忠逆之黨。僞愛王黃崇發。僞顧王吳如孝等股。續渡九洲。二十七以後。屢撲李世忠部將陳自明營盤。至初二夜失陷。初三早浦口繼陷。該逆遂分撲江浦橋林城壘。勢甚猖獗。聞將先竄西梁裕溪。再犯無爲廬州等語。又據寧郡各軍稟報。初一日廟埠等處之賊。分小股逼近郡城。劉松山出城迎勦。擒斬多名。而大股由敬亭山趨併楊柳鋪。圍撲鮑超高祖山老營。鮑超督率諸將。分路出擊。大獲全勝。旋即收復西河。其小淮鑿馬家園等處賊壘。亦經王可陞於初二日率師掃蕩。由是鮑超乘勝進攻。又將紅楊樹高嶺梅嶺竹塘仰賢圩麒麟山各壘。全行平毀。其灣止一股。經水師於初五日擊退。綜計寧郡西南北三面百餘里之賊。一律掃除。惟水揚鎮金寶圩尙未克復。自去秋以來。奇險疊生。仰託聖主鴻福。竟得轉危爲安。實屬至幸。臣以南岸局勢較鬆。調駐防三山之劉連捷三營。北渡無爲州與毛有銘協守石澗埠。調駐防寒亭之梁美材三營。北渡廬州與石清吉協守郡城。會國荃亦守熊登武等營。添紮東西梁山。以保要隘。惟巢含以上。地勢寬曠。賊數衆多。目前兵力單薄。未敢浪戰。必俟李續宜銷假回任。江忠義由江東來。乃能會勦。皖北由巢含迤邐而下。直至浦口九洲洲。除北岸之逆氛。復去夏之初。至石埭太平之賊。於初一日竄至駱縣。旋即退出嶺外。於潛昌化之賊。初三日竄近徽郡。唐義訓迎擊獲勝。此兩股意圖內犯江西。不知能堵截回竄否。臣將金陵戰守事宜商定。即赴九洲洲相度地勢。迴舟西上。仍往蕪湖裕溪無爲州一帶。詳加看察。如果巢賊上竄。自當兼程回省。以固根本要地。聞李世忠親赴五河。所有浦口九洲洲失陷情形。尙未接其咨報。即寧國徽州金柱關三處大捷。亦未接其詳報。除各路戰狀。及應獎應卹人員。續行具奏外。謹將微臣行程。及南北兩岸近日軍情。先陳梗概。伏乞皇太后皇上聖鑒訓示。謹奏。

由金陵回皖沿途查閱並近日軍情摺 同治二年二月二十七日

奏爲微臣由金陵回皖沿途查閱恭報近日軍情仰祈聖鑒事。竊臣行抵金陵。會將兩岸軍情。於本月十二日。具陳梗概在案。十五日由大勝關赴九洲洲。該處江路狹隘。與兩岸草鞋夾列壘對峙。是日風霾蔽塞。瞭望不甚明。

晰。卽於次日回舟西上。十八日入金柱關小河。查閱龍山橋三汊河查家灣等處。十九至二十二等日。由東西梁山入裕溪口小河。查閱雍家鎮運漕石澗埠無爲州等處。二十三日由神塘河出江。現在舟抵大通。不日卽可旋省。北岸之賊。十六日續陷江浦縣城。新河口營壘。趨遷西竄。徘徊於巢舍全椒之間。未遽深入。其僞忠王踪跡。據李鴻章函稱。該會因浙東肅清。調集羣賊。併守杭省。而自留蘇州未出。據蕭慶衍稟稱。該逆竄已北渡。於十三日入巢縣城。據各路生擒賊供。僞天王令忠酋力攻西梁無爲州。圖取廬州和州之米。令侍酋力攻蕪湖金柱關。圖取寧國太平之米。欲還昔歲之舊觀。以保金陵之巢穴各等語。逆謀詭秘。其確情不得知也。臣所謂劉連捷三營。已到石澗鋪。與毛有銘共扎十一營。地勢寬曠。尙嫌兵單。此外如西梁運漕無爲廬州等處。亦僅力能自固。非俟李續宜江忠義到皖。難以輕進。南岸自寧國屢捷後。惟金柱關侍逆一股。爭戰不休。初一十六等日。兩次猛撲查家灣。該逆雖大受懲創。我軍亦疊有傷亡。正擬令鮑超攻取金寶圩。進勦東壩。以固皖南之藩籬。而鈔侍逆之後路。乃徽州青陽兩處。連日警報頻至。石埭之賊。黃文金古隆賢等。併犯青陽。太平之賊。分竄徽州各嶺。又有花旗譚星兩股。由浙江敗回。麇集徽境。唐義訓初三日擊退歙南一路。其東北兩路。愈來愈衆。繞過郡城之西。十五日唐義訓帶隊出剿。從富場橫至岩寺街。頗有擒斬。而別股從黃山南來。十五日猛撲休寧縣城。唐義訓以休城僅留三營。不敷守禦。添派王華雲一營。十六日入城協守。至祁潏一帶。王文瑞於初十日擊退竄擾石坑南湖之賊。其大洪禾戌等嶺。時有逆蹤窺伺。防不勝防。臣本擬令朱品隆回援徽州。因青陽喫緊。該軍不能抽動。不得已令鮑超暫緩東壩之行。而先從南陵馳救青陽。以解目前之急。左宗棠肅清浙東。卽慮敗逆回竄皖南。亦派劉典一軍。援應徽州。羣逆皆窮餒之餘。無巢可歸。蓄意闖入善地。就食江西。若微休青陽等城。俾得保全。該逆或由西以竄饒景。或由歙南以竄婺源。均爲江西北邊之患。臣時時兢惕。並函告沈葆楨預爲防範。合力維持。所有微臣回皖行程。及近日各路軍情。謹繕摺具陳大概。其詳細戰狀。仍俟分案續奏。伏乞皇太后皇上聖鑒訓示。謹奏。

沿途察看軍情賊勢片 同治二年二月二十七日

再密陳者。臣巡視諸軍。詳觀賊勢。攬南北之形勢。察天人之徵應。竊以爲有可懼者數端。而可喜者亦有數端。自池州以下。兩岸難民。皆避居江心洲渚之上。編葦葺茅。棚高三尺。壯者被擄。老幼相攜。草根掘盡。則食其所親之

肉。風雨悲時。死亡枕藉。巨舟過西梁山等處。難民數萬。環跪求食。臣亦無以應之。二月十五日。大勝關江濱失火。茅棚數千。頃刻灰燼。吳聲震野。苦求賑卹。他處蓋棚糞糶。亦往往一炬萬命。徹池寧國等屬。黃茅白骨。或竟日不逢一人。又聞蘇浙之田。多未耕種。羣賊無所得食。故壹意圖竄江西。並窺伺皖浙已復之區。平民無所得食。弱者轉徙溝壑。強者則從賊以偷生。且友黨羽無定數。會長無定謀。便恐變爲流賊。更難收拾。而諸僞王中如李世賢。失金華。楊輔清失寧國。黃文金失蕪湖。古隆賢失青陽。劉官方失池州。巢穴雖破。醜類尙多。其意怏怏。不甚服僞。天王。世王之詞度。其行徑亦與流賊相近。李世忠之心迹。中外皆不敢深信。頃因捆鹽搆衅。親赴五河。雖浦口江浦失守。尙未聞其回營主持。與鄧與河楊岳斌蕭慶衍均有違言。親匪類而遠正人。逞小忿而忘大局。茲值敗軍失地之際。又奉革職留任之旨。竊恐其轉益成怒。倒行逆施。則裏下河先受其災。而此次北渡之賊。亦有直犯裏下河之謀。鹽場倘有疏失。全局愈難支持。凡此皆可懼之端也。粵匪初與。粗有條理。頗能禁止奸淫。以安襄脅之衆。聽民耕種。以安估據之縣。民間耕獲。與賊各分其半。故取江南數郡之糧。運出金柱關。取江北數郡之糧。運出裕溪口。並輸金陵。和春等雖合圍城外。而賊匪仍擅長江之利。挹不竭之源。傍江人民。亦且安之若素。今則民間賊至。痛憾椎心。男婦逃避。煙火斷絕。耕者無顆粒之收。相率廢業。賊行無民之境。猶魚行無水之地。賊居不耕之鄉。猶鳥居無木之山。實處必窮之道。豈有能久之理。而東南要隘。如安慶蕪湖。廬州寧國。東西梁山。金柱關。裕溪口。暨浙之金華。紹興。此皆山川筋脈必爭之地。但求此數處不再失守。終足以制該逆之死命。昔年粵賊所至。築壘如城。掘濠如川。堅深無匹。近亦日就草率。而官軍修壘濬濠。今實遠勝於昔。城中羣酋受封。至九十餘王之多。各爭雄長。苦樂不均。敢不相救。而官軍仰承聖譏。三江兩湖。水陸各營。頗能和衷共濟。呼應靈通。至百姓仰戴皇仁。淪肌浹髓。雖臣等撫綏無術。治軍無效。斯民久陷於水火之中。曾不一聞怨咨之語。翹首而平寇。擊壤而謳吾君。意者。民心所在。天祐孔長。凡此皆可喜之端也。臣從軍數年。從未敢以賊勢稍衰入奏。惟念西北軍興。皇太后皇上焦勞彌甚。故將南中之機。陳述一二。仰慰宸廑。至可懼之端。臣殫竭愚慮。勉思補救。裏下河若有疏失。當在此兩月之中。難亟謀挽回之術。若竊號巨股。變爲流賊。昔文宗皇帝嘗慮及之。但求金陵蘇杭三處。有一二克復。即當大赦羣酋。廣爲招撫。以庶幾赤眉百萬。同日納降之盛軌。此中自有天意。不盡關乎人謀。至李世忠雖梟桀。

猜忌。而其部卒頗懷搆貳。又不善戰。縱或激之生變。亦尚不足深慮。臣始奉將李世忠革職留任之諭。本擬暫不宣示。繼思該提督驕恣已久。尾大不掉。急亦有變。緩亦有變。終不能相安無事。即日當宣示諭旨。待李續宜江忠義軍到。由巢含一路東下。進攻江浦等處。屆時或將李世忠失守各城。嚴參懲究。再行相機辦理。理合一併密陳。伏乞皇太后皇上聖鑒訓示。謹奏。

祁門知縣唐治建祠片 同治二年二月二十七日

再前任祁門縣知縣唐治。於咸豐四年正月間。賊竄縣境。時與天洪司巡檢鍾普塘同時死節。當經奉旨賜卹在案。嗣據該縣紳士饒際可陳得荃等。以唐治莅任數載。凡養士正俗聽訟諸大政。遺愛在民。建賊陷祁城。猶復勒騎巷戰。被執痛置。卒至刳腹屠腸。受禍最慘。謹摺政績死事狀略。籲請奏建專祠等情前來。臣國藩前駐祁門。聞該故員唐治生前卓有政聲。殉節先一日。以書遺其家屬。誓守孤城。早備一死。是其神識堅定。晚近所難。至今比戶謳思。臣覽其遺書。尤增感嘆。尤宜列之祀典。應懇天恩。准將已故知縣唐治。在祁門縣地方。建立專祠。其鍾普塘一員。並予附祀。以妥毅魄。而順輿情。是否有當。伏乞聖鑒訓示。謹附片具奏。請旨。

鮑超軍克寧國近城要隘摺 同治二年二月十一日

奏爲提督鮑超攻破賊巢。悉復西河小淮。鑿紅楊樹麒麟山諸要隘。恭摺馳報。仰祈聖鑒事。竊照鮑超一軍。會合何紹彩王可陞所部。分剿高嶺西河。直至麒麟山。將賊壘全行平毀。臣於二月十二日。具陳梗概在案。先是偽輔王楊輔清。糾約僑隨王張王堵王孝王祐王等。嘯聚西河灣。址紅楊樹黃麻渡麒麟山一帶。不下十餘萬人。以一大枝鈔出高祖山之前。潛匿村落中。距我營七八里十數里不等。以一小枝繞過高祖山之背。橫出楊柳鋪。揚言上犯涇縣。火光燭天。晝夜不眠。鮑超見山前賊旗隱約。山後煙燄突起。計在誘我赴涇。圖襲老營。乃令宋國永布置高祖山營寨。堅壁穩守。而在板橋寒亭清弋江等營。抽隊數成。親自督率。設伏於太子廟山坳。以伺其變。二月初一日。昧爽。楊柳鋪火光漸息。謂知寧郡守將劉松山督同劉光明賀國楨李芳菲等。出城雕勦。殲擒數百人。李芳菲率前哨驍賊中砲死之。楊柳鋪一股。旋向烏沙鋪遁去。鮑超料該逆不得逞於郡城。必將挾全力以撲我營。自登太子廟山岡瞭望。果見烏沙鋪之賊。進逼獅子山。去營不遠。各村落之賊。分三四萬衆。旌旗蔽空。迤邐而

來。將高石山入營。層層圍裹。有控至濠下。爭拔花籬者。鮑超急帶太子廟伏軍。向山僻小徑。捲旗疾趨。行至離營二里許。聞營中砲聲轟發。知老營業已出隊接戰。即派譚勝遠顏紹榮甘星平徐連陞等。直取中路。萬守根洪容海羅文宓張邁春等。由營後左路進。以晝雲慶黃海青唐得勝數隊爲之應。王衍慶何紹彩曹志忠等。由營後右路進。以唐仁寧鄧榮貴孫得友數隊爲之應。仍令梁美材王清泉萬鳳書等潛伏茯苓山之旁。以斷賊後部勒。定。但聞鼓角一聲。譚勝遠萬守根王衍慶各軍。突分三路包賊。霎時合圍。朱國永乘勢從各營夾縫中擊出。截賊數段。鄧訓詰肩有勝等張兩翼鈔殺。賊隊譁亂。不復成伍。正思奪路竄走。適晝雲慶黃海青唐仁廉等馬步齊至。我軍縱橫邊決。賊之前鋒。鮮有脫者。而賊之後隊。尙欲抵死來援。鮑超揮令諸將士奮力衝擊。追進茯苓山。梁美材大呼突出。早斷歸路。羣賊駭懼。罔知所措。紛紛竄入田壠。衆軍合力蹙之。追襲四十餘里。遂至高嶺周家橋諸壘。直抵西河。賊乃倚水爲險。對河列陣。意圖抗拒。俄而晝榮忠帶霆營砲划由清弋江駛下。我軍結筏爭渡。水陸夾勦。俘戮無算。立毀堅巢。敗賊始往桃花園灣。此一路而遁。此二月初一日。擊賊大勝。攻克西河之情形也。西河以北曰馬家園。爲衆賊屯糧之所。迤西則曰黃麻渡。曰小維審。爲王可陞進兵之地。西河既復。王可陞知羣賊膽寒。卽於初一日派蔣占熬楊忠楊明貴等。會約駐守峨橋之楊正彪。各率行隊。進取小維審。親督楊華坤謝春占馬承恩數營。取道黃麻渡。潛襲馬家園逆壘。時已夜分。更鼓將絕。王可陞令軍士傍壘縱火。悉焚賊糧。賊不知官軍之猝至。在睡夢中披衣急起。棄壘狂奔。小維審之賊。正欲聞警赴援。蔣占熬等已斫斷浮橋。破卡而入。乘勝逐之。蹙偪入水者無數。沿途卡壘。盡毀靡遺。維時賊之由西河遁入灣。進者。經晝榮忠砲划隨同外江水師。日夜轟擊。賊不能堪。乃於初二初三等日。縮入灣。進次紅楊塘。旋分大股。歸併梅嶺麒麟山。意在伺間再逞。鮑超謂賊餒雖衰。不速除之。終貽後患。初四日引軍渡河。進次紅楊塘。偪賊不出戰。我軍相持數時。羣以火器環擲。延燃哨棚。軍士冒烟突火。踰濠直進。一壘旣陷。衆壘盡亂。各將弁揮隊盪擊。殲獲頗衆。直追過桃花園竹塘灣。進後山。賊皆聞風先遁。遂焚其巢。是夜鮑超遺書劉松山令於初五日自郡城率師來會。將有事於梅嶺及麒麟山。天甫向曙。秣馬蓐食。傳令宋國永熊鐵生梁美材等十五營。專攻麒麟山。晝雲慶唐仁廉黃海清等馬步入營。專攻梅嶺。而以劉松山所帶各旗營爲斷後。行未十數里。賊竟糾衆來迎。宋國永等縱兵哨就山麓布列。

陣勢。直前搏戰。潛遣銳卒。自山後舉旗先登。襲破賊壘。周庠而呼。賊咸驚疑。卻顧。宋國永等縱兵掩擊。積尸若阜。麒麟山堅壘悉平。是日劉松山亦破廟埠之壘。殲賊千餘。婁雲慶鄧榮貴等擊破梅嶺之壘。並收復仰賢圩各處。餘匪分道竄逸。一由新河莊敗往東壩。一由油榨溝敗往廣德建平。此初二至初五等日。疊克馬家園小淮窰及紅楊樹梅嶺麒麟山等隘之情形也。臣查西河小淮窰爲水路衝要。自被賊踞數月。糧運梗阻。大爲寧國各營之患。仰賴聖主威福。將士同心。五日之間。悉復諸隘。距郡城數十里內。一律肅清。在事人員。厥功甚偉。可否彙入楊柳鋪涇縣各案。酌給獎敘之處。出自鴻施逾格。至力戰陣亡之參將李芳菲等二十六員。另繕清單。請旨敕部從優議卹。以慰忠魂。所有鮑超各軍。連克寧國近城要隘緣由。謹繕摺由驛五百里具奏。伏乞皇上聖鑒訓示。謹奏。

近日軍情片 同治二年二月十一日

再近日軍情。金陵駐守如常。寧國自二月初屢捷後。鮑超派何紹彩一軍守西河。王可陞一軍守灣址。洪容海一軍守清弋江。其劉松山仍守寧國府城。易開俊仍守涇縣。朱品隆仍守清陽縣。又換調吳廷華守南陵縣。遂節布置。糧運通暢。寧郡應無他虞。蕪湖金柱關兩防。自前月十六日大戰獲勝。該逆至今不敢再逞。臣於二十七日過大通。聞黃文金等大股。由青陽上竄。臣卽兼程西旋。次日抵省。調喻吉三護軍二營赴池州。李榕鈞字五營赴東流。以截賊竄江西之路。乃兵甫渡江。賊已由建德闖入彭澤鄱陽境內。而譚星吉古賴等股。又蔓延於徽州各屬。兩路皆有深入江西之計。幸浙江臬司劉典與唐義訓王沐等。在休歙兩縣。屢獲勝仗。徽州一路。必可擊退。其由建德一路竄入者。實恐貽江西腹地之憂。臣正檄令鮑超。由青陽赴援景德鎮。冀保江西完善之區。旋據北岸各營告警。僞忠王大股上竄。分枝牽制廬江無爲州之兵。而以全力猛撲石澗埠。毛有銘劉連捷營盤。自初三至初七日。晝夜圍攻。糧路斷絕。文報不達。臣不得已。又飛檄鮑超。致旆旆渡江。以解石澗埠之圍。曾國荃亦自金陵分撥三營。效援該處。不知均得及否。又有捻匪一股。從河南竄入湖北之麻城。經鄂軍堵剿。卽自三里埂竄至驢水境內。其勢亦將歸併皖境。髮捻聯成一片。安慶廬州各屬。處處喫緊。竄入江西之賊。別無大支勁旅。可以派往援剿。幸崇巨沈葆楨久諳水陸。萬餘人分守景鎮樂平兩處。或者足資扼堵。江之南岸徽州與江西同警。江之北岸。

下游與上游同營。臣調度無方。憂灼實深。除石瀾準等處戰守情形。續行具奏外。理合附片先陳梗概。伏乞皇太后皇上聖鑒。謹奏。

李世忠軍營失陷摺 同治二年二月十二日

奏爲賊渡九洲。攻破李世忠各營。進陷浦口。江浦兩城。橋林一隘。恭摺馳報。仰祈聖鑒事。竊提督李世忠一軍。所駐九洲浦口。江浦各城隘。疊被衆賊攻陷。分撲橋林營壘。臣於二月十二二十七等日。兩次具陳大概。在案。旋准該提督先後報稱。九洲浦口各營。自被賊圍。前敵糧路梗塞。軍火又無接濟。於江浦不能互通消息。危急萬分。二月初三四兩日。又增賊黨二萬餘人。用牛皮爲帳。雜以洋砲隊。并令洋人燃放花炸砲。四面環攻。我營受傷雖多。深知沿江要地。不忍輕棄。於賊尙各誓以死守。無如賊勢過衆。猛撲不休。該將弁等目不交睫。手不釋刃。竭力堵禦。兩晝夜。至初四晚勢難再支。遂將浦口以西。及城南營寨。一併撤回江浦城內。查浦口一城。本毀於賊。我軍在西南兩門外。分營駐紮。此次被圍。挫退。實因半月來內無糧藥。外無援兵。以不能固守。至江浦存城將士。自初五日而後。亦經力守旬餘。屢與賊戰。傷折不少。乃賊衆繞城密圍。水泄不通。城中食盡。糧運又絕。日僅一粥。尙不能飽餐。子藥既罄。徒以輒石擊賊。而賊攻益急。行將就斃。該鎮將因於十六夜率領弁勇。冒死殺出江浦縣城。維時橋林防營。已被圍二十餘日。江浦陷後。羣賊悉趨橋林。該營守將邱昌良。激勵士卒。奮勇爭先。以守爲戰。十八日賊竟愈聚愈多。不下有六七萬衆。洋砲洋槍。子如雨下。我軍抵死堅守。疊有傷亡。賊又以西瓜巨砲。轟塌砲台。緣梯直上。并有踰濠越牆而進者。各勇短刃相接。衆寡不敵。邱昌良身受重創。經左右背負出圍。退至大勝關。查點步卒二千人。亦已十傷八九。所有各該處失事人員。委係力盡援絕。可否均數寬免。惟世忠忝襄軍務。不能先事籌防。無可辭咎。應乞奏參。請旨革職。撤去勇號。不准留營。另行派員接統豫勝營一軍。或在本營各將中。擇能任使。查有遇缺題奏。提督記名總兵甘肅安。西協副將朱元興。堪以勝任。即請奏派該員接統。以重軍事。而免貽誤。世忠罷職後。決不任意妄爲。致負國恩等情。請奏前來。臣前在金陵行次。據探報賊渡九洲。屢撲李世忠部將陳自明營盤。至二月初夜失陷。初三日早浦口繼陷。即經據實陳奏。茲據來咨。稱浦口各營。於初四夜撤退。日期稍有不符。自係探報未確。伏查浦口江浦二城。爲濱江絕大關鍵。一經失此重險。上可由和含巢各屬

進逼廬州。下可犯儻揚各防。進窺裏下河。表延數百里。游衍自如。未易勦辦。該提督李世忠悚惶引咎。深明大義。應如該提督所陳請旨。將李世忠卽行革職。撤去勇號。不准留營。並懇聖恩。允其所舉。卽派遇缺題奏提督甘肅安西協副將朱元興接統該軍。以防重務。臣自上年十月。卽有調度該軍之責。未能先事籌畫。又不能設法救援。各亦難辭。請旨將臣交部嚴加議處。除陣亡各將弁俟咨到續行奏卹外。所有賊陷九墩洲浦口江浦橋林各城營緣由。謹繕摺由驛馳奏。伏乞皇上聖鑒。謹奏。

蕪湖金柱關水陸防軍屢勝摺 同治二年二月二十七日

奏爲水陸各軍在蕪湖金柱關一帶累月苦戰獲勝。續報詳細情形。仰祈聖鑒事。竊蕪湖金柱關水陸各營。自去秋以來。戰爭不休。金陵解圍以前。業經縷晰具奏。十一月以後。節次戰勝。並奪回灣址一隘。臣國藩已將大概軍情。先後具奏。並聲明續行詳奏在案。上年十一月間。僑侍王李世賢自金陵敗遁後。糾悍賊數萬人。砲船槍划數百號。突出東壩。將犯金柱關。分竄蕪湖。曾國荃以該兩隘水涸兵單。恐爲賊乘。派武明良一營。馳扎東梁山。朱洪章兩營。馳扎龍山橋。以爲聲援。初八日。金柱關守將羅逢元。朱南桂截賊於花津。三十五等日。復敗賊於上壩。渡萬頃湖及梅塘背之西岸。疊有新擒。十七日。朱南桂與臣岳斌商制敵之策。俄報賊之由陸路來者。右至魚壩。左至太平府。由水路來者。已至三汊河。環偈我營。是日南風大作。水師不能助戰。朱南桂羅逢元憑營燃砲。一發而殪數酋。賊爲少卻。我軍出壕縱擊。復以火箭焚賊四船。賊始紛紛奔北。十九夜。羅進賢李助發率水師潛往襲之。奪獲二十餘船。擒僞清天安陳諸賓而還。二十二日。賊由蠶頭率黨護舟。復犯三汊河營寨。勢更洶湧。並有用飛划登岸者。朱南桂羅逢元引軍齊出。朱洪章武明良亦率隊來助。併力搏戰。迫及河干。萬化林唐學發等水營乘勢奪船數十號。賊之墮水而斃者以千計。二十六日。水陸各營會議。賊屢來西岸攻我。未得一逞。不若我軍東渡擊之。是夜五更。朱南桂朱洪章羅逢元整旅渡河。分道疾進。朱南桂令謝大洲率哨勇先赴上壩渡。以截青山後路。而自領所部。進次卿家橋。有一賊卡梗道。矢石如雨。並有砲划密布橋下。我軍猝不得前。忽聞水際礮聲。自遠而近。萬化林彭楚漢羅進賢等。已拆賊浮橋。自下游飛槩而來。衝開賊划。面面環擊。一時蓬飛橋折。尸塞河流。朱南桂見水路得手。知卡賊亦將奪氣。卽飭潘泗知宋楚懷等。躍入卡內。縱橫擊刺。駢戮無遺。羅逢元一枝沿河

勦殺。正攻徐家渡二壘未下。適朱洪章從青山鈔來。哨弁嚴洪賓等鼓勇先登。立破二壘。武明軍亦帶隊趕至。環壘奮擊。壘中之賊無一得脫。其西岸一卡一壘亦經水軍登陸攻破。是日斃賊最多。奪獲戰船一百一十號。洋砲二百餘尊。此十一月初八至二十七等日。金柱關水陸疊獲勝仗之情形也。自有此捷。賊之踉伏不出者幾兩月。意謂金柱關防務可以少休。不料賊之窺伺愈深。蓄計愈狡。金柱關之上十里爲三汊河。又上十里爲龍山橋。又上爲梅塘營。又上爲查家灣新圩角。又上爲三里更清水河。則無濶水師分防之汛地也。賊不得志於下游。乃繞寬梅塘營以上。本年正月二十四日。在新圩角掠船搶渡。朱洪章輕騎馳往。誘賊深入一擊破之。朱南桂等謀之水營。謂賊方在下游西竄。我宜從下游東旋。薛餘老輩可以襲而取也。二十七日。羅逢元派兵伏於花津之下。而自從中路進。朱寬義從右路進。朱南桂從左路進。軍次薛鎮。賊錯愕無備。閉壘死守。堅不出戰。各哨隊圍壘而攻。水師以巨砲傍堤轟擊。賊棄壘爭竄。寬至花津者。半爲代軍所殺。我軍力薄。不能分防河東老營。仍扎於三汊河龍山橋。而分兵戍守查家灣新圩角以上。更番換防。二月初一日。賊由新圩角悉衆來撲。朱洪章整軍以出。搏鬪方酣。不知另股由萬頃湖渡過。鈔我卡後。朱洪章撤隊急退。賊已層層包裹。我軍敗挫。朱南桂帶隊馳援。朱洪章亦奮力衝出。重圍始解。而弁勇已多損折。賊猶疾如風雨。猛撲不休。朱南桂派彭維祥向有田堵河邊一路。向世驥劉紹林等堵陶家灣一路。仍自帶大旗親兵。並振宇營兩哨。衝出查家橋街中。苦戰逾時。羅逢元朱寬義分數路截擊。斷賊歸路。自是轉敗爲勝。賊乃奪路狂奔。衆軍乘之。多有爭渡而溺者。次日羅逢元朱南桂密約蕪湖防兵。周萬俾吳坤修等。水師彭楚漢羅進賢等。乘賊屢挫。共籌再舉。初三日各軍水陸並進。行至萬頃湖邊。見浮橋一道。上下環列賊壘十五座。賊卡賊棚。延五十餘里。羅逢元朱南桂朱洪章督隊過橋。直薄賊壘。周萬俾劉祥勝等繼之。號鼓雷鳴。火器颺發。落河。礮船繞擊。相持兩時。彭楚漢等毀橋登岸。縱焚賊棚。陸軍爭拔地鋪。賊附而上。悉破卡壘。誅夷過半。遂搜勦至上駟渡以歸。十五日賊以小支排列梅塘營查家灣對岸。而以大枝由新圩角過河。專撲朱洪章營卡。時李祥和來自金陵。十六日率師駐防新圩角。甫至該處。而長勝營守卡哨勇先經退守。賊如潮湧。捲地而來。李祥和與吉左振宇營各哨。悉力堵禦。且戰且走。退保老營。羅逢元朱南桂聞警布置。一面飛南彭楚漢等水師來援。一面自簡精銳。倍道進發。羅逢元由陸公壩繞河而上。朱南桂朱寬義白霍木山前進。

行未數里，聞水營總進賢與賊戰於梅塘灣，已報捷矣。又數里，旌旗一色，彌望皆賊。朱南桂、羅逢元等分四路衝入，萬刃交下，槍子橫飛，賊乃大潰。我軍直追至新圩角河邊，水師彭楚漢等適自梅塘灣追賊而至，一鼓蕩洗，餘賊盡溺於河。此正月二十四日。兩路同捷。二月初一初三十五十六等日，兩次小挫，兩次大勝之情形也。先是周萬倬、吳坤修兩軍，勦賊於南新圩，三不管等處，進踞四邊，斬敵頗衆。臣玉麟以該處進逼蕪湖，不能專恃陸師，乃令任星元、左光培等移師船於清水河，爲之倚護。正月二十三日，賊黨自三里埂循河而下，距蕪湖不遠。任星元、左光培率各船泝流迎擊。王三錫登堤督戰，中賊槍子，洞穿右脅，仍復揮兵衝突，將賊擊退。二月初四日，灣址賊將犯我清水河，萬化林會商任星元、左光培等，乘夜駛船潛往。五更即抵灣址，各船方燃炮轟發，適雲營新破西河之賊，派舢板從清弋江而下駛，合力猛攻，更於晨霧中分水勇爲旱隊，在街口積薪焚之，賊不及防，以爲官軍水陸并至，急遽無措，出巢紛竄。我軍遂收復灣址一隘，旋值河水漲溢，萬化林、左光培、任星元等進攻三里埂賊壘，日夜不息。朱洪章等亦率陸軍來會，賊於三月初十日，焚壘奔遁，退併黃池。萬化林等飛駕舢板直逼黃池石壘之下，該逆自恃岸峻壘堅，列砲以待。任星元、萬化林二營奮力仰礮，左光培帶數哨登岸，與水面戰船、摩壘夾擊，各賊驚潰。我軍立復黃池，剽平石壘。朱南桂、羅逢元等陸師會約彭楚漢等水營，亦於次日盡破伏龍橋、譙窩墩、花津賊巢，擒斬甚夥。羣賊遁往金寶圩、溧水、丹陽一帶。此二月初五日。水師攻克灣址。三月初十一等日，續克黃池，悉收內河要地之情形也。臣等查蕪湖、金柱關兩城隘，爲江介要衝，又爲金陵各營後路。上年八九月間，賊蹤環伺，諸將士五旬苦戰，幸獲保全。今又屢卻逆氛，連克灣址、黃池，以通寧國、黃湖之氣，實屬始終不懈，勞苦功多，有所陣亡各員弁，另開清單請卹。在事出力人員，可否彙入前次案內，容臣等開單奏保，以資鼓勵。出自聖恩，所有金柱關、蕪湖、水陸防軍，屢獲大勝，克復灣址、黃池各要隘緣由，謹繕摺由驛五百里馳奏，伏乞皇太后、皇上聖鑒訓示，謹奏。

保穆其琛補無爲州寶缺片 同治二年二月二十七日

再現在代理無爲州知州穆其琛，四川益人。考取教習，選授巴縣教諭。經前任湖北撫臣胡林翼咨調，隨營辦事。咸豐十一年八月，臣札調來營，襄理文案。一年有餘，精細勤慎。臣察其才具，堪勝繁劇。同治元年閏八月，檄令代

理無爲。該員自履任後。鉅細躬親。實事求是。釐剔州縣向來積弊。據實上達。地方應辦之事。次第舉行。甫有端緒。而賊白九欲洲。凌江。十月二十八日。竄理合山巢縣。臣無爲州僅數十里。次日書役人民紛紛遷避。闔城爲之一空。該員猶坐暑中。堅忍靜鎮。迨援兵漸至。固結民志。保衛危城。厥功甚偉。本年強寇壓境。大軍雲集。一面支應軍需。一面辦理堤壩工程。諄應裕如。不形勞瘁。現當地方糜爛之時。分發皖省人員。率皆與足不前。非破格錄用。不足以資鼓勵。相應據實保奏。籲懇天恩。卽以該員穆其琛補授無爲州知州。以爲臨危鎮定者勸。是否有當。伏乞皇太后皇上聖鑒訓示。謹奏。

揀調各員留院委用摺 同治二年三月二十七日

奏爲揀調各員留省補用。並請多發卽用知縣來皖。以資差委。恭摺仰祈聖鑒事。竊惟行政之要。首在得人。吏治之興廢。全繫乎州縣之賢否。安微用兵十載。蹂躪不堪。人人視爲畏途。通省實缺人員。僅有知府二人。州縣二人。卽候補者亦屬寥寥。每出一缺。遴委乏員。小民久困水火之中。偶得一良有司。拊循而煦燠之。無不感深挾纜。事半功倍。如暑蕪湖縣知縣劉世墀。經臣於上年六月奏明委署斯缺。臣此次巡視各軍。舟過蕪湖。卽聞境內之民。頌聲四起。比以母憂去任。臥轍攀留者。相屬於道。可見民心之易感。而吏治之尤宜亟講也。然使拘泥舊章。繩以格例。不稍示變通之法。則目前幾無可委之員。不廣開登進之途。則將來難收得人之效。臣上年所奏委署之二十人。旋准部咨分別准駁。合例者祇有五人。其餘如劉世墀等。均在不合例之列。臣於奏畧後隨時察看。其有人地未宜者。業經陸續撤委。其尙屬得力者。雖與例未符。亦仍從權留任。溯查湖北省自三次克復後。地方彫敝。與今日之安慶相同。經前撫臣胡林翼羅致賢才。多方培養。不數年間。吏治漸振。撫字催科。綽有條理。咸豐元年。胡林翼奏補府州縣各缺。大半與例不符。奉旨交部核議。均經通融議准在案。臣擬此後卽比照湖北章程辦理。聞有才品較優。譽望漸著者。隨時札調來營試用。如其有裨吏治。專案奏請錄用。苟非實有過人之才。不敢率爲破格之請。縱或稍出定例之外。亦不悖乎立法之原。查有前任四川梁山縣知縣曾化南。指分江西試用知縣蔡家馨。經該員識力堅定。心地樸誠。實屬不可多得之員。又前任四川梁山縣知縣曾化南。指分江西試用知縣蔡家馨。經臣先後留營辦事。均屬才堪造就。合無仰懇天恩。准將穆其琛曾化南蔡家馨三員。留於安徽酌量補用。再上年

臣奏請於新進士新拔貢兩班中各配籤十餘枝分發安徽補用部臣以業經製籤未及添配相應請旨敕下吏部於本年新進士即用知縣班中籤掣安徽省十六人並飭令迅速赴省聽候差遣委用該員等初履仕途未染習氣庶幾拔十得五循吏漸多分布各屬撫卹遺黎仰副聖主澄敘官方惠愛民生之至意所有安徽調用人員理合會同署撫臣唐訓方恭摺具奏伏乞皇太后皇上聖鑒訓示謹奏

近日軍情片 同治二年二月二十七日

再近日軍情金陵雨花台一軍撥影毓橋七營北援無爲州後兵力稍單守局尙穩金柱關蕪湖寧國等處距賊漸遠防務大鬆徽州三面皆賊臣僅留唐義訓一軍防守徽休兩城十分單薄幸賴左宗棠派劉典王文瑞兩軍沈葆楨派王沐一軍分駐休寧祁門竭力防勦劉典王沐各營在於長林梅嶺岩寺草市等處疊次苦戰獲勝王文瑞亦於漁亭七里橋等處屢戰獲勝十一日大破黃文金股匪於小路口徽休祁門各城或可倖保然賊思假道微境內犯江西其謀未嘗一日息也其嶺外石埭太平等處又有古賴劉藍等股與嶺內駭祁北面之賊粘連一片縱橫蹂躪臣飭朱品隆由青陽進攻石埭冀掣動微賊之後路三月二十二日大戰獲勝仍以賊多兵寡未敢輕離青陽之本防深入石埭之重地鮑超渡江北援之師三月十六日始抵無爲州正欲進勦石埭卡立解石黎明蕭慶衍彭毓楫會合水師由黃雒河進兵並約被圍之毛有銘劉連捷等由內擊出大破賊壘賊卡立解石潤埠之圍鮑超聞重圍已解登舟仍回上游欲再踐赴援江西之約臣聞賊之大股並未退回巢縣悉銳上竄直撲廬江乃飛檄鮑超急登北岸先援廬江忠奮於十九日攻撲廬江縣城守將梁笑材吳長慶等登陴堅守伺隙出擊擒斬甚衆賊由界河迤邐而北分竄桐城舒城一帶其由鄂東竄之捻股在蕪水分爲兩枝一枝回竄黃州一枝下竄皖境十八日攻撲宿松縣十九二十等日越過太湖潛山界上二十二日自青草塢突撲桐城守桐城者爲湖南提督周寬世開城迎擊擒斬頗多賊遂入孔城鎮與廬江之大股髮逆聯成一片矣據搜獲忠僑偽文將由舒城六安而上英霍麻城宋埠一出黃州一出漢口擾犯湖北意欲掣我南岸之兵以援北掣我下游之兵以援上無非圖解金陵之圍臣以該逆規畫甚大蓄謀甚狡湖北爲數省樞紐不可稍有疏失飛咨官文嚴樹森調成大吉回駐壩口撥水師速赴武漢聞李續宜於初十日自湘啓行擬俟其道出鄂疆商請暫駐黃州會籌鄂

皖大局。嘗此南岸喫緊之際。臣方恨無力援徽。援江。乃北岸事變疊生。下則江浦浦口。和含巢縣。一片逆氛。上則髮捻巨股。疊撲各城。兼圍鄂境。而苗練復於十八日圍攻壽州。並在正陽關與開揚船。叛迹大露。徽臣調度乖方。艱危百出。憂憤何極。所幸浙瀋兩軍。捷書頻至。浙軍若克富陽一城。杭州卽有可圖。瀋軍若克崑山一城。蘇州卽有可圖。仰託聖主威福。但求皖鄂江西不大決裂。與各悍賊相持數月。俾蘇浙果收成效。或者大波特起。旋慶安瀾。焦灼無地之時。輒不勝禱祀徵倖之想。除各路戰狀分案詳奏外。合先附陳大概。伏乞皇太后皇上聖鑒。謹奏。

石澗埠六安州廬江等處戰守情形摺 同治二年四月十一日

奏爲忠逆大股疊撲城營。官軍苦守力戰。石澗埠廬江桐城舒城六安州先後解圍。恭摺馳陳。仰祈聖鑒事。竊自石澗埠圍營之賊。經水陸各軍。合力剿退後。進撲廬江。分竄桐城舒城。與由鄂東下之捻股。聯爲一片。臣於三月二十七日。附陳大槪在案。僞忠王李秀成以三月初二日犯石澗埠。揚隊焚屋。近逼我營。該處將領毛有銘劉連捷等。密飭士卒。穩守營寨。以觀其變。初三初四等日。賊衆數萬。圍攻南後營。及瑞左簿右元中信中等營。東草如山。呼聲動地。各負片板。撲近簿右營濠邊。毛有銘以中右營兩後哨前往助守。排礮環擊。殪其前鋒。賊猶晝夜猛攻。相持不下。如是者數日。初七日。毛有銘挑銳卒潛出濠外。突焚積草。劉連捷復於初九日派隊奮擊。悉毀攻具。賊爲少卻。仍於營前營後增壘盈百。層層圍繞。營中文報不通。糧運汲道。一時俱絕。如是者又數日。曾國荃在金陵聞警。卽派彭毓橘馬步八營。倍道而至。彭玉麟亦調周萬倬劉祥勝等。渡江來援。遂與蕭慶衍會軍於黃維河。十六日。彭玉麟親督水師。進次海子口。牽制東關一路。遣死士瀾入石澗埠營中。密約詰朝會戰。是夜四更。彭毓橘率師進攻釘子壩皇國寺各賊壘。蕭慶衍周萬倬率各師進攻黃龍岡迎珠塔各賊壘。號礮齊發。毛有銘卽於重圍中衝出。攻草鞋嶺之壘。劉連捷出攻石澗埠之卡。王載駟等亦馳出戰。賊於羊虎山。瞥見黃龍岡迎珠塔火光突起。知黃維河援軍先已得手。遂乘勢猛進。併力夾擊。俘斬無算。彭毓橘亦自皇國寺來會。縱橫盪洗。羣壘悉平。而東關賊援亦爲水師堵退。忠督各黨。乃分向小嶺開成橋而遁。此三月十七日。力解石澗埠重圍之情形也。臣所調餉超北渡之師。十六日抵無爲州。未及移營進剿。聞賊已解圍以去。擬回軍以踐上援江西之約。甫及登舟。猶未行也。賊之另股竄盛家橋者。先於十二十三等日。逼犯廬江。該城守將有吳長慶等三營。又截留

梁美材等三營分段繕守。乘賊喘息未定。一擊卻之。十五日王占魁出城雕勦。又捷於羅家埠。至十九日。忠會大股自石澗埠而來。悉萃廬江。圍撲城池。臣飛檄鮑超舍舟登陸。轉援廬江。而廬江之賊已於十九二十等日。經吳道蔣凝學分軍營勦。賊退七里河。是夜設伏誘賊。大挫兇鋒。執僞天將羽天福於陣。維時捻逆張宗兩。髮逆馬融和等。由豫而鄂而皖。閉道疾馳。足無停趾。瞬息而至桐城。守桐城者。爲湖南提督周寬世。出戰於三里街。凌厲無前。賊大怖。將謀宵遁。我軍聯騎追勦。該逆遂往孔城鎮。與忠會合而爲一矣。二十三日。忠會前隊衝至六安州之十里埠。該州城大而圯。留守者僅有蔣凝學部下王臨祥袁秀林兩營。及糧臺道員曾廣翼。知州何家驄而已。四人者力籌守禦。二十四日。賊以大股繼至。自東南迤北而西。植旗若林。面面結壘。軍士守定壕口。各以巨礮環轟。曾不少卻。二十五日。賊分三路來攻。將抵城根。東門城垣久爲風雨所損。猝傾六七丈。一時塵土蔽空。羣賊大呼。擁入王臨祥厲兵齊上。抽刀攢刺。擲尸城下。曾廣翼袁秀林飛騎繼至。悉截進口之賊。搶築木城二道。二十六日。賊攻小北門。旋即擊退。二十七日。賊衆傾巢而出。自北城以至西城。幾無寸隙。憚我城上礮火猛烈。欲前且卻。其尤悍者。挽盾直前。誓以死搏。我軍屹立不動。俟其躍過城壕。火球擲下。焚賊無數。始各裹尸而退。二十八日。曾廣翼王臨祥見城南一二里外。掩映賊旗。徘徊不進。乃令勇士縋城馳擊。斃賊六人。三十日。又縋死士出。覘鮑家圩擄糧之賊。軒僞富天豫張承得擒僞左監議劉朝柱。臣以六安州係淮南樞紐。恐忠會與苗捻勾合。愈不可制。檄鮑超由廬江往援。檄劉連捷彭統橋毛有銘由無爲州往援。鮑超將至舒城。賊遂於四月初二日。解圍遁往廬州。一路。此廬江桐城舒城防守得完。及六安州解圍之情形也。臣查無爲州爲江北之膏腴。六安州爲皖鄂之要衝。忠會以全力圍撲石澗埠。冀破無爲。旋由廬江舒桐糾結捻股。圍爭六安一城。其行蹤爲至疾。其蓄謀爲至狡。諸將士苦善戰守。城營均獲保全。使賊不敢橫竄鄂疆。均屬著有微勞。所有固守石澗埠六安州。尤爲出力之布政使銜記名按察使劉連捷。請交部從優議敘。記名道毛有銘。請賞加按察使銜。並賞給勇號。藍翎江西候補道曾廣翼。請賞加鹽運使銜。並賞換花翎。候補副將王臨祥袁秀林。均請交軍機處記名。遇有總兵缺出。請旨簡放。署安徽六安州事。補用同知直隸州何家驄。請以知府補用。先換頂帶。其餘出力員弁。可否容臣查明酌請獎敘之。

處。出自聖恩。花翎參將黃仁親。藍翎都司趙人和。藍翎守備蕭淇松。守備劉紹志。藍翎千總吳秀高。藍翎把總李
大材。毛昌。五謝仁。馮藍翎外委李升山。沈謙德。向慎光。外委童景星。均在石澗排接戰陣亡。應請勅部各照本職。
從優議卹。所有皖北各城營防守解圍緣由。謹繕摺由。驛五百里馳奏。伏乞皇太后皇上聖鑒訓示。謹奏。

覆陳淮鹽暫難改辦官運摺 同治二年四月十一日

奏為淮南引鹽察酌現在情形。暫難改辦官運。恭摺覆陳。仰祈聖鑒事。竊臣承准議政王軍機大臣字寄。同治元
年十二月初十日奉。上諭。一本日據中允錢寶廉片奏。請官運淮鹽。以裕軍餉等語。淮南鹺務。廢弛已久。現在運
販楚北者。劣員奸商居多。曾國藩雖設卡抽釐。而所得未多。前據戶部奏請。飭該大臣酌提成本。由官督運。則利
權操之自上。而於皖浙軍餉。必能稍資接濟。茲據該中允所奏。與戶部前奏。是否可行。著曾國藩一併悉心議
奏。一等因欽此。旋於本年正月二十八日。接准戶部來咨。一淮南鹽務。應先試辦官運一案。經該部詳晰具奏。請
飭臣遴選公正大員。實心經理。奉旨依議。欽此。一並鈔錄原奏咨照到臣。當即轉行兩淮運使喬松年。議覆去後。
茲據該運使詳稱。竊繹戶部之意。係欲加徵課銀。收回引地。以冀漸復舊規。又恐商販不前。改由官運。洵是籌辦
南鹽至要之策。無如引地為鄰鹽侵占日久。籌銷極難。正課因釐捐抽納過多。加增非易。上年江路漸通。楚西兩
岸。亦嘗招商試辦。乃以淮鹽久不到岸。所銷盡是川鹽粵鹽。蓋川粵之成本較輕。賣價可減。淮鹽之成本最重。賣
價獨昂。故淮鹽之疲滯。斷不敢川粵各鹽之旺銷。則商既不前。即官運亦恐無起色。至部文所稱。仍以四百斤為
一引。令繳正課每引三兩七分三釐零。係照承平時科則而言。現在除完課外。運司衙門所收釐金。及沿江各釐。
每鹽一票。約共完銀十五兩以上。釐捐如是之重。是以試運楚西之鹽。止能照稅鹽章程完納稅鹽。每票九百斤。
僅完課銀一兩八分。尚且無利可圖。今欲以四百斤鹽完三兩有零之課。其勢更有難行。若議減釐增課。則各路
軍餉處處皆待釐金接濟。豈能遽為裁減。部文又稱令運使嚴禁奸商私行與販。以疏官鹽銷路。查私鹽自應嚴
緝究辦。若因官運而概禁商人運鹽。則恐官運猶未辦成。而商販轉先裹足。况南鹽運本極大。籌辦官運。縱有十
萬兩之本。尚未足以資周轉。亦不能不藉羣商之力。廣為興販。開拓銷路。部文又稱勸諭商民捐輸運本。雖准按
照舊餉例減成給獎。而江北捐款林立。減折上捐。所在多有。斷難期其踴躍。部文又稱聞內地現已購備輪船七

隻。於此項船內撥出數隻，拖帶鹽船。查前購輪船，尙未入江，且爲水師交仗而設，斷難撥爲拖帶鹽船之用。至商販公雇輪船，報明在案者，現有四隻，若歸官運，卽此雇船之費，已不易籌。蓋淮南目下情形，不患無商之可招，而患無利之可獲。惟有將楚西兩岸銷路，大加整頓，仍由運司衙門，招來新舊各商，趕赴楚西銷售，以期淮鹽逐漸進步，爲得寸得尺之計。前經都統富明阿奏請招商，旋派知府杜文瀾前往楚北試辦，如果辦有成效，再當另議章程詳辦。等情，具詳請奏前來。伏查各軍餉絀，是臣之隱憂，兩淮鹽務，是臣之專政。假使官運淮鹽，果有大利可圖，臣豈不思竭力籌辦，謀本分自然之利，濟本營非常之貧，無如楚西兩岸，被粵私川私侵佔太久，斷非一蹴所能挽回。此時必欲爭回引地，非大減賣價，則不能敵鄰私。非先輕成本，則不能跌買價。據現行事例，九百斤一引者，並鹽本稅課，釐金、運脚、拖費，計算幾及四十兩。成本已屬極重。若如部議，減爲四百斤之引，加爲三兩有零之課，又以重價購買之輪船，拖帶試行之官鹽，則成本更重。安能敵鄰私而暢銷路？若將各處釐金，概議裁減，則下而鎮揚，上而九江，湖北之關釐，皆將向巨處索取。而臣軍除沿江鹽釐外，亦別無可籌之餉。實有不能終日之勢。臣悉心酌核，官運雖屬良法，目前尙多窒礙，應暫照該運使所議，俟富明阿派辦之官鹽，試行有效，再行另擬章程。奏明辦理。所有准鹽現難改辦官運，遵旨議覆緣由，謹繕摺具奏。伏乞皇太后、皇上聖鑒訓示。謹奏。

近日軍情片 同治二年四月十二日

再近日軍情。雨花台、金柱關、蕪湖、東西梁山各營，水陸穩固，均無戰事。寧國附近如南湖、新河莊等處，涇縣附近如茂林、章家渡等處，均有賊蹤游弋，防務尙難鬆動。然寧郡及涇縣、南陵、青陽各城，灣址及西河清弋、江各隘，水陸防守，綦布星羅。朱品隆在青陽，亦於春末夏初，疊獲勝仗，保寧國之後路，足以仰慰宸廑。徽郡防兵單薄，是臣布置最疏之處。去冬寧國之賊，今春浙東之賊，現在彙集於石埭、太平及徽郡饒景一帶，實屬防不勝防。勦不勝勦。幸左宗棠派劉典一軍，沈葆楨派王沐一軍，先後援徽。三月十七日，會克黟縣。十九至二十五等日，搜勦近城之賊。大破廬村、黃村之賊。王文瑞亦將柏溪金字牌零股，一律擊退。黟郡境內，甫靖瘴氛，而賊之竄往鄱陽者，已自梹田街進逼浮梁。王沐將回駐景德鎮，劉典亦將馳援饒景。江西之門戶可虞，而徽州之空虛尤可慮矣。現調

李榕一軍。由北岸馳赴建德。進援祁門。調席寶田一軍。由湖南馳赴撫州。進授徽境。不知能迅速趕到。併力驅除否。僞志三百六安州。每圍下竄。或稱其回救蘇州。或稱其圍犯揚州。裏下河。或稱其糾合苗黨。竄擾濱淮各屬。其確耗。尚不得知。然悉數夷越。并未西犯鄂疆。卽屬大局之幸。臣現檄龍超由廬州追擊忠倫。卽從柘皋進兵。以攻葉縣之北。檄劉連捷彭統橋蕭慶行從迎塔塔進兵。以攻葉縣之東。檄蔣庭學毛有銘由六安進援壽州。並調成大吉白鄂回皖。會師壽州。共討苗黨。該州糧缺兵單。倘能嬰城固守。再過半月。各軍次第趕到。合力補剿。而僧格林沁李續宜遵旨偕來。諒屢叛之逆豎。保長淮之重險。庶足以彰天討而定人心。除各路戰狀。分案續奏外。合先附陳大概。伏乞聖鑒。謹奏。

恭謝天恩。溼陳下清播。同治二年四月二十二日

奏爲恭謝天恩。溼陳下清播。仰祈聖鑒事。竊臣接准兵部火票。送到同治二年三月十八日內閣奉。上諭。浙江巡撫著會國荃補授。欽此。一當經恭設香案。望闕叩頭。謝恩訖。又恭讀寄諭。一浙省係左宗棠兼轄。臣兼署巡撫。尤責無旁貸。會國荃著仍統前敵之軍。駐紮雨花台。一意相機進取。以圖金陵。毋庸以浙事爲念。一等因欽此。仰見皇上破格錄用。委曲培成之至意。准是受恩愈重。報稱愈難。現在髮捻紛乘。苗練復叛。軍情反覆。世變環生。祇貽宵旰之憂。會之補苴之術。每與巨擘國荃。寓書傲暢。慚悚交并。本年二月。臣至雨花台大營。與臣弟共處八日。慨兵事之方殷。感王恩之極渥。中夜奮興。互相誠勉。以大局論之。沿江三千里。名城要隘。皆爲我有。加以浙東列郡。蘇松各屬。次第克復。凡山川筋脈之地。米糧百產之源。該逆一無可恃。未嘗不託聖朝之威福。冀功績之可成。而一念夫拓地日廣。頓兵堅城。戍守之卒太多。游擊之軍太少。師老餉竭。士氣漸疲。羣盜如毛。飢餓四竄。竊號之寇未滅。流賊之患或興。則又爲之登頌。敬獻。愧臣兄弟。謬當重任。深恐上辜君恩。下負民孳。遂陷於大戾。而不自知。憂灼之餘。每思避位讓賢。稍分責任。又不取數數陳奏。上瀆宸聰。上年正月間。臣密陳金陵未克以前。不再加恩。臣家誠以功名之際。終之實難。消長之機。盈則必缺。會蒙寄諭嘉許。俯鑒愚忱。臣弟國荃。旋擢藩司。已叨非分。今又特沛恩綸。授以開府之榮。專其治軍之責。聞命而後。已悶兼旬。臣與臣弟兩次函商。欲固辭則頗涉矯情。思立異於當世。欲受事則不自量力。懼貽譏於方來。再四躊躇。誠恐治軍無效。傾覆尋至。不如少安愚拙之分。徐圖尺

寸之功。惟有籲懇天恩。收回成命。俯准臣弟以開缺藩司。效力行間。與臣隨時熟籌戰守。相機進取。或者以勅補拙。以恐致福。迅克堅城。殄除醜類。稍答高厚。鳩慈於萬一。除由臣弟國荃專摺瀝陳外。所有微臣感激下忱。理合繕摺叩謝天恩。伏乞皇太后皇上聖鑒。謹奏。

謝會貞幹予謚建祠恩摺 同治二年四月二十二日

奏爲恭謝天恩。仰祈聖鑒事。竊臣接准江蘇撫臣李鴻章咨稱。同治元年十二月三十日內閣奉上諭。前據會國藩奏知府會貞幹積勞病故。嘗經降旨追贈按察使銜。照按察使軍營立功後病故例議卹。茲據李鴻章奏報會貞幹力疾督戰情形。並臚陳生前戰績。懇請逾格優卹一摺。已故知府會貞幹。隨同伊兄會國藩等。從事戎行。治軍有紀律。善拊循戰士。履危蹈險。堅固不搖。咸豐十年克復太湖縣城。十一年克復安慶省城。本年肅清江北各城。進圍金陵。皆會貞幹之力居多。七八月間。大股援賊數十萬人。圍撲雨花台大營。屢爭官軍餉道。該故員從容布置。防勤兼施。力戰苦守。四十餘日。使賊卒不得逞。被創遁去。乃因在軍日久。勞苦憂思。遂致一病不起。以死勤事。實屬可嘉可憫。會貞幹著加恩照二品例議卹。並准其予謚。於本籍及死事地方。建立專祠。仍宣付史館特予立傳。以彰忠藎。欽此。聞命之下。感泣難名。當卽恭設香案。望闕叩頭謝恩。伏念臣弟貞幹本無遠略。夙抱愚忠。十載從戎。未酬培穴擒渠之願。九原齋志。空懷渡河殺賊之心。仰蒙哀贈臚卹。優卹後嗣。已沐逾恆之典。實爲曠代之榮。重壤增輝。結草不足伸其報。闔門銜感。臥薪無以表其誠。乃撫臣李鴻章相距較遠。聞信稍遲。復具疏而上陳。荷恩綸之再賁。既增秩以崇班聯。更易名以表行誼。建祠兩地。忝附馨香。俎豆之林。列傳千秋。永垂神化。丹青之業。死而有知。感將何極。臣自愧庸愚。久膺艱鉅。下懷季弟未償之志。上戴聖主不次之恩。惟有率同臣弟國荃。香燭醜類。規取土疆。嘗膽以圖功。側身以修行。兢兢業業。冀竭涓埃報答之忱。子子孫孫。無忘高厚生成之德。所有微臣感激下忱。謹會同浙江撫臣會國荃恭摺叩謝天恩。伏乞皇太后皇上聖鑒。謹奏。

克復東關銅城開兩隘摺 同治二年四月二十七日

奏爲水陸各軍。會克東關銅城開兩隘。恭摺馳陳。仰祈聖鑒事。竊自僞忠王李秀成在六安州解圍下竄。鮑超跟蹤追擊。卽從柘皋進兵。以攻巢縣之北。劉連捷彭毓楠蕭慶衍等從迎珠塔進兵。以攻巢縣之東。臣國藩於四月

十二日附陳大概在案。惟是欲圖巢縣。必先力取東關銅城關以毀其門戶。初五日。臣玉麟商令蕭慶衍彭毓楫等。專攻銅城關。派水師會泗美會合劉連捷。毛有銘。專攻東關。踞東關者爲僞閩天安蕭逆。高壘深溝。擁衆堅守。劉連捷知該隘之未可力爭也。乃於初六日夜令師船。由蟹子口潛渡。陸軍緣堤埂而進。伏於九峯山下。另派譚國泰帶勇士數十人。從東關近處。以木盆偷渡。毀柵越壕。突逼壘下。肉薄而登。賊以礮石外擊。密若飛蝗。胡德雲石太和從烟箴中驚梯直上。中礮死之。劉連捷遂督副後南後兩營。奮力繼進。會泗美從水路列礮環轟。聲徹霄半。壘賊惶遽欲遁。九峯山下伏兵齊出。合軍衝殺。立破石壘。遂於五更克復東關。黎明。七陳村打鼓山南水坳之賊。一齊來援。劉連捷令譚國泰守定石壘。親率副後等營迎敵。毛有銘率湘右等營。由九峯山斜刺而入。賊乃卻走。我軍以賊未受創。必將復至。遂於石壘之旁。增修一壘。以爲犄角。嚴陣以待之。俄報賊又從林頭鎮吳家村揚隊而來。毛有銘隨令葛清泰向南水坳進。自率湘右營繼之。劉連捷令李瑞二向打鼓山進。自率副後營繼之。王載駟向九峯山進。乘乘珩向七陳村進。分道並進。搏鬪移時。王載駟等聞南水坳打鼓山之兵。已將得手。卽帶部卒搶上九峯山。會泗美率舢板從河曲中出。斷賊歸路。擒斬甚衆。盡焚各賊卡賊館而還。此四月初七日。攻克東關。并擊退援賊之情形也。其陸師之分攻銅城關者。蕭慶衍彭毓楫等軍。於初六日由黃墩渡河。過八角廟下寨。會約喻俊明成發翔張錦芬唐敏義水師四營。奮攻一日夜。賊但堅修老巢。伏匿不出。并於南北兩街。各添四壘。爲負嵎死守計。時值河水泛溢。圩田皆成巨浸。臣玉麟於初七日令喻俊明成發翔等。鑿開土埂。師船從決口駛入。南北兩圩。直薄賊巢之下。更番擊之。初九日各軍會商。留彭毓楫所部。扼守八角廟。分蕭慶衍所部。移勦百旺市五顯集一帶。先清銅城關之後路。分軍爲三百旺市接戰正酣。三汶河雍家鎮兩支亦至。遂將兩處卡壘。一律平毀。振旅而旋。水師之入南北圩者。乘勢猛攻。環賊壘之三面。皆有舢板小划。拋擲火毬。陸軍亦萬槍齊放。五更時踞毀南城土壘。遂攻破銅城關一隘。駢尸塞道。幾無脫者。而林頭鎮另股亦旋爲水師擊走。此四月初十日。續克銅城關之情形也。臣等查賊踞北岸。以巢縣爲根本。以東關銅城關爲屏蔽。橫據重險。賊計甚堅。仰賴聖主威福。將士同心。數日而下兩隘。從此飽超。攻其北。劉連捷扼其南。蕭慶衍彭毓楫圍其東。巢縣必有可克之機。此次力戰陣亡之藍翎千總彭勝華。藍翎把總曾彩雲。把總胡德雲石太和等。應請勅部從優議卹。以慰忠魂。所有水

陸會克東關銅城圍緣由。謹繕摺由驛五百里馳奏。伏乞皇太后皇上聖鑒訓示。謹奏。

近日軍情并陳餉絀情形片 同治二年四月二十七日

再近日軍情。大江南岸雨花台各營。堅守如常。蕪湖寧國南陵數城。金柱關灣沚西河數隘。水陸布置。防務尙鬆。涇縣守將易開俊於四月十八日。在章家渡擊賊大勝。朱品隆亦在青陽境內。擊賊屢勝。徽州自王沐回駐景德鎮後。賊又從太平竄入歙縣之許村。唐義訓督軍擊卻。追出箬嶺。前調李榕南渡一軍。十九日進攻建德。未下。二十三日。再戰克之。臣檄令進攻彭澤鄱陽會合韓進春席寶田等軍。由內打出。冀埽上游之羣賊。而保江西之完區。大江北岸自忠酋下竄。賊勢漸衰。我軍攻克東關銅城開。劉連捷進紮荃城岡。彭毓楨進紮葉縣東門。水陸攻擊一晝夜。遂於二十二夜。克復葉城。現檄鮑超與蕭慶衍彭毓楨劉連捷諸軍。進取和含二浦。直達九袱洲。冀驅賊併歸南岸。較易勦辦。苗沛霖圍攻壽州。已逾一月。城中僅有五百人。絕糧者八日。署知州毛維翼與民苦守。可嘉可觀。蔣凝學於十六日自六安援壽。甫抵謝埠。又爲羣捻所阻。毛有銘自東關援壽。以無餉可領。軍行稍滯。成大吉自麻城援壽。亦以餉缺未能成行。今年兵事之遲鈍。半由於需餉之奇絀。臣部八萬餘人。益以李續宜部下二萬人。欠餉多者十五箇月。少亦八九箇月。昨鮑超自縱陽登岸。苦無途費。其部卒逃散一千餘人。毛有銘自東關起程。其部卒逃散數十人。并據將倡逃之將弁鄒慶星等。稟請參革。臣帶兵九載。今年始有餉匱兵逃之事。從前徽寧兩防。每月額餉二十萬。皆由浙江供支。臣接辦以來。庚辛二年。奏撥江西漕折。每月五萬。至壬戌年。奏撥四萬。奉旨允准。旋經撫臣沈葆楨奏。留供本省防兵之用。戶部議准。而臣所統徽寧兩防。遂無一毫可恃之餉矣。江西通省釐金。臣指定河口景鎮等卡。協濟左宗棠。月約三萬兩。指定吳城等卡。協濟彭玉麟。月約二萬數千。又撥給本省水師劉于濤孫昌國兩軍。月約二萬數千。四處共支去八萬。而實解臣臺者。遂無幾矣。湖南東征局釐金。今年因米價昂貴。留楚買米。而現銀解皖者。亦無幾矣。廣東釐金。奏定專充皖浙軍餉。近亦有留供本省之議。臣力小任重。統軍過多。每月需額餉五十餘萬。而入款不過十餘萬。不敷之數甚鉅。且唐訓方近駐臨淮。李世忠近駐滁州。索餉之文。月凡數至。即赫德所購輪船。指日可到。亦必向臣處索餉。昔以數人分辦之軍務。今專責於一人。昔以各路分籌之軍餉。今併萃於一身。夙夜懼。恐微臣之顛踣立見。而大局之決裂尤可虞也。臣在軍多

年從不敢輕上請餉之奏。蓋不欲以危詞上煩聖聽。又不欲以苦語渙散軍心。茲因有勇丁逃散之案。不得不據實密陳。可否竊懇天恩。在於九江洋稅項下。每月撥銀三萬兩。解皖濟餉。出自鴻臚。仍懇勅下廣東督撫。將釐金全解皖浙。本省不得截留。大局幸甚。臣忝任江督。已滿三年。前二年事機稍順。去夏至今。變故紛乘。幾蹈大戾。目下風波雖定。憂悸未忘。誠恐積日累年。更無成效。仰祈皇上天恩。特派大員來南。於欽差大臣兩江總督二篆之中。分節一篆。俾臣責任略輕。稍釋惴慄之懷。臣昨專差進京。與臣弟國荃并辭浙撫之命。亦因誠淺才疏。恐妨賢路。均祈俯鑒。懸忱。次第允准。不勝感激悚切之至。理合附片密陳。伏乞聖鑒訓示。謹奏。

金陵軍攻克石城石壘摺 同治二年五月十二日

奏爲官軍攻破雨花台僑城。及聚寶門外諸石壘。恭摺馳陳。仰祈聖鑒事。竊僑忠王李秀成。自六安戰敗。率衆東竄。紛傳將回救蘇州。江蘇撫臣李鴻章函商曾國荃。囑其力攻上游。以分賊勢。無令忠酋得以全力援蘇。曾國荃以忠賊回援蘇州。固屬可慮。即直犯揚州。裏下河。尤爲可虞。計莫如急爭金陵老巢。以攻其所必救。使城中之賊。不暇遠趨蘇郡。而北岸之賊。亦不敢專注揚州。乃於四月二十七日。宣諭各軍。多備攻具。先登者上賞。退後者必誅。漏甫二下。齊隊出壘。六路併進。每路以一營爲前鋒。兩營爲策應。令李臣典趙三元武交靖等。專攻雨花台石城。趙清河黃東南攻聚寶門外南卡石壘。晏禮遇易春光攻西卡石壘。何玉貴張詩日楊西平攻東卡石壘。又令陳湜率李定元朱文光羅景集等。出中路應之。蕭孚泗率蕭致祥李泰山胡松江等。出右路應之。易良虎禹志蓮等。出左路應之。前鋒各營。於三更時匍伏蛇行。偷近石城石壘。東草填濠。架梯欲上。賊遽驚覺。燃礮外擊。我勇中礮而踣者五人。衆勇辟易。李臣典立斬二卒。率旗直前。軍中無敢少後者。羣以火箭火毬。盤空飛擲。悉入石城。天漸霽明。趙三元率中軍親兵。從礮台下蟻附而升。李臣典武交清各率部卒。從中右兩路。肉薄齊登。維時敵樓火發。賊方爭相奔救。不料烟霾中人聲鼎沸。亂鋒交下。我軍已奪僑城一座。該處地高勢險。倚瞰東卡。西卡。南卡。九石壘。歷歷在目。旋見趙清河黃東南。旻禮週何玉貴等乘勢猛擊。平毀數壘。餘即棄壘竄遁。蕭孚泗易良虎陳湜縱軍圍勦。將賊追過長王橋。蹙逼入水者無數。曾國荃以南花台地段遼闊。近接城圍。賊必與我爭此要害。乃抽四營駐守石城。增修六新壘。以接各舊營之氣。並調集後路各營以待之。未幾。城賊出大股。潛匿附郭屋舍中。以

誘敵各軍蓄銳不發。俟賊少懈。突出奮擊。蕭孚泗陳湜易良虎扼其前。趙三元趙清河黃東南晏澧週易春光伍維壽等截其後。賊不得逞。遂繞雨花台。乘我新營未定。悉銳猛攻。抵死不退。李臣典趙三元武交清張詩日等。奮除馳援。黃潤昌成東昂等。亦引軍來助。搏鬪移時。賊乃負創入城。是役也。俘執逾二百名。殲戮近六千人。奪獲礮械尤多。軍士亦小有傷折。臣查雨花台及金陵南門外各石壘。據險雄峙。屏蔽城垣。昔年和春張國樞等。屢攻未下。茲賴聖主威福。諸將同心。克此堅壘。不特可分蘇揚之賊勢。亦於信勘金陵。深裨裨益。此次首先登壘。戰功最著。之提督銜記名總兵李臣典。請交軍機處記名。遇有提督缺出。請旨簡放。記名總兵晏澧週。請簡授總兵實缺。並賞加提督銜。副將趙三元武交清趙清河何玉貴黃東南伍維壽。均請交軍機處記名。遇有總兵缺出。請旨簡放。其餘出力人員。可否附於葉舍和案內。容臣開單保奏。出自恩施。陣亡各員弁。查明另案請卹。所有官軍攻克雨花台等處石城石壘緣由。謹會同大學士湖廣督臣官文。江蘇撫臣李鴻章。由驛五百里具奏。伏乞皇太后皇上聖鑒訓示。謹奏。

水陸會克葉舍和三城摺 同治二年五月十一日

奏爲水陸各營會克葉縣含山和州三城。恭摺馳報。仰祈聖鑒事。竊自官軍疊克東關銅城閣後。遂由望城岡攻復巢縣。臣國藩於四月二十七日。附陳大概在案。先是銅城閣既克。劉連捷與蕭慶衍彭毓楨謀欲取巢縣。必自進兵望城岡始。十六日劉連捷率所部各營。會合彭毓楨陸師。成發翔水師。分道並發。行不數里。詎知筭箕山麓。伏有賊股。劉連捷恐爲所乘。始駐軍以觀其變。俄而賊已大至。一枝由陳村來。一枝由斬龍岡來。旌旗迷目。布滿原野。我軍整隊禦之。賊恃衆悍。往來猛撲數次。互有損折。旋分賊竊掠陣而過。劉連捷知有狡謀。麾兵稍退。賊已半鈔後路。適礮艇連橋駛至。彭毓楨亦帶馬步六營。從斜徑刺入。三路合圍。擒斬頗衆。劉連捷乘賊戰敗。遂於筭箕山搶築營牆。彭毓楨驅賊至七八里外。仍回駐迎珠塔下。十八日蕭慶衍率師來會。遂於十九日進次洪家山。輕騎至望城岡履勘形勢。遙見賊於葉湖口岸。跨水爲壘。水際密排賊剋。阻我進兵之路。成發翔會泗美會督澄海清江左右四營。決開圩堰。灌水入圩。更鑿圩內大隄。將移舢板以入。巢湖賊乃增壘塞隄。百計擄我。卒不得逞。二十日蕭慶衍劉連捷兩軍。披赴望城岡。未及下寨。賊即擁衆渡河。成發翔俟賊半渡。令各水營由決口飛礮進

圩。由圩達湖。鈔過賊後。賊方遠巡卻顧。我舟師已橫截圩中。萬礮齊轟。斷其歸路。成發翔會泗美等。又分水勇。乘勢登陸。四出痛勦。賊酋蕭主將臬悍絕倫。左營裨將李宏試縛而斬之。羣賊奪氣。不知所爲。我軍水陸交攻。襲破二卡一壘。壘中壘外。積尸若阜。罕有逃脫者。此四月十六日大戰筭箕山。二十日偃黎壘城岡。堵勦獲勝之情形也。壘城岡既紮定。則葉縣之南。賊無竄路。陸師可薄城而營。水師亦可繞湖而陣。二十一日。彭毓橋由迎珠塔拔隊進札東門外之塞廟地方。蕭慶衍撥軍護之。次日。水師成發翔唐敏義從南堤入五聯圩。轉攻西門。張錦芳攻五聯圩。隄上之石卡。會泗美喻俊明同攻東門石壘。並約陸師彭毓橋移逼城根。揚隊搗賊。賊據城壘。矢石交下。我軍且卻且前。相持竟日。二更後。水師環隄猛擊。悉焚湖中賊划。毀其浮橋。火毬橫擲入壘。火箭飛射入城。喧聲鼎沸。劉連捷亦自河南飛騎馳至。共破塞廟沿河六石壘。壘賊競向東門進城。會泗美喻俊明即躡蹤從東門而入。成發翔等從南門攻入。適鮑超亦派數營。自盧郡西來。遂於二十二夜。克復葉縣。二十三日。鮑超由柘皋督軍出清溪鎮擊賊。勝之。略地而東。是晚蕭慶衍亦截尾賊於林台圩。旋合劉連捷彭毓橋等營。渡河前進。於二十四日。與鮑超會師含山。而賊已宵遁。鮑超蕭慶衍等。以賊去未遠。星夜往襲和州。比入州境。天甫曙也。但見賊旗靡亂。不絕於道。而水師成發翔約駐泊鱖魚背之楊占鰲已駛入和州港內。城賊逃遁不及。半聚壘中。鮑超蕭慶衍與水師環壘急攻。賊大怖。出壘乞降。盡釋脅從者。而斬其頭目以徇。於是各整部伍入城。少息。所獲遺穀甚多。此二十二日攻克葉縣。二十四五等日。連復含山和州之情形也。臣等查賊渡北岸。由和州而含山。而葉縣。力爭要地。堅踞數月。意將西竄鄂省。北犯淮甸。掣動上游之全局。冀解金陵之重圍。幸仗天威。大彰捷伐。四日之內。壓下三城。從此進取江浦九江洲。或可剪其枝葉。圖拔金陵。此次苦戰數月。記名提督江南京口協副將成發翔功績最偉。應如何優加獎勵之處。恭候聖裁。按察使銜記名道彭毓橋請賞給勇號。記名提督蕭慶衍請賞給提督應得封典。記名總兵張錦芳。副將李宏試均請賞給勇號。副將會泗美請交軍機處記名。遇有總兵缺出。請旨簡放。總兵銜副將劉長槐朱吉玉趙太和。均請以總兵記名。請旨簡放。并賞加提督銜。副將唐敏義請賞加總兵銜。其餘出力人員。容臣等查明擇尤酌保。籲懇恩施。以資鼓勵。至力戰陣亡之花翎副將銜參將陳邦榮楊繼隆傅堂春。花翎游擊鄭楨祥。藍翎游擊劉春福。都司丁文彬。藍翎守備張彪。藍翎外委屈傳芝。顏隆許李連勝。及因傷身

故之花翎副將黃福田。花翎游擊潘宏勝二員。均請勅部分別從優議卹。所有官軍水陸會勦。疊復三城緣由。謹繪摺由驛五百里具陳。伏乞皇太后皇上聖鑒。謹奏。

近日軍情片 同治二年五月十二日

再近日軍情。南岸會國荃一軍。自克雨花台石城。及南門外各壘後。汛地愈廣。防兵愈單。抽調金柱關守兵千人。移紮金陵。又調回彭毓橘一軍。回顧老營。仍留劉連捷步隊。楊鎮南馬隊。隨同鮑超進攻江浦九洲等處。其蕪湖金柱關寧國灣。迤西河東西梁山青陽南陵池州一帶。節節布置。均尙穩固。五月初三日。太平石埭之賊。分竄茂林涇縣。守將易開俊督軍痛勦。殲斃盈千。徽州自四月肅清後。近無戰事。其竄江西之黃金等股。在鄱陽浮梁境內。屢爲官軍所敗。現在斜趨都昌湖口等屬。李榕一軍。於端午日破賊於彭澤之衆家山。初七日進援湖口。綜計饒州九江各屬水路。有劉于濤孫昌國左光培丁義方等營。陸路有段起李榕席寶田王沐韓進春等營。而劉典又自徽州赴饒。聞江忠義亦將自湖南赴潯。水陸兵力。會萃數萬。當可驅賊出境。不使深入腹地矣。苗逆攻圍壽州。繞城築壘數十座。周以長壕。城西濱淮一路。環列礮船。帆檣如織。蔣凝學毛有銘援壽之師。於四月二十七日進扎九里溝。二十八日之戰。雖破牛尾岡三壘。而我軍傷亡頗衆。官弁陣亡至二十四人。士氣稍沮。臣已飛催成大吉由湖北迅赴三河尖。爲西路之援應。並悉周寬世由桐城馳赴六安。分札州城及謝阜馬頭集。保蔣凝學等之後路。又以長淮千里。並無得力水師。飭派李朝斌帶太湖師船十營赴滬。調現駐滬上之黃翼升帶淮揚師船六七營。由洪澤湖入淮。一則各歸本汛。仍符奏設水師之初議。一則駛至五河以上。掃清潰渦。淮肥汝潁諸巨川。俾苗逆不得盡收水濱之利。惟壽州城中。僅五百饑疲之卒。無升斗續進之糧。累月苦守。危在旦夕。赴援之陸師。既不能並力衝入。續調之水師。又不能尅期來會。誠恐要地難保。無以慰州牧毛維翼等倒懸之望。憂灼之餘。彌增愧歎。除各路戰狀。分案續報外。合先附陳梗概。伏乞皇太后皇上聖鑒。謹奏。

攻克江浦浦口九洲洲江面一律肅清摺 同治二年五月二十七日

奏爲水陸各軍會克江浦浦口二城。草鞋夾燕子磯等數隘。并力破九洲洲一關。江面一律肅清。恭摺馳報。仰祈聖鑒事。竊自巢舍和三城相繼攻克。旋破雨花台等處石城石壘。臣等於五月十二日陳奏在案。厥後鮑超與蕭

麥衍劉連捷等。在和州慮軍數日。正寢。幸捲東下。疊探報賊中以兩花台連破百壘。恐官軍大舉攻城。又以崑
新軍克。恐軍大舉圍。李季成與諸僞三將紛攻。議由江北返捷。近救金陵。遠救蘇州。於是天長六合安
等處。次第軍。軍南南。而賊之分。橋林小店者。亦於五月。初五日。冒雨掠舟。紛紛搶渡江面。入警。聞不絕。
竟。麥衍。度江浦浦口各賊。將無固志矣。乃遣騎隊襲之。行未中途。聞浦口之賊。先已棄城遁走。江浦之賊。獻書
請營乞降。能。遂劉連捷。察知其詐。於初九日。引軍疾進。蕭慶行。出烏江。與各水營會師。約戰。適李朝斌。統太湖水
師。將赴。上。亦於是時。道出金陵。初十日。李朝斌。派部將。鄔桂芳。李助。發江福山等師船。由大江衝卡。先駐浦口。
以扼。宏。餘黨之未渡江者。臣玉麟。自率定湘澄海清江三營。臣岳斌。自率親兵。左後護衛等營。並調正中副後
副右親兵。前四營。統入內河。詎師次江浦。而賊又聞風宵遁。遂會合陸師。將江浦浦口。一件收復。仍沿途追剿。鈔
過逃賊之前。賊正竄。奔九洲。洲上僞城之賊。不納。我舟師。截江圍擊。賊不得渡。爭向蘆葦中駭竄。不知叢葦密
處。水深丈許。或數丈。昔道光年間。備夷之。張國樑。禦賊之。又羣賊。歷年添修之。溝港縱橫。人馬紛。一蹶
卽。溺死者。積以數萬計。至十一日。餘賊。飢啼江邊。既爲新開河所隔。不得仍回北岸。又爲大江所阻。不得徑渡
南岸。各水師。分隊登陸。晝日輪攻。擐刃就戮者半。隨江自沈者半。惟新中營副將。鄔桂芳。飛將前驅。徑奪洲隘。中
砲死之。此五月初十日。克復江浦浦口兩城之情形也。二浦既復。我軍將有事於九洲。會國荃。乘夜至新江口。
與臣玉麟。臣岳斌。會勸該洲。在驚流急湍之中。高峙僞城。巨砲層列。對岸有攔江磯。中關。諸石壘。又有草鞋夾。下
關七里洲。燕子磯。十數堅壘。賊艦。賊划。與爲倚護。斷非陸師所能飛越。亦非水師所易猝攻。計莫如先取南岸。數
隘。庶撤其藩籬。而九洲洲乃有下手之處。十二日。派丁泗濱。許雲發。楊明海。胡俊友等四營。爲頭隊。從下關進。派
喻俊明。唐敏義。陶樹恩。嚴定國。羅宏裕。楊占鼇等六營。爲二隊。從草鞋夾進。更派彭楚漢。傅敏才。顏海仙。張錦芳
等爲三隊。以應之。臣岳斌。仍與李朝斌。往來督戰。臣玉麟。親督成發。銜任星元兩營。據九洲洲上流。作欲攻不攻
之勢。使洲賊。不暇兼顧南岸。調派既定。十三日。天未曙。丁泗濱。喻俊明。彭楚漢等。乃循兩岸飛駛而下。將逼賊
寨。賊竟萬砲齊轟。猝不得近其壘。我軍。預以枯荻灌油。縱火江上。先焚其舟數百。賊艦一時俱燼。衆勇乘勢薄壘。
有緣牆而上者。有從砲眼中搶險而入者。遂平下關草鞋夾。入賊壘。移師。轉向中關。該關內倚小河。外濱大江。水

流箭急，師船不能上駛。胡俊友舍舟邊陸，突出壘下。方將一躍而登，忽爲鎗子洞腹，蹙頰於陣。陶樹恩許雲發憤極搏戰，復受重創。士卒亦損折過衆，回軍暫息。乃於次日分兵襲破燕子磯，殺賊毀壘而還。此三十四等日，壘克下，關草鞋夾燕子磯三隘之情形也。先是，臣岳斌詢諸土人，知江濱叢莽中有隄埂一道，可達九洲。賊踞之外，至是商令陸軍劉連捷揚鎮南數隊，由隄埂缺處，斃水而進。派彭楚漢傳敏才顏海仙三營，從洲尾攻上。派張錦芳成發翔任星元三營，由洲頭攻下。派喻俊明唐敏毅嚴定國等，及李朝斌所部之李助發周正林江福山等營，各駕舢板繞洲奮擊。另飭丁泗濱羅宏裕楊占鰲等，由南岸分領水師，直趨中關。十五日昧爽，兩岸並舉，人人皆殊死戰。賊之在中關者，自恃附城爲壘，卒不稍動。其堅踞九洲者，下有賊划，上有僞城，千砲環轟，片刻不息。又於東西南三路，分伏洋鎗悍隊，伺間出擊，損我精銳，幾不可以數計。彭楚漢唐敏毅負劍角戰，誓得此隘而甘心。戰至日晡，賊少怠矣。乃於初更時，謀之成發翔喻俊明顏海仙張錦芳等，乘月色昏暗中，移船前近賊壘。會西南風大作，衆軍士火箭攢射，立焚水中拖罟數隻，風引火猛，然及洲上卡房。喻俊明李朝斌磨軍直上，成發翔任星元張錦芳在左，彭楚漢顏海仙傳敏才在右，各率弁勇大呼升岸。丁泗濱亦自中關鼓漿而來，躍過重壕，肉薄齊登。前鋒既殪，後者更進，踰者被戕，踐尸復登，竟以二更後，鷓鴣撲入，聚斂萃醜，無一脫者。遂奪九洲僞城一座，并獲大礮數百尊，牛馬旗械無數。此又十五日力克九洲之情形也。臣等查九洲爲大江關鍵，與金陵相犄角，實逆所必爭之地。幸賴天威震疊，奪此要隘，北岸盡爲我有，長江一律肅清。從此圍攻金陵，較有把握。諸將士酷暑鏖兵，血戰至五晝夜之久，傷亡至二千餘人之多，實亦可嘉可憫。此次尤爲出力之提督銜浙江定海鎮總兵喻俊明，浙江黃巖鎮總兵丁泗濱，記名總兵彭楚漢楊明海，均請交軍機處記名。遇有提督缺出，請旨簡放。彭楚漢一員，臣國藩曾於堪勝水師總兵案內，特保歷請先擢總兵實缺。記名提督浙江處州鎮總兵李朝斌，因赴滬之便，竭力助功，應如何加恩之虞，恭候聖裁。總兵銜記名提督江南京口協副將成發翔，前於克復甯縣案內，推爲首功。此次應如何酌獎，仍候聖裁。總兵銜副將楊占鰲，李助發嚴定國，副將顏海仙，羅宏裕，傳敏才，周正林，李宏試，均請交軍機處記名。遇有總兵缺出，請旨簡放。楊占鰲並賞加提督銜，李助發羅宏裕，顏海仙，傳敏才並賞給勇號。記名總兵張錦芳，請賞加提督銜。已保總兵銜副將唐敏毅，請賞給勇號。副將銜參將許雲發，陶

樹恩均請以副將營先補用。並賞給勇號。許雲發並加總兵銜。游擊江福山請以參將儘先選用。並加副將銜。其餘出力人員。可否由臣等專案奏獎。出自天恩。至總兵銜副將鄒桂芳副將胡俊友。力戰捐軀。深堪憫惻。均請照總兵陣亡例。從優賜卹。以慰忠魂。此外陣亡各員弁。容俟查明彙案奏卹。所有官軍克復各城隘。及九嶽洲緣由。謹會同大學士湖廣總督臣宣文。江蘇巡撫臣李鴻章。浙江巡撫臣曾國荃。恭摺由驛六百里具奏。伏乞皇太后皇上聖鑒訓示。謹奏。

近日軍情片 同治二年五月二十七日

再近日軍情。壽州一城。苗逆圍攻如故。蔣凝學毛有銘等於五月十三日。毀東皋峯逆壘數座。該逆續調悍黨。增修多壘。意在以長圍久困。城內米糧久罄。殺馬食土。聞苗黨有夜棹小舟。運麥入石。以濟城中者。可知從苗之心。亦不甚堅。臣現檄周寬世四營。扎迎河集及四十里鋪。保蔣凝學等之後路。成大吉於十四日在麻城之宋埠拔隊。亦令併援壽州。以厚兵力。其濱江一帶。自九嶽洲攻克後。留蕭慶衍駐江浦浦口。以固北岸之岸。派鮑超渡江。進紮孝陵衛。以合金陵之圍。十四日吳坤修萬化林等水陸勦賊。破楊四渡大壘。王可陞何紹彩周萬倬等。並在裘公渡雁翅鬥門。連破七壘。遂收復金寶圩。距蕪湖金柱關百里內。已無賊蹤。西河灣並各防。亦均穩固。寧國守將劉松山。先於初八日赴涇縣。與易開俊會勦灣灘大坑之賊。獲一勝仗。十六日僞襄王奉王等股。一由章家渡擾及丁村。一由大坑逼犯涇縣。易開俊分隊出擊。力戰卻之。其青陽守將朱品隆。既破梅嶺兩卡。又毀陵陽鎮四壘。直薄石埭城下。屢攻未克。回軍仍駐青陽。徽州嶺防。近無戰事。饒州景德鎮一帶。劉勝祥於十二日獲一勝仗。劉典席寶田於十四十五日。各獲勝仗。李榕抵湖口後。因病卒太多。賊勢太重。尙未接戰。俟江忠義到湖口。與饒軍兩路并進。江西各賊股。必可悉就驅除。臣當檄江忠義李榕席寶田等。各率所部。自石太漸進東壩。則攻取金陵老巢。較有把握矣。然金陵城大賊衆。諸酋目眷屬資財。萃聚於斯。洪逆老於戎事。又留僞忠王。不援蘇州。共守金陵。斷無輕棄之理。必須力斷接濟。仍照昔年攻九江安慶之法。嚴防江路。禁截賊糧。則餘百里之城。數十萬之賊。專恃肩挑陸運。勢必不給。數月以後。當有因飢內訌之事。查前此長江上下輪船。與紅單師船。均不免暗中濟賊。除紅單船一項。由城設法查禁外。輪船往來剽疾。稽察尤難。應請旨飭下總理衙門。照會英法各國公使。於金

陵未克以前。不得在該城外。停泊輪船。庶該逆城孤糧絕。不至又成持久之局。所有近日各路軍情。合先附陳大概。伏乞聖鑒訓示。謹奏。

覆陳金陵壽州軍情摺 同治二年六月十一日

奏爲欽奉諭旨。恭摺覆陳。仰祈聖鑒事。同治二年六月初四日。承准議政王軍機大臣字寄。五月二十七日奉。上諭。一會國藩前奏鮑超等軍追賊。已至江浦。飭令攻克二浦後。即進攻九洲。茲據都興阿等所奏。一江浦浦口。已於本月初九日攻破。七里洲於十二日攻破。九洲於十五日攻破。一九洲爲江中要地。賊踞堅壘。數年之久。官軍此次攻克。竟能敏速如此。都興阿等所奏。諒係實情。會國藩奏報。是否業已在途。著即將詳細情形。迅即馳奏。都興阿等摺內所稱。一忠逆帶隊渡江援浦。爲梁正源截擊於寶塔根。賊遂敗竄。一現在竄往何處。下關七里洲之賊。向中關回遁。其九洲踞賊。斃溺而外。是否尚有餘匪紛竄。均須確切查明。委籌堵剿。會國藩業將雨花臺賊壘攻克。茲九洲又爲鮑超等乘勢掃除。金陵勢成檻穽。其機大有可乘。應如何相機進據。及會商左宗棠李鴻章進攻蘇杭。使賊應接不暇。以圖進取之處。會國藩諒必有成竹在胸。惟窮寇必思鋌走。江路水陸寬廣。備禦宜嚴。裏下河一帶。尤應嚴密設防。一等因欽此。又於初八日續奉六月初一日上諭。一二浦九洲等洲克復情形。迄今尙未據會國藩奏報。前據都興阿等奏到。當經寄諭該大臣。迅將詳細情形。及水陸進攻機宜。迅速馳奏。此時諒已奏報在途。其馮子材等規復丹陽進兵機宜。並着該大臣妥籌指示。策應調度。以期互相犄角。毋誤戎機。唐訓方前奏爲苗逆所困情形。甚爲急迫。連日未得其奏報。慮系殊深。疊經諭令會國藩設法撥兵馳援。現在臨淮壽州蒙城等處。該大臣曾否派兵前往救應。如何布置。及各該處現在情形如何。著會國藩迅速馳奏。一等因欽此。仰見我皇上軫情南服。須臾不忘。竊二浦九洲等處。距揚州較近。而去安慶甚遠。揚州距京較近。而安慶又甚遠。臣於二十一日。聞九洲克復之信。二十五日始接各營公牘。即於二十七日馳奏。郵路阻長。不得與都興阿同時奏到。早慰宸廬。致朝廷殷殷瞻念。無任慚悚。各軍戰狀。臣已詳細馳報。其金陵近日布置。與苗逆近日情形。理合縷晰覆陳。諭旨垂詢餘匪紛竄。妥籌堵剿。及嚴防裏下河一節。臣查三月之杪。僞忠王銳意犯鄂。自攻撲石澗。準盧舒六安等城。連不得逞。折而東趨。又聞其銳意以犯揚州。並犯裏下河。厥後李鴻章之兵。攻破

崑山。進逼蘇州。會國荃之兵。攻破兩花臺各石壘。而蕪縣和含次第克復。於是逆謀大亂。紛紛南渡。遠救蘇州。近救金陵。天六來安瓜洲之賊。不擊而自退。江浦橋林浦口之賊。不攻而自破。在忠酋之意。收回山北羣賊。以全力保守江南。僅留精銳分守九洲湖七里洲等壘。與金陵相犄角。爲堅拒不拔之基。不料我軍大舉進攻。正值羣賊甫渡中洲。未達南岸之際。凡蕪渡之賊。與守壘之賊。環聚於濠汊蘆葦之中。各礮船繞舟圍攻。登岸搏戰。數萬悍寇。悉數聚殲。縱偶有倖脫者。不過逃歸金陵老巢。實未嘗紛竄江北。致貽裏下河之患。此臣自去冬以來所深慮。至是始稍釋隱憂者也。諭旨垂詢如何相機進搗。會商滬浙。攻取蘇杭一節。九洲湖甫克以後。臣卽檄鮑超南渡。撤蕭慶衍防守二浦。旋接楊岳斌會國荃來函。請調蕭慶衍同渡南岸。駐紮神策門一帶。而以鮑超一軍。繞過鍾山。直達孝陵衛。漸圍合圍。爲持重之謀者。則以城垣太廣。兵力尙單。不宜遽求合圍。恐大股援賊齊至。一隙可乘。全局俱震。爲制敵之謀者。則以浙攻富陽。滬攻蘇州。金陵亦宜迅速合圍。使該逆備多力分。不遑兼顧。或者致力於金陵。收效於蘇州。三處有一得手。兩處可期并下。臣亦主合圍制敵之說。與諭旨所示。使賊應接不暇者。暗相符合。特勁旅無多。不足以窳深根之寇。擬俟江西邊境蕩平。再調江忠義李榕席寶田等軍。由皖南進趨東壩。會勦金陵。一面咨請揚州鎮江防兵前來協勦。亦非旦夕所能集事。此籌勦金陵老巢之大略也。諭旨垂詢壽州蒙城近日情形一節。苗逆復叛以後。臣先後飭派蔣凝學毛有銘周寬世成大吉等援救壽州。壽州三面環水。僅南門一路可通。又以賊寨林立。與水際礮刻相爲倚護。四月二十八日之戰。毀牛尾岡三壘。五月十二日之戰。毀京皋峯數壘。二十六日猛攻城外賊壘未下。而我軍三次苦戰。已損精銳二千餘人之多。據署知州毛維翼遣死士甌水出城。稱城中野草雜蔬。摘食俱盡。道殣相望。勢將不支。蔣凝學毛有銘以重金啗苗圩。潛運米麥進城。冀再堅持數日。成大吉趕至。必可合解重圍。不謂六月初二日。運米者甫入。而下蔡外委邱維城。旋於初四日四更。舉城獻賊。毛維翼力戰死之。臣以壽州既陷。皖北與豫鄂三省震動。乃檄蔣凝學暫駐三河尖。辦足米糧。移紮潁州。以保要郡。而衛豫境。檄成大吉仍紮三河尖。以蔽鄂疆。檄周寬世退紮六安州。以固皖省。毛有銘暫駐六安州。爲諸路游擊之師。亦因傷亡過多。難遽進剿也。苗沛霖既得壽州。凶餒彌熾。必窺伺臨淮。臣現飛調何紹彩四營。由寧國北渡。馳赴臨淮。歸唐訓方調遣。前調之黃翼升淮揚師船。須俟李朝斌抵滬後。始得交替防務。上駛入淮。輾

轉需時。尙恐緩不濟急。又飛咨彭玉麟楊岳斌選派舢板八十號。星赴臨淮。援勦苗逆。待黃翼升到淮。仍令各回本汛。臨淮能否保全。尙不可知。其蒙城一軍。則更無兵接。鞭長莫及。憂愧徒深。此壽州失陷後。力圖補救之情形也。伏查去冬今春。危險疊生。自菜舍二浦九嶽州次第克復。長江數千里。盡爲我有。江北髮逆。一律肅清。方幸大局旋轉。澄清有日。不謂苗逆煽亂。壽州被陷。是皆微臣治軍無狀。調度多乖。愧憤曷已。連同銜署安徽壽州知州毛維翼。忍飢撫土。扶病登陣。以練丁五百人。苦守七十六日。民皆効死弗去。卒至食盡力竭。城陷同殉。亮節孤忠。一時隻絕。惟有籲懇破格恩施。准將毛維翼追贈道員。照道員陣亡例。從優賜卹。仍於原籍及死事處所。建立專祠。以彰忠蓋。其餘在城文武員弁。俟查明再行辦理。自李續宜丁憂回籍。臣即兼統其部下四軍。去歲賊竄江北。驟失三城。臣調肅慶衍毛有銘兩軍南援。遂將防守壽州之三營。移駐六安等處。今歲苗逆既叛。又不能以全力撲滅苗黨。仍留肅慶衍會勦葉縣。調成大吉回援鄂省。實有顧此失彼之咎。應請旨將臣交部嚴加議處。至各軍救援不力。均有應得之咎。布政使銜安肅道蔣凝學。首先調援。初到壽城。稟請破苗解圍。確有把握。厥後一戰失利。自悔輕敵。貽誤匪淺。應請旨革去布政使銜。記名提督成大吉。在湖北接到飛檄。久不成行。五月十四日。在麻城之宋埠拔隊。遲至二十四日始抵固始。又復逗留數日。竟未趕至壽州。實屬遲延玩誤。請旨將成大吉撤銷勇號。以參將降補。稍示懲儆。仍各留營帶隊。以觀後效。按察使銜記名道毛有銘。同辦一事。厥各維均。惟該員前在石澗埠苦守半月。終解重圍。克復東關之後。馳驅數百里。赴援六壽。頒行之時。其缺鈞與成大吉相同。而拔隊迅速。不敢稍誤師期。功過尙足相抵。應請免其置議。所有遵旨覆奏緣由。恭摺由六百里馳陳。伏乞皇太后皇上聖鑒訓示。謹奏。

覆陳南洋通商大臣無庸改設摺 同治二年六月十一日

奏爲南洋通商大臣一缺。籌度現在情形。仍請無庸改設。恭摺覆陳。仰祈聖鑒事。竊臣於上年六月初六日。奏改長江通商大臣一案。經總理衙門議將駐紮處所。及廉俸各款。請旨仍飭臣會同薛煥酌定具奏。臣遵卽與薛煥往返函商。悉心籌畫。統計通商大臣廉俸一項。添設官屬書役等項。每歲約需銀四萬餘兩。目前卽無庸另建衙署。而於長江各口。租備行館。僱用輪船。所費亦屬不貲。數年後漸推漸廣。勢必有增無減。濱江四省。中外交涉事

件。果能一一取決於專設之大臣。誠不敢爲國家惜此帑項。惟事有粗論之而僅得其端倪。細審之而始盡其曲折者。薛煥奉到會議彙傳之旨。又經專函與巨總商。具道長江通商使臣。所以可裁之故。蓋有數端。其大意以爲自各國公使駐京。一切裁決於總理衙門。凡各口洋人。偶違條約。有時可與力爭。則可就關員結辯。則臨以督撫而有所餘。有時爭之不服。則動向公使陳訴。雖臨以大臣而無濟。大臣巡歷各口。督撫近駐本省。洋人性急。弗耐守候。不能不由本省就近辦理。有時督撫奏咨。未及到京。而公使早已周知。郵遞之稽遲。尙不及輪船之迅速。况由大臣輟轉覈咨。更恐貽誤事機。至華洋商民爭鬥。攬攬。關涉刑名案件。事隸地方有司。尤不能不資督撫之力。庶飭辦易則呼應更靈。通商縱有專員。在內仍不能免總理衙門之煩瀆。在外仍不能減各省督撫之責任。虛糜一官。有名無實。各等語。對切見商。臣比致覆書。深服其言之精當。然猶以蘇皖羣盜如毛。疆臣專謀軍事。恐難兼顧洋務。厥後李鴻章奉命兼領通商大臣。數月以來。秩然就理。益信華洋交涉之事。均係疆吏必不可省之事。是五口大臣。固屬可裁。卽長江大臣。亦同虛設。相應請旨。仍照薛煥原奏。裁撤通商大臣一缺。歸併本省督撫及將軍經理。以節糜費。臣於中外撫馭機宜。向未諳究。而因時權變。又何敢以具奏在先。堅持初議。曲爲迴護。所有南洋通商大臣。仍請裁缺緣由。謹繕摺由驛具奏。伏乞皇太后皇上聖鑒訓示。再此案前經臣咨請薛煥主稿會奏。逮薛煥定稿寄院。卽已東裝北上。近始接其到京來函。是以覆奏稍遲。亦不復會銜矣。合併聲明。謹奏。

同治元年下半年淮南徵課數目摺 同治二年六月十一日

奏爲查明同治元年下半年淮南徵課數目。仰祈聖鑒事。竊查淮南試行稅鹽。奏明按半年一次造報。前已報至同治元年上半年止。茲查同治元年七月起。至十二月止。共徵收稅課銀十三萬六千九百八十三兩三錢九分八釐。又外江鹽釐銀十一萬七千七百七十九兩七錢八分二釐。又外江內河鹽釐錢十三萬六千七百九十九千三百六十四文。除隨時解支江皖軍需。水陸營餉。並支銷鹽屬養廉外。計存外江鹽釐銀二千四百四十六兩九錢一分七釐一毫。錢六千三百三十二千六百五十三文。已彙入二年分徵收銀錢。分別湊解軍需。核計下半年課釐。比較上半年所收數目。均屬有盈無絀。據運司喬松年詳請具奏前來。臣覆核無異。除飭送部科外。理合恭摺具陳。伏乞皇上聖鑒。勅部查核。謹奏。

彙報各路軍情摺 同治二年六月二十七日

奏爲彙報各路軍情。先陳梗概。仰祈聖鑒事。竊金陵與壽州等處軍情。臣於六月十二日馳奏在案。近日探報。僞忠王侍王均隨洪逆。堅守金陵。搬運蘇州之糧。接濟老巢。曾國荃一軍。自五月十五十八等日。攻破金陵南城。角長干橋一壘。二卡後。圍逼如常。別無戰事。鮑超至鍾山築營。將竣。本擬移紮孝陵衛。旋因自染暑瘧。又以軍中疾疫大作。死亡相屬。恐前敵爲賊所乘。遂平毀鍾山營基。仍駐軍策門沿江一帶。金陵城下。暫難合圍。臣亦以江西未靖。皖南方棘。恐鮑超須調勦上游。不敢令其遽爾合圍也。蕪湖寧國南陵涇縣各城。金柱關灣址清弋江各隘。雖抽調何紹彩西河一軍。而水陸防守。幸均完固。僞輔王楊七麻等股。在於東水陽新河莊結卡踞守。亦未敢伺隙內犯。二十至二十六等日。寧國守將劉松山。會約涇縣守將易開俊。勦賊於黃村北共里曹村考坑。奪麥灣等處。四戰四捷。朱品隆亦自青陽會勦於木竹潭順安鎮黃柏嶺等處。獲勝三次。鏖賊極多。前據搜獲僞文。忠酋欲調黃李古賴各賊。回援金陵。近則井無其事。古賴劉藍等逆。仍在太石涇旌之交。黃李等逆。則僞聚於湖口都番一帶。數月以來。江西官軍與左宗棠派援之師。苦戰苦守。屢獲勝仗。景鎮鄱陽之賊。次第退竄。沈葆楨又咨調江忠義專勦湖口。清甯卽日全軍肅清。六月初二日。韓進春在洋塘挫潰凶餓復張。目下賊勢趨重湖口一路。六月十七日。猛撲江忠義。堅山營寨。李榕部將陳由立援勦獲勝。旋以追賊致挫。十九二十三等日。復來堅山圍營。攻撲甚猛。江忠義雖係宿將。而所部老勇較少。新募居多。李榕則全係新立之軍。未經大敵。殊可危慮。由湖口下至彭澤馬當東流。上至屏峯南康都昌濱江濱湖。一片逆氛。臣現咨商彭玉麟。多帶礮船。親赴湖口。援勦江西。寄諭所示。廓清江境。然後併力皖南。規取金陵。誠爲確不可易之理。卽當欽遵辦理。苗逆既陷壽州。北圍蒙城益力。又遣黨至汪家集。西伺霍邱。蒙城勢尤危迫。臣與唐訓方均無兵可撥。鞭長莫及。憂灼徒深。霍邱居三河六安之中。迤東北曰榴子口。密邇正陽。最據形勝。臣令蔣凝學暫不赴三河尖。就駐防榴子口。令周寬世撥三營駐防迎河集。該二處皆賊所必爭。兵力過單。未知能穩守否。毛有銘所部。則守六北壽南之老廟集。以杜野掠。而保米糧。且令夏圩有所依附。不致盡叛歸苗。指日水師入淮。或者大舉會討。較有下手之處。除各路戰狀。分案續報外。所有近日軍情。合先白驛具陳大概。伏乞皇太后皇上聖鑒訓示。謹奏。

彙報近日各路軍情摺 同治二年七月十一日

奏爲彙報近日各路軍情恭摺仰祈聖鑒事竊自大江南北兩岸軍事孔亟。歷奉寄諭。指示周詳。殷殷以金陵江西及淮上各防爲慮。其大概情形。臣於六月二十七日具奏在案。茲復就近日戰守事宜。分晰條列。續陳於左。

一、金陵各軍。疾疫過半。飽超所部。霆營爲尤甚。僞忠王侍王輔王章王等。糾率悍黨。堅守老巢。時復伺隙出戰。以圖一逞。六月二十二日。突分兩枝。一出儀鳳門。直撲飽超。霆字右營。一出太平門。繞撲劉連捷。南字等營。我軍轟擊竟日。負創而遁。七月初一日。又以西瓜礮。猛攻劉連捷下關營寨。勢更凶悍。得水師協力苦戰。擊退。而李成謀與劉連捷各受創傷。幸不甚劇。聞白齊文投入賊中。以重金廣置礮礮。分解金陵。現在劉連捷營外。明掘直壕。暗開地道。計日內必有數次惡戰。又准李鴻章鈔送忠奮等僞文。新調僞護王朝王同援金陵。展王爲王。改守句容。但願羣逆畢萃金陵。或者蘇常等處。有機可乘。未始非官軍之利也。

一、毛鴻賓請調張運蘭入粵。欽奉諭旨。垂詢所部老湘營。能否調往。飭臣酌量辦理。張運蘭自上年十月間。因病回籍。所部湘勇十營。卽派部將易開俊劉松山各統五營。分守寧國府涇縣兩城。寧國當廣德建平之衝。涇縣當太平石埭之衝。易開俊等內防外勦。屢卻賊氛。城垣賴以保固。所駐皆係最要之地。臣處別無換防之師。接據毛鴻賓來函。亦以該營欠餉過多。一時恐難抽動。已令張運蘭另募三千人。帶赴粵中。則原部湘勇。自應仍留皖南。以資得力。

一、太平石埭之賊。堅踞如常。六月十七日。分股進章嶺。竄入黟縣。意將由上溪口衝出婺源。就食江西。十八日王文瑞自祁門督軍。會合劉典留守漁亭之各營。併攻黟城。一戰克之。驅賊至嶺外十數里。擒斬甚衆。此次幸仗天威。勦辦極速。不使徽州更增一患。卽免江西再設一防。

一、江忠義李榕兩軍。駐守湖口。六月十九日。堅山之戰。僞堵王黃文金寶負重傷。二十八日。勦賊於陳兵馬水車港等處。二十九日。迫賊於梧桐嶺。太平關等處。分道馳擊。均獲勝仗。七月初三夜。堅山營中。俯瞰文橋賊寨。火光隱約。江忠義知賊將宵遁。約李榕於將曙時。引軍襲破諸壘。賊乃敗過黃沙嶺。分竄都昌彭澤境內。湖口已無賊蹤。江忠義等加派隊伍。裹帶乾糧。馳追三日。尙未收回。前奉聖諭。速由湖口與饒軍並進。將江境各賊。

悉力驅除。由石太進取東壩。有此一捷。賊鋒稍挫。如江西一律肅清。臣即當催令江忠義李榕等。欽遵前旨。妥速辦理。

一、恭奉六月初五日諭旨。垂詢李世忠作何動靜。飭臣隨時奏聞。李世忠之心跡。中外皆不敢深信。臣於二月二十七日。亦經密陳及之。乃二浦並陷。深感聖主之不加嚴譴。九洲既克。又畏楚軍之難與抗衡。臣察其愧悟漸生。頗知斂抑。亦復推誠相待。事事示以不欺。近接該提督來函。有「五河地方。爲臨淮後路。倘苗逆下竄。誓必堅守五河。決一勝負。」等語。李世忠與苗逆積怨甚深。其欲發憤勦苗。既伸公義。又報私讎。似屬出於至誠。近日臣處餉項極絀。數月以來。並無銀米子藥解濟滁州。李世忠亦無怨望之意。若坦然相處。當不至別生枝節。

一、苗逆圍陷壽州後。遣黨在正陽關增壘浚濠。尙未蠢動。何紹彩陸師四營。於六月二十六日。取道廬州前進。彭玉麟楊岳斌所派舢板八十號。亦於二十二二十五等日。由九洲洲先後開行。計此時均已趕到。臨淮得此水陸倚護。唐訓方之老營。可期穩固。惟蒙城糧路將絕。危殆萬分。恭讀六月十九日諭旨。命臣另籌一軍。赴潁上擄苗逆老巢。能否於江北陸路防軍內。抽調勁旅。或徑援蒙城。或由定遠馳抵懷遠等因。查江北陸營如蕭慶衍所部。駐防江浦浦口周寬世所部。分防桐城六安迎河集等處。蔣凝學所部。分防潁州霍邱三劉集等處。成大吉所部。扼防三河尖一帶。毛有銘所部。扼防老廟集一帶。各守要區。萬難抽撤。此外實無一枝勁旅。可援蒙城。並赴潁上。無以仰慰宸廑。曷勝愧悚。

以上六條。均係諭旨垂詢之件。及各路布置情形。除戰狀分案續報外。合先逐條詳列。由驛五百里馳陳。伏乞皇太后皇上聖鑒訓示。謹奏。

催調黃翼升赴臨淮片 同治二年七月十二日

再臣前調黃翼升准揚水師。由洪澤湖赴援臨淮。須俟李朝斌太湖水師到滬後。交替防務。始得自上海拔營渡江西上。誠恐輾轉需時。緩不濟急。因飛商彭玉麟楊岳斌等。在長江各水師營中。暫派舢板八十號。先赴臨淮。日內計可趕到。而太湖師船陸續入滬。李朝斌亦可即日抵防上海。戰船足敷分布。相應請旨飭下江南提督黃翼

升。親統淮揚水師之半。刻日馳往臨淮。仍分一半留滬助剿。責成該署提督往來布置。兼顧淮滬兩防。一俟克復蘇州。即將駐滬各營。分紮洪澤湖。巡防淮揚通泰等處。駐淮各營。分紮洪湖以上。巡防淮潁會渦等河。至江南提督一缺。黃翼升既赴臨淮。未便攜印入皖。應懇天恩。即令浙江處州鎮總兵李朝斌。就近在滬接署。以重職守。其黃翼升一軍所需餉糧子藥。目下應由李鴻章全數供支。將來唐訓方事機漸順。餉項漸裕。即由蘇皖兩省。各支一半。臣處鹽務。稍有起色。亦必多撥鹽稅。供支該軍。以期與淮揚二字。名實相符。理合附片陳請。伏乞皇太后皇上聖鑒訓示。謹奏。

覆陳淮鹽不能赴陝片 同治二年七月十二日

再臣欽奉四月初九日寄諭。『瑛榮奏請飭兩淮籌撥陝餉等語。據稱。『陝省司庫空虛。自上年四月以來。有出無入。羅掘已罄。各屬糜爛。耕種盡廢。偶有麥秋。徧地萑苻。難期收穫。錢糧既無從徵收。捐借更難以彙集。窘迫萬分。查淮鹽北課。向充皖省軍鹽。而江運入萬積引。本在淮課之外。』勝保奏請。『江運改湖八萬引。改撥陝省。業經奏准在案。此時陝餉缺乏已極。請江運入萬引仍撥陝省。』等語。西安省防各營。兵勇欠餉纍纍。鄰封所撥協餉。又均未解到。若非量爲接濟。勢必譁潰堪虞。瑛榮所請飭下兩淮鹽運使。照舊將江運入萬引。仍撥陝省。派委道府大員。前往接濟。招商捆運。以充軍食之處。是否可行。著會國藩督飭兩淮鹽運使。體察情形。妥籌速奏。』等因欽此。遵即劄行前運使喬松年。妥速籌議去後。茲據詳稱。『前大臣勝保奏撥淮北餉鹽十五萬包一案。初議在臨淮營及撫營撥營各分半成協濟。嗣奉續奏。在江運改湖積存餘引項下。撥出領引。又經查明江運入萬餘引。係在淮北奏銷。額行二十九萬餘引之中。有歷年造報冊籍可稽。若於額引內提出江運引數。皖餉愈形短絀。當將未能遵辦情形。通詳奏停在案。今陝西撫院奏稱。本在北課之外。已屬與案不符。且目下情形。亦與上年冬季。大不相同。上年淮河通行。餉鹽可以出湖銷售。故勝保奏撥之鹽。雖有礙於皖餉。猶可酌濟。秦中。現在淮河有苗逆梗阻。鹽船被劫。萬難上駛。皖營應提之餉鹽。尙且無可運銷。何能再爲陝省籌計。原奏內所稱。『派委道府大員前往接辦。招商捆運。』當此咽喉梗塞。無商可招。無路可運。即皖餉亦自顧不遑。勢難兼顧陝餉。』等情。請奏前來。臣查苗逆復叛。淮河梗阻。皖營之鹽。疏銷無路。若使撥鹽濟陝。亦屬無處銷售。該運使所議。委係實在情

形。應請無庸置議。所有遵旨妥籌緣由。理合附片覆陳。伏乞聖鑒。謹奏。

湖口防軍勝仗摺 同治二年七月二十七日

奏爲湖口各軍疊挫賊鋒。遂毀文橋堅巢。羣賊悉遁。恭摺彙報。仰祈聖鑒事。竊自江忠義李榕督軍進次湖口。擊賊屢勝。臣於六月二十七暨七月十二等日節次具陳。大概在案。先是僞堵王莫文金糾合諸賊。於二月由皖入江。分擾鄱陽浮梁祁門都昌境內。屢薦劉典段起席寶田韓進春等軍所扼。不得深入江西。乃折而西竄。趨重湖口。分爲三路。上路曰文橋。中路曰梧桐嶺。下路曰太平關。袤延三十餘里。而文橋賊勢最重。凡堅壘七座。黃逆親踞其中。浙江鹽運使李榕。自彭澤項家山一捷後。聞湖邑告急。於五月十四日移營湖口之三里街。越十數日。江忠義亦率所部。自九江東渡。會師於馬影橋。六月初九日。離勘殷家山徐家嶺之賊。展旗一進。不戰而卻。江忠義旋紮堅山以徇之。十七日賊由文橋出大股三萬餘衆。分道來犯。江忠義留兵守定老營。遂令徐士巍徐生德王順慶等直前迎敵。而以李祥松劉光文林志金等爲左翼。江忠寬黃仁遺權光燦等爲右翼。仍親督陳鳴志江忠華馬步各營。從後繼進。戰不兩時。李榕部下鄭陽和楊春華兩營前來會勦。突出堅山之右。列陣裹賊。李榕以賊方衆悍。勢恐不敵。飛騎止之。而鄭陽和已衝過曹均橋。與賊戰於田壠。一馬中鎗而逸。羣馬卻後。幾亂步隊。李榕抽刃押定陣腳。江忠義麾軍驅殺至數里外。賊乃回戈轉鬪。且卻且前。哨弁黃忠勝李光明李士青江忠修鄧在仁黃守和等縱橫盪擊。各負重創。李榕部將陳由立大呼陷陣。殲賊百餘人。盡力窮追。深入敵境。誤爲伏賊所鈔。急引軍躍出重圍。士卒已傷亡九十五人。十九日賊以大枝匿於剛山張天社一帶。乃以小枝薄營誘戰。江忠義戒諭將士。堅壁不動。賊始計沮。悉衆來攻。排列五六層。猛撲十數次。官軍但以鎗礮外轟。遇者輒殲。忽有一酋指麾衆賊。賊無敢反顧者。江忠義詢之降卒。知爲逆渠黃文金。俟其撲近花籬。聚羣槍同時並發。應聲而仆。賊遽譁亂。爭昇以行。餘亦相率竄走。據生擒賊供。逆首黃老虎。實受重傷而奔。此六月十七十九等日。賊犯堅山。各營合戰獲勝之情形也。自黃逆負創後。賊爲氣奪。悉屯文橋壘後。匿不復出。江忠義李榕周歷形勢。共籌進取。必以一營斷梧桐嶺來賊。二三營防文橋壘賊。而以全力注陳兵馬地方。庶有下手之處。二十八日。江忠義率精健九營。進陳兵馬中左兩路。李榕率鈞字五營。出左路之左。進水車港。鄭陽和策馬當先。手刃瞭望二賊。楊春華麾

隊繼之。轉戰而入。江忠義遙望樹林陰翳中。賊旗纓約。卽督中軍親兵。鼓行疾進。兩鋒相交。火器燃發。鎗子雨飛。何明立鄭長來聯騎齊驅。將賊促逼出林。直薄陳兵馬賊館。賊復增黨決戰。陳由立正在傍山搜勦。見鄭揚和楊春華從左路橫躍入陣。急催部卒併赴前敵。與江忠寬陳正珀猛進猛擊。賊乃大潰。但以另股繞出。縱焚郟舍。徹夜擾我。次日。李榕率偏師突出擊之。由太平關一路打散刈麥之賊數百。小有擒斬。江忠義分軍爲二。一出花尖山。一出毛家店。所向辟易。張寶鑑橫渠直入。殪騎於陣。旋以中賊三矛。逾時殞命。各營奮力馳護。數路並進。林志金江忠倬亦自花尖山移軍來助。賊不能支。敗過梧桐嶺。懼伏不動者數日。適會劉典席寶田等。有南路青山橋之捷。賊於是有意退志矣。七月初二夜。江忠義在堅山營中。俯瞰文橋七壘。火光熒熒。若隱若現。度賊將遁。約李榕部隊於五更時出營會勦。仍先遣將士潛至壘下。鳴號鼓以驚賊。賊不虞官軍之猝至。惶遽不知所爲。各勇乘勢踰濠。蟻附而上。比江忠義率李榕全軍踵至。衆壘已平。遺棄米穀相望於道。於是各整隊伍。裹四日糧。越黃沙嶺。馳斬尾股。足無停趾。直出建德所屬之羅家畝上下房等處。殺賊二千有奇。積尸塞路。始於初八日。整旅而還。此六月二十八九等日。擊賊屢勝。七月初三夜。攻奪文橋。及連日追勦之情形也。臣查皖南各賊。圖竄江西邊境。不得逞於饒州景鎮。遂欲佔踞湖口。圖擾腹地。經江忠義李榕等擊傷悍目。攻毀老巢。使賊不敢駐足。江境次第肅清。實屬有裨大局。其應獎應卹人員。除江忠義一軍。應由沈葆楨奏請外。李榕一軍。可否容臣查明酌獎之處。出自聖恩。至花翎守備張儀卿楊友和。藍翎守備劉喜祿王俊傑沈克明。藍翎千總汪春旺金家見張先亮藍翎把總夏楚寅。譚正與韓得勝。馮玉峯。外委楊興隆等十三員。均係力戰陣亡。應請敕部。各照本職。從優議卹。以慰忠魂。所有湖口防軍。屢獲勝仗。各賊全遁。緣由。謹繕摺由驛五百里馳陳。伏乞皇太后皇上聖鑒訓示。謹奏。

近日軍情片 同治二年七月二十七日

再近日軍情。會國荃一軍。派劉連捷駐營下關。自六月二十二至七月初六。該逆猛撲數晝夜。洋鎗礮礮。多而且悍。經劉連捷竭力擊退。會國荃因北路喫緊。力攻南路。以掣賊勢。七月初八九日。大戰獲勝。攻毀印子山賊壘。調蕭慶衍由江浦南渡。分守要地。飽超病體。尙未全愈。其將卒雖亦多病。然較去歲則已少矣。蕪湖守將吳坤修於十七日約會水師。迎擊於雙斗門。破其二壘。乘勝追至水陽。金柱關蕪湖兩防。均可鬆勁。寧國南陵涇縣灣沚清

弋江各防。近亦均無戰事。惟湖口肅清之後。江西羣賊。悉數東趨。行走剽疾。二十日已繞過池州。近撲青陽縣城。守將朱品隆督軍固守。二十一、二等日。賊又以全力來撲。四面合圍。環城而營。朱品隆所部七營。營官病者四人。其胞弟甫經病故。朱品隆亦抱病甚重。昇疾登陴。未知能否堅守待援。現在劉典一軍。回駐徽州。江忠義李榕席寶田三軍。臣檄令作爲犄角。微寧池五郡遊擊之師。李榕已抵東流。江忠義席寶田亦以病多夫少。尙未拔營入皖。但願青陽保守無恙。各軍陸續前進。則皖南大局。不至決裂。苗黨之據壽者。踞伏未動。蔣凝學毛有銘周寬世成大吉所部。各駐要區。防守尙穩。蒙城解圍以後。賊聚懷遠。普承堯張得勝等攻懷之師。已被該逆截斷後路。糧運梗塞。臣所派赴援臨淮之何紹彩陸師二千人。王吉丁泗濱柳板八十號。已據先後到防。十三日水陸並進。水師攻奪宋家灘墩划數十隻。惜河洲一壘未破。前敵糧運。仍爲賊阻。其留守臨淮者。兵力過單。別無可濟之師。殊少自全之策。北顧淮甸。殷憂曷已。除各路戰狀。分案續奏外。合先附陳梗概。伏乞皇太后皇上聖鑒。謹奏。

江西邊辦茶葉落地稅片 同治二年七月二十七日

再咸豐十一年十二月。接准戶部來咨。廣東巡撫覺羅耆齡奏。抽收茶葉落地稅一案。經該部核議具奏。請旨飭下湖南湖北江蘇安徽江西浙江福建各督撫。詳細查明各本省產茶及設立茶莊處所。妥議章程。奏明辦理。奉旨依議。欽此。並鈔錄原奏咨照到臣。查江西自咸豐九年。詳定章程。分別茶釐茶捐兩宗。每茶百斤。除境內抽釐銀二錢。出境又抽釐銀一錢五分有零外。向於產茶及設立茶莊處所。勸辦茶捐。每茶百斤。捐銀一兩四錢。或一兩二錢不等。填給收單。准照籌餉事例。彙齊請獎。歷經分別辦理在案。臣於咸豐十年五月。將江西全省釐務奏明。充臣軍餉。仍照舊章辦理。因捐釐銀數既多。如再徵收落地稅。民力恐有未逮。此遲遲未辦之緣由也。本年三月二十二日。據九江關署監督蔡錦青詳稱。一遵照戶部奏。准飭將鹽茶竹木四項。統徵關稅。已於三月二十日啓徵。一等情前來。臣查江西茶葉。運至九江。有洋商華商之分。洋商既完子口半稅。固不抽釐。華商既納海關正稅。亦未便再令完釐。而茶捐一事。多不請獎。全係移獎戚友。流弊百出。是釐捐二者。均不能不改弦更張。應照戶部奏准章程。徵收落地稅。臣卽於六月初一日。刊發告示於義寧州。開辦落地稅新章。惟原奏內稱。一「大箱淨茶六十七斤。徵收稅銀一兩四錢。二五箱淨茶二十五斤。徵收稅銀七錢。未經採細之茶。每百斤徵稅銀一

兩四錢。」等因。科則稍重。臣復分別核減。參酌茶捐向章。定於每茶百斤。義寧州等處。徵銀一兩四錢。河口鎮徵銀一兩二錢五分。概充臣營軍餉。由臣刊發稅單護票。委員經收。或業戶自行完納。或茶莊代爲完稅領單。及至茶葉發販時。統由茶莊繳銷稅單。華商換給護票。洋商即憑運照。販至各處銷售。除華商完納九江關稅。洋商完納子口半稅外。經過江西安徽各釐卡。驗明放行。概不准需索絲毫費資。如此辦理。與戶部之原奏總理衙門之條約。一一符合。稅單雖係茶莊經手。稅銀實係業戶所出。與商販決不相干。洋商不得藉口於子口半稅。而禁中國之業戶。不完中國之地稅。華商既免總卡抽釐。亦免致紛紛私買運照。冒充洋商。似不失爲持平之道。所有江西邊辦茶葉落地稅緣由。謹會同江西撫臣沈葆楨附片呈奏。伏乞皇太后皇上聖鑒。飭下總理衙門暨戶部知照。謹奏。

覆陳籌援臨淮摺 同治二年八月十一日

奏爲欽奉疊次諭旨。恭摺覆陳。仰祈聖鑒事。竊臣承准議政王軍機大臣字寄。同治二年七月初十日奉上諭。「昨因彭玉麟赴援江西。諭令會國藩迅催楊岳斌督率水師。駛赴臨淮。藉資援救。此時苗逆勢極猖獗。援兵早到一日。庶得早救一日之倒懸。仍著會國藩遵旨嚴催。毋稍遲玩。唐訓方仍就現有兵力。妥籌守禦。以待援師。並飛催蔣凝學周寬世毛有銘等軍。迅速進紮溜子口等處。約期會剿。不可稍有鬆勁。」等因。欽此。又奉七月二十四日上諭。「臨淮地方關係皖北全局。豈容稍有疏虞。現在危急情形。迥異尋常。非有陸路援軍速行馳救。大局將不堪設想。會國藩所部各營。雖不敷分布。亦當於無可籌撥之中。勉力抽派一軍。星馳援應。」等因。欽此。又奉七月三十日上諭。「李世忠既欲出力報效。與其駐勇五河。專俟賊至。何如督飭所部。由五河星馳前進。以拯臨淮之急。並著會國藩即行札調該提督迅速進兵。毋稍遲誤。會國藩接奉此旨後。察看李世忠近日情形。如果私離公憤。發於至誠。即將此旨摘錄傳諭。並須坦白相待。使之不疑。令其知感愧。樂爲我用。李世忠是否可資其力。此次可否摘錄傳諭。並著會國藩酌量辦理。隨時覆奏。」等因。欽此。伏查濱淮之要區有五。北曰潁上。曰懷遠。南曰壽州。曰鳳陽。曰臨淮。皆係傍淮水者也。距淮稍遠之要區有四。北則濱潁河者曰潁郡。濱渦河者曰蒙城。南則濱淝河者曰六安。濱史河者曰固始。皆滙於淮水者也。自潁上懷遠壽州悉淪於賊。九處已失其三。目下唐訓方

所置守者。爲臨淮。爲蒙城。爲鳳陽三處。臣所置守者。爲六安。爲潁州。爲固始三處。情形雖稍分緩急。而皆苗逆必爭之地。臣前派何紹彩陸師二千人。及彭玉麟楊岳斌所撥舢板八十號。先後抵淮。亦嘗戰勝一次。因苗逆黨徒日衆。夾淮而軍。懷遠蚌埠。糧路已斷。七月二十二日。唐訓方將各營撤退。卽長淮衛小傍埠一帶。亦被苗逆佔據。臨淮一軍。危如累卵。臣本思速撥援兵。挽救全局。况又疊奉諭旨。責無旁貸。無如近淮諸軍。如周寬世蔣凝學。毛有銘成大吉等。皆扼守最要之地。不能抽動。周寬世所部。分守六安迎河集二處。尙嫌單薄。頃又調桐城一營。併紮迎河集。蔣凝學所部。分守潁郡霍邱三劉集三處。七月十七日。攻破黃梁集西南二圩。十八十九日。疊平數圩。該處在榴子口之南。苗黨尙貫金嘯聚其間。蔣凝學派隊出劉家台湖口。焚其米船。盡毀羣圩。遂於八月初一日。襲破偷逆老巢。嚴防河路。爲將來進兵榴子口之計。毛有銘所部。駐守老廟集。七月十七日。攻破陶家三圩。旋又分紮板橋集。凡壽南六北之夏圩。賴該軍以自保。成大吉所部。分駐固始三河尖。近以爲潁郡之聲援。遠以爲鄂省之屏蔽。而潘璋等圩。首鼠觀望。亦須有該軍維繫其間。庶不至堅其公然從苗之志。凡此皆近淮諸軍。難以調動之情形也。至大江南岸諸軍。自江西肅清後。黃文金等股七僞王團撲青陽。守將朱昂隆病勢日篤。不能登陣。將士死者過半。苦守兩旬。兵單糧絕。岌岌可危。李榕之由水路赴援者。甫抵離城十八里之銅埠。江忠義席寶田之由陸路赴援者。現尙未至。池州青陽之能否保全。殊無把握。縱青邑倖保無恙。而賊意在圍魏救趙。將徧擾皖南最要之區。以掣金陵官軍之勢。凡寧國蕪湖南陵涇縣灣沚清弋江。必將處處喫緊。臣以金陵各軍新破。上方橋河西二壘城賊。水運已斷。不得已檄令鮑超引軍西上。以勦由江回皖之賊。以救寧國蕪湖之急。方今滬軍極盛。江陰新克。已將蘇浙之賊。截爲數段。正在得手之際。本宜加功於金陵。收效於蘇郡。臣分金陵之兵。以救皖南。已屬失算。若再遠救淮上。所失尤大。此江南諸軍不能赴淮之情形也。諭旨命臣劄調李世忠迅速進兵。毋稍遲誤。並垂詢是否可資其力一節。李世忠中心感愧。與苗爲讎。是其可信之端。而將弁驕恣。士卒攜貳。又其不可恃之端。該部所駐江北州縣。惟滁州五河兩城。稍有關係。數年之儲蓄。各營之精銳。畢萃於斯。論守局。則自顧身家。或有堅忍之力。論戰陣。則向無紀律。難操必勝之權。果其該提督迫於公義私憤。併力勦苗。自未便阻其敵愾之心。致啓其猜疑之漸。若必調勤以資其力。則臣能保該提督之無他。不能必該部衆之用命。萬一軍心不固。前敵挫

失恐五河後路。又蹈二浦覆轍。欲救臨淮之急。轉貽全局之憂。此又臣所不能不過慮者也。竊計臨淮各營。何紹彩歐陽勝美等之陸師。丁泗濱王吉等之水軍。尙無損折。普承堯張得勝挫退以後。已逾半月。當可收集補綴。次第成軍。臣處解銀二萬。及子藥槍礮。以資整頓。倘得陳國瑞援軍。迅速臨淮。或者勉力克持。保此危疆。臣皖南軍事稍鬆。仍當另籌一旅。馳往會勦。斷不敢稍存膜視。上煩宸廬。所有疊奉諭旨緣由。謹繕摺由驛五百里覆奏。伏乞皇太后皇上聖鑒訓示。謹奏。

丙丁戌三綱淮北鹽課奏銷摺 同治二年八月十二日

奏爲恭報丙辰丁巳戊午年三綱淮北鹽課錢糧奏銷。仰祈聖鑒事。竊據兩淮鹽運使新授江寧布政使喬松年詳稱。淮北引鹽。先經前督臣奏准。先儘奏額二十九萬餘引。飭販領運。其盜運之十六萬餘引。俟銷路通暢。再行察看情形。接續酌運。除乙卯綱課前已照儘奏額造報外。所有丙辰等綱引課。自應趕緊造報。近年淮北鹽課。多以鹽抵。淮河逼塞靡常。銷市暢滯無定。不能拘定年限造報。而歷年所抵鹽課。自應截清數目。按綱奏銷。以昭核實。查丙辰開河以後。河路通行。趕運趕銷。解鹽抵課濟餉。所抵之課。除抵足丙辰綱造報額課外。餘即歸入下綱額數。分算併報。計自咸豐十年五月二十一日。開辦丙辰綱起。截至同治元年十二月十五日止。已足三綱造報。所有丙辰綱奏銷舊管銀無項。新收咸豐六年分淮北綱食正雜各課銀二十九萬三千三十九兩四錢八分七釐。開除銀無項。實在存庫銀二十九萬三千三十九兩四錢八分七釐。又丁巳綱奏銷舊管銀無項。新收咸豐七年分淮北綱食正雜各課銀二十九萬三千三十九兩四錢八分七釐。又戊午綱奏銷舊管銀無項。新收咸豐八年分淮北綱食正雜各課銀二十九萬三千三十九兩四錢八分七釐。開除銀無項。實在存庫銀二十九萬三千三十九兩四錢八分七釐。以上三綱存銀。俱經分別提解。業於冊內登註。扣除實存候撥銀無。造具冊揭詳請會核奏咨。并據另詳聲明造報後。原冀即開己未新綱。奈上年十二月十五日截數以後。即有江南提督臣李世忠營內封鹽之事。販情惶惑。停頓三月有餘。又因苗練復叛。淮河梗阻。以致新綱未能開辦。應俟道路稍通。擇期開辦各等情前來。除飭司一俟路通。即行趕開新綱。運鹽濟餉。並將飭揭咨移部院科道外。所有丙辰丁巳戊午三綱淮北鹽課奏銷緣由。理合會同漕運總督

臣吳業合詞恭摺具奏伏乞皇上聖鑒敕部查覈謹奏

金陵軍攻克上方橋江東橋石壘摺 同治二年八月二十七日

奏爲金陵陸師擊賊屢勝將上方橋江東橋諸堅壘一律毀平恭摺馳陳仰祈聖鑒事竊本年七月初間官軍在金陵城外堵剿獲勝併克印子山賊巢業經浙江撫臣曾國荃會報戰狀在案自昔年賊據金陵逆酋楊秀清布署最密城外如九泖洲七星洲中關下關雨花台紫金山秣陵關江東橋上方橋等處類皆築壘如城掘濠如江爲堅不可拔之基曾國荃一軍今年攻克數處聲威頗震又以江東橋爲西南隅要隘飭陳湜督軍圍之上方橋爲東南隅糧路飭蕭慶衍進兵圍之七月二十日蕭慶衍率七營出印子山之東偏賊壘而下寨城賊與七營橋之賊竭力來爭曾國荃令蕭孚泗張詩日李臣典等分隊堵禦俾蕭慶衍牆濠逾時而成二十二派李祥和凌有和等滾營而進更紮蕭慶衍新壘之前賊擁衆猛撲我軍力擊卻之壘成後昇巨礮晝夜環轟賊爲堅壁不出者數日曾國荃於二十九日潛遣熊登武胡松江陳壽武等繞過上方橋五里許搶築大小營以截賊後賊懼糧路阻絕乃糾數大枝悉銳來撲蕭孚泗李成典等麾軍迎戰小有擒斬伍維壽周日昇復以騎隊從石路遠來包鈔賊始駭潰合軍追及秣陵關破十餘卡盡奪河下賊船而河西之接濟斷矣蕭慶衍知壘賊計窮傳令郭鵬程蕭恆書等營會合李祥和所部於夜半時各員秣桿擁至海邊競拔地鍼大呼猛進比賊驚覺前鋒軍士半已躍入壘中礮色驟靡各軍抽刃環追悉殲羣醜罕有脫者此七月三十日攻毀上方橋河西堅壘之情形也其江東橋一路石壘高峙環繞木城外隔水二道賊以有險可倚負固拒守陳湜率吉後兩營及平字盛字恭字三營設法進攻數月不下阮明德等力戰死之陳湜積憤填臆乃置攻具建浮橋將制死於敵人而諸將未之喻也八月十一夜風霾蔽月咫尺莫辨陳湜選銳卒數百涉流而渡潛匿壘下特掣絕大噴筒望空飛擲賊方驚駭不已陳必友朱載武等已衝過浮橋徑拔花籃晏公山劉定發從右路鈔出壘後吳隆海陳汝俊從左路鈔至旱西門陳湜旋督大隊繼進賊恃牆堅礮利連環轟擊我軍所挾藥筒爲該逆素所未見焚及木城朱載武險壽春引死士肉薄齊登先登者負傷輒蹶陳湜率吳隆海陳汝俊抽刀壓陣士卒不敢卻顧有緣梯而上者有向礮暗中蛇行而入者賊皆惶遽失措奪路爭竄次日昧爽遂拔石壘並將衆壘一鼓下之而城中出援之賊適遇蕭孚泗張詩日

黃潤昌羅逢元趙三元各營隊伍。自賽拱橋突出。搏鬪稜時。受創而遁。此八月十二日攻克江東橋各壘之情形也。臣查上方橋江東橋均占形勢。經諸將士悉力攻克。俟上游軍事稍鬆。大集新舊各軍。徐圖合圍。較有把握。此次出力人員。可否附於克復兩花台案內。酌請獎敘之處。出自聖恩。陣亡員弁。俟彙案開單請卹。所有金陵各軍。攻破上方橋江東橋兩隘緣由。謹會同大學士湖廣督臣官文。江蘇撫臣李鴻章。浙江撫臣曾國荃。由驛五百里具奏。伏乞皇太后皇上聖鑒訓示。謹奏。

近日軍情並調金國琛回皖片 同治二年八月二十七日

再近日軍情。青陽一城。黃文金等僞王。圍攻已歷一月零六日。文報不通。米糧久斷。八月十二日。李榕部將鄭陽和等兵。至距城十里之袁橋紮營。旋被該逆攻陷。喻吉三率三營繼進。十八日紮營徐道村。二十一日即攻破袁橋賊壘。小有斬擒。二十二日江忠義席寶田兩軍繼進。將合謀力戰。以解重圍。旋得朱品隆密稟。城中樹皮草根。採食俱盡。能否忍飢。爲數日之守。殊不可知。青陽迤北爲桐陵縣。突有藍逆另股竄入。彭玉麟派在防水師。一戰遂卻之。其迤東爲涇縣。賊股分擾。劉松山自寧郡督隊至涇。會同守將易開俊。勦賊於金村李村鳳村茂林章家渡等處。疊獲大勝。又有花旗廣匪窺犯寧國郡城。值劉松山引軍回郡。力戰卻之。目下皖南羣盜如毛。幾與去冬相似。幸劉典王文瑞王沐等共議。由徽州分道出嶺。進規石埭太平二縣。而臣所謂鮑超一軍。亦由金陵上援。先赴蕪湖寧國。或可以力保皖南。支持全局。至壽州苗逆之黨。自前月破我懷遠圍師後。復攻蒙城。凶餒益熾。八月十二夜間。渦河南北各營。全數潰退。撤至小澗集。守城者僅李南華等練勇千餘人。決難倖全。臨淮一路。有都興阿派二千人赴援。諭旨又飭富明阿帶兵繼進。李世忠亦親督率五千人來會。夾淮分屯。尙足自固。苗逆若不得進於臨淮。則上游六安潁州固始三河尖處處喫緊。周寬世成大吉蔣凝學毛有銘等。俱各守一方。勢鈞力敵。不相統屬。臣日夜憂灼。深恐心志不齊。調度舛錯。貽誤大局。查前任湖北安襄鄖荆道降補同知金國琛與成大吉蔣凝學毛有銘等。均同出李續宜部下。周寬世亦出自李續賓部下。該數軍分駐皖豫之交。須使有人維繫其間。庶得聯爲一氣。李續宜病勢日深。暫難東下。臣擬親赴六安。察看一切。又因皖南事急。不敢遠離江濱。所可調護湘營。籌勦苗逆者。微金國琛。孰能勝此任。該員疊奉諭旨。飭赴河南軍營。因傷疾舉發。羈留河南。尙未成行。臣思

皖豫邊境。同以苗逆爲鉅患。潁州雖屬安徽省疆土。而實爲河南所必爭之地。固始三河尖雖屬河南省疆土。而實爲安徽所必爭之地。并爲湖北所必守之地。形勢雖判爲三省。事權宜歸於一線。現聞金國琛舊疾漸愈。赴豫則須另募新軍。恐難求速效。赴皖則可通四軍之氣。而固兩省之防。惟有仰懇天恩。准將金國琛一員。改赴皖北。責令綜理周寬世等四軍營務。仍往來固始三河尖等處。會辦皖豫交界勦苗逆事宜。實於兩省均有裨益。除各路戰狀。分案詳奏外。所有軍情梗概。及調金國琛會辦皖豫交界勦苗逆事宜。理合附片陳請。伏乞聖鑒訓示。謹奏。

調回派辦粵釐各員片 同治二年八月二十七日

再臣於上年五月初三日。遵奉諭旨。奏派黃冕等九員。隨同晏端書辦理廣東釐務。當蒙恩准。飭派前往。在案。現在晏端書奉命內召。粵省抽釐事宜。歸於新任督撫兼辦。仰蒙聖慈。垂廬殷殷。以江浙軍餉爲慮。諭飭毛鴻賓郭嵩燾等經理粵釐。解濟皖餉。諭旨傳宣。雖未弁戡卒。亦知感激。圖報。以毛鴻賓等兩臣之公忠。必能妙選賢俊。籌濟東南。是廣東釐金。不患無人妥辦。臣所原派各員。如黃冕趙煥聯。當時因撫臣咨留。並未赴粵。李瀚章已升授廣東臬司。蔣志章吳贊誠。本係廣東實缺人員。此外尙有江西補用道蔡應嵩。應即調回江西當差。湖南補用知府顏培鼎。應即調回湖南當差。江西候補知縣丁日昌。陶慶仍等。應仍調回臣營當差。惟該員等隔省籍餉。衆志未孚。委曲勸導。苦心經營。始克集事。均屬著有微勞。除李瀚章蔣志章業經擢升三司。不敢再邀議敘外。其蔡應嵩一員。久任江西府縣。卓著循聲。內方外和。條理精密。臣本思專疏保薦。仰副聖主旁求之意。目下江西需才孔亟。可否籲懇天恩。遇有江西司道缺出。特予升補之處。出自聖裁。其顏培鼎吳贊誠。丁日昌陶慶仍四員。可否容臣會商晏端書酌予保獎。恭候鴻施。臣一面札飭蔡應嵩等。次第銷差。理合附片陳明。伏乞聖鑒訓示。謹奏。

青陽援師大捷解圍摺 同治二年九月十一日

奏爲青陽苦守三十八日。援師大捷。立解城圍。恭摺馳報。仰祈聖鑒事。竊逆匪由江入皖。圍撲青陽。官軍水陸進援。先挫後勝。臣節次附陳大概在案。初僞堵王祐王等七悍酋。擁十餘萬衆。在都昌湖口彭澤一帶。戰敗而東。遂略池州。直薄青陽城下。七月二十日。守將朱品隆派隊迎敵。挫賊前鋒。斬忠盼朝將洪逆以徇。俄而賊分爲兩大

枝一由廟前而來。信我西南兩門。一由茅坦而來。信我東北兩門。蟻聚蜂屯。爭營巢窟。不數日間。近城約半里。環築六十六壘。又數日。更築七十餘壘。濱河設有木城。河岸堅卡林立。皆悍黨守之。自是城中糧運斷絕。文報亦阻矣。二十三日。我軍分道擊賊。毀東門三卡。西門二壘。二十六七日。又在北門毀賊數卡。然皆隨毀隨修。不經宿而皆立就。八月初旬以後。無日不戰。戰或小勝。而朱品隆病莫能興。部將亦多嬰疾病。漸不可支持。時江忠義席寶田兩軍。尙在東流。李榕先率所部。於初六日。由水路駛抵距城十八里之桐埠。安營築埂。成軍以濟。初十日。李榕揚隊至洪山口。該處左水右山。路狹如綫。馬不得上。乃令左右兩營。尋覓民划。分載陸勇。約柳壽田水軍。乘溪水未落。夜襲袁橋賊卡。五更以後。李榕駕小舟。從後策應。少頃。礮划銜尾而上。袁橋卡破。盡殲據卡之賊。遂於十二日。派鄭陽和陳由立等各將三百人。進紮袁橋。守城將士。遙望援兵初進。亦出隊應之。奮擊西北兩門卡壘。冀通內外之氣。詎鄭陽和牆濠甫成。被賊撲陷。水師柳壽田亦挫敗而歸。陳由立以背水孤營。被賊層層圍裹。封壁不動。自未刻直至四更。苦戰苦守。遠賊之環攻少懈。始得振臂一呼。引軍突出。自是外援絕。而城中之饑餒益甚矣。幸臣所謂之喻吉三陸師。彭玉麟所派之喻俊明水師。已達茅坦。十八日。進紮徐家村。城中始知援兵營壘已定。衆心稍安。江忠義席寶田等。亦先後踵至。駐軍於石墨鋪。二十一日。喻吉三等有袁橋之捷。越三日。席寶田更進五溪橋。踰嶺破卡。賊遽驚潰。堵逆黃文金自刃數賊。遂轉鬪而前。席寶田撥隊鈔入卡後。黃文金從亂軍中逸去。我軍併進伍家村土地壇。屠戮無算。而軍勢爲之一振。此係七月二十至八月二十四等日。賊圍青陽苦戰守之情形也。疊據朱品隆遣死士易服而出。蠟書隱語。言軍中米糧既盡。現食及牛馬。牛馬既盡。食及草根樹皮。聞者爲之隕涕。適彭玉麟來自池州。周歷形勢。遙見董家村路口對峙二卡。右枕高岡。左臨溪隴。卡後地稍平衍。結壘者四。將以拒我援軍。乃與諸將熟商。議定江忠義率精健八營。出董家村山後。爲攻卡正兵。喻吉三護軍三營。出陳家村後。包過田隴。爲攻卡抄襲之兵。李榕先派鈞前副右兩營。守定樓子店烏魚潭兩後路。而自率鈞中左右三營。徑渡西岸。由獅子山頂歷下。會於董家村口。爲護軍接應之兵。並以喻俊明柳壽田等水師。分進夾山洪山兩口。專攻袁橋陳家村大小羅村各賊壘。爲陸師依護之兵。二十七日五更。蓐食。水陸大舉。江忠義親督黃仁遺江忠寬徐生德鄭長希等。行近董家村。從山後榛莽中。揮隊緣巖而上。賊在巖腰。燃發洋槍。先登者中槍輒

蹶黃仁遵率王高來身先禦之。江忠寬卻自右路抄上巖腰。遇賊即砍。無一得脫者。徐生德乘勢躍過濠溝。撲卡直入。而護軍旗幟出自田隴。喻吉三涉水而前。水深及腹。盡焚路口二卡。遂合黃仁遺鄭長希等。擊退援賊。殺軍轉攻賊壘。相持逾時。堵逆突糾大股數萬衆。環布壘外。圖鈔我後。我軍少卻。江忠義歷定陣脚。勢不返顧。各營哨弁衝入賊叢。縱橫盪決。哨長鄧新維身中數矛。猶復裹劍力戰。喻吉三正在麾軍助陣。乃賊隊忽亂。敗若湧潮。中路堅壘既破。左路二壘俱下。李榕適由獅子山直繞至村口。賊衆惶駭奔北。聲若頽牆。維時水師亦自袁橋棄舟登陸。攻破陳家村逆壘。席寶田在五溪橋相距甚遠。疾馳來會。行次中途。遙望西北附郭一帶。烟燄蔽天。知是守城之軍。自內擊出。卽約同諸援軍。一鼓猛進。悉掃賊巢。直抵城根。而青陽之圍立解。計平一百三十餘壘。殲擒實逾萬人。餘賊遁歸石埭一路。此八月二十七日會師青陽城下。力解重圍之情形也。臣查青陽一城。陷賊十年。旋經鮑超用兵數月。始得攻克。此次黃文金各賊股。以全力爭此要區。意將大擾皖南。掣我金陵兵勢。幸託聖主威福。諸將士忍飢扶病。內守外援。歷三十八日之久。卒能拔出重險。力保垂陷危城。實屬有裨大局。凡在事尤爲出力人員。應先另繕清單。仰懇恩施。以昭激勸。其餘出力員弁。可否容臣查明專案奏獎之處。當出自聖裁。至陣亡花翎都司許和山。藍翎千總李席珍。藍翎把總余才勝。李華崑。周玉祥。楊元成。劉受一。把總張修。胡承初。謝見章。鍾登高。藍翎外委李得勝。周新喜。賀宗修。張夏才等。共十五員弁。應請敕部從優議卹。至已革參將李殿華。於湖口堅山之戰。身先陷賊。最稱得力。此次力戰捐軀。尤爲憫惜。並請開復原官。照副將陣亡按例從優賜卹。以慰忠魂。所有青陽援師大捷。共解城圍緣由。謹繕摺由驛六百里馳奏。伏乞皇太后皇上聖鑒訓示。謹奏。

近日軍情片 同治二年九月十一日

再近日軍情。臨淮一路。穩守如常。陳國瑞於八月二十四日。至小澗集會合英瀚所部。四日之內。疊破賊圩。蒙城文報漸通。重圍可期。迅解。唐訓方亦調派何紹彩再進蚌埠一路。以掣賊勢。前此蔣凝學攻克黃梁集。逆首倘貴金適赴下蔡乞援。致令漏網。近聞該逆在蒙城勾結苗黨萬人至壽州境。分竄余家集三覺寺等處。意在擄掠。或不至遽謀深入。大江南岸青陽解圍後。太平石埭旌德寧國四縣。尙爲賊踞。劉典王文瑞王沐等軍。正議由徽州出嶺會剿。適因太平縣之賊。竄入著嶺。延擾許村石門一帶。雖經劉典會同唐義訓擊退。而浙江富陽新復。左宗

棠札調劉典回浙省。該臬司去後。徽州防兵單弱。勢難再圖。外。現令江宗義席寶田李榕朱品隆喻吉三等。分兵兩路。進攻石埭太平等縣。惟該數軍轉戰數月。尙多嬰疾未愈。朱品隆亦因大病過久。請假回籍調理。鮑超一軍。已抵至南陵。擬令收勦新河莊水陽金寶圩之賊。由建平直達東壩。其寧國守將劉松山。涇縣守將易開俊。自八月初九十一等日大捷後。十七日賊圍寧國郡城。劉松山力戰卻之。二十二日賊至廟埠。又卻之。而易開俊亦於八月二十四日。九月初三日。先後破賊於涇縣之茶坑平垣等處。但求將皖南各股。悉數驅除。東接浙師之氣。北絕金陵之援。則事機漸順矣。除另摺詳報戰狀外。合先附陳大概。伏乞皇太后皇上聖鑒。謹奏。

京倉需米照部議妥籌摺

奏爲京倉需米甚殷。遵照部議。悉心妥籌。恭摺覆奏。仰祈聖鑒事。竊臣接准戶部咨開。三口通商大臣崇厚。籌備京倉一摺。經該部議奏。請旨飭下臣與官文沈葆楨世臨嚴樹森等。會同籌畫。將鹽課漕折兩項。實能籌撥若干。宜妥籌辦理等因。於同治二年七月初一日。奉旨依議欽此。一並鈔錄原奏咨會到臣。臣伏查咸豐十年以來。蘇浙淪陷。南漕運京。爲數寥寥。上年全漕竟未與辦。僅賴李鴻章勸辦。鉅商捐米九萬石。於夏間次第解京。在上海經營甚苦。而在天庾則裨益甚微。本年東南應徵之漕。自應設法多解本色。上供京師至急之需。然江蘇淮揚通海之米。現已由漕臣吳棠奏准。仍徵折色。撥充揚州軍餉。湖北之米。已由撫臣嚴樹森奏准。萬難改征本色。至江西之米。亦由撫臣沈葆楨具奏。仍難改征本色。此三臣者。皆素抱公忠。絕非不顧京倉根本之人。其所以難於解米者。蓋爲時勢所迫。成例所拘。殆非一二言所能罄。目下欲運江楚之米入京。即百餘年之成憲。與近數年之專例。均不能不大爲變通。臣請爲皇上縷晰陳之。向來三江兩湖。均皆有官製漕船。分幫編號。水次受兌。各有定所。今則漕船盡壞。將欲全數修復。需銀約近三十萬兩。既難籌此巨款。又值黃河北徙。運道久淤之後。又值泰西就撫。海道暢行之時。由江浙閩廣以達天津。出入洋面。如履戶庭。接之天時人事。自須全廢河運。概行海運。而兩湖江西安徽尙未辦過海運成案。江湖之遠。雇船之費。若非由部臣先爲定議。疆臣頗難措手。自前明以屯田養衛軍。以衛丁運糧船。我朝因之改爲旗丁。行之既久。屯戶不能耕田。而鬻與平民。動倚衛官以抗糧。衛軍不能使船。而另募水勇。動倚旗丁以滋事。名實相舛。旣已不勝其弊矣。而旗丁每次領運。需索幫費。視州縣若魚肉。聞

壻之委員。通州之倉書。又視旗丁若魚肉。臣屢觀道光年間諸臣之奏疏。宣宗之諭旨。言及州縣淨收旗丁幫費。未嘗不深恨次骨。終以積重難返。莫可如何。今則局勢大變。日月重新。漕船既可全廢。旗丁亦可全裁。頃者兵部議覆嚴樹森裁兵一案。飭臣等酌量辦理。郭嵩燾在糧道任內。因之詳請盡裁屯兵。以屯田改隸州縣。以衛官改隸綠營。其說甚爲詳明。臣以戎事倥偬。尙未據以入奏。茲既議廢漕糧。自應并革衛軍。臣所謂百年成憲。不能不大爲變通者此也。道光二十七年。王大臣戶部會議。以京師之現銀太少。南中之淨收太重。請將南漕改征折色。以資部庫。而蘇民困。旋經督臣李星沅奏駁不行。文宗登極。撫臣傅鼐勦痛陳淨收幫費之弊。民不聊生。又請改征折色。旋經部科議駁不行。遠咸豐三年。粵匪竄陷金陵。長江梗塞。不得已改收折色。定爲每石一兩三錢。當時銀價每兩換錢二千餘文。米價每石不過一千餘文。故一兩三錢。民猶病其重也。今則情形迥異。價值懸殊。銀價每兩不過換錢千三百餘文。米價雖各省不同。然大致相類。李鴻章嚴樹森奏稱四兩以外。係就夏間荒歉言之。吳棠沈葆楨奏稱三兩上下。係就秋間收穫言之。臣處目下所買之米。其價亦近三兩。若如崇厚原奏。合米價運費。僅及二兩。則近年絕無此事。米價既費三兩。加以由內河而出江。由江而海而津。船價耗米等費。計亦不下二兩。是南省解到天津之米。約計需銀四兩九錢。而南省所收民間之漕。部價僅算一兩三錢。若解十萬石。卽有三十六萬金無著之歛。部臣不准銷。疆臣不能賠。此中窒礙情形。實乏彌縫之術。卽以江西而論。辛酉年之漕折。臣與毓科出示。每石徵錢三千。壬戌年之漕折。臣與沈葆楨出示。每石徵銀一兩九錢。以一兩三錢之部價計之。則所納並不爲少。以目下穀米之市價計之。則所納之數。斷不能購米一石。而船耗米各費。更無所出。以臣愚見。必求部臣奏請特旨。米價運費。均准據實報銷。原定一兩三錢之數。庶江楚本屆之漕。尙可設法解京。臣所謂近年事例。不得不大爲變通者此也。兩淮鹽務與漕政。本不相涉。與崇厚議撥鹽課以購南米。亦權宜救時之一策。臣忝任鹽院。三載有奇。而淮鹺未嘗竭力經營。非敢置爲緩圖也。沿江上下各軍釐卡。至十餘處之多。均以鹽釐爲大宗。臣若驟議變革。則各軍皆向臣處索餉。若全不變革。則官鹽決不能逐卡完釐。而楚岸引地。久爲川私粵私侵佔。西岸引地。久爲浙私粵私侵佔。民間藉此。以免淡食。鄰省藉此。以籌釐餉。江路未通。豈能禁鄰私之盛行。且輪船拖帶。流弊百出。既可授洋人侵奪鹽利之權。又恐啓私梟假託洋商之漸。種種窒礙。無處著手。故吳文錫之

呈詞。錢寶廉之奏疏。雖奉諭旨飭辦。臣尙因循未及興辦。職此之由。仰託皇上威福。九洲既克。長江一律肅清。臣始與郭嵩燾重立新章。先辦江西一岸。現在規模初定。稍遲再行專案具奏。大約緩納逐卡之釐金。由臣處總收。而分送各處。禁軍餉鹽之名目。以商運爲主。而輔以官運。庶幾收回利權。漸循軌軌。此又當變通近年之事例。而返諸昔年之成憲者也。斯二者。皆當今之急務。而糧漕關係尤重。更張尤大。相應請旨飭下王大臣戶部。悉心集議。據臣愚見。復南漕之舊章。定海運之全規。縱使軍務大順。亦須俟諸同治五六年以後。目下二三年內。祇可作試行之局。難據爲永定之章。米石不必徵諸民間。民折銀而官購米亦可。商捐米而官代解亦可。米色不必拘守成例。江廣而摻用白糧亦可。蘇浙不盡硬米亦可。數不必其如額。全解不厭其多。三四萬石不嫌其少。價不必其盡同。此省與彼省可以參差。前批與後批可以增減。但求有米到京。一切不爲束縛。聽東南各省撫因地制宜。從容展布。試行一二年後。自然漸講漸精。中外皆有把握。惟今日之試行。卽爲他日之成案。如漕船應否另造。屯衛應否速裁。沙船應於何處受兌。上游應於何處匯總。何條應用。歷年海運之例。何條應用。本年商捐之例。均須由王大臣戶部預爲議定。庶幾可暫可久。得所遵循。至鹽務係微臣專政。目下實無鹽課銀兩可以撥充漕費。抱愧殊深。所幸湖南撫臣惲世臨。籌畫精詳。擬解米十萬石進京。除新舊漕折外。另籌巨款。以作運費。將銀兩先解臣處。商所以運津之法。又奏派迤東道黃冕。察看長江剝運事宜。黃冕因創爲米鹽互市之議。稟請於皖省設互市局。招徠湖南商賈。運米至皖。由皖省設法運滬運津。並招淮南商運鹽至皖。與楚中米商交易而退。此局若成。不特湖南漕米可以中途交兌。卽江西湖北之漕。亦可酌量由皖遞運。惟鹽如有起色。既可清軍餉之積欠。亦可補京米之不足。與崇厚之原奏。戶部之議覆。均相符合。卽與華祝三請提江廣之銀。交吳棠買米解京之奏。其用意亦復暗合。實屬因勢利導。兩有裨益。除由臣函商江楚三省詳議。各行具奏外。所有京倉需米。遵照部議。悉心妥籌緣由。恭摺由驛五百里復奏。伏乞皇太后皇上聖鑒訓示。再郭嵩燾請裁衛兵之詳。謹鈔呈御覽。以備發交王大臣戶部一併集議。臣卽不另案具陳矣。謹奏。

近日軍情片 同治二年九月二十二日

再近日軍情。金陵雨花台各營。及金柱關蕪湖各防。均無戰事。飽超一軍。由蕪湖進攻建平東壩。須先勦新河莊。

水陽金寶圩之賊。日內計嘗接戰。石埭太平之賊。窮蹙已久。本無固志。惜江忠義席寶田等軍。病卒甚多。尙未進兵。九月初七八等日。涇縣守將易開俊。勦賊於晏公塘風坑琴溪橋一帶。又獲大勝。賊乃遁往寧國縣境。其黃文金各股。由青陽迤邐下竄。意在併入浙江。左宗棠調劉典旋浙。或足以資防勦。北岸臨淮六安諸營。防守尙穩。惟蒙城糧盡援絕。恐難持久。又有陳大燾捻股。由豫入鄂。歷竄隨州棗陽應城麻城。以達黃州。勢將闖入皖境。皖北祇此兵力。別無迎擊之師。殊爲可慮。除寧國涇縣各戰狀。另案詳報外。合先附陳梗概。伏乞聖鑒。謹奏。

甯國涇縣防軍勝仗摺 同治二年九月二十七日

奏爲寧國郡縣防軍疊獲勝仗。恭摺馳陳。仰祈聖鑒事。竊總兵易開俊劉松山等。各統湘勇五營。分駐寧郡涇縣。屢遏內犯之賊。經臣三次奏陳梗概在案。本年七月下旬。太平逆酋古隆賢。石埭逆酋賴文鴻等。乘青陽被圍。官軍不暇兼顧之時。各糾大股。蓄意犯涇。以古逆一股。踞聚茂林潘村等處。以賴逆一股。踞聚丁家渡章家渡等處。附近村落。布滿賊旗。寧國守將劉松山。督隊於八月初八日。馳抵涇城。與守涇之易開俊會商。以章家渡距城較近。必須先清此路。而後可徐圖茂林。初九日。部勒各營。侵曉卽發。劉松山令章瑞璿率各旗從右路進。易開俊令陳名鈺喻先達率各旗從左路進。仍自率陳青雲王華國蕭章開繼之。道出了家渡。斬守卡賊數人。不數里。枕山依水。賊館羅列。我軍甫進。各賊已紛紛縮入章家渡。易開俊劉松山等。催軍猛擊。斬賊頗多。突有花旗一股。自金村來援。章家渡敗賊。亦復回戈轉鬪。勢殊驚悍。陳青雲率隊斜刺而入。章合才易德麟併力乘之。王華國蕭章開等。從叢箐中。鈔出賊後。賊乃錯愕。敢往水南都而去。易開俊以該處去茂林尙十七里。勢難同日進勦。謀之劉松山。於十一日。馳擊茂林。至則鳳村李村之賊。聞風悉遁。乃以大旗攻茂林四壘。以二旗攻潘村三壘。茂林之賊。踰橋來拒。鄧光武雷國英急起乘之。信賊過橋。退至村口。章合才率衆追之。樟樹下一壘。出千餘賊。互爲之援。適易德麟騎隊橫出。邀擊之。而章合才王華國等。亦從村後鈔來。賊隊散亂。不能歸。壘中守賊。亦靡然潰矣。其攻中壘者。爲歐陽廷易致中。仰攻逾時。忽見古酋出巢督戰。歐陽廷以一旗往來掠陣。易致中昇巨礮轟之。古酋負創返奔。易開俊亦自將勁隊馳至。火箭火毬齊擲賊中。立燬巨壘二座。而潘村三壘。亦爲陳青雲張恆舟二營所破。於是合軍追逐。又踰二壘於潘村之後。餘黨向太平老葉而遁。此八月初九十一等日。會勦涇縣之章家渡。及攻破

茂林潘村等處七村九壘之情形也。寧國北路曰水陽。曰馬山埠。爲羣賊所嚆聚。一聞劉松山赴涇。寧郡空虛。潛謀襲我郡城。十四日劉松山引軍馳回。傳令各門。繕修守具戒備。以觀其變。十七日諜報賊至油榨溝。將以詰朝來襲。劉松山令章瑞璿舒翰楊玉迪等。夜出南門。繞過敬亭山。擇險設伏。又令張聲壯易德麟等。在西城嚴陣以待。天甫向曙。賊數千人。沿河蜂擁而至。一悍目繞城大呼以令於衆。我將士伏於女牆。寂若無人。注視良久。見賊布勢漸寬。號鼓一發。爭拔鹿角。踰壕競進。劉松山令張聲壯等迎勦西門之賊。並分擊街後一路。陳世隆出勦南門之賊。而自督胡文高章合才等。突啓北門。鼓譟而出。賊不及備。死於壕下者三四十人。遂驅賊至北門街。賊翻身猛撲。抽刃巷戰。賊正倉皇欲遁。張聲壯易德麟等適從西門追賊而來。勢若奔瀉。遂將北門兩股一併擊退。賊之在南門者。聞信惶懼。將望敬亭山折竄而北。詎料我軍正設伏該處。橫斷歸路。賊乃東趨廟埠。併股狂奔。劉松山又遣章合才等。遮擊於前。陳世隆章瑞璿等緊躡於後。伏尸盈野。賊走陳郤灣濱河一帶。爭舟舟覆。促僞入水者無數。劉松山又於二十二日。率楊玉迪章合才等。迎賊於廟埠。不戰而退。楊玉迪進軍油榨溝河奮擊。忽爲飛子傷鼻。血流交頤。猶復單騎突陣。賊不敢犯。始相率遁河下竄。此八月十八日賊襲寧國府城。力戰擊退之情形也。維時涇縣之水南都。尚有踞匪。糾黨營聚丁塘。延及茶坑田坊四貢村。其勢復張。二十四夜。易開俊密諭各營。出奇兵以離勦。比曉進圍四貢村。執先鋒賊數百斬之。隨分二旗撲入茶坑。二旗馳入田坊。又破之。會師轉向丁塘。乘賊無備。攀卡齊入。短兵巷戰。賊盡披靡。一時潰出雲嶺。越數日。仍踰嶺而西。竄至水南都。旋踞平垣。九月初三日。易開俊軍次平垣五里許。以蕭章開曹義勝擊中路。以陳青雲王華國擊左右兩路。賊競踰崖而逸。初七日。我軍搜勦晏公塘零匪。未及交鋒。遽壩頭漕倭合股併退風坑。易開俊即於初八日。出隊琴溪橋下。設伏誘賊。賊自風坑悉衆來撲。曹義勝張涵舟接戰。伴卻引入伏中。歐陽廷陳青雲等突出包圍。亂刃交錯。賊不能支。敗往寧國縣而去。此八月下旬至九月初八等日。涇縣分勦獲勝之情形也。臣查寧國涇縣。地居皖南數屬之中。自上年張運蘭因病回湘。易開俊劉松山等接統所部。分駐兩城。屢卻大敵。復能馳驅援應。往往日行百里。實屬勞苦功多。保全大局。藍翎把總鄧光武。藍翎外委雷國英。均係力戰陣亡。應請敕部從優議卹。所有官軍駐守寧國涇縣。擊賊疊勝緣由。謹繕摺由驛五百里具奏。伏乞皇太后皇上聖鑒訓示。謹奏。

查辦章鎮黃彬參款訊明擬結摺 同治二年九月二十七日

奏爲審明章鎮黃彬被參確情。科罪擬結。恭摺仰祈聖鑒事。竊臣承准議政王軍機大臣密寄同治元年閏八月二十五日奉上諭。有人奏幫辦軍務水師總兵黃彬。安坐瓜洲。不理營務。專以收取沿江釐金。侵吞肥己爲事。并縱容所部艇師。攔劫商民貨物。誣稱盜賊。慘殺無辜。上年六月間。游擊郭定猷帶兵在劉河地面。擄劫商船。殺害良民數百人。瓜分贖財十餘萬。捏稟勦賊大勝。由黃彬入奏請獎。疊經被害家屬周姓等。在巡撫衙門控告。本年三月。有人見黃彬在船宴客。聞卽粵逆渠魁。五月內石埠橋甫經投誠之賊。在儀徵縣楊鐘琛公寓宴飲。門外擁進多人。詢係黃彬水勇。來尋賊目。索取米賬。並有接濟賊米之船。經民圍查獲。該鎮輒藉詞搶案懲辦。民團現在長江。南岸之賊。時思偷渡江北。正水師防勦吃緊之時。若委任此等劣員。駐防江面。必致與賊潛通消息。勾結竄越。於江防大有關係。著會國藩李鴻章按照所參各款。嚴密查辦。務得確情。如果通賊屬實。卽著於審明後。以軍法從事。等因欽此。又奉十一月初六日上諭。浙江黃巖鎮總兵黃彬。自幫辦江北軍務以來。總統水師。從未見其於沿江賊匪所踞各城。及附近口岸。痛勦一次。攻克一城。迨經訪查該總兵專以設卡圖利爲事。縱容兵勇。攔劫商民。藉圖肥己。僞奉檄飭焚燬沿江村莊。擄殺難民。捏報勝仗。跋扈橫行。肆無忌憚。黃彬以微末武弁。不數年間擢至專閫。派令幫辦重任。宜如何整頓營伍。奮勇勦賊。乃竟敢恃恩驕恣。肆意妄行。以致民怨沸騰。若不從嚴懲辦。何以肅軍律而飭戎行。黃彬著撤去幫辦軍務。總統水師各營。卽行革職。并著都與阿解交會國藩軍營。聽候查辦。欽此。旋經都與阿恭錄諭旨。准將黃彬咨解到皖。當卽飭發善後局司道收審取供。又派咨調來營之刑部員外郎范泰亨會提覆訊。茲據凱得黃彬供稱。一革鎮於咸豐十年。蒙恩賞加提督銜。總統水師。幫辦都與阿軍務。計是年至同治元年。三次解鎮江城圍。兩次在揚州府境。會合陸軍。痛勦江皖竄匪。暨渡江悍賊。又派上下游將領郭定猷等。各帶砲划。督同靖江如皋兵團擊退江陰壽星沙之賊。此外在小河魏村焦山各口岸。屢次獲勝。經歷任將軍巴棟阿都與阿查明會奏有案。實無擄殺難民。捏報勝仗。及劉河打仗之事。亦無村民向水營喊訴之案。惟水師船隻。大小僅三百餘號。分防江面七百餘里。南北港汊分歧。髮逆出沒無常。各處險隘。均須分船駐守。未能攻克一城。職是之故。嗣蘇杭失陷。逃勇。遺勇。廣匪。土匪。入江劫掠。疊經革鎮嚴拿。遇案卽辦。又

何敢縱容水勇。攔劫商民。至沿江設卡抽釐。實因水師餉竭。革鎮先後稟商提督李若珠。將軍都與阿准與吳全美。賴鎮海並委員梁傳黃立偉。在沙漫洲試辦。其時上下商船。每幫或數十號。或百餘號。水師派船彈壓。巡查局員抽釐。發單餉。所收銀錢。均係局員主政。迨沿江各港辦齊。旋由北台通歸南台收放。復由台改歸江北籌餉局。局撤仍歸南台收放。節經漕督王夔齡。吳棠分別奏咨。案據確鑿。委無罔利肥己情弊。又軍務倥偬。何暇宴客。或路過同鄉官。及奉差事將弁。偶爾留飯。固屬事所恆有。豈有於衆人屬目之地。公然招飲。粵逆渠魁。革鎮雖愚。亦愚不至此。若兵勇接濟賊米一節。各路水師。革鎮不時親往巡察。都與阿亦隨時派有差官查探。並未查有此事。但江路綿長。蘇杭游兵散勇。各處商船往來不絕。或有冒充兵勇。擾害商民。或有牟利之徒。裝米潛行濟賊。革鎮巡視不周。有失覺察。實屬咎無可辭。各等供議詳請奏前來。臣逐核原參各款。水師將佐實未在劉河打仗。前於會奏郭定猷案內。業經聲明。巡撫衙門。並無周姓控案。即沿江卡釐。既歸台局經理。亦無侵吞實據。惟在船宴客。索取米賤兩事。案關通賊。情節較重。反覆推勘。派員密訪。均未查有確證。是所供各情。尚無遁飾。然於游匪潛濟賊米。未能竟察。恐其部卒亦不免參錯其中。以致物議沸騰。實非尋常失察可比。自應從重比例擬結。查例載。奸徒偷運米穀。接濟奸匪者。絞。失察汛口各官。照例議處。此案已革黃巖鎮總兵黃彬。雖訊無通賊重情。乃以幫辦軍務。總統水師大員。既不能攻克城池。肅清江面。又不能禁遏奸匪。接濟賊糧。科以失察議處之例。殊覺過於輕縱。業經革職在先。仍擬請旨將黃彬發往軍台效力贖罪。以肅軍政。所有查辦總兵大員參款。訊明擬結緣由。理合繕摺覆奏。是否有當。伏乞皇太后皇上聖鑒訓示。謹奏。

恭謝天恩摺 同治二年九月二十八日

奏爲恭謝天恩。仰祈聖鑒事。同治二年八月十九日。接准兵部咨稱。奉旨頒發文宗顯皇帝御製詩文全集一部。共六冊。一覽遞到臣。當即恭設香案。望闕叩頭。祇領訖。欽惟文宗顯皇帝。聰明天亶。聖敬日躋。見知聞知。紹道統於二千餘歲。心法治法。契真源於三五六經。無日不在憂勤之中。無時不念付託之重。大孝備矣。故得萬國之歡。庶事康哉。猶恐一夫不獲。是以幾餘翰墨。悉本敬天法祖之誠。御製經筵。聿宣內聖外王之學。金穰水毀。察六府而睿藻攸廬。畢雨箕風。占庶徵而宸章屢注。虞陞之羽干未格。每咨羣牧。以徂征鼎湖之弓劍。莫攀。尤切終身。

之孺慕。金剛感應。披貝葉以成呪。寶鑄宣威。眷棟華之協力。布在方策。發爲詠歌。詩錄三百餘章。雅合飄篇之旨。文分上下兩卷。適符發易之經。揭日月以齊光。與球圖而並壽。皇上緝熙念典。宥密單心。適追而見。龔見牆。紹述而肯堂肯構。虹光下照。異書賁於石渠。雞次遠浮。鉅典說於江介。臣受恩深重。矢報涓埃。盆地開圖。未掃櫬槍之氣。在天成象。驚瞻奎壁之輝。恭廣盼信之詩。亟思克捷。謹繹開誠之喻。痛戒因循。庶冀呼轉來賓。效於甘露。河滙恢復。見於大中。崑崙渤海之波濤不驚。鉤陳大微之星緯咸若。慰先皇十一載未竟之志。大告武成。願聖主億萬年有道之長。誕敷文德。所有微臣感激下忱。理合繕摺叩謝天恩。伏乞皇上聖鑒。謹奏。

金陵軍疊克八隘并復秣陵關摺 同治二年十月十二日

奏爲金陵陸師疊克東南沿河八隘。并復秣陵關僞城。恭摺馳陳。仰祈聖鑒事。竊本年八月間。官軍攻克江東橋上方橋後。金陵城東。尙有數隘未下。夾河而壘。戒備甚嚴。近城者曰中和橋。曰雙橋門。曰七堯橋。稍遠者曰方山土山。曰上方門。高橋門。門以南則爲秣陵關。以至於博望鎮。亦金陵之外輔也。曾國荃以東路未平。不能制城賊之死命。遂令蕭慶衍彭毓橘蕭孚泗等。擇小河紆曲之處。架橋結筏。謀分隊伍東渡立營。詎賊已先據河東。築數壘以拒我。蕭慶衍壘用巨礮。隔河迎擊。旋於九月十八日。派朱吉玉李祥和更在西岸上下游。各修三營。爲進兵之計。賊復列洋槍數千枝於隄埂下。與我軍盡力對壘。相持不下者兩日夜。二十日四更時。李祥和王仕益蕭開印吳次漢等。率銳卒從下游過河。蕭慶衍率朱吉玉劉長槐等營。從上游過河。破五土壘。殲賊頗重。俄而城賊壘賊蟻擁來爭。蕭慶衍一面搶築營寨。一面麾軍環進。挫賊前鋒。逾時卻走。而東岸之營壘已成。二十二日。賊又諸道并出。銳不可當。陳凝彭毓橘蕭孚泗會督趙三元武交清駐兵其中。使雙橋門以東。不能通城賊之氣。蕭慶衍更率所部各營。徑取中路。賊入垓心。會輝日王棲鳳蕭有致等死之。各將士憤甚。相排競進。賊乃靡然返竄。蕭慶衍以騎隊邀斷歸路。遂克上方門高橋門雙橋門諸石壘。而右路方山土山之賊。經熊登武胡松江陳壽式等。分道馳勦。亦各棄壘而奔。於是七堯橋踞賊。惶懼欲遁。蕭孚泗彭毓橘帶熊登武等八營。扼定東岸之左。李臣典帶吳宗國等五營。遮擊西岸之前。正謀前後合圍。一鼓并下。城中忽出大股。抵死來援。兩軍相搏。張毓明劉開傳章盛南蔡典隆羅得升喻得輝等又死之。蕭孚泗彭毓橘急督各軍。擊退援賊。仍復偃壘。環攻至二十四夜。令死士

濬往縱火。賊衆冒煙突出。乃克斯壘。屠戮無算。此九月十七至二十四等日。連克上方高橋門。雙橋門。土山。方山。七龜橋。二十餘壘之情形也。方山以南爲秣陵關。關以南則爲博望之鎮。賊在該鎮設卡者二。築壘者七。上可以應水陽。而旁可以控金柱關。守關者爲朱南桂。亦曾國荃之部將也。九月十八日。聞鮑超等軍將有事於水陽。朱南桂即會約朱洪章。武明良等五營。進次小丹陽。潛察形勢。議襲博望鎮。使不能爲水陽之援。夜漏四下。朱南桂率黎冠湘等銜枚疾進。以武明良爲右翼。朱洪章等爲左翼。十九日昧爽。各軍前鋒齊抵博望卡下。卡賊負固死守。槍礮橫飛。猝不得進。朱洪章俟賊少懈。昇巨礮至左卡。一發而殲數賊。武明良又用火箭攢射。燔及右卡。哨柵羣賊駭懼。撲火爭竄。我軍正乘勢殺入。燬其堅卡。而壘中之賊。傾巢驟至。朱南桂往來猛撲。未能略挫其鋒。朱洪章武明良陰率哨勇。繞出頭壘。踰牆而登。賊聞後路人聲若沸。返顧羣壘。已易官軍旗幟。錯愕不知所爲。朱南桂等遂縱兵夾勦。驅賊至長流背地方。墮河而溺者強半。乃引軍回駐博望。奪獲米穀近二千石。此九月十九日金柱關防軍。攻破博望鎮二卡七壘之情形也。曾國荃以博望旣得。則秣陵之勢孤。七龜橋旣得。則中和橋之勢孤。二十五日。派趙三元伍維壽。共帶馬步九營。南略秣陵關。又派陳湜黃潤昌分帶八營。出七龜橋之西。與熊登武胡松江等會師於中和橋。一戰克之。而秣陵關之賊。見我馬步馳至。即棄釜奔潰。各營追及河干。深不可涉。僅斬尾股二百餘人而還。自是紫金山西南。無一賊巢矣。二十七日。曾國荃親督蕭慶衍蕭孚泗彭毓橘李臣典陳湜等。往勘孝陵衛地勢。將欲移駐分營。賊自朝陽太平兩門突出二枝。前來搦戰。蕭慶衍陳湜率所部各當一路。蕭孚泗李臣典率所部傍城鈔入。鏖戰方酣。俄有一酋指麾督陣。曾國荃知爲巨目。乃匿洋鎗隊於山麓。伺其近而擊之。該酋中槍墜馬。賊陣遽亂。有敗往城中者。有不及回城。轉向淳化鎮大路而逸者。蕭慶衍陳湜等率騎兵追至三十里外。俘執百數十人。訊據供稱。中鎗之酋。僞護王陳坤書也。章順二僞王。仍退入城。殆不敢復出矣。此二十五至二十七日。疊克中和橋秣陵關及大戰城下。獲勝之情形也。臣查金陵一城。面面布置。據有重險。爲拱逆堅不可拔之基。自克九洲江東橋。險而西南一面。已爲我有。茲又克七龜橋秣陵關等險。而東南一面。並爲我有。現今蕭慶衍全隊進紮孝陵衛。經營城北。漸成合圍之局。此次出力人員。應俟續立功績。彙案請獎。其力戰陣亡人員。俟查明另行開單請卹。所有金陵一軍。疊克要隘緣由。謹會同大學士湖廣督臣官文。江蘇撫臣李鴻

章浙江撫臣曾國荃由驛五百里具奏伏乞皇太后皇上聖鑒訓示謹奏

古隆賢率衆投誠收復三縣摺 同治二年十月十一日

奏爲降人古隆賢舉衆就撫收復石埭太平旌德三城恭摺馳陳仰祈聖鑒事竊僞匡王賴文鴻竄踞太平一縣僞奉王古隆賢分踞石埭旌德廣德等城聚黨出掠久貽皖南之患自賴文鴻爲涇軍所敗遁入寧國縣而太平遂爲古隆賢分地本年八月下旬青陽解圍後該城守將朱品隆疊據古隆賢遣人通款請以四城獻部衆之在石太者四萬有奇其在旌廣者亦三萬有奇悉願反正乞貸一死朱品隆察其窮誠歸誠情詞肫切知非挾詐僞而來也卽呈明臣處議將廣德撫局以鮑超任之旌德撫局以易開俊任之石埭太平撫局則請自任之九月十九至二十三等日朱品隆兩派營弁馳赴石埭宣諭降衆先繳軍械次令薙髮分屯城下以待命二十八日親督易澗壇梅錦源等分帶四營入城受降並調踞守太平之江老三二千餘衆歸併石埭詳加簡閱挑留馬步千人編立營哨仍交古隆賢管帶責令立功贖罪餘則由臣籌發萬金視原籍之遠近定給資之多寡概予遣散是日旣復石埭縣城遂於次日飭喻志業前往太平并復城池調喻吉三所部三營守之初江老三方以太平來獻僞天將江會義率黨背盟殺古朝將以叛取道三溪竄往廣德二十七日涇縣守將易開俊突由馬渡橋橫出截擊斬馘頗衆乃引軍進次旌德城外守旌德者爲僞咄天義申法喜早已聞風先遁餘黨盧旺有汪泯珊長蹠道左舉城歸降易開俊安撫城中盡遣降卒三千餘人卽分所部兩營守之據總兵朱品隆易開俊歷將籌辦情形呈報前來臣查古隆賢爲賊巨魁本屬罪不容誅一旦翻然悔悟自拔來歸不煩一兵而三城並下亦尙有寸功足錄不邀寬典則無以開羣盜自新之路而廣聖朝如天之仁合無籲懇天恩准照上年洪容海投誠成案賞給古隆賢游擊虛銜頂戴以昭激勸其部下頭目及經辦招撫各將士可否容臣查明酌加獎勵之處出自聖裁所有古隆賢率衆來降疊復三縣緣由謹繕摺由驛具奏伏乞皇太后皇上聖鑒訓示再廣德一城臣飭鮑超部下宋國永往辦招撫事宜旋有叛黨江會義申法喜等下竄尙恐事多中變現在水陸各軍已克復東場鮑超卽將由建平進勦廣德該州之或撫或剿已檄令相機辦理續行具奏合併陳明謹奏

近日軍情片 同治二年十月十一日

再近日軍情。臨淮一路。穩守如常。甯明阿於九月二十五日。親赴蒙城督勦。李世忠進軍姚家灣。以圖下蔡。直擄苗逆老巢。唐訓方亦分軍大小蚌埠。以圖懷遠。聲勢頗爲聯絡。潁州兵練攻破朱滑孜圩。郡西漸靖。陳大燿捨股。亦經鄂軍擊敗。由麻城境內竄歸河南。無慮旁延皖境矣。湖南道州有警。孫長絨以江西南邊空虛。咨調席寶田一軍。赴贛州防守。臣又令江忠義一軍。回駐饒州境內。江西設有緩急。添此兩軍。足資防禦。大江兩岸。寧國太平。以東。久爲賊藪。彭玉麟親督水師。會合王可陞吳坤修等陸師。於九月杪。攻克鑿灣金寶圩水陽新河莊塘溝滄。各賊壘。駐師高淳湖口。高淳守賊楊友清。遣人乞降。十月初二日。收復高淳縣城。東壩賊黨黎立新等。亦即具稟納款。願爲內應。彭玉麟知東壩一股。已無固志。商同鮑超率師疾進。楊岳斌亦帶師船來會。旋於初七日。攻克東壩。留黎立新降衆三營。餘則誅夷殆盡。此次幸仗天威。得此東壩要隘。不特皖南可冀肅清。卽東至蘇州。北至金陵。攻取亦較有把握。除水陸勦撫各情形。另摺續報外。合先附陳大概。仰慰宸廑。伏乞皇太后皇上聖鑒。謹奏。

聲明石太旌寧四城失陷緣由片 同治二年十月十一日

再臣欽奉寄諭。以太平石埭旌德寧國四縣城。於何時失陷。現在是否均淪於賊。著會國藩查明具奏。一等因欽此。臣查上年六月十五日。寧郡克復後。臣於宣城涇縣南陵寧邑皆置守兵。以其爲邊圍距賊近也。於石埭太平青陽池州。皆未置守兵。以其爲腹地。去賊遠也。厥後七八等月。疫疾盛行。鮑超游擊之兵。與各城防守之兵。均岌岌不能自保。寧國縣城於九月初六日被賊攻陷。守將韋志俊洪容海皆係降人。臣故未嚴參也。十月中旬。羣賊圍攻旌德。守將朱品隆苦戰苦守。幸得保全。十一月初三日。賊從旌德闌入太平。并由太平繞越祁門。初十日。出赤嶺趨田家樂。竄入石埭。十二月初五日。青陽不守。臣於是調朱品隆一軍。舍邊圍而先固腹地。棄旌德而移勦青陽。雖旋即克復青陽。而旌德一城。苦無駐守。又爲賊踞矣。該四城失陷原委。臣經四次奏陳在案。現在古隆賢投誠。石埭太平旌德三縣並復。惟寧國縣尙爲賴文鴻所據。一俟廣德勦撫辦有端倪。則該縣勢孤。或亦不難於攻取。所有奉旨飭查緣由。理合附片覆奏。伏乞聖鑒。謹奏。

克復水陽東壩等隘高淳等四縣摺 同治二年十月二十七日

奏爲水陸各軍。勦撫兼施。疊復水陽新河莊東壩等隘。高淳寧國建平溧水四城。恭摺馳報。仰祈聖鑒事。竊官軍

攻克水陽新河莊並復高淳東壘等城。臣國藩於十月十二日附陳大概在案。方鮑超進軍仙人橋。王可陞進軍東門渡。出金寶圩之南。將併攻新河莊。臣玉麟以該處地窄勢險。未可以用衆也。因率喻俊明唐敏義水師兩營。並約吳坤修劉祥勝傅家桂等陸師六營。出金寶圩之北。將有事於水陽。臣岳斌亦率李濟清羅宏裕王仁和等戰船來會。師次窰灣。見有堅大石壘。礮眼層列。能越水陽等壘。而遙擊我軍。九月二十六日。風雨蔽天。賊備少懈。喻俊明唐敏義乘夜運礮過河。密排洲次。徹夜環轟。比曉。石壘半圯。遂合劉祥勝等鼓噪而前。李濟清吳坤修亦駕小划。入亮陸門。平圩壘數壘。并攻水陽破之。其南路則有成發翔張錦芳等。帶舢板進南湖。毀夾岸兩卡。卽於次日衝過新河莊。從油榨溝倒擊而下。時鮑超浮橋未成。弗克東渡。王可陞偏師獨進。正與衆賊相持。各水勇升岸大呼。踰壕竄入。力攻新河莊。又破之。水陽迤北曰滄溪。距滄溪十餘里。曰塘溝。爲直達高淳之要路。臣玉麟於二十九日。令吳坤修萬化林往取滄溪。親督水師及傅家桂等陸師。襲陷塘溝。進塘溝數里。曰高淳湖口。東西兩壘。萬槍齊發。阻我陸軍進步。十月初一日。唐敏義王仁和於槍子如雨之中。會合各舟師。疾駛而進。拔其堅壘。又數里。曰長樂鎮。街市之中。賊築石城礮臺。旌旗迷目。我軍略不停槳。衝入湖心。忽梗一橋。洋槍集於橋下。喻俊明羅宏裕李濟清傍兩岸。悉力衝擊。唐敏義王仁和爭拔樁木。斫斷橋梁。一躍而上。舉火立燔石城。該鎮既克。劉祥勝傅家桂亦渡早隊來助。吳坤修萬化林亦自滄溪戰勝而還。乃合軍謀進高淳。先是高淳賊目楊友清。乞撫不許。至是該賊目遣人通款。伏地涕泣。自陳。臣玉麟察其情詞可信。令與僞輔王餘黨自相攻鬪。始許之降。初二日。率師前往受降。及至西門外。煙焰上騰。殺聲未絕。楊友清率衆扣馬告曰。僞輔王府餘孽有變。頃已計斬之矣。於是入城安撫。悉遣降衆。是夜略地而東。並取固城一鎮。此九月二十七至十月初一日。水陸連破七隘。初二日收復高淳縣城之情形也。自太平旌德背盟叛去之江申二會。下竄東安鎮。圖與僞匡王賴文鴻合股。易開。復以旌城初復。賊未遠颺。利在速戰。而又慮廣德撫議未成。仍爲該二會挾之以叛也。乃遣降人彭國鈞。開道入廣德。馳諭招之。一面部勒營伍。於初三日度環雲嶺。將抵東安鎮市口。賊館如雲。散布村落間。歐陽廷易致中步隊。及蕭章開騎隊。騰蹕而出。所遇輒殲。隔岸賊援。涉水來爭。又得陳裕英等渡河鈔擊。陳名鈺等沿河兜剿。賊受大創。圍然而潰。維時寧郡守將劉松山。方揚隊於白菓樹湯村何村一帶。詎知株木店增賊四五千衆。悉自東安

鎮戰敗而來。乃引軍突出截之。賊正傳餐將發。不虞我兵猝至。悉無鬪志。棄釜駭奔。劉松山親督各勇。馳出廣德大路。旋即移師東嚮。將歸寧國縣城。賊賴文鴻先經聞風。宵遁。而易開俊所派之陳玉英等旗適至。遂與劉松山會復城池。初四日彭國鈞返自廣德。引降將鄭魁武部衆萬餘人。詣東安鎮軍前乞降。易開俊曉以大義。簡留一營。餘則概予資遣。惟鄭魁武舉衆來歸。廣德一城。又爲江會義申法喜叛黨乘虛竊據矣。此十月初三日收復寧國縣城之情形也。初新河莊既克。尙有東夏四壘。爲建平東壘之樞紐。初八日鮑超令馮標周有勝王衍慶等。屯軍曹塘。進攻東夏。賊恃牆濶濠深。堅伏不出。馮標摩壘而進。手刃悍酋。周有勝王衍慶率衆爭抽鹿角。齊登一壘。平而衆壘俱下。自是東壘守賊黎立新等。上書水營。請爲內應。建平守賊張勝祿等。上書陸營。請獻城池。定議。建平撫事使馮標任之。東壘之戰事。則鮑超與臣玉麟同任之。初七日。臣玉麟率水師入營。及吳坤修劉祥勝等。早勇六營。鮑超亦率馬步十三營。合趨東壘。見壘上高峙三大壘。壘後築有僞城。橫互數里。正議分單立寨。僞隨王楊柳谷馳告壘賊梗命。楊輔清爲謀主。乞速進兵。以踐黎立新之約。鮑超即令譚勝達李文益熊鐵生黃海清孫得友等。繞壘圍攻。臣玉麟亦令喻俊明唐敏義等五營。依護吳坤修劉祥勝各隊。直出壘上。適臣岳斌飛檄而來。督令李濟清王仁和羅宏裕等。專向水路助陣。戰不逾時。殲賊盈千。賊多踰壘而逸者。楊輔清從亂軍中。敗往溧陽。而楊柳谷立獻僞城。乃克東壘要隘。東壘復而建平之捷書亦至。自馮標入境宣諭。張勝祿等十二人。感激涕零。矢志不貳。卽於是日。斬僞跟王藍仁得。舉城以降。建平復而溧水之降書又至。踞溧水者爲楊英清。黨衆萬餘。願繳軍械。各散回籍。十二日。臣玉麟會同臣岳斌。帶隊進城。溫詞撫慰。盡資之行。不復稍留降衆。另立新營。此十月初七至十二等日。勤撫兼施。克復建平溧水二縣。及東壘一隘之情形也。伏查江皖接壤之區。以東壘爲最要關鍵。仰賴天威震疊。讐服羣酋。旬日之間。收取四城。并奪東壘重險。臣國藩現檄鮑超全軍。駐守東壘。保此三省扼要之地。卽爲附近游擊之師。檄派王可陞守溧水。李榕守建平。洪容海守高淳。朱品隆喻吉三兩軍分守青陽石埭太平三城。易開俊劉松山兩軍分守寧郡旌德涇縣三城。此外無兵可撥。以故廣德一州。未能進勦。寧國一縣。未能置守。致皖南不能一律肅清。愧歎實深。諸賊目革面自新。有裨全局。似宜宥其罪而并錄其功。合無籲懇聖恩。准將楊柳谷鄭魁武張勝祿等三人。賞給都司虛銜頂帶。楊仁義黃儒繡李明魁黃勇發江元泰陳永爵董

明玉湯桂風陳世青周珍金汪保發等十一人賞給守備虛銜頂帶以昭激勸其餘大小頭目可否酌給虛銜此次在事出力人員可否容臣等查明併案保獎之處出自鴻施逾格至陣亡各員弁均俟一併確查彙案請卹所有官軍勦撫並籌疊復各城隘緣由謹繕摺由驛五百里具奏伏乞皇太后皇上聖鑒訓示謹奏

李世忠軍破苗圩復懷遠縣摺 同治二年十一月十二日

奏爲提督李世忠率師入淮疊破苗圩會復懷遠縣城恭摺彙陳仰祈聖鑒事竊自苗逆倡亂連陷壽州潁上懷遠各州縣圍撲蒙城分伺臨淮李世忠以臨淮爲中原樞紐未可爲賊所伺乃由滁州馳檄討苗誓師前進派朱元與李顯發等各帶數千人先後赴援臨淮仍親督大隊移駐五河以爲之繼九月二十三日我軍循淮河南岸而上道出劉府考城灰溝一帶旋據姚家灣總姚紹珍率衆來助李世忠即令徧諭各圩許以自新於是淮南北之聞風反正者百有餘圩惟壽州中心渡之東鄉有柏家圩尙爲苗黨死守十月初三日李世忠由石頭埠催隊猛進逾時平之初八日行次中心渡自東迤南引軍繞圩而過不料圩中槍礮突發損我軍士二十餘人李世忠諒知該數圩悉皆壽城賊渠李萬春之黨即飭各營分道圍擊使賊不能相顧盡舉十四圩又平之次日我軍所至且勦且撫計毀八圩收十數圩並於十一日攻克小古墩集六圩該集之西曰夏家寨寨中悍賊所聚濠深牆峻猝不易攻李世忠先令陳自明與李顯安等率隊直前誘賊出寨俄見賊負長槍爭先迎拒火機所觸發無不中乃令李顯發鈔出賊後朱元與蔣立功等分兩翼斜刺而入賊知不敵返奔入寨我軍追至濠邊緣牆欲上詎賊守禦益嚴先登者中槍輒蹶十二日各勇填濠縱火烟塵蔽天守寨之賊不及燃礮衆軍已搴旂而登鋒刃環加鮮有脫者夏寨既破壽東附苗十一圩亦皆不戰而潰矣二十二日李世忠即派李顯爵帶礮艇出蚌埠擊賊獲勝尋聞蚌埠守賊張士端舉衆就撫計懷遠一城必可襲而取也遂於二十七日督同李顯發朱元與蔣立功陳自明李顯安等合壽州而轉趨懷遠與唐訓方會師於城下未幾城賊自亂喧聲突起我軍知其內變乘勢急攻賊卽披關出降長臨道左各軍整隊而入立將縣城收復節據江南提督李世忠呈報前來臣查逆練苗沛霖稱兵復叛疊陷城池據有長淮形勝屢以甘語詭詞煽誘李世忠乃李世忠赤心報國作嚴檄以誅苗申大義而誓衆毅然以討賊爲己任親率萬數千人削平四十餘圩收復名城此次僧格林沁大兵南下苗逆立刻授首

誠如疾雷破山。無堅不靡。而李世忠勤平各圩。能使苗黨紛紛反正。實亦有裨大局。除該提督部將李顯發李綱爵業由撫臣唐訓方另摺奏請獎敘外。應懇天恩。俯准開復李世忠革職留任處分。以昭激勸。其餘出力員弁。可否容臣查明酌保之處。出自聖裁。所有李世忠一軍勤撫諸圩。收復懷遠縣城緣由。謹繕摺由驛五百里馳奏。伏乞皇太后皇上聖鑒訓示。謹奏。

近日軍情片 同治二年十一月十二日

再近日軍情。曾國荃雨花臺一軍。於十月初五六等日。攻克淳化解溪隆都湖墅三岔鎮五隘。破賊二十餘壘。金陵城東百餘里內。一律肅清。遂於十五日進紮孝陵衛。城賊運糧之路。業已斷絕。惟城內賊數尚多。其氣尚固。我軍於四月開挖地道。直至十一月初五夜。始得挖成。用火藥轟陷十餘丈。該逆內築月城。下穿橫洞。竟能搶堵缺口。我軍陣亡三百餘人。傷者更多。蘇州克復而後。聞僞忠王之計。將入金陵勸洪逆首以出竄。臣觀洪酋之堅悍。未必肯棄金陵。而竄他處。目下當以全力謀破堅城。一面布置各軍。分堵上游。事機愈順。圖謀愈不可不慎。長淮一帶。蒙城解圍。苗逆授首。蔣凝學成大吉等進取潁上。於十月初二三等日。攻毀近城七圩。該城頭目方長華。乞降不許。乃斬苗景和苗景花以獻。次日遂復縣城。毛有銘初四日進攻正陽關。苗黨朱萬隆遣人乞降。適僧格林沁遣將康錦文。富明阿遣將程文炳前來招撫。遂會同納降。收復正陽關城。又據李世忠咨報。二十九日派何璜收復下蔡。獲苗逆妻子五人。二十日派朱元興收復壽州。等語。臣查壽州下蔡去僧格林沁大營最近。當已遣將先行招撫。除俟接到僧格林沁唐訓方來咨。另案續報外。合先附陳大概。馳慰宸廬。伏乞聖鑒。謹奏。

李續宜病故遺書代陳摺 同治二年十一月二十七日

奏爲前任安徽撫臣病故。遺書節錄代陳。恭摺奏祈聖鑒事。竊臣接據湘鄉來函。前任安徽撫臣李續宜。於十月二十八日在籍病故。其前一日。該撫自作遺書寄臣。中有云。伏枕自揣。決無生機。續宜死何足惜。所最難安者。兩朝之恩未報。老父之養未終。髮逆蔓延。苗逆猖獗。敵部二萬人。分駐皖省。一切全賴主持。續宜臥病家山。奄奄待盡。心事未了。死不瞑目。前數日原擬將未了事宜。力疾爲一遺表。乃搆思未就。遽爾病革。一息尚存。遺憾何極。伏懇具疏代達鄙忱。上謝聖朝高厚之恩。略表圖報來生之意。等語。臣查該故撫李續宜。以書生從戎。咸豐

三四五年幫辦其師羅澤南營務。六七八年幫辦其兄李續賓營務。戰勝攻取。無役不從。臣與胡林翼皆知其才。足以獨當一面。勸令召募新軍。別樹一幟。李續宜堅不允從。故數年功績。爲其兄所掩。未予優獎。直至八年之冬。李續賓殉節三河。李續宜始始泣誓師。代領其衆。九年夏間。逆酋石達開擁數十萬衆。圍攻寶慶九十餘日。李續宜自鄂馳援。一戰而解。威望由此大震。恩遇因之日隆。未及一歲。由道員擢巡撫。回援湖北。連克兩府五縣。李續宜猶以驟膺重任。不克上酬國恩。下雪私仇爲恥。聖主臨御。李續宜調任鄂省。再撫皖中。旋授欽差大臣。異數稠疊。密諭肫誠。李續宜每與臣言。自以新進之路。謬受腹心之寄。恩重報輕。惶悚無地。逮丁憂以後。賞給治喪銀兩。派地方官經理。詔許回籍。屢次展假。受恩愈渥。圖報愈切。而病亦愈深。不可爲矣。自李續賓帶兵以來。兄弟皆以潔清自矢。廉俸薪資。悉供軍用。家無長物。環堵蕭然。李續宜每謂區區介節。不足以言報稱。古有沒而結草以酬恩遇。李續宜臨終遺書。殆出至誠。臣蓋於其平日信之也。李續宜之入皖也。與袁甲三志同道合。皆以銳意討苗爲己任。袁甲三彌留之際。亦嘗有書遺臣。囑臣慎益加慎。勿輕苗逆爲易剪。勿視淮地爲易收等語。有苟偃付托。士句死不瞑目之風。今苗沛霖伏誅。淮甸澄清。該兩臣齋志以終。不克親歷行間。一抒生前之忠憤。尤爲可悲可憫。除袁甲三業已加恩褒卹外。李續宜應得卹典。例由湖南撫臣入奏。臣不敢妄有陳請。特其臨終遺函。悱惻哀痛。理合專疏馳報。代達勞臣戀闕之忱。所有接據前撫臣病故遺書。節錄代陳緣由。伏乞皇太后皇上聖鑒訓示。謹奏。

近日軍情片 同治二年十一月二十七日

再近日軍情。僞忠王李秀成自蘇州逸出。統衆數萬。分布丹陽句容龍潭石埠橋等處。初十日。忠逆率數百騎。由太平門入城。會國荃令蕭孚泗李祥和等。在附城一帶。修一月牆。十三日賊出大股來撲。我軍力戰卻之。賊亦傍城增壘。防我地道。我軍復於十六夜力攻破之。疊據降賊供稱。忠逆既至金陵。勸供逆棄城同逃。供逆不從。忠逆有向寧國縣繞越開化玉山入江西之議。臣已咨商左宗棠沈葆楨嚴防東路。其西路爲羣賊上犯之熟徑。處處可通。臣於徽寧池三屬。派兵分守十城。江西之東北邊境。如石門洋塘景德鎮等隘。亦經沈葆楨逐段設防。惟尙欠大枝游擊之師。頃因贛南防務已鬆。臣函商沈葆楨檄調韓進春一軍。回顧鏡景重地。以期有備無患。理合附

片具陳梗概。伏乞聖鑒訓示。謹奏。

欽奉諭旨覆陳四條摺。同治二年十二月十二日。

奏爲欽奉疊次諭旨。恭摺覆陳。仰祈聖鑒事。竊自本年入冬以來。苗黨就誅。蘇垣克復。東南軍事。大有起色。惟劇寇未除。反側難安。可慮之處尙多。屢蒙誥誠精詳。指示機要。計十一月十一至二十二等日。奉旨飭查及垂詢各種事宜。謹一一分晰條列。詳對如左。

一、恭奉十一月十一日諭旨。壽州收復之後。李世忠所部進城。擅殺守門勇丁五名。又於圍攻下蔡時。因宋慶不肯讓給調隊攻打。爭功起釁。實屬不成事體。飭將啓釁根由。秉公查辦一節。臣查陳國瑞與李世忠構衅。彼此各執一詞。據陳國瑞稟稱。一派副將康錦文帶同苗景開。於初一日攻克壽州。初三日有李世忠營將領進城。即殺守門勇丁五名。康錦文遂整隊迎敵。立將李營隊伍逐出城外。生擒五十餘名。內有已保提督之蔣立功一名。等語。據李世忠呈稱。一派朱元與等前往收復壽州。不料被苗景開將記名提督朱元與杜宜魁二員。同時殺斃。尸在壽州月城之內。又派蔣立功前往收復正陽。行過壽州。被人誘入城內。宋慶康錦文將提督蔣立功鎖押。等語。僧格林沁初次具奏。稱李世忠所部。擅殺守門勇丁。其時但據陳國瑞之稟。尙未接李世忠之稟。厥後接到李世忠稟件。知陳國瑞部下宋康二將。有鎖押蔣立功之案。其所帶之苗景開。又有殺斃朱元與杜宜魁之案。情節尤重。僧格林沁寄臣一函。謂兩造各執一詞。已咨唐訓方查辦矣。唐訓方旋亦寄臣一函。謂朱元與杜宜魁與宋慶康錦文先後同入壽城。彼此互爭。互有殺傷。今李世忠咨稱朱元與杜死於苗景開之手。應即殺苗景開以讎抵。先了此案。等語。以臣愚見。觀之。苗景開本係苗沛霖親屬死黨。即無殺朱元與杜二人。應抵之案。亦在萬不可赦之列。宋慶雖稟訴蔣立功擅殺門卒。然互爭之時。殺傷實亦相當。又於李世忠部下之提鎮擊斃二人。鎖押一人。當不至更有餘怒。李世忠不敢歸咎宋慶等。而指名係苗景開所殺。又恐其部下滋事。急急帶隊回滁。是尙無尋仇生衅之意。若果殺苗景開以慰之。必且感而兼畏。不至更有後言。此案由唐訓方悉心查明。僧格林沁就近判斷。自可處置妥善。兩得其平。至下蔡之役。係李世忠部將何瓚先入。苗衆雖降。而尙未獻寨。逮宋慶康錦文挾苗景開而來。賊始舉寨以獻。當時互爭鬪殺。在所不免。何瓚旋即退至龍王廟。

尙無始終爭執情事。謹就微臣所聞。覆陳梗概。其詳細情形。應由僧格林沁。唐訓方查明擬結。

一、恭奉十一月二十二日諭旨。垂詢正陽收復之時。道員蔣凝學何以有等奪開礮。致傷兵勇之事。飭令查明。據實奏聞一節。查正陽關城本係毛有銘會同康錦文程文炳。於十一月初四日前往收復。維時蔣凝學成大吉兩軍。尙在額上。未知朱萬隆先已獻關投誠。初六日移師至正陽。隔河立營。正擬搭造浮橋。而關上陸軍。河下礮刻已羣起轟擊。蔣凝學等但知有朱萬隆尙在城內。以爲苗黨之出拒官軍也。不得不開礮還擊。蓋康錦文自壽州而往。在正陽之東。毛有銘自六安而往。在正陽之西南。蔣凝學自額上而往。在正陽之西北。三者各不相謀。嘗彼此互擊之時。不特康錦文官兵在關城之內。蔣凝學不得而知。即毛有銘湘軍在關城之旁。蔣凝學亦不得而知也。旋經毛有銘飛騎馳告。彼此各自收隊。究竟浮橋未成。並無一人渡河。蔣凝學所稟傷亡六十餘人。康錦文所稟傷亡二十餘人。臣竊以爲皆不可信。頃據唐訓方來咨。有「親赴正陽。細加訪察。實因兩下未及知會。並非有心尋衅。」等語。揆厥情形。尙屬可信。唐訓方業經咨呈僧格林沁。免其查辦。臣卽日亦當具咨詳述一切。

一、恭奉十一月十五日諭旨。鮑超全軍。現紮東壩。此時溧水已復。自應進圖句容。以斷忠逆救援金陵之路一節。查溧水迤北爲句容。而迤東則爲溧陽。該處去東壩較近。實僞侍王李世賢之老巢。十一月十二日。侍逆糾黨五六萬衆。分屯梅塘。距東壩建平各四十餘里。十四日進犯建平。守城將士一戰卻之。又轉趨周城社。一帶。於二十五日猛撲溧水。守將王可陞徹夜登陴。力戰卻之。近據諜報。忠逆由金陵退入句容。旋由句容潛入溧陽。與侍逆合股。意在分擾溧水建平。奪我東壩一關。併圖上竄。東壩爲江皖浙三省關鍵。鮑超正須以全力爭此要區。暫不能進取句容。以合金陵之圍。自句容而外。論者又謂宜急取廣德。肅清全皖。扼賊上犯之路。臣以廣德易取而不易守。鮑超既力扼東壩。更無他軍可當廣德一路。句容廣德之不能早爭。先著。蓋臣之力薄。而心彌歉耳。

一、恭奉十一月二十二日諭旨。壽穎各城。均已收復。現祇勦辦零星股匪。可以無須大兵屯聚。張得勝蔣凝學成大吉諸軍。均可移緩就急。分撥赴陝一節。查湘營之在皖北者有四。一日蔣凝學。駐軍潁州及三劉集。取穎

上縣城者也。一曰毛有銘。駐軍老廟集。會復正陽一關者也。一曰周寬世。駐軍六安州。分防迎河集者也。一曰成大吉。駐軍三河尖。與蔣凝學同進潁上者也。此外又有石青吉一軍。駐防廬州。係多隆阿舊部。亦歸臣處調遣。臣以皖北苗黨就滅。羣圩悉平。而忠逆又有上竄江西之議。皖南別無大枝游擊之師。乃檄毛有銘所部移駐皖南。並調周寬世回守省城。而換出安慶防兵。與毛有銘同赴南岸。爲江皖交界游擊之師。其成大吉一軍。已准官文來咨。調赴鄂省。防勦三關一帶。石青吉一軍。亦赴鄂省。防勦小河西一帶。將來此二軍者。或久留湖北。或漸入陝西。應由官文酌度辦理。臣所轄皖北之兵。除調出四軍外。僅留蔣凝學數營。分防潁州六安等處。暫時未可輕動。

以上四條。均係近日奉旨查詢之件。理合逐款條對。由驛五百里馳奏。伏乞皇太后皇上聖鑒訓示。謹奏。

恭謝天恩並陳近日軍情摺 同治二年十二月二十七日

奏爲恭謝天恩。並陳近日軍情。仰祈聖鑒事。竊臣接准江蘇撫臣咨開李鴻章奏克復蘇州一摺。同治二年十一月初四日。內閣奉上諭。一協辦大學士兩江總督曾國藩。遣將助兵。克復名城。著交部從優議敘。一等因欽此。當即恭設香案。望闕叩頭謝恩。伏念臣忝督兩江。才識短淺。庚申辛酉兩年。方以經營皖事。愧不能調將分兵。早達蘇境。以慰吳人雲霓之望。而紓朝廷宵旰之憂。逮壬戌年。疏薦李鴻章率師赴滬。又愧不能多撥得力之營。同履危險之地。維時所遣之將。陸軍僅程學啓一人。係曾國藩拔諸降衆之中。信其謀勇寡儻。水軍僅黃翼升一人。係臣奏統舟師之員。信其忠誠可恃。此外如潘鼎新劉銘傳張樹聲吳長慶張遇春等。皆臣與李鴻章商同遴派之將。自李鴻章抵滬以後。臣卽未續撥一將。續助一兵。今夏派李朝斌太湖水師東下。滬中之局已大定。威已大振矣。蘇州功績之成。乃由李鴻章秉承聖謨。獨摠忠愫。每當艱險之際。恆匹馬以當先。或遇絕續之交。持孤注以爭勝。用能轉危而爲安。遠攻而近守。臣自愧謀略之不如。亦並爲始願所不及。更復何功可言。何勞可錄。不圖聖澤旁敷。優加甄叙。聞命之下。感悚交併。縱愚忱之勉竭。覺報稱之彌難。自蘇州克復。僞忠王卽帶數萬人援救金陵。到城已近五十日。尙未猛撲官軍營壘。近據李鴻章來函。一聞忠逆以溧陽至饒景數百里。處處乏食。頗以裹糧無趨爲難。一又據鮑超來牘。一探報侍逆將親率悍黨。裹二十日糧。蓄意由長興廣德寧國一帶。上犯江西。先

據產糧之區。以俟忠逆續至。各等語。臣竊計忠侍二逆。既不能各保分地。又不能苦援金陵。誠非自皖入江。別無圖存之策。從廣德寧邑上竄江西。約有兩路。西路由旌德太平石埭以竄饒景。東路由昌化淳安開化以竄玉山。西路之防。臣已派兵堅守涇旌太石青池六城。東路之防。必由浙境經過。臣已飛咨左宗棠沈葆楨。分別扼守。以期節節堵遏。力保上游完區。其金陵洪逆老巢。賊氣尚固。糧食未竭。臣弟曾國荃日夜憂灼。臣屬令不求速效。但求穩慎。以期仰副聖主廬念南疆。謀出萬全之至意。所有微臣感激下忱。並近日軍情。謹繕摺由驛具奏。伏乞皇太后皇上聖鑒。謹奏。

淮南鹽運暢通力籌整頓摺 同治二年正月十二日

奏爲淮南鹽務運道暢通。力籌整頓。以冀規復舊制。恭摺仰祈聖鑒事。竊臣於上年九月二十二日覆奏京倉帶米摺內。曾將籌辦南鹺情形。略陳大概。在案。伏查淮南鹽課。甲於天下。自長江梗阻。引岸廢弛。疊經前督臣於咸豐四年。奏辦就場抽稅。販戶下場細鹽。收課甚微。又於七年。奏改設局征稅。令水販就棧探買。稍有成效。但每年所徵課銀。較全盛時。尚不及十分之一。總因楚西引地未通。鹽無去路。是以課無來源。現在江路肅清。運道暢行。無阻。所有楚西各岸。自應趕緊設法。運鹽濟售。力圖整理。而籌辦之難。大端有二。一在鄰鹽之侵灌。太久。西岸則食浙私粵私。而兼以閩私。楚岸則食川私粵私。而兼以潞私。引地被占。將及十年。民既藉此以濟食。官亦藉此以抽釐。積重難返。久假不歸。勢不能驟行禁絕。一在釐卡之設立太多。淮鹽出江。自儀徵而金柱關。而荻港。而大通。而安慶。而華陽鎮。以達於楚西。層層設卡。處處報稅。均以鹽釐爲大宗。諸軍仰食。性命相依。勢不能概行裁撤。臣博訪衆論。核定新章。按切今日之時勢。仍仿昔年之成法。大致不外乎疏銷。輕本。保價。杜私四者。請爲我皇上羈縻其略。自鄰鹽侵佔淮界。本輕利厚。淮鹽不能與之相敵。江楚百餘州縣。徧地皆是。查之不勝其煩。堵之且恐生變。計惟重稅鄰私。俾鄰本重而淮本輕。庶鄰鹽可以化私爲官。而淮鹽亦得逐漸進步。現已咨明湖廣江西各督撫。將鄰私釐金酌量加抽。聽鄰鹽與淮鹽并行不悖。譬之田產。被客民佔據。田主初歸。姑與客分耕而食。待至淮運日多。銷路日暢。然後逐佔田之客。申鄰鹽之禁。此疏銷之略也。近年楚西之鹽。每引完釐約共在十五兩以上。所分濟者。下游爲都興阿之餉。馮子材之餉。李世忠之餉。上游爲臣與官文部下之餉。皆萬不可停者。臣與各處

咨商。鹽釐不能全停。未始不可暫緩。除揚鎮兩防。宜照舊額外。其餘未始不可少減。臣酌定新章。前之逢卡抽收者。今改爲到岸售銷後。彙總完釐。分解各軍。前之收十五兩有奇者。今改爲楚岸每引抽銀十一兩九錢八分。西岸每引抽銀九兩四錢四分。皖岸每引抽銀九兩四錢。既減釐以便商。又先售而後納。此輕本之略也。商販挾貴求利。無不願價值常昂。保而勿失。然不由官爲主持。往往見小欲速。跌價搶售。其始一二奸商零販。但願卸貨而先銷。不肯守日而賠利。其後彼此爭先。愈跌愈賤。如風捲潮退。雖欲挽回以保成本。而不可得。官與商俱受其害。現於楚西各岸。設立督銷局。派委大員。駐局經理。鹽運到岸。令商販投局掛號。懸牌定價。挨次輪銷。時而鹽少。小民無食貴之虞。時而銷滯。商賈無虧本之慮。此保價之略也。鹽法首重緝私。大駭私梟。明目張膽。猶不難派兵捕拏。最易偷漏者。包內之重斤。船戶之夾帶。所謂官中之私。查禁尤難。現經改復道光三十年舊章。每引正鹽六百斤。分細八包。每包另給涵耗七斤半。包索三斤半。共重八十六斤。由臣刊發大票。隨時填給。并於大勝關大通安慶等處。派員驗票截角。如有重斤夾帶。立即嚴加懲究。提鹽充公。其各岸之兼行鄰鹽者。亦必另給稅單。苟無單而販私。即按律而科罪。此杜私之略也。茲四者。均就目前之要務。及道光年間之成規。參酌而損益之。無論官運營運。悉照商運一律辦理。至應完課銀。因鹽釐爲數過衆。未能遽議加增。仍照咸豐七年奏案徵收。向來鹽課按半年奏報一次。今擬將各處彙收之釐。亦分上下半年。隨課並報。以便部臣有所稽考。惟兵燹之餘。戶口大減。以今日之民數。照承平之引額。恐運銷不及一半。加以鄰私充斥。挽復非易。殷商絕少。招徠尤難。能否漸有起色。殊無把握。臣惟有督飭署運司。忠廉實力講求。以期國課軍需。兩有裨益。所有淮南鹽務。運道暢通。力籌整頓緣由。理合恭摺具奏。伏乞皇太后皇上聖鑒訓示。再准北以鹽抵課。紊亂舊章。疲壞已極。經部臣奏奉諭旨。飭令設法。容俟辦有頭緒。另行覆奏。合併陳明。謹奏。

近日軍情片 同治二年正月十一日

再近日軍情。金陵城中。積糧未罄。仍爲負嵎死守之謀。另股分擾上興埠力山柘塘等處。十二月二十八夜。窺犯溧水。該城守將王可陞。登陴防禦。賊不得逞。僞侍王勾結逆黃文金及廣德餘鯨。於正月初二日。由寧國縣上竄。初六日。已至績溪。人數頗多。勢甚剽疾。意在衝過徽州。直上江西。沈葆楨探得賊勢趨重東路。於臘底調韓進

春五千餘人。移防玉山。調席寶田等軍萬人。移防婺源。臣亦調毛有銘一軍。由安慶過江。馳赴休寧。均爲江皖交界遊擊之師。惟連日大雪數尺。各軍不能成行。未知果不落後否否。深爲焦慮。合將大概情形。由驛附陳。伏乞聖鑒。謹奏。

官軍攻復績溪并在歙獲勝摺 同治三年正月二十七日

奏爲賊竄績溪。旋經官軍攻復。并在歙南截剿獲勝。恭摺馳陳。仰祈聖鑒事。竊僞侍王李世賢賊黨。由寧國縣竄入績溪。臣於正月十二日附陳大概。在案。自新正以來。徽州等處探報。均稱侍逆擁衆上行。將由徽浙以竄江西。溧水等處探報。則稱侍逆尙在溧陽。將攻溧水。以救金陵。二說互異。臣合各路稟報參觀。則竄徽者。侍賊之黨羽也。約分四枝。以一枝趨績溪。以一枝趨績屬之大石門。轉向歙縣南鄉。以二枝趨浙江之昌化。上窺遂安。正月初六日。績溪既陷。賊即延踞雄路孔靈等處。意將直撲徽州府城。署皖南鎮總兵唐義訓。於初八日率所部入營。自徽城出紮吳山鋪。分駐新管地方。俄有紅衣悍酋帶馬步賊隊。層層擁至。我軍列陣迎戰。傷賊馬二騎。斬執旗賊數人。唐義訓乘賊少卻。催軍奮剿。自龍塘以達雄路。盡毀賊館。賊向績城孔靈兩路退走。回顧各山。賊旗展動。恃有後援。旋馬轉鬪。我軍奮力猛擊。斬賊尤多。比及日晡收軍。適左宗棠部將王開琳。督帶老湘營。自屯溪馳至。唐義訓與之商定。次日會師進攻。初九日。王開琳率隊由臨溪大路進。唐義訓率隊渡過臨溪對河。與賊戰於孔靈鎮。斬百餘賊。追襲十數里。將爲薄城之計。王開琳自臨溪驅賊至七里牌。踰卡而登。直抵城南一帶。賊遽返走入城。唐義訓麾兵夾擊。斜入城西。城賊由東北兩門遁出。諸將士乘勝併進。馳剪尾股。立復績城。仍回臨溪下寨。此正月初八日擊敗雄路股匪。初九日會復績溪縣城之情形也。維時賊之在大石門者。已由大嶺竄至鳩琴七賢方村等處。係歙之旱南鄉。距城三四十里。其在昌化境內。已由白牛橋竄過威坪街口大周圍等處。係歙之水南鄉。距城亦祇百有餘里。王開琳以賊注南路。慮越休寧斜竄而上也。引軍回駐屯溪。唐義訓則出佛嶺及南源口以截之。初十日唐義訓前隊既發。詢知大周圍下游。有賊過河。急揮後隊。冒雪追及。忍寒決戰。頗有殲擒。旋聞績溪敗賊。并聚於鳩琴七賢各村。落不可不移軍往勦。是夜駐師南源口。十一日。風雪轉厲。唐義訓步隊迤邐而進。賊不虞官軍之驟至。惶懼失措。多有躡伏雪中而就戮者。鮮血沒脛。雪泥盡赤。我軍入村搜捕。俘執其酋誅夷。凍

假之匪不復成伍。十二日唐義訓迎擊昌化另股。十三日追勦深渡零賊。沿途抄殺。正擬進取街口威坪一路。距此路之賊已竄往遂安所屬之郭村。而王開琳屯溪一軍旋出白際嶺。赴援遂安矣。此初十至十四等日。截勦歙縣南鄉。疊獲勝仗之情形也。臣查此次侍逆各黨上犯。股數甚衆。意在抄過徽州。就食江西腹地。雖經唐義訓王開琳等攻克績溪。旋有歙南之捷。徽郡暫告肅清。而遂安一帶賊勢尙重。現又擾及開化之馬金街。該處一通休寧。一通婺源。一通常玉兩山。臣所調毛有銘一軍。於十七日由安慶渡江。計此時可抵休寧。沈葆楨所派席寶田等移守婺源之軍。韓進春等移守玉山之軍。亦據先後到防。除飭各軍扼要分堵。力保江西藩籬外。所有官軍攻復績溪。并在歙南獲勝緣由。謹繕摺由驛五百里具奏。伏乞皇太后皇上聖鑒。謹奏。

覆陳李世忠情形片 同治二年正月二十七日

再臣欽奉正月十七日密寄諭旨。一飭臣遵照前旨。剴調李世忠到營。將其部衆妥爲安置。所占城池釐卡。諭令交出歸官。一等因欽此。伏查李世忠於正月初一日來文。請將原守之五河滁州全椒天長六合等城交出。所部營勇。或進攻江南。或另行調撥。或酌量遣散歸農。悉聽臣斟酌辦理。又於正月初三日來文。已將大小礮船裁撤。水勇概行遣散。所辦礮位百餘尊。情願捐繳報效。請臣派弁驗收解回各等語。臣見該提督措詞馴謹。絕無把持兵柄。留戀利權之意。因於初七日備文咨復。令其悉遣部衆。其中有萬難遣撤。或須量爲留用者。官不得過一百員。勇不得過二千人。所繳礮位。即飭黃翼升就近在五河點收運回。并遵旨給予一函。囑李世忠自赴安慶一行。倘有經手未了事宜。即派親信大員來營面商。遣勇事宜。亦無不可。示以至誠。出以和霽。消其疑畏之心。使不至望而裹足。旋又於十一日接其來文。五河縣城業已交出。弁勇業已撤遣。并發給餉鹽。以爲回籍川資。即由舊縣返至滁州。將滁全等城。次第交出。不致仍聚一隅。稍有滋擾等語。是李世忠之願將各城一律交官。已無疑義。惟部衆太多。是否悉遵約束。該提督是否親來安慶。江北各城如何派營接防之處。現尙行文未久。應俟呈覆到日。再行奏明辦理。所有往來咨牘及調營信稿。臣均鈔送僧格林沁處備查。因係未經辦定之案。不敢遽呈御覽。謹先附片覆陳大概。仰慰宸廑。謹奏。

攻克鍾山石壘金陵合圍摺 同治二年正月十一日

秦爲官軍攻克鍾山石壘。扼斷太平神策兩門。遂合金陵城圍。恭摺馳陳。仰祈聖鑒。事。竊金陵一城。延亙百有餘里。自會國荃駐師雨花台以來。奪取附城諸要隘。東西南三面。悉爲我有。惟鍾山僞壘。尙未克復。城北兩門。尙未合圍。終不能制賊之命。上年十一月間。穴地竊城。未遽得手。不得不經營城北。先扼糧路。爲布合長圍之謀。會國荃商之楊岳斌。飭派彭楚漢丁泗濱各師船。雪夜巡江。見奸民小劫。載米偷渡。輒要而奪之。以斷江面之接濟。又派朱洪章武明良熊登武羅兩春沈鴻賓蕭開坤等營。各出三成隊。繞過鍾山之後。分夜輪擊。以扼陸路之接濟。然城北地面大寬。洪逆與忠會。踞守老巢。仍堅伏而不動。其兩夜搬運賊糧。亦有防不勝防之慮。會國荃調章志俊五營。渡江守金柱關。騰出朱南桂等六營。助圍金陵。甫至三汊河。適值大雪連朝。平地數尺。人馬阻絕。頓兵未發。比至正月十六日。始令陳萬合胡克安帶桂後等營。由草鞋夾登岸。而朱南桂率黎冠湘彭維祥等繼進。將欲移營城北。旋於二十夜。偵知忠會之子僞二殿下率黨數千。自太平門赴句容。護糧進城。經朱洪章等潛約各營。伏兵要路。羣起截擊。斬七百餘級。執二百餘人。棄糧阜積。狼藉道左。次日會國荃親督朱南桂張詩日譚國泰梁美材等。各率親兵槍隊。至洪山北固山神策太平等門外。周歷形勢。詳勘營基。適忠會先由城中糾大股出鍾山之南。猛撲嘉字營濠牆。爭拔地鍬。躍躍欲上。我營以槍礮憑牆環擊。賊不少卻。朱鴻章與武明良等。見賊抵死來犯。知非痛勦無以挫其鋒。遂留兵守定營寨。一面率隊出壕。分路夾擊。朱洪章羅兩春沈鴻賓等向右路。武明良武義山等向左路。率旗直前。搏戰移時。殲賊數百。賊乃返走上山。鍾山之顛。有石壘。僞名曰天保城。羅兩春攀崖直上。中槍幾墜。沈鴻賓率哨弁繼至。各挾火球火箭。從壘後擲入。賊多冒火突出。各弁勇從礮眼中肉薄而登。所遇輒殪。出壘之賊。又經朱洪章武明良等四出抄殺。無一得脫。立將鍾山石壘克復。以長勝營四哨守之。二十二三等日。賊又兩次來撲。會國荃撥軍擊退後。遂飭黃潤昌熊上珍移駐山嶺。分戍天保城。二十四日。派蕭季泗蕭慶衍馬步十二營出山北。列隊太平門外。護修二壘。以王遠和等湘後左右營守之。維時梁美材所部紮洪山。朱南桂所部紮北固山。堵住神策門大路。僅餘玄武湖一段。無兵分駐。然隔水甚寬。援賊不得入。城賊不得出。而金陵城北之圍。自此合矣。臣查會國荃屯兵金陵。苦守苦戰。將及兩年。始將城外數十石壘全數攻克。抄過北路。以成四面包圍之勢。其距城百里之外。如鎮江東壩溧水金柱關。均有重兵駐守。宜與溧陽二縣。又新經蘇軍克復。

外援將絕。糧米無多。仰仗聖主威福。如果克此堅城。當不致有大股逸出。貽患他方。惟是圍師不滿五萬。分撥九十餘里。僅困數十萬賊。深慮窮寇衝突。抵隙蹈瑕。警之堵塞河決。合龍固屬可喜。走埽亦復可虞。每念臣弟國荃才力淺薄。荷此重任。臣尤惴惴如履春冰。除飭各營加倍穩慎外。所有官軍攻克鍾山偽城。金陵合圍緣由。謹繕摺由驛五百里具奏。伏乞皇太后皇上聖鑒。謹奏。

近日軍情片 同治三年二月十一日

再近日上游軍情。侍逆之黨。僞寧王一股。於正月十七日由湖樂司續竄績溪十三都。時唐義訓在歙南勦賊。移軍馳至績境。賊見官軍即走。僅斬尾隊數百而還。其另股之闌入遂安者。十五十七等日。經王開琳迎擊於中洲昏口一帶。疊有斬擒。賊乃由馬金嶺華埠分枝。一向婺源。一向玉山。其向婺源者。由白沙關內犯。席寶田等軍於二十日在規橋頭大獲勝仗。其向玉山者。由七都球內犯。韓進春一軍於二十三日在洋口大獲勝仗。該逆雖屢經敗挫。而銳意上竄。但求覓食以偷生。絕不返顧以圖全。現已繞至廣豐。又繞至鉛山湖坊。勢將蔓延腹地。窺伺撫建兩郡。臣調席寶田一軍援勦廣玉撫建等處。又與撫臣沈葆楨咨商。或添調繼果等營。回顧江西腹地。所幸此次竄江。尚非大股凶悍之賊。除忠逆紮在金陵。勢難他竄外。如堵逆黃文金尚在湖州。輔逆楊輔清未知的在何處。侍逆溧陽老巢。新爲蘇軍所破。聞該逆率其黨羽。歸併湖州。目下湖州賊數極多。由安吉孝豐昌化遂安。以竄江西。毫無阻隔。如侍堵等逆。接續上竄。則三省交界之游兵。江西內地之防兵。均嫌單薄。臣當嚴飭唐義訓毛有銘等軍。慎守徽休。兼顧馬金。以固藩籬。所有近日軍情。理合附陳大概。伏乞聖鑒。謹奏。

覆陳接統揚防大員片 同治三年二月十一日

再臣欽奉正月二十九日寄諭。前因各岸各軍不敷分布。曾經諭令會國藩酌量情形。調都與阿所部渡江協勦。復因甘省回匪鴟張。特命都與阿前赴綏遠城。會同德勒克多爾濟辦理防務。並令富明阿即日前赴揚州。接統所部。扼守江北。惟念都與阿老成持重。久於行陣。深得兵心。此次奉命北行。所部揚防兵勇。非有諳練戎機之大員。不能接統。富明阿患病尙未銷假。且北省需才正急。將來尙有另行簡用之處。自應趕緊遴選將才。以備任使。現在江北文武大員。惟吳棠勤捨。向稱得力。第伊久在清淮一帶督兵。與揚防兵勇。素不相習。且恐該漕督一

離清河。則徐宿一帶。卽有鞭長莫及之虞。吳棠可否令其接統都與阿所部。若務紮揚州。能否兼顧清淮之處。著會國藩酌覈具奏。詹啓綸帶兵亦稱得力。如令吳棠赴揚督兵。能否駕馭得宜。詹啓綸本任係徐州鎮總兵。似可飭令赴任。以重職守。陳國瑞勇敢素著。如今接統揚防。或幫同吳棠辦理。尙能融洽。其能否獨當一面之處。并著會國藩察看。迅速覆奏。倘吳棠陳國瑞二員內。均難調派。卽著該大臣於所部各員內。擇其英勇兼全。材能統衆者。奏請派赴揚州。接帶兵勇。庶江北守禦。不至空虛。且與大江以南。聯爲一氣。至黑龍江馬隊。非有諳習情形之大員。不能統率。都與阿前赴綏遠會辦防勦。所有黑龍江馬隊。卽可令其隨帶北來。藉資得力。其餘都與阿所部兵勇。均著會國藩仍遵前旨。分別布置調派。等因欽此。仰見聖慮周詳。無微不至。臣查清選督臣吳棠。久戰戎行。閱歷最深。江北情形亦熟。實堪接統此軍。惟清淮界連三省。今日已成重鎮。皖豫苗捻之餘黨。山東驅教各匪之根株。一日未除。清淮一日不可無統兵大員爲之鎮壓。揚州距清淮四百餘里。難於兼顧。誠如聖諭。該漕督一離清河。則徐宿一帶。卽有鞭長莫及之慮。陳國瑞驍勇善戰。罕有倫比。惟年僅二十餘歲。桀驁之氣未化。近日養病高寶境內。縣署頗受其侮辱。民間亦畏其騷擾。又與李世忠積不相能。斷難獨當一面。以臣愚見。宜令傅格林沁吳棠等。挾以征戰。收其猛鷲之用。不宜使之接統揚軍。并不可使之幫辦揚防。恐長降將驕奢之風。亦杜場滁五關之漸。李世忠近稟復臣處。除邊示酌留千餘人外。餘限二三月一概散遣。城卡一律交出。雖可信該提督決無變志。而其部下素無紀律。難保不另生枝節。宜令陳國瑞與之隔絕。愈遠愈妙。詹啓綸亦係降將。往年販鹽擾民。聲名平常。近歲漸就範圍。都與阿北征之後。恐非他人所能駕馭。應如諭旨。飭赴徐州本任。以聯東豫之氣。至臣所部各軍。添募益多。將材益少。類皆樸謹自守之員。實乏統率一路之選。其昔年曾隸臣部者。楊岳斌。母病未痊。終將領請開缺。彭玉麟專管水師。亦難更膺他任。惟降補藩司唐訓方。居心寬厚。耐勞愛民。戰守均屬嫻習。於李世忠亦撫馭得宜。若令接辦揚州防務。可期妥適。第才識稍短。又係甫經奉旨降補之員。非臣下所敢奏請。惟有恭候皇上聖裁。特簡大員。接統揚防一軍。該軍馬隊自應隨都與阿全數北行。其水師之紅單等船。卽可由徽巨兼轄。酌量裁撤。以節糜費。臣謬膺重寄。不克除選賢將。以備朝廷之器使。曷勝愧悚。欽奉諭旨。殷殷垂詢。理合附片覆陳。伏乞皇太后皇上聖鑒訓示。謹奏。

遵旨籌議停補額兵摺 同治三年二月二十七日

奏爲遵旨籌議恭摺仰祈聖鑒事。竊臣接准部咨議覆湖北巡撫嚴樹森奏請停補江蘇浙江安徽等省綠營額兵一摺。奉旨著各省督撫悉心籌畫妥議具奏。又准前安徽撫臣唐訓方轉准親王僧格林沁咨稱。皖境苗捻各匪漸次削平。自宜整飭營伍。分兵駐紮。庶可隨時彈壓地方。以期日久安謐。等因。當經札飭安徽善後局司道會查議詳去後。茲據該司道等詳稱。皖省額設制兵。自軍興以來。大半奉調出征。其留存各屬城汛者。每因郡縣失陷。遷避鄉里。或附託軍營。爲營差餬口之計。此時地方新復。各大小文武衙門。文卷蕩然無存。不但征兵之歸伍與否。一時未能查考。即各屬之城汛兵弁。應給新糧。亦且無從核斷。溯自楚師東下。地方之守禦。本無藉於州縣存城存汛之兵。况皖南壽春兩鎮。皆在行間帶勇。所轄各協營兵。散處零星。該鎮將多不能隨時簡校。而將弁各缺。既無兵卒可使操防。卽照常敘補。亦屬無事可辦。現雖皖北苗捻各匪。次第削平。然楚豫捻股。根株未盡。駐防各軍。尙難悉數全撤。金陵賊勢窮蹙。屢欲潰突江西。其皖南各防。亦尙未能鬆勁。是皖省防勦彈壓諸事。宜仍須有大枝勇丁鎮駐其間。原設營兵。應請仿照浙江辦法。暫緩募補。以節糜費。等情。具詳請奏前來。臣查浙江綠營。業經左宗棠覆奏。暫行裁撤。將弁暫緩敘補。奉旨允准在案。安徽一省。被賊蹂躪最久。原設綠營。額兵散亡殆盡。應如該司道等所議。仿照浙江成案。潰卒不准收伍。間存零星孱弱之兵。卽予一律裁撤。其營汛將弁缺出。并請暫緩敘補。統俟一二年後。軍事大定。或挑選勇丁。或招募鄉民。次第簡補。以實營伍。而復舊制。庶幾兵歸實用。餉不虛糜。於地方戎政。較有裨益。所有遵旨議覆緣由。謹會同安徽撫臣喬松年。繕摺具奏。伏乞皇太后皇上聖鑒訓示。謹奏。

近日軍情片 同治三年二月二十七日

再近日軍情。金陵首逆。並未出城猛撲。僅於水西旱西兩門。放出老幼婦女萬餘人。爲節省米糧之計。會國荃悉心布置。總以使賊不能衝出爲要。鮑超東壩之師。久無戰事。臣檄令分營進取句容丹陽一帶。如克復句容。卽以全軍駐之。專防金陵城破後。截勦冒死外竄之賊。不令貽患他省。廣德州踞匪。亦以糧盡棄城。於十五日遁歸湖州。目下湖州羣匪麇集。皆思上犯江西。以覓生路。所幸左宗棠分派各軍扼防淳安遂安華埠等處。甚爲周密。臣

亦嚴飭徽寧各防。聯絡要擊。其業經內竄江西者。初九日席寶田馳勦金谿獲勝。十一日收復縣城。賊乃由爐溪潛向建昌。十二三四等日。該郡水陸防軍在萬年橋等處。三戰三捷。十六日楊錦斌於郡南小挫一次。韓進春於郡東獲勝一次。十八日賊撲附城各營。席寶田會同韓進春劉勝祥等軍。併力迎勦。大敗之。有此一捷。當可保全腹地完善之區。沈葆楨又添調繼果營一軍。回顧撫建。或可驅除出境。惟據席寶田稟。撫建股匪人數。實有八九萬衆。未可輕視。應請旨飭下閩粵兩湖。一體嚴防。免致變成流寇。又煩兵力。前奉寄諭。飭臣即派楊岳斌戰船數百號。駛赴鄱陽。并將江忠義舊部歸其統帶等因。查刻下賊由建昌退聚兗港。近偏南豐。在鄱湖之南五百里。江忠義精捷一軍。駐守婺源新建等處。又在鄱湖之北四百里。均非水師所能兼顧。江西水師有劉于濬孫昌國二軍。儘數分布。而精捷一軍。業經奏調江忠朝統帶。據報起程來江。亦未便另派大員兼統。是楊岳斌師船駛至上游。無裨於江西防務。似不若仍紮金陵江面。尙可斷接濟而防竄越。所有近日軍情。及楊岳斌無庸飭調緣由。理合附陳大概。伏乞聖鑒。謹奏。

覆陳李世忠近狀片 同治三年二月二十七日

再臣欽奉二月初六日密寄諭旨。所有李世忠部衆。如何妥協遣散。所留二千人。是否分隸各營。如何管帶調遣。及交出各城。如何派管接防。均著責成。會國藩悉心籌畫。妥速辦理。不可稍涉大意。致留後患。等因。欽此。伏查李世忠於正月十八日接臣書函後。即於二月初二日覆呈一函。據稱。前已咨呈將五河天長兩城兵勇。先行遣散。所有滁州全椒來安六合各城。世忠亦嚴飭各弁勇。限定三月底全數移出。概行遣散。斷不遲誤。一日。敝營餉鹽與採買之鹽。盡在五河西壩堆存。現在陸續運售。將鹽暨銀分散各將弁勇丁。以爲回籍川費。并將滁州歷年所收穀糶售賣。先發給天長兵勇川費。令其迅速遣散。世忠理應投轅請罪。親聆訓示。奈滁州數城兵勇。必得親自料理。不能離身。特派記名總兵王廷瑞陳自明代躬赴皖請示。其有遣散未盡之將士。酌留千餘名。交陳自明統帶赴轅。靜候指揮。各等語。旋於二月十九日。王廷瑞陳自明等來營謁見。面陳之詞。與李世忠原函大略相同。遣勇以後。李世忠應如何引退之處。候示遵行等語。臣比即明白開導。頃又給予一函。告以儘此三月內。盡散五城兵勇。四月初親來安慶。晤商一切。由臣奏乞恩施。飭令赴任。仍俟任事數月後。呈請開缺回籍。以踐去

夏引退歸耕之前言。臣查李世忠平日攬權專利。詭詐多端。此次憚懾天威。畏罪輸誠。陳自明籍隸雲南。曾爲向榮舊部。以之管帶酌留之千餘人。尙屬相宜。此外餘榮各文武親屬。能否悉臻妥協。尙不可知。除俟三月底五城交單。李世忠離滌。專案奏結外。合再附片覆陳近狀。馳慰宸廬。伏乞聖鑒。謹奏。

江西牙釐請照舊經收摺 同治二年三月十一日

奏爲江西牙釐仍應歸巨處經收。以竟金陵將蕨之功。恭摺奏祈聖鑒事。竊臣接准江西撫臣沈葆楨咨稱。以江西軍務方殷。請將茶稅牙釐歸本省經收。於二月二十六日具奏鈔摺咨會到臣。伏查臣軍奏撥江西之餉。前後約有三項。臣初任江督。奉旨兼辦皖南軍務。其時江南六府糜爛。皖南僅存祁門一縣。一片賊氛。無從下手。臣於是奏辦江西釐金。以充東征諸軍之餉。奏撥江西漕折五萬。以充徽寧兩防之餉。逮二年四月。因各軍逃亡過多。又奏九江洋稅三萬。以清積欠。先後奉旨允准。惟沈葆楨到任後。於元年九月奏明將漕折截留。不解臣營。二年六月。奏留洋稅。專充江忠義席寶田之餉。并未解過臣營一次。此兩項者。臣均未具疏覆奏。力與爭辯。此次截留牙釐。不能不縷陳而力爭者。實因微臣統軍太多。月需額餉五十餘萬。前此江西釐金稍旺。合各處入款。約可發餉六成。今年則僅發四成。而江西撫臣所統各軍之餉。竟發至八成以上。臣軍欠餉十六七個月不等。而江西各軍欠餉不及五月。即以民困而論。皖南及江寧各屬。市人肉以相食。或數十里野無耕種。村無炊煙。江西亦尙不至此。請我皇上欽派大員。察看東南數省。果江西之軍民較苦乎。抑皖南金陵之軍民較苦乎。假令沈葆楨奉使巡視皖吳一次。果行軍於江西較難乎。抑行軍於皖南金陵較難乎。知必有不辨而自明者。臣於三省皆係轄境。非敢厚於皖吳而薄於江西也。無論何人。處臣之地勢。不得不出於此也。今蘇浙之省會已克。金陵之長圍已合。論者輒謂大功指日可陳。元惡指日可斃。以臣觀之。洪曾與忠逆堅悍異常。屢掘地道。俱未得手。本無糧盡確耗。又城中新種麥禾。青黃彌望。臣之愚計。諄囑會國荃鮑超等總須力扼窺路。不使逆會挾大股衝出。貽患他方。至克復之遲速。尙難預計。往昔庚申之春。和春張國樑大軍合圍。功敗垂成。彼時圍師比今日多二萬人。餉項存營者尙數十萬。徒以遲延未發。尙爲軍士藉口。全局決裂。况今日餉需奇絀。朝不保夕。安得不以江西之釐。以慰軍士之心。此臣之隱衷。外人詭爲過慮。惟冀皇上鑒亮者也。前代之制。一州歲入之款。置轉運使主之。疆吏不得專

擅我朝之制。一省所入之款。報明聽候部撥。疆吏亦不得專擅。自軍興以來。各督丁漕等款。紛紛奏留。供本省軍需。於是戶部之權日輕。疆臣之權日重。然疆臣既得專筦利權。則督與撫事同一律。不得又有輕重主客之分。臣嘗細繹會典事例。大抵吏事應由撫臣主政。兵事應由督臣主政。就江西餉項論之。丁漕應歸沈葆楨主政。以其與吏事相附麗也。釐金應歸臣處主政。以其與兵事相附麗也。釐金之起。始於咸豐三年。雷以誠倡辦於揚州。專爲髮逆兵事而設。初非國家經制之款。臣忝督兩江。又縮兵符。凡江西土地所出之財。臣皆得奏明提用。卽丁漕洋稅三者。一一分提濟用。亦不爲過。何況釐金奏定之款。尤爲分內應籌之餉。不得目爲協餉。更不得稱爲隔省代謀。如江西以臣爲代謀之客。則何處是臣應籌餉之地。謂安徽應籌耶。則喬松年亦得執本省隔省之說以相拒。謂江南蘇松各屬應籌耶。則李鴻章兵數之多。亞於臣處。戰事之殷。倍於上游。除議定月解四萬外。勢難再行提用。謂江北淮揚各屬應籌耶。則裏下河蕞爾之區。臣與吳棠富明阿馮子材四人。爭剝荒取。其何能給。且畛域之說太明。則鎮陽兩防。斷不足以自存。而僧格林沁多隆阿等。不兼封疆之帥。必有窒礙難行之日。臣竊以爲不可。臣所最抱歉者。廣東七成之釐金。湖南東征局之釐金。皆非臣分內應得之餉。用兵太久。乞鄰救飢。私衷耿耿。如負重斃。然毛鴻賓揮世臨。不遽奏請停止者。知臣處入不敷出甚鉅也。一俟軍務稍定。臣卽當奏明。先還廣東七成之釐。次罷湖南東征之餉。斷不肯久假不歸。蹈專利之陋習。而不自覺。此心籌之熟矣。抑臣又聞同僚交際之道。不外二端。曰分。曰情。巡撫應歸總督節制。見諸會典。載諸坐名敕書。臣又曾奉特旨。節制江西巡撫。臣以才力不逮。再三懇辭。特旨之節制。一時之異數。臣得而辭之。會典敕書之節制。數百年之成憲。臣不得而辭。沈葆楨亦不得而違。分也。軍事危急之際。同寅之患相卹。有無相濟。情也。沈葆楨於臣處軍餉。論分論情。皆應和衷熟商。元年八月間。臣軍疾疫大作。死亡無算。而忠逆大舉援救金陵。危險萬狀。沈葆楨乃於是時截留漕折銀四萬。既不函商。又不咨商。實屬不近人情。二年籌關洋稅一案。臣奏撥三萬兩。奉旨允准。沈葆楨旋奏留專供江席二軍之餉。欽奉寄諭。以皖營軍餉短絀。飭撫臣妥籌兼顧。如數分撥。遠關道蔡錦青分撥萬五千兩。解至臣營。沈葆楨乃大怒。嚴札申飭蔡錦青。并移咨詰問臣處。但有峻厲之詞。絕無婉商之語。此次截留釐金。亦并未函商咨商一次。不知臣有何事開罪。而不肯一與商酌。以爲事勢緊急。無暇遠商耶。則前年漕折。去年洋稅。今年釐金三事。

中。豈無一事可以先商後奏者。殊不可解。人恆苦不自知。或臣明於責沈葆楨。而闇於自責。臣例可節制江西。或因此而生挾權之咎。臣曾保奏沈葆楨數次。或因此而生市德之咎。幾微不慎。動成仇隙。然臣閱世已深。素以挾權市德爲可羞。頗能虛心檢點。卽如漕折一案。臣曾函商一次。咨商一次。洋稅一案。臣接撫臣峻詞詰問之咨。曾經密函婉復。茲特抄呈御覽。以明臣不敢有挾權市德之意。自此二案外。臣之公牘私函。在江西者極多。其中如有挾權市德。措詞失當者。請旨飭下沈葆楨多鈔數件進呈。倘蒙皇上摘出指示。或有顯過。臣固甘受譴罰。卽有隱匿。臣亦必痛自懲艾。若臣返躬內省。則自覺對沈葆楨而無愧。卽訊諸大廷。質諸鬼神而無慚。而沈葆楨專尙客氣。不顧情理。實有令人難堪者。臣亦不復能隱忍不言矣。臣處自聞截去江西釐金之信。各軍人心皇皇。轉相告語。大局實虞決裂。合無籲懇天恩。飭諭江西釐金。仍全歸臣處經收。以竟將蕝之功。俟金陵克復之日。立卽請旨分成勻犒。一面派撥重兵。回援江西。兼顧湖南。其金陵未克以前。除彭玉麟劉于濬孫昌國三軍需餉五萬有奇。循舊仍由江西釐金供支外。其江席兩軍萬人。臣亦必於釐金項下竭力分撥。特不可遽改局面。動搖軍心。致生功虧一簣之變。所有江西牙釐。應歸臣營緣由。恭摺由驛馳奏。伏乞皇太后皇上聖鑒訓示。謹奏。

近日軍情片 同治二年二月十三日

再近日軍情。金陵城賊。常放婦女幼孩出城。以爲節食之計。洪酋志逆。堅忍異常。前此兩次掘穿地道。及二月初七日雲梯猛攻。均未得手。飽超一軍。於三月初六日與賊戰於句容城下。大敗之。次日遂復縣城。擒僞翰王項大英。僞列王方成宗。從此金陵以外城壘。悉爲我有。嘗不能以入股衝出。貽患他方。惟營中餉需奇絀。米糧昂貴。深慮軍心不固。另生波折。杭城克復後。賊由德清併入湖州。該處股數日多。恐仍將覓食上竄。臣與左宗棠之師。在於徽浙之交。節節布置。以防羣賊再犯江西。其前此竄入建昌境內者。一枝趨南豐。一枝趨新城。并分股擾及廣昌界上。席寶田劉勝祥韓進春等。均在南豐。二月二十三、四日。疊獲勝仗。斬僞天將譚福於陣。其精捷營一軍。亦由貴溪馳赴南豐新城。若能克復該縣。使前股不能立定巢穴。則後股亦難踉蹌上竄。庶勤辦不甚費手。除句容戰狀。另案續報外。合先附陳大概。伏乞聖鑒。謹奏。

克復句容縣城摺 同治二年二月二十五日

奏爲官軍攻復句容縣城。生擒二酋。乘勝勦平寶堰賊壘。恭摺馳陳。仰祈聖鑒事。竊鮑超一軍。進攻句容。克復縣城。生擒兩僞王。臣於本月十二日附陳。大概在案。先是句容縣逆僞守王方海宗。部黨搆貳。有誓爲死守者。有願爲內應者。方海宗知衆心不固。又聞鮑超大軍將至。即在金壇寶堰等處。糾結僞翰王項大英。僞列王方成宗兩。大股。同守句容。以拒我。三月初五日。鮑超親督各營。冒雨疾馳。行過溧水。攻三岔賊卡。破之。初六日。軍次句容所屬之塔岡。距城祇十里。正在修築營寨間。距城中突出三四萬衆。密布山岡。彌望皆賊。意將乘我立營未定。悉銳猛撲。鮑超即令周有勝王衍慶鄭德亮等七營。直前迎敵。以宋國永帶領譚勝達易昌煥段福唐仁康等八營攻其左。以馮標帶領劉順隆何田玉李文益孫開華等八營攻其右。兩軍相搏。戰至數時。殊不少卻。黃海清唐德勝閃連升劉得勝蔣魁南等。各率騎隊。分左右兩路。越過田隴。直抄賊後。萋雲慶更以步隊佐之。賊見歸路將斷。大譁欲遁。我軍且戰且進。逼近城下。殲賊數千。附城四壘之賊。相顧錯愕。亦卽一圍散走。鮑超料城賊膽落。利在速圖。乃飭各營齊施槍礮。徹夜環攻。漏至四下。忽見城東一角。火光燭天。知內變已作。急行軍東向。而賊已啓南門。傾巢衝出。諸將士乘勢截勦。斬賊尤多。并縛二酋以獻。俄有翟本邦等內應七人。叩馬通報。指擒賊而言曰。「此僞翰王項大英僞列王方成宗也。」遂於初七日黎明。相率入城。立將句容克復。派員檻送二酋前來安慶。臣於十八日訊明正法。距句容四十五里。曰寶堰。南通金壇。北達丹陽。有五堅壘在焉。維時句容逆首方海宗。遁至該處。與壘賊僞顯王袁得厚合謀。阻進兵之路。初九日。鮑超率隊前往。摩壘而攻。賊但穴牆施礮。堅閉不出。是夜派萋雲慶唐得勝等潛伏壘下。又派馮標鄒連陞胡良作等。五路并進。萬槍齊發。子如雨集。賊漸不支。各軍負草填壕。爭先躍入。一壘既破。衆壘盡亂。壘中逸出之賊。又經伏兵掩殺。蹙偪入河者無算。方逆袁逆遁往金壇丹陽而去。奪獲大礮二十一尊。礮船旗幟多件。據提督鮑超咨報前來。臣查句容一城。與金壇丹陽鼎足而三。實爲金陵之左輔。鮑超率師進勦。仰賴天威。一戰克之。并執二僞王。毀五賊壘。而金陵亦有日孤之勢。裨益全局。厥功甚偉。所有尤爲出力之提督銜甘肅涼州鎮總兵馮標。提督銜記名總兵譚勝達唐仁康。均請交軍機處記名。遇有提督缺出。請旨簡放。記名總兵周有勝易昌煥李文益。均請賞加提督。記名總兵提督銜劉順隆王衍慶。記名總兵張玉田。均請簡放總兵缺。副將銜安徽補用參將黃海清。請以副將仍留原省。儘先補用。並賞給勇號。副將孫開

華請賞加總兵銜并賞給勇號。總兵銜四川卽補副將陳永康。四川卽補副將羅運昌均請無論四川推題副將缺出將該員等先行補授。羅運昌并賞加總兵銜。副將段福請遇有副將缺出將該員先行補授并賞加總兵銜。副將銜參將唐得勝請以副將儘先補用并賞加總兵銜。游擊拱容海請以參將儘先補用并賞加副將銜。降人翟本邦張宏發楊文明龔福全張明道張志寬童得勝等潛爲內應冒險圖功均請賞給守備虛銜其餘在事出力員弁可否容臣查明彙案保獎出自聖恩卽選知府田芬副將銜參將陽茂泰花翎都司易新勝都司黃昌陳光謨花翎守備向忠國等均係力戰陣亡仰懇敕部從優議卹所有官軍克復句容縣城并毀寶堰各壘緣由謹摺由驛五百里具奏伏乞皇太后皇上聖鑒訓示謹奏。

請假調理摺 同治二年二月二十五日

奏爲微臣身體患病懇恩賞假一月在營調養仰祈聖鑒事竊臣向患嘔吐之症每發則減食斷章旋就痊可三月二十二日復行舉發以爲舊恙不甚經意二十四日忽然眩暈左手左腳疼痛異常搖擻數次起坐不便延醫診視據云「肝家血虧又中風寒非調理得宜恐成偏廢之症」臣忝縮兵符將近四年尙未克復金陵悚仄方深若遽嬰疾不能治事尤增愧憾幸右手尙能勉強作字而年未六十或不至竟成痼疾惟有仰懇皇上天恩俯准賞假一月在營調養一俟病痊卽當奏明銷假理合附驛馳陳伏乞皇太后皇上聖鑒訓示謹奏。

近日軍情片 同治二年二月二十五日

再近日軍情杭州賊酋陳炳文汪海洋等分道犯徽三月十三日唐義訓戰於徽郡之南殺傷相當毛有銘在郡東三十里外迎戰失利十四日郡賊併犯郡城圍攻東北兩門力戰卻之十五十六等日官軍出城奮擊均獲勝仗詎湖州僑侍王大隊續由昌化而來十七日唐義訓毛有銘渡河進剿竟大挫於楊村刻下嶺內遍地賊氛徽休祁駭四城岌岌難保而賊之前隊已紛紛由龍灣婺源上竄江西後股續至者猶復絡繹不絕蓋侍堵輔三巨酋實有二十萬衆臣素所稔知曾經兩次陳奏湖州克復悉數由徽竄江其餘杭德清武康之賊臣不知其詳據報甚多且整也金壇丹陽業經鮑超會同鎮揚兩軍克復常州亦有克復之信計蘇境各賊皆將繞由浙皖竄犯江西臣現調石埭二營青陽四營入嶺援救徽州又調鮑超全軍回援江西道塗太遠竊恐已落後著欽奉迭次

諭旨。垂詢微臣能否親往金陵。督辦剿賊。目下微境賊勢如此浩大。上游無所秉承。臣自不宜前赴金陵。願彼失此。所有金陵圍師。仍責成曾國荃一手經理。圍師諸將中有蕭慶衍部下之亨中營。於昨十六七八等日闖餉。曾國荃憂惶無計。臣覆函囑其欠餉太久。不可過繩以法。只宜多方撫慰。蔽此一簣之功。又囑其不可令大股衝出。貽患他方。並囑萬一金陵幸克。卽由曾國荃彭玉麟楊岳斌三銜將大概情形。先行馳奏。以慰聖懷。其詳細戰狀。則轉咨官文與臣會奏。至漢中捻匪。前聞竄至鄧州內鄉之交。頃接稟報。鄂軍成大吉等。於三月初六日在樊城附近。大獲勝仗。賊已全竄豫境。該逆欲以舟師水陸下竄。援救金陵。斷無可慮。所慮者由豫皖陸路衝至鳳潁廬州葉縣一帶。擄船南渡。圍解金陵之圍。是應防者在安慶以下之江面。不在蕪黃以上之江面也。臣現咨商楊岳斌彭玉麟於浦口以上七百里要津渡口。節節布置。以防漢中東援之賊。至鄂中須用水師。該省本有袍船四五百號。下游如楊岳斌全軍。向食鄂臺之餉。朝調則朝往。夕調則夕往。前准官文嚴樹森咨調李濟清萬化林二營。臣飭派前往。想已到矣。欽奉十六日寄諭。飭於楊岳斌彭玉麟二人中。酌分一人溯流而上。以資防勦。並統率鄂省陸軍之處。候接到官文來咨。再行察酌辦理。除金壇丹陽之克。徽州之捷。另行分案續報。仍俟查明微軍敗挫實情。參劾諸將。自請嚴議外。合先附陳大概。伏乞皇太后皇上聖鑒。訓示施行。謹奏。

謝交部從優議敘恩摺 同治三年二月二十七日

奏爲恭謝天恩。仰祈聖鑒事。竊臣於三月十五日。接准吏部咨開。同治三年正月二十三日內閣奉上諭。一協辦大學士兩江總督曾國荃。督軍勦賊。節制東南數省。盡心區畫。地方以次削平。舉賢任能。克資羣力。著交部從優議敘。一等因欽此。當卽恭設香案。望闕叩頭謝恩。訖。伏念臣猥以凡庸。謬膺重寄。轄境太廣。柄任過隆。事變彌多。智識愈短。當咸豐十年。初膺鉅任。審己量分。已深知不克稱職。特以其時江浙糜爛。不敢畏難謝事。姑以菲材承乏其間。待事機之徐轉。厥後安慶克復。大局稍定。臣卽三次具疏。請皇上簡派大臣。分任其責。未蒙俞允。其節制四省之命。臣亦經三次疏辭。仰蒙聖慈垂鑒。故臣於浙江兵事。並未與聞。幸託皇太后皇上鴻福。東南數省。將次削平。皆由聖主知人之哲。擢用封疆將帥。俾得各展所長。收茲成效。如臣碌碌。何敢貪天之功。掠人之美。金陵合圍以來。附近各城壘。雖已悉爲我有。而首逆堅守老巢。蕩平尙稽時日。蘇杭克復以後。全局益振。而窮寇紛奔求。

食窺伺皖南游繹江西驅除尙煩兵力補過不遑慚懼彌深迺荷聖恩優加甄敘濫登上考聞命之下感悚莫名臣惟有勤以補拙慎以圖功勉持不矜之忱益收羣策羣力之助庶幾仰答高厚深恩於萬一所有微臣感激下忱謹繕摺專弁叩謝天恩伏乞皇太后皇上聖鑒謹奏。

克復金壇縣城摺 同治三年四月十一日

奏爲官軍進攻金壇誘賊出戰乘勢攻克縣城恭摺馳陳仰祈聖鑒事竊金壇一城續經鮑超率師克復臣於三月二十五日附陳大概在案初鮑超既取句容遂平寶堰五壘該處東北有丹陽東南有金壇賊方分踞以與常州相犄角丹陽一路有富明阿馮子材會軍攻之其金壇一路灌壕成河自西洋村以達城根凡隔小河數十道三月十二日鮑超親督所部渡河競進將欲壁於城下俄得馮子材緘報丹陽賊勢甚重商令移師助剿鮑超即派婁雲慶周有勝等率馬步七營留駐金壇城外而自率十四營暫回句容十六十七等日金壇之賊擁衆出城迭撲我營婁雲慶周有勝力戰卻之鮑超回句容後接馮子材請剿丹陽之書又接臣力保東壩之檄十九日乃飛馬傳知金壇城外各營盡行撤回句容以備分援二處之急甫經傳令轉念金壇撤營之時恐城賊追躡我後或致疏失乃親率全隊偃旗息鼓於二十日折回西洋村備擊金壇出巢之賊遂於後茅山一帶面面設伏令周有勝曹志忠等四營伏於茅山之左而以黃海清劉得勝等騎隊佐之令唐仁廉李文益等四營伏於茅山之右而以婁雲慶熊高望等騎隊佐之金壇逆酋盛明友聞官軍撤隊即糾城賊二萬餘衆悉力窮追官軍伏在山後屏息不動俟賊追過茅山正向田隴村落間迤邐而進鮑超揮令張玉田羅運昌張遇春楊友益鄭德亮等突出中路萬槍齊發賊亦以洋槍小隊蜂擁來迎張遇春於羣子如雨之中衝入賊隊賊爲披靡鮑超催動號鼓伏兵四起旌旗滿山黃海清劉得勝等驅馬入陣截賊數段婁雲慶亦率熊高望等從山後鈔出橫斷歸路賊不虞窮追遇伏倉皇失措棄械滿道各軍追殺五十餘里逼至金壇西門敗賊不敢進城而城賊亦啓南門盡向三仙關遁走我軍正在跟蹤追剿間乃丹陽小路出賊一股自北而南循西洋村以至店埠連互不斷勢將出我後路鮑超傳諭各將士暫不入城乘勝分軍縱擊賊受重創前股竄往店埠大路而去後股仍由丹陽小路而逃據擒賊供稱此係常州城外敗匪取道丹陽欲由建平廣德以上竄者也於是揚隊西洋村以備續至之賊一面移軍金

壇。卽於二十日收復縣城。准提督鮑超呈報前來。臣查金壇雖彈丸小邑。而旁接丹陽。內蔽常州。亦賊所必爭之地。鮑超因調隊暫回句容。恐賊城逼追。爲其所乘。引軍設伏。計破此城。不特常州丹陽輔車相依。卽金陵老巢。愈成孤立。實屬有裨大局。游擊張遇春奮不顧身。疾馳入陣。至於受創幾絕。尤爲偏裨中難得之材。相應懇恩。以副將儘先補用。其餘出力員弁兵勇。容卽彙入東壩。句容各案。查明奏保。仰候恩施。至參將鮑昌齡。都司宋連陞。王正禮。均係力戰陣亡。并請敕部從優議卹。以慰忠魂。所有鮑超一軍攻克金壇縣城緣由。謹繕摺由驛五百里具奏。伏乞皇太后皇上聖鑒訓示。謹奏。

徽州防軍挫失摺 同治二年四月十一日

奏爲浙省賊股上犯。微軍挫失。未能遏賊西竄。恭摺馳報。仰祈聖鑒事。竊僞聽王陳炳文。僞侍王李世賢各酋。由浙境先後犯徽。臣於三月二十五日附陳大概在案。自杭州餘杭既克。賊首陳炳文汪海洋等黨。分道出竄。一由昌化出老竹嶺。一由孝豐出寧國績溪兩縣。畢萃於徽郡之東南。三月十二日。毛有銘率所部八營。自休寧至郡。商之唐義訓出城迎勦。十三日唐義訓出郡南。毛有銘出郡東。乃東軍甫抵新營。不虞賊之驟至。隊伍未整。猝然應敵。前軍旣挫。後軍旋亂。毛有銘抽刀警衆。不能歷住陣脚。遂相率退入郡城。唐義訓在南路之方村。迎戰獲勝。冒雨追賊。傍夕聞東軍失利。亦卽撤隊回城。而賊已由吳山鋪分繞桂林。又繞出藍田富場等處。自東而北而西。面面傳烽。直撲城垣。郡中大震。十四日昧爽。我軍旣擊卻撲城之賊。唐義訓出城北向江村沙村兩路并進。毛有銘出城西。分軍爲三。一枝赴巖市街。一枝抄過鄭村場田。一枝趨古虹橋迎勦。於富場之郊。遙望賊旗擁至。密不見尾。毛有銘督兵前進。決戰兩時許。部將金茂榮楊德雲曾過文死之。我軍更以排槍環擊。猛撲猛進。而鄭村場田之師。搏鬪方酣。唐義訓亦自江村沙村擊散一股。由富場渡河而來。於是合軍夾勦。偏搜場田槐塘棠樹唐模各村村落。斬馘頗衆。賊乃由巖市遁入屯溪。圍撲該處營壘矣。防守屯溪之銓字兩營。其將官爲牟寅洪良輝。被圍之後。竭力堅守一晝夜。適毛有銘於夜半向屯溪疾進。又有汶口三營前來助戰。時方天曙。該逆不暇蓐食。棄釜撤圍。多向龍灣上溪口竄去。毛有銘卽築營駐師屯溪。此三月十三日官軍在歙東挫失。十四五日疊獲小勝之情形也。十六日唐義訓率隊至齊武。見羣賊由山下麥隴中抄出。分兩翼來迎。卽令勇士昇礮轟之。殪賊騎五人。

步賊爭相奔救。我軍包過山麓。夾攻賊後。自蘇村霞川驅出深渡。薄有擒斬。俄聞侍逆分股繞竄巖市以西。而親督死黨出深渡過河。唐義訓知此股之既多且悍也。乃令王品高王華雲李祖祥等。各帶哨勇。留駐朱村。而自帶親兵及葛清泰一營。馳紮篁墩。謀與毛有銘會師禦賊。十七日朱村各營。侵曉出隊。行次楊村。詎深渡之賊已大至。展旗一進。洋槍鼙發。銳不可當。李祖祥唐廷揚謝捷勝楊德和等死之。唐義訓由篁墩督軍繼至。突陣縱擊。初尙得手。屢進屢退。裹入重圍。賀義和左茂中謝國雄盧大忠黃炳雲王炳信等又死之。時毛有銘適在屯溪上游渡隊。途次聞警。卽飭各營分三路飛援。毛有銘自外攻入。唐義訓自內衝出。賊始披靡。我軍追過十餘里。山坳中忽有伏賊一枝。鼓噪而出。敗賊亦返戈轉鬪。剽悍無前。各軍戰久力疲。自知不敵。撤隊急走。賊且於天晚路雜之中。三面掩至。遂至步伍散亂。將士損折。棄械爭渡。幾不能軍。迨二更後。毛有銘回營。次日唐義訓回郡。賊已連脊西上。直信休寧。自是歛休境內。無地非賊。亦無路不梗。布長圍以困我郡城。而郡東之接踵而來者。仍復絡繹於道。十八十九兩日。唐義訓擊退郡城之賊。并獲小捷。休寧守將劉長春等。亦於十九二十等日。一截賊於溪邊村。再截賊於汪金橋下。汶溪藍田濯橋等處。賊知兩城守禦尙固。乃戰者自戰。行者自行。由龍灣折嶺分竄婺源境內。以遠江西之德興。延及玉山矣。此十七日追賊大挫。及十六至二十等日。擊賊小勝之情形也。伏查此次竄徽之賊。號稱十餘萬衆。論徵軍衆。寡懸殊。誠不足以資抵禦。然唐義訓毛有銘兩部。合計將及萬人。除守休徽兩城屯溪港口外。尙可得六千餘人。苟其布置得宜。好謀力戰。亦何致寇氛猖獗若此。乃毛有銘到防日久。而十三日之戰。全無紀律。交鋒卽退。聲威一損。賊鼓頓熾。唐義訓十七日之役。亦屬堵勦不力。雖俾能保全徽休兩城。而臨敵儻事。各無可辭。相應請旨將署皖南鎮總兵唐義訓。革職。仍留署任。按察使銜記名道毛有銘。革去勇號。拔去花翎。以知府降補。仍留營差委。以觀後效。臣調度無方。并請旨將臣交部。嚴加議處。至力戰陣亡之花翎參將金茂榮。花翎游擊銜都司李祖祥。花翎都司唐廷揚。藍翎都司銜守備曾文遇。都司銜守備賀義和左茂中。藍翎守備楊德雲。守備謝國雄盧大忠。藍翎守備銜千總謝捷勝楊德和。守備銜千總黃炳雲。把總王炳信等十三員。均請各照本職本銜。勅部從優議卹。所有賊由徽州上犯。各軍堵遏不力緣由。謹繕摺由驛五百里具奏。伏乞皇太后皇上聖鑒訓示。謹奏。

李世忠開缺回籍摺 同治二年四月十一日

奏爲江北一律肅清提督李世忠遣散部衆交出城卡呈請開缺回籍恭摺仰祈聖鑒事竊臣於同治元年九月奉命統轄滁州李世忠一軍是冬卽值金陵髮逆渡江北竄攻陷和巢二年春間僞忠王復大舉北犯撲陷浦口江浦李世忠力保滁全大等城僞忠逆疊撲無慮桐舒直至六安連不得逞退而東竄官軍乘勝追剿克復二浦九洲江北肅清李世忠函告臣處卽請開缺回籍臣正在復函熟商聞適聞苗逆復叛壽州失守李世忠慷慨誓師親統所部赴淮助平苗黨十月之杪僧格林心大兵擒斬苗逆准甸重安該提督正將率師回滁乃因壽州下蔡有爭功互鬪之案又因師行缺米有沿途騷擾之說經中外臣工參奏疊奉諭旨飭臣會同僧格林沁查辦旋經僧格林沁將提督朱元興杜宜魁被害情形詳悉復奏李世忠亦咨呈臣處請將所守五城交出所部營勇或另行調撥或遣散歸農聽巨斟酌辦理經臣屢次具奏并聲明俟三月底盡散五城兵勇後由臣奏懇恩施准令赴任在案旋據該提督三月初六日文稱「世忠於去臘傷病復發滿擬早得就痊藉圖報效詎當春令病益增劇舊傷亦發卽欲遵照赴任實恐隕越貽羞且先人遺柩至今未能安葬現擬俟各城交出兵勇盡行撤遣之後扶柩回里安葬并以調治傷病所有提督本缺世忠既不能赴任自應呈請開缺另擇能員補授以期營伍有裨」等語茲復接其三月二十七日一函據稱「日前兩陰過久所發餉鹽未克掃售各兵勇川資不敷尙未散盡惟全椒天長等城已於二十及二十四等日一併退清來安一城亦于四月初二日定卽退出只俟鹽價銀到隨將各弁勇飭催起程所有滁州六合兩城縱久不過初五六日均可撤退萬不能再有遲誤惟有趕將兵勇迅速催散俟散盡之後遵卽赴轅面陳一切」各等情前來查詢下游文武來皖者均稱此次遣散勇丁給與川資若發現錢或給鹽包少者四五千多者七八千將領數十兩不等皆由李世忠散財和衆綏靖地方接喬松年來書亦言「李營退出之五河盪卡業經該撫派員接辦讓出兩城全椒頗爲安靜天長所遣之勇雖稍滋事不至爲患」等語是李世忠所設之卡所守之城均已交出歸官克踐前言臣以各城既撤須兵替防無可調撥咨請吳棠派兵防守滁州兼顧來安咨請富明阿派兵防守六合而陳自明挑留之二千人則調赴南岸之池州駐紮遠離故土俾游勇之逗留滁屬者不得假託李世忠舊部之名滋生事端以清界限而便稽查至李世忠自投

誠以來。於今七年。屢著戰功。捍衛江北。前此髮逆苗逆。甘言煽誘。該提督自矢忠貞。堅凝金石。上年助平苗黨。決計解兵引退。官欠餉鹽五十餘萬包。不求補給。又出其所藏。資遣部下弁勇。并捐建滁州學宮。捐發滁屬農民牛種。又欲捐修雒河集新城。捐助臣處軍餉。此四者。皆係巨款。俟議定確數。再行分案具奏。該提督李世忠。於江淮軍務大定之後。潔身引退。廣散資財。不敢私爲己有。尙屬深明大義。合無籲懇皇上天恩。准予開缺回籍。保全令名。所遺江南提督一缺。并懇迅賜簡放。以重職守。所有李世忠撤勇交城。呈請開缺各緣由。理合專摺具奏。伏乞皇太后皇上聖鑒訓示。謹奏。

近日軍情片 同治二年四月十二日

再臣前次奏報湖州丹陽均已克復。常州亦有得手之說。常州係據委員探稟。臣亦知其不確。至丹陽一城。係據溧水守將王可陞之稟。稱於二月十一日克復。湖州一城。係據左宗棠之咨。稱于三月初九日克復。不知皆係訛傳。湖州未克。則黃文金楊輔金是否由微入江。尙未可知。常州未克。則蘇軍能否分兵接防東壩。尙未可知。臣倉卒陳奏不實。惶悚曷極。至近日軍情。金陵一軍。在朝陽神策金川等門外。開挖地道十數處。賊於附城一帶築月圍以拒之。三月二十三二十五六等日。攻破月圍防。其火藥礮斃極衆。而我軍前後傷亡。亦近三千人。當此之時。除卻嚴圍猛攻。力禁接濟。更無他法。賊之由婺源城內闖入江西者。一聚德興。一撲玉山。又將延擾腹地。臣前調鮑超率師西援。縱使李鴻章派兵替守句容東壩。鮑軍亦難速到。實恐緩不濟急。因派周寬世駐省七營。金國琛馬步九營。先從饒州一路進援江西。未知果否有裨。鮑超於尙未援江之際。囑令會同鎮揚兩軍。力攻丹陽。剪除金陵常州之枝葉。上游髮捻巨股。已竄過隨州棗陽。蔣及黃德二郡。意在假道鄂皖。東援金陵。前奉旨飭於彭玉麟楊岳斌二人中。派一人拆流而上。統率鄂軍。現接官文來咨。鄂省江面防剿。有李濟清萬化林等師船。足敷分布。請於彭玉麟楊岳斌二人中。商派一人。分置九江以下。臣即商請彭玉麟率師上駛。已於四月初九日過安慶。初十日由安慶馳赴九江。防剿北岸鄂皖江面。兼顧南岸鄱湖都昌一帶。自徽軍失利後。臣慮婺源樂平饒州景鎮或致淪陷。不意均得保全。且聞竄江之賊。因糧食不繼。號令不一。紛紛逃散。仰託聖主威福。此股或不足深慮。惟皖北陸軍。僅潁州六安廬郡巢縣等處。置有防兵。其餘濟太英霍桐舒等縣。皆係昔年髮捻往來熟徑。調守無

兵。空虛可慮。臣睹此時事孔棘。焦灼彌深。惟有力疾調度。勉撐危局。庶冀仰慰宸廑。除各路戰狀彙案續報外。合先附陳大概。伏乞聖鑒。謹奏。

擬陳餉絀情形片 同治三年四月十二日

再臣接准部文。戶部於三月十六日覆奏摺內稱。一會國藩軍營。現在月餉。每月湖北協濟銀五萬兩。湖南協濟銀二萬五千兩。四川協濟銀五萬兩。江西協濟銀三萬兩外。尚有廣東釐金及江蘇釐金等款。爲數甚鉅。均可源源接濟。縱各省報解稍有未齊。通盤籌畫。亦總可補苴支住。一又於三月二十三日片內奏稱。一會國藩軍營。湖南湖北廣東四川江西等省。每月協餉。約計數十萬兩。一各等語。查四川一省。除戊午之冬。己未之春。兩次解過臣營銀二萬五千兩外。近五年以來。并無絲毫協解之款。不知戶部以何處奏咨爲據。言四川每月協臣五萬。請旨敕下該部鈔出原案。知照臣處。以憑查核。湖南除東征局另抽半釐外。間有協濟臣處之款。然亦無月額二萬五千之多。臣處亦未奏定有案。本年尙未協解一次。江西所謂三萬者。嘗係指去夏奏撥洋稅言之。此款僅據關道蔡錦青解過一批銀萬五千兩。旋即退還矣。廣東釐金。係臣所不應得之餉。亦臣所最抱疚之端。然本年百餘日。尙僅解過銀九萬兩。徒有專利之名。究無救窮之實。江蘇釐金。係臣分應籌之餉。然淮揚各屬。向歸漕臣及鎮揚兩防抽收。蘇松各屬。向歸撫臣抽收。蘇軍人數最多。臣亦未便遽起相爭。僅去秋議定由滬上月解臣臺銀四萬。亦未能如期按解。本年僅解過一批三萬耳。戶部所指六省供臣之餉。爲數甚鉅。實則所得極少。臣向不肯以缺餉危苦之詞。籲告朝廷。故戶部不得知其詳也。江西湖南江蘇川廣五省。臣既粗陳其略矣。此外惟湖北一省。與臣處交涉最多。然亦無月協五萬之款。自安慶克復以後。於今三年。鄂省并未解過臣臺協餉。惟楊岳斌水軍梁美材辜志俊陸軍李續宜舊部成大吉蕭慶衍蔣凝學毛有銘四軍。歷食鄂臺之餉。而勦蘇皖之賊。戶部所稱湖北濟臣餉項。或即指此言之。然官文與胡林翼嚴樹森數人者。素抱勦滅金陵逆巢之志。而此數軍者。向歸湖北糧臺報銷之營。是蓋鄂軍勦鄰境之賊。非鄂省協臣臺之餉也。自去冬以來。湖北餉項亦絀。疊准官文嚴樹森來咨。楊岳斌蕭慶衍蔣凝學毛有銘梁美材諸軍。鄂臺只可發餉六成。由臣處湊發一成。臣雖勉強應允。而目下窮窘至此。本部十萬人。無以自存。安能更覓一成之餉。助供鄂軍。相應奏明。請旨飭令官文嚴樹森將此數軍。仍

照昔年舊例。一律供支。或於六成之外。酌添一二成。始終以鄂兵鄂餉。助皖助吳。俾微臣謀餉憂灼之情。爲之少減。又如普承堯何紹彩兩軍。本係唐訓方部曲降官。以後撥隸臣處。檄令分防巢縣廬郡兩城。餉項均無著落。現在淮甸澄清。利源日廣。相應請旨。敕下喬松年。將此兩軍交該撫調遣。餉項由臨淮糧臺支發。即歸該臺報銷。俾微臣謀餉憂灼之情。又爲少解。不勝大幸。臣才識愚庸。謬當重任。肩勢過大。頭緒太多。論功則已成強弩之末。論餉則久爲無米之炊。而戶部奏稱收支六省巨款。疑臣廣攬利權。如臣雖至愚。豈不知古來竊利權者。每違奇禍。外畏清議。內顧身家。終夜悚惶。且憂且懼。臣所居職位。昔年凡六人任之。欽差駐金陵者一人。總督駐常州者一人。皖江以南徽防統帥一人。寧防統帥一人。皖江以北。而下滁和天六全來歸。臨淮控馭者。爲東路統帥一人。上而英霍潛太桐舒六廬。多隆阿等經營其間者五年。爲西路統帥一人。微臣謬以庸材。兼此六事。曾經兩次奏請簡派大臣來南會辦。未蒙俞允。今兵弱餉絀。顛覆將及。而髮撿巨股。大舉東犯。自英霍以至滁來。處處空虛。萬一該逆竄踞各城。皖北糜爛。或並貽患於裏下河。臣亦何能當此重咎。合無籲懇天恩。飭將皖北西路責成喬松年。東路責成吳棠富明阿。共籌防勦。臣非敢預爲姦過之地。實以縣力而兼病軀。自度不足捍禦賊氛。不得不瀝陳於聖主之前。所有微臣辦理竭蹶下情。謹附片略述其梗概。伏乞皇太后皇上聖鑒訓示。謹奏。

東壩防軍截賊獲勝摺 同治二年四月二十七日

奏爲東壩防軍。截擊丹陽上竄之賊。大戰獲勝。恭摺馳報。仰祈聖鑒事。竊自丹陽一城。經富明阿。馮子材。會師攻復後。僑顯王。甘王。及僑忠王。二殿下等。巨酋糾聚。三四萬衆。由天皇寺。進竄木家莊。大山頭一帶。以圖犯我東壩。并分枝由漆橋。進竄塘溝。固城湖一帶。以圖犯我高淳。四月十三日。水師營官柳壽田。乘賊未及盡濟。迎擊於固城湖。敗之。遂約高淳守將蕭信集。戴德祥等。追擊於楊村。又敗之。賊大怖。遁回漆橋。時鮑超引軍自句容出。鏢水。正欲馳諭譚勝達。率東壩各營。先勦大山頭一股。仍親督騎隊。專勦漆橋一股。詎行抵漆橋。賊已合股。併向東壩一路。四月十四日。譚勝達商之。吳雲集。鄧訓。譚李文益。曾成武。黎光照等營。暮食出隊。天未曙也。少頃。師次安。與遙見山谷中。賊旗林立。若遠若近。迎面撲來。諸將士奮勇直前。燃槍環擊。賊乃全無怯志。前股少卻。後股繼至。往來猛鬪十餘次。更以賊馬分兩翼抄出。勢益剽悍。譚勝達於敵騎衝突之際。橫躍入陣。徑取中路。抽刀疊刺。立

梟數奮，賊氣爲奪。吳雲集，見中路搏鬪方酣，卽以所部向左路大呼疾馳。左脇已受重傷，猶復與會成武麾兵疾進，截賊數段，乘勢追過右路。而右路聚賊尤衆，洋炮排列，擁護一奮，各弁勇指曰：「此渠魁也。」鄧訓誥策馬營先，突出斬之。中左兩路之賊，奔救不及，嘩亂欲遁。適李文益從山後掩至，黎光照亦節節掃蕩而來，各營會合，併力長驅，勢不可遏。甘逆顯逆率悍黨在高岡督陣，正思折隊反走，不料我軍馳颺電掣，一擁卽至，亂鋒交下，死者山積，賊乃大潰。軍士踐尸而過，逐出三十里外，始各回軍下壩，旋有匪來自漆橋，適與我軍相值，不敢尋戰，捲旗卽行。比至定埠，又爲易華元師船所截，頗有斬擒。餘黨悉向湖州廣德竄去。是役斃賊約七千人，中有僞王等十七人，均搜出僞印，解至安慶。據譚勝達稟報，由提督鮑超轉呈前來。臣查丹陽各賊股意在衝出東壩，由皖南併竄江西，經鮑超飭令譚勝達等督軍痛剿，雖未能悉數剪除，而下游多殺一賊，卽上游少竄一賊，挫此凶鋒，亦屬有裨大局。現准李鴻章來咨，已派劉銘傳十二營接守句容，鄭國魁水陸五營接守東壩，鮑超俟蘇軍到防後，擬卽親統全隊，刻日上援江西。臣亦於滬餉贛餉中撥銀十萬兩，解交鮑超，以作途費。冀速師行，而慰民望。此次出力員弁，仍請附入東壩句容各案內，彙保優獎，以勵軍心。其陣亡及前案續查人員，另開清單，請旨敕部議卹。所有東壩一軍，截擊竄賊獲勝緣由，謹繕摺由驛五百里具陳，伏乞皇太后皇上聖鑒訓示，謹奏。

徽州防軍截賊獲勝摺 同治二年四月二十七日

奏爲蘇賊續竄徽州，官軍擊勦屢勝，餘衆潰散，恭摺馳報，仰祈聖鑒事。竊僞聽王陳炳文，僞侍王李世賢等，先後由浙犯徽。由徽入江，臣於四月十二日詳陳戰狀在案。嗣報徽州南路復有賊至，詢其僞目爲僞烈王林逆，麟王朱逆，及僞爵潘忠義，李石黃宗保等，究其來路，蓋江陰楊舍之敗賊，常州城外之壘賊，常郡合圍以後，該逆等不能入城，由丹陽湖州而上竄者也。乃從昌化進老竹嶺，闖入歙境大阜七賢坊村等處，距郡城三四十里。四月初十日，徽郡守將唐義訓率所部六營，馳出城南爲迎頭截勦之謀。賊衆懼而東趨，擾及臨溪孔壘一帶。揣賊狡計，必將出藍田鍾塘嶺官場繞郡城而西也。乃馳函告金國琛，毛有銘，各以所部來會。是夜三更，唐義訓以一營伏鍾塘嶺後，十一日昧爽，以五營進，遇賊接戰，伏軍并發，殲其前鋒。是時金國琛、毛有銘留兩營守休寧，會帶馬步十二營，行抵官場，隔河而屯，傳餐未畢，賊遽以大股嚮至，山岡上下，若蟻若蠅。金國琛等令王俊南爲中路衝鋒。

羅盛典佐之。趙仁和爲左路衝鋒。楊啓益佐之。葛清泰爲右路衝鋒。王玉藻李致和佐之。仍親督李贊勳馬隊。牟寅洪良輝步隊。爲諸路策應。部勒既定。姑不出戰。俟賊涉水將半。一聲號礮。突出奮擊。賊恃衆悍。搶上隄埂。我軍猛撲猛進。更以騎卒沿途包抄。正酣戰間。唐義訓適從鍾塘嶺尾賊而至。兩面夾攻。賊即不支。緣山而竄。各營奮力追殺。俘斬千餘人。解散不可勝計。逸出之賊。方由呈坎遁向黃山小路。復於十二日爲唐義訓所敗。此四月十一二日等日。鍾塘嶺富場等處。勦賊獲勝之情形也。賊既趨重黃山。則歙休之北。黟縣之東。均形喫重。十三日我軍向漁亭併進。唐義訓爲前茅。毛有銘繼之。金國琛又繼之。馳抵五弓橋。賊已揚旗怒馬而來。唐義訓先與交鋒。毛有銘金國琛分路勦擊。窮寇苦戰。銳不可當。唐義訓率隊上山。抄過賊後。毛有銘等揮令各營。從溪河上流。大呼衝入。斬敵無數。駢尸塞流。正擬入山追勦。而日斜土飢。乃分軍少息。齊雲山之麓。俄而賊旗隱現。右側山衝。忽出一枝。我軍再起破之。餘匪退遁。藍田山溪一帶。是夜月色正明。唐義訓派隊赴南渡。循河直上。以一營在西館旁山埋伏。一營在西館對岸埋伏。一營在渭橋山後埋伏。一營在巖脚林際埋伏。比至天曉。金國琛毛有銘等。亦率各營自五弓橋銜枚疾進。賊半在西館過河。半在南渡過橋。我軍鼓角齊鳴。一擁而上。各山伏兵突出。殺聲大振。羣賊驚亂。不復成伍。其未及渡者。衆軍蹙之入水。其已渡者。爲渭橋巖脚之軍所截。前股擊散。後股續至。奪路狂奔。生擒林義等十酋。陣斬潘忠義等十四酋。死者散者。實有二萬餘衆。所剩敗殘零賊。潛向上溪口。紛紛南竄。不過二三千人。而婦女輜重馬匹器械。拋棄略盡。此十三四等日。五弓橋西館等處。搜剿大勝之情形也。伏查本年正月以來。蘇浙諸賊。已三次衝出徽境。併竄江西。江省防軍。已有應接不暇之勢。此次續股上竄。各軍積愧生奮。擒斬解散。約去十分之八。入江之匪無幾。軍威爲之一振。在事出力員弁。可否容臣酌量保獎之處。出自聖裁。陣亡將弁。查明彙案辦理。所有徽軍擊賊獲勝緣由。謹繕摺由驛五百里具陳。伏乞皇太后皇上聖鑒訓示。謹奏。

近日軍情片 同治二年四月二十七日

再蘇浙羣賊。由徽上竄者。約分六起。第一起爲僞痞王等。係溧陽宜興敗出者。溧陽本僞侍王老菓。故痞逆侍黨也。現尙踞江西之南豐縣城。暨分竄汀州等處。第二起爲陳炳文汪海洋等。係杭州敗出者。輜重最多。隊伍頗整。餘杭武康德清石門各股。皆附之以行。現尙延擾於鉛山之湖坊陳坊等處。第三起爲僞侍王。來自湖州。由徽入

江攻陷弋陽。四月十六七等日。圍撲撫州。旋退至金谿之許灣。將與南豐股匪合爲一路。第四起爲江陰楊舍之敗賊。常州城外之壘賊。卽唐義訓金國琛等軍。十三四日在歙休境內所破者也。其金壇句容敗出之賊。是否在內。尙未可知。常州克城之時。各頭目與兩粵老賊。均就駢誅。無一漏網。不至貽患於上游。至從丹陽逸出之賊。雖在東壩一敗。而餘黨悉趨廣德湖州。是將爲第五起。而湖州堵輔二悍酋。徒黨尙衆。又將爲第六起。揣其勢要無不圍竄徽境。併犯江西。欽奉四月十九日寄諭。「鮑超一軍。自可騰出。移援徽郡。或卽令渡江北防。斯濬太英霍桐舒一帶。」仰見聖謨廣運。先事豫防。惟查目下賊情。究以江西爲最重。而江西之待援。實比皖北爲尤急。鮑超全隊。四月必可成行。五月當可到江。自不宜改援皖北。致辜江西軍民雲霓之望。至周寬世金國琛兩軍。巨本檄令由饒景一帶援江。旋因饒景數百里。并無賊蹤。侍逆南竄已遠。乃改調周寬世等暫不赴江。分駐祁門漁亭休寧等處。以備迎堵。續至之賊。俟丹陽湖州廣德各股竄盡後。再行馳入江西會剿。所有近日軍情。理合附片具陳。伏乞皇太后皇上聖鑒訓示。謹奏。

力疾銷假片 同治三年四月二十七日

再臣前因驟患眩暈。手足搐搦。恐成偏廢之疾。嘗於三月二十五日。奏蒙恩准賞假調養。現已一月期滿。雖見客甚少。而軍務及地方文件。仍不能不逐日閱看。左手摘摺。不時舉發。右手作字。亦不方便。據醫家云。「心肝兩家血虧。必須謝棄百事。冥心靜攝。病根已深。非一時所能遽痊。」惟疊接湖北各營函稟。上游髮捻延竄。應山孝感境內。賊計在圍剿救趙。屢有攻撲。安慶圍援金陵之說。而金陵圍師。與江西羣賊。亦均在危疑震撼之際。臣受恩深重。當此軍事方殷。何敢顧惜微軀。陳請續假。已於四月二十六日。力疾強起。照常治事。藉固軍心。而慰宸衷。所有微臣暫行銷假緣由。理合附片陳明。伏乞聖鑒。謹奏。

謝寬免嚴議恩摺 同治三年五月初六日

奏爲恭謝天恩。仰祈聖鑒事。竊臣承准議政王軍機大臣字寄。同治三年四月十九日奉。上諭。「曾國藩奏徵軍挫失。自請嚴議之處。著加恩寬免。」等因。欽此。祗承之下。感悚交并。伏念臣智識淺短。膠膠重寄。矢冰淵以常懷。猶措置之多乖。此次徵軍挫失。雖衆寡懸殊。究係堵剿不力。臣調度失宜。咎無可辭。迺蒙聖慈。曲加寬貸。隆施逾

格。愧悚難名。臣亦惟有欽遵訓誨。振刷精神。勵冰瑩之微忱。策桑榆之後效。常思艱而圖易。冀掃穴而擒渠。庶以仰答高厚鴻恩於萬一。所有微臣感激下忱。謹繕摺專弁叩謝天恩。伏乞皇太后皇上聖鑒。謹奏。

鮑超請假葬親摺 同治二年五月十二日

奏爲帶兵大員請假葬親。恭摺籲懇天恩。仰祈聖鑒事。竊浙江提督鮑超。於同治元年十一月二十日在寧國高祖山軍營。聞訃丁母憂。呈請奔喪回籍。時值寧國境內。自紅楊樹清弋江西河灣址等處。面面賊氛。皖南全局震動。鮑超獨當一路。斷難離營。臣奏奉諭旨。俟江南軍務大定。再由臣奏請給假回籍營葬。鮑超一聞成命。悲不自勝。亦仍復公牘私函。再三申請。臣與之期約。俟攻克江西河灣址。保全寧郡後。必當代爲陳奏。上年二月臣查閱沿江營伍。行次榕溪口。鮑超迎謁舟中。以西河灣址并復寧郡肅清。請踐前言。情詞迫切。聲淚俱下。并稱臣與胡林翼李續宜三人丁憂。均得邀恩離營回籍治喪。超母鞠育之苦。迥異尋常。懇爲援例聲請。俾展孝思等語。臣多方撫慰。又與之期約。待攻克東壩後。始行具奏。十月間。水陸諸軍。奪取東壩一關。而乞假之文旋至。臣復婉辭批答。囑其暫留五箇月。勉抑一時哀慕之忱。以待金陵大勦之集。如金陵逾期弗克。亦必專疏籲求恩准。給假歸營葬事。今年三月初間。五箇月之期又滿。鮑超復以悽詞苦語。懇請代奏。臣伏查該軍赴援江西。斷非一蹴所能了事。前次節節爽約。致其家奄奄在堂。久不克成歸望之禮。至此而再失信於鮑超。竊懼此後之號令不復能示信於諸將矣。目下江西軍務喫緊。本不應率請離營。惟鮑超部將如宋國永。楊標。婁雲慶。諸鎮。皆相從十年之久。其餘驍將尙多。足資勦辦。頃復欽奉諭旨。派楊岳斌督辦江西軍務。鮑超係其舊日部曲。卽令楊岳斌統率該軍以行。必可指揮如意。合無籲懇天恩。俯念鮑超苦戰功多。賞假四箇月。飭令暫回四川本籍。俟營葬事竣。卽即回營。俾展人子烏私之誼。彌彰聖朝孝治之隆。所有帶兵大員請假葬親緣由。謹繕摺由驛馳陳。伏乞皇太后皇上聖鑒訓示。謹奏。

近日軍情片 同治二年五月十二日

再近日軍情。湖州廣德各賊黨。分踞如故。尙無上竄之信。賊之在徽州擊潰者。由婺源德興併入江西。道員王德榜率長左營截殺於弋陽境內。大獲勝仗。據稱「盜衆數萬。全股殲滅」。其所報賊數。與徽軍所報數。迥僅有數。

千者。多寡懸殊。雖彼此均有不實不盡。而此股賊勢之羸弱。誅戮之將盡。尙屬可信。侍逆一股。攻破建昌之萬年橋下。以小枝牽制官軍。以大枝疾趨而西。疊陷宜黃崇任兩縣。即在崇仁縉城擄糧。爲久踞計。凡樟樹鎮及豐城新淦峽江等縣。處處喫緊。省城戒嚴。沈葆楨調湖口守將萬泰王定國管帶濬兵。於五月初三日進省。彭玉麟派喻俊明張錦芳等。亦自湖口各率師艦駛入省河。臣飛檄周寬世銓字七營。從景鎮饒州雇船赴援。必能先後趕到。省垣重地。必可無虞。飽超一軍。於初六日由蕪湖啓行。擬取道湖口九江繞出樟樹鎮迎頭遏擊。與劉典王文瑞諸將。痛勦數次。不使羣賊竄渡贛江以西。或不至有妨大局。至鄂中髮捻。現尙蔓延黃陂孝感麻城一帶。去皖甚近。英霍潛太桐舒處處空虛。臣咨商李鴻章分撥數軍。接守建平溧水高淳三處。騰出李榕王可陞等軍。渡江而北。扼紮桐舒。以固藩籬。准轅轉調防。有需時日。不免有鞭長莫及之處。所有江皖軍務情形。謹由驛馳陳大槪。伏乞皇太后皇上聖鑒訓示。謹奏。

遵旨會師籌剿金陵摺 同治三年五月二十一日

奏爲遵奉諭旨。會師籌剿金陵。恭摺覆陳。仰祈聖鑒事。竊臣承准議政王軍機大臣字寄。同治三年五月初八日奉。上諭。李鴻章所部兵勇。攻城奪隘。所向有功。礮隊尤爲得力。現在金陵功在垂成。髮捻蓄意東趨。遲恐掣動全局。李鴻章豈能坐視。著即迅調勁旅數千。及得力礮隊。前赴金陵。會合曾國荃圍師。相機進取。速奏膚功。李鴻章如能親督各軍。與曾國荃會商機宜。剿辦更易得手。著該撫酌度情形。一面奏聞。一面迅速辦理。曾國藩身爲統帥。全局在胸。尤當督同李鴻章會同曾國荃彭玉麟和衷共濟。速竟全功。掃穴擒渠。同膺懋賞。總以大局爲重。不可稍存畛域之見。等因。欽此。仰見聖謨廣運。指示周詳。欽悚曷任。自蘇常攻克之後。臣本擬咨請李鴻章親來金陵會剿。特以該撫係封疆將帥之臣。又值苦戰積勞之際。非臣所敢奏調。是以未及具疏上陳。函商臣弟曾國荃。亦以師久無功。愧悚無地。不敢更求助於人。近於畏難卸責。始勤終怠者之所爲。乃兩月以來。百計環攻。逼城太近。被賊以洋槍狙擊。我軍傷亡至四千人之多。所挖地道十餘處。已被該逆等從內掘出。穿透三洞。此外諸洞。亦難奏效。前聞賊糧於五月罄盡。近來城中收割新麥。又可支持數月。是掃穴擒渠之期。尙無把握。而曾國荃焦勞致疾。飲食漸減。身發溼毒。不便起坐。餉項奇窘。尤爲可慮。聞蘇軍開花砲位。無堅不破。其洋槍隊扒城攻壘。無敵

不破。臣於五月十一日始咨調蘇軍之來。句容等處者。如郭松林劉銘傳兩鎮。酌帶開花礮位。輔以槍隊。就近助攻金陵。然猶未敢請李鴻章親來也。今幸欽奉寄諭。飭李鴻章親督各軍。西來會剿。臣已恭錄諭旨。具咨加函催請李鴻章刻日馳赴金陵。與會國荃會商勦辦。前接李鴻章來函。言蘇軍將士太勞。宜少休息。待會克長與湖州。再行選將撥兵。助攻金陵等語。然使僅派諸將前來。其知者以爲憐該撫之過勞。信蘇將之可恃。不知者以爲臣弟貪獨得之美名。忌同列之分功。尤非臣兄弟平日報國區區之意。合無籲懇天恩。飭催李鴻章速赴金陵。不必待七月暑退以後。亦不必待攻克湖州之時。金陵早破一日。天下之人心早安一日。俾髮捻東竄。不至掣動大局。餉項奇絀。不至更生他變。實爲至幸。提督鮑超黃翼升於五月初十一等日。均來安慶接見一次。臣飭鮑超速援江西。十七日已至九江。飭黃翼升速回金陵。接統楊岳斌外江水師。仍俟楊岳斌行抵江西。換出彭玉麟所部師船。駛赴下游。謹遵會籌金陵之命。仍須回顧上游。兼防鄂省東下之賊。臣於三月間。本欲前往金陵督剿。旋因徽州大警。迄不果行。此次湖北羣賊。已竄過鄂皖交界之馬鞍山英霍潛太等縣。一蹶卽至安慶首邑。鄉民亦遷徙震動。省會重地。防兵單薄。刻下未可暫離。擬俟北岸軍事稍鬆。臣於六月親赴金陵。會同李鴻章彭玉麟會國荃。籌商攻剿。倘屆時安慶警急。亦卽乘坐輪船。星夜上駛。總當兼權緩急。量而後動。斷不敢顧彼失此。致煩宸廬。所有遵旨會勘金陵緣由。謹會同兵部右侍郎臣彭玉麟。浙江巡撫臣會國荃。繕摺由驛五百里馳奏。伏乞皇太后皇上聖鑒訓示。謹奏。

奉旨覆奏并陳近日軍情摺 同治三年五月二十七日

奏爲續奉諭旨。恭摺覆奏。并陳近日軍情。仰祈聖鑒事。竊臣承准議政王軍機大臣字寄。同治三年五月十六日奉。上諭。『此時賊勢固結不解。必須將金陵迅速攻拔。使該逆無所依附。自成瓦解之勢。前經疊諭李鴻章撥兵助攻金陵。能否親往。並令該撫酌辦。現當事機緊要之時。李鴻章務當不分畛域。不避嫌怨。迅速遵辦。力圖共濟。不准稍有推諉。』等因。欽此。又奉五月十九日上諭。『現在羣賊紛竄。總當速拔金陵。覆其巢穴。會國藩當嚴飭會國荃督率所部。奮力圖功。不得再有稽延。李鴻章恪遵前旨。不分畛域。撥兵助剿。或親往會攻。毋稍避嫌推諉。前因會國藩軍餉竭蹶。諭令李鴻章將輪船經費銀五十萬兩。全數撥歸該營。旋據李鴻章奏。『據赫德聲稱。現

時只能湊解銀十五萬兩。當飭江海關道趕緊起解。」等語。迄今爲日已久。尙未據會國藩奏到。究竟現存之十五萬兩。曾否解赴安慶。并著會國藩查明覆奏。」等因。欽此。仰見皇上體顧東南。刻刻廬念。臣於五月十一日咨請李鴻章選派驍將。酌帶開花礮位。前求助剿。旋奉敕下李鴻章督軍會剿之諭。復於十五日具咨加函。請其親來會辦。均於五月二十二日專疏覆奏。頃已抄摺寄蘇。加函催促。李鴻章所派何隊。現尙未報起程。能否親赴金陵。亦未接准咨覆。據會國藩來文。神策朝陽兩門外所掘地道。又被城賊從內挖出。橫穿數處。勇士傷折甚多。金陵城厚且高。迥非他地可比。卽金川門左近俗號矮城者。亦尙高至五丈以外。是開花礮之能否收效。尙未敢必。臣惟有倍加勤慎。飛催李鴻章率師來會。一面晝夜環攻。一面嚴斷接濟。俾令糧援并絕。飛走路窮。盡殲數萬。堅忍之賊。仰慰九重宵旰之憂。前此奉撥輪船經費一項。據代理江海關道應寶時先後批解規平銀二十三萬八千兩有奇。合庫平銀近二十二萬兩。內以五萬兩分濟鮑超一軍。以四萬兩提解安慶糧臺。餘十三萬撥歸金陵大營。飢困之際。獲此巨款。正如久旱得雨。莫不含哺而頌皇仁。惟此項銀兩。轉瞬已罄。臣不敢謂籌餉之尙少。而深悔募勇之太多。惴惴焉恐生他變。或誤大局。既願李鴻章統兵以來助。尤望其攜餉以相遺也。至上游近日軍情。賊之竄擾江西者。自攻陷宜黃崇仁以後。株守不出。并未北窺省會。西越贛江。逃者頗多。鮑超於二十一日單舟晉省。與撫臣籌商一切。其全隊由湖口渡湖。將取道九江瑞州而進。楊岳斌亦抽調水陸十營。前赴江西。合之鮑軍共二萬餘人。臣因江西兵力極厚。不難盡殄寇氛。改調周寬世一軍合赴皖北。以防鄂省東竄之賊。鄂賊現在麻城黃岡之交。一播足卽入皖境。刻城空虛。殊深焦慮。擬令陳國瑞駐紮壽州。處淮南江北適中之地。爲盧壽舒六游擊之師。仍當防守要區。嚴扼江面。俾不得舉動金陵全局。仰副諭飭諄諄之意。所有續奉諭旨。并陳近日軍情。謹繕摺由驛五百里覆奏。伏乞皇太后皇上聖鑒訓示。謹奏。

覆陳長江水師提督員缺片 同治二年五月二十七日

再准兵部咨開同治三年四月十九日內閣奉上諭。「江南提督著李朝斌補授。欽此。」同日奉上諭。「江南水師提督著黃翼升補授。欽此。」欽遵行文到臣。查江南全省。額設提督一員。兼轄水陸。駐紮松江。此外并無江南水師提督員缺。惟於元年二月間。臣於覆奏改建安徽省城摺內。曾有添設長江水師提督之請。旋經部臣議准。

在於蕪湖地方。新建立長江水師提督衙署。而於總兵副參以至千把應設幾缺。暨分汛修艦各事宜。行令臣熟籌妥議。臣以軍務倥偬。尙未及議奏。又因部臣所論上接九江。下連江寧。係專指安徽江面而言。徵臣所擬則當上起岳州。下抵福山。係通指五省江面而言之。必須會同五省督撫。暨楊岳斌彭玉麟等往來熟商。始克定議。是以遲遲未及具疏上陳。自奏准新設此缺。至今尙未蒙簡放有人。此次欽奉諭旨。李朝斌補授江南提督。自係李世忠所遺之缺。其黃翼升所補江南水師提督。是否卽此係新設長江水師提督之缺。如卽係此缺。應請敕部撰擬字樣。新鑄印信。頒發來南。以昭信守。至於長江水師提督設官。分汛修艦撥餉各事宜。臣當遵照部文。會同沿江督撫及楊岳斌彭玉麟等。詳悉議奏。恭候欽定。理合先附片陳請。伏乞皇太后皇上聖鑒訓示。謹奏。

覆陳金陵皖北江西各路軍務籌辦情形摺 同治二年六月十一日

奏爲欽奉諭旨。恭摺覆奏。仰祈聖鑒事。竊臣自旬日以來。歷奉寄諭。殷殷指示。不外乎迅勘金陵。及皖北江西兩路軍務。所有近日籌辦情形。理合分晰詳對。馳慰宸衷。如諭旨飭令李鴻章俟長興得手後。卽統率諸軍。助攻金陵一節。臣接李鴻章來咨。一教練礮隊。尙須時日。又以蕪湖州賊衆。蘇常毗連。會攻金陵。卽不能協勘湖州。又謂天氣炎熱。洋槍連放卽紅。多則炸裂開花。礮放至十數出。卽不能著手。一等語。臣查李鴻章平日間任事最勇。進兵最速。此次會攻金陵。稍涉遲滯。蓋絕無世俗避嫌之意。始有讓功之心。而不欲居其名。惟所稱全力助金陵。則除留防蘇境外。更難協勘湖州。則係屬實在情形。臣亦未便再三瀆催。轉瞬新秋暑退。該撫必可督兵親來。屆時湖郡或已先下。無復浙賊犯蘇之慮。亦無槍礮紅裂之大患矣。諭旨詢及聞中外匪徒。仍然有偷濟賊糧食軍火之事。飭卽實力嚴防一節。查金陵城大而堅。重山複港。引河穿城。接濟極不易斷。然自二月合圍以來。陸路晝夜搜查。據報已粒米不能入城。水路百計防範。終難淨絕。至四月底。始定上下民船。三日放關一次。均派砲船護送。除放關有期外。概不准一船往來。臣頃面詢楊岳斌。據稱。一五月以來。江濱奸匪暗賣賊糧者。實已絕蹤。一然水路六百六七十里。臣何敢信其一無疏漏。惟當諄飭各營。加意嚴防。近聞戈登語及白齊文暗回中國。招集無賴。雇備輪船。將赴金陵助濟逆酋。此則意外之虞。頗難防禦耳。諭旨以髮捻東趨。飭調李榕王可陞等。迅赴舒桐。調周寬世移赴皖北一節。查上游髮捻。由孝感黃陂夏延至麻城黃岡羅田等縣。近已竄入英山境內。臣前調蘇軍

接防溧水高淳建平三城。而椒三城防兵移駐舒桐等處。旋據李鴻章撥營接守溧水高淳。臣因調溧水王可陞一軍移駐無爲州。楊岳斌帶高淳一軍馳入江西。惟建平非蘇所轄。無兵接防。臣又咨請李鴻章於新克長興各軍中分兵守建。騰出李榕大營。馳赴桐城。并調李世忠舊部陳自明四營。由池州馳紮廬江。未知能否速到。至周寬世一軍。臣前因江西兵力足敷剿辦。已改調該軍由江旋皖。不謂軍檄未至。而該提督已抵南昌。適因東鄉不守。南昌戒嚴。經該省官紳合詞請留。又不得不先其所急。令赴進賢防剿。目下不能遽回皖北。諭旨以英霍喫緊。去安慶不遠。飭臣俟上游軍務漸平。即赴金陵督師一節。查賊之由鄂趨皖。意在掣動金陵全局。果能扼守皖境。即所以協助金陵。臣前次奏明擬於六月親赴下游。籌商攻剿。現值鄂省各股竄近英霍。新調桐城廬江無爲之兵。均未到防。安慶人心震動。誠如聖諭。臣實未可輕離。惟有催集防軍。設法堵遏。俟皖北稍安。李鴻章會勦有期。即嘗馳赴金陵商辦一切。以上四條。皆蒙宸衷廬系。謹將近日情形。恭摺由驛五百里覆奏。伏乞皇太后皇上聖鑒訓示。謹奏。

金陵克復全股悍賊盡數殲滅摺 同治二年六月二十五日

奏爲克復金陵全股悍賊盡數殲滅恭報詳細情形仰祈聖鑒事。竊照官軍攻克金陵業經浙江撫臣曾國荃已將大概情形於十六日亥刻會同臣等馳奏在案。茲據曾國荃十九日咨稱。此次攻城剿洗老巢之難。與悍賊等拚死鏖戰之苦。實爲久歷戎行者所未見。自得天堡城後。城中防守益密。地堡城扼住去路。百計環攻。無隙可乘。直至五月十三日。始經李祥和羅逢源王遠和黃潤昌陳壽武熊上珍王仕益等率隊攻克。占取龍脖子山陰。居高臨下。勢在掌握中。自六月初一日起。各營輪流苦攻。傷亡極多。李臣典偵知城內米麥尙足支持數月。又見我軍地道三十餘穴。都已無成。官軍共五萬餘人。筋力將疲。若不趁此攻克。事久變生。深爲可懼。李臣典願率吳宗國等。從賊礮最密之處。重開地道。蕭孚泗黃潤昌熊登武王遠和願距城十數丈。修築砲台數十座。通派各營隊伍。刈割徑蘆蒿草。堆細山積。上覆沙土。又左路地勢甚高。利於聲攻。右路地勢極低。利於潛攻。如是者半月。未嘗一刻稍休。肉薄相逼。損傷精銳。不可勝數。總兵陳萬勝王紹箴郭鵬程等。皆素稱驍將。數日之內。次第陣亡。尤堪憫惻。十五夜四更。地道裝藥之時。曾國荃與李臣典正在洞口籌商一切。忠曾李秀成突出死黨約數百人。由

太平門傍城根直犯地道大壘。別從朝陽門東角出數百人。裝官軍號衣。持火彈。延燒各墩壘。及附近煙蘆蒿草。官軍於久勞之後。夜深幾爲所乘。賴伍維壽李臣典黃廷爵張詩日堵住左路。斃賊無算。彭毓橋熊上珍陶立志等將。堵殺右路。擒斬亦多。幸克保全洞口。十六早。嚮明。曾國荃將四路隊伍調齊。預飭各軍士穩貼牆壕。嚴防冲突。惟將太平門龍牌子一帶。自黎明攻至午刻。李臣典報地道封築口門。安放引線。曾國荃懸不賞之賞。嚴退後之誅。劉連捷朱洪章武明良伍維壽熊登武陳壽武李臣典張詩日。各率營官。席地敬聽。各願具軍令狀。誓死報國。遂傳令即刻發火。霹靂一聲。揭開城垣二十餘丈。煙塵蔽空。磚石滿谷。武明良伍維壽朱洪章譚國泰劉連捷張詩日沈鴻賓羅雨春李臣典等。皆身先士卒。直衝倒口而入。而各弁勇蟻附齊進。銳不可當。而左路城頭之賊。以火藥傾盆。燒我士卒。死者甚衆。大隊因之稍卻。經彭毓橋蕭孚泗李祥和蕭慶衍蕭開印等。以大刀手刃數人。由是弁勇無一人敢退者。而武明良伍維壽朱洪章劉連捷譚國泰張詩日等。各率隊伍登龍廣山。與右路太平門之賊。排列轟擊。移時賊乃卻退。李祥和王仕益從太平門月城攻入。羣賊已知此次地道缺口。不復似前次之可以堵禦矣。維時官軍分四路剿擊。王遠和王仕益朱洪章羅雨春沈鴻賓黃潤昌熊上珍等。進擊中路。力攻僞天王府之北。劉連捷張詩日譚國泰崔文田等。進擊右路。由臺城趨神策門一帶。適遇朱南桂朱惟堂梁美材等。亦率隊從神策門地道之旁。梯攻而入。相與會合齊進。兵力益厚。直壘戰至獅子山上。奪取儀鳳門。其中左一路。則有彭毓橋率羅朝雲趙清河黃東南與武明良武明善武義山等。由內城舊址直擊至通濟門。左路則有蕭孚泗熊登武蕭慶衍蕭開印率同蕭致祥周恆禮李泰山蕭清世蕭恆書朱吉玉趙太和劉良槐蕭上林等。分途奪取朝陽洪武二門。城上守牌城門守樓之賊。以及附近一帶賊隊。悉被殺戮。其抄截疾馳。各路同一神速。其留兵置守各門。同一布置。此十六日地道成功。城中鏖戰。以及東北兩路抄剿之情形也。方我軍大隊之直抵龍廣山也。西南守牌之賊。猶植立未動。迨奪取朝陽門。賊始亂次。而羅逢源張定魁彭椿年張光明楊西平何鳴高彭光友熊紹濂羅興祥葉必信等。各率所部兵。從聚寶門之西舊地道缺口。仰攻而入。李金洲胡松江朱文光武交清劉湘南易孔昭戴名山張正榮等。率隊從通濟門月城。緣梯而上城。而陳湜易良虎易良豹龍清垣率吳隆海張葉江晏恭山馮盛德陳汝俊劉定發各營。則猛攻旱西水西兩門月城。僞忠王李秀成方自率死黨狂奔。將向旱

西門奪路衝出。適爲陳湜大隊所阻。乃仍然回轉清涼山。江南提督黃翼升率許雲發等水師各營攻奪中關。攔江礮石壘。乘勝猛攻濱江之賊。遂與陳湜易良虎等奪取水西旱西兩門。將守賊殲盡。由是全城各門皆攻破。大事已定。日色將暝。陳湜易良虎遙見忠奮賊隊。隱匿西南房屋如鱗之內。益戒所部嚴防賊衝。彭毓楨扼守寶門通濟門。李臣典李祥和扼守太平門。黃潤昌王遠和朱洪章等。見星收隊。結爲圍陣。站立龍廣山。稍資休息。此水陸各軍。攻克西南兩城。及分守要隘。預防賊股衝突之情形也。方朱洪章等與賊搏戰於僞天府城北之時。沈鴻賓周恆禮袁大升等。率隊從左路捲旗疾趨。繞僞城之東。設伏出奇。爲擒渠掃穴之計。迨朱洪章戰馬帶傷。悍賊隱扼石橋。我軍隊伍不能飛越城河。繞僞城之西。當日暮苦戰之後。正兵收隊龍廣山。而伏兵深入。由僞城之東逶迤而南。不能收隊。時已三更矣。僞忠王傳令羣賊。將天王府及各僞王府。同時舉火焚燒僞宮殿。火藥沖霄。煙燄滿城。袁大升周恆禮沈鴻賓等。見僞殿前南門突出。悍賊千餘人。執持軍器洋槍。向民房街巷而去。知是洪逆竄至民房。遂率隊腰截擊之。殺賊七百餘人。奪僞玉璽二方。金印一方。寬約七寸。卽洪奮僱用之印也。至其僞宮殿侍女。縊於前苑內者。不下數百人。死於城河者。不下二千餘人。其時僞城火已燎原。不可羈邇。街巷要道。賊均延燒塞衢。官軍以暮夜路徑生疏。不能巷戰。遂收隊踞城。此十六夜攻破僞天王內城。斃賊極多之情形也。是夜四更。有賊一股。假裝官軍號衣號補。手持軍器洋槍約千餘人。向太平門地道缺口衝突。經崑字湘後左右各營截擊。多用火桶火彈焚燒。人馬死者已多。約尙有六七百人。騎馬衝出。向孝陵衛定林鎮一路而逃。伍維壽楊鉞南陶立忠等。急率馬隊跟隨。會國荃一聞騎賊裝扮官軍逃出之信。卽加派張定魁李泰山黃萬鵬黃廷爵等馬隊七百騎追之。并飛咨溧水東壩句容各守將。會合追勦。直至十九日酉刻。伍維壽黃萬鵬等回營面稟。迨至淳化鎮。生擒僞烈王李萬材。帶領前進。追至湖熟地方。逃賊在前。當經馬隊圍住。全行斬刈。未留一人。又追至溧陽。據百姓言。前路并無賊蹤經過。會國荃親訊李萬材。供稱。『城破後。僞忠王之兄巨王幼西王幼南王定王崇王璋王乘夜衝出。被官軍馬隊追至湖熟橋邊。將各頭目全行殺斃。更無餘孽。』又據城內各賊供稱。『首逆洪秀全實係本年五月間。官軍猛攻時服毒而死。瘞於僞宮院內。立幼主洪福瑣重襲僞號。城破後。僞幼王積薪宮殿。舉火自焚。』等語。應俟僞宮火熄。挖出洪秀全逆尸。查明自焚確據。續行具奏。至僞忠王李秀成一犯。城

破受傷。匿於山內民房。十九夜提督蕭孚泗親自搜出。并搜檢王次兄洪仁遠。二十日會國荃親訊。供認不諱。應否檻送京師。抑或卽在金陵正法。咨請定奪。其餘兩廣兩湖江北多年悍賊。七十八等日。曾良佐周光正鄧吉山劉泰財聶福厚譚信高胡克安朱連甲王春華黎冠湘彭維祥陳萬合朱連泗謝三洪李臣榮彭玉堂劉金蘭等。分段搜殺。三日之間。斃賊共十餘萬人。秦淮長河。屍首如麻。凡僞王僞主將天將及大小首目。約有三千餘名。死於亂軍之中者居其半。死於城河溝渠及自焚者居其半。三日夜火光不息。至十九日。尚有賊踞高屋之顛。以洋槍狙擊官軍者。此馬隊窮追逸出之賊。及搜勦首逆并羣賊之情形也。現在派營救火。掩埋賊尸。安置難民婦女。料理善後事宜。百緒繁興。竊念金陵一軍。圍攻二載有奇。前後死於疾疫者萬餘人。死於戰陣者八九千人。令人悲涕。不堪回首。仰賴皇上威福。迄今乃得收寸效。一等情。由會國荃咨報前來。臣等伏查洪逆倡亂粵西。於今十有五年。竊據金陵亦十二年。流毒海內。神人共憤。我朝武功之盛。超越前古。屢次削平大難。焜耀史編。然如嘉慶川楚之役。蹂躪僅及四省。淪陷不過十餘年。康熙三藩之役。蹂躪尙止十二省。淪陷亦第三百餘城。今粵匪之變。蹂躪竟及十六省。淪陷至六百餘城之多。而其中凶僞悍黨。如李開方馮官屯。林啓容守九江。葉芸來守安慶。皆堅忍不屈。此次金陵城破。十餘萬賊。無一降者。至聚衆自焚而不悔。實爲古今罕見之劇寇。然卒能次第蕩平。剷除元惡。臣等深維其故。蓋由我文宗顯皇帝盛德宏謨。早裕戡亂之本。宮禁雖極儉嗇。而不惜鉅餉。以募戰士。名器雖極慎重。而不惜破格。以獎有功。廟算雖極精密。而不惜屈己。以從將帥之謀。皇太后皇上守此三者。悉循舊章。而加之以去邪彌罟。求賢彌廣。用能誅除濟僞。蔚成中興之業。臣等忝竊兵符。遭逢際會。既痛我文宗不及目覩。獻誠告成之日。又念生靈塗炭。爲時過久。惟當始終慎勉。掃蕩餘匪。以蘇子黎之困。而分宵旰之憂。此次應獎應卹人員。另繕清單。籲懇恩施。臣國藩拜摺後。卽行馳赴金陵。李秀成洪仁遠應否獻俘。俟到金陵後。察酌具奏。所有金陵克復。全股悍賊。盡數殲滅緣由。謹會同陝甘總督臣楊岳斌。兵部侍郎臣彭玉麟。江蘇巡撫臣李鴻章。浙江巡撫臣曾國荃。恭摺由驛六百里加緊馳奏。伏乞皇太后皇上聖鑒訓示。謹奏。

賊酋分別處治粗籌善後事宜摺 同治二年七月初七日

奏爲洪秀全李秀成二酋分別處治。并粗籌善後事宜。恭摺具奏。仰祈聖鑒事。竊臣於六月二十三日具奏克復

金陵詳細情形。於僞天王幼主之實在下落。李秀成等之應否獻俘。聲明續奏在案。拜疏後。臣即乘坐輪船。於二十五日駛抵金陵。周歷各營。接見諸將。均有憔悴可憐之色。蓋自五月三十日攻破地堡城後。連攻十五晝夜。未嘗少休。四面之兵。挑集龍膊子一隅。但出行隊。未支帳棚。晝則日炙。宵則露宿。又出入地洞之中。面目黎黑。雖與臣最熟之將。初見幾不相識。其論功居首之李臣典。因冒暑受傷。督工過急。克城後一病不起。諸將士亦傷病山積。死亡相屬。臣弟曾國荃。前病業已痊愈。近因隨蒙露處過久。又復徧發瘴毒。臣帶兵多年。克城數十。罕見如此次之勞苦者。臣宣道皇仁。多方撫慰。既獎其可憫可敬之功。復勸以忘勞忘死之義。至僞天王洪秀全逆尸將士積憤之餘。皆欲得而甘心。直至六月二十七日。始從僞宮內掘出。二十八日扛至營次。臣與臣弟國荃驗看。臣所帶委員中有曾在刑部秋審處之勒方綺。龐際雲。孫尙絳等。置各文武公同相驗。該逆尸遵尙邪教。不用棺木。徧身皆用繡龍黃緞包裹。雖袴脚亦係龍緞。頭禿無髮。鬚尙全存。已間白矣。左股右膂肉猶未脫。驗畢。戮尸舉烈火而焚之。有僞宦婢者。係道州黃姓女子。即手埋逆尸者也。臣親加訊問。據供。洪秀全生前。經年不見臣僚。四月二十七日。因官軍攻急。服毒身死。秘不發喪。而城內羣賊。城外官兵。喧傳已徧。十餘日始行宣布。等語。僞幼主洪福瑱。繞室積薪。爲城破自焚之計。衆供皆合。連日在僞宮灰燼之中。反復搜尋。茫無實據。觀其金玉二印。皆在巷戰時所奪。又似業已逃出僞宮者。李秀成之供。則稱。曾經挾之出城。始行分散。然此次逃奔之賊。僅十六夜。從地道缺口逸出數百人。曾經騎兵追至湖熟。圍殺淨盡。自十七日後。曾國荃即將缺口封砌。關閉各城。搜殺三日。洪福瑱以十六歲童。縱未斃於烈火。亦必死於亂軍。當無疑義。所有僞玉璽二方。金印一方。臣嘗專差賣送軍機處。俾方略館有所考焉。李秀成之就擒也。各營之降卒。附城之居民。人人皆識。觀者如堵。臣二十五日甫至金陵。親訊一次。旋派候選道龐際雲。候補知府李鴻裔。候補同知周悅修等。鞠訊累日。令寫親供。多至數萬字。敘髮逆之始末。述忠酋之戰事。甚爲詳悉。臣復詢以江西李世賢。湖北馬融和。湖州黃文金各股賊情。據李秀成供。一湖州廣德之賊。即可不攻自遁。馬融和一股。本由陝西調援金陵。因長江阻隔。久無來信。李世賢係李秀成堂弟。與之約定八月以前。則擄江西之糧。以救侍黨之飢。八月以後。全數回竄。圖解長圍。則擄寧國之糧。以救金陵之飢。等語。又力勸官兵不宜專殺兩廣之人。恐粵賊愈孤。逆黨愈固。軍事仍無了日。其言頗有可采。日來在

事文武。將請將李秀成檻送京師。卽洋人戈登雅妥瑪等來賀者。亦以忠逆解京爲快。臣竊以聖朝天威。滅此小醜。除僭號之洪秀全外。其餘皆可不必獻俘。陳玉成石達開卽有成例可援。且自來元惡解京。必須誘以甘言。許以不死。李秀成自知萬無可逭。在途或不食而死。或竄奪而逃。翻恐逃顯戮而貽巨患。與臣弟國荃熟商。意見相同。輒於七月初六日將李秀成絞處死。傳首髮逆所到各省。以快人心。其僞福王洪仁達一犯。係洪秀全之胞兄。與其長兄洪仁發皆暴虐恣橫。多行不義。爲李秀成等所深憾。亦於初四日絞處死。李秀成之供詞。文理不甚通適。而情事真確。謹鈔送軍機處。以備查考。臣旣將各逆首分別處治。卽應料理善後事宜。歷年以來。中外紛傳洪逆之富。金銀如海。百貨充盈。臣亦曾與會國荃論及城破之日。查封賊庫。所得財物。多則進奉戶部。少則留充軍餉。酌濟難民。乃十六日克復以後。搜殺三日。不遑他顧。僞宮賊館一炬成灰。遠二十日查詢。則並無所謂賊庫者。訊問李秀成。據稱昔年雖有聖庫之名。實係洪秀全之私藏。并非僞都之公帑。僞朝官兵。向無俸餉。而王長兄次兄且用窮刑峻法。搜括各館之銀米。蘇州存銀稍多於金陵。亦無公帑積儲一處。惟秀成所得銀物。盡數散給部下。衆情翕然。此外則各私其財。而公家貧困等語。臣弟國荃以爲賊館必有窖藏。賊身必有囊金。勒令各管按名繳出。以抵欠餉。臣則謂勇丁所得賊贓。多寡不齊。按名勒繳。弱者刑求而不得。強者抗令而遁逃。所抵之餉無幾。徒損政體而失土心。因曉諭軍中。凡剝取賊身囊金者。概置不問。凡發掘賊館窖金者。報官充公。違者治罪。所以潤其貧而獎其功。差爲得體。然克復老棗。而全無貨財。實出微臣意料之外。亦爲從來罕聞之事。而目下籌辦善後。需銀甚急。爲款甚鉅。臣統軍太多。卽擬裁撤三四萬人。以節糜費。應撤者欠餉無著。應留者口糧無措。江寧生靈荼毒甚於他省。欲撫卹此八屬災民。經費亦無所出。自上年五月起。周歲之久。官軍常有數百人。開挖地道。縱橫計之。城脚空虛約二十餘里。賊自內挖出者。不在此數。理宜趕緊修築。駐防滿營。亦宜修理。均難靠此巨款。凡此皆善後之大端。其餘百緒繁興。左支右絀。臣欣喜之餘。翻增焦灼。總督衙門卽係僞天府之地。片瓦無存。現擇房屋之稍完者。量加修葺。爲臣衙署。臣當回安慶一次。料理上游軍事。八九月間再來金陵。經畫一切。除率臣典應得卹典。另行專摺具奏外。所有洪秀全李秀成二首。分別處治。並處籌善後事宜。恭摺由驛六百里馳奏。伏乞皇太后皇上聖鑒訓示。謹奏。

謝錫封侯爵恩摺 同治二年七月十六日

奏爲恭謝天恩。仰祈聖鑒事。竊臣於七月初十日。准兵部火票。遞到同治三年六月二十九日內閣奉上諭。一差大臣協辦大學士兩江總督曾國藩。自咸豐四年在湖南省首倡團練。創立舟師。與塔齊布羅澤南等屢建殊功。保全湖南郡縣。克復武漢等城。肅清江西全境。東征以來。由宿松克潛山太湖。進駐祁門。疊復徽州郡縣。遂拔安慶省城。以爲根本。分檄水陸將士。規復下游州郡。茲幸大功告成。逆首誅鋤。實由該大臣籌策無遺。謀勇兼備。知人善任。調度得宜。曾國藩著加恩。賞加太子太保銜。錫侯封一等爵。世襲罔替。并賞戴雙眼花翎。一等因欽此。當卽恭設香案。望闕叩頭謝恩。伏念臣忝膺疆寄。於今五年。德薄材庸。無裨時局。遠屯兵於建業。愧師久而無功。值甲子元會之昌期。復東南陸沈之重地。此蓋仰託累朝厚澤。聖主天威。合億萬衆敵愾之心。平十餘年稽誅之寇。如臣碌碌。何功可言。迺復滙荷恩綸。特邀曠典。錫以通侯之爵。超諸丞弼之班。更分日月之重光。俾煥雲霄之一羽。殊恩稠疊。皆人臣罕覩之榮。天語褒嘉。尤曠古非常之寵。溯自楚師初興。水陸并進。實藉同澤同袍之力。夫豈一手一足之勞。歷年漸久。人事變遷。前此死事之臣。既埋忠而長逝。卽今前驅之將。尙苦戰而未休。而臣謬被隆施。先蒙褒賞。撫今追昔。愧悚尤深。臣惟有履冰知懼。躡堦自箴。虞憲後而跋前。常慎終而如始。引萑賢而競進。冀氛覆之全消。庶以仰答高厚生成於萬一。所有微臣感激下忱。謹繕摺專弁叩謝天恩。伏乞皇太后皇上聖鑒。謹奏。

李臣典病故請卹摺 同治二年七月二十日

奏爲一等子爵總兵李臣典病故。請旨交部議卹。仰祈聖鑒事。竊記名提督歸德鎮總兵李臣典病故。臣於七月初七日聲明另摺請卹在案。七月初十日。欽奉六月二十九日諭旨。一記名提督李臣典。於槍礮叢中。搶挖地道。誓死滅賊。從倒口首先衝入。衆軍隨之。因而得手。實屬謀勇過人。著加恩賜封一等子爵。并賞穿黃馬褂。賞戴雙眼花翎。欽此。一旋據曾國荃咨稱。一李臣典性情朴實。忠勇絕倫。洽軍愛民。井然有條。料敵制勝。毫髮不爽。實爲難得之將。以軍功洊擢記名提督。實授河南歸德鎮總兵。聞命之日。誓死報國。不冀生還。與國荃同居前敵。已閱九年。每當危險之際。慷慨赴敵。或以身翼蔽主將。宛轉救護。義形於色。年方二十七歲。竟有名將之風。六月十五

日在地洞口受傷。十六日克復金陵城池。十七日因傷增病。醫治無效。二十日昇回兩花台營次。醫者謂：「傷及腰穴。氣脈阻滯。不久恐變喘症。加以冒暑過勞。難期痊可。」二十三日國荃親往省視。李臣典不肯服藥。自云：「此次萬無生理。徒以聖恩未報。」言之淚下。并無一語及其家私。即於七月初二日已刻出缺。其胞弟李臣榮李臣章料理後事。即日將歸原籍。擇立繼嗣。欽奉六月二十九日上諭。有錫爵之曠典。有黃馬褂雙眼花翎之懋賞。李臣典竟不克親拜寵命。感聖恩之優渥。歎該員之數奇。國荃私心痛悼。寢食難忘。謹將該員歷年在江西安徽及進兵金陵所立戰功。臚列實跡。開具清單。應請詳晰代奏。仰祈優卹。等情。由會國荃移咨前來。臣覆查無異。茲將李臣典戰功清單。錄呈御覽。可否籲懇皇上天恩。宣付國史館立傳。敕部優卹。特旨予諡。并於江西吉安府安慶金陵建立專祠。以彰忠盡。出自逾格。鳩施。所有李臣典病故請卹緣由。恭摺由驛馳奏。伏乞皇太后皇上聖鑒訓示。謹奏。

蕭孚泗丁憂開缺摺 同治二年七月二十日

奏爲提督蕭孚泗聞訃丁憂。循例由驛馳奏。仰祈聖鑒事。竊臣接准浙江巡撫一等伯臣曾國荃咨：「據福建陸路提督蕭孚泗呈報：『本年六月二十二日接到家信。親父仁先於本年五月二十日戌時。在湖南湘鄉縣原籍病故。』孚泗係屬親子。例應丁憂。懇即奏請開缺。奔喪回籍守制。」等情。轉咨前來。臣查提督蕭孚泗從征十年。歷著戰功。疊荷恩綸。擢至福建提督。此次克復金陵。又蒙逾格天恩。錫封一等男爵。賞戴雙眼花翎。殊榮異數。該提督感激圖報。彌切忘私忘家之志。惟現在老萊旣破。大功初成。蕭孚泗聞訃丁憂。呈請奔喪。乃人子之至情。亦聖朝之定制。應懇天恩。准其開缺。即令奔喪回籍。以遂孝思。其福建陸路提督一缺。請旨迅賜簡放。以重職守。理合繕摺馳陳。伏乞皇上聖鑒訓示。謹奏。

覆陳逆會正法片 同治二年七月二十日

再臣於七月初十日。欽奉六月二十九日寄諭：「逆首李秀成洪仁達等。均以內地亂民。不必獻俘。第該逆等罪惡貫盈。自應檻送京師。審明後盡法懲治。以洩神人之憤。著會國藩遴派委員。將李秀成洪仁達押解來京。并咨明沿途督撫。督飭地方文武。多派兵役。小心護送。毋稍大意。」等因。欽此。臣於六月二十三日報捷摺內。聲明李

秀成洪仁達應否解京。俟到金陵後。察酌具奏。旋於二十五日馳抵金陵。詢及李秀成權術要結。頗得民心。城破後。竄逸鄉間。鄉民憐而匿之。蕭孚泗生擒李逆之後。鄉民竟將親兵王三瘡捉去。殺而投諸水中。若代李逆報私忿者。李秀成既入囚籠。次日又擒僑松王陳德風到營。一見李逆。卽長跪請安。臣聞此二端。惡其民心之未去。黨羽之尙堅。卽決計就地正法。厥後鞠訊累日。觀者極衆。營中文武各員。始則紛紛請解京師。繼則因李秀成言能收降江西湖州各股。又紛紛請貸其一死。留爲雉媒。以招餘黨。臣則力主速殺。免致疎虞。以貽後患。遂於初六日正法。初七日錄供具奏。其洪仁達一犯。雖據李秀成供。在賊中暴虐專權。而如醉如癡。口稱天父不絕。無供可錄。因其抱病甚重。已於初四日先行處死矣。初十日始奉將二酋解京之旨。扣算日期。臣處應於初六日接到批旨。乃驛站由安慶轉遞江寧。致遲四日之久。臣查軍機處封面及兵部火票。皆註明遞至江寧字樣。不知驛站何處錯誤。應卽行文揆站查辦。又欽奉六月二十九日諭旨。「洪秀全屍身覓獲後。剝屍梟示。仍傳首被害地方。以雪衆恨。欽此。」臣於六月二十八日驗明洪逆正身。卽行戮屍焚化。未將首級留傳各省。是臣識見不到之咎。欽奉諭旨訓示。不勝惶悚。至軍機處交片查取僞玉璽二顆。金印一顆。臣於十六日專差齎送謝恩摺件。并將三印附送軍機處矣。理合附片覆奏。伏乞皇太后皇上聖鑒。謹奏。

近日軍情擬裁撤湘勇片 同治二年七月二十日

再臣欽奉六月二十九日寄諭。「廣德等處。如有踞賊。曾國荃尙須駐扎江寧。卽由曾國藩派撥兵隊。乘勢掃蕩。勿稍延緩。」等因欽此。臣初到金陵。擬令將士休息一月。卽派勦廣德等處。乃諸將盛暑疊兵。病者甚多。紛紛稟請撤勇回籍。臣以皖浙未靖。本不欲遽撤多營。惟念近歲以來。但見增勇。不見裁撤。無論食何省之餉。所吸者皆斯民之膏脂。所損者皆國家之元氣。前此賊氛方盛。萬不得已。屢募屢增。以救一時之急。今幸老巢既破。大局粗定。裁一勇卽節一勇之糜費。亦卽銷無窮之後患。諸將之愿遣散歸籍。蓋未始非臣之幸。未始非大局之幸。因與臣弟國荃商定。將金陵全軍五萬人。裁撤一半。酌留二萬數千人。分守金陵蕪湖金柱關各要隘。其餘作爲游擊之師。進勦廣德等處。而曾國荃克城之後。困憊殊甚。徹夜不寐。有似怔忡。據稱心血過虧。萬難再當大任。恐致債事。意欲奏請回籍。一面調理病軀。一面親率遣散之勇。部勒南歸。求所爲善聚不如善散。善始不如善終之道。臣

奏稿

囑以苟可支持。不必遽請開缺。姑在金陵安心調理。代臣料理善後事宜。臣即日仍回安慶一次。俟上游布置粗定。再行馳赴江寧。藩司萬啓琛運司忠廉。昨來金陵接見。亦須仍回泰州一次。俟彼中清釐就緒。再行分駐江揚二府。至於鎮江之兵。臣與馮子材面商。似可全行裁撤。俟蘇軍接防鎮江丹陽。即當次第遣散。揚州之兵。臣與富明阿面商。目下尙難遽撤。俟鄂中髮捻趨向大定。乃可酌量裁減。軍興日久。各有厭苦兵間之意。但使欠餉有著。遣散時當不至別生枝節。足慰宸廑。江西軍務。鮑超於七月初四在許灣大獲勝仗。據報平壘七十餘座。殺賊四萬有奇。崇宜等縣。或亦易於得手。楊岳斌過安慶時。臣與之商定。以後鮑超周寬世戰狀。即歸該督主稿會奏矣。所有近日各路軍情。理合附片馳陳。伏乞皇太后皇上聖鑒訓示。謹奏。

停止廣東釐金摺 同治二年七月二十九日

奏爲停止廣東釐金。并請加廣該省鄉試中額。恭摺奏陳。仰祈聖鑒事。竊臣於同治元年。奏請開辦廣東釐金。接濟浙江安徽江蘇三省軍餉。仰蒙欽派都察院右副都御史晏端書。馳赴廣東竭力經營。分批撥解皖浙各軍。兩年以來。深資饋運。本年三月間。臣於滬陳餉絀情形摺內。聲明廣東七成之釐。非臣分內應得之餉。俟軍務稍定。即由臣奏請先行停止在案。現在江寧省城。幸已告克。臣統軍太多。擬即次第遣撤。籌裁勇之欠餉。發征兵之行糧。需款甚鉅。各處釐卡。仍應照舊征收。准廣東釐金一款。臣爲拯貧之策。幾蹈專利之名。私衷耿耿。如負重疚。應請旨飭下廣東督撫。所有廣東釐金。截至本年八月三十日止。全充本省兵餉。無庸再解臣營。以踐前言。而紓鄰困。此項釐金。自元年七月起至本年四月止。除留歸該省軍需局外。實解皖營及浙江軍營一百一十萬兩。若截至八月底。當在百二十萬兩以外。該省商民踴躍輸將。成此巨數。俾臣藉以殲除金陵首逆。爲利甚溥。查部定章程。凡捐輸銀三十萬兩。准加文武鄉試定額各一名。合無仰懇天恩。俯准將粵釐照一百二十萬兩之數。加廣東省文武鄉試永遠定額各四名。以廣聖主如天之仁。而彰粵人急公之義。臣又查捐輸定章。於本身應得獎敘外。復准通縣合算。加廣學額。通省合算。加廣中額。係專指捐輸言之。若抽釐濟餉。則既無給獎本身之條。更無合算加額之例。惟各省釐金。皆由本管督撫派員經收。軍興既久。幾與丁漕關稅同爲歲入正款。商民亦習而安之。自不可給獎加額。致滋冒濫。若廣東釐金。兩年以來。專濟三江之餉。與各省大有區別。除本年照例不得給獎外。可否

通省合算。加廣中額之處。出自聖主鴻裁。交部核議施行。所有停止粵釐緣由。恭摺馳奏。伏乞皇太后皇上聖鑒訓示。謹奏。

裁撤湘勇查供福瑱下落片 同治三年七月二十九日

再七月二十四五日。臣在舟次。疊奉七月十一十四十五等日寄諭。訓飭之事甚多。而遣散勇丁。及查洪福瑱下落二事。宸廑尤切。伏讀諭旨。有云。『裁撤兵勇。雖爲節餉起見。然驟撤三四萬人。恐此輩久在戎行。不能省事。必至隨處嘯聚爲亂。從前川楚善後。積至數年。方始肅清。可爲殷鑒。不若先汰老弱。而以精壯各軍。分赴江楚。俟江楚一律肅清。再議裁撤歸農。或挑補各營兵額。俾不致復生枝節。方爲盡善。』等因欽此。臣以欠餉太鉅。後患無窮。久思大加裁撤。以節糜費。嗣與臣弟曾國荃酌商。防戍之兵。與游擊之師。不宜太少。定將金陵全軍五萬人。裁汰一半。於七月二十日續奏在案。湘勇招募之初。選擇鄉里農民。有業者多。無根者少。但使欠餉有著。當可安靜回籍。不至別生枝節。至挑補兵額之說。近多建此議者。臣竊不以爲然。蓋勇丁之口糧。一倍於馬兵。三倍於守兵。馬糧之缺極少。守糧月支一兩。斷不足供衣食之需。誰肯於數千里外。補一衣食不敷之缺。欲以湖南樸實之勇。補三江綠營之兵。必不情願。其願補者。皆游惰無歸者也。此事另奉諭旨。鈔發陳廷經之條奏。飭令妥辦。臣愚以爲勇則遣回原籍。兵則另募土著。各返本而復始。庶爲經久可行之道。諭旨又云。『昨據曾國藩奏。洪福瑱積薪自焚。茫無實據。似已逃出僞宮。李秀成供。』曾經挾之出城。後始分散。』其爲逃出已無疑義。湖熟防軍所報斬殺淨盡之說。全不可靠。著曾國藩查明。此外究有逸出若干。並將防範不力之員弁。從事參辦。』等因欽此。臣初聞金陵克復。亦深慮極大之城。必多竄逸之賊。湖熟追殺淨盡之說。臣亦不敢深信。迨臣至江寧。小住經旬。距克城已闕二十日。而附近如溧水句容丹陽高淳東壩建平各防之將。各縣之官。并未稟報有賊匪竄過之事。臣弟所派各路跟查之弁。亦自東壩溧陽等處歸來。報稱沿途百姓。未見有賊蹤經過之事。臣於是釋然大慰。以爲洪福瑱必死於亂軍無疑矣。旋於七月十一日。接寧國守將劉松山及委員陳斌稟稱。『洪福瑱帶二三千人。逃至廣德。』旋又見左宗棠寄臣弟函稱。『僞幼主率賊二三千人。逃入廣德。迎至湖州。皆云係逃出難民所供。』十三日接浙江糧道楊昌濬稟。亦云。『洪福瑱帶二三千人。竄至廣德。』十四日左宗棠寄臣一函。則云。『金陵餘

逆漏出數百。亦有數千之說。一與劉松山楊昌濬所云二三千者。微有不符。臣再三推詳。由金陵至廣德。縣縣有兵。層層密布。其中如駐句容之劉銘傳。駐溧水之王可陞。駐建平之李榕。駐東壩之鄭魁武。皆曉事不欺之人。又奉嚴防逸賊之札。若謂供福瑱僅帶零賊。雜髮潛遁。此數處者。或不知之。若賊至二三千之衆。而謂此數處一無聞見。既不截勦。又不稟報。此事理所必無也。臣觀附近各縣各將之無稟。悉以李秀成之親供。逸出漏網之賊。多亦不過數百。堪以仰慰宸廑。其供福瑱果否尙存。臣現派蒼髮降卒四處訪查。不欲僅以難民之言爲憑。尙未訪有端倪。至防範不力之員弁。是夕賊從缺口衝出。我軍巷戰終日。並未派有專員防守缺口。無可指之汛地。礙難查參。且杭州省城克復時。僞康王汪海洋。僞聽王陳炳文兩股。十萬之衆。全數逸出。尙未糾參。此次逸出數百人。亦應暫緩參辦。賊情詭譎。或供福瑱實已身死。而黃文金僞稱尙存。亦古來敗賊常有之事。應俟查明。供福瑱實在下落。續行具奏。抑臣更有幸者。向使破城之夜。該逆大開十三門。每門衝出數百人。不僅由缺口一路。官軍亦未必能悉數截勦。向使李秀成不因鄉民爭匿。羈延時刻。官軍亦未必能既脫復擒。今之逸賊無幾。渠魁就縛。蓋全仗皇太后皇上之福。非臣兄弟之力所能及也。除諭旨垂詢各事。另行分條覆奏外。謹將此二事先行附片馳陳。伏乞皇太后皇上聖鑒訓示。謹奏。

近日軍情片 同治二年七月二十九日

再近日軍情。江西之賊。占踞許灣者。爲僞康王汪海洋一股。經鮑超於七月初四破其長壕。殺賊數萬。分踞東鄉金谿者。爲僞聽王陳炳文一股。僞我許灣之賊。遂於初十一兩日。棄東鄉金谿兩城。陸續退遁。率衆求撫。據鮑超寄到陳炳文投誠稟帖。共有黨衆六萬餘人。洋鎗隊七千餘人。皆願效順等語。此二股皆由杭州竄出者。分踞崇仁宜黃之賊。爲僞侍王李逆一股。經江忠朝等於十一十二兩日。次第克復。南豐之賊。爲僞培王譚逆一股。經鮑超於十八日克復。此二股係由湖州溧陽先後竄出者。一切調度。想楊岳斌沈葆楨已經詳奏。欽奉諭旨。飭臣酌派金陵陸師。赴江協勦。目下江西軍威大振。無須添派援江之兵矣。臣所慮者。在皖北英霍一路。皖南廣德一路。而金陵之師。急切不能起程。應遣撤者。無由籌給欠餉。應出勦者。無由籌發行糧。不料老巢既破。而餉絀若此。皆臣經理不善之咎。前派鮑超一軍。馳援江西。發給行糧十萬。賴有總理衙門撥濟巨款。得以成行。刻下不惟無

此巨款而金陵既克。廣東之釐金。不得不歸還本省。江西一半之釐金。除留饒景二卡。接濟徽軍兵米。此外亦全留江西。發飽起周寬世兩軍之餉。更無涓滴解赴皖臺。臣軍現入之款。惟湖南東征局與安徽沿江釐金兩項。月計所入不過數萬。以供皖南北兩岸防兵。不敷尙鉅。更無餘力分濟金陵裁兵之欠餉。與出勦之行糧。臣再四思維。訖無善策。擬即日札派江蘇官營。在於上海勸捐。並函商李鴻章酌分撥釐金。撥解臣軍。不識能否有濟。湖北之賊。尙盤結羅田麻城一帶。僧格林沁已調陳國瑞進勦麻城。英翰進紮商城。喬松年調蔣凝學之兵進紮英山。臣亦調李榕之兵駐防桐城。布置尙密。惟無大枝勁旅。猶加勦洗。尙爲湖北皖豫三省之患。所有近日軍情。理合附片馳陳。伏乞皇太后皇上聖鑒訓示。謹奏。

奉旨分條覆陳。摺。同治二年八月十三日

奏爲欽奉諭旨。分條覆陳。仰祈聖鑒事。竊臣歷奉本年七月十一至二十七等日寄諭。以江皖釐各路軍事。殷殷下詢。如遣撤勇丁。及查供福瑣下落兩事。業於上月二十九日覆奏。此外奉旨飭查之件尙多。謹一一分條詳對。爲我皇上陳之。

一、恭奉諭旨。垂詢江寧城內情形若何。居人能否漸次復業。貢院有無損壞。應如何修葺之處。飭臣查明具奏一節。查江寧省城。賊踞最久。居民流亡殆盡。此次官軍克城。羣僉縱火焚燒。昔年巨室富家。改造僞府。微有存者。此外民房極少。故克復幾及兩月。街市尙未復業。臣嘗至貢院履勘一次。至公堂衡鑒堂明遠樓未經毀壞。號舍一萬六千餘間。亦多完好。惟號板全數毀失。監臨主考房官提調監試各屋。臚錄對讀彌封供給各所。片瓦無存。均須蓋造。現經派員在鄂皖等處。採辦木料。廣集工匠。飭委記名臬司黃潤昌趕緊興修。擬於九月奏請簡派主考銜命南來。於十一月舉行鄉試。庶冀士子雲集。商民亦可漸次來歸矣。

一、恭奉諭旨。江寧克復。旗營駐防事宜。亦應早籌辦理。飭臣等妥籌款項。迅將江寧京口駐防房屋。早爲建蓋。以資棲止。其兵丁俸餉。能否卽行照例全支之處。並著妥籌辦理。現在京旗駐防。生齒日繁。如挑其閒散。陸續撥補江寧兵額。能否有裨。酌量具奏等因。查駐防旗營。亟宜修理。臣已於七月初七日陳奏及之。惟一時大工畢舉。籌款實難。擬俟貢院工竣。次修江寧旗營。又次京口旗營。工作有先後之分。庶籌辦有措手之處。昔歲賊

陷江寧。旗營三萬餘人。幾同一爐。被害之慘。甚於京口。殉節之烈。甲於天下。十餘年來。陸續增添。現存不過八百餘人。籌餉尙易爲力。臣擬將江寧滿營。概發全餉。其京口旗兵。業已挑補足額。俸餉較鉅。應請仍照現辦章程。暫給半餉。一俟庫藏漸裕。續行奏明。一體全支。至挑閒散京旗。以實江南兵額。亦俟修蓋營房。規模粗定。會同富明阿續奏辦理。

一、恭奉諭旨。據御史陳廷經條陳善後事宜內。疆輿略爲變通一條。飭臣等酌度形勢。妥籌具奏。并鈔示陳廷經原摺一條。臣查蘇皖未分之時。跨江淮而爲省。古人經畫疆里。具有深意。我朝聖君賢相。未嘗輕議更張。若必畫江而分南北兩省。則亦宜畫淮而分南北兩界。淮北如蘇之徐州。皖之潁州。將割隸何省乎。唐之十道。宋之十五路。其於江南北皆截然分而爲二。與該御史所奏大指略同。然唐自中興以後。聲教不行。泗北。宋自中興以後。號令并不行於江北。晝疆太明。未必果能久安。論形勢控扼之道。守江南者必須先固淮甸。棄淮則江南不可保。昔人如吳師道。胡安國。楊萬里。暨趙范。葉適輩。言之詳矣。臣愚以爲疆吏苟賢。則雖跨江跨淮。而無損於軍事。吏事之興。疆吏苟不賢。則雖畫江分治。而無補於軍事。吏事之廢。此等大政。似不必輕改成憲。區區愚見。未嘗有當萬一否。

一、前奉兩次諭旨。垂詢楊岳斌赴任後。鮑超謀勇素裕。能否勝督辦之任。頃又奉八月初二日寄諭。飭楊岳斌迅赴陝甘之任。臣前以江西軍務。雖已得手。而待逆未受大創。趨重南贛。湖州等股。又將續入江西。咨商楊岳斌暫緩赴任。正在具摺覆奏間。再奉諭旨。驚悉新疆失陷三城。又經飛咨楊岳斌迅赴甘肅。該督接奉八月初二日諭旨。亦必刻日起程。專疏覆奏矣。鮑超戰功最偉。屢次收降巨股。賊中服其威信。自足勝督辦之任。惟目下湖州克復。江西軍務。應分兩路辦理。鮑超現駐撫建。應責令專顧北路。備勘湖州。廣德。續至之賊。劉典席寶田。江忠朝。王文瑞。劉勝祥。韓進春等。現已併趨寧贛。應責令專顧南路。追勘侍康等逆。上竄之賊。果能分任責成。撫臣和衷調度。當不必另派大員督辦。而江境亦可次第肅清矣。

一、恭奉諭旨。飭臣調派金陵將弁。帶精兵萬人。從英山一路前進。與楚師會合夾擊一節。查前此皖南北邊境。喫緊。臣卽在金陵抽調朱南桂八營。馳赴皖南。進勘廣德一路。劉連捷十營。朱洪章三營。渡過皖北。防勘英山。

一路不謂調撥甫定。羅田蕪水之賊。已於七月之杪。犯英山。圍撲我軍。蔣凝學雖迭獲勝仗。而糧路梗塞。深爲可虞。適廣德已克。臣飛催劉連捷朱洪章朱南桂三軍。悉赴皖北。苦於川資無措。一俟籌銀四五萬兩。即可迅速西行。徑趨英霍。以收夾擊之效。

以上五條。皆係奉旨垂詢飭辦之事。除英山戰狀另行詳奏外。謹繕摺逐一臚陳。伏乞皇太后皇上聖鑒訓示。謹奏。

金陵陸軍請獎請卹摺 同治三年八月十三日

奏爲攻克金陵之陸軍出力員弁。遵旨查明保奏。仰祈聖鑒事。竊粵匪竄踞金陵。十有二年。前此各將帥屯營城下。功效垂成。同治元年四月間。曾國荃以偏師東下。竭力圍攻。二年有餘。始得仰仗天威。破此老巢。洪逆劉尸。忠逆就縛。悍黨十萬。幾無孑遺。微臣兄弟。仰蒙恩賚。溥邀異數。在事文武員弁。欽奉諭旨。飭臣查明保奏。遵經恭錄轉行去後。茲據各營開列勞績等差。呈送請奏前來。臣覆加詳覈。無濫無遺。相應繕具清單。仰懇天恩。准照所請給獎。以示鼓勵。其藍翎千把外委。仍仿照湖北之例。咨部註冊。現當撤勇歸農之際。俾得同戴皇恩。寵耀閭里。至陣亡傷病身故之彭迎祥等五百一員名。一併開單。請旨敕部。分別議卹。所有遵保出力員弁。及附案請卹緣由。謹會同大學士湖廣督臣官文。浙江撫臣曾國荃。恭摺具奏。伏乞皇上聖鑒訓示。再此外水師各營。暨陸軍之距金陵最近者。防勦二年。亦屬著有勞績。又隨臣在安慶各營防守要地。及辦理文案。善後糧臺諸事。竭力經營。已越三年。其蘇皖印委各官。有裨金陵軍事餉事者。臣均當確切查明。續行分案擇尤請獎。合併陳明。謹奏。

保案請免注考語片 同治三年八月十二日

再臣自咸豐十年四月。忝任兩江。督師東征。幸賴水陸各軍。同心戮力。先後攻克各城。暨雨花臺解圍之役。經臣分案保奏出力人員。奉旨允准在案。乃疊准吏部來咨。以臣前保各案。均未分晰何員係何項勞績。奏准聲明報部。再行分別核辦等因。查軍中歷辦保案。由各統領查明。造冊呈送。臣又詳加覆核。必擇其首先陷陣。卓著戰功者。始保越級免補免選等項。實與部章本無不符。惟軍務倥偬。於原保清單。未及按名註考。而事隔數年。積至三十二案之多。又值地方庶務。籌辦不遑。勢不能將前案逐一分晰。補註考語。伏念金陵克復。中外臣工。無不上蒙

恩賞。若令積年有功之士。所保官階。懸而無薄。未免向隅。應懇天恩。敕部。將臣營自十年起。所保各案。均免加考。報部核議。卽照原單一體註冊。俾在營之士。有所激勸。理合附片陳請。伏乞聖鑒訓示。謹奏。

繪呈安徽地圖並長江圖說摺 同治二年八月十六日

奏爲遵繪安徽全省地圖。并長江圖說。恭摺進呈。仰祈聖鑒事。竊臣於同治二年十二月三十日。接准總理各國事務衙門咨稱。『該衙門具奏。飭令各省繪具地圖一摺。奉旨依議。欽此。』行知到臣。伏查兩江統轄三省。幅員遼闊。當經臣咨明江蘇地圖。由李鴻章繪呈。江西地圖。由沈葆楨繪呈。其安徽地圖。爲臣現在駐紮之所。應由臣處繪呈。至長江數千里。近年中外交爭。關係最重。有應另繪一圖。均由臣衙門辦理。旋經札派分發補用知府劉翰清。選用縣丞方駿。綜理其事。該二員淹雅詳慎。會同各屬地方官詳查。將山川險阨。村鎮關津。水旱驛站。計里詳繪。遵照總理衙門所開二寸方格。每格當五十里。推測星度。按方繪填。計總繪安徽省圖一幅。分繪府圖八幅。直隸州圖五幅。至各州縣零星村集。自軍興以後。多經焚燬。詢訪甚難。若憑志乘舊圖。又恐歧誤失實。因仿照康熙圖之例。但將村鎮併入府圖。不復另繪縣圖。以昭核實。其長江一圖。從湖南巴陵縣洞庭湖口起。至江蘇崇明縣海口止。凡夫江面曲折。道里表斜。磯港暗沙。夷館關卡。均經實測詳查。逐一登載。至輪船行江。最長擱淺。其於江底淺深尺寸。講求甚精。現亦略仿其意。另行貼說。以便稽考。謹將安徽各圖長江圖。裝成全冊。專弁齎遞。恭呈御覽。與各省所呈之圖。未知體例相符否。總理衙門原摺。限半年內彙齊。本應於七月初恭進。因臣前有金陵之行。遲誤月餘。合併聲明。所有遵繪地圖緣由。恭摺具奏。伏乞皇太后皇上聖鑒。謹奏。

會國荃請開缺調理摺 同治二年八月二十七日

奏爲據情代奏。仰祈聖鑒事。竊據臣弟會國荃咨稱。『同治三年七月二十七日。奉上諭。『據奏會國荃於克城之後。心血過虧。因憊殊甚。欲請回籍調理。部勒散勇南歸。求所爲善始善終之道。等語。該撫所見。雖合於出處之道。而於盡臣謀國之誼。尙未斟酌盡善。况遣散勇丁。祇須分派妥靠之員。沿途照料。而現在江寧安慶等城。均須督兵鎮守。該撫正宜駐紮江寧。安心調理。一俟就痊。卽可幫同會國藩分任其勞。卽著會國藩傳旨存問。無庸遽請開缺回籍。』等因。欽此。跪誦之下。悚感難名。伏念國荃受恩深重。每於盡臣謀國之誼。亦嘗刻自惕勵。以期仰

答鵠慈於萬一。祇以讀書太少。未能斟酌盡善。恭禱聖訓。益覺無地自容。現奉恩諭。准在江寧安心調理。復諭以就痊後分任其勞。國荃正當恪遵諭旨。趕緊醫治就痊。於金陵一切善後事宜。有關吏治民瘼者。加意講求。藉資練習。何敢稍耽安逸。自外生成。惟一月以來。延醫診視。日進湯藥。病勢有增無減。緣怔忡舊患。起於心血先虧。而成於憂勞過甚。從前數月一發。尚可支持。近則一月數發。日增狼狽。每至舉發之時。粥飯不能下咽。徹夜不能成眠。始覺氣如奔豚。上衝胸際。漸至心神搖動。頭暈目眩。平地有顛仆之虞。醫者云。一症由內傷。必須靜養數月。醫藥方能見功。一國荃自揣年力壯盛。及早醫治得法。尚可復元。若此勉力支撐。精神不能周到。措置必至乖方。思維再四。惟有籲懇天恩。賞准開缺。回籍調理。冀得早就痊愈。國荃以書生從戎。忝膺疆寄。疊沐殊恩。曾未入覲天顏。跪聆聖訓。倘得病勢稍愈。自當銷假入都。泥首宮門。藉伸數年犬馬戀主之忱。至現在遣散勇丁。已近萬人。派員照料回籍。其餘專俟餉到。次第遣撤。又派過皖北者一萬一千人。交劉連捷朱南桂朱洪章統帶。已於十二三等日過江。馳援英霍。其防守金陵城池。及附近要隘萬餘人。業已分段布置。登陴守禦。江浙四省。指日可報肅清。整修貢院。九月可以完竣。國荃別無經手事件。惟冀回籍養病。稍息仔肩。一等情。懇請代奏前來。伏查臣弟曾國荃。春夏之交。飲食日減。睡不成寐。臣曾陳奏一次。然以一人而統九十里之圍師。與羣酋悍賊相持。自無安枕熟睡之理。亦係將帥應嘗之苦。臣尚不甚介意。迨克城以後。臣至金陵。見其徧體瘡痍。仍復徹夜不眠。心竊慮之。近十數日。不得家書。詢之來皖差弁。知其肝火上炎。病勢日增。竟不能握管作字。幸值撤勇就緒。軍務業經大定。地方又無專責。合無仰懇聖恩。俯如所請。准會國荃開缺。回籍調理。一俟病體就痊。即令奏請銷假。入都陛見。跪求聖訓。所有臣弟國荃因病籲請開缺緣由。理合據情代奏。伏乞皇太后皇上聖鑒訓示。謹奏。

湖州廣德敗賊犯欽官軍截勦屢勝摺 同治三年八月二十七日

奏爲湖州廣德敗賊併犯欽南。經官軍截勦屢勝。恭摺馳陳。仰祈聖鑒事。竊自湖州克復。賊衆數萬。糾合廣德餘黨。分路出竄。業經蘇浙各軍兜勦窮追。狼狽已甚。其衝過徽寧境內者。八月初一日。經寧國守將劉松山迎擊於錢卹鋪。收降卒常宇安等四千餘人。悉行遣散。旌德守將易開俊聞警拔營。旋向板橋繼進。賊之後隊。乃由老竹嶺轉竄歙縣之南鄉。初七日。徽州守將唐義訓。自杞梓里進軍中嶺。易開俊亦自板橋進軍山陽坑。合隊夾擊。大

敗之。斬擒三千有奇。餘賊翻過六甲嶺。遁向淳安一路。初九日探報老竹嶺有續到之股。爲僞幼英王陳逆。僞幼忠王李逆。及僞幼孝王等。人數尤衆。易開俊率隊疾進。先令歐陽廷易致中路。馳擊中路。戰不數時。復督蕭章開曹義勝何作霖三營。從叢箐中橫出截賊。賊不稍卻。喻先達易致中歐陽廷何作霖等。大呼陷陣。立殲前鋒。賊始潰走。我軍沿途跟蹤。斬斃近千。解散盈萬。餘賊聚於六甲嶺頭。易開俊於次日分所部爲六路。撥開榛莽。蟻附上升。羣賊一見即奔。各軍踰嶺壓下。殺賊又以千計。直追至畢家園而返。十一日易開俊進紮蘇村。駐軍少息。十四日督隊向胡須嶺履勘地勢。適與賊遇。令歐陽廷易致中鄭開武爲前鋒。自率馬隊親兵應之。令蕭章開爲左翼。喻先達爲右翼。三路併進。擒斬無算。賊仍遁出嶺外。此八月初七至十四等日。易開俊一軍疊擊山陽坑六甲嶺胡須嶺竄賊獲勝之情形也。維時賊之遁向潛安一路者。已抵威坪。爲浙軍所扼。將欲回竄歙境。唐義訓飛飭馬登富宋光隆穩守深渡。自率左俊逸王品高等五營。於十四日馳至昌溪。適見賊紛紛過嶺。比及引軍擊退。又報賊以大股衝竄江村。另股繞出約坑佛嶺一帶。將在定潭橋出口。唐義訓遂令王華雲蔣信玉等。赴豹嶺扼堵。唐義謨左俊逸等。赴佛嶺扼堵。并督小隊親往深渡。而賊已由鎮口渡河。急派馬登富宋光隆繞河橫擊。賊之中槍墮水者不少。時唐義謨左俊逸等。正在佛嶺而出約坑。合軍猛勦。截賊兩段。一面堵住過河之賊。一面迎敵鎮口衝出之賊。相持數時。賊始受創。退往江村。王華雲等亦在豹嶺脚大有斬獲而還。是夜雨甚。賊冒雨涉水。由小川搶渡。我軍節節截勦。戰至嚮晨。唐義訓分軍抄出陣口後路。仍親率數營。斜越深渡上游。賊見我軍過河。大駭而奔。折向黃備一帶。又爲金國琛步隊所襲。拋棄輜重略盡。十六日唐義訓先派各營。面面設伏以待賊。賊果向鎮口。悉衆竄出。上下五六里。旗幟層列。斃水爭渡。猶未盡濟也。不料我伏軍突出擊之。既濟之賊。半蹙入水。而未濟之賊。欲遁無路。馬登富蔣信玉等。從陸路環擊。浙軍礮軍。亦從水路駛至。賊乃伏地乞撫。願效前驅。中有廣賊千餘人。誓死不降。又經我軍直前痛勦。斬馘數百。惟游擊唐遠昂力戰死之。是役也。殲大小酋目九人。降者散者數千人。僞幼孝王胡逆並死於亂軍之中。此十四五六等日。唐義訓一軍在豹嶺大嶺鎮口等處堵勦大勝之情形也。臣查湖州廣德各賊。傾巢敗竄。勢將由徽入江。以圖生路。幸易開俊唐義訓等在歙縣東南。併力堵遏。俘斬降散。爲數甚衆。再得一二勝仗。可冀就地殄滅。不至貽患江西。實屬有裨大局。在事出力員弁。應俟皖南

全境肅清後。彙集恩施。花翎參將銜游擊唐遠岳。擊賊陣亡。應請敕部照參將例從優議卹。所有微寧防軍截勦竄賊。疊獲勝仗緣由。謹會同督軍江西皖南軍務陝甘督臣楊岳斌。由驛五百里具奏。伏乞皇太后皇上聖鑒訓示。謹奏。

近日軍情片 同治三年八月二十七日

再近日軍情。江西侍逆等股。竄擾南安水城。汪忠朝王文瑞兩軍趕到。尙未擊退。楊岳斌已抵贛州。若南贛不清。恐難遽赴甘肅。湖州廣德之賊。經浙江徽軍層層追擊。縱有零股竄入江西。亦不過數千人。得鮑超劉典等軍迎勦北路。當易於肅清。皖北之英山霍山。一片賊氛。蔣凝學雖屢獲勝仗。而糧路尙屬梗塞。臣現調劉連捷朱洪章朱南桂等。率金陵萬餘人。由桐城進勦英山。調李榕王可陞何紹彩三軍八千人。由六安進援霍山。有此兩枝大兵。皖北亦易勦辦。臣本擬俟全皖肅清。再行移駐金陵。因臣弟曾國荃病勢增劇。下游無人主持。定於九月初間起程。駐紮江寧舊治。貢院工程。據稟可於九月一律完竣。臣到江寧親往驗工。如實無草率之處。再行奏請簡派試官。以昭慎重。理合附片陳明。伏乞聖鑒。謹奏。

彭玉麟不專駐安慶片 同治三年八月二十七日

再臣欽奉寄諭。一安慶地處上游。控制皖南皖北。不可無大員鎮撫。卽著彭玉麟駐紮安慶。妥籌防勦。一因欽此。臣查彭玉麟習於水師。不習陸戰。咸豐十一年蒙恩簡受安慶巡撫。嘗經上疏回辭。具陳大略。目下金陵克復。長江雖一律肅清。而水師事務尙繁且重。自兩湖以至蘇州。江淮湖海港汊紛歧。船隻千餘號。墩位數千尊。雖分爲四大支。而黃翼升係彭玉麟部下撥出。李朝斌係楊岳斌部下撥出。惟二人者。可以綜覽全局。今楊岳斌奉旨馳赴甘肅之任。臣管轄之事過多。所有長江水師。親定規模。不得不責成彭玉麟區畫一切。上自岳州。下至崇明。旁及兩湖三江境內之湖蕩河汊。凡長江水師提督所轄。何處立營分汛。何處創立衙署。開設船廠。均須彭玉麟周歷巡察。議定章程。由臣與該侍郎暨沿江督撫會奏。彭玉麟實不能專駐安慶。亦不能兼顧陸路。其安慶省城防守并善後事宜。臣已札飭藩司馬新貽。署臬司何璟。暨記名總兵喻吉三。會同妥辦。必無疏虞。理合附片陳明。伏乞皇太后皇上聖鑒。謹奏。

截停淮北餉鹽設法整理以復舊制摺 同治二年八月二十七日

奏爲遵旨截停淮北餉鹽設法整理以復票鹽舊制恭摺仰祈聖鑒事竊臣承准議政王軍機大臣字寄同治二年十一月十八日奉上諭「本日據戶部奏『淮北票鹽提充軍餉請分別截留以保正課』一摺亦因苗逆伏誅皖徐平靜淮北銷路漸通亟應將餉鹽分別截留以挽頽綱而裕正課著會國藩嚴飭鹽運司忠廉設法遵照辦理戶部摺并著鈔給閱看」等因欽此伏查淮北鹽務自從前督臣陶樹攻行票鹽意美法良商民稱便果能率由舊章行之百年不敝無如軍興以後運道之通塞靡常銷數之暢滯無定鹽既不能如額運售課即不能按綱造報拖延套搭已覺年不如年然未辦餉鹽以前票販雖日形竭蹶而尙能勉力從公池商雖難免偷漏而未敢任意售私迨軍營提鹽抵課變易舊規營員日出於其途商販遂聞而卻步李世忠部下赴壩領鹽尤屬桀驁一不遂欲百般恐嚇甚至因棧鹽不足下場自緝一營開端各營效尤護私夾私之弊遂至不可窮詰現在李世忠業經開缺回籍其部下兵勇亦皆遣散當此淮甸澄清自宜恪遵聖諭將餉鹽截停招集新舊票販照常請票運鹽完納現課出湖銷售臣旁咨博訪參考成法核議新章約有必須停止者三急宜整理者四請爲我皇上陳之漕臣以清淮防費支絀先令場商每包捐鹽五斤每引共二十斤旋因逐包捐繳諸多未便由海分司詳攻每運鹽百包帶繳五包其應完課銀及售出鹽價雖經吳棠奏明作爲清淮軍需但鑄銖而取之瑣屑而派之殊非政體所宜此必須停止者一也徐州係山東引地前因捻氛梗阻東引未能到岸經督辦徐宿軍務田在田奏准借運北鹽劃收東課原係暫時權宜之計行之日久流弊滋多探買則私自赴場售銷則旁侵皖界刻下東引業已通行徐民無虞淡食不能再託借運之虛名貽侵銷之實惠此必須停止者二也北鹽向有淨鹽毛鹽之分已改細者爲淨鹽未改細者爲毛鹽皆須納課方准出湖近來私梟勾串營弁朋販毛鹽結隊橫行連檣闖越堵之嚴則營員出而包庇緝之疏則官引盡被占銷此必須停止者三也夫權鹽之法草其弊而利自與餉鹽停則強封害販之弊除捐鹽停則科斂奸商之弊除借運朋販之鹽停則引界棍徒營私充斥之弊無不除臣所謂整理之四端蓋亦就諸弊旣去因勢利導耳淮北綱引前係奏至戊午綱爲止今於五月初八日接開己未新綱惟兵燹以後戶口大減斷不能銷四十六萬引之數應循照近年奏案先辦正額二十九萬六千九百二十八引每引

例收報部正課一兩五分一厘。雜課二錢。又外辦經費四錢。倉穀河費鹽捕營各一分。此外如圍練。壩工。緝費。號項等款。名目太繁。一概刪除。以紓販力。此現籌整理者一也。近來軍餉皆賴鹽厘接濟。勢不能概行裁撤。而長淮處處設卡。商販視為畏途。且從前各卡總計每包約須完厘錢二千餘文。爲數過重。自應大加核減。今擬仿淮南總收分解辦法。歸併兩處。自西壩出湖。先在五河設卡。每包收厘錢五百文。運赴上游。再於正陽關設卡。每包收厘錢五百文。他卡只准驗票。不准重抽。統由臣選派委員。駐卡經理。蓋非減厘不足以輕本。非裁卡不足以卹商。此現籌整理者二也。淮北解餉。原案向以十成分攤。臨淮軍營分四成。安徽李營分四成。安徽撫營分二成。今臨滁兩營。業已分別裁并。自可將該兩營舊有之餉。改撥金陵一軍。稍解燃眉之急。惟漕臣停止捐鹽。亦應量予撥濟。以資貼補。嗣後所收課厘。臣已咨明吳棠喬松年。應仍以十成分派。臣營派五成。撫營派四成。漕營派一成。論兵數則小有裒益。論舊例則無甚更張。此現籌整理者三也。北鹽每引例定正鹽四百斤。分細四包。每包連滷耗重一百十斤。近來棧鹽出湖。皆在西壩改細。大包重一百二十三十斤不等。以省運脚及按包抽釐之費。換包後。鹽粟不符。叢生弊竇。臣已嚴申禁令。不准改細大包。並於例給大票外。將每船裝鹽包數。亦仿淮南之例。填給艙口清單。庶鹽與粟符。可杜就重而避輕。不致以多而報少。此現籌整理者四也。以上各條。係就戶部原奏。及御史劉毓楠之條陳。悉心參酌。方挽近年之稅政。悉復疇昔之成規。而又恐積弊已深。一旦改收現課。各販不甚踴躍。更讞輔以官運。照商販一律辦理。以示倡導。淮北近年以來。綱法紊亂。開網既無定期。奏銷亦無定限。目下新章既定。臣嚴飭運司督同海州分司。廣爲招徠。源源認運。仍限一年造報奏銷。以符定制。但例銷北鹽口岸。疊被苗捻蹂躪之後。不但煙戶凋零。人民稀少。且未經開網以前。存積餉鹽捐鹽販鹽。爲數不少。舊鹽之占壓太多。新鹽之售銷難速。勢有必然。又皖之潁六廬鳳。豫之信羅光固。逼近捻氛。軍情變幻。刻刻可憂。課項能否如額收足。奏銷能否依限造報。未敢信有把握。其五河正陽關所收鹽釐。將來自當隨同正課。一并報部。以重款項。惟因餉需緊要。此時所收鹽課。只能支應軍需。未能先運京餉。私衷耿耿。抱疚良深。臣惟有督飭督運司忠廉。殫盡血忱。實力經理。以仰副皇上整飭離綱之至意。所有截停淮北餉鹽。設法整理緣由。理合恭摺具奏。伏乞皇太后皇上聖鑒訓示。再戶部飭查歷年各營抵餉數目。已飭運司逐細確查造冊詳送。容俟送到清冊。另行咨部。合並聲明。謹奏。

江南貢院工竣請放考官摺 同治二年九月十一日

奏爲江南貢院建修工竣定於十一月舉行鄉試懇請簡放考官仰祈聖鑒事竊江南鄉試自咸豐九年在浙江借闈特開萬壽恩榜并補行乙卯正科後尙有戊午辛酉壬戌及本屆四科歷經奏請展緩辦理遠本年六月江寧省城克復臣親勘貢院幸尙未全毀當即鳩工庀材飭派記名臬司黃潤昌監視興修於八月十三日奏陳大概旋據該員以要工完竣繪圖呈驗臣於九月初一日自安慶起程初七日舟抵金陵初九日至貢院查驗工程所有主考監臨提調監試房官各屋騰錄對讀彌封供給各所新造者十之九修補者十之一號舍一萬六千餘間新造者十之一葺補者十之九又因江南人文蒼萃向慮號舍不敷酌就闈外圈入隙地以備將來添建號舍之用臣逐段勘驗現僅號板未全牌坊及油飾未畢約計九月二十日前一律完竣工堅料實煥然一新兩江人士聞風鼓舞流亡旋歸商賈雲集現在已通飭各屬出示曉諭定於十一月舉行鄉試江南監臨向係江蘇安徽兩省巡撫分科輪辦本屆甲子及補行戊午各正科係屬江蘇輪值之年臣已咨明撫臣李鴻章請其屆時前來入闈辦理監臨事務其提調監試各官向例於江安兩省藩臬道府大員中調派內簾十八房則於科第出身實缺州縣中考充如實缺人數不敷卽於兩省候補之卽用大挑揀發各班挑選現值地方多係新復實缺人員寥寥無幾所有內外簾各執事應由監臨官循例分別調取至江南正副考官向章八月鄉試係於六月二十二日簡放主考禮部於二十日進本此次十一月舉行鄉試似應於九月二十二請旨簡放考官向章江南主考由徐州臨淮滁州驛路行走目下滁州等驛尙未整飭應改由清江浦揚州馳驛南來以免遲誤前此咸豐九年借用浙闈舉行己未恩科並補行乙卯正科安徽取中正額因皖北赴考人數較少奏准先中大成酌留四成計兩科存留中額三十六名俟皖北肅清後於下科鄉試補中目下英蹇賊退全皖將次肅清應否將所留三十六名於本科補中之處請旨敕下禮部核議知會正副主考官查照辦理所有貢院工竣舉行鄉試請旨簡放考官緣由恭摺由驛五百里馳奏伏乞皇太后皇上聖鑒訓示謹奏

覆陳補行鄉試事宜片 同治二年九月十一日

再臣於八月二十七日欽奉八月二十一日寄諭「江南北現經盪平亟宜振興文教前次寄諭以貢院有無損

壞爲問。原欲於來歲特開一科。以免士子日久向隅。茲據該大臣親至貢院履勘。至公堂等處及號舍。均尙完好。惟號板毀失。監臨主考房官等屋。片瓦無存。現已派員採辦木料。趕緊興修。擬於九月奏請簡放考官。於十一月舉行鄉試等語。著卽飭令委員認真經理。如工料一時不能畢集。卽緩至來歲。補行鄉試。亦無不可。仍著該大臣酌度時勢。再行奏請。等因。欽此。本日續奉九月初四日寄諭。曾國藩奏貢院試士一節。恐本年爲期過遲。辦理諸多窒礙。仍著遵前旨。酌度情形辦理。等因。欽此。仰見皇上慎重大典。不令草率從事。無任欽服。竊自六月攻克江寧省城後。臣弟曾國荃查看貢院。大致完好。卽創議於本年舉行鄉試。先將各僞王府木料查封備用。臣弟素性任事最勇。有謀必成。帶病督同委員。廣集工匠。每日常有二千餘人。晝夜趕辦。而遠近一聞鄉試之信。四民輻湊。奔走借來。臣此次行抵省城。各街巷熙熙攘攘。煥然改觀。殊出意料之外。查鄉試事宜。除修理貢院外。以試卷爲大宗。臣於八月間已札飭江西藩司趕辦江南硃墨卷各一萬八千套。定限十月十五以前。委員解赴金陵。不至遲誤。其餘應需各件。均可咄嗟立辦。現已咨行各屬。出示曉諭。自不可更改前議。臣於此等大事。向以敬慎自持。斷不敢稍涉草率。所有遵旨酌度辦理情形。理合附片覆陳。仰慰宸廑。伏祈聖鑒。謹奏。

落運兩司各回原駐片 同治三年九月十一日

再臣欽奉七月十一日寄諭。兩淮鹽務爲庫款大宗。曾國藩早經派員興辦。此時江路通暢。可以圖復舊觀。著飭運司招商認運。以期國課漸充。並著飭令落運司等官。各歸舊駐地方。不得仍前駐紮泰州一隅。圖旦夕宴安之便。致與大局無益。等因。欽此。當經恭錄行知。落運兩司等。稍涉因循。未遽移歸舊駐地方。臣於九月初一日。自安慶東下。又經札調藩司回駐金陵。運司回駐揚州。以重職守。查江寧藩司有兼辦揚鎮糧臺之責。目下鎮防兵勇業已全撤。揚州糧臺出入大款。仍應責成萬啓琛綜理。該藩司移駐江寧後。揀派可靠之員。在於揚州辦理支應事宜。泰州毋庸再設糧臺。江寧省城諸事。草創均須藩司經理。十一月間舉行鄉試。尤屬責無旁貸。萬啓琛回駐江寧。自屬刻不容緩。至運司移駐之期。據忠廉稟稱。須候挑河築壩設立公棧等事。辦有頭緒。乃可移駐。臣札飭該運司先赴揚州。經營草創。其設棧挑河等事。隨後陸續興辦。不必待諸事就緒。乃可移動。運司衙門距臣稍近。庶幾呼吸相通。除再行檄催外。理合附片陳明。伏乞聖鑒。謹奏。

皖南北兩岸肅清摺 同治三年九月二十七日

奏爲官軍驅賊出境。皖南北兩岸肅清。恭摺馳陳。仰祈聖鑒事。竊自鄂賊圍撲英山。皖軍戰守逾月。經喬松年節次奏報。浙賊併犯徽州。各軍截勦屢勝。亦經臣於八月二十七日奏報在案。方湖北髮捻大股由麻城入羅田。勢漸東下。六安守將蔣凝學率隊進勦。兵次金家鋪。立營甫定。爲賊所困。我軍伺隙一擊敗之。賊乃轉趨英山。圍襲縣城。蔣凝學裹糧馳援。又卻之。城池遂以得完。厥後蕪水另股之賊。羅田續至之賊。英山受創之賊。愈聚愈衆。環布長圍。日逼城壘。糧運文報。一時俱絕。蔣凝學忍飢誓衆。屢戰獲勝。先後俘斬解散者以數千計。賊知不可復逞。於九月初間悉數退竄楚境。適英翰郭寶昌擊敗霍山之賊。由六安以達英山。蔣凝學奉湖廣督臣之檄。亦即由英山赴援羅田。而賊之徧擾蕪水蘄州廣濟黃梅者。正入太湖西境。聞劉連捷朱南桂等軍已抵太湖。遂悉數退竄鄂疆。此皖北暫就肅清之情形也。賊之由浙入皖。而延擾徽郡者。易開俊迎擊於山陽坑。六甲嶺。胡須嶺等處。唐義訓金國琛截擊於豹嶺。佛嶺。黃備鎮口等處。臣前疏業已詳陳。賊自鎮口一敗。死者降者散者。棄老弱輜重而遁者。十之六七。唐義訓慮餘賊尙圖鋌走。率所部馳至草市。遏之。金國琛亦要截於小溪。賊乃踰歙嶺而逸。唐義訓令左俊逸出連嶺。王華雲出白際嶺。宋光隆出馬金嶺。跟蹤追勦。仍自將兩隊以繼各軍之後。賊聞徽軍出嶺。足不停趾。急走遂安。竄入章村郭村一帶。左俊逸王華雲宋光隆追及郭村。斬三百餘級。解去千餘人。金國琛亦自小溪逐賊而來。賊橫竄馬石橋。出豐口小路。陷開化。走華埠。據報漏逸而西者。不過數千。此皖南全境肅清之情形也。臣查十年以來。安徽南北兩岸受禍最烈。今幸仰仗天威。全皖粗安。子黎漸有還歸之望。然湖北之賊尙趨重於蕪水廣濟等縣。臣方添調各軍。扼堵太湖潛山宿松英霍等處。是皖北目前之肅清。未可深恃。皖南之賊竄入江西。節節皆有重兵。餘匪當竄楚粵。不能復擾皖境。所有皖南諸軍。如易開俊唐義訓劉松山金國琛等。防勦多年。艱苦備嘗。應卽籲懇恩施。以昭激勸。提督銜安徽壽春鎮總兵易開俊。可否交軍機處記名。遇有提督缺出。請旨簡放。署安徽皖南鎮總兵唐義訓。可否開復革職留任處分。并簡補皖南鎮寶缺。提督銜記名總兵劉松山。可否簡放寶缺。並給予一品封典。前布政使銜湖北安襄鄖道降補同知金國琛。可否先行開復道員原官。其餘出力員弁。可否彙入擊退竄賊各案內。容臣開單奏保。均出皇上鴻施。所有官軍驅勦竄賊。皖境肅清緣由。

謹會同督辦江西皖南軍務陝甘督臣楊岳斌。安徽撫臣喬松年。由驛五百里具奏。伏乞皇太后皇上聖鑒訓示。謹奏。

報銷皖省抵徵摺 同治二年九月二十七日

奏爲皖省改辦抵徵。彙報收解簡明總數。恭摺仰祈聖鑒事。竊安徽與湖北連界。自楚師入境。疊復郡邑。各州縣支應兵差。款項無出。每立公局。按畝捐錢。以紳士經理其事。民捐民辦。從不報銷。日久弊生。縣官不能過問。紳士亦互爭利權。徵求無度。百姓苦之。咸豐十一年八月。安慶省城克復。臣國藩督同出示。司道停止畝捐。稍蘇民困。旋因募兵增餉。大舉東征。勢不能不重累閭閻。再籌經費。第以兵革之後。冊檔全失。丁漕混淆。遽徵錢漕。竟無下手之處。嘗經善後總局議以畝捐之法。參用正供之意。查明各處熟田。按畝捐錢四百文。給予縣印串票。以抵正賦。名曰抵徵。一切收解動用。官爲報銷。兼設紳局。襄辦清查糧畝。仍不得稍侵利權。於同治二年二月詳辦在案。當時初易畝捐。而爲抵徵。取之有制。民無重徵之慮。操之自上。紳無侵蝕之權。行之二年。百姓既欣然樂從。軍餉大有裨益。惟抵徵雖與正供無異。而未分款目。難入奏銷。且查畝略有頭緒。卽宜仍還舊章。本年軍事大定。臣國藩又於春間札飭一律開辦丁漕。以復舊制。所有同治元二兩年。安徽各州縣收過抵徵項下銀米錢三款。自應專案作正報銷。計銀一兩作錢一千四百文核算。凡撥解司庫者。銀錢併計。共錢三十三萬一千三百二十九串零。應由藩司報銷。凡撥充糧臺軍餉者。銀錢併計。共錢六十二萬三千二百二十六串。米九千四百五十五石。應由糧臺報銷。凡撥歸善後局者。銀錢併計。共錢七千八百串。合之地方州縣供應兵差。均歸軍需造冊。併入藩司衙門報銷。據藩臬兩司會詳請奏前來。臣等查安徽辦理抵徵。係臣國藩與前撫臣李續宜先後會商。其時議定。由李續宜主稿會奏。厥後李續宜患病丁憂。久未銷假旋皖。而唐訓方任內。日在危險之中。亦未出奏。以皖省抵徵。係由督署始終主持。自應由臣國藩具奏梗概。仍飭布政司核明各屬實征完解各數。造冊由臣松年咨部查核。其三年以後開辦丁漕。亦由臣松年屆時奏銷。所有皖省改辦抵徵兩年。收解簡明總數。理合會摺具奏。伏乞皇太后皇上聖鑒訓示。謹奏。

謝賞會國荃人參恩摺 同治二年十月初五日

奏爲恭謝天恩。仰祈聖鑒事。竊臣接准兵部火票。遞到同治三年九月初四日內閣奉上諭。一會國荃著准其開缺回籍調理。並著賞給人參六兩。交該撫祇領。用資保衛。一等因欽此。臣當卽恭設香案。率同臣弟國荃。望闕叩頭謝恩。伏念臣弟國荃。以書生從戎。濬膺疆寄。屬以陳師白下。遠寇稽誅。謬遣大而投艱。幾智窮而能索。逮夫大功粗就。懋賞榮膺。異數析於信圭。溫詔榮於華袞。方竭陳而圖報。乃嬰疾而逾時。乞骸之疏甫陳。逾格之恩已沛。令還山以靜攝。准開缺以遄歸。天上頒來。遙錫駐年之藥。田間退處。敢忘向日之葵。舉族增榮。闔門銜感。臣惟有互相規勸。益矢忠誠。諄囑臣弟回籍上緊醫治。一俟病痊。卽令奏請銷假。入都陛見。跪求聖訓。所有微臣感激下忱。謹繕摺叩謝天恩。伏乞皇太后皇上聖鑒。謹奏。

謝賞雲騎尉及直隸州知州恩摺 同治二年十月初五日

奏爲恭謝天恩。仰祈聖鑒事。竊臣等恭閱邸報。同治三年七月二十六日。內閣奉上諭。一前任湖南候選同知曾國華。著加恩賞一雲騎尉世職。前卽用知府曾貞幹。著加恩賞給伊子直隸州知州。照例補用。一等因欽此。臣等聞命之下。感泣難名。伏念臣弟國華等。夙抱愚忠。未嫻遠略。或從戎於皖北。報國捐軀。或勦賊於江南。以死勤事。疊荷兩朝賜卹。同蒙高天厚地之施。固已闔室鏤心。誓圖結草銜環之報。茲因金陵奏捷。玉陛推恩。凡封疆將帥之大臣。悉邀世賞。而禦侮後先之末吏。并沐皇仁。羽林廂都尉之班。角非忝方州之長。在聖主眷懷忠節。今古獨隆。在臣家渥戴恩榮。存沒均感。臣等惟有督教臣姪。讀書敦品。砥行礪名。共勉經文緯武之資。并矢移孝作忠之志。庶幾仰答生成。闡澤於萬一。所有微臣等感激下忱。謹合詞繕摺。叩謝天恩。伏乞皇太后皇上聖鑒。謹奏。

近日軍情片 同治二年十月十二日

再近日軍情。金陵各營勇丁。陸續遣撤。已及二萬五千餘人。臣弟國荃於十月初一日起程。親帶後批勇丁回籍。各項餉銀。俱先儘遣勇之資。又給與期票。札訂定數月後補領。現在頭二批業已到籍。沿途均屬安帖。前由金陵派援皖北之劉連捷朱南桂朱洪章三軍。行抵太湖宿松。先經官文檄調會剿。劉連捷抱病甚重。恐一軍獨進。不能制此大股。具稟請示前來。臣因檄令三軍同進。爲赴鄂援勤之師。又添調易開俊由皖南率隊渡江。與李榕王可陞等同爲後路策應之師。適奉九月二十六日寄諭。飭催赴鄂。臣又趕解行糧四萬兩。催令前進。乃部勒甫定。

而鄂事旋鬆。羅田蕪水之賊。已由太湖潛山境內橫竄霍山之黃尾河管駕渡等處。皖疆又形喫緊。臣以軍事千變。不特臣相距七百里外。不宜遙制。即官文喬松年相距五百里內外。亦難一一懸斷。因函致馬新貽。請就近酌度緩急。和衷調度。無論在鄂在皖。總以劉連捷等軍力當前敵。以王可陞等軍保固後路。各軍之銀米子藥。皆取給於安慶糧臺。與馬新貽息息相通。凡官文喬松年所有調度。亦請馬新貽與之往返函商。庶幾節節靈通。無彼此兩歧之患。是否有當。伏乞皇太后皇上聖鑒訓示。謹奏。

遵旨馳赴皖鄂交界督兵勦賊摺 同治二年十月二十一日

奏爲遵旨馳赴皖鄂交界督兵勦賊恭摺仰祈聖鑒事。竊臣承准議政王軍機大臣字寄。同治二年十月初八日奉。上諭。現在江寧已臻底平。軍務業經蒞事。即著會國藩酌帶所部。前赴皖鄂交界督兵勦賊。務期迅速前進。勿少延緩。第恐會國藩之兵。由東路進。偏賊必避兵西竄。武漢一帶防守。亦關緊要。官文俟會國藩到後。即可回駐省垣。會同吳昌壽妥籌防範。並將各營餉需。源源接濟。毋令缺乏。僧格林沁現駐黃岡之岡巴河。第恐深入楚境。難保賊匪不伺隙竄擾北路。著酌量情形。扼要駐紮。力固豫疆。賊或北竄。即著督率馬步。迎頭夾擊。以期聚而殲旃。僧格林沁官文會國藩均係威望素著。似此三面扼紮。必能將此股賊匪。悉數殲除。剋期蒞事。至江南甯經肅清。所有撫輯地方一切事宜。均須妥爲籌辦。即著李鴻章前赴江寧。暫署總督篆務。會國藩俟李鴻章到後。即行交代起程。等因欽此。適值李鴻章前來江寧。辦理監臨事務。十月十七日馳抵金陵。臣與之面商。湘勇多勦髮匪。少遇捻匪。不若添調淮勇。熟於穎壽之程途。兼悉捻匪之伎倆。湘淮各軍。三路并進。更資得力。因會檄調劉銘傳李鶴章等。統率淮勇。渡江而北。隨臣西上。進勦皖鄂之賊。臣自咸豐四年。躬親矢石。屢次敗挫。厥後十載。久未親臨前敵。即元年秋間大疫。羣賊紛乘。會國荃被圍四十六日。鮑超絕糧三日。臣俱未親行援救。本年屢奉諭旨。飭臣督攻金陵。臣亦未親往圍攻。非膜視也。自揣臨陣指揮。非其所長。不得不自藏其短。俾諸將得展其才。此次臣若自赴楚界。未必有益。而與僧格林沁官文同駐蕪黃四百里之內。以欽差三人。萃於一隅。恐啓賊匪輕視將帥之心。擬仍駐紮安慶六安等處。派劉連捷等直入黃州各屬。聽候官文調遣。凡臣所能調者。官文皆能調之。臣部之名位勦勞。以鮑超爲最著。諭旨詢派督辦軍務。臣尙奏請由沈葆楨和衷調度。豈有官文督楚十年。反不

能調楚師之理。倘有不遵調度。惟臣是問。力戒將士畛域之見。以敦江楚一家之誼。務將此股髮捻悉數掃除。使皖鄂一律肅清。庶幾仰慰宸廬於萬一。除交卸督篆。起程日期。續行具奏外。所有遵旨馳赴皖鄂交界。督兵勦賊緣由。恭摺由驛五百里覆奏。伏乞皇太后皇上聖鑒訓示。謹奏。

江寧省城建立湘軍昭忠祠摺 同治二年十月二十一日

奏爲江寧省城捐建昭忠祠。彙祀湘軍陣亡。傷病將士。恭摺仰祈聖鑒事。竊臣准前任浙江撫臣曾國荃咨稱。一。同治元年五月間。進攻江寧。駐軍城下以來。凡我從征將士。屢次攻奪要隘。捍禦劇寇。計先後陣亡傷亡近九千人。積勞病故萬五六千人。皆係沒於王事。今大功粗定。自應擇地建祠。立主奉祀。以妥忠魂。據各營官會勘得江寧城北蓮花第五橋地方。有僑聽王府一所。係賊中所造之屋。共七重。前臨小塘。後抵石梁巷。東至進香河。西有圍牆。外皆空地。堪以此屋改建江寧昭忠祠。除由國荃暨各營官捐貲與工修整外。應查明陣亡傷亡病故各員弁銜名。建立木主入祀。每年春秋二祭。派地方官主祭。等情。請奏前來。臣查楚軍水師殉難人員。曾在湖口建立昭忠祠。臣於咸豐八年八月。會同楊載福李續賓具奏。欽奉諭旨允准。飭地方官春秋致祭在案。自曾國荃師抵金陵。攻戰兩年。將士死事者尤多。雖屢邀朝廷優卹之文。而崇祀報功。尙闕焉而未備。茲就城中遺屋。略爲擴充。凡陣亡傷病文武員弁兵勇。分別正祀祔祀。依次列入。庶足妥侑毅魄。激勸方來。合無仰懇天恩。准照各府昭忠祠之例。飭地方官春秋致祭。於聖朝褒忠勵節之道。或亦有補於萬一。所有請建江寧昭忠祠緣由。理合繕摺陳奏。伏乞皇太后皇上聖鑒訓示。謹奏。

江粵釐金各歸本省抽收片 同治二年十月二十二日

再臣於同治元年三月。奏准開辦廣東釐金。解濟皖浙各軍。本年六月金陵克復。七月奏請停止。粵釐仍歸本省抽收。仰蒙皇上軫恤飢軍。未邀俞允。旋又奉旨飭令三成解皖。七成歸粵。伏思粵省現有軍事。釐餉解江。於理終覺未安。仍請該省全數截留。俟軍事稍平。再行酌解。臣處彌補欠餉。至江西釐金。本年三月經撫臣沈葆楨奏定與臣各提一半。五月間。臣派鮑超周寬世先後赴援。即咨明解皖之半釐。留充該兩軍之餉項。僅提出饒州景德鎮兩卡。作爲邪門糧臺辦米之需。其餘概不解皖。又於八月抄札飭藩司江西釐務由司道稟請撫臣核辦在案。

臣現交卸督篆。未便再管江西釐務。此後請概歸沈葆楨經收。其鮑超周寬世兩軍。應歸沈葆楨調度。給發口糧。該兩軍之應留應撤。悉由沈葆楨請旨定奪。惟鮑超周寬世兩軍而外。分駐金陵及皖南北者。尚有五萬餘人。發目下防兵之口糧。籌將來撤勇之欠餉。若非取給於兩江境內。臣實一籌莫展。應請將蘇皖之鹽務釐卡。向歸臣處者。仍照舊章撥解。饒州景德之半釐。亦仍舊撥解祁臺。以資饋運。而免飢瀆。理合附片具陳。伏乞聖鑒訓示。謹奏。

交卸督篆仍回本任摺 同治三年十一月十八日

奏爲恭報微臣交卸督篆并遵旨仍回本任各日期。仰祈聖鑒事。竊臣前奉馳赴皖鄂督勦之命。遵經檄派各軍。並將擬駐安慶六安等處就近調度情形。於十月二十二日具陳大槪在案。拜摺後。飭令李鶴章輕舟回營。照料劉銘傳周盛波刻日拔隊渡江。嗣據周盛波呈報。定於十一月初六初八等日。率所部九營。由溧陽先後起程。劉銘傳亦定於十二日率所部十六營。由廣德建平陸續起程。臣將地方經辦事宜。略爲部署。先於初三日交卸兩江總督篆務。料簡西行。續奉寄諭。『據僧格林沁等先後奏報。『蕪水獲勝。成大吉軍解圍。賊竄英山等處。經僧格林沁督師進剿。擒獲首逆多名。降者十餘萬。』昨又據喬松年奏報。『擒逆陳德才自戕。髮逆數除淨盡。皖省一律肅清。』是楚皖近日軍情。較之半月以前。大不相同。現在楚境餘賊。由黃孝竄德安一帶。逆數無多。楚軍可敷勦辦。曾國藩又派劉連捷等軍歸官文調遣。計日定可廓清。著即飭令劉連捷李鶴章劉銘傳等軍。迅赴黃州德安等處。遇賊即擊。如賊趨皖豫。並令各軍分投防勦。通力合作。爲一勞永逸之計。曾國藩即可無庸前赴安慶。本無須交卸督篆。仍駐紮金陵。妥籌調度。』等因欽此。查鄂中髮逆。雖經全數殄滅。而擒逆退竄德安一帶。則由鄂而豫而皖均係往來熟徑。劉連捷等軍宜以黃州上巴河爲老營。凡黃州八屬有警。即令分隊馳剿。并添派吳坤修前往料理營務。劉銘傳等軍宜以三河尖固始爲老營。凡皖豫交界有警。即令相機防勦。仍飭派李鶴章同往料理營務。有此兩枝勁旅。庶可騰出湖北本省兵力。專顧德安襄陽等處。以爲通力合作之計。頃准李鶴章將總督關防派弁齎送出關。臣即於十一月十七日接篆。照常任事。俟此間科舉完竣。諸務就緒。擬仍乘坐輪舟。駛赴安慶黃州一次。面囑諸將妥籌防勦。迅掃上游餘孽。以慰宸廑。所有遵奉諭旨交卸回任各緣由。謹繕摺由驛

奏報伏乞皇太后皇上聖鑒訓示謹奏。

欽奉諭旨分條覆陳摺 同治二年十一月十三日

奏爲欽奉疊次諭旨恭摺覆陳仰祈聖鑒事竊自本年春夏以來江皖兵事尙亟凡先後寄諭事件有關調度攻戰者業經隨時詳奏馳慰宸廬厥後金陵克復百緒繁興計秋冬奉旨垂詢之事未及具覆者尙有數端謹分條爲皇上敬陳其略伏讀諭旨飭派曾國荃前往明太祖孝陵致祭其有應行修葺之處飭臣一面查明情形迅速奏聞一面督飭地方官酌量興修等因查孝陵衛在江寧省城東北爲昔年向榮等駐軍之所十年兵燹不特聖殿全毀卽圍牆碑亭亦已蕩然無存仰荷聖慈優禮勝朝遣官致祭邊卽移會曾國荃於九月二十日按照會典謹備祭品前往行禮臣亦嘗往展謁一次察看明陵毀傷過甚修理維艱旋委管後局司道勘估工程據稟匠人不甚諳練約略估計需銀在十二萬兩以外金陵應修之工極多且鉅六月十六破城時地道缺口及南門城樓甫經修竣頃又於十二月初七日挑浚秦淮河此三處皆用營中勇夫分段賦工然需費已二萬有奇此外城脚地道二十餘處明春有頽塌之虞目下無此鉅款興修卽明陵要工亦尙無款可撥不能不稍緩數月再行籌辦諭旨有云曾國藩咨送李秀成供詞一本昨議政王軍機大臣呈進均已悉覽末段所載該逆宛轉求生乞貸一命請招降江西湖北各賊言招降事宜有十要洪逆有十誤均歸刪節飭將原供仍詳細鈔錄咨送軍機處等因查李秀成原供摭拾萬言雖多可信之處而自誇戰功與各路軍報不甚符合其中反覆重沓獻諛乞憐無非圖延旦夕之一命臣竊謂該逆斷無赦理江西湖北各賊股亦斷無憑該逆尺書全數就撫之理臣是以將其支詞妄語概行刪節既奉諭旨查詢茲將其十要十誤及其他語補鈔進呈以備考核諭旨又因李秀成供詞內稱「張國樑遺骸係伊用棺木收埋」在丹陽寶塔塔根下「飭臣傳知曾國荃派員尋覓卽飭該故員家屬認領收葬等因」遵經恭錄轉移曾國荃派員往查日久無獲臣又續派副將朱士達守備施占琦前往丹陽東門外附近寶塔之皖江會館三義閣一帶徧詢該處居民並寺僧寶華僉稱從前寶塔下并無墳墓咸豐十一年擾後始有墳墓一坵本年九月曾國藩派員尋訪後又經馮子材委員訪求張國樑遺骸至此啓視不符重爲加工封築此外別無一墳更無一能知之者旋據江西縣丞王丙燁稟報「伊弟丙椿在張國樑部下同時戰歿丙椿隨身長夫現

在逃至江西。頗能述當日死事情形。臣已批令飭派該長夫迅至金陵。以憑詰問。張國樞收埋下落。尙不知有無端倪。諭旨又詢江北之餉。計可騰出若干。飭臣等查明實在數目。以一半分解甘省。以濟要需。以一半分濟皖軍前敵。如甘省待用萬分緊迫。即將此有著之款。儘力籌撥。不必拘定一半之數。並著妥議章程。迅速具奏等因。臣查江北糧臺進款。約有數大宗。曰漕折。曰地丁。雜稅。蘆課。曰運庫。月協二萬。曰統捐。曰花布行棧。按畝各捐。本年八月以前。每月所入計十萬兩有奇。自奉准部文。啟捐行棧捐先後停止。釐捐局卡分別裁併。而統捐一欸。明春勢難再辦。地丁蘆課等項。現經藩司衙門詳請留作旗綠各營坐餉之需。另案會奏。漕折一欸。本年已奉部駁。不准截留。旋經官明阿奏准暫留。借充遣撤各勇之用。仍須籌款解還。舍此數者。統計來年騰出有著之款。准運庫協餉及江北釐捐二宗。每月不過五萬兩。臣擬候揚州防勇撤竣後。先提江北四五箇月入款。儘數解部。抵還本年所留漕折。此後按月以三萬兩撥赴甘省。以二萬兩留供皖軍。仍俟皖軍一經裁撤。即將此項分成之餉。併解甘肅。以濟要需。是否有當。恭候訓示遵行。諭旨又以池州府知府范先謨。飭臣隨時悉心察看。如始終不能勝任。即行據實參奏。毋稍遷就等因。臣嘗即札飭藩司密為訪察。旋據稟該員范先謨由安徽候補直隸州。委署池州府篆。循分供職。尙無別項劣跡。學政朱蘭在池州考試月餘。臣細加詢訪。亦無貶詞。惟係佐雜保升之員。器識未免狹小。而署任已滿一年。辦事殊少振作。未便稍涉遷就。臣現函商撫臣喬松年。即將該員撤任。調省。仰副聖主澄敘官方之至意。以上五條。皆奉諭飭查之件。謹分晰條列。繕摺由驛馳奏。伏乞皇太后皇上聖鑒訓示。謹奏。

查覆淮北鹽務摺 同治二年十一月十三日

奏爲遵旨確查御史劉毓楠條陳淮北鹽務。恭摺覆陳。仰祈聖鑒事。竊臣於同治二年十二月十五日接准部咨議覆。一御史劉毓楠奏准北引滯課拙。請設法整頓。一摺。同治二年十一月初七日具奏。本日議政王軍機大臣奉旨依議。欽此。一恭錄到臣。伏查該御史所奏六條。除汰冗員一條。業經戶部奏覆。所需廉俸無多。毋庸缺裁外。他如裁釐捐以舒厥力。禁私鹽以暢官引。減經費以重公項。定場鹽之價以杜居奇。濬河道之淤泥以利挽運。洵於北鹺確有所見。臣前議准北新章。即將該御史所奏。詳加參酌。弊之應革者。逐加釐剔。利之應興者。徐圖規復。

至所稱。一歷任海州運判。到任必先核減鹽價。恐嚇商民。迨至賄賂備盡。始行詳復舊制。又河費捐款。經十餘年之久。已逾數萬。商販屢請挑河。該運判置若罔聞。一等語。果如所奏。則商民任其簸弄。公歎難免侵吞。必須遵照部議。添委大員。澈底根究。方足以儆官邪。本年正月。江寧藩司萬啓琛自安慶起程赴任。臣即札派該藩司會同署運司忠廉秉公詳查。旋據該藩司等派員密訪。弔卷確查。悉心勾稽。按款詳覆。正在核奏間。接到部文。內稱。一御史劉毓楠條陳淮北票鹽一摺內。如裁釐捐。禁私鹽。減經費三條。現據兩江總督奏明分別裁減。毋庸再行籌議。尙有定鹽價。通河道兩條。未據查覆。應即查照前奏。指詢各情。迅速根查。一等因。臣查場價之長落。向視壩銷之暢滯。銷暢則販利較厚。自宜酌增場價。以貼池商。銷滯則販本有虧。又宜酌減場價。以貼票販。譬諸百貨有盈缺。市價即有低昂。從前票鹽舊章。池商應得之鹽價。每引共計九錢。軍興以後。路梗銷疲。咸豐四年。即經前任海分司詳明減爲七錢。厥後續有增減之案。經萬啓琛等查明。均係稟詳運司。因時制宜。尙非憑空簸弄。惟向章鹽價係繳分司衙門。轉發池商。嗣因餉需緊要。往往將鹽價墊解軍餉。以致未能按期給發。池商益形苦累。自丙辰綱起。改爲由販自付。不由分司收放。既無挪墊之虞。亦無剋扣之慮。池商運鹽一引。可得現價七錢。足資轉輸。本年新綱。亦係照此辦理。臣又將池商捐繳之河費團練船工等項。概予刪除。商情皆稱允服。又查淮北河費。向係票販與池商每引各捐一分。咸豐四年以後。販力竭蹶。經前任海分司詳明。將票販帶繳之一分裁去。僅留池商一分。從前每綱運鹽四十六萬引。照額收照。祇收銀四千六百兩。近年銷數益滯。捐款益微。歷綱并無繳定之年。場河亦有興挑之案。即倉穀勇糧等款。經萬啓琛等逐細確查。皆出因公動用。尙無侵吞情弊。本年新綱。列征票販河費一分。臣已飭令專款存儲。自當隨時委勘擇壅塞淺阻之區。爲疏濬深通之計。又飭海州分司將歷年所收外辦雜款。按綱接任。造具支用清冊詳報。由臣逐款核銷。以昭核實。所有違旨確查緣由。理合恭摺覆陳。伏乞皇太后皇上聖鑒。勅部查覈施行。再戶部奏催淮南招商配引章程。現在淮南鹽務。悉照臣本年正月奏定之案辦理。漸有起色。此時無庸另議更張。一俟川私稍衰。楚岸稍暢。即當酌增鹽課。臣已於十月二十七日奏覆。合併聲明。謹奏。

再江西吉安府知府范泰亨。前於刑部員外郎任內。疊經胡林翼駱秉章保奏。咸豐十一年四月。丁憂回四川隆昌縣本籍。續經嚴樹森奏調。上年服闋後。遵旨赴鄂差委。臣又咨調來皖。奏明派往江西。會辦總糧臺及牙釐事務。該員銜稽綜覈。釐定舊章。治事以來。心血過虧。先於十二月十三日未蒙簡授今職以前。積勞病故。又刑部主事柯鉞。係安徽歙縣丁憂在籍人員。臣於咸豐十一年。調營委辦文案。殫心兵事。晝夜勞動。每治軍書。動中窅要。數年來頗資臂助。自本年四月。續丁父憂。該員勞瘁之軀。加以衰毀。嘔血數斗。遂至不支。遽於七月初一日在營病故。伏查該故員范泰亨器識深穩。綜貫數事。能勝艱鉅之任。柯鉞以儒生從戎。効學力行。清正不阿。皆爲時輩所推服。方冀共資歷練。儲爲大用。乃以從公盡瘁。未竟所長。竇志云徂。均堪憫惜。合無仰懇天恩。准將前任江西吉安府知府范泰亨。四品銜刑部候補主事柯鉞。各按本職本銜。勅部照軍營立功後病故例。從優議卹。以慰靈魂。理合附片陳請。伏乞聖鑒訓示。謹奏。

胡大任請獎片 同治三年十一月十三日

再記名四品京堂胡大任。於咸豐三年。由禮部候補主事。奉旨飭令回籍。幫辦團練。旋補主客司主事。洊升祠祭員外郎。該員在湖北本籍七年。倡辦全省牙釐。歲入二百數十萬兩。援兵四出。轉輸不絕。至今猶資其力。曾經臣與督臣官文。撫臣胡林翼會摺保奏。蒙恩記名以四品京堂提奏。十年四月。赴部供職。未幾因病請假出京。同治二年七月。兩廣督臣毛鴻賓。以該員在鄂辦釐得力。奏請起病調赴粵東。總理釐務。該員抵粵辦事以來。悉心區畫。釐事日起有功。即今克復金陵。東南底定。中外臣工。渥邀聖恩。優予獎敘。胡大任經理粵釐。自有微勞足錄。粵東釐務。現由本省督撫綜理。該員應即交卸入都。合無籲懇天恩。俯准胡大任免補員外郎原缺。仍以四品京堂遇缺開列在前。請旨簡用。藉資鼓勵之處。出自鳩施逾格。理合附片陳請。伏乞聖鑒訓示。謹奏。

黃冕請開缺片 同治三年十一月十三日

再布政使銜雲南迤東道黃冕。自上年九月間。經臣奏留蘇皖差委。旋以差竣。仍回湖南辦理東征釐局。茲據稟稱。一染受風溼。痲疾舊愈大發。兼之年逾七旬。心血日耗。舉動需人扶掖。醫治久不痊愈。萬難再供驅策。稟請委驗銷差。所有迤東道本任。并懇請開缺。一等情前來。伏查咸豐四五等年。湖南設立釐金鹽茶諸局。駱秉章委任

黃冕經理。歷著成效。十年八月。臣設立東征籌餉局。亦令其總持大綱。該員任事最勇。苟可勉力支持。斷不至託病辭勞。茲據稱年逾七十。骸疾增劇。由本省撫臣委驗屬實。應懇天恩。准開雲南迤東道缺。並准銷各局差使。令其安心調理。以示體恤。至黃冕函稟。請撤東征釐局。以符當年金陵克復。即裁東釐之初約。本應力踐前言。惟臣目下統軍尙多。欠餉過鉅。江西廣東之釐。皆已歸還該省。臣處入款太少。應暫留東征局之半釐。稍清遺勇之欠項。待至四年夏間。再當奏撤該局。以紓商力。而符初議。合併陳明。謹會同湖南撫臣惲世臨附片具奏。伏乞聖鑒訓示。謹奏。

豁免皖省錢漕摺 同治三年十二月二十八日

奏爲查明皖省各州縣應徵錢糧雜稅。分別被災輕重。酌擬蠲免年分。請旨遵行。恭摺仰祈聖鑒事。竊江蘇安徽兩省。歷年積欠錢糧及雜稅等項。於本年七月二十二日。經戶部奏奉諭旨。一截至克復之日爲止。著會國藩李鴻章喬松年各飭藩司。分別查明。彙奏請豁。一等因欽此。仰見聖主痼痲在抱。念切民瘼。欽感曷任。伏查江蘇被兵地方。應蠲錢漕。業經李鴻章隨時會摺奏辦。安徽八府五十九州縣。陷於粵逆者十居其七。破於捻匪叛練者十居其三。蹂躪情形。較他省爲尤甚。遵經督飭前藩司馬新貽會同臬司何璟。糧道王朝綸詳查去後。旋據查覆。一皖南徽寧廣等屬。兵戈之後。繼以凶年。百姓死亡殆盡。白骨遍野。此受害最重者也。皖北滁全來天盱等屬。爲豫勝營駐兵之地。亦爲羣賊往來之路。淮北鳳潁泗等屬。苗捻出沒。恣意焚殺。至再至三。此皆受害較重者也。沿江安池大廳和六等屬。多係水鄉。又遭兵燹。十年之久。此亦受害次重者也。溯查咸豐十年閏三月。奉上諭。懷遠鳳陽五河各縣。及臨淮鄉應徵咸豐七八九十等年錢漕。均著照部議概予豁免。一十一年十二月。奉上諭。江蘇安徽浙江三省失陷郡縣。明年錢糧一概蠲免。又先後奉准部文。豁免咸豐九年以前積欠錢糧漕米。蠲免同治二三年。安徽蒙亳等處錢漕。本年四月間。戶部議將會經失守地方。收復之後。以前積欠錢糧。全行豁免。均蒙俞允。此次續奉恩旨。自應欽遵。併案辦理。惟安徽用兵十餘年。通省淪陷。殺戮之重。焚掠之慘。殆難言喻。實是非常之奇禍。不同偶遇之偏災。縱有城池克復。一兩年者。田地荒蕪。耕種無人。徒有招徠之方。殊乏來歸之戶。新貽等公同察核。若僅照克復年分。請豁免糧。民力實有未逮。新賦尙難於輪納。積欠亦徒有其名。請擬援照

蒙亳二州縣。及江蘇武進陽湖兩縣之例。於克復後加豁一二年。以示格外體恤。除咸豐九年以前民欠錢糧漕米。已奉旨豁免不計外。請將受害最重之績溪寧國旌德太平宣城南陵涇縣青陽石埭廣德建平十一州縣。咸豐十年起至同治四年止。并受害較重之鳳陽及臨淮鄉懷遠壽州鳳台潁上霍邱滁州全椒來安盱眙天長東流歙縣黟縣貴池建德十六州縣。咸豐十年起。至同治三年止。同受害次重之懷寧桐城潛山太湖宿松望江祁門銅陵休寧英山當塗蕪湖繁昌合肥無爲舒城廬江巢縣定遠宿州五河和州含山六安霍山二十五州縣。咸豐十年起至同治二年止。暨受害稍次之婺源阜陽太和泗州及舊虹鄉靈璧五州縣。咸豐十年起至同治元年止。一應人民正雜錢糧銀米。商牙魚雜各稅。歷徵蘆課各項官租。概行豁免。又亳州蒙城二州縣。咸豐十年起至同治元年止。民欠錢漕。并請補行豁免。所有安慶新安宣州建陽廬州鳳陽滁州泗州長淮各衛錢糧銀米。亦與屯坐州縣一律照辦。內有津貼一項。向不豁免。第漕艘現已停運。旗丁同一被難。應請一併按年豁除。其城池完固。及克復多年。曾經徵收錢糧之各州縣。仍循例造冊。查明實欠在民者。始准豁免。徵存在官者。嚴行提解。藉端侵挪。則按律參追。凡被擾後未經啓徵之處。冊檔全失。應暫免造冊。俟將來開辦之年。統以未豁年分起。照例辦理。而本年業已起徵之處。亦難照額全完。并俟秋成後另行詳辦。等語。經會詳請奏前來。臣等復查安徽全省。賊擾殆徧。創鉅痛深。地方雖有已復之名。而田畝多係不耕之土。其尤甚者。或終日不過行人。百里不見炊煙。該司道等請將應徵錢漕。援例加豁之處。均係體察情形。迫於萬不得已。當該司道七月具詳時。廣德尙未克復。臣等以皖江南北未能一律肅清。又經展轉行查。是以陳奏稍遲。茲值殘歲將終。陽春布澤。皖省全清。已歷數月。合無籲懇天恩。准照所請年限。分別豁免。以紓民困。而廣皇仁。其廣德建平寧國縣三屬。被害尤酷。應照原詳加免一年。一併繕具清單。仰懇恩施。恭候命下之日。刊刻騰黃。徧行曉諭。使官吏悉絕弊端。而災黎均霑實惠。以副朝廷軫恤元元之意。所有應豁皖省錢漕雜稅。遵旨查覆緣由。謹會同漕運督臣吳棠合詞具奏。伏乞皇太后皇上聖鑒訓示。再同治元二兩年。尙有改辦抵徵之州縣。雖係捐助軍餉。亦與正賦無殊。應將該兩年抵徵未完者。比照錢糧一例請蠲。以免兩歧。其蠲免各處。現在已有開徵者。流抵將來應徵之項。即由各該州縣刊刻免單。詳開恩蠲年分。及流抵新賦字樣。按月付執。以爲流抵確據。合併陳明。謹奏。

欽奉諭旨覆陳近日軍情摺 同治三年十一月二十八日

奏爲欽奉疊次諭旨恭摺覆陳仰祈聖鑒事竊臘月以來疊奉十一月二十六、二十七、十二月初九、十五等日寄諭飭令劉連捷劉銘傳等迅赴豫省歸格格林沁調遣鮑超迅赴甘肅新疆飭臣與各省督撫酌撥協餉等因臣反覆籌維思所以助勦中原經營西北之道謹就愚慮所及爲我皇上分條陳之

一、勦辦捻匪宜用淮勇并宜用船運火器至周家口一帶也查捻匪出沒無定馬隊頗多楚軍不慣麵食不善馳騁於勦捻難期得力惟李鴻章所部淮勇居址相近熟悉捻匪行徑足以制其死命臣於辛酉年初招淮勇時曾以勦捻相期諸將亦毅然自任此次諭旨飭劉銘傳等赴豫維時李鴻章尙在金陵臣與之面商李鴻章以淮軍勦捻人地相宜義無可辭惟稱「劉銘傳等所用洋礮軍火最爲笨重須由水路運送路途河涸目下不能達豫」等語該撫回至蘇州又將此情切實具奏矣臣查蘇軍赴豫不特洋鎗炸礮宜由水路運送即子藥米糧亦須多備船隻源源濟運河南水次以周家口爲都會自揚州洪澤臨淮潁州以達於周家口計程三千餘里冬春水涸挽運極艱似若嫌其迂緩然淮勇所長全在火器須俟淮潁水漲將軍火米糧運足然後用其所長猛擊猛進無饋運不繼之患周家口距汴梁最近亦無驅賊北竄之患

一、西路軍務宜并力先清甘肅再及關外臣處餉項日絀不能協濟鮑軍也新疆回氛甚熾本宜及早撲滅惟寧夏淪陷階州未復秦隴戒嚴甘肅兵單餉絀軍無固志內地之根本未穩焉能揚威塞外須將嘉峪關以內一律掃蕩方能大舉出關鮑超接奉疊次恩旨急思回籍募勇立功西域以圖報項據該提督函商臣處詢問出關事宜并請將現統之楚軍全數帶赴新疆臣詳細函復言楚勇離甘太遠不服水土不如川勇相距較近曾在新疆著有成效由江西帶去舊部以六千人爲率由四川續添新軍以四千人爲率若再多則籌餉不易轉運尤難且還蜀募勇不宜用川東之人宜用川北保寧龍安兩府之人由龍安而至甘肅之階州古笄稱陰平道也由保寧昭化而至階州近日水陸通行之道也保龍二府兵勇與甘肅風氣不甚相遠若兩湖兵勇帶至階州倘其不服水土即須酌量遣回換募川勇乃可率之出關各等語函復去後旋接鮑超來文擬帶舊部八千三百人西征并由沈葆楨據咨代表奏矣聞閩中賊勢猖獗江西官紳頗欲留翼營全軍先清閩匪以臣

愚見。鮑超目下回籍葬親。所部全軍。儘可暫留江西防勦閩匪。待數月假滿以後。鮑超一面由夔府馳赴川北。另募新勇。大加訓練。宋國永一面由江西馳赴川東。管帶舊部。續行入甘。兩者均不致遲誤。至諭旨令臣與各省督撫協撥鮑軍之餉。臣處兵勇尙多。餉項奇絀。實無餘力規撥關外巨餉。伏乞聖鑒。

一、餉源日匱。必須多撤楚勇也。臣處向來募兵。約計入款出款。不甚懸絕。故積欠雖多。尙未譁瀆。自元年克復沿江十餘城。籌金陵之圍師。增南北之游兵。置各城之戍卒。陸續添至十萬人。於是入不敷出。爲數甚鉅。今春減去江西釐金之半。臣遂若旁皇失措。幸蒙聖恩。飭總理衙門撥銀五十萬兩。前後共收到四十餘萬。實出意想之外。臣今年所幸免決裂者。全賴此巨款彌縫其間。今則輪船經費。業經用罄。江西廣東之釐金。業經歸還該省。湖南東征局之半釐。除留清期票欠餉外。明年亦將裁撤。入款日見其隘。而出款不見其減。反覺其增。如蔣凝學請領赴甘途費銀四萬兩。楊岳斌請協募勇經費一萬兩。金陵科場及浚河修城共銀十餘萬兩。皆係決不可省之項。臣再四籌思。舍裁勇別無節餉之法。秋冬之間。臣處已撤勇三萬。明歲當續裁二萬餘人。金陵守兵。嘗裁去七千人。皖南朱岳隆唐義訓兩軍。亦應次第裁遣。皖北劉連捷朱南桂朱洪章三軍。前因行糧無措。未遽赴楚。旋接官文兩次來咨。以楚境漸次肅清。飭令該軍無須前往。現在金陵安謐。劉連捷患病甚深。應即先撤該軍。而朱南桂等二軍。亦在裁撤之列。除章志俊洪容海古隆賢陳炳文諸降將。另謀安插外。其餘總以多撤爲貴。騰出有用之餉。不特足供留防之勇。亦可解濟西征之軍。且數萬之衆。早散早遣。尙恐不免於後患。豈可聽其安閑長聚。致貽無窮之累。臣素非畏事之徒。近年統勇過多。揣揣焉若不克終日者。故薄立功。續。不敢自喜。但求遣散各勇。不生他變。庶免於咎戾。

以上各條。謹就近日軍情。諭旨再三訓飭者。縷晰覆陳。伏乞皇太后皇上聖鑒訓示。謹奏。

何桂珍等請予諡片 同治二年十一月二十八日

再臣欽奉八月二十一日寄諭。李元度一員。本日又催令左宗棠迅即查覆。俟覆奏到日。再降諭旨。江忠源已屢次加恩。於朝廷報功之典。亦尙允當。此次該大臣所請與何桂珍劉騰鴻畢金科等三員。應如何一併加恩之處。即著該大臣查明具奏。等因。欽此。除李元度之案。業經續奉諭旨交部定擬。江忠源之續。本年又蒙特恩賞。

給三等輕車都尉世職。未敢再乞恩施外。惟原任安徽寧池太廣道何桂珍。以道員率三百人。實以救援廬江。遂至鑄職。其在軍備嘗艱苦。挫折萬端。實屬世所罕聞。遽殞於叛人之手。臣至今猶憫其冤。補用直隸州知州道員例議卹。劉騰鴻銳志討賊。幾與羅澤南李續賓齊名。所部千餘人。由鄂援江。無堅不破。江西大難。因此而解。苦攻瑞州。中礮洞脅。齋志云。遠近悼惜。候補游擊雲南臨沅鎮都司畢金科。當世驍將。七年正月。景德鎮之役。實因餉絀而冒險求戰。輕兵深入。失此將材。此三人者。荷蒙先皇帝卹贈有差。忠勇邁倫。死事甚烈。深恐積久弗彰。合無籲懇天恩。將何桂珍劉騰鴻畢金科等三員。各予賜諡。以表忠蓋。而示來茲。謹附片覆陳。伏乞皇太后皇上聖鑒訓示。謹奏。

補陳寧國涇縣保案摺 同治四年二月十四日

奏爲易開俊劉松山兩軍堅守寧國涇縣各城。出力員弁懇恩獎敘。恭摺仰祈聖鑒事。竊總兵易開俊劉松山接統張運蘭舊部老湘營六千餘人。分駐寧國府涇縣兩城。自同治元年閏八月起。至二年正月止。大疫之後。苦戰苦守。經臣屢次具奏在案。時李世賢李秀成等僞王圍會國荃於兩花台。黃文金楊輔清等僞王。外則圍飽超於清弋江高祖山等處。內則圍易開俊劉松山於寧涇兩城。臣既將危險情形。縷晰具奏。并稱臣力不足任此艱鉅。疊請大臣來南會辦。厥後三處次第解圍。奏請優加獎敘。蒙恩允准。會國荃一軍。臣於二年四月間開單請獎。飽超一軍。於二年五月間開單請獎。惟易開俊劉松山兩軍。尙未奏獎。三年冬。因皖南肅清一案。行令各軍開單稟保。以爲凱撤之地。茲據易開俊自壽州來謁。面稱。一該兩軍於元年秋季冬。苦守寧國之役。業經奉旨准保。尙未出奏。一臣始悟前案漏未陳奏之失。因飭取元年秋季冬守城出力各員擬保升階。謹繕清單。仰懇天恩。俯准所請。以昭激勸。其把總外委兩項。照舊咨部核辦。臣於應奏之案。久未陳奏。實屬異常疎忽。相應請旨將臣交部議處。所有易開俊劉松山兩軍出力員弁。查案請獎緣由。理合由驛專摺補陳。伏乞皇太后皇上聖鑒訓示。再該兩軍於二年三月。屢有戰勝克城。奏明准保之案。俟彙入皖南肅清案內。續行具奏。合併聲明。謹奏。

報收輪船經費撥解銀兩摺 同治四年二月十四日

奏爲奉撥輪船經費。全數解清。恭摺奏報。仰祈聖鑒事。竊自上年三月間。以金陵功在垂成。餉需短絀。總理各國

事務衙門奏奉諭旨。該衙門總稅務司赫德所呈。上年奉撥輪船回國經費等項銀五十萬有奇。如果均係實存。即全數撥歸會國藩軍營充餉。又據聲稱。此項內有二十萬兩零。本屬現存有著之款。著李鴻章查明。先行儘數撥解會國藩軍營。該大臣亦可暫時以資散放。等因欽此。遵經宣示軍中。莫不仰賴皇仁。同聲欽感。旋即咨會江蘇撫臣李鴻章。飭據代理江海關道應寶時。轉據總稅務司赫德。於四月初二十一等日。解交銀二十萬八千三百三十四兩九分。又於海關原撥之五萬兩內。先行籌解銀三萬兩。迨丁日昌接署關道後。稔知此項銀兩。係急不可緩之需。節次催令該總稅務司等陸續措繳。乃赫德來函所欠洋銀十九萬餘元。已由香港寄回英國李泰國收用。其能否滙還。尙未可知。等語。續經函商赫德。馳書英國。設法諄催。始於九十兩月。將前項洋銀寄還彙解。計自四月起。截至十二月初止。粵閩各關解款。及補解應實時任內海關撥存之二萬兩。共解到銀四十六萬八千三百一兩三錢八分四釐。均分批赴營投納。仍將各關欠繳若干。李泰國欠繳若干。逐一清查。又據赫德滙交銀四萬三千二百一十七兩二錢四分八釐。統計先後解過規平銀五十一萬一千五百八十八兩六錢三分一釐。合庫平銀四十六萬六千七百十四兩八分核與五十萬有奇之數相符。據關道丁日昌開摺稟報前來。臣查上年四五月間。臣營餉項奇絀。束手無策。厥後金陵告克。大功纍成。即飽超赴援江西。師行無滯。全賴此項經費。保全危局。鼓舞軍心。該關道及總稅務司等。於數月之間。催繳齊全。絕無絲毫帶欠。固屬竭力經營。仰副朝廷軫恤戎行之意。而業經寄回英國之銀。竟能於數萬里外。如數滙還。足見天威遠播。震懾重洋。亦普天臣民可爲慶慰之機。除彙入軍需項下報部外。所有輪船經費全數解清緣由。理合專摺具奏。伏乞皇太后皇上聖鑒。謹奏。

江寧暫緩開關查案另籌辦貢摺 同治四年二月二十七日

奏爲酌度江寧現在情形。應暫緩開關。請旨飭查成案。籌款辦貢。仰祈聖鑒事。竊江寧城外。向設兩關。曰龍江。曰西新。例由織造兼司樞務。并徵城門進出貨稅。每年額徵龍江工關稅銀暨銅斤水脚銀五萬七千六百七兩零。盈餘銀五萬五千兩。西新戶關稅銀暨銅斤水脚銀四萬一千三百七十六兩零。盈餘銀三萬三千兩。共徵正餘銀十八萬六千九百八十三兩有奇。除開支關署應銷各款外。照例將所徵銀兩。按兩季解京。自咸豐三年。江寧

城陷。織造退處江北。計兩關停徵稅課十有二年。逮同治元年五月。曾國荃駐軍雨花台。楊岳斌彭玉麟水師分布江面。二年攻克九洲。上下游貨物漸通。乃在距城西南數十里之大勝關。設卡抽釐。爲湊發各營軍餉之用。上年六月。金陵克復後。十一月舉行鄉試。商民稍稍安集。又在城中添派門釐。專給上江兩縣耕牛籽種之用。他事不准動用分毫。凡此兩處釐金之所收。卽昔年兩關稅課之所出也。然地方元氣過傷。商民疲困。城中試辦一月。旋即改爲半釐。月僅收錢一千餘串。大勝關尙能月收錢三四千串。至正月。則收數較少。不過收錢一千五百餘串。若遽撤卡設關。斷不能足額徵之數。相去懸遠。加以銜暑多所開銷。胥役從而苛索。并恐所徵不敵釐卡之數。臣查上年杭州北新等關。開辦之後。徵解寥寥。經左宗棠專摺奏停。仰蒙俞允。江寧蹂躪日久。其凋敝較杭州爲尤甚。而城門進出。皆須收稅。更恐商民聞風裹足。有礙於招集流亡之政。應請援照浙省奏案。暫無庸開關徵稅。俟城市復業。各路商賈偕來。由臣體察情形。再行奏請設關。以復舊制。至織造衙門年例。額辦上用官用緞匹。及各項活計工料。軍興以來。久經停運。目下省城既復。縱機戶星散。不及如常開織。而本年乙丑大運。亦應由織造松瑞按照部派數目。量爲採買運解。以應官府至急之需。而盡職分當爲之事。惟此項經費。現據松瑞請向藩庫籌撥。無如藩署文卷全失。臣處又無案可稽。及攷之會典事例。亦僅載一條云。一江寧織辦緞紗。照杭州之例。每年於藩庫現存銀內。先支二萬兩。餘俟派文到日找給。等語。臣擬卽令藩司萬啓琛。遵會典所載。撥銀二萬。解交松瑞。先行購辦。而所辦年貢。共需用銀若干。向由何款撥解。相應請旨敕下戶部內務府查明成案具奏。行文到臣。遵照酌核辦理。其織造及所屬各員資廉薪資。并書吏。匠役。紙張。飯食等項。亦宜妥籌津貼。擬并照浙江奏定章程。另由釐金項下。按月提銀一千兩。歸該織造支用。自行彙案題銷。以資辦公。而重款項。所有江寧請緩開關。查案另籌辦貢緣。由理合繪摺陳奏。伏祈皇太后皇上聖鑒訓示。謹奏。

通籌滇黔大局摺 同治四年二月十五日

奏爲遵旨通籌滇黔大局。恭摺覆陳。仰祈聖鑒事。竊臣承准議政王軍機大臣字寄。同治四年二月二十六日奉。上諭。一滇黔慘遭蹂躪。十有餘年。誰非朝廷赤子。豈忍坐視其顛危。而不一拯救。惟以東南未盡盪平。西北尤關緊要。是以徵兵籌餉。不得不先清腹地。再顧邊陲。茲幸江浙肅清。東南底定。張亮基身任黔撫。自不得不爲滇黔

籌畫。曾國藩等前奏遣撤楚勇。能否派員酌帶赴黔。交張亮基調遣。及各省釐金。能否酌量先行分撥若干。以資接濟之處。著曾國藩李鴻章妥爲區畫。一等因欽此。又奉三月初四日上諭。此時滇中軍務未平。綱紀廢弛。非有督撫大員。統兵入滇。相機勦撫。不足挽回全局。林鴻年現擬進紮昭東。保全完善。以期節節前進。第餉項支絀。蹙後跋前。仍恐於事無益。官文曾國藩等素顧大局。務當與吳昌壽李瀚章等。各就本省情形。於撥解西征餉銀外。每月可以協解滇餉若干。酌定數目。迅速奏明辦理。一等因欽此。仰見皇上廬念民瘼。綏靖邊徼之至意。臣查滇省於天下爲最遠。黔省於天下爲最貧。當此時局糜爛之餘。實有鞭長莫及之勢。然聖主紹承大統。雖在新疆萬里之外。猶且尺土在所必爭。一民在所必救。况滇黔尙屬內地。豈得不力圖遠略。規復舊基。自古行軍之道。不一。而進兵必有根本之地。籌餉必有責成之人。故言謀江南者。必以上游爲根本。謀西域者。必以關內爲根本。理有固然。古今不易。臣愚竊謂滇當以蜀爲根本。即以籌餉責之四川總督。謀黔當以湘爲根本。即以籌餉責之湖南巡撫。蜀之南多與滇鄰。湘之西多與黔鄰。進勦即所以自防。勢有不得已者。義亦不得而辭。惟既令其專謀一方。則不能兼顧他省。試就湖南論之。近年西勦貴州。東防江西。本省之兵。爲數不少。而又有東征一局。以巨款解濟皖吳。此外又有滇捐之局。黔捐之局。江西捐局。浙江捐局。各處之籌餉愈多。則本省之進款愈少。斷不能大有所爲。上年惲世臨派周洪印戈艦等進勦貴州。連克古州都江上江天柱四城。黔民已有來蘇之望。當時若能乘勢進取。北勦鎮遠。南攻都勻。即可與貴陽省城通氣。勞崇光等亦不至坐困若此。因湖南餉項無幾。惲世臨不敢募勇添營。大舉深入。致負黔人之望。今皇上慨然遠慮。思出黔民於水火。飭臣與李鴻章妥爲區畫。新任撫臣李瀚章。本在巨營六年之久。又係李鴻章之胞兄。金陵回湘之將。蘇軍得力之員。多與李瀚章相知相信。若令選將練兵。專圖黔事。必可次第奏功。但東征局既裁之後。只能酌添本省之釐。以濟平黔之餉。不能多供甘肅。更不能分濟雲南。謀一則情專。餉分則力薄。此謀黔之一說也。又就四川論之。近年肅清本省。協濟外省。亦已悉索敝賦。杼軸久空。成都去滇省近三千里。萬山叢雜。兵多則糧運極艱。兵少則回匪難制。即竭蜀力以圖雲南。尙恐無濟。又况川北之保寧龍安。須以重兵防甘肅之賊。川南之酉陽瀘州。須以重兵防貴州之賊。其勢不能專事滇境。而盡棄他處。然滇省孤懸南徼。惟四川相距稍近。昭通東川二府。康熙以前。本隸四川。雍正年間始隸雲南。皇上

不忍棄滇民於化外。舍蜀別無下手之方。倘使四川督臣能兼督辦滇省軍務之銜。或竟赴敘州。駐紮半年。調度一切。每月專解滇餉四五萬。撫臣林鴻年進紮昭東。庶幾有恃無恐。而文武兵勇之相從入滇者。去其有往無歸之懼。乃可鼓其立功殺賊之心。數月之後。果能於昭東立定脚跟。修明政事。滇民感天子之不棄遐陬。信撫臣之足資保障。相率來歸。共圖勦回之法。然後開銅廠以興鼓鑄。造戰船以利轉運。或可挽回全局。此又謀滇之一說也。臣亦知湘蜀兩省。物力有限。然非湖南節節進剿。則守黔省者。將因援盡而終陷。非四川月月饋運。則進昭通者。將因糧絕而仍退。此後更難措手矣。張亮基欲徵兵於蘇皖。林鴻年欲分餉於長沙。其用心良苦。而其成效難期。倘蒙皇上俯采臣言。以黔事責之湘撫。以滇事責之川督。則甘肅之餉。應責成江蘇。江西浙江湖北四省。臣等均不敢有所推諉。所有遵旨通籌黔滇軍務緣由。謹繕摺由驛五百里覆奏。伏乞皇太后皇上聖鑒訓示。謹奏。

陳明請停湖南東征局片 同治四年二月十五日

再咸豐十年。長沙創立東征局。於本省釐金之外。重抽半釐。本屬商賈積不能平之事。當時冒不韙之名。而堅持定議者。黃冕一人之力為多。其局既設於黃冕宅內。是以百口譏議。多方阻撓。且有揚言焚燒黃冕住宅。以恐喝之者。其所以幸而辦成。全賴撫臣駱秉章主持其事。臣於十年四月。忝膺江督之命。進駐祁門。正值蘇常新陷。全皖糜爛。無片土可以籌餉。甚盼東征局成。借湘餉以勦吳賊。因聞物議紛滋。不敢遽奏。該局於八月辦成。駱秉章於十月赴蜀。臣於臘月底始行具奏。乃湘省商民。不怨駱秉章之主持。亦不甚怨臣之妄取。而專歸咎於黃冕之倡議。蓋籌餉本為愆府。籌本省之餉。專供越境之軍。尤為各省所無之創舉。眾口鑠金。勢所必然。同治二年。欽奉十月初二日寄諭。以黃冕不符衆論。飭臣隨時秉公查覈。臣查黃冕前官江南府縣。頗著劣蹟。後隨浙江軍營。獲咎甚重。然皆在二三十年以前。近年黃冕大招商議。則惟東征局一事。而其事實大有益於臣處。是以未及覆奏。蓋既不敢辨。人言之無因。而又不欲東征局之遽罷也。咸豐十一年。安慶垂克之際。糧餉罄盡。賴東征局解銀七萬。立慰軍心。厥後進兵雨花臺。孤軍深入。時虞飢潰。臣統軍過多。不能專顧金陵一軍。每當萬分危迫之際。臣弟曾國荃飛書乞餉於東征局。無不立時應付。外間不知者。但覺該局籌餉裕如。實則通省商民之心。以謂金陵早克一日。則此局早停一日。并心壹志。以助其成功者。非有餘也。求速停也。迨至去年六月。金陵倖克。湖南人民舉

手相慶。謂今而後東征事竣。物力可以稍紓矣。臣亦早思力踐初議。業於三年三月十二日先行陳奏一次。迨金陵克復。又於十二月十三日二十八日兩次具奏。議定今年夏閒。裁撤東征局。并先期函告楊岳斌。輝世臨。黃冕及湖南各官紳。其湘人來營及公車過此者。均力請早撤此局。臣堅訂而悉許之。湖湘之間。傳播殆遍。今楊岳斌請改東征之局。專供西征之餉。而張亮基。林鴻年。又奏分東征餉項。協濟滇黔。皆蒙皇上允准。臣伏念五年以來。湖南一省。獨加半釐。本已偏枯。臣奏停廣東江西之釐。而於桑梓。獨食其言。臣實用湖南各卡之釐。而令黃冕代被其謗。均有甚不安於心者。謹一一縷陳於聖主之前。俟四月間。臣即專摺裁停東征局務。俾湘民同感高厚之恩。而微臣亦稍釋隱微之疚。至於楊岳斌餉項。臣已與之訂定。自五月起。即由金陵協解三萬。適符東征局解臣之數。又加官文。李鴻章。沈葆楨。馬新貽等處。協款甘餉十餘萬。不患無著。滇黔之餉。臣同日另摺具奏矣。區區愚忱。伏乞皇太后皇上聖鑒訓示。謹奏。

報李世忠捐餉銀數片 同治四年三月十五日

再前任江南提督李世忠。捐助臣營軍餉。前於奏請開缺摺內。聲明俟有確數。再行具奏在案。茲查該提督曾派員弁在於淮南辦運皖岸官鹽。撤勇以後。即將鹽斤分批呈繳淮鹽六千四百五十餘引。照皖岸售價。合庫平銀十一萬三千七百八十五兩三錢九分。又據呈繳赤金三千二百五十餘兩。臣派船送至上海。札飭關道丁日昌變換庫平銀四萬五千九百四十四兩三錢六厘。共計庫平銀十五萬九千七百二十五兩九分六厘。均解臣營充餉。伏查該提督前次遣散弁勇。皆係自散私財。并未請領官項。自奉恩命。准其開缺回籍。滙荷浩蕩之仁。益矢涓埃之報。深知臣營餉絀。先後捐助至十五萬九千餘兩之多。尤屬急公好義。該提督受恩深重。雖未敢仰邀獎敘。而核與加廣中額之例相符。合無仰懇天恩俯准。以此項銀兩併入河南各捐款中。為將來加廣中額之地。理合附片陳請。伏乞皇太后皇上聖鑒。敕部查照施行。謹奏。

錄寄諭傳知曾國荃片 同治四年三月十五日

再欽奉二月二十六日寄諭。「傳知曾國荃如病已就痊。即行來京陛見。」等因。欽此。查臣弟國荃自上年開缺回籍後。趕緊醫治。病勢業已大減。旋接來信。溼瘡稍發。夜不成寐之症。迄未痊愈。臣囑以此症宜捐棄萬事。凝神

靜坐。不宜雜進藥劑。遽求速效。仰蒙聖主垂詢。殷殷期望。感悚曷已。遵將諭旨。恭錄傳知。究竟病體近復何如。能否入都陛見。已飭令自行具摺。寄至臣處。代爲呈遞矣。理合附片覆陳。伏乞聖鑒。謹奏。

彭玉麟辭漕督任片 同治四年二月二十五日

再正在封摺間。接奉三月十七日寄諭。令催彭玉麟速赴漕督署任。查彭玉麟自咸豐三年。初入臣營。堅與臣約。不願服官。嗣後屢經奏保。無不力辭。每除一官。卽具稟固請開缺。臣以其本在營中。無須赴任。未經爲之奏達。彭玉麟深以爲歎。咸豐十一年。擢任安徽巡撫。三次疏辭。臣亦代爲陳情一次。仰懇聖慈允准。此次欽奉恩旨。署理漕運總督。該侍郎聞命悚惶。專摺瀝陳。接奉批旨。仍飭迅赴署任。頃來金陵。具述積疾之深。再申開缺之請。臣相處日久。深知其勇於大義。淡於浮榮。不願仕宦。係出至誠。未便強爲阻止。且該侍郎久領水師。本於陸師不甚諳習。而失血舊病。亦不宜更膺重任。可否仰懇天恩。俯准另行簡員。署理漕運總督。免致彭玉麟再四固辭。貽誤清淮。廣東兩處防務。出自聖裁。寄諭又飭防徐宿裏下河等處。現在豫匪竄擾山東。蔓延曹濟。至於曲阜。勢極飄忽。若折而南向。一入江境。防不勝防。而徐州清江兩處。尤爲喫緊。臣前聞豫逆逼近徐州之信。卽咨調駐防鎮江之樹字六營。移赴徐州。而李鶴章亦調該軍移駐清江。兩處相隔三百餘里。勢難兼顧。欽奉諭旨。臣卽日當會商李鴻章。札飭樹字六營。專駐清江。而另檄現駐六安之劉銘傳。周盛波兩軍。移防徐宿。與東兵收夾擊之效。除俟劉銘傳等拔營後。詳細奏報外。理合附片先陳梗概。仰慰宸廑。伏乞皇太后皇上聖鑒訓示。謹奏。

覆奏劉銘傳等軍赴防摺 同治四年四月十六日

奏爲欽奉疊次諭旨。恭摺覆奏。仰祈聖鑒事。竊臣接奉本年四月初二日寄諭。江南派往淮揚之張樹珊吳毓芬兩軍。并歐陽利見所帶礮船。及疊諭派防江北之兵。著會國藩李鴻章飭令速赴江北。并嚴飭黃翼升礮船星夜前赴駐裏下河一帶。不准片刻遲延。等因。又奉初四日寄諭。歐陽利見於三月二十二日起程。到淮必速。張樹珊張樹珊等軍。何以尙未起程。著會國藩李鴻章飛催赴援。以厚兵力。劉銘傳一軍。已據會國藩奏稱。調赴邳宿。著卽嚴催前進。如其再敢觀望不前。致賊蹤日肆滋蔓。卽將該提督從重參處。昨據彭玉麟奏。力辭署理漕督。已有旨俯如所請。該員現仍著以兵部侍郎。總統水師。著卽迅撥輕利礮船數十號。前赴清淮一帶邊防。如能

親自統帶前來。會同吳棠辦理剿匪事宜。更資得力。一等因欽此。查裏下河以清淮爲屏蔽。又以揚州爲後路。臣於三月二十七日巡歷江面。先至鎮江對岸。查勘淮鹽移棧之地。旋至揚州。察看各營布置之法。揚防向有萬餘人。此次吳毓芬部下僅有二千人。尙嫌力薄。自不可棄此要郡。更移他處。因催張樹珊統帶樹字六營。護軍一營。於四月初一日由鎮江拔隊起程。臣亦於初三日由揚州回省。檄令黃翼升帶張光泰等營。於初五日駛赴清江。仍由江寧藩庫解銀一萬。海州分司解銀二萬。接濟吳棠餉需。稍固軍心。旋准吳棠先後來函。歐陽利見於初一日到清江浦防所。張樹珊張光泰均於初六日到防。張樹聲自蘇州啓行。於初八日到防。黃翼升於初十日到防。援軍四集。裏下河一帶。當可無虞。劉銘傳周盛波統兵萬餘。自六安拔營。程途較遠。軍火笨重。據報初六七八等日。分起就道。至十二日全隊成行。計日內亦將到邳宿等處矣。兵部侍郎臣彭玉麟。於未奉諭旨。飭撥礮船之先。已派定海鎮總兵喻俊明。管帶水師。前往清江。協同防剿。偷賊勢趨重下游。擬親統所部。兼程赴援。正與聖謨不謀而合。目下捻氛所至。又在郟城西北。似東路漸鬆。而西路喫緊。臣嘗會商吳棠李鴻章。飭令黃翼升張樹聲等。力固東防。劉銘傳周盛波等。嚴扼西境。各專責成。冀與北路僧格林沁大軍。共收夾擊之效。所有欽奉疊次諭旨。恭摺由驛覆陳。伏乞皇太后皇上聖鑒訓示。謹奏。

袁甲三請復建臨淮專祠摺 同治四年四月十六日

奏爲鳳陽紳民。籲懇建復故漕督袁甲三臨淮專祠。據情陳奏。仰祈聖鑒事。竊據安徽布政司。詳據鳳陽府屬各紳民。知府田端書等。聯名稟稱。『罰不辟賢。朝廷之大法。恩不忍釋。士庶之公心。本微顯志晦之文。春秋不寬於責備。永服教長神之祀。俎豆難已於追崇。伏讀同治三年三月廿九日。奉上諭。『前任漕運總督袁甲三。准在臨淮地方。建立專祠。』天語遙頤。人情胥暢。當事探輿論以入告。澤隨淮水俱長。聖人錄舊績以加恩。祠繼陳州再建。民爭趨役。正期不日告成。過或因人。忽更自天降譴。旋於七月初六日。奉上諭。『前次降旨。准將該故漕督在臨淮建祠之處。著即撤銷。』仰見聖明。一無私照。功過兩不相妨。惟是朝有典章。既明示勸懲之義。人懷威德。究難忘崇報之情。漢隆沔水之祠。不爲街亭而追輟。唐仆魏徵之碣。未逾貞觀而重興。竊思袁前漕督。以德意感人。以忠誠報國。清廉兩字。雖悍夫亦信其生平。勤苦十年。至臨危不辭。夫艱鉅。識奮屯於細柳。誰忘保障之勞。鯨鯨餘

蔭於甘棠。猶見拊循之惠。卽壽州紳練一案。辦理誠有不善。然而用人之過。何至遽敗其身名。雖在與難之家。亦可共明其心跡。況乎倖邀寬典。九原早銜聖主之恩。若竟重撤明裡。一眚恐掩終身之德。現在淮安府專祠。業經後任漕督具疏奏請。奉旨准建。其西至廬大。東至淮揚。遺愛在民。願爲建祠私致崇敬者。不可勝數。環乞再懇天恩。垂念下情。仍申前旨。免其撤銷。等情。於三年十月具詳到臣。臣與撫臣喬松年。正函商移奏間。又據該故漕督之子袁保恆呈稱。「伊父自咸豐九年。再督皖軍。克復鳳陽各城關後。連年兵餉兩窮。髮捻交訖。於事會萬難之際。堅忍辱負重之心。歷盡艱危。卒全大局。至今父老。謫思舊德。積久不忘。情願納還本身官職。抵銷先人處分。仍准臨淮建祠。以愜紳民之望。」等情。呈請代奏前來。臣查已故漕督袁甲三。統兵多年。久駐臨淮。先經奉旨建祠。旋有因案撤銷之命。一予一奪。悉本大公。豈容臣下再有瀆請。第念臨淮當南北衝要。而餉尤奇絀。該故漕督卒以二萬餘。飢疲之衆。控悍寇而保巖疆。坎坷艱難。爲近來所罕見。臣昔年共事皖境。每一書至。未嘗不歎其困苦難堪之中。具有堅貞不拔之概。報功崇祀。禮亦宜之。此次袁保恆所陳。雖屬人子之私願。而該紳民所請。實由衆論之僉同。陳州本籍及淮安服官之地。先後請建祠宇。均蒙俞允。臨淮一祠。業經度地鳩工。中途停輟。衆心若有歉然不安者。既據紳民等合詞籲請。何敢匿不以聞。可否仰懇天恩。俯念袁甲三生前支撐危局。宥其小過。仍准在於臨淮地方。建復專祠。以慰衆望。出自聖主鴻裁。所有紳民懇復前漕督臨淮專祠緣由。謹會同安徽撫臣喬松年。據情具奏。伏乞皇太后皇上聖鑒訓示。謹奏。

劉松山等緩赴甘肅片 同治四年四月十六日

再皖南鎮總兵唐義訓。前因陝甘督臣楊岳斌奏調赴甘。於上年十二月帶病請假。回籍葬親。臣卽飭其謁見楊岳斌。面商募勇赴甘事宜。其皖南鎮家務。由臣覈委記名總兵劉松山署理。正擬具摺陳奏間。旋經楊岳斌奏奉諭旨。「唐義訓既稱舊疾復發。著毋庸調赴甘省。惟皖南重鎮。豈可懸缺待人。卽著會國藩查明唐義訓病勢難痊。卽行奏令開缺。請旨另行簡放。」等因。欽此。查唐義訓久在兵間。積受風溼。向有頭暈之疾。時發時止。接據楊岳斌來咨。亦稱唐義訓回籍後。舊病增劇。難冀速痊。已奏明病軀不能遠征。無庸隨赴甘肅。該鎮雜營業逾四月。尙未來皖銷假。自未可仍飭回任。應請旨飭下兵部將唐義訓皖南鎮總兵開缺。另行辦理。近三年來。臣以徽州

防務責成唐義訓。以寧國防務責成易開險劉松山二人。去年二月。又令金國琛駐紮徽境。與唐義訓協同防剿。本年正月。易開俊移駐皖北。履壽春鎮本任。唐義訓又開缺回籍。目下寧防僅劉松山一人。徽防僅金國琛一人。而金國琛蒙恩簡授鞏秦階道。劉松山蒙恩簡授肅州鎮總兵。均奉諭旨飭催赴甘。臣查福建李汪兩股。悍黨尙多。據探該逆屢欲回竄江西。皖南徽寧兩防。不可懈弛。所有金國琛一員。應請暫緩赴甘。俟閩浙江皖軍事大定。徽州撤防。再行奏明。飭赴新任。至劉松山一員。久駐寧國。深得民心。近署皖南鎮篆務。整頓營伍。綽有調理。臣欲另派委員。接辦寧防。一時實難其選。合無仰懇天恩。即以劉松山調補皖南鎮總兵。實於地方防務。兩有裨益。如蒙俞允。所遺甘肅肅州鎮總兵一缺。并請旨另賜簡放。以重職守。唐義訓病雖未愈。臣當僅令力疾來皖。俟欠餉有著。即將該軍遣撤。以節糜費。理合附片覆陳。伏乞皇太后皇上聖鑒訓示。謹奏。

李宗羲暫留運司任片 同治四年四月十六日

再欽奉同治四年三月十七日寄諭。一署兩淮鹽運使李宗羲。已經簡任安徽按察使。現當整飭離網之際。必須廉明練達。有爲有守之員。方足以資整頓。著會國藩遴派委員。先往接署。仍著酌保數員。候旨簡放。總期操守謹嚴。洞悉鹽務情形。於興利除弊各事宜。實力舉行。庶於國課民生。兩有裨益。一等因欽此。仰見皇上慎簡百僚。周咨博訪之至意。伏查上年冬月。臣派委李宗羲總辦江北厘務。本年正月。奏委署理運司。兩年以來。歷奉諭旨。令臣革除厘金積弊。因飭李宗羲悉心考察。重訂新章。裁撤小卡。刪去煩苛。議定於五月初一日。試行新定章程。至淮南鹽務。昔年本由儀徵設棧。改捆出江。自咸豐七年。改由泰興岸之口岸出江。該處河道淺窄。挽運維艱。查得離瓜洲三里許。名新河口地方。本有老河一道。舊河挑濬。可屯小船。沿江築堤。可建倉棧。外江駐泊鹽艘。亦無風波之虞。近日李宗羲督同官商。經理挑河設棧事宜。臣昨往履勘一次。議定自閏五月內。各鹽均改由新河出江。是鹽厘兩事。皆於五六月間。新立規模。李宗羲正值經營喫緊之際。未便更易生手。合無仰懇天恩。俯准李宗羲暫留兩淮運司之任。并暨緩北上陛見。俟厘務新章已定。臣當另派委員接辦鹽務。移棧已定。臣遵即酌保堪勝運司者數員。請旨簡放。屆時再飭李宗羲赴安徽臬司之任。是否有當。理合附片陳請。伏乞皇太后皇上聖鑒訓示。謹奏。

奏奉諭旨覆陳摺 同治四年五月初一日

奏爲欽奉疊次諭旨恭摺覆陳仰祈聖鑒事竊近月以來豫捻東竄南徧清淮北踰兗沂欲近黃河南岸而鮑超所部霆軍之赴甘者行次湖北金口又以索餉潰變上廬宸慮惶悚曷任謹將現在籌辦情形爲皇上敬陳其略伏讀四月十八日寄諭「官文奏霆軍赴川路經鄂省金口地方乘閒潰散一摺現在官軍旣星夜跟追該勇丁等自必聞風急竄趨向靡定江西安徽湖南等省各路可通著會國藩孫長絨喬松年李瀚章石贊清各派兵勇於湖北交界地方飛速探蹤攔截」又奉旨「傳知鮑超趕緊起程取道湖北一帶順便將已散勇丁招集若干申明紀律統帶赴閩剿賊」等因查此起勇丁中途潰亂固憚萬里遠征之苦竄由積年欠餉之多前准官文孫長絨先後函牘暨接各路告變之書臣卽飛咨鮑超令其迅赴鄂中妥爲調停免貽巨患迨奉此次諭旨又經恭錄咨催刻日東下長途數千里尙非一蹴可至而該潰勇聞已在咸寧戕官掠人旋走崇陽通城擾及江西之義寧新昌境內正在焦灼籌慮間忽接鮑超部將婁雲慶來文備述援閩霆軍待餉不至日難半飽賣馬易食行將不能忍飢臣恐一波未平一波又起乃飛函商之孫長絨速發大批餉米藉回閩中軍士之心免爲金口潰卒所誘不謂臣書未到該軍先於四月初九夜在上杭城外糧絕而譁幾釀巨禍逼脅婁雲慶率之回江就食幸江省聞信後隨發銀六萬兩迎解軍前上杭飢噪一軍或可不致決裂而金口叛亂一股斷難再事羈縻臣現調劉連捷朱洪章朱南桂三軍由宿松渡過九江徑赴瑞州臨江兩府嚴防陸路以保贛河之西并咨彭玉麟酌派水師數營布置湖口南康饒州吳城四處分防水路一面出示撫慰在閩霆營無令與金口潰卒勾結一面飛致鮑超星速來江招安已叛之卒總以解散爲妙此辦理霆營叛勇之大概也至水師由浦入東一節屢奉諭旨飭催并奉四月二十三日寄諭「據劉長佑奏賊由東平濟寧折竄西南大名開長防務均形喫重更須亟集援軍以防賊匪奔突著會國藩飭令劉銘傳懷遠前督酌帶所部數千名北行無稍延緩所餘兵勇著該督遴選統帶以期得力賊旣由東平濟寧折竄西南有渡黃上竄直隸之勢江南水陸援軍俱落賊後黃翼升歐陽利見水師及彭玉麟等師船會否溯流上駛如吳棠前奏駐紮濟寧一帶扼之黃運兩河之交著吳棠彭玉麟斟酌情形相機迅速調派」等因查水師礮船宜用於長江大川之中不宜用於岸高河窄之地岸高則大礮難於仰攻河窄則戰

船難於轉旋。而陸賊轉得據高俯擊。兩岸之槍子火彈。一一落我船中。自處必敗之道。現據黃翼升呈稱。前赴運河察看一次。計清江至濟寧七百餘里。河道久淤。處處擱淺。自台莊迤北。隄岸愈高。河面愈狹。僅容一舟。有閘二十餘處。閘口陡險。必須多人絞車而上。水師斷難施展。等語。臣查吳棠前奏所謂扼賊於黃運之交者。指黃河以南。運河以東言之也。倘使黃南運東。果有數路陸兵。或可兜剿而痛懲之。而該處現在并無大枝陸兵。僅有親王僧格林沁一軍。而步隊太少。勞動太久。其劉銘傳周盛波等軍萬餘人。則尙在運河以西。諭旨令劉銘傳徑赴直隸。則又須渡黃河以北。與吳棠所稱黃運之交者。均不相合。臣之愚見。以爲礮船扼住運河。賊無歸路。仍慮偪之北竄。似不如讓出運河之西。驅回皖豫之界。則勦辦較易爲力。而直東始可無虞。至於扼防黃河。似可不用礮船。但嚴檄州縣禁止船舶南岸。該逆卽難飛渡。如必須用礮船。則黃河之船與江船之式迥殊。南人弄船與北邊水性亦異。似宜由山東河南撫臣另造舢板。分列黃運兩河。嚴輔可永無捺匪之患。比之臣處派船北駛。轉運較便。調遣較靈。是否有當。恭候聖裁。侍臣彭玉麟前於四月二十三日親率舢板兩營。駛赴清淮。與黃翼升共籌防禦。目下清淮軍事已鬆。東境又勢難兼顧。臣愚以爲彭玉麟黃翼升。可不必溯流上駛。應以黃翼升留駐清江一路。而以彭玉麟回駐江西一路。會同孫長絨籌防叛勇。及閩匪諸事。其劉銘傳一軍。亦不必遽入直隸。宜剿賊於黃河以南。不宜聽賊渡黃。震驚畿輔。如蒙俞允。臣卽咨商彭玉麟由浦回江。馳駐湖口。藉以鎮撫上游。并檄行劉銘傳暫留江皖。相機防禦。此又籌辦齊豫捺匪之大概也。臣智小謀大。精力日頹。髮捺未平。而叛勇復起。兵力已弱。而事變紛乘。夙夜憂灼。不知所籌有當萬一否。所有疊奉諭旨。飭辦各緣由。謹繕摺由驛五百里覆陳。伏乞皇太后皇上聖鑒訓示。謹奏。

陳明霆營餉細情形片 同治四年五月初一日

再提督鮑超靈營一軍。係咸豐六年冬間。胡林翼招練而成。在湖北剿賊四年。久稱勁旅。鄂省糧臺餉項。悉經發清。迨咸豐十年六月。臣忝任江督。調該軍赴徽剿賊。嗣後歸臣糧臺發餉。臣統帶亦歷四年。陸續欠該軍餉項至百二十餘萬之多。遠同治三年四月。調靈軍援剿江西。咨明自五月以後。應歸江西糧臺發餉。并於十月間奏明在案。聞江西給餉亦少。窮窘難支。該軍積勞最久。立功最多。平日本乏紀律。將卒以屢勝而驕。又以無餉而怨。又

值統將回蜀之時。又有新疆遠征之苦。故赴川之八千人。臣早慮其潰散。曾於三月十五日密奏一次。然臣慮其潰而滋事。猶不料其叛而爲寇。是否別有情節。尙須詳細訪查。至甚雲慶一軍。在閩鼓噪。則實係因飢生變。別無他故。臣先接該總兵三月二十五日來文。據稱。『該軍馬步二十餘營。日難半飽。暫令賣私馬充飢。』等語。四月初九生變之後。又據該營幫辦致臣處委員書。亦稱閩省斗米千錢。江省餉項不繼。四月初九夜。魏左正左營。史宗興部下勇丁。不能忍飢。忽然譁噪。震撼數里。聲稱。『出關各營。已在南昌發前欠六箇月口糧。何獨我營如此。缺餉。食粥不飽。必須放回江西要餉。』其詞似有忿激亂之情。迨初十一等日。譁謀三次。十二日行至武平。拾獲勇丁揭帖一紙。中有云。『復往江西地界。必須安分守己。如有一人再鬧。我等衆人不依。』其詞又有做戒畏禍之意。大抵因飢生變。毫無疑義。臣擬函商孫長絨。先撫上杭之飢軍。再辦金口之叛卒。聞孫長絨業已解銀六萬。中途迎交。或可不致決裂。惟是魏營欠餉多至百數十萬。其各皆在徵臣。不在江西。又臣明知魏營出關。必將生變。乃不能於去冬奏請停調。直至三月始奏。釀成今日之禍。皆臣區畫不善。恩信不孚。各無可辭。除俟金口兵潰原委。詳查到日。再當據實奏明。自請嚴處外。理合附片先行具陳。伏乞皇太后皇上聖鑒訓示。謹奏。

遵旨赴山東剿賊并陳萬難迅速情形摺 同治四年五月初九日

奏爲遵旨前赴山東剿賊并瀝陳萬難迅速情形。恭摺仰祈聖鑒事。竊臣欽奉同治四年四月二十九日上諭。『欽差大臣協辦大學士兩江總督一等毅勇侯曾國藩。著即前赴山東一帶。督兵剿賊。兩江總督著李鴻章暫行署理。江蘇巡撫著劉郁膏暫行護理。欽此。』又准軍機大臣字寄。四月二十九。五月初一等日。疊次上諭。飭臣趕緊赴援。保衛畿疆各等因。臣部署一切。擬於月內起程。先赴徐州。以徐州爲老營。派一良將駐紮濟寧。臣亦當親赴濟寧一帶。察看形勢。惟僧格林沁以督師重臣。猝爾捐軀。震遠近之人心。長逆賊之凶餒。朝廷責臣討賊。至切且速。卽山東官民。亦望巨星速北上。臣躊躇再四。有萬難迅速者數端。請爲我皇上縷晰陳之。臣自江寧啓程。不能不酌帶楚勇數營。以資護衛。查臣部現有之勇。除劉連捷等新調江西。易開俊等分防皖南皖北外。金陵未撤之兵。僅存十六營。人人思歸。三月間。因御史朱鎮參奏。諭旨飭令裁撤。當卽宣示各營。飭將秦淮淤土挑竣。一律撤遣。此次聞有山東之行。各勇紛紛求歸。不願北征。勸諭三日。始定議裁撤者十三營。北征者僅四營。又新募兩

營合三千人。作爲隨臣左右之親兵。此外惟劉松山寧國一軍。相距較近。現已飛檄往調。等候劉松山前來。如其部卒不願北征。臣亦不復相驗。當酌帶楚軍將弁。另募徐州勇丁。倣臣處之營制而約束之。存楚師之規模。開齊充之風氣。李鴻章所部之淮勇。已稍習於北方矣。然尙專食稻米。不慣麥麵。若徐充間能另出勁旅。則北路數省。到處相宜。臣鑒於金口叛兵之禍。不敢強楚勇以遠征。現僅劉銘傳周盛波兩軍。歸臣調遣。淮勇雖稱勁旅。人數尙少。不敷分撥。不得已爲此迂緩之謀。添募徐方之士。約須三四月。乃能訓練成軍。此其不能迅速者一也。捻匪積年擄掠。戰馬極多。此次蒙古馬隊潰散。恐亦爲賊所得。現聞賊馬多至萬餘匹。馳驟平原。其鋒甚銳。臣處昔亦有馬二千。除撥交左宗棠李榕共三百匹外。餘皆撥交會國荃鮑超兩處。數月以來。其隸會國荃李榕部下者。業已全數遣散。其隸鮑超部下者。卽係上杭飢餓之軍。尙未安撫就緒。劉銘傳一軍。添募馬隊。甫經李鴻章於三月間奏請出口買馬。臣亦擬在徐州添練馬隊。派員前赴古北口一帶。採買戰馬千匹。約計往返程途。至速亦須三月。加以訓練。非再得兩月。斷難集事。若竟不佐以馬隊。而強驅步兵。以當騎賊。雖有賁育之勇。亦將不戰自靡。此其不能迅速者二也。扼賊北竄。惟黃河天險。最爲可恃。防河之策。自爲目前第一要義。臣上次摺內。卽擬由河南山東撫臣另造舢板戰船。現在事機尤緊。直隸齊豫三省。均須迅速造船。分列河干。以壯聲勢。據吳棠所奏。江南之船。於黃河水性不合。與臣前奏相符。所有斟酌船式。採辦木料。招募水勇。應由該三省督撫悉心籌畫。因地制宜。惟礮位一宗。北省較少。金陵存留尙多。臣擬撥礮三百尊。分濟三省。派船解至寧濟州。由該三省派船前來迎接。黃河水師辦成。畿輔可永無捻匪之患。其事雖緩。其利甚大。然非有四五月工夫。難期就緒。此其不能迅速者三也。至劉銘傳一軍。不宜遽入直隸。宜剿賊於黃河以南。臣於上次摺內陳明在案。節次寄諭。嚴催劉銘傳渡河。徑赴劉長佑軍營。果使於事有濟。自應設法北渡。惟目前濮州范縣荷澤鄆城等處。黃河南岸。一片賊氛。若非節節掃蕩。焉能衝過北渡。若使遠避賊鋒。繞路行走。則上游須繞至河南蘭儀等處。下游須繞至山東歷城長清等處。非迂繞五百六里。不能徑行渡河。且該軍現在南岸。尙未遇賊一擊。若賊未北渡。而該軍先至北岸。反置勁旅於無用之地。似於軍情地勢。均未相宜。臣昨接劉銘傳來文。批令在魚臺滕縣附近運河之處駐紮。擬俟糧運稍。有把握。再令進駐濟寧。正籌度間。接奉五月初三日寄諭。飭劉銘傳由金鄉嘉祥一帶黃河南岸。向西兜剿。又接

國瑞來咨。亦欲劉銘傳在黃河南岸協剿。與臣暫不北渡之說相合。以理勢揆之。黃河夏秋盛漲。劉長佑親統大軍防堵河北。該逆應難飛渡。不特劉銘傳目下不宜渡黃也。卽將來事勢稍定。亦不宜令河南之兵兼顧河北。查河北僅有直隸一省。近年捻患尚少。河南有齊豫蘇皖四省。近年捻患極多。據臣愚見。直隸宜另籌防禦之兵。但令分守河岸。齊豫蘇皖四省。宜另籌追剿之師。不使馳援河北。蓋楚勇淮勇。向例每日僅行四十里。黃河船少。萬人渡河。動逾旬日。若令時而北渡。時而南渡。我則疲於奔命。賊則相去已遠。殊爲失策。此因行軍不能迅速。遂不能兼顧直隸者。又其一端也。僧格林沁之忠勇絕倫。婦孺皆知。華夷傳誦。其統兵追賊。日行七八十里。或百餘里不等。然步隊不及馬隊。騫馬不及夏馬。勢必參差不齊。聞僧格林沁於三月馳至仗上。步隊後七日始到兗州。馬隊亦有後三日始到者。行走太速。勢不能自帶米糧。埋鍋造飯。行文州縣。令其供支麵飯。兵燹困苦之餘。州縣力難具數千人之食。又或倉猝得信。家丁逃匿。或兩縣交界。彼此推諉。將士爭先落後。飢飽不均。有連日不得一餐者。其隊伍難整在此。其行軍神速亦在此。臣虞行兵之例。每日行軍。支帳埋鍋造飯。不向州縣索米供應。略師古法。日行僅四十里。少或二三十里。李鴻章之淮勇。亦仿楚師之法。其步步穩妥在此。其行軍遲鈍亦在此。僧格林沁剿辦此賊。一年以來。周歷湖北安徽河南江蘇山東五省。若他人接辦此賊。斷不能兼顧五省。不特不能至湖北也。卽齊豫蘇皖四省。亦不能處處兼顧。如以徐州爲老營。則山東祇能辦臨沂曹濟四郡。而濟東泰臨以北。力不逮矣。河南祇能辦歸陳兩郡。而開許南汝以西。力不逮矣。江蘇祇能辦淮徐海三郡。安徽祇能辦廬鳳潁泗四郡。餘屬皆力不逮矣。此四省十三府州者。縱橫千里。從古四戰之場。歷年捻匪出沒最熟之區。若以此責成督辦之臣。而以餘屬責成四省之巡撫。則汛地各有專屬。庶軍務漸有歸宿。此賊已成流寇。飄忽靡常。宜各練有定之兵。乃足以制無定之賊。此因行軍不能迅速。遂不能徧顧各省者。又其一端也。方今賢帥新隕。劇寇方張。山東之莒援。急於星火。而臣策戰事乃在半年以後。北路之最重。莫如畿輔。而臣策直隸。乃須另籌防兵。此皆駭人聽聞之言。殆不免於物議紛騰。交章責備。然臣籌思累日。非專力於捻匪最熟之十三府州。不足以弭流寇之禍。理合直陳芻蕘。備聖主之採擇。所有遵旨督師剿賊。及滙陳萬難迅速緣由。恭摺由驛六百里馳陳。伏乞皇太后皇上聖鑒。逐條訓示。謹奏。

請另簡知兵大員督辦北路軍務片 同治四年五月初九日

再臣精力頹憊不能再任艱鉅業經五次具奏在案近則衰態更增說話至二十句舌尖輒木險蹇不能再說以接見人客爲苦前聞霆營金口潰變之信憂心如焚徹夜不寐近聞賢王郟城殉節之信彌加焦灼寸心無故驚怖更事愈久心膽愈小公事應了之件積壓甚多所部兵勇除霆營及已撤者外餘存尙近三萬均屬強弩之末不堪驅策本日奏疏中所稱專力十三府州者臣自問能言之而不能行之惟有仰懇天恩另簡知兵大員督辦北路軍務稍寬臣之責任臣願以閑散人員在營効力不敢置身事外忘盡瘁之大義亦不敢久縮兵符自知將致債事而不預爲一言區區愚忱伏乞聖慈垂鑒訓示謹奏

謹陳籌辦情形并請收回成命摺 同治四年五月十二日

奏爲欽奉諭旨謹陳現在籌辦情形并懇收回成命恭摺仰祈聖鑒事竊臣於五月初九日將赴東剿賊萬難迅速情形專疏覆奏在案拜摺後欽奉同治四年五月初四日上諭「欽差大臣協辦大學士兩江總督一等毅勇侯曾國藩現赴山東一帶督師剿賊所有直隸山東河南三省旗綠各營及地方文武員弁均著歸曾國藩節制調遣如該地方文武有不遵調度者卽由該大臣指名嚴參欽此」又承准軍機大臣字寄五月初四日上諭飭臣剋日統帶親軍小隊輕騎就道兼程北上并以時值艱難申誠微臣不可意存謙抑仍辭節制三省之命致往返再有耽延各等因跪誦之下感悚莫名伏查駐軍徐州經營十三府州者將來剿擒之常策也先願畿輔安定直東人心者目下應變之急圖也黃河當仲夏盛漲之候北岸有劉長佑列防之兵謂賊難以渡河者事理之常可以臆度也汛遠而防兵太單賊多而土匪勾引恐賊猝然渡河者軍情之變不可逆料也萬一賊竟北渡則臣前疏所言未免狃於常而忘於變明於將來而昧於目前正在籌思無策之際接准李鴻章來咨已派常鎮道潘鼎新統帶所部鼎字淮勇十營由輪船馳赴天津有此一軍可以壯畿輔之威可以慰聖主之懷可以補微臣迂緩之過至劉銘傳一軍接該提督來文定與五月初八日起程赴直臣查曹濟等處一片賊氛國瑞駐紮濟寧深恐孤軍受敵再有挫失因檄令劉銘傳軍赴濟寧與國瑞會商進北如賊竟渡河北則該提督一軍應由東阿平陰一帶渡黃在於東昌境內迎剿若賊未渡河則仍應駐紮濟寧進剿鄆城一帶之賊有潘鼎新專駐河北之師

以助劉長佑。有劉銘傳可南可北之師。以助國瑞。目前局勢似已可保無虞。臣到山東後。即當力擊曹濟之賊。驅之西竄。俟此次風波大定。仍當回駐徐州。就臣上次摺內所稱十三府州者。扼要設防。分道兜剿。務使擒匪東出西沒。皆不能出吾網羅之外。庶幾彼勞我逸。致人而不致於人。是否有當。伏候聖裁。惟節制直東河南三省。則微臣不敢拜此寵命。臣以菲材。忝司兵柄。江南矗立寸功。皆諸將艱難百戰而成。臣并未躬冒矢石。頻叨懋賞。抱慚已久。今則精力衰頹。公事廢弛。心神則無故驚怖。多言則舌端蹇澀。自問蒲柳之姿。萬難再膺艱鉅。即久駐徐州。專辦十三府州擒匪。亦自度能言之而不能行之。前疏請另簡督辦大臣。而臣以閒散人員。効力其間。尙未奉到批旨。更何敢肩荷非常。節制三省。惟有籲懇天恩。收回成命。俾臣稍安愚拙之分。不爲直責所歸。感戴鴻慈。曷其有極。至直東河南三省軍事。凡臣思慮所能及。自當知無不言。言無不盡。直隸獨處河北。除此次宜集各路之兵。急援畿輔外。嗣後應責成該省總督。另籌防兵。不可調南岸之師。往來疲黃。疲於奔命。河南山東兩省。除豫之歸陳。齊之充沂曹濟。另由大臣督辦外。其餘各屬。應責成該省總督。另籌防兵。不可使剿擒之師。追逐千里。永無歸宿。臣前疏已略陳梗概。茲更反覆申明。不特微臣難勝鉅任。即才力十倍於臣者。籌辦此賊。似亦不必有節制三省之名。區區愚誠。伏乞俯加采納。臣急欲啓程。因撤勇之遺資。征兵之途費。需銀十餘萬。尙未措齊。而水陸各軍。留於江皖者。經手事件極多。必待李鴻章到寧後。一一面爲交代。頭緒乃可清晰。除續行具奏外。所有現辦情形。及瀝陳下悃各緣由。謹繕摺由驛六百里馳奏。伏乞皇太后皇上聖鑒訓示。謹奏。

祁宿藻補祥厚祠片 同治四年五月十二日

再已故江寧布政使祁宿藻。前於咸豐三年正月。粵賊圍省之三日。積勞病劇。嘔血數升而歿。時方賊烽四起。未及歸窺。歿後而盾諸城北僻地。厥後十日。金陵城陷。同治三年六月。省城克復。經前大學士祁雋藻。遣家丁南來。於舊時厝所。檢獲遺櫬。昇歸山西原籍。此八月間事。臣尙未至金陵也。溯查該故員祁宿藻。自咸豐元年調任江寧。正值豐北河決。流民載道。即於途次出三千金濟之。明年周歷災區。籌辦賑務。數月中全活無算。人多憫其勞。而頌其德。三年正月。賊由湖北武昌東下。該故員發庫儲製軍械。令各屬兵米。及南門外各商屯積之米。悉移入城。將爲嬰城堅守之計。乃部署甫定。而疾已大作。迨賊蕩城下。獨隨前江寧將軍祥厚等。扶疾登陴。晝則指麾禦

敵夜則露立女牆。如是者三晝夜。心摧力竭。血湧如潮。遂至不起。死之日。紳民軍士。無不感動悲涕。疏入。蒙先皇帝准照布政使軍營病故例。加等賜卹。現查當時同城殉節諸臣。自將軍祥厚以下各忠骸。多未訪獲。而該故員獨得輿觀以歸。九原應無遺憾。惟跡其忠厚抑鬱。齋憾先殂。與城陷殉節者無異。而於報功崇祀之文。尙闕焉而未備。合無仰懇天恩。俯准將該故員祁宿藻。附入將軍祥厚專祠。以光祀典。而妥忠魂。實出鴻施逾格。謹附片陳請。伏乞皇太后皇上聖鑒訓示。謹奏。

調李鶴章辦理營務片 同治四年五月十三日

再臣此次馳赴山東。隨帶楚勇無多。所有潘鼎新劉銘傳張樹聲周盛波等軍。因皆係淮勇。經李鴻章兄弟苦心訓練而成者。臣擬帶甘涼道李鶴章前往總理營務處。庶幾上下交孚。呼應又靈。惟該員抱病已久。前在江蘇統領湘淮各軍。於攻克太倉時。駭受槍傷。未及醫治收口。一有焦勞。卽流膿血。且久居棚帳。積受寒溼。漏疾日劇。不能鞍馬。上年九月奉旨簡授甘涼道缺。旋因臣將有皖楚之行。檄調淮軍渡江剿捻。札飭李鶴章辦理行營營務。未能赴任。本年二月中旬。該員寒熱交作。舊傷血流不止。漏核腫大。困憊異常。卽經具稟臣處。請代奏開缺調理。臣以李氏兄弟。所向有功。不赴甘肅。迹涉規避。雖經批准。尙未代爲陳奏。此次臣帶李鶴章北征。擬令隨臣左右。調護贊襄。不使常履行間。衝鋒陷陣。倘或傷疾并發。准其隨時離營醫治。以示體恤。惟淮勇剿捻。非年餘所能速了。而李鶴章之病。亦非數月所能速痊。合無仰懇天恩。准開李鶴章甘涼道本缺。俾該員有調養之便。而臣亦收指臂之效。實屬兩有裨益。又查李鴻章之季弟。候選。郎中李昭慶。英毅穩練。亞於諸兄。將來亦可獨當一面。臣擬在徐州添募馬步各隊。將楚勇淮勇之風氣。推而行之北方。暗收中原梟悍之徒。變爲國家干城之士。李昭慶似可勝訓練之任。并懇天恩。飭下李鴻章。令李昭慶卽赴臣營差遣。於治軍必有成效。二者如均蒙俞允。所遺甘涼道一缺。應請旨另賜簡放。以重職守。謹附片陳請。伏乞聖鑒訓示。謹奏。

恭報交卸督篆帶兵出省日期摺 同治四年五月二十四日

奏爲恭報微臣交卸督篆帶兵出省日期。仰祈聖鑒事。竊臣疊奉諭旨。飭赴山東剿賊。遵將籌辦調派各情形。於初九十三等日。兩次繕陳在案。連日料簡諸務。於奏撤金陵十二營外。續撤三營。僅存舊勇一營。仍在所撤各勇

中。選募數營。湊成三千人之數。另調寧國劉松山一軍。均由金陵陸行。以達清江。又調壽州易開俊一軍。由臨淮北行。以達徐州。頃接張樹聲來稟。曹州捻黨已由徐州回竄皖境。又接劉銘傳來文。濟寧捻黨亦將由徐州西竄皖豫。如果屬實。則山東情形漸熾。當無渡黃北犯之慮。臣復飛檄易開俊一軍。仍留壽鳳。不必遽赴徐州矣。署督臣李鴻章。於二十日自蘇起程。現已行抵江寧。一切兵事餉事。臣與籌商定議。當將總督關防鹽政印信。於二十二日委員齎交任事。臣亦即部勒行隊。於二十五日督帶北上。俟到清江後。察看徐州濟寧。何處喫緊。再行相機調度。所有微臣交卸督篆。帶兵出省緣由。謹繕摺由驛五百里馳陳。伏乞皇太后皇上聖鑒訓示。謹奏。

請飭鮑營所買戰馬改解山東片 同治四年五月二十四日

再臣此次帶兵出省。擬在徐州添練馬隊。派員出口探買戰馬千匹。業於初九日奏明在案。查本年二月間。提督鮑超先會籌備馬價銀兩。派委副將蕭以德。都司馬長清。前赴張家口古北口一帶。採辦戰馬八百匹。經臣札飭該員等買馬進口。由京至陝西暫駐。聽候鮑超撥用。其時霽營將赴甘肅。故令在陝等候也。現因霽營兵變。鮑超已奉諭旨赴閩剿賊。毋庸前赴新疆。江閩之間。山路叢雜。不利騎隊。自應將此項馬匹。改解臣營。相應請旨敕下兵部。俟該員蕭以德等到部請票時。飭將所辦戰馬。徑赴山東兗濟一帶。探明臣特駐紮地方。趕解來營。俾資練習。仍請援照歷年成案。由部知照經過各關口。將蕭以德等馬匹。按數查驗。照例免稅放行。除咨部查照外。理合附片陳請。伏乞聖鑒訓示。謹奏。

裁撤湖南東征局片 同治四年五月二十四日

再湖南東征一局。係於本省釐金外。加抽半釐。每貨至卡。如本省抽一兩者。另抽東局五錢。本省抽百文者。另抽東局五十文。爲各省所未有。實與重征無異。自設局以至於今。已滿五年。商賈疲困。民怨沸騰。臣危困時。所重有賴者在此。臣數年來。所最疚心者亦在此。前經三次具奏。輾於本年夏間撤局。本年三月。又詳晰密陳。聲明四月間。裁停東征局務。欽奉寄諭。須俟甘肅之餉。籌定數目。確有把握。再撤該局。近接各處函咨。除臣於揚防節省項下。奏定月解甘餉三萬外。浙江奏定月解二萬。江蘇奏定月解一萬。湖北奏明停止各路協餉。聞議定每月解甘三萬五千兩。湖南亦議月解一萬兩。通計甘肅軍餉。每月可得十萬五千兩。臣自咸豐四年帶兵至九年止。從無

月得現餉五萬者。卽十年十一年。忝任江督。亦無月得現餉十萬者。今甘肅月入十萬有奇。確有把握。據臣觀之。實不爲少。甘餉既已有著。而臣又將移師山東。斷不敢再留東征局名目。以重困於商民。而食言於桑梓。理合奏明。一面札飭局員李明墀等。將東征局卡概行停止。一面函商撫臣李瀚章。於向抽東征貨厘之中。酌擇奏物數種。仍留厘金數成。增寫本省厘票內。作爲協濟甘肅之餉。是雖無東征局之名。已暗留協助甘餉之實。臣之所謂湖南議解一萬者。係就最少之月言之。如月收較旺。尙可儘數多解。由湖南撫臣酌量辦理。所有裁撤東征局及籌計甘餉緣由。附片由驛陳明。伏乞皇太后皇上聖鑒訓示。謹奏。

查勘陸建瀛殉節情形片 同治四年五月二十四日

再已故兩江總督陸建瀛。前於咸豐三年正月。督師失利。退守江寧省城。旣而城陷。吳中人士謗議繁興。至有守備汪大成誣稟污壞之案。諭旨飭交前督臣怡良密查。旋經怡良密奏該故督死事大略。力辨其誣。咸豐三年六月三十日。奉硃批另有旨。陸建瀛專閫大員。斷不至昧於大節。汪大成任意誣毀。可惡之至。欽此。惟原奏中尙有「俟省城克復。親自查勘。以證虛實。」等語。是克城以後。臣爲江督。卽有應行查勘之責。上年六月。據蒙城縣知縣林用光稟。據家人和祥面稱。該故督陸建瀛。實於城陷後。被賊殺害。係由該家人隨同巡捕官姚俞鄭興堂。江繼勳。章長貴等。照料棺斂。瘞於水月庵側菜園中。言之甚詳。經臣批令轉飭和祥。迅至江寧。以憑細詢。一面行文湖北原籍。飭傳該家屬知照。旋據該故督之子陸式毅。帶同和祥前來。臣復加派道員陳慶長。潘鴻燾等。於十一月初六日。認明瘞埋基址。眼同啓視。遺骸猶存。該故督實係當時在城殉難。克全大節。毫無疑義。當由陸式毅重爲棺斂。臣親往弔祭。派委礮船。護送回籍。理合附片陳明。伏乞聖鑒。謹奏。

皖軍被困派兵援剿摺 同治四年閏五月十一日

奏爲捻衆南趨。皖軍被困。擬派重兵援剿。恭摺馳陳。仰祈聖鑒事。竊臣於五月二十五日。帶兵出省。陳明俟到清江後。察看徐州濟寧何處喫緊。再行相機調度。恭疏馳奏在案。茲於閏五月初八日。行抵清江。疊據安徽布政使英翰稟稱。五月二十五日。捻匪竄陷高鎮。集後雋河。糧路業已不通。二十八日。復有大股三四萬人。如牆而進。猛撲該軍部將牛師韓頭營。經我軍奮力轟擊。賊始稍退。盤踞各村四五十里外。火光燭天。擒獲賊黨供稱。張

總懸糾合任柱牛老洪穎文光等股銳意攻蒙雒河營盤。現在四面被圍萬分危急請派大隊星速救援一等語又據總兵易開俊稟稱「該軍奉調赴徐於五月二十七日行抵蒙城正高直鎗集被陷雒河圍困暫駐蒙城而賊蹤分布渦河兩岸逼近蒙城糧路亦已梗塞該軍僅三千人斷不能禦數萬之寇若馳援雒河深恐孤軍尙事更長賊氛」等情具稟請示臣批飭該總兵穩紮穩守不可輕進貽誤伏查蒙亳雒河皆羣捻之老窠同治二年經親王僧格林沁擒斬各酋肅清該處議定於雒河設立新縣築城增防今髮捻四股合而爲一併力爭此以爲窟穴英翰以藩司大員素稱皖北得力之師萬一因援絕而潰則雒河北岸一片逆氛已屬不可收拾倘竟竄越淮南上而壽州六安以至安慶下而廬州滁和以至揚郡均係累年百戰恢復之疆土何堪再被蹂躪臣現檄調提督黃翼升水師由高良潤進洪澤湖以達臨淮調總兵周盛波陸師由徐郡赴宿州以援蒙亳惟水師難入小港不能竟達雒河陸軍不滿五千亦難解此重圍不得已飛調劉銘傳一軍自濟寧馳回徐州以拯皖北之危近日疊奉寄諭令劉銘傳駐防山東潘鼎新駐防直隸現在東境已無戰事而皖北危困如此別無大支勁旅可以獨當一面自應調劉銘傳回皖作爲往來遊擊之師請旨飭下該提督星速旋軍先顧皖疆其潘鼎新一軍專爲拱衛畿輔而往謹遵諭旨不遽調赴他省臣所部楚勇因道遠年久力竭精疲暮氣將乘疊經縝晰具奏今會國丞一軍遣撤將畢飽超一軍半潰於京口半留於贛州難以復用此次金陵羅麓森等新募之軍寧國劉松山調出之軍現尙未至清江亦恐南人北征遷地非良皇上命臣辦捻不能不專資淮勇之力擬俟八九月間直隸齊豫三省礮船造成臣親赴黃河驗畢或奏調潘鼎新兼顧東豫屆時再行請旨辦理臣在清江小駐數日俟步隊到齊即當馳赴徐州相機調度所有皖軍被圍擬派重兵援剿緣由謹繕摺由驛五百里馳陳伏乞皇太后皇上聖鑒訓示謹奏

再請收回節制三省成命片 同治四年閏五月十一日

再臣上次具摺力辭節制直隸山東河南三省之命未蒙俞允在皇上略短取長不惜假以威柄而微臣度德量力實難任此事權即使賊氛尙在北路亦將專疏再辭得請乃已况現在大股捻逆全趨皖境劉銘傳周盛波兩軍均已調回皖北助剿將來臣之兵力祇能顧及河南之歸陳山東之兗沂曹濟其餘各府萬難兼顧直隸則遠

在黃河北岸。臣力恐不能遠。徒冒虛名。全無實際。寸心惴惴。深抱不安。從前親王僧格林沁節制直東豫三省。每當追賊之際。晝食蠶糲。夜宿單棚。勦勞卓著。臣自愧十分不及一二。縱令臣習勞耐苦。效法該親王之所爲。然以封疆大吏較之。勦滅賢王。禮數回當大減。名分豈可齊衡。惟有籲懇天恩。明降諭旨。收回節制三省成命。俾臣不居極大之名。稍安愚拙之分。至於剿捻事宜。凡思慮所能及。才力所能及者。自當殫竭血誠。與三省督撫和衷商辦。冀以速殲逆氛。仰紓宸慮。區區愚忱。伏乞皇太后皇上聖鑒訓示。謹奏。

賊衆全萃皖境先赴臨淮摺 同治四年閏五月二十一日

奏爲羣賊全萃皖境。臣應先駐臨淮。後赴徐州。恭摺仰祈聖鑒事。竊臣行抵清江。卽將皖軍被圍。擬派重兵援剿。各緣由。於本月十一日馳奏在案。十四日羅麓森等金陵六營。齊抵清江。劉松山寧國一軍。老勇在途。苦求假歸。挑選募補。行程稍滯。甫於二十日全隊到齊。臣在此小駐十二日。疊聞留防徽州各軍。索餉滋鬧。力籌撥銀鎮撫。晝夜憂灼。本擬步隊到齊。卽日馳赴徐州。相機調度。連日接據安徽布政使英翰來稟。該軍困於雒河集。已先帶二十餘騎。退至西洋集。其部將史念祖等尙能相約死守。以待援兵。等語。又據壽春鎮總兵易開俊來稟。該軍進紮西洋集。擬先攻高鐘。以解雒河之圍。惟該總兵目疾增劇。勢將警廢。請派員接統該軍。各等情。臣查英翰出重圍而求援。易開俊臨大敵而嬰疾。均屬萬分危急。臣若先赴徐州。則去賊愈遠。諸軍無所稟承。適接撫臣喬松年咨函。亦稱賊聚皖北。官軍正可合圍會剿。爲一勞永逸之計。臣與吳棠熟商。遂定議親率金陵六營。寧國六營。先赴臨淮關駐紮。俟皖事稍鬆。再行進駐徐州。臣初次奏稱專力於四省十三府州之地。今既由臨淮進兵。將來安徽卽以臨淮爲老營。江蘇卽以徐州爲老營。山東以濟寧爲老營。河南以周家口爲老營。四路各駐大兵。多儲糧草子藥。爲四省之重鎮。一省有急。三省往援。其援軍之糧藥。卽取給於受援之地。庶幾往來神速。呼吸相通。就目前諸將而論。劉銘傳潘鼎新均可獨當一面。張樹聲周盛波兩軍相合。可當一面。劉松山易開俊兩軍相合。可當一面。四路專汛之兵。頗敷分布。此外須另籌游兵一枝。擬派候選郎中李昭慶。訓練馬隊。合之親王僧格林沁舊部馬步各軍。同爲游擊之師。臣私衷區畫如此。軍情瞬息千變。不知將來能成規模否。至糧運爲用兵第一要義。周家口臨淮兩軍。以淮河潁河爲運道。濟寧徐州兩軍。以運河爲運道。擬趁有水之時。先將米糧子藥。

悉數分運四處。存儲備用。已在清江設立轉運局。派淮揚道吳世熊專司其事。如四路軍食充足。則四省有首尾相應之象。而諸軍無疲於奔命之虞。或可以速補還徐圖功效。所有羣賊萃皖。微臣先赴臨淮緣由。謹繕摺由驛五百里馳陳。伏乞皇太后皇上聖鑒訓示。謹奏。

請派陳國瑞赴河南片 同治四年閏五月二十一日

正封摺間。欽奉閏五月十六日寄諭。陳國瑞劉銘傳兩軍。曾有互鬪之案。此時同赴皖北剿賊。該提督總兵等風知大義。諒不敢以私廢公。惟東省兵力尙薄。倘賊匪乘虛回竄。甚屬可虞。陳國瑞一軍。如尙未起程。即著國瑞傳知。暫留山東駐紮。遏賊回竄。毋庸赴皖。如業已起程前進。該軍應否駐紮淮徐一帶。堵遏賊蹤。抑朝回山東之處。著會國藩斟酌。妥爲調派。一等因欽此。查陳國瑞去年在皖。曾因英翰鄭寶昌告變。仇隙甚深。昨在濟寧長溝。其部卒入劉銘傳營內搶奪洋槍。被劉營殺傷頗衆。餘怒未平。英翰現在雒河集被圍。劉銘傳馳回援救。該兩軍均在皖北。若陳國瑞與之共事一處。不免各存意見。互相猜疑。統將微有猜疑。則弁勇必搆煽紛爭。恐於強寇環伺之時。又有私鬪意外之變。據臣愚見。陳國瑞一軍。應暫駐紮河南之歸德。如歸德無賊。即赴南汝光三屬防剿。聽候河南撫臣吳昌壽調遣。毋庸再赴皖境。如已入皖界。亦應折回豫省。少遏逆匪回竄之路。而杜諸軍內訌之漸。除照會陳國瑞。并咨行各處外。理合附片覆奏。伏乞聖鑒。謹奏。

派員迎提軍馬摺 同治四年閏五月二十一日

奏爲派委司道大員經理交代事件。并迎提各項軍馬。恭摺奏祈聖鑒事。竊臣欽奉閏五月初七日寄諭。國瑞奏。將各項馬兵步勇安插。即行回京。一摺。除酌留直東二省兵勇外。其餘應留兵勇軍火。均著造具清冊。面交會國藩接管。會國藩此時計已抵徐郡。所有國瑞應交會國藩馬步各隊及軍火等件。即著該大臣飛速迎提。以資攻剿。毋任遷延觀望。現在暫駐曹考之色爾回善所帶馬隊。應如何酌量留防。及進剿之處。著會國藩妥籌調遣。前據阿克敦布奏稱。邊調山東軍營馬一等千匹。已於五月十九等日派員管解進口。前赴山東。當經批令將此項馬匹。解至曹考。探明軍營交授。會國藩即行派員迎提。歸該大臣調撥應用。一等因欽此。自應欽遵辦理。惟目前皖北危急。臣改駐臨淮。不能親赴濟寧。并不克遽抵徐州。國瑞勢難久待。應由臣派員前往經理交

代事件。查前任浙江鹽運使李榕。統帶鈞字一軍。業已凱撤。現隨臣北上。擬即派令前往濟寧。稟商國瑞。將親王僧格林沁原部馬步各隊。各應行交代之件。逐一承領。又欽奉五月初九日寄諭。『潘鼎新等駐師張秋。係爲屏蔽北路。惟此起勁軍駐於無賊之地。亦甚可惜。著該大臣酌量調派。』等因。據臣愚見。此時直隸兵力。儘數分布。潘鼎新一軍。似應由張秋移駐濟寧。一則曹濟等處敗兵游勇極多。必須有重兵鎮駐。以資彈壓。一則徐州濟寧兩軍。互相犄角。可以伐賊回竄之謀。如蒙俞允。臣卽札飭潘鼎新速至濟寧。會同李榕料理交代事宜。凡國瑞應留兵勇軍火。均將清冊交李榕潘鼎新接管。其溫德勒克西等馬隊。遵旨交色爾固管帶。應令卽赴徐州。聽臣就近調遣。阿克敦布遵調之營馬千匹。俟解至曹考之日。由李榕潘鼎新迎提。飭令并解徐州。聽候撥用。所有派員經理交代。迎提軍馬緣由。恭摺由驛五百里馳奏。伏乞皇太后皇上聖鑒訓示。謹奏。

調馬隊官兵赴皖北助剿摺 同治四年閏五月二十八日

奏爲吉林黑龍江馬隊官兵。謹遵節次諭旨。調赴皖北助剿。恭摺仰祈聖鑒事。竊臣欽奉閏五月初一初五初七十六等日寄諭。飭將親王僧格林沁所遺馬步各隊。酌量調派。并令色爾固管帶統溫德勒克西所帶馬隊。迅赴臣營。妥籌布置。臣遵卽檄派前任浙江鹽運使李榕。前赴濟寧。稟請國瑞承領交代事件。并迎提軍火兵馬。於本月二十一日奏明在案。旋准國瑞來咨。鈔送奏稿。親王僧格林沁所遺馬步各隊。已悉數分撥完竣。并無一騎撥歸臣營。其托倫布所帶馬隊。則奏交直隸督臣調遣。欽奉閏五月十九日寄諭。『國瑞擬將托倫布所帶馬隊官兵四百九十六員名。應交劉長佑之處。著改撥河南交吳昌壽酌量調遣。』等因。欽此。伏查現在賊勢全萃皖境。雉河集被圍已久。賊馬四出滋擾。北至宿州城外及濉溪口等集。西至潁上縣之江口集。蒙亳數百里間。一片逆氣。非馬隊斷不足以制勝。就目前賊情而論。不特將勁騎調赴直隸。置諸無用之地。卽河南軍情。亦視皖北爲較輕。若馬隊調赴河南後。再由歸德夏邑永城一帶。援剿皖北。須繞遠四百餘里。實屬緩不濟急。所有托倫布等統帶吉林黑龍江馬隊四百九十六員名。應卽全數由濟寧徑赴徐州。與劉銘傳先後援皖。以輔步隊之不足。而扼騎賊之凶鋒。除由臣咨商國瑞外。相應請旨。飭下托倫布等。剋日起程前來。庶於現在軍務有益。而於節次諭旨亦屬相符。至色爾固管一員。現在河南穿孝。尙難遽赴山東。其溫德勒克西所帶馬隊。諭旨飭赴臣營者。國瑞摺

中井無其人。惟撥交山東之烏爾圖那遜等馬隊。至一千三百餘名之多。是否即係溫德勒克西一起。應俟查明另案奏辦。所有請調馬隊官兵緣由。恭摺由驛五百里馳奏。伏乞皇太后皇上聖鑒訓示。再臣於二十二日自清江啓行。二十五六等日渡洪澤湖。計程月內可抵臨淮。合併陳明。謹奏。

仍請收回節制三省成命片 同治四年閏五月二十八日

再臣欽奉閏五月十六日上諭。一會國藩因節制三省。任大責重。復懇請收回成命。具見謙抑之忱。第賊氛猖獗。時事孔艱。事權不一。則一切調度事宜。深恐呼應不靈。該大臣惟當力任艱鉅。與三省督撫和衷籌畫。將此股賊衆剋期殄滅。彼時三省軍務既平。自可毋庸該督節制。既爲其實。毋避其名。萬不可稍存顧慮之心。再有續請。一等因欽此。跪誦之下。悚懼彌深。臣自度近日之精神。與目前之兵力。苟稍稱此重任。亦何敢再三續請。惟精力實已衰頹。而所帶楚勇數千。整肅遠不如昔。此外概用李鴻章之淮勇。雖情誼本同一家。而人數不備二萬。馬隊尙無一騎。與各省會辦此寇。則可以微臣總攬全綱。則力有不逮。若僅虛與委蛇。姑存其名。又與臣篤實之志趣相乖。臣博觀史冊。近閱世情。竊見無才而位高於衆。則轉瞬必致禍災。無德而權重於人。則羣情必生疑忌。臣之德薄才短。自知已久。不敢因會立功而自忘其陋。今尙未開兩江總督之缺。而更增節制三省之名。臣何人斯。曷克當此。耿耿寸衷。如負重疚。惟有仍懇天恩俯准。收回成命。但責臣以會辦剿捻事宜。自當殫精竭誠。通力合作。不敢稍存畛域之見。如不蒙聖慈俞允。明降諭旨。臣更當累疏瀆陳。雖上干嚴譴。所不敢辭。區區愚忱。伏乞皇太后皇上聖鑒訓示。謹奏。

欽奉諭旨覆陳摺 同治四年七月初八日

奏爲欽奉諭旨。恭摺覆陳。仰祈聖鑒事。竊臣於七月初五日。承准軍機大臣字寄。六月二十九日奉上諭。一現在髮捻股匪。嚮聚豫疆。該省兵力不敷。剿辦著會國藩喬松年。迅飭張得勝。史念祖等軍。馳赴豫省。會合李世玉等。將賴汶光等股匪。剿除淨盡。并著會國藩添派官兵。并飭副都統托倫布富森保等馬隊。星馳前赴吳昌壽軍營。聽候調遣。其春壽及烏爾圖那遜兩起馬隊。亦著會國藩喬松年。速飭赴豫助剿。勿稍遲緩。皖北是否尙有匪。官軍現在剿辦情形若何。及如何布置一切情形。即著迅速馳奏。此後皖鄂防剿事宜。官文等當隨時具奏。毋得

仍前濡緩。致朝廷久深股盼。曾國藩并著遵奉前旨。酌量情形。擇要前進駐紮。以便就近調度。等因欽此。查維河集解圍以後。髮捻西竄。分爲兩路。其向北路者。爲張總愚任柱等。由柘城太康扶溝洧川徑趨而西。現聞將至汝洛。尙無細耗。其向南路者。爲賴汶光李尤等。由太和竄至沈邱。蹂躪陳州周家口一帶。臣於半月以前。已檄調直隸提督劉銘傳全軍。馳赴周家口。後接陳州知府告急之稟。又添調烏爾圖那遜等馬隊。同援陳州。積潦沒途。行走極艱。然屈指計之。該兩軍日內當已抵陳州。與賊接仗矣。北竄汝洛一股。臣軍萬難追及。南竄陳州一股。有劉銘傳等兩軍。應足制之。萬一兵力尙單。再派周盛波托倫布兩軍。前往助之。周盛波之步隊。臣批令進駐亳州。以便就近援陳。托倫布之馬隊。前來謁見時。臣已面囑其整頓一切。預備赴豫矣。此臣酌派馬步各隊援剿河南之情形也。諭旨又飭富森保前赴吳昌壽軍營。查富森保之馬隊。即係色爾固營所管之一起。富森保現在蕭縣。因大水阻隔。患病未愈。不能來營。與臣一見。色爾固善曾來臨淮。臣接見數次。據稱馬隊馳驅太久。又在曹南新挫。人馬俱疲。鎗械不齊。馬匹多缺。必須大加整頓。乃可剿賊。臣囑其即在徐州認真整頓。不特色爾固善一起。然也。又有達爾濟一起。係奏明由山東撥歸臣處者。現據閩敬銘咨稱。達爾濟在兗州患病。察哈爾官兵病者幾及一半。派訥穆錦帶吉林官兵及馬勇。先到徐州。現亦人困馬疲。急須整理。又有帕克巴札普一起。係新由察哈爾調來者。官兵不嫻戰事。馬之病斃者尤多。是數軍者。若非大加整理。斷難驅之向敵。臣本欲急赴徐州。料簡一切。無如月餘以來。淮河盛漲。沿河民間及臣之營壘。皆在水中。築隄捍禦。時虞潰決。百物缺乏。臨淮屯紮重兵。應儲之軍糧器械。應修之米倉藥庫。均未就緒。大小道路處處被淹。應俟晴久水涸。乃可起程赴徐。此馬隊必須整理。臣尙未至徐州之情形也。諭旨又令臣酌量前進。擇要駐紮。以便就近調度。臣雖至愚。豈不思步步進逼。急圖殲滅之方。惟臣細觀賊情。已成流寇行徑。若賊流而官兵與之俱流。則節節尾追。著著落後。假令此時追至汝洛。待賊南趨光黃。又折而追至光黃。或賊東趨徐充。又折而追至徐充。雖終歲奔波。終無大損於賊。臣之愚見。常欲堅持初議。於擒匪必經之途。駐紮重兵。如劉銘傳駐周家口。賊若回竄扶溝鄆陵。即自周家口迎頭擊之。賊竄張樹聲等駐徐州。賊若回竄永城蕭縣。即自徐州迎頭擊之。推之賊竄蒙宿。則劉松山等自臨淮迎頭擊之。賊竄曹軍。則潘鼎新自濟寧迎頭擊之。變尾追之局。爲攔頭之師。以有定之兵。制無定之寇。庶幾漸有歸宿。皇上如以

臣議爲可探。則於臣駐兵四處之外。請旨敕下湖北河南督撫。於豫之鞏落宛鄧。楚之隨棗黃麻。各駐勁兵一枝。與諸將堅約。重在攔頭迎剿。不重在賊退尾追。似亦制勝之策。近人多謂擒匪非無大志。旦夕可平。微臣獨念擒匪或成流寇。禍患方長。此賊有甚似流寇者一端。有不甚似流寇者一端。凡流寇所以日聚日衆。非良民皆樂於從賊也。祇因賊騎剽忽。劫掠居民。不得耕穫。百里廢耕。則百里之民從賊偷活。千里廢耕。則千里之民從賊偷活。今鳳潁徐泗歸陳等郡。幾於千里廢耕。而官兵又騷擾異常。幾有賊過如篋。兵過如洗之慘。民圩仇視官兵。於賊匪反有怨詞。卽從賊亦無愧色。此甚似流寇之象。症之可危者也。凡流寇如無源之水。聽其所之。而此賊尙眷戀蒙亳老巢。旁縣皆田荒屋毀。而蒙亳尙有田廬之樂。斯又不甚似流寇。症之差善者也。臣旣於四處設立重兵。以遏其流。又擬查辦民圩。以清其源。先查亳州蒙城宿州永城四屬之圩。分別良莠。大加懲治。其餘有捨州縣。次第查辦。近日出有告示一件。鈔稿附呈御覽。臣駐紮之處。仍應以徐州爲老營。以臨淮濟寧周家口爲行營。庶於清查民圩。督飭諸將。兩有神益。是否有當。伏候聖謨詳爲指飭。所有欽奉寄諭各事。恭摺由驛伏陳。伏乞皇太后皇上聖鑒訓示。謹奏。

徽休防軍索餉譁現擬查辦摺 同治四年七月初八日

奏爲微休防軍索餉譁現擬查辦。恭摺仰祈聖鑒事。竊總兵唐義訓所部強中等七營。久駐徽州府城。防剿頗資得力。上年春間。逆匪分竄皖南。又派遣員毛有銘統領義從等九營。馳往援剿。毛有銘因敗挫獲咎。派金國琛接統該軍。分駐休寧祁門兩城。一年以來。亦尙與民相安。該兩軍餉項。唐義訓所部。向由臣營糧臺供支。金國琛所部。半係鄂省舊部。向由鄂臺籌發。近由皖臺供支。核算欠餉。該兩軍各已積至三十餘萬之多。而每月新餉。則由臣飭令糧臺均勻籌給。大致兩軍每月均可領至六成。上年冬間。皖南防務較鬆。唐義訓於十二月請假回籍葬親。稟派其胞兄候選同知唐義讓代統營務。金國琛於本年正月。至金陵面稟。請回常州本籍省墓。經臣准其暫假。竊意留防之軍。業已紮定坐營。并不遠調他省。所領銀米。足敷口食。以常情度之。必應安然無事。忽於五月二十一日。金國琛所部瑞左營首先鬧餉。其餘各營。紛紛效尤。唐義訓所部各營。亦於二十七日相繼滋鬧。鎗礮鼓角。喧鬧十三日之久。維時唐義訓金國琛俱未回營。皖南道張鳳翥馳往徽州府城。委曲曉諭。而各勇丁

毫無忌憚。肆意侮辱。并有毆傷重情。逼寫期票。應允發給八箇月滿餉。始得稍斂凶鋒。臣於閏五月初旬。在清江營次。始聞各營鬧餉之信。卽籌撥銀入萬兩。解往勻濟。及聞毆辱道員。逼寫期票之事。不勝憤懣。竊思湘軍紀律。素稱嚴明。屢立功績。臣待各軍。平日則發給六成。足資食用。臨撤則全清欠餉。從不減折。不應更有鬧餉之事。自本年三月間。雲營叛卒潰於金口。此端一開。各營接踵而起。臣每引咎自責。刻刻隱憂。然雲營潰變。固由累年積欠之多。尤憚萬里遠征之苦。其致變之故。與各軍迥不相同。此次徵休兩軍。無端鼓譟。臣詳切訪察。其中情節較輕者。金國琛所部尙有三營。唐義訓所部尙有二營。偶爾誼譁。旋即安帖。皆由營官平日廉正。故能臨變不搖。此外率衆同鬧者。究其起畔之由。半由營官發餉不公。激成衆怒。又每營各有刁健之弁勇數人。煽惑衆心。非將貪庸不職之營官查明嚴辦。無以平勇丁之積怒。非將首先倡亂之勇丁拏獲懲治。無以杜後日之亂萌。現在金國琛業已回營。唐義訓據報閏五月二十八日自籍起程。日內計亦可到防。臣已嚴札該鎮道。勒令交出剋扣之營官。倡亂之勇丁。押送臣營。審明嚴辦。如果查辦首惡之後。各勇丁畏法安靜。擬將所欠之餉。悉數找清。陸續遣撤。卽湖北應發之欠餉。亦由臣營糧臺墊給。不少絲毫。業經出示曉諭。以安勇丁之心。能否辦理順手。尙未確有把握。萬一因此激變。重覩金口叛卒之事。臣嘗身任其咎。亦不能畏激變而一味姑息。全不查辦。縱貪刻之將領。長各路之刁風。臣已知會各省。豫籌防剿。至候選同知唐義謨。有代統之責任。聽各營譁噪。甚至毆辱大員。束手無策。庸懦不職。應請旨卽行革職。提解臣營審訊定擬。唐義訓假歸之時。臣知唐義謨斷非統領之才。深恐久而生事。批令該鎮迅速回營。乃遲至半年之久。始報起程。實屬遲延。金國琛假歸省墓。臣以金陵至常州。尙不甚遠。姑准一行。并未派人代統。乃該道遷延太久。殊屬不知緩急。請旨將前任皖南鎮總兵唐義訓。甘肅鞏秦階道金國琛。先行交部議處。皖南道張鳳翥。於兩軍鬧餉之時。親赴徵休撫慰。尙無不合。惟并未具稟請示。率行書寫期票。以長凶愾。事定之後。徑赴婺源籌餉。迹有似於畏避。應卽先行撤任。另行遴員接署。俟將來此案奏結時。再行聲明。請旨辦理。臣前於雲營潰變之事。業經奏明。俟查清後。奏請議處。嗣雖查明金口叛卒。實因遠征缺餉。以致潰亂。別無他故。惟臣未能先期陳奏。力阻遠調。究屬咎有應得。此次徵休兩軍索餉譁噪。臣有督辦之責。未能先事預籌。尤深愧歎。應請旨將臣交部議處。除俟查辦兩軍情形。能否安帖。再行陳奏外。合將現擬認真懲辦緣由。恭

摺由驛馳奏。伏乞皇太后皇上聖鑒訓示。謹奏。

恭謝天恩并陳明曾國荃病未復元摺 同治四年七月初八日

奏爲恭謝天恩。仰祈聖鑒事。竊臣承准軍機大臣字寄。同治四年六月十八日奉上諭。曾國荃已簡授山西巡撫。曾國藩當囑該撫勉圖報效。作速赴任。勿以病辭。欽此。一聞命之下。感悚莫名。伏念臣弟國荃於上年九月蒙恩開缺。回籍調理。本年二月間。仰荷特旨詢問。眷遇優隆。嗣經臣弟國荃專摺具奏。病未痊癒。懇請暫緩入都。接奉批旨。飭令趕緊醫治。一俟稍愈。即速起程北上。以副委任等因。欽此。五月間。又疊奉寄諭。飭催即日北上。仰見朝廷嚮用之殷。期望之切。臣每寄家書。勸其壹意靜攝。冀圖速愈。以慰宸廑。茲乃欽承恩命。昇以專圻。值時事之多難。念門庭之太盛。感極而懼。若涉春冰。伏思山西爲北路完善之區。目今值邊防喫緊之際。臣弟國荃受恩深重。苟可勉力馳驅。斷不稍耽安逸。惟臣前接家信。知其舊患瘵疾。本未痊癒。又於閏五月初六日。感染時證。不進穀食者九日。頗覺可危。至十五日。始有轉機。據醫家云。此次大病之後。積年病根。俱已發洩。如果調理得宜。轉可漸漸復元。一等語。現已相距月餘。是否全癒。尙未敢必。臣恭錄諭旨。馳函家中。囑其自揣精力。迅速赴闕。勉圖報效。一面寄書臣營。代爲陳奏。近日沿途積潦。文報多梗。不知臣函何日可以達湘。除俟臣弟國荃覆信到營。再行具奏外。所有微臣感激下忱。合先具摺恭謝天恩。伏乞皇太后皇上聖鑒。謹奏。

遵旨覆陳并請中外臣工會議勘揀事宜摺 同治七年七月二十四日

奏爲欽奉諭旨恭疏覆陳并請勅下中外臣工會議勘揀事宜以定謀議仰祈聖鑒事竊臣於七月初九日承准軍機大臣字寄七月初三日奉_上諭「晉省完善之區并無得力勁旅設被竄擾關係匪輕著令國藩速派劉銘傳等軍循河西上酌量水陸兩路孰爲便捷馳赴洛陽以西一帶扼要駐紮與秦晉防兵聯絡聲勢相機防勦俾賊不得分竄擾及完善」等因欽此又於七月十五日承准軍機大臣字寄七月初九日奉_上諭「晉國藩身任統帥責無旁貸前經疊諭該大臣籌撥一軍兼顧晉省并令劉銘傳等軍馳赴豫省北路繞出賊前防賊竄擾秦晉之路又令派撥馬隊馳赴豫省助勦復以賊去徐郡甚遠令該大臣酌量前進駐紮乃該大臣日久迄無奏報於近來皖豫情形及各路如何布置情形均未陳奏歷次所奉諭旨亦未答覆實屬疲玩因循若欲藉此獲咎冀卸節制三省仔肩何以仰副朝廷倚任之重諒該大臣公忠體國之心何忍出此」等因欽此跪誦之下惶悚莫名查派撥馬步各隊赴豫及臣仍擬駐紮徐州各情業已於本月初八日專摺具奏在案目前賊勢前股已至南召魯山裕州并聞竄入湖北之棗陽後股由臨潁鄆城而折回上蔡接據吳昌壽咨稱賊將竄擾周家口又接劉銘傳文稱即日由周家口出隊迎擊上蔡之賊諭旨飭令劉銘傳一軍循河西上馳赴洛陽以西扼要駐紮自係先事預防之策臣竊觀刻下局勢周家口最爲扼要之區該處距豫之開歸陳許及汝寧光州六郡均在三百里內外卽皖之潁州及蒙亳老巢相去亦不過三百里八面受敵不可無重兵鎮駐臣所部各軍惟劉銘傳將略較優人數較多故以周家口之重任付之今若移駐洛陽以西反置勁旅於無用之地至秦晉兩省防務臣聞陝西殘破更甚於河南似非該逆之所垂涎山西雖屬完善然黃河天險似非該逆所能遽渡自洛陽至潼關五百餘里必須晉豫兩省多設礮船乃足禦之亦非陸路一軍所能徧防劉銘傳西去竊恐無益於晉而有損於豫臣既知周家口之防更切於洛陽不敢不剴切上陳冀迴聖聽且不獨劉銘傳一軍萬難遽調也李鴻章部下淮南之勇不慣麵食與楚軍同而其軍火礮械之笨重則更甚於楚軍自古行軍皆以糧運爲先務乾隆年間新疆用兵

以大學士黃廷柱總理肅州糧台。米麥雜糧無一不備。車駝轉運之瓊瓊。純皇帝親自計畫。遙爲指揮。今河南等省用兵。全不講求轉運。糧械多有闕乏。將士不肯盡力。臣與李鴻章所部。歷年行兵於江湖水鄉。糧運最便。士卒習而安之。今改運於濟寧周家口等處。尙有運河淮河一水之便。而派流太遠。已覺十分艱難。若再令遠征秦晉之交。不特不能多運大米。並不能多運洋穀。恐惟勇遷地弗良。或生他變。前此靈營調赴關外。亦以道途太遠。無米可食。中途潰變。臣未能先期陳奏。力阻其行。至今愧恨。頃在臨淮。臣檄翰林院編修張錫燦招募淮北之勇。專取能食麥麵雜糧之人。冀備他年征勦西北之用。其在淮水以南。不慣麵食者。概不收募。蓋恐飲食違其本性。驅策必不得力。此又臣所輟轉籌思而未敢輕調秦晉防兵者也。至於節制三省之命。臣三次具疏回辭。未蒙俞允。以臣賦性韻戆。卽一省已難專任。然臣受恩深重。雖數省亦當通籌。竊計擒匪可到之處。約有八省。分爲三路。江蘇安徽兩省及豫之歸陳。齊之兗沂曹濟。臣初次疏中所指之十三府州皆東路也。直隸山西兩省及豫之彰懷衛輝。齊之東武臨濟。凡在黃河以北。皆北路也。湖北陝西兩省及豫之南汝洛陝等郡。皆西路也。論用兵緩急先後之序。則東路最重。西路次之。北路又次之。論微臣之才識。與所部之兵力。則卽東路十三府州縱橫千里。已嫌汎地太寬。動虞疏失。實不能兼顧西路。更何能謀及北路。今皇上飭臣兼顧晉省。已在節制三省之外。而外間望治之心。責臣之詞。尙不止於晉省。一似三路之前截後追。爲防爲勦者。皆臣軍應辦之事。臣何以堪此重任。又何能當此重咎。以僧格林沁之賢。忠可以拉鬼神。勇可以迴山岳。辦捻五年。尙未蕝功。今捻匪之馬匹愈多。而時論之視賊愈輕。一似數月期年。可望肅清。臣又安能奏此速效。臣自揣殫竭愚誠。籌東路十三府州之防。加以清查民圩。訓練馬隊。一二年內。或可漸就穩固。其北路防河之法。西路堵勦之方。均非臣力所能逮。應請旨飭令山西河南速辦舟師守禦黃河。免致賊竄晉境。倉皇貽誤。臣管見所及。已略具於五月初九日十三日七月初八日三次疏中。常思堅持初議。又恐失之執拗。可否仰懇天恩。勅下九卿科道。八省督撫。會議勦捻事宜。各抒所見。恭請宸斷。定一不可改易之策畫。分汎地各專責成。無論賊竄何處。而辦賊之方。萬變而不離其宗。庶幾謀不紛歧。事有歸宿。微臣幸甚。大局幸甚。至臣處奏報之稀。曾於同治元年二月初六日覆奏一次。一則不輕奏謠傳之言。一則不輕奏未定之事。一則不輕奏預計之說。仰蒙聖訓稱許。數年以來。不改此度。茲奉嚴旨詰責。惶愧無地。若欲

藉此獲咎。以卸仔肩。則臣生平所志所學。斷不肯如此取巧。伏乞聖慈垂鑒。所有遵旨覆陳。并請中外臣工會議。勦擒事宜各緣由。恭摺由驛馳奏。伏乞皇太后皇上聖鑒訓示。再臣拜摺後。即於本日前赴徐州。整理馬隊。俟抵徐後。再行陳奏。合併聲明。謹奏。

補參陳國瑞摺 同治四年七月二十四日

奏爲曹南未能救護之總兵。同罪異罰。補行糾參。恭摺仰祈聖鑒事。竊查總兵陳國瑞。隨同親王僧格林沁。帶兵勦擒。與郭寶昌分統左右兩翼。本年四月曹南之戰。僧格林沁追賊陣亡。郭寶昌不顧主將。奉旨革職。拏問。其餘翼長成保以下各官。未能救護者。發遣降革有差。即山東撫臣閻敬銘。布政使丁寶楨等。亦均交部議處。予以應得之咎。紀綱所在。不稍優容。獨陳國瑞飾辭巧脫。迨逃法外。無論所稟受傷各情。不足深信。即使均屬實情。亦祇可略從未減。未便概置不問。伏讀五月初二日上諭。陳國瑞未能救援僧格林沁。本屬咎有應得。姑念其從來打仗奮勇。屢著戰功。且此次身騎俱受重傷。困苦情形。不無可憫。姑免置議。等因。欽此。仰見朝廷愛惜將才。格外寬宥。惟臣接統此軍。博詢衆論。僉謂以馬步各翼長同罪異罰。不應過於懸殊。古稱法立而後知恩。在帥臣當申明法律之嚴。庶裨將益感戴聖恩之厚。相應補行糾參。請旨將總兵陳國瑞撤去幫辦軍務。革去黃馬褂。暫留處州鎮實缺。責令戴罪立功。以示薄懲。而觀後效。所有補行糾參緣由。恭摺具陳。伏乞皇太后皇上聖鑒訓示。謹奏。

金寶圩團練殉難請卹摺 同治四年八月初八日

奏爲宣城縣金寶圩團練陣亡紳民懇恩分別旌卹。恭摺仰祈聖鑒事。竊查安徽寧國府宣城縣金寶圩。地本膏腴。人知好義。自咸豐六年以後。鹽提舉銜候選訓導丁翥等。創辦義團。寧國府兩次失陷。該圩屹然孤立。力挫賊鋒。至同治元年冬間。僑侍王率領悍黨圍攻數旬。十二月二十日。破圩而入。賊衆銜恨次骨。恣意屠殺。一圩之內。死者不下八九萬人。其逃至蕪湖者。老弱一千餘人。臣爲籌款賑卹。僅存百分之一。歷數辦團之堅忍。被害之慘酷。僉謂爲各省所無。嗣據該圩練總藍翎主簿唐兆麟等。查明圩內殉難紳民婦女。就其可考者。造具清冊。就近稟請。侍即臣彭玉麟。行營咨送核奏。彭玉麟駐營裕溪口。周歷沿江上下。親見該圩遭難之慘。白骨青燐。目不忍

親。本年二月間。捐資購買義山。收檢枯骼。爲萬人大塚。勒石誌之。以表節義。每與臣言及金寶圩死事情形。爲之隕涕。臣查該圩以一隅之地。力抗悍賊。至七年之久。卒以勢孤力竭。萬衆同殉。忠義之誠。堅逾金石。當將清冊發交採訪忠義局委員。詳加核對。據該委員等將宣城縣歷年殉難紳民。彙案請奏前來。臣覆加查核。內一門殉難者八家。共三十九人。合家殉難而口數可計名字不可考者一百三十六家。并無口數可計者二十七家。官紳殉難者九十七員名。團總團丁殉難者六百七十四名。士民殉難者二千三百二十二名。婦女殉難者一千零四十三口。均屬大節凜然。臨難不苟。相應繕具清單。仰懇天恩。敕部分別從優旌卹。以爲効忠苦守者勸。除事實清冊循案咨部外。所有團練陣亡。紳民彙案請卹緣由。理合專摺具奏。伏乞皇太后皇上聖鑒。再兩江忠義未奏各案。俱已移交署督臣辦理。此案係臣與彭玉麟始終經理。該圩紳民。殉節尤慘。謹由臣主稿先行具奏。合併聲明。謹奏。

移駐徐州整理馬隊并陳近日軍情摺 同治四年八月十七日

奏爲微臣移駐徐州整理馬隊并陳近日軍情。恭摺仰祈聖鑒事。竊臣於七月二十四日。自臨淮起程。八月初四日。行抵徐州。旬日來料簡各起馬隊。計已到徐州者共爲四起。一爲色爾固善所部。官兵七百二十八員名。原係高福常星阿溫德勒克西三人分帶。奉旨派色爾固善統帶。一爲托倫布所部官兵四百八十五員名。一爲納穆錦所部吉林官兵一百五十五員名。前敵馬勇四百四員名。此三起者。均係親王僧格林沁舊部。合之國瑞本年新調之察哈爾官兵一千名。共計四起。凡馬隊二千七百七十二人。然舊存者馳驅太久。傷病甚多。新調者技藝太生。瘴疾亦重。必須大加裁汰。訓練成軍。方足以利征勦。臣督飭營務處李昭慶李恆清。會同管帶各官。認真挑選。編立隊伍。配齊器械。換補馬匹。計色爾固善原帶之隊。挑留五百一十九人。專歸高福管帶。托倫布原帶之隊。挑留三百五十四人。又添併吉林兵三十八人。仍歸托倫布管帶。該兩起官兵。遵旨均令色爾固善統領節制。納穆錦原帶之隊。除酌留吉林官兵併入托倫布部下外。專以前敵馬勇四百四員名。責成納穆錦管帶。其新調之察哈爾官兵一千名。原派營總帕克巴札普貢噶德里克二人。久病未愈。馬匹亦倒斃過多。現僅挑留兵丁五百一十六人。另派營總二員。檄令溫德勒克西管帶。其餘老弱患病者。概行遣撤回旂。以上四起。共祇挑選一千八

百三十一人。又挑留官弁五十七員名。一并隨營差遣。此外尙有烏爾圖那遜所帶七百零九名。前已奏明駐紮周家口。據稟該起官兵。出征年久。殘廢俱多。請即分別汰留。其土默特一起。並請全行遣撤。臣擬俟周家口防務稍鬆。調回徐州。大加整頓。其應留若干。應撤若干。另案奏明辦理。至富森保所帶一起。官兵三百七十四員名。前由河南調赴徐州。富森保僅帶四十三人來徐。其部下官兵。均已陸續遣歸湖北。經督臣王文奏明咨會。臣因并飭富森保於八月初八日自徐赴楚。即作爲楚省防勤之兵。此臣整理馬隊之大概情形也。規模甫定。臣本擬親行教練。認真操演。再行分別調派。惟現據各路稟報。牛洪任柱陳大澹賴文光等股。回寬阜陽縣境之瓦店集迎仙店等處。占踞各圩。勢甚兇悍。英翰部下駐紮潁州。出隊截擊。略有斬擒。安徽撫臣喬松年飭調張得勝一軍。由固始回勤。克蒙額從潁州繼進。臣不得已檄飭色爾固管統領該兩起馬隊。由徐州前赴潁州。會同勦辦。並檄周盛波一軍。由亳州拔隊。南赴太和潁州一帶。劉銘傳一軍。由周家口拔隊回援潁州。各路合力會勤。或可一收夾擊之效。除各軍戰狀具報到日。續行陳奏。并遣撤馬隊。俟起程回旂。分別奏咨外。所有微臣整理馬隊。及近日軍情。理合恭摺由驛馳奏。伏乞皇太后皇上聖鑒訓示。謹奏。

銘軍疊勝信賊東竄現籌布置摺 同治四年九月初一日

奏爲劉銘傳一軍。疊獲勝仗。信賊東竄。曹州現籌布置情形。恭摺仰祈聖鑒事。竊臣以捻逆竄擾潁州。飭令劉銘傳一軍。由周家口回援周盛波等協勤。於八月十八日。奏明在案。劉銘傳未接臣檄之先。已派劉盛藻唐殿魁率步隊各營。張景春劉盛瑞率新練之馬勇二營。由周家口馳赴潁州。於十一日。行抵沈邱。與豫軍蔣希夷。皖軍康錦文等會同進勤。十二日。進逼凹張賊寨。該逆窺我營未定。集馬步賊萬餘人。乘機猛撲。唐殿魁擊其左。劉盛藻擊其右。酣戰踰時。斃賊三百餘名。蔣希夷康錦文兩軍從中路繼進。張景春劉盛瑞馬隊兩邊包抄。賊即奔潰。我軍追三十餘里。至洪河南岸瓦店等處。擒斬甚多。奪獲器械無算。驟馬二百餘匹。拔出難民數千。破賊寨二十餘座。賊狂竄向西南而去。十四日。又折回洪河之北岸埠。兩日夜竄至項城西境之南頓集。距周家口五十里。劉銘傳遂督軍由項城間道。一日夜馳抵南頓。飭各營及烏爾圖那遜之馬隊。三路并進。賊勢披靡。我軍疾追十餘里。殺斃槍斃賊千餘名。生擒三百餘名。奪獲馬百餘匹。器械千餘件。賊乘夜越周家口徑渡沙河而北。此劉銘傳一

軍在阜陽沈邱兩次獲勝肅清皖境之情形也。賊渡潁後。由西華竄入太康。劉銘傳於十九日追抵太康。至則賊又奔向睢州。二十日追至睢州。則賊又已先發矣。劉銘傳乃暫棄步軍。獨督馬隊。馳三十餘里。從後追及。賊四散狂奔。拋棄輜重器械甚多。敗潰十餘里。復聚馬賊數百迎敵。又經張景春及營總白圖善六十七訥爾桓額等擊退。其肩盛波一軍。馳至歸德邀截。以賊匪未過宋郡。不及而返。此十九二十等日追剿四百餘里之情形也。自二十日後。該逆竄至考城之保庶寨。曹境之魏灣集。盤踞定陶境內。已越三日。據劉銘傳送到生擒賊供。此次東竄之匪。係任柱爲主。而賴文光牛洪亦在其中。圖入青石關。以擄掠富饒之境。臣查羣賊之中。以任柱之騎爲最悍。以賴文光之謀爲最詭。如果二酋同來。則賊勢已趨重東路。而青石關通登萊青三府。尤爲山東膏腴之地。不可不速籌援剿。除飭潘鼎新一軍。扼守運河外。頃又調張樹珊之步隊。色爾固營之馬隊。率徐州全軍。馳赴山東協剿。又調臨淮六千人。以四千接防徐州。以二千續往山東。調周盛波一軍。移駐歸德。以遏東賊回竄之路。留劉銘傳一軍。仍駐周家口。以扼陳汝最要之區。惜無大枝馬隊。可以縱橫追逐。僅現有兵力東顧齊省。西顧豫省。中間兼顧徐州臨淮兩處。期於首尾相應。此臣近日調度諸軍。布置各路之情形也。欽奉八月二十二日兩次寄諭。飭臣進駐許州。并籌游擊之師。臣屢疏覆奏。本擬四路駐兵之外。更添大枝游擊之師。惟游兵須以馬隊爲主。而以步隊之輕迅者助之。今臣處所接舊營之馬隊。不滿二千。其餘新調之察哈爾馬兵。新募之淮馬勇。其數無多。其技尤劣。不敢驅之向敵。久未辦成游擊之師。自問尙無破寇之術。日夜焦思。彌深愧悚。至賊勢趨重山東。自當先勦東路。不必遽赴許州。皇上因時制宜。想有權衡於至當者。伏乞續示宸謨。俯鑒愚忱之不敢欺。助以棉力之所能及。微臣幸甚。所有勦賊獲勝。及近日調度各情。恭摺由驛馳陳。伏乞皇太后皇上聖鑒訓示。謹奏。

奉旨覆陳近日軍情摺 同治四年九月十九日

奏爲疊奉諭旨。恭摺覆奏。并陳近日軍情。仰祈聖鑒事。竊臣接奉九月初六日寄諭。欲令李鴻章親帶楊鼎勳等軍。馳赴河南。將豫西股匪撲滅。兼顧山陝門戶。而以吳棠署理兩江總督。李宗羲丁日昌遞署漕督。蘇撫。飭臣函商迅速覆奏。又奉十一日寄諭。令鮑超馳赴豫南。歸臣節制各等因。仰見聖德謙冲。憂勤彌篤。聞命之下。愧悚難名。臣查近日軍情。捻竄回竄。徂蒙回竄。徂布荷澤曹定等處。潘鼎新已至鉅野。由徐州調往之色爾固營張樹珊馬步各軍。

均至濟寧。正可會合進剿。而該匪忽分支狂竄。一支回竄徐州。攻破銅山境內之辛家寨邊馬及於鄭家集。距徐城僅六十里。一支直趨濟寧之長溝。勢將渡運河而東。據各路探報。馬賊近萬。步賊以六七萬計。任柱牛洪賴紋光李允陳大濬各酋。俱已東來。其西留豫境者。僅張總愚南陽一股。人數較少。力亦較弱。是目下賊勢趨重東路。不特秦晉暫可無急。即宛洛患亦稍輕。自當以全力專顧東路。徐州一支。恐竄沂州海州。而擾及裏下河。長溝一支。恐竄濟南泰安而擾及東三府。現飭潘鼎新張樹珊兩軍。防剿東北濟泰一路。而調郭松林楊鼎勳兩軍。防剿東南沂海一路。此外則劉銘傳留於周家口。周盛波留於歸德府。斯大軍者。皆准勇最勁之兵。所駐皆三省最要之地。其防戍大江以南者。僅有劉秉璋等三起。分駐蘇松東壩等處。萬不能再行調出。千里空虛。諭旨飭李鴻章視師河洛。該處現無可剿之賊。准勇亦別無可調之師。至臣所部楚軍。除酌留劉松山等勦捻外。餘擬全數遣撤。疊經奏明在案。臣今所倚以辦賊者。全賴淮勇諸軍。供其指麾。李鴻章若果入洛。亦豈肯撤臣布置已定之兵。挾以西行。坐視山東江蘇之糜爛而不顧。是李鴻章之無兵帶赴西路。時焉之也。勢焉之也。臣屢接稟報。閩軍黃少春等攻克鎮平。江軍席寶田萋雲慶等疊獲大捷。髮逆勢極窮蹙。又有劉典康國器劉連捷周寬世各軍。星羅棋布。似閩越餘孽。不久即可殲除。諭旨令鮑超改赴河南。實屬於粵無損。於豫有益。惟餉項由楚省解濟。未知能否無缺。臣擬商之李鴻章。若能由江南協解數成。則河南多一枝勁旅。湖北少一分供應。俾聖主可紓西顧之憂。而微臣亦稍塞豫人之責。諭旨垂詢。以李宗羲暫署漕運總督。丁日昌署理江蘇巡撫。查李宗羲由安徽知府。甫於去年保奏。以道員留江補用。本年奏署運司。疊擢安徽臬司。江寧藩司。一歲三遷。已爲非常之遭際。該員廉正有餘。才略稍短。權領封圻。未免嫌其過驟。丁日昌以江西知縣。因案革職。三年之內。開復原官。浚保府道。擢任兩淮運司。雖稱熟習夷務。而資格太淺。物望未孚。洋人變詐多端。非勦名素著之大臣。不足以戢其詭謀。而懾其驕氣。該員實難勝此重任。數年以來。皇上求才若渴。於疆臣保薦人員。往往破格超遷。外間因其不次之擢。疑爲非常之才。責備之下。加以吹求。於是臺諫彈劾生風。并歸咎於原保之員。若使保升者循資漸進。少爲迴翔。久經磨練。則該員不至見妬於同僚。而言路亦不至仇視乎疆吏。實於中外和衷之道。大有裨益。抑臣尤有請者。歷觀前史。明訓軍事之進退緩急。戰守屯駐。統帥主之。朝廷之上。不宜遙制。廟堂之黜陟將帥。賞罰百僚。天子與左右大臣

主之。閩外之臣。不宜干預。朝廷而遙制兵事。其患猶淺。閩外而干預內政。其害實深。從古統兵重臣。造執國命。未有能善其後者。同治元年正月。皇上命臣保舉封疆大員。臣密片奏稱。疆臣既有征伐之權。不當更分黜陟之柄。宜防外重內輕之漸。素杜植私樹黨之端等語。仰蒙聖慈垂鑒。今以要缺督撫命臣等往返函商。如臣愚見。密保尙且不敢。會商更覺非宜。因不俟李鴻章吳榮商定。直抒管見。未審有當於萬一否。所有疊奉諭旨。並陳近日軍情緣由。恭摺由驛馳奏。伏乞皇太后皇上聖鑒訓示。謹奏。

近日軍情片 同治四年九月十九日

再正封摺間。又據潘鼎新等稟稱。捻逆因濟寧長溝一帶。駐有重兵。不敢北竄。已由武城金鄉南趨豐碼頭等處。據擒賊供稱。該匪欲回雒河老葉等語。查賊蹤飄忽。臣謂諸軍甫集曹濟。該逆忽擾及徐州。徐防兵力頗單。祇堪堅守。不能迎剿。欲調馬步各隊回顧徐郡。該逆又將紛竄他處。狡謀多端。亟肆疲我。殊深焦灼。又接李鴻章函稱。因奉馳赴河洛之旨。欲留楊鼎勛等二軍。暫緩前進。臣以沂海裏下河一路。尙無防兵。仍當飛檄調來。會剿徐境之賊。又接劉銘傳呈稱。張總愚一股。由南陽西南竄去。已近鄂省邊境。楚北防範甚嚴。似亦不足深慮。理合附片陳明。伏乞聖鑒。謹奏。

官軍疊勝該逆仍竄山東摺 同治四年十月十一日

奏爲官軍疊獲勝仗。該逆仍竄山東。恭報近日軍情。仰祈聖鑒事。竊自九月十五日以後。任賴牛李各酋。分支直犯徐州銅山。臣於十九日具奏在案。厥後曹州之賊。知濟寧防守甚嚴。不能渡運河而東。遂悉數南竄徐州。分布豐沛銅山境內。盤踞湖團一帶。臣調張樹珊色爾固善等回軍追剿。并調潘鼎新越境夾擊。二十三日。張樹珊等駐軍豐魚交界之谷亭。紮營未定。賊馬五六百匹。突來撲犯。我軍迎擊。賊之。追奔十餘里。擒斬數十名。二十八日。臣派營務處李昭慶帶忠樸等營。會同張詩日之步隊。烏爾圖那遜之馬隊。馳剿徐州北境。二十九日。至柳新莊。賊大隊南來。見官軍步伐整齊。且戰且走。我軍追及於張谷山。烏爾圖那遜馬隊從旁抄擊。副將黃金志衝其中堅。賊勢不支。紛紛敗竄。追逐二十餘里。逼入湖中。淹斃百數十名。陣斬二百餘名。拔出難民三百餘人。生擒悍賊二十六名。奪獲器械驛馬甚多。賊由劉家集西竄蕭縣而去。色爾固善接到臣檄。知賊已逼近徐州。二十七日由

鹽縣回顧郡城。初一日行近蕭縣。與賊邊馬遇於郝家集。色爾固善令高福托倫布爲兩翼。而自率納穆錦分三路并進。賊卽敗潰。迨至胡家莊。擊殺數十名。生擒十三名。奪獲騾馬五十餘匹。餘匪逃入民房。我兵縱火焚燒。逸出者盡皆殲斃。此徐防諸軍各獲勝仗之情形也。臣意賊旣由曹而南竄徐州。又由徐州而西竄蕭縣。勢必回顧蒙亳老巢矣。據生擒賊供亦云。將回蒙亳。或云窺伺清江。臣飛咨喬松年吳棠速爲籌防。不料賊於初二日。又復折回豐縣。與後股會合。徧布城南十餘里。是時鼎軍四營。尙留濟寧。僅六營先到豐縣。兵力甚單。初三日。潘鼎新帶六營入成隊。赴陳家莊布置粗定。自率零騎。逼近賊營挑戰。該逆悉衆抗拒。我軍漸退。誘賊離莊里許。故示以弱。賊見官兵極少。縱令馬步各匪。約二萬餘人。四面圍裹。更番衝突。我軍屹立不動。俟賊逼近。將洋鎗連環施放。炸礮迎頭轟擊。賊陣潰亂。我軍乘勝縱擊。殺賊一千餘人。屍骸枕藉。炸礮馬匹。奪獲器械。不計其數。賊向西南狂奔。竟夜不敢停宿。折而北竄。直向魚臺一路。初四日。適遇道員潘鼎琛。帶留濟之四營前來。與戰于豐北。潘鼎新仍帶六營。并調副將王心安之軍。馳往夾擊。殺斃無算。賊復大敗。竄向西路單縣而去。此濟防潘鼎新一軍在豐縣南北兩獲大勝之情形也。臣查該逆狡詐多端。飄忽異常。從不肯與堂堂之陣。約期鏖戰。必伺官軍勢孤力竭之時。出不意以困我。此次徐濟諸軍。各有斬擒。惟潘鼎新以孤軍當狂寇。以步隊擊馬賊。人人自危。竟獲全功。差足以寒賊膽。惟該逆死黨極多。行走甚速。乘虛蹈隙。是其慣技。當初竄東省。已有由青石關窺伺登萊之說。現值運河水涸。難保不潛行偷渡。潘鼎新一軍。已全隊撤回濟寧防所。臣飭張樹珊色爾固善暫駐豐縣。如賊久駐曹屬。該兩軍仍營齊赴山東。如果渡運內竄。再調李昭慶率大枝游擊之師。赴東會剿。以保完善之區。而遏狂奔之寇。所有官軍疊獲勝仗。該逆仍竄山東緣由。恭摺由五百里馳奏。伏乞皇太后皇上聖鑒訓示。謹奏。

籌商直隸河防片 同治四年十月十一日

再臣接奉十月初四日寄諭。一豫省馬隊太單。現在直隸河防漸鬆。所有副都統安住所帶馬隊。卽著劉長佑飭令統帶赴豫。交吳昌壽調遣。一等因欽此。查擒匪現竄曹單。與直隸之東明長垣一帶。處處毗連。霜降以後。黃河水淺。歸槽礮船。本屬無多。轉瞬歲寒冰堅。卽可鋪草墊土。全河皆成坦途。尤非礮船所能爲力。臣方深以爲慮。黃河北岸。汛地甚長。目下祇可增兵。斷難減戍。臣所以注重東路者。以山東北鄰畿輔。天下之根本也。南鄰江蘇。臣

軍銀米器械所自出。楚勇惟勇之根本也。賊匪所以注重東路者。以山東運河以北平衍富饒。不似豫皖之難於覓食也。若非數次痛斃而大創之。則該匪斷不能忘情於山東山東之事。一日不鬆。則直隸之防。一日難弛。相應請旨勅下直隸督臣劉長佑。仍將副都統安住所帶馬隊。調回駐守。并須酌添步兵。使將領皆知冬春之防。重於夏秋。務保萬全。是爲至要。至豫省馬隊太單。臣亦豈宜置之不顧。惟畿疆防務較重。不得不略分緩急。如果該逆因此間五次敗挫。不敢留戀山東。則必由曹軍回竄河南。俟其竄過開封陳州以西。臣當一面具奏。一面咨商劉長佑吳昌壽或調安住馬隊。仍赴河南。臣亦當添派大枝游擊之師。赴豫會剿。愚昧之見。是否有當。伏乞皇太后皇上聖鑒。謹奏。

寧陵扶溝等處勝仗摺 同治四年十月二十日

奏爲官軍在寧陵扶溝等處擊賊。疊獲勝仗。並現籌辦情形。恭摺仰祈聖鑒事。竊捻逆在豐縣南北。被我軍兩次擊敗。仍竄山東。臣於十月十一日具奏在案。該逆知東路防守甚嚴。不能偷渡黃河。復不敢久駐曹屬。遂折而西竄。知歸德有兵。欲由舊黃河北岸。繞越直趨汴梁。與張總愚合股。駐紮歸德之周盛波。探得此信。卽傳令帶大成隊。裹五日糧。於初九日。披隊至睢州迎擊。行至寧陵之趙村集途次。接得該令稟報。縣城被捻逆大隊圍攻。勢甚危急。卽將鍋帳存留趙村。整隊直逼城下。時已二更。賊撤開東面。任柱馬隊。賴文光悍黨。俱紮離城西南之十五里。周盛波恐賊至天明遁去。議定乘夜攻之。其弟記名提督周盛傳素善夜戰。因令與副將衛汝貴董邦傑三營。伏於黃河集。復派記名總兵周壽昌劉啓福由東路進攻。游擊楊安典賈起勝由北路進攻。自率副將周盛武楊正國由呂家集中路進攻。洋鎗如牆而進。出賊不意。任賴二逆。揮令悍賊圍繞中路。不料伏兵忽起。橫出截擊。鏖戰逾時。賊紛紛敗潰。我軍四面尾追。由呂家集跟追四十餘里。至睢柘交界。賊狂奔向太康大路而去。共殺斃悍賊六百餘名。拔出難民千餘。解散脅從甚多。奪獲器械馬匹。不計其數。據擒賊供稱。僞祥天安袁逆被游擊賈起勝等擊斃。牛落紅坐馬衣服盡行拋棄。僞天將唐矮孜坐馬槍斃等語。此初九日夜周盛波在寧陵勦賊大獲勝仗之情形也。該匪敗後。由太康南竄。行走甚速。駐紮周家口之劉銘傳聞東賊回竄。初十日卽帶隊向東迎勦。十一日。行抵西華之上郭橋。十二日。中途接扶溝縣稟知縣城被圍甚急。求援未刻。馳抵扶溝縣之東宏濟橋。見

賊邊馬。當即飭令劉盛璋張長發帶馬隊兩營爲前鋒。自督馬隊一營。步隊三營爲後應。復派唐殿魁由北路劉盛藻由南路同時并進。賊見我軍驟至。向西遁走。劉盛璋等追及。擒斬十餘名。至城西里許。遇賊馬步大隊萬餘人。分三大枝。將我軍包抄。中軍圍裏尤密。劉銘傳傳令結陣自固。四面環擊。斃賊甚多。劉盛藻派馬汝霖等。連開炸礮。擊其左。唐殿魁派王得成等擊其右。我軍伏地蹂進。施放排鎗。賊勢不支。劉銘傳令李錫增馬汝霖等。連開炸礮。打入賊陣。該匪駭而狂奔。我軍追殺十餘里。陣斬二百餘名。鎗斃一千餘名。奪獲器械無算。扶溝城圍立解。我軍亦傷亡數十人。是夜三更。賊尙奔走不息。此十二日劉銘傳在扶溝勦賊大獲勝仗之情形也。臣查此次捻逆東竄。其初雖未受懲創。厥後徐州小捷。豐縣大勝。俱是攔頭之師。今寧陵扶溝之戰。亦係攔頭要截。該逆處處投觸網羅。不能逞其流賊馳騁之故智。據生擒賊供。寧陵之役。僅有任賴牛李等奮一股。扶溝之役。則已與張總愚一股相合。目下不敢東竄。將謀擾及湖北。據吳昌壽咨。羣賊現聚襄葉舞陽一帶。臣於十八日檄飭色爾固善張樹珊馬步兩軍。移駐周家口。騰出劉銘傳一軍。作爲游擊之師。謹遵前次諭旨。不復拘泥十三府州之說。卽南汝光許等郡。隨賊所向跟蹤追勦。其營務處李昭慶所辦游擊之師。鞍馬尙未齊備。臣已疊次派員進京買鞍。出口買馬。待至臘底辦齊。卽令李昭慶馳赴河南與劉銘傳各帶馬兵萬人。同作兩枝游兵。做照僧格林沁之法。與該逆縱橫追逐。使之不得休息。而濟寧徐州臨淮周家口四處之兵。仍舊鎮駐不動。以備賊匪流竄時。迎頭截擊。惟臣處湘淮各勇。向來不住民房。支搭帳棚。行走不能迅速。現擬購雇大車。兼買駱駝。發交劉銘傳李昭慶等軍裝載。輜重。俾師行無遲鈍之慮。民間無滋擾之虞。近歲車輛極少。能否多辦。以供游兵之用。尙未可知。除俟辦理就緒。續行具奏外。所有寧陵扶溝等處擊賊疊獲勝仗。並現籌勦各緣由。恭摺由驛五百里馳奏。伏乞皇太后皇上聖鑒訓示。謹奏。

擬調鮑超會勦西路片 同治四年十月二十日

再臣欽奉到十月十五日寄諭。一南陽捻逆。豫軍旣不能勦除。恐其日久裹脅愈多。前諭鮑超由襄赴豫。會國藩覆奏。有與李鴻章商籌協餉數成。嗣因官文奏稱。該提督游勇太多。漫無紀律。上杭之勇。聞有赴豫之信。恐引牽呼類而來。請飭仍赴江右。第念鮑超勦賊。向稱勇往。若令嚴汰游勇。妥加鈐束。使該提督有敬懼之心。未始不可

資其攻勦。官文恐鄂餉難支。因有飭赴江右之奏。著會國藩李鴻章妥爲商酌。於江蘇接濟數成餉需。並令該處督將游勇。嚴行裁汰。不許任意招留。卽札令赴南陽勦賊。統歸會國藩節制。以一事權。而資鈐攝。倘事屬可行。卽著一面札調。一面奏聞。用期迅捷。一等因欽此。臣查鮑超之所短。在貪將多兵。濫收降卒。馭下專尙威嚴。條理不甚清晰。其所長之處。在威名久著。爲賊所憚。平日本有敬懼之心。又慕古人忠盡之名。自金口軍叛以後。該提督鑑於前車。以後斷不敢輕收降卒。若令少統數營。赴豫勦擒。餉項則不甚缺乏。米糧則派員專管。獎其多年之勦勞。勦以後日之忠慎。必於大局有裨。惟進兵之路。須以襄陽爲老營。乃能北控南汝。西蔽鄖陝。凡銀米軍械子藥等事。均應由湖北糧臺作主。江南雖可協餉數成。而不能隨時照料。臣前已函商官文。一俟接到覆信。如可由官文主持一切。俾該軍米糧有著。臣卽當奏調鮑超會勦擒匪。專辦西路。合先附片陳明。仰慰宸廑。伏乞皇太后皇上聖鑒。謹奏。

疊奉諭旨覆奏摺 同治四年十一月二十七日

奏爲欽奉疊次諭旨。恭摺覆奏。仰祈聖鑒事。竊臣欽奉十月二十七日寄諭。以豫省賊數益衆。飭臣統籌全局。將原設西鎮兵勇。移向西進。步步進逼。臣亦當移營進紮。就近督勦。又奉十一月初六日寄諭。飭臣斟酌情形。相機前進。各等因。欽此。竊臣奉命勦擒。業經奏定徐州臨淮濟寧周家口四處。設立重兵。則此四處臣皆可駐紮。以初非有所戀於徐州。有所怯於周家口也。不過因東北則畿輔。爲天下之根本。東南則江蘇。爲巨軍之根本。故臣視東路略重。駐徐州略久耳。自十一月初間。擒匪由山東全數竄豫。臣卽擬進駐周家口。又因李昭慶一軍鞍馬未齊。不克遽行赴豫。業於上次奏明在案。臣於秋間籌算除僧格林沁留遣馬隊。汰存一千八百有奇外。又有新調之察哈爾馬隊一千。又有餘馬一千。又有借用鮑超所購之馬八百。以爲必不可敷用。不料察哈爾馬匹倒斃。已及三分之二。存者亦瘦弱不堪。不得已又復派員出口買馬。屈指計之。兩次買鞍者。年底均可回徐。兩次買馬者。回營早遲難定。臣擬派李昭慶於正月統帶萬人赴豫。與劉銘傳分途進剿。無論欠馬若干。但就現有馬匹。先行勦辦。所恃步隊尙多。足以輔騎兵之不及。臣亦定於正月進駐周家口。就近調度。惟臣於東路終不放心。擬令李昭慶由徐徑赴河南。臣則先赴濟寧兗州曹州一帶。察看情形。并查閱黃河礮船。再由歸德陳州。以抵周家口。庶地

勢之孰重孰輕。留兵之宜多宜少。臣胸中較有把握。別有一事。與勘揀大有關係者。銅山沛縣等處。有湖團焉。咸豐四五年間。山東曹州一帶。黃河汎漫。難民唐守忠等。遷徙銅沛境內。多係微山湖涸出之地。久之聚至數萬人。佔地百餘里。當時在事官吏。不能遣之回籍。暫與撫綏。因就東民所佔地畝。設局丈量。定爲上中下三等。科則納租充餉。耕種豐稔。漸臻富強。在東省難民。以爲全係湖荒之地。在銅沛居民。則以爲霸佔有主之產。爭訟多年。屢釀巨案。吳棠等曾疊次具奏奉旨查辦。本年十月。賊竄沛縣。逆首任柱牛洪賴汶光等皆住湖團之內。臣處生擒賊供。多稱係湖團。信函邀約而來。沛民平日本與湖團爲不解之仇。至是愈以團民勾匪。紛紛控告。有不能一朝居之勢。而湖團中如唐守忠父子罵賊殉難。全圩房屋焚燒殆盡。則又忠節昭然。乃沛民仍以叛逆目之。若不早爲之所。則沛民與團民必且械鬥不休。而夏團與莠團亦且真僞莫辨。臣擬將通揀之團。酌量懲辦。而其餘數萬人。全數資遣回籍。現經兩次派員前往山東鄆城鉅野等處。察看該團民原籍。尙足安插否。如其可以安插。則遣之東歸。在沛縣可免佔產之訟。在徐州亦無招揀之窩。臣再將資遣事宜專疏奏辦。而臣之赴豫。則須稍遲。如其不可安插。臣亦不勉強驅遣。在徐沛不無後患。而臣之赴豫。可以稍速。理合預爲具奏。以慰宸廑。又奉十一月初六日寄諭。一飭臣檄調鮑超統帶新募各營。馳赴湖北。由襄陽一帶。相機進剿。一切進止機宜。仍歸會國藩妥籌調度。其鮑超留江舊部。仍令歸婁雲慶統帶勦辦。一等因欽此。本應欽遵辦理。惟臣接官文來函。鮑超必欲統帶多兵。鄂省實難供應。雖江蘇分任協餉。尙恐不足以資挹注。又接李鴻章來函。粵中賊氛尙熾。汪逆悍黨數萬人。以一隅遙爲牽制。而我數省不得解嚴。須留鮑超在江。方足支撐各等語。又聞汪逆近已竄陷嘉應州。窺伺閩汀。臣思鄂省之餉源既如此。江粵之賊情又如彼。不敢固執己見。致誤事機。目下鮑超一軍。已由贛州進兵。暫難調遣。應俟江粵肅清。再檄該軍勦揀。庶不至往返僕僕。顧此失彼。所有疊奉寄諭恭疏覆奏。伏乞皇太后皇上聖鑒訓示。謹奏。

會議長江水師營制事宜摺 同治四年十二月二十八日

奏爲會議長江水師營制事宜。恭摺仰祈聖鑒事。竊臣國藩於同治元年二月覆奏安徽省城仍建安慶案內。請再專設長江水師提督。及總兵以下各官。奉旨交軍機大臣會同該部議奏。旋經吏部等於五月二十三日定議。

具奏。准其設立長江水師。而於總兵參副。以至千把。應設幾缺。暨分汛修艦各事宜。臣體察情形。再行詳核議奏。三年四月。奉旨以淮揚鎮總兵黃翼升補授長江提督之缺。六月。克復金陵。濱江五省。戰事大定。卽應將前募之水勇。改爲經制之水兵。核定章程。會議具奏。特以勇丁之口糧較多。額兵之口糧極少。相去懸絕。難于酌中定議。展轉籌思。是以覆奏稍遲。臣國藩於咸豐二年臘月。初招湘勇。維持長沙甫經解圍。各路兵勇往來湖南。絡繹不絕。臣徧查餉章。參差不齊。惟張國樑之勇。每月五兩四錢。江忠源之勇。每月四兩五錢。該兩軍最爲有名於時。逮三年夏間。勝保奏請招募陸勇。月餉四兩五錢。戶部議准江南大營循而行之。遂定爲報銷之常例。臣於三年冬間。召募水陸兩軍。陸勇酌減爲每月四兩二錢。而親兵什長則稍有增加。水勇酌減爲每月三兩六錢。而礮手船工稍有增加。厥後銀價日賤。米價日昂。咸豐十一年。楊載福等請將水勇加爲每月三兩九錢。至今未改。臣復詳加詢訪。如山東河南餉章微少外。其餘江楚閩浙等十餘省勇餉。均係四兩有奇。目下各路招集陸勇。紛紛未已。若水軍驟爲大減。則人皆去爲陸勇。誰復願充水兵。臣所議章程。於兵餉條暫從其優。一俟軍務告竣。再行酌量核減。審時度勢。有不能不出於此者。非敢與陸營戰守糧額故示懸殊也。自古來養兵本無善政。南宋之括財。晚明之增餉。皆爲兵多所累。識者病之。我朝綠營兵丁五十餘萬。較之宋明已屬極少。然乾隆四十六年。議增缺額名糧。大學士阿桂會上疏力爭。臣國藩亦於咸豐元年疏請裁兵五萬。戶部初未議准。後乃通行各省酌辦。溯自供揚倡亂。捻回繼變。軍興十餘年。惟向榮和春大營。用兵稍多。其餘皆倚勇丁以集事。國家養兵之費。歲逾二十萬。當此多事之秋。乃未聞綠營立一奇功。出一良將。今各省勇丁合計約在三十萬以外。而昔年經制之兵。仍未罷議。裁議減守戰各兵。在營之坐糧雖少。而出征外者。加以鹽折夫價餘丁等款。每兵一名。月支亦在五兩上下。夫平日有糧少之名。臨事無省費之實。百年收養兵之累。應急無破寇之效。統籌全局。殊非長策。臣愚以爲軍務全竣後。仍當綜核名實。裁減陸兵。其必不可裁者。卽當增加口糧。此又因今日設立水營而卽爲異日綠營之地者也。謹議事宜三十條。營制二十四條。分繪二摺。恭呈御覽。計戰船七百七十四號。除提督已預關防外。新設總兵四員。撥出兼隸之總兵一員。副參游三項營官二十四員。都守千把外委等哨官七百七十四員。兵數一萬二千餘人。兵餉船價廉俸雜費修艦之資。約計每月五萬有餘。凡選將練兵餉項。捕務暨考核教演之法。莫不屢定。

章程。冀垂令典。請旨勅下軍機大臣會同吏戶兵工等部。暨總理衙門核議施行。所有會議長江水師營制事宜。緣由。謹會同漕運總督臣吳棠。護江蘇巡撫臣劉郁膏。安徽巡撫臣喬松年。江西巡撫臣劉坤一。湖北巡撫臣鄭敦謹。湖南巡撫臣李瀚章。恭摺由驛具奏。伏乞皇太后皇上聖鑒訓示。再此摺係臣曾國藩彭玉麟主稿。合併聲明。謹奏。

長江水師事宜

第一條 提督建衙太平府

長江水師提督駐紮。原議在於蕪湖建立衙署。查蕪湖內河甚小。冬令水涸。不能安泊戰艦。若泊大江之中。則洪濤巨浸。其患莫測。查江南太平府河外通江。內通湖。可紮戰船數十營。右達皖南寧國府。南瀕固城諸湖。左達江蘇高淳溧水兩縣。石臼丹陽諸湖。兼可扼東壩之要隘。擬以提督駐紮太平府設立衙署。

第二條 提督立行署於岳州

長江水師提督管轄之地。上自荊州岳州。下自江蘇崇明兩岸。支河內湖均歸統轄。計程近五千餘里。分別五省。若僅駐紮太平府。恐其照料難周。擬於岳州府設立行署。該提督分月輪駐。以半年駐下江太平府。以半年駐上江岳州府。每年周歷巡查。駐上江則巡閱至洞庭湖荊州止。駐下江則巡閱至狼山止。

第三條 提督單銜奏事

長江水師提督統轄較遠。責任甚重。擬請單銜奏事。以專責成。如遇有與各省地方公事。及陸營交涉之件。則會商該省督撫分別奏咨辦理。如地方公事。及陸營有與水師交涉之件。該省督撫亦會商長江提督。分別奏咨辦理。提督之官。其初本係文職。明末李如松始以武臣而爲提督。初尙文武兼用。後乃專用武職。惟九門提督一缺。尙是文武兼領。江皖晉豫等省。提督之缺。尙以巡撫兼領。略存舊制。今長江提督一缺。擬請文武兼用。蓋緣長江通商。處處與外國交接。朝夕相見。必須提督平日稍有威權。乃足以資彈壓。該提督仍歸兩江總督湖廣總督節制。

第四條 長江共立六標

奏稿

長江水師共立六標。提督駐紮太平府。所轄提標五營。岳州設一總兵。所轄鎮標四營。漢陽設一總兵。所轄鎮標四營。湖口設一總兵。所轄鎮標五營。瓜州設一總兵。所轄鎮標四營。狼山鎮總兵。兼隸長江所轄鎮標二營。通共二十四營。

第五條 長江與各省水面分界

長江水師與各省河湖交界之處。應卽畫分界限。各有汛地。以專責成。湖北除江面千餘里。全歸長江提督外。其自荊州以上。溯江至宜昌巴東。漢陽以上。溯漢至襄陽鄖陽。及各支河湖。以應由湖北另行設防。歸湖廣總督。湖北提督統轄。湖南除江面及洞庭湖。歸長江提督外。其湘沅二水。應由湖南另行設防。歸湖南巡撫。湖南提督統轄。江西除江面及鄱陽湖。歸長江提督外。其吳城以上。省河及東西支河。應由江西另行設防。歸江西巡撫統轄。安徽除江面與傍江之湖。歸長江提督外。其淮河自正陽關以下。至洪澤湖止。并接連蘇屬之支河湖蕩。應另設淮陽水師。歸淮陽鎮總兵統帶。兩江總督。漕運總督。安徽巡撫兼轄。江蘇除江面歸長江提督外。其自鎮江以東。凡江南之支河湖蕩。應另設太湖水師。歸兩江總督。江蘇巡撫。江南提督統轄。其舊設海口之狼山福山蘇松三鎮。除福山蘇松二鎮。悉仍其舊外。擬以狼山鎮兼隸長江提督標下。仍聽兩江總督。江南提督節制。

第六條 副參游沿江建衙

副將參將游擊各有專營。自應設立衙署。惟長江水師管汛。其責任專重在水面。并無防守城池彈壓市鎮之責。其立汛建署。須擇有港汊內河可收泊戰艦者。庶免風濤覆爛之患。雖孤洲野岸。亦可修造衙署。宜距城市稍遠。乃爲妥善。

第七條 都司以下不立衙署

水師官兵。皆宜以船爲家。不准登岸居住。如違例住岸上者。官卽革職。兵卽革糧。自都司以下。皆係哨官。卽以哨船爲辦公之所。不准建衙衛居。至長江提鎮。除例給坐船外。各給督陣舢板二號。每船額設守備哨官一員。兵二十名。內舵兵一名。頭兵一名。礮兵二名。槳兵十六名。凡提鎮衙門巡捕。跟丁執事人等。輪流派此船之人值班聽差。下班仍以船爲家。不准在岸居住。副參游督陣舢板各一號。悉如之。

第八條 營制船數

副將營制。戰船四十三號。內長龍船二號。舢板船四十號。督陣大舢板船一號。參將營制。戰船三十三號。內長龍船二號。舢板船三十號。督陣大舢板船一號。遊擊營制。戰船二十三號。內長龍船二號。舢板船二十號。大舢板船一號。其雖係遊擊營制。而用船三十三號者。惟岳州漢陽二營。凡專立之營。皆以都司二員。管駕長龍爲領哨。其各散哨員弁。均受約束。左領哨專管本營錢糧。右領哨專管本營船礮軍裝及一切差遣巡查諸務。其舢板之以守備充哨官者。爲副領哨。每守備率領船十號。

第九條 戰船人數

長江水師額兵。副將營督陣舢板船一號。兵二十名。長龍船二號。每船二十五人。共兵五十名。舢板船四十號。每船十四人。共兵五百六十名。稿書書識十四名。共額兵六百三十名。共哨官四十三員。參將營督陣舢板船一號。兵二十名。長龍船二號。每船二十五人。共兵五十名。舢板船三十號。每船十四人。共兵四百二十名。共額兵四百九十名。共哨官三十三員。遊擊營督陣舢板船一號。兵二十名。長龍船二號。每船二十五人。共兵五十名。舢板船二十號。每船十四人。共兵二百八十名。共額兵三百五十名。共哨官二十三員。其遊擊營亦有用三十三船者。全仿照參將營之例。稿書書識均不在內。

第十條 都司於本船之外另有打仗舢板

領哨都司除長龍戰船一號有兵外。另給無兵之舢板船一號。如遇出兵入小河港汊。恐長龍遲滯。則由長龍撥兵歸此舢板乘坐。領哨出隊。以期便捷。

第十一條 設立書吏

長江水師提督。用稿書四名。書識八名。總兵用稿書二名。書識六名。副參游皆用稿書二名。書識四名。都司用稿書一名。書識二名。守備用書識二名。千把各用書識一名。

第十二條 兵丁糧額

咸豐四年初立水師之時。設陸軍勇糧稍減。槳手每月三兩六錢。舵工四兩五錢。頭工四兩二錢不等。厥後因銀

價日賤。米價日貴。槩手加爲三兩九錢。今將水勇改爲額兵。而各處陸營。紛紛招勇。若遽將水兵口糧太減。則人皆去爲陸勇。誰復肯當水兵。自應斟酌暫從。其優長龍戰船額設兵二十五名。內柁工兵一名。每月給銀三兩六錢。每日一錢二分。管艙兵一名。頭工兵一名。礮手兵四名。每月給銀三兩。每日一錢。槩手兵十八名。每月給銀二兩七錢。每日九分。舳板戰船。額設兵十四名。內柁工兵一名。頭工兵一名。礮手兵二名。槩手兵十名。督陣大舳板。額設兵二十名。內柁工兵一名。頭工兵一名。礮手兵二名。槩手兵十六名。月餉均與長龍戰船同。稿書與柁糧同。月支三兩六錢。書識與槩糧同。月支二兩七錢。俟軍務大定。各路并無招勇之事。再由長江提督江楚總督專案具奏。議將口糧酌減。乃爲定額。亦須優於陸兵。庶不至似今日綠營之廢弛。

第十三條 哨官額缺

長江水師副將營協標哨官額缺。應設都司二缺。守備三缺。千總十缺。把總十二缺。外委十六缺。參將營哨官額缺。應設都司二缺。守備二缺。千總八缺。把總九缺。外委十二缺。游擊營哨官額缺。應設都司二缺。守備一缺。千總四缺。把總六缺。外委十缺。以上各營哨官。皆以各員所管之船爲缺。不設衙署。

第十四條 另給座船

長江水師提督給座船四號。總兵給座船三號。副參游給座船二號。各營哨官都司守備以下。直至外委。皆無衙署。每哨各給座船一號。以抵陸營衙署馬匹之費。提督每座船月支價銀十六兩。總兵副參游。每座船月支價銀十四兩。都守以下。每座船月支價銀十二兩。

第十五條 出缺遞補

長江水師哨官缺出。都守千把外委五項。應全歸長江提督主政。卽就長江水師中選員題補。其營官缺出。副參游三項。擬以七成歸長江水師中題補。以三成由兵部就各省水師中推補。至總兵缺出。由長江提督兩江總督湖廣總督三人各保堪勝人員。平日開單保奏。屆時恭候特旨簡放。

第十六條 餉項出入報銷

長江水師上下五千里。分防五省。若向五處藩庫領餉。分歸五省報銷。殊覺散漫無紀。戶部難於稽考。而各處入

欸俱有常額。若添此項兵餉，殊覺別籌維艱。查沿江釐卡，皆係水師恢復之地。水軍歷年口糧，多取諸此。今長江既立經制，水師酌定永遠章程。凡俸廉糧餉船礮子藥一切費用，應酌留釐卡數處。在兩江境內者，歸江寧鹽道經收。在兩湖境內者，歸武昌鹽道經收。每年屆發餉之時，其在楚境各營造冊呈明湖廣總督長江提督，赴武昌鹽庫支領。其在江境各營造冊呈明兩江總督長江提督，赴江寧鹽道庫支領。江楚兩總督每年各自具本題銷，不彙入各省藩庫奏銷案內，以免牽混。

第十七條 三處設藥彈局

長江水師礮位，大者千餘斤，次者亦數百斤，所須子藥最多，須常設子藥局，以資操演，而備不虞。查湖北省城安徽省城造藥均有牛碾，極爲穩便。該二省應各設火藥局，常川製造。江蘇江西應辦硝斤，協濟安徽藥局，湖南應辦硝斤，協濟湖北藥局。至生鐵產於湖南，應在長沙設立子彈局，常川製造封門大子，熟鐵羣子，分解湖北安徽兩省。所有楚境各營均赴武昌請領子藥，江境各營均赴安徽請領子藥。至三局造辦子藥之費，由武昌江西鹽道庫於釐金項下撥給。

第十八條 三處設立船廠

長江戰船大礮震驚，最易朽壞。定每屆三年修理一次，十二年卽行更換。應於湖北之漢陽，江西之吳城，江南之草鞋夾三處，各設船廠，排定子丑寅卯等年。某年應修整某營某哨之船，幾年應更換某營某哨之船，輪流興工。江境兩廠，由兩江總督暨長江提督委員監修。楚境一廠，由湖廣總督暨長江提督委員監修。所有船廠經費，亦由江寧鹽道武昌鹽道兩庫撥給。其風篷一件，三年卽須更換一次，桿索纜緯等物，每屆修整之年，亦須酌量添換，均准在於船廠請領。

第十九條 兩篷旗幟等費

長江戰船，并無竹篷木蔴，惟以布棚遮蔽，雨露霜雪，名曰雨棚，最易朽腐。又如錨本腦索纜繩旗幟紅袖白油等項，均須時常修換，不能待三年之期，亦不能赴船廠請領。此五者名曰雜費，酌定長龍戰船每年發銀六十兩，舢板戰船每年發銀四十兩，交該哨官採辦修飾，以壯軍容。江境之船，由江寧鹽道發給楚境之船，由武昌鹽道發

給。

第二十條 廉俸兵米

長江水師提督現擬文武兼用。其養廉應即加重。每年支銀八千兩。其餘俸薪蔬菜燭炭心紅紙張等項。均照綠營提督之例支給。自總兵以下直至千把。凡養廉俸薪蔬菜燭炭心紅紙張等項。均照陸營之例發給。外委准食柁糧雙分。仍每年支養廉銀十八兩。惟綠營之例馬。改爲水師之座船。其水師官兵應領之米。照各省綠營陸兵例。每人日支八合。亦由江寧鹽道。武昌鹽道。兩衙門於釐卡項下購米。按季支發。以上子藥局船廠雜費廉俸兵米四條。均彙入正餉案內題銷。

第二十一條 禁約三事

長江水師舊日營規甚嚴。近來日就鬆懈。今立爲經制。水師應申明定規三條。決不可犯者。一曰不許沿岸居住。二曰不許吸食洋煙。三曰不許賭博。如有登岸居住吸食洋煙者。官則革職。兵則革糧。有犯賭者。由該管將領察核情節。稟明嚴辦。

第二十二條 疏防處分

現在髮逆肅清。長江水師。各分汛地。專以驅逐游匪。嚴防劫盜爲重。倘有水盜劫船搶巨案。逾限不獲。由長江提督專案參劾。不得以陸營尙未開參。文員尙未開參。稍涉推諉遲延。以重江防而絕盜風。

第二十三條 已保官階大者借補小缺

長江水師設立營汛。待部議准後。即須補放實缺。查軍興十餘載。水師員弁。所保官階提鎮居多。副參游亦不少。所設營缺有限。應以保舉較大之階借補較小之缺。由臣等會同長江提督開單奏補。其現在勇丁營制。俟部議准後。應即陸續遣撤。一俟勇營撤畢。即照新定兵丁餉章發給。

第二十四條 不准私借戰船

長江水師。各有汛地。不得私離。且長龍舢板。均係官物。非同私物可以借用。凡各省文武出差人員。雖有緊急公務。非奉有長江提督。及五省督撫專札。派坐戰船者。不得私借戰船乘坐。以圖便易。違者照不應馳驛。妄行馳驛。

例議處。各營哨官。非奉有專札。而以戰船私借客官及朋友乘坐者。照私離汛地例議處。

第二十五條 船式礮數

長江水師修造戰船式樣。長龍底長四丈一尺。底中寬五尺四寸。舳板底長二丈九尺。底中寬三尺二寸。督陣舳板。略加長大。長龍設大礮前後左右六位。舳板設大礮前後兩位。左右設車轉小礮兩位。小鎗短刀長矛噴筒。隨宜配用。

第二十六條 海口添造大船

狼山鎮總兵。現改歸長江提督管轄。該處江寬百餘里。洪濤浩汗。海風不測。長龍舳板。船身太小。有風即不能出港。狼鎮所轄均係洋面。近來寧釣沙船。帶有礮位槍械。每以捕盜爲名。趁風行劫。擬每營設大舳板二十號。并造大船數號。如紅單拖罟式樣。多安礮位。巡緝內洋。以壯聲威。又擬造輪船數號。分布狼山崇明等處。於江海防務更資得力。

第二十七條 不准私立礮船亦不許水師干預鹽務

礮船爲江中利器。然可以禦暴。亦可以爲暴。如准商民私造礮船。則強盜亦可造礮船以行劫。鹽梟亦可造礮船以護私。假名僞旗。萬難稽查。此後既立長江經制水師。應將民間私造礮船。一概禁革。雖文武官員。亦不准私設礮船。以杜奸民影射。難於查察。如有私立礮船。不立時稟報者。惟該汛之水師是問。至巡緝私鹽。本以礮船爲最便。然亦只准於瓜州漢陽兩鎮標下。奉派戰船若干號。巡緝某處。其未經奉派之戰船。概不准干預鹽務。尤不准包庇私鹽。如有包庇者。由兩江總督湖廣總督嚴行參辦。

第二十八條 建衙經費

長江水師提鎮暨副參游駐紮之處。均須設立衙署。軍裝即取諸酌留釐卡。一俟部議覆准。即由臣等會同江楚總督。長江提督。派員勘估。次第建造。事竣核實報銷。

第二十九條 沿江舊日水師改隸長江提督

江南之京口狼山等營。江西之湖口營。湖北之漢陽營。湖南之岳州等營。凡向有水師之名。而無礮船之實者。今

各該處均立標營。改從新章。應悉歸長江水師節制。以昭畫一。其向無水師名目者。不必更改。

第三十條 考糧考缺操演章程

水師以使船爲第一義。管放礮次之。凡考築糧。須令一人駕一小划。渡江一兩次。凡考礮糧。須令連放五礮。無走火遲鈍等弊。凡考應升應補之缺。須令數船於無風之日。盪槳逆行三十里。驗其遲速。其哨官仍考試技藝。以定等差。至校各鎮之優劣。每年春季。長江提督會同兩湖總督。調集岳州漢陽二標。在於武昌江面。或武漢各湖。簡閱一次。秋季會同兩江總督。調集湖口太平瓜洲狼山四標。住於黃天蕩等處。簡閱一次。閱畢。會摺具奏。優者酌量保獎。劣者分別參辦。

長江水師營制

一岳州設立總兵。設中軍中營游擊。用船三十三號。仿參將營之例。分防自城陵磯起。至鹿角壘石簷陵潭湘陰一帶。

一沅江設立參將。屬岳州鎮左營。分防君山西湖及常德龍陽華容等河。出湖之處。但不進防內河。其沅湘等水。應由湖南另行設防。

一荊州設立副將。屬岳州鎮後營。分防自荊州以下江面石首監利一帶。至荊河口止。

一陸溪口設立游擊。屬岳州前營。分防自荊河口以下江面螺山新堤及倒口以內之黃蓋湖。

一簪州設立參將。屬漢陽鎮後營。分防自倒口以下江面自沌口止。兼防金口以內之斧頭湖。

一漢陽設立總兵。設中軍中營游擊。用船三十三號。仿參將營之例。分防自沌口以下江面至團風止。并防省城兩岸。後湖青林等湖。其漢水上通樊城一千餘里。及各支河漢湖。應由湖北另行設防。

一巴河設立游擊。屬漢陽鎮右營。分防自團風以下江面黃州蘭溪至道士洲止。並防樊口以內之樑子湖。

一田家鎮設立副將營。屬漢陽鎮前營。分防自道士洲以下江面漳源口蘄州武穴至陸家嘴止。并防漳源口及隆平以內之湖。

一湖口設立總兵。設中軍游擊游擊。分防自陸家嘴以下江面九江十八號至老洲頭止。

一吳城設立參將。屬湖口鎮左營。分防自湖口以內姑塘南康渚磯一帶。

一饒州設立參將。屬湖口鎮後營。分防都昌鄱陽康山一帶。其彭蠡湖東通廣信樂平浮梁各河。南通省城贛江。均由江西另行設防。

一華陽鎮設立游擊。屬湖口右營。分防自老洲頭以下彭澤香口至東流止。並防吉水溝以內各湖。

一安慶府設立副將。屬湖口鎮前營。分防自東流以下江面黃石磯李湯河一帶。至樅陽止。并防北岸鹽河及樅陽以內之湖。南岸通殷家匯之河。

一大通設立參將。屬提標後營。分防自樅陽以下江面池州土橋一帶。至荻港止。

一蕪湖設立游擊。屬提標右營。分防自荻港以下江面至裕溪口止。並防灣沚清弋江等內河。

一裕溪口設立參將。屬提標左營。分防江面東西梁山至金柱關止。並防運漕巢縣無爲州各內河及巢湖百餘里。

一太平府設立提督衙署。設中軍中營副將。分防金柱關以下江面至烏江止。

一金陵草鞋夾設立參將。屬提標前營。分防自烏江以下江面至通江集止。并防江浦六合之內河。

一瓜洲設立總兵。設中軍中營游擊。分防自通江集以下江面至焦山止。并防內河至揚州止。自揚州以上高郵寶應諸湖。應由淮揚鎮總兵另行設防。

一孟河口設立游擊。屬瓜洲鎮右營。分防南岸各夾江。自焦山起至江陰口止。其南岸各內河。應由松江提標另行設防。

一三江營設立游擊。屬瓜洲鎮左營。分防北岸各夾江。自焦山起至靖江口止。其北岸各內河。應由淮揚鎮標另行設防。

一江陰設立副將。屬瓜洲鎮前營。分防自江陰口以下江面至鹿茆港止。及常陰壽興等沙。其鹿茆港以下。由福山鎮標接防。

一狼山鎮總兵。即舊日所設者。應添設兩營水師。兼隸長江水師提督管轄。查狼山鎮原統中左右三營。鹽捕揚

州三江泰州泰興掘港六營共九營。今擬一切悉仍其舊。惟於通州設一游擊。名曰綬通營。分防自靖江八圍港以下江面。至通州止。其船用長龍二號。督陣舢板一號。二十人之大舢板十號。十四人之舢板十號。仍酌添紅單拖罟等船。

一海門廳設立副將。名曰綬海營。分防由狼山至海門一帶北岸江口海汶。其船隻用長龍二號。督陣舢板二號。大舢板二十號。仍酌添火輪船并紅單拖罟等船。至崇明一帶南海岸汶。則歸江南提督分防。

以上新設岳州鎮標四營。漢陽鎮標四營。湖口鎮標五營。提標五營。瓜洲鎮標四營。添設狼山鎮標二營。共二十四營。內副將六營。參將七營。游擊十一營。

賊萃湖北派大軍援鄂摺 同治四年十二月二十八日

奏為兩路擒匪全萃湖北。又有叛勇之變。現派大軍援鄂。恭摺仰祈聖鑒事。竊任賴牛李各酋。於上月竄擾光固。臣檄飭劉銘傳進剿。該軍以車輛未齊。尙未起程。旋報該逆已由麻城竄入鄂境。接據道員黃家駒等來稟。成大吉所部十營。原紮宋埠地方。忽於本月初二日。以索餉為名。燒營謀變。該統領親出彈壓。亦受重傷。越三日。僅得破圍而去。其部下弁勇。多已從亂。聞游匪唐姓。實為主謀。勾通擒匪。遍擾黃安黃岡黃陂孝感等縣。其張總愚新野一股。亦已竄至樊城。游匪疊起。裹脅日衆。旋又接得官文函牘。請臣派兵由麻城黃安援鄂。情詞甚切。臣一面商之兵部右侍郎彭玉麟。令總兵喻俊明等率帶師船駛赴武漢。一面檄調直隸提督劉銘傳一軍。自周家口馳赴光固麻城。徑援黃州。劉銘傳未接臣檄之先。亦有呈文前來。自請率師援楚。據稱車輛駱駝。俱已辦齊。即可以成行。臣慮惟該軍人數較多。距鄂境較近。當不至稍涉遲延。惟周家口至黃州。向有七百餘里。恐我軍趕到。該逆又有變動。諭臣處之馬隊太少。則楚中利用步兵。而淮軍之勦辦稍易。諭臣處之糧運維艱。則豫中已有頭緒。而湖北之另籌更難。臣前累次具奏。但任十三府州之地。厥後東路無賊。乃推廣及於陳許南汝光五郡。今則直隸齊豫三省。皆已無賊。自未可堅持初議。惟當窮寇之所往。不計遠近。竭力之所能。不計利鈍。以期有補於萬一而已。所有擒黨叛勇全萃湖北。現派大軍援鄂緣由。恭摺由驛五百里具奏。伏乞皇太后皇上聖鑒訓示。謹奏。

查覆吳昌壽張曜參案摺 同治四年十二月二十八日

奏爲遵旨確查河南巡撫吳昌壽總兵張曜等被參各款恭摺覆陳仰祈聖鑒事。本年八月十八日承准軍機大臣字寄同治四年八月十四日奉上諭「御史劉毓楠等奏本年擒匪由皖竄豫勢甚披猖蹂躪最慘巡撫吳昌壽始以防守省城爲名縱容馬兵任意騷擾蘇廷魁陳國瑞勸令出城屢改行期不得已往紮許州未接一仗陳州紳民請救不遣一兵往援總兵張曜任令兵勇搶殺六月初旬兵勇在底閣寨擄掠婦女該寨難民鎗斃兵勇一名張曜輒卽圍寨逼脅寨民獻出高思義一人償命勒索賄銀四百兩始行解圍皆由吳昌壽調度無方以致張曜肆行不法遂平縣知縣文玉勒捐被訴該撫有心袒護置之不理鄧州知州黃縉昌貪劣該撫已飭王文常署理旋因有人請託立將委牌撤回似此瞻徇情面難望整頓吏治」各等語中州爲天下樞紐現值捻匪肆擾尤在封疆大吏實力圖維迅速籌辦方能盪寇綏疆該御史等所奏如果屬實於軍務吏治大有關係著會國藩將吳昌壽張曜被參各節嚴密訪查據實具奏毋稍徇隱劉毓楠等原摺着抄給閱看欽此」十月廿六日承准軍機大臣字寄同治四年十月二十二日奉上諭「前據吳昌壽奏保劾屬員賢否請將遂平令文玉以知府用汝陽令蘊琛革職當經降旨允准茲有人奏文玉於遂平任內縱役殃民妄率無辜門丁舞弊蘊琛歷任上蔡汝陽南陽勤政愛民除莠安良操守廉潔該撫是非顛倒臬白不分請查明等語致治之原首先察吏封疆大吏舉劾屬員關繫實非淺鮮吳昌壽前以文玉爲守兼優體用俱備到任未久民愛滋深蘊琛好尙虛浮政事廢弛分別陳奏且稱或探自公評或驗其實跡並詢據臬藩兩司均屬察訪相同自當確有聞見何以有人稱其甄別失嘗并廬列文玉勒捐妄率等款及蘊琛爲民愛戴各情所奏是否屬實著會國藩卽行密派委員前赴豫省按照所陳各節嚴密訪查將該二員賢否務得實蹟秉公覆奏以肅吏治而示勸懲毋得稍涉徇徇原摺着抄給閱看欽此」臣博訪來往官紳并派員赴豫密查互考參稽已得崖略原摺所稱吳昌壽許州督師未接一仗陳州請救未發一兵暨馬兵在汴騷擾等情查本年六月擒匪自雒河分股西竄前股張總愚等由亳州歷歸德鹿邑柘城淮寧太康鄆陵而至許州豫軍追及於許清交界之朱曲與相持者數日旋又由襄郟寶豐而至魯山南召破張旂營瓦店而趨鄧州又折而東向鎮平內鄉之交後賴汶光等由亳州鹿邑竄入陳州惟時豫軍西去陳無一旅之師該逆盤踞蹂躪至二十日之久飽掠而去復由鄆城襄城擾及西平遂平確山上蔡等縣直至新蔡阜陽

之間。八月初十日等。豫皖諸軍與劉銘傳等會擊破之。賊乃北走。回竄山東。嘗捻黨游弋許州之時。吳昌壽即讖赴許。因聞後賊踵至。未卜所向。遲疑不決。蘇廷魁陳國瑞從容勸請。吳昌壽旋即赴許。而賊已先後颺去。無從接戰。陳州被圍。府縣疊次請救。均未得達。遠紳士袁保恆等專馬到汴。該汴撫隨即派兵往援。而賊去已三日矣。是赴許之稍緩。初非有意逗遛。救陳之稍遲。實因文報梗阻。惟所稱馬兵騷擾一節。係屬實情。省城鼓樓街南北上街。各飯館客店。大半關閉。輿論亦與原奏相符。河南兵勇。毫無紀律。不支棚帳。專住民房。閭閻苦之。由來已久。不獨馬隊爲然。即各營步隊。亦皆與民爲仇。該撫威信未孚。莫能禁止。此訪查吳昌壽辦理軍務之梗概也。原摺所參張曜殺掠難民一節。查本年六月十三日。豫軍追賊至通許縣之底閣寨。逃難民車。與兵勇相值。因搶物互爭。有秦姓者。毆傷官兵一名。旋以中傷而死。兵勇近寨。鼓譟而趨之。約數十人。多以花布裹頭。是時捻匪甫過。民疑爲賊。至互相擊殺。未幾大隊擁至。始知爲宋慶部下之勇。張曜見兵民大譁。出而調停。寨中首事始敢出見。畏懼之際。因譏犒軍贖罪。經各統領嚴詞拒絕。乃獻出高思義一人。張曜等飭令送縣究辦。其意陰欲保全之。中途爲亂兵所戕。兵散之後。有王姓朱姓到寨。借銀二百兩。如數付給。嗣又有蔣姓到寨借銀一百兩。該寨民祇求息事。不敢究所從來。聞係是無賴之徒。乘風訛詐。并非營中弁勇。亦非張曜所使。至擄去婦女八車。實無其事。是日有附近民人坐驢牛車六七輛。前來避難。聞兵勇一到。即棄之而匿於高梁叢中。兵勇經過。坐車而去。後經寨長稟明。帶兵官將車放回。徧詢本地居民。俱云未見當日有姦淫情事。此即查訪張曜在底閣寨一案之情形也。原奏所陳文玉黃縉昌蘊琛等事。查遂平縣知縣文玉。聲名平常。本年二月。有一武生李夢齡至汝寧府控告該令派捐供差。由府押發回縣。在途脫逃。該令詢查同謀與訟之人。有監生趙乾修者。在城開設正興錢店。因在店內鈔錄李夢齡控府呈詞。該縣訪聞。當將趙乾修收押刑責。逼令捐輸錢文。妄率正興店數。及大興布店之王姓。查亦實有其事。門丁李二。實有其人。丁役訛索銀錢一節。未能訪出實據。至趙乾修所控文玉淨收錢糧。查西平遂平等縣。征收地丁。爲數頗重。咸豐九年。西平有聚衆圍城之案。其時正銀一兩。已收錢二千八百文。遂平近日爲數更增。文玉淨收有若干。必須調齊卷宗。當堂質訊。乃成信讞。即由河南另案奏結。聞五月間。文玉妻女至千總馬建功家聽戲。兩家內眷。同席而飲。有伶人至簾內敬酒。該令聞知。當將妻女喚回。並邀馬建功到署。面加申飭。

馬建功認錯。卽派差將戲班逐出境外。所稱職官相毆。其女被拐。蓋外間傳聞過當之詞。惟文王毫無善政。輿論
僉同。又有京控未結之案。吳昌壽遠以民愛滋深。保列升階。殊爲失實。鄧州知州黃縉昌。因有人命緝兇之案。臬
司王正誼以情節不符。稟請將該牧撤任。委王文常署理。旋因王文常在考城縣任內。有應解欵項未楚。仍將委
牌撤回。責令黃縉昌趕緊緝兇。暫緩撤任。事屬因公。并非出自該撫吳昌壽之意。黃縉昌尚係讀書本色。平日官
聲毀譽參半。信任家丁。在所不免。而實無貪劣可指之迹。汝陽縣知縣蘊琛。清廉剛直。實心任事。署上蔡縣時。捕
蝗緝匪。甚洽民心。汝陽被圍數月。募勇堵禦。頗著勤勞。調署南陽。聽斷詳明。去任之日。咸有去思。原奏所稱亦與
臣處委查相符。乃以本管知府揭參。吳昌壽漫不加察。遽列彈章。物論大爲不平。所謂是非顛倒者。卽豫中僚屬
亦已竊竊議之。此訪查文王黃縉昌蘊琛三員之梗概也。臣奉命查察。勉效虛公之義。其漫無依據者。不敢率爾
附會。其確有見聞者。亦何敢稍涉徇隱。上負聖朝揚清激濁之意。就臣所查者酌加擬議。遂平縣知縣文玉。似應
卽行革職。汝陽縣知縣蘊琛。似應開復原官。鄧州知州黃縉昌。似可無庸置議。巡撫吳昌壽總兵張曜。如何分別
懲處。恭候聖裁。所有遵查河南巡撫吳昌壽總兵張曜被參各欵緣由。恭摺由驛馳奏。伏乞皇太后皇上聖鑒訓
示。謹奏。

查覆山東撫藩等參欵摺 同治四年十一月二十八日

奏爲遵旨密查山東巡撫藩司等被參各欵。恭摺覆陳。仰祈聖鑒事。竊臣於本年六月十四日。承准軍機大臣密
寄同治四年六月初八日奉上諭。一有人奏僧格林沁在山東督師勦賊。經四十餘州縣。閻敬銘安坐省城。不爲
援應。并飭州縣不准支應口糧。該親王函致該撫。赴曹助勦。該撫借防河爲名。竟往東昌。迨該親王殉難。疾馳回
省。將家眷裝扮民婦。送往署齊河縣知縣李均署中。李均與該撫係屬親戚。以候補知縣久署齊河。笑缺在省。開
設錢店銀樓等鋪。每七八日赴省一次。寓居鋪內。招妓聚飲。便衣小帽。出入撫衙。該撫將其列入賢能。奏保升階。
丁寶楨在曹州防堵。迄未與僧格林沁會合。亦從未獲一勝仗。所部勇丁。在濟南焚搶。肆無忌憚。兗沂曹濟道盧
朝安隨國瑞駐劄清寧。於僧格林沁追勦吃緊之時。該道約同城官員。逢迎國瑞。開筵痛飲。演戲三日。該親王凶
問之來。正在恆舞酣歌之際。候補道王繼庭聞係閻敬銘私人。以官爲幕。居住撫衙。本係坐辦文案。該撫列入勦

賊案內。免補知府。保升道員。各等語。以上各情。是否屬實。有無其事。著會國藩詳細嚴密訪查。據實具奏。毋稍徇隱。原摺片着鈔給閱看。將此密諭知之。欽此。○七月十一日。准兵部火票遞到軍機大臣字寄。同治四年七月初五日奉。上諭。○有人奏。髮捻各匪竄入東境。巡撫毫無布置。藩司縱勇殃民。恐誤大局。一摺。據稱張總愚等股由河南竄入東境。旋擾江南贛榆。復回竄山東鄒城等境。僧格林沁盡力追剿。閻敬銘安坐省城。並不發兵守隘。任賊奔突。致該大臣遇伏陣亡。藩司丁寶楨帶勇出省。行至蘭山縣聞賊竄江南。並不擇要駐紮。逼賊歸路。輒即折回。嗣復出省防堵。離賊甚遠。始終未與賊遇。并縱令兵勇。徑掠焚擄。閻敬銘置之不問。各等語。以上所奏。該撫等措置失宜。各情。如果屬實。殊負委任。即著會國藩按照所參各節。確切查明。據實具奏。毋稍徇隱。另片奏山東鄒城縣知縣周士傳。於賊匪攻撲楊家圩之時。并不督率兵勇。力為援救。以致被匪攻陷。肆行殺戮。情殊可恨。著該督一併查明參辦。原摺片均着鈔給閱看。○等因。欽此。臣博訪該省官紳。並派員赴東密查。雖未必洞悉毫芒。亦已粗得崖略。如原摺稱僧格林沁在山東督剿經四十餘州縣。閻敬銘不為援應。該親王函致該撫。赴曹助剿。該撫藉防河為名。竟往東昌等語。查僧格林沁今年督師山東。經過曹縣定陶荷澤鄆城鉅野嘉祥濟寧寧陽曲阜。汶上東平滋陽鄒縣滕縣嶧縣蘭山鄒城共歷十七州縣。其中雖有數縣再過者。然實無四十餘縣之多。馬步諸將。現在臣處言之甚詳。僧格林沁亦無緘致該撫赴曹助剿之事。諸將皆略知之。該親王居心仁厚。深知各省大吏。多不能親臨陣陣。故但見調將領隨剿之檄。從未見調巡撫會剿之文。不獨山東然也。至東昌防河。係遵奉屢次寄諭。先期奏明而往。惟該親王殉難後。閻敬銘不應疾馳回省。彼時賢王新逝。遠近震動。該撫但宜進駐汶上東平。以定衆志。不宜躉回省城。以惑軍心。此軍事闕歷太少之失也。至將家眷妝扮民婦。送往齊河縣署。則臣歷詢往來各員。皆稱未聞此說。捻匪向不攻城。衆所共知。當曹南警信至時。鄉民紛紛避亂。挈眷進省。豈有舍省垣鞏固之區。趨旁邑彈丸之地。此不待辨而可明者。其各牧令請餉接濟大營。該撫駁斥一節。查山東協餉五萬兩。按月批解。絲毫無誤。戶部有案可稽。即該親王身後。糧臺尙餘銀二十餘萬。亦足為餉項無絀之證。聞各州縣或困養勇練團。稟請動用正項。閻敬銘疑其浮銷。多從駁斥。該撫自負清正。往往以不肖待人。僚屬怨其刻覈。要其於僧格林沁傾心敬服。固一無所吝也。原摺又謂閻敬銘請添幫辦之疏。在該親王陣亡後一日所發。作為不知。

故示先見。果若所言。心術豈復堪問。查僧格林沁於四月二十四夜殉節。其時敗兵四散。臣詢之翼長陳國瑞。常星阿等。二十五日午刻。尙不知該親王存亡確耗。國瑞近在濟寧。距鄆城僅二百餘里。二十七日始得真信。飛章入奏。閻敬銘時在荏平。距鄆城四百餘里。聞此摺。係二十五日所發。其爲不知主帥已死。當無疑義。且賢王已逝。而僞奏以誦先見之明。此至愚之小人所不忍爲。豈閻敬銘而爲之乎。原摺又謂齊河縣知縣李均與閻敬銘係屬親戚。列入賢能奏保。查李均之弟內閣中書李應萃。與該撫爲親戚。齊河一缺。係前任撫臣譚廷襄所委。閻敬銘因之久未調動。又將齊河本任之張聯奎。另案甄別。酌改簡缺。又將李均列入賢員。保舉升階。外間旣疑張聯奎之被劾。係爲李均騰挪斯缺。又疑李均之得舉。毫無善政可紀。物議多爲不平。李均於省城西門內開設麟芝公錢店。漆店。麟芝藥棧。原摺所指。均屬確鑿。其招妓聚飲。查無實據。而率意妄行。寡廉鮮恥。則衆論多與原奏相符。此訪查閻敬銘暨附參李均之梗概也。原奏所稱山東布政使丁寶楨帶勇擾民一節。查丁寶楨以癸丑庶吉士回籍。捐資募勇。毀家紓難。在安平鎮遠一帶。屢立戰功。蒙恩簡放岳州府知府。擢署陝西臬司。適值湖南撫臣毛鴻賓奉募勇援剿山東之旨。遂奏令丁寶楨帶勇改赴東省。旋授山東臬司。該司所帶湘勇。僅有千人。厥後陸續增募。亦僅步隊二千六百人。較之捻黨馬步數萬。衆寡懸殊。本年二月初間。帶兵出省。甫至曹縣。賊已由東明一帶竄入定陶。遂與僧格林沁分道跟追。二月十六日。曾在寧陽縣獲一小勝。三月二十四日。接僧格林沁之札。以賊擾沂州。恐由莒州日照東趨。飭丁寶楨卽折赴歷城章邱交界之龍山鎮堵禦。甫經赴防。又接該親王札。飭令回嶧縣駐紮。原摺所參。四月初二日。折回省垣。初五日復防東平。不知其一往一返。皆係奉札而行也。四月初二日。其部將戰賊於大泛口。十二日丁寶楨親自截賊於滕縣之臨城驛。殺傷過當。十三日。與僧格林沁相遇於道。頗加慰勞。飭令暫回濟寧防守。原摺所稱始終未與賊遇。并未與該親王接見者。殆係傳聞失實之詞。該司帶勇思多於威。誠不免於騷擾。然并無淫擄重情及畏楚勇甚於畏賊之謠。遠僧格林沁殉節以後。各路敗兵游勇。齊集濟寧。凡他營不法之案。亦或歸咎於該司部下。丁寶楨深爲憤悵。鬱鬱恆不自得。閻敬銘亦重其才。而思至其名。將所部改隸他將。飭回藩司本任。該司心地光明。辦事結實。山東官民實無聞言。此訪查藩司丁寶楨之梗概也。原摺所參兗沂曹濟道盧朝安候補道王繼庭一節。查盧朝安係捐納佐雜出身。前任單縣知縣時。藉團練

爲名。勒索富紳朱姓財物。久爲衆所指目。在濟寧任內。辦理大營糧臺。本年四月。與紳士姚姓飲酒觀戲。忽傳僧格林沁凶問。倉皇驚散。雖無約同都司周貞元章京玉姓邀請國瑞之事。而原摺所指多屬得實。閩敬銘亦素惡其人。今盧朝安已告病開缺。物論猶共鄙之。候補道王繼庭。前在青州府任。爲巡撫文煜奏參革職。閩敬銘因其熟悉例案。延之入幕。佐理文書。動中款要。該撫於公事極爲認真。每與該道熟商。近以交代款項參劾多員。間有過當之處。外間疑出王繼庭之意。遂共怨其刻薄。因并疑其專擅。至并未打仗。列入保單一層。近日疆吏。於得力幹員。附入戰功。通融入奏。久爲軍營積習。各營皆然。蓋統領營官之文案。皆得保獎。而督撫之文案。獨令向隅。情勢有所難行。其中固有冒功倖進者。亦有愛惜人才。借此以振拔淹滯者。願督撫之心。公私何如。所保之人邪正何如耳。王繼庭未臨行陣。自不能爲之諱。而廉正精細。尙屬有用之才。此訪查盧朝安王繼庭之梗概也。原奏所稱鄰城縣西楊家圩被賊攻陷。知縣周士燁並不救援一節。臣另派一員往查。據稱撿逆於三月初。自費縣獨山境內。西北界柳莊圍。三十里至重坊圍。十里至曹家樓圍。十里至丁家溝圍。五里至亭子廟圍。三十五里至東南鄉紅花埠圍。遂入宿遷桃源界。內并無楊家圩名目。細詢居民。俱言亭子廟圍內圍長楊倬。係已革文生。或卽楊家圩之誤。圍中居民百餘家。撿匪來時。并未圍攻。三月二十日。仍從東南竄回西北。亦未圍攻破寨。則所稱周士燁坐視不救。係屬訛傳。似無疑義。此又訪查鄰城民圩之梗概也。維臣仰承聖主垂詢。固不肯撫拾浮言。淆亂是非。亦何敢稍涉徇徇。上負朝廷好問察言之意。就臣所查者。酌加擬議。藩司丁寶楨功多過少。衆望允孚。似應免其置議。兗沂曹濟道盧朝安心術險鄙。聲名尤劣。雖經告病開缺。未便姑容。似應勒令休致。候補道王繼庭才尙可用。并無劣跡。似應開復原官。撤銷道員。候補知府署齊河縣知縣李均。貪鄙妄爲。似應卽行革職。鄰城縣知縣周士燁似可無庸置議。巡撫閩敬銘應如何量予處分之處。恭候欽定。所有遵查山東巡撫藩司被參各款緣由。恭摺由驛具奏。伏乞皇太后皇上聖鑒訓示。謹奏。

酌撥馬隊馳赴奉天剿賊摺 同治五年正月十四日

奏爲遵旨酌撥馬隊。馳赴奉天剿賊。恭摺仰祈聖鑒事。竊臣承准軍機大臣字寄。同治四年十二月二十四日奉
上諭。一本日據文祥等奏奉天勦辦馬賊緊要。請調烏爾圖那遜統帶土默特本部兵丁百餘名。前赴奉省調遣

等語。烏爾圖那遜所部兵丁。爲數無多。諒尙可以抽撥。著會國藩卽飭該員迅帶所部。馳赴奉天省城。聽候文祥調遣。勿稍延緩。等因欽此。伏查親王僧格林沁舊部。臣於上年八月挑留馬兵九百六十八員名。馬勇四百四員名。歸色爾固善統帶。會於八月十七日奏明在案。厥後挑留馬兵五百三十三員名。交烏爾圖那遜管帶。其土默特一起。出征年久。殘廢居多。除酌留數員外。業經全數遣撤回旗。亦於十月三十日奏明在案。色爾固善所統三起。去秋赴山東一次。現駐河南陳州府。烏爾圖那遜所帶一起。臣派歸劉銘傳統轄。久在周家口駐紮。頃據劉銘傳文稱。已於十二月二十四日拔營赴鄂援勤。又據烏爾圖那遜稟稱。於二十六日隨同銘軍前進。並以舊傷復發。請假醫治前來。臣批准給假一月。飭令該軍隨同劉銘傳迅速援鄂。現計已入楚境。不特該參領請假醫傷。難遽北行。卽鄂中賊勢正熾。劉銘傳攻勦正殷。亦不能將此起馬隊撤回。且由楚赴遠。程途太遠。僅調弁兵百餘名。爲數太少。誠恐於事無濟。反覆籌思。奉天實爲根本之地。陳州現非吃緊之時。尙可移緩就急。惟有將色爾固善一軍。派赴關東。歸文祥調遣。程途較近。人數較多。當於大局有裨。色爾固善所統三起中。有訥穆錦一起。徐州馬勇四百餘人。不善放槍。臣已札飭全數遣撤。其伯都訥副都統高福一起。漢軍副都統托倫布一起。共計九百餘人。均係吉林黑龍江弁兵。久從征役。還救桑梓。或可竭力勦辦。勉奏膚功。除檄飭色爾固善等卽日遵照起程外。所有邊撥馬隊馳赴奉天勦賊緣由。恭摺由驛五百里覆奏。伏乞皇太后皇上聖鑒訓示。謹奏。

近日軍情並將湖團分別撤留片 同治五年正月十四日

再捻匪兩路入鄂。又有叛勇之變。湖北喫緊。臣檄銘軍由光固進援黃州。於十二月二十八日奏明在案。旋據各路文報。該逆分擾蘄水羅田境內。四出焚掠。成大吉潰勇。雖已招集七營。而軍心未定。殊不足恃。張總愚一股。又由楚境折回河南葉裕等屬。并有東竄之意。劉銘傳一軍。此時計已抵鄂。未知能力挫兇鋒。以紓鄂人之患否。本擬令李昭慶一軍。迅赴豫省。因湖團一案未清。尙恐稍煩兵力。臣與地方各官。再四籌商。議定將安分之唐趙等團。留駐徐州。將勾賊之王團。容賊之刁團。逐回山東。勒限正月十五以前。撤歸本籍。如有抗拒遷延。卽派兵勦辦。一俟此事辦妥。李昭慶卽於燈節後。統帶馬步各營。馳赴周家口。如張總愚東竄齊省。則令李昭慶跟蹤追剿。除湖團一案。另行詳細奏結外。理合附片陳明。伏乞皇太后皇上聖鑒訓示。謹奏。

向師棟病故請卹片 同治五年正月十四日

再江蘇候補知縣向師棟於同治元年投效安慶軍營幫辦營務。臣察其器識邁衆。條理精詳。於二年十月密摺保奏。奉旨發往江蘇。以知縣交李鴻章差遣委用。厥後在營襄事。未遽服官。本年五月。隨臣北征。駐紮徐州。佐治軍書。晝夜辛勤。在營感受寒溼。又因稽勞成疾。於十一月十八日病故。查該員品端志遠。方冀其勉成大器。留備異日佐使。乃中道云殂。殊堪憫惜。合無仰懇天恩。將江蘇候補知縣向師棟照軍營立功後病故例議卹。以昭激勸。理合附片陳請。伏乞皇太后皇上聖鑒訓示。謹奏。

請令劉秉璋襄辦軍務片 同治五年正月十四日

再臣近來目力昏花。心血愈耗。精神迥不如前。久膺艱鉅。終虞債事。必須得人相助爲理。庶可彌縫其失。而佐其所不逮。查有翰林院侍講學士劉秉璋。隨同江蘇撫臣李鴻章轉戰蘇常。屢著功績。該員志趣堅卓。精實耐勞。籍隸廬江。與淮軍均有桑梓親舊之誼。若令襄辦臣處軍務。應可聯絡諸將。獨當一面。現在淮軍文武各員。如劉銘傳。潘鼎新。張樹聲等。并蒙聖主鴻恩。次第擢用。此外又有翰林院編修張錫嘏。籍隸淮北。其堅卓耐勞。與劉秉璋相等。惟軍務閎濶尙淺。將來磨厲戎行。多更事變。似亦可爲國家肩任艱鉅。臣於咸豐十年六月。奏請將候補四品京堂左宗棠襄辦臣處軍務。荷蒙諭旨允准。今臣精力更遜。而捻匪所到之處。縱橫三千餘里。深恐照料難周。合無籲懇聖恩。飭令翰林院侍講學士劉秉璋襄辦軍務。實於大局有裨。如蒙俞允。或令該員駐紮徐州。或駐襄陽南陽。容臣察看情形。續行具奏。理合附片陳請。伏乞皇太后皇上聖鑒訓示。謹奏。

查辦湖團酌籌善後事宜摺 同治五年二月初八日

奏爲查辦湖團分別留遣并酌籌善後事宜。擬議結案。恭摺馳陳。仰祈聖鑒事。竊臣於上年奏復軍情摺內。附陳銅沛境內有與勦捻相關之湖團一案。亟宜查辦。以杜後患。今年正月復將通賊之王刁兩團。勒限驅逐。安分之唐趙等團。仍駐徐州。先後具奏在案。查湖團者。山東曹屬之客。墾種蘇齊交界之湖地。聚族日衆。立而爲團也。該處濱微山昭陽兩湖。西岸南迄銅山。北跨魚臺縣。互二百餘里。寬三四十里。或二三十里不等。其在魚臺之團有二。曰魏團任團。其在銅沛之團有八。曰唐團。北王團。北趙團。曰南王團。南趙團。曰千團。雖團。侯團。均以首事者之

姓爲名。昔之侯團。卽今之刁團也。魚臺兩團。以東民居東境。人數寡而墾地少。一經官爲處置。漸以相安無事。惟銅沛之八團。人數衆而墾地多。主客構訟。幾成不可解之仇。溯查咸豐元年。黃河未淤。豐工下游沛縣等屬。正當其衝。凡微山昭陽之湖地。銅沛魚臺之民田。均已匯爲巨浸。一片汪洋。居民流離轉徙。以爲故鄉永成澤國。不復顧戀矣。厥後咸豐五年。黃河決於蘭儀。下游鄆城等屬。正當其衝。於是鄆城嘉祥鉅野等縣之難民。由山東遷徙來徐。其時銅沛之巨浸。已爲新涸之淤地。相率寄居於此。墾荒爲田。結棚爲屋。持器械以自衛。立團長以自雄。前任徐州道王夔齡以其形迹可疑。飭令押逐回籍。繼而來者日多。復經沛縣稟請以東民黨係被災困窮。擬查明所佔沛地。押令退還。其湖邊無主荒地。暫令耕種納租。經前河臣庚長批准。旋議勘丈湖荒。分爲上中下三則。設立湖田局。招墾繳價輸租充餉。又飭於沛團交錯之地。通築長堤。名曰大邊。以清東民與土民之界限。遂得創立各團。據爲永業。此東民初至。留住湖團之情形也。銅沛之土民當豐工初決時。流亡在外。迨後數載還鄉。睹此一片圩地。變爲山東客民之產。固已心懷不平。而官長議定所佔沛地。押令退還者。又僅託諸空言。并未施諸實事。且同此巨浸新涸之區。孰爲湖荒。孰爲民田。茫無可辨。沛民之有產者。既恨其霸佔。卽無產者。亦咸抱公憤。而團民恃其人衆。置之不理。反或欺侮土著。日尋鬪爭。遂有不能兩立之勢。咸豐九年。侯團窩匪搶劫銅山之鄭家集。經徐州道派兵拏辦。并將該團民驅逐出境。另行遴董招選。輾轉更置。是爲今之刁團。同治元年。又有東民在唐團邊外佔種沛地。設立新團。屢與沛民械鬪。爭控至三年六月。遂有攻破劉莊寨。連斃數十命之事。經漕臣吳棠飭派徐州鎮道帶兵勦辦。平毀新團。此咸豐六七年後。客民擅逞。疊釀巨案之情形也。新團既毀。擒斬至千人之多。并將團地退出。謂可抒沛民之憤。而折其心矣。乃沛人賁生張其浦張士舉。文生王獻華等。與劉莊寨主劉際昌先後赴京。以新團一案。唐守忠主盟指使。情同叛逆。請將各舊團一概勦辦各情。在都察院呈控。欽奉諭旨交吳棠等密速查辦。旋經吳棠以唐守忠來團最早。其名特著。核諸所控各辭。毫無實據。且與原呈不符。不過欲將新舊各團。一概驅逐。而奪其成熟之田等語。復奏在案。而沛人紛紛構訟。仍復不休。臣博采輿論。昔年銅沛受害之家。被水而田產盡失。水退而田復被佔。其懷恨與訟。自出於情之不得已。近則構訟之人。并非失業之戶。不過一二刁生劣監。設局斂錢。終歲戀訟。不特團民苦之。卽土民亦以按戶派錢爲苦。而主訟者多方構煽。旣以強客

歷主激成衆怒。又以奪還大利款動衆心。官長或爲持平之論。訟者輒目爲受賄。各團豈無安分之民。訟者概指爲通賊。初至有領地之價。後來有輸地之租。而訟者不問案牘之原委。必欲盡逐此數萬人而後快。此又新團旣勦以後。沛民健訟不顧其安之情形也。上年八月。臣駐紮徐州。銅沛紳民赴臣轅控告各團呈詞。累數十紙。臣以案情重大。竇兆兵端。未敢遽爲剖斷。至九月間。檢案東竄。遠近探稟。均稱湖團勾賊。鞠訊據生擒賊供。亦稱南王團有人函約賊來。百口一詞。反復研究。未得主名。而平時該團窩匪搶劫。積案纍纍。情實可信。又刁團平日窩匪與南王團相等。此次賊退之後。臣飭徐州府縣親赴各團察看情形。旋據復稱以捻首牛賴各賊目。均住刁團之中。該團房屋糧草。器具完好如故。其爲縱容賊黨。亦無疑義。又稱唐團練董唐守忠其子唐錫彤其叔唐振海。帶練擊賊。力屈被執。脅之以降。罵不絕口。同時遇害。除王刁兩團外。其餘六團。或憑圩禦賊。或圩破被害。遭賊焚擄。殺掠之情形。歷歷在目。其爲并未通賊。亦屬確有可據。而沛縣上年京控湖團之王獻華等。一聞湖團通賊之語。復行聯名多人。指控各團。無非賊黨。卽殉難甚烈之唐守忠。仍加以叛逆之名。稟請一律勦逐。臣親提鞠訊。原告旣多捏名。供情亦多支飾。其爲刁訟生事。亦屬無可置辯。臣乃剖別是非。平情論斷。不分土民客民。但分孰良孰莠。其有契串各據產業。爲團所佔。急求清還者。是土民之良者也。無契串產業。但知斂錢構訟。激衆怒以與禍端者。是土民之莠者也。其平日安分耕種。如唐團之拒賊殉節。受害極慘者。是客民之良者也。其平日之凌辱土著。如王團之勾賊。刁團之容賊。是客民之莠者也。遂於臘月下旬。通行曉諭。飭令王刁兩團。勒限十月十五日以前。逐回山東本籍。派劉松山帶兵往前彈壓。頃據各州縣稟報。該兩團業已全數徙去。安靜回籍。臣酌定善後事宜。三條。檄飭徐州道督同府縣次第經理。一曰酌給錢文。以恤已逐之團。王刁兩團。平日之窩匪。去秋之通賊。衆所共知。然除首犯王長振罪在不赦外。其餘要犯。未能指出姓名。應卽全數赦宥。以安反側之心。此外無辜之衆。尤應酌加體卹。同沛朝廷之澤。現定於鄆城縣設局。將兩團原繳地價。照數發還。其兩團已種之麥。現派徐州鎮兵在彼屯守。待至四月收割。估價若干。以一半給屯田之兵。一半給兩團之民。庶東民回籍者。不至流離失所矣。二曰設立官長。以安留住之團。兩團旣去。尙有唐趙等六團。留居徐境。擬請設立同知一員。俾客民有所依歸。或令徐州同知移駐該處。聽斷詞訟。稽查保甲。籌辦湖團一切事務。俟二三年後。安置旣定。仍將湖團地畝分歸銅沛

兩縣。奏明按地升科。輸租執業。以歸畫一。各團所築大堤。酌量平毀。以期水利之通暢。亦免畛域之太明。團中如有窩匪通搶重情。官爲查明。小則率犯誅懲。大則派兵勦辦。視之同於土著。永不再言驅逐之說。亦不許土民妄控。目爲畝匪字樣。盡消爭訟之嫌。同敦睦鄰之誼。三日撥還田畝。以平土民之心。昔年東民開墾湖荒。雖不免侵佔民田。然爲數要不甚多。今王刁兩團退出之田。六百五十餘頃。以抵侵佔之數。有贏無絀。此項田產。先儘失業之民。凡有印契糧票者。准其照數撥還。無契票者。概不准撥。以示限制。以斷葛藤。其次則培植學校。凡銅沛兩縣書院之膏火。小考之卷價。鄉試之賓與費。會試之公車費。各准撥田若干。以爲造士之資。縱使民田被佔。契票無存。私家偶失有限之田。通縣共享無窮之利。其餘則概充官田。派兵屯種。兵或不足。召民佃耕。在銅沛可解積年之公憤。在東民可免霸佔之惡名矣。所有罵賊之五品頂戴州同銜前平陽屯屯官唐守忠。其子文生唐錫彤。其叔衛千總唐振海三名。同時被害。大堪嘉濶。應請旨交部從優議恤。并建立專坊。以爲草莽效忠者勸。沛縣激衆搆訟之文生王獻華。應請褫革衣衾。以示懲儆。王長振現尙在逃。俟緝獲之日。盡法處治。以爲通匪者戒。未盡事宜。除分咨江蘇山東督撫及漕督諸臣。妥籌會辦外。合將湖團一案。擬結緣由。恭摺馳陳。伏乞皇太后皇上聖鑒訓示。謹奏。

會國荃補湖北巡撫謝恩摺 同治五年二月初八日

奏爲恭謝天恩。仰祈聖鑒事。竊臣承准軍機大臣字寄。同治五年正月二十六日奉。上諭。會國荃調補湖北巡撫。著會國藩知照該撫。迅速馳赴湖北新任。力圖報稱。不得稍存推諉之念。有負屬望。會國荃舊部中。有得力將弁兵勇。并著酌量帶往湖北。以資差遣。又奉正月二十七日寄諭。湖北巡撫已令會國荃調補。鄭敦謹著俟會國荃到任後。再行交卸。一等因欽此。跪誦之下。感悚莫名。伏念臣弟國荃上年蒙恩賞假。在籍調理。臣屢函問訊。囑其靜心養攝。近聞病體漸痊。假期將滿。正擬催令入都。陛見。勉圖報稱。遽承恩詔。移撫鄂疆。荷寵命之疊頒。愧涓埃之未答。門庭太盛。惕厲彌深。伏思湖北據江表之上流。爲南北之樞紐。現值捻蹤。屬集。擄掠極慘。聞難民流徙江干。至數十萬之衆。防勤方殷。未可稍事遷延。貽誤大局。臣已知照臣弟國荃屬其召募舊部。一面遵旨迅赴新任。一面出身勦賊。并奏明俟鄂氛稍遠。人心稍定。仍趨赴闕庭。恭求訓誨。臣弟感荷殊恩。如體氣日強。必

不至稍涉推諉。自外生成。鄂省現有劉銘傳之勁旅。及皖豫之援師。加以臣弟帶出之部。鮑超赴楚之軍。將士雲集。似已足敷勦辦。此外江閩騰出兵力。不必再調以勦擒。或調赴滇黔。或會勦甘肅。容臣籌商另案覆奏。所有微臣感激下忱。謹繕摺恭謝天恩。伏乞皇太后皇上聖鑒。謹奏。

報啓行赴周家口日期片 同治五年二月初八日

再營務處李昭慶一軍於正月十九日自徐州拔營。二十五日至歸德府。臣將湖團一案奏結。定於二月初九日啓程。由充濟歸陳。繞赴周家口。就近調度。并飭劉松山會同張詩日續赴湖北。助勦漢黃一帶。久已通飭邊照。頃接李昭慶自柘城發來之稟。據稱。張總愚股匪現在西平遂平一帶。意欲竄入山東各路。生擒賊供。皆稱賊團東竄。因改飭劉松山等仍駐徐州湖團等處。俟東路無警。再行西征赴鄂。臣則又未便更改。仍以初九成行。理合附片馳陳。伏乞皇太后皇上聖鑒。謹奏。

銘軍援鄂克黃陂縣城摺 同治五年二月十五日

奏爲銘軍援鄂。克復黃陂縣城。恭摺奏祈聖鑒事。竊劉銘傳一軍於上年十二月二十四日。自周家口起行援鄂。正月初間行抵羅山。苦爲兩雪所阻。二十日始克拔營。二十四日行抵河口。聞賊之大股。盤踞黃陂縣城內。卽由長仙嶺進規該縣。二十七日行抵距城二十五里之王家河。記名提督唐殿魁率師在下石港紮營。城內出馬步賊數千。直撲該營。唐殿魁張景春率領田履安周志本等分頭迎勦。陣斬數名。賊勢不支。紛紛奔潰。張景春率馬勇百餘名。追至西關外賊館。手刃數賊。身受戈傷三處。唐殿魁督帶步隊各營繼進。賊乃敗退入城。我軍亦各收隊。生擒賊首宋矮子孫貴等二十餘人。二十八日五鼓。劉銘傳派令劉盛藻率所部六營。由馬家山紮營。攻城之東。唐殿魁率所部六營。由河邊紮營。攻城之西。自督黃桂蘭畢乃爾等。由甘羅山下紮營。直抵城根。賊見大兵逼近。於已刻出馬。步賊萬餘人。分數路來撲。劉銘傳亦分數路迎勦。唐殿魁督帶王德成滕學義朱起昌等。分兩支攻賊。步隊劉盛藻督帶劉盛休馮如霖龔元友等。分三支攻賊。馬隊黃桂蘭張士元張景春等。繞攻賊後。一合甫交。賊卽敗退入城。其馬賊數千。仍在城外東南一帶排列。我軍乘勝攻城。劉銘傳令畢乃爾李錫增由北門開礮。王德成率勇首先登城。頭受刀傷見骨。賊猶未退。田履安丁汝昌劉朝幹韋和禮等。復相繼蟻附而上。賊衆盡由

東南兩門奔出。當將黃陂縣城克復。劉盛藻屠殿魁黃桂蘭等。督帶各營追殺。至城東南二十里之茆屋店。賊馬數千。折回抵敵。仍經我軍擊敗。賊盡向新洲一路狂奔而去。計陣斬賊二百餘名。生擒七十四名。奪獲驃馬三百餘匹。救出難民男婦萬人。我勇亦傷亡三十餘人。銘軍遠道馳援。近城即戰。擬在黃陂暫駐。備辦行糧。稍息士力。即行拔隊前去追剿等情。由劉銘傳呈報前來。臣查銘字全軍。上年終歲奔馳。夏間長溝一戰。而退山東之賊。石弓山一戰。而解雒河之圍。秋冬阜陽之捷。扶溝之捷。均未開單請獎。此次賊犯湖北。該提督自請援鄂。甫經到防。立克堅城。實足寒賊膽而慰民心。自應酌加獎勵。以昭激勸。直隸提督劉銘傳應請開復革職。留任處分。仍交部從優議敘。按察使銜補用道劉盛藻。請賞加布政使銜。記名提督屠殿魁。請遇有提督缺出。儘先簡放。記名總兵張景春。請賞加提督銜。并賞給勇號。儘先總兵黃桂蘭。畢乃爾。均請交軍機處記名。遇有總兵缺出。提奏補用。并賞加提督銜。兩江補用副將馮如霖。儘先副將田履安。劉盛休。周志本。均請以總兵記名簡放。并賞給勇號。儘先副將韋和禮。劉明幹。均請以總兵記名簡放。參將銜補用游擊龔元友。儘先游擊王德成。均請免補參將。以副將儘先補用。王德成。并請賞給勇號。儘先副將李錫增。請賞給勇號。游擊廕學義。朱起昌。請以參將留於兩江。儘先補用。都司丁汝昌。請以游擊儘先補用。并賞加副將銜。都司吳維章。請以游擊儘先補用。并賞加參將銜。已革副都統銜。即補參領烏爾圖。請開復原官原銜。陣亡之花翎守備陳福祿。藍翎守備張思聰。儘先守備李先道。藍翎千總錢萬桂。四員。請交部從優賜卹。其餘在事出力員弁。上年阜陽案內。業奉諭旨。准其列保。可否容臣併案開單請獎。出自鴻施。所有銘軍援鄂克復黃陂縣城緣由。恭摺由驛馳奏。伏乞皇太后皇上聖鑒訓示。再臣於初九日自徐州啓行。十五日行抵鄒縣。合併陳明。謹奏。

鮑超軍北來剿捻籌定餉項摺 同治五年二月初五日

奏爲遵旨檄調鮑超一軍。北來剿捻。并籌議有著之餉。恭摺覆奏。仰祈聖鑒事。竊臣承准軍機大臣字寄。正月二十三日奉上諭。現在東南雖已肅清。而捻匪竄擾北路。楚豫等省。到處戒嚴。防剿正當吃緊。鮑超一軍。前本令其馳赴北路助剿。此時粵賊業已辦結。即著左宗棠飭令統帶所部。迅赴楚豫之交。聽候會同藩剿。其江閩各路。得力將弁兵勇。有可調赴楚豫江皖助剿者。并著會同藩迅速函商左宗棠等。酌量調往。以期厚集兵力。早殄

逆氛。」等因欽此。又奉二月初一日寄諭。「嗣後江西浙江湖南每月可協濟甘省餉銀若干兩。并協濟調赴鄂豫江皖助勦勇銀若干兩。鮑超一軍調赴鄂豫約有若干名。楚北可協濟此軍餉銀若干兩。江蘇省能否於現協甘省月餉外再行籌添若干兩。均著官文會國藩左宗棠李鴻章劉坤一馬新貽李瀚章妥籌速奏。」等因欽此。又奉二月二十八日寄諭。「鮑超奏拔營抵江。擬請籌撥餉項採辦戰馬。整隊赴豫一摺。前因鮑超一軍調豫助勦。曾經諭令官文會國藩將該營所需餉項。函商奏撥。茲據鮑超奏稱豫省地勢平曠。利在騎戰。現此派員採買戰馬。并赴粵購辦馬槍等件。俟馬匹到齊。編立十五營操練候調。至所部新舊各軍。月餉銀九萬七千零。馬隊編立。照章需餉三萬四千零。合共月需餉銀十三萬一千有奇。此時東南軍務告竣。江省各軍分別裁撤。該營月需餉銀可否仍由江西籌撥。馬隊均用洋槍。所需洋藥洋火。請飭廣東陸續採運各等語。著官文會國藩懷遵前旨。將鮑超軍營月餉迅速函商。籌撥有著之款。源源接濟。如鄂省餉需缺乏。不能全顧。鮑超軍餉。或由江西每月協濟若干。亦著官文會國藩酌度情形奏明辦理。其洋槍所需火藥等件。應用若干。并著官文等酌定數目。咨明廣東趕緊籌解。以利師行。」等因欽此。並鈔示鮑超原摺到臣。臣查捻匪萬騎縱橫。行蹤剽疾。而步賊則裹脅居多。火器極少。臣所部湘淮各軍。戰守俱優。而騎兵則馬匹太少。技藝尤生。是捻匪所長者在馬。而不在步。官軍所短者。亦在馬而不在步。署督臣李鴻章近寄臣函。謂宜裁減步兵。酌添馬隊。實屬因時制宜之策。鮑超所統步隊。需餉至九萬七千有奇。爲數過多。應令裁撤三千餘人。酌留一萬二千人。按鮑超向來營制。可編二十營。每月給予餉銀七萬兩。其馬隊之數。應令招募三千二百人。按臣處新定營制。可編十二營有奇。每月給予額餉三萬兩。臣自抵淮惟以來。察看皖北齊豫等省。皆以柴草之故。兵民相爭。動成仇隙。應令各營發價購買柴草。絲毫不妄取於民間。鮑超一軍。除口糧外。又有柴草之費。添換馬匹之費。西洋軍火之費。雇買車輛駱駝。以資陸運之費。每月不下一萬四五千金。這共供支該軍月需十一萬數千兩。據鮑超原奏。請全由江西籌撥。不至缺乏。其致臣書函。亦稱將與撫臣劉坤一面商。請供渠軍鉅款。臣查鮑超一軍。咸豐十一年馳援江西。驅除李秀成巨股。肅清全境。同治三年。再援江西。許灣大捷。挽回危局。此次克復嘉應州。俾江粵得以撤防。有功於江西甚鉅。即以霆軍之餉。全責江西。亦無不可。惟江西須協解席寶田赴黔之軍。而本省酌留防兵。不無積欠。雖劉坤一局量宏遠。究恐

力有不逮。臣反復權衡。擬請旨飭下江西月解七萬。供霆營步軍之餉。湖北月解二萬。供霆營馬隊之餉。江蘇月解二萬五千。以一萬充馬隊口糧。以一萬數千爲購買柴草車駝添補洋藥馬匹之用。江蘇供應淮軍湘軍七萬餘人。爲款極鉅。茲又協濟鮑超軍餉。業已入不敷出。江西協黔協豫。物力已竭。該兩省除前此議定甘餉照舊按解外。似不宜再添協甘之款。諭旨飭令浙江湖南協濟勦捻之餉銀。又令廣東籌解霆營之洋藥。臣今皆未議及。蓋欲騰出浙江廣東之銀。以大批協解甘肅。騰出湖南之銀。以全力專謀貴州也。至勦捻之師。新添鮑超一軍。步隊愈厚。馬隊亦不爲薄。但患調度不營。不患兵力不敷。無庸再調遠兵。致滋糜費。相應請旨飭下左宗棠劉坤一等將閩江各軍。分別遣撤。次第銷兵。以靖民氣。抑臣尤有慮者。鮑超所部各營。頗有騷擾之名。每當拔營。沿江行走。擄掠船隻。舟人畏避。市肆驚惶。去歲金口之變。沙井之譁。尤爲人所詬病。然猶有可原者。前此餉項支絀。士卒終歲無銀寄家。間或食米稍缺。將領不能以空言撫慰。故號令有所不行。今既籌得有著之款。十一萬餘兩。應即在於襄陽設立該軍糧臺。派襄陽道總司其事。仍由江西派一委員駐臺。支應步軍口糧。湖北江蘇各派一委員駐臺。支應馬隊口糧。及洋藥器械等事。步軍欠餉。將來仍由江西找補。馬隊欠餉。將來仍由湖北江蘇找補。俾鮑超得以專精辦賊。不分心於管餉。以符原奏之意。河南民圩。恨兵如仇。積怨已久。必須秋毫無犯。乃可挽回此風。軍民一氣。霆營月餉充足。如再有騷擾情事。臣必據實參奏。請將該軍遣散。一以保全鮑超之令名。一以拊循河南之赤子。紀律所在。關係甚重。不得不預先陳明。管全終始。所有邊議鮑超勦捻籌定餉項緣由。恭摺由驛馳奏。伏乞皇太后皇上聖鑒訓示。謹奏。

近日軍情暫駐濟寧就近調度摺 同治五年二月初五日

奏爲陳報近日軍情。微臣暫駐濟南。就近調度。恭摺仰祈聖鑒事。竊臣於二月十五日。在鄒縣拜摺後。十九日行抵海寧。擬即暫駐數日。閱視黃運兩河。與護撫臣丁寶楨等妥籌布置。再由曹州赴豫。尙未成行。次日。即聞張總愚大股。由豫入東之信。續據各路稟報。二十二日。該逆竄至曹縣。二十四五等日。遂由荷澤定陶擾及鉅野鄆城。二十六夜。攻破鉅屬之太平寨圩。盤踞該處。擄人擄糧。有必欲渡運之勢。臣於二十日。飭令山東臬司潘鼎新一軍。酌留四營防守濟寧。而自帶八營。馳赴嘉祥鉅野。相機勦辦。另調湘軍三營。自徐州來濟換防。騰出潘鼎新之

軍均赴前敵。其自濟寧以上之開河袁口一帶。水勢極淺。爲該逆渡運熟經之地。丁寶楨以五千人分扼其間。而親駐袁口督飭防範。本省防邊之軍。紮於豫東界上者。一爲曹州金堤集楊飛熊一師。一爲曹縣魏家灣王心安之師。賊皆繞越管外。深入腹地。該兩軍先後追勦。楊飛熊一軍。二十六日在曹州之安與寨接仗。先勝後挫。王心安一軍。二十八日在鉅野之龍垌集接仗。挫損尤甚。該兩將勇於赴敵。身受多傷。臣咨商撫臣將兩軍調赴運河以東。憑河堵禦。藉固北路之防。而免偷渡之患。該逆在太平寨盤踞四日。潘鼎新於二十九初一等日。出隊搦戰。該逆一見旌幟。卽行退避。初二日。潘鼎新進攻太平寨。該逆已全數北竄梁山。有銳欲渡運之象。運河汛地太長。防兵太薄。不知果足以抗之否。此山東各軍堵勦之情形也。至李昭慶一軍。臣檄令赴豫勦賊。已至周家口。因賊蹤盤旋無定。追逐於鄆陵沛川等縣。迨追至尉氏。則聞賊已撲竄汴梁。迨行至朱仙鎮。則聞賊已直犯山東。於是。由通許杞縣東行。二十九日。馳抵曹縣。雖不如賊匪之迅速。而日行約六七十里。步卒已極疲乏。軍糧亦將罄竭。頃據稟報。初二日。抵鉅野之章逢集。少事休息。卽會合潘鼎新一軍。分道進勦。或可一收夾擊之效。又據擒賊供稱。桂逆錫楨。此次同來。欲渡運河。前赴曲阜報仇等語。臣檄調徐州楊鼎勦之軍來東。如聞賊已渡運。卽徑赴曲阜護衛孔林。賊未渡運。卽暫駐兗州。聽候調遣。此李昭慶一軍及添調徐軍來東之情形也。任穎等逆一股。自劉銘傳攻克黃陂後。竄出鄂境。悉由光息正陽一帶。竄至項城沈邱。十八日。逼近槐店。張樹珊冒雨出隊。該逆驟聞官軍之至。卽折而南趨。一日夜竄至江口集。距槐店已二百餘里。劉銘傳緊躡賊後。二十四日。可抵太和。周盛波聞該逆有回踞蒙亳老巢之信。亦於二十五日。由歸德馳赴亳州。會合銘軍。專力辦此一股。疊據生擒賊供。任穎等逆。窺伺山東完善之區。銳志東趨。目下南未渡淮。北未渡潁。尙在兩河之間。或不至遽犯齊境。此又鄂賊回竄皖豫交界之情形也。臣上年屢次覆奏。謂宜於四鎮之外。另設數支游擊之師。始可與此賊縱橫追逐。經營半載。甫成。劉銘傳李昭慶兩支。挈以應敵。今捻逆西逼楚疆。東趨海岱。相去動三千里。馬步以數萬計。官兵步多騎少。每每失之遲鈍。必須飽超劉秉璋劉松山等多成數支游兵。庶足以布遠勢而圖近功。臣現駐濟甯。應卽在此就近調度。俟東事大定。再行奏明赴豫。所有陳報近日軍情緣由。恭摺由驛五百里馳奏。伏乞皇太后皇上聖鑒訓示。謹奏。

彙報山東近日軍情相機調度摺 同治五年三月二十一日

奏爲彙報山東近日軍情相機調度恭摺仰祈聖鑒事竊自張逆大股竄踞山東鉅野等處臣飭各軍分投河防業於三月初五日奏明在案初三日臬司潘鼎新率師至鄆城聞該逆在距城西北十八里之潘溪渡屯踞該處跨灘河南北分峙兩寨被賊攻破其附近孟家莊樊樓等處一片逆氛初四日黎明潘鼎新督軍馳進行抵刁家河溝知寨賊未動當分三路進攻潘鼎立步隊萬國順馬隊抄南寨前路唐宏成余在榜步隊黃齊昂馬隊抄南寨後路戴春林吳從發潘國英等進南寨中路該逆自兩寨出拒亦分三路來犯步賊居中馬賊張兩翼環包先以左翼抄我前路潘鼎立等即施放排鎗炸礮連發轟擊賊不能包即撤左翼聚於右抄我後路唐宏成等力戰御之中路步賊吶喊齊進礮塵漲天我勇訖不少動火箭洋礮分段齊發賊勢稍卻而孟家莊等處援賊跡至我軍三路奮進礮無虛發該逆紛紛敗潰萬國順黃齊昂督馬勇追殺過河至北寨之西兩寨踞賊不能接應乃令潘鼎立唐宏成等與馬營一面追剿敗賊而戴春林等一面環攻兩寨該逆奪門狂竄被砍入濠及寨門踐死者無算潘溪渡南北兩寨立時攻克附近各莊登時竄盡其追剿之軍橫衝而前馬賊向北步賊向西不復成隊經我軍追殺各十餘里自辰至申警賊千餘生擒二百餘人奪獲牲口數百救出難民三千餘人查閱我勇受傷二十餘人陣亡二人是夜該逆復陷踞蕭廳寨去潘溪渡十八九里附近各圩紛紛請救初六日潘鼎新率隊往攻至離寨八里之柳條圈賊即排列步仗自西至東繚互三四里以馬賊數圍徑前衝突我軍列陣以待槍礮連發馬賊紛紛敗竄步賊即因之而靡萬國順黃齊昂黃金志馬隊三營見賊隊已亂分路猛追去步隊已遠賊馬忽從樹林後回撲如潮而來該三營猝然被挫直退至步隊紮處風塵障天人馬不辨幸部伍未動槍礮連環轟擊傷賊頗多賊仍紛紛敗回我軍至晚始行收隊約計陣斃賊百餘名我軍亦傷亡四十餘人此潘鼎新一軍初四日大獲全勝初六日馬隊小挫步隊小勝之情形也營務處李昭慶一軍自河南迤邐追賊而來行逾千里三月初五日馳抵嘉祥即接潘鼎新函牘知該逆大股去梁山不遠有急欲渡運之勢李昭慶酌留數營扼紮長溝而自擊入成行隊進剿初七日未至蕭廳寨三里許賊即出隊來迎李昭慶令隊伍分爲兩路排進鎗砲齊施相持至二時之久賊勢不支我軍乘勝擁進寨中之賊見大隊敗退奪門而走立將蕭廳寨奪回李昭慶令各軍排立

寨前不許入寨。移時賊果整隊回撲。我軍向前迎敵。賊勢佯敗。星騎右營馬隊追逼過猛。陷入賊中。營官陳玉章中鎗墜馬。弁勇搶護。隊伍與賊擾亂。親兵中營隨後接應。被賊馬及長槍隊圍裹。困於垓心。哨官裴兆宏吳坤田登時陣亡。營勇傷亡過半。營官朱公遠與賊搏戰危急之際。風沙霾障。不辨天日。桂前護衛兩營前往救應。與賊之槍隊對敵。洋槍子如雨下。賊旋倒旋進。衝逼愈緊。營官韓鳳昌曹仁賢力戰不退。曹仁賢身受重傷。馬賊仍向前奔突。左右旋繞。李昭慶加派護軍中營松字右營救應。桂字前營。松字中營。忠樸左營救應。護衛營及派溫德勒克西張士芳馬隊迎擊。包抄各營。鎗砲齊發。步賊紛紛倒地漸退。馬隊槍斃紅衣賊目一名。營官王芝生。砍斃黃衣賊目一名。該逆始全行敗走。將重圍解圍。我軍日暮追至趙王河而返。計陣斃賊目二名。槍斃者不計其數。弁勇陣亡一百餘人。受傷百數十人。此李昭慶一軍初七日奪回蕭廳寨。與賊力戰。互有損傷之情形也。自是之後。賊踞黑虎廟相持數日。十二三日。該逆逐漸西走。已去百餘里。似有回豫之勢。臣以沿河水套一帶。地勢沮洳。曠各軍穩慎前進。潘鼎新率隊跟追。十四日行至鄆濮交界之紅川口。適遇大股折回北竄。潘鼎新率五成隊伍為方陣以禦之。該逆以馬隊三起猛撲。步隊繼進。我軍鎗礮齊發。乘勢逼壓。每進一步。賊退一步。追至正西四五里外。各營官鑒於賊馬回撲之悍。不敢猛追。當即撲回。截其尾隊。擒斬三十餘人。奪獲牲畜百餘。此又潘鼎新一軍。十四日接仗獲勝之情形也。臣接據各路稟報。十五日張逆仍回至黑虎廟一帶。邊馬及於運河西岸。擾犯沈家口安山等處。亟圖搶渡。撫臣閻敬銘督率東軍認真堵禦。其任賴等逆。亦即於十五日竄入曹州。圖與張逆合併。數日以來。張逆萃於濮苑境內。任賴萃于鄆鉅境內。一片寇氛。臣慮潘鼎新孤軍深入。前後受敵。已將該軍調回新口。兼顧運河北路。令李昭慶各營。分屯長溝趙邯。兼顧運河南路。目下但為堅守之局。與該逆力爭運河。使不得東。以待援軍之至。劉銘傳一軍。由湖北躡追任賴等逆。二千餘里。十八日可抵定陶。周盛波一軍。由歸德帶隊追賊。十七日已至曹縣。劉松山一軍。臣飭令先其所急。十八日由湖團起行。不日可來濟寧。應俟各軍先後到齊。再行會商進擊。楊鼎勛一軍。行抵鄒縣。臣以曲阜無驚。與閻敬銘往復函商。檄令改赴韓莊八關一帶。以防運河下游。不知果足遏堵否。所有潘鼎新一軍陣亡之花翎游擊劉洪盛。藍翎千總俞大錫。李德明。張希堯。儘先千總劉成浩。儘先把總擬保藍翎千總金起元。藍翎把總王國賓。楊連富。把總吳正陞。李福林。外委孫幹。陳榮華。

李昭慶一軍陣亡之都司裴兆宏都司銜守備段道益千總吳坤田蕭永祥朱占鼇把總史兆龍江宏發方恆發汪保朝丁雙隆楊志淮于得寬余德春李長勝外委張懷信奮勇捐軀均堪憫惻請旨飭部查照各該員所保原銜從優議卹以慰忠魂所有彙陳近日軍情相機調度各緣由恭摺由驛五百里馳奏伏乞皇太后皇上聖鑒訓示謹奏。

銘樹兩軍在皖豫剿賊獲勝摺 同治五年二月二十一日

奏爲銘樹兩軍在皖豫剿賊獲勝恭摺陳仰祈聖鑒事竊任賴牛桂等逆自湖北回皖竄至江口集後徘徊於淮潁兩河之間劉銘傳一軍緊躡其後二月二十六日兵抵潁州與藩司英翰等會商進剿之策皖軍由大橋集前進銘軍由潁州西南前進二十七日抵小田市二十八日大雨如注劉銘傳派令各營趁雨中賊皆無備分路進擊劉盛藻率所部六營由楊家樓抄擊西路以烏爾遜那遜馬隊隨之唐殿魁率所部六營由黎樹寨抄擊東路以張景春馬隊隨之而自率黃蘭桂畢乃爾等五營并親兵馬隊由中路楊家圩前進甫經出隊該逆哨馬見之立即棄館奔逃我軍追趕數里因賊去已遠兩勢過大遂令步兵收隊馬隊營總保成吉爾洪額六十七并張景春等追及之逆酋賴汝光率賊黨數千回頭迎撲經張景春等奮力擊敗該逆盡棄輜重過谷河狂奔而去我軍生擒百餘人中有賊目金天福馬太山二名奪獲驟馬多匹是夜官軍即駐楊家圩左右劉銘傳以重兵在東料賊必由西竄二十九日自率中軍并張景春馬隊前進而令劉鳳藻唐殿魁保輔重以徐行午刻行抵白菓園即見賊隊當令各營停駐派幫帶官胡鳳階率馬勇百名前探甫行二里許猝遇賊馬千餘來迎胡鳳階見衆寡不敵且戰且退張景春率全部迎擊賊勢稍卻胡鳳階亦勒馬回勦崔萬榮劉盛藻亦從兩旁包擊賊即回奔張景春等正欲乘勝追殺忽西南出賊馬步二萬餘人分路來撲劉銘傳恐馬隊不利令黃蘭桂張士元兩營前往接應賊見步兵太少拚死來犯張景春令馬隊三營撤退與步兵相依羣賊將我騎步五營包在中心而以另股直撲親兵洋礮等營劉銘傳令畢乃爾等連開炸礮賊陣始亂張勝崎劉銘幹張佩之等衝入賊中生擒數人賊氣始沮是時劉盛藻率所部由西抄擊該逆乃棄黃蘭桂之圍併股迎之唐殿魁率所部并黃旗馬隊保成等亦由東繞擊而出各軍奮力齊進賊乃大挫奪路狂奔而皖軍張得勝程文炳適率所部由南路追來兩面夾擊共

追殺二十餘里。途中賊尸狼藉。奪獲器械數百件。戰馬四十餘匹。嘗查副將銜儘先參將胡鳳階。於被圍時中槍殞命。弁勇亦傷亡數十人。此二十八九兩日。劉銘傳一軍。在潁州追勦獲勝之情形也。該逆被擊敗後。一日夜疾馳至槐店。張樹珊在周家口。聞大股北趨之信。三月初三日。五鼓前進。行抵苑寨。見有賊馬多起。正在該處渡過沙河。遂令各營乘其不備。一擁而進。將該逆截爲兩段。其大股在寨之東南。層疊踵至。先以馬賊數團。前來衝突。我軍嚴陣以待。用槍擊退。隨派三營攻其左。三營攻其右。張樹珊親率正副兩營擣其中。令馬隊直前衝陣。該逆步隊萬餘人。分股抗拒。而馬賊數千。分左右翼。作包抄之勢。我軍鎗礮齊施。刀矛迎刺。殺賊甚衆。左路之賊。最爲驍悍。於鎗子如雨。中。冒烟死鬥。總兵王德勝直前殪一賊首。總兵董大義領隊衝鋒。賊卻而復進者數次。連用槍礮轟擊。人馬紛紛倒斃。賊衆散亂。總兵宋立新馳入盪決。各軍乘勝縱擊。賊勢不支。自辰至未。殺傷千餘人。該逆四散奔潰。馬隊追逐。維時賊之前股。向周家口奔竄。意欲乘我遂出。攻撲老營。守營之副將張樹屏出隊迎勦。張樹珊亦率師回顧。首尾夾擊。賊無所遁。於周家口下流。冒死擠渡。窮力奔竄。我軍追至日落。始行收隊。生擒僞天將徐昌先一名。僞福裕等賊目五十七名。散賊百餘名。奪獲騾馬百餘匹。僞天將印一方。僞官照數十紙。我軍亦微有傷亡。此初三日。張樹珊一軍。在周家口迎勦獲勝之情形也。是夕。張樹珊挑選小隊至大朱樓地方。乘夜襲擊。該逆驚逃。頗有俘斬。初四日。大隊繼出。追至淮寧北鄉之清河堰。不及而還。據該提督總兵各呈報前來。臣查任賴等逆。凶悍異常。一月之間。馳突三省。經該兩軍節次邀擊。足以稍折凶鋒。張樹珊一軍。臣仍檄飭駐紮周家口。以顧四鎮根本之地。劉銘傳一軍。則令尾追緊躡。迅赴山東。頃已據報。該軍於十二日。由尉氏起行。十八日。可抵定陶矣。此次銘軍陣亡之副將銜儘先參將胡鳳階。並千總劉德發。均堪憫惜。相應請旨。飭部從優議卹。以慰愆魂。所有銘樹兩軍勦賊獲勝各緣由。理合繕摺馳陳。伏乞皇太后皇上聖鑒訓示。謹奏。

擒匪自山東回竄追勦獲勝摺 同治五年四月初七日

奏爲擒匪自山東回竄。各軍追勦。疊獲勝仗。恭摺仰祈聖鑒事。竊張賴等逆。全股萃於鄆濮一帶。各軍堅守運河。劉銘傳等跟追來東。臣於三月二十一日。奏明在案。臬司潘鼎新自接奉臣檄後。卽由梁山拔赴新口駐紮。十九二十等日。率隊巡運河之西岸。行抵安山。卽見賊馬充斥。該軍整隊而進。北至戴廟。賊見運河東岸。東軍防守嚴

密。而西岸又有梭巡之兵。萬難飛越。始設渡運之謀。卽於二十一日。向西南回竄。屯聚鄆鉅之交。劉銘傳周盛波兩軍。亦於二十一日。同抵鉅野。逼賊而軍。二十二日。會商進剿之策。劉銘傳由鉅城西北。出隊行十餘里。遇牛洪前隊。經黑龍江馬隊猛進擊之。生擒三十餘人。賊遂奔潰。張景春馬隊。從後追擊不及而還。周盛波由鉅之正北出隊。亦行十餘里。與逆黨相遇。該軍排隊直前。斬獲數十人。奪馬十餘匹。該逆不肯戀戰。遽向西南狂奔。此賊棄運河而返。銘盛兩軍迎勦各獲小勝之情形也。二十三日。劉銘傳率衆跟追。行過韓氏橋十餘里。卽見賊之馬步大隊。與銘軍相距五六里。該逆將部隊藏於村樹林中。以馬賊選撲張景春之師。尙未交鋒。遽行返奔。劉銘傳知其詐敗。不令追逐。該逆仍結隊南行。劉銘傳亦率衆南趨。與賊並驅。旌旗相望。行抵烏官屯。賊驅老弱西走。張總愚自率悍黨。排紮不行。劉銘傳令各營輜重。盡歸烏官屯。派劉盛藻偕張景春之馬隊。由南迎戰。唐殿魁由中迎戰。而自領中軍。及黑龍江馬隊。由北迎戰。賊見黑龍江馬隊蜂擁來撲。保成等施放洋槍。斃賊數名。賊勢稍卻。畢乃爾連用炸礮轟擊。黃桂蘭劉明幹率隊殺入。張景春吉爾供額六十七等。乘勢抄追。挫斬悍賊十餘名。馬賊大潰。步賊亦退。劉盛藻唐殿魁見北路之賊已敗。各督隊猛進。甫開槍礮。賊卽潰走。該營官等。鑒於前次之詐。猶不令猛追。該逆退至四五里。仍跑隊南行。其時銘軍已行五十餘里。劉銘傳慮其疲乏。商詢各營兵將。俱願奮力一戰。不肯休息。遂率黃桂蘭畢乃爾等。由南路擊賊之首。唐殿魁由中路擊賊之腰。劉盛藻由北路擊賊之尾。保成及張景春馬隊。俱由北路抄擊。張逆亦分股迎撲。左右兩軍。牛逆迎撲中軍。進抵龍壩集西。畢乃爾李錫增各放炸礮。牛逆勢甚怯弱。不敢前進。張逆以馬賊抄我馬隊之後。而步賊拚死撲我步隊。劉盛藻派馬汝霖等兩營迎戰。自率劉盛休等四營接應。唐殿魁派孫學義等兩營迎戰。自率周志本等四營接應。張景春保成等。各以馬隊一營迎戰。兩營接應。馬賊先與我交鋒。未分勝負。步賊從後擁進。丁汝昌滕學義等各放排槍。斃賊滿地。賊猶持矛猛進。惡戰片時。唐殿魁督軍一呼。如牆而進。殺賊五六百人。餘皆棄矛奔逃。馬賊見步賊潰敗。齊來救應。復被劉盛藻等擊敗。張景春保成等。縱馬追殺。所向披靡。劉銘傳見張逆馬步俱敗。亦令黃桂蘭等率勇衝擊。牛逆之隊。該逆卽棄矛回奔。殲殺者百餘人。餘賊向西潰去。我軍追奔十餘里。暝黑收隊。當查營官馮汝霖頭受矛傷。弁勇傷亡數十名。奪獲長矛千餘桿。戰馬百餘匹。此二十三日劉銘傳一軍在龍壩集大獲勝仗之情形也。周盛波

一軍自鉅野接仗後。訊據生擒賊供張牛等逆。欲由歸安德。回竄蒙亳老巢。該軍留於歸德。僅帶八成行隊來東。二十三日。趕回防所。是夕宿章縫集。次日大雨如注。二十五日。探知逆股竄向城武。披隊疾馳。申刻遙見賊隊。周盛波派周盛傳率步騎四營前進。至城西二三里許。該逆大股蜂擁而至。見官軍人數極少。猛力攻撲。我軍屹立不動。槍礮環擊。鏖戰逾時。馬隊橫截而出。營官周行發手刃逆首張大發一名。賊衆立潰。適周盛波各營亦至。前後掩殺。共斃賊匪二百餘名。我軍亦微有傷亡。二十六日。周盛傳仍率原隊前進。至荷澤之侯家集。該逆正在分攻各寨。而其新破之游莊寨。毫無準備。周盛傳揮兵直進。一擁而入。殺斃賊衆百餘名。就地紮住。該逆糾黨還撲。力戰卻之。周盛波於二十七日黎明趕到。與周盛傳會合一處。探知張牛二逆之精銳。盡聚於此。令各軍先行紮營。然後進剿。該逆見我軍分布營壘。乃搶踞前後大莊三處。拚死來戰。我軍一面施放洋槍炸礮。一面趕築營牆。頃刻而就。周盛波派周盛傳等三營勦中路。周壽昌等三營勦右路。賈啓勝等三營勦左路。而自率親兵小隊及周行發馬隊接應。該逆亦分股來敵。騎賊前後包衝。我軍洋槍炸礮。分段齊發。往返回合。鏖戰極苦。槍矛交集。一處前者死傷枕藉。後者猶冒烟直上。經周盛傳指揮。連斃賊目十餘名。賊隊始亂。各營乘勢掩殺。賊乃奔潰。追逐五六里。晡時收隊。是役我軍僅二千餘人。賊過十倍。自辰至酉。終能冒險制勝。營官周盛傳衛汝貴楊安典楊正國均受矛傷。弁勇傷亡者百餘人。其夜二更以後。周盛波派隊於方埠賊巢之外。逼紮兩營。二十八日。大隊繼進。張逆正出隊抵拒。我軍用炸礮轟塌土牆。攻克該圩。捻衆紛紛奪門向東南逃竄。圩內搜殺又數百名。救出難民五六百人。此二十五六二十七八等日。周盛波一軍追勦大勝一次。小勝三次之情形也。劉銘傳一軍。於二十七日。向晚至曹縣。探知近城有賊。不辨何股。令選小隊。於三更後潛至賊館。分三路掩襲。中左二路。賊哨驚覺。悉數逃去。右路滕學義朱起昌等。撲入賊館。賊俱無備。殲殺數十名。奪獲騾馬百餘匹。又獲小勝一次。據該提鎮等先後呈報前來。臣查此次擒黨。全數東竄。銳意搶渡運河。就食完善之區。潛鼎新潘濞一捷。首挫兇鋒。厥後初六十四等日。接仗及帶隊梭巡西岸。牽綴賊勢。使不得得意東渡。該軍於上年六月。由蘇州進衛畿輔。盛暑航海。輪船酷熱。物故者多。自駐防濟甯。去秋之季。今春之杪。均以力戰保全東境。應懇天恩。准臣將潘鼎新一軍。開單保獎。以示鼓勵。山東諸軍。扼防運河。屢次撲犯。均經擊退。爲昔年所未見。併懇天恩。准開敬銘擇尤保獎。以策效於

將來。臣調齊各軍。以次進逼。本可合圍痛剿。乃該逆遽折而南趨。未加懲創。正深焦灼。幸劉銘傳龍摺集之捷。殺傷精銳頗多。周盛波游莊寨之捷。以少勝衆。冒險立功。有此兩戰。足以稍快人心。所有銘軍出力之營總。藍翎恩騎尉保成。請以防禦儘先補用。賞換花翎。佐領吉爾洪額六十七。均請以參領補用。吉爾洪額并請賞換花翎。其餘出力員弁。仍歸黃陂寨內彙獎。涼州鎮總兵周盛波兄弟。竭力苦戰。膽智俱優。可否頒賞撥指等物。交周盛波周盛傳祗領分藏之處。出自格外鴻施。其所部盛軍出力員弁。暫行存記。俟續有戰功。再爲請獎。所有擒逆自山東回竄各軍追剿疊獲勝仗緣由。恭摺由驛五百里馳奏。伏乞皇太后皇上聖鑒訓示。謹奏。

擬於運河增隄置柵片。同治五年四月初七日

再臣接據各路稟報。捻黨大股。自二十三日。與銘軍接仗後。即分股南趨。張牛等逆。被周盛波二十七日擊敗。連日竄往歸德虞城。旋又由豐縣折回單縣。徘徊不去。似有回竄曹濮之意。劉銘傳一軍。初三日由虞城馳抵單縣之黃岡集。緊躡其後。臣檄飭李昭慶一軍。由金鄉馳赴單縣。與銘軍會同勦辦。而仍以潘鼎新之軍留防濟寧長溝一帶。備賊回竄。劉松山一軍。前已調至濟寧。因賊衆回竄。又令趕回湖團。周盛波一軍。已於二十九日趕回歸德。因聞賊有分竄雒河者。又於初四日拔赴亳州。究竟蒙亳是否有賊。係何會分股。臣尙未聞其詳也。至任柱等一股。則先由永城碭蕭竄至睢寧境內之雙溝。初二日馬賊已撲近早河洋河等處。距宿遷不遠。該縣現有襄辦軍務侍講學士劉秉璋一軍駐防。與上游密灣等處吳棠派出之軍。韓莊八閘楊鼎勳之軍。聲勢向爲聯絡。該學士昨來濟寧。臣晤商一切。聞警後。即日馳回宿遷。布署一切。將來即移所部。駐紮徐州。居四陸適中之地。仍作一路游擊之師。臣本早擬查看黃運兩河。因賊蹤去而復返。盤旋不定。遲遲未行。臣以東北則畿輔爲天下之根本。東南則江蘇爲臣軍之根本。屢經奏明。注重東路。既以東路爲重。不得不藉運河衣帶之水。以爲流寇阻截之界。惟河淺且窄。汛長千有餘里。防不勝防。臣擬會同閻敬銘等大加修浚。增隄置柵。能否確有把握。俟查勘後續行具奏。謹先附片陳明。伏乞皇太后皇上聖鑒訓示。謹奏。

曹徐淮泗剿擒勝仗摺。同治五年四月二十五日

奏爲擒匪兩股竄擾曹徐淮泗各軍分路剿辦。恭摺仰祈聖鑒事。竊擒逆自山東回竄。各軍追剿獲勝。業於四月

初七日奏明在案。張總愚牛落紅一股。經劉銘傳周盛波擊敗後。連日盤旋於虞碭豐單四縣之間。劉銘傳一軍由虞城馳抵單縣之黃岡集。緊躡其後。初三四五等日。節次與該逆相遇。頗有斬擒。賊向東南奔竄。初七日。撲近湖園。劉松山出隊迎剿。旋又折回單縣。十一日。竄至城武。十二日。圍攻曹縣。十三日。竄至龍堽集。十五日。復圍曹城。適李昭慶一軍由城武。劉松山一軍由豐縣。同時趕至會擊。立解城圍。是夕。李昭慶與劉松山會商進剿之策。以湘軍爲左路。以淮軍爲右路。兩軍議定。相距三四里。互爲應援。十六日。李昭慶等督軍前進。離營數里。賊即分路來撲。李昭慶飭令各營屹立不動。洋槍洋礮。連環轟擊。賊隊已亂。我軍馬隊。始從樹林內突出橫衝。右路之賊。全行敗走。李昭慶登高瞭望。見賊馬六七百匹。步隊千餘人。向南繞竄。折而東北。圍撲後路營壘。一面傳知各營嚴備以待。一面調派桂字三營。向南截剿。復將另股撲營之賊。登時擊退。斃賊甚多。其撲犯左路之賊。劉松山飭派記名總兵李榮貴等各營。分三路進擊。而自率親兵督戰。部署甫定。賊馬數千。已向前衝突。各軍鎗礮齊發。轟擊半時之久。賊馬傷斃者頗多。該逆知衝陣不動。遂從兩旁包抄。而以步隊大股。合力猛撲。各營穩持如故。奮勇鏖戰。槍矛并施。十盪十決。賊勢不支。紛紛敗績。另股之繞過南路。牽制官軍者。亦經我軍擊退。計鎗斃殺斃者。幾及千名。奪獲驃馬六十餘匹。湘軍陣亡者十三人。受傷者七八十名。幸獲大勝。張牛等逆。遂由曹南奔潰。是日。劉銘傳一軍。適由碭山而來。復過於王閭集。劉銘傳督軍迎戰。我軍馬隊先與馬賊交鋒。生擒十餘名。鎗斃數名。步賊旋鋒擁而至。各軍鎗礮齊發。賊猶冒煙猛進。經周志本張士元等持矛惡鬪。將接仗悍賊數百名。斃斃殆盡。賊勢大奔。銘營乘勢追殺。陣斬者約四百餘名。鎗礮擊斃者尤多。獲戰馬五十餘匹。弁勇傷亡者。亦數十名。戰罷後。劉銘傳與李昭慶劉松山會晤。該逆悉數向曹縣東南竄走。十八日。各軍拔隊跟追。二十日。賊已竄至豐縣。旋竄銅沛。此張總愚牛落紅等一股。竄擾曹徐之交。湘淮各軍十六日。力戰獲勝之情形也。至竄近宿遷清江一股。是爲賴文光任柱李允等首。該逆於初七八等日。攻撲運河。防守嚴密。技不得逞。遂折竄泗州靈璧。連日盤踞該處。有搶割二麥之意。臣檄飭派駐臨淮之王永勝一軍。刻日渡淮就勦靈泗一帶。又調古州鎮總兵劉士奇七營。渡江移紮宿遷。騰出劉秉璋與楊鼎勳兩軍。除酌留數營。扼防韓莊八閘外。其餘概作游擊之師。專辦靈泗睢宿及蘇皖交界各州縣。該三軍尙未拔行。頃聞泗州之賊。業已南竄。未知又向何處。周盛波一軍。自移營亳州後。重修

濠牆。料理糧仗。聞該逆盤踞泗靈。十八日。率隊由宿州進剿。其臨淮一鎮。有編修張錫鏘陸營。會同水師防守。不至侵犯淮南。此賴文光任柱等逆竄擾淮泗一帶。各軍防剿之情形也。臣查此次捻黨。由山東回竄。分爲南北兩大股。久踞曹徐淮泗徘徊不去。一則各屬二麥既熟。乘勢搶割。以圖一飽。一則牽制我軍。冀乘不備。襲渡運河。竄入齊蘇完善之區。實屬狡譎異常。計臣軍之剿辦。北路者則有劉銘傳李昭慶劉松山等三支剿辦。南路者則有周盛波一支。而劉秉璋王永勝亦已改爲游兵。或可一收夾擊之效。惟銘傳一軍。自去年臘月以來。援鄂援皖。援豫援齊。馳驅四省。將士疲勞已極。頃據該提督呈請休息。一二月。藉資整頓。臣已批准。飭令該軍移赴濟寧駐紮。騰出潘鼎新一軍。代爲遊擊之師。如此更番遞戰。庶軍士不至過勞。亦可以保其常新之氣。於剿辦似有裨益。所有捻逆兩股。竄擾曹徐淮泗各軍分路剿辦緣由。理合由驛五百里馳奏。伏乞皇太后皇上聖鑒訓示。謹奏。

查勘黃運情形片 同治五年四月二十五日

再臣擬將運河查勘一次。大加修浚。業經陳明在案。本月初七日。會同撫臣閻敬銘。由濟寧啓行。沿河查閱。自微山湖以北至長溝止。有潘鼎新一軍駐守。足敷分布。長溝以北至開河一段。向恃有南旺湖水。故未設防。茲查湖水全涸。已由閻敬銘添撥防兵。開河以北至靳口一帶。水勢稍淺。牆壘較低。自靳口至安山戴廟。水勢甚深。差爲可恃。自戴廟至沈家口十八里。夏秋黃河灌運。水極深廣。冬春沙淤河乾。殊難守禦。現經閻敬銘籌議條款。督同文武將領。剋期興工。無論河深河淺。均增高牆深濠以輔之。其沙地及民圩。不能掘濠者。酌立木柵以補之。運河閘畢之後。初十一等日。與直隸督臣劉長佑會晤。三人同閱黃河。若非隆冬冰堅。防守尙易爲力。十三日。還至安山。由陸路至東平泰安。查看形勢。因便一登岱岳。十九日。仍回濟寧防所。濟寧以下。微山湖長一百八十里。無須設防。自湖以南。運河淺深不等。議定八關暨宿遷等處。由學士劉秉璋派兵防守。審灣暨成于河等處。由漕臣吳棠派兵防守。總期力扼此河。不使該逆流竄蘇齊膏腴之地。未知果否有裨。理合附片具陳。伏乞皇太后皇上聖鑒訓示。謹奏。

彙陳各軍近日追剿情形摺 同治五年五月二十二日

奏爲彙陳各軍近日追剿情形。捻黨分股回竄豫皖。恭摺仰祈聖鑒事。竊捻逆兩股。竄擾曹徐淮泗。各軍分路剿

業於四月二十五日奏明在案。張總愚牛落紅一股。在曹縣經李昭慶劉松山等軍擊敗。後四月二十日。竄至豐縣。次日。竄入沛縣。二十三日。至徐州城西十餘里。總兵董鳳高李祥和各以兩營分路出隊。擒獲數十名。該逆旋即退去。是夜李祥和派兵潛劫賊營。奪有輪車。奪獲賊馬十餘匹。二十五六等日。該逆竄至銅山之雙溝楊家窪一帶。二十八日。竄至宿遷之埠子鎮洋河集。逕撲運河。二十九日。逼近桃源。三十日。襄辦軍務江蘇臬司劉秉璋督軍馳至洋河集。探知賊之大股在圩外五六里紮住。馬步萬餘人。四出焚掠。劉秉璋派令總兵吳長慶況文榜等。各帶五成隊伍。於三更後。徑擣賊寨。斬擒近七十名。五月初一日。黎明收隊。隨即傳令各營。整隊出擊。該逆且戰且走。吳長慶況文榜等。由舊河隄內外。分路夾擊。追過倉家集。賊陣大亂。斃賊甚多。該逆另以六七百騎步賊千餘。由倉家集西北。包出我軍之後。直撲營壘。守營將士。槍礮排擊。王占魁率隊回援。陣斬三十餘名。槍斃賊目二名。始全數退走。與倉家集之賊合併西趨。弁勇陣亡受傷者各十餘名。初三日。該逆由睢寧之歸仁集回竄。適劉松山一軍由徐州追賊而來。行抵離城十八里之王家林。即見賊馬紛紛逼近。劉松山一面飭督各營趕築營壘。一面派隊迎敵。部署甫定。賊馬千餘。向前衝突。各營槍礮齊發。穩擊逾時。步賊大股踵至。各營奮力齊進。賊勢不支。退至里許。馬賊復從兩旁包抄。我軍隊伍穩持如故。力戰良久。賊始敗去。計斃賊近三百名。弁勇陣亡者四名。受傷者二十名。此劉秉璋一軍初一日在洋河。劉松山一軍初三日在王家林。各與張逆接仗獲勝之情形也。初四五日。該逆晝夜攻撲早河及利運閘馬家渡一帶。均經水師鄧長里等擊退。由是不復圖犯運東。乃由利國驛回竄銅山。初八日。劉松山進至銅山之苑山圩。據報賊之後隊相距僅八九里。比即整隊前進。行至魏家莊。已與賊遇。營壘猝不及修。劉松山飭令各營將輜重圍聚一處。以四成隊固守。以六成隊分三路迎擊。頃刻斃賊數十名。該逆馬步均不肯戀戰。由西南竄走。各營乘勢猛逼七八里。沿途又斃賊百餘名。將該逆截為兩段。一段向西北荆山橋李家瓦房而去。一段向西南楊家集而去。共計斃賊二百餘名。生擒十四名。弁勇受傷者十七名。其賊之前隊。已於初七日竄近徐州。是時劉銘傳方赴濟寧。與臣晤商一切。其部將周殿魁劉盛藻。分帶銘軍。駐紮徐州。以賊氛逼近郡城。初八日。會商董鳳高出隊。行抵離城十八里之趙莊寨。偵知賊之前隊。盡在荆山橋河左右。馬隊張景春保成等渡河直前接仗。黃桂蘭劉朝幹等步隊三營渡河接應。李錫增畢乃爾兩營隔河施放

炸礮。鏖戰逾時。馬賊敗入河中。上爲步隊兜擊。下爲荆山橋所阻。被我軍擒斬甚衆。該逆悉數敗過河東。唐殿魁等督軍。追至十餘里而還。奪獲賊馬二百餘匹。斃賊約計百名。此張逆自宿遷桃源回徐。劉銘傳劉松山兩軍初八日兩處接仗。獲勝之情形也。任柱賴文洸等大股。自四月十三日窺撲泗州城後。旋復竄擾宿州。二十三日。竄至永城縣東湖莊寨。正在圍攻之際。周盛波馬隊一營先到。突衝賊隊。擒斬數十名。賊衆潰退。該營即在胡莊寨駐紮。與步軍相離尙十餘里。二十四日。周盛波率軍前進。行甫數里。該逆分三路來撲。以馬隊猛撲中路。周盛波督令童邦傑等排列隊伍。併力禦之。洋槍炸礮。迎頭轟擊。該逆抵死不。當派都司周行發率領馬隊。由城西抄入賊後。賊始驚潰。其前路步賊。經周壽昌等擊敗。後路步賊。亦經周盛傳等擊敗。自辰至暮。各營終日未嘗計斃賊近二百名。奪獲騾馬頗多。弁勇傷亡者十餘人。二十六日。該逆竄往歸德。二十八日。與豫軍接仗。三十日。又折回永城夏邑之交。初二日二鼓。周盛傳率隊掩襲。小有俘獲。初三日。由蕭縣之西。竄入銅山。初八日。擾及東賀莊。將與荆山橋張逆之股相合。適原駐徐城之張詩日李祥和等營出隊至土山寺。而周盛波追軍適至。遂會商進擊。又擒斬百餘名。此周盛波一軍二十四初八等日。在永城及徐州兩次接仗。獲勝之情形也。初八以後。張牛一股。由豐縣碭山竄至虞城以西。任賴一股。由桃山至宿州竄入懷遠。渡渦河而南。盤踞下蔡等處。臣查該逆自二月北竄以來。堅圖渡運。前在山東鄆城一帶搶渡。後在江南宿遷一帶搶渡。徘徊曹徐淮泗者兩月有餘。迄不得逞。雖足伐其東渡之謀。尙未挫其兇悍之氣。現在張逆入豫。任逆入皖。臣已檄飭潘鼎新會同周盛波兩軍爲一路。劉松山會同張詩日等兩軍爲一路。專剿張牛一股。劉秉璋會同楊鼎勳爲一路。專剿任賴一股。無論該逆竄往何處。均與之縱橫馳逐。未知能否有濟。至劉銘傳一軍。改調在徐州駐紮休息。騰出劉秉璋全部。概作游兵。李昭慶一軍。以八營赴防韓莊。以十營赴防濟寧。駐紮休息。騰出潘鼎新楊鼎勳兩軍。概作游兵。潘鼎新已於十五日拔隊起程。前赴歸德矣。所有彙陳各軍近日追剿情形。捻黨回竄豫皖各緣由。理合由驛五百里馳報。伏乞皇太后皇上聖鑒訓示。謹奏。

請分段扼防片 同治五年五月二十一日

再臣前次查看黃運兩河。至張秋一帶。與直隸督臣劉長佑。山東撫臣閻敬銘會籌防務。三人面商。直東兩省防

兵互相攙雜。心志不齊。不如畫分汛地。各有專責。議定自范縣豆腐店以上。如東明長垣等處。統歸劉長佑派兵設防。自豆腐店以下。如張秋東阿等處。統歸閻敬銘派兵設防。該督撫業已各奏梗概。又函商臣奏明界限。以專責成。至運河北路隄牆。現經閻敬銘督飭修築。甚爲堅實。其南路隄牆。前因賊擾桃宿。尙未認真興辦。臣擬於近日至宿遷桃源等處。會同吳棠查閱一次。飭令各文武加工修築。期於一勞永逸。保全運東完善之區。理合附片陳明。伏乞皇太后皇上聖鑒。謹奏。

彙報軍情檄調各軍防剿摺 同治五年六月十四日

奏爲彙報近日軍情。并檄調各軍防勦事宜。恭摺仰祈聖鑒事。竊各軍追勦捻逆分股回竄豫皖。臣於五月二十二日具奏在案。牛落紅一股。自五月初八日。被我軍擊敗後。不能與張總愚合併。周盛波督軍跟追。十五日行抵永城之同和集。探知牛逆欲由白龍王廟竄過渦河。遂催督各營連夜窮追。十七日五鼓。抵白龍王廟。該逆已竄過渦河。周盛波趕搭浮橋渡河。派周盛傳由西路進。劉啓福等由東路進。周壽昌等由中路進。而令陳明昇周行發各帶馬隊一營。從兩旁衝截。牛逆勢已窮蹙。疾驅悍賊數千人。賊中所謂內五營者。蜂擁回拒。我軍馬步各營分路猛擊。賊衆冒死抵敵。周盛傳坐馬被賊矛刺倒。徒步交戰。兵勇皆殊死格鬪。賊始大敗。正追逐間。有步賊一股。逃入路旁廢圩。周壽昌率師衝入圩內。搜殺淨盡。無一脫者。餘賊向南飛奔。我軍追殺二十餘里。牛逆踉蹌逸去。周盛波晝夜追逐。十八日至亳州。十九日至鹿邑西南之羅家寨。該逆已竄入陳州境內。馳逐四百餘里。人馬俱困。將士多病。即在馬家寨休息。此周盛波一軍大破牛逆股匪之情形也。任柱賴文洸一股。自五月初由宿州西竄。盤踞鳳台縣屬之平阿山一帶。與皖軍張得勝等相持日久。擄脅益衆。二十三日。王永勝一軍趕至懷遠。二十五日。劉秉璋一軍趕至蒙城。周盛波亦自馬家寨回援。二十六日。至潁州東五十餘里之棗莊集。賊聞援師四集。遂自平阿山全數西竄。欲由潁郡之留陵口偷渡沙河。竄擾光固。適遇盛軍突至。遂折向東北竄逸。繞至烏江河上游。意圖抄襲我軍後路。周盛波麾軍三面齊進。洋槍炸礮。連環轟擊。逆勢不支。向西狂奔。奪獲牛騾器械頗多。解散脅從難民千餘人。二十九日。賊竄至太和。初一日。竄至港溝。劉秉璋與皖軍英翰等次第跟追。此周盛波與任賴股匪接戰小勝及各軍追剿之情形也。張總愚一股。自五月中旬。由虞城西竄。潘鼎新與劉松山張詩日

三軍追勦。二十一日。同抵寧陵。探知該逆。已至睢州城南之河陽集。因會商次日均至睢州。察看形勢。該逆知官軍緊躡其後。不敢停留。二十一日。一撲陳州城下。旋即退去。二十二日。竄近周家口之北寨。牛逆亦由苑寨偷渡河南。與張逆分而復合。駐防周家口之右江鎮總兵張樹珊。派副將閔鳳來馬隊迎擊。殺賊數十名。奪獲騾馬四十餘匹。是夕復分隊離勦。該逆不敢迎戰。連夜由迨遙集一帶。渡過沙河。張逆自郟城西遁。牛逆自商水西遁。均奔遂平確山一路。訊據生擒賊供。均稱該逆欲由信陽竄往光固六安。斫取茅竹。補製兵器等情。此張樹珊一軍迎剿張牛一股。薄有斬擒。及各軍跟追之情形也。臣查該逆各股回竄豫皖。兩省中原平曠之地。四通八達。若不擇地設防。此勦彼竄。終不能大加懲創。上年劉銘傳帶兵入豫。察看地勢。即創扼守沙河以南。以感其勢。臣以彼時兵力未齊。未遽允行。今張牛等逆。既渡沙河以南。任穎等逆。亦將渡沙渡淮。并趨南路。本年防守運河。蠲有成效。應即仿照於沙河設防。俾賊騎稍有遮攔。庶軍事漸有歸宿。惟查沙河上流。直至郊縣汝州。地段太長。幾無止境。臣博詢衆議。擬自周家口以下。至槐店止。扼守沙河。自周家口以上。至朱仙鎮止。扼守賈魯河。由臣派兵設防。自朱仙鎮以北。四十里至汴梁省城。又北三十里至黃河南岸。無河可扼。挖濠守之。由李鶴年派兵設防。自槐店以下。至正陽關。仍守沙河。由喬松年派兵設防。自正陽關以下。即係淮河。由臣派水師與皖軍會防。各分汛地。層層布置。或者漸逼漸緊。逐於西南山多田少之處。官軍較易爲力。現已檄令劉銘傳自徐州拔赴沙河。與潘鼎新張樹珊等熟商防守之策。并咨商河南安徽兩撫。調兵分防。皆憑人力以堅守。不以地險爲可恃。至羣賊南竄。不出南汝光固黃州六安等處。則飽超所統之霆軍。劉秉璋楊鼎勳王永勝所統之淮軍。劉松山張詩日所統之湘軍。分路游擊。亦尙足敷勦辦。臣擬於十五日。拔營東下。閱看宿遷桃源一帶隄牆。即由運入淮。派流而上。逕赴周家口。沿途察看賊情地勢。續行奏報。所有近日軍情及檄調各軍防勦事宜。理合由驛五百里馳陳。伏乞皇太后皇上聖鑒訓示。謹奏。

防守沙河賈魯河片 同治五年六月十四日

再臣於四月初。先擬挑濬賈魯河。置船設防。專函商諸東河督臣張之萬。旋准覆稱。賈魯河沙淤已久。萬難興挑。詢之河南紳士。言亦相同。沙河上下千餘里。地段太長。防此兩河本係極難之事。惟念臣處馬隊不敵賊騎。戰事

既無把握。不能不兼籌守事。且防河之舉。辦成則有大利。不成亦無大害。是以仍就前議。竭力與辦。劉銘傳首畫此策。卽令其與潘鼎新張樹珊會防。力任其難。防守朱仙鎮以下四百里。其自朱仙鎮以上。必須專資河南兵力。撫臣李鶴年現已移駐許州。豫兵已赴西路追剿。臣趕辦河防。咨商李鶴年。請其暫駐省城。調回各軍。先圖近守。不必遠剿。查自朱仙鎮以北。至河南省城四十里。又自省城以北。至黃河南岸三十里。以豫省各軍全力守此七十里。似乎頓兵不進。難免外間浮議。然此七十里。全係沙地。開挖深濠。猶恐旋開旋壅。汛地雖少。防禦甚難。但使扼防得力。將來可與追剿之兵。同一論功請獎。本年三月。山東兩軍。先在曹州迎剿。均經失利。後在運河扼防。均稱得力。臣會奏請獎敘。蒙恩允許。河南兵不甚多。即可仿照山東辦理。不貪馳勦之虛名。或收制賊之實效。臣於軍事辦未就緒者。向不輕於具奏。因臣主聚兵防河之說。恐使李鶴年蒙頓兵不進之譏。不得不預先奏明。可否請旨飭李鶴年暫駐汴梁。調齊各兵。先辦朱仙鎮以北防務。設兩河防務不能辦成。或有損於大局。臣願獨當其咎。不與李鶴年相干。除由臣詳細函商外。理合據實附陳。伏乞皇太后皇上聖鑒訓示。謹奏。

任賴股匪回竄東路調兵分勦摺 同治五年七月初四日

奏爲任賴股匪回竄東路。調兵分剿。恭摺仰祈聖鑒事。竊臣檄調各軍防剿。并議扼守沙河賈魯河等情。於六月十四日具奏在案。臣拜摺後。經於十五日由水路東下。沿途水勢盛漲。南陽微山等湖。與運河連成一片。春閘所修隄牆。自韓莊以下八閘。兩岸較高。砂土質鬆。大雨之後。多已坍塌。其黃林莊以下。二百餘里。兩岸較低。隄身或露二尺有餘。或露一尺數寸。或全淹水中。隄外亦皆積水如湖。節節均有決口。與隄內之河水互相出入。目下茫茫巨浸。賊匪斷難飛渡。將來秋深水落。竟須全數另行興修。二十五日。行抵宿遷縣。二十七日。准山東撫臣閻敬銘咨稱。據曹縣稱任賴兩逆。因張市朱仙鎮等處河水驟漲。不能西渡。仍由扶溝太康回竄。已至杞縣之沙窩。睢州之芋香鋪。勢將直趨曹境。七月初一日。又准河南撫臣李鶴年咨稱。據睢州稟報十八日該州西南之馬頭寨。已被叛逆攻破占據。豫兵不敷馳剿。咨商撥兵救援各等情。臣查扼守沙河賈魯河之議。必俟捻逆各股全趨沙河以南。方可與辦。現在任賴一股。既爲沙河大水所阻。不敢西行。折而東竄。則防河之策。斷難遽行。應卽先行撥兵馳剿。劉銘傳接臣飭守沙河之檄。業於六月二十三日自徐州拔行。潘鼎新一軍。前在西華。周盛波一軍。前在

太和。此三軍者。本擬分防沙河。現令移赴睢州曹考一路。專辦沙河東北之賊。而飽超之靈軍。劉秉璋楊鼎勳王永勝之淮軍。劉松山張詩日之湘軍。仍辦沙河西南之賊。頃已分別各行。相機剿辦。惟自五月下旬以後。淮南北諸郡大水。爲數十年來所未有。積潦盈途。深過馬腹。軍中米糧子藥。車載夫運。寸步難行。不特各軍拔隊。因之滯滯。卽臣處文報往來。亦多阻隔遲誤。而秋稼被淹。民慮漂沒。臣卽自憶調度乖方。軍務毫無起色。又恐飢民失所。不免從賊。以圖偷生。勦辦撫綏。兩俱棘手。籌思反覆。憂愧實深。臣在宿遷停留數日。初聞捻蹤回竄之信。本擬改駐徐州。就近調度。惟賊蹤旣分兩支。無論臣駐何處。均有不能不兼顧之勢。入豫之議。不可再緩。俟與漕臣吳棠會晤後。卽在楊莊換船由湖泝淮。逕赴陳州周家口籌防一切。所有任賴兩逆。回竄東路。調兵分勦緣由。理合由驛五百里馳陳。伏乞皇太后皇上聖鑒訓示。謹奏。

擒股西竄仍辦河防摺 同治五年七月二十八日

奏爲潘鼎新一軍。迎勦獲勝。任賴一股。竄至賈魯河以西。現仍辦理河防。恭摺仰祈聖鑒事。竊任賴等逆。回竄東境。調兵分勦。臣於七月初四日。在宿遷馳奏在案。山東臬司潘鼎新一軍。行至西華縣。爲大水所阻。該司銳意勦賊。於六月二十日。會各營。挽水而進。二十二日。行抵太康。探知太康之崔橋。杞縣之五岔口。通許之底閣等處。逆氛連成一片。二十五日。逕趨崔橋。該逆大股先退。邊馬不絕。二十六日。分兩營留紮崔橋。以馬步十一營。裹糧疾進。至石頭岡。有馬賊數百。迎頭而來。各勇爭先奮擊。獲馬二十餘匹。追至油坊岡之大林。賊幟密布。知其有伏。潘鼎新率三營爲中路。戴春林率三營爲左路。吳從發率三營爲右路。又令唐宏成帶一營。於林叢水淖中。或隱或伏。以爲誘賊之計。該逆果出林搏戰。我軍連營齊進。斬擒悍賊數十名。追至林後油坊岡大寨。潘鼎立揮衆向南寨門一擁而上。該逆翻牆北竄。追殺四五百名。立將大寨奪回。留二營守之。餘悉向前追勦。甫行三里。任逆率悍黨驟馬衝至。萬國順帶馬隊鏖戰。擊殺賊多名。其時附近寨寨。俱蟻聚於十里外。潘鼎新親督各營。整陣以待。未幾。步賊從中路大至。馬賊左右分抄。各營如牆而進。連環轟擊。逆勢不支。紛紛奔北。追至武岡沙窩一帶。各路寨賊俱遁。潘鼎新因勞苦過甚。飭令收隊。詰旦。二十七日。乘勝追勦。至高陽集。任賴兩股。不敢停止。直竄過賈魯河以西。潘鼎新因行糧已罄。兵力極疲。暫停休息。該軍將士。於盛暑深淖中。忍飢追逐。一日三捷。聞勇丁斃水淹斃

者數十人。傷亡亦復不少。實屬異常出力。應由臣暫行存記。俟續有戰功。彙案請獎。臣查前此防河之策。甫經議定。而該逆回竄杞睢。臣深慮其再竄山東。則賊分兩路。勦辦更形棘手。幸得潘鼎新一軍。迎頭截擊。驅之西去。仍應防守賈魯河沙河。以扼其回竄之路。已檄令劉銘傳潘鼎新張樹珊三軍。仍如前議。并添周盛波一軍。分段盡守。豫省諸軍。分防朱仙鎮。及黃河南岸一帶。亦咨撫臣李鶴年迅速舉辦。屢接稟報。任賴及張牛四逆。均已竄至裕州葉縣以西。去襄陽漸近。兩股似有合併之勢。劉銘傳等業已興工修浚。紳民亦肯効力。防河之議。或可辦成。惟上下七百餘里。地段太長。未敢謂防務既成。百無一失。然臣必始終堅持此議。不因艱難而自畫。不因浮言而中更。以求有裨時局。自古辦流寇。本無善策。惟有防之使不得流。猶是得寸則寸之道。現在除防兵外。尚有鮑超劉秉璋楊鼎勳劉松山張詩日等五支游兵。俟防河辦成。則令防河者與游擊者。彼防此戰。更番互換。庶足以保常新之氣。所有任賴逆股被勦西趨。仍辦河防緣由。恭摺由驛五百里馳陳。伏乞皇太后皇上聖鑒訓示。謹奏。

湘軍剿捻勝仗大略情形片 同治五年七月二十八日

再臣行抵雙溝。即聞劉松山張詩日兩軍。自六月十七至二十三等日。在西華上蔡等處。四次獲勝。殺賊近萬。嗣據各路探報。及河南撫臣李鶴年咨文。所稱大略相同。在臨淮時。接見水鎮弁勇。有曾在河南親見戰狀者。皆云大捷。屬實。捻匪近年未嘗受此懲創。詳細情形。須俟該鎮呈報到日。方能具奏。臣在臨淮停數日。尙未接該鎮等來稟。聞係遞至濟寧。沿途隔水。不知何處阻滯。適臣於二十二日。感受風寒。發汗腹瀉。渾身酸疼。二十七日。稍愈。二十八日。力疾登舟西上。擬由懷遠入渦河。由蒙城亳州。察看形勢。逕赴周家口。除俟接到劉松山等捷報。專摺馳奏外。合將患病稽延數日緣由。附片陳明。伏乞聖鑒。謹奏。

湘軍迎剿張逆四獲勝仗摺 同治五年八月十一日

奏爲官軍在西華上蔡等處。迎剿張逆四獲勝仗。恭摺仰祈聖鑒事。竊皖南鎮總兵劉松山。宣化鎮總兵張詩日等。勦捻大勝。臣於七月二十八日。附奏大概。聲明俟接稟。再行詳奏。在案。旋於途次。據劉松山等稟稱。張牛兩逆。自渡沙河以西。分股竄擾。西平上蔡等屬。逆氛連成一片。劉松山張詩日兩軍。行抵周家口。爲大水所阻。停住數日。六月初六日。被隊沿沙河河西行。十七日。由歸村行至西華之萬金寨。聞張逆大股。在前距寨不遠。整隊徐行。

猝遇賊馬百餘。首先衝突。該軍甫開槍礮。賊即卻退。如此數次。劉松山等知賊有伏。飭令各營嚴陣以待。行未三
里。該逆大股馬賊齊至。步賊亦從兩邊林內三道并出。劉松山張詩日等麾軍力戰。斃傷數百。馬賊尙抵死不
退。復經我軍疊戰逾時。始紛紛潰敗。各營追殺十餘里。經過永平寨。直抵上蔡之雙廟。雙廟爲該逆占踞之巢。守
巢悍賊齊出接應。兵勇混戰一時。日已向暮。遂行收隊。就永平寨外趕築營壘。與賊相持。是日擒斬斃斃。約逾千
名。十八日大雨未能出隊。時有馬賊前來搦戰。劉松山等伏兵要擊。略有斬獲。方是時。各營輜重尙留於歸村老
營。相距三十餘里。又據生擒賊供。該逆有至西平約牛落紅救援之說。劉松山張詩日等。以牛逆來援。必由歸村
經過。兩路夾攻。則首尾不能相顧。商令十九日。將老營移至永平寨。該逆偵知我軍移營。預伏千餘騎於萬金寨
旁。意圖截取輜重。幸總兵李祥和等督隊護送。李榮貴易德麟合軍夾擊。將馬賊擊退。斬獲多名。其旁竄各村莊
者。亦經易致中搜勦殆盡。兩軍既合。商定進取雙廟。決一惡戰。二十日。張詩日與李祥和朱式雲等率隊進攻左
路。劉松山等率隊進攻右路。該逆以大股結團十餘起。前來迎敵。張詩日飭令各營槍礮齊發。力戰時許。斃賊無
算。漸逼漸進。追過雙廟之後。林中忽出賊馬千餘。包抄我軍。步賊亦藉勢猛力回撲。經彭秀清楊瑞堂力扼後路。
擊斃馬賊百餘。賊乃退卻。各營乘勢猛進。十盪十決。該逆大敗。尸骸枕藉。直追過義合寨前。抵洪河岸側。逼入水
中。淹斃者叫號浮沈。數里不絕。其右路之賊。劉松山分三路進勦。步步穩擊。追至雙廟之後。該逆將馬步隊伍頓
住。散而復整。回頭衝突。將士惡戰踰時。猶相持不下。馬賊千餘。忽自右路抄我陣後。劉松山揮令易德麟從陣中
橫出。將馬賊截爲兩段。唐光輝以槍礮連環轟擊。傷斃數十。馬賊悉向高粱林內遁去。步賊亦因之而靡。涉水狂
奔。劉松山飭令各營分途追殺。呼聲震地。該逆見官軍追剿甚急。自相踐踏。有奔向洪河墜水淹死者。有陷入泥
淖。甘受刃而不拒者。總計兩軍擒斬斃斃者近三千名。淹斃者數又過之。解脅從千餘名。奪獲騾馬器械無算。此
十七十九二十等日三次大獲勝仗之情形也。張逆連次被創後。不敢停留。因沙河東路水勢過大。遂折回西趨。
二十二日。該軍追至歸村。二十三日。及於鄆城之召陵。劉松山張詩日布署既定。如牆而進。該逆馬步全股來敵。
我軍槍礮火彈。分段齊發。戰不半時。斃賊甚多。該逆無心戀戰。劉松山等見逆勢不支。各軍屢勝之後。一往直前。
循潔灣河直追至四合莊。沿途擒斬槍斃者雖不及二十日之多。爲數亦逾二千。騾馬器械拋棄泥塗者。不可勝

計。此又二十三日續獲大勝之情形也。查點我軍七日之間。四次猛戰。劉松山一軍。共計陣亡二十八名。受傷一百四十三名。張詩日一軍。陣亡十九名。受傷九十一名。其因疊水及疲勞受病者。凡數百名。據核總兵等稟報前來。臣查張逆一股。自近年以來。縱橫於齊豫皖鄂之間。從未大受創懲。此次經湘軍節次奮擊。凶鋒頓衰。精銳損傷三分之一。實足以快人心。而伸天討。各營將士。於盛暑泥淖之中。徒涉遠征。忍飢苦戰。異常出力。可否容臣查明出力員弁。彙案奏獎。以昭激勸之虞。出自逾格鳩施。所有官軍在西華上蔡等處迎剿張逆獲勝緣由。恭摺由驛五百里馳陳。伏乞皇太后皇上聖鑒訓示。謹奏。

請假一月片 同治五年八月十二日

再臣在臨淮時感受暑溼。渾身酸疼。醫治未痊。力疾西上。行抵蒙城濉河。淺僅尺許。更換小舟。至亳州登岸。八月初九日。始抵周家口。沿途加意調理。外感漸愈。惟出汗過多。心氣甚虧。偶一用心。輒復出汗不止。夜眠則盜汗漉體。舊患耳鳴已久。近日則漸至重聽。據醫者云。耳聾由於淨火。尙易調治。惟用心輒汗。所關匪淺。必須靜攝。以冀速痊。合無仰懇天恩。俯准賞假一月。在營調理。附片陳請。伏乞皇太后皇上聖鑒訓示。謹奏。

近日軍情片 同治五年八月十二日

再近日軍情。任穎一股。久踞舞陽葉縣之交。八月初間。邊馬常至襄城鄆城。有回竄東北之勢。劉秉璋楊鼎勳於初四日由周家口前赴鄆城堵剿。張牛一股。經劉松山張詩日暨豫省宋慶三軍跟蹤追剿。七月二十一二十二等日。又在新野鄧州續得勝仗。追至南召魯山。該逆被追緊急。折而奔竄。葉縣等處。邊馬至長葛洧川一帶。聞有回竄東北。再窺山東之意。臣檄劉銘傳潘鼎新二軍。由中牟尉氏一路迎剿。與長葛洧川相距甚近。與劉秉璋楊鼎勳赴鄆之師。聲勢亦可聯絡。又令劉松山及張詩日兩軍跟蹤回剿。鮑超由汝寧北出迎剿。總以力扼東竄。然後可收兜剿之效。至防河之策。自朱仙鎮以下。業由劉銘傳等與築堤牆工程。約就八分。現在一經調撥。尙未能分汛地堅守。如果各軍分路剿辦。逼賊西趨。仍當一面追剿。一面防河。以待初議。除劉松山等新野鄧州接仗細情。續行詳奏外。所有近日軍情調度緣由。謹附片陳明。伏乞皇太后皇上聖鑒訓示。謹奏。

頂奏保案片 同治五年八月十二日

再臣疊准部咨以金陵續保等案。未及逐員聲註考語。行文分別駁查。俟咨復到日再行核辦等因。臣查金陵克復以後。臣處所辦保案。共有六起。除續保青陽解圍一案。加具考語。奉部指駁者。應由臣另案陳奏外。其續保克復金陵兩案。進援青陽并克東壩等城隘一案。肅清皖南一案。堅守寧國涇縣一案。均因金陵倖克。大功羸成。各營將士從征太久。遣撤在即。僉以早沐恩施爲幸。未及詳加考語。繕摺具陳。仰蒙聖恩均准所請。嗣經部臣照章駁查。自應遵照辦理。惟查部定章程。克復城池。擒斬要逆。始准保奏免補選等項。似應就一案言之。非就一人言之。係克復城池。斬擒要逆之案。即應不拘人數。擇其尤爲出力者。列保免補免選越級請升。以示鼓勵。臣向辦保案。極爲矜慎。咸豐四年。克復武漢。僅保三百餘人。五六兩年。保奏三案。合計僅數百人。上年奉命勦擒。已逾一歲。諸軍屢獲勝仗。尙未開單請獎一次。各營將士。頗疑臣保奏過邊。稍形缺望。惟咸豐十一年。及同治元二年等臣處保舉稍寬。實因統轄至十餘萬衆。克復至數十城。不得不略示優獎。至克復金陵。續保各案。本不必盡由臣處出奏。卽如水師兩案。儘可由楊岳斌彭玉麟具奏。江西善後釐局之案。亦可由江西撫臣具奏。安徽善後釐局。及皖南肅清之案。亦可由安徽撫臣具奏。以其均屢有功金陵。概由臣處奏保。合併則見爲多。分隸則見爲少矣。堅守寧國涇縣一案。前以保奏較遲。臣尙自請議處。若非實有關係。臣亦豈肯爲此小事。自行檢舉。現在原保之各統領。如楊岳斌遠赴甘肅。朱品隆唐義訓易開俊等營。已遣散開缺回籍。若再往返行查。分析加考。經年累月。申覆無期。致令出力人員。有虛名而無實惠。殊非論功行賞之本意。查左宗棠在浙時保奏之案。未加考語。經該督辨析詳陳。均蒙特旨允准。臣於三年八月。陳奏一次。亦蒙恩准施行。合無仰懇天恩。俯念各營行查之難。立功之苦。特降諭旨。准將臣營所保五案。敕部仍照原奏清單註冊。其業經議駁者。一並欽遵初次諭旨辦理。免其逐員加考咨復。以爲奮勇立功者勸。惟獲咎人員。保奏開復者。部臣駁飭詳查。應照部議辦理。如其中情實可原。再當分別專案具奏。以符定例。伏乞皇太后皇上聖鑒訓示。謹奏。

檢股東竄河防無成現派軍追勦摺 同治五年八月二十三日

奏爲檢股東竄河防無成現派各軍追剿恭摺仰祈聖鑒事竊檢衆擾及長葛涪川志圖再竄山東等情臣於八月十二日具奏在案十三日以後疊據各路稟報張牛任賴等逆麇聚於許州禹州一帶決志東竄臣所部游擊

之師。如劉秉璋劉松山等軍。由西路追賊而東。先後趕至許州襄城。而賊復進逼北竄。防河之師。如劉銘傳潘鼎新等軍。八月初間。分防各汛。一律工竣。十一月十二兩日。趕赴汴梁。幫修省北濠隄一段。十四日。劉銘傳回至尉氏。潘鼎新回至樊寨。十五日。據擒賊供稱。該逆欲於中秋夜由汴梁左右東竄。劉銘傳等移紮朱仙鎮以上。一面牽制北路賊勢。一面兼顧本管汛地。十六夜。曠望火光。漸迤而北。逼近豫軍長牆。派馬馳探行至離汴省十餘里。見隄牆已毀塌數處。詢據余承恩云。二更時股賊潮湧而至。撫標三營所守隄牆。嘗被衝破。賊已竄逸東去等語。劉銘傳即派烏爾圖那遜等馬隊。向東追剿。派唐殿魁一軍。向北截剿未過之賊。烏爾圖那遜追至杞縣境內。遇賊接仗。頗有擒斬。唐殿魁行至汴城之南。正遇牛逆後股。當即攔腰猛擊。截回馬步賊千餘人。向南逃去。由劉銘傳等先後呈報前來。臣查河防陸路七百餘里。水路九百餘里。地段太長。自張市朱仙鎮直至黃河。浮沙壅塞。即使竭數月之力。認真修防。猶未敢謂百無一失。臣於七月二十八日疏內。早慮及之。今一處疏失。功敗垂成。半由於人力未周。半由於賊勢過重。聞信之餘。實深焦憤。現已檄令劉銘傳潘鼎新兩軍。由虞城單縣一路。劉秉璋楊鼎勳兩軍。由徐州韓莊一路。均赴山東。跟蹤追剿。又飭張樹珊一軍。由徐州馳赴曲阜。預衛孔林。其李昭慶一軍。本留在濟寧韓莊等處防守運河。計臣所調度之淮勇七軍。除周盛波一軍。暫留周家口外。餘均飭赴山東。與羣賊縱橫追逐。至運河防務。自夏水盛漲。隄牆坍塌。七八月間。又經加工修築。比春間更爲堅固。差覺可恃。但此次賊衆且悍。四股合而爲一。蓄欲渡運東竄。深秋水落。能否堵禦完固。殊未敢必。且賊蹤紛竄無定。黃河防務同時吃緊。相應請旨飭下直隸督臣。山東撫臣。堅守黃河。檄船上下梭巡。屏蔽畿輔。務保萬全。所有擒股東竄。派兵追剿緣由。恭摺由驛五百里馳陳。伏乞皇太后皇上聖鑒訓示。謹奏。

請飭李鴻章暫駐徐州調度軍務片 同治五年八月二十二日

再密陳者。擒匪行徑。已成流寇。難於收拾。臣於本年三月奏明在案。從前僧格林沁剿辦此賊。馳驅四年有餘。幾於無日不追。無旬不戰。至三年秋冬挫衄。良馬盡被搶奪去。兵力過疲。將星遽隕。臣奉命接辦。鑒於追逐之無濟。又自度騎兵萬不逮僧格林沁之精。建議設立四鎮。兼議扼守運河沙河。且防且剿。辦理一年有餘。仍無成效。日夜籌思。憂愧何極。上年九月。欽奉諭旨。派李鴻章帶兵馳赴洛陽。彼時洛陽並無賊蹤。而臣所帶之兵。均係李

鴻章所部之卒。察看賊志。實在東而不在西。李鴻章亦恐一離本任。則糧餉軍火。均無所出。彼此據實奏覆。事遂中止。今則賊趨東路。而臣駐紮周家口。相距較遠。今臣因病請假期內。萬難迅速移營。徐州濟寧若移駐東路。又恐賊匪折回西竄。仍覺調度不靈。伏查嘉慶道光年間。黃河防汛之時。兩江總督出駐清江半年。或暫駐徐州數月。至催遣漕船。并有至韓莊台莊之時。總督出省。本有成例。可否鑒懇天恩。特降諭旨。飭李鴻章攜帶兩江總督關防。駐紮徐州。專管本轄之徐海淮泗各府。并與山東撫臣商辦山東軍務。現在調赴山東諸軍。皆李鴻章所部之淮勇也。惟將帥帶兵勦賊。非督撫手有理財之權者。軍餉必不應手。湘淮各軍。五六萬人。食兩江之餉。勦三省之賊。年餘以來。李鴻章籌畫餉項。百計經營。而淮勇去年僅發八月。今年僅發至五月。士卒已微有怨言。李鴻章暫駐徐州。俟東路軍務稍鬆。仍當回駐金陵。或駐清江。竭力籌餉。乃足以固軍心。而維大局。至西路現雖稍鬆。亦不可不預爲籌備。臣弟曾國荃駐紮德安。業已出省。惟歷年賊勢在豫時多。在鄂時少。捻匪若擾河南。汝光汝洛等屬。不特飽超可以馳剿。即曾國荃所部諸軍。亦可越境會剿。可否請旨飭下湖北撫臣曾國荃。遇河南緊急時。攜帶關防。移駐南陽府。與河南撫臣商辦軍務。遇事稍鬆。仍當回駐德安。或回武昌。兼籌餉項。臣現駐周家口。正居數省之中。如中路有事。臣與豫皖兩省撫臣商之。東路有事。李鴻章與山東撫臣商之。西路有事。曾國荃與河南撫臣商之。庶可聯絡一氣。呼吸相通。臣才智本短。精力日衰。值病體之未痊。忽軍情之驟變。不得不廣求仗助。冀以免於大戾。附片密陳。伏乞皇太后皇上聖鑒訓示。謹奏。

彙陳查辦民圩擒斬捻匪摺 同治五年八月二十二日

奏爲彙陳查辦民圩擒斬著名積捻。恭摺仰祈聖鑒事。竊自捻逆擾亂以來。奔竄無常。而時戀蒙亳老巢。以爲歸宿。其節次回竄。皆有莠民爲之勾引。居則爲民。出則爲捻。若商賈之遠行。時出時歸。恬不爲怪。臣於雒河解圍以後。即擬查辦民圩。以清其源。曾於上年七月初八日具奏。并鈔告示。進呈御覽。旋即遴選各員。先從蒙城亳州等屬。分途試辦。蒙城派委安徽候補知縣桂中行朱名瓌。亳州派委候補同知李炳燾。補用知縣薛元啓。宿州派委本任知州張雲吉。而佐以龍山營游擊吳峻基。阜陽派委候補直隸州知州尹沛清。而佐以潁州營游擊翁開甲。飭令會同地方正印各官。簡擇紳耆。照臣所擬四條告示。認真稽查。於被脅從捻者。則多方勸誠。許以自新。於甘

心從擒者。則悉力搜拏。立予正法。計自各該員任事之日起。至本年六月底止。蒙城擒獲積擒五十九名。亳州擒獲積擒四十六名。阜陽五名。其間或係著名擒首。聚黨豎旗。或係勾擒破圩。殺傷多命。或已降而復叛。或陽順而陰逆。均屬莠民之尤。法無可貸。臣恐拏獲後有劫犯逃遁等弊。預行頒發大令。由各該員訊明。卽行正法。錄供具稟。蒙城亳州二屬。擒斬尤多。辦理最善。本年四五月間。任穎等逆。由泗宿而入懷遠。牛落紅一股。由永城而竄亳州。皆欲回至老巢。糾合黨羽。該二屬圩寨。疊經各員。先期開導。良民知所愧悟。頗以從逆爲非。莠民亦知畏法。不敢裝旗勾引。以故該逆大股徘徊於懷遠幾及一月。竟不能向蒙亳境內肆行盤踞。蓋爲前此所未聞。該員等勞心勞力。著有成效。臣擬於黃陂寨內。擇尤保獎。其正法各擒。相應繕列清單。作爲第一案。恭呈御覽。以後續獲積擒。再行逐案開單彙奏。所有查辦民圩擒斬著名積擒各緣由。理合附驛馳陳。伏乞皇太后皇上聖鑒訓示。謹奏。

調馬德順來豫勦捻片 同治五年八月二十二日

再臣於咸豐十年十一年。會練馬隊數營。派馬德順一營。交左宗棠統轄。帶赴浙江。派伍華瀚一營。交鮑超統轄。帶赴皖南。派楊鎮南一營。交曾國荃統轄。帶赴金陵。厥後馬德順在浙疊著戰功。累保至記名提督。補授處州鎮總兵。其原帶之哨官楊世俊等。均稱得力。本年五月。接據浙江撫臣馬新貽函稱。浙中尙有馬隊兩起。現已均歸副將楊世俊張會元二人管帶。人馬俱精壯可用。浙省肅清已久。無須留防。儘可調赴中原勦捻。臣以江蘇水災。餉項支絀。請其酌協餉銀。又接覆函。允許每月協解餉銀一萬兩。以資飽騰。臣卽咨調該副將等管帶馬隊。由浙來營。交皖南鎮總兵劉松山統領。節制去後。旋據原帶此項馬隊之處州鎮總兵馬德順稟稱。德順生長中州。地勢賊情。目見耳聞。尤爲熟悉。懇卽檄調助剿。等語前來。臣查該總兵籍隸河南。誼切桑梓。願隨攻伐。壯志可嘉。若檄令剿捻於北方。人地相宜。可期得力。惟係實缺人員。例須奏明辦理。除由臣一面咨調外。相應請旨。敕下浙江撫臣馬新貽。迅飭馬德順來豫。以資指臂之助。理合附片具陳。伏乞聖鑒。謹奏。

湘軍在新野南陽勝仗摺 同治五年九月十三日

奏爲官軍在新野南陽等處迎剿張牛逆股。疊獲勝仗。恭摺仰祈聖鑒事。竊皖南鎮總兵劉松山。宣化鎮總兵張詩日。在新野等處。剿賊獲勝。臣於八月十二日附奏。大概在案。旋據劉松山等稟稱。七月十四日。聞宋慶一軍在

刁河被圍。立即拔隊馳援。十五日。行抵南陽。探知豫軍業已解圍。該逆向東南竄過瓦店一帶。適白河水勢陡漲。甕船駛渡。十七八等日渡畢。二十一日。行抵灤灘。與宋慶相見。籌商會剿之策。是時賊方攻破南陽之尹家寨。屯聚各村。議定宋慶一軍。進左路。張詩日一軍。進中路。劉松山一軍。進右路。行二里許。步賊大隊。分路撲近。馬賊從兩旁包鈔。勢甚披猖。我軍三路迎敵。戰未半時。賊悉退守尹家寨。爲負嵎死拒之計。劉松山揮衆猛攻。一鼓下之。各軍三路跟追。至二十餘里之桑莊寨。將賊踞村莊四十五處。悉數奪回。該逆大潰。直奔向侯橋寨一路。共計斃賊千餘人。解散脅從甚夥。是晚趕齊輜重。覓宿桑莊寨。二十二日。整隊進抵侯橋寨。張牛馬步大隊。蟻聚對河。相距四五里。各軍商定。仍分中左右三路。宋慶居左。張詩日居中。劉松山居右。而於中左兩路。又各分中左右三路。回環策應。蟬聯而進。由河之南。轉折而東。追至新野所屬之上仙崗。賊股愈出愈多。兩旁村莊。步賊結成圍陣。數十起。分別以待。騎賊數千。包鈔我軍之後。劉松山見賊挾全勢來抗。嚴飭各營屹立穩持。施放槍礮。步步轟擊。未幾馬賊漸包漸近。而中路賊勢尤厚。先以大股衝撲中路之右。經彭秀清羅朝雲率兩營抵住。該逆即直撲中路之左。長矛數千分排林立。我軍當中路之左者。爲知府銜浙江同知朱式雲。督星豫三營。施放噴筒。步賊稍卻。而馬賊又從星右營之後。盤旋而入。步賊於煙焰中。持矛衝突。我軍以短兵鏖戰。一以當十。血戰半時之久。賊之矛桿摧折者。猶徒手爭先。裹創力戰。星左營受賊最久。幾不能支。朱式雲持刀躍馬。往來督陣。賊勢漸靡。劉松山張詩日約同宋慶等率隊猛擊。呼聲雷動。立斃悍賊六七百名。合軍追殺十餘里。遂收隊。至上仙岡暫息。是日計殺斃生擒及解散者不下三千名。奪獲騾馬二百餘匹。查點各軍陣亡者。哨官花翎都司鄒明立一名。受傷最重者副將黃瑞。都司賀大有二名。各勇陣亡者十八名。受傷者二百四十九名。由劉松山等詳細具報前來。臣查張牛二賊。前經劉松山張詩日兩軍敗之於上蔡等處。茲又追及南陽之尹家寨。新野之上仙岡。奮勇鏖戰。雖殺賊不及前此之多。而賊勢之悍。臨陣之猛。亦近來所罕見。劉松山等聞豫軍被圍。即日馳援。及解圍後。即與宋慶聯絡一氣。同心苦戰。尤得師克在和之義。除將出力各員。附上上蔡案內彙獎外。其陣亡之花翎都司鄒明立一員。仰懇天恩。勅部照陣亡例議卹。以慰忠魂。所有官軍在新野南陽等處剿賊獲勝緣由。恭摺由驛馳陳。伏乞皇太后皇上聖鑒訓示。再此案已據河南撫臣具奏。合併聲明謹奏。

淮軍往來剿賊勝仗摺 同治五年九月十二日

奏爲劉銘傳潘鼎新兩軍往來剿賊疊獲勝仗并現籌防勦事宜恭摺仰祈聖鑒事竊捻逆東竄後調兵追剿臣於八月二十三日奏明在案劉銘傳一軍於二十七日馳抵城武潘鼎新一軍於二十六日馳抵濟寧是時賊正奮聚鄆鉅之間山東撫臣閻敬銘派出之王成謙王正起兩軍三次進勦疊獲勝仗二十六至三十等日該逆猛撲運河之袁口靳口開河等處東軍抵禦嚴密未能搶渡其長溝以下之運防李昭慶一軍修築堅固又經潘鼎新一軍趕至濟寧軍威頗壯該逆未敢撲犯三十日劉銘傳潘鼎新會於汶上境內之馬村探知賊俱盤據梁山前後火光橫亙數十里九月初一日劉銘傳一軍由蔡家陵進潘鼎新一軍由方家廟進分州直薄梁山賊之馬隊由東至西包鈔而來張景春烏爾圖那遜督馬隊迎剿劉盛藻唐殿魁率步軍繼進陣斬悍逆數十名馬賊敗走其另股步賊三千餘名馬賊數百人自北而南正與潘鼎新一軍相遇潘鼎琛余在榜等施放炸礮潘鼎立率隊從旁鈔擊賊即轉向西奔我軍三面齊進該逆盡向王莊奪路竄走烏爾圖那遜追至王莊逕入賊隊手斬馬賊身受矛傷五處猶不少卻經張佩之率隊衝進救護回營北路劉盛藻唐殿魁從後追到南路潘鼎琛等攔頭擊之賊不敢戀戰悉數狂奔我軍追至二十餘里殲賊無算因天晚俱各收隊查點旗兵陣亡一名馬勇陣亡受傷十餘名自有此戰賊已膽落次日向南回竄劉銘傳潘鼎新兩軍并力緊追初二至初五日在鄆城荷澤曹縣東明等處或一日一戰或一日再戰該逆被躡窮急三次整衆來犯連不得逞殺傷逃散甚多牲畜器械遺棄遍地潘鼎新一軍初八日趕至杞縣接仗小勝劉銘傳一軍初八日趕至睢州該二軍於兩旬之間往來一千六七百里縱橫迢遞迄未停趾現在杞縣陳留一帶籌備米糧仍即跟蹤追剿此次賊鋒已挫其勢或可稍衰既不得志於東必仍狂竄而西臣已檄令劉松山一軍由扶溝以北向前迎勦并檄鮑超一軍由南陽至南召魯山一帶遮截賊入洛陽之路如果驅賊南趨鄂境當一面派兵與鄂軍會勦一面留兵再辦沙夏兩河防守事宜冀收夾擊之效除劉銘傳等軍初二至初五詳細戰狀另行續奏外所有淮軍往來追勦獲勝及現籌防勦緣由恭摺由驛五百里馳陳伏乞皇太后皇上聖鑒訓示謹奏

水師報捐請廣學額摺 同治五年九月十二日

奏爲水師各營報效銀兩懇請加廣本邑學額恭摺仰祈聖鑒事竊臣接准兵部右侍郎臣彭玉麟咨稱所部水師十營積欠餉項陸續設法籌補現將同治二三年分欠餉補發外尙欠十一箇半月據各營稟稱從征十餘年轉戰六七省公誼私仇激於義憤今幸長江肅清金陵克復東南漸次廓清而餉源仍形支絀乃蒙籌補同治二三年分薪水口糧從枵腹習戰之餘得土馬飽騰之樂各營感激圖報特於補領口糧內共捐銀十萬兩以助軍餉不敢仰邀議敘惟各將士均籍隸湖南可否查照成案以銀三萬兩加廣衡陽縣永遠文武學額各三名銀二萬兩加廣清泉縣永遠文武學額各二名銀五萬兩加廣衡州府永遠文武學額各五名以作士氣而廣皇仁除將所捐銀兩發交水師糧臺續發口糧外相應據情咨請具奏前來臣查彭玉麟所部水師十營積年以來欠餉甚鉅均經該侍郎設法彌補現據咨稱同治二三年分薪水補發外尙欠十一箇半月各營將士體念時艱力顧大局願於補領薪糧內捐出銀十萬實屬深明大義出於至誠查戶部奏定章程凡捐輸銀一萬兩者准加文武定額各一名今水師各營合捐銀十萬兩請加廣衡陽縣永遠文武學額各三名清泉縣永遠文武學額各二名衡州府永遠文武學額各五名共廣定額十名係屬與例相符合無仰懇天恩俯准勅部議覆施行所有水師各營報效銀兩請廣學額緣由謹繕摺具陳伏乞皇太后皇上聖鑒訓示謹奏

彭玉麟報捐歷任養廉片 同治五年九月十三日

再臣接准兵部右侍郎臣彭玉麟咨稱查軍需則例載各省文職人員調派軍營自督撫司道以及州縣佐雜應得養廉銀兩俱照本任應得養廉之數全分支給卽於軍需項下作正造銷等語今自咸豐五年七月二十日補授浙江金華府知府之日起至同治元年正月十七日安徽巡撫開缺之日止歷任應得養廉銀兩計金華府知府任內應領銀一千一百二十兩有奇廣東惠潮嘉道任內應領銀一萬五千五十八兩有奇廣東按察使任內應領銀二千七百九十九兩有奇安徽巡撫任內應領銀二千五百六十四兩有奇共應領養廉銀二萬一千五百餘兩均未到任支領亦未在軍營糧臺支給現在各省軍需支絀自應悉數捐助聊資補苴並不敢仰邀議敘等因請奏前來臣查彭玉麟帶兵十餘年治軍極嚴士心長愛皆由於廉以率下不名一錢今因軍餉支絀願將應得養廉銀兩悉數報捐由各該省提充軍餉不敢仰邀議敘實屬淡於榮利公爾忘私除由該侍郎咨明浙江

廣東安徵巡撫作正造銷外。理合附片陳明。伏乞皇太后皇上聖鑒。勅部查照。謹奏。

續假調理片 同治五年九月十二日

再臣於八月十二日因病請假。蒙恩允准。一月以來。服藥調治。外症全愈。惟用心稍久。輒復煩燥出汗。夜間尙有盜汗。耳聾亦時作時止。昨初五六七等日。李鶴年張之萬先後過訪。臣營會商軍務。臣尙能勉強酬應。初九日西刻。忽然昏暈倒地。雖旋即扶坐無恙。而衰頹之態。實難支持。據醫者云。「心氣過虧。必須謝絕人客。加意靜攝。或可不再添病。」合無仰懇天恩。俯准續假一月。在營調理。至目下羣賊西竄。淮軍湘軍豫軍鄂軍。或剿或防。徵調紛紛。臣嘗與各督撫妥商調度。雖在病中。不敢稍涉大意。請釋宸慮。謹附片陳情。伏乞皇太后皇上聖鑒訓示。謹奏。

彙報近日軍情摺 同治五年十月十三日

奏爲彙報近日軍情。恭摺仰祈聖鑒事。竊捻逆全股。由山東曹州竄回豫境杞縣扶溝等處。臣於九月十三日馳奏在案。維時尙不知賊分兩股之說。厥後節據探稟任賴一股。分竄西北。徘徊黃河南岸黑岡一帶。十一日。賊至榮澤壩。十二日。偷挖河堤。十三日。豫軍礮船趕到。會同陸軍宋慶等。將賊擊退。張總愚一股。由扶溝分竄西南。十四五等日。攻撲許州。適張樹珊一軍由山東追賊回豫。十五日。聞許州告警。即率隊馳援。一擊敗之。劉秉璋楊鼎勳兩軍。亦馳抵許州之小召鋪。逐賊於溟河東岸。頗有斬擒。由是各賊遂分東西兩路。其東竄者爲任柱賴汶光一股。西竄者爲張總愚全股。牛落紅已死。其子牛喜接管賊黨。或云隨任賴東竄。或云隨張逆西竄。尙無確信。臣於九月十八日。檄令劉銘傳潘鼎新張樹珊三軍。馳剿東路一股。鮑超劉秉璋楊鼎勳劉松山專辦西路一股。潘鼎新一軍。九月二十日。自朱仙鎮拔隊。四日而馳抵定陶。該逆一日夜行二百餘里。先於二十一至二十五等日。猛撲運河之袁口開河等處。經東軍竭力擊退。潘鼎新趕到後。逆蹤盤旋於鄆城鉅野金鄉等處。二十八九兩日。潘鼎新在嘉祥剿賊獲勝。劉銘傳於二十九日。至鉅野之葛店。派張景山等選帶馬隊馳剿賊館。十月初一日。在牟山擊賊獲勝。追至金鄉東北之周圩收隊。現在劉銘傳紮金鄉。潘鼎新紮濟寧之安居。賊在金濟之間。張樹珊一軍。由虞城馳赴單縣。聞賊若不得逞於山東。即竄徐淮圖撲運河。李鴻章已至徐州。諸軍畢集。當可保全運防。

徐圖兜擊。此東路各軍剿賊之情形也。賊之西竄者。由襄城郟縣汝州一路奔竄。鮑超於九月十六日由南陽拔隊。初聞賊竄襄城。擬由裕州一路進剿。及行抵裕州。知賊已竄汝州。卽兼程行走。二十一日馳抵魯山。而賊已遁往汝州之臨汝白沙地方。旋由宜陽永寧連夜狂奔。鮑超亦由汝州洛陽跟追。二十九日抵宜陽之韓城鎮。十月初二日。行至陝州之觀音山。賊知追兵將至。遂於閩鄉西南之大峪口。繞越潼關以南。闖入陝西之商州一帶。各軍餉項未到。米糧罄盡。陝閩商榷萬山之中。初冬苦寒。士卒寒衣未備。萬難再進。據逃出難民稱。賊以陝西無食可覓。意欲由荆紫關竄往湖北等語。查商州與鄖陽毗連。又近南陽之內鄉鎮平等處。鮑超現擬由章茂寨回至南陽。劉秉璋擬由觀音堂回至新鄭。一面籌備米糧。一面備勦回竄之賊。劉松山拔隊稍遲。十月初三日甫至汝州。因賊去已遠。卽在汝屬暫駐。續候調度。此西路各軍追賊之情形也。臣查此次賊分兩股奔竄。東路一股。劉銘傳各軍尙能追及。邀擊西路一股。鮑超等奔馳千里。未及接仗。實深焦憤。惟陝西艱苦已極。不特官軍米糧子藥籌運萬難。卽該逆志在擄掠。亦必無所得食。恐不久仍將回竄。同治二年。羣賊銳意入秦。三年正月。又棄漢中而回竄鄂皖。其明證也。臣所慮者山西防務。僅恃一河。賊若北渡竄晉。爲患方長。伏乞皇上飭下山西撫臣嚴扼河防。保全完善之區。若僅在秦境。則數月之內。又將回竄豫鄂。臣已檄飭各軍沿途確探。相機迎勦。除劉銘傳等在山東冬戰。應由李鴻章詳細具奏外。所有近日軍情緣由。謹繕摺由驛五百里具陳。伏乞皇太后皇上聖鑒訓示。謹奏。

病難速痊請開各缺仍留軍中效力摺 同治五年十月十二日

奏爲微臣病難速痊。籲懇天恩。准開各缺。仍在軍中效力。恭摺仰祈聖鑒事。竊臣因病請假。仰蒙恩准。兩次均賞假一月。在營調理。兩月以來。加意調治。而心氣過虧。不時出汗。不能多閱文牘。說話逾十餘句外。舌端即蹇澀異常。耳亦重聽。不說話時。耳鳴而尙不甚聾。因是終日不願見客。標病則屢有變換。近日右腰疼痛。陝西撫臣喬松年過此。目覩臣狼狽之狀。似此病軀。久膺重任。斷無不債事之理。再四籌思。不得不仰懇聖慈。請開各缺。安心調理。惟臣受恩深重。有不敢遽請離營者。人臣事君之義。苟有所長所短。皆可直陳於聖主之前。臣不善騎馬。未能身臨前敵。親自督陣。又行軍過於遲鈍。十餘年來。但知結硬寨。打呆戰。從未用一奇謀。施一方略。制敵於意計之

外。此臣之所短也。臣昔於諸將來謁。無不立時接見。諄諄訓誨。上勸忠勤以報國。下戒驕擾以保民。別後則寄書告誡。頗有師弟督課之責。其於銀米子藥。搬運遠近。亦必計算時日。妥爲代謀。從不誑以虛語。各將士諒臣苦衷。頗有家人父子之情。此臣昔日之徵長也。今臣病勢日重。憚於見客。即見亦不能多言。豈復能殷勤教誨。不以親筆信函答諸將者。已年餘矣。近則代擬之信稿。亦難核改。稍長之公牘。皆難細閱。是臣昔之長者。今已盡失其長。而用兵拙鈍。勦粵匪或尙可倖勝。勦捻匪實大不相宜。昔之短者。今則愈形其短。明知必誤大局。而猶貪戀權位。譚飾而不肯直陳。是欺君也。明知湘淮各軍。相信頗深。而必遽求離營。不願軍心之渙散。是負恩也。臣不敢欺飾於大廷。亦不忍負疚於隱微。惟有籲懇天恩。准開協辦大學士兩江總督實缺。並另簡欽差大臣接辦軍務。臣以散員留營。不主調度賞罰之權。但以維繫將士之心。庶於軍國大事。毫無所損。而臣之寸心無忝。即病體亦可期漸愈。感激鴻施。曷有既極。所有微臣病難速痊。請開各缺。仍留軍中效力緣由。謹繕摺具陳。伏乞皇太后皇上聖鑒訓示。謹奏。

請暫註銷爵秩片 同治五年十月十二日

再臣於同治三年七月蒙恩錫封一等侯爵世襲罔替。祇承恩命。懼弗克勝。維時金陵倖克。初立功績。皆賴諸將之力。朝廷論功行賞。恩賚有差。各將士皆邀殊榮。臣忝居統帥。不敢立異固辭。然自拜命以來。無日不兢兢業業。恐負非常之寵。而貽不稱之譏。去歲奉命剿捻。至今已一年零五個月。毫無成效。雖聖主不加譴責。而臣心實覺悚惶。應懇天恩收回成命。勅部將臣所得封爵。暫行註銷。此後臣效力行間。如果病體全愈。續有微勞。再當乞恩賞還爵秩。謹法古人自貶之義。以明微臣抱歉之忱。不敢稍涉矯激。理合附片具陳。伏乞皇太后皇上聖鑒訓示。謹奏。

淮軍勝仗詳細情形摺 同治五年十月十二日

奏爲官軍在鄆城等處追勦屢勝。恭摺補奏。仰祈聖鑒事。竊九月初旬。直隸提督劉銘傳。山東按察使潘鼎新兩軍。在鄆城等處剿賊疊勝。臣於九月十三日附陳大概。聲明續報戰狀在案。旋據劉銘傳等呈稱。九月初一日。該兩軍在梁山破賊後。初二日追至鄆城之季家莊。與賊相隔半程。初三日行抵安興孔集等處。探知賊在曹州府

東之新集。初四日，嚮明。潘鼎新一軍先馳至新集之南，約四五里。該逆正思西竄，我軍衝入賊陣，截賊數段，逆勢奔潰。劉銘傳一軍馬步亦到，追殺十餘里。至趙王河沿，賊由曹州城北西奔。兩軍督隊緊追，截殺多名，并生擒擒首與大剛及賊黨二百餘名。初五日，又攻賊於曹縣朱家寨。該逆因連日被創窘急，先驅牌尾南走。悉整悍衆迎犯。其馬賊分數股，先撲劉銘傳馬隊。步賊分十餘團繼之。劉盛藻、唐殿魁率軍先至，張景春率馬隊由黃集迎剿。馬步方接戰時，潘鼎新由周集直趨賊後。該逆前後受敵，顧應不暇。陣勢紛亂，盡向西南奔潰。我軍追殺十餘里。該逆又折而東走，欲鈔潘鼎新後路。後復經潘鼎琛、潘鼎立等從東路擊敗，追至桃源驛寨。天已昏暮，收隊暫息。是夜賊不敢停留，卽由老黃河向正南奔竄。初六日，由東明界追至新攷城之敬勝寨。該逆奔向杞縣之間。我軍跟蹤緊追，沿途逃散及歸降者無算。初七日，劉銘傳至睢州。潘鼎新至蘭儀。賊於初八日竄至杞縣。潘鼎新從蘭儀南來，行至離城二十里之陽堽集。正遇賊馬奔馳，當卽整隊而前。該逆不意官軍又從北面繞出其前，未敢交戰。棄械亂竄。潘鼎新萬國順、潘國揚乘勢掩殺，獲馬百匹，擒斬悍匪二百餘名。統計七日之間，大小六戰，縱橫盪決，無役不勝。由劉銘傳等呈報前來。臣伏查逆衆東犯，銳意竄渡運河。自九月初一日梁山一戰，賊勢稍卻。尙思留戀東境，爲覓食苟延之計。劉銘傳潘鼎新兩軍盡力追剿，窮賊所往，遂使悉數敗竄。東省運防無恙。固由守禦之嚴，亦賴追兵之速。其在事出力人員，應卽歸入前案彙保。所有淮軍在鄆城等處剿賊詳細情形，恭摺馳陳。伏乞皇太后皇上聖鑒訓示。謹奏。

黃翼升回駐江寧片 同治五年十月十二日

再長江水師提督黃翼升於四月間出省巡視駐防各水師。經升任漕臣吳棠奏明在案。該提督由運沂淮，周歷濟寧臨淮等處，查閱各營。八月中旬，自周家口下駛，行至清江。適暑雨江督臣李鴻章帶印出省。該提督卽回駐江寧省城，藉資鎮撫。謹附片陳明。伏乞聖鑒。謹奏。

調鮑超劉松山兩軍分路援剿摺 同治五年十一月初二日

奏爲恭報近日軍情，並檄調鮑超劉松山二軍分路援剿。恭摺仰祈聖鑒事。竊東西兩路賊情，臣於十月十三日馳奏在案。西竄之匪，十月二十二日以前，臣接各路探報，均稱賊將回竄豫鄂。自二十三日以後，五日中午探報，並

無西股回竄之說。臣恐該逆深入秦境。遂于二十七日。檄令鮑超統帶霆軍由鎮平內鄉浙川進荆紫關。以達商州。入秦援勦東路一股。劉銘傳張樹珊等軍。二十六日在曹接仗獲勝。該逆狂奔南竄。二十八日。據報邊馬已至太康。臣恐該逆回至豫境。又將西竄汝洛。圖犯秦晉。晉省防務僅隔一河。陝州之三門茅津渡一帶。河淺石多。冰結成橋。若乘間偷渡。蔓延晉境。尤屬可慮。因檄令劉松山統帶一軍。迅赴汝州。攔頭截擊。遏其西去之路。並至陝州三門等處。與山西臬司陳澍夾河設守。力保晉省完善之區。惟是霆軍入秦。湘軍防晉。不特秦省米糧極少。有錢無市。即豫省洛陝一帶。糧食亦艱貴異常。臣已函商兩省撫臣李鶴年趙長齡。請其爲該二軍辦糧。並函致陳澍。囑其設法多辦糧食。舟運入渭。接濟鮑超一軍。陸運渡河。接濟劉松山一軍。不知能源購運無誤。軍食否。相應請旨飭下趙長齡採辦解濟。其糧價運價。或由應協臣餉項下扣抵。或由臣另籌解還。均無不可。抑臣更可慮者。鮑超軍中。向少明幹之員。料理米糧等事。前在皖南由臣派員辦糧。源源接濟。在江西時。各官紳亦竭力助糧。全無缺乏。故能專心打仗。所向有功。一離江皖。至福建省。即有上杭缺糧之譁。赴甘肅者。又有金口棄舟之變。若入秦以後。糧米不繼。深恐滋生事端。從前多隆阿楊岳斌蔣凝學諸軍。一入秦境。糧貴路遠。勇丁逃回者極多。以僧格林沁之忠勇。辦捻四年有餘。凡捻匪所到之處。該親王無不躬自追勦。惟同治二年。捻股入秦。該親王未嘗派兵西追。想亦因米糧難購之故。臣此次辦調鮑超文內有云。如實無米可辦。到萬分爲難之際。亦可中途折回。一並許以兵行至西安省城爲止。不再西征。仍奏明專剿捻匪。不剿回匪等語。與之約定。臣蓋鑒于金口之變。故特參以活筆。預爲維繫軍心之地。伏乞皇上曲賜原諒。臣仍一面諄催鮑超西行。得尺則尺。得寸則寸。總期有益秦疆。不生他患。冀副聖主眷顧西陲之意。所有近日軍情。並檄調兩軍援剿緣由。恭摺由驛五百里馳陳。伏乞皇太后皇上聖鑒訓示。謹奏。

奉到諭旨先行覆陳片 同治五年十一月初二日

再臣欽奉十月二十日寄諭。該大臣勦陞夙著積勞致疾。自係實情。著再賞假一箇月。在營安心調理。欽差大臣關防。著李鴻章暫行署理。會國藩俟調理就痊。即行來京。陛見一次。以慰廬係。等因。欽此。跪誦之下。感悚莫名。查統兵大員。非身任督撫。有理財之權者。軍餉必不應手。士卒即難用命。臣前以侍郎辦賊五年。卒無寸功。後

以江督辦賊四年。乃有成效。深知其中之甘苦。現在湘勇及淮北勇月餉須七萬有餘。淮勇月餉須三十萬有餘。皆季鴻章一手籌畫。本年添出清水潭工。江北賑務。需銀近八十萬。軍餉遂形竭蹶。李鴻章或任江督。或任蘇撫。必有寶缺一席。乃能籌此每月四十萬之巨款。一離江南境內。則糧餉軍火。均無所出。淮湘軍心。立見渙散。此等情形。臣于上年九月本年七月會兩次詳奏。因諭旨詢及李鴻章能否移紮豫境。不得不行續陳。上瀆宸聽。李鴻章既難離江境。則接署關防。似可暫而不可久。臣自問行軍太呆。不能平此流寇。精力太衰。不能當此大任。一俟霆軍西行就緒。病體調理稍痊。約計臘尾春初入京陛見。一以謝累歲高厚之恩。一以請辦捨不捨之罪。再當面懇鴻恩。准開各缺。并懇於李鴻章外。另簡大臣來豫接辦。臣但求開缺以減事權。斷不求回籍以圖安逸。仍留軍營幫同照料一切。維繫湘淮各軍之心。聯絡蘇鄂兩路之氣。既無置身局外之想。亦免病軀戀棧之譏。庶臣之寸心稍安。而于大局毫無所損。除將關防擇日派員送交李鴻章。另疏恭報起程日期外。所有奉到諭旨。理合先行覆陳。伏乞皇太后皇上聖鑒訓示。謹奏。

近日軍情片 同治五年十一月初二日

正封摺間。東路股匪由太康竄至陳州所屬之中和寨等處。臣派楊鼎勳一軍及張錫燦敬字三營。出隊追剿。斬擒二百餘名。賊蹤直奔沙河以南。該逆先被周盛波一軍。于十月二十八九兩日。在柘城太康鹿邑境內迎剿數次。俘獲解散頗衆。勢已稍衰。據擒賊供稱任賴等逆。將由光固以竄鄂境。臣意賊既回竄。或南竄光固。或西竄汝洛。均未可定。且東股縱不竄陝。亦恐西股由秦回竄洛陝。劉松山一軍。仍令由汝洛進兵。總以力保黃河。先顧山西爲主。至西路之賊。續據陝州閩鄉等處稟稱。又回竄潼關迤西一帶。并云已至閩鄉境內。臣察看情形。張逆回竄之說。恐不甚確。鮑超一軍。仍令從荆紫關一路進兵援秦。不再改調。合併附陳。伏乞聖鑒訓示。謹奏。

酌籌西路軍務派員辦霆營軍米摺 同治五年十一月十七日

奏爲酌籌西路軍務。仍令鮑超一軍援秦。並遴派大員。專辦霆營軍糧。恭摺仰祈聖鑒事。竊臣檄派鮑超一軍援秦。劉松山一軍防晉。曾于十一月初二日馳奏在案。旋接鮑超來文。瀝陳入秦之難。反復辯論。所最慮者有三。一在米糧之難辦。一在餉銀之難解。一在回匪之牽制。兼以口馬尙未到口。擬在南陽陸續操練。一俟馬隊練成。陝

省米糧轉運等事布置周妥。再行入關。且引上年進援粵省大吏。一面援催。一面代爲預備糧草。轉運照料客軍。至爲周到。故進兵雖遲。而到防未及十日。即能一戰克捷等因。咨呈前來。請臣代爲陳奏。臣詳閱該提督所稱。均係實在情形。惟所慮之三端。回匪牽制一節。雖屬意中之事。然臣前次檄文內。許其專剿捻匪。不剿回匪。業經奏明。此時無庸預慮。餉銀難解一節。該營餉項以江西爲大宗。撫臣劉坤一力顧大局。籌解並未稍遲。惟路途太遠。轉折太多。自難免停軍待餉之憂。臣一面咨商劉坤一。格外趲早。一面咨請河南陝西兩撫臣。設法按站接解。當不至十分遲誤。米糧難辦一節。則爲軍中最要之事。查有陝州靈寶縣丁憂在任之江蘇候補道前任蘇州府知府薛書常。才長心細。熟悉秦晉豫三省交界情形。臣已派委該員就近稟請山西撫臣。領銀二萬兩。商之臬司陳澍。就地購糧接濟霆軍。并以軍士入秦艱苦。其買糧之價。由臣籌款。另發一箇月。不扣勇丁月餉。一箇月之外。續辦糧米。由臣加價一半。在勇丁月餉中酌扣一半。事事籌畫清晰。咨覆鮑超去後。鮑超未接此咨。因接臣第二次催函。頃已復信。言俟接江西協餉。日內即可赴秦矣。查署陝西撫臣劉蓉。先經疊催鮑超入秦。嗣又奏請改派劉松山。劉秉璋。楊鼎勳三軍入秦。不知各軍前在洛陝。未能赴秦。先後退回者。皆由米糧太缺之故。若秦中米糧有著。則劉楊等軍可往。鮑超亦可前往。現在劉松山一軍。業已馳赴汝洛。與陳澍協防黃河。力扼賊竄晉省之路。楊鼎勳一軍。駐防周家口。劉秉璋一軍。臣前調回山東。因行至睢州。遇任賴回竄。跟蹤追剿四百餘里。現經李鴻章調赴清江。接防成子河等處。此三軍者。一時均難更動。惟鮑超一軍。人數較衆。約束亦嚴。本年所過鄂豫境內。臣時加訪問。並無騷擾情事。今又爲之酌加米價。廣辦軍糧。自不至更有他虞。相應奏明請旨。勅下河南撫臣李鶴年。行知薛書常本籍。催令赴晉領銀。并請旨飭下山西撫臣趙長齡。迅籌銀二萬兩。發交薛書常採辦米糧。以濟軍食。而利戎行。山西所籌銀兩。或由應協臣餉項下扣抵。或由臣另籌解還。仍如上次所奏辦理。霆軍入秦以後。離臣一千餘里。離李鴻章二千餘里。似應由提臣鮑超自行奏報軍情。庶朝廷之見聞較速。調度較靈。并懇寄諭中許。以專剿捻匪。不剿回匪。俾鮑超得以安慰軍士之心。免生意外之變。是否有當。恭候聖裁。所有酌籌西路軍務。仍令霆軍援秦。并遴派大員。採辦軍米緣由。恭摺由驛五百里馳陳。伏乞皇太后皇上聖鑒訓示。謹奏。

奏爲欽奉諭旨恭摺覆陳。仰祈聖鑒事。竊臣接准兵部火票遞到同治五年十一月初一日奉上諭。曾國藩著回兩江總督本任。暫緩來京陛見。江蘇巡撫一等肅毅伯李鴻章著授爲欽差大臣。專辦勦匪事宜。欽此。旋准軍機大臣字寄同治五年十一月初八日奉上諭。著曾國藩即遵前旨。將軍務交李鴻章接辦。該督即回兩江總督本任。辦理餉需軍火。源源籌解。俾李鴻章得離江境。統兵進剿。則籌餉與剿匪之功。均爲國家倚重。正不必以開缺赴營。始足爲朝廷宣力也。一等因欽此。跪誦之下。無任欽感。邊即擇於十九日。飭派江蘇候補道林桐芳。衡州協副將胡正盛。謹齋欽差大臣關防。馳赴徐州。交李鴻章祇領。至臣仍回兩江總督本任一節。朝廷體恤下情。不責臣以治軍。但責臣以籌餉。不令離營勉圖後效。但令回署調理病軀。聖恩高厚。感悚交并。惟兩江總督公牘之煩。數倍于軍營。而疆吏統轄文武。尤以接見僚屬爲要義。臣精力日衰。用心久則汗出。說話多則舌蹇。不能多見賓客。不能多閱文牘。業經屢次陳奏。數月以來。標病雖除。而此二患者迄未痊可。若非將舌端蹇澀之症。醫治全愈。實難勝江督之任。且臣屢陳病牘。求開各缺。若爲將帥則辭之。爲封疆則就之。則是去危而就安。避難而就易。臣平日教訓部曲。每以堅忍盡忠爲法。以畏難取巧爲戒。今因病離營。安居金陵衙署。迹涉取巧。與平日教人之言。自相矛盾。不特畏清議之交譏。亦恐爲部曲所竊笑。臣內度病體。外度大義。減輕事權則可。竟回本任則不可。故前兩次奏稱。但求開缺。不求離營。蓋自抱病以來。反覆籌思。必出于此。然後心安而理得也。臣既不能回江督本任。而李鴻章新膺專征之命。又難久署江督之任。亦不可不熟計而兼籌。查刻下賊分兩股。東股任賴等逆竄至光固。非西入鄂即南入皖。李鴻章或仍駐徐州。或移駐六安。以剿鄂賊。或移駐潁州。以剿皖豫之賊。皆在兩江轄境之內。是李鴻章暫署江督。於剿辦東股。毫無窒礙。至西股張逆在秦。臣現多方籌辦糧米。湘軍防晉。業已起行赴洛。霆軍援秦。即日亦可入關。似兩三月內。李鴻章兼署江督。尙無損于大局。合無籲懇天恩。勅下李鴻章以欽差大臣。暫行兼署兩江總督。一面料理出省事宜。兩三月後。或請另簡兩江總督。或另請簡欽差大臣。或令李鴻章自薦籌餉大員。布置後路。該大臣出省之宜。遲宜速。均聽皇上權衡定奪。屆時臣再具疏。請開江督等缺。目下謹遵諭旨。暫緩陛見。仍在周口軍營照料一切。維湘淮之軍心。聯將帥之情誼。凡臣才力所可勉。精神所能到。必當竭殫愚忱。力圖補救。斷不因兵符已解。稍涉疏懈。致乖古人盡瘁之義。請釋宸廬。所有欽奉諭旨。恭摺

覆奏緣由。理合由驛馳陳。伏乞皇太后皇上聖鑒訓示。謹奏。

刊用木質關防片 同治五年十一月十七日

再臣因病不能回江督本任。留營自效。李鴻章未入豫境。臣經手各件。仍須認真籌辦。一切公文。照常通行。查咸豐十年以前。臣辦理軍務。皆用木質關防。並擬仍刊木質關防一顆。其文曰。協辦大學士兩江總督一等毅勇侯行營關防。十九日送交欽差大臣關防後。即行開用。東西兩路軍務。目下商同調度。俟李鴻章出省後。臣即不主調度賞罰之權。俾事權歸於畫一。庶將領有所適從。臣仍以散員留營。幫同料理。理合附片陳明。伏乞聖鑒。謹奏。

近日軍情片 同治五年十一月十七日

再東路近日軍情。任賴股匪。自山東被剿窮蹙。回竄豫境。初一日渡過沙河。由正陽息縣羅山一路狂奔。擾及信陽之南。將入鄂境。鄂軍甫經出隊迎剿。即行折回。周盛波一軍。跟蹤前進。初十日。遇賊於羅山縣城之東北。逼賊南趨山徑。首尾環擊。擒斬俘獲甚衆。該逆向東南竹竿河一帶驚竄。又經馬隊截殺無算。奪獲騾馬千餘匹。十一、十二日。該匪竄擾光州光山。十三日竄至固始。探稱圖犯鄂境。此股賊匪先在東省猛撲運河。傷亡頗多。旋在豐單曹濟一帶。經劉銘傳等軍痛剿。拋棄器械幾盡。此次竄至信陽。斫取青竹新矛。又經周盛波縱橫攔截。沿途遺棄。賊餓實已日衰。現飭張樹珊一軍。拔隊追剿。劉銘傳一軍。疲勞太久。臣令在周口休息兩旬。亦即赴鄂會剿。又檄李昭慶全軍由潁毫以達光固六安。冀與鄂軍一收夾擊之效。除周盛波及東路各軍詳細戰狀。此後均歸李鴻章具奏外。理合附陳梗概。伏乞皇太后皇上聖鑒。謹奏。

欽奉諭旨再陳下悃摺 同治五年十二月初三日

奏爲欽奉諭旨。再陳下悃。恭摺仰祈聖鑒事。竊臣承准軍機大臣字寄。同治五年十一月二十三日奉。上諭。曾國藩請以散員仍在軍營自效之處。具徵奮勉圖功。不避艱難之意。惟兩江總督責任綦重。湘淮各軍尤須曾國藩籌辦接濟。與前敵督軍同爲朝廷所倚賴。該督忠勤素著。且係朝廷特簡。正不必以避勞就逸爲嫌。致多過慮。著遵奉前旨。仍回本任。以便李鴻章酌量移營前進。並免後顧之憂。等因。欽此。跪誦之下。欽感莫名。臣辦接無

效仰荷天恩。不加嚴譴。特令回居優缺。又蒙聖慈垂訓。解釋避勞就逸之嫌。所以曲體下情者。無微不至。臣具有天良。豈不思黽勉圖報。惟兩江總督一缺。事繁任重。察吏筭鹽籌餉諸大端外。又有洋務交涉之件。臣舌端蹇澀。不能多見僚屬。于察吏二字。已不克舉其職。筭鹽籌餉兩者。亦須精神周到。乃能提挈綱領。釐剔弊端。臣用心輒舛。實難多閱文牘。至中外交涉之事。臣素未推究。若剛柔失宜。不特貽誤事機。兼恐有傷國體。細度此缺之繁難。斷非病軀所能勝任。與其勉強回任。辜恩瀆職。不如量而後入。避位讓賢。臣上次摺內。請俟兩三月後。再行請開各缺。目下察看軍務。東路任賴一股。鄂軍雖獲勝仗。尙未大加懲創。西路張逆一股。已至輞川藍田等處。鮑超一軍。因等候餉銀馬匹。尙未據報起程。臣彌深焦灼。若非李鴻章迅赴前敵。恐軍務終無起色。合無仰懇天恩。另簡兩江總督。專辦後路籌餉等事。或勅下李鴻章自薦籌餉大員。悉心區畫。奏明某欵某欵。專供湘淮各軍。俾得出省調度。庶幾上釋宸廬。下慰民望。臣卽在周口行營。調養病體。暗中商酌軍務。不敢稍存漠視。抑臣更有請者。臣才力竭蹶。不堪負荷艱鉅。曾于同治元年二年三次具奏。又于三年十月附片密陳衰狀。上年五月十三日。瀝陳精力衰頹。舌端蹇澀等情。臣未北征之前。業已五次陳奏。並非因辦捻無功。而始以引疾爲卸責之地。倘必責臣以回任。則開缺之疏。將累上而不已。臣咎愈重。宸聽愈煩。輾轉耽延。徒稽時日。大局或因而有損。臣心愈無以自安。惟有籲懇天恩。俯如所請。准開兩江總督協辦大學士兩缺。從此安心調治。一二年後。幸獲全愈。臣必趨赴闕廷。再求簡任。圖報高厚之恩於萬一。伏求聖慈垂察。所有欵奉諭旨。再陳下悃緣由。恭摺由驛馳陳。伏乞皇太后皇上聖鑒訓示。再此次封摺。仿照駱秉章入蜀之例。卽用木質關防拜發。合併聲明。謹奏。

近日軍情片 同治五年十二月初二日

再近日軍情。東路任賴一股。上月十八九等日。由黃安黃陂邊境竄擾孝感。二十二日。鄂軍譚仁芳接仗獲勝。逆蹤橫竄德安。適郭松林一軍。由隨州疾馳迎剿。二十三夜。在德安城外大獲勝仗。二十四日。跟蹤追剿。二十五日。經過應城。追至王家廟接仗獲勝。二十六日。在于皂河苦戰。互有勝負。曾國荃來函。賊現敗竄鍾祥。恐將由隨州棗陽回竄豫境等語。臣調劉銘傳一軍。由上蔡遂平至唐縣新野一帶攔剿。劉秉璋一軍。李鴻章前調之防成子河後。聞清江防務仍由漕臣張之萬督辦。臣檄劉秉璋與銘軍合爲一路。探蹤跟剿。又慮賊由汝寧舞葉西竄。復

檄劉松山。一面嚴防晉省黃河。一面截賊入洛之路。不知能否有裨西路。張逆一股。接據喬松年劉蓉來咨。陝軍張兩翼攻剿。業已屢勝。惟恐賊循南山竄入興安等語。現已檄鮑超飭分兵由商州山陽扼駐鎮安。以截賊竄興安之路。仍以大隊駐荆紫關。防賊回竄楚豫。鮑超因等候餉銀。尙未據報起程日期。如東股任賴賊蹤適至南陽數十里之內。卽應先剿東股。與淮軍會合夾擊。如業已拔隊赴秦。則不可回顧東股。而誤西征之期。除檄飭相機辦理外。謹附片陳明。伏乞聖鑒訓示。謹奏。

銘軍攻克黃陂等處五案併保摺 同治五年十二月初二日

奏爲劉銘傳一軍。攻克黃陂等處五案併保。恭摺仰祈聖鑒事。竊直隸提督劉銘傳一軍。于四年五月調之剿捻。首先北行。濟寧長溝一戰。正當撿勢極熾之時。力破狂寇。軍威始振。迨後石弓山一戰。而解雒河之圍。阜陽一戰。而清皖境之賊。旋檄該軍駐紮周家口。約束嚴明。民情翕服。十月間調該軍爲游擊之師。扶溝大捷。立解城圍。本年正月。馳援鄂境。正值賊踞黃陂。該軍奮力攻勦。一戰克之。疊次奏奉諭旨。准其彙案保獎。自春徂冬。該軍往來追擊。足未停趾。無暇辦理保案。臣屢次催令。開單請獎。以固軍心。茲據該提督呈請具奏前來。臣查劉銘傳一軍。馬步二十四營。人數較多。勦捻以來。縱橫馳逐。戰功最偉。勞苦尤甚。此次五案併保。尙無冒濫。而臣行營委員。亦擇其勞績較深者。酌量彙獎。相應繕具清單。仰懇天恩。准照所請。給與獎敘。以昭激勵。除千總以下藍翎等項。仍照准軍向例。造冊咨部核辦外。所有劉銘傳一軍。攻克黃陂等處五案併保緣由。恭摺馳陳。伏乞皇太后皇上聖鑒訓示。謹奏。

暫回本任仍駐徐州並陳下摺摺 同治五年十二月二十一日

奏爲遵旨暫回本任。仍駐徐州。並再瀝陳下情。恭摺仰祈聖鑒事。竊臣承准軍機大臣字寄。同治五年十二月初九日奉。上諭。前因曾國藩患病未痊。軍營事繁。特令回兩江總督本任。以資調攝。並因其請以散員自效。復疊次諭令。迅速回任。俾李鴻章得以相機進剿。曾國藩爲國家心膂之臣。誠信相孚已久。當此捻逆未平。後路糧餉軍火。無人籌辦。豈能無誤事機。曾國藩當仰體朝廷之意。爲國家分憂。豈可稍涉疑慮。固執己見。著卽離邊前旨。剋期回任。俾李鴻章得專意勦賊。迅奏膚功。該督回任以後。遇有湘淮軍事。李鴻章仍當虛心咨商。以期聯絡一

氣。毋許再有回請。用慰塵念。」等因欽此。跪誦之下。感激莫名。臣受恩極重。剿擒無功。何敢固執己見。不爲朝廷分憂。惟臣屢次陳請開缺。實以兩江總督任重事繁。非病軀所能勝任。累疏所陳。均係實情。毫無虛飾。乃蒙聖恩寬假。勉以弗涉疑慮。示以誠信相孚。委曲開導。無微不至。揆之古人。遇合之隆。無以逾此。臣再四躊躇。欲回任則自揣一日之精神。難了一日之公牘。終致貽誤地方。欲再辭則臣一日不回本任。李鴻章一日不出江境。必先貽誤軍事。二者兼權。仍以軍務爲重。謹遵諭旨。卽于正月初旬回駐徐州。暫接兩江總督關防。俾李鴻章迅速交卸。馳赴前敵。仰副皇上殷殷訓誡之至意。惟微臣之下忱。有不能不再陳於聖主之前者。江督爲疆吏最崇之位。又爲目前完善之區。臣一回金陵。則軍事之成敗利鈍。不至叢責于一身。卸至重之肩。居極優之缺。于臣私計。豈不甚便。惟臣久任將帥。有功則受賞。無功則免罰。既覺無以謝清議。而臣平日教人常以長難取巧爲戒。今因告病而回任。迹涉取巧。尤覺無以對部曲。豈可便一時之私圖。盡隳平生之素守。且臣曾奏稱捻匪已成流寇。剿辦極無把握。爲慮方長等語。兩次密陳在案。今又擾及陝西。流竄六省。縱橫三千餘里。剿疾如風。李鴻章一人接辦。尙恐照料難周。今卽萃各路之兵將。竭天下之財力。專辦捻匪。猶難遽滅。縱其不能。亦當遵照上年九月初六日寄諭。東西兩路。分別辦理。李鴻章精力方盛。新縮兵符。統籌全局。駐紮則以西路爲主。臣駐紮徐州防剿。惟以東路爲主。一以爲李鴻章後勁之助。一以爲微臣補過之資。至臣病體未痊。不能多見賓客。不能多閱文牘。業經疊次詳奏。力疾以圖軍事。斷難兼顧地方重任。惟有籲懇天恩。從容籌議。另簡兩江總督。仍俾臣以散員效力行間。感沐鴻慈。實無旣極。兩三月後。臣再當割切具奏。理合預爲陳明。伏求聖慈垂察。至中外交涉事件。臣素未講求。殊慮輕重失宜。查兩淮運司丁日昌。自廣東差旋。尙未回任。該員精思果力。熟悉洋務。合無仰懇天恩。明降諭旨。令丁日昌暫行護理通商欽差大臣關防。必能有裨時局。臣精力衰頹。迹近推諉。曷勝戰栗惶悚之至。所有遵旨暫回本任。仍駐徐州。並再瀝陳下悃緣由。恭摺由驛馳陳。伏乞皇太后皇上聖鑒訓示。謹奏。

近日軍情片 同治五年十二月二十一日

再近日軍情。東路任賴一股。盤旋安陸之白口等處。鄂軍疊次獲勝。十二月初六日。郭松林挫衄一次。沈鴻賓營壘被圍。苦守獲全。十一日。彭毓橘熊登武譚仁芳等三軍。在沙港地方。鏖戰竟日。殺傷相當。十二日。該逆逼近安

陸府城。劉維楨一軍。乘夜擊之。遂折而東趨。十五日。姜玉順一軍。在應城迎剿。以兵力太單。未能扼截。臣接會國
荃十六夜來信。賊之頭隊。已至義堂鎮。距德安府城四十餘里。必向孝感大路奔竄等語。計算援剿之師。鮑超一
軍。于初九日行抵棗陽。周盛波張樹珊兩軍。初九日至隨州。劉銘傳劉秉璋兩軍。亦向隨棗一路進發。兵力均在
鄂省。西路賊知援軍將至。疾馳東趨。此剿彼竄。備多力分。迄無制勝之策。現惟檄令鮑超劉銘傳等軍。仍向鄂東
分途追剿。不知能否補救。屬勝憂憤。西路張逆一股。疊據各路報稱。賊由臨潼縣屬之交口等處。渡過渭北。勢將
竄援同朝。窺伺晉省。臣前于初九日。接鮑超來文。因任賴股匪逼近襄陽。業經自行奏明。移師赴鄂。先剿東股等
語。臣以籌畫月餘。無兵入秦。正深焦灼。次日接喬松年函稱。鮑超若由荆紫關入秦。正恐逼賊愈西。轉形棘手。若
由潼關進兵。機勢較順。臣卽改檄劉松山速從潼關入秦。頃據劉松山稟報。已于十六日。自洛陽拔隊援秦。年內
必入潼關。或可在同朝等處。設法瀾剿。保全晉省完善之區。劉松山張錫嘯等。既已入秦。應卽在陝州設立糧臺。
仍派候補道薛書常管理。江南之餉。銀洋藥等件。擬由徐州雇備長車。解至河南省城。請旨勅下河南撫臣李鶴
年。亦雇長車轉解陝州。如此分段遞運。較易集事。至三河茅津渡一帶。河凍冰堅。必須有兵與晉省夾河設防。已
商之李鴻章於淮勇中酌調兩車。赴陝州駐紮矣。謹附片具陳。伏乞皇太后皇上聖鑒訓示。謹奏。

陳明皖餉支細片 同治五年十二月二十一日

再安徽撫臣英翰。于十月間前來臣營。面商軍事。深以皖餉支絀爲慮。臣亦謂整頓管規。必須月餉略裕。方可下
手。斷無餉不足數。而兵能用命之理。英翰擬請酌提丁漕銀兩。臣告以河南山東均係奏留本省之丁漕。養本省
之兵勇。儘可援例奏請。旋准英翰函稱。業經奏奉諭旨。交部覈議。經部議駁。擬再奏乞天恩。并屬臣刻銜會奏等
因。臣因病未能回任。不便會銜具奏。惟酌提丁漕銀兩之議。英翰曾與臣再三商酌。臣深知皖營兵勇。除餉粟外。
月支一兩八錢較之他省爲最少。而十年以來。皖軍久有饑困之名。實因餉項不敷。有難以整頓者。欲力變從前
之習。不可不籌有著之餉。而目前制捨之策。亦須各省兵力。均足自強。乃可徐圖會剿。于大局殊有關繫。即使皖
軍每人每月加餉數錢。或加至一兩。尙不知淮湘各勇之多。亦不及齊豫各軍之數。如英翰再疏籲請。可否仰懇
天恩。俯如所請。出自逾格鴻慈。謹附片陳明。伏乞皇太后皇上聖鑒訓示。謹奏。

出洋委員容閱請獎片 同治五年十二月二十一日

再花翎運同銜容閱。熟習泰西各國語言文字。往來花旗最久。頗有膽識。臣于同治二年十月。撥給銀兩。飭令前往西洋採辦鐵廠機器。四年十月回營。所購機器一百數十種。均交上海製造局收存備用。查該員不避險阻。涉歷重洋。爲時逾兩年之久。計程越四萬里而遙。實與古人出使絕域。其難相等。應予獎勵。以昭激勸。合無仰懇天恩。俯准以同知留于江蘇。遇缺卽補。理合附摺陳明。伏乞聖鑒訓示。謹奏。

回駐徐州接篆任事摺 同治六年正月二十一日

奏爲微臣回駐徐州接篆任事。恭摺仰祈聖鑒事。竊臣于正月初三日。承准軍機大臣字寄。同治五年十二月二十七日奉。上諭。一。曾國藩于來年正月初旬。接兩江總督關防後。卽著回駐徐州。力顧東路。并顧李鴻章後路。辦理糧餉。無令缺乏。江督事繁責重。此豈可以安逸之時。該督自以迹涉畏難取巧。無以對部曲。未免齷齪過慮。所請令丁日昌暫護通商大臣關防。丁日昌係該督所屬。卽著責成該員。妥辦中外交涉事件。仍由該督統率。無容令其護理關防。一。等因。欽此。聖恩優渥。指示周詳。聞命之下。敢不懷遵。卽于初六日。自周家口啓程。十五日行抵徐州府城。十九日署督臣李鴻章派員將兩江總督關防。兩淮鹽政印信。并通商欽差大臣關防。齊送前來。臣當卽恭設香案。望闕叩頭。祇領任事。伏念臣精力日衰。治軍無效。本不敢再膺繁劇。貽誤地方。仰蒙皇上訓誡再三。曲爲開導。不責其畏難取巧。并諭以事繁責重。所以解釋疑慮。啓發顛愚者。無微不至。循誦聖訓。感愧無地。惟有誓竭心力。圖報涓埃。常早作而夜思。求盡忠而補過。庶以仰答高厚鴻慈于萬一。所有微臣回至徐州接篆日期。恭摺由驛馳陳。伏乞皇太后皇上聖鑒訓示。謹奏。

近日軍情並陳鮑超暫緩入秦片 同治六年正月二十一日

再近日軍情。任賴股匪于上年臘杪。又竄白口一帶。欲從豐洛河搶過襄水。均經鄂中水師擊退。劉銘傳一軍。緊躡賊後。疊有斬擒。正月初一日。繞出賊前。在冠山口獲一勝仗。軍氣頗振。該逆受此懲創。折而下趨。據會國荃來信。言鮑超劉銘傳劉秉璋周盛波等軍。會合鄂軍。三面布置頗密。再調李昭慶一軍。由信陽至宋河。則四面有合圍之勢。但地方遼闊。賊情詭譎。不知能否聚殲等語。查此次賊竄鄂境。忽東忽西。變遷無定。剿辦流寇。本不可以

無定之賊蹤。改已定之成局。飽超一軍。前經議定援秦。不應于十二月初三日。秦改援鄂。既已援鄂。則鄂事未清。不應遽奏赴秦。該提督急于立功。曾國荃亦無定見。遂均有前後歧異之處。疊奉諭旨飭責。洵屬明見萬里。無微不至。臣在歸德途次。聞任賴亦有入秦之意。恐飽超從荆紫關援秦。而潼關一路空虛。萬一任賴西趨汝洛。則秦晉兩省。均屬可慮。已于初十日。檄令飽超緊躡任賴一股。無令再窺秦中。凡賊在開封以西。如南陽汝寧許州境內。均與之縱橫追逐。如任賴至汝州河陝等處。亦即跟蹤西行。助晉省河外之防。爲陝省援師之繼等語。檄行去後。頃來徐州與李鴻章熟商。亦以爲現僅劉松山一軍入秦。糧運已極不易。若使任賴續窺陝省。則各軍皆須赴秦。以四五萬人之糧餉。從江南至陝西。勢必竭蹶。盛貽誤。自應暫留飽超一軍于豫西。攔截任賴。不使西窺。俟任賴一股。賊情定後。再行奏調彙軍赴秦。乃爲穩著。是否有當。理合附片陳明。伏乞皇太后皇上聖鑒訓示。謹奏。

彭玉麟懇辭獎敘片 同治六年正月二十一日

再兵部右侍郎彭玉麟報捐養廉銀兩。由臣具奏。欽奉諭旨。彭玉麟所捐養廉銀兩。著加恩查明該侍郎子弟。給予獎敘。該部知道。欽此。一嘗經恭錄咨會去後。茲據該侍郎咨稱。玉麟祇有一子。已得二品蔭生。胞弟一人。亦已捐納道員。此皆仰賴聖恩。始得子弟均列仕籍。且察其性質。均極樸魯。現惟飭令安分家居。未能出而圖報。方覺昕夕惶愧。何敢再邀獎敘。在皇上天恩。固屬有加無已。而玉麟起家寒素。屢沐高厚之恩。未效涓埃之報。藉此廉項。以盡微忱。斷不敢再邀獎敘。有違初心等因。請奏前來。臣查彭玉麟淡于榮利。退讓爲懷。自帶水師以來。身居小舟。十有五年。從未謀及家室。此次捐助養廉。力辭獎敘。出於至誠。應懇天恩。俯如所請。毋庸再給獎敘。以遂其報效之誠。理合附片陳明。伏乞皇太后皇上聖鑒訓示。謹奏。

報銷款目分四案開單摺 同治六年二月初八日

奏爲造報軍需款目。分爲四案。開列簡明清單。恭摺仰祈聖鑒事。竊臣接准部咨。同治三年七月初十日。內閣奉上諭。一軍需報銷一事。本有例定章程。惟近來用兵十餘年。蔓延十數省。報銷款目。所在多有。若責令照例辦理。不獨虛糜帑項。徒爲委員書吏開需索之門。而且支應稍有不符。于例卽難核准。不得不著落賠償。將帥宣力行間。甫邀恩錫。旋迫追呼。甚非國家厚待勳臣之意。著照該部所請。所有同治三年六月以前各處辦理軍務。未經

報銷之案。准將收支款目總數。分年分起。開具簡明清單。奏明存案。免其造冊報銷。等因。欽此。仰見我皇上蠲除煩苛。務崇大體之至意。臣自咸豐三年。帶兵以來。統轄日廣。條目太繁。曾于咸豐七年十二月。酌擬報銷大概規模。陳奏一次。十年四月。奉命署理兩江總督。即于五月附片奏明。擬自咸豐三年至十年五月。分作三案報銷。并先將咸豐三年九月起至六年十二月止。作為第一案。專摺具奏。照例造冊。咨部在案。臣初出帶兵。并未奏派大員。總理糧臺。收放各款。隨時遴選經管。咸豐四五六七年。以今湖南撫臣李瀚章前任守令時經手者居多。八九兩年。以江西候補知府張韶南經手者居多。十年五月。忝任江督以後。始奏明于江西省城設立總糧臺。派江西布政使總司其事。臣時駐紮祁門。另設行營。支應糧臺。收委江西建昌府知府隋藏珠與張韶南會同經理。至十一年秋。克復安慶。圍攻金陵。又于安慶立臺。名曰江外糧臺。調隋藏珠管理。而以江西候補知府王延長副之。其留于祁門者。支應皖省諸軍。名曰山內糧臺。其時張韶南物故。派安徽候補知府李興銳始終其事。其隨臣弟曾國荃在安慶金陵者。則有江西候補知府李作士等員。別無臺局名目。但在舟次支應而已。臣統軍甚久。人數甚多。款目甚鉅。而委員極少。前後十餘年。大小委員。不滿四十人。以故浮費較少。頭緒易清。此臣營歷年支放軍需大概情形也。同治三年七月。奉到諭旨。飭開簡明清單。即札行各省臺局。開送歷年所解餉銀總數。彙齊核對。嗣准各處陸續送齊。即于四年十一月。在安慶省城設立報銷總局。派安慶江西兩省布政使總理其事。仍令王延長李興銳二人。專司其事。以資熟手。又添派安徽候補知府彭嘉玉。幫同查核。其江西總臺案卷。則由江西布政使。派委候補同知直隸州陳長吉。齎至安慶。會同清釐。一年以來。各該員等。逐款稽查。悉心覈算。開單則期于簡明。底冊則歸于詳核。茲據署安徽布政使吳坤修。江西布政使孫長絨。前署安徽布政使調任湖北布政使何璟。會同詳稱。自咸豐三年九月起至六年十二月底止。前經具奏者。茲亦重開一單。列為第一案。共收銀二百八十九萬一千四百一十九兩五錢有奇。收米五萬三千七百四十九石八升有奇。共支發銀二百六十六萬七千三百七十一兩六錢有奇。支放米三千七百九十九石五斗八升有奇。所餘銀兩及餘米變價等項。共計存銀二十九萬一千三百九十四兩一錢有奇。其自咸豐七年正月起到二月二十日。臣丁憂回籍之日止。陸續支放及各項雜款。未經列入初案者。另開一單。作為第二案。共支發銀二十九萬一千三百九十四兩一錢有奇。自咸豐

八年六月。臣由原籍起復帶兵援浙之日起。至十年四月底止。開列一單。作爲第三案。共收銀一百六十九萬一千六百七十六兩一錢有奇。收錢一千一百一十九串有奇。共支發銀一百六十二萬七千四百八十六兩八錢有奇。支發錢一千一百一十九串有奇。自咸豐十年五月。臣接任兩江總督起。至同治三年六月。克復金陵止。開列一單。作爲第四案。共收銀一千六百八十五萬四千五百九十九兩七錢有奇。收錢九十六萬五千五百五十二串有奇。共支發銀一千六百七十六萬三千七百七十五兩有奇。支發錢八十七萬二千八百六十三串有奇。以上四案。均就實收實放之款。逐一開報。其各軍欠餉。及協濟各路銀錢等款。另行分析。開單具詳請奏前來。臣查向來軍營放款。緩急多少。糧臺委員。得以主持其事。臣營則十餘年來。無論支發何款。無不親自裁度。雖有不合例之供支。從無不核實之款目。同治二三年間。統軍至十餘萬人。欠餉至十五六箇月。從未有兵勇向糧臺索餉滋鬧者。一由于糧臺之銀。隨到隨發。從無存留。一由于發餉之際。概由微臣斟酌。不與委員相干。因是差免于浮冒之弊。而卽以取信于將士之心。此次彙辦報銷。爲時閱十二年之久。用款至二千一百三十餘萬之多。臣復加查覈。均係確鑿。可據。除自三年六月以後。至四年五月北征之日止。臣督飭各員接辦。照例報銷外。所有咸豐三年九月起。至同治三年六月底止。軍需款目。分爲四案。開列簡明清單。恭呈御覽。謹專摺具陳。伏乞皇太后皇上聖鑒。勅部查照辦理。謹奏。

安徽抵徵比例請銷片 同治六年二月初八日

再安徽省抵徵一項。臣于同治三年九月二十七日具奏聲明。解司庫者。由藩司報銷。解糧臺者。由糧臺報銷。乃可清款目而省謬葛。惟其中不合例之說。不特糧臺有之。卽司庫亦有之。其中合例者。如各官養廉俸銀等項。計司庫放錢十七萬四千八百九十六千有奇。不合例者如田荒之州縣發給牛種銀兩。無驛之州縣發給津貼銀兩。暨委員薪水等項。共計司庫放錢十五萬七千二百五十六千有奇。此次辦理三年六月以前簡明清單。若將此十五萬七千餘串不合例之款。列入單內。自可一併核銷。臣以抵徵一項。收欸本依創格。用欸尤多變通。報銷之不合例。司庫與糧臺同。而各歸各報。則臣奏明有案。不可稍有牽混。自相矛盾。查軍興以來。惟皖省蹂躪最久。當地方初復。公私掃地。無一錢一物。以爲基址。萬端締造。特立牛種津貼等名目。酌量核給。以蘇民困。而勵官廉。

各任藩司。隨時稟商。皆由臣悉心核定。迥非照例支給者可比。將來司庫造報。應比照簡明清單之例。一律請銷。以昭核實。除飭安徽藩司將合例不合例之款。分析造報外。理合預爲陳明。伏乞皇太后皇上聖鑒。勅部查照。謹奏。

補發湘軍欠餉作第四案續報之款片 同治六年二月初八日

再此次開列簡明清單。清釐各軍月餉。除已發各款外。核算同治三年六月以前。尙欠發各軍銀四百九十八萬七千五百兩有奇。內飽超一軍。欠餉銀一百萬餘兩。業經該提督奏明。作爲各營報效。請加學額在案。徵休兩軍十七營。鬪餉罰銀二十三萬。臣于同治四年十一月二十七日奏結亦在案。其餘金陵安慶皖南各軍欠餉。自三年七月起至四年臘月止。除截贖銀兩不發外。均經分別補給。臣所部湘軍十餘萬人。惟劉松山之老湘營未撤。欠餉亦至今未清。此外各營。一律清楚。所發銀兩。擬於第五案照例報銷之始。另列一單。作爲第四案續報之款。庶簡明清單。與照例造報。二者年月既畫然不亂。款目亦截然不紊。理合附片陳明。伏乞皇太后皇上聖鑒。勅部查明。謹奏。

恭報自徐州起程日期摺 同治六年二月十四日

奏爲疊奉諭旨。移駐金陵。恭報起程日期。仰祈聖鑒事。竊臣于正月二十九日。承准軍機大臣字寄。同治六年正月二十四日奉。上諭。曾國藩既經接受兩江省篆。所有察吏籌餉。及地方應辦事宜。均關緊要。且金陵亦不可無勳望素著大員坐鎮。著即回住省城。以資鎮攝。該督公忠體國。自當仰體朝廷倚畀之隆。勉爲國家宣力。一切軍情。並調度事宜。仍著李鴻章隨時咨商。以資裨益。等因。欽此。旋于二月初一日。又奉正月二十六日寄諭。曾國藩奏赴徐接印視事一摺。覽奏欣慰。著該督即遵前旨。回駐江寧省城。籌辦糧餉。及地方事宜。以資坐鎮。等因。欽此。跪誦之下。感悚莫名。臣辦捻無效。夙夜疚心。自交卸兵符以後。飽超大捷于湖北。劉松山屢勝于關西。雖較之去歲微有起色。而寇氛仍未大衰。殄滅尙無把握。臣展轉憂惶。以回任爲可愧之事。幸李鴻章忠泉耐勞。毅然以勦捻爲己任。或可分宵旰之憂。補微臣之愆咎。而淮湘各軍將士。人人以餉絀爲慮。朝廷亦恐後路或不應手。前敵即難奏功。殷勤訓誡。至再至三。臣仰承慈訓。定于十六日由徐起行。回駐金陵。籌辦一切。臣用心軌

汗之病。近已漸愈。披閱公牘。尙能盡職。舌端蹇澀之病。猶未痊愈。疆臣之職。每日至少須見客五六次。察看僚屬。詢訪教戒。乃爲稱職。臣到省之後。加意調理。如實不能多見賓客。自度不克舉其職。仍當據實陳情。不敢以病軀戀棧。如稍可支持。自度不至曠官。亦不至託疾飾辭。上負高厚生成之德。所有微臣自徐起程回省日期。恭摺由驛三百里馳奏。伏乞皇太后皇上聖鑒訓示。謹奏。

張樹珊在周家口建祠片 同治六年二月十四日

再上年十二月二十一日。廣西右江鎮總兵張樹珊。剿賊于湖北德安府屬之新家園地方。力戰陣亡。業經李鴻章奏奉上諭。一「張樹珊著照所請陣亡例從優議卹。并加恩予諡。其廬州本籍。及立功地方。均著建立專祠。」等因。欽此。嗣據張樹珊之兄直隸按察使張樹聲及其營官劉克仁等先後具稟。據稱張樹珊少負奇氣。自咸豐四五年間。在籍辦團。八年秋間。樹珊乃始於合肥倡築堡寨。羣賊更番來攻。悉受創去。是時髮逆方張。苗捻繼熾。皖北幾無寸土安靜之地。而獨合肥西鄉。不充僑官。保全無恙。張樹珊爲之倡也。其平時帶練助勤。一赴壽春之急。再解六安之圍。疊克來安。無爲潛山太湖霍山三河諸河隘。樹珊常爲軍鋒。有未盡入奏者。同治元年。樹珊以都司從李鴻章馳赴上海。平定三吳。歷任戰功。均經李鴻章奏報在案。惟進攻福山之役。尤爲人所難爲。時航海之師抵岸。未及成營。而賊衆奄至。前軍被圍。樹珊倚坡結陣。大呼馳下。直搗中堅。拔出被圍諸軍。身受數傷。既克回營。解衣就臥。袖中乾血。片片墮地。嘗苦戰時。負痛而不自知也。四年隨臣北征。五年春夏。該軍分防周家口。紀律嚴明。商民感戴。遠冬間。臣駐周家口。聞周家口殉難之信。市民爲之巷哭。紛紛營齋營奠。并請于周口南寨建立專祠。以酬遺愛。其兄張樹聲則請撰次行誼。宣付史館。各等情前來。臣查提鎮大員。殉節疆場。國史例得立傳。無須專案陳請。應懇天恩。准予周家口爲張樹珊建立專祠。以慰民思。而褒忠節。理合附片陳明。伏乞皇太后皇上聖鑒訓示。謹奏。

張錫嶸在陝西陣亡請加恩片 同治六年二月十四日

再翰林院編修張錫嶸。于本年正月初六日。在陝西西安府兩花寨地方。剿賊陣亡。業經喬松年奏奉上諭。一「張錫嶸着追贈翰林院侍講學士銜。照侍講學士例議卹。以慰忠魂。」欽此。欽遵在案。竊維張錫嶸由翰林院編修

大考高等。歷蒙文宗顯皇帝簡用山西副考官。雲南學政。當其入雲南時。人人視爲畏途。自抵貴州境後。驛路動多梗塞。州縣全無供支。張錫燦毅然過征。往往徒步而行。雜糧充飢。遠抵滇省後。守城數次。全未開考。卽丁父憂。又復徵行賊中。間關回皖。臣時在安慶。與之接晤。聞其往返滇南。不避艱險。又見其誦法先儒。學有本源。卽已深器其人。四年六月。臣駐軍臨淮。檄令張錫燦辦理營務。旋令招募靈璧勇。立爲敬字三營。朝夕訓練。該編修戎衣短後。帕首鞞刀。能于烈日雨泥之中。奔走不輟。靈璧爲淮北瘠苦之區。其勇丁極耐勞苦。慣食麥麵。臣舊部湘勇及李鴻章淮南之勇。均不慣食麵食。臣常慮其于北路。不甚相宜。既見張錫燦募成淮北一軍。則期望甚切。意欲儲爲西北之用。曾于四年七月五年正月。兩次具奏。并于五年十一月十七日。將張錫燦附片密保。謂其習勞耐苦。不名一錢。與劉銘傳潘鼎新劉松山三人並稱。蓋一則以張錫燦堅苦有守。意欲稍加磨鍊。漸付艱鉅之任。一則以徵臣衰病侵尋。意欲求賢自輔。冀收桑榆之效也。臣前撤湘軍十餘萬人。獨留劉松山一軍。因其紀律嚴明。戰守可靠。上年臘月。檄張錫燦與劉松山會合援秦。令與湘軍同戰。以資觀摩。不料正月初六日之役。張錫燦身率百餘卒。親自陷陣。登時負傷殞命。聞報之下。深爲慟惜。既惜該編修好學耐勞。齋志以終。亦惜勇丁之習慣麵食。宜于西北者。統將不易再得也。頃臣回駐徐州。張錫燦之長子張志敦。匍匐來營。年僅十三歲。已讀經書。衣不掩脛。家計困窮。盡然傷之。謹將張錫燦生平志行及臣所屬望于該員者。略陳梗概。可否將其子張志敦量爲加恩之處。出自聖主格外鴻施。理合附片具陳。伏乞皇太后皇上聖鑒訓示。謹奏。

覆陳祝塏被參一案摺 同治六年二月十四日

再鹽運使銜直隸候補道祝塏。經臣咨調來營。辦理營務。一年有餘。上年十二月初三日。臣會附片密保。旋承准軍機大臣字寄。同治五年十二月初六日奉。上諭。前因直隸添練新軍。曾經劉長佑奏稱。易州一軍。擬派前大名道祝塏爲總統。茲據侍郎毛昶熙奏稱。該道員之材。止可以供驅策。若令獨當一面。恐致債事等語。該侍郎與祝塏共事有年。知之自悉。易州一軍。著劉長佑另揀委員。派充統領。以期于事有濟。祝塏現在會國藩軍營。能否不致誤事。並著會國藩隨時考察。量材差遣。毛昶熙原摺。均著鈔給閱看。將此諭令知之。欽此。一臣于毛昶熙原參各語。不必辨論。惟祝塏隨臣辦事。在與毛昶熙從事之後。已閱四年。或者閱歷磨鍊。大有長進。臣向辦軍。若臬

保之案。稍失之寬。至于密保人員。則慎之又慎。不敢妄加一語。上年奏片中。稱祝塏在豫。士心歸附。氣韻沈雄。才具深穩。能濟時艱。雖不敢信爲定評。要可考驗于數年數十年以後。臣自周家口來時。祝塏因事遲留。未遽同行。前因劉長佑有函來調本省。咨回直隸。仍補道員。冀有補于吏治。頃李鴻章行至歸德。與祝塏相遇。因其熟悉豫事。又檄令隨營差遣。將來是否仍回直隸。應由李鴻章酌量奏辦。理合附片陳明。伏乞皇太后皇上聖鑒。謹奏。

報回省日期並近日軍情摺 同治六年二月二十日

奏爲恭報徵臣回省日期。並陳近日軍情。恭摺仰祈聖鑒事。竊臣移駐金陵起程日期。于二月十四日具奏在案。拜摺後。十六日自徐州至韓莊。由運河水路南下。二十二日。查看成子河防務。二十三日。行抵清江。與漕臣張之萬晤商一切。二十六日。至清水潭。驗視新修河隄。三月初三日。至七濠口。查閱瓜州鹽棧。初六日。行抵江寧省城。旬日來。接見僚屬。披閱文牘。勉力支持。深以不克稱職爲懼。疊據各路稟報。鄂省賊股由皖省回竄後。盤旋黃陂黃岡等處。現又擾及雲夢。向西北竄走。或由德隨遁入豫境。或由安陸偷渡漢水。均屬可慮。臣據李鴻章會國荃來函。均擬令鮑超由樊城會師東下。惟該提督兩次奏請開缺。不知其傷疾舉發。近狀若何。臣已馳函再三勸誠。勉其力疾進兵。不知能否迅速拔隊。至陝省股匪。劉松山一軍。自二月十五夜攻破銀渠金渠後。該逆竄過渭北。二十一日。劉松山進軍郿縣。探知張逆已與回逆合股。勢頗蔓延。三月初一日。我軍出隊迎擊。踏平沿河賊巢。奪回村莊十餘處。該軍自援秦後。連次獲勝。似于戰事。尙有把握。惟擒匪之狡。回匪之齊心。均屬悍寇。而進兵愈遠。運糧愈難。孤軍深入。尤不放心。臣屢囑其暫圖穩慎。俟各軍四集。別有後繼之帥。再爲猛攻之計。臣勦擒年餘。無功而返。臣弟國荃所部疊次敗屢。憂愧無地。惟有謹遵諭旨。力籌軍餉。源源接濟。俾前敵不至匱乏。軍心藉以維持。或可補救愆尤。仰答高厚鴻慈于萬一。所有徵臣回省日期。及陳近日軍情緣由。謹繕摺由驛三百里馳陳。伏乞皇太后皇上聖鑒訓示。謹奏。

通籌酌解陝甘軍餉片 同治六年三月二十日

再臣於二月初七日欽奉寄諭。陝省需餉萬緊。飭令於協甘專餉內。按月籌銀二萬兩。專解陝西。等因。又于二月十五日欽奉寄諭。甘肅餉項支絀。必得各省協濟。飭令酌量情形。每月究能撥解若干。據實具奏。等因。

欽此。查協甘餉銀。除江海關月撥銀一萬兩外。臣於四年五月。奏定每月協濟三萬兩。自五月起至十月止。按月均交楊岳斌提督。委員轉解。十一月以後。李鴻章議定以二萬兩解楊岳斌軍營。以一萬兩解穆圖善軍營。按月解至五年六月止。尚未絲毫短少。五年六月以後。清水潭決口。江北釐課大減。李鴻章奏明協甘之款。先儘收數分作三股。以兩股撥陝甘督臣軍營。以一股撥寧夏軍營。約計每月尚有二萬兩。統計四年五月以後。解過銀六十餘萬。臣此次回任後。核計應發餉項。如准勇各軍勦擒之師。劉松山援陝之師。鮑超援鄂之師。及籌解京餉。本省應撥綠營槽標兵餉。淮揚太湖水師月餉。皆係無可議減之款。統算一年入數。較之出數。不敷甚鉅。淮軍每年正餉僅放九關。久欲設法增添。而計無所出。實爲臣疚心之事。即上海鐵廠。今年擬造輪船。亦尙無款可籌。論目下江南情形。本難兼顧外省協濟。惟協助甘肅軍需。萬無可推諉之理。臣仍照原奏。每月三萬兩之議。按月籌解。即指定之江北釐金。或月收不及三萬。亦當以他款補足。以期有言必踐。若欲于協甘之外。添協陝餉。實屬無此餘力。臣再四思維。陝甘軍務。本屬相聯一氣。目下甘回常竄陝境。陝擒亦近甘界。軍務本須通籌。協餉亦可融解。擬于每月協甘三萬兩內。以二萬兩解甘肅軍營。以一萬兩解陝西軍營。仍俟籌解兩三月後。察看兩省軍務。孰緩孰急。再行定議。如此通籌酌解。則甘肅軍營合之浙江劃抵之一萬兩。每月可得蘇餉三萬兩。陝西軍營每月可得蘇餉一萬兩。如此酌盈劑虛。庶足以資周轉。理合附片覆陳。伏乞皇太后皇上聖鑒訓示。謹奏。

鮑超傷疾甚劇酌調大員統軍摺 同治六年四月初七日

奏爲提督鮑超傷疾甚劇。酌調大員南來統軍。恭摺仰祈聖鑒事。竊浙江提督鮑超。傷疾屢發。兩次奏請開缺調理。未蒙允准。臣亦以軍情正緊。馳書鄂中。再三勸勉。屬其力疾進兵。尙未接該提督回信。頃接李鴻章函。鈔寄甯營各鎮將宋國永等公稟。瀝陳鮑超病狀。據稱。「本年正月間。楊家澤接仗獲勝後。鮑超督隊追賊。五晝夜迄未少息。虛火上炎。兩目盡赤。嗣以發表太過。引動舊傷。日益增劇。左手已麻木不仁。頂上傷疤肉跳。轉側呻吟。三月十二日。昏暈一二時之久。疲湧咽喉。良久始蘇。又加左肋之傷。亦復跳痛不止。實屬萬分危險。請迅派大員前來接統。近日尙可親爲交代。萬有不測。更無人親算交代。」等語。臣接閱之下。不勝憂灼。鮑超帶兵十餘年。肅清東南。無役不從。實爲第一著名驍將。其受傷多而且重。衆所共知。今宋國永等縷稟如此。當無捏飾。臣現已派員前

往襄陽。攜帶藥物。屬其酌量情形。如實難支持。卽由李鴻章奏明。前來江寧安心調理。或可冀其漸次痊愈。惟雲營人數較多。立功最久。各營官類皆百戰餘生。資望相等。非有才智卓越。情誼相聯之大員。難勝接統之任。查鮑超部下諸將。以宋國永、婁雲慶二員爲最著。宋國永前在江西之長井。湖北之金口。不能定亂。因案革職。此次在營出力。尙未奏請開復。且其才欠剛斷。不足以資統率。惟現署直隸提督。正定鎮總兵。婁雲慶。臨敵調度。條理秩然。同治三年。駐軍上杭。各勇以缺餉譁。該員從容鎮靜。危而復安。是其才堪應變。已有明證。目前劉長佑添練新兵。保衛畿輔。亦屬需才孔亟之際。然較之鄂豫等省賊氛之熾。湘淮各軍求助之殷。究有緩急之殊。而婁雲慶在直隸日淺。尙非必不可少之員。以之接統雲軍。則可和輯衆心。李鴻章來函反覆熟商。與臣意見相同。合無仰懇天恩。勅下直隸督臣劉長佑。迅卽派員接署提督篆務。俾婁雲慶卽日交卸。由天津乘坐輪船。前來江寧。臣與之商定一切。速赴軍營。庶雲軍得有主持之人。鮑超卽可安心養病。如鮑超病勢日愈。無須更換統領。臣當令其雲慶另募一軍。在于安慶。認真訓練。其餉項取之湖北。卽以郭松林、彭毓橘兩部裁撤之欸。作爲婁雲慶新軍之餉。臣嘗常坐輪船。馳至安慶。親督操練。務成勁旅。以遏寇氛。前月賊至黃梅宿松之交。安慶及附近州縣。遷徙一空。遠淮軍星馳往援。賊又倏忽西趨。若此軍練成。則皖鄂之江濱有備。各淮軍專勤北路。李鴻章可省南顧之憂。于大局似有裨益。所有酌調大員。南來統軍緣由。謹會同兩廣總督臣李鴻章恭摺由驛五百里馳陳。伏乞皇太后皇上聖鑒訓示。謹奏。

奏撥二成洋稅銀片 同治六年四月初七日

再臣回任後。通計餉需款目。一年入數。較之出數。不敷甚鉅。且有萬不容緩之事。須另行籌款者。約計數端。如製造輪船。實爲救時要策。上海開設鐵廠。在滬及外洋購買機器兩副。大致已屬全備。而造船一事。則以無款可籌。尙未與辦。臣前在安慶會試造一小輪船。不甚得法。李鴻章苦心經營。獨得要領。現在江寧上海各局。製造洋礮。洋鎗。洋火等項。均用內地匠人。能學外洋機巧。以必應速辦之事。又有可乘之時。而坐困于無可撥之銀。殊覺機會可惜。此一端也。勦捻之師。如劉松山一軍。例支月餉六萬兩。入秦以後。因添發米價運費。將近七萬。今年尙僅解去兩關。該軍孤懸西陲。日與捻回兩寇接戰。深恐餉項不繼。或生他變。淮勇諸軍人數較多。雲軍

湘軍上年均發滿餉。惟勇僅發九關。臣寸心抱歉。久欲略爲增添。而計無所出。近則蘇局釐金大減。滬釐亦遠不如前。鹽務則久無起色。似此情形。并不能足九關之數。目下三四兩關。卽難湊齊。夙夜憂懼。深恐無以維繫軍心。此又一端也。揜逆馳突無定。臣嘗謂北以黃河防務爲主。東以運河防務爲主。南以大江防務爲主。能守定此數處。不使賊蹤竄過一步。大局尙不至決裂。而長江上下數千里。僅恃水師。絕少陸兵。北岸沿江最要郡縣。安慶僅有兩營。揚州亦僅兩營。滁州和州無爲州並無一兵。臣思添練數營。布置各城。爲思患預防之計。免致如二月間。賊竄江濱。上下千里。紛紛遷避。亦以無款可籌。迄未舉行。此又一端也。運河自清水潭以外。處處卑薄。壑塌。險工林立。前月漕臣奏修堤壩。又另片奏挑張福口引河修復。新堤三案。分別勸捐撥款辦理。臣經過淮揚。察看商民太苦。旋經咨商停捐。而各工均不可緩。銀款又無可撥。此亦一端也。臣在營十餘年。每謂疆臣自有籌餉之權。從不敢以支絀情形。輕瀆宸聽。今江南雖已肅清。民力實尙窮困。入款祇有此數。出款常有加增。卽京餉及協濟陝甘。霆軍之餉。義亦不可少減。至製造輪船等事。福建尙奏撥鉅款。新立鐵廠。江南已有鐵廠。豈可置之不辦。再四思維。實有萬難周轉之勢。查江海關洋稅一項。自扣款清結以後。提解四成。另款存儲部庫。本係奏定專撥之款。未敢動用絲毫。惟現嘗餉需萬緊。合無仰懇天恩。俯准將洋稅解部之四成。酌留二成。以濟要需。如蒙俞允。臣擬以一成爲專造輪船之用。以一成酌濟淮軍及添兵等事。其餘二成。仍隨時按結報解。俟輪船辦理就緒。各軍餉項稍裕。卽當奏明。仍按四成全數解部。以符初議。理合附片陳請。伏乞皇太后皇上聖鑒訓示。謹奏。

謝京察優敘恩摺 同治六年四月十六日

奏爲恭謝天恩。仰祈聖鑒事。竊臣於三月十二日。接准吏部咨開。同治六年正月二十六日內閣奉上諭。一協辦大學士兩江總督曾國藩。公忠素著。保障東南。著交部從優議敘。一等因欽此。當卽恭設香案。望闕叩頭謝恩。伏念臣督師勦捻。未立寸功。屢爲言路所糾彈。悉荷聖恩之寬宥。撫衷自問。正切悚慚。上年疊奉溫綸。命回本任。自二月回省以來。竊見東南數省。雖就肅清。而田舍荒蕪。人民稀少。數千里間。被兵之困。實爲數百年來未有之事。自准徐以南。皖潯以東。去歲多被水災。今春又苦久旱。饑民載道。生意日凋。思欲漸培元氣。卽此遺黎。而中原之揜患未平。西路之回氛尙熾。杼軸悉取諸東人。絲毫皆出自民力。臣忝膺疆寄。無術補苴。早夜以思。憂愧無地。

乃蒙聖慈曲逮。上考濫膺。聞命之餘。更深感悚。臣惟有勤以補過。慎以圖功。敢言保障之勞。益矢愚誠之素。庶期仰答高厚鴻慈于萬一。所有微臣感激下忱。謹繕摺叩謝天恩。伏乞皇太后皇上聖鑒訓示。謹奏。

陳明天旱水涸及東西兩路軍情片 同治六年五月十五日

再任賴逆股自鄂省出竄。現在擾至葉裕許州一帶。已有東趨之勢。山東防務。以運河爲最要。去年逆蹤三次竄撲。均經苦戰擊退。固由防務之嚴密。亦恃水勢爲屏蔽。本年天氣亢旱。河水乾涸。臣率屬步禱。已逾兩旬。雖於四月二十四日。五月初三初十日得雨三次。均未霑足。農田枯坼。禾稻不能栽插。鹽河無水。鹽斤不能出場。遠近祈禱。人心皇皇。皆由微臣位高德薄。上干天和。累及斯民。憂愧無地。徧詢各處。湖南江西浙江等省。及蘇松徽寧等府。已得透雨。安廬鳳潁淮揚江鎮等府。及鄰省湖北均未得沛甘霖。若過夏至不雨。則旱災已成。不特民食軍食兩無所出。且恐饑民流而爲盜。軍務愈形棘手。目前運河日涸。水師無可展施。旱兵尙嫌單薄。賊如悉數猛撲。恐上年之濬河修牆。前功盡棄。此東路軍情之可慮也。至陝西張逆一股。屢經劉松山擊敗。逆燄漸衰。聞有回竄出關之意。如又竄至豫鄂。應請旨勅下李鴻章。仍檄劉松山追賊東還。不宜久留秦中。一則道途太遠。糧餉難運。一則該軍與捻逆接仗已多。深悉賊中伎倆。應令各軍全力合謀。先保中原腹地。臣治捻無功。抱愧莫釋。天時人事。交暢於中。苟有所見。不敢不據實上陳。伏乞皇太后皇上聖鑒訓示。謹奏。

謝授大學士恩摺 同治六年六月初九日

奏爲恭謝天恩仰祈聖鑒事。竊臣接准吏部咨開同治六年五月初九日內閣奉上諭。曾國藩著補授大學士。仍留兩江總督之任。欽此。一當卽恭設香案。望闕叩頭謝恩。伏念臣材識疎庸。班資尙淺。謬點參知之位。久懷覆餗之虞。比以勤撿無功。回居本任。尤抱慚于衾影。若冒涉於冰淵。茲乃欽奉恩綸。晉階端揆。處人臣之極地。爲稽古之至榮。當此時事多艱。討賊無效。既幸寬于譴責。反滂晉乎台司。恩過彌隆。悚惶何極。臣自回江南。倏逾三月。精力日減。舊疾未痊。文牘憚于詳求。賓僚艱于接見。不特軍國大計。無補絲毫。卽論吏事之多疎。已覺斯職之不稱。五月初間。本擬具疏陳情。讓賢避位。時以亢旱爲憂。民心惶懼。今則羣賊東竄。軍事方殷。自當補救乎艱虞。未敢輕言乎思退。赧顏而拜新命。撫躬而省舊愆。惟有勉竭愚忱。強扶衰疾。更集思而廣益。冀補過而盡忠。或以

報答高厚鴻慈于萬一。所有微臣感激下忱，謹繕摺叩謝天恩。伏乞皇太后皇上聖鑒。謹奏。

鮑超懇請回籍養病摺 同治六年六月初十日

奏爲提督鮑超傷病深重，籲懇天恩，准令回籍養病。據情代奏。仰祈聖鑒事。竊鮑超傷病情形，臣于四月初七日專摺陳奏後，該提督回任武昌養病。嗣由署湖廣督臣李鴻章奏請續假，并于五月十九日會同臣弟國荃陳奏。該提督病狀在案。二十三日，鮑超派委補用同知吳葆儀前來金陵，據函稱云：超自三月十二日疊去時許之後，日益沈重，常常昏迷，動輒一、二日不省人事。到鄂省後，連服清心養陰之劑，近始日漸清醒，無如左手及兩腿麻木更甚于前，轉側非人不可，舌蹇雖愈，但不敢多言。話久則氣微痰喘，不能接續，傷痕仍然跳響，驚悸則較前尤甚。每食惟稀粥半盞，聞油膩則作惡欲嘔，形銷骨立，輾轉在牀，凶多吉少，無論未必能愈，即有萬一之望，亦非一年半載所能起牀者。自神志稍清以來，心寒膽顫，萬事俱灰，十餘年到處奔馳，從不以家事繫懷。今左股已成癱，是此身已有一半非我所有。一子年甫六齡，家事全未料理，思鄉念切，恨不奮飛，伏望格外矜全。奏請回籍調治。如蒙聖慈允准，生當隕首，死當結草，等情到臣。查鮑超苦戰功高，一時名將，無出其右。此次傷病大發，垂危之際，曾集將士環列臥榻，勸以報國盡忠，感動部曲，仰蒙聖慈，賞假賞葺。該提督感激涕零，雖神志不清，而喃喃嚙語，猶思殺賊立功，惟病勢過重，現雖有三分轉機，而臣詢之來員吳葆儀，據稱面目黧黑，左足痺痿，頭頂傷痕，跳躑不止，似此情形，斷非一年半載所能全愈。若勉強留于軍中，既不足以示體恤，而他人代統其衆，恐號令不一，轉非慎重軍務之道。可否仰懇天恩，俯准鮑超回籍養病，出自格外鴻施。至所部霆軍馬步各營，現在駐紮襄陽，臣商之李鴻章等，分別撤留，令其雲慶赴鄂酌辦，能否妥協得力，再行專案陳奏。所有提督鮑超傷疾已深，懇恩回籍養病，據情代奏緣由，謹會同湖廣督臣李鴻章由驛馳陳，伏乞皇太后皇上聖鑒訓示。謹奏。

江寧昭忠祠合祀楚軍水陸營官片 同治六年六月初十日

再江寧省城建立昭忠祠，請祀湘軍陣亡員弁。臣于同治三年十月二十日具奏，欽奉諭旨允准在案。當建祠之始，係在金陵初克之時，就僞王府略加修葺，專祀圍攻金陵之陸軍將士，計陣亡病故不下二萬四五百人。未能推及水師，亦因水師昭忠祠先于咸豐八年奏建于湖口縣之石鐘山，已足以妥忠魂，不必更以金陵專祠爲重。

也。惟論金陵克復之功。實賴水師肅清江面。斷絕賊糧。上游三千里。濱江城隘。皆由水軍苦戰得來。最後九洲一役。戰功尤偉。死事更多。而江寧昭忠祠。僅及陸師。未列水師。究不足以彰公道。現擬略易規模。重加釐訂。其陸軍哨勇之祀祀者。業于同治三年。徧立神牌。應即仍如其舊。惟將祠內正屋。改造一層。並祀水陸之統領營官。庶幾于理至順。于心始安。相應奏明請旨。准將江寧昭忠祠合祀。楚軍水陸各營。仍飭地方官。一并春秋致祭。在國恩尤爲公溥。而衆心亦皆允愜。理合會同兵部侍郎臣彭玉麟。附片具陳。伏乞皇太后皇上聖鑒訓示。謹奏。

霆軍分別撤留。雲慶另募新軍摺。同治六年七月二十九日。

奏爲霆字全軍分別撤留。並檄雲慶另募新軍。以備防勦。恭摺仰祈聖鑒事。竊提督鮑超回籍養病。臣于六月初十日具奏。旋奉六月十八日寄諭。一會國藩奏鮑超傷病深重。懇准回籍一摺。本日已明降諭旨允准。其所部各營。並令雲慶接統矣。該提督馬步各營。人數太雜。紀律未嚴。應如何嚴加裁汰。分別撤留之處。著會國藩李鴻章悉心籌商。著責成雲慶嚴加整頓。毋貽他患。一等因欽此。查霆軍步隊二十營。馬隊十二營。自鮑超患病後。暫交前宣化鎮總兵宋國永代統數月。頗稱安靜。而宋國永秉性謹慎。偏于慈柔。又鑑于昔年金口之變。屢次來稟。不敢接統。臣奏調正定鎮總兵雲慶統轄該軍。而霆軍各將領。又畏雲慶之嚴明。公稟不願隸其部下。五月之季。雲慶自直隸馳至金陵。臣與之商酌。該提督以霆軍人數太多。彈壓匪易。各將領共事已久。勢分本相等夷。雖公稟不過出于一二人之私意。而情意既有未孚。臨急必難得力。不敢冒昧接統。臣又與李鴻章及湖北督撫兩臣。往返函商。余謂代統全軍。固難其人。分統各軍。亦非良策。遂定分別撤留之議。霆軍之制。步隊每營六百人。馬隊每營二百四十人。步隊苦戰多年。爲賊所憚。馬隊募練未久。尙無威名。于是酌定先撤馬隊十二營。步隊六營。尙留步隊十四營。暫由臣弟國荃主持調度。仍令宋國永駐營照料。一面即令雲慶馳赴安陸府。另招步隊九營。俾已撤者可應新營之募。新招者仍係慣戰之兵。由臣分別檄行去後。正在籌辦間。續奉六月二十一日寄諭。一譚廷襄奏。此軍人數較衆。內多降勇。一議遣撤。勢必藉端索餉。枝節橫生。祇可議分。不可議撤等語。所奏不爲無見。著會國藩李鴻章設法籌辦。總期駕馭得宜。毋滋事端。一等因欽此。臣早夜籌思。亦嘗深慮及此。故不敢以未定之事。遽行入告。仰煩宸念。茲據宋國永馳報。于七月初一日起。至初四日止。先遣步隊六營。次遣

馬隊十二營。籌給口糧。收回器械。各弁勇悉遵其東。並無浮言。間有不法之勇。欲肆煽惑。立即查獲正法。其違撤之勇。有回籍歸農者。有至婁雲慶新營應募者。各弁勇悉遵其便。既已安靜。則沿途必不至另滋事端。宋國永辦理此事。極爲妥協。所留之十四營。現仍駐紮襄陽之八條岡。該軍若防堵鄂境。必可得力。若令征勦外省。則宋國永久勞之身。苦求卸肩。臣亦慮其過於慈柔。難勝重任。容當熟爲籌商。奏明辦理。其霆營馬隊。既撤之後。內記名提督譚勝達。唐仁廉。曹志忠等。均係著名驍將。臣令其酌帶鞍馬。另募北人。附入淮軍步隊之中。會同勦賊。現經李瀚章等檄令挑選精騎一千匹。帶赴濟寧。歸李鴻章調遣。大約馬隊雖撤。仍須就現有馬匹。補招足額。不過裁減南勇。多換北人。改霆軍之名目。就淮勇之範圍。以便會勦一路耳。至婁雲慶新招之營。已據稟報于六月二十八日。前赴安陸府開招。將來募練成軍。飭駐何處防剿。宋國永既不能遠征。或將其部下各營。酌量撥歸某部統轄。均俟另案陳奏。所有霆軍分別撤留。並檄婁雲慶另募新軍緣由。恭摺由驛四百里馳奏。伏乞皇太后皇上聖鑒訓示。謹奏。

籌撥直隸安徽協款試辦導淮摺 同治六年七月二十九日

奏爲遵旨籌撥直隸安徽協款。並另行籌款試辦修復淮瀆事宜。恭摺仰祈聖鑒事。竊准部咨覆奏候補四品京堂彭祖賢奏旱災較重。請籌賑濟一摺。議提江蘇釐金銀二十萬兩。解京支放等因。同治六年五月二十六日具奏奉旨依議欽此。又准軍機大臣字寄。同治六年七月初三日奉上諭。江海關應協皖餉。前經部議照常撥解。現在皖軍出境防堵。需用甚亟。著會國藩郭柏蔭迅爲按月籌撥。一等因欽此。臣查直隸賑銀皖省協餉。均屬必不可緩之事。而此二事之外。尚有爲時較緩。而需款尤鉅之事。本年二月間。淮揚紳士公稟。請復淮水故道。臣以費用須百餘萬金。無款可籌。不敢批准。而念上年清水潭之變。官帑之用。出及少征者已逾百餘。民間所失之數。尙不止此。目覩淮揚民困。又復不忍批駁。遲之數月。始議定撥銀試辦。以上三端。共需銀數十萬。加以皖淮之緊餉。實有不敷周轉之勢。請爲皇太后皇上。粗陳其略。卽如直隸賑銀一項。下籌撥查江蘇釐捐。共分三處。一爲江北釐金。除指供甘餉每月三萬外。并無盈餘。一爲蘇州釐局。一爲松滬釐局。除認供淮軍巨餉外。尚有淮揚太湖兩支水師月餉。撫標兵丁額餉。織造大運等項。皆於釐局取之。此外入款。又有鹽釐。茶釐。關稅三宗。出款又有陝

西湘軍之餉。湖北靈軍之餉。漕臣月協之餉。章詒轉運之費。製造軍火之費。近日師集膠萊。又添米糧海運之費。款目浩繁。支應終無。以入抵出。本年尙短銀七十萬以外。斷無餘力分撥他處。惟直隸爲根本重地。無論如何。爲難。必應設法籌濟。臣現飭令蘇州布政司丁日昌。于地丁項下。籌銀六萬兩。分批解京。以供支放。此外實難再撥。仰求聖慈。曲賜體諒。安微協餉一項。自部定江海關協餉二萬兩後。以無款可籌。從未起解。喬松年在安微巡撫任內。院管十分支絀。而未經奏催。江海關一款。卽英翰上年請留丁漕摺內。屢數各省協餉。亦未議及此款。皆深知關稅短絀。無可勻撥也。目前英翰出省防剿。需餉甚亟。奏催海關協餉。自係萬不得已之舉。臣亦諒其苦衷。當英翰未催關稅之先。臣於六月就淮軍月餉項下。騰出銀一萬兩。解皖濟用。七月。又籌濟銀一萬兩。解交宿遷行營。此後八九月。尙擬籌濟二萬兩。共湊四萬兩。以助皖軍需要。八月以後。英翰奏留之丁漕三萬。必可按月提用。不至十分支絀。江海關之常稅洋稅入款。戶部及總理衙門皆有案可稽。所有月餉皖餉二萬。無以應之。擬請旨卽行停止。以歸核實。江皖皆臣管轄。斷無漠視之理。今年除四萬兩外。如力能再撥少許。不必指定何款。臣當與英翰熟商辦理。至興復淮水故道一事。金明昌年間黃河奪淮瀆之道。自是七百餘載。水患頻仍。咸豐初年。黃河北徙。軍事方殷。未暇導淮水之故瀆。并未暇修運河之長堤。上年清水潭隄決。爲害甚大。此外可決之處尙多。淮水之患無已。雖復瀆之大利。不敢必其遽興。然淮揚之大害。不可不思稍減。減害之法。不外分淮流以入故道。或從成子河分淮以出桃源。或從張福口分淮出清口。總須興工以減運河之漲。擬本軍撥銀十萬兩。在雲梯關以下試辦挑濬。并於清江設立導淮局。從容籌議。不求速效。但求實際。此事辦成與否。未敢預必。而爲糜餉之大宗。不敢不預行陳明。上瀆震聽。並將公呈一件。章程十六條。有利無害論一篇。及臣批答一件。彙錄咨送軍機處。以備查核。臣素不善籌餉。江南財賦之邦。又斷不能求助于外省。計今歲湘淮各餉本短銀七十萬。加以直隸賑濟及協皖導淮三事。又增二十萬。均屬無款可指。俟冬間設法籌措。再行具奏。導淮大工。如果興辦。需銀百數十萬。尤屬無款可指。俟明年設法籌措。再行陸續陳奏。所有遵旨籌撥直隸安微協款。及試辦興復淮瀆緣由。謹會同漕運總督臣張之萬。署江蘇巡撫臣郭柏蔭。恭摺馳陳。伏乞皇太后皇上聖鑒訓示。謹奏。

籌撥丁卯大運銀兩片 同治六年七月二十九日

再江南織造春年。奏請添撥丁卯大運銀兩一摺。經部議覆。請旨飭臣按照所奏撥銀五六萬兩之數。籌款接濟等因。又准春年兩次文稱。造辦處移會同治六年三月二十一日傳旨。著總管內務府大臣傳知造辦處。照交下應預備皇后所用等項活計。畫樣一分。傳辦活計單一件。繕寫紅摺一分。傳交江南織造。妥爲辦理等因。欽此。又造辦處移會同治六年五月二十四日奉旨傳江南織造。上使五色纈金絹五百張。硃紅絹疋方一百張等因。欽此。咨商籌款前來。臣查江寧織造。承辦年例大運。同治四年四月。曾准戶部咨到覆奏一摺。聲明每年內務府並戶工兩部暨陝西總督辦解緞紗。共用藩庫工料銀五六萬兩不等。係按照乾隆嘉慶年間舊例言之。其時東南全盛。物力豐裕。每年例支。尚不過五萬兩。今則兵燹之後。公私窮窘。陝甘年例。久已停解。部派緞匹。不責取盈。每年籌撥銀三萬兩。在織造尙可擇要辦運。在藩庫實已竭力供支。本年丁卯大運銀兩。仍照丙寅年例。籌撥三萬兩。陸續解交織造衙門應用。實難再增。其造辦處所傳五色纈金絹等項。及零星傳辦之件。不能不於大運之外。另籌補撥之款。擬自本年起。每年撥銀五千兩。交織造撙節支用。統俟數年之後。軍務平定。庫款充裕。再行核議添撥。請旨遵行。至皇上大婚需用之件。自較尋常傳辦。迥不相同。必宜認真籌備。惟繕活計等件。總以顏色鮮明爲上。若爲時過早。轉恐色不新鮮。非所以昭誠敬。擬請皇上大婚擇吉有期。於一年之前。明降諭旨。由禮部行知各省。所有應用各件。一一敬謹預備。似於期限尙覺從容。而辦理益昭鄭重。理合附片陳明。伏乞皇太后皇上聖訓示。謹奏。

甄別府縣等官摺 同治六年九月十八日

奏爲甄別府縣等官以肅吏治。恭摺仰祈聖鑒事。竊臣自回任兩江以來。舌蹇之證。迄未全愈。屬僚之來謁者。未能時時接見。深愧察吏未精。不敢輕加舉劾。惟隨時留心查訪。屢飭江寧布政使李宗羲。江蘇布政使丁日昌。暨安徽司道。詳察密陳。探諸輿論。證以案牘。謹就事之已著者。甄別一二。以儆其餘。查有徐州府知府邵雲鶴。公事顛頂。情多偏徇。辦理碭山縣馬公田私築圩寨一案。措置乖方。經臣批令撤任。應請旨即將邵雲鶴開缺。留省察看。另候酌補。江蘇升用知府候補同知直隸州金鴻保。於署丹陽縣知縣任內。抽收補捐。以多報少。且在上海駁開合隆漕鋪。與民爭利。應請將金鴻保卽行革職。江蘇新陽縣知縣戴元鼎。辦理五年冬漕。任聽丁書需索。控案

疊見不協輿情。該員係舉人出身。文理尙優。應請將戴元鼎以教職改用。署江蘇宜興縣知縣鄭漪菴。荆溪縣知縣張喬林。五年冬間。辦理畝捐。於詳案外。畝收之田。私行派捐。現經該藩司詳請參辦。本應嚴劾。惟該二員平日心地尙屬長厚。鄭漪菴係進士出身。應請以教職改用。張喬林請以府經歷降補同知銜。安徽寧國縣知縣張志學。以請應兵差爲名。苛派民間出錢。又以考費爲名。勒捐肥己。以酷濟貪。應請將張志學即行革職。永不敘用。署安徽南陵縣知縣蔚元昆。淨收錢糧價值。勒派鄉保冊費。民怨沸騰。雖爲時未久。即行撤任。未便稍事優容。應請將蔚元昆以從九品改用。以上各員。均于廉明二字相背。爰就已著之劣績。參觀平日之心術。權衡輕重。稍示勸懲。冀於吏治民生少裨益。所有甄別府縣等官緣由。謹繕摺具陳。伏乞皇太后皇上聖鑒訓示。再新陽縣荆溪縣均係選缺。江省現有應補人員。應請扣留外補。合併聲明。謹奏。

烈婦程胡氏請旌片 同治六年九月十八日

再安徽績溪縣附生程光輔之妻胡氏。於本年七月初六日。在江寧省城夫死殉節。先是臣設立兩江采訪忠義局。派程光輔之兄程光國分任其事。程胡氏素聞奇節芳行。敬而慕之。本年六月二十一日。其夫程光輔染患時疾。程胡氏知其病將不起。即有「生死相從」之語。七月初一日。程光輔身故。程胡氏斷絕飲食。家人環勸。矢志不移。至初六日。凡不食六日而死。由安慶江寧兩省在籍紳士何慎修等呈請具奏前來。臣查定例。各省烈婦。由督撫專案具題。應否予旌。請旨定奪。歷數成案。均蒙聖恩。准予旌表。程胡氏以兵燹餘生。僑寓金陵。矢志殉夫。從容就義。該紳士等不期往弔者數十百人。無不歎息泣下。臣見聞所及。不忍聽其湮沒。合無仰懇天恩。准即照例賜旌。以彰貞烈。謹會同安徽撫臣英翰附片具陳。伏乞皇太后皇上聖鑒訓示。謹奏。

李朝斌本姓王氏請仍歸李氏片 同治六年十一月初二日

再江南提督李朝斌。本姓王氏。襁褓中爲李氏父母撫養鞠育。至于成立。迭遭艱虞。王氏本生父母。隔絕不相聞問。李朝斌初不自知爲王氏所生也。本年三月間。有善化人王正儒來臣處稟稱。李朝斌係所生季子。自幼育於李氏。請飭復姓歸宗等語。臣當即詢之李朝斌。究竟是否有因。李朝斌茫然不解。即寄書至家。詢其族叔李傳誠等語。據詳告顛末。蓋李朝斌未生以前。王氏本生父母。已有子三人。世俗之見。以多子爲累。王正儒與李朝斌之

父相識。故指腹訂定。墮地後卽任聽李氏攜去。王氏父母。固已棄之如遺矣。事隔四十三年。忽有呈請復姓之議。李氏族人謂王氏恩誼已斷。寄書詳論。極陳不應歸宗之義。其言亦頗中肯。臣復加查核。此事關係綱常名義。未可憑空臆斷。查本朝言禮之書。尙書秦蕙田所纂五禮通考。最爲精核。其於異姓爲後之事。反覆辯論。一以原情爲主。所引金史張詩一事。詩本李氏子。育於張氏。閱三十年始知之。初議歸宗。終以張氏無子。遂仍其舊。秦蕙田稱張詩爲孝子。今王氏本生之父母有子三人。而李氏撫養之父母。別無主後。正與張氏之事相類。伏查例出嗣之子歸宗。亦以所後父母有無子嗣爲斷。若令李朝斌歸宗。則在王氏本生之父母。不過于三子之外。又增一子。而在李氏撫養之父母。竟至斬焉不祀。撫子者將抱恫于九泉。爲子者將難安于畢世。核諸古禮。參以今律。李朝斌應于李氏別爲一宗。但後其撫育之父母。而不祭其以上之祖宗。于王氏則不通昏姻。一以報顧復之深恩。一以別族屬之大義。其于王氏之父母。則曲盡敬養。庶爲兩全之道。該提督天性純摯。未忍自決。臣爲之參酌定議。詳晰批示。偏告宗人。情義既可兼盡。衆論亦已僉同。惟以提督大員。異姓爲後。必應奏明立案。以昭鄭重。而垂久遠。用敢詳陳本末。上達宸聰。伏乞皇太后皇上聖鑒訓示。謹奏。

籌辦本年江北新漕摺 同治六年十一月初二日

奏爲查明本年江北新漕徵解實數。現在籌辦情形。恭摺具陳。仰祈聖鑒事。竊臣承准軍機大臣字寄。同治六年九月十四日奉。上諭。戶部奏來歲海運河運新漕。請飭各省力籌足額。提前趕辦。一摺。江北漕糧。仍當遵照成規。妥速兌運。一等因欽此。遵經轉飭江寧藩司會同江安糧道。妥速籌辦。茲據會詳前來。查江北漕糧。自咸豐三年後。概徵折色。截留充餉。同治四年。揚防凱撤。是年冬漕。各州縣仍每石折解銀二兩四錢。節存銀一兩。臣李鴻章等奏明民折官辦。以漕米四萬石。試行河運。餘米三萬石。照部定變價每石解銀一兩四錢。節存銀一兩。貼補河運之費。五年冬漕。因高郵漫口。僅徵揚通等府所屬熟田漕米一萬四千餘石。奏准全數截留。撥補江寧各標營兵米。此軍興以來。江北歷年冬漕徵解之章程也。本年春夏苦旱。秋後雨水盛漲。補種之晚稻。又被水淹。現據勘定歉收分數。除徐州府屬變價解充徐臺軍餉。海州等七屬向徵折色外。統計淮揚通三屬。應徵熟田。起運糧正。改兌正耗米六萬九千六百八十餘石。內應請截留撥補災缺綠營兵米九千四百石有奇。實應起運本色米

六萬二百石有奇。其截留之米。同日另片具奏。此本年起運正漕之實數也。現當京倉匱乏。民間維正之供。自願飭解本色。第江北折徵已久。民間完納稱便。宜各州縣廢倉未修。收米無處儲積。祇可仍按折價徵收。現飭各州縣酌減收米之價。以恤民艱。並准各州縣將應解漕米變價。每石減銀三錢。實解銀二兩一錢。仍由官買米辦運。盈餘之款。即作運米之資。此本年徵解之情形也。查起運通倉米石。自漕船停廢以後。驟難重整舊章。部臣力籌河運事宜。原圖規復全漕大局。無如黃水穿運。如張秋南壩頭等處。節節淺阻。逐段加挑。而淤墊太甚。仍盼大雨盛漲。始得通行。然同治三年。雖得長運抵通。而原船不能回空。船戶折賣板料。怨讟滋多。同治四年。不能長運抵通。另于臨清一帶。換船刺送。計運漕及盤剝等項。每石約合銀三兩七八錢。山東挑河之需。猶不在內。本年江北六萬石之米。爲數無多。實不致再爲試行。耗費巨款。臣等督飭司道。再四熟商。不如仿照蘇浙章程。併歸海運。在江北雖屬創舉。然較之河運之費。所省正復不少。現查上海沙船衛船甚少。不敷蘇屬運米之用。須待來年三月。頭批回空。方得裝運江北之米。上屆江北河運。係至次年五月。始得北行。如用上海頭批回空之船。不過旬日抵津。似較河運猶爲迅速。惟春令米價必增。各屬折價。一時不能解到。現飭司道庫先行籌墊。委員分赴產米地方。趕緊探買。設法存儲。俟明年三月。蘇屬海運沙船回空。即空前項漕米六萬二百石零。全數海運。屆時萬一沙船太少。尙可雇用夾板裝載。倘或別有窒礙。無船可用。仍可將所買之米。變價解京。不致延誤。所有籌辦本年江北新漕緣由。謹會同漕運總督臣張之萬。署江蘇巡撫臣郭柏蔭。恭摺陳奏。伏乞皇太后皇上聖鑒訓示。謹奏。

預籌明年協甘餉銀摺 同治六年十二月初三日

奏爲遵旨籌解明年協甘餉銀。恭摺仰祈聖鑒事。竊臣先後承准軍機大臣字寄。同治六年九月初七日奉上諭。飭臣將每月應協甘餉解到湖北糧臺後。即飭轉交穆圖善委員史敬銘收領。等因欽此。同治六年十月初七日奉上諭。「穆圖善奏請飭催各省協甘餉銀。並籌撥雷正綰軍餉。飭臣迅將奏定協甘餉銀。按月如數撥解。以收飽騰之效。」等因欽此。同治六年十一月初三日奉上諭。「張之萬奏以金陵釐局月協甘餉。臣迅將奏定於本年十二月。可將江海關借項抵清。擬自明年正月爲始。於此款內勻撥一萬五千兩。以願清准餉需。下餘一萬五千兩。仍協甘省。著會國藩酌酌緩急。妥爲籌撥。」等因欽此。臣查清准餉需。從前吳棠在任時。並無常協之款。本

年五月起。臣按月協濟四千兩。嗣經漕臣張之萬奏請。每月撥銀二萬兩。續又函復臣處。減爲每月六千兩。已於十一月由運庫解過一次。此後仍當源源撥解。漕臣辦理清淮防務。稍有疎失。是江蘇境內切近之災。亦微臣分內難寬之責。臣斷不敢稍存膜視。惟前次張之萬增餉之謀。實爲添兵之計。目前任逆就殲。淮軍屢捷。六塘河守局已定。無須添兵。就清淮本有之餉。加以臣處協濟之款。已可按月敷衍。無庸另籌。至江南協甘之三萬兩。本係指定江北釐金一款。去年以來。水旱頻災。釐金減色。臣回任後。以他款籌補。仍足三萬之數。本年四五六三個月。奏明以一萬兩解陝西。以二萬兩解甘肅。七月以後。左宗棠有洋商借款。在江關海劃抵。扣至十二月。借款十八萬。業已抵解完竣。明年自應另行籌議。若以一萬五千兩分給清淮。就本境之錢。協本境之軍。多寡尙可通融。於臣豈不甚便。惟甘肅艱險情形。實爲各省至苦之區。權衡緩急。不能不先儘甘餉。臣擬從明年正月。起每月仍籌足三萬兩。全數解交甘肅。以一萬兩協濟穆圖善軍營。遵旨解至湖北。轉交穆圖善委員史敬銘收領。以二萬兩協濟左宗棠軍營。交留滬委員胡光墉領解。其張之萬軍餉。如實缺乏。臣仍當設法籌濟。以免貽誤。所有籌解明年協甘餉銀緣由。理合繕摺覆陳。伏乞皇太后皇上聖鑒訓示。謹奏。

江寧建立軍營官紳昭忠祠摺 同治六年十二月初二日

奏爲江寧城內建立軍營官紳昭忠祠恭摺仰祈聖鑒事。竊臣於同治三年十月二十二日。奏請於江寧省城建立昭忠祠。專祀湘軍陸師陣亡各員弁。嗣於本年六月初十日。奏請增祀水師陣亡各員弁。均經奉旨允准在案。惟江寧自咸豐三年淪陷。向榮和春等駐兵入城。陣亡之文武將弁。殉難之官紳士民。爲數極多。尙未建祠崇祀。實爲闕典。前准禮部咨稱。同治五年五月十六日奉上諭。御史朱鎮奏請飭查殉難官紳。建立專祠等語。咸豐三年間。粵逆竄擾江寧省城。所有殉難之將軍祥厚等。及紳士曹森等。或臨陣捐軀。或積勞病故。均堪憫惻。著准其在江寧省城建立忠義專祠。卽著李鴻章將江寧前後殉難各官紳詳細查明。一併附祀。其迭次殉難之民婦。著該署督查查明。一併奏請建祠。以表忠藎。而彰節烈。欽此。前署督臣李鴻章遵旨飭派委員于城東關帝廟左側。建立一祠。甫經落成。未遑經理。卽已督師北征。臣回任之後。親往查驗。見其地隘宇卑。規制多闕。祠中未立粟主。婦女別無設位之處。寸心慙焉不安。旋值秋祭之時。勘得湘軍昭忠祠在城北蓮花第五橋。係克城之初。就僞

王府路加修葺者。工程雖稍簡陋。地基極爲寬宏。因與僚屬集議。就該處並建三祠。中祠仍爲湘軍陸師昭忠祠。但拆其舊者。改建後棟兩廡。東邊新建金陵軍營官紳昭忠祠。西邊新建湘軍水師昭忠祠。俾各省各軍。前後抗志捐軀者。忠魂毅魄。萃于一處。官旣免于分祭。民亦便於瞻瞻。始覺理得而心安。其三祠應祀人數。中祠應祀湘軍陸師將士。甲子冬間。已查明一萬二千餘人。各立神牌。應仍其舊。西祠祀湘軍水師將士。因先於咸豐八年奏准在江西湖口縣之石鐘山建有總祠。設立木主。此間僅祀水師營官及九洲殉難之員。爲數較少。查辦較易。惟東邊一祠。應祀之人最多。稽查之事最難。綜舉大綱。約有六端。一曰咸豐三年金陵城陷。滿漢文武殉難之員。二曰自癸丑至庚申八載。向榮和春營中陣亡及病故之員。三曰江寧七屬。歷年殉難之紳。及外籍而寓居金陵遇害之紳。本籍而陣亡於外省之紳。四曰生平久居金陵大營。其後盡節他處。如鄧紹良周天受張玉良之類。五曰揚州鎮江兩軍。皆因圖克金陵而設。兩處傷亡陣亡病故之員。亦應附祀省城祠中。六曰金陵滿漢婦女。不屈而死者。應別立貞烈祠祀之。臣現派道員杜文瀾楊鍾琛朱履恆查此大色人等。詳考事實。書立神牌。同享明禋。期無遺漏。派道員桂嵩慶鳩工庀材。悉求堅實。約計明年二月。祠工可以蒞事。合無仰懇天恩。明降諭旨。准立金陵軍營官紳昭忠祠。飭令地方官春秋致祭。前奉准建湘軍陸師昭忠祠。上諭一道。臣曾敬謹繕寫。伐石樹碑。此次欽奉諭旨。亦擬恭錄勒石。庶使雙碑並峙。千古不刊。聖謨與日月同昭。臣節偕山河並壯。於熙朝褒忠勸善之道。不無裨補。所有建立軍營官紳昭忠祠緣由。謹繕摺具陳。伏乞皇太后皇上聖鑒訓示。謹奏。

謝加恩賞世職摺 同治七年正月十七日

奏爲恭謝天恩仰祈聖鑒事。竊臣接准湖廣督臣李鴻章咨開。同治六年十二月廿二日奉諭。大學士兩江總督一等毅勇侯曾國藩。加恩著賞一等雲騎尉世職。欽此。一當卽恭設香案。望闕叩頭謝恩。訖伏念臣勤辦捻匪。一年有餘。愧籌策之不臧。無成功之可指。仰蒙聖慈曲宥。飭回本任。雖溼荷夫溫綸。實抱慚于衾影。仰托聖主如天之福。兼賴諸將累歲之勞。遂使巨憝就殲。餘氛盡掃。定謀以李鴻章爲主。論功以劉銘傳爲先。微臣區區。何力之有。乃荷恩賚下頒。濫膺非分。在朝廷加恩無已。始終皆寬大之仁。在微臣省咎不遑。夙夜切冰淵之懼。撫衷循分。祇益悚惶。惟有慎以持躬。勤以補過。抒遠謀以禦外患。布實惠以蘇疲氓。庶期仰答高厚鴻慈于萬一。所有

微臣感激下忱。理合繕摺恭謝天恩。伏乞皇太后皇上聖鑒。謹奏。

擬補長江水師各缺續陳未盡事宜摺 同治七年二月初五日

奏爲擬補長江水師各缺。並續陳未盡事宜。恭摺仰祈聖鑒事。竊長江水師營制事宜。臣等會同定議。于同治四年十二月二十八日具奏。欽奉諭旨。敕下軍機大臣會同該衙門妥議具奏。嗣于五年八月初七日。准兵部咨開。逐條會議具奏。奉旨允准。又于六年十一月初十日。接准兵部咨。催長江所設各缺。均未奏補有人。飭令迅速揀員請補。以專責成。而符定制等因。先後行文到臣。查各路水師。以臣玉麟所部內江水師。及前陝甘督臣楊岳斌所部外江水師。閱時最久。人數最多。楊岳斌赴陝甘之任。將水軍調改陸路者。居其大半。留江人員。爲數已減。此外又有黃翼升所部外江水師。李朝斌所部太湖水師。而江西湖南湖北三省水師中。亦各有資格較深。功績較著之員。臣等公同商酌。以各軍立營之先後。分此次得缺之多寡。遵照奏定章程。以大銜借補小缺。各加遴選。開單咨送。臣國藩臣玉麟。復加稽核。其岳州漢陽湖口瓜州四鎮總兵。擇其勞績最著。足膺閫寄者。擬定四員。請旨簡放。其副參游三項。營官二十四缺。都守千把外委七百七十四缺。擬定員名。分析開單。恭呈御覽。伏查定例。武備自守備以上。選補各缺。均須引見補授。此次設立長江水師。百事創始。分防汛地。嚴定營規。雖以久募之勇。改爲經制之兵。似若易于就緒。而裁撤各軍。以此營而歸併彼營。配補各缺。以江境而互調楚境。實覺頭緒繁多。非數月半年所能定局。相應奏明。請旨暫緩引見。敕部先行頒給劄付。以昭信守。仍俟立營停妥。各歸本汛。後由部中分年分起。調取引見。乃可從容料理。原奏所議事宜三十條。經部臣核復允行。立法已屬周密。惟製立水師。造端宏大。不厭詳求。茲將未盡事宜。續議十條。另開清單。恭求訓誨。溯查咸豐三年。衡州試辦水師之始。初非有舊例之可循。亦非能一辨而即妥。大抵屢試屢變。漸推漸廣。前月所立之法。後月覺其不備。而又增之。今歲所行之事。明歲覺其不便。而又改之。卽如因船中無主。而始設哨官。因棲止不便。而始加雨篷。因巨艇不甚靈括。而全用舢板。因弁勇不可陸居。而另給座船。若此之類。皆履之而後知。試之而後改。遠規模之粗定。遂習慣而成常。新舊所擬事宜四十條。皆就習慣者而著爲令典。在目下已不敢謂立法之善。將來時移事異。更恐有窒礙難行之處。且法待人而後舉。苟非其人。則雖前賢良法。猶或易啓弊端。况臣等才智短淺。創議新章。深慮弊竇之叢生。致煩

後人之譏議。夙夜兢兢。不勝祗懼。所願數十年後。濱江之督撫提鎮。隨時損益。以補今日之闕味。遇事講求。以冀將來之輩出。庶幾有舉不廢。歷久常新。則臣等所禱祀以求者也。其請鑄關防清單。請裁各缺清單。一併開列。恭呈御覽。請旨敕下各衙門。議覆施行。所有擬補長江水師各缺。並續陳未盡事宜。緣由。謹會同湖廣總督臣李鴻章。漕河總督臣張之萬。江蘇巡撫臣丁日昌。署安徽巡撫臣吳坤修。江西巡撫臣劉坤一。護理湖北巡撫臣何璟。湖南巡撫臣劉峴。長江提督臣黃翼升。恭摺具奏。伏乞皇太后皇上聖鑒訓示。謹奏。

謹將長江水師前奏未盡事宜。續行定擬。開單恭呈御覽。

第一條 頒發關防條記

一、請鑄關防。于官街上均冠長江水師字樣。如四鎮總兵。岳州鎮曰長江水師岳州鎮總兵官關防。漢陽鎮曰長江水師漢陽鎮總兵官關防。湖口鎮曰長江水師湖口鎮總兵官關防。瓜州鎮曰長江水師瓜州鎮總兵官關防。狼山鎮仍循其舊。副參游都守等官。請鑄關防條記字樣。另開詳細清單。呈御覽。各營均用本汛地之名。如荊州則曰荊州營。陸溪口則曰陸溪營。皆就府縣口岸之名。以爲營名。其草鞋夾地名太俗。改名曰金陵營。准提標中營。不刻汛地之名。至前奏所擬之綏通營。綏海營。茲亦改名曰通州營。海門營。使人易曉。其千把外委等官。即由外刊刻鈐記。以昭信守。

第二條 酌釐釐卡充餉

一、原奏第十六條內。戶部議酌留沿江釐卡。供給水師製造軍火器械船楫。以各處商貨暢滯。時地不同。經收數目。難以懸定。多則中飽。少則貽誤。餉需不可不預杜其弊。應如何酌盈劑虛。俾垂久遠。妥籌章程。奏明辦理等因。臣等查長江水師兼轄三省。所需餉項。合之則見多。分之則見少。應于三省各留釐卡一處。湖南即留岳州一卡。湖北即留漢口一卡。江西即留湖口一卡。安徽即留大通一卡。江蘇即留瓜州一卡。岳州漢口兩卡。所收之釐。每年每卡。各提十餘萬兩。解交湖北鹽道衙門。供支水師之用。其餘入款。仍歸兩湖藩司收用。湖口大通瓜洲三卡。所收之釐。每年每卡。各提十餘萬兩。解交江寧鹽道衙門。供支水師之用。其餘入款。仍歸三江藩司收用。歸水師用者。由江楚總督報銷。歸藩司用者。由該省巡撫報銷。俟水勇裁撤完畢。經制水師立定之後。

此五處卡員。卽由江鄂兩鹽道。會同該省藩司委員經收。自此五卡之外。各省釐卡。俟軍務大定。本應全行裁撤。倘有願留一二卡。添補永遠經費者。由各督撫體察。專案奏辦。

第三條 裁撤水勇日期

一、原奏第二十三條內戶部議。江南軍務大定。所有各營勇丁。自當陸續遣撤。酌留水勇。改爲經制水師。應令將遣撤勇丁數目。何時撤盡。糧額何時起支。一併奏報等因。臣等查長江水勇。向分內江外江兩軍。除留補缺額外。所有內江一軍水勇。已經臣彭玉麟陸續遣撤。其數目業經咨報兵部在案。其外江水勇。此次奏定補缺一案。卽將勇目次第裁撤。俟撤盡。再行咨報。此外尚有淮揚水勇一軍。太湖水勇一軍。原議第五條內。另設淮揚經制水師。太湖經制水師。現已將大概規模議定。臣國藩擬于一兩月內。會奏定案。俟經制水兵之案奏定後。卽將淮揚水勇太湖水勇遣撤。陸續具報。

第四條 派船巡查私鹽

一、原奏第二十七條內。戶部議。礮船爲長江利器。以之巡緝私鹽。固最便利。而包庇私鹽。實難稽查。若不嚴定章程。將來弊竇叢生。隱政因此而壞。營制卽因此而弛。關係實大。應令提督會同江楚總督公同遴選師船。奏派若干隻。另立旗幟字號。仍令兩淮鹽運使及湖北鹽道。會同各營。嚴密查訪。其未經奏派之哨船。不准干預鹽務。如有包庇私鹽。官則參辦。兵則比照尋常私梟。加等治罪。其如何明定官兵處分罪名。應令悉心酌擬。奏明定案等因。查前奏由漢陽瓜洲兩鎮標派船巡緝私鹽。茲定瓜洲鎮派巡鹽船三號。一年一換。歸湖北鹽道暨督銷局稽查。其餉卽由督棧委員稽查。其餉卽由瓜棧支發。漢陽鎮派巡鹽船三號。一年一換。歸湖北鹽道暨督銷局稽查。其餉卽由督銷局支發。所巡不過上下四十里。不准太遠。以防流弊。此外戰船一概不准干預鹽務。至弁兵包庇私鹽。或失察。或知情。或受賄。或通同與販。各有本例。將來應按照情節問擬。毋庸另立處分罪名。轉啓遷避之漸。

第五條 酌定礮械旗幟

一、原奏第七條內。工部議。「戰船應配旗幟礮位等項。應令查明各船應配何項礮位。旗幟器械若干。卽將名目件數。造冊送部查核」等因。查長龍戰船頭礮二位。係洋莊。各重八百斤。一千斤不等。邊礮四位。洋莊。各重

七百斤。梢礮一位洋莊。重七百斤。舳板戰船頭礮一位洋莊。重七百斤。八百斤不等。梢礮一位洋莊。重六百斤。七百斤不等。兩邊轉珠小礮二位。重四五十斤不等。此外洋鎗烏鎗刀矛之類。隨宜分配。至戰船旗幟。悉以桅旗並梢旗爲主。凡桅上用方旗。長龍船桅旗長一丈二尺。寬七尺。舳板戰船桅旗長九尺。寬六尺。上半節俱用紅色。下半節俱用白色。或畫北斗。或畫太極圖。或畫如意的類。提鎮各標各畫一樣。以示區別。船梢用尖角旗。長龍梢旗長一丈一尺。寬九尺。舳板梢旗長九尺。寬七尺。均寫明某標某營某哨字樣。此外各標各營哨。或桅上添一小旗。或船頭設一立旗。或寫姓號爲記。顏色制度。各聽其便。

第六條 更換額缺官階

一、岳州漢陽湖口瓜洲四鎮中軍游擊營制。惟岳州漢陽兩鎮用船三十三號。其湖口瓜洲兩鎮中軍。僅用船二十三號。該兩營地當衝要。不敷分布。瓜洲又有應派巡鹽之船。尤嫌其少。查原奏第七條。長江提鎮例給坐船外。各給督陣舳板二號。以守備爲哨官。本應設立守備十二缺。茲將此十二缺裁去。撥六缺歸湖口中軍營。撥六缺歸瓜洲中軍營。改爲守備各一缺。千總各二缺。把總各三缺。各成十二缺之數。與原奏七百七十四哨總數相符。而四鎮中軍船數。亦不致多寡懸殊。所有提鎮督陣舳板之兵丁。由中軍派員管轄。

第七條 議裁舊日額缺

一、原奏第二十九條。京口狼山湖口漢陽岳州等營。凡向有水師之名。而無礮船之實者。今各該處均立標營。應改從新章。悉歸長江水師提督節制。以昭畫一。其向無水師名目者。不必更改等語。查原議之意。濱江舊設之水師。仍不裁革。不過改歸長江提督節制而已。近來細加講求。舊營斷不能與新營相合。舊制雖名水師。而無船無礮。官員各有衙署。新章則水師專以船礮爲主。自都司以下。卽無衙門。以船隻爲辦公之所。舊制雖名水師。不過月支一兩至二兩爲止。新章則水兵口糧月支二兩七錢。而官員之俸薪養廉船價。亦與舊制迥別。舊營水兵口糧。不過放礮等事。新章則專重使船放礮。若將舊營與新營並存。則規制懸殊。必生缺望。若令舊官補新營之缺。則舟居不慣。必難得力。再四籌思。迄無善策。惟有將濱江舊日水師酌量裁去。如湖北原設之荊州參將營。漢陽副將營。湖南原設之洞庭水師營。岳州水師營。江西原設之鄱湖南湖九江水師營。均應裁

去。所裁之缺。副將參將游擊都司等。均請兵部另行調補陸營實缺。守備千把外委等。均由該省督撫另行調補陸營實缺。其未經調補以前。仍在原省支食本缺廉俸。其兵丁則竟行裁去。無庸另募。茲將應裁各缺。開單進呈御覽。至長江水師。西至荊州爲止。其自荊州以上。泝江至宜昌巴東。原奏事宜第五條聲明。另由湖北設防。所有宜昌鎮標水師三營。應仍其舊。但歸湖北督撫提督統轄。不歸長江提督節制。又如江南舊有京口水師副將三營。及狼山以東各水師舊營。現擬將江蘇水師認真整理。或裁或改。由臣國藩另案奏辦。

第八條 各省督撫節制

一、長江水師。雖以提督爲主。而在五省境內。應各歸五省督撫節制。調遣副參游以下。歸本境巡撫節制。總兵並歸總督節制。即以湖南而論。去太平府提督衙門甚遠者。若該省土匪竊發。須用戰船勘辦者。即由湖南巡撫檄調境內水師往勤。岳州鎮總兵接到咨檄。立即發兵。不可等候長江提督回文。致誤軍機。湖北江西蘇皖四省巡撫皆然。至總督調度轄境水營。尤屬通行之舊例。平日無事之際。督撫偶調水營操演。一接檄文。立即前往應操。不可藉口等候長江提督回文。致誤操期。蓋立法雖密。設或長江提督不得其人。則法皆不行。口糧既恐虛糜。船礮亦恐廢壞。若督撫中有一省認真者。則一省之水軍不至廢弛。有兩省勤操者。則兩省不致廢弛。自調兵調操兩事而外。凡水營政務。各督撫仍商之長江提督。聽候主持。

第九條 核定疎防處分

一、原奏第二十二條。遇有劫盜案件。即由長江提督專案參辦。而未將處分詳細聲明。查武職疎防搶劫案件。向例查明離汛里數。分別參處。有五里以內。五里以外之分。又有專汛協防兼轄統轄之別。今長江水師分布江面。自都司守備以下。即以座船爲衙署。本應隨時上下梭巡。不能指定汛地。五里之起訖。確在何處。擬以哨官爲專汛之官。營官爲本轄之官。遇有搶劫案件。專汛哨官。係何職名。應由該營官指出。初參仍照定例。四月限滿。題參疎防。專汛官住俸。本轄官罰俸六箇月。二三四等參向例一年限期者。酌量加重。改爲各予限八箇月。二參限滿。專汛官降一級留任。本轄官罰俸一年。三參限滿。專汛官加重降二級留任。四參限滿。專汛官加重降二級調用。不准抵銷。如汛守內有一夜連劫數次情事。仍照舊例。俟三箇月限滿。犯無弋獲。即將專汛官

降二級調用。本轄者降二級留任。毋庸立協防外委名目。亦毋庸議統轄官之處分。倘能于限內獲犯過半。兼獲盜首。均准免其參處。遵照原奏。自提督查明。隨時專案參辦。如提督遲不開參。即由督撫參奏。以示江面劫案。較陸路尤爲漢重。又有應酌議者。水師處分既已加重。則江中漁船。應概歸水師稽查管轄。向來江中水盜。均以漁船爲窩藏出沒之所。嗣後魚稅。仍歸州縣經收。漁船則歸水師編查。以清盜源。而一事權。

第十條 各營輪流更調

一、水師所重者。以船爲家。不准登岸居住。若永遠駐紮一處。則經年累月。戰船全不移動。必致廢弛朽壞。相率私造屋宇。棄舟楫而住室廬。不可不防其漸。茲定江楚各營。每逢半年更調一次。副將與副將之營互調。參將與參將之營互調。游擊與游擊之營互調。每營調居客汛二次。駐紮一年。又准調回本任一次。駐紮半年。其互調之或遠或近。聽提督隨時斟酌。總不令其廢弛安逸。依懸陸居而已。惟哨官之有疎防處分者。不准調動。以杜規避。

陸營借補小缺請飭部核議片 同治七年二月初五日

再武職各官大銜借補小缺。臣于六年五月十五日具奏。欽奉諭旨。允准在案。嗣准部咨。以同一軍營出力官職。大者補缺之途太廣。官職小者。補缺反致無期。不足以服軍心。而作士氣。仍應照章議駁。一等因。咨會前來。臣等此次奏補長江水師各缺。甚至以提督之銜。而借補千把之缺。未免駭人聽聞。然勇丁出身。入營之資格極久。例保之次數較多。而家中貧寒如故。情願補一小缺。爲終身衣食之資。此亦人之常情。臣等既不忍拂其意。而又取其入伍多年。可收駕輕就熟之效。伏乞皇上敕下該部議准。以從衆願。仍遵照兵部原議。將來此項人員用竣。不准再行借補。以示限制。至陸路人員。臣近來奏咨大銜借補小缺者。均經兵部議駁。在兵部之意。一則恐銜缺懸殊。名實不符。或有礙于體制。一則恐千把微員。永無升階。或屈抑乎人才。此等苦心。臣亦能曲體而深亮之。惟查軍與十餘年。凡綠營弁兵。略有才力膽識。無不奮迹行間。但有僥倖優保者。斷無屈抑未保者。是人才本無沈淪之患。若慮未弁永無升階。則請暫于此二十年内。准以大銜借補小缺。截至同治二十七年爲止。以後仍照舊例。按班序補。亦即兵部所云。此項人員用竣。不再借補之意也。至于名實不符。有礙體制之說。查崇階而退居小

缺。在補缺者已覺得不償失。在獎功者尙恐賞不酬勞。上下雖不滿意。究無損于政體。若崇階而永無補期。則功績最殘者轉得各占寶缺。勞苦最久者反致長抱虛榮。是缺望更深。所損更大矣。統計各省軍營。保至武職三品以上者。不下數萬人。將來軍事大定。各路撤兵。此項有階無缺之員。難保不滋生事端。同治三年沈寶楨奏請安置此項人員。自提鎮至都守。均照寶缺之例。給與俸銀米石。諭旨頗以爲然。飭令臣等核議。臣以靡費太鉅。未經議准。若大銜借補小缺。則毫無靡費。雖不能安置多員。而要可略安望缺者之心。相應奏明。請旨將陸營借補小缺一案。一併飭部核議。如蒙議准。臣等仍隨時察看。或每年將借補者酌補六七成。序補三四成。總期衆志交孚。不虞偏廢。理合附片陳情。伏乞皇太后皇上聖鑒訓示。謹奏。

六年江北冬漕併歸海運詳議章程摺 同治七年二月初五日

奏爲同治六年江北冬漕併歸海運。詳議辦理章程。恭摺仰祈聖鑒事。竊照江北淮揚通三屬。同治六年分徵解實數籌辦情形。業經臣等于六年十二月初三日專摺具奏在案。嗣准部咨。『江北漕糧海運。議令全用夾板船裝運』等因。伏查海運漕糧。本以雇用沙船爲正辦。此次江北漕米無多。沙船大號可裝二千餘石者。不過需用三十號。小號可裝七八百石者。亦不過需船七十餘號。現已委員馳赴上海。先儘沙船雇用。如實不敷用。或仍參用夾板船。總期體察情形。及時酌辦。不致遺誤。所有江北同治六年分漕糧。除奏明撥抵兵糧外。實計起運米五萬七千三百餘石。又高郵泰州寶應三州縣帶徵五年緩漕米二千四百餘石。應隨同新漕。一併起運。共實該交倉漕糧正耗米五萬九千八百餘石。計需沙船經剝食耗等米六千餘石。又籌備二升餘米一千一百餘石。應派江安督糧道王大經酌帶委員紳董先期赴津。承辦交米事宜。並由部臣屆時咨請欽派大臣。一併驗收。以昭慎重。此外應辦一切事宜。業已分別次第舉行。據江寧布政使李宗羲。江安督糧道王大經查照蘇屬海運成案。以江北情形悉心酌擬章程。詳請具奏前來。臣等復加酌核。相應繕具清單。恭呈御覽。如有未盡事宜。容隨時奏明辦理。所有臣等酌議海運章程緣由。謹會同漕運總督臣張之萬。江蘇巡撫臣丁日昌恭摺具奏。伏乞皇太后皇上聖鑒訓示。謹奏。

謹將江北淮揚通三屬同治六年分漕糧海運酌擬章程十條。繕具清單。恭呈御覽。

討論

一、米色應挑選乾潔也。江北淮揚一帶。出產稔米無多。從前兩屆河運。均係紅白兼收。稔糶並買。此次改由海運。仍當照舊派委員。分投採辦。並令多辦稔米。認真挑選乾潔。不准稍有潮雜。以重倉儲。

一、分定米數應畫一免收也。查同治六年分江北淮揚通三府州屬。應徵熟田漕糧。除奏明撥抵兵糧外。實該起運米五萬七千三百六十八石七斗四合六勺。內正兌正米二萬八千七百二十石九斗八升八合六勺。加三耗米八千五百四十三石四斗一升八合九勺。改兌正米一萬六千三十八石三斗五升一合二勺。加二五耗米四千三十三石八斗八升三勺。加二二耗米三十二石六升五合六勺。又高郵泰州寶應三州縣帶徵同治五年分緩漕米二千四百六十八石二斗五升一合九勺。內正兌正米一千七百十七石一斗五升九合一勺。加三耗米五百十五石一斗四升七合七勺。改兌正米一百八十八石七斗五升六合一勺。加二五耗米四十七石一斗八升九合。以上共該起運交倉米五萬九千八百三十六石九斗五升六合五勺。查照向章。按漕斛探買交倉。亦歸漕斛。現用部頒小口鐵斛。製造木斛。由糧道較準發交買米各員應用。仍令各備樣米。俟交兌沙船時呈驗。加貼印花。連道庫鐵斛。一並帶運較兌。以歸畫一。

一、江北米數無多。應從簡辦理也。查蘇屬歷屆海運。在蘇州設立省局。由司道督辦。委蘇州府總局其事。並委首廳縣隨同辦理。又在上海設立滬局。委辦雇船驗兌各事宜。此次江北漕糧改辦海運。事屬創始。然米祇六萬石。當此經費支絀。自應格外撙節。由藩司糧道會同督辦。毋庸設立省局。所有雇船驗兌各銀。且酌派委員。會同蘇屬滬局員董。妥為經理。毋須另設一局。以節糜費。其天津交米事宜。應派江安督糧道王大經酌帶員董。馳赴天津經理交兌。會同直隸委員妥辦。

一、江北漕米應雇沙船裝運也。向來漕糧海運。均用沙船。歷著成效。江北此次海運。因上冬沙衛船隻甚少。故前奏有參用夾板船之議。現已委員赴滬先儘沙船雇用。飭令挑選妥實商船。責成同行。互相結保。編列號旗。排泊浦江。交兌放洋時。准其二成載貨。照案免稅。咨明各關查照。至由津回空。販運北地貨物。並准照案全行免稅。該沙船倘遇有在洋遭風。即時報明所在地方官驗明。除折桅鬆艙糧貨俱損。奏明豁免外。如貨物並未

拋棄。獨棄官糧者。雖鬆艙屬實。仍令賠補。如果承運無誤。並准援案分別給獎。至回空沙船。如往天津牛莊各口販貨。應由局查明米石交清。方准填給全行免稅印照。持赴各關呈驗放行。其交米不清之船。一概不准給照。以示區別。以上俱指雇用沙船而言。或參用夾板船隻。另議章程。咨明辦理。

一、耗餘等米應備帶本色也。查海運章程。天津剝船食米。每槽米一石。給米一升一合五勺。通倉經紀。耗米每石給米一升五合。均以洪斛核計。又每石備帶餘米二升。隨正交倉。又沙船耗米每石給米八升。江北漕糧海運。自應查照。一律購齊本色。解滬兌交。隨正開報。至沙船耗米一項。原備到津。或有折耗彌補之用。如有盈餘。由官收買。咸豐五年。復議於此項耗米內。限定提出三成。由津局按照市價收買。亦應照辦。該船戶等於裝兌後。不得私行糶變。查出嚴究。以裕倉儲。

一、水脚應照章核給也。查歷屆海運。雇用沙衛等船。每裝米一石。給水脚銀四錢。上屆奏准加給銀一錢五分。連神稱犒賞等共七款。每石給銀五錢七分八釐一毫。此次江北漕糧海運。自應照辦。俟船隻備齊。核明應需銀數。解由滬局兌收轉給。以利進行。

一、津通經費應核實開支也。查海運章程。天津官剝每百石給剝價雜費銀八兩四錢四分七釐三毫。民剝每百石給銀九兩八錢八分四釐八毫。箇兒錢每百石給銀二兩。江北此次海運。均應照章辦理。此外津通經費。除輕濟席本銀兩。由糧道衙門照例批解外。其津局用項。在津收買沙船餘米各款。係屬創辦。難以豫定。擬仿照舊章。寬為籌備。以免缺誤。至沙船水脚。及一切經費。係在槽項本折。及此次所買米價盈餘款內。抵支。如有不敷。仍應由司籌撥。事竣分別造冊核實報銷。如果委員辦理無誤。准其援案請獎。俾示鼓勵。

一、米船放洋應責成巡護也。查歷屆海運舊章。准令沙船各帶礮械。出口給領。入口呈繳。於放洋時。由捕盜局派令員董選撥輪勇各船。出洋護送。一面責成沿海水師鎮將。多派備弁兵船。在於所轄各島。嚴密巡防。逐段迎護。催償趕速抵津。並先咨明直隸山東各督撫臣。一體分飭護送。開具專任分任各職名。送部查考。以昭慎重。

一、米船交清應責成經紀也。查歷屆海運。均經戶部奏請欽派大臣赴津查驗。並由倉場侍郎揀派坐糧廳酌

帶經紀斛手。直隸總督派委天津道總辦在案。江北此次海運。應請照案。屆時仍由各衙門奏請欽派。並請於米船抵津時。隨到隨驗。除實有霉變。應立時風晾外。如係乾潔之米。務須隨驗隨收。至已交之米。由津運通。由通運倉。應照戶部奏定章程。責成經紀承管。如有偷漏潮溼撓和等弊。責令賠補究治。不得牽涉原裝沙船。以免羈候。而示體卹。

一、餘米應循案抵補也。查歷屆海運。遇有沙船在洋遭風失事。及霉變遲到等米。均以本屆籌備餘米。並上屆存倉米數抵補交足。具報全完。續到米船。由天津道驗運交倉。另檔存記。留抵下屆正供之用。歷經循辦有案。此次應請照辦。以速正運。

張詩日病故請卹摺 同治七年二月初五日

奏爲宣化鎮總兵張詩日積勞病故。籲懇天恩。准予議卹。並請旨簡放遺缺。恭摺仰祈聖鑒事。竊記名提督直隸宣化鎮總兵張詩日。於咸豐六年。卽隨巨弟曾國荃帶勇勦賊。其時江鄂糜爛。劇寇縱橫。險阻艱難。實備嘗之。自八年克復吉安府城。嗣後在景德鎮太湖等處。疊著戰功。遠克復安慶省城。沿江直下。搗破東西梁山等處賊寨。連克十數城隘。無役不從。同治三年。克復江寧省城。張詩日嘗西北一路。輸功在李臣典劉連捷蕭孚泗之次。蒙恩賞穿黃馬褂。給予一等輕車都尉世職。旋奉諭旨。簡放直隸宣化鎮總兵。四年五月。臣奉命勦擒時。楚軍遣撤殆盡。檄令張詩日與劉松山帶隊北征。徧歷蘇皖齊豫各省。五年秋間。在河南上蔡南陽等處。大捷。力遏兇鋒。旋以積勞過甚。傷疾大發。請假回籍調理。方冀其病痊赴任。足備千城之選。茲據該總兵之子張榮璞稟報。張詩日於六年十一月十九日病故等情。伏念總兵張詩日從軍十有一年。身經百戰。綜其生平。將略稍短。而樸誠勇敢。實屬不可多得。積勞殞命。殊堪憫惻。合無仰懇天恩。敕部照總兵軍營立功後病故例議卹。並准加恩予諡。以彰忠藎。其所遺直隸宣化鎮總兵一缺。請旨簡放。以重職守。所有總兵出缺懇卹議卹緣由。恭摺具陳。伏乞皇太后皇上聖鑒訓示。謹奏。

擬赴上海查閱鐵廠片 同治七年四月初七日

再江南外海水師。向設戰船一百七十一號。道光二十四年前任兩江督臣肇昌奏稱。一概朽爛漂蕩無存。彼時

雖奏請減船加工。另行修造。而其費出於攤捐。故其船成者極少。咸豐三年。兵燹以後。煨燼殆盡。近年洋面不靖。屢有劫案。亟應規復水師。出洋捕剿。惟外洋開仗。較之長江開仗。其難數倍。臣往年所用之長龍舢板。均不便於出洋。現於上海鐵廠製造輪船。又於蕪湖等處試造廣東艇船。俟船成之後。仍須酌改營制。略仿西洋之法。一船設一專官。乃可角逐海上。日起有功。查上海吳淞口出江入海。華洋雲集。商船輻輳。尤爲盜蹤出沒之所。臣擬於近日親至上海一行。會同撫臣丁日昌。周歷履勘。博詢洋面戰爭之道。細查鐵廠製造之工。再行酌議。外海水師章程。會核具奏。所有臣衙門日行公事。照例由藩司代拆代行。理合附片陳明。伏乞皇太后皇上聖鑒。謹奏。

遵旨酌提制錢解津摺 同治七年閏四月十四日

奏爲遵旨酌提制錢解津。謹將大概情形。恭摺由驛復奏。仰祈聖鑒事。竊臣等承准軍機大臣密寄同治六年十一月十五日奉諭。戶部奏請飭濱臨江海各省。解錢籌銅一摺。前因銅片缺乏。鼓鑄當十大錢。原爲一時權宜之計。行之日久。不無流弊。近來市廛行使。暗中折減。於國用民生。均有未便。惟欲規復圓法。必須籌備制錢。京師自通行大錢以來。所有制錢。大都運往外省。若欲鼓鑄新錢。又非一二年所能驟復。戶部議令濱臨江海各省。籌解制錢。實爲便捷之法。前經譚廷襄函商湖北督撫。擬於鹽釐項下。酌提制錢。由輪船運津。據稱事屬可行。此外如江西江蘇浙江廣東四省。均有海船可通。各該省釐金較旺。自可一律提解。著會國藩郭柏蔭英翰馬新貽瑞麟蔣益澧李瀚章何璟劉坤一各於鹽釐卡收欸內。每年酌提制錢三十萬串。由輪船裝運天津。交崇厚擇地嚴密收存。聽候提用。酌提錢文。准照銀價劃抵。應解京餉。其制錢一千合銀若干。及運脚若干。即著各該督撫迅速議定具奏。所提之錢。務須年清年欸。以兩年爲止。不准稍有短解。此項錢文。即名爲天津練餉。以昭慎密。不可稍有宣露。致令外來商民。傳播都城。有礙錢法。是爲至要。其湖北施宜等處。向多銅礦。著該督撫飭屬招商試辦。酌抽礦稅。試行有效。即籌款收買商銅。以裕鼓鑄。並著妥議章程具奏。至濱海商賈。向有販運紅銅條銅等項。應如何招商收買之處。並著各該督撫三口通商大臣。妥速議奏。一等因欽此。當經轉飭司道欽遵籌議。伏查理財之道。全在酌盈劑虛。京師爲首善之區。錢法爲民生所繫。今因大錢相率折減。亟須調劑均平。臣等忝任疆圉。必應公同籌畫。准查制錢一項。蘇省軍興以後。因滇銅採辦惟艱。已停鑄多年。現在市肆所有錢文。均係就地周轉。

散而不聚。亦鮮有從而之他者。所收鹽釐貨釐。雖以錢數入冊。實則紋銀與洋錢兩項折算者多。且撥充軍餉等項。均係易銀批解。是以民用未形不足。若遽以數十串提運出省。則錢少價昂。小民衣食之需。勢必漸臻騰貴。實亦不可不防。巨等往復籌畫。竊以應解京餉。以兩淮上海爲最。且鹽釐均在兩淮。貨釐半在上海。地之相去。幾及千里。分路籌出。則不見其多。按季解交。則不形其驟。至由兩淮運司蘇松太道本年各解錢十五萬串。分作四季勻解。如錢款不敷。卽由司關隨時與釐局兌換。以免市僧居奇。至銀錢市價低昂不一。現在每錢一千。約易銀六錢有零。將來走運時。長落尙難預定。所有自滬至津。輪船水脚保險。以及麻袋繩索捆紮。辛工每錢百千。約需銀六十兩有零。如以押運委員薪水川資。及到津駁運挑力等項。每次約銀二百餘兩。其由兩淮解至上海轉解者。尙須加給水脚等項。應俟起解時。分別給發。統在應解京餉項下開支。事竣彙計銀數。核實造報。卽以抵作奉撥京餉。另行奏咨。俟運足三十萬串。如錢價不致過昂。民用亦無窒礙。仍當酌量情形。接續起解。仰慰宸廑。如因運解過多。錢價驟增。卽當奏明。下半年少解數成。期於中外通籌。無畸重畸輕之弊。此項錢文。謹遵諭旨。名爲天津練餉。以昭慎密。自紅銅條銅。大半產自外洋。蘇省從前鼓鑄之時。係由官民兩商自備船隻。采辦洋銅。現在東洋各貨。悉聽泰西各國運銷。銅商無利可圖。以致華人望而卻步。應如何招商收買。變通辦理。已飭司道體察情形。確切籌計。俟辦有眉目。再當另行核奏。除飭司道將解錢日期呈報咨外。合將邊辦緣由。恭摺由驛覆陳。伏乞皇太后皇上聖鑒訓示。再此案久擬覆奏。臣國藩因有會查海口之舉。寄信與臣日昌面商定奪。頃臣國藩於初三日至蘇州。初七日會查太湖。十一日同來上海。議定一切。是以覆奏稍遲。合併聲明。謹奏。

直隸陝甘協餉分別籌辦摺 同治七年閏四月十四日

奏爲奉直隸軍餉先行酌數籌濟。並將近年協撥陝甘軍餉情形。彙摺覆陳。仰祈聖鑒事。竊臣等承准軍機大臣字寄。同治七年二月二十八日奉。上諭。一官文奏請飭各省協撥軍餉一摺。檢匪竄擾直境。將及兩月。各省官軍雲集。爲數幾及十萬。雖餉需未盡盡資於直省。而各軍隨帶餉銀用盡。卽須由直隸接濟。糧米柴草。亦須籌備。直境上年被旱被擾。民間蓋藏空虛。購辦之費較鉅。亟應寬爲儲備。著湖南湖北江西江蘇廣東福建各省督撫。速於捐輸鹽釐。並華洋關稅項下。無論何款。每省各撥助餉銀十萬兩。剋期由海道輪船解赴天津。交崇厚驗收。卽

由崇厚轉解保交官文應用。以期迅速。等因欽此。又奉三月二十八日寄諭。穆圖善奏請飭江南等省撥解甘餉各摺片。覽奏均悉。江南等省欠解甘餉甚多。著會國藩了日昌將上年七月以前應撥甘餉如數迅解。等因欽此。又奉四月初七日寄諭。劉典奏請催原撥廣東江蘇協餉各摺片。陝省軍務方殷。待餉孔亟。前經諭令閩海粵省江漢等關。於四成洋稅內各按月撥解銀一萬兩。又原撥廣東江蘇兩省協餉。按月一萬兩。乃廣東等省撥解寥寥。設因餉需不繼。兵勇譁潰。於大局甚有關繫。江蘇月協陝省。著了日昌就近派委道員胡光墉按月催領起運。並著會國藩瑞麟了日昌將前欠陝省協餉。迅即籌款如數分起補解。仍按月源源籌解。以資接濟。等因欽此。均經轉行欽遵在案。伏查捻氛竄擾直境。大兵雲集。需餉浩繁。臣等忝膺疆寄。分應協力圖維。以期餉足兵精。迅殲醜類。是以臣等正月間。一聞捻匪北竄之信。即迅籌糧餉軍火。陸路由清江轉運。水路由天津轉運。源源運解。俾前敵淮湘各營軍士安心追剿。又籌銀七萬兩。並提前預解固本京餉三萬五百兩。統計十萬五百兩。委員裝搭輪船。迅速赴津。分別解交總理衙門戶部。轉解神機營。俾資杯水之助。茲奉飭籌官文軍餉。何敢稍有歧視。惟江蘇自用兵以後。連年出款極鉅。已成強弩之末。臣會國藩臣李鴻章先後統師北征。餉源皆取給於江蘇。去年李鴻章剿平東捻任賴一股。所有軍火賞卹。轉運各款。尤為繁重。蓋緣道路愈遠。征戰愈苦。則費用愈繁。兼之提督劉松山一軍。向由江蘇供支。自到直隸後。運費日增。漕臣張之萬清淮一軍。現調至黃河以北。亦由江蘇協濟。提督黃翼升淮揚水師一軍。現調至張秋以北。亦由江蘇支應。是現在直隸山東剿賊之兵。大半出自江蘇之餉。較之他省略供前敵之餉。與全未供前敵之餉者。緩急情形。迥不相同。加以本省旗綠各營之兵餉。洋槍隊及水師之勇糧。湖北霆峻等營之協餉。款目浩繁。亦為各省所未有。江蘇釐金。昔年收數甚旺。近來輪船夾板。分我江海之利。華商本小利薄。逐漸停歇。稅釐日形短絀。臣等久思將各局卡分別裁撤歸併。以甦商困。而支用太繁。未敢輕議更張。入款日減。出款反增。實屬力盡筋疲。不敷周轉。惟是畿輔需餉。無論如何為難。敢不稍竭微忱。臣等公同熟商。擬籌湊二萬兩。委員解赴天津。交三口通商大臣崇厚驗收轉解。其餘銀兩。能否續解。仍俟察看前敵情形。再行酌量辦理。至江蘇協甘軍餉三萬兩。向在金陵釐捐撥解。同治六年四五六共三箇月。應協之餉。經臣國藩奏明以一萬兩解陝西。以二萬兩解甘肅。早經報解清楚。七月以後。陝甘督臣左宗棠有洋商借

款在於江海關。因劃抵扣。至十二月止。計借款十八萬兩。亦已抵解完竣。七年協甘之餉。每月以二萬兩解左宗棠軍營。以一萬兩解穆圖善軍營。左營則解現銀者三箇月。抵借款者十箇月。穆營則全解現銀。臣國藩於上年十二月初三日。本年三月初五日。兩次奏明在案。刻下正二三四等月。業已解清。並無短欠。穆圖善所稱欠解之處。或係未知上年協餉。全歸左營。本年協餉。尚在途次乎。至劉典所奏江蘇應協陝餉一萬兩。即係戶部議覆喬松年洋稅摺內所指之款。此項協陝萬金。當初本無確定之案。是以臣國藩六年三月二十日奏撥陝餉。即在月協甘餉三萬之內。酌抽一萬解陝。解滿三月。即行停止。目下江蘇支絀如此。即有額協定款。亦應奏明停解。況陝西本無定案。自應俟直隸肅清。准軍漸撤。乃可另議協奏之法。所有直隸陝甘協餉。分別籌辦情形。謹合詞恭摺覆陳。伏乞皇太后皇上聖鑒訓示。謹奏。

調閩省輪船赴津巡洋片 同治七年閏四月十四日

再臣等承准軍機大臣字寄。同治七年四月初七日奉上諭。一賊蹤逼近海隅。恐有洋人勾結。暗濟軍火。著會國藩。丁日昌。迅即派員。將上海捕盜輪船。架設配兵。星馳來津。交崇厚酌度。派令巡查。嚴防海口。一等因欽此。即經轉飭蘇松太道。應實時遵辦去後。旋據該道稟稱。上海捕盜局內。僅有天平鐵皮輪船兩號。其鐵皮一號。船身本屬短小。不過於內洋及長江等處。護餉捕盜。向不能行駛外洋。現因損壞拆修。報竣尙需時日。至天平輪船。從前曾至天津。惟船身亦漸殘朽。汽爐屢經挖補。故今春護漕。僅在山東洋面以南。不敢駛赴北洋。據機器匠人聲稱。汽爐殘損過甚。只能勉強在內洋行走一二年。若調赴天津。則石島以北。風浪迥異。一經搏擊。即恐震裂。萬一中途竟有疎虞。徒失一捕盜之船。而於津沽毫無實濟。正在籌畫間。適前署福建藩司周開錫。因採辦米石來滬。而陝甘轉運委員福建候補道胡光墉。亦在滬中。該道與之論及此事。周開錫等以閩局之華福寶輪船。現在上海。可以移用。該船均係中國管駕。並無洋人在內。惟礙械水勇。不甚全備。現添配開花礮六尊。洋槍一百桿。趕雇水勇五十名。即飭委福建候補同知沈應奎。黃維煊。閩浙水師。儘先游擊。貝錦泉。督帶北上。聽候調遣。約計閏四月十五以前。即可開行。該船所需煤炭人工。抵津後。距閩較遠。未能隨時接濟。且時日久。暫難必。應由三口通商大臣。臣核給。擬俟配募齊全。先給水勇一月口糧。同槍礮價直等項。均由周開錫籌墊。據實開報。仍由三口通商大臣。

給發還欸等情。先後具稟前來。臣等伏查蘇省輪船。現既不適於用。則閩省輪船。自可移緩就急。該前司周開銀等不分畛域。通融移用於大局。不無裨補。理合附片陳明。伏乞聖鑒。謹奏。

謝授武英殿大學士恩摺 同治七年五月初八日

奏爲恭謝天恩。仰祈聖鑒事。竊臣准吏部咨開。同治七年四月二十四日內閣奉上諭。一。曾國藩著授爲武英殿大學士。欽此。一。嘗卽恭設香案。望闕叩頭。謝恩。訖。伏念臣謬居揆席。兼領封圻。愧無尺寸之功。祇切備盈之懼。茲乃欽承恩命。忝長班行。溯通籍於三十年前。未預纂修之役。拜新命於九重天上。適承遭遇之隆。就詞館而論班資。同朝尙多先達。以疆臣而登台輔。從古詫爲殊榮。自顧顛蒙。倍深悚惕。當此寇氛猶警。民力未紓。臣惟當盡瘁鞠躬。習勤補緇。恤疲氓以培元氣。求賢士以集衆思。常履薄而臨深。冀盡忠而補過。庶幾仰答高厚。鴻慈於萬一。所有微臣感激下忱。謹繕摺叩謝天恩。伏乞皇太后皇上聖鑒。謹奏。

水師赴防運河湘營添募新勇片 同治七年五月初八日

再臣疊准湖廣督臣李鴻章咨稱。現籌圍制捻逆之法。亟須調派水師。分段駐防。檄令長江水師提督黃翼升酌帶水師五營。並添調淮揚鎮總兵歐陽利見帶領所部一營。會同前進。現據黃翼升函稱。均於閏四月二十五日。馳抵海寧。惟自張秋北至東昌。運河全涸。總須六月間。黃水盛漲。方可行舟。目前各營。暫泊濟寧。黃翼升歐陽利見。同至張秋。察看地勢。一俟有水浮送。即可兼程駛抵東昌。臨清以北。嚴密分防。又據廣東提督劉松山文稱。各營追剿二年。病勇過多。擬派員回至湖南募勇一千七百名。來營更換。以資得力。該營馬隊。向祇四百餘人。亦須添募一營。俾利馳勦。臣以劉松山一軍。馳逐最苦。該提督忱慨激發。志尤可嘉。已札飭湖南鹽局撥銀二萬兩。招募新勇。迅速成行。並令在直隸就近添募馬勇。以厚兵力。惟湘勇自南而北。經過河南山東直隸各省。路途遙遠。且常有民團仇殺之案。應請旨飭下各該省督撫轉飭所屬。一體知照。以利進行。所有提鎮大員。出境北援。及湘軍添募馬步各勇緣由。理合附片陳明。伏乞皇太后皇上聖鑒訓示。謹奏。

張運桂裕祀張運蘭祠片 同治七年六月十八日

再記名總兵張運桂。前充老湘營營務處。同治元年八月。在徽州營中積勞病故。由臣奏蒙賜卹。並准從祀湖南

昭忠祠在案。該總兵爲前任福建臬司張運蘭胞弟。隨同帶兵克復交處。功績頗著。迨駐兵徽州。張運蘭時方請假回籍。張運桂獨率弁勇。力保危城。厥功尤偉。張運蘭殉節武平。欽奉諭旨。在湖南建立專祠。茲據其舊部前任壽春鎮總兵易開俊等。縷稟張運桂生前功績。請約祀張運蘭專祠等情前來。臣查張運桂生前幫同胞。兄征勦各省。備嘗甘苦。沒而約祀其兄之祠。尙屬準情管理。合無仰懇天恩。俯准總兵張運桂一併約祀。以彰忠靈。理合附片陳請。伏乞聖鑒訓示。謹奏。

胡開泰正法片 同治七年六月十八日

再准兵部右侍郎巨彭玉麟咨稱。五月初三日。道經安慶省城。士民數百人。遮道環哀。江西補用副將胡開泰凶暴異常。路人側目。近更有毒毆繼妻王氏身死之事。當經親提胡開泰研訊。供認不諱。並經署懷寧縣知縣王鵬飛驗訊屬實。旋晤皖省司道。面稟情節相同。查該副將強暴絕倫。萬民痛憾。亟應立正重典。未便久稽顯戮。適署安徽撫臣吳坤修因公回省。會商意見相同。當將胡開泰按照軍令就地正法。咨請奏報前來。查定例夫毆妻至死者。罪應擬絞。仍就情形輕重。分別寬緩辦理。胡開泰無故毆妻斃命。據懷寧縣知縣勘驗屍身。徧體鱗傷。情極殘忍。就案定罪。已在情實之例。該副將平日橫行不法。惡跡多端。至省城數百人公稟。請除此害。其兇狠尤可概見。業經彭玉麟吳坤修會訊。按照軍法從事。足以警殘暴而快人心。所有副將正法緣由。理合附片陳明。伏乞聖鑒。謹奏。

預籌撤勇經費摺 同治七年七月二十二日

奏爲預籌撤勇經費。恭摺仰祈聖鑒事。竊兩湖督臣李鴻章統師剿捻。所部淮軍馬步水師五萬餘人。暨劉松山老湘營一軍。皆由蘇省供支。自乙丑至今。已閱四年。悉索轉輸。不遺餘力。今幸仰託聖主威福。東西捻股。一律肅清。亟應趕緊裁撤。以節餉需。而蘇民力。惟蘇省按月應用之餉。本係各指各款。毫無贏餘。本年上半年撥款。更有出於指定款項之外者。如撫臣丁日昌兩次護解神機營銀十一萬兩。運河馬棚灣堤工用錢十三萬餘。均係騰挪籌撥。各庫台移借一空。閏四月間。因周轉不敷。曾咨商浙江撫臣。借銀十萬兩。以應急需。預計下半年應用之款。又有出於指定款項之外者。如戶部指撥陝西每月銀一萬兩。前以西捻未平。尙難籌解。撫臣劉典函商臣處。

臣允以捻股蕩平。必當分濟。如後自不能不按月協解。又如裏下河民田。以運河東西兩堤爲保障。現在勘估小羅堡一段工程。約須錢十餘萬串。亦屬必不可緩之款。蘇省餉源。以釐捐爲大宗。閏四月間。臣至上海。商民稟求減釐。業已飭局量予裁減。六月初因苦雨爲災。蘇民環跪訴求免釐。又經撫臣將銷捐釐金裁免。入款既有所減。出款轉有所增。若欲再籌巨款。爲撤勇之資。更屬力有未逮。臣等往返函商。本思向洋商借銀五十萬兩。因利銀太多。而中國屢借洋銀。亦屬疆臣之恥。惟有向浙江江西湖北等省。暫時挪借。尙可設法通融。查前借浙江銀十萬兩。或作協款。或作借款。本擬秋間定議具奏。而目前情形不特前款無可籌還。並須續行添借。江西省供應軍。兩年來按月撥解。已逾百數十萬。撫臣劉坤一力顧大局。臣方時以爲款本不欲作盡忠竭歡之舉。而目下需用甚亟。不得不再商籌借。湖北本年境內無事。養兵極少。又係臣李鴻章本轄之境。自可緩急相通。合無籲懇天恩。敕下浙江江西兩撫臣。各借銀二十萬兩。湖北借銀十萬兩。撥解臣處。爲遣撤淮湘各軍之用。仍由蘇省於四箇月以後。陸續歸款。浙江之款。則由愬屬釐局解還。江西之款。則由江西鹽釐銷局解還。湖北之款。則由鄂鹽督銷局解還。或李鴻章履任後酌量籌辦。一轉移間。蘇省之力稍紓。而三省亦尙無所損。至閏四月間。所借浙江之十萬兩。更無餘力籌還。應請旨飭下浙江撫臣。作爲協蘇之款。將來卽由浙江歸入軍需報銷。以省膠轕。所有預籌撤勇經費緣由。理合會同兩湖督臣李鴻章。江蘇撫臣丁日昌。恭摺馳陳。伏乞皇太后皇上聖鑒訓示。謹奏。

查明運河水誌情形摺 同治七年七月二十二日

奏爲遵旨查明運河水誌情形。恭摺覆陳仰祈聖鑒事。竊臣等承准軍機大臣字寄。同治七年閏四月初六日奉上諭。「都察院奏江蘇舉人蔡則灃等違抱。以水壩頻年被淹。請復舊誌等詞。赴該衙門呈訴。據稱現在政誌。原爲保堤而設。但運河存水。常行在一丈以外。今減爲一丈四尺。勢必連年開壩。民力均屬拋荒。仍請水誌。遵行一丈六尺。立秋後始准開壩。處暑後始准開中。新等壩。成案等語。該舉人等所稱各情。應如何因時制宜。仍復舊案。以衛民生之處。著會國藩張之萬。丁日昌。悉心會商。妥爲辦理。原呈均著鈔給閱看。」等因。欽此。伏查運河水誌。前經臣之萬會同前署督臣李鴻章參酌成案。議定立秋節前。高郵誌椿長至一丈四尺。啓放車壩。仍每加四寸。遵行接啓南中新壩。如逾立秋。則照一丈二尺八寸。按章遞啓等因。於五年十一月初十日。奏明在案。茲

據舉人蔡則澧等三請，仍復誌椿舊案。查呈內所稱舊案有水誌一丈六尺，始行開啓。前後參觀，並無水誌。以一丈六尺爲度之說，自係該舉人蔡則澧等三請。臣衙門案卷全失，無可稽考。竊據淮揚道鈐錄成案，出自傳述，並非有案可稽。至請立秋處暑後始行開壩一節，查各壩遲開一日，則下河受益一日。自是正隸，然水勢長落，每年遲早不同。若必待立秋以後，且必限定誌椿一丈六尺，始放水壩壩，萬一盛漲潰決，則運河之啓壩稍遲，下河之受害更大。且誌椿尺寸，雖經奏定，臣等總以得守且守。督飭工員細心稽察，斷無專顧堤工，急於開壩之事。查五年奏定章程以後，六年七月十五日，始開車遲壩，已在立秋之後。本年水勢較小，現在處暑已逾半月，並未開放各壩。如果他年並無異常盛漲，則終歲不必開壩，更爲盡善。總之裏下河之居民，以運河之兩堤爲命脈。十餘年來，久未興修，險工林立。本年春間，撥錢十餘萬串，派員將最險之馬棚灣一段修整。九月間，尙擬款續修小羅堡一段，擬於二三年內，將東西兩堤，全行修築。務期格外高厚堅實，能使水誌過於一丈四尺，尙不開壩，則捍衛有資。保全更大。臣等愚見，以爲隄工加一分，則裏下河受一分之益。若徒爭開壩之尺寸，較時日之早遲，則放壩之際，浩瀾奔注，立成澤國。雖比潰決之禍稍輕，而其有傷於農田則一也。五年奏定之案，甫經二年，行之無弊。未便遽爾更張。該舉人蔡則澧三請改定誌椿尺寸之處，應毋庸議。所有臣等遵旨查覆緣由，理合恭摺具陳。伏乞皇太后皇上聖鑒訓示。謹奏。

謝交部優敘恩摺 同治七年八月初六日

奏爲恭謝天恩，仰祈聖鑒事。竊臣接准吏部咨開同治七年七月初十日內閣奉上諭：「兩江總督曾國藩籌辦淮軍後路軍火，俾李鴻章等克竟全功，著交部從優議敘。欽此。」當即恭設香案，望闕叩頭謝恩訖。伏念揀逆擾亂十有餘年，上年冬間，削平任賴股匪，民困稍紓，而張逆縱橫河朔，震驚三輔。今幸殄除餘孽，一律肅清。上蒞先皇未竟之功，實託聖主如天之福。臣剿擒無效，抱疚實深。方補過之不遑，夫何功之可錄。乃荷溫綸下賚，甄敘優加，以轉饗之微勞，沐詔書之褒寵。撫衷循省，倍覺悚惶。臣惟有宣布皇仁，拊循遺役，士卒有歸耕之樂，東南無伏莽之虞。庶幾仰答高厚鴻慈於萬一。所有微臣感激下忱，謹繕摺叩謝天恩。伏乞皇太后皇上聖鑒。謹奏。

謝調補直隸總督恩摺 同治七年八月初六日

奏爲恭謝天恩，籲懇陞見，恭摺仰祈聖鑒事。竊臣准兵部火票遞到同治七年七月二十日內閣奉上諭：「曾國藩著調補直隸總督，欽此。」當卽恭設香案，望闕叩頭謝恩訖。伏念臣自咸豐十年仰蒙文宗顯皇帝簡任兩江，已越九年。中間軍書旁午，身在戎行，於吏治未得盡心。卽在江寧任所，前後二年，籌畫餉需，顧此失彼，仍未能講求吏治，惠卹疲民。夙夜抱慚，惟以不獲稱職爲懼。茲乃欽承恩旨，調任畿疆，聞命之餘，倍深悚惕。目前中原軍務，一律肅清，所有撤勇事宜，業與湖廣督臣李鴻章往返函商，粗有頭緒。新任督臣馬新貽到任後，可與李鴻章和衷妥辦。臣現將經手未了事件，趕緊清釐。籲懇天恩，俯准於交卸後入都陞見，俾得瞻仰天顏，跪聆聖訓，冀一切有所遵循。而粵匪案內，累荷高厚之恩，剿擒案內，仰沐優容之德，亦得叩謝闕廷。稽首頓首，志感志愧，庶以稍抒悃忱於萬一。所有微臣感激下忱，并籲請陞見緣由，理合繕摺具陳，伏乞皇太后皇上聖鑒訓示。謹奏。

陳明服中帶兵未能終制片 同治七年八月初六日

再臣自咸豐七年二月在營丁父憂回籍。八年六月，以浙江軍務緊迫，欽奉諭旨，催促赴援，勉循金革無避之義，復出帶兵，守制尙欠一年。雖墨經從戎，與接篆居官者有間，而臣丁母憂，亦僅五箇月。卽遵旨赴省辦團，並未在家終制。兩次冒禮從公，耿耿此心。如墨重咎，臣在家時，父母葬地，未能詳慎，嗣由臣弟等攻卜遷葬。至今已越十年，並未一展謁墓之禮。瞻望松楸，難安夢寐。至臣剿擒無功，本屬疚心之事，而回任以後，又不克勤於其職。從前疆臣有聲於時者，屬員之賢否，公事之源委，無不博諏而默識之。一一了然於心，方足經緯萬端，措置精當。臣舌蹇心悸之體，迄未痊癒，不能多見僚屬，卽接見之時，亦因艱於言語，不能暢論公事。不能殷勤訓勵，暗中多所廢弛。論今日之有負重任，則無以對吾君；論前此之有忝子職，則無以對吾親。凡此愧歎兩端，常恐難言之隱，未能自達於聖主之前。今幸交卸在卽，赴闕有期，除俟到京後，割切具奏外，謹先附片陳明，伏乞皇太后皇上聖鑒訓示。謹奏。

新造輪船摺 同治七年九月初二日

奏爲新造第一號輪船工竣，並附陳上海機器局籌辦情形，恭摺仰祈聖鑒事。竊中國試造輪船之議，臣於咸豐十一年七月覆奏，購買輪船撥摺內，卽有此說。同治元二年間，駐紮安慶，設局試造洋器，全用漢人，未雇洋匠。雖造

成一小輪船而行駛遲鈍不甚得法。二年冬間。派令候補同知容閩出洋購買機器。漸有擴充之意。湖廣督臣李鴻章。自初任蘇撫。即留心外洋軍械。維時丁日昌在上海道任內。彼此講求禦侮之策。製器之方。四年五月。在滬購買機器一座。派委知府馮煥光沈保靖等。謁設鐵廠。適容閩所購之器。亦於是時運到。歸并一局。始以攻勦方殷。專造槍礮。亦因經費支絀。難與船工。至六年四月。臣奏請撥留洋稅二成。以一成爲專造輪船之用。仰蒙聖慈允准。於是撥款漸裕。購料漸多。蘇松太道應寶時及馮煥光沈保靖等。朝夕討論。期於必成。查製造輪船。以汽鑪機器船壳二項爲大宗。從前上海洋廠自製造輪船。其汽鑪機器。均係購自外洋。帶至內地。裝配船壳。從未有自構式樣。造成重大機器汽鑪全具者。此次創辦之始。攷究圖說。自出機杼。本年閏四月間。臣赴上海察看。已有端緒。七月初旬。第一號工竣。臣命名曰恬吉輪船。意取四海波恬。厥務安吉也。其汽鑪船壳兩項。均係廠中自造。機器則購買舊者修整參用。船身長十八丈五尺。闊二丈七尺五寸。先在吳淞口外試行。由銅沙直出大洋。至浙江舟山而旋。復於八月十三日。駛至金陵。臣親自登舟。試行至采石磯。每一時上水行七十餘里。下水行一百二十餘里。尙屬堅緻靈便。可以涉歷重洋。原議擬造四號。今第一號係屬明輪。此後即續造暗輪。將來漸推漸精。即二十餘丈之大艦。可伸可縮之煙筒。可高可低之輪軸。或亦可苦思而得之。上年試辦以來。臣深恐日久無成。未敢率爾具奏。仰賴朝廷不惜巨款。不責速効。得以從容集事。中國自強之道。或基於此。各委員苦心經營。其勞動亦不可沒也。溯自上海初立鐵廠。迄今已逾三年。先後籌辦情形。請爲皇上粗陳其概。開局之初。軍事孔亟。李鴻章飭令先造槍礮兩項。以應急需。惟製造槍礮。必先有製槍製礮之器。乃能舉辦。查原購鐵廠。修船之器居多。造礮之器甚少。各委員詳考圖說。以點線面體之法。求方圓平直之用。就廠中洋器。以母生子。觸類旁通。造成大小機器三十餘座。即用此器以鑄礮。鑪高三丈。圍逾一丈。以風輪煽熾火力。去渣存液。一氣鑄成。先鑄實心。再用機器車刮鑲挖。使礮之外光如鏡。內滑如脂。製造開花田雞等礮。配備礮車炸彈藥引木心等物。皆與外洋所造者足相匹敵。至洋槍一項。需用機器尤多。如碾捲槍筒車刮外光鑽挖內膛鑲造斜梭等事。各有精器。巧式百出。槍成之後。亦與購自外洋者無異。此四五年間。先造槍礮兼造製器之器之情形也。該局向在上海虹口暫租洋廠。中外錯處。諸多不便。且機器日增。廠地狹窄。不能安置。六年夏間。乃於上海城南興建新廠。購地七十餘畝。修造公

所。其已成者曰汽鑪廠。曰機器廠。曰熱鐵廠。曰洋槍廠。曰木工廠。曰鑄銅鐵廠。曰火箭廠。曰庫房棧房。煤房。文案房。工務廳。暨中外工匠住居之室。房屋頗多。規矩亦肅。其未成者。尙須速開船塢。以整破舟。酌建瓦棚。以儲木料。另立學館。以習繙譯。蓋繙譯一事。係製造之根本。洋人製器。出於算學。其中奧妙。皆有圖說可尋。特以彼此文義捍格不通。故雖曰習其器。究不期夫用器與製器之所以然。本年局中委員。於繙譯甚爲究心。先後訂請英國偉烈亞力。美國傅蘭雅瑪高溫三名。專擇有裨製造之書。詳細繙出。現已譯成機器發軔。汽機問答。運規約指。泰西探煤圖說四種。擬俟學館建成。卽選聰穎子弟。隨同學習。委立課程。先從圖說入手。切實研究。庶幾物理融貫。不必假手洋人。亦可引伸。月勒成書。此又擇地遷厰。及添建繙譯館之情形也。茲因輪船初成之際。理合一併附奏。該局員等殫精竭慮。規此宏規。實屬著有成效。其尤爲出力各員。可否籲懇天恩。給予獎敘。恭候命下遵行。如蒙俞允。臣當與李鴻章。丁日昌酌核清單。由新任督臣馬新貽會奏。所有新造第一號輪船工竣。並附陳機器局籌辦情形。謹會同湖廣總督臣李鴻章。江蘇巡撫臣丁日昌恭摺具陳。伏乞皇太后皇上聖鑒訓示。謹奏。

黎庶昌留蘇補用片 同治七年九月初二日

再臣於同治元年十二月二十一日承准議政王軍機大臣字寄十月十三日奉上諭。前因貴州貢生黎庶昌呈遞條陳。言尙可探。當降旨賞給知縣。交會國藩差遣委用。該員以旁省諸生。抒悃上言。頗有見地。其才似堪造就。誠恐年少恃才。言行或未能符合。著候該員到營後。由該大臣留心察看。是否有裨實用。不致徒託空言。附便據實具奏。一等因欽此。同治二年三月該員到臣安慶軍營當差。三年六月。金陵克復。委辦善後事宜。四年五月。臣奉命勘揀。相從北征。五年九月二十四日。在周家口軍營。聞卽丁嫡母憂。請假回籍守制。經臣批准。俟到籍百日後。仍回營襄辦營務。上年九月。該員假滿。重至金陵。臣查黎庶昌自到營以來。先後六年。未嘗去臣左右。北征以後。追隨臣幕。與之朝夕晤對。察看該員。篤學耐勞。內懷抗希先哲補救時艱之志。而外甚樸訥。不事矜飾。臣於同治二年十一月。密保一次。又於續保克復金陵水陸等軍。暨銘軍攻克黃陂案內。明保兩次。奏請以直隸州知州留於江蘇。遇缺卽補。均經奉旨允准在案。今臣交卸督篆在卽。該員係特旨差委人員。既無經手事件。不必隨臣前赴直隸。亦無須補見。應卽歸於江蘇聽候補用。除俟該員服闕。由新任督臣馬新貽咨部起復外。理合附片

具陳。伏乞皇太后皇上聖鑒。敕部查照。謹奏。

交卸暫緩起程摺 同治七年十月初五日

奏爲恭報微臣交卸日期。並遵旨會商公事。暫緩起程。恭摺仰祈聖鑒事。竊臣承准軍機大臣字寄。同治七年八月二十三日奉上諭。一會國藩著俟馬新貽抵任後。將散勇事宜。及地方一切公事。會同商辦妥協後。再行來京陛見。一等因欽此。新任督臣馬新貽於九月二十日行抵江寧省城。二十六日臣飭派署中軍副將喻吉三。江寧府知府徐宗瀛。賈送兩江總督關防。兩淮鹽政印信。通商欽差大臣關防。並王命旗牌等件。交馬新貽接受任事。臣本任內應辦各事。大致業已清楚。遣散勇丁經費。亦已籌出。只候李鴻章出京。行至徐州清江等處。臣與之商一二次。即可就緒。長江水師分汛等事。前侍郎臣彭玉麟擬俟明年春間。再行回籍。必可始終料理。至一切地方公事。均與新任督臣馬新貽詳細面商。隨時妥辦。揚州教堂一案。疊准總理衙門來函。囑臣妥爲辦竣。業經另派司道大員。會同英國領事。赴洋查辦。稍需時日。除起程日期。續行具報外。所有微臣交卸日期。理合繕摺具陳。伏乞皇太后皇上聖鑒訓示。謹奏。

請禁川私行楚收復淮南引地摺 同治七年十月初五日

奏爲請禁川私行楚收復淮南引地。以復舊制。而整鹽綱。恭摺仰祈聖鑒事。竊照楚省本係淮南引地。定額最多。銷鹽最廣。從前淮網盛時。歲徵各岸課銀。甲於天下。其徵諸蘇省者。不及十之一。徵諸江西安徽者。不過十之三。徵諸兩湖者。則居十之六。是淮網之興替。全視楚岸之暢滯爲轉移。軍興以後。長江梗塞。淮鹽不能行楚。經楚省督撫奏明。借食川鹽。原屬權宜之計。臣於同治二三年間。整理鹹務。維時淮南即以收復楚岸爲請。祇因引地被占。十有餘年。行之既習。爲常。禁之未便太驟。是以暫將鄰鹽釐稅。酌量加重。原冀川私本重而日衰。淮鹽漸進而日旺。不謂川販巧於遷避。百計漏釐。每運兩引之鹽。僅完一引之稅。臣訪知其弊。上年曾派委員至宜昌。會同楚省委員。公同掣驗。本年又減淮鹽之釐。期收敵私之效。非不多方補救。乃查鄂湘兩局。積壓淮鹽。不下十餘萬引。存數極多。銷數極滯。而川私紛至沓來。較前尤甚。推原其故。總由鄂省利食川鹽。雖有掣驗之名。而明讓斤兩。近聞宜昌押收川稅。仍不過六七折。以致川販成本太輕。來源愈旺。是前此繞越而偷行者。今更肆行而無忌。川鄂

官商。幾忘引地之應屬何省。請舉淮之受害於川者數端。爲皇太后皇上縷晰陳之。淮鹽逆流上駛。歷長江洞庭之險。每船至少須裝千餘包。船笨載重。計自瓜洲開行。非四五箇月不能達鄂。非六七箇月不能達湘。偶遇暴風山磯。立時淹消。巨萬本銀。悉歸烏有。川鹽則自川江順流而下。勢甚建瓴。雜用小船。靈便異常。計程途則淮遠而川近。論舟行則下易而上難。此運道之捷於淮者其害一也。淮南之鹽。以餘東呂四兩場爲通場之冠。俗所稱餘呂真梁者也。從前暢行楚岸。其鹽色之潔。由於商力充足。本年所產之鹽。堆至次年。始行開售。堆愈久則滷愈淨。近年垣商疲乏。隨收隨售。鹽色不無稍減。川鹽則自行楚以後。廣開井竈。其色甚白。其質甚乾。川販因之而居奇。淮岸因之而日廢。喧賓奪主。莫斯爲甚。此鹽色之勝於淮者其害二也。淮鹽定章。以五百引起票。係於鑒於道光末年改辦票運。不拘引數。聽商稟認。厥後承辦數千引之大販。皆爲一二十引之小販。搶運所誤。故新章定以限制。一以杜無本冒充之弊。一以驗有力承運之資。計請鄂湘引票五百引。非現銀七八千兩不辦。川鹽則計斤不計引。集資數百千。即可辦運。鹽皆散裝。既官私之莫辨。釐不預納。亦來去之自由。此籌運之巧於淮者其害三也。淮湘兩局籌鹽。皆以到岸之先後。定出售之遲速。鹽未到輪。不准搶賣。近數年來。銷雖極疲。而商未跌價。深得整輪之益。但在船守風。抵岸守輪。計一檔之鹽。非一年之久。不得脫銷。川鹽則到處可售。得價即賣。銷路廣。則窮鄉僻壤。徧地皆私。賣價輕。則鋪戶行家。非川不鬻。此籌銷之便於淮者其害四也。有此四害。淮何能與川敵。川鹽一日不停。淮鹽一日無暢銷之望。議者謂川鹽停止於川省業鹽人等有礙。殊不知淮南通泰二十場垣商煎了。以及鉤橫細絮人等。不下數百萬戶。兵荒年久。困苦顛連。爲從來所未有。端望江路通行。規復引地。徐圖轉機。不料湘鄂最暢之岸。盡爲川私以占。西岸亦爲粵私閩私所占。場運各商。倒歇之家固衆。而煎細各役。失業之人尤多。比之川省業鹽者。何止數倍。凡認淮引之商。屢赴臣衙門呈遞稟詞。請堵川私。幾無虛日。譬之家有田產。任客民多年占據。爲尊長者。忍視子弟之啼飢號寒。而不爲之救。有是情乎。至湖北軍餉。原以川釐爲大宗。刻下髮捻俱滅。軍事大定。鄂省存銀極少。餉項足敷周轉。況淮鹽內亦收鄂釐。淮銷果暢。鄂省卽因之而增。此時堵止川私。核與前准部文俟淮鹽暢行。應卽申明舊章。嚴禁鄰私。毋任侵占等語。實相脗合。相應請旨。敕下四川湖廣各督撫。停止川私行楚。以復昔年之舊制。而收經久之利權。臣職司鹵權。歷有歲年。所徵課銀。因軍餉緊要。未能多籌解

京私衷抱歉。耿耿於心。今雖交卸鹽篆。猶思籌異日之有餘。補近年之不足。我朝鹽法。沿明舊制。畫分引地。係大經大法。一成而不可易。今南北軍務告竣。而不力爭以圖規復。則二百餘年之憲典。自臣而墮。其拂逆商情。斂一時之怨。厥咎尙輕。敗壞成法。貽後世之譏。厥咎更重。用是縷晰具陳。如蒙諭旨准禁川私。應如何分立限期。漸減漸停。如何堵緝粵私。潞私。閩私。不復抽收鄰稅。統由新任督臣馬新貽核議章程。奏明辦理。所有請禁川私行楚。收回淮南引地緣由。理合會同兩江督臣馬新貽恭摺具奏。伏乞皇太后皇上聖鑒訓示。謹奏。

陝甘協餉歸湖北轉解片 同治七年十月初五日

再廣東提督劉松山所統老湘營一軍。自同治五年冬間入陝以後。凡餉項軍火棚帳雜械一切。俱由江南供支。其運送承接之處。一曰清江轉運局。一曰徐州糧臺。一曰靈寶糧臺。三處接遞。源源轉輸。彼時揆揆無定。各軍奔馳於道。清江徐州兩處。供應繁多。非專爲老湘營而設。其靈寶糧臺一處。則係奏明專管老湘營餉項。現在捻股蕩平。各軍凱撤。其轉運局糧臺。各有長雇之車馬。有護送之勇丁。費用浩繁。應即次第裁撤。以節經費。惟劉松山一軍。奉命西征。所有該軍餉項。臣與新任督臣馬新貽。撫臣丁日昌面商。仍歸江蘇接濟。俾劉松山無後顧之憂。方能一意勤賊。其轉運之路。則須從長計議。籌一可久之策。從前江南餉項。解至清江登陸。由徐州轉解汴梁洛陽等處入關。旱路近三千里。勢迂而費多。不若由江路直達湖北襄陽之老河口。再行登陸。則由浙川入紫荊關。旱路三百餘里。勢順而費少。該軍月餉。約計每月正項需銀六萬有奇。嗣後江蘇協餉每月籌銀六萬兩。解交湖北省城。甘肅後路糧臺接收。合之左營穆營之三萬兩。劉典營中之一萬兩。計江蘇協濟陝甘之餉。每月共十萬兩。均解湖北。由陝甘委員彙同各省協餉。併解襄陽老河口登陸入關。昨據徐海道高梯稟稱。蘇豫交界地方。游兵散勇。三五乘騎。絡繹來往。槍械馳逐。解餉深恐遺誤等語。此時糧臺未撤。已有戒心。項臣已將靈寶糧臺裁撤。而徐州糧臺清江轉運局。明年亦必裁撤。數千里無一營盤。又無臺局勇丁護送。陸路太遠。實不放心。不若改由襄陽入秦。水路愈遠愈便。陸路愈少愈好。至老湘營未經勘驗以前截止。四年五月底止。欠發銀九萬九千四百九兩有奇。尙係兩江境內勦賊時之欸。仍應由江南籌發。業經臣札飭湖南督銷淮鹽局分作十箇月。每月籌銀一萬兩。解至湖北。交甘肅後路糧臺轉解該軍。以清積欠。臣交卸之際。應將經手事件。略爲結束。相應奏明。請旨

救下陝甘江南河南各督撫查照辦理。謹附片陳明。伏乞皇太后皇上聖鑒訓示。謹奏。

鄒鳴鶴請優卹摺 同治七年十月初五日

奏爲殉難大員政績卓著。籲懇天恩。從優加卹。以表循良。而彰忠節。恭摺仰祈聖鑒事。竊據前任浙江寧紹台道史致諤等二十人。聯名呈稱。原任廣西巡撫鄒鳴鶴。江蘇無錫縣人。由進士出宰河南。政聲卓著。著升道員。道光三十年內外大臣。交章論薦。由江西糧道。特擢順天府府尹。簡授廣西巡撫。咸豐二年。逆匪圍撲省垣。嬰城苦守。三十三晝夜。城賴以全。嗣因被議去職。回籍。三年正月。金陵戒嚴。奉旨督辦沿江防堵事宜。時已病甚。力疾馳赴江寧。會同地方文武。竭力守禦。總督陸建瀛。憫其老病。勸令還家。憤然拒之。二月初十日。城陷。率衆巷戰。手刃二酋。賊僑至。遂被支解殉節。奏蒙諭旨。照道員例議卹。在案。竊思鄒鳴鶴巡撫廣西。力保危城。厥功甚偉。旋以辦團大員。殉節金陵。同治二年。克復後。其子遍求骸骨。并無覓葬之所。情形慘烈。哀動路人。現在東南軍務。一律肅清。朝廷褒忠之典。有加無已。可否專奏。從優加卹等情前來。臣查鄒鳴鶴在開封府任內。正值祥符決口。捍禦水災。卓然有古循吏風。汴人至今感頌。其官順天府府尹時。臣在京供職。與之往還。心敬其人。迨巡撫廣西。守城卻賊。公論昭著。回籍後。以閒散之員。力疾辦團。誓死勿去。綜其生平。歷任府縣。均有政績可傳。而在江寧殉節。本無守土之責。尤爲臨難不苟。大節凜然。該員曾任廣西巡撫。合無籲懇天恩。俯准照巡撫例。從優加卹。并准特旨予諡。以表循良。而彰忠節。出自逾格。鴻慈。所有殉難大員政績卓著。籲請從優加卹緣由。理合會同新任督臣馬新貽。據情陳奏。伏乞皇太后皇上聖鑒訓示。謹奏。

湘軍第五案報銷摺 同治七年十一月初三日

奏爲湘軍第五案軍需欸目邊旨造冊報銷。恭摺仰祈聖鑒事。竊臣欽奉同治三年七月初十日上諭。同治三年六月以前各處辦理軍務。未經報銷之案。准將收支欸目總數。分年分起。開具簡明清單。奏明存案。免其造冊報銷。其自本年七月起。一應軍需。凡有例可循者。務當遵例支發。力求撙節。其例所不及。有應酌量變通者。亦須先行奏咨備案。事竣之日。一併造冊報銷。等因欽此。所有同治三年六月以前。簡明清單。分爲四案。臣於六年二月初八日。專摺具奏。並聲明三年六月以後。至四年五月北征之日止。督飭各員接辦。照例報銷在案。查四年

閏五月以後。湘淮各軍。同爲勦擒之師。應由臣與湖廣督臣李鴻章會同造報。另案辦理。其自同治三年七月初一日起。至四年五月底止。臣尙未奉旨勦擒。以前所有隨時遣撤。及留防之湘軍。一切用款。仍由臣飭派江西候補知府王延長。安徽候補知府李興銳。彭嘉玉。一手經理。逐款清釐。作爲湘軍第五案。茲據安徽藩司張兆棟等督率王延長等詳稱。仿照簡明清單。據實開報之意。而另造細冊。咨部查核。以符造冊報銷之義。綜計收欸第四案。簡明清單內。實存銀九萬八千五百兩有奇。實存錢七萬二千六百八十九兩有奇。新收江皖湘鄂各省藩庫道庫。關稅。釐捐。茶稅。鹽釐。及扣存製造轉運等項平餘。共銀七百七十二萬六千四百二十二兩有奇。內除補放各軍欠餉三百四十二萬四千七百三十五兩有奇。錢一萬九百三十一千有奇。協濟外省餉銀一百三萬三千一百五十三兩有奇。計實收銀三百三十五萬九千三百四十九兩有奇。錢六萬一千七百五十七千有奇。開除正雜各欸實銷銀三百三十四萬七千五百二十二兩有奇。錢三萬六千九百一十千有奇。實存銀一萬二千二百九十六兩有奇。錢二萬四千八百四十七千有奇。歸於勦擒軍需案下接辦。以上各營用款。自同治三年七月初一日接報起。截至同治四年五月底出省勦擒止。畫清界限。各歸各報。其有未調勦擒。隨後裁撤之湘中。強中。義從。吉左。湘副後。長勝各營。附入此次造銷。以了湘軍東征積贖。入欸不足。則酌提五月以後釐金鹽釐兩項補足。以清欸目等因。具詳請奏前來。臣查從前各路軍營辦理報銷。均按軍需則例。分欸開報。其有與例不合者。必一一稟就求合乎例而後止。在當時定例。誠以軍營用款。最易冒銷。故於萬不能定數之事。而使之束縛於定例之中。所以杜冒濫。定限制。立法未爲不嚴。用意未爲不善。然相沿既久。不問用款之有無虛實。但求造冊之針孔相符。內外胥吏。互相勾結。以冊式爲秘笈。以報銷爲利藪。而於公家帑項。毫無裨益。臣此次造冊報銷。嚴飭各委員認定實用實銷四字。不准設法騰挪。不准曲爲彌縫。情願與部例不符。不願與實數不合。蓋部中則例。定自乾隆年間。其時全用經制之兵。用部撥之餉。與此次兵由外募。餉由外籌。情形迥不相同。卽嘉慶年間。參用勇丁。而所募之數甚少。所定之例甚略。從未有一軍募至十餘萬之多。行之十餘年之久。如此次者也。臣於咸豐三年初募湘勇。係照江忠源營中發餉章程。酌量核減散勇。每月四兩二錢。親兵四兩五錢。什長四兩八錢。在衡州將章程刊刻一次。頒發各營。厥後略有增改。在江西刊刻一次。至咸豐十年。在祁門又刻一次。自後遵守多年。不復更改。臣

之刊章。雖未進呈御覽。而東南各省。傳播已徧。卽京師亦間有流布者。嘗在聖明洞鑒之中。臣於咸豐七年九月。具奏報銷規模。同治四年臘月。具奏水師事宜。均將發餉數目。大概陳明。而駱秉章胡林翼喬松年前後所奏。均有照臣處刊本章程發餉之語。是臣營餉章。昭昭在人耳目。斷難一字掩飾。茲將咸豐十年所刊營制營規各一本。隨摺咨送軍機處備查。此次報銷卽係照刊本核算。從前江南大營請銷兵丁口糧。每名月支銀三兩八錢有奇。仍支本身餘丁。本色口分米糧。加以管帶員弁大小約三十餘員。鹽糧等項。連原省坐糧。每用兵一千名。每月約需銀七千兩。請銷勇營口糧。每名日支錢三百文。錢價酌中折銀。每名月需銀六兩以外。加以管帶各官。薪水雜支。每勇千名。每月亦逾六千兩。臣部湘勇以五百人爲一營。營官哨官勇夫薪糧公費統計一營月支銀二千八百兩有奇。每勇千名合計不過五千七百餘兩。較之江南大營。成案有減無增。向例軍營各官。遞升一階。則酌加薪糧若干。或得一巴圖魯勇號。則領餉更優。臣所定湘軍陸師章程。專論差使。不論官階營哨。各官論功則隨時保擢。領餉則從不加支。卽使從千把保至提鎮。而薪糧如故。其巴圖魯等項。亦但有虛榮而無實惠。他如旗幟號衣書醫匠役。例准支銷者。悉包括於公費一項之內。故由後來論之。則安徽河南山東等省之餉章。較之巨軍而更少。由前此論之。則向榮和春張國樑等軍之餉章。較之巨軍而更優。自臣定章以後。湘軍四出援剿。鄂皖江浙秦蜀黔粵等處。大率從臣章者居多。亦有先從而後改。大同而小異者。又有雖隸臣部下而飽超之靈字營。劉松山之老湘營。王可陞之陞字營。不盡遵臣刊章者。要之。凡勇千名。月餉總不得越五千八百兩。李鴻章所部諸軍。同治元年初至上海。孤軍特起。地處極危。不得不稍加優異。以鼓士氣。四年二月間。李鴻章附奏軍需用欸一片。係指在滬蘇用兵時發餉而言。欸目稍異。情形不同。然亦千勇未嘗逾六千兩之數。迨四年五月。臣奉旨督師所用各軍。淮多湘少。同爲勦捻之軍。仍照刊章。一律支放。此又因時權衡。而仍力求撙節之本意也。向來採買製造。爲銷欸之弊。蓋臣於帳棚軍火。再三推求。博訪而預籌之。但有製辦太多之患。而無價值過昂之弊。向來軍需正欸。收放一律庫平。惟雜欸每百兩扣平餘銀一兩。臣營初亦純用庫平。自咸豐九年。起與胡林翼議定。無分正雜用欸。概以湘平支放。而所收各處庫平。每百兩申出三兩六錢。另列入欸撥用。積少成多。所省頗巨。向來花名清冊。爲送台領餉之據。卽爲送部備查之案。然兵冊則的名居多。勇冊則假名居多。相沿已久。蓋勇丁去來無定。

原籍本無伍符可稽。而又有汰革者。告假者。隨時更換。又或疫疾連喪數十人。大敗連喪數百人。倉卒難以募補。則其空缺之時。應有截贖銀兩。在營官之賢者。或將此項截贖銀兩。多養死士。修補軍械。不肯者。則以此自肥私橐。臣每於各營遣撤之時。飭令繳出。截贖銀若干。平日則未及深究。若令按月造送名冊。彼不能將贖缺一一呈明。必造假名冊以應之。積習牢不可破。臣洞悉此弊。故刊章內。但以勤於點名為重。而不以造花名冊為重。各營無冊送臣處。臣遂無冊送部。咸豐九十年間。戶部屢次催造花名冊。臣迄未造送。其有違部例者在此。其不欺朝廷者亦在此。此心可實鬼神。初無絲毫意見。致與部臣相抗也。今此案造冊報銷。亦但造銀數冊。仍未造花名冊。實不欲以臨時編造偽名。稍涉欺飾。伏乞皇上垂察。敕下該部曲為鑒亮幸甚。將來勦擒軍需。惟湘各軍。同支江南之餉。臣與李鴻章會同造報。亦擬不造花名冊。以歸簡易。理合預行陳明。所有湘軍第五案造冊報銷緣由。專摺具陳。伏乞皇太后皇上聖鑒。敕部核覆施行。謹奏。

酌議江蘇水師事宜摺 同治七年十一月初二日

奏為酌議江蘇水師事宜。恭摺仰祈聖鑒事。竊臣擬酌改江南外海水師營制。業於本年四月初七日附片陳奏。大概在案。伏思釐定新章。必須參稽舊制。查中樞政考所載江南水師。向分外海內河兩支。外海兵六千七百七十六名。官一百一十八員。內河兵八千零二十一員。官一百三十三員。其船數則無可稽考。道光二十四年。前督臣璧昌奏稱江南舊例。營船二百七十五隻。業已破廢不堪。另造舢板船一百三十五號。大舢船十二號等語。約而計之。其船不過裝載二千數百人。額定之兵尚有萬餘人。無船可載。有水師之名。無舟楫之實。不能不大為變通。講求實際。竊謂水師之多少。宜以船隻之多少為斷。無船則兵無用武之地。官為虛設之員。欲定水兵之額數。必先籌口糧之入款。兼籌修船之經費。即如海外船隻。須用廣艇紅單拖督之類。每造一號。動費數千金。夾底者。或萬餘金。加以大小修整。繩索槓具。子藥礮械。所費更為不貲。上而火輪兵船。用款尤鉅。下而舢板小艇。需費亦繁。竭江蘇之物力。不過辦船百餘號。裝兵三千餘人而止。其不能不大裁舊制之兵。酌減舊設之官者。勢也。至於養兵之餉。舊制水師亦照陸營之例。有馬糧戰糧守糧等名目。平日或小買營生。或手藝餬口。尚不足以自存。今既責令常住船上。不得不稍從優厚。故長江章程。兵糧月支二兩七錢。或三兩不等。較戰糧已加一倍。較守糧幾

加二倍。今議江蘇水師亦宜仿照長江之例。外海則尙須略增。自軍興以來。綠營之兵無功。各省之勇著績。兵丁亦頗以平素餉薄爲辭。今欲一兵收一兵之用。不能不酌增口分者。亦勢也。惟旣增出款。卽須籌畫入款。長江之餉。五省各留釐卡一處。係出於正賦之外。臣尙以太多爲慮。江蘇水師則經費出自司庫。斷不能於正額之外。添出無著之餉。尤不可狃抽釐之說。留一永遠之卡。溯查乾隆四十七年。增兵六萬有奇。其時大學士阿桂上疏。陳論以爲國家經費驟加。不覺其多。度支則難爲繼。臣國藩於咸豐元年。在侍郎任內。奏請裁兵。卽引伸其言。歎爲遠慮。今日整理水師。豈肯盡背前言。江蘇水師。嘉慶道光年間。每歲用銀若干。蘇省無案可稽。此時約略計算。總不欲使新章之銀。浮於船制之外。如其不敷。更須酌裁陸兵。以補救之。不獨江蘇爲然也。卽沿海各省。整頓水師。均須核算餉項。如使新餉果浮於原數。卽應兼裁陸兵。以酌濟水餉。蓋水師久無戰船。非修造兩三年不能集事。陸路縱缺額兵。苟募軍兩三月卽可成軍。陸路則有事招勇。無事裁撤。水路則製器於多年。取用於一旦。權衡緩急。海疆似以水營爲重。其他省之但有陸兵。并無水師者。縱不遽議裁撤。趁此中原大定之際。亦可將出缺之弁兵。緩至二十年後再議募補。將來重募之日。儘可仿浙江之例。大減額兵。酌加口糧。此又因節省經費。而兼籌陸營之計也。謹擬江蘇水師事宜十四條。管制十六條。繕具清摺。恭呈御覽。伏乞敕下各衙門詳細會議。歸於至當。凡疆臣奏事。每畏部臣駁詰。亦古來之恆情。獨至此等大政。則不畏駁詰。且惟恐其不駁。惟恐其少駁。目前多一詰難。日後少一愆尤。不特求部臣再三駁詰。卽江蘇前後各任。如協辦大學士湖廣督臣李鴻章。在蘇省用兵最久。洞悉水陸情形。兩江督臣馬新貽。在浙江辦理滅兵事件。講求已熟。江蘇撫臣丁日昌。素有捍禦外洋之志。並請敕下李鴻章馬新貽丁日昌各抒所見。將江蘇水師船政。妥爲核議。務使外防與內盜并謀。舊制與新章兼顧。臣雖離兩江。尙有所見。仍當續行陳議。期於利多弊少。不特江蘇爲然。卽長江水師亦乞敕下沿江五省督撫。隨時察看。如有不妥之處。三年以內。儘可奏明。斟酌損益。臣斷不因係初議之人。稍存迴護之見。臣之微意。不過欲使中國兵勇。以舟楫爲望家。以海洋爲坦道。庶幾專以屢試而漸精。人以狎水而漸壯。至於船式如何而後善。營制如何而後強。自當博採羣言。不敢略執成見也。一俟江蘇水師定章後。沿海閩粵各省。均可參酌辦理。大局幸甚。所有酌議江蘇水師事宜緣由。謹會同兩江督臣馬新貽。江蘇撫臣丁日昌恭摺具奏。伏乞皇太后皇上聖鑒。

訓示。謹奏。

謹將酌議江蘇水師事宜十四條開單恭呈御覽。

第一條 分別內洋外海及裏河三支

江蘇轄境江海滙歸之處。固稱澤國。卽江以南蘇常松太等屬。亦復湖河紛歧。陸步皆水。原制水師內河外海。分爲兩支。今擬改爲三大支。曰內洋。曰外海。曰裏河。自江陰之蝦蟆山以東至崇明之十墩口四百餘里。皆長江之尾閘。此內洋也。自十墩口以東八十里至佘山。由佘山以北至贛榆縣之鷹游門。出洋約八九百里。與山東洋面毗連。內爲五條沙。外爲黑水洋。由佘山迤南。至金山衛出洋。約二百七十八里。與浙江洋面毗連。此外海也。至腹地之水。以太湖爲巨浸。太湖入海。凡分三道。北爲劉河。南爲黃浦江。中爲吳淞江。此裏河也。就內洋而論。北岸之港。五十有四。南岸之港。二十。崇明之港。五十有五。沙路叢出。最易藏奸。就外海而論。半山馬蹟花腦陳錢有嶼避風。皆爲盜賊出沒之所。其沙船遇盜。則佘山前後尤多。就裏河而論。太湖久爲盜藪。而泖湖澱山楊城崑城等湖。及福山江陰等口。亦常有搶劫之案。外而禦侮。內而詰奸。三支水師均不可少。

第二條 內洋外海水師分立營數

江南水師向以提督所屬之南漕一營。蘇松鎮之中左右三營。及所屬之吳淞川沙二營。福山鎮之左營一營。狼山鎮之右營一營。及所屬之掘港一營。爲外海九營。近年長江章程內。新議添設狼山鎮屬有通州海門二營。共爲十一營。今酌量核議。應於其中分五營。爲內洋水師。分六營。爲外海水師。查福山一鎮。係道光年間所創。外海之營太少。今擬撥蘇松鎮之吳淞川沙二營。改歸福山鎮管轄。凡內洋五營。曰蘇松鎮之右營。曰福山鎮之左營。曰狼山鎮之右營。通州海門營。凡外海六營。曰提督之南漕營。曰蘇松鎮之中營左營。曰撥歸福山鎮之吳淞營。川沙營。曰狼山鎮之掘港營。內洋五營。略分汛地北岸。上游狼山右營主之。北岸下游。通州營主之。南岸上游。福山左營主之。南岸下游。海門營主之。崇明南北。皆蘇松右營主之。外海六營。則不分汛地。當以吳淞十墩口兩處爲各艇船停聚之所。無事之時。則分別月分。輪流巡哨。有事之際。則不分畛域。一體勦捕。至於分月巡哨之章程。失事之處。分統俟初次部覆到後。再行續議。其內洋五營。與長江水師之江陰營。如何分

別巡哨。互相防衛之處。亦俟下次續議。

第三條 裏河水師分立營數

江蘇裏河。向有提標右營。太湖水師左營右營。茲仍其舊。而另添崧北營崧南營。共爲五營。崧北營巡緝吳淞江以北之支河湖蕩。如尙湖昆城湖陽城湖金雞湖之類。並查劉河北茆七丫福山江陰等出江之口。崧南營巡緝吳淞江以南之支河湖蕩。如殿山湖澄湖龐山湖鷺脰湖暨葉舍蕩王江涇等處。與浙江接壤。鎗船出沒之所。汛地至三泖爲止。太湖左營巡緝東路蘇州所屬湖面。右營巡緝西路常州所屬湖面。兼查運河東流西流長蕩湖獨湖等處。提標右營巡緝自三泖起。至吳淞口止。專防黃浦江駛入腹地之門戶。凡裏河五營。不復分隸各鎮。專歸提督統轄。仍聽督撫節制。惟從前舊制內河各營。雖名水師。實則并管陸路。各有汛地。此次五營所分地段太寬。支流太多。凡近水面有事。皆係水師之責。近水口岸。亦可兼顧。若離岸稍遠。水師不能兼顧。

第四條 狼山鎮新設之通州海門二營仍須酌改規制

長江章程第二十六條內。載狼山江寬百餘里。洪濤浩瀚。海風不測。長龍舢板。船身太小。有風卽不能出港。擬每營造大舢板二十號。并造紅單拖罟等大船數號等語。茲查長江之舢板。槳枝多而船身低。於該處甚不相宜。而紅單等船。又嫌其太大。惟現造之八團舢板。尙屬合用。但專靠風力。不用人力。無風有湖。則不能行駛。且修造之價頗貴。爲數不宜太多。今酌船隻之大小。以定營制之多寡。應改爲通州營八團。舢板十二號。海門營八團。舢板十二號。較原議共減去二十三號。至臣國藩於同治四年臘月議長江章程一案。營制摺內。通州海門兩營。皆係舢板二十號。事宜摺內。副將營應派舢板四十三號。本年三月議補缺案內。將海門舢板補四十三缺。但顧副將營四十三號之通例。遂忘海門營二十四號之專條。係屬錯誤。應請旨將臣國藩交部議處。此外如續有查出錯誤之處。容隨時奏請更正。至江蘇內洋外海水師。既已另立規制。則通州海門二營。仍應歸江南提督專管。長江提督兼轄。

第五條 各營船制數目

江南水師船數兵數。兵燹以後。無案可稽。僅由蘇松鎮衙門鈔得原任督臣璧昌道光二十四年十一月奏案

一件。據稱舊例江南營船二百七十五隻。業已破廢不堪。璧昌等乃議減數另造。計外海大舢船十二號。內洋大舢板船八十五號。小舢板船三十八號。當時船式。今不可考。臣於本年訂造廣艇。仿廣東紅單拖罟之式。僅成一號。訂造八團舢板。已成十餘號。尙屬合用。將來經久章程。擬造廣艇十二號。外海六營。每營各撥二號。每號記兵約四十名。擬造八團舢板六十四號。內洋五營。每營各撥十二號。每號記兵約二十名。擬撥長江之式舢板七十六號。添北添南營各十五號。太湖二營。各十五號。兼用八團舢板各二號。提標右營二十號。每號記兵十四名。擬造火輪兵船四號。每號記兵約五十名。至八十名不等。共計戰船一百五十六號。較之璧昌稟案多出二十一號。較之舊制尙少一百十九號。蓋弁兵之薪糧宜增。而司庫之經費有限。不宜多設額缺耳。

第六條 添用火輪協巡

八團舢板及廣艇。皆須乘風乘潮。一遇風逆潮阻。均難行駛。惟輪船則風水兩無所礙。擬以現在海生小輪船一號。交福山鎮管轄。飛龍小輪船一號。交狼山鎮管轄。專巡內洋。以捕盜肩天平輪船一號。交提督管轄。鐵皮輪船一號。交蘇松鎮管轄。專巡外海。上海鐵廠今年造成者。尙非兵船。此後即續造火輪兵船。擬造四號。分撥提督。及蘇松狼山福山三鎮。爲專巡外海內洋之用。

第七條 設廠修造戰船

上年因船隻太少。海面屢有搶劫之案。本年雇廣艇八號。民船二十餘號巡緝。尙稱得力。又在廣東借艇船二號。在揚州買艇船一號。其在吳城新廠新造者。廣艇甫成一號。八團舢板已成十餘號。尙欠四十餘號。明年春夏乃可辦畢。現定於金陵之燕子磯設立船廠。若辦艇船十二號。則須吳城燕子磯兩廠並造。又須至廣東購造以輔之。計三處經營。二年乃可辦畢。每成一號。即將現雇商人之艇船退去一號。至上海鐵廠修造輪船。本年造成者。尙非兵船。此後乃續造兵船。如造四號。亦須二年乃可辦畢。其裏河五營所用之舢板。即用李朝斌所部太湖水勇之船。目前暫可無須另造。然其中多有咸豐八九年以後所修造者。漸已朽壞。勢亦不能久待。即當陸續抽換。將來三年一小修。十二年一更換。均照長江之例。排定子丑寅卯年分。舢板在金陵船廠輪流興工。輪船則在上海鐵廠興工。廣艇一項。則或在金陵船廠修造。或借上海船塢整理。或赴廣東購造。隨時斟

酌委辦。船廠所以設於金陵者。以木簡不宜入鎮江以內之裏河。不宜入江陰以下之內洋也。故在上游較爲穩便。

第八條 新營與舊制酌量更改

向來水師之制。新章有必須更改者。舊時雖有水師之名。并無船礮之實。將弁皆常住衙署。新章則宜常住船上。舊制水師亦有戰兵馬兵守兵之名。新章則不分馬步。但有舵工水手之名。舊制江南戰船經費。司庫所撥甚少。悉令道府州縣攤捐。新章則以船礮爲最要之務。經費宜籌巨款。舊制水兵月支一兩至二兩不等。口糧太輕。誰肯效命於大海風濤之中。新章擬增加口糧。欲加口糧。不得不裁減昔年之兵額。查中樞政考內載江南內河水師兵丁八千零二十一。名。外海水師兵丁六千七百七十六。名。內河副參游都守共二十一員。千把外委一百零四員。外海參游都守共十七員。千把外委九十九員。臣令擬定新章。水師專以管船爲主。每船各設一官。船大者酌設兩官。其無船之官。皆須裁撤。約計應裁去兵一萬一千餘人。應裁去官六十餘員。乃與船數相符。茲將各營酌改舊制。及擬裁官兵。另開清單。恭呈御覽。

第九條 弁兵薪糧

長江章程。兵丁中舵工月支三兩六錢。管艙頭工礮手等月支三兩。槳手月支二兩七錢。茲定江蘇三支水師。其裏河五營。內洋五營。將弁兵丁書識等。悉照長江水師章程給發。至外海六營。弁兵格外辛苦。均宜稍從豐厚。凡養廉俸薪蔬菜燭炭紙張等項。擬請副將月加銀二十兩。參將游擊月加銀十六兩。都司加十二兩。守備加十兩。千把外委加八兩。廣艇舵工月給銀九兩。班手月給銀六兩。其餘兵丁書識月給銀四兩五錢。庶與內洋及裏河水師顯示區別。至火輪船之將弁舵工兵丁。俟兵船造成後。另行續議。其外海提鎮。酌加廉銀。亦俟奉到部覆。另行續議。

第十條 前議淮揚水師應行緩辦

長江章程第五條內載。安徽淮河自正陽關以下。至洪澤湖止。并接連蘇屬之支河湖蕩。應另設淮揚水師。鎮江以東。凡江南之支河湖蕩。應另設太湖水師各等語。今此案太湖水師即包於裏河五營之內。是江以南之

湖河業經粗定章程矣。至江以北淮揚海三屬。舊制本有東海鹽城營。若與安徽之洪澤湖一帶共立一支水師。係屬正辦。臣亦嘗與安徽撫臣往返咨商。將淮揚水師章程議妥。將行具奏矣。近聞榮澤決口。黃河南趨。渾水已入洪澤湖內。若使大溜果注江南。則局勢全變。泛濫無定。所有淮揚水師之說。自應緩辦。東海鹽城兩營。祇可姑仍其舊。置之不議。如明年榮澤合龍。黃流北趨。江淮晏安。則蘇省之東海營水師。鹽城營水師。自可酌修礮船。整理舊制。而皖省之洪澤湖上下。亦可添立二三營。爲一支水軍。以詰奸而禦侮。惟經費有常。必須量入爲出。現議江蘇水師極力撙節。斷不使新章之費。浮於舊制之外。將來議淮揚水師。亦須加意撙節。或裁陸營之兵。增水營之餉。不使新章之費。浮於舊制之外。乃爲可久之道。此外如湖北湖南江西三省支河湖汊。原議亦有另行設防之說。今軍政大定。長江之礮船足敷各省之調遣。該三省如須另立水師。似亦宜裁減陸兵。添濟水餉。不使新章之銀。浮於舊制之外。庶臻妥愜。因臣淮揚而兼及安徽。因安徽而兼及兩湖江西。蓋緣數省水軍設防之議。發自微臣。恐糜費過巨。不得不慮及久遠也。

第十一條 緩撤太湖水勇

江蘇之太湖水師。係同治二年所立。歸李朝斌統帶。當時軍務喫緊。處處皆須礮船防禦。厥後蘇境肅清。李朝斌補授江南提督。此項礮船。卽爲調勘擒匪。捕拏水盜。及保護釐卡之用。臣回任後。陸續裁撤四營。現在尙存七營。今裏河既立五營。自應將水勇七營之船。改爲經制五營之船。但移換之際。最難妥協。若將七營之哨勇。遽行裁撤。改用舊官舊兵。則陸居已久。操舟不慣。勢難用短而捨長。若全留水勇。分隸各營。概以舊官管帶。則兵將不習。必至不相融洽。若以水勇改爲水兵。卽以現在之營哨官充補舊缺。則舉官又無從位置。再四思維。惟有將七營水勇。儘明年內緩緩裁撤。每撤一營。騰出船礮。卽交舊官舊兵使用。舊兵不足者。募水勇以充補。此一年數月之中。遇有裏河五營缺出。卽將應撤之營哨官酌補。使勇營之官。與舊營之官。狎處相習。庶兵丁可漸慣舟居矣。

第十二條 裁出之缺分標另補

此次裁缺人員。江蘇之內河外海水師。共裁千把外委六十五人。係中樞政考舊定之缺。長江之通州海門兩

營共裁守備千把外委二十三人。係本年奏定新設之缺。該弁等本有實缺人員。勢不能不遺以一缺。調補他處。今擬通州海門兩營裁去之員。俟有長江水師缺出。即歸於長江提督黃翼升會商總督。先行敘補。必須此項有缺人員。補完之後。始能另補他項人員。外海內河各營裁去之員。俟有江蘇水師缺出。即歸於江南提督李朝斌會商。先行敘補。必須此項有缺人員。補完之後。始能另補他項人員。此兩項舊官。其於未經補缺之先。仍准酌給薪俸。以資贍養。至江蘇所裁之缺。因遷就姑存舊官。是以全裁外委未裁千把。將來千把出缺。應以一半酌改爲外委之缺。以期與營制相合。其究應裁千把若干。外委若干。俟初次部覆到日。再行續議。

第十三條 三鎮酌留陸兵

從前蘇松狼山福山三鎮。所轄外海內河各營。雖名水師。實則兼管陸路。故解犯解餉。看守城門等事。皆屬陸兵之責。各鎮皆有中軍。皆有隨身兵丁。伺應差事。今既酌改舊制。水兵以船爲家。則陸路公私差使。無人承應。擬三鎮各留陸兵百人。以備差遣。至中軍係標下之領袖。蘇松鎮中營。今議仍舊。即以中營游擊爲中軍。狼山鎮中營。現議裁去。該鎮本駐通州。即以新設之通州營游擊爲中軍。福山鎮中營亦議裁去。該鎮所屬。尙有左營仍舊。即以左營游擊爲中軍。所留陸兵。均歸中軍兼管。庶水陸截然分途。而體制仍存舊規。

第十四條 計算出入經費

江蘇水師自嘉慶道光以來。每歲用金若干。蘇省無案可考。惟就中樞政考所載。水師十九營。官弁兵丁之數。約略計算。每歲需用俸薪餉項銀七萬六千餘兩。兵米四萬九千一百餘石。每石以銀一兩三錢合折。需銀六萬四千餘兩。共銀十四萬餘兩。又就鈔得璧昌之奏案。內稱江南舊設外海水師船一百七十一隻。三年小修。三年大修。又三年拆造。九年一周。例動司庫銀十九萬七千七百八十九兩有奇。內河水師船一百四隻。三年小修。五年大修。又三年小修。三年拆造。十四年一周。例動司庫銀五萬九千七百兩有奇。每屆一周。除司庫正支外。由道府州縣攤捐銀約在百萬以外。各等語。是除攤捐之百萬。十二年中。司庫實用銀二十五萬七千兩有奇。每年牽算。僅二萬餘金耳。司庫所發太少。而攤捐之銀。又有名無實。以致咸豐初年。並無一船。其流弊遂至於此。臣於此次酌定章程。審之又審。總求常有堅船。而又不欲使文員攤捐分文。又不欲使新章之銀。浮於

舊制之外。除火輪兵船一項。議在二成洋稅另議動支外。約計十六營官兵俸銀。每歲需銀十五萬餘兩。再加修船及各項雜費。歲需銀約三萬兩。兵米歲需銀約一萬餘兩。較之原制每歲多用銀三萬餘兩。此外尚有坐船書識子藥等費。不能不議裁陸兵。以補水師項額之不足。如陸兵不可裁。則需再減船數兵數。此事關係各省大局。應俟奉到初次部覆。乃可詳細續議。

謹將江蘇水師酌改舊制及擬裁官兵。開列清單。恭呈御覽。

計開

提督所屬之外海南滙營。原制都司一人。守備一人。千總一人。把總二人。外委二人。共官七員。配兵四百一十四名。

今擬仍爲提督之南滙營。添游擊一員。爲營官。用廣艇二號。每號正副哨官各一員。頭號正哨都司一員。副哨千總一員。二號正哨守備一員。副哨把總一員。配兵各四十名。共兵八十名。再增輪船一號。正哨都司一員。副哨守備一員。兵數俟續議。照舊制裁去外委二員。其把總一員。移於提督右營。其所添之游擊。擬以福山鎮內河中營游擊移調。其所添輪船之都司一員。擬以狼山鎮左營都司移調。其所添輪船之守備一員。擬以太湖營守備移調。

蘇松鎮所屬之外海中營。原制游擊一人。守備一人。千總二人。把總四人。外委六人。共官十四員。配兵八百一十名。

今擬仍爲蘇松鎮之中營。以游擊爲營官。用廣艇二號。每號正副哨官各一員。頭號正哨守備一員。副哨把總一員。二號正哨千總一員。副哨把總一員。配兵各四十名。共兵八十名。再增輪船一號。正哨添都司一員。副哨千總一員。兵數俟續議。照舊制裁去外委六員。其把總二員。移於太湖營。其所添輪船之都司。擬以內河京口協左營都司移調。

蘇松鎮所屬之外海左營。原制游擊一人。守備一人。千總二人。把總四人。外委五人。共官十三員。配兵八百零一名。

今擬仍爲蘇松鎮之左營以游擊爲營官。用廣艇二號。每號正副哨官各一員。頭號正哨守備一員。副哨千總一員。二號正哨守備一員。副哨千總一員。配兵各四十名。共兵八十名。照舊制裁去外委五員。其把總四員。移於太湖營。其所添之守備。擬以福山鎮內河中營守備移調。

蘇松鎮所屬之外海吳淞營。原制參將一人。守備一人。千總三人。把總六人。外委七人。共官十八員。配兵一千八十九名。

查道光二十三年。添設福山鎮總兵。僅立外海一營。今擬將蘇松鎮之吳淞營改歸福山鎮標下。以參將爲營官。用廣艇二號。每號正副哨官各一員。頭號正哨守備一員。副哨把總一員。二號正哨千總一員。副哨把總一員。配兵各四十名。共兵八十名。再增輪船一號。正哨都司一員。副哨千總一員。兵數俟續議。照舊制裁去外委七員。其千總一員。移於淞南營。把總四員。移於淞北營。其所添輪船之都司。擬以劉河營都司移調。蘇松鎮所屬之外海川沙營。原制參將一人。守備一人。千總三人。把總五人。外委七人。共官十七員。配兵一千五十名。

今擬將蘇松鎮之川沙營改隸福山鎮標下。以參將爲營官。用廣艇二號。每號正副哨官各一員。頭號正哨守備一員。副哨千總一員。二號守備一員。副哨把總一員。配兵各四十名。共兵八十名。照舊制裁去外委七員。千總一員。其千總一員。移於太湖營。把總四員。片於淞南營。其所添之守備。擬以狼山鎮內河中營守備移調。

狼山鎮所屬之外海掘港營。原制都司一人。千總一人。把總二人。外委二人。共官六員。配兵二百四十一名。今擬仍爲狼山鎮之掘港營添游擊一員爲營官。用廣艇二號。每號正副哨官各一員。頭號正哨守備一員。副哨把總一員。二號正哨守備一員。副哨把總一員。配兵各四十名。共兵八十名。再添輪船一號。正哨都司一員。副哨千總一員。兵數俟續議。照舊制裁去外委二員。其所添之游擊。擬以狼山鎮內河中營游擊移調。其所添之守備。擬以狼山鎮內河左營守備一員。蘇松鎮右營守備一員。移調。

以上外海六營。用艇船共十二號。營官六員。正副哨官共二十四員。兵共四百八十名。輪船四號。正副哨官

共八員。事宜內議定提督及蘇狼福三鎮。各帶輪船一號。將來或並不分標分營。俟輪船成後。再行續議。蘇松鎮所屬之外海右營。原制都司一人。守備一人。千總二人。把總四人。外委五人。共官十三員。配兵八百名。今擬仍爲蘇松鎮之右營。但改作內洋字樣。添游擊一員爲營官。用八團舢板船十二號。共哨官十二員。內都司一員。千總二員。把總四員。外委五員。每號配兵二十名。共兵二百四十名。照舊制裁去守備一員。移於掘港營。其所添之游擊。擬以內河京口協中營游擊移調。

福山鎮所屬之外海左營。原制游擊二人。守備一人。千總二人。把總四人。外委六人。共官十四員。配兵七百三十三名。

今擬仍爲福山鎮之左營。但改作內洋字樣。以游擊爲營官。用八團舢板船十二號。共哨官十二員。內守備一員。千總二員。把總四員。外委五員。每號配兵二十名。共兵二百四十名。照舊制裁去外委一員。

狼山鎮所屬之外海右營。原制游擊一人。守備一人。千總二人。把總四人。外委六人。共官十四員。配兵八百三十八名。

今擬仍爲狼山鎮之右營。但改作內洋字樣。以游擊爲營官。用把總四員。外委五員。每號配兵二十名。共兵二百四十名。照舊八團舢板船十二號。共哨官十二員。內守備一員。千總二員。照舊制裁去外委一員。

狼山鎮所屬新設之通州營。長江水師營。原制議用二十五人之長龍船二號。二十人之督陣大舢板船一號。二十人之大舢板船十號。十四人之舢板船十號。營官游擊一員。哨官都司二員。守備一員。千總四員。把總六員。外委十員。共官二十四員。配兵四百一十名。

今擬改用八團舢板船十二號。仍以游擊爲營官。共哨官十二員。內都司二員。守備一員。千總二員。把總三員。外委四員。每號配兵二十名。共兵二百四十名。照前制裁去千總二員。把總三員。外委六員。

狼山鎮所屬之新設海門營。除誤補之十九缺。已於事宜單內聲明外。查長江水師營制。原議用二十五人之長龍船二號。二十人之督陣舢板船二號。二十人之大舢板二十號。營官副將一員。哨官都司二員。守備三員。千總十員。把總九員。共官二十五員。配兵四百九十名。

今擬改用八團舢板船十二號。仍以副將爲營官。共哨官十二員。內都司二員。守備一員。千總四員。把總五員。每號配兵二十名。共兵二百四十名。照前制裁去守備二員。千總六員。把總四員。

以上內洋五營。用八團舢板船共六十號。營官五員。哨官共六十員。兵共一千二百名。

提督所屬之內河右營。原制參將一人。守備一人。千總三人。把總四人。外委七人。共官十四員。配兵七百四十七名。

今擬改爲提標裏河右營。仍以參將爲營官。用長江舢板船二十號。共哨官二十員。內守備一員。千總七員。把總九員。外委三員。每號配兵十四名。共兵二百八十名。照舊制裁去外委四員。其所添之千總四員。擬以劉河營千總二員。福山鎮內河中營千總二員移調。其所添之把總五員。擬以劉河營把總四員。南匯營把總一員移調。

提督所屬之太湖左右兩營。原制副將一人。守備一人。都司一人。千總三人。把總四人。外委四人。共官十四員。配兵七百七十七名。

查原制官數兵數。若干屬左營。若干屬右營。無案可稽。今擬仍爲提督之太湖左右兩營。左營以副將爲營官。右營即以都司爲營官。仍歸副將統轄。每營用長江舢板船各十三號。兼用八團舢板各二號。哨官各十五員。內左營千總三員。右營千總三員。兩營把總各十員。外委各二員。長江舢板每號配兵十四名。八團舢板每號配兵二十名。共兵四百四十四名。照舊制裁去守備一員。移於南匯營。其所添之千總三員。擬以川沙營千總一員。狼山鎮中營千總二員移調。其所添之把總十六員。擬以福山鎮中營把總二員。蘇松鎮中營把總二員。左營把總四員。狼山鎮中營左營把總各四員移調。

督標所屬之內河京口協中營。原制副將一人。游擊一人。守備一人。千總一人。把總五人。外委六人。共官十五員。配兵九百三十五名。

今擬改爲崧北營。仍以副將爲營官。用長江舢板船十五號。共哨官十五員。內守備一員。千總三員。把總十員。外委一員。每號配兵十四名。共兵二百一十名。照舊制裁去外委五員。其游擊一員。移於蘇松鎮右營。其

所添之千總二員。擬以狼山鎮左營千總二員移調。其所添之把總五員。擬以吳淞營把總四員。福山鎮中營把總一員移調。

督標所屬之內河京口協右營原制游擊一人。守備一人。千總二人。把總五人。外委六人。共官十五員。配兵八百七十六名。

今擬改爲淞南營。以游擊爲營官。用長江舢板船十五號。共哨官十五員。內守備一員。千總三員。把總十員。外委一員。每號配兵十四名。共兵二百一十名。照舊制裁去外委五員。其所添之千總一員。擬以吳淞營千總一員移調。其所添之把總五員。擬以福山鎮中營把總一員。川沙營把總四員移調。

以上裏河五營。用長江舢板船共七十六號。八團舢板船四號。營官五員。哨官共八十員。兵共一千一百四十四名。

漕標內河所屬之鹽城營。原制游擊一人。守備一人。千總二人。把總二人。外委二人。共官八員。配兵六百九十六名。

今擬暫仍其舊。

漕標所屬之內河東海營。原制都司一人。千總一人。把總二人。外委二人。共官六員。配兵四百五十二名。

今擬暫仍其舊。

督標所屬之內河高資營。改爲京口協左營者。原制都司一人。把總一人。外委二人。共官四員。配兵五百八十四名。

今擬裁去此營。其都司一員。已移調他處。實只裁把總一員。外委二人。

提督所屬之內河劉河營。原制都司一人。千總二人。把總二人。外委四人。共官十一員。配兵六百九十四名。

今擬裁去此營。劉河營之汛地。卽新章淞北營之地也。其都司一員。千總二員。把總四員。已移調他處。實只裁外委四員。

福山鎮所屬之內河中營。原制游擊一人。守備一人。千總二人。把總四人。外委六人。共官十四員。配兵七百七

十四名。

今擬裁去此營。其游擊一員。守備一員。千總二員。把總四員。已稜調他處。實只裁外委六員。

狼山鎮所屬之內河中營。原制游擊一人。守備一人。千總二人。把總四人。外委三人。共官十一員。配兵七百三十六名。

今擬裁去此營。即新設通州營之汛地也。其游擊一員。守備一員。千總二員。把總四員。已稜調他處。實只裁

外委三員。

狼山鎮所屬之內河左營。原制都司一人。守備一人。千總二人。把總四人。外委三人。共官十一員。配兵七百五十名。

今擬裁去此營。即新設海門營之汛地也。其都司一員。守備一員。千總二員。把總四員。已稜調他處。實只裁

外委二員。

以上擬裁者五員。

以上江南舊制。見於中樞政考者。外海內河水師二十一營。官二百四十一員。兵一萬四千七百九十七名。除鹽城東海兩營仍舊外。今改爲十四營。存官一百六十二員。實裁去千總一員。把總一員。外委六十三員。存兵二千四百四十名。實裁去一萬一千二百零九名。除官弁隨時補足外。兵則有目前本未招足者。如外海川沙營原額一千二十二名。現僅招一百名。內河太湖左右營。原額七百六十一名。現僅招七十五名。其餘可以類推。是今之所裁者。皆空缺之兵。非已補之兵也。亦有目前招募將足者。如吳淞營現有兵千餘人。狼山蘇松兩鎮。現各有兵二千餘人。提右營現有兵九百餘人。此項已招之兵。應仿浙江之例。分別裁遣。俟接到初次部覆。再行續議。至長江新設之通州海門二營。原制官四十九員。並誤補者凡六十八員。勇丁凡九百名。今仍定爲二營。存官二十六員。實裁去四十二員。存兵共五百二十八名。勇丁則全行裁遣。

江淮等屬墊發兵差酌議辦理摺 同治七年十一月初二日

奏爲查明江淮等屬。歷年墊應兵差。添設台站。酌擬辦法。以清交代。恭摺仰祈聖鑒事。竊照江蘇自咸豐三年用

兵以來。金陵及揚州。皆有欽差大營。江寧藩司所屬各州縣。承辦兵差。應付過境官弁。鹽糧馬乾車船腳價。以及運解軍需。絡繹不絕。迨十年。蘇常淪陷。江路不通。南北往來。均取道於裏下河。各州縣亦皆支應兵差。添設台站。夫馬快船。接遞軍報。其時藩庫空虛。州縣無從領款。皆係挪移正項錢糧。暫行墊付。遇交卸時。前任則將墊款列入交代作抵。後任則因係未經造銷之款。不肯作收。於是彼此推諉。相率因循。江寧藩司所屬交代之案。十餘年不能結報。職此之故。欲清交代。必先查辦兵差台站之墊款。欲查墊款。必先核明所墊之准銷。不准銷。分別報部。乃可定案。歷任江寧藩司。皆因軍務倥偬。未暇兼顧。同治五年夏間。經現任江寧藩司李宗箴詳明設局。督同委員候補知縣陸長齡。悉心查辦。准是兵差報銷。事逾十年。官非一任。頭緒極爲紛繁。聞有失守地方。案卷散失。兵勇去來。無可追溯。李宗箴力求覈實。酌定章程。支應兵差。必須過境起數。確有憑據。其所添台站。亦須有添設日期。並核對上下站冊報相符者。方足爲准。若無憑證。一概不准報銷。其曾經失守之句容。溧水。高淳。江浦。六合。阜寧。清河。桃源。江都。甘泉。儀徵等縣。案卷無存。雖失守以前。亦有承應兵差。添設台站之處。該藩司以一經失守。倉庫尙歸烏有。墊款更無庸議。亦皆不准報銷。而各州縣則謂雖無文據。實有是事。且本任並無公虧。所墊係屬私款。斷斷爭辯。堅請開銷。藩司之上遵部例。下杜冒濫。所執固有至理。州縣之巧者。浮開。愿者。賠累。所爭亦頗有苦衷。二年以來。紛紛辯論。殊乏剖晰至當之法。每際交卸。藩司則令解本屆之錢糧。兼索前此之舊欠。州縣則請撥還前此之墊款。乃能解現在之欠項。一縣而前任墊款。後任影射。一官而昔年墊款。近年藉口。歲月愈久。膠轕愈多。交代永無結算之期。臣任兩江最久。惟此爲經手未完之件。今將遠離北上。若再不設法清釐。恐後此流弊無窮。頃與督臣馬新貽。撫臣丁日昌。熟商辦法。囑令藩司李宗箴。不必過於拘泥。擬自咸豐三年起。至同治三年六月底止。仿照糧臺之例。開單奏銷。凡州縣應付兵差。添設台站之墊款。有文據者。准其開銷。即無確實文據。但有傳牌。摺單。或鄰縣有案可稽者。亦准量予核銷。惟墊款在前。失守在後者。概不准銷。以示限制。自同治三年七月起。至七年北征兵勇凱撤之時止。造冊送部核銷。凡州縣兵差台站墊款。非有確實文據者。均不准銷。開單者由外核斷。造冊者由部核准。所墊有係應銷之項。本應撥款發還。莫若准其作正開銷。就近劃還庫款。免致一發一解。多費周折。如此分別辦理。庶全案易於就緒。前此之款目。不致永遠糾紛。後此之交代。可以隨時清結。於蘇省

吏治。不無裨益。所有查明江淮等屬墊應兵差添設台站。酌議辦法以清交代緣由。謹會同督臣馬新貽撫臣丁日昌。恭摺具奏。伏乞皇太后皇上聖鑒訓示。謹奏。

酌擬武職借補章程摺 同治七年十一月初三日

奏爲酌擬武職借補章程。恭摺仰祈聖鑒事。竊准兵部咨。會議具奏。嗣後曾經軍務省分。綠營各缺。暫准奏請通融借補。提鎮准借至副參。副將准借至游擊。以次遞借。不得借至三級以下。其已經借補實缺之員。即以本銜在任候補。不得照借缺品級。再行陞借他缺。至已經借補一缺。每項不准接續。借補年終。開單奏明。借補成數統計。至多不准過五成。如逾此數。仍於次年將序補人員補還。至長江水師各缺。亦應按此次定章。以三級爲限。統俟十年後。再察情形。應否仍復舊例。奏明酌核辦理。等因。於同治七年五月初三日。欽奉諭旨。著照所議辦理。欽此。查部臣所議章程。斟酌時宜。仍不肯平古法。極爲周妥。自應遵照辦理。惟與現在情形。不得不再求變通者。約有數端。一在借補官階。部議不得逾三級。查軍營出力人員。洊保崇階者太多。不得不推廣借補。以爲安插之計。擬請嗣後各項補缺。提鎮借至副參游止。副參游借至都守止。都守借至千把止。如此明示限制。雖與部議稍有不符。而品級不甚懸殊。體制亦無窒礙。惟千把補缺。向歸咨案。現以大銜借補。擬請改歸奏案。以示區別。其本別擬補千把者。則仍歸咨案辦理。一在借補人數。部議不得逾五成。查十餘年來。各路軍營。搜拔人才。稍有才略者。斷不致沈淪未弁。循例應補之員。較之降格借補之員。才具之優劣迥殊。人數之多寡亦異。既使借補人數。十居八九。亦不致令本班之人。頓形缺望。惟部臣慮及借補太多。易滋流弊。擬請嗣後各項補缺借補者。三缺得二。挨補者三缺得一。借補則分考試當差兩班。擇其技藝嫺熟。差事勤奮者。按班借補。挨補則分候補應升兩班。核其名次在前。歷俸較深者。按班挨補。如此明定班次。既可超拔人材。亦頗限以資格。似與部議尙相脗合。一在借補後升轉之途。部議祇准照本銜候補。自屬簡便良法。惟尙有未能限定者。如提鎮借補參游之後。本班額缺較少。斷難冀倖簡放。而著有勞績。亦不能不循例升轉。以下遞推本班之難於得缺。情形相同。嗣後借補各官。如遇升轉。擬請隨時酌量奏明。請旨定奪。仍照部議。以十年爲限。十年之後。應否仍復舊制。再行驗察情形。奏明酌辦。臣所以鯁鯁過慮者。實因三江兩湖。用兵太久。武職保舉大員太多。姑存借補小缺之途。以爲安插閒將之

地。臣今奉命調任直隸。該省募勇無多。武職保舉之員較少。本可不再置議。然東南江楚等省。遣撤將弁。惶惶無所依歸者。實不乏人。臣不敢以身離兩江。遂不謀一安置之法。且處處可以收標。省省可以考試。技高者固可考補實缺。技劣者亦可稍沾薪糧。庶漸少游蕩無歸之員。亦足戢羣凌不靖之氣。謹將江南近年考試武職章程錄呈御覽。至長江水師初次擬補各缺。尙未明定章程。卽第二次第三次出缺酌補。亦尙難期劃一。臣今議奏江蘇外海水師。應俟部議允准。暨閩粵等省水師次第議定後。再由部臣議一水師班次遞補章程。與陸軍畫分兩途。而疆臣亦各參末議。庶爲可久之道。所有酌擬武職借補章程。恭摺具奏。伏乞皇太后皇上聖鑒訓示。謹奏。

謹將江南省近年考試武職章程。分別四條。恭呈御覽。

一、校閱弓箭技藝。初定章時。每月於二十五日考試一次。試以射步箭。挽大弓。演鳥鎗。習長矛。馬上放鎗五事。各員弁報明待考。聽其自行註明願考何技。五事中以能試兩技爲合格。僅一技者不准與考。屆期由臣自行校閱。如一人不能偏閱。或咨提督或札司道。隨同閱看。嗣改爲馬箭。步箭。鳥鎗三項。先馬後步。本年五月。乃改爲先射步箭。以中三矢爲合式。予考馬箭。鳥鎗。若中箭不及三矢。免考馬箭。鳥鎗。屆臘月封印以後。經前署督臣李鴻章定爲免考一次。仍照章酌給賞項。俾資度歲。而示體恤。

一、分定班次額數。軍營遣撤人員。官階大小不一。同治四年二月。初定考試章程。係列兩班。游擊以上者。爲一班。都司以下者。爲一班。丁卯年。武闈鄉試後。又有武生稟求附考。因再酌分班次。游擊以上仍爲一班。都守千把世職武舉另立一班。外委武生又爲一班。共分三班。其考取之額數。初定章時。並未限定取數。年來報考者不下三百人。現定游擊以上每二名取一名。都守千把世職武舉等項五名取二名。外委武生兩項三名取一名。武生一項求收考者極多。上年十月收錄三十餘人。後旋即停止。不准預考。他省若行此法。則武生宜概不收考。

一、酌給薪水獎賞。初定章時。游擊以上列爲一榜。超等月給薪水錢十二千文。特等月給錢十千文。壹等月給錢八千文。都司以下列爲一榜。超等月給薪水錢八千文。特等月給錢六千文。壹等月給錢四千文。嗣因營中哨弁及隨轄當差人等。有願與考試者。該員弁等本有月支之薪水。略給獎賞。由司道等酌議。游擊以上一班

無薪水者。超等給洋錢十二元。特等八元。一等六元。都司以下至武舉一班無薪水者。超等給洋錢八元。特等六元。一等四元。游擊以上本有薪水者。如取超等一名。給獎賞銀五兩。二名以下給銀四兩。特等給銀三兩。一等給銀二兩。都司以下至武舉本有薪水者。超等第一名給獎賞銀三兩。二名以下給銀二兩。特等給銀一兩五錢。一等給銀一兩。其外委武生一班無薪水者。超等給洋錢四元。特等三元。一等二元。有薪水者減半。此項月需經費。均由善後局籌款動放。統歸外銷。業經咨明戶兵二部有案。

一、酌量補缺委員。初定章時。略仿書院月課之式。專爲鼓勵人才起見。本擬屢次前列者。即准儘先拔補。各員弁等。人人奮興。每日自赴教場。習練功課甚密。無如缺少人多。四五兩年。考班拔補者。甚屬寥寥。六七年間。始酌量拔補委員。其中如陳勝輝五次列超等第一。委署松江城守營游擊。楊治三次超等第一。補京口左營都司。黃炳恆三次超等第一。補江陰營把總。譚新益兩次超等第一。補安徽宿州營守備。馬祺華兩次超等第一。補淮安城守營守備。其餘一次超等第一名。如鞠登樞署安慶協副將。顏連玉署泗州營都司。王步雲補柘林營都司。劉傳愈署江寧城守營都司。陳瑞麟補蘇松鎮中營千總。陳得順補金山營千總。其列於超等第二名以後者。如劉玉堂署洪湖營都司。劉青山署葦蕩右營守備。劉得勝署鎮江營把總。奎秀補吳淞營參將。向從龍補溧陽營都司。張鵬程補蘇州營右軍守備。王占鼇補提標右營把總。略足以示獎勵。由是考班始有欣欣向榮之意。惟勇丁出身。撤勇投標者。尙多技藝出衆之材。嗣後仍不得不隨時遴選。或酌補或委署。以慰將士之心。

請傳辦要件統歸內務府大臣行文片 同治七年十一月初三日

再臣未交卸以前。兩次接造辦處來文。俱稱移會兩淮監督。並附紅單兩件。內開。預備皇后所用活計等因。查各省承辦上用物件。向例或由內務府大臣咨明督撫。或由織造轉咨督撫。籌款辦理。造辦處係內務府之司官。祇有移會織造監督之文。並無徑咨各省督撫之事。至此次來文。俱稱移會兩淮監督。查兩淮祇有鹽政。並無監督。自道光十一年裁撤鹽政。歸併總督兼管。迄今已近四十年。在京各衙門。無不周知。造辦處豈不知之。而杜撰一兩淮監督之名。滋人疑慮。殊不可解。本朝設立內務府衙門。其總管大臣。即以內閣部院大臣爲之。將前明宦寺

擅權。征求外省之弊。革除淨盡。實爲千古善政。內務府之堂官司官。與部院之堂官司官。體制相同。部院行文於督撫。皆用堂官之印。不列各司之銜。則內務府行文於督撫。亦應用堂官之印。不列司官之銜。除將兩次來文。鈔送軍機處查核外。相應奏明。請旨勅下該衙門。嗣後遇有傳辦要件。統歸內務府大臣行文督撫。不宜徑由造辦處移會。以符定制。而杜弊端。理合附片陳明。伏乞皇太后皇上聖鑒訓示。謹奏。

恭報起程日期片 同治七年十一月初三日

再臣交卸督篆。暫緩起程。業於十月初五日陳奏在案。揚州教堂一事。派委運司李元華。關道應寶時等辦竣。十月十七日。會咨總理衙門結案。旋接李鴻章途中來函。計程十月杪可到。囑臣在金陵稍待。李鴻章於十月二十六日。行抵江寧省城。臣與之會晤。面商一切。所有淮勇各營。業經斟酌定議。分別去留。何營駐防何處。由李鴻章專疏具奏。前此借撥之撤勇經費。已由浙江等省陸續解到。尾批亦起解在途。足敷支放。至霆字營未撤者。僅餘駐紮湖北黃安之正新九營。臣與湖北督撫臣往返函商。亦已妥爲遣撤。一律安靜回籍。臣經手事竣。定於十一月初四日起程。理合附片陳明。伏乞皇太后皇上聖鑒。謹奏。

謝賞朝馬恩摺 同治七年十一月十五日

奏爲恭謝天恩。仰祈聖鑒事。同治七年十二月十四日內閣奉上諭。大學士直隸總督一等毅勇侯曾國藩。著加恩在紫禁城內騎馬。欽此。伏念臣忝廁戎行。久離京輦。材非驃騎。愧乏汗馬之勞。夢繞觚棱。如樹飛龍之仗。茲以量移畿輔。展覲天顏。荷聖主之殊施。拜康侯之寵錫。憶昔備員三館。供職六曹。禮嚴乎過闕。必趨銘。凜乎循牆而走。卅年舊事。重待漏於掖垣。十駕凡材。竟鳴珂於中禁。撫躬循省。慚悚無涯。臣惟有勉著先鞭。勤思後效。策駑駘而修晚節。市神駿而薦賢才。從茲三命益恭。長詠無敢無邪之什。更願萬方送喜。同廣載囊載戢之詩。所有微臣感激下忱。謹繕摺叩謝天恩。伏乞皇太后皇上聖鑒。謹奏。

略陳直隸應辦事宜摺 同治八年正月十七日

奏爲略陳直隸應辦事宜。並請酌調人才。以資差委。酌撥餉銀。以濟要需事。竊臣奉命移督直隸。自願精力衰頹。夙夜兢兢。深以不克勝任爲懼。上年十二月召對之次。荷蒙皇太后兩次訓示。以畿輔空虛。必須認真練兵。吏治

尤須整頓等論。臣恭聆之下。悚佩難名。近復詳加察訪。練兵飭吏二端。誠爲直隸最大之政。其次則治河亦屬要圖。謹就此三者。略陳梗概。伏候明訓指示。直隸近歲以來。北有馬賊。南有教匪。東南與齊省接壤。則梟匪出沒之區。而降掠游勇。亦多散處其間。伏莽堪虞。一旦竊發。旬日嘯聚。動以千計。非有數千勁兵。星速勦捕。卽恐釀成大變。此內患也。其無形之外患。陝回現尙猖獗。宣化固宜嚴爲置防。洋務雖曰安恬。天津亦宜暗爲設備。綜計數者。必須練兵二萬有奇。乃足以敷調遣。目下劉銘傳一軍萬餘人。駐紮張秋。該軍精勁冠時。應請勅下李鴻章卽以銘軍長作拱衛京畿之師。其餉項照舊由江南供支。業經李鴻章奏明在案。待劉銘傳陞見以後。或將該軍全調北路。或因運米之故。分紮東直之交。臣再與之商酌辦理。此外尙須練兵萬人。或專就原議之六軍調省城而合練之。或兼用湘淮之營制募北勇而另練之。俟臣到任後。再行察度奏明辦理。惟二萬餘人。果能練成勁旅。敬求皇上不輕調動。凡兵一經調出。卽難遽歸。倉卒有警。畿輔仍屬空虛。上年輦轂震驚。可爲鑒戒。此不能不預爲陳明者也。直隸之吏治。臣入境以後。略詢民間疾苦。大約積獄太多。羈累無辜。聞有州縣到任年餘。未曾坐堂一次。訊結一案者。又因連年用兵。差徭甚重。大戶則勒派車馬供支柴草。小戶則攤派錢文。虜充長夫。劣紳勾通書役。因緣詭索。車輛有出而無歸。貧戶十室而九逃。今雖軍事大定。尙復派修城之費。索前欠之費。誅求無已。大吏過於寬厚。罔恤民艱。加以政出多門。相忍爲國。劣員於此處敗露。方懼嚴參。而彼處鑽營。反得優保。總督之事權不一。屬僚之徑竇愈多。玩上則簸弄是非。虐民則毫無忌憚。風氣之壞。竟爲各省所未聞。臣到任後。不得不大加參劾。擬以清理積訟。停止雜派爲先務。嚴立法禁。違者重懲。臣自問素非苛刻者流。近在江南。亦係失之於寬。今忽變爲嚴厲。劣員或求書函以圖成全。或騰謗議以冀寬弛。皆屬意中之事。臣隨時體察。攻伐之劑。去病卽止。苟使數月期年。風氣稍轉。亦無難漸就和乎。復我常度。而下車伊始。則非剛猛不能除此官邪。是亦宜預爲陳明者也。直隸之大河凡九。其不經東西二淀。而徑入海者有三。其經過東西二淀。而後入海者有六。六者之中。惟永定河滹沱河常泛溢而爲民患。論者謂二淀爲民間田廬所佔。不能容納衆流。日就淤塞。上年永定水決。被水之縣甚多。臣於河工素未講求。出京以後。擬先看永定河。再行履任。審度情形。奏明興工。惟查永定河工。從前每年部撥歲修銀近十萬兩。中隔數年。輒復另案發帑。加培土工。自道光二十二年後。而另案之土工停矣。自咸豐三年以

後而歲修十萬僅發四分之一矣。近雖由劉長佑奏請歲發五萬。而司庫支絀。不能如期到工。以致堤身處處受病。常常潰決。上年南四汛大工。原請經費十一萬。而部撥之閩海三萬。山東三萬。泊未報解。將來三月興工。無款籌墊。不能不奏請先從部庫借撥。又聞所估之數。只可敷衍目前。斷難堅實經久。恐須添籌鉅款。乃可一勞永逸。此亦宜預先陳明者也。此三者。非有人不能振興。非有財不能展布。河工尙難計算。即練兵一事。除戶部六軍經費照常撥解外。所短尙多。請旨勅下兩江總督馬新貽。江蘇巡撫丁日昌。每月撥銀三萬兩。解至直隸。稍資周轉。臣就兩江員紳中。開列數人。請旨敕下吏部。調至直隸。俾收臂指之助。不勝感幸。所有直隸應辦事宜。緣由。恭摺具陳。伏乞皇太后皇上聖鑒訓示。謹奏。

到任接印摺 同治八年二月初八日

奏爲微臣到任接篆。恭摺叩謝天恩。仰祈聖鑒事。竊臣於正月十七日請訓陛辭。二十日束裝就道。由蘆溝橋以下。查閱永定河工程。自宛平縣之南上汛。至永清縣之南七汛。計程二百餘里。二十四日。查工粗畢。即於是日西旋。二十七日。行抵保定府城。二月初二日。署督臣官文將直隸總督關防。及長蘆鹽政印信。委員齎送前來。當即恭設香案。望闕叩頭。祇領視事。伏念臣菲材薄植。久領大藩。顧精力之衰頹。荷郊畿之重寄。私衷惴惴。若涉深淵。惟早作而夜思。冀盡忠而補過。凡諭旨所示。飭吏整軍之道。暨微臣所陳治河弭患之方。謹當督率僚屬次第施行。期道不敢計功。習勤祇以補拙。庶期仰答高厚鴻慈於萬一。除到任日期。恭疏具題外。理合繕摺。叩謝天恩。伏乞皇太后皇上聖鑒。謹奏。

舉辦永定河工片 同治八年二月初八日

再臣查閱永定河。見南北兩隄。高於隄外之民田一丈二丈不等。高於隄內之河身不過二三尺。且有河身與隄相平者。兩隄相去約三四里許。中間容水之地。不爲不寬。奈淤塞太久。河中壅成沙洲。高平堅實。樹木蕃生。遂使河之中泓。有窄僅數丈者。水偪而無所洩。則衝刷隄身。處處潰決。議者多思更改河道。以南隄作北隄。而於南邊另築一隄。臣思數百里田廬墳墓。百姓豈肯遷改。且此河本挾泥沙而行。徙隄數年之後。新河淤成高洲。又將改徙何處。即使再增巨款。加培兩隄。隄高河淤而亦高。是勞費而終無益也。伏查乾隆年間。初定章程。歲修銀一萬

兩挑挖中泓銀五千兩。疏濬下口銀五千兩。歲修者。培河上之兩隄也。挑中泓者。於冬春乾涸時挖河身之淤沙也。濬下口者。疏三角淀之尾閘也。厥後雖經費屢加。而辦法則仍三者並舉。頗著成效。近數十年以來。三角淀淤成平陸。而濬下口之法廢矣。河身久不開挖。而挑中泓之法廢矣。兩法雖已久廢。而部撥經費。仍留此兩款之名目。臣愚以爲當此窮極思通之時。宜復挑挖中泓之法。每歲除五六七八盛漲之月。冬臘正堅冰之月不計外。其餘五箇月。均可興工挑挖。凡春深秋盡之時。此河有水之處。不過數十丈。其乾涸之處。尙餘數百丈。挖出乾處之士。近南岸者。覆於南隄。近北岸者。覆於北隄。雇車以運遙隄之上。引溜以趨新泓之中。年年挑掘。節節開挖。河患或可少減。是否有濟。臣擬試辦一二處。續行具奏。目下二三月尙有最要之工。上年南上汛決口。本未堵塞。南四汛。南七汛。兩處決口。雖經堵塞。尙未開挖引河。合之各處要工。共估銀十一萬兩。經戶部撥山東銀三萬兩。閩海關銀三萬兩。均無報解消息。現擬即日興工。趕於四月初間合龍。司庫銀兩。因去年僅發兵餉一季。刻下須補發一季之餉。別無餘款。可以挪用。相應請旨。敕下戶部。借發銀六萬兩。趕修河工。一俟山東及閩海關之銀解到。即行解部歸款。臣因要工刻難延緩。是以正月請訓摺內。即已預爲陳明。茲經詳查再申前請。伏乞皇太后皇上聖鑒訓示。謹奏。

留臬司張樹聲清理積訟摺 同治八年二月十六日

奏爲欽奉諭寄。恭摺覆奏。仰祈聖鑒事。本月十三日。承准軍機大臣字寄。三月十二日奉。上諭。日本日降旨。已令張樹聲調補山西臬司。直隸臬司。令史念祖補授矣。史念祖由軍營出身。人尙明白。惟未經歷地方事務。是否勝臬司之任。着會國藩留心察看。據實具奏。以重地方。欽此。一竊。臣履任月餘。見直隸日行公事。訟案居十之七八。他件不過十之二三。頻年辦理軍務。積壓極多。督署應題之本。未辦者二百三十餘件。府局京控上控之案。未結者一百三十餘件。各屬委審及自理之案。未完者殆以萬計。或延擱二三年。或五六年。八九年不等。吏治之疲。民生之困。端由於此。臣與臬司張樹聲力籌清釐積案之法。日夜孜孜。甫有端緒。臣自誤清訟事宜十條。令司道各局員等覆核。尙未刊刻完竣。又囑張樹聲。限期功過章程十餘條。臣爲之覆核。尙未斟酌妥善。其中最要者。直隸舊章州縣積案若干件。按月有四柱冊報。監禁若干名。管押若干名。亦按月有四柱冊報。未獲之賊。痕斃之

四。按月亦有稟報。立法本屬盡善。無奈虛應故事。遂無成效。今特令各屬實力奉行。臣督同臬司實力稽查。每月將各屬報冊詳細核對。分別功過。懸榜院司官廳。且催且誡。以冀日起有功。張樹聲任臬司四年。刑名之條例已精。直隸之情形尤熟。臣每詢屬員之賢否。巨案之源委。所對多得要領。若該臬司能留畿輔。佐臣不遠計一年之內。可將積案全數清結。若張樹聲遠赴山西。臣精力衰頹。自度萬不能了此數千滯獄。史念祖初入仕途。縱有過人之才智。而欲究詰刑律。熟悉地方。殆非數月期年不能。合無籲懇天恩。准令張樹聲暫留直隸臬司本任。助臣一臂之力。將州縣月報各冊。悉心稽核。俟積案清理完畢。再行遷調。使臣區區整飭畿甸之志。不至盡託空言。亦非獨微臣之幸也。聞山西刑名案件。不及直隸之半。史念祖若陳臬晉省。較易稱職。能否勝任。似亦可由鄒敦謹察看覆奏。謹將臣所撰直隸清訟事宜十條。鈔呈御覽。此等告誡僚屬之文。本不敢輕瀆聖聽。緣其中委曲繁難。必得極熟之臬司。乃可相助爲理。伏乞聖明垂鑒。至張樹聲所撰限期功過章程。臣核定後亦當附鈔呈奏。其中微有變通舊例者。俟續奏時再爲聲明。所有欽奉寄諭緣由。恭摺覆奏。伏乞皇太后皇上聖鑒訓示。謹奏。

舉劾屬吏摺 同治八年二月十六日

奏爲特參劣員。整飭吏治。恭摺仰祈聖鑒事。竊臣於正月十七日請訓摺內具陳直隸劣員。風氣甚壞。必須大加參劾。以儆官邪。荷蒙聖慈垂鑒。履任以後。密札藩臬兩司。令將府廳州縣各員。開列優者一單。劣者一單。面呈商辦。而清河道官直隸最久。亦令就所見所聞。開單密呈。以備參劾。旋據盧定勳張樹聲等先後呈送清單。分注考語。臣詳加核對。與臣在途在京所採訪者。大致相合。足見直道之公。古今無異。秉彜之好。遠近攸同。而月餘以來。接見羣僚。賢員亦尙不少。差喜所見勝於所聞。但見彰輝之無私。可冀風氣之漸轉。玆就劣蹟尤著者。甄劾十一人。開具清單。恭呈御覽。雖鑒衡未必允當。然在臣實已博訪周諮。不敢輕聽浮言。不敢稍涉成見。此外尙有十餘人。訪察未確。俟兩三月後詳細推求。再行據實具奏。重者仍令罷斥。不致同罪而異罰。輕者予以自新。略示大誠而小懲。其兩司單開之賢員。與臣所訪各單相合者。亦分作兩次進呈御覽。此次所開十員。略注考語。不過表其政績。並不稍乞恩施。古來循良之吏。或有蠶書褒異。非必歲歲遷官。人人進秩也。近世各省。保舉浮濫。習見不珍。該員等雖無獎拔之實。而循聲遠於聖聰。即光寵逾於華袞。應請敕下該部。無庸調取引見。俾得久於其任。專心

民事。幸甚。所有特參劣員。整飭吏治緣由。恭摺具奏。伏乞皇太后皇上聖鑒訓示。謹奏。

果渠村估工摺 同治八年二月十六日

奏爲歲修果渠村壩埽等工。節節估計。循例動項挑修。恭摺仰祈聖鑒事。竊照通州境內。溫榆河上游果渠村一帶。自開挖新河。建築壩埽以來。漕糧軍剝船隻。均可直抵石壩。所有石壩樓流水溝等處。每年挑淤工費。悉行節省。該處地當山水之衝。隄身河底。每易汕刷淤墊。必須擇要修濬。歷經勘估奏辦在案。茲據通永道英良詳稱。據漕運通判李載蘇將同治八年應行修濬各工。勘估詳報。委員會勘。緣上年汛內大雨時行。河水盛漲。各工極其危險。設法防護。幸保無虞。隄身河底。多被汕刷淤墊。亟應擇要修濬。茲勘得大壩舊龍門迤東邊堤一段。長二十五丈。龍門迤西邊埽二段。湊長九丈。又接西邊埽一段。長十四丈。又一段長十丈。又接西邊埽一段。長七丈。裏頭邊埽一段。長七丈。裏頭接西邊埽一段。長十丈。又接西邊埽一段。長十四丈。以上各埽。均屬平矮卑墊。應請分別拆修加鑲。以資捍禦。大壩背後戩隄一道。長四十丈。殘缺過甚。急宜加高培厚。又大壩對河淤有沙灘一段。逼溜直趨埽根。助礙河流。亦須挑挖深通。俾河流順軌。埽工不致喫重。經該道親詣覆勘。委係應辦要工。遵照部議。減半章程。確切估計。共需例價銀一千四百九十一兩一銀六分四釐。應請援照該工歲修奏准之案。將一半票銀撥給一半實銀。開單繪圖請奏。到前署督臣。移交到臣。覆加查覈。均係歲修必不可緩之工。估辦實數。覈與減半章程相符。其一半票銀。據請援照該工歲修奏准之案。撥給一半實銀。亦經該道確切查明屬實。應請一併照准估辦。仍在於道庫丁字沽稅銀。並攤地租項下撥給。責成通永道督率。該廳認真辦理。務於大汛以前。照估如式趕修完竣。報候驗收。儘有草率偷減。即行參賠循例。恭摺具奏。並繕清單。敬呈御覽。伏乞皇太后皇上聖鑒訓示。謹奏。

勘永定河工起程日期片 同治八年四月初一日

再永定河南上等工。上年漫口失事。經前署督臣官文奏請部撥經費。擇定今春動工。嗣臣由京來任。先到工次。周歷履勘。查得南七南四引河。丈尺淺窄。地段太短。原估銀數亦覺過少。不能導溜東趨。因酌加銀二萬數千兩。札飭永定河道徐繼鑑。候補道蔣春元分投興修。茲據該道等稟報。三月初一日開工督飭。在事各員。認真分

投趕辦。現計大壩引河已有八九分工程。擬於四月初七日合龍。臣應親往查勘驗收。定於四月初一日出省。馳赴工次。所有臣暑日行文件。飭委布政司盧定勳代印代行。如有緊要事件。仍包封臣行次核辦。理合附片具奏。伏乞皇太后皇上聖鑒。謹奏。

驗收回省日期片 同治八年四月十四日

再前因永定河工程將竣。臣於四月初一日親往驗收。當將出省日期附片具奏。旋經差弁贖回原片。奉旨片中空白一字。殊屬疎忽。將臣交部察議。聞命之餘。惶悚無地。臣於初三日馳抵永清之小惠家莊。初四日驗收南七大壩引河各工。初五日驗收南四大壩引河各工。初六日因感受風寒。先行起程回省。派遣員任信成赴南上下等汛收驗大壩引河各工。所有南上決口。於初七早丑刻合龍。現值桑乾之際。河中無水。係合旱龍。凡新築之隄。未與水鬪。不知其可靠與否。猶之新練之兵。未與賊鬪。不知其能勝與否也。是以永定河每合旱龍。民間常不放心。上年南下南四南七各工。均合旱龍。此次南上金門。又合旱龍。臣亦殊不放心。雖勘驗壩基尚屬堅固。引河尚屬寬深。究不敢遽謂十分可恃。茲將大概情形附報。其合龍正摺。應俟經過大汛水漲後。再行具奏。其工員有應開復處分者。亦俟屆時再乞恩施。臣已於初八日旋省。任信成亦於十一日旋省。沿途察看民情安靜。堪以仰慰宸廑。惟亢旱太久。二麥已成災歉之象。祇盼日內大沛甘霖。秋禾猶可播種。庶幾稍慰民望。所有臣回省日期。謹附片具奏。伏乞皇太后皇上聖鑒。謹奏。

覆陳劉松山湘軍情形摺 同治八年五月初四日

奏為遵旨籌議。恭摺覆陳。仰祈聖鑒事。竊臣前於三月十四日承准軍機大臣字寄。三月十三日奉上諭。據御史宋邦德奏。陝省營勇變亂。請飭左宗棠詳察情形等語。本日已寄諭該大臣。斟酌辦理矣。營勇因餉餉滋事。已屬亂萌。而此番劉松山所部留防綏德州之四營。據城以叛。高連陞所部。竟至戕其主將。實為各營所未聞。雖據左宗棠奏稱。因查拳哥老會起衅。而勇丁之好亂樂禍。難以有功亦可概見。該御史所稱勇丁因地瘠缺望起見。諒亦有之。而招募勇土。能否奏效。亦難確有把握。削平粵匪以來。楚勇暮氣已乘。此時應如何變通。以弭後患。著卽悉心籌度。據實以聞。用副瞻咨之意。原片著鈔給閱看。將此諭令知之。欽此。查克復金陵以後。楚勇從征過

久。官秩日高。暮氣將乘。難資得力。送經臣於同治三年秋冬及四年夏間先後奏明在案。及臣奉命勘揀。所用專係淮軍。其時湘勇十餘萬人。裁撤略盡。隨臣北征者。僅劉松山一軍。及張詩日等數營。至次年。張詩日因病遣撤。則臣之舊部。僅留劉松山老湘一軍矣。當時楚軍將士驕矜自足。真氣日衰。獨劉松山矯厲奮興。尙有旭日初升之象。臣因令其添募選練。獨當一路。數年以來。轉戰秦晉燕齊。所向有功。號爲勁旅。湘軍之名。自是復振。此次陝西宜君綏德兩處旬日之間。楚軍再變。諭旨殷殷垂詢。恐勇丁好亂樂禍。難以有功。查楚軍之在秦者。他營臣不能盡知。老湘營紀律素稱嚴整。勇丁之好亂樂禍者。可決其不甚多也。其所以有綏德之變。雖由主將遠出。會匪起衅。不啻彈壓之咎。推原其故。實亦軍士久役勞苦。思歸所致。大抵艱難百折。不辭勞瘁者。將領之壯志也。從征十載。懷歸少息者。士卒之恆情也。上年平捻之後。致令湘軍西征。臣見該營苦戰十年。力窮氣憊。必應量予休息。曾檄令劉松山暫緩西行。帶回長沙遣撤舊勇。另行招募。如戚繼光所謂澄定渾水。再汲新水之說。庶幾重新壁壘。克蕪全功。劉松山未接此文。遽行渡黃西征。箠者頗懷歸志。桀黠者或蓄譎謀。遂至倉皇煽亂。有此一失。幸賴劉松山平日間馭衆有法。恩誼相孚。足以懾伏叛黨。不旋踵而事即定。而勇丁之好亂樂禍者。究不甚多。亦即於此可見矣。至御史宋邦德所奏地瘠缺望之說。老湘營亦尙無此弊。五年冬間。張總愚竄入秦中。臣檄霆軍援秦。遷延不進。臣改檄湘軍入關。當時諸將皆以秦隴爲苦。臣恐湘軍西行。必難迅速。劉松山一奉檄調。投袂而起。毫無難色。該營勇丁亦皆感激效命。未聞有以地瘠缺望者。臣亦優待該軍。奏明每勇每月加米價銀四錢五分。迄今已閱三年。閒聞感戴之語。並無怨望之詞。起衅之端。殆非由此。此軍還秦以來。迭次獲勝。回逆望風吐款。收降董福祥等十七萬餘人。軍威大振。乃因此次小變致損令名。臣深惜之。諭旨懲前毖後。飭籌變通湘勇之法。臣竊以爲去年湘軍未入秦境之先。本可休息數月。帶回湖南撤換舊勇。當時未行此策。今在秦境勦辦得力之際。斷難再議撤退。另換他營。凡軍氣之盛衰。全視主將之強弱。劉松山精神未懈。近雖經此波折。銳氣亦未少減。頃接該提督三月杪來函。仍擬再接再厲。整軍深入。由北路進兵。規取金積堡老巢。扼賊北竄草地之路。並稱陝甘之糧。取給山西。遠至千數百里。必須妥籌轉運。擬由軍渡以至綏德。由綏德以至鎮靖堡。由鎮靖堡以至銀條梁。至花馬池。節節計里分站。用營中之馱騾勇夫。及降衆中挑選壯丁。分班搬運。別其易險。而均其勞逸。臣觀其艱

難措置。規畫精詳。竊以爲有古名將之風。當期從容奏績。而秦中自克復董志源以後。軍事已大有起色。亦無煩改絃更張。若新募秦隴之人。未經戰陣。未諳營制。雖得善將者統率訓練。亦非寬假歲月。不能有爲。撤大枝之勁旅。募烏合之土軍。沮已定之成謀。冀難必之後效。誠恐新舊兼除之際。該逆得以乘間聚合。死灰復然。則於大局所損甚鉅。固不僅欠餉難於籌給。違勇難於綏輯也。臣於秦隴各楚軍。不甚諳悉。專就劉松山一軍而論。自應暫仍舊貫。毋庸更議變通。所有微臣遵旨籌議緣由。恭摺覆陳。伏乞皇太后皇上聖鑒訓示。謹奏。

覆議直隸練軍事宜摺 同治八年五月二十一日

奏爲遵旨籌議練軍事宜。恭摺覆陳。仰祈聖鑒事。竊臣去年十月初六日。在江南接奉寄諭。直隸營務久經廢弛。前經總理各國事務衙門會同戶部兵部議定。選練大軍。誠以根本重地。當爲自強之謀。迨擒匪北竄。直隸官兵打仗。仍不得力。雖云訓練未精。然國家歲糜鉅萬帑金。養此無用之兵。實堪痛憾。此時賊匪既平。亟應將前定練軍章程。從新整頓。會國藩久諳戎事。應如何因時變通之處。著於到任後。詳慎妥籌。悉心經理。務期化弱爲強。一洗從前積弊。以衛畿疆。倘因直境甫就。救乎毗連東豫一帶。應暫撥勇隊。以資彈壓。一併由該督斟酌奏明辦理。會國藩未到以前。官文務飭各員。弁照常訓練。不得稍有懈怠。神機營原摺。均著鈔給閱看。一等因欽此。迨臣臘正兩月間。展覲天顏。仰蒙聖訓周詳。亦以直隸練軍爲要務。臣於二月抵任。檢閱六軍案卷。見內外臣工章奏。於直隸不宜屯留客勇一節。言之詳矣。當此全境救平。若留大枝勇隊。駐於近畿。窮年累月。勤無可勲。防無可防。不特於居民難期和協。卽於事勢亦同贅疣。是以諸臣之議。多主練兵而不主養勇。惟養勇雖非長策。而東南募勇多矣。其中亦儘有良法美意。爲此間練軍所當參用者。臣請略言數端。一曰文法宜簡。勇丁帕首短衣。樸誠耐苦。但講實際。不事虛文。營規只有數條。此外別無文告。管轄只論差事。不甚計較官階。而挖壕築壘。刻日而告成。運米搬柴。崇朝而集事。兵則編籍入伍。伺應差使。講求儀節。卽有一種在官人役氣象。及其出征。則行路須用官車。紮營須用民夫。油滑偷惰。積習使然。而前此所定練軍規條。至一百五十餘條之多。雖士大夫不能驟通而全記。文法太繁。官氣太重。此當參用勇營之意者也。一曰事權宜專。一營之權。全付營官。統領不爲遙制。一軍之權。全付統領。大帥不爲遙制。統領或欲招兵買馬。儲糧製械。黜陟將弁。防勤進止。大帥有求必應。從不掣肘。近年江

楚良將。爲統領時。卽能大展其材。縱橫如意。皆由事權歸一之故。今直隸六軍。統領迭次更換。所部營哨。文武各官。皆由總督派撥前往。下有翼長分其任。上有總督攬其全。統領並無進退人材綜管餉項之權。一旦驅之赴敵。羣下豈肯用命。加以總理衙門。戶部兵部。層層檢制。雖將亦瞻前顧後。莫敢放膽任事。又焉能盡其所長。此亦當參用勇營之意者也。一曰情意宜洽。勇營之制。營官由統領挑選。哨弁由營官挑選。什長由哨弁挑選。勇丁由什長挑選。譬之木焉。統領如根。由根而生。幹生枝。枝生葉。皆一氣所貫通。是以口糧雖出自公款。而勇丁感管官挑選之恩。皆若受其私惠。平日既有恩誼相孚。臨陣自能患難相顧。今練軍之兵。離其本管本汛。調入新哨新隊。其挑取多由本管主政。新練之營官。不能操去取之權。而又別無優待親兵。獎拔健卒之柄。上下隔閡。情意全不相聯。緩急豈可深恃。此雖欲參用勇營之意。而勢有所不能者也。又聞各營練軍。皆有冒名頂替之弊。防不勝防。蓋兵丁之常態。口分不足以自給。每兼以小翼營生。手藝營生。以補事畜之資。此各省所同也。直隸六軍。以此處之兵。調至他處訓練。其練餉二兩四錢。在練營支領。其底餉一兩五錢。仍在本營支領。兵丁不願離鄉。往往正身仍留本處。特於練營左近。僱人頂替。應點應操。少分練軍所加之餉。給與受僱冒名之人。一遇有事。調使遠征。受僱者又不肯行。則又轉僱乞丐窮民代往。兵止一名。人已三變。練兵十人。替者過半。尙安望其得力耶。臣兩月以來。博采衆論。參以愚見。就目前練軍之規模。卽使力加整頓。亦難遽化弱爲強。將欲倚爲干城。備禦強寇。殊無把握。今當講求變通之方。自須先杜頂替之弊。擬令嗣後一兵挑入練軍。卽將本營額缺裁去。練軍增一兵。底營卽減一兵。無論底餉練餉。均歸一處支放。或因事斥革。卽由練營募補。底營不得干預。冀所練者皆爲正身。或可少變積習。此外尙有須酌改者。如馬隊不應雜於步隊。各哨之內。應另立馬隊營。使臨敵不至瀰亂。一隊不應增至二十五人。應仍爲什人一隊。使士卒易知易從。若此之類。臣本擬定一簡明章程。重整練軍。練足萬人。以副朝廷殷勤訓飭之意。乃近者節逾夏至。亢旱如故。二麥業已歉收。秋禾多未播種。深恐歲饑民困。藩庫入款太減。不能不長慮卻顧。暫緩興辦。查直隸司庫本屬入不敷出。同治六七兩年收數尤少。而欠發各款。除京協各餉。及文職應領之款。共欠一百五十餘萬外。專就本省武營言之。欠發綠營及駐防俸薪養廉三十二萬餘兩。欠發兵餉二百七十餘萬兩。欠發米折及公費銀十三萬餘兩。近來武營俸餉。本僅支五折七折八折不等。既折之後。又欠發三

百餘萬。是以各將士紛紛訴苦。衣食無資。辦公無費。卽令六軍選練極精。而各底營存餘之兵。已廢弛不可救藥矣。通盤籌算。本省可指之銀。斷不能撥濟練軍之餉。若於現存四千人之外。增練六千或八千人。仍須由部另撥的餉二萬兩。按月解直。乃可應手久辦。徐圖功效。其未挑入練者。各底營存餘之兵。亦須略爲料理。未可聽其困窮墮壞。臣擬略仿浙江減兵增餉之法。不必大減兵額。但將老弱者汰而不補。病故者闕而不補。卽以所節之餉。量發歷年之欠款。俾各營微有公費。添製器械旗幟之屬。庶足壯觀瞻而作士氣。數年之後。或將五折七折八折者。全數賞發。兵丁之入練軍者。所得固優。卽留底營者。亦足自贍。營務或可漸有起色。而畿輔練兵之議。亦不至屢作屢廢。事同兒戲。至騰出裁兵所省之餉。彌補練軍所增之餉。多寡尙難預定。要亦少有裨益。是否有當。請旨敕下原議各衙門核議施行。所有遵旨籌議直隸練軍緣由。恭摺覆奏。伏乞皇太后皇上聖鑒訓示。謹奏。

報永定河合龍穩固摺 同治八年五月二十一日

奏爲永定河新修隄工合龍。歷經麥汛水漲。穩固如常。引河亦極通暢。恭摺具奏。仰祈聖鑒事。竊查永定河南上汛漫口等工。經臣奏派永定河道徐繼鑑。候補道蔣春元。分投領款興辦。前據報督率掌壩隨壩各員。帶同兵夫。趕緊修築。擇定四月初七日合龍。臣先期馳往查驗。已將出省回省日期。先後附片奏報。因前後新辦各工。均趁水涸之時趕做。雖驗明壩埽堅固。引河深通。但新修之隄。未與水鬪。究未敢遽信爲可靠。當經聲明先報大概情形。俟經歷盛漲。再將合龍正摺另奏在案。茲據永定河道徐繼鑑。候補道蔣春元稟稱。五月初三日未刻。渾水直抵壩前。水勢擡高八九尺。壩埽悉臻穩固。啓放引河。導溜東趨。當派員弁兵夫連夜跟水直抵南七。初六日申刻。逕達尾閘。匯入鳳河。全河復歸故道。形勢極爲暢順。毫無阻滯。等情會報前來。臣查此次南上漫工。先據該道廳等估需銀十一萬餘兩。經前督臣官文奏蒙恩准。奉部撥款興辦。臣出京時。先赴工次。沿隄親歷履勘。心疑通工頽廢情形。何遽至於此極。旋復周諮博訪。余謂自成豐三年以後。前此所定經費。僅發四分之一。迄今十五六載。領款太短。到工又遲。各汛左支右絀。不得不因陋就簡。以致隄愈削薄。河益淤高。年甚一年。遂至於此。否則漫溢失事之案。從未有似此連月疊出者。則通工之受病。可想而知。臣因取該道等所呈估摺。按照所歷情形。一一覆核。覺南四南七引河丈尺淺窄。地段亦短。尙須加挑寬深。因與申明昔年挖濬中泓之舉例。謂引河若果深

通。卽中泓亦已疏濬。名異而事實相同。新工與舊例相合。當許於原估銀數外。加酌兩倍。增銀二萬二千有奇。此外隄堰有應添培高厚者。有應酌增壩埽者。全河可慮之處。均須擇要添做。卽於本年應領歲搶修銀內。指款速辦。仍許以事竣酌增銀數千兩。以補歲搶修之不足。又與該道及廳汛等。嚴定約束。此次大工。務先痛除向來河工舊習。一切購料辦工。事事力求真實。上不准絲毫剋扣。下不准絲毫浮冒。其大工估定之銀。與年例應領之款。均於二三月一律撥發。許於奏乞天恩。免追賠款。宜各激發天良。認真報效。並又遴派熟諳河工之候補知府徐本衡。候補知縣陳贊濬。朱錫慶等。暨地方官西路同知鄒在人。南路同知蕭屢中等多員。赴工襄辦。該河道徐繼鑣。派駐南七。督辦南岸培隄切坎築壩挑淤事宜。及南七引河各工。委員候補道蔣春元。派駐南上。督辦漫河兩壩鑲築事宜。及南四引河各工。旋據呈報。擇於三月初一日。與工督飭掌壩隨壩員弁。率領兵夫。趕辦鑲進水占壩邊。接做水埽。層土層料。密築長椿。加壓厚土。多派兵丁。層層夯碾。重打堅實。並添做夾土壩。堅築土櫃養水盆。金門口僅剩五丈餘。雖上游甫經水涸。而壩前尚有清水二三尺深。卽於四月初七日丑刻。掛纜合龍。追壓到底。隨下關門壩。加釘大椿。均係該候補道蔣春元。逐日在壩親驗監催。其南上南下南四引河。加深展寬。添長地段。各工亦經按照添估委員分辦報竣。該河道徐繼鑣。督率員弁。堅做壩埽。疏濬引河。先是龍王廟以下。河身節節淤塞。並有高仰及坐灣不順之處。現均逐一詳勘。一律加深展寬。裁曲取直。添挖子河。兼做溝工。至寶店密迤下。均以通暢。復周歷兩岸各險工。如南上南下南二南三南四等汛。加倍隄堰。添做土埽。北三汛加築子堰。添辦五號圍隄。十二三號土工。並添做魚鱗埽段。北四上汛二號十號挑水壩。北四下汛鑲做埽段。南四汛四號。加做挑壩護埽。並將各處切坎工程。均按添估之式。飭屬趕辦完竣。是此次堵築南上汛一處漫口。實將通工二十汛之隄堰壩埽。均已普律全修。雖南七南四引河。臣尙嫌其逐漸逼窄。難容全溜。不無可慮。而詢訪民間。皆稱此次工程堅實。已爲近二十年所未有。轉詢伏秋漲發。靡有定程。事難懸揣。應卽責成該河道督飭廳汛員弁。振刷精神。隨時搶護。務保無虞。臣於四月初四五等日。驗收引河大隄各工。其南上大壩引河各工。亦經委員候補道任信成馳往驗收。據覆工堅料實。足資經久。目下潭水漲發。自上而下。新做壩埽。均經洪流衝刷。悉保穩固。大溜鋪滿暢行。引河無阻。堪以仰慰宸廑。此次印委大小文武員弁。均能認真修築。奮勉出力。可否准臣擇優酌保。以資鼓勵。

屬之虞。伏乞聖裁示遵。所有漫工合龍後。初經盛漲壩堰埽穰固引河通暢緣由。理合恭摺具奏。伏乞皇太后皇
上聖鑒訓示。謹奏。

河工撥用長蘆復價片 同治八年五月二十一日

再查二月中旬。臣飭委趕修永定河工。因無款可撥。即札飭長蘆運司在於復價項下。撥銀三萬兩解赴固安工
次應用。旋經批定此款以二萬二千餘兩作為添估南四南七引河之用。即所謂以引河之新工。復挑挖中泓之
舊例者也。其餘七千餘兩。現飭堆儲料塋。酌備現錢。專為盛漲搶險之用。蓋歲修搶修儲料運脚四款道光中歷
係每年在部支銀九萬數千兩。至咸豐四年。僅發一半。又改為半銀半票。改為司庫給發。同治二年。劉長佑奏准
免發半票。然折扣之餘。每年所登實銀尚不足四萬兩。臣愚以為與其與大工於失事之後。不如慎修防於無事
之時。擬將挑挖中泓疏濬下口兩事。歸於歲修年例領款內認真興辦。縱不能遽復舊額。亦不得不酌量加增。除
將應增之數詳議另奏。及此次所能復價銀兩。另行報銷外。合將所提長蘆銀三萬兩。附片具奏。伏乞皇太后皇
上聖鑒。敕下戶部查照。謹奏。

試辦撤留長蘆總商摺 同治八年六月十一日

奏為循照部議將總商分別撤留。先行試辦。以杜把持。而資整頓。恭摺奏祈聖鑒事。竊查前准部咨。令將長蘆總
商四人。查照山東成案。酌量裁撤。按年輪替。並將各總商拖欠課款。詳查催完。奏奉諭旨依議。欽此。咨行到省。當
經前督臣劉長佑轉飭遵辦。乃七年正月間。適值捻逆撲犯省城。嗣又竄擾津滄一帶。彼時軍務吃緊。無暇兼顧
離務。迨直境肅清後。前督督臣官文。乃始查案行催。旋據運司以各總商多係諳練熟手。難以裁撤輪替。詳經咨
部。即經戶部奏駁。咨覆行令。仍照前咨辦理。又經臣札飭遵辦去後。茲據鹽運使恆慶詳稱。長蘆通網總散各商。
應交課款。均由司派員催令自行交納。斷不敢以散商完足分數。為總商撥抵牽算。其歷年奏銷冊報未完銀兩。
委係累參各商欠交之款。且網總商人黃昭融等。屢據具稟求退。皆因近來綱務繁劇。接辦之人。未克批准。並非
該總商等希冀取巧。日久把持。惟網總為一綱之領袖。非公正練達。熟悉綱情。難期服眾。若將現充網總之四商。
概行裁撤更換。不特一時難得其人。即使舉有新商。恐於向辦舊章。及一切款項。未能深悉。奏限在邇。催課正當

吃緊。未便遽易生手。致有舛錯貽誤。惟既奉奏定飭遵。自應遵照所指辦理。茲照山東裁撤成案。將長蘆綱總商人一名黃昭融。引名振德。一名高凌漢。引名益德裕。先行裁撤。其總商楊俊元。華楨二名。暫行酌留。仍由司留心體察。暨飭通綱商人。公舉殷實公正妥商。以備遴選接充。按年輪流更換。並將新商姓名。專案報部。以符原議等情。具詳前來。臣查蘆綱散商。領引納課。以及應查應議等事。向來概歸綱總查催籌議。是以非熟悉綱情。通達大體者。不能勝任。而權之所在。即爲弊之所叢。誠如部議把持擲攻等弊。事所不免。今止裁留二名。改爲按年輪換。勢孤情怯。諸弊可期廓清。第蘆綱較東綱轄境稍寬。公事亦較劇。兩人之才分不齊。其能否料理裕如。殊不可必。應飭暫先試辦。仍由運司隨時督飭整頓。以專責成。除飭將撤退衆商欠款。並官商捆運引岸。趕緊分別查辦外。所有遵議裁留綱總。先行試辦緣由。合先據詳恭摺具奏。伏乞皇太后皇上聖鑒。飭部核議施行。謹奏。

永定河漫口請參處各員摺 同治八年六月十一日

奏爲永定河節次暴漲。道廳搶護新工。竟於北四下汛平工處所。忽致漫溢。分別參辦。並請旨將臣交部議處。恭摺奏祈聖鑒事。竊查前因永定河南上等汛合龍以後。經歷盛漲。壩埽均甚穩固。引河亦尙通暢。意謂後即長水似可不致他虞。用敢專摺奏報。並將已前參革各員。懇恩開復在案。不料本年宣大一帶。得雨甚大且勤。屢見各屬稟報。即慮山水匯注。一出山口。勢必異常漲發。正在懸系之際。乃五月二十八日。接永定河道徐繼鑪稟稱。查通工形勢。以南上南下爲最險。而南四各號新工。尤形險要。因十八號以下引河。過於逼窄。漫灘水普律出槽。拍岸盈隄。情形十分喫重。該道督率廳汛各員。分投搶護。將各埽段加鑲壓土。窮一日之力。始得漸臻穩實。旋據代理北岸同知王維清稟報。北四上汛。十三四號起。至北四下凡三四五號。及於工尾二十餘里之間。一片汪洋。水勢近逼堤根。續漲不止。愈擡愈高。卑溝水漫過五號堤堰。趕即掛柳捲。由多方搶護。正在搶辦間。三號又復馳報。水勢直漫隄岸。危險萬分。當經分飭汛員弁兵。招集村民。跑買土料。設法搶救。不意二十一日酉戌之間。大風陡起。激浪騰空。北四下汛五號水越堰頂。刷塌口門十餘丈。昏黑之間。措手不及。理合據實稟報。該道當即北渡馳往。猶冀以人力回天。乃值風狂溜急。駛至北三工冒險渡河。烈風雷雨之中。行抵北四下汛三號。因漫水將隄身隔斷。不能徑赴五號。又復連夜渡河折回南岸。二十二日。繞由南五。過河查看北四下汛五號漫口。已經奪溜衝

刷口門三十餘丈。無可挽救。查勘此次漫口。係由舊減河順流而下。被淹村莊無多。人口無傷。現已趕緊備料。盤築裹頭。以防續塌等情。稟請參奏前來。臣查永定河隄工。前經臣親歷細勘。誠屬廢弛已極。第上年請帑十一萬金。臣又加撥二萬餘金。爲款已鉅。原冀引河加長。中泓稍寬。又將歲搶修年例應發之銀。全數早發。亦冀全工擇要修培。庶可無慮。乃北四下汛五號。竟被漫越。隄頂刷塌三十餘丈。雖在平工處。所尚非本年新工之失。而本廳本汛各員所司何事。實屬咎無可辭。相應請旨將代理北岸同知候補通判王維清。北四下汛固安縣縣丞候補從九品岳翰。一并革職留工效力。該河道徐繼鎔統轄全河。疏於防範。應請革職留任。臣督率無方。請旨將臣交部議處。現在伏秋兩汛。接續將至。汛期正長。上游險工林立。而歷年以來河身並無中泓。本年所挖南四南七引河。既短且窄。不能容受全溜。臣前摺所慮。即在於此。河身既不能容。則隄埽處處可虞。亟應上緊防護。除飭委候補道蔣春元先行馳往查勘。嚴飭上游各汛。務各加意修防。仍速盤築裹頭。以防續塌外。所有北四下汛漫溢緣由。理合恭摺具奏。伏乞皇太后皇上聖鑒訓示。再此次漫口。據該道稟引河淤墊無多。擬於半月之內。設法搶辦。冀蓋前愆。今已半月屆滿。堵塞漫口。尙無把握。是以出奏稍遲。合併聲明。如果於數日之內。僥倖搶辦合龍。再當專摺由驛馳奏。謹奏。

永定河未能合龍片 同治八年七月初一日

再查永定河北四下汛漫口。前據該道等以引河淤墊無多。口門亦尙不寬。請就半月內搶辦堵閉。以贖前愆。當經准其試辦。而又料其全無把握。曾於上次摺尾聲明在案。茲據永定河道徐繼鎔稟稱。該道自六月初二日起。晝夜趕辦兩壩。進占澆做夾土壩。挑築背後土工。並鑲做邊埽。加壓頂上。至十六日止共進十二占。連小壩共二十四占。僅留金門口四丈七尺。其河身淤墊處。所引河溝工。亦經開段挑挖。本定十八日合龍。因十七日大雨。竟日。兵夫不能站立。是以改至十九日。當於是日卯刻。掛纜測量金門口水深一丈二三尺不等。溜勢湍急異常。兩壩十分吃重。該道不惜重費。竭力跑買。無如伏水性極凶猛。勢若排山。金門口隨鑲隨蝕。壩前水愈撞愈高。以千餘人搶辦。三時之久。迄未能迫壓閉氣。又值水適驟漲。勢更難與強爭。祇可以保全大壩爲急。不得已將金門口土料拆去。俾河流得有去路。免致傷及壩身。俟秋後水弱。再將引河加挑寬深。方可合龍。現計大壩引河均尙如

故已派弁嚴密防守。亦不致虛糜經費等情。具稟前來。臣查此時正交初伏。水力剛勁。本難徵幸成功。特因該道廳等急圖自贖。是以姑准試行。今功效垂成。實亦意中之事。且全河受病已久。下口太高。無尾閘可以宣洩。中泓太淺。無河身可以暢流。墊使北四下汛。幸而堵合。而堤堰單薄。處處可虞。不決於此。或溢於彼。總坐河無可歸之槽。溜無容受之處。故泛濫爲患耳。將來秋冬合龍之後。必須將挑挖中泓。疏濬下口。二者認真籌辦。庶可補救萬一。臣識闇才疎。不克研究河務。胸懷成竹。以致底績無期。曷勝惶悚之至。理合附片具陳。伏乞皇太后皇上聖鑒。謹奏。

再議練軍事宜摺 同治八年八月二十七日

奏爲再行酌議練軍事宜。恭摺仰祈聖鑒事。竊臣接准部咨會奏直隸練軍事宜一摺。令臣迅即籌定簡明章程。奏報定議等因。咨行到臣。臣竊維用兵之道。隨地形賊勢而變焉者也。初無一定之規。可泥之法。或古人著績之事。後人效法而無功。或今日致勝之方。異日狃之而反敗。惟知陳迹之不可狃。獨見之不可恃。隨處擇善而從。庶可常行無弊。卽就紮營一事言之。湘勇初出。亦屢爲粵匪所破。旣而高其壘。深其壕。先圖自固之道。旋即用此以制敵。厥後惟勇諸軍繼起。亦皆以高壘深溝爲自立之本。善紮營者。卽稱勁旅。直至移師北來。攻勦捻匪。每日計行路之遠近。分各營之優劣。曾無築壘挖壕之暇。而營壘之或堅或否。於勝敗全不相涉。卽詢及陝甘勦回。貴州平苗。亦不以築壘挖壕爲先務。至天津捍禦外洋。雖堅壁亦不足恃。卽此一端。已知陳迹之不可狃。兵勢之變化無常矣。然安營支帳。埋鍋造飯。一則不擾閭閻。一則自固壁壘。斯乃古來之常法。并非勇營之新章。終未可棄而不講也。臣愚以爲直隸練軍。宜添學紮營之法。每月拔營一次。行二三百里爲率。令兵丁修壘浚壕。躬親畚築。以習勞勩。不坐差車。以慣行走。至運米搬柴。則勇丁不過偶爾爲之。如今年近事。老湘營之勇。由綏德州運米至花馬池。銘軍之勇。由濟寧州輸米至張秋是也。論平日之常例。則採薪等事。每勇百人。照章有長夫三十六名。兵丁百人。舊例亦有夫役三十名。并有報銷四十名者。臣意練軍竣。拔營行動。卽須添募長夫百名。給三十名。雖所費較鉅。似亦不可省之項。有長夫任樵汲負重之事。則兵丁可不任搬運之勞。旣以稍示體恤。又以見築壘挖壕等事。必須躬親。寬於此者。正欲其嚴於彼。至部臣所議兵丁宜講衣冠禮節。臣意老營操演。儘可整冠束帶。以習儀

文被營行走。仍宜帕首短衣。以歸簡便。凡此皆一張一弛。擇善而從者也。臣前摺所謂重統領之權者。蓋因平日之事權不一。則臨陣之指麾不靈。臣在南中。嘗見有藩臬衙門。募勇多營。平日之領餉拔缺請獎等事。皆由衙門主政。至臨陣之際。則另派武員統領率之打仗。致指麾不克如意。即巡撫及大帥所部多營。平日無一定之統領。臨時酌撥數營。派一將統之赴敵。終不能得士卒之死力。而江楚諸省。幸獲成功者。大抵皆有得力統領。其權素重。臨陣往來。指揮號令。進退之人。即係平日發餉挑缺主持賞罰之人。士卒之耳目有專屬。心志無疑貳。是以所向有功。臣所謂事權宜專。本意如此。然亦會逢其適。幸遇塔齊布羅澤南李續賓楊岳斌多隆阿鮑超劉銘傳劉松山諸人。或隸臣部。或隸他部。皆假重權而樹偉績。苟非其人。權亦未可概施。部臣所議。得良將則日起有功。遇不肖則流弊不可勝言。洵爲允當之論。良將者可幸遇而不可強求者也。嗣後直隸練軍統領。臣所議得良將。遇上選則破格優待。盡其所長。遇中材則隨處防維。無使越分。庶兩全之道耳。部臣復議及兵將相習。可收一氣貫通之效。又言轉弱爲強。雖不必借才於異地等語。臣竊意就兵言之。以土著爲主。以保狀爲憑。斷無令外省客勇充補之理。而客勇亦無願補遠省額兵之志。就官言之。則武職自一命以上。直至提鎮。皆准服官各省。况畿輔萬方輻輳。尤志士願效馳驅之地。是各路將弁有出色者。皆可酌調來直。不得以借才論。直隸練軍。詢諸衆論。不外二法。一曰就本營之弁兵。一曰調南人之戰將。調南人之戰將。練北人之新兵而已。訪聞前此大軍。用本營鎮將爲統領者。其情易通。而苦於闔營無振作之氣。用南人戰將爲統領者。其氣稍盛。而苦於上下無聯絡之情。將欲救二者之弊。氣之不振。本營官或不勝統帥之任。嘗察其懈弛。擇人而換之。情之不聯。南將或不知士卒之艱。當令其久處。積誠以感之。臣今擬於前留四千人外。先添三千人。稍復舊觀。一於古北口暫添千人。該提督傳振邦老於戎行。安詳勤慎。一於正定鎮暫練千人。該總兵譚勝勇敢素著。志氣方新。二處皆以本管官統之者也。一於保定暫添千人。令前瓊州鎮彭楚漢以南將統之。與中軍冷慶所轄千人。姑分兩起。俟察驗實在得力。而後合併一軍。此因論兵將相孚。而擬目前添練之拙計也。部臣又令籌定簡明章程。再行按月給餉。并查明直隸未經遣撤之勇。飭令回籍。妥爲安插。臣查直隸勇丁。上年經督臣官文奏留十二營。臣今年撤去余承恩三營。其後夏麥秋禾。疊遭亢旱。常有匪徒竊發。因恐散勇窮無所歸。聚而滋事。是以遷延未及續撤。俟秋末安靖。再當遣撤。

數營即以裁勇之銀添作練軍之費。至淮勇銘軍乃臣所奏爲拱衛京畿之師其大隊紮於張秋分數營駐保定數營駐紮臨清目下不擬裁撤另行附片覆奏練軍規模臣擬仍以四軍爲斷二軍駐京以北二軍駐京以南每軍三千人統將功效尤著者或添至四千五百人其餘常行章程已詳具於部臣及前督臣劉長佑所議條款中臣昨議練餉底餉一併支領馬隊不獨步隊之中一棚只以十人爲率亦經部議允准此外如頂名冒替是前此之積弊未知將來能否革除參用南將是前此所已行未知此後能否融洽此次所議添募長夫每月拔營亦未知有無窒礙斯三者一有未妥則全局皆須變更臣不敢遽定章程恐不久仍須更換也可否請旨一面交各衙門覈議臣一面先行試辦其餉需暫用江南協款俟定議後再由戶部撥發俟試行果有頭緒然後刊刻簡明章程俾各軍一律遵守所有再議練軍事宜恭摺覆陳伏乞皇太后皇上聖鑒訓示謹奏

銘軍統領無庸更換片 同治八年八月二十七日

再臣於四月十九日接奉寄諭「李鴻章奏提督劉銘傳患病未痊懇請開缺已明降諭旨准其開缺調理矣惟該提督所部各營前經會國藩奏明作爲畿輔護衛之師現在劉銘傳既經開缺劉盛藻接統是否勝任或須另派委員接管並應否遺留之虞著會國藩悉心察度隨時奏明辦理李鴻章原摺著鈔給閱看將此諭令知之欽此」臣查保升按察使劉盛藻向在提臣劉銘傳大營分統左軍唐殿魁分統右軍均稱得力唐殿魁殉難以後劉盛藻每照料全軍事務上年劉銘傳回籍養傷劉盛藻代統其衆將士翕服本年正月臣奏明以銘軍護衛畿輔旋經撤調分兵來省該員派營務處趙宗道管帶八營移駐保定五月間梟匪將起又檄調滕學義管帶三營移駐臨清而劉盛藻老營仍駐張秋三處均歸該員統轄迄今已閱數月察看該員勤廉精細能識大體尙可勝任其軍分紮各屬於直隸山東百姓亦甚相安現在西陲未靖昨接山西撫臣李宗羲來函於舊設沿河防兵外已再募新勇添設八營用防隴匪竄越而河道綿長瞬交冬令將結冰橋晉省河防尙未知可恃與否直隸與山西毗連此時銘軍自未便遽撤仍應責成劉盛藻統領以資熟手毋須另行派員接管理合附片覆陳伏乞皇太后皇上聖鑒訓示謹奏

核辦永定河工程款項摺 同治八年九月二十一日

奏爲核明永定河工程酌擬辦法。請撥款項。恭摺仰祈聖鑒事。竊惟永定河北下四汛隄岸。於五月二十一日漫決。接連伏秋二汛。未克合龍。八月間。奏派候補道蔣春元。前往署理。籌度興工。并飭周歷下游。詳加察勘。下口是否疏通。中洪是否無阻。一一勘明。免致此處甫經合龍。彼處又報決口。仍蹈近年之覆轍。茲據蔣春元稟稱。自八月二十一至二十五等日。督同文武員弁。周歷查勘。查永定河至南北七汛以下。河道寬至數十里。由道光二十三年至今。所謂下口者。或傍南岸而行。或傍北岸而行。或歸中道而行。均下抵鳳河。以達於海。遷徙不常。茲勘得舊傍北岸之河。北七頭號至三十一號。均係河身寬深。距隄亦遠。形勢極順。無如三十一號以下。河距隄身太近。其形甚窄。至四十八號以下。並無隄身。水出則漫淹武清東安。是改歸北岸之議。未可舉行。其舊行中道之河。若由北七工三四號同望河樓。調河頭仍引入中道。距南北兩隄均遠。一線順流。無所依傍。直達鳳河。形勢亦順。無如間段淤墊太長。漸成平陸。有并無河影者。所需經費過鉅。是引歸中道之議。亦未可行。惟近年水傍南隄之河。即係道光二十二年以前之故道。目前水入下口。不能不循此道而行。人力稍覺易施。惟下口既傍南岸而行。則南七名號。即係初近下口吃重之地。查南七五號。同治六年漫口。秋後堵閉。因限於經費。未將攔河大壩修復。合龍之後。凌汛驟發。即已鼓裂塌陷。幸去年南四決口。該處未經過水。今年南上合龍。大溜甫過。該處水上壩面。與隄相平。岌岌可危。現在隄身受病。隄內坑塘太深。頭分引河太窄。是南七之六七號。實爲下游第一險工。茲擬向前第五村之東南隅。另挑引河工長七百丈。下與舊挑之河身相接。并於南七工頭二號。做一截水大壩。鑲埽簽椿。工長百丈。撇水入新河。河不入坑塘。仍於壩根兩傍作一圍堰。堰工長千丈。以衛前辦之隄。估計土埽各項。需銀一萬六千兩有奇。此南七初近下口預防危險。擬辦引河壩堰之工也。至龍王廟上下。河身窄。並未刷寬。須加挑至十二丈寬。寶店審以下五百丈。亦宜挑寬加深。估需實銀一萬八千兩有奇。其餘河漕稍寬。及離鳳河較近之區。姑置後圖。此疏通下口之工也。南六南五北五兩岸。以上至張家墳西頭。工段甚長。紆曲過多。水來則壅積難下。以致上游擡高。急應節節挑挖。或裁灣取直。或切坎順軌。只存南五十七號。北六十三號兩處次險之工。其餘一切險工。皆已撤去。盛漲來時。或可勢同建瓴。徑行無滯。估需實銀二萬二千兩有奇。此挑挖中洪之工也。至北下四壩工。均皆墊陷堅實。惟秋汛以來。金門口刷寬。現尙有十二三丈。應行盡占。金門口水深一丈一二尺。一丈

三四尺不等。新估背後之土。加寬加高。又添做養水盆。河頭則須向南展寬。以順來流引河。又須加挑以通去路。并前搶辦時用過之費。共估需銀二萬四千兩有奇。此堵合北四決口之工也。此數者。惟北下四汛堵口。係屬正案。其餘皆係另案。然不辦中洪下口。則合龍後。水勢不能下行。不惟新工吃重。即凡水經過之處。隄身處處堪虞。四項工程。共估需銀八萬餘兩。伏乞源源發款。及時趕辦。至向來方價料價皆有常例。此次剔除積習。核實力減。以求撙節等情。具稟前來。臣查永定河工。近年多係由外捐辦。去歲經督臣官文奏請帑項十一萬。仰荷聖恩。允准。臣春間到工。又於南七南四引河增撥銀二萬三千兩。已屬非常之舉。今冬又需專款八萬。殊覺糜費太鉅。第既據該道暨各員勘明。不辦中洪下口。則水勢不能暢行。仍恐合龍之後。旋即失事。隄身受病已久。本屬在在堪虞。臣不得已。札飭核減銀九千兩。准其一面與辦。至由外勸捐。歷年成案。皆係由司庫借撥現銀。再於歲修項下。按年攤扣歸款。歲修等銀。久經裁減。又加扣去捐款。則河員之領項愈微。到工之實銀愈少。河務所以日壞。皆在於此。臣愚以爲欲整頓河務。必須停止攤捐。發給現銀。免致廳汛有所藉口。即以作弁兵夫役之氣。合無仰懇天恩。飭部內撥銀四萬兩。下少三萬餘兩。臣即於江南協直項下撥發。今年直隸水旱報災。近七十縣。民力窮困。藩部無可動撥。伏希聖慈亮鑒。如蒙俞允。臣當分別辦理。張家墳一帶挑挖中洪。龍王廟以下疏通下口。二者皆多年失修之工。即用部撥之款。其北下四汛。堵塞決口。南七六號。添做壩堰。係近日應辦之工。即用外籌之款。如此區別造報。庶不失慎重帑項之義。所有核明永定河工程酌擬辦法。請撥款項緣由。恭摺具奏。伏乞皇太后皇

上聖鑒訓示。謹奏。

請撥中洪河下口歲修銀兩片 同治八年九月二十一日

再查永定河向例。每年歲修銀三萬四千兩。搶修銀二萬七千兩。備防銀二萬五千餘兩。加增運腳銀八千五百兩。均於先年歲終。由部庫請領。久經遵辦在案。咸豐四年。因軍需浩繁。庫款支絀。奉部議定減半給發。並令在藩庫旂租項下撥發。維時藩庫一應放款。均係銀鈔各半。遂於河工歲修等實銀。亦發半銀半鈔。向之每年發九萬四千餘兩者。至是僅發實銀四分之一。不過二萬三千餘兩矣。同治三年前。督臣劉長佑。以部議徵放既停止鈔票。則永定河歲搶修各銀。亦應停止發鈔。奏請發給五成實銀。奉旨允准。于是較之向例。可得四分之一。每年可

發四萬七千餘兩矣。然司庫扣去部平及攤捐等款。年年所發實銀。尙不備四萬兩。是以到工之費甚少。向來歲修銀兩。本有挑挖中洪。疏濬下口二款。厥後領款。尙存其名。而修工則無其事。近年領銀太少。堤埽已極草率。而中洪下口。更置之不問矣。臣愚以爲欲弭永定河之患。必須於中洪下口二者。年年加功。夏間曾以河務函詢通商大臣崇厚。旋接其覆書。亦謂宜從下口施力。永定河真正下口。在天津西北之韓家樹地方。爲永定河與大清河匯流之處。每日海河潮洑。可以達到。能從韓家樹下口節節向上挑挖。使渾水直達海河。與潮洑可以相接。藉潮力以級引。使下游不能停積。自上游不虞壅遏等語。其言似屬可行。臣雖未至下口盡處。而兩次到工。見河身無槽之處甚多。竊以爲常疏中洪。宜與崇厚先挖下口之說。相輔而行。合無仰懇天恩。飭部核議。准將昔年裁減歲修搶修等銀。再加撥二萬三千餘兩。較之道光年間原額。酌復四分之一。每年共發七萬一千餘兩。以一半爲修隄搶險之用。以一半爲疏濬中洪下口之用。每年桑乾及九十月間。奏明修理下口若干里。中洪若干段。工竣後。必須總督親往收驗。如其草減浮冒。立即參劾罰賠。所難者挑河所出之廢土。仍堆積於河中。不能遠送隄上。一遇風吹水蕩。不免壅滯河槽之內。終非可久之計。臣現札飭上海機器局。詢問洋人制器。有能送土於數里之外。不甚糜費者否。有其器則挖出之土。送於隄上。加以夯碾。固屬一勞永逸之道。即無其器。而年年挑挖。究亦不無小補。如蒙俞允。此項銀兩。部款難發給。司庫亦極窘迫。擬請於長蘆運庫先發一二年。以濟要需。將來部庫充裕。或仍復道光年間之舊章。每年發歲搶修銀九萬四千餘兩。亦仍以一半修堤搶險。以一半挑濬下口中洪。屆時應從何處支發。俟數年後再議。臣才識淺陋。聞於河務。但見河身與隄相平。隄工難於得力。不如挑濬下口中洪。爲易致功。是否有當。請旨敕戶工兩部議覆施行。伏乞皇太后皇上聖鑒訓示。謹奏。

條陳長蘆鹽務摺 同治八年十一月初一日

奏爲長蘆鹽務。按照部議分修。覆奏仰祈聖鑒事。竊臣於同治八年五月初一日。奉到寄諭。前因給事中陳鴻翊奏請整頓長蘆鹽務。當經降旨交戶部議奏。茲據奏稱。陳鴻翊所擬各條。或得申明成例。或係現辦有案。或款由外銷。向未報部。總之蘆綱積弊。在引岸虛懸。乏人認運。因而交款日絀。浮費太重。商力難紓。正供遂至暗虧。請飭迅速整頓等語。著曾國藩按照部議各條。督飭長蘆運司。將應辦事宜。趕緊修舉。應汰陋習。實力掃除。如尙有

未盡事宜。並著體察情形。酌擬章程具奏。等因欽此。當即恭錄札飭運司恆慶。據實詳覆。以憑核奏。旋據該運司將鹽捐錢文津貼刺船一條。先行詳情咨復。其餘九條。亦於六月間詳覆。臣以其中利弊。未能詳細釐別。所陳尙有不實不盡。批令再行確查具詳。九月初間。又經另委候補知府李與銳馳赴天津。按照原奏各條。明查暗訪。悉心考究。具實稟覆。茲據該司及委員先後查復前來。臣參觀互證。酌擬辦法。分條具陳如左。

第一條 認辦懸岸宜定期限

查蘆商認辦引地。向例於具稟後。飭網查明。是否家道殷實。仍由本商自覓散商聯名出結具保。由網總循例加結。始由運司轉詳咨部更名。一面給發行知領引辦運。此等層折。原爲慎重課帑。由來已久。其中緊要關鍵。重在出結之保商。不在加結畫押之總商。其或商本實不充足。或外來人地生疎。網中無商承保。則往返查訪。稽延時日。亦事勢所常有。並非該商總等有意刁難。藉端需索也。惟新商認岸之初。辦千引者。向令先交兩課銀一千餘兩不等。名曰寄庫。以驗殷乏。又認運租運捆運之外。另有試運章程。試之二三年。果不能辦。准其稟退。有寄庫則資本之證據早明。有試運則本商之進退裕如。在網總不必過於慎重。徒啓壟斷之疑。不以爲因循廢公。卽以爲靳惜笑岸。迹近把持。情同勒索。以後新商具呈。但有散商聯名結保者。卽令網總酌定期限。於二十日內加結畫押。運司亦迅速發給行知。庶衆商可資鼓舞。

第二條 保結商人宜專責成

查長蘆向例。新商入網。取具聯名商保。保其家道殷實。如有貽誤課運。願甘分賠甘結。惟各商因通網向有隨引帶交參課銀兩。遇有參商拖欠課款。除查抄家產變抵不敷外。均在商交參課內彌補。是以從無保商攤賠之案。迨至道光二十九年。引案參懸無商認辦。懸課過多。參課不敷彌補。通網添捐懸岸課一款。隨領引時每引交銀四分。專補懸課之用。無如懸岸日增。歸補愈難。所有續參商課。雖逐案飭令分賠。總未據完交實銀。且查蘆網商人。多因誤運誤課。其本商名下。自能保全出網者。甚屬稀少。若再責令分賠。代人受過。並不予以年限。難免不紛紛累遠。避則蘆屬引地。從此有參無認。殊於全局有礙。自應量爲變通。擬請仿照保固三年定限。如果三年正課之內。認商貽誤課運被參。卽將應交正課除抄查備抵外。其餘參欠課銀分作三成。在於參

商名下逋交二成。出結之散商。加結之總商。分賠一成。如逾三年之期。認商業經完過索銷引課。可稱家道殷實。卽與保商無涉。以示限制。似此酌核辦理。於庫款分賠有著。而於各商亦不致有畏累不保之慮矣。

第三條 督催總商宜先完課

查蘆商完課。無論總商散商。均照通綱一律辦理。近年奏銷後。所欠勒限課銀。委係累商欠交。於款綱商名下。應交正課均經依限催完。惟向來章程。每屬上課之期。運司派委鹽務候補數員。率同綱總督催委員。平日與總商情誼不洽。於鹽務底裏不明。催督無權。虛應故事。每屆籠統完至八分以上爲率。而此八分中。孰多孰寡。孰先孰後。無從稽考。是總商之拉勾據算。從中取巧。其物議亦由此而起。嗣後惟當遵照部議。敕令總督首先完納。每屆奏銷。將總商名下課款是否清完之處。附案聲明。仍由運司將總商另立簿冊。散商亦立一簿。將已完幾成。未完幾成。據實登註。隨同銷冊詳文。送鹽院衙門備查。綱總無從撻拉。衆商無從朦混。開誠布公。共見共聞。征收亦當日有起色。

第四條 捆運懸岸宜交全課

查長蘆懸岸。前於道光廿八年。經欽差王大臣查辦鹽務案內。將無商州縣五十五處。除有州縣自行運銷者十一處。無容更改外。其餘四十四處之河南懸岸。二十州縣。盡改票鹽。仿照淮北成案。先課後鹽。無論資本多寡。一經交課給票。護運直隸懸岸二十四處。予限半年。責令各州縣或招商或招販。一律整理。倘商販無人。責成各州縣領運。如州縣實有不能辦理之處。仍由鹽運司遴員官運等因。今查直隸各處懸岸。除陸續招募新商具認外。尙有豫屬之新鄭太康扶溝長葛。直屬之成安開州。並先經曾有商認辦。復又參懸岸之豫屬鄆陵沈邱項城滑川。又二十八年以後。續經參懸引岸。隨據新商接認外。尙有南岸之祥符許州禹州臨潁鄆城。直隸之永清邢臺鷄澤隆平鉅鹿衡水唐山曲周。統計二十三處。內除衡水現有新商稟認試辦外。其餘各岸。迭經該司出示招商。並通知各屬一體廣爲招募。迄今無商認辦。引岸虛懸。民食堪虞。自不得不照按飭令官商民販招運。藉濟民食。以補課款。惟捆運多寡無定。原與包額認辦不同。若輩惟利是圖。能多捆一包之鹽。卽多獲一包之利。亦未嘗不願多運多銷。而卒之所運無幾。蓋亦有故。或因資本微薄。無力多捆。或因岸地滯銷。有

虧成本。以致未能按額捆運。現在既准部議。自應遵照飭令捆運之各官商。如果情願包額認辦。限一年之內。出具認狀。保結詳請。咨部更名。一面由司另行招募新商。稟認妥辦。如有實在銷滯無商辦認之處。每岸專案詳咨。不復以籠統浮詞搪塞。蓋懸岸爲中外所同慮。捆運乃初政之弊端。本無所容其掩飾也。

第五條 長蘆網總宜令更代

查山東網總。雖係按年更換。第山東先課後引。長蘆先引後課。網總責任。兩不相侔。換期太促。必以甲年應完之課款。責成丙年之網總督催。恐此推彼諉之弊。必且層見迭出。且網總爲通網領袖。要在遴選得人。非其人卽一月一換。無裨實政。得其人卽累年不換。亦愜輿情。蘆商殷實者少。殷實而認真辦事者尤少。年年更換。恐中選之人無多。而廢弛之患滋甚。現經運司於舊網總四人之內。挑留楊俊元華楨。斥退高凌漢黃昭融。於本年六月具奏。衆論尙屬允協。嗣後網總擬不必限定換期。爲衆商所翕服者。酌留接充。如其不然。隨時撤換。詳請咨部查照。

第六條 代銷融銷宜分別

查長蘆滯積岸引。例准融與暢岸分成代銷。當辦理融銷之初。原爲蘆商疲累居多。銷路又滯。每至奏銷屆限。雖引地積有存鹽。而課項無措。力不能完。勢必紛紛參追。各商以融鹽與融引事同一律。稟請將積鹽融賣與別商銷售。以所得之鹽價。卽交庫抵課。惟復價一項。歸買商完交。其餘一切課款。仍由賣商按限程約。乃爲保全奏課起見。同治三年。前任督臣劉長佑奏覆河南撫臣張之萬奏參蘆商把持案內。將融銷引鹽一層。業經詳細聲明。有案可稽。檢查近三年案卷。亦係疲累之商。或因正課無措。或因復價到限。無力措交。不得已將所運之鹽。融賣與別商。運赴暢岸銷售。其所得價銀。由買商呈出交官。以濟目前之急。是賣商賣價融銷。卽與自運銷售無異。在買商既經按包交價。並非得無課之鹽。在賣商鹽已收價。亦非上無鹽之課。融賣融買。事出兩商情願。並非買商圖得便宜。致有弊竇。且代銷與融銷稍異之處。代銷則賣主津貼銀每引三錢五六分。至四錢不等。其正雜課復價等款。概歸買主完納融銷。則買主代交正課六錢。復價五錢。解費二分一釐。其餘各款。仍由賣主自行完納。代銷則賣主出津貼之費。融銷則賣主有自納之款。其辦法不同。而使累商得稍資周轉。

則三賣者。後此扣算定價。兩相清題。則亦同。所有各商融銷引鹽除捆運之商。仍遵三年奏案。飭令一概領引運鹽。不准註銷外。其行商註鹽。應請照舊辦理。免其禁革。以保額額。而重帑項。

第七條 歷年積欠宣令代交

查籌補庫墊積欠一項。自道光廿八年清查案內。共計銀二千三百四十三萬一千四百餘兩。每年釐定庫墊銀六萬兩。積欠銀十一萬兩。分年按引攤交。每引攤銀二錢四分零。自同治二年。因商力拮据。改爲外引撥出銀一錢二分。京引撥出銀八分。領引時隨引完納。其餘銀兩。仍照按限帶交。嗣於同治五年。因綱情愈疲。稟請外引減交銀一錢。京引減交銀六分。自道光二十九年。起至咸豐八年。止除已完現商。淨欠交銀五十九萬八千三百三十餘兩。業經奏奉部覆。准自咸豐十一年。奏銷後。分作五年代完。又自咸豐九年。起至同治七年。止。積應徵銀一百七十萬兩。內除參懸無著銀四十九萬九千二百四十餘兩。永平七屬官辦暨天津公共口岸。未撥銀四萬四千二百三十餘兩。現商應交銀一百十五萬六千五百二十餘兩。內已完銀三十五萬六千七百餘兩。連前實計現商。共未完銀一百三十九萬八千一百五十餘兩。其已交銀兩。均經撥各餉動用。按季冊報在案。其欠交銀兩。雖屢經嚴諭飭催。無如各商僉稱。因近年引地被授被災。領運失時。額引帶銷。商力拮据。願運願課。已屬萬分竭蹶。前項積欠。代交前商參累之款。一時無力賠交。委屬實情。且近來參商迭出。長蘆懸岸。已屬不少。若以此紛紛參辦。通網無商不欠。幾至無岸不懸。全網掣動。所關非細。茲准部議。除將欠交銀兩。趕緊設法。嚴行催交。以清積欠外。所有隨引先交之款。按每年出庫引數。核計應完數目。進入春秋撥冊。聽候部撥。至於欲紓商力。必須減成本。臣當另案陳奏。

第八條 報災補運宜再詳查

查各州縣詳報被搶被水。各商引鹽。有詳運司已經委員會勘。尚未勘覆詳報者。是以失鹽數目。卽院司兩處案卷。已覺未能相符。茲據該司逐細詳查。除奉部覆准補運五六等年。被梟匪髮逆燒搶之寧晉臨城杞縣。七年被搶逆焚搶之定州南樂清豐大名開州東明臨漳等州縣。商人益德裕等被搶失鹽一萬六千零廿九包。不計外。實在現據委員勘復陸續詳報之清苑等處商人。被搶失鹽四萬五千六百七十七包。又新城等州縣

被水衝淹鹽一萬八千六百三十一包。又已委未經復勘之濟源等州縣。并未經委勘之安平縣商人。被搶失鹽一萬零八百五十六包。又因案情未符批飭覆查。未據詳覆之溫縣等處商人。在途被搶失鹽三千二百四十六包。餘由司核明照例分案敘詳。并將未經通詳之各州縣分飭另行補報。以昭核實外。所有州縣商名鹽數。分別另造清冊。呈送備查。謹將原冊封送軍機處。并分咨戶部。以備考核。

第九條 加飭抽錢宜行禁止

查道光廿八年。清查案內。每包加鹽一百五十觔。合計北鹽重五百六十七觔。有奇。南鹽重五百七十二觔。有奇。違者即以私論。各商赴坨築鹽。向由批驗所大使驗明秤掣。按包編號之後。始行飭商裝運。前奉部飭。即經該運司明查暗訪。出示嚴禁。並親赴關所查照鹽包。挨次編列號數。按包抽提。當堂秤掣。均屬相符。訊據各商僉稱。伊等赴坨。按引築包。均由批驗大使。查驗秤掣編號。有一鹽必有一引。造關時按號抽提。過秤。既有官司稽查。又有部砵飭兩。衆目共睹。非商等所能行私朦混。且伊等深知例禁甚嚴。亦當自顧身家。何肯犯法取利。至造關時裝載備掣者。即係批驗所過秤編號之引鹽。此外實在並無另有私築號鹽。意圖夾私加飭情事。復飭據小直沽批驗所大使王鳳崗。以查明各商赴坨築運。均係遵照部砵飭兩。一律辦理。並無夾飭加帶。另築號鹽。以備掣抽情弊。出具印結詳送到司。該司恐尙有不實不盡。復經連日逐細查訪。僉稱如一。此後惟有嚴益加嚴。督飭委員。暨批驗大使。認真秤掣。不時密查。倘有奸商夾私加飭情弊。立即照例從嚴懲辦。臣亦常不時由省委員赴津密查掣驗事宜。斷不敢稍存姑息。以杜流弊。而肅鹺政。至隨引每包抽收津貼錢五十文。乃係同治六年海運案內。各商公議。捐作津貼槽刺民船之用。並無淨收抑勒情弊。業經另行詳明。咨部覆准在案。

第十條 墨筆科則宜加裁革

查道光廿八年欽差王大巨查辦鹽務。核定科則。曰正雜課。曰平飯。曰補欠。曰歸補積欠。曰王范備垣租息。曰領告雜費。曰緝費。曰各項解費。曰內外各利。共九款。每引攤交銀二兩六釐。刊單通行。飭商遵照。此木板之則也。後有續增兩捐款項。因年浪多寡。並無一定。一經捐足。即由各商隨時稟請停止。並非作爲定額。是以向用

墨筆添寫刊單之後。同治三年。河南撫臣張之萬。奏參蘆商把持。運使受其賾弊案內。指稱墨筆私加私用。經前運司克明查出。墨筆添寫者曰懸岸課。曰捐補參價。曰欽天監生息。曰歸補緝費。曰口岸汛工。曰籌補津貼。曰還墊詳公。曰酌增領告。曰朝袍冊寶。曰修署。曰報效軍需。曰隨引復價。凡十二款。當將墨筆原委。逐款造冊。由前督臣劉長佑奏覆。有案可稽。嗣將朝袍冊寶六釐。修署一分。報效軍需二分三款。先後停止。同治六七年間。因送奉內務府奏。派長蘆探辦絹箋。以及蘆勇口糧。並捐築金堤挑挖府河等事。增添一款。初曰寄庫還款。改曰金堤還款。其餘均照前奏之數。並無私毫加增。此外又有南場各商稟添大河口巡費一款。南引各商。捐添報効。豫省協餉一款。係不在這網科則之列。皆墨筆之則也。至所稱領引時。外交者三款。查有津貼辦貢一款。因前辦彩緞貢商人張鑑歷年賠累。各舊商公議。願每引津貼辦貢銀三分五釐。又津貼辦公一款。因總商辦公一切費用。出自己囊。衆商公議。願每引幫貼辦公銀六釐。迨因舊商星散。新商心力不齊。完交寥寥。本年已將此二款停止矣。至巡費津貼一款。係承辦青靜滄鹽四處引地緝費。裁減不敷。通網公議。每引願幫銀四釐。此爲保護引地而設。應仍其舊。斯三者外交幫貼之則也。據該運司造具木板科則一冊。續增墨筆一冊。外交幫貼一冊。並將領告科則款式。呈送前來。理合封送軍機處。並分咨戶部備查。至部議以浮費過重。行令認真釐剔。分別禁止。臣亦深知蘆網之疲。由於成本太重。銷路太滯。而衆商亦稟訴苦累情形。呈請拯救。頃至天津與運司面商一切。卽日將各項科則酌擬裁減具奏。以輕成本。而挽頹綱。

以上十條。就部文所指者。逐細查覆。至於引滯商疲。全網不振。別圖補救之方。容卽於酌減科則案內。另行具呈。伏乞皇太后皇上聖鑒訓示。謹奏。

秋收災歉未能種麥片 同治八年十一月初一日

再臣查直隸地方。本年麥收。本非豐稔。秋收更多歉薄。而三秋兩少。宿麥未能及時播種。縱有種者。不過十之二三。南路大順廣一帶。雨澤尤艱。種麥尤少。該處毗連豫東。風爲梟教。各匪煽惑。仍歲用兵以後。民間素少蓋藏。民氣又多浮動。目前情形。雖尙安帖。而畿南歲收。向以二麥爲大宗。麥種一日未播。則人心一日不安。此雖不在秋災之列。而來春青黃不及。窮黎乏食。難保不乘機煽惑。饑民爲變。勦撫兩難。於大局所關甚鉅。正不得不先事預

籌。臣已密飭該管道府就近留心體察。隨時據實稟報。不准稍事諱飾。如明歲二三月間。必須另籌賑撫。統俟臘底春初。由臣詳細察奪。專案具奏。所有直省一麥未能普種。及大廣一帶恐須另籌賑撫緣由。理合附片預陳。伏乞皇太后、皇上聖鑒訓示。謹奏。

覆奏察看史念祖摺 同治八年十一月十九日

奏爲疊奉諭旨。察看臬司。恭摺覆奏。仰祈聖鑒事。竊臣於三月十三日。奉到寄諭。史念祖由軍營出身。人尙明白。惟未經履地方事務。是否能勝臬司之任。著會國藩留心察看。據實具奏。以重地方。欽此。又於九月初十日。奉到寄諭。前因直隸臬司史念祖年歲甚輕。恐未能勝方面之任。諭令會國藩留心察看。嗣經該督奏稱。飭令該臬司總理發省局。藉資講求刑律。現在已閱數月。史念祖能否通曉刑名。足以表率實僚。諒該督知之必真。著即據實具奏。臬司爲刑名總匯。關係至重。朝廷用人。初無成見。史念祖如不勝任。該督必不稍存遷就也。欽此。臣奏明飭令該臬司綜理局務。原欲其常赴局中。督同首府暨各局員。講求刑律。朝夕參稽。迄今已逾半年。張樹聲聞尙或赴局。史念祖並未到局一次。外省規制。司道自爲一班。而府廳州縣自爲一班。等威亦自有辨。史念祖不能破除常例。不欲與守令等官同局辦事。既未至臬局一行。又別無案牘可閱。則其刑名之難遽通曉。已可概見。臣久欲據此覆奏。惟屢與史念祖接見。見其心地明白。器局開展。論事亦尙有識。似又足勝臬司之任。凡聰明過人者。每患視事太易。必須加以磨鍊。使心漸細而氣漸斂。乃足以玉成其材。直隸刑名較繁。與四川廣東相等。史念祖資望尙淺。若謂刑名稍簡之省。磨厲數年。斂才勤學。當可陶成令器。而直隸積案。由張樹聲一手辦畢。尤爲妥善。如他省猝無相當可調之缺。或仍令史念祖陳臬直隸。則任事之後。臣當隨時察核。一有不稱。即行密陳。不敢以此次覆奏在前。稍涉回護。所有遵旨察看臬司緣由。恭摺覆奏。伏乞皇太后、皇上聖鑒訓示。謹奏。

蘆綱億累請減成本摺 同治八年十一月十九日

奏爲查明蘆綱億累日甚。亟宜減輕成本。以蘇商困。而保頹綱。恭摺上呈。仰祈聖鑒事。竊照戶部議覆給事中陳鴻坤條奏。長蘆鹽務摺內。請蘆綱億累。在於引案虛懸。交款日絀。浮費過重。商力難紓。尙爲洞悉源委之論。奉旨飭巨體察情形。酌擬具奏。臣已按照十條逐一確查。分晰覆奏。惟於裁革科用一條。僅先將原定木板科則。續增

墨筆科則並外交幫貼三款。按項分晰臚陳。其如何酌擬裁減。聲明卽日另奏在案。伏查長蘆鹽務自道光中年以來。疲乏已久。至二十八年欽差王大臣載銓等查辦。如勸減價。裁費恤商科則。僅二兩六釐有奇。滿擬商力可紓。乃因加勸而未及減引。銷數仍形疲滯。咸豐同治年間。領引科則。屢次遞增。較查辦時加至三分之一。加以私梟迭起。侵佔搶掠。捻逆縱橫。擾亂焚燬。業商虧累日深。本年銀價昂貴。每兩換制錢一千八百上下。而滹沱河北徙。順廣等處之引。不能行舟到廠。小清河枯旱。保定等處之引。到岸過於遲滯。豫省加價。黃河以南之引。盡被鄰私侵佔。各商之難處不同。而累狀則無少異。莫不由於交款太多。成本太重。銷路太滯。前據通網商人聯名稟訴疾苦。嗣於雙口途次。又據京引商人。聯名投訴。臣委員至天津明查暗訪。又接晤運司恆慶。均稱商情疲憊。若不趕緊調劑。勢必家家受累。處處參懸。臣囑該司通盤籌計。務求有益於商人。而又不甚礙於庫款。斟酌裁減。以期變通盡利。茲據該運司恆慶核議詳覆前來。臣細加參核。理合奏懇恩施。曲加矜恤。以甦商困。而保額綱。僅分條陳如左。

一、木板科則中二款可暫停也。查原定木板科則共九款。業於十一月初九日造冊具奏。內除七款無可裁減外。惟第三款曰補欠銀八分七釐九毫有奇。第四款曰歸補積欠銀一錢九分一釐一毫有奇。此二款係因積欠太鉅。道光廿八年議定每年歸完銀十七萬兩。由各商按引攤交。彌補舊欠。是虧欠者乃數十年前之商。捐補者乃數十年後之商。李代桃僵。本屬勉強從事。嗣因各商拖欠不完。於同治二年起。改爲隨領引時。外引先交銀六分。每年按出庫引數。約征銀五萬餘。餘照按依限繳交。同治五年。網情愈疲。又改爲外引交銀一錢。京引交銀六分。每年按出庫引數約征銀五萬餘。年前奉戶部飭撥。以備長蘆採辦布疋絲勛之用。目下通網疲累異常。現商辦運交課。自顧不遑。更無餘力代完舊商之欠。擬請將隨引攤交補欠歸補積欠銀兩。暫行停止。五六年後。如鹽務見起色。察看情形。再行酌量征收。以蘇商困。嗣後如遇傳派長蘆採買布疋絲勛。並請仍由引課項下動支。報部核銷。

一、續增墨筆科則中二款可減。五款可裁也。查墨筆添寫科則共十一款。業經造冊具奏。內除四款可無裁減外。擬酌減者二款。全裁者五款。其酌減者。一曰軍需復價。外引銀五錢。京引二錢五分。此項復價。原爲天津

海防軍需而設。每年按出庫之引。約征銀二十餘萬兩。每月撥解天津支應局六千兩。解保定省局一萬一千兩。或另文提用。爲數更生。目下餉需依舊。本難議減。惟商力日形拮据。不得不量爲核減。以全大局。擬請外引減去一錢四分。每引交銀三錢六分。京引減去七分。每引交銀一錢八分。隨領引時。外引交銀九分。京引交銀四分五釐。下餘外引二錢七分。京引一錢三分五釐。仍照案以三個月爲一限。分作三限完納。一曰金堤還款銀三分六釐。此款前因迭奉內務府傳辦綉箋。並劉景芳蘆勇口糧。每引捐交二分六釐。名曰寄庫還款。嗣因修築新堤。挑挖府河。捐賑等項。增爲三分六釐。改名曰金堤還款。計運庫墊發之款。商捐歸補。尙有不敷。當此綱情疲憊。不得不設法恤商。所有金堤還款。擬減去一分六釐。酌留二分。嗣後如有內務府傳辦綉箋價值運費。擬請作正開銷。直字營馬隊餉需。責令運司另行籌解。奏咨辦理。右二者皆可酌減者也。其全裁者。一曰復解解費二分一釐三毫。擬即在木刻解費項下通融搭解。一曰籌補津貼銀三分。此款全已追交足數矣。一曰懸岸課銀四分。此款自道光二十九年。起飭商攤貼。參懸無着之課款。衆商求免未允。嗣後改爲蘆圍經費。同治五年正月間。各商稟請豫省免抽鹽釐案內。又改爲協濟豫餉之用。名實久已不符。擬請停豫省協餉。免捐此款。以抒商困。一曰還墊辦公銀一分。此係昔年商墊軍營米麵。及天津壕牆之用。今早已歸款矣。一曰酌增領告銀二分。係咸豐十年所增。應即裁除。其中有應行支解者。可由木刻之領告雜貨項下酌量籌撥。右五者皆可全裁者也。至此次墨筆款目。比上次所奏款目。微有參差。上次未列復解解費一欸。此次未列大河口巡費協濟豫餉二欸耳。

一、京引商人宜加補救也。查京引原額十萬五千九百餘道。從前銷六成滯四成。自道光元年以後。減引二次。停引一次。淨行銷引七萬二百餘道。銷數已不及前。道光廿八年欽差王大臣查辦鹽務。每包加鹽一百五十斤。未嘗減引。從此滯銷更甚。自京師行使大錢。諸行蕭索。每年銷鹽不過二萬六七千包。是所銷不過三成七八分。其餘六成二三。均係滯銷之數。以二萬六七千包之鹽價。上七萬多引之課款。是一引幾及三課包。加以引多。如何能支。且百物均隨銀價長落。惟實鹽例皆用錢。而完交課款。又須易銀。目今銀價日昂。展轉虧賒。加以引多商重。殷乏不一。心志不齊。此商賤價求售。彼商即被牽掣。同治四年。衆商設立內廠收鹽。亦恐

搶跌賤售之故。奈資本有限。價仍不齊。緣引引粟商較多。辦運交課。悉由重息借貸。鹽既運出。公私交迫。本京油鹽店窺見底裏。又復多方勒措。累商圖到現銀。暫應眉急。不得不賤價濫售。一唱百隨。即殷商亦難自立。成本虧折。愈辦愈累。刻下雖將科則。以漸減輕。而滯銷太多。包課太重。仍不足蘇其困。茲據運司核議具詳。擬懇天恩。飭下該部。俯念京綱苦累實情。准自同治九年。起暫停額引二萬道。俾包課略輕。商力可漸紓展。餘存額引五萬二百餘道。督令勉力辦運。俟綱情稍轉。行市暢旺。再行相機議加。

一、河南加價宜請停免也。河南撫臣前因防勦兵多。餉無所出。奏明豫鹽每斤加制錢二文。先由商人按包總交。雖曰取之於民。並非取之於商。惟其價先由商墊。已不勝其累。屢次求免未允。不得已稟明每年捐錢八萬兩。分四月十月兩次呈交。無如豫引運道過遠。成本過重。上年被災擾。商本虧折。辦運益覺艱難。今年請領引目不及十分之七。現計每引按四錢六分派攤。不敷呈解之數。且河南一省。分食潞淮東蘆四省之鹽。減價尙不能敵私。一經加價。則別省私鹽更易侵灌充斥。商賈惟利是趨。居民擇賤而食。三者皆賤。蘆鹽獨貴。孰肯舍彼而取此。滯銷愈甚。攤數愈多。近年豫引各商。除逃匿參懸外。餘均岌岌自危。有朝不保暮之勢。刻下中原肅清。豫省兵數可減。商力實在不支。應請旨飭下河南撫臣。准將加價停免。不使南引各商。揭此八萬兩之數。蘆綱幸甚。

一、山東館陶厘捐宜請停止也。山東撫臣前因逆氛孔熾。防餉難籌。因就館陶設局抽釐。凡豫引鹽船。由此經過者。每包抽收津錢三百六十文。以備接濟餉需。在東省積少成多。籌款不無小補。在蘆商筋疲力困。元氣實已大虧。現在運務已靖。餉預稍紓。本省應用款項。尙爲分別可緩可停。普將科則裁減。以輕成本。此項釐捐。應請皇上飭令山東撫臣。將館陶鹽釐准予停免。以舒商力。

以上五條。第三條專恤京引之商。四五條專恤南引之商。第一二條爲通網商人。力籌挽救之法。計木板刊刻。並墨筆添寫之科則。連閩每引銀二兩七錢三分七釐六毫有奇。今裁減銀五錢二分六釐三毫有奇。尙存銀二兩二錢一分一厘三毫有奇。雖較之道光二十八年查辦時尙多二錢有餘。而較之近年已覺輕減。衆商稍有轉機。不至相對歎歎。但自此後不復參懸。懸岸漸可認辦。則名爲卹商。而裕課亦即寓其中。至滹沱河改道。下西河丹

運不通。臣已屢次派員查勘。俟勘定後。當奏明籌款挑挖。一律深通。務期暢行無阻。俾西河各商。免受改道改廠之累。長蘆鹽務。可望漸有轉機。感荷天恩。實無涯涘。所有蘆網疲憊。減輕成本緣由。理合恭摺具陳。伏乞皇太后皇上聖鑒訓示。謹奏。

報永定河合龍摺 同治八年十一月十九日

奏爲永定河北四下汛合龍。驗收壩工。暨中洪下口。均屬穩固深通。恭摺具奏。仰祈聖鑒事。竊照永定河本年北四下汛漫口。經臣酌擬辦法。請撥款項。檄令署河道督飭廳訊委員。分投趕辦。旋據該署道蔣春元稟報。定於十月十二日合龍。臣當即奏明親往驗收。業將出省回省日期。先後奏奉在案。惟是歷屆堵築漫工。祇將漫口堵完。引河挖通。即爲歲事。此次期於搜除病根。規畫久遠。是以專從下游著手。一面估築大壩。深挑引河。一面開挖中洪。疏通下口。使大溜建瓴直瀉。不稍停留。可免下壅上潰。及此塞彼決之虞。當據該道逐條詳稟。臣即批准照辦。茲據署永定河道蔣春元具稟。自興工以來。駐紮北四下汛壩次。會同前任道徐繼鏞及各委員。分別經理石景山。同知王茂壩。掌管北四大壩。督率各員。嚴飭兵夫。慎重進占。接做上下邊埽。密簽長椿。加壓厚土。層土層戩。夯築堅實。并添做後戩夾土壩。堅築土櫃。養水盆。署南岸同知朱錫慶等。掌管南七截水大壩。董率各員。鑲做邊埽。悉係深槽密椿。層土層戩。均增堅固。其中洪下口。引河委員。按段挑挖。均於十月初十日前一律完竣。寬深丈尺。皆與原結相符。並無短少。該放清水。極爲通暢。量得金門口止賸四丈五尺。愈收愈窄。水深一丈四五尺不等。當於十二日卯時。掛纜合龍。水勢湍急異常。兩壩均形吃重。同時陡發。幸兵夫雲集。料物充盈。隨發隨鑲。悉臻穩固。當即挑挖河園土梗。啓放引河。建瓴而下。汛如箭急。大溜掣動。引河全槽鋪滿。暢流下注。隨下關門大埽。層土層料。迫壓到底。惟金門口以下。尙未斷流。復經不惜重資。撒手跑買。併力搶辦。竭晝夜之力。於十三日巳刻。全行閉氣。金門以下養水盆。旋即斷流。並無滲漏。隨派弁跟蹤查看。據報十三日午刻。至十四日辰刻。未及兩晝夜。直達鳳河尾閘。並無壅滯。全河復歸于故道。兩壩一律鞏固。除督飭各員。趕辦善後工程外。此次調往委員。並在工應汛各員。極爲出力。可否准其擇尤保獎。應請奏明辦理等情。具報前來。臣到工逐一勘驗。北四下汛及南七兩處壩工。均各工堅料實。張家墳一帶所挑中河。南七以下所挖引河。拍岸暢流。直注下口。毫無阻滯。此後但能按年

務。修治堤堰。停河身不蓋溢。則盛緩亦可無虞。新任河道李朝儀。已於十月二十六日抵任。接印。該道廉正。時勞。隨事認真。講求河務。嘗有起色。至此次工程。因時近寒冬。急求蒞事。恐河員不敷。由省調委多員。相間派委。據署。這蔣春元奎明。極爲出力。似應量予鼓勵。可否准其擇尤保獎之處。恭候聖明裁示。所有堵築北四下汛。漫工合龍。暨疏濬中洪下口各緣由。理合恭摺具奏。伏乞皇太后皇上聖鑒訓示。謹奏。

擬賑卹畿南災款摺 同治八年十一月二十四日

奏爲遵旨查明畿南所屬災款較重。來春應行賑卹。酌擬辦法。仰祈聖鑒事。竊臣接奉十月二十八日寄諭。一給事中陳鴻鸞奏直隸西南各屬。本年兩雨稀少。災款已成。聞有報災未送。人懷亂萌之說。又廣平屬之清河威縣。毗連河南安陽等縣。大名府則與曹州接壤。捻幅餘匪。難保不潛伏其間。其開州等處。人心亦多浮動。現聞各處已漸有均糧等事。若飢民相率效尤。各匪乘機竊發。必至貽害地方。請飭會國藩查明辦理等語。著會國藩迅即派員查明各該地方被災輕重情形。分別賑濟。如有應蠲應緩之處。並著趕緊奏明辦理。以惠災黎。而消隱患。原摺著抄給閱看。將此諭令知之。欽此。一十一月初一日。臣即將通省被災各州縣。應徵錢糧。按照分數。懇請蠲緩。會同兼管順天府尹臣萬青黎。府尹臣王榕吉等。具摺恭奏。於十一月初四日。荷蒙恩諭准行。並附片具奏南路大順廣一帶兩澤尤艱。種麥尤少。明春恐須另籌賑撫。奉旨。知道了。欽此。一均經欽遵行知在案。查本年直隸收成。以永平遵化爲最豐。天津河間宣化正定次之。順天保定深易趙定等府州所屬。均在歉薄之列。南路大名廣平順德爲最下。八九月間。南三府各屬。所報災歉情形。均不甚重。與臣在省所聞者不符。頗深疑訝。蓋州縣積習。多以辦災爲難。緣荒政之條例甚嚴。關係甚重。初報災時。不論災之輕重。即有先發一月口糧之例。厥後不論貧乏極次。又有普賑一月之例。旋又有續賑摘賑大賑加賑之例。蠲免則有六分七分四分之別。徵緩則有三年二年次年之差。皆視其災之分數。以爲區別。而分數憑官之一言。以爲斷。豈能恰如其量。同一縣也。或東鄉九分。而西鄉六分。同一鄉也。或左村四分。而右村五分。百姓起而相爭。以爲參差之處。或涉偏私。即將來之或蠲或緩。多賑少賑。高下懸殊。分數之所辨甚微。而民間之所爭甚巨。故州縣之不樂辦災。非盡恐免徵之後。辦公無資。咸由賑事繁重。對百姓則易於見怨。難於見德。對上司則易於見過。難於見功耳。臣前聞南三府災情較重。恐州縣

格於成例。狂於積習。所報或不實不盡。因函囑升任按察使大名道錢鼎銘。親歷各處認真稽查。借重編門牌之便。抽計極貧戶口。於臘月內彙齊稟報。該升道旋即出示查勘。徧歷三府二十六州縣之地。茲據錢鼎銘稟稱。伏查三府中旱歉情形。以廣平爲最大。名次之。順德又次之。緣順郡沾百泉河之利。井地又多。秋夏間徧得陣雨。雖九屬高下不同。要皆可以支持。無須調劑。大郡開東長三處。因得黃河之潤。轉歉爲豐。南樂清豐光景尙不窘迫。廣郡則磁州清河威縣最佳。雞澤曲周稍次。而以肥鄉廣平成安邯鄲及永年縣毗聯肥縣之數十村莊。及大名所屬之大元兩縣爲最苦之區。尤以肥鄉廣平爲極重。成安邯鄲永年爲次重。大名元成二縣爲略輕。此七處急需設法補救。兩旬餘轍迹所經。體驗真情。博采輿論。種種成法。皆不易行。惟有按口給糧。最爲直截了當。但勘災宜細判等差。而望澤殊不分彼此。嘗接見久宦直省素肯盡心之守令輩。皆謂本年酌辦緩徵災輕之區。紛紛觀望。不肯輸納。則將來酌辦抽賑。必致多所窒礙。然事關民瘼。又安能因噎廢食。反復推求。惟有寓施於貸之一法。就各屬中著名災重之縣。就各縣中著名災重之村。復於一村中擇老弱病廢婦女及無業丁壯。種地不滿十畝者。往時尙可借貸。今年災廣。告貸無門。名曰極貧。即在此次重編門牌上。詳細揭出。編定戶口。徧行榜示。某戶某口。加恩酌借口糧兩月。大口每日給制錢若干。小口每日減半。由本村公正紳耆。出具保狀。俟秋成後酌量清還。不曰賑而曰貸。則鄰近災輕之區。無可比較。不致生覬覦之心。二月中旬開辦。辦竣後。大張告示。宣布皇仁。按村曉諭。概行蠲免。毋須清還。俾窮黎得沾實惠。名爲貸而實則賑矣。至災區中之次貧者。本非無告之民。類皆有田之戶。或有他技濟生。或有春收指望。察核情形。尙可支持。至三四月間。再行酌辦。暫且不必調劑。若果雪澤不沾。春雨復少。此等次貧之戶。固須接濟。恐各屬災輕之區。亦宜普爲設法。屆時春荒一成。實屬難於著手。是惟虔禱天心之仁愛。默爲轉移。庶幾司牧之愆。或可稍遠等情。稟復前來。臣查戶部則例內開。災有五分者。准著借來春口糧等語。五分乃極輕之災。本有准借口糧之例。廣平等七十縣。據各屬原報。雖有尙不及五分者。而被災較重。遠近周知。錢鼎銘擬用酌借口糧之例。以暗行其賑濟之實。期則寬以兩月。足救春末之飢。惠不及於次貧。足杜冒濫之弊。所議尙爲妥協。其按口給錢。亦古人所稱施粥不如放米。散銀不如發錢者。恰相符合。惟七屬貧民。每縣多或數萬人。少則萬餘人。所費亦殊不貲。合無仰懇天恩。敕部於天津存儲現銀項下。撥制錢十萬串。由天

津運至大名，卽交錢鼎銘經理賑卹事宜。預弭畿南無形之患，大局幸甚。微臣幸甚。至於以貸爲賑，係恐災輕之區，或生覬覦之心，故借此名以息爭端。惟我朝遇災蠲恤之典，皇仁最溥，良法最多。然法之最善者，分數亦必有輕重。貧戶亦必有極次。斷不能無向隅缺望之人，亦不能無幸澤爭競之事。此次雖未必盡合成法，然意在先救極貧，是謂之借貸也可。卽謂之賑卹也可。但使稽察精細，心術公平，縱有缺望爭競，當亦不足深慮。若賑卹之地，無糧可買，尙應擇要設平糴局數處，糴入則較市價略貴，糴出則較市價略賤。庶米商可廣爲徂徠，而貧民亦稍沾便益。倘其商賈流通，糧價不甚昂貴，則無須由官設局。是亦當預爲議定者也。除通省各屬應否調劑，同日另案具奏外，所有邊旨查明畿南所屬災歉較重，應行賑卹緣由，理合恭摺覆奏。伏乞皇太后皇上聖鑒訓示。謹奏。

陳滹沱河水患大概摺 同治八年十二月二十四日

奏爲滹沱河改道北流，已閱兩年，各屬被害，亟應設法修治，謹陳大概情形，仰祈聖鑒事。竊維直隸有五大河，子牙河居其一。其上游卽滹沱河也。該河原出山西繁峙縣，入直隸平山縣境，逕靈壽正定藁城等縣，下抵晉州。前此滹沱由晉州東行，至衡水武強會合滄陽河，經過獻縣而後，名爲子牙河。又逕河間大城靜海等縣，由天津縣之海河入海。自同治七年秋初，河從晉州藁城之間，改道北徙，遂與滄陽河不復相通。因漫及東鹿深州安平饒陽肅清河間獻縣任邱保定雄縣霸州各州縣，均被其患。而文安大城，受害最重。俗所稱文安大窪者也。維時又值永定河南岸上汛決口未合，下游竄入大清河，致清河日受其累，節節淤淺。臣抵任後，飭永定河道於三月間分段趕緊。四月初旬南上合龍，又飭清河河道挖濬清河口亞古城龍灣村張青口各段積淤，並濬挑府河。修建石閘，厥後永定河北岸復決，大清河亦未能一律深通。是微臣抱愧之事。然二河皆能興工開辦，究亦不無裨補。惟滹沱河未能興工，一則因藩庫難籌經費，一則因該河別無去路。是以久未定議。而文安被害日深，亟思彌復田業。遂會商大城兩縣紳民，捐貲集衆，自行興辦。於該縣之東隅，開挖莊莊，引河由王口歸入子牙河，將大窪積水洩去三尺有餘。殘處一律種稻。備擬秋收可望。不料六月中滹沱河上游水漲，來源洶湧，其患仍與上年相等。不特文安一邑變爲洪湖，卽大城雄縣任邱饒陽安平等屬，亦皆淹沒田廬，侵占驛路。小民蕩析離居，栖托無所。而

潞沱既已北徙。舊河斷流。向之由西河運鹽至順廣正趙等處者。今則舟楫不通。鹽商誤運。所關亦鉅。且文安與雄縣交界。有西堤一道。文安則聚衆築塞。堵禦上游之水。雄縣則聚衆掘開。以洩本境之水。竟用鎗炮器械。傷斃文安守堤民夫。七月九日。迭次爭鬥。兩造洶洶。相持不決。現雖經委員彈壓勸諭。暫停械鬪。而水患未除。爭端終不得息。仍恐數縣交訐。激成巨案。此皆最切之患。不得不急爲修治者也。臣數月以來。博采羣言。有議改平山縣治河。以分其勢者。查元時曾闢治河。自爲經流。不與潞沱相合。雍正元年。怡賢親王亦奏稱治河引入洩河。則潞沱之猛可滅。然洩河本入寧晉泊。今泊已淤塞。難容巨水。且潞沱挾水至多。亦不待會同治河。方能爲患。是分闢治河。未必有益也。有議由雄縣之辛莊挑引河入王口鹽河者。查辛莊至王口八十餘里。皆穿文安之境。文安形同釜底。若道潞沱橫貫縣境。則永遠爲患。且辛莊王口亦並不能暢洩河水。以救目前之急。是辛莊引河更不宜挑也。有議從去年新徙之道開濬。以復其舊者。查近州下至武強二百餘里。河徙之後。一片粗砂。舊道多成平陸。開有河形。亦若隱若見。絕少大段槽道。築勢開挖。且前明至今。潞沱屢次遷徙。從不能挽由故道而行。誠以河因高壅而決。水徙沙停。斷難遽還舊觀。是故道不能竟復也。有議於南旺村開通引河。以達獻縣回子牙之故道者。臣派員至該處測量高下。人力似尙可施。惟田畝皆膏腴之地。百姓不願開河。且由獻縣修治上游。仍然泛濫。鹽運仍然不通。此獻縣之不宜開挖也。有議開王村廢閘引潞沱之水。分消西淀。歸入大清河者。查大清河地勢較高。不惟不能多消潞沱積水。且恐引西淀之水。灌入文安大窪。是開王村閘未必有益也。迭經委員查勘。迄無定議。最後派委清河道費學曾。候補道陳重前往細勘。另籌修治之法。訪得蠶城南樓村迤南尙有乾隆五十九年迭成豐元年潞沱間行之故道。自蠶州東門外起。經晉州趙州寧晉之境。計共河路一百八十里。至冀州邵村下。會鹽陽。河形尙存。其下游且間有寬至二十餘丈。深至一丈餘者。雖亦多有游平。若就此施功。尙可著手。該道等於九月履勘繪圖貼說。會同稟覆。臣批令會商藩運兩司。酌籌款項。設法興辦。並飭令再赴蠶城一帶。覆加勘估。茲據費學曾等於十一月底回省。勘得蠶城新徙河口。水深一丈。而寬七十一丈。接連兩岸老坎嫩灘。共長三百一十丈。擬築大壩。以堵塞之。高二丈五尺。底寬十五丈。頂寬五丈。兩旁依次遞減。惟旁無堤埝築壩。無處生根。擬接修土埝長九千一百五十丈。計五十餘里。以遏旁溢。而固壩基。其引河之新開者。擬自蠶城東門外壩前起。至

陳村舊河首止。裁灣取直。共長一千一百六十丈。以上接入舊河。間有平灘。至晉州界止。連前共長九千七百三十四丈。擬拓寬二十丈。至十餘丈不等。又晉州境內工長一千二百八十丈。冀城境內工長四百丈。趙州境內工長三千四百五十丈。晉州境內工長二千八百五十丈。寧晉境內工長九千一百七十丈。約計估銀二十萬兩有奇。該道等所以不能確估定數者。據稱專就引河壩埝工料計。其數尚不過十七萬兩。惟壩埝所占之民田。若民間索取地價。則多寡不可預定。又引河所經之處。應納地糧。有從前除額。今未升科者。有從前緩征。今已起征者。現在皆成熟地。若民間求索地價。則多寡尤難預定。論大河官工之長。向無價買民地之理。此費本屬可省。然亦須察看輿情。權衡時事。乃能定局。臣本擬於明年二月興工。急拯文安等處之災。惟經費太鉅。前在天津與運司商酌。擬令每墊銀十萬兩。將來按引攤捐。數年歸款。此外尚短十餘萬兩。無從籌措。而訪諸衆論。皆稱修治滹沱河。係毫無把握之事。或謂該河性善。遷徙即就東鹿縣治而論。自順治至乾隆百年之間。已徙二十五次。一縣如此。他縣可知。遷徙既無定所。修築亦屬徒勞。或謂滹沱河剽悍激烈。不受約束。隄防愈堅。衝決愈甚。且其下有伏流。往往水尙未至。土已迸裂。居民見而預避。不久即有橫流經過。築隄埝於伏流之上。斷難久恃。或謂滹沱河挾沙最多。質本磽薄。性最鬆浮。從前怡賢親王修治之時。亦係旋開旋淤。今僅築埝濬河。勉救目前。仍非經久之計。若必遠築長堤。大開引河。不得不議歲修。既有歲修。必設汛官。將來日增無窮之費。而水害仍不能免。臣正慮籌款之無著。而聞此數說者。又恐巨款付之一擲。不得不徘徊瞻顧。然念及文安之淪焉巨浸。雄縣之互相鬪爭。及西河鹽船之別無運道。又不忍置之不問。反復焦思。殆無長策。茲擬改於明年八月秋收後。籌定經費。再行與辦理合先行具奏。請旨敕下部臣核議。此雖疆吏之責。本不必重煩廷議。惟水患迫近畿郊。當此衆說紛紜。或辦或否。或別有良圖。得在廷臣工討論裁奪。則是非得失。可以折衷至當。而遲至明秋。則籌款購料等事。措置亦覺暇豫。所有滹沱河改道北流。亟應設法修治緣由。謹會同兼管順天府尹臣萬青黎。府尹臣王榕吉恭摺具奏。伏乞皇太后皇上聖鑒訓示。謹奏。

直隸清訟請獎摺 同治九年二月初二日

奏爲直隸清訟舊案陸續完竣。新案辦理就緒。請將勤奮各員酌予獎勵。恭摺仰祈聖鑒事。竊維訟獄爲民命所

關。審辦之遲速。民生之休戚繫之。直隸裁案之繁。甲於他省。聽斷稍稽。卽虞積壓。自咸豐初年。軍興以來。地方官或辦理防堵。或供應兵差。未能專治訟事。而前任督臣及歷任臬司。均因督辦防勤。節次公出。軍務緊急。還將刑名事件。稍置緩圖。日積月累。年復一年。截至同治八年三月底止。通省未結同治七年以前之案。積至一萬二千餘起之多。微臣履任。以直隸軍事已定。民困未蘇。積案尤爲當務之急。卽經奏請張樹聲暫留直隸臬司。本任以資熟手。奉旨允准。酌議清訟事宜。並飭司議定期功過章程。一併刊發各屬。實力奉行。將積案及監押逸犯四種。開列四柱單冊。按月造送。臣衙門及藩臬二司三處。臣署派奏調之知縣金吳瀾等。幫同經理。臬署派縣丞陳本等。幫同經理。藩署派知縣夏子鑾幫同經理。參互稽核。分別勤惰。記功記過。每月懸榜院司官廳。大衆閱看。以期羣相砥礪。其詞訟案內。交差管押人證。往往州縣漫不經心。書役人等。難保無私放濫押情弊。復經隨時委員分投密查。其有人數不符者。立予記過撤任。至保定府臬司史念祖會督局委悉心核議。以昭慎重。計自上年四月開辦起。至十一月底止。共八箇月。歷據各屬審結。並註銷息銷七年以前舊案一萬二千零七十四起。又結八年新案二萬八千一百二十一。此外尙存未結舊案僅止九十五起。或緊要犯證無獲。或隔省關查未覆。均已咨部展限。又未結八年新案二千九百四十起。不足一月新收之數。不難漸就清理。此次辦理清訟。卽委各員振刷精神。悉心推鞠。閒有平反重案。悉臻允協。多年淹滯塵牘。爲之拂拭一清。凡無辜被牽者。從此得免拖累。該員等不無微勞可紀。首府臬局。爲通省之表率。該府恩福會督委員。無閒寒暑所懈。悉心研鞠。審辦完竣。尤屬勤勞卓著。據兩司具詳前來。謹將七年以前舊案在百起以上。至千餘起一律全清者。及記功較多者。擇尤開單。恭呈御覽。合無仰懇聖恩。俯准照蘇省成案給獎。以示鼓勵。所有直隸清訟完竣。請將各員酌獎緣由。恭摺具奏。伏乞皇太后皇上聖鑒訓示。再積訟已就清理。臬司張樹聲自應欽遵諭旨。飭赴山西臬司之任。惟新任直隸臬司錢鼎銘。前已奏明留辦畿南一帶賑務。請俟事畢。再行各赴本任。合併陳明。謹奏。

謝京察優敘恩摺 同治九年二月二十一日

奏爲恭謝天恩。仰祈聖鑒事。竊臣於二月初九日。接准吏部咨開同治九年正月二十四日內閣奉上諭。「大率

士直隸總督曾國藩老成宿望。表率羣僚。調任畿疆。盡心民事。著交部從優議敘。等因欽此。當卽恭設香案。望闕叩頭謝恩。伏念臣猥以菲材。謬膺重寄。自量稜畿輔以來。值甫經兵燹之後。亦思培養元氣。與民休息。乃去歲天時亢旱。年穀不登。自冬徂春。雨雪過於稀少。麥收又已失望。嗷嗷千里。流民塞途。加以四方多虞。而練軍尙無規模。北河雖塞。而隄防尙無把握。回思陛辭之際。具疏所言三事。至今毫無寸效。撫己內慙。憂惶無地。乃蒙聖慈甄敘。上考濫登。闕命之餘。更深感悚。臣惟有力持晚節。勉竭愚忱。如履薄而臨深。更集思而廣益。庶以仰答高厚。鴻慈於萬一。所有微臣感激下忱。謹繕摺叩謝天恩。伏乞皇太后皇上聖鑒。謹奏。

報銷勦捻軍需第一案摺 同治九年二月二十一日

奏爲湘淮各軍勦捻軍需。自同治四年閏五月起至五年底止。第一案收支款目。造冊報銷。恭摺仰祈聖鑒事。竊照前因豫東等省捻匪蔓延。臣國藩於同治四年五月間。奉命督師勦捻。旋調湘淮水陸各軍。並將吉林等處馬隊官兵歸臣節制。又經陸續添募馬步兵勇。分投堵截。游擊追勦。臣國藩先駐臨淮關。後到徐州濟寧。繼移營周家口各路。分設行營糧臺。儲備軍米。並轉運軍械各局。所以供支應而免缺乏。金陵省城。設立北征糧臺。飭由江寧藩司總理。臣鴻章先在金陵料理後路糧餉等事。厥後奉命督師進駐徐州。各處糧臺局所。均仍其舊。所用各軍。惟多湘少。同爲勦捻之師。同支江南之餉。仍照刊章。一律支放。所有四年五月底以前軍需各款。畫清界限。湘軍准軍。各歸各報。四年閏五月以後。勦捻軍需。應由臣國藩與臣鴻章會同造報。前於湘軍第五案報銷摺內。續晰陳明。奉旨。著照所請。該部知道。欽此。欽遵。當飭江寧蘇州兩藩司。於金陵省城設立報銷總局。督同局員。自四年閏五月初一日起。截至五年底止。爲一案。逐款清釐。併案造報。茲據署江寧藩司候補道孫衣言。蘇州藩司張兆棟。督同局員江蘇候補知府王廷長。道員用安徽候補知府石楷等詳稱。總計收欸舊管項。下安慶報銷局湘軍第五案四年五月底止。報銷案內實存銀一萬二千二百九十六兩有奇。錢二萬四千八百四十七兩有奇。蘇省軍需報銷局淮軍四年五月底止。報銷案內實存銀四千八十一兩有奇。錢二萬一百一十九兩有奇。又存米合價銀二百一兩有奇。新收項下直隸山東等省協餉安徽江蘇藩庫關稅釐捐茶稅鹽釐絲茶牙帖紳富等捐。並本案扣存平餘共銀一千二百七萬九千七百五十四兩有奇。錢九萬八千串。文內除登除協撥各欸。共

銀四十三萬三千四百六十六兩有奇。錢四千七百五十七千有奇。又除補發湘軍欠餉銀五十萬八千六百六十七兩有奇。錢八千九百一十九千有奇。又附銷徐防城守官弁勇丁鹽糧等項銀九萬二千六百一十六兩有奇。又除本案附請專案奏銷洋鎗隊英法官兵教練勇糧等四款。共支銀一百六萬三千三百一十九兩有奇。計實收銀一十萬六千四百八十三兩有奇。錢一十二萬九千二百八十九千有奇。開除正雜各款。遵照同治八年九月二十九日戶部議奏。酌定軍需報銷章程。各歸各部核銷。計應歸戶部核銷銀九百二十八萬三千七百九十四兩有奇。錢二萬九千八百八十八千有奇。應歸兵部核銷銀一十九萬四千三百三十二兩有奇。錢七萬五千七百七十二千有奇。應歸工部核銷銀四十八萬五千五百有奇。統共請銷銀九百九十六萬三千一百三十三兩有奇。錢一十萬五千五百八十千有奇。實存銀四萬三千三百五十兩有奇。錢二萬三千七百八十八千有奇。歸於勦擒軍需案下。舊營接報等情。具詳請奏前來。臣伏查此次造報湘淮勇營。仍循前案。未開花名清冊。係照楚軍刊章。一律發餉。吉林等起馬隊官兵。暨續立馬隊勇營。均經臣等酌定薪糧支給。隨營文武員弁。新夫採辦製造轉運雜支等項。均係實用實銷。並無浮冒。所有正雜各款。概發湘淮平折實庫平造報。仍扣雜款一分平餘。除飭將六七年用款趕緊接續清釐造報外。合將勦擒軍需等一案收支款目造冊報銷緣由。謹合詞專摺具奏。並繕清單呈御覽。伏乞皇太后皇上聖鑒。敕部覈覆施行。謹奏。

臚陳劉松山事蹟摺 同治九年二月二十一日

奏爲提督劉松山宣力最久。志勇邁倫。據該軍諸將稟請具奏仰祈聖鑒事。竊廣東陸路提督劉松山。力攻回寨。受傷殞命。業經欽奉恩旨賜卹。飾終之典。至優極渥。惟臣接該軍分統章合才。蕭章開營務處黃萬友。劉錦棠等公稟。臚陳事蹟。求臣轉奏。有不敢墜於上聞者。劉松山初隨道員王鑫。繼隨臬司張運蘭。轉戰各省。其功績多歸於統將。故其事不甚著。遠咸豐九年十年。臣在江西皖南。統轄老湘營一軍。同治元年十月之杪。張運蘭因病請假回籍。臣乃奏派劉松山與易開俊分統該軍。當未爲統領之先。咸豐九年六月十四日。官軍破景德鎮。各營猛追三十里。隊伍散漫。將至浮梁縣。中有浮橋三道。賊因過橋擁擠。回頭猛撲。城內亦出悍賊數千。乘瑕擊我。劉松山在東橋邊縱橫苦戰。力遏賊衝。少頃後隊到齊。各軍賴以保全。咸豐十一年三月十二日。官軍進攻徽州。分駐

民村。三更後賊出偷營。呼聲震地。諸軍驚潰四散。劉松山獨列隊不動。月下遮諸將而告之曰。「請無奔潰。我第四旗劉松山也。排立在此。」衆軍畢歸。乃從容殿後而還。賊亦終不敢近。此二事者。當時稟牘奏章。均未敘及。後來詢得其狀。臣之識劉松山爲將材。實始於此。迨旣爲統領。自同治元年冬。暨二三年間。皖南羣盜如毛。寧國等處。疾疫盛行。該軍堅守郡城。四出截勦。歷年戰事。已由臣節次奏報在案。同治四年夏。臣奉命赴北路辦捻。湖南將士。因不慣北方麵食。多不願隨征。獨劉松山毅然請從。由寧國帶隊至江寧之龍潭渡。江士卒或索餉不肯北渡。劉松山誅戮數人。而撫慰其衆。師次臨淮。易開俊告病開缺以後。於是老湘營一軍。全歸劉松山統領。是後馳驅江蘇山東河南等省。一面訓練部卒。講求髮逆捻逆勦辦異宜。首貴行走迅速。隊伍整嚴。一面聯絡民圩。使遠近聞風信服。廣籌米糧。使士卒不因乏食而思歸。未幾山東河南一帶官民。皆稱老湘營紀律之嚴。所至逢迎恐後。而部下亦習而安之。不以北征爲苦。臣於五年冬間。密保劉松山忠勇樸實。堪倚平寇。是時捻逆張總愚竄入秦中。臣檄鮑超率霆軍赴援。霆軍遲延不進。改檄湘軍。劉松山不辭艱苦。慷慨入關。臣已解兵柄。以賊擾關中。寸心負疚。旋聞老湘營晝夜馳逐。竟以臘底趕至西安。上以釋朝廷之憂。下亦贖微臣之咎。是尤臣所感而敬之者也。厥後在秦疊報大捷。奉旨補授廣東陸路提督。兼拜小刀荷包之賜。有喬松年等具奏在案。七年春間。由陝晉追至直隸。捻逆全股蕩平。拜黃馬褂。輕車都尉世職之恩。有左宗棠具奏在案。臣以劉松山年逾三十。尙未完婚。且該軍勞苦太久。或須資遣疲卒。另募新勇。休養數月。始可西征。乃該提督未接臣牒。業已起程。在洛陽請假成婚。未及兩月。又復率師入關。行抵綏德州。土回兼勦。竭六晝夜之力。轉戰數百里。收降董福祥等十七萬餘人。設法安插。旣而定計由北路進兵。規取金積堡。以陝甘之糧。取給山西。遠至千數百里。妥籌轉運。由軍渡至深澗。歷安定定邊至花馬池。按程設站。用營中馱騾勇夫。及降衆中挑選壯丁。分班搬運。別其夷險。而均其勞逸。糧運粗足。長驅西向。蕩平回寨。堅壘約五十座。賊巢九十餘處。克復靈州城池。方意回氣已衰。蕩平有日。不圖大功未竟。長城遽摧。報國丹忱。齋志入地。可勝悼歎。劉松山在軍無日不對部卒而訓迪之。雖戰罷宵旰。猶懇懇勸誠不休。絮語格言。至誠旣足感人。而其平日公忠自矢。但知軍國是圖。不以室家爲念。又實足以激發士氣。是以守寧國之時。疾疫盛行。十人五病。餉項久虧。而有警則一呼齊振。弁勇不以爲困。渡江勦捻。誅罰不用命者。弁勇不以爲

醉。北山崎嶇之中。草土盛暑暹暹。與驟驢負重並行。而弁勇不以爲虐。即至綬德之役。哥老會匪叛變。一聞主將歸來。即相維乘輪服。亦不聞退。有怨言。衆情之翕服。實爲近時所罕見。其餘各軍交際。不特惟軍諸將。如劉銘傳。潘鼎新。久已水乳交融。即豫軍之宋慶。張曜。皖軍之郭寶昌輩。及秦隴諸將。亦皆推心置腹。至性相孚。臣意衆望所屬。將必爲國家肩任艱巨。中道淪謝。悵愧何窮。據章合才。劉錦棠等。合詞具稟前來。謹就咸豐九年以後事蹟。臣所夙知。而未經詳奏者。臚陳一二。伏乞宣付史館。俾名將行實昭著。仍請於本籍建立專祠。出自逾格鴻慈。所有提督宣力最久。忠勇邁倫。據稟入告緣由。伏乞皇太后皇上聖鑒訓示。謹奏。

報永定河凌汛安瀾摺 同治九年二月二十九日

奏爲恭報永定河凌汛安瀾。仰祈聖鑒事。竊據永定河道李朝儀稟稱。本年凌汛屆期。派委文武員弁。分駐要工。往來防護。因天氣和暖。冰雪融化。河水疊次增長。自八九尺至一丈一二尺不等。溜勢洶湧。與歷年大汛無異。南岸之南。上南下南二南三南四南五南六南七等工。北岸之北。下北二下北三北四北五北六等工。或河流頂衝。或溜勢側注。各工埽段。紛紛警陷。其平工處所。亦因溜勢變遷。刷坍灘坎。情形均關緊要。而南上南下南三南四南六南七北二下北四北五等汛。奇險疊出。尤爲喫重。當即督率文武員弁。動用存工料物。趕緊搶鑲。添埽捲由。一律保護平穩。茲於三月十三日。全河冰凌融消淨盡。水勢漸落。下口通暢。蘆溝橋現存底水八尺五寸。兩岸隄埽石土各工。悉臻穩固。稟報安瀾。請奏前來。除飭該道督率廳汛員弁。加意防巡。並將應辦歲修及疏濬事宜。實力趕辦。以禦伏秋汛漲外。所有永定河凌汛安瀾緣由。理合循例恭摺具奏。伏乞皇太后皇上聖鑒。謹奏。

試辦練軍酌定營制摺 同治九年四月十六日

奏爲試辦練軍。略有端緒。酌定營制。次第舉行。恭摺仰祈聖鑒事。竊照直隸練軍。臣於上年八月再行酌議事宜。一摺。擬照舊制。略爲變通。先行試辦。一面奏明。一面咨行提督傅振邦。於古北口提標兵內。挑選千人。正定鎮總兵譚勝達於正定鎮標兵內。挑選千人。前廣東瓊州鎮總兵彭楚漢於督標兵內。挑選千人。共三千人。立成六營。其前署督臣王文韶贖之四千人。分地操防。相因未改。嗣於十一月內。接准部咨令。即先行試辦。俟半年後。察看

果皆妥善。再行酌定永遠章程。奏明核辦等因。分別行知在案。查新練步隊六營。自去冬成軍後。各立營壘。認真操演。本年三月初旬。凍解春融。彭楚漢帶保定兩營拔赴保定一次。譚勝達帶保定兩營拔赴保定一次。四月初旬。提督臣傅振邦帶古北口兩營拔赴保定一次。沿途支搭帳棚。不入村鎮。兵丁築壘挖壕。每日習熟。不以爲苦。惟北方野曠風勁。冬臘正二等月。單帳易裂。鐵線難穩。若古北口及宣化。則十月已不能支棚矣。將來嚴寒出師。或須分駐村鎮。趨程追賊。或當暫棄鍋帳。在諸將隨時酌辦。此外則逐日安營。荷鋤修壘。皆直隸弁兵之所優爲者也。其脫逃頂替者。每軍不過數人。多者十餘人。此在無事之際。不知將來驅之赴敵。不至如往年之紛紛逃避否。畿南騎賊頗多。聚散不常。動輒數十騎。聯鑣疾走。非有得力馬隊。不能制之。直隸綠營官馬。缺額極多。存者大半疲瘦。綠草料昂貴。每日非實銀一錢。不能養馬一匹。而例領馬乾七折。每日僅得銀二分一厘。不敷甚鉅。是以營馬瘦弱不堪。不特直隸爲然。卽各省官馬。從未見驍壯可愛者。獨勇隊中常多良馬。銘軍馬尤肥健。蓋以其爲勇丁之私馬。是以愛惜珍重。調養得宜。臣與僚屬熟商。欲求馬隊精強。必令馬爲士卒之私物。欲令士卒惜其私馬。必以勇營爲之倡。而以兵營效之。適值李鴻章奉征黔援秦之命。銘軍勢難久留直隸。臣因飭譚勝達募馬勇二營。彭楚漢募馬勇一營。王可陞練馬兵一營。每營二百五十人。四營合成千人。勇則各帶私馬以來。兵則先給官馬。每月扣銀一兩。俟將馬價扣畢。卽作爲該兵之私馬。使人人自護惜其私馬。則鬪營皆勁騎矣。茲將步隊馬隊營制鈔呈御覽。請旨勅下部臣核議。其中如馬隊不瀾步隊之中。一棚只以十人爲率。及練餉底餉併作一處支領。均經部議允准在案。此外應行事宜。大約比照湘勇練軍舊章。參酌增損。如步隊之章可行。則前署督臣官文所留之四千人。除宣化鎮之千人已檄王可陞改爲步隊兩營。馬隊一營外。其餘三千人。均擬改從新章。并添練三千人。足成一萬之數。如馬隊之章可行。尙擬添練千人。足成二千之數。如馬步勁健可恃。卽將馬勇陸續裁撤。仰副朝廷整頓綠營。少用勇丁之本意。至淮勇銘軍。乃臣所奏拱衛京畿之師。大隊紮於張秋。分調八營。紮於保定。彈壓地方。深資得力。今秦隴軍事吃緊。該軍恐須入關。臣已飭駐紮保定之臬司丁壽昌暫留銘軍步馬六營。仍增募^{勇丁}一營。以備緩急之用。待直隸練兵萬二千人。概有成效。再將銘軍分別調遣。庶畿輔有警。不至倉皇失措。至每月餉項。現有部餉四萬。蘇餉三萬。長蘆復價一萬一千。已統歸練餉局派委司道經營。目前足敷支

用。將來如有短絀。再行奏請飭撥。至軍火器械。馬步各營。均已半用洋鎗。半用長矛。爲得力。此間難於購辦。臣於
遼閩已派人前赴安徽。採辦竹桿長矛。又檄飭上海機器局。先製造洋鎗二千桿。并代買馬鎗千桿。暨洋藥銅帽
之屬。以資應用。惟恐須購自外國。遲速尙難預定。目下操練器械。均不精良。難期遠有起色。合併陳明。所有試辦
練軍酌定營制緣由。理合恭摺具陳。伏乞皇太后皇上聖鑒訓示。謹奏。

直隸練軍步隊營制

一營之制

營官一人。哨官四人。哨長五人。什長四十人。正兵三百六十人。營官親兵五十人。哨官護兵四十人。以上共五
百人。伙夫長夫在外。

營官自帶中哨之制

每營五哨。前後左右四哨。皆有哨官哨長。中哨則營官自帶。別無哨官。只有哨長。每哨八隊。中哨第一隊。洋劈
山礮礮車二輛。礮四尊。親兵十二人。什長一人。第二隊。刀矛親兵十人。什長一人。第三隊。洋開花礮礮車二輛。
親兵十二人。什長一人。第四隊。刀矛親兵十人。什長一人。此外又有雜項親兵六人。如藍旂紅旂。掌號令金鼓
之類。皆在其內。以上五十人。皆食親兵之餉。又有第五隊。火器。第六隊。刀矛。第七隊。火器。第八隊。刀矛。每隊正
兵十人。什長一人。此四隊與各哨正兵相同。不食親兵之餉。凡八隊。每隊伙夫一人。營官哨長。及雜項親兵。共
伙夫二人。

前後左右四哨之制

每哨一三五七。凡四隊。皆用火器。二四六八。凡四隊。皆用刀矛。每隊十人。又什長一人。共正兵八十人。什長八
人。又護兵十人。以六人隨侍哨官。四人隨侍哨長。共百人。外八隊伙夫八人。哨官哨長。暨護兵共伙夫一人。火
器現用拾鎗馬鎗。將來或改用洋鎗。凡都守千把外委等。皆可充當哨官哨長。以差事爲主。不以官階爲重。

長夫之制

平日營哨官及每棚。各用伙夫一名。或以餘丁爲之。或另雇人爲之。無論坐營行營。皆不可少。計一營已用火

夫四十六名矣。此外四哨之哨官。應各用長夫三名。營官用長夫十二名。共二十四名。無論行營坐營。皆准募足至拔營之時。每隊添用長夫二名。負運帳棚鋤鐵之類。共八十名。合成百五十名之數。其統領營官。非本省實缺人員。准再添長夫四名。

薪水口糧之制

營官月給薪水銀五十兩。辦公費一百兩。凡練軍章程中所有州縣佐雜各員。及管帳目軍裝醫生工匠薪糧。及置辦旂幟號補各費。均在其內。哨官每月十兩。哨長每月六兩。什長每月四兩二錢。親兵護兵每月三兩九錢。正兵每月三兩六錢。伙夫長夫每月各三兩。每營每月酌發柴草銀一百四十兩。由營官分派。以免騷擾百姓。

帳棚之制

營官幫辦書記軍火糧餉等。共用夾帳棚八架。單帳棚二架。每哨哨官哨長護兵。共夾帳棚一架。單帳棚二架。中哨哨長夾帳棚一架。營官親兵每隊夾帳棚一架。單帳棚一架。正兵每隊單帳棚二架。每營共用夾帳棚十七架。單帳棚八十六架。惟統領加大夾帳棚二架。兼帶一營者。減夾帳棚二架。

底餉練餉合領之制

舊制練兵所領底餉。以七折扣之。參差不齊。如馬糧除去乾銀。除去朋扣銀合米折計之。每月可領實銀一兩五錢四分。戰糧除去朋扣銀合米折計之。每月督提標可合實銀一兩五錢七分五厘。鎮標可領一兩三錢有零。守糧除去朋扣銀合米折計之。每月可領實銀八錢八分九厘。今正兵定爲每月三兩六錢。在馬糧僅加二兩有零。在戰糧則督提二標加二兩有零。五鎮標加二兩二錢有零。在守糧則加二兩七錢有零。由藩司於底營之餉扣出。概交練營統領與練餉一併支發。

挑募之制

挑募之時。由底營本管官作主人。練營派充什長。親兵護兵。正兵如因事故開除。即由練營統領營官作主。就地招募。挑作練兵底營之本管官。不得干預。仍知照各底營。及藩司衙門備案。但不得以剗省之人充補。應專

募直隸本省之人

出征加餉之制

原定練軍之制。正兵月餉二兩四錢。加馬戰兵底餉。則三兩九錢餘矣。親兵月餉三兩五錢。加馬戰兵底餉。則五兩餘矣。今新定之章。守兵較舊制稍增。馬戰兵較舊制已減。應於出征時酌量增加。出征本省。無論正兵親兵護兵什長。均照前督臣奏准之例。每兵月加四錢。出征外省。每兵月加六錢。以示體卹。

統領之制

統領自帶一營。其所得之薪水公費。照營官之例。月支一百五十兩。統至三千人以上者。每月加公費銀百兩。不滿三千人者。月加五十兩。焉修補軍械等用。如設翼長一員。薪水照舊章給六十兩。

新章與原定章程不符者列後

原定每軍總統一員。薪水八十兩。又親兵十六名。今改爲統領自帶一營。親兵五十名。

原定每軍文武翼長二員。薪水各六十兩。親兵各八名。今改爲有人則用翼長一員。無其人則闕。聽統領自酌擇用。

原定每營管帶官一員。薪水每月二十兩。今改爲薪水公費百五十兩。

原定每營幫帶官一員。薪水每月十五兩。今不用幫帶官。

原定哨官五員。薪水每月十兩。今減去哨官一員。薪水相同。又加哨長五員。薪水每月六兩。

原定每營隊長二十名。每隊管二十五人。步隊長月餉三兩。底餉在外。今改爲每營隊長四十名。稱曰什長。各管十人。月餉四兩二錢。底餉在外。

原定每軍文案州縣二員。薪水每月四十兩。糧餉州縣一員。薪水每月四十兩。佐雜一員。薪水每月二十四兩。軍火州縣一員。薪水每月四十兩。佐雜一員。薪水每月二十四兩。

以上五項令刪去。聽統領營官自行擇請。或稱幫辦。或稱委員。或一員或數員。其薪水卽出於統領營官公費之內。

原定每營步兵四百名。餉每月二兩四錢。步隊長十六名。餉每月三兩。底餉在外。今改爲步兵連底餉共三兩六錢。隊長連底餉共四兩二錢。

原定每營馬兵一百名。餉乾每月五兩四錢。馬隊長四名。餉乾每月六兩。今改馬隊另立專營。另議營制。

原定總統翼長營官。皆有親兵。餉每月三兩五錢。底餉在外。哨官餘丁二名。今改爲每營親兵五十名。每哨護兵十名。餉每月三兩九錢。底餉在內。

原定每隊有餘丁三名。餉每月一兩五錢。今改爲每隊伙夫一名。拔營時添長夫二名。每月餉三兩。

原定每營書手醫士獸醫鐵匠木匠裁縫皆有定數。今皆聽營官酌用。或即在親兵之中。或另行雇募。其餉不另增。

馬隊營制

一、直省練軍馬步合爲一營。難於訓練。令另立馬隊營。即募本省樸實健捷之人。充當馬勇。其督隊官以上之員。不拘省分。所募馬勇。概募直隸人。即令帶私馬入營。嗣後如有倒斃。隨時由官籌款買補。發給該勇。每月扣銀一兩。將馬價扣畢。卽作爲該勇之私馬。若係綠營官兵挑選。無論馬糧戰糧守糧。概照勇丁之例。每月發餉乾銀七兩。更不另發底餉。其發給官馬。亦每月扣銀一兩。待馬價扣畢。卽作爲該兵之私馬。旣爲私馬。則兵勇自知珍重愛惜。蓄養臚壯矣。

一、馬隊人數。每營營官一員。幫辦二員。字識一名。分前後左右中五哨。督隊官五員。每哨馬兵五十名。卽以營官爲中哨。內提二十名爲親兵。前後左右四哨。每哨哨官一員。每哨五棚。每棚什長一名。正兵九名。什長共二十五名。正兵二百二十五名。營官幫辦字識共用伙兵二名。四哨哨官督隊官共用伙兵四名。二十五棚每棚伙兵一名。共用伙兵三十一名。外營官馬夫四名。幫辦二員。各用馬夫二名。字識用馬夫一名。四哨哨官各用馬夫二名。督隊官各用馬夫一名。共用馬夫二十二名。一營員弁兵夫共三百一十六員名。

一、營官馬四匹。月給薪水銀五十兩。馬乾銀十二兩。公費銀一百兩。獸醫工匠旂幟號補均在其內。又柴草銀八十兩。分給全營。幫辦馬二匹。月給薪水銀十兩。馬乾銀六兩。字識馬一匹。月給薪水銀六兩。馬乾銀三兩。哨

官馬二匹。月給薪水銀十二兩。馬乾銀六兩。督隊官馬各一匹。月給薪水銀九兩。馬乾銀三兩。以上皆不扣建。什長日給銀一錢五分。馬乾銀一錢。親兵日給銀一錢四分。馬乾銀一錢。正兵日給銀一錢三分三厘三毫。馬乾銀一錢。每月餉乾共七兩。均各帶馬一匹。伙兵日給銀一錢。馬夫日給銀一錢。以上皆扣建。一營共需馬二百七十二匹。餉乾銀二千三百四十兩零五錢。

一、出征防剿巡哨。搬運帳棚軍械子藥秣料。應添公長夫四十名。每名日給銀一錢。月支銀一百二十兩。或以夫價雇備大車六輛。亦足敷用。營官用一輛。五哨用五輛。無論用夫用車。照此分派。坐營停給。馬隊較步隊稍優。出征本省。概不加餉。出征外省。每月加銀二錢。

一、馬隊駐紮老營。與步隊一律浚壕築牆。營內應做營房馬棚馬槽。以備寒暑訓練之所。出征防剿巡哨。各帶鐵鋤支棚野宿。不得借住民房。其老營修房經費。准其核實開報。

一、招募馬勇。除自備鞍韉外。其由戰糧守糧挑入者。韉外其新買之馬。應由營官自備鞍韉油皮鞍皮紮鐵嚼。鋼草刀。紮料口袋。號衣。挑選馬兵。除馬糧不發鞍韉外。其由戰糧守糧挑入者。亦由營官置備鞍韉油皮韉皮。紮鐵嚼。鋼草刀。口袋。號衣之類。初立營之始。准營官報銷一次。其大小埽把。鐵銛。馬槽。柳籬。出自營官公費。其修補鞍上坐褥布屨。後鐵轡頭肚帶及拴肚帶。寬皮條。拴鑿窄皮條。均由乘騎之人自備。惟小鎗。洋槍。長矛。子藥帳棚。應由軍需局發給。或由營官置備。核實請銷。

新章與原定章程不符者列後

原定每營除中哨外。其前後左右四哨。每哨分爲四隊。每隊二十五人。第四隊馬二十五匹。馬上小槍兵八名。弓箭兵八名。長矛兵八名。隊旗兵一名。共二十五人。爲五伍四哨。計馬一百匹。今改爲馬隊立專營。一營馬二百七十二匹。員弁兵夫三百十六員名。

原定每營戰馬百匹。鞍韉鐵轡全備。給兵領騎。定以三年滿。一年內倒斃者。本兵賠償。二年內倒斃者。兵賠三分之一。哨隊官賠三分之一。三年內倒斃者。本兵賠半。哨隊官賠半。今改爲馬勇自帶私馬入營。如有倒斃。隨時由官買補。每月扣銀一兩。馬價扣畢。即作爲該勇之私馬。若係綠營官兵挑選入營。其發給官馬。亦每月

扣銀一兩。馬價扣畢。卽作爲該兵之私馬。

原定馬兵餉乾每名月支銀五兩四錢。加底餉一兩五錢四分不等。每月六兩九錢有零。隊長每名餉乾月支銀六兩。加底餉一兩五錢四分不等。每月七兩五錢有零。今改爲正兵日給銀一錢三分三厘三毫。馬乾銀一錢。月共支銀七兩。什長日給銀一錢五分。馬乾銀一錢。月共支銀七兩五錢。

籌議邊防片 同治九年四月十六日

再臣前奉本年四月初三日寄諭。一察哈爾額固巴雅爾暨庫克額爾濟地方。均有馬賊數百竄入。肆行焚掠。察哈爾地方遼闊。東與直隸張獨多三廳接壤。張家口尤爲緊要之區。著會國藩飭令地方文武。認真巡緝。一等因。欽此。續奉初十日寄諭。一前因文盛奏軍台被賊竄擾。當以察哈爾額固巴雅爾張獨多三廳接壤。諭令會國藩飭令地方文武。認真巡緝。嗣據張廷岳等奏稱。內地勤敗餘匪。由札薩克阿巴爾米特游牧竄入。圖什業圖汗部落。到處滋擾。復在賽音諾彥部落。肆行焚搶。並探另有大股圖犯庫倫等語。庫倫至察哈爾一帶。地勢平曠。并無扼要處。所可以守禦。萬一匪蹤飄忽。突向南竄。恐直境人心。未免震動。亟應嚴爲戒備。會國藩當勤加使探。於沿邊一帶。應如何不動聲色。嚴密設防。以備不虞之處。卽著妥籌辦理。前經劉盛藻派趙宗道管帶銘軍入營。移紮保定。該軍是否勤加訓練。足備調遣。嗣後有續調來直者否。該督前奏酌議練軍事宜。古北口又添千人。卽由提督傅振邦統帶。其軍是否足恃。其餘譚勝達等所統正定等處練軍。遇有緩急。能否備調。以資策應。著會國藩統籌全局。豫爲布置。將此諭令知之。欽此。一業經先後分別咨行欽遵。並飭宣化鎮道嚴密防範。在案。臣查文盛所奏。竄擾軍台之賊。據犯供由甘肅甘州竄出。尙在渤海以南。當是甘省回黨。沿邊而東犯者。張廷岳等所奏竄擾四愛曼之賊。據稱係內地勤敗餘匪。既至瀚海以北。當是甘省回黨。度漠而北犯者。雖未能確探賊蹤。而同時似有兩股并出。或因勤敗而紛奔。或該回勾結外匪。令其四出竄擾。分我兵力。皆未可知。若官軍分援漠北。漠南。遠道窮追。適中該匪多方誤我之計。聞賊數無多。擾及蒙古游牧者。內外札薩克之兵。當足禦之。惟匪蹤飄忽。突向南竄。事在意中。誠宜嚴密設防。預備不虞。查直隸張獨多三廳。惟張獨二口。近梳邊牆。多倫一廳。孤懸邊外。距張家口五百餘里。地勢曠衍。無險可扼。臣當咨商察哈爾都統相機策應。宣化鎮本有舊練之軍千人。王可陞於二月

陛見之後。臣令其改從新章。提出馬隊。另練一營。派兵二百。足成步隊兩營。刻下計已成軍。王可陞尙係宿將。若在張家口一帶扼守邊牆。加意防禦。尙無疏失。十一日奉到諭旨之時。提臣傅振邦適率練軍來省。臣與面商一切。如賊竄熱河。該提督當統新舊練軍二千。出關會剿。若灤陽無警。仍當在古北口堅守邊關。乃有把握。其譚勝遠在正定。彭楚漢在保定。新練之軍。續有警報。皆可赴防。張家口一帶。以壯聲援。至保定。銘軍入營。前係趙宗道管轄。上年九月。趙宗道赴部引見後。即赴江南候補。續委記名按察司丁壽昌統帶。前恐銘軍有赴黔赴秦之行。會經往返函商。擬留六營在於直隸。臣又飭續募二營。令丁壽昌統之。留防畿輔。其餘二營。令劉盛藻統之。續入關陝。粗有足議。今北口烽燧告警。練軍以直隸之兵防沿邊之寇。係屬分內之事。應可勉力支撐。若出塞遠征。則不惟新練之軍。不足深恃。即銘軍百戰勁旅。而風土未宜。形勢未熟。馳逐草地。亦必疲敝無功。若腹地有事。則銘軍易於奏效耳。謹將現擬辦理情形。附片覆陳。上紓廬慮。伏乞皇太后皇上聖鑒訓示。謹奏。

因病請假摺 同治九年四月二十一日

奏爲微臣患病已深。籲懇天恩。賞假調理。仰祈聖鑒事。竊臣自上年秋冬以後。目力昏眩。看字常如隔膜。治事稍久。則眼蒙益甚。初猶自謂衰老之常態。迨本年二月二十九日。偶以一手自捫左目。竟不復辨知人物。始知右目已屬無光。倩人察視。黑珠變色。瞳子亦漸昏大。因醫家補陰補陽。紛紛聚訟。亦未敢輕於服藥。雖明知垂暮之年。目光更無復明之理。本不敢以病軀尸此高位。惟念蒞任逾年。未立寸效。又值亢旱爲災。麥收失望。通省官民。皇皇憂灼之際。未敢遽爾具疏請假。本月十五日。設壇祈雨。校閱練軍。歸署後。治事稍多。十六日復得眩暈之病。清晨不能坐起。昏暈欲絕。但覺房屋牀帳。翻覆旋轉。心神不能自主。頭若墜水。足若上舉。是日禱雨。竟未赴壇拈香。急投調補之藥。並無大效。是後久臥不動。乃能稍平。扶牀強起。則眩暈如故。醫云心氣虧損。血不養肝。以致陽越。病在本源。起居不慎。便恐中風。法宜閑臥靜養。以意消息。非僅藥品所能見功。而署內公事。一日不理。則愈積愈多。斷無可以臥治之術。自臣十六日病後。逐日事件。廢閣已多。細察病勢。未能速愈。合無仰懇天恩。俯准賞假一月。俾得專心調理。臣衙門應行公事。暫委藩司代理代行。一俟調理稍痊。即行銷假視事。所有微臣因病請假緣由。謹繪摺陳明。伏乞皇太后皇上聖鑒訓示。謹奏。

謝子紀澤員外郎分部恩摺 同治九年五月初八日

奏爲恭謝天恩。仰祈聖鑒事。竊臣接閱邸鈔。四月二十五日。考試廩生。二十八日。臣子紀澤由吏部帶領引見。奉旨。『本日引見之正二品廩生曾紀澤。著加恩以員外行走。欽此。』臣當即恭設香案。望闕叩頭謝恩。伏念臣猥以疎庸。早承知遇。聖作聖述。累朝沛高厚之恩。懋賞懋官。盡室戴生成之德。臣子紀澤。荷先朝之延賞。已年例之久符。臣以其學殖無成。官常未習。恐濫竽之弗稱。遂應試之稍遲。茲乃郎位驟登。遷階躡晉。邀隆施之逾格。非夢想所敢期。現在直境久旱不雨。二麥業已失收。秋穀未能播種。仍歲災歉。皆由微臣德薄位高。致此殃咎。臣之目疾。固難速痊。眩暈之病。亦未全愈。以病軀而親茲凶歲。既補救之無方。以弱息而荷此殊榮。尤悚慚而靡已。臣惟有督教臣子。慎守官箴。恆朝乾而夕惕。如履薄而臨深。庶以仰答鴻慈於萬一。所有微臣感激下忱。謹繕摺叩謝天恩。伏乞皇太后皇上聖鑒。謹奏。

續請病假摺 同治九年五月二十二日

奏爲微臣病尚未痊。續請賞假調理。恭摺仰祈聖鑒事。竊臣於四月二十一日。因病請假。奉上諭。『曾國藩著賞假一月。安心調理。欽此。』匝月以來。服藥醫治。眩暈之疾。十愈其八。惟醫家補陰。多用清潤之劑。遂致脾胃受傷。飲食減少。精神困倦。不能自持。醫云。衰年氣體已虧。不任偏補。現宜少進藥餌。專意靜攝。庶可漸望痊除。臣右目無光。係屬根本之病。一時固難速痊。然醫家皆言其源。由於焦勞過度。與眩暈同爲肝家之病。法宜滋補肝腎。一面息心靜養。掃除一切焦慮。庶眩暈可淨絕根株。而目病亦漸有轉機。合無仰懇天恩。續假一月。俾得認真調理。現在天時久旱。節交夏至。秋禾迄未播種。合省官民。遠近皇皇。但令臣病稍可支持。即當銷假視事。上分宵旰之憂。不敢稍耽安逸。所有微臣病尚未痊。續行請假緣由。理合恭摺具陳。伏乞皇太后皇上聖鑒訓示。謹奏。

報赴天津起程日期摺 同治九年六月初七日

奏爲遵旨前赴天津。恭報起程日期。仰祈聖鑒事。竊臣於五月二十九日。覆陳赴津查辦一摺。奉上諭。『曾國藩眩暈之證。現已十愈其八。日內如可支持。即著前赴天津。會同崇厚。悉心商辦。』等因。欽此。數日以來。在署練習行步。登階降階。不令左右扶掖。雖飲食尚未復常。而兩足漸覺有力。已於本月初六日。自省啓行。諭旨飭查各節。

容俟抵津後與崇厚面商妥辦。其傷斃人口。據天津縣知縣稟報。已獲屍具。妥爲棺斂者。法國十三人。俄商三人。其餘尙未查確。其焚燬房屋。據天津縣知縣稟報。法國教堂一處。公館一處。仁慈堂一處。洋行一處。又誤燬英國講書堂四處。美國講書堂二處。臣與崇厚往返函商。擬先將俄國誤傷之人。及英美誤毀之講堂。速爲料理。應賠償者。先與賠償。不與法國一併議結。以免歧混。此議能否辦到。現尙未敢預期。至教堂牽涉迷拐之案。訊供雖稍有端倪。尙未能確指證據。天津倡首滋事之衆。彈壓雖漸就安戢。然而未敢查拿正凶。二者查辦之要。莫大於此。而棘手之處。亦在於此。臣智慮短淺。此次赴津。深懼措置乖方。失機債事。除俟到津後隨時奏明請旨遵行外。所有起程日期。恭摺由驛馳報。伏乞皇太后皇上聖鑒訓示。謹奏。

查明津案大概情形摺 同治九年六月二十二日

奏爲查明天津滋事大概情形。恭摺仰祈聖鑒事。竊臣國藩於六月初九日。靜海途次。承准軍機大臣字寄。六月初八日奉上諭。會國藩奏起程赴津籌辦情形一摺。據稱教堂牽涉迷拐之案。訊供稍有端倪。尙未能確指證據等語。此案啓衅之由。因迷拐幼孩而起。總以有無確據爲最要關鍵。必須切實根究。則曲直既明。方可再籌辦法。至洋人傷斃多人。情節較重。若不將倡首滋事之犯懲辦。此事亦勢難了結。著會國藩崇厚悉心會商。體察事機。妥籌辦理。以期早日完案。免滋後患。會國藩擬將誤傷俄國人命及誤毀英美兩國講堂先行設法議結。不與法國牽混。所見甚是。著即會同崇厚妥爲商辦。以免膠轕。將此由五百里各密諭知之。欽此。臣等伏查此案起衅之由。因奸民迷拐人口。牽涉教堂。並有挖眼剖心。作爲藥材等語。遂致積疑生憤。激成大變。必須確查虛實。乃能分別是非曲直。昭示公道。臣國藩抵津以後。逐細研訊。教民迷拐人口一節。王三雖經供認授藥與武蘭珍。然尙時供時翻。又其籍在天津。與武蘭珍原供在寧津者不符。亦無教堂主使之確據。至仁慈堂查出男女一百五十餘名口。逐一訊供。均稱習教已久。其家送至堂中參養。並無被拐情事。至挖眼剖心。則全係謠傳。毫無實據。臣國藩初入津郡。百姓攔輿遞稟。數百餘人。親加推問。挖眼剖心。有何實據。無一能指實者。詢之天津城內外。亦無遺失一幼孩之家。控告有案者。惟此等謠傳。不特天津有之。即昔年之湖南江西。近年之揚州天長。及本省之大名廣平。皆有檄文揭帖。或稱教堂拐騙丁口。或稱教堂挖眼剖心。或稱教堂誘污婦女。厥後各處案雖議結。總未

將檄文揭帖之虛實剖辨明白。此次詳查挖眼剖心一條。竟無確據。外間紛紛言有眼盈罈。亦無其事。蓋殺孩壞尸。採生配藥。野番兇惡之族。尙不肯爲。英法各國。乃著名大邦。豈肯爲此殘忍之行。以理決之。必無是事。天主教本係勸人爲善。聖祖仁皇帝時久經允行。倘戕害民生。若是之慘。豈能容於康熙之世。卽仁慈堂之設。其初意亦與育嬰堂養濟院略同。專以收卹窮民爲主。每年所費銀兩甚鉅。彼以仁慈爲名。而反受殘酷之謗。宜洋人之憤忿不平也。至津民之所以積疑生憤者。則亦有故。蓋見外國之堂。終年扃閉。過於秘密。莫能窺測底裏。教堂仁慈堂。皆有地窖。係從他處募工修造者。臣等親履被燒堂址。細加查勘。其爲地窖。不過隔去潮濕。度置煤炭。非有他用。而津民未盡目覩。但聞地窖深邃。各幼孩幽閉其中。又不經本地匠人之手。其致疑一也。中國人民有至仁慈堂治病者。往往被留。不令復出。卽如前任江西進賢縣知縣魏席珍之女賀魏氏。帶女入堂治病。久而不還。其父至堂婉勸回家。堅不肯歸。因謂其有藥迷喪本心。其致疑二也。仁慈堂收留無依子女。雖乞丐孀民。及疾病將死者。亦皆收入。彼教又有施洗之說。施洗者。其人已死。而教主以水沃其額。而封其目。謂可升天堂也。百姓見其收及將死之人。聞其親洗新尸之眼。已堪詫異。又由他處車船致送來京者。動輒數十百人。皆但見其入。而不見其出。不明何故。其致疑三也。堂中院落既多。或念經。或讀書。或傭工。或醫病。分類而處。有子在前院。而母在後院。母在仁慈堂。而子在河樓教堂。往往經年不一相見。其致疑四也。加以本年四五月間。有拐匪用藥迷人之事。適於是時。堂中死人過多。其掩埋又多。以夜。或有兩尸三尸共一棺者。五月初六日。河東叢塚。有爲狗所發者。一棺二尸。天津鎮中醫游擊左寶貴等。曾經目覩。死人皆由內先腐。此獨由外先腐。胸腹皆爛。腸肚外露。由是浮言大起。其致疑五也。平日熟聞各處檄文揭帖之言。信爲確據。而又積此五疑於內。各懷恚恨。迨至拐匪牽涉教堂。叢塚洞見胸腹。而衆怒已不可遏。迨至府縣赴堂查訊。王三豐領事對官放鎗。而衆怒尤不可遏。是以萬口譁譟。同時並舉。猝成巨變。其浮囂固屬可惡。而其積疑則非一朝一夕之故矣。今既查明根柢。惟有仰懇皇上。明降諭旨。通飭各省。俾知從前檄文揭帖。所稱教民挖眼剖心。戕害生民之說。多屬虛誣。布告天下。咸使聞知。一以雪洋人之冤。一以解士民之惑。並請將津人致疑之端。宣示一二。天津風氣剛勁。人多好義。其僅止隨聲附和者。尙不失爲義憤所激。自當一切置之不問。其行兇首要各犯。及乘機搶奪之徒。自當捕拏嚴懲。以儆將來。在中國戕官斃命。

尙嘗按名擬抵。況傷害外國多命。幾開邊衅。刁風尤不可長。惟當時非有倡首之人。預爲糾集。正兇本無主名。津郡人心。至今未靖。向來有曰混星子者。結黨成羣。好亂樂禍。必須佐以兵力。乃足以資彈壓。頃將保定銘軍三千人。朝紮靜海。此軍係記名臬司丁壽昌統帶。該員現署天津道缺。一俟民氣稍舒。即以緝兇事件委之。該署道督同府縣辦理。皆可勝任。至武蘭珍犯供。已牽涉教堂。經臣崇厚飭令地方官赴堂內查驗。實爲解釋衆疑起見。近日江南亦有教堂迷拐之謠。亦卽如此辦理。其後豐大業等之死。教堂公館之焚。變起倉猝。非復人力所能禁止。惟地方釀成如此巨案。究係官府不能化導於平時。不能預防於先事。現已將道府縣三員均行撤任。聽候查辦。由臣國藩揀員署理。同日另片奏其殺斃人口。現經確查姓名實數。惟仁慈堂尙有女尸五具。未經尋獲。其餘均妥爲棺殮。已交英國領事官李蔚海收存。俄國三人。已由該國領事官孔氣驗明掩埋。謹開列清單。恭呈御覽。法國公使羅淑亞業經到津。議及賠修教堂事宜。臣等擬卽派員經理。餘俟議有端緒。續行陳奏。其誤斃俄國之人命。誤毀英美兩國之講堂。亦俟議結另行具奏。所有查明大概情形。謹具摺先行會奏。伏乞皇太后皇上聖鑒訓示。謹奏。

揀員署天津道府縣缺片 同治九年六月二十二日

再天津道府縣三員。俱以辦理不善。先行撤任。聽候查辦。所遺各缺。亟應揀員署理。查有布政司銜記名臬司丁壽昌。在軍九年。才優識卓。洞悉戎機。曾在上海與英人巴夏里共事。頗識洋人情僞。檢逆既平。該員還家養母。臣上年招致來直。令其幫統銘軍。每引與議事。所籌動中窾要。足以肩荷艱鉅。天津道員缺。擬以該員署理。三品銜道員用晉州知州馬繩武。有聲應之才。又復詳慎忠懇。久處天津。熟於中外交涉事件。天津府員缺。擬以該員署理。知州銜試用知縣蕭世本。由翰林散館到部。改捐知縣。上年隨臣來直。察看該員。抗志前哲。有體有用。精明練達。不避險艱。試之盤錯之區。必能培養元氣。天津縣員缺。擬以該員署理。目下津郡地方。新出事變。中外猜疑。人心驚懼。臣當飭該員等妥爲鎮撫。柔遠能邇。以期弭患無形。理合附片陳明。伏乞皇太后皇上聖鑒訓示。謹奏。

請將天津府縣官交刑部片 同治九年六月二十二日

再法公使羅淑亞。以本月十九日到津。臣國藩迎至。臣崇厚通商衙門。與該使相見。辭氣頗爲和婉。但以賠修教

堂埋葬豐領事。將地方官懲究。及查辦兇手等語爲辭。二十日。崇厚復至該使公館。所言與十九日略等。迨至二十一日。該使忽大變聲口。聞有照會臣處一牘。語言躁狠。挾制多端。二十二日。投遞到臣。據照會內稱。不將府縣及提督陳國瑞即行抵命。早晚該國水師提督到津。即令其便宜行事等語。臣與崇厚妥籌熟商。該府縣等實不應獲此重咎。惟該使要求之意甚堅。若無以慰服其心。恐致大局決裂。且地方官事前既疏於防範。事後又不能迅速獲犯。其訊辦拐匪。亦有操之過蹙之處。相應奏明。將天津府知府張光藻。天津縣知縣劉傑二員。即行革職。請旨飭交刑部治罪。以示懲儆。而維大局。其陳國瑞一員。不知法國有何證據。聞該員現在京城。因照復該使將陳國瑞交總理衙門就近查辦。其照會及臣照復之件。鈔送軍機處備查。理合附片陳明。伏乞聖鑒訓示。謹奏。

覆陳津事各情摺 同治九年六月二十八日

奏爲欽奉諭旨。恭摺覆陳。仰祈聖鑒事。竊臣承准軍機大臣密寄六月二十三日奉上諭。有人奏風聞津郡百姓。焚燬教堂之日。由教堂內起有人眼人心等物。呈交崇厚收執。該大臣於奏報時并未提及。且聞現已消滅等語。所奏是否實有其事。著會國藩確切查明。據實奏聞。至所稱傳教有礙通商一節。應如何設法弭衅之處。并著詳察情形。妥籌具奏。原摺着鈔給閱看。將此密諭知之。欽此。同日奉上諭。前據會國藩奏本月初六日啓程赴津。現抵該處。已逾多日。此案啓衅之根由。想該督必已詳細查明。妥爲籌辦矣。迷拐一案。究竟有無確據。此係緊要關鍵。即著該督迅速具奏。以慰廬系。即將現在籌辦之法。及該處近日民情。一併奏聞。崇厚已派出使法國。自應啓行及早。著會國藩體察情形。如崇厚此時可以交卸。即著該侍郎先行來京陛見。以便即日起程。其通商大臣事務。著會國藩暫時接辦。成林現已病痊銷假。不日亦可馳赴天津。俟該京卿到時。會國藩即可將通商事務交卸。將此由五百里各密諭知之。欽此。臣於二十三日。業將查明大概情形。會同崇厚恭摺具陳在案。洋人挖眼取心之說。全係謠傳。毫無確據。故彼族引以爲恥。忿忿不平。焚毀教堂之日。衆目昭彰。若有人眼人心等物。豈崇厚一人所可消滅。且當時由教堂取出。必有取出之人。呈交崇厚收執。亦必有呈交之人。此等異事。紳民豈有不知。臣抵津後。查訊挖眼取心。有無確據。紳民俱無辭以對。內有一人言眼珠由陳大帥自帶進京。大帥者俗間稱陳國瑞之名也。其爲訛傳。已不待辨。原其訛傳所起。由崇厚前月二十四日專弁到京。向總理衙門。口稱有

搜出眼珠盈罈之說。其時倉猝傳聞。該弁未經考實。致有此訛。其實眼珠若至盈罈。則堂內必有千百無目之人。毀堂之時。何無一人見在。卽云殘害其屍具。又將何歸。此可決知其妄者。諭旨垂詢迷拐一案。究竟有無確據。臣查挖眼剖心。決非事實。迷拐人口。實難保其必無。天津之王三安三。河間峯獲之王三紀。靜海現留之劉金玉。供詞牽涉教堂。在在可疑。臣前奏係力辨洋人之誣。請發明諭。故於迷拐一節言之不實不盡。誠恐有礙於和局。當時另有片奏。密陳迷拐之可疑。旋因慮及偶有漏洩。法使羅淑亞必致又與波瀾。洋人此時斷不肯自認理虧。不如渾含出之。使彼有轉圜之地。故臨發時將密片抽出。將來此案辦結。仍當再申前說。請令教堂仁慈堂。均由地方官管轄。庶冀永弭弊端。至諭旨垂詢傳教堂有礙通商一節。臣上年在京會與臣文祥論及。傳教不宜兼設育嬰堂。文祥力言其勢不可禁遏。禁育嬰堂且不能。況能禁傳教乎。諭旨垂詢現在辦法。臣已爲昭雪挖眼剖心等事之誣。以平洋人之心。其焚燬教堂公館。業已委員興修。王三屢經翻供。現已釋還。教民安三。迷拐被獲。因獄詞未定。而該使索之甚堅。亦經暫行釋放。至查拏正兇。措手稍難。已飭新任道府拿獲九名。拷訊黨羽。至俄國誤傷三人。前委員與俄國總領事官孔氣商酌。每傷一人。給予卹銀五千兩。該領事當以請示國主爲辭。昨經臣處動用公牘。再爲詢商。准法使羅淑亞必欲將天津府縣及陳國瑞三人擬抵。經臣照復該使。府縣並非有心與洋人爲難。陳國瑞不在事中。仍復曲徇所請。將該府縣奏交刑部治罪。昨據該使照會。仍執前說。必令該三員抵償。又遣繙譯官德偉力亞來臣處面稱。必如照會所言。方不決裂。臣與辨論良久。問該使稱府縣主使。究有何據。德偉力亞不能指出。然其辭氣始終狡執。未就範圍。臣查府縣實無大過。送交刑部。已屬情輕法重。該使必欲擬抵。實難再允所求。由臣處給予照復。另錄送軍機處備查。彼若不構衅。則我所斷不能允者。當可徐徐自轉。彼若立意決裂。雖百請百從。仍難保其無事。諭旨垂詢近日民情。雖經臣疊次曉諭。而其疾視洋人。仍難遽予解化。夏民安分畏事。必欲自衛身家。莠民幸災樂禍。輒欲因亂搶奪。浮動之意。至今未定。故有邀集衆紳。往見羅使者。亦有撕毀教堂告示者。現有銘軍二千人在此彈壓。當可無虞。但臣舉措多不愜輿情。堪內疚耳。諭旨詢及崇厚。如可交卸。卽著先行來京。現在辦理雖有端倪。羅使尙未應允。臣於夷務素未諳悉。且病勢久深。崇厚與洋人交涉已久。無事不熟。應請飭令該侍郎暫緩赴京。留此會辦。俾臣不致僨事。於大局實有裨益。所有微臣奉旨查詢緣由。謹

繕摺覆陳。伏乞皇太后皇上聖鑒訓示。謹奏。

覆陳津案各情片 同治九年六月二十八日

再臣正繕摺間。承准軍機大臣密寄六月二十五日奉上諭。會國藩崇厚奏查明天津滋事大概情形一摺。另片奏請將天津府縣革職治罪等語。已均照所請。明降諭旨宣示矣。會國藩等此次陳奏各節。因爲消弭衅端。委曲求全起見。惟洋人詭譎性成。得步進步。若事遂其所求。將來何所底止。是欲弭衅而仍不免啓衅也。該督等現給該使照會。於緝兇修堂等事。已力爲應允。想該使自不至再生異詞。此後如洋人仍有要挾恫喝之語。會國藩務當力持正論。據理駁斥。庶可折敵箠而張國維。至備豫不虞。尤爲目前至急之務。會國藩已委記名臬司丁壽昌署理天津道篆。其駐紮張秋之兵。自應調紮附近要隘。以壯聲威。李鴻章已於五月十六日馳抵潼關。所部郭松林等軍。亦已先後抵陝。此時竄陝回匪。屢經官軍勦敗。其氣漸衰。若移緩就急。調赴畿疆。似較得力。著會國藩斟酌情形。趕緊具奏。再降諭旨。日來辦理情形若何。能否迅就了結。並著隨時馳奏。總之和局固宜保全。民心尤不可失。會國藩總當體察人情向背。全局通籌。使民心允服。始能中外相安。沿江沿海各督撫。本日已有寄諭。令其嚴行戒備。陳國瑞當時是否不在場。到津後即可質明虛實。已令神機營責令該提督赴津聽候。會國藩查問矣。將此由五百里各密諭知之。欽此。臣查此次天津之案。事端宏大。未能輕易消弭。中國目前之力。斷難遽啓兵端。惟有委曲求全之一法。臣於五月二十九日。覆奏摺內。曾聲明立意不與開衅。卅月以來。朝廷加意柔遠。中外臣民。亦已共見共聞。臣等現辦情形。仍屬堅持初議。而羅音肆意要挾。卒未稍就範圍。諭旨所示。洋人詭譎性成。得步進步。若事遂其所求。將來何所底止。是欲弭衅而仍不免啓衅。確中事理。洞悉敵情。臣等且佩且悚。目下操縱之權。主之自彼。誠非有求必應。所能潛弭禍機。此後彼所要求。苟在我稍可曲徇。仍當量予轉圜。苟在我萬難允從。亦必據理駁斥。惟洋人遇事專論強弱。不論是非。兵力愈多。挾制愈甚。若中國無備。則勢箠張。若其有備。和議或稍易定。現今張秋全隊九千人。披赴滄洲一帶。略資防禦。李鴻章前在潼關。臣已致函商諭。萬一事急。恐須統率所部。由秦入燕。此時陝回屢受大創。若令李鴻章入陝之師。移緩就急。迅赴畿疆。辦理自爲得力。英美兩國水師提督。現已均在大沽。其請示國主。旬日內當有覆信。法國若僅與津人爲難。則稱兵必速。若要求無厭。

真與國家爲難。則稱兵較遲。李鴻章若於近日奉旨移軍東指。當不嫌其過緩。臣於洋務。素未研求。昨二十一日。眩暈之病。又復舉發。連日心氣耗散。精神不能支持。目光蒙昧。二十六日。崇厚來臣處面商一切。親見臣昏暈嘔吐。左右扶入臥內。不能強起陪客。該大臣已有由京另派重臣來津之奏。臣自咸豐三年帶兵。早矢效命疆場之志。今茲事雖急。病雖深。而此志堅實。毫無顧畏。平日頗知持正理。而畏清議。亦不肯因外國有所要挾。盡變常度。朝廷接崇厚之奏。是否已派重臣前來。應否再派李鴻章東來。伏候聖裁。抑臣更有請者。時勢雖極艱難。謀畫必須斷決。伏見道光庚子以後。辦理夷務。失在朝和夕戰。無一定之至計。遂至外患漸深。不可收拾。皇上登極已來。外國強盛如故。惟賴守定和議。絕無改更。用能中外相安。十年無事。此已事之成效。津郡此案。因愚民一旦憤激。致成大變。初非臣僚有意挑畔。倘即從此動兵。則今年即能倖勝。明年彼必復來。天津即可支持。沿海勢難盡備。朝廷昭示大信。不開兵端。此實天下生民之福。雖李鴻章兵力稍強。然以外國之窮年累世。專講戰事者。尙屬不遠。以後仍當堅持一心。曲全鄰好。惟萬不得已而設備。乃取以善全和局。兵端決不可自我而開。以爲保民之道。時時設備。以爲立國之本。二者不可偏廢。臣此次以無備之故。辦理過柔。寸心抱疚。而區區愚慮。不敢不略陳所見。伏乞皇太后皇上聖鑒訓示。謹奏。

請留閩米存津片 同治九年七月初九日

再保定銘軍二千餘人。張秋銘軍九千餘人。先後調集天津滄州等處。李鴻章所部郭松林周盛傳等。旋當東來直境。荒歉之後。糧食艱貴異常。軍米一項。卒難購辦。准軍部衆。率係南人。慣食大米。南方采買海船裝運。節節無難。現在福建船局。購辦京米。已由前任臺灣道吳大廷解運提津。臣擬截留二萬石。存儲津郡。以濟急需。合無仰懇天恩。准將此項福建運到之米。由天津撥留二萬石。以爲李鴻章軍營及銘軍全隊之用。俾各軍抵津。不以缺食爲患。如此通融辦理。於大局實有裨益。理合附片陳明。伏乞皇太后皇上聖鑒訓示。謹奏。

覆陳彭玉麟等出處江海異形片 同治九年七月十九日

再臣前奉六月十四日寄諭。令彭玉麟迅赴江南。並垂詢劉銘傳能否來直。楊岳斌起用。能否得力。等因。續奉六月二十七日諭旨。令臣檄催劉銘傳乘程赴直。統帶銘軍。以備緩急。等因。欽此。查捻逆肅清以後。劉銘傳即

堅請開缺。臣七年北上時。遇劉銘傳於清江。再三慰留。該提督面稱畿輔如有警急。仍當投袂而起。昨臣檄調張秋銘軍。即經致函勸駕。催令迅速赴軍。目下淮勇半已遣撤。李鴻章所部。多係選用宿將。添募新勇。惟銘字一軍。尚係百戰之舊卒。其開花礮隊。亦較他軍爲尤精。但駐防過久。恐於戰事稍疏。若令劉銘傳親出統馭。不難復還舊觀。戮力用命。劉銘傳在同時諸將之中。實爲魁傑之材。此次催令來直。可否稍示優異之處。伏候聖裁。彭玉麟前治水師。積勞過久。謝病還家。近來每與臣書。屢言病狀增劇。諭旨飭赴江南。未審能否即出。楊岳斌上年不憚千餘里之遙。訪鮑超於夔州。李鴻章過夔州。聞有此事。即欲薦令復出治軍海上。與臣往返函商。其後楊岳斌復鮑超書。以親老身病爲辭。遂議中止。今奉諭旨。臣已致書楊岳斌彭玉麟二臣。詢其能否再出。俟有覆信。續行奏陳。臣竊謂治海上之水師。與江面之水師。截然不同。江則輕舸小艇。已爲利器。海則非有堅重輪船。配用巨礮。斷不足自立。以與敵爭衡。江則兩湖三江之人。皆可招募。海則風潮掀簸。非閩廣寧波沿海之人。往往嘔吐發軟。不能便習重洋。江則支湖小港。一望可知。海則浩無津涯。非練習多年。不足以定方向。而測淺深。其餘均須艱難創造。另起鑪錘。長江得力之將帥。用之海上。殊恐遷地弗良。今中國輪船。甫經修造。尙未能如洋人兵船之式。洋鎗洋砲。甫經操練。亦不能及洋人技藝之精。至若招募水軍。出海操演。此時尙未議及。苟欲捍禦外侮。徐圖自強。自非內外臣工。各有臥薪嘗膽之志。持以一二十年之久。未易收效。然因事端艱鉅。畏縮不爲。俟諸後人。則後人又將託辭以俟後人。且永無自強之一日。茲當閩滬兩廠船成之時。即當於兩處選立統將。慎擇船主。出洋操練。無論有警無警。窮年累歲。練習不懈。或者求艾三年。終有可以卸戎之時。愚昧之見。附陳梗概。伏乞皇太后皇上聖鑒訓示。謹奏。

天津府縣到案日期摺 同治九年七月二十日

奏爲提解已革天津府縣到津日期。恭摺覆陳。仰祈聖鑒事。竊臣等前奉七月十一日寄諭。會國藩現將天津府縣解交刑部治罪。本日軍機大臣。呈遞毛昶熙信函。有羅淑亞即擬進京之語。該府縣解送到部時。萬一羅淑亞欲到刑部觀看審訊。殊屬不成事體。不若仍令張光藻等解赴天津。並令會國藩等取具該府縣親供。等因欽此。又奉十二日寄諭。府縣抵償一節。萬無允准之理。昨已傳諭錢鼎銘。將張光藻等解赴天津。並令會國藩

取具該府縣親供爲憑。今羅使既因不遂所欲，悻悻回京。此時中外一心，力拒詭謀。曾國藩仍當飭張光藻等速遞親供。在天津候質。一等因欽此。仰見朝廷法外施仁，於該府縣等，曲予保全，以申正氣。而崇國體。凡在臣僚，同深感激。續奉十六日寄諭：「張光藻劉傑現在何處，已否到津，趁此洋人在京，趕緊取具親供，奏明辦理。庶其中不至爲難。若以奉旨治罪之員，任其他去，既於國體有傷，在該革員等亦非計之得者。」等因欽此。續又奉二十日寄諭：「本日據軍機大臣呈遞直隸按察使錢鼎銘稟函，據稱『已革天津府知府張光藻因患病出省，在順德府調治。已革天津縣知縣劉傑亦在密雲縣治病。已派員分赴守催』等語。覽奏不勝詫異。張光藻劉傑以奉旨治罪人員，即使患病屬實，亦應在天津聽候查辦。乃該革員等一赴順德，一赴密雲，捏病遠避，直視諭旨如弁髦，尙復成何事體。試思該革員等不呈遞親供，辨別是非，總理各國事務衙門王大臣等與洋人終日辨詰，何能以空言相抵。朝廷之令該革員等赴津者，實曲示保全之意，乃皆不能體會，儻然置身事外。若使洋人聞之，豈不益滋口實。此事關係重大，不可再涉遷延。著錢鼎銘懷邊前旨，星夜派員前往，將該革員等迅解天津，不准藉詞託病。仍著將起解日期，趕緊覆奏。曾國藩於張光藻等革職後，率行給假他去，實屬不知緩急。並著派員勒限催提。俟解到日，會同毛昶熙取具該革員等確切親供，以憑核辦。若再託詞遠避，國法具在，豈能寬宥。將此由五百里諭知曾國藩，並傳諭錢鼎銘知之。欽此。」臣國藩查該府縣自六月十六日撤任以後，即行請假離津。臣初見該員等本無大過，不欲於撤任之後，更予重咎。故各允其所請。其時尚未奏參也。迨羅淑亞到津，照會臣處，欲將府縣擬抵。臣與崇厚酌定革職交部。皆在府縣離津數日之後。不惟該員等不及聞知，即微臣初意亦不及此。實非奏參後仍復縱令潛逃。其後奉到七月十一日改解津郡之旨，仰體設法保全之意，即經飛檄催提。而該員等一往順德，特就醫藥。一往密雲安置眷累，相距較遠。臣檄臬司委員分提，飛騎兼程。而道途迴遠，水潦阻滯，未能迅速到案。其張光藻以十八日由順德起程。劉傑以二十二日由密雲起程。業由錢鼎銘專摺馳報。二十五日劉傑解到天津。二十七日張光藻亦已解到。臣等擬即會同丁日昌當堂審訊。取具該員等切實親供，奏明辦理。旋接總理衙門來信，稱法國繙譯官德偉理亞遞洋文照會，大意言府縣及陳國瑞主使證據，現飭同文館速行緝譯。該府縣親供，應俟所譯洋文寄津，按照彼所指各節，逐一詳細質訊。紋入供摺，方免歧舛。應即遵照辦理。俟寄

到洋文之後。再行取具供摺。分送總理衙門刑部。以便核辦。至辜犯一節。現在已獲三十七名。仍嚴飭地方文武員弁。認真緝獲。將在逃首要兇犯。儘數弋獲。一面設局派員。隔別研訊。不任狡展。首者擬以實抵。從者擬以軍流。爲此分別嚴辦。庶足以杜外患。而消亂萌。除俟訊明府縣確供。續行會奏外。所有該革員等提解到津日期。及現在辦理情形。理合會同江蘇撫臣丁日昌。具摺馳報。伏乞皇太后皇上聖鑒訓示。謹奏。

謝恩并辭江督任摺 同治九年八月初七日

奏爲恭謝天恩。並陳下情。仰祈聖鑒事。竊臣接准兵部火票。遞到同治九年八月初三日內閣奉上諭。一會國藩著調補兩江總督。未到任以前。著魁玉暫行兼署。直隸總督著李鴻章調補。欽此。一當即恭設香案。望闕叩頭謝恩。伏念臣猥以菲材。久膺重寄。愧涓埃之無補。實隕越之時虞。昔歲勤捨無功。回任江南。至今抱慚無地。上年量移畿輔。於奏明之吏治軍政河工三者。毫無績效。惶悚尤深。乃蒙新命之優加。更許舊官之重莅。在聖主曲加體恤。不以無用而棄樗櫟之材。在微臣感荷恩知。亦思竭誠而圖桑榆之報。惟臣自本年二月以來。衰疾日甚。前在假期之內。奉旨馳赴天津。實因津事重大。不敢因病推諉。而目疾已深。將來必須開缺調理。會於摺內預爲聲明。到津以後。眩暈時發。又感受暑邪。有嘔吐泄瀉等證。近日標病雖已痊除。目疾實難醫治。右目久經無光。左目亦日加昏眩。疆臣之職。必以披覽文牘爲要。臣目病甚重。往來文件。難以細閱。幕僚擬稿。難以核改。江南庶政殷繁。若以病軀承乏。將來貽誤必多。臣自去春履任直隸。今已一年六個月。自問曠官瀆職。負疚甚深。倘以病目重履江南。則曠官瀆職。必有更甚於今日者。臣受累朝高厚之恩。皇太后皇上委任尤隆。優容尤至。即捐糜頂踵。不足云報。豈復愛惜身命。自便私圖。然因病而不能居官。與居官而不能勤政。其辜恩究有輕重之分。再四籌思。惟有避位讓賢。乞回成命。合無籲懇聖恩。另簡賢能。昇以兩江重任。目下津案尙未就緒。李鴻章到津接篆以後。臣仍當再留津郡。會同辦理。以期仰慰聖廬。一俟津事奏結。再行請開大學士之缺。專心調理。倘能仰託聖主福庇。目光復明。仍當泥首宮門。求賞差使。再圖酬報。鴻慈於萬一。所有微臣感激下忱。謹繕摺叩謝天恩。伏乞皇太后皇上聖鑒訓示。謹奏。

請以陳欽畧天津府摺 同治九年八月初七日

奏爲海疆要缺。人地實在相需。仰懇天恩。破格用人。恭摺具陳。仰祈聖鑒事。竊維洋務之棘手。由於人才之匱乏。人才之罕覩。由於事理之不明。中外交涉以來。二十餘年。好言勢者。專以消弭爲事。於立國之根基。民生之疾苦。置之不問。雖不至遽形決裂。而上下偷安。久將疲茶而不可復振。好言理者。持攘夷之正論。蓄雪恥之忠謀。又多未能審量。彼己。統籌全局。一己之虛名。而使國家受無窮之實累。自非理勢並審。體用兼全。鮮克有濟。所謂盤根錯節之區。尤貴有適時應變之具也。天津爲通商要口。而又爲京畿門戶。治理不得其人。則貽誤已深。而不見覺。臣前到津郡。奏派馬繩武暫署天津府知府。當時衆務叢雜。得該員馳驅肆應。藉足集事。惟該員另有實缺。且圖謀久遠。必須另擇賢能。乃可爲斯邦之保障。查有刑部郎中陳欽正。而不迂介。而有爲。在總理衙門。當差多年。於中外交涉情形。洞悉本末。研究入微。頃隨毛昶熙來至天津。聞與洋人爭論。其辯才足以折服強悍。其誠心亦足感動彼族。若以之署理天津府知府。必能折衝於平日。禦侮於無形。於時局大有裨益。臣與尙書臣毛昶熙。撫臣丁日昌。熟商。皆極力贊成其事。惟該員係記名海關道。署理知府。與例稍有未符。且京員出差。即留署外省之缺。亦近世所未有。合無仰懇天恩。俯念天津值多事之秋。需才孔亟。准以該員陳欽正署理天津府知府。可收破格用人之效。一俟情形稍鬆。遇有沿江沿海海關道缺出。仍由特恩簡放。以符原保。而免向隅之處。出自逾格鴻慈。臣爲人地相需起見。謹會同工部尙書臣毛昶熙。江蘇巡撫臣丁日昌。署三口通商大臣臣成林。恭摺馳陳。是否。有賞。伏乞皇太后皇上聖鑒訓示。謹奏。

訊取天津府縣親供摺 同治九年八月十四日

奏爲訊取已革天津府縣確實親供。請旨交部核議。仰祈聖鑒事。竊臣等於七月三十日。將提解已革天津府縣到津日期。恭摺奏報。奉上諭。一羅淑亞所遞洋文。即著會國藩等按照所指各節。逐一詳訊。取具切實親供。其事所必無者。回應明白剖晰。其情所或有者。亦不可諱飾避就。庶有以折服洋人之心。不致再滋口實。一因欽此。臣等查府縣改解津郡。朝廷權衡至當。具有深心。疊奉諭旨。催取革員等親供。以爲辯難之資。而總理衙門來書。於府縣擬抵一節。亦皆堅持定力。不肯曲從。正論持之自上。已足張國勢而懾敵情。臣等曷勝欽佩。張光藻劉傑。抵津後。即據呈遞親供。臣等彼此面商。誠恐供詞內仍有不實不盡之處。上孤聖主矜全之恩。下授洋人吹求之

柄。議由臣等在津先加駁詰。凡該員等敘供。有本係疏虞。意存迴護者。亦有本無大過。語未分晰者。均經臣等摘出詰問。令其逐條答復。其羅淑亞所遞洋文。由總理衙門鈔寄到臣。亦令該革員等按照所指各節。一一供明。羅使照會內稱。此次洋文。業經分送各國。意謂懸之國門。垂爲定論。府縣供詞。亦必令各國共知。推問尤宜覈實。臣等令署理天津道丁壽昌。會同臣昶熙。臣成林。奏帶司員。臣國藩。奏派之道員。先行會審。臣等親加鞫問。務令該革員等心服。仍復有辭。以對洋人。方爲確實。謹將府縣親供。及答復洋文各條。鈔送軍機處。備呈御覽。臣等細核此案。雖由謠言肇衅。而百姓聚衆滋事。實緣豐大業之對官放鎗。倉卒致變。未經放鎗以前。該領事怒責其巡捕。趨赴商署。持械出入。百姓并皆讓路。任令行走。初無傷害之心。若使豐大業不兩次放鎗。必可安然無事。迨至滋事以後。則衆人洶洶已成不可禁遏之勢。該府縣等臨時失於彈壓。事後不能緝兇。揆其情勢。雖亦不無可原。惟地方釀成如此大變。邊衅幾從此開。自非尋常因案被議者可比。相應請旨。飭下刑部核議具奏。其應如何定讞之處。伏候聖裁。至滋事兇犯。現已拿獲八十餘名。設局審訊。各犯恃無旁證。異常狡展。計確有證供應正法者。已有七八人。略有證供應治罪者。約二十餘人。唯尙時供時翻。將來定案。但取情節較真。恐不能拘守常例。俟各犯嚴訊明確。再行會奏。所有臣等訊取府縣確供。謹繕摺具奏。伏乞皇太后皇上聖鑒訓示。謹奏。

審明津案各犯摺 同治九年八月二十二日

奏爲審明天津案內各犯。分別定擬。恭摺仰祈聖鑒事。竊臣等疊奉諭旨。飭將津郡五月二十三日案內滋事兇犯。迅速辦結。近又接奉八月二十日寄諭。一飭將未獲各犯。勒限嚴拿。現獲之犯。認真研鞫。不得稍涉寬縱。致令兇徒漏網。轉滋洋人口實。一等因欽此。臣等自承辦此案。久經督飭文武。設法購拿。悉心研鞫。自七月下旬。設局發審。嚴立限期。晝夜追求。直至中秋節前。僅得應正法者七八人。應治罪者二十餘人。臣以辦理日久。人犯無多。深負委任。更恐洋人不肯輸服。轉致枝節橫生。日來激厲各員。不得稍存寬縱。務令多緝正兇。以示持平。而全大局。惟此案事起倉卒。本無預先糾集之正兇。而洋人多已傷亡。又無當堂質對之苦主。各屍初入水火。旋就掩埋。並未驗傷填格。絕無形迹。可爲物色兇手之資。用是漏網之犯。難於掩捕。已獲之犯。不肯認供。天津無賴之徒。有稱爲混星子者。向以能熬刑自詡。此次輒以爲出於義憤。雖酷刑而不畏。而鄰右亦不敢出而質證。恐爲輿論所

讖彈。又慮仇家之報復。欲求罪當情真。定案萬難迅速。欲以無辜充數。則問心既有所不忍。而亦不足服洋人之心。棘手甚多。愈辦愈窘。反復籌思。若拘守常例。實屬窒礙難行。有不能不變通辦理者。常例羣毆斃命。以最後下手傷重者當其重罪。此案則當時衆忿齊發。聚如雲屯。去如鳥散。事後追究。斷不能辨其孰先孰後。孰致命。孰不致命。但求確係下手正兇。不復究其毆傷何處。此變通辦理之一端也。常例斷獄決囚。必以本犯畫供爲定。其本犯供詞狡展。則有衆證確鑿。即同獄成之例。此案則各犯恃無屍親。堅不吐實。旁人不肯輕易指實。衆證亦殊難得。臣等議定本犯無供。但得旁證二人三人指實。取具切結。亦即據以定案。此又變通辦理之一法也。計訊定供證確實者十一人。無供而有確證者四人。共計可以正法者十五名。擬辦軍流者四人。擬辦徒罪者十七人。共計可科輕罪者廿一名。除即日將各犯恭摺咨送總理衙門。暨刑部外。謹先繕具清單。恭呈御覽。其情節較重。訊有端倪。供證均未確實者。尚有十六名。擬歸於第二批辦理。情節較重。在逃未獲者。尚有十一名。一併開單先呈御覽。以釋宸廬。將來第二批奏結。或再辦首從犯各數名。或與洋人訂定抵償實數。中國如數辦到。請旨飭下總理衙門核定行知臣等。以便遵循。此次定擬各犯。若遂速行處決。將來牽辦愈難。應與洋人商定。統俟續奏二批後。併案辦理。所有臣等審明第一批人犯。分別擬定原由。謹繕摺具陳。伏乞皇太后皇上聖鑒訓示。再臣國藩於六月初十日到津。今已逾七十日。始將要犯具奏。辦理遲延。應請旨將臣會國藩交部嚴加議處。合併陳明。謹奏。

史念祖開缺差委摺 同治九年八月二十九日

奏爲臬司開缺差委遵旨隨時具奏。仰祈聖鑒事。竊臣上年覆奏察看臬司史念祖一摺。奉上諭。史念祖心地既尙明白。若隨同會國藩遇事講求。久加歷練。於公事大有裨益。俟接印任事後。仍著會國藩隨時察看。欽此。旋經內閣學士鍾佩賢奏稱。臬司責任綦重。未宜輕授。續奉諭旨。史念祖著即開缺。以原官留於直隸。交會國藩差委。如能諳練公務。即由該督隨時奏聞。等因。欽此。復經吏部議奏。從前已保藩臬記名題奏者。如非曾任實缺道府。均准戴用原銜。一律先補道員。奉旨允准。各在案。臣查史念祖器局開展。論事有識。加以磨厲。本可鍊成有用之才。徒以資望尚淺。驟畀重任。未鑒衆心。諭旨飭令開缺。裁抑甚微。玉成實大。數月以來。察看該員返躬循省。立志奮興。尙能仰體朝廷裁成之至意。至鍾佩賢奏稱。衆謂該員識字太少。文理未通。則傳聞之辭。殊

奏稿

九二九

屬失實。史念祖衣冠舊族。其祖史致儼前爲刑部尙書。甚負時望。其伯父丙榮。以進士服官安徵。歷著循績。其胞兄大立。亦以進士分部。該員幼承家訓。文理精通。臣嘗覽其所爲詩稿。才思頗爲開拓。其公牘亦簡明周備。筆足達其所見。不至如鍾佩賢所奏云云也。惟史念祖開缺之後。仍令以原官差委。查外省候補人員。向例至道府而止。若藩臬大僚。留省差委。實近世所罕見。而諭旨僅令留直交臣差委。又似不得爲直隸候補人員。其官已屬虛無。懸薄竟無補缺之期。臣每觀其論事剖晰條理。窮原竟委。儘可陶成令器。投閒置散。實爲可惜。合無仰懇天恩。簡放一缺。俾得及時自效。必能勤慎稱職。或臬司或道員。恭候聖裁。抑臣更有請者。軍營保舉記名道府。實因微臣創始。臣於咸豐四年。請保羅澤南李續賓彭玉麟三員。始照京察記名章程開用此例。緣三臣才能卓越。又建非常之功。是以破格請獎。記名後不過數月。均蒙文宗皇帝簡放實缺。厥後各處倣照此例。武而提鎮。文而藩臬。均保記名請簡。軍與愈久。員數愈多。非臣初意所及料。濫竽冒進之弊。誠所不免。而遵衆之才。異常之勞。亦未嘗不出於其中。現在陝甘雲貴兵事未已。沿海沿江。時局亦多隱患。仍屬需才孔亟之時。部議新章。保藩臬者。一律先補道員。在各員不至遽爾缺望。但求聖慈存記。每年簡放實缺數人。俾知軍功記名一途。尙有得缺之一日。羣彥爭奮於功名之會。而軍營愈以見鼓舞之神。部章之除授有定。所以慎重名器。聖主之特簡無定。所以驅策羣才。二者互相爲用。於振厲人材之道。更爲詳備。臣因史念祖堪膺實缺。而因念記名一途。於新章之外。稍參末議。未識有當萬一否。所有臬司開缺差委之處。謹遵旨隨時具奏。伏乞皇太后皇上聖鑒訓示。謹奏。

報交卸日期摺 同治九年九月初六日

奏爲微臣交卸日期恭摺奏報。仰祈聖鑒事。竊臣前奉諭旨調任兩江。并飭新任督臣李鴻章馳赴天津接篆。茲李鴻章於八月二十五日行抵天津。九月初六日臣飭派署天津府知府馬繩武。大沽協副將張秉鐸。賈送直隸總督關防長蘆鹽政印信。交李鴻章接受任事。其王命旂牌等件。存於保定署內。天津滋事之案。第二批首從各犯。訊辦已有端倪。數日內即可奏結。此後應辦情形。均經詳細熟商。新任督臣李鴻章。必能斟酌機宜。曲全大局。仰釋聖慮。所有微臣交卸日期理合繕摺具陳。伏乞皇太后皇上聖鑒。謹奏。

調吳大廷操練輪船片 同治九年九月初六日

再福建前任臺灣道吳大廷於同治七年在臺灣任內因病呈請開缺回籍調理。八年三月經沈葆楨奏請起用。奉旨諭知湖南巡撫劉峴飭令迅速回閩襄理船政。該道病痊遵旨復出。以八年七月到閩。旋經督解萬年清輪船赴津請驗。本年又經奏派運米赴津驗收。臣查該道學問淵邃才識闊遠前因李續宜奏調赴皖常在臣營。即擬備爲國家異日之用。後入閩浙。睽隔數年。此次來津。適臣查辦津案。屢與接晤。見其學益精。才益練。議事尤有通識。誠堪勝艱鉅之任。目下沿海防務亟宜籌備。閩滬兩處鐵廠成船漸多。而未嘗議及海上操兵事宜。臣於七月十九日曾經具奏一次。操兵之法。其要全在船主得人。既爲一船之主。第一貴善於使船。熟悉掌舵看火等事。而後合船之水手兵役。皆可俯首聽命。第二貴明於海道沙線兼管閱看地圖。第三貴嫻於戰陣。能悉進退分合機宜。三者兼全。即洋人亦不可多得。中國武員中尤難其選。臣愚以爲須求之文員中。得一素諳戎機。講究地圖。兼明洋務。而又不憚風濤者。綜理其事。始則博求將才。探訪可爲船主之員。繼則出洋督同操練。稽其勤惰。終則徧詢外國水戰事宜。暗師其法。而取其長。乃可日起有功。該道吳大廷熟悉船政。於兵事洋務。講求有素。近年南北往返。屢涉重洋。不畏艱險。又久在閩浙。頗留心可爲船主之才。現在上海船廠道員馮俊光等專講造船及鎗礮等事。無暇兼顧操兵。擬請將吳大廷調至江南。綜理輪船操練事宜。微臣藉資臂助。該道久駐閩廠。閩滬亦可聯絡一氣。於整頓海防。實有裨益。理合附片陳明。伏乞聖鑒訓示。謹奏。

謝恩賜壽摺 同治九年九月十六日

奏爲恭謝天恩。仰祈聖鑒事。竊臣於本月十二日承准軍機大臣咨交到恩賞臣六十生辰。御書勳高柱石匾額一方。御書福壽字各一方。梵銅壽佛一尊。紫檀嵌玉如意一柄。蟒袍面一件。小卷吉綢十件。臣當即恭設香案。望闕叩頭。祇頌伏念臣忝任封圻。握承知遇。愧涓埃之無補。憶歲月之侵頽。迺當馬齒漸加。復荷龍光下逮。睹昭回於宸翰。彩煥雲霞。增兢惕於臣心。襄慚柱石。託福林而自天降祐。依壽寓而由帝錫齡。對茲寶相莊嚴。彌深恪敬。捧到瓊枝溫酒。用效指麾。黼黻生華。備彰施於五采。絲綰入詠。增晏粲於三英。臣惟有勉竭愚忱。堅持晚節。偕兆民而蹈德。共沐一人有慶之麻。瞻九陛以陳詞。更晉萬壽無疆之頌。所有微臣感激榮幸下忱。謹繕摺恭謝天恩。伏乞皇太后皇上聖鑒。謹奏。

恭請陛見摺 同治九年九月十六日

奏爲遵旨赴任兩江恭請陛見仰祈聖鑒事竊臣前奉諭旨調補兩江總督當因目疾已深不能重履江南奏請另簡賢能畀以兩江重任八月初十日奉上諭「會國藩奏瀝陳病目情形懇請另簡賢能畀以兩江重任俟津事奏結再請開大學士缺專心調理一摺兩江事務殷繁職任繁重會國藩老成宿望前在江南多年情形熟悉措置咸宜現雖目疾未痊但能該督坐鎮其間諸事自可就理該督所請另簡賢能之處著毋庸議仍著俟津事奏結即行前赴兩江總督之任毋再固辭欽此」訓辭懇至惶悚曷任臣前承乏江南初無治狀荷蒙獎勵抱愧已深今則衰疾相尋尤難再膺劇職聖主體恤備至許以坐鎮不令固辭慚感交并罔知所報欲勉從後命則病軀難供驅策必致墮越貽譏欲自遂初衷則聖恩已極優容何敢再三瀆請謹當遵旨赴官力疾視事揆諸古人鞠躬盡瘁之義一息尙存不敢稍耽安逸特目病萬難痊除兩脚近復浮腫貽誤實在意中早夜慄慄常懼辜負聖恩目下津案首從各犯業已奏結二批和議不難即定臣可毋庸久留惟有仰懇天恩准令入都陛見面聆訓示再赴新任本日又奉九月十五日寄諭「會國藩等本係特簡查辦津案之員此時該繙譯業已抵津修堂撫恤諸事在津易於定議即著該督等晤商德偉理亞妥籌辦理迅速具奏」等因欽此查德偉理亞業於十三日回京由天津府派外委郭仲奎護送此間別無法德人員無從與議賠償撫恤等事應否在京定議如德繙譯再來津郡似可即由督臣李鴻章等與之議結恭候聖訓遵行所有微臣籲請陛見緣由謹繕摺附驛具奏伏乞皇太后皇上聖鑒訓示謹奏

調陳蘭彬江南差遣片 同治九年九月十六日

再四品銜刑部主事陳蘭彬經臣於上年正月奏調來直襄辦一切深資臂助該員實心孤詣智勇深沈歷練既久敏抑才氣而精悍堅卓不避險艱實有任重致遠之志臣九月初六日奏陳海上操兵之法其要全在船主得人目下中國輪船於駕駛出洋尙未練習欲求已成之材可爲船主者自屬不易多獲將來招募之始必先擇閩粵沿海之人不憚風濤者使之學習掌舵看火測量沙線等事以期漸就嫻熟該員生長粵東留心兵事若令延攬將材於輪船操練事宜必有裨益至外國技術之精爲中國所未逮如輿圖算法步天測海製造機器等事無

一不與造船練兵相爲表裏。其制則廣立書院。分科肄業。凡民無不有學。其學皆專門名家。每治一藝。每製一器。皆係父子相傳。世繼其業。然後通微合漠。愈久愈精。其國家於軍政船政皆視爲身心性命之學。如俄羅斯初無輪船。國主易服微行。親入鄰國船廠。學得其法。乾隆間。其世子又至英國書院肄業數年。今則俄人巨礮大船。不亞於英法各國。此其明效。江蘇撫臣丁日昌。屢與臣言。宜博選聰穎子弟。赴泰西各國書院。及軍政船政等院。分門學習。優給資斧。寬假歲時。爲三年蓄艾之計。行之既久。或有異材出乎其間。精通其法。仿倣其意。使西人擅長之事。中國皆能究知。然後可以徐圖自強。且謂攜帶子弟前赴外國者。如該員陳蘭彬及江蘇同知容閎輩。皆可勝任等語。臣精力日衰。自度難策後效。然於防海製器等事。亦思稍立基緒。異日有各將帥者出。俾之得所憑藉。庶不難漸次拓充。陳蘭彬素有遠志。每與議及此事。輒復雄心激發。樂與有成。該員係奉旨交臣差遣之委。此次仍擬帶至江南。於目前操練輪船。將來肄業西洋各事。必能實力講求。悉心規畫。理合附片陳明。伏乞皇太后皇

上聖鑒訓示。謹奏。

報接印日期摺 同治九年十一月初六日

奏爲恭報微臣接印日期。仰祈聖鑒事。竊臣入都陛見。跪聆聖訓。後於十月十五日出京。二十八日至山東濟寧州。由水路南下。閏十月二十日。行抵江寧省城。二十二日。准署督臣魁玉飭派署江寧府知府蒯德模。署中軍副將周良才。齎送兩江總督關防。鹽政印信。欽差大臣關防。及王命旗牌文卷等件。一併移交前來。臣當即恭設香案。望闕叩頭謝恩。任事。伏思兩江地大物博。政務殷繁。臣前此承乏數年。於一切察吏安民。防江籌海諸大政。頗思實心整理。均有志而未逮。茲以衰病之軀。溷被新給。重臨舊地。凡清議所責望。衆情所瞻矚。暨臣心所素願。自勉者。自揣精力更遜於前。能否隨事補救。尙無把握。五中循省。悚惕滋深。惟有廣集衆思。力圖補過。勉策桑榆之效。冀收尺寸之長。以仰答高厚鴻慈於萬一。所有微臣接印日期。除恭疏具題外。理合專摺陳奏。伏乞皇太后皇上聖鑒。再通商事件。未經奉有明諭。目下蘇州巡撫新舊交替。尙未履任。臣自應將洋務日行文件。從權核辦。暫用總督關防。所有欽差大臣關防。敬謹封儲。聽候諭旨。合並聲明。謹奏。

會議海運交米摺 同治十年正月十二日

奏爲遵旨會議。海運米石。改由糧道赴通徑交。擬俟下屆再行試辦。恭摺仰祈聖鑒事。竊臣等承准軍機大臣字寄。同治九年十一月二十日奉。上諭。海運交卸一節。該部擬請按照河運章程。改由糧道赴通徑交。係爲掃除積弊起見。著會同藩李鴻章英桂張兆棟張之萬楊昌濬斟酌情形。詳細委商。會同覆議具奏。原摺片均着分別鈔閱給看。一等因欽此。臣國藩當即劄飭江蘇糧道英樸。會同藩司核議詳覆。臣昌濬亦即劄飭浙江糧道如山。會同司道核議詳覆。旋據浙江糧道如山等會詳。稱海運章程。始自道光六年。由滬運津。責成南省委員。由津運通。責成北省委員。釐然判而爲二。各有專責。奉行既久。法非不善。而弊即叢生。今欲大改章程。不外除弊節費二事。然運通之弊。全在剝船。若改由糧道委員押運。以隔省人地生疎之委員。權察隔省積慣作弊之船戶。恐呼應不靈。其弊更甚。至海運經費。係按照米數備帶赴津。力求撙節。方可敷用。向來北省押米員弁。多至一百數十員。今若改由南省帶員赴北。薪水既多。川資更鉅。即此一項。已形糜費。其餘各款。亦必驟增。恐於事未必有濟。而所費更屬不支。又津局以起剝爲重。通壩以交卸爲重。糧道專駐津局。則交米之事。無所專責。先赴通壩。則起剝之事。又恐羈延。而沙船在津等候太久。耗費更多。尤慮畏累遠避。有礙於下次之招雇。種種窒礙。未敢輕議更張等語。由臣昌濬咨商臣國藩。察核所陳各節。均係切中事理。並非意存推諉。即擬據詳會奏矣。適又接江蘇糧道英樸稟稱。邇來海運弊不在商船之運津。而在剝船之運通。剝船舞弊。固由積習之相沿。亦由水脚之過少。該船戶既虧累於平時。復需用於臨事。偷漏撓和。無弊不作。致令乾圓潔淨之米。一交剝船。米色頓壞。殊爲可惜。今欲力矯前失。惟有遵照部議。由南省糧道徑運交通。自津過剝以後。慎選委員。以押運舟。分設卡段。以司稽查。嚴定偷漏罪名。以鈐制之。節省經紀等費。以優恤之。或可一洗剝船之弊。至封僱彈壓等事。仍由直隸地方官妥爲照料。南北通籌。恩威並用。漕務當有起色。現已草創章程十四條。雖不能十分周密。請卽試辦一年等語。臣國藩以該糧道英樸在浙江辦理海運三次。調任江蘇。又辦九年。一切情形。久爲熟悉。既肯力爲其難。勇於任事。果能除漕米水撓潮雜之弊。豈非大有裨益。復經函商臣之萬。臣昌濬核酌辦理。臣昌濬旋又覆函。以爲遵通之弊。果能改弦更張。實爲中外所共願。惟改革而仍用額設之經紀。向有之剝船。則從前錮習。牢不可破。若欲重立新章。另行僱船。另行派人。則事屬創始。必須通盤籌畫。確有把握。方可試辦。接准閩浙督臣英桂來函。亦深慮驟然改革。諸

多窒礙。現在米船將次放洋。爲期已迫。糧積如山。議請俟下屆再行試辦。與其倉猝改章。不如從容集議。臣之萬覆函。亦稱直隸督臣李鴻章覆奏海運事宜摺內。業已聲明。今年報漕。只能照章往津驗收。諭旨允派倉場侍郎一員赴津會辦。若改爲徑運。赴通驗收。則南北辦理兩歧。奏咨商改。多費周折。殊覺不便。臣國藩參考衆論。酌度時勢。本年海運。應仍在天津驗收。江蘇糧道英樸既有創辦徑運赴通之志。浙江糧道如山續行覆議。亦有下屆試辦之請。臣等公同定議。檄飭英樸如山於馳抵天津後。先將本年糧米查照向章辦理。再將下屆糧米運通改章之處。面稟李鴻章。應將經紀若何更換。剝船若何整頓。各項經費若何覈實動用。一一籌度。不厭精詳。俟下屆漕糧海運。由臣等先期議定章程。奏明辦理。以昭慎重。所有海運米石。改由糧道赴通徑交。擬俟下屆試辦緣由。謹會同閩浙總督臣英桂。漕運總督臣張兆棟。恭摺覆陳。伏乞皇太后皇上聖鑒訓示。謹奏。

籌辦河運事宜摺 同治十年正月十二日

奏爲陳明河運艱難情形。應行設法預籌。恭摺仰祈聖鑒事。竊九年分江北冬漕。遵照部議。仍辦河運。臣於十一月十二日。專摺陳奏在案。伏查八年分江北漕米。以九年河運赴通。節節阻滯。水陸兼運。直至十月杪。始能載事。一切經費。雖由糧道王大經格外撙節。不至過鉅。而人事之艱。時日之久。較之海運。難易懸殊。該糧道交米事竣。赴部引見。現已馳回江寧。臣面詢情形。證以臣出京時。由運河南下所見者。其言多屬相符。若不預爲籌畫。恐下次又蹈覆轍。據稱本屆承辦河運。任事六月之久。中間處處阻滯。歷歷可數。如嶧縣境內之大泛口。該處爲山水經由之所。一遇暴漲。則迅流急湍。迨水退之後。則沙淤停積。今年漕船經過該處。水深不及二尺。河底碎石縱橫。最礙舟行。必須由山東認真興挑挖深四五尺。并將近灘石堆剷除。與河底配平。方利行駛。自大泛口而北。則有滕縣境內之鄰山口。該處爲入湖要道。淺而且窄。又微山湖內之王家樓滿家口安家口。獨山湖內之利建閘。南陽湖北之新店閘。華家淺石佛閘。南旺閘。分水龍王廟以北之劉老口袁口閘。處處淤淺。或數十丈。或百餘丈。亦須由山東逐段勘明。一律挑深。方可無阻。此未渡黃以前阻滯之處。宜預爲籌辦者也。議者謂早日開兌。早日過湖。即使費力。尙不愆期。不知濟寧以南。淺處已多。濟寧以北。運河尤爲乾涸。總須守候伏汎盛漲。方足以資浮送。至黃水穿運之處。漸徙而南。自安山至戴家廟三十里。自戴家廟至八里廟廿二里。運河舊有之堤。盡被黃水衝

破。缺口極多。黃水湍悍而勢急。漕船載重而質脆。斷難破浪而行。需用剗船下控。以立之根。然後由漕船繳關。步上上移。否則簸蕩急溜之中。無復收泊之處。而十里鋪姜家莊道人橋等處。又極淤淺。似須由山東設法。一面於淤阻處極力疏濬。一面於運隄各缺口。排釘木椿。貫以巨索。俾漕船經過。有所依傍牽挽。不至爲洪溜所吸。倉卒失事。此渡黃時艱滯情形。宜預爲籌辦者也。及至渡黃以後。若在伏汛未落以前。或易爲力。若伏汛已過。等候秋汛。卽屬杳茫。不可必之數。九年在八里廟守候兩月之久。可爲前鑒。自張秋至臨清二百餘里。河身有高有下。其疏導之法。須量河身之高下。高者開挖宜深。下者開挖稍淺。庶可高低相等。一律深通。再於黃流已長未落之時。卽下開板蓄水。以免消耗。或就平水南閘迤東。築一挑水壩。引黃入運。皆多方設法。力圖斡旋之策。此渡黃以後。運道易涸。宜預爲籌辦者也。山東水勢。長落無定。或先長而後忽落。或先小而後復大。漕船經由山東一千數百里。向歸嶧膝魚臺濟寧東平東阿各州縣封雇船隻。以備起剗之用。而地方官相距甚遠。兼顧不遑。九年所雇剗船。不免臨時逃散。擬請酌改章程。責成東省管河廳員。雇備剗船。小者裝米三十石。大者至百石爲止。一遇漕船。阻則斟酌起剗。由糧道按石給發飯錢。以免枵腹。至開夫亦改由河員招集。歸其約束。一併由糧道給予工食。庶不缺誤。此又略改舊章。宜預爲籌辦者也。東平州運河之西。有一鹽河。倚山爲障。爲東省鹽船所經要道。漕船若由安山左近繞入鹽河。至八里廟。仍歸運道。計程二百餘里。較之徑渡黃流。上有缺口大溜。下有亂石樹椿者。其難易懸殊。是以商船率多避黃。而趨此路。上年因非運漕正道。未敢試行。十年行抵安山時。如遇黃流過猛。祇宜變通改道。惟自安山三里堡入鹽河之路。亦須預先勘明。何處平順。先立標竿爲誌。免致臨時周章。此又渡黃改道。宜預爲籌辦者也。以上五端。皆河工應辦事宜。又皆在山東境內。從前糧艘運北沿途修閘築壩。挑河過剗。均由南河東河兩督臣。治黃治運。注意專在漕務。事事各有考成。處處不惜重費。故能駕輕就熟。事無不舉。今則黃流橫決。運河失修。河員之經費大減。河運之米數極微。欲以江北一隅數萬之漕。而責山東以全力治河治運。未免獨爲其難。然部臣所以不肯竟廢河運者。亦因成法不可輕改。圖事不可畏難。具有遠慮。丁寶楨見義勇爲。力顧大局。亦必不因米數太少之故。而忽視沿河應辦之工。糧道且經躬肩重任。既已經歷險艱。茲令再試危途。不得不預爲綢繆。免其遲誤。現在欽奉諭旨。派飭漕臣張兆棟前往山東會勘築隄東黃事宜。必可與東河督臣

蘇廷魁山東撫臣丁寶楨面商一切相應請旨敕下該督撫等通籌運道全局建可久之宏謨並將臣此摺所指興工之處分投興辦目前之漕務臣當飭催該糧道等趕緊兌米及早開行仰慰宸廑所有河運艱難設法預籌緣由謹會同漕運督臣張兆棟江蘇撫臣張之萬恭摺馳陳伏乞皇太后皇上聖鑒謹奏

覆陳淮南鹽價難增摺 同治十年二月初二日

奏爲淮南鹽價礙難議增恭摺覆陳仰祈聖鑒事竊查接管卷內接准部咨議覆督辦西征糧臺侍講學士袁保恆奏請權加鹽價以濟軍餉一摺應由兼管鹽務各督撫轉飭各運司鹽道將現辦綱引地方能否計勛加價體察商力民情據實奏覆等因同治九年九月初十日奉旨依議欽此欽遵轉咨前來當經前兼署督臣魁玉札運司飭各鹽道悉心籌議茲據兩淮鹽運使方濬頤署江南鹽巡道凌煥等先後詳覆臣查袁保恆原奏意在停捐以除積弊增價以裕軍儲用意未始不善惟各省鹽法情形不同卽就淮南而論有窒礙難行者數端請爲皇太后皇上縷晰陳之夫所謂加增鹽價者將加之於商乎商人運鹽不能零星起運淮南奏定章程以六百觔爲一引五百引爲一票資本不足一票者卽不准運今擬每觔酌加三四文約計每票須增成本一千餘串分言之則形其少合計之則見其多此時淮南運商適非昔比類皆集資湊運商力實有未逮其窒礙難行者一也將加之於民乎近來西楚鹽價較承平時已屬騰貴一由鹽釐之過重一由銀價之過昂均以京外餉需緊迫未能減輕售價民間旣以鹽貴爲苦局中又以消滯爲患若再按觔加價則水販無利可圖勢必聞風而裹足梟徒有私可囤又將乘隙以賤售其窒礙難行者二也原奏謂一省獨加則滯各省同加則通此固可避免貴食賤之患殊不知市價難齊物情使然不獨一省有一省之價卽淮南自附揚州縣起推而至於江寧皖省以達楚西此岸與彼岸價皆不同緣路有遠近之分卽價有低昂之判今欲比而同之雖法令亦有時而窮其窒礙難行者三也原奏又謂加價之款卽與各省鹽勛出場時隨同正課收納此亦可杜以多報少之弊殊不知淮南新章之尙易招徠者全在緩納課釐成本藉以減輕轉輸可期便捷應納之課須緩至場鹽售與運販後再繳應納之釐須緩至到岸售與水販後再繳引額以兩淮爲獨多加價卽以兩淮爲更鉅一旦責令商竈在於鹽場出場之前完納鉅萬鹽價勢有不能其窒礙難行者四也以上各層係就淮南商力民情言之若論川淮交匯則淮引受害爲尤深前

此長江未通。川鹽行楚。同一占銷淮地。而彼時淮南兵燹之餘。通泰二十場商竈。因鐵廢墾荒。場鹽既不能達岸。引地原不妨讓入。自賊平以後。另定新章。新舊各商添繳修墾。逐漸整頓。產數日增。而湖北湖南爲銷鹽最廣之區。迄今盡爲川私所占。現計存垣在棧。存岸淮鹽。積壓過多。苦無出路。商人資本久擱。年復一年。運商則決裂堪虞。場商則困窮無賴。竈丁貧而生變。亦屬意中之事。譬之治河。下游無歸壚之處。上游必有溢潰之患。今欲求疏通淮銷。非規復引地不可。欲規復引地。非禁止川私不可。臣於同治七年曾經劃切陳奏。而四川湖北湖南各督撫。皆以軍餉爲重。交章力爭。部臣亦調停其間。是江省之於川鹽。方欲遏之使絕。而楚省且招之使來。臣目擊淮引地面。盡被川私佔奪。不禁川則盡壞我朝之成法。欲禁川則先開鄰省之弊端。辦理掣肘。焦灼萬分。部議謂節經江督奏請減價。以敵鄰私。推引尙難暢銷。是淮南目前情形。部中亦所洞悉。臣斷不敢預存推諉。不願邊陲。亦何敢稍涉遷就。貽誤隴局。所有淮南鹽價。強難議增緣由。理合恭摺覆陳。伏乞皇太后皇上聖鑒訓示。謹奏。

馬新貽本籍建祠摺 同治十年二月二十四日

奏爲已故督臣有功桑梓。同鄉各員。稟懇天恩。准在本籍建立專祠。據情轉奏。仰祈聖鑒事。竊據山東文武現官江蘇之員。候補知府劉毓敏。前任山西太原鎮總兵田在田等十五人。呈稱原任兩江總督馬新貽。籍隸山東曹州府荷澤縣。以進士即用知縣。分發安徽。仰蒙朝廷特達之知。涖歷封圻。忠勤篤業。固已上邀宸眷。下愜輿評。而其家世謹厚。矜式鄉閭。生平踐履篤實。亦自卓然可傳。至於捍災禦患。遇事敢爲。鄉人咸被其更生之澤者。則尤在咸豐十一年團練之舉。是年南捻北竄。山東土匪蟻起。曹州地當極衝。各鄉築圍自保。人無固志。岌岌不可終日。馬新貽於四月間丁憂回籍。力任其難。不避險阻。親歷各圩。曉以利害。互相聯絡。於是桀驁者帖服。良懦者奮興。衆志成城。力卻悍賊。荷澤一縣。竟得轉危爲安。至十一月間。又經親王僧格林沁檄令督辦善後事宜。主持全局。籌畫經費。勾稽出內。百廢俱興。至今荷澤士民。言之無不稱頌。敢援殽祀於鄉之義。稍展里人愛敬之忱。擬請在於本籍荷澤縣建立專祠。春秋官爲致祭等情。稟請具奏前來。臣查馬新貽起家縣令。所至有聲。嗣以軍營積功。涖擢至安徽布政使。維時臣駐軍安慶。始與共事一方。每與商榷政事。沉幾內斷。言必中理。臣已心儀而深敬之。厥後眷昇日隆。聲望愈起。每蒞一任。從不輕易更張。而遇事變通。則於無形之中。默寓補救之策。其在兩江總

督任內。於用人行政。籌餉練兵。數大端。反覆推究。晝夜孜孜。或至達旦不寐。蓋有過人之聰明。而自視欲然。惟自不足。臣蒞任後。徧訪官紳士民。毫無間言。竊歎其治事之獨精。而能消盡矜張之氣。殊不可及。仰沐聖恩。高厚眷念。盡臣飾終之典。至優極渥。凡在臣僚。同深寅感。茲據劉毓敏等。臚舉辦理團練捍災禦患等情。雖屬該故督臣居家之一事。而有功鄉里。允宜尸祝不忘。相應奏明。請旨准在山東荷澤縣建立專祠。春秋官爲致祭。以順輿情。而彰忠藎。出自天恩。謹恭摺具陳。伏乞皇太后皇上聖鑒訓示。謹奏。

議復楚省淮南引地摺 同治十年二月十九日

奏爲湖南永州寶慶二府引地。未便改運粵鹽。并陳楚省鹽地。被川鹽侵佔太甚。懇請勅部核議。恭摺具陳。仰祈聖鑒事。竊准部咨。議復湖南巡撫劉峴奏請。於永寶二府。試行官運粵鹽一摺。衡州以下各屬。能否不致侵灌。近來淮南鹽釐收數。遂形短少。永寶二府。係淮南口岸。應由兩江督臣通盤籌畫。有無窒礙。准網之處。妥議覆奏等因。同治九年九月初十日。具奏奉旨依議。欽此。欽遵。轉咨前來。先經前兼署督臣魁玉咨明粵省會商妥辦。茲准兩廣督臣瑞麟咨稱。惟粵鹽務引地。各有定界。不能攙越。行銷湖南永寶二府。自粵東禁海遷竈以後。向食淮鹽。歷年引課奏銷。例由淮綱核辦。今湘省議行官運粵鹽。將粵課撥歸淮綱。不特款項轉虧。考成難以核計。且由粵運鹽至湘。節節均係粵省引地。其中不肖船戶。影射夾帶。沿途洒賣情弊。勢所難免。實於粵省引課。大有關係。況粵東遞年場產鹽。亦僅敷粵引配運。並無溢額。若加增永寶二府食鹽。場產不足。又復從何購買。湘省此議。雖爲籌裕餉源起見。而更易口岸。委屬窒礙難行。咨復核辦等因。臣查湖南永州府一州七縣。寶慶府一州四縣。自康熙六年。題准行銷淮鹽。雍正乾隆時。屢有改食粵鹽之議。均經內外臣工奏駁有案。前人立法。具有深意。行鹽必分界限。係我朝大經大法。凡兩省接壤之區。不許鄰私稍踰尺寸。引界一定。縱有奸商偷漏。影射越境。即以私論。民尙知所畏懼。官亦便於稽查。卽如蘇松常鎮。皆係浙鹽引地。與淮南場竈。僅隔一江。鎮江與瓜州。淮棧僅隔咫尺。路旣便捷。價亦輕減。然必須行銷浙鹽。而不能改食淮鹽者。正以界限分明。則紀綱永守也。湖南之永寶二府。地居湘岸極邊。又被粵私徧地侵灌。淮鹽久已不至該處。然不敢以二府改隸粵引者。誠以永寶一經改隸。則衡州亦將佔奪。長沙亦將侵銷。紀綱一紊。萬事紛亂。且留此二郡。藉以保長衡之藩籬。尙可冀將來之暢旺。且鹽

政不敢棄引地而不顧。猶之疆臣不敢棄邊邑而不守。今兩廣督臣既咨稱窒礙難行。而兩淮運司方濬頤亦詳稱湘省各商均不願以永寶引地改屬粵中。所有湘省改運粵鹽行於永寶之處。臣未敢輕於議准。抑臣更有請者。部庫餉源。以鹽課爲大宗。鹽課又以兩淮爲大宗。而兩淮引地之被侵奪者。湖北全侵於川鹽。湖南則既見侵於粵鹽。又大侵於川鹽。臣初次奏定淮南新章。但重加抽鄰稅。不遽拒絕鄰鹽。旋因軍務大定。又於七年奏請禁止川私入楚。無非欲收回引地。冀復昔時之盛。現查川私侵楚。以鄰數收數計之。同治四五年間。其勢稍衰。自七年分。逐漸加增。八九兩年。川鹽愈來愈旺。照淮南之六百觔成引者計之。每年占銷不下二十萬引。蓋一萬二千萬觔之多。而繞越夾帶漏稅之私。尚不在此數。湖北九年分所銷淮鹽。僅七萬餘引。比川鹽銷數不過三分之一。喧賓奪主。莫此爲甚。運庫課釐日減。上年秋冬所收。短絀尤甚。以致部撥大婚彩綢之款。不能應解。鹽積如山。庫空如洗。場商數百家艱窘尤甚。現在存堆在途。到泰到瓜之鹽。共有五十餘萬引。無處銷售。存堆者成本之占。已多。到瓜棧者有上倉住船之費。有換包折觔之耗。公私之虧累尤巨。日內紛紛至臣處呈稟。請令運商先買繳價。運商亦因楚岸不銷。觀望不前。今年垣產甚旺。臣勉強借給銀十五萬兩。令場商收買。春產場商猶以款少鹽多。不能徧收。深恐竄丁賣私通梟。尤慮其貧極生變。而船戶數千。亦因無鹽可運。窮迫無聊。蓋淮南自官商以至船窺夫役數十萬人。此兩月間。皆皇皇焉若生計之將盡者。不料鹽務竭蹶。一至於此。臣辦理不善。咎固難辭。亦實由楚岸引地。盡被川鹽侵佔。譬之農家被人奪去田產。舉室無措也。部文有云。通泰各分司場窺所產鹽觔。無從銷售。必致私梟競起。關係全局。何以數百十年。無有改易淮南口岸之議。殆不啻目擊淮南近日苦況矣。臣於七年九月奏禁川私入楚一疏。經戶部議准。欽奉諭旨。飭李鴻章等撤局停稅。飭吳棠封禁井窺。并令覈議覆奏。旋於八年秋冬。李鴻章覆奏川鹽未可遽禁者六端。而議於沙市設局。以川鹽八成准鹽二成配銷。吳棠覆奏川鹽躉楚。難以遽停者四端。而力言井之不宜封禁。經戶部先後議覆。均令前兩江督臣馬新貽力圖補救。委商覆奏。厥後沙市二八配銷之局。初議以觔計。繼議以包計。川鹽每包三百五十觔。至八十觔不等。八成則近三千觔。淮鹽每包連包索八十六觔。二成則僅一百七十二觔。名爲淮占二成。實則不及一成。由此川勢日旺。淮銷日微。淮南吞聲飲憾。而無知之何。今欲挽回一二。惟求聖上勅下戶部。主持全綱。剴斷是非。縱不能全禁川私入楚。亦

嘗使淮多於川。保守國家之大經大法。或淮八成而川二成。或淮七而川三。川雖極多亦不得滿四成。庶幾官私判別。成憲常昭。其分成之法。或指明某府某縣。暫准借食川鹽。或鄂境每年准行川鹽若干萬觔。不許溢額。但求部臣將大概規模斷定。其餘細微條目。臣嘗與川楚諸臣。妥商章程具奏。凡輟吏辦事。全賴各省和衷。乃克有濟。向來江督鹽務。本仗楚督緝私催銷。始有起色。道光年間。林則徐周天爵爲楚督時。則淮鹽大暢。他人爲督。其時並無袒護川鹽之事。而苟非一心維持。則淮銷常滯。蓋責弁役以緝私。課州縣以銷數。非本省大吏不足鞭策之也。目今湖廣督臣李瀚章曾在臣軍久管糧臺。相得益彰。深知其顧全大局。毫無私見。於臣處事件。無不竭力相助。然外間頗議其袒護川鹽。膜視淮鹽。非與淮爲難也。該督見鄂中水陸各營。京協各餉。需款甚鉅。恐一旦川鹽不暢。餉項驟減。前數任已成之規。不欲自己而墜。且見貧民散勇。謀食於川鹽者多。恐其失業滋事。此二者籌之愈熟。故於川鹽護之愈堅。今欲楚岸鹽綱之平允。但在楚督一心之轉移。一心向川。則川銷旺而衆商有恃矣。分心向淮。則淮銷旺而衆商亦有恃矣。臣所求者。淮鹽堆積場棧者五十餘萬引。堆積鄂湘者十餘萬引。於此七十萬引中。稍稍行銷楚岸。則運商場商之氣。爲之一蘇。煎丁捆役及謀食於淮之衆。不至失業滋事。卽爲大幸。而淮南本分之引地。不至棄而他屬。亦臣盡職之一端。至於餉項之贏絀。則臣絕不敢爭。昔年初定章程。淮鹽行楚。每引撥釐銀四兩二錢。解交湖北糧臺。後遞減爲二兩四錢。初章撥釐銀六兩一錢二分。解臣安慶糧臺。後遞減爲三兩九錢二分七釐。今欲鄂省減去川鹽入款。願將臣處應得釐銀。多撥數成歸鄂。抑或全數歸鄂。如其全數歸鄂。則每銷淮鹽一引。鄂省可得銀六兩三錢有奇。以近日銀價計之。合錢十一千有奇。較之鄂省銷川鹽六百觔。僅收川釐十千有奇。尙屬淮南於川於鄂。餉有盈無絀。果能勤緝川私。鄂中應無難辦之處。倘蒙皇上乾斷。楚省引地。必歸淮南作主。其餘各節。臣當與李瀚章吳棠妥商。無不通融辦理。俟湖北酌堵川鹽。稍有起色。再商湖北堵川之法。續行奏辦。所有議覆永州寶慶二府。未便改運粵鹽。暨楚省引地被川鹽侵佔。太甚緣由。恭摺具奏。請旨敕下核議。伏乞皇太后皇上聖鑒訓示。謹奏。

李世忠陳國瑞尋仇互鬪奏請參處摺 同治十年五月十一日

奏爲曾任提鎮大員尋仇構釁據實參奏恭摺仰祈聖鑒事竊前任江南提督李世忠於同治三年開缺回籍本

年三月間前來江寧。見臣一次。旋赴揚州。該提督有一房屋。賃與洋人。作爲教堂。限期已滿。索取甚急。幾至生衅。經常鎮道沈秉成會同運司方濬頤議由官收買此屋。仍賃洋人。酌核辦妥。該提督逗留在揚。與前任浙江處州鎮總兵陳國瑞相遇。二人本有夙仇。李世忠匿怨納交。與陳國瑞勾結往來。日夜演戲。不露聲色。忽於四月十四早。潛赴陳國瑞寓中。乘其不備。喝令殺黨。將陳國瑞捆縛赴船。行抵揚州之四里鋪地方。關禁舟中。意在嚇取財物。以圖報復私仇。彼時正值運鉞船一百餘號。及沿江上下湖廣船隻聚集兩岸。大半與陳國瑞同鄉。陳國瑞之姪陳澤培等。聞信趕至。立時喊幫救命。揚言有能救出陳國瑞者。立賞萬金。捉獲李世忠者。亦賞萬金等語。一時各船之水手。近地之棍徒。嘯聚數千人。呼聲震天。李世忠見衆怒難犯。將陳國瑞藏匿一船。派人送赴上游。而另覓小舟。爲逃生之計。因追者環繞。倉皇落水。遇救得生。其輜重及家屬之船。則被水手棍徒於十四日晚擄掠一空。婢妾四人。追逐登岸。內一人不知何時落水淹斃。其餘三人。擁至揚城。叢毆欺辱。經營務處候補道楊鍾琛塗遇喝禁。始行釋放。迭據揚州文武各官。及瓜州營汛馳稟各情。臣正在飭查間。卽鎮李世忠隻身來轅。開具失單。稟訴人財被擄等情。臣一面確切查訊。一面派員至江中迎提陳國瑞來轅。又據陳國瑞以無辜受辱。開具寓中失單。稟請查究。當經飭營務處候補道袁保慶。瓜州鎮總兵吳家榜。切實查辦。錄取兩造初次親供。又令其互相辯駁。再行呈遞二次親供。惟其中情節各執一詞。臣詳加察核。李世忠所供陳國瑞結怨從前之事。同治元年有在高良澗劫去鉛物一案。二年有壽州截殺李世忠部將朱元興等一案。三年有懷遠劫留鹽船及搶奪馬鞍皮衣二案。揆度當日情勢。正是陳國瑞打仗奮勇。聲名日起之時。李世忠則人人切齒。中外交疑。正聲名極壞之時。或畏陳國瑞而不敢與校。亦屬意中之事。惟高良澗一案。據李世忠供稱已由前漕督臣吳棠賠銀一千五百兩。陳國瑞則稱賠銀二千兩。壽州一案。其時陳國瑞並未到壽。親王僧格林沁因朱元興杜宜魁死於無辜。曾經奏參將苗景開李萬春正法。奉有諭旨。此二案業已了結。其未見明文者。懷遠鹽船一事。陳國瑞現供認擄得李世忠鹽船變賣充賞。馬鞍皮衣一事。陳國瑞現供係李世忠贈送。其爲強奪無疑。然當時并未呈報有案。此次又未先行申訴。從前軍營無理之事。祇可概置不論。以持大體。而弭爭端。臣據理駁斥。李世忠亦俯首無辭。至此次揚州起衅緣由。李世忠早蓄誑誘之計。陳國瑞猶是強梁之積習。其供詞之互異者。李世忠供稱陳國瑞索取山石。

陳國瑞則稱李世忠以山石相送。查山石在李世忠舊房。即係教堂內之物。李世忠明知難取。而故作挑釁之媒。陳國瑞自恃其強。而思逞一朝之忿。其情均屬可惡。又據李世忠供稱。陳國瑞硬要戲班。陳國瑞則稱李世忠派人送戲。查李世忠攜帶戲班。到處送演。陳國瑞好勇鬪狠。有意扣留。該二員素行頑獷。不足深論。惟捆縛一節。則爲此案之正文。據李世忠供稱。攜手偕同回船。并未凌辱。陳國瑞則稱。拖扭之時。揪落頭髮一綖。到船後。捆縛辱詈。又逼寫家信。勒取財物等語。查李世忠蓄憾已久。下此毒手。斷無不加凌辱之理。且以陳國瑞之狡譎暴戾。若非李世忠用強逞蠻。何肯隨同赴船。此尤理之顯然者。至陳國瑞之姪糾集船戶棍徒。聚衆釀命。則又爲李世忠意料所不及。害人而適以自害。凡逞兇私鬪。枝節橫生。大率類此。平情而論。四月十四日以前。兩人謬訂知交。往還親密。各懷猜疑。各蓄機心。陳國瑞供稱。屢以正言規勸李世忠。即係生平甘言欺人之伎倆。李世忠供稱。陳國瑞有所求索。事事遂其所欲。即係平日蓄謀害人之伎倆。兩人之心術相近。而李世忠尤爲陰狠。聞上年曾輒禁道員楊姓。勒令出銀數萬。始准放還。此次又輒禁陳國瑞。其行徑同於擄人勒贖。若照例嚴辦。厥罪甚重。臣仰體朝廷之意。業已保全於前。此次仍從寬議結。相應請旨。將前任江南提督李世忠。即行革職。免其治罪。勒令回籍。交地方官嚴加管束。如再出外滋事。一經查出。即行奏明重懲。陳國瑞於船戶聚衆之事。雖非其所主謀。而家屬糾衆釀命。亦不得盡諉爲不知。且擄怨由於昔年搶奪數次。報復之來。亦素行乖謬所致。應一併奏參革職。各亦難辭。姑念此次滋事。實由於李世忠尋釁。似宜分別輕重。相應請旨。將記名提督前任浙江處州鎮總兵陳國瑞。以都司降補。勒令速回湖北原籍。不准再在揚州逗留。以免滋生事端。船戶水手。滋事之人。現已拿獲二人。俟再拿要犯後。與陳國瑞之姪分別歸案究辦。另行咨結。所有曾任提鎮大員尋仇擄釁。據實參奏緣由。恭摺由驛三百里具陳。伏乞皇太后皇上聖鑒訓示。謹奏。

聖訓類到謝恩摺 同治十年六月十二日

奏爲恭謝天恩。仰祈聖鑒事。竊臣欽奉頒發文宗顯皇帝聖訓全部。共二十二函。由便員自京帶出。敬謹祗領。當即恭設香案。望闕叩頭。謝恩。伏維我朝成憲。於恭纂實錄之外。特派巨工。編集聖訓一書。所以表勳業於文章。炳球圖於霄漢也。我文宗顯皇帝臨御十有一年。無時不以法祖愛民爲念。無日不在憂勤惕厲之中。聖德謙冲。

訓詞深厚。鑒中外臣民之望。軼漢唐詔令之文。偶舉偏端。無不經天緯地。獲觀全帙。允足震古鑠今。偉烈豐功。陋封禪於七十二代。盛德大業。契真源於三五六經。凡黃閣之傳宣。暨丹臺之記注。罔弗靡牟六合。函蓋四瀛。摹繪平乾坤。神明平矩矱。仰維我皇上道隆繼述。志在繼承。合人間共讀之至文。成天上難窺之祕笈。命史臣而詳校。寵疆吏而分頒。虹光下賁於石渠。鴻寶遠傳於江介。臣拜經比重。發篋增榮。感三朝優渥之恩。懷兩字因循之誠。在昔備員。親聆天語。提撕。洎乎承乏戎旃。悉稟廟謨。指授。追思往事。具在斯編。仰鉅製於訓誥典謨。欽至德於聖神文武。書萬本而誦萬徧。如見先皇圖治之心。諷丕顯而烈丕承。大啓聖主中興之業。所有微臣感激下忱。謹繕摺叩謝天恩。伏乞皇太后皇上聖鑒。謹奏。

代遞張亮基遺摺摺 同治十年六月十二日

奏爲曾任總督大員在籍病故。循例代遞遺摺。仰祈聖鑒事。竊前任雲貴總督張亮基。於同治六年在署貴州巡撫任內。被議革職。暫寓湖南就醫。九年五月。始回江省。因原籍徐州。房屋無存。寄居揚州府城。十年四月十七日。在寓所病故。臣查張亮基由內閣侍讀。蒙宣宗成皇帝特達之知。由知府甫經兩載。洊擢封疆。咸豐二年。粵逆圍攻湖南省城。張亮基在巡撫任內。嬰城固守。轉危爲安。湘人至今德之。遠調任山東等省。籌餉籌兵。力顧大局。嗣經升補雲貴總督。告病開缺。同治元年奉命署理貴州巡撫。軍書旁午。瘠苦異常。支持五年之久。實已力任其難。上年臣道經揚州。張亮基在寓養病。嘗晤談兩次。歷述黔省貧困情形。自稱殫竭心力。無補時艱。至今媿悚等語。拳拳愛國之誠。見於詞色。不意積病已深。遽爾身故。殊堪憫惻。茲據該家屬呈遞遺摺前來。理合恭摺代遞。伏乞皇太后皇上聖鑒。謹奏。

擬選子弟出洋學藝摺 同治十年七月初三日

奏爲擬選聰穎子弟。前赴泰西各國。肄習技藝。以培人材。恭摺仰祈聖鑒事。竊臣國藩上年在天津辦理洋務。經前江蘇巡撫丁日昌奉旨來津會辦。屢與臣商榷。擬選聰穎幼童。送赴泰西各國書院。學習軍政船政。步算製造。諸書。約計十餘年。業成而歸。使西人擅長之技。中國皆能諳習。然後可以漸圖自強。且謂攜帶幼童。前赴外國者。如四品銜刑部主事陳蘭彬。江蘇候補同知容闕。皆可勝任等語。臣國藩深達其言。會於上年九月本年正月。兩

次附奏在案。臣鴻章復往返函商。竊謂自斌春及志剛孫家穀兩次奉命遊歷各國。於海外情形。業已窺其要領。如輿圖算法。步天測海。造船製器等事。無一不與用兵相表裏。凡西人游學他國。得有長技者。歸即延入書院。分科傳授。精益求精。其於軍政船政。直視爲身心性命之學。今中國欲仿倣其意。而精通其法。當此風氣既開。似宜亟選聰穎子弟。攜往外國肄業。實力講求。以仰副我皇上徐圖自強之至意。查美國新立和約第七條。內載嗣後中國人欲入美國大小官學習學各等文藝。須照相待最優國人民一體優待。又美國可以在中國指准外國人居住地方。設立學堂。中國人亦可在美國一體照辦等語。本年春間。美國公使過天津時。臣鴻章面與商及。允俟知照到日。即轉致本國。妥爲照料。三月間。英國公使來津接見。亦以此事有無相詢。臣鴻章當以實告。意頗欣許。亦謂先赴美國學習。英國大書院極多。將來亦可隨便派往。此固外國人所深願。似於和好大局。有益無損。臣等伏思外國所長。既肯聽人共習。志剛孫家穀又已導之先路。計由太平洋乘輪船逕達美國。月餘可至。當非甚難之事。或謂天津上海福州等處。已設局仿造輪船鎗礮軍火。京師設同文館選滿漢子弟。延西人教授。又上海開廣方言館。選文章肄業。似中國已有基緒。無須遠涉重洋。不知設局製造。開館教習。所以圖振奮之基也。遠適肄業。集思廣益。所以收遠大之效也。西人學求實濟。無輪爲士爲工爲兵。無不入塾讀書。共明其理。習見其器。躬親其事。各致其心思巧力。遞相師授。期於月異而歲不同。中國欲取其長。一旦遽圖盡購其器。不惟力有不逮。且此奧竅中苟非徧覽久習。則本原無由洞徹。而曲折無以自明。古人謂學齊語者須引而置之莊嶽之間。又曰百聞不如一見。比物此志也。況誠得其法而歸。觸類引伸。視今日所爲孜孜以求者。不更擴充於無窮耶。惟是試辦之難有二。一曰選材。一曰籌費。蓋聰穎子弟。不可多得。必其志趣遠大。品質樸實。不牽於家累。不役於紛紜者。方能遠游異國。安心學習。則選材難。國家帑項。歲有常額。增此派人出洋肄習之款。更須措辦。則籌費又難。凡此二者。臣等亦深知其難。第以成山始於一簣。蓄艾期於三年。及今以圖。庶他日繼長增高。稍易爲力。爰飭陳蘭彬容闈等。悉心酌議。加以復核。擬派員在滬設局。訪選沿海各省聰穎幼童。每年以三十名爲率。四年計一百二十名。分年搭船赴洋。在外國肄習十五年後。按年分起挨次回華。計回華之日。各幼童不過三十歲上下。年力方強。正可及時報效。聞前閩粵寧波子弟。亦時有赴洋學習者。但止圖識粗淺洋文洋話。以便與洋人交易。爲衣食計。此則

入選之初。慎之又慎。至帶赴外國。悉歸委員管束。分門別類。務求學術精到。又有繙譯教習。隨時課以中國文義。俾識立身大節。可冀成有用之材。雖未必皆爲偉器。而人材旣衆。當有瑰異者出乎其中。此拔十得五之說也。至於通計費用。首尾二十年。需銀百二十萬兩。誠屬巨款。然此款不必一時湊撥。分析計之。每年接濟六萬。尙不覺其過難。除初年盤川發給委員攜帶外。其餘指有定款。按年預撥。交與銀號陸續匯寄。事亦易辦。總之。圖事之始。固不能予之甚吝。而遠望之甚賒。况遠道異國。儲才備用。更不可以經費偶乏。淺嘗中輟。近年來設局製造。開館教習。凡西人擅長之技。中國頗知究心。所須經費。均蒙諭旨准撥。亦以志在必成。雖難不憚。雖費不惜。日積月累。成效漸有可觀。茲擬選派聰穎子弟赴外國肄業。事雖稍異。意實相同。謹將章程十二條。恭呈御覽。合無仰懇天恩。飭下江海關於洋稅項下。按年指撥。勿使缺乏。恭候命下。臣等卽飭設局挑選聰穎子弟。妥慎辦理。如有章程中未盡事宜。並請飭下總理衙門酌核更改。臣等亦可隨時奏請更正。所有擬選聰穎子弟。前赴泰西各國肄業。技藝緣由。謹合詞恭摺具陳。伏乞皇太后皇上聖鑒訓示。謹奏。

謹將挑選幼童前赴泰西肄業酌議章程。恭呈御覽。

一、商知美國公使。照會大伯爾士頓。將中國派員每年選送幼童三十名。至彼中書院肄業緣由。與之言明。其束脩膏火一切。均中國自備。並請俟學識明通。量材拔入軍政船政兩院肄習。至赴院規條。悉照美國向章辦理。

一、上海設局經理。挑選幼童。派送出洋等事。擬派大小委員三員。由通商劉飭大臣在於上海寧波福建廣東等處挑選聰慧幼童。年十三四歲至二十歲爲止。曾經讀中國書數年。其親屬情愿送往西國肄業者。卽會同地方官取其親屬甘結。并開明年貌籍貫存案。攜至上海公局考試。如資性聰穎。並稍通中國文理者。卽在公局暫住。聽候齊集出洋。否卽撤退。以節糜費。

一、選送幼童。每年以三十名爲率。四年計一百二十名。駐洋肄習十五年後。每年回華三十名。由駐洋委員臚列各人所長。聽候派用。分別奏賞頂戴官階差事。此係官生。不准在外洋入籍逗留。及私自先回。違謀別業。

一、赴洋幼童。學習一年。如氣性頑劣。或不服水土。將來難望成就。應由駐洋委員隨時撤回。如訪有金山地方。

華人年在十五歲內外。西學已有幾分工夫者。應由駐洋委員隨時募補。以收得人之效。臨時斟酌辦理。

一、赴洋學習幼童入學之初。所讀何書。所肄何業。應由駐洋委員列冊登註。四月考驗一次。年終註明等第。詳載細冊。費送上海道轉報。

一、駐洋派正副委員二員。每員每月薪水銀四百五十兩。繙譯一員。每月薪水銀二百五十兩。教習二員。每員每月薪水銀一百六十兩。

一、每年駐洋公費銀共約六百兩。以備醫藥信資文冊紙筆各項雜用。

一、正副委員繙譯教習來回川費。每員銀七百五十兩。

一、幼童來回川費及衣物等件。每名銀七百九十兩。

一、幼童駐洋束脩膏火屋租衣服食用等項。每名每年計銀四百兩。

一、每年駐洋委員將一年使費開單知照上海道轉報。倘正款有餘。仍涓滴歸公。若正款實有不足之處。由委員隨時知照上海道稟請補給。

一、每年駐洋薪水膏火等費。約計庫平銀六萬兩。以二十年計之。約需庫平銀一百二十萬兩。

大閱事竣摺 同治十年十一月初一日

奏為微臣查閱營伍事竣回省。陳明大概情形。恭摺仰祈聖鑒事。竊同治九年輪應查閱江蘇營伍。前督臣馬新貽未及舉行。臣蒞任後。奏請展緩。嗣經定於八月十三日出省。校閱均附片具奏在案。伏查江蘇通省水陸各營大閱之典。自道光三十年以後。迄未舉行。東南用兵。十有餘年。綠營幾同虛設。軍務肅清。稍稍補募。缺額尙多。而挑練政設。日有增損。此次通行校閱。約有四宗。曰原設之綠營。即經制額兵也。曰新改之水師。即臣七年冬月所奏經部議准者也。曰挑練之新兵。即就各營挑出另練。馬新貽丁日昌所奏准者也。曰留防之勇營。昔年未撤之勇。陸續酌留者也。臣先於八月十二日在省城閱看江寧督標四營。暨新兵五營。又星字勇丁二營。十三日啓程。十八日至揚州。二十日閱看揚州城守鹽捕二營。並調閱奇兵泰州泰興瓜州青山三江等營。又慶字勇丁三營。二十九日及九月初一初二日。在靖江閱看淮揚鎮標中右兩營。及挑練之新兵營。並閱漕標中左右三營。淮安

城守海州鹽城東海宿遷廟灣佃湖洪湖等營。初三日。由陸路赴徐州。初九初十日。閱看徐鎮中營城守營及挑練之新兵二營。並調閱蕭管宿州營。又鳳字勇丁二營。仍由清淮南旋。二十日。在鎮江閱看鎮江營。並調閱崧南。崧北二營。二十三日。在常州閱看常州營。並調閱孟河江陰靖江等營。二十六日。在福山閱看福山標鎮左右二營。並調閱狼山鎮標陸汛。及右營劉河通州海門等營。十月初二日。在蘇州閱看撫標左右城守等營。並調閱平望太湖等營。又慶字等勇丁二營。初六日。在崧江閱看提標中左前後松江城守等營。並調閱金山青村柘林等營。又駐防鳳凰山洋人教練之勇丁三營。十二日。在吳淞口閱看吳淞川沙南匯掘港等營。並調閱提右營。又蘇松鎮標中左右等營。又在海口閱看外海艇船六營。內洋八團舢板五營。及新造輪船操演一次。遂於十五日。由輪船回抵江寧省城。綜計通省水陸各營。除浦口溧陽二營。兵數太少。淮陽鎮左營清江城守營蔣壩營及葦蕩左右二營。均係河營改操。但將官弁校閱。未經調閱兵丁外。其餘各營。查閱一周。計陸營四十有一。水營十有一。挑練之新兵營十有一。留防各勇之營十有二。兵數則原額三萬三千四百名有奇。現存二萬四千二百名有奇。其中多寡參差不一。有已逾原額之半者。有不及原額三分之一者。兵數較多之營。演陣尙有可觀。其畸零不成隊者數營。合操仍難整齊。緩急殊不足恃。臣悉心酌核。就今日之情形。準以舊時之條例。參訪當世有識之議論。其必宜更改者。約有數端。向例營兵差操二字混在一處。然差則護餉押犯緝捕等事。必須散處塘汛。各專責成。操則習技練陣聽令等事。必須聚處營盤。同受約束。其事向不相同。近來聚處紮營事。有神機營。直隸練軍。及江寧蘇州之新兵。皆於額兵之中另挑立營。既須屯聚常練。即不能散處營盤。而各項差使。勢又不能盡廢。將來經制之兵。似宜分差操爲兩起。差則兵宜散而少。官宜以分塘分汛爲額。操則兵宜聚而多。官宜以分營分哨爲額。此舊制之宜改者一也。向例綠旗餉銀馬兵二兩。戰兵一兩五錢。守兵一兩。米則一律日支八合三勺。即使照數滿發。猶不足以供事畜之資。而各省司庫支絀。尙有祇發七成八成者。勇丁口食或多至一倍二倍。兵丁或小買營生。或手藝餬口。應名充數。出征則漫無鬥志。毫不足恃。此天下綠營之通病。目前直隸練軍。及江蘇新兵各營。皆已加餉。然加餉而不裁兵。則度支立匱。斷不足以持久。此舊制之宜改者二也。向例各營軍械俱用烏鎗門藥。風則吹散。雨則沾濕。實不利於戰陣。近年各處兵勇。俱用洋鎗銅帽。精而且捷。風氣一開。人人以烏鎗門藥爲太

苦。在上者雖有大力。不能強遏人情。軍事最貴神速。而最忌遲鈍。準情度勢。恐不能不全用洋鎗。而各項器械。亦有當用洋製者。此舊制之宜改者三也。向例各路水師。並不講求船隻。造船經費不取之於司庫。但令官員攤派。或由紳富捐辦。兵丁仍用馬戰守名目。殊覺名實不符。竊謂既號水師。即宜居住舟中。官兵皆以狎水爲能。但有頭舵鎗礮之分。并無馬兵戰守之名。日漸月靡。或者由支河而漸及大洋。由小舟而漸及巨艇。由防內而漸及禦外。亦銖積寸累之義。將來各省水師。以皆宜籌造船之費。以船爲家。但可兼操陸隊。不能分管陸汛。此舊制之宜改者四也。以上四端。如水師先重船隻一節。臣於同治七年奏改章程。厥後馬新貽修造外海內洋裏河各船隻。大致粗備。操練亦頗勤篤。其軍械全用洋鎗一節。各省果能籌款。均可自行奏改。其差兵與操兵分爲兩途。及酌加餉數二者。則大變舊章。關係全局。非奉有特旨飭改。或由部臣議定通行。外省臣工。不敢率爾立意。遽議更張。臣前改水師。已自覺其鹵莽。今閱綠營。豈敢復有變更。惟當就缺額最多之營。飭令招足一半。認真操練。稍復舊觀。亦未敢必其遂堪折衝禦侮也。所有查閱營伍事竣回省陳明大概情形緣由。理合繕摺具奏。伏乞皇太后皇上聖鑒訓示。謹奏。

續議江蘇水師事宜摺 同治十年十二月二十一日

奏爲續議江蘇水師事宜。恭摺仰祈聖鑒事。竊臣議改江蘇水師章程。於同治七年十一月初四日。專摺具陳。旋准兵部會議覆奏。請旨敕下兩江總督等查照各條。妥爲辦理。各等因。於同治八年三月間。知會到蘇。彼時臣已赴任直隸。前兩江督臣馬新貽逐條核辦。與提臣李朝斌及狼山福山蘇松三鎮總兵。詳細斟酌。略有損益。並諮訪熟於江蘇營伍之人。參酌舊則。釐定新章二十五條。馬新貽業已定稿過印。擬於大閱之時。察看各處地勢。再行具奏。臣接任後。查閱馬新貽所定原稿。大致略備。其中有數事。與原奏稍異者。如裏河五營內之崧南崧北兩營。地段太寬。船隻太少。提臣李朝斌屢有改章之請。馬新貽以奏定之案。不欲率爾更張。往返籌議。至再至三。今年派員查勘裏河各地段一次。始定仍如前議。略添船隻。而於汛地之中。專以官塘幹河爲重。支河汶港處分從寬。俾責任較專。而巡查易徧。此馬新貽之未確定。而近日妥議者也。又如蘇松狼福等三鎮額兵。臣初次議奏。除水兵分船派定外。每鎮各留陸兵一百名。本謂水師以船爲家。不必尙存陸兵名目。嗣後馬新貽博采衆議。僉謂

三鎮陸兵。有必須承應之差。有不可盡廢之勢。改爲蘇松狼山兩鎮。各留兵五百名。福山鎮本有右營陸兵。計原額五百三十三名。現祇存兵二百名。擬再招二百名。合之原奏之一百名。亦成五百名之數。其統帶之官弁。互有更換。又如海門一營。原奏擬歸狼山鎮統轄。嗣經李朝斌與馬新貽會商。以海門營汎地離狼山鎮爲遠。而離蘇松鎮爲近。擬改撥蘇松鎮管轄。以期形勢聯絡。此二條皆馬新貽所改定。臣復加察核。無以易之者也。其餘各條。俱就原奏應辦之事。一一臚列。大致與長江章程相彷彿。惟彼則創始。此則酌改。故於新章之中。仍須兼顧舊制。馬新貽屬稿時。苦心經營。實屬詳備。臣就原稿二十五條。刪減三條。歸併一條。定爲二十一條。另繕清單。恭呈御覽。伏乞敕下各衙門。詳議定奪。臣之微意。大都以水師之住船。譬諸陸師之紮營。狎習舟楫。爲水師之根本。講求船礮。爲禦外之根本。是以區區籌議。迭次瀆陳。然皆不過就嘉慶道光年間之規模。稍加整理。至異日輪船愈多。或者外海內江。悉用輪舟。則今日所辦之船。所立之法。將悉爲可棄之筌蹄。是所望於後之賢者。因時變通。臣之才智。尙未暇及此也。至馬新貽所議章程。近年行之。已有成效。自應參酌上陳。以補臣原奏所不逮。所有續議江蘇水師事宜緣由。謹會同江蘇巡撫臣張之萬。恭摺具奏。伏乞皇太后皇上聖鑒訓示。謹奏。

謹將續議江蘇水師章程二十一條。開單恭呈御覽。

第一條 外海六營輪流巡哨

查原奏外海六營。無事之時。輪流巡哨。有事之際。一體剿捕。該六營既不分汎地。自應按月輪巡。今擬定以十二船分爲三起。第一起四船駐馬蹟。東巡至陳錢。西巡至大小傘山七山。北巡至四礮雞骨礁等處。第二起駐十礮。東巡至佘山。北巡至洋漲沙木錨套。南由銅沙巡至乍浦交界之葛蓬墩瀆水曹。東南巡至大小七山及雞骨礁等處。第三起駐塘鱸港。南巡至洋漲沙木錨套。東北巡至東凌斗崙王家等港一帶。南匯營與掘港營合爲一起。蘇松中左兩營合爲一起。吳淞川沙兩營合爲一起。由各該鎮督帶分起出洋。每起每營分雙單月。第一號承值上半月。第二號承值下半月。遇有失事。即將承值員弁參處。俟定案後。彙同營制。送部查核。

第二條 內洋五營劃分汎界

查原奏內洋五營。略分汎地。自應劃清界限。以專責成。狼右營轄北岸上游。所部八團。舢板十二號。擬以狼山

港駐四船。營船港駐四船。老洪港駐四船。西以張皇港與長江之江陰營分界。東以牛洪港與北岸下游之通州營分界。南以中洪與南岸上游之福左營分界。通州營轄北途下游。所部八團。舢板十二號。擬以宋季港駐四船。太平港駐四船。三丫支船駐四船。西以牛洪港則北岸上游之狼右營分界。東以塘鱸港與外海分界。南以協安永旺青魚楊家惠安等沙中洪與蘇松右營分界。福左營轄南岸上游。所部八團。舢板十二號。擬以白茆港駐四船。澆浦港駐四船。鹿茆港駐四船。西以蝦蟆山與長江之江陰營分界。東以七丫港口與南岸下游之海門營分界。北有中洪與北岸上游之狼右營分界。海門營轄南岸下游。所部八團。舢板十二號。擬以劉河口駐四船。吳淞口駐四船。黃家灣駐四船。惟黃家灣一帶。並無泊船之港。擬令暫與吳淞寄稅。仍按赴該處巡哨。西以七丫港口與南岸上游之福左營分界。東以紅星塔與海外分界。東北以江流入海。並崇寶石頭等沙中洪與蘇松右營分界。蘇松右營轄崇明南北兩岸。所部八團。舢板十二號。擬以薑沙頭駐四船。協安沙駐四船。永興沙駐四船。西南以江流入海。並崇寶石頭等沙。中洪與南岸下游之海門營分界。北以協安永旺青魚楊家惠安等沙中洪與北岸下游之通州營分界。東以十墩外沙脚淺水與外海分界。各按五日會哨一次。逢五與本營會哨。逢十與別營會哨。再北岸上游之狼右營。南岸上游之福左營。其迤西均與長江之江陰營交界。應令於每月初一十五兩日。各會哨一次。庶江海聯爲一氣。可以呼應靈通。至各該營與陸營分界。以近岸一里爲率。其沿江各口。與陸營分界。以進口五里爲率。所有各汛地段。應俟定案後。彙造營制冊圖。送部查核。

第三條 裏河五營劃分汛界

查原奏淞南淞北兩營。分轄吳淞江南北兩岸。太湖左右兩營。分巡太湖西東兩路。提標右營。專防黃浦一江。凡水師與陸營交界之處。固應劃清界限。卽各該營汛境。亦應明晰分定。今擬提右一營。分前後左右四哨。內前後兩哨。每船五號。左右兩哨。每船四號。尙餘兩號。作爲營官總巡之船。太湖左右淞南北四營。各分前後左右四哨。每哨四船。共計十六船。太湖兩營。各餘八團。舢板兩號。淞南淞北兩營。各餘舢板二號。均作爲營官總巡之船。淞南營轄吳淞江以南。北自三江口以東。以吳淞江爲界。三江口以西。以致和塘與淞北營分界。南以運河震澤梅埕塘與太湖左營分界。淞北營轄吳淞江以北。北自三江口以東。以吳淞江分界。三江口以西。以

致和塘與嶽南營分界。致和塘以西。以運河與太湖右營分界。太湖左營。巡緝東路。東南以運河震澤梅嶺塘與嶽南營分界。太湖右營。巡緝西路。西北以運河與嶽北營分界。其左右兩營。即以沙墩港口分界。其運河由望亭至沙墩港口。歸左營巡緝。由沙墩港出口。即屬右營湖面。仍歸吳塘山馬山歧嘴沙墩各汛巡緝。提標右營。專防黃浦一江。自三泖起。至吳淞口止。專請巡緝。惟太湖等四營汛地。湖蕩支渠。紛歧錯出。應以官塘幹河爲專責。以支河汶港爲兼巡。每一營四哨。分紮四段。船流巡哨。各專責成。各該營與陸營分界。應以近岸一里爲率。其鎮市設有陸汛。係在官塘幹河者。一里以內。水陸分任其責。其有與長江內洋各營分界處所。應以進口五里爲率。所有各該營分隊駐船汛界。已飭開具細摺呈送。應俟定案後。彙造營制冊圖。送部查核。

第四條 嶽南嶽北太湖左右四營酌添船隻

查原奏嶽北嶽南兩營。各設舢板船十五號。太湖兩營。各設舢板船十三號。兼用八團舢板各二號。提標右營。設舢板船二十號。每舢板船配兵十四名。復查提右營專防黃浦一江。船隻尙數分布。嶽南北及太湖左右四營。地段太寬。船隻太少。分巡扼要。在在難周。今擬各四營各添船三號。每船仍配兵十四。計四營共添船十二號。應添兵一百六十八名。加以添派官弁。應給廉糧。經費雖不免增多。而於設防巡緝。較有裨益。

第五條 水營所遺陸汛分別移併留防

查江蘇水師營分。均係水陸兼防。新章水師以船爲家。所遺陸汛。不特巡緝地面。前有城池倉庫接遞之責。必須撥歸附近之陸汛兼管。其相離較遠。無可歸併者。仍須留撥陸兵。以資巡緝。而免偏廢。內太湖左右兩營。所轄之東山馬曠山等處。孤峙湖心。汪洋巨浸。無附近陸營可以歸併。擬於該兩營酌留陸兵五十名。外委一員。以資分布巡緝。並於舊制額外內。酌留一員糧餉。即在五十名兵數內支給。其所留之兵。即於提標各營。未經募足之空額內調撥。各按派防汛地。歸該兩營管官。就近兼轄。其陸汛之鄰近蘇常等汛者。仍就近撥歸分管。至零標右營。退出陸汛。撥歸附近之松江城守營兼轄。並擬將提後營游擊移駐嘉定。轄吳淞劉河兩營。所遺陸汛。以柘林營都司移駐南匯。接管川沙南匯兩營。所遺陸汛。以收居中調度之益。其柘林營所遺本汛。則撥歸金山營兼管。其中南匯營舊汛之一帶地方。與青村營相近。擬即撥歸青村營管轄。其提後營所遺全汛。撥

歸提前營兼管。又福山鎮中左兩營。所遺陸汛。查有福山右營。現係專管陸路。應將該兩營舊汛。併歸管理。其福中營議裁之兵一百名。歸右營分防陸汛。又狼山中左右掘四營。陸汛地面甚廣。附近之泰州泰興等營。相距太遠。勢難兼顧。該鎮原留之陸兵一百名。實屬不敷分布。茲擬於狼山鎮兼轄之泰州泰興揚州三營。各撥兵額一成。或一百四十三名。又在附近之常州江陰靖江三江等營。抽撥兵丁二百名。又於提標空額內。撥補五十七名。共成四百名。千把外委八員。前赴狼鎮所屬於城守及緊要汛地。分別填紮。原奏有通州營爲狼山鎮中軍。今查通州營地處下游。離城較遠。應改以泰州營游擊爲狼山鎮中軍。所有原留及擬調之陸兵。均歸該中軍游擊就近兼轄。應領糧餉。均照陸營舊制。其泰州地方擬將泰興都司移駐。以重汛地。所有各該營水陸分汛冊圖。俟定案彙齊。送部查核。

第六條 京口三營陸汛墩堤分別管轄

查京口中右兩營新章。改爲崧南崧北兩營。京左營撤裁。該三營江面。均係長江水師汛地。其臨江之小舟。水師亦可兼顧。惟各營原轄有大沙洲一處。回環百有餘里。必須撥歸陸汛巡防。查該處與北岸三江營相似。擬在該營抽兵四十名。移駐大沙洲。並留京左營裁缺千總一員。作爲專汛。歸三江營守備管轄。又道光年間。奏設防江墩堤。京口中左右三營汛內。有原管大小石灣劉團沙團山大二磯頭。東生州等墩堤數處。事關江防。舊制既無陸營接防。擬撥歸附近之長江水師管轄。以昭慎重。

第七條 酌擬改隸營分並留設守備

查原奏內洋南岸下游海門營主之。歸狼山鎮管轄。今查海門營新汛。在川沙寶山太倉州境內。與狼山鎮相隔幾及百里。呼應欠靈。而與蘇松鎮則相離較近。應將海門營改隸蘇松鎮管轄。又太湖左營。係副將營分。並統轄右營都司。而本營所屬。僅止千把弁缺。與營制稍有未符。擬請留設守備一缺。即將原奏移調南匯營之太湖右營。守備移調太湖左營。專調錢糧子藥軍裝等件。既與體制相洽。亦於人地相宜。並於該營添設之三船內。少設外委一缺。以符其數。至南匯營應添之守備一員。改以狼中營。撥歸川沙營之守備一員移調。其川沙營二號艇船正哨。查原奏川沙營本有應裁千總一員。應請毋庸議。裁撥歸該艇填補。以免輟轉調撥。

第八條 緊要陸汛酌定多留陸兵

查蘇松鎮駐紮崇明四面皆海。中左右三營。所遺陸汛。週圍三四百里。汛口七十餘處。外接大海。內連長江。向爲水陸兼防扼要之區。新章中左兩營。改爲外海。右營改爲內洋。哨官住懸。不准登岸。則所遺陸汛。萬難虛懸。且有城池倉庫錢糧接邊之責。非有陸兵駐防。不足以資巡哨。又上海地方。華洋雜處。人煙稠密。該處向設之提標右營。現已專管水師。縣城內外。地面冗闊。賊暴查奸。在在均關緊要。亦非酌留陸兵不可。現擬於蘇松三營所遺陸汛內。除原留陸兵一百名外。加留四百名。千把外委十員。歸蘇松中營兼轄。上海留兵二百名。汛兵兩員。並添設守備一員。仍歸提右營參將就近兼轄。所留弁兵。均於提標各營未經募足之額內調撥餉項。不另加增。其守備一缺。擬於水營中多留千總一員。而調一守備於陸汛。庶幾海疆要隘。不致有空懸之慮。

第九條 核定將弁處分

查舊制武職疏防搶劫案件。分別參處。現在外海內洋裏河三大支水師。均係住船。而自都司以下。均屬哨官。並無離汛里數遠近之分。亦無專汛協防兼轄統轄之別。四船駐防一處。遇有失事之案。未便將四船哨官一律開參。茲定外海艇船十二號。分三起。按月輪流巡哨。計兩營四艇爲一起。每起每營分雙單月分。一號承值上半月。二號承值下半月。如有失事。即將承值將弁參處。由營官將職名開送查參。各營一律照辦。內洋每港派駐四號。分兩船出巡港之上游。兩船出巡港之下游。仍按逢五與本營會哨。逢十與別營會哨。以一船承值半箇月。派巡地段內。設有失事。即將輪巡員弁參處。亦由營官將職名開送查參。裏河五營。內提右一營。專防黃浦一江。如有失事。由營官開送職名查參。其餘四營。每營分爲四段。每段派船四號。以官塘幹河爲專責。以支河汶港爲兼巡。各認巡地。不必會哨。如有失事。在官塘幹河者。照專汛之例。由營官開送職名查參。在支河汶港者。照兼轄之例。開參。均應照長江章程。以都守千把外委五項哨官爲專汛之官。以副參游都司四項哨官爲本轄之官。遇有搶劫案件。專汛哨官係何職名。應由該營官指出初參。仍照定例。四月限滿。題參疏防。專汛官住俸。本轄者罰俸六箇月。二三四等參。向例一年限期者。酌量加重。改爲各予限八箇月。二參限滿。專汛官降一級留任。本轄者罰俸一年。三參限滿。專汛官降二級留任。四參限滿。專汛官加重降二級調用。不准抵

銷。如汛內有一夜連劫數次情事。仍照舊例。俟三箇月限滿犯無弋獲。即將專汛官降二級調用。本轄官降二級留任。倘能於限內獲犯過半。兼獲盜首者。均准免其參處。失事之時。管官一面報明提鎮。移知臬司。州縣官一面稟明本府臬司。如本營屆期不參。卽由臬司揭參。

第十條 各營現定船數

查原奏外海六營。各撥艇船二號。內洋五營。各撥八團。舢板十二號。裏河五營。內提標右營。撥長江舢板二十號。崧北崧南兩營。各十五號。太湖兩營。各十三號。兼用八團舢板十二號。又提鎮各撥火輪船一號。又現撥崧南北及太湖左右四營。各添船三號。共計十二號。所有外海艇船十二號。已由廣東釘造齊全。按營撥給。其內洋五營八團舢板六十號。太湖兩營八團舢板四號。亦經吳城燕子磯兩廠如數造齊。分派駕駛。其有須改用領江船者。經費相等。俟下次修造時。酌量改換。裏河五營。內太湖左右。崧南北四營。所用舢板。亦經飭廠次第造齊。其提標右營。所須長江舢板二十號。先在太湖水師裁撤之船內擇用五號。其餘十五號。另行釘造給領。至輪船一項。現在尙未造齊。已另案奏明。歸前臺灣道吳大廷統轄操演。俟將每年蒙養輪船經費籌定後。應否分撥一提三鎮爲巡防外海內洋之用。屆時專案奏辦。

第十一條 酌定外委缺數

查部議江蘇所裁之缺。因遷就姑存舊官。全裁外委。未裁千把。究應裁千把若干。外委若干。應令妥洽情形。再行籌議。復查各營舊制。每千把一員。設立外委一員。將來千把出缺。應照該營缺數補選外委。計南匯營應裁二號副哨把總一員。改設外委一員。蘇松中營應裁二號副哨把總一員。改設外委一員。蘇松左營應裁二號副哨千總一員。改設外委一員。吳淞營應裁二號副哨把總一員。改設外委一員。川沙營應裁二號副哨把總一員。改設外委一員。掘港營應裁二號副哨把總一員。改設外委一員。蘇松右營福山左營狼山右營通州營。原定千總外委缺數。應請照舊。海門營應裁千總二員。把總二員。改設外委四員。提標右營。應裁千總三員。把總四員。改設外委六員。太湖左右兩營。應裁把總七員。改設外委七員。崧北營應裁千總一員。把總三員。改設外委四員。崧南營應裁千總一員。把總三員。改設外委四員。以符營制。又福山左營現留陸兵一百名。應留該

營原額外委一員專管陸兵。

第十二條 酌定裁缺外委薪糧

查部議現任武職裁缺留標另補。照原任職銜支給俸薪。惟外委一項向食馬兵糧餉。而本案管制。又無馬步戰兵名目。其應作何支給之處。酌定報部查核。復查長江水師新章。外委支給柁糧雙分。轉較裁缺千把爲優。茲酌定裁缺外委支柁糧單分月給銀三兩六錢。額外月給銀三兩。以資養贍。

第十三條 營官建署地方

查原奏外海六營。不分汛地。以吳淞口十墩爲各艇船停聚之所。又離岸稍遠。水師不能兼顧等語。現在外海六營十二船。分爲三起。派駐地段輪流巡哨。所有該六營營官衙署。應於吳淞口塘鱸港兩處建立。查各該營現在均有舊署。應准暫行借住。俟新署造成。再行遷移。內洋裏河十營。均應於該管汛內近水之處。建立衙署。庶一切呼應較靈。內狼右蘇右兩營。尙可仍循其舊。海門營應以劉河營舊署爲新署。該營舊署已廢。應行另建通州營新汛。離城較遠。應於新港建署。福左營已無舊署。應行另建提標右營。上海城內。本有參將衙署。毋庸另建。淞北營應於常熟城外建署。淞南營應於周莊鎮西隅建署。太湖左營應在東山重建新署。太湖右營應在宜興之烏溪關建署。以重汛守。其各船哨官。自都司以至外委。不立衙署。不准登岸居住。違者官卽革職。兵卽革糧。再各營官建署後。應各給差兵十名。以資照料。均於提標各營。未經募足之空額內撥給。

第十四條 各營座船數目

查原奏第十四條。科算出入經費聲明。此外尙有座船書識子藥等費。又長江水師第二十條內陸營之例。馬一改爲水師之座船。是各官均應給予座船。俾資辦公。惟江蘇水師提鎮兼轄陸營。與長江新設者不同。例馬一項。仍應照舊開支。自不得兼支座船。其自營官以下。則應仍照長江章程辦理。副參游各給座船二號。各營哨官自都司以至外委。各給座船一號。副參游每座船各月支銀十四兩。都守以下每座船各月支銀十二兩。惟太湖右營。係以都司爲營官。應准給座船二號。以示區別。

第十五條 官兵數目

查外海陸營。共艇船十二號。內設參將二員。游擊四員。爲營官。都司一員。守備八員。千總六員。把總三員。外委六員。爲哨官。又輪船四號。原奏係設都司四員。守備一員。千總三員。爲正副哨官。每艇船配兵四十名。共四百八十名。每輪船原奏配兵六十名。共二百四十名。內洋五營。共八團。舢板六十號。內設副將一員。游擊四員。爲營官。都司五員。守備四員。千總十員。把總十八員。外委二十三員。爲哨官。每八團。舢板一號。配兵二十名。共一千二百名。裏河五營。共八團。舢板四號。長江舢板八十八號。內設副將二員。參將一員。游擊一員。都司一員。爲營官。守備三員。千總十五員。把總三十二員。外委三十七員。爲哨官。每八團。舢板一號。配兵二十名。共八十八名。每長江舢板一號。配兵十四名。共一千二百三十二名。通共設副將三員。參將三員。游擊九員。都司十一員。守備十六員。千總三十四員。把總五十三員。外委六十六員。共配兵三千二百三十二名。惟輪船一項。現派道員統領操演。未歸提鎮管轄。與原奏官兵數目不符。將來籌定養船經費。尙須專案另奏。

第十六條 核定書吏名數

查江蘇水師。現改新章。各官應用書識。應援照長江水師章程核給。江南提督衙門。本有額設稿書書識。與長江水師新設者不同。無庸增添。總兵各用稿書二名。書識六名。副參游各用稿書二名。書識四名。都司各用稿書一名。書識二名。惟太湖右營都司。係屬營官。應用稿書二名。書識三名。守備各用書識二名。惟淞南淞北太湖左狼山右福山左五營。並無都司。專設守備一員。事務較繁。應各加稿書一名。其各船千把外委。同係哨官。亦有應辦之事。各准用書識一名。以上共用稿書五十三名。書識二百八十六名。

第十七條 兩篷旗幟等費

查內洋裏河各船。並無竹篷木蔴。惟以布篷遮蔽。其旗幟一項。尤應整齊。現嘗立營之始。各營旗幟號衣。均須隨船新製。普發一次。以後歲修之需。查長江章程。長龍戰船。每年發銀六十兩。今八團舢板與長龍相等。擬定每年亦發銀六十兩。長江舢板。照章每年發銀四十兩。交各營哨官採辦修飾。至艇船一項。船身既大。且終年出入外洋。風擊蟲蛆。最易損壞。每年油臉燂洗四次。所費甚鉅。其旗幟號衣篷帳等項。亦所必需。擬定每船每年各給銀二百四十兩。隨時修理。以壯軍容。而昭慎重。

第十八條 官兵糧額

查原奏內洋裏河十營。將弁兵丁書識。應須廉俸薪薪等項。悉照長江水師章程給發。至外海六營。均宜稍從豐厚。除營哨各官。月加公費。業經部議核准外。查水師提督。及蘇松狼福三鎮。額定廉俸。本屬無多。嗣後既須營哨督巡。責任重大。亦應酌加各費。用示體卹。擬提督每月加給巡洋經費銀一百兩。總兵每月加給巡洋經費銀八十兩。以資辦公。至原定廣艇航工等項。訪之久於巡洋者。尙應稍爲變通。擬每船設正舵一名。月給銀九兩。副舵一名。月給銀七兩二錢。遊手繚手各二名。月給銀六兩。錨枕一名。月給銀六兩。木匠險匠各一名。月各給銀五兩。以上共九名。均係出洋捕盜。必不可少之人。且仍在每船額兵四十名之內。所加餉項。亦屬無多。其艇船稿書。與綠糧同。月給銀六兩。書識與兵糧同。月給銀四兩五錢。又各營稿書書識。並非兵丁。應照例俟五年役滿。考職送部。

第十九條 各營船隻酌用槍礮數目

外海六營。艇船十二隻。每船應配礮十尊。洋槍十二桿。內洋五營。八團舢板六十隻。每船配礮五尊。洋槍六桿。裏河八團舢板四隻。每船配礮五尊。洋槍六桿。裏河五營舢板八十八隻。每船配礮二尊。洋槍四桿。通共大小礮位六百一十六尊。洋槍八百八十桿。此外長矛刀叉噴筒。亦須隨宜配用。現於蘇寧軍裝局。將水陸各軍繳存礮位洋槍軍械。儘數勻撥。尙有不敷。另行添購足數。

第二十條 各船火藥洋火子彈等項數目

查各船大小礮位六百一十六尊。大者三四千觔。次者一千餘觔。小者六七百觔不等。每月約用土藥近一千觔。洋槍八百八十桿。每月約用洋藥四百四十餘觔。洋火三萬六千餘觔。洋鉛子四百四十餘觔。此外皮紙更香封門大小熟鐵羣子。若遇緩急。應隨時酌數請領。共月需經費約在千兩左右。按年總共約需銀一萬餘兩。土藥鐵子鉛丸。擬在蘇州設局製造。洋藥洋火等項。擬在上海陸續購買。將來外洋六營。就近在上海請領。內洋裏河十營。就近在蘇局請領。

第二十一條 核計餉項


查前奏部議按照道光二十八年以後。兵馬銷冊。及咸豐二年估冊內開。江蘇水師二十一營。歲需薪俸餉銀米折共銀二十六萬二千一百七十三兩六錢三分四釐。內除未經裁減之鹽城東海兩營餉米共銀二萬一千一百十六兩八錢四分。又原定蘇狼福三鎮各留兵丁一百名。餉米五千五百兩零八錢。均仍支舊餉。應行扣除外。計原設水師十九營。額支舊餉二十四萬零三十四兩五錢七分八厘。現在新立外海內洋裏河十六營。除輪船餉需另行核計外。所有官兵薪俸養廉餉米。加以提鎮公費馬乾書識。各營哨官公費。座船書識。又每船月給雜費。通盤核計。每歲共需銀二十三萬兩有奇。核之十九營額數。尚屬有減無增。惟改定章程。條目太多。將來或尚有續增之歟。總使新定之餉。不浮於舊額之數。以符原議。而重帑項。其狼山營酌留兵四百名。係由揚州等營抽撥。及提標空額內募補。蘇松鎮添留兵四百名。上海留兵二百名。太湖留兵五十名。各營署共留差兵百六十名。均係在於提標各營。未經募足之空額內調撥。本有舊餉可抵。毋庸另行核計。至於各營更調官兵。有由江屬撥歸蘇屬者。有由蘇屬撥歸江屬者。又有此營撥歸彼營者。原額餉銀。應由江蘇兩藩司先行查明。分別撥抵。再由各營查照向章。按季備具領冊送候核明。統歸藩庫放給。築同陸營餉項。按年題銷。至每年所用火藥子彈皮紙更香等項。需款甚鉅。又各營船隻風浪之中。擊燬火之震動。不能不隨時修整。必須籌有專款。朔查部議。從前修造船隻。司庫例動銀十九萬七千餘兩。按照十年攤算。每年應動銀一萬九千七百餘兩。現議即儘此款。作為採辦軍火修造船隻之用。統歸糧餉案內一律報銷。此外尚有裁撤外委四十五名。留營候補。每月各給養贍銀三兩六錢。每年共計銀二千一百餘兩。此項人員。將來補一少一。原非常年額款。尚屬易為籌計。至輪船各項經費。原奏第十四條內聲明。在二成洋稅項下動支。不在定例額餉之內。將來造成日多。必須另籌養餉船之費。另案奏辦。

楚岸鹽引淮川分界行銷摺 同治十一年正月二十八日

奏為楚岸淮鹽引地業經會商定議。暫與川鹽分界行銷。恭摺覆陳。仰祈聖鑒事。竊楚省引岸。被川鹽侵占太甚。經臣國藩於同治十年二三月間。縷晰具奏。嗣准戶部奏覆。應由兩江會同湖廣四川妥議章程。奏明辦理。同治十年六月二十五日。奉旨依議。欽此。恭錄轉咨前來。臣等伏查行鹽各有引界。今有川淮兩省之鹽。同行湖北一界。

之內。此謂則彼隱。勢有必然。近年淮南銷數日疲。存鹽壅積。無術疏通。皆由川鹽到處洒賣。遂使淮引之界。幾被川鹽占盡。論鹽勛則色白味鹹。川貨本甚於淮。論般運則下水順流。川路較近於淮。論民情則楚人食川。習慣而已成自然。論官事則川販聚楚。驟禁而恐生事變。故川私侵佔淮南引地。雖屬大紊紀綱之事。而有萬難遽變之勢。今欲於積重難返之後。挽回一二。仍當暫分疆界。為徐圖規復之計。湖北淮引之地。九府一州。此國家之大法。終古不變者也。就川私侵淮之地。而於其中收復數府。專行淮綱。酌分數府。准銷川鹽者。此目下之權宜。四面兼顧者也。臣等函牘往來。籌商再四。就湖北九府一州計之。現定將武昌漢陽黃州德安四府先行歸還淮南。專銷淮鹽。其安陸襄陽鄭陽荊州宜昌荊門五府一州。仍准川鹽暫行借銷。議定以後。淮分之界。不准川鹽侵入分寸。而川分之界。仍可由淮南就中酌設子店。撥售零引。以明本係淮引地方。不可喧賓而奪主。一劃而永棄前於沙市所設配銷局。既於川販多所未便。而淮銷亦並無成效。應將此局裁撤。移設新堤。改為分銷淮鹽局。至武漢黃德四府。內湖北所設抽收川稅水陸川卡。亦一律裁撤。禁止川鹽。不得顆粒侵銷四府地界。此會議分界之大略也。准鹽滯銷之由。固由川私充斥。而銀價日昂。鹽價日貴。亦屬有礙銷路。初定章程時。湖北每銀一兩。約易錢一千五百餘文。今則增至一千八百餘文。居民買鹽則用錢。而局中售鹽則收銀。水販成本。因之暗增。不能不量予酌減。查楚岸定章。本定每引售銀二十四兩。厥後遞減至十九兩二錢。現擬每引再減舊價一兩二錢。每正引六百觔。定售銀十八兩。所減之價。在於應售鄂淮鹽釐內。各半分扣。將來銀價如跌。再將鹽價隨時酌提。以昭平允。此減價之大略也。地方州縣。本有緝私疏銷之責。若不加意整頓。深恐完稅之川鹽。雖申禁令。而無稅之川私。勢更蔓延。加以濫私北私交相侵權。名雖定界。仍無補於淮銷。除湖北飭派緝私各兵勇。照常佈置外。所有武漢黃德四府。擬擇扼要之地。設卡分堵。凡濫私北私及川鹽越界漏稅之私。仍由臣瀚章通飭州縣。各不分畛域。幫同局卡。實力緝拿。每年年終。由督銷局會同湖北鹽道。視銷數之暢滯。定州縣之勤惰。開具清摺。送由臣等會同考核。酌量勸懲。以收實效。一面由臣國藩責成運司。督飭各場。講求煎煉之法。務使淮南鹽色日潔。期與川鹽相敵。倘有以醜劣低鹽運棧。立將場員記過撤委。此又講求緝務整頓鹽色之大略也。兵燹以後。戶口大減。各岸應銷之鹽。較昔年額數。已屬極少。而業鹽而謀食者。人數日衆。場井之產亦日多。臣等不敢期銷數之極旺。但求業維離

者不致因銷路被奪。而遂絕生計。業川隴者。不至因銷路被堵。而別出事端。是卽兩全之道。此次分界之後。如果淮釐有贏。鄂釐日絀。卽當貼補鄂餉。期於勻分餘利而止。如果淮銷仍滯。川銷大暢。卽當嚴堵川私。期於不侵新略而止。若其軍事大順。滇黔肅清。川鹽自有本管之引地。則今日分割之五府一州。仍當歸還淮綱。淮南引地。行之數百年。不刊之典。臣未敢輕於議割也。總之隨時體察川淮情形。補偏救弊。務在不戾時宜。不墜憲章。至湖南堵川之法。前經臣國藩奏明。俟湖北酌堵川鹽。稍有起色。續行奏辦。現查湘省祇有岳州常德澧州三屬。行銷川鹽。岳州係達省會之門戶。常德係入辰沅之要津。均爲淮鹽緊要口岸。亦經議定專歸淮銷。惟澧州與荊州相近。川鹽運往路捷價輕。應暫分與川銷。其餘未盡事宜。俟開辦數月。再行酌核。續陳。所有臣等會議暫行分界銷售緣由。理合會同四川督臣吳棠。署湖南撫臣王文韶。恭摺具陳。伏乞皇太后皇上聖鑒訓示。謹奏。



第三册

手 札

書 牘

批 牘

日 記

讀 書 錄

治 兵 語 錄

雜 著

景印真蹟

會文正公手札

世界書局印行



意城仁弟左右。王衡臣之世兄來鄉。接展

惠書。頃又接黃宅專丁寄到

賜緘。荷承

垂注殷。至。臣為感。目矣昏花。目丁未年已用增光
鏡。近則雖有鏡而多其裨。益。或看書作字。霧
裏采花。濛濛。多似。何其憊也。經事之悔。蓋心真
舉。太。大。號。台。過。多。公。事。私。事。不。全。未。竟。之。緒。生
者。死。者。猶。多。媿。負。之。言。用。是。觸。緒。生。感。不。能。自
克。亦。由。心。血。積。虧。不。能。養。肝。本。末。均。失。其。宜。遂

手
札

成怔愕之象。此猶平善。然不憚而餒。難遽言充實也。先嚴墓地。自須急求改卜。

來示所云。蓋古人所稱利不什不實法。害不什不易制。先君墓域人多謂其凶煞。果若所云。是在害什之科。而利什者又不可以率求。斯亦疚心之一端耳。應咨轉詳之件。尚有數件事。月內以病故。諸事廢闕。山中無書吏。須手自料檢。遂尔遲遲。來書須三月十五以前趕辦。今既過期矣。九江竟尚未克。林野帶之堅忍。良不可及。但惜作賊耳。麻

城防兵。聞於三月十日小柱。次信否。令兄初次家
叔。比想已到。金弟接其正月十三惠書。知其尚在
內城。稍辟塵囂也。霞仙昨在舍間。言

闕下當以四月來報。來示約占霞公同柱。數

廬。六年之別。得一良覲。欣慰何極。掃徑延佇。惟增
飢渴。家謚會合詩刻本收到。令弟對聯屏幅。書
就奉上。摺扇未寫。目力不耐細字。筆止退不中書。
祈 亮。相見有日。候客面罄。甬渡一二。順問
近安。諸希

心鑒。

孟兄若曾國藩再拜

意城仁弟左右。腊月中旬接展
惠書。敬審一切。比想

起居康勝。新社增綏。至君為慰。粵中
猖獗。良可憤噉。惟弟情志在通
商。稍有損於

國體。尚望審於民生。或者許和之後。
仍可馴擾。則此方生靈免遭塗炭耳。
厚廣東下。計已早抵南州。或金陵
先渡。則尚需迫庵之繼。任吾補

矣。周姓銀兩。即日當檄告村鄉。觀察查
收到籍後。應一盜稱者。為有數。可以
在案。不致具公續。一切傳聞。心甚歎。不
頃。接孫閣青信。渠以接丁父憂。須由家
盜。屬由縣轉詳。云。此法為要。擬即
推而行之。凡有應盜。多件。呈明本
縣。為盜歸入詳內。或亦要計。聞印
後。即專人赴縣。巡緝。然已沈閣久矣。
筠仙令兄至周家。口後。有信回家否。治

途想當年事。儻恪守禮廬。諸託安善。
惟心血積虧。夜罕佳眠。或通夕不寐。
目光昏花。看字不能過四葉。回思數年
在外。僞言尤叢集。時用肉疾。又壬歲
母喪。葬非佳壤。去年一葬。父亦非
吉域。今歲擬親履各處。求稍可以安
吾心者而改卜焉。庶幾少釋歡哀。
眉洒布。復順候。迨祉。諸惟
心照。

五兄弟曾國藩再拜

正月十日

意城仁事親家閣下。正月廿日。張六藥太守
步丁未。建。接腊月十七日

重書。藉出一切。即論

敵歲多祺。尚潭麻吉。急為尉。此間賀
正。摺弁於十九日旋營。接翁公信。知以陳尚
書。薦。入直

南高。

台對兩次。

寵眷方隆。而此間已於十一日附片奏請來營。

既奪其供草之莫。又奪其分枝之羨。柳子厚
所謂名者愛之。其實害之。該所謂騎馬不運
報家。騎牛運報家也耶。嘗南浚川軍。至輜
如浚。而赴信。幸以解重圍。凱軍。至景
德鎮。浚。腊月十九日。知固小挫。與鈴峯部
下共亡百六十人。廿七日。凱軍。獲勝。其部下亦亡
九十人。正月十七日。凱軍。又小挫。第五旗之福
扎牛角嶺。被賊撲去。焚之。盤。余曾於除夕
。圍告。謂五旗。距凱。大遠。恐。種。獨。三。凱。浚。信。言。

旗長可憐。遂不終也。五旗被搯後。只換
三旗。札半角額。余心雖喜其堅剛。而益
益遜之矣。自

閣下與人抄。返去。老胡家字等。便不與
通氣。而此凱章十一。極敗挫。而幸叔廿日
始到。翔圖玄。腊請撤之。有云勿惜人之
殘生。憐此二千之性命。等終。似僕正馬不可終
日。僕因批。遂即撤。而渠。續字。又。新。侯。景
鑑。克。後。再。撤。十九日。之。我。凱。出。隊。接。應。二十七

日之戰。翔又未出。隊接應。其中是非曲直。均難一二分明。若使

閣下与人指在此。則凱翔必有私面縷訴。即沈甫金第在此。亦較疏通。黃登

閣下即約人指。枚村与金第於二月間同

來。互切互禱。金第以温甫之故。在家中多

方隱匿。至今為某說破。目下恩卹已至。想不

能一再匿。正在哀禮終頓之際。又先嚴

政葬多未安。家井之病未之痊。能否速行。尚未

可定。僕此次通倭之矣。凱章既在孤危之中。自當謀所以濟之。振之。現派彭山峴調兵六百。喻吉三、余星煥等添勇一千。崇雲、崖添勇二百。張岳齡添平江勇千二百人。俟其到時。先換千人赴凱章軍。要迎剿。將來另求一統領。添打一支。現向者中丞索餉。雖不可必得。然不得不放手一擲也。

順請

台安。

此次未定 李公信抄一

國藩

正月廿三

意城任事。執家闈下。二月初九接

惠緘。知為在鄉。喜甚。省也。此間一切調

度。俱次第緘告。在李公。自可徐違

言。覽。此次亦有書。詳布李公。祈一索

閱。翔岡初曾來見一次。愧悔之情。與憤

發之志。似終是有為。此次大段之錯。在

翔。一日之錯。實在訛。今事且了。然矣。若

闈下與人。杓在此。嘗早了。然也。李公

書言

閣下仍當出車入局湘中。維繫之
殷。不問可知。目下却望

閣下來此一行。能挈叔村同來更妙。
否亦須俟人抄來也。四月以後。阮甫必
到。隨公去。則

閣下可飄然遠引矣。千石之書。遲以
此間購得佳書數十種。若非親筆。玉
趾前來領取。不可得耳。漢語

台安。石下。

姻憲兄弟曾國藩

二月十日

意城仁弟親家閣下。冬來得

惠書。只增馳系。寶郡域內外各營。
被破大圍。包裹殊深。焦灼。黃水派
來之卒千二百人。聞已渡湖。希庵想已
率之而南矣。此間景德鎮於十四夜
克渡。而浮梁城為素退出。不知別有
詭計否。各營皆小心謹慎。進剿。當
無它慮。如果破踪遠竄。寶城仍不
解圍。當謀派人回援耳。前步戈什

吟至浙江。頃於十二日回接。接卸位西
信。并西作其房侍講墓志。並抄專
呈。又國藩作孫太公墓表一首。曾言序
一首。附呈。祈

可交孫定。或代謀刻印。又銀百兩。西亦
西云以半賻。以半刻書。共祈與仲雲
元字為經理。其書言全冊。擬再寄在
西閱。故未附還。尚布一顧。向

台安。不。了。

姻兄曾國藩

書

六月六日

善城親家夫人閣下。某日接頌日

惠緘。知霞仙往分山居。

漢游之艱。至慰。凱章已於十日。至

江西省城。次書十日。見之。待生抵

徽。當以能季能三公。由石樓。汪旌三。強

救援寧國。在。廣德。如。於。十。買。收。渡。

季。兩。到。即。由。廣。德。逢。勅。新。境。此。間

而取辦於國藩。與少峯三人之手。此峯八月
赴滬揚辦水師。以後僅無人獨峯。
某不能給。

親家既不入蜀。千求遠來一函。八月底到
滬。封多我三月。年終歸家。決不食言。求
不可必。惟可高聲唵佛而已。明問

手札
國藩
手

七月廿三日

憲城任弟執家大人閣下。福旨接育十
白

惠緘。并密寄料書。累悉一切。郵曹獻
君以文涉僅加札祈。代僅速來。栲壺告
假。為執。一月即來。皖南。如法僅之。暫
駟。帥之。掌。得。固。莫。書。為。不。躊。躇。次。日。閱。素。與。師
淡。浙。江。危。急。遂。出。買。陸。陳。黃。新。性。愷。愷。為
閣下所稔。乞。此。故。也。為。度。外。之。舉。為。大。局。計。

非得也。善果邀

命先。靈仙親家或亦出佐駭師之帝。仍亦
闕下前來相迎。以多丹信來。不難做官。但難
出佐。教是帝。仍亦每年為着一次。

闕下善果。此皆年。亦亦每年一好。燕。有代
飛之後。鴛鴦少。獨為之時。此亦天下之至怒也。

闕下。此三。已。善乎。野山。輕。羅。寶。垣。均。以。空。扎。調。之。
能事。与。不。果。可。去。且。先。廣。者。搜。集。所。謂。取。

疑情。用之非性也。仍祈

閣下擇詞。彙為五題。東局擬占潤師

副令而食。蓋以節餉近日起絕也。吾故地數

精遲步。以法難索。恐難償所取。但書弱士

到祁門。凱章一節。可抵推德。甚望尚未到。

甚部下日。向當以仗闕。殊不敢心。涉致近日。甚

疑信。弄。閣下。向

台安。

國藩

去

八月廿日

嘉城仁弟親家大人閣下。舍弟自得

賜書。敬悉一切。蜀中為古來兵燹

所必爭。

屢緘。薄以此為慮。今聞敵帥咽喉作
亂。連陷四縣。郡城亦有不守之虞。若
使石送入蜀。乘機煽誘。若禍正自不
淺。此等入台。三道人院。

老謀自是切多。特鄂中家世。此氣

力。現擬以國藩任第一路。由石屏規安
慶。由太潛取桐城。潤帥任第三路。由
英望取舒城。希庵任第四路。由商
固六安以圍廬。而潤帥既定率於
吏事。精力難以出境。希庵又以母病不
能遠來。則四路之說。亦恐徒託之空言。
而河南粵捻。叢雜甚。至清海。西至礮山。
二千餘里。無一乾淨之土。老牛帥莫

諸人由商固繞出懷家以此。自揣棉力。
實已有志遠。楊厚廣新。受池血章。
或目之降。欲僕速結之。持其可。亦以才。
諾不敵任也。九月福三軀日益孱弱。又已不出。
幸。閏雨之激。而親家相繼淪焉。益增。
中幸之感。所幸。鄂省官紳。莫不精。媿。
差用自適。順。春。

台安。

手札

國藩

尚

三

十月廿

憲城仁弟親家大人閣下。十九日接福至白

惠緘。敬羨一切。長公雪仙親家此已抵家否。

所懷亦多不遘。只值感夏南風。沿途阻滯。知

殊愴悵也。長公辦了。與鄰人苦事之鹵莽而計。

減別累而輕。約略相同。其橫被厚。幾難自明

也。亦同。

聖人之若與憲之若也。憲也又同。已嘗書覆仁

憲。長公至鄉。消搖散遣。秋冬再謀。幸來會合。

想 首憲六領然出。協防江西之兵。亦已台無多。至
千人。甚好。豈不可撤。請

鄂軍兵力。村。老。於南路。自全防守南贛一帶。
宜於此路。只全。剿徽寧一帶。尚老。湘。陸。續。已
到。表。如。凱。章。之。將。漢。抵。表。左。坪。半。區。因。化。樂。昌
之。矣。吉。賴。要。動。望。請。截。軍。凱。章。輕。臨。表。四。此。間
寧。國。危。在。旦。夕。於。潛。昌。促。之。賊。逼。近。抗。如。日。盼。委。望
凱。章。之。人。前。來。望。眼。穿。豈。真。更。被。截。信。而

吉安青脾。湖南江西。有兩要害之區。又不敢竟催
 凱軍來皖。如孩跡薄。如生破舟。焦灼萬狀。求
 閣下商之。籌師。李帥。如吉要危急。自不得

不望凱軍。輒之。願南。路。否。則。或。以

想若奉命軍

劉蓋臣可委吉要

才。而。五。千。人。共。防。南。或。另。募。一。枝。防。南。總。求。軍

令。凱。軍。得。違。皖。境。纏。打。各。局。區。要。至。武。南。篇

子。已。照。辦。云。情。想。區。湘。出。之。漢。國

多矣。

國藩

友

六月廿三日

憲城仁弟親家大人閣下。連接初二初六
去三緘。初二日。以廿七到。西遲滯。餘
皆應時而至。此間克景。然後即派凱
鈐四千人。回援岳祥。此軍。素見。雖
有參差。而善戰。穩扎。實非。它軍
所及。到湘後。必可。獨當。一面。惟湘。多。紆
緩。如再。赴。外省。防。勦。凱。鈐。竟。有。不。能。援
令。之。勢。似。當。以。鈐。另。領。一。小。支。而。凱。領

大友亦須添募密配。拆封換底。祈
閣下與季高。人梅。兩君。察者。調理。目
下。防。刺。事。急。不。必。提。及。九。舍。弟。因。改
葬。了。即。須。回。家。一。行。初。一。二。可。來
接。函。兄。弟。既。後。國。藩。亦。即。起。程。由。浙
西。上。也。相。舟。自。天。津。一。路。携。翁。公
信。抄。呈。惜。敘。戰。了。太。路。再。一。眼。昏。州
泐。即。後。台。安。國。藩。古。月。昔。

志城仁弟。親家閣下。十旨接初夜
惠緘二千。軍外寄墨。領四紙。謂之不認可
乎。否也。彭雪琴於九覆。過之公懷。好來
文一極。焚毀。謂之不違乎。否也。凱章一
軍。似多。遠來之象。大彰大慰。前嘉總來拒
賊於皖浙。不令闖入江西境內。昌江浙并
受其福。果然。否也。
子之德。不然。否也。

子之怨也。李公在姑是為教面。誠如

多指。國藩

於思其來晚。一而商定大概

規模。一則觀季

論旨。六須面之俱到。如其世界為未全金。

而亦敢遺以和強也。以書任防勸於國

信。彼泉稱牙鑿於江西。步荃稱水師於

陸揚。國藩

左右仍是單介特。子主其也。

李公若不遺出。而求

閣下翩然命駕。速事數筵。并懇預告。
二親家母。共令長友。日以按巡。敬筵。徵台
追呼。聲震遐迩。頃季公直筵。吾載之
日。嘉城謫君。子惺內癖。季曰。彼乃自癖而
及。誣人以癖。孰癖孰癖。請以此口下之。僕
已於十五日自宿松起程。廿日五棧壩頭。諸
切平順。呈慰。虔念。渡向
台安。不。下。

國藩

右

意城仁弟親家閣下。昨尚蘇師之手信。
告織飛在駱帥。想已

入覽。茲因作梅兄之母論陷賊地。恐其刻不
能寄。特告織告之。求

旨處派人要送作梅兄寺。若至益陽。即送
送益陽為幸。凱章款密之軍。請即迅
令東事。若竟至江西接師一帶。雖調守。或
既得志於蘇。恐其一面攻浙江。一面擾江西。
若既到江西。則我湖南守東所之兵。非四五萬

人不可。未刻江西。外以守北東所。不。不。不。
三第。餘人。且專。命。布。凱。章。若。東。新。意。
且先。令。保。廣。信。景。結。等。雲。西。國。江。西。所。所。
以。固。守。法。也。

善。善。如。以。為。然。外。諸。國。之。答。即。之。之。左。
季。公。忽。於。意。前。可。抵。長。沙。之。也。宋。清。忽。斷。
松。本。大。勢。鄂。餉。自。絕。林。之。年。之。書。不。及。天。下。
多。何。自。大。轉。乎。正。向。

台。島。雲。仙。家。家。近。信。在。并。向。之。正。國。播。也。
三月廿三日

意城仁弟親家夫人閣下。廿日接千之
賜書。敬悉一切。前幸求之之端。涉承
惠先。當以錄奉。聊

親家之痛。季公到省後。尚望一字見及。何
也。世兄未全愈耶。抑瘳性發作耶。

論自飭令入蜀。與潤帥會商。漢書抄
稿寄

閱。王叔材招勇三千。已札虜伯府送銀五

千支枚村。不知何所可到。以又札陳俊臣
另拉桂勇三千。求泐中協餉二千。極知泐
庫已竭。勢必此間之一支可措。又距桂太遠。
為此不情不之請。可否於衡郴等處撥營
多量。俟臣出。不在重答之列。若於鑄券
中補鑄一行耳。同定度表等。均由龍
以以窺南贛。故預以俊臣之軍撥之。俊臣咸
芝。湘省。湖南。已。警。心。可。互。商。借。調。若。兩

省南路平安。公俊軍亦來皖南。大約李

公親軍為天柱。龍朱李。張凱章王陳

為六山柱。并萃江皖之交。或亦一御軍或氣。

若季公入蜀。則六柱缺之不可。尚缺其一。公性

親家是向此。坐協防之師。坐更甚。亦謂協在。

江西見之。道。馬安第嚴汰。玉班留在長沙。

和道不復調。南渡順後。

台。社維。心。國藩。

五月廿三日
水師營次

素城仁弟。親家夫人閣下。連接五月廿八日物次。

惠緘。備聆。是。江。八。湘。二。後。似。已。鼎。諾。象。慰。幸。何。極。仰。懇。

大方玉成。即日咨渡。江右。亦。當。竭。力。營。謀。但。求。破。不。入。境。整。軍。總。步。漸。王。或。可。令。左。李。張。陳。法。軍。車。斗。不。過。遠。叙。乎。

沛之惠也。

君之力也。臣皮書等經不遠遠。亦望僅凱

章。遂牙。千萬之禱。國藩於十一日到祁門。取適

值甯國被圍。奮救甚迫。國藩以遣營未到。

能然。尚系抵鄂。未然。新病未痊。未允措

手。繼救。且新書

案。編。只。亦。輕。率。前。進。宜。加。我。等。為。要。之

命。而。幸。公。與

閣下。但。以。遠。達。為。戒。不。得。不。堅。生。打。去。然。有

跡々望極而怨。極而思。不久當為禱。甚矣。
惟望季子公早來一日。則能難早來。行一日。
季公与梅村能合成。再年為六千之數。更妙也。
如其不能而合併為一。總望於七月中旬感行。
不可再遲。屆時出伏。亦不甚執也。人梅公
請於六月底先行。均鑒。

閣下為我禱。致怒不另緘。千萬上。順候

台安。

國藩

長

六月十二日

作梅於五月十七日。聖仙教家。在抵師堂。

手札

聖仙仁弟親家大人閣下。昨接

意城

憲公六月十四日惠緘。頃又得

長公次公兩緘。敬悉一切。近日軍務捷
書頻仍。本屬數年所未有。莫如甫遭
國恤。旌值胡帥淪陷之耗。可欣可慰之
事。皆憂者之悲可憫之端。往年謂劉
某雲於學子間有大志。近見潤帥於經濟
有大志。其之精力不足副其願。潤之才

德足以發其志。中道棄捐。豈獨吾黨
之不辜。希庵接續鄂篆。正事有賴。惟
下游太廣。決非孱薄所能獨支。舍弟現
進廬江。其者一路。多公當進舒城廬郡。惟
安一路。尚覺其重。南岸調度。另有一公續
抄呈。是亦有當。乞

裁示印謹

復。

國藩

手

九月十日

浙日棘力往援是一疾心言向強補未若臣晉之請多未見列

手札

四一

聖仙
意城
接李
仁弟親家大人閣下。五月七日

素老四月十七日惠書。而

堂公所給瞿遵訓一緘。六適以是日到
堂。教承一切。不知新人所寄桂木搥人
挺。世搥拿一書。未得上徹

左右。宇宙至文。野晦且射。兼重抄一
通。奪塵。自玄冬以算。昔日不在危檣駭

浪之中。十一月初。逆首黃文金連破六
縣。偪伺景鎮。竭左鉅西軍之力。至正月
底始行駢除。而偽侍王李世賢挾十
餘萬衆。又由東路撲陷景鎮。至三月
杪左軍甫苦戰却之。而逆首四眼狗
適以是時救援高慶。拊舍者一軍之背。
方盡革一多能成朱諸勁旅。與狗逆
相持未決。而偽忠王又連陷吉安瑞砂。

蒙寧王寧寧李勣與國等十餘郡縣。
仿王物劉官方又陷建德。仿佐物古
隆。賈又陷黔縣。其湖北久玄六城。及江
西南。賴之賊。閩汀。巨賊。非救軍。西應防
剿者。尚不在此數。多令定。古未嘗只
也。今安度。幸就平。穩。能公破赤岡
嶺。賊壘四。惶。賊三年。忠執駢誅。逆首
劉瑄林。為水師。生擒支解。若能再。此克

復皖城。大局乃已轉機。江西湖北腹地
之賊。乃次第分徇。袁帥偏處髮捻
苗李之間。兵單餉竭。屢次敗
挫。有月初七。改上之後。伊勝也。副帥
陣亡。

勅編

修 不肯稱國。革職戍邊。光緒一月。

勅瑞和帶隊不力。革職。以皇而親。

醴江之後。

象箬之初作耳。美調之業不出。自
在志中。然近日久涉危地。又嬰多病。
怒馬寡性。豈里於死前一見
故人。陳舫仙出函

意公審片。潤帥亦深惡滅。此對調之
說。世人主稿。劉紫梅曾湘常水師。已
批注在。餘不。順問

台安。

姻黃元曾國藩

安

五月十日

嘉城仁弟親家大人閣下。三月十日接初四
惠書。敬承一切。此間近事。雖已於十二日。美
少中。業經咨達湘帥。去日。寄金浣弟一信。
尤者。詳明。茲抄呈

台覽。此岸之事。有兩軍。與張毛劉合軍。以
禦下游。忠前大股。有成李兩軍。以禦上游。搃
匪一股。應王支枋。南岸之事。古賴等及洪東
敗匪。廣集徽幼。產廣桂生。鈴峯諸軍。出有

難於支撐之勢。黃老寬等股。從東連內犯。饒景則更生活兵為之。沈帥以五千人守景鎮。必可保全。其以韓進妻五千人防荊石門。則恐未必可靠。前有函牘。請保席研香。速赴撫劄。不知已抵何處。再求。

閣下^未博僅。愈速愈妙。并請函保江味。招建棉。東堂由素。玃互換玃。与研香合為路。專禦黃老寬一腹。如黃逆幸。於饒景擊退。不入江境。以

江席直入皖南。再行相機進止。味軍之或南
或此。前此奉朱定計。今所以決淨南岸此。一則
以鮑軍此渡。援解毛軍之圍。南岸太遠。共軍二
則以黃逆竄。江席軍太單。必味研合打一路。
庶至保江西之腹地。疏並可固吾湘之東藩。三則
以味振與希帥較親。與左帥較親。軍行皖南。要
與鄰人及左帥相周旋。諸事睽結。融溢。因此
共。故宜請味帥由江西進兵。求

閣下先達高意。即日另有函候催之。南翁
 擢迤東道。亦仍由寄師會。銜責留。京米家
 不易辦。擬請其至下江。行商辦鹽務。黃度
 之妻在甯遠營生狀。并甘於以黃勝高承繼之
 說。并云夏令官存身張氏。妻遣與各營官憤
 不平。謂和立打提鎮之妻。頗動眾怒。寔免
 責打與否。務祈 詳查見示。即請

呈報。

國藩

切

三月十日

夏令上徽厚及字竟視張氏與黃勝高有曖昧不止全不為黃度留體面矣

袁臣仁弟親家夫人閣下。久不接

惠書。方以卷終。頃得三月白一面。知書有文。左張
二君帶來之書。教忠一切。正月竄江上賊。左帥
文移僅剩三。千人竄至廣信。而研香方多。以為數
過十萬。吾輩寧失之性。毋失之疎。故亟研寧資
明。信行各省。現踞南寧。彰城。西。巨。江。序。韓。劉。揚。五
軍。萃。於。一。雲。及。不。能。勝。三。則。數。萬。云。說。宜。若。可。信。杭州
浚浚。偽。曉。王。等。由。德。浩。於。潛。昌。化。寧。國。物。而。至。績

漢。毛竹丹於十三日在徽東小杜。賊遂蔓延休歙之
南。十五日由龍灣下甯。計必由婺源景鎮入江寧矣。
此股合抗餘系與賊計必不下數萬。為未侍地輔三
大枝。計又不下二十餘萬。必為自湖鄉銜出。上犯江西。
而常州宜溧之大股。金陵丹白之大股。合江西以
外。必復別無去路。是目下南面彭城之賊。雖不
足為巨患。為未踵至之賊。為東大而具長。不
能治患江西。并為重湘切近之災。

切勿忽視。至要。後臣防堵南路。應為可
靠。鄒憲銜峯一軍。宜由茶陵赴吉。克庵一軍。
宜由醴陵赴素。窮寇股多有障即竄。尚不似
九年石達開之入湘。專趨南路也。然賊中覈全
不一。心志不齊。只要能打緊箇猛仗。究比早年易
制耳。教要於十二日早疏。與江西魏金。與沈帥
恐遂浩劫。令臣股陸續甯江。而不能撥兵往援。
同心固已抱愧。而官紳之交口朝罵。尤為不堪。涉

想。坐衆軍倚毫為命。有不能不爭之勢。金陵
之後未畢。又有不能按撥之勢。此心殆無以求其於
天下也。秦豫髮搖環逼襄樊。不久又及皖北。僅恃
藉之純喜欽堂何子文數人。殊難應敵。南坡翁
今日抵皖。即日送數檄西上。皆守之正月。別我而
西。將由宜昌以達長沙。刻下計將到矣。東麓
近狀何如。能於三萬之外增與五萬否。頃向

台安。

國藩

切

三月十九日

意匠仁弟親家閣下。十二日接四月初日

惠書。十九日又得俗佛日一緘。放達一切。竊江之賊。

第一起者偽陪王等。係潭陽跋出潭陽李偽逆渠

穴。改陪王偽黨也。第二起者陳炳文汪海洋等。杭

州跋出者多。而李康德汪原等股。亦附陳汪以往。

輜重最多。程懺信取鮮。第三起者偽侍王由湖

廣出者。敎中友因接在師克復湖州王宮。詔駐紮補

與偽逆同者一起。遂致陳奕不實。頃於十二日奉

更正兵。第四起者江陰揚舍之敗賊。常州城外
之壘賊。与友金壇白字克復之賊。頃能十三四
等日。唐鞋生与金毛筆。在休豎。屢獲勝仗。擊散
一隊。未知生何首也。常州於福旨克復。頭目及勇
逆駢誅。無漏網者。餘亦殺誠遣散。不留餘毒。丹陽
於初八日克復。逆者甚多。是時者第五起。而
湖歙之賊者第六起。皆當由徽入江。人教實已
不少。而率不甚凶悍。魏令不一。志不高。以達擄

糧多飢少飽。終逃散。不敢言戰。此機勢之策可
喜也。而敵最者軍。江西各軍。絕少。臣將勦掠。多
入能。此散漫之賊。在部。是勝。亦多勦集之平。
此又時局之策可慮也。現調委靈馬步五千人上援
江西。少者已派。臣接防東垣向營。聖軍途費九萬
金。六兩次第解到。十日內必可成。五月當可到江。
屆時賊若乘渡贛江西。則全局穩固矣。

未可以謂另籌大軍。喜便於此。厚。慮之。厥。臣。五。

區志已決。不特不肯改統陸軍。并不肯久統水軍。
學禁之然。鄙人之力固不能強二公舍舟而望陸也。東
征局每月解三萬^平與厚部。早經豫定。今日始發。一公
陵。六田厚。多未陵。故遲也。此間米石已呈度過
荒月。下游價亦日賤。三厘

垂屋。湘鹽旱卡。解私。分究不可少。極是極是。發案
擇人名之。無係建昌之。讓成巨案。則幸矣。順問
白也。

國藩

有

四月二十日

崇城仁弟親家閣下。十二日接奉

惠書。內言四月之件。亦有五月三日

手信間。敘承一切。此間近事。自克復巢谷和

城後。於又於初九日收復橋林江浦。口許城隘。現

在水陸會攻九洲湖。未知能否得手。壽州之圍。

至今未解。苗逆實孔悍寇。竊毛并此不能制之。

希帥久離整次。湘軍稍屬安。自奉初令

味招赴粵。

旨。鄙人本不欲再致之東來。曾亦自奉違
左右。并於味帥未續批答。於接味報信於
歸覆。實決計接江征皖。而江西蓋後局祥堂
以帶二軍。已為勞。可藉之餉。散復因再咨
味報。請其速移。東來。并咨明寄帥。不致
江軍。果成。可否。務請一策。東局之詳。
業經批。請。惟解皖。僅約三萬。稍二萬。尚難其
少。又聞成。殆。蓋江遠。悠。等。雜。漢。得。錢。數。千。

率以為採硝之率。若盡屏此輩不用。則諸人目
下有賸累之苦。而敵中反為未仍不能不另
覓采買之人。擬請芝生與成江李張等
約法三章。稍擇老成謹厚之流。去其拆墻
極民之習。諸人既已獲之資本。保為破之體
面。或可競之率法。而敵中局硝二方之外。又
略增采硝少許。予限半率。再行全撤。全撤之
後。東局於約三硝二之外。再議添解幾萬。是

李以當統求

閣下與南公朔芝生熟商見示。李樵高同年
去歲未此。豈可位置。乃以爲采訪忠家局之
領袖。月致勸資三十金。其眷屬當江西省城。
頃因清耗。經手捐夥。屢有一行。亂後官況。託
局務以自存。貴同門。其有不世荒之莊。崇朝之
澤乎。唯問

台安。

國藩

少

五月六日

憲城仁弟親家閣下。日內未得

惠書。伏審

與居多社。至為在禱。此間近事頗順。某念
於廿四日克復。和約於廿五日投誠。玩檄能蕭
彭劉進勅二浦九汝湖。並毛援壽勅苗。日
內必可解圍。南岸徽境肅清。劉王段韓
李席諸軍。併萃饒景一帶。當可駐之。返皖。
味根二軍。四月七日

寄諭。又令即日赴粵。此軍先陰。遂恐銷磨
 於道途之中。亦足暗傷銳氣。此時若強之東來。
 未始不可。然聞皖已鬆。兩粵必屢疏奏調。
 皇上亦必叠諭促江往粵。不知此次早遵

諭旨。決計不改。省得來道途惟艱。國藩

率極思味軍東來。惟度粵之可無人可了。必且放

棄不休。而救世首密片一併抄閱處餉項。竟難添供此軍。特此

飛布。即日另函寄味兩帥也。順謹。白。國藩

家信一件敬求專人送去

五月廿一日

白

素城仁事執家夫人閣下。廿九日接廿日

惠書。敬悉一切。鄭陽和陳申多早已到此。又
截留至班之趙仁和一營不赴重慶。合之原守
省城兵。每度共已。陸兵四百人。水師近千。足
以自固。棠梨之賊。仍納至於廿四日。改據棠為劫。
該知本弓李勇甚。少者李勇。汪勇五營守之。沈
甫自重慶派劉南雲二營來。是日亦到。救處所
派蕭毛二軍。亦於廿六日可到。此路兵力較厚。

度。空柱關。六屢。且小勝。蓋湖周。乃倖。吳。所。莊
等。廿七日。破石碛。賊壘二處。防務。亦自穩固。
祁山之賊。退至太平石埭。氣蹙。勢弱。亦未甯
動。目下。最危急。仍是。喜。雲。一。路。黃。麻。渡。孔。定
後。賊。又。駐。下。游。不。淺。密。運。道。仍。梗。卒。地。招
補。之。人。固。極。散。漫。湖。南。新。到。之。勇。亦。多。逃
亡。決。裂。實。在。患。中。難。期。挽。迴。務。祈
閣。下。與。季。雲。賢。帥。商。宜。迅。派。兵。赴。蓮。塘。替

出味招一軍。星速東來。由江援皖。不勝感禱。
 未示謀及。宜逸亭觀察。沈甫之謀及於此。惟
 友嚴甫經効。莫部皖呼吸相通。未便因一人而
 失氣於鄰。且潤帥晚幸。與宜甚相親。願
 希慮家渠。六議示之。其中必此等因。宜舊部
 僅于彭二人。田湘。此外另招郭勇。六非。卅月不能
 成軍。此當且作罷論。黃伯海元齡。閔竹屋達川伯暉言。可倚任。昨
 令其招地。營。教。求。迎料一切。即。問。台。安。國。備。切。

十二月拾二日

葉城仁弟親家大人閣下。接五月廿日

惠書。裁後稍稽。至以為歡。寄帥控弁兩廣。

次帥即接粵湘。不特多疆域得人。且度。即

實。等餉。六陰。受其福。第不知

白。漢。星。否。度。嶺。一。行。世。間。朋。好。多。略

賢。其。久。福。乘。祥。也。下。游。軍。多。皇。陵。大。望。病。瘦。又

作。死。亡。相。繼。鮑。公。已。在。鍾。山。修。壘。因。為。其。久。多。又。平

毀。之。而。扎。江。濱。神。策。門。一。帶。蕭。軍。六。扎。二。浦。未。遠。南

渡。即。使。蕭。渡。南。岸。六。尚。不。能。合。圍。蕭。為。則。請。假。回。籍。

其西鄙矣。餉太多。豐稟曾有一信。懷之令人氣短。抄呈一覽。迪希部曲。督率胡文忠視之。如祥麟。或鳳。餉項最優。孔亡軍。所教望。今一落。鄙人之手。月餉不滿三成。實當官軍。所來歷之苦。蒲軍如此。成將毛亦。幾不獲一飽。士率既怨。郭台。亦嘗鄙人。乃難望視。不一。自滿也。援壽之後。游毛不其和協。看未注上之亂。方長。黃孔難乎。人自不逞。耳之。味根申亥。在湖口。與黃老虎相拒。亦因窮勇太多。隊伍不整。不能制賊。乃一由都湖。再窺鄒浮。即劉席諸軍。亦恐防不勝防。死。

特江西腹地之憂。恐湘六所食也。成江諸人。漢資
西籍之確。既由

閣下匪料。收爰。不令貽累。教。安。自可。步。責。東。局。以
為。不。二。法。門。不。漫。多。尋。頭。緒。自。取。煩。擾。前。已。批。准。東
局。會。詳。此。時。而。不。另。議。飭。傳。定。形。化。激。浦。去。逐。之。案。
層。見。疊。出。鄂。小。甚。深。恐。為。慮。謂。部。太。守。久。宦。寶。慶。力
能。捍。衛。斯。郡。而。恐。其。調。守。他。府。必。思。借。寇。久。保。無。詳。請
閣。下。便。申。一。言。教。安。志。管。苗。託。中。也。後。問

台。司。

國。藩。

為

六月某日

意城仁市親家夫人閣下。大在閩金陵
克復之信。次日即盜。憚帥。想早

入覽。廿二日始聞內城克復。追殺逃賊淨盡之
信。廿三日始聞生擒偽主之信。是日申刻掃疏
叔桂。至刻。輪舟。廿五早至金陵。此次攻克
逆巢。舍弟魏令蒙明。擢士人。用命。盡洗
向來搶奪財物子。必之習。故能搜殺數
日。無一漏網。舍弟為餉項所窘。幾致決裂。

賴

閣下与 南翁諸君子一力扶持。俾弟兄弟
收此尺寸之功。實深感泐。浚紀鴻於廿二日回
省鄉試。學植步淺。八股尤陋。沈弟望之甚殷。
姑令一試。即在 南翁家居佳。庶得常親 鈞
誨。并求易芝生先生指示一切。世家子弟。易惹
物議。惟嚴戒條子。并禁_之均求指示。即請
台安。

國藩

書

六月廿

志匡仁弟親家大人閣下。十二日金陵行次接奉
惠書。稔以江寧告克。遠勞

暖質。以閣下閩江之取。補助之厚。臣為家以

只過於身親。臣之親。惟追思同袍諸君。或百戰功高

而早以麗黃壤。或患難與共而中更差池。或生死力相

扶而罔望石彩。而步兄弟稍遭逢際會。同存

上賞。或涉之餘。弥增慙悚。鄙人在金陵。亦住二十餘日。若

執相國。望中又世。辦公之地。亟必紛繁。二十日望舟西上。

田畝度料理。月餘再至江寧。籌辦善後事。卷第一

軍。宜議裁撤一半。以稿抄。閱餉項事務。乃多道

軍。所委。東征局裁撤之議。當須俟之冬間。九月

月。務求多辦一二事。至禱。康遂至行灣。仿九雀弟守兩

花之例。七十畝之外。包以長圍。固以深濠。亦意若乾公

所破。其二得脫。此處得半。三物相繼克復。陸遂承六十

万人校練。江西高下指日肅清。吾鄉東起。吾夏。酌其之

去。留一陸。學裁五。後向。台步。國藩。大

七月廿四日
蘇東官舟次

意城仁弟親家閣下。去臘接奉

惠書。藉審

禮躬康勝。泊然物外。豈勝企仰。國藩自奉
命此征。初籌四鎮。至是。繼謀游擊之師。諸
未就緒。候逾數月。捻黨悉衆西趨。於是中
外訥諛紛。責敕部。不致與賊縱橫。追逐。
迨冬臘月間。數處游兵粗已成軍。正擬
并力西向。專辦豫。而任賴牛李等首。

全楚鄆省黃麻一帶。張總兵由南陽
竄入襄樊。又召成部叛勇之衆。楚多日
棘。不得已。檄鄆省三軍由周家口援鄆。
不特鄆比兩襄十二府。紛不能自守。其說即
論旨所指之三省。亦不能恪遵而自畫。其
既注重湖北。則淮徐濟寧周家口四鎮。均不
能筋脈聯貫。自須多籌游擊之師。與
之往來奔馳。而初議所云以召定之兵。制

其堂之寇也。六終恐是踐斯言。終如此。
何時定乎。昔歲嘗與人言。曰

閣下為不聞和尚。自去歲向事。置身在村
不村之間。邦政在閉不閉之際。擺落塵緣。
蒲酒送日。閩中佛國。令人嘆羨。東征局
巨款請加中額。在求

大草代此一摺。互寄書南坡翁。為我
轉達。恐踰十名之數。或千駁詰。曾經謬

弓安策否。國藩精力日積。目光愈發。實不堪再膺艱巨。事會所乘。猝難撕狀。令兄尤為鬱鬱。弓逝躬去。沙之況。兒如姻。去是誠不欲送。與今妻寂。眷回籍。則或湘或粵。聽

閣下小兒商定可也。諸維

心鑒。順問

台安。

思兄曾國藩

友

正月十六日

意城仁弟親家閣下。自三月接奉

度函。久未續寄一箋。伏審

與屋宇。枯槁鄂延。釐豆以爲慰。此間喜霖淫
溢。二麥歉收。入夏爲苦。雨多。各城災禱。頃已
霽晴一月。而蛟水四出。積潦淹稼。及颶風破壞
海濱田產。其日報不絕。大約災率不及七分。收成
所幸。附近兩湖江西浙江皆告大熟。或於餉事
不至甚窘。鹽務全無起色。即皖岸西岸。災
遜於丙丁兩年。誠如

未示紀美禁川粵劫私必甘轉機然鄂中官
商上下。無人不願行蜀鹺與川鄂之交甚固。其
相求甚殷。正恐棄信之後。徒減鄰稅之入款。其
益涇鹽之銷數。是以徘徊不肯遽發。林廣西之
返。私事固自鬱。公事亦殊不愜適。蜀人亦累月
焦灼。見鹽務之積。則閉目判之。而不復厝意於其
間。鈔器壽久。經派一局差。黃子妻之派查由差事。
巢物望輕損。才調頗長。人多議其別有嗜好。為未審
察。出偽耳。次青被蜀帥所劾。聞已引疾歸事。不知

宋還長沙否。渠所著國朝先正事略。同時筆
流中。豈比鉅製。必可風行海內。傳之不朽。惟帶兵
實能所長。以此善刀而藏。則大妙矣。聞

尊府子弟應制諸藝。但有可觀。舍回則全未講
求。至今未請得良友師。舍姪舍姪學亦未獲一講。名
師。殊以為慮。思得一文章天矯。出醫叔筆質。仍
態。總代為物色。連日頻得捷書。直隸於股。二
月內宜可殲滅。亦堪慶幸。甚也。順問

台安。諸維心鑒。

國藩

去

六月廿日

再昨有一函求 令兄薦良師與 次兒同
舟東來。近日同郡諸孝廉中。八股筆仗
俊拔而又略通經史者。究以何人為最。雖未
必能延請課讀。亦能識其姓氏。實曰或令 兒輩
相從擇焉。

尊府子姪及令坦等。兩從業師均係何人。乞
一示及。久困兵間。遂疏步。後問

意臣仁弟親家台好。

國藩 又啓 三月廿日

素匡仁弟親家閣下。得十月朔日
惠書。教審以素祥多故。後出

注事常僚。又扶壻舒世兄。彰舉於鄉。
台候多緩。惡者尉。哥匪之外。又及高遜。
形在芳苑。多鄉未形之惠。俾不出牙。而
極。然亦只宜批卻。真竊以甚厚。入邑間。未
可概用。片谷陵節而施。舍澄弟在湘鄉。藉
理哥匪。則批掣不中。理好。徒是以堅

脅從身從逐之心。而臬案考或多遁匿。
世辜考或遭刑戮。國藩前恐激之生變。
或善邑侯到明府。概注寬弛。頃又政函
韞為中丞。申內嚴外寬之說。在湘鄉當立
一寬字。其互與正頭目。須予嚴懲考。則
拏奸省垣。聽中丞委。審定奪。不知韞
帥以考然否。竊意湘鄉采辦得法。則他
屬之哥匪易戢。哥匪辦得法。則通省

之高匪亦親。欲湘鄉之果就範圍。則營教之
權當操之。接帥。湘邑不淫。控教一人。獄訟
權當操之。邑侯。局紳不准。控斷一獄。此湖
南大局之福。六塞門私家之事也。望

閣下佐中丞力者主。於他縣或可放鬆。惟
湘鄉舉動。纖悉必交。務署呼吸皆公。
明以照之。靜以鎮之。或可化民。乃為善
耳。東路拾股。自十月廿四日。擊斃巨酋

任程後。賊歎曰。哀。劉潘郭揚諸軍。追至
 志勿等處。若邪。再大創。賊次。該逆。進不
 得。擄糧。運。不。敢。渡。連。出。當。弓。校。滅。其。直
 隸。臬。匪。亦。其。矣。而。官。相。頃。有。署。直。督。之
 信。不。公。印。渠。何。故。近。日。厚。霞。錫。沅。次。第。去
 任。而。印。後。繼。之。吾。鄉。極。盛。固。難。久。耶。思。之
 悚。惕。後。問。

台好。

國藩

友

十一月廿

再國藩 不止肯回江督之任。實因告病在先。回任之
命在後。心星又則病勢甚重。江督則
病瘥甚速。謂能取巧而何。君子不特千萬人之袂
頰。而畏一者識之竊嘆。且方寸先不自許。是以
屬疏勞之。又自揣精力日衰。實不敢多閱公牘。
多見宸宥。是以但求辭要職。以輕責任。不敢
離軍營。以圖安逸。乃教疏上後。外間紛稱。擬
乃有函索所呈。極可再嘆也。不知長沙來群

置議如何。夫人蹈常習故。偶見呂籍柔共。便亦
驚恠。以謂天下必不虛有如此。豈今之出處。便默
必稽查成案而守之耶。洪楊任賴吾匪。不知係與何年
成案稱理也。五月政。字震一函。僅言

令兄可憫。默終古。昨接筠公信。謂斷人責以褊迫
世養。和面似世世四字。或字震所添。如江鈍翁編
造典故乎。再向

彙城仁弟。祝來歲禧。國藩又啓。十一月廿

仿古字版

會文正公書牘

世界書局印行

目錄

覆賀精庚中丞……………一
 致劉孟容……………二
 答黃麓溪……………四
 答歐陽功甫……………四
 覆胡蓮舫……………五
 覆嚴仙舫……………六
 與劉星房都轉書論鹽務……………七
 復彭麗生……………九
 與江岷樵左季高……………九
 復歐陽曉岑……………一〇
 與朱石翹……………一一
 與王璞山……………一一
 與張石卿制軍……………一三
 與彭筱房曾香海……………一四
 與王璞山……………一五
 與劉孟容……………一七
 與王璞山……………一八

覆劉霞仙……………一八
 與王璞山……………一九
 覆江岷樵中丞……………二〇
 覆夏翹亭……………二二
 覆龍翰臣……………二二
 覆黃子春……………二三
 覆王璞山……………二四
 覆朱石樵……………二五
 與胡詠芝……………二五
 覆駱中丞……………二六
 覆褚一帆……………二七
 與劉霞仙……………二七
 與羅羅山劉霞仙……………二七
 致羅羅山……………二八
 與李次青……………二九
 與李次青……………三〇
 與羅伯宜……………三〇

與羅伯宜……………三一
 與羅伯宜……………三一
 與劉霞仙……………三一
 致胡潤芝中丞……………三一
 致李迪庵中丞……………三一
 致胡潤芝中丞……………三一
 覆李希菴……………三三
 與鮑春巽……………三四
 與羅少村……………三四
 與彭雪琴……………三四
 與左季高……………三四
 與李希庵……………三五
 與沈幼丹……………三五
 覆左季高……………三六
 與吳翺岡……………三六
 覆胡官保……………三七
 覆胡官保……………三八

與張廉卿	三九
覆胡官保	三九
覆葛舉山	三九
覆胡官保	四〇
覆李少荃	四〇
覆鄧寅階	四一
覆莊衛生	四一
覆葛舉山	四二
覆易芝生	四二
覆劉霞仙	四三
覆許仙屏	四三
覆胡官保	四三
與左季高	四三
致胡官保	四四
覆歐陽小岑	四四
致吳竹如	四五
覆李申夫	四五
覆李申夫	四五
覆李申夫	四六

覆胡官保	四六
覆吳南屏	四六
覆黃莘農中丞	四七
覆胡官保	四八
覆吳子序	四八
致李希庵	四九
覆胡官保	五〇
覆多禮堂都護	五〇
與李申夫	五一
覆郭意城	五一
與何廉昉	五二
覆張廉卿	五二
與李申夫	五三
覆李希庵	五三
覆胡官保	五四
致沈幼丹	五五
覆彭雪琴	五五
覆胡官保	五五
覆李次青	五六

覆李希庵	五六
覆李筱泉	五七
覆胡官保	五七
致李黼堂	五七
覆方子白	五八
致沈幼丹	五八
覆李次青	五八
覆李黼堂	五九
覆李雨亭	六〇
覆胡官保	六〇
覆胡官保	六〇
覆李筱泉	六一
覆夏毅甫	六一
覆張凱章	六一
覆胡官保	六一
覆李希庵	六二
覆宋滋久	六三
覆胡官保	六三
覆胡官保	六三

覆胡宮保	六四
致宋滋久	六四
覆宋滋久	六四
覆郭憲城	六五
覆胡宮保	六五
覆左季高	六六
覆方子白	六六
覆胡宮保	六七
覆左季高	六七
覆許仙屏	六八

覆胡宮保	六八
覆左季高	六九
覆胡宮保	六九
覆鄧寅階	七〇
覆胡宮保	七〇
覆胡宮保	七〇
覆劉馨室	七一
覆李希庵中丞	七一
覆左季高	七一
覆李黼堂	七二

覆毛寄雲中丞	七二
覆左季高太常	七三
與朱雲崖	七四
與唐桂生	七四
覆毛寄雲中丞	七四
覆姚秋浦	七六
覆李少荃	七六
覆李少荃	七七

曾文正公書牘

覆賀耦庚中丞 道光庚子

國藩頓首頓首耦庚前輩大人閣下。二月接奉手示。兼辱雅贖。感謝感謝。過蒙矜寵。裝飾益量。國藩學。尋聲逐響。自從鏡海先生遊。稍乃粗識指歸。坐管見明。亦耿耿耳。乃甫涉向道之藩。遽鈞過情之蓋。嘗扶剛平生之病源。養癰藏癩。百孔雜出。而其要在不誠而已矣。竊以爲天地之所以不息。國之所以立。賢人之德業之所以可大可久。皆誠爲之也。故曰誠者物之終始。不誠無物。今之學者。言考据則持爲騁辯之柄。講經濟則據爲獵名之津。言之者不怍。信之者噴耳。轉相欺謾。不以爲恥。至如仕途積習。益尙虛文。奸弊所在。蹈之而不怪。知之而不言。彼此塗飾。聊以自保。泄泄成風。阿同駭異。故每私發狂議。謂今日而言治術。則莫若綜核名實。今日而言學術。則莫若取篤實踐履之士。物窮則變。救浮華者莫如質。積翫之後。振之以猛。意在斯乎。方今時事孔棘。追究厲階之生。何嘗不歸咎於發難者。彼豈實見天下之大計。當痛懲而廓清之哉。豈預知今日之變。實能自我收之哉。不過以語言欺人。思先登要路耳。國藩以茲內省。早歲所爲涉覽書冊。講求衆藝者。何一非欺人之事。所爲高談古今。嚶嚶自許者。何一非欺人之言。中夜以思。汗下如霽。頃觀先生所爲楹帖。道在存誠云云。旨哉其闡然君子之言乎。果存誠而不自欺。則聖學王道。又有他哉。鏡海先生庶幾不欺者也。佞長峯前輩見過自訟。言動無妄。吳竹如比部天質木訥。貞足幹事。同鄉則黎月橋前輩至性純純。陳岱雲行已知恥。馮樹堂有志力學。皆勉於篤實者也。國藩雖愚柔。既聞明訓。敢不請事。若夫讀書之道。博學詳說。經世之才。循采廣詢。自度智慧精神。終恐有所不逮。惟當謹守繩墨。不敢以浮夸導子弟。不敢以暴棄殆父母之遺囑。其有所進。幸也。無所進。終吾身而已矣。辱承扶掖之盛心。恐不察其淺鄙。而期許過實。故謹布一二。以爲請益之地。亦附於皇華三拜之義云。書不宣盡。伏惟垂鑒。



致劉孟容

去歲辱惠書。所以講明學術者甚正且詳。而於僕多寬假之詞。意欲誘而進之。且使其述爲學大指。良厚良厚。蓋僕早不自立。自庚子以來。種事學問。涉獵於前明本朝諸大儒之書。而不克辦其得失。聞此間有工爲古文詩者。就而審之。乃桐城姚郎中鼐之緒論。其言誠有可取。於是取司馬遷班固杜甫韓愈歐陽修曾鞏王安石及方苞之作。悉心而讀之。其他六代之能詩者。及李白蘇軾黃庭堅之徒。亦皆泛其流而究其歸。然後知古之知道者。未有不明於文字者也。能文而不能知道者或有矣。烏有知道而不明文者乎。古聖觀天地之文。默迨鳥迹。而作書契。於是平有文。文與文相生而爲字。字與字相續而成句。句與句相續而成篇。口所不能達者。文字能曲傳之。故文字者。所以代口而傳之千百世者也。伏羲既深。知經緯三才之道。而畫卦以著之。文王周公恐人之不能明也。於是立文字以彰之。孔子又作十翼定諸經以闡顯之。而道之散列於萬事萬物者。亦略盡於文字中矣。所貴乎聖人者。謂其立行與萬事萬物相交錯。而曲當乎道。其文字可以教後世也。吾儒所賴以學聖賢者。亦藉此文字。以考古聖之行。以究其用心之所在。然則此句與句續。字與字續者。古聖之精神語笑。胥寓於此。差若毫釐。謬以千里。詞氣之緩急。韻味之厚薄。屬文者一不慎。則規模立變。讀書者一不慎。則鹵莽無知。故國藩竊謂今日欲明先王之道。不得不以精研文字爲要務。三古盛時。聖君賢相。承繼熙洽。道德之精。淪於骨髓。而問學之意。達於閭巷。是以其時。雖冒兔之野人。漢陽之游女。皆含性貞。爛吟咏。若伊萊周召凡伯仲山甫之倫。其道足文工。又不待言。降及春秋。王澤衰竭。道固將廢。文亦殆殊已。故孔子覩獲麟曰。吾道窮矣。畏匡曰。斯文將喪。於是慨然發憤。修訂六籍。昭百王之法戒。垂千世而不刊。心至苦。事至盛也。仲尼既沒。徒人分布。轉相流衍。厥後聰明魁桀之士。或有識解讓箸。大抵孔氏之苗裔。其文之醇駁。一視乎見道之多寡以爲差。見道尤多者。文尤醇焉。孟軻是也。次多者。醇次焉。見少者。文駁焉。尤少者。尤駁焉。自荀揚莊烈屈賈而下。次第等差。略可指數。夫所謂見道多寡之分數。何也。曰深也博也。昔者孔子贊易以明天道。作春秋以表人事之至當。可謂深矣。孔子之門有四科。子路知兵。冉

求富國。問禮於柱史。論樂於魯伶。九流之說。皆悉其原。可謂博矣。深則能研萬事微芒之幾。博則能究萬物之情狀。而不窮於用。後之見道不及孔氏者。其深有差焉。其博有差焉。能深且博而屬文復不失古聖之誼者。孟氏而下。惟周子之通書。張子之正蒙。醇厚正大。巍焉寡儔。許鄭亦能深博。而訓詁之文。或失則碎。程朱亦且深博。而指示之語。或失則隘。其他若杜佑鄭樵馬貴與王應麟之徒。能博而不能深。則文流於蔓矣。游揚金許薛胡之傳。能深而不能博。則文傷於易矣。由是有漢學宋學之分。斷斷相角。非一朝矣。僕竊不自揆。謬欲兼取二者之長。見道既深且博。而爲文復臻於無累。區區之心。不勝奢願。譬若以蚊而負山。盲人而行萬里也。亦可哂已。蓋上者仰企於通書正蒙。其次則篤嗜司馬遷韓愈之書。謂二子誠亦深博。而頗窺古人屬文之法。今論者不究二子之識解。輒謂遷之書憤懣不平。愈之書傲兀自喜。而足下或不深察。亦偶同於世人之說。是猶觀盤詰之聲牙。而謂尙書不可讀。觀鄭衛之淫亂。而謂全詩可刪。其毋乃漫於一概。而未之細推也乎。孟子曰。君子所性。雖大行不加焉。雖窮居不損焉。僕則謂君子所性。雖破萬卷不加焉。雖一字不識無損焉。離書籍而言道。則仁義忠信。反躬皆備。堯舜孔孟非有餘。愚夫愚婦非不足。初不關乎文字也。卽書籍而言道。則道猶人心所載之理也。文字猶人身之血氣也。血氣誠不可以名理矣。然舍血氣則性情亦胡以附麗乎。今世雕蟲小夫。旣溺於聲律續藻之末。而稍知道者。又謂讀聖賢書。當明其道。不當究其文字。是猶論觀人者。當觀其心所載之理。不當觀其耳目言動血氣之末也。不亦誕乎。知舍血氣無以見心理。則知舍文字無以窺聖人之道矣。周濂溪氏稱文以載道。而以虛車讓俗儒。夫虛車誠不可。無車又可以行遠乎。孔孟沒而道至今存者。賴有此行遠之車也。吾輩今日苟有所見。而欲爲行遠之計。又可不早具堅車乎哉。故凡僕之鄙願。苟於道有所見。不特見之。必實體行之。不特身行之。必求以文字傳之後世。雖曰不遠。志則如斯。其於百家之著述。皆就其文字。以校其見道之多寡。剖其銖兩而殿最焉。於漢宋二家構訟之端。皆不能左袒。以附一闕。於諸儒崇道貶文之說。尤不敢雷同而苟隨。極知狂謬。爲有道君子所深屏。然默而不宣。其文過彌甚。聊因足下之引誘。而一陳涯略。伏惟憫其愚而繩其愆。幸甚幸甚。

答黃麓溪 道光戊申

兩接手書。闕然未報。疏爛之咎。靡所於辭。夙懿德鑒。亮獲寬宥。比想道履清娛。政祉佳暢。甚善甚善。蘇垣爲仕宦鱗萃之場。以弟所聞。大氏揮霍者。蒙卓聲。謹守者。沈散秩。生辣者。鵠起。和厚者。蟻伏。標榜者。互相援引。務實者。獨守岑寂。揆斯三者。於吾兄。俱未爲諧叶。然君子之道。不汲汲於名望。要在案牘律例之中。誠能三折肱而九折臂。則閱時稍久。亦終爲僚友所推。上官所許。弟有一言。奉吾兄於數年之內行之者。其曰耐乎。不爲大府所器重。則耐冷爲要。薪米或時迫窘。則耐苦爲要。聽鼓不勝其煩。酬應不勝其擾。則耐勞爲要。與我輩者。或以聲氣得利。在我後者。或以干請得榮。則耐閒爲要。安分竭力。怡然如一無所求者。不過二年。則必爲上官僚友所欽屬矣。此二年中。悉力講求捕盜之法。催科之方。此兩事爲江南尤急之務。一旦莅任。則措之裕如。人見其耐也如此。又見其有爲如彼。雖欲不彪炳。其可得乎。來書過自抑退。所屬望於弟者甚深。故特以迂腐之辭。上貢左右。閣下以爲然耶否耶。弟居官依舊。殊無佳狀。去歲癘疾。比已十愈其九。根株未拔。終恐復萌。翰林不得外差。其清況蓋甚於外吏。然弟一毫不敢萌妄念。目前所處。既已忝居非分多多矣。而況敢再覬乎。

答歐陽功甫 道光己酉

春間辱惠書。並詩一首。荷意良厚。而陳義甚高。有非淺陋所敢當者。然於足下教我之厚意。不敢不敬承之也。蓋僕寡昧之資。不自振厲。恆資輔車以自彊。故生平於友誼兢兢焉。嘗自慮執德不宏。量既隘而不足以來天下之善。故不敢執一律求之。雖偏長薄善。苟其有裨於吾。未嘗不博取焉。以自資益。其有以讜言評論陳於前者。即不必有當於吾。未嘗不深感其意。以爲彼之所以愛我者。異於衆人泛然相遇之情也。昨秋與二陳兄弟相見。論辯之間。不合者十六七矣。然心雅重其人。以爲實今日豪傑之士。所見雖不盡衷於道。而要其所以自得者。非俗儒口耳之學所及。持論雖不必矩於醇。而其所譏切。實足以匡吾之不逮。至於性情氣詣之相感。又別有微契焉。別後獨時時念之。以爲如斯人實友朋中所不可少者。而不敢以門戶之見參之也。蓋平日區區所以自勵而差堪

自信者如此。今觀來書操主宰而不分畛域之言。乃適有會於余心焉。故特述此懷。以答雅意。抑足下方妙年。而所見及此。其識解有大過人者。故樂舉爲足下告也。凡人材高下。視其志趣。卑者安流俗庸陋之規。而日趨污下。高者慕往哲盛隆之軌。而日即高明。賢否智愚。所由區矣。足下慨然病俗學之陋。且知務訓詁詞章。以取名者之不足貴。志趣所存。有足尙者。誠於此。審趨向。循繩尺以求之。所造豈有量哉。秋闈伊邇。計當專意舉業。但循其程度。而勿置得失於意中。亦君子之所以異於人者也。廣募千里奔喪。良堪憫念。不知比已扶櫬歸里否。欲以一書唁之。並問訊鬻叔行止。倘有便鴻。希并示及。所錄詩詞。似尙非其佳者。往見渠兄弟詩古文各數十首。倘可續寄否耶。王船山通鑑論已刷出未。告爲代覓一部。行納價付意城處也。

覆胡蓮舫 咸豐辛亥

去臘奉到手書。懇懇數千言。昔觀嚴茂之面。今知故人之心。別紙所陳數事。空山憂戚之中。乃能盡傷民瘼。遂欲拯桑梓於水火。起瘡痍而沐浴之。其爲惻怛。豈勝欽挹。以世風之滔滔。長民者之狹隘酷烈。而吾子伏處閭巷。內度身世。卽暑浮沈。旣茫乎未有畔岸。外觀鄉里。飢殍滿眼。又汲汲乎有生涯日蹙之勢。進不能以自効。退不能以自存。則吾子之迫切而思以鑰於九閭者。實仁人君子之至不得已也。然事顧有難者。自客春求言以來。在廷獻納。不下數百餘章。其中豈乏嘉謨至計。或下所司核議。輒以毋庸議三字了之。或通諭直省。則奉行一文之後。已復高閣束置。若風馬牛之不相與。如足下所條數事。蓋亦不能出乎交議通諭之外。其究亦歸於簿書屋積堆中。而書生之血誠。徒以供胥吏唾棄之具。每念及茲。可爲憤懣。故初奉尊書。本思投匭徑獻。繼念身處山中。而屬他人上書闕下。近世已無此風。且足下祥琴未屈。反授人以口實。故與可亭同年熟商。若其託名他氏。無難縷晰入告。若以尊名特達。則恐無益於民。先損於身。固未可率爾以嘗也。中如林周二公。仿漢氏繡衣直指之說。良足以劇劇賊而懲墨吏。國藩將據以上請。會林公遽歸道山。周公奉命撫粵。而粵西盜賊。亦日熾而不可嚮邇。於是事有專重。而治盜之使。不復能旁及矣。今春以來。粵盜益復猖獗。西盡泗鎮。東極平梧。二千里中。幾無一尺淨土。推

尋本原。何嘗不以有司虐用其民。魚肉日久。激而不復反顧。蓋大吏之泄泄於上。而一切廢置不問者。非一朝夕之故矣。國藩嘗私慮。以爲天下有三大患。一曰人才。二曰財用。三曰兵力。人才之不振。曾於去歲具疏略陳大指。財用兵力二者。昨又具疏言之。茲錄一通。敬塵清覽。未審足下以爲有補萬一否。如以爲可行。則他日仍當續請也。國藩學識短淺。自以躡躡高位。不敢不悚切講求。奈疾病相尋。心血虧損。夜不善寐。稍一搆思。輒心動手顫。年方壯歲。境亦安樂。而脆耗如此。理不可解。蒲葦之質。勢難堅強。以謬附於松柏。辱足下知愛。合傾誠相告耳。至於簪紱之榮。驕人之態。雖在不肖。猶能緣此腥穢。足下乃以銜版見投。毋乃細人視我。而鄙爲不足深語。今亦不復相璧。但求捐此陋俗。而時以德言箴我。幸甚無量。書不詳盡。伏惟鑒察。并乞多謝王君子壽。倘有藥石。幸脫故人。瞻望雲天。企伫曷已。

覆嚴仙舫

三月之末。奉到賜書。辱惠續行水金鑑及他珍物。嘉貺盛懷。感喟不既。比想大旆遂已南征。粵西小醜。不謂猖獗如此。天子以供億浩穰。倚仗賢明。故以屬之台端。而姚公運籌。鄒公建節。皆與閣下素號石交。如驂之靳。宜克有濟。不似往者趨辛乖分。意見歧出也。嘗考乾隆西師之役。用兵五載。轉輸萬里。而以肅州糧臺爲中外之樞紐。以大學士總督黃公廷桂任之。其時羽檄星馳。士馬糧械。倥偬萬端。黃公令藩臬道府州縣承辦軍需者。皆同館一班。公亦竟日危坐其中。每郵騎至。直入館院。啓視符牒。應付何司者。立予分派。目擊其錄稿鈐印畢。即以咨覆。重門洞開。毫無隔閡。一切神速。了無留滯。夫是以鮮中飽之人。而少浮銷之費也。閣下以他省官員。客寄粵中。地望未極優崇。僚屬未甚愜洽。不審遂能遠法黃公。得以惟所欲爲否。如其上不見疑。下不見忌。則所益於國帑者。爲已多矣。鄒公幕府有汪君者。與國藩友善。熟於輿地。亦能屬文。蓋軍中有用之才。閣下試引與深談。亦足助輶鈐之萬一。岷樵讀禮山中。誼嘗爲鄉里禦寇。然墨經從戎。則非所宜。弟比有書告其不必遠出。君子愛人以德。似應如此。閣下以爲然焉否耶。書不十一。伏冀迅奏膚功。懋賞歸朝。一握爲歡。慶幸無量。南望雲山。不勝馳系。

與劉星房都轉書論鹽務

頃得讀閣下所寄鹽法節略一紙。仰見筆畫精到。籌謀深遠。敬佩無已。去歲變法之初。規模粗具。亦容有未盡善者。今茲復欲小有變更。以期保此大局。此密益求密之道也。第試行未久。謗議未熄。忽又自改其前說。適足以快讒慝之口。此次小議改轍。要須周浹詳慎。不復少留滲漏。以期十年廿年永不再改。而後有以自立。弟等雖未諳鹽政。亦欲勉強管蠡以相佐助。搜尋罅漏以相詰難。謹就節略中所載及其所不載。悉心研究。竊以爲不足慮者有二。未深晰者有四。宜熟計者有三焉。伏惟分別而詳示之。辛丑五綱之殘課。及清查扣留部府各款。從前奏案。每引加帶課銀五錢有奇。此舊商之殘欠。本與新販無涉。戶部不能執甲所負之債。而取償於乙。執綱商之賬。而追呼於粟商。且去年初改新章之時。此項欠課。業已奏明停緩。豈甫經年餘。忽從而追索之。此其不足慮者一也。活支外款。本無成數。樽節一萬。卽報一萬。以候部撥。樽節十萬。卽報十萬。以候部撥。假使外間動用已盡。無分毫可供指撥。戶部亦不能持籌以相問。執簿以相責。此項銀兩。係兩淮額外樂輸。或多或少。或有或無。其權操自尊處。戶部不得爲政。此其不足慮者二也。節略中言此時鹽課。皆當復還舊額。方爲正辦。不知所謂復額者。復一百三十九萬餘引。每引四百觔之額乎。抑鹽觔復一百三十九萬餘引之舊。而仍照新章併爲六百觔大引。僅存九十三萬引乎。由前之說。則由六百觔而仍改還四百觔。是成本驟加。課額驟增。辦理將大致竭蹶。想智者必不爲此矣。由後之說。則較戊申綱之八十九萬引。僅多行四萬引。雖觔數暗與會典定額相符。而引數究嫌短絀。此弟等之未深晰者一也。節略中又稱俱復舊額。照科則卽每引須加徵五錢有零。不知尊意以爲此項宜加乎。不宜加乎。以爲宜加。則二年以來。每引止費六兩一錢有奇。衆商已慣見而慣聞矣。忽增五錢。亦恐其因而裹足。以爲不宜加。則國家課額。自有定數。去年議增二十萬引。業已攤課而之輕。今年議減十六萬引。亦宜攤課而之重。倘徑裁課額。則人言藉藉。豈不可畏。此其未深晰者二也。岸價之長跌。非官吏所能爲力。場價之貴賤。則院司可以裁制。去年陸公奏定新章云。官定場價。不得過二兩四錢。不許擅價居奇。今節略云。場鹽每引加貴七八錢。何以

官不能制。此其未深晰者三也。去年奏定新章云。祇行一百九萬餘引。滿額即止。以防壅積。乃節略中云。政票以來。已運正引三百餘萬。是兩年而行三綱之引矣。其果壅滯耶。則於百九萬引額滿之時。即應停止。不應自背前奏。溢出額外。自誇銷引之多。而受壅積之害。其果疏暢耶。則此時不應忽有改圖減引之議。此其未深晰者四也。乙未綱之鹽。從前陶文毅奏案。本請分年帶運。鹽既分十年帶運。課亦分十年帶徵。聞此綱至今。鹽未運畢。課亦未徵完。去年陸公奏章。乃稱爲乙未綱已納錢糧米運之鹽。實與陶公前奏不合。弟等已著疑於心矣。惟力籌卹商輕本之法。不得不思加勛。既思加勛。不能不指此項乙鹽爲名。以爲所加之勛。初非無課之鹽。有識君子。亦當深諒任事者之苦心。第每引配帶二百勛。兩年以來。行引至三百萬之多。則乙鹽全綱。配帶已畢。且溢出乙鹽之外矣。此後每引仍加二百勛。又將指何項鹽爲名。將來淮南粟引。永以六百勛爲定例乎。抑仍有改還四百勛之時乎。若不奏明。必爲言者所藉口。此其宜熟計者一也。去年陸公奏定章程云。自百引起至千引止。厥後儀徵設棧。乃改爲百十引起。以便小販。從前淮北試粟。所以從十引起者。以其引地甚隘。道里甚近。民販甚小耳。淮南則縱橫萬里。交錯七省。與淮北迥不侔矣。近聞江廣各岸。小販充斥。規趨微利。爭先跌價。大販守候不利。則折本賤售。一轍既覆。相戒不復再舉。蓋大販之受擠於小販。亦猶官鹽之受擠於私鹽。似應禁革小販。仍從百引起票。否則巨商畏縮。實於大局有妨。此其宜熟計者二也。去年奏定新章云。被災舊商。凡請運新鹽千引者。准其配帶補運免課之鹽二百引。如舊商無力。情願自招新商代運者。亦准配補二百引。弟等竊以爲此條過矣。每引六百勛內。既有二百勛無課之鹽。以千引計之。因加勛而無課者三之一。因配補而無課者五之一。是無課者占五百三十餘引也。無課之鹽太多。成本太輕。岸價焉得而不賤。新商焉得而不虧。場產焉得而不絀。往者綱商取巧之術。有所謂掩銷補運者。有所謂加帶融楚者。掩銷云何。船被水淹之鹽。准其免課補運。奸商則鑿沈無鹽之船。而希圖報淹。融楚云何。食岸輕課之鹽。通融行於楚岸。奸商則懸閣應運之引。而鑽營融楚。二者之免課輕課。其害較私鹽而更甚。今日之配補無課。其害較二者而更甚。若不裁革此項。則新商行票。既受擠於小販。又受擠於配補

跌價賠本。職是之由。此其宜熟籌者三也。凡此數者。弟等未經身履。或莫悉其機要。十年以來。國家大政。惟此事足挽回元氣。閣下與陸公之忠盡。士林所共仰也。然裁抑滋多。謗讟亦鉅。其初規有未善者。此次小議變更。不可不詳盡周至。務使目前無遺議。日後無流弊。庶足宏濟於艱難耳。

復彭麗生 咸豐壬子

前承惠書。存唁不孝。頃又蒙手書。所以期勸故人。甚篤且勤。國藩積愆叢臆。無實行而盜虛聲。爲神明所不容。乃不隕滅我躬。而延禍於吾母。椎心悔憾。蓋不得自比於人數。其又何經濟之足言。願如足下所稱。今日不可救藥之端。惟在人心陷溺。絕無廉恥云云。則國藩之私見。實與賢者相脗合。竊嘗以爲無兵不足深憂。無餉不足痛哭。獨舉目斯世。求一攘利不先。赴義恐後。忠憤耿耿者。不可亟得。或僅得之。而又屈居卑下。往往抑鬱不伸。以挫以去。以死。而貪饕退縮者。果驥首而上騰。而富貴。而名譽。而老健不死。此其可爲浩歎者也。足下與某公書。言之至爲深痛。積年痒疥。爲君一搔。憂患餘生。得少快慰。國藩來此。蓋以鄂中失守。恐其回竄。不得不出。以自別於畏死之徒。至於求有補濟。則骯髒之性。將以方柄周旋於圓鑿之中。亦知其鉅鎔而鮮嘗矣。刻下所志。惟在練兵除暴二事。練兵則猶七年之病。求三年之艾。除暴則借一方之良。鋤一方之莠。故急急訪求各州縣公正紳耆。佐我不逮。先與以一書。然後剴切示諭之。年來飽更世故。又經憂患。齒髮稍侵。精神頹敗。幸故人一來。顧我。相對紆論。收召散亡之魂魄。被濯如山之塵垢。庶生新機。而還舊職。卽拯時艱於萬一。亦未可知。郭筠仙。劉霞仙。羅羅山。及平日交舊。都來此間。尙望足下惠然命駕。無任佇企。

與江岷樵左季高 咸豐癸丑

士子壽。林天直。張廉卿俱到。衆賢彙進。龜亂噬枯。必有厭人心志之政。今日百廢莫舉。千瘡並潰。無可收拾。獨賴此精忠耿耿之寸衷。與斯民相對於骨嶽血淵之中。冀其塞絕橫流之人欲。以挽回厭亂之天心。庶幾萬有一補。不然。但就局勢而論之。則滔滔者吾不知其所底也。岷樵爲向軍門所奏。俾充翼長。義似不可以辭。非區區計較。

於己身之利害而已。彼既翻然而引與同袍。則岷樵之風抱。與所熟睹於軍中之利弊短長。或者得盡展布。而唯命是從。亦未可知。卽不然而言不吾聽。謀不吾用。亦且優容其間。益得盡究軍情得失。而一喙不置。彼誠懷矣。其又能久居此席乎。將來奉身而退。亦易爲計。若預薄其不足有爲。而悍然不顧。則非有心人援溺迫切之心也。若謂某子不足共事。則又岷樵之度之不足容納衆流也。兩端者。二君尙細思之。

復歐陽曉岑

頃奉賜書。不特識解度越吾輩。卽文氣之深厚。亦似夫張子厚之書牘。尊兄宏量精思。近日遂爾臻此。莊生所謂聞任氏之風俗。殆未可與輕才詭說之徒。簡髮而道一一也。所論數事。國藩蓋亦粗識指歸。謹以復於左右。書院之說。誠爲進退失據。接來教之次日。卽將關聘卻去。今仍以屬陳水部。未陽常寧一帶。頃有土匪竊發。已調楚勇五百。湘勇三百。前往進剿。若撲滅稍遲。則國藩當移駐衡州。藉令無事。而東南如衡永各郡。西南如寶慶各屬。實爲匪徒淵藪。亦宜選駐彼處。搜求洞穴。與草薶而禽獮之。未可講學會垣。轉荒職事。保甲之法。誠爲善政。然判定科條。散布鄉愚。求能行法之人。不苛斂於民間。蓋或百里而不得一賢焉。世教既衰。人人各逞其亡等之欲。魚肉孱民而刀匕之。官司布一令甲。徒以供若輩橫索暴斂之名目。故團練保甲。皆今日之要務。而鄙人妄謂。皆不可鹵莽以行。滅裂以舉。人心陷溺。固已抵此。獨嚴縛匪黨。動與磔死。差令鄉里善長。得以伸彼之氣。而應吾之令耳。梅里之兄子。頃攜尊兄書來。欲教湘勇以技藝。已收畜在此。武弁中有塔齊布。頗曉軍事。僕亟欲與之誘掖。又周金城在府署教技。亦有師法。將來操練。卽倚此三人。文案不立。不足興事。誠如尊諭。頃已在公館立審案局。派知州一人。照磨一人承審。匪類解到。重則立決。輕則斃之杖下。又輕則鞭之千百。徹處所爲。止此三科。巨案則自行稟奏。小者則惟吾專之。期於立辦。無所罣礙牽掣於其間。案至卽時訊供。卽時正法。亦無所期待遷延。昨城內擱獻土匪。本交善化縣。敬處聞信卽提來。已立梟二人矣。至於集思廣益。本非易事。而施之於會城之內。尤易爲人欺蔽。日之抵吾門者。或上書獻策。或面陳機宜。大抵不出尊書三端之外。抑所謂陽驕者也。然因

此而盡廢吐握之風。則又不可。要當內持定見。而六轡在手。外廣延納。而萬流赴壑。乃爲盡善。我思古人。殆應如此。而區區則未逮矣。潮勇淫掠。極爲毒害。近有他處潰兵逃勇。假託於潮。以張其莫敢誰何之威。亦有并非兵勇。游匪四出。而國人相烏呼以爲潮勇者。抗之則力有不能。遣之則資有不繼。招之則患且無休。今方謀擇其桀悍者。日磔幾人。然後再謀遞解之法。若云拒孤城以整鄰國。則初意原不如是也。捐輸之例。百無一良。若以屬之鄙人。惟當敬謝不敏。畧中丞君明白曉事。近與僕謀事。意見多合。第相响相濡。尙未能忘足忘要。或稍久更當融吐。此入事者。尊兄之所慮。亦僕所日夜籌維者也。謹一一銓覆。即有不當。幸無惜更迭辨論。以示榜槩。企望企望。或乘輿扁舟。又復翩然來過。彌慰私懷。禱祀求之。不敢必也。

與朱石翹

自去歲以來。搶劫之案。各縣多有。惟吾邑無之。亦無以他事冤抑持片詞來控訴者。仁人之所被。豈淺鮮哉。現在設法購拿各劫案首要諸犯。至則立予磔死。不復拘守常例。持之稍久。巨案或可少息。方今民窮財困。吾輩勢不能別有噢咻生息之術。計惟力去害民之人。以聽吾民之自華自活而已矣。去冬之出。奉命以團練爲名。近來不談此二字。每告人曰。鄉村宜團而不宜練。城廂宜練而不宜多。如此立說。明知有日就懈散之弊。然懈散之弊尙少。若一意操切行之。則新進生事者。持札四出。訛索徇勒。無所不至。功無尺寸。而弊重邱山。亦良可深慮也。朱嵐喧五兄。聞遂捐萬金以賑飢。可謂豪傑之士。湘潭左家。弟已面勸其大捐。以濟本邑之賑務。雖小有允諾。然恐不過千金以外。弟又擬爲書函。以勸同里各富人。不知何處較易爲力。便中尙祈示悉。散放之法。古人皆以放錢放米爲善。設粥廠非佳政也。

與王璞山

僕於十六日到家。身染小恙。比已全愈。每念天下大局。極可傷痛。桂東之役。三廳兵尋殺湘勇於市。足下所親見也。江西之行。鎮筸兵殺湘勇於三江口。傷重者十餘人。七月十三。八月初六。省城兩次兵燹。執旗吹號。出隊開仗。

皆以兵勇不和之故。七月廿四。臨莊諸君遇難。亦以鎮寧雲貴兵見賊逃潰。危敗不救。遂致新痛。蓋近世之兵。屢怯極矣。而偏善妒功。忌能。懦於禦賊。而勇於擾民。仁心以媚殺己之逆賊。而狠心以仇勝己之兵勇。其仇勇也。又更勝於仇兵。曩者己酉新甯李沅發之變。鄉勇一躍登城。將攻破矣。諸兵以烏鎗擊勇墜死。遂不能入。近者兵丁殺害壯勇之案。尤層見疊出。且無論其公相仇殺。即各勇與賊事殷之際。而各兵一不相救。此區區之勇。欲求成功。其可得邪。不特勇也。即兵與兵相遇。豈聞有此營已敗。而彼營冒險往救者乎。豈聞有此軍餓死。而彼軍肯分一粒往哺者乎。僕之愚見。以爲今日將欲滅賊。必先諸將一心。萬衆一氣。而後可以言戰。而以今日營伍之習氣。與今日調遣之成法。雖聖者不能使之一心一氣。自非別樹一幟。改絃更張。斷不能辦此賊也。鄙意欲練鄉勇萬人。概求吾黨質直而曉軍事之君子將之。以忠義之氣爲主。而輔之以訓練之勤。相激相勵。以庶幾於所謂諸將一心萬衆一氣者。或可馳驅中原。漸望澄清。目今江西已有楚勇二千。湘勇一千。頗有和尙相衛之象。而自臨莊諸君殉難以來。僕日夜憂慮。深恐吾岷石羅筠諸兄。無以取勝而立於萬全之地。且以賊氛數萬之衆。而吾勇僅有四千。亦無以壯其魄而樹厥威。擬請再練勇六千。合成一萬之數。概歸岷樵石樵二君子統領。其經費一面勸捐。一面由藩庫提取數萬金應用。以此入奏。宜蒙俞允。不識足下以爲然否。前者石樵刺史臨發之時。曾爲一書致足下。請提左營之師。同爲援江之行。僕以榔桂之民。方喁喁焉望湘勇駐彼。如嬰兒之依倚慈母。是以留足下防榔。而沈石兄之書。不以違諸左右。今聞臨莊春池諸君之難。又甚悔僕之淺慮。不早致足下之師於江西也。然湘勇十九始抵江省。去廿四之役。僅五日耳。假使足下果得石兄之信。亦不能飛越而遽達也。儲石友之爲人。僕取其誠樸而有忠義之氣。與足下宜相鍼芥。又有守備周鳳山者。聞膽勇過人。亦知大義。昨令其由州永帶勇三百餘。赴足下新甯之援。比想二處之勇皆已到矣。足下爲我細細究察周守備。果可引爲吾黨之助否。儲君縱才或稍不恢闊。然自是忠節中人。僕已深信之矣。惟周守備則未深知。如其可倚爲心腹。則望足下與之深相結納。或以渠所帶三百之勇。令其添爲三百六十。合僕所定之營制。儲石友所帶之二百六十。亦令再添湘人一百。合

僕營制。而足下與儲君。陰爲物色豪傑。可共大義者。儲以爲各營之將。若尊處果成三營。合之塔參將守醴陵之二營。鄒嶽屏守瀏陽之一營。有奇。及舍弟衡州之營。則已將近三千矣。漸充漸廣。足成六千。殆亦非難。斯議果行。則今冬訓練可成。如江西賊尙未退。則全赴江西。陸續前往。與之血戰。若其悉退。則徑赴江南。馳逐河北。誓不與此賊俱食息於天地之間耳。鄙見如此。一以爲岷石羅筠諸君謀萬全。一以爲國家大局。反復思維。非此殆無一二千人可聯爲一氣者也。茲特專函與足下熟商。足下如不以爲然。則求即賜復示。如以爲可。則求一面專使至江西商辦。一面陰籌一切。或軍事稍暇。能來衡州與僕面議曲折。尤所企望。如不得隙。不宜輕動。惟酌之。

與張石卿制軍

奉惠書。未即箋復。比聞簡調山東。自以密邇畿輔。重資鳩籌。作鎮海岱。惟兩湖吏治方就整飭。軍政亦有起色。遽爾移節東征。不獨文武方振之綱。莫爲廣續。卽南北紳庶。亦若失所依倚。弟自今歲以來。所辦之事。強半皆冒侵官越俎之嫌。只以時事孔艱。苟利於國。或益於民。卽不惜攘臂爲之。冀以補瘡痍之萬一。而扶正氣於將歇。練勇之舉。亦非有他。只以近日官兵在鄉。不無騷擾。而去歲潮勇有姦淫擄掠之事。民間倡爲謠言。反謂兵勇不如賊匪之安靜。國藩痛恨斯言。恐民心一去。不可挽回。誓欲練成一旅。秋毫無犯。以挽民心而塞民口。每逢三八操演。集諸勇而教之。反復開說。至千百語。但令其無擾百姓。自四月以後。閉令塔將傳喚營官。一同操演。亦不過令弁委前來。聽我教語。每次與諸弁兵講說。至一時數刻之久。雖不敢云說法點頑石之頭。亦誠欲以苦口滴杜鵑之血。練者其名。訓者其實。聽者甚逸。講者甚勞。今各弁固在。具有天良。可覆按而一一詢也。國藩之爲此。蓋欲感動一二。冀其不擾百姓。以雪兵勇不如賊匪之恥。而稍變武弁漫無紀律之態。迨六月初。提軍到省。謂防堵不宜操兵。盛暑不宜過勞。遂切責塔將而右護清將。而中丞亦疑弟不宜干預兵事。會弟與老兄有舉塔劾清之摺。同時並發。而尊處又有札斥塔將何不操練。提軍遂疑兄與弟併力排之。皆挾私見而非公忠也。豈其然哉。豈其然哉。嗣后兵勇相爭。弟雖常持正議。而每抑勇而伸兵。自謂寸心無私。可見諒於人人。遠初六日兵譁之變出。論者或

謂是有指賊。或謂早伏陰機。何不預爲之所。君子直道而行。豈肯以機械峻賊。與人相競禦哉。惟弟本以鄉紳。半涉官事。全恃虛聲。以彈壓匪徒。一有挫損。則宵小得以窺伺。而初終恐難一律。是以抽擊轉後。暫駐衡州。蓋因二月一奏。曾言上四屬土匪極多。將來請駐衡數月也。到衡不十日。而茶陵安仁相繼失守。去衡州較近。距長沙略遠。弟奏中亦慮及此。曾言吉安土匪。恐被江西剿急。竄入安酃一帶。不幸言中。弟來衡似不爲無益。現已命塔副將王同知之勇。自北往攻。王縣丞及舍弟之勇。自西往攻。東南兩路。令駐紮興甯之湘勇兜截。未審能即日撲滅否。然係烏合。想無足深慮。至於粵賊大局。若以各處兵力剿之。恐終難了此。鄙意欲練勇萬人。概歸岷樵管帶。或猶能指揮如意。不審鴻裁果以爲然否。粵賊竟據九江。田家鎮之師。不審果足資堵禦否。如賊勢稍紓。大旆當即北發。相去益遠。會合無因。依依之情。筆不能罄。

與彭後房曾香海

粵逆於八月廿二退出江西。過湖口後。即分竄上下游。一破安慶。一據九江。比聞北陷黃梅。南擾興國。此時大局糜爛。即使三城克復。秦晉無驚。而流賊之勢固已成矣。岷樵勦莖日隆。全握兵柄。是意中事。鄙意欲練勇萬人。概交岷老統帶。以爲掃蕩澄清之具。近時各營之兵。東調一百。西撥五十。將與將不和。卒與卒不習。勝則相忌。敗不相救。即有十萬衆在我麾下。亦且各懷攜貳。離心離德。居今之世。用今之兵。雖諸葛復起。未必能滅此賊也。鄙意必須萬衆一心。諸將一氣。而後改絃更張。或有成功之一日。昨已爲書告邑人王璞山鑫。又以書告岷樵矣。璞山亦有書抵我。痛夫江西七月廿四之役。湘勇陣亡者八十餘人。又重以帶勇者四人。大興義憤。思報友仇而紓國難。茲將渠書並弟書二件抄呈尊覽。兩人者起意不同。而指歸則一。現擬於衡州廣募新勇。大加訓練。前六月間。託魁太守所招之勇。邵陽各勇。較勝於新化。後弟自省歸。邵勇交塔副將帶往醴陵防堵。昨在安仁剿江西土匪。一戰蕩平者是也。新化勇則散遣歸農矣。弟來衡時。聞新勇並未散。且屢來具呈。稟請赴江殺賊。是以復行招集。現存二百餘人。鄙意欲再招百五十人。合成三百六十。以符弟之管制。茲著新化勇數人回籍。令其自行招集。呼

朋引類。或可得勁悍之卒。亦未可知。香海兄若素知新化健卒。何處最多。或見此數人。加以指蹤。無取浮滑之輩。而求土作之類。是爲至要。其途費業經議定。來時不給一錢。到衛之日。每人給錢三百文而已。此事各勇自能了之。兩兄不管亦可。自新化勇而外。弟又欲招魁太守曾經訓練之邵陽勇一營。計三百六十人。以爲弟之親兵。煩兩兄與蔭翁商妥。須擇其精而又精者。蔭兄無留上駟自用。而以下駟應客。至禱至感。其口糧銀數。在衛操演。每日給予一錢。出征本省土匪。每日一錢四分。征外省粵匪。每日一錢五分。其爲隊長哨長。以次而加。養傷銀。上等三十。中等二十。下等十兩。陣亡卹銀六十兩。征本省土匪減半。弟若不出外。或交岷樵作親兵亦如之。望兩兄與諸勇晰言之也。此次初出。無所謂安家銀兩。在寶亦不能先給幾日口糧。途費亦惟到衛之日。每人給三百文而已。抑又有請者。不難於勇。而難於帶勇之人。帶勇之人。第一要才堪治民。第二要不怕死。第三要不急急名利。第四要耐受辛苦。治民之才。不外公明勤三字。不公不明。則諸勇必不悅服。不勤則營務細鉅皆廢弛不治。故第一要務在此。不怕死。則臨陣當先。士卒乃可效命。故次之。爲名利而出者。保舉稍遲則怨。稍不如意則怨。與同輩爭薪水。與士卒爭毫釐。故又次之。身體羸弱者。過勞則病。精神乏短者。久用則散。故又次之。四者似過於求備。而苟闕其一。則萬不可以帶勇。故弟嘗謂帶勇須智深勇沈之士。文經武緯之才。數月以來。夢想以求之。焚香以禱之。蓋無須臾或忘諸懷。大抵有忠義血性。則四者相從以俱至。無忠義血性。則貌似四者。終不可恃。兩兄平生物色。果有此等人否。如其有之。萬望道達鄙意。禮請以出。非弟之私好也。爲天下出也。弟之汲汲。尤在於此。

與王璞山

荆襄扼長江之上游。控秦豫之要害。誠爲古來必爭之地。然以目前論之。則武昌更爲喫緊。蓋賊首既巢金陵。近穴鎮揚二城。遠處所宜急爭者。莫要於武昌。昔人謂江自出蜀以後。有三大鎮。荊州爲上鎮。武昌爲中鎮。九江次之。建業爲下鎮。京口次之。今粵逆已得下鎮矣。其意固將由中鎮以漸及上鎮。聞九江安慶。近已設立僞官。據爲四窟。若更陷鄂城。上及荊州。則大江四千里。遂爲此賊專而有之。北兵不能渡江而南。兩湖兩廣三江閩浙之兵。

不能渡江而北。章奏不克上達。朝命不能下宣。而湖南江西。逼近強寇。尤不能一朝安居。即使賊兵不遽渡湖南。竄而沅湘固時有彘卵之危。然則鄂省之存亡。關係天下之全局固大。關係吾省之禍福尤切。鄂省存則賊雖南竄。長沙猶有倖存之理。鄂省亡則賊雖不南竄。長沙斷無獨存之勢。然則今日之計。萬不可不以援鄂爲先籌。此不待智者而決也。足下義氣薄雲霄。忠肝貫金石。莖率湘勇三千。即日渡湖而北。與岷樵石樵之師相合。力保鄂城。以固全局。則不特湖南受其利。天下實有賴焉。惟近日省局支絀。處處皆須節省慎重。即以三千勇援鄂。一切用費。不宜過二萬金。乃爲妥善。國藩六月招楚勇一千。湘勇二千。赴援江西。共用去二萬二千有奇。在家初出之途費。起行月餘之口糧。及興辦各件之雜費。與朱石樵郭筠仙另支之儲款。皆在其內。此次湖北行程較近。天氣較好。足下辦理。若能少此更妙。至多亦不宜過二萬二千也。前者足下欲募勇二千。往報湘人七月之仇。國藩欲添勇數千。往助岷樵一臂之力。兩書往還。不謀而合。厥後足下來衡。面商大概規模。約定餉需不必支之藩庫。器械不必取之省局。足下自許可勸捐餉銀壹萬。可私辦軍裝數項。蓋以爲此吾輩私興之義舉。非省垣應辦之官事也。嗣足下廿二書來。言廿四走省請餉一萬。僕已訝其與初議相刺謬矣。適會田家鎮之敗。鄂省大震。長沙戒嚴。中丞命足下帶勇防守省城。倉卒興舉。一切皆取之於官。此則局勢與前議大變。止可謂之官勇。不得復謂之義師也。旣爲官勇。則值此官項支絀之秋。不得不通盤籌畫。目下兵勇萬餘。傾庫中所藏。僅敷兩月之需。而足下寄來稟稿。乃云須再發銀二萬。各勇須預支月半口糧。將來招足萬人等語。是則足下未能統籌全局。不知措餉之艱難也。又云帳房三百架。硝磺等項。委員解縣。招勇本以援省。而多此一番周折。是亦足下閱歷太淺。不善省財省力之咎也。僕素敬足下馭士有方。三次立功。近日忠勇奮發。尤見慷慨擊楫之風。心中愛重。恨不卽游揚其善。直暴於衆。冀爲國家收澄清之用。見足下所行未善。不得不詳明規勸。又察足下志氣滿溢。語言誇大。恐持之不固。發之不慎。將來或至僨事。天下反以激烈男子爲戒。尤不敢不忠告痛陳。伏冀足下細察詳玩。以改適於慎重深穩之途。斯則愛足下者所禱祀求之者也。刻下康揚帶回之勇千人。羅李與鄒將歸之勇亦有千餘。合足

下之三千。計會城共有湘勇五千餘人。若足下能帶三千。毅然援鄂。則省城所存之二千餘。宜酌量裁汰。止存千餘爲妥。若足下不往援鄂。尤宜大加裁汰。止存二千餘爲妥。然以足下之志之識。亮必慨然以援鄂爲己任也。其存省之兵。望一概用坐糧之例。每日一錢。蓋行糧本過優。亦宜與往鄂者示有區別耳。古來名將。得士卒之心。蓋有在於錢財之外者。後世將弁。專恃糧重賞優。爲牢籠兵心之具。其本爲已淺矣。是以金多則奮勇蟻附。利盡則冷落獸散。昔嘗與岷樵細論此層。茲更爲足下進一解焉。

與劉孟容

伯母已得安葬甚善。四方多故。早爲封樹。卽亦無復它慮。岷筠兩君。國藩日日系念。今辰得筠仙書。知已自黃陂與岷樵分手。遂得南旋。想已安抵梓木洞矣。惟岷老之師。尙在漢陽德安一帶。未得渡江退保武昌。茲以爲系耳。璞山在衡。與國藩約共招勇六營。往江南殺賊。將報湘人七月之仇。兼助岷樵一臂之力。其餉銀軍裝。皆由勸捐自籌。不欲取之省局。所以別於官軍。自成一枝義旅也。厥後璞山歸湘。卽往省城請餉。蓋與初議異矣。適會下游警急。中丞囑璞山帶勇晉省防堵。此則局勢與在衡之議大變。自有格例。未可意爲伸縮。而璞山請餉請器物。多不中程。以是省局上下。大滋物議。而璞山語言意氣。又多不檢。以是訾議其短者。評譏日入於吾之耳。書函日入於吾之目。國藩昨爲一書規箴璞山。未知其能細味而曲從否。僕蓋愛之深而思益成之。非以文吏常譚。挫其銳氣也。鄂省事棘。萬不可不發兵往援。自璞山外。殆罕有請纓自行者。而此老雖銳以自任。左右無能夾輔之人。以助其義氣。而彌其闕失。是用隱憂。老弟嘗亦同此懸懸也。樹堂九月已歸去。吾弟能來此一存視否。吾不願聞弟譚宿腐之義理。不願聽弟論膚泛之軍政。但願朝挹容暉。暮親臭味。吾心自適。吾魂自安。筠老雖深藏洞中。亦當強之一行。天下紛紛。烏亂於上。魚亂於下。而容筠獨得晏然乎。閱吾弟與岷樵書稿。抑所謂膚泛者也。岷在江西。與鄧厚甫大不協。張中丞常以此等議論勸岷老。尊書之旨。蓋相去不遠。獨文詞深美。遂躋古人。國藩入世已深。厭聞一種寬厚論說。模稜氣象。養成不黑不白不痛不癢之世界。誤人家國。已非一日。偶有所觸。則輪囷肝膽。又

與掀撥一番。非吾弟亦無以發吾之狂言。

與王璞山

接到手書。改過光於日星。真氣塞於戶牖。忻慰無極。前者足下過衡。意氣盈溢。視天下事若無足爲。僕竊憂其乏。惕厲戰兢之象。以其握別匆匆。將待再來。衡城時。乃相與密語規箴。以求砥於古人敬慎自克之道。自足下去後。而毀言日至。或責賢而求全。或積疑而成謗。僕亦未甚深慮。遠吳竹莊書來。而投稜之起。乃大不懌。於是有初八奉規一函。僕函既發以後。又接家嚴手諭。道及足下忠勇勃發。宜大蘊蓄。不宜暴露。然後知足下又不理於梓里之口。向非大智慧轉圜神速。痛自懲艾。幾何不流於矜善伐能之途。古人謂齊桓葵邱之會。微有振矜。而叛者九國。亢盈悔吝之際。不可以不慎也。比聞足下率勇三千。赴援鄂。僕既幸吾黨男子。有擊楫聞雞之風。又憫旁無夾輔之人。譬如孤竹干霄。不畏嚴霜之摧。而畏烈風之搖。終虞足下無以荷此重任。頃朱石樵書來。渠自鄂省十一二即可起行。大約日內可到長沙。觀其書詞。則逆賊全數下竄。武昌業已解嚴。僕昨奉諭旨。令帶勇即日援鄂。今不特僕不必去。即足下亦可免此一行。僕另有書致中丞。商湘勇停止援鄂之舉。不知意見合否。祈足下面稟中丞。細決行止。至足下之初志。欲興義旅。徑赴下游殺賊。則須計出萬全。不可倉皇一行。蓋舟師必須兼備。操練必須兩月。裒糧必儲半年。三者闕一。皆有坐困之道。而無成功之理。朱石翁殺賊之志。甚銳且堅。此次歸來。必且大有興舉。若中丞能從僕言。停止援鄂之行。則望足下與朱石兄同來衡城。就僕熱計。講求水戰之道。精析練勇之法。僕雖不才。亦當隨諸君子杖劍東下。討此凶逆。如足下鄂中之行。勢不能止。猶望示我一書。苦雨多愁。所懷千端。諸惟心照不盡。

覆劉霞仙

璞山募勇之事。國藩蓋時時系念。前此爲赴鄂救援之行。不妨倉卒成軍。近日爲東下討賊之計。必須簡練慎出。若不教之卒。虛敗之械。則何地無之。而必遠求之湖南。等於遠東自詡之家。仍同霸上兒戲之軍哉。故此行不可

不精選，不可不久練。無愚智皆知之。豈以足下與璞山之賢，而反不知乎？選貴精，則璞山新招之卒，其可汰者必多。練貴久，則未出之前，與成行之後，其口糧必須早爲計畫。現在江遠川新招之千人，僕擬先發安徵，助岷樵之急需矣。其餘五千，今冬須備兩月坐糧。明春須備兩月行糧。計其所費，良復不貲。止得選備十營，合長夫爲五千人，或可勉強支持。是以昨復中丞一書，將各勇通盤核算。璞山新舊之勇，多不過留四營。茲將原書抄呈。足下與璞山覽之，可得其詳也。湘勇佳處有二：一則性質尙馴，可以理喻情感；一則齊心相顧，不肯輕棄伴侶。其不佳處亦有二：一則鄉思極切，無長征久戰之志；一則體質薄弱，不耐勞苦，動多疾病。以此四者參觀，大抵征本省之土匪則利，禦江南之粵寇則怯。朱石樵歸來，必有一番閱歷篤論也。至於練勇之道，必須營官晝夜從事，乃可漸幾於熟。如雞伏卵，如鑪鍊丹，未宜須臾稍離。前與璞山面議，每營須有文武兼備之營官，始克照料一切。不知璞山已覓有賢者幾人，果能當此一席否？僕極不放心。今年援江之舉，以營官未暇詳擇，至今懊悔。望足下與璞山將四營之營官伊誰，幫辦伊誰，即日飛示，至要至要。

與王璞山

近日在敝處攻足下之短者甚多。其來尊處言僕之輕信讒謗，棄君如遺者，亦必不可少。要之兩心炯炯，各有深信之處，爲非毀所不能入。金石所不能穿者，別自有在。今欲多言，則反以晦真至之情。古人所謂窗櫺愈多，則愈蔽明者也。特書與足下約，計必從鄙意而不可改者五條，不必從僕聽足下自爲屈伸主張者三條，僕自密辦而不遽以書告足下者二條，並具於左。

一必從鄙意而不可改者五。

各勇宜操練兩個月。體弱者藝低者，油滑者，陸續嚴汰。明春始行遠出。每營必須擇一營官，必盡然分出營數。此時即將全數交付與他，不必由足下一手經理。任人則逸，獨任則勞。此後必成流賊，股數甚多。吾須分投與之相逐。若平日由足下一人統帶，臨陣始分股逐賊，則差之毫釐，謬以千里矣。幫辦者每營須四五人，必須博求

賢俊不盡取之湘鄉。萬一營官有病。則幫辦即可統領。斷不可草率。足下現物色得幫辦者幾人。祈開單見示。器械必趕緊製辦。局中廠苦之件。概不可用。伯韓所造抬鎗甚好。不知烏鎗已成若干。石樵言帳房宜用夾的。是否屬實。祈復示。如必須改的。此時尙可趕辦。鄒岳屏所捐鎗桿亦不好。竟須另覓硬木圓身未經鑄破者。如有一械未精。不可輕出。戰船能多更妙。縱使不能。亦當雇民船百餘號。與陸路之兵同宿同行。夾江而下。凡米煤油鹽布疋乾肉錢項鐵船竹木之類。百物皆備。匠工皆全。凡兵勇紮營。即以船爲市。所發之餉。即換吾船之錢。所換之錢。即買吾船之貨。如此展轉灌輸。銀錢總不外散。而兵勇無米鹽斷缺之患。無數倍昂貴之患。

一不必從僕。聽足下自爲屈伸主張者三。

鄙意定爲十營。合長夫計之。得五千人。非不知其太少。實恐口糧無出也。已由公牘札飭足下僅留四營。如足下能設法勸捐。多留一營亦可。鄙意欲足下來衡州合操。若憚於往返。即在省別操亦可。竹莊可帶一營。可囑其管帶來衡。石樵歸時。必來衡商議大局。足下倘不同來。必須開一單與石樵。粗定規模。再由敝處核定。陣法原無一定。然以一隊言之。則以駕壽三才二陣爲要。以一營言之。則一正兩奇。一接應。一設伏。四者斷不可缺一。此外聽足下自爲變化。將多人以禦劇寇。斷不可無陣法也。

一自爲密辦而不遽以書奉告者二。

有人願帶五百人。隨同遠征。已許之矣。船戶已請多人去邀集。未知果有成否。足下亦有相契之船否。祈示。以上各條。皆切要之語。務求迅速回示。盼切盼切。

覆江岷樵中丞

來示論兵勇短長。最爲切當。僕於二月間復魁太守書有云。岳王復生。或可換孱兵之筋骨。孔子復生。難遽變營伍之習氣。雖語涉諧謔。實痛切之言也。今欲圖謀大局。萬衆一心。自須別開生面。斬新日月。專用新招之勇。求忠義之士將之。不雜入營稍久之兵。不用守備以上之將。國藩之意。蓋與閣下若符契耳。添勇六千之說。昨因令弟

達川帶勇一千進省。卽令其先將此勇趕緊赴皖。以備閣下爪牙之需。其餘五千。須俟船礮辦齊。水陸並進。乃可有濟。省中諸友及璞山之意。皆欲急急成軍以出。國藩思此次由楚省召勇東下。一以爲四省合防之計。一以助閣下澄清之用。必須選百練之卒。備精堅之械。舟師則船礮並置。陸路則將卒並憤。作三年不歸之想。爲百戰艱難之行。豈可兒戲成軍。倉卒一出。人盡烏合。器多苦窳。船不滿二百。礮不滿五百。如大海簸豆。黑子著面。縱能迅速皖省。究竟於事何補。是以鄙人愚見。總須備戰艦二百號。又輔以民船載貨者七八百。大小礮千餘位。水勇四千。陸勇六千。夾江而下。明年成行。與麾下相遇於九江小孤之間。方始略成氣候。否則名爲大興義旅。實等矮人觀場。不直方家一哂耳。明知閣下盼望此勇甚切。然速而無益。不如遲而有備。且閣下初到廬江。亦宜將吏治民事。略爲整頓。卽陸路堵禦。本境剿匪。有隨身帶往之勇。有達川續往之勇。有李少荃舊練之勇。亦尙足資捍衛。想卓裁定以爲然也。閣下奏保辦理舟師之張觀察敬修。頃聞由郴州北來。日內可抵衡州。此間辦法。有與制軍書與羅山書。抄稿呈覽。可以得其大凡。羅山新自吉安歸省。聞有不願長征之意。未卜能強之一出否。璞山以汰勇之故。頗致怨於國藩。尙須徐徐開譬。叔績學術浩博。天下共知。其宏識遠略。可謀大事。則獨國藩與閣下知之。今年併力援江。實與伊定議也。安徽紳士。國藩所知者。自呂鶴田吳竹如李少荃外。又有何慎修子永。徐宗瀛閻仙其去安徽最近者。又有宿遷之臧牧菴。淮安之魯通甫。皆碩學鴻才。桐城戴存莊。雖文學之士。而有血性。官場自岱雲外。袁午橋最爲結實。才氣亦足以包舉大事。國藩去年曾過州縣。見宿州郭刺史尙。瀉實有賢聲。此外閻呂鶴翁李少荃。當不差謬。季高。筠仙。僕寄書山中。屬其來衡練兵。遠赴皖中。助閣下一臂之力。現皆未來。霞仙諸君。不知可出佐閣下否。伯韓必宜送往幕府。但須船成之後。與大隊偕行耳。承示致周敬修先生書。不特規畫大局。有陳同父一流人氣象。卽文義之美。亦殊非近時所有。此老與國藩會晤雖淺。結契頗深。實能脫去世俗仕宦町畦。近聞其遂作古人。不知果否。其世兄亦自可用。安徽利源。惟淮北鹽務。嘗有可圖。洪湖以西。尙無阻滯。北可以侵河東之引地。西可以侵淮南之引地。署運使者爲合親郭兩三。閣下能與鶴翁謀在此間圖生活否。否則專恃

捐輸。斷不可恃。此間設局開捐。足音登然。涸轍之勢。卽在目前。奈何奈何。

覆夏憩亭

還將之道。誠爲至要。惟僕所用之人。如塔智亭帶邵陽勇。林秀山帶平江勇。周鳳山帶道州勇。楊名聲帶新化勇。卽舍弟輩之帶湘勇。皆有各樹一幟之風。止可直隸鄙人麾下。未便又立總統之名。貌爲相轄。實不相降。江汝舟自回楚後。並未與弟通書。聞羅山到此。有不願長征之意。璞山之志。久不樂爲弟用。且觀其過自矜許。亦似宜於剿土匪。而不宜於營大寇。惟伯韓近日來衡。弟當與之熟商一切耳。戰艦之事。近已分局湘潭。均刻期燈節前後舉工。惟張觀察購辦之夷礮廣礮。到楚尙無確耗。若不俟之以行。則彼此皆不能成軍。弟北望君門。東望皖江。寸心焦灼。豈敢片刻安處。而籌辦各件。俱非倉卒所能遽就。且卽使成軍以出。亦當於黃州巴河九江等處。先謀收復。又不能遽赴吾岷老之急。大局所在。止論地形之要害。不得顧朋友之私誼。卽君父諭旨所指示。亦有時而不敢盡泥也。弟以非材。謬與戎事。蚊虻負山。自知不勝。往在京師。頗好與勝己者往還。或有所圖。則招以共事。此次膺斯重責。豈不知博求豪俊。救我不逮。惟念兵凶戰危。以萬衆而託命於鄙人。苟非慨然相許。卽亦不敢相強。閣下珊網之訓。謹當感佩。然幾幾誠求。又幾幾不爲強求。此亦自有苦衷。閣下應能曲諒之也。

覆龍翰巨

頃奉惠函。伏審動止康勝。德業益懋。至以爲慰。諭及陳告民瘼一節。實有萬不得已。具徵仁人君子之用心。二三十年來。士大夫習於優容苟安。掄修袂而養媮步。倡爲一種不白不黑不痛不痒之風。見有慷慨感激以鳴不平者。則相與譏其後。以爲是不更事輕淺而好自見。國藩昔廁六曹。目擊此等風味。蓋已痛恨次骨。今年承乏團務。見一二當軸者。自藩籬管。深閉固拒。若惟恐人之攘臂而與其間也者。欲固執謙德。則於事無濟。而於心亦多不可耐。於是攘臂越俎。誅斬匪徒。處分重案。不復以相關白。方今主憂國弱。僕以近臣而與聞四方之事。苟利民人。卽先部治而後上聞。豈爲一己自專威福。所以尊朝廷也。來示之指。殆與鄙衷若合符契。近日大局。益不可問。江

岷樵至廬以後。卽被逆賊圍逼。其戚劉君長佑帶楚勇千餘。自鄂繼往。其胞弟又帶楚勇千餘。自湘繼往。皆未知能果至救援否。黃州旣爲賊據。修壘濬壕。儼然峴負。巴河以下。賊舟櫛比鱗次。動盈百里。湖北船楫。皆無可恃。而崇中丞參劾吳制軍閉城株守。不圖進剿。諭旨切責。頃制軍奏明出省至黃州一帶督戰。極小之舟。無幾之楫。未練之勇。屢逃之兵。驅之赴敵。至則潰耳。崇公旣不知事理。而冒昧一劾。制軍亦宜據理覆陳。不宜輕於一進。此行關係鄂省之安危。卽南北之大局所係也。國藩奉命赴皖援剿。救焚拯溺。豈敢少緩。祇以辦船之事。非倉卒所能畢工。而張德國觀察回東購楫。至今尙無確耗。此間專候此項楫位。庶足稍壯聲威。計起行之期。當在正月之末耳。

覆黃子春

劉君霞仙來衡。盛道閣下鸞骨松心。通曉治體。不復踐踏尋常仕宦町畦。郭君筠仙亦稱道不容口。比又得夏觀察書。尤以推轂津津。三君子者。皆與鄙人金石至交。許與不妄。用知閣下之風格。不似世間桔槔故態。隨人俯仰者也。國藩從宦有年。飽閱京洛風塵。達官貴人。優容養望。與在下者。輒熟和同之象。蓋已稔知之而慣嘗之。積不能平。乃變而爲慷慨激烈。軒爽翫礪之一途。思欲稍易三四十年來。不白不黑不痛不痒。牢不可破之習。而矯枉過正。或不免流於意氣之偏。以是屢蹈愆尤。獲譏取戾。而仁人君子。固不當責以中庸之道。且當憐其有所激而矯之之苦衷也。頃間奉到寄諭。命國藩赴皖援剿。自維才智短淺。無能爲役。而與辦船隻。選練義勇。擬以水陸萬數千人。夾江而下。規模亦已粗備。但求宏才偉識。共濟時艱。閣下若不棄鄙人爲不足與謀。尙祈岸幘棹舟。翩然過我。其有不遠。而爲指陳。至幸至幸。又聞貴邑有江鼎臣孝廉。尤豪俠堪倚任。亦望閣下以尺一致之。囑其在鄱陽宮亭之間。招集漁戶。早爲部勒。以待湖南北兩省之師。過湖口時。一相會合。其所須經費。卽乞與憩亭兄熟商。必有方略。可資集用。若能於漁舟之外。更謀雇買民船。改修戰艦。可置楫位。尤足以壯聲勢。若二者俱不能。則陰求血性男子。招募義旅五百人。與此間陸路之兵。聯爲一氣。亦足以別開生面。飛揚旌旆。國藩智小謀大。不無見

晒方家。然大局糜爛至此。志士仁人。又豈宜晏然袖視。坐聽狂賊之屠戮。生靈而不一眷顧耶。

覆王璞山

方今友朋中。如足下之精心研求者。蓋不幾見。僕於此等處。亦頗究心。茲將僕之營制。與所以位置諸賢人君子之助我者。逐條臚列。祈飛書覆我。歸於一是。且以逆賊楊秀清。不過閩里一偷兒。其羽黨亦烏合嘯聚。而其官職。營制。人數之多少。旗幟之分寸。號令之森嚴。尙刊定章程。堅不可攻。況吾黨奉朝廷之命。與君子之師。而可參差錯亂。彼立一幟。此更一制。不克整齊而畫一之哉。所定條款。務望遵從。卽小處或有不當。亦當委曲商酌。不可遽爾違異。

一舊制三百六十人爲一營。茲添爲五百人一營。每哨添火器二隊。刻有新營制一紙。足下之二千人。卽可分爲四營。

一營官必須賢能之士。卽幫辦亦須博求時彥。與其一手經理。或有不逮。不如求賢以自輔也。現在貴處各營官幫辦。中有朱鐵橋。鍾台州及桂東之某生。僕所倚信。亦在此三君子。此外則閱歷較淺。恐未足恃。僕意足下自將一營。以朱鐵橋輔之。朱石樵將一營。以鍾台州輔之。孫閱青將一營。以桂東某生輔之。鄒伯韓將一營。以其本家元探等輔之。此三君者。皆足下平日深相契好。以之分帶足下之勇。有相成之益。無相妒之嫌。此區區位置之苦心。想足下能鑑照也。

一陸路十二營。須有一總提調。擬以朱石樵爲之。提調斷不可無兵。故令其自帶一營。又恐其不能斤斤於營中之瑣務也。故以鍾台州輔之。行軍必有智勇兼全者爲先鋒。茲特立嚮導處。擬以足下爲提調。又別立偵探處。擬以鄒伯韓爲提調。此三提調者。皆極要事也。三君子皆自帶一營。而又兼管此三事。分之則各有專職。合之則聯爲一氣。

一陣法初無定式。然總以握奇經之天地風雲龍虎鳥蛇爲極善。茲以五百人定爲四面相應陣。以爲凡各陣法

之根本。各營均須遵照。茲附去一紙。其每隊之駕壽陣三才陣。前已刻式。茲亦附去一紙。

一貴處所留之鄉勇。聞有二千四百人。分爲四營外。其餘剩四百人。竟可汰去。

一羅山往永興時。與我握別面訂曰。既不肯放我還山。則或在幕府參謀。或帶一營同行。或留守衡州。三者惟君之所位置。現在鄙意欲留羅山守衡。蓋他人難當此一面也。如羅山守衡。則尊處所剩之四百人。卽交之勦辦土匪。

一長沙丁氏兄弟。皆一時賢俊。比之新化之鄒。湘陰之郭。殆將過之。聞丁秩臣之弟號巽卿者。艱苦忠信。智勇深沈。足下若能求此人帶勇。則可師可友。望設法求之。足下忠銳絕倫。惜尙未能多求勝己者耳。

覆朱石樵 咸豐甲寅

岷樵素調台端赴皖。公義私情。俱不可以不往。弟擬月杪起行。在省耽閣數日。花朝之前。可以赴鄂。旌從或與偕行。亦未爲不可。特到鄂以後。弟須水陸並進。與此賊決戰於黃州巴河之間。閣下則可由黃陂麻田間道赴處。弟欲聽閣下之自往。則失吾干城腹心之助。欲攜閣下以偕行。又負岷樵救焚拯溺之望。以是展轉難遽決爾。假令天心厭亂。鄂湘二省之師。竟能克復黃州。驅逐巴河。與岷樵及閣下之師。會於湖口小孤之間。併力而攻安慶。則大局猶有可爲。蒼蒼者究竟未知何若。吾輩竭力爲之。成敗不復計耳。此間所辦快蟹船。差強人意。長龍船薄脆不堪。連日鬱惱異常。弟前見成守備熟悉船事。推心置腹。委用極專。不謂遽失所恃。璞山不願從吾營制。弟比與霞仙細商。亦嫌其帳下幫手過少。恐二千餘人者。非一二人所能馴御。且此時斷斷不合。將來進止參差。亦難得力。弟卽決計不帶之東下。方今世亂需才。如璞山者。弟卽不能用。自有他人能用之者。勉於求合。乃所以愈離也。

與胡詠芝

閣下治軍鄂堵。爲甄師喜。爲兩湖喜。而同時又接廬州失陷岷樵殉難之信。爲天下憂。爲吾黨憂。國藩自九月來。募練諸勇。造備戰船。擬與甄師岷老合爲一氣。共商四省合防之策。兼籌以勦爲堵之道。意將奉甄師爲主。而侍

與岷老輔之。不謂新材遽成名以去。而甄師又被羣言謗劾。孤立無助。對此茫茫。止堪痛哭。待先後招用陸勇六千人。訓練可用者略近三千。水勇五千人。皆新集之船工水手。不知軍火爲何物。戰鬪爲何事。調集之官。招聘之紳。亦無敢以舟師自任。願與此賊相搏於風濤浩渺之中者。以是毫無把握。日夜焦思。計自衡至鄂。舟行當逾二旬。可以逆風之暇。操演數次。船隻仿粵東之式。有所謂快蟹長龍者。人多見謂可用。礮則不滿六百。稍與分配。即行成軍以出。鄂中整助孔亟。亦不復可延候矣。計二月之杪。當與旌從相遇。季翁堅臥不起。郭筠仙亦無意再出。蕭可卿以年逾六十。不願卽戎。譚湘溪老母在堂。家無昆弟。歐赤城新有母喪。王元圃去秋沒矣。此外聘求之士。尙有數人。相見伊邇。嘗一一爲閣下道之。方今世變孔棘。而宦場泄沓之風。曾無少爲振作。有識者以是深懼。皆懷入山恐不深入林恐不密之志。故侍之不克羅致英彥。固由素行淺薄。不足以引鍼拾芥。亦實因有道之往往潛藏。不肯輕予人以一知也。尊書所拔滇黔各材。想甄師必以入告。不知曾會賤銜否。所須軍械。到黃即可分用。此行以水次爲糧台。一切軍裝米鹽。皆儲舟中。較之陸路糧台稍便耳。

覆駱中丞

水師將不暇擇。實因將官不願下河。湖北亦同此患。而招水勇亦較陸勇迴不相侔。陸路應募者極多。而水路則久不能齊。是以有來卽行收留。來示謂非慎重周詳之道。極是。然急何能擇。姑以充數。礮架除辦四十餘箇外。再求多造百個。廣礮之架無磨盤。不甚靈便。到省當換三分之一。璞山之勇。若歸我督帶。則須受我節制。此一定之理。待於去年箴規璞山一函。業抄稿呈閱矣。厥後璞山復書。但求乞放還山。而於侍書各條。並不一一答復。此其意豈願與侍同事者乎。既不能受節制。自難帶以同行。今日大局糜爛。侍豈復挾長恃勢。苛人小節以自尊。又豈復妬才忌功。不挾健者以自衛。惟一將不受節制。則他將相效。又成離心離德之象。故遂決計不帶也。昨閣下欲札飭璞山先赴黃州。不知比已下札否。札中所言。係令其歸甄師節制否。若歸甄師節制。則尊處宜速行咨明。若不歸甄師節制。聽璞山自成一軍。則尊處宜先行奏明。此亦一定之理。今世雖大亂。而此等處尙不可紊也。國藩

性本褻隘。因有鑑於晚明君子。朝肩敢壞將盡。而猶偏競意氣。爲可恥笑。是以時自省警。閣下若取侍與省中諸僚友往返書函。一一俯覽。而察我心緒。亦足以知區區之非盡無說矣。

覆褚一札

湖南向無水師。此次開天闢地。披荆棘之世界。實屬萬難。陸路之勇。一入船上。則站立不穩。頭暈嘔吐者。往往有之。故鄙意欲招舊船水手。以免站立搖晃也。須俟喫口糧稍久。徐徐教導。徐徐新添。乃可成事。衡郡大營副右營楊將官。於初點名時。即將如何往江南殺賊。如何號令嚴明。退法者如何正法。一一問明。各勇紛紛告退。無一願者。正前營諸將官。正左營龍將官。起初並不與諸勇問明。但每日給之口糧。教之放礮盪漿等事。不過廿日。諸勇欣然。今則躍躍欲戰。愚民無知。於素所未見未聞之事。輒疑其難於上天。一人告退。百人附和。其實該勇心中。亦並無真知灼見。假令有百人稱好。即千人同聲稱好矣。咸南塘論招勇之法。亦嘗詳及此層。其說極精。胡維峯昨來稟函。道及閣下與渠言招陸勇之說。弟甚善之。祈閣下飛告維峯。雜招陸勇。但須肯上船者耳。弟爲勇未招齊。極爲懸系。惟於二十八日起行。抵潭時再與閣下面商。免致兩處牽繫。目前數日。廣爲招之。將來嚴爲汰之。不過多費口糧耳。卽有應行更改者。亦可更改。閣下與厲伯符一商。無容盡行稟陳也。

與劉霞仙

前接惠書。中心多不白。故不卽覆。頃又接初五夜手書。僕本擬今日赴省。以各營拾礮配船。忙冗萬狀。役夫數千。而不能畢。期以今夕二更趕畢。明早開行。半日可到也。近日友朋致書規我。多疑我近於妬功嫉能。伎薄險狠者之所爲。遂使我憤恨無已。紅黃荊卿之心。而見者以爲淫氣而薄之。碧化黃宏之血。而覽者以爲頑石而棄之。古今同慨。我豈伊殊。屈疊之所以一沈而萬世不復返顧者。良有以也。僕之不能推誠與人。蓋有歲年。今欲矯揉而灼灼向人。是再僞耳。相見匪遙。行與痛宣。

與羅羅山劉霞仙 咸豐乙卯

前復一函。由寶勇帶往。亮遠觀聽。此間先接胡潤公十一日一函。而知陸軍敗挫之狀。旋接雪琴厚庵初五一函。而知水軍自十二至廿四。旬餘血戰。入險出危。奇功不世。爲之駭詫敬歎。有此偉績。而蒼蒼者不遂令竟復武漢。其卒不復耶。抑留以有待耶。時事愈艱。則挽回之道。自須先之以戒懼惕厲。霞弟傲兀鬱積之氣。足以肩任艱鉅。然視事太易。亦是一弊。鄙意此時不可分支。且以五千之衆。併爲一路。非必勝羅而薛霞也。姑試十餘戰。徐徐以養霞公之望。而堅軍士之信耳。寶勇尤不可獨分一支。想羅兄深知之。岳鄂地勢甚大。賊股甚衆。必有爲分支之說者。故國藩兩書皆兢兢焉。伏惟詳督。郴州之賊。擾陷茶陵醴陵等處。不無警動。尊處亦不宜撥兵回救。古人所謂絕利一源。用師十倍者也。筱泉刺史丁艱。國藩擬附片奏請留營辦事。此間水陸如舊。周副將潯城一軍。尙足自立。次青在蘇官渡。師垂老矣。後幫三營。故乏起色。前幫四營。可與防守。難與進取。外江事勢如此。雪琴恐不能遽來章門。如決不能來者。則請於鮑超張榮貴二人之中。飛調一人來南康。以振積疲之氣。天下滔滔。何處英雄。翻然來止。以輔不遠而張屢厥乎。雪琴厚庵處。不別作書。鮑張二君。亦不具公牘。求閣下爲我力致之。必分一人前來而後有濟也。

致羅羅山 咸豐丙辰

新正九日。接臘月十七惠書。並公牘。具悉一切。水陸屢次大捷。似武漢不難克復。獻歲新祉。嚶嚶。想已蹋破黃鶴。馳奏露布。勳福無量。至以爲頌。江右軍事。洎無善狀。周鳳山臘月初四樟鎮大捷之後。本應留賊之浮橋。星夜修補。濟師西岸。速剿臨江。正可一鼓而下。乃不知出此。而循河之東岸而上。以剿離樟鎮六十里之新淦。初十日收復縣城。於是疑議紛起。司道移文請周軍就近南援。以解吉安之圍。而吉安城中周廉訪陳太守等。亦飛書請援於周副將。而新淦縣李令則稟請周軍留淦。以防賊竄撫建之路。往返商確。遂耽閣十餘日。新撫文中丞批令由樟鎮仍剿臨江。而亦未堅主其議。國藩恐周將地形不熟。方略不明。遂飭雪琴觀察由南康馳赴臨江。與周將商辦一切。逮新正四日。始抵樟鎮。而陸軍已有初一夜之挫。蓋周將自駐新淦。分辰勇常勇八百人回駐樟樹。護衛

水師賊匪覬知兵單遂渡三四千人於樟鎮乘之攻陷營盤傷亡二百餘勇幸初三日周將自新檢回援中途大
戰獲勝斃賊數百奪器械馬匹甚多初二日江軍水師戰勝奪獲船隻礮位初七日雪琴水師戰勝搶奪浮橋木
牌軍威稍振周將亦於初五回紮樟鎮日內可同雪琴進剿釜慰廬念惟自彭周而外江西無一軍可恃吉安之
圍五旬未解西路州縣陷至二十餘處無人過問餉項業已罄竭臘月卽發鈔票一半辦理諸多棘手國藩爲江
省計之深望閣下之來援爲大局計之又甚不願閣下之回援何也凡善弈者每於棋危劫急之時一面自救一
面破敵往往因病成妍轉敗爲功善用兵者亦然今江西之勢亦可謂棋危劫急矣嘗此之時若雄師能從北岸
長驅與水軍鼓行東下直至小池口八里江等處則敵處青山湖口之師忽如枯魚之得水江西瑞州臨江之賊
忽如釜底之去薪以不援爲援乃轉敗爲功之要著也如閣下仍從通城義甯回援江西則武漢縱能克復恐敗
賊從而回竄北岸旣無重兵外江之水師萬無東下之理內湖之水師終無出江之望是回援而滿盤皆滯不援
而全局皆生國藩所反覆思維而確見其然者也頃接黃南坡兄來信湖南擬以六千兵勇救援江西係黃與夏
憩亭方伯朱石樵太守三人董其事此舉果成則由袁州建瓴而下較之閣下從外兜剿而入尤爲得勢望探確
湘中實情如援師已成閣下卽無庸回江國藩細察目下局勢閣下克復武漢後由北岸迅速東下湖南援師由
袁州橫出上策也湖南援師不成閣下克復武漢後回剿瑞臨中策也援師旣不成武漢不復閣下屯兵鄂渚國
藩親率青山湖口陸兵馳援腹地與周鳳山一軍夾剿此則近於下策而亦不能不出此者也敢布區區尙祈卓
裁示復水師近未開仗青山蘇官渡尙屬平順霞仙比已至尊營否筠仙已赴浙中軍事多虞離索增感

與李次青

賊匪每夜明火列炬更鼓嚴明正守城之下乘林啓睿之守九江黃文金之守湖口乃以悄寂無聲爲貴江岷樵
守江西省城亦禁止擊柝列炬已無聲而後可以聽人之聲已無形而後可以伺人之形撫賊之備物太甚者其
中蓋有所不足也願足下以精心察之冷眼窺之無乘以躁氣無藉以衆論自能覷出可破之隙若急於求效雖

以浮情答氣。則或泰山當前而不克見。以瓦注者巧。以鉤注者憚。以黃金注者昏。外重而內輕。其爲蔽也久矣。僕之不欲再增撫州陸兵。實以金注太重爲慮。其水師助剿。已謂新中親兵二營。以饒防稍鬆也。連日苦雨不息。風雷交作。憂懼百集。不知尊營能無被浸淹否。將士淋漓困乏之中。尙不至多病否。此等苦况。軍中所不數見。足下積年體弱。能勝此否。國藩比亦移居營帳之中。深宵聞喧。頗傾注之聲。念我撫郡征人。茫然不知天道人事之何所終極也。各屬民未厭亂。從逆如歸。所出告示。嚴厲操切。正合此時辦法。但示中所能言者。手段須能行之。無惑於妄傷良民。恐損陰鷲之說。斬刈草菅。使民之畏我。遠過於畏賊。大局或有轉機。四五月餉項竭蹶。每名每日只能給百文。待六月贖東餉到。再行逐一補足外。每日加費米一升鹽三錢。將來不復扣還。此係萬不得已之計。望足下傳集各弁勇。將國藩苦衷。一一告明。即日再會中丞銜。出一告示。並諄札各營也。豐城經劉養素水師克復。亦一快事。省城虎勇等營。將以日內駐紮瑞州等處。西爲湖南援師與隔嶺之雲。東爲撫州大軍抽釜底之薪。或者稍有裨益。捐功牌銀數。由足下更定。便宜行之。一面稟明可也。

與李次青

接惠書。知渡河截剿。援賊獲勝。欣慰欣慰。足下與秀三彌之圍攻之師。兵力頗厚。惟屢次爲鎗礮傷我壯士。逾數百人。銳氣損壞。最爲兵家所忌。夫戰勇氣也。再而衰。三而竭。國藩於此數語。常常體驗。大約用兵無他詭巧。常存有餘不盡之氣而已。孫仲謀之攻合肥。受創於張遼。諸葛武侯之攻陳倉。受創於郝昭。皆初氣過銳。漸就衰竭之故。惟荀彧之拔偃陽。氣已竭而忽振。陸抗之拔西陵。預料城之不能遽下。而蓄養銳氣。先備外援。以待內之自敵。此善於用氣者也。足下忠勇內蘊。適往無前。惟猛進有餘。好謀不足。吾願足下學陸抗。氣未用而預籌之。不願學知盤。氣已竭而復振之。願算臯而後戰。不宜且戰而徐算。至慮至慮。

與羅伯宜

初四大仗之後。初五初六時銜連日日落。不甚相宜。蓋瑞州一軍。所恃者在湘寶兩營。到瑞數大戰以來。受傷者

亦頗不少。似此精銳百戰之卒。當加意愛惜之。宜使賊來尋我。我不去尋賊。僕於用兵。深以主客二字爲重。撲營則以營盤爲主。撲者爲客。野戰則以先至戰地者爲主。後至戰地者爲客。隨陣則以先吶喊放鎗者爲客。後吶喊放鎗者爲主。前廿五日有信與峙衡。囑其移營。暢言主客之義。今兩次大勝之後。正可趁此時移營。久頓城下。賊常主而我常客。不過兩月。銳氣暗損。懈心暗生。強兵將變爲疲兵。望與峙衡切商。卽日移營。至要至要。賊雖屢敗。而城中精銳老賊。並未多損。切不可稍存輕敵之見。千萬千萬。

與羅伯宜

峙衡招勇。僕囑其緩三月再辦。僕於峙衡。欲其先精而後大。先鬱而後暢。往年余愛敬塔羅二公。逢人輒稱頌其智勇。雖聲名布滿天下。而究惜大功未竟。至今頗用悔嘆。足下愛敬峙衡。當代爲蘊之蓄之。不必逢人頌揚。使其實常浮於名。則所以愛之者更大也。

與羅伯宜

初一日接惠書。具悉種種。日中則昃。月盈則虧。故古詩花未全開。月未圓之句。君子以爲知道。自僕行軍以來。每介疑勝疑敗之際。戰兢恐懼。上下怵惕者。其後常得大勝。或當志得意滿之候。各路雲集。狃於屢勝。將卒矜慢。其後常有意外之失。瑞州一軍。自初一初四大捷。各營漸有輕敵之態。頃聞黃澤遠添營已至。王吉昌虎勇亦來。周梧岡及舍九弟亦將畢集於此。鄙懷惴惴。輒有鑒於九江小池口往轍。或致意外之失。聞峙衡思深慮遠。乞足下與之精心默究。在己有少滿足之懷。則箴砭之。將士有矜慢之漸。則戒飭之。關係至大。千萬千萬。

與劉霞仙 咸豐丁巳

尊惠著積丸。近十日服之。尙無成效。大箸遊記二首。以義理言。則多精當。以文字言。終少強勁之氣。自孔孟以後。惟濂溪通書。橫渠正蒙。道與文可謂兼至交盡。其次如昌黎原道。子固學記。朱子大學序。寥寥數篇而已。此外則道與文竟不能不離而爲二。鄙意欲發明義理。則當法經說理窟。及各語錄劄記。(如讀書錄。居業錄。困知記。思

辨錄之屬。欲學爲文。則當掃蕩一副舊習。赤地新立。將前此所業。蕩然若喪其所有。乃始別有一番文境。望溪所以不得入古人之閫奧者。正爲兩下兼顧。以致無可怡悅。輒妄施批點。極知無當高深之萬一。然各有本師。未敢自詘其家法以從人也。論文凡說。嘗錄出以汚尊冊。然決無百葉之多。得四十葉爲幸耳。李雨蒼雲麟。即去冬上萬言書者。企仰令問。特往趨叩。予以一函。爲進謁之資。乞進而裁成之。

致胡潤芝中丞 咸豐戊午

接手函。敬悉榮晉宮銜。殊勳懋賞。允愜人心。慰幸曷已。厚迪優賞。亦其功實足以致之。厚庵聞已東下。不知率水師幾千前往。雪琴果駐何處。亦頗東行否。安慶之賊。想已無多。從此略蕩平矣。浙中賊數雖多。亦成強弩之末。饒廷選健者。衢州必不可無虞。卽有得失。杭城亦自可保。所慮變爲流賊。西趨襄陽。北趨南陽。並可擾及關洛。今豐熟如此。天下計。爲湖北計。均須先靖皖豫。如天年荒歉。尙恐變爲流賊。西趨襄陽。北趨南陽。並可擾及關洛。今豐熟如此。決當無慮。敝處報銷。似宜設於水次。若設局鄂垣。痕迹太重。耆中丞去歲請國藩赴江。其辭甚摯。又請霞仙代渠草奏。其意甚誠。因僕固守不出。始變而惱怒。余自有款於彼。彼固無款於余也。能設於武穴等處。痕迹較爲渾融。總攬大綱之人。擬謂伯符蓮舫篠泉三人。篠泉精細圓通。其從國藩也極久。其爲國藩謀也極忠。往年余擬專摺保之。曾爲羅忠節兩次言之。忠節亦極力贊成。厥後因循不果行。國藩之保舉稍吝。不過局度較隘。至於次青篠泉。泉之不得優保。畢金科之不成功名。則國藩實有蔽賢之咎。中夜以思。如何可贖。今畢金科則長已矣。次青篠泉二人。萬乞閣下大力。設法優保。或留鄂補用。以私言之。則國藩內有補於歉衷。外有益於報銷。以公言之。則二子存心愛民。必有裨於吏治。必有贊於高深。務乞留意。承允敝處部費。代爲設法。豁如之度。感佩曷極。舍弟溫甫尙在李營否。黃麻克復。比稜何處。溫弟小試不售。鄉試不中。蓄爲深恥。比之北行。尙欲攘臂一入秋闈。特以時過未肯昌言。舍九弟亦以不得一第爲恨。比在營公私尙順。無復他念。然鸞鳥思秋。未能忘情。國藩褊衷。無以化之。閣下宏度。弟輩所欽。尙祈有以教誨。

致李迪庵中丞

得胡伯母仙逝之信。不獨僕與賢昆仲厚雪數人者。失所依倚。實關係東南數省大局安危。聞鄂省衆議。欲官帥奏請潤帥於百日後強起視事。不知潤帥肯爲蒼生行此權宜否。此事殊難協宜。古來似此關係絕大之人。亦不多也。潤公聰明。本可移入霸術一路。近來一味講求平實樸質。從日行俗事中。看出至理來。開口便是正大的話。舉筆便是正大之文。不意朋輩中進德之猛。有如此者。其於朋友。純用獎借。而箴規卽寓乎其中。一旦以憂去位。不特公事棘手。而吾輩亦少切磋警惕之益。國藩至湖口。暑後傷風。病中聞胡伯母噩耗。愴然不復能爲懷。想賢昆仲必有同情也。

致胡潤芝中丞

十四日恩恩奉唁數行。亮登荃照。頃得次山壽山信。知秀帥出奏時。附陳閣下一身關係安危甚重。不知出自何人手筆。想尙得體。年來新造江漢。皆閣下心手層注。知人之明。用人之專所致。恐中朝未盡周知。若從大處一爲抒寫。使衆人知時流中。有如此襟懷氣局。不與倉卒成功名。權宜就事會者相等。庶與閣下力求濬樸平實之指相合。此次摺稿。待亟思一見也。伯母靈馭。定於何日起行還湘。經手事件。尙易清釐否。各處局紳。不遽形渙散否。至爲懸系。朱品隆十五日至九江。已令其十九日開行。由陸路至吳城登舟。水路至貴溪。侍竟須晉省一行。帶船三四號。餘船不晉省。由鄱湖東渡至貴溪等候。吳國佐無信。想改陸矣。侍擬十九日別湖口而上。在章門不過小住二日。此後相去日遠。可勝悵結。謹具祭幛一懸。輓聯一副。銀二百兩。少佐扶襯時費需。伏希晒存。專揚名聲費上。代躬叩奠。伏惟節哀順變。爲天下自重。

覆李希庵

接周壽珊信。得讀諭旨。及官帥綿將軍前日奏章。以朝野官紳軍民倚望之殷。潤帥實以不遽去位。所全較大。然潤帥近日扶持善類。力挽頽風。於人之邪正。事之是非。剖判入微。不少假借。有權術而不屑用。有才智而不自用。

皆大過人之處。兩奏皆未能道著一二。潤公之識。不肯輕言奪情。吾輩愛之深者。亦何能輕以相強也。吾鄉數人。均有薄名。尙在中年。正可聖可狂之際。惟當兢兢業業。互相箴規。不特不宜自是。並不宜過於獎許。長友朋自是之心。彼此恆以過相砭。以善相養。千里同心。庶不終爲小人之歸。足下用心甚深。進德甚猛。亮以鄙言爲不謬也。

與鮑春霆

足下數年以來。水陸數百戰。開府作鎮。國家酬獎之典。亦可謂至優極渥。指日榮晉提軍。勳位並隆。務宜敬以持躬。恕以待人。故則小心翼翼。事無巨細。皆不敢忽。恕則凡事留餘地以處人。功不獨居。過不推諉。常常記此二字。則長履大任。福祚無量矣。

與羅少村

足下俊邁之骨。深遠之識。方今四方多虞。計必不能久處囊中。竊以先哲經世之書。莫善於司馬文正公資治通鑑。其論古皆折衷至當。開拓心胸。如因三家分晉而論名分。因曹魏移祚而論風俗。因蜀漢而論正閏。因樊英而論名實。皆能窮物之理。執聖之權。又好敘兵事所以得失之由。脈絡分明。又好詳名公巨卿所以興家敗家之故。使士大夫悚然知戒。實大經以外不刊之典也。閣下若能熟讀此書。而參稽三通兩衍義諸書。將來出而任事。自有所持循。而不至失隊。切在知愛。輒忘其愚陋。妄貢區區。

與彭雪琴

僕觀作古文者。例有傲骨。惟歐陽公較平和。此外皆剛介倔強。與世齟齬。足下傲骨嶙峋。所以爲文之質。恰與古人相合。惟病在貪多。動致冗長。可取國朝二十四家古文讀之。參之侯朝宗魏叔子。以寫胸中磊塊不平之氣。參之方望溪汪鈍翁。以藥平日浮冗之失。兩者並進。所詣自當日深。易以有成也。

與左季高

夷務果有翻局。不悉聽其所要。是極好機會。然國家之強。以得人爲強。所謂無競維人也。若不得其人。則毛羽未

備亦似難以高飛。昔在宣宗皇帝。亦嘗切齒發憤。屢海和議而主戰守。卒以無良將帥。不獲大雪國恥。今欲罷和主戰。亦必得三數引重致遠折衝禦侮之人以擬之。若僅恃區區楚材。目下知名之數人。則干將莫邪。恐未必終不刃折。且取數太少。亦不足以分布海隅。閣下以爲何如。官帥之意。以唐義渠率三千人。赴臨淮助袁午帥。以普寶寶勇劉牧湘後營。循大江南岸以下達蕪湖。實則普劉難以獨當一路。而唐公亦尙不辦此。鄂兵日增。而餉源日減。非潤帥強起。恐終不濟也。住署與否。接篆與否。均不甚關緊要。所爭在另簡新撫否耳。然以潤公之威望才氣。羽翼既成。亦非他人所能牽掣。造寶塔者合其尖。或者少從權宜。終濟巨川乎。

與李希庵

令兄迪庵軍事。僕前囑其環繞蕪湖。擊剿傍湖各屬。不必兼及淮北。頃又囑其不必北及定遠。又於舍弟書中。言不宜遠離水師。以固根本。不宜徇人情面。而分兵力。二語是迪軍要訣。不知閣下以爲何如。迪公近日聲望鼎隆。閣下名譽亦日增赫奕。舍九弟比亦薄有聲望。鄙人在外。毀譽互見。然究係毀者少而譽者多。清夜自思。尙覺名浮於實十倍百倍也。吾輩互相砥礪。要當以聲聞過情爲切戒。意城此次在做幕。深資其力。公牘私緘。一一代辦。識見論議。多與相合。故雖精力耗竭。而目下尙無廢閣之事。足慰廬注。

與沈幼丹

新任建昌王太守。正派而英明。似是有焉之才。尊兄德卜有鄰矣。竊觀自古大亂之世。必先變亂是非。而後政治顛倒。災害從之。屈平之所以憤激沈身而不悔者。亦以嘗曰是非淆亂爲至痛。故曰蘭芷變而不芳。荃蕙化而爲茅。又曰。固時俗之從流。又孰能無變化。傷是非之日移日滯。而幾不能自主也。後世如漢晉唐宋之末造。亦由朝廷之是非先紊。而後小人得志。君子有皇皇無依之象。推而至於一省之中。一軍之內。亦必其是非不詭於正。而後其政績少有可觀。賞罰之任。視乎權位。有得行。有不得行。至於維持是非之公。則吾輩皆有不可辭之任。顧亭林先生所稱匹夫與有責焉者也。國藩若有江北之行。則相去日遠。音書日稀。凡文武人士。如閣下所見以爲是

者。望無惜時時開示。如鄙人所見以爲是者。亦當疏記奉告。或先見爲是。後見爲非。亦可隨時互聞。此間去信州尙近。不審能設法一來相見否。彼中事如繁重。則亦不欲奉挽也。

覆左季高

惠緘敬悉一切。迪庵之死何疑。卽舍弟溫甫及篠石篁村龍臣懷軒諸人之死。亦又何疑。鄂中兩奏。皆作不了語。亦闕事不多之故。戰敗而主將尙存。不過半日卽喧傳。兵衆蹙附之矣。李續燾紮大營後面。歸路必經之地。不告而先退。趙克彰不救三河之難。楊得武敗回。不一詣希庵營次。此皆可惡。聞下謂我痛弟與迪爲不違。此次殲我湘人。殆逾六千。焉得不痛。又焉得不惡彼背負者也。國藩定於正月初旬移營饒州。於彭澤湖口等處。擇地駐紮。意在保全湖口。爲潯江兩岸聲援。如潤帥希庵之意。欲弟移駐北岸。亦甚易耳。徐州歸德曹縣失守。確否。捨匪氣欲日壯。論者以爲禍烈於洪楊。山東河南兩省大府。不講吏治。從亂之民日多。來示欲弟講求馬隊。誠爲要指。此事弟夙來究心。楚人柔脆不耐勞。恐終不濟。南馬亦弱小。遠不及河北口北。論人馬耐苦。終以內外扎薩克爲優。東三省則以吉林黑龍江爲優。陪京人材。近稍淨滑好利。習俗易矣。吾楚水陸諸軍士卒。多不耐苦。大是短處。將帥亦皆煦煦愛人。少英斷肅殺之氣。來書謂羅李晚節。皆失之寬。正不獨羅李爲然也。乾鎮河溪等處。如有好兵。吾欲調千人練之。不須統將。祇須千把數員分帶之。拾鎗鳥鎗。操得快而有準。無論或南或北。或山或野。終是可靠。吳翔岡在金瓶嶺所操鎗手。現在存者無幾。皆已分投各軍。若操練千兵。則無分散之慮。陳德園一起。係勝帥所調。終當索去。未便竭吾力操練此起耳。

與吳翔岡

前此面論高明平實二義。張楊園先生嘗言之矣。大抵莅事以明字爲第一要義。明有二。曰高明。曰精明。同一境。而登山者獨見其遠。乘城者獨覺其曠。此高明之說也。同一物。而臆度者不如權衡之審。目巧者不如尺度之確。此精明之說也。凡高明者欲降心抑志。以遽趨於平實。頗不易易。若能事事求精。輕重長短。一絲不差。則漸實矣。

能實則漸平矣。輒貢區區。以備采擇。

覆胡宦保 咸豐己未

新正二日。展誦惠緘。知歲杪有二耶。河之行。又承賜示祭迪庵中。正文字挾飛鳴之勢。而筆含哀憤之聲。讀之令人增朋友之重。迪公真不死矣。不審他日鄙人能得此於先生否。此不可不預爲要約也。初十日。又得元旦賜緘。并讀迪公優卹諭旨。可歌可泣。尙復何憾。三函所論各事。謹一一詳復如左。

一閣下不居暑中。與希菴相處。寸步不離。公義私情。兩爲曲盡。然希菴將來不能不率師入皖。不能不一攻舒桐三河。以雪湘人之恥。而抒迪公之憤。閣下似宜久駐黃州。可伸可縮。可外圍皖省。可內保腹地。上游可籌餉。可察吏。下游可督潛太進剿之師。可顧二蘄防守之兵。似覺面面俱到。若台旆一入皖境。則於籌餉察吏等事。不甚靈通。鄙意春夏間。希菴與閣下似可堅駐黃州。如新馬隊能練成。希菴進剿皖中。閣下可一至下游視師。時往時返。仍開府黃州。長爲老營。常常添練新兵新勇。接濟前敵。更換淘汰。如蕭相關中故事。則爲益極大。芻蕘之獻。不審有嘗否。一都鮑欲兩路進剿。自是正辦。我進則賊自守不暇。賊進則我亦自守不暇。一消一長。斷無中立之理。惟目下毛羽不豐。兩路俱須馬隊。現僅馬千餘匹。不敷分布。且一入皖境。卽無歇手之時。希菴如須回湘一行。不如其假旋。再行進兵。氣更充足。一湖口彭澤。總須一枝精兵。乃可保全。此不特爲侍鬱悒之所。亦堪羅李三君九泉所必爭。且楊彭及諸將士。亦不可再有此疏失也。守湖口之賊首黃文金。今尙在蕪太等處。必不能忘情於此。景德鎮若能克復。擬以凱章當此一路。庶足禦之。劉傑人。李寶賢。劉連捷。黃澤遠。皆好營官。惜無好手統領之。寶營則風氣日壞。難期得力矣。一季公似不宜赴鄂。目下湘中亦多事。東防南安之賊。南防廣西之賊。西防黔中之賊。必家鄉平安無事。而後湘勇之在江在鄂者。無內顧之憂。來示謂全軍而後能保楚。保楚而後能圖吳。吾謂固湘而後能全軍心也。印渠及其三將。除江西外。剿湘剿鄂。皆其所願。征皖北尤所甚願。但目下須防寶永一帶。不知此軍能遠出否。侍已減詢季公矣。楚勇東伍太不講。往會與岷樞言之。去冬又爲印渠言之。頃季公書

來。已另立規模。爲之編束。一來示留意統將之才。此卻極難。前此所得諸名將。皆邂逅遇之。非求而得之也。近來長千人長五百人者。容可物色。或無其才而徐徐操習以幾。獨統領則必天生是才。非學所能幾。王枚存不知能統一路否。希菴嘗稱之。頃亦緘詢季高矣。李筱泉之弟少荃。名鴻章。丁未編修。其才與氣似可統一軍。擬令其招淮南之勇。操練馬隊。渠久客呂鶴翁處。福元翁處。閱事過多。不敢輕於任事。刻尙未相許也。意城內耿介而外圓和。論事觀人俱有識。卻是吾鄉一把好手。幼丹與本會上下官多齟齬。深虞其憂悶致疾。建昌王太守。明決有才。此三人合之次青。均濟時之良器。然皆不宜於統軍。名將難得。寤寐求之。一西丹似可不調。調千人亦太少。無益大局也。鹿角禦馬是古法。京營漢軍專有一項界鹿角兵。然亦似鄙人初講水師時。以魚網牛皮擋礮子耳。真能戰者決不事此也。侍決計另練新馬隊。更不講求他法。雖岳公之麻軋刀。亦倖而偶勝耳。以上各條。謹就垂商處奉答。仍求詳示。

覆胡宦保

接兩次惠緘。并說帖一件。敬聆一切。所欲復者條列於左。

一水師操習陸戰。衝出下游。亟肆以疲賊。多方以誤。賊此自勝算。七年閣下曾上一疏。與此亦大同小異。四年黃麓西上一說帖在侍處。亦大同小異。國藩淺見。竊以爲吏治有常者也。可先立法而後求人。兵事無常者也。當先求人而後立法。求人以統領爲最難。營官亦頗不易得。厚菴自三河大變後。愴懷同志。度其情態。且如中鈞之魚。失配之鳥。勢難強其另闢門面。重立規模。雪琴亦久疲思息。非復有朝氣可用。縱強之使爲統領。亦必不討好。若於楊彭二公外。別求統領之才。不知陳金鼇劉國斌李成謀三人。可統此席否。若水師營官中不能挑出統陸兵之人。而另擇一人納入水營。誠如尊慮。必不愜洽。此陸軍坐船。以求統領爲第一義之說也。至抽勇三分之一。以習陸戰。恐楊彭及各營官哨官。皆不甚願。自廬州再陷。某湖水師好船好礮。盡以資賊。計亦必出江與楊彭決戰。水師抽勇登岸。固亦不可不慎。鄙意抽撥水勇。操習陸戰。不過欲其熟舟楫。彼此聯絡耳。卻須准其另募槳手。補

足原額。其船隻則須另行打造。如極大舢板。如渡船。如長龍之無平盤者。與賊舟相似。而不用前此之師船。或者人人樂從。此段議論。待不寫信告楊彭。恐先淆亂水營之耳目也。

一官揆帥欲奏調察哈馬千匹。大凌河千匹。采買千匹。自是欲與侍原奏合符起見。旋奉寄諭。令斟酌採買。不知又變議否。侍建策時。尙未悉官馬若是之不可恃也。且待秀帥會尊處覆奏後。再行酌定。采買何必定北口。陝甘去鄂稍近。亦有可買否。田與恕似可爲騎將。已緘商季高兄矣。

與張廉卿

足下爲古文。筆力稍患其弱。昔姚惜抱先生論古文之途。有得於陽與剛之美者。有得於陰與柔之美者。二端判分。晝然不謀。余嘗數陽剛者約得四家。曰莊子。曰揚雄。曰韓愈。柳宗元。陰柔者約得四家。曰司馬遷。曰劉向。曰歐陽修。曾鞏。然柔和淵懿之中。必有堅勁之質。雄直之氣。運乎其中。乃有以自立。足下氣體近柔。望熟讀揚韓各文。而參以兩漢古賦。以救其短何如。

覆胡宮保

西丹得調千名甚好。大凌河捐馬。恐不可恃。將來仍須至北口采買。尙祈早去早來。鄙意猶思募淮南之勇。試北口之馬。蓋西丹有窮。練勇無盡。兵事未艾。早遲終須以南勇習北騎。不如早動手一日。多一日之閱歷也。若鄂中采馬到時。乞惠給敝處一二百匹。并乞都將軍惠撥官二三員。兵一二十人。先令此間弁勇。稍爲濡染。李朝斌會充敝處戈什哈。有真性情。水師今年必有數次惡戰。又多分好手還湘。此後水營得力之人。不可令其登陸矣。劉傑人殉節。其爲人可敬可憫。本非統領之才。是所謂賊夫人之子也。軍事不可無悍鷲之氣。而驕氣卽與之相連。不可無安詳之氣。而情氣卽與之相連。有二氣之利而無其害。有道君子。尙難養得恰好。况弁勇乎。

覆葛舉山

溫甫舍弟。雖不幸早世。而得附忠義之林。詔書褒異。上邀封誥。下蔭遺孤。差稱完節。惟家叔病體未復。弟婦哀痛

過情。尙望足下設法勸慰。日臻平善。庶幾迂方來之福。而釋征人之念。足下至性純厚。明德之後。定卜遠到。吾輩讀書。惟敬字恆字二端。是徹始徹終工夫。去歲揖別時。曾以敬字相助。今年致芝生書。亦以有恆爲告。蓋鄙人生平。欠此二字工夫。至今老而無成。深自悔憾。故凡友人有下問者。輒以己之所悔爲言。勸人及時自勉。尊府祖德。爲一鄉之望。言坊行表。實克修敬字之全體。足下紹衣發聞。於進德則持之以敬。於修業則貞之以恆。即時文一事。亦不可少有間斷。久之自然精進。猶長日加益而人不覺也。

覆胡宮保

得兩次惠緘。敬承一切。祁陽已於十八日解圍。新甯武岡亦先後解圍。羣賊萃於寶郡。官軍如田興恕。周寬世。趙玉班。王人樹。亦會於寶郡。計不下二萬餘人。大局當可無礙。來示慮及賊出沅資。修造戰船。據洞庭之上游。鄙見以爲此不足爲慮。國藩初在衡州造船百六十號。規模極狹小。器用極草率。然已費盡千氣萬力。閣下於五六年間。恢廓水師。以左右博大精至之才。又得湖南公私之助。然辦礮之難。需子藥之多。造船之委曲繁重。固亦費盡千氣萬力。乃得集事。今賊欲於資沅造船。何處得一清淨之所。兩月三月無官兵去擊者。何處購礮。何處得此大樁子藥。若自鑄土礮。則亦不足畏。若僅造民船。則徒供楊彭之一焚。尤不足畏矣。若果入蜀中。鄂省添出西邊防務。卻自費手。然亦在陸而不在水。芻蕘之見。是否足供採擇。此賊鈍於浙。又鈍於閩。入楚後又鈍於永。鈍於祁。或竟不能入蜀。亦未可知。巢湖賊舟出江。下游必有幾次惡戰。黃石磯湖口各營。應請不再調開。李申甯尙未來營。蓋爲雪琴留談也。

覆李少荃

閣下此行。其著意在察看楚軍各營氣象。其得處安在。其失處安在。將領中果有任重致遠者否。規模法制有尙須更改者否。一一悉心體察。在閣下既可量而後入。在敵處可度德而處。閣下閱才遠志。自是匡濟令器。然大易之道。重時與位。二者皆有大力者冥冥主持。毫不得以人力與於其間。昨揖別時。以此相箴。蓋亦近歲閱歷之餘。

見得一二，非謂能夙以自持也。

覆鄧寅階

小兒紀澤，頗事看書，不好制藝。吾意學者於看讀寫作四者缺一不可。看者涉獵，宜多宜速。讀者諷誦，宜熟宜專。看者日知其所亡，讀者月無忘其所能。看者如商賈趨利，聞風卽往，但求其多。讀者如富人積錢，日夜摩挲，但求其久。看者如攻城拓地，讀者如守土防隘，二者截然兩事，不可闕亦不可混。至寫字不多則不熟，不熟則不速，無論何事，均不能敏以圖功。至作文則所以論此心之靈機也，心常用則活，不用則窒。如泉在地，不鑿汲則不得甘醴，如玉在璞，不切磋則不成令器。今古名人，雖韓歐之文章，范韓之事業，程朱之道術，斷無久不作文之理。張子云：心有所開，卽便札記，不思則還塞之矣。小兒於每三八課期，敬求先生督令作文，約以五百字爲率，或作制藝，或作賦，或作論，或作經解，札記斷不可一字不作，或逢三作制藝，逢八作賦論經解，亦尙妥善，未有無一字之常課，而可以幾於成者也。囑爲族譜弁言，諠不容辭，惟此時尙未暇也。二姓合修，在閣下本仁至義盡之心，體先世權宜合好之意，稱情起例，未爲不可。惟欲永遠聯稱，如諸葛歐陽之例，則微有不侔。如近世嘉興之陸費，湘潭之郭汪，差近之耳。弟稜屯撫州，倏逾兩月，昨派老營六千人會攻景鎮，鏖戰數次，幸獲全勝。於十四日克復景鎮，十五日進克浮梁，沿途擒斬逼燭，難以數計。餘黨由祁門奪路奔逃，卽派張凱章率四千人回湘援剿，會攻寶慶。七月當可抵湘，知關廬念，特用布聞。

覆莊衛生

接奉惠書，獎借溢量，疊歲湘人援鄂，無藝之供，其求必應。萬衆誦德，至今弗緩。比復雄藩懋建，內以富民，外而遏寇，風猷峻邁，歧想何窮。承詢選將一節，猥以湖湘俊彥朋與，推求汲引之原，鄙人替替，奚足以言衡鑒。風雲際遇，時或使之，生當是邦，會逢其適。於鄙鈍初無與也，抑又竊疑古人論將，神明變幻，不可方物，幾於百長并集，一短難容，恐亦史冊追崇之辭。初非當日預定之品，要以衡才不拘一格。論事不求苛細，無因寸朽而棄連抱，無施數

晉以失巨鱗。斯先哲之恆言。雖愚蒙而可勉。更願南鍼遠錫。證此不逮。弟疊奉防蜀之命。所部除分起援湘外。尚挈七八千人以行。已於十九日舟次湖口。稍與料檢。卽當赴鄂。瞻對雅範。願言之懷。匪朝伊夕。

覆葛舉山

國藩生平。坐不敬無恆二事。行年五十。百無一成。深自愧恨。故近於知交門徒。及姻戚子弟。必以此二者相告。敬字惟無衆寡。無小大無敢慢三語。最爲切當。君之祖與吾之祖。於此三語。皆能體行幾分。僕待人處事。向來多失之慢。今老矣。始改前失。望足下及早勉之。至於有恆二字。尤不易言。大抵看書與讀書。須畫然分爲兩事。前寄寅皆先生書已詳言之矣。看書宜多宜速。不速則不能看畢。是無恆也。讀書宜精宜熟。能熟而不能完。是亦無恆也。足下現闕八家文選。卽須將全部看完。如其中最好歐陽公之文。卽將歐文抄讀幾篇。切不可將看與讀混爲一事。尤不可因看之無味。遂不看完。致蹈無恆之弊。家叔性情。最與家祖相似。家祖晚年。適意事多。家叔則不適意之事多。望閣下細心勸慰焉感。

覆易芝生

接到惠書。流慰無量。國藩昔年銳意討賊。思慮頗專。而事機未順。援助過少。拂亂之餘。百務俱廢。接人應事。恆多怠慢。公牘私書。或未酬答。坐是與時乖舛。動多齟齬。此次再赴軍中。銷除事求可功。求成之宿見。虛與委蛇。絕去町畦。無不復之緘容。無不批之稟牘。小物克勤。酬應少周。藉以稍息浮言。而精力日耗。目光眩昏。平生於古文辭。鑽研頗久。差有敝帚之獲。而眼之所鶻。手不能應。心所欲爲。日不暇給。自去冬至今。曾作文七八篇。罕稱意者。羅忠節墓銘。久思一答。尊囑。因意與少佳。亦姑置之。卽先祖先考妣神道碑。尙未能敬謹從事。終夜疚心。因念文章之事。究以精力盛時。易於進功。足下年力方強。志趣拔俗。宜趁此時併日而學。絕塵而奔。雖未必遽躋作者。而看讀寫作四者。兼營并進。亦自有一番之功效。舉山亦有志之士。小兒舍姪輩。得以步趨後塵。爭相濯磨。則寒門之幸也。足下尙有意乎。

覆劉霞仙

國藩於六月初奉防蜀之命。以景鎮未復。難遽撤動。而所部將才太少。難期高飛。作疏直陳。後以江西肅清。不得不移師西上。行至武穴。接官帥咨。已奏請會剿皖賊。頃奉諭旨。以川境可保無虞。即行進剿皖省。如尙未免有入蜀之虞。只可從緩酌量云云。是聖心并無成見。仍聽外間裁酌。蜀中本大可有爲之邦。惟國藩倦游已久。深憚作客之難。作客於無賊之區。周旋於素不相知之主人。則尤難。以是裴衷中立。未敢望劍南而西笑也。自黃州至武昌。僅百餘里。而阻風已逾四日。俟與官帥商。恐仍嘗從胡李多飽諸公之後。共圖皖中。更事日多。斯不敢爲天下先耳。趨時之效。茫如捕風。亦稍稍倦矣。歷年疚心之端。逐一補救。十已得其七八。如期慚林秀三之家。而纂文刊碑於撫州殉節之處。亦近日一稱心事。目光眩昏。老境日增。所學無成。不無感喟。

與許仙屏

來示趨時者博無識之喜。損有道之真。謹當書紳銘佩。吾齒髮已老。乃欲俛仰一效桔槔。所謂未得國能。徒失故步者也。自宜仍守吾拙。不妄說人。以副同志期待之厚。年伯大人近日愁緒當已漸解。足下及時養志。正不必汲汲科名。高堂康勝復常。即求專緘示及。

覆胡官保

手示敬悉。安樂棄子。世態之常。待去年過此。與今年情形迥異。所示莫危於漸。誠爲篤論。然此時只當用老僧不見不聞法。天下惟忘機可以消衆機。惟懵懂可以被不祥也。萬事無成四字。是鄙人一生考語。公安得攘而有之。一入鄂境。軍事庶政。井井有法。官紳印委。多用正人。優劣得所。此豈無成者之所爲。糜爛江漢。整成一個嶄新日月。太和世界。是多大事。在公只算一筆外銷帳。謙固美德。太謙又占卻他人地位。特我輩指目者多。須保得此後不大錯謬爲佳耳。

與左季高

蜀中之行。思之至熟。凡治事。公則權勢。私則情誼。二者必須居一於此。前見蜀帥覆陳一疏。未有云必不專俟會某來。此致誤事機。而鄂中自潤帥外。皆不以西行爲然。且云。師至荆宜以上。則商旅疑阻。鹽釐減色。蜀既不肯爲百兩入驚之迎。鄂又不願爲路車乘黃之送。權勢如此。情誼如彼。雖欲獨辦一事。難矣。弟老境侵尋。精力日絀。所部又無一統將之才。假令賊果入蜀。亦決非敵處見兵所能禦。是以依倚潤帥。聊相响濡。潤帥近亦不甚適意。苦心孤詣。未果見亮於人人。而軍事吏事二者。亦殊叢雜。弟若與共圖皖中。軍事可少商酌也。日內初操馬隊。湘人不耐辛苦。難期練成。然東三省擾民積習。嘗借此以風止之。

致胡宦保

前日因循未及赴黃州。昨夕定今日成行。而又風雨交作矣。自占英霍山險之路。而以沿江平易一路讓鄙人。此公之盛德。而鄙人所最難安者。面商之事。此爲第一。惟撫標各營。與希庵各營。處處黏連一片。勢難拆分。希菴既居商六一路。則大纛不能不居英霍一路。侍雖欲辭易而居險。而事理不甚切當。且細思賊所必爭。苦戰不休者。乃在大湖桐城大關等處。此爲第二路。今多飽所占者也。蕭浚川來。亦擬調歸此路。今多飽蕭唐四人。萃於第二路。則兵力極厚。可以更番少休。台端專轄三四兩路。侍專轄第一路。至第二路則兩人公轄之。且不時撥生力兵協助之。此路正兵。屹立不動。餘三路皆當以奇兵論。不審籌以爲然否。希庵應否於十月來黃。如以爲可。侍當便緘催之。

覆歐陽小岑

得惠書并南屏一緘。敬悉一切。南屏不願在桐城。諸君子竈下討生活。真吾鄉豪傑之士也。而直以姚氏爲呂居仁之比。則貶之已甚。姚氏要爲知言君子。特才力薄弱。不足以發之耳。其古文辭類纂一書。雖闌入劉海峯氏。稍涉私好。而大體固是有倫。其序跋類。淵源於易繫。詞賦類仿劉歆七略。則不刊之典也。國藩之爲是。不過於伯宜處略聞功甫生平之言論風指。而縱筆及之。非謂時流諸君子者。果足以名於世而垂於後。不特不和之。且私

獨薄之。南兄識得鄙意。曰侍郎之心。殊未必然。所謂搔著痒處。固當相視而笑。莫逆於心也。

致吳竹如

九月初接奉惠書。得悉夏秋兩緘。均塵台覽。敬諗德業闔富。學道不厭。欽企曷既。閣邸鈔知復陳臬畿輔。未審左遷果緣何案。圖鑿方柄。齟齬乃分。所應爾。幸聖明在上。猶覺直道得行耳。桐城方君。援儒入釋。閣下辯紉田巴。角摧五鹿。竟能引異爲同。範圍不過。此黃魯直所謂能就地收汗馬之功者也。近年軍中閱歷有年。益知天下事當於大處著眼。小處下手。陸氏但稱先立乎其大者。若不輔以朱子銖積寸累工夫。則下梢全無把握。故國藩治軍。屏去一切高深神奇之說。專就粗淺纖悉處致力。雖坐是不克大有功效。然爲鈍拙計。則猶守約之方也。所最難者。近日調兵接餉。察吏選將。皆以應酬人情之道行之。不問事勢之緩急。諭旨之寬嚴。苟無人情。百求罔應。卽舉劾賞罰。無人情。則雖大賢莫薦。有人情。則雖巨慝亦釋。故賊餒雖已漸衰。而人心殊未厭亂。每獨居深念。憾不得與閣下促膝密語。一據積憤。國藩自景鎮克復。卽率師西上。會南湖巨股。盡竄廣西。蜀可無虞。諭旨飭令會剿皖賊。現擬四路進兵。沿江兩路。一由石牌以規安慶。一由潛太取桐城。傍山兩路。一由英霍以搗舒城。一由商固以規廬州。弟與胡中丞分任其事。聲勢頗盛。惟羣盜如毛。我軍尙單。未知能否得手。珂鄉數百里內。友朋死於此者至多。如江岷樵陳岱雲鄒叔績在廬州。呂鶴田朱臥雲在舒城。何丹畦在英山。郭兩山在定遠。戴存莊在桐城。舍弟及迪庵等在三河。思之至痛。若能廓清一方。爲親友少雪此積憤。亦一快也。

覆李申夫

接來緘。具悉營務處合嘉字營行住有法。驩慰之至。去黃梅日近。務宜勤發哨探。凡臨敵觀氣色。有二可慮。驕氣則有浮淫之色。(淫盛也大也漫也)情氣則有晦滯之色。(晦晦也闇也)望體察而補救之。何鏡海若能克勤小物四字上用功。應日有長進。望閣下虛己以待之。方不膈膜。

覆李申夫

前曾語閣下以取人爲善。與人爲善。閣下默記近數日內。取諸人者若干事。與人者若干事。大抵取諸人者。當在小處實處。與人者。當在大處空處。號手悠揚可聽。親兵驅使愈喜。或亦取諸人者乎。抑有獨得於心者乎。以後望將取諸人者何事。與人者何事。隨時開一清單見示。每月彙總帳銷算一次。或即卜氏所云日知月無忘者乎。

覆李申夫

驕氣情氣等語。却不宜與人說及。此等默察之而默救之可耳。凡與諸將語。理不宜深。令不宜煩。愈易愈簡愈妙也。不特與諸將語爲然。卽吾輩治心治身。理亦不可太多。知亦不可太雜。切身日用得著的。不過一兩句。所謂守約也。

覆胡宦保

取利多而民怨。參劾多而官誅。有以此見告者。非不當自省。但不宜以鬱蓄心中耳。吾輩所慎之又慎者。只在用人二字上。此外竟無可著力之處。古人云。若從流俗毀譽上討消息。必至站脚不牢。待平日短處。亦只是在毀譽上討消息。近則思在用人當否上討消息耳。揆帥欲以義渠一軍。繞赴淮北。似尙委叶。侍已允諾。飽超思歸甚迫。已來此間。當面爲慰勸也。

覆吳南屏

去歲辱惠書。久未奉報。尊書以弟所作歐陽生集序中。稱引井世文家。妄將大名臚於諸君子之次。見謂不倫。李耳與韓非同傳。誠爲失當。然贊末一語曰。而老子深遠矣。子長胸中。固非全無涇渭。今之屬辭連類。或亦同科。至姚惜抱氏。雖不可遽語於古之作者。尊兄至比之呂居仁。則亦未爲明允。惜抱於劉才甫。不無阿私。而辨文章之源流。識古書之正僞。亦實有突過歸方之處。尊兄鄙其宗派之說。而并沒其篤古之功。揆之專理。當可謂平。至尊緘有曰。果以宗桐城爲派。則侍郎之心。殊未必然。斯實搔著痒處。往在京師。雅不欲濶入梅郎中之後塵。私怪閣下幽人貞介。何必追逐名譽。不自閔惜。昔睹驪黃之面。今知君子之心。吾鄉富人。長爲命案所汙累。至糜錢五百

千摘除其名。尊兄畏拙文將來援爲案據。何不捐輸巨資。摘除大名。亦一法也。見示詩文諸作。質雅勁健。不盜襲前人字句。良可誦愛。中如書西銘講義後。鄙見約略相同。然此等處。頗難於著文。雖以退之著論。日光玉潔。後賢猶不免有微辭。故僕嘗稱古文之道。無施不可。但不宜說理耳。送人序。退之爲之。最多且善。然僕意宇宙間。乃不應有此一種文體。後世生日有書序。遷官有賀序。上檄有序。字號有序。皆此體濫觴。至於不可究詰。青年作書歸。照甫文集後。曾持此論。譏世人不能糾正退之之謬。而逐其波。而拾其澣。異時嘗就尊兄暢發斯旨。往歲見寄之書。似尙不遠。今秋惠書。暨復筱岑書之雅深。國藩自癸丑以來。久荒文字。去歲及今茲。作得十餘首。都不稱意。茲鈔五六首奉呈教正。平生好雄奇瑰瑋之文。近乃平淺無可驚喜。一則精神耗竭。不克窮探幽險。一則軍中卒少。閑適之味。惟希屢繩而詳究之。詩則八年不作。今歲僅作次韻七律十六首。不中尺度。尊兄詩骨勁拔。迥越時賢。姚惜抱氏謂詩文宜從聲音證入。嘗有取於大歷及明七子之風。尊兄睥睨姚氏。亦頗欲參用其說否。弟約束文武。略似塾師之待弟子。不至縱弛。去夏惠書。箴規二事。研生父子之在敝營。弟相待之意。始終本末。尙不至失之過薄。至卑官失禮一節。甲辰秋有此事。外間以爲口實。至今亦尙親愛。視世之口不言而心啣之者。有間。邇來儀文彌加檢點。而真意反遜於前。將求一中之道而從事。又不可以遽幾。蓋嗛然也。

覆黃莘農中丞

月前展誦惠書。會泐函佈復。諒登籤掌。頃手書以皖捻蟻屯蒙亳。接軫中州。滋蔓時虞。力圖防剿。仰見蓋懷純篤。碩畫周詳。至爲欽佩。迺辱明誨。欲以湘衡舊旅。從事中原。且勸勉之殷。至三至再。回環循誦。五中惶悚。夫天下大勢。北而畿輔。東而三齊。皆以豫州爲縮轂之區。來書指明輕重緩急。無待著龜。國藩自再出視師。奔馳江楚。不敢告勞。果能勉竭駑駘。與大君子戮力同仇。肅清北路。獲收鉛刀一割之用。良所至願。無如南北異勢。遷地弗良。前書未盡欲言。今復爲老前輩縷陳之。河淮以北之民。賦性剛勁。耐寒習苦。囊裏乾餼。且行且食。以該處之兵。辦本地之賊。必可得力。若敝部皆衡湘之士。狃於南方風氣。不慣麵食。冬則皮帽皮衣。炭盤手爐。刻不能離。羅李名將。

亦不免於冬烘氣象。昔閣下與二公爲至交。亮所稔知。至勇丁安靜不擾。甲於他處。而文弱不耐勞苦。又常常告假思歸。禁之不可。刑之不聽。珂鄉貧民風氣。與敵縣人情。一一相同。其不可強之北征者。勢使然也。况敵部蕭張兩軍。調赴湘粵。兵力本形單薄。所賴楚北諸軍。五爲聲援。前兩次奉旨籌撥一軍。取道光固潁州。繞出懷蒙以北。籌維再四。至今無以應命。現下游援賊。聞有四眼狗大股西來。太湖一路。最爲吃重。敵部進屯宿松。與太湖相爲犄角。兼顧後路餉道。似難臨敵撤調。方命之愆。實深悚歎。抑侍更有進者。自太行以東。至於曹鄆。皆自古百戰之場。如鄴下古之雄都。大名宋之北京。良將勁卒。尤當世不乏人。皆閣下按部必經之地。可否奏請直隸齊豫三省督撫中。飭令一人。召募河北壯丁萬餘人。認真訓練。不過數月。其雄健必可遠勝於湘勇。較之調南勇而北征者。難易不啻霄壤。或三省各募各練。直隸則屯駐大名。山東則屯駐東平。河南則屯駐彰衛。有事易調撥。無事易遣散。實爲事半功倍。是否可行。惟祈籌畫熟商。

覆胡宮保

接浚川稟。冬月廿七日抵湘。潭。索餉甚切。若湘中少有以濟之。臘月當至鄂矣。浚川來。則以八千人圍太湖。多鮑蔣諸軍。可禦援賊於新倉等處。亦如閣下之初指矣。大約楚軍圖皖。須分兩宗。一曰堅扼之師。一曰游擊之師。侍郎與公部。可爲堅扼之師。多鮑希浚四軍。可爲游擊之師。唐則尙在堅扼之列。蔣則終歸併希軍者也。侍在第一路焉。汛地不必輕動。多鮑蕭雖在第二路。萬一三四路有非常之警。仍可借用。公目前切不宜深入。軍事如鎗法。門戶宜緊。如拳法。有伸有縮。若公入之太深。則有伸無縮矣。

覆吳子序

接惠書。揭君遺書序讀過。清勁爲尊。兄本色。所短者乃在聲色之間。弟嘗勸人讀漢書文選。以日漸於腴潤。姚惜抱論詩文。每稱當從聲音證入。尊兄或可以此二義參證得失。弟夙昔好揚雄韓愈瓌璋奇崛之文。而近時所作。率傷平直。不稱鄙意。亦緣軍中日接俗務。不克精心營度耳。

致李希庵

日前奉復一緘。於閣下請假一節。并未提及。蓋深知閣下去年連遭手足之痛。今冬值嫺伯母病未康復。勢難絕
藉而出也。乃此間近日軍情。氣機日變。人心日散。有萬不能不請閣下速出來皖者。潤帥於上月十七日。檄飭鮑
唐蔣三軍。概歸多都護統領。以一事權。自是鮑唐二公。心含不平。卽鄙人亦不以爲然。多欲鮑進紮距潛山四十
里之小池驛。多自紮新倉。蔣紮新倉小池之間。以距四眼狗由潛山來援之路。又欲唐軍半守石牌。半擊援賊。又
欲敵軍以七千人往圍太湖。潤帥聽多策。分檄各處。緘知敵處。國藩以太湖賊近萬人。敵軍現無統將。未之允從。
且念鮑軍進紮小池。前有潛山之援賊。後逼太湖之城賊。亦非穩著。往返屢商。卒未允許。潤帥兼探鄙說。於是定
爲多蔣擊援賊。鮑唐圍城賊。兼顧鄂疆之議。此十一月至十二月初一二籌商之大略也。至十二三日。援賊頭隊
已至潛山。四眼狗亦有入桐城之信。多公檄令鮑公進紮小池驛。多仍紮新倉。蔣紮新倉小池之間。以擊援賊。留
唐獨圍太湖。以困城賊。定於十六日移營。鄙人詳加體察。可慮約有數端。連日雨雪。泥深數尺。鮑營新移。牆濠難
修。前禦大股援賊。後逼太湖城賊。多公隔二十里外。難遽救應。一可慮也。太湖城賊萬人。能戰者約六千。唐公僅
三千四百人。且多新立之營。豈能過此城賊。萬一突出。西至黃梅。北至蘄州。皆僅數十里。旣入鄂境。必至黃州一
府。有賊處處驚惶。卽城賊不遠出。但在環城二十三里滋擾。則口糧子藥。俱難運送。二可慮也。多公伎而盈滿。觀
其舉動。於左季公所謂宜靜宜整。宜無示之以形三者。恰與相反。三可慮也。潤帥新調舒公及逸亭幹臣馬步萬
人。進紮霍山。距舒城僅九十里。去英山潤帥老營則二百七十里。深入太猛。後路太空。其餘際昌等天堂一軍。賊
若分枝撲犯。則無兵可以撥援。四可慮也。敵軍現紮宿松。本可爲後繼之師。無如人數近萬。無一統領。如散錢委
地。中有新募四千人。尤不可恃。萬一前敵稍有疏失。敵軍竟不足資補救。五可慮也。細察氣機。誠恐謀皖不成。反
致引患入鄂。特此飛請閣下星夜前來。預爲補救之地。一面函商潤帥。請將舒金吳軍暫緩赴霍。庶閣下一到蘄
水。卽入本軍。閣下前年由瑞赴黃。今年由鄂赴寶。俱能扶危定傾。此次關係極大。務祈星夜前來。能燈節前趕到

爲妙。國藩之求，非爲私也。

覆胡宦保

金余內外會攻之說，實不易易。記得塔羅破半壁山時，楊彭紮釣魚臺東，距陸營僅四十餘里。三日不能通一信。雪琴在吳城時，約厚菴同攻湖口，亦屢約不能如期。此賊之多且悍。又遠過秦日綱輩也。鄙意金余之師，請閣下囑其擇要駐紮。一出水吼嶺，賊必設法尋金余開仗。金余營盤果立於不敗之地，則山外各軍，自有可以破賊之理。以余金爲堅立營壘，致賊而不致於賊之師，以唐道爲帶鮑蔣顧老營防鈔後之師，以多鮑蔣三軍爲進勦之師。三者各有專職，各足自立，不必約期會戰。如彼此開仗，恰值同日，則天緣湊泊，幸也。若不值同日，亦自無礙。不約期則各自進止，毫無牽掣。約期則彼此牽制，反恐誤事。國藩擬以此意商之唐蔣二公，閣下若以爲然，則請告之金余，總以自立不敗爲主，不可靠山外之援應也。

覆多禮堂都護

咸豐庚辛

手絨具悉。所示羅溪河係山僻小路，不能禁我軍躡其後。陳德園二耶河該逆現無如許之衆等語，可謂知彼知己。確有卓見。該逆布散謠言，口稱上竄，無非欲我軍急於求戰，急於攻壘攻山，使我爲客而彼爲主，彼得占些便宜耳。胡宮保欲調朱雲崖七營赴馬齒嶺，弟欲調四營暫回太湖，蓋皆不免爲謠言所動也。四眼狗之長技有二：一則善於日暮收隊時殺回馬鎗，一則播散謠言誘人攻他，他得反客爲主。閣下昨日見賊不出，即不進擊賊巢，不受狗賊之誘，可謂有識。嗣後若能常守此法，山內山外，兩邊夾賊爲營，我勢日鬆，賊勢日僵，賊不能不尋我開仗，則我爲主而賊爲客。狗之二技，可破其一矣。金軍移紮陳家嶺等處，其後路有二：東爲水吼嶺，西爲羅溪河，皆有兵駐紮，當可無虞。足紓廬注。來示詢及太湖情形，日內援賊無進太湖之信，尙不喫緊。雲崖四營，暫可不必回太。應令仍住庵下左右，開仗時助前敵一臂之力也。

再狗賊二技，弟向日已聞之，然聞其殺回馬鎗耳。此次乃必於日暮時始逞其技，但聞其好截紮官軍後路，信官

軍尋他開仗。令官軍爲客而他常爲主耳。此次則不能截官軍之後路。而反置彼之後路於不顧。豈果另有他長哉。鄙意狗賊之計。仍不過誘官軍去攻他之堅壘。攻他之山險。他爲主而我爲客。上半日以匪黨拒我。下半日乘我疲乏。狗自出巢。逞其猖獗耳。是此次狗以二技變爲一技也。閣下機智過人。有何妙法破此二技。祈熟思詳示爲荷。

與李申夫

昨日得張筱浦副憲咨來奏稿。浙江似已失守。鄙意浙江未失。則援浙爲重。以其膏腴也。蘇州金陵之後路也。京漕之所出也。浙江既失。則安慶爲重。以其爲武昌九江之門戶也。水師得此城。則有所依附以爲根本也。以絕金陵賊糧之源。以殺江淮各賊犄角之勢也。是目下我軍。仍以進攻安慶分搆桐城爲上策。所以遲疑不決者。懷桐兩支圍兵。青草壩一支援應兵。商固英霍兩支防守兵。五支均不可少。若於此五支之中。分出一二支去援江浙。則全局皆變。大股援賊來懷桐。兩支皆站不住。與其待站不住而退。不如此時不輕進之爲愈也。候商之胡帥裁奪。

覆郭意城

今日閣邸鈔。筠公業已奏請回籍就醫。奉旨允准矣。聞本有意南旋。因山東尙有餘波未平。稍稍濡忍未決。得潤帥勸歸之書。遂爾浩然具疏。鄙意卻嫌其太速。既已入直。即宜迴翔一半年。再行引退。庶山左之風波大定。而一身之進退有餘。今如此毅然。恐又非了局。季公被潤帥句留。酣嬉淋漓。至今未來敵處。前此自領一隊之說。余復信勸其不必添此蛇足。今亦作罷論矣。渠若能流連皖楚之交。或在敵處。或在潤希厚雪諸處。均有大益。特恐歸思易萌耳。專書隸字似不如草篆。少陵瘦硬通神。專爲隸字言之。東坡欲泛及於真草諸體。以爲未公不憑。非至論也。僕不解作字。昔年治說文。曾廣購漢魏各碑。討尋源流。如禮器碑。結體方雅。要爲隸家正範。張猛龍碑。將隸楷融成一氣。尤足津逮來學。唐隸稍肥。有乖大雅。敢爲閣下陳一戒律。近姚伯昂先生。專師曹全碑。相沿成風。亦

旁門也。是否諸祈證示。

與何廉昉

閣下此次次韻大篇。似較上年三疊尤爲卓絕。秋長消人四發端句。何減後有千年自此開也。愈唱愈高。幾欲去天三尺。其謂是乎。承詢及欲購書目。鄙人嘗以謂四部之書。浩如淵海。而其中自爲之書。有原之水。不過數十部耳。經則十三經是已。史則廿四史暨通鑑是已。子則五子暨管晏韓非淮南呂覽等十餘種是已。集則漢魏六朝百三家之外。唐宋以來廿餘家而已。此外入子集部之書。皆贗作也。皆勦襲也。入經史部之書。皆類書也。不特太平御覽藝文類聚等爲類書。卽三通亦類書也。小學近思錄衍義衍義補。亦類書也。故嘗謬論修藝文志四庫書目者。當以古人自爲之書。有原之川瀆。另行編列。別白而定一尊。其分門別類。雜纂古人成書者。別爲一編。則蕩除廓清。而書之可存者日少矣。做處現無多書。江西如有殿板初印十三經廿四史。無論或全部。或零種。均乞代買。非初印者則不必買。此外嘉道以來所刻諸影宋本書。亦祈購覓。不惜重價。瓊瑣精神。不安之至。

覆張廉卿

前敵各軍。久應進兵。前以浙警。繼以雨阻。未得遽赴。頃始分信安慶桐城兩路。猶未能直薄城下。地大人衆。都未能應弦赴節。讀來示所稱先事熟籌。乘機迅發云云。爲之愧赧。援鶉堂筆記。翰閣一二卷。殊不愜意。凡讀書筆記。貴於得閒。戴東原謂閩百詩善看書。以其能蹈瑕抵隙。能環攻古人之短也。近世如高郵王氏。凡讀一書。於正文注文。一一求其至是。其疑者非者。不敢苟同。以亂古人之真。而欺方寸之知。若專校異同。某字某本作某。則謂之考異。謂之校對。不得與精覈大義。參稽疑誤者。同日而語。今觀援鶉堂所記幽通思元二賦。多云何云某字後漢書作某。是義門校對之字。而薑塢鈔謄之也。閒觀它卷。亦多謄義門語。而已無所質正於其間。當時批寫書眉。本不以爲著述之事。後人概以編入筆記之內。殆非薑塢及惜抱之意。若得有識君子。披沙揀金。非無可采。然非大爲淘汰。恐無益耳。尊作古文。著句俱有筋骨。日進無疆。至爲欣慰。輒就鄙見評騭一二。以資互證。僕近亦作得文

數首都不稱意。年老目眩。但思多讀古書。以補昔日之闕。人事紛擾。不得如意。茲可慰耳。

與李申夫

用兵久則驕情自生。驕情則未有不敗者。勤字所以醫驕。慎字所以醫驕。此二字之先。須有一誠字以立之本。立志要將此事知得透辦得穿。精誠所至。金石亦開。鬼神亦避。此在己之誠也。人之生也直。與武員相交。尤貴乎直。文員之心。多曲多歪。多不坦白。往往與武員不相水乳。必盡去歪曲私衷。事事推心置腹。使武人粗人。坦然無疑。此接物之誠也。以誠字爲之本。以勤字慎字爲之用。庶幾免於大戾。免於大敗。願與閣下共勉之。

覆李希菴

接惠緘并賜名馬。感紉無似。凡受惠皆須即日申謝。惟受馬宜略緩再謝。近日風氣。馬之上驕。必自珍秘。而以下駟應客。恐賢者或不免爲習俗所移。今早試騎一次。誠有德驥之風。而無厭之求。更覲覷得一力驥也。蘇常失守。杭州亦岌岌可危。東南大局。決裂至此。不知尙有何術可以挽回。國藩昨辦一咨。咨兩湖江西各帥。茲抄稿呈覽。應如何保全江楚三省。以爲恢復下游之根本。敬求閣下深思熟計。詳悉見示。此賊斷非能成果者。吾輩若同心竭力。早作夜思。未必不可挽回於萬一。大約勤字誠字公字厚字。皆吾輩之根本。刻不可忘。而目前規畫大局。禦賊匪秋間兩路大舉之狡謀。則尙有非此四字所能救急者。現奉寄諭。飭國藩往援蘇常。蓋不知蘇常已失也。鄙意楚軍刻不能救援下游。且當竭三省全力。禦賊匪秋間之大舉。如能於秋間兩路大捷。然後有餘力兼謀下游。目前實有不逮。尊意以爲何如。桐城鄉間。此時尙有書可買邪。鄙人嘗謂古今書籍。浩如煙海。而本根之書。不過數十種。經則十三經是已。史則廿四史暨通鑑是已。子則十子是已。（五子之外。管列韓非淮南歸冠）集則文選。百三名家。暨唐宋以來專集數十家是已。自斯以外。皆剿襲前人之說以爲言。編集衆家之精以爲書。本根之書。猶山之幹龍也。編集者。猶枝龍護砂也。軍事匆匆。不暇細開書目。閣下如購書。望多買經史。少買後人編集之書爲要。

覆胡官保

接廿七夜兩次手教。并丁汪兩信。當此大局震駭之際。讀二君信。爲之氣壯。應卽鈔一通於坐右。氣餒時一爲省覽。大絨未蒙詳示一切。茲將鄙見條上一二。

一侍雖辦兩江之事。而前日咨商三省合防之局。仍不可變。固上游以爲圖下游之根本。一定之理也。江北江南。總求呼吸相關。侍駐南岸。求閣下移駐宿松。相距較近。以便隨時飛商一切。仍擬造渡船一百號。每號可載六七人。置於東流安慶之間。南北兩岸有非常之警。則渡兵過江。互相救應。

一南岸分兵三路。第一路在山西濱江。由池州以規蕪湖。第二路在山內。由祁門至徽州寧國。第三路專守廣信。貴溪弋陽。恐賊上竄江西。第一第二路之兵。應由國藩帶去。第三路之兵。擬請次青招三千人。現有平江勇五千。合爲八千。概歸次青幼丹及饒廷選三人管轄。幼丹處卽日當專摺奏請出山。

一侍所帶之兵。擬帶霆字全軍。張凱章一軍。禮字二營。共萬一千人。分爲山內山外二路。本太單薄。目下二二月內。霆凱二營不能遽到。必先帶萬人南渡。或帶希公一軍。或請希代圍安慶。而侍帶沅弟一軍皆可。待一二月後。霆凱皆到。或希或沅。侍必仍令其渡回北岸。蓋侍以北岸爲根本。若有胞弟倚公在北岸。則侍之本固矣。

一舍弟沅甫一軍。擬令再添二千人。足成萬數。於其中抽出朱唐二人。仍歸侍身邊護衛。侍之第一第二路。得春霆凱章雲崖三人。在南岸差足自立。禮希沅皆在北岸。萬無一失。若希能再以成大吉昇我。則南岸亦漸壯盛。一侍之餉項。擬派李筱荃與李輔堂。專辦江西牙釐。奏明江西全省錢漕。歸中丞收。牙釐歸侍收。其抽釐章程。及釐局用人之法。與具奏立言之法。均求指示。

一多公不肯分兵。都公如何赴揚州去。調撥步隊。亦極不易。查淮揚下河七州縣。若就場征課。益以錢漕釐金。每年可得六七十萬。若得能辦吏事善理財用者。代都公此席。江北之事。非不可爲也。閣下心中如有其人。當會奏請都公免此一行。如無其人。卻不敢奏。都公此行。大有損於鄂。卻無益於淮揚。實爲難事。

致沈幼舟

四月之季。胡潤帥左季高俱來宿松。與國藩及次青筱荃少荃諸人。鬯談累日。咸以爲大局日壞。吾輩不可不竭力支持。做一分算一分。在一日撐一日。庶冀挽回於萬一。因屈指海內賢者。朋輩志士。惟閣下高臥林泉。置身事外。因定計堅請台從出山。一奏再奏。以至三五奏。數十緘請。總以出而握手之日爲止。次青體氣羸弱。僊於戎事。本不欲更以介胄之事苦之。因弟初膺艱鉅。逆氛日熾。不得不挽其復出禦侮。爲弟干城腹心之助。閣下若能慷慨投袂。助鄙人卽助次青也。且計賊蹤若由浙省而蔓及衢信。卽珂鄉亦萬無獨全之理。而閣下菽水之資。稻粱之謀。固當不足於三年之蓄。早遲終不免於一出。不如趁此時機。猶是賢者衆志交孚之時。伏冀上念國家。下念桑梓。中念友朋。翻然遽起。以慰喁喁之望。翹企何旣。

覆彭雪琴

國藩至黃石磯。僅帶幕客二李及親丁數人。巡捕文案數人而已。欲與閣下及厚菴及舍弟靜談二三日。千乞無迎接。無辦席。無令營哨官弁紛紛請安。禁吹手。禁爆竹。禁排礮。各營在黃石磯者。令稟見一次。餘在下游上游者。一概不許來見。斷不可做八九年湖口之樣。多費錢文。連日與希菴暢談楚軍水陸之好處。全在無官氣而有血性。若官氣增一分。則血性必減一分。八九兩年。余過湖口時。彼此皆不免有官氣。此次余與厚菴及閣下。皆當力戒以挽風氣。

覆胡宮保

接兩緘。並渭春方伯文若司馬等件。敬悉一切。季公之事。已具緘奉復。茲將摺稿鈔呈。一二日卽可拜發。淮鹽之五利三慮。誠爲切當。惟陸師僅二千人。則嫌其太少。侍初六日復緘。謂須陸兵三千人。亦尙太少。三洞尖爲羣捻出沒之區。大約陸師須五千勁旅。得一名將統之。庶臻穩固。該處陸兵能站得住。則不特鹽利可興。且鄂之北防亦堅。而永無捻患矣。五利中惟第三條似不甚確。所指額引。在盛世尙不能銷售如額。况兵燹十年。巨商裹足。僅

待零商小販。又兼陸運數百里之遠。安能行至九十餘萬引之多。侍辦浙鹽。行之江西。人人樂從。僅陸運玉山八十里。行之五年。至今尙未滿十萬引。文若兄原議。到楚淮鹽尙有五十餘萬引。以鄙見策之。到楚不過數萬引耳。如原議則爲利甚鉅。如鄙見則爲利甚微。應請卓斷。然爲利雖微。而此事要不可不辦。侍既有辦淮揚水師之奏。則造船於淮安。與造船於三河尖。上一也。公既有設北路防兵之議。則設防於商固。與設防於三河尖。遠近一也。應請以侍認辦水師。而公認辦陸師。兩軍成後。先辦官運之鹽。如果有利可圖。則商販或亦源源而至。若其無利。商販不至。則水師以衛淮揚兩郡。陸師以防鄂之第四路。本不爲鹽釐而設。亦無損也。

覆李次青

彭大壽爲各營領袖。而不能遽歸尊處。縱不北走湖。南走越。亦慮吳楚之急遮劇孟也。此公在外多年。閱歷深透。頗近於滑。軍營宜多用樸實少心竅之人。則風氣易於純正。彭公若尙未歸。祈另擇一誠實不佞者以爲領袖。藉資表率。以楚產之良。謂之樸實頭地之品。殆不其然。特物色未至耳。國家養綠營兵五十餘萬。二百年來。所費何可勝計。今大難之起。無一兵足供一割之用。實以官氣太重。心竅太多。腐樸散醇。真意蕩然。湘勇之興。凡官氣重心竅多者。在所必斥。歷歲稍久。亦未免沾染習氣。望閣下以爲首圖而切戒之。幼丹復信。堅臥不起。求閣下再行專緘強之。請其專顧信州之防。而籌軍單之餉。渠若不出。則閣下太苦。彭鴻軒近在於潛。敢推。該軍若不歸併左右。斷不得力。似當撤散而另招之。

覆李希菴

鈔寄潤帥函。所論營頭歸人。猶女子許嫁。精確之至。凡事皆須識得此意。訟卦之作事謀始。進賢之如不得已。皆此義也。又精益求精。帶數百人亦甚不易一節。國藩於乙卯年。曾將此義屢次致書於次青。亦引羅李岳州之千人爲證。六年冬。又以此義勸戒峙衡。惜俱未能領會入微。潤帥處書辭莊重。傲處却無函相告。當由彼此真意相季。漸見枝辭之少。如尙有一半分未孚人處。鄙人亦惟以至誠專責閣下而已。

覆李後泉

牙釐事件。公牘所陳十四條。經繡堂兄與閣下推究。至爲妥善。間有一二未叶。業經批明。往於道光十九年。在漢口長沙會館。見抽船釐。收者出者。皆賣買微賤之人。坦然交易。無詐無虞。今雖以官抽濟餉。仍須帶幾分賣買交易氣象。不宜多涉官氣。牙帖尤賣買場中鄙瑣之事。尤不可經衙門人手。減冗員裁浮費二語。似迂而關繫極鉅。此中所謂坐支者少。卽去浮費也。閩中釐源。爲數無幾。前在建昌時已深知之。

覆胡官保

手教並批牘二冊。不特當世無兩。亦恐爲百年來所僅見。卽如昨者霍山張組一稟。國藩亦歎其賢。不過以一語批准。今讀大咨錄批。聲聲打入心坎。不獨激發張令之志氣。亦可免他人之蹂躪。此公家之至寶。宇宙之至文也。甯國圍困日甚。餘杭失守。賊蹤去浙省不過百里。微帥與浙帥。皆望極生怨。徵色發聲。行且彈射叢集矣。擬守條侯之法。以梁委吳。未審果有當於事理否。敬求詳明指示。嘗四月初定大計之時。已知必有此衆怨交集之日。今臨事而不能無所搖惑。尙祈訓定。

致李繡堂

牙釐各務。仰蒙擘畫周詳。綜理密微。曷勝佩仰。此事究係倡始於生意場中。故鄙意注重於除官氣裁浮費二語。頃意城寄函潤帥。亦以專駐會垣。恐耳目不能周徧。勸令參用紳士。互相查察。國藩於江西紳士。熟識無多。聞見亦不甚廣。卽於湖南紳士。亦不似潤帥之博探廣詢。左右逢原。仍求閣下就近悉心搜羅。或函商意城。於湖南釐卡最得力之員。借用一二人。將來卽可保作江西之官。如向未在釐局當差者。亦可做湖北之例。楚材晉用。但當禮羅江西賢紳。兼進並收。不宜過示偏重。使豫章才俊。有向隅之感。其自湘來者。先給薪水。優加禮貌。不必遽授以事。收之欲其廣。用之欲其慎。大約有操守而無官氣。多條理而少大言。本此四者以衡人。則於抽釐之道。思過半矣。務祈及時羅致。鄙人亦當幫同探訪。樟樹三江口等處。彼荃可親往經理一番否。

覆方子白

國藩才智淺薄。精力極疲。忽膺艱鉅。大懼賢越。惟當廣引直諫之友。啓牖忠益。匡其不逮。承薦令弟及武舉張君。請卽束裝來做營。量才位置。以後閣下鑒衡所及。如有文可爲牧令。武可爲將領者。望無惜時時汲引。冀收拔茅連茹之效。若無實在出色之處。介乎有用無用之間。則可不必要多薦。以不收則空勞往返。收之則漸成冗員也。大抵觀人之道。以樸實廉介爲質。有其質而更傳以他長。斯爲可貴。無其質。則長處亦不足恃。甘受和。白受采。古人所謂無本不立。義或在此。閣下以爲何如。

致沈幼丹

次青擅長過人之處極多。惟弟與閣下知之最深。而短處則患在無知人之明。於在高位者。猶或留心察看。分別真邪。至於位卑職小。出己之下者。則一槩援籌善從長之義。無復覺有奸邪情僞。凡有請託。無不曲從。卽有詭狀發露。亦必多方徇容。此次青之短。將來位望愈高。終不免爲其所累。閣下知人之明。遠勝儕輩。務求台駕迅出。且先在信州小駐。將次青所用文武各員。一一經法眼甄別。位置得宜。優劣得所。次青去此一短。則衆長畢露。幸甚。做處用人。間有不當。亦望閣下時時惠錫箴言。以資質證。至禱至禱。

覆李次青

一皖南膏腴之地。大有可爲。頃已奏閣下調補斯缺。明年國藩有淮揚之行。此四府一州者。敬以相屬。大抵地方事關下主之。軍務事季高主之。升遷舉劾。則兩公商辦。而僕與胡宮保亦可參酌。務須從吏治上痛下工夫。斯民庶得少蘇。

一前議閣下一軍。由廣信於潛昌化一帶繞至廣德州。皆三路中之南一路。閣下所知也。今饒枚巨已入杭不返。沈幼丹堅臥不出。彭鴻軒一敗不振。廣德又於初四日失守。賊勢彌張。貴部三千餘人。恐難當此一路。擬請貴軍全駐甯國。季翁新軍六千當廣德一路。凱章則遊擊於廣德甯國之間。春霆則由石埭進攻池州。國藩則駐徽州。

此將來定局也。

一目下急援甯國。應派春霆全軍先攻石埭。凱章由太平以攻涇縣。貴部至廣信後。休息數日。卽由華埠以達徽州。閣下輕騎來祁門一行。再專人至廣信調隊。與貴部會與徽州。由旌德以救甯。此目下分路援甯國之局也。一鳩軒一軍。既歸浙江調遣。凡來此相就者。閣下不宜招惹。整頓敗軍。實不易易。閣下新軍既有四千七八百人。益以屈劉之千六百人。則不甚單薄。特慮其中未盡訓練之實耳。閣下不赴浙履任。又不管鳩軒之軍。浙人難免怨閣下而兼怨不佞。然僕以貴部守甯國之名城。而以左張鮑三軍左右夾輔。則僕之爲閣下謀也甚忠。以左張劉廣德。屏蔽浙西。則僕之爲浙江謀也甚忠。此心可告皇天。可盟鬼神。雖千怨萬謗。亦不足惜。閣下不必瞻顧也。一吾輩均屬有志之士。亦忍辱耐苦之士。所差者咬文嚼字。習氣未除。一心想學戰。一心又想讀書。所謂樞竄五技而窮也。僕今痛改此弊。兩月以來。不開卷矣。閣下往年亦係看書時多。料理營務時少。其點名看操查牆子等事。似俱未躬親。此後應請親任之。閣下贊吳退菴之賢。證以胡宮保所稱。似亦學問中人。非軍旅中人也。俟相見再議。

覆李鶴堂

前寄一緘。道及求人之法。須有操守而無官氣。多條理而少大言。日來以此廣告各處。求薦才以輔我不逮。尙無應者。兩君物色得人否。求人之道。須如白圭之治生。如鷹隼之擊物。不得不休。又如蚌之有母。雉之有媒。以類相求。以氣相引。庶幾得一而可及其餘。大抵人才約有兩種。一種官氣較多。一種鄉氣較多。官氣多者。好講資格。好問樣子。辦事無驚世駭俗之象。語言無此防礙之弊。其失也奄奄無氣。凡遇一事。但憑書辦家人之口說出。憑文書寫出。不能身到心到。口到眼到。尤不能苦下身段。去事上體察一番。鄉氣多者。好逞才。能好出新樣。行事則知己不知人。語言則願前不願後。其失也一事未成。物議先騰。兩者之失。厥各維均。人非大賢。亦斷難出此兩失之外。吾欲以勞苦忍辱四字教人。故且戒官氣而姑用鄉氣之人。必取遇事體察。身到心到。口到眼到者。趙屢漢

好用新進少年。劉晏好用士人理財。竊願師之。

覆李兩亭

接惠緘。得悉尊體尙未痊愈。至以爲念。凡沈疴在身。而人力可以自爲主持者。約有二端。一曰以志帥氣。一曰以靜制動。人之疲憊不振。由於氣弱。而志之強者。氣亦爲之稍變。如食早睡。則強起以興之。無聊賴。則端坐以凝之。此以志帥氣之說也。久病虛怯。則時時有一畏死之見。憧擾於胸中。卽魂夢亦甚。不安恬。須將生前之名。身後之事。與一切妄念。剷除淨盡。自然有一種恬淡意味。而寂定之餘。真陽自生。此以靜制動之法也。願閣下於藥物調養之外。更將此兩法體驗一番。久之必有小效。僕精力日憊。權位日崇。隕越之虞。深爲可慮。但以勤勞二字自勵。冀少補於鈍拙。寄雲同年。擬請其來此一行。不知渠尙須北上否。

覆胡宮保

惠緘杜潤生實不勝民社。已用公牘咨復。請公另委賢員。不必顧忌許多。州縣略好一分。百姓略安一分。卽吾輩清夜自思。可自慰一分。公之功在天下。以吏治大政面目并變。風氣爲第一。蕩平疆土二千里。猶爲次著。待師公之爲。亦當以吏治人心爲第一義。皖北州縣。一一皆請公以夾袋中人才換之。待當附片奏之。翁公雖膠固於成例。束縛於屬吏。然畏公而有所不敢發。亦德公而有所不忍負。公以王者之心。行伯者之政。不久必爲世所共亮。其夾袋私囊中尙有餘才。則請波及皖南。待如物色得人。亦必保爲湖北州縣。交易而退。以報大德。廣德州又已退出。州境已報肅清。甯國賊勢日鬆。意者秋涼馬肥。賊將以全力救安慶乎。去冬英霍諸山。運米糴等物。赴金。余軍中夫役。如何給錢。如何押運。求詳示。

覆胡宮保

惠緘敬悉。天津之事。決裂至此。驚心動魄。可爲痛哭。幸近日接奉硃批。皆七月初五以後所發。聖人似尙不改常度。侍昨寄希菴信云。方今天下大亂。人人懷苟且之心。出範圍之外。無過而問焉者。吾輩當自立準繩。自爲守之。

并約同志者共守之。無使吾心之賊。破吾心之牆。予云云。此後侍與老前輩。當謹守準繩。互相規勸。不可互相獎飾。互相包荒。卽昨留駱帥等度外之舉。嗣後均不敢爲矣。次青已到祁門。浙事危急。患不在賊多。而在兵勇太雜。太亂。實覺無藥可醫。桐城援賊果到否。久修之壘易守。似不宜因援賊到而另移新壘。

覆李筱泉

來示所陳各情。實爲切中要害。鄙人無以易之。大抵人才約有兩種。高明者好顧體面。恥居人後。獎之以忠。則勉而爲忠。許之以廉。則勉而爲廉。若是者。當以吾前信之法行之。卽薪水稍優。誇許稍過。冀有一二人。才出乎其間。不妨略示假借。卑瑣者本無遠志。但計錙銖。馭之以嚴。則生憚。防之稍寬。則日肆。若是者。當以來示之法行之。俾得循循於規矩之中。以官階論。州縣以上。類多自愛。佐雜以下。類多算細。以釐務論。大卡總局。必求自愛之士。宜用鄙信之說。小卡分局。不乏算細之員。宜用來信之說。位西之意。亦與兩君相同。而鄙說要不可盡廢。祈參用之。

覆夏筱甫

頃接惠書。並送到大箬。具見研具軌道。學有本原。軍中少暇。不及悉心紉繹。但繙閱一二。檀弓辨誣。發千古之覆。成一家之言。足與閻氏古文尙書疏證。同爲不刊之典。轉注說。與鄙人所見。不甚符合。而述朱質疑。中所論朱子之學。得之艱苦。則國藩生平之宗旨。治軍之微尙。有如桴鼓之相應。自以秉質愚柔。舍困勉二字。別無入處。而不意閣下尙論大賢。亦以艱苦二字發其微也。乾嘉以來。士大夫爲訓詁之學者。薄宋儒爲空疏。爲性理之學者。又薄漢儒爲支離。鄙意由博乃能返約。格物乃能正心。必從事於禮經。考覈於三千三百之詳。博稽乎一名一物之細。然後本末兼該。源流畢貫。雖極之軍旅戰爭。食貨凌雜。皆禮家所應討論之事。故嘗謂江氏禮書綱目。秦氏五禮通考。可以通漢宋二家之結。而息頓漸諸說之爭。足下講學有年。多士矜式。如能惠然肯來。啓牖愚蒙。實所忻望。婺源大賢故里。有江汪諸儒之遺風。又得足下薰陶教育。想復英彥朋興。所有忠義。既經採訪詳確。造成冊結。卽照蘇常之例。一體辦理。并請攜二三學者。同來敝處。卽入忠義局。月致修金。分任採訪。不勝跂望。

覆張凱章

守城極不易易。城內雖有守堞之兵。城外亦須紮營。以護餉道汲道。閣下僅三千人。恐不敷分布。次青卽前車之鑒矣。鄙意仍以全紮城外爲要。祈酌之。如業已修城。心有把握。則由閣下定計。僕亦不爲遙制。總之主守則專守。主戰則專戰。主城則專修城。主壘則專修壘。切不可脚踏兩邊橋。臨時張皇也。次青所以失者。力主守城之說。乃必待戰敗之後。始入城而分守之。分布未定。賊已來撲。士氣已餒。軍械已失。豈復能堅守哉。閣下若爲守城計。則當早早分布。早早約定。不準一人出戰。待賊來撲城。我軍在城上。悄悄靜靜。看得分明的當。然後出戰。若不度其必勝。尙不出仗也。

覆胡宮保

連接惠書。鈔寄探報。及六君子公緘。具悉。此間侍與諸君。各有一議。鈔呈台覽。祈閣下兼綜衆說。折衷一是。至西巡之說。則萬萬不可。木蘭秋獮。本國家之憲章。嘉慶年間。無歲不舉。宣宗因抱鼎湖攀號之慟。不忍更蒞其地。非棄而弗有也。距京城及東西陵。皆不甚遠。卽去盛京暨科爾沁部。亦不過數百里。左右前後。無非四十九部之臣民。以鄙見觀之。權宜避狄之計。無如熱河之妥善者。若秦晉則物產兵力人心。無一足恃。不知何見。而以爲愈於樂陽。大抵天下有理有勢。北援理也。保江西兩湖三省勢也。吾輩但就目前之職位。求不違乎勢。而亦不甚悖乎理。此外出位之思。非常之策。吾輩尙可不必遽議。閣下以爲然否。

覆李希菴

青草壩各營進援六安州。聞州城解圍後。此舉業已停止。不知確否。胡中丞於久經謀定之局。每至臨事變其初計。如去年七月初破石牌之時。卽議定守石牌圍太湖矣。十一月援賊將到。忽變爲進禦小池驛之計。本年三四月初進安慶之時。卽議定遠攻桐廬近守英霍矣。今九月援賊將到。忽變爲分救六安之計。大抵宮保德性之堅定。遠勝於往年。而主意不勝堅定。猶不免往年移游之見。左季翁謂其多謀少斷。良爲不誣。閣下當力持初議。以

堅定二字。輔官保之不遠。國藩亦嘗從容諷勸。勿爲人言所動。此次救援六安。聞出自伍茂生之策。謂往返不過二十日。實則天下無此神速之兵也。歷口王彭二營。已札飭速回北岸。次青已回祁門。季高紮樂平未動。安慶賊氣已衰。只要桐城青草壩兩軍。堅定不搖。安慶必可速克。此陰陽交爭之幾。南北兩岸士氣。賴之一振。長圍必不可撤。亦乞閣下審幾而力圖之。

覆宋滋久

離城太遠。出仗難以收隊。必須移近。乃可圖功。打仗要隊伍整齊。開鎗不可太遠。上半日要寂靜。下半日收隊時。要不散漫。弟昔作有得勝歌云。起手要陰。後要陽。出隊要弱。收隊強。初交手時如老鼠。越打越很如老虎。雖粗淺之言。而精意不外乎是。凱章辦事。皆從淺處實處着力。於勇情體貼入微。閣下與之共事。望亦從淺處實處下手。賊匪最譎詐。吾輩讀書人。大約失之笨拙。即當自安於拙。而以勤補之。以慎出之。不可弄巧賣智。而所誤更甚。鄙人閱歷之語。謹貢一得。以備芻詢。

覆胡官保

西遷之策。侍連日思之。未得端緒。仲遠兄陳灤陽之不可久駐。內六盟之未足深恃。誠爲切當。必謂關中遂可建不拔之基。似亦無據。朝廷草創。略修宮禁。暨壇廟官寺之類。養禁旅衛卒二萬人。非二百萬金不辦。倉卒間何從得此。萬一粵匪捻匪。分道西犯。秦中兵勇。豈足禦之。又遷都大事。宜府須二三非常之才。經緯萬端。三輔須熊羆不二心之臣。捍禦外侮。將仍求之滿蒙宗藩勳舊之中。則舊科難改。若求之漢人。卿相督撫之中。則亦殊乏妙選。蓋有人則可秦可灤。均足自立。無人則灤失而秦亦未必得。斯鄙見所未敢遽決者也。

覆胡官保

鄭兵至。奉賜書並錫匣惠件。又梅村兄與廉卿鴻文。讀之愧悚難任。公有賜物。無一敢卻。此次則實不敢當。而又不取還璧。謀之少荃。以爲令誕不遠。可還以此致祝。而賡之以他物。姑存其說。先以鳴謝。梅公之古藻聯翩。廉卿

之真氣流轉。獎許之過。期待之厚。諸無以副之。少遲再行肅函奉謝。專丁歸。又奉環章。西遷之說。幸與日前寄復嚴張信。不謀而合。至云斬陳元振。出之柳伉。則爲忠直。出之郭李。則爲跋扈。尤爲至論。嘗熟思袁紹之誅除宦豎。陳元禮之迫脅馬嵬。雖一時快心之舉。然豈稍有儒生氣象者所能爲哉。又豈有儒生氣象者所應爲哉。寔營新軍。苦甚。主將又悞忿不解。俱非佳象。侍心竊憂之。宋國永似尙曉事。然亦怯於積威。難遽挽回。公辛苦教練數年。成此一枝勁旅。恐一調南岸。而踰推變枳。尤以爲疚。

覆胡宦保

惠書敬悉一切。權不可預設。變不可先圖。自是至當之論。大抵平日非至穩之兵。必不可輕用。險着。平日非至正之道。必不可輕用。奇謀。然則穩也。正也。人事之力行於平日者也。險也。奇也。天機之湊泊於臨時者也。敢以質之左右。有嘗萬一否。桐城之捷。此間得見探報。粗知大概。戰事尙無所聞。左帥來祁已四日。其部下自安仁大捷後。至今尙無續報。若再不紮屯溪。此路賊必生心。可慮之至。九舍弟仰承明教。尙知欽感。我公實能以善養人。不僮以善服人。故才氣之士。易於服化。敬謝敬謝。

致宋滋九

浮梁疏失。飽張退紮。致休歛難民。栖息無所。皆國藩調度乖方之咎。且疚且愧。貴部昨已抵盧村。賊匪連日犯嶺。留禮字二營駐防盧村。應請貴部移駐漁亭。與寔字之副左副右。老湘之右翼二旗。合并駐紮。務祈深溝高壘。立於不敗之地。寔營之精悍。老湘之謹嚴。求閣下參仿行之。略變微防氣習。治軍之道。以勤字爲先。身勤則強。佚則病。家勤則興。懶則弱。國勤則治。怠則亂。軍勤則勝。惰則敗。情者暮氣也。求閣下以身率之。常常提其朝氣爲要。

覆宋滋九

惠緘具悉。目下抽出寔營。回剿浮梁景鎮。作爲游擊之師。自不能遽回駭休境內。所有漁亭葉村盧村各營。及祁門老營。皆專以一守字爲主。祁門葉村地勢較好。所慮者漁亭及盧村耳。漁亭現有大營。當再加派寔字二營前

往同紮。則兵力較厚。務祈閣下督率各營。深溝高壘。爲堅不可拔之甚。千萬千萬。治軍以勤字爲先。實閱歷而知其不可易。未有平日不早起。而臨敵忽能早起者。未有平日不習勞。而臨敵忽能習勞者。未有平日不能忍飢耐寒。而臨敵忽能忍飢耐寒者。微防擊眷擾民。習氣已深。實難挽回。吾輩當共習勤勞。先之以愧厲。繼之以痛懲。閣下若有志斯事。或另招一二哨。苦心訓練。繩以敵處管規。盡變微防積習。如果可用。則逐漸增加。以是保衛珂鄉。卽以是共維大局。可否祈酌度辦理。

覆郭意城

兩次惠書。不及以時報。蓋十一月以來。軍事棘手。自普鎮建德失陷。於是軒然大波。憚赫千里。連破東流建德彭澤都昌鄱陽浮梁大縣。其同時并舉者。東路則破上饒江灣兩營盤。婺源一城。現復破浙之常山。圍江西之玉山。北路則破弇棧禾成各嶺。撲煥亭小溪各營。實覺危險迭至。應接不遑。幸北路一支。經鮑張屢次大捷。輒得安枕。西路一支。得季翁保守景德鎮。雪琴保守湖口。所全甚大。惟東路無兵往援。不知信玉兩城能堅守否。若李秀成自廣信而南犯。朱衣點等自南贛而北趨。則江西腹地。殆不可支矣。湘省借行粵鹽之舉。以虞民食淡言之。則嘗由湘撫主稿入奏。以鹽釐濟餉言之。則嘗由敵處主稿入奏。本食淡立言。淮引不到。而借蜀鹽。蜀亂不通。而借粵鹽。皆爲民食起見。其詞公而順。本濟餉立言。吳餉無措。而設法於湘。湘餉無措。而設法於粵。皆爲己軍起見。其詞私而逆。國藩既患廣東督撫之夙相鉅錙。必難集事。又惡夫奏疏措辭之不公不順。是以遲久未奏。且遲久未批。良以此也。然以諸君子殷殷然爲我代謀。而我乃先掣其肘。先關其口。天下其謂我何。是以終不能不奏。終不能不批准。以答諸君子相愛相助之意。其事則未必果成。恐與四年之奏勸捐於四川。六年之奏抽釐於上海。同一轍也。吳退菴募二千五百人之局。聞台端大不謂然。以不成人惡爲錢。僕既有三次札批於前。又當面要約於後。此時斷難失信。渠以扁舟千餘里來。祈請示。僕無異詞。今豈可忽變乎。

覆胡宮保

得惠緘承獎贊借夷助剿一疏。係左季翁捉刀爲之。鄙人不辦此也。至於大敗之後。力不能拒。和好之初。情不宜拒。此則鄙見與季公相同。此時以甘言誘我。我乃峻辭拒之。異時以惡言加我。我反哀辭求之。不亦晚乎。似宜虛與委蛇。與之爲嬰兒。與之爲無町畦。猶爲少足自立之道。比聞僞忠王圍玉山。竇挾有黑夷數人同行。江浙千里。不免辛有之歎。左鮑二公。因連日雨雪。致阻師期。黃文金在石門一帶。殊無退意。鮑公由祁門回剿景鎮。蓋欲收夾擊之效。摹仿閣下令金余萬人出水吼嶺之法。尊急全愈否。已移至太湖否。以公之謀。輔以希之斷。北岸軍事。宜可萬全。令人讀書端坐聽之。此顧氏之法。而閣下效之。國藩久不開卷。近日苦雨無膠。略一緝閱。都無意緒。不足仰報。

覆左季高 咸豐辛酉

接惠書。戰事稍順。驛遞亦速矣。胡官保之病。連接數信。知其病源頗重。且語氣亦過於慈祥。此公年來進德之猛。用心之苦。建功之大。不特爲塔羅所不及。亦遠出江季之上。至其推賢揚善。惟恐失之。則古來名臣。殆不是過。數十年所未見也。弟勸其請假兩三月。回武昌醫調。北岸軍事。多李猶可勉強支持。吏事餉事。潤帥一日不理。則敗壞將不可問。每思此事。寸心懸懸。但求天祐聖朝。佑此勞臣。速就康復耳。魏質齋添勇。弟批准添足二千。乃數尊處調遣。景鎮碉卡。務求速辦。請公留千人守之。以爲重鎮也。

覆方子白

接上年十月惠函。力主遷都長安之議。此事京中具奏者甚多。鄂省司道諸公。亦衆口同聲。以爲目下第一良策。山陝河南各疆臣。亦皆先後陳奏。鄙意以爲中興在乎得人。不在乎得地。漢遷許都而亡。晉遷金陵而存。拓跋遷雲中而興。遷洛陽而衰。唐明皇德宗再遷而皆振。僖宗昭宗再遷而遂滅。宋遷臨安而盛昌。金遷蔡州而淪胥。大抵有憂勤之君。賢勞之臣。遷亦可保。不遷亦可保。無其君。無其臣。遷亦可危。不遷亦可危。鄙人閱歷世變。但覺除得人以外。無一事可恃。張仲遠觀察持遷秦之說甚力。與鄙見微若斷斷。因閣下垂詢。略報一二。伏惟採擇。仍賜

辨正爲荷。

覆胡宮保

奉惠書。得知狗黨尙在黃州上巴河一帶。爲之大慰。前聞黃州不守。意狗逆長驅上犯。已燬漢口矣。今既徘徊黃州。希帥嘗已追及。北岸必可無虞。公之病可不因此而增加。至幸至幸。貴體雖弱。而醫家所稱心肺脈模糊者。不可盡信。公生平最好用心。尤好用心於無可如何之地。莊子有言。違命之情者。不務知之所無可奈何。假如目下武漢江西。倏有大變。是雖知之而無可奈何者也。假如吾輩。三日不汗。溘先朝露。是雖知之而無可奈何者也。願公於人力所能爲者。則略加思慮。於天命之無可奈何者。則冥然不顧。尊忿其漸有瘳乎。鮑軍若不動。待移駐江濱當走謁也。

覆左季高

初五日奉復一緘。不知何時可到。是日各營進攻徽州。午刻薄城。忽值大雨。湘前強中等營敗挫。傷亡近二百人。老湘霆字等營幸無損失。機勢殊覺不順。凱章之意。欲再舉猛攻一次。蓋各處皆死路。惟攻徽是一條生路也。若能攻開。擬請貴軍進駐婺源。且堅守徽郡大縣。以爲吾輩根基。若不能克。再行熟計。然棄三縣而出嶺外東建。亦非足以自立之地。若舍皖南而全置不顧。盡縮入江西境內。或如尊指。挈師赴潯。則過於避難就易。亦未敢出此也。鮑軍本應由潯赴瑞臨。目下此間圍困若此。不能不請鮑公先剿景鎮。弟與江西文報久隔。竟不知腹地作何糜爛之狀。接來書詢弟自定大計。弟自奉江督之命。奏明從皖南進兵入吳。旋奉督辦皖南之命。又奉江南大帥之命。是江南與皖南。弟之汛地也。除堅守祁休駱三縣力攻徽州外。惟東建尙可移駐。閣下欲弟赴潯。李少荃欲弟赴省。以固根本。似俱不可。至貴軍不可舍我而去。公義私情。尤其次也。惟弟與兄二人。愈合愈近。或可兩全。愈離愈遠。則必兩傷。鄙見敵處仍攻徽州。貴軍從樂平北攻景鎮。鮑軍從鄱陽上攻景鎮。徽州果克。則景鎮非我之咽喉。置之不問可也。徽州不克。祁門另出一支。由臧家灣以攻景鎮。方今鄂省糜爛。贛江西又糜爛。斷無完策。

斷無勝算。能打幾次好仗，便是勝算耳。祁休米糧，勉強可支兩月。任星元水師，張太守糧台各船，須在角山前一帶。遠亦在康上爲妙。若出湖至建德，則相去近九百里，呼應不靈矣。

覆許仙屏

接奉惠書，久未裁復。又辱手簡，伏審纂著日精，至以爲慰。此間軍事，自徽甯失後，局勢過促，地小無舞袖之方，夢中無伸足之處。十一月普軍敗挫，建東都郡浮彭大邑同失，祁門老營孤懸被困，幸左鮑將黃逆一股擊退，方慶更生，而僞侍王李世賢一股，又陷樂平景鎮，斷我後路，塞我糧源。現以左鮑兩軍夾擊景鎮，而老營抽兵力攻徽州。若二者能一處得手，庶米糧可通，不使三萬軍士盡陷重險之中。撫建股匪深入腹地，本擬檄鮑公由省城援剿，因景鎮之變，不能不令先援老營，聞樟樹已失，不知瑞臨得保無恙否。珂鄉罹水火久矣，劫數猶未滿耶。來示詢及古文之法，僕本無所解，近更荒淺，不復厝意。古文者，韓退之氏厭棄魏晉六朝駢儷之文，而反之於六經兩漢，從而名焉者也。名號雖殊，而其積字而爲句，積句而爲段，積段而爲篇，則天下之凡名爲文者一也。國藩以爲欲着字之古，宜研究爾雅說文小學訓詁之書，故嘗好觀近人王氏段氏之說，欲造句之古，宜倣效漢書文選，而後可破俗而裁僞，欲分段之古，宜熟讀班馬韓歐之作，審其行氣之短長，自然之節奏，欲謀篇之古，則羣經諸子，以至近世名家，莫不各有匠心，以成章法，如人之有肢體，室之有結構，衣之有要領，大抵以力去陳言，戛戛獨造，爲始事。以聲調鏗鏘包蘊不盡爲終事。僕學無師承，冥行臆斷，所辛苦而僅得之者，如是而已。自頃羣賊逼處，無日不在危機駭浪之中，偶一展卷，都無意緒，不足仰報故人，勉惜分陰，以光絕業，瞻企不盡。

覆胡宮保

接惠書，知玉體稍痊，夜能成寐，此最好消息。慶慰無已。觀所致希菴逸亭信，切當事理，賊非必果不可破，而事機往往差錯。如鮑公由下隅坂至鄱陽，不滿二百里，而乃坐船赴湖口，迂繞三四百里，遂令祁景軍心震恐，乞公爲我催之。侍近惡聞高言深論，但好庸言庸行，雖以作梅之模實，亦嫌其立論失之高深，其論公之病，侍亦慮其過

於幽渺。願公從庸處。殘處着想。聖人言不逆詐不僥不信。吾輩且當不逆死不僥不起。以爲養生之法。不逆敗不僥不振。以爲行軍之法。公爲堯爾否耶。

覆左季高

侍逆若不破衢州。必仍折回江境。或由雲際關道閩境以竄建昌。或由河口港口等處。以擾上清而達撫建。貴部能於鉛山弋陽境內截之。則不致尋僞忠故轍。否則渠奉僞詔以擾江爲救皖。必深入腹地。而後可免於咎責也。侍逆驅除之後。仍請大纛回至景鎮。一則來示所云。華埠等處。難辦米糧。仍須取道樂景以赴婺源。一則建德新失。恐賊由石門以窺景鎮。饒信徽三府二十一屬。皖江與浙交匯之區。賊所屢爭不一爭之地也。貴軍在此三郡威德已著。事機尙順。請卽周旋於此二十一屬之中。不必攻堅。而自足制賊之死命。不必展轉馳驅。尋賊開仗。而賊自不能不奔突以投閣下之羅網。誠使陳狗楊麻劉官方李秀成等。凡有入二十一屬者。皆受劍而去。則江西之北境日安。皖南之軍威大振。而貴軍誓不攻堅之志亦可遂矣。惟地段太廣。兵力太單。能遊擊則無人駐守。能駐守則無人游擊。不駐則師無根基。不游則師無遠勢。皆非可久之道。應請閣下募足步隊萬人。以二千守婺源。以二千守景鎮。以六千爲游擊之師。益以馬隊數百。即可縱橫如意。婺源城極易守。茶鹽釐務。所獲頗饒。景鎮爲三府總匯之地。又係閣下苦守苦戰而得之者。若堅築石壘數座。不特釐務可圖。且祁休各軍。得所託命。弟自去冬以來。屢勸閣下駐守景婺兩處者。以兵勢餉源。皆不可不以此兩處爲重也。其添募一節。卽日另備公牘。奉達冰案。安慶軍事平穩。多公獲一勝仗。狗逆意欲先攻多公。挂車河營盤。然後再援安慶。庶無後路之虞。今反爲多所敗。又水大不能驟回。飽成各軍。業已聚集賢關。狗回亦有以禦之。皖城或終可圖也。建德之賊。日內無他竄信息。李金賜被擒後。自安義逃回。已入省城矣。

覆胡宮保

李金賜本非國藩所願調。因左帥之緘咨。而照轉行之。未敗之先。已批糧台不准發餉。不准在江西境內。並參革

不准留營。既敗之後，函復中丞則謂：李金暘降賊之說，難保其無，但不可憑張光照一人之供，恐未戰先逃者，架誣其上云云。今李金暘果自賊中逃出，赴省自首，則待之所言，不爲無驗。大抵亂世之所以彌亂者，第一在黑白混淆，第二在君子愈讓，小人愈妄。待不如往年風力之勁，正坐好讓，公之稍遜首年，亦坐此耳。

覆鄧寅階

斯文精萃，亦係古文中最善之本，尚不如文選之盡善。文選縱不能全讀，其中詩數本，則須全卷熟讀，不可刪減一字。餘文亦以多讀爲妙。蓋京都田獵江海諸賦，雖難於成誦，而造字形聲訓詁之學，卽已不待他求。此外各文，則并無難成誦者也。

覆胡宮保

惠書內鈔省城全局一緘，希庵請自謀黃州一緘，多都護自請回剿上游一緘，聆悉一切。鄙意以成武巨軍還之，希帥令其進圖黃州，或不近城下，專爲北岸游擊之師。鮑軍南渡，援剿潯瑞武義興冶等處，專爲南岸游擊之師。上游有兩枝活兵，大局必有轉機。至狗首千方百計，無非爲安慶解圍而設，其精銳之賊，必仍在懷桐兩處。現在江水盛漲，沅甫守內外濠，兵力尙敷分布。禮帥馬步之強，甲於諸軍。禮帥主剿援賊，沅甫主圍城池。又有潛太石牌三處堅守，以保糧路，必臻穩固，以鄂省論之。上段有金劉圍攻德隨之師，中段有希霆兩岸游擊之師，下段有禮沅援師圍師，似俱有七八分把握。閣下如不以鄙見爲然，待亦嘗於節後調鮑軍至南岸，由潯趨瑞。蓋今春以來，敵處屢次調鮑公援省，援撫援潯，厥後皆中途改議，失信於江西官紳多矣。四月瑞州郭李敗後，毓中丞迭次函咨調鮑援潯，待皆吝復應允，斷不可再行失信。霆軍至南岸後，視僞忠王所在而剿之，或在江境，或在鄂境，決不敢稍分畛域，但須從瑞州武義入手，庶有以對江西官紳，而霆營亦易於領餉耳。

覆胡宮保

手教敬悉，血證不止，懸系之至，急思趨晤，而勢不克赴太湖，惟望台旌由華陽鎮經過，敬候起居耳。賊之精神，全

注懷桐。吾輩亦當以全副精神注之。成武臣調赴上游。待當另調數營。以益飽軍之力。有三事切陳於台端。必求俯從。一曰蕪黃之間。斷無野仗可打。不過頓兵城下而已。請公不必帶兵赴蕪。親臨行間。二曰希菴來謀黃州。兵力不可太薄。宜以成武臣七營還之。希與成不可分爲兩軍。胡鎮三營。須俟石牌有替人到。再行歸併希處。三曰台旌宜逕還省城。養病以慰衆心。籌餉以圖可繼。不宜徘徊中路。使各處人心懸懸。以上段省城自任。以中一段蕪黃。付之希菴。以下一段懷桐。付之鄙人與楊多諸公。仍請由華陽鎮行走。俾得走送。曾鈞千萬千萬。

覆劉馨室

嶺賊新破。踞縣克復。欣慰之至。聞左軍已至景鎮。糧路不至梗塞。應可安嶺內軍民之心。江軍門專事驚慌。全無主意。書函不可盡信。若非賊圍柏溪營盤。朱軍不可輕易出隊。凡出隊有宜速者。有宜遲者。宜速者。我去尋賊。先發制人者也。宜遲者。賊來尋我。以主待客者也。主氣常靜。客氣常動。客氣先盛而後衰。主氣先微而後壯。故善用兵者。最喜爲主。不喜作客。休祁踞諸軍。但知先發制人一層。不知以主待客一層。加之探報不確。地勢不審。賊情不明。徒能先發。而不能制人。鄙人深以爲慮。請閣下與諸公。講明此兩層。或我尋賊。先發制人。或賊尋我。以主待客。總須審定乃行。切不可於兩層一無所見。貿然一出也。

覆李希菴中丞

鄂之南岸。一律肅清。此岸得金劉圍攻於上。成蔣離剿於下。應可漸殄逆氛。潤帥病勢未愈。至爲系念。江楚皖豫諸將帥。惟潤帥能調和。一氣聯合一家。鄙人雖有聯絡之志。苦於才短性懶。書問太疏。遂不能合衆志以勤王事。合羣力以貫金石。至於察吏理財。拙才更遜百倍矣。萬一有它。四省大局。實虞其散。箴言書院記。昨已勉爲纂就。交潤帥來丁帶去。本欲將胡氏父子育材肫肫之意寫出。奈久疏文字。機軸太生。不足以副潤帥之望。

覆左季高

大喪典禮。軍中僅大員素服三日。尙須於營外設次。其弁勇則照常辦事。不素服。不藍印。不蓄髮。弟因現住省城。

與學使府縣等官相處。故參用地方官儀制。公則以九卿治軍於外。宜全用軍營儀制也。飽軍掃清湖坊河口一帶。解廣信之圍。江西腹地肅清。此後餉源。當稍寬裕。浙賊太多。回竄江西。乃意中之事。必至之勢。廣信河口一帶。不得不煩閣下鎮駐其間。霆軍紀律不嚴。若久住腹地。恐商賈不願出其途。反於釐餉有損。故惟貴軍最宜耳。弋陽距鉛山貴溪興安。皆在數十里之內。距雙港河口湖坊港口。亦不出數十里。與廣信呼吸相通。似是適中之地。大憲是否應駐弋陽。乞裁示。薊泉到後。尊處即可分兵援浙矣。目下且保全江西善地。壹意與民休息。俾丁漕釐務三者。皆大有起色。次第清償欠餉。庶收土馬飽騰羽毛豐滿之效。黃州克復。隨州亦必速下。湖北肅清後。亦宜息民裕餉。以清積欠。綱節久無信來。不知迭聞捷音。病可少減否。

正封緘間。接湖北信。胡宮保於八月二十六日亥刻去世。痛心之至。赤心以愛國家。小心以事友生。苦心以護諸將。天下寧復有似斯人者哉。奉旨以李希菴暫署湖北巡撫。蓋因潤帥請開缺一摺薦之自代也。

覆李黼堂

接八月二十五日密緘。并二冊三單。丁漕減收一案。敬悉條理之精密。斤斧之宏豁。深合龜亂更始之道。鄙人去歲建議初。願不到此。佩仰無既。札稿悉依原本。示稿略爲刪改。期於簡明。惟此事利於民而不利於官。民有停捐之樂。又得減價之惠。或可踊躍輸將。官不以停攤款爲德。而但以減丁漕爲怨。必且多方撓阻。請閣下於攤捐節壽漕規等項。嚴行禁止。俾大利歸於州縣。而敝處於抗違新章。征解不力者。參劾一二員。則事不勞而自集矣。先此密復。容日再有公緘。奉達左右也。津貼之項。自以防兵征兵各半爲妥。日內聞國制與胡宮保之喪。意緒慘慄。或徹夜不能成寐。幕中又無一友相助。諸事停閣。寸心歉仄。

覆毛寄雲中丞

此間自克復安慶後。連克池州銅陵桐城舒城廬江等郡縣。而湖北江西兩省。除隨州一城外。一律肅清。可謂至幸。而乃躉鼎湖弓劍之悲。又值潤帥人琴之感。近事之可欣可慰者。不足爲喜。而反足以增無窮之愴痛。念我大

行皇帝臨御寰宇十有二年。無日不在艱難危懼之中。今事機甫轉。而安慶捷音。不能早達甘泉。博天顏之一喜。此先皇之隱憾。亦臣子之至慟。胡帥用一糜爛棄之鄂。締造支持。變爲富強可宗之鄂。卽謀皖之舉。亦自胡帥出謀發慮。今皖事稍有基緒。而斯人云亡。蓋臣苦心。或不盡白。撫今追昔。能不怛傷。現請文任吾周壽山兩君。送回益陽。料理一切。仍求閣下飭屬沿途照料。其箴言書院未竟之事。弟當與希菴二人代爲主持。潤帥之整飭吏治。全在破除情面。著誠去僞八字。側聞閣下新政。不動聲色。移宮換羽。力量不減潤帥。而關繫尤爲重大。來示淨僞便佞各實兼收二語。蓋亦鄙人夙昔所深惡。曾於作林秀山殉難碑中。微露其端。今幸千里合轍。其符契又不止如席鄧兩管未雨綢繆之說也。憚方伯會辦東征局務。茲已備札寄去。并咨達冰案。接部文。知閣下已真除湘撫。爲做鄉幸。爲同譜慶。卽爲東南大局稱賀。舍弟於初二日進兵。先紮廬江。以固安慶藩籬。其無爲州三河等處。該逆守禦已固。恐難猝得。待多軍進攻廬郡。或須另辦船隻。先清巢湖水面。乃可克傍湖三城耳。

覆左季高太常

霆軍之騷擾。弟久以爲慮。方在盛名之際。雖再三誠飭。春霆卽稍做惕。弁勇皆驕矜。不知做也。該軍無方略。不宜遠征。其患猶淺。惟無紀律。不宜腹地。其患至深。台麾將移駐廣玉之交。兼顧婺源。自必準乎地勢之至當。弟於他軍尙不肯遙制。况閣下乎。擬卽奏明。大憲開府於信州。凡江西之饒州廣信。皖南之徽州廣德各軍。皆歸閣下節制。卽由尊處奏報。庶調度較捷。呼應較靈。自度力可援浙。卽由閣下就近派將往援。利則愈打愈遠。不利則收回信州。亦可伸縮自如。特此奉商。閣下如以爲可。覆信一到。做處一面具奏。尊處一面調發。如昔年公居湖南之幕。剿江西之賊。公家之利。知無不爲。免致與弟函商於千里以外。動失機宜也。貴軍餉項。鄙人刻刻不忘。前與少荃黼堂。定了漕減價章程。漕米每石完三千文。地丁每兩完二千四百文。茲將札稿示稿咨達冰案。黼堂旣竭力辦減價一案。期於必行。又以貴部欠餉太多。思在廣信設法清補。於是函商做處。請於信漕新章三千之外。再將各縣向來頭折之數。以錢易銀。加收若干。如上饒向來頭折五兩九錢。今年則收五千九百文。雖較之各府新章增

多二千九百。似有向隅之歎。而較之廣信舊例。已減四千餘文。仍不失曠蕩之恩。若果如此辦理。於貴軍餉項。良有裨益。第弟與中丞會銜告示。業將三千定爲通例。徧貼各處。信州士民。豈無聞見。獨增二千九百。不知辦得動否。閣下接黼堂信後。如何區畫。望賜詳示。此間舍弟一軍。由廬江進攻無爲州。聞已克復。多公尙未進兵。四眼狗現踞廬郡。分黨防守三河。潤帥靈樞聞於二十六日旋湘。此公憂國之誠。進德之猛。好賢之篤。馭將之仁。察吏之嚴。用兵之奇。理財之精。令人愈思愈慟。昨寄一聯。不能道其萬一也。

與朱雲崖

將各事細說一徧。使我一一如目睹。極好極好。以後望常常如此。勇夫極勤。至有菜出賣。則平日安本分可知。總之吾輩帶兵勇。如父兄帶弟子一般。無銀錢。無保舉。尙是小事。切不可使他因擾民而壞品行。因嫖賭洋煙而壞身體。个个學好。人人成材。則兵勇感恩。兵勇之父母妻子亦感恩矣。

與唐桂生

操技藝之外。須常常操練隊伍。湘勇小操技藝之時多。若多飽兩軍。則大操隊伍之時多。又多軍於大操時。不在校場平地。專操翻山越嶺過溝跳澗之處。如隊伍不亂。則真不亂矣。閣下以後操練。宜學多公也。待勇不可太寬。平日規矩。宜更整嚴。庶臨陣時。勇心知畏。不敢違令。至囑至囑。

覆毛寄雲中丞 同治壬戌

接展華函。並錄大素。屬爲推敲疑義。國藩愚陋。於夷務無所通曉。卽各國通商條約。亦未嘗悉心研究。淺之如起貨落貨。驗貨剝貨。驗單稅單。紅單保單之類。均不能縷晰其名。確指其地。說者或謂內江水道淺狹。與外洋迥異。洋貨一抵中國五口。必須加裝細紮。大船換小。重載改輕。乃能駛赴內江。起貨是初抵五口之名。剝貨是換船入江之名。亦未知其果否。未敢執是與閣下相辨詰也。惟就鄙人平日所知。與來示疏稿所指。則亦有不合者。請獻其所疑一二端。仰祈反覆開示。冀彼此皆臻渙然豁然之境。來示謂由江出洋。不必從上海經過。且言內洋只粵

海一口。以弟所聞。則殊不然。長江之入海。猶做省湘水之入江也。江右有孤懸之崇明。猶湘口有孤懸之君山。江初出口。循右而下。之有吳淞江。猶湘初出口。循右而下。之有旋湖港也。吳淞江內六十里。爲上海縣。該監督與領事官。雖皆住上海城廂。而關卡則設於吳淞出海之黃浦口。亦猶旋湖港內之人。設卡於該港出江之播鼓台。洋人由海入江。不能不由黃浦口經過。亦猶之鄂人由江入湖。不能不由播鼓台經過也。滬上紳士來此請援者。播有上海地圖。附呈一閱。閱畢另募存查。請以原圖擲還。做處。至疏稿謂。夷船入內洋。必先經過粵海。而後可達崇明。尤非事實。西人由印度海而來。一過蘇門答臘。即可粵可閩。可浙可蘇。不必定由粵省經過。如必過粵。則繞越嘗在五千里以外。而閣下以與黃浦入滬。僅繞六十里者相比。亦太不倫矣。此國藩之獻疑者一也。大疏謂內江各口無權稅之權。欲其呈驗報單。且不可得。違問稽查。弟亦嘗以此層爲慮。惟檢閱長江章程。在上海有由領事官赴道署領江照之法。又有領軍器執照之法。又有派員役同駕送往鎮江之法。又有海關紅單之法。又有商客人名數單之法。到鎮江後。又有呈驗單照四件之法。又有稟遞船口單載明貨件斤兩價值之法。又有給鎮江紅單之法。至九江漢口。又均有呈驗單照五件之法。均有稟遞船口單。注明貨件斤兩價值之法。其歸也。有鎮江派員役送回上海之法。其運油麻鋼鐵等物也。有請漢關灣關給執照之法。又有呈具保單之法。計洋船由滬至鄂。往返不過十日。而爲文憑者八事。爲法禁者十三事。種種關防。層層稽查。網亦密矣。而大疏乃云長江數千里。防維盡失。往來貿易。不受稽查。豈篤論乎。自古聖王。以禮讓爲國。法制寬簡。用能息兵安民。至秦用商鞅。以耕戰二字爲國。法令如毛。國祚不永。今之西洋。以商戰二字爲國。法令更密於牛毛。斷無能久之理。然彼自橫其征。而不禁中國之權稅。彼自密其法。而亦不禁中國之稽查。則猶有怨道焉。咸豐三年。劉麗川攻上海。至五年元。且克復。洋人代收海關之稅。猶交還七十餘萬。與監督吳道。國藩嘗歎彼雖商賈之國。頗有君子之行。即今滬鎮灣漢。凡有領事官之處。皆令我國管關者一體稽查。一體呈驗船口單。正稅子稅。較我釐金科則業已倍之。三之。在彼回自謂仁至義盡矣。而閣下與揆帥。必欲令其改赴漢口輪納。滬與鄂同一中國也。朝三暮四。旋令旋改。在滬關

必怒楚人之攘利。在西人且笑晉政之多門。此國藩之獻疑者二也。長江通商章程十二條。據總理衙門咨。係恭親王與英國卜公使議定。又洋貨稅單。土貨運照三聯報單。亦據總理衙門咨。係恭親王所定。而大疏稿中。指劾薛中丞貪婪蒙蔽。極辭醜詆。且云與恭親王前奏絕不相符。不知閣下因恭邸親賢柄政。不敢指斥。故據其咎於薛公平。抑別有確據。知此章爲薛公所定乎。薛公之於夷務。往歲事不可知。自庚申冬以來。大事秉承恭邸。小事壹委吳道。似無所短長於其間。恭邸先以長江有賊。不准通商。旋因英國回請。乃始允許。其不賣軍器及油麻等保單各條。皆辛酉七月以後所定。尊疏盡以誣詆薛公。似不足以服其心。此國藩之獻疑者三也。方今髮捻交熾。苗禍日深。中國實自治之不暇。苟可與洋人相安無事。似不必別尋釁端。漢口納稅之說。發之於滬稅未定之先。則可。爭之於滬議既成之後。則不可。大疏發此難端。英法諸國不從。將默爾而遠息乎。則是壯頑而啓侮。將爭辨而不休乎。則且廢好而興戎。二者必居一於此。區區之愚。願閣下與筠仙親家熟商審處。幸甚。如鄙言全不當理。則請詳晰剖示。以資質證。

覆姚秋浦

來示推獎溢量。讀之悚汗。然此等過情之語。出之於尋常朋知之贈答。察屬之慶賀。亦自見憤不驚。出之於閣下。則殊乖夙昔之望。閣下素以古誼自處。亦宜以古誼處人。德不稱位。實不稱名。前世之自善其末路者幾人。近世此席。覆轍相尋。尤可惕懼。閣下相知日深。當代鄙人憂危之不暇。而暇附會諛詞。增長客氣。揚湯而助沸耶。羅承勳一員。國藩思之已熟。將領之浮滑者。一遇危險之際。其神情之飛動。足以搖惑軍心。其言語之圓滑。足以淆亂是非。故楚軍歷不喜用善說話之將。非僅第一人然也。羅承勳於庚申六月。不肯竭力送糧入甯國。貽誤全局。厥罪甚重。其開復處分。非我所願。江軍門又假之事權。用爲諸將之領袖。風氣一壞。萬難挽回。故決意屏斥。請閣下與江軍門熟商。專從危難之際。默察樸拙之人。則幾矣。

覆李少荃

一夷務本難措置。然根本不外孔子忠信篤敬四字。篤者厚也。敬者慎也。信只不說假話耳。然卻極難。吾輩當從此一字下手。今日說定之話。明日勿因小利害而變。如必推做處主持。亦不敢辭。禍福置之度外。但以不知夷情爲大慮。滬上若有深悉洋情。而又不過輒媚者。請邀之來皖一行。

一上海所出之餉。先儘滬軍。其次則解濟鎮江。又次乃做處。壞營劣勇。不可不裁。民怨夷謗。俱可不顧。但須付量撤去之勇。萬一滋事。吾力足以制之否耳。羽毛不豐。不可高飛。訓練不精。豈可征戰。縱或中旨詰責。閣下可答以做處堅囑不令出仗。二三月後。各營隊伍極整。營官躍躍欲試。然後出隊痛打幾仗。

一閣下此次。專以練兵學戰爲性命根本。吏治洋務。皆置後圖。吳公關道一席。目下斷不可換。筠公芬芳悱惻。然著述之才。非繁劇之才也。閣下與筠公別十六年。若但憑人言。冒昧一奏。將來多般棘手。既誤筠公。又誤公事。亦何及哉。

一此間自克復青陽後。又克銅城關。克雍家鎮。現在沅弟已進巢縣。若能攻克裕溪口。則淮揚水師歇下時。僅過九洲一關矣。

覆李少荃

兵勇訓練未熟。人數未齊。目下斷不宜出仗。儘可以鄙人堅持不允。力卻衆論。如賊果前來逼撲。有不得不打之勢。則尊處自爲相機辦理。國藩不遙制也。愛民乃行軍第一義。須日日三令五申。視爲性命根本之事。毋視爲要結紛飾之文。洋兵會剿腹地。吾亦勉爲應允。但說明無人可派往會剿耳。此間近事頗順。春霆克復青陽後。又克石埭太平。頃又克涇縣。沅甫克巢舍後。又克和州暨西梁山裕溪口。季弟亦克復繁昌。只要廬郡速下。二浦天大無恙。則皖北一律肅清矣。淮揚水師僅衝過九洲。當不甚難。惟昌岐全軍至懋。斷不相宜。一則河小船多。恐與洋舟擁擠生事。一則宜駐揚鎮通泰一帶。乃得形勢。請先調二三營進滬。一二月後。再行細酌分合內外之宜。湖州之急。此間准於十日內往援。分續溪間道甯國正道兩路前去。不知果有裨否。

正封緘間。又接惠書。洋人纏躑。頗難處置。尊處只宜以兩言決之。曰會防上海則可。會剿它處則不可。近而嘉定。金南。遠而蘇常金陵。皆他處也。皆腹地也。詞氣宜和婉。意思宜肫誠。切不可露傲情之象。閣下向與敵以下交接。頗近傲慢。一居高位。則宜時時檢點。與外國人相交際。尤宜和順。不可誤認簡傲爲風骨。風骨者。內足自立。外無所求之謂。非傲慢之謂也。薛公各營。挑二三千人。隨同夷兵操練。駐紮一說。亦斷斷不可。明知薛營爲洋人所鄙棄。而以此愚弄之可乎。閣下只認定會防不會剿五字。自非賊匪信撲。彙城。我與英法可毫無交涉也。

仿古字版

會文正公批牘

世界書局印行

目錄

保靖縣稟奉發團練告示信函現在遵照辦理由	一
候補縣丞王奎稟奉札調湘勇回省聽候差遣探據廣東樂昌江西萬安賊匪糾眾離近桂東團勇未成餘匪不盡暫留防堵謹候示遵由	一
管帶義字營吳主簿國佐稟兩次接仗敗挫難於復振兼病體難支懇即撤遣由	一
統領湘勇張道運蘭稟牛角嶺與賊苦戰失險旋復由	一
統領湘勇張道運蘭稟代吉左營懇請發給帳棚另單稟約會進剿由	一
統領湘勇張道運蘭稟近日賊情軍情可否添設馬隊由	三
統領湘勇王道文張運蘭稟俟攻克景鎮可否回師剿楚由	三
吳廷華稟奉委管帶新立之湖北撫標新仁營勇由	三
平江右營營官郭丞式源賀午節稟	四
統領江軍水師總理饒防事務劉道于純稟連日大獲勝仗各情形由	四
統領湘勇張道運蘭稟職管與吉中各軍擊賊獲勝由	四
湘後營營務處何令應祺副後營劉丞連捷左營李參將寶賢稟復查明勇丁有無滋事由	五
湘後營營務處何令應祺副後營劉丞連捷左營李參將寶賢稟呈收發餉項清冊及欠發薪糧銀數由	五
余參將際昌稟到防天主堂佈置情形及探報賊踪由	五
何令應祺稟陳管見由	六
余參將際昌稟昌軍在槎水販剿擊援賊獲勝由	六

- 余參將際昌稟移營進剿緣由……………六
- 四川試用知府馮卓懷稟奉調大營差委自川啓程日期由……………七
- 受業吳希顏稟陳時務由……………七
- 寔副左營馮副將標賀秋節稟……………七
- 統領湘勇張道運蘭稟派旂分布開仗獲勝由……………八
- 管帶戈什哈親兵葉游擊光岳稟懇准招湘勇一營以圖報効由……………八
- 受業吳希顏稟就便回籍由……………八
- 管帶禮前禮後營楊游擊鎮魁稟拔營抵盧村偵探賊情由……………九
- 統領湘勇張道運蘭稟奉飭回駐婺源政由祈門繞行馳赴由……………九
- 統領湘勇張道運蘭稟奉飭寔湘各四營應援半防懇留宋副將暫駐漁亭由……………九
- 余大勝稟探報賊情由……………〇
- 統領寔字營鮑鎮超稟軍抵曹家渡並探報賊情……………〇
- 統領寔字營鮑提督超稟由赤岡嶺進攻賊壘由……………一
- 湖北撫標新仁營兼轄英字營吳倅廷華稟克復孝感縣城追至德安圍剿由……………一
- 統領安慶全軍會道國荃稟桐城方侍郎苞碩德忠誠孝友純篤請奏懇從祀文廟由……………一
- 辦理老湘營務副將張運桂稟小股逆匪竄踞威坪商派右營前往剿辦由……………二
- 統帶湘恆左右兩營會丞貞幹稟到防察看情形擬將投誠之人編立六營並請頒發關防由……………二
- 統領寔字營鮑提督超稟可否請飭令峯禮各營前來合圍青陽由……………三
- 王軍門明山稟現因鱸魚嘴地方空虛飛調湘新後祥後兩營移往換防等情……………三

- 潘鼎新劉銘傳稟後營進紮金山衛連日攻勦情形由……………一三
- 統帶江蘇撫標親軍總辦湘淮各營防勦事宜李令鶴章稟出隊援救北新涇獲勝解圍情形由……………一四
- 鮑提督超稟請籌發一二月滿餉由……………一四
- 鮑提督超稟賊撲清弋江我軍出隊開仗由……………一五
- 統領馬步官軍會藩司國荃稟請增募十營圍勦金陵由……………一五
- 督帶常勝軍吳道煦詳報常勝軍由甌長行并送留守松江勇丁冊由……………一六
- 督帶常勝軍吳道煦稟進勦九洲洲請預定派何營會攻先賜咨行等情由……………一六
- 統領韓字營全軍韓參將進春稟奉招勇抵省立營管帶由……………一六
- 王副將品高呈報開用管帶強中前營關防日期并同徽城訓練由……………一六
- 朱鎮品隆稟連日擊賊并出隊由……………一七
- 批唐總鎮二月十七日稟……………一七
- 批唐總鎮二月二十八日稟……………一七
- 鮑超稟探報賊抵廬江我軍舟行由樅陽登岸迎頭截勦由……………一八
- 朱鎮品隆稟賊撲青陽籌備儲糧堅守由……………一八
- 朱鎮品隆稟賊攻城壘我軍出擊獲勝由……………一八
- 批唐總鎮三月二十五日稟……………一九
- 朱鎮品隆稟連日勦擊各路賊營獲勝由……………一九
- 批唐鎮義訓稟連日擊賊獲勝由……………二〇
- 唐鎮義訓稟祁防喫緊懇飭朱軍入嶺以固根本由……………二〇

- 批唐鎮軍三月二十八日稟……………二一〇
- 統帶貞右馬步各營成提督大吉統帶湘皖等營蔣道凝學管理湘中右等營軍務毛道有銘會稟預籌分
軍防守各處情形由……………二一一
- 三河尖練統潘令塏稟遵札辦理團練並俟訪得才堪濟變者當密爲舉報由……………二一二
- 傳參將家桂稟奉札代理湘新後等營統帶事務……………二一三
- 朱鎮品隆稟青陽解圍由……………二一四
- 統帶江蘇撫標親軍總辦湘各營防勦事宜李令鶴章稟克復江陰縣城由……………二一五
- 朱鎮品隆稟古賢隆獻城乞降懇分飭嶺外各軍暫緩進兵由……………二一六
- 三河尖練總潘令塏稟呈所議練規懇示遵行由……………二一七
- 統帶湘皖等營蔣道凝學申查復固始縣紳耆稟成軍各條……………二一八
- 管理湘中右等營毛道有銘稟明率老廟集五營進紮蘇王壩由……………二一九
- 統帶湘皖等營蔣道凝學統帶貞右等營陳參將大吉稟克復潁上縣城乘勢進攻正陽由……………二二〇
- 代辦精捷全軍事務陳道鳴志稟統憲江軍門病故懇奏請賜卹由……………二二一
- 管理湘中右等營毛道有銘稟收復正陽關由……………二二二
- 批朱鎮軍十一月十三日稟……………二二三
- 統帶精毅營席道寶田稟陳道鈔奉批示擬緩期前赴江西省垣由……………二二四
- 批梅守錦源十一月二十二日稟……………二二五
- 統領老湘營易鎮開俊稟遵示整肅稟規由……………二二六
- 暫理依仁等營事務吳守廷華稟請將依仁營另行委員接帶併歸張道統轄由……………二二七

統帶精毅營席道寶田稟復卑營裨將各情另單稟請飭令吳中書紹烈前來勦辦營務由	二七
李軍門世忠稟移眷住省暨陳鎮自明所部發歸何處請示由	二七
統領精捷全軍江總兵忠朝稟收復弋陽後擊賊情形并籌畫進止緣由	二八
湘前營營務處梅守錦源稟奉札查復湘前各勇夫在青陽騷擾百姓及朱鎮品隆上年招降古隆賢并無受賄各情由	二八
江西撫科候選縣丞劉志壘歷陳時事稟	二八
管帶義從營黃令元齡稟奉檄馳抵天柱縣辦理勦撫黔苗事宜由	二九
鮑爵帥超稟單三件	二九
統領銘字營劉軍門銘傳稟兩奉傳諭催赴畿疆等情	三〇
潘道鼎新稟陳言北方用兵宜用車戰各情	三一
浙江處州鎮陳國瑞稟暫駐歸德并餉項軍火如何籌措由	三一
統領銘字營劉軍門銘傳稟連日進勦捻逆情形	三二
署安徽稟司何稟陳管見數端伏候裁擇由	三二
統領銘字營劉軍門銘傳稟李提督祥和稟新招勇丁潛逃懇札飭靈璧縣令飭差緝拏解轅究辦由	三五
統領銘字營劉軍門銘傳稟三件	三六
前皖南道張鳳翥稟二件	三七
唐令翰題稟奉委辦理江寧全屬輿圖完竣緣由	三七
委查蒙城圩務朱令名璪稟查明蒙城各圩情形繪圖呈候訓示由	三七
委辦蒙城圩務桂令中行稟紳士幫辦圩務并濶陽地界請發執照由	三八
蒙城縣令林令用光	三八

臨淮營務處張緝修錫鑾呈酌定軍船條規緣由……………三八

委辦亳州民圩事務李丞炳濤薛令元啓亳州知州李孟荃稟祇領令箭並開用關防日期由……………三九

前浙江鹽運司李榕等會詳邊札審訊探買戰馬委員副將蕭以德都司馬長清互控一案議擬緣由……………三九

委辦蒙城圩務桂令中行稟查閩東鄉鄰家圩情形……………四〇

委辦阜陽圩務尹汝德情稟查明圩寨分別去留緣由……………四〇

委辦蒙城圩務桂令中行稟查閩渦河以北各圩情形并開摺繪圖呈鑒由……………四一

委該亳州查圩事務薛令元啓李丞炳濤稟查辦各保情形……………四一

受業陳枝蓮賀年稟一件并陳辦理保甲與舉義學由……………四一

候選訓導計毛印堂稟候選直隸州州判竇鈺稟分赴宛汝查辦圩寨由……………四二

銘字營劉軍門銘傳稟軍抵周口休息兩日緣由……………四二

全軍營務處李副將昭慶呈軍抵嘉祥城門不開請飭行東省州縣遇有官兵到境勿得堅閉城門由……………四二

張編修錫鑾函牘一件并另呈覆現在籌備各事宜由……………四三

統領老湘營劉鎮松山稟遵批前進追擊擒逆由……………四三

老湘營劉鎮松山稟報勦敗巨股擒匪大獲勝仗由……………四三

候選訓導計棠稟呈豫中採訪記略摺……………四四

盛字營周鎮盛波稟回亳就近發餉及全軍拔隊赴豫勦賊由……………四四

盛字營周鎮盛波稟奉到諭賜白玉翎管各件懇附片具奏代謝天恩由……………四四

統領老湘全軍劉鎮松山統領星字古中豫字營朱故式雲稟軍抵王家後林遇賊接仗獲勝由……………四五

銘字營劉軍門銘傳稟防河事宜俟抵周口與潘張二軍通力合作由……………四五

盛字營周鎮盛波遞批確查各情由	四六
委辦宿州查圩事務張牧雲吉稟詣查各圩沿途阻水延滯緣由	四七
委辦宿州查圩事務張牧雲吉稟奪獲捻目高繼周等訊明正法由	四七
統領毅字營宋鎮慶稟防守黃河賊蹤偷挖未遂緣由	四八
鮑軍門超稟軍抵汝州偵探賊情由	四八
委辦蒙城圩務朱令名稟稟復蒙邑現在情形	四八
補用道王勳稟請咨商通行修寨由	四九
鮑軍門超稟探聞賊又遁回京山天門德安一帶俟到襄陽後覬賊所向相機截擊由	四九
銜字前營劉克仁等稟統領張鎮捐軀救援未及會請參辦由	五〇
統領老熊營劉鎮松山稟張編修受傷殞命并戰仗情形	五〇
統領和厚營李鎮和稟張編修受傷殞命并戰仗情形	五一
銘字營劉軍門銘傳稟尹澧河接仗情形并請暫爲休息由	五一
易守佩紳稟湖南援勦貴東各情形擬籌變通辦理由	五一
江南提督李軍門朝斌呈復姓歸宗抄函呈請核奪由	五一
馬鎮德順稟由周口拔營行抵台莊三里之黃林等情	五二
銘字營劉軍門銘傳稟追剿捻逆獲勝情形	五二
銘字營劉軍門銘傳稟連日追賊獲勝由	五三
冀鎮雲慶稟副五營拔抵黃安尙須整頓等情	五三
批饒陽民許有立等呈控苛派差徭	五四
批候補陳道天津河防同知讖覆黃河改道情形	五四

- 批候補縣丞杭楚沅稟呈條陳……………五四
- 批安平縣唐令稟濬沱河上治中治下治三策……………五五
- 批候補知縣胡丞頤稟陳管見二條……………五六
- 江藩司詳送許邦行甄別考試由……………五六
- 潁州府李守文森稟擬淮北善後事宜十條……………五七
- 署安徽何藩司璟等會詳議覆荒產續還業主及安置難民由……………五九
- 江寧萬藩司啓琛等稟縷陳善後局前後報銷由……………六〇
- 蘇松太道稟籌設上海普育事宜并改經費請示由……………六〇
- 漢陽許鎮稟抵署察看各汛情形……………六〇
- 曾任江南提督李世忠稟因陳鎮國瑞前在淮河劫去鹽船衣物隱忍多年今知在場適來舟中扣留懇請查究等情……………六一
- 瓜州吳鎮等稟前江南李提督與陳鎮國瑞互相滋事緣由……………六二
- 淮陽海屬紳士裴蔭森等稟請復淮水故道由……………六三
- 雲南迤東黃道寬稟米鹽互市一案……………六四
- 上海機器局委員徐壽等稟條陳輪船製器四條……………六四
- 揚州營朱參將會稟戴德生來揚傳教人民獲有屍孩動念解散由……………六五
- 常鎮蔡道稟鎮江民人因洋人租屋滋事一案……………六六
- 劉法國領事文稿……………六七

曾文正公批牘

保靖縣稟奉發團練告示信函現在遵照辦理由 以下爲咸豐二年長沙行轅之事

據稟已悉。古人謂感人以言。其本已淺。區區文告。何敢遽冀洽民之心。惟期賢有司。進百姓而親訓迪之。真實惻怛之意。達於面貌。則感悅畏服之忱。動於肺腑矣。訟事完畢之後。當堂誥誡。此時最足感人。今日之民。官可使之立見信從者。惟勤於聽訟。伸理冤抑。則見效甚速。卽囑紳耆辦團拏匪。亦須先使信從。然後其言易入。聞該縣平日甚得民心。故復諄諄商論也。

候補縣丞王鑫稟奉札調湘勇回省聽候差遣探據廣東樂昌江西萬安賊匪糾衆離近桂東團勇未成餘匪不盡暫留防堵謹候示遵由

據稟已悉。札調之後。旋有札止之想。日內早經接到。彼中不可一日無兵。自是實在情形。現在湘勇駐札該縣。無事之時。仍可認真操練。務須講求分合之法。千變萬變。行伍不亂。乃可以少勝多。以靜勝動。該丞紀律嚴明。頗近程不識之刁斗。而士卒樂爲盡力。亦有古人遺意。惟以久履行間。不得養靜爲慮。則尙有所未達。須知千軍萬馬。金鼓喧聒之中。未始非凝靜致遠。精思通神之地。諸葛武侯王文成之氣象。至今宛然在人心目。彼何嘗以勞乏自汨其神哉。此間往援江西之湘勇。朱同知羅教諭及各營。均札營永和門外。惟康祖成一營。經江臬司調入城內。守前日缺口。並於十八九二日到江。其江忠淑所帶之楚勇千人。於二十日到江西省城。因便附及。

管帶義字營吳主簿國佐稟兩次接仗敗挫難於復振兼病體難支懇卽撤遣由 以下爲咸豐八年江西行轅之事

勝負兵家之常。原不因一二敗仗。卽作一瞥一掩。惟此次未看明路徑。未穩札營盤。未約會江軍。卽所謂約張道相機進剿者。其約亦未必申訂堅明。凡云少兵以營賊。僞退以誘賊。二者皆士識將心。至精至熟者之所爲。非新

營所可學也。該主簿屢稱此賊不足平。告請剿辦英夷以自效。本部堂常以平實二字誡之。意此次必於虛心求益。謀定後戰。不謂其仍草草也。官秩有尊卑。閱歷有深淺。該主簿概置不問。生手而自居於熟手。無學而自詡爲有學。志亢而行不能踐。氣浮而幾不能審。施之他事尙不可。况兵凶戰危乎。既據稟請撤遣。准卽銷差回籍。該營一併遣散。卽卽帶赴貴溪。將軍裝器械。一點交委員凌蔭庭收報。其該營弁勇。有願立功報効者。卽派凌委員挑選。另立營頭。收集後帶至建昌老營。本部堂親加教練兩三月。再行出征。至公餘銀四千兩。除願隨該主簿回南之弁勇。准酌給行費。繕單通稟外。餘卽并交凌委員收解來營。以重款項。

統領湘勇張道運蘭稟牛角嶺與賊苦戰失隘旋復由

兵法最忌形見勢絀四字。常宜隱隱約約。虛虛實實。使賊不能盡窺我之底蘊。若人數單薄。尤宜知此訣。若常紮一處。人力太單。日久則形見矣。我之形既盡。被賊黨覷破。則勢絀矣。此大忌也。必須變動不測。時進時退。時虛時實。時示怯弱。時示強壯。有神龍矯變之狀。老湘營昔日之妙處。全在乎此。此次以三百人紮牛角嶺。已是大呆。正蹈形見勢絀之弊。除夕曾函止之。十一日五旂失隘後。再以第三旂紮此。則更呆矣。卽卽熟思審度。不可紮則竟撤之。聚合一處。俟賊至則併力決戰。得一勝而銳氣全復矣。如慮賊抄我軍後路。卽退保樂平。亦無不可。不必定有進而無退也。凡交戰勝負。決於須臾之頃。彼此在八里以外。卽已不能相救。應若雨雪泥濘。則四里以外。已不能相救。應矣。又將卒之精神心血。只有此數。若刻刻兢業。夜夜提防。不過旬日。卽有疲倦不繼之勢。既疲而用之。則有暮氣。必不得力。譬如水以屢汲而渾濁。必須澄定片時。乃能再見清水也。本部堂前此之不欲紮牛角嶺者。正恐其不能救應。恐其太疲而渾濁耳。他處可以類推。

統帶湘勇張道運蘭稟代吉左營懇請發給帳棚另單稟約會進剿由

查柳溪距景鎮三十餘里。途徑歧雜。主客勞逸。飢飽之勢迥殊。行仗實不易打。况屢挫之後。各將領雖尙氣壯。而各勇銳氣未復。必須暗中體察。勉強進攻。徒傷精銳。再有挫折。則不特不能攻。不能戰。并將不能守矣。屢批無庸

性急。何竟置若罔聞。劉道遠隔百里。其軍屢挫。所約何足爲憑。此後宜斂兵守險。蓄銳養精。以靜待動。一月以內。無許出隊進攻。賊若來犯。俟其近前。然後併力痛剿。必能得手。平江新中營。已到涌山。仰卽飛調。合紮一處。不必令孤駐涌山。祥字營至。亦須合紮。凡分紮一路。必須各能自立。其力量足以獨當大股之賊。乃可遠分。若恃彼此救應。則斷不可遠。勝負決於須臾。八里以外。卽救應不及矣。此一定之理。雖善戰者不能易也。

統帶湘勇張道運蘭稟近日賊情軍情可否添設馬隊由

鎮賊糧食將盡。仍宜堅扼以觀其變。果能嚴密周防。斷其接濟之路。可不戰而屈之矣。操練馬隊之法。馬上能使鳥鎗者爲上。能使弓矢者次之。若僅能使大刀。則技之下者。無能爲也。景鎮賊馬。聞僅能使大刀。若我軍陣腳不動。進退有法。鎗礮有準。不過打中數馬。則百馬反奔矣。官軍自臘月十九以來。爲賊所懼。士卒之志先怯。是怯賊也。非怯馬也。今欲練馬隊以禦之。亦是要著。但須操習純熟。控縱如意。乃可試之。若馬劣人拙。爲賊所笑。則反貽豎虎類狗之譏。仰就平前寶祥等營中。擇善騎者。試行操習。共得若干名。稟明核奪。俟七月以後。鄂省採買口馬到後。再行認真多操可也。

統帶湘勇王道文瑞張道運蘭稟俟攻克景鎮可否回師援楚由

俟攻克景鎮後。酌量緩急。再定行止。前接湖南省信。已徵調兵勇二三萬人。將領中如劉道長佑。趙道煥聯。劉守坤一。王守勳。田鎮興。恕。江守忠。義等之陸兵。王鎮明山。謝游擊。泰平之水師。皆威略素優。又益以蕭道啓江。回援之師。當能得力。吳主簿留撫之四百人。亦令其回援矣。湖南不患無兵。不患無將。所患齊集略緩。不能趁賊之初入而撲滅耳。然此時計已集矣。此賊不能害閩浙。必不能得志於湖南。傳諭各弁勇。安心勤辦。無庸懷內顧之憂也。

吳廷華稟奉委管帶新立之湖北撫標新仁營勇由

該員既奉委帶新仁營。仰卽悉心訓練。殺賊立功。以副委任。爲將之道。謀勇不可以強幾。廉明二字。則可學而幾

也。弁勇之於本管將領。他事尙不深求。惟銀錢之潔否。保舉之當否。則衆目眈眈。以此相伺。衆口嘖嘖。以此相譏。惟自處於廉。公私出入款項。使鬪營共見共聞。清潔之行。已早有以服弁勇之心。而於小款小費。又常常從寬。使在下者恆得沾潤膏澤。則惠足使人矣。明之一字。第一在臨陣之際。看明某弁係衝鋒陷陣。某弁係隨後助勢。某弁迴合力堵。某弁見危先避。一一看明。而又證之以平日辦事之勤惰虛實。逐細考核。久之雖一勇一夫之長短賢否。皆有以識其大略。則漸幾於明矣。得廉明二字爲之基。則智信仁勇諸美德。可以積累而漸臻。若不從此二字下手。則諸德亦茫無把握。

平江右營營官郭丞式源賀午節稟

屢披舊事。讀之增感。該丞備嘗艱險。百折不回。卒能樹立聲績。久而彌芬。所謂盤錯足以別利器也。平江勇善戰耐苦。是其所長。規矩太鬆。是其所短。現張令岳齡。新立岳字營。屢囑其以規矩森嚴。進止畫一爲先務。俟該營日內抵景德鎮。仰該丞與張令熟商整頓營規之法。雖係累年之舊營。卻振一番之新氣。則將來事業。正未可限量也。勉之慎之。

統領江軍水師總理鏡防事務劉道于純稟連日大獲勝仗各情形由

該軍連戰九晝夜。斃賊多名。各營將士。實屬用命。惟東西兩路。聲息太隔。仰設法會商。立一通信捷法。或五里設一煙墩。一處舉煙。則節節皆應。或一處放冲天火箭。亦節節應之。或五里十里設一報馬。做驛站之法。而塘數更近。遞換更速。限一時行四十里。無論有警無警。每日與東路通信一次。則消息最捷。可互相救應矣。否則西路深入而東不至。水師深入而陸不齊。恐不免於疏失。至要至要。

統領湘勇張道運蘭稟職營與吉中各軍擊賊獲勝由

各營穩札穩打。自然立於不敗之地。與悍賊交手。總以能看出他的破綻。爲第一義。若在賊者全無破綻。而我昧焉以往。則在我者必有破綻。被賊窺出矣。該道身經數百戰。於此等尙宜留心細察也。

湘後營營務處何令應祺副後營劉丞連捷左營李參將寶賢稟復查明勇丁有無滋事由稟覆各情。是前次風聞之事。非盡無因。該營務處營官等所稟。尙無欺飾。便是好處。凡人不患有過。但患文過。不貴無過。但貴改過。此後自當愛惜聲名。愛惜百姓。加意整飭。勿得稍存袒護之見。將領之管兵勇。如父兄之管子弟。父兄嚴者。其子弟整肅。其家必興。溺愛者。其子弟驕縱。其家必敗。包攬釐卡之勇丁。既經責革。姑准免究。至民勇爭鬧。多由於采買稻草。該令所擬坐營日派護哨押取。行營酌增夫價。專於運草。此法尙善。仰即嚴督各哨。實力試行。如行之果有成效。將通飭各營照辦也。

湘後營營務處何令應祺副後營劉丞連捷左營李參將寶賢稟呈收發餉項清冊及欠發薪糧銀數由據稟呈該營收發清冊。及欠發銀數。候飭糧臺查核籌給。並咨江撫院解還歸款。另單所稟各情。固係體恤勇艱。但該員只知見惠於各勇。殊不思湘後一軍。自調赴撫州以來。口糧並未欠缺一日。何至因羨生怨。公然誹謗。即勇丁無知。亦由該營務處。及營官等。不善開導約束之故。從前江西省欠項。非獨該營爲然。江軍多係半餉。亦豈能偏厚於該營。本部堂平恕居心。以該營艱苦日久。故商調隨轅。加意作養。該員尙嘮叨不休。殊屬不諳事體。李道前帶平江勇。屢立戰功。僅支半餉。至三年之久。從未如此絮聒。凡治軍辦事。須忍苦耐煩。有堅定之力。現糧餉尙係接給。輒連篇呼索。彼忍飢力戰者。又將何說以處之耶。楚軍分布各省。如湘後營。不下五六萬人者。其精勁遠不逮他營。而煩聒則遠過之。若專以嘮叨爲得意。本部堂惟咨送回江。不敢引而近之矣。至行營添夫挑草一節。該員稟明有案。自稟之而自駁之。又換出草躉半皮二議。旋稟旋駁。既俱不能行。即不必續稟。此亦識力未定之明證也。

余參將際昌稟到防天堂佈置情形及探報賊蹤由 以下爲咸豐九年湖北行轅之事

賊若往援太湖。天堂乃其必爭之地。賊乘銳氣而來。利於速戰。該將兵力單薄。若赴衙前迎以擊之。以我之單。迎賊之銳。恐難得手。不如深溝高壘。堅壁不出。使賊之銳氣。不得遽逞。待其飢疲情歸而後擊之。進不必過驟。追不

必過遠。一二次小勝後，然後變化從心，屈伸如意。此以少禦多之一法也。該將擇取而參用之。

何令應祺稟陳管見由

據陳各條，頗爲切中機要。蕭道現留廣西，一時未能來皖，且該道統帶五千人，亦不能再統多營。目下本部萬人，自宜亟定統帶。該令既有所見，仰就現在諸營官中，開摺密保，當面呈遞，衝鋒陷陣，軍中必不可少。誠使拔出勇敢者，自足以救流弊。特恐所拔非人，不足示勸。臨敵交鋒，刀矛尤爲利器。南方矛法，素少師傳。故湘勇多不善使矛。此實歷年大病。然本部堂於三年夏間，曾賃天妃宮，教鄔家矛法，閉門教習兩月，亦未敢輕視此事。各營現亦日操長矛二次。稟中所稱竊嗤腹誅云云，似尙無此氣習。該令如能覓得教師，本部堂不惜重價雇募，以挽頹弱。至進取自有機宜，豈可一味持重。俟統帶得人，機會可行，卽行進兵。該令返躬察己，長短自知。果不愛錢，又能推賢讓能，忍氣任怨，待人以誠，愛才如命，則良將良吏，一身可兼。何業之不成哉。但期勉踐斯言，持之以靜，真之以恆，實所厚望。

余參將際昌稟昌軍在樵水駁勦擊援賊獲勝由

以下咸豐九年己未歲十一月起宿松行轅之事

該將佈置嚴密，脚枚疾趨，奮勇攻擊，用兵可謂神速。凡賊來撲營，須靜守以待其飢悔。我去擊賊，須猛進以乘其驚擾。熟於此法，則識力堅定，神明莫測矣。賊情狡詐，此後必添大股來援。該將惟慎之又慎，勿驕勿餒，勉成大功，慰甚盼甚。

余參將際昌稟移營進剿緣由

水吼嶺爲潛北咽喉，各路總匯。該營一經出嶺，賊必以全力來撲。惟當酌擇險要，固壘深溝，先立於不敗之地。若約期會戰，其處有三，相隔路遠，通信不易，一慮也。約期既定，臨敵千變，進止兩難自由，二慮也。甚或彼此相靠，牽制誤事，三慮也。本部堂意，山內山外二軍，不必約會師期，可戰則戰。山內該軍，及金守之軍，惟以站定脚跟，自立不敗爲主。

四川試用知府馮卓懷稟奉調大營差委自川啓程日期由 以下咸豐十年正月

該守已於七月初八日自萬縣啓行。八月內即由長沙馳赴大營。閱稟至爲忻慰。皖南軍事。均有乏才之患。該守如同籍時。物色賢能之士。即邀同來營。相助爲理。多多益善。取人之式。以有操守而無官氣。多條理而少大言爲要。辦事之法。以五到爲要。五到者。身到。心到。眼到。手到。口到也。身到者。如作吏則親驗命盜案。親巡鄉里。治軍則親巡營壘。親探賊地是也。心到者。凡事苦心剖晰。大條理。小條理。始條理。終條理。理其緒而分之。又比其類而合之也。眼到者。著意看人。認真看公牘也。手到者。於人之長短。事之關鍵。隨筆寫記。以備遺忘也。口到者。使人之事。既有公文。又苦口叮囑也。該守前在四川。循績大著。以該守已試之效。參以本部堂之所論。用以訪求人才。當可拔十得五。中庸所謂取人以身。朱子所謂以類求之。胥於是乎在。仰即博采速來。無稍延緩。

受業吳希顏稟陳時務由

該員所陳時務三條。詞氣敷暢。用意亦善。首條內稱地方官與紳董設局辦團。一切徵收獄訟。就地酌辦等語。殊非政體。而多流弊。地方官固不盡賢。紳董之賢而無欲者。又可多得耶。次條欲以古兵書。考核將才。分派正副文武營官。皆書生之見。讀書之與用兵。判然兩途。古來名將。如前漢之韓信。曹參。後漢之皇甫嵩。朱儁。未聞其著書。近世咸繼光能著書。而戰功又甚平平。孫武之不能自踐其言。則老蘇已譏之矣。末條論王安石堅僻自是。不知辨別賢才而用之。自是久定之論。本部堂私心所切戒者。懼蔽賢之罪。亦未始不懼拔取浮士。貽誤方來。人不易知。知人不易。孰爲卑鄙猥瑣。而不堪問者。孰爲瑰奇卓犖。而迥出流俗者。果有所知。不妨實指其名。現於行營門外。設匾求言。有能言本部堂之過失。及人材賢否。地方利弊者。皆許密封投進。該員果有肝鬲之要。勿憚盡言。外七言詩一篇。冗長不工。通體有頌無規。非導諛而何。是投我以藥石。而益之以美苴也。

雲副左營馮副將標賞秋節稟

該將既知小惠愛民之無益。亦當知平日敬神酬愿之無益。凡子之孝父母。必作人有規矩。辦事有條理。親族賴

之遠近服之。然後父母愈愛之。此孝之大者也。若作人毫不講究。辦事毫無道理。爲親族所唾罵。遠近所鄙棄。則貽父母以羞辱。縱使常奉甘旨。常親定省。亦不得謂之孝矣。敬神者之燒香酬愿。亦猶事親者之甘旨定省。實無大益。若作人不苟。辦事不錯。百姓賴之。遠近服之。則神必鑒之。佑之。勝於燒香酬愿多矣。

統領湘勇張道運蘭稟派旗分布開仗獲勝由

勞師襲遠。與前日致緘堅守靜鎮之議。本屬相背。而相機雕勦。與本日致緘中小隊牽掣之說。又恰相合。只要旌德老營。立於不敗之地。本部堂之所望已足。此外出奇制勝。由該統領隨時酌度。本部堂固不能一一遙制也。惟老營處孤危之地。則小隊出奇之師。貴少不貴多。貴變不貴常。古人謂之狙擊。明人書之雕勦。設小隊稍有疏失。而老營仍一塵不驚。斯爲盡善。老營則安如泰山。小隊則動如脫兔。該營近日宜用此二語。

管帶戈什哈親兵葉游擊光岳稟懇准招湘勇一營以圖報効由

爾初來時英氣外溢。吾愛之如子弟。期望甚厚。自放哨官後。估柒營伍習氣。及官場中揣摩猜嫌惡派。故於前營營哨各官。多面善而心非。八年隨入陸營。稍假事權。而所管之戈什哈親兵。皆退有後言。總由待人不誠。說話無信。故居爾下者多不服也。本部堂因爾隨口編造謊話。曾經面責數次。並未悛改。思欲屏棄不用。又惜爾聰明過人。或可漸漸陶鑄而變化之。今爾稟請另帶一營。以舒壯志。志亦可取。但言素無信。未必能踐也。應准酌帶三百人。以試其果能得土心與否。爾若能體本部堂陶鑄之苦心。第一說話要謹慎。不可隨口編湊謊話。第二要耐勞苦。莫學文弱浮薄傲情樣子。第三心竅要正。要直。不可歪曲。動好與人鬪機鬪巧。此三者能改變一二。將來尙可造就。若三個月毫無長進。卽行革去。

受業吳希顏稟就便回籍由

讀書人之通病。約有二端。一曰尙文而不尙實。一曰責人而不責己。尙文之弊。連篇累牘。言之成理。及躬任其事。則忙亂廢弛。毫無條理。責人之弊。則無論何等。人以高深難幾之道相苛。韓公所謂以衆人待其身。而以聖人

望於人者。往往而是。該員在副後營。若能存一片與人爲善之心。諄諄勸誘。縱不能使之薰德善長。亦可期水乳交融。乃本營劉營官。既不與之相洽。又許其同僚。俾傷和氣。若自居於監軍使之職者。安冀人之相容哉。

管帶禮前禮後營楊遊擊鎮魁稟拔營抵盧村偵探賊情由

辦事者莫恃上司之恩典。宜仗自己之本領。若有本領。辦事好。雖仇人做上司。也不能壓下去。若無本領。辦事不好。雖父親做上司。也不能抬起來。爾年紀尚輕。若立定志向。何事不可爲。目下第一。須認真修牆挖濠。修成之後。與本部堂老營牆子相同。雖有數萬賊來圍。也不怕他。則脚跟立定。人人皆另眼相看矣。若全無本領。縱然做到提鎮。也是抱愧的。望爾日日學一勤字。勤到十分。自然做成一個好漢。本部堂現已年老。尙從勤苦二字用功。故亦以勤字教訓爾等勉之。

統領湘勇張道運蘭稟奉飭回駐婺源改由祁門繞行馳赴由

該道欲由祁門繞赴婺源。未免過於謹慎。現在上溪口有楊革將一軍。江灣有王副將一軍。又有江軍門之軍新到。該道若由上溪口赴婺源。斷無被賊攔截之理。且昨日函中。令該軍駐紮下溪口龍灣五城山斗等處。係堵休南竄婺源之路。不必定駐婺源也。聞龍灣及下溪口。距屯溪尙有二十餘里。距休城尙有五十里。左京堂新集之師。尙擬獨進屯溪。該道一軍。豈不能紮龍灣及五城等處乎。目下左軍尙有五營。留駐婺源。該軍可暫不移動。然亦當整理行裝。一聞左軍自婺源全數拔去。即當星速移於休南。或紮龍灣下溪口等處。或徑守婺源。由該道到上溪口後。再行察看斟酌。能先派委人看定更好。附去地圖一張。雖不甚確。然大致不差。約計由迪祥拔營。自西館至上溪口。不過兩日可到。自漁亭至上溪口。不過三日。自上溪口至龍灣。不過一日可到。上溪口至婺源。不過四日可到。若由迪祥走黟縣祁門減家灣而至婺源。則非十餘日不能到。而休北無大軍。休南之上。溪口江灣。均嫌孤立矣。仰該道一面詳悉稟復。一面派委員跣看龍灣等處。并探婺源左軍全拔否。

統領湘勇張道運蘭稟奉飭霆湘各四營應援守防懇留宋副將暫駐漁亭由

宋副將之留此閒。官紳及各委員均以爲請。言之甚力。謂霆營不能不赴景鎮。老湘營之力。只能自守。不能破賊。須留宋副將統四營。駐紮漁亭。爲各嶺之援。衆口一詞。牢不可拔。本部堂商之鮑鎮。景鎮之行。宋副將萬不可不去。因改派龔副將雲慶。統率漁亭四營。已由鮑鎮札飭矣。吾觀龔副將沈慎有謀。似不亞於宋副將。該道試與會晤一二次。熟商戰守事宜。察看何如。該營每次救援各嶺。聞信卽行。道途奔波。動逾七八十里。師勞力疲。縱能接仗。亦不能取勝。縱能獲勝。亦不能遠追。勢也。情也。嗣後賊如犯竿新各嶺。該軍所派四營。與漁亭四營。出隊至駁縣。會齊歇宿一夜。次日再至盧村等處開仗。庶不過於飢疲。賊若犯漳方釣魚諸嶺。亦可令隊伍在駁縣一宿。次日至三都接仗。駁城至三都僅十里耳。比盧村較近。

余大勝稟探報賊情形由

據稟已悉。賊若來撲漁亭。我官軍切不可出隊太早。須待各路之賊到齊。看明何路賊多。何路賊少。何路賊強。何路賊弱。何路爲賊之正兵。何路爲賊之伏兵。一一看清。待營中飽喫中飯後。申酉之閒。天色將晚。賊匪久立氣疲。頭目欲戰。衆賊欲歸。然後出隊擊之。必可獲勝。勝後不必遠追。追五六里。整隊還營可也。若賊來太多。則堅守不出。一面告知邪門葉村派隊助之。然漁亭地方甚窄。極多不過容得一萬賊耳。不必慮也。邪門有五千人護衛。賊來可戰可守。該營官等不必呈念。

統領霆字營鮑鎮超稟軍抵曹家渡並探報賊情

來緘具悉。貴營現紮曹家渡。離賊巢皆三四十里不等。左京堂軍亦於十三日。分隊拔營。會合進剿。以兩軍進兵之勢論之。貴軍須走中路。而兼顧左路。左軍須走右路。而兼顧中路。左軍以留鎮之兩營爲後路根本。貴軍稍向左向前。卽以左軍爲後路根本。兩軍各打一。路。不可分支。賊之布勢太寬。我之人數較少。情願先儘右邊。覓空左邊。不可作一網打盡之計。賊若來包抄。只許他從左邊來。斷不許他從右邊來。右邊穩則後路無虞矣。賊之凶悍者。常在右路石門一帶。其桐子渡之賊。防我饒州進兵也。張家嶺之賊。防我湖口進兵也。陳家衝之賊。該道自保

歸路也。應請貴鎮與左京堂一一熟商。總以先儘右路。無遠深入爲主。建德瘠苦非常。擄無可擄。賊之米糧。運於二百里以外。我之米糧。去水次甚近。我可持久。賊難持久。此次慎以圖之。新年則可放膽行之矣。至所獲僞文。殊不足信。胡黃二逆已死。故賊屢次作僞文。以自張耳。

統領霆字營鮑提督超稟由赤岡嶺進攻賊壘由 以下爲咸豐十一年東流行轅之事

來緘具悉。十一日進攻赤岡嶺賊壘。楊軍門督率水營。及新後營。亦急欲破壘。以圖迅克皖城。非僅貴鎮一人之計。今傷亡雖多。士氣尙壯。休養數日。即可大戰取勝也。惟此後不可再行蠻攻堅壘。須扼紮要地。賊所必爭之區。致令賊來攻我。我亦堅壁不與之戰。待其氣疲力盡。而後出而擊之。自操勝算。應請貴鎮即日進紮高橋嶺。西可由且記嶺茅嶺。與會道。營盤通氣。南可由石門湖獅子山。與楊軍門水師通氣。東可由集賢關。與菱湖新紮六營通氣。如狗逆由桐城回援。進關打仗。則貴軍恰好抄狗逆後也。貴軍紮於高橋嶺。關外賊壘。自然失勢。不必再往圍攻。不但知賊之四壘。去高橋嶺遠近若何耳。自成軍七營。應令即日進關。紮於菱湖賊壘之後。即住會道十三日新築六壘之中。將菱湖賊一併以大圍包之。當可制賊之死命。自初十日至十五早。水長四尺四寸。狗酋既入桐城。爲河所阻。必難遽回。如其回援。貴軍擊之於前。多部護追之於後。亦易得手。仰即錄批。函報各處查照。

湖北撫標新仁營兼轄英字營吳倅廷華稟克復孝感縣城追至德安圍剿由

前聞孝感克復。使上竄之賊。兇餒頓衰。欣慰之至。德安已圍剿月餘。勢成孤注。我軍月前密開地道。不知不爲水所阻否。才力不逮。不必引以爲歎。凡才力得之天稟者不足喜。得之人事者乃可據。厲志以廣之。苦學以踐之。才力無不日長者。水之漸也。盈科而進。木之漸也。積時而高。才力之增。亦在乎漸而已矣。

統領安慶全軍會道國荃稟桐城方侍郎苞碩德忠誠孝友純篤請奏懇從祀文廟由

桐城方侍郎。學行志節。德業文章。卓然爲一代偉人。奏懇賜諡從祀。褒崇碩儒。闡明正學。事屬可行。惟詳細事實清冊。未據呈送。無憑核奏。又康熙五十年。戴名世南山集一案。隸入漢軍。及赦歸原籍。前後所奉兩朝詔旨。并國

史館本傳均應一一詳考。未便率爾上陳。近歲因奏請從祀者太多。上年經大學士九卿於議覆陸秀夫附祀案內。聲明嗣後外閒。不得率請從祀。此案當置緩圖也。

辦理老湘營務副將張運桂稟小股逆匪竄踞威坪商派右營前往勦辦由 以下爲咸豐十一年安慶行

轅之事

浙省業已解圍。該逆紛紛肆竄。難保不意圖上犯。該軍人數無多。宜專守城內城外。不可遠紮他處。但可於百里之內。伺隙鷓鴣。鷓鴣者如鷺鳥之擊物。破空而來。倏忽而去。無論有獲無獲。皆立即颺去。用兵者師其意。探明賊之所在。前往狙擊一次。無論或勝或否。皆立即收隊。迅回老營。徽郡通浙之路甚多。必應分道確探。不可專注一路。探明賊之所在。前往鷓鴣。四十里以內。本日即可往返。四十里以外。須擇地駐宿。總以出其不意四字爲主。老營仍紮郡城內外。斷不可動。街口深渡。皆不可紮。恐人數太單。一處失利。各處驚惶。去年李道叢山關之敗。卽前車之鑒也。

統帶湘恆左右兩營會丞貞幹稟到防察看情形擬將投誠之人編立六營並請頒發關防由

據稟已悉。所收投誠之人。應改爲四營。帳房軍械各項。准卽照四營給發。此外收留者。俱令當長夫。每名每日發錢七十文。其四營之勇。每名每日給發錢一百文。軍器每營照章酌發一半。候飭知銀錢軍械兩所查照。聞此後來降者尙多。立法之初。不可不慎。求爲可繼。求爲可廣。此項降卒。本地人多。軍械甚少。自係該處百姓。爲賊所脅。雖授僞職。罕經戰陣。今見賊勢日衰。人無固志。又因米糧太少。急思反正。以爲就食之計耳。官軍宥其罪而收之。以爲招降賊也可。以爲卹難民也亦可。若欲練成勁旅。恃之攻戰則不可。此次初辦招降事件。稍示寬大。以勸來者。嗣後續降之人。當分作兩種辦法。一種兩湖江西之人。無籍可歸。強者當勇。日給百文。弱者當夫。日給七十文。其有籍可歸者。仍資遣之。一種皖南本地之人。無家可歸者。日給五十文。有家可歸者。亦資遣之。若輩此項降人。立功關土。則錯認題目矣。

統領霆字營鮑提督超稟可否請飭令峯禮各營前來合圍青陽由

來緘具悉。貴軍門已於正月十七日欽奉諭旨補授浙江提督矣。除俟部文到日再行備咨飭知外。先此告賀。貴軍門近日疊受渥恩。尤當竭誠圖報。第一戒箇驕字。心根之際。若有絲毫驕矜。則在下之營官必微。士卒必惰。打仗必不得力矣。第二守箇廉字。名位日尊。豈有怕窮之理。常使在下之將官。多占些便益。士卒多沾些恩澤。則人人悅服。切不可處處打算。惹人談論。得了名就顧不得利。莫作名利雙收之想。但立名揚萬古之志。此是金石之言。貴軍門當年記牢記。王仁彪充春營後哨。處置尙妥。峯禮等營。目下尙不能調。微境之賊。較之古賴賊黨。更多且悍也。

王軍門明山稟現因鹹魚嘴地方空虛飛調湘新後祥後兩營移往換防等情

來緘具悉。南岸陸師。現已進逼金陵。後路空虛可慮。湘新後祥後兩營。宜仍守蕪湖。不可調過鹹魚嘴。現調團防營千四百人。駐西梁山。北岸尙不甚虛。可無慮也。至水師布置。自蕪魯以至金柱關。則交李鎮八營分防。自太平以下。則由貴軍門會商彭部堂。調派防勦。惟距賊太近。營頭太多。切不可擁擠一處。致有疏失。行營則紮江心洲。浦包洲一帶。老營須紮上游。距城二三十里之遠。行營只許戰船紮泊。不許民船混雜其間。以防賊之詭計。九墩洲賊守甚堅。俟多將軍大隊會勦。乃可得手。目下陸軍未到。水軍亦不必獨攻。恐損精銳。淮揚黃鎮水師。宜催令迅赴上海。李撫部院盼望極切。不可再延片刻。本部堂前批令黃鎮親帶三營。駛赴上海。其餘六營。留駐鎮江以下。北岸三江口一帶。現在大隊師船。盡萃於金陵城下。距鎮江及三江口。不過二百里內外。信息易通。倘上游實嫌單薄。則酌留淮揚水軍一二營。會勦金陵。暫不赴鎮江以下。亦無不可。此層應由彭部堂。商之黃鎮。妥籌辦理。黃鎮則急宜往滬。不可少緩也。李軍門世忠。所部士卒。聞其騷擾異常。難與共事。貴軍門并未呈商。何可遽行函調。以後不宜續致。

潘鼎新劉銘傳稟移營進紮金山衛連日攻勦情形由

據稟已悉。金山衛城前准李撫部院來咨。業已克復矣。浦東一律肅清。該營尙爲出力。殊堪嘉獎。惟昨准撫部院緘稱。銘字營勇夫。鎗斃奉賢縣楊令一案。不勝駭異。該都司雖遠在金山。何以一任營哨如此肆鬧。本部堂募練淮勇。具有苦心。兩淮風氣剛勁。古來多出英傑。近日無人倡導。其甘心爲髮逆爲捻匪者。則竭力苦戰。抵死不悔。卽幸而爲弁勇。爲團練者。亦久染惡習。騷擾百姓。本部堂與李撫部院之志。欲力挽淮上之惡習。變作國家之干城。第一教之忠君。忠君必先敬畏官長。義也。第二教之愛民。愛民必先保護閭閻。仁也。斯二者總須紀律嚴明。訓導有素。李撫部院倡之。全賴爾鼎銘春樹各營官教之戒之。淮勇將來爲忠臣義士。爲名將遠官。是爾等數員戒之功。若爲驕兵悍卒。爲害家凶國。亦爾等數員不教之罪。成敗禍福。係乎爾等營官數人之身。亦卽在此立軍數月之內。此時不變。昔年之惡習。則終不能變矣。所有奉賢一案。仰霆字營劉遊擊。查出行凶弁勇。緝送李撫部院大營。盡法處治。不可袒護。一二滋事之勇目。敗壞淮勇全軍之聲名也。仰將滋事緣由。及懲辦情形。稟復查核。統帶江蘇撫標親軍總辦湘淮各營防勦事宜李令鶴章稟出隊援救北新涇獲勝解圍情形由

閱稟慰悉。該令督攻青浦。克復城垣。已著勞績。此次派隊援救北新涇之圍。赴機神速。尤堪嘉獎。已准撫部院咨鈔奏稿。並分別查明出力員弁。及陣亡弁勇。彙案請保請卹矣。另稟所陳各情。具見慮事周詳。持心審慎。惟此時滬上軍事。湘勇不多。淮勇一軍。雖經撫部院提倡募練。漸有規模。特犢悍之習未除。致有銘字營勇夫戕官之案。又收集吳建瀛等數起降卒。張丞劉都司等。添招五營。亦皆新勇。未諳紀律。人數日增。恐營務日繁。紀律日弛。聲譽亦將日減。撫部院有全省地方之事。勢不能時時專教淮勇。該令統率各營。和輯衆志。已有成效。足見平日能以情意相感孚。並不在以位望服人也。此後當常以苦口教之。教之而有效。則淮勇可多出忠臣義士。名將顯宦。教之而無效。則淮勇仍不免爲驕將悍卒。害家凶國。一人不誠。萬衆可感。一心堅定。天地可廻。該令前帶勇經過清江淮揚一帶。秋毫無犯。頌聲大作。望推此以教訓淮勇全軍。苦心磨鍊。副我厚望。勿遽作息肩計也。

鮑提督超稟請籌發一二月滿餉由

貴軍一月全餉。合計不滿八萬。老前新前禮字三營。病死者已千餘人。合之各營病故者。約在三千以外。陣亡傷亡及散走者。亦在一千以外。比較前此勇額。減去三分之一。何以緘稱到餉二萬。止能散給七日。殊不可解。貴軍門事。不愧名將。惟利心太重。不足服衆。聞近日催提各營截贖之銀。彙送貴軍門處。有此舉否。爲統帥者。欲服將士之心。在不爭將士之利。前於四月廿一日。密寄一函。曾言利之所在。當與人共分之。名之所在。當與人共享之。囑貴軍門於霆字十五營。中分五營與宋國永統帶。分五營與婁雲慶統帶。貴軍門親統五營。及仁字禮字峯字春字。暨馬隊各營。仿李多兩帥分支派統之法。一則人心易服。二則照料易周。三則使麾下宿將。各顯手段。造成獨當一面之才。以爲久遠不敗之地。其法至善。何以至今猶未決也。仰將副五營撥與婁鎮統帶。新五營撥與宋鎮統帶。銀錢則歸該二鎮自支自放。戰守則仍歸貴軍門節制調度。無得久專利權。致干參辦。

鮑提督超稟賊撲清弋江我軍出隊開仗由

攻堅最損精銳。目下各營弁勇。營大病之後。又經閏月廿日。九月廿一兩次小挫。尤宜切戒。此次西河之戰。受傷營官兩員。傷亡勇丁極多。亦不宜攻堅之明效大驗也。清弋江與老營兩處。貴軍門與宋鎮。臨時更換駐守。終恐號令紛歧。事權不一。不如將賊勢審定。地勢一一看明。何處最衝。可以屏蔽各路。何處次衝。僅能扼守一隅。最衝之地。由貴軍門親臨駐守。次衝之地。責成宋鎮帶隊分防。庶幾用心專一。較之臨時更換。似有把握。此時以力保貴軍。及甯郡餉道爲急務。若能擇一扼要之地。可以顧全兩處之糧路。卽令各營併紮一處。貴軍門與宋鎮。不分紮兩處。則兵力不單。照料亦易周。兵最怕分。分兵最易誤事。梁美材等三營。分紮抱龍岡。本部堂極不放心。能令隨貴軍門同駐。或隨宋鎮同駐更好。水運糧路。以力保爲妙。如不能保。本部堂卽日派員至繁昌。會同地方官。雇夫辦理陸運事宜。吳廷華一軍。現尙未到安慶。何紹彩一軍。本日已到安慶。十四日卽閉赴下游。由三山登岸。直赴南陵。餉銀今日已到五萬。明日起解。以四萬交貴軍。以一萬交張臬司老湘營。

統領馬步官軍會藩司國荃稟請增募十營圍剿金陵由

行軍之要。屯宿之守。兵宜少。游擊之活。兵宜多。此次大股援逆。圍撲官軍營盤。苦守兩月。幸獲擊退。轉危爲安。亦自人事居多。天幸居半。此等至險之著。豈可恃以爲常哉。目前宜急思變計。酌留萬人。或八千人於金陵。與水師相依護。最衝處皆修石壘。磚壘。與城池相等。爲牢固不拔之基。此外皆須退打東壩等處。乃活著也。若必欲厚集兵力。以圍金陵。該城周圍百二十里之寬。縱添四十營。亦尙不能合圍。亦不能因城賊。設頓兵日久。變證另生。從前向和之覆轍。當以爲鑒。卽向和在金陵時。亦常常防勦東壩高瀆溧陽溧水句容鎮江等處。且常常援浙援閩。不僅圍金陵也。須另換局面。則可添營。以資攻勦。目下株守之局。則不可添。所請礙難准行。

督帶常勝軍吳道煦詳報常勝軍由滬長行并送留守松江勇丁冊由

自九月中旬。接該道屢稟。卽稱速救金陵。今近五十日矣。并未見到。天下有如此遲延。而可謂之救兵者乎。金陵雖屢幸解圍。而大股賊匪。已由九洲洲悉竄江北。向使該軍於十月初來攻九洲洲。此禍當不如是之烈。時而稟稱某日可以齊集。時而稟稱攻破九洲洲下關。應派何營防守。但有期會。而無實事。可笑可怪。

督帶常勝軍吳道煦稟進勦九洲洲請預定派何營會攻先賜咨行等情由

據稟均悉。該軍但有文書期會。永無到防之日。何必預爲裁定。何必專文密訂。何必早定派營。守九洲洲七星洲等處。無論中國外國。無論古人今人。無論大官小官。有才無才。危急之際。言而無信。便一錢不值矣。

統領韓字營全軍韓參將進春稟奉委招勇抵省立營管帶由

新募之勇。全在立營時。認真訓練。訓有二。訓打仗之法。訓作人之道。訓打仗則專尙嚴明。須令臨陣之際。兵勇畏主將之法令。甚於畏賊之礮子。訓作人則全要純誠。如父母教子。有殷殷望其成立之意。庶人人易於感動。練有二。練隊伍。練技藝。練技藝則欲一人足禦數人。練隊伍則欲數百人如一人。該將自立之道。則須以勤字廉字爲本。庶幾磨鍊動忍。漸成名將。勉之。發去勸誡淺語三本。聊資觀省。

王副將品高呈報開用管帶強中前營關防日期并回徵城訓練由

良營舊勇。騷擾地方。習氣最壞。既經挑選。改立新營。務當認真訓練。整飭營規。一洗從前積習。庶幾可用。營頭之優劣。全視乎管帶之人。該營官果勤以自勵。廉以率下。自可作士氣而服衆心。第一禁洋煙。第二禁騷擾。第三戒晏起。第四勤操練。營務必日有起色。勉之勉之。千萬千萬。本部堂既怕各營打敗仗。尤慮各營官學壞樣。小敗不過誤於一時。學壞則誤及終身矣。我教爾等。卽如父兄之教子弟。字字皆我之心血。切莫忽略看過。

朱鎮品隆稟連日擊賊并出隊由

胡黃李三逆。已另咨鮑軍門。卽日率師。由南陵青陽一路進剿。特恐各股併行。逼入嶺內。微軍難以支持。而徽郡各防兵。尤以休甯一城。未可深恃爲慮。昨唐鎮加派王華雲一營。協守休城。未知足當大敵否。該軍駐守青陽。暫時仍應緩進。凡守城之道。賊始至猛撲一鼓銳氣。宜堅壁不出。少鈍其鋒。而銷磨其氣。卽一日之中。賊初來之時。其氣甚銳。至未申以來。則意興減而氣衰矣。古人所謂避其銳氣。擊其情歸者此也。貴鎮好出零隊。好打油仗。最易爲賊所輕。不出則堅壁靜守。出則須以大隊猛打。不可零進零退。徒長賊餒也。

批唐總鎮二月十七日稟

本部堂深以休甯一城爲慮。貴鎮派王副將入休協守。甚慰甚慰。但守則靜守。不放一鎗。不出一人。打則猛打。出隊不可太零。收隊不可太快。出隊見賊。未開仗而輕收者。尤長賊氣。貴鎮與雲巖一軍。每好出零隊。打油仗。以致爲賊所輕。以後出隊之時。點足實數。若不滿一千。不必輕出也。賊竄江西。不能飛越景鎮樂平。若該二處自能堅守。則各處援兵亦必速到耳。

批唐總鎮二月二十八日稟

日內軍務吃緊。皖北則江浦浦口等城失守後。僞忠王上竄巢城。以數支牽制廬江官兵。以數支牽制無爲州官兵。而以大股初四五日。猛攻石澗埠。毛道營盤。文報接濟。皆已不通。南岸則花旗古劉等股。壘集徽境。而黃胡李等股。又從東建直犯饒景。本部堂已調霆軍。馳援景鎮。鮑軍門於初七日到青陽。將由建德赴江西矣。因毛道四

面被圍。又調寔軍攻援石爛埠。先解毛軍之圍。不知景鎮樂平官軍。能堅守待援否。貴鎮守徽休。王道守祁。均可放心。但恐劉臬司須赴景鎮。山內別無游擊之師。殊深焦灼耳。

鮑超稟探報賊抵廬江我軍舟行由樅陽登岸迎頭截勦由

來緘聞悉。貴軍門一聞石爛埠解圍之信。卽應確探賊竄何路。設法腰截方爲不負此行。乃冒昧返舟。殊屬不合。貴軍門於初十早。接調援無爲之牘。十一日儘可渡江。十二三四五等日。儘可由陸路抵無爲州。十六由州出隊。十七日毛劉彭蕭大戰之時。寔軍儘可由西路會勦。若使貴軍十七會勦。該逆何至由西路上竄廬江。來緘又稱乘此風利上行。試思十八日自無爲開行。廿一日申刻始至泥汊。四日僅行六十里。尙得謂之風利行速耶。明知船行甚鈍。貴軍門聽將士之言。貪舟中之逸。不願登陸。此次擄船至千餘號之多。大通荻港各卡。釐金大減。船戶人人含怨。前據緘稱到無爲後。欲仍留各船。本部堂曾答以所得者少。所損者多。批令將各船一律開釋。豈未接此批耶。往年加夫八百餘名。豈至今一步皆不能走。而動必需船耶。如再不將各船隻一律開釋。本部堂定當據實奏參。勿謂言之不早也。廿一日發去一咨。請貴軍門由王家套等處。起岸進兵。以解廬江之圍。茲據稱欲由樅陽登岸。縱陽至廬江二百一十里。王家套至廬江一百里。何爲舍近而圖遠。應卽仍由王家套登岸。迅速進剿。不必親來安慶。

朱鎮品隆稟賊撲青陽籌備儲糧堅守由

據稟。斷能穩守。穩擊。大慰大慰。所領米糧。卽飭糧臺。趕緊籌辦。徽州之賊。旣已退回。則徽休祁門。可保無虞。此大可喜之事。賊中無斗王。卽堵。王民間皆稱堵王。係黃文金。號黃老虎者也。在皖南諸賊中。最爲凶悍。十一日在祁門小路口。大敗於王鈐峯之手。現聞尙在石門洋塘桃樹店一帶。總圖內竄江西。來函謂斗王亦至青陽。恐未可信。希卽詳細探明見示。

朱鎮品隆稟賊攻城壘我軍出擊獲勝由

此股賊匪。前自甯國涇縣敗回。本已衰弱。頃又自徽州敗回。其氣尤餒。我軍平日宜戒浪戰。若看定地勢。酌定時候。本有可打之機。卻又不可太斯文了。一經得手。即須痛勦窮追。上午得手。下午又勦。先日得手。次日又勦。又追。乃足以振軍威而塞賊膽。不過猛打數次。三千餘人。即足抵萬人之聲威矣。若一味穩慎。全不勇猛。交鋒之際。見賊小挫退。我亦得罷且罷。得收且收。不說天色將晚。便說風雨將至。不說士卒飢疲。便說出隊太遠。不說怕有埋伏。便說另股包抄。如此則永無痛勦之時。賊亦永無喫虧之日。不過數次。賊必狎而玩之。三千餘人。只足抵千餘人之聲威矣。往昔鮑春燾。帶三千四百人。七年打意生寺。八年打涼亭河。實有十餘萬悍賊。故鮑在二郞河一帶。三千餘人之聲威。足抵萬人。近日王鈐峯守祁門。僅二千八百人。尙分二營紮漁亭。三月十一。破黃老虎一股於小路口。打得甚猛。黃老虎不敢再擾祁門。其聲威已足抵五千人。貴鎮在青陽。與古賴劉藍等逆相周旋。儘可大有作爲。不料聲威日減。大負期望。唐鎮亦是過於穩慎。爲劉王客兵所笑。此批仰鈔錄後。知唐鎮可也。

批唐總鎮三月二十五日稟

頃接來勇面稟。二十五夜宿漁亭。聞劉王各軍。已於二十五日。再攻駿縣。嶺內肅清矣。此次僞忠王大股。於十七日自石瀾埠解圍後。於十九日攻撲廬江。二十一日圍攻舒城。二十五日圍攻六安州。舒城守兵僅有蔣道二營。六安守兵。僅有蔣部之利左等二營。亦能堅守城池。皖南羣賊。不如忠逆之悍。徽休二城。不僅兩營之多。除守城外。貴鎮儘可帶二三千人。出打行仗。會同劉王各軍。痛勦駭縣之賊。乃劉王各軍迭次苦戰。貴鎮始終不發一兵相助。大爲客兵所笑。本部堂有何顏面見人。朱鎮一軍。現在亦但能守而不能戰。大負期望。可嘆可嘆。

朱鎮品隆稟連日勦擊各路賊營獲勝由

兩日之戰。總不切實痛快。譬如治病者。略施表散之方。而無猛攻之劑。則病終不能去。目下皖南之賊。人多而不悍。勢散而不整。實係衰弱無能。易於攻打。我軍但審機量敵。一有可乘之隙。即猛擊猛進。猛殺猛追。使逆膽悉寒。不敢窺伺。庶可一勞永逸。不然株守以待賊至。稍勝而即收隊。穩則穩矣。於賊毫無所損。而各股之環繞於前後。

左右者。或遠或近。若出若沒。且糾纏而無已時也。

批唐鎮義訓稟連日擊賊獲勝由

初一二三等日。連日苦戰獲勝。賊膽必日寒。士心必日壯。凡軍威所以大振者。全是打出來的。有四分是把穩打的。有六分是冒險打的。從前楚軍初立。塔軍門有八分冒險。後來多飽有七分冒險。李忠武亦有六分冒險。近來各軍專圖十分把穩。不肯冒一二分險。雖窮餓之賊。殘敗之賊。亦從不猛打痛追。以致窮蹙者不肯降。裏脅者不肯散。浙賊所以棄浙而趨皖者。以浙打而皖不打也。望貴鎮挽此積習。變此風氣。東館西館。陵陽鎮之賊。望次第痛勦而驅除之。至囑。

唐鎮義訓稟祁防喫緊懇飭朱軍入贛以固根本由

該軍是徽郡之地主。各軍皆係客兵。該軍雖僅紮徽休兩城。而於淪駱祁三處。皆當派人坐探。與各軍宜常通信。息。有警急宜飛速馳援。有喜信宜飛速馳報。方不失主人之道。方足聯客兵之歡。劉王兩軍。於二十五日大獲勝仗。將十都等處賊壘。全數攻破。駭賊全數出嶺。該鎮二十六日。尙不得音信。何憤憤若此耶。此次客兵十分出力。主兵從不會勦。本部堂實無顏面對人。該軍只可出隊勦。不能分紮巖寺。本部堂已於劉臬司稟內批明。並照會貴鎮矣。朱鎮日內方與各賊屢次苦戰。青陽亦係萬不可失之地。已另調李道鈞字一軍。由建進剿祁西矣。

批唐鎮軍三月二十八日稟

該軍只可出隊勦。不能分紮巖寺。前已批於劉臬司稟內。並批該鎮小稟矣。至親赴淪亭會晤劉臬司。則早應前往。且應常常往見。殷殷親近。渠以客兵如此速來。如此苦戰。葉道則宜聯以誠意。贈以儀物。貴鎮則宜助之同戰。陪之同勞。庶不愧爲主人之道。乃葉道與貴鎮許久不至劉臬司營中一會。任他苦戰苦守。東奔西馳。本處鎮道。若置之不聞不問。昨劉臬司有將赴景鎮之議。而王沐亦將回顧江西。駭淪之事。恐致決裂。實深憂悸。現調李道鈞字一軍。由建救祁。亦須中旬乃能到也。

統帶貞右馬步各營成提督大吉統帶湘皖等營蔣道凝學管理湘中右等營軍務毛道有銘會稟預籌分軍防守各處情形由

據稟所籌各情形。具見周密。本部堂前因我軍攻堅。傷亡過多。壽城既失。士氣減損。故但思斂兵以保六安。潁州尖鎮三處。而未計及不守各要隘。則三處亦不能保。又未計及兵退太遠。則六北之糧。盡爲苗有。六北之圩。盡被苗脅。此本部堂之疏失也。茲來稟籌畫詳明。應卽如所擬。妥爲布置。

三河尖練總潘令。遣稟遵札辦理團練。并俟訪得才堪濟變者。當密爲舉報由

該令居心光明。措詞真切。此稟可以見其大概。閱之欣慰無已。所稱抱濟世之才。矢堅貞之志。不爲利害所動。此豪傑之士也。心知順逆。隱懷忠義。而亦不免被其逼脅。此不失爲良善之人也。豪傑之士。難以邂逅遇之。良善之人。尙可以人力求之。求之而實見其行。實信其心。方行舉報。則斟酌而無冒濫矣。仰隨時留心訪察。以慰期望。得一好人。便爲天地消一浩劫也。

傅參將家桂稟奉札代理湘新後等營統帶事務

該將質地寬厚。易得勇心。惟行軍當以嚴爲主。臨陣紀律不嚴。則無以作勇敢之氣。平日營規不嚴。則無以儆騷擾之風。周鎮能打猛仗。能耐勞苦。故該營屢立功績。該將接統其衆。無墮成規可也。

朱鎮岳隆稟青陽解圍由

此次黃李大股。圍攻青陽。適值我軍疾病。空乏不能自存之時。可謂奇險。貴鎮扶病登陣。與各將士忍飢苦守。竟能堅持三十八日之久。與援師內外夾擊。力解重圍。實非本部堂初意所及料也。我湘軍近年以來。守城守壘。已磨鍊出絕大本領。如前年冬之徽州。去秋之雨花臺。今春之石澗埠。此次之青陽。皆有百折不回之力。良可欣慰。貴鎮病勢已漸愈否。營官中病者三人。皆就痊否。深爲軫念。昨已檄調湘後兩營。接防青陽。建字兩營。接防池郡。貴軍暨江席李喻諸軍。分爲兩大枝。進圍石太旌德各城。而江席及喻。紛紛呈請大加休養。該軍旬日可拔隊開

行否。能趁此機。收復石太旌德。則省力多矣。

統帶江蘇撫標親軍總辦湘淮各營。防勦事宜。李令鶴章稟克復江陰縣城由

江陰爲蘇州北路屏蔽。賊所必爭之地。經該統領添調援師。將東南木城卡壘。掃蕩淨盡。立復堅城。使蘇賊無路北渡。實屬有功全局。與前此守常熟。克崑山。諸偉績。互相震耀。惟淮勇威望日著。本部堂所期者。不在勦烈。而在紀律。必須如該統領去年。初過淮揚時之秋毫無犯。而後可保常勝。可免後患。仰即時時誥誡。處處維持。勿視爲老生常談也。

朱鎮品隆稟古隆賢獻城乞降懇分飭嶺外各軍蹙緩進兵由

古隆賢一股。嘗飢困窮蹙之時。又懣嶺內外各軍夾擊之威。其率衆投誠。事尙可信。從前韋志俊獻池州府城。旋被楊賊佔奪。去年洪容海獻廣德州城。亦因其部下內變。旋得旋失。貴鎮此次。當引前事爲鑒。十分防範。十分審慎。庶免後患。旌德招撫事宜。候卽飭易鎮就近帶營往辦。然一展轉閒。未免有需時日。且首尾茫然不知。亦太隔閡。不如一面由易鎮。派兩營駐防旌德。一面由貴鎮派員。將旌邑降衆。帶至青陽。一併安置。廣德州招撫事宜。卽派雲營。宋鎮酌帶數營往辦。以資熟手。惟胡黃等股。方營集廣德一帶。其城易得而難守。殊爲可慮。甯邑賴遊一股。尙不足慮。祇要石太旌廣四城。皆爲我有。此賊裏在中閒。豈能站腳。不降亦將遁矣。此時飽軍方欲先取東壩。山內各軍。亦因劉軍回浙。批令暫緩出嶺。江席李諸軍。亦尙在青城。均可卽照所請。暫緩進兵。候分別咨行遵照。其劉臬司績溪一軍。已於廿五夜。專差飭知。毋庸剿旌矣。古隆賢在皖南日久。其所部黨衆。多係皖南被脅之人。不願回籍者。諒不甚多。卽日飭臺解銀一萬兩。爲石太旌廣四城遣散之資。其距籍較近者。由貴鎮等酌給路費。其距籍太遠者。每名給路費一千文。或以銀七錢代之。仍分省分起。派頭目管帶押送。以免沿途滋擾。務須一律遣散。不令窮極投降之賊。仍擁重兵。卽有無家可歸者。不能不暫行留營。交其管帶。亦應遵照前批。至多不得過四百人。至要至要。前二次各擁衆二千餘人。其遣散者爲數極少。辦理不善。宜以爲戒。毋以爲法也。至請給該會

二品頂戴。未免過優。無此辦法。從前張國樞李世忠章志俊洪容海投誠之時。亦未給如此官階。朝廷名器。亦當顧惜。俟各城招撫辦妥之後。本部堂當奏請加恩古隆賢。賞給游擊虛銜。以示獎勵。

三河尖練總潘令塏稟呈所議練規懇示遵行由

據稟已悉。本部堂嘗言團練。須擇人而辦。細閱所議練規。首先以慎舉練總爲務。誠得擇人而辦之意。練總得一好人。則練長練丁。皆成好人矣。藉團練之名。苛派公費。抗玩官事。此天下鄉團之通弊也。藉團練之名。築圩恃險。魚肉良民。此近日兩淮之風氣也。所議練規。於此數事。苦心分明。一一禁絕。良可欣慰。候卽刊刻辦理。三河尖團練鈐記。以昭信守。昨准河南撫部院函稱。光屬團練。已派固始紳士李守孟平。專司其事。若事權不一。恐彼此觀望。難收實效。不如豫人屬皖。皖人屬皖。各辦各團。遇邊隅有警。仍令兩省練勇。彼此聯絡聲勢。協力守禦。如此則無事各專責成。有事仍可互相策應。事權旣一。呼應亦靈。各等因。是光固之團。已由河南撫部院派員專辦。本部堂未便越俎。應派該令專辦尖鎮。及阜霍一帶練務。較易爲力。仰卽遵照可也。

統帶湘皖等營蔣道凝學申查復固始縣紳耆稟成軍各條

據申覆各情。成參將之廢弛營務。毫無紀律。已可概見。業經批飭該參將。候金前道到營接手後。卽行來省。聽候查辦。所有固始縣紳原控各節內。胡宗士及李榮業二案。尙未將犯交出。應俟金前道到營時。飭令查交訊究。餘并須力加整頓。以肅營規。另單併悉。地方官挾嫌搆誣。在所不免。然軍營每至各縣。其初須力禁騷擾。其繼須獎借官民。若旣不禁騷擾。又不能獎借。而反苛責之。怨詈之。則官民之責我。百倍於軍中之責彼。彼詈彼矣。該道前在六安舒城。名望極好。聞亦多用獎借之詞。不知成軍。何以全不知此義也。

管理湘中右等營毛道有銘稟明率老廟集五營進紮蘇王壩由

以下爲同治二年安慶行轅之事
據稟及另單輿圖。均已閱悉。前因該道與六安會道函稱。正陽有機可乘。後路不虞抄截。故派該道會同周軍。進取正陽。久不見稟報披營日期。以爲奉調卽行矣。茲據稱李軍尙未進攻下蔡。壽城之賊。猶恐時出滋擾。又恐王

家灣黃家埂塘各匪圩。包抄我軍後路。難於進攻各等語。闔之殊深詫異。然則該道與六安會道通函。欲攻正陽之時。李軍已進取下蔡乎。王家灣黃家埂塘。當時遂無匪圩乎。出爾反爾。不能自踐其言。殊不可解。正陽東南北之水。據圖稱晴久則涸。入冬以來。連晴二十餘日。想亦可搭造浮橋。渡江進剿矣。昨批令周軍。卽由王家灣進兵。以攻正陽。該道與之。或分或合。板橋集老廟集之營。或撤或留。此等小處。本部堂概不遙制。概由該道自主。但不准不攻正陽。而以收撫苗圩。輕輕了事耳。所以急於進兵者。原冀掣動賊勢。以解蒙圍。若文報往返太多。耽擱太久。蒙城不守。苗勢大張。則該軍與周軍。方自守之不暇。豈復似前此之有機可乘哉。李軍門方銳志進圖。下蔡老巢。或不暇繞過壽南。附近壽城之圩。大抵平日則自附苗黨。官軍至則自稱良圩。及戰爭之際。苗勝則助苗。官軍勝則助官。譬若草從風靡。可南可北。李軍門所攻民圩數十。果能必其一非苗黨乎。該道將來進兵。然後知似苗非苗。分別良莠。極不易易也。所請預禁之處。應毋庸議。

統帶湘皖等營蔣道凝學統帶貞右等營陳參將大吉稟克復潁上縣城乘勢進攻正陽由

苗逆就戮。賊膽皆寒。潁上踞逆。獻城出降。自是意中之事。若再將正陽收復。則淮甸可告肅清。此時壽州之賊已降。正陽之賊。斷難孤立。大兵一至。亦必相率獻城也。其尤爲出力員弁兵練。俟正陽收復後。彙案核獎。此次平苗之功。以僧邸及唐富李陳諸軍爲最。我湘軍未當前敵。未經大戰。當邸帥未誅苗逆之先。該軍等前卻次。且屢催不進。將來祇能酌保數人。不能開單多保也。

代辦精捷全軍事務陳道鳴志稟統憲江軍門病故懇奏請賜卹由

江軍門自咸豐三年以後。日在兵閒。殊勳偉績。照耀於江湘鄂皖粵西等省。不可殫數。此次千軍赴援。暑雨載途。喘息未定。卽進剿澎湖之賊。病勇未愈。又馳解青陽之圍。戰功最多。勞苦最甚。昨者因病過皖。相見悽惻。然猶冀天佑勞臣。傷病雖深。或者壽命不促。茲聞來稟。竟於初四日舟抵吳城時病故。悲悼曷已。查江軍門以書生從戎。歷保文職。洊至監司大員。又蒙恩擢署貴州巡撫。茲於立功後。積勞病故。應奏請特恩。仍照文職例賜卹。以慰忠

魏井奏明照例入城治喪。

管理湘中右等營毛道有銘稟收復正陽關由

此次會復正陽關城。苗黨係畏僧耶之威。非畏楚軍之進攻也。我軍前此既不能保全。後此株守五個月。不能進剿。壽正穎之一次。以掣懷蒙之賊勢。直至僧耶南下。蒙城解圍。苗逆授首。乃始進攻穎正。惟上諸軍。必譏我軍危時全不動手。安時乃來爭功矣。所有正陽一關。該軍等不必留營戍守。以避爭功之嫌。

批朱鎮軍十一月十三日稟

祁門既已收復。徽休兩城。尙可堅守。此大局之幸也。余前擬令貴軍棄旌不守。而退守徽休。今貴軍米糧子藥。既可支二三個月。則旌城斷不可輕棄。宜仍竭力堅守。至礪至礪。現在鮑軍糧路已通。若年內能將甯郡之賊打退。則蕪湖魯港之船。可由涇縣直運至三溪旌德矣。較之由徽祁嶺內運出。難易迥殊也。王道鈐鋒一軍。現今其駐紮祁門。但該軍非本部堂所統。倘左帥欲調至景鎮婺源等處。則貴軍宜退徽州。唐軍宜退休甯。各派二營。共守休甯。若王鈐峯尙在祁門。則貴軍斷不可輕動也。涇旌兩縣交界之區。貴軍宜約易鎮吳守。有事則會剿。無事則會哨。庶旌軍不甚孤寂。賊若竄江西。本部堂已奏調江味根一軍來剿。沈帥亦派韓軍五千人。左帥亦派蔣軍萬人會剿。皆商定矣。應無大礙。

統帶精毅營席道寶田稟陳道鈔奉批示擬緩期前赴江西省垣由

該道因陳道進省。防務無人照料。暫緩離營。具見公爾忘私。顧全大局。頃接蘇撫部院函稱。僞忠王將由甯國縣竄至玉山廣信。上犯江西等語。查咸豐十年冬。忠酋上竄江西。係由甯國縣而出。昌化淳安開化。以達於玉山。十一年正月初旬。連圍玉山廣信三城。然後內竄腹地。圍撫建。陷吉安瑞州義甯。遂入鄂省。連破七城。仍回江西新昌瑞州豐城撫州廬溪鉛山。以抵浙江而陷杭州。其時該逆雖未能解安慶之圍。而數月之內。長驅五千餘里。攻陷二十餘城。擄人數十萬。財物無算。是僞忠王生平最快意之事。此次自蘇州踉蹌奔出。失意之秋。思欲重

尋此路上犯江西兩湖。實屬賊計。應有之舉。亦官軍最可慮之端。若昌化淳開一路。難以闢過。則仍從旌德太石。上犯建德饒景。亦屬意中之事。仰該道妥爲防範。并將石門洋塘。通景鎮之路。無分大道窄徑。一一踏勘繪圖。通知各軍。以備互相援應。仍以一分。齎呈本部堂備查。

批梅守錦源十一月二十二日稟

頃見石埭紳耆。致在省諸紳書。深怨朱軍之騷擾。其略云。古目投誠。民皆以爲有家可歸。種作有期。不意被朱軍駐紮。兵勇將房屋拆毀。以作柴薪。歸民捉去。爲伊搬運。所有店舖。被兵勇輩佔居買賣。更有夫役人等。借名砍伐竹木。而實搜取室物。我邑城鄉內外。房屋完全者。百無一二。如此橫行。以致歸民有官營不若長毛之嘆云云。以上皆信申語。雲巖不在營中。何以各營官全不管束。致紳民怨恨若此。究竟何營規矩最鬆。拆屋者何哨最甚。仰一面查明懲辦。一面開單稟明。吾輩帶兵。若不從愛民二字上用功。則造孽大矣。千萬懷懷。

統領老湘營易鎮開俊稟遵示整肅營規由

前此涇縣捉夫搶擄諸案。業經臬示數人。亦殺一警百之道。惟一味撇清。謂與貴鎮營內勇夫無涉。究未免信心太過。蓋統轄既多。必有耳目難周。號令不行之處。本部堂治軍多年。刻刻嚴禁騷擾。而每遇人告我部下擾民之案。不敢護短。以拒人言。不敢信我兵之皆良。不敢疑告者之皆誣也。貴鎮於此類重案。事前既失於防範。事後袒庇部曲。堅拒人言。該軍弁勇。從此益無忌憚。官民從此益不敢以實言相告矣。欲與情之不怨。其可得乎。前此貴鎮初駐涇時。發粥搭棚諸惠政。涇民靡不歌誦。本部堂每爲之嘉慰無已。當此營規初壞。聲名驟滅之際。果能嚴於自治。實力整頓營規。保全舊日聲名。在百姓最存公道。又將化怨詈爲歌誦矣。不然以愛民始。以擾民終。先後判若兩人。非本部堂拳拳委任之意也。稟之。至囑至囑。

管理依仁等營事務吳守廷華稟請將依仁營另行委員接帶併歸張道統轄由

下游蘇州雖克。而忠侍兩台。尙聚句容溧陽一帶。皆逆黃文金。亦踞湖州一路。屢據稱報。均有由皖入江之議。卽

將來金陵杭州并復羣賊必圖紛紛上竄該守所部駐守祈門係江西門戶亦爲嶺內外第一關鍵防務正須加嚴仰仍遵照前批假滿趕即回營并飭吳從九先行來皖銷假凡作一事無論艱險平易但須埋頭做去掘井不已終有及泉之日該守於軍務閱歷已深儘可鍊成將材何不猛著一鞭期於及泉而止若觀望猶豫半途而廢不特於兵事無所成即他事亦自費矣吳從九藉詞不出似有缺望於保舉者尤爲不可

統帶精毅營席道寶田稟復卑營裨將各情另單稟請飭令吳中書紹烈前來勦辦營務由 以下爲同治

二年安慶行轅之事

該營裨將邊成阮可資臂助金張等六人又皆敢戰之士是尙不爲乏材庶人之家數語深得反己自強之道自古聖賢立德豪傑立功成不成初不敢預必只是日就月將盡其在我孔子所謂誰敢侮孟子所謂強爲箠皆此義也游擊之師有二難本部堂亦深以爲慮無術補救王鎮永章既可獨當一面應仍留湘省以備桑梓緩急之需至請此閒選可恃之將殊難其人在皖南各統將中以現守甯國之劉鎮松山爲最日內又嘗派毛道有銘金道國琛率六千人南渡爲徽池饒州之活兵此三將皆可與該軍共事不審果饜人意否吳中書紹烈候即飭赴該營贊助一切

李軍門世忠稟移眷住省暨陳鎮自明所部發歸何處請示由

前與貴軍門疊次函牘商定三月內將五城兵勇全數遣散四月初親來安慶晤商一次即赴本任均經本部堂據實奏明在案頃接來牘又不親來安慶而欲先赴舊縣一變前約殊失本部堂誠信相接之意其實舊縣靈柩儘可派人扶送回籍何必親往杭州嘉興均已克復松江去賊甚遠又有本部堂爲之主持何處謗議俟到任數月後呈請開缺或退居原籍或移寓省城均由貴軍門自便此時不必預計也今與貴軍門約定三條一則三月內將勇丁遣撤完竣一則四月半以前親來安慶謁見一則只准赴本任及固始兩處不准留戀舊縣把持利權致各部曲散而復聚生出多少葛藤此三條如不一一辦到不待他人參劾本部堂定行奏參治罪貴部下之名

散而實未散者。皇上亦必派兵剿辦也。望善自保全。勿貽後悔。陳鎮自明。所帶勇丁二千人。亦限於三月內。拔赴南岸之池州駐紮。聽候調遣。李副將顯發。准給咨飭赴漕中協本任。不准仍帶馬隊親兵。卽一併遣散可也。

統領精捷全軍江總兵忠朝稟收復弋陽後擊賊情形并籌畫進止緣由

弋陽賊萬有餘衆。已延至上清宮。是撫建情形較緊。前聞繼果營馳回撫郡。不知果已趕到。力保腹地否。續溪一股。於十二三四等日。在歛休境內。經徽軍擊散。所剩餘匪。不過二千。器械無多。不足深慮也。前營左翼兩營。候咨明左部堂。飭派來江。歸於該部。以厚兵力。江前軍門臨危之際。與席臬司和好如初。誼若昆弟。本部堂所深知。精捷營諸將弁之不服席臬司。亦本部堂所稔聞也。此時若違求其合。必且參商日甚。痕迹日深。不如各打一路。精捷本多能戰之才。該鎮與陳鄧兩道。以好言獎慰之。以謗議激勵之。用其善戰之長。戒其擾民之短。不過一二月。勳績卓著。遠近皆無閒言。則精毅營之違言。亦不辨而自熄矣。席道本無成心。將來仍有可合之道也。此時精捷諸將。在力求和睦。力禁騷擾。苟能自強。卽聖人所謂誰敢侮之矣。

湘前營營務處梅守錦源稟奉札查復湘前各營勇夫在青陽騷擾百姓及朱鎮品隆上年招降古隆賢并無受賄各情由

閩稟覆各情。則勇丁強耕熟田。奪取農器。封攆重載船隻。摘茶砍傷女人。考試時打傷童生。均係確有之事。果係何營何哨勇丁。卽即查明稟復。一面從嚴懲治。并稟請將該營哨。分別懲究。毋庸再札青陽縣另查矣。所查朱鎮兩事。亦自有理。然物必先腐而後蟲生。該守與朱鎮交誼甚篤。而本部堂所聞。亦係與朱鎮交密者之言。該守必須互相助勉。以勵廉隅。而迴清議。天下滔滔。皆沈迷於利字之中。惟賴文武大員。有長人之責者。矢清潔於屋漏幽獨之地。少取一分。則蘇一分之民困。亦卽挽一分之天心。此則本部堂所願與該守輩兢兢自勵者也。

江西撫科候選縣丞劉忠壘瀝陳時事稟 以下爲同治三年金陵督轅之事

聞此具見血性過人。然語太激切。便涉冬氣。凡關係吾親之事。若不得半點客氣。古來忠臣孝子。多半是處逆境

唐錄出來的。若一片順境。有何難處。若不遏抑客氣。一念之差。大不幸則爲李懷光。小不幸則爲勝克訥。可戒也。爾能善保血性。力除客氣。將來必有成就。吾亦不憚於常教耳。

管帶義從營黃令元齡稟奉檄馳抵天柱縣辦理勦撫黔苗事宜由

前聞該令治軍。時時以愛民爲念。本部堂嘗以國器目之。稟中所稱極意拊綏。非僅兵威。所能了事。尤見慈祥愷。測溢於言表。爲名將。爲良吏。亦惟持此心以加勉。天下絕大事業。多從不忍二字做出。天下無窮進境。多從不自足三字做出。願共勸焉。

鮑爵帥超稟單三件

前貴爵軍門陳情歸葬。來文請假一年。本部堂奏請給假六箇月。奉旨僅准兩月。誠以甘省回匪日熾。朝廷之眷顧西陲至切。而急盼貴爵軍門之率隊出關。又至殷。縱使假期過促。營葬未能成事。亦祇可臨時咨請駱督部堂奏懇。量爲展假。此時斷未可瀆請也。舊部兵勇得力將弁。原奉諭旨。准其酌量奏調。隨帶同行。餘交宋婁兩鎮分領赴閩。若遽調至二十五六營之多。則赴閩者所餘無幾。亦難形諸奏牘。本部堂代爲酌度。應請貴爵軍門。帶譚勝達新五營。唐仁廉一營。親兵一營。合計已四千人矣。此外張遏春洪容海陳炳文楊忠等各軍中。酌帶二千人。或帶其將而遣其勇。總之由江西帶往者。以六千人爲率。由四川續調續募者。以四千人爲率。萬人西征。足以橫行塞外。斷不可以再多。再多則運糧更難矣。除帶六千人至回疆外。留江西者尚有萬餘人。宋婁二鎮。皆實缺總兵。得力統將。二人中須留一人。在江西統帶援閩之師。遵旨悉歸左督部堂節制。其口糧係由江西籌發。仍須遵照本部堂所奏。諄屬宋婁。暨留江諸將。聽候沈撫部院調度。即貴爵軍門此次萬里出關。所帶兵勇。所需行糧。亦須一一與沈撫部院往返函商。俟商定後。一面由沈撫部院具奏。迅速啓程回蜀。一面咨復本部堂具奏。互相印證。以慰聖懷。廣武左軍。雖稱得力。然現在陳臬司部下。應由貴爵軍門函商該司。咨商湖南撫部院辦理。至川省調募兵勇。亦請貴爵軍門。就近與駱督部堂商辦。所營新需糧餉軍裝。應卽由川省籌撥。貴軍在江西克復各城。

及許灣大捷。甯都解圍。應併作一案保獎。應就近咨明沈撫部院。開單出奏。較爲簡捷。如必欲由本部堂核明奏獎。則每百人中不得過十人。再諭旨不令貴爵軍門帶全部西征。而令在四川募勇。蓋深知兩湖之勇。不慣麵食。不耐嚴寒。與甘肅關外風氣不同。水土不服。故召募川勇。爲其稍與西路相近也。貴爵軍門回蜀調募勇兵。尙不宜用川東之人。宜用川北保寧龍安兩府之人。由龍安而至甘肅之階州。古所謂陰平道也。由保寧昭化而至階州。近日各陸路通行之道也。甚龍二府勇兵。與甘肅風氣。不甚相遠。若兩湖兵勇。必須帶至階州。稍與休息。察其能服水土與否。倘階州已不相安。惟不宜帶之出關。但宜遵旨。換募川勇矣。風土人情。遠近異宜。此不可不知者也。又如靈軍馬隊。本係貴爵軍門。與各營官捐出截贖銀兩購買之馬。西北又係馬隊見長之地。理應全帶出關。惟查由江西湖北而入三峽。又由夔州重慶而至保寧。以上遠甘肅階州。水路約六七千里。換船數次。節節上水灘河。萬不能載馬以行。若人舟行而馬陸行。則馳驅太遠。弊者必多。且甘肅新疆之馬。甲於天下。既多且賤。不若酌帶操熟之馬勇。并帶買馬之銀二萬兩。俟入甘後。多購良馬。最易成軍。其靈營現有馬匹。仍留江西歸宋。其二鎮管轄。庶爲兩便。如貴爵軍門以爲可行。則購馬之二萬金。可由本部堂籌解甘省也。

統領銘字營劉軍門銘傳稟兩奉傳諭催赴畿疆等情。以下爲同治四年北征行轅之事

來牘已悉。本部堂於初一日奏明。貴軍門所部。不宜遽入直隸。宜剿賊於黃河以南。當經鈔摺咨會在案。惟現值僧邸陣亡。局面又變。宵旰憂虞。迥異尋常。二十九日及初一日。廷寄均令貴軍門。繞赴劉長佑軍營。貴軍門若不出江南之境。恐干嚴譴。若竟赴劉部堂軍營。則亦有數不便者。一則賊未渡黃。而銘軍渡黃。反置勁旅於無用之地。二則鄆城荷阿等邑。黃河南岸。一片瘴氛。銘軍孤軍深入。若不掃盡羣賊。焉能衝過北岸。三則米糧礮械。均未籌畫運送之法。餉銀亦無著落。惟勇渡黃。飲食器用不便。必難得力。本部堂奉旨前赴山東督剿。本月部署啓行。擬在濟寧州駐紮。銘軍目下不能遽赴直隸。亦當先赴山東境內。應在魚臺滕縣兩邑所屬。於運河附近之處。擇要駐紮。盛字營應紮於徐州府。樹字營現紮韓莊。與銘營可遙爲犄角。米糧火器。由運河轉輸。亦尙方便。能鄆

曹等處之賊。前來撲營。貴軍穩紮隱打。當可無虞。俟本部堂到韓莊關後。再行酌量調度。

潘道鼎新稟陳言北方用兵宜用車戰各情

所論北方形勢。主客機宜。悉中窾要。惟車戰一事。殊未易言。昔人如房琯。行之不善而敗。李忠定請以車制頌京。東西製造教閱。而南渡諸戰。未聞以車制勝者。咸南塘練兵實紀。孫高陽車戰百八。言之詳矣。而二公守邊。亦不聞車戰之益。即近時胡文忠公。欲募二千人爲三營。每營創造小車二十架。每架置礮一尊。謂沿江征剿。大有奇境。亦卒無成。本部堂到徐後。擬製造車輛。購養牛馬。以利糧運。若以之臨敵。終患推挽不靈。未敢嘗試也。至用兵以得人心爲第一義。非獨今日勤捨爲然。古來平寇亂者。莫不皆然也。

浙江處州鎮陳國瑞稟暫駐歸德并餉項軍火如何籌措由

該鎮所部。業奉諭旨。飭赴歸德。軍火器械。自應在河南糧臺支領。至八千人之餉。爲數甚鉅。斷非每月二萬。所能敷用。况二萬金之協餉。尙屬不甚可靠。古諺有云。兵馬未動。糧草先行。此萬不可易之理。若以八千之衆。全無確實之餉。將來因飢生變。禍端不測。本部堂所部皖南各軍。近日因餉絀鬧事。紛紛閉城。毆官。居民逃避。焦灼之至。該鎮宜就近與豫撫部院熟商。若餉項極絀。固宜及早遣撤。即餉項稍優。該鎮濫收敗兵游勇。亦宜遣撤大半。或酌留二三千人。庶免弗戢自焚之患。不可貪部卒衆盛之名。而忘飢軍殃民之慮也。

再前於閏五月初間。連接該鎮二稟。一件言自嘉祥解圍。回至濟寧。勇丁與劉軍門部下械鬪。一件言陳振邦招勇未到。不能迅速拔營。本部堂所以未遽批答者。因心中有千言萬語。欲與該鎮說明。又恐該鎮不好聽逆耳之言。是以遲遲未發。茲該鎮稟商餉銀軍械等事。急欲立功報國。而恐諸事掣肘。其志亦可憫可敬。特將本部堂平日所聞之言。與玉成該鎮之意。層層熟籌而敬告之。本部堂在安慶金陵時。但聞人言該鎮劣迹甚多。此次經過淮陽清江鳳陽。處處留心察訪。大約毀該鎮者十之七。譽該鎮者十之三。其毀者則謂該鎮忘恩負義。黃鎮開榜。於該鎮有收養之恩。袁帥欲奉該鎮正法。黃鎮夫婦極力營救。得保一命。該鎮不以爲德。反以爲仇。又謂該鎮性

好私鬪。在臨淮與袁帥部將屢開明仗。在壽州與李世忠部下開明仗。殺死朱杜二提督。旋在正陽關捆縛李顯安。搶鹽數萬包。在汜水時。因與米船口角小爭。特至湖西調隊二千。與米商開明仗。知縣叩頭苦求。始肯罷兵。又謂該鎮騷擾百姓。凌虐州縣。往往苛派州縣。代辦軍裝號衣等件。在泗州毆辱知州潘司。張光第同在一處。躲避床下。旋即告病。在高郵勒索水脚。所部圍至內署搶掠。合署眷屬。跳牆逃避。知州叩頭請罪乃息。又謂該鎮吸食鴉片。喜怒無常。左右拂意。動輒處死。并有因一麻油餅殺廚子之事。藐視各路將帥。信口譏評。每每梗令。不聽調度。動稱我將造反。郭寶昌之告變。事非無因。本年四月曹南之敗。與郭寶昌同一不救主帥。同罪異罰。衆論不平。凡此皆言該鎮之劣迹者也。其譽者則謂該鎮驍勇絕倫。清江白蓮池蒙城之役。皆能以少勝衆。臨陣決謀。多中機宜。又謂該鎮至性過人。聞人談古來忠臣孝子。傾聽不倦。常喜親近名儒。講誦孟子。又謂該鎮素不好色。亦不甚貪財。常有出世修行。棄官爲僧之志。凡此皆言該鎮之長處者也。譽該鎮者如僧督吳帥。河南蘇藩司。寶應王編修凱泰。山陽丁封君晏。靈璧張編修錫嶸。皆不妄言之君子。毀該鎮者。其人尤多。亦皆不妄言之君子。今不復悉舉其名。本部堂細察羣言。憐該鎮本有可爲名將之質。而爲習俗所壞。若再不加猛省。將來身敗名裂而不自覺。今爲該鎮痛下針砭。告戒三事。一曰不擾民。二曰不私鬪。三曰不梗令。凡設官所以養民。用兵所以衛民。官吏不愛民。是民蠹也。兵將不愛民。是民賊也。近日州縣。多與帶兵官不睦。州縣雖未必皆賢。然帶兵者既欲愛民。不得不兼愛州縣。若苛派州縣。供應柴草夫馬。則州縣攤派各鄉村。而百姓受害矣。百姓被兵勇欺壓。訴於州縣。州縣轉訴於軍營。若帶兵者輕視州縣。而不爲民申冤。則百姓又受害矣。本部堂統兵十年。深知愛民之道。必先顧惜州縣。就一家比之。皇上譬如父母。帶兵大員。譬如管事之子。百姓譬如幼孩。州縣譬如乳抱幼孩之僕媪。若日鞭撻僕媪。何以保幼孩。何以慰父母乎。聞該鎮亦無仇視斯民之心。但素好苛派州縣。州縣轉而派民。又好凌虐弁兵。弁兵轉而虐民。焉得不怨聲載道。自今以後。當痛戒之。昔楊素百戰百勝。官至宰相。朱溫百戰百勝。位至天子。然二人皆慘殺軍士。殘害百姓。千古罵之如猶如犬。關帝岳王。爭城奪地之功甚少。然二人皆忘主愛民。千

古敬之如天如神。願該鎮以此爲法。以彼爲戒。念念不忘百姓。必有鬼神祐助。此不擾民之說也。至於私相鬪爭。乃匹夫之小忿。豈有大將而屑爲之。本部堂二年以前。即聞該鎮有性好私鬪之名。此名一出。人人皆懷疑而預防之。閏五月十九日之事。銘字營先破長溝。已居圩內。該鎮之隊。後入圩內。因搶奪洋鎗。口角爭鬪。銘營殺傷該隊部卒甚多。劉軍門喝之而不能止。固由倉猝氣忿所致。亦由該鎮平日好鬪之名。有以召之耳。聞該鎮好讀孟子養氣之章。須知孟子之養氣。行有不慊則餒。曾子之大勇。自反不縮則端。縮者直也。慊者足也。端則不壯。餒則不強。蓋必理直而後氣壯。必理足而後自強。長溝起衅之時。其初則該鎮理曲。其後則銘營太甚。該鎮若再圖私鬪。以洩此忿。則禍在一身。而患在大局。若圖立大功。成大名。以雪此恥。則弱在一時。而強在千秋。昔韓信受胯下之辱。厥後功成身貴。召辱己者而官之。是豪傑之舉動也。郭汾陽之祖墳。被人發掘。引咎自責。而不追究。是名臣之度量也。該鎮受軟禁之辱。遠不如胯下及掘墳之甚。宜效韓公郭公之所爲。坦然置之。不特不報復銘營。並且約束部下。以後永遠不與他營鬪爭。能忍小忿。乃成大勳。此戒私鬪之說也。國家定制。以兵權付之封疆將帥。而提督概歸其節制。相沿二百餘年矣。封疆將帥。雖未必皆賢。然文武咸敬而尊之。所以尊朝命也。該鎮好攻人短。譏評各路將帥。亦有傷於大體。當此寇亂未平。全仗統兵大員。心存敬畏。上則畏君。下則畏民。中則畏尊長。畏清議。庶幾世亂而紀綱不亂。今該鎮虐使其下。氣凌其上。一似此心毫無畏懼者。殆非載福之道。凡貧家之子。自恃其竭力養親。而不知敬畏。則孔子比之於犬馬。亂世之臣。自恃其打仗立功。而不知敬畏。則陷於大戾而不知。嗣後該鎮奉檄征調。務須恪恭聽命。凡募募勇丁。支應糧餉。均須稟命而行。不可擅自專主。漸漸養成名將之氣量。挽回舊日之惡名。此不梗令之說也。以上三者。該鎮如能細心領會。則俟軍務稍鬆。前來稟見。本部堂於覲面時。更當諄切言之。務令有益於該鎮。有益於時局。玉成一名將。亦本部堂之一功也。若該鎮不能細心領會。亦有數事當勒令遵從者。第一條八千勇數。必須大爲裁減。極多不准過三千人。免致雜收游勇。飢潰生變。第二條該軍與淮勇及英康等軍。一年之內。不准同札一處。第三條該鎮官銜。宜去欽差字樣。各省協餉。均歸河南糧臺轉發。

不准別立門戶。獨樹一幟。仰該鎮逐條稟復。以憑詳晰具奏。至於所述毀譽之言。孰真孰僞。亦仰該鎮逐條稟復。其毀言之僞者。儘可剖辨。真者亦可承認。大丈夫光明磊落。何所容其遮掩。其譽言之真者。守之而加勉。僞者辭之而不居。保天生謀勇兼優之本質。改後來傲虐自是之惡習。於該鎮有厚望焉。

統領銘字營劉軍門銘傳稟連日進剿擒逆情形

貴軍自徐州過行。力破崔家樓孫家寨等處。賊衆聞風膽寒。據周鎮稟報。雒河左右之賊。均於初三日。向西北一路遁去。雖未大受懲創。而英藩司一軍。保全無恙。淮軍先聲奪人。解此重圍。深堪嘉慰。現在賊蹤所向。尙無準信。想已西竄日遠矣。貴軍應在宿蒙亳一帶。擇一柴草較多。轉運稍便之處。駐紮休息。廣羅紳耆。訪問三屬著名。擒首。勒令該圩交出。如不交出。即將該圩勦洗。仍用打孫家寨之法。其交出者。則斬其匪首。而餘衆概予不問。其圩首素非稔惡。而其下有甘心爲匪者。則令圩首捆獻一二人斬之。而仍免圩首之罪。該軍冒暑奔馳。辛苦太久。本應休息一兩月。以養土氣。趁此閒暇之時。清查三屬圩寨。殺一擒卽除一害。清一圩卽少一患。此是治擒之根本。臨陣擒斬百人。不如清圩時斬數人之得當也。惟清查圩寨。其中有許多條目。訪問紳耆。亦須優以禮貌。給以薪水。又恐有仇扳袒庇等弊。尙須定一章程。出一告示。希貴軍門於賊竄已遠之後。輕騎前來臨淮。面商一切。

署安徽藩司何璟臬司李文森稟陳管見數端伏候裁擇由

細閱來稟。大要謂皖北捻患正盛。皖南兵禍方興。兵禍實在腹心。捻患譬猶肢體。具見該司等通籌大局。智慮周詳。良爲佩慰。自龔營金口之變。各軍紛紛效尤。婁軍譟於上杭。韓軍譟於會昌。李成謀蔣凝學兩軍。譟於湖北。訓義兩軍。譟於皖北。而金唐朱各軍。譟於皖南。然當皖南十六營鼓動時。獨義從左一營。帖然無恙。聞該營官楊啓益。平日發餉。足服衆心。故臨亂不惑。是各營之變。其罪本不盡在兵勇。然兵勇以譟亂爲慣技。狃於故常。毫無懼懼。其患何所底止。自須大加懲創。再議遣撤。擬俟唐鎮抵營後。一面剴切曉諭。一面勒令金道唐鎮。每營交出倡亂者一二人。解至大營。嚴訊究辦。乃可分別撤留。來稟請飾唐鎮將滋事之人交出。與此閒意見相合。惟勒令交

人。又必紛紛煽誘。甚至激成大變。如金口一起。亦屬意中之事。而外間亦將以息事安民。辦理不善等語。相勸相嚇。仰該司等堅持定議。鑒於本部堂不得已之苦衷。相與剛斷從事。不復參以一前一卻之說。以淆衆聽。每營除峯辦一二人外。餘仍全發欠餉。告示中亦當詳明言之也。唐鎮未到之先。仍當秘密爲要。撤勇即補兵額之說。近日多建此議。不知湘軍營制。口糧每月四兩二錢。一倍於馬兵。三倍於守兵。守糧月支一兩。斷不足以供衣食。且參將都守。率皆充哨官什長。以補兵缺。斷不情願。本部堂於上年七月二十九。曾將此義覆奏一次。至副鎮以上。品秩較優。缺額益少。以提補鎮。以鎮補副。近來朝廷亦多通融補授。并未拘定成格。然保者數萬。而鎮副參游之缺。不過數百。何能鑿人之欲。江西段糧道。請將凡保之武官。概准在籍支食全俸。亦難籌此巨款。此等大患。只好待變生而救之。竟不能預立一法。以防變矣。本部堂北征之初。原擬駐紮徐州。行至清江。而搶蹤全竄皖北。則又改赴臨淮。調回劉銘傳一軍。由睢溪口進剿。周盛波一軍。由蒙城進援。周軍已於初三日解雒河之圍。劉軍亦將石弓山老巢攻破。該逆尙未知圖竄何路。日來淮水盛漲。已飭黃軍門統帶礮船。駛赴正陽潁州三河尖三處。與來稟所請令水師分布長淮者。亦正相同。本部堂初次奏陳大局。謂專用力於四省十三府州。厥後又奏擬於濟寧徐州。各紮勁旅一支。以運河爲運道。臨淮周家口各紮勁旅一支。以淮潁爲運道。另籌馬隊一支。作爲游擊之師。惟臨淮至周家口。相去太遠。現飭英藩司移駐潁郡。劉軍門駐紮周家口。該司等所慮之太和阜陽歸陳永城諸處。均在二百里內外。必可兼顧。以上各端。已行者必益求精密。未行者當次第舉辦。以無負該司勤相啓告之意。惟軍情瞬息千變。不知將來能如願以償否耳。

統帶吉中和厚等營李提督祥和稟新招勇丁潛逃懇札飭靈璧縣令飭差緝拏解轅究辦由

淮北之勇。初次應募。或不耐營規之拘苦。遂爾私逃。此次暫不緝拏。俟三月以後。再行按律懲辦。諺曰教子嬰孩。教婦初來。該提督務當督飭營官哨官什長。苦口訓導。一次不聽。則再教之。三教之。若語言不甚通曉。多說幾遍。務期明了而後已。本部堂之意。冀以湘軍之規模。開淮北之風氣。該兩營爲之倡導。先在孚其心志。次在教以規

矩總以耐煩二字爲要。久久自有效驗。

統領銘字營劉軍門銘傳稟三件

二十九三次來牘均悉。一件言到防日期。一件言請假治病。一件言添立馬隊。分條批答於後。一柴草爲軍中要需。刻不容緩。若非就地採辦。斷難應急。若令兵勇下鄉樵採。又恐滋生事端。有礙聲名。本部堂前於潘道鼎軍柴草一項。係咨請閩撫部院。札飭該處州縣採買供支。該軍五千五百人。加以長夫。每日約須柴二萬二千斤。草二千斤。貴軍在豫。自應一例辦理。仰候咨請吳撫部院。札行地方仿照辦理。如豫省斷不肯供應。請貴軍門自行價買。其錢自本部堂發給。一本部堂原奏之十三府州縣。開許及南汝光。均不在內。五月初九十三日兩摺。已咨行貴軍門矣。近七月初八日二十四日兩摺。仍係堅持初議。惟有時亦難悉拘成見。昨有一咨請貴軍門。於周家口前後左古三百里內。進止悉聽自爲裁酌。本部堂不爲遙制。誠以軍事變動無常。必須因機制變。故稍參活筆也。若洛陽以西。則轉運萬難。又恐空勞往返。故貴軍門不宜西去。不能不懇切上陳。兩摺鈔發閱看。一貴軍赴援上蔡。該逆聞風遁逃。未及痛剿。貴軍門引以爲恨。具見懷抱之偉。現因暑溼鬱蒸。舊疾舉發。皆由馳驅太久。積勞所致。斷不能不休息數月。藉資調養。惟刻下豫事甚棘。貴軍門聲望正隆。與近年楊鮑相埒。必須奏准。乃能回籍。應即在軍中調理。無庸請假回籍。貴軍門志在滅賊。撿逆一日不平。卽一日難釋此重任。古人有臥護諸將者。可做而行之也。另單開列之道員劉盛藻。記名提督唐殿魁。記名總兵黃桂蘭。畢乃爾。張景春。先行存記。俟有缺出。本部堂附片具奏。請旨簡放。一貴營添立馬隊。本部堂業經允許。茲已立張景春劉盛藻二營。以後只可添哨。不宜添營。馬隊以養馬爲第一義。寧可馬浮於人一倍。不可人浮於馬一匹。其營制管規。俟到徐後。定一妥籌章程。刊刻共守。貴部至二十日以前。小口糧之資。續到馬匹喂養之費。均照所擬辦理。另單所稱馬參領馬隊鍋碗帳棚等項。一無所有。仰候札飭清江轉運委員郭道。趕速解送。以濟急需。長夫一層。亦俟章程刊定後。一律辦理。凡委官太多。兵勇太疲者。概加裁汰。遣撤回旗。以期漸就範圍。徐州新到察哈爾馬隊。言語不通。無人管帶。春協領

既於該軍漸啓猜疑。候本部堂抵徐後。查看情形。酌量調用。

前皖南道張鳳翥稟二件

皖南各軍鬧餉情形。本部堂業已洞悉。該道既赴微休。則已既往赴難。則當懷必死之心。抱不屈之氣。韓昌黎之說。王庭湊。幸而得生。顏魯公之說。李希烈。不幸而死。二公者。禍福不同。而其初去之時。懷必死之心。抱不屈之氣。則一也。該道若抗辭不屈。其禍未必更甚於毆辱。若自度平日無恩無情。臨急畏死。則當時不宜輕於一往。卽曰韓顏之正氣。偉烈。非尋常人所易幾及。然危急之際。逼脅而書期票。既出之後。亦應自陳辦理之謬。稟商懲創之法。乃屢次來稟。專務借錢籌餉。一若各營之鬧。分所當然。但求善撤而不可得者。又久駐婺源。迹涉畏避。措置不善之咎。其焉可辭。此次本部堂查辦。具有苦心。蓋恐嚴札一到。立卽反叛。則該道首受不測之禍。故將該道之札。先發一日。撤委調省。以避凶鋒。將來結案之時。亦必將該道委曲苦衷。詳晰奏明。妥爲位置。但仍視兩軍之果叛與否。以爲輕重耳。

唐令翰題稟奉委辦理江寧全屬輿圖完竣緣由

輿圖各幅。均屬妥善。府縣交界處。尙能接合。說亦明晰。具見積學苦心。山川方位。以內府圖李圖爲藍本。而參用省志。府志。填繪。惟江寧淮安徐揚及省志。均無善本。舛錯頗多。必重加考訂。方可依據。淮揚裏下河水道。似以馮道立水利全圖爲藍本。其人半生力學。皆在河工。故運河各閘下河羣流交匯處。不差毫髮。該令所繪。河道源流。實所自出。尙不如馮圖之尺寸皆合也。明末靖口。已成平陸。靳文襄始開引河四道。張文端又加開太平引河。卽三岔河也。厥後名雖更易。而引河之有五如故。咸豐間又淤成平陸。目今似僅有一河。此圖府縣皆畫兩引河。不古不今。不知何據。江寧城西北太尖長。是稍疏處。然大段精緻完整。甚屬難得。長江圖皖圖。一并收到。前刻金陵圖。發去備查。

委查蒙城圩務朱令名環稟查明蒙城各圩情形繪圖呈候訓示由

該員在蒙業已月餘。所諭自多實情。各圩現有之圩長。原不能盡人而更換之。亦不盡人而皆不肯。是在該員等細心訪查。擇其可用者用之。不可用者去之。執照徐徐給發。亦無不可。然亦必有速發者。一概緩發則不可。既發之後。如查有劣迹者。仍可隨時更易。至稽查之法。在外從圩者。限一月回家。爲期稍迫。應予限兩箇月。私出從檢者。亦應限圩長以半箇月稟報。過期不報者。即以袒護論。仰商之林令。出示辦理。至所稱救病之源。莫如使之親信。然非勤而且廉。至誠惻怛。則不能使之親。非勸善懲惡一秉至公。則不能使之信。此其責專在委員矣。本部堂於稽查圩寨一事。派有專員。以印官自有地方公事。不能日日在鄉稽查。昨已頒發令箭。生殺予奪。委員俱得自由。本部堂但慮該員等之姑息。不慮該員等之專擅也。如有掣肘之事。專擅之謗。本部堂必能維持申理。該委員等亦須盡心竭力。而以巽慎出之。處處與印官和衷商酌。無論一年半載。總以辦到無餘孽爲止。無庸預爲推諉也。

委辦蒙城圩務桂令中行蒙城縣林令用光稟紳士幫辦圩務并渦陽地界請發執照由

守備陸懷武。都司魏大用。准其幫同辦理西北三鄉圩務。惟分別良莠。須廉明而兼細心之人。方能無枉無縱。若一味任性輕率。必不濟事。魏都司已作兩處汛官。尙不甚沾染官場氣習否。告示稿甚好。淺顯通暢處。幾有王陽明呂新吾之風。特旃懇真切處不及耳。直須設身處地。譬如自家住在蒙城。親族鄰右。一家爲檢。百家受累。不能不苦勸親鄰。以保身家。則立言自更真切矣。當面教誡紳耆時。亦宜常存此意。至囑至囑。

臨淮營務處張編修錫燦呈酌定軍船條規緣由

任法不如任人。大部之法。可謂多矣。而書吏之弊更多。臨淮攜船一事。本部堂所恃者。惟在貴編修與劉鎮二人之心耳。心不公明。則雖有良法百條。行之全失其本意。心誠公明。則法所未備者。臨時可另增新法。以期便民。所議船票一條。儘可不必。第三條如遇有船可換之站。准託地方官代雇更換。尤滋弊端。書差之留難需索。更有甚於營弁也。所稱得乙放甲。得丙放乙。果有實事可指否。此等應與劉鎮商明。會銜呈請。乃爲妥叶。

委辦亳州民圩事務李丞炳濤薛令元啓亳州知州李孟荃稟稭領令箭并開用關防日期由

亳州向爲撿逆巢穴稽查民圩較他縣更須認真亦較他縣爲難辦該員等但當徐以圖功不可操切從事凡地方之頑梗者開導之紳董之不妥者更換之自守以廉而濟之以勤無論一年半載總以辦到無餘孽爲止本部堂於此次查圩之事所以使印委各員合辦者以印官呼應較靈也所以責重委員者以印官不能日日在鄉也委員有薪水辦公銀兩親兵書識所以示絲毫之擾於民也今該牧欲以查田之事與查圩之事同時並舉敢捐錢文以爲辦公經費合兩事爲一事大非本部堂立法之微意各圩紳董清查戶口辨別良莠其事甚繁亦無暇再查田畝且愚民易惑難曉將謂查圩之事專爲敢捐起見何以使之從忠革薄與印委各員相親相習乎稽查民圩除紙張外亦無多須經費如果委員經費不足儘可直稟本部堂酌量加增不惜重賞期於不取民間分文斷不宜以查田之事混而爲一以致滋弊端也

前浙江鹽運司李榕等會詳遵札審訊探買戰馬委員副將蕭以德都司馬長清互控一案議擬緣由

副將蕭以德奉委帶同馬長清出口買馬蕭爲沿途彈壓照料之員馬爲口外熟識探辦之員不思和衷共事輒以爭擅利權互相訐告本部堂前以買馬爲重批令馬長清獨辦其事該都司買馬回南沿途自派前站處處藐視蕭副將雖據供收受雄縣折辦麵草銀兩未曾逾額而倚勢作威情狀業已全露所控蕭以德向索銀六百兩訊無實據蕭以德通共僅支銀六百七十餘兩而部費會票費川資等項均在其內斷無侵蝕六百元之事馬長清首先誣控厥咎較重蕭以德所領營糧臺銀四千零五十兩查無短少其寄家之銀指爲代自他人或尙可信惟於到口之日挾制馬長清幾誤公事亦屬可惡馬長清應參劾二級以守備降補蕭以德應參劾一級以參將降補用示懲警惟念此次所買之馬尙屬龐壯較常略佳營務處業經驗收之六百九十四匹准照例給價銀十三兩五錢由臺先發足六千九百兩其餘每匹應補三兩五錢俟緩數日再行全發仍勒令蕭以德馬長清再行出口買馬一次以試該二員之孰優孰劣二員各執一票各發銀三千兩先後進京赴北口探買將來買就時同

營。執遲執速。馬匹孰肥孰瘦。在途孰爲安靜。孰爲騷擾。以定二員之優劣。如其馬肥回速。在途安靜。即將此次應參之案。加恩寬免。如其馬瘦回遲。在途騷擾。蕭以德除參降一級外。再行加參革職。馬長清除參降二級外。再將此次應找之馬價。罰扣一千兩。仰該司道等剴切傳知蕭副將馬都司遵照。

委辦蒙城圩務桂令中行稟查關東鄉鄒家圩情形

鄒家圩從逆已久。鄒老金竟敢挈家。自捨來歸。妻妾之所自來。皆不可問。又與雉河之鄒目往還不絕。其爲甘心從逆。已無疑義。鄒學禮曾爲苗沛霖局董。亦非善類。嘗此立法之始。若不將居心叵測之人。立予誅鋤。以後必節節阻撓。仰該員等將鄒老金與雉河之鄒目。一并嚴密查拏正法。鄒學禮如實係莠民。亦卽正法。曉諭各圩。以示懲戒。至歸併之法。稟中不甚明晰。將此圩鄒姓及衆姓三百餘戶。全徙於附近之他圩乎。抑不僅徙入一圩。而分徙數圩。借他姓以鈐制鄒姓乎。告示四條中。本無令不可靠之圩。遷併他圩之條。後因林士班有併圩之稟。札飭該員等。亦但令小圩歸併大圩。初未嘗令莠圩併歸良圩也。告示有云。入莠冊者在籍則擒拏正法。該員等但當遷示立誅莠民。如全圩皆係莠民。請兵勦洗可也。不嘗勒令併圩。於告示之外。另立新法。使民無所適從。一圩至三百餘戶之多。其不願遷乃屬常情。稟中所稱懇之再四者。僅鄒姓不願遷乎。抑衆姓皆不願遷乎。除鄒老金鄒學禮外。鄒姓之甘心從逆者。究有若干。能一一訪查其名乎。仰迅速稟以憑核奪。

委辦阜陽圩務尹牧沛清稟查明圩寨分別去留緣由

該牧等稽查圩寨。於西鄉各圩中。畫出段落。互相圍繞。尙屬有條不紊。惟西鄉十四團五百八十七圩。據所稟之數核之。留者二百八十圩。去者乃三百零七圩。一鄉之中。圩寨平毀大半。推之四鄉。去者幾千餘寨。與本部堂四條告示。殊不相符。本部堂告示中第一條。堅壁清野。第二條。分別良莠。初無平毀之說。厥後因林士班之稟。始批令將零屋不能自存之圩。酌量歸併。然亦須因地制宜。不強人以所難。非謂將良莠不齊之圩。一律去之也。大凡一圩之中。或房屋堅實。而不易遷。或田地就近。而不肯遷。皆人之常情。該牧等須試爲設身處地。期於一令之出。

蒙即遵行。禮所謂知事人。然後能使人也。且良莠之不齊。處處皆然。不獨此三百零七圩。其准留之圩。果皆良乎。一圩之中。著名匪人。不過數人。嚴奉正法可也。若全圩從檢。派兵洗之亦可也。斷無以平毀爲查辦之理。仰尹牧即將經手事件。交與程令作速來徐。本部堂面詢一切。再行核示。

委辦蒙城圩務桂令中行稟查閱渦河以北各圩情形。并開摺繪圖呈鑒由

蒙城習於從檢。陷溺已深。有非法令所能止。全賴該員等不憚煩勞。苦心訪察。苦口開導。明之極而才略生焉。誠之極而感化見焉。即多殺匪黨。亦須自明字誠字中做出。至於圩長之賢愚。圩寨之平否。儘可從容查辦。而以有恆持之。不患其無成效也。

委辦亳州查圩事務薛令元啓李丞炳濤稟查辦各保情形 以下爲同治五年北征行轅之事

該員等所論稽查情形。似尙認真辦理。惟各圩怙惡不悛之徒。既有所聞。應即隨地隨時。擒拿正法。該員等又謂恐此有所發。則彼有所逃。欲俟清釐既畢之後。同時查拏。不知亳州地面甚寬。該員等帶人甚少。斷無同時能拏許多之理。各匪徒轉得從容颺去。殊屬因循姑息。大負委任。必須隨時擒拏。使各怙惡者知在外爲賊。即不得在家爲民。尤不得去來自由。混其身於時。捨時民之閒。總以當幾立決。購線捕誅爲主。至各圩應去應留。該員等於經過時。當已察酌情形。胸有成竹。亦貴當幾立決。無待於各鄉紳董之會議。致滋紛呶也。

受業陳枝蓮賀年稟一件并陳辦理保甲與舉義學由

該令辦理保甲。與舉義學。與諸生講論文藝。於勤字已能切實用功。嘉平之月。詞訟減少。亦收勤字之效。至於廉之一字。其效先見於宅門內之四項人。次見於頭門內之二等人。卻無明效大驗。見於百姓之身。挂於百姓之口。如必欲百姓頌官之廉。則不免於矜炫矯飾。反非出於自然。可以持久之道。故勤可以得名。廉則不宜有名。此中最貴體貼。四川循吏。現有幾人。宜擇一二深交而觀摩之。近人張文端之教子弟。汪龍莊之論良吏。皆以取友爲要。不可不師其意也。

候選訓導計業毛印堂候選直隸州州判竇鉅稟分赴宛汝查辦圩寨由

據稟已悉。本部堂在徐州啓行時。本意一月有餘。即可由歸陳以達於周家口。不料行抵濟寧。適值張逆北竄。繼又益以任頹等逆。現均聚於鄆鉅濮范之間。近日以全力與該逆爭扼運河。使不得東渡。以擾完善之區。劉周諸軍已到。日內必有大戰。不知能否得手。赴豫之期。遙遙莫定。該員等自應將曉諭圩寨事宜。先期舉辦。該員等此次愬愬入汴。所過之處。不過貼告示一張。與圩長多不得見面者。形同逆旅。自難使民間共信。必須在所經之州縣。每處多盤旋幾日。苦心誠求。苦口開導。總須辦到圩寨。釋去疑慮。兵民一氣而後止。若謂開歸陳數百里之廣。數千圩之多。其中無一肯與湘淮軍通氣之圩。圩長無一可與言之人。此理究不可信。若遠分三道入洛入宛入汝。是猶掘井尙未及泉。而欲改掘數處。以求速效。不知頭緒愈多。用力愈勞。愈無及泉之期。該員等仍當專力於開歸陳三府。擇一易辦之縣。從切實處下手。一縣辦有成效。然後再移他縣他郡。至於賢才之有無。不可預必。如有灼見。開單存記。候本部堂到豫後。察看委用。求賢以治本。諭圩以治標。二者兼營。其餘力不能做到。分不應與聞之事。不管可也。

銘字營劉軍門銘傳稟軍抵周口休息兩日緣由

張總愚股匪。向聞不如任頹一股之強。然我軍日來與戰三次。初四獲勝。初六初七。即有兩次挫敗。張逆凶悍如此。况任頹等逆人數較衆。其悍過之。雖經潁州苑寨兩次。邀擊獲勝。而并未傷其精銳。豈肯輕自散去。其沿途逃散者。不過新擄之衆耳。該逆所到之處。擄人擄糧。彼散此聚。於人數仍屬無損。自成豐以來。辦此賊者。不曰勢極窮蹙。即曰諒茲小醜。不難指日蕩平。而十餘年來。賊之猖獗尤甚。僧邸以馬隊擅長。而前後被擒奪去馬匹。至四五千之多。淮軍以洋槍擅長。而昨亦被擒奪去百餘桿。賊勢日熾。我輩自應倍加警惕。明末流賊之患。亦係旋散旋聚。旋滅旋起。後遂至於不可收拾。貴軍門老於軍旅。諒必見及。斷不宜輕視此賊也。

全軍營務處李副將昭慶呈軍抵嘉祥城門不開請飭行東省州縣遇有官兵到境勿得堅閉城門由

查張逆大股。初二夜棄鉅野之太平集。向西北竄去。初三日遂撲鄆城。初四日潘臬司一軍。接仗於城西十餘里之礮溪渡。是逆蹤距嘉祥城有百餘里。該軍初五日馳抵城外。黃令何得開門不納。該令以地方瘠苦。不能供應兵差。儘可當面說明。本部堂近在濟寧。亦可稟明。斷不強令應差。至於堅閉城門。絕禁出入。則大不可。并不出城稟見一次。尤屬荒謬。兵勇亦皇上之赤子。城池乃皇上之城池。原非該令所得而私。似此行爲。實出情理之外。東豫兩省民間圩寨。本已恨兵如仇。若各州縣再爲之倡。則以後行軍。處處皆成荆棘。實屬有礙大局。仰候咨請閩撫部院。將嘉祥黃令。即行撤委奏參。以示懲警。

張編修錫嘯函牘一件并另呈覆現在籌備各事宜由

貴編修於回營後。極力整飭。籌布防守事宜。諸臻允協。良以爲慰。其所陳八條。惟第六條絕賊糧。法非不善。然斷非命一委員。張貼告示。所能做到。臨淮百餘里內外。亦恐號令有所不行。存糧不惟過石。違者以通匪論。恐委員即借此以擾民生事。雖有愛民之政。亦須出以肫誠委曲。若惟恐民之不便者。王介甫不知此義。故青苗雇役。其志亦將利民。而遣使非人。適以害民。且存糧太少。必不能辦到。凡出一令而僅託空言者。不出可也。

統領老湘營劉鎮松山稟遵批前進追擊擒逆由

擒逆大股。逼近湖團。該軍甫經出隊。即行颺去。殊可憤恨。刻下該鎮。既已全部拔動。作爲游擊之師。應即尾追緊躡。期於力戰數次。獨當一路。不必依傍他軍。以成功。度該鎮之才力。足以辦此。會商進剿之說。不過使彼此聲勢聯絡。使該逆有所牽制。而我得專力一方。至於臨敵應變。則非他人之所能爲力也。大抵打仗。貴於自立。不可存借助將伯之心。使弁勇稍生怠忽。謀事貴於謙下。須常存廣詢求助之心。使他軍樂於親附。二者看似相反。實則相成。均不可少。至囑至囑。

老湘營劉鎮松山稟報剿敗巨股擒匪大獲勝仗由

曹縣之役。該軍初次與擒相遇。鏖戰終日。卒以穩慎獲勝。力遏凶鋒。欣慰無已。本部堂屢詢擒匪長處。在馬隊。四

面包圍。騎賊好用大刀長棒。步賊好冒煙衝突。然終以未能目覩。恐致隔膜。今該軍經此大戰之後。於賊之所短所長。自必一一了然。究竟揀衆伎倆。在粵匪諸僞王中。於何酋最爲相似。官軍宜以何法制之。仰熟思稟復。

候選訓導計崇稟呈豫中採訪記略摺

該員在汴已久。於豫中風土人情。嘗已洞悉。各處圩寨。如何而後可以禦賊。如何而後可與官軍相安。本部堂前次發去之批。是否接到。稟中一字不題。而忽發此題外之論。洋人之患。此天所爲。實非一手一足所能補救。本部堂分內之事。現在專重在勦辦捻匪。但使捻匪之凶餓。少減一分。即爲朝廷釋一分之憂勞。該員分內之事。現在專重查辦民圩。但使兵民疑團稍釋一分。即爲本部堂寬一分之責任。此外非分內而又萬難做到之事。不必多管。成大事者多在銖積寸累上用功。如殷浩呂頤浩輩。志非不大。其究何嘗有分寸之補。該員若專事高掌遠矚。竊恐一無所成也。採訪記略摺存閱。

盛字營周鎮盛波稟同毫就近發餉及全軍拔隊赴豫勦賊由

數月以來。該鎮攜行隊二千餘人。擊賊雖數次獲勝。而該逆究未大受懲創者。未嘗非人數太單之故。此次同毫將月餉趕放。全部悉拔以行。期與此賊縱橫馳逐。兵力既厚。各將士膽氣更壯。即該鎮亦無內顧之憂。從前飽軍門。近日劉軍門。皆不肯分兵。行則全部俱行。戰則全部俱戰。爲賊所畏。總由大力盤旋。不僅出零隊翦尾股。小吹小打而已。該軍既作游擊之師。自後須奇正并用。正則排開大隊。苦戰竟日之類是也。奇則黑夜切營。專截輜重之類是也。望好謀而善用之。

盛字營周鎮盛波稟奉到諭賜白玉翎管各件懇附片具奏代謝天恩由

來稟已悉。御賞翎管撥指等物。業經祇領分藏。該鎮係實缺人員。自應具摺率同胞弟謝恩。候即代辦陳遞。嗣後該鎮兄弟。受恩愈渥。報稱愈難。益當筋厲戎行。力圖滅賊。公則紓朝廷之憂患。私則保昆季之勳名。本部堂於該鎮實有厚望。乃近聞各處輿論。於該軍不免微有訾言。二月間賊由淮州東竄。該軍會由淮西至杞縣。聞賊將至。

仍即折回。未與賊迎戰。言該鎮有家眷住歸德城內。都司高琢家欲入該軍者。皆賂高琢以進。故該軍頗染豫兵習氣。三月內該鎮赴東省勦賊。營二十四。賊氛逼近歸德之時。營內有婦女數十人。皆蘇常裝飾。由西北兩門冒雨入城。見者深以爲異。又其時附郭東西。時見邊馬。適該鎮新招馬。勇中有孫姓者。日與四五人躍馬出城。不著號衣。因此鄉民聞有謂馬勇冒賊者。又聞該鎮由山東回歸德。途經劉家口。該寨不肯開門。遂將該寨之人責打。聞者亦遂譁然。四月初旬。賊犯歸德境內。該軍拔營赴亳。不救歸德之急。宋人怨之。如此之類。雖係傳聞之詞。未可盡信。然亦未必盡出無因。本部堂實用憂慮。一則以豫中兵民。仇隙已久。全賴該鎮等以節制之師。推示大信。使民間漸釋疑團。聯爲一氣。若該鎮等染豫軍積習。則以後更有何人挽回風氣。一則以淮勇各軍。經李爵署部堂。與各統領經營數年之力。始成今日規模。始成今日紀律。斷不可令絕好之聲名。因數事而貽人口實。履霜堅冰。不可不慎。該鎮兄弟。能謀善戰。治軍嚴明。久爲豫人所欽服。仰將以上各節查明。如實有其事。即行懲儆。更政。不特該鎮兄弟。自保令名。卽與本部堂曉諭圩寨之告示。亦不違背。與李爵部堂訓練淮軍之苦心。亦不辜負矣。仍仰逐層稟復。

統領老湘全軍劉鎮松山
統領星字吉中營朱啟式

稟軍抵王家後林遇賊接仗獲勝由

王家林之捷。昨於該鎮等初六日稟內。批令補具備案。今此稟已到。卽無庸再具矣。該鎮等軍。長處全在穩持。擊隊伍不亂。鎗礮不斷。故能制此悍賊。從此由穩而加以以猛。隊伍不僅整於排立之時。而并能整於追逐之時。當更可立偉績也。我軍長矛。與賊矛對刺對撥時。究竟能勝賊矛否。便中再一稟復。

銘字營劉軍門銘傳稟防河事宜俟抵周口與潘張二軍通力合作由

防守沙河之策。從前無以此議相告者。貴軍門創建之。本部堂主持之。凡發一謀。舉一事。必有風波磨折。必有浮議搖撼。從前水師之設。創議於江忠烈公。安慶之圍。創義於胡文忠公。其後本部堂辦水師。一敗於靖江。再敗於湖口。將弁皆願去水而就陸。堅忍維持。而後再振。安慶未合圍之際。祁門危急。黃德糜爛。羣議撤安慶之圍。援彼

二處。堅忍力爭。而後有濟。至金陵百里之城。孤軍合圍。羣議皆恐蹈和張之覆轍。即本部堂亦不以爲然。厥後堅忍支撐。竟以地道成功。可見天下事果能堅忍不懈。總可有志竟成。辦捨之法。馬隊即不得力。防河亦屬善策。但須以堅忍持之。假如初次不能辦成。或辦成之後。一處疏防。賊仍竄過沙河以北。開歸陳徐之民。必怨其不能屏蔽。中外必譏其既不能戰。又不能防。無論何等風波。何等浮議。本部堂當一力承擔。不與建議者相干。即有各豫兵不應株守一隅者。亦當一力承擔。不與豫撫部院相干。此本部堂之貴乎堅忍也。游擊雖勞而易見功效。易收名譽。防河雖勞。而功不甚顯。名亦稍減。統勁旅者不屑爲之。且汎地太長。其中必有極難之處。貴軍門當爲其無名者。爲其極難者。又况僚屬之中。未必人人諒此苦衷。識此遠謀。難保不有一二違言。貴軍門當勤懇懇懇。譬如自家私事一般。求人相助。央人竭力。久之人人皆將鑒其誠。而服其智。迨至防務辦成。則又讓他軍接防。而自帶銘軍游擊。人必更欽其量矣。此貴軍門之貴乎堅忍也。若甫受磨折。或聞浮言。即意沮而思變計。則掘井不及泉而止者。攻掘數井。亦不見泉矣。願與貴軍門共勉之。

盛字營周鎮盛波稟遵批確查各情由

該鎮今年二月。聞賊犯東省之信。披隊赴杞。迎勦張牛等逆。旋由蘭考一帶奔竄。尾股距杞不遠。該軍抵杞後。縱不能迎擊大隊。亦當略停二三日。派兵追其餘黨。始足以塞杞人之望。乃該鎮一聞賊蹤離杞。旋即退回。當時該軍尙無城武荷澤之戰。故未能取信於人。本部堂所聞輿論。即係指此次而言。非指三月十二。任賴股匪。由周口回竄一次也。迨張牛一股。二十七日與該軍接仗後。四月初至十三四日。在單縣礪山虞城盤踞十餘日。去宋近而去毫遠。該鎮初二日。自宋赴毫。正歸德喫緊之時。何謂旬後。方有警信。其時任賴股匪。由礪蕭肅寧宿桃。以趨泗州。亦并未入毫也。馬勇冒賊。即指陳明昇之勇而言。當賊氣密邇歸德之時。該營雖尙未呈冊驗點名。而各勇已自稱爲周軍矣。都司高琢既係職官。又租其屋。何得謂井無名目。受賄即無實據。然其人之向爲宋人所鄙。已可概見。攜帶家眷。雖非該鎮所爲。而出自左營官周提督壽昌。實屬有違紀律。應將周壽昌摘去頂戴。姑免參辦。

以示薄懲。淮軍聲名久爲蘇豫皖齊等省所稱。該鎮等莠業維持。猶恐不能鑿人之望。若似此不加警惕。始則漸鬆漸懈。繼則怙過飾非。以一軍之紀律日疏。連累諸軍之聲名皆壞。不特本部堂所不許。亦衆論所不容也。茲再苦口勸誡。望該鎮反躬內省。毋護前失。與諸將共相勉勵。改過不吝。卽是一大善矣。

委辦宿州查圩事務張牧雲吉稟詣查各圩沿途阻水延滯緣由

今年水勢過大。淮南北幾成澤國。圩寨傾塌者何可勝數。亂後子黎。遭此災厄。自顧不暇。何暇修築圩牆。自未可催督過急。所幸賊氛稍遠。倘可從容以圖。歸併圩寨。已是查圩第二義。凡圩戶至一二百戶者。卽難驅併。蓋安土重遷。人之常情。不如更易其圩長而教導之。圩長之抗傲不遵。情節較重者。枷之責之。尤重者殺之。本部堂查圩之始。其意專重在訪拏積匪。多殺數人。便足以靖根株而消反側。該牧查辦圩務。不爲不久。而誅戮僅及十人。此威信之所以不立也。若欲平毀圩寨。興衆動兵。則二百人不足以濟事。若搜拏積匪。則二十人已自餘。且各圩團民。亦可號召。事畢之後。酌予賞錢。本部堂原所不惜。蒙城亳州各員。多用此法以集事。觀該牧歷次來稟。於查匪一事。似尙未得要領。豈姑息以邀譽乎。抑才不足以勝任乎。卽如稟中所稱拏獲窩匪之魏廣春魏三科等。何以不殺。魏慶洪李昌林等。何以不革。革之而該圩長猶從中作梗。拏而殺之可也。蓋殺數壞人。而保全一圩。則其事易。因圩中有數壞人。而遂欲平圩。犯衆人之所不欲。則其事難也。現在既無可撥之營項。亦無餉項可以再募勇丁。所請添募二百營之處。礙難允行。

委辦宿州查圩事務張牧雲吉稟拏獲搶目高繼周等訊明正法由

正法高繼周等三犯。辦理漸覺認真。稍爲一慰。蒙宿情勢。雖有不同。而本部堂所辦係拏勾搶之匪從。并未翻苗逆之舊案。卽蒙城正法各犯。據桂令等節次稟報口供。亦皆常搶屬實。非以其從苗而殺之也。總之查圩之意。祇分良莠。不問苗搶。甘心爲莠者。雖概未從苗。亦在所必誅。洗心向善者。雖曾經從苗從搶。亦在所必釋。該員節次嚴飭之後。甫經振作。遽欲預爲惰人請命。以邀慈惠之名。而爲節勞之地。殊屬誤會題旨。本部堂并非好殺人者。

辦理之認真與否。自有輿論可訪。非計殺人之數。以較優劣也。

統領毅字營宋鎮慶稟防守黃河賊蹤偷挖未遂緣由

防河之議。順賈魯河以上。直守至京水鎮爲止。李撫部院來函。亦係如此。本部堂深贊其策。勝於原奏之所議。正擬與工分汎。該逆又分股東竄。只能暫緩河防。先檄銘鼎樹三軍。赴山東追勦矣。其西竄之賊。檄令霆軍與劉鎮之湘軍。劉楊之淮軍。跟蹤進勦。昨准李撫部院函稱。亦令該軍勦辦西路。不知能會合諸軍。力保河洛否。至本部堂所部各軍。惟劉軍門係建議守河之人。潘臬司贊成其事。故責成二人。修工守河。均未嘗稍有推諉。此外諸將。則紛紛推諉。均願游擊。不願防河。蓋防河者與工之時。荷鍤負土。十分辛苦。不比游擊者之半行半住。稍覺安逸。防河者工竣之後。保守汎地。厥罪甚重。不似游擊者易於報功。難於見過。故勇丁願行路。不願挑土。將領願做活事。不願做笨事。人情大類然也。聞該鎮樸實耐勞。向不取巧。既知守至京水鎮。可保黃河大隄。永無北顧之憂。卽應躬任其難。無令推諉者效尤可也。

鮑軍門超稟軍抵汝州偵探賊情由

昨接永寧縣稟。據稱九月二十二日。賊撲該縣。偃師縣稟則稱二十五日。賊又回竄宜陽西之三鄉鎮。現在無論賊竄何處。貴爵軍門。總以力勦西路一股爲主。總以本營專人確探爲憑。各路地方官探報。不足盡信。目前賊勢。東西分竄。東路任賴較弱。西路張逆較強。此人人所共知者。并非東路強而西路弱。若霆軍舍張逆而尋任賴。則外間必笑其尋弱者開仗。則霆軍之名稍損矣。貴爵軍門。務宜專心西勦。不可另作比較。凡賊在豫境河南兩陽兩府。陝汝兩州。均請跟蹤追勦。若賊入秦省。則不必越境勦辦。貴軍此次入豫。紀律嚴明。毫不騷擾。各處函牘。無不稱讚。此爲可喜。惟尙未與賊接仗。向來霆營敢戰之名。外間佩服者多。貴望者尤重。務須確探張逆所在。痛快一戰。以慰民望。若因山路崎嶇。轉運艱難。糧食不便。行走稍緩。則可。改勦東股。則不可也。

委辦蒙城圩務朱令名稟復蒙邑現在情形

宋鎮之言，是否可信。本部堂前次所批，本令該令等斟酌稟復，并未據爲定論。此稟所陳，確有見地，洵爲閩歷有得之言。以後仍須認真查辦。其有一線可原者，苦口開導，令其自新，費一番工夫，自有一番效驗。否則多殺虎狼，不爲損德。多刈稂莠，正以養苗。總不使嘗捨者，視同商賈，出入自由，乃可有轉機。至整頓營務，亦非空言所能做到。該令如查有真係捨首，而倚仗營中爲護符者，儘可指名密稟，聽候酌辦。

補用道王勳稟請咨商通行修築由

湘省功名太盛，元氣發洩，漸少誠樸之風。本部堂時切隱憂，所可慮者，不獨哥老會一端也。哥老會傳染甚廣，勾結秘密，然以目前時勢而論，挺身出爲戎首者，或尙無人。曾以此意商之李撫部院，亦謂逐漸消弭，可無大礙。該道情殷桑梓，具有遠識，惟修築寨堡一層，事經創始，豪情必難允從。且依山守險，此是防禦外寇之事。若本處內患一經築寨，譬猶醫者之引疾入內，會匪即可憑案以起事。據案以負嵎，防患而適以滋患，亦非萬全之策也。候錄此稟，函商李撫部院，相機酌奪。

鮑軍門超稟探聞賊又遁回京山天門德安一帶俟到棗陽後覘賊所向相機截擊由

初八初九十一二次來牘均悉。昨准曾爵部院來函，賊於十六日竄至義堂鎮，離德安城四十餘里，必向孝感大路奔竄。此次貴軍門自行奏明，先勦東股，仍未與賊一遇。朝廷必不以爲然。本部堂籌畫月餘，無兵入秦，尤覺無以對秦人。適接喬撫部院函稱，霆軍若由荆紫關入秦，轉恐逼賊愈西等語。十一日已改檄老湘營劉鎮，由潼關入秦。該鎮十四接信，十六拔營，年內計必入關，極爲迅速。西路有此援兵，已可慰秦中之望。貴軍門仍當勦辦東股，能將任賴痛勦數次，庶幾上可以對聖主，下可以免物議。一切進兵之機，宜就近與曾爵部院隨時熟商。本部堂與李爵大臣，均不造制，惟擒匪狡猾異常。我軍追勦宜速，進隊卻宜穩，仍須步步顧定後路，防其抄襲。今年六月，老湘營在上蔡等處大戰，聞貴軍門曾派人往看，想已得其大概矣。至探報尤爲要緊，最難確實。貴軍九月十六自南陽拔營，若徑赴魯山，儘可攔截張逆，不令入陝。乃因探報之誤，繞至裕州，失此機會。昨初十日至平林岩。

若趕緊進兵。十二三日。或可見賊接仗。乃因探報之誤。十一日折回棗陽。又失機會。以後務須多發探馬。到處探問。慎無輕聽人言也。

樹字前營劉克仁等稟統領張鎮捐軀救援未及會請參辦由

張鎮身先士卒。力戰捐軀。聞之曷深痛惜。該統領前在江南勦賊。迭著戰功。上年隨同北征。馳驅齊皖豫鄂四省。見其樸厚果毅。言不妄發。仁愛士卒百姓。出於至誠。方冀仔肩大任。戡定中原。不意追勦過猛。遽隕將星。賊斂日長。尤深悲憤。該營官等。救援不力。雖由賊勢過重。亦屬咎無可辭。一切戰狀。想李爵大臣。曾爵部院。先後詳細入告。本部堂亦當專案具奏。慰逝者於九原。張鎮靈柩回廬。不知應從何處登舟。汝寧至三河尖。可通舟楫否。若來周口。恐迂道太遠。至樹字全軍隊伍。應由營務處劉鎮。帶赴周口駐紮。聽候李爵大臣調度。本部堂已有函商之矣。

統領老湘營劉鎮松山稟張編修受傷殞命并戰仗情形 以下爲同治六年徐州行轅之事
統領和厚營李鎮祥

來牘已悉。貴軍初至西安。正值賊氛極熾之時。初六日馬部賊大股。猛撲七八次。我軍奮勇鏖戰。以遠道馳援之。客軍當凶斂方張之劇寇。再接再厲。已獲勝戰。而張編修竟以力戰殉節。聞之大慟。前年本部堂初招淮北勇丁。實欲逐漸擴充。於淮湘兩軍之外。另開生面。張編修能耐勞苦。文員中實無其匹。而性情之誠懇。志趣之超邁。學識之深遠。操守之廉潔。均能卓然自立。方冀養成大器。共濟時艱。不意千里赴援。一戰而死。浩然長往。齋志無窮。貴鎮少此幫手。軍勢愈孤。本部堂相離甚遠。尤不放心。務宜慎之又慎。切不可猛浪輕進。賊在西安附近。則宜傍城立營。保護省城。賊向西南。不可孤軍進追。或致疏失。賊至同朝一帶。則宜傍渭水河水立營。與晉軍常通聲氣。但能自立於不敗之地。總可徐徐圖功。敬字三營。護送張編修靈柩至徐州府城。本部堂祭奠後。再回靈璧本籍。張編修死事情形。即日專摺具奏。陳請優卹。并將身後各事。妥爲料理。以慰忠魂。仰即傳知敬字三營勇丁。并令該營官沿途嚴加約束。無許騷擾。留此令名。以慰張編修於九原。亦貴鎮所以報良友也。

銘字劉營軍門銘傳稟尹隆河接仗情形并請暫爲休息由

十五日之戰。以誤聽後路驚傳。分隊回顧。爲賊所乘。蓋撥隊旋行之際。賊匪見之。疑爲潰奔。卽士卒見之。亦疑爲失利。未必人人知爲抽隊回救後路也。唐鎮誠機鏡勇。失此良將。於大局實有關係。深堪悼惜。惟銘軍立營以後。從未挫衄。得此小挫。亦足生將弁之敬慎。而窮軍事之變態。無折肱不成良醫。無垂翅亦不成名將也。貴軍馳驅太久。此番必須休息整頓。想李爵大臣已詳示矣。

易守佩紳稟湖南援勦貴東各情形擬籌變通辦理理由 以下爲同治六年金陵督轅之事

該守行抵銅仁。體察情形。爲湘黔兩省亟籌變通之法。地勢軍情。瞭如指掌。所論苗教之長。客兵之短。亦多精當之論。惟所籌變通之法。欲以湖南之餉。責成貴東之官。收用貴東之民。則言之甚易。行之甚難。湘省援黔之兆。李周三軍。業已深入黔境。今欲改令回貴東六府。各籌戰守。非一二年難期有成。此局未成之前。湘軍遽撤。則匪勢亦將蔓延。湘軍不撤。則餉項無從另籌。一難也。鎮遠等六府。地有廣狹。費有多少。所論良是。該守意在收撫戰守屯墾三事。然收撫則非痛勦後。無從下手。戰守則選將極難。屯墾則其名最笑。而其實則雖有巨款。尙難奏效。前年李爵大臣。於常州辦理招墾。費錢二十萬串。究鮮實效。該守所稱六十萬金。無論湘省難籌此款。卽使有之。恐用以整理鎮遠一府。尙未必確有功效。若分給六府。少者月僅數千金。三事必一無所成。二難也。辦事總以得人爲主。稟中所稱六府。各得有體有用之知府。而又不計名位之升降。本部堂閱歷十餘年。目中尙未見有此等人。得一已足戡亂。安得同時六人之多。三難也。劉撫部院於該守素有國器之目。前經過金陵時。本部堂與之論及該府。必思所以盡其才。現已到湘履任。與該府熟商黔省之事。本部堂因多營難險。故於視事太易者。必爲諄諄勸誡。示之以難。告之以誠。該守不必因斯言而遽自退沮。亦不可忽視斯批。而輕議更張也。

江南提督李軍門朝斌呈復姓歸宗鈔函呈請核奪由

來牘具悉。貴軍門於始生之際。卽爲李氏撫養。艱難鞠育。至於成立。王氏本生父母。已隔絕不相聞問。事隔四十

三年。直至今歲。始有呈請歸宗之議。來轅具稟。茲又披閱所鈔李氏族叔傳誠等家信。其中所引典故。大半本於晉賀喬妻于氏表文。未必十分中禮。所述從前情事。稱王氏恩誼已斷。尙非過當之論。本部堂考核古禮。無與此案恰相脗合者。惟查古來名臣。如吳之朱然。本姓施氏。周逸本姓左氏。魏之陳矯。本姓劉氏。宋之葉夢鼎。本姓陳氏。卽當代名族。如嘉興錢文端公之先。本姓何氏。合肥李蔚大臣之先。本姓許氏。其後皆未歸宗。必有權衡於至當者。乃不爲世所譏。本朝言禮之書。惟秦文恭公蕙田之五禮通考。最博且精。其所引金史張詩一案。詩本李氏子。育於張氏。閱三十年始知。初議歸宗。終以張氏無子。遂仍其舊。秦公稱張詩爲孝。今貴軍門王氏本生之父母。尙有衆弟兄承祀。而李氏撫養之父母。別無主後。正與張詩之事相類。權度禮意。貴軍門應爲李氏後。不必歸宗。毫無疑義。惟於李氏別爲一宗。於王氏不通昏姻。一以報鞠養之深恩。一以明族屬之大義。本部堂嘗奏明立案。以爲貴軍門家業之緣起。至王氏二老。以垂暮之年。目覩貴軍門身躋通顯。追念前事。羨而兼悔。自屬常情。禮不忘其所自生。貴軍門天性純摯。必宜曲盡敬養之禮。恩義周至。斯兩全之道也。

馬鎮德順稟由周口拔營行抵台莊三里之黃林等情

勘檢自以馬隊爲最利。口外買馬到營。尙需時日。該鎮現統四營。能融洽一氣否。近時將領官階。多相等夷。難以分位相統屬。惟恃一片忠勇之心。臨危則居人之先。虛公之度。有利則居人之後。或者以德望爲同輩所推服。則所統屬可成一大支精騎。本部堂於馬隊一事。未能辦成。至今以爲憾事。該鎮熟習騎射。能於馬隊勦賊之法。實力講求。庶可爲本部堂彌縫闕憾。實有厚望。冀軍有唐提督仁廉。譚提督勝達。卽日當至徐州等處。亦望該鎮苦心與之聯絡也。

銘字營劉軍門銘傳稟追剿捻逆獲勝情形

十四日一戰。足以略寒賊膽。目下賊蹤游弋於宿桃境內。貴軍與之追逐。諒必又有戰事。如各軍能更番互戰。使賊不得休息。則軍事當有起色。昨李爵大臣鈔來貴軍門信稿。能於軍事棘手之際。神暇氣旺。具徵識力過人。惟

秋後賊無所掠。不打自散等語。猶未免視事太易。所望以銳氣辦賊。以小心慮事。古來才有成。有不成就。爭每在疏密二字。幸細參之。

銘字營劉軍門銘傳稟連日追賊獲勝由

貴軍門自灘上拔隊。十六日於安邱大獲勝仗。將賴逆一股。殲除殆盡。二十四日。復追至贛榆。斬擒益多。巨酋任柱。以計斃之。謀勇兼施。勳勞卓著。捻中去此悍寇。與昔年粵匪中去一四眼狗。情勢相同。曷勝忻慰。惟捻匪昔年既燬而復熾。屢衰而忽旺。未可遽存輕視此寇之心。仰更穩慎追剿。以竟全功。李爵大臣忍辱含詬。已逾數月。今當積憤少舒之際。尤望諸軍無忘臥薪之況也。

婁鎮雲慶稟副五營拔抵黃安尙須整頓等情

霆副五營。已抵黃安。稍以爲慰。營規整肅。以發餉公平。統領廉潔爲根本。該鎮來見時。本部堂誥誠再三。嗣後批發來牘。亦時時提及。不嫌煩複。本月初間。該鎮稟稱八箇月清發六箇月口糧等語。本部堂以爲該鎮實心辦事。但恐辦理不得法。故批令兩月以後。勇夫是否信服。再行稟聞。乃詳加訪察。該鎮辦理此事。除發食米外。僅發小菜錢。并未令每勇每夫。各發京摺。亦未出告示。營務處及營官。俱未商量。勇丁因此逃去二百餘名。軍心無不怨恨。此應嚴查者一也。該鎮於八營。每營提十八名。共一百四十四名。熊韓兩營務處。各占四十二名。該鎮占六十六名。各營官從而効尤。以致合營無公長夫。凡起軍裝米糧等事。卽派各營之勇。勇心極怨。此應嚴查者一也。營官哨官。皆接家眷。先在船上。近又接至黃安城內外。各哨官扣每勇銀若干。作坐船費。甚至霆峻副左營。唱戲取樂。該鎮親至往觀。毫無顧忌。此應嚴查者一也。以上各節。本部堂查訪確鑿。均非傳聞過當之詞。不意該鎮沾染惡習。如此之甚。本部堂一面派員再行密查。一面仰該鎮逐條明白稟復。專弁坐輪船送來。守候批示。一面將僅發半餉。八箇月清結六箇月之章。立卽更改。果能翻然改悔。力除積習。本部堂尙可爲該鎮保全聲名。另籌整頓之法。卽欲多請銀兩。亦可勉強批准。倘再飾詞強辯。欺瞞上司。必行嚴參治罪。且勇怨已深。軍心可畏。若不及早挽

同。聯絡士卒。恐該鎮將受不測之禍。稟之。

批饒陽民許有立等呈控苛派差徭。以下爲同治八年直隸督轅之事

據稟十一月間。差徭疊出。係何項差徭。未據指明。惡役於中取利。硬行浮派。正派之數若干。浮派之數若干。亦未說明。語多浮泛。不似身親受害者之詞。大抵南方漕糧繁重。而控告漕糧者。多係不安分之徒。北方差徭繁重。而控告差徭者。多係不安分之徒。未便率准。至書差處。處處訛詐橫行。現已另刻章程十條。嚴行懲究矣。並候行司查照備案。

批候補陳道天津河防同知議覆黃河改道情形

據稟謂導河北趨。實勝南歸故道。所見甚是。指陳四便。亦屬持之有故。言之成理。蓋黃河現在入海之道。卽漢千乘故道也。雖未能復禹舊跡。而順其已成之軌。已得水性就下之常矣。攷乾隆間裘文達公日修治河策云。必不得已而思北歸次策。漢明帝永平時德棣之間。河播爲八。王景因之以成功。歷漢唐至後周。八百餘年無河患。今尋其故道而疏之。河流通暢。可慶安瀾。孫文定公嘉陵。請開滅河疏云。大清河之東南。皆泰山之基脚。故其道互古不壞。亦不遷移。從前南北分流。已受黃河之半。嗣後張秋潰決。聞受黃河之全。史言其由此入海。並未聞有衝城郭淹人民之事。則此河之有利而無害。亦百試而足徵矣。核前賢之說。與該丞今日所言。若合符節。是該丞於黃河全局。講求有素。成竹在胸。且裘孫二公。議於河未北趨之日。語尙懸虛。該丞議於河既北趨之日。語皆徵實。稟內稱可以轉搬之法。濟河漕直達之窮。南北之水性不同。舟楫之做法迥異。辦漕本以轉搬爲善策。長運乃勉強行之。非良法也。自明以來。治黃非難。治黃而兼治運。且治黃運午黃之處。乃極難事。無窮巨帑。費於此矣。今並不求長運。亦不求運河能貫黃水。但求運河尙不全廢。該丞有所見。不妨再詳細敷陳。以備採擇也。

批候補縣丞杭楚沅稟呈條陳

據稟。增廣鄉學六條。意在振興文教。力挽薄俗。殊堪嘉尙。惟鄉學之設。與保甲社會等。得其人則事誠有益。非其

人則筭亦叢生。且詳閱所稟。亦有窒礙難行之處。如第一條云。籌經費必廣勸捐。查捐務最爲厲民。稅政在州縣有苛派之病。在紳士有武斷之虞。恐百姓未見鄉學之益。先受勸捐之害。從前軍務未平。閒有勸捐助餉者。民力已不能堪。今直省救平。瘡痍之後。正當蠲去煩苛。與民休息。未便因舉辦鄉學。廣爲勸捐。以滋擾累。第二條云。舉紳董必專責成。凡地方公事。廉靜謹飭之紳士。多不願爲。其樂於從事者。則往往侵蝕把持。從中牟利。欲各鄉所舉。盡屬佳士。勢必不能。一有不肖者參之。則弊端百出。本部堂有鑒乎此。故常訓飭各屬。不准藉事立局。濫引紳董。亦不准於應徵錢糧之外。加派分文。該員所陳。首即不免犯此二弊。應毋庸議。至學規一條。欲使各崇實學。謂可不習時文。論亦近正。在士人爲學。自以抗希往哲。深明道義者爲最要。本不可專溺於文辭。惟文以載道。亦未有文理不通。而能通知道理者。近來講學之人。務爲高論。未通章句。先鄙文辭。爲不足爲。文風日衰。儒術日陋。弊皆坐此。本部堂前在皖中。刻有勸誡淺語。其中勸學問以擴才。擴才識以待用各條。於士人進德修業之方。不無裨助。近讓清訟事宜。分德才學三科取士。茲各發去一冊。仰即收領。以備參核。

批安平縣唐令稟滹沱河上治中治下治三策

據稟。滹沱河上治中治下治三策。足見實心任事。可嘉之至。查滹沱源出山西繁峙縣泰戲山。逕代州三里河七里河注之。又逕崞縣北橋河板橋河注之。又逕定襄縣牧馬川忻川水注之。入直隸平山縣境。始會冶河。入井陘縣境。始會甘陶河綿蔓河。此三河同出山西平定州。不遠而合者也。自此以下。仍會靈壽縣之嵩陽河泥河雷溝河。又會正定縣之西韓河柏棠河林濟河清水河旺泉河。及藁城縣之只照河。然後下抵晉州。據元史。因河決真定城南。故於平山縣西北。分冶河爲一道。引合冶河入寧晉泊。久而道淤。仍歸滹沱。雍正四年。怡賢親王有議請濬冶入校之疏。未經舉行。適值滹沱決晉州之周頭。乃亟築壩導河。由木邱逕焦岡。而注之溢水。致功總在晉東衛冀之間。蓋以正定上游。早息河患。治即合校。至入始通溢之後。下流究亦合於滹沱也。且滹沱挾水至多。不必會同治甘數河。方能爲惠。此數河者。遇雨暴漲。獨行。亦足成災。是上治之法。固可毋庸議也。該令所謂下治。至爲

當理。蓋河必歸墟。斯能順軌。苟不與以達海之路。則橫決倒灌。在在堪虞。稟稱應由八里橋。疏入子身河。實屬片言居要。淮是地勢之高低。程途之遠近。槽身之廣狹。工費之多寡。須得逐一豫籌。該令既成。竹在胸。仰再詳切陳明。以資採擇。至所謂中治者。第就安平一縣而言。現在河流紛歧。縣境民瘼攸關。或疏或堵。暫顧目前。亦屬該令萬不獲已之舉。所稟挖濠築隄。築懸創淺。以及論捐代賑等法。議論均井井有條。唯稟中所云。疏其二而塞其一者。疏係何股。塞係何股。未據聲明。按之繪圖。與稟中股數。亦不盡符合。仰即將應疏應塞之河道。分析指陳。並疏塞之處。於隣境有無防礙。一併敘及。迅爲覆稟。

批候補知縣胡承頤稟陳管見二條

保甲之法最古。前人行之亦屬有效。然古云。有治人無治法。此亦一端也。如得其人。誠如稟內所謂一邑之內。人之善惡。戶之大小。歷歷在目。斷詞訟。詰盜賊。日可見功。否則接奉檄飭。徒以一卷文冊。虛應故事。甚且假手胥吏劣紳。設局斂錢。轉滋紛擾。非爲無益而已。實知其爲夏司牧。而札飭行之則可。令通省普律行之則不可。王荆公行之一縣而效。行之天下而不效。亦職是故也。至詞訟罰捐一節。若如所稟。前此愚民犯禁。有司念其無知。而思曲全。又地方適有要工。令罰銀錢若干。則赦而不議。此與律意迴殊矣。律例中贖罪之條。皆罪有定議。乃贖有定數。所贖者。或因事係過失。人係老疾之類。其事情重大。或准或不准。或加成或不加成。仍候部議。總之贖在議罪之後。並非赦而不議。又例載若有指稱修理。不分有無罪犯。用強科罰米穀至五十石。銀至二十兩以上。絹帛貴細之物。直銀二十兩以上者。事發交部照例議處等語。從知地方工程。非可於訟案罰捐。致蹈因公科斂。及私行勒派之咎也。現在畿輔凋敝。亟嘗與民休息。加意撫綏。豈容地方官藉口工程。動則邀結紳士。開局收捐。致累百姓。况所謂罰捐者。實迫以不得不從。又無準數。縱云罰項。不送入衙門。而案既在官。捐之多少。究竟由官而定。中間仍必有往來傳話之人。其弊竇何堪設想。候即專札通飭各屬。於詞訟罰捐。概行停止。

江藩司詳送許邦行甄別考試白

以下爲江督任內吏科之事

據詳許邦行濛嵩慶袁照期滿日期均悉。查外省官員向無由督撫考試之例。唐宋以來。考士屬之禮部。考官屬之吏部。前明及國初選官。皆考一判。今雖不考判。而每月部選各官。尙進月官卷。猶存考試遺意。是考官乃吏部之權。非外省所得爲政也。本部堂前在安慶。每月接見三員。但令各書履歷數行。觀其字迹而已。初不據此以定賢否。查閱該司詳文內。所內初次部咨。僅稱詳加考核。分別繁簡。所謂考核者。非考試也。嗣經司中議詳變通。留寧各員期滿章程。始有漕憲考試字樣。係屬不根之論。旋准部覆。亦就外間咨文。籠統言之。遂有考試之說。并道府亦以考試分繁簡。殊非政體。本部堂覆加酌定。嗣後一年期滿。各員應由該司出具考語。詳請本部堂驗看。分別繁簡。奏咨辦理。此次所詳三員內。許邦行濛嵩慶兩員。係科甲大挑。及軍功勞績班次。部中本無考試章程。無須再議。仰卽出具考語。另詳核辦。袁照一員。係捐納班次。該司詳內所引酌增常例。詳加考試等語。本部堂署內案卷不全。無憑查核。仰將捐例內考試一條。鈔呈稟復。到日再行批示核辦。

潁州府李守文森稟擬淮北善後事宜十條

據稟呈條議十則。綱舉目張。多可見諸施行。該守到淮北甫及年餘。於地方利弊。言之歷歷。足見隨處留心。銳於任事。嘉慰無已。第一條。雒河修城經費。已由李軍門捐錢十萬緡。無須另籌鉅款。就地添設釐卡。專屬可行。惟於不能開徵各州縣。開籌麥捐。則斷斷不可。按敵派捐。本屬弊政。又新立麥捐名目。則將來有爲稻捐豆捐之說者矣。凡善後之事。約有三端。官紳賢。經費足。籌給牛種而招徠之上也。無賊匪之驚。無吏胥之擾。聽民自生自息。以徐。俟元氣之復。次也。將興利民之舉。而先多方以索民之財。劍未嘗而肉已剗。斯爲下矣。欲施善政。須問其資財之所自來。挹注彼此之間。不可不辨。第二條。於府州縣添派委員。分任善後之事。府四人。州縣二人。各員原有分府之說。州縣委員。則不可限以名數。皖省各屬近例。有所謂幫辦者。但見其害。未覩其利。如得賢員。聽各牧令自行稟請。原無不可。不可定爲令甲。動多窒礙。第三條。亳州州同。應免裁撤。新縣典史。應另行添設。張村鋪應添設巡檢一員。候咨商撫部院。察奪辦理。惟將三河尖東西兩岸。歸併一省。則可不必。天下之市鎮城汛。分隸兩省三

省者甚多。政之不可勝政。亦無益也。本年正月奉旨交出袁侍講條陳。請於亳州之雒河集。宿州之臨渙集。靈璧之固鎮。壽州之爐橋。合肥之梁園。阜陽。東北之王市集。正西之鯛陽城。添設新縣各等因。阜陽兩處。究竟應否添設。該守駐顏。耳目最近。仰親往履勘。查明申覆。第四條。不准帶兵員弁。干預地方公事。騷擾百姓。候即通行嚴飭。惟帶兵各官。文職多係道府。武職多係提鎮。令歸府州縣節制調遣。其勢斷不能行。駐防各營。不時調動。亦不能指定何營。抵補何處額兵。必俟一二年後。軍事大定。始能次第整頓。漸復綠營舊制。本部堂於二月二十七日。將綠營額兵。暫緩募補之故。專摺覆奏。茲鈔給閣看。至於文武兵民。互相水火。不特招募之營爲然。即經制之營亦未始不然。其軍民相安。水乳交融者。勇丁中亦往往而有。鴉亂未平。不能因噎而廢食。舉一而廢百耳。第五條。清查田畝。爲善後第一要務。然頗難辦到。逐畝丈量。則費多而民擾。亦無此不厭煩勞之官。限期造冊。則老冊已多散失。新冊毫無可靠。安慶各屬。前年試辦抵徵。本部堂三令五申。兢兢以查畝爲務。始而責成紳董。繼而責成書吏。至今毫無眉目。亦迄無良法。惟桐城薛令。具稟驗契推收之法。似有把握。本部堂恐稅契一節。小民疑畏。因與之再三辨論。以爲稅契斷不可行。驗契卻不可少。茲將原案鈔發一閱。該守試以此法。於潁郡參酌行之。惟限期太促。恐各屬潦草塞責。不必限定秋前蒞事也。第六條。暫留阜亳以西。暨太和境內各圩。與第七條免究舊從。不理尋仇控告之案。擄人子女。占人田產。措不退還者。仍照甘心從逆論。所議均極允愜。仰即出示曉諭。查照辦理。第八條。各州縣城倉衙獄。及各項公所。自應次第修理。然不宜操之太蹙。或地方凋敝太甚。一二年內。不能全行修復。亦當諒之。蓋各項經費。皆取之於民。非取之於官也。若參撤太嚴。則官顧考成。而百姓轉不免苛派之累。其有殷實好義。自願認修公所者。應如所擬。給予獎敘。免其報銷。第九條。令各屬於開徵之後。提銀采買穀麥。存之常平倉。以備凶荒。事屬可行。地方元氣未復。若捐復義社等倉。則須聽民自便。不必亟亟以年內爲限。第十條。爲府縣佐貳各官。籌加津貼。事屬可行。惟每月或至六百千之多。安得如許鉅款。各軍營官之薪水。勇丁之口糧。有欠至一年數月者。幾於饑殍不繼。地方官安得獨爾優裕。該守閱歷未廣。視事太易。亦履之而後知其艱耳。以上

十條。俟行善後局司道通籌會議。以期推行盡善。總之立法不如用人。該守所見。牧令佐貳各官。及地方紳士。如有賢者。可隨時密稟。以備錄用。則所裨尤大矣。

署安徽何藩司璟等會詳議覆荒產續還業主及安置難民由

查朱侍御原奏。大致有三。一曰業主領田。寬定限期。一曰稽查逆產。不令牽認。一曰詭充業主。嚴行查辦。合之呂侍御所奏。安置難民一節。應一併覆奏者。共有四端。該司等所議八條。悉心酌核。尙有未盡妥協者。應再詳加討論。第一條第三條第四條。一定荒田入官之章程。一定荒田招墾之辦法。一定荒田領回之限期。所議尙屬周匝。惟名爲荒田。總有業主。斷不可註明入官字樣。此等名目。最宜審慎。本部堂去年刊發皖南墾荒章程內。第五條載業主佃戶。并無人者。由局查明報縣立案。一面募人佃種。聲明業主何人。倘日後回鄉。仍將原田歸還。此項荒田。只可目以歸局經理之名。至招佃墾種。不論土著流寓。均准具結領種。事屬可行。惟荒田與逆產。不能相提並論。逆產者田已充公。而由官召佃也。荒田者田本有主。而暫時歸局募佃也。務須剖析分明。以免牽混。其業主領田之限期。自同治四年起。予以兩年正限。一年餘限。分別有契無契。准其領回執業。所議原屬妥協。惟三年之後。始歸本籍。實有印契呈驗者。應仍准其領回。其無契者。遲至三年之後。如議不准再認。以示區別。第二條清查逆產。此事最易擾累。所擬飭令各州縣查明著名叛逆。及叛逆之父母祖孫兄弟。共有田產若干。造冊查考等語。將來借端勒索。流弊百出。所有皖北逆產。如實係著名之張落刑苗沛霖等。飭各州縣於奉文後查明。限三月一箇月通稟。經督撫批准者。始作爲逆產入官。其未經批准者。無論前此有犯何案。後此查有何據。應即奏明。一概免其查追。以廣聖朝寬大之恩。而省閭閻無窮之累。第五條嚴查冒佔各弊。第六條籌給耕牛籽種。第七條領墾荒田。分別繳租。第八條安插降衆難民。所議詳妥。均可照辦。總之立法不如任人。凡條目所不能詳者。全在臨時權衡。衷諸至當。仰即責成該管道府。督同州縣。隨時稟商妥辦。不必另派道府大員。以節經費。仍錄批報明撫部院。會核具奏。

江寧萬藩司啓琛等稟陳陳管後局前後報銷由

嗣後按月造報。則眉目易清。應省之虞。亦可隨時裁減。凡治大事。以員少爲妙。少則薪資較省。有專責而無推諉。少則必擇才足了事者。而劣員不得濫竽其間。少則各項頭緒。悉在二三人心中。不至叢雜遺忘。多則反是。總之爲事擇人。則心公而事舉。爲人謀事。則心私而事廢。該局冗員稍多。以後大小事件。須各有專責。一一吹竿。則漸有起色矣。

蘇松太道稟籌設上海普育事宜并改經費請示由 此爲江督署內禮科之事

據稟并另單均悉。上海普育堂之設。該道竭力經營。支持三年之久。樂善不倦。用心可嘉。惟此等乃鄉里好善者之所爲。非爲政之大體。衣食分人。曹劇指爲小惠。乘輿濟人。孟子謂非政要。近世儒者王船山。於社倉義倉等事。皆反覆譏議。乍見似駭聽聞。深思乃有至理。本部堂雖不敢議及古法。而於以感應陰陽等編。爲立教之首。以育嬰卹瘡等事。爲立政之本。則未敢以爲然也。所請將垃圾局經費錢五百千文。改作普育堂經費。准每月照撥一半。以資接濟。該道與局董籌出經久之法。則善矣。

漢陽許鎮稟抵署察看各汛情形 此爲江督署內兵科之事

長江水師。係創始之營。又係各營勇丁。改爲經制水師。與地方文武各官。均格格不相入。本部堂初定章程。惟恐流弊滋多。招人營議。數年來時加訪問。大半不愜人意。而於兩湖爲尤甚。近則不待訪問。而言者愈衆。其弊端之顯著者。縱容弁兵。索取過往船隻燈油錢等項。又以峯賭博爲名。遇民船之有骨牌者。有字牌者。率得索取錢文。始准釋放。又或借峯私錢。峯私鹽爲名。誘索銀錢。又或擅受詞訟。坐堂審訊。刑責紳民。買備食物。勒給官價。日間全不操演。夜間全不巡查。以致長江常出劫案。聲名狼籍。其致病之原。則在遇事科派錢文。總兵取之營官。則有議定年規章程。致送三節兩壽。開銷雜款。營官取之哨官。哨官取之額兵。則有扣去公項雜費。捐項送禮等銀。每季或扣一二十兩。多者扣至七八十兩。皆弁兵六分應得之款。弁兵之心中。眼中。惟錢財看得分明。若鎮將勒派

錢文。此處扣一分。彼處縮一錢。層層剝削。則弁兵受害不淺。不特心含怨怒。且百事皆懶做矣。故鎮將貪者。備營皆有廢弛之氣。廉者備營皆有振興之象。貪者部下常有仇恨之心。廉者部下常有佩服之意。銀錢只有此數。上愈寬則下愈窘。上不苟取分文。則下皆畏而愛之。本部堂平日教人。總以廉字爲立身之本。長江水師定章。自提鎮以下。領款無不從優。專爲嚴禁浮費而設。該鎮先從廉字做起。每季發餉。總不可扣弁兵分文。而約束弁兵。則以勤字爲本。刻刻教督。是曰口勤。處處查察。是曰腳勤。事事體恤。是曰心勤。有此三端。自能與弁兵聯絡一氣。平日嚴課之功。日必操演。夜必巡查。沿江竊盜之事。有案必破。有犯必懲。地方官紳。交相推重。豈非快事。至於與人交際之道。則以敬字爲主。切不可仍留軍營脫略模樣。此雖末節。亦易惹人笑話。該鎮於岳州彭鎮。均爲彭官保識拔之人。到任數年。聲名日減。不特從前戰功盡棄。並且有累彭官保知人之明。試問於心安否。本部堂殷殷誥誠。無非欲爲該鎮保全名。此批並錄與彭鎮一看。從此互相砥礪。實力奉行勤廉二字。而待人接物。常存敬畏之心。行之既久。天下自有公論。斷不是是非倒置。若再自護前非。漸染積習。人言可畏。本部堂亦不能曲爲寬貸也。

曾任江南提督李世忠稟因陳鎮國瑞前在淮河劫去鹽船衣物隱忍多年今知在揚適來舟中扣留懇請

查究等情 以下爲江督署內刑科之事

該提督開缺數年。尙能守法安分。故外間浮言漸息。免遭稱譏。自係該提督之幸事。此次來省謁見。本部堂以禮相待。無非始絃成全之意。今據稟稱扣留陳鎮在船等情。仍是從前驕肆之態。閱之不勝詫異。所稱同治三年。淮河內鹽船皮衣被搶一事。無論是否屬實。即使真有其事。當時何以不確切稟明。事後何以不詳細申訴。今已相隔七年之久。忽然與此波瀾。駭人聽聞。該提督未投誠以前。所得本皆不義之財。即後來自行籌餉。所營亦非盡應得之利。當時物議紛紛。咸稱該提督富蓋數省。宜即鈔沒。全行充公。此等議論。想該提督亦曾聞之。陳鎮當時。如果有搶奪之事。立刻申理則可。事久行蠻則不可。向大吏衙門與訟則可。自行捆縛大員則不可。似此無賴行

徑殊爲遠近所笑。仰候將起畔情形。先行據實奏參。一面再派員詳細確查。秉公核辦。

瓜州吳鎮等稟前江南李提督與陳鎮國瑞互相滋事緣由

據稟及面呈李世忠陳國瑞陳澤培等親供五紙。均悉。本部堂詳加察核。李世忠陳國瑞兩人夙怨。如同治元年。高良瀾搶奪之事。二年壽州截殺朱元興等之事。三年扣留鹽船馬鞍皮衣之事。其中情節。雖各執一詞。而陳國瑞逞強搶物。鑿然無疑。揆度當日情事。正是陳國瑞打仗奮勇。聲名日起之時。李世忠則人人切齒。中外疑之。正聲名極壞之時。或畏陳鎮而不取與校。亦屬意中之事。且高良瀾一案。據李世忠供稱。已賄銀一千五百兩。陳國瑞則稱二千兩。壽州一案。其時陳國瑞并未到壽。僧親王因朱杜等。死於無辜。曾經參奏。將苗景開李萬春等正法。奉有諭旨。此二事業已了結。其未見明文者。惟懷遠鹽船之事。陳國瑞現認變賣充賞。馬鞍皮衣之事。陳國瑞現認係李所贈送。其爲估奪可知。然當時未經呈報有案。此次又未先行申訴。從前軍營無理之事。只好概置不論。試問李世忠咸豐年間。擄財殺人之事。不知凡幾。若令被害之家。一一全來訴冤。又將何以處之。此昔年之事。祇一筆勾銷。不准再提。並非袒護陳國瑞。所以持大禮而毋爭毀也。至此次在揚州滋事情由。陳國瑞初與李世忠相遇。要金魚。要山石。要戲班。在陳國瑞猶是強梁之積習。在李世忠已蓄誑誘之詭計。供內所敘陳國瑞談論洋務各情。一種恃強喜事光景。逼肖口吻。李世忠作爲結納。隱圖報復。遂有十四日突至陳國瑞寓中。捆縛赴船之事。衆情洶洶。共見共聞。無可掩飾。陳國瑞所供逼寫家信。勒取財物。并另稟扭拖之時。揪落頭髮一綰。均屬可信。陳澤培如果欲設法救援伊叔。或向揚州文武各官求救。或逕赴本部堂衙門申訴。均屬分內之事。何至糾合船戶水手。揚言捉獲李世忠者。立予重賞。以致聚集數千人。填塞江岸。乘機搶奪。甚至逼勒婦女。擁至揚州。並有煽惑一人之事。尙得一概諉諸公憤乎。陳國瑞關閉在船。據稱並不知情。而平日不能約束家屬。豈能辭咎乎。李世忠所供攜手偕同回船等語。以陳國瑞之狡譎暴戾。若非李世忠乘其不備。用強逼脅。何肯隨同赴船。李世忠蓄謀已久。一旦下手。所稱并未凌辱。殊不足信。陳國瑞所供將大船橫挖一洞。拖上砲船。此屬過甚其詞。亦不足

信。李世忠攜帶戲班，到處送演，已屬毫無廉恥，且所蓄脚色，半係打手。人言籍籍，形迹可疑。陳國瑞所稱軍營穿著，攜帶刀鎗，亦非無因。平情而論，十四日以前，李陳謬訂知交，來往親密，各懷猜疑，各蓄機心。陳國瑞所供，規勸李世忠各語，即係生平甘言欺人之伎倆。李世忠之舉事，允其所請，即係生平蓄謀害人之伎倆。兩人之心術相近，而李世忠尤爲凶狠。聞上年會軟禁楊姓，勒令出銀數萬，始准放還。此次又軟禁陳鎮，其行徑同於擄人勒贖。若照例嚴辦，厥罪甚重。惟本部堂仰體朝廷之意，業已保全於前，姑從寬奏參革職，免治其罪。勒令回籍，交地方官嚴加管束。如再出外滋事，一經查出，立即奏明重懲。陳國瑞於陳澤培聚衆之時，雖不知情，而昔年恃強佔奪，近在揚州，好作大言，以致家屬效尤生事。且先與李世忠交結往來，挾妓演戲，亦屬有玷官箴。應奏參以部司降補。勒令回籍，不准在外逗留。陳澤培糾衆釀命，應先革去監生，船戶水手，倡首滋鬧之人，現已派田鎮前往嚴拿。查獲後，如審出重情，陳澤培再當酌加懲辦。船戶亦當嚴懲，以儆刁風。此係本部堂斟酌至再，格外從寬。李世忠等應卽悔悟，敘迹保全末路。仰將此批，給付二人閱看。本部堂一面卽據此具奏，并通行各省，以彰公論。

淮揚海屬紳士裴蔭森等稟請復淮水故道由 此爲江督署內工科之事

此案籌議兩月，不能斷決。博詢衆論，力主修復淮瀆故道者固多，而辨難者亦復不少。難者之說，不盡平允，而有數事可信者。一謂淮揚農民窮困，鹽商亦極疲乏，不忍再捐，卽捐亦不能年內卽至百萬之多。一謂章程第八條之遙隄暫做掃工，第九條之河渠，出土宜遠，纜堤寬百餘丈，乃是正經辦法。河身堅土板沙，斷非如第三條溝線跌塘之法，所能爲力。一謂洪湖北高南下，形如側釜，勢難引全湖之水，盡出清口。中河比洪湖尤高，勢難挽南趨之水，折而東注。此三層皆近理之言。欲復淮瀆，經費既慮其太鉅，效驗亦茫無把握。惟復瀆之大利，未敢必其遽與。而淮揚之大患，不可不思稍減滅害之法。仍不外平分淮流以入故道。擬就稟中所謂成子河，引淮入黃者，非此案之正文。不但三河緩堵，卽清口亦可緩開。應自海口起，西至桃源，濬此五百餘里之河身，修築纜堤遙堤，工不可率，費不可省。自戊辰年起，每年籌銀三十萬，倘歲事豐稔，軍務稍鬆，尙可增加。逐年修濬，自下而上，濬至揚

莊高築南堤。則中河泗沂之水。可東行注海矣。又濬至桃源。則刷開成子河。可分淮入黃矣。如果自成子河至海。一律通暢。測量水勢。不至掣留南趨。再行掘開清口。多一分淮之路。如清口一律通暢。再行堵塞三河。以弭下河之災。目下軍餉緊急。籌款極艱。然亦不能不急辦。以慰該紳民之望。准於本年八月起。至明年三月止。陸續撥銀十萬。在於雲梯關以下。先行試辦。并於清江開設導淮局。派委官紳。履勘水陸。測量高低。製備器具。博採異議。熟商工程做法。其公呈中所未及者。如自高長濶以至清口。節節淺空。尙須分別闢濬。自雙溝以至舊縣。亦須酌濬湖身。推之奎河睢河。均須大加開濬。使徐宿之水。導歸於淮。皆應由局中查勘定議。刻成導淮事宜一書。分別緩急。次第興工。不求速效。但求實濟。不求利多。但求患滅。仰准揚道循傳該紳等知照。

雲南迤東黃道覓粟米鹽互市一案 以下爲江督署內鹽政科之事

北宋漕運之法。荆湖岳鄂之粟。運至真州。入轉般倉回船。即自真州請鹽。運至荆湖銷售。真州今之儀徵也。荆湖岳鄂。今之湖南湖北也。將來兩湖江西之漕。改辦海運。應略仿宋世之法。宋世由真州換船入淮以達汴。今日亦須由揚儀金焦一帶。換船入海以達津。宋世漕船。可由儀徵帶鹽回楚。今日亦可由儀徵帶鹽回楚。海運一案。部臣仍令各督撫妥議章程覆奏。本部堂擬於覆陳疏內議及。仍於儀徵設立米鹽互市局。若經理得宜。不獨可省多造漕船。實亦官商兩利之事。目下兩湖米價奇貴。湘漕仍解折色。所有安慶互市一局。應暫停撤。改爲轉運淮鹽局。專管官本運湘之鹽。另行刊發關防。至湖南借撥漕折銀十萬兩。即於運湘新鹽銷售項內。劃還湖南糧庫歸款。已於去冬咨明惲撫部院矣。

上海機器局委員徐壽等稟條陳輪船製器四條 以下爲江督署內鹽商科之事

來稟所陳。似多出於揣度之詞。未得要領。緣製造輪船。係由總署與外國公使議定。爲借法自強之一事。與造時所用極大。木料與銅板鐵板之類。無一不取材外洋。不僅鐵之一項也。即專以鐵言。如輪船應用通長大鐵軸。斷非中國所能鑄造。設一旦無從購運。此事即當作罷論。縱能自設鐵廠。亦復何爲。故目下只可乘此機會。量力試

辦不必預計他日之何如也。第二條礮與船相配而行。船成時自必由局中酌量。安設大礮。聞上海局中於六十四磅以上之礮。實未能製。蓋人事物力均有所限。未易勉強擴充。然礮亦不必過大。軍事固須利器。然究以選擇將材爲先務。第三條行船與管機。自是兩事。洋船所用諸色目人。有大鐵櫃二鐵櫃之稱。即管機之類。今日果能學製。他日或可管理。此事若行。船則外國謂之船主。中國謂之舵工。非熟習風雲沙線之人。不可令充。其選製船與駕輪。豈能合爲一手。第四條製造必從圖說入門。聞上海局中洋匠。向來專造輪船。本有成書可據。第有各種輪式。爲該匠所未曾經造者。即不能依圖立說。是必得圖而後能製造。亦必且造且困且思且通。而後能繪圖也。至外國書不難於購求。而難於翻譯。必得熟精洋文。而又深諳算造。且別具會心者。方能闡明秘要。未易言耳。滬局開設已近二年。在局委員。必均能見於此。該員等此番赴局。宜遵諭專心襄辦輪船。能於一年之內。趕速製成一二隻。乃爲不負委用。其輪船以外之事。勿遽推廣言之。精心廣願。而出之以約旨卑思。庶其有濟。切切。

揚州營朱參將

會稟戴德生來揚傳教人民獲有屍孩動忿解散由

洋人設立育嬰堂名目。原爲條約所未載。上年法教士金緘三來揚。私在三義閣租房。欲立育嬰堂。即據稟報有謠言衆多。紛紛傳說之語。彼時稟經批示後。如果即能查詰來歷。並將中國本有育嬰善舉。無須外國再爲設堂。該教士嘗不復私行收養。該士民等。亦得釋然。不致積忿生事。茲聞江都縣另稟查驗。起出死屍。勻係女屍。情形可慘。其有無取眼取腦情事。介在疑似之間。無怪乎民間公忿。不約而同。即如該堂之陸榮仁所供。今年死掉四十多箇嬰孩。皆乳媽踏踏死的等語。此尤爲切要供詞。是育嬰而反以害嬰。其中即無別故。亦不足取信於民。據鈔呈戴教士一函。並無言及焚燬器物書籍之語。既經當時彈壓解散。自屬無可查究。現在該堂門已鎖閉。如該洋人再行前來。應即勸令於數月之內。不可赴揚。免生他變。俟本部堂將此案詳細咨明總理衙門。總署商之公使。訂定各教士斷無取腦取眼行徑。由本部堂大張告示。俾揚州士民。曉然共知。然後傳教士奉文而來。自不至與之爲難。中外相信。庶諸事毫無扞格。告示未到之先。切囑其不宜冒昧復往。迨激出事變。再求懲治補救之法。

則已晚矣。此不特保全揚民。正所以保全教士也。至私代賃房。既已查係黃姓彭姓所爲。仰卽催差查提交案究懲。並將各領事索去示稿。刻日錄送查核。

常鎮蔡道稟鎮江民人因洋人租屋滋事一案

查城內建堂之案。同治四年間。法國教士在浙江會稽縣賃屋。咨准總理衙門核復。內地建堂。由來已久。但傳教士究係外國之人。如買地爲建堂之用。其賣契內。祇可載明賣作本處天主教堂公產字樣。若係洋人在內地置買私產。與條約不合。仍應禁止等因。轉行在案。近年江寧安慶。所辦法國教堂立契。均照此辦理。今鎮江本係通商口岸。江皖旣已允准立堂。並給公所。鎮江事同一律。卽在城內賃屋設堂。亦屬應准之事。此次英教士戴德生在鎮所租夏姓房屋。該道按約查理。並無錯處。惟當夏李氏控告退租。該道旣與英委員阿林格說明。允願另覓。其時卽應詳告丹徒王令。飭其料理清楚。另覓了結。該道不及詳囑妥辦。而遽行赴蘇。王令不責夏姓先租後退之非。又不另爲覓屋。以弭釁端。均有不合。王令業因另案撤委。應免置議。該道雖失之疏忽。各不至於撤參。所請改委之處。應無庸議。夏姓始則違例私租。後則婦女控退。本應懲究。惟懲究夏履之。恐反觸洋人之忌。若懲究夏李氏。堅執仍租夏姓之屋。又恐愚民疑忿。激成事變。查同治五六年間。法國雷教士在安慶。已買定雙蓮寺之屋。因紳民懷疑不允。改作書院公所。經府縣在城外。擇買堂基。城內另租公所。雷教士始欣然允從。鎮江亦可仿照安慶之例。仰該道督同府縣。於城內另租公所。妥辦稟復。如洋人不堪樂從。則俟委領事來金陵時。本部堂再與之面商定奪。至租屋傳教。必須百姓出賃者。赴縣呈明方准成交。一則恐外國教士。並非安分無過之人。與中國刁民。私相授受。二則恐姦民僞契盜賣。使教士之買者喫虧。三則與上海租地。先行報明查視。再行稅契。辦法亦屬一律。四則與會稽案內。只准買立教堂。不准置買私產。亦屬相符。仰將此四層。與領事暨各洋人。反覆陳說。當可信從。仍將傳教係條約准行。開導士民。務使人人共知。不必與之爲難。如再有聚衆生事。斷難姑容。不論兵民旗漢。概卽擇尤牽緝。以示儆戒。切切。

劉法國領事文稿

爲劉復事。據該總領事於七月十七日申陳一件。八月二十一日。又具申陳一件。各等情前來。本大臣均已閱悉。具見該總領事深明條約。立言公正。洵爲嘉慰。查金司鐸前在淮安地方。借名買屋立契。後又自填天主堂字樣。迹近欺瞞。誠如該總領事所云。此金司鐸之過也。本大臣並不另責其非。所有在淮私買之屋。已滋物議於前。惟該屋是否可以爲教士建堂之用。有無關礙居民情事。抑應如安慶之案。在城外擇買堂基。在城內另租公所。已飭淮安府縣。妥速查辦申復。另再剴知。至貴國傳教司鐸。據申皆是安分良善之士。倘有不遵和約。或置私產者。該總領事當隨時核辦切禁等語。本大臣聞之喜悅。固無不釋之疑懷。而教士之置屋建堂。先經本大臣按照條約。一再剴切。飭屬曉示百姓。原期地方官查酌相宜。不使教中喫虧。各教士當可體會此意。坦然明言辦理。不必私相授受。轉生事端。迨事後補救。已屬無益矣。此外設立育嬰堂。收養男女幼孩。實爲各國條約所無。如昨揚州百姓。誤擾英國教堂之事。係由金司鐸在揚私租房屋。收養育嬰幼孩。死傷太多。據江都縣查訊。李得義供。已埋了十四箇嬰孩。據陸榮仁供。本年堂內。死了四十多箇嬰孩。皆乳媽糟踏死的。百姓謠傳。育嬰有將幼孩挖眼挖心之事。本已懷疑。又見死傷太多。相驗均係女屍。致激衆怒。誤擾英國教堂。而法國之堂。亦即盡行鎖閉。並無一人。後經本大臣派員赴揚開導百姓。以嬰孩死傷雖多。是醫生乳媽之咎。非教士之過。並無挖眼挖心等弊。民怨稍止。現理英國教堂之案。本大臣只就本案究辦。并不咎及金司鐸。欲以護教士而全和好也。茲據申陳內所言。明係爲揚州一案而設。是以一併摘略告知。但育嬰一項。乃中國自辦善舉。與外國人無涉。故條約內無此名目。况教士縱有善心。而經理之人不妥。與乳媽任意糟踏。死傷嬰孩太多。使教士暗損陰德。又累聲名。殊屬不便。務望該總領事。力勸教士。嗣後到處。只宜傳教。不可設堂育嬰。庶民間知傳教係條約所准。育嬰乃條約所無。既不育嬰。即無挖眼挖心之說。人人共曉。何患謠言不息。何患民教不能相安。本大臣所見如此。當咨請總理衙門。與公使商之。并望該總領事。查酌妥議。隨時具復。又據來申內。以淮安府案內批示。按本大臣之意。教士買地。須領

事官幫辦云云。和約內無此明文。該總領事力加辨論。查此節恐係因誤會所致。緣傳教士初入內地。未經呈出印照。中國無由悉其來歷。必須有領事申請之文。方憑酌辦。非謂教士買地。由領事官從中幫辦也。本大臣批示內。並無此說。或係地方官告示內。詞意未及分析。致成誤解。據後一次來申閱悉。丹徒縣告示內載入批示。尤爲明析。是該總領事於此層。已釋然無疑矣。須至劄復者。

仿古字版

會文正公日記

世界書局印行

目次

問學	一
省克	一九
治道	三三
軍謀	三八
倫理	四七
文藝	四九
鑒賞	六五
頤養	六八
品藻	七一
游覽	七七

曾文正公日記

問學

夜深。思將古來政事人物分類。隨手鈔記。實爲有益。尙未有條緒。(辛丑正月)

學問之事。以「日知月無亡」爲吃緊話。文章之事。以「讀書多。積理富」爲要。(辛丑二月)

讀書之志。須以困勉之功。志大人之學。(辛丑閏三月)

至鏡海先生處。問檢身之要。讀書之法。先生言。「嘗以朱子全書爲宗。」時余新買此書。問及。因道。「此書最宜熟讀。(即以爲課程。身體力行。)不宜視爲瀏覽之書。」又言。「治經宜專一經。一經果能通。則諸經可旁及。若遽求兼精。則萬不能通一經。」先生自言生平最喜讀易。又言。「爲學只有三門。曰義理。曰考核。曰文章。考核之事。多求粗而遺精。管窺而蠡測。文章之事。非精於義理者不能。至經濟之學。即在義理內。」又問經濟宜如何審端致力。答曰。「經濟不外看史。古人已然之迹。法戒昭然。歷代典章。不外乎此。」又言。「近時河南倭良峯(仁)前輩。用功最篤實。每日自朝至寢。一言一動作。飲食皆有劄記。或心有私欲不克。外有不及檢。皆記出。」先生嘗教之曰。「不是將此心別借他心來把捉才提醒。便是閑邪存誠。」又言。「檢攝於外。只有『整齊嚴肅』四字。持守於內。只有『主一無適』四字。」又言。「詩文詞曲。皆可不必用功。誠能用力於義理之學。彼小技亦非所難。」又言。「第一要戒欺。萬不可揜著。」云云。聽之昭然若發矇也。(辛丑七月)

倭良峯前輩先生言。「研幾工夫最要緊。顏子之有不善。未嘗不知是研幾也。」周子曰。「幾善惡。」中庸曰。「潛雖伏矣。亦孔之昭。」劉念臺先生曰。「卜動念以知幾。」皆謂此也。失此不察。則心放而難收矣。又曰。「人心善惡之幾。與國家治亂一幾相通。」(壬寅正月)

靜坐思。心正氣順。必須到「天地位。萬物育」田地。方好。（壬寅正月）

默坐思。此心須常有滿腔生意。雜念憧憧。將何以極力掃却。勉之。（壬寅正月）

吳竹如言。「『敬』字最好。」予謂須添一「和」字。則所謂敬者。方不是勉強一持。卽禮樂不可斯須失身之意。（壬寅正月）

誦養氣章。似有所會。願終身私淑孟子。雖造次顛沛。皆有孟夫子在前。須臾不離。或到死之日。可以仰希萬一。（壬寅正月）

心得語。一經說破。胸中便無餘味。所謂德之棄也。況無心得而有掠影之談乎。（壬寅正月）

易大壯卦象大衆。正與養氣章通。

「靜」字全無工夫。欲心之凝定。得乎。（壬寅正月）

晉卦。「罔孚裕。無咎。」裕。難矣。中庸明善誠身二節。其所謂裕者乎。（壬寅正月）

精神要常令有餘。於事則氣充。而心不散漫。（壬寅正月）

凡事之須逐日檢點者。一日姑待。後來補救。則難矣。況進德修業之事乎。海秋言。「人處德我者。不足觀心術。處

相怨者。而能平情。必君子也。」（壬寅正月）

讀書窮理。不辨得極虛之心。則先自窒矣。（壬寅正月）

「咸恆損益」四卦。可合之得虛心實心之法。（壬寅正月）

不能主一之咎。由於習之不熟。由於志之不立。而實由於知之不真。若真見得不主一之害心廢學。便如食鳥啄之殺人。則必主一矣。不能主一。無擇無守。則雖念念在四書五經上。亦只算游思雜念。心無統攝故也。（壬寅正月）

巽乎水而上水。頗悟養生家之說。（壬寅）

良峯前輩言。「無間最難。聖人之純亦不易。顏子之三月不違。此不易學。即日月之至。亦非諸賢不能。」至「字

煞宜體會。我輩但宜繼續。求其時習而已。」（壬寅）

存心則緝熙光明。如日之升。修容則正身凝命。如鼎之鎮。內外亦養。敬義夾持。何患無上達。（壬寅十一月）

至岱雲處。看渠日課。岱雲近日志日堅。而識日卓越。聞之喜極無言。半日好善之心。頗有「若己有之」之誠。而

前日讀篤仙詩。本日觀岱雲日課。尤中心好之也。（壬寅十一月）

樹堂來。與言養心養體之法。渠言。「舍靜坐。更無下手處。能靜坐。而天下之能事畢矣。」因教我焚香靜坐之法。所言皆閎歷語。靜中真味。煞能領取。又言。「心與氣總拆不開。心微淨則氣淨矣。氣散則心亦散矣。」此即孟子所謂「志壹則動氣。氣壹則動志也。」（壬寅十一月）

「神明則如日之升。身體則如鼎之鎮。」此二語可守者也。惟心到靜極時。所謂未發之中。寂然不動之體。畢竟未體驗出真境來。意者只是閉藏之極。逗出一點至意來。如今至一陽初動時乎。貞之固也。乃所以爲元也。蟄之坏也。乃所以爲啓也。穀之堅實也。乃所以爲始播之種子也。然則不可以爲種子者。不可謂之堅實之穀也。此中無滿腔生意。若萬物皆資始於我心者。不可謂之至靜之境也。然則靜極生陽。蓋一點生物之仁心也。息息靜極。仁心之不息。其參天與地之至誠乎。顏子三月不違。亦可謂洗心退藏。極靜中之真樂者矣。我輩求靜。欲異乎禪氏入定。冥然罔覺之旨。其必驗之此心。有所謂一陽初動。萬物資始者。庶可謂之靜極。可謂之未發之中。寂然不動之體也。不然。深閉過拒。心如死灰。自以爲靜。而生理或幾乎息矣。況乎其並不能靜也。有或擾之。不且憧憧往來乎。深觀道體。蓋陰先於陽信矣。然非實由體驗得來。終掠影之談也。（壬寅十一月）

人必中虛。不着一物。而後能真實無妄。蓋實者。不欺之謂也。人之所以欺人者。必心中別著一物。心中別有私見。不敢告人。而後造僞言以欺人。若心中了不著私物。又何必欺人哉。其所以自欺者。亦以心中別著私物也。所知在好德。而所私在好色。不能去好色之私。即不能不欺其好德之知矣。是故誠者。不欺者也。不欺者。心無私著也。

無私著者。至虛者也。是故天下之至誠。天下之至誠者也。當讀書。則讀書。心無著於見客也。當見客。則見客。心無著於讀書也。一有著。則私也。靈明無著。物來順應。未來不迎。當時不雜。既過不戀。是之謂虛而已矣。是之謂誠而已矣。以此讀無妄。咸。中孚三卦。蓋扞格者辭矣。（壬寅十一月）

凡作文詩。有情極真摯。不得不一傾吐之時。然必須平日積理既富。不假思索。左右逢原。其所言之理。足以達其胸中。至真至正之情。作文時無鐫刻字句之苦。文成後無鬱塞不吐之情。皆平日讀書積理之功也。若平日醞釀不深。則雖有真情欲吐。而理不足以達之。不得不臨時尋思義理。義理非一時所可取辦。則不得不求工於字句。至於修飾字句。則巧言取悅。作僞日拙。所謂修辭立誠者。蕩然失其本旨矣。以後真情激發之時。則必視胸中義理何如。如取如攜。傾而出之可也。不然。而須臨時取辦。則不如不作。作則必巧僞媚人矣。（壬寅十一月）

材也。

竹如教我曰。「耐」。予嘗言竹如「貞」。足幹事。予所闕者「貞」耳。竹如以一「耐」字教我。蓋欲我鎮躁以歸於靜。以漸幾於能「貞」也。此一字。足以醫心病矣。（癸卯正月）

寫字時。心稍定。便覺安恬些。可知平日不能耐。不能靜。所以致病也。寫字可以驗精力之注否。以後即以此養心。（癸卯正月）

萬事付之空寂。此心轉覺安定。可知往時只在得失場中過日子。何嘗能稍自立志哉。（癸卯二月）

記云。「君子莊敬日強」。我日日安肆。日日衰頹。欲其強。得乎。譬諸草木。志之立。本則撥矣。是知千言萬語的莫先於立志也。（癸卯二月）

唐先生言。「國朝諸大儒。推張楊園陸稼書兩先生。最爲正大篤實。雖湯文正猶或小遜。李厚庵方望煥文章。究優於德行。」（癸卯二月）

夜讀楊園先生集。中有數條。如破我伎求之私。當頭棒喝。（癸卯二月）
讀楊園近古錄。真能使鄙夫寬。薄夫敦。（癸卯二月）

因作字。思用功所以無恆者。皆助長之念害之也。本日因聞竹如言。知此事萬非疲頓人所能勝。須是剛猛。用血戰功夫。斷不可弱。二者不易之理也。時時謹記朱子語類。雞伏卵。及猛火煮二條。刻刻莫忘。（癸卯二月）

凡讀書。有爲人爲己之分。爲人者。縱有心得。亦已悠然日亡。予於杜詩。不無一隙之見。而批點之時。自省良有爲人之念。雖欲蘊蓄而有味。得乎。（癸卯二月）

竹如言。交情有天有人。凡事皆然。然人定亦可勝天。不可以適然者委之於數。如知人之哲。友朋之投契。君臣之遇合。本有定分。然亦可以積誠而致之。故曰。「命也。有性焉。君子不謂命也。」（癸卯二月）

鏡丈言。「讀書有心得。不必輕言著述。注經者。依經求義。不敢支蔓。說經者。置身經外。與經相附麗。不背可也。不必說此句。卽解此句也。」（癸卯二月）

今早友人見示一文稿。讀之使人忠義之氣。勃然而生。鄙私之萌。斬焉而滅。甚矣。人之不可無良友也。（癸卯二月）

自戒懼而約之。以至於至靜之中。無少偏倚。而其守不失。則極其中而天地位。此縣縣者。由動以之靜也。自謹獨而精之。以至於應物之處。無少差謬。而無適不然。則極其和。而萬物育。此穆穆者。由靜以之動也。由靜之動。有神主之。由動之靜。有鬼司之。終始往來。一敬貫之。（辛亥七月）

莊子曰。「笑成在久。驟而見信於人者。其相信必不回。驟而得名於時者。其爲名必過情。君子無赫赫之稱。無驟著之笑。猶四時之運。漸成歲功。使人不覺。」則人之相孚是桃李。不言下自成蹊矣。（辛亥七月）

有蓋寬饒諸葛豐之勁節。必兼有山巨源謝安石之雅量。於是乎言足以興。默足以容。否則。螳螂易缺。適足以取禍也。程量雖由於性生。然亦恃學力以養之。惟以聖賢律己。躬自厚而薄責於人。則度量闊深矣。（辛亥七月）

知己之過失。卽自爲承認之地。政去毫無吝惜之心。此最難事。豪傑之所以爲豪傑。聖賢之所以爲聖賢。便是此等處。嘉落過人。能透過此一關。寸心便異常安樂。省得多少膠葛。省得多少遮掩裝飾醜態。(辛亥七月)

有義理之學。有詞章之學。有經濟之學。有考據之學。義理之學。卽宋史所謂道學也。在孔門爲德行科。詞章之學。在孔門爲言語科。經濟之學。在孔門爲政事科。考據之學。卽今世所謂漢學也。在孔門爲文學科。此四者。闕一不可。予於四者。略涉津涯。天質魯鈍。萬不能造其奧窔矣。惟取其尤要者。而日日從事。庶以漸磨之久。而漸有所開。義理之學。吾之從事者。二書焉。曰「四子書」。曰「近思錄」。詞章之學。吾之從事者。二書焉。曰「曾氏讀古文鈔」。曾氏讀詩鈔」。二書皆尙未纂集成帙。然胸中已有成竹矣。經濟之學。吾之從事者。二書焉。曰「會典」。曰「皇朝經世文編」。考據之學。吾之從事者。四書焉。曰「易經」。曰「詩經」。曰「史記」。曰「漢書」。此十種者。須要爛熟於心中。凡讀此書。皆附於此十書。如室有基而丹雘附之。如木有根而枝葉附之。如雞伏卵。不稍歇而便冷。如蛾成堙。不見異而思遷。其斯爲有本之學乎。(辛亥七月)

天行健。君子以自強不息。地勢坤。君子以厚德載物。頤。君子以慎言語。節飲食。損。君子以懲忿窒慾。益。君子以見善則遷。有過則改。鼎。君子以正位凝命。此六卦之大象。最切於人。頤以養身。養德。鼎以養心。養賢。尤爲切要。(辛亥七月)

座右爲聯語。以自箴云。「不爲聖賢。便爲禽獸。莫問收穫。但問耕耘。」(辛亥七月)

治家貴嚴。嚴父常多孝子。不嚴。則子弟之習氣。日就佚惰。而流弊不可勝言矣。故易曰。「威如吉。」欲嚴而膏威。必本於莊敬。不苟言。不苟笑。故曰。「威如之吉。反身之謂也。」(辛亥七月)

書味深者。而自粹潤。保養完者。神自充足。此不可以僞爲。必火候既到。乃有此驗。(辛亥七月)

盜虛名者。有不測之禍。負隱隱者。有不測之禍。懷伎心者。有不測之禍。(辛亥七月)

除却進德修業。乃是一無所恃。所謂把鏡四路頭也。若不日日向上。則人非鬼。身敗名裂。不旋踵而至矣。可不

畏哉。(辛亥八月)

顏泉明尋求姑姊妹。及其子而並收其父之部曲妻子。且斂衰履謙之衣衾。與其父果卿同。盛德之事。足以貴日月矣。(辛亥八月)

是夜思人之見信於朋友。見信於君父。見信於外人。皆絲毫不可勉強。猶四時之運。漸推漸移。而成歲功。自是不可欲速。不可助長。(辛亥十一月)

窒慾常念男兒猴。慾忿當思屬纊時。(辛亥十一月)

治心之道。先去其毒。陽惡曰忿。陰惡曰慾。治身之道。必防其患。剛惡曰暴。柔惡曰慢。治口之道。二者交傷。曰慎言。曰節飲食。凡此數端。其藥維何。禮以居敬。樂以導和。陽剛之惡。和以宜之。陰柔之惡。敬以持之。飲食之過。敬以檢之。言語之過。和以斂之。敬極肅肅。和極雍雍。穆穆縣縣。斯爲德容。容在於外。實根於內。動靜交養。睟面盎背。(壬子正月)

余生平雖頗好看書。總不免好名好勝之見。參預其間。是以無孟子深遠。自得一章之味。無杜元凱優柔。鑿一一段之趣。故到老而無一書可恃。無一事有成。今雖暮齒衰邁。當從「敬靜純淡」四字上痛加工夫。縱不能如孟子元凱之所云。但養得胸中一種恬靜書味。亦稍足自適矣。(壬子)

處逆境之道。惟西銘「無所逃而待烹。申生其恭也。勇於從而順令者。伯奇也」等句。最爲親切。(壬子) 偶作聯語以自箴云。「禽裏還人。靜由敬出。死中求活。淡極樂生。」一本孟子養氣章之意。一本論語疏水曲肱章之意。以絕去枯亡營擾之私。

本朝博學之家。頗多宏儒碩士。而其中爲人者多。爲己者少。如顧閻並稱。顧則爲己。閻則不免人之見者存。江戴並稱。江則爲己。戴則不免人之見者存。段王並稱。王則爲己。段則不免人之見者存。方劉姚並稱。方姚爲己。劉則不免人之見者存。其達而在上者。李厚基李可亭秦味經。則爲己之數多。紀曉嵐阮芸臺則不免人之見者存。學

者用心。固宜於幽冥中。先將爲己爲人之界。分別明白。然後審端致力。種桃得桃。種杏得杏。未有根本不正。而枝葉發生。而自鬯茂者也。(戊午十一月)

邵子所謂觀物。莊子所謂觀化。程子所謂觀天地生物氣象。須要放大胸懷。游心物外。乃能絕去一切繳繞。鬱悒煩悶。不寧之習。(戊午十一月)

讀書之道。朝聞道而夕死。殊不易易。問道者。必真知而篤信之。吾輩自己不能自信。心中已無把握。焉能問道。(己未二月)

胸襟廣大。宜從「平」「淡」二字用功。凡人我之際。須看得平。功名之際。須看得淡。庶幾胸懷日闊。(己未二月)

傍夕。與子序登樓。論老年用功。不可有驕氣。暮氣。(己未二月)

念「不知命。不知禮。不知言」三者。論語以殿全篇之末。良有深意。若知斯三者。而益之以孟子「取人爲善。與人爲善」之義。則庶幾可爲完人矣。(己未二月)

聞子序談養氣章末四節。言孔子之所以異於伯夷伊尹者。不在高處。而在平處。不在隆處。而在好處。好者。下也。平者。庸也。夷尹之聖。以其隆高而異於衆人也。宰我之論堯舜。以勳業而隆。孔子以並無勳業而好。子貢之論百王。以禮樂而隆。孔子以并無禮樂而好。有若之論他聖人。以出類拔萃而隆。孔子以即在類萃之中。出不拔。而自處於好。以好下而同於衆人。此其所以異於夷尹也。此其所以爲生民所未有也。(己未二月)

讀東坡「但尋牛矢覓歸路」詩。陸放翁「斜陽古柳趙家莊」詩。杜工部「黃四孃東花滿蹊」詩。念古人胸次瀟灑曠遠。毫無渣滓。出其大也。余飽歷世故。而胸中猶不免計較將迎。何其小也。沈吟玩味久之。(己未四月)

思夫人皆爲名所驅。爲利所驅。而尤爲勢所驅。當孟子之時。蘇秦張儀公孫衍輩。有排山倒海。飛沙走石之勢。而孟子能不爲所播。真豪傑之士。足以振厲百世者矣。(己未五月)

爲人之道有四知。天道有三惡。三惡之目。曰天道惡巧。天道惡盈。天道惡貳。貳者。多猜疑也。不忠誠也。無恆心也。四知之目。卽論語末章。知命。知禮。知言。而吾更加以知仁。仁者。恕也。己欲立而立人。己欲達而達人。恕道也。立者。足以自立也。達者。四達不悖。遠近信之。人心歸之。詩云。「自西自東。自南自北。無思不服。」禮云。「推而放諸四海而準。」達之謂也。我欲足以自立。則不可使人無以自立。我欲四達不悖。則不可使人一步不行。此立人達人之義也。孔子所云。「己所不欲。勿施於人。」孟子所云。「取人焉善。與人焉善。」皆恕也。仁也。知此則識大量大。不知此則識小量小。故吾於三知之外。更加知仁。願與沆弟共勉之。沆弟亦深領此言。謂欲培植家運。須從此七字致力也。(己未五月)

讀書之道。杜元凱稱若江海之浸。膏澤之潤。若見聞太寡。蘊蓄太淺。譬猶一勺之水。斷無轉相灌注。潤澤豐美之象。故君子不可以小道自域也。(己未五月)

與子序言聖人之道。亦曰。「學問闊歷。漸推漸廣。漸習漸熟。以至於四達不悖。」因戲稱曰。鄉人有終年賭博。而破家者。語人曰。「吾賭則輸矣。而賭之道精矣。」從來聖賢未有不由勉強以幾自然。由闊歷悔悟以幾成熟者也。程子解孟子苦勞。皸乏。拂亂。動忍等語云。「若要熟也。須從這裏過。」亦與賭輸而道精之義相近。子序笑應之。(己未五月)

余近日常寫大字。微有長進。而不甚貴氣。蓋緣結體之際。不能字字一律。如或上鬆下緊。或上緊下鬆。或左大右小。或右大左小。均須始終一律。乃成體段。余字取勢。本係左大右小。而不能一律。故恆無所成。推之作古文辭。亦自有體勢。須篇篇一律。乃爲成家。辦事亦自有體勢。須事事一律。乃爲成章。言語動作。亦自有體勢。須日日一律。乃爲成德。否則載沉載浮。終無所成矣。(己未六月)

作書者宜臨帖摹幅。作文作詩皆宜專學一家。乃易長進。然則作人之道。亦宜專學一古人。或得今人之賢者。而師法之。庶易長進。(己未八月)

德成以謹言慎行爲要。而「敬恕儉靜勤潤」六者闕一不可。學成以三經三史三子三集爛熟爲要。而三者亦須提其要而鉤其元。藝成以多作多寫爲要。亦須自闢門徑。不依傍古人格式。功成以開疆安民爲要。而亦須能樹人。能立法。能是二者。雖不拓疆。不擇民。不害其爲功也。四者能成其一。則足以自怡。此雖近於名心。而猶爲得其正。(己未八月)

念天道三惡之外。又覺好露而不能潭。亦天之所惡也。(己未九月)

余復胡中丞信中有云。「惟忘機可以消衆機。惟澹懂可以被不祥。」似頗有義意。而媿未能自體行之。(己未九月)

凡人涼薄之德。約有三端。最易觸犯。聞有惡德敗行。談之娓娓不倦。妒功忌名。幸災樂禍。此涼德之一端也。人受命於天也。如臣受命於君。子受命於父。而或不能受命。居卑思尊。日夜自謀。置其身於高明之地。譬諸金躍冶而以鑊鄒干將自命。此涼德之二端也。胸苞清濁。口不臧否者。聖哲之用心也。強分黑白。過事激揚者。文士輕薄之習。優伶風切之態也。而吾輩不察而效之。動輒區別善惡。品第高下。使優者未必加勸。而劣者幾無以自處。此涼德之三端也。余今老矣。此三者。尙加戒之。(己未九月)

君子有三樂。讀書聲出金石。飄飄意遠。一樂也。宏獎人材。誘人日進。二樂也。勤勞而後憩息。三樂也。(己未九月)

孔子所謂性相近。習相遠。上智下愚不移者。凡事皆然。即以圍棋論。生而爲國手者。上智也。屢學而不知局道。不辨死活者。下愚也。此外皆相近之姿。視乎教者何如。教者高。則習之而高矣。教者低。則習之而低矣。以作字論。生而筆姿秀挺者。上智也。屢學而拙如薑芽者。下愚也。此外則皆相近之姿。視乎教者何如。教者鍾王。則衆習於鍾王矣。教者蘇米。則衆習於蘇米矣。推而至於作文亦然。打仗亦然。皆視乎在上者一人之短長。而衆人之習隨之。爲轉移。若在上者不自咎其才德之不足以移人。而徒致慨上智之不可得。是猶執策而歎無馬。是真無馬哉。(己未十月)

李申甫自黃州歸來，稍論時事。余謂當豎起骨頭，竭力撐持。三更不眠，因作一聯云：「養活一團春意，撐起兩根窮骨頭。」用自警也。余生平作自箴聯句頗多，惜皆未寫出。丁未年在家作一聯云：「不愆不尤，但反身爭箇一壁靜，勿忘勿助。看平地長得萬丈高。」曾用木板刻出，與此聯意相近。因附記之。（己未十月）

夜闌荀子三篇，三更盡睡。四更即醒，又作一聯云：「天下無易境，天下無難境，終身有樂處，終身有憂處。」至五更，又改作二聯。一云：「取人爲善，與人爲善，樂以終身，憂以終身。」一云：「天下斷無易處之境遇，人間那有空閒的光陰。」（己未十月）

今夜醒後，心境不甚恬適，於愛憎恩怨未能悉化。不如昨夜之清白坦蕩遠甚。夫子所稱日月至焉者，或亦似此乎。（己未十月）

近日之失，由於心太弦緊，無舒和之意。以後作人，當得一鬆字。意味日來，每思吾身能於十三字者用功，尚不失晚年進境。十三字者，謂三經、三史、三子、三集、三實、三忌、三薄、三知、三樂、三寡也。三經、三史、三子、三集、三實，余在京師嘗以匾其室。在江西曾刻印章矣。三忌者，即所謂天道忌巧，天道忌盈，天道忌貳也。三薄者，幸災樂禍，一薄德也。逆命億數，二薄德也。臆斷皂白，三薄德也。三知者，論語末章所謂知命、知禮、知言也。三樂者，即前所記讀書聲、出金石、一樂也。宏獎人材，誘人日進，二樂也。勤勞而後思息，三樂也。三寡者，寡言養氣，寡視養神，寡欲養精，十三字者，時時省察，其猶失之東隅，收之桑榆者乎。（己未十一月）

聖人之所言，有所不言。積善餘慶，其所言者也。萬事由命不由人，其所不言者也。「禮樂政刑，仁義忠信，其所言者也。虛無清靜，無爲自化，其所不言者也。」吾人當以不言者爲體，以所言者爲用。以不言者存諸心，以所言者勉諸身。以莊子之道自怡，以荀子之道自克，其庶爲闡道之君子乎。（己未十一月）

日來心緒總覺不自在。殆孔子所謂不仁者，不可以久處約也。軍中乃爭權挾勢之場，又實非處約者所能濟事。求其真白不移，淡泊自守，而足以驅使羣力者，頗難其道爾。（己未十一月）

孔子所謂「下學上達」，達字中必自有一種「洞徹無疑」意味。即蘇子瞻晚年意思深遠，隨處自得，亦必有脫離塵垢，卓然自立之趣。吾困知勉行，久無所得，年已五十，胸襟意識猶未免爲庸俗之人，可愧也已。（己未十二月）

天下事一一責報，則必有大失所望之時。佛氏因果之說，不可盡信，亦有有因而無果者。憶蘇子瞻詩云：「治生不求富，讀書不求官。譬如飲不醉，陶然有餘歡。」吾更爲添數詞云：「治生不求富，讀書不求官，修德不求報。爲文不求傳，譬如飲不醉，陶然有餘歡。中含不盡意，欲辨已忘言。」（己未十二月）

與作梅陽論易圖及風水之說，又論天下之理，惟易簡乃可行，極爲契合。（庚申正月）

此身無論處何境遇，而「敬」「恕」「勤」字無片刻可弛，苟能守此數字，則無人不自得。又何必斤斤計較得君與不得君，氣誼孤與不孤哉。（庚申正月）

安得一二好友，胸襟曠達，蕭然自得者，與之相處，砭吾之短，其次則博學能文，精通訓詁者，亦可助益於我。（庚申正月）

讀書之道，以胡氏之科條論之，則經義當分小學、理學、詞章、典禮四門，治事當分吏治、軍務、食貨、地理四門。（庚申三月）

凡事皆有至淺至深之道，不可須臾離者，因欲名其堂曰：「八本堂。」其目曰：「讀書以訓詁爲本，詩文以聲調爲本，事親以得歡心爲本，養生以少惱怒爲本，立身以不妄語爲本，居家以不晏起爲本，居官以不要錢爲本，行軍以不擾民爲本。」古人格言儘多，要之每事有第一義，必不可不竭力爲之者，得之如探驪得珠，失之如舍根本而圖枝葉，古人格言雖多，亦在乎吾人之慎擇而已矣。（庚申四月）

凡做好人，做好官，做名將，俱要好師，好友，好榜樣。（庚申五月）

聞季高說，有孝子孀婦二人，因其家火起，早其母靈柩於外，二人平日皆不以力著，婦尤孱弱，誠至則神應，一也。

情急則智生。二也。勢激則力勁。如水之可以升山。矢之可以及遠。三也。因是以推。則天下無不可爲之事矣。（庚申五月）

諸生呈繳工課。余教以「誠」「勤」「廉」「明」四字。而勤字之要。但在「好問」「好察」云云兩事。反復開導。（庚申五月）

九弟諫余數事。余亦教九弟「靜虛涵泳。蕭然物外。」（庚申五月）

余身旁須有一胸襟恬淡者。時時伺吾之短。以相箴規。庶不使「矜心」生於不自覺。（庚申七月）

夏穀甫言。「朱子之學。得之艱苦。所以爲百世之師。」二語深有感於余心。天下事未有不從艱苦中得來。而可久可大也。（庚申八月）

憶八年所定「敬」「恕」「誠」「靜」「勤」「潤」六字。課心課身之法。實爲至要至該。吾近於靜字欠工夫耳。（庚申九月）

傲爲凶德。凡當大任者。皆以此字致於顛覆。用兵者最戒驕氣。情氣作人之道。亦惟驕情二字。誤事最甚。（庚申九月）

與作梅邕談當今之世。富貴無所圖。功名亦斷難就。惟有自正其心。以維風俗。或可補救於萬一。所謂正心者。曰「厚」「實」。厚者。恕也。「己欲立而立人。己欲達而達人。」「己所不欲。勿施於人。」存心之厚。可以少正天下澆薄之風。實者。不說大話。不務虛名。不行駕空之事。不談過高之理。如此可以少正天下浮僞之習。因引顧亭林所稱「匹夫之賤。與有責焉」者。以勉之。（庚申九月）

東坡「守駿莫如跛」五字。凡技皆當知之。若一味駿快奔放。必有顛躓之時。一向貪美名。必有大污辱之事。余以「求闕」名齋。即求自有缺陷不滿之處。亦「守駿莫如跛」之意也。（庚申九月）

送人銀錢。隨人用情之厚薄。一言之輕重。父不能代子謀。兄不能代弟謀。譬如飲水冷暖。自知而已。（庚申十一月）

月)

古人「修身」「治人」之道。不外乎「勤」「大」「謙」。勤若文王之不遑。大若舜禹之不與。謙若漢文之不勝。而勤謙二字。尤爲徹始徹終。須臾不可離之道。勤所以傲惰也。謙所以傲傲也。能勤且謙。則大字在其中矣。千古之聖賢豪傑。卽奸雄。欲有立於世者。不外一勤字。千古有道自得之士。不外一謙字。吾將守此二字以終身。儻所謂「朝聞道。夕死可矣」者乎。(庚申十二月)

「勞謙」二字。受用無窮。勞所以戒惰也。謙所以戒傲也。有此二者。何惡不去。何善不臻。當鈔寫幾分。徧示諸弟及子姪。(庚申十二月)

吾祖父星岡公在時。不信醫藥。不信僧巫。不信地仙。卓識定志。確乎不可播奪。實爲子孫者所當遵守。近年家中兄弟子姪。於此三者皆不免相反。余之不信僧巫。不信地仙。頗能謹遵祖訓。父訓。而不能不信藥。自八年起。常服鹿茸丸。是亦不能繼志之一端也。以後當漸漸戒止。并函誠諸弟。戒信僧巫地仙等事。以紹家風。(庚申十二月)

立身之道。有禹墨之「勤」。「儉」。兼老莊之「靜」。「虛」。庶於「修己」。「治人」之術。兩得之矣。(辛酉十月)

周末諸子各有極至之詣。其所以不及孔子者。此有所偏至。卽彼有所獨缺。亦猶夷惠之不及孔子耳。若游心能如老莊之虛靜。治身能如墨翟之勤儉。齊民能如管商之嚴整。而又持之以不自是之心。偏者裁之。缺者補之。則諸子皆可師。不可棄也。(辛酉八月)

與九弟言「與人爲善。取人爲善」之道。如大河水盛。足以浸灌小河。小河水盛。亦足以浸灌大河。無論爲上爲下。爲師爲弟。爲長爲幼。彼此以善相浸灌。則日見其益。而不自知矣。九弟深以爲然。(辛酉八月)

孟子光頭俊偉之氣。淮莊子與韓退之得其彷彿。近世如王陽明亦殊磊落。但文辭不如三子者之跌宕耳。(辛

百九月。

修己治人之道。止「勤於邦。儉於家。言忠信。行篤敬」四語。終身用之。有不能盡。不在多。亦不在深。（辛酉十一月）

天下凡物。加倍磨治。皆能變換本質。別生精彩。何況人之於學。但能日新又新。百倍其功。何患不變化氣質。超凡入聖。（辛酉十一月）

九弟有事。求「可功求成」之念。不免代天主張。與之言者。莊自然之趣。囑其游心虛靜之域。（壬戌二月）

靜中細思古今億萬年。無有窮期。人生其間。數十寒暑。僅須臾耳。大地數萬里。不可紀極。人在其中。寢處游息。畫僅一室耳。夜僅一榻耳。古人書籍。近人著述。浩如煙海。人生目光之所能及者。不過九牛之一毛耳。事變萬端。笑名百途。人生才力之所能及者。不過太倉之一粒耳。知天之長。而吾所歷者短。則還憂患橫逆之來。當少忍以待其定。知地之大。而吾所居者小。則遇榮利爭奪之境。當退讓以守其雌。知書籍之多。而吾所見者寡。則不敢以一得自喜。而當思擇善而約守之。知事變之多。而吾所辦者少。則不敢以功名自矜。而當思舉賢而共圖之。夫如是則自私自滿之見。可漸漸蠲除矣。（壬戌二月）

讀原毀。伯夷頌。獲麟解。龍雜說諸首。岸然想見古人。獨立千古。確乎不拔之象。（壬戌四月）

闕王而農所注張子正蒙。於盡性知命之旨。略有所會。蓋盡其所可知者。於己性也。聽其不可知者。於天命也。易繫辭「尺蠖之屈」八句。盡性也。「過此以往」四句。知命也。農夫之服田力穡。勤者有收。惰者歉收。性也。焉稼湯世。終歸焦爛。命也。愛人。治人。禮人。性也。愛之而不親。治人而不治。禮人而不答。命也。聖人之不可及處。在盡性以至於命。盡性猶下學之事。至於命。則上達矣。當盡性之時。功力已至十分。而效驗或有應有不應。聖人於此淡然泊然。若知之。若不知之。若著力。若不著力。其中消息。最難體認。若於性分當盡之事。百倍其功以赴之。而俟命之學。則以淡如泊如爲宗。庶幾其近道乎。（壬戌十月）

古聖人之道。莫大乎與人爲善。以言誨人。是以善教人也。以德薰人。是以善養人也。皆與人爲善之事也。然徒與人。則我之善有限。故又貴取諸人以爲善。人有善則取以益我。我有善則與以益人。連環相生。故善端無窮。彼此挹注。故善源不竭。君相之道。莫大乎此。師儒之道。亦莫大乎此。仲尼之學。無常師。即取人爲善也。無行不與。即與人爲善也。爲之不厭。即取人爲善也。誨人不倦。即與人爲善也。念忝竊高位。劇寇方張。大難莫平。惟有就吾之所見。多教數人。因取人之所長。還攻吾短。或者鼓盪斯世之善機。因以挽回天地之生機乎。癸亥二月。

處人處事之所以不當者。以其知之不明也。若巨細周知。表裏洞澈。則處之自有方術矣。吾之所以不能周知者。不好問。不善問耳。○（癸亥二月）

修己治人之道。果能常守「勤」「儉」「謹」「信」四字。而又能取人爲善。與人爲善。以禮自治。以禮治人。自然寡尤寡悔。鬼伏神欽。特恐信道不篤。間或客氣用事耳。○（癸亥八月）

溫孟子分段記出。寫於每章之首。如言心性之屬。曰。「性道至言。」言取與出處之屬。曰。「廉節大防。」言自况自謙之屬。曰。「抗心高望。」言反躬刻厲之屬。曰。「切己反求。」○（癸亥十一月）

百種弊病皆從懶生。類則弛緩。弛緩則治人不嚴。而趣功不敏。一處遲則百處懈矣。○（甲子二月）

前以八德自勉。曰。勤。儉。剛。明。孝。信。謙。渾。近日於勤字不能實踐。於謙渾二字。尤覺相違。悚愧無已。勤儉剛明四字。皆求諸己之事。孝信謙渾四字。皆施諸人之事。孝以施於上。信以施於同列。謙以施於下。渾則無往不宜。大約與人。恐爭。不可自求萬全處。白人是非。不可過於武斷。此渾字之最切於實用者耳。○（甲子四月）

夢見姚姬傳先生。頰長清癯。而生趣盎然。○（甲子十二月）

闕聖祖庭訓格言。嗣後擬將此書。及張文端公之聰訓齋語。每日細閱數則。以養此心和平篤實之雅矣。○（乙丑五月）

闕劉石庵清愛堂帖。其起筆多師晉賢。及智永千文。用遊說之法。故能蘊鋒。張得天之筆。多師褚顏兩家。用直來

橫受之法。故不藏鋒。而聯絲縈帶。以發其機趣。二者其理本一貫。特逆蹴與直來橫受。形迹判然。難合而爲一耳。
(辛酉六月)

看劉文清公清愛堂帖。留得其自然之趣。方悟文人技藝。佳境有二。曰雄奇。曰淡遠。作文然。作詩然。作字亦然。若能含雄奇於淡遠之中。尤爲可貴。
(辛酉六月)

夢劉文清公。與之盤旋良久。說話甚多。都不記憶。惟記問其作字。果用純筆毫乎。抑用純紫毫乎。文清答以某年到某處道員之任。曾好寫某店水筆。夢中記其店名甚確。醒後亦忘之矣。
(戊辰)

作字之法。險字和字。二者缺一不可。本日闕王簪林贈語。亦於此二字三致意焉。
(辛酉二月)

偶思作字之法。可爲師資者。作二語云。「時賢一石兩水。古法二租六宗。」一石謂劉石庵。兩水謂李春湖程春海。二租謂籤獻。六宗謂歐虞褚李柳黃也。
(丁卯十一月)

日內頗好寫字。而年老手鈍。毫無長進。故知此事須於三十歲前寫定規模。自三十歲以後。只能下一熟字工夫。熟極則巧妙出焉。筆意間架。梓匠之規矩也。由熟而得妙。則不能與人之巧也。吾於三四十歲時。規矩未定。故不能有所成。人有恆言曰。「妙來無過熟。」又曰。「熟能生巧。」又曰。「成熟故知妙也。」巧也。成也。皆從極熟之後得之者也。不特寫字然。凡天下庶事百技。皆先立定規模。後求精熟。即人之所以爲聖人。亦係先立規模。後求精熟。即顏淵未達一閭。亦只是欠熟耳。故曰。「夫仁亦在乎熟之而已矣。」
(己未四月)

觀何廉舫書扇頭小字。個個權奇。自成風格。余年已五十。而作書無一定之風格。屢有遷變。殊爲可愧。古文一事。寸心頗有一定之風格。而作之太少。不足以自證自慰。至於居家之道。治軍之法。與人酬應之方。亦皆無一定之風格。傳曰。「君子也者。人之成名也。」又曰。「君子成德之稱。」余一無所成。其不足爲君子也明矣。
(己未四月)

余往年在京。深以學書爲意。苦思力索。幾於困心衡慮。但胸中有字。手下無字。近歲在軍。不甚思索。但每日筆不

停揮。除寫字及辦公事外。尙習字一張。不甚間斷。專從間架上用心。而筆意筆力。與之俱進。十年前胸中之字。今竟能達之腕下。可見思與學不可偏廢。(辛酉二月)

昔年於慎獨居敬等事。全未用功。至今衰老。毫無把握。悔之晚矣。(庚午閏十月)

記性日壞。過目之事。頃刻即忘。因立記事冊。於應記者。逐日略記一二。從本日爲始。(庚午十二月)

古來聖哲。胸懷極廣。而可達天德者。約有四端。如篤恭修己。而生睿智。程子之說也。至誠感神。而致前知。子思之訓也。安貧樂道。而潤身辟面。孔顏曾孟之旨也。觀物閒吟。而意適神恬。陶白蘇陸之趣也。自恨少壯不知努力。老年常多悔思。於古人心境。不能領取一二。反復尋思。歎喟無已。(辛未二月)

近年焦慮過多。無一日遊於坦蕩之天。總由於名心大切。俗見太重二端。名心切。於學問無成。德行未立。不勝其媿餒。俗見重。故於家人之疾病。子孫及兄弟子孫之有無賢否強弱。不勝縈擾。用是憂慚踟躕如鷓自縛。今欲去此二病。須在「淡」字上著意。不特富貴功名及身家之順逆。子孫之旺否。悉由天定。卽學問德行之成立與否。一大半關乎天事。一概淡而忘之。庶此心稍得自在。(辛未二月)

近來每苦心緒鬱悶。毫無生機。因思尋樂約有三端。勤勞而後憩息。一樂也。至淡以消伎心。二樂也。讀書聲出金石。三樂也。一樂三樂。是咸豐八年所曾有志行之。載於日記者。二樂則近日搜求病根。迄未拔去者。必須於未死之前。拔除淨盡。乃稍安耳。(辛未四月)

閣理學宗傳中朱子。陸子。孫氏所錄。朱子之語。多取其與陸子相近者。蓋偏於陸王之途。去洛閩甚遠也。(辛未五月)

將周易之象及常用之字。分爲條類。別而錄之。庶幾取象於天文地理。取象於身於物者。一目了然。少壯不學。老年始爲此寒淺之舉。抑何陋也。(辛未十二月)

前曾以四語自儆。曰。慎獨則心安。主敬則身強。求仁則人悅。習勞則神欽。近日又添四語。曰。內訟以去惡。曰。日新

以希天。曰：宏獎以育才，曰：貞勝以蒙難。與前此四語互相表裏，而下手工夫，各有切要之方。不知鏡老尚能實踐
一一查（辛未十二月）

少省克

憶自辛卯年改號滌生。滌者，取滌其舊染之污也。生者，取明責了凡之言。一從前種種譬如昨日死，以後種種譬如今日生也。改號至今九年，而不學如故，豈不可歎。余今年已三十，資稟頑鈍，精神虧損。此後豈復能有所成，但求勤儉有恆，無縱逸欲，以喪先人元氣，困知勉行，期有寸得，以無失詞臣體面。日日自苦，不至佚而生淫。如種樹然，斧斤縱尋之後，牛牟又從而牧之，如熬燈然，膏油欲盡之時，無使微風乘之，庶幾稍稍培養精神。不至自速死，誠能日日用功有常，則可以保身體，可以自立，可以仰事俯畜，可以惜福，不使祖宗積累，自我一人享用而盡，可以無愧詞臣，尚能以文章報國。（庚子十月）

與小岑譚，有不合處，自念一二知心，亦復見疑，則平日不自修，不見信於人，亦可知矣。可不儆懼乎。（辛丑三月）三十年爲一世，吾生以辛未十月十一日，今一世矣。聰明日減，學業無成，可勝慨哉。語不云乎：「往者不可諫，來者猶可追。」自今以始，吾其不得自逸矣。（辛丑九月）

夜歸，與九弟言讀書事。九弟悔從前讀得不好，若再不認真教他，愈不能有成矣。余體雖虛弱，此後自己工夫尚
可拋棄，萬不可不教弟讀書也。（辛丑十二月）

岱雲來久談，彼此相勸以善。予言皆己所未能而責人者。陳岱雲言余第一要戒「慢」字，謂我無處不著怠慢之氣，真切中膏肓也。又言予於朋友，每相待過深，不知量而後入，隨處不留分寸。卒至小者齟齬，大者凶隙，不可不慎。又言我處事不惠不精明，患太刻薄，須步步留心。此三言者，皆藥石也。直哉岱雲，克敦友誼。（壬寅正月）

果能據德依仁。即使游心於詩字雜藝。亦無在不可靜心養氣。如作詩之時。只是要壓倒他人。要取名譽。此豈復有爲己之志。(壬寅正月)

凡喜譽惡毀之心。卽鄙夫患得患失之心也。於此關打不破。則一切學問才智。適足以欺世盜名。(壬寅正月)

小珊前與予有隙。細思得我之不是。苟我素以忠信待人。何至人不見信。苟我素能禮人以敬。何至人有慢言。且卽令人有不是。何至肆口慢罵。忿戾不顧。幾於忘身及親若此。此事余有三大過。平日不信不敬。相恃太深。一也。此時一語不合。忿恨無禮。二也。齟齬之後。人反平易。我反悍然。不近人情。三也。(壬寅正月)

與子敦久談後。子貞歸後。兄弟立次。予自書詩韻。欣羨其才。何爲人驚外之見。如此其重。而爲己之志。如此其不堅也。真獨物矣。(壬寅正月)

言物行恆。誠身之道也。萬化基於此矣。余病根在無恆。故家內瑣事。今日立條例。明日仍散漫。下人無常規可循。將來蒞衆。必不能信。作事必不能成。戒之。(壬寅正月)

數日心沾滯於詩。總由心不靜。故不專一。當力求主一之法。誠能主一。養得心靜氣恬。到天機活潑之時。卽作詩亦自無妨我。今尙未主一。徒以浮躁之故。故一日之間。情志屢遷耳。(壬寅正月)

凡際起於相疑。相疑由於自矜明察。我之於小珊。其如上九之於六三乎。吳氏謂合際之道。在於推誠守正。委曲含宏。而無私意猜疑之弊。戒之。勉之。此我之要藥也。(壬寅正月)

客來示以詩藝。讀歎語不由中。余此病甚深。孔子之所謂鈺。其我之謂乎。以爲人情好譽。非是不足以悅其心。試思此求悅於人之念。君子乎。女子小人乎。且我誠能言必忠信。不欺人。不妄語。積久人自知之。不讚。人亦不怪。苟有試而譽人。人且引以爲重。若日日譽人。人必不重我言矣。欺人自欺。滅忠信。喪廉恥。皆在於此。切戒。切戒。(壬寅正月)

竹如說理。實有體驗。言舍「敬」一字。別無下手之方。總以嚴肅爲要。自問亦深知敬字是喫緊下手處。然每日自

且至夜，瑟僞赫喧之意，曾不可得行坐自如。總有放鬆的意思。及見君子時，又偏覺整齊些。是非所以捨著者。那家人上九曰：「有孚威如。」論語曰：「望之儼然。」要使房闔之際，僕婢之前，燕昵之友，常以此等氣象對之。方好獨居。則火滅修容，切記切記。此予第一要藥。能如此，乃有轉機。否則墮落下流，不必問其他矣。（壬寅正月）

吾齒長矣。而詩書六藝，一無所識。志不立，過不改。欲求無忝所生，難矣。（壬寅正月）

日內不敬不靜，常致勞乏。以後須從「心正氣順」四字上體驗。（壬寅正月）

每日游思，多半是要人說好，爲人好名，可恥。而好名之意，又自謂比他人高一層。此名心之連結於隱微者深也。（壬寅正月）

袋雲每日工夫甚多而嚴，可謂惜分陰者。予則玩泄不振。（壬寅正月）

接家信，大人教以保身三要。曰：「節欲，節勞，節飲食。」又言：「凡人交友，祇見得友不是，而我是，所以今日管鮑，明日秦越。」謂我與小珊有隙，是盡人歡，竭人忠之過。宜速改過。走小珊處，當面自認不是。又云：「使氣亦非保身體之道。」小子讀之悚然。小子一喜一怒，勞逸疴癢，無刻不繫於大人之懷也。若不敬身，真禽獸矣。（壬寅正月）

日來自治愈疏矣。絕無瑟僞之意。何貴有此日課之冊。看來只是好名，好作詩，名心也。寫此冊而不日日改過，則此冊真盜名之具也。亦既不能痛癢舊習，何必寫此冊。（壬寅）

唐先生言：「最是『靜』字工夫要緊。大程夫子是三代後聖人，亦是靜字工夫足。王文成亦是靜字有工夫。所以他能不動心，若不靜，省身也不密，見理也不明，都是淨的。總是要靜。」又曰：「凡人皆有切身之病，剛惡柔惡，各有所偏。溺濶既深，動輒發見，須自己體察所溺之病，終身在此處克治。」余比告先生謂素有忿很，不願氣習，偏於剛惡。既而自窺所病，只是好動不好靜。先生兩言，蓋對症下藥也。務當力求主靜，使神明如日之升。即此以求其繼續者，即所謂緝熙也。知此而不行，真暴棄矣。真小人矣。（壬寅十月）

自戒烟煙以來，心神彷彿幾若無主。遏欲之難，類如此矣。不挾破釜沉舟之勢，詎有濟哉。（壬寅十月）

寶蘭泉來。言理見商。余實未能心領其語意。而妄有所陳。自欺欺人。莫此爲甚。總由心有不誠。故詞氣虛憊。卽與人談理。亦是自文淺陋。徇外爲人。果何益哉。(壬寅十一月)

馮樹堂來(渠近日覺得好靜氣迎人)談半時。邀余同至岱雲處久談。論詩文之業。亦可因以進德。彼此持論不合。反覆辯詰。余內有矜氣。自是特甚。反疑人不虛心。何明於責人。而闇於責己也。(壬寅十一月)

此刻下手工夫。除謹言。修容。靜坐三事。更從何處下手。每日全無切實處。尙曉曉與人說理。說他何益。(壬寅十一月)

岱雲欲觀余饋貧糧本。予以雕蟲瑣瑣。深閉固拒。不欲與之觀。一時揜着之情。自文固陋之情。巧言令色。種種叢集。皆從好名心發出。蓋此中根株深矣。(壬寅十一月)

凡往日游戲隨和之處。不能遽立崖岸。惟嘗往還漸稀。相見必敬。漸改徵逐之習。平日辯論夸誕之人。不能遽變聲啞。惟嘗談論漸卑。開口必誠。力去狂妄之習。(壬寅十一月)

朱廉甫前輩偕蕙西來。二君皆直諒多聞者。廉甫前輩之枉過。說欲引余爲同志。謂可與適道也。豈知余絕無改過之實。徒有不作之言。竟爾盜得令聞。非穿窬而何。(壬寅十一月)

自立志自新以來。至今五十餘日。未曾改得一過。此後值須徹底盪滌。一絲不放鬆。從前種種。譬如昨日死。以後種種。譬如今日生。務使息息靜極。使此生意不息。

至岱雲處。與之談詩。傾筐倒篋。言無不盡。至子初方歸。此時自謂與人甚忠。殊不知已認賊作子矣。日內就着詩文。不從戒懼謹獨上切實用功。已自誤矣。更以之誤人乎。(壬寅十一月)

馮樹堂來。因約岱雲來。三人暢談小酌。二君皆有節制。惟予縱論無閑。仍不出昨夜談議。而往復自慧。自謂忠於爲人。實以重外而輕內。且味昌黎知名箴之訓。總之每日不外乎多言。不外乎要人說好。(癸卯正月)

於與人往還。最小處計較。意欲俟人先施。純是私意繫縛。克去一念。虛生一念。飯後靜坐。卽已成寐。神昏不振。一

至於此。(癸卯正月)

早起心多游思。因算去年共用銀數。拋却一早。可惜。(癸卯正月)
會客時。有一語極失檢。由忿字伏根甚深。故有觸即發耳。

飯後語及小故。予大發忿語。不可遏。有忘身及親之忿。雖經友人理諭。猶復肆口漫罵。比時絕無忌憚。樹堂昨夜云。「心中根子未盡。久必一發。發則救之無及矣。」我自蓄此忿。僅自反數次。餘則但知尤人。本年立志重新。換一箇人。才過兩天。便決裂至此。雖痛衰而悔。豈有及乎。真所謂與禽獸奚擇者矣。(癸卯正月)

車中無戒懼意。爲下人不得力。屢動氣。每日間。總是忿字。忿字。往往知而不克去。總是此志頽放耳。可惜。可恥。(癸卯正月)

坐車中頻生氣。雖下人不甚能幹。實由懲忿絕無功夫。遂至瑣細足以累其心。(癸卯正月)

自去年十二月廿後。心常忡忡不自持。若有所失亡者。至今如故。蓋志不能立。時易散倒。故心無定向。無定向則不能靜。不靜民不安其根。只在志之不立耳。又有鄙陋之見。檢點細事。不忍小忿。故一毫之細。竟夕躊躇。一端之忤。終日怙戀。坐是所以忡忡也。志不立。識又鄙。欲求心之安。不可得矣。是夜竟不成寐。展轉千思。俱是。夫之見。於應酬小處計較。遂以小故引伸成忿。懲之不暇。而更引之。是引盜入室矣。(癸卯正月)

所以須日課冊者。以時時省過。立即克去耳。今五日一記。則所謂省察者安在。所謂自新者安在。吾誰欺乎。真甘爲小人。而絕無羞惡之心者矣。(癸卯正月)

早起吐血數口。不能靜養。遂以斲喪父母之遺體。一至於此。再不保養。是將限入太不孝矣。將盡之資。豈可速之以風。萌蘗之木。豈可速之以牛羊。苟失其養。無物不消。况我之氣血素虧者乎。今惟有日日靜養。節嗜慾。慎飲食。寡思慮而已。(癸卯正月)

樹堂蕙西蓮舫三人。先後來陪客。坐不安席。若舌比平時較短者。屈伸轉旋俱不適。黃蒲腳約飲。竟不。不知

身體何以虧乏若此。不敬身之罪大矣。高景逸先生云。「接教言。連日精神不暢。此不可放過。凡天理自然通暢和樂。不通暢處。皆私欲也。當時刻喚醒。不令放倒。」然則人之精神短弱。皆自己以有以致之也。(癸卯正月)

戊戌同年團拜。予爲值年。承辦諸事。早至文昌館。至四更方歸。凡辦公事。須視如己事。將來爲國爲民。亦宜處處視如一家一身之圖。方能親切。予今日愧無此見。致用費稍淨。又辦事有要譽的意思。此兩者。皆他日大病根。當時時猛省。(癸卯正月)

赴張兩農飲約。更初方歸。席間面諛人。有要譽的意思。語多諧謔。便涉輕佻。所謂「君子不重則不威也。」歸途便至杜蘭溪家商事。又至竺度處久談。多言不知戒。絕無所謂省察者。志安在邪。恥安在邪。(癸卯正月)

余體不舒暢。悶甚不適。高景逸云。「凡天理自然通暢。」予今悶損至此。蓋身被私意私欲纏擾矣。尙何自拔哉。立志今年自新。重起爐冶。痛與血戰一番。而半月以來。暴棄一至於此。何以爲人。何以爲子。(癸卯正月)

日來居敬窮理。并無工夫。故聞人說理。聽來都是隔膜。都不真切。愧恥孰甚。(癸卯正月)

聞劉覺香先生言。渠作外官景况之苦。愈知我輩舍節儉。別無可以自立。若冀倖得一外官。以彌縫罅漏。缺瘠則無以自存。缺肥則不堪問矣。可不懼哉。(癸卯二月)

自正月以來。日日頽放。遂已一月。志之不立。一至於此。每觀此冊。不知所謂可以爲人乎。聊存爲告朔之餼羊爾。看書眼蒙如老人。蓋安肆日偷。積偷之至。腠理都極懈弛。不復足以固肌膚。束筋骸。於是風寒易侵。日見疲輒。此不能居敬者之不能養小體也。又心不專一。則雜而無主。積之既久。必且伎求迭至。忿怒紛來。其究也。則搖搖如懸旌。皇皇如有所失。總之曰。「無主則已。而乃釀爲心病。此不能居敬者之不能養大體也。」是故吾人行父母之遺體。雖居敬更無別法。內則專靜純一。以養大體。外則整齊嚴肅。以養小體。如是而不自強。吾不信也。嗚呼。言出汝口。而汝則背之。是何肺腸。(癸卯二月)

言多諧謔。又不出自心中之說。每日言語之失。直是鬼域清狀。遍問其他。(癸卯二月)

觀人作應制詩。面諛之。不忠不信。何以爲友。聖人所謂「善柔便佞之摯友。」我之謂矣。（癸卯二月）

年在壯歲而頹情稱病。可恥孰甚。今年營已四十日矣。一事不成。晏安自甘。再不懲戒。天其殃汝。惕之。惕之。

予對客有怠慢之容。對此良友。不能生嚴憚之心。何以取人之益。是將拒人於千里之外矣。况見賓如此。違問聞

居火滅。修容之謂何。小人哉。（癸卯二月）

考試之有得失。猶歲之有豐歉也。有耕而即期大有。是貪夫也。然絕不施耕耨之功。不已。棄天平。我則身爲惰農。而翻笑穗萎爲多事。偵孰甚焉。

蕙西面責予數事。一曰。「慢。」謂交友不能久而敬也。二曰。「自是。」謂看詩文多執己見也。三曰。「僞。」謂對人能作幾副面孔也。直哉。吾友。吾日蹈大惡而不知矣。（癸卯二月）

季師意欲余致力於考試工夫。而余以身弱爲辭。豈欺人哉。自欺而已。暴棄至此。尙可救藥乎。（癸卯二月）

竹如言及渠生平交道。而以知己許余。且曰。「凡閣下所以期許下走之言。信之則足以長自是之私。辭之而又恐負相知之真。吾惟有懼以終始而已。」云云。予聞此數語。悚然汗下。竹如之敬我。直乃神明內斂。我何德以當之乎。日來安肆如此。何以爲竹如知己。是汚竹如也。（癸卯二月）

處衆人中。孤零零若無所許可者。自以爲人莫予知。不知在己。本一無足知也。何尤人焉。（癸卯三月）

今年忽忽已過兩月。自新之志。日以不振。愈昏愈頹。以至不如禽獸。昨夜痛自猛省。以爲自今日始。當斬然更新。不終小人之歸。不謂雲階招與對弈。仍不克力卻。日日如此。奈何。（癸卯三月）

何丹畦請余爲是正文字。儼然自任。蓋矜心之內伏者。深矣。（甲辰三月）

日內沾滯於詩。明知詩文以積久勃發爲佳。無取乎強索。乃思之不得。百事俱廢。是所謂縲心者也。戒之。（甲辰五月）

飯後無所事事。心如懸而不降者。知其不能定且靜也。久矣。（甲辰七月）

早在朝房言一事。謂無樣子。夫言欲以口舌勝人。轉爲人所不服也。(辛亥九月)
孫高陽史道鄰皆極耐得苦。故能艱難馳驅。爲一代之偉人。今已養成膏粱安逸之身。他日何以肩得大事。(辛亥九月)

凡事豫則立。本日下午天。因明日有天壇興工。監視行禮。及製造神牌行禮等事。日內未經慮及。頗覺心中不定。懼致貽誤。皆不豫之故也。(辛亥十月)

是日因早間聞人言。刑部同堂諸君子。疑我去年所上摺。有參劾刑部之言。心不怡者一日。以平日不見信於人。遂招此羣疑衆謗也。(壬子正月)

是日忿怒二念皆大動。竟不能止。恐遂成內傷病矣。(壬子正月)

心生忿懣。蓋無養之故也。(戊午六月)

子序之言。欲余捐除雜念。輕視萬事。淡泊明志。信良友之言。余今若矣。忿不能懲。怒不能望。客氣聚於上焦。深用愧憾。古人所以貴於爲道日損也。(戊午十一月)

捐忿之心。蓄於方寸。自咎局量太小。不足任天下之大事。(戊午十一月)

心緒作惡。因無耐性。故刻刻不自安適。又以心中實無所得。不能輕視外物。成敗毀譽。不能無所動於心。甚愧淺陋也。(戊午十一月)

余在軍中。頗以詩文廢正務。後當切戒。(己未二月)

思人心所以擾擾不定者。只爲不知命。陶淵明白香山蘇子瞻所以受用者。只爲知命。吾涉世數十年。而有時猶起計較之心。若信命不及者。深可媿也。(己未五月)

寫字略多。困倦殊甚。眼花而疼。足輒若不能立者。說話若不能高聲者。衰憊之狀。如七十許人。蓋受質太薄。而疾病憂鬱。多年纏綿。既有以撼其外。讀書學道。志充而力不副。識遠而行不逮。又有以病其內。故不覺衰日之日逼。

也。(己未五月)

閱日知錄。易經有曰。「易六十四卦。三百八十四爻。一言以蔽之曰。『不恆其德。或承之羞。』」讀之不覺愧汗。(己未六月)

此心褊激清介。殊非載福之道。當力移寬大溫潤一路。(己未十二月)

寸衷微有鬱積。總由中無所得。下學而不克上達。故世俗之見。尚不免膠擾於懷中耳。(庚申正月)

至老淵頭登大舟。舟係吳城船廠爲余新造者。極堅實。極華麗。而慨然曰。「誦章公『自慚居處崇。未視斯民康』之句。爲之愧悚不已。」(庚申五月)

恭讀硃批余之師心自用。余昔己亥年進京。臨別求祖父教訓。祖父以一傲字戒我。今上又以師心戒我。當刻圖書一方。記此二端。(庚申八月)

與作梅圍棋一局。旋復鬯論人情之厚薄。讀書人之多涉於虛浮。作梅所陳。多見道之言。余所發。多有激之詞。(庚申九月)

作梅言。「見得天下皆是壞人。不如見得天下皆是好人。存一番薰陶玉成之心。使人樂於爲善。」云云。蓋諷余近日好言人之短。見得人多是也。(庚申九月)

見羅瞿江三縣令。因語言不合理。余怒斥之甚厲。頗失「爲人上者。泰而不驕。威而不猛」之義。(庚申九月)

余德薄能鮮。忝竊高位。又竊虛名。已干造物之忌。恐家中老少習於驕奢佚三字。實深悚懼。(庚申九月)

九弟信言。「古稱君有爭臣。臣有爭君。今兄有爭弟。」余近以居位太高。虛名太大。不得聞規諫之言爲慮。若九弟果能隨事規諫。又得一二嚴憚之友。時以言正相勸。內有直弟。外有畏友。庶幾其免於大戾乎。居高位者。何人不敗於自是。何人不敗於惡聞正言哉。(庚申十一月)

古人言。「晝課妻子。夜課夢寐。」吾於睡中夢中。總乏一種好意味。蓋猶未免爲鄉人也。(庚申十一月)

夜因武甯楊令與鄭莫互訐之案。頗爲鬱悞不平。繼思謙抑之道。凡事須力戒爭勝之心。痛自懲艾。(辛酉正月)身體若有病者。奄奄思睡。或以積擱文牘太多。此心歉然。若有所負疚者而然與。(辛酉六月)

少荃論余之短處。總是懦弱。與往年周穀甫所論略同。(辛酉六月)

誠中形外。根心生色。古來有道之士。其淡雅和潤。無不達於面貌。余氣象未稍進。豈嗜欲有未淡邪。機心未消邪。當猛省於寸衷。而取驗於顏面。(辛酉七月)

陸放翁謂「得壽如得富貴。初不知其所以然。便躋高年。」余近浪得虛名。亦不知其所以然。便獲美譽。古之得虛名而值時艱者。往往不克保其終。思此不勝大懼。將具奏摺辭謝大權。不敢節制四省。恐蹈覆餗負乘之咎也。(辛酉十一月)

日內與張廉卿屢談。渠學問又已大進。而余志學二十年。至今毫無進步。耄已及矣。(辛酉十一月)

一日因作摺。將公事拋荒未斷。古人有兼人之材。余不特不能兼人。即一日治兼數事。尙有未逮。甚矣。余之鈍也。(辛酉十一月)

洪琴西來。與之言風俗移人。凡才人皆隨風氣爲轉移。雖賢者不能自拔於風尙之外。因言「余老無能有所樹立。但不欲開壞風氣。導天下以惡習耳。」(辛酉十二月)

見隋觀察時。詞色太厲。令人難堪。退而悔之。(壬戌二月)

近來事有不如意者。方寸鬱塞殊甚。亦足見器量之不闊。養氣之不深也。(壬戌七月)

寸心鬱鬱不自得。因思日內以金陵寧國危險之狀。憂灼過度。又以江西諸事掣肘。悶損不堪。皆由平日於養氣上欠工夫。故不能不動心。欲求養氣。不外「自反而縮。行慊於心」兩句。欲求行慊於心。不外「清」「慎」「勤」三字。因將此三字各綴數句。爲之疏解。清字曰。無貪無競。省事清心。一介不苟。鬼伏神斂。慎字曰。戰戰兢兢。兢兢死而後已。行有不得。反求諸己。勤字曰。手眼俱到。心力交瘁。因知勉行。夜以繼日。此十二語者。吾當守之終身。遇

大憂患。大拂逆之時。庶幾免於尤悔耳。(壬戌九月)

五更醒。展轉不能成寐。盡寸心爲金陵寧國之賊憂悸者十分之八。而因僚屬不和順。思怨憤懣者。亦十之二三。實則處大亂之時。余所遇之僚屬。尙不十分傲慢無禮。而鄙懷忿懣若此。甚矣。余之隘也。余天性褊急。痛自刻責。懲治者有年。而有觸即發。仍不可遏。殆將終身不改矣。愧悚何已。(壬戌九月)

古人辦事掣肘之虞。拂逆之端。世世有之。人人不免。惡其拂逆而必欲順從。設法以誅鋤異己者。權臣之行徑也。聽其拂逆而動心忍心。委曲求全。且以無敵國外患而亡爲慮者。聖賢之用心也。吾正可借人之拂逆以磨厲我之德性。其庶幾乎。(壬戌九月)

近日心緒之惡。襟懷之隘。可鄙可恥。甚矣。變化氣質之難也。(壬戌十月)

光陰似箭。冉冉又過十年。念德業之不進。愧位名之久竊。此後當於勤儉謹信四字之外。加以忍字。渾字。痛自鍼砭。以求益炳燭之明。作補牢之計。(壬戌十一月)

近日常見得人多不是。鬱鬱不平。毋乃明於責人。而暗於責己乎。(辛亥正月)

比來每以說話微多。遂覺神氣疲倦不支。甚矣吾衰。身膺重任。大懼隕越。實深惴惴。(癸亥正月)

日內應酬繁多。神昏氣乏。若不克支持者。然後知高官巨職。足以損人之智。而長人之傲也。(癸亥二月)

觀人有鈔冊。鈔余文頗多。自以無實而享盛名。忸怩不甯。(癸亥五月)

古人云。「其爲人也。多暇日者。其出人也。不遠矣。」余身當大任。而月餘以來。竟日暇逸。不事事。公私廢擱。實深慚懼。誰當速迅投劾去位。冀免愆尤耳。(癸亥五月)

是日應辦奏稿。方不誤次日發報之期。一念之情。遂廢本日之常課。又愆奏事之定期。乃知天下百病。生於懶也。

(癸亥六月)

近日省察自己短處。每日愈玩時多。治事時少。看書作字。治私事時多。察人看稿。治公事時少。職分所在。雖日讀

古書。其曠官廢弛。與廢於酒色游戲者。一也。莊子所謂臧穀所業不同。其於亡羊均也。本無知人察吏之才。而又度外置之。對京察褒嘉之語。殊有愧矣。(甲子二月)

日內鬱鬱不自得。愁腸九迴者。一則餉項太絀。恐金陵兵譁。功敗垂成。徽州賊多。恐三城全失。貽患江西。一則以用事太久。恐中外疑我擅權專利。江西爭釐之事。不勝則餉缺而兵潰。固屬可慮。勝則專利之名尤著。亦爲可慮。反復籌思。惟告病引退。少息二三年。庶幾害取其輕之義。若能從此事機日順。四海銷兵。不用吾。引退而長終山林。不復出而與聞政事。則公私之幸也。(甲子二月)

戶部奏摺似有意與此間爲難。寸心抑鬱不自得。用事太久。恐人疑我兵權太重。利權太大。意欲解去兵權。引退數年。以息疑謗。故本日具摺請病。以明不敢久握重柄之義。(甲子二月)

自古高位重權。蓋無日不在憂患之中。其成敗禍福。則天也。(甲子二月)

因念家中多故。紀澤兒病未全愈。心中焦慮之至。而天氣陰雨乍寒。恐傷麥收。又不知兵事之變態何如。彌覺憂皇。不能自甯。因集古人成語。作一聯以自箴曰。「彊勉行道。莊敬日強。」上句箴余近有鬱抑不平之氣。不能彊勉以安命。下句箴余近有頹散不振之氣。不能莊敬以自奮。惜強字相同。不得因發音變讀。而易用耳。(甲子四月)

玩弟談久。稍發摻其抑鬱不平之氣。余稍沮止勸解。仍令畢其說。以暢其懷。玩弟所陳。多切中事理之言。遂相與縱談。至三更。其諫余之短言。「處兄弟骨肉之間。不能養其生機。而使之暢。遂深爲忠告曲盡。」(甲子八月)

聞家中修整「富厚堂」屋子。用錢共七千串之多。不知何以浩費如此。深爲駭歎。余生平以起屋買田爲仕宦之惡習。誓不爲之。不料奢靡若此。何顏見人。平日所說之話。全不踐言。可羞孰甚。李肅漢言。「照李希帥之標。打銀壺一把。爲炖人參燕窩之用。費銀八兩有奇。深爲愧悔。」今小民皆食草根。官員亦多窮困。而吾居高位。驕奢若此。且盜廉儉之虛名。竄愧何地。以後當於此等處。痛下鍼砭。(丁卯四月)

吾平日以儉字教人而吾近來飲食起居殊太豐厚。昨聞魁時若將軍言渠家四代一品而婦女在家亦未穿著綢緞軟料。吾家婦女亦過於講究。深恐享受太過。足以折福。(丁卯十一月)

與萬篋軒偶談家常。渠家百萬之富。而日用極儉。其內眷終年不辦葷菜。每日書房先生所吃之葷菜餘贖者。撤下則內室吃之。其母過六十後。篋軒苦求。始準添葷菜一樣。今亂後而家不甚破。子孫俱好。皆省儉所惜之福也。(丁卯十一月)

心緒憧憧。如有所失。念人生苦不知足。方望倏謂「漢文帝之終身常若自覺不勝天子之任者。」最爲善形容古人心曲。大抵人常懷愧對之意。便是載福之器。入德之門。如覺天之待我甚厚。我愧對天。君之待我過優。我愧對君。父母之待我過慈。我愧對父母。兄弟之待我過愛。我愧對兄弟。朋友之待我過重。我愧對朋友。便覺處處皆有善氣相逢。如自覺我已無愧無怍。但覺他人待我太薄。天待我太賚。則處處皆有戾氣相逢。德以滿而損。福以驕而減矣。此念願時刻凜之。(戊辰四月)

昔年曾以居官四敗。居家四敗。書於日記。以自儆惕。茲恐久而遺忘。再書於此。與前次微有不同。居官四敗。曰。昏惰任下者敗。傲狠妄爲者敗。貪鄙無忌者敗。反覆多詐者敗。居家四敗。曰。婦女奢淫者敗。子弟驕怠者敗。兄弟不和者敗。侮師慢客者敗。仕宦之家。不犯此八敗。庶有悠久氣象。(戊辰四月)

余蓋屋三間。上爲擺設地球之用。不料工料過於堅緻。簷過於深。費錢太多。而地球仍將黑暗。不能明朗。心爲悔歎。余好以「儉」字教人。而自家實不能儉。傍夕與紀澤談。令其將銀錢賬目自行經理。講求儉約之法。(戊辰四月)

紀官姪得取縣案首。縣令考試甚嚴。當可免於物議。甚以爲慰。吾每慮吾兄弟功名太盛。發洩殆盡。觀近年添丁之漸多。子弟之向學。或者祖澤尙厚。方與未艾。且喜且惴惴也。(戊辰四月)

在京酒食應酬。雖不甚多。而每日疲精以徇物。遠不如外省之得以自由。自問胸次。添出鄙俗之見。殊無謂也。(

戊辰十二月)

余生平於酬酢之際。好察人情之順逆厚薄。京師勢利之藪。處處皆有冷暖向背之分。余老矣。尙存於心而不能化。甚矣。余之鄙也。(己巳正月)

余以老年吃齋。風中行路。殊非所堪。又念百姓麥稼已失。稷梁不能下種。將成非常之災。又念紀澤兒在運河一帶。風大河淺。家眷各船。膠滯難行。又念施占琦運書箱在海中。恐有不測。種種懸念。不勝焦灼。(己巳四月)

余日衰老。而學無一成。應作之文甚多。總未能發奮爲之。忝竊虛名。毫無實際。愧悔之至。老邁如此。每日辦官事。尙不能畢。安能更著述耶。(己巳四月)

初到直隸。頗有民望。今諸事皆難振作。恐虎頭蛇尾。爲人所笑。尤爲內疚於心。輾轉慚沮。刻不自安。(己巳五月) 日月如流。倏已秋分。學業旣一無所成。而德行不修。尤悔叢集。自顧竟無湔除政徙之時。憂媿曷已。(己巳八月) 念生平所作事。錯謬甚多。久居高位。而德行學問。一無可取。後世將譏議交加。愧悔無及。(己巳八月)

余回憶生平。尤叢集。悔不勝悔。而精力疲憊。自問更無晚蓋之力。乃作一聯云。「莫苦悔已往。誓尤但求此日行爲。無慚神鬼。休預怕後來災禍。只要暮年心氣。感召祥和。」(己巳八月)

夢在場中考試。枯澀不能下筆。不能完卷。焦急之至。驚醒。余以讀書科第。官躋極品。而於學術一無所成。亦不能完卷之象也。媿歎無已。(庚午二月)

余此生學問文章。一無所成。愧悔無已。(庚午二月)

自二月杪。右目失明。至是四十餘日。不敢治事。每日暇逸。愧悔。身閒而心亂。蓋生平之一無所養。甚矣。(庚午四月)

人而不勤。則萬事俱廢。一家俱有衰象。余於三四月內。不治一辜。於居家之道。大有所損。愧悚無已。(庚午五月) 余年來出處之間。多可愧者。爲之躊躇不安。如負重致。年老位高。豈堪常有咎悔之事。(庚午十月)

到江甯任。又已兩月餘。應辦之事。全未料理。悠悠忽忽。忝居高位。每日飽食甜眠。慚愧至矣。（庚午十二月）
自省目病之源在肝。肝病之源。則由於於心。各心。不能克盡之故。在室中反覆自訟。不能治事。（辛未四月）
至花園一覽。園在署西。現在修工未畢。正值趕辦之時。偶一觀玩。深愧居處太崇。享用太過。（辛未十二月）
余精神散漫已久。凡遇應了結之件。久不能完。應收拾之件。久不能檢。如敗葉滿山。全無歸宿。通籍三十餘年。官至極品。而學業一無所成。德行一無可許。老大徒傷。不勝悚惶慚赧。（壬申二月）

治道

關溫公謹習疏。慨然有感。（戊午十月）

隋開皇之十二年。有司家府藏皆滿。無所容。積於廊廡。曾不一紀。煬帝嗣位。東征高麗。南幸江都。遂至困窮。唐天寶之八載。帝觀帑藏。金帛充牣。古今罕儔。曾不數年。祿山反叛。九廟焚燬。六飛播遷。遂以大變。故國之富不足恃。獨特有人主。兢兢業業之一心耳。（辛亥七月）

李牧在趙。匈奴不侵。汲黯在朝。淮南寢謀。林甫爲相。閹鳳反。盧杞柄政。李懷光叛。反叛。非其本心也。故人君謹置左右之臣。其益於人國者。多矣。（辛亥七月）

陳湯斬郅支單于之首。匡衡抑其功。僅得封關內侯。祁靈荃得突厥默啜之首。宋璟抑其功。僅得授郎將。其後湯以非罪而流。靈荃以慟哭而死。宰相妨功。病能人之不得伸其志者。多矣。（辛亥七月）

唐宣宗之立。不能平於李德裕。至毛髮爲之灑。漸此與霍光驂乘。而宣帝芒刺在背者。何以異。功高震主。或不無自伐之容。公孫碩膚赤烏几几。此周公所以爲大聖也。（辛亥九月）

裴耀卿置輪場於河口。河口。卽沐水達於黃河之口也。南人舟運江淮之米。自沐以達河口。吳人不習河漕。便令輸米於河口之倉而去。則吳人便矣。三門。卽砥柱山。在洛陽之東。地最險。不可行舟。耀卿於三門之東西。各置一

倉。又鑿山開車路十八里。以避三門之險。江淮之米既輸於河口之倉矣。官爲別雇舟。泝河漕至三門之東。視水可通。則徑以舟過三門。水險。則由車路挽過三門。輸入三門以西之太原倉。然後入漕。以漕關中。自江淮至河口。自河口至三門。自三門入漕。至長安。凡三次轉搬。乃得達也。今天下之漕糧。概用長運。漕至袁浦。黃高於清。則百端營謀。行灌塘渡舟之下策。虞黃倒汙湖之巨患。種種敝壞。未知所底。故鄙意常欲行搬運之法。於袁浦置倉。楊莊各倉。亦修葺之。分天下之漕艘。半置河以南。半置河以北。每年各運兩次。爲河帥者。治河則不顧淮。治淮則不顧河。治運則不顧河淮。庶幾易爲力乎。(辛亥十月)

天下之大事。宜考究者。凡十四宗。曰。官制。曰。財用。曰。鹽政。曰。漕務。曰。錢法。曰。冠禮。曰。昏禮。曰。喪禮。曰。祭禮。曰。兵制。曰。兵法。曰。刑律。曰。地輿。曰。河渠。皆以本朝爲主。而歷溯前代之沿革本末。衷之以仁義。歸之以易簡。前世所襲誤者。可以自我更之。前世所未及者。可以自我更之。其苟且者。知將來之必敝。其至當者。知將來之必因。所謂雖百世可知也。(辛亥七月)

文官加養廉。始於雍正三年之耗發歸公。武官加養廉。始於乾隆四十六年之補缺額名糧。(戊午十一月)
王震軒來辭行。將以明日往南豐。余告以用紳士之法。宜少予以名利。而仍不說破。以養其廉恥。震軒深以爲然。(戊午十二月)

溫循吏傳。太史公所謂循吏者。法立令行。能識大體而已。後世專尙慈惠。或以煦煦爲仁者當之。失循吏之義矣。思爲將帥之道。亦以法立令行。整齊嚴肅爲先。不貴煦嫗也。(己未三月)

三代下不矯激。不足以得美名。不要結。不足以得民心。(己未九月)
人才以陶冶而成。不可眼孔甚高。動謂無人可用。(己未九月)

胡中丞言。一州縣辦上司衙門之筵。所費不過百千。而其筵。總家丁開報。至三四千串之多。縣令無所出。則於錢糧不經。積爲虧空。皆天家受其弊。故紿北州縣。現無絲毫筵事。如有向例。由州縣辦筵者。皆自藩庫發現銀與州

繼令其發給。不使州縣賠墊分毫。其名別天家喫虧。其實則州縣無可藉口。錢漕待數清解。爲天家添出數十倍之利。信爲知言。(庚申四月)

居高位之道。約有三端。一曰不與。謂若於己毫無交涉也。二曰不終。古人所謂日慎一日。而恐其不終。蓋居高履危。而能善其終者。鮮矣。三曰不勝。古人所謂懷乎若朽索之馭六馬。慄慄危懼。若將隕於深淵。蓋惟恐其不勝任也。鼎折足。覆公餗。其形渥凶。言不勝其任也。方望溪言漢文帝之爲君。時時有謙讓。若不克居之意。其有「得於不勝」之義者乎。孟子謂周公有不合者。仰而思之。夜以繼日。其有「得於惟恐不終」之義者乎。(庚申六月)

盛世創業垂統之英雄。以襟懷豁達爲第一義。末世扶危救難之英雄。以心力勞苦爲第一義。(庚申六月)

料理官事。摘由備查。一也。圈點京報。二也。注解摺紳。三也。此三者。夜間之功課。亦留心庶事之一法也。

玩弟信。極論文士之涉於虛空。不可用其言。頗切當。(庚申八月)

李次青赴徽州。余與之約法五章。曰戒浮。謂不用文人之好大言者。曰戒謙。謂次青好爲逾恆之謙。啓寵納侮也。曰戒濫。謂銀錢保舉。宜有限制也。曰戒反覆。謂次青好朝令暮改也。曰戒私。謂用人當爲官擇人。不爲人擇官也。(庚申八月)

委員之道以四者爲最要。一曰習勞苦以盡職。一曰崇儉約以養廉。一曰動勉問以廣才。一曰戒傲情以正俗。紳士之道。以四者爲要。一曰保愚懦以庇鄉。一曰崇廉讓以奉公。一曰禁大言以務實。一曰擴才識以待用。(辛酉八月)

九弟臨別贈言。馭下宜嚴。治事宜速。余亦深知馭軍馭吏。皆莫先於嚴。特恐明不旁燭。則嚴不中禮耳。(辛酉十月)

向來安徽與江蘇合闈鄉試。既有長江之險。難於遠行。又以號舍之少。難於錄遺。故上江深以鄉試爲苦。余意欲令上下分闈考試。故於五月奏摺內。略一及之。本日看定北門東門之間。可爲貢院基址。惜高下不甚平耳。(辛酉十月)

酉十一月)

治世之道。專以致賢養民爲本。其風氣之正與否。則絲毫皆推本於一己之身與心。一舉一動。一語一默。人皆化之。以成風氣。故爲人上者。專重修身。以下之効之者。速而且廣也。(辛酉十一月)

一省風氣。依乎督撫司道及首府數人。此外官紳。皆隨風俗爲轉移者也。(辛酉十一月)

周致甫將赴上海催餉。余勉之以維持風教。勿自菲薄。引顧亭林日知錄「匹夫之賤。與有責焉」一節以勸之。(辛酉十一月)

爲督撫之道。卽與師道無異。其訓飭屬員殷殷之意。卽與人爲善之意。孔子所謂誨人不倦也。其廣諮忠益。以身作則。卽取人爲善之意。孔子所謂爲之不厭也。爲將帥者之於偏裨。此皆以君道而兼師道。故曰。「作之君。作之師。」又曰。「民生於三事之如一。」皆此義爾。(壬戌三月)

爲政之道。得人。治事。二者並重。得人不外四事。曰。廣收。慎用。勤教。嚴繩。治事不外四端。曰。經分。綸合。詳思。約守。操斯八術以往。其無所失矣。(壬戌四月)

定城南城外發賑章程。因冒濫者多。十六日發至四萬四千人之衆。後此斷難爲繼。乃定爲每人發小票一紙。十九日察看真正飢民。給與一票。二十二日持票領米。二十三日再加察看。給二十五日之米票。二十五日再加甄別。給二十八日之米票。每三日一發。上次給下次之票。庶幾漸免於冒濫。(壬戌四月)

近日公事不甚認真。人客頗多。志趣較前散漫。大約吏事。軍事。餉事。文事。每日須以精心果力。獨造幽奧。直臻單微。以求進境。一日無進境。則日日漸退矣。以後每日留心吏事。須從勤見僚屬。多問外事下手。留心軍事。須從教訓將領。屢閱操練下手。留心餉事。須從懷擇卡員。比較人數下手。留心文事。須從恬吟聲調。廣徵古訓下手。每日午前。於吏事。軍事加意。午後。於餉事加意。晝後於文事加意。以一縷精心。用於幽微之境。縱不日進。或可免於退步。(壬戌八月)

每日應辦之事，積摺甚多，當於清早，單開本日應辦之件，日內了之，如農家早起分派本日之事，無本日不了者，庶積摺較少。（壬戌閏八月）

大君以生殺予奪之權，授之督撫將帥。猶東家以銀錢貨物授之店中聚賤。若保舉太濫，視大君之名器不甚愛惜。猶之賤售浪費。視東家之貨財不甚愛惜也。介之推曰：「竊人之財，猶謂之盜。况貪天之功，以爲己力乎。」余則略攻之曰：「竊人之財，猶謂之盜。况假大君之名器，以市一己之私恩乎。」余忝居高位，惟此事不與力挽回，風深爲慚愧。（癸亥四月）

是日在途中，見麥稼爲旱所傷，高不過二三寸，節氣已屆收割，而吐穗極少。間有用人力施水灌漑者，高或六七寸，色青而穗亦可觀。嵇康所云：「一溉者後亡。」信人力足以補人事之窮。然百分中不過二三分，餘則立見黑稿。縱三日之內大雨，亦無救矣。目擊心傷，不忍細看。（己巳四月）

爲疆吏者，全仗年豐民樂，此心乃可以自恬。若事事棘手，則竟日如在桎梏中矣。（己巳五月）

閱吳文節公集，觀其批屬員之稟，甚爲嚴明，對之有愧。吾今日之爲督撫，真尸位耳。（辛未正月）

古聖王制作之事，無論大小精粗，大抵皆本事平爭，因勢善習，從俗便民，救敝非此六者，則不輕於制作也。吾曩者志事，以老莊爲體，禹墨爲用，以不與不違，不稱三者爲法。若再深求六者之旨，而不輕於有所興作，則咎戾鮮矣。（戊辰十一月）

欲制夷人，不宜在關稅之多寡，禮節之恭倨上著眼，卽內地民人，居處媚夷，豔夷而鄙華，借夷而壓華，雖極可憾可惡，而遠識者尙不宜在此等著眼。吾輩著眼之地，前乎此者，洋人十年八月入京，不傷毀我宗廟社稷，目下在上海甯波等處，助我攻勦髮匪，二者皆有德於我。我中國不宜忘其大者而怨其小者，欲求自強之道，總以修政事求賢才爲急務，以學作炸礮，學造輪舟等具，爲下手工夫，但使彼之所長，我皆有之，順則報德，有其具，逆則報怨，亦有其具。若在我者，挾持無具，則曲固罪也，直亦罪也，怨之罪也，德之亦罪也，內地之民，人人媚夷，吾固無能

制之。人人仇表。吾亦不能用也。(壬戌五月)

華衡芳徐壽所作火輪船之機。來此試演。其法以火蒸水氣。竅入筒。筒中四竅。閉前二竅。則氣入前竅。其機自退。而輪行上弦。閉後二竅。則氣入後竅。其機自進。而輪行下弦。火愈大。則氣愈盛。機之進退如飛。輪行亦如飛。約試演一時。竊喜洋人之智巧。我中國人亦能爲之。彼不能做我。以其所不知矣。(壬戌七月)

至機器局。觀一切造製機器。屋宇雖不甚大。而機器頗備。旋觀新造之輪船。長十六丈。寬三丈許。最要者。惟船底之龍骨中間。龍骨夾層兩邊。各龍骨三根。中骨直而徑達兩頭。兩邊骨曲。而次第縮短。骨之下。板一層。骨之上。板一層。是爲夾板。板厚三寸。龍骨之外。惟船肋最爲要緊。約寬厚三寸有奇。皆用極堅之木。計此船七月可以下水。(戊辰五月)

至礮廠拜劉佐禹馬格里。渠備洋酒點心。小飲刻許。閱新作之礮。三十六筒可以齊放。則三十六子同出。如傾盆之雨。可以連環放。則各子繼出。如搗鼙鼓。又閱放火箭。每箭筒長尺許。圓徑寸餘。遠約三里許。又閱放開花礮。(辛未十月)

軍謀

凡用兵。主、客、奇、正。夫人而能言之。未心果能知之也。守城者爲主。攻者爲客。守營壘者爲主。攻者爲客。中途相遇。先至戰地者爲主。後至者爲客。兩軍相持。先吶喊放槍者爲客。後吶喊放槍者爲主。兩人持矛相格鬪。先動手戮第一下者爲客。後動手卽格開而卽戮者爲主。中間排隊迎敵爲正兵。左右兩旁抄出爲奇兵。屯宿重兵。堅扎老營。與賊相持者爲正兵。分出遊兵。飄忽無常。伺隙狙擊者爲奇兵。意有專向。吾所持以禦寇者爲正兵。多張疑陣。示人以不可測者爲奇兵。旌旗鮮明。使敵不敢犯者爲正兵。羸馬疲卒。偃旗息鼓。本強而故示以弱者爲奇兵。建旗鳴鼓。屹然不輕動者爲正兵。佯敗作退。詐代而誘敵者爲奇兵。忽主忽客。忽正忽奇。變動無定時。轉發無定勢。

能一區而別之。則於用兵之道。足過半矣。(己未)

兵者。陰事也。哀戚之意。如臨親喪。肅敬之心。如承大祭。庶爲近之。今以羊牛犬豕而就屠烹。見其悲啼於割刺之頃。宛轉於刀俎之間。仁者將有所不忍。况以人命爲浪博輕擲之物。無論其敗喪也。即使倖勝。而死傷相望。斷頭洞胸。折臂失足。血肉狼籍。日陳吾前。哀矜之不遑。喜於何有。故軍中不宜有歡欣之象。有歡欣之象者。無論或爲和悅。或爲驕盈。終歸於敗而已矣。田單之在即墨。將軍有死之心。士卒無生之氣。此所以破燕也。及其攻狄也。黃金橫帶。而騁乎淄澠之間。有生之變。無死之心。魯仲連策其必不勝。兵事之宜慘戚不宜歡欣。亦明矣。嘉慶季年。名將楊遇春屢立戰功。嘗語人曰。『吾每臨陣。行間覺有熱風吹拂面上者。是日必敗。行間若有冷風。身體似不寒寒者。是日必勝。』斯亦肅殺之義也。(己未)

田單攻狄。魯仲連策其不能下。已而果三月不下。田單問之。仲連曰。『將軍在即墨。坐則織蕘。立則仗鉞。爲士卒倡。將軍有死之心。士卒無生之氣。聞君言。莫不揮涕奮臂而欲戰。此所以破燕也。當今將軍東有夜邑之奉。西有淄上之娛。黃金橫帶。而騁乎淄澠之間。有生之樂。無死之心。所以不勝也。』余嘗深信仲連此語。以爲不刊之論。同治三年。江甯克復後。余見湘軍將士。驕盈娛樂。慮其不可復用。全行遣散歸農。至四年五月。余奉命至山東河南。勦捻。湘軍從者極少。專用安徽之淮勇。余見淮軍將士。雖有振奮之氣。亦乏憂危之懷。竊用爲慮。恐其不能平賊。莊子云。『兩軍相對。哀者勝矣。』仲連所言以憂勤而勝。以娛樂而不勝。亦卽孟子『生於憂患。死於安樂』之旨也。其後余因疾病。疏請退休。遂解兵柄。而合肥李相國卒用淮軍。削平捻匪。蓋淮軍之氣尙銳。憂危以感士卒之情。振奮以作三軍之氣。二者皆可以致勝。在主帥相時而善用之已矣。余專主憂勤之說。殆知其一而不知其二也。聊志於此。以識吾見理之偏。亦見古人格言至論。不可舉一概百言。各有所當也。(辛未)

史記敘韓信破魏豹。以木罌渡軍。其破龍且。以囊沙壅水。竊嘗疑之。魏以大將柏直當韓信。以騎將馮敬當灌嬰。以步將項它當曹參。則兩軍之數。殆亦各不下萬人。木罌之所渡幾何。至多不過二三百人。豈足以制勝乎。沙壅

壅水下可滲漏。旁可橫溢。自非與工嚴塞。斷不能築成大堰。壅之使下流竟絕。如其寬河盛漲。則塞之固難。決之亦復不易。若其小港微流。易壅易決。則決後未必遂不可涉渡也。二者揆之事理。皆不可信。紘兵事莫善於史記。史公紘兵。莫詳於淮陰傳。而其不足據如此。孟子曰。「盡信書。則不如無書。」君子之作事。既徵諸古籍。誼諸人言。而又必慎思而明辨之。庶不至冒昧從事耳。(辛未)

約期打仗。最易誤事。然期不可約。信則不可不通也。(丁巳)

治軍之道。以「勤」字爲先。身勤則強。佚則病。家勤則興。懶則衰。國勤則治。怠則亂。軍勤則勝。惰則敗。惰者。暮氣也。常常提其朝氣爲要。

凡打仗。一鼓再鼓。而人不動者。則氣必衰滅。凡攻壘。一撲再撲。而人不動者。則氣必衰滅。

守城煞非易事。銀米。子藥。油鹽。有一不備。不可言守備矣。又須得一謀勇兼優者爲一城之主。

軍中須得好統領。營官。統領營官。須得好真心實腸。是第一義。算路程之遠近。算糧仗之闕乏。算彼己之強弱。是第二義。二者微有把握。此外良法雖多。調度雖善。有效有无效。盡人事以聽天而已。

兵者不得已而用之。常存一不敢爲先之心。須人打第二下。我打第一下。(己未二月)

近年從事戎行。每駐紮之處。周歷城鄉。所見無不毀之屋。無不伐之樹。無不破之富家。無不欺之窮民。大抵受害於賊者十之七八。受害於兵者亦有二三。目擊心傷。喟然私歎行軍之害民。一至此乎。故於將官委員告戒。總以禁止騷擾爲第一義。

軍事有驕氣。情氣。皆敗氣也。孔子之臨事而懼。則絕驕之源。好謀而成。則絕惰之源。無時不謀。無事不謀。自無情時矣。

古人有言曰。「作事威克厥愛。雖小必濟。」莫敬所謂「逆取順守。」亦此意也。軍營用民夫。其先則廣取之。虐役之。其後則體卹必周。給錢必均。法可隨意變通。總須用人得當耳。

洋煙爲壞管規之長，盡行汰去，不可稍存姑待之意。黎明點名，卯正長初，即可點畢，嗣夜每早，或查營，或點名，或看操，三者總行其一，不專行查營一事也。

練勇之道，必須管官晝夜從事，乃可漸幾於熟。如雞伏卵，如鐘鍊丹，未宜須臾稍離。（丙辰）

戰陣之事，須半動半靜，動如水，靜如山。（己未二月）

軍事不可無悍鷲之氣，而驕氣即與之相連，不可無安詳之氣，而情氣即與之相連，有二氣之利，而無其害，有道君子尚難養得恰好，況弁勇乎。（戊午）

凡用兵之道，本強而故示弱，多勝而故示敵以強者，多敗。敵加於我，審量而後應之者，多勝。漫無審量，輕以兵加於敵者，多敗。

凡修壘以濠深爲妙，木城及外牆，均有流弊，恐反爲賊遮蔽礮子也。修礮之事，軍士四出征剿，有老家以爲基址，亦行軍一法也。擇地有兩法，有自固者，有扼賊者。自固者，擇高山，擇要隘，扼賊者，擇平坦必經之路，擇淺水津渡之處。嗣後每立一軍，則修礮二十座，以爲老營，環老營之四面，方三百里，皆可往來梭剿，庶幾可戰可守，可奇可正，得四軍可靠者，則變化無窮。於景鎮作一榜樣，而他軍效法行之，可得也。但不知何爲法術，亦可得見乎。

與李少荃許仙屏言團練之無益於辦賊，直可盡廢，如必欲團練，即不可不少假以威權。（己未四月）

近年馭將失之寬厚，又與諸軍相距過遠，危險之際，弊端百出，然後知古人所云，「作事威克厥愛，雖小必濟。」反是乃敗道也。

持之以敬，臨之以莊，無聲無形之際，常有懷然難犯之象，則人知威矣。孟子曰：「君子以仁存心，以禮存心。」守是二者，雖蠻貊之邦可行，又何兵勇之不洽哉。（己未六月）

帶勇之法，用恩莫如用仁，用威莫如用禮。仁者，即所謂欲立立人，欲達達人也。待弁勇如待子弟之心，嘗望其成

立。望其發達。則人知恩矣。禮者。卽所謂無衆寡。無小人。無敢慢。泰而不驕也。正其衣冠。尊其瞻視。儼然人望而畏之。威而不猛也。持之以敬。臨之以莊。無形無聲之際。常有凜然難犯之象。則人知威矣。守斯二者。雖蠻貊之邦行矣。何兵勇之不可治哉。（己未八月三日）

余至武昌火藥局。看造火藥之法。以銅爲輪。以鐵爲轆。圍地爲大磨盤。以牛碾之。盤大徑二丈三尺。周圍七丈許。每盤用四牛。每牛連曳兩輪。盤外周圍溝槽。約寬八寸許。火藥在槽內。牛在槽外。馭牛之人行槽內。每牛以一人馭之。每兩牛四輪之後。則有鑿藥者一人。隨之執銅鑿。於槽內鑿動。庶轆過之後。火藥不患太緊也。又有小磨盤。磨礮與磨麥相似。僅用一人。又有櫃篩礮。篩炭。其法絕精。非圖說不能明。（己未八月）

營務處之道。一在樹人。一則立法。有心人不以不能戰勝攻取爲恥。而以不能樹人立法爲恥。樹人之道有二。一曰。知人善任。一曰。陶鑄造就。（己未九月）

凡軍驕氣。則有浮淫之色。情氣。則有淹滯之色。須時時察看。而補救之。帶兵之道。「勤恕廉明」四字。缺一不可也。但兵以力作主。巧作客。

軍務須從日用眠食上下手。（庚申正月）

呂蒙誅取鎧之卒。魏絳戮亂行之僕。古人處此。豈以爲名。非是則無以警衆耳。窄路打勝仗。全係頭敵數人。若頭敵站不住。後面雖有好手。亦被人擠退了。

出青之法。卽漢書趙充國傳所謂就草。（庚申二月）

天下之人稍有才智者。心思有所表見。以自旌異於人。好勝者。此也。好名者。亦此也。同當兵勇。則思於兵勇翹然而出其類。同當長夫。則思於長夫中翹然而出其類。同當將官。則思於將官中翹然而出其類。同爲主帥。則思於衆帥中翹然而出其類。雖才智有大小淺深之不同。其不知足。不安分。則一也。能打破此一副庸俗之見。而後可與言道。（庚申四月）

古人以用兵之道。通於聲律。故聽音樂而知兵之勝敗。國之存亡。余生平於音律算法。二者一無所解。故不能知兵耳。(庚申十月)

用兵之難。莫大於見人危急而不能救。

明戚繼光紀效新書中有立牌。卽古之盾也。有圓牌。卽今之藤牌也。統謂之曰櫛牌。又有所謂剛柔牌者。其法以生漆牛皮蒙於外。而以湖綿搵成小團。及頭髮裝於內。蓋戚氏自以巧思製造。非有所師於古也。古之干盾。所以捍禦矢石。今之櫛牌。所以捍禦礮子。礮子所當。無堅不破。豈矢石所可同言而語哉。國藩初辦水師時。嘗博求禦礮子之法。以魚網數層。懸空張挂。礮子一過卽穿。不能禦也。以絮被攢濕張挂。礮子一過卽穿。不能禦也。以生牛皮懸於船旁。以藤牌陳於船梢。不能禦也。又作數層厚牌。以竹鱗排於外爲一層。牛皮爲一層。水絮爲一層。頭髮爲一層。合而成牌。亦不能禦也。以此而推。戚氏之剛柔牌。不足以禦礮子明矣。烏槍子如梧子大者。或有法以禦之。抬槍子。劈山礮子。凡大如黃豆以上者。竟無拒禦之法。近時楊軍門載福等。深知礮子之無可禦。遂屏棄魚網。水絮。牛皮等物。一切不用。直以血肉之軀。植立船頭。可避者避之。不可避者聽之。而其麾下。水師弁勇。亦相率而植立直前。無所迴避。明於此義。而古來干盾。檣牌諸器。皆可廢矣。友人劉騰鴻峙衡治軍。刁斗森嚴。凜不可犯。臨陣則埋根行首。堅立如山。有名將之風。惟過於自熹。在武昌時嘗獨立城下。呼賊以礮子擊之。賊發十餘礮。不中。堅坐良久乃還。在瑞州時亦如是。卒以徇難。殞我壯士。人百莫贖。此則剛毅太過。於好謀而成之道。少有違耳。(己未)

余初不解造羣子之法。以生鐵令鑄工鑄之。渣滓未融。經藥輒散。且多蜂眼。鳴而不能及遠。乃與吳坤修竹莊。商用熟鐵打造。其法以鐵先鍊成直條。每條燒紅其端。截出半寸。打成圓顆。又燒其端。又打成顆。每顆如葡萄大。後至江西。商之姚鑲。以此法打造。姚君又作爲鐵模。半渦截鐵條之端。置之模中。宛轉錘鍊。圓滑可愛。於是及遠較多。一里有奇也。今湖南湖北江西三省。打造羣子。均用此法。每礮用百餘顆。多者或三四百顆。噴薄而出。如珠如

雨。殆無隙地。嘗之輒碎。不仁之器。莫甚於此矣。然海疆尚未靖謐。此其亟宜講求者也。(己未)

行軍之道。有依次而進者。有越敵人所守之寨。而先攻他處者。姑以通鑑所記兵事平之。宋明帝泰始二年。晉安王子勛之亂。袁顛相拒於濃湖。久未決。龍驤將軍張興世建議曰。賊據上游。兵強地勝。我雖持之有餘。而制之不足。若以奇兵潛出其上。因險而壁。見利而動。使其首尾周遍。進退疑阻。中流旣梗。糧運自艱。此制賊之奇也。錢鏐江岸最狹。去大軍不遠。下臨洄流。船下必來泊岸。又有橫浦。可以藏船。千人守險。萬夫不能過。衝要之地。莫出於此。沈攸之吳喜並贊其策。乃選戰士七十。輕舸二百。配與興世。興世率其衆。泝流稍上。尋復退歸。如是者屢日。賊將劉胡聞之。笑曰。我尚不敢越彼。下取揚州。張興世何人。欲輕據我上。不爲之備。一夕四更。值風便。與世舉帆直前。渡湖白。過鵲尾。胡旣覺。乃遣其將胡靈秀。將兵於東岸。翼之而進。戊戌夕。與世宿景洪浦。靈秀亦留。與世潛遣其將黃道標帥七十舸。徑趨錢鏐立營寨。己亥。與世引兵進搆之。靈秀不能禁。庚子。劉胡自將水步二十大軍。來攻錢鏐。將士欲迎擊之。與世禁之曰。賊來尙遠。氣盛而矢驟。驟旣易盡。盛亦易衰。不如待之。令將士治城如故。俄而胡來。轉近船。入洄流。與世命壽寂之。任農夫帥壯士數百擊之。衆軍相繼並進。胡收兵而下。與世遂於錢鏐立城。國藩按是時官軍在下游諸圻。袁顛等在上游之濃湖。劉胡等又在上游之鵲尾。更上乃爲錢鏐。越濃湖鵲尾兩寨而上。立城於錢鏐。此險途也。厥後賊屢攻錢鏐不勝。糧運中梗。而鵲尾濃湖並以饋降。此越寨進攻。而得勝者也。

秦始三年。魏尉元上表言。賊向彭城。必由清泗過宿豫。歷下邳。趨青州。亦由下邳沂水。經東安。此數者。皆爲賊用兵之要。今若先定下邳。平宿豫。鎮淮場。戍東安。則青冀諸州可不攻而克。若四鎮不服。青冀難拔。百姓狼顧。猶懷僥倖之心。臣愚以爲宜釋青冀之師。先定東南之地。斷劉或北顧之意。絕愚民南望之心。如此。則淮北自舉。晉勞永逸。國藩按宋與魏歷世兵爭。宋有青州。歷城徐州諸鎮。遠在青岱。與魏接畛。而下邳宿豫沂水東安四城。乃在淮南。去魏尙遠。魏越青州諸鎮。而進攻四城。此險途也。厥後四城攻。而青州歷城徐州諸鎮。相繼沒於魏。此

越鎮進攻而勝者也。

梁簡文帝二年。侯景之變。郢州刺史蕭方諸以徐文盛軍在西陽。不設備。（西陽卽今黃州。）侯景以江夏空虛。使宋子仙約帥精騎四百。由淮內襲郢州。丙午。大風疾雨。天色晦冥。子仙等入城。方諸迎拜。遂擒鮑泉。虞豫。送於景所。景因便風。中江舉帆。遂越徐文盛等軍直上。入江夏。文盛衆懼而潰。國藩按侯景與徐文盛皆在黃州夾江築壘。乃越徐軍而上。入江夏。此險途也。而江夏以無備而破。徐軍以失勢而潰。此越寨進攻而勝者也。

陳文帝天嘉元年。王琳屯西岸之柵口。侯瑱屯東岸之蕪湖。相持百餘日。旋均出江外。隔洲而泊。二月。丙申。西南風急。琳引兵直趨建康。瑱等徐出蕪湖。躡其後。西南風翻爲瑱用。琳擲火炬以燒陳船。皆反燒其船。瑱發拍以擊琳艦。又以蒙衝小船。擊其艦。琳軍大敗。軍士溺死什二三。餘皆棄舟登岸。國藩按王琳與侯景同屯蕪湖之上。琳乃越瑱軍而直下金陵。此險途也。而瑱軍自後躡之。反爲所破。此越寨進攻而破者也。

唐貞觀十九年。太宗親征高麗。旣拔遼東。蓋牟諸城。至安市。將決戰。高麗靺鞨合兵爲陳。長四十里。江夏王道宗曰。「高麗傾國以拒王師。平原之守必弱。願假臣精兵五千。覆其本根。則數十萬之衆。可不戰能降。」上不應。後攻安市。竟不能拔。降將請先攻烏骨城。衆議不從。遂自安市班師。國藩按道宗請越安市而進攻平壤。此雖險途。而實制勝之奇兵也。太宗不從。無功而返。此不能進攻而失者也。

安史之亂。李泌請命建甯王俊爲范陽節度大使。並塞北出與李光弼。南北犄角。以取范陽。（胡三省注曰。泌欲使建甯自靈夏更豐勝靈朔之寨。直擣馮檀攻范陽之北。光弼自太原取恆定攻范陽之南。）覆其巢穴。賊退則無所歸。留則不獲安然。後大軍四合而攻之。必成擒矣。上悅。已而不果行。國藩按是時大軍在扶風。郭子儀在馮翊。李光弼在太原。勢宜先取兩京。李泌欲先搗范陽賊巢。此亦制勝之奇兵也。事不果行。致史思明爲關洛之患。此亦不能越攻而失者也。

元和十二年。淮蔡之役。李祐言於李愬曰。「蔡之精兵皆在洄曲及四境拒守。守州城者皆羸老之卒。可以乘虛

直抵其城。比賊將聞之。元濟已成擒矣。一愬然之。十月辛未。李愬李祐李忠義李進誠軍出。東行十六里。夜至張柴村。盡殺其戍卒及烽子。據其柵。命士少休。食乾糲。整羈勒。留義成軍五百人鎮之。以斷洄曲及諸道橋梁。復夜引兵出門。時大風雪。旌旗裂。夜半雪愈甚。行七十里。四鼓。愬至蔡州城下。無一人知者。李祐李忠義鑿其城爲坎。以先登。愬入居元濟外宅。以檻車送元濟詣京師。國藩按元濟精兵盡在洄曲。董重質磨下。李愬越之而直入蔡州。此越寨進攻而勝者也。

朱梁均王四年。楚岳州刺史許德勳。將水軍巡邊。夜分南風暴起。都指揮使王環乘風趨黃州。以繩梯登城。徑趨州署。執吳刺史馬勣。大掠而還。德勳曰。一鄂州將邀我。宜備之。一環曰。一我軍入黃州。鄂人不知。奄過其城。彼自救不暇。安能邀我。一乃展旗鳴鼓而行。鄂人不敢逼。國藩按楚之岳州東北。與吳爲鄰。嘉魚陸日等處。吳必立寨設備。乃王環越之而趨黃州。此越寨進攻而勝者也。

唐同光元年。後唐與朱梁相拒於楊劉德勝之間。時梁將段凝軍。臨河之南。即澶淵今開州。王彥章進逼鄆州。今東平府。唐臣李紹宏等。請棄鄆州與淵約合。帝獨召郭崇韜問之。對曰。一降者皆言大梁無兵。陛下若留兵守魏。固保楊劉。自以精兵長驅入汴。彼城中既空虛。必望風自潰。苟僞主授首。則諸將自降矣。一帝曰。一此正合朕志。一冬。十月壬申。帝大軍自楊劉濟河。癸酉。至鄆州。甲戌。圍中都城。破之。擒王彥章。帝召諸將問進退之計。諸將請先下東方諸鎮城。然後觀釁而動。康延孝李嗣源請亟取大梁。乙亥。帝發鄆州中都。丁丑。至曹州。己卯。至大梁。滅梁。壬午。段凝將其衆五萬。自滑州濟河入援。解甲請降。國藩按郭崇韜之初議。直取大梁也。時梁將王彥章軍在鄆州。段凝軍在河上。越兩寨而進攻。此險途也。厥後破中都。擒王彥章。而段凝猶在河北。越一寨而進攻。亦險機也。然段凝隔於河北。若自白馬南濟。則阻於大河。若自下游直濟。則一阻於大河。再阻於新決之護駕水。勢難入援。遂得直取汴梁。以成大功。此越寨進攻而勝者也。

以上九事。張與世之據錢鑑。宋子仙之取鄆州。許德勳之下黃州。皆水路進攻而勝。王祐之下金陵。以水路越攻。

而敗尉元之取下郟四城李愬之入蔡州郭崇韜之策汴梁以陸路越攻而得之李道宗之策平壤李泌之策范陽以陸路不越攻而失之成敗得失固無一定之軌轍也。咸豐四年十月十一日。賊目陳玉成據蘄州。秦曰綱據田鎮。我舟師越蘄州而直下。十三日攻破田家鎮。十四日蘄州之賊亦潰。此越寨進攻而勝者也。十一月。水陸各軍會於九江。時賊目林啓榮據九江。黃文金據湖口。石達開羅大綱等同在湖口。我舟師彭玉麟等。十六日越九江而下攻湖口。陸軍羅澤南等。十二月初五日。下攻湖口。十二日。水師敗挫。二十四日。陸軍亦無利而歸。此越寨進攻而敗者也。咸豐六年五月初二日。武漢黃州未破。楊載福以舟師駛下。直至九江。七年九月二十八日。九江安慶未破。楊載福以舟師駛下。直至蕪縣。往來如飛。此越寨進攻而勝者也。故知勝敗無常。視將才爲轉移耳。當時越九江而下攻湖口之策。發於國藩。定於羅君羅山。劉君孟容二人。事敗之後。或深咎此策之失。且專歸罪於劉君者。非事實也。

公倫理

萬化始於闔門。除「刑于」以外無政化。除「用賢」以外無經濟。（壬寅十一月）
所貴乎世家者不在多置良田美宅。亦不在多蓄書籍字畫。在乎子孫能自樹立。多讀書。無驕矜習氣。（戊午十一月）

聞溫弟信。國家事故。憂鬱填膺。不能辦一事。夜不成寐。（戊午十一月）

念溫弟不得歸骨。其賦命太苦。余於手足之間。抱媿多矣。（己未正月）

九弟所寫溫甫哀辭。字秀勁近古。刻工亦佳。家有賢子弟。爲之欣然。（庚申正月）

沅弟專二人送信。勸我速移東流建德。情詞懇惻。令人不忍卒讀。余復信云。「讀出師表而不動心者。其人必不忠。讀陳情表能不動心者。其人必不孝。讀沅季此信而不動心者。其人必不友。」遂定於二十四日。移營東流。以

慰兩弟之心。(辛酉四月)

沉弟來久談。教以胸襟宜淡遠。游心虛靜之域。獨立萬物之表。又每日宜讀書少許。以擴識見。弟圖安慶。前後皆有強寇。人數甚單。地段甚廣。晝夜辛勤。事事躬親。雖酷暑大雨。而每日奔馳往返。常五六十里。余憐其太勞。故欲其以虛靜養心也。(辛酉八月)

紀澤兒體氣清瘦。系念殊深。或稱其讀書太勤。用心太過。因教以遊心虛靜。雖有榮觀。宜處超然之義。(癸亥十月)

聞張清恪之子張慤。敬公師戟所輯課子隨筆。皆節鈔古人家訓名言。大約與家之道。不外內外勤儉。兄弟和睦。子弟謙謹等事。敗家則反是。夜接周中堂之子文龔。謝余致聘儀之信。則別字甚多。字跡惡劣不堪。大抵門客爲之。主人全未寓目。聞周少君平日眼孔甚高。口好雌黃。而喪事潦草如此。殊爲可歎。蓋違官之子弟。聽慣高議論。見慣大排場。往往輕慢師長。譏彈人短。所謂驕也。由驕而奢而淫而佚。以致於無惡不作。皆從驕字生出之弊。而子弟之驕。又多由於父母爲違官者。得運乘時。幸致顯宦。遂自忘其本領之低。學識之陋。自驕自滿。以致子弟效其驕而不覺。吾家子姪輩亦多輕慢師長。譏彈人短之惡習。欲求稍有成立。必先力除此習。力戒其驕。欲禁子弟之驕。先戒吾心之自驕自滿。願終身自勉之。因周少君之荒謬不堪。既已面諭紀澤。又詳記之於此。(戊辰正月)

接沉弟信。知紀官姪於正月初九日申刻生子。欣慰之至。吾兄弟共得五孫。丁口漸盛。只望兒姪輩讀書。少有所成。將來孫輩看作榜樣。便是世家好氣象。若兒姪輩不能發奮用功。文理不通。則榜樣太壞。將來孫輩斷難成立。此中關鍵。全在紀鴻紀瑞二人。吾家後輩之興衰。視此二人爲轉移也。(戊辰四月)

與紀澤一談。囑其看理學書。俾志氣日趨於剛大。心思日入於沈細。(戊辰七月)

鴻兒稟稱澄弟臨別。以火狐馬褂送我。蓋眉生述杜小舫之言。謂天下之最暖者。莫如火狐。勝如紫貂。玄狐云。余曾兩次述此言與澄弟聽。或謂意疑我畏寒。遂解已所著衣以贈我邪。余本有狐馬褂。捨別馬褂。而弟歸途少此。

禦崇之具寸心十分不安（戊辰十月）

接澄沉兩弟信。澄勸送眷回籍。沉擬以晚女許尋家。皆有脆誠願恤之意。久宦於外。疾病相尋。如舟行海中。不得停泊。惟兄弟骨肉至親。能亮之也。（己巳十一月）

古文藝

易經有聖人之道四。而朱子專重以卜筮者。尙其占一句。似未的當。因言古人說經。多斷章取義。以意逆志。不必定符本義。（壬戌四月）

閣經義述聞。如「弗過遇之。弗過防之」等語。深有所會。余於本朝經學小學諸家。獨服膺王懷祖先生父子之精核。蓋以其於經文之虛神實訓。體味曲盡也。（辛酉二月）

擬閱校船山周易內傳。王氏說理之書。每失之艱深。而不能軒豁。與正蒙注相同。（辛酉七月）

今日看書經。見蔡傳訓詁。良多不講。如以敷言爲「敷衍之言」之類。宜致漢學家之指摘。（壬子六月）

溫書經無逸。用吳文正公纂言本。若有所會。（庚申正月）

溫書經呂刑。於句法若有所會。（乙丑正月）

思書經呂刑。於句法若有所會。（己未九月）

呂刑篇。於後世古文家蹊徑最近。惜不能盡通其讀。（辛酉六月）

余好讀呂刑而苦不能盡通其讀。茲閱戴氏之說。有愜余心者。如「制百姓於刑之中。天齊於民。俾我一口。」暨「非從惟從」等句。皆犁然有當於人心。欣賞無已。（辛酉七月）

讀顧命康王之誥。喜戴氏治經。與余所見多同。惜其生前未與嚶談。（辛酉七月）

溫盤庚上盤庚中。因戴存莊兩探宋元。及本朝治漢學者之說。每多當人意處。故樂觀之。（辛酉七月）

邵位西言。「詩序係孟子萬章之徒所作。大序與小序不當分而爲二。所以記次第。非所以明章旨也。猶揚子法言之有後序爾。」其言奇而頗確。(庚申八月)

閻鄒序詩經說。學有根柢。其用意往往得古人深處。特證據太少。恐不足以大鳴於世耳。(戊午十一月)

自去年九月廿一日始讀儀禮。至是粗畢。老年能治此經。雖嫌其晚。猶勝於終不措意者。昔張蒿庵三十而讀儀禮。至五十九歲而通此經。爲國朝有數大儒。余今五十七歲。略通此經。稍增炳燭之明。惟蒿庵以前名儒。窮儀禮者絕少。能於荆棘荒蕪之中。獨闢康莊。斯爲大難。余生本朝經學昌明之後。窮此經者。不下數十人。有蒿庵之句讀。張本文之圖。康莊共由之道。而又有入以扶掖之。則從事甚易矣。(丁卯二月)

俞樾蔭甫所著羣經平議之十四卷。論考工記世室。重屋。明堂之制。駁正鄭注。思通鬼神。有超乎戴氏考工記圖者。(丙寅四月)

夜又批船山禮記二條。余閱此書。本爲校對譌字。以便修板。再行刷印。乃覆查全書。辨論經義者半。校出錯譌者半。蓋非校讎家之體例。然其中亦微有可存者。若前數年在安慶金陵時。則反不能如此之精勤。此軍營事簡。老年差可慰悅之境。而流寇縱橫。制敵無術。體衰目昏。學問無成。則又可深爲憂灼之境也。(丙寅十月)

閻桐城張承華容溪所爲學庸隱解二十四葉畢。其言大學文。須用古本。而不煩補傳義。須宗朱子。而不取陽明。與余平日之說相合。餘亦多獨得之見。(丙寅十月)

孟子所謂「善言德行者。」嘗爲後世理學諸家之源。「善爲辭令者。」嘗爲後世詞章諸家之源。孔子自謙不能辭令。而以善言德行自許。蓋在己者實有盛德至行。而後能自道其所得也。論語一書。乃善言德行之尤著者。因默誦學而爲政八佾三篇。(乙丑五月)

朱彬經傳攷證。其訓詁攷證。亦與王伯申先生相仿。其言書經大字。多語助辭。則前人所未發也。(己未五月)
閻戴東原緒言。閻錢竹汀聲類。此書未刻於本集。其錢例亦不分明。(乙丑五月)

錢辛樞先生聲類一書分釋詁釋言釋訓釋語釋天釋地名號之異等目皆因聲得義者足見古人先有聲音後有文字余前有意爲是書而未果錢氏此書亦未成之書故未編入潛研堂叢書中（己巳正月）

陳荔秋所送之陳蘭甫澧著聲律通考一種漢書地理志水道圖說一種略一繙閱服其精博（己巳二月）樂律之不可不通以其與兵事文章相爲表裏（辛酉十月）

紀澤作音學考約近五千字於考古及審音二者均有所得爲之一感（己巳十月）

澤兄呈所著分韻說文解字略一繙閱其法用廣韻之次第佩文韻之字數抄錄許氏注及大徐翻印其有申明原注之說則以夾行注之其於注外則有陳說則於翻切之下夾圈以別異之其佩文韻所有說文所無者則有楷文而無篆文仍用篇韻各說以注之其佩文韻所無說文所有者則別爲補編仍依翻切以分東冬鍾江各韻（丁卯十一月）（以上經學）

讀五代史於歐公不僞梁一段不以爲然（辛未）

閱周保緒所著晉絡趙惠甫所寄來者周名濟荆溪人著成於道光十八年亦近世著作才也（辛未五月）

諸子中惟老莊荀子孫子自成一家之言餘皆不免於剽襲（庚申）

王懷祖先生讀書雜誌所校管子各條似不如校他書之精實（辛酉七月）

讀淮南子精神訓至「大禹竭力以勞萬民」句若有所感（庚申十一月）

讀脩務訓中「功可強成名可強立」若有所會淮南子本道家者流而此篇之旨與荀子相近大抵理之足以

見極者百家未嘗不相合也（庚申十二月）

閱淮南子淑真訓言「有道之士亦須遇時」爲之增感（庚申十二月）

揚子法言究不如文中子之平實蓋子雲文學中人非道德中人也

船山氏最推重正蒙一書以余觀之亦艱深而不能顯豁其參兩篇言天地日月五行之理數尤多障礙（丙寅

六月）（以上子史）

正誼堂叢書凡五六十種。張清恪輯刻。吳竹莊所贈也。因取正誼堂中清恪公所輯程子二十篇讀之。至脯時讀畢。凡十卷。取論語二十篇之意。編采二程粹言。略分門類。頗爲精當。（壬戌四月）

張清恪公所輯朱子七篇。每篇各分上下。仿孟子七篇之意。張公蓋以程配孔。以朱配孟也。

讀張文端公聰訓齋語。文和公激懷園語。此老父子學問。亦以知命爲第一義。（己未四月）

閩羅羅山人極衍義。姚江學辨等書。服其見理甚真。所志甚大。信爲吾鄉豪傑之士。（甲子十月）

鍾涵齋題言。蓋理學之緒餘。而參以陰陽果報者。（庚午正月）

聖武記又闕一徧畢。中有嘉慶川湖陝靖寇記八篇未闕。以昔年在京閱過。嫌此八篇敘事冗亂也。（丁卯十二月）

閩會香墅先生漫鈔及各種香墅名廷枚。賓谷之伯父也。其書仿困學紀聞。容齋隨筆之類。特根柢不深耳。（戊

午十一月）

莫子偲交出何願船二信。內有張石洲蒙古游牧記四本。又朔方備乘凡例數頁。信爲當世積學之士。（辛酉七月）

古文之道。謀篇布勢。是一段最大工夫。書經左傳。每一篇空處較多。實處較少。旁面較多。正面較少。精神注於眉宇目光。不可周身皆眉。到處皆目也。綫索要如蛛絲馬跡。絲不可過粗。跡不可太密也。（己未八月）

古人文筆。有雲屬波委。官止神行之象。實從熟後生出。所謂「文入妙來。無過熟者」此也。（庚申九月）

古文之道。布局須有千巖萬壑。重巒複嶂之觀。不可一覽而盡。又不可雜亂無紀。（庚申十月）

古文之道。亦須有奇橫之趣。自然之致。二者并進。乃爲成體之文。（辛酉七月）

古文之法。全在「氣」字上用功夫。（辛酉十一月）

爲文全在氣盛欲氣盛全在段落清。每段分束之際似斷不斷似咽非咽似吞非吞似吐非吐。古人無限妙境難於領取。每段張起之際似承非承似提非提似突非突似紆非紆。古人無限妙用亦難領取。(辛亥七月)

奇辭大句須得瑰璋飛騰之氣驅之以行。凡堆重處皆化爲空虛乃能爲大篇。所謂氣力有餘於文之外也。否則氣不能舉其體矣。(辛亥七月)

吾嘗取姚姬傳先生之說。文章之道分陽剛之美陰柔之美。大抵陽剛者氣勢浩瀚陰柔者韻味深美。浩瀚者噴薄而出之深美者吞吐而出之就吾所分十一類言之。論著類詞賦類宜噴薄序跋類宜吞吐奏議類哀祭類宜噴薄。詔令類書牘類宜吞吐傳誌類敘記類宜噴薄典志類雜記類宜吞吐。其一類中微有區別者如哀祭類雖宜噴薄而祭郊社祖宗則宜吞吐。詔令類雖宜吞吐而檄文則宜噴薄。書牘類雖宜吞吐而論事則宜噴薄。此外各類皆可以此意推之。(庚申二月)

類纂所選書牘有不盡厭於吾心者。未知古人書牘何者最善。(辛亥)

古文中惟書牘一門竟鮮佳者。八家中韓公差勝。然亦非書簡正宗。此外則竟無可采。諸葛武侯王右軍兩公書翰風神高遠最愜吾意。然患太少且乏大篇。皆小簡耳。(庚申二月)

閱駢體文鈔將其所分類歸併於吾所分三門十一類之中。嫌其繁碎不合古義也。(庚申三月)

余所編經史百家雜鈔編成後有文八百篇上下未免太多不足備簡練揣摩之用。宜另鈔小冊選文五十首鈔之。朝夕誦誦庶爲守約之道。(庚申閏二月)

往年余思古文有八字訣曰雄直怪麗澹遠茹雅。近於「茹」字似更有所得。而音響節奏須一「和」字爲主。因將「澹」字改作「和」字。(庚申)

文章陽剛之美莫要於「慎湧直怪」四字。陰柔之美莫要於「憂茹遠潔」四字。惜余知其意而不能竟其學。(癸亥九月)

嘗慕古文之境之美者。約有八言。陽剛之美。曰「雄直怪麗」。陰柔之美。曰「茹遠潔適」。蓄之數年而余未能發爲文章。略得八美之一。以副斯志。是夜將此八言者。各作十六字贊之。至次日辰刻。作畢。附錄如左。

雄。劉然軒昂。盡棄故常。跌宕頓挫。捫之有芒。

直。黃河千曲。其體仍直。山勢如龍。轉換無迹。

怪。奇趣橫生。人駭鬼眩。易玄山經。張韓互見。

麗。青春大澤。萬卉初葩。詩騷之韻。班揚之華。

茹。衆義輻湊。吞多吐少。幽獨咀含。不求共曉。

遠。九天俯視。下界聚蚊。寤寐周孔。落落寡羣。

潔。冗意陳言。頹字盡芟。憤爾褒貶。神人共監。

適。心境兩閒。無營無待。柳記歐跋。得大自在。

偶思古文古詩。最可學者。占八句云。詩之節。書之括。孟之烈。韓之越。馬之咽。莊之跌。陶之潔。杜之拙。(丙寅正月)

離騷三百二十四句。誦畢。老年讀生書成誦。稍補少壯之缺陷。亦一樂也。(丁卯三月)

鄒陽獄中上梁王書。千古傳誦。余究不知其深處。太史公以鄒陽與魯仲連並列。余亦不知其所以相合之處。(辛亥五月)

夜溫長楊賦。於古人行文之氣。似有所得。(己未九月)

輿中讀上林賦千餘言。略能成誦。少時所深以爲難者。老年乃頗能之。非聰明進於昔時。乃由稍知其節奏。氣勢與用意之所在。故略記之。(丁卯正月)

余近年最好揚馬班張之賦。未能迴環朗誦。偶一誦讀。如逢故人。易於熟洽。但衰年讀書。未必能久記耳。(二月)

漢魏人作賦。一貴訓詁精確。一貴聲調鏗鏘。(庚申四月)

古文之道與駢體相通。由徐庾而進於任沈。由任沈而進於潘陸。由潘陸而進於左思。由左思而進於琰張。由班張而進於卿雲。韓退之之文。比卿雲更高一格。解學韓文。則可窺六經之闡奧矣。（庚申三月）

二日內始悟昌黎諸文。皆學書經。（辛亥九月）

二日內因讀辛劉詞。又大悟韓文之妙。實從子雲相如得來。（壬子）

二日內觀於古文大有所得。乃悟韓文實從揚馬得來。而參以孔孟之義理。所以雄視千古。（壬子正月）

韓文柳州羅池碑。覺情韻不匱。聲調鏗鏘。乃文章中第一妙境。情以生文。文亦以生情。文以引聲。聲亦足以引文。循環互發。油然不能自已。庶漸漸可入佳境。（己未九月）

閱韓文送高閑上人。所謂機應於心。不挫於物。姚氏以爲韓公自道作文之旨。余謂機應於心。熟極之候也。莊子養生篇之說也。不挫於物。自慊之候也。孟子養生氣章之說也。不挫於物者。體也。道也。本也。機應於心者。用也。技也。末也。韓子之於文。技也。進乎道矣。（庚申十月）

讀原駁。伯夷頌。獲麟解。龍雜說諸首。岸然想見古人。獨立千古。確乎不拔之象。（壬戌九月）

韓公「周情孔思」四字。非李漢知之極深。焉能道得出。爲文者要須窺得此四字。乃爲知本。（辛酉二月）

韓文誌傳中。有兩篇相配偶者。如曹成任王宏兩篇爲偶。柳子厚鄭羣兩篇爲偶。張署張徹兩篇爲偶。推此而全集中可以爲偶者甚多。古人之文。可爲偶者甚多。惜不能一一稱量而配合之耳。（癸亥十月）

溫韓文數篇。若有所得。古人之不可及。全在行氣。如列子之御風。不在義理字句間也。（癸亥十一月）

柳子厚山水記。似有得於陶淵明沖淡之趣。文境最高。不易及。（庚申八月）

夜闌古賦識小錄。深有味於柳子厚之囚山篇。（戊午二月）

姚公謂蘇氏學莊子外篇之文。實則恢詭處。不逮遠甚。（辛酉二月）

蘇子由謂東坡晚年。以文章爲鼓吹。真知文章中之樂境。余亦微知之。惜無寬閒歲月。竟其所學耳。（辛酉正月）

讀震川文數首。所謂風塵中讀之。一似嚼冰雪者。信爲清潔。而波瀾意度。猶嫌不足以發揮奇趣。(己未六月)

閱震川古文。遂并翻其四書文閣之。其渾灑流轉之氣。乃更勝於古文也。(五月)

閱湯文正集。惟傳狀碑銘之類。不愜吾意。餘如語錄。告諭。書牘之屬。皆有誠意挾正氣以行。學問本極淵博。講學尤甚公允。不可及也。(己巳二月)

程伯敷出示洪稚存上成親王書。卽嘉慶己未獲咎。發遣新疆者。當時直聲震於天下。今觀之。亦無甚觸忌諱之處。(正月)

閱梅伯言文集。歎其鑽研之久。功力之深。(壬戌九月)

至錢警石先生久談。得見其族兄衍石先生家書數十封。攜歸一閱。實嘉道間一碩儒也。(癸亥九月)

閱錢衍石先生與其弟警石先生家信。服其學問精博。機趣洋溢。(癸亥九月)

閱陳秋勳吳偉卿所作應制賦。氣勢流利。古不乖時。今不同弊。心賞其能。而自愧弗如也。(癸卯三月)

吳竹如文集。方存之代爲編出者。計十二卷。粗閱數十葉。於儒釋朱陸之辨。剖晰最精。(戊辰七月)

閱吳南屏伴湖文錄數十首。歎其少而能文。老而不倦。爲不可及。(辛未六月)

左季高信內寄祭胡潤帥文稿一篇。情文并茂。殊爲傑構。(辛酉九月)

馮敬亭名桂芬。寄校邨廬初稿二冊。共議四十二篇。粗讀數十篇。雖多難見之施行。然自是名儒之論。(壬戌九月)

寶蘭泉近作辨論十餘首。多閱歷之言。而文義未能入古。(甲子)

與次青論古文之法。次青天分高。成就當未可量。(己未六月)

蔣琦齡所陳時政十二事。約計萬餘言。多可見之施行。文筆亦雅健暢達。末條請崇宋學而抑漢學。似與各條不類。(壬戌)

申育在此豔談。言渠文筆所以不甚豔者。爲在己之禁令太多。難於下筆耳。余勸其破除禁令。一以條暢爲主。凡辦事者。先貴敷陳明暢也。(己未十一月)

劉霞仙所作辨蔡壽祺誣劾一疏。置身甚高。辭旨深厚。真各作也。(乙丑五月)

閩邱抄。中見霞仙以本年覆奏一疏降調。如此名奏議。而反以獲譴。頗不可解。(乙丑八月)

張廉卿文有王介甫之風。日進不已。可畏可愛。(庚申四月)

閩張廉卿近所爲古文。喜其入古甚深。因爲加圈批。(戊辰七月)

石芸齋所作房山石經山訪碑記。亦偉觀也。(庚午二月)

思白香山陸放翁之襟懷。殆不可及。古文家胸懷雖淡泊。而筆下難於寫出。思一爲之。以寫淡定之懷。古所謂一卷冰雪文者也。(己未六月)

古文一事。平日自覺頗有心得。而握管之時。不克殫精極思。作成總不稱意。安得屏去萬事。酣睡旬日。神完意適。然後作文一首。以據胸中奇趣。(己未十一月)

余於古文一道。十分已得六七。而不能竭智畢力於此。匪特世務相擾。時有未閑。亦實志有未專也。此後精力雖衰。官事雖煩。仍當篤志斯文。以卒吾業。(辛酉正月)

久不作文。機軸甚生。心思遲鈍。尙不能成篇。亦因見客太多。瑣事煩瀆。神智昏攪故也。(乙丑二月)

昔年每作一文。輒數日不能成寐。不知老年何以轉無此病。豈反健於壯歲耶。抑用心未能銳入耶。(乙丑三月)

念生平稍致力於古文。思欲有所述作。今老憊而一無所成。深用自悔。(丙寅三月)

與兒子一論所作之文。考據與筆力。兩無可取。(庚午二月)

每一作文。未下筆之先。若有佳境。既下筆則無一是處。由於平日用功浮泛。全無實際故耳。(辛未五月)

作孫芝房芻論序一首。約九百字。至三更始畢。老年作文。頗覺吃力。而機勢全不湊泊。總由少作太生之故耳。(

己未六月)

作莫猶人墓表。文筆平衍。無復昔年傲岸勁折之氣。蓋老境日增耳。(己未十一月)

思作金陵官紳昭忠祠碑。而不能成。遂竟日昏睡如醉癡。向來習態如此。而數十年因循不肯苦學作文。至今已衰老。悔無及矣。(己巳五月)

作苗君墓志銘。畢。細閱竟無一字是處。昔余終年不動筆作文。而自度能知古人之堂奧。以爲將來爲之。必有可觀。不料今年試作數首。乃無一合於古人義法。媿赧何極。(己巳八月)

作唐公墓誌。覆視無一是處。乃知昔年自詭爲知文。而曾不一動筆爲之。不可恃也。天下事知得十分。不如行得七分。非閱歷何由大明哉。(己巳十月)

郭銘碑辭作畢。全不合古人義法。深以爲愧。(庚午正月)

思作江甯府學宮記。苦探力索。竟不能成一字。固屬衰憊之象。亦由昔年本無實學。故枯竭至此。深爲歎愧。(庚午二月)

作星岡公墓表。文成視之。無一當意之處。甚矣。余思之鈍。學之淺。而精力之衰也。余前有信寄筠仙云。『近世達官。無如余之荒陋者。』頃筠仙信。力雪此語之誣。余自知甚明。豈有誣乎。(辛未正月)

紀澤所作擬莊三首。頗能善談名理。亦略通訓詁奇字之學。(壬戌五月)

余昔年鈔古文。分氣勢。識度。情韻。味趣爲四屬。擬再鈔古近體詩。亦分爲四屬。而別增一機神之屬。機者。無心遇之。偶然觸之。姚惜抱謂文王周公繫易家辭爻辭。其取象亦偶觸於其機。假令易一日而爲之。其機之所觸少變。則其辭之取象亦少異矣。余嘗歎爲知言。神者人功與天機相湊泊。如卜筮之有繇辭。如左傳諸史之有童謠。如佛書之有偈語。其義在可解不可解之間。古人有所託諷。如阮嗣宗之類。故作神語以亂其辭。唐人如太白之豪。少陵之雄。龍標之逸。昌谷之奇。及元白張王之樂府。亦往往多神到機到之語。卽宋世名家之詩。亦皆人巧極而

天工錯。徑路絕而風雲通。蓋必可與言機。可與言神。而後極詩之能事。余鈔詩。擬增此一種。與古文微有異同。
(戊辰四月)

是日思詩既選十八家矣。古文嘗選百篇。鈔置案頭。以爲揣摩。因自爲之記曰。「爲政十四門。爲學十五書。鈔文一百首。鈔詩十八家。」(壬子正月)

余既鈔選十八家之詩。雖存「他樂不請」之懷。未免「足已自封」之陋。乃近日意思尤爲簡約。五古擬專讀陶潛謝朓兩家。七古擬專讀韓愈蘇軾兩家。五律專讀杜甫。七律專讀黃庭堅。七絕專讀陸游。以一二家爲主。而他家則參觀互證。庶幾用志不紛。然老境侵尋。亦只能長吟以自娛。不能抗手以入古矣。(壬戌二月)

五言古詩有二種。最高之境一種。比興之體。始終不說出正意。始知頑人但頌莊姜美盛。而無子兆亂。已在言外。太叔于田。但謗叔段雄武。而耦國兆亂。已在言外。曹阮陳張李杜往往有之。一種盛氣噴薄而出。跌蕩淋漓。曲折如意。不復知爲有韻之文。曹鮑杜韓往往有之。余解此二境。而會未一作此等詩。自愧亦自憾也。(甲子正月)

夜闌陶公述酒詩。爲南宋鄱陽湯文清公漢所注。於陶公瘦詞微旨。盡得解釋。欣悅無已。(丙寅三月)

闕陶詩全部。取其太闕適者記出。將鈔一冊。合之杜韋白蘇陸五家之閑適詩。纂成一集。以備朝夕誦誦。洗滌各利爭勝之心。(辛未十二月)

闕文選雜擬。古人措辭之深秀。實非唐以後人所可及。特氣有騫翥駿邁者。亦有不盡然者。或不免爲詞所累耳。若以顏謝鮑謝之辭。而運之以子雲退之之氣。豈不更可貴哉。(辛酉二月)

批校太白樂府。每日僅校二十首或十餘首。蓋余於樂府向未用功。茲稍一措意。全無入處也。(戊辰四月)

日來讀杜詩。頗有小得。無事則心頭口頭不離杜詩。雖細加咀嚼。而穿有爲人的意思。(癸卯二月)

杜詩韓文所以能百世不朽者。彼自有知言養氣工夫。惟其知言。故常有一二見道語。談及時事。亦甚識當世要務。惟其養氣。故無纖薄之響。(癸卯二月)

溫杜詩五古。觀其筆。伸縮吐茹之際。絕似史記。憶古人有謂杜少陵似太史公者。不記是東坡之言乎。抑他人之言乎。(己巳四月)

關杜詩五古。古人妙處。只是造句之法。變幻無窮。故終身無一複句。猶之毛詩無相襲之調也。昔嘗以作古文。宜用杜詩造句之法。近來久未溫習及此矣。(己巳十月)

溫杜詩五古。愛其句法瘦勁。變化通於古文造句之法。憾吾能知之。而手不能爲之耳。(庚午正月)

夜誦杜韓七古。頗多似有會於古人沈鬱頓挫之義。(丙寅四月)

關白香山集。因近日胸襟鬱結不開。故思以陶白蘇陸之詩。及張文端公之言解之也。(己巳五月)

車中看義山詩。似有所得。夜繙樊川集。證之。亦然。知何大復明月篇之有心得也。(癸卯正月)

與李眉生談詩。極佩杜牧之俊偉。(壬戌)

日內於蘇詩似有新得。領其沖淡之趣。灑落之機。(辛酉六月)

溫蘇詩。朗誦頗久。有聲出金石之樂。因思古人文章。所以與天地不敵者。實賴氣以昌之。聲以求之。故讀書不結求之聲氣二者之間。徒糟粕耳。(辛酉十二月)

放翁七言絕句。實能道得空曠胸懷出。(辛酉正月)

將祁文端公詩集闕二三卷。昔年深不以公詩爲然。茲多閱數十百首。其中多可取者。(己巳三月)

朱伯韓詩。所詣在韓白之間。(甲辰正月)

至易念園處。觀渠所爲詩。宗法晚唐。頗有法度。予性好言詩。憲西謂余於詩太自主張。不免自是。細思良然。

吳南屏寄毛西垣詩。繙讀一過。信爲朋輩中所不可多得。宜南屏之亟稱之也。(辛酉三月)

何廉舫信附七律十六章。才人之筆。人人歎之。不置。(己未)

作七律五首。和何廉舫詩次韻。同和者爲李次青吳子序甘子大許仙屏等數人。而王霞軒鄧彌之何敬海等亦

將和之。余見廉筋詩才軒舉。所著辨文樂府。皆有可觀。憫其闔家殉節。因欲和詩一二章以慰勞之。本無意次韻也。子序次青諸君皆次其韻。余亦遂勉爲之。(己未正月)

闔馮焯詩稿。焯代州人。字穉華。其七世祖如京。官廣東左布政使。六世祖璽。以進士官至同知。五世祖光裕。以舉人官至湖南巡撫。四世祖祁。官編修。曾祖均。以舉人應生。官至湖北按察使。祖成。以舉人官浙江知縣。焯爲潛山縣天堂巡檢。又署屯溪巡檢。刻詩四卷。清穩不俗。昨和余詩八首。今日問之程伯。始知其人。因取其詩披閱數十首。兼閱其曾祖及祖刻詩。乃知其世家淵源有自也。(壬戌四月)

觀李眉生詩。愛其俊拔而有情韻。將來必爲詩人。紀澤前後作次篋字韻詩二首。韻穩而脈清。吐屬亦尙名貴。將來或亦爲詩人。殊以爲慰。(戊辰四月)

趙惠甫近作書懷五章。又錄舊作詞十調見示。皆才人之筆也。(丁卯七月)

海秋言七律須講究藻采聲調。不可專言上乘證果。反昧初開。切中予病。又盛贊予五律。(癸卯二月)

昔年每作一詩。輒不能睡。後遂闔筆不復爲詩。今試一爲之。又不成寐。豈果體弱不耐苦吟耶。抑機軸太生。成之艱幸耶。(甲子八月) (以上論詩文)

作字之法。繇繇如蠶之吐絲。穆穆如玉之成璧。(庚申三月)

作字之道。用筆貴勒貴努。而不可過露勒努之迹。精心運之出以和柔之力。斯善於用勒用努者。(庚申十月)

寫字之道。如修腳匠之修腳。古人所謂撥燈法較空靈。余所謂修腳法較平穩。(庚申十二月)

凡用之筆。未有十分合手者。往往有小毛病不稱人意。善書者於每用一筆。先識其病。即因其病勢而用之。或筆之病。次日又有小變。又因其變症而用之。或者因病成妍。則善於用筆矣。(辛酉五月)

用狼筆寫新宣紙。悟古人頓挫之法。撲筆之法。只是筆不入紙。使勁撲下耳。(辛酉十月)

京中翰林善寫白摺者。相傳中有一絲牽黃於行間。作大字亦嘗知此意味。(辛酉十月)

作書之道。寓沈雄於靜穆之中。乃有別味。雄字須有長劍快戟。龍拏虎踞之象。鋒銳森森。不可逼視者爲正宗。不得以劍拔弩張四字相鄙。作一種鄉愿字。名爲含蓄深厚。舉之無舉。刺之無刺。終身無入處也。作古文古詩亦然。作人之道亦然。治軍亦然。(辛酉十二月)

摹書譜一過。乃知蕩之精。其致力全在微妙處。若人人共見共聞之處。必無通微合妙之詣。若一向在浮名時譽上措意。豈有是處。(辛酉六月)

作字之道。點如珠。畫如玉。體如鷹。勢如龍。四者缺一不可。體者。一字之結構也。勢者。數字數行之機勢也。(辛酉七月)

大抵作字及作詩古文。胸中須有一段奇氣。盤結於中。而達之筆墨者。却須遏抑掩蔽。不令過露。乃爲深至。若將絲豪求知見好之心。洗滌淨盡。乃有合處。故曰七均師無聲。五和常主淡也。(辛酉九月)

因讀李太白杜子美各大篇。悟作書之道。亦須先有驚心動魄之處。乃能漸入證果。若一向由靈妙處着意。終不免描頭畫角伎倆。(壬戌四月)

作字之道。全以筆陣爲主。直以取勢。橫以出力。當少勝矣。(壬戌二月)

讀孫子「驚鳥之疾。至於毀折者。節也。」句。悟作字之法。亦有所謂節者。無勢則節不緊。無節則勢不長。(壬戌七月)

出筆宜顛腹互用。取勢宜正斜并見。用筆之顛。則取正勢。有破空而下之狀。用筆之腹。則取斜勢。有執屬踟躕之象。(甲子十二月)

夜寫零字頗多。略有所會。於昔年「體如鷹……」四句之外。又添四句曰。「點如珠。畫如玉。體如鷹。勢如龍。內跌宕。外拙直。鵝轉頭。屋漏痕。」(丙寅二月)

古來詩家。文家。書家。皆有所謂筆陣者。厚蓄於陣之初。而不必究極於陣之終。陣將酣時。又已另作變態矣。(丁

卯十月

作書。思偃筆多用之於橫。抽筆多用之於豎。豎法宜努抽並用。橫法宜勒偃並用。又首貴有俊拔之氣。後貴有自然之勢。

大約書法不外羲獻父子。余以師羲不可遽幾。則先師歐陽信本。歐陽不可遽幾。則先師李北海。師獻不可遽幾。則先師虞永興。師虞不可遽幾。則先師黃山谷。二路并進。必有合處。杜陵言書貴瘦硬。乃千古不刊之論。東坡駁之非也。(辛酉四月)

闕皇甫碑。識得歐字意思。知顏柳之硬。褚歐之瘦。學書者不可不領略也。(己亥五月)

因寫零字。偶有所得。知歐虞用筆。與褚相通之故。書家之有歐虞褚及李北海。猶詩家之有李杜韓蘇。實不祧之祖也。(丁卯十月)

悟北海上取直勢。下取橫勢。左取直勢。右取橫勢之法。大約直勢本於秦篆。橫勢本於漢隸。直勢盛於右軍。暨東晉諸帖。橫勢盛於三魏諸碑。唐初歐公用直勢。褚公用橫勢。李公則兼用二勢。(丙寅四月)

孫過庭書譜。稍得王大令之法。(辛酉十月)

余往歲好黃魯直書。深得晉人真意。而逸趣橫生。嘗更致力。

作書之法。劉石菴善用偃筆。鄭板橋善用蹲筆。王夢樓善用縮筆。惟努筆近人無善用者。古人惟米元章最擅勝場。吾嘗於此自極其思耳。(辛酉正月)

董香光專用渴筆。以極其縱橫使轉之力。但少雄直之氣。余當以渴筆寫吾雄直之氣耳。(辛酉二月)

作書之法。古人師歐李劉黃。今人師鄧鄭劉王。(壬戌九月)

作字之法。亦有所謂陽德之笑。陰德之笑。余所得之意象。爲陽德之笑者四端。曰直。曰勒。曰努。爲陰德之笑者四端。曰猷。曰偃。曰綿。曰遠。兼此八者。庶幾其爲成體之書。在我者以八德自勸。又於古今人中擇八家以爲法。

曰。歐虞李黃鄧劉鄭王。(壬戌十一月)

作字之道。二者並進。有着力而取險勁之勢。有不着力而得自然之味。着力如昌黎之文。不着力如淵明之詩。着力則右軍所稱如錐畫沙也。不着力則右軍所稱如印泥也。二者闕一不可。猶文家所謂陽剛之美。陰柔之美矣。(甲子五月)

余生三十以前。作字未能盡心。間架不穩。手腕不穩。四十以後。雖略有長進。而手腕時靈時鈍。鈍時則如古人所謂薑芽凍癢蠅者。可自笑也。(辛酉正月)

日內於作字之道。若有所會。惜精神疲乏。目光眩花。老境日臻。不克竟其所學。古人所以貴及時力學也。(辛酉九月)

作字之道。剛健婀娜。二者闕一不可。余既奉歐陽率更李北海黃山谷三家。以爲剛健之宗。又嘗參以褚河南董思白婀娜之致。庶爲成體之書。(辛酉十月)

余老年始略解書法。而無一定規矩態度。仍歸於一無所成。今定以間架師歐陽率更。而輔之以李北海丰神。師虞永興。而輔之以黃山谷用墨之鬆秀。師徐季海所書之朱巨川告身。而輔之以趙子昂天冠山諸種。庶乎其爲成體之書。(辛酉四月)

用狼毫筆寫寸以外字。足以發摠心中邁往之氣。爲之神怡。(辛酉)

久未作小楷。下筆輒重而不入。是日筆輕稍能入紙。乃悟輪扁甘苦疾徐之說。(辛酉六月)

日內作書。常有長進。蓋以每日不間斷之故。(辛酉十一月)

古之書家。字裏行間。別有一種意態。如笑人之眉目。可畫者也。其精神意態。不可畫者也。意態超人者。古人謂之韻勝。余近年於書略有長進。以後當更於意態上着些體驗工夫。因爲四語曰。「飢屬鷹視。撥燈嚼絨。欲落不落。欲行不行。」(癸亥九月)

近來作書，略有長進，但少蕭然物外之致，不能得古人風韻耳。（甲子五月）

余作字不專師一家，終無所成。定以後楷書學虞劉李王，取橫勢以求自然之致。利在稍肥，行書學張歐黃鄭，取直勢以盡睨視之態。利在稍瘦，二者兼營並進，庶有歸於一條鞭之時。（丙寅八月）

日內作字，手甚喫力，擬用「跌敵注卷」四字訣爲之，用力輕勻，或轉可歷久不變。（丙寅八月）

余近習字，非求字佳，老年手指硬拙，有如薑芽，借古帖使運動稍活耳。（丁卯四月）

習字一紙，似有所會，因就前所作詩二句，復增二句云：「側勢遠從天上落，橫波旋向弩端涵。」刷如丹漆，輕輕抹，換似龍蛇節節銜。」自此專從側橫刷換致力，不復以他妙雜縈吾慮矣。（丁卯十月）（以上論字）

臨金賞

子愚處觀宋高宗書幽風，字畫雅潔，圖亦工雅絕倫。（癸卯）

黎壽民送手卷，係劉石菴翁覃溪二公乾隆四十二年在順天園中所寫，各臨蘭亭一本，又書詩跋甚多，余以其物尤可珍貴，璧之。（庚申九月）

李少荃贈以姚惜抱先生所書草字千卷，書蘇公登徑山詩，中有缺脫，姚君學懷素書，不甚沈著，特字以入重耳。（辛酉九月）

觀錢子密家藏字畫二種，一爲其太高祖母陳太夫人畫冊，凡十幀，內一幀畫一黑犬，一幀畫一蝶，未入花叢，另一幀畫一蝦，一蟹，二小魚，一幀花籃，一幀古柏，一幀梅花仙女，一幀修篁茂林，一幀楊梅，枇杷，二桃，一幀喜雀，一幀蘆葦，白菜，皆清華名貴，秀絕人寰，每幀有其夫錢綸光廉江先生題詩二句，乾隆三十一年，其子文端公陳羣進呈御覽，高宗於每幀題七絕一首，并御題一跋於後發還，文端公及其子侍郎汝誠各作十詩，恭和元韻，而汝誠詳跋於後，以誌慶幸，逮乾隆四十七年，文端與侍郎皆歿，而高宗因閱錢邊所畫烏犬，偶憶陳太夫人原冊，遣

人回浙。取至京師。再呈御覽。高宗再題七律一首。長跋一幀。仍歸錢氏。信名蹟奇遇也。其一種爲直廬問寢圖。文瑞公早朝。先至其母陳太夫人所問安之象。爲王肇基所繪。亦非俗筆。(壬戌十二月)

子偲以所藏董容光等尺牘。王孟津草稿。乞與一觀。諦觀之。非真蹟也。(甲子五月)

錢子密出示其先世錢文端之母夜紡授經圖。高宗及諸名臣題詠甚多。觀玩甚久。信家寶也。(乙丑) (以上書畫)

休甯瞿令福田送右軍帖一本。王夢樓跋。斷爲淳化祖本。且定爲唐刻。考核未必確鑿。而神采奕奕。如神龍矯變。不可方物。實爲希世至寶。余行年五十有一。得見此奇。可爲眼福。瞿令又送趙待制仲穆所畫飛白竹。上有施愚山沈繹堂諸先生題跋。亦可寶也。余以世間尤物。不敢妄取。審玩片刻。仍爾璧還。去年黎令福疇送劉石菴翁覃溪二公在閩中所書手卷。余亦璧却。此三件。可稱祔門三寶。(辛酉正月)

莊思永帶來法帖多種。中有三希堂帖。又有宋拓皇甫碑。王虛舟跋。非真蹟也。又六觀帖。王夢樓姚姬傳手蹟。賞玩片時。(癸亥)

劉伯山攜其所藏西岳華山廟碑。在世所傳三名本之外。三名本者。一長垣本。宋漫堂成親王等所遞藏。後歸劉燕庭者也。一四明本。全謝山及范氏天一閣所遞藏。後歸阮文達者也。一華陰本。王山史朱笥河等所遞藏。後歸梁荏林者也。劉氏本。則其父文祺孟瞻於揚州市肆得之。久不見稱於世。亦可寶也。(甲子)

楊海琴信。寄到湖南永州等處金石各種。及臬刻鄧石如篆隸。又集中與頌字爲聯見贈。展玩良久。楊以乙巳翰林出守永州。性耽金石。新升鎮筸道者也。(乙丑正月)

在李小湖處借得宋搨閣帖。觀玩良久。(乙丑二月)

至李小湖處久談。觀其先人春湖先生所藏四寶中之丁道護碑。善法寺碑。又觀明刻本夏承碑。(乙丑五月)

李小湖所藏法帖。一曰褚書孟法師碑。筆意似虞永興。而結體絕似歐陽率更。與褚公他書不類。一曰丁道護書

啓法寺碑。隋碑而字體有類晚唐。矮方而勻整。開春湖侍郎以千金購之。蘇州陸恭家。一曰。宋搨虞廟堂碑。即春湖侍郎曾經刻者也。一曰。善才寺碑。名爲褚河南書。實魏棲梧書。仿褚法耳。又有晉唐小楷共十一種。其中樂毅論。東方贊。絕佳。乃樞古人用筆之道。如強弩引滿。蓄而不發。歸途作詩二句云。「側勢遠從天上落。橫波旋向峯端颯。」（丁卯五月）

觀李小湖所藏法帖。一唐搨虞書廟堂碑。一褚書孟法師碑。一丁道護書啓法寺碑。一魏棲梧書善才寺碑。余於褚書尤愛不忍釋。又觀大悲帖三卷。亦舊搨也。展玩良久。（丁卯十一月）

至李小湖處。看其所藏法帖。如歐書化度寺碑。褚書孟法師碑。虞書廟堂碑。皆天下之至寶也。又有魏棲梧書善才寺碑。丁道護書啓法寺碑。蔡伯喈書夏承碑。亦皆上品。（戊辰七月）

在李王叔處。見陳香泉法帖。見其草書題畫一首。飛舞變化。賞玩無已。惜余老年學書。不復能副吾意之所至耳。（戊辰）（以上碑帖）

莫子偁得唐人寫本說文。僅木部下半一百八十象。自作校勘記。比較孫刻大徐本。祁刻小徐本異同。其佳處不可勝舉。大喜。以爲天下之至寶也。（癸亥三月）

馬徵銘有影宋鈔本集韻。今東南亂後。僅存之本。可貴也。（甲子十月）

至莫子偁處。觀親近年所得書。收藏頗富。內有汲古閣開化紙初印十七史。天地甚長。又有白紙初印五禮通攷。其殊字。相傳係秦文恭公手校。又有通志堂另刻之體記釋文。又有明刻千家注杜詩。均善本也。歸後子偁以杜詩本見鮑嘉靖丙申玉几山人校刻。竟莫知爲何人也。（丁卯四月）

至丁兩生家。吃飯之後。看渠所藏書。其富甲於江蘇之官紳。最精者有宋刻世綵堂韓文。東都事略等書。渠欲以之饋余。余素不奪人之好。因取其次等者。如明刻內經。東雅堂韓文。笠澤叢書三種。攜之以歸。（丁卯）

汪梅村寄新刻皇朝中外一統輿圖。凡三十二冊。首冊序跋。凡例。中卷爲京師北二十度至俄羅斯北海止。南十

度至越南國。大致以康熙乾隆兩朝內府圖及近人李兆洛圖爲藍本。而增小地名頗多。亦鉅製也。（甲子二月）與劉開生同觀蘇松常鎮太五府州新圖。東西十九號。每號十格。南北十四排。每排十格。每格見方二里半。中國自有地圖以來。以此爲最精矣。（戊辰九月）（以上圖籍）

苗仙露。河間人。精六書諧聲之學。觀所藏君子館碑開元瓦詩冊。屬予題詩。（壬寅）

雷警邨以誠送一硯。云係韓襄毅雍之硯。刻一瓶形。襄毅自題曰。「韓瓶硯。」後歸王文成公。題硯背數十字。至本朝乾隆中。歸阿文成公。王蘭泉侍郎題硯匣百餘字。咸豐中。孔有涵繼縑以贈雷侍郎。今雷又以詒我也。（甲子十一月）（以上古器）

頤養

精神委頓之至。年未五十。而早衰如此。蓋以稟賦不厚。而又百憂摧撻。歷年鬱抑。不無悶損。此後每日須靜坐一次。庶幾等一概於湯世也。（己未五月）

夜洗澡。近製一木盆。盛水極多。洗澡後。至爲暢適。東坡詩所謂「浴槽添斛江河傾。本來無垢洗更輕。」頗領略得一二。（己未四月）

石芸齋言。「養目之法。早起洗面後。以水泡目。目屬肝。以水養之。以熱凝之氣。祛散寒駢。久必有效。」云云。而後漢書方術傳云。「愛膏精神。不極視大言。」二語亦養目之法。（乙未四月）

放翁每以美睡爲樂。蓋必心無愧怍。而後睡夢皆恬。故古人每以此自課也。（庚申四月）

放翁胸次廣大。蓋與陶淵明白樂天邵堯夫蘇子瞻等。同其曠逸。其於滅虜之意。養生之道。千言萬語。造次不離。真可謂有道之士。惜余備員兵間。不獲於閒靜中。探討道義。夜睡頗成寐。當思玩索陸詩。少得裨補乎。（辛酉正月）

務觀言。「養生之道，以目光爲驗。」又言。「忿怒二字，聖賢亦有之，特能少忍，須臾便不傷生。」可謂名言至論。
(辛酉正月)

養生家之法，莫大於「懲忿窒慾，少食多動」八字。(辛酉正月)

梁蔭林中丞歸田瑣記言。「養生之道，不特食宜少，眠亦宜少。」可謂名言。(辛酉正月)

余少時每遇困乏，卽夢覺。道光十二年間，先大夫數數呼喚不醒，每以爲憂。今三十年矣，而此病如昔。精神亦似未甚衰減者。(辛酉二月)

癢痒異常，手不停爬，左腿已爬搔糜爛，皮熱作疼。夜用水晶界尺熨貼，取其寒而潤也。(辛酉六月)

養生之道，當於眠食二字，悉心體驗。食卽平日飯菜，但食之甘美，卽勝於珍藥也。眠亦不在多寢，但實得神凝夢甜，卽片刻亦足攝生矣。(辛酉十一月)

養生之道，莫大於眠食。眠不必甘寢，鼾睡而後爲佳，但能淡然無欲，曠然無累，閉目存神，雖不成寐，亦尙足以養生。余多年不獲美睡，當於此加之意而已。(壬戌正月)

日來癢痒異常，徧身若有芒刺者然。數夜不能成寐，本日尤不耐煩，因服歸脾湯一帖，睡後竟能酣睡。至五更方醒，近數月所未嘗有也。(壬戌正月)

累年不能成寐之病，今春忽得痊愈，連宵多得美睡，殊不可解。豈俗所謂時好運好，百病皆除耶？抑憂勤變爲逸豫，清明變爲昏濁，爲衰耗之徵耶？(壬戌二月)

余自三十時，卽不能多說話，至數十句，便氣不接續，神尤困倦。今已三十餘年，故態不改，亦不加甚。故知身體之強弱，千態萬變，未可以一事之偶強，而遽信爲壽徵；一事之偶弱，而遽信爲敗徵也。(壬戌九月)

余少時讀書，見先君子於日入之後，上燈之前，小睡片刻，夜則精神百倍。余近日亦思法之，日入後於竹床小睡，燈後治事，果覺清爽。余於起居飲食，按時按刻，各有常度，一一皆法吾祖吾父之所爲，庶冀不墜家風。(癸亥四)

月)

細思近日之所以衰頹。固由年老精力日衰之故。亦由圍棋太多。讀書太久。目光昏經。精神困之愈困也。嗣後當戒圍棋。卽看書亦宜少減。每日靜坐時許。以資調攝。(癸亥)

因咳嗽勉強靜坐數息。果有驗。可停一二刻不咳。靜坐良久。間以偃臥。直至燈時。覺咳痰微減矣。(丁卯六月)近來因眼蒙。常有昏瞶氣象。計非靜坐。別無治法。作一聯以自警云。「一心履薄臨深。長天之鑒。長神之格。兩眼沐日浴月。由靜而明。由敬而強。」(庚午二月)

二月) 日內因眼病日篤。老而無成。焦灼殊甚。究其所以鬱鬱不暢者。總由名心未死之故。當痛懲之。以養餘年。(庚午二月)

閱范文正集。尺牘年譜中有云。「千古聖賢。不能免生死。不能管後事。一身從無中來。卻歸無中去。誰是親疎。誰能主宰。既無奈何。卽放心逍遙。任委來往。如此既心氣漸順。五臟亦和。藥方有效。食方有味也。只如安樂人忽有憂事。便喫食不下。何況久病。更憂生死。更憂身後。乃在大怖中。飲食安可得下。請寬心將息」云云。乃勸其中舍三哥之書。余近日多憂多慮。正宜讀此一段。(庚午二月)

日內寸心憂灼。迄無寬舒之時。以是病愈難減。總由少壯不努力。老大悔憾甚多。致心境愁悶異常耳。(庚午四月)

黃靜軒勸我靜坐凝神。以目光內視丹田。因舉四語要訣曰。「但凝空心。不凝住心。但滅動心。不滅照心。」又稱一二語曰。「未死先學死。有生卽殺生。」有生。謂妄念初生。殺生。謂立予鏟除也。又謂此與孟子子勿忘勿助之功相通。吾謂與朱子致中和一節之注亦相通。(庚午五月)

閱福壽金鑑。午正數息靜坐。仿東坡養生頌之法。而心粗氣淨。不特不能攝心。並使身不少動搖而不能。酉刻服藥後。行一小週天。一法。靜坐半時許。(庚午五月)

丁兩生力勸余不看書。不寫字。不多閱公牘。以保將盲之左目。其言懇惻深至。余將遵而行之。(庚午五月)
許仙屏送有瑀瓊。中空積水者。與空青相類。紀澤命匠以金剛鑽鑽之。取水點於余右目中。閉目少頃。傍夕小睡。(庚午十二月)

吳竹如爲余診脈。渠謂余病在心肝。虛火上炎。宜靜坐以養之。非藥所能爲力。(庚午十二月)

聞翰仙言。何鏡海得靜坐之法。於熊榮隱。竇幻齋學之。目已瞽而復明。余亦思一試也。(庚午十二月)

楊羊庵寄信。言治目方。每早黎明未起時。以兩手掌之根擦熱極。加以舌尖之津。閉目擦八十一下。久則有效。日內試爲之。而初睡時擦一次。黎明又擦一次。不知果有益否。(辛未二月)

近來每日圍棋二局。耗損心力。日中動念之時。夜間初醒之時。皆縈繞於楸枰黑白之上。心血因而愈虧。目光因而愈蒙。欲病體之漸痊。非戒棋不爲功。(辛未四月)

有一守備馬昌明善爲道家內功。云能爲余治目疾。與余對坐。渠自運氣能移於吾身五臟云云。因與對坐三刻許。(辛未八月)

竹如處坐甚久。燈後歸。脚腫愈甚。常服之襪已不能入。肥而復瘦。且似已腫過膝上者。大約作文及看生書。俱嫌用心太過。有損於血而氣不能運化。故至於此。以後嘗不作文。不看生書。(辛未八月)

養生之道。視息眠食四字最爲要緊。息必歸海。視必垂簾。食必淡節。眠必虛恬。歸海。謂藏息於丹田氣也。垂簾。謂半視不全開。不苦用也。虛謂心虛而無營。腹虛而不滯也。謹此四字。雖無醫藥丹訣。而足以卻病矣。(辛未八月)
日內眼蒙益甚。或謂調息養神。尚可補救。因試爲之。土捧而塞孟津。深恐其無當也。(辛未十一月)

品藻

何子貞來談詩文。甚知要。得藝通於道之旨。子貞能自樹立者也。(壬寅十一月)

樹堂至情動人。惜不得使舍弟見之與感。又惜不得使霞仙見之也。說到家庭。誠有味乎言之。(癸卯正月)

看子貞批所圈古文及史記。信乎其能自立者。揚子雲云。「其爲人也。多暇日者。其過人也。不遠矣。」自念如此。悠悠。何以自立者。子貞者。名不苟立。可敬也。(癸卯二月)

竹如兄與人交。雖人極濃厚。渠常冷淡。使人穆然。與之俱深。真是可敬。(癸卯二月)

何子貞來。談及渠在國史館。每去手鈔書十頁。錄東華錄所不載。而事有關繫者。約五千字。聞之服其敏而好學。予前冬入史館。而絕不供職。對之愧殺。(癸卯二月)

羅椒生來久談。有志之士。闍然日章。不勝欽服。(癸卯二月)

朱廉甫得福建道御史。有志獻納。得居言路。可喜也。讀廉甫詩數首。知其用力已深。其心血亦足。可以力戰不衰。予所不及。(癸卯二月)

吳子序言。「聖人言保國保天下。老氏言取國取天下。吾道只自守。老氏有殺機。」云云。其義甚精。好學深思。子序不愧。(癸卯四月)

接霞仙書。懇懇千餘言。識見博大而平實。其文氣深穩。多養到之言。一別四年。其所造遠臻此。對之慚愧無地。再不努力。他日何面目見故人耶。(戊午六月)

劉蔭渠自新城來見。六年不見。一面即深和愛重。喜其與三十年在京相見無異。仍是樸訥書生氣象。未染軍營氣習。亦無官場氣習也。(戊午七月)

孫芝房信。寄近作古文一本。夜闔論治六首。通達事理。文亦勁快。傑作也。(戊午七月)

汪梅村。名士鐸。積學士也。江寧人。庚子舉人。出胡中丞門下。江寧城破。陷賊中。年餘後逃出。至績溪山中。去年胡中丞請之來鄂。署修讀史兵略一書。其學精於輿地。曾補畫水經注圖。又精於小學。又曾作南北史補注。其師友爲胡竹莊培翠。胡雲莊承洪。陳碩甫煥。徐星伯松。張子舟穆之屬。又言胡墨莊六種。胡竹莊儀禮。及焦理堂羣經

宣室圖諸書最好。(己未八月)

馬徵麟業師陳雪樓。乙未進士。曾任甘肅知縣。著有周易廓。及詩集。古文。馬讀書頗有淵源。會著三立明辨。謂立德立功立言三者。各纂集諸書。自爲條例。又有馬壽華。號小坡。馬復震。號星平。皆桐城人。在此投效。志趣亦不卑。(庚申正月)

鄧守之頗通小學。蓋其父完百先生與李申耆先生。皆嘗代名宿。濡染較深也。(庚申三月)

與季高次青嚮談。夜又與季高久談。季高言。「凡人須從喫苦中來。收積銀錢貨物。固無益於子孫。卽收積書籍字畫。亦未必不爲子孫之累。」云云。多見道之語。(庚申四月)

羅澹村中丞。以乙未進士。歷官直隸湖北浙江等省。凡二十五年。家無一錢。舊屋數椽。極爲狹陋。聞前後僅寄銀三百兩到家。夫人終身未著皮襖。真當世第一清官。可敬也。(庚申四月)

胡中丞熟商江南軍事。又言凡事皆須精神貫注。心有二用。則必不能有成。余亦言軍事不日進則日退。斷無中立之理。二人皆許爲知言。(庚申四月)

周致甫頗習夷務。所言亦曉暢事理。(辛酉十月)

賀宏勳帶瀏陽精於古樂者。邱慶籥等六人來。邱係毅士先生之子。六人者。皆承毅士之教。講求古樂。帶來樂器。琴一。瑟一。鳳簫一。洞簫一。匏一。埙一。篪一。笙一。因令奏樂。以鼓節之。音節清雅。穆然令人想三代之盛。古昔聖王修己治人之術。其精者全存乎樂。而後世之獨闕者。乃首在樂。余因古人治兵之道。作詩之法。皆與音樂相通。而懵然不知。深以爲恥。思訪尋毅士先生之徒黨。相與講求一二。故招集六人者。自瀏陽來皖。兒子紀澤粗曉音律。明年當令來營。究心茲事。(辛酉十一月)

錢子密送其尊甫錢警石先生泰吉文稿。泰吉爲香樹先生之曾孫。衍石先生之弟。爲海甯教官二十七年。又在海甯爲山長九年。現避亂寓江西新建鄉間。生平最喜校書。所校各本題識名曰曝書雜記。(壬戌四月)

嚴渭春中丞信中抄寄渠與司道論湖北軍務一函。地勢之熟。詞氣之謙。均不可及。(癸亥四月)

李少荃殺蘇州降王八人。殊爲眼明手辣。(癸亥)

李善蘭王叔楊峴見山來坐。攜陳碩甫先生名片一紙。知已由賊中逃到滬。言將來皖。年八十二歲。段茂堂之弟子。東南之精於經學小學。歸然僅存矣。(癸卯五月)

李王叔帶來二人。一張斯桂。浙江蕭山人。工於製造洋器之法。一張文虎。江蘇南匯人。精於算法。兼通經學小學。爲阮文達公所器賞。(癸亥五月)

柳賓叔。名與恩。丹徒王辰舉人。七十六歲。精於穀梁之學。曾在阮文達家。課讀十餘年。學術頗有家法也。(戊辰十月)

單地山於席間盛稱余所作江忠烈神道碑。背誦如流。老輩好善。不可及也。(己巳正月)

馮樹堂來久談。三十年前老友。自祁門一別。至是忽十餘年矣。暢敘一切。渠絕無老態。在山中善於調養也。(辛未二月)

閻霞仙近年所作詩文。淵懿暢達。較青年已大進。(辛未九月) (以上十人後)

邵蕙西示以方世兄所作論。年方十五而才華如此。黃子壽來示以所作選將論。真奇才也。吳翔岡言。識見高明者。特患踐履不平實。高明則崇。效天。平實則卑。法地。因進之以腳踏實地。事事就平實上用功。(戊午十二月)

次青又作懷人詩十六首。再用何廉勅原韻。綿麗遒勁。才人之筆。(己未二月)

觀鄧孺之吳竹莊和詩。竹莊詩牢騷。噴薄而出。不忍卒讀。蓋其中鬱抑深矣。(己未二月)

接何廉勅信。寫作俱佳。依戀之意。溢於言表。才士不遇。讀之慨然。(己未三月)

張廉卿近日好學不倦。作古文亦極精進。余門徒中望有成就者。端推此人。臨別依依。余亦篤愛不忍舍去。求爲其祖作墓誌。近日當應之也。(己未九月)

陳大力來。與之言襟懷貴宏大。世俗之功名失得。須看得略平淡些。(庚申二月)
趙蕙甫上條陳一篇。識解闊遠。文解通雅。逸才也。(辛未八月)

劉仲良。庶常秉璋。廬江人。李少荃之門生。氣象崢嶸。志意沈著。美才也。(辛酉十月)

嚴仙舫信來。薦其內姪向師棟。果令器也。(壬戌)

郭兩三之胞弟用中。與其子階。自東台來。談最久。階字慕徐。其業師爲揚州劉孟瞻文淇之子。經學已有師法矣。(壬戌八月)

閱嚴秋農先器識。而後文藝論。嚴係仙舫通政之子。樂園廉訪之孫。年十八。中咸豐丁巳舉人。今僅二十三歲。而史事爛熟。識見遠大。洵吾鄉英俊也。(壬戌八月)

與許仙舫談氣節文章。二者缺一不可。囑其勉於此。以與鄉人相切磋。(癸卯十月)

歛人汪宗沂者。王子懷之壻。呈所作禮樂一貫錄。雖學識尙淺。而頗有心得。(甲子二月)

孫文川賈鍾麟。皆紳士之有才者也。(乙丑正月)

薛晴帆之子薛福辰。所遞條陳。約萬餘言。闕畢嘉賞無已。(乙丑正月)

戴醇士之長子有恆。季子穗孫來見。尙能世其家學。穗孫新得優貢。器宇軒昂。可喜也。(戊辰正月)

蒙陰管縣令福曜。河南駐防。係倭良峯相國之胞姪。福新伯觀察咸之堂弟。字煥卿。雅飭有循吏風。(戊辰)

石琢堂之曾孫。名師鑄。字似梅者。自湖南來。筠仙有書薦之。盛稱其才。果俊才也。(辛未十二月)

雷州舉人陳喬森。談甚久。陳號逸山。許仙舫有書。極贊其文行不羣也。(五月) (以上獎勵)

監印委員莫祥芝。患病入城醫治。求一見。語言時明時昧。顛連可憫。(戊午)

黎宗銘。零陵人。向在王璞山營。聰明警敏。字仿左。季高。體絕肖。志趣高亢。方期漸進於誠實。遽以疾歿。殊爲可惜。

(戊午七月)

成章鑑在吳城病故。不勝悲悼。成以武弁而知忠義愛民。謀勇兼優。方冀其繼塔揚而起。不意其遽逝也。（戊午十月）

夢江岷樵。如平生歡。多年未一入夢。茲忽夢之。不勝傷感。但不知溫甫弟果尙生存否。溫與岷亦至交也。（戊午十一月）

接孫芝房信。告病勢垂危。託以身後之事。並請作其父墓誌。及刻所著詩十卷。河防紀略四卷。散文六卷。又請邵恆西作墓誌。亦自爲手書別之。託余轉寄。又接意誠信。告芝房死矣。芝房於去歲六月。面求作其父墓誌。余已許之。十一月。又寄作古文一本。求余作序。余因循未及即爲。而芝房遽歸道山。負此良友。疚憶何極。芝房十三歲入縣學。十六歲登鄉舉。二十六歲入翰林。少有神童之目。好學勵品。同輩所欽。近歲家運極蹇。其胞弟鰲洲主事。叔孚孝廉相繼下世。又喪其長子次子。又丁母憂。又喪其妻。又喪其妾。皆在此十年之內。憂能傷人。遂以隕生。如此美才。天不假之以年。俾成大器。可悲可憫。因憶道光二十八年劉芸雲將死之時。亦先爲一書寄京以告別。請余爲作墓誌。凡內傷病。神氣清明不亂。使生者愈難爲清耳。（己未三月）

子序寄其姪昌箴之文。因閱一過。識見卓越。有子序之風。惜其早死也。（戊午十二月）

袁漱大有志讀書。期至中古之作者。而竟百不能償其一。二。良可深痛。今年六月。郭雨三親家陣亡。茲又聞漱六之喪。中年哀樂。觸緒生感。古人所云。「既悲逝者。行自念也。」（己未十月）

胡宮保於八月廿八日亥時去世。哀痛不已。赤心以憂國家。小心以事友生。苦心以護諸將。天下甯復有似斯人者哉。（辛酉九月）

羅伯宜來談極久。深歎黎壽民之敦厚。早逝爲可惜。（壬戌）

周殺甫在滬淪逝。老年一廬薦牖。遽被參劾。抑鬱潦倒以死。悠悠毀譽。竟足殺人。良可憐傷。（壬戌八月）

趙景賢竹生以一在籍紳士。苦守孤城。四面援絕。至半年之久。城陷身殉。良可痛憫。擬爲一疏。歷敘其賢行勛績。

而自請不能赴援之咎。(壬戌)

聞姚秋浦之喪。深以爲憂。姚自去年五月暑皖南道。至今年餘。無日不在艱危困苦之中。茲以疫病。四日不起。可勝悲惋。

鄧守之子解。字作卿。於本日寅正在公館內去世。完白先生之孫也。余派人料理殮殮。未刻昇出。其父曾諄託教訓培植。余以公私繁冗。久未一省視。不知其一病不起。有負重託。殊爲歉仄。(癸亥五月)

至楊樓菴處看病。觀其安閒淡定。視死如歸。不愧學道君子之自然。病則十分沈重。無可挽回矣。(癸亥六月)

袁午橋臨終有遺函寄余。中云。「勿以苗逆爲易剪。勿以長淮爲易收。」讀之悚動哀感。(癸亥七月)

李希菴於十月廿八日子刻棄世。苦戰多年。家無長物。忠盡廉介。可敬可傷。旋又聞錢警石先生仙逝。老成凋謝。彌深悵惘。(癸亥十二月)

范雲吉於十二日戌刻棄世。仁厚正派。而有見識。方意其大有爲於時。而止於此。良可痛也。(癸亥十二月)

聞張鍊渠歿於安慶。爲之怛然不釋。蓋鍊渠於徵休鬧餉時。百計維持。大受毆辱。而余查辦之。札復過於嚴厲也。

(乙丑八月)

至塔軍門家。直延入上房。具酒相待。其母八十歲。相對涕泣。其三弟咸豐四年已死。其次弟本年八月十三日亦死。其兩弟婦寡居。并出拜見。三弟皆無子。僅塔軍門一女。次弟阿陵布四女。親房無可承繼之人。實爲可慘。其妹其女。并出拜見。泣求提拔其婿等。(戊辰十二月) (以上感傷)

游覽

白溝河上游爲巨馬河。巨馬河出廣昌縣。至涑水分爲二支。北支經涿州北關外。繞而東合琉璃河。統名曰白溝河。宋遼分界在此。故曰界河。此河自二月至十月。皆可坐船。風帆蘆葦。似江南風景。惟橋多而矮。轎在船上。則不

能多過其下。十一月冰凍，亦無船也。此河至雄縣之南，匯焉西淀。下游至天津入海。十二連橋，卽西沱也。宋何承矩爲滄州節度使，請於順安營西開易河瀆口導水，東注於海。東西三百餘里，南北百七十里，築堤瀆水爲屯田，以遏敵騎之奔軼。於是雄鎮霸州平戎破魯顧安等軍，興堰六百里，置斗門，引淀水溉田，獲漁稻之利，而水深不可以舟行，淺不可以徒涉。此東淀西淀之所由起也。

河間府古瀛洲也。

獻縣之北，過一河，上有橋甚高，下有船，風帆往來，蓋子牙河也。滹沱河發源山西，由廣平北流至天津入海，自與滄陽河合流後，卽謂之子牙河。

自交河埧城景州至劉智廟一帶，皆傍運河之西岸行。至明日，德州渡河，則過東岸矣。向來此數百里間，窪地積水，夏潦甚盛，故使江西者，甚爲難行。景州南北，常須坐船，沂運高而至德門。今年此間夏雨無多，故昨二十九、初一，及今三日，皆路乾好走，甚難得也。然聞黃水由微山湖全灌入運，頂託北流，故運河水盛旺，而衛漳之來源亦旺。景州之南北岸，已決口矣。四女寺有一滾水壩，運河水太盛，則開閘放出，下游由直隸之甯津慶雲一帶入海。土人稱鹽河亦稱老黃河，若秋冬春，則無水矣。

魏家灣有一滾水壩，水多則開閘放出，下游由樂陵德豐一帶入海。李氏地圖謂爲馬頰河，蓋附會九河古名而稱之。土人謂爲趙王河，蓋運河之西岸。本有趙王河，入於運，故指此爲趙王河之下游也。

東昌府城東有一龍灣滾水壩，運河水多則開閘放出，下游由禹城惠民一帶入海。李氏地圖謂之徒駭河，余問之士人，仍稱曰「趙王河」。此河與昨日之馬頰河水勢皆小。莽運河滾壩，皆在未會衛河以前。四女寺滾壩，則在既會衛河以後也。

大清河，河廣約三十丈，水深而濁，但不似黃河之端悍耳。大清河，本濟水也，出王屋濟源縣，絕黃河出，而溢爲滎。東北會汶而入於海。古之濟水加此，自濟水絕流已久，而凡東平州以下，經東阿平陰歷城濟陽等處，至利津入

海者。均謂之大清河。其源自平陰縣南之柳溝諸泉。由東平州北門外過。折而東北。汶水爲戴村壩所遏之餘水來會。又折而北。運河夏漲。張秋鎮城壩之水來會。自是浩浩一巨川矣。昔之清河。濟爲主而汶附之。今之清河。汶爲主而柳溝諸泉附之。運河城壩又附之也。又爲鹽船所經歷。故亦謂之鹽河。

自別京外西山後。幾十日不見山。至舊縣始見。四圍皆山。蓋泰山支麓也。

東平州北關外渡河。廣約三十丈。蓋大清河自汶水來。雖爲戴村壩所遏。全汶入運。而其溢出一水。漫壩而下者。卽經東平州之北門外。蓋昨日所渡大清河之上游也。李氏地圖以州城在此河之外。誤也。州城內外多積水。南門外一橋下。積漲頗深。橋南尤泥濘難行。今年尙好。往年雨多。環城皆水。竟不可行。須繞道行十五六里也。州城甚大。周四十里。漢爲東平國。取禹貢東原底平之義。劉宋後。魏曰東平郡。隋曰鄆州。唐元和中。置天平軍節度。宋政和初。升爲東平府。元曰東平路。明曰東平州。初隸濟寧府。後改隸兗州府。國朝隸泰安府。實四戰之地也。元韓仲輝初於安山開會通河。今僅有一安山閘而已。

汶水本自大清河入海。自明宋尙書禮。築戴村壩。遏全汶入運。三分北流。七分南流。而汶水遂爲運河之源矣。此渡處地名草橋。去南旺湖分水處。尙五十里。過渡後。又十里至汶上縣。過高檣橋。行僅一里許。卽坐船泛小河。問之士人云。一名泉河。由泰山來。夏月大雨。則溪漲流出。下注運河。冬則無水矣。」

泗水橋長約五十丈。泗水出陪尾山。下游分二支。南支入獨山湖。北支過兗州府。會洸河。過濟寧州入運。此橋北支也。

白馬河源出大龍山。西流會於汶。入運河。

出兗州府城。卽望見東南有一山。高秀迴出。蓋鄒縣之嶧山也。在縣內二十五里。秦始皇刻石於此。晉郗鑒避寇於此。自嶧山之北。衆山綿亘數十里。嶧山之南。綿亘百餘里。昨日今日。大道之中。皆山相送也。蓋皆泰山之支麓。嶧爲主峯。余問之士人。有曰連青山者。有曰高山者。有曰龍山者。其名不一。昨日所過之泗水白馬河。今日所過

之南沙河北沙河及鄒縣之南小溪數處。皆發源山下。西北流入於運河。或入於泗水。入於南旺昭陽微山等湖。孔孟桑梓。山川雄秀絕倫也。

南沙河廣與北沙河等。水深尺餘。古之鄒水也。出連青山入薛河。又行二十五里。至官橋鎮。相傳卽孟嘗君封薛之故邑。鎮南關外有一水。自東南來。西北入運河。又行十餘里。有一水甚大。土人云。「名十字河。」亦自東南來。西北入運河。

連日皆行運河東隄之外。黃河豐北缺口未塞。水淹豐沛魚臺金鄉嘉祥鉅野一帶。皆在運河西隄之外。鄒縣滕縣。途中間遇饑民。攜老抱幼。北去乞食。又牽耕牛數十頭。一路求售。僅五六千錢一頭。蓋折本不啻三四倍矣。

至韓莊。沿途見道西湖水浩淼。風帆往來。蓋微山湖本在運河之西。近被黃水沖溢。湖水漫過運河之東也。韓莊向有店二三千家。運河貫於街中。微山湖在西隄諸店之後。近爲黃水所掩。房屋無一存者。皆結楫爲廬。栖止。河千頭盡爲湖所吞。僅餘兩線單隄。中走一泓運河。其溜極急。自此下游無隄以束之。運河寬五六十里矣。余騎馬行泥淖中。繞道數里。至此渡運河。又二里許。渡新河。新河者。上游亦受微山湖之水。下游仍入運也。

微山湖之下游。向係民田。因全黃入湖大溜。頂託北行。餘水則散漫四溢。此其漫而南流。下游入運者也。在船上行十五里。所過民田村莊房屋。堅固者尙峙水中。未倒。船至荆山橋之南岸。一村莊前上岸。荆山橋者。其河甚寬。上游受微山湖之水。下游入運。今汪洋一片。則此河軌道不復見矣。但見長橋露於水面。其長約二里許。北岸一小山。南岸一石牌坊而已。上岸後坐轎行十八里。至黃河北岸。渡一新河。係官爲新開者。蓋欲引微山湖之水。流入黃河以殺湖漲也。僅二丈寬。與黃河僅隔一隄。新河用船渡。而黃河則坐轎行過。無勻水矣。河堤之下。卽至徐州府。

在堤上見徐州北門內。有東坡之黃樓。南門外有雲龍山。山上有放鶴亭。東南隅有戲馬臺。皆歷歷在望。符離集。古符離縣城也。睢河在集中。上有橋。下有船往來。睢水有三源。出江蘇碭山縣者。爲睢河。出河南虞城縣

者。北一支爲洪澤河。南一支爲巴渠河。至蕭縣與睢水合。下游入洪澤湖。

至宿州城北關外。隔水用船行三里許。據方輿紀要。汴水經州城北。今汴水竟無蹟矣。李氏圖亦不載也。州牧郭世亨來見。據稱此水係北股河。南股河上游。係黃河南岸之減壩。所謂天然閘者是也。往年皆盛漲。今年黃河北決。無減壩。南流到此。因雨水太大。合州成災。故環城皆水云。

滄河出河南歸德府。有二源。一曰南沙河。一曰北沙河。下游至五河縣。與淮水會。又行三十里。至新橋。渡澗河。河面甚寬。澗河來源不遠。上游僅三四十里。下游僅二三十里。卽入滄河也。方輿紀要無此河。李氏圖有之。冬夏皆有船。從前有橋。今塌矣。

洪澤湖以黃河南岸減壩數十年所放之水。積淤漸高。又加廿二三年中。辛祥符缺口。水皆入洪澤湖。廿九年開吳城大堡。游湖尤甚。不能容水。故數年來。宿州靈璧鳳陽一帶。水無所歸。遂成澤國。此泛舟所行之水。皆村莊民田也。行二十餘里。卽入淮河。沿河而下。又行二十餘里。凡五十五里。至臨淮關。

梁縣城市鎮甚大。且繁盛。按漢慎縣本屬汝南郡。劉宋喬置汝陰郡於此。因此爲慎縣。東魏置平梁郡。陳曰梁郡。隋唐皆曰慎縣。宋紹興間避諱。改曰梁縣。從故郡名也。元仍宋舊。明初併入合肥縣。今爲梁鄉縣。

廬州府城。東門名威武門。南門名德勝門。東門外過一橋。橋下河內有船。卽肥水也。上游來源不遠。卽在合肥境內。下游匯爲巢湖。土人名爲交湖。音之誤也。湖去府城四十里。由湖流出爲黃落河。入大江也。三十七里至派河。上有橋。下有船。問之土人。此名上派河。尙有中派河。下派河。三河皆通巢湖也。

桃城店街外有一河。以船搭浮橋。河中船頗多。問之土人云。名桃城河。上游出西北一帶山下。下游入巢湖也。距舒城七里。有一河頗深。名七里河。過船後。又行二十里。復有一河。無船。幸水小。有橋易過。聞山水盛漲時。極難過也。此二河下游皆出巢湖。入大江。其地有市鎮。卽名南港。至此望諸山。四圍如畫。西一高峯。名春秋山。南一高峯。名鹿起山。又十里至梅心驛。公館面山。後有舫齋極雅。諸尹鈕西農所造也。

自入安徵廬鳳以來不見高山。今日始行山中。小關本名北岐。巡檢駐紮於此。大關本名南岐。即古硤石山也。三國時孫權攻皖。張遼自合肥馳救。圍城已破。至硤石築壘戍守。後曹休攻皖。陳璜朱桓等拒之。追至硤石。即此地也。此二關爲南北要隘。自此以北。猶有北方風景。自此以南。則純南方氣象也。自此以北。水皆北流。由洪湖入大江。自此以南。水皆南流。由縱陽河入大江。

呂亭驛。即宋元嘉間立呂亭。左縣。即此地也。

桐城縣中有一河。縣城在河南。出公館後。過河橋。經城下行。行四十五里。至陶冲驛。自昨日入桐城境後。山水即極蒼翠明秀。爲出京以來所未見。今早新雨。千巖競秀。萬壑滴翠。尤步步可愛。陶冲驛換馬後。行二十里。過一沙河。編竹爲籬。置轎其上。河廣約四十丈。若山水暴漲。則難過也。此已入潛山縣界矣。後又過小河三次。不用竹籬。分水上游。皆發諸山之麓。下游皆合於縱陽河入大江也。

由潛山縣行里餘。過一河。有竹籬。又二里。過一河。亦用竹籬。馬皆浮水而過。又五里。過河。馬亦用船。轎用籬。自城內起。凡四十里。至小池驛。

潛山縣。山甚高。山中泉水及雨水下游。皆由石牌河入大江。每山水盛漲時。則橫潰壞田爲患。河本多於桐城。而隄防不如桐城之堅實。故桐城得水溉田。受水之利。而潛山則但受水之害也。潛山出篋席。精而賤。是日買一牀。縣城以北。山與桐城相等。以南則草木不茂矣。(以上壬子)

弋陽縣之派。自靈山來。靈山在上饒境。在弋陽之東北。六峯聳峙。形如筆架。與廬山五老峯略同。縣之對河南岸。龜峯山。形如龜。去縣南稍西。約三十里。甫臨上饒。北繞弋溪。弋溪發源於靈山。西流至縣之西門。注入上饒江。縣北門外有橋。去城不半里。橋南有小山。可紮營。城外有山。可紮營。西門外有小平坡。可紮營。皆守城者所宜占也。西門外過弋溪河五里許。有黃土岡。可紮營。攻城者所宜占也。東門外有詹家山最高。羣山頗多。皆可紮營。守者攻者皆宜占也。或豐五年。羅李紮西門外之黃土岡。余今紮營家山之側。

自荷苞塘過半里許。小憩於野。策馬登山。名曰響石巖。其北爲峭壁。南略斜上爲平頂。在龜峯之東。登此山即見龜山之背。對面東南一山。亦壁立。高平如臺形。與龜峯略同。又行二十里。至雙港。住宿。雙港係一大壑。余紮營之處。名曰五鼓嶺。坐西向東。後曰虎形山。月輪山。對面山巖。山右脇有一水。從義嶺來。右東南角有一水。從陳坊吳坊來。會於雙港。東北流至於黃沙港。入弋陽江。

余率師由建昌入閩。自港口行四十里。至塘陂灣紮營。營盤坐西向東北。遙望東南外山。爲天華山最高。西南巖臺山。東隅爲降兵峯。北至貴溪五十里。東至光澤縣一百八十里。南至耳口寨四十里。西南至上清宮五十里。上清宮內有櫺星門。下馬亭。有正殿。有雍正九年御碑亭。極雄偉。皆爲賊所毀。神像狼籍。宮門外有趙子昂聖教碑。尙完好。旁有雍正年一碑。上無覆亭。剝落盡矣。

上桂州。即前明夏貴溪相國故宅。有水發源於爐溪。自西而東流。至安仁之上。合入廣信大河也。下游西北隅爲龍虎山。即張真人修煉之所。上游東北隅爲象山。即陸子講學之所。正東爲藐姑峯。即饅頭嶺。正南爲出雲峯。正西爲華西山。東北至塘坡灣五十里。北至貴溪縣七十里。西北分三路。至鷹潭四十里。至安仁九十里。至鄧家埠七十里。西南至金谿七十里。東南至耳口寨四十里。

西華山之東一大壑。即上清宮曠野也。西華山之西一壑。較上清宮之野略小。去西華山半里許爲獅山。葬前明一天師。墳有石人石馬。獅山之北。接冲天山。俯臨江水。即上清宮之口水鶴泉源也。其東南爲雲林山。雄秀聳特。撫建之巨鎮也。東北即龍虎山。西北爲仙鶴峯。南爲白馬峯。東至孔坊十五里。西至青田橋二十里。北至魚塘三十里。

金谿膏腴之區。近被賊蹂躪。殘破不堪。城中僅有一二民房未毀。餘皆頽垣破瓦。目不忍觀。城北爲鷓鴣嶺。南爲鶴梅峯。山牌嶺諸山。南路左至爐溪百里。右至建昌府百一十里。西南至撫州府百里。金谿王家嶺。南有仙人嶺。東有大猛山。西北有羅家山。東北有韓婆嶺。

與憲城仙屏筮等同遊麻姑山。進城東門。出南門。約十三四里入山。山高四里許。中有半山亭。過亭後。有試劍石。有雙瀑泉。烏龜潭。水月潭。伏獅潭。又上爲金龍。爲龍門橋。水簾洞。與廬山之栖賢三峽橋最相似。橋內有神功泉。極清冽。又進爲一大壑。北爲仙都觀。觀外爲仙橋。觀內有壁蓮池。壁上嵌魯公書麻姑壇記。中龕麻姑神像。今燬矣。廟後爲螺螄巖。巖後爲大松祠。側爲十賢堂。堂後爲慈惠庵。仙都觀之上。有壁禱庵。庵內有大士閣。飯後又遊丹霞洞。在仙都觀之西南約八里許。小溪側有大石。中窪。相傳窪內。舊爲入洞之門。今爲砂石所閉塞。其上爲行人徑路。頓足。欲然有聲。土人謂其下空洞。故履之成聲。然山色粗獷。絕無靈異之象。縱有小巖深洞。必非佳境。不足以宅仙靈矣。申刻歸。仍至龍門橋小憩。麻姑山之勝。以此爲第一。昔人傳會。不足珍也。

出建昌府城西約二十里。有麻嶺。巨石峭壁。聳立千尋。有水繞於峭壁之北。約小半里許流出。是爲麻源洞口。入麻嶺內。兩岸皆石壁。中夾一溪。清流激湍。東岸摩崖。有雲間二大字。西岸摩崖。字甚多。不可辨識。谷口有店。約二十餘家。出谷口二百步許。有五谷山。羅星極圓。儼護水口。又百步許。有平坡。土人各曰曾和坡。五谷山與此坡似。斷似連。坡之西一谷。坡之東二谷。每谷各有一溪。溪源約各十五里許。東二溪匯於石橋。三溪匯於谷口店鋪前。是之謂麻源。三谷東岸山皆石壁。西岸皆土。東岸山最高者。爲雲谷峯。下有平岡。卽華子岡。

建昌府城守之甚易。攻之頗難。東面及東南隅。貼近盱江大河。東門外卽太平橋。橋東有洲。洲南有從姑山。洲首爲新河。與盱江相會處。洲尾曰楊林渡。兩河相隔約一里有奇。中有小港。穿通兩河。港有橋曰平江橋。由楊林渡東岸循河而下。約三里餘。爲寶塔山。山下爲萬年橋。欲圍攻建昌城者。東岸自從姑山起至洲尾止。可紮三四千人。須於上下楊林渡縮搭浮橋。以通岸北頭。河沿不便紮營。宜紮於石仙院。及望馬岡等處。西面宜紮師公山。王象山等處。西北隅之鳳凰山側亦可。迤邐連紮數營。此圍城之說也。若攻城。三面皆石山。不能挖地道。亦不能起土山。難爲力矣。爲守城之計者。則宜占住太平橋。占住中洲。通東路之接濟。庶不至於圍困。(以上戊午)

望琴所修湖口昭忠祠。中廳各營官哨官神主在焉。後廳各勇神主在焉。西一所爲慈悲禪林。僧徒所居。其後爲

陶音閣。中一層爲鐘樓。樓之西爲坡仙樓。刻東坡記於壁。東一所爲浣香別墅。中一層爲「聽濤跳雨」之軒。後一層爲芍芸齋。齋之後身爲且閣亭。亭後有小池。有假山石洞。穿洞而出。登山。爲鎖江亭。余去歲及今過此。皆住芍芸齋中。

是日彭雪琴與余登石鍾山。時北風吹雨。蕭然有秋意。因題一聯云。「長笛不吹江月落。高樓遙吸好風來。」因棹小舟至鍾山下。尋石洞。入可數十丈。仍由東大石下出。大石卽東坡所稱可坐百人者也。余曰。「石鍾山者。山中空形如鍾。東坡歎李渤之陋。不知坡亦陋也。」上鍾山之下。亦有深巖。

建德府城內本寓後。有高樓。可以眺望。因額以「北樓風韻」四字。以房主人姓謝也。

周子墓距九江府城十五里。在石塘鋪之東南五里。辰正起行。已正到。其地發脈於廬山之蓮花峯。東行至江濱。繞折迤邐。皆平岡。邊至西頭。入脈結穴。係鈴穴。兩穴本沙。環抱甚緊。坐北向南。近案爲一金星。遠朝卽蓮花峯。所謂「迴龍顧祖」也。溪水從右流出。微嫌右手外。沙太少耳。墓所咸豐五年羅羅山所修。墳頂結爲龜形。約高六尺。徑一丈四五尺。

岳武穆王母姚太夫人之墓。在九江南四十餘里。坐船行四十里到沙河鎮上岸。又陸行八里許至墓上。地名株墩。山水粗頑。非佳城也。

再入山謁岳武穆之配李夫人墓。墓去河鎮十一二里許。在株墩姚太夫人墓之西。名曰太陽山。坐北向南。墳下三丈許。有山巖叟墳。岳夫人墓。不知其初所。據明宏治九年童某修縣志。以爲葬在此。厥後嘉靖六年。何某修志。以爲不葬在此。係與姚太夫人合葬株墩也。嘉靖十年。陳氏墳遂葬於下方。至崇禎二年。岳陳二家搆訟。逮至本朝康熙雍正。訟百餘年。久不決。至乾隆五年。九江府知府施君廷翰判斷。定爲岳夫人實葬在此。陳氏墳因其太久。亦不復遷。二姓皆永禁葬墳。遂爲定案。詳巡道李君根雲批。亦以童志爲斷。今詳文並批。皆刻於東一碑石。西一碑。係乾隆十年縣令禁錫牧者。墓有古樹。皆乾隆中所禁。近年亦枯朽矣。

大抵吉地。乃造物所最闕惜。不容以絲毫詐力與於其間。世之因地脈而獲福蔭者。其先必係貧賤之家。無心得之。至富貴成名之後。有心謀地。則難於獲福矣。吾親友中如長塘葛氏。既富後而謀地。金蘭常氏。既貴後而謀地。邵陽魏默深。既成名後而謀地。將兩代改葬揚州。皆未見有福蔭。蓋皆不免以詐力與於其間。造物忌巧。有心謀之。則不應也。

日內紮營在黃梅城外約四里許。用羅盤審定縣城在午位。廬山亦在午位。去營約百四十里。排子山在坤位。四祖山雙峯尖在庚位。最爲峭聳。去營約四十里。多雲山在酉位。去營十餘里。小溪山在辛位。龍平山在乾位。最爲高峻。去營約五十里。祖山配亥位。去營二十六七里。東山在壬位。綽壁鎮在子癸位。獨山鎮在寅位。馬尾山在卯乙辰巽己位。東北一帶。自綽壁至馬尾山。出皆平衍。西北一帶。自四祖山至山。山皆高峻。惟南面無山。百餘里外。過大江。乃有廬山耳。

至錢家山龍泥潭等處。闔看地勢。在錢家山用羅盤視之。龍泥潭在子位。黃梅縣城之來脈也。縣城在午位。河水自西面蘄州界來。經錢家山及縣城之西。自內位流出。下入龍湖。一塔在丙位。所以鎮水口也。又一塔在巽位。所以培文峯也。季玉山在午丙位。卽現駐營之處。槎山在辰位。卽湘後三營之外山。河西諸低山在庚辛酉位。石家墳山在未位。蘄州黃梅諸大山之後。(以上己未)

至沙溪紮營。是日所行之處。皆兩山之中夾一溪。居民極少。竹木極多。

桃樹嶺上下約共五里。頗陡峻。高不如桐梁山。而窄斗過之。略似棧道也。

由建德至祁門。日行萬山之中。泉冽竹茂。與吾鄉風景相似。特大菱糞桶。高至五尺。人皆以梯登廁。上蓋瓦屋。街市道旁。處處有之。鱗次櫛比。殊可駭異。

箬坑四面皆山。中央有河。泉甘林茂。實山谷之佳境也。

歷口者。歷山之口也。祁門萬巖巖巖。歷山最爲一縣之主峯。(以上庚申)

自休甯回祁門。行三十里。至岸脚。因便遊齊雲山。肩輿行六里許。至「洞天福地」。中有石岸。相傳張邁過修鍊之所。（張邁過。年百八十歲。羽化登仙。）步行里許。至一天門。羅漢洞。二天門。三天門。及正殿等處。又步行二里許。至紫霄岸。齊雲山。卽白岳也。結構甚小。而羅漢洞實爲奇特。正殿有五峯。前有香爐峯。亦秀拔。天成名山。固不虛傳矣。（辛酉）

登焦山絕頂。一覽各寺。皆在山之南。同游者爲彭雪琴侍郎玉鑾。李小湖大理聯琇。黃昌岐軍門翼升。鄧守之布衣傳密。方元徵大令駿謨。陳小浦廣文方坦。皆隨余自金陵來者也。李兩亭都察宗綬。莫子儂大令友芝。張芭堂觀察富年。皆自揚州來者也。在山頂山北兩寺小憩良久。歸寺。觀雪琴守之作書數幅。

由焦山開船。至北固山。登山西望雄壯。佇立良久。旋入鎮江城。在知府周輯瑞署後。登城一望。與北固山相距兩箭許。守府城不可不兼守北固。城周約十七八里。旋出城八里。登山。已在南岸。不復在江心矣。眺望良久。旋渡江。至北岸八濠口。擬於此處開一新河。俾鹽船由瓜洲之小口子轉入新河。庶小船免行江路。而大船灣泊鎮江對岸。亦無風濤之險也。

與兩亭等步行查勘。中飯後坐轎由八濠口至瓜洲。大江沿途細看。旋開船赴揚州。

自揚州開船出江。與方元徵圍棋三局。至三汊河。觀行宮舊址。聖祖仁皇帝於康熙四十三年南巡過此。御製碑文。賜寺名曰高旻寺。其右有高宗五言律詩碑一道。此外一片瓦礫。蕩然無所有也。午正至瓜洲口。午後出江。登鐵平輪船。將長龍船拖帶於後。逆風逆水。又值退潮之際。輪舟亦不能速行。至二更始到草鞋夾外。又換小舟入夾。行十里許。至燕子磯灣泊。是日共行百九十里。在輪舟看鄧守之冊頁四本。

由天妃閣過五壩。在頭壩之上。入高良澗小河口。至吳城七堡。昔道光二十七年。黃河穿入洪澤湖之澗口。看舊黃河影。今將成平曠矣。

至十里灣登岸一看。岸卽洪澤湖東岸之大堤。南至蔣家堤。北至東精堤。凡石堤長一百三十里。本日所登者。蓋

南距蔣家堤七十里。北距東清堤五十里也。

洪澤湖昔年自東清堤起。卽爲太湖。至雙溝止。乃爲湖尾。凡渡湖三百二十里。近則自東清堤以上。皆濬成平陸。直至高良澗。乃爲太湖。自高良澗至老子山。山高六十里。湖水一望無際。自老子山以西。則湖面漸窄。自盱眙至雙溝尤窄。猶彭蠡湖至南康。以至湖口也。特彼之窄處在下流。此之窄處在上流。湖于雙溝上三十餘里。爲淨山口。卽梁武帝築堰處也。

泗州僧伽寺塔。唐時最爲宏盛。李太白及韓蘇皆有詩。韓卽送僧澄觀七古一章。皆在舊泗州。今之泗州。則虹縣治所改。非僧伽之寺矣。而頗有樹木。亦爲江淮間所僅見。

明皇陵周圍約一百里。中有曠野。其平如水。坐南向北。北面之東爲鳳陽府城。其西爲鳳陽縣城。羅圍之內。南北約三十里。東西約四十里。大致則渾圓。非橢圓也。圍內之水。由東北隅一圓山下出。山形如緯帽。高十餘丈。墳高約二丈許。登墳一望。四面之山十餘丈。廿餘丈者。皆若俯出其下。天光極爲圓聚。信異地也。(以上乙丑)

宣村之東六里。曰堯村。孟子之母宣獻端範夫人之墓在焉。因往展謁。孟子之父處國公同塚。墓在堯山之背。俗名馬鞍山。卽龜蒙堯繹之堯也。策馬登堯山頂一望。回至宣村。又行二十里。至曲阜縣。未刻謁至聖廟。衍聖公孔祥珂陪同行禮。旋至殿上及後殿。敬謹瞻仰。卽聖配并官夫人之寢殿也。又至東邊謁孔氏先世五王。各崇聖祠。閣歷代支派圖碑二座。閣孔壁。相傳卽魯恭王闡金絲之壁。今僅一尋常照壁耳。壁之西爲孔子古井。其南爲詩禮堂。在此小坐飲茶。茶罷。至大成門內。閣孔子手植之檜。環以石欄。高僅尺許。有似立石。色凝紅。有似肉芝。檜欄之北爲杏壇。有似樓觀。旋出大成門外。閣御碑亭十三座。其九爲國朝碑。其四爲唐宋金元碑。旋至西邊。謁啓聖祠。又至後殿。瞻聖母顏夫人寢殿。又闔金絲堂。觀各樂器。皆衍聖公陪同。歷各處。旋出廟至衍聖公府。

至顏子復聖廟瞻拜。行兩跪六叩禮。又至後殿。爲復聖夫人寢殿。至西邊。開祀國公顏路祠。其後殿爲端獻夫人祠。出外爲樂亭。亭前稍西有井。相傳卽陋巷井。其南有一檜。傳爲唐樹。兩廡配享。爲顏韻顏之推真御景御等八

人

出城北門。謁至聖林。約三里許。有萬古長春坊。稍北有紅牆夾甬道。道皆有古柏儀樹勻排。又北有樓觀。卽林牆門也。過下馬牌後。有洙水橋。橋北入大門。至享殿行禮。殿後甬道之右。爲子貢手植之樹。稍北爲乾隆駐蹕亭。康熙駐蹕亭。又北爲宋真宗駐蹕亭。又北卽聖人墓。墓之東爲伯魚墓。其南爲子思墓。其西南爲子貢墓。旋至周公廟。行三跪九叩禮。廟之規模甚小。周公廟在陝西。相傳此爲魯太廟遺址。兩廡配享魯三十三公也。旋行十里許。謁少昊陵。曲阜頗以此墓爲可疑。然墳塚壘石爲之。廣八丈九尺。高二丈。規模奇古。云是宋時所爲。則其已舊矣。又行二十里許。謁啓聖王林。行六叩禮。聖兄孟皮墓在其南。享殿坍塌。不蔽風雨矣。午初三刻回城。往返約六十里。作一聯寫贈衍聖公云。「學紹二南。羣倫宗主。道傳一貫。累世通家。」未正。至衍聖公府赴宴。茶罷。閱乾隆三十六年所頒周朝銅器十事。曰木鼎。曰亞尊。曰犧尊。曰伯彝。曰冊卣。曰蟠夔敦。曰寶簠。曰夔鳳豆。曰饗餼。曰四足鬲。古澤爛然。信法物也。又觀吳道子所畫至聖像。無題識。絹本有小印二方。一曰會稽太守章。一曰紹興。又觀趙子昂所畫至聖像。綾本。無題。無印。又有一冊。畫明君臣像。如太祖成祖世宗憲宗等君。徐達常遇春鄧愈湯和劉基宋濂方孝孺楊士奇于謙王鏊王守仁湛若水李東陽湯遜等臣。俱有畫像。而無題識。又有大軸。元世祖明太祖像二幅。又出示元明兩朝衍聖公。及孔氏違官所留遺之冠帶衣履。采色如新。亦生平所未見也。

濟寧州鐵塔寺。有僧王長生祿位。因與毛寄雲拈香拜謁。

閣視濟寧州城外土圩。從玉露菴登圩。城東北隅也。轉西正北常清門。正西青雲橋至西南隅。運河府河相鈔之處小坐。又由正南之興隆門東南隅之章獻柵。正東之楊家壩。歸玉露菴。午正回寓。凡三十四里。濟寧州三面皆水。運河自西北而來。繞至城南。從東南而去。下入南陽湖。凝山湖。以達於江南。府河自東北而來。繞城北城西二面。下入馬場湖。匯運湖而去。府河即泗水由兗州城而來。故曰府也。濟甯之土圩。南則穿入運河及月河之外。北則穿入府河之外。故遠闊彎曲。難設守。

太白酒樓。在濟甯南門城樓之傍。純皇帝曾經巡幸兩次。有御製詩二碑。一乾隆二十年。一係三十九年甲辰也。飯後至曾子讀書處。扁書「宗聖遺址」四字。廬已頽敗。中塑曾子子思孟子三像。

謁分水龍王廟。行六叩禮。廟對汶水。有大雄殿。有宋尙書禮祠。配享者。爲白老人。潘同知。此間運河兩邊。岸高如山。約十丈有奇。當日開河之士。覆於兩岸也。登廟後高坡一望。乃知南旺湖現在泗成平陸。車馬可行。向來特有一湖。此段全不設守。今乃知其疏矣。

沈家口一帶。河窄水住。舟屢擱淺。大雨如注。各勇下水拖舟。風大作寒。行路甚苦。午正始抵戴廟。風雨不止。遂不復行。

至泰安府。西正至岱廟頭門。凡五門。正中曰正陽門。左右曰掖門。又左曰仰高門。又右曰見大門。余入仰高門。院中左有宣和碑。右有祥符碑。二門曰仁安門。院中左右皆有乾隆御碑亭。餘碑甚多。正殿曰峻極殿。祀東嶽大帝。後殿曰寢宮。祀大帝與碧霞元君。正殿墁堦之下。東有古柏如龍。爪有藤蘿繞之。西有新柏如鳳翼。有倒挂嫩枝。蔥翠異常。又有一柏。正當甬道。名曰獨立大夫。稍南有一太湖石。甚奇。名曰扶桑石。其西院有環詠亭。自宋元以來。題詠各碑。環嵌壁間。李斯刻碑。亦自山頂移嵌於此。其內爲東嶽帝之便殿。陳列朝所頒法物珍器於此中。有乾隆間額鎮圭。長三尺許。厚二寸許。上青中白。下紺色。首爲涼玉。邸爲溫玉。環詠亭之南有唐槐。蒼古無匹。旋赴東院。有炳靈宮。宮前有漢柏六株。尤爲奇古。又登仰高門王陽門之樓。一望嶽色。曠時還寓。料理明日登岱各事。四月十六日。與幕客六人登岱。出泰安北門三里許。過岱宗坊。旋至玉皇閣小坐。有孫真人化身。據道士云。「孫某在此修煉。年九十四歲。康熙四十年化去。今手足皮骨尙在。如乾腊然。惟頭係土塑耳。」又至關帝廟小坐。有鹽當會館。旋過飛雲閣。有孔子登臨處坊。旋過萬仙樓下。未登樓。旋至妯姆閣小坐。水聲清激可聽。旋過水簾洞。在大路之西。圖中誤刻於東。旋閱石經峪。峪在大路。過溪之東。約步行小半里。其上爲摩天嶺。嶺上泉流澗中。巨石鋪於澗底。縱橫五畝許。刻金剛經其上。字大徑尺四寸許。中書三大字。曰「曝經石」。又有明汪玉者。著論談

文。其子汪坦刻之石上。側署二大字。曰「經正」。旁一巨石曰「試劍石」。旋邊大路。過一小橋。土人名曰「東西橋」。自此橋以下。路在溪之西。自此橋以上。路在溪之東矣。夾道翠柏成列。土人名曰「柏洞」。旋至壺天閣小坐。自城至此。凡十八里。又過迴馬嶺。至二虎廟。登岱程途。至此得半矣。路稍平夷。微有陟降。名曰「快活山」。過此爲雲母橋。有瀑布。名曰「御帳坪」。小坐。蓋途中最勝之處也。遙望東邊石壁摩崖。一碑曰「萬丈碑」。過朝陽洞。有元君殿。今頽毀矣。旋至五松樹小坐。有石坊曰「五大夫松」。秦時松久不可見。今亦有虬松數株。又過此爲對松山。溪之兩岸。古松森列。與東西橋之柏洞。皆岱嶽茂林也。自此以上爲慢十八盤。過昇仙坊爲緊十八盤。岱嶽中最爲險峻之處。至南天門小坐。旋折而東行里許。爲碧霞元君廟。又東北一百步許。爲東嶽大帝廟。余即在此停住。卯初自城起程。午初一刻到此。不覺登陟之艱。蓋號爲四十里。實不過三十二三里。小憩片時。旋至兩廟。各行三跪九叩禮。因捻匪未平。默爲祈禱。中飯後小睡片時。旋與幕友步行。登覽各處。先至岱頂。即所謂天柱峯也。中有玉皇殿。殿外有巨石跛陀。相傳爲山之顛頂。門外有無字碑。廣二尺許。厚一尺五六寸。高一丈二三尺。志稱爲漢時立石。頂之西南爲青帝宮。又西爲寢宮。內有元君臥像。門鎖未得啓視。其南爲北斗台。台上兩石幢。高二尺許。寢宮之西爲孔子殿。以上宮殿四處。及北斗台。皆已頽敗。旋至岱頂之東。有乾坤亭。因純皇帝書「乾坤普照」扁而名之也。又東爲日觀峯亭。亦有純皇帝詩碑。其後一碑。題孔子小天下處。此亭本可觀日出。今已頽毀。上無片瓦。不如玉皇殿一軒。看日出之便。又東南爲舍身巖。改名愛身巖。巖之側爲仙人橋。兩石壁之間。三石相銜。下臨深谷。有如飛橋。又東爲東神霄山。即日觀峯。迤東之聳起者。實一山耳。遙對西神霄山。即南天門。迤西之聳起者。傍夕歸。觀東嶽殿後。唐明皇摩巖紀泰山銘。其傍小泉曰「聖女池」。凡泰頂之可觀者。略盡於此。此外如丈人峯。不過三石略具人形。東天門西天門北天門。不過各立二石而已。大抵泰山自北而南。分兩大支。一小支。西大支。由西神霄峯而南。至臥馬峯。傲來峯一帶。東大支。由東神霄峯而南。至乾坤山。老人寨。二虎山。摩天嶺一帶。中一小支。自東支之二虎山分出。南至馬蹏峪。水簾洞。白楊洞一帶。東大支及中小支皆不甚長。惟西

支自微來峯以西。綿互三四十里。重巒巨幘。惜不及徧游也。水亦分兩支。發源於南天門。目下乾涸。至對松山始見流水。下經微來峯。出郡城之西門外。名曰黃西河。又名捺河。東支發源於二虎山。皆自二虎山以南大路。皆在此溪之沿。名曰中溪。亦曰環水。余粗識脈絡如此。餘不及詳。因昨夕陰雲凝雨。計五鼓。斷不能觀覽日出。遂高臥不起。而幕友黎純齋及薛叔芸王彝丞葉亭甥等四人。登玉皇殿東軒。五更嚴風凝雨過後。竟得一觀日出之勝。乃知天下事。未閱歷者。不可以臆測。稍艱難者。不可以中阻也。卯初二刻起行下山。中過水簾洞萬仙樓。均小停登眺。至山麓王母池小坐。辰正一刻。即入郡城。下山行走極速。蓋登岱者。別有一種山轆。長六尺許。兩楨弧而向上。如一弓小橋然。舁夫以皮韋承肩。上下石磴。轎皆橫行。舁夫面皆向前。以直行則皮韋正圍在項後。橫行則皮韋斜曳在肩側也。

此次登岱所小費者。在廟則殫鎮圭。爲李斯碑。爲漢柏唐槐。爲龍爪柏。爲扶桑石。在山則爲玉皇頂。無字碑。爲紀泰銘。爲南天門。爲御帳坪。外此雖有勝蹟。非所欽已。

由濟寧起程。至嘉祥縣。將謁曾子林廟。大雨之後。積潦盈途。行三十里。至新開河茶尖。沿途見運河堤牆。概行坍塌。憂慮之至。因思一律改爲板築。與程刺史繩武商議良久。又行十八里。至嘉祥縣。未正始到。住嘉祥書院。至宗聖廟叩謁。行三跪九叩禮。廟中規模偏小。朽敗已甚。左子思配享。右孟子配享。後爲啓聖廟。名養志樓。尤朽敗不能庇風雨。旋至宗子五經博士廣菴家一坐。其頭二門及大堂等。一概頽毀無存。其內室亦甚淺陋。即雍正間所賜「省身念祖」匾。亦無懸挂之處。僅度置於棹上。余前聞嘉祥聖裔式微。久思有以任卹之。本日捐祭產銀千兩。又贈廣菴銀四十兩。及見此景况。則又愾焉不安。怒焉不忍。而非人力所能遽振也。

由嘉祥至南武山。本不過四十餘里。因路上處處隔水。繞道行五十餘里。始至南武山。未刻到。已正在紙坊集打尖。即住宗聖廟之東省身堂。廟在南武山下。山高約五十丈。一片頑石。不生草木。廟外內柏數百株。大約二尺圍上下。殆嘉慶間所植。附近居民種五穀者少。皆藍及苳。曾氏合族人丁不過三百。貧苦特甚。文生曾毓鑑等來備

述簪狀。未正詞廟。先拜萊蕪侯廟。在正殿之西。後有寢殿。旋拜宗聖廟。廟修不知始於何時。初係宗聖在前殿。萊蕪侯在後寢。明正統間重修。始改爲宗聖在中。萊蕪在西。至萬曆間重修。有太僕少卿劉不息碑記。載會質粹之孫名承業者。承襲時與訟辜。碑立於萬曆七年。在廟庭之東南。至國朝雍正七年。請帑重修。規模始大。後有寢殿。前有御碑亭。刻純皇帝宗聖贊。兩廡祀弟子陽膚樂正子春。東西各五人。中有宗聖門。前有石坊三座。西刻謁林墓。在廟西南里許。北東西三面皆石山。墓在平地。今兩後墓道被掩。石馬翁仲皆在水中。僅墳未掩耳。亭堂及門。類敗異常。幾於片瓦無存。有碑曰。廓國公宗聖曾子之墓。緣宗聖公墓久已佚亡。不知所在。明成化初。山東守臣奏嘉祥縣南武山。有漁者陷入一穴中。得懸棺。有石鑿曾參之墓。宏治十八年。山東巡撫金洪奏請建享堂石坊。即今林也。余觀山石頑犢。地勢散漫。不似葬聖賢者。殊以爲疑。至章獻柵。看新築之牆。高六尺。基厚一尺六寸。頂厚一尺二寸。長五丈。余以河沿隄牆全塌。故欲改爲板築。令程刺史先築數丈爲式。觀者以爲築成後。半月不雨。可保三年也。

伸與之南岸數里。卽桃源縣。又十餘里。卽成子河。余本擬至成子河看視。捻匪竄清江之要隘。因隔水三道。陸路不能去。水路又不通舢板。遂不果去。殊以爲歎。旋又開船。行七十餘里。至雙輿關泊宿。距楊莊僅十二里耳。聞清水潭二閘決堤。高郵興化東臺鹽城俱被水淹。田舍漂沒。所憂者。又不僅在賊矣。

七月十五日。自五河開船。距臨淮僅十里小泊。忽於酉正二刻。大風暴至。雷雨交作。冰雹掠面。附近舢板。翻沈二隻。余船亦傾倒。危急之至。幸近岸側。各船人下水拖船上岸。大風將頭篷二篷繩索扯斷。有如刀截。颺去江中。而船乃定。戌初二刻。風稍息。乃慶更生。聞譚鰲舟覆溺死矣。舢板覆溺八隻。死者四人。各船上下三五里外者。風略小。幸得保全。余生平經江湖風波之險。道光十八年九月二十五日。在安陸河中。與郭筠仙凌狄洲同舟。狂風竟夜。咸豐四年三月初七日。帶水師在岳州南津港。大風猛起。湖中各船多覆。港中之水。被風捲去。各船皆擱於乾地。凡二日。風息水回。而船始活。不謂老年。又受此驚嚇也。夜遣人四處問壞船消息。

至雒河築登岸。一看新渦陽縣城基。卽彭恬勅定濶所相視之處也。隍已浚而城未修。又至雒河街上。西頭新築土圩。知縣卽在其中。(以上兩實)

去年六月二十九日。清水潭決口。距馬湖灣十里。程觀察國熙承修。此工於十月二十二日興工。十二月初九日合龍。凡修運河西隄四百餘丈。實做掃工二百九十丈。余坐轎至該處驗工。由西堤行走。東堤工程僅及三分之一。尙有深塘掃工未做。余始得見挂纜進占之法。至新河看瓜棧。及河堤東塢西塢。余三年二月至此。議挖新河。設立瓜棧。爲過壑之地。其時尙是荒江寂寞之濱。今則塵市樓閣。千牆林立矣。

已刻與幕友至元武湖看荷花。出太平門。同坐小船。每船約受三人。長約八九尺。窄行於荷花之中。自太平門外行三里許。登麟洲一望。旋復下船。麟洲之西北爲趾洲。爲老洲。其西南爲長洲。爲新洲。洲上尙有百餘家。亂後復還。不及一半矣。行五里。至神策門。登岸進城。凡行荷中八里許。天氣陰而微雨。既不濕衣。亦無烈日。賓主樂之。自神策門行至妙相菴。約十里許。午未置酒。申初散。

與吳竹如朱久香同看荷花。至長洲新洲登岸。在民家小坐。二洲中又有小湖。上有小山。旋回船。午正驕陽正熾。燥熱殊甚。卽在城樓中飯。久香學使卽席作七律一首。

中秋約幕府諸友在樓上置酒。月出已高。爲雲所掩。勢將雨而未成。涼風頗動。稍息炎蒸之氣。至後園一覽。自昨日起調湘勇隊。將後園瓦礫挑成二山。園係賊中僞忠王李秀成之府。圍牆極大。周圍約三里許。雖蓋知府。二府。三府衙門於中。而空地尙有三分之二。故欲挑起瓦礫。以栽竹而種菜也。

至清涼山看新修之翠凝亭。覽觀形勢。金陵城實太大。西北閒地荒田太多。若將城縮小。由雞鳴山起近鼓樓迤南。至小倉山順蛇山之脊。以至漢西門。當不滿十里。而神策金川儀鳳定淮清涼五門。均割截於城外。局勢當稍緊耳。以上丁卯

伯黃浦墩登岸一觀。小金山四面臨水。中一圓亭。約徑六丈。圍十七八丈許。樓上地下。周圍窗格。純皇帝題詩甚

多。旋至惠山觀昭忠祠。及第二泉。

將往遊太湖約丁兩生中丞李質堂軍門。及官紳等十餘人同遊。定以初七日。遊木瀆范墳等處。初八日遊東西洞庭。閱視應設水師之所。開船行二十五日。至木瀆。至許緣仲寓所葛園。一覽水石之勝。旋肩輿至靈巖山。登絕頂極覽。歸至端園中飯。飯後肩輿至天平山。步行登山。有下白雲。一線天。中白雲。上白雲四名。實則從山脚至山頂。尙不及二里。余陟其巔。同行丁中丞等五人。俱中道而止。下山後往謁范墳。西爲高義園。因范文正公之義田而立。純皇帝題匾及詩碑在焉。東爲范墳。文正公之高祖。唐麗水縣丞某某之墓在焉。墓在天平山之左脅。山質皆石無土。羣石矗立。土人名曰「萬笏朝天」。結穴之處有土。方數十丈。其後石山壁立。亦不似吾鄉堪輿家所稱「老山抽嫩枝。反落脈峯頂」云云者。不知何以貴盛久遠如此。旋肩輿行三里許。至無隱菴。蓋天平山爲最高之三峯。面向其東。貼近左脅。爲范氏先墓。又東曰牛頭山。中有御路。爲純皇帝幸范墳所由之道。又東迤邐而南。凡五峯。中一峯稍高者。朱家山。卽支硎山也。天平山之西。迤邐而南。凡四峯。其第三峯。曰馬鞍山。與東邊之朱家山相對。卽無隱菴之後山也。其第四峯較高。卽靈巖山也。東西兩嶂。儼立相對。中間大壑。相距二里許。西正三刻。回木瀆登舟。往返約三十二三里。舟行將赴胥口。乃彼處市鎮中間。橋密而岸窄。余舟太大。節節逼隘。至一橋下。兩岸夾立石壁。良久不得過來。余乃登岸至許緣仲家宿。而令各船次第倒行。退去三里之下。丁中丞及司道等來會。遊興焉之頓減。因改議明日不復遊洞庭東西山。但至胥口一覽而已。

與丁兩生李質堂同赴胥口。查閱太湖形勝。同登香山之背。在胥口之西。其後爲小團山。大團山。最高者曰窮隆山。胥口之東。曰清明山。亦曰胥山。其山脚拖入湖中者。曰菱湖。其拖而東北者。曰堯峯山。堯峯之尾曰七子山。其與胥口相對橫亘於此者。橫山。其內曰橫塘。此皆濱臨太湖之山也。其湖中之山。東洞庭距胥口約二十餘里。西洞庭距胥口約三十餘里。長沙山。約距十里許。此目中所見者。其極北之馬蹟山。極西之大雷小雷。皆不見也。太湖若立水師。宜分三營。以一營駐東洞庭。轄蘇州吳長江震四縣湖面。而西洞庭亦駐船數號。與浙會辦。以一

營駐馬蹟山。轄常州陽湖無錫宜興荆溪四縣湖面。以一營駐大雷山。轄湖州長興烏程兩縣湖面。闔畢。回至木瀆。中飯後開船自木瀆回蘇州。

至洋涇瀆。回拜法國領事白來尼。傾誠款接。雖其母其妻子之臥室。亦預爲騰出。引余與丁李兩君閣看。所居樓閣四層。一一登覽。玉宇瓊樓。鏤金錯彩。我中國帝王之居。殆不及也。(以上戊辰四月)

自前日在青它寺打尖。後卽見大道之西。有一大山。蓋蒙山也。前日昨日。皆見此山。并大路而北。本日自翼家城行十五里。至蒙陰縣大道。轉向西行。似卽蒙山北頭盡處矣。至整陽大道之西。有一石山。土人稱曰青雲山。卽整山也。

出新泰城北望。見一山。土人曰蓮花山。一曰新甯山。過半流店後。望見西北大山。卽徂徠山。將至羅家莊。則徂徠山將盡。泰山在目前矣。

至章夏打尖。大道循河而行。詢之士人。此河名葛乙河。其源自汶水分出。而雜以泰山各溪壑之泉。下游入大清河也。

將直隸地圖細閱。略考水道。約直隸大河。不由東西淀而入海者凡三。曰南運河。其源爲山西之清漳水。濁漳水。河南之衛河。山東分汶。北流之運河。逕流至天津入海。曰際河。其源出蒙古。過承德府。至永平府之際川入海。曰北運河。其源出於古北口。稱石口外。至密雲合流。又匯以昌平州之水。玉泉山之水。南壩子之水。至天津入海。由東西淀而入海者凡四。曰豬龍河。其北源出山西之代州。南源出平定州。至衡水縣分爲兩支。均經東淀而入海。曰西龍河。其源爲無極靈壽之滋河。阜平新樂之沙河。渾源靈邯之沱河。至祁州合而爲一。經西淀東淀而入海。曰白溝河。其源出於房山涑水。又匯揚州之易水。乃經西淀東淀而入海。曰桑乾河。其北源出於蒙古。經過宜化。其南源出於朔平大同。至保安州。合而爲一。至懷來縣入關。經東淀而入海。本年桑乾河決於蘆溝橋以下。至今未塞。故雄縣積水未消也。(以上戊辰十一月)

將看永定河工行十一里。至玉皇廟茶尖。旋行三里許。至灰壩看減河。減河原所以減洩正河之盛漲。近因正河之身高於減河之堤。遂至減河反奪正河之全溜。而正河乾枯。積沙日高。減河下遊亦礙塞矣。旋看南上汛第九號。該處爲前裴文達公擬開壩河之處。距灰壩僅八九里。灰壩減河修復。則此間不必再開矣。旋至南上汛第十五號。閘仙岱看決口。該處於戊辰七月潰決。至百五十餘丈之寬。已於去冬修築。現存口門七十餘丈。須於二月與工。三月底合龍。乃爲得時。旋回至南上汛署打尖。尖後行二十餘里。至龍王廟南下汛署內住宿。中間過小青河一道。深僅尺許。又於下游過河。卽永定河決口以下之流也。

至南下工十號。看去秋新堵閉之決口。蓋去年七月初七日。在該處決口。是日又在上游閘仙岱決口。此口無水。旋即修堵。余嫌其單薄。須加倍也。辰正至南二工十四號打尖。中飯後看金門閘。係乾隆三年建。亦壞水壩也。旋至南三工二十三號。看已廢之草壩。此處本不應有工。惟十一號兩邊坑塘甚深。余雖未下車。心憂其險。旋過乾河。至北岸三工。看已經堵閉之旱口。此處緊靠北隄。有一深溝。正河分溜竄入。溝不能容。以致潰決。頗難施工。旋至第十二十三號。此處河如「之」字。初向北。則十三號當其衝。折而向南。則南四汛當其衝。故兩岸皆險也。午刻在金門閘龍王廟拈香行禮。申正在十五號龍王廟拈香行禮。旋過乾河。至南四汛署住宿。此處至固安縣八里。至龍王廟將軍廟先後拈香。看南四工四號險工。卽昨所看之「之」字河也。旋至九號看隄。自九號至十二號。河身極窄。切逼南隄。河中隆起高土。如埂如山。高過南隄。寬則數十倍過之。若非剷挖河中大埂。南隄三四里。極可危也。旋至十七八號打茶尖。看大壩。此處於上年三月決口。四月堵塞。將合龍而不成。八月上流決口。此處河乾。乃築大壩。避坑塘之深。棄原隄不用。而於河中另築一隄。約五里許。開一引河。余嫌其淺窄也。自南四汛二十號起。至南五汛十三號。隄卑不過三四尺。寬不過三尺許。土牛高不過二尺許。真同兒戲。至十四號汛署打尖。飯後至南五工十七號看險工。至南六工十二號雙營住宿。

至南六工十七號。該處無工可查。但旗民貪佔遊河沃饒之地。紛紛至戶部呈報升科。據爲己業。亦一勘視。旋至

南七工四號。此處爲上年決口之處。內外坑塘甚深。河身中有一大洲隆起。其高過於南隄。土膠而堅。洲之南。隄之北。僅十餘丈。不足以容河身。又曲折迎溜頂衝。極可危也。再下二三里。看六七號新開引河。於河身堅土中。生開一河。底寬僅四丈五尺。面寬僅十二丈。深僅一丈四尺。斷不能容永定河之全溜。聞此下十六里。并無河影。純仗生開新河。十六里以下。雖有河影。而節節高仰。計永定一河。非處處開挖河身。別無良法。甚可憂也。

至新橋打尖。此橋本琉璃河水。今永定河於南上汛十五號決口。竄入琉璃河內時。有水泛溢民地。如新橋附近。則泛溢頗寬。適費觀察送到所勘新城雄縣文安等處河道圖說。閱看良久。大抵直隸水患有二。北則永定決口。竄入大沽河。而新城安州雄縣受其害。南則滹沱河改道。不入子牙河。而竄入魏水。而深州饒陽任邱文安等處受其害。又聞麥稼已壞。無可挽救。水旱并災。民困已極。焦灼之至。

至南七工四號。驗收引河工程。正月所看之坑塘已填。隆起之沙洲已裁去雞嘴。又在洲旁。挑一引河。使大溜不得直薄南隄。第一段引河。一百四十五丈。口寬十二丈。底寬八丈九尺。至四丈五尺不等。深一丈二三尺不等。凡行二十里許。至十五段工程。丈尺均與第二段相同。至龍王廟拈香行禮。又行一里許。看十五段之末一截。則口寬僅九丈。底寬僅四丈矣。至十六段。則口寬僅六丈。底寬僅三丈六尺矣。自此以下。余因病不能往。聞十九段口寬僅三丈。底寬僅二丈。不復成其爲引河矣。旋回小惠家莊公館。往返約五十里。

看南六工十三號。南五工十七號兩處工程。至南五工十四號汛。看打尖。旋看南四工十八號以下之引河。大約口寬八丈。底寬三丈二尺。深一丈五尺。如此者七里許。以下再開濬工七里。則更窄更深。以上至引河頭。則口寬底寬。各加二丈許。旋看十八號大壩。頗爲堅實。又看十二號工。切坎如上法。南岸做挑水壩二座。亦尙得力。又看九號工。靠河北坎。裁去雞嘴。開挖引河。申正二刻。至南四大公館住宿。

至新橋打尖。卽正月二十五日打尖之地也。飯後行五里許。至民間辦捐。決河亦於初七日合龍。約夫役二千人。費錢萬串內外。不發官帑。余因賞錢四百串。

由曹各莊起行。至北下四合龍處所。再一細看。旋過河由南岸行走。順引河而下。看中泓新挖之處。卽摺中所稱張家墳一帶中洪也。原河極爲彎曲。今皆挖爲直河。約二十里許。

至南七號看坑塘。卽前此之廢河。昨日所看新大壩之後身也。又行十餘里。至龍王廟拈香行禮。又行十餘里。至南七工十七號。新挖直河。亦截彎取直之工也。

順永定河而下。行十餘里。與大清河相匯。崇地山侍郎厚來舟次。與之久談。至船頭同看與北運河相匯。旋又與子牙河相匯。入天津之圩圍。又與客入艙一坐。旋至望海樓與南運河相匯。兩河同向北流。名曰海河。入海河四箭許登岸。(以上云云)

至車邏壩。余甫起。早飯後。登東岸。看車邏臣閘。劉受亭程敬之兩觀察隨同閱看。餘官伺候者頗多。閘畢後登舟。行六里至新壩。卽程敬之今年所修之工。長六十六丈。寬六丈。正月四日興工。七月二十五日告竣者也。樁之排於海漫石以下者。不可得見。其得見之樁三層。每層二排三排不等。釘法尙堅。海漫石亦堅實。兩頭壩牆亦穩。又看南關耳閘。至監工棚內一坐。茶畢。又至工廠內一坐。卽程敬之住廠也。

至馬棚灣登岸。看隄工。卽同治七年所修者。當時冒雨興工。碓築不固。今面上碎石已多坍卸。石下之土亦被水齧。卸入湖中矣。急須修補。而估計需五萬二千串之多。又難於籌款也。

十一月二十二日。移居新衙門。卽百餘年江督舊署。亂後洪逆據爲僞宮者也。本年重修。自三月興工。至是粗竣。西邊花園工尙未畢。雖未能別出邱壑。而已備極宏壯矣。早飯後移居至新署。儀門行禮。大堂行拜牌禮。旋至各處觀覽。

登福山。望內洋及對岸之狼山。山頂有碑臥地。因土人謬傳高爲殿山。其下小阜爲福山。特立碑以辨其失言。高者實福山也。

六月初八日。梅小巖孫琴西請遊後湖。辰正出署。至太平門城樓小坐。同遊者爲薛慰農。山長桂蕪亭觀察。旋出

城登舟。行七里許登岸。至老洲湖神廟一看。小坐半時許。午初二刻。返棹。清風徐來。一散炎融之氣。荷香撲鼻。不以盛暑爲苦。回至太平門。升輿進城。至妙相菴。未初二刻登席。酒半大雨。席接荷池。雨盛荷喧。景物清快。席散又在廟中遊覽。出廟陸行二里許。至通心橋登舟。行八九里許。至大中橋小泊。點燈。余船張燈八十三炷。同行之船各張五六十燈。及十餘燈不等。行至下游。遇商民燈船。約三四十號。燈最多者。與余船同。喜復略見太平景象矣。

（以上辛亥）

仿古字版

會文正公讀書錄

世界書局印行

曾文正公讀書錄目次

經

周易

一

周官

二

儀禮

八

禮記

二二

左傳

二二

國語

二六

穀梁傳

二六

爾雅

二六

詁訓雜記

三〇

史

史記

三三

漢書

四一

後漢書

七八

三國志

七九

通鑑

八一

文獻通考

八四

子

管子

八九

莊子

九一

淮南子

九二

集

楚辭

九四

陳思王集

九六

阮步兵集

九六

陶淵明集

一〇〇

謝康樂集

一〇四

鮑參軍集

一〇六

謝宣城集

一〇八

李太白集

一〇九

杜少陵集

一一九

陸宣公集

一二八

韓昌黎集

一二九

昌黎外集

一五二

會文正公集

柳河東集	一五二
白氏長慶集	一五三
李義山集	一五三
杜樊川集	一五七
嘉祐集	一五九
元豐類稿	一五九
東坡文集	一五九
東坡詩集	一六一
山谷詩集	一六三
劍南詩集	一七七

朱子文集	一七九
元遺山詩集	一八〇
陽明文集	一八一
望溪文集	一八二
孫文定集	一八二
文選	一八二
古文辭類纂	一八三
駢體文鈔	一八四
附廣韻	一八四

曾文正公讀書錄

經

周易

「晉」上九罔孚裕无咎。裕難矣。中庸「明善誠身」一節。其所謂「裕」者乎。

「家人」上九有孚威如。『有孚威如』即論語「望之儼然」意。要使房闔之際。僕婢之前。燕昵之友。常以此等氣象對之方好。

「象曰威如之吉反身之謂也」治家貴嚴。嚴父常多孝子。不嚴則子弟之習氣日就佚情。而流弊不可勝言矣。故易曰「威如吉」。欲嚴而有威。必本於莊敬。不苟言。不苟笑。故曰「威如之吉反身之謂也」。

「睽」凡睽起於相疑。相疑猶如自矜明察。我之於某君。其如上九之於六三乎。吳氏謂合睽之道。在於推誠守正。委曲含宏。而無私意猜疑之弊。戒之勉之。此我之要藥也。

「中孚」讀「中孚卦」。因思人必中虛。不著一物。而後能真實无妄。蓋實者不欺之謂也。人之所以欺人者。必心中別著一物。心中別有私見。不敢告人。而後造僞言以欺人。若心中了不著私物。又何必欺人哉。其所以自欺者。亦以心中別著私物也。所知在好德。而所私在好色。不能去好色之私。則不能不欺其好德之知矣。是故誠者不欺者也。不欺者。心無私著也。無私著者。至虛也。是故天下之至誠。天下之至虛者也。當讀書則讀書。心無著於見客也。當見客則見客。心無著於讀書也。一有著則私也。靈明無著。物來順應。未來不迎。當時不雜。既過不戀。是之謂虛而已矣。是之謂誠而已矣。以此讀「无妄」「中孚」「咸」三卦。蓋扞格者鮮矣。

「寂然不動」神明則如日之升。身體則如鼎之鎮。此二語。可守者也。惟心到靜極時。所謂未發之中。寂然

不動之體。畢竟未體驗出真境來。意者只是開藏之極。逗出一點生意來。如冬至一陽初動時乎。貞之固也。乃所以爲元也。蟄之坏也。乃所以爲啓也。穀之堅實也。乃所以爲始播之種子也。然則不可以爲種子者。不可謂之堅實之穀也。此中無滿腔生意。若萬物皆資始於我心者。不可謂之至靜之境也。然則靜極生陽。蓋一點生物之仁心者。仁心不息。其參天兩地之至誠乎。顏子三月不違。亦可謂洗心退藏。極靜中之真樂者矣。我輩求靜。欲異乎禪氏入定。冥然罔覺之旨。其必驗之此心。有所謂一陽初動。萬物資始者。庶可謂之靜極。可謂之未發之中。寂然不動之體也。不然。深閉固拒。心如死灰。自以爲靜。而生理或幾乎息矣。況乎其並不能靜也。有或擾之。不且憧憧往來乎。深觀道體。蓋陰先於陽信矣。然非實由體驗得來。終掠影之談也。姑記於此。以俟異日。

〔夫易聖人之所以極深而研幾也。〕研幾工夫。最要緊。顏子之有不善。未嘗不知。是研幾也。周子曰。『幾善惡。』中庸曰。『潛雖伏矣。亦孔之炤。』劉念臺曰。『卜動念以知幾。』皆謂此也。失此不察。則心放而難收矣。

周官

〔天官大宰。〕〔八月官計以弊邦治注弊斷也。〕小宰六計。弊羣吏之治。秋官大司寇。以邦成弊之。小司寇以輔衆志而弊謀。弊皆斷也。士師斷獄弊訟。弊與斷字平列。弊亦斷也。蔽亦有斷義。小爾雅蔽斷也。論語『一言以蔽之。』左傳『蔽罪邢侯。』

〔歲終則令百官府各正其治受其會。〕〔謂一歲之大計也。〕我大清五月各省進奏銷冊。卽歲會也。小宰令羣吏致事。注云。使齋歲盡文來至。

〔小宰。〕〔四曰。聽稱責以傳別。注。傳別謂爲大手。書於一札中字別之。〕如今之合同。中字裁分。各執其半。又如兩聯票矣。

〔七曰。聽賣買以質劑。謂兩書一札。同而別之。長曰質。短曰劑。〕此卽今之兩聯票也。一札而左右兩書。皆同其

中別之處。作數大字。卽今之編號也。

〔宰夫〕〔敍羣吏之治。以待賓客之令。諸臣之復。萬民之逆。注。鄭司農云。〕復。請也。元謂復之言報也。反也。反報於王。謂於朝廷奏事。〕按。復。白事也。孟子有復於王者曰。〔曲禮。願有復也。〕大司寇。凡俾獨老幼之欲有復於王者。皆謂白也。先鄭於司土注云。〔逆。獨受下奏。〕於宰夫注云。〔逆。謂迎受王命者。〕後鄭於宰夫注云。〔逆。謂上書自下而上曰逆。〕國藩謂。復。逆一也。復者有白於上也。逆者有干請於上也。亦卽白也。宰夫曰。〔諸臣之復。萬民之逆。〕司土曰。〔諸侯之復。逆。〕小臣曰。〔三公孤卿之復。逆。〕御僕曰。〔羣吏之逆。〕庶民之復。皆以違下情也。

〔凡失財用物辟名者。以官刑詔冢宰而誅之。注。辟名。詐爲書以空作見文書。與實不相應也。〕按。名。猶俗曰認。呂后本紀。〔詐取它人子名之。〕此亦無其物而僞作文書以詐名之也。

〔賜之殮。牽。與其陳數。注。殮。牽。客始至所送禮。〕殮。客至而送酒席也。牽。則兼送豬羊矣。左傳。〔餼。牽。竭矣。〕亦有餼有牽也。

〔內。蹇。〕〔鳥。鱗。色。而。沙。鳴。注。沙。漸也。〕按。病人失音者。可謂之沙聲。

〔鼈人。〕〔凡。狸。物。注。自。狸。藏。伏。於。泥。中。者。〕按。自。遁。藏。伏。之。物。皆。可。名。曰。狸。物。猶。曰。鼠。伏。曰。狙。伺。

〔地。官。大。司。徒。〕〔其。民。專。而。長。注。專。團也。〕按。專。徒。丸。反。讀。如。團。謂。面。團。也。

〔鄉。大。夫。〕〔五。物。詢。衆。庶。注。鄭。司。農。云。〕詢。謀。也。問。於。衆。庶。甯。復。有。賢。能。者。〕按。上。文。已。獻。賢。能。之。書。於。王。矣。鄉。大。夫。退。而。再。詢。此。外。更。有。賢。能。者。乎。使。衆。庶。更。舉。之。

〔廛人。〕〔總布。注。杜。子。春。云。〕總。當。爲。僂。〕謂。無。肆。立。持。者。之。稅。也。〕按。今。世。手。持。貨。物。者。若。抽。取。釐。稅。則。苛。矣。

〔遂。大。夫。〕〔屬。其。地。治。者。注。屬。猶。聚。也。〕史。記。屈。原。屬。草。囊。未。定。左。傳。屬。宗。祧。之。時。猶。值。也。

〔春官大宗伯〕〔以騶辜祭四方百物。注。騶牲。胸也。騶而磔之。謂磔壤及蜡祭。〕按。騶。猶破也。折也。謂破牲之胸也。所以禳災。詩。『不折不副。』副。卽騶也。

〔肆師〕〔及果築竊。注。築。煮。築。香草。煮以爲鬯。〕按。竊。煮。同字。香草。鬱金也。築。如今俗云搗碎。搗而煮之。以和于秬鬯之酒也。

〔鬯人〕〔禁門用瓢齋。注。齋。讀爲齊。取甘瓠割去柢。以齊爲尊。〕按。割去柢。割去瓠中之瓠子也。卽莊子之『剖瓠以爲尊。』

〔天府〕〔上春。覺寶鎮及寶器。注。覺。謂殺牲以血血之。〕此與『解衣衣我。推食食我』者。『春風。風人。夏兩。』字法相同。

〔典瑞〕〔四圭有邸。以祀天。旅上帝。兩圭有邸。以祀地。旅四望。〕四圭有邸者。於一玉之中。中央琢爲璧。四面各琢一圭。圭之末四出。其本爲璧。邸者本也。柢也。兩圭有邸者。中央琢爲璧。兩頭各琢一圭。邸如足之相對也。

〔司服〕〔廢衣服。注。廢衣服。所藏於椁中。疏。此則明器之衣服。亦沽而小者也。〕罽師。廢晉鼓。籥師。廢羽籥。典庸器。廢筍。虞。司干。廢干盾。眡瞭。廢錘。磬。司兵。廢五兵。皆明器也。

〔典同〕〔高聲硯。注。高。鐘形上大也。高。則形上藏。袞。然旋如裏。〕按。硯。聲在鐘裏。旋轉不散也。硯。卽聲之硯。硯然。

〔眡稜〕〔三日鑄。注。謂日旁氣刺目也。〕按。氣如錐之直刺也。漢書。翟方進傳。『故使掾平鑄令。』亦謂刺取其劣跡也。

〔大祝〕〔三日禴。注。禴。祭名。告有災變也。〕天官。女祝有禴。亦除災害也。春官。大宗伯有禴禮。謂同盟有喪失財物者。謀補救之也。

〔辨六號。注。號。謂尊其名。更爲美稱焉。〕古者。凡物皆立之名。辨號。卽正名也。

〔來警令皋舞。注。皋。讀爲卒。嗥呼之。〕來嗥者。皆謂呼之入。〔按。來讀爲徠。東坡志林謂。〕若優施來之。趙高來之。』是也。左傳。『魯人之皋。』皋。緩也。禮運。『皋某復。』皋。引長聲也。

〔巾車。〕〔錫樊纓。注。錫。馬面當。盧刻金爲之。所謂鏤錫也。鄭司農云。纓謂當胸。元謂纓謂馬鞅。〕按。錫。卽莊子之所謂月題。當胸在腹之上。卽鉤膺之處也。鞅。則夾馬頸者。

〔疏。路大也。王之所在。故以大爲名。諸侯亦然。左氏義。以爲行於道路。故以路名之。若然。門寢之等。豈亦行於路乎。〕按。王之五路。玉路。金路。象路。木路。革路。皆大之也。載匿之車。曰匿路。亦大之也。又鼓人有路。鼓亦與路車路馬同一尊大之稱。

〔凡良車散車。不在等者。其用無常。注。不在等者。謂若今輜車後戶之屬。作之有功有沽。〕按。凡曰功曰攻曰工曰堅曰綴曰精曰良。皆器之善也。凡曰苦曰瀛曰楛曰沽曰鹽曰粗曰羸曰疏曰散。皆器之惡也。

〔司常。〕〔通帛爲楹。注。通帛謂大赤。從周正色。無飾雜帛者。〕按。九旗之帛。皆用絳。特中畫他色耳。此不畫者卽曰通帛。

〔夏官序官。〕〔環人。注。環。猶卻也。以勇力卻敵。〕按。環人。掌察軍隱。巡邦國。搏諜賊。蓋周環巡視之意。殆如今之巡捕矣。

〔羊人。〕〔賓客供其饘。〕此法字義與法駕法從法宮相同。

〔田僕。〕〔設驅逆之車。注。逆。衙還之。使不出圍。〕衙還。謂遮列之職。方氏。〔其畜宜六擾。〕此卽左傳擾龍之擾。〔擯人。〕〔使萬民和說而正王面。〕此面字與書之。『面稽天。』若。『謀面用丕訓德。』均不甚可解。

〔秋官大司寇。〕〔使州里任之。則宥而赦之。〕此卽今令人取保。乃釋放犯人也。

〔凡庶民之獄訟。以邦成弊。注。邦成。若今決事比也。〕今六部皆查成案。刑部又有比案。卽邦成也。士師掌士之八成。疏。八者皆是斷事成品式。

〔朝士〕〔凡盜賊軍鄉邑及家人殺之無罪。注。若今時無故入人室宅。〕按。家人。卽庶人也。魯世家爲家人。晉世家遷爲家人。皆庶人也。

〔野廬氏〕〔比國郊及野之道路。注。比猶校也。〕按。比。猶言展省也。今世曰稽查也。

〔司儀〕〔不朝不夕。注。不正東鄉。不正西鄉。〕爾雅。山東曰朝陽。山西曰夕陽。卽以朝夕爲山名也。春秋朝日。秋夕夕月。卽以朝夕爲祭名也。

〔冬官考工記〕〔車軫四尺。注。軾。輿後橫木。〕按。軾。當在車箱之底。輿底之軾。駕於軸上。其間惟有兩伏兔貼之耳。

〔軾崇三尺有三寸。注。鄭司農云。軾。車也。元謂軾。轂末也。〕按。軾者。轂上衆鑿所以內輻者。

〔加軾與鞵焉。注。鞵。謂伏兔。〕按。鞵。卽輶也。漢時謂之伏兔。唐時謂之車屐。在軸之上。軾之下。兩頭各施一鞵。中空見光也。

〔既其綆欲其蚤之正也。注。蚤。當爲爪。謂輻入牙中者也。〕按。輻之一頭。壯者入轂。謂之軾。一頭纖者入牙。謂之蚤。

〔信其程圖。以爲部廣。部廣六寸〕戴氏曰。〔蓋斗謂之部。部廣六寸。厚一寸。中隆一分。〕國藩按。二十八弓共一部。猶三十輻共一轂。以其隲之半爲之較崇。阮氏曰。〔輻。立木達輒。謂之較。〕國藩按。阮君之意。以輻爲車旁之板。凡板必有柱以維之。柱在三尺三寸以下則直立。其三尺三寸以上則勢向外曲。如角之張。則較也。同車一耳也。在板謂之輒。在柱則謂之較。兩角外張。有開張寬廣之象。故詩笑武公曰。〔寬兮綽兮。猗重較兮。〕

〔參分軾圖去一以爲鞵圖〕戴氏曰。〔式下人所對謂之鞵。〕阮氏曰。〔鞵。橫輪也。〕國藩按。輪者。車箱兩旁午交之木。直者曰軾。橫者曰鞵。輪如窗之格。鞵如窗之紙。無輪則鞵板無所附矣。

〔任正者。十分其輻之長。以其一爲之圖。〕戴氏說。任正。卽輻也。阮氏說。在後軾之下。別有一任正木。爲輻所植。

根之處。其說甚長。國藩謂。任正。卽後軫。其圓較左右三軫更大耳。

〔十分其軫之長。以其一爲之。當兔之圖。〕戴氏曰。『兩轆之閒。謂之當兔。』阮氏曰。『當伏兔者。謂之當兔。』國藩按。當兔。亦一橫木也。後軫前軫。與中閒之當兔。凡三橫木。如三字。軫午貫其中。則如王字。當兔之下。正與軸相值。二轆上銜。當兔木下銜軸之處。如履形。可銜可脫。銜當兔之處。則連爲一體。一成而永不脫耳。

〔五分其頸圖去一以爲踵圖。〕戴氏曰。『軫後謂之踵。』阮氏曰。『軫後役任正謂之踵。』國藩按。阮氏以任正爲後軫下之一大木。軾所植根之處。是踵者。猶云柄也。猶輻之有筭也。

〔冶氏。〕〔胡三之。注。胡其子。〕戴氏曰。『戈戟下垂者曰胡。』國藩按。戈之胡。如半月。戟之胡。如腰鐐。其曲刃處。名胡者。象領下垂胡之形也。名子者。象子字偏曲之形也。

〔冕氏。〕〔銑閒謂之于。注。于。鍾脣之上祛也。疏。以于爲祛者。鍾脣厚然褰祛然。〕按。褰祛。猶云振祛也。鍾脣微揚若祛之微舉也。

〔鉦上謂之舞。〕今俗稱舞曰鍾頂。

〔鍾帶謂之篆。注。帶所以介其名也。〕按。鍾之周圍橫痕一道。謂之帶。于之一道曰鼓。鼓之一道曰鉦。鉦之一道曰舞帶。形如鑲入然。故曰篆也。

〔于上之攄。謂之隧。注。攄所擊之處。攄弊也。隧在鼓中窻而生光。有似夫隧。〕按。今鍾上受杵之處。往往窻深如圓月形。卽隧也。

〔玉人。〕〔終葵首。注。終葵椎也。〕按。瑳玉以椎爲首。長六寸。當是圖首。自六寸以下則方。

〔裸圭尺有二寸。有瓚以祀廟。注。瓚如盤。其柄用圭。有流前注。〕瓚。以圭爲柄曰圭瓚。以璋爲柄曰璋瓚。前有黃金勺。勺端有鼻。鼻下有流。所以注酒。故詩曰。『黃流在中。』

〔矢人。〕〔鏃矢參分。殺矢參分。一在前。二在後。兵矢田矢五分。二在前。三在後。蕘矢七分。三在前。四在後。〕一

在前者。前有鐵重。與二在後者。亭平也。五分而二在前。則鐵稍輕矣。七分而三在前。則鐵更輕矣。

〔刃長寸圍寸〕矢之匕中博。自博處至鋒。謂之刃。長一寸。全匕則長二寸。矢匕中有脊微高。圍寸。並脊計之。博則不滿寸矣。

〔梓人〕〔顧脰。注。顧長脰貌。故書顧。或作恆。鄭司農云。恆讀爲鬻。頭無髮之髡。〕按。莊子而視全人其脰。肩與顧同音通用。

〔匠人〕〔四阿重屋。注。四阿。若今四注。屋四面皆有霽也。〕按。四面垂霽曰阿。吾鄉謂之天井。因而一面垂霽亦曰阿。

〔九夫爲井。井闢廣四尺。深四尺。謂之溝。方十里爲成。成闢廣八尺。深八尺。謂之洫。方百里爲同。同闢廣二尋。深二仞。謂之澮。〕按。一夫受田百畝。兩夫之閒。必有一溝。方里而井。方十里爲成。兩井之閒。必有一洫。一成。則九洫矣。方百里爲同。兩成之閒。必有一同。一曰則九澮矣。又按。遂人百夫有洫。千夫有澮。匠人則十井。九十九夫。卽有洫界之。千井。九千夫。乃有澮界之。大同小異。

〔弓人〕〔凡昵之類。不能方。注。昵。或作檝。或爲剝。黏也。〕按。剝。正字。昵。暱借字。

〔冰析澇。〕按。澇。漆紋也。有似水波鱗鱗之紋。

〔夫筋之所由檐。注。檐。絕起也。〕按。檐。與『輪雖敝不葺』之葺同義。

〔今夫芟解中有變焉。故校。〕芟解。謂隈與蕭相接之處。弓幹之端。析爲兩歧。而以蕭刺入。幹勢向內。蕭勢向外。形制有變。故抗弦有力。是以校也。

〔下柎之弓。末應將與。〕下柎。謂柎不高而力弱也。與謂把處有搖撼之患。

〔士冠禮〕〔拍上韞。注。韞。蔽筴之器也。今時藏弓矢者。謂之韞丸也。〕按。韞以韋爲之。下韞自下韞而上。上韞自上韞而下。

〔有篚實勺。罈角。柄。注。柄狀如匕。以角爲之者。欲滑也。〕按。柄與匕。其狀皆如今之羹匙。但少半及公食大夫之柄。用以扱半與豕於餽。以木爲之。其柄宜長。故舊禮圖云。『柄長尺。橫博三寸。曲柄長六寸。』櫛。卽葉也。士冠禮之柄。用以扱醴於爵中。以角爲之。其柄宜短。想葉博不過一寸許。曲柄不過三寸耳。禮圖無士冠禮之柄。無可考證。以意擬之耳。

〔三醴有乾肉折俎〕乾肉之醴。三醴。皆用脯醢。惟未醴有乾肉折俎特殺之醴。始醴亦薦脯醢。再醴加兩豆兩籩。三醴加俎。鄭注。二醴時徹去始醴之脯醢。張爾岐云。三醴不徹再醴之豆籩。國藩以爲未醴既不徹豆籩。則再醴亦不宜徹脯醢。

〔爵弁纁履黑。絢纁純純博寸。疏云。爵弁。尊其屨。飾以纁。次者。案冬官畫纁之事云。青與白相次。赤與黑相次。元與黃相次。纁以爲衣。青與赤謂之文。赤與白謂之章。白與黑謂之黼。黑與青謂之黻。纁以爲裳。是對方爲纁次。比方爲纁次。〕按。東青與西白對。北黑與南赤對。天元與地黃對。三者纁以爲衣。故曰對方爲纁次也。東青與南赤相比近。南赤與西白相比近。西白與北黑相比近。北黑與東青相比近。四者纁以爲裳。故曰比方爲纁次也。

〔士昏禮〕〔姆加景。注。景之制。蓋如期衣。加之以爲行道禦塵。令衣鮮明也。景亦明也。〕按。吾鄉嫁女。在與著布青衣如上。或亦景之遺意歟。隋書禮儀志作加幪。

〔皆祭舉食舉也。注。舉。卽脊與肺也。〕按。凡祭禮。有祭肺。有舉肺脊。祭肺專祭而不食。祭時亦不舉。舉肺脊則祭時舉之。既祭又食之。故名此肺此脊曰舉祭。舉者。祭此肺脊也。食舉者。食此肺脊也。

〔執皮攝之內文。注。攝。猶辟也。〕張爾岐曰。執皮之法。襲積衣。使文在內。國藩按。攝。斂也。辟與襲通。謂褶疊而斂之。使文在內耳。

〔士相見禮〕〔凡言非對也。注。凡言。謂己爲君言事也。〕按。凡言。該下與君與大人。與老者。與幼者。與衆。與居官者六等。不必專指爲君言事。

〔鄉飲酒禮〕〔賓坐奠爵與辭〕疏云。賓西階前東面坐。奠爵與辭降。此賓辭降之位也。上節云。主人坐奠爵於階前辭。此主人辭降之位也。均云「階前」者。主人與東階相直。賓與西階相直耳。賓則去階稍遠。將近碑前。非降階卽辭也。張氏惠言之圖云。『如此北面。』按北面二字。指主人也。若循上文西北面獻賓。東西酢主人之例。則此當云「北面酬賓」。』

〔每一人獻。則薦諸其席。〕按。張爾岐云。席次賓介。西介字衍文也。三賓席次。賓之西介。席則在南耳。與三賓席不相次。

〔執觴與〕按。執觴者之導飲。與主人之導飲略同。但彼則主人。阼階上奠觴。此則執觴者。西階上奠觴。彼則賓於西階上答拜。此則賓於席末答拜。彼則賓降辭洗。此則不辭洗。彼則賓奠觴於薦東。此則賓奠觴於薦西。茲數節爲異耳。

〔立飲〕卽導飲也。

〔司正退立于序端東面〕按。觀經文「受酬者降席」句。似司正於贊堂上三賓受酬之時。則在西階北面之位。其於贊堂下衆賓受酬之時。則在序端東面之位。如疏之說。則賓首一人受介酬者。司正則於西階位贊之。其餘則皆於序端位贊之矣。疑疏與經注微有不合。

〔皆進薦西奠之賓辭坐取觴以興。介則薦南奠之。介坐受以興退。皆拜送降賓。介奠于其所。〕按。二人舉觴。與上節一人舉觴悉同。皆拜送者。二人皆於西階上拜送也。奠於其所者。賓仍奠於薦。西介仍奠於薦南也。

〔介俎脊脅肫肺皆離〕朱子曰。介俎。卽本有肫字。然釋文無音。疏又云。有肫。而介不用。明無此字也。石經亦誤。

〔注。後脛骨二。膊胫也。〕按。後脛骨亦三。髀膊胫也。髀近竅賤。不登於俎。故僅云二骨。
〔樂正與立者。皆薦以齒。〕按。樂正與立者之位。皆有脯醢。故曰薦於其位。

〔凡舉爵三作而不徒爵。注。謂獻賓獻大夫獻工。皆有薦。〕按。三作注說未安。卽盛氏郝氏方氏之說。亦均未確。惟儀禮正義揚大培之說差爲近之。其言曰。『記言舉爵。爲經一人舉。解言也。』云凡者。兼二人舉。解言也。經文一人舉。解於賓。云實解於西階上坐奠爵。遂拜執爵與。是一作也。又云坐祭遂飲執解與。是二作也。又云坐奠解。遂拜執解與。是三作也。不徒爵者。謂其必實解也。二人舉解之禮亦同。

〔鄉射禮。〕〔乏參侯道。注。容謂之乏。所以爲獲者禦矢也。侯道五十步。此乏去侯北十丈。西三丈。〕爾雅。『容謂之防。』郭注。『形如今頭小曲屏風。唱射所以自防隱。』荀子正論篇云。『居則設張容。負屨而坐。』楊倞注。『容。如小曲屏風。施此於戶牖。負之而坐。』國藩按。射者去侯三十丈。設乏之北十丈。西三丈。去射者約二十丈之狀。類曲屏。唱獲立於其中。名曰容者。可以容身也。名曰防者。可以防矢也。名曰乏者。矢力至此已匱乏。不至傷人也。若如荀子之言。則燕居亦有容。不獨射時然矣。

〔賓進東北面辭洗。注。必進者方辭洗。宜違位也。言東北面。則位南於洗矣。〕張爾岐曰。『鄉飲酒此處注異。彼於東字句。此於進字句。』國藩按。鄭注雖有一於東字句。一於進字句之別。經文實無分別。

〔主人卒洗。〕鄉飲於卒洗之上。有曰主人坐取爵沃洗者西北面。此亦當有沃洗者。

〔賓席之前。〕按此句當如鄉飲作賓之席。前石經亦誤。注進於賓也。當從宋本作進酒於賓也。此錢氏儀吉所校定者。

〔賓反奠於其所。〕鄉飲。鄭注云。所薦西也。

〔大夫若有邊者。則入門左。〕張爾岐曰。『言若有者。或有或無不定也。』按。鄉飲酒。於篇末略言邊者之禮。此經乃著其詳。正所謂如介禮者也。國藩按。如介禮者拜至也。辭洗而不拜洗也。主人於西階之右拜送爵也。不啻

肺不啐酒不告旨也。授主人爵於兩楹閒也。主人實爵自酢也。再拜崇酒也。餘少異。鄉飲酒記云。邊者席於賓東。賓亦在尊東也。

〔卻手自弓下取一个〕按。對下覆手言之。則卻手者仰手也。

〔與進者相左〕進者次耦也。次耦退時。三耦方進。亦與相左。

〔俎與薦皆三祭〕張爾岐曰。『脯之半脰。俎之離肺。皆三也。』國藩按。將以脰肺祭神。因名脰肺曰祭。

〔左个之西北三步。東面設薦俎。獲者薦右。東面立飲。〕按。張惠言儀禮圖獲者之薦俎。凡設六處。初設於侯之正北。次執而設於右个。次執而設於左个。次執而設於中。次立飲時。設於左个之西北三步。次復位後。辟設於乏南後。五處皆與經合。初設一處。不知確否。經與注皆不甚明。大射儀曰。卒錯獲者。適右个。是薦俎先已錯矣。或即張圖之所本與。

〔卒北面搢三挾一个。注。亦於三耦爲之位。〕按。注兩曰三耦。爲所爲者。搢三挾一之事也。賓主人爲此事。亦於此位。大夫爲此事。亦於此位。

〔注自若留下〕自若者。猶云如故也。霍光傳曰。『霍山自若領尙書。』

〔賓禪以之主人。主人之禪長受。〕按之。往也。以之主人。猶云送往主人所也。大夫之禪。送往衆賓長所也。

〔其中蛇交章當。注。直心背之衣曰當。以丹帶爲之。〕張爾岐曰。『章當者。以韋束幅之中央。如人心背之衣。』國藩按。瓦當及玉卮無當。皆謂兩頭爲當。此謂心背爲當。猶曰前面後面耳。

〔燕禮〕〔若臚禪也。則降。更禪。洗。言更禪。脚尊也。〕張爾岐曰。『臚禪。本非臣所可襲。以君命故得。一用。至酌他人。則必更矣。注釋更字義。亦未可信。』國藩按。上文云公有命。則不易不洗。此不定之辭也。若公無命。則易

禪洗矣。前果易禪乎。則今賓酬大夫。不再更禪。前果用臚禪乎。則今賓酬大夫當更禪。實散注。非張說正之是也。〔秦南陔白華華黍〕按。注自今亡。以下至此其信也。與鄉飲酒禮之注同。後文注闕代也。至其義未闕一節。周

南召南國風篇也。至筮聞之篇未聞一筮。與鄉飲酒禮之注同。特數字小異耳。

〔君曰以我安〕張爾岐云。『當爲我安坐以留之。』國藩按。張說辭意微有不合。安卽留也。非安坐之外別有所爲留也。直云以我意留之耳。

〔司正命執爵者。爵辯卒受者。與以酬士。〕按。命之之辭。止爵辯卒受者與以酬士九字。執爵者三字。非命辭也。上文云。唯公所賜。統堂上之。孤卿大夫言之。孤卿大夫坐行。皆有執爵者以代酌酒送罇。至士相旅酌。則執爵者不代送罇矣。故特以詔告執爵者。執散爵者。酌以之。公命所賜。所賜者與。受爵降席下奠爵再拜稽首。按前三次辯酬卿大夫。皆用二人所賡之罇。皆公與。至西階親賜受君酬者。皆降拜。酬人者皆拜送。此禮之最隆者也。第四次賜卿大夫而徧及於士。用賓所賡之罇。亦公與。至西階親賜受君酬者。亦降拜。但酬人者不拜授。而由他人代酌以授。受酬者亦不拜受。是禮漸殺而歡漸洽矣。此爲第五次賜卿大夫而徧及於士。不用賡而用散。君不親賜而僅命執爵者賜之。受賜者不降階拜。而僅降席拜。是禮尤殺。而歡尤洽矣。

〔小臣以巾授矢稍屬。〕按。稍屬者。矢不竟授之君手。稍與相近耳。

〔大射儀。〕〔臚尊兩甌在南。〕燕禮云。公尊瓦大兩。又云在尊南。此云臚尊兩甌在南。詞異而實同。甌卽瓦大也。

〔尊士旅食于西鑄之南。〕燕禮云。『尊士旅食於門。西亦西鑄之南也。』

〔公命長。注。命之使遷於長幼之中也。卿則尊。士則卑。〕言大夫則無尊卑之殊。但有長幼之分。故於大夫中遷之。

〔長致者。〕燕禮長致。致者。有兩致字。此少一致字。誤也。

〔大師及少師上工皆降立於鼓北。羣工陪于後。注。鼓北。西縣之北也。考工記曰。鼓人爲皋陶。長六尺有六寸。〕張爾岐曰。『注鼓北西縣之北也。句可疑。』國藩按。注引考工記曰。『皋陶長六尺有六寸。』西縣之鐘磬鑄鑿

等皆不如鼓之長。鼓之面在前。其北與太師少師上工立處相齊。鼓之尾在後。其北與鼗鐘鐃相齊。鼓之中一段。其北卽羣工也。張惠言氏之圖與注相合。張爾岐氏之疑。乃未明鼓長六尺有六寸一句耳。

〔小臣師以中內拂矢而授矢于公稍屬。注。稍屬不搢矢。〕按稍屬者。不遠近君之手。俟君自接取也。

〔司官尊侯於服。不之東北。〕卽篇首所云。『大侯之乏東北。』

〔公樂作而後就物稍屬。〕稍屬者。公射之儀。與樂之音稍相連屬。而不盡能應節也。與上文小臣授矢稍屬不同。

〔司射命釋獲者。退中與算而俟。〕獲者退。薦俎而釋。獲者未追。鄭注補之。鄉射則皆鄭注所補。

〔司馬正升自西階。燕禮無馬字。燕禮膳宰徹公俎。此用庶子正司正。命執爵者。〕爵辨卒受者。與以酬士。〕

〔聘禮。〕聘幣制玄纁束。注純四咫。制丈八尺。〕咫長八寸。四咫則幅廣三尺二寸。太廣非其度。疏引鄭答趙商云。四當爲三。三咫則幅廣二尺四寸。

〔從其幣出請受。〕請受二字。疑義文也。

〔士介入門右。奠幣再拜稽首。注。終不敢以臣禮見。〕賓與上介。以臣禮。覲時皆入門右。以客禮。覲時皆入門左。士介則兩次皆入門右。似以入右爲敬謹。入左爲抗禮。亦猶奠幣爲敬謹。受幣爲抗禮也。此注云終不敢以客禮見得之上。注云私事自闕右。似失之矣。後注賓面卿節云。入門右爲若降等。然引曲禮客若降等。則就主人之階。最合經旨矣。

〔米百筥。筥半斛。〕按。經云。筥半斛。而記云。四秉曰筥。則六十四斛矣。蓋筥之大小不同。隨時命名耳。

〔賓降階。西再拜稽首。拜餼亦如之。注。賓殊拜之。〕張爾岐云。『殊拜者。分別兩次拜之。成拜訖。又降拜也。』國藩按。張云成拜訖。又降拜。似失經之序。當云降拜訖。又成拜也。

〔大夫擗入。注入者省內事也。既而俟於宇也。〕按。注俟於宇。恐當作俟於宇門。屋宇即廟門之內。醫也。
〔大夫還璋如初入賓。裼迎大夫。賄用束紡。禮玉束帛。乘皮。皆如還玉禮。〕按。注賄用紡。禮用玉與帛與皮。此一
事也。還璋又一事也。二事皆如還玉之儀。不得分賄紡與禮玉爲二事。還璋亦如還玉禮。賄紡禮玉亦如初入。互
相備也。

〔若賓死未將命。則既斂于棺。造于朝。介將命。若介死。歸復命。唯上介造于朝。〕上介死則將命時不以柩造聘
國之朝。士介死。則覆命時。不以柩造本國之朝。

〔弊之所及皆勞。〕幣之所及。即賓請有事之所及也。當是時。尙未用幣請。有事既及之。則幣將及之矣。知賓之
幣將及於我。則我宜先勞之矣。

〔又拜送。〕記之首節云。『明日君館之。』鄭注以爲特聘宜加禮一節。宜在其下。國藩按。首節記卒聘報書之
速。謂報書在前一日。館賓尙在後一日也。首節以記卒聘爲主。此節以記館賓時釋詞爲主。不可相蒙。

〔公食大夫禮。〕〔寡君從子。〕按。從猶及也。與也。聘禮亦曰。『寡君從子。』左傳曰。『吾從子如驂之斬。』
〔士羞庶羞。皆有大蓋。執豆如宰。〕張爾岐云。『蓋。執豆兼蓋而執之也。』國藩按。蓋字別爲一句。謂皆有大皆
有蓋也。張氏解屬下句讀。則不辭矣。

〔一以授賓。賓受兼壹祭之。注。一一受之。而兼一祭之。〕張爾岐云。『一以授賓者。品授之也。兼一祭之者。總祭
也。』國藩按。一與壹同。一以受賓。謂總合授之也。上文贊者坐而辯取庶羞。辯取之後又與矣。十六羞之大。必有
一器盛之。乃能執之以與賓之所受。總受一器也。非分受十六大也。故一字當與壹同義。若一一授之。則以字爲
不辭也。張氏解上節壹以授賓爲總合授賓。而解此節爲品授之。是但知上注猶稍也之誤。而不知此注一一受
之亦誤也。

〔喪服。〕〔衰三升。注。布八十縷爲升。升字當爲登。登成也。〕按。升登成三字。古人多互用。樂記。『則亂升。』論

語『新穀既升。』及『衰縷之升。』升皆訓成也。曲禮『年穀不登。』詩『登是南邦。』春秋傳『不登叛人之黨。』登訓成也。

〔菲屨菅菲也。疏云。周公時謂之屨。夏時謂之菲。〕按。菲字疑與屨字通。左傳『共其資糧屨屨。』杜注。屨草屨。

〔喪服。〕〔庶子不爲長子。三年不繼祖也。注。庶子者。爲父後者之弟也。小記曰。不繼祖與禰。〕按。禰卽庶子。庶子之長子。可以繼禰。但不得繼祖。以其父固庶子耳。

〔爲所後者之祖父母妻。妻之父母昆弟。昆弟之子若子。〕張爾岐云。『所後者之妻。卽其母所後者之妻之父母昆弟。昆弟之子卽其外祖父母及舅與內兄弟。皆如親子。爲之著服也。』國藩按。所後者之昆弟。卽其世父叔父也。所後者之昆弟之子。卽其從父昆弟也。張氏謂卽舅與內兄弟。恐非經意。顧氏炎武盛氏世佐已詳辨之。

〔公卿大夫室老士貴臣。其餘皆衆臣也。〕方觀承氏以經所云公之士及大夫之衆臣。皆非貴臣也。故降其服。傳所云公之卿及大夫之室老士皆貴臣也。故不降其服。其說亦近。

〔齊衰大功。冠其受也。緦麻以功。冠其衰也。〕按。齊衰之受服衰七升。初喪之冠亦七升。大功之受服衰十升。初喪之冠亦十升。故云衰其受也。小功之衰十升。冠亦如之。緦麻之衰十五升。抽其半七升半。冠亦如之。故云冠其衰也。餘皆可以類推。疏稱引稍多。僅引一條。似更簡明。又按。郝氏敬謂緦麻以小功之冠爲衰。小功以大功之冠爲衰。盛氏世佐謂小功冠衰之升數有別。二說皆與疏異。與經文亦似不合。俟考。

〔同居則服齊衰期。異居則服齊衰三月也。必嘗同居。然後爲異居。未嘗同居。則不異居。〕按。子必隨母適人而後名曰同居。卽上齊衰杖期章內所謂繼母嫁從也。異居者。若范文正公初隨母嫁朱氏。後復歸於范氏。嘗文正在朱家時。謂之同居。及還范家之後。謂之異居。若其初本未嘗從母適朱氏。則並不得以異居名之。是無服矣。傳意蓋在三者。皆具經意。別尊重同居。經傳似微有區別。至傳言爲築宮廟。亦與貧窶之孤子。情事不合。顧亭林氏

已譏之矣。

「大夫之子。爲世父母。叔父母子。昆弟。昆弟之子。姑姊妹女子子無主者。爲大夫命婦者。唯子不報。注。君命其夫。則后夫人亦命其妻矣。此所爲者皆六命夫六命婦。」按。注六命夫者。世父也。叔父也。子也。昆也。弟也。昆弟之子也。六命婦者。世母也。叔母也。姑也。姊也。妹也。女子子也。

「諸侯之大夫。以時接見於天子。」盛世佐曰。「旣爲大夫。雖未嘗聘問於王朝。而其可以接見之禮自在。疏云。不聘即不服非。」國藩按。張氏以傳注爲諸侯使大夫來見天子。適有天子之喪。故其服如此。似與傳注之意不合。傳注云。以時者。猶云大夫有時接見天子爾。盛說是也。

「大夫。公之昆弟。大夫之子。爲其昆弟。庶子姑姊妹女子子之長殤。」古者五十而後篤無。大夫而殤。死者亦無。旣爲大夫。而有兄若姊之殤者。敖氏繼公盛氏世佐皆以此爲疑。疏謂或有盛德。少年卽爲大夫。欽定義疏。謂亦有公族高勳。世爲大夫者。適子年雖未冠。已爲大夫者。理或然與。

「從母丈夫婦人報。」按。此丈夫婦人四字。從鄭氏說。則似旣服母之姊妹。又並服母之姊妹之子。從馬氏說。則似從母報服於姊妹之子。男女並報以小功。二說皆於先王制服之條理不合。從敖氏繼公說。則丈夫婦人。卽爲從母服者也。又於經文之例不合。至通典引晉袁準之論。謂從母者。母之姊妹。從母而嫁爲己庶母者也。則又與從父從祖之名不合。此條殊多可疑。姑闕之。

「總者十五升。抽其半。」姜氏兆錫曰。「十五升。抽其半者。謂十有四升有半。而總計一千一百有六十也。」盛氏世佐秦氏蕙田皆從姜說。足正相沿之誤。

「貴臣貴妾。」鄭注賈疏及雷次宗廟。炎武專指大夫言之。馬融陳銓盛世佐通指大夫以上至天子諸侯言之。敖繼公張爾岐秦蕙田及欽定義疏。皆專指士言之。詳考禮意。自以指士者爲正。下文乳母。敖母。亦以爲蒙士士爲二字言之。

〔從祖昆弟之子〕與其父同曾祖。則子稱吾爲族父母矣。故注曰。『族父母爲之服。』

〔小功以下爲兄弟〕此句愚意兼上三節。及下『君之所爲兄弟』『夫之所爲兄弟』二節言之。則『妻降一等』之語。尙可強通。

〔夫之所爲兄弟服。妻降一等。〕妻於夫之兄弟無服。此所謂兄弟者。疏謂是夫之從母。敖氏謂是夫之祖父母。欽定義疏謂是夫之從祖。祖父母。夫之從父姊妹。皆不可信也。

〔凡衰外削幅裳。內削幅。注。削猶殺也。〕按。此削字之義。如考工記『鞞爾而下迤也』之鞞。

〔衣帶下尺。注。衣帶下尺者。要也。廣尺足以掩裳上際也。〕張爾岐曰。『用布高一尺。上綴衣身。纓要前後。據疏衣帶。言其物。下尺者。向下量之一尺。言其度也。』國藩按。下尺。注指廣言。張氏指長言。張氏是也。

〔冒緇質長與手齊。經殺掩足。〕按。王夫之喪大記章句云。『冒殺之制。皆如囊。縫合一頭。與一旁。其一旁則綴帶以維結之。所謂綴旁也。』張爾岐謂綴質與殺相接之處。是質則綴下。殺則綴上。不得名曰綴旁矣。恐當從王說。

〔既井椁。〕按。椁。大不以全者。昇送宅兆。先在殯門外構成。一試觀之。然後析爲散木。昇送宅兆。待窆後。再於壙中構成全椁也。椁成有似井形。試構之。故曰井椁。吾鄉聚木板四方。裏空架之。亦曰一井。

〔作龜與。注。炮也。周禮卜人揚火以作龜。致其墨。〕按。古人名步馬曰作馬。易雜卦爲作足也。作龜之意。略同。〔既夕。〕〔遷于祖用軸。注。軸狀如轉轆。刻兩頭爲軹。軹狀如長牀。穿椁前後。著金而關軸焉。大夫諸侯以上。有四周。謂之輻。天子畫之以龍。〕按。淮南子說林訓注。楚人謂戶限曰輻。此注云如轉轆者。當謂如戶樞之轉也。軹者。軸頭之畫。內於椁上之穿者。士之軹牀。亦應有四周。但大夫諸侯以上。則椁彌厚彌大。天子則尤大。故畫龍耳。

〔轂披。注。披駱柳棺上。〕張爾岐云。『注文駱字當是絡字。』國藩按。左傳『僖十五年。駱秦伯。』注。駱止也。『

轂披。注。披駱柳棺上。』張爾岐云。『注文駱字當是絡字。』國藩按。左傳『僖十五年。駱秦伯。』注。駱止也。『

宣二年。狂狡輅鄭人。亦訓止也。輅。有繫止之義。不必作絡。

〔夷狄執軸。饌于西階東。注。夷狄饌於祖席。執軸饌於殯宮。其二階者。於彌亦供執軸焉。〕國藩謂雖有二席執軸。似不必兩具。

〔士虞禮〕。〔苴荊茅長五寸束之。注。苴猶藉也。〕張爾岐曰。〔苴荊茅者。藉祭之荆茅也。〕國藩按。下文〔洗茅設於席上。取黍稷祭於苴。〕是此苴實爲虛祭棲神之物矣。

〔尸取奠〕。張爾岐曰。〔尸取奠。取祝所反。奠於鉶南之罍也。〕國藩按。罍久奠於鉶南。因名此罍曰奠。下文祭曰奠。祭此罍也。特牲饋食禮曰。嗣舉罍。舉此奠也。

〔祝薦席。徹入於房。祝自執其俎出。〕按。祝有薦。有席。有俎。薦席則徹入於房。俎則自執以出。〔升左肩。臠肫。膈脊。脅。離肺。〕正字通。今謂自肩至肘曰臠。自肘至腕曰臂。國藩按。肩臂臠前在前足。肫膈在後足。脊在中體之岡。脅在中體之牆。膈在胡。此十者皆取諸左。肺則取諸腹內。

〔祝反入門左。〕此下尙須入徹陰厭。重設西北隅之陽厭。事畢。祝自執其俎以出。乃復庭中北面之位。記不詳者。經文已言之也。

〔在西塾。〕以上記錢尸之饌。尸出以下。則記卒哭禮畢。行錢尸之禮也。

〔死三日而殯。注。異人之閒。其義或殊。〕按。異人之閒四字。不辭。疑當作異同之閒。

〔俎入。注。入。設俎載者。〕按。鄭注入。設俎載者。言入而設俎於室之人。即在庭載牲體於俎之人。謂執事也。

〔食舉。主人羞肝俎於臚北。至反黍稷於其所。〕按。食舉之舉。讀如〔五旬而舉之〕之舉。牲體有骨者。肉離骨曰舉。肺以提心曰舉。脊以離骨曰舉。佐食之舉。幹舉。骼舉。肩。皆從俎中分出少許。以授尸。將盛於俎以歸尸也。尸自舉之。肺脊。雖主人立進肝俎。尸不遽入於肝俎而暨入於菹豆者。謙也。至九飯畢。佐食。乃取肺脊。加於肝俎。併以歸尸焉。

〔椹禁〕按。椹禁上有四周無足者爲椹。方木槩。當與吾鄉茶槩相似。有足者。則當與俎相似矣。論形制。則椹無足。禁有足。論等秩。則大夫用椹。士用禁。其常也。然至鄉飲鄉射。則雖大夫去足者亦得名禁。至此饋食禮。則雖士之有足者。亦得名椹。

〔少牢饋食禮〕〔放於西方〕放。猶檀弓「吾將安放」之放。

〔載右胖。髀不升。肩臂臠膊胙。正脊一。脰脊一。橫脊一。短脊一。正脊一。代脊一。皆二骨。以並腸三胃三長。皆及俎。拒舉肺一。長終肺祭肺三。皆切肩臂臠膊胙在兩端。脊脊肺肩在上。〕凡牲體有豚解有體解。豚解者。解爲七體。一脊。兩脅。兩肱。兩股也。脅者肋骨。亦謂之肱。肱者前脛骨。謂之肩。股者後脛骨。謂之髀。脅肱股三者。各分左右兩胖。故爲六體。合脊則七體矣。此豚解也。體解者。卽七體而折解之。爲二十一體。折脊骨爲三。前爲正脊。中爲脰脊。後爲橫脊。折脅骨爲三。前爲代脊。中爲長脊。亦名正脊。後爲短脊。折肱骨爲三。上爲肩。中爲臂。下爲臠。投股骨爲三。上爲髀。中爲臠。下爲胙。脅與肱股三者。各分左右兩胖。共得十八體。合脊之三體。則二十一體矣。兩髀以近數之。故賤之。不升於俎。故凡十九體。而牲體之數備矣。此外正脊之前。當頸處。謂之脰。亦謂之脰。後足之末。近臠者。謂之髀。皆不在正體之數。此秦氏蕙田之說。而國藩微有刪改。

〔主婦被錫衣後袂〕欽定義疏云。「錫衣。當是緣衣。」緣字一譌。而爲錫。再譌而爲錫。又云。士妻助祭於公。則服緣衣。自祭於家。則服綉衣。大夫妻助祭於公。則服展衣。自祭於家。則服緣衣。秦氏蕙田云。「漢樂府云。曳阿錫。注云。細布。言布滑易如錫也。以細布爲衣。而侈其袂。卽緣衣也。」國藩按。據此二說。則錫衣乃身服之衣。非首服之次也。服緣衣者。首卽服次。不必更言首服矣。

〔食畢三飯〕此下當有「尸實舉於菹豆」六字。經不言者。略之也。特性禮「佐食舉幹」之上。當有「尸實舉於菹豆」六字。經不言者。蓋敘於舉獸幹魚一之下也。

〔有司徹〕〔次室筭宰燂如尸禮。侑降筵自北方。〕如尸禮。亦當橫一燂於俎上。以進。禮橫執俎以降也。

〔次賓羞七涪如尸禮〕如尸禮亦當醯執七俎以升。縮七於俎上以降。

〔司空取爵於篚以授婦贊者於房東一節〕主婦獻爵猶初獻之主人獻爵也。設兩銅糝修猶初獻之薦豆籩也。此外如羞七涪羞肉涪羞醢皆與初獻相同。其不同者不授几不載俎設俎耳。

〔受爵酌獻侑一節〕於獻爵羞糝修之外有羞豕豮羞豕醢二節。較之主婦之獻尸則已爲少殺。蓋無羞七涪及兩銅也。然較之主人之獻侑則尙爲少隆。蓋彼於正俎之外僅羞羊醢無七涪並無肉涪也。

〔次賓羞羊醢如主人之禮〕尸酢主婦較之酢主人時少羞七涪羞肉涪二節。

〔宰夫洗罍以升一節〕此節六『爵』字皆宰夫新洗之罍非上文之酢爵也。

〔皆若是以辯〕謂衆兄弟皆由洗東升阼階上拜受爵坐祭立飲也。

〔尸作三獻之爵一節〕上文賓三獻之禮未畢即暫停而別行主人酬尸及均神惠之禮。至是乃補三獻之禮。又上文初獻載尸正俎時已歷說十一俎未遽載也。至尸酢主婦時八俎載畢尙有三魚俎未載至此載之。

〔司士羞一涪魚〕侑及主人之涪魚有一字尸無一字。上文已著五魚也。

〔主人以酬侑於西楹西〕尸酬主人在東楹東主人酬侑侑酬長賓長賓酬衆賓衆賓酬兄弟兄弟酬私人皆在西楹西。

〔兄弟之後生者舉觶於其長〕注古文觶皆爲爵。延景中詔校書定作觶。延景漢諸帝年號無此稱。釋文改作延烹。張爾岐從之。盛世佐以爲當作『烹平』。

〔亦遂之於下〕『遂之於下』者嘗亦遂及主人侑賓兄弟私人。不著主人侑似與經『如初』二字不合。

〔佐食受牢舉如饋〕少牢十一飯之末上佐食受尸牢肺正脊加於胾也。

〔主婦反取籩於房中執棗糝棗在稷南糝在棗南婦贊者執栗脯主婦不興受設之栗在糝東脯在棗東〕饋尸者薦豆則菲菹醢醢昌本糝糝加籩則醢黃白黑比較殺故注云下饋尸。

〔于尸祝主人主婦〕儻尸則羞於尸侑。主人主婦不儻。則羞於尸祝主人主婦。

禮記

〔檀弓〕〔予疇昔之夜〕鄭注。『疇。發聲也。昔。猶前也。』史記『疇人子弟分散。』樂彥注。云『疇昔。知星人也。』國藩謹按。二者解疇昔。皆誤也。書『疇咨若時登庸。』注。疇。誰也。謂於衆人之中。不知當屬何人。乃疇字引申之義也。史記於疇若於工。作誰能馴於工。疇若予上下草木鳥獸。作誰能馴予上下草木鳥獸。謂衆人之中。何人能若予工。何人能馴草木鳥獸也。疇昔猶云誰昔。謂不知曩者何時也。詩『知而不知。誰昔然矣。』爾雅釋訓。『誰昔昔也。』皆不記何時之義也。

左傳

〔隱五年〕〔宋人使來告命〕九年。宋不告命。告命。猶今言告急也。奔命。似亦有危急而奔救也。成七年一歲七奔命。

〔叔父有憾於寡人〕舊事有不能釋然者謂之憾。非怨也。李廣傳『將軍自念有憾者乎。』亦非悔也。

〔隱六年〕〔從自及也。杜注。從隨也。〕從。猶將也。行也。

〔隱十一年〕〔傳於許〕謂兵薄於城下也。宣十二年。遂傳於蕭。襄六年。傳於堞。襄九年。聞師將傳。襄三十五年。傳諸其軍。義皆同。又凡物附著者謂之傳。如『毛將安傳。』及『傳藥於脂。』『傳毒於矢。』之類。

〔桓三年〕〔公子則下卿送之〕公所生女。亦稱公子。昭三年。以其子更公女而嫁公子。其公子即公女也。謂以己女更公女嫁晉。乃以公子別嫁於人。昭二十七年。子重之子曰重。重亦魯公子。懿之女也。

〔桓十二年〕〔覆諸山下〕覆。謂設伏兵。隱十年。爲三覆以待之。鄭之戰。師七覆於敖前。三年。使東鄙覆諸郟。

〔莊八年〕「公問不至。杜注。問命也。」問。卽音問也。三國志有定問外問。王基傳有凶問。

〔莊三十二年〕「見孟任從之闕。注。闕不從公也。」今律曰。調姦不從。又按史記西南夷傳。謂道不通曰闕。

〔僖七年〕「若總其罪人以臨之。注。總領也。」此總字。猶今用率字持字。

〔僖十五年〕「晉於是乎作爰田。注。分公田應入租稅。改換與衆。」此爰字有換字之義。三國志陸瑋傳。少爰居會稽。

〔僖十九年〕「欲以屬東夷。」此屬字。有聯屬懷來之意。下文「以屬諸侯。」哀十三年「屬徒五千。」哀十

四年「屬徒攻闕與大門。」哀二十七年「屬孤子三日朝。」皆同。

〔僖二十二年〕「鼓儻可也。」此儻字。有孱弱不整之意。

〔文二年〕「廢大關。」家語作「置大關。」按。莊子廢一於堂。廢一於庭。亦以廢爲置。

〔文四年〕「曹伯如晉會正。注。會受貢賦之政也。」後文「諸侯朝正於王。」注。朝而受政教也。又書無逸「

惟正之共。」正亦與政通。

〔文六年〕「陳之藝極。注。藝。準也。傳曰。『貢之無藝。』」藝。謂貢事皆有定則也。昭十三年「藝貢事。」昭十

六年「而共無藝。」義同。

〔宣二年〕「三進及溜而後視之。注。前進而及於屋溜也。」溜。卽中霤。

〔宣四年〕「沃朝及鼓跗。注。沃過也。朝車轅。跗所以架鼓。」沃朝。猶黃草之貫穿過也。周禮有足鼓。足亦跗也。

〔宣十二年〕「略基趾。注。略度也。」昭二十五年。楚子爲舟師以略吳疆。

〔成二年〕「匱盟也。」猶云「力竭而請盟」也。

〔成九年〕「使稅之。注。稅解也。」稅。駕之稅。亦解也。

〔成十三年〕「略其武夫。注。略取也。」按。今刑律有「略賣。」亦強取之也。襄四年「季孫曰略。」注。不以直

取焉略。

〔成十六年〕〔使行人執榼承飲造於子重。注。承貯也。〕今通用盛字。襄二十五年。〔承飲而進獻。〕昭十三年。〔子產爭承。〕注。承貢賦之次。

〔成十八年〕〔今將崇諸侯之奸而披其地。注。披分也。〕昭五年。〔又披其邑。〕注。披折也。史記。〔披其枝者傷其心。〕

〔襄九年〕〔使華閱討右官。注。討治也。〕誅責曰討。修治亦曰討。

〔襄十三年〕〔小人農力以事其上。〕此農字。猶厚也。呂刑農殖嘉穀。亦厚也。

〔襄十四年〕〔今官之師旅。〕此師旅猶曰徒衆。非軍旅也。襄二十五年。百官之政長師旅。

〔襄十七年〕〔遂幽其妻曰。畀余而大璧。〕殺吳乃華臣所使。幽妻索璧。則六賊所自爲也。故曰遂。

〔襄二十二年〕〔寡君悉其土實。〕二十八年。〔則以其內實遷於盧蒲摯氏。〕三十一年。〔則君之府實也。〕義皆同。二十五年。〔豈爲其口實。〕注。口實祿養也。

〔襄二十三年〕〔貳廣上之登御邢公。注。貳廣。公副車也。〕宣十二年。〔楚子爲乘廣。廣隊不能進。〕襄二十四年。〔使御廣車而行。〕注。皆云兵車也。廣爲兵車。故貳廣爲副車。

〔襄二十五年〕〔並衍沃。〕釋文下平曰衍。有流曰沃。國藩按。取其田而并之也。

〔襄二十五年〕〔朱也當御。〕當御。猶今言值班。

〔天下誰畜之。注。畜容也。〕史記。〔太后兒子蓄之。弟蓄灌夫。〕

〔襄二十七年〕〔崔成崔疆殺東郭偃棠无咎於崔氏之朝。〕春秋時。大夫有私朝。襄二十八年。〔慶氏國靈朝焉。〕三十年。〔伯有氏朝至未已。〕

〔僕質於野。〕僕質。猶今俗言蒲趁也。

〔襄二十九年〕「處而不底」底，歸也。猶沈滯拘泥也。昭元年「勿使有所墜開激底，以露其體。」

〔昭元年〕「弗去懼選」注：選，數也。「數，責也。詩不可選也。」

〔邑姜方震太叔。注：懷胎爲震。〕生民詩「載震載夙。」昭三十二年「始震而下。」爾雅釋詁：振，動也。注：振，猶震也。

〔昭三年〕「辱收寡人」按：收，恤也。存也。撫而有之也。史記多用收字。

〔昭七年〕「若屬有疆場之言」按：屬，謂值其時也。昭十六年「屬有讒人，交鬪其間。」史記屈賈傳「屬草稿未定。」

〔昭十二年〕「惟蔡於感」按：此感字，與憾字同。謂惟於蔡不能釋然也。

〔朝有著位。注：著，定朝內列位常處。謂之表著。〕昭十二年「則固有著矣。」注：著，位次也。十六年已有著位。

〔昭十八年〕「弗夏及也」猶今諺云「不得好好看見。」

〔昭二十五年〕「生宋元夫人。注：宋元夫人，平子之外姊。」外姊，猶今俗云表姊也。成十一年，有外弟外妹，謂同母異父者也。漢高祖有外婦，謂私通者也。

〔昭伯問家故焉。盡對。注：故事也。〕按：文王世子有國故，儒林傳有掌故。

〔昭二十六年〕「將亢子」下文曰「母及亢諸。」又曰「何敢亢之。」此亢字，與禦字同，與抗字相近。

〔昭二十九年〕「官宿其業」注：宿，猶安也。「宿，猶久也。」

〔定八年〕「桓子咋謂林楚曰」注：咋，暫也。「咋，猶乍也。」

〔定十二年〕「與其素厲，甯爲無勇」注：素，空也。厲，猛也。「謂無實而空猛也。猶無功而爵曰素封，無能而祿曰素餐。此素字與乾字白字同意。」

〔哀元年〕「如子西之素」此素字，猶云計畫素定也。宣十一年「不愆於素。」

〔哀九年〕〔吳子使來傲師〕此傲字。猶禮經「戒寘」之戒。
〔哀十七年〕〔太子又使椽之〕此椽字。猶今京師諺語軋也。譖訴也。詩「天天是椽。昏椽靡共。」亦有傾軋之意。

國語

〔魯語上〕〔越哉。臧孫之爲政也。〕章注。越迂也。言其迂闊不知政要也。〔按。越過也。言臧孫祀爰居過乎禮法之外也。〕

〔吳語〕〔天王豈辱裁之。〕章注。豈能辱意裁制之。〔按。豈字語意猶云儻也。漢書丙吉傳「豈宜尊顯。」亦猶儻也。〕

數梁傳

〔文十八年〕〔姪娣者。不孤子之意也。一人有子。三人緩帶。〕疏云。有子則喜樂之情均。貴賤之意等。緩帶優游之意也。〔按。國君取女九人。欲以廣嗣也。故夫子之於姪娣媵妾。皆誼屬一體。一人有子。三人緩帶云者。言衆人皆歡暢而優游。不獨生子者一人私喜也。宣公但知奉其所生之母敬瀛。而不知奉夫人姜氏。使姜氏大歸。則與三人緩帶之義相悖。故春秋譏之。緩帶二字。猶云開襟歡暢云爾。陶淵明雜詩云。『緩帶盡歡娛。』正得其解。三國志諸葛亮傳云。『遂解帶寫誠。深相結納。』示開襟歡暢之意。推此以觀。凡言襟抱歡暢。皆可稱曰「緩帶。」而方望溪氏文集有曰。『夫人急緩帶之思。』若以緩帶專爲夫人望妾媵生子之稱。如隱語然。亦爲誤也。方氏於修詞號爲潔淨。而此等猶爲未諦。斯亦好藻飾者之過也。

爾雅

〔釋詁〕「堅固也」下又云「堅厚也」。國藩按。學者堅持安重之意。堅持卽固也。安重卽厚也。莊子徐無鬼

「擊好惡」。謂堅持其好惡。使不妄發也。說文引詩曰。『赤馬擊。』擊謂安重也。

〔屈聚也〕。注引詩云。『屈此羣醜。』釋文引韓詩云。『屈牧也。收斂。得此聚衆。』國藩按。法言『漢絀羣才。羣

才絀羣力。』絀字亦與此屈字同義。謂收聚人之才力。而爲我用也。

〔痛病也〕。〔邵晉涵曰。漢書注引韓詩云。薰膏以痛。痛病也。通作鋪。〕大雅江漢云。淮夷來鋪。毛傳。鋪病也。國藩謂。淮夷來鋪之鋪。毛傳本不甚諦。此引以爲痛。痛病也。通作鋪。亦未嘗也。

〔戮病也〕。邵晉涵云。戮以恥辱爲病。鄭注秋官掌戮云。戮猶辱也。左傳文十年傳云。『國君不可戮也。』國藩按。莊子『山木栗林。虞人以吾爲戮。吾所以不庭也。』戮亦辱也。

〔忿憂也〕。邵晉涵云。楚辭九辨云。『遷及君之無忿。』國藩按。公孫宏傳亦云。『何忿不已。』

〔稅舍也〕。左傳『成九年。鐘儀南冠而縶晉侯。使稅之。』杜注。稅解也。卽舍也之意。郭引召伯所稅。國藩疑其與舍字微有不合。

〔歷傳也。注傳近。〕按此歷字。當讀如雜麗也之麗。凡人所經歷之迹。猶附麗也。猶傳著也。凡物附著者。謂之傳。如傅藥於膚。傳毒於矢之類。左傳『毛將安傳。』謂毛當附著於皮也。兵薄於城下曰『傳。』亦謂軍士附著於城身也。左傳『隱十一年。傳於許。』『僖二十五年。昏而傳焉。』『宣十二年。遂傳於蕭。』『襄六年。傳於堞。』皆是也。郭氏訓近得之。邵氏微有不合。『襄九年。聞師將傳。』聞師將近城也。

〔在存也〕。邵晉涵引左氏僖九年云。其在亂乎。杜注。在存也。國藩按。左傳『襄二十六年。吾子獨不在寡人。』杜注。在存問也。

〔釋言〕。『怒。飢也。』怒以思爲正訓。怒如調飢。苦思而如飢也。怒焉如擣。苦思而如擣也。此等恐非本經。後人孱亂者與。

〔釋宮〕〔扶謂之闕〕匡謬正俗曰問曰。俗謂門限爲門荷何也。答曰。〔按。爾雅扶謂之闕。郭景純注。門限也。音切。今言門荷是扶聲之轉耳。字宜爲扶而作切音。〕國藩按。漢書外戚傳切皆銅沓。冒注。切門限也。切當是扶之假借字。

〔樞達北方。謂之落時。注。門持樞者。或達北樞。以爲固也。〕按門持樞之木。持上樞者卽梁。持下樞者卽闕也。若達於北樞。則極長矣。今上樞之梁長或如此。

〔堍謂之站。在堂隅。〕按站有二。明堂位崇坿康圭。論語有反站。此站皆築土爲小方臺。以度物也。若堂角之站。則初無上臺。但有其名耳。

〔鐻謂之朽。〕說方鐻鐵朽也。或作揚。秦謂之朽。關東謂之揚。孟子毀瓦畫墁。王肅注。〔論語朽墁也。〕國藩按。鐻。本涂牆之器。而涂之亦曰鐻。有用鐵者。有用木者。故或從金。或從木。或從土。異同字也。

〔楳在牆者。謂之禰。〕內則疏云。植曰禰。橫曰箠。國藩按。植非立於地也。但著於牆壁耳。吾鄉俗曰釘子。可以挂衣。

〔植。謂之傳。注。戶持鑰植也。〕按。鑰門持鑰之木。有橫鑰者。有直鑰者。此曰直。蓋直木也。

〔案。腐謂之梁。〕韓文大木爲案。本此。國藩按。梁施於南北兩楹之上。堂之東西。凡兩梁四楹。

〔開謂之楹。注。柱上構也。〕按。侏儒短柱之上。或施方木如版。或施直木如笄。上以承棟。如花房之有蒂。所以斟酌厚薄之閒也。

〔榑謂之塗。注。卽楹也。〕說文楹柱上柎也。國藩按。說文以楹爲柱上之柎。則與榑楹等字相同。郭氏謂榑卽楹也。則是短柱而非柱上之柎。釋名云。楹在柱端。顏注漢書亦云。薄楹。柱上柎也。是楹以指柱上之柎。爲正解。

〔棟謂之桴。注。屋椽。〕按。凡承椽之橫木。京師曰標之。集韻標音棟。屋上橫木。吾鄉俗曰房條。其屋脊后中者。曰棟。曰楹。曰危。說文棟。曰楹。屋脊之棟。亦謂之危。其餘曰桴。說文桴。棟名。晉語云。桴一名桴。是桴者中棟也。桴

之檼。案云檼從中。檼之名而亦得爲檼耳。曰桼。說文桼。榱屋桼也。國藩按凡榼皆可名桼。其在復屋者曰桼。曰望。說文檼。桼也。釋名云。檼隱也。所以隱胡也。或謂之望。言高可望也。或謂之桼。是檼即桼也。或謂之阿。土昏禮。鄭注阿。棟也。西京賦。『列桼。檼以布翼。』指檼之小者言之。『荷棟。榼而高。』指檼之大者言之。至土昏禮。訓阿爲棟。則指其地言之耳。非果名爲阿也。劉熙偶有未察耳。

〔檼謂之檼。直而遂謂之闕。不受檼謂之交。〕穀梁釋文云。方曰檼。圓曰椽。國藩按。北五省椽有方者。有圓者。吾鄉則以薄版爲之。名曰椽皮。椽長者。從棟直達於檼曰闕。椽短者。不能達於檼。須換他椽。續之曰交。若吾鄉之椽皮。則有三續四續者矣。

〔檼謂之檼。注。屋椽。〕邵晉涵曰。椽。又謂之宇。士喪禮。置於宇西。注。宇椽也。國藩按。衆椽之頭。參差不齊。故施橫木以齊之。吾鄉於椽皮之當。掩以橫版。名曰『落椽。』亦其意也。其名曰椽。曰檼。曰椽。曰檼。釋名。椽。旅也。連旅。旅也。或謂之椽。椽。綿也。綿。連。椽。頭。使齊平也。國藩按。椽有二物。一爲塗。塗之器。一爲椽頭之木。曰椽。說文。椽。素名。屋椽也。齊謂之椽。楚謂之椽。釋名。椽。眉也。近前若面之有眉也。曰椽。說文。屋椽。聯也。楚辭。九歌。薰。椽。今。既。張。曰。椽。說文。椽。椽也。椽。椽也。徐。鑿。曰。連。椽。木。在。椽。之。端。者。曰。椽。頭。釋名。連。椽。頭。之。木。上。入。曰。椽。頭。形。如。椽。頭。也。實。一。物。也。凡椽之上。皆曰宇。鄭氏訓宇爲椽。指其地言之耳。非爲椽端之木。果名曰宇也。邵氏失之。

〔梁謂之闕。〕闕者。門中所豎短木。臬者。植一直木以爲之表也。與檼杖之在地者無別。但檼杖或有欹斜。臬則正直耳。

〔釋山。〕〔小山宮大山岌。〕此宮字。與莊子德充符。『而王先生。』之王字。字相同。

〔泰山爲東嶽。華山爲西嶽。霍山爲南嶽。恆山爲北嶽。高高爲中嶽。〕邵氏曰。『冀之霍山。與泰衡華恆。唐虞之五嶽也。華嶽。泰衡。恆。嵩。高。漢初之五嶽也。泰華。霍。恆。嵩。高。武帝所定之五嶽也。』國藩按。邵氏以此數語爲定論。頗爲武斷。

〔釋畜〕〔騶躡躡善陞顧。注。騶躡躡如躡。而健上山。秦時有「騶躡苑」。〕國藩按。若以騶躡爲獸名。則躡下當更重一躡字。躡躡與下枝躡躡爲一例。郭注有兩躡字。是也。若以騶爲獸名。則讀騶爲句。躡躡爲句。李巡顏師古之說。亦自可通。邵晉涵遽駁小顏。未見其審。

詁訓雜記

〔經典形容之字。約有三端。〕一曰雙字。一曰駢字。卽雙聲疊韻字。一曰單字。依依。杲杲。泄泄。亦作證。證見詩述聞。查查。亦作諸。諸泯泯。亂也。見詩述聞。焚焚。逸周書作芬。芬駸駸。折折。鼎鼎。縱縱。此形容之用雙字者也。窈窕。阿難。倏倏。踟蹰。化離。判煥。彊禦。倉兄。殿屎。此形容之用駢字者也。檐如翼如。勃如蹊如。退然。檀弓墮然。確然。易賁然。詩白駒儵然。俛然。頽乎。頽乎。均覆記。螟爾。掣爾。均考工記。變彼倬彼。瑟彼。倬彼。倬彼。景彼。狄彼。於論。於樂。於皇。於赫。於鏘。於昭。於粲。於緝。熙。均見詩。有斂其香。有椒其馨。有依其土。有略其耜。有噴其鏘。有猗其角。有鏘簋殽。有倬棘七。有冽仇泉。有覺其楹。有墳其首。有莘其尾。有頗者弁。有截其所。有鬻其猗。有鬻其鏘。有厭其傑。有倬其道。有倬其城。有嗿其星。有實其積。有卷者阿。有秩斯秬。有扁斯右。有彌濟盈。有覽雉鳴。有虔秉鉞。有空大谷。大風有隧。庸鼓有歎。會同有繹。萬舞有奕。執事有恪。海外有截。旗旒有翻。松栢有挺。松栢有焉。閔宮有位。儻革有饒。下民有厭。籩豆有且。旅楹有開。與夫伊嘏文王。假哉皇考之類。皆形容之用單字者也。

〔駢字異字同義者〕途遁。一曰途循。曰蹲循。曰邊循。曰巡遁。曰途巡。會賓谷之父辨之甚詳。摠摠。十二諸侯年表。一曰摠摠。藝文志曰摠摠。刑法志曰摠摠。唐書柳璟傳阿那。洞篇賦。一曰阿娜。蘇詩論書曰猗那。詩商頌曰阿難。詩隰桑有阿曰猗猗。詩隰有萋楚。詩述聞王注楚辭。卽猗猗也。披離。哀郢。一曰披離。曰化離。詩曰披麗。甘泉賦曰配黎。同上。灼灼。一曰嬰鏘。曰綽約。曰灼爍。婉孌。魯靈光殿賦。一曰婉傳。上林賦曰宛延。甘泉賦曰婉婉。槃散。子真言。一曰槃環。史記相如傳曰槃環。漢書相如傳曰端環。猗猗。上林賦。一曰迤靡。曰猗猗。曰迤。曰施靡。

均甘泉賦曰旂泥曰遷迤。倭遲一曰委蛇。曰蟻蛇。曰委移。曰威遲。曰遷迤。容齋隨筆記之。襄牟一曰儻牟。西京賦曰方驥。思元賦曰潢洋。九辨曰相牟。薛駢曰常牟。僕僮樂志曰徜徉。羊眠一曰羊綿。曰阡眠。曰翩翩。曰聯綿。鬱伊一曰鬱邑。曰於邑。曰於悒。曰於悒。九辨容裔曰淫裔。曰容與。崔嵬一曰畏佳。曰崔萃。曰崑嵬。魯靈光殿賦曰崑嵬。曰崑崙。均甘泉賦曰崑嵬。聳愿一曰聳夷。曰從愿。曰疎踊。曰從容。浩瀚一曰瀚阡。魯靈光殿賦曰瀚阡。上林賦曰瀚阡。蘇子歌曠隴一曰曠隴。曰蒙籠。盤桓易屯一曰盤還。投壺曰盤旋。譁張。無逸一曰翰張。劉琨答盧諶詩曰侏張。揚雄園三老箴彷彿一曰髣髴。魯靈光殿賦曰彷彿。甘泉賦便娟南都賦一曰嬋娟。西京賦曰嬋娟。甘泉賦落魄一曰落泊。曰落拓。要眇一曰幼妙。曰幽眇。迢遞一曰昭曠。魯靈光殿賦曰迢遞。九戚宮禮泉銘辟援一曰判煥。曰泮煥。流離一曰琉璃。曰留黎。參差一曰參差。曰參差。匍匐一曰扶服。曰復服。原涉傳桀結後漢書南蠻傳一曰槃結。曰蟠結。孟浪詳述聞通說一曰莫絡。曰暮絡。擲揄一曰邪揄。曰厭瘳。後漢書王翳傳憑臆長門賦並見經義述聞我庚維億下一曰服億。扁鵲傳曰愒億。氣備也。陳湯傳方言注叱噎。史魯仲連傳一曰叱咤。史韓信傳曰猝嗟。漢韓信傳曰咄嗟。漢落莊子一曰獲略。大人賦甘泉賦曰獲略。魏公傳劉流思元賦一曰周流。上林賦注非曰膠流。甘泉賦卷曲莊首篇一曰曲局。詩子髮曲局注局卷也。曰蜷局。醫經猶豫一曰猶與。曰容與。曰夷與。均見述聞通說。鏗鞳上林賦注一曰闐鞳。撥刺張弓貌一曰拔刺。布濩上林賦注一曰布護。後漢西南夷傳喬皇一曰適皇。思元賦躑躅一曰躑躅。殺核詩賓之初筵一曰肴覈。班固答賓戲辱顏一曰巉岩。首鼠一曰首施。後漢西羌傳璽禦一曰璽圍。薛駢詳見詩述聞要紹西京賦一曰優紹。蠲繆大人賦一曰蚪繆。魯靈光殿賦崔錯上林賦一曰崔錯。魯靈光殿賦蕭森一曰蕭簦。上林賦俊茂駘一曰蔭湫。上林賦齟齬一曰握齟。取蜀萃蔡子虛賦一曰萃蔞。蕭田賦徒倚一曰徒迤。洞窟賦無閭一曰巫閭。峽岩一曰迭邊。思元賦勿慮一曰無慮。扶疏一曰扶蘇。旁薄一曰旁魄。驪虞一曰歡娛。左傳詩集雅障一曰雫障。九辨雜斯一曰奔繩。灑澗甘泉賦一曰汀澗。韓詩殷麟一曰麟麟。璿瑤一曰璿瑒。膠葛一曰膠鞞。傑儻甘泉賦一曰叁池。愴怳九辨一曰倉兄。詩

一字略轉而異義者。索居之索訓散。索詢則義別矣。離麗之麗訓附。別離則義別矣。招攜之攜訓離。攜手則義別矣。亂臣之亂訓治。亂世則義別矣。蒞厥豐草之蒞訓治。道蒞不除則義別矣。我車旣攻之攻訓善。環而攻之則義別矣。疆禦之禦訓守。孰能禦之則義別矣。擾龍之擾訓馴。擾亂則義別矣。我且柔之矣之柔訓服。柔弱則義別矣。天明長之畏訓威。聲畏天下則義別矣。又如來即往。詩。適追來孝。太史自序。自今以來。亦略轉而異義者也。經典顛倒字。惟詩最多。如家室。裳衣。衡縱。稷黍。鼓鐘。下上。半牛。樂豈。息偃。孫子。家邦。鼎彝。中谷。中林。中河。中原。中田之類皆是。書無逸之四三年。祭義。孟子之祿爵。亦閒有之。見於史者。惟後漢王丹傳之鹽燻。牟續傳之病利。餘不多見。

〔古今雅俗異同字〕顧即雇。彙錯傳。斂民財以顧其攻。踣即舛。重即但。羽獵賦。注。轡即帽。同上。赫即嚇。莊子注。醉即釋。管蔡世家。張儀傳。雅即瑣。衡即橫。薄即毫。蹇即蹇。夙。彙書。橫即鬢。鮪。見傳。蹇。堰即埵。皇甫嵩傳。夾即俠。後漢東夷傳。釐即釐。後漢西夷傳。柳即葦。棺。濟之飾。檀弓。周禮。隊即墜。段注。說文。溜即鬻。左傳。宣二年音即蔭。左傳。鹿死不擇音。徧即辨。左傳。定九年。子言。徧舍。魯於季氏之廣。匡即恒。禮器。噉即劇。禡即鎬。功即攻。致即綴。月令。填池。卽奠撤。檀弓。

〔俚俗字有所本〕斗絕。見後漢竇融傳。什物。見後漢宣秉傳。什器。見鮑昱傳。上司。見楊震傳。司官。見陳實傳。底裏。見竇融傳。細弱。見杜林傳。文書。見鮑昱傳。人事。見章和八王及黃琬傳。人事。魯今言。應酬也。小便。見張湛傳及絕交書。折。見東夷傳。折。魯今言。折算也。公館。見禮會子問。

史

史記

今上本紀（孝武本紀）自初即位，尤敬事鬼神，以下至末，皆封禪書之文，決非禘先生所補也。孝武紀篇中於是字凡二十二見，又有用而字者，又有用其後者，文氣亦與於是字相承接。太史公行文，間有氣不能籌舉處，韓公故嘗勝之。

三代世表（豈不偉哉）偉與詭同，侓亦同，猶云異也。

律書（西至於注）注即柳下文，西至於瓠，瓠即臯，北至於留，留即昂。

歷書（故疇人子弟分散，或在諸夏，或在夷狄）如淳曰：「家業世世相傳爲疇，律年二十三傳之疇官，各從其父學。」韋昭曰：「疇，類也。」孟康曰：「同類之人，明歷者也。」樂彥曰：「疇，昔知星者也。」按：韋孟說是也。說文：「疇，耕治之田也。」本以田疇爲正訓，而各載籍用疇字多與傳通。北海相景君碑：「英彥失疇。」譏耶元賓碑：「朋疇宗親。」此疇與傳通之證也。儻，類也。書洪範：「不畀洪範九疇。」國策：「夫物各有疇比。」比，訓類也。可知疇人爲同類相聚，以明歷算之人矣。文選東晉補亡詩注云：「晉與同業疇人，肆修鄉飲之禮。」則凡同術相聚者，皆得稱爲疇人，又不懂推明歷算者也。

平準書平準，卽管子輕重之法也。唐劉晏亦用之。

「享宏羊，天乃雨。」是時宏羊固未死也。借卜式惡詈之言作結。若宏羊業已享殺者，此太史公之禱衷耳。齊世家（殺之郭關）田氏之殺我，與孫緜殺諸葛恪略相似。

陳涉世家懷王入秦不返，天下之公憤，屈原之私憤，而太史公亦自引爲己憤也。楚雖三戶，亡秦必楚。子長時時不忘此二語，故於陳涉之張，楚項羽之楚，皆所嚮慕，卽於襄彊之楚，呂臣之楚，景駒之楚，黥布之楚，懷王孫心之楚，亦縷敘而不致忽。

外戚世家通篇注重命字。首段呂后未指明天命，後薄后竇后王后衛后亦俱舍命字之意在言外。楚元王世家前兼敘羹頤侯及代王，後兼敘趙王河間王，不僅楚元王也。

荆燕世家贊「豈不爲偉乎。」王念孫說，偉異也。樂布傳西京賦「豈不詭哉。」詭亦異也。劉惔以疏屬封王，故歎其異。

蕭相國世家蕭相之功，只從獵狗及鄂君兩段指點。其餘卻皆從沒要緊處著筆。實事當有數十百案，概不補寫。文之所以高潔也。後人爲之，當累數萬言不能休矣。

曹參世家敘戰功極多，而不傷繁冗。中有邁往之氣，足以舉之也。

留侯世家觀「從容言天下事甚衆」數語，則子長於子房事不書者多矣。敘留侯計畫，亦不出戰國策士氣象。未知子房尙有進於此者否。

陳丞相世家陰謀奇計，是陳平世家著重處。未段及贊中點出。

絳侯周勃世家太史公於不平事，多借以發揮。以自鳴其鬱抑。此於絳侯父子下獄事，卻不代鳴冤苦，而以「足己不學，守節不遜」二語責條侯。故知子長自聞大道，或以謗書譏之非也。

梁孝王世家自梁最親有功，又爲大國，以下一氣噴薄而出。見梁王所以怨望，欲爲不善者，皆太后景帝有以啓之。

五宗世家方望、綏謂歸熙甫文。於人微而言無忌者，蓋多近古之詞。吾謂子長五宗世家等文，乃更進於敘述賢哲功臣之作。抑所云「瓦注賢於黃金」也。

伯夷傳首段至文辭不少概見。止言古來高節之士，惟吳太伯、伯夷可信。許由、務光之倫，未經孔子論定者，不可信。第二段至怨邪非邪，止言伯夷、叔齊實事。惟孔子之言可信。傳及軼詩可信。第三段，至是邪非邪，止言天道福善之說，不足深信。第四段至末，言人貴後世之名，不貴當時之榮，因慨己不得附孔子以傳。

管晏列傳子長傷世無知己，故感慕於鮑叔。晏子之事特深。老莊韓非列傳，以申韓爲原於道德之意。此等識解，後儒固不能到。

『故其著書十餘萬言。大抵率寓言也。』太史公莊子曰：『大抵率寓言也。』余讀史記亦大抵率寓言也。列傳首伯夷。一以寓天道福善之不足據。一以寓不得依聖人以爲師。非自著書。則將無所託以垂於不朽。次管晏傳。傷己不得飽。叔者爲之知己。又不得如晏子者爲之薦達。此外如子胥之憤。屈賈之枉。皆借以自鳴其鬱耳。非以此爲古來偉人計功簿也。班固人表。失其指矣。

司馬穰苴列傳。未敘高國之滅。田齊之興。文氣遼遠。獨子長有此。

孫子吳起列傳。傳言世傳孫臏兵法。而贊言世俗稱十三篇。及吳起兵法。則知臏兵法當時已無人稱道矣。

伍子胥列傳。子胥以報怨而成爲烈丈夫。漁父之義。專諾之俠。申包胥之乞師。白公之報仇。石乞之甘烹。皆爲烈字。襯託出光芒。

仲尼弟子列傳。太史公好奇。凡戰國策士。詭謀雄辯。多著之篇。此載子貢之事特詳。亦近戰國策士之風。商君列傳。贊最明允而深厚。

蘇秦列傳。贊『吾故列其行事。次其時序。毋令獨蒙惡聲焉。』觀次其時序一語。則知當日有並非蘇秦時事。而附之於秦者。班固次東方朔傳。指意亦頗類此。

張儀列傳。子長最惡暴秦。故謂張儀之行事。甚於蘇秦。實則兩人之傾險。亦相等耳。特秦挾最勝之勢。故張儀尤爲得計。

樗里子甘茂傳。贊『方秦之強時。天下尤趨謀詐哉。』讀此等贊。知子長胸中自具遠識。

穰侯列傳。首言穰侯涇陽華陽高陵之權倖。末言范雎奪四貴之勢。皆簡潔無枝辭。

『少割而有質。』少割者。謂少割梁地也。有質者。謂取秦之質子也。

白起王翦列傳。贊未爲精當。言王翦之短。尤非事實。

孟子荀卿列傳。自秦焚書以後。漢之儒者。惟子長與董仲舒見得大意。

魏公子列傳公子二字。凡百四十五見。故爾願盼生姿。跌宕自喜。

廉頗藺相如列傳廉頗爲趙將最久。戰功最多。故以廉頗爲主。絃藺相如趙奢父子。皆以廉頗經緯其間。卽絃李牧亦插入廉頗已入魏句。此子長裁篇之本意也。惟功績雖以廉頗爲最。而子長所佩仰者。則以相如爲最。故贊中專美相如。且以廉藺目其篇。

田單列傳贊魏武帝好以勁兵錢騎。留於後。故注孫子以後出者爲奇兵。實則孫子所謂正奇者。非果以先出後出分也。處女脫兔四語。子長玩味極深。絃趙奢李牧戰功。亦暗含此四句在中。不獨贊歎田單爲然。

魯仲連鄒陽列傳仲連高節。似非鄒陽可擬。上梁王書亦拉雜無精義。子長特以書中所稱。有與己身相感觸者。遂錄存之。

屈原賈生列傳余嘗謂子長引屈原爲同調。故絃屈原事。散見於各篇中。懷王入秦不返。戰國天下之公憤。而子長若引爲一人之私憤。旣數數著之矣。此篇尤大聲疾呼。低徊欲絕。

『令尹子蘭聞之大怒。』聞之。聞屈平之作離騷。

呂不韋列傳贊孔子之所謂聞者。實與呂子不侔。子長讀論語。別自有說。

刺客列傳聶政傳之後數行。荆軻傳之首尾各十數行。其蕩漾疏散吞吐處。正自不可幾及。

李斯列傳李斯之功。只從獄中上書絃出。與蕭何之功。從鄂君語中絃出。同一機杼。李斯之罪。從趙高反覆熱商立胡亥事絃出。與伍被說淮南。蒯通說韓信同一機杼。

蒙恬列傳贊『吾適北邊。自直道歸至。固輕百姓力矣。』始皇紀曰。二十七年治馳道。六國表曰。三十五年爲直道。道九原。通甘泉。是直道與馳道不同也。蒙恬未治馳道。止治直道築長城二事。子長責其輕民力。可謂定論。

張耳陳餘列傳子長尙黃老。進游俠。班孟堅譏之。蓋實錄也。好游俠。故數稱堅忍卓絕之行。如屈原虞卿田橫侯蘇田光。及此篇之述賈高皆是。尙黃老。故數稱脫屣富貴。厭世棄俗之人。如本紀以黃帝第一。世家以吳太伯第

一、列傳以伯夷第一。皆其指也。此贊稱張陳與太伯季札異。亦謂其不能遺外勢利。棄屣天下。魏豹彭越列傳贊（獨患無身耳）五字。古來英雄所爭在此。子長烈士也。故道得到。

黔布列傳贊以坑殺人爲首虐。遂以身爲大僇。此亦後世因果之說。如韓彭英布之智力。自有不能與高祖並立之理。卽覺端發自愛姬。亦不足論。此等贊子長似不甚屑意。

淮陰侯列傳彭城敗散而後信收兵至滎陽。破楚京索之間。趙魏破代而後。漢輒收信精兵。滎陽距楚成畧圍急而後。漢王至趙。馳入信壁。此三役。皆高祖有急。賴信得全。子長於此等處。頗爲用意。

韓王信盧縮列傳贊（夫計之生孰成敗於人也深矣。）韓王信。盧縮陳豨皆計事不孰。此句蓋兼三人者言之。田儼列傳田氏王氏八人。益以韓信。凡九人。敘次分明。一絲不紊。筆力極寤舉也。

樊鄴滕灌列傳樊噲夏侯嬰皆沛人。灌嬰雖非沛人。而淮陽去沛不遠。且終身爲騎將。與夏侯嬰終身爲太僕略相類。三人同傳宜也。酈商不入食其傳。又不入傳靳等傳。而列之此傳。頗不可解。夏侯嬰傳太僕字凡十三見。奉車字凡五見。以兵車趣攻戰疾字凡四見。灌嬰傳將騎兵凡九見。

張丞相列傳夾敘周昌趙堯任敖事。與蒙恬傳夾敘趙高事。機杼略相類。酈生陸賈列傳初沛公引兵過陳。留酈生踵軍門上謁。此一節應別行寫。正傳中。旣載酈生誡騎士以進。沛公踞牀洗足見之矣。此又載酈生按劍以叱使者。當時傳聞不一。聊記於傳後。以廣異聞。又有傳酈生書者。謂漢王定三秦至鞏洛。酈生乃始來見。則贊中辨其非是。

傳靳黈成列傳子長於當世豔稱之功。臣封爵者。皆不甚滿意。常以不可知者。歸之天命。如於蕭何則曰。『碌碌未有奇節。依日月之末光。』於曹參則曰。『以與淮陰侯俱。』於樊鄴滕灌則曰。『豈自知附驥之尾。垂名漢廷。』於傳寬靳黈則曰。『此亦天授於衛青。亦曰天幸者。』以成功委之於命。雖要歸有良善者。然亦由子長褊衷。不能忘情於功名。故時時以命字置諸喉舌之間。若仲尼則罕言命。且不答南宮适羿稟禹稷之間。茲其所以爲大

也。

劉敬叔孫通列傳贊「智豈可專邪」此語是子長識力過人處。

季布樂布列傳狀季布季心樂布諸人俱有瑰瑋絕特之氣贊中仍自寓不輕於一死之意子長跌宕自喜之概時時一發露也。

袁盎鼂錯列傳「宦者趙同嘗害盎盎兄子種說盎曰『君與鬪廷辱之使其毀不用』」使其毀不用者謂廷辱之後趙談雖進毀言文帝將不聽用也。

贊鼂錯隋直刻深袁盎天姿亦頗近之故兩人相忌嫉特深子長以好聲矜賢譏盎亦互文見義。

張釋之馮唐列傳贊「書曰『不偏不黨王道蕩蕩不黨不偏王道便便』張季馮公近之矣」季布樂布袁盎鼂錯皆激烈隋直非和平之器張馮焉爲得其平故引書洪範贊之。

萬石張叔列傳子長生平風旨不與萬石建陵諸人相近而此傳曲盡情態亦自具有大度後世卿相老成醇謹者託義於此則有所摹擬而爲之爲文者亦純事摹擬矣。

田叔列傳不別爲黃高立傳而別爲田叔立傳子長與任安田仁善也。

扁鵲倉公列傳太史公好奇如扁鵲倉公日者龜策貨殖等事無所不載初無一定之例也後世或援太史公以爲例或反引班范以後之例而譏繩太史公皆失之矣。

吳王濞列傳先敘太子爭博鼂錯削地詳致反之由次敘吳詭膠西膠西約五國詳約從之狀次敘下令國中遺書諸侯詳聲勢之大次敘鼂錯始誅袁盎出使詳息兵之策次敘條侯出師鄧都尉獻謀詳破吳之計次敘田祿伯奇道桓將軍疾西詳專智之失六者皆詳矣獨於吳軍之敗不詳敘但於周丘戰勝之時聞吳王敗走而已此亦可悟爲文詳略之法。

魏其武安侯列傳武安之勢力盛時雖以魏其之貴咸元功而無如之何灌夫之強力盛氣而無如之何廷臣內

史等心非之而無如之何。主上不直之而無如之何。子長深惡勢利之足以移易是非。故敘之沈痛如此。前言灌夫亦持武安陰事。後言夫繫。遂不得告言武安陰事。至篇末乃出淮南遺金財事。此亦如畫龍者將畢乃點睛之法。

韓長孺列傳壺遂田仁。皆與子長深交。故敘梁趙諸臣。多親切。

李將軍列傳初廣之從弟李蔡至此。乃將軍所以不得俟者也。十餘行中。專敘廣之數奇。已令人讀之短氣。在下接敘從衛青出擊匈奴徒東道迷失道事。愈覺悲壯淋漓。若將從衛青出塞事敘於前。而以廣之從弟李蔡一段議論敘於後。則無此沈雄矣。故知位置之先後。剪裁之繁簡。爲文家第一要義也。

匈奴列傳贊孔氏著春秋。隱桓之間則章。至定哀之際則微。爲其切當世之文。而罔廢忘諱之辭也。敘武帝時事。不實不盡。故贊首數語云爾。

衛將軍驃騎列傳衛青霍去病傳右衛而左霍。猶魏其武安傳右實而左田也。衛之封侯。意已含風刺矣。霍則風刺更甚。句中有筋。字中有眼。故知文章須得偏驚不平之氣。乃是佳耳。

平津侯主父列傳平津亦賢相。而太史公屢非刺之。蓋子長褊衷。於汲黯董仲舒既所心折。卽郭解主父偃亦所深許。遂不能不惡平津耳。

南越尉陀列傳。自尉陀初王。後五世九十三歲而國亡焉。五世九十三歲。越國必有善政。趙光趙定居翁之屬漢。必有事實。茲皆不書。略人之所詳也。太后之淫亂。置酒之坐次。詳人所略也。故知記事之文。宜講剪裁之法。東越列傳莊助發郡國之兵。不從田蚡計。楊僕韓說等之三道並進。后股多軍之封侯。俱足發明武帝之英風俊采。特不於贊中揭出耳。

朝鮮列傳事緒繁多。敘次明晰。柳子厚所稱太史之潔也。

西南夷列傳通二方。置七郡。敘次先後。最爲明晰。

司馬相如列傳贊漢書春秋二字上有『司馬遷稱』四字。蓋自春秋推見至隱。下至風諫。何異司馬遷之言也。自『靡麗之賦』下至『不已虧乎』止。揚雄之言也。後人將漢書論贊。屏入史記內。太史公而引揚雄之言。遂不可讀矣。

淮南衡山列傳伍被既造謀徙民朔方。以怨其民。興詔獄。逮諸侯太子幸臣。以怨其諸侯。則所以爲淮南反計者。亦甚深至。前此所爲雅辭。引漢之笑者。嘗不可盡信也。太史公素惡丞相弘。廷尉湯。故欲曲貸伍被。或不無增飾於其間耳。

循吏列傳循吏者。法立令行。識大體而已。後世之稱循吏者。專尙慈惠。或以煦煦爲仁者嘗之。與太史公此傳之本意不倫。

汲鄭列傳汲黯傳處處以公孫宏張湯相提並論。此太史公平生好惡之所在。景武間人才。以此傳爲線索。

儒林列傳子長最不滿於公孫宏。風刺之屢矣。此篇錄公孫宏奏疏之著於功令者。則曰。『余讀功令。未嘗不廢書而歎。』於轅固生則曰。『公孫宏側目視固。』於董仲舒則曰。『公孫宏希世用事。』於胡毋生則曰。『公孫宏亦頗受焉。』蓋當時以經術致卿相者。獨宏。子長既薄其學。又醜其行。故褊衷時時一發露也。

酷吏列傳通首以『法令滋章。盜賊多有』二語爲主。序中天下之網管密數行。指秦言之。即以諷武帝時也。大宛列傳前敘諸國從張騫口中述出。最爲明暢。後敘兩次伐宛。亦極雄偉。中間敘烏孫和親。及西北外國之俗。筆力尙未濶舉。

〔得烏孫馬好。名曰天馬。及得大宛汗血馬。益壯。〕得烏孫馬。得大宛馬。皆後此之事。茲附錄於前。〔出此初郡〕初郡者。初置之郡。

游俠列傳序分三等。人術取卿相功名俱著一也。季次原憲獨行君子二也。游俠三也。於游俠中。又分三等。人布衣閭巷之俠一也。有士卿相之富二也。暴豪恣欲之徒三也。反側錯綜。語南意北。驟難覓其緘線之蹟。

侯幸列傳以本朝巨子而歷敘諸帝幸臣。此王允所謂謗書也。

滑稽列傳序「天道恢恢。豈不大哉。談言微中。亦可以解紛。」言不特六藝有益於治世。即滑稽之談言微中。亦有裨於治道也。

曰者列傳周秦諸子著書。及漢人作賦。多設爲問答之辭。此篇與東方朔諸文略相類。

龜策列傳褚先生在長安求之不得。故後世皆知此傳爲僞。

貨殖列傳自桑孔輩出。當時之弊。天子與民爭利。平準書譏上之政。貨殖傳譏下之俗。上下交征利。孟子列傳序所爲廢書而歎也。中惟「家貧親老」數行。是子長自傷之辭。餘則姚惜抱之論得之。

太史公自序論六家要指。即太史公遷之學術也。託諸其父談之詞耳。姚惜抱以爲其父之辭。蓋失之。

「上大夫妻遂曰」設爲壺遂問答。卽解嘲。賓戲。進學解之意。

漢書

景帝紀「元年。廷尉信謹與丞相議曰。『吏及諸有秩。受其官屬所監所治所行所將。其與飲食計償費。勿論它物。若買故賤。賣故貴。皆坐臧爲盜。沒入臧。縣官吏遷徙免罷。受其故官屬所將。盡治送財物。奪爵爲士伍。免之。』故官屬及所將所監所治而獨無所行者。故時巡行之處。其官屬未必更送財物也。僅奪爵爲士伍。而不以坐臧爲盜論者。前任之官。其罰稍輕於現任也。『所將。』謂所攝以自隨之人也。若『將雛。』『將子。』『將軍。』之將。」

武帝紀「太初元年夏五月。正歷以正月爲歲首。」自此以前。雖皆以建亥之月爲歲首。然皆稱冬十月。冬十一月。冬十二月。春正月。未嘗以建亥之月爲正月。蓋漢初稱建亥月爲正。而班氏追改之。故師古曰「史追正其名。」

宣帝紀「地節四年。詔曰。『今繫者或以掠辜。若飢寒瘵死獄中。』」掠辜而死一端也。飢寒而瘵死一端也。師古分作三端。蓋失之。下文「掠笞若瘵死者」亦只二端。

天文志「凡以宿星通下之變者。維星散。句星信。則地動。」維者。謂周圍如圍。若鼉星。天津。天錢。天壘城。天苑之類。句者。謂其末如鉤。若天鉤。卷舌。天讒。大陵。積尸之類。維者。欲圍不欲散。句者。欲曲不欲伸。否則地動。不專指極後之四星與斗杓後之三星言。

五行志「言之不從。從順也。」貌之不恭。傳「曰」之下。有「說曰」。『此言不從』句上。亦應有「說曰」。二字。

「視之不明。是謂不愆。愆知也。」「視之不明」句上。嘗有「說曰」二字。昭公二十五年夏。有鷦鷯來巢。至繼嗣可立。災變尙可銷也。

以上六事。皆禽鳥視之不明。嘗有羸蟲之孽。此羽蟲六事。不知何以列入。

「思心之不睿。是謂不聖。思心者。心思慮也。」思心之不睿上。應有「說曰」二字。

「皇之不極。是謂不建。皇君也。」皇之不極句上。亦應有「說曰」二字。

地理志「京兆尹南陵。師古曰。『茲水秦穆公更名以章霸。功視子孫。讀視曰示。』」視讀曰示。師古不應自爲作音。疑有誤也。

溝洫志「於是爲發卒萬人。穿渠自徵。引洛水至商顏下。」國藩按。洛水此今之北洛水也。中隔渭水。不知何以能至商顏。

陳勝傳「行收兵。」行收兵云者。且行且收兵也。

「公孫慶曰。『齊不請楚而立王。楚何故請齊而立王。』」田儼立爲齊王之時。未嘗請命於陳勝故云。

項籍傳「東陽少年。殺其令。相聚數千人。欲立長。無適用。」國藩按。適。主也。本毛傳之訓。然經典中如「誰適爲

容。『奚其適詩。』『莫適爲主。』『我安適詩矣。』『吾誰適從』等語。皆詞氣相類。若皆訓爲主。則莫適爲主。當訓爲莫主爲主矣。若各處望文立訓。參差互異。則古書之例。又不爾也。適蓋願安之詞。孟子云。『寡人願安承教。謂心願而意安之也。』莊子忘足履之適也。忘腰帶之適也。亦願而安之也。如上所引五語。及此無適用。皆可以願安之意通之。梁曰田假與國之王。窮來歸我。不忍殺趙。亦不殺角闕以市於齊。國藩按。師古訓市字極精當矣。然以市於齊四字。乃兼楚趙言之。本求齊出兵俱西者。楚也。若楚自殺。假又令趙殺角闕。是賣此三人以買齊兵也。今皆不殺。是不以此三人市齊之兵也。不得專指角闕。

〔羽謂其騎曰。〕吾爲公取彼一將。令四面騎馳下。期山東爲三處。〔期山東爲三處云者。本由山上四面分馳而下。既下則皆聚會於山之東面也。分爲三處者。爲疑陣。使漢兵不知羽所在。猝不敢前也。皆會於東者。東面濱大江甚近。將渡江也。〕

〔贊曰。賈生之過秦曰。〕史記錄賈生過秦三篇於秦本紀後。賈生本爲秦而作也。班氏錄過秦一篇於此。則似專爲贊陳勝而錄之。同一錄賈生。而文意各有當也。

張耳陳餘傳。〔縣殺其令丞。郡殺其守尉。今日張大楚王陳。師古曰。〕言張建大楚之國。而王於陳地。〔巨瞿曰。〕張大楚謂張而大之也。不宜以大楚連讀。

〔餘曰。吾願以無益。〕願猶特也。本傳願其勢初定。吾願目無益。願爲王寶不反。皆宜作特字解。漢書中此等願字甚多。王念孫皆作特字解。師古訓爲思念。皆失之。

韓信傳。〔蕭何曰。〕諸將易得。至如信國士無雙。〔國士謂其才智足伏一國也。又等而上之。則曰。〕天下士。管仲天下才是也。莊子此國馬也。而未若天下馬也。義與國士天下士同。師古注失之。

〔今韓信兵號數萬。其實不能千里襲我。〕其實不能。云者。雖名爲數萬。實尙不精數萬也。彭越傳。〔項籍入關。王諸侯還歸。〕還歸。歸彭城也。

〔遁拜越爲魏相國。擅將兵略定梁地。〕擅者。謂雖爲魏相國。而兵事不由魏豹調遣。越得專主之也。
燕王澤傳〔高后時。齊人田生游乏資。以畫奸澤。〕莊子天運篇以奸者七十二君。奸求也。

〔澤使人謂田生曰。弗與矣。〕弗與矣者。怨望之詞。言旣得金去。遂不復顧我矣。猶餓則依人。飽則颺去也。厥後田生以計爲澤求得封王。以明身雖不在澤所。而無日不爲澤畫策。報恩之深也。

吳王濞傳〔然其居國以銅鹽。故百姓無賦。卒踐更。輒予平賈。〕自行而踐更者。定例也。出錢而過更者。寬政也。過更者。旣選寬政矣。而踐更者。又予之以傭直。是富者出錢而不自行。貧者雖自行而得傭資。此吳王之欲得民心也。服說是。晉說非也。

〔竊聞大王以爵事有過。所聞諸侯削地。罪不至此。此恐不止削地而已。〕言楚趙王削地之罪。不至於膠西王賣爵之罪之甚。楚趙尙削地。則膠西恐不止於削地而已。言其當滅國也。此以危言怖膠西王也。

〔西走蜀漢中告越。注師古曰。言王子定長沙已北而西趣蜀及漢中平定。呂訪使報南越也。〕國藩按。師古說非也。長沙以北。西走蜀漢中。地方數千里。此非幼弱之長沙王子所能定也。南越是時最強盛。故吳王以此屬南越王。長沙與南越相直。王子可爲內應。故曰因王子也。告越者。言已將此指告南越矣。

〔削奪之地。〕之。疑作封。

楚元王傳〔德厚寬好施生。〕易曰。『天施地生。』此施生字之所本也。
劉向傳〔民萌何以勸勉。〕萌與毗同。力田之民曰毗。

用紆絮斲陳漆其間。陳施也。以石爲櫛。又以紆絮斲糜爛而施漆於其間。猶今世之以藥灰和漆封棺口也。
〔封墳掩坎。其高可隱。〕其高可隱。謂人隔墳而立。可隱肘也。不能遮蔽全身。不甚高耳。

〔石櫛爲游館。〕游館以石爲離宮。別館於地下。

〔上以我先帝舊臣。每進見。常加優禮。吾而不言。孰當言者。向遂上封事諫曰。〕奏疏惟西漢之文。冠絕古今。西

漢前推賈鼂。後推匡劉。賈鼂以才勝。匡劉以學勝。此人人共知者也。余尤好劉子政忠愛之忱。若有所差不得已於中者。足以貫三光而通神明。是故識精而不炫。氣盛而不矜。料王氏之必篡。思有以早爲所。而又無誅滅王氏之意。宅心平實。指事確鑿。皆本忠愛二字。彌綸周浹而出。吾輩欲師其文章。先師其心術。根本固則枝葉自茂矣。

〔行汙而寄治〕汙亂也。寄亦託也。本行汙亂。而託爲澄治。

〔根垂地中〕垂當作甬。甬與插同。

〔雖立石起柳。無以過此之明也。〕指明梓柱之微。果爲王氏篡漢之兆。向之忠直。出於至誠。故其道可以前知。讀至王劉不並立等語。至今如親其涕泣之狀。如聞其嗚咽之聲。

劉歆傳〔詩始萌芽。天下衆書。往往頗出。〕曰萌芽。曰頗出。言不完不備也。

〔或爲雅或爲頌。相合而成。〕詩或以相合而成。書或以後得而集。亦言其不完不備也。

〔其古文舊書。皆有徵驗。外內相應。豈苟而已哉。〕內者。祕府之藏也。外者。柏公賈公庸生之學也。兩者皆同。故曰相應。

季布傳〔布之官辯士曹邱生數招權顧金錢。〕劉攽曰。〔招權謂作爲形勢。招權歸己也。顧金錢者。謂志在金錢也。顧猶念也。〕愚按招權歸己。劉說是也。其訓顧曰念。非也。本書鼂錯傳注。顧離也。後漢桓帝紀注。顧。酬也。曰離曰酬云者。皆謂此有所往。彼有所反。無德不報之謂也。曹邱生既招權歸己矣。因以其權轉而假人。人乃以金錢報之。我以權往。人以金錢反。故曰顧也。後世有曰招權市利者。義正與此相同。謂既招得貴人之權歸己。因轉而以權假人。人卽以利報我。故曰市利也。

〔使僕游揚足下名於天下。顧不美乎。〕顧反也。師古訓念非也。

齊悼惠王傳〔高后見子畜之。笑曰。願乃父知田耳。〕師古曰。〔乃汝也。汝父爲高帝也。〕劉攽曰。〔兒子畜之。不以人臣待之也。乃父直謂王肥耳。〕國藩按。劉說是也。古人謂孫及兄弟之子。兄弟之孫。及他年輩幼小者。

皆可稱兒子。本傳下文云。齊王自以兒子年少可證。

〔勃曰。〕失火之家。豈暇先言丈人後救火乎。〕丈人尊長之稱。謂先告家長。以後往救火。猶先讀詔命。而後靖諸呂之難也。史記作大人。亦謂家長也。

贊〔左官附益阿黨之法設。〕愚按。附益亦解在諸侯王表。師古於表解云。背正法而厚於私家。於傳解云。欲增益諸侯王。自相矛盾。

蕭何傳〔秦御史監郡者。與從事辦之。〕劉敞曰。此句先題目下事。言秦制御史監郡者。凡有事皆與從事共辦之。愚按。劉說是也。凡監郡皆然。不獨泗水郡爲然。何給泗水卒。史卽泗水郡之從事也。

曹參傳〔度之欲有言復飲酒。〕度之師古讀爲大各反。則是以爲篤。度之度也。度人復欲有言。則又從而飲之。酒。是度之之字。爲彘文矣。國藩按。度之。史記作閭之。義相同也。猶曰頃之。曰少閒。曰少頃耳。

〔至朝時。帝讓參曰。與密胡洽乎。〕胡洽云者。謂在家幹洽何事。諷其管子也。不便面責。以無罪管子之咎。乃詰以在家幹洽何事云耳。

王陵傳史記王陵周勃等事。皆列入陳平世家中。始乎曰。以下我多陰謀。云云。接上文。何坐略人。妻棄市。皆陳平事也。漢書別分爲王陵傳。以周勃陳平問獄。欲錢穀事。闕入陵傳。已失其義矣。而何坐略人妻棄市之下。始乎曰之上。又闕入王陵。審食其後嗣一段。遂使審平與陳平之名混淆。

周勃傳〔得縮大將。抵丞相偃守陘。〕盧縮起事至微薄。未嘗置丞相之官。而其尊貴。略如漢之丞相。故曰抵丞相也。

〔迺顧虜左右執戟皆仆兵罷。〕仆者棄兵衛於地也。罷者散去也。左右皆執兵衛少帝者。故勝。公令其仆兵而各散去。師古訓頭未妥。

〔有謁者十人。持戟衛端門。曰。天子在也。足下何爲者。〕陰公以少帝非劉氏不當立。不以少帝爲君。故稱

之曰『足下。』謂者不知少帝已廢。代王已立。不以代王爲君。故亦稱曰『足下。』

〔上視而笑曰。〕此非不足君所乎。孟康注。設敵無箸者。此非不足滿於君所乎。嫌憾之也。師古注。孟說近之。帝言賜君食而不設箸。由此我意於君有不足乎。宋祁曰。浙本注文。『由我。』上有『豈不。』二字。按。孟注。『恨。讀爲很。違也。』說文。『很。不聽從也。』一曰。盪也。漢書李敢怨大將軍之恨其文。夏侯常連恨慍。兩恨字。皆當讀爲違戾之很。此孟注云。『嫌恨之也。』者。言明示以不足滿於君所之意。嫌有意與亞夫相違戾也。

樊噲傳。〔項羽既饗軍士中酒。〕愚按。中酒之中。當讀如字。文選上林賦。『於是酒中樂酣。』郭注。中。半也。此中酒之中。亦當訓爲半也。師古音竹仲反。解爲不醉不醒。失之矣。凡竹仲反之中。有兩義。皆從射之中。引伸而得。射有用之於禮射者。則以中爲合度。有用之於克敵者。則以中爲殺傷。從合度之義而引伸之。則中訓爲得也。應也。合也。嘗也。如封禪書。『與王不相中。』是中訓爲得。禮記。『律中太簇。』是中訓爲應。穆天子傳。『味中糜膏而滑。』是中訓爲合。司馬遷傳。『其聲中其實者。』是中訓爲當。凡此皆從射以中爲合度而引伸之者也。從殺傷之義而引伸之。則如趙王彭祖傳云。『持詭辨以中人。』何武傳。『欲以吏事中商。』之類。皆從射者以矢傷人而引伸之者也。中酒之中。亦從矢傷人之義。而引伸之。謂酒力足以傷人之生。伐人之性。如受中傷於矢耳。師古訓中酒爲不醒不醉。抑又非也。

夏侯嬰傳。〔高祖時。爲亭長。重坐傷人。〕愚按。重難也。坐傷人。則罹刑罰。故高祖難之。

〔高祖初爲沛公。賜爵七大夫。以嬰爲太僕常奉車。〕嬰自高祖初爲沛公時。卽爲太僕常奉車。及至專孝惠呂后。孝文終身皆爲太僕奉車也。故史記歷歷數之。或曰。『以太僕奉車。』或曰。『復常奉車。』或曰。『因復奉車。』或曰。『以太僕從擊某。』或曰。『以太僕擊某。』終高祖之世。凡十一見。而於末總之曰。『嬰自上初起常爲太僕。竟高祖崩。』其後有四見。合之凡十五見。雖史公磊落自喜。不厭其復。然究嫌煩贅也。漢書刪去八處。僅七見。可謂得體。然獨於從攻定南陽之上。著『因奉車』三字。殊爲不類。又於『號昭平侯。』之下者。『復爲太僕。』

四字。亦爲自亂其例。嬰自始至終。固無日不爲太僕。所有攻戰之功。固無一不因奉車以從也。

傅寬傳〔擊破齊歷下軍。擊田解。屬相國參殘博〕韓信破齊。曹參以左丞相屬焉。寬之破歷下。擊田解。固隸屬信之麾。殘博時雖專屬參。猶不出信之麾下也。蓋參是時若次將□□□耳。

周昌傳〔趙人方與公〕秦漢間。尊稱人多曰公。有以官名稱公者。如曹參傳中之秦監公。以士人稱公者。如高祖爲沛公。膠西有蓋公是也。有以縣令稱公者。如曹參爲咸令。曰咸公。夏侯嬰爲滕令。曰滕公。王武爲柘公是也。此方與公。亦以縣令而尊稱之耳。孟說非也。

任敖傳〔以淮南相張蒼爲御史大夫〕史記周昌任敖申屠嘉。皆附入張蒼列傳中。通首以蒼爲主。而以昌敖等事緯之。漢書既各爲標目。昌與敖各爲立傳矣。而乃以蒼事入敖傳中。斯爲不倫。

申屠嘉傳〔嘉謂長史曰。〕吾悔不先斬錯。迺請之爲錯所賣。〕師古訓先斬而後奏。是以迺請之屬上爲一句讀。今按當斷爲二句。言悔不先斬而乃先請。出於下策。致爲所賣也。史記作乃先請之。是分爲二句矣。

贊〔張蒼文好律歷〕師古訓爲名好律歷。殊爲不詞。今按。好者學字之誤。史記本文學律歷。漢書偶有譌字。師古不及糾正之耳。

酈食其傳〔爲里監門。然吏縣中賢豪不敢役。〕嘗云爲里監門吏。班固書誤倒寫然字於吏字上。史記不誤。〔項王遷殺義帝。漢王起蜀漢之兵。擊三秦出關而責義帝之負處。宋祁曰。〕或無負字。〕愚按。或本是也。此涉下殺義帝之負句而誤耳。史記無負字。

陸賈傳〔謂其子曰。〕與女約。過女。女給人馬酒食。極飲十日而更。所死家。得寶劍車騎侍從者。一歲中以往來過他客。率不過再過。數擊鮮。毋久溷女爲也。〕史記云。一歲中往來過他客。率不過再三過。數見不鮮。毋久溷公爲也。國藩按。他客謂親族僚友也。數見不鮮二語。賈與他客約之辭。上文六語。賈與其五子約之辭。與五子約稱曰女。與他客約稱曰公。區以別矣。孟堅改爲數擊鮮毋久溷女二語。並此亦似與五子約之辭。此孟堅未深究

子長之文義而改之也。又過他客不過再三過者。賈常傳食於其子。故無暇過他客也。孟堅改爲以往來過他客。率不過再過。似賈在他客過往來之時多。而其諸子處反僅再過矣。此又與子長之文意相長也。

淮南厲王傳「而殺列侯以自爲名」自爲名者。自以爲報母仇。以孝爲名也。

「大王欲屬國爲布衣」屬國云者。以國屬之人。而不復欲自有之也。

衡山王傳「王日夜求壯士於周郟等。數稱引吳楚反時計畫約東。衡山王非敢效淮南王求卽天子位。畏淮南起并其國。以爲淮南已西。發兵定江淮間而有之。望如是。」按。數稱引吳楚及時計畫約東者。壯士等之所稱引也。衡山王非敢以下。而有之以上。皆壯士等私相計畫之辭。淮南已西云者。言淮南王起兵西入長安。則衡山王發兵定江淮間。據淮南王之地。而有之。淮南朝發。則衡山夕起。庶不爲淮南王所并也。所望不過如是而已。

伍被傳「須士卒休。乃穿井得水。迺敢飲。軍罷。士卒已踰河。迺度皇太后所賜金錢。盡以賞賜。」軍罷二字。若屬上句讀。則無義可尋。若屬下句讀。則踰河之處。不必適在軍罷時也。此處當有二飲字。文云穿井得水。飲軍罷。乃敢飲。轉寫脫一飲字。又誤置軍罷二字於上耳。

「王曰。『男子之所死者。一言耳。』」凡男子之死於一言者。約有數等。與人爭很。一言之忿。不顧而死者。是死於忿也。氣誼相許。一言之約。借軀以相酬報者。是死於要約也。要事同計。異人同情。因旁人一言之感觸。遂以激發欲死者。是死於激切也。厲王遷死。淮南賓客。多以此感激安。或安以一言而激發欲死耳。師古二義解一言甚當。而於王安未合也。

「天下勞苦。有聞矣。」有聞。謂有隙可乘也。如說是。師古失之。孟子曰。『連得聞矣。』文氣略同。

「王曰。『此可也。雖然。吾君不至若此專發而已。』」史記作『吾以爲不至若此。』言不至如伍被之說如此。其難耳。漢書少一爲字。義與史記同。師古之解非也。

周仁傳「仁爲人陰重不泄。常衣弊補衣。孀袴。期爲不潔。清以是得幸。入臥內於後宮。祕戲。仁在旁終無所言。劉

奉世曰。『袴非小袴。能藉則近潔矣。此常袴。漏溼其上。不洗濯之。以其不潔之故。人惡遠之。乃得至後宮也。』愚按。劉說常袴不洗濯是也。其說人惡遠之非也。仁之衣弊衣。漏袴。言其不好修飾。不事容悅也。漏者。甚之之詞。猶曰不潔云耳。以其慎密質樸。是以得幸。雖後宮祕戲。亦得在旁。取其謹愿之至。不瀆洩禁中褻語。非取其垢汙而爲人所惡遠。遂與宦者同視也。劉說蓋爲張說所誤。亦陋甚也。

賈誼傳。『弔屈原賦。歷九州而相其君兮。何必懷此都也。』自『鳳縹緲其高遊兮。』至篇末。皆賈屈原不能引身遠遁。自取尤辱。其切責之。乃所以深痛之也。師古之說非是。

〔誼數上疏。陳政事。多所欲匡建。〕奏疏以漢人爲極執。而氣勢最盛。事理最顯者。尤莫善於治安策。故千古奏議。推此篇爲絕唱。可流涕者少一條。可長太息者少一條。漢書所載者。殆尙非賈子全文。賈生爲此疏時。當在文帝七年。僅三十歲耳。於三代及秦治術。無不貫澈。漢家中外政事。無不通曉。蓋有天授。非學所能幾耳。奏議以明白顯豁。人人易曉爲要。後世讀此文者。疑其稱名甚古。其用字甚雅。若倉卒不能解者。不知在漢時乃人人共稱之名。人人慣用之字。即人人所能解也。即以稱名而論。其稱淮南濟北。如今日稱端華肅順也。其稱匈奴。如今日稱英吉利也。其稱淮陰侯黥布彭越韓信張敖盧縮陳豨六七公。猶今日稱洪秀全李秀成石達開張洛刑苗沛霖竊匪回匪也。其稱樊鄴絳灌。猶今日稱江塔羅李也。其稱郡國。猶今日稱府廳也。其稱傅相丞尉。猶今日稱司道守令也。又以用字而論。其用厝字。猶今日用置字也。其用庠字。猶今日用平字也。其用慮字。猶今日用大也。其用執字。猶今日用勢字也。其用亡字。猶今日用无字也。其用賈字。猶今日用但字也。其用幾幸。猶今日用冀倖也。其用險字。猶今日用踰字也。其用縣字。猶今日用懸字也。由此等以類推。則當日通稱之名。通用之字。斷无不共喻者。然則居今日而講求奏章。亦用今日通稱之名。通用之字可矣。首尾銜決。猶橫決也。古人言直皆曰縱。言橫皆曰衡。於事之忤亂无條理者。則橫字作去聲讀。如曰橫逆。曰洪水橫流是也。此處若作橫決。亦當讀爲去聲。

〔祖有功。而宗有德。使願成之廟。稱爲太宗。〕此疏陳於文帝時。便謂文帝死後廟號。應稱太宗。足見當時風俗近古。

〔夫樹國固必相疑之勢。〕樹猶立也。於京師之外。又樹立宗室多。國勢必相疑。

〔今或親弟謀爲東帝。親兄之子。西鄉而擊。今吳又見告矣。〕親弟。謂淮南厲王長。親兄之子。謂齊悼惠王之子興居。皆謀反也。

〔如此有異。淮南濟北之爲邪。〕淮南謂上文親弟。謀爲東帝也。濟北謂上文親兄之子。西鄉而擊也。

〔非有仄室之勢。以豫席之也。〕仄室之勢。猶曰寸土半階之勢。席猶曰憑藉也。

〔動一親戚。〕古人稱父子兄弟曰親戚。

〔長沙乃在二萬五千戶耳。〕在讀如纔。猶曰僅也。

〔諸侯之地。其削頗入漢者。爲徙其侯國。及封其子孫也。以數償之。〕諸侯之地。前頗有削而入漢者。猶今云入官也。仍當移徙界址。歸入侯國境內。待封其子孫時。全數還之。

〔一二指搯。身處亡聊。〕搯集韻類篇並云牽制也。一二指搯云者。謂偶然有所指。或有所牽制也。處猶云大氏也。謂脛與指大癩。平居不可屈伸。偶然牽動。則周身大氏皆痛。甚亡聊矣。

〔斥候望烽燧。不得臥。〕斥。遠也。候。候伺也。斥候。猶今之放哨者也。

〔臣竊料匈奴之衆。不過漢一大縣。〕漢之匈奴南北二千里。東西五千里。而曰不過抵漢一大縣。此賈生閱歷之淺也。

〔陛下何不試以臣爲屬國之官。以主匈奴。〕典屬國之官。專主外國事。後蘇武嘗爲之。

〔今民賣僮者。爲之繡衣絲履。偏諸緣。〕偏諸卽牙條。今之闌干縷子之屬。近之。

〔澁以偏諸。〕偏諸。卽縷子。澁謂縫於衣之領緣也。

〔其慈子耆利〕慈子耆利，猶云溺愛貪利。

〔遂利不耳〕利不耳，卽利否耳。

〔是非其功效大驗邪〕以刑法與禮教，層層比較，勸漢帝宜學周，不宜學秦。

〔故貴大臣，定有其辜矣。猶未斥然，正以諫之也。尙遷就而爲之諱也。〕是時丞相絳侯周勃免就國，人有告勃謀反者，遂繫長安獄，故賈生以此譏之。

〔夫將爲我危〕夫猶彼也。左傳：『則夫致死焉。』亦謂彼致死也。〔故可託以不御之權〕不御之權，謂全授以權柄，不復制御之也。

〔卒破七國。至武帝時，淮南厲王子爲王者，兩國亦反。〕卒破七國，言誼策梁足以扞齊趙，淮陽足以禁吳楚，其言果應也。厲王子爲王者，兩國亦反，言誼策淮南四子爲父報仇，其言果應也。

袁盎傳：『盎兄子種爲常侍騎，諫盎曰：『君衆辱之。』』古稱尊長多曰君，自稱多曰臣，此君衆辱之，是稱其叔父曰君也。王章傳：『我君素剛。』是稱其父曰君也。秦漢閒談說之際，自稱曰臣者，不可枚舉。

龜錯傳：『巨便爲之。』猶云以暇時爲之也。

〔詔策曰：『悉陳其志，毋有所隱。愚臣竊見五帝之賢臣，明之臣，聞五帝，其臣莫能及，則自親之。三王臣主俱賢，則共憂之。五伯不及其臣，則任使之。此所以神明不遺而羣聖不廢也。』云云。又曰：『今執事之臣，皆天下之選已，然莫能望陛下清光。譬之猶五帝之佐也。陛下不自躬親而待，不望清光之臣，臣竊恐神明之遺也。』按：清光，卽才智也。莫能望，謂遠不能及也。五帝才知過於其臣，則自親政事。三王才知與臣相等，則共謀政事。五伯才知不及其臣，則以政事委任臣下。龜錯之意，以當時盜賊不衰，邊竟未安，文帝之才知既不足以濟事，而諸臣之才知反不能望文帝之清光，是臣下亦不足以備任使也。則政事必有闕遺而不舉者矣。錯自度其才知過於文帝，又遠過於在廷諸臣，隱在以五伯之佐自命，欲帝之舉國而任己也。故以對詔策中：『悉陳其志，毋有所隱。』

二語。

〔神明不遺。賢聖不廢。謂神明之所照者無遺棄之事。賢聖之所通者無廢闕之端。〕師古說非也。賢謂過人之智。聖謂通明之才。不必皆成德而後稱曰賢曰聖也。

〔錯父謂錯曰。〕「上初卽位。公爲政用事。侵削諸侯。疏人骨肉。口讓多怨。公何爲也。」錯曰。『固也。』『固也。』云者。言乃父所責固嘗。師古訓非也。

汲黯傳〔賜從軍死者家鹵獲。因與之。〕鹵獲得匈奴之財也。因與之。亦賜從軍死者之家也。

竇嬰傳〔孝景三年。吳楚反。上察宗室諸竇。無如嬰賢。〕凡與國有親戚屬籍者。亦得呼爲宗室。酷吏傳〔周陽由以宗室任爲郎。〕謂其父趙兼爲淮南王之舅。與國爲戚屬也。本傳後文〔廷辨時。〕史記曰〔俱外家宗室。〕故廷辨亦謂外宗爲宗室也。

〔所賜金陳廊廡下。軍吏過。輒令財取爲用。〕財猶曰少也。王念孫解財察財幸財留念等語。其說甚詳。灌夫傳〔夫亦持蚡陰事爲姦利。愛淮南王金與語言。〕與語言者。卽蚡爲太尉時。迎淮南王於霸上。相將之語也。

〔蚡起爲壽。坐皆避席伏已。嬰爲壽。獨故人避席。餘半膝席。〕避席者。一身去位。離席而起立也。膝席者。半身已起立。其半尙膝倚於席也。

韓安國傳〔且匈奴輕疾悍亟之兵也。至如彘風。去如收電。畜牧爲業。弧弓欺獵。逐獸隨草。居處無常。難得而制。今使邊郡久廢耕織。日支胡之常事。其勢不相權也。〕胡欺獵逐。徒以用兵爲常。漢久廢耕織。以用兵爲變。以變而支常。故輕重不鈞。

江都易王傳〔與其后成光共使越婢下神。祝詛上。〕下神。猶云降神。迎之而使來臨也。廣川惠王傳〔昭信謂去曰前。畫工畫望卿舍。〕畫望卿舍。謂作畫於望卿之室也。

〔去即與昭信從諸姬至望御所。〕前云會諸姬。謂去與昭信擊。與昭信擊望御。令諸姬皆從而觀之也。

常山憲王傳〔漢使者視憲王喪。稅自言憲王病時。王后太子不侍。〕自言訟訴也。下皆獄辭。

李廣傳〔程不識故與廣俱以邊太守將屯。及出擊胡。〕將兵屯田。胡來則出擊。二者皆邊太守之事也。

〔是時廣軍幾沒。罷歸。宋祁曰。〕浙本及越本。並無罷字。〕罷歸二字。當爲句。

〔廣從弟李蔡武帝元朔中爲輕車將軍。從大將軍擊右賢王有功。中率。封爲樂安侯。〕集韻〔率計數之名。〕凡言大率者。猶云大數也。中率。猶云中程中科。謂有一定之程課。一定之科則也。上文云中首虜率。此云中率封侯。皆謂其功合於漢家科程也。

〔大將軍弗聽。令長史封書與廣之莫府。曰。〕急詣部如書。〕廣不謝大將軍而起行。意象愠怒而就部。引兵與右將軍食其合軍出東道。〕書中所載。仍令廣從食其出東道。書若今之札飭。

李陵傳〔一日五十萬矢皆盡。即棄車去。士尙三千餘人。徒斬車輻而持之。〕愚按。徒。徒步也。棄車而徒。斬其車輻。持以爲兵也。

〔陵還太息曰。〕兵敗死矣。〕軍吏或曰。〕將軍威震匈奴。天命不遂。〕後求道徑還歸。〕天命不遂。下。當更有二語云。〕姑隱忍不死。少留匈奴。〕中下乃云。〕後求道徑還歸。〕詞意乃備。漢書多簡字簡語。往往然也。

〔期至遮虜郭者相待。〕意以入塞之際。當相聚少蘇。計數得脫歸生入者。果幾人也。

〔上海陵無救。曰。〕陵當發出塞。迺詔疆弩都尉令迎軍。坐預詔之。得令。老將生姦詐。〕孟康曰。〕坐預詔疆弩都尉。路博德迎陵。博德若將出塞。不見令。陵見沒也。〕陵之見沒。由於兵少無救。兵之少由於使路博德別出西河。遮他道。而使陵以孤軍出塞。故敗沒也。武帝至是深自悔。以爲向使待陵發出塞之時。乃令博德迎其軍而隨往。則博德必同出塞。無所施其姦計矣。事機之所以失。由於當陵未發出塞之先。預詔博德迎陵軍。致令博德上

書稽行。反疑陵不欲出。故迫陵以孤軍出塞也。陵之以無救而敗。由於博德姦詐上書。致武帝疑陵而逼令分軍各出。博德之所以能行其姦詐。由於武帝預詔。先示以疑陵之隙。此武帝所以悔也。』孟說失之。

董仲舒傳「仲舒爲博士時。下帷講誦。弟子傳。以久次相授業。」久者。爲之師。其次久者。從而受業。次久者。爲師。新來者。又從而受業。

「武帝即位。舉賢良文學之士。前後百數。而仲舒以賢良對策焉。」武帝之間。以爲作樂。即可致治。何以後世樂器雖在。而治不可復。仲舒之意。以爲欲作樂。必先興教化。欲興教化。必先疆勉行道。能行道。則治可復。教化可興。而樂可作。皆自人力主之。非天命之所能主也。武帝之間。以爲何修何飭。而後可致諸祥。仲舒之對。以爲修飭德教。則姦邪自止。而諸祥可致。若修飭刑法。則姦邪愈生。而諸祥不可致矣。中言正心正朝廷數語。是修飭之本。末言仁義禮智信。是修飭之目。致諸祥。必由於止姦邪。任刑罰。則姦邪不止。任教化。則姦邪止。於問中何修何飭。而致諸祥。最相鍼對。武帝之間。本以力本任賢對舉。以親耕籍田。爲已能力本矣。勸孝弟。崇有德。爲已能任賢矣。而以功效不獲爲疑。仲舒之對。則略力本而專重任賢一邊。以爲賢才不出。由於素不養士。下以興太學爲養士之要。大臣歲貢二人。爲選賢之要。

司馬相如傳「子虛賦『觸穹石』至『衍溢陂池』一節」子虛賦言水始終不外有力自然兩義。如穹石四句。言水之盛怒。有力澤弗五句。極言其有力。穹隆四句。言其自然。批巖二句。言其有力。臨坻二句。言其自然。沈沈二句。言其有力。瀺瀺二句。言其自然。馳波十句。皆言其自然。脈絡極分明也。并概瀨沛隆。極拂爲韻。懷歸回池。爲韻。而一韻之中。上有數句。又各自自爲韻。如汗例私自爲韻。整浥私自爲韻也。

「其南則有平原廣澤。」此絃南有平原廣澤。似最宜改獵之地。改獵。但在東西北三處。而不及南之廣澤。蓋虛實互相備。

「巖積壤縹。紆徐委曲。鬱橈谿谷。粉粉裊裊。揚施戍削。斐纖垂髻。」巖積至谿谷三句。粉粉至垂髻三句。皆下一

句用韻。

〔舞千戚〕千戚疑當作千羽。此處當用韻。不似四句乃韻者。

〔世有大人兮。在乎中州。宅彌萬里兮。曾不足以少留。悲世俗之迫隘兮。竭輕舉而遠游。〕前六句。總以輕舉遠游四字爲一賦之指。

〔登閩風而遙集兮。亢鳥騰而一止。〕以上游行。至是始止息也。壹止云者。如鳥之飛。歛然而止。

〔未有殊尤絕迹。可考於今者也。然猶躡梁父。登太山。建纛號。施尊名。〕可考於今。謂奇絕之功迹。至今猶可考見者。言自古莫盛於成周。然周亦未有奇絕功迹。猶且封禪也。豈有漢之功迹奇絕如此。尙吝於封禪者。

〔於是。大司馬進曰。〕大司馬之位號。武帝特置以寵衛霍者。

〔亦各並時而榮。咸濟厥世而屈。〕濟。猶度也。越也。並時而榮。猶當時則榮。越世則屈。絕無稱也。

〔以浸黎民。〕浸。言澤潤也。

〔猶兼正列其義。被飾厥文。〕作春秋一義。猶兼若猶復之謂也。既舉其事。猶復著之藝文。以垂後世也。

〔不已戲乎。〕猶云。不太輕視相如乎。

張騫傳〔其後烏孫竟與漢結婚。〕以下皆言漢使至西域往來不絕事。皆史記大宛列傳內之文。此錄入張騫傳不可解。又未段亦大宛傳之文。明所以伐宛之由。茲入騫傳失之。未又忽入騫孫猛云云。亦未嘗也。

李廣利傳〔於是遣水工徙其城下水空。以穴其城。〕史記作〔以空其城。〕徐廣曰。〔言空者。令城內渴乏。〕此言遣水工備至宛時徙水道之用。下文決其水源移之。乃其事也。

司馬遷傳〔不相師用。而流俗人之言。〕蘇林曰。〔而猶如也。謂視少卿之言。如流俗人之言。而不相師用也。〕燕刺王旦傳〔王曰。〕老虜曹爲事。當族。〕老虜曹。謂上官桀輩也。且怨桀等謀事不減。自取滅族也。

廣陵厲王胥傳〔女須泣曰。〕孝武帝下我。〕下我云者。神降而見於我前也。

〔歌曰。〕千里馬兮。駐待路。張晏曰。二與亭驛。待以答詔命。二與。廷尉大鴻臚也。亭驛。爲駐於驛館也。此以千里馬喻二卿也。

國藩按。此語極狀其急。言命在須臾。不能少待之意。不必指二卿也。

昌邑哀王傳。〔賀曰。〕城門與郭門等耳。且至未央宮東闕。遂曰。昌邑帳在是闕外馳道北。且至。將至也。是闕遂遙望東闕而指稱之辭。下文曰到者。至闕也。

嚴助傳。大爲發興。遣兩將兵誅閩越。淮南王安上書諫曰。淮南王安收養文士。著淮南子。亦猶呂不韋好客養士。著呂覽一書也。此篇蓋亦入公輩所爲。陳義甚高。搗辭居要。無淮南子允蔓之弊。班史載入助傳中。與主父偃徐樂嚴安賈捐之諸篇并列。以見務廣窮兵之害。均爲有國者所當深鑒。後世如蘇子瞻代張方平諫用兵書。亦可與此數篇方軌并駕。

〔天下攝然〕攝者。收斂之意。攝然猶安然也。

〔輿輻而險領〕領卽嶺字。自貴州廣西廣東福建浙江。皆共此嶺。古嶺內爲中國。嶺外爲百越。今之嶺內爲湖南江西浙江三省。嶺外則黔廣閩浙五省。

〔暴露中原。露積山谷〕暴露謂骨。露積謂血。

〔其入中國。必下領水〕今湖南之郴州河。江西之贛州河。皆領水也。此領水當指建昌河廣信河言之。故下文言至餘干界中。

〔而中國之人。不能其水土也。〕不能。卽不耐也。猶今言不服水土。

〔陛下若欲來內處之中國〕來。同徠。內。同納。謂招徠收納之也。於是山東之難始興。山東之難。謂秦二世時陳涉等作難。皆在太行山以東也。

〔如使越人蒙死徵佗〕蒙死。猶冒死也。徵佗。越人自知不能勝中國。而徵求幸勝也。

〔使中大夫玉上書言事聞之。朕奉先帝之休德。〕聞之。屬上句讀。言既聞之矣。

〔陛下故遣臣助告王其事。王居遠事薄。遠不與王同其計。〕言王所居既遠而漢廷之事又薄。遠不及與王往反熟計以抵和同也。

〔輒遣使者罷屯。毋後農時。〕後農時。謂以兵事稽之而失農時也。急罷屯不稽矣。

賈捐之傳〔元帝初元元年。珠崖又反。發兵擊之。諸縣更叛。連年不定。上與有司議大發軍。捐之建議以爲不當。上使侍中駙馬都尉樂昌侯王商詰問捐之曰。〕珠崖內屬爲郡久矣。今背叛逆節而云不當擊。長蠻夷之亂。虧先帝功德。經義何以處之。〕

〔捐之對曰。〕賈君房在當世有文名。故楊與曰。〔君房下筆。語言妙天下。〕昔亡弟愍烈公溫甫好語言妙天下五字。尤好讀麗珠崖對。大抵西漢之文氣味深厚。音調鏗鏘。迥非後世可及。固由其措辭之高。胎息之古。亦由其義理正大。有不可磨滅之質。驗也。如此篇及路溫舒言德緩刑書。非獨文辭超前絕後。即說理亦與六經同風已。

〔民賦四十丁男三年而一事。〕本一年供役一次。因天下民多。故三年僅供一役也。事卽役也。

〔父戰死於前。子鬪傷於後。女子乘亭鄣。孤兒號於道。〕古文中五字句極少。此連用四句。聲調悲壯。可歌可泣。亭鄣。邊塞屯宿之所。猶今城上之更柵也。

〔欲驅士衆擠之大海之中。〕珠崖。卽今之瓊州也。故曰〔擠之大海之中。〕

〔與曰。縣官嘗言。與瘡薛大夫我易助也。〕我易助云者。謂天子既許我愈薛大夫。是天子已器我矣。若更得旁人一言之薦。則天子必從。故易助也。

楊敞傳〔真人所謂。鼠不容穴。銜窠數者也。〕言鼠則不見於穴矣。而又銜窠數。則愈以自妨。終不爲世所容耳。〔蒙富平侯力。得族罪。毋泄譚話。令太僕聞之。亂絲事。〕謂富平既不肯爲我廢前語。則當直言證實我必得族

罪矣。但此次我戒飭富平之語，毋得再泄。令太僕聞之，更與前事參伍相亂，彌增罪狀也。毋泄憚語云者，謂此次戒飭富平勿證實之語，非謂前番奔車抵殿門，昭帝崩之語也。

〔車孫劉田王楊蔡陳鄭傳贊〕車千秋傳。始元六年，詔舉國舉賢良文學，問民所疾苦。於是鹽鐵之議興焉。傳未明鹽鐵之議云何，故於贊申明之。

〔成同類長同行〕同類者，則順成之。同行者，則比長之。長猶「長君之惡」之長。

楊王孫傳〔且夫死者，終生之化〕終生，猶曰畢生。曰一生，曰終身也。

翟光傳〔召內泰壹宗廟，樂人鞞道牟首，鼓吹歌舞，悉奏衆樂。〕泰壹宗廟，樂人祀泰壹神之樂人，及祭宗廟之樂人也。召樂人而內之，由鞞道而同遊牟首之地，以鼓吹歌舞悉奏衆樂也。牟首，孟康說是也。

〔中二千石，治莫府冢上〕於冢上開莫府，典治葬事也。

金安上傳〔上拜涉爲侍中，使待幸綠車，載送衛尉舍。〕綠車，皇孫之車也。待幸常設以待臨幸，不俟倉卒再駕也。待幸之車非一，有天子之乘輿，有太子之車，有皇孫之綠車，此以待幸之綠車，載送金涉，欲其速至，且不榮寵也。

〔時王莽新誅平帝外家衛氏，召明禮少府宗伯鳳入，詭爲人後之誼，白令公卿將軍侍中朝臣並聽。〕白令並聽云者，莽白於太后，令公卿朝臣並聽鳳說也。

趙充國傳〔充國以爲狼何小月氏種，在陽關西南，孰不能獨造此計，疑匈奴使已至羌中，先零罕邅迺解仇作約，到秋馬肥，變必起矣。宜遣使者行邊兵，豫爲備救，視諸羌，毋令解仇，以發覺其謀。於是兩府復白遣義渠安國行視諸羌，分別善惡，安國至，先零諸豪三十餘人，以尤桀黠，皆斬之。縱兵擊其種人，斬首千餘級，於是諸降羌及歸義羌侯楊玉等，恐怒亡所信鄉。〕王曰：「恐怒，宜作怨怒，謂怨怒漢吏，不親信，而歸嚮之也。」國藩按：恐怒者，且恐且怒也。信者，投誠之謂。嚮者，向慕歸義之謂。諸降羌，本欲歸順於漢，今漢使不分善惡，一切皆斬之，降羌

且恐且怒。靡所適從。故曰亡所信嚮也。充國此次使視諸羌。本重在分別善惡。無令其混合爲一。乃安國不分善惡。不分降者與逆者。一概斬之。此所以激諸羌背畔也。充國之心。總不欲其混合爲一。惟在釋罕犂先零。堅持此議。始終不改。故深以安國此行不分善惡。多殺激變爲咎。下文充國數曰。『承相復白。遣安國。竟沮敗羌。』卽歸咎於此役也。又大犂小犂曰。『得亡效五年時不分別人而并擊我。』亦卽指此役之不分別善惡也。

〔充國計欲以威信招降罕犂及劫略者〕罕。一種也。犂。一種也。劫略者。他小羌種之爲先零所劫略而俱畔者也。

〔此殆空言。非至計也。〕非至計。與東方朔傳『非至數也』之至同。

〔有通谷水草〕通谷。謂窮山深谷中。往往有徑路。與匈奴相通也。

〔將軍不念中國之費。欲以歲數而勝。〕欲以歲數而勝云者。謂決勝之期。欲以歲計。不特以月計也。故下充國復奏曰。『恐國家之憂。繇十年數。』謂且以十年計。尙不止於歲數而已。

〔燉煌太守快。將二千人〕快。太守之名也。

〔將軍其引兵便道西並進。雖不相及。使虜聞東方北方兵並來。〕雖不相及云者。謂武賢快等軍。從北而南。充國兵從東而西。兩路兵雖不能同時相會聚。但使虜聞聲震懼。亦自佳也。

〔迺上書謝罪。因陳兵利害曰。〕『臣竊見騎都尉安國』以下數句。解說難明。蓋前安國復使視諸羌時。天子曾有賜書告罕犂以不誅罕。故充國使雕庫邊告犂。亦許以不誅。是推廣天子告罕之意也。故曰『罕犂之屬。皆聞知明詔。』

〔六月戊申。奏。七月甲寅。璽書報。從充國計焉。〕戊申至甲寅。凡七日。長安至金城。往返三千餘里。

〔會得進兵璽書。中郎將邛邛。使客諫充國曰。〕『誠令兵出破軍殺將。以傾國家。將軍守之可也。卽利與病。又何足爭。』邛意以兵出而果有破軍殺將傾國家之禍。則將軍固宜守不出兵之議。所爭者大。所全者多。猶之可

也。今則爲利爲病。所差無幾。又何足爭。

〔竟沮敗完〕諸完本有意投誠。因安國不分善惡而執殺之。諸完遂以亡所信嚮而背畔。故曰沮敗。

〔倅馬什二就草〕就草。猶今之出青。今官馬以四月出察哈爾。擇水草處牧放。謂之出青。

〔今大司農所轉穀至者。足支萬人一歲食。謹上田處及器用簿。〕王曰。『今大司農。今當作令。太平御覽引此。正作令。國藩按。屯田自有穀。不必更令大司農轉穀矣。今字未誤也。蓋謂目今已經轉至之穀。不復煩大司農轉矣。謹上田處及器用簿。謂所由之地。及應製之器用。分爲二簿呈上也。』

〔又大拜小拜前言曰。〕我告漢軍。先零所在。兵不往擊。久留得亡。效五年時。不分別人。而并擊我。』劉奉世曰。『本始年未伐先零。此即元康五年。未改神爵以前。義渠安國召誅先零之時。所謂無所信嚮。即是。』國藩按。元康五年。改元神爵。羌人不深悉。故至今尙以五年呼之也。安國不分別善惡。召誅先零而執殺罕罕。故大拜有此言。

〔畔還者不絕〕謂罕罕莫須各種背畔而來歸於漢者。往往不絕也。

〔燧火幸通。執及并力〕并力。疑當爲力并。營壘相次。燧火相通。則聲執聯絡矣。故曰。『既聯絡。則衆力合并也。』

〔不足以故出兵〕王曰。『故上宜有疑字。漢紀正作不足。以疑故出兵。』國藩按。此言大小拜雖有得亡效五年之疑詞。然有臨衆往宣明諭。終當亡他心。不必因此小故。而出兵也。不著疑字亦可。

陳湯傳。『而康居副王。抱閼將數千騎。寇赤谷城。東殺略大昆彌千餘人。毆畜產甚多。從後與漢軍相及。』漢軍從北道入。赤谷即西行。不由赤谷之東路。故經過時不與康居副王之兵相遇。迨漢兵既西去。而康居副王之兵亦還。恰尾漢兵之後。故得相及也。

〔騎步兵皆入。延壽湯令軍聞鼓音。皆薄城下。〕騎兵。即百餘騎。往來馳城下者也。步兵。即夾門魚鱗陳者也。騎

步兵皆入。則城外無郵支兵矣。故漢兵遂薄城下。

〔夜過半木城窠。中人卻入土城。乘城呼。時康居兵萬餘騎。分爲十餘處。四面環城。亦與相應和。夜數犇營不利。輒卻。平明四面火起。吏士喜。大呼乘之。〕中人。郵支兵也。乘城而呼者。欲助軍威。亦以見其譁然不整也。康居兵與之相應和者。所以戲之。明其助漢也。〔夜過半木城窠。〕與上文〔夜數百騎欲出。〕同爲一夜也。〔平明火起。〕卽上文云。〔發薪燒木城。〕者也。

段會宗傳〔總領百蠻。懷柔殊俗。子之所長。愚以無喻。劉放曰。〕此言總領百蠻。懷柔殊俗。是子之所長。愚無以相喻也。〔國藩按。谷永之意。以爲邊事雖子之所長。而朋友相戒。則以毋求奇功爲善。〕

〔終更卽還。〕謂三年之期。得代卽速歸也。

〔會宗曰。〕豫告昆彌。逃匿之爲大罪。卽飲食以付我。傷骨肉恩。故不先告。〔言豫告昆彌。若漏洩。使番邸得以逃匿。則昆彌有負漢之罪。若昆彌飲食漢兵。助誅番邸。則昆彌又傷骨肉之恩。是使昆彌進退爲難也。故不先告。于定國傳。〕後貢禹代爲御史大夫。數處駁義。定國明習政事。率常丞相議可。〔議可者。天子可其議也。丞相與御史大夫駁議不合。天子可丞議。而不從御史大夫也。〕

〔民多冤結。州郡不理。連上書者。交於闕廷。〕王曰。〔連宋祁說作遠是。〕國藩按。作遠而下無方字。亦爲不詞。韋賢傳〔諫詩云。〕致冰匪霜。致隊靡嫚。瞻惟我王。昔靡不練。〔謂致冰豈不由於霜。致隊豈不由於嫚。我王在昔。應亦聞歷旣多。知之熟矣。〕

〔黃髮不近。〕言黃髮之人。今豈不近在目前乎。蓋孟隱以自謂也。

〔懼穢此征。〕恐玷好王朝。將於此而遂行也。

〔在鄒詩。〕嗟我小子。豈不懷土。云云。所以輕去鄉里。而絕祖考者。將以寤楚王而反朝也。至於夢中與王違長。於是法王之終不悟。旣不能諫正君王。又忍於輕絕祖禰。二者並傷。所以涕泣也。

章玄成傳「上欲感風憲王，輔以禮讓之臣。」感風憲王，欲其仍安宗藩之分，不得覬覦儲貳也，故以禮讓之臣輔之。

「凡祖宗廟在郡國六十八，合百六十七所。而京師自高祖下至宣帝與太上皇悼皇考各自居陵旁立廟，並爲百七十六。」京師七帝，並太上皇悼皇考，凡九廟。合郡國之百六十七所，故爲百七十六也。

魏相傳「相獨恨曰：『大將軍聞此令去官。』」獨恨者，相私自揣懼，非必對人爲此語也。

丙吉傳「豈宜褒顯，先使入侍。」朱子文曰：「豈字，於文爲悖，恐是直字。」錢大昕曰：「豈宜者，猶言宜也。古人語急，以豈不爲不，不可爲可。此嘗言豈不宜，亦語急而省文耳。」王念孫曰：「豈猶其也。言有美材如此，其宜褒顯也。吳語曰：『天王豈辱裁之。』燕策曰：『將軍豈有意乎。』史記曰：『我豈有所失哉。』豈字並與其同義。」國藩按：說文「豈，一曰欲也。登也。」段氏以爲嘗作欲登也。欲登者，欲引而上也。凡言豈者，皆庶幾之詞。言幾至於此也。故曰欲登，愚竊以爲豈字古義。段氏之說近之。今京師但語謂事之相去甚近者，則曰「穀得上」，其相去遠者，則曰「穀不上」。豈字詞意，蓋在穀得上穀不上之間，未定之詞也。亦重難之詞也。明知其近於此矣。然審重而未敢深信，則曰豈。周漢人文字曰豈者，往往然也。曾子問周公曰：「豈不可。」豈不可者，云明知其不可而姑爲審重之詞也。此丙吉曰：「豈宜褒顯，先使入侍。」豈宜褒顯云者，明知其宜褒顯，而姑爲審重之詞，使大將軍裁決之也。如大將軍果以爲可，則先使入侍，尙不遽卽尊位，此外古人文字，稱豈皆有重難未定之意。後人文字稱豈則有相反之意。若今但語之難道，是於古人詞氣不盡合矣。

「此馭吏邊郡人，習知邊塞發犇命警備事。」犇命，犇走之極急也。發犇命，若今言發急足警備，言邊塞有警告戒嚴也。事猶狀也。此馭吏習知其狀也。犇命與亡命字詞意略同，亡命謂逃亡極急，今但語謂犇走之極急者，或曰「不要命」，亦其類也。不必作命令解矣。左傳「一歲七奔命」，亦奔走救應之義。

「馭吏因隨驛騎至，公車刺取。」公車，因公事而馳至京師者，謂之公車。其所戾止之地，亦謂之公車。漢制衛尉

屬官。有公車司馬。天下上事及闕下凡所徵召。皆總領之。此邊告警備。亦上事之屬也。

京房傳「唯陛下毋難還臣而易逆天意。」毋以還臣爲難。而以逆天意爲易。難謂遲疑不決。易謂不足畏也。

趙廣漢傳「其尉薦待遇吏。殷勤甚備。」尉薦。猶尉藉也。尉者。以大尉繒從上按下也。薦草之深厚者。可以爲席。從下藉上也。皆體貼人心。曲意安撫之詞。如淳說近之。師古以薦爲薦達。非也。韓延壽傳云「引見尉薦。郡中翕然。」胡建傳云「尉薦士卒。得其歡心。」皆無薦達之意。

「京兆尹趙君謝兩卿。無得殺質。」質。蘇回也。兩卿。劫回之二人也。

「又素聞廣漢名。卽開戶出下堂叩頭。」廣漢立庭中。賊在堂內。丞叩堂戶曉賊。故賊卽開戶下堂。就庭中向廣漢叩頭也。

「不詣屯所。乏軍輿。賢父上書訟罪告廣漢。」乏軍輿。謂以乏軍輿之律罪之也。訟罪。訟理其子之罪。告廣漢。告禹之劾賢。乃廣漢風使之也。

「又坐殺賊不辜。鞠獄故不以實擅。斥除騎士。乏軍輿數罪。」賊殺不辜。謂殺榮畜也。斥除騎士。謂劾蘇賢也。廣漢於摧辱魏相之外。又坐此數罪。

韓延壽傳「百姓遵用其教。賣偶車馬下里僞物者。棄之市道。」百姓遵延壽之教。市中夙賣偶車馬等物者。至是無人購買。故棄之也。

「人救不殊。」殊。死也。不必身首絕。而後爲殊。

張敞傳「盜賊並起。至攻官寺。」寺者。法地也。官禁之內。謂之省寺。百姓治事之署。謂之官寺。自浮屠入中國。凡藏置佛經之地。亦謂之寺。蓋竊取法地之意而名之。

「時時越法縱舍。有足大者。」有足大者。與有足多者。有足稱者。詞意相類。

「敝使主簿持教告縣曰。」五日京兆。竟何如。冬月已盡。廷命乎。師古曰。「言汝不欲望延命乎。」立春以

後則不復行刑。惡意既以斂爲五日京兆。不足復案事。又以冬月僅餘數日。終不能復置己於死。惡懷此二端。故了不復畏斂也。斂竟置之死。臨刑之際。故爲二語告舜曰。『五日京兆。竟何如。冬月已盡。延命乎。』意以汝料我五日京兆。不復能案事。今竟能案事否。汝料我冬月將盡。不能復行刑。今竟能延命否。蓋作詰問之詞。以鑄誚之也。師古之解未當。

王尊傳〔少孤。歸諸父。〕歸。猶投也。若歸誠。歸命。歸義。歸罪之歸。

〔問詔書行事〕行事。猶故事。謂已往之事。若今言成案也。詳見王氏念孫解陳湯傳。

〔一郡之錢。盡入輔家。然適足以葬矣。〕宋元人詩詞。往往用『斷送』字。今世俚語有『葬送』字。此云適足以葬。謂彼之多錢。適足以斷送其身命乎。

〔御史大夫中。奏尊暴虐不改。外爲大言。倨嫚嫺上。威信日廢。〕暴虐不改。謂當春而繫者千人也。外爲大言。謂尊自奏強。不陵弱四語。是大言誇謾也。倨嫚嫺上。謂對放之詞也。威信日廢。謂許仲家殺人。吏不敢捕也。

〔及任舉尊者。嘗獲選舉之事。不可但已。〕是時王氏用事。尊爲王鳳所薦。罪尊過重。則鳳之坐罪。亦不得輕。冀朝廷投鼠忌器。所以深救尊也。

孫寶傳〔明府素著威名。今不敢取釋季。當且闔閭。勿有所問。卽度釋季而謹他事。衆口謹譁。終身自墮。〕度。越也。若一無所問。吏民亦不敢謗毀。若有所問。則當先其大者。後其小者。必自釋季始也。儻越釋季而問他事。則吏民謗毀。衆口謹譁。終身剛直之聲。以此一事而墮壞矣。

何並傳〔令騎奴還至寺門。拔刀剝其建鼓。〕建鼓。謂高懸之鼓也。莊子『若負建鼓而求亡子』是也。

蕭望之傳〔令天下共給其費。〕共。讀曰供。上文既有『天下』字。則此共字。不應又訓作同共也。

馮野王傳〔收捕並不首吏。〕首之云者。猶誠心投向之謂。曰首塗。謂誠心投向。將趨前塗也。曰首公。謂誠心投向。治公家之事也。曰首罪。誠心投向。自歸於司敗也。此曰首吏。謂誠心投向。從吏收治也。

東平思王傳「治石象瓠山立石。束倍草并祠之。劉放曰。『立石。屬上句。』」國藩按。謂象瓠山之立石也。并祠云者。謂瓠山所有之石。與宮中所治之石。二者并祠祀也。

匡衡傳「衡上疏戒妃匹。勸經學威儀之則。」三代以下。陳奏君上之文。嘗以此篇及諸葛公出師表爲冠。獮懿篤厚。直與六經同風。如情欲之感。無闕於儀容。晏私之意。不形乎動靜。等句。朱子取以入詩經集傳。蓋其立言爲有本矣。

王商傳「商部屬按問」部屬。謂行部所屬。

「宜以爲後」猶云。『且徐觀後效』也。

「會日有蝕之。大中大夫蜀郡張匡其人佞巧。上書。願對近臣。陳日蝕咎下朝者。」朝者。卽近臣。匡願對近臣面陳。故令近臣受其所陳對之辭也。

史丹傳「臣竊戒屬毋澆泣」屬者。謂進見之頃也。

薛宣傳「戒曰。『贛君至丞相。我兩子亦中丞相史。』」中丞相史。謂堪爲丞相史也。禮曰。『用器不中度。幅廣狹不中量。木不中伐。禽獸魚鼈不中殺。』中義皆同此。中猶合也。

「責義不量力」謂責人以義。而不量其力之不逮。

「宣考績功課。簡在兩府」簡。策記也。猶今考功稽勳兩司記歷官功過也。

「不相救丞化」救。戒也。丞。輔翊也。謂宣父子不能相戒。輔翊聖化。

「廷尉直以爲律曰。『鬪以刃傷人。完爲城旦。其賊加罪一等。與謀者同罪。』詔書『無以詆欺成罪。』傳曰。『遇人不以義而見涼者。與瘠人之罪鈞。』惡不直也。」鬪則曲直均。賊則曲專在傷人者。故同一傷人也。鬪則爲城旦。賊則加罪一等。無以詆欺成罪。謂罪不至此。而以詆欺強入人罪。瘠亦涼也。見涼與瘠人之罪同。論起事之曲直也。先引律。次引詔書。次引傳。後斷本案。應此三者。

朱博傳「吏民數百人，遮道自言。」自言，謂自訟理。若今赴訴呈狀也。外戚傳有「王翁須自言。」

「杖拭用禁，能自效不。」杖拭，猶灑被。謂棄瑕錄用也。今人亦多用照拂字。

翟方進傳「居官不煩苛，所察應條輒舉，甚有威名。」察吏有不法，應科條者，輒即舉法，無所依違，徇隱也。

「時慶有章，劾自道行事，以贖論。今尙書持我事來，當於此決。」劾，自道行事，猶今自行檢舉也。以贖論，謂已所自劾之事，其罪合贖，猶今之功罪准抵銷也。尙書持我事來，當於此決，謂即在甘泉宮定決也。尙書猶今之內閣票擬也。

「前我爲尙書時，嘗有所奏事，忽忘之，留月餘。」謂此等小事，疾遲無定，多有忘去，滯留月餘，不決遣也。今此自劾之事，尙書難當，即日持來決遣，然尙書或偶忘之，今日不決，亦未可知。言此以見己有犯過失，甚微薄也。

「豫自設不坐之比。」謂慶自言以贖論也。

「又暴揚尙書事，言遲疾無所在。」謂慶言忽忘之，留月餘，意謂小事遲疾無定也。

「虧損聖德之聰明，奉詔不謹，皆不敬。」虧損聖德之聰明云者，謂贖不贖當斷於聖心，不應豫自擬於不坐也。奉詔不謹云者，謂應奏之事，而忘之月餘也。此二條皆不敬。

「後承相宣以一不道賊，不道賊，謂誥商也。」

「欲必勝立威。」必勝者，謂慶劾方進，方進亦劾慶以求勝，勦劾宣，方進助宣勦勦以求勝。

「以主守盜十金，賊殺不辜。」二者皆死罪，義以深文誅立，不必實有其事也。

「設令時命不成，死國埋名。」埋，猶死也。謂死於國事，埋於功名也。

谷永傳「二而同月。」謂黑龍與日食同，九月星隕，與日食同二月也。

何武傳「服罪者爲虧除，免之而已，不服極法，奏之抵罪，或至死。」謂服罪者，則滅除其罪狀，僅令免官，不服者，則盡法處治之也。

〔有所舉以屬郡〕謂囚徒中審擬不當。有所舉發。仍令太守更自平反也。

王嘉傳〔徵收殺之。其家自寃。〕自寃。謂自以爲寃抑。而更訟理之。猶朱博傳中之「自言」也。

〔孝宣皇帝愛其良民吏。〕民吏。猶云民牧。良民吏。謂民吏之良者。

〔暴平其事。必有言當封者。〕暴平其事云者。謂暴露其事。而使其在廷諸臣共平決之也。廷臣既多。故必有言當封者。嘉意不重。爲天下分咎。重在宜暴露其事。蓋賢本無章奏可暴露也。

揚雄傳〔反離騷辭曰。〕淑周楚之豐烈兮。超旣離虜皇波。〕淑。善也。雄自謂襲先人之善慶。故云周楚豐烈。離。歷也。謂己遨遊於嶠江之邊。周歷此大波。同投文於下遊。而弔屈原也。

〔鳳皇翔於蓬階兮。豈鴛鴦之能捷。騁驂騑以曲躓兮。躓驪連蹇而齊足。〕階。水中邱。蓬階。謂枉階之生蓬茅者。鳳皇宜翔於千仞名山。今不幸而翔於蓬階。則會不得與鴛鴦爭捷。驂騑宜騁於天衢。今不幸而騁於曲躓。則且與躓驪齊足矣。解鳳皇二句。應晉說並誤。

〔固不如變而幽之離房。〕變。大徐以爲變積如辨。蓋有分劈之義。謂不如分散衆香而幽之。使不揚也。

〔鸞皇騰而不屬兮。豈獨飛廉與雲師。〕本欲留日反縱日使速逝。雖鸞皇亦追之不及。而飛廉雲師無論已。不屬。謂追不及也。

〔甘泉賦廼搜搜索糶。皋伊之徒冠倫魁。〕徒冠倫魁云者。謂同爲皋伊之徒。而更選其冠。同爲皋伊之倫。而更遴其魁也。

儒林傳〔詣太常。得受業如弟子。一歲皆輒課。〕謂太常所擇之弟子。若干人。與郡國所察。令其計偕之受業者。若干人。皆每歲輒課也。

〔卽有秀才異等。輒以名聞。〕俟不次遷擢。又不僅以爲郎中也。

〔其不事學若下村。及不能通一藝。輒罷之。而詩詣能稱者。巨謹按詔書。律令下者罷之。〕謂罷黜不復得爲博

士弟子也。詔書本命予博士弟子。故宏奏自諸能稱者以上。皆遵詔書置弟子。及如弟子者兩等人之事。自「臣謹案詔書」以下。則又因詔書所言而推廣之也。

〔比二百石目上。及吏百石。通一藝目上。補左右內史大行卒史。〕師古曰。『左右內史。後爲左馮翊右扶風。而大行爲大鴻臚也。』

〔比二百石以上。及吏真百石者。此兩項人之通一藝者。其遷擢同也。〕右內史後更名京兆尹。左內史後更名左馮翊。主爵中尉。後更名右扶風。師古誤也。

〔比百石以下。補郡太守。卒史皆各二人。〕比百石以下。亦宜有通一藝以上句。文簡省也。皆各二人。謂內史之卒史。大行之卒史。郡太守之卒史。皆各二人也。

循吏傳「簿書正。以廉稱。」簿書正。當是馮翊之屬官。其職主簿書者也。漢制廷尉之屬官有正。南北軍之屬官有正。則三輔之屬官。或亦有丞有正也。霸所補卒史。無專掌。故以署簿書正之職也。

〔米鹽靡密。〕靡密。謂纖靡而周密也。史記天官書云。米鹽凌雜。謂雜亂無敍次也。此用其語而謂其有條理。〔今去不得陽狂。恐知身死爲世戮奈何。〕言既不得去而陽狂。又恐爲人知。徒然身死爲世戮辱也。

〔令口種一樹榆。百本。五十本。一畦。〕家二母。五雞。〔榆。蔥。韭。足供一口。雞。足供一家。〕

酷吏傳「匈奴素聞郅都節舉邊。爲引兵去。」舉邊。猶云舉家舉室。盡邊之人。皆爲引去也。〔至晚節事益多。吏務爲嚴峻。而再治加緩。名爲平。〕加緩。猶孟子加少加多之謂。言早歲酷急。晚節寬緩。遂得其平名。爲平者。當世號爲公平也。

〔王溫舒等後起。治峻。〕謂其治較禹更嚴峻也。

〔少溫籍。縣無遺事。〕溫籍。讀曰蘊籍。遺事。謂廢失不治之事。

〔縱至掩定囊獄中。重罪二百餘人。〕掩。謂出其不意。而突入掩之也。

〔至冬楊可方受告緝。縱以爲此亂民。〕部吏捕其爲可使者。受告緝云者。民有告人不出緝者。楊可受其辭也。部吏部勒胥吏。捕爲楊可所使之役也。

〔其治米鹽事。小大皆關其手。自部署縣名曹實物。〕名曹。謂諸曹掾史之名。手自疏記實物。謂諸官物由曹史經理者。若鹽鐵之類。實物。史記作寶物。

〔今縣官出三千萬。自乞之。何哉。〕謂今此三千萬。即使縣官出此錢給與之。亦何不可之有。

〔通往就獄。〕光欲延年歸誠投己。卻爲道地。惡延年之飾詞拒己。故使之就獄也。

〔於是覆劾延年闕內罪人。〕闕內謂失闕而內入之也。王嘉傳云。坐戶門殿失闕免。

〔以結延年。坐怨望。非謗政治。不道棄市。〕怨望。謂徵爲左焉翊不果而憾。一也。坐察吏不實。貶秩而笑。二也。非謗。謂誚黃霸一也。譏壽昌二也。義所上十事。不出此等矣。

〔賞親閱見十置一。〕十置一。謂十人之中。才一人脫免。置不問也。

〔賞所置皆其魁宿。〕所置。即上文所謂十置一者也。魁宿。謂渠魁宿姦也。宿魁黃之。善家子之失足。脇從者亦黃之。故曰『皆黃。』

〔甘耆姦惡。〕甘耆云者。猶云欲得而甘心也。

游俠傳〔先是黃門郎揚雄作酒箴以諷諫成帝。〕揚子雲作文無一不摹仿前哲。傳稱其仿論語而作法言。仿易而作玄。仿凡將急就而作訓纂。仿虞箴而作州箴。仿相如而作賦。仿東方朔而作解嘲。姚惜抱氏又謂其諫不受單于朝。仿諫伐韓。長楊賦仿難蜀父老。是皆然矣。余獨好其酒箴。無所依傍。蘇子瞻亦好之。嘗取爲子雲諸文之冠。

佞幸傳重賢〔質性巧佞。翼姦以獲封侯。〕孫寵息夫躬誣東平王本爲作姦。而賢扶翼之。三人同封侯。故云翼

姦獲封也。

匈奴傳「於是匈奴得寬復稍渡河南與中國界於故塞。」故塞在河南蒙恬前放河南地以河爲塞凡河套以內皆秦適戍所居之地也。至是適戍復去故匈奴得南度入河套內仍以故塞爲界。

「於是說教單于左右。疏記以計。識其人衆畜牧。」左右單于之隨侍者也。疏記說教之分條記事也。計。計簿也。人衆畜牧以計簿識其數目也。

「其親豈不自奪溫厚肥美齋送飲食行者乎。」以溫厚之衣。齋送行者以肥美之品。飲食行者。詰漢俗未嘗不貴壯而賤老也。律飭胡巫言。先單于怒曰。『胡故時祠兵。常言得貳師以社。』巫者。往往託神言以感人。故託爲先單于之言。欲殺貳師以祠社。

「雖空行空反。尙誅兩將軍。」謂誅虎牙將軍田順。祁連將軍田廣明也。

「固已犁其庭。」犁。讀曰務。務。刺也。劃也。犁庭。猶云剗刃匈奴之庭也。

「三垂比之懸矣。」三垂。謂東西南三邊。比之北狄。相去懸絕。

「因以兵迫脇。將至長安。」將至者。挾以俱至也。

西南夷傳「皆棄此國而關蜀故徼。」謂以蜀之故徼爲關閉而塞之。不復通五尺之道也。

「今日長沙豫章往水道多絕難行。」多絕。謂往往隔絕。如湘灘之閒。當時無李渤之斗門。卽隔絕也。

「誠目漢之強。巴蜀之饒。」漢強則夜郎畏威。巴蜀饒則夜郎貪利。

「會越已破漢。八校尉不下。」不下。謂八校尉擊且蘭而不能下也。適有郭昌衛廣之兵。因並擊且蘭。

「漢王始首箠。」首箠。猶云擣箠。言漢至是始內擣也。師古失之。南粵傳「凡三輩。上書謝過。皆不反。」不反。謂漢留之而不遣也。

「立明王長男粵妻子。術陽侯建德爲王。」明王長男者。言嬰齊之嫡子也。粵妻子者。言其母家在本國。異於中

國。繆氏女也。衛陽侯。其封邑。建德其名。

〔故其校司馬蘇弘得建德〕故字疑衍文。

閩粵傳〔因立餘善爲東粵王〕東粵已舉國徙江淮之間。其地空虛。故復立餘善爲東粵王。

〔及故粵建成侯敖與繇王居股謀〕繇王居股。當是繇王丑之後。傳中漏未敘明。居股後封爲萬戶侯。則是粵閩亦比於內諸侯。兩粵皆虛矣。傳中亦漏未敘明。

朝鮮傳〔朝鮮王滿燕人〕滿姓衛。朝鮮自箕子後傳四十餘世。至準始稱王。衛滿攻破準而自王也。

〔獨左將軍并將戰益急。恐不能與。〕不能與。猶『易與耳』之與。

西域傳〔其南山東出金城。與漠南山屬焉。〕南山中隔大沙漠。度漠又數千里。始抵漠南山。疑不屬也。

〔從鄼善傍南山北波河西行。至莎車爲南道。〕南山即今云哈朗歸山。尾莽依山。

〔自車師前王廷。隨北山波河西行。至疏勒爲北道。〕北山今云騰格里山。即天山也。

〔都護治烏壘城〕烏壘城。在今哈喇沙爾之西。地名策特爾。

〔精絕國王。治精絕城。〕今喀喇沙爾之正南。不過四五百里。即大戈壁矣。漢精絕國在烏壘之正南二千七百餘里。意漢時固無戈壁。抑度戈壁而南。在今青海之西北與。

〔上廼以烏孫主解憂弟子相夫爲公主。置官屬侍御百餘人。〕解憂同母弟之子。名相夫者。姪從姑也。

〔漢立其弟末振將代。時大昆彌雌栗靡健。〕健。強盛也。亦猶上文云大昆彌弱。師古注曰。弱幼小也。

〔國中大安。和翁歸靡時。〕和翁歸靡時爲句則甚不詞。和當爲如字之誤也。

〔雖不指爲漢。合於討賊。〕合於討賊云者。謂合於春秋討賊之義。匈奴能爲其君報仇。故褒之。大祿寺不能獲衛其君。故貶之。漢軍破城。食至多。然士自載。不足以竟師。言破車師城。因敵之糧。其食本至多。然苦於道遠。士卒自載者無多。請塗未竟。而糧已竭。適者。以縛馬書。徧視丞相御史二千石。諸大夫。即爲文學者。縛馬書。即軍侯弘

所上之書也。

〔匈奴使巫埋牛羊所出諸道。及水上以詛軍單于遺天子馬裘。常使巫祝之縛馬者。詛軍事也。〕引牛羊詛軍馬裘巫祝二事。以明縛馬。亦不過以詛軍而已。上文或云句馬。或云不祥。或云見疆。皆非也。

〔大鳩臚等。又讖欲募囚徒。送匈奴使者。明封侯之賞。以報忿。〕募人送使以還匈奴。若所募之人不辱命。則歸來宜受封侯之賞。漢與匈奴本積忿怨。是以封侯之賞報忿也。

〔郡國二千石。各上進畜馬方略。補邊狀與計對。〕補邊狀者。繕修邊備之狀也。有能進畜馬之方略。及補邊之狀者。郡國上其名於京師。

外戚傳〔太后安能殺吾母。而名我。我壯卽爲所爲。〕爲所爲者。謂彼殺吾母。吾亦殺彼也。

〔還幄坐而步〕還讀若旋。

〔其問賈長兒妻貞及從者師遂辭。〕貞長兒妻名。師遂。從者二人名也。

〔其母將行卜相〕謂將共女同行。而出卜相也。

〔上宿供張白虎殿〕宿供張者。先期供張也。

〔奈何令長信得聞之〕猶云。安得令太后聞之也。後吾邱遵語意亦同。

〔許氏竟當復立邪。〕成帝前后本姓許。後被廢。今許美人生子。恐又立爲后。故曰許氏復立。

〔是家輕族人〕是家私語。指斥官家之詞。輕族人者。言動輒族滅人家。武有子。恐被族滅。故不敢斥言也。

元后傳〔孝元皇后。王莽之姑也。莽自謂黃帝之後。其自本曰。〕自本。當是莽別有一篇書。自敘其本系也。如司馬遷傳。揚雄傳。馮奉世傳。傳首皆有系。亦皆諸人自爲敘述之詞。

〔土山漸臺西白虎〕西白虎云者。天子之白虎殿在東。今曲陽侯之土山漸臺。其制儼與白虎殿等。是西又有一白虎也。

王莽傳「莽休沐出振車騎。師古曰。『振整也。』」一曰。『振張起也。』」振前說是修整車騎。自往勞遺。以明敬禮其師也。

「傳太后聞之。大怒。不肯會。重怨恚莽。」一劾董宏。一徹坐。故曰重怨恚。

「上應古制。下準行事。」行事謂已行之事。言故事也。古制謂周公。行事謂霍光也。陳湯傳薛宣傳皆有行事字。解詭創於劉敞。而王念孫暢之。

「考故官。問新職。以知其稱否。」謂謁對之時。問其舊日曾歷何官。有何政績。今新履何職。宜以何爲治。雜問以知其稱否也。

「克身自約。糴食遠給。」糴食者。家無儲粟。買之於外。亦叩市之一端也。

「比三世。爲三公。再奉送大行。」比近也。謂近時成哀平之世。皆爲三公也。成哀大喪。皆預其事。故曰送大行。

「是故公孫戎位。在充郎選。」在。讀若才。謂公孫戎之位。始得充郎選耳。

「臣莽實無奇策異謀。奉承太后。聖宣詔之。于下。不能得什一。受羣賢之籌畫。而上巨聞。不能得什伍。當被無益之辜。」太后聖詔中有德意。莽代爲傳宣。不能盡達其德意。僅能得其什一。羣賢籌畫中有忠愆。莽代爲上聞。不能盡寫其忠愆。僅能得其什伍也。師古失之。無益之辜。言無益於國。當蒙其罪。

「安漢公在中府外第。虎賁爲門衛。嘗出入者。傳籍。」凡出入安漢公之府第者。皆著於籍。不在籍者。不得擅出入。

「子午道從杜陵。直絕南山徑漢中。」南山。自商顏。西至嶧冢。橫互千餘里。杜陵在山北。子方也。漢中在山南。午方也。於山腰通一徑。故曰直絕。

「今攝皇帝背依踐阼。」背依。卽負屨也。

「諸劉更屬籍。京兆大尹。勿解其復。各終厥身。」前漢時。諸劉皆復。世世無有所與。今王氏受命。諸劉仍復其身。

勿解者。不解除其復籍也。但終其身而已。其子則不復。

〔欲防民盜鑄。乃禁不得挾銅炭。〕炭以熾火鼓鑄。故禁不得挾。

〔置五威司命中城四關將軍。司命司上公以下。中城主十二城門。〕四關之職。主皆在各策命中。故此立言司命。中城二將軍。主級曰繞鬻之固。南當荆楚。繞鬻。疑亦地名也。四將軍之所守。在皆關中。如曰繞鬻。曰羊頭。曰肴。曰妍隴。皆去長安甚近。其所當者。則甚遠。如曰荆楚。曰燕趙。曰鄭衛。曰戎狄。皆使之扼險以禦外。

〔劉氏當復趣空宮。〕趣空宮云者。令王莽急走出。空其所居之宮。己得入居也。

〔漢氏高皇帝比箸戒云。罷吏卒爲賓食。誠欲承天心全子孫也。其宗廟不當在常安城中。及諸劉爲諸侯者。當與漢俱廢。〕比近也。箸戒者。王莽以漢高之事。箸於戒令也。『罷吏卒爲賓食』六字。卽戒令之辭。『誠欲』二句。建推闡戒令。意其『宗廟』三句。又建以己意奏請者也。師古以爲高祖頻戒。失之。

〔成帝異姓之兄弟。平帝壻也。皆不宜復入其廟。〕成帝。莽姑元后之子。故曰『異姓兄弟。』

〔正有他心。宜令州郡。且尉安之。〕正。猶云正令。字亦作政。

〔今猥被以大罪。〕猥。猶云乃也。師古訓多未是。

〔誅貉之部。先縱焉。〕誅貉之部。猶云誅貉之師。縱謂縱師也。

〔太官齋補乾肉。內者行張坐臥。〕內者。宦名也。如宦者謁者之屬。與太官爲對文。

〔莽卽真尤備大臣。〕備大臣。謂設禁防而備之。

〔敕曰。非但保國。將闔門當保親屬。在西州者。諸公皆輕賤。而章尤甚。〕非但保二句。莽之敕詞。諸公皆輕賤句。班史之詞。言莽屈抑大臣。輕賤諸公。而袁章尤其所賤也。

〔卽有災害。以什率多少而損臆焉。〕宋祁曰。『什下當有計字。』國藩按。率者。計數之名。趙充國傳有中率字。今算學家亦以定數爲率。以十計數。十害一則減臆一分。十害二則減臆二分。率上不必增計字也。

〔大司馬保納卿言卿仕卿作卿京尉扶尉兆隊右隊中部左。洎前七部。〕劉奉世曰。〔七部嘗爲七郡。〕王念孫曰。〔嘗爲十郡。〕國藩按。嘗云。〔中部。左部。洎前十郡。〕

〔以太官陰益備損而爲節。〕謂太官臚備。則官吏之祿亦備。臚損則官吏之祿亦損也。

〔士吏四十五萬。人士千三百五十萬人。〕國藩按。師古或五或十之下。嘗云或三或兩或三十。

〔倉無見穀以給傳。車馬不能足。賦取道中車馬。取辦於民。〕劉敞曰。〔以給當屬上句。〕國藩按。此疑有錯簡。嘗云倉無見穀以給傳。取辦於民。車馬不能足。賦取道中車馬。

〔見王路堂者。張於西廂及後閣更衣中。又以皇后被疾。臨且去。本就舍。妃妾在東永巷。〕臨或見葬於王路堂。則設帷帳於西廂。及更衣室。臨或來待皇后之疾。則舍於西廂。及更衣室。臨之妃妾。則在東永巷。

〔建章承光包陽大臺儲元宮及平樂當路陽祿館凡十餘所。〕劉敞曰。〔建章與宮名同。疑當是字誤。〕國藩按。建章承光包陽大臺儲元五宮名也。平樂當路陽祿三館名也。

〔郡縣力事。上官應塞詰對。〕對。猶對簿對狀之對。詰對。猶詰責也。上官歸咎於郡縣。而詰責之。郡縣竭力以事上官。思所以應答而塞責也。

〔凡三十萬衆。迫措青徐盜賊。〕迫。急也。措。謂料理收拾之也。

〔敘傳。〕班彪幽通賦云。恐罔蠲之責景兮。慶未得其云已。師古訓引莊子云。景曰。〔吾有待而然。吾所待又有待而然。〕按。吾有待而然者。景爲形所使也。吾所待又有待而然者。形爲氣所使也。皆有所因。賦引此言之。禍福皆有所由來也。

〔羸取威於百儀兮。〕王念孫曰。〔威。德也。言伯益有儀。百物之德。而羸氏以興。〕國藩按。王說非也。取威定伯。出左傳僖公二十七年。言秦所以伯。由於益有儀百物之功。

〔既仁得其信然兮。〕叩天路而同軌。〔求仁得仁。既可以人力信其不差矣。而天道亦巧與相助。若合符節。故曰

同軌。

〔嬀巢姜於孺筮兮〕詩「維鵠有巢。維鳩居之。」言姜有國。而爲嬀所奪。故曰巢。

〔三樂同於一體兮。雖移盈然不忒。〕嚴之咎。雖移於盈。然報應之理。究不忒也。

〔守孔約而不貳兮。迺輸德而無累。〕孔約謂孔氏之誠約也。上文有欲不居。有惡不避。卽孔門之訓。師古訓孔爲甚失之。

〔侯草木之區別兮。至李虎發而石開。〕有其實。必有其榮。有其感。必有其應。至誠而不動者。未之有也。爲其事而無功者。未嘗覩也。孔子契韶漢之褒。孔養李之精誠通神。皆一貫之義。

〔德薄位尊。非胙惟殃。〕按胙。福祚字。段氏玉裁以爲古無祚字。卽用胙字耳。言數人之處尊位。非所以福之。適所以殃之也。

〔如台不匡。禮法是謂。〕言國家無以匡正之。將禮法之謂何。

後漢書

邳彤傳「謀夫景同」景同。猶云景從景附。

景丹傳「秋與吳漢。建盛大將軍耿弇。建義大將軍朱祐。執金吾賈復等從擊破五校於龔陽。降其衆五萬人。」以遷固文法推之。大司馬吳漢五字。均應有。不得但云吳漢也。

劉隆傳「趣吏不肯服」趣下當有對字。

〔吏乃實首服〕實字。當在首服二字下。

竇融傳「融於是日往守。萌辭讓鉅鹿。圖出河西。注守。猶求也。」守。無訓求者。日往守。謂常至萌處也。辭讓鉅鹿。屢次辭之。圖出河西。亦屢次圖之也。

〔謂留子何〕留子。謂伯春留於漢也。

〔帝將自西征之〕將自當作自將。

竇固傳〔固忠至天山擊呼衍王斬首千餘級。〕固在極西一路。去天山僅千餘里。故有功。

趙熹傳〔更始笑曰。〕藟粟犢。豈能負重致遠乎。〕下文更始大悅。謂熹曰。〔卿名家駒。努力勉之。〕按藟粟犢。曰家駒。俱不似更始口中語。爲其失之過文也。司馬遷之文。古人稱其能質。正謂此等不妄著浮詞耳。

桓譚傳〔譬猶卜數隻偶之類。〕隻偶。猶奇偶也。猶隻雙也。

鄧暉傳〔暉曰。〕孟軻以彊其君之所不能爲忠。量其君之所不能爲賊。〕引責難於君謂之恭。吾君不能謂之賊也。注引孟子對齊宣王曰。〔力足以舉百鈞。〕云云。又曰。〔惻隱之心。仁之端也。〕云云。失之。

孔奮傳〔徒益苦辛耳〕劉敞以爲益當在徒字上。按益字在下爲叶。劉說非也。

鄭宏傳〔四遷建初。爲尙書令。〕建初下嘗更有一初字。

法雄傳〔燒宮寺〕宮寺。疑當作宦寺。

劉般傳〔因值王莽篡位〕值字上。不合更有因字。

趙咨傳〔徵拜議郎。抗疾京師〕抗疾者。累起召而固以疾辭也。

班固傳〔詔以譴責競〕詔以。當作詔書。

第五倫傳〔亦宜所以安之〕宜字下疑脫去一思字。

〔乃召羽具告之。謂曰。〕告之下。不當更有謂字。

爰延傳〔臣聞天子尊無爲上〕爲當作二。

章帝八王傳〔中常侍鄭颯中黃門董騰並任俠通剽輕。數與佹交通〕按剽輕。剽悍疾蹶之人。颯騰與之通也。神語傳〔推達名臣橋玄皇甫規等爲爵職相〕殿本考證曰。〔監本無相字。臣會汾按橋玄於光和元年。一爲

太尉。皇甫規歷職邊郡。官止度遠將軍。未嘗爲相也。相字舛誤無疑。若從監本。則語勢又似不完。疑爲字亦誤。今姑從宋本。國藩按。稱職相謂種暘也。以其推進名臣。故曰稱職。非謂玄規爲相也。

臧洪傳「辭行被拘」觀此語。則洪於請兵之後。復有隻身赴難之請。爲袁紹所拘留也。上文敘紹竟不聽之下。少有疏脫。

左周黃傳論「則武宣之軌。豈其遠而。」前書公孫弘卜式傳贊。備言武宣兩朝得人之盛。故此言武宣之軌。段熲傳「思爲永甯之算」按前言揚雄疏云。不暫疲者。不永甯。穎前疏引其語。故曰永甯之算。袁紹傳「是以周公垂涕以斃管蔡之獄」斃應作蔽。

二二國志

「后妃傳文昭甄皇后」明帝愛女淑薨。追封諡爲平原懿公主。爲之立廟。取后亡從孫黃與合葬。追封黃列侯。以夫人郭氏從弟子德爲之後。承甄氏姓。封惠爲平原侯。襲公主爵。淑以幼女天亡。而追封以邑。黃以幼子天亡。因嫁殤之故。而追封以爵。惠以郭氏因后族之故。而襲甄姓封爵。重緦馳繆於斯極矣。

董卓傳終敘李傕郭汜張濟胡才張樂韓遂馬騰馬超後事。文勢邁遠。有似史記。

夏侯淵傳自首至殄氏反。淵引軍還。所敘十三事。而字數極少。有似史記曹參世家。

曹仁傳將騎兵數點出。做史記灌嬰傳。

諸夏侯曹傳「援至良才」謂薦引賢才以輔爽也。

樂進傳自首至別攻雍奴破之。敘戰功十五事。極簡明。

王粲傳因粲而兼敘徐陳阮應劉事。略仿孟子荀卿列傳之例。

「亦有文采。而不在此七人之例。」例當作列。此疑當作六人。合曹植乃爲七人。謂邯鄲淳繁欽路粹丁儀楊修。

荀緯丁虞七人不得與王徐陳阮應劉六人並列也。

諸葛誕傳注「喪王基之功」喪疑當作表。

鄧艾傳使居民表猶云在民之外也。

諸葛亮傳「五年率諸軍北駐漢中。臨發上疏曰。」古人絕大事業。恆以精心敬慎出之。以區區蜀漢一隅。而欲出師關中。北伐曹魏。其志願之宏大。事勢之艱危。亦古今所罕見。而此文不言其艱鉅。但言志氣宜恢宏。刑賞宜平允。君宜以親賢納言爲務。臣宜以討賊進諫爲直而已。故知不朽之文。必自襟度遠大。思慮精微始也。前漢宮禁。尙參用士人。後漢宮中。如中常侍小黃門之屬。則悉用閹人。不復雜調他士。與府中有內外之分。大亂朝政。諸葛公鑒於桓靈之失。痛憾閹官。故力陳宮中府中。宜爲一體。蓋恐宦官日親。賢臣日疏。內外隔闕也。公以丞相而兼元帥。凡宮中府中。以及營中之事。無不兼綜。舉郭費董三人治宮中之事。舉向寵治營中之事。殆皆指留守成都者言之。其府中之事。則公所自治。百司庶政。皆公在軍中親爲裁決焉。

張嶷傳「又令離姊逆逢妻」離姊二字疑衍。冬逢之妻。爲狼路之姑。卽狼離之姊也。下文並見其姊。卽見逢妻也。上文當作令離逆逢妻明矣。

費禕傳「少孤。依族父伯仁。伯仁姑益州牧劉璋之母也。」上伯字疑當在父字之上。下伯字疑衍也。

呂範傳「初策使範典主財計云云。」國策之「長者拒之。少者報之。」高祖之封雍齒而斬丁公。略與此節旨趣相同。

周飭傳譎挑曹休七踐。此等可不必全錄於傳。

胡綜傳代吳質作降文三條。此等亦可不錄入傳中。

滕胤傳作未了之勢。猶有史記意度。

孫峻傳「以後事付緄」峻雖已死。文亦作未了之勢。

孫綝傳「遣侍中左將軍華融中書丞丁寔告胤取據。」此處應將據自殺敘出。或曰：語在據傳。或敘於殺滕胤之後亦可。

通鑑

漢紀五十七「權謂瑜曰：『卿能辦之者，誠決。遲遲不如意，便還就孤。孤當與孟德決之。』」決疑當作快。瑜能辦此事焉。快事，如不能辦，則權自往決戰。上決因下文決字而誤耳。

魏紀二「濟更鑿地四五道，蹴船令聚豫作土豚。」國藩按：豚，壓埽一也。亦可作墩。嘗有水之地而築之，則謂之隄。謂之埽，嘗無水之地，豫築之，則謂之豚。謂之埽地，亦可謂之墩。謂之埽。

魏紀七「爽得懿奏事，不通，迫窘不知所爲。」不通，謂不上之帝所也。

「初吳大帝」東興堤以遏巢湖。其後入寇淮南，敗以內船，遂廢不復治。」愚按：東興堤成，湖內之船不得出湖外之船，亦不得入。吳寇淮南，自毀其堤，納船以入湖內，敗毀也。內讀如出納之納。胡注失之。

晉紀八「皇輿東返，俊彥盈朝。」吳中是時尙未知惠帝已崩，故第言皇輿東返。

「榮乃出與周玕共說甘卓曰：『若江東之事可濟，當共成之。』」大江北流，故謂金陵爲江東，歷陽爲江西。晉紀九「王浚怒，遣燕相胡矩督諸軍與遼西公段疾陸眷共攻希殺之，驅略三郡士女而去。」疾六眷，務勿厘之子也。疾六眷即疾陸眷。胡語音同字異者皆同也。

晉紀二十六「邵保戰死難，超退屯淮北。玄與何謙戴遂田洛共追之，戰於君川。」盱眙在淮南，玄等已追及於淮北，非盱眙之君山也。胡注失之。

「晉紀三十七」聞晉兵入峴，自將步騎四萬往就之，使五樓帥騎進據巨蔑水。今日巨瀾河。

「於是衆軍轉集，裕恐循侵軼，用虞邱計，伐樹柵，石頭淮口，修治越城，築查浦藥園廷尉三壘。」國藩按：添築小

城一段。謂之越城。謂越大城之外也。今運河正闢之外。往往加一越闢。宋紀四「道濟曰。『卿非大丈夫。小敗何苦。』」何苦。猶云何害何傷也。

梁紀三「魏主聞邢巒屢捷。命中山王英趣義陽。英以衆少。累表請兵。弗許。英至懸瓠。輒與巒共攻之。」魏命英趣義陽。英自至懸瓠助攻。故曰輒。輒專也。

梁紀八「今四方多虞。府藏罄竭。冀定擾攘。常謂之絹。不復可收。唯仰府庫。有出無入。略論鹽稅一年之中。準絹而言不下三十萬匹。乃是移冀定二州。置於幾甸。今若廢之。事同再失。」既失冀定常謂之絹。又失鹽稅。故同再失。

「念生鼻戮。寶寅就擒。費穆破蠻。」三句。略有事實。醜奴請降。絳蜀漸平二句。則爲誇言。以拒爾朱榮耳。

梁紀九「顥先以慶之爲徐州刺史。因回求之鎮。顥心憚之。不遣曰。『主上以洛陽之地。全相任委。忽聞捨此朝寄。』」主上。梁主也。朝寄。梁朝所委寄也。胡注失之。

梁紀十四「侯景等夜解圍去。辛卯。泰帥輕騎追景至河上。景爲陳北據河橋。南屬邗山。與泰合戰。泰馬中流矢。驚逸。遂失所之。泰墜地。東魏兵追及之。左右皆散。都督李穆下馬。以策扶泰背罵曰。『籠東軍士。爾曹主何在。而獨留此。』追者不疑其貴人。捨之而過。穆以馬授泰與之俱逸。魏兵復振。擊東魏兵。大破之。云云。」此處當書西魏之敗。下文如獨狐信李遠趙貴等之棄卒先歸。宇文泰之燒營而歸。王思政之重創悶絕。蔡祐之發矢枕股。關中之圍敗作亂。王儼之固守河東。高歡之攻破金墉。指西魏大敗後事也。至於高敖曹之死。宋顯之見殺。方俟洛之勒兵。則西魏兵復振。東魏小挫時事也。通鑑不先書西魏之敗。故前後節次不清。

陳紀四「淳于量軍夏口。直軍魯山。使元定以步騎數千圍郢州。皎軍于白螺。」今岳州下四十里。有白螺磯。又下五十里。有螺山。衛公直亦奔江陵。元定孤軍。進退無路。斫竹開徑。且戰且引。欲趣巴陵。衛公直在魯山。亦在西岸。惟元定一軍在東岸。故無路可歸也。

陳紀六「齊主力與馮敏妃獵於天池。晉州告急者自旦至午，驢馬三至。右丞相高阿那肱曰：『大家正爲樂遊，鄙小小交兵，乃是常事，何急奏聞。』」上文云齊主自晉陽趣晉州，是聞急奏時正在途次也。或別有一天池，陳紀八「時諸將競勸梁主舉兵，與尉遲迥連謀，以爲進可以盡節周氏，退可以席卷山南。胡注：漢沔之地，在中南太華諸山之南，中南當作終南。國藩按：自古言山南，皆專指終南山而言，不及太華也。

陳紀九「帝深嗟異，皆納用之。遣不僕元暉出伊吾道，指達頭，賜以狼頭露，達頭使來引，居沙鉢略，使上以辰爲車騎將軍，出黃龍道齋幣，賜奚霫契丹。」元暉之出，所謂通使玷厥，使攝圖備西也。長孫晟之出，所謂遣連奚霫，使攝圖備東也。

陳紀十「命晉王廣、秦王俊、清河公楊素，皆爲行軍元帥。廣出六合，俊出襄陽，素出永安。」六合，橫度也。襄陽，漢水之上游也。永安，江水之上游也。廣所出之途，與晉伐吳王濞之任略同。俊所出之途，與賈充略同。素所出之途，與王濬略同。

隋紀五「唯衛文昇一軍獨全。初九軍度遼，凡三十萬五千，及還至遼東城，唯二千七百人，資儲器械巨萬，計失亡蕩盡。」上文云，至薩水軍半濟，今又云衛文昇一軍獨全，觀此則三十萬人中得脫免者，決不止二千七百人也。雖沿途多有逃亡，而史文亦不可盡信。

隋紀八「左光祿大夫李孝恭招慰山南，府尹曹張道源招慰山東。」此山東，謂終南山之東，商雒等處耳。

唐紀五「先是汪華據歙，歙稱王十餘年，雄誕還軍擊之，至會日暮，引還，伏兵已據其洞口，華不得入，窘迫請降云云。」前云甲子遣使來降，拜歙州總管，此云窘迫請降，事在十一月，嘗有一誤，宜刪併一處。

唐紀十三「陛下君臨天下，十有七載，以仁恩結庶類，以信義撫戎夷，莫不欣然，負之無力，國藩按：負荷也，無力，謂恩重難荷也。庾信謝表，所謂鼃戴三山，深知其重，亦有難於負荷之義。

唐紀十五「旣而反譖遺直，遺直自言。」自言，訟訴也。見漢書朱博東方朔外戚等傳。

唐紀十七「當時將帥號令許以勳賞無所不至及達西岸惟聞枷鎖推禁奪賜破勳」破勳者有勳可紀因坐他事而削除之猶破國破產之破。

唐紀三十三「屯武軍以拒賊」武牢卽虎牢唐諱虎改爲武牢在今汜水縣西。

「先是清河客李萼年二十餘爲郡人乞師於真卿曰「公首唱大義河北諸郡恃公以爲長城今清河公之西鄰」」按德州平原治也真卿在德州去清河二百餘里故胡注引九域志以釋之。

「三郡兵力戰盡日魏兵大敗」嘗云知泰兵大敗茲云魏兵大敗不合通鑑之例。

唐紀四十一「承嗣知范陽寶臣鄉里心常欲之因刻石作讖云「二帝同功勢萬全將田爲侶入幽燕密令蹙寶臣境內使望氣者言彼有王氣寶臣握而得之」」田承嗣之玩侮李正己李寶臣與石勒之玩侮王浚劉崑略同。

唐紀四十二「出則囚服就獄入則擁笏垂魚卽貶于潮」卽字漢書多用之此文出於韓退之曹成王碑與漢書諸用卽字者同胡注訓就也非是。

「崇義懼益修武備流人郭昔告崇義爲變崇義聞之請罪上爲之杖昔遠流之」昔本流人也因告崇義而更加罪流之遠州故曰遠流之胡注非是。

唐紀四十三「留百騎擊鼓鳴角於營中仍抱薪持火俟諸軍畢發則止鼓角匿其旁俟悅軍畢渡焚其橋軍行十里所悅聞之帥淄青成德步騎四萬踰橋掩其後乘風縱火鼓譟而進」留百騎擊鼓鳴角於營中令賊知我軍已出趨魏州也匿其旁不使賊踰橋時得見之也焚其橋使賊敗無路可歸也乘風縱火賊燒附近民居以助勢欲與上文百騎持火不相涉。

序（至於有侍中給事中之官。而未嘗司宮禁之事。是名內而實外也。）唐以來以侍中爲三公官。以處勳臣。又以給事中爲封駁之官。皆以外庭之臣爲之。並不預宮中之事。

（有太尉司馬之官。而未嘗司兵戎之事。是名武而實文也。）太尉漢承秦以爲三公。猶掌武事也。唐以後亦爲三公。宋時呂夷簡王旦韓琦。官皆至太尉。非武臣也。大司馬周官掌兵。至漢元成以後。爲三公。亞於司徒。乃後來執政之任。亦非武臣也。

（尙書令在漢爲司牘小吏。而後世則爲大臣。所不敢嘗之穹官。校尉在漢爲兵師要職。而後世則爲武弁。所不齒之冗秩。）尙書令漢初其秩至卑。銅章青綬。主宮禁文書而已。至唐則爲三省長官。高祖入長安時。太宗以秦王爲之後。郭子儀以勳臣嘗拜。以太宗曾爲之辭。不敢受。自後至宋無官。拜此官者。漢入校尉。領禁衛諸軍。皆尊顯之官。宰相之罷政者。至爲城門校尉。又司隸校尉督察三輔。彈劾公卿。其權至雄尊。護羌校尉。護烏桓校尉。皆領重兵鎮方面。乃大帥之職。至宋時校尉副尉爲武職初階。不入品從。至爲冗從。

（則星辰之遲留。伏逆往來。其所紀述。豈足憑乎。）按漢哀帝以日無精光。邪氣連昏之事。問待詔李尋。而尋所對。具言其故。光武以建武五年。召嚴光入禁中。共臥。而太史奏客星犯帝座。二事。見於李尋嚴光傳。而以漢志考之。終哀帝時不言日無精光之事。光武建武五年。亦不言客星事。亦可證其疏略也。

田賦一（趙過能爲代田。田一畝三畦。歲代處。故曰代田。治代易也。）按今年之剛在彼。明年之剛在此。播種不在原處也。

田賦二（民賦曰調。晉平吳制戶調。唐賦入之制。曰租曰庸曰調。調者令民輸絹帛也。）按征入曰。調斂散出。曰。調發。曰。調遣。曰。貢賦。散出曰。賦政。於外曰。賦工。曰。賦鹽。皆分頒於外也。卽詩賦之賦。亦敷陳於外也。趙充國傳賦人二十畝。賦田於人也。

田賦三（唐代宗時。察民有粟帛者。籍其所有。而中分之。甚者十取八九。謂之白著。）按白著。猶今俗言白當差。

也。

〔唐大歷中國用急。苗方青則征之。號青苗錢。〕按宋王安石以苗方青時。貸錢與民。至秋收息。亦謂之青苗錢。〔後唐有稔場院。令天下納稔草。每束約一文。〕按說文稔。束稔也。即今之稻草也。

田賦四〔五季暴政。食鹽則輸鹽米。〕按每正供米一石。另輸鹽米四斗。官給以鹽一斤。

〔五季時供軍需。則有鞋錢。〕按今征調官兵。亦有草鞋錢之名。

〔五季時民輸米入倉。則有糜錢。〕按糜。籩條也。所以藉米。今漕米上倉。亦有蘆席錢之名。宋時雜賦亦『納蘆糜。』

〔五代周顯德中有逃戶莊田。許人請射承佃。供納租稅。〕按射猶曰占也。猶曰認耕也。

〔宋開寶中輸納錢帛。每貫收七文。每匹收十文。曰頭子錢。〕按耗錢耗米。名目歷代不同。頭子錢亦一名也。近世賭博者。百錢取五文入公。亦曰頭子錢。宋末葉水心疏言。每貫取頭子錢五十六文。

〔李椿年言經界不正之弊。七日倚閣不實。〕按倚閣猶今俗停閣耽擱也。

〔李椿年措置經界。言已打量者四十縣。未打量者展期一月。〕按打量猶曰估計也。〔今世俗有此語。

田賦五〕人煙田產在此處。而稅在彼處。謂之寫佃。〕按吾鄉有居宅在此而耕作在彼者。謂之寫作田。〔建炎四年。詔物帛非紕疏濫惡。不許抑退。〕按紕。繪欲壞也。繪。疏也。

〔官收物而給印信文憑曰鈔。即今鈔關。宋紹興中。凡賦稅必具四鈔。曰戶鈔。則人戶收執。曰縣鈔。則關縣司銷籍。曰監鈔。則納官掌之。曰住鈔。則府庫藏之。〕按今收錢漕者曰串票。征關卡者曰三聯票。皆鈔之類也。

朱子正經界疏。實佃者。或申逃閣。無田者。反遭俵寄。按俵。分散也。無田者。或被他人以其稅分寄名下。

田賦六〔李冰爲蜀守壅江水作壩。穿二江。成都中。雙過郡下。以通舟船。因以灌慨諸郡。〕按作壩以穿二江。猶云壩爲二渠也。按壩。水中之潭也。

〔江東水鄉。隄河之兩涯。而田其中。謂之圩。圩者。圍也。內以圍田。外以圍水。蓋河高而田在水下。故以隄禦水。隄中。通斗門。引水入港。以溉田。〕按。今皖南如甯國太平。皖北如廬州潁州六安州滁州和州。皆有圍田。民多築圩以居。

田賦七。〔嘗屯之內。有輓有硬。〕按。嘗猶該也。今世曰該府。該州縣。六朝唐宋曰嘗道。嘗郡。嘗州。嘗縣。嘗屯。今京師諺亦曰。『嘗街。嘗院。』

〔順時颺土。〕按。颺字。或書作甞。俗作覓。音莫狄切。又音脈。颺土。察土之脈也。

〔漢昭帝元年。上畊於鉤盾弄田。注。帝年九歲。在鉤盾近畧。試耕爲戲。故曰弄田。〕按。鄧通爲弄臣。與此弄田。皆嘗時偶爾立名稿。按。吾鄉呼稻菅曰管。草之去皮者曰管心。草之編爲席曰稿薦。

〔取民間田契根磨。〕按。唐宋公牘中。考究事實。或曰根括。或曰磨勘。或曰根磨。今日根究。曰磨對。曰勘驗。錢幣一。〔周禮泉府買者。各從其抵。先鄭注。抵故買也。後鄭注。抵本也。〕國藩按。抵如今之借錢。有保人也。今販

官鹽者。亦須取具的保。乃許領引運鹽。

〔大觀元年。改四川交子爲錢引。〕按。引亦鈔券之類也。宋世有茶引。有鹽鈔。近世亦有茶引鹽引。戶口一。〔宣王料民於太原。〕按。謂料數之也。

〔漢景帝二年。令天下男子年二十始傅。注。傅。著也。言著名籍。給公家徭役。〕按。今世謂之著役。

戶口二。〔北周破江陵。盡俘士民爲奴。曰官口。〕按。靖康之役。金人虜宋之貴族士庶。盡沒爲奴婢。卽官口之類也。諸葛武侯拔西縣千餘家還蜀。

國初牧山東直隸降人爲漢軍。亦官口之類也。其私家奴婢。如卓王孫家僮八百。程鄭數百。又如晉代王公貴人。有佃客。有典計。有衣食客。

國朝王公府。各有包衣旗之類。則私屬也。

職役一〔公人百姓決配〕按俗稱在官人亦曰公人

職役二〔部送綱運〕按宋時以輸送官物爲綱有茶綱有鹽綱修良岳有花石綱南宋市舶有綱首見市羅一今黃河渡船有綱頭又按國用亦有米綱銀綱錢綱綿綱

〔蘇轍論復差役之弊敷錢太重〕按敷錢猶今云派錢也

征權一〔自晉至陳石頭津置津主十分稅一〕按津主即今水卡卡員抽釐者也石頭津在今龍江關矣

〔後魏稅市入者人一錢北齊顏之推奏立關市邸店之稅後周除市門稅〕按此即今之門釐矣

〔唐崔融議曰江津河口置鋪此津纔過彼津復止〕按此鋪猶今之設局設卡也今俗曰鋪則市店之通稱

征權四〔椿〕按宋世日月椿庫曰防椿庫曰封椿錢如今之銀錢曰存項曰某項又有曰椿發曰椿辦曰椿管則爲活用之字

也

征權六〔宋時勘合錢每貫收十文〕按即今之稅契司尾也宋時亦名曰鈔旁定帖錢鈔即契也旁帖即粘尾

也

市糴二〔謹守重流而天下不吾洩矣〕注謂謹守穀價不使流散也按粟有所禦之禦與此流字爲類

〔玉篇蠻夷以財贖罪曰贖〕按今實布賤布概稱蠻夷之財賦

國用一〔並不給幹〕按南齊任宦皆給以僮幹亦祿賜之類即僕役也

刑二〔景四年師侏儒嘗鞠擊者頌繫之〕注頌讀曰容容寬不桎梏也按頌繫即今刑部之保外不收繫也

〔楚王英之獄每上彭考〕注彭即榜也按今刑具俗稱爲上彭字

〔鈗鑽之屬慘苦無極說文鈗鉦也玉篇鉦拔髮也類篇鉦箝也與鐸同〕按鉦與鐸同則鈗者亦有兩股夾取

物如今之夾剪矣

刑五〔枷研棖轂唐書索元禮傳以鐵籠轂囚首加以楔玉篇轂急束〕按鐵籠如鐵枷然囚首既入則以轂束

之以楔轄之也。

兵九。〔侯將來袞同再試〕按。袞亦或作滾。袞同。今雅語。或作彙同。俗語作連同。

兵十一。〔豪右辜權。注。辜。障也。權。專也。謂障餘人買賣。而自取其利。〕按。障。塞他人之買賣。而已獨專之。豪右辜權。猶今奸商把持。

職官五。〔六部監門條。仍今六部。踏逐奏在序位。〕按。踏逐。猶云日逐。蓋隨時奏請更換也。

職官十。〔大理卿篇。左右各五案。如左廳曰詳刑案。詳獻案。右廳曰左推案。右推案之類。〕按。宋時諸司治事分案。如中書省五案。吏部尙書十五案。侍郎十五案。戶部左曹三案。右曹六案。禮部五案。兵部十案。工部六案。刑部不分案。大理寺分十案。即刑部之職事矣。此外又有分窠者。分房者。與案異名而同實。今六部諸司。不分案。而分股。而具稿。猶曰某司案呈。循古稱也。

職官十九。〔自一品以下。至流外勳品。各給事力。一品至三十人。〕按。力者。若今挑水夫之類。淳化閣帖有來力字。

子

管子

牧民第一。〔不璋兩原。則刑乃繁。不明鬼神。則陋民不悟。〕璋者。障之假借字。悟疑誤。以與神不韻也。

形勢第二。有感斯有應。有往斯有來。有實斯有名。有形斯有勢。故爲政者當盡其在我者。務其遠者大者。飛蓬之聞。聲聞之無根者也。

〔主功有素。寶幣奚爲。羿之道。非射也。造父之術。非馭也。奚仲之巧。非斲削也。〕寶幣。非享神之具。羿非射。造父非御。奚仲非斲削。別有尸之者也。

〔召遠者。使無爲焉。親近者。言無事焉。〕召之不在於使。趨之不在於言。亦別有尸之者也。

〔警食者。不肥體。〕警食者。計警而食。猶云數米而炊。

立政第四〔右五事〕此管子經國之大略。卽後世保甲之法所自昉。

宙合第十一。〔進傷爲人君嚴之義。退害爲人臣者之生。〕按。此卽揚雄傳『得時則大行。不得時則龍蛇』之義。

〔以爲鳥起於北。意南而至於南。起於南。意北而至於北。苟大意得。不以小缺爲傷。〕莊子謂行小變而不失大常。亦此意。

法禁第十四。〔故曰絕而定。〕絕而定。猶董子『皆絕勿進』之絕。

重令第十五。此篇言令不違。卽商鞅之所本。

〔虧令者死。益令者死。不行令者死。留令者死。不從令者死。五者死而不赦。〕按。五不赦。商鞅之所本也。

〔三器者何也。曰號令也。斧鉞也。祿賞也。〕按。法禁篇首三句曰法制。曰刑殺。曰爵祿。三者并重。亦卽此三器也。

法禁第十六。〔倨傲。易令。錯儀。畫制。作議者。盡誅。〕按。倨傲。卽私議自貴也。易令。卽怪嚴也。錯儀。卽雜俗也。畫制。卽異禮也。作議。卽私議也。

兵法第十七。〔始乎無端者道也。卒乎無窮者德也。〕按。始乎無端也。陰陽之循環。隨所遇皆可爲端也。故曰道。

卒乎無窮者。人心之變化既極。而又以苦思得通也。故曰德。

〔因便而教。准利而行。教無常。〕按。因便而教。准利而行者。兵無常形。因勢合變。

大匡第十八。〔士處靖。〕按。處靖。謂居止有定也。下出入無常。是反面。

小匡第二十。〔夫鮑叔之忍。不僂賢人。〕左傳正義云。『夫鮑叔之不忍。僂賢人。其智知稱賢以自成也。』王云。

『應從正義爲是。不忍上應更增一仁字。與智字相對。』

霸言第二十三。〔兼正之國之謂王〕按。『兼正之國。』疑當作『兼正四國。』

〔故貴爲天子。富有天下。而伐不謂貪者。其大計存也。〕伐不謂貪。王云伐字當爲我字之譌。國落按。伐字當爲世字之譌。唐諱世。凡世字皆改作代。代又譌爲伐耳。

問第二十四。〔事先大功。政自小始。〕按。以上總提。以下分條考問。

〔徒負勿入。〕謂不收其稅入也。

君臣上第三十。此篇言爲君者。專重求人。不侵臣下之職。

君臣下第三十一。〔故曰。德侵則君危。〕按。侵過也。猶淫也。盜也。侈也。故下文云。『審淫禁侵。上盜分則下亦越分。上禁淫侵。適如其分。故下無冀幸也。』

小稱第三十一。此篇多精深語。大約畏民以自修。反己以自責。

〔操名從人。無不彊也。操名去人。無不弱也。〕注。謂君自行善。持名使之延譽。故彊也。君旣行惡。卽是持名去人。無善可稱。故弱也。〔按。操名者。民操之也。操名以從我。則我彊。操名以去我。則我弱。〕注。失之。

〔聖人得利而託焉。〕按。聖人行善。宣之於氣。達之於目。是心中之善。託於氣與目以出也。故曰得利而託。聖人有善則託可好。我有過則託可惡。

四稱第三十一。此篇言有道君。無道君。有道臣。無道臣四者。

侈靡第三十五。此篇多不可曉。

心術上第三十六。〔故曰上離其道。〕按。此『故曰』二字。涉下文解中而衍。

莊子

『養生主』莊子自以爲遊方之外。不嬰世內。余讀養生主人閒世等篇。其持身涉世。用心亦何苦也。其曰。『虛

舟不忤。雖有伎心。不怨飄瓦。與齊皆入。與汨俱出。』反復言之。豈誠忘機哉。使誠忘機。則不復言機矣。越世家載其不救陶朱公之子。亦機心之爲之也。姚惜抱氏責之。非過也。

『庚桑楚』。『吞舟之魚。碣而失水。則鰲能苦之。』按。碣。水中石。水涸而見沙。石不得津潤。失所憑依之象。通鑑答謂靖郭君曰。君不聞海大魚乎。網不能止。駒不能牽。蕩而失水。則螻蟻制焉。以蕩爲碣。失其義矣。王介甫和王微之高齋三首。『蕭條中原碣無主。螭蝮又此憑江淮。』俗本誤作蕩。亦爲失之。

淮南子

『倣真訓』。『夫大碗載我以形。勞我以生。逸我以老。休我以死。善我生者。乃所以善我死也。』數句襲莊子大宗師篇。

『天文訓』。『右背德』。按。背卽後也。孫子曰。『右背山陵。前左水澤。』亦以背與前爲對。

『覽冥訓』。『使俗人不得其君形者』。君形。主宰乎形骸者也。

『本經訓』。『句爪居牙』。庾信賦作『駒爪鏘牙。』

『凡人之性節』。此段雜襲儒家者言。與本篇大旨不合。

『主術訓』。『凡此六反者。不可不察也。』六反者。小與大反。方與圓反。多與鮮反。

『繆稱訓』。要略云。『斷短爲節。以應小具。』故此篇嘉言兩集。妙義雲來。皆短章零節。無長言繁稱者也。

『道應訓』。此篇雜徵事實。而證之以老子道德之言。意以已驗之事。皆與昔之言道者相應也。故題曰『道應』。每節之末。皆引老子語證之。凡引五十二處。

『大清問於無窮曰節』。此段襲莊子知北游篇。

『齧缺問道於披衣節』。此段本莊子知北游篇。『恣乎若新生之懷。莊作瞳焉。瞳焉者。目灼灼不瞬之貌。此作

蹇乎。」亦近之。

「四累之上也。」注。此上凡四事。皆累於世。而男女莫不歡然爲上也。按。累者。層累也。刺不入擊不中。一層也。弗敢刺。弗敢擊。二層也。無其意。三層也。歡然愛利。四層也。故曰四累之上。高注失之。

「太王亶父居邠節。」太王事。本莊子讓王篇。

「中山公子牟謂詹子曰節。」公子牟事。本莊子讓王篇。

「桓公讀書於堂節。」輪扁事。本莊子天道篇。

「大司馬捶鉤者年八十矣節。」捶鉤事。本莊子知北遊篇。

「跖之徒問跖曰。盜亦有道乎。」本莊子胠篋篇。

「光耀問於無有曰。」光耀事。本莊子知北遊篇。

「柴箕子之門。」按。後漢書楊震傳。柴門謝客。三國志。以萬兵柴道。與此柴字義同。卽塞也。

「詮言訓。」此篇大指不以功名自章。不以賢智先人。卽莊子「無成無虧」之義。

「故適性之情者。不務性之所無。以爲通命之情者。不憂命之所無。奈何。」四句。本莊子達生篇。

「通於道者。物莫不足滑其調。」莫字疑誤。

「方船濟乎江。」虛舟事。本莊子山木篇。

「兵略訓。」而勝亡焉。按。勝亡焉。猶云勝不係乎此也。全不係乎此也。

「將者必有隧四義。五行十守節。」三隧。四義。五行。十守。三隱。八善。皆不足貴。惟獨見獨知。睿量虛實爲足貴。

「說山訓。」故玉在山而草木潤。淵生珠而岸不枯。二句。本荀子勸學篇。

「食草之獸。不疾易數。水居之蟲。不疾易水。行小變而不失其常。」數句。本莊子田子方篇。

「人閒訓。」單豹倍世離俗節。」本莊子達生篇。

『修務訓』「夫世有易成者。名小。難成者功大。君子雖未有利。福將在後至。」言美成在久。後世當有知者。猶揚雄言後世有子雲則知之矣。

『秦族訓』按。族。聚也。羣道衆妙之所聚萃也。秦族者。聚而又聚者也。始之又始。曰秦始。一之又一日秦一。伯之前有伯曰秦伯。極之上有極曰秦極。以及『秦山』『秦廟』『秦壇』『秦折』皆尊之之辭。

集

楚辭

惜誦「欲逴回以干僚兮」僚。當作際。謂際邊際會。莊子仁義之士貴際。

涉江文選獨選此篇。無亂曰「鷺鳥鳳皇。日以遠兮」以下一節。

惜往日自吳才老疑古文尙書爲贋作。朱子語類亦數數疑之。明宣城梅氏崑山歸氏復申其說。我朝自閻百詩後。辨僞古文者。無慮數十百家。姚姬傳氏。獨以神氣辨之。曰不類。柳子厚辨鸚冠子之僞。亦曰不類。余讀屈原九章。惜往日亦疑其贋作。何以辨之。曰不類。

懷沙史記屈原傳於「予何畏懼兮」之下。多四句。

陳思王集

壁篋引此篇言盛時難恃。樂不可極。其末。歸於知命而無憂也。

綴鮪篇按解題云。『謂長歌行者。以芳華不久。當努力行樂。無至老大乃傷悲也。』此則有遠志而思立功於世者。殊與長歌行不類。

豫章行言賢才得知己而用之。則遠則福。無知己而棄之。則窮則禍。

蒲生行浮萍篇塘上行。或以爲魏武帝所作。或以爲文帝妻甄后所作。歎以讒訴見棄。此篇之意亦同。門有萬里客。門有車馬客。其客多敝市朝。遷變朋舊凋落之事。此門有萬里客。其客自敝行役之苦。

怨歌行子建蓋以周公自喻。

美女篇美女如此容華。而安於義命。不輕於求遇合。以喻士不求苟達也。

白馬篇此亦求自試表中之意。

盤石篇詩意大抵言生於帝王之家。處於風波之地。常有性命之憂。

『盤石山巖石』上石字有誤。當用連綿字。與飄緲字對。

驅車篇此亦輕舉遠遊之意。

種葛篇『恩紀曠不接』謂已見疏於文帝。猶婦見棄於其夫也。

棄婦篇子建見疏於文帝。屢遷國邑。有才而不見用。自嗟屏逐之臣。故以棄婦自喻。

公讌詩此在鄴宮與兄丕讌飲時。武帝在。故稱丕爲公子。

贈徐幹和氏。植自喻。謂已有獻寶之責。而已遭刑也。知己。植自指。謂徐幹侯己。而已之冠亦被敝棄也。

贈丁儀首四句。賦景物。朝雲四句。喻用才。則民被其澤。棄才則國無所獲。在貴四句。譏時之貴臣。不以薦賢下士

爲意。末四句。自矢不棄良友。

贈王粲鴛鴦喻粲。我願二句。喻己思引粲而無良會。重陰句。喻太祖。王粲最爲太祖所重。故末四句云爾。

贈丁儀王粲『從軍』謂建安三十年。曹西征張魯。皇佐指魏太祖權家。謂兵法之權謀家也。君子。謂丁王也。

丁時爲太子掾。位卑。故曰怨在朝。王時免官在家。故曰歡自營。歡怨皆有所不平。故勸之以中和。

贈丁廩『君子義休侍。小人德無儲』侍。待也。一曰具也。儲謂蓄積之。以待無也。休侍。謂美而有餘也。

贈白馬王彪第五首。『同生』指任城王彰。『桑榆』以日之將落。喻人之將老。影響雖捷。尚不如將逝之年光。

其去更速也。

第七首。言有司逼迫太甚。時虞不測之禍。變生斯須。聞事耳。誰能保百年哉。

遊仙詩。此亦升天行。五遊篇。遠遊篇。仙人篇等作之旨。

雜詩第一首。之子遠人。嘗有所專指之人。若徐幹之類。易小過飛鳥遺之音。謂欲託之。寄音信於故鄉也。轉瞬而雁之形影已不見矣。

第二首。轉蓬游子。似皆子建以自喻者。本根。指京師也。

第三首。良人我君。皆喻思君之意。

第四首。此首自惜有才。而不得及時見用也。

第五首。此即求自試表。願身分蜀境。首懸吳闕之意。

第六首。此亦求自試表之意。

閨情。此亦與棄婦篇相近。

七哀詩。按樂府詩集所載。又有一首。晉樂所奏。凡二十八句。較本辭多十二句。

情詩。此代述久役不歸之情。游魚二句。言得所也。眇眇二句。言不如魚鳥也。

阮步兵集

詠懷第六首。此首阮公以邵平自比。膏火二句。亦譏趨附權勢者。

第九首。首四句。阮公以伯夷自況。鸚鵡似亦刺趨時附勢之小人。

第七首。魏甘露五年六月甲寅。司馬昭立常道鄉公。在月之三日。陳沆謂此詩即指此事。三日將欲殺云者。謂過

三旬即移秋節也。願覩卒歡好云者。恐其復爲齊王芳高貴鄉公之續也。

第八首。陳沆以聲折志歸焉。譏黨附司馬氏者。未知然否。至謂末四句爲阮公自命之詞。鑒黃鶴之失路。甯燕雀以卑棲。則深得本指矣。

第十首。陳沆謂此章譏黨附司馬氏者。愚謂前六句似譏鄧颺何晏之徒。後四句則自沉之語言。雖不能避世高舉。猶可全生遠害耳。

第十三首。求仁得仁。猶云求禍得禍。蘇李之誅死。自取之耳。

第十五首。此首自述其抗志自修。遜世無悶。千秋二句。言榮名不足稱。錢門二句。言長生不足慕。但求有自修之實耳。

第十八首。首四句。言魏祚將傾。朝爲二句。指前此被魏之恩澤者。豈知六句。言夏侯之屬云亡。殉國之人未見。景山松。似有所指之人。可信其勁節不改者。

第二十首。陳沆以此首與二妃游江濱。昔日繁華子二章。同類并觀。皆以妾婦譏司馬氏也。國藩按。歧路染絲。言變遷不定。翻覆無常。不特燕婉之情如此。卽國之存亡。亦不過一反覆間耳。

第二十一首。阮公自沉之詩。

第二十八首。首四句。謂日往月來。月往日來。互有屈伸。不相讎怨。人生有違卽有窮。有得卽有失。又何怨哉。豈效二句。言不學世上小兒。營營干求。朱鼈。阮公以之自沉。亦遠遊遺世之意。

第三十二首。此亦汲汲自修之意。

第三十四首。揚雄傳云。『君子得時則大利。不得時則龍蛇。』龍蛇者。一曲一直。一伸一屈。如危行。伸也。言孫卽屈也。此時畏高行之見傷。必言孫以自屈。龍蛇之道也。

第三十五首。願攬二句。有魯陽揮戈駐景之意。白日不移光云者。欲使魏祚不遽移於晉也。天階二句。言手無斧柯。無路可以迴天也。

第三十六首。無形。言無生之始也。莊子『溯其始而本無形。』非徒無形也。而本無生。豈華樹日中時也。至冥則夕矣。

第三十七首。天之道。陰求陽。陽求陰。氣也。人之道。男求女。女求男。情也。古人以不遇爲不偶。詩騷之稱笑人。皆求君求友也。此詩之望所思。亦求友之意。似有所指。言天時既嘉。道路無慮。而美人不來。能無感慨。

第三十八首。此首有屈原遠遊之志。高舉出世之想。

第三十九首。此首似指王凌諸葛誕母邱儉之徒。

第四十一首。首四句。謂晉氏網羅人才。庸庸者皆見錄用。生命無期度以下。阮公自喻其遊於世網之外。

第四十二首。首四句。言魏三祖時多良輔賢士。陰陽四句。指齊王芳以後之時。園綺八句。阮公以自喻也。上世士。卽園綺伯陽之倫。

第四十三首。此首亦遠遊遺世之念。

第四十四首。焉敢二句。嘗有誤字。凌風樹。亦阮公以自況者。有『託根霄漢。終古不凋』之意。

第四十五首。幽蘭四句。喻當世之賢士。葛藟二句。喻當世之在勢者。

第四十六首。此首藝文類聚所載。與今本不同。而義意近優觀。李善文選注。江文通擬詠懷詩。所引與藝文同。亦一證也。今從藝文定正。國藩按。此首似以鸞鳩自比。以明不慕高位。不貪遠圖之意。

第四十八首。按上林賦注。『焦明似鳳。西方之鳥也。』此與鳴鳩並舉。殊覺不倫。末二句。與前四句尤爲不倫。疑後人所附益也。

第四十九首。喬松。冀有國楨。扶魏祚於將傾者。高鳥。自喻其遺世外也。末二句。有謂伯夷之心。而不學伯夷之迹也。

第五十首。明遠。似指一死生。齊彭殤者言之。

第五十一首。四句言曹氏施厚澤於司馬，而遭其反噬。末二句言司馬氏機智可怖。

第五十三首。大要不易方云者，謂貧富貴賤，死生禍福，皆有自然之理。雖智巧萬端，不能逃出範圍之外。末二句言花有榮必有落，人有盛必有衰也。

第五十四首。前八句有遠遊遺世之志。末二句言己雖生於濁世，豈其玉石不分，隨衆人之混混，而昧於時代之變遷邪。

第五十五首。按日夕將見欺，用季平子日入慝作事。

第五十六首。鶴鶴且飛且鳴，詩小雅及東方朔答客難，皆以喻汲汲自修之士。此則譏附勢之人。

第五十七首。首四句，有時移勢異，舉目山河之感。翩翩二句，言時移勢殊，我亦遺世遠舉，不效世之龔贖，貪戀祿位，茫然不知玉步之已改也。

第五十八首。此首亦有高舉遺世之意。末二句，似譏拘守禮法之士。

第五十九首。二三句，似亦刺魏巨而二心於晉旋盛旋敗者。

第六十一首。少年欲從軍立功，而晚節悔恨者。念仇敵不在吳蜀，而在堂廉之閒也。

第六十二首。此首或指孫登嵇康之流。

第六十三首。此首自述其韜精匿志，觀物自怡之素。

第六十四首。首二句與第九首相似，而基字不如岑字之穩。末句思妖姬語，尤不倫。疑非阮公詩。後人附益之耳。

第六十五首。以王子晉比曹芳，以浮邱比司馬懿。

第六十七首。此首似譏司馬懿厚貌深情，善自厲飾。

第六十九首。明珠句，似用鄧陽明珠闔投之意。干即投也。并一餐，即并日而食也。將損彼之有餘，益我之不足。而

愁壘已生，公道不可持也。

第七十一首。此首有冉冉將老。修名不立之感。

第七十二首。首四句。刺馳騫於名利之途者。勢路有所由。謂趙孟能賤之也。更希句。卽毀方瓦合。儉德避難之意。末句疑有誤字。

第七十三首。前六句。似刺賈充鍾會之徒。

第七十四首。甯子二句。謂甯戚非全不知道者。而飯牛之歌。果爲何事而肯以身殉之也。薄甯戚而慕巢由。阮公之志事著矣。咄嗟。猶須臾也。言榮來辱去。辱來榮去。不過須臾間事。吾但味吾道真而已。

第七十六首。『秋駕安可學。東野窮路旁。』秋駕。作稅駕者說。莊子逸篇。尹儒學御三年而無所得。夜夢受秋駕。明日往朝師。師曰。今將教子以秋駕。註曰。秋駕。法駕也。國藩按。秋駕二句。言有才終至蹉跌。東野稷馬力已竭事。見莊子。

第七十七首。此首謂死不足憂。但恐有平生親好。迫之死於非命。同始異支流。謂少年相好之人。中道異趣也。憐怨非他人。乃平生親昵朝夕聞見之人。一旦異趣。談笑之際。睽睽之閒。已成胡越。此有憂生之歎矣。末句疑有誤字。

第七十八首。終身履冰。下學上達。皆嗣宗吃緊爲人處。

第七十九首。鳳皇。阮公自況也。處非立三字。疑有誤。

第八十首。望佳人而不見。招松喬而不來。將抱孤芳而長逝耳。

第八十二首。此與四十四首七十一首語意重復。別無精義。疑亦後人附益之也。

陶淵明集

神釋。日醉二句。辨形贈影之言。立善二句。辨影答形之言。

九日閒居。時暹傾。指易代之事。淹留無成。騷人語也。今反之。謂事業則無所成。於道德豈無成邪。

游斜川詩序。淮南子。『崑崙山有層城九重。』陶公因目中所見之層城。而遙想崑崙之層城。觀上文臨長流。望曾城句。當是斜川有山名曾城。故愛其佳名。與崑崙同耳。駱庭芝云。『曾城落星寺也。』然云『獨秀中舉。』則是指山非指寺矣。

『中觴縱遙情。』中觴。猶大謝詩之『中飲。』卽酒半也。

示周續之。祖企謝景夷三郎。時三人皆講禮校書。

『相去不尋常。』言不近也。

『祖謝響然臻。』薦禰表章士響臻。

怨詩。楚調示龐主簿鄧治中。古今樂錄載怨詩。始於下和。繼以班婕妤。蓋傷不見知之意。此篇之末。亦傷世無知己也。

答龐參軍詩序。『本既不豐。』謂素癯瘠也。

五月旦作和戴主簿。『回復遂無窮。』去復來。來復去也。

『晨色奏景風。』史記律書。景風者。居南方。

棲居。『想思則披衣。』言起往相訪也。此理二句。言此樂不可勝。無爲舍而去之也。

於王撫軍座送客。王弘爲撫軍將軍。江州刺史庾登之爲西陽太守。時被徵還京。謝瞻爲豫章太守。時將赴郡。王撫軍於湓浦餞之。或邀陶公預宴。

『懸車厥餘暉。』淮南子。『日至悲泉。是謂懸車。』

與殷晉安別。良才句。指殷。江湖句。陶公自指。

贈羊長史。劉裕破秦以後。霸業已盛。『玉步將更。』故前者思越中都而九域未一。今者九域已一。而世代將改。但

當從綺角游耳。駟馬不贊憂患。貧賤或多歡娛。亦公之素志也。

始作鎮軍參軍。經曲阿。謂無心遇之也。觀一荷字。明其爲適然相值。非有意就此參軍也。

庚子歲五月中。從都邊阻風于規林第二首。『巽坎難與期』。巽順也。坎險也。或曰。巽風也。坎水也。

癸卯歲十二月中。作與從弟敬遠平津二句。言苟不慕公孫弘之丞相封侯。則栖遲山林。亦未爲拙也。不由。謂不由其道也。

賁子舒儼宣侯雍份端佚通修。凡五人。舒宣雍端通皆小名。

飲酒第二首榮啓期事。見列子。至於九十猶不免行而帶索。則自少壯至老。當年之飢寒。不可勝述矣。

第七首。此首文選錄入雜詩中。

第十一首。『顏生稱爲仁。榮公歸有道。』歸猶稱也。論語『天下歸仁焉。』稱其仁也。曹植詩『衆工歸我妍。』

稱其妍也。此歸字與上句稱字對舉互見。

第十三首。晉宋間以同居爲同止。兩人同居。一醉一醒。淵明以醒者規規爲愚。而醉者傲兀差穎耳。

第十六首。『孟公不在茲。』孟公。陳遵也。

第十八首。末句用柳下惠事。蓋以揚雄柳下自比。陶公與親舊亦好縱言鬯論。但不言禪代事耳。

第十九首。彭澤之歸。在義熙元年。此云『復一紀。』則賦此飲酒。當是義熙十二三年間。

止酒首六句止字。俱不貼酒說。末二句止字。亦不貼酒。

述酒按湯文清公漢註述酒詩。定爲庾詞隱語。蓋蓋帝哀詩。

『重離照南陸。』司馬氏出重黎之後。以離爲黎。故爲錯亂也。

『素礫鼎修渚。南嶽無餘雲。』修渚。指長江。卽江左也。此二句。言氣數衰謝。已上言晉室南渡。國雖未亡。而勢已

分裂矣。

『豫章抗高門。重華回靈墳。』劉裕初封豫章王。重華謂恭帝禪宋也。

『流猴抱中數。傾耳聽司晨。』因恭帝之弑。故流猴長歎而達曙。

『神州獻佳粟。西靈爲我馴。』義熙十四年。鞏縣人獻嘉禾。西靈當作四靈。裕受禪文有『四靈效徵』之語。

『諸梁董師旅。羊勝喪其身。』葉公殺白公勝。喻裕篡宗室之有才望者。

『山陽歸下國。成名猶不勤。』謚佞不勤成名曰靈。二句以魏降漢獻爲山陽公而卒弑之。喻裕廢帝爲零陵王而卒弑之也。

『安樂不爲君。』安樂公。蓋以劉禪比恭帝。

『平生去舊京。』卜生句。平生入句。不甚可解。湯公之說。亦不可通。

『峨峨西嶺內。偃息常所親。』西嶺。嘗指恭帝所葬之地。謂偃息邨山。天容自固。豈與尋常之壽夭并論哉。

擬古第二首。『聞有田子泰。節義爲士雄。』田疇字子泰。事劉虞。虞爲公孫瓚所害。誓爲報讎。不遂。陶公蓋以疇自比。

第六首。『稷下多談士。指彼決吾疑。』稷下決疑。亦詹尹問卜之類。淵明不任之志久定。姑託爲訪卜稷下之辭耳。

第七首。首六句。公自詠。後四句。歎趨時附勢之人。

第八首。首陽易水。伯牙莊周。陶公之志事可見矣。

第九首。兩晉立國。本無苞桑之固。干寶論之詳矣。末二句。似追咎謀國者之不臧。

雜詩第一首。『落地爲兄弟。』言隨處相逢皆兄弟也。

第三首。此篇亦感興亡之意。

第四首。『不知老』句貫下六句。謂自少至老。祇在一邱一壑之中。與親戚子孫相聚。正與四海句相反。末四句。謂死後縱有空名。而生前冰炭滿懷。已不勝其苦矣。

第七首。『素標插人頭。前途漸就窄。』素髮在頭。若標幟然。前途漸窄。猶云來日漸短也。

第八首。代耕。祿也。既失其方。則蹇蹶乃其理也。

第九首。淵明未嘗有遊行之役。似因故國已亡。譬若遠行在外。無家可歸。託爲之辭。後二首。亦有行役之感。不甚可解。

詠貧士第一首。雲見而隨滅。鳥出而復歸。皆喻己之甘守故轍。早賦歸來也。

謝康樂集

述祖德詩。『弦高情贈師。』贈舊作晉。呂氏春秋載秦三帥對弦高之言曰。『贈之道也。迷惑陷入大國之道。』

高誘注曰。『贈。國名也。』

『明哲垂經綸。』明哲指祖玄也。

第二首。河外爲洛陽。西晉一失。不復反正也。江介謂金陵。東晉疆宇日蹙也。賢相謂祖玄也。舜分十二州。東晉時有其七。故曰七州。

九日從宋公戲馬臺送孔令時哲歸客。皆指孔令也。毛詩序曰。『鹿鳴廢則和樂缺矣。』此云『隆所缺。』謂尙有鹿鳴之意。孔以養素爲榮。而已以戀位爲辱。故云愧將別。

從游京口北固應詔玉璽黃屋二事。皆因辨名教而立之等威也。若道則有超乎二事之外者矣。

永初三年七月十六日之郡初廢都。始得傍歸路。靈運之永嘉。必途經始甯故宅。及祖父邱墓。皆在始甯。故曰傍歸路。

鄰里相送至方山資寡欲之理。爲幽棲之道。豈止年歲之別。將有終善之志。富春渚『外物徒龍夔』徒龍夔云者。聽其或屈或伸。於己心了若無與也。

七里瀨『遭物悼遷斥。存期得要妙。』物。外物也。期。襟期也。

晚出西射堂『含情尙勞愛。如何離賞心。』言爲含情尙知勞愛。況乎人而離於賞心也。

登池上樓。以深潛而葆真。鴻以高飛而遠害。今以嬰俗網。故有愧虬鳩也。

『新陽攻故陰。』神龍本草曰。春夏爲陽。秋冬爲陰。

游赤石進帆海。永甯安固二縣。中路東南便是赤石。又枕海。仲連句。明海上之可悅。子牟句。言雖悅海上。仍不忘朝廷。

游嶺門山詩『威摧三山嶠。滌汨兩江駛。』威摧滌汨。皆疊韻連綿字。

田南樹園激流植援『樵隱俱在山。繇來事不同。不同非一事。養病亦園中。』樵者在山。隱者亦在山。老圃在園。吾之養病亦在園。所以。在園者。亦不同。故曰不同非一事。

於南山往北山經湖中瞻眺『解作竟何感。升長皆丰容。』解作升長。用二卦名。

還舊園作見顏范二中書聖靈句。謂宋高祖。微尙句。謂歸隱之志。未遽宣陳也。事蹟句。言媿不似史魚。兩如矢之直也。心愜句。言慕孫叔敖。三去相之賢也。兩如。三避。歇後語。究未穩愜。盛明二句。指宋武帝。殊方二句。謂己昔蒙召用。

酬從弟惠連首章喜惠連之來會。次章喜其聚而處其辭。三章敘別後得其來詩。

初發石首城日月句。指宋太祖也。成貸句。貸施也。既貸其性命。又予以官職。故曰『兼茲晨裝搏會颺』會颺。猶屢隨也。搏字用莊子『搏扶搖』牟角字。再與句。前之永嘉。今適臨川。故曰『再與朋知辭。』

『道路憶山中。』越客。靈運自謂。楚人。指屈原。存鄉句。亦指屈原。

『自已爲誰慕』已止也。纂繼也。莊子曰。『夫吹萬不同。而使之自已』也。言情已止矣。不解因何復慕也。擬魏太子鄴中集詩第二首王粲秣馬赴楚壤。粲至荊州也。上宰。指魏武帝。雲騎二句。謂平劉表也。

第三首陳琳相公。指魏武帝。明德指魏文也。

第四首徐幹。『中飲顧惜心』說苑晉靈公欲殺趙宣孟而飲之酒。宣孟知之。中飲而出。國藩按。中飲。猶曰酒半也。鄭註天官小宰。中字別之。三國志周瑜傳中江舉帆。兩中字與中飲略同。

第五首劉楨。『朝游牛半下。暮坐括揭鳴。』括揭鳴。疑當作埴揭鳴。揭與築音義同。埴揭鳴。卽雞鳴。謂晨也。朝游則至於夕。暮坐則達於晨也。

鮑參軍集

採桑陌上桑。本秦羅敷拒絕挑者之辭。樂府解題謂採桑。亦出於陌上桑。國藩按。陌上桑。謂夫不在而拒人。此則似與夫同處者。

代放歌行放歌行。一曰孤兒行。一曰孤子生行。言孤兒爲兄嫂所苦。難與久居也。鮑照此詩。則言榮利之場。不宜輕入也。此詩首四句。以蓼蟲之習苦。喻世之習於榮利無任。沈溺而不反者。鷄鳴八句。極言榮利之場。衆所共趨。夷世十句。蓋反言以見意。向使君非愛才。嫌猜不斷。則不能不臨路邊回矣。

代陳思王京洛篇第一首。『春吹回白日』四句。言時移事異。盛極必衰。

代門有車馬客行門有車馬客。皆言問訊。其客備敘市朝遷變。親友彫落之意也。鮑詩則并敘此客。旋又別去。篤行李。猶云珍重道途。

代東武吟東武吟。傷時移事異。榮華徂謝也。此專言苦戰老將。傷時事之移易。始隨張校尉。張審也。後逐李輕車。李蔡也。密塗二句。密近塗。猶萬里。則遠者可知。甯歲猶七奔。則多事時可知。

代出自薊北門行出自薊北門行。大致與從軍行同。而兼言燕薊風物。此則并及忠節矣。

代陳思王白馬篇『埋身守漢境。沈命對胡封。』埋身沈命。皆堅志赴敵之意。

代昇天行昇天行。本求仙之意。而此詩窮途二句。似亦譏學仙者。

松柏篇『行女游歸途。』行女。已嫁之女。

代苦熱行前言苦熱瘴毒。末言從軍死地。勞多而賞薄。

『茵露夜沾衣。』茵。草名。有毒。其上露。觸之。肉即潰爛。

代結客少年場行結客少年場行。本言輕生重義。慷慨以立功名者。此則兼言晚節坎壈之狀。

答客對客自陳素抱。而終問之。亦屈原卜居之旨。

從臨海王上荆初發新渚首二句。襲王粲從軍行調。

詠史『寒暑在一時。』所好生毛羽。所惡成瘡疥。勢利所在。變態須臾。故曰寒暑在一時。

擬古第一首自傷不遇。不如魯客之宦成名遂。

第二首前十句。以舌端筆鋒。跌宕自喜。晚節四句。僅以和戎見長。悼本志之變化。末二句。言今之事。已異於昔之志。則後之遇。當又異於今之事矣。

第三首志在立功邊郡。

紹古辭第七首憂來無行伍。歷亂如草葛。詩女子善懷。亦各有行。似爲明遠此句之所本。

學劉公幹體第三首以朔雪自比其歲寒皎潔之性。以桃李比側媚之子。希世取寵者。茲晨冬也。豔陽天春也。

白雲此亦輕舉遠遊之意。

行樂至城東橋此詩亦感春之屬。前十四句。言衆人爭名爭利。擾擾不休。末四句。言華容銷歇。不勝感歎。

『開方及禪節含采客驚春』二句。以草喻人也。吝惜也。草始而開芳。既而含采。草極茂。則有驚春之象。盛極則

必衰。故可惜也。

謝宣城集

暫使下都。夜發新林。至京邑。贈西府同僚。『驅車鼎門外。思見昭邱陽。』成王定鼎於郊。其南門各定鼎門。此借用以指建康之南門。昭邱指荊州。

郡內高齋。聞望答呂法曹。『若遺金門步。』若字有儻能之意。

新亭渚別范零陵。『洞庭張樂地。瀟湘帝子游。雲去蒼梧野。水還江漢流。』洞庭瀟湘。皆范赴零陵經過之道。蒼梧則更在零陵之南。故曰雲去。零陵之水。必須由江漢金陵以東入於海。故曰水還。

『廣平』二句。言范同廣平。而聲聽方向籍。己當居茂陵之下。將於彼而求見。

恭役湘州與宣城吏民別。『下車遽喧席。』喧席。卽煖席也。後世所譏。虬戶銑溪。亦此類耳。

晚登三山還望京邑。『灑埃望長安。河陽視京縣。』以灑陵河陽比三山。以長安洛陽比石頭城。

始出尙書省。眺兼尙書殿中郎。高宗輔政。以眺爲諮議。領記室。故出尙書省也。逢休明。謂齊武帝時也。宸景句。謂武帝崩也。繼體句。指鬱林王昭業也。英袞二句。謂明帝廢鬱林王海林王而卽位也。明帝卽高宗也。輕生。似眺自稱之辭。猶自稱微生小生也。辭宮闕。出尙書省也。陪旌棨。爲諮議領記室也。

和王箬作融八公山。『西距孟諸陸。』周禮曰。『正東曰青州。其數曰孟諸。』亦在八公山之東。而云西者。避上文耳。『素景淪伊穀。』素景。晉也。伊穀。洛陽也。淪者。謂懷愍陷於賊庭。宗袞指謝安。明牧指謝玄。

『春秀夏已凋。秋場庶能築。』春秀句。謂年華已逝。秋場句。謂終嘗歸田。

和伏武昌登孫權故城北拒句。謂周瑜破曹操於赤壁。西龕句。謂陸遜破劉備於西陵。卜揆崇離殿。卜揆用詩。卜

云其吉。揆之以日。指吳相宅於武昌也。茂宰指伏鼻容。幽客。眺自謂也。

李太白集

古風第二首蟾蜍句。暗指楊妃。蟬螭句。指祿山陷京師。兩耀。謂元宗在蜀。肅宗在靈武。

第六首。『蟣蝨生虎鷄』按。上林賦。『蒙鷄蘇綺白虎』。蓋畫鷄蘇以爲冠。畫白虎以爲袴也。此云『蟣蝨生虎鷄』。蓋蟣蝨生於衣袴之上也。

第十二首。君平。騶虞。鸞鷟。皆太白以自比。

第二十首。此首亦志在學仙。

第二十一首。此首言曲高寡和。

第二十二首。此首有倦遊思歸。落葉糞根之意。

第二十三首。此首悲年光之迅駛。

第二十六首。美女求偶。皆喻賢才求主。不獨此首爲然。亦不獨公詩爲然。

第二十七首。此首亦傷時光之易逝。

第二十八首。此首亦欲高舉出世。

第二十九首。大儒二句。用莊子『儒以詩禮發冢』事。

第三十一首。此首亦感時節之早謝。

第三十二首。此首自況。即賦大鵬之意也。

第三十三首。此首似諷天寶末徵兵討閣羅鳳。即白太傅新豐折臂翁之詩意。

第三十四首。此首刺當時文士之以雕飾奪天真者。即第一首。『綺麗不足珍』之意。

第三十五首。此首戒懷材者。不宜自炫。宜以老子魯連爲法也。

第三十六首。前六句。言積誠可以回天。後六句。言衆口可以鑠金。理有定而事無定。反復感歎。

第三十七首。此首喻賢才處幽谷。須有汲引之者。

第三十八首。此首言萬事反覆。波瀾千變。

第四十首。此首卽屈子遠遊之意。

第四十二首。此卽郭景純所譏。『燕昭無靈氣。漢武非仙才』之意。

第四十三首。此歎華士不能久榮。

第四十四首。此首志在高舉出世。亦自況之詩。

第四十五首。此歎承平時權門之盛。今已衰歇。

第四十六首。末二句自況。卽陶公『凝霜殄異類。卓然見高枝』之意。

第五十一首。此首亦『歲不我與』之意。

第五十八首。此首卽翟公署門之意。老杜貧交行。亦同此慨。

『古朗月行』按『蟾蜍蝕影』『陰精淪惑』等句。似亦調譏諂蔽明之意。

『上之回』渭川老。文王訪賢也。襄野童。黃帝問道也。瑤池宴。穆王佚遊也。末四句。似有所覬。

門有車馬客。行北風二句。言兩京俱陷。借古題以傷時事。

東海有勇婦。魏鞞舞五曲中。一曰關中有賢女。太白作此代之。

白馬篇。言人當立功立事。盡力爲國。不可念私也。鮑照沈約之作。則言邊塞征戰之事。

秦女休行。左延年辭。言秦女休。爲燕王婦。爲宗報讎。殺人都市。遇赦得免。傅元詞。言龐娥。爲報仇殺人。以烈義稱。

太白此辭。擬左延年。但左傳俱用長短句。太白但用五言。爲小異耳。

東武吟傷時移事異。榮華徂謝也。

短歌行魏武帝短歌行。有身世多憂。汲汲求賢之意。各家多及時行樂之意。

空城雀按空城雀自鮑照以下。皆有含辛茹苦。守分安命之意。

紫騮馬郭集以紫騮馬爲從軍久戍歸而作。此詩末二句反之。語愈沈痛。

豫章行按豫章行。陸機謝靈運之作。言壽短景融。容華不久。傅元之作。言盡力於人。終以華落見棄。太白此作。則似從軍之辭。

對酒按魏武帝賦。對酒。其旨言王者德澤廣被。政理民和。萬物咸遂。范雲以下。則言當及時行樂。

去婦辭按『自從』二字。疑衍。通首皆五言。不應著此一七字句。按此顧況棄婦辭也。後人竄入太白集中。

長歌行按長歌行。言人當努力爲樂。無至老大乃傷悲也。

贈徐安宜『浮人若雲歸』浮人。猶流人也。『遊子滯安邑』遊子。太白自謂也。

贈任城盧主簿潛『海鳥知天風』海鳥。太白以自喻也。

早秋贈裴十八坦『撫琴發長嘯』以上十句。太白自詠也。

贈范金鄉二首前一首。自述。次首頌范觀枉。『清眇相招攜』等句。似范有書邀太白東遊也。桃李二句。謂縱無書信人。猶願攀附而來。那能二句。言況復有書相招也。

玉真公主別館苦雨贈衛尉張卿第二首前路備陳苦雨愁寂之狀。末八句。自露英雄振奮之概。

贈韋秘書子春首八句。論賢者宜濟世。不宜高隱。惟君八句。言韋門第甚盛。不宜久於祕書。且復八句。敘韋暫歸

山中。末八句。敘兩人交誼。卻願女几峯句。女几山在河南府宜陽縣。韋祕書此時當暫歸山中。行將復出也。

贈何七判官浩五字句中。跌宕乃爾。

讀諸葛武侯傳書懷贈長安崔少府叔封昆季用崔州平影入少府。鍼線痕跡。宛爾可尋。

贈崔侍御楊齊賢本無末二句。似以無之爲是。如有此二句。赤草使必有誤字。

贈新平少年『搏擊申所能』亦有李廣斬霸陵尉之意。太白千古英豪。度量亦殊不廣。

書情贈蔡舍人雄首八句自敘。夙有用世之志。遭逢十句。敘被讒去國。皇穹十句。敘讒謗得雪。再被恩寵。夫子四句。頌蔡將得志。乘時我縱句。至末。自述邈然高蹈之志。

贈別從甥高五三朝謂歲朝月朝日朝。卽正月元旦也。見漢書谷永傳觀『貧家羞好客』六句。蓋高五至公家辭別。而公愧款接不能豐贖耳。

贈裴司馬暹首皆用比體。愁苦不窺鄰。於人無怨也。泣上流黃機。反身修德也。天寒四句。動心忍性也。容華世中稀。增益其所不能也。

贈從孫義興宰名元惡。謂安史之亂。疲人卽疲民也。因避諱而作人。應桑林。用莊子庖丁解牛合於桑林之舞事。謂李銘與亞相投契。如響斯應也。

贈深陽宋少府陟首四句。以李宋二姓引入。嘗聞四句。喜相見而披豁情懷也。威蕤四句。指宋由京而至江南。早懷四句。自敘遭讒失志。末四句。敘投分之意。

贈張相鎬第一首『昔爲管將鮑』以下皆自述也。第二首首二句。自敘家世。本出李廣。想像六句。借晉事以喻明皇幸蜀。

獄中上崔相換太白坐永王璘事。繫尋陽獄。宣撫大臣崔煥與御史中丞宋若愚驗治。以爲罪薄宜黃。繫尋陽上崔相換『毛遂不墮井。曾參甯殺人』。毛遂曾參。皆有兩人同名。事見西京雜記。太白引此。以自比其遭讒之枉。

贈劉都使此向劉都使借貸之詩。下語極有斟酌。

贈常侍御『周秦保宗社』。周秦謂東京西京時尙未收復也。經離亂後。天恩流夜郎。憶舊游書懷。贈江夏韋太

守良宰。自首至『白日落昆明』三十句。自敘少時以謫仙之才。講匡時之略。曾承韋太守餞別於長安。自十月到幽州。至『榮枯異炎涼』三十四句。自敘薄流燕齊知祿山之必反。而未敢言。又與韋相見於昌樂。親見韋秩滿歸朝之事。自『炎涼幾度改』至『兩京遂邛壘』。敘安史之亂。自『帝子許專征』至『何由訴蒼昊』二十六句。敘永王璘東巡。己因迫脅。賜金而獲罪。自『良牧稱神明』至『天然去雕飾』三十句。敘至江夏後韋太守顧遇之厚。並贊其詩句之工。自『逸興橫素襟』至末三十四句。敘與韋綢繆日久。得聞赦書。仍思見用於世。破賊立功。

贈宣城宇文太守兼呈崔侍御首十二句。太白自敘高潔之性。昔攀十二句。自敘平生有滅胡之壯志。蹉跎十六句。自敘功名不遂。薄遊江南。流連宣城之狀。君從二十句。頌宇文太守之賢。光祿至末二十句。敘太白與宇文交誼兼及崔侍御。

贈宣城趙太守悅首十二句。敘趙世胄之盛。憶在南陽十二句。敘昔相見之早。並頌太守之賢。選人十六句。謝趙款接之厚。仍冀其汲引也。

自梁園至敬亭山見會公談陵陽山水兼期同遊因有此贈『黃鶴久不來。子安在蒼茫。』子明子安。俱於陵陽得仙。黃鶴棲於園。即子安之仙蹟也。

獻從叔嘗塗陽冰首六句。以蕭曹耿賈引起陽冰不甚精切。浮雲三句。言邑中艱難瘠苦。安陸白兆山桃花巖寄劉侍御縮此等詩。似謝宣城。

聞丹邱子於城北山營石門幽居中有高鳳遺跡僕離羣遠懷亦有棲遁之志因敘舊以寄之敘嵩陽一會。旋別向雁門。落陽一會。旋別向故園。脈絡分明。而行閒一種跌宕飄逸之氣。獨邁羣賢。

淮陰書懷寄王宗成前十二句。言昔在梁苑。與王相會聚。後十二句。敘近至淮陰心懷。禪房懷友人岑倫南遊羅浮兼泛桂海自春徂秋不返僕旅江外書情寄之自首至『白日凋華髮。』敘岑在嶺

南自「春氣變楚關」至「出望黃雲蔽」，敘己在尋陽未入句。敘懷想之殷。自金陵泝流過白壁山，詠月達天門，寄句容王主簿，「故人在咫尺，新賞成胡越」，謂雖有新賞，而隔絕不得與同。咫尺萬里如胡越也。

留別西河劉少府「閒傾魯壺酒，笑對劉公榮」，阮籍與王戎飲酒，不與劉公榮，謂其相知甚深，無所疑忌也。感時留別從兄徐王延年從弟延陵首十句。敘李氏本老子貴貴，至唐而宗支蕃衍，自哲兄以下二十八句。敘徐王事，自兄弟八人以下二十二句。敘延陵與己交契之厚，自鳴蟬至末十四句。述留別之意，時方枯旱也。竄夜郎於烏江，留別宗十六環疑烏江及宗字誤。

送王屋山人魏萬還王屋首十六句。敘魏萬巍然獨往，高臥王屋。「入剡尋王許」句。王許，謂王羲之許邁也。「大江自三峽」以下，直至濡須口，皆楚境也。故稱曰楚江。

送溫處士歸黃山白鷺峯舊居首八句。自敘曾遊黃山，亦聞六句。敘溫歸白鷺峯，鳳吹八句。送溫去而又約相訪也。

送楊少府赴選首十句。言吏部選政之平。山苗二句。用左思「鬱鬱澗底松，離離山上苗」之詩，而反其意。夫子四句。送其赴選之正文也。衣工句以下，太白亦有用世之志。冀時有山公者，甄拔及之耳。

送族弟凝至晏堠單父三十里金鄉單縣等處村莊多名堠者。如今日定陶之冉堠，鉅野之龍堠，皆巨鎮也。其字亦作固。通鑑有「薄旬固」。涑水在單縣西南。

送裴十八圖南歸巖山第一首。風吹句。謂賢人遭讒毀，日沒句。謂小人鳴得意。

江西送友人之羅浮「君王縱疏散，雲壑借棗夷」二句。太白自謂供奉翰林，不合詔賜金還山也。

宣城送劉副使入秦「己過秋風吹」，言事過之後，略無形迹。猶云如浮雲之過太虛，如東風之射馬耳也。五松山送殷淑「仲文了不還」，猶云仲文去已久也。

登黃山峻歎臺送族弟深陽尉濟充汎舟赴華陰靜者伏草閒。公自謂也。空手二句。極言處貧約者不得自伸。酬王補嗣惠翼莊廟宋丞泚贈別荒溪波。浩然津。皆太白所命之名。猶莊子稱建德之國。無何有之鄉耳。

答裴侍御先行至石頭驛以書見招期月滿汎洞庭石頭驛在嘉魚之上。白螺磯之下。去岳州百五十里。公時在江夏。裴以月之初三四。至石頭驛。約公速行。將以十五同汎洞庭。公答此詩時。嘗已過十五矣。原注稱石頭驛在金陵失之矣。

尋魯城北范居士失道落蒼耳中見范置酒摘蒼耳作『自詠猛虎辭』。古來猛虎行多言不以艱險變節。太白之猛虎行則自傷不遇耳。

金陵鳳凰臺置酒『天老坐三台』。天老。力牧。黃帝之相。

登金陵冶城西北謝安墩首十句。敘元帝中興都金陵。西秦八句。敘謝安破秦兵事。冶城句。以下述登覽之懷。『胡馬風漢草』。馬牛其風。謂奔逸也。胡馬奔至漢地。因曰風漢草。

九日登巴陵置酒望洞庭水軍『醜齷東籬下。淵明不足羣』。按杜公譏『四皓』為局促。太白譏淵明為醜齷。自是詩人一時豪語。非定論也。東坡極稱『局促商山芝』。為杜公傑句。過矣。若謂其辭雖譏之。其意實欽之。乃為窺見古人深處耳。

自廣平乘醉走馬六十里至邯鄲登城樓覽古書懷相如廉頗。程嬰杵臼。平原毛穎三端。乃趙事之最大者。效古第一首此太白因晚節窮困。回憶昔年遇主寵榮之時。末二句。反言之。凡寓言類多迷離其辭。

第二首。此晒妬己謠詠者。都無才望。皆碌碌庸流耳。

擬古第一首此託為思婦望征夫之辭。

第二首。此託為貞婦不二心之辭。陌上桑羅敷作以自明其心者。

第三首。此託為痛飲者。及時行樂之意。

第四首。此香草以詒美人之意。

第五首。此卷舒自由。坦懷行樂之意。

第六首。此指安史之亂。『六龍頽西荒。』喻明皇幸蜀也。鴛鴦二句。太白自喻。而在江南爲永王所汙染也。惟肯二句。謂諸將不過鷹犬之材。忽躋侯王之尊也。

第七首。此首言仕途險穢。非己所可干。當立名於身後耳。

第八首。此首欲飲酒學仙。以遣愁思。

第九首。此與十九首中之迴車駕言邁。去者日以疏。二首同意。

第十一首。此亦探芳以貽美人之辭。

第十二首。此亦託爲貞婦思夫之辭。

寄遠第一首。『寫水落井中。同泉豈殊波。秦心與楚恨。皎皎爲誰多。』寫水。卽瀉水也。本鮑明遠『瀉水置平地。』寫水四句。謂彼此兩地同一想思。未知情恨孰多耳。

第十二首。『朝共琅玕之綺食。』琅玕。玉也。謂玉食也。

蜀道難按。樂府題解曰。『蜀道難。備言銅梁玉壘之阻。與蜀國絃頗同。』尙書談錄曰。『李白作蜀道難。以罪嚴武。後陸錫作蜀道易。以頌章梟。而公所自注。則曰諷章仇兼瓊。或故亂其辭邪。』

梁甫吟按。李勉琴說。言曾子思其父母。撰梁甫吟。郭茂倩謂梁甫吟者。言人死葬此山。亦葬歌也。諸葛武侯之梁甫吟似弔賢士之冤死。太白此詩。則抱才而專俟際會之時。

烏夜啼按。郭集所引唐書樂志教坊記。皆云宋彭城王義康聞烏夜啼被赦而作此曲。今郭集所錄諸詩。殊無及赦事者。

春日行鮑照春日行。言春日泛舟飲酒。張籍春日行。言春日入園賞花。太白此詩。言泛舟而不願學仙。

前有樽酒行。此題郭集錄者七家。大抵及時行樂之意。

北風行鮑照太白。皆言北風兩雪。而行人不歸。

鞠歌行按。鞠歌行。言知己難逢之意。郭集古今樂錄曰。『王僧虔技錄平調。又有鞠歌行。今無歌者。』陸機序曰。『按。漢宮閭有含章室。靈芝鞠室。後漢馬防第宅。卜臨道。連閭通池。鞠城彌於街路。鞠歌將謂此也。』又東阿王詩。『連騎擊壤。』或謂蹴鞠乎。三言七言。雖奇寶名器。不遇知己。終不見重。願逢知己以託意焉。

中山孺子妾歌郭集漢書曰。『詔賜中山靖王噲及孺子妾冰。未央才人歌詩四篇。』如淳曰。『孺子幼少稱。孺子妾官人也。』顏師古曰。『孺子。王妾之有品號者。妾。王之衆妾也。冰其名。才人。天子內官。』按此謂以歌詩賜中山王及孺子妾未央才人等爾。累言之故云及也。而陸厥作歌。乃謂之中山孺子妾。失之遠矣。藝文志又曰。臨江王及愁思節士歌詩四篇。李夫人及幸貴人歌詩三篇。亦皆累辭也。國藩按。如郭之說。則靖王子噲也。孺子妾冰也。未央才人也。三者平列。陸厥及太白辭。皆失之。然則古辭之鄧書燕說者亦多矣。設辟邪仗鼓吹稚子曲辭鼓吹曲。皆軍中之樂。耿介死不求四句。亦烈士報國之志也。

白頭吟郭集古今樂錄曰。『王僧虔技錄曰。白頭吟行。歌古體如山上雪篇。』西京雜記曰。『司馬相如將聘茂陵人女爲妾。卓文君作白頭吟以自絕。相如乃止。』樂府解題曰。『古辭云。體如山上雪。皎若雲間月。又云。願得一人心。白頭不相離。』始言良人有兩意。故來與之相決絕。次言別於溝水之上。敘其本情。終言男兒重意氣。何用錢刀爲。若宋鮑照直如朱絲繩。陳張正見平生懷直道。唐虞世南氣如幽徑蘭。皆自傷清直芬馥。而遭鑠金玷玉之謗。君恩以薄。與古文近焉。一說云白頭吟。疾人相知。以新簡舊。不能至於白首。故以爲名。唐元稹又有決絕詞。亦出於此。

臨江王節士歌漢書藝文志云。臨江王及愁思節士歌詩四篇。是臨江王也。愁思節士也。二者平列。陸厥及太白之辭。皆失之。庾信賦云。『臨江王有愁思之歌。』亦失之矣。

司馬將軍歌按劉曜之將平先破陳安於隴上安部下爲隴上歌太白作此擬之而無悲傷壯士戰死之意未詳何說。

結襪子按漢書王生使張釋之結襪而釋之名愈重太白此辭大抵言感恩之重而以命相許也。

『來日大難』集所錄諸家題皆曰善哉行太白題曰『來日大難』古辭云『來日大難口燥唇乾』言人命不可保當見親友且永長年術與王喬入公遊焉。

猛虎行按猛虎行多言不以艱險改節太白此詩則自傷不遇耳旆旌以下八句敘述安史之亂頗似楚漢以下十句借張韓以自喻有策不敢犯龍鱗以下則自敘其落魄不偶宣城溧陽皆其所經之地也。

玉壺吟鳳凰以下八句皆自贊之辭西施四句傷不遇也。

笑歌行此首與悲歌行二首皆非太白詩也郭茂倩樂府以悲歌行錄入雜曲歌辭以笑歌行錄入新樂府辭不知有何區別殆亦強作解事不辨其爲贗作耳。

扶風豪士歌洛陽三月四句言安祿山破東京我亦東奔四句自敘避亂來吳因至扶風豪士之家扶風豪士嘗亦秦人而同時避亂於吳者『扶風豪士天下奇』以下十句專贊其豪俊奇偉撫長劍以下九句自述其高懷逸志。

梁園吟玩詩指蓋公泝黃河而西赴長安過梁園時懷古而作也不知定在何時或祿山未亂以前耳。

鳴皋歌奉餞從翁清歸五崖山居鳴皋山在河南府陸渾縣故曰伊陽公此時與從翁俱在梁園故從翁歸鳴皋應由嵩少經過也。

勞勞亭歌既以康樂自比又以袁宏自比但恨無邂逅相知如謝尚者致寂寂獨宿空簾耳。

東山吟『浩浩洪流之詠何必奇』『浩浩洪流帶我邦畿』嵇康詩也太白之意謂不戀戀於王畿耳。

峨嶺山月歌送蜀僧晏入中京觀黃鶴樓前二句太白時在江夏見僧晏也我滯吳越句當指前事言之耳。

和盧侍御通塘曲結句似與起句相應。言會稽雖有邪溪。尚不如尋陽之通塘。會稽之梁孟。尚不如尋陽之盧侍御也。

江夏贈韋南陵冰「苦心不得申」一句以上。喜遷謫後相遇繡衣。當即指潘侍御。南平指從弟之造也。頭陀寺在鄂州。宋大明五年寔。

憶舊遊寄譙郡元參軍「君留洛北」以上。洛陽相會。旋即相別。「我醉橫眠」以上。洛陽相會。旋又相別。「歌曲自繞」以上。晉州相會。旋又相別。「鄴臺之北」以上。關中相遇。旋又相別。四會四別。統名曰憶舊遊。

魯郡堯祠送竇明府薄華還西京自「蛟龍盤」以上。均敘堯祠風景。自「君不見」以下。談詭跌宕。變化離合。不可方物矣。

高陽小飲真瓊瑣。山公醲酎何如我。竹林七子去道賒。蘭亭雄筆安足誇。賒。遠也。謂竹林諸子去道甚遠也。四句評貶古人之豪飲嘉宴。不足尙也。

單父東樓秋夜送族弟況之秦時。凝弟在席自「長安宮闕九天上」至末。皆太白自傷曾爲近臣。有疏落天涯之感。

答杜秀才五松山見贈「銅井炎鑪歎九天」秋浦有銅有銀。南陵有銅官冶。卽梅根治也。

杜少陵集

送高三十五書記國藩按。王師句。窮荒句。慎儀二句。皆不備於哥舒之辭。

昔兩奉寄隴西公兼呈王徵士「奮飛旣胡越」按奮飛句。言爲兩所阻。咫尺千里。不能奮飛若胡越之相隔也。同諸公登慈恩寺塔按。昔賢謂以王母比楊妃。瑤池日晏比極樂忘返。在杜公之意。或有之。至謂虞舜蒼梧以二妃不從。比楊妃之從遊。又謂黃鵠比賢人遠引。陽雁比小人懷祿。則失之鑿矣。黃鵠蓋公以自喻。謂己有大志。而

卒無所遇。不如碌碌者多得溫飽耳。

奉同郭給事湯東靈激作按。首十四句。敘玄宗常以十月幸驪山湯泉。初聞以下十六句。敘罷移激之事。陂陀以下六句。錢箋以爲指安祿山入朝之事。似未必然。末四句。言郭給事有詩也。

夜聽許十損誦詩愛而有作。『陶謝不枝梧。』枝梧。謂格格不入。互相撐拄。不相投契也。漢書朱雲傳。『連拄五鹿君。』拄卽枝梧不相讓之意。不枝梧則相契合矣。

自京赴奉先縣詠懷五百字按。自首至『頗愁絕。』自述生平大志勁節。自『歲暮』至『難再述。』因過驪山而歎君臣歡娛。憂其荒淫兆亂。自『北轅』至末。敘涇渭改道至奉先。及到家情事。此詩作於天寶十四載十一月。而安祿山卽於是月叛亂。詩中極究君臣歡娛。茂茂有亂離之憂。或祿山反叛。已略有所聞耶。

白水縣崔少府十九翁高齋三十韻按。是時安祿山已陷東都。而關中無急。故因見華嶽而言林巒皆有兵氣。川光亦雜鋒鏑也。相公軍。謂哥舒翰守潼關之師也。

晦日尋崔駉李封按。阮籍等卽公自指。並指崔李等也。熟醉句。高其弇句。皆謂只謀一身之樂。不恤天下之憂也。長鯨三句。指今天下之亂。

送率府程錄事還鄉。『義動修螿地。』修螿地。不知所謂。

塞廬子按。扼兩寇者。謂東扼高史等。窺太原之寇。西則扼昆戎之寇。塞者所以遮塞而扼守之也。錢氏謂塞廬關而入。直擣長安。殊非塞字之義。亦非詩旨。杜公以書生談兵。未必有當於事理。然公之意。以延州爲秦之北戶。在長安之臂。扼此兩寇。則長安或可收復耳。末言『胡行速如鬼。』言我不疾驅塞之。胡將速行而入。則長安之守益固。援亦厚。不復可克矣。

北征。『憂虞何時畢。』以上。將歸而戀闕。不忍遽去。『殘害爲異物。』以上。敘途次所見景物。『生理焉得說。』以上。敘到家後情形。『皇綱未宜絕。』以上。回憶至尊在鳳翔而憂回紇不可恃。末節追頌戡亂之功。而極抒望

始之懷。

遺興第三首按。時來二句。謂天下多事。但展材力。早晚皆可致富貴也。鹿皮二句。公以自況。謂不思乘時自奮於功名。但忘機觀物耳。

幽人按此遊仙詩之類。洪濤以下八句。自思一旦飄然長往。造此境界。以自適其適。知名二句。謂不欲學四皓留名於世也。五湖二句。自歎束縛塵中。不能出世也。

佳人按此詩不可解。嘗有一賢者。曾居高位。後遭屏棄。公敬慕而傷悼之。故作詩以歎美之耳。關中昔喪敗四句。當是寶賦其事。前後皆以美人喻賢者。迷離其辭。使人驟難尋求。與阮公詠懷詩相近。在山句。謂賢人隱居未仕者。出山句。謂賢人已仕。而因事爲時所棄。則愛憐之者少矣。如李陵房瑄。雖爲史遷與杜公所重。而終不爲時論所許。亦『出山泉濁』之類也。

前出塞按錢箋。謂前出塞爲徵秦龍之兵。赴交河而作。刺主上窮兵開邊。其說近是。謂後出塞爲徵東都之兵。赴薊門而作。譏祿山逆節已萌。而人主不悟。其說尙有未當。兩詩皆公在秦州追憶前事而作。前出塞追咎天寶閒徵兵開邊。後出塞追咎至德閒徵兵赴薊。以討安史。觀『坐見幽州騎』二句。則所憶者。乃安史已破兩京以後之事。非憶未亂以前之事也。

兩當縣吳十侍御江上宅。吳君因論賊謀。分別真僞。酌予原宥。而見黜。敘事雅潔。極不易學。

青陽峽末八句。謂登隴阪時。氣象寥廓。眼界已爲之一曠矣。不意茲山又突兀趁人。信造物之冥冥難測也。

鹿頭山登鹿頭山。則成都沃野千里。如在目前。故云『始喜原野闊。俯見千里豁。』

贈蜀僧閻邱師兄按。『嗚呼先博士』以下十六句。均詠閻邱。均晚看作者二句。指僧也。不獨卿相尊者。謂主上亦重之也。

將適吳楚。留別章使君。留後兼幕府諸公。得柳字。自首至『扁舟落吾手。』自敘居蜀已久。將赴吳楚。眷眷八句。

敘飲錢末十二句。敘別意。

寄題江外草堂『自首至數能同釣船。』謂至成都經營草堂數年乃成。自『干戈未偃息』以下。謂因亂至梓州。遠離草堂。思憶之也。

南池自首至『富喬木。』敘南池景物。自『獨歎』至『一川瀆。』敘漢主淫祀。末六句。唱歎作收。

草堂按自『請陳喪亂初。』至『自及梟獍徒。』敘寶應元年。嚴武入朝。徐知道反。旋爲其下李忠厚所殺也。自『義士皆痛憤』至此。又足驚吁。敘徐逆雖誅。而成都無主。紀綱大亂。誅殺無辜。但所謂『一國三公』者。不知指何人耳。自『賤子且奔走。』以下。敘廣德二年。嚴武再來鎮蜀。公自梓州復還成都。

營屋『不願翦伐殘』按。不願疑當作不願。謂前此甚好此竹。愛惜六載。不願伐之。茲晨將營屋。伐去千竿耳。太子張舍人遺織成襪段。敘事得雄直之氣。韓公五古多學此等。

杜鵑黃鸝本載舊本題注云。『上皇幸蜀還。肅宗用李輔國謀。遷之西內。上皇惴惴而崩。此詩感是而作。』錢箋以是說爲然。國藩按。望帝禪位於開明。而自隱於西山。與明皇幸蜀而內禪於肅宗。其事略同。此詩及杜鵑行。皆爲上呈而作。殆近之矣。

鄭典設自施州歸列郡句以上。敘鄭自施州歸。北風句以下。敘公亦思南行也。

七月三日亭午以後較熱。退晚加小涼。穩睡有詩。因論壯年樂事。戲呈元二十一曹長。按。『歛思以下八句。蓋公回思少年時。清秋射獵之樂。公他日有詩。所謂放蕩齊趙閒。裘馬頗清狂。春歌叢臺上。冬獵青邱旁。』者也。

『牽牛織女。』末句不可解。

毒熱寄簡崔評事十六弟。空牀難暗投云者。謂蠖蟄出於牀閒。不敢於暮暗時投身寢臥也。而執燭入室。又惡其炎熱。種種可憎。況乃心懷故鄉乎。公詩拙處。往往如此。不可學也。

贈李十五丈別『玄成笑。價存子山舊業傳。』李十五之父。嘗有各位於時。故以韋賢庾肩吾比之。

暇日小園散病將種秋菜督勒耕牛兼書觸目自『採擷接青春』以上。敘散病種秋菜之事。自『飛來兩白鶴』以下。書觸目也。

八哀詩贈左僕射鄭國公嚴武『受辭劍閣道。謁帝蕭關城。』武自劍閣受元宗之命。謁肅宗於靈武。亦與房瑄張鎬相同。

八哀詩贈秘書監江夏李公邕自『學貴天人際』以上。渾贊其才與學。自『干謁走其門』以下。敘其多作碑版。驚文獲財。自『往者武后朝』以下。敘其風骨峻嶒。勁直獲罪。自『伊昔臨淄亭』以下。公自敘獲交於李公。而記錄其論文之語。論文以下。述李公評論諸家之文。『是非張相國。』謂李於張之文有褒有貶。因此兩賢相厄。李爲張所排擠。鏡猶機也。謂李之機鋒。警捷一發。不能自閉也。『例及吾家詩』四句。謂李評論杜審言之詩。賞其嗣真之作。比之玉山之桂也。『鍾律』句。贊李論文法律之細。『鯤鯨』句。贊李才力之大。以上皆就論文言之。『陂陀』以下十句。則哀之耳。

八哀詩故秘書少監武功蘇源明蔡夢弼以肅宗復兩京。辨別逆順。諸署僞官者皆伏誅。故有『范曄李斯』之句。獨源明以臨難不變其節。得知制誥。故有『茂松之况』云云。國藩按。肅宗收京之後。奸僞職者以六等定罪。殊不類范曄李斯之事。不知公詩竟何指也。又『虜庭悲所遣』句。似蘇公會奉命出使虜中。諭賊使反正。而不效者。『胡爲投乳贊』句。似蘇公會嬰奸權之怒。摧折以死者。其事均不可攷。詩旨亦難盡明。

八哀詩故著作郎貶台州司戶綬陽鄭公虔『春深秦山秀』六句。追憶昔在長安與虔宴遊之樂。所謂『懷蕩』也。原注『著作與秘書監鄭君審篇翰齊價。謫江陵。』故有『阮咸江樓』之句。

八哀詩故右僕射相公張公九齡自『寂寞想玉階』至『飄詠』句。敘張公仕宦出處。雖一生翔翔雲路。而不忘江湖之思也。碣石句指安祿山。天池句指李林甫。二人者乃張公之榛梗也。自『詩罷地有餘』至末缺句。敘張公詩文之美。

往在自首至『私泣百歲翁』。敘述祿山陷京師。焚毀宗廟之事。自『車駕既云還』。至眾愚愚行角弓。述肅宗收京。重修廟祀。而以末四句敘吐蕃再毀宗廟之事。自『安得自西極』。至末懸想中興致治之盛。而以結二句。自抒不得還鄉之悲。豪邁蒼涼之氣。跌宕變幻之節。皆臻絕詣。

昔遊自『是時倉廩實』。至起黃埃祿山釀亂之由。思滅胡。謂祿山討奚契丹也。望三台。謂祿山領范陽節度使。求平章事也。隔河云者。杜公時遊單父。在黃河之南。祿山領范陽在黃河之北。當日見祿山之煩費驕貴。隔河長眺。不勝感歎。至今猶憶之也。

壯遊『俗物都茫茫』。以上。述少年意氣之盛。『忽如攜葛嶮』。以上。敘歷游吳越齊趙。『引古惜興亡』。以上。敘至京師。豪氣漸衰。時事漸變。『鼻酸朝未央』。以上。敘祿山亂後。肅宗至鳳翔。公以拾遺諫爭獲罪。末節述暮年客蜀。

敬寄族弟唐十八使君唐十八流配施州。在夷陵合舟登陸時。有書與公。公寄此詩酬之。

送重表姪王珣評事使南海自『盛事垂不朽』。以上。述祖姑國初識英雄事。自『鳳雛無凡毛』。以下。敘砢昔日避亂之情。今茲送別之感。

詠懷第一首按。督有司以供軍儲。取民之財。多有不堪問者。高賢二句。如今日盤金局之類。雖賢者亦知其病民。而不能遽去。疲茶二句。杜公自歎有策而不得施也。

第二首按。公蓋有意爲嶺表交廣之遊。既而不果。

送顧八分文學適洪吉州自首至『鉤深法更秘』。句。贊其八分之工。自『文學與我遊』。至『時危話顛躓』。句。敘前後交誼之厚。『我甘多病老』。至末。送別也。

宿花石戍『罷人不在村』。罷人。卽疲民也。罷與疲同。民字避諱故作人。周禮曰。『以嘉石平疲民。西征賦收疲民於西夏』。文選亦因避諱作疲人。

奉贈李八丈判官『泛愛惜衰朽。』句言李待己之厚。以下卽自歎其窮老也。

入衡州首十二句。言唐自安史之亂。紀綱一失。兵端遂多。自嗟彼苦節士。至『明徵天莽茫』句。敘潭州刺史崔瓘清謹守法。將吏多不便之。兵馬使臧玠爲亂。瓘遂遇害。自『銷魂避鋒鏑』。至通郭句。敘避亂入衡州。自『華表雲鳥埤』。至蚊蚋句。敘衡州刺史楊濟及其客蘇渙討賊必勝。自『橘井舊地宅』。至末言將往郴州依其舅崔偉及其掾張勣。

白絲行首六句。言白絲之笑。自喻其材質。美人六句。言製衣之精。自喻其技能。末四句。言汙壤棄置。自喻其不見珍於時。

哀江頭按哀江頭。弔楊妃也。憶昔八句。極言昔年貴寵奢麗。明眸四句。敘貴妃縊死。明皇入蜀。生死去住。彼此心傷。末四句言其悲感。

洗兵馬按錢箋。謂此詩刺肅宗而作。句句指摘。雖未必盡然。然成王六句。係指收京者。乃二三豪傑作靈武之從臣也。鶴禁二句。譏肅宗之有虧子道。攀龍四句。譏靈武諸巨之驟貴。皆詩旨之顯而易見者。

石笋行石犀行按兩詩。皆前六句立案。後半乃譏議之。石笋則議其不實也。石犀則議其無益也。趙氏以爲石笋譏李輔國。恐未必然。

杜鵑行按此詩錢箋以爲哀上皇遷居西內。幽鬱孤寂之狀。似爲得之。投簡成華兩縣諸子韓公學杜。與此等最相似。

短歌行瓌璋頓挫。跌宕。粟姚。可謂空前絕後。丹青引首八句。贊其書畫。開元八句。敘其畫凌煙功臣。先帝十六句。敘其畫馬。末八句。敘其寫真。

寄韓諫議按鄴侯外傳。平生多遇異人。頗修真仙之術。此詩至京以下六句。蓋隱約指其事。似聞四句。指鄴侯於元肅閒有定社稷之功。國家二句。言己雖位卑而不忍不言。周南句。杜公自指。南極句。仍指鄴侯耳。

釋閻按湖城在今閩鄉。卽漢之湖縣。後魏之湖城縣也。代宗由長安幸陝。必過湖城。錢箋引晉元帝至湖陰事。失之矣。

荆南兵馬使太常卿趙公大食刀歌如鍊水英雄弭。俱不可解。

王兵馬使二角鷹。將軍玉帳軒翠氣。甘泉賦。賜翠氣之苑延。李善注曰。言宮觀之高。故翠氣苑延在其側。崑崙虞泉入馬嘒。虞泉卽虞淵。唐諱淵字也。

白覺行按黃鶴自喻其少年之遠志。白覺自喻其老年之貞節。中四句。自喻其窮困踳躄。末二句。言志士仁人。踳躄者多。非僅我也。

朱鳳行按此詩與鳳凰臺一首。用意略同。均以鳳自況。而思有濟於世。彼言鳳之心在致君。此言鳳之心在澤民耳。螻蟻黃雀。皆民也。鴟梟。虐民之吏也。

清明。金盞下山紅粉晚。牙檣戾拖青樓遠。二句謂舍馬登舟也。

暮秋枉裴道州手札率爾遣興與寄近呈蘇煥侍御按自首至。費鑿燭。極寫得書歡忭之情。自。憶子初尉。句至。吹青春。敘遷官甚速。冀其大用。末四句。憶其敘會燕語之時。宴筵二句。因裴公會語及蘇。因敘與蘇交情之密。茅齋四句。與蘇往還親密也。無數三句。言羣小得志。蛟龍句。言蘇不見用也。

陪鄭廣文遊何將軍山林第三首。萬里戎王子。本草曰華子云。獨活一名戎王使者。此花當是其類。第四首。碾渦深沒馬。按碾渦。當是舊時水磨。今碾磑。未必尙存。而其渦漩之水。猶深可沒馬也。

第七首。棘樹寒雲色。吳若本注。刊作棟。爾雅云。棟。赤棟白者。棟。山厄切。注云。赤棟好叢生山中。白棟圓葉而歧。爲大木。國藩按。本句云。寒雲色下。云陰益食單涼。自嘗作棟樹。非棘樹也。元日寄韋氏妹此至德二載。元日作。妹嫁韋氏。卽同谷七歌所云。有妹有妹在鍾離者也。鍾離卽今之鳳陽府。戰國時屬楚地。詩中鄂樹句。指妹在楚境也。婦人稱其夫曰郎。曰伯。詩。自伯之東。

留別賈嚴二閣老兩院遺補諸公二閣老。賈至嚴武也。杜公家寓鄜州。彌年艱窘。詔許自往視。此將北征之時所作。

至德二載。甫自京金光門出。閒道歸鳳翔。乾元初。從左拾遺。移華州掾。與親故別。因出此門。有悲往事。按公以至德二載。疏救房瑄獲咎。賴張鎬救全之。至次年。出爲華州司功。或爲當事者所排擠。非肅宗意也。故曰『移官豈至尊。』

獨立按草露。喻謗汙染也。蛛絲喻網罟置罟也。天機雖自淡泊。無奈與人事日日相近。動輒得咎。故因有所見而感歎。

觀兵按末二句。言不宜老師於鄴下。嘗直取燕薊賊巢也。

秦州雜詩第三首『州圖領同谷』同谷。今在甘肅階州之成縣境。去秦州約二百里。

懷錦水居止『柴門豈重過』謂此生不復能經過成都草堂也。

將曉第一首。巴人二句。應作一氣讀。謂巴人之往成都者。常被梗阻。不得還歸也。

奉寄李十五秘書文巖第一首『竹枝歌未好』竹枝歌。巴渝之遺音。惟峽人善唱。

洞房八首。按此八首。當爲一時所作。可作一章讀。洞房。夙昔。能畫。鬪雞四首。追憶開元盛時。宮中淫樂之事。歷歷

一首。自歎今日在夔淒涼之狀。洛陽驪山二首。弔明皇之不終。提封一首。懲前而思所以誌後也。

不離西閣第一首『肯別定留人』言不知西閣之意。肯別我乎。抑定留人乎。

東屯北澗淨生。杜公自言平生爲盜賊所困。異俗謂居巴蠻。異俗之地。亦多貧民也。

朝第一首『病身終不動』終不動者。謂鷓鴣與烏皆以晨而動。萬物皆靜極而動。惟己因病終不動也。

望王使君宅第一首。首二句。謂韓信被追之際。謝安未起之日。皆泥蟠而未大展其才之時也。若吾則徒自縻泊耳。自逆旅耳。自朽質耳。豈復泥蟠者比。尙有飛騰變化之時乎。

贈田九判官梁邱使節將軍。指哥舒翰也。阮瑀田郎。始及梁邱。和裴迪登蜀州東亭送客逢早梅相憶見寄按末二句。因裴蜀州東亭之梅而言己之成都草堂。亦有江梅垂發也。

秋與八首按此八首。皆居夔州而懷長安。前三首對夔州景物。而增悲秋之感。後五首雜憶長安今昔之事。第四首懷遠官第宅。第五首懷宮殿。第六首懷曲江。第七首懷昆明池。第八首懷漢陂也。

詠懷古跡第一首。獨胡。以侯景比安祿山。庾信。杜公以自比也。季夏送鄉弟詔陪黃門從叔朝謁按詩中莫出者。猶云無出其右也。相國。指杜鴻漸。以大歷二年六月入朝。鴻漸本以黃門侍郎。同平章事。鎮蜀。故稱曰黃門從叔。

解悶十二首後四首。專詠荔支。不知何以與前八首同爲解悶之詩。

陸官公集

駢體文。爲大雅所羞稱。以其不能發揮精義。並恐以蕪累而傷氣也。陸公文則無一句不對。無一字不諧平仄。無一聯不調馬蹏。而義理之精。足以比隆濂洛。氣勢之盛。亦堪方駕韓蘇。退之本爲陸公所取士。予瞻奏議。終身效法陸公。而公之剖晰事理精當。則非韓蘇所能及。

奉天請罷瓊林大盈二庫狀。右臣聞作法於涼。其弊猶貪。作法於貪。弊將安救。四句。見左傳。『昭七年。』

『示人以義。其患猶私。示人以私。患必難弭。』以上四句。不知有所本否。

『生之長之。而不恃其爲。成之收之。而不私其有。付物以道。混然忘情。取之不爲貪。散之不爲費。以言乎體。則博大。以言乎道。則精微。』數句。言天子理財之道。極大極精。

『而諸方曲獻。』曲獻。猶云私獻。

『天猶尙梗』言世亂也。猶皇路清夷。言世治也。

『試詢候館之吏』公時奉使出外。故詢候館之吏。今之馳驛者。州縣皆至公館迎候。

『果如所慮』卽果如所慮也。不作慮者。調平仄馬蹏耳。

『積憾已甚。或忿形謗讟』節。敘軍士怨讟之興。款款入情。婉婉動聽。此等處最不易及。

『奉三無私。以壹有衆』壹對三。有衆對無私。開後世借對之法。究不宜學。

韓昌黎集

復志賦『甘潛伏以老死兮』將跌入佐汴。先出潛伏一層。筆勢跳躍。而志之所以復。亦必先有此志爲張本。

南山詩西南十句。賦太白山。昆明入句。賦昆明池。清樞爲微瀾所破碎。故揉狄躁而驚呼。呀而不仆。此述昆明池

所見。前尋下二十二句。言從杜陵入山。因羣峯之擁塞。不得登絕頂而窮覽也。惡羣峯之擁塞。思得如『巨靈』

『夸娥』者。擘開而析裂之。然雷電不爲先驅。終不能攀。遂有攀緣踏蹬之困。因緣以下十二句。因觀龍湫而書

所見。前年以下十二句。謂謫陽山時。曾經此地。不暇窮探極覽也。昨來以下。至『蠢蠢駭不懋』。謂此次始得窮

觀變態。前此遊太白遊昆明池遊杜陵遊龍湫。本非一次。卽謫貶時亦嘗經過南山。俱不如此次之暢心悅目耳。

謝自然『灼灼信可傳』以上。敘謝自然白晝輕舉事。以下論神仙事不足信。

秋懷第一首此首因闡脫葉秋聲而生感。

第二首。此首言四時運行。百物雖有早晚長短貴賤之不同。要皆稟氣自然。不足異也。

第三首。此首言己之所嗜與時異趣。雖舉世不好。而無怨也。

第五首。此首卽陶公『今是昨非』之意。若新有所悟者。以浮名爲恥。以薄味爲幸。知道之言也。

第六首。此首本思遺世高舉。不復願伺候於塵埃之中。而爲生事所累。尙須龜勉以從王事也。

第七首。此首言本不能逐時趨。因石甌謀生之故。難違舍去。與上首之指略同。

第八首。此首因落葉而感觸生平之志事。甚遠且大。

第九首。此首因葉落而疑爲月竄。志士固有非常之感觸也。

第十首。此首因任途嶮巇。動觸陷窞。思委蛇以逐時趨。而此心終以爲恥。不敢自違其本志也。強懷本志也。弱念時趨也。詰曲。時趨也。冥茫。本志也。

第十一首。此首有安貧知命。致死不變。確乎不拔之意。

赴江陵途中寄贈王二十補闕李十一拾遺李二十六員外翰林三學士。『行行詣連州』以上。因上疏而貶連州。對案輒懷愁。以上。敘道途及連州之苦。『旅泊尙夷猶』以上。敘順宗卽位。大赦。公量移江陵法曹。末節憲宗卽位。朝政清明。有望於三賢之借箸援引。

江漢一首答孟郊王褒云。有其具者。易其備。舟馬裘燭。皆禦物之具也。忘信。履險之具也。韓公與其徒黨。固常常以自立相勸矣。

此日足可惜一首贈張籍。『諒知有所成』以上。籍與公相見於汴州。籍中進士。『決若驚鷗翔』以上。公送董晉之喪。至洛中途。聞汴州亂。至洛東還。將赴徐州中閭。一謁李元於河陽。由洛赴徐。本應行黃河之南。是時或因汴州之亂。避行河北歟。『窗戶忽已涼』以上。由河陽經汜水陳許而至徐州。『子豈知我情』句。謂望其來。而籍竟來矣。末敘籍來月餘而又別。

歸彭城。『見待頗異禮。未能去皮毛。』謂不能披肝瀝膽。豁露天真。猶今諺云『客氣』也。

送惠師自『遂登天台』以下十八句。敘天台觀日出。『禹穴』以下十二句。敘會稽觀禹穴。浙江觀潮。『盛歎』以下十二句。敘江州觀廬山。南海觀羅浮。『自來』八句。敘惠至連州。徧遊諸勝。『昨日』以下十八句。惠別韓公之辭。『吾言子當去』以下十句。韓公送惠之辭。

送靈師首八句。論佛法爲世大害。靈師八句。敘其少時事。軒騰句。謂其棄俗而爲僧矣。圖基十二句。敘其博奕詩酒之能。尋勝以下二十二句。敘其遊黔蜀及在瞿塘落水得生事。昨者以下十句。敘遊林邑。十月以下十六句。敘其在連州。久聚韶陽以下十四句。敘其由連至韶。

縣齋有懷首十六句。敘少年中進士。試宏博時事。人情以下二十句。敘出都從董晉張建封幕事。求官以下十四句。敘爲御史上疏被謫事。湖波以下十四句。敘道塗及陽山之苦。嗣皇以下十六句。思得赦宥而歸故土。

合江亭邦君指齊映初。建此亭者也。老郎。繼齊而樹蘭菽竹者也。庸懦。指元澄被楊憑劾去者也。君侯。指鄒君款接韓公者也。鄒君逸其名。老郎并逸其姓。

陪杜侍御游湘西兩寺獨宿有題一首。因獻楊常侍陪賞句以上。敘陪杜侍御同遊。幸逢以下十六句。敘獨宿。珥貂以下。頌楊常侍。

岳陽樓別竇司直軒然大波以下十四句。狀其洪濤壯觀。朝過宜春以下二十二句。狀其風息波恬。自「主人孩童舊」至末。公於竇氏兄弟最爲契好。故於歡宴之餘。追憶前事。言之沉痛。

送文暢師北遊「自言本吳人」以下十八句。皆述文暢在四門館之言。出其囊中文以下十二句。敘前作送文暢序贈別之事。三年窺荒嶺以下十四句。敘貶陽山及回京再見文暢。自當今聖政初至末。送文暢北遊。而自擬歸耕。

答張徹自「肝膽一古劍」至「懼衝城畫局」。皆敘貞元十五年。離岸連居。與張徹相從之樂。自「及去事戎轡」至「淚皆還雙燧」。十六句。敘公以徐州從事。朝正京師。與徹同行之事。塵祛二句。公先出京。徹後出京。又與途中相見。而再別也。洛邑得休告以下十二句。敘登華山事。蛾豸忝備列以下二十四句。敘爲御史上疏貶賜山事。赦行五百里以下至末。敘入爲國子博士。因答徹詩。

苦寒「褰旒去耳續」旒。垂目續。塞耳。褰旒去續。謂明目遠聽也。

崔十六少府攝伊陽以詩及書見投因酬三十韻。又言致豬鹿。此語乃善幻。三年國子師。腸肚習藜苳。况住洛之涯。魴鱠可單汕。國藩按。崔詩必言將以豬鹿野鮮餉公。公詩辭之善幻。猶云善戲。漢書西域傳有「善眩」之語。顏注云。「眩。讀與幻同。」况住洛之涯。公時以國子博士。分教東都。謂但食藜苳魴鱠。不勞致豬鹿異味也。招揚之衆。柏移就平地。馬羈入廡中。國藩按。柏移平地。謂去荒陋之邦。而漸染雅化。馬入廡中。謂去泛駕之習。而範我馳驅。皆裁成之衆之意。

雙鳥詩。朱子以雙鳥指己與孟郊。而作落城市者己也。集巖幽者孟也。韻語陽秋。已有此說。

題炭谷湫祠堂。吁無吹毛刃。血此牛蹠殷。國藩按。退之剛正傲岸。不信神道。如衡山詩則曰「神縱欲福難爲功」。記夢詩則曰「乃知神人未賢聖」。此詩則曰「血此牛蹠殷」。皆凜凜有生氣。

送陸暘歸江南。悲嘯上車女。骨肉不可分。國藩按。董晉家洛陽。觀悲嘯上車女句。陸自董府攜婦歸吳。而公在洛時送之也。

嘲魯連子國藩按。此當有與公爭名者。而公甘以名讓之。禪讓也。鳩聲。大名也。

贈張籍。此是黃金產。黃嘗作萬。至文章紹編刻十一句。皆張籍之辭。我身疑當作君身。蓋籍稱公不應我之也。

寄崔二十六立之。自「往歲戰詞賦」至「無人角雄雌」三十二句。敘崔技能之高。科名之震。自「由來人間事」至「那用分高卑」二十四句。敘崔登科後。仕宦不遂。所如不偶。擊鳥子。駒馬子。麋鹿子。皆喻新進少年。不得自由。處處爲世法所束縛。自「憐我還好古」至「譬彼鳥黏鷄」四十八句。敘與崔交誼之厚。諸毛。方氏以爲筆也。朱子以爲必是爲毛穎傳而發。國藩按。韓公毛穎傳。柳州曾贊歎之。崔之來書。及詩。當亦贊毛穎傳之奇偉。蛟螭雷電等。或卽來詩中語邪。「敦敦卽書案」。敦敦。卽「敦彼獨宿」之敦。謂凝坐不動也。賈捐之傳中有所謂顛顛者。義亦略同。「且吾聞之師」。至「相待安眾簞」。三十四句。言名位不足戀。當以文章傳後。約崔同歸偕隱。自「我有雙欵鑿」至末二十四句。敘公以雙鷺之一遺崔。亦所以報百尺綵也。鯨月。草花。芙蓉。皆禩上則畫者。

示爽『汝來江南近』二句不可解韓公本貫在河內之修武又曾遷居洛陽爽自江南赴長安二處皆其經過之地或謂其過河內洛陽與里閭相近二句作一句讀邪不然則上句有譌誤邪公作女孿銘云『歸骨於河南之河陽韓氏墓』是河陽亦可以河南稱之洛陽則自古久稱河南妄意此句當作河南近俟質之博聞君子贈別元十八協律六首元十八蓋將裴行立之命以書及藥物勞公於途次者。

第一首『何人識章甫而知駿蹏蹏』章甫適越不爲時用駿蹏歷險或至蹉跌二端皆公以自喻者識知二字則謂元能知之亮之也。

南內朝賀歸呈同官『渺不調鹽醢』調鹽醢似寓韓彭蒞醢之意。

鳴雁此在幕府不得志之詩欲遠舉而他適也。

條山蒼波浪句喻世人隨俗波靡松柏句喻君子歲寒後凋亦自況之詩。

八月十五夜贈張功曹暑自『洞庭連天』至『難追攀』句皆張暑之歌辭末五句韓公之歌辭。

憶昨行自首至淚落句敘張與裴帥饗社之宴酒後臥病自『念昔從君』至『眉方開』句敘與張同貶南荒而俱幸北歸自『今君縱暑』至末祝張病體康復將耦耕於嵩山之下上公禮罷句上公方以爲當作社公敘

荆帥裴均罷社而享客也朱子云上公卽社神也不必改爲社公今君縱暑二句張在江陵雖經邕管經略使路

恕奏署爲判官而可以辭謝不往故勸其投檄北去投檄猶『投絨』『投劾』之投。

劉生詩劉在廣南嘗有名妓聲價甚高而遇劉獨厚者美酒二句劉之冶遊也倒心句傾情於名妓也千金句聲

價高也綢繆句待劉厚也。

陸渾山火和皇甫湜用其韻自首至『孰飛奔渾』寫野燒之盛自祝融告休以下至頰目暖設爲祝融宴客儀

衛之盛賓從之豪笑語之歡告休猶休暇也卑尊卽客也周禮小司徒云使各登其鄉之衆寡鄉大夫云率其吏

與其衆寡此云卑尊猶彼云衆寡耳自『頌冥收威』至末皆水火相剋相濟之說拳肩跟者謂肩與足跟拳踞

相連。極言顛頊玄冥君臣失勢之狀。洪曰。『丁火也。壬水也。火女也。水男也。』丁女而爲婦於壬。故曰女丁婦壬。自火行於冬。至囚之崑崙九句。皆上帝勸慰水神之辭。言不必與火結讐。時至。行將勝之也。

和虞部盧四汀翻鞞林錢七微赤藤杖歌。『空堂晝眠倚牖戶。飛電留壁搜蛟螭。』東坡以鐵拄杖壽樂全詩。有句云。『欵壁蛟龍護晝眠。』融化此兩句。而爲之也。

石鼓歌自周綱陵遲以下十二句。敘周宣蒐狩鑄功勒石。自公從何處以下十四句。敘搨本之精。文字之古。自嗟余好古以下二十句。議請移鼓於太學。自中朝大官至未十六句。慨移鼓之議不遽施行。恐其無人收拾。

盧郎中雲夫寄示送盤谷子詩兩章。歌以和之首十四句。敘昔至盤谷訪李愿事。天井關之水。被風吹灑洛陽。語則誕而情則奇。歸來辛苦以下十句。敘盧寄示詩篇。知李已入山矣。未六句。敘己將歸耕。

射訓狐。『斗柄行拄西南隅。』謂天將明也。『意欲唐突羲和烏。』謂侵陵主上也。

城南聯句自首至馱妖藤索緝六十四句。雜敘城南所見景物。迴平。按平者。地之平處也。如華山有青柯平。種藥平之類。卷鬻。不舒放也。見莊子。自『荒學五六卷。』至『幽靈落書棚。』二十四句。敘荒郊塋域淒涼之狀。自『惟昔集嘉詠。』至『風期誰復廣。』三十八句。言城南乃昔日文人詞客遊詠宴集之地。今無復往時雲霞之興。風期之盛矣。餘鼎。日光也。凝猶過也。謂其聲能遏日光。使不動也。自『皋區扶帝壤。』至『鵲鷓攢瓌橙。』五十八句。歷敘土壤之美。因及人才之俊。物產之富。冶遊之盛。自『鶩廣雜良牧。』至『抑橫免官評。』二十八句。敘簪纓世族之豪橫。自『殺候肆陵翦。』至『惡嚼嘔腥膻。』二十二句。敘射獵之樂。自『歲律及郊至。』至『思熙完則剌。』十六句。敘郊祀之禮。自『宅土盡華族。』至『眼剽強訂隄。』三十句。敘民居寺宇之麗。因及遊寺之人。盛繩覲城莖。蓋美女爲秋千戲者。亦遊寺所見也。

會合聯句念難須勤追二句。憶往時之艱難。悔出言之輕易也。自『念難須勤追。』至『謫夢憶猶洵。』十八句。敘韓公以言事謫貶陽山。還朝爲國子博士。郊籍徹三人皆在弟子之列。詩意仍以韓公爲主。

納涼聯句自『長簷倦還捉』以上。皆敘煩熱之狀。『幸茲得佳朋』以下。乃敘納涼之事。

秋雨聯句。薄也。氣。謂雲氣稍薄。寧亂句。謂旋又擁塞也。陰旌。謂雲氣如旌旆。膠流猶周流也。帝鼓。謂雷魯儒二公以魯兩生自比也。以秦人好言利。故魯儒無可巧貨。

征蜀聯句。奔。與礮同。廣韻。軍戰石也。礮。擊者。奔石之聲。燕。燒其城也。抉門。啓其門也。桴。敲。焚城之聲。疊韻字。呀。拗。門闕之狀。雙聲字。遏。雄。今將帥無多殺也。漢棧。罷置閬者。謂自秦至蜀。征人漸少。不甚置閬也。

晚秋鄆城夜會聯句自『再入更顯嚴』至『遠志無隕穫』句。皆敘裴相破賊還京。後選官宴客之事。似非事前所作之詩。雪下收新息。亦非事前語。豈在鄆城時作此詩。而還朝後更潤色之邪。

『耽顏傾鑿落』。鑿落。飲器。白樂天詩『銀杯傾鑿落』。『生堂含鑿鑿』。爾雅『大磬。謂之鑿。大鐘。謂之鑿。』注。『亦名鑿。』

原性此實與孔子性相近二章相合。程朱又分出義理之性。氣質之性。以明孟子性善之說之無失。亦自言各有當。要之韓公之言固無失耳。

原毀言在上者須明斯世所以多忌多毀之由。而後可以知人。篇末說明作意。『聞古之人。有周公者』。節。通篇德藝平列。周公原不僅有藝。就藝中引一尤不可幾者。故舉周公。

行難以行難命題。所以表陸先生之賢也。爲文之意。則欲存此理。使有用人之貢者知之耳。句法瘦鍊。王荆國多師此種。

雜說一此段未經人道。舜武得五臣十亂而益彰其神聖。所謂得雲益靈者也。名師賢相。亦能廣植徒黨。旁求俊彥。亦有所謂雲者。其義甚大。

雜說四謂千里馬不常有。便是不祥之言。何地無才。惟在管使之耳。

讀荀此與讀騷冠子讀儀禮讀墨子四首矜慎之至。一字不苟。文氣類史公各年表序。

讀鷓冠子「正三十有五字。乙者三。滅者二十有二。治十有二字云。」正者。正譌也。乙者。上下倒置也。滅者。塗去也。注者。添綴於旁也。

師說傳道。謂修己治人之道。授業。謂古文六藝之業。解惑。謂解此二者之惑。韓公一生學道好文。二者兼營。故往往並言之。未幅云「聞道有先後。術業有專攻。」仍作雙收。

進學解做東方客難。揚雄解嘲。氣味之淵懿不及。而論道論文二段。精實處過之。「春秋謹嚴。左氏浮夸。易奇而法。詩正而葩。下逮莊騷。太史所錄。子雲相如。同工異曲。」韓公於文。用力絕勤。故言之切當有味如此。

謹辨此種文。爲世所好。然太快利。非韓公上乘文字。

伯夷頌舉世非之而不惑。乃退之生平制行作文宗指。此自況之文也。

釋言才高被謗。爲文自解。仍不減其峻嶒之氣。

汴州東水門記「誕置聯鎖於河。宵浮畫港。舟不潛通。然其襟抱虧疏。風氣宣洩。」誕寔。猶云大寔也。宵。則使鎖浮於水面。不使通舟楫也。汴州之有河水。猶襟抱。然無門以闌之。故虧疏宣洩也。

燕喜亭記柳公山水記。以峭削見奇。固非韓公所能比並。

徐泗濠三州節度掌書記廳壁記此等文。雖公爲之。不能奇也。

畫記桐城方先生。以爲此學周人之文。

藍田縣丞廳壁記崔斯立之爲人。必有奇崛之才。而又天趣橫溢。與公相見。必彼此善謔。而又相敦以古誼者。如西城員外丞一詩。前路謔且爲虐矣。而後半絕沉痛。則足獻玉一書。絕沉痛亦帶謔聲。藍田十月雪塞關一詩。亦然。此文則純用善謔。而憐才共命之意。沉痛處自在言外。

新修滕王閣記反復以不得至彼爲恨。此等蹊徑。自公闢之。亦無害。後人踵之以千萬。乃遂可厭矣。故知造意之無關義理者。皆不足陳也。

科斗書後記敘述無一閒字。

鄆州谿堂詩序『于時沂密。殆分而殘其帥。』『生此波瀾。』『然而皆曰。鄆爲虜棗。且六十年。』節。著此一變議論。便爾壯闊。蹊徑獨闢。若先陳新立之難。又陳不扇而變之難。便無此奇警。

『公私掃地亦立。』能造難狀之語。於是天子以公爲尙書右僕射。『接法本史公。

『貓相乳。』敘事絕筆。而所以爲文之意。固不免人之見者存。故收處過諛。『夫貓。人畜也。』謂畜於人。爭臣論逐節根據經義。故盡言而無客氣。『夫天授人以賢聖才能。』節。此段陳義甚高。

太學生何蕃傳善用縮筆。舒餘頓宕。如將不盡。

重答張籍書觀此書。則韓公當日之於二氏。亦未敢昌言排之。二氏盛行中土。六七百年。公以數篇文字斥之。遂爾炳如日星。識力之大。令千世人肅然起敬。『非我其誰哉。』自任處絕沈著。

與孟東野書真氣足以動千歲下之人。韓公書札不甚矜意者。其文尤至。

答尉遲生書傲兀自喜。

答楊子書『尙須驗以言。』公已深知楊子。恐楊不之信也。故須驗以言。

上襄陽于相公書諛辭累牘。固不能工。

上留守鄭相公啓『愈無適時才。漸不喜爲吏。』凡爲文必視乎其行。能棄官如屣。而後氣壯。而文無沮詞。

上宰相書連用三抑。又閤義層出不窮。然究是少年才思橫溢。欠缺鍊處。故文氣不適也。若刪去『洪範曰。』至『廉於自進也。』則格老而氣適矣。

後十九日復上宰相書後二書。皆可不上。宰相能知我。前書足矣。其不知。十上何益。公少年時。蓋閱世尙未深。而自守未定也。

後二十九日復上宰相書『以其於周不可則去之魯。於魯不可則去之齊。於齊不可則去之宋之鄭之秦之楚。

也。』魯同姓。禮義之邦。故次周。後齊大國次之。宋鄭小國次之。秦楚戎蠻又次之。非率爾泛指也。

答侯繼書『含意連辭。將發復已。』含意。辭不能申其意也。連辭。欲陳此說。復牽彼義。裁度不能遽當也。凡文家經營。爲文時有此二難。『然古之人未有不通此。而能爲大賢君子者。』所陳數事。皆專家之學。幽莽者多棄置而不講。觀韓公此書。然後知儒者須通曉各門。乃可語道。孔氏所謂博學於文。亦此義也。

『將試學焉。力不足而後止。』凡人於右數事。皆未試而先稱力不足。所謂畫也。

答崔立之書。韓公命世之英。自位不在文中。所稱五子下。其試於禮部吏部。蓋深用爲恥。立之乃以『獻玉再進』相勸。所謂鶴鷄已翔乎寥廓。而羅者猶倚夫藪澤也。篇中前半述己隱忍就試之由。『夫所謂博學者』一段。嗚其悲憤。後幅『方今天下』一段。寫其懷抱。視世絕卑。自負絕大。極用意之作。『君子小人之所憫笑』。君子小人。猶言人人。周禮『鄉大夫帥其吏。與其衆寡。』衆寡者。言鄉人或衆或寡。無定也。此言人人憫笑。無分君子小人也。『夫所謂博學者』。節。博學宏辭。美稱也。惟公足以當之。而顧不能中選。甚羞與今世之中選者比倫。而又不能不隱忍與之同試。甚願與屈孟五子同志。而又不能效其不與斗筭者同試。心所恥。而行不能從。己所恥。而人不能諒。層層感憤。迸露紙上。『必知其懷慚。乃不自進而已耳。』謂懷慚之極。至於自甘。終不進取乃已。『作唐之一經。垂之於無窮。』極自負語。公蓋奴視一世人。

重答李翊書。韓公文如主人。坐於堂上。而與堂下奴子言是非。然不善學之。恐長客氣。代張籍與李浙東書。筆端大峻。若出他手。代盲人干有位者。氣必不能自振矣。

答李秀才書。義深而文淡永。

答陳生書『孰信哉。信乎己而已矣。』陳生必求俯仰趨時之術。故告之以此。所謂對症發藥也。不然。專信己則足以長傲。王介甫云。『時然而然。衆人也。己然而然。君子也。』語弊亦似此。與李翊書『今而思之。如痛定之人。思當痛之時。』能達難白之情。

答胡生書「不知者。乃用是爲謗」節。言不惜稱道揄揚之愛惜也。彼輩自有可合之人。吾不因其可以干澤而思與之苟合。若能如此。則可孤行而不恤衆謗。而生又不能。生離鄉遠出。本爲求仕。非徒求韓公之知也。是者指上文相知稱道云也。

與崔羣書「風土不並以北。」不與江北比並也。「自古賢者少。不肖者多」節。悲感交集。王荆公與段縫書中段。爲曾子回代鳴不平。文氣脫胎於此。「人固有薄卿相之高」節。憤激出奇想。沈痛至矣。「僕無以自全活者」一節。後路絕深痛。

與陳給事書「衣食於奔走」造句奇。

與馮宿論文書「以此而言」節。自負語絕沈著。

與祠部陸員外書「文章之尤者。有侯喜者」節。稱人之長。造句俱極跌宕。

應科目時與人書其意態詭詭瑰瑋。蓋本諸滑稽傳。干澤文字如是。乃可軒昂。他篇皆不能自振。

與孟尚書書此爲韓公第一等文字。當與原道並讀。

答呂鑿山人書絕傲兀自負。

答滄州李使君書李蓋有所干於要路。求韓公爲之道地。故答之如此。「傳曰。『君子俟命』」節。「既以安命。候命之說進。又言李君亦爛熟安命。候命之說。如常御之飲食。饜飫久矣。無益於事。故增愧。

答元侍御書「斥其餘。以救人之急。」斥遠也。揮而遠之。謂散去也。

與鄂州柳中丞書文氣絕勁。

與鄂州柳中丞第二書「就令如是」節。善然入人之肺腑。故足以作忠孝之氣。「夫遠徵軍士」節。論事之文。不遜賈晁。

送陸欽州詩序「我衣之華兮」節。洒然而來。

送孟東野序天擇物之善者。而假之鳴。其爲鳴盛與鳴不幸。惟天之所命耳。文之立意止此。徵引太繁。頗傷冗蔓。『惟天之於時也亦然。』通首接住天字。

送許鄆州序『而能與卑鄙庸陋相應。答如影響。』四字並用。措語過重。情已至而事不從。小人之所不爲也。轉換痕跡未化。便可直接本事。不須爲二語紐合也。『故其贈也。不以頌而以規。』收句俗筆。

上巳日燕太學聽彈琴詩序和雅淵懿。東京遺韻。

送齊暉下第序入題連用三平字俗調。篇末一一回繳前文。俗調。

送陳密序閒淡有體。

送李愿歸盤谷序別出奇徑。跌宕自喜。

送董邵南序沈鬱往復。去庸存液。

贈張童子序前半志選舉疏健。後半勸童子簡宕。

送浮屠文暉師序闢佛者。從治心與之辨毫芒。是抱薪救火矣。韓公言若無中國之聖人。則彼佛者。亦如禽獸。爲物所害。莫能自脫。如此立說。彼教更從何處置喙。立言有本。故真氣充盈。歷久常新。

送何堅序前半磊落而含遊戲之聲。收復奇情幻出。合讀之。但覺狡獪不測。

送廖道士序磊落而迷離。收處絕詭變。

送王秀才序淡折夷猶。風神絕遠。

送孟秀才序敘述絮。訓詞當。

送陳秀才序『如是而又問焉。以質其學。』祇此一意。再作往復。亦復傲兀自喜。

送王秀才序讀古人書。而能辨其正譌醇疵。是謂知言。孟子以下。程朱以前。無人有此識量。

送幽州李端公序骨峻上而詞瑰瑋。極用意之作。

送區冊序送區宏南歸詩。傲兀跌宕。此文當是一時作。故蹊徑與句之廉悍。並與詩相類。

送張道士序立言絕善。『詩甯當不埃報。』述上書不報事。立言飄灑。不著痕迹。

送高閑上人序事之機括。與心相應。事不如志。則氣挫。所向如意。則不挫於氣。榮辱得失。不糾纏於心。此序所謂機應於心。不挫於物者。姚氏以爲韓公自道作文之旨。余謂機應於心。熟極之候也。莊子養生主之說也。不挫於物。自謙之候也。孟子養氣章之說也。不挫於物者。體也。道也。本也。機應於心者。用也。技也。末也。韓公之於文。技也。進乎道矣。

送殷員外序字字峭立。個儻軒偉。

送楊少尹序唱歎抑揚。與送王秀才序略相類。歐公多似此種。

送權秀才序酬應之作。亦自不俗。

送湖南李正字序『往時侍御有無。盡費於朋友。』有無。猶多寡也。檀弓『稱家之有無。』言盡家之財。無問或多或少。盡用之也。此言侍御盡家之財。皆費於朋友也。

送石處士序。唐時處士聲勢。足以傾一時。韓公頗不滿於石。溫二生。觀寄盧仝詩可見。此文前含譏諷。後寫箴規。皆不著痕迹。極狡獪之能。

送溫處士赴河陽軍序。此種起法。創自韓公。然不善爲之。譬若唐人爲官韻賦。往往起四句。峭健壁立。施之於文家。則於立言之體大乖。漢文無起筆峭立者。按之固自有序也。不可不察。

送鄭尙書序。氣體似漢書匈奴傳。

送水陸運使韓侍御歸所治序。此即條議時事之文。鋪敘處絕警聳。『吾以爲邊軍皆不知耕作。』接筆絕逾緊。石鼎聯句詩序。傲兀自喜。此等情事。亦適與公筆勢相發也。

歐陽生哀辭前半敘述矜嘗。後半就『父母老矣。』反復低徊。絕耐紉誦。『詹閩越人也。』悠然入情。

祭嵇員外文瘦折奧峭。

祭郴州李使君文亦不出六朝軌範。不使一穠麗字。不著一閒冗句。遂爾風骨遒上。通首不轉韻。古無此體。宋人爲長短句祭文。則皆一韻到底。

祭河南張員外文以奇嘯鳴其悲鬱。鏖戰神鬼。層疊可愕。

祭薛中丞文無俊健之骨。不似韓公手筆。當是同僚所爲。而薛氏託公名爲重耳。

潮州祭神文第二首別出才調。岸然入古。

祭柳子厚文峻潔直上。語經百鍊。公文如此等。乃不復可攀躋矣。

弔武侯御所畫佛文置身千仞之上。下視昧昧者。但覺可憐憫也。公詩如謝自然誰氏子。文如孟尙書書。及此等。當觀其卓然不惑處。此篇弔辭。亦絕古勁。

李元賓墓誌銘誌中不稱元賓之長。而銘詞著「才高乎當世。行出乎古人」二語。故爾可貴。若通首贊頌不休。不足取信矣。

崔評事墓銘「外盡賓客於其所止。其來如歸。」盡禮也。凡崔君栖止之處。族賓皆來歸也。「雖不肯收之如賢」王介甫敘人之長。皆學此等。

施先生墓銘或先敘世系。而後銘功德。或先表其能。而後及世系。或有誌無詩。或有詩無誌。皆韓公創法。後來文家踵之。遂援爲金石定例。究之深於文者。乃可與言例。精於例者。仍未必知文也。

考功員外盧君墓銘「大歷初。御史大夫李栖筠由工部侍郎。爲浙西觀察使。」起筆逆。此處接筆逆。以下得勢矣。「以老故。自任者。以千百數。」老故。猶稱老臣故舊。

施州房使君鄭夫人殯表「此非其邱。」狐死正邱首。不忘本也。權殯於此。終當反葬。故曰非其邱。

監察御史元君妻京兆韋氏夫人墓誌銘「率所事。所言皆從儀法。」家世可詳則詳之。行誼無可詳。則祇二語。

登封縣尉盧殷墓誌樸老。

與元少尹房君墓誌「謹飭長慎。」稱其賢祇四字。「子與吾兒次卿游。」古者兄弟之子亦稱子。故曰吾兒。稱姪俗也。

河南少尹李公墓誌銘「京兆尹符縣割昇之。」下符於萬年。割田與之也。「以崇文幕府。爭鹽府因革便不便。命公使崇文。」或因以鹽井與之。或遂革之。二者孰便。命使者往治也。「遷蘇州。李綺前反。權將之戍諸州者。」公未遷蘇。李綺已先反於鎮海。公至蘇十二日。賊始至蘇也。「皆斂兵立不逼。」新書言賊釘公於絛。誌爲飾詞。「綺命械至公軍。」致於鎮海軍也。「綺適敗縛。」綺敗爲其屬所縛。故曰敗縛。「民抱扶迎盡出。」抱幼扶老皆出。「奈何乎公。」奇句。

集賢院校理石君墓誌銘石處士之名。殆能傾一世人。而韓公不甚許之。觀銘詩可見。寄盧全詩亦寓諷刺。卒之籍湜郊島輩皆有以自表見於後世。而溫石二公僅見於韓公之文而已。盛名足據乎。

江西觀察使韋公墓誌銘他文提振起。絕聳矯。此稍遜之。「不足張職。」觀察使位高祿厚。則所職宜鉅。三州職事無幾。故云不足張職。「人去濼汚。氣益蘇。」旣爲南北市。又爲長衢。故人去卑濕。而氣蘇也。「馬以不連死。」馬多無經年不一死者。不連死。謂不相繼以死。「前走七州刺史。」謂七州刺史。奔走於前也。

河南府王屋縣尉畢君墓誌銘「尙書生珣家破時。珣生始四歲。」此處入主位不清。後並混淆。謹以公他文之法準之。妄易數字云。「君之父也。君諱珣。字某。家破時。君生始四歲。」聞「君篤行能官。請相見。」上文不易。則此處君字無胎。

襄陽盧丞墓誌銘「常最其列。」於同列中后最也。「今年寶元和六年。」奇句。

唐朝散大夫贈司勳員外郎孔君墓誌銘「昭義節度盧從史。有賢佐。曰孔君。」此等起法。維韓公筆力警聳矯。變無所不可。若他手爲之。恐債張而長客氣。故不如樸拙按部之猶爲近古也。

唐銀青光祿大夫守左散騎常侍致仕上柱國襄陽郡王平陽路公神道碑銘『割餘零都作縣安遠。』割零都縣之餘地。析置安遠縣。『陶甕而城。籠人屢築。』土城易崩。故屢築甕城。一勞永逸也。『人不歲苦。』以草覆屋。每歲易之。故曰歲苦。有陶瓦。故不歲苦。『至則出倉米。下其估半。以廩餼人。』句酷鍊。『坐牢江東心。』坐鎮以堅江東士卒之心。

烏氏廟碑銘最善取勢。左領君。中郎君。尙書君。三世同廟。不敘左領中郎事蹟。專敘尙書。大家之文。所以適簡也。低手。三世各鋪敘幾句。便無此勁潔。

唐故河東節度觀察使榮陽鄭公神道碑文『削四鄰之交。賄省姘嬙之大燕。』偶句傷氣。『施罷不埃日。』或行或罷。

魏博節度使沂國公先廟碑銘起最得勢。樸茂典重。近追漢京。遠法尙書。序文疏簡。著意在銘詩。而終不稱其先世功德一字。可謂有體。

劉統軍碑銘『公由游寄。』因游浮寄於蜀也。『蓋古有云。人職其憂。無事于職。而與固謀。』四言詩中。有此收束。彙勁之筆。『蔡卒幸喪。』幸許有新喪。『新師不牢。』士卒心不回。『勛勳將遠。』幕府諸人也。『聲駕元侯。』駕其上。『脫權下威。』不攬權也。下弛也。

衢州徐偃王廟碑衢州有徐偃王廟。其事本支離漫誕。文亦以恢詭出之。命意甚遠。其神在若有若無之間。想亦營度既久而後得之。『藩拔級夷。』藩籬撤階級平也。

袁氏先廟碑『莫不官稱。』能稱其位。

曹成王碑。泛潮與降。夏事小振。平李希烈。事大振。凡敘事皆分大小。爲主賓。驟看乃似直敘漫鋪。韓文誌傳中。有兩篇相對偶者。如曹成王韓宏兩篇爲偶。柳子厚鄭羣兩篇爲偶。張畧張徹兩篇爲偶。推此而全篇可以爲偶者甚多。惜不能一一而稱量而配合之耳。

試大理評事王君墓誌銘以蔡伯嗜碑文律之。此等文已失古意。然能者遊戲。無所不可。未流效之。乃墮惡趣矣。『妻上谷侯氏處士高女。高固奇士。自方阿衡太師。世莫能用吾言。再試吏。再怒去。』通首寫奇崛。疏狂之態。皆因此事而引伸之。

扶風郡夫人墓誌銘『克受成福。母有多子。』金石文。造句正軌。

殿中侍御史李君墓誌銘『愈追占其夢曰。』節。敘占夢事。與前敘推算事。首尾兩相映發。餘俱不甚著意。

秘書少監贈絳州刺史獨孤府君墓誌銘『戴笑世令。而年再不羸。』上戴前人之笑。世有令德。父子俱不永年。

虞部員外郎張府君墓誌銘『而獨以其死累余。可傷也已。』澹宕遠收。

檢校尚書左僕射右龍武軍統軍劉公墓誌銘『殊不敢以不見舍望公。』舍。謂開城次舍之也。望。怨望也。

監察御史衛府君墓誌銘集中有與衛中行書。交誼絕厚。而銘其兄墓。專敘其合藥一事。極愚。可憫。若中行存世

俗之見。只肯稱笑。而不稱惡。公或倂從之。而夾敘其善事一二。則文不能如此之奇警矣。自歐王已不能行此直

道於人。後世更無論已。『趾笑進士。續聞成宗。』趾笑。猶踵笑。續令聞成大宗也。君雖益厭。然不能無萬一冀。

二句。襲封禪書。

河南令張君墓誌銘『無敢闌入。』闌。猶防也。張君有防範諸曹。不敢參入一語也。凡稱闌入。皆越入定防之內。

漢書『戶殿門失闌。』亦失防守之義。『棘棘不阿。』促促棘棘。他書不經見。所謂己出。『君獨疏言。治迫嶺下。』

他手摘錄疏言。必數句乃了。此僅一句。故過。『尚書有經數。』經常也。經費字出平準書。『留噤不敢從。』留。留

牒不下民。誦也。噤。不應觀察之求。亦未聲言與之爭也。

其兄將作少監普請銘於右庶子韓愈觀集中。祭張十一文。張與公往還情事最密。而此僅一句。故知文各有裁。

鳳翔隴州節度使李公墓誌銘『守卒出。』天子蒙塵。故守卒弛。而放出罪人也。『隨手所幸。』走德宗所至之

地。『不宜規小利。起事盜思。』起事。起邊釁也。盜思。每有小獲報捷。朝廷輒予以恩。是盜竊也。『販者負入褒斜。

船循渭而下。『褒斜不通舟車。肩負以入西上也。船循渭東下也。』首尾相繼不絕。『此句兼承上二句。中散大夫少府監胡良公墓神道碑。』使人自京師南走八千里。至閩南兩越之界上。請爲公銘。刻之墓碑。於潮州刺史韓愈曰。『三十四字爲句。岸然自喜。』遭讒府介。『介紹。皆佐人者也。魏公開府。鄭滑以胡爲佐。故曰府介。』不配其有。『言官不稱其能。』

故相權公墓碑矜慎簡鍊。一字不苟。金石文字之正軌也。『公在相位三年。』節敘事先其尤大者。簡嘗。『其所設張舉措。』節敘權公相業。專述用人一節。大抵嘉善而矜不能。和而不失其正。二句該之。而文特矜鍊。祇此是敘名臣之法。若一一敘列事蹟。則累牘不能盡矣。『以幾教化。』冀以教化遷人於善。『多所助與。維匡調娛。』不能者助之。能者與之。維持匡救。正也。調停娛樂。和也。『不爲聲章。』不爲嚴刻之條教。『其在山南河南。勤於選付。』選付。選擇事之要務。即與分付。不繁瑣。無留滯也。『鳳鳥不至。』奇句。『半途以稅。』稅。止也。用『稅駕』字。『出入屏毗。』出爲藩屏。入爲天子所毗也。

平淮西碑。『大憲適去。』謂安史也。『又况一二臣同。』節敘諸將。皆述皇帝詔言。故文氣振拔異常。通首得勢在此。

南海神廟碑。筆力足以追相如作賦之才。而鋪敘少傷平直。故王氏謂骨力差減也。然古來文士。並以賦物爲難。蓋藻繪三才。刻畫萬態。而不可剝襲一字。故其難也。後人雖綴前人字句爲文。又不究事物之情狀。淺矣。

處州孔子廟碑。太史公孔子世家贊數十語。文外有無限遠神遙韻。此文前半贊歎孔子無復不盡之味。不無遺恨也。『自天子至郡邑守長。通得祀而徧天下者。唯社稷與孔子爲然。』切定祀事。不泛作孔子頌。是文家定法。羅池廟碑。此文情韻不匱。聲調鏗鏘。乃文章第一妙境。情以生文。文亦足以生情。文以引聲。聲亦足以引文。循環互發。油然不能自己。庶可漸入佳境。『光顯矣。已而擯不用。』不敘一事。文各有裁。『荔子丹兮蕉黃。』九歌嗣響。

黃陵廟碑此等題。以高簡爲要。百數十言足矣。若與剗晰考證。必且闕疏不當。『故九歌辭謂娥皇爲君。謂女英帝子。』此等故無確據。如此說。亦自可從。其下方乃死者。所以釋陟爲死也。旣以陟代死字。則下文死字爲複。而方乃二字。不可解說矣。如言舜南巡而死。宜言下方不得言陟方也。帝王之死。皆可稱陟。則生時所至之處。皆稱陟。如後世之稱幸者。亦無不可。必謂南去不得言陟。亦未然也。且自『大別』至零陵。皆泝江水湘水而上。泝逆流二千餘里。亦不得稱下方。『二妃之力。宜常爲神食民之祭。』謂二妃有功於舜。遂宜爲神受祭。其說亦疏。且何以立專祠祀於湖北。亦宜有說。

江南西道觀察使中大夫洪州刺史兼御史中丞上柱國賜紫金魚袋贈左散騎常侍太原王公神道碑銘『軍息之不已。掌吏壞產。猶不釋囚之。』貸錢於軍。而取其息。息增加。取之無有已時。旣破產。則囚送。

司徒兼侍中中書令贈太尉許國公神道碑桐城姚郎中云。『宏本傳及李光顏傳。載宏以女子閒撓光顏事。與誌正相反。

口口口墓亦已甚矣。而文則雄偉。首尾無一字懈。精神奕然。『事。』指意指也。付。委以事也。『又首變兩河事。』

(此處有缺文)

口口口兵北過河。我即東兵以取曹。『由鄆至河東故。』故東兵。『歸財與糧。以濟諸軍。』歸。輸也。(此處有缺文)

『師道之誅。』若他手爲之。則曰誅李師道也。與上文對舉矣。退之則隨手變換。無所不可。『承五亂之後。掠賞之餘。』掠亂兵。掠去也。賞。亂時重賞購募也。『贊元經禮。』經野禮國也。『汴之南。則蔡。北則鄆。』節。敘次既畢。復摘其尤大者著識。以最其功。筆端大廉悍。亦其位置裁布有以顯之也。『察其顛呻。與其脫胸。』其所苦也。其所伺也。『三年而墟。』謂三年之內。蔡鄆並爲墟也。『天施不留。其討不逋。』天之所施不愆留。謂魏博也。天之所討不稽逋。謂蔡鄆也。

柳子厚墓誌銘『今夫平居里巷相慕悅』節。此段爲俗子剽襲爛矣。然光氣終自不滅。昭武校尉守左金吾衛將軍李公墓誌銘『以先朝時嘗信妄人柳泌能燒水銀爲不死藥』妄人韓公於事後貶之之名也。嘗薦時固不以爲妄矣。『大支於今其尙有封』言太宗之支久不當有封矣。賴成王特起故尙有封也。『誰黜不復』誰猶云誰謂也。

朝散大夫越州刺史薛公墓誌銘『皆家歸之』歸之如自歸其家也。

楚國夫人墓誌銘『又太尉劉公甥內外尊顯』夫人於韓氏爲內家。於翟氏爲外家。韓宏稱母之族。劉氏又外家也。『司徒公曰』節。兩層意相配。而詞不對。王荆國於此等。則皆置對停勻矣。『高陵相漢義以家訓』翟方進封高陵侯。其子翟義傾家以訓國恩。『孰盛與夷』夷等也。

國子司業竇公墓誌銘『比四代仍襲爵名』謂同昌以上四代皆封西河公。『佐六府五公』節。五府六公。而僅敘崔縱鄭餘慶。餘皆不敘。文所以簡貴正在此。而敘事簡直有法。故文氣適而不冗。『公始在崔大夫縱留守東都』兩層意對立。而詞亦漸相耦。已開王荆公誌文法。『銘』酷鍊然傷雕琢。足以開茁軋之習矣。『聖樞旋河犢引比』謂孔子聞竇鳴犢死。臨河而返。『相嬰撥漢納孔軌』謂竇嬰撥漢亂。納之於正大之軌也。『正議大夫尙書左丞孔公墓誌銘通首得勢。在前半。敘去官事。前半得勢。又在首句。筆愈提。則氣愈振。』臣與孔戮同在南省』節。疏文絕似漢書諸雜奏記。『如戮輩在朝。不過三數人。』他手爲之。必有『足以至治』四字。『自海抵京師』節。敘事絕狡獪。『絕海之商。有死于吾地者。』海外諸國。商人中有海隔絕也。『盡沒有之』。沒入官而據爲己有也。『厚守宰俸。而嚴其法。』不許守宰沒海商之貨。故嚴立法令也。『觀吏厚薄緩急。或叛或從。』待之厚而緩其禁。則從。待之薄而操之急。則叛。以破諸黃爲類。向意助之。敘與淮西河南北等類也。『嶺南霽然。』敘諸黃事往此。下申言孔公料事之明。最爲簡裁。『銘』謂吾不得見孔子而見其孫云云。其或尙與孔子類也。銘詞絕奇。

江南西道觀察使贈左散騎常侍太原王公墓誌銘以江南西道觀察使特具一段於中以爲主峯餘則敘官階於前。敘政績於後。章法變化。爲王公作神道碑。又作墓誌銘二文。無一字同。觀此知敘事之文。狡獪變化。無所不可。神道碑於敘官階。逐段敘其政績。此篇首先將官階敘畢。然後申敘居某官爲某事。『徵命拜中書舍人。』拜中書舍人。與除江南西道觀察使事蹟。卽敘於官階之下。與神道碑同一位置。有變有不變也。『丞相聞問。語語如傳云。』非編列之民。『錢餘於庫。米餘於廩。』二句同神道碑。『公之爲拾遺。』篇首已敘官階。此下再申敘事蹟。此等蹊徑。於文體爲已卑。王介甫多學之。『旬歲皆稱其便。』旬徧也。周一歲也。旬月周一月。旬日周天。千之十日也。『銘。』用韻法創見。『我最其迹。』考成有殿最。最字本此。韓宏碑最功定次亦如之。殿中少監馬君墓誌情韻不匱。凡誌墓之文。懼千百年後。谷遷陵改。見者不知誰氏之墓。故刻石以文告之也。語氣須是對。不知誰何之人說話。此文少乖。似哀諫文序。

南陽樊紹述墓誌銘道路所遇。及器物門里雜銘二百二十句。謂山水泉石諸古蹟。皆可爲銘。『然而必出於己。』節退之言屬文。皆親切有味。『於辭於聲天得也。』若敘知聲。如敘其於辭。則冗長不警拔矣。前半敘其文辭銘辭。亦專贊其辭。而此言其於聲云云。警絕。『後皆指前公相襲。』公心之所安。而昭彰無疑者也。詩『公然來思。』左傳『賄賂公行。』意皆如此。

中大夫陝府左司馬李公墓誌銘。『王孫道明唐初以屬封淮陽王。』天潢族屬。『景融親益疏不王。』於親屬益疏遠也。『魯公真卿。』不稱姓古法。『尹慚其廷中人曰。』言對廷中人有慚色。『拾掇三年。無所得。』言撫拾其罪過不得。『是與其故。故得用。』言與宰相爲親故。『詞愈下而微。』旣極復飛。『言王封後累世式微也。』言窮極無家。

故幽州刺史判官贈給事中清河張君墓誌銘。『奏君名迹中御史也。』謂聲名行迹也。『發半道。』謂張君行

至中途。『驟覺我辜。無庸殺。』戒張御史戒其徒。『君出門。罵衆曰。』著語極精神。『其友侯雲長佐鄆使。』鄆於范陽。相去不千里。『世慕顧以行。』東有所慕。西有所顧。猶瞻徇也。『噎暗。』猶啞嚙不敢出聲也。

河南府法曹參軍盧府君夫人苗氏墓誌銘。『其族世所謂甲乙者。』崔盧。唐世所稱巨族。甲乙猶云第一第二也。『有攜有壘。』攜。牽以行也。壘。在抱也。

故貝州司法參軍李君墓誌銘。李翽善爲文。故公此首尤矜慎。稍變其豪橫之氣。而出以瘦勁。『壙於丁巳。』掘坎也。『墳於九月丁酉。』四周圍。阜中隆起也。『窆於丁卯。』下棺也。『翽其孫也。有道而甚文。固於是乎在。』收處絕疏古。化去筆墨痕跡。

虞士盧君墓誌銘。『貴兮富兮。如其材。得何數兮。』材應得之。貴富不足數也。

統州司戶韓府君墓誌銘。凡墓誌之文。以告後世。不知誰何之人。其先人有可稱則稱之。其身無可稱則不著一語可也。此文合法。

女孿壙銘。『愈之爲少秋官。』替代語。破文體。『言佛夷鬼。』自然沈痛。

乳母墓誌銘。銘者。自名也。自述先祖之德善行義。刻之金石。長垂令名。故字從金從名。不必有韻之文。而後爲銘也。觀孔惲銘。可見亦有先敘其蹟。後更爲銘詩者。欲使後世歌頌功德。故詩之也。別有銘相警戒者。如金人銘。十七銘之類。爲數語。便於記誦。亦昭著使垂不朽。既自警。亦警人也。又六朝人遇山水古蹟。多爲銘。亦刻石。使衆著於耳目之義。總之。銘也者。垂後著名之通稱。不分詞之有韻無韻。亦不分文之爲頌爲箴也。

瘞硯銘。『復其質。非生死類。』歸於土。故曰復質。『全斯用。毀不忍棄。』謂全時則用之。

毛穎傳東坡詩云。『退之仙人也。游戲於斯文。』凡韓文無不狡獪變化。具大神通。此尤作劇耳。

送窮文。『傲數與名。』名數皆學之粗迹。『文窮不專一。能怪怪奇奇。不可時施。祇以自嬉。』四語足盡韓文之妙。不可時施。言不可施於時。『企足以待。寔我警寃。』言我企足以待彼。而彼寔我於寃警也。『子知我名。凡我

所爲。驅我令去。小結大癡。』四句錯雜成篇。驅我令去句。當在凡我所爲之下。『惟乖于時。乃與天通。』精語驚人。『攜持瑰瑤。易一羊皮。飫于肥甘。慕彼糠糜。』瑰瑤肥甘。謂百世不磨之名。羊皮糠糜。謂遇時之浮榮也。鱷魚文。文氣似諭巴蜀檄。彼以雄深。此則矯健。『出貢賦以供天地宗廟百神之祀之壤者哉。』長句聳拔。故金紫光祿大夫檢校尚書左僕射同中書門下平章事兼汴州刺史充宣武軍節度副大使知節度事管內支度營田汴宋亳穎等州觀察處置等使上柱國隴西郡開國公贈太傅董公行狀。著意在論回紇。諭李懷光。及入汴州三事。餘皆不甚措意。惟有所略。故詳者震聳異常。『爾之馬歲至。』節微有描摹左傳痕蹟。論今年權停選舉狀。此首與下御史臺上論天旱人饑狀。請復國子監生徒狀。當時奏議文字如此。雖以韓公爲之。氣體仍自不古。

復讎狀。柳子厚此議最爲允當。

錢重物輕狀。頗似賈生博禡七福疏。

爲宰相公讓官表。韓公爲四六文。亦不廁一俗字。歐王效之。遂開宋代清真之風。

論捕賊行賞表。『昔秦孝公用商鞅爲相。』節引用太爛漫。蘇長公文多似此。

潮州刺史謝上表。『苟非陛下哀而念之。』節求哀君父。不乞援奧竈。有節概人。固應如此。『臣於當時之文。亦未有過人者。』如奏議文字。及試禮部吏部之文。『東巡泰山。』此則阿世取悅。韓公於此等處。多信道不篤。

論孔戣致仕狀。孔公墓誌銘中。節錄此狀數語。絕古茂。而此文亦平平耳。所謂於當世之文。亦未有以過人也。

論淮西事宜狀。『難處使先。』凡有艱難之處。使先冒其鋒也。『悉令卻牒。歸本道。』以客軍各歸本道。而以其

兵器給召募人。『臨城小縣。可收百姓。於便地。作行縣以主領之。使免散失。』從前各處堡柵。皆置兵馬。則百姓倚以無恐。今兵馬聚爲四道。則各處無聲援。不免散失。故無兵馬屯聚之處。則作行縣以主領之。

論變鹽法事宜狀。『積數雖多。不可遽算。』每斤失利七八文。如積至百千億斤。則失利無算也。『及至院監請

受「車牛到官。請受而用之。」不用門戶。皆殺停留。「不用之車牛。皆暫停住。」輸納之時。人事又別。「猶今俗稱交卸。」凡事和雇。無不皆然。「載鹽時。須輪次。交納時。又有規條。不得自由。」

昌黎外集

芍藥歌太爛漫。不似韓公詩。

海水層折不窮。

與少室李拾遺書。敦諭隱士之文。以大朝駢文爲雅。若散文則三四行已足。如兩漢中諸小簡可也。

答劉秀才論史書「且傳聞不同」節。退之實見史不易爲。爲之者。皆不免草草。率爾言及此。則雖遷固亦不免自心慚愧也。假令遷固同傳一人。同敘一事。其傳聞愛憎。仍各不同也。欲不謂之草草得乎。退之不爲史。正識力大過人處。

鄆人對「然或陷於危難。能回其志孝。」然或二字。接法不古。「矧非是希免輪者乎。」矧字不法。題李生壁。低個唱嘆。深遠不盡。無韻之詩也。「昔時無度量之心。」度量。謂爲之限制。如布帛之有幅也。無度量。謂不爲限制。爛漫而無所不可也。

祭董相公文「兩水于雲。瀆水于坤。蒼昌生物。有假有因。天睠唐邦。錫之元臣。」兩瀆比元臣。雲坤比唐邦。順宗實錄爲張薦令狐垣立傳。俱不宜闌入實錄中。若張萬福陸贄陽城。爲一時偉人。王叔文王伾韋執誼。爲一時姦回。自宜詳敘顛末。然張陸陽皆德宗朝人。尙不宜闌入順宗實錄。獨三奸與順宗相終始耳。

柳河東集

零陵三亭記。昌黎誌東野則做東野。誌樊宗師則做宗師。其作羅池碑。似亦做此等文爲之。然如「裨諶宓子」

等句。實未脫唐時駢文陸徑。昌黎不屑爲也。

對夕月柳子厚對夕月。開洪容齋王伯厚及近世顧亭林錢辛楣王懷祖之先。故知古人讀書非囿莽者。

白氏長慶集

薛後走筆酬劉五主簿長句之贈兼簡張太賈二十四先輩昆季自首至月夜句。敘昔年與劉及張賈兄弟同居符離。自「我年漸長」至「駭人」句。敘公與張賈先後登科。而劉未得科第。自「元和運啓」至「才微」句。公自敘遭際明時。得官禁近。自「晚松寒竹」句至末。敘重與劉君相聚。有贈詩而公酬之。

霓裳羽衣舞歌和微之自首至「長引聲」句。敘元和時曾於內宴時。見霓裳舞。自「當時」至「各星散」句。敘在杭州時。曾教妓學霓裳舞。自「今年五月」至「圖寫出」句。敘在蘇州以書問元。元以霓裳譜答之。自「我愛」至末。言將取蘇妓教之。

池上作西池南潭。皆池中勝處也。

李義山集

重過聖女祠。聖女祠。集中凡三見。程氏以爲皆刺當時女道士者。萼綠華降傘權家。杜蘭香數詣張碩。皆以仙女而與男子交際。所以深譏之也。

題僧壁集中有贈田叟詩第六句云。「交親得跡昧平生。」程氏謂此篇亦是彼詩之意。窮途以求故人。傾身納交。而棄我如遺。猶之捨生求佛。而卒無所得。「琥珀初成憶舊松。」按舊松。是指令狐楚。謂己少時。賴以獎借成名。

潭州大中元年。鄭亞廉察桂州。義山爲從事。是年李德裕貶潮州。程氏以爲義山經過潭州時。聞德裕之貶。而作

是詩。

贈司戶劉黃程氏以爲義山爲桂州判官時嘗自桂林奉使江南。又使南郡。賁貶柳州司戶。當在此時。或道途舟次相遇。而贈此詩。

飲席戲贈同舍同舍。蓋妓席惜別者。

令狐八拾遺。綯見招送裴十四歸華州二十中。耶用謝萬事。郗方回爲王羲之妻舅。謝道韞爲王凝之妻。裴十四嘗是攜家同行。但不知與令狐氏是何等姻親耳。

寄令狐學士。綯唐書史。綯夜對禁中燭盡。帝以金蓮華炬送還。夜吟句。笑其恩遇之隆也。

少年此刺嘗時勳戚子弟。

藥轉程注云。此篇淫媾之辭。朱竹垞以爲藥轉字。出道書。如廁之義也。

隋宮唐人諱淵。紫泉即紫淵。謂長安也。蕪城謂揚州也。刺隋鎖長安之皇殿。而欲家於揚州。

杜工部蜀中離席朱鶴齡以爲擬杜工部之詩。雪嶺松州等。俱切老杜肅代朝事。程夢星以爲柳仲郢鎮東蜀。辟義山爲判官。檢校工部郎中詩。作於是時。題嘗爲辟工部。國藩按。工部郎中京朝之官。非幕府之官也。檢校工部則可。辟工部則不可。朱說近之。

梓州罷吟寄同舍『五年從事霍嫖姚』霍嫖姚喻柳仲郢。

無題二首二詩。言世莫已知。已亦誓不復求知於世。託辭於貞女。以自明其波瀾不起之志。

昨日此冷遊惜別之詩。

子初郊墅集中又有子初全溪作。朱氏程氏未著子初何人。井絡第七句。是作意預警奸雄輩。無恃蜀中之險。而圖割據也。

宋玉此詩弔宋玉。所以自傷也。嘗係自桂林奉使江陵時作。

奉和太原公送前楊秀才戴兼招楊正字戎楊敬之兼太常少卿二子。戎戴同日登科。朱注太原公王茂元也。第三句送戴四句招戎。

臨發崇讓宅西谿叢語。洛陽崇讓坊有河陽節度使王茂元宅。臨發者。將由洛陽王宅赴京也。

野菊朱氏云。此詩又見孫逖集。題作咏樓前海石榴。程氏云。此詩與九日詩詞旨皆同。野菊命題。即君子在野之歎。國藩按。程氏說是也。義山以官不挂朝籍爲恨。故以未嘗稼穡御筵。不能不致愆於令狐氏耳。

過僕射舊宅伊慎兗州人。大歷閒。以軍功封南兗郡王。歷官檢校尚書右僕射。兼右衛大將軍。末二句。朱氏以爲義山時自桂林奉使江陵。故有此語。程氏以爲伊慎立功。初在嶺南。後在湖襄。愚意當從朱說。

聞歌程氏以此詩爲宦妓流落在人閒者而作。考唐德宗嘗命陸贄草詔。使潭城訪求奉天所失裏頭內人。其事可證。觀細腰句。似在江陵時所作。

贈華陽宋真人兼寄清都劉先生。此詩朱氏以宋真人爲女道士。程氏謂義山以劉比周史。而自比於徐甲。推復至矣。義山文集有云。『志在玄門』宋真人。必道侶也。

重有感文宗太和九年十一月二十一日。甘露之變。宦官既殺宰相王涯。賈餗。舒元興等。時鄭注爲鳳翔節度使。爲監軍所殺。王茂元在涇原。蕭弘在廊坊。勒兵以備非常。昭義節度使劉從諫。三上疏問王涯等罪名。義山欲茂元入清君側之奏。故有此詩。

春雨此借春雨懷人。而寫君門萬里之感。朱云。『玉璫緘札。猶今所云侑緘。』

楚宮宋申錫爲宦者所誣。貶開州司馬。卒於貶所。開州屬山南道。本楚地。程氏以爲此詩。弔宋申錫而作。

宿晉昌亭聞鶯禽長安圖經自京城啓夏門北入東街第二坊。曰晉昌坊。國藩按。末四句。言失羣之胡馬。挂木之楚猿。與此鶯禽之心相同。即與義山之羈縲亦同也。

安定城樓涇州保定郡本安定郡。此義山在王茂元涇原幕中時作。

利州江潭作武后自冊爲金輪皇帝。父士讓爲利州都督。生后。此詩在利州咏武后也。三四句。卽潭中之景。寓懷古之意。五六七句。均以龍比武后。

猿前六句。猿凡六種。固已可傷。末二句。以青袍寒士而送玉珂貴客。其猿尤可悲也。流鷺末句。亦自恨官不挂朝籍之意。

七月二十九日崇讓宅讌作程云。集中有七月二十八日夜。與王鄭二秀才聽雨。夢後作七古一首。敘見知於王茂元。而歸結悼亡之意。此詩僅後一日。所言亦復悽惋。疑七月二十八九。爲義山悼亡之日。贈從兄闈之魚標鹿跡。言處處有機事。機心也。

九成宮送荔支者而被天書恩幸。亦「一騎紅塵妃子笑」之意。

詠史此篇朱氏以爲因文宗而發。今按三四句詠文宗之儉。如史所稱「衣必三澣」是也。五句以馬喻賢才。傷時無良臣也。六句以蛇喻宦官。盤結而不能去也。末句言己爲文宗開成二年進士。曾與衆仙同詠霓裳也。

無題此篇程注以爲出秘書省。調宏農尉時所作。三四句。出爲外吏。而不忘禁省也。五六句。言省垣朋遊之樂。末句蘭臺朱氏以爲義山爲王茂元所辟。得侍御史事。

赴職梓潼留別畏之員外同年長之名瞻。韓偓之父。開成二年。與義山同年進士。觀前四句。似韓與義山同時娶妻。同年登第。而義山旋即悼亡。朱云義山與畏之爲僚壻。意或然與。時韓留京師。

曲池此似冶遊惜別之詩。

留贈畏之程云。『此必將赴梓潼往謁畏之。值其朝迴。而不一見。故有慨乎言之耳。』朱云。『左川卽東川』國藩按。此必自東川奉使入京一次。故自稱曰歸客。與前留別畏之詩。非一時也。

玉山程注此詩。亦望恩干進之意。國藩按。此人蓋居勢要而有才望者。三四句。皆就山取譬。山能回日馭。謂其能回天眷也。山有上天梯。謂其接引甚易也。神仙。言其居要地。才子。言其負時望也。

牡丹程云此豔詩也。以其人爲國色。故以牡丹喻之。首句原注。『典略云。夫子見南子在錦禕之中。』一片程氏以此爲幽期密約之詩。國藩按。此當致書友人。求爲京朝一官。如陳咸致書於陳湯。得入帝城。死不恨也。前四句。言帝城風景可望而不可即。後四句。自春去秋來。日月易逝。時事變遷。無使我失望也。促漏此詩高標。以爲擬深宮怨女而作。程氏以爲託於閨情。亦怨令狐綯之不見答耳。

可歎此詩程氏以爲歎彼姝所遭非耦。起句結句。蓋曾與義山目成而不及亂也。愚謂此亦刺戚里之爲女道士者。

富平少侯此亦譏勳戚子弟。

贈趙協律督吏部相公令狐楚也。時爲當路所軋。置之散地。故曰。賓館徒在。安平公權我也。以太和六年八月卒。故曰妓樓已空。第四句。原注。愚與趙俱出。今吏部相公門下。又同爲故尙書安平公所知。復皆是安平公表姪。曲江太和九年正月。鄭注。言秦中有災。宜興土功厭之。乃興曲江之役。是年十一月。因甘露之變。遂罷曲江亭館。此詩所以慨也。天荒地變。王室之公憂也。傷春。義山之私感也。當別有感耳。

回中牡丹爲雨所敗。回中在安定高平。其中有宮。程云。此二首乃歎長安故妓。流落回中者。牡丹。特借喻耳。

杜樊川集

長安雜題長句第二首韓嫣四句。言勳戚豪家之盛。末二句。言不游權貴之門也。

第三首。此首言方春景物之麗。士女冶遊之盛。而已甘陋巷寂寞也。

第四首。期嚴四句。自言疏慵。不宜於從公。有嵇康七不堪之意。

李給事中敏太和六年大旱。中敏以司門員外郎。上言請斬鄭注以快忠臣之魂。帝不省。中敏以病告歸。注誅中敏被召。累遷給事中。又論仇士良不應蔭子。爲士良所怒。由是復棄官去。和白相公聖德和平。致茲休運。歲終功

就合詠盛明。呈上三相公長句四韻。宣宗大中二年。收復河湟。白敏中進詩。同時馬植魏扶崔鉉皆進詩。三相公謂馬魏崔也。聖德和平四句。蓋白公題中語。

送國基王逢『浮生七十更萬日』牧之是時年四十二三。若得至七十。猶有萬日。

西江懷古注家謂楚人指蜀江爲西江。謂從西而下也。國藩按。詩中魏帝苻堅等語。殊不似指蜀中者。大朝隋唐皆以金陵爲江東。歷陽爲江西。厥後豫章郡奪江西之名而歷陽等處。不甚稱江西矣。此西江或指歷陽烏江言之。

池州李使君沒後十一日。處州新命始到。後見歸妓感而成詩。巨卿句用後漢書范式傳。阿鷺句用魏志朱建平傳。生子句用任延傳。

八月十三日得替後。移居霽溪館。因題長句四韻。據馮注。牧之於大中四月至湖州。五年八月得替。恰及一年。故曰『一年人住豈無情。』

早雁雁爲虜。弦所驚而來。落想奇警。辭亦足以達人。

湖南正初。招李鄩秀才。李鄩字楚望。大中進士。長安人。唐末避亂嶺表。馮注云。李鄩有和湖州杜員外冬至日白蘋洲見憶詩。與牧之此詩用韻并同。此湖南當是湖州之誤。

懷鍾陵舊遊第一首。漢之豫章郡。隋改爲縣。唐改鍾陵縣。後改南昌縣。征南。指沈傳師也。傳師。太和元年卒。子樞。詢皆登進士第。詢歷清顯。至禮部侍郎。故以機雲比之。

第四首。馮注通典。南昌有龍沙。水經注。龍沙甚潔白。高峻而陀。有龍形。國藩按。此詩之意。謂沙之白細。就中可揀出蜀羅也。以比就紅粉隊中。揀選絕色。蓋攜妓夜遊之詩。

詠歌聖德。遠懷天寶。因題關亭長句四韻。『聖敬文思業太平。』宣宗微號曰聖敬文思。和武光孝皇帝。寄浙東韓又八評事。『一笑五雲溪上舟。』會稽若邪溪。徐皓改爲五雲溪。

書懷寄中朝往還。往還猶云舊遊。
『爲吏塵中勢自迴』迴猶云變易也。

嘉祐集

詩論『以爲可以博生也。』博換也。貿易也。古琴曲有不博金。猶諺稱金不換也。宋世有博馬司。謂以茶易蕃馬也。

元豐類稿

序越州鑑湖圖『謂湖不必濬者。曰益隄壅水而已。』湖不必復。前八說所無。益隄壅水。刁約張伯玉之言也。
宜黃縣學記『則其材之不成。夫疑固然。』夫疑固然四字。似當作固然無疑。

越州趙公救舊記末段文氣平衍。
廣德軍重修鼓角樓記氣體頗近。退之。但少奇崛之趣。

東坡文集

石鐘山記自咸豐四年十二月。楚軍水師在湖口爲賊所敗。自是戰爭八年。至十一年乃少定。石鐘山之片石寸草。諸將士皆能辨識。上鐘巖與下鐘巖。其下皆有洞。可容數百人。深不可窺。形如覆鐘。彭侍郎玉麟於鐘山之頂。建立昭忠祠。乃知鐘山以形言之。非以聲言之。鄺氏蘇氏所言。皆非事實也。

代張方平諫用兵書東坡之文。其長處在徵引史事。切實精當。又善設譬諭。凡難顯之情。他人所不能達者。坡公輒以譬諭明之。如百步供詩首數句。設譬入端。此外詩文亦幾無篇不設譬者。此文以屠殺膽羞。喻輕視民命。以箠楚奴婢。喻上忤天心。皆巧於構想。他人所百思不到者。既讀之。而適爲人人意中所有。古今奏議。推賈長沙陸

宣公蘇文忠三人爲超前絕後。余謂長沙明於利害。宣公明於義理。文忠明於人情。陳言之道。縱不能兼明此三者。亦須有一二端。深明透達。庶無格格不吐之態。『至於興事首議之人。冥謫尤重。蓋以平民無故緣兵而死。怨氣充積。必有任其咎者。』數句非儒者之言。亦失陳奏之體。『此豈爲善之報也哉。』武氏之禍。謂由太宗窮兵所致。亦非事實。『營猶屠殺牛豕。剝鱗魚鼈。以爲膳羞。食者甚笑。死者甚苦。』姚姬傳氏謂東坡此言。是子虛烏有之事。方平並未入奏。蓋在黃州時。聞永樂徐禧之敗。神宗悔痛。故追作是文。以發揮己意。其以屠殺膳羞爲喻。亦是黃州戒殺時議論也。國藩謂東坡好佛。以好殺喻贖兵。理自可通。惟首段言冥謫尤重。則失體耳。

圓邱合祭六議。劉子按秦氏蕙田錄此疏於五禮通考中。極辨其謬。蓋主天地必宜分祭之說。雖依經據古。確不可易。而蘇氏酌時勢以立言。亦自不可廢也。

上皇帝書。奏疏總以明顯爲要。時文家有典顯淺三字訣。奏疏能備此三字。則盡善矣。典字最難。必熟於前史之事蹟。並熟於本朝之掌故。乃可言典。至顯淺二字。則多本於天授。雖有博學多聞之士。而下筆不能顯豁者多矣。淺字與雅字相背。白香山詩務令老嫗皆解。而細求之。皆雅筋而不失之率。吾嘗謂奏疏能如白詩之淺。則遠近易於傳播。而君上亦易感動。此文雖不甚淺。而典顯二字。則千古所罕見也。『臣近者不度愚賤。輒上封章言買鐘事。』篇首三百餘字。失之冗漫。漢唐制科對策。往往如此。今京曹奏疏。首段亦多浮詞。若督撫奏疏。宜就事論事。閒話不可太多。『驅鷹犬而赴林藪。』語人曰。『我非獵也。』不如放鷹犬而獸自馴。操網罟而入江湖。語人曰。『我非漁也。』不如捐網罟而人自信。『善言事者。每於最難明之處。設譬喻以明之。東坡詩文。皆以此擅長。』宰相。人臣也。且不欲以此自污。而陛下獨安受其名而不辭。非臣愚之所識也。『四句有傾軋王介甫之意。』今者徒聞江浙之閒。數郡雇役。』王荆公新法。惟雇役爲善政。當日諸君子。亦爭之不已。厥後司馬溫公改雇役仍爲差役。東坡又力爭之。雇役猶今軍中雇募民夫。給與飯錢也。差役猶今擄人當夫。不給錢文也。『又欲官賣所在坊場。以充衙前雇直。』衙前猶差總之名也。凡縣有大役。如運送官物錢糧之類。則責成衙前爲夫役之總。故

宋時派充衙前者。鄉之富民。立即貧窮。韓魏公司馬溫公皆有疏論之。王荆公以坊場爲衙前雇價。較之前此全不給錢者。已稍優矣。『且東南買絹。本用見錢。』節買絹之初。本發見錢。後亦失信。揀刺義勇之初。本言永不戍邊。後亦失信。以喻王介甫放青苗錢之初。本言不許抑配。不久亦必失信也。東坡言事。或引古事以譬之。或引近事以譬之。取其易曉。『計其閒願請之戶。必皆孤貧不濟之人家。若自有贏餘。何至與官交易。』今之領常平倉穀者。亦皆孤貧不濟之人。況宋領青苗錢。須還利錢乎。『頃在陝西見刺義勇提舉諸縣。臣嘗親行。愁怨之民。哭聲振野。當時奉使還者。皆言民盡樂爲。』又以刺義勇時。民怨而帝不聞。喻青苗一事。亦民怨而帝不聞。『縱使其閒薄有所獲。而征商之額。所損必多。』均輸。猶官運之鹽也。商稅。猶各卡之抽釐也。官運多則釐稅少。自然之理。『使天下常調。』循資按額者。謂之常調官。『許以風聞而無官長。』無官長。猶云無上司也。今都察院之總憲副憲。雖稱臺長。亦非堂官之體。『臣恐自茲以往。習慣成風。盡爲執政私人。以致人主孤立。紀綱一廢。何事不生。』執政私人等句。亦有傾軋之意。『臣之所謂願存紀綱者。此之謂也。』存紀綱一節。事實太少。議論亦淺。與前二條殊不相稱。不足乎列爲三。

東坡詩集

和子由踏青前八句。敘踏青。後八句。就道人賣符生波。

石鼓歌下揖冰斯同穀穀以上。推尋字體。豈有名字記誰某以上。敘石鼓爲周宣王時作。以下至末。論鼓不爲秦所培植。

司竹監燒葦園因召都巡檢柴貽勛左藏以其徒會獵園下『欲出已被蒼鷹遮。』以上言狐兔歲歲藏葦中。敘獵之地。野人以下。正賦獵事。末言獵罷置酒。

朱壽昌郎中少不知母所在刺血寫經求之五十年去歲得之蜀中以詩賀之末引六事作收。別是一種章法。

續麗人行心醉二句拙。孟光二句腐。

次韻答劉涇前嘲劉之苦。後敘己之樂。

和子由送將官梁左藏仲通前八句自敘閒適之趣。後八句敘梁來徐兼憶子由。

次韻孔毅父久旱已而甚雨三首第一首專詠久旱第二首前半喜已得雨後半將謀作塘。第三首詠甚雨。而及楊道士。

和蔡景繁海州石室『蒼髯白甲低瓊戶』以上。敘石曼卿種桃。我來四句。敘公嘗攜家一游。有婢彈胡琴。爾來十句。因蔡寄詩。復念及胡琴婢。

張近幾仲有龍尾子石硯以龍劍易之此等爲後世惡詩所藉口。最不宜學。

寄蘄簞與蒲傳正翻從寒冷時。倒映出炎熱得簞之妙。亦自昌黎之『卻願天日長炎曦』句脫胎。

送表弟程六知楚州三老。嘗謂東坡與程六德孺之祖爲二老。又加石氏一老也。諸孫卽指程六及坡自謂耳。前十句。敘少時故鄉聚處。後十句。敘暮年京師送別。

送王伯敦守饒等入嶠函句。謂行人等入函谷關。而至長安。不肯久留饒州也。

武昌西山前十二句。敘昔在黃州。往來西山。浪翁六句。敘鄧曾作窪尊銘。當時六句。敘曾宿玉堂。

次韻米黻二王書跋尾二首前六句。敘曾在三館見二王真蹟。後八句。敘米得此本。

書王定國所藏煙江疊嶂圖前十二句。狀畫中勝境。使君四句。點明題目。君不見十二句。言樊口勝境。亦不減於途中之景。但人自欠聞耳。

喜劉景文至前十二句。喜劉至。後八句。念蘇杭舊遊。以劉自杭來也。

在潁州與德麟同治西湖未成政揚州三月十六日湖成德麟有詩見懷次其韻首四句。辨杭潁之雌雄。我在六句。敘在杭修隄。竭來四句。敘在潁治湖。末六句。敘見官揚州。

遊博羅香積寺首六句。敝麥禾之美。誰言六句。因見麥禾溪水。而謀及日磨。末八句。豔說飽食麥禾之味。收麵句。麥也。春種句。禾也。雲子句。禾也。瓊肌句。麥也。牢九句。麥也。真一句。禾也。

荔支數後八句。因荔支而嘆貢茶貢花之弊。

次韻正輔同遊白水山首八句。言被塵俗所纏縛。欲爲物外之遊。首參十句。敝自到嶺南。備歷諸勝。朱明八句。言自羅浮遊白水。故人至末十四句。有飄逸出世之想。

『仙山一見五色羽。』此句謂有五色雀曾一至儋耳庭中。公後有五色雀詩。

歐陽晦夫遺接羅琴枕戲作此詩謝之首六句。自敝至嶺南。後冠服見君六句。敝送冠枕。末十句有懷歐梅。

常潤道中有懷錢塘寄述古第二首。『去年柳絮飛時節。記得金籠放雪衣。』按映雪堂刻東坡帖。有『開籠若放雪衣女。長念金剛般若經』一事。亦與此詩相合。

與參寥行園中得黃耳蕈。『蕭然放箸東南去。』東南去者公此時將離徐州。改官湖州矣。

山谷詩集

送范德孺知慶州德孺名純粹。元豐八年八月。除知慶州。山谷以次年春爲此詩贈之。乃翁。謂范文正公。阿兄。謂忠宣公純仁也。

次韻李之純少監惠視汝州葉縣有黃公山。山谷熙甯間嘗爲葉縣尉。當迎候之純也。猛獸最風。借以言石之狀。仙伯。謂李之純。蓬萊。謂見李於京師也。與清流者。山谷以哲宗初除館職也。黃山卽黃公山。謂前此見石不知其可爲硯材。

詠李伯時摹韓幹三馬次蘇子由韻簡伯時兼寄李德素太史。嘗謂子由作起居郎左史之任。雲雨垂。謂如在天上也。馬官二句。言其馴伏如此。必非新自西極來者。任注詩意。若曰老於中朝之士。與來自鈞築者。其英傑之氣。

固自不同。如仗下馬與渥注之驥也。士或句。言五筵皮已自輕其身矣。而今乃有井不須此價者。次韻子瞻和子由觀韓幹馬因論伯時畫天馬翰林。謂東坡也。坡詩云。『少陵評事貴瘦硬。此論未公吾不恐。』言少陵評幹不畫骨。李侯亦不以爲憑也。

謝黃從善司業寄惠山泉。『錫谷寒泉鑿石俱。』鑿音委。圓而長曰鑿。鑿石所以澄水也。

次韻錢穆父贈松扇銀鉤字也。玉唾詩也。噴溝。高麗城名。龍藏。謂不曉事人。山谷以自道也。

戲和文潛謝穆父松扇山谷有猩猩毛筆詩。蓋亦穆父高麗所得。文潛體肥。故有肉山之譏。黃閒。奇名。

次韻王炳之惠玉版紙。『董狐南史一筆無。』二句。山谷時爲史官。自謙云爾。

送鄭彥能宣德知福昌縣冠氏縣屬大名府。鄭由冠氏遷福昌。故稱之曰鄭冠氏。猶稱王元之曰王黃州。稱范德

孺曰慶州。稱孫賁曰孫陽翟耳。

雙井茶送子瞻雙井在洪州分甯縣。山谷所居也。

和答子瞻山谷時病目。故首二句云。東坡謝山谷餽茶詩云。『明年我欲東南去。』故曰『貽我東南句。』

子瞻以子夏邱明見戲聊復戲答。『上清虛皇對久如。』句。謂素對久之。詩箋曰。『丞然。猶言久如也。』軒轅。謂

神宗。時山谷修寶錄故云。

省中烹茶懷子瞻用前韻文德殿東上閣門之東。有井絕佳。陸羽復州竟陵人。著茶經三篇。以廬山康王谷水簾

爲天下第一。爭名句。謂衆人爭名於烈燄之中。東坡則以水沃其焚如之燄也。

戲呈孔毅父。『校書著作頻詔除。』山谷以元豐八年四月。爲校書郎。元祐二年正月。爲著作佐郎。

以團茶洮州綠石研贈无咎文潛元祐元年十二月。試太學。錄張耒試太學正。晁補之並爲秘書省正字。所謂道

山延閣。所謂此地。并指禁省館閣言之也。思齋。指宣仁太后。紫皇及訪落。并指哲宗也。

次韻答曹子方雜言山谷在京寓居醕池寺。首五句山谷自敘近狀。時持戒律甚嚴。故有齋盂之句。冷卿。如稱詞

部爲冷廳。廣文爲冷官之類。謂光祿卿也。或云冷姓也。國藩按。冷卿以姓爲是。往時以下八句。山谷昔在冷宅。始知曹之名。誰憐四句。敘與曹相遇時。曹貧而冷亦不如昔矣。末七句招曹偕隱。張侯似是張仲謀。

次韻子瞻武昌西山元次山因石顛有窟。因修之。以藏酒。命爲窪樽而銘之。鄧聖求在武昌。嘗作元次山窪樽銘。東坡在玉堂。與鄧同夜直。語及此事。因作武昌西山詩。請鄧同賦。山谷和之。首四句敘次山作窪樽。平生四海以下十二句。敘東坡在黃州尋次山之遺蹟。鄧公四句。敘東坡摩挲鄧公之銘。謫去至末八句。敘東坡還京。與鄧同直玉堂。

謝送張賜壑源揀芽熙甯末。神廟有旨下建州。製密雲龍建州茶。以北苑壑源爲上。沙溪爲下。第一春。謂元豐元年。睿思。蓋神宗便殿也。橋山。謂作神宗裕陵也。右丞謂李清臣邦直。校書郎山谷以元豐八年召爲校書郎也。春風。謂茶。

以小龍團及半挺贈无咎并詩。用前韻爲戲。佳人。謂无咎。碁局。謂團茶。下隱隱有此文。蓋篋痕也。雞蘇。胡麻。俗人衰茶。多以此二物雜之。晉有羌人姚馥。但言竭於酒。羣輩呼爲竭羌。

送謝公定作竟陵主簿。謝公謂師厚。公定蓋其子也。竟陵與襄陽皆在漢水之濱。四海句。以習鑿齒比公定才行之高。拄笏句。以王微之比公定襟懷之雅。

僧景宗相訪寄法王航禪師首二句。山谷自敘近狀。三四句。指智航。一絲句。謂智航無罣礙。脫離世網。萬古句。慨世人爲物所牽。如蟻之旋磨。末二句。謂智航能以法力致雨。熟其田園。不須令小僧景宗乞化也。

次韻子瞻詠好頭赤圖。精神權奇。汗溝赤。銅馬相法曰。汗溝欲深長。

觀伯時畫馬元祐三年春。東坡知貢舉。山谷與李伯時。皆爲其屬。故試院中作數詩。儀鑿司掌奉供帳之事。翰林司掌供御酒茗湯果及內外筵設。太極老君。與傅先生木鑿。使穿一石槃。厚五寸許。積四十七年。而石穿。遂得神丹。

記夢洪駒父詩話。謂山谷見一貴宗室。攜妓女遊某寺。此篇記其事也。僧惠洪冷齋夜話謂山谷晝臥黼池寺。夢與一道士遊蓬萊覺而作此詩。二說未知孰是。

次韻子瞻送李豸豸字方叔。東坡知貢舉而豸不第。有詩送之。巨浸二句。言其所成者大。風蟬二句。勸其不求速化。

次韻子瞻寄眉山王宣義王准奇字度源。蜀之青神人。東坡叔丈人也。東坡有王丈求紅帶詩。『林間醉著人伐木。』聞伐木喧噪之聲。猶以爲追呼也。

聽宋宗儒摘阮歌翰林尙書。當是宋景文公。耆域。天竺高僧也。嘗以淨水一杯。楊柳一枝。起滕永文之病。

答黃冕仲索煎雙井并簡揚休王戎封安豐侯。善發談端。此引以比揚休。秋月澄江。言詩之清絕如此。夜堂句。不知何指。

再答冕仲『春溪蒲稗沒鷓鴣。』急就篇。顏注曰。『鷓鴣頸毛也。』『他日過飯隨家風。』漢書鮑宣傳『俱過宣一飯去。』『走謁鄰翁稱子本。』稱子本。謂稱貧於鄰家。以治具。韓文子本相侔。

戲答陳元與元祐二年八月。陳軒爲主客郎中。軒字元與。陳汀洲亦猶稱鄭冠氏。孫陽翟之類。任注云。『東門拜書。』當是拜誥於東上閣門。小人山谷自謂也。迎笑句。謂少婦也。夜窗句。謂寒宵也。秋衣句。謂侍妾薰衣也。謂元與雖甘枯淡。恐有少婦寒宵薰衣。意根復動耳。

再答元與牛鐸。山谷自比黃鐘。以比元與也。邂逅。謂不期而得之。補袞。謂名位也。謂名位倉卒可得。不如不忘其本也。

演雅『穉蜂趨衙供蜜課。』唐食貨志。有課戶。今猶以賦稅爲國課。此謂蜂以釀蜜爲課也。

『黃口只知貪飯顆。』黃口。小雀也。

戲答趙伯充勸莫學書及爲席子澤解嘲平生二句。言不好飲。我醉二句。言不好色。崔謂崔瑗。杜謂杜度。長沙僧

懷素也。自言得草書三昧。任注。席君。蓋京師醫者。與山谷寓舍相鄰。山谷書帖中所謂席三卽其人也。杭州永明寺智學禪師延壽著宗鏡錄一百卷。

戲書秦少遊壁『微服過宋。』謂少遊過宋之南京。今之歸德也。宋父以喻所盼者之父。百年。喻百兩之禮。鵲鶴喻此女也。秦氏喻少遊之夫人。兄喻少遊之子。已長矣。憐炊句。喻少遊昔年與妻同貧苦。未肯句。喻妻意不欲少遊納妾。莫愁句。勸少遊妻無怨其夫。但願句。言富貴後不妨廣置姬妾也。任注云。觀此詩意。當是少遊過南京時。有所盼主翁待少遊厚。欲令從歸。而其家難之也。

送少章從翰林蘇公餘杭『卽如常在郎罷前。』顧況詩曰。『隔地絕天。直至黃泉。不得在郎罷前。』便羅王丞送碧香酒用子瞻韻。戲贈鄭彥能王詵晉卿。尙蜀國公主。其家酒名碧香。彥能名僅。漢賜丞相。上尊酒。言貧者無此骨相。不能盡給賜也。應憐二句。皆謂王憐山谷。憐其坐則無毡。出則被謗也。

再答景叔『賜錢千萬民猶餓。雪後排簷凍銀竹。』元祐二年十二月。以大雪寒。出錢百萬。令開封府賜貧民銀竹。謂冰柱也。

次韻李任道晚飲鎖江亭任道名仔。梓人。寓江津二十餘年。鎖江亭在戎州之東。今敘州也。唐改豫章曰『鍾陵』山谷自思鄉里也。

送石長卿大學秋補漢文句。謂徽宗初立也。

題策君祖元大師此君軒王師四句。敘其善鼓琴。神人四句。敘其善推命。程嬰句。狀竹之勁。伯夷句。狀竹之瘦。霜鐘二句。因竹而及琴。回顧篇首。

戲贈家安國安國字復禮。眉山人。初以武進。後入左選。二蘇。謂東坡。黃門亦眉山人。皆有贈安國之詩。和王觀復洪駒父謁陳無已長句九鼎句。謂無已有前輩典型。足爲士林之重。一角以無已比麟。謂如學士中之瑞也。砥柱句。言無已獨立於頽波之間。

送密老住五峯密老。蓋法昌之嗣。螺螄吞大象。法昌法身頌中語也。美酒無深巷。古語也。謂酒之笑者。雖在深僻之地。人必就沽。山谷之意。以爲密老但解法昌宗旨。何患不爲人所知哉。

武昌松風閣山谷以崇甯元年壬午九月至鄂。東坡已於前一年辛巳死矣。故曰。『東坡道人已沉泉。』文潛時謫黃州安置。尙未到黃。故曰。『何時到眼前。』

次韻文韻後江。卽凌雲凌波之類。韓詩。『遂凌大江極東陬。』任注云。『三豪。當是東坡先生。及范純夫。秦少游。於時皆死矣。』有人二句。謂安民修政。自有廟堂諸人。身任茲責。吾輩政可隱几學道。息諸妄念爾。末二句。言賢愚邪正。久而自明。猶水清而石自見。

次韻元實病目首二句。言爲道者惟恐心之不衰。爲學者惟恐見之不博。各異趣也。

花光仲仁出秦蘇詩卷思。兩國士不可復見。開卷絕歎。因花光爲我作梅數枝及畫煙外遠山。追少游韻記卷末。仲仁。蓋衡州花光山長老。夢蝶真人。用莊子事。籬落逢花。用陶潛事。以比秦少遊逢花便醉也。法融禪師入牛頭山幽栖寺。有百鳥銜花之異。少游卒於藤州。其子處度棗殯於潭。故有『長眠橘洲』之句。霜前草。言喜尙未死也。

太平寺慈氏閣元結在零陵尋得巖洞。名曰朝陽巖。結爲春陵刺史。死已久矣。故曰。『不聞卓蓋下。』愚溪。懷柳子厚也。

題澗山巖第二首徵君。謂周貞實。零陵人。居澗山石室。秦始皇三徵不起。遂化爲石。元次山有大回中小回中詩。言樊水之回湫也。此借用。以言巖洞之回環。

明遠菴淵明好眠。空瓶亦好臥。故曰同此趣。甕頭。初熟酒也。梨花。酒杯樣製如此。

戲答歐陽誠發奉議謝予送茶歌。歐陽昔年曾爲東坡所賞。餽之以酒。茲又與山谷往還。餽之以茶。歐陽君必多事。故用宋華元『于思』事。

和范信中寓居崇甯遇兩慶曼。蓋崇甯兩禪僧。徽宗崇甯三年詔天下置崇甯寺觀。爲上祈年。

還家呈伯氏『強趨手版汝陽城。更責愆期被訶詆。』山谷初到汝州時。鎮相富公以到官逾期下吏。

流民歌熙甯二年。河北於旱後。又遭水災。流民南渡。就食襄葉間。所云疏遠之謀。老生常談者。山谷是時必陳救荒之策也。

答和甫盧泉水『此邦雖陋有佳士。』嘗指德平言之。

贈趙言北門六句。山谷時在北京。謂他人不顧。而趙言獨來相尋訪也。

次韻晁補之廖正一贈答詩晁无咎集云。及第東歸。將赴調。寄李成季。又云。復用前韻。答明略。并呈魯直。『頃隨計吏西入關。』以下七句。俱言其不得志。輕裘句。言其登科也。

再次韻呈廖明略『君旣不能如鍾世笑。』函上書動天子。』

元豐元年十一月。鍾世美以內舍生。上書稱旨得官。世美蓋黨附王安石者。山谷此言特戲之耳。

走答明略。適堯民來相約。奉謁。故篇末及之。『省庭無人與爭長。』唐宋進士曰省試。韓公詩『下豔入省門。』

此云省庭。皆指試進士言之。『比鄰著作相勞苦。』指堯民也。

答明略並寄无咎『已得樽前兩友生。』謂堯民明略。『更思一士濟陽城。』謂无咎時在濟州也。嗣宗謂无咎之諸父。以无咎比阮咸也。

次韻呈明略并寄无咎『一夫鄂鄂獨無望。』四句。言舉世混濁不清。是非不明。故但當拄笏看雲。不問榮枯耳。後忽幻出一夢。夢與二子對酒。奇甚。

再答明略第一首讀書餽口。言不能有爲於時也。南箕北斗。言故人各在天一方也。當時四句。言良友遠別。不復向時人索知音也。

次韻孔著作早行但問無恙者。言過家不遑久處也。何意句。言更不能過訪親長也。韓文以孔殲之白而長身。類

孔子山谷此詩。以孔著作之好古發憤類孔子。史注云。先言明經使者。又言北行河決。蓋比之漢平當也。平當以明經爲博士。又以明經禹貢使行河。

次韻无咎閻子常攜琴入村山谷嘗爲梁父吟。跋云。『武侯此詩。乃以曹公專國殺楊修孔融荀彧耳。』此用梁父吟亦跋中之意也。村村四句。詠入村也。晉石崇及衛瓘傳。皆言飯化爲螺殼。成螺句。借用以言穀已堅粟也。公子。謂晁氏之羣從也。

贈張仲謀首二句。山谷自言近狀也。平日出門極少。今張君遣騎來迎。故往張氏。盡醉極歡。

送薛樂道知鄭鄉首八句。敘昔年交好。重以婚姻。近年同居京師也。城頭四句。敘送薛出都。史注云。『無玉佩以贈送。而徒折柳。與千里駒不相稱也。』國藩疑不字有誤。或作慚對千里駒耳。念君以下九句。論其到官後飲酒奉親行孝。至末六句。囑其過南陽問訊謝家也。南陽漢之南都。宋之鄧州。山谷繼室南陽謝師厚之女。諸謝。謂公靜公定輩。

對酒歌答謝公靜南陽城邊十句。言雨雪嚴寒。小民貧餓可憂。而又以不居其位。憂亦無益。故作寬解之詞。青童之辭。蓋有勸以枉尺直尋致身通顯者。而答以但當飲酒。詭辭謝之也。

謝公定征南謠熙寧八年。交趾入寇。陷欽廉邕三州。神宗以口口口招討使郭逵爲宣撫使。討平之。而費錢帛甚多。二廣之口口困。標槍大盾。南蠻所執之軍器也。合浦廉州也。晉與邕州。後漢永和二年。日南徼外蠻反。李固薦張喬祝良爲刺史。太守募蠻夷。自相攻。嶺外悉平。

送劉道純劉格字道純。劉恕道原之弟。爲司馬溫公蘇東坡所知。道純時當爲銅陵主簿。故首四句云爾。七八句。謂道純對衆人自神王。而衆人則以白眼向之。皆朱顏句。謂長醉不省事也。阿翁。謂劉凝之。子政。謂道原也。諸兒曰。羲仲曰和叔曰秤。

次韻子瞻春菜。『萼絲色紫菰首白。』菰與瓜同。彫胡也。『驚雷菌子出萬釘。白鵝截掌鼈解甲。』萬釘。喻菌子。

之形。鵝掌鼈甲。喻菌子之色與味。『軟炊香飣煨短茁。』短茁。筍之初出者。

次韻子瞻與舒堯文禱雪霽豬泉倡和『老農年饑望人腹。』按說文『望字從臣。月滿也。望字從亡。望其還也。』莊子『無聚祿以望人之腹。』謂無祿以滿人之腹。當取盈滿之義。不取盼望之義。當從臣。不從亡。山谷曰。『年饑望人腹。』蓋誤用莊子耳。閱雪用穀梁閔兩字。豈云。猶曰豈止。得微。猶云得無也。『甯當罪繫葛陂淵。』句後漢費長房曰。『東海君有罪。吾前繫於葛陂。今出之。使作兩。』於是兩立注。齊博士。指舒堯文時爲教授。請天一二句。堯文告龍之詞。爾指龍也。從公指東坡也。

答王道濟寺丞觀許道甯山水圖首四句。敘昔在京師。見許作畫。異時至非筆力十四句。敘許曾在黃家作畫。先君。我君。似皆指山谷之父。史注云。『張京兆疑是張乖崖。』自自言以下。至市盡傾。敘許自言在蜀畫八幅山水。而黃家在汴梁。以十萬錢購得也。

聽崇德君鼓琴朝議大夫王之才妻南昌縣君李氏。尚書公澤之妹。能臨松竹木石等畫。山谷有姨母李夫人墨竹詩。又有觀崇德君墨竹歌。

次韻答楊子聞見贈首六句。敘昔在京師宴遊之盛。第七句。元注云。『太和縣古白下。』分吞聲。猶云甘吞聲。以其獨唱無和。故甘吞聲。不復道及也。

答永新宗令寄石耳自荷眷私以上。贊石耳之佳。自吾聞以下。言不以石耳難得之物累民。

奉答茂衡惠紙長句征南。謂索靖爲征南司馬。黃門。謂史游也。梵語。伽佉。此言諷誦。

長句陳適用惠送吳南雄所贈紙『洗椰葉風溪水碧。』洗椰木。廣南所出。南雄亦隸廣南。

追憶予泊舟西江事次韻按山谷。以元豐六年十二月移監德平鎮。此詩題曰追憶。當在已離太和之後。

次韻郭明叔長歌鵬翼句。指郭。燕菓句。山谷自謂也。山谷時自太和還家。故云見社。

奉送時中攝東曹獄掾時中蓋太和同官。將赴廬陵郡城攝事。首四句。山谷自述近狀。遺騎句。山谷遣人邀時中

來同欽也。昨日句。時中甫自外歸。又將赴郡也。

次韻和答孔毅父。六年國子無寸功。猶得江南萬家縣。六年國子監。謂作北京教授也。萬家縣。太和。更用舊韻。寄孔毅甫。『澄清庾公樓香鑪。』均指毅甫。時在江州也。

寄朱樂仲。『故人昔在國北門。』國北門。謂北京大名也。

戲贈曹子方家鳳兒揀芽蠟。茶名也。鳳兒嘗是子方侍婢。末句恐其以閩語而變嬌音也。

和曹子方雜言龜藏六。謂首尾及四足凡六。皆藏也。六用。又借用楞嚴經字。

奉謝劉景文送團茶鶉窠。蜀絹也。以絕細之絹爲羅。使茶如雪落也。粟面。蓋茗花也。

謝景文惠浩然所作廷珪墨蘇家。謂蘇浩然。墨也。用高麗煤雜遠煙作之。李成。營邱人。有驟雨圖。

戲答仇夢得承制秦少游作任師中墓表云。元豐中。朝廷治西南乞第之罪。至於斬將帥。絀監司。兩蜀騷然。四年

而後定。黃口兒。指夏主乾順方幼也。

玉京軒前六句賦山。後六句賦軒。

宦亭湖史注。引神仙樂巴一事。又引高僧安清一事。山谷似專指樂巴事。

一官四十已包羞。山谷以乙酉生。至元豐七年甲子去太和而北行。恰四十歲。

別蔣穎叔蔣之奇字穎叔。新法行。屢爲福建通判。淮東運副。江西河北等運副。又爲陝西運副。後爲淮南轉運使。

江淮荆湖等路發運副使。此詩嘗蔣爲陝西運副時作也。金城千里。謂秦中。三品句。蔣於元豐六年奏計賜三品

服。鑿渠句。蔣在淮南始鑿泗州股渠。以避長淮之險。

書石牛溪旁大石上石牛洞。在三祖山。山谷寺之西北。其石狀如伏牛。因以爲名。初李伯時畫魯直坐石上。因此

號山谷道人。題此詩於石上。

岩下放言史注。文選陸士衡有連珠五十首。山谷效其體。而更其名曰放言。國藩按。冠鼈臺池亭之未。不用偶句。

靈椿之首。不用韻語。又不與連珠體相合。此體篇無定句。句無定字。蓋雜言之類耳。

二十八宿歌贈別無咎有心。謂虎犀與蟹無心。謂藥材同一死也。神龜爲江使。漁者豫且網得之。宋元王問衛平而知之。見史記龜策傳。無南箕云者。謂衛平之口。更大於南箕也。此二句言神龜以慧而死。與上六句同意。皆鱗龜也。謂等著龜耳。歲晏張弓二句。不知所謂。

再和公擇舅氏雜言自觀文字以上。感其教養之德。自更蒙著鞭以下。專謝其贈研。

贈鄭交山谷以元豐六年。解官太和。過武甯。聞惟清上人當至延恩寺。因謁鄭交問消息。題此詩於鄭交草堂之壁。大土。指惟清也。丈人。指鄭交也。壞柄句。謂惟清尙未來延恩也。白頭句。謂交也。老禪。指延恩長老法安師也。

和游景叔月捷三捷元祐二年八月。禽西蕃首領。景莊青宜結縵送闕下。蓋游師雄與种誼所定之謀。而誼與姚兕所攻破者。師雄有絕句四首。七律一首。山谷并和之。景叔。師雄字也。

王聖美三子補中廣文生囊書句。當是鑽以書籍。故曰當贈錢。舍中幘子句。晉書石勒之母曰。『快牛爲幘子時。多能破車。』

次韻王定國揚州見寄元豐中。導洛水入汴河。謂之清洛。首二句云者。謂山谷在汴京晝夜思王。猶清洛水之畫夜流下揚州也。

同子瞻韻和趙伯充團練金玉句。指趙。謂宗室富貴之家。而能自處於寂靜也。仙班句。謂東坡與趙同在朝列也。兩宮指宣仁后及哲宗也。老臣。指文呂諸公。

送顯子敦赴河東第二首青牛。謂老子乘青牛車也。句當。謂功成名遂身退之語。第三首。『行臺無妾護衣箒。』漢官儀。尙書郎入直臺中。女侍史二人。執香鑪燒熏以從。入使護衣服。此句謂顯未攜家往耳。

次韻宋琳宗僦居甘泉坊雪後書懷。『烏瘦三山葉打門。』元稹望雲雕歌曰。『勝簪三山尾株直。』山谷此句。

用官清馬骨高之意。

次韻宋徽宗三月十四日到西池都人盛觀翰林公出處。『還作遨頭驚俗眼。』蜀人好遊樂。謂成都帥爲遨頭。此信用。

次韻張昌言給事喜雨第五句。謂朝廷以旱故減常膳。第六句謂徧走羣望以禱雨。

次韻奉酬劉景文河上見寄歸鴈用雁寄書事。石友指劉潛。郎山谷自謂。

和答元明黔南贈別紹聖二年。山谷年五十一歲。以國史事爲蔡卞所中傷。謫黔南安置。與其兄元明出尉氏。許昌出漢河。趨江陵。上夔峽。四月二十三日。到黔南。後元明別去。

贈黔南賈使君春入二句。任注。謂皆言故園無主之意。國藩以爲此詩。蓋送賈出行者。山谷放臣。既少歡悰。賈又出巡。城中無主。故待賈征還日。鶯花梨棗。皆有主耳。

次韻奉答少激紀贈第二首少激登元祐三年進士第。時東坡知貢舉。山谷爲其屬。頗有師友淵源。自紹聖改元。東坡謫竄。時去而勢移矣。三四句。言蜀國懷愴。五六句。言交舊彫疏。少激與坡皆蜀人。故因坡貶而言蜀中蒼涼之狀。

次韻馬荆州馬城字中玉。山谷自館閣遷貶。故以劉向自比。荆州卽漢之南郡。故以中玉比馬融也。

贈李輔聖三句。謂將逐冥鴻而遠引。四句。謂不復浮沈京洛風塵間也。

和高仲本喜相見南浦。山谷自蜀放還過萬州。曾見仲本。萬州卽唐南浦郡。

和中玉使君晚秋開天甯節道場徽宗以十月十日降誕。爲天甯節。開啓。蓋九月十日。

新喻道中寄元明用觴字韻山谷以崇甯四年四月。省元明於萍鄉。同住十五日而去。任注。以爲別後所作。然穫稻殊不類四月間事。未知其審。末二句。指元明送山谷至黔中時事。

湖口人李正臣蓄異石九峯東坡先生銘曰。壺中九華並爲作詩云云末二句。言壺中九華石。雖爲人偷取。而石

山則不能偷去。猶可聽其音響。

次韻德孺五丈惠貺秋字之句三四句。言未應鬢髮遽白。豈不見有卻老之丹砂耶。末二句。言區區憂國之心。徒過計耳。

宜陽別元明用觴字韻『老大永思堂下草』明月灣永思堂。皆在雙井堂。在先墓之側。故以永思爲名。

再次韻兼簡履中南玉三首第一首鎖江主人。第二首江津道人。李侯皆謂李任道也。任道名仔。本梓人。寓居江津。第三首經術二句。指當世誦法王氏之學者。抱關。用蕭望之事。

罷姑熟寄元明用觴字韻『追隨富貴勞牽尾』太玄經勤首曰勞牽。不於其鼻於尾弊。范注曰。『牽牛不於鼻而於尾。故勞弊。』

送劉季辰從軍雁門第二首代州五臺山。有仙人跡。石巖出笑石。金剛窟出藥草。三句五句。皆承石言。四句六句。皆承草言。

送徐隱父宰餘干第一首贅婿句。用唐書張允濟傳事。長官句。用唐書馮元淑傳事。第二首。江南生賢句。謂徐稹生於南昌也。第三句承首句言徐陵。第四句承次句言徐稹。

池口風雨留三日池口。卽今池州府江口。山谷之官太和縣。自此經過。

思親汝州作富郵公以前宰相判汝州。山谷爲葉縣尉。九月。至汝州。吏責其愆期。拘留至歲晚。五六句。言丞相不以爲罪。吏或讒之。三人成虎耳。末二句。言事本極小。而傳播故鄉。老母懸念也。

次韻戲答彥和傳鑑錄布袋和尚。形裁腹。覺額暗腹。此借以喻彥和之肥偉。和答孫不愚見贈五六句。謂因奉台相之筆牘。而困於簿領。因迎使星之鞍馬。而困於風埃也。

世孺惠詩求舜泉。輒欲以長安酥共泛一杯。次韻戲答『舜泉』河北酒名。閏月訪同年李夷伯子真於河上。子真以詩謝次韻『十年不見猶如此』自治平丁未與李同唱第。至是十一

年矣。

次韻元日前一歲十二月山谷請授州別駕黔涪州安置故此詩有霜威嚼蠟等語。衛南『白鳥自多人自少。』此句用杜詩『江湖多白鳥。人少豺虎多。』二句之意。

題落星寺嵐漪軒三首三詩。非一時所作。故語有重複。

次韻胡彥明同年羈旅京師寄李子飛三章『看除日月坐中銓。』唐制。三銓選士。曰尚書銓。曰侍郎中銓。曰侍郎東銓。宋有侍郎左右選。胡彥明隸左選。故曰中銓。第二首。『丁未同升鄉里賢。』胡與山谷以治平四年丁未同登第。

次韻奉寄子由山谷之兄元明。寄子由詩云。『鍾鼎勳名掩管庫。朝廷翰墨寫風煙。』管庫。謂子由監筠州鹽酒稅也。子由思東坡山谷思元明。故曰脊令各有恨也。

寄黃從善『渴雨芭蕉心不展。』渴雨見雲漢詩箋。

廖袁州次韻見答并寄黃靖國再生傳次韻寄之千寶作搜神記。徐鉉作稽神錄。廖君嘗有小說。

觀王主簿家醢醢冷齋夜話云。『詩人詠花。多比美女。』山谷詠醢醢。獨比美丈夫。

登巔上寄余洪範『二川來集南康郡。』二川。章水貢水也。

同韻和元明兄知命弟九日相憶二首第二首。阿熊阿秦。當是山谷兄弟小字。山谷兄弟五人。長大臨字元明。次庭堅字魯直。次叔獻。次叔達。字知命。次仲熊。字非熊。卽此詩所謂熊也。阿秦可類推已。

子範徵巡諸鄉捕逐羣盜幾盡。輒作長句勞苦行李。『乃兄本是文章伯。』子範之兄李觀字夢符。爲清江尉。其文嘗爲歐陽公所稱。

喜太守畢朝散致政『萬夫爭處首先回。』萬夫爭處。卽功名富貴也。

次韻君庸寓慈雲寺待詔惠錢不至。『馬祖峯前青未了。鬱孤臺下水如空。江山信美思歸去。聽我勞歌亦欲東。』

馬祖峯在太和。鬱孤臺在虔州。時君庸在虔。山谷在太和。皆有思歸之意。趙令許載酒見過。買魚所餽。須論網。論網謂數網而論價。言其賤也。

初望淮山。想見夕陽三徑裏。亂蟬嘶罷柳陰陰。三徑亂蟬。指雙井家林也。

漫書呈仲謀。不然吾已過江南。過字疑當作返。

曹村道中首句。嘶馬蕭蕭蒼草黃。第三句。瓜田餘蔓有荒隴。蒼字有字疑誤。

食瓜有感。蘇井筠籠浸蒼玉。金盃碧筍薦寒冰。食瓜者。先以井水浸之。或以竹籠置井中。蒼玉喻瓜之皮。寒冰喻瓜之瓢也。

講武臺南有感。有感者。哀逝也。

七臺峯後六句。以七人比山之七峯。

靈壽臺。何時暫取蒼烟策。獻與本朝優老成。蒼烟策。謂竹之根節可作杖者。優老成。用孔光靈壽杖事。

劍南詩集

望江道中。此由判建康府。改判隆興府。道出望江。隆興今江西南康府也。

送劉政之東歸五六句。言跡今雖在斜谷。情已若出玉關也。

八月二十二日嘉州大關王炎辟先生幹辦公事。是時嘗隨王至嘉州。

六月十四日宿東林寺。遠客豈知今再到。先生自蜀歸。遷江西常平提舉。江西水災。出峽後。舟過荊州武昌。

自九江登岸。赴南昌。故經過東林寺。先生昔嘗判隆興府。故曰。今再到。

過采石有感。先生至江西不久。即召還與祠。又出江。自小孤金陵至浙江還家。故過采石。

歸雲門。徵官行矣。聞山去。宋史先生本傳。但載自江西召還與祠。即起知嚴州。不載聞山徵官之事。

奏乞奉祠留衢州皇華館待命先生自建安至鉛山至玉山常山遂達衢州。

行至嚴州壽昌縣界得請許免入奏仍除外官感恩述懷先生自蜀歸山陰後一出官於建安再官於撫州自撫州謝事後至高安一行又還自嚴州得免入奏之命從此又歸山陰矣。

高安春雨初霽先生還自蜀中一爲江西常平卽歸山陰數年今始入朝旋即還山此詩之末句已決矣考其時嘗在孝宗淳熙十三年丙午之春。

縱筆第三首『行省當年駐隴頭』行省謂蜀帥王炎輩開幕府於隴蜀。

感憤秋夜作此時已自嚴州謝事還家矣。

舟中大醉偶賦長句三句謂初離嚴州四句謂已歸山陰也。

醉中浩歌罷戲書此時解軍器又回山陰矣。

自局中歸馬上口占先生自紹熙元年還山家居十有三年至是嘉泰二年以孝宗光宗兩朝實錄及三朝史未就詔同修國史實錄院同修撰免奉朝請尋兼祕書監明年書成致仕。

舟行錢清柯橋之間『逾年夢想會稽城』先生以壬戌六月十四日入都門癸亥五月十四日去國中有閏月相距恰及一年至是又歸山陰。

和高子長參議道中二絕『共憶扁舟晝畫谿』晝畫谿在越州思鄉也。

思政堂東軒偶題『喚起十年閩嶺夢』先生嘗爲福州甯德主簿故曰閩嶺夢。

遊仙羅澗谷選放翁詩有遊仙七古一首卽『飄飄初珥玉殿』三絕句合成者。

贈道友凡遊仙及學道詩都無事實縹緲恍惚語在可解不可解之間太白最多放翁亦屢爲之此末二首又似先生自述之詞。

朱子文集

戊申封事此篇正文一萬一百一十字。公之自注。夾行書寫者。又二千九百一十四字。北宋之萬言書。以蘇東坡王介甫兩篇爲最著。南宋之萬言書。以公此篇及文信國對策爲最著。文章則蘇王較健。義理則公較精。篇中約分四節。第一節言所以不上殿入對。而僅陳奏封事之故。第二節陳大本一端。第三節言急務六事。第四節辨駁當時士大夫四說。第三節所指各務。皆切中時政之得失。其意直殆過於汲黯魏徵。此氣節之激昂。則方望溪氏以擬明季楊左者。庶幾近之。他人諫其事。公則格其心。他人攻君之失。公則並糾大臣近臣之過。第二節第四節所論。皆本其平日讀書學道深造有得之言。實有諸己而後以獻諸君。初無一語取辦於臨時者。此非文士所可襲取也。惟過於冗長。似一筆書成。無修飾潤色之功。故乏勁健之氣。鏗鏘之節。其逐段夾行分注。以達未盡之意。似不可以爲訓。第四節辨駁四說。似不宜屏入此篇之內。學古者不可不知。

『往者。淵觀說林之徒。』龍大淵曾觀張說王林。皆以近習而至卿相。

『獨有前日。臣所面奏者。』所面奏者。卽內侍甘昇也。

『豈有一毫愛戴陛下之心哉。』方望溪謂朱子封事。雖明季楊左之忠直敢言。無以過之。當卽謂此等處耳。

『是以除書未出。而其物色已定。姓名未顯。而中外已逆知其非第一流矣。』此等語。實甚慙直。孝宗以其爲賢者而優容之耳。

『一遭飛語。則體究具析。』體究具析。皆宋時公牘字樣。猶今日懲究曰查辦也。

『蓋取版曹歲入窠名之。必可指擬者。號爲歲終羨餘之數。而輸之內帑。願以其有名無實。積累掛欠。空載簿籍。不可催理者。撥之版曹。』窠名。猶今日款目。版曹。今之戶部也。必可指擬者。猶今日有著之款。不可催理者。猶今日無著之款。

「徒使經費闕乏。督趣日竣。以至廢去祖宗以來破分良法。」舊法。州縣催理官物。已及九分以上。謂之破分。諸司卽行住催。版曹亦置不問。貧民些少拖欠。亦得遷延。以待蠲免。自曾懷用事。始除此法。舊欠悉行拘催。

「而祈以姓名。達於陛下之貴將。貴將得其姓名。卽以付之軍中。使自什伍以上。節次保明。稱其有材武堪任將帥。然後具爲奏牘。而言之陛下。」今軍中士卒稟保而後具奏。當時蓋有此例。咸豐十年。王有齡令軍中將士具呈公保何桂清。請免治罪。或亦做其例與。

「夫將者。三軍之司命。」節理直而氣剛。

「至於屯田。則彼自營者。尤所不願。故朝廷不免爲之別置使者。以典治之。而屯兵之衆。資其撥遣。則又不免使參其務。然闢其占護軍人。不肯募其願耕者以行。而強其不能者以往。」屯田之衆。須由軍中撥交屯田使者。不得不令參與其事。占護。猶今言霸占袒護也。

「屯田不立。漕運煩費。」水路輸送曰漕。陸路輸送曰運。曰轉。凡物皆然。不獨米糧也。

「伏惟陛下察臣之言。以究四說之同異。而明辨之。」因循奮勉。老莊管商。卽上文所駁之四說也。

元遺山詩集

寄希顏二首。希顏時在徐州粘合幕。兩首殆非同時作。故再用元龍事。

橫波亭自注爲清口帥賦。清口帥卽移刺粘合。初帥彭城。雷希顏在幕。楊叔能元裕之皆游其門。時望甚重。金亡降宋。

葉縣雨中（自注。時崧前旱尤甚）遺山僑居崧山。故以家鄉旱爲憂。

圍城病中文舉相過圍城。天興元年元圍汴京也。文舉白華也。

永甯南原秋望永甯。卽今河南府永甯縣。天興元年。遺帥守永甯元村寨。十一月爲元兵所破。遺山此詩。蓋在未

穀防戍以前。

甲午除夜金亡。以甲午正月。遺山是年在聊城度歲。

出都元之中都。即今順天府也。遺山於金亡後。曾至燕京四次。

衛州感事二首。金哀宗自汴京突圍出走河北。令白撒攻襲新衛州。爲史天澤所敗。哀宗單舸走歸德。遺山此詩。蓋國亡後過衛州而弔也。

贈馮內翰二首。序中云「丙申夏六月。公至東平。將展墓於鎮陽。以某在冠氏。枉駕見過。」冠氏縣。宋金屬大名府。今日冠縣。屬東昌府。遺山自金亡。拘留管聊城。旋即寓居冠氏。馮公。蓋真定人。寓居東平。鎮陽卽真定也。還家省墓。故過冠氏一訪遺山。丙申之夏。金亡已三年矣。

陽明文文集

文章之道。以氣象光明俊偉爲最難而可貴。如久雨初晴。登高山而望曠野。如樓俯大江。獨坐明窗淨几之下。而可以遠眺。如英雄俠士。褻裘而來。絕無齷齪猥鄙之態。此三者。皆光明俊偉之象。文中有此氣象者。大抵得於天授。不盡關乎學術。自孟子韓子而外。惟賈生及陸敬輿蘇子瞻得此氣象最多。陽明之文。亦有光明俊偉之象。雖辭旨不甚淵雅。而其軒爽洞達。如與曉事人語。表裏粲然。中邊俱澈。固自不可幾及也。

申明賞罰以厲人心疏。「盜賊習知官府之不彼與也。」與敵也。左傳「襄二十五年。一與一。」謂一人敵一人也。吾鄉諺語曰。「个打个。」史記「龍且曰。吾生平知韓信爲人易與耳。」謂易敵也。此與字之古義也。陽明云「不彼與。」猶俗云「官府不敢惹他也。」

「題封欽依。備行前來。」欽依。今日欽遵。備行。今日行知。或曰咨行移行。

「夫任不專。權不重。」節。自請旗牌。恐人疑爲貪權。故又自明其脫屣名位之素志。

尚三溪文集

送左未生南歸序而孫之死二句承接牽強。

矯除積習興起人材劉子望溪先生古文辭。爲國家二百餘年之冠。學者久無異辭。卽其經術之湛深。八股文之雄厚。亦不愧爲一代大儒。雖乾嘉以來漢學諸家。百方攻擊。曾無損於毫末。惟其經世之學。持論太高。當時同志諸老。自朱文端楊文定數人外。多見爲迂闊。而不近人情。此疏閱歷極深。四條皆確實可行。而文氣深厚。則國朝奏議中所罕見。

「兵部之實。在戢將校之驕氣。以綏靖兵民。」此條立論太高。多不切於事實。今之兵部與將校並不相接。何能戢其驕氣。

孫文定集

三習一弊疏乾隆初。鄂張兩相當國。蔡文勤輔翼聖德。高宗聰明天竄。如旭日初升。四海清明。每詔諭頒示中外。識者以比之典謨誓誥。獨孫文定公。以不自是。匡弼聖德。可謂憂盛危明以道事君者矣。純廟御宇六十年。盛德大業。始終不懈。未必非此疏裨助高深。厥後嘉慶元年。道光元年。臣僚皆抄此疏進呈。至道光三十年。文宗登極。壽陽相國祁雋藻亦抄此疏進呈。余在京時。聞諸士友。多稱此疏爲本朝奏議第一。余以其文氣不甚高古。稍忽易之。近年細加紬繹。其所云「三習一弊。」凡中智以上。大抵皆蹈此弊。而不自覺。而所云「自是之根不拔。黑白可以轉色。東西可以易位。」亦非絕大智慧。猛加警惕者。不能道。

文選

揚子雲長楊賦「軌屬而還。」注善曰。「委屬而還。謂委擇其事。連屬而來還也。軌。古委字。」按。軌。軌也。屬。連

屬也。駭異者，欹斜聯翩之狀，謂翩然相引而還，善說非也。

『拈隔鳴球。』拈隔，與尙書之『夏擊』音義同。

潘安仁西征賦『稅駕西周。』對洛陽之東周言，則長安爲西周，對鞏縣之東周言，則洛邑爲西周。

古文辭類纂

桐城姚姬傳郎中鼐所選古文辭類纂，嘉道以來，知言君子，羣相推服，謂學古文者，求諸是而足矣。國藩服膺有年，竊見其中亦小有疵誤，茲摘舉於左。

論辨類太史公談論大家要指司馬遷自序中，述其父太史公談論大家要指，諸家互有得失，而終以道家爲本。此自司馬氏父子學術相傳如是，其指要，則談啓之，其文辭，則遷爲之也。在自序篇中，僅文中之一段，故無首尾裁成之迹。今姚氏割此爲一篇，而標其目曰論大家要指，失其義矣。遷作五帝本紀，夏本紀，所引堯典禹貢等書，尙多改經文之舊，此述其父之語，豈獨無所刪改，且如管晏列傳中，管仲自述感鮑叔之言，豈得遽錄以爲管仲之文。淮陰侯傳中，韓信說高祖定三秦一節，豈得遽錄以爲韓信之文邪。

奏議類匡雅主論治性正家疏此疏，凡分三段，首段言遵祖，次段言治性，末段言正家。姚氏目以治性正家，則首段無所附麗。

匡雅主戒妃匹勸經學疏漢書匡衡傳，成帝卽位，衡上書戒妃匹勸經學，威儀之則曰云云。國藩按，此疏凡三條，妃匹一也，經學二也，威儀三也。自妃匹之際，至遠技能止，第一節言妃匹也，自竊見聖德純茂，至宜究其意止，第二節言經學也，自巨又聞聖王之自爲動靜周旋，至末第三節言威儀也。今姚氏錄此文，標其目曰『戒妃匹勸經學疏』，是於三條獨遺其一，而於班書所敘若未之深究者，亦一失也。

書說類案毅報燕惠王書應入奏議。

駢體文鈔

蔡邕陳留東昏里庫上里社碑漢碑多翻應缺頌之文此碑亦專爲虞氏而作
王延壽桐柏廟碑韓退之南海神廟碑。蹊徑似做此文。而青勝於藍。不啻百倍。

附廣韻

一東。衷。左傳「楚辟我衷。」按。謂楚邪而我正也。

二冬。農。呂刑「農殖嘉穀。」王念孫曰。「農。勉也。」廣雅云。「農。勉也。」左傳「小人農力以事其上。」

三鍾。從。左傳「昭五年。以亂大從。」杜注。「亂大和順之道。從。順也。」左傳「吾所商日食從矣。」按。謂子之言皆驗矣。

五支。披。左傳「又披其邑。」注。「披。析也。」按。謂分析之也。離。左傳「昭元年。楚公子設服離衛。」注。離。陳也。

九魚。居。左傳「民其居乎。」注。民將有事。不得安也。如。左傳「昭十三年。則如違之。以待所濟。則如與之。以濟所欲。」按。如猶云不如。

二十一。欣。勤。書「周公咸勤。」謂勞勉也。

二十二。元。藩。左傳「昭元年。貨以藩身。」按。猶衛也。

二十三。魂。敦。莊子「使士敦劍。」注。敦。斷也。試使用劍相截。斷也。莊子「敦杖蹙之乎隕。」注。敦。讀曰頓。賢也。

二十五。寒。奸。莊子「以奸者七十二君。」注。犯也。

二仙。鮮。左傳「昭五年。葬鮮者。自西門。」杜注。不以壽終爲鮮。

四。窳。橋。莊子「欲惡去就。于是橋起。」按。橋。讀上聲。謂昂起勁挺也。禮記「奉席如橋衡。」莊子又云。「橋運之

相使。』並同。

十一唐。傍。莊子『求禪傍者斬之。』注。棺之全一邊者。謂之禪傍。（禪音臆）

十七登。能。書『不能厥家人。』按。相處久而安也。左傳『不能其大夫至於君祖母。』書『柔遠能邇。』與此義

同。又左傳『昭十一年。而不能其民。』

十八尤。由。左傳『昭八年。猶將復由。』按。謂將萌蘖滋長也。

十九侯。鉤。莊子『一君無所鉤用。』注。鉤。取也。

二十一侵。淫。左傳『淫芻蕘者。』按。謂縱淫之。

二履。蹇。左傳『昭十一年。楚將有之然蹇也。』注。乃所以蹇積其惡也。

六止。以。左傳『昭三年。君求以貪。』按。以與己同。理。李。左傳『昭十三年。行理之命。』注。即行李也。按。司理亦作

司李。漢書『有黃帝李法。』與理同。

八語。圍。莊子『其來不可圍。』按。與禦同。

二十八獮。選。左傳『昭元年。鍼懼選。』按。謂指數其罪也。詩云。『不可選也。』與此義同。

六至。自。左傳『昭五年。不敢自也。』按。猶云不敢從也。

九御。著。左傳『昭十一年。朝有著定。』注。朝內列位常處。謂之表著。左又曰。『則固有著矣。』

十遇。寓。莊子『寓而政于臧丈人。』寓。猶付託也。

十一暮。故。莊子『證彘今故。』注。今故猶古今。昨。左傳『以昨乃勳舊。』布。禮記『季氏旅歸四布。』按。謂四方

貨財也。莊子『千金之布多矣。』

十三祭。際。莊子『仁義之士。貴際。』按。言交際也。左傳『云爾未際饗大夫。以落之。』莊子又云。『不應諸侯之

際。』蔽。書『丕蔽嬰囚。』按。謂蓋覆也。猶易言『冒天下之道』之冒。論語『一言以蔽之。』呂覽『功名蔽天

地。』皆當以此訓通之。一訓決也。斷也。

二十六恩。恩。左傳。『主不恩賓。』按。謂主不以賓爲恩。擾而安之也。史記。『無久綢子。』與此恩同。

二十一禰。間。左傳。『間晉而取諸杞。』按。晉侯之間隙也。

二十七號。奧。左傳。『昭十三年。國有奧主。』按。謂在內也。

四十一爨。爨。莊子。『爨爨今故。』注。爨。明也。

十七薛。說。左傳。『子產立伯有後。公孫洩何爲。』曰。說也。『杜蕢飲酒之役。晉侯立荀躒以說焉。』徹。左傳。『昭

二年。徹命于執事。』按。猶達命也。

十九鐸。落。莊子。『落馬首。穿牛鼻。』與絡同。

二十陌。莫。莊子。『莫然有間。』注。定也。擇。呂刑。『敬忌罔有。擇言在身。』王引之曰。『擇。讀曰數。數。敗也。』

二十二昔。昔。莊子。『蚊虻嚼膚。則通昔不寐矣。』注。昔。夜也。

二十五德。國。莊子。『未能國能。』按。曰。國能者。猶士曰國士。馬曰國馬。弈曰國手。琴曰國工耳。

二十八盬。闔。莊子。『闔胡嘗視其良。』注。闔。語助也。按。與曷同。

仿古字版

會文正公治兵語錄

世界書局印行

曾文正公治兵語錄目次

一	將材	一
二	用人	二
三	尙志	三
四	誠實	四
五	勇毅	六
六	嚴明	八
七	公明	九
八	仁愛	一
九	勤勞	二
十	和輯	四
十一	兵機	五
十二	戰守	六

會文正公治兵語錄

一 將材

帶兵之人。第一要才堪治兵。第二要不怕死。第三要不急急名利。第四要耐受辛苦。治兵之才。不外「公明勤」。不公不明。則兵不悅服。不勤。則營務鉅細。皆廢弛不治。故第一要務在此。不怕死。則臨陣當先。士卒乃可効命。故次之。爲名利而出者。保舉稍遲。則怨。稍不如意。則怨。與同輩爭薪水。與士卒爭毫釐。故又次之。身體羸弱者。過勞則病。精神短乏者。久用則散。故又次之。四者似過於求備。而苟闕其一。則萬不可以帶兵。故吾謂帶兵之人。須智深勇沈之士。文經武緯之才。數月以來。夢想以求之。焚香以禱之。蓋無須臾或忘諸懷。大抵有忠義血性。則四者相從以俱至。無忠義血性。則貌似四者。終不可恃。

帶兵之道。勤廉恕明。缺一不可。(以上會語)(一)

古來名將。得士卒之心。蓋有在於錢財之外者。後世將弁。專恃糧重餉優。爲牢籠兵心之具。其本爲已淺矣。是以金多則奮勇蟻附。利盡則冷落獸散。

軍中須得好統領營官。統領營官。須得真心實腸。是第一義。算路程之遠近。算糧仗之缺乏。算彼己之強弱。是第二義。二者微有把握。此外良法雖多。調度雖普。有效有不效。盡人事以聽天而已。璞山之志。久不樂爲吾用。且觀其過自矜許。亦似宜於剿土匪。而不宜於當大敵。

揀選將材。必求智略深遠之人。又須號令嚴明。能耐勞苦。三者兼全。乃爲上選。(以上會語)(二)

爲政之道。得人治事。二者並重。得人不外四事。曰廣收。慎用。勤教。嚴繩。治事不外四端。曰經分。論合。詳思。約守。

(以上會語)(三)

古人論將有五德。曰「智信仁勇嚴」。取義至精。責望至嚴。西人之論將。輒曰「天才」。析而言之。則曰天所

特賦之智與勇。而曾胡兩公之所同唱者。則以爲將之道。以良心血性爲前提。尤爲扼要探本之論。亦即現身之說法。咸同之際。尋寇蹂躪十餘省。東南半壁。淪陷殆盡。兩公均一介書生。出身詞林。一清宦。一僚吏。其於兵事一端。素未夢見。所供之役。所事之事。莫不與兵事背道而馳。乃爲良心血性二者所驅使。遂使其可能性發展於絕頂。武功爛然。溥被海內。按其功事言論。足與古今名將相頡頏。而毫無遜色。得非精誠所感。金石爲開者歟。苟曾胡之良心血性。而無異於常人。充其所至。不過爲一顯宦。否則亦不過薄有時譽之著書家。隨風塵以殄瘁已耳。復何能崛起行間。削平大難。建不世之偉績也哉。（以上蔡松坡評語）

一一 用人

今日所嘗講求。尤在用人一端。人材有轉移之道。有培養之方。有考察之法。人材以陶冶而成。不可眼孔太高。動謂無人可用。

竊疑古人論將。神明變幻。不可方物。幾於百長并集。一短難容。恐亦史冊追崇之詞。初非預定之品。要以衡材不拘一格。論事不求苛細。無因寸朽而棄違抱。無施數罟以失鉅鱗。斯先哲之恆言。雖愚蒙而可勉。

求入之道。須如白圭之治生。如鷹隼之擊物。不得不休。又如蚨之有母。雉之有媒。以類相求。以氣相引。庶幾得一而可及其餘。大抵人材約有兩種。——一種官氣較多。一種鄉氣較多。官氣較多者。好講資格。好問樣子。辦事無驚世駭俗之象。言語無此妨彼礙之弊。其失也。奄奄無氣。凡遇一事。但憑書辦家人之口說。憑文一寫出。不能身到心到。口到眼到。尤不能苦下身段。去事上體察一番。——鄉氣多者。好逞才能。好出新樣。行事則知己不知人。言語則顧前不顧後。其失也。一事未成。物議先騰。兩者之失。厥各惟均。人非大賢。亦斷難出此兩失之外。吾欲以「勞苦忍辱」四字教人。故且戒官氣而姑用鄉氣之人。必取遇事體察。身到心到。口到眼到者。趙廣漢好用新進少年。劉晏好用士人理財。竊願師之。（以上會語）（四）

專從危難之際。默察樸拙之人。則幾矣。

人才非困阨則不能激。非危心深慮則不能達。（以上會語）（五）

會謂人才以陶冶而成。胡亦曰：人才由用才者之分量而出。可知用人不必拘定一格，而熏陶裁成之術，尤在用人者運之以精心，使人人各得顯其所長，去其所短而已。竊謂人才隨風氣爲轉移，居上位者有轉移風氣之責。（所指範圍甚廣，非僅謂居高位之一二人言。如官長居目兵之上位，中級官居次級官之上位也。）因勢而利導，對病而下藥，風氣雖敗劣，自有挽回之一日。今日吾國社會風氣敗壞極矣，因而感染至於軍隊，以故人才消乏，不能舉練兵之實績，頽波浩浩，不知所屆。惟在多數同心共德之君子，相與握擊維繫，激盪挑撥，障狂瀾使西倒，俾善者日趨於善，不善者亦潛移默化，則人皆可用矣。（以上蔡松坡評語）

二 尙志

凡人才高下，視其志趣。卑者安流庸陋之規，而日趨污下。高者慕往哲隆盛之軌，而日即高明。賢否智愚，所由區矣。

無兵不足深憂，無餉不足痛哭。獨舉目斯世，求一攘利不先，赴義恐後，忠憤耿耿者，不可亟得。或僅得之，而又屈居卑下，往往抑鬱不伸，以挫以去，以死，而貪饕退縮者，果驪首而上騰，而富貴而名譽，而老健不死，此其可謂浩歎者也。

今日百廢莫舉，千瘡並潰，無可收拾。獨賴此耿耿精忠之寸衷，與斯民相對於骨鯁血沸之中，冀其塞絕橫流之人欲，以挽回厭亂之天心。庶幾萬一有補，不然，但就時局而論之，則滔滔者吾不知其所底也。

胸懷廣大，須從平淡二字用功。凡人我之際，須看得平。功名之際，須看得淡。庶幾胸懷日闊。

做好人，做好官，做名將，俱要好師，好友，好榜樣。

喜譽惡毀之心，即鄙夫患得患失之心也。於此關打不破，則一切學問才智，實足以欺世盜名。

方今天下大亂，人懷苟且之心，出範圍之外，無過而問焉者。吾輩當立準繩，自爲守之，並約同志共守之。無使吾心之賊，破吾心之牆子。

君子欲有所濟立，必自不安求人知始。

古人患難憂虞之際，正是德業長進之時。其功在於胸懷坦夷，其効在於身體康健。聖賢之所以爲聖賢，佛家之所以成佛，所爭皆在大難磨折之日。將此心放得實，養得靈，有活潑潑之胸襟，有坦蕩蕩之意境，則身體雖有外感，必不至於內傷。（以上會語）（六）

凡人心之發，必一鼓作氣，盡吾力之所能爲，稍有轉念，則疑心生，私心亦生。

余死生早已置之度外，但求臨死之際，寸心無可悔憾，斯爲大幸。

舍命報國，側身修行。

古稱『金丹換骨』，余謂立志卽丹也。（以上會語）（七）

右列各節，語多沉痛，悲人心之陷溺，而志節之不振也。今日時局之危殆，禍機之劇烈，殆十倍於咸同之世。吾儕自膺軍職，非大發志願，以救國爲目的，以死爲歸屬，不足渡同胞於苦海，置國家於坦途，須以耿耿精忠之心，獻之骨嶽血淵之間，毫不返顧，始能有濟。果能拿定主見，百折不磨，則千災百難，不難迎刃而解。若吾輩將校，則以騎高位，享厚祿，安富尊榮爲志，目兵則以希虛譽，得餉糈爲志，曾胡兩公必痛哭於九原矣。（以上蔡松坡評語）

四 誠實

天地之所以不息，國之所以立，聖賢之德業所以可大可久，皆誠焉之也。故曰：『誠者物之終始，不誠無物。』人必虛中，不著一物，而後能真實無妄。蓋實者不欺之謂也。人之所以欺人者，必心中別著一物，心中別有私見，不敢告人，而後造僞言以欺人。若心中了不着私物，又何必欺人哉。其所以自欺者，亦以心中別著私物也。所知在好德，而所私在好色，不能去好色之私，則不能不欺其好德之知矣。是故誠者，不欺者也。不欺者，心無私著也。無私著者，至虛者也。是故天下之至誠，天下之至虛者也。當讀書則讀書，心無着於見客也。當見客則見客，心無着於讀書也。一有着，則私也。靈明無着，物來順應，未來不迎，當時不雜，既過不戀，是之謂虛而已矣。是之謂誠而已矣。

已矣。

知己之過失。卽自爲承認之地。改去毫無吝惜之心。此最難之事。豪傑之所以爲豪傑。聖賢之所以爲聖賢。便是此等處。磊落過人。能透過此一關。寸心便異常安樂。省得多少膠轕。省得多少遮掩裝飾醜態。

盜虛名者。有不測之禍。負隱匿者。有不測之禍。懷忮心者。有不測之禍。

用兵久則驕情自生。驕情則未有不敗者。勤字所以醫情。慎字所以醫驕。二字之先。須有一誠字以立之本。立意要將此事知得透。辨得穿。精誠所至。金石亦開。鬼神亦避。此在己之誠也。人之生也直。與武員之交接。尤貴乎直。文員之心。多曲多歪。多不坦白。往往與武員不相水乳。必盡去歪曲私衷。事事推心置腹。使武人粗人。坦然無疑。此接物之誠也。以誠爲之本。以勤字慎字爲之用。庶幾免於大戾。免於大敗。

楚軍水陸師有好處。全在無官氣。而有血性。若官氣增一分。血性必減一分。

軍營宜多用樸實少心竅之人。則風氣易於純正。今大難之起。無一兵足供之用。實以官氣太重。心竅太多。腐襟散醇。真意蕩然。湘軍之興。凡官氣重。心竅多者。在所必斥。歷歲稍久。亦未免沾染習氣。應切戒之。

將領之浮滑者。一遇危險之際。其神情之飛越。足以搖惑軍心。其言語之圓滑。足以淆亂是非。故楚軍歷不喜用善說話之將。

今日所說之話。明日勿因小利害而變。

軍事是極實之事。二十三史除班馬而外。皆文人以意爲之。不知甲仗爲何物。戰陣爲何事。浮詞僞語。隨意編造。斷不可信。

凡正話實話。多說幾句。久之人自能共亮其心。卽直話亦不妨多說。但不可可以訐爲直。尤不可背後攻人之短。馭將之道。最貴推誠。不貴權術。

吾輩總以誠心求之。虛心處之。心誠則志專而氣足。千磨百折。而不改其常度。終有順理成章之一日。心虛則不客氣。不挾私見。終可爲人共諒。

楚軍之所以耐久者。亦由於辦事結實。敦樸之氣。未盡澆散。若奏報浮僞。不特畏趨避之指摘。亦恐壞桑梓之風。

氣。

自古馭外國。或稱恩信。或稱威信。總不出一信字。非必顯違條約。輕棄前諾。而後爲失信也。卽纖悉之事。嘖笑之間。亦須有真意載之以出。心中待他。祇有七分。外面不必假裝十分。既已通和講好。凡事公平照拂。不使遠人喫虧。此恩信也。至於令人畏敬。全在自立自強。不在裝模做樣。臨難有不屈撓之節。臨財有不沾染之廉。此威信也。周易立家之道。尙以有孚之威。歸諸反身。況立威於外域。求孚於異族。而可不反求諸己哉。斯二者。似迂遠而不切於事情。實則質直而消慮於無形。(以上會語)(八)

君子之道。莫大乎以忠誠爲天下倡。世之亂也。上下縱於亡等之欲。姦僞相吞。變詐相角。自圖其安。而予人以至危。畏難避害。會不肯捐絲粟之力。以拯天下。得忠誠者起而矯之。克己而愛人。去僞而崇拙。躬履諸難。而不責人以同患。浩然捐生。如遠遊之還鄉。而無所顧悸。由是衆人效其所爲。亦皆以苟活爲羞。以避事爲恥。嗚呼。吾鄉數君子。所以鼓舞羣倫。歷九載而戡大亂。非拙且誠者之效歟。

凡說話不中事理。不擔斤兩者。其下必不服。(以上會語)(九)

吾國人心。斷送於僞之一字。吾國人心之僞。足以斷送國家及其種族而有餘。上以僞驅下。下以僞事上。同輩以僞交。馴至習慣於僞。祇知僞之利。不知僞之害矣。人性本善。何樂於僞。惟以非僞不足以自存。不得不趨於僞之一途。僞者人固莫恥其爲僞。誠者羣亦莫知其爲誠。且轉相疑駭。於是由僞生疑。由疑生嫉。嫉心既起。則無數惡德。從之俱生。舉所謂倫常道德。皆可蹴去不顧。嗚呼。僞之爲害烈矣。軍隊之爲用。全恃萬衆一心。同袍無間。不容有絲毫芥蒂。此尤在有一誠字爲之貫串。爲之維繫。否則如一盤散沙。必將不戢自焚。社會以僞相尙。其禍伏而緩。軍隊以僞相尙。其禍彰而速。且烈。吾輩既充軍人。則將僞之一字。排斥之不遺餘力。將此種性根拔除淨盡。不使稍留萌芽。乃可以言治兵。乃可以爲將。乃可以當兵。惟誠可以破天下之僞。惟實可以破天下之虛。李廣疑石爲虎。射之沒羽。荆軻赴秦。長虹貫日。精誠之所致也。(以上蔡松坡評語)

大抵任事之人。斷不能有毀而無譽。有恩而無怨。自修者。但求大閑不踰。不可因譏議而餒沈毅之氣。衡人者。但求一長可取。不可因微瑕而棄有用之材。苟於蟻蟻者。過事苛求。則庸庸者反得倖全。

事會相薄。變化乘除。吾嘗舉功業之成敗。名譽之優劣。文章之工拙。概以付之運氣。一囊之中。久而彌自信其說之不可易也。然吾輩自信之道。則當與彼賭乾坤於俄頃。較殿最於錙銖。終不令囊獨勝而吾獨敗。國藩昔在江西湖南。幾於通國不能相容。六七年間。浩然不欲復聞世事。惟以造端過大本。以不顧生死自命。寧當更問毀譽。遇棘手之際。須從耐煩二字痛下工夫。

我輩辦事。成敗聽之天命。毀譽聽之於人。惟在己之規模氣象。則我有可以自立者。亦曰不隨衆人之喜懼爲喜懼耳。

軍事棘手之際。物議指摘之時。惟有數事最宜把持得定。一曰待民不可騷擾。二曰稟報不可諱飾。三曰調度不可散亂。譬如舟行。遇大風暴。祇要把舵者心明力定。則成敗雖未可知。要勝於他舟之慌亂者數倍。

若從流俗毀譽上討消息。必致站腳不牢。(以上會語)(十)

道微俗薄。舉世方尙中庸之說。聞激烈之行。則警其過中。或以罔濟尼之。其果不濟。則大快奸者之口。夫忠臣孝子。豈必一一求有濟哉。勢窮計迫。義不反顧。効死而已矣。其濟天也。不濟於吾心無憾焉耳。

時事愈艱。則挽回之道。自須先之以戒懼。惕厲。傲兀。鬱積之氣。足以肩任艱鉅。然視事太易。亦是一弊。(以上會語)(十一)

大局日壞。吾輩不可不竭力支持。做一分。算一分。在一日。撐一日。

強毅之氣。決不可無。然強毅與剛愎有別。古語云。『自勝之謂強。』曰強制。曰強恕。曰強爲善。皆自勝之義也。如不憤早起。而強之未明即起。不憤莊敬。而強之坐尸立齋。不憤勞苦。而強之與士卒同甘苦。強之勤勞不倦。是即強也。不憤有恆。而強之有恆。即毅也。舍此而求以客氣勝人。剛愎而已矣。二者相似。而其流相去霄壤。不可不察。不可不謹。

日慎一日。以求事之濟。一懷焦憤之念。則恐無成。千萬忍耐。忍耐千萬。『久而敬之』四字。不特處朋友爲然。即

凡事亦莫不然。

袁了凡所謂。『從前種種譬如昨日死。從後種種譬如今日生。』另起鑪竈。重開世界。安知此兩番之大敗。非天之磨鍊英雄。使予大有長進乎。諺云。『喫一壺。長一智。』吾生平長進。全在受挫受辱之時。務須敲牙勵志。蓄其氣而長其智。切不可恹然自餒也。

予當此百端拂逆之時。亦祇有逆來順受之法。仍不外悔字訣。硬字訣而已。

百種弊病。皆從懶生。懶則弛緩。弛緩則治人不嚴。而趣功不敏。一處遲則百處懈矣。（以上會語）（十二）

勇有狹義的。廣義的。及急遽的。持續的之別。『暴虎馮河。死而無悔。』『臨難不苟。義不反顧。』此狹義的急遽的者也。『成敗利鈍。非所逆睹。』『鞠躬盡瘁。死而後已。』此廣義的持續的者也。前者孟子所謂『小勇』。後者所謂『大勇』。所謂『浩然之氣』者也。右章所列。多指大勇而言。所謂勇而毅也。軍人之居高位者。除能勇不算外。尤須於『毅』之一字。痛下工夫。挾一往無前之志。具百折不回之氣。毀譽榮辱。死生皆可不必計較。惟求吾良知之所安。以吾之大勇。表率無數之小勇。則其爲力也厚。爲効也廣。至於級居下僚（將校以至目兵）則應以勇爲惟一之天性。以各盡其所職。不獨勇於戰陣也。卽平日一切職務。不宜稍示怯弱。以貽軍人之羞。世所謂無名之英雄者。吾輩是也。（以上蔡松坡評語）

六 嚴明

古人用兵。先明功罪賞罰。

救浮華者。莫如實積訖之後。振之以猛。

醫者之治瘡癰。甚者必剗其腐肉。而生其新肉。今日之劣弁羸兵。蓋亦嘗爲簡汰。以剗其腐肉者。痛加訓練。以生其新肉者。不循此二道。則武備之弛。殆不知所底止。

太史公所謂『循吏者。性立令行。能識大體而已。』後世專尙慈惠。或以煦煦爲仁者當之。失循吏之義矣。爲將之道。亦以法立令行。整齊嚴肅爲先。不貴煦煦也。

立法不難。行法爲難。凡立一法。總須實實行之。且常常行之。

九弟臨別。深言禦下宜嚴。治事宜深。余亦深知。馭軍馭吏。皆莫先於嚴。特恐明不傍燭。則嚴不中禮耳。

呂蒙誅取鎧之人。魏終戮亂行之僕。古人處此。豈以爲名。非是無以警衆耳。

近年馭將。失之寬厚。又與諸將相距遙遠。危險之際。弊端百出。然後知古人所云。『作事威克厥愛。雖少必濟。』

反是乃馭道耳。(以上會語)(十二)

治軍之要。尤在賞罰嚴明。煦煦爲仁。足以墮軍紀而誤國事。此盡人所皆知者。近年軍隊風氣。紀綱大弛。賞罰之寬嚴。每不中程。或姑息以圖見好。或故爲苛罰以示威。以愛憎爲喜怒。憑喜怒以決賞罰。於是賞不知感。罰不知畏。此中消息。由於人心之澆。澆者居其半。而由於措施之乖方者亦居半。當此沓泄成風。委頓疲玩之餘。非振之以猛。不足以挽回頹風。與其失之寬。不如失之嚴。法立然後知恩。威立然後知感。以菩薩心腸。行霹靂手段。此其時矣。是望諸勇健者。毅然行之。而無稍餒。則軍事其有奇乎。(以上蔡松坡評語)

七 公明

大君以生殺予奪之權。授之將帥。猶東家之錢銀貨物。授之店中衆賤。若保舉太濫。視大君之名器。不甚愛惜。猶之賤售浪費。視東家之貨財。不甚愛惜也。介之推曰。『竊人之財。猶謂之盜。况貪天之功。以爲己力乎。』余則略改之曰。『竊人之財。猶謂之盜。况假大君之名器。以市一己之私恩乎。』余忝居高位。惟此事不能力挽頹風。深爲愧慚。

竊觀自古大亂之世。必先變亂是非。而後政治顛倒。災害從之。屈原之所以憤慨沈世而不悔者。亦以當日是非淆亂爲至痛。故曰。『蘭芷變而不芳。荃蕙化而爲茅。』又曰。『固時俗之從流。又孰能無變化。』傷是非之日移。日澆。而幾不能自立也。後世如漢晉唐宋之末造。亦由朝廷之是非先紊。而後小人得志。君子有遑遑無依之象。推而至於一省之中。一軍之內。亦必其是非不揆於正。而後其政績少有可觀。賞罰之任。視乎權位。有得行有不得行。至於維持是非之公。則吾輩皆有不可辭之責。顧亭林先生所謂。『匹夫與有責焉』者也。

大抵治事以明字爲第一要義。明有二。曰高明。曰精明。同一境而登山者獨見其遠。乘城者獨覺其曠。此高明之說也。同一物而慮度者不如權衡之審。目巧者不如尺度之精。此精明之說也。凡高明者欲降心抑志以遽趨於平實。頗不易易。若能事事求精。輕重長短。一絲不差。則漸實矣。能實則漸平矣。

凡利之所在。當與人共分之。名之所在。當與人共享之。居高位以知人曉事二者爲職。知人誠不易學。曉事則可以闕屢勉得之。曉事則無論同己異己。均可徐徐開悟。以冀和衷。不曉事則挾私回謬。秉公亦謬。小人固謬。君子亦謬。鄉愿回謬。狂狷亦謬。重以不知人。則終古相背而馳。決非和協之理。故恆言皆以分別君子小人爲要。而鄙論則謂天下無一成不變之君子。亦無一成不變之小人。今日能知人。能曉事。則爲君子。明日不知人。不曉事。則爲小人。寅刻公正光明。則爲君子。卯刻偏私暗曖。則爲小人。故羣毀羣譽之所在。下走常穆然深念。不能附和。警哨官之權過輕。則不得各行其志。危險之際。愛而從之者或有一二。畏而從之者則無其事也。此中消息。應默察之。而默挽之。總攬則不無偏蔽。分寄則多所維繫。(以上會語)

知天之長。而吾所歷者短。則遇憂患橫逆之來。當少忍以待其定。知地之大。而吾所居者小。則遇榮利爭奪之境。當退讓以守其雌。知學問之多。而吾所見者寡。則不敢以一得自喜。而當思擇善而約守之。知事變之多。而吾所辦者少。則不敢以功名自矜。而當思舉賢而共圖之。——夫如是。則自私自滿之見。可漸漸蠲除矣。(以上會語)

(十四)

文正公謂。居高位以知人曉事爲職。且以能知人曉事與否。判別其爲君子爲小人。雖屬有感而發。持論至爲正當。並非憤激之說。用人之嘗否。視乎知人之明昧。辦事之才不才。視乎曉事之透不透。不知人則不能用人。不曉事則何能辦事。君子小人之別。以能否利人濟物爲斷。苟所用之人不能稱職。所辦之事措置乖方。以致貽誤大局。縱曰其心無他。究難爲之寬恕者也。

昔賢於用人之端。內舉不避親。外舉不避仇。其宅心之正大。足以矜式百世。曾公之薦左宗棠。而劾李次青。不以恩怨而廢舉劾。各臣胸襟。自足千古。

用人講資格。固足以屈抑人才。今之不講資格。尤未足以激揚清濁。賞不必功。惠不必勞。舉不必才。劾不必劣。

或今賢而昨劣。或今辱而昨榮。揚之則舉之九天之上。抑之則置之九淵之下。得之者不爲喜。失之者不爲歎。所稱爲操縱人才策勵士氣之具。其効力竟以全失。欲圖挽回補救。其權操之自上。非吾儕所得與聞。惟吾人職居將校。在一小部分內。於用人一端。亦非絕無幾希之權力。既有此權。自應於用人惟賢。循名核實之義。特加之意。能於一小部分。有所裨益。亦足心安理得。（以上蔡松坡評語）

八 仁愛

帶兵之道。用恩莫如用仁。用威莫如用禮。仁者所謂欲立立人。欲達達人是也。待弁兵如待子弟之心。常望其發達。望其成立。則人知恩矣。禮者所謂無衆寡。無大小。無敢慢。泰而不驕也。正其衣冠。尊其瞻視。儼然人望而畏之。威而不猛也。持之以敬。臨之以莊。無形無聲之際。常有凜然難犯之象。則人知威矣。守斯二者。雖蠻貊之邦行矣。何兵之不可治哉。

吾輩帶兵。如父兄之帶子弟一般。無銀錢。無保舉。尙是小事。切不可使之因擾民而壞品行。因嫖賭洋烟而壞身體。箇箇學好。人人成材。則兵勇感恩。兵勇之父母亦感恩矣。

愛民爲治兵第一要義。須日日三令五申。視爲性命根本之事。毋視爲要結粉飾之文。（以上會語）（十五）

帶兵如父兄之帶子弟一語。最爲慈仁貼切。以此存心。則今帶兵格言。千言萬語。皆可付之一炬。父兄之待子弟。慮其愚蒙無知也。則教之誨之。慮其飢寒苦痛也。則愛之護之。慮其放蕩無行也。則懲責之。慮其不克發達也。則培養之。無論爲寬。爲嚴。爲愛。爲憎。爲好。爲惡。爲賞。爲罰。均出之。以至誠無僞。行之。以至公無私。如此則弁兵愛戴長上。亦必如子弟愛其父兄矣。

軍人以軍營爲第二家庭。此言殊親切有味。然實而按之。此第二家庭。較之固有之家庭。其關係之密切。殆將過之。何以故。長上之教育部下也。如師友。其約束督責愛護之也。如父兄。部下之對長上也。其恪恭將事。與子弟之對於師友父兄。殆無異耳。及其同蒞戰役也。同患難。共死生。休戚無不相關。利害靡不與共。且一經從戎。由常備而續備。由續備而後備。其間年月正長。不能脫軍籍之關係。一有戰事。卽須荷戈以出。爲國宣勞。此以

情言之耳。國爲家之集合體。衛國亦所以衛家。軍人爲衛國團體之中堅。則應視此第二家庭爲重。此以義言之耳。

古今名將用兵。莫不以安民愛民爲本。蓋用兵原爲安民。若擾之害之。是悖用兵之本旨也。兵者民之所出。餉亦出之自民。索本探源。何忍加以擾害。行師地方。仰給於民者。豈止一端。休養軍隊。採辦糧秣。徵發夫役。探訪敵情。帶引道路。何一非借重民力。若修怨於民。而報其反抗。是自困也。卽於與師外國。亦不可以無端之禍亂。加之無辜之民。致上千天和。下招怨讎。仁師義旅。決不出此。此海陸戰條約所以嚴擄掠之禁也。（以上蔡松坡評語）

九 勤勞

練兵之道。必須官弁晝夜從事。乃可漸幾於熟。如鷄伏卵。如鱸鍊丹。未可須臾稍離。天下事未有不由艱苦中得來。而可大可久者也。

百種弊端。皆由懶生。懶則弛緩。弛緩則治人不嚴。而趣功不敏。一處弛則百事懶矣。

治軍之道。以勤爲先。身勤則強。逸則病。家勤則興。懶則衰。國勤則治。怠則亂。軍勤則勝。惰則敗。惰者。暮氣也。常常提其朝氣爲要。

治軍以勤字爲先。由閱歷而知其不可易。未有平日不早起。而臨敵忽能早起者。未有平日不習勞。而臨敵忽能習勞者。未有平日不能忍飢耐寒。而臨敵忽能忍耐飢寒者。吾輩當共習勤勞。始之以愧厲。繼之以痛懲。

每日應辦之事。積擱過多。當於清早單開本日應了之件。日內了之。如農家早起。分派本日之事。無本日不了者。庶幾積壓較少。

養生之道。莫大於懲忿窒慾。多動少食。（以上會語）（十六）

耐冷耐苦。耐勞耐閑。

立法不難。行法爲難。以後總求實實行之。且常常行之。

應事接物時。常從人情物理中之極粗極淺處著眼。莫從深處細處看。

身體雖弱。卻不宜過於愛惜。精神愈用則愈出。陽氣愈提而愈盛。每日作事愈多。則夜間臨睡愈快活。若存愛惜精神的意見。將前將卻。奄奄無氣。決難成事。

總須腳踏實地。克勤小物。乃可日起而有功。

精神愈用而愈出。不可因身體素弱。過於保惜。智慧愈苦而愈明。不可因境遇偶拂。遽爾摧沮。不輕進。不輕退。

習勞爲辦事之本。引用一班能耐勞苦之正人。日久自有大效。

欲去驕字。總以不輕非笑人爲第一義。欲去惰字。總以不晏起爲第一義。

每日臨睡之時。默數本日勞心者幾件。勞力者幾件。則知宜勤國事之處無多。更宜勤誠以圖之。

自古聖賢豪傑。文人才士。其志事不同。而其豁達光明之胸。大略相同。吾輩既辦軍務。係處功利場中。既刻刻勤勞。如農之力耨。如賈之趨利。如篙工之上灘。早作夜思。以求有濟。而法事之外。此中卻須有一段冲融氣象。二者並進。則勤勞而以恬淡出之。最有意味。

用兵最戒驕氣情氣。作人之道。亦惟驕惰二字誤之最甚。扶危救難之英雄。以心力勞苦爲第一義。(以上會語)(十七)

戰爭之事。或跋涉冰天雪窟之間。或馳驅酷暑惡瘴之鄉。或趁雨雪露營。或晝夜趨程行軍。寒不得衣。飢不得食。渴不得水。槍林彈雨之中。血肉橫飛。極人世所不見之慘。受恆人所不經之苦。其精神。其體力。非於平時養之有素。練之有恆。豈能堪此。練兵之主旨。以能効命於疆場爲歸屬。欲其効命於疆場。尤宜於平時。竭盡手段。以修養其精神。鍛鍊其體魄。嫻熟其技藝。臨事之際。乃能有恃以不恐。故習勞忍苦。爲治軍之第一要義。而馭兵之道。亦以使之勞苦。爲不二法門。蓋人性似猴。喜動不喜靜。宜勞不宜逸。勞則思。逸則淫。閑居無所事事。則爲不善。此常人恆態。聚數百千血氣方剛之少年於一團。苟無所以範其心志。勞其體膚。其不踰閑蕩檢潰隄。出防之外者。烏可得耶。(以上蔡松坡評語)

十 和韓

禍穰之發，莫烈於猜忌。此古今之通病。敗國亡家，喪身皆猜忌之所致。詩稱：『不忮不求，何用不臧。』忮求二端，蓋妾婦穿窬秦而有之者也。

凡兩軍相處，統將有一分齟齬，則管哨必有三分。兵夫必有六七分。故欲求和衷共濟，自統將先辦一副平恕之心。始人之好名，誰不如我。同打仗不可譏人之退縮，同行路不可疑人之騷擾。處處嚴於治己而薄於責人，則唇舌自省矣。

敬以持躬，恕以待人，敬則小心翼翼，事無鉅細，皆不敢忽。恕則凡事留餘地以處人，功不獨居，過不推諉。常常記此二字，則長履大任，福祚無量。

湘軍之所以無敵者，全賴彼此相顧，彼此相救。雖平日積怨深仇，臨陣仍彼此照顧。雖上午口角參商，下午仍彼此救援。（以上會語）（十八）

沅弟謂『雪聲色俱厲。』凡目能見千里而不能自見其睫，聲音笑貌之拒人，每苦於不自見，苦於不自知。雪之厲，雪不自知。沅之聲色，亦恐未始不厲，特不自知耳。（雪謂彭雪琴，即彭玉麟也。沅爲曾沅甫，即曾國荃也。）（以上會語）（十九）

古人相處，有憤爭公庭而言歡私室，有交闕於平昔，而救助於疆場。蓋不以公而廢私，復不以私而害公也。人心不同如其面，萬難強之使同。驅之相合，則睚眦之怨，芥蒂之隙，自所難免。惟於公私之界，分得清，認得明，使之劃然兩途，不相混擾，則善矣。髮檢之役，中日之役，中法之役，列將因爭意氣，而致敗績者，不一而足。故老相傳，言之鑿鑿。從前握兵符者，多起自行間，罔知大體，動以意氣用事，無怪其然。今後一有戰役，用兵必在數十萬以上，三十數鎮之師，情誼風不相孚，言語亦多隔閡，統馭調度之難，蓋可想見。苟非共矢忠誠，無猜無貳，或難免不蹈既往之覆轍。欲求和衷共濟，則惟有恪遵先哲遺言，自統將先辦一副平恕之心。始功不獨居，乃可以言破敵。（以上蔡松坡評語）

十一 兵機

前此爲赴鄂救援之行。不妨倉卒成軍。近日爲東下討賊之計。必須簡練慎出。若不教之卒。遽敗之械。則何地無之。而必遠求之湖南。等於遼東自詡之豕。仍同灑上兒戲之軍。故此行不可不精選。不可不久練。兵者陰事也。衰威之意。如臨親喪。肅敬之心。如承大祭。故軍中不宜有歡欣之象。有歡欣之象者。無論或爲和悅。或爲驕盈。終歸於敗而已矣。田單之在即墨。將軍有必死之心。士卒無生還之氣。此其所以破燕也。及其攻狄也。黃金橫帶。有生之樂。無死之心。魯仲連策其必不勝。兵事之宜慘戚。不宜歡欣。亦明矣。

此次由楚省招兵東下。必須選百鍊之卒。備精堅之械。舟師則船礮並富。陸路則將卒並慎。作三年不歸之想。爲百戰艱難之行。豈可兒戲成軍。倉卒成行。人盡烏合。器多苦窳。船不滿二百。礮不滿五百。如大海簸豆。黑子著面。縱能速達皖省。究竟於事何補。是以鄙見。總須戰艦二百號。又補以民船七八百。大小礮千餘位。水軍四千。陸軍六千。夾江而下。明年成行。始略成氣候。否則名爲大興義旅。實等矮人觀場。不直方家一哂。

夫戰。勇氣也。再而衰。三而竭。國藩於此數語。常常體念。大約用兵無他巧妙。常存有餘不盡之氣而已。孫仲謀之攻合肥。受創於張遼。諸葛武侯之攻陳倉。受創於郝昭。皆初氣過銳。漸就衰竭之故。惟荀營之破偃陽。氣已竭而後振。陸抗之拔西陵。預料城之不遽下。而奮發銳氣。先備外援。以待內之自斃。此善於用氣者也。

日中則昃。月盈則虧。故古詩『花未全開月未圓』之句。君子以爲知道。故余治兵以來。每介疑勝疑敗之際。戰兢恐懼。上下悚懼者。其後常得大勝。當志得意滿之候。各路雲集。狂於屢勝。將卒矜慢。其後常有意外之失。

國家之強。以得人爲強。所謂『無競惟人』也。若不得其人。則羽毛未豐。亦似難以飛高。昔在宣宗皇帝。亦嘗切齒發憤。屢悔和議。而主戰守。卒以無良將帥。不獲大雪山國恥。今欲罷和主戰。亦必得三數引重致遠。折衝禦侮之人。以擬之。若僅區區楚材。目下知名之數人。則千將莫邪。恐未必不終剝折。且聚數太少。亦不足以分布海隅。用兵之道。最忌『勢窮力弱』四字。力。則指將士之精力言之。勢。則指大局大計。及糧餉之接續。人才之繼否言之。能戰雖失算亦勝。不能戰雖勝算亦敗。

懸軍深入而無後繼。這是用兵大忌。

危急之際。尤以全軍保全士氣爲主。孤軍無助。糧餉不繼。奔走疲憊。皆散亂必敗之道。（以上會語）（二十一）

凡危急之時。祇有在己者靠得住。其在人者皆不可靠。恃之以守。恐其臨危而先亂。恃之以戰。恐其猛進而驟退。凡用兵須蓄不竭之氣。留之餘之力。（以上會語）（二十二）

會謂之論兵。極主主客之說。謂「守者爲主。攻者爲客。主逸而客勞。主勝而客敗。」尤戒攻堅圍城。其說與普法戰爭前法國兵學家所主張者殆同。（其時俄土兩國亦盛行此說。）其論出師前之準備。宜十分周到。謂「一不精。不可輕出。勢力不厚。不可成行。」與近今之動員準備。用意相合。其「以全軍破敵爲上。不以得土地城池爲意。」所見尤爲精到卓越。與東西各國兵學家所唱道者。如出一轍。「臨陣分枝宜散。先期合力宜厚。」二語。尤足以賅括戰術戰略之精妙處。臨陣分枝者。卽分主攻助攻之軍。及散兵援隊預備隊之配置等是也。先期合力者。卽戰略上之聚中展開。及戰術上之開進等是也。所論諸端。皆從實行後經驗中得來。與近世各國兵家所論。若合符節。吾思先賢。不能不馨香崇拜之矣。（以上蔡松坡評語）

十一 戰守

凡出隊有宜速者。有宜遲者。宜速者。我去尋敵。先發制人者也。宜遲者。敵來尋我。以主待客者也。主氣常靜。客氣常動。客氣先盛而後衰。主氣先微而後壯。故善用兵者。每喜爲主。不喜作客。休邪諸軍。但知先發制人一層。不知以主待客一層。加之探報不實。地勢不審。敵情不明。徒能先發而不能制人。應研究此兩層。或我尋敵。先發制人。或敵尋我。以主待客。總須審定乃行。切不可於兩層一無所見。貿然出隊。

師行所至之處。必須多問多思。思之於己。問之於人。皆好謀之實迹也。昔璞山帶兵。有名將風。每與敵遇。將接仗之前一夕。傳各營官齊集。與之暢諭敵情地勢。袖中出地圖十餘張。每人分給一張。令諸將各抒所見。如何進兵。如何分支。某營埋伏某營並不接仗。待事畢後。專派追剿。諸將一一說畢。璞山乃將自己主意說出。每人發一傳單。卽議定主意也。次日戰罷。有與初議不符者。雖有功亦必加罰。其平日無事。每三日必傳各營官熟論戰守之

法。

一曰。紮營宜深溝高壘。雖僅一宿。亦須爲堅不可拔之計。但使能守我營壘。安如泰山。縱不能進攻。亦無損於大局。一曰。哨探嚴明。離敵既近。時時作敵來撲營之想。敵來之路。應敵之路。埋伏之路。勝仗追擊之路。一夕探明。切勿孟浪。一曰。痛除客氣。未經戰陣之兵。每好言戰。帶兵者亦然。若稍有閱歷。但覺我軍處處瑕隙。無一可恃。不輕言戰矣。

用兵以渡水爲最難。不特渡長江大河爲難。卽偶渡漸車之水。丈二之溝。亦須再三審慎。恐其半渡而擊。背水無歸。敗兵爭舟。人馬踐爛。種種皆兵家所忌。

險路打勝仗。全在頭敵。若頭敵站腳不住。後面雖有好手。亦被擠退。(以上會語)(一一)

右揭戰守之法。意括而言。賅曰。攻戰曰。守戰曰。遭遇戰曰。肩地戰。以及防邊之策。攻城之術。無不獨具卓識。得其要訣。雖以近世戰術之日新月異。而大旨亦不外是。其論夜間宿營。亦須深溝高壘。爲堅不可拔之計。則防禦之緊嚴。立意之穩健。尤爲近世兵家所不及道者也。(按咸同時戰爭兩方。多爲不規則之混戰。來去飄忽。不可端倪。故紮營務求堅固以防侵襲。)

會說論兵。極重主客之見。祇知守則爲主之利。不知守反爲客之害。蓋因其時所對之敵。並非節制之師。精練之卒。且其人數常倍於我。其兵器未如今日之發達。又無礮礮兩兵之編制。耳目不靈。攻擊力復甚薄弱。故每挖泥於地形地物。攻擊精神。未由奮興。故戰術偏重於攻勢防禦。蓋亦因時制宜之法。近自普法日俄兩大戰役以後。環球之耳目一新。攻擊之利。昭然若揭。各國兵學家。舉凡戰略戰術。皆極端的主張攻擊。苟非兵力較弱。或地勢敵情。有特別之關係。無復有以防守爲計者矣。然戰略戰術。須因時以制宜。審勢以求當。未可稍事拘滯。若不揣其本。徒思仿效於人。勢將如跛者之競走。鮮不蹶矣。兵略之取攻守。固也。必須兵力雄厚。士馬精練。軍資(軍需器械)完善。交通利便。四者均有可恃。乃足以操勝算。四者之中。偶缺一。貿然以取攻勢。卽會公所謂徒先發而不能制人者也。普法戰役。法人國境之師。動員頗爲迅速。而以兵力未能悉集。軍資亦虛缺乏。遂致着着落後。陷於防守之地位。日俄之役。俄軍以交通線僅恃一單軌鐵道。運輸不繼。遂屢爲優勢之

日軍所制。雖迭經試取攻勢。終歸無效。以吾國軍隊現勢論。其數則有二十餘鎮之多。然續備後備之制。尙未實行。每鎮僅戰。至多不過得戰兵五千。須有兵力三鎮以上。方足與他一鎮之兵力相抗衡。且一有傷亡。無從補充。是兵力一層。決難如鄰邦之雄厚也。今日吾國軍隊。能否說到『精練』二字。此稍知軍事者。自能辨之。他日與強鄰一相角逐。能否效一割之用。似又難作億倖萬一之想。至於軍資交通兩端。更瞠乎人後。如此而曰吾將取戰略戰術上最有利益之攻勢。烏可得耶。鄙意我國數年之內。若與他邦以兵戎相見。與其爲孤注一擲之舉。不如採用波亞戰術。據險以守。節節爲防。以全軍而老敵師爲主。俟其深入無繼。乃一舉而殲除之。昔俄人之蹴拿破崙於境外。使之一蹶不振。可借鑑也。（以上蔡松坡評語）

仿古字版

會文正公雜著

世界書局印行

曾文正公雜著目次

先大夫置祭費記戊午	五	禁洋煙等事之規	五四
筆記二十七則己未	五	稽查之規五條	五四
筆記十二篇辛未	二七	營制己未	五五
課程十二條壬寅	三一	查拏徵義堂餘匪示癸丑	五九
日課四條辛未	三二	禁止賽會告示癸丑	六〇
淮鹽運行西岸章程癸亥	三四	禁誘傳揭糴告示癸丑	六〇
淮鹽運行皖岸章程甲子	三七	催完錢糧告示癸丑	六一
淮鹽運行楚岸章程甲子	三八	禁止擄船告示癸亥	六二
淮北票鹽章程乙丑	四一	金陵房產告示八條乙丑	六二
馬勇章程五條乙丑	四四	勦捻告示乙丑	六四
徽甯池三府屬洋莊茶引捐釐章程十條丁卯	四五	勦捻告示四條乙丑	六四
直隸清訟限期功過章程	四六	禁止私押告示己巳	六六
初定營規二十二條戊午	四九	保守平安歌三首壬子	六七
營規己未	五一	水師得勝歌并序乙卯	六八
營之規八條	五二	陸軍得勝歌丙辰	六九
行路之規三條	五三	愛民歌戊午	七一
禁授民之規	五三	解散歌辛酉	七二

格言四幅書贈李芋仙辛酉	七二
書贈仲弟大則戊辰	七三
勸誠州縣辛酉	七五
勸誠營官四條	七六
勸誠委員四條	七七
勸誠紳士四條	七八
勸學篇示直隸士子己巳	八〇
直隸清訟事宜十條己巳	八一
曉諭新募鄉勇甲寅	八七
諭賊目林啓容丙辰	八九
諭巡捕門印簽押三條庚申	九〇
諭天津士民示庚午	九一
照復洋人庚午	九二
將赴天津示二子庚午	九三
附枝求詩二首	九五

曾文正公雜著

先大夫置祭費記

古者大夫之制。別子爲祖。繼別者爲大宗。得立太祖之廟。繼禰繼祖繼高曾者爲小宗。得立四親之廟。後世封建不行。別子久廢。無復太祖立廟之稱。而宗法既墮。即祖禰高曾。亦不復有區別。而立親廟者。時異勢殊。古法不可施於今久矣。金匱秦尙書蕙田有言。後世天下一家。仕宦遷徙。其有子孫繁衍而成族者。則始至之人。宜爲始遷之祖。與古之別子無異。今直省名家鉅族。皆有祠堂祀其初遷者爲始祖。大率皆比附秦尙書之議而然也。或富貴好禮。分建支祠。亦猶古者小宗親廟之遺意。國藩不肖。託先人之餘蔭。竊祿朝右。承乏六官。遭逢今天子登極。宣宗成皇帝升配大典。覃恩錫類。累封先考王考。曾祖王考皆爲光祿大夫。妣皆封一品夫人。而春秋薦享。曾無廟宇。以妥宗祏。筮日無門。麗牲乏碑。其奚以宣鬯皇恩。宏昭世德。永敕後嗣。子若孫而作其肅敬之心。咸豐八年四月。吾兄弟居先考之喪。蓋十有四月矣。節序不屆。將變而之吉。祭廟之不修。器皿之不備。無財不可爲悅。實用大懼。於是各具白金若干兩。積爲竹亭府君公資。備它日祠廟祭田之需。當明之季。聖清之初。吾曾氏始自衡陽遷居湘鄉。家微也。力田不足以自給。嘉慶十九年。我王考星岡府君。倡建宗祠於衡。道光二十八年。季父高軒創建支祠於湘。奉元吉府君爲祖。遷湘之始祖。本自孟學府君。而支祠祖元吉府君者。以其創業始大也。元吉府君六子。咸豐七年。六公者之裔。各以其祖禰於元吉公祠。其仲曰輔臣府君。於國藩爲高祖王考。是生竟希府君。爲我曾祖王考。是生星岡府君。爲我王考。輔臣府君既已升祔支祠矣。竟希府君星岡府君皆僅積公費。以供祭具。廟禰之典闕焉。今茲爲竹亭府君積植公費。異時合三代之蓄。而共建一廟。事其庶易舉乎。戴氏記王制大夫三廟。一昭一穆。與太祖之廟而三。說者以謂昭穆僅有祖禰而無高曾二廟。程子始辨之。以爲自天子以至庶人。皆

嘗祭及高祖。馬貴與推闡其說。至我朝宿儒萬斯大氏之論出。博稽經傳。而大夫士得祭高曾祖禰四代。乃確然而不可易。今國藩僅立三親廟。而不言高祖。蓋輔臣府君業已上廟祔支祠。而竟希府君以下三代皆膺封誥。抑所以表國恩也。其或因事致祭而上祀輔臣府君元吉府君。而援禮經于矜及其高祖之例。卽不應經。而禮緣義起。但求當乎孝子慈孫之心之公且安者而已矣。若夫田產錢幣。存積之法。天家賜物。宗器弄皮之宜。祭器供具。圖書貴重之物。凡應藏於廟者。皆書於冊。立爲科條。其別如左。

一 田產

把戲灣田十六畝。屋宇池塘園土。咸豐七年九月十六日承當王葛氏及舅水九之產。去錢二百六十千文。下塘灣田三十畝。屋宇山塘園土。咸豐六年十二月二十六日承當羅道源之產。去錢二百九十六千文。以上二處。每年共納租四十四石二斗。定議置倉貯之。公同封鎖。次年糶出。其錢亦封貯於倉。以是爲常。不許私糶。不許外借。

一 銀錢

國藩出銀百兩。國華出銀百兩。國荃出銀百兩。國潢國葆共出銀百兩。定議交國潢經筵。滿二年再移交他手。其銀每年秋間糶穀置倉。於永豐貯之。次年糶出。其年換銀。歸貯於家內之倉。或存錢永豐亦可。秋間仍糶穀貯倉。明年糶出亦如之。以是爲常。不許私支私糶。不許外借。

一 賜物

道光三十年二月初二日。奉內賜宣宗成皇帝遺念衣一件。玉佩一事。咸豐元年八月初六日奉內賜御製詩石刻橫幅一幀。咸豐四年十二月二十五日。奉內賜狐皮黃馬褂一件。小刀火鑷撥指荷包四事。是夕賊匪偷營。將此四事遺失。咸豐四年膺月三十日。奉內賜福字一幅。荷包三對。咸豐六年正月十六日。奉內賜福字一幅。荷包三對。咸豐七年正月十三日。奉內賜福字一幅。荷包三對。咸豐七年三月十一日。奉賜經理喪事銀四百兩。謹按以上各物。惟四年臘月二十五夜遺失之四事。謹當由京師照樣買補。其日同受賜者。塔忠武公亦有四事。

可以爲式也。俟買到後，與各件皆當敬謹尊藏於家廟。其七年賜銀，業經用去。當另封四百兩，藏之廟內，以誌頌。賜非常之恩。道光二十五年十月初十日，孝和睿皇后七十萬壽，單恩誥封竹亭公爲中憲大夫，妣爲恭人。賜封星岡公爲中憲大夫，妣爲恭人。誥命二軸。祖父道光三十年正月二十六日，今天子登極，單恩加一級。誥封三代。誥命四軸。三代及叔父三月十二日，孝和睿皇后升祔，單恩不加級。誥封本身妻室。誥命一軸。四月十二日，宣宗成皇帝升配，單恩加二級。誥封三代。誥命四軸。三代及叔父。

謹按已上各誥軸，宜酌量分貯白玉堂老宅、黃金堂新宅，及將來修立之廟內。

一 宗器

竹亭府君硯池一箇，紅青緞袱。手抄四書文二本，紅青緞袱。謹按先大夫課徒二十餘年，皆手此硯，以黑漆爲合，蓋無當久矣。國藩昔侍親側，見先大夫逢三八課日，則晨起洗硯，謂效法邑中耆宿彭薄暨先生之所爲也。手抄文二本，亦肄業雙峯書院，師事薄暨先生時之所抄。咸豐七年，余兄弟奔喪歸來，始珍弄此二物，以爲手澤。各爲之袱，駝色緞綿袍一件，佛青緞綿褂一件。道光二十七年五月，國藩以大考二等，蒙恩賞大卷緞二件，遂製袍褂二付。一以奉星岡府君，一以奉竹亭府君。星岡府君以爲斂服，竹亭府君之衣尙存。它日祭祀，或陳裳衣，此其一也。文選一部，竹亭府君曾手批者。

一 祭器

錫五事。咸豐七年置。銀爵三。其二在京師帶回，其一係塔忠武謁師所獻。錫水碗八件。咸豐七年俞刺史所贈。錫碗一席。磁公碗一席。紀澤之元配賀安人所置。臨沒時請捐爲祭器。

一 供具

漆棹二十張。漆凳六十條。漆椅十六張。茶几十三張。榻木香几一張。香亭二座。藍呢棹圍八個。藍呢綵五疋。錫提鐘四個。鏡燈四對。紗布燈九對。以上各件，皆咸豐七年治喪事時所置。大鏡屏一架。獅鹿笮一張。并几墊。錢櫃一

篋。櫃一個。以上各件。皆家中往年所置。

謹按藍呢裱圍及綵。僅足爲忌日祭祀之供具。其它祀典。皆吉禮也。宜另置紅裱圍紅綵紅傘之類。其錢櫃及櫃。極不足珍。本無異於有無之數。以其向在先大夫臥房之內。睹物生慕。故留爲祠廟之供具。亦猶宗器之義云爾。

一 圖書

皇朝經解三十六套。三百六十冊。陳岱雲太守所贈。國荃裝訂成籍。廿二史一部。趙玉珩太守贈國荃者。計汲古閣十七史以宏簡錄代宋遠金元等史。又配以明史。咸豐八年正月。國荃自吉安營中寄回淳化本前後漢書各一部。各六函。汪刻前後漢書各一部。各四函。袁漱六太守所贈。國藩許以淳化本後漢書。汪刻前漢書。贈劉君霞仙。其淳化本前漢書汪刻後漢書。則留藏家廟。此善本不可多得者也。宋板莊子一部。亦漱六太守所送。皆咸豐七年十二月寄到。五禮通考讀禮通考一部。共十二函。百二十冊。文獻通考一部。共八函。一百冊。吳竹莊觀察所贈。咸豐七年十月送到。德化萬刻五經六函。四十冊。萬刻十三經古注八函。八十四冊。萬刻文章軌範一函。二冊。崇仁謝刻通典一部。四函。四十冊。漢魏六朝百三家一部。八函。八十冊。方輿紀要一部。八函。四十八冊。胡刻通鑑一部。八函。百二十八冊。胡刻文選一部。一匣。二十四冊。日知錄一部。十二冊。三國志一部。八冊。施注蘇詩一部。八冊。前漢書一部。三十冊。長恩書室叢書一部。八冊。四書一部。六冊。以上皆自江西營中帶歸之書。通鑑係國藩奔喪時自行帶回。咸豐七年。用硃筆校讀一過。餘係陳季牧張小山先後帶歸。古文辭類纂一部。十二冊。十八家詩鈔一部。八冊。漢書一部。十冊。莊子一部。二冊。南河編年紀要一部。三冊。朱刻說文一部。三冊。以上皆咸豐二年自京帶回之書。朱子綱目一部。十二函。百二十冊。皇朝經世文編一部。八函。八十冊。王刻十子全書四函。三十冊。史漢評林二部。共四十冊。王白田朱子年譜一函。四冊。殿板周易折中十二冊。殿板性理精義五冊。湖海詩傳文傳二部。共十八冊。浙刻東萊博議一部。朱子全集一部。十三經注疏一部。以上皆家中舊有之書。多係國華國荃所置。或有自京師帶歸者。

筆記二十七則

禮

古之君子之所以盡其心養其性者。不可得而見。其修身齊家治國平天下。則一秉乎禮。自內焉者言之。舍禮無所謂道德。自外焉者言之。舍禮無所謂政事。故六官經制大備。而以周禮名書。春秋之世。士大夫知禮。善說辭者。常足以服人而強國。戰國以後。以儀文之瓊爲禮。是女叔齊之所譏也。荀卿張載。兢兢以禮爲務。可謂知本好古。不逐乎流俗。近世張爾岐氏。作中庸論。凌廷堪氏。作復禮論。亦有以窺見先王之大原。秦蕙田氏。輯五禮通考。以天文算學錄入。爲觀象授時門。以地理州郡錄入。爲禮國經野門。於著書之例義。則或駁而不精。其於經世之禮。之無所不該。則未爲失也。

赦

牧馬者去其害馬者而已。牧羊者去其亂羣者而已。牧民之道。何獨不然。諸葛武侯治蜀。有言公惜赦者。答曰。『治世以大德。不以小惠。故匡衡吳漢不願爲赦。先帝亦言吾周旋陳元方鄭康成間。每見啓告治亂之道。悉矣。曾不語赦也。若劉景升季玉父子。歲歲赦宥。何益於治。』蜀人稱亮之賢。厥後費禕秉政。大赦河南。孟光責費禕曰。『赦者偏枯之物。非明世所宜有也。』國藩嘗見家有不孝之子。其父曲宥其過。衆子相率而日流於不肖。又見軍士有失律者。主者鞭責不及數。又故輕黃之。厥後衆士傲慢。日常戲侮其管轄之官。故知小仁者大仁之賊。多赦不可以治民。縹愛不可以治家。寬縱不可以治軍。

世澤

士大夫之志趣學術。果有異於人者。則修之於身。式之於家。必將有流風餘韻。傳之子孫。化行鄉里。所謂君子之澤也。就其最善者。約有三端。曰詩書之澤。禮讓之澤。稼穡之澤。詩書之澤。如韋玄成議禮。王吉傳經。虞魏之昆。願

陸之裔。代有名。家不可殫述。我朝如桐城張氏。自文端公而下。鉅卿碩學。世濟其美。宣城梅氏。自定九徵君以下。世精算學。其六世孫梅伯言。郎中曾亮。自謂莫紹先緒。而所爲文章詩篇。一時推爲祭酒。高郵王氏。自文肅公安國以下。世爲名儒。而懷祖先生訓詁之學。賈集古今之大成。國藩於此三家者。常低回歎仰。以爲不可及。禮讓之澤。如萬石君之廉謹。富平侯之敬慎。唐之河東柳氏。宋之藍田呂氏。門庭之內。彬彬焉有君子之風。余所見近時搢紳。未有崇禮法而不與。習傲慢而不敗者。稼穡之澤。惟周家開國。幽風陳業。述生理之艱難。導民風於淳厚。有味乎其言之。近世張敦復之恆產瑣言。張楊園之農書。用意至爲深遠。國藩竊以爲稼穡之澤。視詩書禮讓之澤。尤爲可大可久。吾祖光祿大夫星岡公嘗有言曰。『吾子孫雖至大官。家中不可廢祖宗舊業。』懿哉至訓。可爲萬世法已。

悔吝

吉凶悔吝。四者相爲循環。吉非有祥瑞之可言。但行事措之咸宜。無有人非鬼責。是卽謂之吉。過是則爲吝矣。天道忌滿。鬼神害盈。日中則仄。月盈則虧。易爻多言貞吝。易之道。當隨時變易以處中。當變而守此不變。則貞而吝矣。凡行之而過。無論其非義也。卽盡善之舉。盛德之事。稍過則吝隨之。余官京師。自名所居之室曰求闕齋。恐以滿盈致吝也。人無賢愚。遇凶皆知自悔。悔則可免於災戾。故曰『震无咎者。存乎悔。』動心忍性。斯大任之基。側身修行。乃中興之本。自古成大業者。未有不自困心橫慮覺悟知非而來者也。吝則馴致於凶。悔則漸趨於吉。故大易之道。莫善於悔。莫不善於吝。吾家子弟。將欲自修而免於咎。尤有二語焉。曰『無好快意之事。常存省過之心。』

儒緩

論語兩稱『敏則有功。』敏有得之天事者。才藝膽識。裁決如流。此不數數觀也。有得之人事者。人十己千。習勤不輟。中材以下。皆可勉焉而幾。余性魯鈍。他人目下二三行。余或疾讀不能終一行。他人頃刻立辦者。余或沈吟

數時不能了。友人陽湖周致甫騰虎嘗謂余儒緩不及事。余亦深以舒緩自愧。左傳齊人責魯君不答稽首。國歌之曰。魯人之舉。數年不覺。使我高蹈。惟其儒書。以爲二國憂。言魯人好儒術而失之舉緩。故二國與師來問也。漢書朱博傳齊部舒緩養名。博奮髻抵几曰。『觀齊兒欲以此爲俗耶。』皆斥罷諸吏。門下掾韜送。替老大儒。拜起舒緩。博謂贛老生不習吏禮。令主簿教之。拜起閑習。又以功曹官屬。多褒衣大褶。不中節度。敕令掾史衣皆去地二尺。此亦惡儒術之舒緩。不足了事也。通鑑涼驃騎大將軍宋混曰。『臣弟澄政事愈於臣。但恐儒緩。機事不稱耳。』胡三省注曰。『凡儒者多務爲舒緩。而不能應機以趨事赴功。』大氏儒術非病。儒而失之舒緩。則從政多積滯之事。治軍少可趁之功。王昶儒緩見北史王憲從孫唐相張鎰儒緩見通鑑二百二十八卷

名望

知識愈高。則天之所以責之者愈厚。名望愈重。則鬼神之所以伺察者愈嚴。故君子之自處。不肯與衆人掣量長短。以爲己之素所自期者大。不肯自欺其知識以欺天也。己之名望素尊。不肯更以鄙小之見。貽譏於神明也。

居業

古者英雄立事。必有基業。如高祖之關中。光武之河內。魏之兗州。唐之晉陽。皆先據此爲基。然後進可以戰。退可以守。君子之學道也。亦必有所謂基業者。大氏以規模宏大。言詞誠信爲本。如居室然。宏大則所宅者廣。託庇者衆。誠信則置址甚固。結構甚牢。易曰。寬以居之。謂宏大也。修辭立其誠。所以居業。謂誠信也。大程子曰。『道之浩浩。何處下手。淮立誠纔有可居之處。誠便是忠信。修省言辭。便是要立得這忠信。若口不擇言。逢事便說。則忠信亦被汨沒動盪。立不住了。』國藩按立得住。即所謂居業也。今世俗言與家立業是也。子張曰。『執德不宏。信道不篤。焉能爲有。焉能爲亡。』亦謂苟不能宏大誠信。則在我之知識浮泛動盪。指爲我之所有也。不可指爲我之所無也。亦不可。是則終身無可居之業。程子所謂立不住者耳。

英雄誠子弟

古之英雄。意量恢拓。規模宏遠。而其訓誡子弟。恆有恭謹歛退之象。劉先主臨終。敕太子曰。『勉之。勉之。勿以惡小而爲之。勿以善小而爲。惟賢惟德。可以服人。汝父德薄。不足效也。汝與丞相從事。事之如父。』西涼李暹。手令戒諸子。以爲從政者。當審慎賞罰。勿任愛憎。近忠正。遠佞諛。勿使左右竊弄威福。毀譽之來。當研覈真僞。聽訟折獄。必和顏任理。慎勿逆詐僥倖。輕加聲色。務廣咨詢。勿自專任。吾蒞事五年。雖未能息民。然含垢匿瑕。朝爲寇讎。夕委心膂。粗無負於新舊。事任公平。坦然無類。初不容懷。有所損益。計近則如不足。經遠乃爲有餘。庶亦無愧前人也。宋文帝以弟江夏王義恭都督荆湘等八州諸軍事。爲書誡之曰。『天下艱難。國家事重。雖曰守成。實亦未易。隆替安危。在吾曹耳。豈可不感尋王業。大懼負荷。汝性褊急。志之所歸。其欲必行。意所不存。從物回改。此最弊事。宜念裁抑。衛青遇士大夫。以禮。與小人有恩。西門安于。矯性。齊美關公。張飛。任偏同弊。行己舉事。深宜鑒此。若事異今日。嗣子幼蒙。司徒當周公之事。汝不可不盡。祗順之理。爾時天下安危。決汝一人耳。汝一月自用錢。不可過三十萬。若能省此。益矣。西楚府舍。略所詰究。計當不須改作。日求新異。凡訊獄。多決當時。難可逆慮。此實爲難。至訊日。虛懷博盡。慎無以喜怒加人。能擇善者而從之。笑歸自己。不可專意自決。以矜獨斷之明也。名器深宜慎惜。不可妄以假人。昵近爵賜。尤應裁量。吾於左右。雖爲少恩。如聞外論。不以爲非也。以貴凌物。物不服。以威加人。人不厭。此易達事耳。聲樂嬉遊。不宜令過。猜酒漁獵。一切勿爲。供用奉身。皆有節度。奇服異器。不宜與長。又宜數引見佐史。相見不數。則彼我不親。不親無因。得盡人情。人情不盡。復何由知衆事也。』數君者。皆雄才大略。有經營四海之志。而其教誡子弟。則約旨卑恩。斂抑已甚。伏波將軍馬援。亦曠代英傑。而其誡兄子書曰。『吾欲汝曹聞人過失。如聞父母之名。耳可得聞。口不可得言也。好議論人長短。妄是非政法。此吾所大惡也。甯死不願子孫有此行也。龍伯高敦厚周慎。口無擇言。謙約節儉。廉公有威。吾愛之重之。願汝曹效之。杜季良豪俠好義。憂人之憂。樂人之樂。父喪致客。數郡畢至。吾愛之重之。不願汝曹效也。效伯高不得。猶爲謹敕之士。所謂刻鵠不成。尙類鶩者也。效季良不得。陷爲天下輕薄子。所謂畫虎不成。反類狗者也。』此亦謙謹自將。斂其高遠之懷。卽於卑

近之道。蓋不如是。則不足以自致於遠大。藏之不密。則放之不準。蘇軾詩。『始知真放本精微。』卽此義也。

氣節 傲

自好之士。多講氣節。講之不精。則流於傲而不自覺。風節守於己者也。傲則加於人者也。漢蕭望之初見霍大將軍光。不肯露索挾持。王仲翁譏之。望之曰。『各從其志。』魏孫資劉放用事。辛毗不與往來。子儼諫之。毗正色曰。『吾立身自有本末。就與孫劉不平。不過令吾不作三公而已。』宋顧覲之不肯降意於戴法興等。蔡興宗嫌其風節太峻。覲之曰。『辛毗有言。孫劉不過使我不作三公耳。人稟命有定分。非智力可移。』因命弟子原。著定命論以釋之。此三事者。皆風節之守於己者也。若汲黯不下張湯。宋璟不禮王毛仲。此自位高望重。得行其志。已不得不以風節目之矣。然猶不可謂之傲也。以傲加人者。若蓋寬饒之於許伯。孔融之於曹操。此傲在言詞者也。嵇康之於鍾會。謝靈運之於孟覲。此傲在神理者也。殷仲文之於何無忌。王僧達之於路瓊之。此傲在儀節者也。息夫躬歷詆諸公。暨豔彈射百寮。此傲在奏議者也。此數人者。皆不得令終。大抵人道害盈。鬼神福謙。傲者內恃其才。外溢其氣。其心已不回矣。如蓋孔稚恭謝殷王等。僅以加諸一二人。猶且無德不報。有毒必發。若息夫躬豔豔之徒。遍忤同列。安有幸全之理哉。

裴子野曰。『夫有逸羣之才。必思冲天之據。蓋俗之量。則儻常均之下。其能守之以道。將之以禮。殆爲鮮乎。』大抵懷材負奇。恆冀人以異眼相看。若一概以平等視之。非所願也。韓信含羞於噲等。彭寵積望於無異。彼其素所挾持者高。誠不欲與庸庸者齊耳。君子之道。莫善於能下人。莫不善於矜。以齊桓公之盛業。葵邱之會。微有振矜。而叛者九國。以關公之忠勇。一念之矜。則身敗於徐晃。地喪於呂蒙。以大禹之聖。而伯益贊之以『滿招損。謙受益。』以鄒伯之弱。而楚莊王曰。『其君能下人。必能信用其民矣。』不自恃者。雖危而得安。自恃者。雖安而易危。自古國家。往往然也。故挾貴挾長。挾賢挾故。勳勞。皆孟子之所不答。而怙寵怙倭。怙非怙亂。皆春秋士大夫之所深譏爾。

碣

莊子庚桑楚夫函車之獸。介而離山。則不免於網罟之患。吞舟之魚。碣而失水。則蟻能苦之。國藩按碣。水中石。水涸而見沙。石不得津潤。失所憑依之象。通鑑客謂靖郭君曰。『君不聞海大魚乎。網不能止。鈎不能牽。蕩而失水。則蟻蟻制焉。』以蕩爲碣。失其義矣。王介甫和王微之高齋三首。『蕭條中原碣無主。嶮強又此憑江淮。』俗本誤作蕩無主。亦爲失之。

陵 京 阜 墳 冢 邱

古人於陵京阜墳冢邱等字。皆取山阜高大厚實之義以象。凡物之高大厚實。大抵皆稱美之詞。天保詩『如山如阜。如岡如陵。』是善頌善禱之證也。左傳『有內如陵。』謂大而實也。荀子致仕篇『節奏欲陵。』注陵峻也。峻卽高也。禮記檀弓『喪事雖遠。不陵節。』學記不陵節而施。陵越也。西京賦『陵重巘。』注陵升也。皆升高之義也。詩傳『京高邱也。』又曰『大阜也。』左傳『莫之與京。』言莫與比高也。西京賦『燎京薪。』謂積薪極高也。左傳『收晉尸以爲京觀。』謂積尸極高也。漢曰京兆。後世曰京師。兆衆也。師亦衆也。京則大也。釋名土山曰阜。言高厚也。詩『駟鐵孔阜。』以阜比馬之大也。『火烈具阜。』以阜比火之盛也。『爾穀既阜。』以阜比穀之多也。古歌『可以阜吾民之財。』西京賦『百物殷阜。』以阜比財物之富也。土之高且大者謂之墳。詩『艸牟墳首。』言其首極大也。周禮『司烜氏共墳燭庭燎。』言其燭極大也。『三墳五典。』言三皇之書。其義極大也。列子天瑞篇『墳如也。』亦形容其大也。『冢子冢適。』皆謂長子太子也。『冢婦。』大婦也。『冢卿冢宰。』謂六官之長。太宰也。『友邦冢君。』言大君也。『乃立冢土。』言大社也。漢書楚元王傳。『邱嫂。』謂長嫂大嫂也。易『顛頭拂經。於邱頤。征凶。』謂於高處求頤養也。以邱爲高也。孟子『得乎邱民。爲天子。』謂成聚之民也。以邱爲大也。推此以論。凡物之高大厚實者。皆可以陵京阜墳冢邱等字。擬議而形容之。末世綴文之士。但知阜字有高大富實之義。而不知墳冢等字。與之同類而并稱。又或以陵爲帝王所藏。京爲帝王所居。謂二字有崇高

之義。而於墳冢邱壟等字指爲不祥之文。蓋古字古義之不講久矣。

格 枝 柴 梗

說文「格木長貌。」國藩按。凡木之兩枝相交而互錯者。謂之格。以其枝條交互。故格字有相交之義焉。以其兩枝禁架。故格字有相拒之義焉。以其長條直暢。疎密成理。故格字又有規制整齊之意焉。是三者皆從本義引伸之者也。朋友曰交游。男女曰交媾。量買相通曰交易。陰陽相合曰交孚。木之枝條。兩相交際。亦猶是也。論語「有恥且格。」謂民之心。與上相交孚也。大學「致知在格物。」謂吾心之知。必與事物相麗相交。不可離物以求知也。書曰「格於上下。格於皇天。」詩曰「神之格思。」皆訓至也。皆交孚之義也。書曰「格汝舜。格汝衆。」詩曰「神保是格。」皆訓來也。皆引之來相交接也。舟與舟相觸。則必忤。枝與枝相拒。則不入。素問「陰厥且格。」注格拒也。周書「窮寇不格。」注格鬪也。荀子議兵篇「格者不合。」注格謂相捍拒者。後漢劉盆子傳注「相拒而殺之曰格。」通鑑「王賁攻齊。莫敢格者。驅羣羊而攻猛虎。不格明矣。」皆謂莫能拒禦也。凡曰捍格不勝。曰格格不入。曰廢格不行。曰沮格不進。皆相拒之義也。至於枝格相交。長短合度。疎密停勻。儼然若有規矩。木工爲窗格。有曰冰梅格。有曰卍字格者。即取象於樹條之格也。曰體格。曰風格。曰格律。曰格式。皆從此而引伸之也。孟子「惟大人爲能格君心之非。」注格正也。家語「口不吐訓格之言。」注格法也。禮緝衣「言有物而行有格。」注格舊法也。後漢傅燮傳注「格猶標準也。」凡皆規格之義也。書罔命「格其非心。」是亦取格正爲義。而孔疏曰「格謂檢括。」斯則整文生訓。有乖古意矣。論語「有恥且格。」當以交孚爲確義。集解曰「正也。」亦不免望文生訓之弊。至大學「格物」之說。聚訟千年。洎無定論。國藩以爲人心當麗事物以求知。不可舍事物而言知。朱子曰「至也。」是也。其曰「窮至事物之理。欲其極處。無不到。」則於格字求之太深。反多一障耳。說文「枝木別生幹也。」國藩按。幹直而專。枝分而雜。有歧雜之義焉。凡木之枝。斜挺旁出。如相扶倚。有撐持之義焉。杈枒森布。猝不可近。有拒禦之義焉。周秦古書。凡用枝字。大抵不出此三義。易曰「中心疑者。其辭枝。」荀

子解蔽篇曰。『心枝則無知。』此歧雜之義也。漢書叔孫通等傳曰。『廊廟之材。非一木之枝。莊子師曠之枝策也。』靈光殿賦。『環峽峽而枝拄。』此撐持之義也。史記項羽本紀。『諸將讙服。莫敢枝梧。』魯仲連傳。『枝桓公之心於壇坫之上。』此拒禦之義也。漢書地理志。『漢中涇洪枝柱。與巴蜀同俗。』注。『言意相節卻。不順從也。亦拒禦之義也。』歧雜者。枝字之本義。撐持與拒禦者。枝字引伸之義。後人不知引伸之義。每疑枝當作支。蓋古訓文不明也。

說文。『柴小木散材。』楚詞注。『枯木爲柴。』國藩按。小木枯枝。雜縛一束。謂之柴。世俗之通稱也。由柴字而引申之。有枯槁阻塞之義焉。莊子。『柴立其中央。』柴立猶枯坐也。所謂形如枯木也。外物篇。『柴生乎守。』柴謂梗塞也。言所以閉塞不通者。由於拘守太過也。天地篇。『趣舍聲色。以柴其內。』謂梗塞於胸中也。凡莊子篇中柴字。皆取枯槁阻塞之義。通鑑漢紀。『收楊震太尉印綬。震於是柴門謝賓客。』胡身之注曰。『柴塞其門也。』又魏紀。『朱桓言於吳王曰。曹休戰必敗。敗必走。走必由夾石挂車。此兩道皆險阨。若以萬兵柴路。則彼衆可盡。休可生虜。』胡身之注曰。『柴路謂以柴塞路也。』國藩按。柴卽塞也。以兵阻塞此路。非更以柴塞之也。胡氏於漢紀注近之。於魏紀注失之。

方言。『凡草木刺人。自關以東。或謂之梗。』國藩按。凡木之粗枝。無碎枝零葉者。世俗通謂之梗。在樹而生者謂之枝。斫伐在地而枯者。則謂之梗。謂之柴矣。梗字者粗直之義。又有阻塞之義。爾雅釋詁。『梗直也。』方言。『梗略也。』吳都賦注。『梗概粗言也。』東京賦注。『梗概不纖密也。』此粗直之義也。周禮。『女祝掌以時招梗禴禳之事。』鄭注。『梗禦未至也。謂未至之凶災。先梗而禦之。』此阻塞之義也。詩曰。『誰生厲階。至今爲梗。』此謂蕩蕩王道。而政化不能流行。忽至梗塞也。毛傳。『梗病也。』此望文生訓。非其義也。杜注左傳曰。『病也。』廣雅亦曰。『病也。』此承毛傳而誤者也。格枝柴梗四字。在後世以爲死字。在古人常引伸其義而活用之。苟明平死字活用之法。而周秦古書故訓。不可通者寡矣。

乾白素坐

史記張湯傳「始爲小吏乾沒。」晉書潘岳傳「汝當知足而乾沒不已乎。」服虔曰「乾沒射成敗也。」如淳曰「預居物以待之得利爲乾失利爲沒。」國藩按服如二說皆望文生訓非本義也。沒者謂沒入人之財物也。凡財物入官者曰「籍沒入官。」子女入官者曰「沒入爲奴爲婢。」或曰「沒入奚官。」乾沒者謂無故而沒入人財物。潘岳傳之「乾沒」謂無故而取高爵厚祿當知足止也。韓愈詩「乾愁萬斛湯自解。」謂無故而自愁也。乾死窮山竟何俟。謂無故而枉死也。又有曰白者與乾字義略相等。通鑑「晉劉毅上疏曰徒結白論而品狀相妨。」胡氏注曰「白素也。白論猶空言也。」又陳頴遺王導書曰「先白望而後實事。」胡注「白望猶空名也。」國藩按無故而獲譽望也。又世俗諺曰「白說。」謂無故而空說。曰「白饒。」謂空饒此一語也。又有曰素者與乾字白字義略相等。「不素餐兮。」注「素空也。謂無故而空餐也。」史記命曰「素封。」注「素空也。謂無故而自得比於封爵也。」又有曰坐者與乾字白字素字義亦相等。通鑑後出師表「使孫策坐大。遂并江東。」此謂無故而自致強大也。蕪城賦「驚砂坐飛。」此謂無故而自飛也。此四字注家多失之。又劉裕有「白直隊。」杜祐曰「白直無月給之數。」又元魏爾朱榮乞追贈亡者白民。贈郡鎮。胡注「身無官爵。謂之白民。」猶言白丁也。又唐元載取民間粟帛什取八九謂之白著。高雲有白著歌曰上元官吏務剝削江淮之人多白著。

疇人 等人 內人 何人

古者隨其所指。皆稱曰人。以職言。則如周官之牛人。犬人。雞人。龜人。酒人。漿人。醢人。鹽人是已。以地言。則如春秋之魯人。齊人。晉人。楚人。衛人。宋人。周人。周人是已。名之笑者。則曰聖人。神人。至人。天人。完人。全人。見莊子笑人。詩簡兮佳人。晉鑿冒子寔佳人名之惡者。則曰小人。匪人。讒人。佞人。儉人。奸人。敝人。亂人。見莊子徐無鬼。又有隨事而命名者。曰亡人。曰義人。曰叛人。曰降人。曰官人。韓愈王適墓志曰軍人。又有承上文而稱之者。史記曆書曰「

疇人子弟。』此承上文言明於曆算之人也。通鑑魏紀曰：『典章謂等人曰：「虜來十步乃白之。」等人曰：「十步矣。」又曰：「五步乃白。」等人懼。』此承上文言應募陷陣之人也。漢書舊不疑傳：『廷尉驗治，何人竟得姦詐。』此承上文言詐稱戾太子之人也。通鑑宋紀曰：『內人皆化弘微之讓，一無所爭。弘微曰：「內人尙能無言，豈可導之使爭乎。」』此承上文以妻妹及伯母兩姑爲內人也。凡此皆臨文立義，非有一定之主名也。今世俗以內人專指妻妾，蓋失其義。又或以疇人專指明於曆算者言之，亦爲失考。阮芸台相國作疇人傳，殆襲譌而承繆耳。

家人 白衣 齊民 平民

家人白衣皆如稱庶人也。漢書汲黯傳曰：『家人失火，屋比延燒。』師古曰：『家人猶言庶人家也。』馮唐傳：『夫士卒盡家人子，起田中從軍。』師古曰：『家人子，謂庶人家之子也。』高祖本紀：『不事家人，生產作業。』光武紀：『劉續不事家人居業。』皆謂不學庶人家之操作也。外戚傳：『一旦人主意有所移，雖欲爲家人，亦不可得。』師古曰：『家人言凡庶匹夫。』游俠傳：『子獨不見家人寡婦邪。』亦謂庶人家之寡婦也。通鑑劉向曰：『家人尙不欲絕種祠。』注：『家人謂庶人之家也。』漢書董賢欲求蕭咸女爲婦，咸曰：『此豈家人子所能堪邪。』師古曰：『家人猶言庶人也。』通鑑：『吳人多言祥瑞，章昭曰：此家人筐篋中物耳。』謂尋常人家皆有祥瑞之書也。通鑑：『魏文帝祀太祖於洛陽建始殿，如家人禮。』亦謂以庶人之禮祭之也。柳宗元文：『且家人父子尙不能以此自克，况號爲君臣者耶。』國藩按：此亦謂凡民父子，猶賈誼之言布衣昆弟也。書康誥曰：『亦惟君惟長，不能厥家人。』竊謂亦當指庶人百姓言之。各傳注皆訓不能齊家，失其義矣。白衣猶言布衣，卽齊民也。風俗通：『舜禹本以白衣，砥行顯名，升爲天子。』史記：『公孫弘以春秋白衣爲天子三公。』皆謂以齊民而爲天子之三公也。後漢書崔駰傳：『憲諫以爲不宜與白衣會。』孔融傳：『與白衣襦衡，跌蕩放言。』晉書閻續傳：『薦白衣南安朱冲可爲師傅。』皆謂布衣無職者也。晉書胡奮傳：『宣帝伐遼東，以白衣侍從左右。』通鑑：『薛

訥以滌河之役免官。以白衣爲防禦使。破吐蕃。劉仁軌以征遠免官。以白衣從軍。平百濟。五代南唐宋齊邱歸第。白衣待罪。皆謂落職之後。與庶人無異也。漢書兩龔傳。聞之白衣。師古曰。白衣給官府趨走賤人。若今亭長掌固之屬。此亦望文生訓。非通義也。三國志呂蒙傳。白衣搖櫓。作商賈人服。此亦謂齊民不著兵卒衣也。通鑑。山陽曹偉白衣與吳王交書求賂。帝聞而誅之。續晉陽秋。陶潛九月九日。望見白衣人送酒。皆謂平民也。歐陽公送田畫序曰。反衣白衣。顧寧人日知錄引李泌白衣。及趙世家願得黑衣之缺。若別有所謂白色之衣者。皆非確義。

文

文字者。以代語言。記事物名數而已。其流別大率十有一類。著作敷陳發明吾心之所欲言者。其爲類有二。無韻者曰著作。辯論之類。有韻者曰詞賦。敷陳之類。人有所著。吾以意從而闡明之者。其爲類一。曰敘述。注釋之類。以言告於人者。其爲類有三。自上告下曰詔誥檄令之類。自下告上曰奏議獻策之類。友朋相告曰書問箋牘之類。以言告於鬼神者。其爲類一。曰祝祭。哀弔之類。記載事實。以傳示於後世者。其爲類有四。記名人曰紀傳碑表之類。記事蹟曰敘述書事之類。記大綱曰大政典禮之類。記小物曰小事雜記之類。凡此十一類。古今文字之用。盡於此矣。其九類者。帖。舉小儒。夫人而能爲之。至詞賦敷陳之類。大政典禮之類。非博學通識。殆庶之才。烏足以涉其藩籬哉。

造句約有二端。一曰雄奇。一曰愜適。雄奇者。瓌瑋俊邁。以揚馬爲最。詭詭恣肆。以莊生爲最。兼擅瓌瑋詭詭之勝者。則莫盛於韓子。愜適者。僕之匡劉。宋之歐曾。均能細意熨貼。樸厲微至。雄奇者。得之天事。非人力所可強企。愜適者。詩書醞釀。歲月磨鍊。皆可日起而有功。愜適未必能兼雄奇之長。雄奇則未有不愜適者。學者之識。當仰窺於瓌瑋俊邁。詭詭恣肆之域。以期日進於高明。若施手之處。則端從平實愜適始。

友人錢塘戴醕士。熙嘗爲余言。李伯時畫七十二賢像。其妙全在鼻端一筆。面目精神。四肢百體。衣褶韡紋。皆與

其鼻端相準相肖。或端拱而凝思。或欹斜以取勢。或若列仙古佛之殊形。或若麟身蛇軀之詭趣。皆自其鼻端一筆以生變化。而卒不離其宗。國藩以謂斯言也。可通於古文之道。夫古文亦自有氣焉。有體焉。今使有人於此。足反居上。首顧居下。一經之大幾如要。一指之大幾如股。則見者謂之不成人。又或頤隱於齊。肩高於頂。五管在上。兩髀爲脅。則見者亦必反而卻走。爲文者或無所專注。無所歸宿。漫衍而不知所裁。氣不能舉其體。則謂之不成文。故雖長篇鉅製。其精神意趣之所在。必有所謂鼻端之一筆者。譬若水之有幹流。山之有主峯。畫龍者之有睛。物不能兩大。人不能兩首。文之主意。亦不能兩重。專重一處。而四體停勻。乃始成章矣。

知道者。時時有憂危之意。其臨文也。亦然。仲尼釋易之興也。其於中古乎。作易者其有憂患乎。又曰。『於稽其類。其衰世之意耶。』蓋深有見於前聖之危心遠慮。而揭其不得已而有言之故。卽夫子之釋咸四困三解上等十一卦之爻辭。抑何其惕厲而深至也。蓋飽經乎世變之多端。則常有跋前疐後之懼。博識乎義理之無盡。則不敢爲臆斷專決之辭。自孟子好爲直截俊拔之語。已不能如仲尼之謙謹。而況其下焉者乎。後世如諸葛武侯之書牘。紆餘簡遠。差明此義。而曾子固亦有宛轉深思之處。外此則辭與意俱盡。尙何謙謹之有。或辭之所至。而此心初未嘗置慮於其間。又烏知所謂憂危者哉。

斂 後 伸 縮

凡爲文用意。宜斂多而後少。行氣宜縮多而伸少。推之孟子不如孔子處。亦不過辭昌語快。用意稍後耳。後人爲文。但求其氣之伸。古人爲文。但求其氣之縮。氣恆縮則詞句多澀。然深於文者。固當從這裏過。

古文辭類纂正誤

桐城姚姬傳郎中鼐所選古文辭類纂。嘉道以來。知言君子。羣相推服。謂學古文者。求諸是而足矣。國藩服膺有年。竊見其中亦有小謬誤。茲摘舉如左。

司馬遷自序中。述其父太史公談論大家要指。諸家互有得失。而終以道家爲本。此自司馬氏父子學術相傳如

是其要指。則談啓之。其文辭則遷之爲之也。在自序篇中。僅文中之一段。故無首尾裁成之迹。今姚氏割此爲一篇。而標其目曰。太史公談論六家要指。失其義矣。遷作五帝本紀夏本紀所引堯典禹貢等書。尙多改經文之舊。此述其父之語。豈獨無所刪改。且如管晏列傳中管仲自述感鮑叔之言。豈得遂錄以爲管仲之文。淮陰傳中韓信說高祖定三秦一節。豈得遂錄以爲韓信之文耶。

漢書匡衡傳成帝卽位。衡上疏戒妃匹勸經學威儀之則曰云云。國藩按。此疏凡三條。妃匹一也。經學二也。威儀三也。自妃匹之際。至逐技能止。第一節言妃匹也。自竊見聖德純茂至宜究其意止。第二節言經學也。自臣又聞聖主之自爲動靜周旋至末。第三節言威儀也。今姚氏錄此文標其目曰。『戒妃匹勸經學疏。』是於三條獨遺其一。而於班書所敘若未之深究者。亦一失也。

甲乙

甲乙丙丁。古來皆以記事物之次第。有以爲官館之次第者。如曰甲館。漢書外戚傳曰甲第。漢書張敖傳甲觀。庚信哀江南賦曰丙殿。漢書元后傳曰丙舍。王羲之有丙舍墓田是也。有以爲帷帳之次第者。如曰甲乙之帳。漢書東方朔傳是也。有以爲科目之次第者。如唐明經本有甲乙丙丁四科。而其實唯乙科。明法以全通爲甲。通入以上爲乙是也。有以爲藏書之次第者。如唐四庫書以經史子集分甲乙丙丁四部。隋於東都觀文殿構屋貯書。東屋藏甲乙。西屋藏丙丁是也。有以爲卷帙之次第者。如李善注文選分賦甲賦乙以至賦癸。詩甲詩乙以至詩庚。司馬溫公通鑑分漢獻帝爲十卷。甲乙至癸。晉安帝亦十卷。甲乙至癸是也。有以爲律令之次第者。如曰令甲令乙令丙。後漢書章帝紀是也。有以爲算法者。如勾爲甲。股爲乙。弦爲丙。高爲甲。高對衝爲乙。平地爲丙。北極出地爲丁。南極出地爲戊是也。有以爲官名者。如漢之戊校尉己校尉。明之甲字庫大使及乙字丙字戊字庫大使是也。有以爲姓氏次第者。如南朝王謝。北朝崔盧。皆稱甲乙鉅族是也。有以爲假名者。如史記萬石君傳長子建次子甲次子乙次子慶及獄吏田甲。史記韓安國傳齊宦者徐甲。漢書高五

王傳罪生甲。穉生乙。穉非子。張甲王乙李丙趙丁。盤范嶺神。熾詣等是也。有以記夜時之早晚者。如本始元年四月壬戌甲夜。地節元年正月戊午乙夜。漢書天文志自甲夜至五鼓。三國志曹爽傳四月三日丙夜一籌。晉書趙王倫傳是也。推之凡物有高下品第者。皆可以甲乙區之。凡人等子虛烏有者。皆可以甲乙稱之。溫庭筠詩。『往日樓臺非甲帳。去時冠劍是丁年。』則失其義矣。

成敗無定

漢晁錯建議削藩。厥後吳楚七國反。景帝誅錯而事以成。明齊泰黃子澄建議削藩。厥後燕王南犯。建文誅齊黃而事以敗。我朝米思翰等建議削藩。厥後吳耿三叛並起。聖祖不誅米思翰而事以成。此三案者。最相類。或誅或宥。或成或敗。參差不一。士大夫處大事。決大疑。但當熟思是非。不必泥於往事之成敗。以遷就一時之利害也。唐昭宗以王室日卑。發憤欲討李茂貞。賁宰相杜讓能專主兵事。杜讓能再三辭謝。言他日臣徒受晁錯之誅。不能弭七國之禍。厥後李茂貞進逼興平。禁軍敗潰。京城大震。茂貞表請誅讓能。讓能曰。『臣固先言之矣。』上第下不能禁。曰。『與卿訣矣。』是日貶讓能梧州刺史。尋賜自盡。斯則無故受誅。其寃有甚於晁錯齊泰黃子澄。昭宗既強之於前。復誅之於後。此其所以爲亡國之君也。國藩在軍時。有一時與人定議。厥後敗挫。或少歸咎於人。不能無稍露於辭色者。亦以見理未明之故耳。

後唐路王盧石敬瑭之將反。李崧呂琦勸帝與契丹和親。薛文遇沮之。帝欲移石敬瑭鎮鄆州。文遇力贊成之。厥後敬瑭果反。引契丹大破唐兵。唐王見薛文遇曰。『我見此物肉顛。幾欲抽佩刀刺之。』大抵事敗而歸咎於謀主者。庸人之恆情也。

勉強

孟子曰。『口之於味也。目之於色也。耳之於聲也。鼻之於臭也。四肢之於安佚也。性也。有命焉。君子不謂性也。』人性本善。自爲氣稟所拘。物欲所蔽。則本性日失。故須學焉而後復之。失又甚者。須勉強而後復之。喪之哀也。不可

以僞爲者也。然袁麻苦塊，覩物而痛，劍自至，蹙蹙號呼，變節而涕洟隨之。是亦可勉強而致哀也。祭之敬也，不可以僞爲者也。然自盥至薦，將之以盛心，自朝至昃，勝之以強力。是亦可以勉強而致敬也。與人之和也，不可以僞爲者。也。然揖讓拜跪，人不答而已，則下之。筐篚豆籩，意不足而文則先之。是亦可以勉強而致和也。凡有血氣，必有爭心。人之好勝，誰不如我。施諸己而不顧，亦勿施於人。此強恕之事也。一日強恕，一日強恕，一事強恕，事事強恕。久之則漸近自然。以之修身，則順而安。以之涉世，則諧而祥。孔子之告子貢仲弓，孟子之言求仁，皆無先於此者。若不能勉強而聽其自至，以頑鈍之質，而希生安之效。見人之氣類與己不合，則隔膜棄置，甚或加之，以不能堪。不復能勉強自抑，舍己從人，傲情彰於身，乖戾著於外，鮮不及矣。莊子有言，刻核太甚，則人將以不肖之心應之。董生有言，強勉學問，則聞見博而知益明。強勉行道，則德日進而大有功。至哉言乎！故勉強之爲道，甚博而端自強恕始。

功效

天下之事，有其功必有其效。功未至而求效之遽臻，則妄矣。未施敬於民，而欲民之信我，鹵莽而耕，滅裂而耘，而欲收豐穫十倍之利，此必不得之數也。在易恆之初六曰：『浚恆貞凶，无攸利。』胡瑗釋之曰：『天下之事，必皆有漸，在平積日累久，而後能成其功。是故爲學既久，則道業可成。聖賢可到，爲治既久，則教化可行。堯舜可至。若是之類，莫不由積日累久而後至。固非驟而及也。』初六居下卦之初，爲事之始。責其長久之道，永遠之效，是猶爲學之始。欲亟至於周孔，爲治之始。欲化及於堯舜，不能積久其事，而求常道之深，或於真正之道，見其凶也。无攸利者，以此而往，必無所利。孔子曰：欲速則不達也。是故君子之用功也，如雞伏卵，不食，而生氣漸充。如燕營巢，不息，而結構漸牢。如滋培之木，不見其長，有時而大。如有本之泉，不舍晝夜，盈科而後進，放乎四海。但知所謂功，不知所謂效。而效亦徐徐以至也。

稽康曰：『夫爲稼於湯之世，偏有一概之功者，雖終歸於焦爛，必一概者後枯。然則一概之益，固不可誣也。』此

言有一分之功。必有一分之效也。程子曰：『修養之所以引年。國祚之所以祈天永命。常人之至於聖賢。皆工夫到這裏。則自有此應。』此言有真積力久之功。而後有高厚悠遠之效也。孟子曰：『宋人有閔其苗之不長而揠之者。謂其入曰。予助苗長矣。其子趨而往視之。苗則槁矣。』此言不俟功候之至而遽期速效。反以害之也。蘇軾曰：『南方多沒人。日與水居也。七歲而能涉。十歲而能浮。十五而能沒矣。北方之勇者。生不識水。問於沒人而求所以沒。以其言試之。河未有不溺者也。』此言不知致功之方。而但求速效。亦反以害之也。

君子小人

陳容有言曰：『仁義豈有常。蹈之則爲君子。違之則爲小人。』大哉言乎。仁者物我無間之謂也。一有自私之心。則小人矣。義者。無所爲而爲之謂也。一有自利之心。則小人矣。同一日也。朝而公正。則爲君子。夕而私利。則爲小人。同一事也。初念公正。則爲君子。轉念私利。則爲小人。惟聖罔念作狂。惟狂克念作聖。所爭祇有幾微。君子無終食之間違仁。造次必如是。顛沛必如是。一不如是。則流入小人而不自覺矣。所謂小人者。識見小耳。度量小耳。井底之蛙。所窺幾何。而自以爲絕倫之學。遠東之豕。所異幾何。而自以爲蓋世之勳。推之以子子爲義。以硜硜爲信。以齷齪爲廉。此皆識淺而易以自足者也。君臣之知。須積誠以相感。而動疑主恩之過薄。朋友之交。貴積漸以相孚。而動怨知己之罕覩。其或兄弟不相容。夫婦不相信。父子不相亮。此皆量褊而易以滋疑者也。君子則不然。廣其識。則天下之大。棄若敝屣。堯舜之業。視若浮雲。宏其度。則行有不得。反求諸己。己所不欲。勿施於人。烏有所謂自私自利者哉。不此之求。而詡詡然號於衆曰：『吾君子也。』當其自詡君子。深信不疑之時。識者已嗤其爲小人矣。

越寨攻敵

行軍之道。有依次而進者。有越敵人所守之寨。而先攻他處者。姑以通鑑所紀兵事言之。宋明帝泰始二年。晉安王子勛之亂。諸軍與子勛將袁頤相拒於濃湖。久未決。龍驤將軍張興世建議曰：『賊據上流。兵強地勝。我雖持

之有餘。而制之不足。若以奇兵數千。潛出其上。因險而壁。見利而動。使其首尾周遑。進退疑阻。中流旣梗。糧運自艱。此制賊之奇也。錢溪江岸最狹。去大軍不遠。下臨洄湫。船下必來泊岸。又有橫浦。可以藏船。千人守險。萬夫不能過。衝要之地。莫出於此。『沈攸之。吳喜並贊其策。乃選戰士七千。輕舸二百。配與世。興世率其衆。泝流稍上。尋復退歸。如是者累日。賊將劉胡聞之。笑曰。『我尙不敢越彼下取揚州。張興世何人。欲輕據我上。』不爲之備。一夕四更。值便風。興世舉帆直前。渡湖白。過鵲尾。胡旣覺。乃遣其將胡靈秀將兵於東岸翼之而進。戊戌。夕。與世宿景洪浦。靈秀亦留。興世潛遣其將黃道標帥七十舸。徑趨錢溪立營寨。己亥。興世引兵進據之。靈秀不能禁。庚子。劉胡自將水步二十六軍來攻錢溪。將士欲迎擊之。興世禁之曰。『賊來尙遠。氣盛而矢驟。驟旣易盡。盛亦易衰。不如待之。』令將士治城如故。俄而胡來轉近。船入洄湫。興世命壽寂之任農夫帥壯士數百擊之。衆軍相繼並進。胡收兵而下。興世遂於錢溪立城。國藩按。是時官軍在下游豬圻。賊軍袁顛等在上游之濃湖。劉胡等又在上游之鵲尾。更上乃爲錢溪。越濃湖鵲尾兩寨而上。立城於錢溪。此險途也。厥後賊屢攻錢溪不勝。糧運中梗。而鵲尾濃湖並以續降。此越寨進攻而得勝者也。

泰始三年。魏尉元上表。言『賊向彭城。必由清泗過宿豫。歷下邳。趨青州。亦由下邳泝水經東安。此數者皆爲賊用師之要。今若先定下邳。平宿豫。鎮淮陽。戍東安。則青冀諸鎮。可不攻而克。若四城不服。青冀雖拔。百姓狼顧。猶懷僥倖之心。臣愚以爲宜釋青冀之師。先定東南之地。斷劉或北顧之意。絕愚民南望之心。如此則淮北自舉。暫勞永逸。』國藩按。宋與魏歷世兵爭。宋有青州歷城徐州諸鎮。遠在海岱。與魏接畛。而下邳宿豫泝水東安四城。乃在淮南。去魏尙遠。魏越青州諸鎮而進攻四城。此險途也。厥後四城破。而青州歷城徐州諸鎮。相繼沒於魏。此越鎮進攻而勝者也。

梁簡文帝二年。侯景之變。郢州刺史蕭方諸以徐文盛軍在西陽不設備。西陽卽今貴州。侯景以江夏空虛。使宋子仙任約帥精騎四百。由淮內襲郢州。丙午。大風疾雨。天色晦冥。子仙等入城。方諸迎拜。遂擒鮑泉虞豫。送於景。

所。景因便風。中江舉帆。遂越徐文盛等軍直上。入江夏。文盛衆懼而潰。國藩按。侯景與徐文盛皆在黃州夾江築壘。乃越徐軍而上入江夏。此險途也。而江夏以無備而破。徐軍以失勢而潰。此越寨進攻而勝者也。

陳文帝天嘉元年。王琳屯西岸之柵口。侯瑱屯東岸之蕪湖。相持百餘日。旋均出江外。隔洲而泊。二月丙申。西南風急。琳引兵直趨建康。瑱等徐出蕪湖躡其後。西南風翻爲瑱用。琳擲火炬以燒陳船。皆反燒其船。瑱發拍以擊琳艦。又以蒙衝小船擊其艦。琳軍大敗。軍士溺死什二三。餘皆棄舟登岸。國藩按。王琳與侯瑱同屯蕪湖之上。琳乃越瑱軍而直下金陵。此險途也。而瑱軍自後躡之。反爲所破。此越寨進攻而敗者也。

唐貞觀十九年。太宗親征高麗。旣拔遼東蓋牟諸城。至安市。將決戰。高麗靺鞨合兵爲陣。長四十里。江夏王道宗曰。『高麗傾國以拒王師。平壤之守必弱。願假臣精兵五千。覆其本根。則數十萬之衆。可不戰而降。』上不應。後攻安市。竟不能拔。降將請先攻烏骨城。衆議不從。遂自安市班師。國藩按。道宗請越安市而進攻平壤。此雖險途。而實制勝之奇兵也。太宗不從。無功而返。此不能越攻而失者也。

安史之亂。李泌請命建甯王俊爲范陽節度大使。並塞北出。與李光弼南北犄角。以取范陽。胡三省注曰。泌欲使建寧自靈夏並豐蔚雲朔之塞直擣媯檀攻范陽之北。光弼自太原取恆定以攻范陽之南。覆其巢穴。賊退則無所歸。留則不獲安。然後大軍四合而攻之。必成擒矣。上悅。已而不果行。國藩按。是時大軍在扶風。郭子儀在馮翊。李光弼在太原。勢宜先取兩京。李泌欲先搗范陽賊巢。此亦制勝之奇兵也。事不果行。致史思明再爲關洛之患。此亦不能越攻而失者也。

元和十二年。淮蔡之役。李祐言於李愬曰。『蔡之精兵。皆在洄曲及四境拒守。守州城者。皆羸老之兵。可以乘虛直抵其城。比賊將聞之。元濟已成擒矣。』愬然之。十月辛未。李愬李祐李忠義李進誠軍出。東行六十里。夜至張柴村。盡殺其戍卒。及烽子。據其柵。命士少休。食乾糲。整羈勒。約義成軍五百人鎮之。以斷洄曲及諸道橋梁。復夜引兵出門。時大風雪。旌旗裂。夜半雪愈甚。行七十里。四鼓。愬至蔡州城下。無一人知者。李祐李忠義鑿其城爲坎。

以先登，愬入居元濟外宅，以檻車送元濟詣京師。國藩按：蔡之精兵，盡在洵曲，董重質麾下。李愬越之而直入蔡州，此越寨進攻而勝者也。

朱梁均王四年，楚岳州刺史許德勳將水軍巡邊，夜分南風暴起，都指揮使王環乘風趨黃州，以繩梯登城，徑取州署，執吳刺史馬鄴，大掠而還。德勳曰：『鄂州將邀我，宜備之。』環曰：『我軍入黃州，鄂人不知，奄過其城，彼自救不暇，安敢邀我？』乃展旗鳴鼓而行，鄂人不敢逼。國藩按：楚之岳州，東北與吳爲鄰，嘉魚、陸口等，吳必立寨設備，乃王環越之而直趨黃州，此越寨進攻而勝者也。

唐同光元年，後唐與朱梁相拒於楊劉德勝之間。時梁將段凝軍臨河之南，卽檀州今開州王彥章進逼鄆州。今東平府唐臣李紹宏等請棄鄆州與梁約和，帝獨召郭崇韜問之，對曰：『降者皆言大梁無兵，陛下若留兵守魏，保楊劉，自以精兵長驅入汴，彼城中旣空虛，必望風自潰，苟僞主授首，則諸將自降矣。』帝曰：『此正合朕志。』冬十月壬申，帝以大軍自楊劉濟河，癸酉至鄆州，甲戌圍中都城，破之，擒王彥章，帝召諸將問進退之計，諸將請先下東方諸鎮城，然後觀隙而動。康延孝李嗣源請亟取大梁，從之。乙亥，帝發鄆州中都，丁丑至曹州，己卯至大梁，滅梁。壬午，段凝將其衆五萬，自滑州濟河入援，解甲請降。國藩按：郭崇韜之初議直取大梁也。時梁將王彥章軍在鄆州，段凝軍在河上，越兩寨而進攻，此險途也。厥後破中都，擒王彥章，而段凝猶在河北，越一寨而進攻，亦險機也。然段凝隔於河北，若自白馬南濟，則阻於大河，若自下流直濟，則一阻於大河，再阻於新決之護駕水，勢難入援，遂得直取汴梁，以成大功。此越寨進攻而勝者也。

以上九事，張興世之據錢溪，宋子仙之取鄂州，許德勳之下黃州，皆水路越攻而勝。王琳之下金陵，以水路越攻而敗。尉元之取下邳四城，李愬之入蔡州，郭崇韜之策汴梁，以陸路越攻而得之。李道宗之策平壤，李泌之策范陽，以陸路不越攻而失之。成敗得失，固無一定之軌轍也。咸豐四年十月十一日，賊目陳玉成據蘄州，秦日綱據田家鎮，我舟師越蘄州而直下，十三日，攻破田家鎮，十四日，蘄州之賊亦潰。此越寨進攻而勝者也。十一月十五

日水陸各軍會於九江。賊目林啓據九江府。黃文金據湖口。石達開羅大綱等同在湖口。我舟師彭玉麟等十六日越九江而下攻湖口。陸軍羅澤南等十二月初五日下午攻湖口。十二日水師敗挫。廿四日陸軍亦無利而歸。此越寨進攻而敗者也。咸豐六年五月初二日。武漢黃州未破。楊載福以舟師駛下直至九江。七年九月二十八日。九江安慶未破。楊載福以舟師駛下。直至蕪縣。往來如飛。此越寨進攻而勝者也。故知勝敗無常。視將才爲轉移耳。當時越九江而下攻湖口之策。發於國藩。定於羅君羅山劉君孟容四人。事敗之後。或深咎此策之失。且專歸罪於劉君者。非事實也。

兵

凡用兵。主客奇正。夫人而能言之。未必果能知之也。守城者爲主。攻者爲客。守營壘者爲主。攻者爲客。中途相遇。先至戰地者爲主。後至者爲客。兩軍相持。先吶喊放鎗者爲客。後吶喊放鎗者爲主。兩人持矛相格鬪。先動手。第一下者爲客。後動手。卽格鬪而卽戰者爲主。中間排隊迎敵爲正兵。左右兩旁抄出爲奇兵。屯宿重兵。堅扎老營。與賊相持者爲正兵。分出遊兵。飄忽無常。伺隙狙擊者爲奇兵。意有專向。吾所持以禦寇者爲正兵。多張疑陣。示人以不可測者爲奇兵。旌旗鮮明。使敵不敢犯者爲正兵。羸馬瘁卒。偃旗息鼓。本強而故示以弱者爲奇兵。建旗鳴鼓。屹然不輕動者爲正兵。佯敗俾退。設伏而誘敵者爲奇兵。忽主忽客。忽正忽奇。變動無定時。轉移無定勢。能一一區而別之。則於用兵之道。思過半矣。

兵者。陰事也。哀戚之意。如臨親喪。肅敬之心。如承大祭。庶爲近之。今以牛牟犬豕而就屠烹。見其悲號於割劍之頃。宛轉於刀俎之間。仁者將有所不忍。况以人命爲浪博輕擲之物。無論敗喪也。卽使倖賤而死。傷相望。斷頭洞胸。折臂失足。血肉狼籍。日陳吾前。哀矜之不遑。喜於何有。故軍中不宜有歡欣之象。有歡欣之象者。無論或爲和悅。或爲驕盈。終歸於敗而已矣。田單之在即墨。將軍有死之心。士卒無生之氣。此所以破燕也。及其攻狄也。黃金橫帶。而騁乎淄澠之間。有生之樂。無死之心。魯仲連竟其必不勝。兵事之宜慘戚。不宜歡欣。亦明矣。嘉慶季年。名

將楊選春屢立戰功。嘗語人曰：『吾每臨陣。行間覺有熱風吹拂面上者。是日必敗。行間若有冷風。身體似不禁寒者。是日必勝。』斯亦肅殺之義也。

克勤小物

古之成大業者。多自克勤小物而來。百尺之數。基於平地。千丈之帛。一尺一寸之所積也。萬石之鍾。一銖一兩之所累也。文王之聖。而自朝至於日中昃。不違暇食。周公仰而思之。夜以繼日。幸而得之。坐以待旦。仲山甫夙夜匪懈。其勤若此。則無小無大。何事之敢慢哉。諸葛忠武爲相。自杖罪以上。皆親自臨決。杜慧度爲政。織密一如治家。陶侃綜理密微。雖竹頭木屑。皆儲爲有用之物。朱子謂爲學須銖積寸累。爲政者亦未有不由銖積寸累而克底於成者也。秦始皇衛石量書。魏明帝自案行尙書事。隋文帝衛士傳餐。皆爲後世所譏。以爲天子不當親理細事。余謂天子或可不親細事。若爲大臣者。則斷不可不親。陳平之問錢穀。不知問刑獄。不知未可以爲人臣之法也。凡程功立事。必以目所共見者爲效。苟有事必見其賦。苟有衣必見其敝。苟爲博物君子。必見其著述滿家。抄撮累篋。苟爲躬行君子。必見其容色之碎盞。徒黨之感慕。苟善治民。必見其所居民悅。所去見思。苟善治軍。必見其有戰則勝。有攻則取。若不以目所共見者爲效。而但憑心所懸揣者爲高。則將以虛薄爲辯。而賤名檢。以養望爲賢。而笑勤恪。何晏鄧颺之徒。流風相扇。高心而空腹。尊己而傲物。大事細事。皆墮壞於冥昧之中。親者賢者。皆見拒於千里之外。以此而冀大業之成。不亦悖哉。孔子許仲弓南面之才。而雍以居敬爲行簡之本。蓋必能敬乃無廢事也。我宣宗成皇帝臨御三十年。勤政法祖。每日寅正而興。省覽章奏。卯正而畢。事無留滯。道光二十九年。聖躬不豫。自夏徂冬。猶力疾治事。不趨簡便。三十年正月十四日。始命皇四子代閱章奏。召見大臣。即今上皇帝也。對事甫畢。而宣宗龍馭上賓。蓋以七十天子。篤病半載。其不躬親庶政者。僅彌留之頃耳。爲人臣者。其敢自暇自逸。以不親細事自諉乎。

千盾攏牌

周禮夏官司兵掌五盾注。干櫓之屬。其名未盡聞也。司戈盾及舍設藩盾。行則斂之。注藩盾。盾可以藩衛者。如今之扶蘇。與說文『盾殿也。所以扞身蔽目。』揚子方言『盾自關而東。或謂之殿。或謂之干。關西謂之盾。』說文『櫓。大盾也。』玉篇『櫓。城上守禦望樓。韻會戰陣高巢車亦爲櫓。』太公六韜篇『陷堅陣。敗強敵。武翼大櫓。提翼小櫓。』國藩按。干也。盾也。櫓也。其製不可得而盡見。然大抵干盾形制較小。一手執之。可以衛身蔽目。藩盾則形制自大。或二三人執之不等。城上望樓之櫓。則一方倚城。三方必有遮蔽戰陣。巢車之櫓。則一方出入。三方必有遮蔽。與盾之僅蔽一面者異矣。至六韜之大櫓小櫓。則亦僅蔽一面。差同干盾也。

通鑑晉義熙八年。劉裕至荊州伐劉毅。軍人擔彭排戰具。注彭排即今之旁排。所以扞鋒矢。孫愐曰。櫓彭排。魏名曰彭旁也。在旁排敵禦攻也。梁普通五年。北魏將崔延伯等既破莫折天生。進擊万俟醜奴於安定。別造大盾。內爲鎖柱。使壯士負以趨。謂之『排城。』置韜重於中。戰士在外。唐代宗初立。僕固懷恩等破史朝義於洛陽。馬璘單騎奮擊。奪賊兩牌。突入萬衆中。賊左右披靡。注牌古謂之楯。晉宋之間謂之彭排。南方以皮。鷄竹爲之。捍敵。北人以木爲之。左傳樂祁以楊楯買芻。蓋北方之用木也。久矣。國藩按。劉毅之『彭排。』馬璘之牌。即古之盾也。崔延伯之『排城。』則較大矣。殆與周禮之藩盾。六韜之大櫓相類。

明威繼光紀效新書中。有立牌。即古之盾也。有圓牌。即今之藤牌也。統謂之曰『攔牌。』又有所謂『剛柔牌』者。其法以生漆牛皮蒙於外。而以湖綿搵成小團。及頭髮裝於內。蓋戚氏自以巧思製造。非有所師於古也。古之干盾。所以捍禦矢石。今之攔牌。所以捍禦礮子。礮子所當。無堅不破。豈矢石所可同年而語哉。國藩初辦水師時。嘗博求禦礮子之法。以魚網數層。懸空張挂。礮子一過即穿。不能禦也。以絮被漬溼張挂。礮子一過即穿。不能禦也。以生牛皮懸於船旁。以藤牌陳於船梢。不能禦也。又作數層厚牌。以竹鱗排於外爲一層。牛皮爲一層。水絮爲一層。頭髮爲一層。合而成牌。亦不能禦礮。以此而推。戚氏之『剛柔牌。』不足以禦礮子明矣。烏鎗子如梧子大者。或有法以禦之。檣鎗子劈山礮子。凡如大黃豆以上者。並無拒禦之法。近時楊軍門載福等深知礮子之無可

避遂屏棄魚網水絮牛皮等物一切不用。直以血肉之軀植立船頭。可避者避之。不可避者聽之。而其麾下水師弁兵亦相率而植立直前。無所迴避。明於此義。而古來千盾櫓排諸器皆可廢矣。友人劉騰鴻峙銜治軍。刁斗森嚴。虜不可犯。臨陣則埋根行首。堅立如山。有名將之風。惟過於自矜。在武昌時。嘗獨立城下。呼賊以礮擊之。賊發十餘礮。不能中。堅坐良久。乃還。在瑞州時亦如是。卒以殉難。殞我壯士。人百莫贖。此則剛毅太過。於好謀而成之道。少有違爾。

余初不解造羣子之法。以生鐵令鑄工鑄之。渣滓未融。經藥輒散。且多蜂眼。鳴而不能及遠。乃與吳坤修竹莊商。用熟鐵打造。其法以鐵先鍊成直條。每條燒紅其端。截出半寸。打成圓顆。又燒其端。又打成顆。每顆如葡萄大。後至江西。商之姚鑲亦以此法打造。姚君又作爲鐵模半渦。截鐵條之端。置模中。宛轉錘鍊。圓滑可愛。於是能及遠較多。一里有奇也。今湖南湖北江西三省。打造羣子。均用此法。每礮用百餘顆。多者或三四百顆。噴薄而出。如珠如雨。殆無隙地。嘗之輒碎。不仁之器。蓋莫甚於此矣。然海疆尙未靜謐。此其亟宜講求者也。

筆記十二篇

才德

司馬溫公曰。『才德全盡。謂之聖人。才德兼亡。謂之愚人。德勝才。謂之君子。才勝德。謂之小人。』余謂德與才。不可偏重。譬之於水。德在潤下。才即其載物溉田之用。譬之於木。德在曲直。才即其舟楫棟樑之用。德若水之源。才即其波瀾。德若木之根。才即其枝葉。德而無才。以輔之。則近於愚人。才而無德。以主之。則近於小人。世人多不甘以愚人自居。故自命每願爲有才者。世人多不欲與小人爲緣。故觀人每好取有德者。大較然也。二者既不可兼。與其無德而近於小人。毋甯無才而近於愚人。自修之方。觀人之術。皆以此爲衡可矣。吾生平短於才。愛者或謬以德器相許。實則雖曾任艱鉅。自問僅一愚人。幸不以私智詭譎鑿其愚。尙可告後昆耳。

誠神

大聖固由生知。而其平生造次。克念精誠。亦迥異庸衆。聞韶盡善。則亡味。至於三月。讀易算過。則韋編。至於三絕。文王則如見於琴。周公則屢入於夢。至誠所積。神奇應焉。故麟見郊而增感。鳳不至而興嘆。蓋其平日力學所得。自信焉。天地鬼神所不違也。卽至兩楹夢奠之際。禱神爲臣之請。亦皆守禮循常。較然不欺。其後曾子易簧。誦數菟之詩。而自幸知免。猶有聖門一息不懈之風。後世若邵子之終。馬程諸人咸集。朱子之沒。黃蔡諸子并臨。亦皆神明朗徹。不負所學。昔人云。『善吾生者。乃所以善吾死也。』若非精誠積於畢生。神志竇於夙昔。豈能取辦於臨時哉。

兵氣

田單攻狄。魯仲連策其不能下。已而果三月不下。田單問之。仲連曰。『將軍之在卽墨。坐則織黃。立則仗鍤。爲士卒倡。將軍有死之心。士卒無生之氣。聞君言莫不揮涕奮臂而欲戰。此所以破燕也。當今將軍東有夜邑之奉。西有淄上之娛。黃金橫帶。而騁乎淄澠之間。有生之樂。無死之心。所以不勝也。』余嘗深信仲連此語。以爲不刊之論。同治三年。江甯克復後。余見湘軍將士卽驕盈娛樂。慮其不可復用。全行遣撤歸農。至四年五月。余奉命至河南山東勘檢。湘軍從者極少。專用安徽之淮勇。余見淮軍將士。雖有振奮之氣。亦乏憂危之懷。竊用爲慮。恐其不能平賊。莊子云。『兩軍相對。哀者勝矣。』仲連所言以憂勤而勝。以娛樂而不勝。亦卽孟子『生於憂患。死於安樂』之指也。其後余因疾病。疏請退休。遂解兵柄。而合肥李相國卒用淮軍。以削平捻匪。蓋淮軍之氣尙銳。憂危以感士卒之情。振奮以作三軍之氣。二者皆可以致勝。在主帥相時而善用之已矣。余專主憂勤之說。殆知其一而不知其二也。聊志於此。此識吾見理之偏。亦見古人格言至論。不可舉一概百。言各有所當也。

勉強

魏安釐王問天下之高士於子順。子順以魯仲連對。王曰。『魯仲連強作之者。非體自然也。』子順曰。『人皆作

之。作之不止。乃成君子。作之不變。習與體成。則自然也。余觀自古聖賢豪傑。多由彊作而臻絕詣。『淮南子曰。』『功可彊成。名可彊立。』中庸曰。『或勉強而行之。及其成功一也。』近世論人者。或曰某也。向之所爲不如是。今強作如是。是不可信。沮自新之途。而長偷惰之風。莫大乎此。吾之觀人。亦嘗有因此而失賢才者。追書以志吾過。

忠勤

開國之際。若漢唐之初。異才畸士。豐功偉烈。隨舉雲興。蓋全係乎天運。而人事不得與其間。至中葉以後。君子欲有所建樹。以濟世而康屯。則天事居其半。人事居其半。以人事與天事爭衡。莫大乎忠勤二字。亂世多尙巧僞。惟忠者可以革其習。未俗多偷惰。惟勤者可以遏其流。忠不必有過人之才智。盡吾心而已矣。勤不必有過人之精神。竭吾力而已矣。能剖心肝以奉至尊。忠至而智亦生焉。能苦筋骸以捍大患。勤至而勇亦出焉。余觀近世賢哲。得力於此二字者。頗不乏人。余亦忝附諸賢之後。謬竊虛聲。而於忠勤二字。自愧十不逮一。吾家子姪。儻將來有出任艱巨者。當勵忠勤以補吾之闕憾。忠之積於平日者。則自不妄語。始勤之積於平日者。則自不晏起始。

才用

雖有良藥。苟不當於病。不逮下品。雖有賢才。苟不適於用。不逮庸流。梁麗可以衝城。而不可以窒穴。犛牛不可以捕鼠。騏驎不可以守閭。千金之劍。以之析薪。則不如斧。三代之鼎。以之墾田。則不如耜。當其時。當其事。則凡材亦奏神奇之效。否則鉅錚而終無所成。故世不患無才。患用才者不能器使而適宜也。魏無知論陳平曰。『今有尾生孝己之行。而無益勝負之數。陛下何暇用之乎。』當戰爭之世。苟無益勝負之數。雖盛德亦無所用之。余生平好用忠賢者流。今老矣。始知藥之多。不當於病也。

史書

史記敘韓信破魏豹以木罌渡軍。其破龍且以囊沙壅水。竊嘗疑之。魏以大將柏直當韓信。以騎將馮敬當灌嬰。以步將項它當曹參。則兩軍之數。殆亦各不下萬人。木罌之所渡幾何。至多不過二三百人。豈足以制勝乎。沙壅

壅水。下可滲漏。旁可橫溢。自非興工嚴塞。斷不能築成大堰。壅之使下流竟絕。如其寬河盛漲。則塞之固難。決之亦復不易。若其小港微流。易塞易決。則決後未必遂不可涉渡也。二者揆之事理。皆不可信。敘兵事。闡善於史記。史公敘兵。莫詳於淮陰傳。而其不足據如此。孟子曰。『盡信書。則不如無書。』君子之作事。既徵諸古籍。諷諸人言。而又必慎思而明辨之。庶不至冒昧從事耳。

陽剛

漢初功臣。惟樊噲。氣質較粗。不能與諸賢並論。淮陰侯所差。與爲伍者也。然吾觀其人。有不可及者二。沛公初入咸陽。見秦宮室帷帳狗馬。重寶婦女。千數。意欲留居之。噲輒諫止。謂此奢麗之物。乃秦之所以亡。願急還霸上。無留宮中。一也。高祖卽病臥禁中。詔戶者無得入。羣臣。噲獨排闥直入。諫之。以昔何其勇。今何其儆。且引趙高之事。以爲鑒。二也。此二事者。乃不愧大人格。君子之所爲。蓋人稟陽剛之氣最厚者。其達於事理。必有不可掩之偉論。其見於儀度。必有不可犯之英風。噲之鴻門拔帷。拔劍割鹿。與夫霸上還軍之請。病中排闥之諫。皆陽剛之氣之所爲也。未有無陽剛之氣。而能大有立於世者。有志之君子。養之無害可耳。

漢文帝

天下惟誠不可掩。漢文帝之謙讓。其出於至誠者乎。自其初至代邸。西鄉讓三。南鄉讓再。已歉然不敢當帝位之尊。厥後不肯建立太子。增祀不肯祈福。與趙佗書曰。側室之子。曰棄外奉藩。曰不得不立。臨終遺詔。戒重服。戒久臨。戒厚葬。蓋終始自覺不稱天子之位。不欲享至尊之奉。至於馮唐衆辱。而卒使盡言。吳王不朝。而賜以几杖。勾羣臣言朕過失。匡朕不逮。其謙讓皆發於中心。惻怛之誠。蓋其德爲三代後。僅見之賢主。而其心則自愧不稱帝王之職而已矣。夫使居高位者。而常存愧不稱職之心。則其過必鮮。况大君而存此心乎。吾嘗謂爲大臣者。宜法古帝王者三事。舜禹之不與也。大也。文王之不怠也。勤也。漢文之不稱也。謙也。師此三者。而出於至誠。其免於戾矣乎。

周亞夫

周亞夫剛正之氣。已開後世言氣節者之風。觀其細柳勞軍。天子致容。已凜然不可犯。厥後將兵。不救梁王之急。不肯侯王信。不肯王匈奴。六人皆秉剛氣。而持正論。無所瞻顧。無所屈撓。後世西漢若蕭望之。朱雲。東漢若楊震。孔融之徒。其風節略與相近。不得因其死於非命而薄之也。惟其神鋒太雋。瞻矚太尊。亦頗與諸葛恪相近。是乃取禍之道。君子師其剛而去其傲可耳。

言命

孟子言治亂興衰之際。皆由人事主之。初不關乎天命。故曰。『以齊王由反手也。』曰。『可使制梃以撻秦楚之堅甲利兵。』皆以人謀而操必勝之權。所謂禍福無不自己求之也。董子亦曰。『治亂興廢。在於己。非天降命。不可得反。』與孟子之言相合。孔子曰。『天生德於予。桓魋其如予何。天之未喪斯文。匡人其如予何。』亦似深信在己者之有權。然鳳鳥不至。河不出圖。有吾已矣夫之歎。又似以天命歸諸不可知之數。故答子服景伯曰。『道之將行命也。道之將廢命也。』語南宮适曰。『君子若人。尙德若人。』其隱然以天命爲難測。聖賢之言微旨不同。在學者默會之焉耳。

功效

苟有富必能潤屋。苟有德必能潤身。不必如孔子之溫良恭儉。孟子之晬面盎背。而後爲符驗也。凡盛德之君子。必有非常之儀範。是真龍必有雲。是真虎必有風。不必如程門之游楊尹謝。朱門之黃蔡陳李。而後爲響應也。凡修業之大人。必有景從之徒黨。斯二者。其幾甚微。其效甚著。非實有諸己。焉可倖至哉。

課程十一一條道光二十一年在京日記

一 敬整齊嚴肅。無時不懼。無事時。心在腔子裏。應事時。專一不雜。清明在躬。如日之升。

- 二 靜坐。每日不拘何時。靜坐四刻。體驗來復之仁心。正位凝命。如鼎之鎮。
- 三 早起。黎明即起。醒後勿露戀。
- 四 讀書不二。一書未完。不看他書。東繙西閱。徒務外爲人。
- 五 讀史。丙申年購念三史。大人曰。『爾借錢買書。吾不惜極力爲爾彌縫。爾能圈點一遍。則不負我矣。』嗣後每日圈點十葉。間斷不孝。
- 六 謹言。刻刻留心。第一工夫。
- 七 養氣。氣藏丹田。無不可對人言之事。
- 八 保身。十二月奉大人手諭曰。『節勞。節欲。節飲食。』時時當作養病。
- 九 日知所亡。每日讀書記錄心得語。有求深意是徇人。
- 十 月無忘所能。每月作詩文數首。以驗積理之多寡。養氣之盛否。不可一味耽著。最易塌心喪志。
- 十一 作字。飯後寫字半時。凡筆墨應酬。當作自己課程。凡事不可待明日。愈積愈難清。
- 十二 夜不出門。曠功疲神。切戒切戒。

日課四條 同治十年金陵節署中日記

一曰慎獨則心安。自修之道。莫難於養心。心既知有善。知有惡。而不能實用其力以爲善去惡。則謂之自欺。方寸之自欺與否。蓋他人所不及知。而已獨知之。故大學之誠意章。兩言慎獨。果能好善如好好色。惡惡如惡惡臭。力去人欲。以存天理。則大學之所謂自慊。中庸之所謂戒慎恐懼。皆能切實行之。卽曾子之所謂自反而縮。孟子之所謂仰不愧。俯不怍。所謂養心莫善於寡欲。皆不外乎是。故能慎獨。則內省不疚。可以對天地。質鬼神。斷無行有不謙於心。則鍛之時。人無一內愧之事。則天君泰然。此心常快足寬平。是人生第一自強之道。第一尋樂之方。

守身之先務也。

二曰主敬則身強。敬之一字。孔門持以教人。春秋士大夫。亦常言之。至程朱則千言萬語。不離此旨。內而專靜純一。外而整齊嚴肅。敬之工夫也。出門如見大賓。使民如承大祭。敬之氣象也。修己以安百姓。篤恭而天下平。敬之效驗也。程子謂上下一於恭敬。則天地自位。萬物自育。氣無不和。四靈畢至。聰明睿知。皆由此出。以此事天饗帝。蓋謂敬則無美不備也。吾謂敬字切近之效。尤在能回人肌膚之會。筋骸之束。莊敬日強。安肆日偷。皆自然之徵應。雖有衰年病軀。一遇壇廟祭獻之時。戰陣危急之際。亦不覺神爲之悚。氣爲之振。斯足知敬能使人身強矣。若人無衆寡。事無大小。一一恭敬。不敢懈怠。則身體之強健。又何疑乎。

三曰求仁則人悅。凡人之生。皆得天地之理以成性。得天地之氣以成形。我與民物。其大本乃同出一源。若但知私己而不知仁民愛物。是於大本一源之道已悖而失之矣。至於尊官厚祿。高居人上。則有拯民溺救民飢之責。讀書學古。粗知大義。卽有覺後知覺後覺之責。若但知自了而不知教養庶彙。是於天之所以厚我者辜負甚大矣。孔門教人。莫大於求仁。而其最切者。莫要於「欲立立人。欲達達人」數語。立者自立不懼。如富人百物有餘。不假外求。達者四達不悖。如貴人登高一呼。羣山四應。人孰不欲己立己達。若能推以立人達人。則與物同春矣。後世論求仁者。莫精於張子之西銘。彼其視民胞物與。宏濟羣倫。皆事天者性分當然之事。必如此乃可謂之人。不如此則曰悖德。曰賊。誠如其說。則雖盡立天下之人。盡達天下之人。而曾無饗勞之足言。人有不悅而歸之者乎。

四曰習勞則神斂。凡人之情。莫不好逸而惡勞。無論貴賤智愚老少。皆貪於逸而憚於勞。古今之所同也。人一日所著之衣。所進之食。與一日所行之事。所用之力相稱。則旁人臆之。鬼神許之。以爲彼自食其力也。若農夫織婦。終歲勤動。以成數石之粟。數尺之布。而富貴之家。終歲逸樂。不營一業。而食必珍羞。衣必錦繡。酣拳高眠。一呼百諾。此天下最不平之事。鬼神所不許也。其能久乎。古之聖君賢相。若湯之昧且丕顯。文王日昃不遑。周公夜以

繼日。坐以待旦。蓋無時不以勤勞自勵。無逸一篇。推之於勤則壽考。逸則夭亡。歷歷不爽。爲一身計。則必操習技藝。磨鍊筋骨。困知勉行。操心危慮。而後可以增智慧。而長才識。爲天下計。則必己飢己溺。一夫不獲。引爲余辜。大禹之周乘四載。過門不入。墨子之摩頂放踵。以利天下。皆極儉以奉身而極勤以救民。故荀子好稱大禹墨翟之行。以其勤勞也。軍興以來。每見人有一材一技。能耐艱苦者。無不見用於人。見稱於時。其絕無材技。不慣作勞者。皆唾棄於時。飢凍就斃。故勤則壽。逸則夭。勤則有材而見用。逸則無能而見棄。勤則博濟斯民而神祇欽仰。逸則無補於人而神鬼不歆。是以君子欲爲人神所憑依。莫大於習勞也。余衰年多病。目疾日深。萬難挽回。汝及諸姪輩。身體強壯者少。古之君子。修己治家。必能心安身強。而後有振興之象焉。必使人悅神欽。而後有駢集之祥。今書此四條。老年用自儆惕。以補昔歲之愆。并令二子各自勸勉。每夜以此四條相課。每月終以此四條相稽。仍寄諸姪共守。以期有成焉。

淮鹽西口岸認運章程

第一條 泰州設招商局

江路通暢。亟應重整淮網。現於泰州設立招商總局。本部堂札委大員駐局經理。先辦江西口岸。每年定運十萬引。仍照舊例。以六百斤成引。分作春秋兩綱。毋論官紳商富。悉准赴局具呈認辦。以五百引爲始。願多者聽。少者不准。掛號後限一月內領照開江。逾限即將所掛之號注銷。每綱認足五萬引。即行截數。本部堂已刊三聯護照。發交泰州總局。由局填發。以照根留泰州存查。以左照封寄江西總局。以中照給商護運。鹽與粟雜。即以私論。

第二條 江西設督銷局

規復引地。以保價緝私爲要。本部堂札委大員於江西省城設局。專理售鹽定價。扣釐緝私等事。鹽船抵岸。掛號後。按所到先後。榜示局門。挨次發售。不准爭先壓後。亦不准私相授受。跌價搶銷。所售之鹽。已頒發庫秤。連皮包

過秤。每百斤。定價庫平足紋現銀三兩五錢。不准私毫短欠。如銷市場旺。由西局酌量出示提價。至滯銷之時。仍於所提價內酌減。至賤以三兩五錢爲正。以保商本。

第三條三處截角查私

此次辦運。改復綱鹽章程。以六百斤爲一引。外加滷耗六十斤。包索三斤半。每引分裝八包。每包連包索重八十六斤。未接此刊本章程之先業已裝十二包成引者聽之。照斤扣算。自見此刊本章程後。擬以八包成引。由泰州抽查過秤。將護票截去第一角。運至安慶。又抽查過秤。截去第二角。運至湖口。又抽查過秤。截去第三角。如有包外夾帶私鹽。毋論本商及船戶水手。均照販私例治罪。各商亦宜實給水腳銀錢。毋稍剋扣。免致水手帶私。連累本商。一經查出重斤。照全船包數扣算。將鹽充公。嗣後如無本部堂護照。及未經按卡截角者。一概不准過卡。如違重究。

第四條加重鄰私釐稅

江西十府。例行淮鹽。近年爲粵私浙私閩私侵佔。奪我淮引之地。應即重稅鄰私。俾鄰本重而淮本輕。庶淮南之獲利較厚。而鄰鹽亦可化私爲官。現飭江西各釐局。將鄰鹽釐稅加重。閩鹽每斤征錢八文。浙粵鹽每斤各征錢十二文。責成各卡認真緝私。嚴拿繞越。以免偷漏。其新章發售之淮鹽。由西局另刊水程執照。蓋用江西鹽道關防。填給水販護運。與鄰鹽之發給稅單者。不相混濫。經過淮引地面。釐卡一律放行。不准重抽絲毫。留難片刻。如鹽與水程執照相離者。即以私論。

第五條計算本利各款

棧鹽每引八包。連正雜課。暨鹽價在內。約本銀五兩五錢二分。又繳泰州局費銀一錢八分。都營賣犒銀四分八釐。駁船江船商駁辛工棧租等費銀四兩四分二釐。共計成本每引約銀九兩七錢九分。正鹽六百斤。西局售價銀二十一兩。除每引由西局扣存各卡釐銀九兩四錢四分。西局公費銀三錢外。餘銀給還商本銀九兩七錢九

分給商一分半息。銀一兩四錢七分。共銀十一兩三錢。交商具領。以利續運。如遇暢銷之時。提價至三兩五錢以外者。所增之銀。以三成給商。三成解安慶糧臺。四成解金陵大營。至於商人自用之小費。在泰州具呈時。應繳局費銀一錢八分。到西岸後。倉程棧租上力。均係商人自行理落。其售鹽時。出倉下河等費。出自水販。一一預先說定。各無爭競。凡經本部堂核定數目。如有私加。及書役人等需索分文。准商販稟明。嚴行懲辦。

第六條補完各處釐金

近年各路軍營。皆賴抽釐濟餉。如揚州大營。鎮江大營。金陵大營。皖江南北水陸各營。所設之卡。皆以鹽釐爲大宗。此次整頓淮綱。斷不能仍完逐卡之釐。而各軍需餉甚急。又斷不能失此有著之款。應令於初次起運。暫緩完釐。俟到江西銷售之後。由西局彙總扣出。江西釐金。每引一兩五錢。由西局徑解吳城釐金局。該部堂軍餉在內。其餘銀七兩九錢四分。均解安慶牙釐總局。由該局分解金陵大營。釐銀每引三兩四錢五分。解揚鎮軍營。釐銀每引一兩二錢。解沙漫洲糧臺捐銀。每引三錢二分。安慶各卡。每引銀二兩九錢七分。內彭都堂營。楊軍門營。鮑軍門營。章軍志字營。湘新後營。祥後營。善後局。暨江外糧臺應分之銀。向例歸安慶七卡者。均在此項分之。其李軍門通江關釐下。業經另籌。每月一萬二千兩作抵。江甯府楊守瓌船釐金。業經另文停止。以每引計之。則各軍所得。較向來略少。以一年全綱十萬引計之。則較向來所得更多。再加兩湖全綱。則所得尤多矣。只有初行兩個月。略爲展緩。到三四個月後。則源源解還。不誤各軍要需。

第七條商運官運畫一

本部堂現定新章。重在商運。期復綱鹽規模。毋論官運營運。總應與商販一律辦理。不得絲毫取巧。亦不得再立營運餉鹽名目。至各營有藉食鹽爲名。私自下場採買。希圖不完釐課。卽與販私無異。現已通行出示禁止。如敢違犯。無論何營員弁。查出一律嚴辦。

第八條沿途並無艱險

自克復九洲後。長江一律肅清。商船暢行。現飭沿江水陸各營。及沿途關卡。凡新章准鹽經過。驗明護照。一體放行。並派撥船護送。不得需索分文。留難片刻。其儀徵九洲洲中關等處。由金陵大營會撫部院特派文武大員。催儻防護。可期暢行無阻。如有僱船不慎。斤兩有虧。係各商照料不周。毋得藉口短斤。希圖減釐。倘有遭風失水。情事。准其報明所在地方官勘詳。一面申送泰州總局補運。准免釐金一半。如無地方官勘明切結。不准請補。以上各條。均由本部堂體察情形。細為考定。冀與各商販軍民。共圖樂利。以裕稅餉。而復淮綱。

淮鹽運行皖岸章程

第一條斤兩改復舊制

淮南鹽務。向以安徽為中路。現在西岸楚岸均照道光三十年章程。以六百斤成引。皖省應即一律辦理。茲定淮鹽販運安徽者。專發護照。每照一張。運鹽一百二十引。每引正鹽六百斤外。加鹵耗六十斤。包索三斤半。分裝八包。每包連索過掣庫秤。淨重八十六斤。此外查出重斤。即以私論。

第二條大通設招商局

中路售鹽。向以大通為總匯。本部堂札委劉牧履祥駐紮大通。設招商局。專司中路招商驗照。抽秤收釐。各事務。惟大通鎮銷鹽暢滯無定。上下口岸相距過遠。不能仿照楚西之法。挨次銷售。現另刊護照。將下游大勝關金柱關荻港大通四卡釐金。全行緩納。驗照放行。俟鹽到大通。每引總完下四卡釐金錢六千文。專充水路。彭揚陸路。會鮑四軍之餉。按人數之多少。均勻分派。運商完釐後。即將所領護照繳銷。由大通局另給水程執照。轉運他處口岸銷售。自大通以上。仍照舊章。逐卡完釐。

第三條護照另繳軍餉

中路淮鹽護照。每年額定六百張。發交大通招商局劉牧。招商承運。此外不另發護照一張。以一事權。凡各商販

請領護照。除應繳下四卡釐金外。每護照一張。另繳報效軍需銀三百兩。此項報效銀兩。與楚西新章之提分商利無異。應專濬彭楊會飽軍四營餉。按人數之多少。均勻分派。

第四條計算成本數目

商販請領中路護照。前赴秦棧買鹽。每引八包。連正雜課。暨鹽價在內。約計銀五兩五錢二分。應繳報效軍需銀二兩五錢。完揚鎮軍營釐銀一兩二錢。沙漫洲糧臺釐銀三錢二分。都營犒賞銀四分八釐。水脚辛工銀約二兩二錢。鹽到大通後。總完下四卡釐錢六千文。照時價約合銀四兩四錢。完大通局費銀一錢五分。共計每引約合成本銀十六兩三錢三分八釐。該局售價如遇暢銷之時。聽局員斟酌提價。即滯銷之時。至少每百斤不得跌至三兩以內。以保商本。如有不顧大局。私行賤售搶跌者。准衆商查出。稟究議罰。

第五條三處截角查私

運鹽過壩。由泰州抽查過秤。將護照截去第一角。運至大勝關。又抽查過秤。截去第二角。運至大通。又抽查過秤。截去第三角。將照繳銷。如有重斤夾帶。均照販私律嚴懲。

淮鹽運行楚岸章程

第一條泰州設招商局

江路通暢。亟應重整淮綱。本部堂先於泰州設立西岸招商總局。札委大員駐局經理。茲接辦楚岸。添派大員。併歸一局辦理。湖北湖南每年定運十六八萬引。照舊例以六百斤成引。分四季起運。每季四萬引。毋論官紳商富。悉准赴局具呈認辦。以五百引爲始。願多者聽。少者不准。掛號後。限一月內領照開江。逾限即將所掛之號註銷。本部堂已刊三聯護照。發交泰州總局。由局填發。以照根留泰州存查。以中照給商護運。以左照封寄漢口總局。如有運赴湖南者。在漢呈明。由漢局將左照轉送湖南總局。

第二條兩湖設督銷局

規復引地。以保價緝私爲要。本部堂札委大員。於湖北之漢口鎮。設立總局。專理售鹽定價扣釐緝私等事。鹽船抵岸掛號後。按所到先後。榜示局門。挨次發售。不准爭先壓後。亦不准私相授受。跌價搶銷。兩湖所售之鹽。已預發庫秤。連皮包過秤。每百斤。定價庫平足紋現銀四兩。不准絲毫短少。如銷市場旺。由局員酌量出示提價。至銷滯之時。仍於所提價內酌減。至賤以四兩爲止。以保商本。向有商販不至漢口。卽於下游武穴田家鎮偉源口等處發售。應另於入楚境之武穴地方。設立分局。仍歸漢口總局兼管。照章辦理。至湖南應另設督銷局。業經咨商湖南撫院會委大員督辦。准鹽入湘。另增水脚。每引四錢。准於售價內扣出。連加分半利銀六分。一併給還商人。沿途概不完釐。統俟鹽到湘後。由局員照章扣解。

第三條四處裁角查私

此次辦運改復綱鹽章程。以六百斤爲一引。外加滲耗六十斤。包索三斤半。每引分裝八包。每包連包索重八十六斤。由泰抽查過秤。將護票截去第一角。運至安慶。又抽查過秤。截去第二角。運至武穴。又抽查過秤。截去第三角。運赴湖南者。再由漢口抽查過秤。截去第四角。如有包外夾帶私鹽。毋論本商及船戶水手。均照販私例治罪。各商亦宜實給水脚銀錢。毋稍克扣。免致水手私帶。連累本商。一經查出重斤。照全船包數扣算。將鹽充公。嗣後如無本部堂護照。及未按卡截角者。一概不准過卡。如有偷漏到岸。卽照私販拿辦。其漢鎮及湖南設局之後。所有在岸舊鹽。毋論官運管運。一律歸局發售。係已完釐課之鹽。應如何補提餘利充餉。由局員核明市價。稟明辦理。

第四條加重鄰私釐稅

湖南湖北均例行淮鹽。近年爲粵私川私路私侵占。奪我淮引之地。嘗卽重稅鄰私。俾鄰本重而准本輕。庶淮南之獲利較厚。而鄰鹽亦可化私爲官。現咨兩湖總督部堂湖北湖南巡撫部院。將鄰鹽釐稅加抽。川鹽入鄂。於荆

州加抽鹽錢。每斤八文。專鹽入湖。於衡州加抽鹽錢。每斤八文。其錢以五文歸兩淮鹽政。重引地也。以三文歸鄂湘督撫。重卡地也。新章發售之淮鹽。由鄂湘督銷局另刊水程執照。蓋用湖北湖南鹽道關防。填給水販護運。鄂鹽發給稅單。亦蓋鹽行關防。如私違抗。不領稅單。擅便引地者。本部堂派轍船緝拿。鹽則入官。販則治罪。至楚岸鹽行。向係鹽務衙門專管。應由總局委員。將現開各行。造冊詳報。如有欺商欠課。得賄售私等弊。隨時稟明拿究。

第五條計算本利各款

棧鹽每引八包。連正雜課。鹽價在內。約本銀五兩五錢二分。又繳泰州局費銀一錢八分。都督費銀四分八釐。礮船江船商駁辛工棧租等費銀四兩四錢四分二釐。共計湖北成本。每引約銀十兩一錢九分正。鹽六百斤。漢局售價銀二十四兩。除每引由楚局扣存釐稅銀十一兩九錢八分。楚局公費銀三錢外。餘銀給還商本銀十兩一錢九分。給商一分半息銀一兩五錢三分。共銀十一兩七錢二分。交商具領。以利流運。其竈耗包索餘斤。均准貼商。以廣招徠。如遇暢銷之時。提價至四兩以外者。所增之銀。以三成給商。七成解安慶糧臺。至於商人自用之小費。在泰州具呈時。應繳局費銀一錢八分。到岸後船戶坐日等項。均係商人自行理落。其售鹽時挑力等費。出自水販。一一預先說定。各無爭競。凡經本部堂核定數目。如有私加及書役人等需索分文。准商販稟明。嚴行懲辦。湖南成本。每引加四錢六分給商。餘俱照辦。

第六條補完各處釐金

近年各路軍營。皆賴抽釐濟餉。如揚州大營。鎮江大營。金陵大營。江南北水陸各營。所設之卡。皆以鹽釐爲大宗。此次整頓淮網。斷不能仍完逐卡之釐。而各營需餉甚急。又斷不能失此有著之款。應令如初次起運。暫緩完釐。湖北之鹽。俟到漢岸售銷之後。由漢局彙總抽出釐稅銀。每引十一兩九錢八分內。應派楚釐銀四兩二錢。每斤九文半。解交湖北牙釐局。又應派揚鎮軍營釐銀每引一兩二錢。又沙漫洲糧臺釐銀每引三錢二分。均交揚州

糧臺。又九江關稅銀每引一錢四分。解交九江關道府。又安慶各卡每引銀二兩九錢七分。解交安慶牙釐局。分解各營。漢局所扣釐金。除分派外。尚餘銀三兩一錢五分。應解安慶糧臺。湖南之鹽。僅由湖北經過。湖北不能全收九文半之釐。應以二文半歸鄂。以七文歸湘。其餘悉照湖北之例。由湘局彙總扣出。除分解鄂釐及各軍外。尚餘銀二兩六錢九分。亦解安慶糧臺。其李軍門通江關釐卡。業經另籌抵款。江甯府楊守懃船釐金。業經另文停止。至各軍應分之釐。只有初行時略爲緩展。以後源源解還。不致有誤。

第七條商運官運畫一

本部堂現定新章。重在商運。期復綱鹽規模。毋論官運營運。總應與商販一律辦理。不得絲毫取巧。亦不得再立營運餉鹽名目。至各營有藉食鹽爲名。私自下場採買。希圖不完釐課。卽與販私無異。現今通行出示禁止。如敢違犯。無論何營員弁。查出一律嚴辦。

第八條沿途並無艱險

自克復九洲後。長江一律肅清。商船暢行。現飭沿江水陸各營。及沿途關卡。凡新章准鹽經過。驗明護照。一體放行。並派礮船護送。不得需索分文。留難片刻。其儀徵九洲中關等處。由金陵大營會撫部院。特派文武大員。催護防護。可期暢行無阻。如有僱船不滾。斤兩有虧。係各商照料不周。毋得藉口短斤。希圖減釐。倘有遭風失水情事。准其報明地方官勘詳。一面申送泰州總局補運。准免釐金一半。如無地方官勘明切結。不准請補。

以上各條。均由本部堂體察情形。細爲考定。冀與各商販軍民。共圖樂利。以裕稅餉。而復准綱。其各遵行。以副厚望。

江北票鹽章程

第一條改復票鹽舊制

淮之票鹽，立法太繁，言以鹽抵餉，素亂成也。其在淮河轉運，更宜大加整理，應將皖營、滁營之餉，隨漕糧之捐，歸徐、台信運之北鹽，管中私運之三鹽，一概停止，在集新舊票款，運鹽完納，悉歸出湖運售，每引例定正鹽四百斤，分紐四包，每包運法耗鹽百十斤，其請票截角，杜秤上校等事，悉照票鹽成法辦理。

第二條接運已未新綱

淮北奏餉，前已奏至戊午結焉。上應即接開已未新綱，由海分司擇吉起征。惟兵燹以後，戶口大減，斷不能銷四十六萬引之數，應須照近年奏案，先辦正額二十九萬六千九百八十二引，賣成海分司，駐紮西蜀，或改駐楊莊，經理收課發販等事宜，仍限一年造報奏銷，以符定制。

第三條核定正雜各款

收課科則，必須核定，以昭信守。查淮北向例，每引收報部正課銀壹兩五分一釐，雜課二錢，又外辦經費銀四錢，倉穀一分，河費一分，鹽捕營一分，現開已未新綱，皆應照收，其團練工緝費、號項等名目，均係不急之款，應即一概刪除，每引實收現銀壹兩六錢八分一釐，此外不准另索分毫，如有額外加征，准商取指稟究辦。

第四條裁并各處釐金

近來軍餉，皆賴鹽釐接濟，而長淮處處設卡，節節抽收，商販視為畏途。現在滁營釐卡，業已停撤，此外亦應從新妥議，仿照淮南總抽分解之法，惟淮北票鹽，不分口岸，聽販戶隨地運售，與淮南稍有不同，礙難緩釐，應擇扼要之處，分作兩處抽收。自西壩出湖，先在五河設卡，每包收釐錢五百文，運赴上游，再于正陽關設卡，每包收釐錢五百文，統自本部堂派委大員駐卡經收，所需卡用一切經費，即在鹽釐內稟定坐支，不另取諸商販，經此兩卡抽收之後，給予釐票，他卡驗票放行，不准重抽，以輕商本。

第五條分派課釐數目

查淮北解餉原案，係以十成分攤，臨營分四成，滁營分四成，撫營分二成。今滁州已歸併于督營，臨淮已歸併於

撫營。嗣後所收北課。除隨營仍解四成外。其餘大成。本應全解本部堂糧臺。惟漕部堂停止捐鹽。餉項不無短絀。茲議分撥一成。歸於漕轅。以資貼補。至五河正陽關兩卡。總收鹽釐。每包各五百文。亦應照十成分派。議以一成解漕部堂。四成解安撫院。五成解本部堂。連同鹽課。分濟接防滁州各軍。及金陵大營餉需。

第六條計算成本餘利

自場運壩之鹽。每引除正雜課經費銀一兩六錢八分一釐。照舊到壩完納外。另需鹽價駁價。每引七錢。連脚辛工約六錢。共計二兩九錢八分一釐。西壩各棧售價。應由海分司就近稽察。每引至賤不准跌至三兩二錢以內。如遇暢銷。准其隨時提長。禁止湖販賒欠。一律以現銀交易。至正陽關三河尖售價。現在每引約在十兩內外。壩鹽出湖。加以運脚釐金。不過七兩上下。本部堂又派淮揚水師。節節護送。無游匪搶劫之患。其途甚安。其利甚厚。應由運司選派運判一員。前赴該兩處往來督銷。嚴禁搶跌賤售。違者從重究罰。

第七條嚴杜夾帶重斤

前因營弁下場自細。買斤放租。無弊不作。甚至以一引官鹽。夾數引私鹽。大有害於票法。疊經出示嚴禁在案。嗣後無論官運營運。只准就壩探買。不准下場。亦不准再立餉鹽名目。其下場票販。類與卡員熟識。遇有重斤。往往瞻徇情面。通融放過。卡役人等。兼有賣放之弊。以致大伊山順清河等處。秤掣有名無實。殊屬不成事體。應責成海分司嚴督各卡員。認真抽秤。查出包內重斤。即照全船包數。扣罰充公。如有包外夾帶。嚴究詳辦。

第八條禁止出湖改細

近來票鹽出湖。皆在西壩改細大包。重一百二三十斤不等。以省運脚。及按包抽釐之費。改細後。鹽票不符。致有餘票護私之弊。現在鹽釐一項。業經本部堂大加裁減。未便再任避省運脚。叢生弊竇。應示諭車行船戶。論斤不論包。公平承運。出湖之鹽。除例給護票外。並由海分司發給艙口清單。以便卡員憑單查艙。按包抽釐。不准再行改細。以免積弊。而便稽查。

以上各條均由本部堂巡察情形。細爲考定。其餘未盡事宜。統由兩淮運司督同海分司隨時議稟。逐加整頓。冀與各商販共圖樂利。其各遵行。以副厚望。

再新章甫定。誠恐濫販未盡週知。或不踴躍。各營既停餉鹽。勢難久待現銀。凡督轅撫轅漕轅。皆可輔以官運。以示倡導。而速軍需。重訂官運章程四條。開列於左。

- 一、各營籌款委員。赴棧請票買鹽。悉遵商運規矩。概以現銀交易。既以體恤商販。且不使官運本輕。商運本重。
- 一、官運鹽船過卡。設票截角查驗完釐等事。均照商運一律辦理。
- 一、鹽斤到岸。仍歸督銷委員稽察。不准以軍餉藉詞。搶跌賤售。
- 一、委員薪水。由營自給。餘利各歸各營充餉。

馬勇章程五條

- 一、每營人數。營官一員。幫辦一員。字識一名。分前後左右中五哨。其前後左右四哨。各立正哨官一員。副哨官一員。中哨即以營官爲正哨外。立副哨官二員。每哨馬勇五十名。每棚什長一名。一營共什長二十五名。散勇二百二十五名。營官及兩副哨。幫辦。字識等。共用火夫二名。四哨之正副哨官。共用火夫四名。二十五棚。每棚用火夫一名。通營共用火夫三十一名。

- 一、營官月給薪水并馬乾銀五十兩。公費銀一百兩。馬四匹。幫辦月給銀十六兩。馬一匹。字識月給銀九兩。馬一匹。正哨官每員月給銀十八兩。副哨官每員月給銀十五兩。各給馬二匹。什長每名日給銀二錢六分。馬勇每名日給銀二錢四分。均各給馬一匹。火夫每名日給銀一錢一分。營官哨官幫辦字識薪水馬乾。及營官公費。不扣建。餘均扣建。

- 一、營官領藍夾棚二架。白單棚一架。正副哨官共領藍夾棚一架。白單棚一架。幫辦字識領白單棚二架。馬勇每

十人領出單棚一架。

一、搬運鍋帳子藥。每哨僱大車一輛。由糧臺發價。如或置買大車。或置買駱駝。亦由臺發價。每營百馬之內。每年准報倒斃三十六匹。如數換領。以資彌補。

一、獸醫鐵匠。旗幟。大小掃把。鐵刮。竹槽。出自營官公費修補。鞍上坐褥。布屨。後鞅。轡頭。肚帶。及拴肚帶。寬皮條。控鐙。窄皮條。哨官兵勇自辦。更換鞍橋。油皮鞮。皮札鐵嚙。全副馬鎗。弓箭。扎草刀。草料口袋。軍械所辦給。

徽甯池二府屬洋莊茶引捐釐章程十條

一、皖南設立茶引局。由皖南道督辦。由安慶牙釐總局綜理。省中派員駐局經營。所有引票。捐票。釐票。俱用三聯票式。本部堂刊發牙釐總局。移交皖南道。轉發徽甯池三府屬產茶縣分。各商成箱後。在該縣報明。請引照繳引銀捐銀釐銀公費銀。隨時填票給付。各地方官不得於票之外。多取絲毫。所收銀兩。隨時解皖南道。聽候撥用。各縣按月申報牙釐省局。處皖南道茶引局查核。

一、茶引定以司馬秤。每勛合庫秤十六兩八錢。按十六兩八錢庫秤。淨茶一百二十勛為一引。箱皮不計。各商請引時。報明洋茶花色箱數。箱內淨正勛兩。統計成引報明後。該縣親身點箱抽查。如有偷漏。照釐金章程。補交正項引銀捐銀釐銀公費。另加三倍議罰。如有重勛。一律照加照罰。罰款以二成充餉。以一成留卡經費。

一、徽州向章。定以每引收茶釐銀三錢。茶捐銀六錢。公費銀三分。此外運出徽境。逢卡抽釐。現在定章。仿照餉鹽章程。統歸辦茶之地。一處完釐。應即核計加增。每引定繳正項引銀三錢。公費銀三分。捐銀八錢。釐銀九錢五分。共應繳銀二兩零八分。如徽屬出江西之茶。應由景鎮饒州吳城湖口等卡經過。即不抽釐。甯池等屬。出長江之茶。應由華陽鎮安慶大通荻港等卡。即不抽釐。但驗明釐票。查明箱數。一律放行。如箱數不符。照章加罰。該三處採辦洋茶。如不在以上各卡之內。不得持此票為憑。應聽各卡抽釐。其應完內地子口半稅。由該商照

通商條約章程完納。概不在此數內。

一、皖南茶引局。省城牙釐局。及該縣承辦茶務。均須辦公經費。准就公費每引三分。釐金每引九錢五分之內。牙釐總局扣留二分。皖南道扣留二分。該縣扣留四分。作爲辛工紙張書役飯食等費。

一、向章茶捐准其請獎。此次每引加捐二錢。共計八錢。仍悉照向章填給捐票。俟茶開運後。各商將捐照呈繳安徽牙釐總局。照籌餉例一律核獎。換給實收。

一、洋莊熟茶。亦按照十六兩八錢庫秤一百二十觔成引扣算。所有茶捐茶釐。均照章抽取。

一、小販袋裝毛茶。售與各洋莊。向不請引。亦無茶捐名目。經過附近各卡。應照十六兩八錢。庫秤每一百二十觔。抽釐錢一百文。其零星不及石者。應免抽釐。以恤小販。

一、茶釐概歸皖局抽收。江西經過各卡。由本部堂咨明江西撫部院。札行總局。轉飭各該卡。驗票放行。不重抽釐。抽捐。又婺源一縣。現歸左撫部院設卡抽收。應一併咨明照辦。以歸畫一。其婺源茶所得引捐釐各項銀兩。由皖省糧臺。另撥還左撫部院糧臺備抵。

一、向來內地客商販運。行銷內地。篋茶箱茶。及建德向有西商採辦北口茶。不照此例。所有應完徽州茶捐茶釐。茶引。應由皖南道查明舊章。並察看情形。酌議章程。詳候核奪。

一、核定章程。應出示曉諭徽甯池三府屬商民遵照。並通飭經過江西安徽各釐卡。照驗放行。

直隸清訟限期功過章程

一、催解糧租等銀。自奉文之日起。限二十日報解登程。如以空言搪塞。逾限不解。記過一次。再勒限若干日清解。如再逾違。記大過一次。（此在事宜第一條）

一、催解犯證。初次酌限若干日。初限已滿不解者。該州縣記過一次。再勒限若干日。二限已滿不解者。又記過一

次再行勒限若干日。合計以三個月爲率。仍不解者。記大過一次。如捏報外出及患病等情。或有賄縱情弊。另行嚴參。如人證在五名以上。能於初限內全數提解者。准記功一次。(此在事宜第一條)

一、飭該管道府廳州。先查大概情形之件。上司勒限若干日。除去行文往返程期。屆期不覆者。記過一次。再勒限若干日。仍不覆者。或分別記過。或另行示懲。臨時酌辦。至飭各州縣錄案詳覆之件。上司勒限十日。除去行文往返程期。屆期不覆者。記過一次。再勒限若干日。仍不覆者。記大過一次。(此在事宜第一條)

一、定例原問官審斷不當。或犯供翻易。另委賢員審理。委員限一個月定擬。院司限一個月核轉。統限兩個月完結。至京控案件。定例奏交之案。限兩個月完結。委員亦應限一個月定擬。院司亦限一個月核轉。咨文之案。限四個月完結。委員亦應限兩個月定擬。院司亦限兩個月核轉。嗣後首府讞局。均應恪遵此例。凡八年新到之案。從四月初一日起。如有人卷已齊。無故逾限者。承審之正委員。每案記過一次。至道府廳州。奉札委員案件。由承審衙門。於奉文半月內。開摺報查。另行勒限飭遵。(此在事宜第一條)

一、七年臘底以前。府局承審京控省控之案。積壓已至一百三四十起之多。嗣後首府讞局。應分前後左右四股。每股認辦積案三十餘起。每月須各完結三起。其結案不及三起者。各股公同記過一次。其結案四起者。公同記功一次。其結五起以上者。記大功一次。凡讞局公同記功。如一股有三員。記功三次。即係每員一功矣。記過者亦然。有記大功三次者。立即委署一缺。并准仿江蘇之例。於清訟案內奏獎。凡讞局公同記過者。出局時即註銷。不與他過一體積算。以讞局結獄不易。賞宜重而罰宜輕也。(此在事宜第一條)

一、相驗屍身。須即日親往驗訊明確。如無故逾延一兩日者。記過一次。如或委左雜代驗。或任令刑件滋弊。或因遲久始驗。以致屍身腐爛。供清游移者。每案記大過一次。三八告期。不親自收狀者。記過一次。所謂六事宜躬親者。惟此兩事易於訪察。故特爲指出。(此在事宜第二條)

一、管押人犯。并不開明名姓事由月日。懸牌示衆者。記過一次。因而書差舞弊私押者。記大過一次。或雖懸牌。而

牌上所開之人與在押及月報之數不符者亦記大過一次。(此在事宣第四條)

一、尋常命案。定例自獲犯之日起。州縣限三個月審擬招解。斬絞立決命案。州縣限兩個月審擬招解。大小盜案。定例自獲犯之日起。州縣限兩個月審擬招解。軍流以下徒罪以上雜案。定例限兩個月審擬詳解。州縣自理詞訟。定例限二十日完結。自同治八年四月起。均應恪遵部例。不准逾限。如有逾限一個月。記過一次。逾三個月。記大過一次。其例應兩個月擬解者。逾限四個月。其例應三個月擬解者。逾限五個月。均再記大過二次。(此在事宣第六條)

一、四種冊中積案。上月曰舊管。本月曰新收。此指本年言之也。若合前數年言之。則當以七年臘底以前者爲舊案。以八年元旦以後者爲新案。嗣後各州縣清釐積案招解者。每月應結二案。不滿二案者。記過一次。結三四案者。記功一次。結五案以上者。記大功一次。自理者。缺分繁簡不同。積案多寡不一。統限於八年臘底。將七年臘底舊案辦畢。其每月應結若干案。由各州縣自行酌定數目。於奉文半個月稟覆。俟稟到日。另行核示。(此在事宣第六條)

一、四種月報。四柱冊。上月之冊。於下月初一二三等日開報。十三日送齊到省。如開報遲延。逾限至十日者。記過一次。若玩違不報。或雖報而遺漏舛錯。滿十起以上者。記大過一次。(此在事宣第六條)

一、州縣平日不能講求捕務。境內出強盜劫案。一月劫至二起者。記過一次。一月劫至三起者。記大過一次。本境有盜窩。不能查拏。迨被鄰封拏獲。僅以協獲等詞飾稟者。記大過一次。餘均照定例揭參。如有拏獲鄰境盜犯。破獲鄰境盜窩者。除照例奏獎外。每案准記大功一次。(此在事宣第七條)

一、州縣所屬士民。於才德學三科內。全無所舉。及舉而不實者。均記過一次。如舉得其人。記功一次。(此在事宣第十條)

一、記大過至三次。記小過至六次者。現任人員。立予撤任。候補人員。停委二年。有功准其抵銷。其記大功至三次。

記小功至六次者。現任實缺之員。彙案奏請酌獎。署事人員交卸時。立即另行委署。候補人員。立予超班委署。
(此酌定功過總例)

一、各屬關係清訟之文書。各蓋一戳。云清訟要件。限日行一百里。經過接遞之縣。於封面寫明某日某刻過某縣某處。以便稽查。如不及百里。或未經註寫者。記過一次。各府縣接院司。勒限查覆之件。如驛遞延遲。亦即稟請飭查記過。(此因限期酌定罪懲之例)

一、審轉限期。命案。院司各限一個月。盜案。院司各限二十日。凡州縣長解。在省守候發犯。如未滿各上司審轉限期。即行脫逃者。僉差官記過一次。若甫滿審轉限期。不俟上司吩咐。先行脫逃者。僉差官亦記過一次。仍勒限派役來省押解。(此附記臬司詳定章程)

初定營規二十二條

紮營六條

紮營要在山岡。不可在低窪之處。不可在四面平曠。毫無遮護之處。

看營盤者。插竿牽繩。周圍牽一繩牆。長夫到時。即照繩牆築立營盤。

正牆脚寬六尺。子牆脚在內。頂寬一尺五寸。子牆脚寬二尺。正牆高七尺。子牆高三尺五寸。

外壕寬六尺。深八尺。內壕寬三尺。深三尺。凡挖壕之時。每隔二丈。留橫路一道。挖鼻之時。內壕仍留橫路。外壕概行挖去。

凡一營只圍二門。不許太多。門外築一灣牆。營內支帳房兩層。外層向牆開門。內層向中開門。各留大路。以便出隊。

營外每百人。挖茅廁一箇。三箭之外。牽繩牆一道。凡買賣閒人。概不許入繩牆之內。

開仗五條

出隊只分三大支。臨時再多分幾小支。凡有房屋之處。須分一支。以防埋伏。小山之後。須分一支。樹林之中。須分一支。

隊伍要佔住山坡。排立不動。管官要四處往來。登高瞭望。

打仗要打箇穩字。賊吶喊。我不吶喊。賊開鎗。我不開鎗。賊來衝撲時。撲一次。我也站立不動。撲兩次。我也站立不動。穩到兩箇時辰。自然是大勝仗。

前隊用好手五百。以備衝鋒。後隊要好手五百。以備救敗。中間大隊。略弱些也不妨。前隊若小挫。後隊好手出去救敗。前隊若得勝。後隊好手不動。專等收隊時在梢尾行走。

刀矛對殺之時。要讓賊先動手。我後動手。頭一下已過。第二下未來之時。我撥他頭一下。正好殺他。

行路三條

大成隊伍走頭一段。四成隊伍走尾一段。鍋帳擔子走中一段。頭次探馬帶七八人先走二十里。二次探馬先走十里。如遇賊來。頭探先行回報。二探再去。看明虛實續報。如左右有岔路。頭探遣人分路去。如有兩三條岔路。遣兩三起人去探明。看定營盤。頭探插竿牽繩。

大軍行畢五里之後。派一將官押尾。不許有一人落尾旗之後。途中不許有一人進店喫飯。

守夜三條

紮營之處。凡有來路。派人於五里之外守卡。四五更時。另派親信人查卡。

每棚派兩人守上半夜。派兩人守下半夜。不許打更。止許走簷。傳令者大聲。接令者低聲。每夜派哨官四人巡更。從二更起。每哨官巡一更。周圍巡查。查本哨兼查別哨之勇。

起更即關營門。無論客來。文書來。均不許開營門。賊來不許出隊。不許點燈。不許吶喊說話。悄悄靜靜。預備鎗礮。

火毯看準再打。

軍器五條

鎗礮要試過三十次。方免炸裂。羣子要包緊合腔。

矛桿要樹的。不要竹的。要整樹直紋。不要橫紋。

鋤要八寸長三寸寬。鍬要八寸長六寸寬。挑土用四方布袋。盛子藥用生漆皮桶。旗幟要一色。不宜混雜。

刀矛要常磨。火藥要常晒。火毯要親手自製。

營規

招募之規二條

招募兵勇。須取具保結。造具府縣。里居。父母。兄弟。妻子。名姓。箕斗。清冊。各結附冊。以便清查。募格須擇技藝嫻熟。年輕力壯。樸實而有農夫土氣者爲上。其油頭滑面。有市井氣者。有衙門氣者。概不收用。

日夜常課之規七條

五更三點皆起。派三成隊。站牆子一次。放醒礮。聞鑼聲則散。

黎明演早操一次。營官看親兵之操。或幫辦代看。哨官看本哨之操。

午刻點名一次。親兵由營官點。或幫辦代點。各哨由哨長點。

日斜時。演晚操一次。與黎明早操同。

鐘時。派三成隊。站牆子一次。放定更礮。聞鑼聲則散。

二更前點名一次。與午刻點名同。計每日夜。共站牆子二次。點名二次。看操二次。此外營官點全營之名。看全營

之操。無定期。約每月四五次。

每夜派一成隊。站牆唱更。每更一人。輪流替換。如離賊甚近。則派二成隊。每更二人。輪流替換。若但傳令箭而不唱者。謂之暗令。仍派哨長親兵等常常稽查。

紮營之規八條

紮營之地。忌低窪潮濕。水難洩出。忌坦地平洋。四面受敵。忌坐山太低。客山反高。忌斜坡半面。敵子易入。紮營之地。須擇頂上寬平。旁面陡峻者。四面陡峻者難得。或一面二面陡峻亦好。擇背山而水者。兵法右背山陵。前左水澤亦難擇。此好地。但或前或左或右有一面泄水者。即易竄敵。擇砍柴挑水便益者。故道最關緊要。如爲賊所斷。則不可守。

每到一處安營。無論風雨寒暑。隊伍一到。立刻修挖濠壕。一時成功。未成之先。不許休息。亦不許與賊搦戰。

牆子須八尺高。一丈厚。築牆子不用門板竹木。裏外皆用草坯土塊砌成。中間用土築緊。每築尺餘。橫鋪長條小樹。庶免雨後崩裂之患。上有鎗礮眼。內有子牆。爲人站立之地。

濠溝須一丈五尺深。愈深愈好。上寬下窄。濠中取出之土。須覆於二丈以外。不可太近。不可堆高。恐大雨時。客土仍流入濠中也。

花籬用木。須羸大。約長五尺餘。埋土中。約深二尺。堅築旁土。以攀搖不動爲主。或用二三層。或用五六層。

凡牆子濠溝花籬三者。闕一不可。牆子取其高而難登也。濠溝取其深而難越也。花籬取其難遽近前也。曰壘。曰壁。曰土城。名雖不同。皆牆子之類也。曰池。曰塹。曰陷馬坑。不甚寬長。其上虛鋪以土。曰梅花坑。亂挖深坑。約四五尺大小。無定名。雖不同。皆濠溝之類也。曰木城。立木圍排周圍。如城曰柵。亦係立木。不必周圍。皆有曰梅花樁。亂釘者曰梅花樁。分層次者曰梅花笆。曰鹿角。樹之有杈者曰拗馬樁。曰拒馬。曰檔木。中有橫木。用小木斜穿以

架於地曰地刺。用竹削尖釘於地曰鐵蒺藜。曰鐵菱角。名雖不同。皆花籬之類也。牆子只可修築一道。濠溝則兩道。三道更好。花籬等則五層六層更好。

一營開兩門。前門宜正大。後門宜隱僻。營官中軍帳對前門。中留甬道。宜闊。親兵各柵。紮甬道兩旁。前哨紮前門。後哨紮後門。左哨紮左。右哨紮右。兩帳相距略寬。以留水火之路。營外開廁數處。宜遠。營內開廁兩處。專備夜間之用。火藥挖一地。營上覆草棚。用泥塗之。仍安氣眼。免其潮濕。

行路之規三條

凡拔營時。以七成隊預備打仗。以三成隊押夫。若賊在前。則七成隊走前。鍋帳担子走中間。以三成隊在後押之。若賊在後。則以三成隊走前。押鍋帳担子同行。留七成隊在後防賊。如有十營八營。同日拔行。則各營七成隊伍分班行走。不許此營之隊。參入彼營隊中。尤不許鍋帳担子。參入七成隊中。至押夫之三成隊。專押本營之鍋帳担子。不許此營與彼營混亂。

凡拔營須派好手先走。或營官或統領或哨官。哨官皆可擇其善看地勢。善看賊情者。向前探看。在大隊之前。十里或二十里。仔細看明。一探樹林。二探村莊。恐有賊匪埋伏在內。身邊帶七八箇人。每遇一條又路。即派一人往看。若遇過橋過渡。尤須謹慎。恐大隊過水之後。遇賊接仗。進則容易。退則萬難。每營派一弁在後押尾。凡鍋帳担子過完之後。查明恐有病者落後。又恐本營勇夫在後滋事。又恐游勇假名滋鬧。

禁擾民之規

用兵之道。以保民爲第一義。除莠去草。所以愛苗也。打蛇殺虎。所以愛人也。募兵勦賊。所以愛百姓也。若不禁止

騷擾。便與賊匪無異。且或比賊匪更甚。要官兵何用哉。故兵法千言萬語。一言以蔽之曰。『愛民。』特撰愛民歌。令兵勇讀之。歌曰。歌見後。

禁洋烟等事之規

禁止洋烟。營中有吸食洋烟者。盡行責革。營外有烟館賣烟者。盡行驅除。

禁止賭博。凡打牌押寶等事。既耗錢財。又耗精神。一概禁革。

禁止喧嘩。平日不許喧嚷。臨陣不許高聲。夜間有夢魘亂喊亂叫者。本棚之人推醒。各棚不許接聲。

禁止姦淫。和姦者責革。強姦者斬決。

禁止謠言。造言謗上。離散軍心者嚴究。變亂是非。講長說短。使同伴不睦者嚴究。張皇賊勢。妖言邪說。搖惑人

心者斬。

禁止結盟拜會。兵勇結盟拜會。鼓衆挾制者嚴究。結拜哥老會。傳習邪教者斬。

禁止異服。不許穿用紅衣綠衣。紅帶綠帶。不許織紅縹線。不許紫紅綠包巾。印花包巾。不許穿花鞋。

稽查之規 五條

查號補小印。號補上有大印數字。各營皆然。其每營官又須另有小印私記。印於補上。以便稽查。

查口號。每夜發二字做口號。查營時。遇著人來。低聲呼上一字。來者即低呼下一字。應之。錯者登時鞫問。以防

奸細。若人多混雜之地。日間亦發二字做口號。以便稽查。

查街。每日派什長及親兵數人。至營盤附近街市稽查。如有擾民者。吸洋煙賭博者。立即鞫回究辦。

查出營。各勇必掛號執票。方准出營。如守門人不驗票擅放者重責。各勇夫不服查者責革。

查私留外人。各勇夫如有親友來營。須報明本什長哨長。至營官處掛號。方准留宿。違者重究。

營制

一營之制

營官親兵六十名。親兵什長六名。分立前後左右四哨。哨官四員。哨長四名。護勇二十名。什長三十二名。正勇三百三十六名。伙勇四十二名。一營共五百人。營官一員。哨官四員在外。

營官親兵之制

親兵六隊。一隊劈山礮。二隊刀矛。三隊劈山礮。四隊刀矛。五隊小鎗。六隊刀矛。每隊什長一名。親兵十名。伙勇一名。計六隊。共七十二名。

一哨之制

前後左右四哨。每哨哨官一員。哨長一名。共護勇五名。伙勇一名。每哨八隊。一隊拾鎗。二隊刀矛。三隊小鎗。四隊刀矛。五隊拾鎗。六隊刀矛。七隊小鎗。八隊刀矛。每隊什長一名。伙勇一名。其拾鎗隊正勇十二名。合什長伙勇爲十四名。其刀矛小鎗隊正勇十名。合什長伙勇爲十二名。每哨一百零八人。計四哨兵四百三十二人。

長夫之制

營官及幫辦人等。共用長夫四十八名。搬運子藥火繩及一切軍裝等項。共用長夫三十名。親兵。每劈山礮隊用長夫三名。每刀矛小鎗隊用長夫二名。計六隊。共長夫十四名。如拔營遠行。營官另撥公夫幫抬劈山礮。哨官哨長及護勇五名。共夫四名。四哨共夫十六名。每拾鎗隊用長夫三名。每刀矛小鎗隊用長夫二名。計四哨拾鎗八隊。共長夫二十四名。刀矛小鎗二十四隊。共長夫四十八名。以上各項。共長夫一百八十名。五百人一營。計每百人用夫三十六名。只許減少。不許增多。

薪水口糧之制

營官月給薪水銀五十兩。不扣建。又月給辦公費銀一百五十兩。不扣建。凡幫辦及管帳目軍裝書記醫生工匠薪糧。並置辦旗幟號補各費在內。聽營官酌用。

哨官每員日給銀三錢。

哨長每名日給銀二錢。

什長每名日給銀一錢六分。

親兵每名日給銀一錢五分。

護勇每名日給銀一錢五分。

正勇每名日給銀一錢四分。

伙勇每名日給銀一錢一分。

長夫每名日給銀一錢。

以上大建月支銀二千八百九十二兩二錢。小建月支銀二千八百零二兩四錢六分。

軍中浪費。最忌官員太多。夫價太多。今立定限制。無論官多官少。官大官小。凡帶千人者。每月支銀不准過五千八百兩。凡統萬人者。每月支銀不准過五萬八千兩。凡帶百人者。用長夫不准過三十六名。凡帶千人者。用長夫不准過三百六十名。

小口糧及卹賞之制

凡新立營頭。奉札招勇。挑定後無論勇夫。每名每日給小口糧錢一百文。帶至大營。上憲派員點名後。再行起支大口糧。凡陣亡者卹銀三十兩。受傷頭等者賞銀十五兩。二等者銀十兩。三等者銀五兩。成廢者另加。

外省招勇做照楚軍薪糧之制

湖北江西安徽等省。招勇在本省勦賊者。照楚軍章程。不減者凡五項。

營官薪水辦公費每月支二百兩。不減。

哨官每日支三錢。哨長每日支二錢。不減。

什長每日支一錢六分。不減。

伙勇每日支一錢一分。不減。

長夫每日支一錢。不減。

其照楚軍章程酌減二分者。凡兩項。

親兵護勇。每日支一錢三分。已減二分出境至外省勦賊則全不減。

正勇每日支一錢二分。已減二分出境至外省勦賊則全不減。

帳棚之制

營官幫辦書記軍火等。共用夾帳棚八架。單帳棚二架。

哨官哨長護勇。共夾帳棚一架。單帳棚二架。四哨同親兵。每隊夾帳棚一架。單帳棚一架。大隊同。

正勇每隊單帳棚二架。三十二隊同。

以上共夾帳棚十八架。單帳棚八十架。

統領之制

凡統領自帶一營。本營之薪水公費。及夫價已足敷用。此外從優酌加。凡統至三千人以上者。每月加銀百兩。加夫十名。統至五千人以上者。每月加銀二百兩。加夫二十名。統至萬人以上者。每月加銀三百兩。加夫三十名。

馬隊營制

一、壹營拾哨。每哨官給馬壹匹。壹哨馬勇貳拾肆名。每名給馬壹匹。營官親兵捌名。每名給馬壹匹。

一、營官月給薪水銀肆拾兩。公費銀肆拾兩。馬肆匹。馬夫貳名。火夫壹名。長夫捌名。

一、幫辦壹員。月給銀拾陸兩。馬壹匹。長夫壹名。

一、字職壹名。月給銀伍兩。

一、哨官拾員。每員月給銀玖兩陸錢。雜費銀壹兩貳錢。馬夫壹名。棚夫壹名。

一、先鋒官伍員。每員給馬壹匹。月給口糧銀伍兩肆錢。雜費銀陸錢。伍人共爲壹棚。馬夫貳名。火夫壹名。棚夫壹名。

一、親兵捌名。每名給馬壹匹。日給銀壹錢肆分。雜費銀月給陸錢。以肆名爲壹棚。每棚馬夫貳名。火夫壹名。棚夫壹名。

一、步隊親兵什長壹名。日給銀壹錢陸分。步隊親兵拾名。日給銀壹錢伍分。共爲壹棚。火夫壹名。此專備營官差遣及出隊時留守營盤之用。毋許再向各哨派人當差。

一、馬勇日給銀壹錢肆分。雜費銀月給陸錢。每肆名爲壹棚。馬夫貳名。火夫壹名。棚夫壹名。

一、搬運軍械草料公長夫肆拾名。凡長夫每名日給銀壹錢。火夫每名日給銀壹錢壹分。

一、營官領藍夾棚貳架。白單棚壹架。幫辦領藍夾棚壹架。白單棚壹架。馬隊親兵領白單棚貳架。馬圍棚子貳箇。

一、步隊親兵領白單棚貳架。每哨領藍夾棚壹架。白單棚陸架。馬圍棚子柒箇。

一、每營月給燭壹伯伍拾劬。油貳伯劬。

一、每營百馬之內。每年准報倒斃叁拾陸匹。如數換領。以資彌補。另於哨弁兵勇。雜費銀內。每月扣出叁錢。作爲添補馬匹公項。名曰朋馬銀。營官總理其事。月派哨官一員。輪流經管。遇有馬匹額外倒斃。及病瘦不堪馳使者。卽行抽撥此項。隨時採買添補。

一、每馬月給秣料草豆銀貳兩。每年叁肆伍等月。青草正茂。可以放食。每馬減銀伍錢。只給壹兩伍錢。

一、馬醫。鐵匠。號褂。旗幟。大小掃把。鐵刮。竹槽。出自營官公項。

一、修補鞍上坐褥。布屨。後鞞。響頭。哨官兵勇自辦。

一、籠頭偏纏。哨官兵勇自辦。

一、馬藥錢。營官出自公費。哨弁兵勇。出自雜費。

一、更換鞍轡。油皮韉。肚帶。及拴肚帶。寬皮條。拴蹬。窄皮條。皮扎。鐵嚼。全副。馬鎗。弓箭。腰刀。扎草刀。草料口袋。由軍械所辦給。

一、凡幫營之虞。先擇斜坡。掘地二弓。以爲馬圈。可拴四馬。兵勇之棚。卽與馬圈棚子相對。哨官之棚。亦與哨官馬圈相對。凡支馬圈之時。兵勇四名。與馬夫貳名。親自鋤挖。如馬圈辦理不妥。將該哨官分別嚴懲。

查拿徵義堂盜餘匪二示

爲搜查餘匪事。照得徵義堂匪徒。雖經大兵勦滅。而首犯尙有未獲。餘匪亦多未淨。前因各鄉團查拿匪黨。間有報復仇怨。誘索銀錢之事。本部堂出示。嚴禁妄拿。非謂匪黨可以不捕。不株累無辜之平民。乃所以致嚴於真正之堂匪也。近聞古港之局紳。各鄉之團總。畏縮不前。查拿日懈。因本部堂有妄拿之禁。而遂謂真匪亦可以不拿。是猶病者因服藥之誤。而遂謂凡病皆可以不藥。殊失我分別良莠之苦心也。今欲重加整頓。再爲誅除。差役下鄉。則恐閭閻之被累。兵勇臨境。又恐玉石之俱焚。再四思維。仍當責成古港之局紳。各鄉之團總。令其同心踴躍。協力搜查。庶幾耳目既真。擒拿亦易。爲此示仰局紳團總人等知悉。爾等滌慮洗心。立盟設誓。務期明可以質天地。幽可以質鬼神。上可以對祖宗。下可以對子孫。儻其妄拿一人。妄牽一家。不特不能逃國法之森嚴。亦難逃神明之誅殛。不特不能逃鄉里之控告。亦斷難逃本部堂之訪聞。若其真正之堂匪。著名之要犯。自應窮搜力捕。不留餘孽。雖逃往地縣。亦宜越境追之。雖藏匿深山。亦宜設法捕之。其有兩次賞格。俱未列名。而實係堂內要犯者。

準其一體擒拏。其有賞格雖經列名。而實未入堂爲匪者。許該紳等公同取保。永不查拏。凡入之心跡。愈久愈明。果是匪黨。雖父兄不能曲護。果非匪黨。雖仇人不能栽誣。其有曾經入堂而並不爲匪者。宜開一線之恩。予以自新之路。取戶族之保結。爲良民之實據。其有經官保釋。及各團保釋未拏者。各宜改過而悛非。毋得怙惡而取戾。若有負固不服。藉口報復。與肩紳爲仇。與團總爲敵。拒捕戕賊。情同叛逆。立即奔告本部堂行轉。實時來告。即時發兵。痛加勦洗。誅及妻孥。是彼之自外生成。非我之好行殺戮也。本部堂刻有鄉團執照。族團執照。爾瀏陽各鄉。選舉公正廉明之人。前來具領。清查戶口。稽察匪類。細加剖別。大彰公道。領此照者。準其搜拏堂匪。未領照者。不許妄拏。爾士民等體我苦衷。慎之又慎。於除惡務盡之中。寓生道殺人之意。一年之內。不可鬆懈。一犯之疑。不可疏忽。無貽後日之悔。永保百年之安。本部堂有厚望焉。心之曲折。筆不能達。兢兢業業。千萬千萬。毋違。特示。

禁止賽會告示

爲禁止賽會事。照得湖南被賊以後。瘡痍未復。官民上下。各宜儆戒。節儉以惜物力。恐懼以迓天和。庶幾挽回於萬一。所有向來迎神賽會。淫樂奢靡之風。應卽嚴行禁止。爲此示仰軍民人等知悉。如有賽會之事。立即遵照停止。儻敢故違。定將倡首承辦之人。嚴拏究辦。決不寬貸。各宜凜遵。無違。特示。

禁竊傳過糶告示

爲曉諭事。照得設兵所以衛民。足兵尤貴足食。三者相輔而行。不容稍有偏廢。曩因金陵城外。賊船回竄上游。長沙爲水陸交衝之地。適遇青黃不接之時。守禦固應加嚴。日食尤關緊要。是以調集各路兵勇。保我黎民。嚴禁出城米鹽。以實儲備。作未雨綢繆之計。竇欲藉以衛民。非欲以累民。今值大兵雲集。新穀將登。正當籌備軍糧吃緊之際。訪聞城廂內外。因有穀米不準出城之示。誘傳不準販運入城。以致商運不至。兵食維艱。並恐惟利是視之

奸民藉此欺騙無知之花戶。短價販運。接濟盜糧。關係匪輕。合亟示諭。爲此示仰商民人等知悉。嗣後爾等仍各販運穀米入城。照常交易。不得輕聽浮言。自誤生理。其在城各米。如實係鄉民買食二三石。亦準照舊疏通出城。但不準賣給賊船。致干查究。本部院諄諄告誡。無非念切民生。爾等其各凜遵。共圖保衛。毋違。特示。

催完元錢糧告示

爲嚴催早完國課事。照得粵匪稱亂以來。糜費國帑四千餘萬。皇上省宮中之服用。發內府之帑項。不惜一釐所藏。冀爲生民除害。卽王公大臣。文武官員。無一人不裁減廉俸。無一人不捐助軍餉。而獨於百姓。格外體恤。田不加賦。戶不抽丁。不特不加賦已也。水旱偏災之縣。又有蠲緩之條。賊匪經過之區。復有寬免之典。不特不抽丁已也。被脅之良民。免其罪而資遣之。被兵之難民。憫其窮而撫卹之。凡在百姓。想亦共聞之。而共知之矣。自古以來。治日常少。亂日常多。或十餘年而一遇兵戈。或數十年而一逢劫數。獨至我朝二百餘年。同享昇平之福。高曾祖父。未曾見干戈鋒鏑之場。老弱壯丁。未曾經轉徙流離之苦。雍正乾隆年間。普免天下錢糧四次。嘉慶道光年間。豁免民間積欠六次。咸豐元年正月。亦豁免民間積欠錢糧。合計十八省州縣之賦。共免三千萬積欠之金。上考秦漢。下至前明。孰有如我朝之國泰民安。孰有如我朝之深仁厚澤乎。百姓欲報天家之德。必須早完維正之供。乃近聞民間完納國課。每多遲延抗玩。或下忙已過。而上忙未輸。或前年積欠。而今年猶展。或藉口於旱澇之微災。而以爲可緩。或藉口於書差之浮收。而以爲可減。或賄差役。不使帶人入城。以免追比之苦。或詭換冊名。不使糧戶之有著。以免追呼之煩。種種抗延。殊堪深恨。尤有可爲痛恨者。一種無賴之游民。滋事之痞棍。聚集村市。三五成羣。動稱世界已亂。不必完錢糧。愚民無知。將信將疑。亦或將應完之課。故爲遲延。不可不嚴行諭禁。爲此示諭。仰我省紳民人等知悉。務當互相督勸。早完錢糧。族長戒其一族。團總催其一團。無因書差稍有浮收。遂並本分而不交。無因家資稍覺艱難。遂並正供而不納。子貧而斷父母之養。隱者。必非孝子。民貧而欠皇家之錢糧。必

非良民。本部堂既以好言誥諭於前。即以刑法懲責於後。如有不遵緊完納者。飭各州縣三日一比。嚴刑重責。幽之囹圄之中。治以軍流之罪。如有游民害視。倡為謬言。謂世界已亂。不必完糧者。一經拿獲。即行正法。非本部堂之過嚴也。這此言者。即從賊之亂民也。爾紳民人等。敬聽余言。互相傳達。聖朝之恩。斷不可負。抗欠之罪。斷不少寬。凜之凜之。無違。特示。

禁止擄船告示

示 同治二年四月

為嚴禁事。照得近來各營弁勇。擄船之風。日甚一日。或并無差事。擄船而賣放。或多攬貨船。闖關而包盤。即有統領管官在途同行。亦復縱容兵勇。魚肉船戶。無論重載之船。家眷之船。養病之船。送柩之船。一概強擄訛索。或本係上水。而強之下行。或本係小划。而強之遠行。甚至驅逐客商。搜佔貨物。又有游勇土匪。假冒各營之名。到處擄船。長江大湖。支河小港。騷擾幾徧。商民久含怨怒。釐稅因之大減。船戶固不聊生。軍士亦將饑餓。急應嚴行禁革。以肅軍政。而裕釐餉。嗣後各營將弁勇丁。或奉差馳赴他處。或自楚募勇東來。一概不准擄船。只准民價和雇。如敢故違。定以軍法從事。本部堂一面派員嚴拿。一面行知各縣各卡。如有前項情弊。許該縣該卡。拿獲正法後。再行通稟。其非本部堂所轄之營。亦經咨商。一律嚴辦。合行出示曉諭。各宜凜遵。毋違。特示。

金陵房產告示

示 八條

為曉諭事。照得金陵房產章程。前於去年七月議立七條。復於十一月議立四條。出示曉諭在案。其中尙有不便於民者。茲本部堂復加體察。將七月所定七條內刪去三條。十一月所定四條內刪去一條。酌改一條。合行示諭。為此示仰居民人等。一體遵照。特示。

一、城內房產。如原業主持有舊契。准赴管後局呈明。由局派員會同縣令往查。與契符合。注明「驗訖」字樣。蓋

用局印縣印。准其管業。如無印契。實係業主。取具鄰佑切給。赴局呈明。派員會同縣令確查。給予單照。蓋用局印縣印。亦准執單管業。

一、城內房屋。有現任大員。權作衙署。及辦公委員。權作公局者。即有業主。亦暫不准領還。從呈明驗契蓋印之日起。每月按照民價。給予租錢。俟另行修立衙署公局後。再行給還業主。

一、僑府賊館。有一所而佔數家地基者。亦有原係一家而分爲數所者。令各赴局呈明驗契委員。會同首縣勘驗明白。或各管原業。或情願捨少就多。劃彼與此。由民間自行議定。呈明總局。飭縣立案。

一、房屋未經焚毀。尙屬完好者。無論大屋小屋。新造舊造。一概不許拆毀。有擅拆強毀者。拏獲正法。棹椅木器。不許兵勇搬出城外。如違重懲。

一、城廂內外空地。如有客民願造房屋者。先赴善後局呈明。即派保甲局委員履勘該地。尙未有人認業者。暫作官地。視地之廣狹。酌定租價。刊刻雙聯執照。載明丈尺若干。地租若干。照根存善後局。正照給客民收執。准其蓋屋。自此次出示之後。如有未經呈明。擅將無主空地。起造新屋者。除將房料充公外。嚴行枷責。若拆毀舊屋。移造新屋者。立正軍法。其前此已造之屋。亦限於年內呈明善後局。勘地起租。俟有原業主出來。分別核辦。至新年查出無照之屋。亦將房料充公。

一、空地新造之屋。如原地主歸來。赴善後局呈明。派保甲局委員確切查明。即將善後局所議地租。交原地主承管。所造之屋。或新屋主酌找地價。或舊地主酌找屋價。和商定議。各聽自便。其親族代認者。呈明後准其立案。不准領照。自克復日起。扣足兩年。無人來認。再行核辦。

一、舊存之屋。無契據者。若專以鄰佑爲憑。又恐賄串互保。弊竇叢生。嗣後無契之人。赴善後局呈明。由保甲局委員詢問明確。令其具結承領。給予雙聯執照。暫行管業。兩年以內。不准轉典轉售。如承領之後。另有真業主出來。呈明確據。即將在前具結冒領之人。枷號兩月。充軍四千里。嚴懲冒認者。所以保全真業主也。

一、金陵克復一年之久。原屋主尙多未歸。而本籍客籍之人。進屋寄居者。正復不少。此後如真屋主歸來。赴善後局呈明。派保甲局委員赴屋履勘。分別開導。或租或讓。自應商量辦理。各存恕道。毋啓訟端。切屬切屬。

勦擒告示二

爲剴切曉諭事。照得皖豫江境。昔年逼於搶擄。民不聊生。經地方官諭築圩寨。防賊奔突。旣爲爾民各保身家。得安耕穫之利。兼期堅壁清野。漸收滅賊之效。本大臣在江南時。久聞各路圩練。遇有寇警。登陣固守。賊卽無所撓掠。其中勇敢之士。復能抄賊尾。邀賊邊馬。屢著戰功。實堪嘉尙。查擒逆老巢。前在永亳蒙宿之間。被擄最苦之圩。惟此數州縣。或被賊威脅。逼迫相隨。或被賊襲踞。慘遭擄掠。或不甘從賊。而爲賊殺。或被裹出竄。而又爲兵殺。困迫可憫情形。莫此爲甚。上年親王僧督兵入皖。殲斬逆首張落刑等。餘匪遠颺。各圩民始得脫離水火。漸謀復業。乃本年四月。賢王屋隕曹州。賊倖轉張。現在大股匪徒。竄入永亳蒙宿一帶。意在逼脅各圩。以爲黨毆。計殊狡譎。聞此次賊過永宿。各圩拒守。多不從匪。足徵忠義奮發。志切同仇。本大臣奉命督師。赴徐州一帶。勦辦擒逆。該戰則責成官軍。議守仍需整理圩練。爲此出示。曉諭皖豫江境各圩練董知悉。仰各該圩練董。隨時前來徐州。本大臣親詢各路情形。並面諭修圩挖濠防守各事宜。有能憑圩擊賊。或誘擒逆首者。定卽立予優獎。卽有被賊闖入。或被賊逼從之圩。官軍到日。但能殺賊自效。赴本大臣軍營投首者。悉予自新。不加究問。如敢與賊勾通。意懷觀望。官軍至則從官。擒匪至又從匪者。大軍所至。定卽悉力勦除。玉石俱焚。追悔何及。諒爾民守圩禦賊。積時已久。應各知所趨向也。各宜凜遵。毋違。特示。

勦擒告示四條

爲曉諭事。照得本部堂恭奉簡命。勦辦江蘇安徽山東河南等省擒匪。擬於徐州臨淮濟甯周家口等處。設立重

兵以爲戰。又令鄉村設立圩寨以爲守。四路皆有重兵。則無此勦彼竄之虞。各縣皆有圩寨。則無擄人擄糧之患。所有應行事宜。合亟出示曉諭。俾遠近共見共聞。開列四條於左。

一、堅壁清野。擒匪皆擾亂多年。凡蘇皖齊豫當衝之縣。人人皆知修築圩寨。自相保衛。但恐歲久人貧。漸漸懈惰。今宜大加整頓。牆子要高。濠溝要深。此堅壁也。人丁牲畜。米糧柴草。一一搬入圩內。賊來全無可擄。此清野也。如賊匪圍攻圩寨。本部堂立即派兵救援。近則三日五日。遠則十日半月。必可趕到。決不食言。如不能堅守半月。是該圩之過。如半月而救兵不到。即是本部堂之過。爾等操練壯丁。自保身家。本部堂決不調圩練助勦他處。亦不派圩董支應雜差。但願爾等困苦餘生。稍享安靜之福。

二、分別良莠。論擒匪者。皆言蒙城亳州最多。宿州永城次之。帶兵者痛恨蒙亳。皆欲勦洗。以絕禍根。本部堂觀蒙亳之人。性質甚直。良民甚多。倡首爲亂者。不過數人。甘心從逆者。爲數亦少。其餘有因貧而偶爾從擒者。有被脅而不得不從者。雖同得擒黨之名。而罪有輕重之別。應徹底清查一次。分別懲辦。倡首爲亂者。如任柱張總愚牛洪李允諸人。宜戮其身。屠其家。并掘其墳墓。甘心從逆者。誅其身。而不坐其家。其因貧偶從及被脅從擒者。一概赦宥免死。委員督同圩長。挨戶清查。每圩各造二冊。倡首爲亂及甘心從逆者。爲莠民冊。全未從匪者。爲良民冊。偶從與脅從者。爲自新良民。亦編入良民冊內。入莠民冊者。在外則到處追勦。在籍則擒拏正法。入良冊者。五家具保結于圩長。有事則五家連坐。圩長具結於州縣。有事則圩長連坐。願我蒙亳曉事紳耆。將莠民一一舉報。斬除數百家之匪類。保全數十萬之善良。免得一勦再勦。玉石俱焚。通縣皆遭大劫。悔之晚矣。蒙亳宿永四屬。限印委各員。於三箇月查畢。此外有捨之州縣。一體清查。

三、發給執照。各處圩中管事者。稱曰圩主。或曰寨主。主字不可妄稱。今宜概改曰圩長。每圩一人。其幫辦者名曰副圩長。每圩或二三人。多至四人而止。凡充圩長者。無論原有之圩。新立之圩。由圩內大衆公舉一人。具稟州縣。州縣訪察確實。稟明本部堂。正圩長由本部堂發給執照。蓋用關防。副圩長由州縣發給諭單。蓋用印信。

收執爲憑。圩內有陽順官兵。陰從檢匪者。圩長緝獲。送官正法。匪圩而誣。反其圩。嚇逼鄰圩者。各圩公同稟究。送匪最多者。奏明請獎。匪匪不報者。將圩長革去究懲。平日不廢農務。臨警守圩有功者。奏明優獎。圩長苛斂財物。不服人心者。准圩家公稟。查明革換。

四、訪訪英賢。淮徐一路。古時多英傑之士。山左中州。亦爲偉人所萃。方今兵革不息。豈無奇材崛起。無人禮之。則棄於草澤。孰察賤隸之中。有人求之。則足爲國家干城腹心之用。本部堂久歷行間。求賢若渴。如有救時之策。出衆之技。均准來營自行呈明。察酌錄用。卽不收用者。亦必優給途費。如有以鄰境之匪名單來告者。費銀三十兩。如有以巨匪藏匿之蹤跡來告者。賞銀四十兩。如有薦舉賢才者。除賞銀外。酌予褒獎。藉一方之人材。平一方之寇亂。生民或有蘇息之日乎。

禁止私押告示
二十式 各縣辦法恐難畫一故定告示之式

爲奉文曉示禁止私押事。照得本州縣辦理案件。隨到隨審。隨審隨結。惟案內設有訊供未確。或證佐未齊。不能管押候質。無如差役舞弊。或提到而匿不稟明。或訊釋而私押索費。且有以扭交指交爲名。原告串差。私自管押。隨後具呈。以爲欺瞞之計。種種弊竇。相習成風。今奉札嚴行查禁。合亟牌示。爲此示仰諸色人等知悉。嗣後管押人證。本州縣必於當時牌示。註明日期。及至開釋。亦必立刻牌示。俾衆周知。如有示內無名。及已登註開釋。原差仍行私押者。准該家屬人等喊稟。以憑嚴究。特示。

計開

收押項下。按名登註某月某日。因某案收押。

開除項下。按名登註某月某日或訊釋。或交保。或押後收禁等項。逐一開明。

右用橫寬約四尺高約一尺二三寸與諸牌不同懸於頭門前五六行寫告示可以累月不換按三尺餘寫按

名有新收者新編者立節更檢

保守平安歌二首 咸豐二年在湖南湘鄉本齋作

第一莫逃走

眾人謠言雖滿口。我境切莫亂逃走。我境僻處萬山中。四方大路皆不通。我走天下一大半。惟有此處可避亂。走盡九州并四海。惟有此處最自在。別處紛紛多擾動。此處卻是桃源洞。若嫌此地不安靜。別處更難逃性命。只怕你們太膽小。一聞謠言便慌了。一人倉忙四山逃。一家大小拉嗷嗷。男子縱然逃得脫。婦女難免受煎熬。壯丁縱然逃得脫。老幼難免哭號咷。文契縱然帶著走。錢財不能帶分毫。衣服縱然帶著走。豬牛難帶一根毛。走出門來無屋住。躲在山中北風號。夜無被鋪牀板凳。日無鍋甑切菜刀。受盡辛苦破盡財。其實賊匪并未來。祇因謠言自驚慌。惹起土匪抄一場。茶陵道州遭土匪。皆因驚慌先走徙。其餘各縣逃走人。多因謠言嚇斷魂。我境大家要保全。切記不可聽謠言。任憑謠言風浪起。我們穩坐釣魚船。一家安穩不喫驚。十家太平不躲兵。一人當事不害怕。百人心中有柄槩。本鄉本土總不難。立定主意不致移。地方公事齊心辦。大家喫碗安樂飯。

第二要齊心

我境本是安樂鄉。只要齊心不可當。一人不敵二人智。一家不及十家強。你家有事我助你。我家有事你來幫。若是人人來幫助。扶起籬笆便是牆。只怕私心各不同。你向西來我向東。富者但願自己好。貧者卻願大家窮。富者很心不憐貧。不肯周濟半毫分。貧者居心更難說。但願世界遭搶劫。各懷私心說長短。彼此有事不相管。縱然親戚與本家。也去丟開不管他。這等風俗實不好。城隍土地都煩惱。萬一隣境土匪來。不分好歹一筆掃。富者錢米被人搶。貧者飯碗也難保。我們如今定主意。大家齊心共努力。一家有事聞鑼聲。家家向前作救兵。你救我來我救你。各種人情各還禮。縱然平日有仇隙。此時也要解開結。縱然平日打官方。此時也要和一場。大家喫杯團圓

酒。都是親戚與朋友。百家合成一條心。千人合做一雙手。貧家飢寒實可憐。富家量力略周旋。鄰境土匪不怕他。惡龍難鬪地頭蛇。個個齊心約夥伴。關帝廟前立誓願。若有一人心不誠。舉頭三尺有神頭。

第三操武藝

要保一方好土地。大家學些好武藝。武藝果然學得精。縱然有事不受驚。石頭要打二十丈。石灰罐子也一樣。木板只要五寸寬。箭箭要中靶子上。石頭灰罐破得陣。又鉞鉛子一齊進。靶子也立一塊板。板上先鑿四個眼。眼內安個小木毡。戳在鉛子尖上留。只要枝枝戳得準。保守地方總安穩。火器雖然是個寶。烏銃卻要鑄得好。火藥也要辦得真。不然炸裂反傷人。銃手若是不到家。不如操演不用他。惟有一種竹將軍。裝得火藥大半斤。三股麻繩緊緊纏。一墩響動半邊天。件件武藝皆無損。石頭鉛子更要緊。石頭不花一文錢。鉛子要出一道圈。若是兩個習得久。打盡天下無敵手。讀書子弟莫驕奢。學習武藝也保家。耕田人家圖安靜。學習武藝也不差。匠人若能學武藝。出門也有防身計。商賈若能學武藝。店中大膽做生意。雇工若能學武藝。又有聲名又賺錢。白日無閒不能學。夜裏學習也快樂。臨到場上看大操。個個顯出手段高。各有義膽與忘肝。家家戶戶保平安。

水師得勝歌弁序

咸豐五年江西南康水營作

咸豐三年十一月。余初造戰船。辨水師。楚中不知戰船爲何物。工匠亦無能爲役。因思兩湖舊俗。五日龍舟競渡。最爲迅捷。短橈長槳。如絃之足。如鳥之飛。此人力可以爲主者。不盡關乎風力水力也。遂決計仿競渡之舟。以爲戰船。時守備成名標自長沙來衡州。始告余以廣東快蟹船式。舢板船式。同知褚汝航自桂林來衡州。告余以長龍船式。於是鳩集衡州永州工匠。又分廠於湘潭。共造快蟹四十號。長龍四十號。舢板八十號。快蟹配四十五人。搖槳者廿八人。艙八人。長龍配廿四人。搖槳者十六人。舢板配十四人。搖槳者十人。每船舵工一人。礮手數人。頭工一人。四年五月。每船添立管駕者一人。名曰哨官。五年十月。每船於槳槳手中。置火彈手數人。於是規

模略備。行之三年而未嘗更易。惟舳板船小。不能置鑪造飯。不能容十餘人寢宿。其中常另雇一民船爲坐船。終非可久之道。若長江大湖。設立水師。而用吾之法行之。則舳板之坐船。在所當變者也。

余旣於癸丑冬創造戰船。設立水師十營。甲寅三月廿八日。以五營擊湘潭之賊。連獲大捷。以五營擊靖港之賊。軍士敗潰。五月以後。在長沙復修船隻。重整規模。六月克復岳州。七月閏七月。掃蕩岳鄂之間。江面七百餘里。搜勦黃蓋斧頭等湖。八月克復武昌漢陽。於是水師之制略定。將卒亦略諳水戰之法。遂製爲水師得勝歌。令士卒歌誦。口相習以熟。冀爛其大略。而其臨陣之神明變化。則有不能及也。歌曰。

三軍聽我苦口說。教你水戰真秘訣。第一船上要潔淨。全仗神靈保性命。早晚燒香掃灰塵。敬奉江神與礮神。第二灣船要稀鬆。時時防火又防風。打仗也要去得稀。切莫擁擠喫大虧。第三軍器要整齊。船板莫沾半點泥。牛皮圈子挂漿楫。打溼水絮封藥箱。鞞子包包要纏緊。大子個個要同腔。擡鎗磨得乾乾淨。大礮洗得溜溜光。第四軍中要肅靜。大喊大叫須嚴禁。半夜驚營莫急躁。探聽賊情莫亂報。切莫亂打鑼和鼓。亦莫亂放鎗和礮。第五打仗不要慌。老手心中有主張。新手放礮總不準。看來也是打得蠢。遠遠放礮不進營。看來本事也平常。若是好漢打得進。越近賊船越有勁。第六水師要演操。兼習長矛并短刀。邊漿要快舵要穩。打礮總要習個準。斜斜排個一字陣。不慌不忙聽號令。出隊走得一線穿。收隊排得一路連。慢的切莫丟在後。快的切莫走在前。第七不可搶賊贓。怕他來殺回頭槍。又怕暗中藏火藥。未曾得財先受傷。第八水師莫上岸。止許一人當買辦。其餘個個要守船。不可半步走河沿。平時上岸打百板。臨陣上岸就要斬。八條句句值千金。你們牢牢記在心。我待將官如兄弟。我待兵勇如子姪。你們隨我也久長。人人曉得我心腸。願爾將官莫懈怠。願爾兵勇莫學壞。未曾算去先算回。未曾算勝先算敗。各人努力各謹慎。自然萬事都平順。仔細聽我得勝歌。升官發財笑呵呵。

陸軍得勝歌 咸豐六年在江西南昌省城作

三軍聽我苦口說。教你陸戰真秘訣。第一紮營要端詳。營盤選個好山岡。不要低窪潮溼地。不要一坦大平洋。後有退步前有進。一半見面一半藏。看定地方插標記。插起竹竿牽繩牆。繩子圍出三道圈。內圈略窄外圈寬。六尺牆脚八尺壕。壕要築緊牆要牢。正牆高要七尺滿。子牆只有一半高。爛泥碎石不堅固。兩後倒塌一缸糟。一營只開兩道門。門外驅逐閑雜人。肩圍挖些好茅廁。免得熱天氣臭薰。三里以外把個卡。日日守卡夜夜巡。第二打仗要細思。出隊要分三大支。中間一支且紮住。左右兩支先出去。另把一支打接應。再要一支埋伏定。隊伍排在山坡上。營官四處好瞭望。看他那邊是來路。看他那邊是去向。看他那路有伏兵。看他那路有強將。那處來的真賊頭。那邊做的假模樣。件件看清件件說。說得人人都胆壯。他吶喊來我不喊。他放鎗來我不放。他若撲來我不動。待他疲了再接仗。起手要陰後要陽。出隊要弱收隊強。初交手時如老鼠。越打越強如老虎。打散賊匪四山逃。追賊專從兩邊抄。逢屋逢山搜埋伏。隊伍切莫亂分毫。第三行路要分班。各營隊伍莫亂參。四大隊伍走前後。鍋帳担子走中間。不許爭先太擁擠。不許落後太單孤。選個探馬向前探。要選明白真好漢。每日先走二十里。一步一步仔細看。遇著樹林探村莊。遇著河水探橋梁。遇著岔路探埋伏。左邊右邊都要防。遇著賊匪來迎敵。飛馬回報不要忙。看定地勢并虛實。遲報一刻也不妨。前有探馬走前站。後有將官押尾幫。過了尾幫落後邊。插他耳箭打一干。第四規矩要肅清。有禮有法有號令。哨官管兵莫太寬。營官也要嚴哨官。出營歸營要告假。朔日望日要請安。若有公事穿衣服。大家出來站個班。營門擺設杖和枷。閒人進來便鎖拏。不許吸煙并賭博。不許高聲大喧嘩。姦淫擄掠定要斬。巡更傳令都要查。起更各哨就安排。傳齊夫勇點名來。營官三夜點一次。哨官每夜點一回。任憑客到文書到。營門一閉總不開。衣服裝扮要料峭。莫穿紅綠惹人笑。哨官不許穿長衣。兵勇不許穿輓料。脚上草鞋緊緊穿。身上腰帶緊緊纏。頭上包巾緊緊紮。英雄樣子都齊全。第五軍器要整齊。各人製件好東西。雜木杆子溜溜圓。又光又硬又發縣。常常在手摸得久。越摸越熱越值錢。鎗頭只要六寸長。要出楊家梨花鎗。大刀要輕腰刀重。快如閃電白如霜。鎗礮鑽洗要乾淨。鉛子個個要合膛。生漆皮桶盛火藥。勤翻勤曬見太陽。鋤鐵鑿子要

粗大斧頭要嵌三分鋼。火毯都要親手製。六分淨硝四分磺。旂幟三月換一次。紅的印心白的鑲。統領八面營官。四隊長一面哨官雙。樹樹搖出如龍虎。對對走出似鴛鴦。第六兵勇要演操。清靜靜靜莫能嘈。早習大刀並鎗子。晚習爬牆並跳壕。壕溝要跳八尺寬。牆子要爬七尺高。樹個靶子十丈遠。火毯石子手中拋。閒時尋個寬地方。又演跑隊又演鎗。鳥鎗手勁習個穩。擡鎗眼力習個準。灌起鉛子習打靶。翻山過水習跑馬。事事操習事事精。百戰百勝有名聲。者個六條句句好。人人唱熟是祕寶。兵勇甘苦我盡知。生怕你們喫了虧。仔細唱我得勝歌。保你福多又壽多。

愛民氏歌 咸豐八年 在江西建昌大營作

三軍個個仔細聽。行軍先要愛百姓。賊匪害了百姓們。全靠官兵來救人。百姓被賊吃了苦。全靠官兵來作主。第一紮營不要懶。莫走人家取門板。莫拆民房毀磚石。莫踹禾苗壞田產。莫打民間鴨和雞。莫借民間鍋和碗。莫派民夫來挖壕。莫到民家去打館。築牆莫攔街前路。砍柴莫砍墳上樹。挑水莫挑有魚塘。凡事都要讓一步。第二行路要端詳。夜夜總要支帳房。莫進城市占鋪店。莫向鄉間借村莊。人有小事莫喧嘩。人不躲路莫擠他。無錢莫扯道邊菜。無錢莫吃便宜茶。更有一句緊要書。切莫擄人當長夫。一人被擄挑擔去。一家嘯哭不安居。娘哭子來眼也腫。妻哭夫來淚也枯。從中地保又誘錢。分派各團并各都。有夫派夫無派錢。牽了騾馬又牽豬。雞飛狗走都嚇倒。塘裏嚇死幾條魚。第三號令要嚴明。兵勇不許亂出營。走出營來就學壞。總是百姓來受害。或走大家誘錢文。或走小家調婦人。這些地痞做數計。買些燒酒同喝醉。逢著百姓就要打。遇著店家就發氣。可憐百姓打出血。喫了大虧不敢說。生怕老將不自在。還要出錢去陪罪。要得百姓稍安靜。先要兵勇聽號令。陸軍不許亂出營。水軍不許岸上行。在家皆是做良民。出來當兵也是人。官兵賊匪本不同。官兵是人賊是禽。官兵不搶賊匪搶。官兵不淫賊匪淫。若是官兵也淫搶。便同賊匪一條心。官兵與賊不分明。到處傳出醜聲名。百姓聽得就心酸。上司聽得

殺眉尖。上司不肯發糧餉。百姓不肯賣米鹽。愛民之軍處處嘉。擾民之軍處處嫌。我的軍士跟我早。多年在外各
聲好。如今百姓更窮困。願我軍士聽教訓。軍士與民如一家。千記不可欺負他。日日熱唱愛民歌。天和地和又人
和。

解散歌 咸豐十一年安州縣門大營

莫打鼓來莫打鑼。聽我唱個解散歌。如今賊多有緣故。大半都是搆進去。搆了良民當長毛。個個心中都想逃。官
兵若殺脅從人。可憐冤枉無處伸。良民一朝被賊擄。喫盡千辛并萬苦。初搆進去就挑擔。板子打得皮肉爛。又要
糞飯又撮柴。上無衣服下無鞋。看看頭髮一寸長。就要逼他上戰場。初上戰場眼哭腫。又羞又恨又懵懂。向前又
怕官兵砍。退後又怕長毛斬。一年兩載髮更長。從此不敢回家鄉。一封家信無處寄。背地落淚想爺娘。被擄太久
家太貧。兒子餓死妻嫁人。半夜偷逃想回家。層層賊卡有盤查。又怕官軍盤得緊。跪求饒命也不准。又怕團勇來
訛錢。搶去衣服并盤纏。種種苦情說不完。說起閻王心也酸。我今到處貼告示。凡有脅從皆免死。第一不殺老和
少。登時釋放給護照。第二不殺老長髮。一尺二尺皆遺發。第三不殺面刺字。勸他用藥洗幾次。第四不殺打過仗。
丟了軍器便釋放。第五不殺做偽官。被脅受職也可寬。第六不殺舊官兵。殺賊圍捉也原情。第七不殺賊探子。也
有愚民被驅使。第八不殺細送人。也防鄉團緝難民。人人不殺都膽壯。各各逃生尋去向。賊要聚來我要散。賊要
看來我要放。每人給張免死牌。保你千妥又萬當。往年在家犯過罪。從今再不算前帳。不許縣官問陳案。不許仇
人告舊狀。一家骨肉再團圓。九重皇恩真浩蕩。一言普告州和縣。再告兵勇與團練。若遇脅從難民歸。莫搶銀錢
莫刺衣。

格言四幅書贈李芋仙時咸豐十一年在東流大營

身到心到眼到手到口到

身到者。如作吏則親驗命盜案。親查鄉里。治軍則親巡營壘。親冒矢石是也。心到者。凡事苦心剖晰。大條理。小條理。始條理。終條理。先要學得開。後要括得攏是也。眼到者。著意看人。認真看公牘是也。手到者。於人之短長。事之關鍵。隨筆寫記。以備遺忘是也。口到者。於使人之事。警衆之辭。既有公文。又不憚再三苦口丁寧是也。余近與寮友論治事之法。錄貽芋仙共證之。

讀古書以訓詁爲本。作詩文以聲調爲本。事親以得歡心爲本。養生以少惱怒爲本。立身以不妄語爲本。治家以不晏起爲本。居官以不要錢爲本。行軍以不擾民爲本。

右八者。余庚申六月書於日記冊中。用以自警。厥後軍事無利。每於家書中錄此以誡子弟。芋仙屬書后官格言。因錄一通。此八者。後四語尤爲吃緊。或出或處。不可離也。

以才自足。以能自矜。則爲小人所忌。亦爲君子所薄。

老莊之旨。以此爲最要。故再三言之而已。南榮越嘉糧。至老子之所。老子曰。『子何與人偕來之衆也。』國藩每讀之。不覺失笑。以仲尼之溫恭儉讓。常以周公才美驕吝爲戒。而老子猶曰。『去汝之躬矜與容智。』雖非事實。而老氏之所惡於儒術者。舉可知已。莊生尤數數言此。吾最愛徐無鬼篇中語曰。『學一先生之言。則暖暖姝姝而私自悅也。』又曰。『以賢臨人。未有得人者也。以賢下人。未有不得人者也。』

古之善爲詩古文者。其工夫皆在詩古文之外。若尋行數墨以求之。索之愈迫。則去之愈遠矣。

余好讀歐陽公送徐無黨南歸序。乃知古之賢者。其志趣殊不願以文人自命。東坡讀少陵『許身稷契』及『舜學十六相』等句。以謂此老胸中大有事在。大抵經綸雷雨。關乎遭際。非人力所能強。至於襟期澹泊。遺外聲利。則學者人人可勉也。

書贈仲弟六則

清。記曰。『清明在躬。』吾人身心之間。須有一種清氣。使子弟欽其和。鄉黨薰其德。庶幾積善可以致祥。飲酒太
多。則氣必昏濁。說話太多。則神必躁擾。弟於此二弊。皆不能免。欲葆清氣。首貴飲酒有節。次貴說話不苟。

儉。凡多欲者不能儉。好動者不能儉。多欲如好衣好聲色好書畫古玩之類。皆可浪費破家。弟向無癖嗜之好。而
頗有好動之弊。今日思作某事。明日思訪某客。所費日增而不覺。此後講求儉約。首戒好動。不輕出門。不輕舉
事。不特不作無益之事。即修理橋梁道路寺觀善堂。亦不可輕作。舉動多則私費大矣。其次則僕從宜少。所謂
食之者寡也。其次則送情宜減。所謂用之者舒也。否則今日不儉。異日必多欠債。既負累於親友。亦貽累於子
孫。

明。三達德之首曰智。智即明也。古來豪傑動稱英雄。英即明也。明有二端。人見其近。吾見其遠。曰高明。人見其粗。
吾見其細。曰精明。高明者。譬如室中所見有限。登樓則所見遠矣。登山則所見更遠矣。精明者。譬如至微之物。
以顯微鏡照之。則加大一倍十倍百倍矣。又如粗糲之米。再舂則粗糠全去。三舂四舂到精白絕倫矣。高明由
於天分精明。由於學問。吾兄弟忝居大家。天分均不甚高明。專賴學問以求精明。好問若買顯微之鏡。好學若
舂上熟之米。總須心中極明。而後口中可斷。能明而斷。謂之英斷。不明而斷。謂之武斷。武斷自己之事。爲害猶
淺。武斷他人之事。招怨實深。惟謙退而不肯輕斷。最足養福。

慎。古人曰。欽曰敬。曰謙。曰謹。曰虔。恭曰。祗懼。皆慎字之義也。慎者。有所畏懼之謂也。居心不循天理。則畏天怒。作
事不順人情。則畏人言。少賤則畏父師。畏官長。老年則畏後生之竊議。高位則畏僚屬之指摘。凡人方寸有所
畏懼。則過必不大。鬼神必從而原之。若嬉遊鬥牌等事。而毫無忌憚。壞鄰黨之風氣。作子孫之榜樣。其所損者
大矣。

恕。聖門好言仁。仁即恕也。曰富。曰貴。曰成。曰榮。曰譽。曰順。此數者。我之所喜。人亦皆喜之。曰貧。曰賤。曰敗。曰辱。曰
毀。曰逆。此數者。我之所惡。人亦皆惡之。吾輩有聲勢之家。一言可以榮人。一言可以辱人。榮人則得名得利得

光耀人尙未必感我。何也。謂我之勢。幫人不難也。辱人則受刑受罰受苦惱。人必恨我。次骨何也。謂我倚勢欺人太甚也。吾兄弟須從恕字。痛下工夫。隨在皆設身以處地。我要步步站得穩。須知他人也要站得穩。所謂立也。我要處處行得通。須知他人也要行得通。所謂達也。今日我處順境。預想他日也有處逆境之時。今日我以盛氣凌人。預想他日人亦以盛氣凌我之身。或凌我之子孫。常以恕字自惕。常留餘地處人。則荆棘少矣。靜。靜則生明。動則多咎。自然之理也。家長好動。子弟必紛紛擾擾。朝生一策。暮設一計。雖嚴禁之而不能止。欲求一家之安靜。先求一身之清靜。靜有二道。一曰不入是非之場。二曰不入勢利之場。鄉里之詞訟。曲直於我何干。我若強爲割斷。始則賠酒飯。後則惹怨恨。官場之得失升沉。於我何涉。我若稍爲干預。小則招物議。大則挂彈章。不若一概不管。可以斂後輩之躁氣。即可保此身之清福。

勸諭誠州縣上而道府下而在縣以此類推

一曰治署內以端本

宅門以內曰上房。曰官親。曰幕友。曰家丁。頭門以內曰書辦。曰差役。此六項者。皆署內之人也。爲官者。欲治此六項人。須先自治其身。凡銀錢一分一毫。一出一入。無不可對人言之處。則身邊之人。不敢妄取。而上房官親幕友家丁四者皆治矣。凡文書案牘。無一不躬親檢點。則承辦之人。不敢舞弊。而書辦差役二者皆治矣。

二曰明刑法以清訟

管子荀子文中子之書。皆以嚴刑爲是。以赦宥爲非。子產治鄭。諸葛治蜀。王猛治秦。皆用嚴刑。以致乂安。爲州縣者。苟盡心於民事。是非不得不剖辨。讞結不得不迅速。既求迅速。不得不刑惡人。以伸善人之氣。非虐也。除莠所以愛苗也。懲惡所以安良也。若一案到署。不訊不結。不分是非。不用刑法。名爲寬和。實糊塗耳。嬾惰耳。縱姦惡以害善良耳。

三曰重農事以厚生

軍興以來。士與工官。生計或未盡絕。淮農夫則無一人不苦。無一處不苦。農夫受苦太久。則必荒田不耕。軍無糧。則必擾民。民無糧。則必從賊。賊無糧。則必變流賊。而大亂無了日矣。故今日之州縣。以重農爲第一要務。病商之錢可取。病農之錢不可取。薄斂以紓其力。減役以安其身。無牛之家。設法購買。有水之田。設法疏通。要使農夫稍有生聚之樂。庶不至逃徙一空。

四曰崇儉樸以養廉

近日州縣廉俸。入款皆無著落。而出款仍未盡裁。是以艱窘異常。計淮有節用之一法。尙可公私兩全。節用之道。莫先於人少。官親少。則無需索酬應之繁。幕友家丁少。則減辦工雜支之費。官廚少一雙之箸。民間寬一分之力。此外衣服飲食。事事儉約。聲色洋煙。一一禁絕。不獻上司。不肥家產。用之於己者有節。則取之於民者有制矣。

勸懲營官四條 上而統領下而哨弁以此類推

一曰禁騷擾以安民

所惡乎賊匪者。以其淫擄焚殺。擾民害民也。所貴乎官兵者。以其救民安民也。若官兵擾害百姓。則與賊匪無殊矣。故帶兵之道。以禁止騷擾爲第一義。百姓最怕者。淮強擄民夫。強佔民房二事。擄夫則行者辛苦。居者愁思。佔房則器物毀壞。家口流離。爲營官者。先禁此二事。更於淫搶壓買等事。一一禁止。則造福無窮矣。

二曰戒煙賭以儆情

戰守乃極勞苦之事。全仗身體強壯。精神完足。方能謹慎不敗。洋煙賭博二者。既費銀錢。又耗精神。不能起早。不能守夜。斷無不誤軍事之理。軍事最喜朝氣。最忌暮氣。情則皆暮氣也。洋煙癮發之人。涕洟交流。遍身癱軟。賭博勞夜之人。神魂顛倒。竟日癡迷。全是一種暮氣。久驕而不敗者。容或有之。久惰則立見敗亡矣。故欲保軍士常新

之氣。必自戒煙賭始。

三曰勤訓練以禦寇

訓有二端。一曰訓營規。二曰訓家規。練有二端。一曰練技藝。二曰練陣法。點名演操。巡更放哨。此將領教兵勇之營規也。禁嫖賭。戒游惰。慎語言。敬尊長。此父兄教子弟之家規也。爲營官者。待兵勇如子弟。使人人學好。個個成名。則衆勇感之矣。練技藝者。刀矛能保身。能刺人。鎗礮能命中。能及遠。練陣法者。進則同進。站則同站。登山不亂。越水不雜。總不外一熟字。技藝極熟。則一人可敵數十人。陣法極熟。則千萬人可使如一人。

四曰尙廉儉以服衆

兵勇心目之中。專從銀錢上著意。如營官於銀錢不尙。則兵勇畏而且服。若銀錢尙且。則兵勇心中不服。口中譏議。不特扣減口糧。缺額截贖。而後議之也。即營官好多用親戚本家。好應酬上司朋友。用營中之公錢。謀一身之私事。也算是虛糜餉銀也。難免兵勇譏議。欲服軍心。必先尙廉介。欲求廉介。必先崇儉樸。不妄花一錢。則一身廉。不私用一人。則一營廉。不獨兵勇畏服。亦且鬼神欽伏矣。

勸誠委員四條 尙無額缺現有職事之員皆歸此類

一曰習勤勞以盡職

觀於田夫農父。終歲勤勞。而少疾病。則知勞者所以養身也。觀於舜禹周公。終身憂勞。而享壽考。則知勞者所以養心也。大抵勤則難朽。逸則易壞。凡物皆然。勤之道有五。一曰身勤。險遠之路。身往驗之。艱苦之境。身親嘗之。二曰眼勤。遇一人。必詳細察看。接一文。必反覆審閱。三曰手勤。易棄之物。隨手收拾。易忘之物。隨筆記載。四曰口勤。待同僚。則互相規勸。待下屬。則再三訓導。五曰心勤。精誠所至。金石亦開。苦思所積。鬼神亦通。五者皆到。無不盡之職矣。

二曰崇儉約以養廉

昔年州縣佐雜。在省當差。并無薪水銀兩。今則月支數十金。而猶嫌其少。昔年舉貢生員。在外坐館。不過每月數金。今則增至一兩倍。而猶嫌其少。此所謂不知足也。欲學廉介。必先知足。觀於各處難民。徧地饑饉。則吾輩之安居衣食。已屬至幸。尙何奢望哉。尙敢暴殄哉。不特當廉於取利。并當廉於取名。毋貪保舉。毋好虛譽。事事知足。人人守約。則氣運可挽回矣。

三曰勤學問以廣才

今世萬事紛紜。要之不外四端。曰軍事。曰吏事。曰餉事。曰文事而已。凡來此者。於此四端之中。各宜精習一事。習軍事。則講究戰攻。防守。地勢。賊情等件。習吏事。則講究撫字。催科。聽訟。勸農等件。習餉事。則講究丁漕。釐捐。開源。節流等件。習文事。則講究奏疏。條教。公牘。書函等件。講究之法。不外學問二字。學於古。則多看書籍。學於今。則多見榜樣。問於當局。則知其甘苦。問於旁觀。則知其效驗。勤習不已。才自廣而不覺矣。

四曰戒傲情以正俗

余在軍日久。不識術數占驗。而頗能預知敗徵。大約將士有驕傲氣者必敗。有情急氣者必敗。不獨將士然也。凡委員有傲氣者。亦必債事。有情氣者。亦必獲咎。傲情之所起者微。而積久遂成風俗。一人自是。將舉國予聖自雄矣。一人晏起。將舉國俾晝作夜矣。今與諸君約。多做實事。少說大話。有勞不避。有功不矜。人人如此存心。則勦業自此出。風俗自此正。人材亦自此盛矣。

勸戒紳士十四條

本省紳外省客僱之士皆歸此類

一曰保愚懦以庇鄉

軍興以來。各縣皆有紳局。或籌辦團練。或支應官軍。大抵皆斂錢以集事。或酌量捐資。或按畝派費。名爲均分勻

派。實則高下參差。在局之紳者少出。不在局之愚懦多出。與局紳有聲氣者少出。與局紳無瓜葛者多出。與局紳有夙怨者。不惟勒派多出。而且嚴催凌辱。是亦未嘗不害民也。欲選紳士。以能保本鄉愚懦者爲上等。能保愚懦。雖僞職亦尙可恕。凌虐愚懦。雖巨紳亦屬可誅。

二曰崇廉讓以奉公

凡有公局。卽有經管銀錢之權。又有勞績保舉之望。同列之人。或爭利權而相怨。或爭保舉而相軋。此不廉也。始則求縣官之一札以爲榮。繼則大柄下移。毫無忌憚。衙門食用之需。仰給紳士之手。擅作威福。藐視官長。此不遜也。今特申戒各屬紳士。以敬長官爲第一義。財利之權。歸之於官。賞罰之柄。操之自上。卽同列衆紳。亦互相推讓。不爭權勢。紳士能潔己而奉公。則庶民皆尊君而親上矣。

三曰禁大言以務實

以諸葛之智勇。不能克魏之一城。以范韓之經綸。不能制夏之一隅。是知兵事之成敗利鈍。皆天也。非人之所能爲也。近年書生侈口談兵。動輒曰克城若干。拓地若干。此大言也。孔子曰。『攻其惡。無攻人之惡。』近年書生。多好攻人之短。輕詆古賢。苛責時彥。此亦大言也。好談兵事者。其閱歷必淺。好攻人短者。其自修必疏。今與諸君子約。爲務實之學。請自禁大言始。欲禁大言。請自不輕論兵始。自不道人短始。

四曰擴才識以待用

天下無現成之人才。亦無生知之卓識。大抵皆由勉強磨鍊而出耳。淮南子曰。『功可強成。名可強立。』董子曰。『強勉學問。則聞見博。強勉行道。則德日起。』中庸所謂。『人一己百。人十己千。』卽勉強工夫也。今士人皆思見用於世。而乏用世之具。誠能可信於載籍。問途於已經。苦思以求其通。躬行以試其效。勉之又勉。則識可漸進。才亦漸充。才識足以濟世。何患世莫己知哉。

以上十六條。分之。則每一等人。各守四條。合之。則凡諸色人。皆可參觀。聖賢之格言甚多。難以備述。朝廷之律

例甚密。亦難周知。只此淺近之語。科條在此。黜陟亦在此。願我同人共勉焉。咸豐十一年九月。曾國藩識。

勸學篇示直隸士子

人才隨土風而轉移。信乎。曰。是不盡然。然大較莫能外也。前史稱燕趙慷慨悲歌。敢於急人之難。蓋有豪俠之風。余觀直隸先正。若楊忠愍趙忠毅鹿忠節孫徵君諸賢。其後所詣各殊。其初皆於豪俠爲近。即今日士林亦多剛而不撓。質而好義。猶有豪俠之遺。才資本於土風。殆不誣與。豪俠之質。可與入聖人之道者。約有數端。俠者薄視財利。棄萬金而不眴。而聖賢則富貴不處。貧賤不去。痛惡夫墻間之食。龍斷之登。雖精粗不同。而輕財好義之迹。則略近矣。俠者忘己濟物。不惜苦志。脫人於厄。而聖賢以博濟爲懷。鄒魯之汲汲皇皇。與夫禹之猶己溺。堯之猶己飢。伊尹之猶己推之溝中。曾無少異。彼其能力救窮交者。卽其可以進援天下者也。俠者輕死重氣。聖賢學言及此。然孔曰成仁。孟曰取義。堅確不移之操。亦未嘗不與之相類。昔人譏太史公好稱任俠。以余觀此數者。乃不悖於聖賢之道。然則豪俠之徒。未可深貶。而直隸之士。其爲學當較易於他省。烏可以不致力乎哉。致力如何。爲學之術有四。曰義理。曰考據。曰辭章。曰經濟。義理者。在孔門爲言語之科。從古藝文。及今世制義詩賦皆是也。經濟者。在孔門爲文學之科。今世目爲漢學者也。辭章者。在孔門爲言語之科。從古藝文。及今世制義詩賦皆是也。經濟者。在孔門爲政事之科。前代典禮政書。及當世掌故皆是也。人之才智。上哲少而中下多。有生又不過數十寒暑。勢不能求此四術。徧觀而盡取之。是以君子貴慎其所擇而先其所急。擇其切於吾身心。不可遠次離者。則莫急於義理之學。凡人身所自具者。有耳目口體心思。日接於吾前者。有父子兄弟夫婦。稍遠者有君臣。有朋友。爲義理之學者。蓋將使耳目口體心思。各敬其職。而五倫各盡其分。又將推以及物。使凡民皆有以善其身。而無憾於倫紀。夫使舉世皆無憾於倫紀。雖唐虞之盛。有不能遠。苟通義理之學。而經濟該乎其中矣。程朱諸子。遺書具在。曷嘗會末而言本。遺新民而專事明德。觀其雅言推闡。反覆而不厭者。大抵不外立志以植基。居敬以養德。窮理以致知。克

己以力行。成物以致用。義理與經濟。初無兩術之可分。特其施功之序。詳於體而略於用耳。今與直隸多士約。以義理之學爲先。以立志爲本。取鄉先達楊趙鹿孫數君子者爲之表。彼能艱苦困餓。堅忍以成業。而吾何爲不能。彼能置窮通榮辱禍福生死於度外。而吾何爲不能。彼能以功績稱當時。教澤膺後世。而吾何爲不能。洗除舊日曖昧卑劣之見。矯然直趨廣大光明之域。視人世之浮榮微利。若蠅蚋之觸於巨而不留。不憂所如不耦。而憂節概之少貶。不恥凍餒在室。而恥德不被於生民。志之所向。金石爲開。誰能禦之。志既定矣。然後取程朱所謂居敬窮理。力行成物云者。精研而實體之。然後求先儒所謂考據者。使吾之所見。證諸古制而不謬。然後求所謂辭章者。使吾之所獲。達諸筆削而不差。擇一術以堅持。而他術固未敢竟廢也。其或多士之中。質性所近。師友所漸。有偏於考據之學。有偏於辭章之學。亦不必遽易前轍。即二途皆可入聖人之道。其文經史百家。其業學問思辨。其事始於修身。終於濟世。百川異派。何必同哉。同達於海而已矣。若夫風氣無常。隨人事而變遷。有一二人好學。則數輩皆思力進先哲。有一二人好仁。則數輩皆思康濟斯民。倡者啓其結。和者衍其波。倡者可傳諸同志。和者又可禮諸無窮。倡者如有本之泉。放乎川瀆。和者如支河溝澮。交匯旁流。先覺後覺。互相勸誘。譬之大水小水。互相灌注。以直隸之士風。誠得有志者導夫先路。不過數年。必有體用兼備之才。彬彬而四出。泉湧而雲興。余忝官斯土。自媿學無本原。不足儀型多士。嘉此邦有剛方質實之學。鄉賢多堅苦卓絕之行。粗述舊聞。以勗羣士。亦冀通才碩彥。告我昌言。上下交相勸勉。仰希古昔與人爲善。取人爲善之軌。於化民成俗之道。或不無小補云。

直隸清訟事宜十條

第一條通省大小衙門公文宜速

凡公事遞延。通弊有二。曰支。曰展。支者。推諉他人。如院仰司。司仰府。府仰縣之類。一經轉行。卽算辦畢。但求出門。不求了事是也。展者。遞延時日。如上月展至下月。春季展至夏季。愈宕則愈鬆。擔遲不擔錯者是也。各省均難免

此習氣而直隸則似更甚。藩司照轉督院之文。有數月未轉行者。總局奉飭核議之件。有終歲不議詳者。上控之案。飭府先查。大概往往經年不報。飭縣錄案詳復。亦或經年不復。催提錢糧。則曰。『另文批解。』催提人證。則曰。『傳到卽解。』宕過數次。上司亦遂置之不問。上下相容。疲玩已甚。前此猶有軍務可議。本部堂當肅清之後。不得不力挽積習。與諸君子合舊圖新。以公事之勤惰。覘同官之賢否。除尋常文牘外。如催解銀解犯之類。均須酌定期限。分記功過。其四種月報之四柱冊。限期送省。懸榜官廳。至飭道府先查大概之事。飭州縣錄案詳復之件。亦將限期懸牌官廳。違者記過。小過積至六次。大過積至三次者。撤委示懲。司道有積壓之文。本部堂必面加詰責。督署有稽延之牘。亦望僚友立進箴規。通省上下。皆以勤字爲本。自有一種旭日初升氣象。雖不專爲獄訟。而清訟之道。必自此始。

第二條保定府發審局宜首先整頓

保定發審局。雖爲首府之專司。而實總督衙門之分局。凡京控省控。奏交咨交各案。總督獨挈其綱。而兩司與首府分任其責。若不能詳慎速結。則積案日多。弊端百出。聞京控發交到局。委員往提人證。間有得錢賣放之弊。行賄受託。則以患病外出等詞。捏稟搪塞。此一弊也。案證提到省城。分別保押。聽候審辦。有發交清苑取保者。縣役任意訛索。其發交轅門取保者。府役與門丁。任意訛索。有取店保者。店家居奇勒捐。擇肥而噬。此又一弊也。每過堂時。必有差役。承帶案證。而承帶之差。往往五日一換。換差一次。講費一次。誅求無厭。此又一弊也。斯三者。全賴首府認真防範。督院及臬司隨時稽查。提犯則刪除閒人。專提要證。愈少愈好。札飭本地方官。依限解到。不得輕率委員前往。取保。則再三訪察。嚴禁訛索。承帶則一案一差。始終不准更換。吾輩稍盡一分之心。訟者少受一分之苦。及發交局員審訊。每案只派一員承審。一員副之。凡京控巨案。初到時正副二員。將卷宗細看。過堂一二次。尋出端倪。開一節略。其末即稍判曲直。五日之內。臬司帶同首府。及正副承審官上院。本部堂與之商論一番。名曰議獄。其應由藩司主稿者。則兩司帶同首府局員。上院議獄。議畢。再行審訊。緊要工夫。全在議獄一次。及初訊

一二堂。而案之是非已明矣。未過堂之先。不妨詳慎訪察。既過堂。則須求速了。愈速則真情易露。愈久則幻態彌多。其業已淹滯者。尤須設法催辦。上司以嚴札催之。首府以婉言催之。局員以仁心自催之。另立限期。分記功過。訊結之後。取保者飭令速歸。管押者立予釋放。卽監禁者。亦時加檢點。惟恐凍斃。首府之滯獄一清。通省之風俗立變。造福造孽。只在吾人寸心一轉移間耳。

第三條州縣須躬親六事不得盡信幕友丁書

牧令爲自古要官。百姓之所託命。非才德俱優。難言稱職。然天下安得許多翼黃卓魯萃於一方。吾輩與人爲善。懸格不可太高。但求中材可勉者。苟能以勤字爲本。事事必躬必親。便可造到第一等循吏。直隸怠玩之習。相沿已久。每逢三入告期。或委典史收狀。或由承發房將呈詞送交門丁。門丁積壓數日。送交幕友。幕友擬批挂榜。而本官尙不知呈中所告何事。至判閱稿稟時。任聽丁書主政。按照呈內姓名。全數差傳。不敢刪減一名。甚至經年累月。未嘗坐堂訊問。兩造破家蕩產。求息訟而不能。此小民所以困窮。案牘所以叢積也。今與諸君約。有大事宜躬親者。放告之期。必須親自收狀。能斷者立予斷結。不能斷者。交幕擬批。必須親自細核。分別准駁。准理者差票傳人。必須親自刪減。命案盜案。以初時供招爲重。必須親自勘驗。愈速愈妙。承審限期。何日解勘。何日詳結。必須親自計算。監禁管押之犯。常往看視。每日牌示頭門。每月冊報上司。必須親自經理。六者皆能躬親。則聽訟之道。失者寡矣。如其怠情偷安。不肯躬親者。記過示懲。如其識字太少。不能躬親者。嚴參不貸。

第四條禁止濫傳濫押頭門懸牌示衆

凡小民初涉訟時。原被告彼此忿爭。任意混寫多人。其中妄扳者居多。且有差役勾串。牽入呈內者。票上之傳人愈多。書差之索費愈甚。名曰叫點。所謂「堂上一點珠。民間萬點血也。」嗣後自理詞訟。只准一原一被一干證。或證至二三人爲止。不准多傳。傳到人證。非命盜大案。不准輕於管押。只許當堂取保候訊。萬不得已而羈押。則須隨時親到班館查訪。有無凌虐私押等弊。仍製造大粉牌一面。懸掛頭門之外。將在押人姓名。逐一開載。並註

明某月某日因某案管押。書明牌上。俾衆周知。倘書差舞弊私押。准家屬喊稟嚴究。本部堂常常派人密查。如有並未懸牌。或牌上人數與在押人數不符。與月報之數不符者。記過重懲。

第五條禁止書差索費

凡一呈詞到案。如有交涉富民及巨商者。則差役勾串門丁。買此案差票。又或丁書納賄。簽粘原差之名于票尾。朦官標判。又或家丁求明本官。指名簽差。此種弊竇。無處無之。又或原差串通告狀之人。伺該差值日。方來喊控。以爲朋比訛索地步。此卽江南所謂坐差也。差役持票到門。引類呼朋。叫囂徵逐。婦女出避。雞犬不安。本家之搜索既空。親族或因受累。及審訊時。有坐堂之費。將結時。有了衙門之費。兩造議和者。又有和息呈詞之費。一字到官。百端需索。瘡痍赤子。其何以堪。自今以後。各屬當除以上積弊。凡簽差皆擇謹愿者。分路酌派。不准丁書粘簽指請。一切規費。酌量核減。視民家有差騷擾。如吾家有差未退。視民家有訟糾纏。如吾家有訟未結。官長設身處地。則民間受福無窮。此在良有司寸心自儆自修。吾不能一一預懸記過之格。然訪察得實。亦必隨時嚴懲。

第六條四種四柱冊按月呈報懸榜

直隸向來章程。州縣按月呈報上司者。約有五種。一曰新舊各案。已結未結。開摺呈報。二曰監禁之犯。開摺呈報。三曰管押之犯。開摺呈報。四曰監管病斃者。具稟呈報。五曰竊賊未獲者。具稟呈報。每月報此五事。立法可謂至密至善矣。乃近來不報之縣甚多。呈報之縣甚少。即或偶報一月。又復間斷數月。以致無可稽查。今欲清釐獄訟。須將此四種章程。認真行之。本閣部堂定一格式。首曰積案。上月控者爲舊管。本月控者爲新收。審結者。和息者。注銷者。爲開除。未結者爲實在。次曰監禁。次曰管押。皆分舊管。新收。開除。實在爲四柱。又次曰逸犯。無論強盜竊賊。土匪逃軍。凶犯要證。但係逃逸應緝者。概名之曰逸犯。分舊逸。新逸。已獲。在逃爲四柱。其逸犯名數未定者。則倅注曰。又應緝者幾起。每縣每月。填寫格式一葉。而四種朗然在目矣。其每種各開人名事宜清單。仍照向例開寫。但宜略不宜詳耳。州縣於每月初一二三等日。辦齊四柱冊四種。由驛遞省。其偏僻之縣。自度驛遞難到者。專

差送省。限十日內送齊。院司查對數目。釘成總冊。存於三處官廳。大眾閱看。其未報者。報而不實者。立予記過。其已報者。視結案獲犯之遲速。監禁管押之多少。定該員之功過。有過有功者。另寫一榜。懸於三處官廳。此皆本省舊章。前督劉公會申明之。本閣部堂與諸寮友嘗力行之。

第七條嚴治盜賊以弭隱患

近來盜案迭出。搶劫頻仍。勒緝嚴比之文書不絕。而罕見破獲之犯。初二三參之奏咨不絕。而終無降調之官。即真正強盜斬犯。而再三勘轉。狡供駁回。亦非四五年不能正法。爲從者更逍遙法外。毫無畏懼。是以盜風日盛。邦畿重地。萬方輻湊。而行旅皆有戒心。從前臬匪教匪。捻黨降衆。餘氛未殄。一夫煽動。羣盜嘯聚。此直隸之隱患也。欲弭大患。先除小盜。州縣一遇盜案。無不責成捕役。捕役之能幹者。強半通賊。本不願於破案。一經破獲之後。解府解省。往返羈留。費用半出自捕役。捕役應得之工食。本官久措不發。解案之費資。該役無從措辦。此捕快所以藉參賊爲生路。視獲賊爲畏途也。嗣後各州縣。皆宜厚養捕役。工食之外。另給月餉。恣其所爲。譬如良將厚養死士。不問千日之過。但賣一朝之效。及至捕案之時。購線募人等費。官爲給發。重懸賞格。少者數十金。多者每名百金。或數百金。捕而不獲。則又酷刑嚴比。血濺肉飛。大利在前。峻法在後。而捕役之不盡力者寡矣。既養捕役以治其標。又擇團長以治其本。選明幹者數人立爲團長。優加禮貌。酌給薪資。令之幫辦捕務。約束鄉鄰。盲告者有賞。隱匿者連坐。禁賭場以清其藪。率窩家以絕其蹤。專講捕盜之實政。不尙會緝之虛文。既獲之後。分別兩種辦法。一種賊少而情輕者。仍照舊例。招解勘轉。一種賊多而情重者。稟請本部堂可不照軍法從事。本部堂審擇豎犯。批令先行解省。委審明確。立正軍法。劇盜之首逆。羣賊之胆自破。而臬教擒匪之餘黨。或亦可弭患無形。除具奏外。仰各屬實力遵行。其平日不能治本治標。臨時不能重賞嚴比者。記過撤參。其果能認真緝捕者。懸賞之銀。每名百金。可令獲犯之人徑來督院領賞。卽難解之犯。本部堂亦可派兵迎護。事事相諒相助。要不使屬員有掣肘處耳。

第八條訟案久懸不結核明註銷

鄉曲愚民，每因一言參商，致起訟端。迨事過氣平，或經親友勸解，又復怨釋，悔生彼此，情甘罷訟，而衙門索和息錢文，難以措辦，因而避匿遷延，久不到案。此案懸不結之一端也。又有刁民，憑空砌詞涉訟，或挾仇，或漁利，造作影響，無據之言，誣告多人，但求准狀，不求審理。遞呈之後，永遠不敢到案。此案懸不結之又一端也。直隸天津河間，此等惡風尤甚。若任其經年懸宕，則被告干證，受累無窮。每逢新年開印，或值新官到任，一概換票一次，恐嚇傳提，徒爲書差門丁謀利之券，實可深恨。查例載各衙門告言人罪，一經批准，卽令原告投審。若不赴審，輒復脫逃，及並無疾病事故，兩月不到案聽審者，卽將被誣及誣證釋放。所告之事，不與審理，拿獲原告，專治以誣告之罪等語。嗣後有日久未結各案，原告兩月未經呈催，卽照原告兩月無故不投審例，將案註銷，並將差票查繳，以清積牘。一面將註銷緣由稟聞，一面彙入月報冊，列於積案開除項下報查。

第九條分別阜白嚴辨誣告訟棍

直隸民情，樸厚剛直，好善之風，甲於天下。而健訟逞刁者，亦復不少。或貧民挾仇訛詐，砌詞上控，希圖拖累富民，或莠民聚衆相謀，動以錢糧差徭，控告官長，借大題爲斂錢之計，或訟棍扛幫不勝，復以詐贓斃命控告，書差借延訟爲餽啜之計，種種幻態，不可言狀。一經批飭提省，則奸計得行，而無辜受累。嗣後省控之案，院司不可輕於批准，情節支離，批詞卽宜斬截，不可姑准飭府查復等語。少准一誑狀，卽多造一陰功，其必須准理者，不可輕批提省。但責成本管知府，秉公研訊，或委賢明之員，前往會訊。其提省審辦者，則須剖分阜白，實究虛坐，理無兩是，勢不兩存。近來直省京控省控之案，一經發交讞局，平日則多方彌縫，臨結則一味含糊，告官得實者，承審官迴護同僚，但議以不應重不應輕之咎，告吏得實者，承審官剛政情節，但科以笞杖，及除名之罪。其控告全係誣誣者，則又曲庇奸民，惟恐反噬，但以懷疑妄控，及愚民無知等語了結之。奏交之案，十審九虛，刁訟之民，十虛九赦，問官皆自命爲和事之人，訟棍皆立身於不敗之地，阜白不分，莫此爲甚。自今以往，凡京控省控重案，本部堂率

屬讖獄之初。卽當確究虛實。審實者卽治被告以應得之罪。虛誣者卽治奸民以誣告之罪。黑白較然。不稍含混。一變向來麻木不仁之習。訟棍之積習玩法者。除照律科斷外。再加嚴刑。以痛苦之。本部堂懲治他犯。恪遵律例。獨至治盜賊訟棍。則當格外從嚴。冀以救一時之弊。有識者尙鑒亮焉。

第十條獎借人才變易風俗

嚴懲訟棍。邪氣雖除。而正氣不伸。則風俗仍難挽回。風俗之美惡。主持在縣官。轉移則在紳士。欲厚風俗。不得不培養人才。古者鄉大夫。賓興賢能。考其六德六行六藝而登進之。後世風教日頹。所謂六德者。不可得而見矣。至於六行。曰孝友。陸嫻任卹。孝友則宗族敬服。陸嫻則親黨敬服。今世未嘗無此等人也。任則出力以救急。卹則出財以濟窮。今世亦未嘗無此等人也。六藝。曰禮樂射御書數。今世取士。用文字詩賦經策。其事雖異。其名曰藝。則一也。今之牧令。卽古鄉大夫之職。本有興賢舉能之責。本部堂分立三科。以求賢士。凡孝友爲宗族所信。陸嫻爲親黨所信者。是爲有德之科。凡出力以担當難事。出財以襄成善舉者。是爲有才之科。凡工於文字詩賦。長於經解策論者。是爲有學之科。仰各州縣採訪保舉。一縣之中。多者五六人。少者一二人。其全無所舉。及舉而不實者。該牧令皆予記過。教官如確有所見。亦可隨時稟報。舉有德者。本部堂或寄扁額。以旌其宅。或延致來省。賜之酒食。餽之儀物。舉有才者。本部堂或飭屬派充團長。酌給薪水。或調省一見。札令幫辦捕務。舉有學者。本部堂或薦諸學使。量加獎拔。或召之來省肄業。優給膏火。每州每縣皆有數人。爲大吏所知。則正氣可以漸伸。奸宄因而斂迹。此雖與清訟無涉。而端本善俗。尤在於此。用一方之賢士。化一方之莠民。芳草成林。荆棘不鋤而自悴。鸞鳳在境。鷓鴣不逐而自逃。諸良吏無以爲迂而忽之。

曉諭新募鄉勇

爲曉諭事。照得本部堂招你們來充當鄉勇。替國家出力。每日給你們的口糧。養活你們。均是皇上的國帑。原是

三、你們學些武藝，好去與賊人打仗拚命。你們平日如不早將武藝學得精熟，將來遇賊打仗，你不能殺他，他便殺你。你若退縮，又難逃國法。可見學的武藝，原是保護你自己性命的。若是學得武藝精熟，大膽上前，未必即死。一經退後，斷不能生。此理甚明。況人之生死，有命存焉。你若不該死時，雖千萬人將你圍住，自有神明護佑，斷不得死。你若該死，就坐在家中，也是要死。可見與賊打仗，是怕不得的，也不必害怕。於今要你們學習拳棍，是操練你們的筋力。要你們學習鎗法，是操練你們的手脚。要你們跑坡跳坑，是操練你們的步履。要你們學習刀矛鉞叉，是操練你們的技藝。要你們看旗幟，聽號令，是操練你們的耳目。要你們每日演陣，住則同住，行則同行，要快大家快，要慢大家慢，要上前大家上前，要退後大家退後，是操練你們的行伍。要你們齊心，你們若是操得筋力強健，手足伶俐，步履便捷，技藝純熟，耳目精明，而又大家齊心，胆就大了。一遇賊匪，放礮的放礮，放鎗的放鎗，刀矛鉞叉，一齊上前，見一個殺一個，見十個殺十個，那怕他千軍萬馬，不難一戰成功。你們得官的得官，得賞的得賞，上不負皇上深仁厚澤，下即可慰本部堂一片苦心。本部堂於爾等有厚望焉。今將操練日期，開列於後。

一、每逢三六九日午前，本部堂下教場看試技藝演陣法。

一、每逢一四七日午前，著本管官下教場演陣，並看抬鎗鳥鎗打靶。

一、每逢二八日午前，著本管官帶領，赴城外近處跑坡搶旗跳坑。

一、每逢五逢十午前，即在營中演連環槍法。

一、每日午後，即在本營演習拳棒刀矛鉞叉，一日不可間斷。

一、臨陣有能殺賊一名者，功賞銀十兩，並賞八品軍功。

一、殺賊二名者，功賞銀二十兩，並賞六品軍功。

一、殺賊三名以上者，除功賞銀三十兩外，隨即奏請發營，以千把總補用。

一、擷獲長髮賊，每名賞銀二十兩，短髮賊，每名賞銀十五兩。

一、牽獲賊馬一匹。卽以其馬充賞。如不願要馬。將馬繳呈。賞銀十兩。

一、搶獲火藥。每桶賞銀五兩。

一、搶獲鉛子。每桶賞銀三兩。

一、搶獲大礮一尊。賞銀十兩。小礮一尊。五兩。

一、搶獲鳥鎗一桿。賞銀三兩。

一、搶獲刀矛旗幟。每件賞銀二兩。

一、打仗奮勇當先。雖未得功。亦隨時酌給賞號。落後者不賞。如以己物詐功冒賞者。查出細責四十棍。革除。臨陣退縮者。斬殺。

一、假冒功者。梟首示衆。

一、打仗陣亡者。照營制賜卹銀五十兩。燒埋銀十兩。

一、傷分三等。頭等賞銀三十兩。二等賞銀二十兩。三等賞銀十兩。

一、臨陣回身。傷在背者不賞。

一、詐傷冒功者。查出細責四十棍。革除。

諭賊目林啓容丙辰十月十三日

蓋聞知幾爲哲人。識時爲俊傑。時危勢去而不覺悟。則爲下愚。徒爲智者之所鄙笑也。自洪秀全楊秀清倡亂以來。蔓延十省。擄船數萬。自以爲橫行無敵。乃渡黃河者數十萬人。屠戮殆盡。片甲不返。匹馬不歸。而賊勢頓衰。本部堂辦理水師。分布湖北江西。燒燬逆舟。截其糧源。而賊勢更衰。洎今年七月。章昌輝誅殺楊秀清。凡東嗣君西嗣君及楊氏宗族官屬。斬刈無遺。石達開自武昌歸去。幾不免於殺害。金陵內變。而賊勢於是乎大衰。想爾林啓

容亦深知之而深恨之。痛哭而無可如何也。本部堂前年在九江時。統率水陸環攻潯城。林啓容兵單糧少。堅守不屈。本部堂嘉爾有強固之志。官軍拔營以後。爾未嘗屠殺百姓。本部堂嘉爾無缺民之罪。爾在賊黨中。可謂傑出矣。昔之統理賊黨。傾服衆心者。楊秀清也。能知爾能用爾者。楊秀清也。今楊氏既誅。誰能統理而服衆乎。誰能知爾而用爾乎。爾與石達開皆楊氏之黨。韋昌輝必思所以除之。韋與石不兩立。非韋殺石。即石殺韋。縱使百能勝韋。而韋氏宗族甚多。兵卒甚強。冤冤相報。豈有已時。爾等終不免爲韋黨所害。此爾目前之大患也。江西各府。廣東新附之賊居多。外雖諂順。心實猜忌。如周鄧汪盧諸人。甚不願受爾等之約束。楊秀清未死。彼尙畏爾之強。楊秀清既誅。彼已毫無畏憚。一旦反顏相向。廣西金田之老賊。必爲廣東新賊所仇殺。此亦爾將來之大患也。官兵攻勦。爾尙有可防守。惟廣東之賊叛爾。韋氏之黨仇爾。則防之不勝其防。念爾林啓容不死於官兵。則死於廣東之賊。不死於東賊。則死於韋氏之黨。萬無倖全之理。豈不哀哉。本部堂嘉爾有一節之可取。特諭招降。爾能確髮投誠。立功贖罪。奏明皇上。當以待張家強之例待之。可以保身首。可以獲官爵。並可誅戮韋黨。以快私讎。一舉而三善備。計之上也。若執迷不悟。抗違天誅。韋石爲鵠蚌之持。官兵收漁人之利。楊氏若在。爾死猶有薄名。楊氏既滅。爾死不值一錢。爲禍爲福。在爾一心決之。熟思吾言。無遺後悔。或願或否。速行稟復。此諭。

諭巡捕門印簽押

凡爲將帥者。以不騷擾百姓爲第一義。凡爲督撫者。以不需索屬員爲第一義。督撫與屬員交涉。以巡捕門印簽押三處爲最。明日起。早經過地方。卽是與州縣交涉之始。茲特嚴定條約。願巡捕門印簽押。敬聽而牢記之。第一。不許凌辱州縣人。無貴賤賢愚。皆宜以禮貌相待。凡簡慢傲情。人施於己而不能堪者。己施於人。亦不能堪也。往嘗見督撫過境。其巡捕門印簽押及委員等。見州縣官皆有倨侮之色。嚴厲之聲。實可痛恨。今當痛改惡習。凡見州縣及文武屬員。總以和顏遜詞爲主。不可稍涉傲慢。致啓凌辱之漸。

第二、不許收受銀禮。凡自愛者。絲毫不肯苟取於人。凡收人禮物。其初不過收茶葉小菜之類。漸而收及鞍馬衣料。漸而收及金銀古玩。其初不過投贈之情。漸而笑索授意。漸而誅求逼勒。賄賂公行。皆始於此。嗣後我巡捕門印簽押。務各自愛。不准收受絲毫禮物。即茶葉小菜。至親密友。贈送微物。若非稟明本部堂。再三斟酌者。概不准收。倘有隱瞞收受者。重則枷號棍責。輕則遞解回籍。

第三、不許薦引私人。凡巡捕門印簽押。勢之所在。人或不敢不從。或其親族。或其舊識。或薦至各將營盤。或薦入州縣衙門。縱有過失。互相隱蔽。勾通袒護。爲患甚大。自此次告戒之後。概不准薦人入將領之營。入州縣之署。亦不准各營各署收受。

以上三條。巡捕門印簽押三處。各寫一分。貼於座右。如其自度不能。即趁早告退。若其在此當差。即小心凜遵。本部堂既告戒爾等。亦加倍自行儆惕。凡接見文武屬員。無論大小。雖至佐雜外委。亦必以禮貌相待。斷勿以厲色惡聲加人。至送禮物者。一概謝絕不收。無論茶葉小菜。以及裁料衣服。書籍字畫。古玩器皿。金銀食物。均皆不收。亦不薦人入武員之營。文員之署。此三者。本部堂若犯其一。准各隨員指摘諫爭。立即更改。

咸豐十年五月諭巡捕門印簽押三處。

諭天津士民示

自咸豐三四年間。本部堂即聞天津民皆好義。各秉剛氣。心竊嘉之。夫好義者。救人之危難。急人之不平。即古所謂任俠之徒是也。秉剛氣者。一往直前。不顧其他。水火可赴。白刃可蹈之類是也。斯固屬難得之寶。有用之才。然不善造就。則或好義而不明理。或有剛氣而無遠慮。皆足以僨事而致亂。即以昨五月廿三日之事言之。前聞教堂有迷拐幼孩。挖眼剖心之說。爾天津士民。忿怒洋人。斯亦不失爲義憤之所激發。然必須訪察確實。如果有無眼無心之尸。實爲教堂所掩埋。如有迷拐幼孩之犯。實爲教堂所指使。然後歸咎洋人。乃不誣枉。且即有真覆。

實據亦須稟告官長。由官長知會領事。由領事呈明公使。然後將迷拐知情之教士挖眼剖心之洋人。大加懲治。乃爲合理。今並未搜尋迷拐之確證。挖眼之實據。徒憑紛紛謠言。卽思一打浪忿。既不稟明中國官長。轉告洋官。自行懲辦。又不稟明官長。擅殺多命。焚毀多處。此爾士民平日不明理之故也。我能殺。彼亦可以殺報。我能焚。彼亦可以焚報。以忿召忿。以亂召亂。報復無已。則天津之人民房屋。皆屬可危。內則勞皇上之憂慮。外則啓各國之疑。十載講和。維持多方而不足。一朝激變。荼毒萬姓而有餘。譬如家有子弟。但逞一朝之忿。而不顧禍患入於門庭。憂辱及於父兄。可乎。國有士民。但逞一朝之忿。而不顧干戈起於疆場。憂危及於君上。可乎。此爾士民素無遠慮之故也。津郡有好義之風。有剛勁之氣。本多有用之才。然善用之則足備干城。誤用之則適滋事變。聞廿三日焚毀教堂之際。土棍遊匪。混雜其中。紛紛搶奪財物。分攜以歸。以義憤始而以攘利終。不特爲洋人所議。卽本地正紳。亦羞與之爲伍矣。本部堂奉命前來。一以宣布聖主懷柔外國。息事安民之意。一以勸諭津郡士民必明理而後可言好義。必有遠慮而後可行其剛氣。保全前此之美質。挽回後日之令名。此後應如何仰體聖意。和衷遠人。應如何約束同儕。力戒喧鬧。如何而懲既往之咎。如何而靖未平之氣。仰讀書知理君子。悉心籌議。分條稟覆。特諭。

照復洋人

爲照復事。同治九年六月二十四日。本閣部堂接得貴大臣照會。內稱。『現在未能極力彈壓。立拿兇犯正法。』等因。查五月二十三日之案。滋事兇犯。現已嚴飭新任道府趕緊查拏。斷無任令兇徒。久稽顯戮之理。只緣是日津民聚衆過多。不能指實何人爲首。何人爲從。近日訪得數名。已令其先行拏案。嚴刑拷訊。務令供出夥黨。按名緝獲。處以極刑。以申中國之法。以紓貴國官商之恨。大約數日之內。必可弋獲多名。斷不至再事遲延。貴大臣儘可放心。至照會內稱。『天津府縣及提督陳國瑞。議以抵命。』等語。查陳國瑞以客官路過天津。本屬事外之人。

前准照會云云。『該提督現在都門。』本閣部堂昨已咨請總理衙門。就近傳訊。應俟總理衙門訊明。咨復到日。再行核辦。至此案前任府縣。辦理不善。本閣部堂到津後。即將該員等先行撤任。又以案情重大。該府縣事前既不能防範。事後又不能速拏兇徒。業經奏明大皇帝。將該府縣革職。從重解交刑部治罪在案。若如照會所稱。『必將該府縣議以抵命。』查審讞極刑。必須有可誅之心。或有顯著之惡。該府縣並非下手殺人之人。又無絲毫主使確據。本閣部堂未能指實其罪之所在。難以照辦。因思貴大臣當明晰該府縣二人有應抵命之罪。可請逐層說明。本閣部堂得有二人罪狀。實在憑據。自能公平辦理。再本閣部堂到津後。查明天津府有事後之三件事。一係五月二十五六間。河東匪人搶蘇老義等教民數家。張守即前往彈壓。一係有一教民。與一民人。因帳目在府涉訟。張守即將民人枷號示衆。一係府署把門者係教民。該府欲訪查兇手。即令教民密訪兇犯。懸有重賞。現在此人仍在府署當差。此三事雖小。足見知府有保護教民之心。無傷害法國之意。至天津縣劉令。雖無保護確據。而亦無害傷教堂之心。貴大臣如查有府縣罪狀。即請一一開示。以便轉交刑部定議。中國遇有大獄。皆由部臣作主。疆臣不能擅專。爲此再商貴大臣。請煩細核見示。須至照會者。

將赴天津示一子

余即日前赴天津。查辦毆斃洋人。焚毀教堂一案。外國性情凶悍。津民習氣浮囂。俱難和叶。將來構怨與兵。恐致激成大變。余此行反覆籌思。殊無良策。余自咸豐三年。募勇以來。即自誓效命疆場。今老年病軀。危難之際。斷不肯吝於一死。以自負其初心。恐邂逅及難。而爾等諸事無所稟承。茲略示一二。以備不虞。余若長逝。靈柩自以由運河撥回江南。歸湘爲便。中間雖有臨清至張秋一節。須改陸路。較之全行陸路者。差易。去年由海船送來之書籍木器等。過於繁重。斷不可全行帶回。須細心分別去留。可送者分送。可毀者焚毀。其必不可棄者。乃行帶歸。毋貪瑣物。而花途費。其在保定自製之木器。全行分送。沿途謝絕一切。概不收禮。但水路略求兵勇護送而已。

余歷年奏摺。令夏吏擇要鈔錄。今已鈔一多半。自須全行擇鈔。鈔畢後。存之家中。留與子孫觀覽。不可發刻送人。以其間可存者絕少也。余所作古文。黎蓴齋鈔錄頗多。項渠已照鈔一分。寄余處存稿。此外黎所未鈔之文。寥寥無幾。尤不可發刻送人。不特篇幅太少。且少壯不克努力。志亢而才不足。以副之。刻出適以彰其陋耳。如有知舊勸刻余集者。婉言謝之可也。切囑切囑。余生平略涉儒先之書。見聖賢教人修身。千言萬語。而要以求不恃不重。恃者。嫉賢害能。妒功爭寵。所謂怠者不能修。忌者畏人修之類也。求者。貪利貪名。懷土懷惠。所謂未得患得。既得患失之類也。恃不常見。每發露於名業相侔。勢位相埒之人。求不常見。每發露於貨財相接。仕進相妨之際。將欲造福。先去恃心。所謂人能充無欲害人之心。而仁不可勝用也。將欲立品。先去求心。所謂人能充無穿窬之心。而義不可勝用也。恃不去。滿懷皆是荆棘。求不去。滿腔日即卑污。余於此二者。常加克治。恨尙未能掃除淨盡。爾等欲心地乾淨。宜於此二者。痛下工夫。并願子孫世世戒之。附作恃求詩二首錄右。

歷覽有國有家之興。皆由克勤克儉所致。其衰也。則反是。余生乎亦頗以勤字自勵。而實不能勤。故讀書無手鈔之冊。居官無可存之牘。生平亦好以儉字教人。而自問實不能儉。今暑中內外服役之人。廚房日用之數。亦云奢矣。其故由於前在軍營規模宏闊。相沿未改。近因多病。醫藥之資。漫無限制。由儉入奢。易於下水。由奢反儉。難於登天。在兩江交卸時。尙存養廉二萬金。在余初意。不料有此。然似此放手用去。轉瞬即已立盡。爾輩以後居家。須學陸梭山之法。每月用銀若干兩。限一成數。另封秤出。本月用畢。只准贏餘。不准虧欠。衙門奢侈之習。不能不徹底痛改。余初帶兵之時。立志不取軍營之錢。以自肥其私。今日差幸不負始願。然亦不願子孫過於貧困。低顏求人。惟在爾輩力崇儉德。善持其後而已。

孝友爲家庭之祥瑞。凡所稱因果報應。他事或不盡驗。獨孝友則立獲吉慶。反是則立獲殃禍。無不驗者。吾早歲久宦京師。於孝養之道多疏。後來展轉兵間。多獲諸弟之助。而吾毫無裨益於諸弟。余兄弟姊妹。各家均有田宅之安。大抵皆九弟扶助之力。我身歿之後。爾輩事兩叔如父。事叔母如母。視堂兄弟如手足。凡事皆從省儉。獨待

諸叔之家。則處處從厚。待堂兄弟以德業相勸。過失相規。期於彼此有成。爲第一要義。其次則親之欲其富。愛之欲其富。常常以吉祥喜事。代諸昆弟默爲禱祝。自當神人共欽。溫甫季洪兩弟之死。余內省覺有慚德。澄侯沅甫兩弟漸老。余此生不審能否相見。爾輩若能從孝友二字切實講求。亦足爲我彌縫缺憾耳。

附枝求詩一首

善莫大於恕。德莫凶於妒。妒者妾婦行。瓊瓊奚比數。己拙忌人能。己塞忌人遇。己若無事功。忌人得成務。己若無黨援。忌人得多助。勢位苟相敵。畏偏又相惡。己無好聞望。忌人文名著。己無賢子孫。忌人後嗣裕。爭名日夜奔。爭利東西驚。但期一身榮。不惜他人污。聞災或欣幸。聞福或悅豫。問渠何以然。不自知其故。爾室神來格。高明鬼所顧。天道常好還。嫉人還自誤。幽明叢詬忌。乖氣相迴互。重者裁汝躬。輕亦滅汝祚。我今告後生。悚然大覺寤。終身讓人道。曾不失寸步。終身祝人善。曾不損尺布。消除嫉妒心。普天零甘露。家家獲吉祥。我亦無恐怖。右不枝

知足天地寬。貪得宇宙隘。豈無過人姿。多欲爲患害。在約每思豐。居困常求泰。富求千乘車。貴求萬釘帶。未得求速償。既得求勿壞。芬馨比椒蘭。馨固方泰岱。求榮不知鑿。志亢神愈汰。歲燠有時寒。日明有時晦。時來多善緣。運去生災怪。諸福不可期。百殃紛來會。片言動招尤。舉足便有礙。戚戚抱殷憂。精爽日凋瘵。矯首望八荒。乾坤一何大。安榮無遽欣。患難無遽愁。君看十人中。八九無倚賴。人窮多過我。我窮猶可耐。而况處夷途。奚事生嗟憤。於世少所求。俯仰有餘快。俟命堪終古。曾不願平外。右不枝



借 書 到 期 表

Date Due

第四冊

家

訓

家

書

嘉

言

鈔

附

大

事

記

榮

哀

錄

仿古字版

曾文正公家訓

世界書局印行

諭紀澤 (勤儉自持習勞習苦)	一	諭紀澤 (守家法及看文選)	一三
諭紀澤 (讀書寫字作文做人之道)	一	諭紀澤 (宜通訓詁及詞章限定每月功課)	一四
諭紀澤 (讀書宜虛心涵泳切己體察)	二	諭紀澤 (作文須珠圓玉潤)	一四
諭紀澤 (學詩學字之方法勉其雪己之三恥)	三	諭紀澤 (戒舉止太輕勿積銀錢置田產)	一五
諭紀澤 (治經學賦習字之法)	四	諭紀澤 (言語舉止要穩重)	一五
諭紀澤 (研究天文學)	五	諭紀澤 (飯後散步為養生秘訣)	一六
諭紀澤 (宜繙閱校經書籍)	六	諭紀澤 (論文之古雅雄奇)	一六
諭紀澤 (宜先看胡刻文選)	六	諭紀澤 (從短處痛下工夫)	一七
諭紀澤 (宜勉盡愛敬之道)	六	諭紀澤 (述古人之解經說經)	一七
諭紀澤 (寫字之法)	七	諭紀澤 (述須以勞字謙字為重)	一八
諭紀澤 (書法之派別)	七	諭紀澤 (述軍情及自己志願與家教)	一八
諭紀澤 (讀書宜知所選擇)	八	諭紀澤 (告軍情囑雇人種蔬)	一九
諭紀澤 (讀書宜知所選擇)	九	諭紀澤 (開闢菜園之法)	二〇
諭紀澤 (宜分類手鈔體面話頭)	〇	諭紀澤 (學書須窺尋門徑)	二一
諭紀澤 (尚書之真偽)	〇	諭紀澤 (練習看讀寫作工夫)	二一
諭紀澤 (看注疏及寫學法)	一	諭紀澤 (惟崇儉可以長久)	二二
諭紀澤 (早辦男女婚嫁事)	一	諭紀澤 (文字之本原及目錄分類之方法)	二三
諭紀澤 (宜早起及有恆)	二		



3 0405 4875 6

諭紀澤（批示所作之凡例並囑女子歸勿奢

後）……………二四

諭紀澤（胸次須博大恬澹）……………二四

諭紀澤（寄銀爲二女奩資）……………二五

諭紀澤（述讀詩及小學）……………二五

諭紀澤（述軍情）……………二六

諭紀澤（慰其煩勞及述軍情）……………二六

諭紀澤（曷以有恆及告軍事勝利）……………二七

諭紀澤紀鴻（謂讀書可以變化氣質）……………二七

諭紀澤（宜用心詞章之學）……………二八

諭紀澤（當作書教誠袁塔）……………二九

諭紀澤（衣食起居勿沽富貴習氣）……………二九

諭紀澤（宜時時哦詩作字）……………三〇

諭紀澤（行氣爲文章要義）……………三〇

諭紀澤（士卒多病）……………三一

諭紀澤（述軍事在危急之際）……………三一

諭紀澤（囑來營中省視）……………三二

諭紀澤（鑽研小學古義）……………三二

諭紀澤紀鴻（心緒惡劣盼父子一敘）……………三三

諭紀澤（諭四言詩）……………三四

諭紀澤（俟季葬再來皖營）……………三四

諭紀澤（諭韓公五言詩）……………三五

諭紀澤（勸妹柔順恭謹）……………三五

諭紀澤（修石橋）……………三六

諭紀澤（學文須手鈔熟讀）……………三七

諭紀澤（告軍情）……………三七

諭紀澤（須得老成者同伴赴考）……………三八

致十叔（盡力軍事）……………三八

諭紀澤（嫁女不應戀母家）……………三九

諭紀澤（路上不可驚動官長）……………四〇

寄紀瑞姪（勿忘先世之勤儉）……………四〇

諭紀澤（一切以勤謙二字爲主）……………四〇

諭紀澤（述僞忠王已就擒）……………四一

諭紀澤（已將洪秀全等正法）……………四一

諭紀澤（試查封建考）……………四一

諭紀澤（蒙恩封侯）……………四二

諭紀澤（老人畏亢旱酷熱）……………四二

諭紀澤（在船清理擱積之事）……………四三

諭紀澤（述免造報銷）	四三
諭紀鴻（以謙敬二專爲主）	四三
諭紀澤紀鴻（以勤儉二字自惕）	四三
諭紀澤（夜飯不用葷菜）	四四
諭紀澤紀鴻（領略古人文字意趣）	四四
諭紀澤紀鴻（告水災）	四五
諭紀澤（陳刻廿四史頗可愛）	四五
諭紀澤紀鴻（作文氣勢須與揣摩並重）	四六
諭紀澤（服炒米醫脾胃勉閱書有恆）	四六
諭紀澤紀鴻（女兒姻事成禮地點）	四七
諭紀澤（給位西先生作墓銘）	四八
諭紀澤（取書物）	四八
諭紀澤紀鴻（家眷回湘事）	四八
諭紀澤（知節齋戒惱怒）	四九
諭紀澤（告徐州賊勢）	四九
諭紀澤（鉤刻墓銘）	五〇
諭紀澤紀鴻（蒔花竹玩山水）	五〇
諭紀澤（閱聰訓齋語於養身有益）	五〇
諭紀澤紀鴻（將去巡閱地勢）	五一

諭紀澤（請吳元甲作教師）	五一
諭紀澤（臘臘月來徐省覲）	五一
諭紀澤紀鴻（囑翻查會典）	五二
諭紀澤（查問關於提督文武兼用歷史）	五二
諭紀鴻（學字須用困知勉行工夫）	五三
諭紀鴻（講求八股試帖）	五三
諭紀澤（作字之法）	五四
諭紀澤紀鴻（養生之法順其自然）	五四
諭紀澤（稍留去思）	五五
諭紀澤紀鴻（體會八德中之渾字與勤字）	五五
諭紀澤紀鴻（苦心作詩文經策）	五五
諭紀澤紀鴻（專攻八股試帖）	五六
諭紀澤紀鴻（宜從古文上用功）	五六
諭紀澤紀鴻（講求居家規模禮節）	五七
諭紀澤紀鴻（既知保養却宜勤勞）	五七
諭紀澤紀鴻（讀史須作史論詠史詩）	五八
諭紀澤紀鴻（摺片不肯假手於人）	五八
諭紀澤紀鴻（但有志氣可獎成之）	五八
諭紀澤紀鴻（家中須講求蒔蔬）	五九

諭紀鴻（讀古文古詩嘗認貌觀神）……………	五九
諭紀鴻（將進京陸見）……………	六〇
諭紀鴻（不復作宦）……………	六〇
諭紀鴻（奏請開缺）……………	六一
諭紀鴻（勿慢近鄰）……………	六一
致歐陽夫人（嘗爲子孫榜樣）……………	六一
<hr/>	
諭紀澤（書籍式樣）……………	六二
諭紀澤（告鴻兒出痘及述詩文趣味）……………	六三
諭紀澤（不宜妄生意氣）……………	六三
致歐陽夫人（從勤儉耕讀上做出好規模）……………	六四
諭紀澤紀鴻（示備不虞附二詩四課）……………	六四

曾文正公家訓

諭紀鳩（勤儉自持習勞習苦）

字諭紀鳩兒。家中之來營者。多稱爾舉止大方。余爲少慰。凡人多望子孫爲大官。余不願爲大官。自願爲讀書人理之君子。勤儉自持。習勞習苦。可以處樂。可以處約。此君子也。余服官二十年。不敢稍染官宦氣習。館僚起居尚守寒素家風。極儉也可。略豐也可。太豐則我不敢也。

凡仕宦之家。由儉入奢易。由奢返儉難。爾年尚幼。切不可貪愛奢華。不可慣習懶惰。無論大家小家。士農工商。勤苦儉約。未有不興。驕奢倦怠。未有不敗。爾讀書寫字。不可間斷。早晨要早起。莫墜高曾祖考以來相傳之家風。吾父吾叔皆黎明即起。爾之所知也。

凡富貴功名。皆有命定。半由人力。半由天事。惟學作聖賢。全由自己作主。不與天命相干涉。吾有志學爲聖賢。少時欠居敬工夫。至今猶不免偶有戲言戲動。爾宜舉止端莊。言不妄發。則入德之基也。（咸豐六年九月廿九日）

諭紀澤（讀書寫字作文做人之道）

字諭紀澤兒。余此次出門。略載日記。即將日記封每次家信中。爾林文忠家書。卽係如此辦法。爾在省城。僅至丁左兩家。餘不輕出。足慰遠懷。

讀書之法。看讀書作四者。每日不可缺一。看者。如爾去年看史記漢書韓文近思錄。今年看周易折中之類是也。讀者。如四書詩書易經左傳諸經。昭明文選。李杜韓蘇之詩。韓歐曾王之文。非高聲朗誦。則不能得其雄偉之概。非密詠恬吟。則不能探其深遠之韻。譬之富家居積。看書則在外貿易。獲利三倍者也。讀書則在家漢守。不經花費者也。譬之兵家戰爭。看書則攻城爭地。開拓土宇者也。讀書則深溝堅壘。得地能守者也。看書與子夏之「日知所亡」相近。讀書與「無忘所能」相近。二者不可偏廢。



至於寫字。真行篆隸。爾頗好之。切不可間斷一日。既要求好。又要求快。余生平因作字邊鈍。吃虧不少。爾須力求敏捷。每日能作楷書一萬。則幾矣。

至於作詩文。亦宜在二三十歲立定規模。過三十後則長進極難。作四書文。作試帖詩。作律賦。作古今體詩。作古文。作駢體文。數者不可不一講求。一一試爲之。少年不可怕醜。須有「狂者進取」之趣。此時不試爲之。則後此彌不肯爲矣。

至於作人之道。聖賢千言萬語。大抵不外「敬恕」二字。仲弓問仁一章。言敬恕最爲親切。自此以外。如「立則見其參於前也。在輿則見其倚於衡也。」「君子無衆寡。無小大。無敢慢。」斯爲「泰而不驕。」「正其衣冠。儼然人望而畏。」斯爲「威而不猛。」是皆言敬之最好下手者。孔言「欲立立人。欲達達人。」孟言「行有不得。反求諸己。」「以仁存心。以禮存心。」「有終身之憂。無一朝之患。」是皆言恕之最好下手者。爾心境明白。於「恕」字或易著力。「敬」字則宜勉強行之。此立德之基。不可不謹。

科場在即。亦宜保養身體。余在外平安。不多及。再此次日記封入澄侯叔函中。寄至家矣。余自十二至湖口。十九夜五更開船。晉江西省。廿一申刻即至章門。餘不多及。又示。（咸豐八年七月廿一日）

諭紀澤（讀書宜虛心涵泳切己體察）

字諭紀澤。八月一日。劉會撰來營。接爾第二號信。並陸曉帆信。得悉家中母子平安。至以爲慰。汝讀四書。無甚心得。由不能「虛心涵泳。切己體察。」朱子教人讀書之法。此二語爲精當。爾現讀離婁。卽如離婁首章「上無道揆。下無法守。」我在年讀之。亦無甚警惕。近歲在外辦事。乃知上之人必揆諸道。下之人必守乎法。若人人以道揆自許。從心而不從法。則下凌上矣。愛人不親。章往年讀之。不甚親切。近歲閱歷日久。乃知治人不治者。智不足也。此切己體察之一端也。

「涵泳」二字。最不易識。余嘗以意測之。曰涵者。如春雨之潤花。如清渠之溉稻。雨之潤花。過小則難透。過大則

離披。適中則涵濡而滋液。清渠之溉稻。過小則枯槁。過多則傷澇。適中則涵養而勃興。泳者如魚之游水。如人之濯足。程子謂「魚躍於淵。活潑潑地。」莊子言「濠梁觀魚。安知非樂。」此魚水之快也。左太仲有「濯足萬里流」之句。蘇子瞻有夜臥濯足詩。有浴罷詩。亦人性樂水者之一快也。嘗讀書者。須視書如水。而視此心如花如稻如魚。如濯足。則「涵泳」二字。庶可得之於意言之表。爾讀書易於解說文義。却不甚能深入。可就朱子「涵泳」一語察「二語。悉心求之。」

鄒叔明新刊地圖。甚好。余寄書左季翁。託購致十副。爾收得後。可好藏之。薛曉帆銀百兩。宜璧還。余有復信。可并交季翁也。此囑。（咸豐八年八月初三日）

論紀澤（學詩學字之方法勉其雪己之三恥）

字論紀澤。十九日曾六來營。接爾初七日第五號家信。並詩一首。具悉。次日入闈。考具皆齊矣。此時計已出闈還家。

余於初八日至河口。本擬由鉛山入闈。進擣崇安。已拜疏矣。光澤之賊。竄擾江西。連陷慮溪金溪安仁三縣。即在安仁屯踞。十四日派張凱章往剿。十五日余亦回駐弋陽。待安仁破滅後。余乃由慮溪雲際關入闈也。

爾七古詩。氣清而詞亦穩。余閱之忻慰。凡作詩最宜講究聲調。余所選鈔五古九家。七古大家。聲調皆極鏗鏘。耐人百讀不厭。余所未鈔者。如左太仲江文通陳子昂柳子厚之五古。鮑明遠高適夫王摩詰陸放翁之七古。聲調亦清越異常。爾欲作五古七古。須熟讀五古七古各數十篇。先之以高聲朗誦。以昌其氣。繼之以密詠恬吟。以玩其味。二者並進。使古人之聲調。拂拂然若與我之喉舌相習。則下筆爲詩時。必有句調湊赴腕下。詩成自讀之。亦自覺琅琅可誦。引出一種興會來。古人云「新詩政罷自長吟。」又云「撥詩未就且長吟。」可見古人慘淡經營之時。亦純在聲調上下工夫。蓋有字句之詩。人籟也。無字句之詩。天籁也。解此者。能使天籁人籟。湊拍而成。則於詩之道。思過半矣。

爾好寫字。是一好氣習。近日墨色不甚光潤。較去年春夏已稍退矣。以後作字。須講究墨色。古來書家無不嘗使墨者。能令一種神光活色。浮於紙上。固由臨池之勤。染翰之多所致。亦緣於墨之新舊濃淡。用墨之輕重疾徐。皆有精意運乎其間。故能使光氣常新也。

余生平有三恥。學問各途。皆略涉其涯涘。獨天文算學。毫無所知。雖恆星五緯。亦不認識。一恥也。每作一事。治一業。輒有始無終。二恥也。少時作字。不能臨摹一家之體。遂致屢變而無所成。遲鈍而不適於用。近歲在軍。因作字太鈍。廢閣殊多。三恥也。爾若爲克家之子。當思雪此三恥。推步算學。縱難通曉。恆星五緯。觀認尙易。家中言天文之書。有十七史中各天文志。及五禮通考中所輯觀象授時一種。每夜認明恆星二三座。不過數月。可畢識矣。凡作一事。無論大小難易。皆宜有始有終。作字時先求圓勻。次求敏捷。若一日能作楷書一萬。少或七八千。愈多愈熟。則手腕毫不費力。將來以之爲學。則手銘羣書。以之從政。則案無留牘。無窮受用。皆從寫字之勻而且捷生出。三者皆足以彌吾之缺憾矣。

今年初次下場。或中或不中。無甚關係。榜後即嘗看詩經注疏。以後窮經讀史二者迭進。國朝大儒。如顧闈江戴段王。數先生之書。不可不熟讀而深思之。光陰難得。一刻千金。以後寫安稟來營。不妨將胸中所見。簡編所得。馳聘議論。俾余得以考察爾之進步。不宜太寥寥。此諭。(咸豐八年八月二十日)

諭紀澤(治經學賦習字之法)

字諭紀澤。十月十一日接爾安稟。內附隸字一冊。廿四日接澄叔信。內附隸臨元教碑一冊。王五及各長夫來。具述家中瑣事甚詳。爾信內言讀詩注疏之法。比之前一信已有長進。凡漢人傳注唐人之疏。其惡處在確守故訓。失之穿鑿。其好處在確守故訓。不參私見。釋「謂」爲「勤」。尙不數見。釋「言」爲「我」。處處皆然。蓋亦十口相傳之話。而不復顧文字之不安。如伐木爲文王與友人入山。鴛鴦爲明王交於萬物。與爾所疑蠡斯章解。同一穿鑿。朱子集傳。一掃舊障。專在涵泳神味。虛而與之委蛇。然如鄭風諄什。注疏以爲皆刺忽者固非。朱子以爲

皆淫奔者。亦未必是。

爾治經之時。無論看注疏。看朱傳。總宜虛心求之。其愜意者。則以硃筆識出。其懷疑者。則以另冊寫一小條。或多爲辯論。或僅著數字。將來疑者漸晰。又記於此條之下。久久漸成卷帙。則自然日進。高郵王懷祖先生。父子經學。爲本朝之冠。皆自劄記得來。吾雖不及懷祖先生。而望爾爲伯申氏甚切也。

爾問時藝。可否暫置。抑或他有所學。余惟文章之可以道古。可以適今者。莫如作賦。漢魏六朝之賦。名篇鉅製。且載於文選。余嘗以西征蕪城。及恨別等賦示爾矣。其小品賦。則有古賦識小錄。律賦則有本朝吳穀人願耕石陳秋舫諸家。爾若學賦。可於每三二日作一篇。大賦或數千十字。小賦或僅數十字。或對或不對。均無不可。此事比之入股文略有興趣。不知爾性與之相近否。

爾所臨隸書孔廟碑。筆太拘束。不甚鬆活。想係執筆太近毫之故。以後須執於管頂。余以執筆太低。終身吃虧。故教爾趁早改之。元教碑墨氣甚好。可喜可喜。郭二姻叔嫌左肩太俯。右肩太聳。吳子序年伯欲帶歸示其子弟。爾字姿於草書尤相宜。以後專習真草二種。篆隸置之可也。四體並習。恐將來不能一工。

余癱疾近日大愈。目光平平如故。營中各勇夫。病者十分已好六七。惟尙未復元。不能拔營進剿。良深焦灼。聞甲五目疾十愈八九。忻慰之至。爾爲下輩之長。須常常存個樂育諸弟之念。君子之道。莫大乎與人爲善。况兄弟乎。臨二昆八係親表兄弟。爾須與之互相勸勉。爾有所知者。常常與之講論。則彼此並進矣。此諭。(咸豐八年十月廿五日)

諭紀澤(研究天文學)

字諭紀澤。二十五日寄一信。言讀詩經注疏之法。二十七日縣城二勇至。接爾十一日安稟。具悉一切。爾看天文。認得恆星數十座。甚慰甚慰。前信言五禮通考中觀象授時二十卷。內恆星圖最爲明晰。曾緝閱否。

國朝大儒。於天文歷數之學。講求精熟。度越前古。自梅定九王寅旭以至江戴諸老。皆稱絕學。然皆不講占驗。但

講推步。占驗者。觀星象雲氣。以卜吉凶。史記天官書。漢書天文志是也。推步者。測七政行度。以定授時。史記律書。漢書律歷志是也。秦味經先生之觀象授時。簡而得要。心壺既肯。究心此事。可借此書與之閱看。五禮通考內有之。皇清經解內亦有之。若爾與心壺二人。略窺二者之端緒。則足以補余之缺憾矣。（咸豐八年十二月廿九日）

諭紀澤（宜繙閱校經書籍）

字諭紀澤。初一日接爾十二日一稟。得知四宅平安。爾將有長沙之行。想此時又歸也。少庚早世。賀家氣象日以凋耗。爾當常常寄信與爾岳母。以慰其意。每年至長沙。須走一二次。以解其憂。耦庚先生學問文章。卓絕流輩。居官亦體惻慈祥。而家運若此。是真不可解。爾執聯尙穩妥。

詩經字不同者。余忘之。凡經文本本不合者。沅氏校勘記最詳。凡引經不合者。段氏撰異最詳。爾繙而校對之。則疑者明矣。（咸豐八年十二月初三日）

諭紀澤（宜先看胡刻文選）

字諭紀澤。日來接爾兩稟。知爾左傳注疏。將次看完。三禮注疏。非將江慎修禮書綱目識得大段。則注疏亦難領會。爾可暫緩。即公穀亦可緩看。爾明春將胡刻文選細看一徧。一則含英咀華。可醫爾筆下枯澀之弊。一則吾熟讀此書。可常常教爾也。

沅叔及寅皆先生望。爾作四書文。極爲勤懇。余念爾庚申辛酉兩下科場。文章亦不可太醜。惹人笑話。爾自明年正月起。每月作四書文三篇。俱由家信內封寄管中。此外或作得詩賦論策。亦即寄呈。

寫字之中鋒者。用筆尖著紙。古人謂之蹲鋒。如獅蹲虎蹲犬蹲之類。偏鋒者。用筆毫之腹著紙。不倒於左。則倒於右。嘗將倒未倒之際。一提。筆則成蹲鋒。是用偏鋒者。亦有中鋒時也。此諭。（咸豐八年十二月十三日）

諭紀澤（宜勉盡愛敬之道）

字諭紀澤。聞爾至長沙。已逾月餘。而無稟來管。何也。少庚訃信百餘件。聞皆爾親筆寫之。何不發刻。或倩人幫寫。

非謂爾宜自惜精力。蓋以少庚年未三十。情有等差。禮有隆殺。則精力亦不宜過竭耳。近想已歸家度歲。今年家中因溫甫叔之變。氣象較之往年。迥不相同。余因去年在家。爭辨細事。與鄉里鄙人無異。至今抱憾。故雖在外。亦惻然算懽。爾嘗體我此意。於叔祖各叔父母前。盡些愛敬之心。常存休戚一體之念。無懷彼此歧視之見。則老輩內外必器愛爾。後輩兄弟姊妹必以爾爲榜樣。日處日親。愈久愈敬。若使宗族鄉黨。皆曰紀澤之量。大於其父之量。則余欣然矣。

余邇有信教爾學作賦。爾復稟並未提及。又有信言「涵養」二字。爾復稟亦未之及。嗣後我信中所論之事。爾宜一一稟復。余於本朝大儒。自顧亭林之外。最好高郵王氏之學。王安國以鼎甲官至尙書。諡文肅。正色立朝。生懷祖先生念孫。經學精卓。生王引之。復以鼎甲官尙書。諡文簡。三代皆好學深思。有漢韋氏唐顏氏之風。

余自憾學問無成。有愧王文肅公遠甚。而望爾輩爲懷祖先生。爲伯申氏。則夢寐之際。未嘗須臾忘也。懷祖先生所著廣雅疏證。讀書雜誌。家中無之。伯申氏所著經義述聞。經傳釋詞。皇清經解內。有之。爾可試取一閱。其不知者。寫信來問。本朝窮經者。皆精小學。大約不出段王兩家之範圍耳。（咸豐八年十二月十三日）

諭紀澤（寫字之法）

字諭紀澤。三月初二日接爾二月廿日安稟。得知一切。內有賀丹麓先生墓志。字勢流美。天骨開張。覽之忻慰。惟間架間有太鬆之處。尙當加功。大抵寫字。只有用筆結構兩端。學用筆。須多看古人墨蹟。學結構。須用油紙摹古帖。此二者皆決不可易之理。小兒寫影本。肯用心者。不過數月。必與其摹本字相肖。吾自三十時已解古人用筆之意。只爲欠却間架工夫。便爾作字不成體段。生平欲將柳誠懸趙子昂兩家。合爲一爐。亦爲間架欠工夫。有志莫遂。爾以後當從間架用一番苦功。每日用油紙摹帖。或百字。或二百字。不過數月。間架與古人逼肖。而不自覺。能合柳趙爲一。此吾之素願也。不能。則隨爾自擇一家。但不可見異思遷耳。

不特寫字宜摹仿古人間架。即作文亦宜摹仿古人間架。詩經造句之法。無一句無所本。左傳之文。多現成句調。

揚子雲爲漢代文宗。而其太玄摹易。法言摹論語。方言摹爾雅。十二箴摹虞箴。長楊賦摹難蜀父老。解嘲摹客難。甘泉賦摹大人賦。劇秦美新摹封禪文。諫不許單于朝書摹國策信陵君諫伐韓。幾於無篇不摹。即韓歐曾蘇諸巨公之文。亦皆有所摹擬。以成體段。爾以後作文作詩賦。均宜心有摹仿。而後間架可立。其收效較速。其取徑較便。

前信教爾暫不必看經義述聞。今爾此信言業看三本。如看得有些滋味。即一直看下去。不爲或作或輟。亦是好事。惟周禮儀禮大戴禮公毅爾雅國語太歲考等卷。爾向來未讀過正文者。則王氏述聞亦暫可不觀也。爾思來營省覲。甚好。余亦思爾來一見。婚期既定五月廿六日。三四月間自不能來。或七月晉省鄉試。八月底來營省覲亦可。身體雖弱。處多難之世。若能風霜磨鍊。苦心勞神。亦自足堅筋骨而長識見。沉肅叔向最羸弱。近日治軍。反得壯健。亦其證也。(咸豐九年三月初三日)

諭紀澤(書法之派別)

字諭紀澤兒。廿二日接爾稟並書譜敘。以示李少荃次青許仙屏等。皆極贊美云。「爾鈞聯頓挫。純用孫過庭草法。而間架純用趙法。柔中寓剛。綿裏藏鍼。動合自然」等語。余聽之。亦欣慰也。趙文敏集古今之大成。於初唐四家內師虞永興。而參以鍾紹京。因此以上窺二王。下法山谷。此一徑也。於中唐師李北海。而參以顏魯公徐季海之沉着。此一徑也。於晚唐師蘇靈芝。此又一徑也。由虞永興以溯二王。及晉六朝諸賢。世所稱南派者也。由李北海以溯歐褚。及魏北齊諸賢。世所稱北派者也。

爾欲學書。須窺尋二派之所以分。南派以神韻勝。北派以魄力勝。宋四家蘇黃近於南派。米蔡近於北派。趙子昂欲合二派而匯爲一。爾從趙法入門。將來或趨南派。或趨北派。皆可不迷於所往。我先大夫竹亭公。少學趙書。秀骨天成。我兄弟五人。於字皆下苦功。沉叔天分尤高。爾若能光大先業。甚望甚望。

制藝一道。亦須認真用功。鄧瀛師。名手也。爾作文在家有鄧師批改。付營次有次青批改。此極難得。千萬莫錯過。

了。付回趙書楚國夫人碑。可分送汪易葛三先生。及二外甥。暨爾諸堂兄弟。又舊宣紙手卷。新宣紙橫幅。爾可亭書譜。請徐柳臣一看。此囑。（咸豐九年三月二十三日）

諭紀澤（讀書宜知所選擇）

字諭紀澤。前次於諸叔父信中。復示爾所問各書帖之目。鄉間苦於無書。然爾生今日。吾家之書。業已百倍於道光中年矣。買書不可不多。而看書不可不知所擇。以韓退之爲千古大儒。而自述其所服膺之書。不過數種。曰易。曰書。曰詩。曰春秋左傳。曰莊子。曰離騷。曰史記。曰相如子雲。柳子厚自述其所得。正者曰易。曰書。曰詩。曰禮。曰春秋。旁者曰穀梁。曰孟荀。曰老莊。曰國語。曰離騷。曰史記。二公所讀之書。皆不甚多。

本朝善讀古書者。余最好高郵王氏父子。曾爲爾屢言之矣。今觀懷祖先生讀書雜誌中所考訂之書。曰逸周書。曰戰國策。曰史記。曰漢書。曰管子。曰晏子。曰墨子。曰荀子。曰淮南子。曰後漢書。曰老莊。曰呂氏春秋。曰韓非子。曰楊子。曰楚辭。曰文選。凡十六種。又別注廣雅疏證一種。伯申先生經義述聞中所考訂之書。曰易。曰書。曰詩。曰周官。曰禮儀。曰大戴禮。曰禮記。曰左傳。曰國語。曰公羊。曰穀梁。曰爾雅。凡十二種。王氏父子之博古。今所罕見。然亦不滿三十種也。

余於四書五經以外。最好史記漢書莊子韓文四種。好之十餘年。惜不能熟讀精攻。又好通鑑文選。及姚惜抱所選古文辭類纂。所選十八家詩鈔四種。共不過十餘種。早歲篤志爲學。恆思將此十餘書。貫穿精通。略作劄記。仿顧亭林王懷祖之法。今年齒衰老。時事日艱。所志不克成就。中夜思之。每自悔惰。澤兒若能成吾之志。將四書五經。及余所好之八種。一一熟讀而深思之。略作劄記。以志所得。以著所疑。則余歡欣快慰。夜得甘寢。此外別無所求矣。

至王氏父子所考訂之書二十八種。凡家中所無者。爾可開一單來。余當一一購得寄回。學問之途。自漢至唐。風氣略同。自宋至明。風氣略同。國朝又自成一種風氣。其尤著者。不過閩百詩戴東原江慎修錢辛楣秦味經段懋

堂王懷祖數人。而風會所扇。羣彥雲興。爾有志讀書。不必別標漢學之名目。而不可不一窺數君子之門徑。凡有所見所聞。隨時稟知。余隨時論答。較之當面問答。更易長進也。（咸豐九年四月二十一日）

論紀澤（宜分類手鈔體面話頭）

字諭紀澤。爾作時文。宜先講詞藻。欲求詞藻富麗。不可不分類鈔撮體面話頭。近世文人如袁簡齋趙甌北吳穀人。皆有手鈔詞藻小本。此衆人所共知者。阮文達公爲學政時。搜出生童夾帶。必自加細閱。如係親手所鈔。略有條理者。即予進學。如係請人所鈔。概錄陳文者。照例罪斥。阮公一代閩儒。則知文人不可無手鈔夾帶小本矣。昌黎之記事提要。纂言鈎元。亦係分類手鈔小冊也。

爾去年鄉試之文。太無詞藻。幾不能敷衍成篇。此時下手工夫。以分類手鈔詞藻爲第一義。爾此次復信。即將所分之類。開列目錄。附稟寄來。分大綱子目。如倫記類爲大綱。君臣父子兄弟爲子目。王道類爲大綱。則井田學校爲子目。此外各門可以類推。爾曾看過說文經義述聞。二書中可鈔者多。此外如江慎修之類腋。及子史精華淵鑑類函。則可鈔者尤多矣。爾試爲之。此科名之要道。亦即學問之捷徑也。此諭。（咸豐九年五月初四日）

論紀澤（尙書之真僞）

字諭紀澤。接二十九三十號兩稟。得悉書經注疏已看畢。書經注疏頗庸陋。不如詩經之該博。我朝儒者如閻百詩姚姬傳諸公。皆辨別尙書之僞。孔安國之傳。亦僞作也。蓋秦燔書後。漢代伏生所傳。歌陽及大小夏侯所習。皆僅二十八篇。所謂今文尙書者也。厥後孔安國家有古文尙書。多十餘篇。遭巫蠱之事。未得立於學官。不傳於世。厥後張霸有尙書百兩篇。亦不傳於世。後漢賈逵馬鄭作古文尙書注解。亦不傳於世。至東晉梅賾。始獻古文尙書。並孔安國傳。自六朝唐宋以來承之。即今通行之本也。自吳才老及朱子梅鼎祚歸震川皆疑其爲僞。至閻百詩遂專著一書以痛辨之。名曰疏證。自是辨之者數十家。人人皆稱僞古文。僞孔氏也。日知錄中略著其源委。王西莊孫淵如江良庭三家。皆詳言之。此亦六經中一大案。不可不知也。

爾讀書記性平常。此不足慮。所慮者。第一怕無恆。第二怕隨筆點過一徧。並未看得明白。此却是大病。若實看得明白了。久之必得些滋味。寸心若有怡悅之境。則自略記得矣。爾不必求記。卻宜求個明白。鄭先生講書。仍請歸周易折中。余圈過之綱鑑。暫不必講。恐汗壞耳。爾每日起得早否。並問。此諭。(咸豐九年六月十四日)

諭紀澤(看注疏及寫字法)

字諭紀澤兒。接爾七月十三廿七日兩稟。並賦一篇。尙有氣勢。茲批出發還。凡作文未句要吉祥。凡作字墨色要光潤。此先大夫竹亭公常以教余與諸叔父者。兒謹記之。無忘祖訓。爾問各條。分列示知。

爾問箴五末句。「敢告馬走。」凡箴以虞箴爲最古。其末句曰。「獸臣司原。敢告僕夫。」意以獸臣有司郊原之責。吾不敢直告之。但告其僕耳。揚子雲仿之作州箴。冀州曰。「牧臣司冀。敢告在階。」揚州曰。「牧臣司揚。敢告執箴。」荊州曰。「牧臣司荆。敢告執御。」青州曰。「牧臣司青。敢告執矩。」徐州曰。「牧臣司徐。敢告僕夫。」余之敢告馬走。即此類也。走猶僕也。朱子作敬箴曰。「敢告靈臺。」則非僕御之類。於古人微有歧謬矣。凡箴以官箴爲本。如韓公五箴。程子四箴。朱子各箴。范浚心箴之屬。皆失本義。余亦相沿失之。

爾問注疏之法。書經文義奧衍。注疏勉強牽合二語。甚有所見。左疏淺近。亦頗不免。國朝如王西莊鳴盛。孫淵如星衍。江良庭聲。皆注尙書。顧亭林炎武。惠定宇棟。王伯申引之。皆注左傳。皆刻在皇清經解中。書經則孫注較勝。王江不甚足取。左傳則顧惠王三家俱精。王亦有書經述聞。爾曾看過一次矣。大抵十三經注疏。以三禮爲最善。詩疏次之。此外皆有純有駁。爾既已看動數經。即須立志全看一過。以期作事有恆。不可半途而廢。

爾問作字換筆之法。凡轉折之處。如「」之類。必須換筆。不待言矣。至並無轉折形迹。亦須換筆者。如以一直言之。須有三換筆。以一直言之。須有兩換筆。捺與橫相似。特末筆磔處更顯耳。撇與直相似。特末筆更撇向外耳。凡換筆以小換圈識之。可以類推。凡用筆須略帶欹斜之勢。如本斜向左。一換筆則向右矣。本斜向右。一換筆則左向矣。舉一反三。爾自悟取可也。

李春醴處。余擬送之八十金。若家中未先送。可寄信來。凡家中親友。有慶弔事。皆可寄信。由營致情也。（咸豐九年八月十二日）

諭紀澤（早辦男女婚嫁事）

字諭紀澤。廿一日得家書。知爾至長沙一次。何不寄安稟來營。婚期改九月十六。余甚喜慰。余老境侵尋。頗思將兒女婚嫁。早早料理。袁漱六親家患咯血疾。昨專人走松江看視。若得復原。吾即思明春辦大女兒嫁事。袁鐵庵來我家時。爾稟問母親。可以吾意商之。

京中書到時。有胡刻通鑑一部。留家中講解。即將吾圈過一部寄來營可也。又汲古閣初印五代史一部亦寄來。皮衣等件。速速寄來。吾買帖數十部。下次寄爾。此諭。（咸豐九年九月二十四日）

諭紀澤（宜早起及有恆）

字諭紀澤。見接爾十九二十九日兩稟。知喜事完畢。新婦能得爾母之歡。是即家庭之福。我朝列聖相承。總是寅正即起。至今二百年不改。我家高曾祖考相傳早起。吾得見。竟希公星岡公。皆未明即起。冬寒起坐約一個時辰。始見天亮。吾父竹亭公亦甫黎明即起。有事則不待黎明。每夜必起看一二次不等。此爾所及見者也。余近亦黎明即起。思有以紹先人之家風。爾既冠授室。當以早起爲第一先務。自力行之。亦率新婦力行之。

余生平坐無恆之弊。萬事無成。德無成。業無成。已可深恥矣。速辦理軍事。自矢靡他。中間本志變化。尤無恆之大者。用爲內恥。爾若稍有成就。須從有恆二字下手。

余嘗細觀星岡公儀表。絕人。全在一重字。余行路容止。亦頗重厚。蓋取法於星岡公。爾之容止甚輕。是亦大弊病。以後宜時時留心。無論行坐。均須重厚。

早起也。有恆也。重也。三者皆爾最要之務。早起是先人之家法。無恆是吾身之大恥。不重是爾之短處。故特諄諄戒之。

吾前一信。答爾所問者三條。一字中換筆。一敢告馬走。一注疏得失。言之頗詳。爾來稟何以並未提及。以後凡接我教爾之言。宜條條稟復。不可疏略。此外教爾之事。則詳於寄寶皆先生看讀寫作一紙中矣。此諭。（咸豐九年十月十四日）

諭紀澤（守家法及看文選）

字諭紀澤。初一日接爾十六日稟。澄叔已移寓新居。則黃金堂老宅。爾爲一家之主矣。昔吾祖星岡公。最講治家之法。第一要起早。第二打掃潔淨。第三誠修祭祀。第四善待親族鄰里。凡親族鄰里來家。無不恭敬款接。有急必周濟之。有訟必排解之。有喜慶必賀之。有疾必問。有喪必弔。此四事之外。於讀書種菜等事。尤爲刻刻留心。故余近寫家信。常常提及「書蔬魚豬」四端者。蓋祖父相傳之家法也。爾現因讀書無暇。此八字縱不能一一親自經理。亦不可不識得此意。請朱建四先生細心經理。入者缺一不可。其誠修祭祀一端。則必須爾母隨時留心。凡器皿第一等好者。留作祭祀之用。飲食第一等好者。亦備祭祀之需。凡人家不講究祭祀。縱然興旺。亦不久長。至要至要。

爾所論看文選之法。不爲無見。吾觀漢魏文人。有二端最不可及。一曰訓詁精確。二曰聲調鏗鏘。說文訓詁之學。自中唐以後。人多不講。宋以後說經。尤不明訓詁。及至我朝巨儒。始通小學。段茂堂王懷祖兩家。遂精研乎古人文字聲音之末。乃知文選中古賦所用之字。無不典雅精當。爾若能熟讀段王兩家之書。則知眼前常見之字。凡宋唐文人誤用者。惟六經不誤。文選中漢賦。亦不誤也。即以爾稟中所論三都賦言之。如「蔚若相如。儻若君平。」以一蔚字該括相如之文章。以一儻字該括君平之道。此雖不盡關乎訓詁。亦足見下字之不苟矣。至聲調之鏗鏘。如「開高軒以迎山。列綺窗而瞰江。」「碧出葭宏之血。鳥生杜宇之魂。」「洗兵海島。刷馬江洲。」「數軍實乎桂林之苑。饗戎旅乎落星之樓。」等句。音響節奏。皆後世所不能及。爾看文選。能從此二者用心。則漸有入理處矣。

作梅先生想已到家。爾宜恭敬款接。阮叔既已來營。則無人陪往益陽。聞胡宅專人至吾鄉迎接。即請作梅獨去可也。爾舅父牧雲先生。身體不甚耐勞。即請其無庸來營。吾此次無信。爾先致吾意。下次再行寄信。此囑。（咸豐十年閏三月初四日）

諭紀澤（宜通訓詁及詞章限定每月功課）

字諭紀澤。二十七日劉得四到。接爾稟。所議論文選。俱有所得。問小學亦有條理。甚以爲慰。阮叔於二十七到宿松。初三日由宿至集賢關。將爾稟帶去矣。余不能悉記。但記爾問種種二字。此字段茂堂辨論甚晰。「種」爲藝也。「種」爲後熟之禾。詩之「黍稷重穋」。說文作「種稂」。種。正字也。重。假借字也。「稂」與「穋」。異同字也。隸書以「種稂」二字互易。今人於「耕種」概用「種」字矣。

吾於訓詁詞章二端。頗嘗盡心。爾看書若能通訓詁。則於古人之故訓大義。引伸假借。漸漸開悟。而後人承訛襲誤之習可改。若能通詞章。則於古人之文格文氣。開合轉折。漸漸開悟。而後人之硬腔滑調之習可改。是余之所厚望也。

嗣後爾每月作三課。一賦。一古文。一時文。皆交長夫帶至營中。每月十有三次。長夫接家信也。吾於爾有不放心者二事。一則舉止不甚重厚。二則文氣不甚圓適。以後舉止留心一「重」字。行文留心一「圓」字。至囑。（咸豐十年四月初四日）

諭紀澤（作文須珠圓玉潤）

字諭紀澤。十六日接爾初二日稟。並賦二篇。近日大有長進。慰甚。無論古今何等文人。其下筆造句。總以珠圓玉潤爲主。無論古今何等書家。其落筆結體。亦以珠圓玉潤爲主。故吾前示爾書。專以一「重」字教爾之短。一「圓」字望爾之成也。

世人論文家之語。圓而藻麗者。莫如徐陵庾信。而不知江淹鮑昭則更圓。進之沈約任昉則亦圓。進之潘岳陸機

則亦圓。又進而溯之東漢之班固張衡崔駰蔡邕則亦圓。又進而溯之西漢之賈誼鼂錯匡衡劉向則亦圓。至於馬遷相如子雲三人可謂力趨險奧不求圓適矣。而糾讀之亦未始不圓。至於昌黎其志意直欲陵駕子長卿雲三人。真真獨造。力避圓熟矣。而久讀之實無一字不圓。無一句不圓。

爾於古人之文若能從鮑江徐庾四人之圓。步步上溯。直窺卿雲馬韓之圓。則無不可讀之古文矣。即無不可通之經史矣。爾其勉之。余於古人之文。用功甚深。惜未能一一述之腕下。每歎然不怡耳。

江浙賊勢大亂。江西不久亦嘗震動。兩湖亦難安枕。余寸心坦坦蕩蕩。毫無疑怖。爾稟告爾母。儘可放心。人誰不死。只求臨終心無愧悔耳。家中暫不必添起雜屋。總以安靜不動爲妙。(咸豐十年四月二十四日)

諭紀澤紀鴻(戒舉止太輕勿積銀錢置田產)

字諭紀澤紀鴻兩兒。在安慶所發各信。及在黃石磯湖口之信。均已接到。鴻兒所呈擬連珠體壽文。初七日收到。余以初九日出營至駱縣。查閱各嶺。十四日歸營。一切平安。鮑超張凱章二軍。自廿九初四日獲勝後。未再開仗。楊軍門帶水陸三千餘人。至南陵。破賊四十餘壘。拔出陳大富一軍。此近日最可喜之事。

英夷業已就撫。余九月六日請帶兵北援一疏。奉旨無庸前往。余得一意辦東南之事。家中儘可放心。

澤兒看書。天分高而文筆不甚勁挺。又說話太易。舉止太輕。此次在祁門。爲日過淺。未將一輕字之弊除盡。以後須於說話走路時。刻刻留心。鴻兒文筆勁健。可慰可喜。此次連珠文。先生改者若干字。擬體係何人主意。再行詳稟告我。銀錢田產。最易長驕氣逸氣。我家中斷不可積錢。斷不可買田。爾兄弟努力讀書。決不怕沒飯喫。至囑。(咸豐十年十月十六日)

諭紀澤紀鴻(言語舉止要穩重)

字諭紀澤紀鴻兩兒。十月二十九日接爾母及澄叔信。又棉鞋瓜子二包。得知家中各宅平安。澤兒在漢口阻風六日。此時當已抵家。「舉次要重。發言要訥。」爾終身須牢記此二語。無一刻可忽也。

余日內平安。飽張二軍亦平安。左軍二十二日在貴溪獲勝一次。二十九日在德興小勝一次。然賊數甚衆。尙屬可慮。晉軍在建德。賊以大股往撲。祇要左晉二軍站得住。則處處皆穩矣。

澤兒字天分甚高。但少剛勁之氣。須用一番苦工夫。切莫把天分自棄了。家中大小。總以早起爲第一義。澄叔處此次未寫信。爾等稟之。（咸豐十年十一月初四日）

論紀澤（飯後散步爲養生秘訣）

字諭紀澤。曾名琮來。接爾十一月二十五日稟。知五十七。尙有兩稟未到。爾體甚弱。咳吐鹹痰。吾尤以爲慮。然總不宜服藥。藥能活人。亦能害人。良醫則活人者十之七。害人者十之三。庸醫則害人者十之七。活人者十之三。余在鄉在外。凡目所見者。皆庸醫也。余深恐其害人。故近三年來。決計不服醫生所開之方藥。亦不令爾服鄉醫所開之方藥。見理極明。故言之極切。爾其敬聽而遵行之。

每日飯後走數千步。是養生家第一秘訣。爾每餐食畢。可至唐家鋪一行。或至澄叔家一行。歸來大約可三千餘步。三個月後。必有大效矣。爾看完後。漢書須將通鑑看一遍。即將京中帶回之通鑑。仿照余法。用筆點過可也。爾走路近略重否。說話略鈍否。千萬留心此諭。（咸豐十年十二月二十四日）

論紀澤（論文之古雅雄奇）

字諭紀澤。臘月二十九日接爾一稟。係十一月十四日送家信之人帶回。又由沅叔處送到爾初歸時二信。驚悉霞仙先生令弟仙遊。余於近日當寫唁信。並寄奠儀。爾當先去弔唁。

爾問文中雄奇之道。雄奇以行氣爲上。造句次之。選字又次之。然未有文不古雅而句能古雅。句不古雅而氣能古雅者。亦未有字不雄奇而句能雄奇。句不雄奇而氣能雄奇者。是文章之雄奇。其精處在行氣。其羸處全在造句。選字也。余好古人雄奇之文。以昌黎爲第一。揚子雲次之。二公之行氣。本之天授。至於人事之精能。昌黎則造句之工夫居多。子雲則造句之工夫居多。

爾問敘事誌傳之文。難於行氣。是殊不然。昌黎如曹成王碑。韓許公碑。固屬千奇萬變。不可方物。即盧夫人之銘。女峯之誌。寥寥短篇。亦復雄奇倔強。爾試將此四篇熟看。則知二大二小。各極其妙矣。爾所作雪賦詞意頗雅。惟氣勢不暢。對仗不工。兩漢不尙對仗。潘陸則對矣。江鮑徐庾則工對矣。爾宜從對仗上用工夫。此囑。（咸豐十一年正月初四日）

諭紀澤（從短處痛下工夫）

字諭紀澤見。爾求鈔古文目錄。下次即行寄歸。爾寫字筆力太弱。以後即常摹柳帖亦好。家中有柳書元秘塔。琅琊碑。西平碑四種。爾可取琅琊碑日臨百字。摹百字。臨以求其神氣。摹以做其間架。每次家信內。各附數紙送閱。左傳注疏。爾即閱看通鑑。將京中帶回之通鑑。仿我手校本。將目錄寫於面上。其去秋在管帶回手校本。便中仍當寄送祁門。余常思繕閱也。

爾言鴻兒爲鄧師所賞。余甚欣慰。鴻兒現閱通鑑。爾亦可時時教之。

爾看書天分甚高。作字天分甚高。作詩文天分略低。若在十五六歲時。教導得法。亦當不止於此。今年已廿三歲。全靠爾自己掙扎發憤。父兄師長不能爲力。作詩文是爾之所短。即宜從短處痛下工夫。看書寫字。爾之所長。即宜拓而充之。走路宜重。說話宜遲。常常記憶否。余身體平安。告爾母放心。（咸豐十一年正月十四日）

諭紀澤（述古人之解經說經）

字諭紀澤。正月十四發第二號家信。諒已收到。日內祁門尙屬平安。鮑春霆自初九日在岸塘獲勝後。即遣賊至彭澤。官軍駐牯牛嶺。賊匪踞下隅坂。與之相持。尙未開仗。日內兩雪泥淖。寒霜凜冽。氣象殊不適人意。係定王李秀成一股。正月初五日圍玉山縣。初八日圍廣豐縣。初十日圍廣信縣。均經官軍竭力堅守。解圍以去。現竄鉛山之吳坊陳坊等處。或由金溪以竄撫建。或徑由東鄉以撲江西省城。皆意中之事。余囑劉養素等堅守。撫建。而省城亦預籌防守事宜。祇要李逆一股。不甚擾江西腹地。黃逆一股。不再犯景德鎮等。三四月間。安慶克復。江北可

分兵來助南岸。則大局必有轉機矣。日下春季尙必有危險迭見。余當謹慎圖之。泰然處之。

余身雖平安。惟齒痛時發。所選古文。已鈔目錄寄歸。其中有未注明名氏者。爾可查出補注。大約不出三百名家全集。及文選古文辭類纂三書之外。爾問左傳解詩書易。與今解不合。古人解經。有內傳。有外傳。本義也。外傳者。旁推曲衍。以盡其餘義也。孔子繫易小象。則本義爲多。大象則餘義爲多。孟子說詩。亦本子貢之因貧富而悟切磋。子夏之因素絢而悟禮後。證餘義處爲多。韓詩外傳。盡餘義也。左傳說經。亦以餘義立言者矣。

袁庚生之二百金。余去年曾借松江二百金。送季仙九先生。此項祇算還袁宅可也。樹堂先生送爾三百金。余當面祇受百金。爾寫信寄營酬謝。言「受一璧二」云云。余在營中。備二百金并爾信函交焉可也。此字並送澄叔一閱。此次不另作書矣。（咸豐十一年正月二十四日）

諭紀澤紀鴻（述須以勞字謙字爲重）

字諭紀澤紀鴻兩兒。得正月廿四日信。知家中平安。此間軍事。自去冬十一月至今。危險異常。幸皆化險爲夷。目下惟左軍在景德鎮一帶。十分可危。餘俱平安。余將以十七日移駐東流建德。

付回銀八兩。爲我買好茶葉。陸續寄來。

下手竹茂盛。屋後山內仍須栽竹。復吾父在日之舊觀。余七年在家。芟伐各竹。以倒廳不光明也。乃芟後而黑暗如故。至今悔之。故屬重栽之。

「勞」字。「謙」字。常常記得否。（咸豐十一年二月十四日）

諭紀澤紀鴻（述軍情及自己志願與家教）

字諭紀澤紀鴻兩兒。接二月廿三日信。知家中五宅平安。甚慰。甚慰。余以初三日至休寧縣。即聞景德鎮失守之信。初四日寫家信。託九叔處寄湘。即言此間局勢危急。恐難支持。然猶意力攻徽州。或可得手。即是一條生路。初五日進攻。強中湘前等營。在西門挫敗一次。十二日再行進攻。未能誘賊出仗。是夜二更。賊匪偷營劫村。強中湘

前等營大潰。凡去廿二營。其挫敗者八營。（強中三營。老湘三營。湘前一震字一。）其幸而完全無恙者十四營。（老湘六。震二。禮二。親兵一。峯二。）與咸豐四年十二月十二夜。賊踰湖口水營情形相仿。此次未挫之營較多。以尋常兵事言之。此尙爲小挫。不甚傷元氣。目下值局勢萬緊之際。四面梗塞。接濟已斷。如此一挫。軍心尤大震動。所盼望者左軍能破景德鎮樂平之賊。飽軍能從湖口迅速來援。事或略有轉機。否則不堪設想矣。

余自從軍以來。卽懷見危授命之志。丙戌年在家抱病。常恐溘逝牖下。渝我初志。失信於世。起復再出。意尤堅定。此次若遂不測。毫無牽戀。自念貧窶無知。官至一品。壽逾五十。薄有聲名。兼秉兵權。忝竊萬分。夫復何憾。惟古文與詩二者。用力頗深。探索頗苦。而未能介然用之。獨闕康莊。古文尤確有依據。若違先朝露。則寸心所得。遂成廢陵之散。作字用功最淺。而近年略有入處。三者一無所成。不無耿耿。

至行軍本非余所長。兵貴奇而余太平。兵貴詐而余太直。豈能辦此滔天之賊。卽前次屢有克捷。已爲僥倖。出於非望矣。爾等長大之後。切不可涉歷兵間。此事難於見功。易於造孽。尤易於貽萬世口實。余久處行間。日日如坐鍼氈。所差。不負吾心。不負所學者。未嘗須臾忘愛民之意耳。

近來閱歷愈多。深諳督師之苦。爾曹惟當一意讀書。不可從軍。亦不必作官。吾教子弟。不離八本。三致祥。八者。曰。讀古書。以訓詁爲本。作詩文。以聲調爲本。養親。以得歡心爲本。養生。以少惱怒爲本。立身。以不妄語爲本。治家。以不晏起爲本。居官。以不要錢爲本。行軍。以不擾民爲本。三者。曰。孝致祥。勤致祥。恕致祥。吾父竹亭公之教人。則專重孝字。其少壯敬親。暮年愛親。出於至誠。故吾纂墓誌。僅敘一事。吾祖星岡公之教人。則有八字。三不信。八者。曰。考。寶。早。掃。蔬。魚。猪。三者。曰。僧。巫。曰。地。仙。曰。醫。藥。皆不信也。虞茲亂世。銀錢愈少。則愈可免禍。用度愈省。則愈可袞福。爾兄弟奉母。除勞字儉字之外。別無安身之法。吾當軍事極危。輒將此二事叮囑一遍。此外亦別無遺訓之語。爾可稟告諸叔及爾母無忘。（咸豐十一年三月十三日）

諭紀澤（告軍情囑雇人種蔬）

字諭紀澤。三月三十日建德途次。接澄侯弟在永豐所發一信。並爾將去省時在家所留之稟。爾到省後所寄一稟。卻於二十八日先到也。

余二十六日。自祁門拔營起行。初一日至東流縣。飽軍七千餘人。於二十五日自景德鎮起行。三十日至下隅坂。因風雨阻滯。初三日始渡江。即日進援安慶。大約初八九可到。沅弟季弟在安慶。穩守十餘日。極爲平安。朱雲岩五百人。二十四日自祁門起行。初二日已至安慶。助守營壕。家中儘可放心。

此次賊救安慶。攻勢乃在千里以外。如湖北則破黃州。破德安。破孝感。破隨州。雲夢黃梅蘄州等屬。江西則破吉安。破瑞州。吉水新淦永豐等屬。皆所以分兵力。亟肆以疲我。多方以誤我。賊之營於用兵。似較昔年更狡更悍。吾但求力破安慶一門。此外皆不慮與之爭得失。轉旋之機。只在一二月可決耳。

鄉間早起之家。蔬菜茂盛之家。類步吳旺。晏起無蔬之家。類衰衰弱。爾可於省城菜園中。用重價雇人至家種蔬。或二人亦可。其價若干。余由營內寄回。此囑。(咸豐十一年四月四日)

諭紀澤(開闢菜園之法)

字諭紀澤。六月二十日唐介科回營。接爾初三日稟。並澄叔一函。具悉一切。今年「彗星」出於「北斗」與「紫微垣」之間。漸漸移南。不數日而退出「右輔」與「攝光」之外。並未貫「紫微垣」。亦未犯「天市」也。古驗之說。本不足信。即有不祥。或亦不大爲害。

省雇園丁來家。宜廢田一二坵。用爲菜園。吾現在營課勇夫種菜。每塊土約三丈長。五尺寬。窄者四尺餘寬。務使芸草及摘蔬之時。人足行兩邊溝內。不踐菜土之內。溝寬一尺六寸。足容便桶。大小橫直。有溝有滄。下雨則水有所歸。不使積潦傷菜。四川菜園極大。溝滄終歲引水長流。頗得古人井田遺法。吾鄉一家園土有限。斷無橫溝。而直溝則不可少。吾鄉老農。雖不甚精。猶頗認真。老圃則全不講究。我家開此風氣。將來荒山曠土。盡可開墾。種百穀雜蔬之類。如種茶亦獲利極大。吾鄉無人試行。吾家若有山地。可試種之。

爾前問說文中逸字。今將貴州鄭子尹所著二卷。寄爾一閱。渠所補一百六十五字。皆許書本有之字。而後世脫失者也。其子知同又附考三百字。則許書本無之字。而他書引說文有之。知同辨爲不當有者也。爾將鄭氏父子書細閱一遍。則知叔重原有之字。被傳寫逸脫者。實已不少。

紀渠姪近寫篆字。甚有筆力。可喜可慰。茲圈出付回。爾須教之認熟篆文。並解明偏旁本意。渠姪湘姪要大字橫匾。余即日當寫就付歸。壽姪亦當付一匾也。家中有李少溫篆帖三墳記。遷先塋記亦可尋出。呈澄叔一閱。澄叔作篆字間架太散。以無帖意故也。鄧石如先生所寫篆字西銘弟子職之類。永州楊太守新刻一套。爾可求郭憲城姻叔榻一二分。俾家中寫篆者。有所摹仿。

家中有褚書西安聖教。同州聖教。爾可尋出寄營。王聖教亦寄來一閱。如無裒者。則不必寄也。漢魏六朝百三家集。京中一分。江西一分。想俱在家。可寄一部來營。

余瘡疾略好。而癯大作。手不停爬。幸飲食如常。安慶軍事甚好。大約可克復矣。

此次未寫信與澄叔。爾將此呈閱。並問澄弟近好。(咸豐十一年六月廿四日)

諭紀澤(學書須窺尋門徑)

字諭紀澤。爾前寄所臨書譜一卷。余比送徐柳臣先生處。請其批評。初七日接渠回信。茲寄爾一閱。十三晤柳臣先生。渠盛稱爾草字可以入古。又送爾扇一柄。茲寄回。劉世兄送西安聖教。茲與手卷並寄回。查收。

爾前用油紙摹字。若常常爲之。間架必大進。歐虞顏柳四大家。是詩家之李杜韓蘇。天地之日星江河也。爾有志學書。須窺尋四人門徑。至嚙至嚙。(咸豐十一年七月十四日)

諭紀澤(練習看讀寫作工夫)

字諭紀澤。前接來稟。知爾鈔說文。閱通鑑。均尙有恆。能耐久坐。至以爲慰。

去年在營。余教以看、讀、寫、作四字。闕一不可。爾今閣通鑑。算「看」字工夫。鈔說文。算「讀」字工夫。尙能臨帖否。或臨書譜。或用油紙摹歐柳楷書。以藥爾柔弱之體。此「寫」字工夫。必不可少者也。

爾去年曾將文選中零字碎錦。分類纂鈔。以爲屬文之材料。今尙照常摘鈔否。已卒業否。或分類抄文選之詞藻。或分類抄說文之訓詁。爾生平作文太少。似此代作字工夫。亦不可少者也。爾十餘歲至二十歲。虛度光陰。及今將看、讀、寫、作四字。逐日無間。尙可有成。

爾語言太快。舉止太輕。近能力行遲重二字。以改救否。

此間軍事平安。援賊於十九二十廿一日撲安慶後壕。均經擊退。二十二日自己刻起。至五更止。猛撲十一次。亦竭力擊退。從此當可化險爲夷。安慶可望克復矣。

余癰疾未愈。每日夜手不停爬。幸無他病。皖南有左張。江西有鮑。均可放心。目下淮安慶較險。然過二十二之風波。當無慮也。(咸豐十一年七月廿四日)

諭紀澤(惟崇儉可以長久)

字諭紀澤。八月二十日胡必達謝榮鳳到。接爾母子及澄叔三信。並漢魏百三家。聖教序三帖。二十二日譚在榮到。又接爾及澄叔二信。具悉一切。

蔡迎五竟死於京口江中。可異可憫。茲將其口糧三兩補去外。以銀二十兩賑卹其家。朱運四先生之母仙逝。茲寄去奠儀銀八兩。蕙姑娘之女一貞。於今冬發嫁。茲付去賀銀十兩。家中可分別妥送。

大女兒擇於十二月初三日發嫁。袁家已送期來否。余向定嫁奩之資二百金。茲先寄百金回家。製備衣物。餘百金俟下次再寄。其自家至袁家途費。暨六姪女出嫁。儀。均俟下次再寄也。

居家之道。惟崇儉可以長久。虞亂世尤以戒奢侈爲要義。衣服不宜多製。尤不宜大鑲大緣。過於絢爛。爾教導諸妹。敬聽父訓。自有可久之理。

牧雲舅氏書院一席。余以函託寄雲中丞。沅叔告假回長沙。當面再一提及。當無不成。余身體平安。二十一日成。眼哭窮。現在三日已畢。瘡尚未好。每夜搔癢不止。幸不甚爲害。溫叔近患瘧疾。二十二日全愈矣。此次未寫澄叔信。爾將此呈閱。(咸豐十一年八月廿四日)

諭紀澤(文字之本原及目錄分類之方法)

字諭紀澤。接爾八月十四日稟。並日課一單。分類目錄一紙。日課單批明發還。目錄分類。非一言可盡。大抵有一種學問。即有一種分類之法。有一人嗜好。即有一人摘抄之法。若從本原論之。當以爾雅爲分類之最古者。天之星辰。地之山川。鳥獸草木。皆古聖賢人辨其品彙。命之以名。書所稱「大禹主名山川。」禮所稱「黃帝正名百物。」是也。

物必先有名而後有是字。故必知命名之原。乃知文字之原。舟車弓矢。俎豆鐘鼓。日用之具。皆先王制器以利民用。必先有器而後有是字。故必知制器之原。乃知文字之原。君臣上下。禮樂兵刑賞罰之法。皆先王立事以經綸天下。或先有事而後有字。或先有字而後有事。故又必知萬事之本。而後知文字之原。此三者。物最初。器次之。事又次之。三者既具。而後有文詞。

爾雅一書。如釋天。釋地。釋山。釋水。釋草木。釋鳥獸蟲魚。物之屬也。釋器。釋宮。釋樂。器之屬也。釋親。事之屬也。釋詁。釋訓。釋言。文詞之屬也。爾雅之分類。惟屬事者最略。後世之分類。惟屬事者最詳。事之中。又判爲兩端焉。曰虛事。曰實事。虛事者。如經之三禮。馬之八書。班之十志。及三通之區別門類是也。實事者。就史鑑中已往之事蹟。分類纂記。如事文類聚。白孔六帖。太平御覽。及我朝御鑑類函。子史精華等書是也。

爾所呈之目錄。亦是抄摘實事之象。而不如子史精華中目錄之精當。余在京藏子史精華於溫叔處。二十八年帶回。惟尙在白玉堂。爾可取出核對。將子目略爲減少。後世人事日多。史冊日繁。摘類書者事多而器物少。乃勢所必然。爾即可照此抄去。但期與子史精華規矩相仿。即爲善本。其未附古話鄙語。雖未必無用。而不如徑摘抄

說文訓詁。庶與爾雅首三篇相近也。

余亦思仿爾雅之例。抄纂類書。以記日知月無忘之效。特惠年齒已衰。軍務少暇。終不能有所成。或余少引其端。爾將來繼成之可耳。

余身體尙好。惟瘡久不愈。沅叔已拔營赴廬州。無爲州。一切平安。

胡宮保仙遊。是東南大不幸事。可傷之至。

紫兼毫管中無之。茲付筆二十枝。印章一包。查收。藍格本下次再付。澄叔處尙未寫信。將此送閱。(咸豐十一年九月初四日)

諭紀澤(批示所作之凡例並囑女子歸勿奢侈)

字諭紀澤。昨見爾所作說文分韻解字凡例。喜爾今年甚有長進。因請莫君指示錯處。莫君名友芝。字子偁。號侶亭。貴州辛卯舉人。學問淹雅。丁未年在琉璃廠與余相見。以敬其人。七月來營。復得嚶談。其學於考據詞章。二者皆有本原。義理亦踐修不苟。茲將渠批訂爾所作之凡例寄去。余亦批示數處。

又寄銀百五十兩。合前寄之百金。均爲大女兒干歸之用。以二百金辦奩具。以五十金爲程儀。家中切不可另籌銀錢。過於奢侈。遭此亂世。雖大富大貴。亦靠不住。惟儉勤二字。可以持久。又寄丸藥二小瓶。與爾母服食。爾在家常能起早否。諸妹起早否。說話遲鈍。行路厚重否。宜時時省記也。(咸豐十一年九月廿四日)

諭紀澤(胸次須博大活潑)

字諭紀澤。初四夜接爾二十六號稟。所刻心經。微有西安聖教筆意。總要養得胸次博大活潑。此後更當有長進也。

爾去年看詩經注疏已畢否。若未畢。自當補看。不可無恆耳。講通鑑卽以我過筆者講之亦可。將來另購一部。爾照我之樣。過筆一次可也。(咸豐十一年十月廿四日)

諭紀澤（寄銀爲二女醫資）

字諭紀澤。接沅叔信。知二女喜期。陳家擇於正月二十日入贅。澄叔欲於鄉間另備一屋。余意即在黃金堂成禮。或借曾家埭頭行禮。三朝後仍接回黃金堂。想爾母子與諸叔已有定議矣。茲寄回銀二百兩。爲二女奩資。外五十金爲酒席之資。俟下次寄回。（亦於此次寄矣。）

浙江全省皆失。賊勢浩大。迥異往時氣象。鮑軍在青陽。亦因賊聚兵單。未能得手。徽州近又被圍。余任大責重。憂悶之至。

瘡癘並未少減。每當痛癢極苦之時。常思與爾母子相見。因賊氛環逼。不敢遽接家眷。又以羅氏女須嫁。紀鴻須出考。且待明春察看。如賊焰少衰。安慶無虞。則接爾母帶紀鴻來此一行。爾夫婦與陳壻在家照料一切。若賊氛日甚。則仍接爾來此一行。明年正二月。再有准信。

紀鴻縣府各考。均請鄧師親送。澄叔前言紀鴻至書院讀書。則斷不可。前蒙恩賜遺念衣一冠。一班指一表。一。茲用黃箱送回。敬謹尊藏。此囑。（咸豐十一年十二月廿四日）

諭紀澤（述讀詩及小學）

字諭紀澤兒。正月十三四。連接爾十二月十六。二十四兩稟。又得澄叔十二月廿二日一緘。備悉一切。

爾詩一首。閱過發回。爾詩筆遠勝於文筆。以後宜常常爲之。余久不作詩。而好讀詩。每夜輒取古人名篇。高聲朗誦。用以自娛。今年亦嘗間作二三首。與爾曹相和答。做蘇氏父子之例。

爾之才思。能古雅而不能雄駿。大約宜作五言而不宜作七言。

余所選十八家詩。凡十厚冊。在家中。此次可交來丁帶至營中。爾要讀古詩。漢魏六朝。取余所選曹陶謝鮑謝六家。專心讀之。必與爾性質相近。致於開拓心胸。擴充氣魄。窮極變態。則非唐之李杜韓白。宋金之蘇黃陸元八家。不足以盡天下古今之奇觀。爾之質性。雖與八家者不相近。而要不可不將此八人之集。悉心研究一番。實六經

外之鉅製。文學中之尤物也。

爾於小學。盡有所得。深用爲慰。欲讀周漢古書。非明於小學。無可問津。余於道光末年。始好高郵王氏父子之說。從事戎行。未能卒業。冀爾竟其緒耳。

余身體尙可支持。惟公事太多。每易積壓。癩痺迄未甚愈。家中索用銀錢甚多。其最要緊者。余必付回。京報在家。不知係報何喜。若節制四省。則余已兩次疏辭矣。此等空空體面。豈亦有喜報耶。(同治元年正月十四日)

諭紀澤(述軍情)

字諭紀澤兒。二月十三日。接正月二十三日來稟。并澄侯叔一信。知五宅平安。二女正月二十日喜事。諸凡順遂。至以爲慰。

此間軍事如恆。徽州解圍後。賊退不遠。亦未再來犯。左中丞進攻遂安。以爲攻嚴州保衢州之計。鮑春霆頓兵青陽。近未開仗。洪叔在三山夾收降卒三千人。編成四營。沅叔初七日至漢口。十五日後當可抵皖。李希帥初九日至安慶。三月初。赴六安州。多禮堂進攻廬州。賊堅守不出。上海屢次被賊撲犯。洋人助守。尙幸無急。

余身體平安。今歲間能成寐。爲近年所僅見。惟聖眷大隆。責任太重。深以爲危。知交有識者。亦皆代我危之。只好刻刻謹慎。存一臨深履薄之想而已。

今年縣考在何時。鴻兒赴考。須請寅師往送。寅師父子一切盤費。皆我家供應也。(同治元年正月十四日)

諭紀澤(慰其煩勞及述軍情)

字諭紀澤兒。三月十三日。據爾二月二十四日安稟。并澄叔信。具悉五宅平安。

爾至葛家送親後。又須至劉陽送陳壻夫婦。又須趕回黃宅送親。又須接辦羅氏女喜事。今年春夏。爾在家中。比余在營更忙。然古今文人學人。莫不有家常瑣事之勞。其身莫不有世態冷暖之擾。其心。爾現當家門鼎盛之時。炎涼之狀。不接於目。衣食之謀。不繫於懷。雖奔走煩勞。猶遠勝於寒士困苦之境也。

爾母咳嗽不止。其病當在肺家。茲寄去好參四錢五分。高麗參半斤。好者如試之有效。當託人到京再買也。余近久不吃丸藥。每月兩逢節氣。服歸脾湯三劑。邇來渴睡甚多。不知是好是歹。

軍事平安。鮑公於初七日在銅陵。獲一大勝仗。少荃坐火輪船。於初八日赴上海。其所部六千五百人。當陸續載去。希菴所派救潁州之兵。於初五日解潁郡之圍。

第三女於四月廿二日於歸羅家。茲寄去銀二百五十兩。查收。餘不詳。即呈澄叔一閱。此囑。（同治元年三月十四日）

諭紀澤（曷以有恆及告軍事勝利）

字諭紀澤兒。連接爾十四廿二日。在省城所發稟。知二女在陳家。門庭雍睦。衣食有資。不勝欣慰。

爾累月奔馳。剛應。猶能不失常課。當可日進無已。人生惟有「常」是第一美德。余早年於作字一道。亦嘗苦思。力索。終無所成。近日朝朝摹寫。久不間斷。遂覺月異而歲不同。可見年無分老少。事無分難易。但行之有「恆」。自如種樹養畜。日見其大而不覺耳。

爾之短處。在言語欠純訥。舉止欠端重。看書不能深入。而作文不能崢嶸。若能從此三事上。下一番苦工。進之以猛。持之以恆。不過一二年。自爾精進而不覺。言語遲鈍。舉止端重。則德進矣。作文有崢嶸雄快之氣。則益進矣。爾前作詩。差有端序。近亦常作否。李杜韓蘇四家之七古。驚心動魄。曾涉獵及之否。

此間軍事。近日極得手。鮑軍連克青陽石埭太平涇縣四城。沅叔連克葉縣和州含山三城。暨銅城開雍家德裕。溪口西梁山四隘。洪叔連克繁昌南陵二城。暨魯港一隘。現仍穩慎圖之。不敢驕矜。

余近日瘡癬大發。與去年九十月相等。公事叢集。竟日忙冗。尙多積擱之件。所幸飲食如常。每夜安眠。或二更三更之久。不似往昔徹夜不寐。家中可以放心。此信并呈澄叔一閱。不另致也。（同治元年四月初四日）

諭紀澤紀鴻（謂讀書可以變化氣質）

字諭紀澤紀鴻兩兒。今日專人送家信。甫經成行。又接王輝四等帶來四月初十日之信。爾與澄叔各一件。藉悉一切。

爾近來寫字總失之薄弱。骨力不堅勁。墨氣不豐腴。與爾身體向來輕字之弊。正是一路毛病。爾常用油紙摹顏字之郭家廟。柳字之琅琊碑。元祕塔。以藥其病。日日留心。專從厚重二字上用工。否則字質太薄。即體質亦因之更輕矣。人之氣質由於天生。本難改變。惟讀書則可變化氣質。古之精相法。并言讀書可以變換骨相。欲求變化之法。總須先立堅卓之志。即以余生平言之。三十歲最好喫煙。片刻不離。至道光壬寅十一月廿一日立志戒煙。至今不再喫。四十六歲以前作事無恆。近五年深以為戒。現在大小事均尙有恆。即此二端。可見無事不可變也。爾於厚重二字。須立志變改。古稱金丹換骨。余謂立志即丹也。此囑。（同治元年四月廿四日）

諭紀澤（宜用心詞章之學）

字諭紀澤。接爾四月十九日一稟。得知五宅平安。爾說文將看畢。擬先看各經注疏。再從事於詞章之學。余觀漢人詞章。未有不精於小學訓詁者。如相如子雲孟堅。於小學皆專著一書。文選於此三人之文。著錄亦最多。余於古文。志在效法此三人。並司馬遷韓愈五家。以此五家之文。精於小學訓詁。不妄下一字也。爾於小學既粗有所見。正好從詞章上用功。說文看畢之後。可將文選細讀一過。一面細讀。一面抄記。一面作文以倣效之。凡奇僻之字。雅古之訓。不手抄則不能記。不摹倣則不慣用。自宋以後。能文章者。不通小學。國朝諸儒。通小學者。又不能文章。余早歲窺此門徑。因人事太繁。又久歷戎行。不克卒業。至今用爲疚憾。爾之天分。長於看書。短於作文。此道太短。則於古書之用意行氣。必不能看得諦當。目下宜從短處下工夫。專肆力於文選。手抄及摹倣二者。皆不可少。待文筆稍有長進。則以後詁經讀史。事事易於著手矣。

此間軍事平順。沅季兩叔。皆直逼金陵城下。茲將沅季信二件。寄家一閱。惟沅季兩軍進兵太銳。後路蕪湖等處空虛。頗爲可慮。余現籌兵補此瑕隙。不知果無疏失否。余身體平安。惟公事日繁。應復之信。積擱甚多。餘件尙能

料理。家中可以放心。此信送澄叔一閱。余思家鄉茶葉甚切。迅速付來爲要。（同治元年五月十四日）

諭紀澤（當作書教，誠袁增）

字諭紀澤。二十日接家信。係爾與澄叔五月初二所發。廿二日又接衢州澄侯一信。悉具五宅平安。三女嫁事已畢。

爾信極以袁增爲慮。余亦不料其遽爾學壞至此。余即日當作信教之。爾等在家。卻不宜過露痕跡。人所以稍顧體面者。冀人之敬重也。若人之傲慢鄙棄。業已露出。則索性蕩然無恥。拚棄不顧。甘與正人爲仇。而以後不可救藥矣。我家內外大小。於袁增處禮貌。均不可疏忽。若久不悔改。將來或接至皖營。延師教之亦可。大約世家子弟。錢不可多。衣不可多。事雖至小。所關頗大。

此間各路軍事平安。多將軍赴援陝西。沅季在金陵。孤軍無助。不無可慮。湖州於初三日失守。鮑攻寧國。恐難遠克。安徽亢旱。頃間三日大雨。人心始安。穀即在長沙採買。以後澄叔不必挂心。此次不另寄澄叔信。爾稟告之。此囑。（同治元年五月廿四日）

諭紀澤（衣食起居勿沾富貴習氣）

字諭紀澤。前聞爾縣試幸列首選。爲之欣慰。所寄各場文章。亦皆清潤大方。昨接易芝生先生十三日信。知爾已到省。城市繁華之地。爾宜在寓中靜坐。不可出外遊戲徵逐。

茲余函商郭意城先生。在於東征局兌銀四百兩。交爾在省爲進學之用。印卷之費。向例兩學及學書共三分。爾每分宜送錢百千。鄧寅師處謝禮百兩。鄧十世兄處送銀十兩。助渠買書之資。餘銀數十兩。爲爾零用。及略添衣物之需。

凡世家子弟。衣食起居。無一不與寒士相同。庶可以成大器。若沾染富貴習氣。則難望有成。吾忝爲將相。而所有衣服。不值三百金。願爾等常守此儉樸之風。亦惜福之道也。其照例應用之錢。不可過費。謁聖後。拜客數家。即行

歸里今年不必鄉試。一則爾工夫尙早。二則恐體弱難耐勞也。此諭。(同治元年五月廿七日)

諭紀澤(宜時時哦詩作字)

字諭紀澤。曾代四王飛四先後來營。接爾二十日二十六日兩稟。具悉五宅平安。

和張邑侯詩。音節近古。可慰可慰。五言詩若能學到陶潛謝眺一種和淡之味。和諧之音。亦天下之至樂。人間之奇福也。爾既無志於科名祿位。爾能多讀古書。時時哦詩作字。以陶寫性情。則一生受用不盡。第宜東身主璧。法王羲之陶淵明之襟懷瀟灑則可。法嵇阮之放蕩名教。則不可耳。

希庵丁憂。余即在安慶送禮。寫四兄弟之名。家中似不必另送禮。或鼎三姪另送禮物。亦無不可。然只可送祭席。輓幛之類。銀錢則斷不必送。爾與四叔父六媵母商之。希庵到家之後。我家須有人往弔。或四叔。或爾去。皆可。目下先去亦可。

近年以來。爾兄弟讀書。所以不甚就擱者。全賴四叔照料大事。朱金權照料小事。茲寄回鹿茸一架。袍褂料一付。寄謝四叔。高麗參三兩。銀十二兩。寄謝金權。又袍褂料一副。補謝寅皆先生。爾一一妥送。

家中賀書之客。請金權恭敬款接。不可簡慢。至要至要。賢五先生請余作傳。稍遲寄回。此次未寫覆信。爾先告之。

家中有殿板職官表一書。余欲一看。便中寄來。鈔本國史文苑儒林傳尙在否。查出稟知。此囑。(同治元年七月十四日)

諭紀澤(行氣爲文章要義)

字諭紀澤。接爾七月十一日稟。並澄叔信。具悉一切。鳩兒十三日自省起程。想早到家。此間諸事平安。沅季二叔在金陵亦好。惟疾疫頗多。前建清醮後。又陳龍燈獅子諸戲。做古大儂之禮。不知少愈否。

鮑公在寧國招降童容海一股。收用者三千人。餘五百人。憑行遣散。每人給錢一千。鮑公辦妥此事。即由高淳東

壩會剿金陵。

希帥由六安回省。初三已到。久病之後。加以憂戚。氣象黑瘦。咳嗽不止。殊爲可慮。本日接奉諭旨。不准請假回籍。賞銀八百。飭地方官照料。聖恩高厚。無以復加。而希帥思歸極切。觀其病象。若非回籍靜養。斷難痊愈。渠日內擬自行具摺陳情也。

爾所作擬莊三首。能識名理。兼通訓詁。慰甚。余近年頗識古人文章門徑。而在軍鮮暇。未嘗偶作。一吐胸中之奇。爾若而解漢書之訓詁。參以莊子之談詭。則余願償矣。至行氣爲文章第一義。卿雲之跌宕。昌黎之倔強。尤爲行氣不易之法。爾宜先於韓公倔強處。揣摩一番。

京中帶回之書。有謝秋水集。可交來人帶營一看。

澄叔處未另作書。將此呈閱。(同治元年八月初四日)

諭紀澤(士卒多病)

字諭紀澤。日內未接家信。想五宅平安爲慰。

此間近狀如常。各軍士卒多病。迄未少愈。甘子大至寧國一行。歸即一病不起。許吉齋座師之世兄。名敬身。號藻卿者。遠來訪我。亦數日物故。幸楊鮑兩軍門皆有轉機。張凱章聞亦少瘥。三公無他故。則大局尙可爲也。

沅叔營中病者亦多。沅意欲奏調多公一軍回援金陵。多公在秦。正當緊急之際。焉能東旋。且沅季共帶三萬人。僅保營盤。亦無請援之理。惟祝病卒漸愈。禁得此次風浪。則此後皆成坦途矣。

李希庵於閏八月二十三日。自安慶開行。奔喪回里。唐義渠即於是日到皖。兩公於余處。皆以長者之禮見待。公事毫無掣肘。余亦推誠相與。毫無猜疑。皖省吏治。或可漸有起色。余近日癩疾復發。不似去秋之甚。眼蒙則逐日增劇。夜間不能看字。老態相催。固其理也。(同治元年閏八月廿四日)

諭紀澤(述軍事在危急之際)

字諭紀澤兒。接爾閏月稟。知澄叔尙在衡州未歸。家中五宅平安。至以爲慰。此間連日惡風驚浪。僞忠王走金陵。苦攻十六晝夜。經沅叔多方堅守。得以保全。僞侍王初三四亦至。現在金陵之賊。數近二十萬。業經守二十日。或可化險爲夷。茲將沅叔初九十與我二信寄歸外。又有大夫第信一。慰家人之心。

鮑春霖稜紮寧都城二十里之高祖山。雖病弁太多。十分可危。然凱軍在城主守。春霖在外主戰。或足禦之。惟寧國縣城於初六日失守。恐賊猛撲徽州旌德祁門等城。又恐其由間道逕竄江西。殊可深慮。

余近日憂灼。迥異尋常。氣象與八年春間相類。蓋安危之機。關係甚大。不僅爲一己之身名計也。但願沅靈兩處。倖保無恙。則他處尙可徐徐補救。此信送澄叔一閱。不詳。(同治元年九月十四日)

諭紀澤(囑來營中省視)

字諭紀澤兒。旬日未接家信。不知五宅平安如常否。

此間軍事。金柱關蕪湖及水師各營。已有九分穩固可靠。金陵沅叔一軍。已有七分可靠。寧國鮑張各軍。尙不過五分可靠。此次風波之險。迥異尋常。余憂懼太過。似有怔忡之象。每日無論有信與無信。寸心常若皇皇無主。前次專慮金陵沅季大營。或有疏失。近日金陵已穩。而憂惶戰慄之象。不爲少減。自是老年心血虧損之症。欲爾再來營中省視。父子團聚一次。一則或可少解怔忡病症。二則爾之學問亦可稍進。或明年正月起行。稟明爾母及澄叔行之。爾在此住數月歸去。再令鴻兒來此一信。

寅皆先生明年定在大夫第教書。鴻兒隨之受業。金二外甥有志向學。爾可帶之來營。餘詳日記中。此諭。(同治元年十月初四日)

諭紀澤(鑽研小學古義)

字諭紀澤兒。十月初十日。接爾信。與澄叔九月廿日縣城發信。具悉五宅平安。希庵病亦漸好。至以爲慰。

此間軍事。金陵日就平穩。不久當可解圍。沉叔另有二信。余不贅告。鮑軍日內甚爲危急。賊於灣址渡過河西。梗塞靈營糧路。靈軍營士卒大病之後。布置散漫。衆心頗怒。深以爲慮。飽若不支。則張凱章困於寧國郡城之內。亦極可危。如天之福。寧國亦如金陵之轉危爲安。則大幸也。

爾從事小學說文。行之不倦。極慰。極慰。小學凡三大宗。言字者。以說文爲宗。古書惟大小徐二本。至本朝而段氏特開生面。而錢坫王筠桂馥之作。亦可參觀。言訓詁者。以爾雅爲宗。古書惟郭注邢疏。至本朝而邵二雲之爾雅正義。王懷祖之廣雅疏證。郝蘭皋之爾雅義疏。皆稱不朽之作。言音韻者。以唐韻爲宗。古書推廣韻集韻。至本朝而顧氏音學五書。乃爲不刊之典。而江（慎修）戴（東原）段（茂堂）王（懷祖）孔（異軒）江（晉三）諸作。亦可參觀。爾欲於小學鑽研古義。則三宗如顧江段邵郝王六家書。均不可不涉獵而探討之。

余近日心緒極亂。心血極虧。其慌忙無措之象。有似咸豐八年春在家之時。而憂灼過之。甚思爾兄弟來此一見。不知爾何日可來營省視。仰觀天時。默察人事。此賊竟無能平之理。但求全局不遽決裂。余能速死。而不爲萬世所痛罵。則幸矣。（同治元年十月十四日）

諭紀澤紀鴻（心緒惡劣盼父子一敘）

字諭紀澤紀鴻兩兒。日內未接家信。想五宅平安。

此間軍事。金陵於初五日解圍。營中一切平安。惟洪叔有病未愈。目下危急之處有三。一係寧國鮑張兩軍。糧路已斷。外無援兵。一係旌德朱品隆一軍。被賊圍撲。糧米亦缺。一係九洲之賊。竄過北岸。恐李世忠不能抵禦。大約此三處者。斷難倖全。

余兩月以來。十分憂灼。牙疼殊甚。心緒之惡。甚於八年春在家。十年春在祁門之狀。爾明年新正來。此父子一敘。或可少紓憂鬱。

爾近日走路。身體略覺厚重否。說話覺遲鈍否。鴻兒近學作試帖詩否。袁氏壻近常在家否。爾若來。或帶袁壻與

金二外甥同來亦好。(同治元年十月二十四日)

諭紀澤(諭四言詩)

字諭紀澤兒廿九接爾十月十八在長沙所發之信十一月初一又接爾初九日一稟并與左鏡和唱酬詩及澄叔之信具悉一切。

爾詩胎息近古用字亦皆的當惟四言詩最難有聲響有光芒雖文選章孟以後諸作亦復爾雅有餘精光不足揚子雲之州箴百官箴諸四言刻意摹古亦乏作之光淵淵之聲余生平於古人四言最好韓公之作如祭柳子厚文祭張暑文進學解送窮文諸四言固皆光如皎日響如春霆即其他凡墓志之銘詞及集中如淮西碑元和聖德各四言詩亦皆於奇崛之中迸出聲光其要不外意義層出筆仗雄拔而已外則班孟堅漢書敘傳一篇亦四言中之最雋雅者爾將此數篇熟讀成誦則於四言之道自韓公而自有悟境。

鏡和詩雅潔清潤實爲吾鄉罕見之才但亦少奇矯之致凡詩文欲求雄奇矯變總須用意有超羣離俗之想乃能脫去恆蹊爾前信讀馬汧督諫謂其沈鬱似史記極是極是余往年亦篤好斯篇爾若於斯篇及蕪城賦哀江南賦九辨祭張暑文等篇吟詠不已則生情自茂文思汨汨矣。

此間軍事危迫異常九洲州之賊紛竄江北巢縣和州含山俱有失守之信余日夜憂灼智盡能索一息尙存憂勞不懈他無所知耳。

爾行路漸厚重否紀鴻讀書有恆否至爲廬念餘詳日記中。(同治元年十一月初四日)

諭紀澤(俟季葬再來皖營)

字諭紀澤二十三日連寄二信與澄叔驛遞長沙轉寄想俱收到。

季叔齋志長逝實堪傷慟沉叔之意定以季襯葬馬公塘與高軒公合塚爾即可至北港迎接一切築墳等事稟問澄叔必恭必懇俟季叔葬畢再來皖營可也。

爾現用油紙摹帖否。字乏遒勁之氣。是爾生質短處。以後宜從剛字厚字用功。特囑。（同治元年十一月十四日）

諭紀澤（論韓公五言詩）

字諭紀澤。十一日接十一月二十二日稟。內有鴻兒詩四首。十二日又接初五日來稟。其時爾初自長沙歸也。兩次皆有澄叔之信。具悉一切。

韓公五言詩。本難領會。爾且先於怪奇可駭處。詼諧可笑處。細心領會。可駭處。如詠落葉。則曰。「謂是夜氣滅。望舒貫其圓。」詠作文。則曰。「蛟龍弄角牙。造次欲手攬。」可笑處。如詠登科。則曰。「儕輩妒且熱。喘如竹筒吹。」詠苦寒。則曰。「箴和送日出。恆怯頻窺覘。」爾從此等處用心。可以長才力。亦可添風趣。鴻兒試帖。大方而有清氣。易於造就。即日批政寄回。

季叔奉初六恩旨。進贈按察使。照按察使軍營病故例議卹。可稱極優。茲將諭旨錄歸。此間定於十九日開弔。二十日發引。同行者爲厚四甲二甲六葛畢山江龍三諸族戚。又有員弁親兵等數十人送之。大約二月可到湘潭。葬期若定二月底三月初。必不可不誤。

下游軍事漸穩。北岸蕭軍。於初十日克復運漕。飽軍糧路。雖不甚通。而賊實不悍。或可勉強支持。此信送澄叔一閱。（同治元年十二月十四日）

諭紀澤（勸妹柔順恭謹）

字諭紀澤。蕭開二來。接爾正月初五日稟。得知家中平安。羅大翁翁仙逝。當寄奠儀五十金。祭幛一軸。下次付回。

羅婿性情可慮。然此無可如何之事。爾諄囑三妹柔順恭謹。不可有片語違忤。三綱之道。君爲臣綱。父爲子綱。夫爲妻綱。是地維所賴以立。天柱所賴以尊。故傳曰。「君。天也。父。天也。夫。天也。」儀禮記曰。「君。至尊也。父。至尊也。夫。至尊也。君雖不仁。臣不可以不忠。父雖不慈。子不可以不孝。夫雖不賢。妻不可以不順。」吾家讀書居官。世守

禮儀。爾嘗誥誠大妹三妹。忍耐順受。

吾於諸女妝奩甚薄。然使女果貧困。吾亦必周濟而覆育之。目下陳家微窘。袁家羅家並不憂貧。爾諄諄諸妹。以能耐勞忍氣爲要。吾服官多年。亦常在耐勞忍氣四字上做工夫也。

鮑春霆正月初六日涇縣一戰後。各處未再開仗。春霆營士氣復旺。米糧亦足。應可再振。僞忠王復派賊數萬。續渡江北。非希庵與江味根等來。恐難得手。

余牙疼大愈。日內將至金陵。一晤沅叔。此信送澄叔一閱。不另致。同治二年正月廿四日。

諭紀澤（修石橋）

字諭紀澤。二月二十一日。在運漕行次。接爾正月二十二日。二月初三日兩稟。並澄叔兩信。具悉家中五宅平安。大姑母及季叔葬事。此時均當完畢。

爾在團山嘴橋上跌而不傷。極幸極幸。聞爾母與澄叔之意。欲修石橋。爾寫稟來。由營付歸可也。禮云。一「道而不徑。舟而不遊。」古之言孝者專。以保身爲重。鄉間路窄橋孤。嗣後吾家子姪。凡遇過橋。無論騎馬。均須下而步行。吾本意欲爾來營見面。因遠道風波之險。不復望爾前來。且待九月霜降水落。風濤性定。再行寄諭定奪。目下爾在家飽看羣書。兼持門戶。處亂世而得寬閒之歲月。千難萬難。爾切莫錯過此等好光陰也。

余以十六日自金陵開船而上。沿途閱看金柱關。東西梁山。裕溪口。運漕。無爲州等處。軍心均屬穩固。布置亦尙妥當。惟兵力處處單薄。不知足以禦賊否。

余再至青陽一行。月杪即可還省。南岸近亦吃緊。廣匪南股竄撲徽州。古賴等股。竄擾青陽。其志皆在直犯江西。以營一飽。殊爲可慮。

澄叔不願受沉之貽封。余當寄信至京。停止此舉。以成澄志。爾讀書有恆。余歡慰之至。第所閱日博。亦須劄記一二條。以自考證。脚步近稍穩重否。常常留心。此囑。（同治二年二月廿四日）

諭紀澤（學文須手鈔熟讀）

字諭紀澤。接爾二月十三日稟。並聞人賦一首。具悉家中各宅平安。

爾於小學訓詁。頗識古人源流。而文章又窺漢魏六朝之門徑。欣慰無已。余嘗怪國朝大儒。如戴東原錢辛楣段懋堂王懷祖諸老。其小學訓詁。實能超越近古。直逼漢唐。而文章不能追尋古人深處。達於本而闕於末。知其一而昧其二。頗覺不解。私竊有志。欲以戴錢段王之訓詁。發爲班張左郭之文章。久事戎行。斯願莫遂。若爾曾能成我未竟之志。則至樂莫大乎是。即日當批改付歸。爾既得此津筏。以後更當專心壹志。以精確之訓詁。作古茂之文章。由班張左郭上而揚馬而莊騷。而六經。靡不息息相通。下而潘陸而任沈。而江鮑徐庾。則詞愈雜。氣愈薄。而訓詁之道衰矣。至韓昌黎出。乃由班張揚馬而上躋六經。其訓詁亦甚精當。爾試觀南海神廟碑。送鄭尙書序諸篇。則知韓文實與漢賦相近。又觀祭張晉文平淮西碑諸篇。則知韓文實與詩經相近。近世學韓文。皆不知其與揚馬班張一鼻孔出氣。爾須要參透此中消息。

爾閱看書籍頗多。然成誦者太少。亦是一短。嗣後宜將文選最愜意者熟讀。以能背誦爲斷。如兩都賦西征賦蕪城賦。及九辯解嘲之類。皆宜熟讀。選後之文。如與楊遵彥書袁江南賦。亦宜熟讀。又經世之文。如馬貴與文獻通考序二十四首。天文如丹元子之步天歌。地理如顧祖禹之州域形勢敘。以上所選文七篇三種。爾與紀鵬兒皆當手鈔熟讀。互相背誦。將來父子相見。余亦課爾等背誦也。

爾擬以四月來營。余亦甚望爾來。教爾以文。惟長江風波。頗不放心。又恐往返途中。拋荒學業。爾稟請爾母及澄叔酌示。如四月起程。則只帶袁壻及與金二甥同來。如八九月起程。則奉母及弟妹妻女合家同來。到皖住幾月。孰歸孰留。再行商酌。目下皖北賊犯湖北。皖南賊犯江西。今年上半年不安靜。下半年或當稍勝。爾若四月來謁。舟中宜十分穩慎。如八月來。則余派大船至湘潭迎接可也。（同治二年三月初四日）

諭紀澤（告軍情）

字諭紀澤。頃接爾稟及澄叔信。知余二月初四在蕪湖下所發二信。同日到家。季叔與伯姑母葬事。皆已辦妥。爾自樅山歸來。俗務應稍減少。

此間近日軍事最急者。惟石澗埠毛竹九劉南雲營盤被圍。自初三至初十。晝夜環攻。水洩不通。次則黃文金大股由建德竄犯景德鎮。余本檄鮑軍救援景德鎮。因石澗埠危急。又令鮑救援北岸。沅叔亦撥七營救援石澗埠。只要守住十日。南路援兵皆到。必可解圍。又有捻匪由湖北下竄安慶。必須安排守城事宜。各路交警。應接不暇。幸身體平安。尙可支持。

聞人賦圍批發還。爾能抗心希古。大慰余懷。紀鴻好學否。爾說話走路。比往年較遲重否。

付去高麗參一斤。備家中不時之需。又付銀十兩。爾託樅山爲我買好茶葉若干斤。去年寄來之茶。不甚好也。此信送與澄叔一看。不另寄。奏章諭旨一本。查收。（同治二年三月十四日）

諭紀鴻（須得老成者同伴赴考）

字諭紀鴻。接爾稟件。知家中五宅平安。子姪讀書有恆。爲慰。

爾問今年應否往應科考。爾旣作秀才。凡歲考科考。均應前往入場。此朝廷之功令。士子之職業也。惟爾年紀太輕。余不放心。若鄧師能晉省送考。則爾凡事有所稟承。甚好甚好。若鄧師不赴省。則爾或與易芝先生同往。或隨舉山鏡和子祥諸先生同伴。總須得一老成者。照應一切。乃爲穩妥。

爾近日常作試帖詩否。場中細檢一番。無錯平仄。無錯抬頭也。

此次未寫信與澄叔。爾爲稟告。（同治二年五月十八日）

致十叔（盡力軍事）

丹閣十叔大人閣下。前奉賜函。敬審福履康愉。閩潭多祗。至爲慶慰。此間軍事。自去秋以至今春。危險萬狀。四月以後。棗和二浦。次第克復。奪回九嶽州要隘。江北肅清。大局極有轉機。不料苗逆復叛。占踞數城。一波未平。一波

復起。而各軍疾疫大作。死亡相屬。幾與去秋相等。餉項奇絀。醫藥無資。茫茫天意。不知何日果遂厭亂也。姪身體尚適。牙齒脫落一個。餘亦動搖不固。此外視職眠食。未改五十以前舊態。自以菲材。久竊高位。兢兢慄慄。惟是不貪安適。不圖豐豫。以是報聖主之厚恩。卽以是稍惜祖宗之餘澤。

上年恭遇兩次覃恩。已將本身應得封典。馳封伯祖父重五公暨中和公。伯祖母彭太夫人暨蕭太夫人。茲將誥軸。專盛四送回。卽求告知任尊叔。及芝圃榮發厚一厚四諸弟。敬謹收藏。焚黃告墓之日。子姪悉與於祭。茲各寄二十金。少助祭席之資。又參枝對聯書帖微物。略將鄙忱。伏乞哂存。

左君辦硝之事。因採辦諸人。在各縣挖牆拆屋。紛紛釀成控案。東征局司道。乃詳請概歸官辦。不特不能添新委員。卽前此給札者。亦須一律撤回。是以未能照辦。但諸人借奏本錢。分途探買。因此半途而廢。不免吃虧。姪已函告東局主事者。酌量調劑。不令虧本矣。(同治二年七月十二日)

諭紀鴻(嫁女不應戀母家)

字諭紀鴻。接爾澄叔七月十八日信。並爾寄澤兒一函。知爾奉母於八月十九日起程來皖。並三女與羅婿一同前來。

現在金陵未復。皖省南北兩岸。羣盜如毛。爾母及四女等姑嫂來此。並非久住之局。大女理應在袁家侍姑盡孝。本不應同來安慶。因榆生在此。故我未嘗寫信阻大女之行。若三女與羅婿。則尤應在家事姑事母。尤可不必同來。余每見嫁女貪戀母家富貴。而忘其翁姑者。其後必無好處。余家諸女。嘗教之孝順翁姑。敬事丈夫。慎無重母家而輕夫家。效燒俗小家之陋習也。

三女夫婦若尙在縣城省城一帶。儘可令之仍回羅家。奉母奉姑。不必來皖。若業已開行。勢難中途折回。則可同來安慶一次。小住一月二月。余再派人送歸。其陳婿與二女。計必在長沙相見。不可帶之同來。俟此間軍務大順。余寄信去接可也。(同治二年八月初四日)

諭紀澤（路上不可驚動官長）

字諭紀澤兒。爾於十九日自家起行。想九月初可自長沙。挂帆東行矣。船上有大帥字旗。余未在船。不可誤挂。經過府縣各城。可避者。略爲避開。不可驚動官長。煩人應酬也。

余日內平安。沉叔及紀鴻等在金陵亦平安。（同治二年八月十二日）

寄紀瑞姪（勿忘先世之勤儉）

字寄紀瑞姪左右。前接吾姪來信。字跡端秀。知近日大有長進。紀鴻奉母來此。詢及一切。知姪身體業已長成。孝友謹慎。至以爲慰。

吾家累世以來。孝弟勤儉。輔臣公以上。吾不及見。竟希公星岡公皆未明即起。竟日無片刻暇逸。竟希公少時。在陳氏宗祠讀書。正月上學。輔臣公給錢一百。爲零用之需。五月歸時。僅用去二文。尙餘九十八文。還其父。其儉如此。星岡公嘗孫入翰林之後。猶親自種菜收糞。吾父竹亭公之勤儉。則爾等所及見也。今家中境地。雖漸寬裕。姪與諸昆弟切不可忘卻先世之艱難。有福不可享盡。有勢不可使盡。

勤字工夫。第一貴早起。第二貴有恒。儉字工夫。第一莫華麗衣服。第二莫多用僕婢雇工。凡將相無種。聖賢豪傑亦無種。只要人肯立志。都可做得到的。姪等處最順之境。當最富之年。明年又從最賢之師。但須立定志向。何事不可成。何人不可作。願吾姪早勉之也。

廩生尙算正途功名。可以考御史。待姪十八九歲。卽與紀澤同進京應考。然姪此際專心讀書。宜以入股試帖爲要。不可專恃廩生爲基。總以鄉試會試能列榜前。益爲門戶之光。紀官聞甚聰慧。姪亦以立志二字。兄弟互相勸勉。則日進無疆矣。（同治二年十二月十四日）

諭紀澤（一切以勤謙二字爲主）

字諭紀澤兒。余於廿五日巳刻。抵金陵陸營。文案各船。亦於廿六日申刻趕到。

沅叔濕毒未愈。而精神甚好。

僞忠王曾親訊一次。擬即在此殺之。由安慶咨行各處之請。在皖時未辦咨札稿。茲寄去一稿。若已先發。諒與此稿不符。亦無礙也。刻摺稿。寄家可一二十分。或百分亦可。沅叔要二百分。宜先儘沅叔處。此外各處不宜多散。此次令王洪陞坐輪船於廿七日回皖。以後送包封者。仍坐舢舨歸去。包封每日止送一次。不可再多。

爾一切以勤謙二字爲主。至囑。頃見安慶付來之咨行稿甚妥。此間稿不用矣。（同治三年六月二十二日）

諭紀澤（述僞忠王已就擒）

字諭紀澤兒。日內北風甚勁。未接包封及爾稟。余亦未發信也。

僞忠王自寫親供。多至五萬餘字。兩日內看該會親供。如校對房本謄書。殊費目力。頃始具奏。洪李二酋處治正法。李酋已於初六正法。供詞亦咨送軍機處矣。

沅叔已於十一二等日。演戲請客。余亦於十五前後起程回皖。日內因天熱事多。尙未將江西一案出奏。計非五日。不能核定此稿。老年畏熱。亦畏案牘之繁難。

余將來到金陵。即在英王府寓居。頃已派人修理矣。（同治三年七月初七日）

諭紀鴻（已將洪秀全等正法）

字諭紀鴻兒。自爾西行後。南風甚多。此五日內。卻是東北風。不知爾已至岳州否。

余以廿五日至金陵。沅叔病已痊愈。廿八日戮洪秀全之尸。初六日將僞忠王正法。初八日接富將軍咨。余蒙恩封侯。沅叔封伯。余所發之摺。批示尙未接到。不知同事諸公。得何懋賞。然得五等賞甚少。余借人之力。以竊上賞。寸心不安之至。

爾在外以謙謹二字爲主。世家子弟門第鼎盛。萬目所屬。臨行時。教以三戒之首末二條。及力去「傲惰」一弊。嘗已牢記之矣。場前不可與州縣來往。不可送條子。進身之始。務知自重。酷暑尤須保養身體。（同治三年七月

初九日)

諭紀澤(試查封建考)

字諭紀澤兒。廿三日之摺。批旨尙未到皖。頗不可解。豈已遞至官相處耶。

各處來信。皆言須用賀表。余亦不可不辦一分。爾請程伯敷爲我撰一表。爲沅叔撰一表。伯敷前後所作謝摺甚多。此次擬另送潤筆費三十金。蓋亦僅見之笑事也。

得五等之封者。似無多人。余借人之力而竊上賞。寸心深抱不安。從前三藩之役。封爵之人較多。求闕齋西間。有皇朝文獻通考一部。爾試查封建考中。三藩之役。共封幾人。平準部封幾人。平回部封幾人。開單寄來。僞幼王有逃至廣德之說。不知確否。(同治三年七月初九日)

諭紀澤(蒙恩封侯)

字諭紀澤兒。今早接奉廿九日諭旨。余蒙恩封一等侯。太子太保。雙眼花翎。沅叔蒙恩封一等伯。太子少保。雙眼花翎。李少典封子爵。蕭季泗男爵。其餘黃馬褂九人。世職十人。雙眼花翎四人。恩旨本日包封鈔回。茲先將初七之摺寄回發刻。李秀成供。明日付回也。(同治三年七月初十日)

諭紀澤(老人畏亢旱酷熱)

字諭紀澤兒。初十一二等日。獻酒三日。沅叔料理周到。精力沛然。余則深以爲苦。亢旱酷熱。老人所畏。應治之事。多擱廢者。江西周石一案。奏稿久未核辦。尤以爲疚。

自六月廿三日起。凡人證皆由余發給盤川。以示體卹。爾託子密告知兩司可也。

鄂刻地圖。爾可卽送一分與莫偲老。輪船行江說。三日內准付回。另紙繕寫。黏貼大圖空處。

萬鏡軒忠鶴舉。及泰州揚州各官。日內均來此一見。李少荃亦擬來一晤。聞余將以七月回皖。遂不來矣。(同治三年七月十三日)

諭紀澤（在船清理攔積之事）

字諭紀澤兒。二日未接爾稟。蓋北風阻滯之故。此間十七日。大風大雨。肅然便有秋氣。富將軍今日來拜。豈談一切。余擬明日登舟。乘坐民船。不求其快。舟中須作周石獄辜一摺。非三四日不能了。沅叔處無一人獨坐之位。無一刻清淨之時。故未辦也。其他積攔之事。皆須在船。一爲清理。到皖當在月杪矣。此囑。
（同治三年七月十八日）

諭紀澤（述免造報銷）

字諭紀澤兒。余於十九日。回拜富將軍。即起程回皖。約百七十里。乃至棉花隄。今日未刻發報後長行。順風行七十里泊宿。距采石不過十餘里。

接奉諭旨。諸路將帥督撫。均免造冊。造報銷。真中與之特恩也。

頃又接爾十八日稟。鈔錄封爵單一冊。我朝酬庸之典。以此次最隆。愧悚戰兢。何以報稱。爾曹當勉之矣。（同治三年七月二十日）

諭紀鴻（以謙敬二字爲主）

字諭紀鴻。自爾還湘啓行後。久未接爾來稟。殊不放心。今年天氣奇熱。爾在途次平安否。

余在金陵與沅叔相聚二十五日。二十日登舟還皖。體中尙適。余與沅叔蒙恩晉封侯伯。門戶太盛。深爲祇懼。爾在省以謙敬二字爲主。事事請問意見。芝生兩姻叔。斷不可送條子。致騰物議。十六日出關。十七八拜客。十九日即可回家。九月初在家聽榜信後。再起程來署可也。

擇交是第一要事。須擇志趣遠大者。此囑。（同治三年七月廿四日）

諭紀澤紀鴻（以勤儉二字自惕）

字諭紀澤紀鴻兩兒。余於初四日。自邵伯開行後。初八日至清江浦。聞捻匪張任牛三股。並至蒙亳一帶。英方伯

雒河集營被圍。易開俊在蒙城亦兩被賊圍。糧路難通。余商昌岐帶水師。自洪澤湖至臨淮。而自留此。待羅劉旱隊至。乃赴徐州。

爾等奉母在寓。總以勤儉二字自惕。而接物出以謙慎。凡世家有不勤不儉者。驗之於內眷而畢露。余在家深以婦女之奢逸爲慮。爾二人立志。撐持門戶。亦宜自端內教始也。余身尙安。癖略甚耳。(同治四年閏五月初九日)

諭紀澤(夜飯不用葷菜)

字諭紀澤兒。接爾兩次安稟。具悉一切。爾母病已全愈。羅外孫亦好。甚慰。

余到清江已十一日。因劉松山未到。皖南各軍鬧餉。故爾遲遲未發。雒河蒙城等處。日內亦無警信。羅茂堂等。今日開行。由陸路赴臨淮。余俟劉松山到後。擬於廿一日由水路赴臨淮。身體平安。惟慮念湘勇鬧餉。有弗戢自焚之懼。竟日憂灼。蔣之純一軍。在湖北業已叛變。恐各處相煽。即湘鄉亦難安居。想所以有懲之之法。尙無善策。楊見山之五十金。已函復小岑。在於伊卿處致送。邵世兄及各處月送之款。已有一札。由伊卿長送矣。惟王叔向接季送。偶未入單。劉伯山書局撤後。再代謀一安硯之所。該局何時可撤。尙無聞也。寓中絕不酬應。計每月用錢若干。兒婦諸女。果每日紡績有常課否。下次稟復。

吾近夜飯不用葷菜。以肉湯炖蔬菜一二種。令極爛如醬。味美無比。必可以資培養。(菜不必貴。適口則足。養人)試炖爾母食之。(星岡公好於日入時。手摘鮮蔬。以供夜餐。吾當時侍食。實覺津津有味。今則加以肉湯。而味尙不逮於昔時。)後輩則夜飯不葷。專食蔬而不用肉湯。亦養生之宜。崇儉之道也。顏黃門(推之)顏氏家訓。作於亂離之世。張文端英聰訓齋語。作於承平之世。所以教家者極精。爾兄弟各覓一冊。常常閱習。則日進矣。(同治四年閏五月十九日)

諭紀澤紀鴻(領略古人文字意趣)

字諭紀澤紀鴻兩兒。余於廿五六日渡洪澤湖面。二百四十里。廿七日入淮。廿八日在五河停泊一日。等候旱隊。

廿九日抵臨淮。聞劉省三於廿四日抵徐州。廿八日由徐州赴援雒河。英西林於廿六日攻克高鑑集。雒河之軍心益固。大約圍可解矣。羅張朱等明日可以到此。劉松山初五六可到。余小住半月。當仍赴徐州也。毛寄雲年伯至清江。急欲與余一晤。余因太遠。止其在臨淮。

爾篤信太短。近日所看之書。及領略古人文字意趣。所可自據其見。隨時質正。前所示有氣則有勢。有識則有度。有情則有韻。有趣則有味。古人絕好文字。大約於此四者之中。必有一長。爾所閱古文何篇。於何者爲近。可放論而詳問焉。鴻兒亦宜常常具稟。自述近日工夫。此示。（同治四年六月初一日）

諭紀澤紀鴻（告水災）

字諭紀澤紀鴻兩兒。今日接小岑信。知邵世兄一病不起。實深傷悼。位西立身行己。讀書作文。俱無差謬。不知何以家運衰替若此。豈天意真不可測耶。

爾母之病。總帶溫補之劑。當無他虞。羅氏外孫。及朱金權。已痊愈否。

此間水大異常。各營皆已移渡南岸。惟余所居淮北兩營。係羅茂堂所帶。二日內尙可不移。再長水八寸則危矣。陰雲鬱熱。雨勢殊未已也。

邵世兄處。應送奠金五十金。可由家中先爲代出。有便差來營。卽付去。陸中軍所帶百人。可令每半月派一兵來此。不必定候家鄉長夫送信。余託陳小清買龍井來。爾可先交銀十六兩。亦候下次兵來時付去。

邵宅每月二十金。爾告伊卿照常致送否。須補一公牘否。爾每旬至李宮保處一談否。幕中諸友。凌曉風。相見契慳否。氣勢。識度。情韻。趣味四者。偶思邵子四象之說。可以分配。茲錄於別紙。爾試究之。（同治四年六月十九日）

諭紀澤（陳刻廿四史頗可愛）

字諭紀澤兒。廿四日接奉寄諭。知阮叔已簡授山西巡撫。諭旨咨少泉宮保處。爾可借閱。阮叔之病。不知此時全愈否。余須寄信囑其北上。陛見之便。且至徐州。兄弟相會。

陳刻廿四史。頗爲可愛。不知其錯字多否。幾何原本。可先刷一百部。會恆德無事。亦可來營。余又有取閱之書。可令滕中軍派兵送來。錄如別紙。(同治四年六月二十五日)

諭紀澤紀鴻(作文氣勢須與揣摩並重)

字諭紀澤紀鴻兩兒。紀澤於陶詩之識度。不能領會。試取飲酒二十首。擬古九首。歸田園居五首。詠貧士七首等篇。反覆讀之。若能窺其胸襟之廣大。寄託之遙深。則知此公於聖賢豪傑。皆已升堂入室。爾能尋其用意深處。下次試解說一二首寄來。

又問有一專長。是否須兼三者。乃爲合作。此則斷斷不能。韓無陰柔之美。歐無陽剛之美。况於他人而能兼之。凡言兼衆長者。皆其一無所長者也。

鴻兒言此表範圍曲成。橫豎相合。足見善於領會。至於純熟文字。極力揣摩。固屬切實工夫。然少年文字。總貴氣象崢嶸。東坡所謂蓬蓬勃勃。如釜上氣。古文如賈誼治安策。賈山至言。太史公報任安書。韓退之原道。柳子厚封建論。蘇東坡上神宗書。時文如黃陶庵。呂晚村。袁簡齋。曹寅谷。墨卷如墨選觀止。鄉墨精銳中所選兩排三疊之文。皆有最盛之氣勢。爾當兼在氣上用功。無徒在揣摩上用功。大約偶句多。單句少。段落多。分段少。莫拘場屋之格式。或三五百字。長或八九百字。千餘字皆無不可。雖係四書題。或用後世之史事。或論目下之時務。亦無不可。總須將氣勢展得開。筆仗使得強。乃不至於束縛拘滯。愈緊愈呆。嗣後爾每月作五課揣摩之文。作一課氣勢之文。講揣摩者。送師閱改。講氣勢者。寄余閱改。四象表中。惟氣勢之屬太陽者。最難能而可貴。古來文人。雖偏於彼三者。而無不在氣勢上痛下工夫。兩兒均宜勉之。(同治四年七月初三日)

諭紀澤(服炒米醫脾虧勉閱書有恆)

字諭紀澤兒。福秀之病。全在脾虧。今聞曉岑先生峻補脾胃。似亦不甚相宜。凡五臟極虧者。皆不受峻補也。爾少時亦極脾虧。後用老米炒黃。熬成極驢之稀飯。服之半年。乃有轉機。爾母當尙能記憶。金陵可覓得老米否。試焉

禮秀一服此方。

開生到已數日。元徵信接到。茲有覆信。並邵二世兄信。爾爾後。封口交去。渠需銀兩。爾陸續支付可也。義山集。似會批過。但所批無多。奈於道光廿二、三、四、五、六等年。用胭脂圈批。惟余有丁刻史記六套。（在家否。）王刻韓文。（在爾處。）程刻韓詩（最精本。）小本杜詩。唐刻古文辭類纂。（溫叔帶回。霞仙借去。）震川集。（在季帥處。）山谷集。（在黃恕皆家。）首尾完畢。餘皆有始無終。故深以無恆爲憾。近年在軍中閱書。稍覺有恆。然已晚矣。故望爾等於少壯時。即從有恆二字。痛下工夫。然須有情韻趣味。養得生機盎然。乃可歷久不衰。若拘苦疲困。則不能真有恆也。（同治四年七月十三日）

諭紀澤紀鴻（女兒姻事成禮地點）

字諭紀澤紀鴻兩兒。郭宅姻事。吾意決不肯由輪船海道行走。嘉禮儘可安和。中度。何必冒大洋風濤之險。至禮成。或在廣東。或在湘陰。須先將我家或全眷回湘。或澤兒夫婦送妹回湘。吾家主意定後。而後婚期之或遲或早。可定。而後成禮之或鄉或粵亦可定。吾既決計不回江督之任。而全眷獨戀於金陵。不免武仲據防之嫌。是爾母及全眷。早遲總宜回湘。全眷皆須還鄉。四女何必先行。吾意九月間。爾兄弟送家屬悉歸湘。經過省城時。如吉期在半月之內。或爾母親至湘陰一送亦可。如吉期尙遙。則紀澤夫婦。帶四妹在長沙小住。屆期再行送至湘陰成婚。至成禮之地。余意總欲在湘陰爲正辦。雲仙姻丈去歲嫁女。既可在湘陰。由意誠主持。則今年娶婦。亦可在湘陰。由意誠主持。金陵至湘陰近三千里。粵東至湘陰。近二千里。女家送三千。婿家迎三千。而成禮於累世桑梓之地。豈不盡善盡美。爾以此意詳覆雲仙姻丈一函。令崔成貴等由海道回粵。余亦以此意詳致一函。亦排單寄去。卽以此信爲定。喜期定用十二月初二日。全眷十月上旬。自金陵啓行。斷不致誤。如雲仙姻丈。不願在湘陰舉行。仍執送粵之說。則我家全眷暫回湘鄉。明年再商吉期可也。

鴻兒之文。氣勢頗旺。下次再行詳示。爾母須用茯苓。候至京之便購買。余以廿四自臨淮起行。十日無雨。明日可

到徐州矣。途次平安。勿念。(同治四年八月二十九日)

諭紀澤(給位西先生作墓銘)

字諭紀澤兒。邵世兄開來節略等件。收到。位西先生遺文。亦閱過。本月當作墓銘。出月親爲書寫。仍付金陵交張氏兄弟鈎刻。大約刊刻攝印。須三箇月工夫。年底乃可蕝事。爾告邵子晉。急急返杭料理葬事。以速爲妙。此若不宜埋藏土中。將來或藏之邵氏家廟。或嵌之邵家屋壁。或一二年後。於墓之址。文餘另穿一小穴。補行埋之。亦無不可。此次不可待碑成。再定葬期也。(同治四年八月十三日)

諭紀澤(取書物)

字諭紀澤兒。王船山先生書經稗疏三本。春秋家說序一薄本。係託劉韞齋先生在京城文淵閣鈔出者。爾可速寄歐陽曉岑丈處。以便續行刊刻。劉松山前借去鄂刻地圖七本。茲可取回。尙有二十六本在金陵。可寄至大營。配成全部。全唐文太繁。而郭墓徐處。有專集十餘種。其中有韓昌黎集。吾欲寄來一閱。取其無注。便於溫誦也。又文獻通考(吾曾點過田賦。錢幣。戶口。識役。征權。市糴。土貢。國用。刑制。輿地等門者。)晉書。新唐書(要殿本。晉書兼取李芋仙送毛刻本。)均取來。以便繕閱。後漢書亦可帶來。(殿本)冬春皮衣。均於此次舢板帶來。此囑。(同治四年八月十九日)

諭紀澤紀鴻(家眷回湘事)

字諭紀澤紀鴻兩兒。家眷旋湘。應俟接筠仙姻丈覆信。乃可定局。余意婚期果是十二月初二。則澤兒夫婦送妹先行。至湘陰辦喜事畢。即回湘鄉。另覓房屋。覓妥後。寫信至金紀鴻兒奉。母並全眷回籍。若婚期改至明年。則澤兒一人回湘覓屋。家婦及四女皆隨母明年起程。黃金堂之房。爾母素不以爲安。又有塘中溺人之事。自以另擇一處爲妥。余意不願在長沙住。以風俗華靡。一家不能獨儉。若另求僻靜處所。亦殊難得。不如即在金陵。多住一年半載。亦無不可。

澤兒回湘與兩叔父商。在附近二三十里。覓一合式之屋。或尙可得。星岡公昔年思在牛欄大址起屋。即鱖魚壩蕭祠間壁也。不知果可造屋。以終先志否。又油舖里係元吉公屋。犁頭嘴係輔臣公屋。不知可買莊兌換。或借住一二年否。富託可移兌否。爾稟商兩叔。必可設法辦成。

爾母既定於明年起程。則松生夫婦及邵小姐之位置。新年再議可也。近奉諭旨。飭余晉駐徐州。不去則屢違詔旨。又失民望。遽往則局勢不順。必無成功。焦灼之至。餘不多及。（同治四年八月廿一日）

諭紀澤（知節齋戒惱怒）

字諭紀澤。爾十一日患病。十六日尙神倦頭眩。不知近已全愈否。吾於凡事皆守「盡其在我。聽其在天」二語。即養生之道亦然。體強者如富人。因戒奢而益富。體弱者如貧人。因節齋而自全。節齋非獨食色之性也。即讀書用心。亦宜儉約。不使太過。

余入本篇中。言養生以少惱怒爲本。又嘗教爾胸中不宜太苦。須活潑潑地。養得一段生機。亦去惱怒之道也。既戒惱怒。又知節齋。養生之道。已盡其在我者矣。

此外壽之長短。病之有無。一概聽其在天。不必多生妄想。去計較他。凡多服藥餌。求禱神祇。皆妄想也。吾於醫藥禱祝等事。皆記星岡公之遺訓。而稍加推闡。教爾後輩。爾可常常與家中內外言之。

爾今冬若回湘。不必來徐省問。徐去金陵太遠也。近日賊犯山東。余之調度。概咨少荃官保處。澄叔沅叔信附去查閱。不須寄來矣。此囑。（同治四年九月初一日）

諭紀澤（告徐州賊勢）

字諭紀澤兒。十七日接爾初十日稟。知爾病三次翻覆。近已全愈否。

舢板尙未到徐。而此間羣賊。萃於銅沛二縣。攻破民圩頗多。與微山湖相近。湖中水淺。近郡處又窄。舢板或畏賊。不欲進耶。馬步賊約六七萬。火器雖少。而剽悍異常。看來凶餒尙將日長。吾已定與賊相終始。故亦安之若素。

文輔卿自京來此。言近事頗詳。九叔浮言漸息。靈仙雖降調。而物望尙好。雲仙衆望較減。天眷亦甚平平。頃接雲信。婚期已改明年。然則爾今冬亦不可回湘矣。原信鈔去一閱。爾母健飯。大慰。大慰。（同治四年九月二十五日）

諭紀澤（鈎亥墓銘）

字諭紀澤兒。茲將邵位西墓銘付回。其兄之各空二字。爾可填寫。交匠人鈎摹刊刻。季公墓銘。匠人刻出太俗。無深厚之意。余字尙不如是。爾日教張氏二匠。用刀須略明行氣之法。刀下無氣。則順修逆描。全失勁健之氣矣。幾何原本序。付去照收。余十九日覆奏李公入洛。李丁送靈一疏。爾可至李宮保署查閱此處。（同治四年九月二十五日）

諭紀澤紀鴻（蒔花竹玩山水）

字諭紀澤紀鴻兩兒。二十六日。接紀澤排遞之稟。紀鴻舢板帶來稟件衣書。今日派夫往接矣。

澤兒肝氣痛病。亦全好否。爾不應有肝鬱之症。或由元氣不足。諸病易生。身體本弱。用心太過。上次函示以節蓄之道。用心宜約。爾曾體驗否。張文端公（英）所著聰訓齋語。皆教子之言。其中言養身擇友。觀玩山水花竹。純是一片太和生機。爾宜常常省覽。鴻兒身體亦單弱。亦宜常常看此書。

吾教爾兄弟不在多書。但以聖祖之庭訓格言。張公之聰訓齋語二種爲教。句句皆吾肺腑所欲言。以後在家則蒔養花竹。出門則飽看山水。靈金陵百里內外。可以徧遊也。算學書切不可再看。讀他書亦以半日爲率。未刻以後。即宜歇息游觀。古人以懲忿窒慾爲養生要訣。懲忿。即吾前信所謂少惱怒也。窒慾。即吾前信所謂知節蓄也。因好名好勝。而用心太過。亦慾之類也。藥雖有利。害亦隨之。不可輕服。切囑。（同治四年九月卅日）

諭紀澤（閱聰訓齋語於養身有益）

字諭紀澤兒。爾病已好。甚慰。賊於廿九日。稍與馬隊接仗。其夜即竄蕭縣。初二日。竄又漸遠。現尙不知果竄何

處各兵既力求寬限。以後卽限九日。以八百里之程。每日僅走九十里。想非強人所難。張文端公聰訓齋語茲付去二本。爾兄弟細心省覽。不特於德業有益。實於養身有益。余身體平安。惟精神日損。老景遂增。而責任甚重。殊爲悚懼。(同治四年十月初四日)

諭紀澤紀鴻(將去巡閱地勢)

字諭紀澤紀鴻兩兒。賊自初三四兩日。在豐縣爲潘軍所敗。倉皇西竄。行至寧陵。又爲歸德周盛波一軍所敗。據擒賊供稱。將竄湖北。不知確否。此間俟幼泉游擊之師辦成。除四鎮大兵外。尙有兩枝大游兵。儘數剿辦。但求朱唐金軍遣撤。不生事變。則諸務漸有歸宿矣。

澤兒身體復元。思來徐州省覲。余擬於今冬至曹濟歸陳四府巡閱地勢。現尙未定。爾暫不必來。如余不赴齊豫。爾至十二月十五以後。前來徐州。侍余度歲可也。

彭笛仙在糧臺。爾常相見否。有學問長處。究竟何如。聰訓齋語。余以爲可卻病延年。爾兄弟與松生慕徐。常常體驗否。可一稟及此。囑。(同治四年十月十七日)

諭紀澤(請吳元甲作教師)

字諭紀澤兒。余近日身體平安。擒匪自竄河南後。久無消息。十九日之摺。頃接寄諭。業經照准。

明年寓中請師。頃桐城吳汝綸肇甫來此。渠以本年連捷。得內閣中書。告假出京。余勸令不必遽爾進京。當明年可至余幕中。專心讀書。多作古文。因擬請其父吳元甲。號育泉者。至金陵教書。爲紀鴻及陳壻之師。育泉以廩生舉孝廉方正。其子汝綸。係一手所教成者也。肇甫聞此言。欣然樂從。歸告其父。想必允許。惟澄沅叔已答應將膏托讓與我家居住。明歲將送全眷回湘。吳來金陵。恐非長久之局。肇甫由徐赴金陵。余擬派差官送之。爾可與之面商一切。鴻兒每月十日宜寫一稟。字宜略大。墨宜濃厚。(同治四年十月二十四日)

諭紀澤(囑臘月來徐省覲)

字諭紀澤兒。彭宮保尙在安慶。松生陪王益梧去。恐無所遇。抑別有他營耶。河南吳中丞疏稱「豫省情形萬難。供職無狀。請另簡賢能。」諭旨又催發營。現因湖團一案。關係極大。必須至徐料理。新年即將發駐河南之周家口。爾可於臘月來徐省覲。隨同度歲。由金陵坐船至清江。在清江雇王家營轎車至徐。余派弁至清江迎接。大約水陸不過十二三日程耳。季泉無病。何必託詞不來。

聽訓齋語。俟覓得再寄。余前信欲乞慕徐齋頭全唐文殘本中韓文一種。爾曾與慕徐說及否。明史亦未帶來。臘月來營。可將此二書帶來。明史即將陳刻本帶來亦可。王氏廣雅疏證。可附帶也。（同治四年十一月初六日）

諭紀澤紀鴻（囑翻查會典）

字諭紀澤紀鴻兩兒。余明年正月。卽移駐周家口。該處距漢口。八百四十里。距長沙一千六百餘里。距金陵亦一千三百餘里。兩邊皆係陸路。通信於金陵。與通信於長沙其難一也。澤兒來此省覲。送余移營起程後。卽回金陵。全眷仍以三月回湘爲妥。吳育泉正月上學。教滿兩月。如果師弟相得。或請之赴湖南。或令紀鴻陳壻。隨吳師來。余營讀書。亦無不可。家中人少。不宜分作兩處住也。余日來核改水師章程。將次完竣。惟提鎮以下至千把。每年各領養廉若干。此間無書可查。澤兒可辭會典。查出寄來。凡經制之現行者。查典。凡因革之自由者。查事例。武職養廉記。始於乾隆四十七年補足各糧案內。文職養廉記。始於雍正五年耗羨歸公案內。爾細查武養數目。卽日先寄。又提督之官。見明史職官志。都察院條內。本與總督巡撫等官。皆係文職而帶兵者。不知何時改爲武職。廉試翻尋會典。或詢之凌曉嵐張嘯山等。速行稟覆。（同治四年十一月十八日）

諭紀澤（查問關於提督文武兼用歷史）

字諭紀澤兒。蔣大春寶到會典五冊。明史一冊。國初提督尙文武兼用。厥後專用武職。不知始於何時。前明有掛印總兵。以總兵而掛平西將軍征南將軍等印。國朝總兵。亦間存掛印之名。而實無真印。不知何年。并掛印之名而去之。爾試問劉伯山能記之否。水師章程。定於十二日出奏。如其查不出。亦不要緊。凡辦事。不必定講考據也。

(同治四年十一月二十九日)

諭紀鴻(學字須用困知勉行工夫)

字諭紀鴻。爾學柳帖琅琊碑。效其骨力。則失其結構。有其開張。則無其掙搏。古帖本不易學。然爾學之尙不過旬日。焉能蒙笑畢備。收效如此神速。余昔學顏柳帖。臨摹動輒數百紙。猶且一無所似。余四十以前。在京所作之字。骨力間架。皆無可觀。余自媿而自惡之。四十八歲以後。習李北海嶽麓等碑。略有進境。然業歷八年之久。臨摹已過千紙。今爾用功未滿一月。遂欲遠躋神妙耶。

余於凡事皆用困知勉行工夫。爾不可求名太驟。求效太捷也。以後每日習柳字百個。單日以生紙臨之。雙日以油紙摹之。臨帖宜徐。摹帖宜疾。專學其開張處。數月之後。手愈拙。字愈醜。意與愈低。所謂困也。困時切莫間斷。熬過此門。便可少進。再進再困。再熬再奮。自有亨通精進之日。不特習字。凡事皆有極困極難之事。打得通的。便是好漢。

余所責爾之功課。並無多事。每日習字一百。閱通鑑五頁。誦熟書一千字。三八日作一文一詩。此課極簡。每日不過兩個時辰。即可完畢。而看讀書作四者俱全。餘則聽爾自爲主張可也。

爾母欲以全家住周家口。斷不可行。周家口河道甚窄。與永豐河相似。余駐周家口亦非長局。決計全眷回湘。紀澤俟全行復元。二月初回金陵。余於初九日起程也。此囑。(同治五年正月十二日)

諭紀鴻(講求入股試帖)

字諭紀鴻。日內未接爾稟。想闔寓平安。余定以二月九日由徐州起程。至山東濟兗河南歸陳等處。駐紮周家口。以爲老營。紀澤定於初一起程。花朝前後可抵金陵。三月初送全眷回湘。

爾出外二年有奇。詩文全無長進。明年鄉試。不可不認真講求入股試帖。吾鄉難尋明師。長沙書院亦多遊戲徵逐之習。吾不放心。爾至安慶後。可與方存之吳摯甫同伴。由六安州坐船至周家口。隨我大營讀書。李申夫於八

股試帖。最善講說。據渠論及。不過半年。即可使聽者歡欣鼓舞。機鋒趣溢。而不能自己。爾到營後。去棄一切外事。即看鑑臨帖算學等事。皆當設台。專在八股試帖上講求。丁卯六月回籍鄉試。得不得雖有命定。但求試卷不爲人所譏笑。亦非一年苦功不可。此囑。（同治五年正月廿四日）

諭紀澤（作字之法）

字諭紀澤兒。凡作字。總要寫得秀。學顏柳學其秀而能雄。學趙董恐秀而失之弱耳。爾非下等資質。待從前無善講善誘之師。近來又頗有好高好遠之弊。若求長進。須勿忘而兼以勿助。乃不致走入荆棘耳。（同治五年二月十八日）

諭紀澤紀鴻（養生之法順其自然）

字諭紀澤紀鴻兩兒。接紀澤在清江浦金陵所發之信。舟行甚速。病亦大愈。爲慰。老年來。始知聖人教「孟武伯問孝」一節之真功。爾雖體弱多病。然只宜清淨調養。不宜妄施攻治。莊生云。「聞在宥天下。不聞治天下也。」東坡取此二語。以爲養生之法。爾熟於小學。試取「在宥」二字之訓詁。體味一番。則知莊蘇皆有順其自然之意。養生亦然。治天下亦然。若服藥而日更數方。無故而終年峻補。病輕而妄攻施伐。強求發汗。則如商君治秦。荆公治宋。全失自然之妙。柳子厚所諭「名爲愛之。其實善之。」陸務觀所謂「天下本無事。庸人自擾之。」皆此義也。東坡游羅浮詩云。「小兒年少有奇志。中宵起坐存黃庭。」下一存字。正合莊子「在宥」二字之意。蓋蘇氏兄弟父子。皆講養生。竊取黃老微旨。故稱其子爲有奇志。以爾之聰明。豈不能窺透此旨。余教爾從眠食二端用功。看似粗淺。却得自然之妙。爾以後不輕服藥。自然日就壯健矣。

余以十九日至濟寧。即聞河南賊匪圖竄山東。暫駐此間。不遽赴豫。賊於廿二日。已入山東曹縣境。余調朱心楷三營。來濟護衛。衛出潘軍赴曹攻剿。須俟賊出濟境。余乃移營西行也。爾侍母西行。宜作還里之計。不宜留連鄆中。仕宦之家。往往貪戀外者。輕棄其鄉。目前之快意甚少。將來之受累甚大。吾家宜力矯此弊。（同治五年二月

二十五日)

諭紀澤(稍留去思)

字諭紀澤兒。全眷起行。已定十七二十六兩日。當可從容料理。得沅叔二月十三日信。定於三月初間赴鄂履任。爾等到鄂。當可少爲停留。

賊在山東。余須留於濟寧就近調度。不能遽至周家口。紀鴻兒過安慶時。不可輕赴周家口。且隨母至湖北。再行定計。

爾過安慶。往拜吳摯甫之父。禮泉翁。觀其言論風範。果能大有益於鴻兒否。如其藹然可觀。爾兄弟即定計請之。同船赴鄂。即在沅叔署中讀書。若余抵周家口。距漢口八百四十里。紀鴻省覲。尙不甚難。爾則奉母還湘。不必在鄂久住。金陵署內。木器之稍佳者。不必帶去。余擬寄銀三百。請澄叔在湘鄉湘潭置些木器。送於富坵。但求結實。不求華貴。衙門木器等物。除送人少許外。餘概交與房主姚姓張姓。稍留去後之思。(同治五年三月初五日)

諭紀澤紀鴻(體會八德中之渾字與勤字)

字諭紀澤紀鴻兩兒。頃據探報。張逆業已回竄。似有返豫之意。其任賴一股。銳意來東。已過汴梁。頃據探亦有竄西路之意。如果齊省一律肅清。余仍當赴周家口。以踐前言。

雪琴之坐船已送到否。三月十七果成行否。沿途州縣有送迎者。除不受禮物酒席外。爾兄弟遇之。須有一種謙謹氣象。勿恃其清介而生傲情也。

余近年默省之「勤儉剛明忠恕謙渾」八德。曾爲澤兒言之。宜轉告與鴻兒。就中能體會一二字。便有日進之象。澤兒天質聰穎。但嫌過於玲瓏剔透。宜從「渾」字上用些工夫。鴻兒則從「勤」字上用些工夫。用工不可拘苦。須探討些趣味出來。余身體平安。告爾母放心。(同治五年三月十四日)

諭紀澤紀鴻(苦心作詩文經策)

家訓

字諭紀澤紀鴻兩兒。接爾兩人在裕溪口。在安慶。在九江。所發信。知沿途清吉。爲慰。此時想已安抵湖北。沅叔思
明誼美。必留全眷。湖北過夏。余意業已回籍。即以一直到家爲妥。富坵房屋。如未修完。即在大夫第借住。紀鴻即
留鄂暑讀書。世家子弟。既爲秀才。斷無不應科場之理。既入科場。恐詩文爲同人所笑。斷不可不切實用功。六
與黃澤生。若來湖北。紀鴻宜從之。講求入股。湖北有東胡谷。是一時文好手。此外尚有能手否。爾可稟商沅叔。擇
一善講者能師事之。余尙不能遠赴周家口。申夫亦不能遠赴鄂中。道遠而逼近賊氛。鴻兒不可冒昧來營。即在
武昌沅叔左右。苦心作詩文經策。(同治五年四月二十五日)

諭紀澤紀鴻(專攻入股試帖)

字諭紀澤紀鴻兩兒。接爾兩人稟。知九叔母率眷抵鄂。極骨肉團聚之樂。宦途親眷。本難相逢。亂世尤難。留鄂過
暑。自是至情。鴻兒與瑞姪。一同讀書。請黃澤生看文。恰與我前信之意相合。屢聞近日精於舉業者。言及陝西路
閩生先生(德)仁在堂稿。及所選仁在堂試帖律賦課藝。無一不當行出色。宜古宜今。余未見此書。僅見其所
著樞華館試帖。久爲佩仰。陝西近三十年。科第中人。無一不出閩生先生之門。湖北官員中。想亦有之。紀鴻與瑞
姪等。須買仁在堂全稿。樞華館試帖。悉心揣摩。如武漢無可購買。或摺差由京買回亦可。

鴻兒信中。擬專讀唐人詩文。唐詩固宜專讀。唐文除韓柳李孫外。幾無一不四大者。亦可不必要多讀。明年鴻瑞兩
人。宜專攻入股試帖。選仁在堂佳者。讀必手鈔。熟必背誦。爾信中言。一須能背誦。乃讀他篇。一苟能隱言。實良法
也。讀樞華館試帖。亦以背誦爲要。對策不可太空。鴻瑞二人。可將文獻通考序二十五篇讀熟。限五十日讀畢。終
身受用不盡。既在鄂讀書。不必來營省觀矣。(同治五年五月十一日)

諭紀澤紀鴻(宜從古文上用功)

字諭紀澤紀鴻兩兒。沅叔足疼全愈。深可喜慰。惟外毒遽瘳。不知不生內疾否。唐文李孫二家。係指李翱孫樵。八
家始於唐荊州之文編。至茅鹿門而其名大定。至儲欣同人而添孫李二家。御選唐宋文醇。亦從儲而增爲十家。

以全唐皆尙駢儷之文。故韓柳李孫四人之不駢者。爲可貴耳。

湘鄉修縣志。舉爾纂修。爾學未成就。文甚遲鈍。自不宜承認。然亦不可全辭。一則通縣公事。吾家爲物望所歸。不得不竭力贊助。二則爾憚於作文。正可借此逼出幾篇。天下事無所爲而成者極少。有所爲有所利而成者。居其半。有所激有所逼而成者。居其半。

爾篆韻鈔畢。宜從古文上用功。余不能文。而微有文名。深以爲恥。爾文更淺。而亦獲虛名。尤不可也。吾友有山陽魯一同。通父所撰邳州志清河縣志。卽爲近日志書之最善者。此外再取有名之志爲式。議定體例。俟余核過。乃可動手。(同治五年六月十六日)

諭紀澤紀鴻(講求居家規模禮節)

字諭紀澤紀鴻兩兒。十六日在濟寧開船。念四日至宿遷。小舟酷熱。晝不乾汗。夜不成寐。較之去年赴臨淮時。困苦倍之。

吾家門第鼎盛。而居家規模禮節。未能認真求講求。歷觀古來世家長久者。男子須講求耕讀二事。婦女須講求紡績酒食二事。斯干之詩。言帝王居室之事。而女子重在酒食是讒。家人卦。以二爻爲主。重在中饋。內則一篇。言酒食者居半。故吾屢教兒婦諸女。親主中饋。後輩視之。若不要緊。此後還鄉居家。婦女縱不能精於烹調。必須常至廚房。必須講求作酒。作醃醢小菜之類。爾等可須留心於蒔蔬養魚。此一家興旺氣象。斷不可忽。紡績雖不能多。亦不可間斷。大房唱之。各房皆和之。家風自厚矣。至嚙。至嚙。(同治五年六月二十六日)

諭紀澤紀鴻(既知保養却宜勤勞)

字諭紀澤紀鴻兩兒。在臨淮住六七日。擬由懷遠入渦河。經蒙亳以達周口。中秋後。必可趕到。屆時沆叔若至德安。當設法至汝寧正陽等處一會。

余邇來衰態日增。眼光亦蒙。然每日諸事有恆。未改常度。爾等身體皆弱。前所示養生五訣。已行之否。澤兒當逐

不輕服藥一層。共六訣矣。既知保養。却宜勤勞。家之興衰。人之窮通。皆於勤惰卜之。澤兒習勤有恆。則諸弟七八人皆學樣矣。鴻兒來稿太多。以後半月寫稟一次。澤兒稟亦嫌太短。以後可泛論時事。或論學業也。此論。（同治五年七月二十一日）

諭紀澤紀鴻（讀史須作史論詠史詩）

字諭紀澤紀鴻兩兒。接紀澤兩稟。并紀鴻瑞姪稟信入股。兩人氣象俱光昌。有發達之概。惟思路未開。作文以思路宏開。爲必發之品。意義層出不窮。宏開之謂也。余此次行役。始爲酷熱所困。中爲風波所驚。旋爲疾病所苦。此間赴周家口。尙有五百餘里。或可平安耳。

爾擬於明史看畢。重看通鑑。即可便看王船山之讀通鑑論。爾或間作史論。或作詠史詩。惟有所作。則心自易入。史亦易熟。否則難記也。

早間所食之鹽薑已完。近日設法寄至周家口。吾家婦女。須講究作小菜。如腐乳。醬油。醬菜。好醋。倒筒之類。常常做些。寄與我吃。內則言事父母舅姑。以此爲重。若外間買者。則不寄可也。（同治五年八月初三日）

諭紀澤紀鴻（摺片不肯假手於人）

字諭紀澤紀鴻兩兒。接爾等八月初十日稟。知鴻兒生男之喜。軍事棘手。衰病焦灼之際。聞此大爲喜慰。九月初十後。澤兒送全眷回湘。鴻兒可來周家口。侍奉左右。卽年夏間。澤兒來營侍奉。換鴻兒回家鄉試。

余病已全愈。惟不能用心。偶一用心。卽有齒痛出汗等患。而摺片不肯假手於人。實望太重。萬不能不用心也。朱子綱目一書。有續修宋元及明合爲一編者。白玉堂忠愍公有之。武漢買得出否。若有。而字大明顯者。可買一部帶來。此諭。（同治五年八月二十二日）

諭紀澤紀鴻（但有志氣可獎成之）

字諭紀澤紀鴻兩兒。接澤兒八月十八日稟。具悉擇期九月念日還湘。十月二十四日。四女喜事諸務。想辦妥矣。

凡衣服首飾百物。只可照大女二三女子例。不可再加。

紀鴻於念日送母之後。即可束裝來營。自坐一轎。行李用小車。從人或車或馬皆可。請沅叔派人送至羅山。余派人迎至羅山。惟勇不足恃。余亦久聞此言。然物論悠悠。何足深信。所貴好而知其惡。惡而知其美。省三琴軒。均屬有志之士。未可厚非。申夫好作識微之論。而實不能平心細察。余所見將才傑出者。極少。但有志氣。即可予以美名。可獎成之。

余病雖已愈。而難於用心。擬於十二日續假一月。十月奏請開缺。但須沅弟無非常之舉。吾乃可徐行吾志耳。否則別有波折。又須虛與委蛇也。此諭。(同治五年九月初九日)

諭紀澤紀鴻(家中須講求詩蔬)

字諭紀澤紀鴻兩兒。余病大致已好。惟不甚能用心。自度難任艱鉅。已於十三日具片續假一月。將來請開各缺。縱不能離營調養。但求事權稍小。責任稍輕。即爲至幸。欲求平捻功成。從容引退。殆恐不能。即謗免於謗議。亦不能也。

檢匪竄過沙河賈魯河之北。不知已入鄂境否。若鴻兒尙未回湘。目下亦不必來周口。恐中途適與賊遇。鹽豈頗好。所作椿荻子醜菜亦好。家中並須講求詩蔬。內須講求曬小菜。此足驗人家之興衰。不可忽也。(同治五年九月十七日)

諭紀鴻(讀古文古詩當認貌觀神)

字諭紀鴻兒。爾讀李義山詩。於情韻既有所得。則將來於六朝文人詩文。亦必易於契合。凡大家名家之作。必有一種面貌。一種神態。與他人迥不相同。譬之書家。羲獻歐虞褚李顏柳一點一畫。其面貌既截然不同。其神氣亦全無似處。本朝張得天。何義門。雖稱書家。而未能盡雙古人之貌。故必如劉石庵之貌異神異。乃可推爲大家。詩文亦然。若非其貌其神迥絕羣倫。不足以當大家之目。渠既迥絕羣倫矣。而後人讀之。不能辨識其貌。領取其神。

是讀者之見解未到。非作者之咎也。爾以後讀古文古詩。惟當先認其貌。後觀其神。久之自能分別蹊徑。今人動指某人學某家。大抵多道塗聽說。扣槃扞燭之類。不足信也。君子貴於自知。不必隨衆口附和也。

余病已大愈。尙難用心。日內當奏請開缺。近作古文二首。亦尙入理。今冬或可再作數首。唐鏡海先生歿時。其世兄求作墓誌。余已應允。久未動筆。并將節略失去。爾向唐家。或賀世兄處。索取行狀節略寄來。羅山文集年譜。未帶來。亦向易芝先生索一部付來。以便作碑。一償夙諾。

紀鴻初六日自貴安起程。日內應可到此。(同治五年十月十一日)

諭紀鴻(將進京陸見)

字諭紀鴻兒。余於十三日具疏。請開各缺。并附片請注銷爵秩。廿五日接奉批旨。再賞假一月。調理就痊。進京陸見一次。余擬於正月初旬起程進京。

余近無他苦。惟腰疼畏寒。夜不成眠。羣疑衆謗之際。此心無不介介。然回思邇年行事。無甚差謬。自反而縮。不似丁冬戊春之多悔多愁也。

到京後。仍當具疏請開各缺。惟以散員留營。維繫軍心。擔荷稍輕。爾兄弟輪流侍奉。軍務鬆時。請假回籍。省墓一次。亦足以娛暮景。

紀鴻在此。體氣甚好。心思亦似開朗。當令其回家事母耳。(同治五年十月二十六日)

諭紀鴻(不復作官)

字諭紀鴻兒。余定於正月初北上。項已附片覆奏。屆時鴻兒隨行。兩月回豫。鴻兒三月可還湘也。余決計此後不復作官。亦不作回籍安逸之想。但在營中照料雜事。維繫軍心。不居大位享大名。或可免於大禍大謗。若小小凶咎。則亦聽之而已。

余近日路體頗健，鴻兒亦發胖。

家中興衰，全係平內政之整散。爾母率二婦諸女，於酒食紡績二事，斷不可不常常勤習。目下官雖無念，須時時作罷官衰替之想，至囑。至囑。（同治五年十一月初三日）

諭紀鴻（奏請開缺）

字諭紀鴻兒。此間軍事，東股任賴竄入光固，賊勢已衰，西股張總愚久踞秦中華陰一帶。余派春霆往援，大約臘初可以成行。

十七日覆奏不能回。江督本任一摺，刻木質關防留營自效一片。茲抄寄家中一閱。若果能開去各缺，不過留營一年，或可請假省墓。但平日雖有諷謗之言，亦不乏譽頌之人，未必果准悉開各缺耳。

紀鴻在此，禮氣甚好。月餘未令作文，聽其瀟灑閒適，一錫其機。臘月當令與叶樹閣課作文。

爾膽怯等症，由於陰虧。朱子所謂氣清者魄恆弱，若能善睡酣眠，則此症自去矣。（同治五年十一月十八日）

諭紀鴻（勿慢近鄰）

字諭紀鴻兒。此間軍事，任賴由固始竄至鄂境，該逆不能逞志於鄂，勢必仍回河南。張逆入秦，已奏派春霆援秦。本月當可起程。惟該逆有至漢中過年，明春入蜀之說，不知能軍追趕得及否。

本日摺差回營，十三日有滿御史參劾，奉有明發諭旨。茲鈔回一閱。余擬再具數疏婉辭，必期盡開各缺而後已。將來或再奉入覲之旨，亦未可知。

爾在家料理家政，不復召爾來營隨侍矣。

李申夫之母，誓有二語云：「有錢有酒款遠親，火燒盜搶喊四鄰。」戒高貴之家，不可敬遠親而慢近鄰也。我家初發富，不可輕慢近鄰。酒飯宜鬆，禮貌宜恭，或另請一人款待賓客亦可。除不管閒事，不幫官司外，有可行方便之處，亦無吝也。此諭。（同治五年十一月二十八日）

致歐陽夫人（嘗爲子孫榜樣）

接紀鴻兒各稟。知全眷平安抵家。夫人體氣康健。至以爲慰。

余自八月以後。屢疏請告假開缺。幸蒙聖恩。准交卸欽差大臣關防。尙令回江督本任。余病難於見客。難於閱文。不能復勝江督繁劇之任。仍當再三疏辭。但受恩深重。不忍遽請離營。即在周口養病。少泉接辦。如軍務日有起色。余明年或可回籍省墓一次。若久享山林之福。則恐不能。然辦揆無功。欽差交出。而恩眷仍不甚衰。已大幸矣。家中遇祭酒菜。必須夫人率婦女親自經手。祭祀之器皿。另作一箱收之。平日不可動用。內而紡績做小菜。外而蔬菜養魚。款待人客。夫人均須留心。吾夫婦居心行事。各房及子孫皆依以爲榜樣。不可不勞苦。不可不謹慎。近在京買參。每兩去銀廿五金。不知好否。茲寄一兩與夫人服之。

澄叔待兄與嫂。極誠極敬。我夫婦宜以誠敬待之。大小事。絲毫不可瞞他。自然愈久愈親。此間近好。（同治五年十二月初一日）

諭紀澤（書箱式樣）

字諭紀澤兒。余自奉回兩江本任之命。兩次具疏堅辭。皆未俞允。訓詞肫摯。只得遵旨暫回徐州。接受關防。令少泉得以迅赴前敵。以慰宸廬。余自揣精力日衰。不能多閱文牘。而意中所欲看之書。又不肯全行割棄。是以決計不爲疆吏。不居要任。兩三月內。必再專疏懇辭。

余近作書箱。大小如何。廉勅八箱之式。前後用橫板三塊。如吾鄉倉門板之式。四方上下。皆有方木爲柱。爲匡。頂底及兩頭。用板裝之。出門則以繩絡之。而可挑。在家則以架乘之。而可累。兩箱三箱四箱不等。開前倉板則可作櫃。再開後倉板則可過風。當作一小者送回。以爲式樣。吾縣木作最好。而賤。爾可照樣作數十箱。每箱不過費錢數百文。讀書乃塞士本業。切不可有官家風味。吾於書箱及文房器具。但求爲塞士所能備者。不求珍異也。家中新居富坵。一切須存此意。莫作代代做官之想。須作代代做士民之想。門外但挂「宦太保第」一匾而已。（同

治五年十二月二十三日)

諭紀澤 (告鵠兒出痘及述詩文趣味)

字諭紀澤兒。紀鵠病。請一醫來診。鵠兒乃天花痘也。余深用憂駭。以痘太密厚。年太長大。而所服之藥。無一不覈。醫署惶恐失措。幸託痘神佑助。此三日內。轉危爲安。茲將日記由鄂轉寄家中。稍爲一慰。再過三日。痘漿續行。寄信回湘也。

爾七律十五首。圍道深穩。步趨義山。而勁氣倔強。頗似山谷。爾於情韻趣味二者。皆由天分中得之。凡詩文趣味。約有二種。一曰。詼詭之趣。一曰。閑適之趣。詼詭之趣。惟莊柳之文。蘇黃之詩。韓公詩文。皆極詼詭。此外實不多見。閑適之趣。文惟柳子厚遊記近之。詩則韋孟白傳均極閑適。而余所好者。尤在陶之五古。杜之五律。陸之七絕。以爲人生具此高淡襟懷。雖南面王不以易其樂也。爾胸懷頗雅淡。試將此三人之詩。研究一番。但不可走入孤僻一路耳。

余近日平安。告爾母及澄叔知之。(同治六年三月二十二日)

諭紀澤 (不宜妄生意氣)

字諭紀澤兒。鵠兒出痘。余兩次詳信。告知家中。此六日尤爲平順。全家放心。余憂患之餘。每聞危險之事。寸心如沸湯澆灼。鵠兒病痊後。又以鄂省賊久騷。曰口天門。春霆病勢甚重。焦慮之至。

爾信中述左帥密劾次青。又與鵠兒信。言閩中謠歌之事。恐均不確。余於左沈二公之。以怨報德。此中誠不能無芥蒂。然老年篤畏天命。力求克去。藉心伎心。爾輩少年。尤不宜妄生意氣。着不得絲毫意見。切記。切記。

爾稟氣太清。清則易柔。惟志趣高堅。則可變柔爲剛。清則易刻。惟襟懷闊遠。則可化刻爲厚。余字汝曰劼剛。恐其稍涉柔弱也。教汝讀書。須具大量。看陸詩以導閑適之抱。恐其稍涉刻薄也。爾天性淡於榮利。再從此二字用功。則終身受用不盡矣。

鴻兒全數復元。端午後嘗遣之回湘。（同治六年三月二十八日）

致歐陽夫人（從勤儉耕讀上做出好規模）

歐陽夫人左右。自余回金陵後。諸事順遂。惟天氣亢旱。雖四月廿四五月初三日兩次甘雨。稻田尙不能栽插。深以爲慮。

科一出痘。非常危險。幸祖宗神靈庇佑。現已全愈。發體變一結實模樣。十五日滿兩個月後。卽嘗遣之回家。計六月中旬。可以抵湘。如體氣日旺。七月中旬。赴省鄉試可也。

余精力日衰。總難覩見人客。算命者常言十一月交癸運。卽不吉利。

余亦不願久居此官。不欲再接家眷東來。夫人率兒婦輩在家。事事須立個一定章程。作官不過偶然之事。居家乃是長久之計。能從勤儉耕讀上做出好規模。雖一旦罷官。尙不失爲與旺氣象。若貪圖衙門之熱鬧。不立家鄉之基業。則罷官之後。便覺氣象蕭索。凡有盛必有衰。不可不預爲之計。望夫人教訓子孫婦女。常常作家中無官之想。時時有謙恭省儉之意。則福澤悠久。余心大慰矣。

余身體安好如常。惟眼蒙日甚。說話多則舌頭蹇澀。左牙疼甚。而不甚動搖。不至遽脫。堪以告慰。順問近好。（同治五年五月初五日）

諭紀澤紀鴻（示備不虞附二詩四課）

字諭紀澤紀鴻兩兒。余卽日前赴天津。查辦毆斃洋人。焚毀教堂一案。外國性情凶悍。津民習氣浮囂。俱難和叶。將來構怨興兵。恐致激成大變。余此行反覆籌思。殊無良策。余自咸豐三年募勇以來。卽自誓效命疆場。今老年病軀。危難之際。斷不肯吝於一死。以自負其初心。恐遲迨及難。而爾等諸事無所稟承。茲略示一二。以備不虞。余若長逝。靈柩自由運河搬回江南歸湘爲便。中間雖有臨清至張秋一節。須改陸路。較之全行陸路者。差易。去年由海船送來之書籍木器等。過於繁重。斷不可全行帶回。須細心分別去留。可送者分送。可毀者焚毀。其必

不可棄者。乃行帶歸。毋貪瓊物而化途費。其在保定自製之木器。全行分送。沿途謝絕一切。概不收禮。但水陸略求兵勇護送而已。

余歷年奏摺。令胥吏擇要鈔錄。今已鈔一半。多自須全行擇鈔。鈔畢後。存之家中。留於子孫觀覽。不可發刻送人。以其中可存者絕少也。

余所作古文。黎莚齋鈔錄頗多。頃渠已照鈔一分。寄余處存稿。此外黎所未鈔之文。寥寥無幾。尤不可發送別人。不特篇幅太多。且少壯不克努力。志亢而才不足以副之。刻出適以彰其陋耳。如有知舊勸刻余集者。婉言謝之可也。

余生平略涉儒先之書。見聖賢教人修身。千言萬語。而要以不忤不求爲重。忤者。嫉賢害能。妬功爭寵。所謂「怠者能修。忌者畏人修」之類也。求者。貪利貪名。懷土懷惠。所謂「未得懷惠。既得患失」之類也。忤不常見。每發露於名業相侔。勢位相埒之人。求不常見。每發露於貨財相接。仕進相妨之際。將欲造福。先去忤心。所謂「人能充無欲害人之心。而仁不可勝用也。」將欲立品。先去求心。所謂「人能無穿窬之心。而義不可勝用也。」忤不去。滿懷皆是荆棘。求不去。滿腔日即卑污。余於此二者。常加克治。恨尙未能掃淨盡。爾等欲心地乾淨。宜於二者。痛下工夫。并願子孫世世戒之。附作忤求詩二首錄後。

歷覽有國有家之與。皆由克勤克儉所致。其衰也。則反是。余生平亦頗以勤字自勵。而實不能勤。故讀書無手鈔之冊。居官無可存之牘。生平亦好以儉字教人。而自問實不能儉。今暑中內外服役之人。廚房日用之數。亦云奢矣。其故由於前在軍營。規模宏闊。相沿未改。近因多病。醫藥之資。漫無限制。由儉入奢。易於下水。由奢反儉。難於登天。在兩江交卸時。尙存養廉二萬金。在余初意。不料有此。然似此放手用去。轉瞬即已立盡。爾輩以後居家。須學陸峻山之法。每月用銀若干兩。限一成數。封另秤出。本月用畢。只准贏餘。不准虧欠。衙門奢侈之習。不能不徹底痛改。余初帶兵之時。立志不取軍營之錢。以自肥其私。今日差幸。不負始願。然亦不願子孫過於貧困。低頭求

人。惟在爾輩力崇儉德。善持其後而已。

孝友爲家庭之祥瑞。凡所稱因果報應。他事或不盡驗。獨孝友則立獲言慶。反是則立獲殃禍。無不驗者。吾早歲久宦京師。於孝養之道多疎。後來展轉兵間。多獲諸弟之助。而吾毫無裨益於諸弟。余兄弟姊妹各家。均有田宅之安。大抵皆九弟扶助之力。我身歿之後。爾等視兩叔如父。事叔母如母。視堂兄弟如手足。凡事皆從省儉。獨待諸叔之家。則處處從厚。待堂兄弟以德業相勸。過失相規。期於彼此有成。爲第一要義。其次則親之欲其貴。愛之欲其富。常常以吉祥善事。代諸昆季默爲禱祝。自當禘鬼共飲。溫甫季洪兩弟之死。余內省自有慚德。澄侯阮甫兩弟漸老。余此生不審能否相見。爾輩若能從孝友二字。切實講求。亦足爲彌縫缺憾耳。

附岐求詩二首

善莫大於恕。德莫凶於妒。妒者妾婦行。瓊瑣奚比數。己拙忌人能。己塞忌人遇。己若無事功。忌人得成務。己若無黨援。忌人得多助。勢位苟相敵。畏懼又相惡。己無好聞望。忌人文名著。己無賢子孫。忌人後嗣裕。爭名日夜奔。爭利東西驚。但期一身榮。不惜他人污。聞災或欣幸。聞禍或悅豫。問渠何以然。不自知其故。爾室神來格。高明鬼神願。天道常好還。嫉人還自誤。幽明叢詬忌。乘氣相迴互。重者裁汝躬。輕亦減汝祚。我今告後生。悚然大覺寤。終身讓人道。曾不失寸步。終身視人善。曾不損尺布。消除嫉妒心。普天零甘露。家家獲吉祥。我亦無恐怖。

(右不伎)

知足天地寬。貪得宇宙隘。豈無過人姿。多欲爲患害。在約每思豐。居困常求泰。富來千乘車。貴求萬釘帶。未得求速償。既得求勿壞。芬馨比椒蘭。誓固方泰岱。求榮不知愛。志亢神愈振。歲煥有時寒。日明有時晦。時來多善緣。運去生災怪。諸福不可期。百殃分來會。片言動招尤。舉足便有礙。戚戚抱殷憂。精爽日凋瘵。矯首望八荒。乾坤一何大。安榮無遽欣。患難無遽愁。君看十人中。八九無倚賴。人窮多過我。我窮猶可耐。而況處夷塗。奚事生嗟懷。於世少所求。俯仰有餘快。俟命堪終古。曾不願乎外。(右不求)

日課四條（同治十年金節署中日記）

一曰。慎獨則心安。自修之道。莫難於養心。心既知有善。知有惡。而不能實用其力。以爲善去惡。則謂之自欺。方寸之自欺與否。蓋他人所不及知。而已獨之。故大學之誠意章。兩言慎獨。果能好善如好好色。惡惡如惡惡臭。力去人欲以存天理。則大學之所謂自慊。中庸之所謂「戒慎恐懼」。皆能切實行之。即曾子所謂「自反而縮」。孟子所謂「仰不愧。俯不忤」。所謂「養心莫善於寡欲」。皆不外乎是。故能慎獨。則內省不疚。可以對天地。質鬼神。斷無行有不慊於心。則餒之時。人無一內愧之事。則天君泰然。此心常快足。寬平。是人生第一自強之道。第一尋樂之方。守身之先務也。

二曰。主敬則身強。敬之一字。孔門持以教人。春秋士大夫亦常言之。至程朱則千言萬語。不離此旨。內而專靜純一。外而整齊嚴肅。敬之工夫也。出門如見大賓。使民如承大祭。敬之氣象也。修己以安百姓。篤恭而天下平。敬之效驗也。程子謂上下一於恭敬。則天地自位。萬物自育。氣無不和。四靈畢集。聰明睿智。皆由此出。以此事天饗帝。蓋謂敬則無美不備也。吾謂敬字切近之效。就在能固人肌膚之會。筋骸之束。莊敬日強。安肆日偷。皆自然之徵應。雖有衰年病軀。一過壇廟祭獻之時。戰陣危急之際。亦不覺神爲之悚。氣爲之振。斯足知敬能使人身強矣。若人無算衆。事無大小。一一恭敬。不敢怠慢。則身體之強健。又何疑乎。

三曰。求仁則人悅。凡人之生。皆得天地之理以成性。得天地之氣以成形。我與民物。其大本乃同出一源。若但知私己。而不知仁民愛物。是於大本一源之道。已悖而失之矣。至於尊官厚祿。高居人上。則有拯民溺。救民飢之責。讀書學古。粗知大義。即有覺後知覺後覺之責。若但知自了。而不知教養庶彙。是於天之所以厚我者。辜負甚大矣。孔門教人。莫大於求仁。而其最切者。莫要於「欲立立人。欲達達人」。數語。立者。自立不懼。如富人百物有餘。不假外求。達者。四達不悖。如貴人登高一呼。羣山四應。人孰不欲己立己達。若能推以立人達人。則與物同春矣。後世論求仁者。莫精於張子之西銘。彼其視民胞物與。宏濟羣倫。皆事天者性

分當然之事。必如此。乃可謂之人。不如此。則曰悖德。曰賊。誠如其說。則雖盡立天下之人。盡遠天下之人。而會無善勞之足言。人有不悅而歸之者乎。

四曰。習勞則神斂。凡人之情。莫不好逸而惡勞。無論貴賤。智愚老少。皆貪於逸而憚於勞。古今之所同也。人一日所著之衣。所進之食。能一日所行之事。所用之方相稱。則旁人聽之。鬼神許之。以爲彼自食其力也。若農夫織婦。終歲勤動。以成數石之粟。數尺之布。而富貴之家。終歲逸樂。不管一業。而食必珍羞。衣必錦繡。酣豢高眠。一呼百諾。此天下最不平之事。鬼神所不許也。其能久乎。古之聖君賢相。苦湯之味。且丕顯。文王日昃不遑。周公夜以繼日。坐以待旦。蓋無時不以勤勞自勵。無逸一篇。惟之於勤則壽考。逸則夭亡。歷歷不爽。爲一身計。則必操習技藝。磨鍊筋骨。困知勉行。操心危慮。而後可以增智慧而長才識。爲天下計。則必己飢己溺。一夫不獲。引爲余辜。大禹之周乘四載。過門不入。墨子之摩頂放踵。以利天下。皆極儉以奉身。而極勤以救民。故荀子好稱大禹墨翟。以其勤勞也。軍興以來。每見人有一材一技。而耐艱苦者。無不見用於人。見稱於時。其絕無材技。不慣作勞者。皆唾棄於時。饑凍就斃。故勤則壽。逸則夭。勤則有材而見用。逸則無能而見棄。勤則博濟斯民。而神祇欽仰。逸則無補於人。而神鬼不敬。是以君子欲爲人神所憑依。莫大於習勞也。

余衰年多病。目疾日深。萬難挽回。汝及諸姪輩。體身強壯者少。古之君子。修己治家。必能心安身強。而後有振興之象。必使人悅神斂。而後有駢集之祥。今書此四條。老年用自警惕。以補昔歲之愆。并令二子各自勗勉。每夜以此四條相課。每月終。以此四條相稽。轉寄諸姪共守。以期有成焉。(同治六年九月初四日)

仿古字版

會文正公家書

世界書局印行

曾文正公家書總目

卷一	稟祖父母	一
卷二	稟父母	一二
卷三	稟叔父母	四七
卷四	致諸弟	五二
卷五	致諸弟	一〇四
卷六	致諸弟	一四九
卷七	致諸弟	一九一

曾文正公家書

卷一

稟祖父母（請救濟族人）

祖父大人萬福金安。四月十一日。由摺差發第六號家信。十六日摺弁又到。孫男等平安如常。孫婦亦起居維慎。曾孫數日內燠吃粥一頓。因母乳日少。飯食難喂。每日兩飯一粥。

今年散館。湖南三人皆留。全單內共留五十二人。惟三人改部屬。三人改知縣。翰林衙門。現已多至百四五十人。可謂極盛。

琦善已於十四日。押解到京。奉上諭派親王三人。郡王一人。軍機大臣大學士六部尙書會同審訊。現未定案。梅霖生同年因去歲咳嗽未愈。日內頗患咯血。同鄉各京官宅皆如故。

澄侯弟三月初四日在縣城發信。已經收到。正月廿五信。至今未接。蘭姊以何時分娩。是男是女。伏望下次示知。楚善八叔輩。不知去冬是何光景。如絕無解危之處。則二伯祖母將窮迫難堪。竟希公之後人。將見笑於鄉里矣。孫國藩去冬已寫信求東陽叔祖兄弟。不知有補益否。此事全求祖父大人作主。如能救焚拯溺。何難噓枯回生。伏念祖父平日瀆德累仁。救難濟急。孫所知者。已難指數。如廖品一之孤。上蓮叔之妻。彭定五之子。福益叔祖之母。及小羅巷樟樹堂各庵。皆代爲籌畫。曲加矜恤。凡他人所束手無策。計無復之者。得祖父善爲調停。旋乾轉坤。無不立即解危。而况楚善八叔。同胞之親。萬難之時乎。

孫因念及家事。四千里外。杳無消息。不知同堂諸叔。目前光景。又念及家中此時。亦甚艱窘。輒敢冒昧饒舌。伏求祖父大人寬宥無知之罪。楚善叔事。如有設法之處。望詳細寄信來京。茲逢摺便。敬稟一二。即跪叩祖母大人萬

福金安（道光二十一年四月十七日）

稟祖父母（告一家病況及同鄉病故事）

孫男國藩跪稟祖父大人萬福金安。六月初五日。接家信一封。係四弟初十日在省城發得悉一切。不勝欣慰。嗣國藩日內身體平安。國荃於廿三日微受暑熱。服藥一帖。次日即愈。初三日復患腹瀉。服藥二帖。即愈。曾孫甲三於廿三日腹瀉不止。比請鄭小珊診治。次日添請吳竹如。皆云係脾虛而並受暑氣。三日內服藥六帖。亦無大效。廿六日添請本京王醫。專服涼藥。漸次平復。初二兩日未吃藥。刻下病已全好。唯脾胃元尚虧。禮尙未復。孫等自知細心調理。觀其行走如常。飲食如常。不吃藥即可復體。堂上不必聖念。家孫孀身體亦好。婢僕如舊。

同鄉梅霖生病於五月中旬。日日加重。十八日上床。廿五日子時仙逝。胡雲閣先生亦同日同時同刻仙逝。梅霖生身後一切事宜。係陳岱雲黎月喬與孫三人料理。戊戌同年。購儀共五百兩。吳甄甫夫子（戊戌總裁）進京。購贈百兩。將來一概。共可張羅千餘金。計京中用費。及靈柩回南途費。不過用四百金。其餘尙可周恤遺孤。

自五月下旬以至六月初。諸事殷繁。孫荃亦未得讀書。六月前寄文來京。尙有三篇。孫未暇改。廣東事已成功。由軍功陞官及戴花翎監翎者。共二百餘人。將上諭抄回前半節。其後半載陞官人名。未及全抄。昨接家信。始知楚魯八叔竹山灣田。已於去冬歸祖父大人承買。八叔之家稍安。而我家更窘迫。不知祖父如何調停。去冬今年。如何設法。望於家信內詳示。

孫等在京。別無生計。大約冬初即須借賬。不能備仰事之資寄回。不勝愧悚。餘容續稟。即稟祖父母大人萬福金安。孫跪稟（道光二十一年六月初七日）

稟祖父母（告在京中瘡狀及孫婦等病情）

孫男國藩跋稟祖父大人萬福金安。六月初七日發家信第九號。廿九日早。接丹閣十叔信。係正月廿八日發。始知祖父大人於二月間體氣違和。三月已全愈。至今康健如常。家中老幼均吉。不勝欣幸。四弟於五月初九寄信

物於彭山蛇處。至今尙未到。大約七月可到。

丹閣叔信內言。去年楚善叔田業賣於我家承管。其中曲折甚多。添梓坪借錢三百四十千。其實祇三百千。外四十千。係丹閣叔因我家景况艱窘。勉強代楚善叔解危。將來受累不淺。故所代出之四十千。自去冬至今。不敢向我家明言。不特不敢明告祖父。卽父親叔父之前。渠亦不敢直說。蓋事前說出。則事必不成。不成則楚善叔逼迫無路。二伯祖母奉養必闕。而本房日見凋敗。終無安靜之日矣。事後說出。則我家既受其累。又受其欺。祖父大人必怒。渠更無辭可對。無地自容。故將此事寫信告知孫男。託孫原其不得已之故。轉稟告祖父大人。現在家中艱難。渠所代出之四十千。想無錢可以付渠。八月心齋兄南旋。孫在京借銀數十兩。付回家中。歸楚此項。大約須臘底可到。因心齋兄走江南回故也。

孫此刻在京。光景漸窘。然嘗京宦者。大半皆東扯西支。從無充裕之時。亦從無凍餒之時。家中不必繫懷。孫現今管長郡會館事。公項存件。亦已無幾。

孫日內身體如恆。九弟亦好。甲三自五月廿三日起病。至今雖全愈。然十分之中尙有一二分未盡復舊。刻下每日吃炒米粥二餐。泡凍米吃二次。乳已全無。而伊亦要吃。據醫云。「此等乳最不養人。」因其夜哭甚。不能遽斷乳。從前發熱煩躁。夜臥不安。食物不化。及一切諸患。此時皆已去盡。日日嬉笑好吃。現在尙服補脾之藥。大約再服四五帖。本體全復。卽可不藥。孫婦亦感冒三天。鄭小珊云。「服涼藥後。須略吃安胎藥。」目下亦健爽如常。甲三病時。孫婦會跪許裝修家中。觀世音菩薩金身。伏求家中今年馴順。又言西冲有壽佛神像。祖母會叩許裝修。亦係爲甲三而許。亦求今年酬謝了願。梅霖生身後事。辦理頗如意。其子可於七月扶柩回南。同鄉各官如常。家中若有信來。望將王率五家光景寫明。肅此。謹稟祖父父母大人萬福金安。(道光二十一年六月廿九日)

稟祖父父母(告生一女)

孫男國藩跪稟祖父父母大人萬福金安。十五日戌刻。孫婦產生一女。是日孫婦飲食起居如故。更初始作勢。二更

卽寔生。極爲平安。寓中所雇僕婦。因其刁悍。已於先兩日遣去。亦未請穩婆。其斷臍洗三諸事。皆孫婦親自經手。會孫甲三於初十日傷風。十七日全愈。現已復元。係鄭小珊醫治。孫等在京。身體如常。同鄉李碧峯在京。孫憐其窮苦無依。接在宅內居住。新年可代伊找館也。謹稟。（道光二十一年十一月十九日）

稟祖父母（請漆壽具及告英軍占寧波）

孫男國藩跪稟祖父母大人萬福金安。三月十一日。發家信第四號。四月初十日。廿三。發第五號。第六號。後兩號。皆寄省城陳家。因寄有銀參筆帖等物。待諸弟晉省時。當面去接。四月廿一日。接王寅第二號家信。內祖父父親叔父手書各一。兩弟信並詩文具收。伏讀祖父手諭。字跡與早年相同。知精神較健。家中老幼平安。不勝欣幸。遊子在外。最重惟平安二字。承叔父代辦壽具。兄弟感恩。何以圖報。

湘潭帶漆。必須多帶。此物難辦。真假。不可邀人去同買。反有奸弊。在省考試時。與朋友間看漆之法。多問則必能知一二。若臨買時。向紙行邀人同去。則必吃虧。如不知看漆之法。則今年不必買太多。待明年講究熟習。再買不遲。今年漆新壽具之時。祖父母壽具。必須加漆。以後每年加漆一次。四具同加。約計每年漆錢多少。寫信來京。孫付至省城甚易。此事萬不可從儉。子孫所爲報恩之處。惟此最爲切實。其餘皆虛文也。孫意總以厚漆爲主。由一層以加至數十層。愈厚愈堅。不必多用瓷灰夏布等物。恐其與漆不相膠黏。歷久而脫殼也。然此事孫未嘗經歷講究。不知如何而後盡善。家中如何辦法。望四弟寫信詳細告知。更望叔父教訓諸弟。經理家事。

心齋兄去年臨行時。言到縣卽送銀廿八兩至我家。孫因十叔所代之錢。恐家中年底難辦。故向心齋通挪。因渠會挪過孫的。今渠既未送來。則不必向渠借也。家中目下數用不缺。此孫所第一放心者。孫在京已借銀二百兩。此地通挪甚易。故不甚窘迫。恐不能顧家耳。

會孫姊妹二人體甚好。四月念三日。已種牛痘。萬無一失。係廣東京官。設局濟活貧家嬰兒。不取一錢。茲附回種法一張。敬呈慈覽。湘潭長沙皆有牛痘公局。可惜鄉間無人知之。

英夷去年攻占浙江寧波府及定海鎮海兩縣。今年退出寧波。攻占乍浦極可痛恨。京城人心。安謐如無事時。想不日可殄滅也。孫謹稟。道光二十一年四月廿七日。

稟祖父母（告九弟已歸家）

孫男國藩跪稟祖父母大人萬福金安。七月初五日。發第九號信。內言六月廿四後。孫與岱雲意欲送家眷回南。至七月初一。謀之於神。乃決計不送。初五日發信後。至初八日。九弟仍思南歸。其意甚堅。不可挽回。與孫商量。孫即不復勸阻。九弟自從去年四月。父母歸時。即有思歸之意。至九月間。則歸心似箭。孫苦苦細問。終不明言。其所以然。年少無知。大抵厭常而喜新。未到京則想家。已到京則想家。在所不免。又家中僕婢。或對孫則恭敬。對弟則簡慢。亦在所不免。孫於去年決不許他歸。屢責曲勸。千言萬語。弟亦深以為然。幾及兩月。乃決計不歸。今年正月。病中又思歸。孫即不敢復留矣。三月復元後。弟又自言不歸。四五月。讀書習字。一切如常。至六月底。孫有送家眷之說。而弟之歸與又發。孫見其意。是為遂離膝下。思歸盡服事之勞。且逆夷滋擾。外間訛言可畏。雖明知叢爾。不足以當車軌。而九弟既非在外服官。即宜在家承歡。非同有職位者。聞警而告假。使人笑其無膽。罵其無義也。且歸心既動。若強留在此。則心如懸旌。不能讀書。徒廢時日。兼此數層。故孫即定計打發他回。不復禁阻。恰好鄭莘田先生。將去貴州上任。迂道走湖南省城。定於十六日起程。孫即將九弟託他結伴同行。此係初八九起議。十四始決計。即於數日內。將一切貨物辦齊。十五日雇車。時價驕車。本只要二十三千。孫見車店內有頂好官車一輛。牲口亦極好。其車較常車大二寸。深一尺。坐者最舒服。故情願多出大錢四千。恐九弟在道上受熱生病。雇底下人名向澤。其人新來。未知好歹。觀其光景。似尙有良心者。十六日未刻出京。孫送至城外廿里。見道上有積潦甚多。孫大不放心。恐有翻車陷車等事。深為懊悔。廿三日接到弟在途中所發信。始稍放心。茲將九弟原信附呈。

孫交九弟途費紋銀三十二兩整。先日交車行上脚大錢十三千五百文。及上車現大錢六千文。兩項在外。外買

貨物及送人東西。另開一單。九弟帶回。外封銀十兩。敬奉堂上六位老人吃肉之費。孫對九弟云：「萬一少途費。即扯此銀亦可。若到家後。斷不可以他事借用此銀。然途費亦斷不至少也。」向澤訂工費大錢二千文。已在京交楚。鄭家與九弟在長沙分隊。孫囑其在省換小船到縣。向澤即在縣城開銷他。向澤意欲送至家。如果至家。留任幾日打發。求祖父隨時斟酌。

九弟自到京後。去年上半年。用功甚好。六月。因甲三病。耽擱半月餘。九月。弟欲歸。不肯讀書。耽擱兩月。今春弟病。耽擱兩月。其餘工夫。或作或輟。雖多間斷。亦有長進。計此一年半之中。惟書法進功最大。外此則看網鑑卅六本。讀禮記四本。讀周禮一本。讀斯文精萃兩本半。因周禮讀不熟。故改換讀精萃。作文六十餘篇。讀文三十餘首。父親出京後。孫未嘗按期改文。未嘗講書。未能按期點詩文。此孫之過。無所逃罪者也。讀文作文。全不用心。凡事無恆。屢責不改。此九弟之過也。好與弟談倫常。講品行。使之擴見識。立遠志。目前已頗識爲學之次第。將來有路可循。此孫堪對祖父者也。待兄甚恭。待姪輩甚慈。循規蹈矩。一切匪癩。恣淫之事。毫不敢近。舉止大方。性情醇厚。此九弟之好處也。弟有最壞之處在於不知艱苦。年紀本輕。又未嘗辛苦。宜其不知。再過幾年。應該知道。九弟約計可於九月半到家。孫恐家中駭異。疑兄弟或有嫌隙。致生憂慮。故將在京出京情形。述其梗概。至瑣細之故。九弟到家詳述。使堂上大人。知孫兄弟。絕無纖介之隙也。

孫身體如常。惟常耳鳴。不解何故。孫婦及會孫兄妹二人皆好。丫環因其年已長。其人太蠢。已與媒婆兌換一個。彼此不找一錢。此婢名雙喜。天津人。年十三歲。貌比春梧更陋。而略聰明。寓中男僕皆如故。孫在京一切。自知謹慎。伏望堂上大人放心。孫謹稟（道光二十一年八月初一日）

稟祖父母（論高麗參之功用及與英國議和）

孫男國藩跪稟祖父母大人萬福金安。九月十三日。接到家信。係七月父親在省所發。內有叔父及歐陽牧雲致函。知祖母於七月初三日。因感冒致急。不藥而愈。可勝欣幸。高麗參足以補氣。然身上稍有寒熱。服之便不相宜。

以後務須斟酌用之。若微覺感冒。卽忌用此物。平日康強時。和入丸藥內服最好。然此時家中。想已無多。不知可供明年一單丸藥之用否。若其不足。須寫信來京。以便覓便寄回。

四弟六弟考試。又不得志。頗難爲懷。然大器晚成。堂上不必以此置慮。聞六將來有夢熊之喜。幸甚。近叔父爲婦母之病。勞苦憂鬱。有懷莫宣。今六弟一索得男。則叔父含飴弄孫。瓜瓞日繁。其樂何如。

唐鏡海先生德望。爲京城第一。其令嗣極孝。亦係兄子承繼者。先生今年六十五歲。得生一子。人皆以爲盛德之報。

英夷在江南。撫局已定。蓋金陵爲南北咽喉。逆夷旣已扼吭而據要害。不得不權爲和戎之策。以安民而息兵。去年逆夷在廣東。曾經就撫。兵費去六百萬兩。此次之費。外間有言二千一百萬者。又有言此項皆勸紳民捐輸。不動帑藏者。皆不知的否。現在夷船已全數出海。各處防海之兵。陸續撤回。天津亦已撤退。讓撫之使。係伊里布耆英及兩江總督牛鑑三人。牛鑑有失地之罪。故撫局成後。卽革職拿問。伊里布去廣東。代奕山爲將軍。耆英爲兩江總督。自英夷滋擾。已歷二年。將不知兵。兵不用命。於國威不少損失。然此次讓撫。實出於不得已。但使夷人從此永不犯邊。四海晏然安堵。則以大事小。樂天之道。孰不以爲上策哉。

孫身體如常。孫婦及會孫兄妹並皆平安。同縣黃曉潭薦一老嫗吳姓來。因其妻凌虐婢僕。百般慘酷。求孫代爲開脫。孫接至家住一日。轉薦至方夔卿太守處。託其帶回湖南。大約明春可到湘鄉。今年進學之人。孫見題名錄。僅認識彭惠田一人。不知廿三四都進人否。謝寬仁吳光照取一等。皆少年可慕。一等第一。題名錄刻黃生平。不知卽黃星平否。

孫每接家信。常嫌其不詳。以後務求詳明。雖鄉間田宅婚嫁之事。不妨寫出。使遊子如仍未出里門。各族戚家。尤須一一示知。幸甚。敬請祖父母大人萬福金安。餘容後呈。孫謹呈。(道光二十一年九月十七日)

稟祖父母(告升翰林院侍講)

孫男國藩跪稟祖父母大人萬福金安。二月十九日。孫發第二號家信。三月十九日。發第三號。交金竺虔。想必五月中始可到省。孫以下闔家皆平安。三月初六日。奉上諭於初十日大輪考。在闈明園正大光明殿考試。孫初闈之心甚驚恐。蓋久不作賦。字亦生疎。向來大考。大約六年一次。此次自己亥歲二月大考到今。僅滿四年。萬不料有此一舉。故同人聞命之下時。無不惶悚。

孫與陳岱雲等在闈同寓。初十日卯刻進場。酉正出場。題目另紙敬錄。詩賦亦另謄出。通共輪詹一百二十七人。告病不入場者三人。病愈仍須補考。在殿上搜出夾帶。比交刑部治罪者一人。其餘皆整齊完場。十一日。皇上親閱卷。二月十二日。欽派閱卷大臣七人。閱畢。擬定名次。進呈皇上欽定。一等五名。二等五十五名。三等五十六名。四等七名。孫蒙皇上天恩。拔取二等第一名。湖南大輪林。二等四人。三等二人。另有全單。十四日引見。共升官者十一人。記名候升者五人。賞級者十九人。升官者不賞級。孫蒙皇上格外天恩。升授翰林院侍講。十七日謝恩。現在尙未補缺。有缺出即應補。其他升降賞賚。另有全單。

湖南以大考升官者。從前雍正二年。惟陳文肅公。一等等第一。以編修升侍講。近來道光十三年。胡雲閣先生。二等等第四。以學士升少詹。並孫三人而已。孫名次不如陳文肅之高。而升官與之同。此皇上破格之恩也。孫學問膚淺。見識庸鄙。受君父之厚恩。蒙祖宗之德蔭。將來何以爲報。惟當竭力盡忠而已。

金竺虔於廿一日回省。孫託帶五品補服四付。水晶頂戴二座。阿膠一斤半。鹿膠一斤。耳環一雙。外竺虔借銀五十兩。即以付回。昨在竺虔處寄第三號信。寄面信裏。皆寫銀四十兩。發信後。渠又借去十兩。故前後二信不符。竺虔於五月半可到省。若六弟九弟在省城。可面交。若無人在省。則家中專人去取。或諸弟有高與到省者。亦妙。今年考差。大約在五月中旬。孫擬於四月半。下闈用功。孫婦現已有喜。約七月可分娩。曾孫兄弟並如常。寓中今年添用一老媽。用度較去年略多。此次升官。約多用銀百兩。東扯西借。尙不窘迫。不知有部鄂報來家否。若其已來。開錯不可太多。孫十四引見。渠苦於廿八日以前報到。是真部鄂報。費銀四五十兩可也。若至四月始報。是尙

城僑報費數兩足矣。但家中景况不審何如。伏懇示悉爲幸。孫晚稟。道光二十二年三月廿三日。

稟祖父母（報告考差）

孫男國藩跪稟祖父母大人萬福金安。四月廿日孫發第五號家信。不知到否。五月廿九日接到家中第二號信。係三月初一發。六月初二日接第三號信。係四月十八發的。具悉家中老幼平安。百事順遂。欣幸之至。六弟下省讀書。從其所願。情意既暢。志氣必奮。將來必有大成。可爲叔父預賀。祖父去歲曾賜孫手書。今年又已半年。不知目力如何。下次信來。仍求親筆書數語示孫。大考喜信。不知開銷報人錢若干。

孫自今年來。身體不甚好。幸加意保養。得以無恙。大考以後。全未用功。五月初六日考差。孫委當完卷。雖無毛病。亦無好處。首題「使諸大夫國人皆有所矜式」經題「天下有道。則行有枝葉。」詩題「賦得角黍。得經字。」共二百四十一人進場。初八日派閱卷大臣十二人。每人分卷廿本。傳聞取七本。不取者者十三本。彌封未拆。故閱卷者亦不知所取何人。所黜何人。取與不取。一概進呈。恭候欽定。外間謠言。某人第一。某人未取。俱不足憑。總待放差後方可略測端倪。亦有真第一而不得。有真未取而得差者。諱以聽之而已。同鄉考差九人。皆委當完卷。六月初一。放雲南主考。龔寶蓮（辛丑榜眼）段大章（戊戌同年）貴州主考。龍元僖。王桂（庚子湖南主考）孫在京平安。孫婦及會孫兄妹皆如常。前所付銀諒已到家。高麗參目前難寄。容當覓便寄回。六弟在城南。孫已有信託陳堯農先生。同鄉官皆如舊。黃正齋生糧船來。已於六月初三到京。餘容後稟。（道光二十三年六月初六）

稟祖父母（請將銀贖贈戚族）

孫國藩跪稟祖父母大人萬福金安。二月十四日孫發第二號信。不知已收到否。孫身體平安。孫婦及會孫男女皆好。孫去年臘月十八。曾寄信到家。言寄家銀一千兩。以六百爲家中還債之用。以四百爲贖贈親族之用。其分贈數目。另載寄弟信中。以明不敢自專之義也。後接家信。知兌嘯山百三十千。則此銀已虧空一百矣。頃聞會受恬丁艱。其借銀恐難還完。則又虧空一百矣。所存僅八百。而家中舊債尙多。

餽贈親族之銀。係孫一人愚見。不知祖父母父親叔父以爲可行否。伏乞裁奪。孫所以汲汲餽贈者。蓋有二故。一則我家氣運太盛。不可不格外小心。以爲持盈保泰之道。舊債盡清。則好處太全。恐盈極生虧。留債不清。則好中不足。亦處樂之法也。二則各親戚家皆貧。而年老者。今不略爲扶助。則他日不知何如。自孫入都後。如彭滿舅曾祖彭王姑母。歐陽岳祖母。江運十舅。已死數人矣。再過數年。則意中所欲餽贈之人。正不知何若矣。家中之債。今雖不還。後尙可還。贈人之舉。今若不爲。後必悔之。此二者。孫之愚見如此。然孫少不更事。未能遠謀一切。求祖父叔父作主。孫斷不敢擅自專權。其銀待歐陽小岑南歸。孫寄一大箱衣物。銀兩概寄渠處。孫認一半車錢。彼時再有信回。孫謹稟。(道光二十四年二月初十日)

稟祖父母(告送率五回家及生女)

孫勇國藩跪稟祖父母大人萬福金安。八月廿七日。接到七月十五廿五兩次所發之信。內祖父母各一信。父親母親叔父各一信。諸弟亦皆有信。欣悉一切。慰幸之至。叔父之病。得此次信。始可放心。

八月廿八日。陳岱雲之弟送靈柩回南。坐糧船。孫以率五妹丈。與之同伴南歸。船錢飯錢。陳宅皆不受。孫送至城外。率五揮淚而別。甚爲可憐。率五來意。本欲考供事。冀得一官以養家。孫以供事必須十餘年。乃可得一典史。宦海風波。安危莫卜。卑官小吏。尤多危機。每見佐雜未秩。下場鮮有好者。孫在外已久。閱歷已多。故再三苦言勸率五居鄉。勤儉守舊。不必出外做官。勸之既久。率五亦以爲然。其打發行李諸物。孫一一辦妥。另開單呈覽。

孫送率五歸家。卽於是日申刻生女。母女俱平安。前正月間。孫寄銀回南。有餽贈親族之意。理宜由堂上定數目。方合內則不敢私與之道。孫此時糊塗。擅開一單。輕重之際。多不妥當。幸堂上各大人斟酌增減。方爲得宜。但岳家太多。他處相形見絀。孫稍有不安心耳。率五大約在春初可以到家。渠不告而出。心中懷慚。到家後。望大人不加責。並戒家中及近處無相譏訕爲幸。孫謹稟。(道光二十四年八月十九日)

稟祖父母(告會孫愛習字及曬皮衣之法)

孫國藩跪稟祖母大人萬福金安。孫在京平安。孫婦及曾孫男女四人皆好。曾孫最好寫字。散學後。則在其母房中。多寫至更初。猶不肯睡。罵亦不止。目下天寒墨凍。脫手寫多不成字。茲命之寫稟安帖寄呈。以博堂上大人一歡笑而已。

上半年所付黑狸皮料。不知祖父大人合身否。聞狸皮在南邊易於回潮。黑色變爲黃色。不知信否。若果爾。則回潮天氣。須勤勤檢視。又凡收皮貨。須在省城買潮腦。其色如白淮鹽。微帶黃色。其氣如樟木。用皮紙包好。每包約寸大。每衣內置三四包。收衣時。仍將此包置衣內。又每年曬皮貨。曬衣之日。不必折收。須過兩天。待熱氣退盡乃收。

江西家受恬明府。昨有信來。云此銀今冬必付到。不知近來接到否。如未接到。立即寫信來京。再去催取。兌銀之難。往往如此。

同鄉唐鏡海先生。三年以來。連生三子。而長者前以病殤。幼者昨又以痘殤。僅存次子。尙未周歲。良可悼歎。現在京官甚少。僅二十二人。昨十月廿五日。謝恩赴宮門叩頭者。僅到三人。尤非盛時氣象。茲將謝摺付回呈覽。母親生日。京中僅客一席。待明年嘗付壽屏回家。所需之物。須寫信來。明年會試後寄歸。孫國藩稟。（道光二十四年十一月廿一日）

稟祖母（報告補侍讀及皇上求雪）

孫國藩跪稟祖母大人萬福金安。十一月二十二日發十三號信。廿九日祖父大人壽辰。孫等叩頭遙祝。竊中客一席。次日請同縣公車一席。初七日皇上御門。孫得轉補翰林院侍讀。所遺侍讀缺。許乃釗補升。侍讀轉侍讀。照例不謝恩。故孫未具摺謝恩。今冬京中未得厚雪。初九日設三壇求雪。四五六阿哥詣三壇行禮。皇上親詣大高殿行禮。十一日即得大雪。天心感召。呼吸相通。良可賀也。

孫等在京平安。會孫讀書有恆。惟好寫字。見閒紙則亂畫。請其母釘成本子。孫今年用度尙寬裕。明年上半年尙

好。至五月後再作計較。昨接曾與仁信。知渠銀尙未還。孫甚著急。已寫信去催。不知家中今年可不窘。迫否。同鄉京官皆如故。馮樹堂郭筠仙在寓亦好。

荆七自五月出去。至今未敢見孫面。在同鄉陳洪鐘家。光景亦好。若使流落失所。孫亦必宥而收恤之。特渠對人言。情願餓死。不願回南。此實難處置。孫則情願多給銀兩。使他回去。不願他在京再犯出事。望大人明示以計。俾孫遵行。

四弟等自七月寄信來後。至今未再得信。孫甚切望。嚴太爺在京引見。來拜一次。孫回拜一次。又請酒。渠未赴席。此人向有狂妄之名。孫己亥年在家。一切不與之計較。故相安於無事。大約明春可回湘鄉任。孫謹稟。（道光二十四年十二月十四日）

稟祖父（欲另尋祖母墳地）

孫男國藩跪稟祖父大人萬福金安。去年十二月十七。發第廿二號信。並輓聯一包。朱心泉誥命一軸。交徐玉山太守。帶交蕭辛五處。想三月可到。又於廿日。發廿三號信。交摺弁。想二月可到。新正十五日。接到家中十一月十九所發信。敬悉大人之病。已愈大半。不知近日得全愈否。孫去冬信言。須參用化痰之藥。不知可從否。

祖母已於十二月初十安葬。甚好甚好。但孫有略不放心者。孫幸蒙祖父福佑。忝居卿大夫之末。則祖母墳塋。必須局面宏敞。其墓下拜掃之處。須寬闊。其外須建立誥封牌坊。又其外須立神道碑。木兜冲原墳。規模隘小。離河太近。無立牌坊與神道碑之地。是以孫不甚放心。意欲從容另尋一地。以圖改葬。不求富貴吉祥。但求無水蟻。無凶險。面前宏敞而已。不知大人以爲何如。若可則家中在近境四十里內從容尋地可也。餘俟續具。孫謹稟。（道光二十七年正月十七日）

稟父母（述到京後之狀況）

男國藩跪稟父母親大人膝下。去年十二月十六日。男在漢口寄家信付湘潭人和紙行。不知已收到否。後於念一日。在漢口開車。二人共雇二把手小車六輛。男占三輛半。行三百餘里。至河南八里汊度歲。正月初二日開車。初七日至周家口。即換大車。雇三套篷車二輛。每套錢十五千文。男占四套。朱占二套。初九日開車。十二日至河南省城。拜客就擱四天。獲百餘金。十六日起行。即於是日三更。趁風平浪靜。徑渡黃河。念八日到京。一路靖吉平安。天氣亦好。惟過年二天微雪耳。

到京在長郡會館卸車。二月初一日。移寓南橫街千佛庵。屋四間。每月賃錢四千文。與梅陳二人居趾甚近。三月聯會。間日一課。每課一賦一詩。謄真。初八日是湯中堂老師大課。題「智若禹之行水賦」。以「行所無事。則智大矣」。爲韻。詩題「賦得池面魚吹柳絮行。得吹字」。三月尙有大課一次。同年未到者不過二人。梅陳二人皆正月始到。

岱雲江南山東之行。無甚佳處。到京除償債外。不過存二三金。又有入口之家。

男路上用去百金。刻下光景頗好。接家眷之說。鄧小珊現無回信。伊若允諾。似儘妥妙。如其不可。則另圖善計。或緩一二年亦可。因兒子太小故也。家中諸事。都不呈念。惟諸弟讀書。不知有進境否。須將所作文字詩賦。寄一二首來京。丹閣叔大作。亦整寄示。男在京一切謹慎。家中儘可放心。

又稟者。大行皇后於正月十一日升遐。百日以內。禁薙髮。期年禁宴會音樂。何仙槎年伯於二月初五日溘逝。是日男在何家早飯。並未聞其染病。不數刻而凶音至矣。歿後加太子太保銜。其次子何子毅。已於去年十一月物故。自前年出京後。同鄉相繼殞逝者。夏一清。李高衢。楊寶筠。三主事。熊子謙。謝訥庵。及何氏父子。凡七人。光景爲之一變。

男現慎保身體。自奉頗厚。朱師徐師靈櫬。並已回南矣。詹有乾家墨到京。竟不可用。以膠太重也。擬仍付回。或退

或用。隨便。接家眷事。三月又有信回。家中信來。須將本房及各親戚家附載詳明。堂上各老人煩一分敘。以煩瑣爲貴。謹此跪稟萬福金安。(道光二十一年二月初九日)

稟父母(謹守保身之訓)

男國藩跪稟父母親大人萬福金安。自閏三月十四日。在都門拜送父親。嗣後共接家信五封。五月十五日。父親到長沙發信。內有四弟信。六弟文章五首。謹悉祖父母大人康強。家中老幼平安。諸弟讀書發奮。並喜父親出京。一路順暢。自京至省。僅三十餘日。真極神速。

適際男身體如常。每夜早眠。起亦漸早。惟不耐久思。思多則頭昏。故常冥心於無用。優游涵養。以謹守父親保身之訓。九弟功課有常。禮記九本已點完。鑑已看至三國。斯文精粹詩文。各已讀半本。詩略進功。文章未進功。男亦不求速效。觀其領悟。已有心得。大約手不從心耳。

甲三於四月下旬能行走。不須扶持。尙未能言。無乳可食。每日一粥兩飯。家婦身體亦好。已有夢熊之喜。婢僕皆如故。

今年新進士龍翰臣得狀元。係前任湘鄉知縣。見田年伯之世兄。同鄉六人。得四席常。兩知縣。覆試單已於閏三月十六日付回。茲又付呈殿試朝考全單。

同鄉京官如故。鄭莘田給諫服闋來京。梅霖生病勢沉重。深爲可慮。黎樾喬老前輩處。父親未去辭行。男已道達此意。廣東之事。四月十八日得捷音。茲將抄報付回。

男等在京。自知謹慎。堂上各老人。不必望懷。家中事。蘭姊去年生育。是男是女。楚管事如何成就。伏望不知。男謹稟。卽請父母親大人萬福金安。(道光二十一年五月十八日)

稟父母(籌畫歸還借款)

男國藩跪稟父母親大人萬福金安。彭山峴進京。道上爲兩泥所苦。又值黃河水漲。渡河時大費力。行旅衣服皆

濕。淮男所寄書。渠收貯箱內。全無損。真可感也。到京又以臘肉葷茶送男。渠於初九晚到。男於十三日請酒。十六日將四十千錢交楚。渠於十八日賃住黑市。離城十八里。係武會試進場之地。男必去送考。

男在京身體平安。國荃亦如常。男歸於六月廿三四感冒。服藥數帖全愈。又服安胎藥數帖。紀澤自病全愈。後接又服補劑十餘帖。辰下體已復元。每日行走歡呼。雖不能言。已無所不知。食粥一大碗。不食零物。僕婢皆如常。周貴已薦隨陳雲心回南。其人蠢而負恩。蕭祥已跟別人。男見其老成。加錢呼之復來。

男目下光景漸窘。恰有俸銀接續。冬下又望外官例寄炭資。今年尙可勉強支持。至明年則更難籌畫。借錢之難。京城與家鄉相仿。但不勒迫強逼耳。前次寄信回家。言添梓坪借項內。松軒叔兄弟實代出錢四十千。男可寄銀回家。完清此項。近因完彭山此項。又移徙房屋。用錢日多。恐難再付銀回家。男現看定屋在繩匠胡同北頭路東。準於八月初六日遷居。初二日已搬一香案去。取吉日也。棉花六條胡同之屋。王翰城言冬間極不吉。且言重慶下者。不宜住三面懸空之屋。故遂遷移繩匠胡同。房租每月大錢十千。收拾又須十餘千。

心齋借男銀已全楚。渠家中付來銀五百五十兩。又有各項出息。渠言尙須借銀出京。不知信否。

男已於七月留鬚。楚善叔有信寄男。係四月寫。備言其苦。近聞衡陽田已賣。應可勉強度日。戊戌冬所借十千二百。男曾言幫他。曾稟告叔父。未稟祖父大人。是男之罪。非渠之過。其餘細微曲折。時成時否。時朋買。時獨買。叔父信不甚詳明。楚善叔信甚詳。男不敢盡信。總之渠但免債主追迫。即是好處。第目前無屋可住。不知何處安身。若萬一老親幼子。棲託無所。則流離四徙。尤可憐憫。以男愚見。可仍使渠住近處。斷不可住衡陽。求祖父大人代渠謀一安居。若有餘費。則佃田耕作。又求父親寄信問朱堯階。備言楚善光景之苦。與男關注之切。問渠所營產業。可佃與楚善耕否。渠若允從。則男另有信求堯階。租穀須格外從輕。但路太遠。至少亦須耕六十畝。方可了吃。堯階毒屏。託心齋帶回。嚴麗生在湘鄉。不理公事。簞簞不飭。聲名狼籍。如查有真實劣蹟。或有上案。不妨抄錄付京。因有御史在男處查訪也。但須機密。四弟六弟考試。不知如何。得不足喜。失不足憂。總以發憤讀書為主。史宜

日日看。不可間斷。九弟閱易知錄。現已看至隋朝。溫經須先窮一經。一經通後。再治他經。切不可兼營並騫。一無所得。右謹稟父母親大人萬福金安。(道光二十一年八月初三日)

稟父母(借銀寄回家用)

男國藩跪稟父母親大人萬福金安。十四日接家信。內有父親叔父並丹閣叔信各一件。得悉丹閣叔入泮。且堂上各大人康健。不勝欣幸。男於八月初六日。移寓繩匠胡同。北頭路東。屋甚好。共十八間。每月房租京錢二十千文。前在棉花胡同。房甚偏仄。此時房屋爽塏。氣象軒敞。男與九弟言。恨不能接堂上各大人來京住此。

男身體平安。九弟亦如常。前不過小恙。兩日即愈。未服補劑。男三自病體復元後。日見肥胖。每日歡呼趨走。精神不倦。家婦亦如恆。九弟禮記讀完。現讀周禮。心齋兄於八月十六日。男向渠借銀四十千。付寄家用。渠允於到湘鄉時。送銀廿八兩交勤七處。轉交男家。且言萬不致誤。男訂待渠到京日。償還其銀。若到家中。不必還他。又男寄有冬菜一籃。朱堯階壽屏一付。在心齋處。冬菜託交勤七叔送至家。壽屏託交朱嘯山轉寄。

香海處。月內準有信去。王雖園處。去冬有信去。至今無回信。殊不可解。顏字不宜寫白摺。男擬改臨褚柳。去年跪託叔父大人之事。承已代覓一具。感戴之至。泥首萬拜。若得再覓一具。即於今冬明春辦就更妙。敬謝叔父。另有信一函。在京一切自知謹慎。男跪稟。(道光二十一年八月十七日)

稟父母(九弟急欲南歸)

男國藩跪稟父母親大人萬福金安。八月十四日家信三件。內係得父親信一。叔父信一。丹閣叔信一。十八日男發家信第十二號。不知已收到否。

男等在京。身體平安。甲三母子如常。惟九弟迫思南歸。不解何故。自九月初間。即欲言歸。男始聞該異。再四就詢。終不明言。不知男何處不友。遂爾開罪於弟。使弟不願同居。男勸其明白陳辭。萬不可蘊藏於心。稍生猜疑。如男有不是。弟宜正容責之。婉言導之。使男改過自贖。再三勸諭。弟終無一言。如男全無過愆。弟願歸侍定省。亦宜寫

信先告知父親。待回信到時。家中諭令南歸。然後擇件束裝。尙未爲晚。

男因弟歸志已決。百計阻留。勸其多住四十天。而弟仍不願。欲與彭山岬同歸。彭會試罷。擬九月底南旋。現在尙少途費。待渠家寄銀來京。男目下告匱。九弟若歸。途費甚難措辦。

英夷在浙江滋擾日甚。河南水災。豫楚一路。飢民甚多。行旅大有戒心。胡詠之前輩扶襯南歸。行李家眷。雇一大船。頗挾重貲。聞昨已被搶劫。言之可慘。

九弟年少無知。又無大幫作伴。又無健僕。又無途費充裕。又值道上不甚恬謐之際。兼此數者。男所以大不放心。萬萬不令弟歸。卽家中聞之。亦萬萬放心不下。

男現在苦留九弟在此。弟若婉從。則讀書如故。半月內男又有稟呈。弟若執拗不從。則男當責以大義。必不令其獨行。自從閏三月以來。弟未嘗片言違忤。男亦從未加以辭色。兄弟極爲懽樂。茲忽欲歸。男寢饋難安。展轉思維。不解何故。男萬難辭咎。父親寄諭來京。先責男教書不盡職。待弟不友愛之罪。後責弟年少無知之罪。弟嘗翻然改悟。男教訓不先。鞠愛不切。不勝戰慄待罪之至。伏望父母親俯賜懲責。俾知悛悔遵守。斷不致悞過飾。非致兄弟仍稍有嫌隙。男謹稟告家中。望無使外人聞知。疑男兄弟不睦。九弟不過堅執。無絲毫怨男也。男謹稟。(道光二十一年九月十五日)

稟父母(九弟暫不歸家)

男國藩跪稟父母親大人萬福金安。十月十七日。接奉在縣城所發手諭。知家中老幼安吉。各親戚家並皆如常。七月廿五由黃恕皆處寄信。八月十三日由縣附信寄摺差。皆未收到。男於八月初三發第十一號家信。十八發第十二號。九月十六發第十三號。不知皆收到否。

男在京身體平安。近因體氣日強。每天發奮用功。早起溫經。早飯後讀廿三史。下半日閱詩古文。每日共可看書八十頁。皆過筆圈點。若有就擱。則止看一半。九弟體好如常。但不甚讀書。前九月下旬。迫切思歸。男再四勸慰。詢

其何故。九弟終不明言。惟不讀書。不肯在上房共飯。男但就弟房二人同食。男婦獨在上房飯。九月一月皆如此。弟待男恭敬如常。待男婦和易如常。男夫婦相待亦如常。不解因其思歸之故。

男告弟云。「凡兄弟有不是處。必須明言。萬不可蓄疑於心。如我有不是。弟當明爭婉諷。我若不聽。弟當爲信稟告堂上。今欲一人獨歸。浪用途費。錯過光陰。道路艱險。爾又年少無知。祖父母父母聞之。必且食不甘味。寢不安枕。我又安能放心。是萬不可也等語。」又寫信一封。詳言不可歸之故。共二千餘字。又作詩一首示弟。弟微有悔意。而尙不讀書。

十月初九。男及弟等恭慶壽辰。十一日。男三十初度。弟具酒食。肅衣冠。爲男祝賀。嗣後復在上房四人共飯。和好無猜。

昨接父親手諭中。有示荃男一紙。言境遇難得。光陰不再等語。弟始愧悔讀書。男教弟千萬言。而弟不聽。父教弟數言。而弟遽惶恐改悟。是知非弟之咎。乃男之不能友愛。不克修德化導之罪也。伏求更賜手諭。責男之罪。俾男得率教改過。幸甚。

男婦身體如常。器男日見結實。皮色較前稍黑。尙不解語。男自六月接管會館公項。每月收房租大錢十五千文。此項例聽經管支用。俟交卸時算出。不算利錢。男除用此項外。每月僅用銀十一二兩。若稍省儉。明年尙可不借錢。比家中用度較奢華。祖父母父母不必懸念。男本月可補國史館協修官。此輪次挨派者。英夷之事。九月十七大勝。在福建台灣。生擒夷人一百三十三名。斬首三十二名。大快人心。同鄉何宅盡室南歸。餘俱如故。

又呈附錄詩一首云。

「松柏駢危巖。葛藟相鉤帶。兄弟匪他人。患難亦相賴。行酒烹肥羊。嘉賓填門外。喪亂一以聞。寂寞何人會。維鳥有鷄鷄。維獸有狼狽。兄弟審無猜。外侮將予奈。願爲同岑石。無爲水下瀨。水急不可磯。石堅猶可礎。誰謂百年長。倉皇已老大。我邁而斯征。辛勤共纓纒。來世安可期。今生勿玩愒。」（道光二十一年十月十九日）

稟父母（在外借債過年）

男國藩跪稟父母親大人萬福金安。十一月十八日。男有信寄呈。寫十五日生女事。不知到否。昨十二月十七日。奉到手諭。知家中百凡順遂。不勝欣幸。男等在京。身體平安。孫男孫女皆好。現在共用四人。荆七專抱孫男。以春梅事多。不兼顧也。孫男每日清晨。與男同起。即送出外。夜始接歸上房。孫女滿月。有客一席。九弟讀書。近有李碧峯同居。較有樂趣。男精神不甚好。不能勤教。亦不督責。每日兄弟笑語歡娛。蕭然自樂。而九弟似有進境。茲將昨日課文原稿呈上。

男今年過年。除用去會館房租六十千外。又借銀五十兩。前日冀望外間或有炭資之贈。今冬乃絕無此項。聞今年家中可盡完舊債。是男在外有負累。而家無負累。此最可喜之事。岱雲則南北負累。時常憂發。然其人忠信篤敬。見信於人。亦無窘迫之時。

同鄉京官俞岱青先生告假。擬明年春初出京。男便附鹿肉。託渠帶回。杜蘭溪周華甫皆擬送家眷出京。岱雲約男同送家眷。男不肯送。渠謀亦中止。彭山岷出京。男爲代借五十金。昨已如數付來。心齋臨行時。約送銀廿八兩。至勤七叔處。轉交我家。不知能踐言否。嗣後家中信來。四弟六弟各寫數行。能寫長信更好。男謹稟。（道光二十一年十二月二十一日）

稟父母（便附家中大布及茶葉）

男國藩跪稟父親大人萬福金安。男與九弟身體清吉。家婦亦平安。孫男甲三體好。每日吃粥兩頓。不吃零星飲食。去冬已能講話。孫女亦體好。乳食最多。合寓順適。今年新正。景象陽和。較去年正月。甚爲煥發。

茲因俞岱青先生南回。付鹿脯一方。以爲堂上大人甘旨之需。鹿肉恐難寄遠。故薰臘附回。此間現有薰臘肉猪舌猪心臘魚之類。與家中無異。如有便附物來京。望附茶葉大布而已。茶葉須託朱堯階清明時在永豐買。則其價亦廉。茶葉亦好。家中之布。附至此間。爲用甚大。但家中費用窘迫。無錢辦此耳。

同縣李碧峯。苦不堪言。男代爲張羅。已覓得館。每月學俸銀三兩。在男處將住三月。所費無幾。而彼則感激難名。館地現尙未定。大約可成。在京一切自知謹慎。卽請父母親大人萬福金安。(道光二十二年正月初七日)

稟父母(九弟擇日南歸)

男國藩跪稟父母親大人萬福金安。新正月初七日。男發第一號家信。並鹿脯一方。託俞岱青先生交彭山峴寄轉。不知到否。去年臘月十九。發家信。內共信十餘封。想已到矣。初七日信。係男荃代書。初八早。男兄弟率合寓上下。焚香祝壽。下半日荃弟患病。發熱畏寒。遍身骨節痛。脅氣疼痛。次早。請小珊診。係時疫證。連日服藥。現已大愈。小珊云。『凡南人體素陰虛者。入京多患此證。從前彭棟樓夫婦皆患此證。羅蘇溪勞辛階鄭小珊周華甫。亦曾有此病。』

男庚子年之病。亦是此證。其治法不外滋陰祛邪。二者兼顧。九弟此次之病。又兼肝家有鬱。胃家有滯。故病勢來得甚陡。自初八日至十三。脅氣疼痛。呻吟之聲震屋瓦。男等日夜惶懼。初九卽請吳竹和醫治。連日共請四醫。總以竹如爲主。小珊爲輔。十四日。脅痛已止。肝火亦平。十五日。已能食粥。日減日退。現在微有邪熱在胃。小珊云。『再過數日。邪熱祛盡。卽可服補劑。本月盡當可復體還元。』

男自己亥年進京。庚子年自身大病。辛丑年孫兒病。今年九弟病。仰託祖父母父母福蔭。皆保萬全。何幸如之。因思丁酉春祖父之病。男不獲在家伏侍。至今尙覺心悸。

九弟意欲於病體起復後歸家。男不敢復留。待他全好時。當借途費。擇良伴。令其南歸。大約在三月起行。英逆去秋。在浙滋擾。冬間無甚動作。若今春不來天津。或來而我師全勝。使彼片帆不返。則社稷蒼生之福也。黃河決口。去歲動工。用銀五百餘萬。業已告竣。臘底又復決口。湖北崇陽民變。現在調兵剿辦。當易平息。餘容續稟。男謹呈。

(道光二十二年正月十八日)

稟父母(九弟習字長進)

男國藩跪稟父母親大人萬福金安。九弟之病自正月十六日後日見強旺。二月一日開葷。現全復元矣。二月以來日日習字。時有長進。男亦常習小楷。以爲明年考差之具。近來政臨智永千字文帖。不復臨顏柳二家帖。以不合時宜故也。

孫男身體甚好。每日佻達歡呼。曾無歇息。孫女亦好。

浙江之事。聞於正月月底交戰。仍爾不勝。去歲所失甯波府城。定海鎮海二縣城。尙未收復。英夷滋擾以來。皆漢奸助之爲虐。此輩食毛踐土。喪盡天良。不知何日罪惡貫盈。始得聚而殲滅。

湖北崇陽縣逆賊鍾人杰爲亂。攻占崇陽通城二縣。裕制軍卽日撲滅。將鍾人杰及逆黨檻送京師正法。餘孽俱已搜盡。鍾逆倡亂不及一月。黨羽姻屬。皆伏天誅。

黃河去年決口。昨已合龍。大功告成矣。

九弟前病中思歸。近因難覓好伴。且聞道上有虞。是以不復作歸計。弟自病好後。亦安心不甚思家。李碧峯在寓住三月。現已找得館地。在唐同年李杜家教書。每月俸金二兩。月費一千。

男於二月初配丸藥一料。重三斤。約計費錢六千文。男等在京謹慎。望父母親大人放心。男謹稟。（道光二十二年二月二十四日）

稟父母（告孫女種牛痘及經濟狀況）

男國藩跪稟父母親大人萬福金安。三月初。奉大人正月十二日手諭。具悉一切。又知附有布疋臘肉等。在黃茆脚處。第不知黃氏兄弟。何日進京。又不知家中係專人送至省城。抑託人順帶也。

男在京身體如常。男婦亦清吉。九弟體已復元。前二月間。因其初愈。每日只令寫字養神。三月以來。仍理舊業。依去年功課。未服補劑。男分丸藥六兩與他吃。因年少不敢峻補。孫男女皆好。擬於三月間點牛痘。此間牛痘局。係廣東京官請名醫設局積德。不索一錢。萬無一失。

舅近來每日習字。不多看書。同年邀爲試帖詩課。十日內作詩五首。用白摺寫好公評。以爲明年考差之具。又吳子序同年。有兩弟在舅處附課看文。又金臺書院每月月課。舅亦代人作文。因久荒制藝。不得不略爲溫習。

此刻光景已窘。幸每月可收公項房錢十五千外。些微挪借。即可過度。京城銀錢。比外間究爲活動。家中去年繳底澄清。餘債無多。此真可喜。

蕙妹僅存錢四百千。以二百在新鑿食租。不知住何人屋。負薪汲水。又靠何人。率五又文弱。何能習勞。後有家信。望將蕙妹家事。瑣細詳書。餘容後呈。舅謹稟。(道光二十二年二月十一日)

稟父母(兩弟患業不精)

舅國藩跪稟父母親大人萬福金安。六月廿八日。接到家書。係三月廿四日所發。知十九日四弟得生子。男等合室相慶。四妹生產雖難。然血暈亦是常事。且此次既能保全。則下次較爲容易。舅未得信時。常以爲慮。既得此信。如釋重負。

六月底。我縣有人來京捐官。言四月縣考時。渠在城內。並在彭輿岐丁信風兩處。面晤四弟六弟。知渠首是吳定五。男十三年前。在陳氏宗祠讀書。定五纔發蒙作起講。在楊長齋處受業。來年聞吳春崗說定五甚爲發奮。今果得志。可謂成就甚速。其餘前十名。及每場題目。渠已忘記。後有信來。乞四弟寫出。

四弟六弟考運不好。不必置懷。俗語云。「不怕進得遲。只要中得快。」從前邵丹陛前輩。四十三歲入學。五十二歲作學政。現任廣西藩臺汪羽渠。於道光十二年入學。十三年點狀元。阮芸臺前輩。於乾隆五十三年。縣府試頭場皆未取。卽於是年入學中舉。五十四年點翰林。五十五年留館。五十六年大考第一。比放浙江學政。五十九年陞浙江巡撫。些小得失不足慮。特患業之不精耳。兩弟場中文若得意。可將原卷領出寄京。若不得意。不寄可也。舅輩在京平安。紀澤兄妹二人。體甚結實。皮色亦黑。

逆夷在江蘇滋擾。於六月十一日攻陷鎮江。有大船數十隻。在大江遊弋。江甯揚州二府。頗可危慮。然而天不降

災。聖人在上。故京師人心鎮定。同鄉王翰城告假出京。男與陳岱雲亦擬送家眷南旋。與鄭莘田王翰城四家同隊出京。男與陳家。本於六月底定計。後於七月初一請人扶乩。似可不必輕舉妄動。是以中止。現在男與陳家。仍不送家眷回南也。

正月間。俞岱青先生出京。男寄有鹿脯一方。託找彭山蛇轉寄。俞後託謝吉人轉寄。不知到否。又四月託李景岡寄銀寄筆。託曹西垣寄蓆並交陳季牧處。不知到否。前父親教男養鬚之法。男僅留上唇鬚。不能用水浸透。色黃者多。黑者少。下唇擬待三十六歲始留。男屢接家信。嫌其不詳。嗣後更願詳示。男謹稟。（道光二十二年六月初十日）

稟父母（九弟路上安否）

男國藩跪稟父母親大人萬福金安。九弟自七月十六日出京。廿三即有信來京。嗣後在道上未發信來。刻下想已到蕩城矣。不知道上果平安否。男實難放心。黃河決口百九十餘丈。在江南桃源縣之北。為患較去年河南。不過三分之一。逆夷在江南。半月內無甚消息。大約和議已成。

同縣有黃鑑者。為口外宣化巡檢。去年回家。在湘鄉帶一老媽來京。因使用不合。仍託人攜帶南歸。現寄居男寓。求男代覓地方附回。途費則黃自出。謝果堂先生已於八月初六出京。住京兩月。與男極相投合。臨別依依。同鄉如唐鏡海。俞岱青。謝肯堂。三前輩。皆老成典型。於男皆青眼相待。何子貞全家已來京。男婦及孫男女身體如常。此次擢差於七月十六日在省起身。懇父親彼時尙在省城。不知何以無信。陳岱雲家信言。學院十六封門。四弟六弟府考。渠亦不知。彭王姑墓誌銘。九弟起程時。倉卒未及寫。今寫畢。又無便寄。求告知徵一表叔。正月所辦壽具。不知已漆否。萬不可用黃二漆匠。此人男深惡之。他亦不肯盡心也。彭宮五亦不可用。彼未學過。且太遲鈍。餘俟續稟。男謹稟。（道光二十二年八月十二日）

稟父母（痛改過失）

男國藩跪稟父母親大人萬福金安。十月廿二。奉到手諭。敬悉一切。鄭小珊處。小隙已解。男從前於過失。每自忽略。自十月以來。念念改過。雖小必懲。其詳具載。示弟書中。

耳鳴近日略好。然微勞即鳴。每日除應酬外。不能不略自用功。雖欲節勞。實難再節。手諭示以節勞。節欲。節飲食。謹當時時省記。

蕭辛五先生處寄信。不識靠得住否。龍翰臣父子。已於十一月初一日到。布正線索。俱已照單收到。惟茶葉尚在。黃恕皆處。恕皆有信與男。本月可到也。男婦及孫男女等皆平安。餘詳於弟書。謹稟（道光二十二年十月二十六日）

稟父母（年漆壽材一次）

男國藩跪稟父母親大人萬福金安。十二月十四日。奉到十月初七手諭。敬悉一切。芝妹又小產。男恐其氣性太躁。有傷天和。亦於生產有礙。以後須平心和氣。伏望大人教之。朱備之。世兄任實慶同知。其人渾樸。京師頗有笑其憨者。實則篤厚君子也。

漆壽具。既用黃二漆匠亦好。男斷不與此等小人計較。但恐其不盡心耳。聞瓷灰不可多用。多用則積久易脫。不如多漆厚漆。有益無損。不知的否。以後每年四具。必須同漆一次。男每年必付四兩銀至家。專爲買漆之用。

九弟前帶回銀十兩。爲堂上吃肉之費。不知已用完否。男等及孫男女身體俱如常。今年用費共六百餘金。絕不窘手。左右逢源。綽有餘裕。另有寄弟信。詳言之。

正月祖父大人七十大壽。男已作壽屏兩架。明年有便。可付回一架。

今年京察。京城各衙門京察堂官。出考語。列等第。取一等者。卽外放道府。湖南惟黎澍喬得一等。翰林未滿三年俸者。例不京察。同鄉黃蕪卿兄弟到京後。收到茶葉一篋。重廿斤。儘可供二年之食。惟託人東西太大。不免累贅。

心實不安。而渠殊不介意也。在京一切自知謹慎。男謹稟。（道光二十二年十二月二十日）

稟父母（促四弟季弟師覺庵。六弟九弟下省讀書）

男國藩跪稟父母親大人萬福金安。正月八日。恭慶祖父母雙壽。男去臘作壽屏二架。今年同鄉送壽對者五人。拜壽來客四十人。早麵四席。晚酒三席。未吃晚酒者。於十七日廿日補請二席。又倩人畫椿萱重蔭圖。觀者無不歎羨。

男身體如常。新年應酬太繁。幾至日不暇給。媳婦及孫兒女俱平安。正月十五。接到四弟六弟信。四弟欲偕季弟從汪覺庵師遊。六弟欲偕九弟至省城讀書。男思大人家事日煩。必不能常在家塾照管諸弟。且四弟天分平常。斷不能一日無師。講書改詩文。斷不可一課就擱。伏望堂上大人俯從男等之請。即命四弟季弟從覺庵師。其束修銀。男於八月付回。兩弟自必加倍發奮矣。

六弟實不羈之才。鄉間孤陋寡聞。斷不足以啓其見識而堅其心志。且少年英銳之氣。不可久挫。六弟不得入學。既挫之矣。欲進京而男阻之。再挫之矣。若又不許肄業省城。則毋乃太挫其銳氣乎。伏望堂上大人俯從男等之請。即命六弟九弟下省讀書。其費用。男於二月間付銀廿兩。至金竺虔家。

夫家和則福自生。若一家之中。兄有言。弟無不從。弟有請。兄無不應。和氣蒸蒸而家不興者。未之有也。反是而不敗者。亦未之有也。伏望大人察男之志。即此敬稟叔父大人。恕不另具。六弟將來必爲叔父克家之子。即爲吾族光大門第。可喜也。謹述一二。餘續稟。（道光二十二年正月十七日）

稟父母（順四弟六弟之意任其來京讀書）

男國藩跪稟父母大人萬福金安。二月十六日。接到家信第一號。係新正月初三交彭山岬者。敬悉一切。去年十二月十一。祖父大人忽患腸風。賴神靈默佑。得以速痊。然遊子聞之。尙轉心慄。六弟生女。自是大喜。初八日恭逢壽誕。男不克在家慶祝。心猶依依。

諸弟在家不聽教訓。不甚發奮。男觀諸來信即已知之。蓋諸弟之意。總不願在家塾讀書。自己亥年男在家時。即有此意。牢不可破。六弟欲從男進京。男因散館去留未定。故此時未許。庚子年接家眷。即請弟等送。意欲弟等來京讀書也。特以祖父母在上。男不敢許。以故但寫諸弟而不指定何人。迨九弟來京。其意頗遂。而四弟六弟之意。尙未遂也。年年株守家園。時有耽擱。大人又不能常在家教之。近地又無良友。考試又不利。兼此數者。拂鬱難伸。故四弟六弟不免怨男。其所以怨男者有故。丁酉在家教弟。威克厥愛。可怨一矣。己亥在家。未嘗教弟一字。可怨二矣。臨進京不肯帶六弟。可怨三矣。不爲弟另擇外傳。僅延丹閣叔教之。拂厥本意。可怨四矣。明知兩弟不願家居。而屢次信回。勸弟寂守家塾。可怨五矣。惟男有可怨者五端。故四弟六弟難免內懷隱衷。前此含意不申。故從不寫信與男。去臘來信甚長。則盡情吐露矣。男接信時。又喜又懼。喜者喜弟志氣勃勃。不可遏也。懼者男再拂弟意。將傷和氣矣。兄弟和睦。窮氓小戶必興。兄弟不和。雖世家宦族必敗。男深知此理。故稟堂上各位大人。俯從男等兄弟之情。實以和睦兄弟爲第一。九弟前年欲歸。男百般苦留。至去年則不復強留。亦恐拂弟意也。臨別時彼此戀戀。情深似海。故男自九弟去後。思之尤切。信之尤深。謂九弟縱不爲科目中人。亦嘗爲孝弟中人。兄弟人人如此。可以終身互相依倚。則雖不得祿位。亦何傷哉。

伏讀手諭。謂男教弟宜明言責之。不宜瓊瑣告以闕歷工夫。男自憶連年教弟之信。不下數萬字。或明責。或婉勸。或博稱。或約指。知無不言。總之盡心竭力而已。男婦孫男女身體皆平安。伏乞放心。男謹稟。（道光二十三年二月十九日）

稟父母（盤查國庫巨案）

男國藩跪稟父母親大人萬福金安。三月二十日。男發第三號信。廿四日發第四號信。諒已收到。託金竺虔帶回之物。諒已照信收到。男及男婦孫男女皆平安如常。男因身子不甚壯健。恐今年得差勞苦。故現服補藥。預爲調養。已作丸藥兩單。考差尙無信。大約在五月初旬。四月初四御史陳公上摺直諫。此近日所僅見。朝臣仰之如景。

星慶雲，茲將摺稿付回。

三月底盤查國庫，不對數銀九百二十五萬兩。歷任庫官及查庫御史，皆草職分賠。查庫王大臣亦攤賠。此從來未有之巨案也。湖南庫查御史有石承藻、劉夢蘭二人。查庫大臣有周系英、劉權之、何凌漢三人。已故者令子孫分賠。何家須賠銀三千兩。同鄉唐詩甫、李杜選、陝西靖邊縣。於四月廿一出京。王翰城選山西冀寧州知州。於五月底可出京。餘俱如故。男二月接信後，至今望信甚切。男謹稟。（道光二十三年四月二十日）

稟父母（暫緩兒女聯姻）

男國藩跪稟父母親大人萬福金安。五月十一，接到四月十三自省城所發信，具悉一切。母親齒痛，不知比從前略鬆否。現服何藥。下次望四弟寄方來看。叔父之病，至今未愈。想甚沉重。望將藥方病證書明寄京。劉東屏醫道甚精。然高雲亭猶嫌其過於膽大。不知近日精進何如。務宜慎之又慎。

王率五荒唐如此。何以善其後。若使到京，男當嚴以束之。婉以勸之。明年會試後，借公車南歸。自然安置妥當。家中儘可放心。特恐其不到京耳。本家受恬之銀，男當寫信去催。江西撫台係男戊戌座師，男可寫信提及，亦不能言調劑之說。

常南陵之世兄，聞其宦家習氣太重。孫男孫女尚幼，不必急於聯婚。且男之意，兒女聯姻，但求勤儉孝友之家，不願與宦家結契聯婚。不使子弟長奢惰之習。不知大人意見何如。望即日將常家女庚退去。託陽九婉言以謝。

前男送各戚族家銀兩，不知祖父父親叔父之意云何。男之淺見，不送則家家不送。要送則家家全送。要減則每家減去一半。不減則家家不減。不然，口惠而實不至。親族之間，嫌怨叢生。將來學生不測，反成仇讎。伏乞堂上審慎施行。百叩百叩。男謹稟。（道光二十四年五月十二日）

稟父母（無法位置妹夫）

男國藩跪稟父母親大人萬福金安。五月十二日，男發第六號信，其信甚厚。內有寄歐陽小岑、黃仙垣、梁菴莊三

處貨物單。此刻三人想俱到省。不審已照單查收否。男及男婦身體清吉。慕兒亦好。六月十七日。三字經讀完。十八日起讀爾雅。二孫女皆好。馮樹堂郭筠仙皆在寓如常。

王率五妹夫於五月二十三日到京。其從弟仕四同來。二人在湘潭支錢十千。在長沙搭船。四月十二日至漢口。在漢口杉板廠內住十天。廿二在漢口起身。步行至京。道上備嘗辛苦。幸天氣最好。一路無雨無風。平安到京。在道上僅傷風兩日。服藥二帖而愈。到京又服涼藥二帖。補藥三帖。現在精神全好。初到京時。遍身衣褲鞋襪皆壞。件件臨時新製。而率五仍不知艱苦。京城實無位置。只得暫留男寓。待有便即令他回家。男自調停妥當。家中不必挂心。蕙妹亦不必著急。至於仕四目前尚在男寓喫飯。待一月既滿。如有朋友回南。則薦仕四作僕人帶歸。如無便可薦。則亦只得麾之出門。不能常留男寓也。

湖北主考倉少平。係男同年相好。男託倉帶仕四到湖北。倉七月初一出京。男給仕四錢約六千。即可安樂到家。本不欲優待也。然不如此。則稟必流落京城。恐終爲男之累。不如早打發他回爲妥。祖父大人於四月鼻血多出。男聞不勝惶恐。聞率五說祖父近日不喫酒。不甚健步。不知究竟如何。萬求一一詳示。叔父病勢似不輕。男尤望心。務求將病證開示。

男教習庶吉士。五月十八日上學門生六人。二十日蒙皇上御勤政殿召見。天語垂問及男奏對。約共六七十句。今年考差。只剩河南山東山西三省。大約男已無望。男今年甚怕放差。蓋因去年男婦生產。是踏花生。今年恐走舊路。出門難以放心。且去年途中之病。至今心悸。男日來應酬已少。讀書如故。寓中用度浩繁。共二十口喫飯。實爲可怕。居家保身。一切男自知謹慎。大人不必望念。男謹稟。(道光二十四年六月廿二日)

稟父母(勸弟除驕傲氣)

男國藩跪稟父母親大人萬福金安。六月二十三日。男發第七號信交摺差。七月初一日。發第八號交王仕四手。不知已收到否。六月廿日。接六弟五月十二書。七月十六。接四弟九弟五月廿九日書。皆言忙迫之至。寥寥數語。

字跡潦草。即縣試案首前列。皆不寫出。同鄉有同日接信者。即考古老先生。皆已詳載。同一摺差也。各家發信。遲十餘日而從容。諸弟發信。早十餘日而忙迫。何也。且次次忙迫。無一次從容者。又何也。男等在京。大小平安。同鄉諸家皆好。惟湯海秋於七月八日得病。初九日未刻即逝。八月二十八考教習。馮樹堂郭筠仙朱嘯山皆取。湖南今年考差。僅何子貞得差。餘皆未放。惟陳岱雲光景最苦。男因去年之病。反以不放爲樂。王仕四已善爲遣回。率五大約在糧船回。現尙未定。渠身體平安。二妹不必聖心。叔父之病。男累求詳信直告。至今未得。實不放心。

甲三讀爾雅。每日二十餘字。頗肯率教。六弟今年正月信。欲從羅羅山處附課。男甚喜之。後來信絕不提。及不知何故。所付來京之文。殊不甚好。在省讀書二年。不見長進。男心實憂之。而無如何。只恨男不善教誨而已。大抵第一要除驕傲氣習。中無所有。而夜郎自大。此最壞事。四弟九弟雖不長進。亦不自滿。求大人教六弟。總期不自滿足爲要。餘俟續陳。男謹稟。（道光二十四年七月廿日）

稟父母（教弟注重看書）

男國藩跪稟父母親大人萬福金安。八月二十九日。男發第十號信。備載廿八生女。及率五回南寧。不知已收到否。男身體平安。家婦月內甚好。去年月裏有病。今年盡除去。孫兒女皆好。

初十日順天鄉試發榜。湖南中三人。長沙周荇農中南元。率五之歸。本擬附家心齋處。因率五不願坐車。故附陳岱雲之弟處。同坐糧船。昨岱雲自天津歸云。「船不甚好。」男頗不放心。幸船上人多。應可無慮。

諸弟考試後。聞肄業小羅菴巷。不知勤惰若何。此時惟季弟較小。三弟俱年過二十。總以看書爲主。我邑惟彭薄暨先生看書略多。自後無一人講究者。大抵爲考試文章所誤。殊不知看書與考試。全不相礙。彼不看書者。亦仍不利考如故也。我家諸弟。此時無論考試之利不利。無論文章之工不工。總以看書爲急。不然。則年歲日長。科名無成。學問亦無一字可靠。將來求爲塾師而不可得。或經或史。或詩集文集。每日總要看二十頁。

男今年以來。無日不看書。雖萬事叢忙。亦不廢正業。聞九弟意欲與劉霞仙同伴讀書。霞仙近來見道甚有所得。九弟若去。應有進益。望大人斟酌行之。男不敢自主。此事在九弟自爲定計。若愧奮直前。有破釜沉舟之志。則遠遊不負。若徒悠悠因循。則近處儘可度活。何必遠行百里外哉。求大人察九弟之志而定計焉。餘容續陳。男國藩謹稟。(道光二十四年九月十九日)

稟父母(京寓慶祝壽辰)

男國藩跪稟父母親大人萬福金安。男身體平安。讀書日有常課。自六月底起。至今未嘗間斷一天。男婦如常。漸漸有乳。孫男讀書有恆。已讀爾雅一本。共四本。大約明年下半年可讀完。此書大難。他書則易爲力矣。三孫女皆好。餘亦合室平安。男自七月起。寓中已餐車馬。每年須費百金。因郭兩三奉諱出京。渠車馬借與男用。渠會借男五十金。亦未見還。率五在東昌有信來京。已將錢用完。不知餘銀數用否。若不敷用。陳處挪移自易。然男已不放心。鄉至堂來。望付茶葉一篋。大小剪刀各二把。其餘布匹臘肉之類。俱不必付。蓋家中極難辦。路上極難帶也。初九日父親大人壽辰。京寓客共三席。十一月初三日。母親大人六十壽辰。男不獲在家慶祝。不勝瞻戀。男於壽辰後。作壽屏一架。即留在京張掛。不必付回。諸弟讀書。不知明年定在何處。望於今冬寫信告知。不勝懸望。謹稟。即跪叩父母親大人雙壽大喜。(道光二十四年十月廿一日)

稟父母(寄書物等回家)

男國藩跪稟父母親大人。男於三月初六日。蒙恩得分會試房。四月十一日。發榜出場。身體清吉。合室平安。所有。一切事宜。寫信交摺差先寄。茲因嘯山還家。託帶紋銀百兩。高麗參斤半。子史精華六套。古文辭類纂二套。綬寇紀略一套。皆六弟信要。看之書。

高麗參。男意送江岷山。東海二家六兩。以冀少減息銀。又送金竺虔之尊人二兩。以報東道之誼。聽大人裁處。男尙辦有送朱嵐暄掛屏。候郭筠仙帶回。又有壽屏及考試筆等物。亦俟他處寄回。餘俟續具。男謹稟。(道光二十

五年四月十五日。

稟父母（不可入署說公事或與人搆訟）

男國藩跪稟父母親大人膝下。十七日接到諸弟四月廿二日在縣所發信。欣悉九弟得取前列第三。餘三弟皆取二十名。歡欣之至。諸弟前付詩文到京。茲特請楊春皆改正付回。今年長進甚速。良可欣慰。向來六弟文筆最矯健。四弟筆頗笨滯。觀其「爲仁矣」一篇。則文筆大變。與六弟並稱健者。九弟文筆清貴。近來更圓轉如意。季弟秀雅。男再三審覽。實堪怡悅。

男在京平安。男婦服補劑已二十餘帖。大有效驗。醫者云。「虛弱之症。能受補則易好。」孫男女及合室下人皆清吉。長沙館於五月十二日演戲。題名狀元南元朝元三匾。同日張挂。極爲熱鬧。皆男總辦。而人人樂從。頭門對聯云。「同拜十進士。慶榜三名元。」可謂盛矣。

同鄉鄧鐵松在京患吐血病。甚爲危症。大約不可挽回。同鄉有危急事。多有向男商量者。男效祖父大人之法。銀錢則量力扶助。辦事則竭力經營。

嚴慶生取九弟置前列。理應寫信謝他。因其平日官聲不甚好。故不願謝。不審大人意見何如。我家既爲鄉紳。萬萬不可入署說公事。致爲官長所鄙薄。即本家有事。情願吃虧。萬不可與人搆訟。令官長疑爲倚勢凌人。伏乞慈鑒。男謹稟。（道光二十五年五月廿九日）

稟父母（專人去取借款）

男國藩跪稟父母親大人萬福金安。五月三十日。發第七號家信。內有升官謝恩摺。及四弟九弟季弟詩文。不知到否。

男於五月中旬。染瘟症。服藥即效。已全愈矣。而餘熱未盡。近日頭上生癩。身上生熱毒。每日服銀花甘草等藥。醫云。「內熱未散。宜發不宜遏抑。身上之毒。至秋即可全好。頭上之癩。亦不至蔓延。」又云。「恐家中祖塋上有不

潔處。雖不宜挑動。亦不可不打掃。一男以皮膚之患。不甚經意。仍讀書應酬如故。飲食起居。一切如故。男婦服附片高麗參熟地白朮等藥。已五十餘日。飯量略加。尙未十分壯健。然行事起居。亦復如常。孫男女四人。並皆平安。家中僕婢皆好。前有信言寄金年伯高麗參二兩。此萬不可少。望如數分送。去年所送戚族銀。男至今未見全單。男年輕識淺。斷不敢自作主張。然家中諸事。男亦願聞其詳。求大人諭四弟將全單開示爲望。

諸弟考試。今年想必有所得。如得入學。但擇親族拜客。不必遍拜。亦不必請酒。蓋恐親族難於應酬也。曾受恬去年所借錢。不知已寄到否。若未到。須專人去取。萬不可緩。如心齋亦專差。則兩家同去。如渠不專差。則我家獨去。家中近日用度如何。男意有人做官。則待鄰里不可不略鬆。而家用不可不守舊。不知是否。男謹稟。（道光二十五年六月十九日）

稟父母（諸弟願意來否）

男國落魄稟父母親大人萬福金安。六月廿一日。男發第八號家信。不審到否。中言頭上生癩。身上生熱毒云云。近日請醫細看。頭上亦非癩也。皆熱毒耳。用生地煮水長洗。或用熬濃汁。厚塗患處即愈。現在如法洗塗。大有效驗。蓋本因血熱而起。適當鬱蒸天氣而發。生地涼血而滋潤。所以奏功。特此告知。望大人放心。寓中大小平安。陳岱雲之妾。於廿二日到京。其幼子寄在男處養者。渠已於廿四日接歸自養。同鄉各家。並皆如舊。李雙甫先生象鵬。由貴州藩台進京。奉旨以三品京堂候補。雖在渠爲左遷。而湖南多一京官。亦自可喜。

今年考試。想四位老弟中必有入泮者。然世事正難逆料。萬一皆不得售。則諸弟必牢騷抑鬱憤懣不平。此亦人之情也。如杲鬱憂。則問四弟六弟九弟三人中。或有願進京者。不妨來京一遊。可以廣耳目。豁心胸。可以敘兄弟之樂。亦男所甚望也。如諸弟不願來。則不必強。恐其到京而急於思歸也。如有一位入學者。則不必。恐家中既辦印卷。又辦途費。銀錢艱窘也。如皆不進。而諸弟又甚願來。則望大人張羅途費。毋阻其發憤之志。而遏其抑鬱之氣。幸甚。如季弟願來。則須有一兄同來。乃妥。

鄧鐵松病勢日危，恐不復能回南，屢勸之勿服藥，渠皆不聽。今之病，皆藥誤之也。去年大人教男寫字，不宜斜脚，男近日已力除此弊。自去年六月起，無論行楷大小字，皆懸腕懸肘，是以力足而不精緻，伏求大人教訓。男謹稟。
(道光二十五年七月初一日)

稟父母(身上熱毒未好)

男國藩跪稟父母親大人萬福金安。十四日，接到四弟在省發信，內有大人手諭，具悉一切，不勝欣慰。家鄉近事，及去年分贈之項，至是始昭然明白矣。

男在京平順，惟身上熱毒，至今未好。其色白，約有大指頭大一顆，通身約有七八十顆。鼻子兩旁，有而不成堆，餘皆成堆脫白皮疥。髮裏及頸上約二十餘顆，兩脅及胸腹約五十餘顆。現以治癬之法治之，有效與否，尙不敢定。幸喜毫無他病，飲食起居如常，讀書習字應酬亦如常。男婦服補劑漸好。孫兒讀爾雅後，讀詩經，已至凱風，朔望行禮，頗無失儀。孫女及合寓皆平安。

荆七在陳宅，光景尙好。男想叫他回來，不好安置。他亦醜顏不願回來。若男得主考學政，或放外官，則一定叫他回來，帶他上任。京官毫無出息。陳宅有小印結分，故荆七在陳宅，比我家好些。男已將此意告荆七，乞家中並告渠兄弟也。

前次寫升官信，未詳職守。詹事府本是東宮輔導太子之官，因本朝另設有上書房，教阿哥，故詹事府諸官，毫無所事。不過如翰林院爲儲才養望之地。男居此地，仍以讀書爲業。汪覺庵師壽文，惟於八月摺差付回。

溫甫弟生子不育，想不免傷感。然男三十始生子，六弟今年二十三耳。叔父母不必憂慮。四弟與常家對親，甚好。男擬寄輓聯一副，輓常老太烟母，亦在下次寄回。同鄉諸家如舊，惟何子貞脚痛已久，恐倉卒難好。鄧鐵松病亦難好，餘俱平安。男謹稟。(道光二十五年七月十六日)

稟父母(請祖父換藍頂)

男國藩跪稟父母親大人萬福金安。念八日接到手諭。係九月底在縣城新發者。男等在京平安。身上癩毒。至今未得全好。中間自九月中旬數日。即將面上全愈。毫無疤痕。係陳醫士之力。故升官時召見。無隕越之虞。十月下半月。又覺微有痕跡。頭上仍有白皴皮。身上尙如九月之常。照前七八月。則已去其大半矣。一切飲食起居。毫無患苦。四弟六弟。用功皆有定課。昨二十八始開課作文。孫男紀澤。鄭風已讀畢。古詩十九首亦已讀畢。男婦及三孫女皆平順。

前信言宗丈毅然家銀三十兩。可將謝山益家一項去還。頃接山益信云。渠去江西時。囑其子辦蘇市平元絲銀四十兩還我家。想送到矣。如已到。即望大人將銀並男前信送毅然家。渠是紋銀。我還元絲。必須加水。還他三十一兩可也。蕭辛五處鹿膠。准在今冬寄到。

初十皇太后七旬萬壽。皇上率百官行禮。四位阿哥皆騎馬而來。七阿哥僅八歲。亦騎馬雍容。真龍種氣象。十五日。皇上頌恩詔於太和殿。十六日又生一阿哥。皇上於辛丑年六秩。壬寅年生入阿哥。乙巳又生九阿哥。聖躬老而彌康如此。

男得請封章。如今年可用蠶。則明春可寄回。如明夏用蠶。則秋間寄回。然旣得詔旨。則雖誥軸未歸。而恩已至矣。望祖父先換藍頂。其四品補服。候男在京寄回。可與誥軸並付。湖南各家俱平安。餘俟續具。男謹稟。（道光二十五年十月二十九日）

稟父母（擬爲六弟納監）

男國藩跪稟父母親大人萬福金安。男頭上瘡癬。至今未愈。近日每天洗兩次。夜洗藥水。早洗開水。本無大毒。或可因勤洗而好。聞四弟言。家中連年生熱毒者八人。並男共九人。恐祖墳有不潔淨處。望時時打掃。但不可妄爲動土。致驚幽靈。

四弟六弟及兒婿孫男女等皆平安。男近與同年會課作賦。每日看書如常。飲食起居如故。四弟課紀澤讀。師徒

皆有常程。六弟文章極好。擬明年納監下場。但現無銀。不知張羅得就否。

同鄉唐鏡海先生已告病。朔春即將回南。所著國朝學案一書。係男約同人代爲發刻。其刻價則係耦庚先生所出。前門內有義塾。每年延師入。教貧戶子弟三百餘人。昨首事杜姓已死。男約同人接管其事。亦係集腋成裘。男花費亦無幾。紀澤雖從四弟讀書。而李作屋先生尙住男宅。渠頗思南歸。但未定計耳。

詰封二軸。今年不能用。明年乃可寄回。蕭辛五處已寄鹿膠一斤。阿膠半斤與他。家中若須阿膠鹿膠。望信來京。以便覓寄。男謹稟。(道光二十五年十一月二十日)

稟父母(報告兩次兼職)

男國藩跪稟父母親大人萬福金安。乙巳十一月廿二日。同鄉彭棟樓放廣西思恩府知府。廿四日。陳岱雲放江西吉安府知府。岱雲年僅三十二歲。而以翰林出爲太守。亦近來所僅見者。人皆代渠慶幸。而渠深以未得主考學政爲恨。且近日外官情形。動多掣肘。不如京官清貴安穩。能得外差。固爲幸事。即不得差。亦可讀書養望。不染塵埃。岱雲雖已得郡爲榮。仍以失去玉堂爲悔。自放官後。摒擋月餘。已於十二月廿八日出京。是夕。渠有家書到京。男拆開。接大人十一月廿四所示手諭。內叔父及九弟季弟各一信。彭蕪庵表叔一信。具悉家中一切事。

前信言莫管閒事。非恐大人出入衙門。蓋以我邑書吏欺人肥己。黨邪嫉正。設有公正之鄉紳。取彼所魚肉之善。夏而扶植之。取彼所朋比之狐鼠而錘抑之。則於彼大有不便。必且造作謠言。加我以不美之名。進讒於官。代我搆不解之怨。而官亦陰庇彼輩。外雖以好言待我。實則暗笑之而深斥之。甚且當面嘲諷。且此門一開。則求者踵至。必將日不暇給。不如一切謝絕。今大人手示。亦云杜門謝客。此男所深爲慶幸者也。

男身體平安。熱毒至今未好。塗藥則稍愈。總不能斷根。十二月十二。蒙恩充補日講起居注官。廿二日。又得充文淵閣直閣事。兩次恭謝天恩。茲并將原摺付回。講官共十八人。滿八缺。漢十缺。其職司則皇上所到之處。須輪四人侍立。直閣事四缺。不分滿漢。其職司則皇上臨御經筵之日。四人皆侍立而已。

四弟六弟皆有進境。孫男讀書已至陳風。男婦及孫女等皆好。歐陽牧雲有信來京。與男商請封及薦館事。二事男俱不能應允。故作書宛轉告之。外辦江綢套料一件。高麗參二兩。鹿膠一斤。對聯一付。爲岳父慶祝之儀。恐省城寄家無便。故託彭棟樓帶至衡陽寧署。

朱堯階每年贈穀四十石。受惠太多。恐難爲報。今年必嘗辭卻。小米四十石。不過值錢四十千。男每年可付此數到家。不可再受他穀。望家中力辭之。毅然家之銀。想已送矣。若未送。須秤元絲銀三十二兩。以渠來係紋銀也。男有輓聯託岱雲交蕭辛五轉交毅然家。想可無誤。岱雲歸。男寄有冬菜十斤。阿膠二斤。筆四支。彭棟樓歸。男寄有藍頂兩個。四品補服四付。俱交蕭辛五家轉寄。伏乞查收。男謹稟。(道光二十六年正月初三日)

稟父母(病在肝虛)

男國藩跪稟父母親大人萬福金安。初七日。彭棟樓太守出京。男寄補服四付。藍頂二個。又寄歐陽滄溟先生江綢料一件。對聯一付。高麗參二兩。鹿膠一斤。又寄彭荊庵表叔鹿膠一斤。

男等在京合室平安。男病尙未全愈。二月初。喫龍膽瀉肝湯。甚爲受累。始知病在肝虛。近來專服補肝之品。頗覺有效。以何首烏爲君。加以蒺藜淮山藥赤芍茯苓兔絲諸味。男此時不求瘡癬遽好。但求臟腑無病。身體如常。卽爲如天之福。今年雖不能得差。男亦毫無怨尤。

同鄉張鍾健丁艱。男代爲張羅一切。令之卽日奔喪回里。黎棧喬於二月十四日到京。

四弟近日讀書專以求解爲急。每日摘疑義二條來問。爲男煎藥求醫。及紀澤教讀。皆四弟獨任其勞。六弟近日文思大進。每月作四書文六首。經文三首。同人無不擊節稱賞。請封之事。大約六月可以用蠶。秋冬可以寄家餘詳四弟書中。男謹稟。(道光二十六年二月十六日)

稟父母(請勿懸望得差)

男國藩跪稟父母親大人萬福金安。上次男寫信略述癩病情形。有不去考差之意。近有一張姓醫。包一個月治

好。偶試一處。居然有驗。現在趕緊醫治。如果得好。男仍定去考差。若不愈。則不去考差。總之考與不考。皆無關緊要。考而得之。不過多得錢耳。考而不得。與不考同。亦未必不可支持度日。每年考差三百餘人。而得差者通共不過七十餘人。故終身翰林。屢次考差而不得者。亦常有也。如我邑鄧筆山羅九峯是已。男祇求平安。伏望大人勿以得差爲望。四弟已寫信言男病。男恐大人不放心。故特書此紙。男謹稟。道光二十六年三月二十五日。

稟父母（附呈考差詩文）

男國藩跪稟父母親大人萬福金安。五月初二日。赴圓明園。初六日在正大光朝殿考試。共二百七十人入湯湖。南凡十二人。首題「無爲小人儒」。次題「任官惟賢才一節」。詩題「霖雨既零得霑字」。男兩文各七百字。全卷未錯落一字。惟久病之後。兩眼矇矓。場中寫前二開不甚得意。後五開略好。今年考差。好手甚多。男卷難於出色。茲命四弟膽頭篇與詩一首寄回。伏乞大人賜觀。知男在場中不敢潦草。則知男病後精神。毫無傷損。可以放心。知男寫卷不得意。則求大人不必懸望得差。堂上大人不以男病爲憂。不以得差爲望。則男心安逸矣。

男身上癩疾。經張醫調治。已愈十之七矣。若從此漸漸好去。不過閏月。可奏全效。塢中大小平安。男婦有夢熊之喜。大約八九月當生。四弟書法。日日長進。馮樹堂於五月十七到京。以後紀澤仍請樹堂教。四弟可專心讀書。大弟捐監。擬於本月內上兌。填寫三代履歷。里鄉戶長。一切男自斟酌。大人儘可放心。

紀澤詩已讀至浩浩昊天。古詩已讀半本。書皆熟。三孫女皆平安。同鄉各家皆如常。京師今年久旱。屢次求雨。尙未優渥。皇上焦思。未知南省年歲何如也。男謹稟。道光二十六年五月十七日。

稟父母（六弟成就功名）

男國藩跪稟父母親大人萬福金安。五月十八日。發第九號家信。內有考差詩文。男自考差後。癩疾日愈。現在頭面已不甚顯矣。身上自腰以下。亦十去七八。自腹以下尙未治。萬一放差。儘可面聖謝恩。但如此頑病。而得漸好。已爲非常之喜。不敢復設妄想矣。

六弟捐監。於五月廿八日具呈。閏月初兌銀。廿一日可領照。六月初一日可至國子監考到。十四日即可錄科。仰承祖父叔父之餘蔭。六弟幸得成就功名。敬賀敬賀。

男身體平安。現服補氣湯藥。內有高麗參、鹿茸、男婦及孫男女四人。並如常。四弟自樹堂教書之後。功課益勤。六弟近日文章。雖無大進。亦未荒怠。餘俟續呈。男謹稟。（道光二十六年閏五月十五日）

稟父母（請敬接誥封軸）

男國藩跪稟父母親大人萬福金安。六弟六月初一日。在國子監考到。題「視其所以」。經題「聞善以相告也」。……「二句。六弟取列一百三名。廿五日錄科。題「齊之以禮」。詩題「荷珠得珠字」。六弟亦取列百餘名。兩次皆二百餘人入場。

男等身體皆平安。男婦及孫男女皆安泰。今年誥封軸數甚多。聞須八月始能辦完發下。男於八月領到。即懇湖南新學院帶至長沙。男另辦祖父母壽屏一架。華山石刻陳搏所書壽字一個。新刻誥封卷一百本。共四件。皆交新學院帶回。轉交陳岱雲家。求父親大人於九月廿六七赴省。鄒雲陔由廣西過長沙。不過十月初旬。渠有還男銀八十兩。面訂交陳季牧手。父親或面會雲陔。或不去會他。即在陳宅接銀亦可。十月下旬。新學院即可到省。渠有關防。父親萬不可去拜他。但在陳家接誥軸可也。

若新學院與男素不相識。則男另覓便寄回。亦在十月底可到省。最遲亦不過十一月初旬。父親接到。帶歸縣城。寄放相好人家或店內。二十六日。令九弟下縣去接。廿八夜。九弟宿賀家坳等處。廿九日。祖母大人八十大壽。用吹手執事。接誥封數里。接至家。於門外向北置一番案。案上暨聖旨牌位。將誥軸置於案上。祖父母率父母望北。行三跪九叩首禮。壽屏請蕭史樓寫。史樓現未得差。若八月不放學政。則渠必告假回籍。誥軸託渠帶歸亦可也。一切男自知裁酌。茲寄回黃芽白菜子一包。查收。餘俟續呈。男謹稟。（道光二十六年七月初三日）

稟父母（毋以男不得差及六弟不中爲慮）

男國藩跪稟父母親大人萬福金安。九月十七日接讀家信。喜堂上各位老人安康。家事順遂。無任歡慰。男今年不得差。六弟鄉試不售。想堂上大人不免內憂。然男則正以不得爲喜。蓋天下之理。滿則招損。亢則有悔。日中則昃。月盈則虧。至嘗不易之理也。男毫無學識。而官至學士。頻邀非分之榮。祖父母父母皆康健。可謂盛極矣。現在京官。翰林中無重慶下者。惟我家獨享難得之福。是以男慄慄恐懼。不敢求非分之榮。但求堂上大人眠食如常。闔家平安。卽爲至幸。高望祖父母父母叔父母無以男不得差。六弟不中爲慮。則大慰矣。况男三次考差。兩次已得。六弟初次下場。年紀尙輕。尤不必置心也。同縣黃正齋。鄉試嘗外簾差。出闈卽患痰病。時明時昧。近日略愈。男癩疾近日大好。頭面全不看見。身上亦好了。在京一切。自知謹慎。男謹稟。(道光二十六年九月十九日)

稟父母(四弟送歸語軸)

男國藩跪稟父母親大人萬福金安。九月十九日發第十七號信。十月初五發十八號信。諒已收到。

十二三四日內。語軸用寶。大約十八日可領到。同鄉夏階平吏部丁內艱。二十日起程回南。男因渠是素服。不便託帶語軸。又恐其在道上拜客。或有耽擱。祖母大人於出月廿九大壽。若趕緊送回。尙可於壽辰迎接語軸。是以特命四弟束裝出京。專送語軸回家。與夏階平同伴。計十一月十七八可到漢口。漢口到岳州。不過三四天。雇轎五天可到家。四弟到省。卽專人回家。以便家中辦事。迎接語命。

凡事難以逆料。風順則坐船。風不順則坐轎。恐四弟道上或有風水阻隔。不能趕上祖母壽辰。亦未可知。家中做生日酒。且不必辦接語封事。若四弟能到。廿七日有信。廿八辦鼓手香案。廿九接封可也。若廿七無四弟到省之信。則廿九但辦壽筵。明年正月初八日接封可也。倘四弟不歸而託別人。不特廿九趕不上。恐初八亦接不到。此男所以特命四弟送歸之意耳。

四弟數千里來京。伊意不願遽歸。男與國子監祭酒車意園先生商議。令四弟在國子監報名。先交銀數十兩。卽

可給與頂戴。男因具呈爲四弟報名。繳銀三十兩。其餘俟明年陸續繳納。繳完之日。即可領照。男以此打發四弟。四弟亦欣然感謝。且言願在家中幫堂上大人照料家事。不願再應小考。男亦頗以爲然。

男等在京。身體平安。男婦生女後亦平善。六弟決計留京。九弟在江西。有信來甚好。陳岱雲待之如胞弟。飲食教誨。極爲可感。書法亦大有長進。然無故而依人。究似非宜。男寫書與九弟。囑其今年偕郭錫仙同伴回家。大約年底可到家。男在京一切用度。自有調度。家中不必留心。男謹稟。（道光二十六年十月十五日）

稟父母（男在京事。事省儉及告對九弟等之期望）

男國藩跪稟父母親大人禮次。正月十五日。接到父親叔父十一月二十所發手書。敬悉一切。但摺弁於臘月念八。在長沙起程。不知四弟何以尙未到省。祖母葬地。易敬臣之說甚是。男去冬已寫信與朱堯階。請渠尋地。茲又寄書與敬臣。堯階看妥之後。可請敬臣一看。以堯階爲主。而以敬臣爲輔。堯階看定後。若毫無疑義。不再請敬臣可也。若有疑義。則請渠二人商之。男書先寄去。若請他時。四弟再寫一信去。男有信稟祖父大人。不知祖父可允從否。若執意不聽。則遵命不敢違拗。求大人相機而行。

大人念及京中恐無錢用。男在京事。事省儉。偶值闕乏之時。尙有朋友可以通挪。去年家中收各項。約共五百金。整收藏二百勿用。以備不時之需。丁戊二年不考差。恐男無錢寄回。男在京用度。自有打算。大人不必挂心。此間情形。四弟必能詳言之。家中辦喪事情。亦望四弟詳告。共發孝衣幾十件。饗祭幾堂。遠處來吊者幾人。一一細載爲幸。

男身體平安。一男四女。痘後俱好。男婦亦如常。聞母親想六弟回家。叔父信來。亦欲六弟隨公車南旋。此事須由六弟自家作主。男不勸之歸。亦不敢留。家中諸務。浩繁。四弟可一人經理。九弟季弟。必須讀書。萬不可就擱他。九弟季弟亦萬不可懶散自棄。去年江西之行。已不免爲人所竊笑。以後切不可輕舉妄動。只要天不管。地不管。伏案用功而已。男在京時時想望者。只望諸弟中有一發憤自立之人。雖不得科名。亦是男的大幫手。萬望家中勿

以瑣事。就擱九弟季弟。亦望兩弟鑒我苦心。結實用功也。

男之癩疾。近又小發。但不似去春之甚耳。同鄉各家如常。劉月槎已於十五日到京。餘俟續呈。男謹稟。（道光二十七年正月十八日）

稟父母（遵命一意服官）

男國藩跪稟父母親大人膝下。昨初九日已刻。接讀大人示諭。及諸弟信。藉悉一切。祖父大人之病已漸愈。不勝禱祝。想可由此而全愈也。男前與朱家信。言無時不思鄉土。亦久宦之人所不免。故前次家信亦言之。今既承大人之命。男則一意服官。不敢違拗。不作是想矣。昨初六日派總裁房差。同鄉惟黃恕皆一人。男今年又不得差。則家中氣運不致太宣洩。祖父大人之病。必可以速愈。諸弟今年或亦可以入學。此盈虛自然之理也。

男癩病雖發。不甚狠。近用蔣醫方朝夕治之。渠言「此病不要緊。可以徐愈。」治病既好。渠亦不要錢。兩大人不必懸念。

男婦及華男孫男女身體俱好。均無庸掛念。男等所望者。惟祖父大人之病速愈。暨兩大人之節勞。叔母目疾速愈。俾叔父寬懷耳。餘容另稟。（道光二十七年三月初十日）

稟父母（詢問託人寄上之物及告勿因家務過勞）

男國藩跪稟父母親大人膝下。十六夜。接到六月初八日所發家信。欣悉一切。祖父大人病已十愈八九。尤為莫大之福。六月二十八日。曾發一信言升官事。想已收到。馮樹堂六月十七日出京。寄回紅頂補服。袍褂。手釧。筆等物。計八月可以到家。賀禮惟七月初五日出京。寄回鹿膠高麗參等物。計九月可以到家。

四弟九弟信來。言家中大小諸事。皆大人躬親之。未免過於勞苦。勤儉本持家之道。而人所處之地各不同。大人之身上奉高堂。下蔭兒孫。外為族黨鄉里所模範。千金之軀。誠宜珍重。且男忝竊脚貳。服役已兼數人。而大人以家務勞苦如是。男實不安於心。此後萬望總持大綱。以細微事付之四弟。四弟回謹慎者。必能負荷。而大人與叔

父大人。惟日侍祖父大人前。相與娛樂。則萬幸矣。

京寓大小平安。一切自知謹慎。堂上各位大人。不必呈念。餘容另稟。（道光二十七年八月十八日）

稟父母（嘗歸蒸雞治失眠）

男國藩跪稟父母親大人萬福金安。十二月初五。接到家中十一月初旬所發家信。具悉一切。男等在京。身體平安。男癩疾已全愈。六弟禮氣如常。紀澤兄妹五人皆好。男婦懷喜。平安不服藥。同鄉各家亦皆無恙。陳本七先生來京。男自有處置之法。大人儘可放心。大約款待從厚。而打發從薄。男光景頗窘。渠來亦必自悔。

九弟信言。母親常睡不著。男婦亦患此病。用熱地嘗歸蒸母雞食之。大有效驗。九弟可常辦與母親吃。鄉間雞肉猪肉。最爲養人。若常用黃芪嘗歸等類蒸之。略帶藥性。而無藥氣。堂上五位老人食之。甚有益也。望諸弟時時留心辦之。

老秧田背後三角坵。是竹山灣至我家大路。男曾對四弟言及。要將路改於坵下。在檀山嘴那邊架一小橋。由豆土排上橫穿過來。其三角坵則多栽竹樹。上接新塘壩大楓樹。下接檀山嘴大藤。包裹甚爲完緊。我家之氣。更聚。塋堂上大人細思。如以爲可。求叔父於明年春栽竹種樹。如不可。叔父寫信示之爲幸。男等於二十日期服已滿。敬謹祭告。廿九日又祭告一次。餘俟續具。（道光二十七年十二月初六日）

稟父母（好地氣必團聚）

男國藩跪稟父母親大人禮安。四月底接家中二月廿六日所發書。五月初八又接三月廿九所發書。具悉一切。祖父大人病體未愈。不知可服虎骨膠否。男身體如常。華男在黃家就館。端節後。仍於初八上學。紀澤讀告子至魚。我所欲也。書尚熱。次孫體甚肥胖。四孫女俱平安。長孫女論語已讀畢。兩婦亦好。其餘眷口如常。

前叔父信言。知廣彭姓山內有地。有乾田十畝。男思好地峯迴氣聚。田必膏腴。其山必易生樹木。蓋氣之所積。自然豐闓。若磽田童山。氣本不聚。鮮有佳城。如廟山宗祠各山之童壟。斷無吉穴矣。大抵凡至一處。覺得氣勢團聚。

山水環抱者。乃可尋地。否則不免誤認也。知廣之地。不知何如。男因有乾田十畝之說。故進此說。祖母葬後。家中尙屬平安。其地或尙可用。如他處買地。不必專買丈尺者。附近田畝。在三四百千內者。京中儘可寄回。京中欠賬已過千金。然張羅尙活動。從不窘迫。堂上大人儘可放心。餘容續稟。男謹稟。(道光二十八年五月初十日)

稟父母(述紀澤烟事)

男國藩跪稟父母親大人萬福金安。四月十四日。接奉父親三月初九日手諭。並叔父大人賀喜手示。及四弟家書。敬悉祖父大人病體未好。且日加沉劇。父叔率諸兄弟服侍已逾三年。無晝夜之間。無須臾之懈。獨男一人。遠離膝下。未得一日盡孫子之職。罪責甚深。聞華弟荃弟文思大進。葆弟之文。得華弟講攻。亦日馳千里。遠人聞此。歡慰無極。

男近來身體不甚結實。稍一用心。即癆發於面。醫者皆言心虧血熱。故不能養肝。熱極生風。陽氣上肝。故見於頭面。男恐大發。則不能入見。故不敢用心。謹守大人保養身體之訓。隔一日至衙門辦公事。餘則在家不妄出門。現在衙門諸事。男俱已熟悉。各司官於男皆甚佩服。上下水乳俱融。同寅亦極協和。男雖終身在禮部衙門。爲國家辦照例之事。不有不懈。盡就條理。亦所深願也。

英夷在廣東。今年復請入城。徐總督辦理有方。外夷折服。竟不入城。從此永無夷禍。聖心嘉悅之至。術者每言皇上連年命運。行劫財地。去冬始交脫。皇上亦每爲臣工言之。今年氣象。果爲昌泰。誠國家之福也。兒婿及孫女輩皆好。長孫紀澤。前因開蒙太早。教得太寬。頃讀畢書經。請先生再將詩經點讀一遍。夜間講綱鑑正史。約已講至秦商鞅開阡陌。

李家親事。男因桂陽州往來太不便。已在媒人唐鶴九處回信不對。常家親事。男因其女係妾所生。已知其不諧矣。紀澤兒之烟事。屢次不就。男當年亦十五歲始定婚。則紀澤再緩一二年。亦無不可。或求大人即在鄉間選一

耕讀人家之女。或男在京自定。總以無富貴氣習者爲主。紀雲對郭兩三之女。雖未訂盟。而彼此呼親家。稱姻弟。往來親密。斷不致移。二孫女對岱雲之次子。亦不致移。謹此稟聞。餘詳與諸弟書中。男謹稟。(道光二十九年四月十六日)

稟父母(具摺奏請日講)

男國藩跪稟父母親大人福安。橫男三月十五到京。十八日發家信一件。四月內應可收到。藩男十九日下園子。二十日卯刻。恭送大行皇太后上西陵。西陵在易州。離京二百六十里。二十四下午到。廿五日辰刻致祭。比日轉身。趕走一百廿里。廿六日走百四十里。申刻到家。一路清吉。而晝夜未免辛苦。廿八早覆命。數日內作奏摺。擬初一早上具摺。因前奏舉行日講。聖上已允諭於百日後舉行。茲摺要將如何舉行之法。切實呈奏也。

廿九日申刻。接到大人二月廿一日手示。內六弟一信。九弟二十六之信。並六弟與他之信。一并付來。知堂上四位大人康健如常。合家平安。父母親大人俯允來京。男等內外不勝欣喜。手諭云。「起程要待橫男秋冬兩季歸。明年二月。橫男仍送二大人進京。」云云。男等敬謹從命。叔父一二年內。既不肯來。男等亦不敢強。橫男歸家。或九月。或十月。容再定妥。男等內外及兩孫孫女皆好。堂上大人不必懸念。餘俟續稟。(道光三十年二月二十日)

稟父(述辦水賊之法)

男國藩跪稟父親大人萬福金安。屢次接到廿三日廿八日廿九日初二日手諭。敬悉一切。

男前所以招勇往江南殺賊者。以江岷樵麾下人少。必須萬人一氣。諸將一心。而後渠可以指揮如意。所向無前。故八月三十日寄書於岷樵。言絡續訓練。交渠統帶。此男練勇往江南之說也。

王璞山因聞七月廿四日江西之役。謝易四人殉難。鄉勇八十人陣亡。因大發義憤。欲招湘勇二千。前往兩江殺賊。爲易謝諸人報仇。此璞山之意也。

男係爲大局起見。璞山係爲復仇起見。男兼招寶慶湘鄉及各州縣之勇。璞山則專招湘鄉一縣之勇。男係添六千人。合在江西之寶勇。男足成萬人。概歸岷樵統領。璞山則招二千人。由渠統帶。男與璞山大旨相同。中間亦有參差不合之處。恐家書及傳言。但云招勇往江南。而其中細微分合之處。未能盡陳於大人之前也。自九月以來。聞岷樵本縣之勇。皆潰散回楚。而男之初計爲之一變。聞賊匪退出江西。回竄上游。攻破田鎮。逼近湖北。而男之計又一變。而璞山則自前次招勇報仇之說。通稟撫藩各憲。上憲各嘉其志而壯其才。昨璞山往省。撫藩命其急招勇三千。赴省救援。聞近日在澧濱開局。大招壯勇。即日晉省。器械未齊。訓練未精。此則不特非男之意。亦並非璞山之初志也。在勢之推移。有不自知而出於此。若非人力所能自主耳。

季弟之歸。乃弟之意。男不敢強留。昨奉大人手示。嚴切責以大義。不特弟不敢言歸。男亦何敢稍存私見。使胞弟迹近規避。導諸勇以退縮之路。現今季弟仍認原缺之不可爲。且見專用本地人之有時而不可恃也。

男現在專思辦水戰之法。擬俾與船並用。湘潭駐紮。男與樹堂亦嘗熟思之。辦船等事。宜離賊踪略遠。恐未曾辦成之際。遽爾蜂擁而來。則前功盡棄。朱石翁已至湖北。刻難遽回。餘湘勇留江西吳城者。男已專人去調矣。江岷樵聞亦已到湖北。謹此奉聞。男辦理一切。自知謹慎。求大人不必掛心。(咸豐三年十月初四日)

稟覆父(軍中要務數條)

男國藩跪稟父親大人萬福金安。廿二日接到十九日慈諭。訓戒軍中要務數條。謹一一稟覆。

一、營中喫飯宜早。此一定不易之理。本朝聖聖相承。神明壽考。即係早起。能振刷精神之故。即現在粵匪暴亂。爲神人所共怒。而其行軍。亦係四更喫飯。五更起行。男營中起太晏。喫飯太晏。是大壞事。營規振刷不起。即是此咎。自接慈諭後。男每日於放明礮時起來。黎明看各營操演。而喫飯仍晏。實難驟改。當徐徐改作未明喫飯。未知能做得否。

一、紮營一事。男每苦口教各營官。又下札教之。言築牆須八尺高。三尺厚。壕溝須八尺寬。六尺深。牆內有內壕一

道。牆外有外壕二道。或三道。壕內須密釘竹籤云云。各營官總不能遵行。季弟於此等事。尤不肯認真。勇亦太寬。故各營不甚聽話。岳州之潰敗。即係因未能紮營之故。嗣後當嚴戒各營也。

一。調軍出戰。不可太散。慈諭所戒。極爲詳明。昨在岳州。胡林翼已先至。平江通城。屢稟來岳。請兵救援。是以於初五日遣塔周繼往。其岳州城內。王璞山有勇二千四百。朱石樵有勇六百。勇三營。有一千七百。以爲可保無虞矣。不謂璞山至。率樓司一敗。而初十開仗。僅勇三營。與朱石樵之六百人。合共不滿二千人。而賊至三萬之多。是以致敗。此後不敢分散。然即合爲一氣。而我軍僅五千人。賊尙多至六七倍。擬募陸勇萬人。乃足以供分布耳。

一。破賊陣法。平日勇訓戒極多。兼畫圖訓諸營官。二月十三日。勇親畫賊之蓮花抄尾陣。寄交璞山。璞山並不回信。寄交季弟。季弟回信言賊了無伎倆。並無所謂抄尾陣。寄交楊名聲鄒壽璋等。回信言當留心。慈訓言當用常山蛇陣法。必須極熟極精之兵勇。乃能如此。昨日岳州之敗。賊並未用抄尾法。交手不過一個時辰。即紛紛奔退。若使賊用抄尾法。則我兵更膽怯矣。若兵勇無膽無藝。任憑好陣法。他也不管。臨陣總是奔回。實可痛恨。一。拿獲形跡可疑之人。以後必拿辦之。斷不姑息。

以上各條。謹一一稟覆。再求慈訓。勇謹稟。(咸豐四年二月廿五日)

稟父(在省中修理戰船)

勇國藩跪稟父親大人萬福金安。二十日申刻。唐四到。奉到手諭。敬悉一切。家中大小平安。鄉間田禾暢茂。甚爲忻慰。

賊匪於初六日復竄入岳州城內。約有二三千人。岳陽城下。及南津港船。約有數百號。初八九分船至竄。西湖。擾安鄉縣。十三日龍陽失守。東而益陽。西而常德。並皆戒嚴。此間調李相堂都司帶楚勇一千。胡詠芝帶黔勇六百前往。又調周鳳山帶道州勇一千一百。想廿三四可先後到常。又趙璞山帶新寧勇一千。由寶慶往常德。又有貴

州兵一千。亦至常德。想可保全。塔智亭於十二日起程至岳。現尙未到。

男在省修理戰艦。已有八分工程。衡州新船。及廣西水勇。均於本日可到。出月初。即可令水師至西湖剿賊。十八日城牆上之兵一二十人。鬧至中丞署內。因每銀一兩。折放錢二千文。係奉戶部咨。而兵不肯從。斫柱毀橋。鬧至三堂。實屬可慮。

二十日。吳伸修之火器所起火。火藥燒去數千斤。其餘火器全燒。傷人數十。現尙未查清。此事關係最要緊。男之心緒。不能順適。然必認真辦理。斷不因此而稍形懈弛。大人此次下縣。係因公事紳士之請。以後總求不履縣城。男心尤安。尤望不必來省。軍務倥傯之際。免使省中大府。多出一番應酬。男亦惟盡心辦理一切。不以牽裾依戀。轉增大人慈愛感喟之懷。伏乞大人垂鑒。餘容續稟。(咸豐四年五月二十日)

卷二

稟叔父(請再代辦壽材)

姪國藩敬稟叔父大人侍下。本年家信三號。正月一號。至今尙未收到。由彭九峯寄之信。七月初九收到。七夕所發之信。八月十四日收到。欣悉家中一切。三月之事。本姪分所當爲。情所不得已。何足挂齒。

前年跪託之事。蒙在渣前買得頂好料一具。姪謹與弟國荃南望拜謝。感忭難名。更求再買一具。即於今冬明春。請木匠辦就。其所需之錢。望寫信來京。姪可覓便付回。一切經營費心。何能圖報。

婦母之病全愈。不知是何光景。曾否服藥。尙有不時言笑否。若有信來。望詳細示知爲幸。肅此。恭請叔父母大人萬福金安。姪率弟國荃謹稟。(道光二十一年八月十七日)

稟叔父母(稜寓呂祖閣)

姪國藩謹啓叔父母大人座下。屢次家書。或呈祖父。或寄諸弟。想叔父大人皆賜觀覽。今年已寄十一次矣。而家

中諸弟寄京信。每嫌其不詳。平日在家時寄省無便。亦不怪。昨府考以六月十八日到省。而摺差七月初九進京。諸弟無信。八月初一摺差進京。僅四弟一信。六弟九弟季弟皆無信。四弟信又太略。府考共考幾場。每場是何題目。開點何人。前列何人。皆不寫一句。院考題目。考古題目。道案首及進學何人。亦皆不寫一句。去年考試亦如此。至期望甚切。而毫不能得音信。真不可解。九弟前在京時。望家信亦甚切。而歸去後。亦懶於寄信。何也。

至今年至五月來。積身熱毒。煩燥之至。加意調理。應酬最繁。而每次家信必詳細言之。現在身上熱毒。已服藥四十餘帖。尙未得好。據醫者云。「雖無大害。然必至十一月。乃能去盡。」幸飲食起居如恆。因家中客多。不甚清淨。至於十八日移寓呂祖閣廟內。離家不過半里。而在廟內起火食。無事從不歸去。家中姪婦及姪孫姪孫女三人。皆平安如常。姪孫詩經已讀至「定之方中。」

同鄉諸家亦皆如舊。同年中祁雋藻放湖北黃州府知府。本家心齋仙逝。實爲可哀。下次摺差。必作書慰毅然宗伯。四弟六弟。不審已進京否。若未來。仍須發奮。不可牢騷廢學。至謹啓。(道光二十五年八月廿一日)

稟叔父(俠士料理友喪)

姪國藩謹啓叔父大人座下。九月十五十七。連到兩摺差。又無來信。想四弟六弟已經來京矣。若使未來。則在省還家時。必將書信寄京。姪身上熱毒。近日頭面大減。請一陳姓醫生。每早吃丸藥一錢。而小有法術。已請來三次。每次給車馬大錢一千二百文。自今年四月得此病。請醫甚多。服藥亦五十餘劑。皆無效驗。惟此人來。乃將面上治好。頭上已好十分之六。身上尙未好。渠云。「不過一月。即可全愈。」姪起居如常。應酬如故。讀書亦如故。惟不做詩文。少寫楷書而已。姪婦及姪孫兒女皆平安。陳岱雲現又有病。雖不似前年之甚。而其氣甚緩。亦難驟然復元。

湘鄉鄧鐵松孝廉。於八月初五出京。竟於十一日卒於獻縣道中。幸有江岷樵忠源同行。一切附身附棺。必信必誠。此人義俠之士。與姪極好。今年新化孝廉鄒柳溪。在京久病而死。一切皆江君料理。送其靈柩回南。今又扶鐵

松之病而送其死。真俠士也。挾兩友之柩。行數千里。亦極難矣。

姪曾作鄒君墓誌銘。茲付兩張回家。今年七月。忘付黃芽白菜子。八月底寄出。已無及矣。請封之典。要十月十五始可頒恩詔。大約明年秋間。始可寄回。聞彭慶三爺令即入學。此是我境後來之秀。不可不加意培植。望於家中賀禮之外。另封儀大錢一千。上書姪名。以示獎勵。餘不具。姪謹啓。（道光二十五年九月十七日）

稟叔父母（報告升翰林院侍讀學士）

姪國藩謹啓。叔父母大人萬福金安。廿三日四弟六弟到京。體氣如常。廿四日。皇上御門。姪得陞翰林院侍讀學士。每年御門。不過四五次。在京各官缺出。此時未經放人者。則候御門之日簡放。以示爵人於朝。與衆共之之意。姪三次升官。皆御門時特擢。天恩高厚。不知所報。姪合室平安。身上瘡癬。尙未盡淨。惟面上於半月內全好。故謝恩召見。不至隕越。以貽羞。此尤大幸也。

前次寫信回家。內有寄家毅然宗丈一封。言由長沙金年伯家送去心齋之母奠儀三十金。此項本羅蘇溪寄者。託姪轉交。故姪兌與周輯瑞用。由周家遞金家。頃聞四弟言。此項已作途費矣。則毅然伯家奠分必須家中趕緊辦出付去。萬不可失信。謝與岐曾借去銀三十兩。若還來甚好。若未還。求家中另行辦去。

又黃麓西借姪銀二十兩。亦聞家中已收。姪在京借銀與人頗多。姪不寫信告家中者。則家中亦不必收取。蓋在外與居鄉不同。居鄉所緊守銀錢。自可致富。在外者有緊有鬆。有發有收。所謂大門無出。耳門亦無入。余仗名聲好。乃扯得活。若名聲不好。專靠自己收藏之銀。則不過一年。即用盡矣。以後外人借姪銀者。仍使送還京中。家中不必收取。去年蔡朝士曾借姪錢三十千。姪已應允作文昌閣捐項。家中亦不必收取。蓋姪言不信。則日後雖有求於人。人誰肯應哉。姪於銀錢之間。但求四處活動。望堂上大人諒之。

又聞四弟六弟言。父親大人近來常到省城縣城。曾爲蔣市街曾家說墳山事。長壽庵和尙說命案事。此雖積德之舉。然亦是干預公事。姪現在京四品。外放即是臬司。凡鄉紳管公事。地方官無不銜恨。無論有理無理。苟非己

事皆不宜與聞。地方官外面應酬。心實鄙薄。設或敢於侮慢。則姪醜然爲官。而不能免親之受辱。其負疚當何如耶。以後無論何事。望勸父親總不到縣。總不管事。雖納稅正供。使人至縣。伏求堂上大人鑒此苦心。姪時時望念獨此耳。姪謹啓。(道光二十五年十月初一日)

稟叔父母(寄銀五十兩回家並述其用途)

姪國藩敬稟叔父。媿母大人。萬福金安。新年兩次稟空。未得另書敬告一切。姪以庸鄙無知。託祖宗之福蔭。幸竊祿位。時時撫衷滋愧。茲於本月大考。復荷皇上天恩。越四級而超升。姪何得何能。堪此殊榮。常恐祖宗積累之福。自我一人享盡。大可懼也。望叔父作書教姪幸甚。

余竺虔歸。寄回銀五十兩。其四十兩用法。六弟九弟在省讀書。用二十六兩。四弟季弟學俸六兩。買漆四兩。歐陽太岳母奠金四兩。前第三號信業已載明矣。

只餘有十兩。若作家中用度。則嫌其太少。添此無益。減此無損。姪意戚族中有最苦者。不得不些須顧送。求叔父將此十金換錢。分送最親最苦之處。叔父於無意中送他。萬不可說出自姪之意。使未得者有缺望。有怨言。二伯祖父處。或不送錢。按期送肉與油鹽之類。隨叔父斟酌行之可也。姪謹稟。(道光二十七年六月十七日)

稟叔父母(勿勞力過甚)

姪國藩謹稟叔父母大人。禮安。十七接家信二件。內父親一諭。四弟一書。九弟季弟在省各一書。歐陽牧雲一書。得悉一切。祖大人之病。不得少減。日夜勞心。父親叔父辛苦服事。而姪遠離膝下。竟不得效絲毫之力。終夜思維。刻不能安。

江岷樵有信來。告渠已買得虎骨。七月嘗親送我家。以之熬膏。可醫痿痺云云。不知果送來否。

聞叔父去年起公屋。勞心勞力。備極經營。外面極堂皇。工作極堅固。費錢不過百千。而見者擬爲三百千模範。焦勞太過。後至吐血。旋又以祖父復病。勤劬彌甚。而父親亦於奉事祖父之餘。撰理家政。刻不少休。姪竊伏思父親

叔父二大人年壽日高，精力日邁，正宜保養神氣，稍稍休息。家中瑣細事務，可命四弟管理。至服事祖父，凡勞心細察之事，則父親叔父躬任之。凡勞力繁重之事，則另添用僱工一人，不敷則僱二人。

姪近年以來，精力日衰，偶用心略甚，癱疾即發，夜坐略久，次日即昏昏。是以力加保養，不甚用功，以求無病無痛。上慰堂上之遠懷，外間求作文，求寫字，求批改詩文者，往往歷久而莫償宿諾。是以時時抱歉，日日無心安恬恬之時。前四弟在京，能爲我料理一切瑣事，六弟則毫不能管，故四弟歸去之後，姪於外間之回信，家鄉應留心之事，不免疏忽廢弛。

姪等近日身體平安，合家大小皆順。六弟在京，姪苦勸其南歸，一則免告迴避，二則盡仰事俯蓄之誠，三則六弟兩年未作文，必在家中，父親叔父嚴責，方可用功。鄉試渠不肯歸，姪亦無如之何。

叔父去年四十晉一，姪謹備袍套一付，叔母今年四十大壽，姪謹備棉外套一件，皆交曹西垣帶回。服滿後即可著。母親外褂並漢襟布夾襖，亦一同付回。聞母親近思用一丫環，此亦易辦。在省城買，不過三四十千。若有湖北逃荒者來鄉，則更爲便益。姪叔父命四弟留心速買，以供母親叔母之使令。其價姪即寄回。

姪今年光景之窘，較甚於往年。然東支西扯，尚可敷衍。若明年能得外差，或升侍郎，便可彌縫。家中今年季弟喜事，不知窘迫否。姪於八月接到俸銀，即當寄五十金回，即去年每歲百金之說也。在京一切張羅，姪自有調停，毫不費力。堂上大人不必挂念。姪謹稟。（道光二十八年七月二十日）

稟叔父母（託人帶歸銀）

姪國藩跪稟叔父母大人福安。九月初十日，接到四弟九弟季弟等信，係八月半在省城所發者。知祖大人之病，又得稍減。九弟得補廩，不勝欣幸。前勞辛垓廉訪，八月十一出京，姪寄去衣包一個，計衣十件，不知已否。姪有銀數十兩，欲寄回家，久無妙便。十月間，武岡張君經贊回長沙，擬託帶回。聞叔父爲埒上公屋加工修治，姪亦欲寄數銀兩，爲叔父助犒賞匠人之資。羅六所存銀廿二兩，在姪處。右三項，皆擬託張君帶歸。

前歐陽滄溟先生館事。伍太尊已覆書於季仙九先生。茲季師又回一信於伍處。託姪便寄家中。可送至歐陽家。囑其即投伍府尊也。牧雲又託查萬崇軒先生選教官遲早。茲已查出。寫一紅條。大約明冬可選。此二事可囑澄侯寫信告知牧雲。姪等在京。身體平安。常南陔先生欲以幼女許配紀澤。託郭筠仙說媒。李家尙未說定。兩家似可對。不知堂上大人之意若何。望示知。餘容續具。姪謹稟。（道光二十八年九月十二日）

卷四

致諸弟（勿屈於小試。大學之綱領。應用日課冊）

諸位賢弟足下。十月廿一。接九弟在長沙所發信。內途中日記六葉。外藥子一包。廿二接九月初二日家信。欣悉以慰。

自九弟出京後。余無日不憂慮。誠恐道路變故多端。難以臆揣。及讀來書。果不出吾所料。千辛萬苦。始得到家。幸哉幸哉。鄭仲之不足恃。余早已知之矣。郁滋堂如此之好。余實不勝感激。在長沙時。曾未道及彭山吧。何也。

四弟來信甚詳。其發憤自勵之志。溢於行間。然必欲找館出外。此何意也。不過謂家塾離家太近。容易耽擱。不如出外較淨耳。然出外從師。則無甚耽擱。古出外教書。其耽擱更甚於家塾矣。且苟能發奮自立。則家塾可讀書。即曠野之地。熱鬧之場。亦可讀書。負薪牧豕。皆可讀書。苟不能發奮自立。則家塾不宜讀書。即清淨之鄉。神仙之境。皆不能讀書。何必擇地。何必擇時。但自問立志之真不真耳。

六弟自怨數奇。余亦深以爲然。然屈於小試。輒發牢騷。吾竊笑其志之小。而所憂之不大也。君子之立志也。有民胞物與之量。有內聖外王之業。而後不忝於父母之所生。不愧爲天地之完人。故其爲憂也。以不如舜。不如周公爲憂也。以德不修。學不講。爲憂也。是故頑民梗化則憂之。蠻夷猾夏則憂之。小人在位。賢人否閉。則憂之。匹夫匹婦不被己澤。則憂之。所謂悲天命而憫人窮。此君子之所憂也。若夫一體之屈伸。一家之飢飽。世俗之榮辱得失。

貴賤毀譽。君子固不暇憂及此也。六弟屬於小試。自稱數奇。余竊笑其所憂之不大也。

蓋人不讀書則已。亦既自名曰讀書人。則必從事於大學。大學之綱領有二。明德新民。止至善。皆我分內事也。若讀書不能體貼到身上去。謂此三項。與我身毫不相涉。則讀書何用。雖使能文能詩。博雅自詡。亦只算得識字之牧猪奴耳。豈不謂之明理有用之人也。朝廷以制藝取士。亦謂其能代聖賢立言。必能明聖賢之理。行聖賢之行。可以居官莅民。整躬率物也。若以明德新民爲分外事。則雖能文能詩。而於修己治人之道。實茫然不講。朝廷用此等人作官。與用牧猪奴作官。何以異哉。然則既自名爲讀書人。則大學之綱領。皆己立身切要之事項矣。其修目有八。自我觀之。其致功之處。則僅二者而已。曰格物。曰誠意。格物。致知之事也。誠意。力行之事也。物者何。即所謂本末之物也。身心意知家國天下。皆物也。天地萬物。皆物也。日用常行之事。皆物也。格者。即格物而窮其理也。如事親定省。物也。究其所以當定省之理。即格物也。事兄隨行。物也。究其所以當隨行之理。即格物也。吾心。物也。究其存心之理。又博究其省察涵養以存心之理。即格物也。吾身。物也。究其敬身之理。又博究其立齊坐尸以敬身之理。即格物也。每日所看之書。句句皆物也。切己體察。窮究其理。即格物也。此致知之事也。所謂誠意者。即其所知而力行之。是不欺也。知一句便行二句。此力行之事也。此二者並進。下學在此。上達亦在此。

吾友吳竹如格物工夫頗深。一事一物。皆求其理。倭良峯先生則誠意工夫極嚴。每日有日課冊。一日之中。一念之差。一事之失。一言一默。皆筆之於書。書皆楷字。三月則訂一本。自乙未年起。今三十本矣。蓋其慎獨之嚴。雖妄念偶動。必即時克治。而著之於書。故所讀之書。句句皆切身之要藥。茲將良峯先生日課。鈔三葉付歸。與諸弟看。余自十月初一日起。亦照良峯樣。每日一念一事。皆寫之於冊。以便觸目克治。亦寫楷書。馮樹堂與余同日記起。亦有日課冊。樹堂極爲虛心。愛我如兄弟。敬我如師。將來必有所成。余向來有無恆之弊。自此寫日課本。子起。可保終身有恆矣。蓋明師益友。重重夾持。能進不能退也。本欲鈔余日課冊付諸弟閱。因今日鏡海先生來。要將本子帶回去。故不及鈔。十一月有摺差。准抄幾葉付回也。

余之益友。如倭良峯之瑟僂。令人對之肅然。吳竹如竇蘭泉之精義。一言一事。必求至是。吳子序邵蕙西之談經。深思明辨。何子貞之談字。其精妙處。無一不合。其談詩尤最符契。子貞深喜吾詩。故吾自十月來。已作詩十八首。茲鈔二葉付回。與諸弟閱。馮樹堂陳岱雲之立志。汲汲不遑。亦良友也。鏡海先生。吾雖未嘗執贄請業。而心已師之矣。

吾每作書與諸弟。不覺其言之長。想諸弟或厭煩難看矣。然諸弟苟有長信與我。我實樂之。如獲至寶。人固各有性情也。

余自十月初一日起。記日課。念念欲改過自新。思從前與小珊有隙。實是一朝之忿。不近人情。即欲登門謝罪。恰好初九日小珊來拜壽。是夜余即至小珊家久談。十三日與岱雲合駁。請小珊吃飯。從此歡笑如初。前隙盡釋矣。近事大略如此。容再續書。兄國藩手具。(道光二十二年十月二十六日)

致諸弟(述近况並對待童僕之態度)

諸位賢弟足下。前十一月八日。已將日課鈔與弟閱。嗣後每次家書。可鈔三葉付回。日課本皆楷書。一筆不苟。惜鈔回不能作楷書耳。

馮樹堂進功最猛。余亦教之如弟。知無不言。可惜九弟不能在京。與樹堂日日切磋。余無日無刻不太息也。九弟在京年半。余懶散不努力。九弟去後。余乃稍能立志。蓋余實負九弟矣。

余嘗語岱雲曰。「余欲盡孝道。更無他事。我能教諸弟進德業一分。則我之孝有一分。能教諸弟進十分。則我之孝有十分。若全不能教弟成名。則我大不孝矣。」九弟之無所進。是我之大不孝也。惟願諸弟發奮立志。念念有恆。以補我不孝之罪。幸甚幸甚。

岱雲與易五近亦有日課冊。惜其識不甚超越。余雖日日與之談論。渠究不能悉心領會。頗疑我言太夸。然岱雲近極勤奮。將來必有所成。何子敬近待我甚好。常彼此作詩唱和。蓋因其兄欽佩我詩。且談字最相合。故子敬亦

政容加禮。

子貞現臨隸字，每日臨七八葉，今年已千葉矣。近又考訂漢書之譌，每日手不釋卷。蓋子貞之學，長於五事。一曰儀禮精。二曰漢書熟。三曰說文精。四曰各體詩好。五曰字好。此五事者，渠意皆欲有所傳於後世，以余觀之，此三者，余不甚精，不知淺深究竟何如。若字則必傳千古無疑矣。詩亦遠出時手之上，必能卓然成家。近日京城詩家頗少，故余亦欲多做幾首。

金竺處在小珊家住，頗有面善心非之隙。唐詩甫亦與小珊有隙，余現仍與小珊來往，泯然無嫌，但心中不甚愜洽耳。曹西垣與鄒雲陔，十月十六起程，現尙未到。湯海秋久與之處，其人誕言太多，十句之中，僅一二句可信。今冬嫁女二次，一係杜蘭溪之子，一係李石樞之子入贅。黎樹翁亦有次女招贅，其婿雖未讀書，遠勝於馮翼矣。李筆峰尙館海秋處，因代考供事，得銀數十，衣服煥然一新。王翰城捐知州，去大錢八千串，何子敬捐知縣，去大錢七千串，皆於明年可遷實缺。黃子壽處本日去看他，工夫甚長，進古文有才華，好買書，東翻西閱，涉獵頗多，心中已有許多古董。

何世兄亦甚好，沈濟之至，天分不高，將來必有所成。吳竹如近日未出城，余亦未去，蓋每見則耽擱一天也。其世兄亦極沈潛，言動中禮，現在亦學倭良峯先生，吾觀何吳兩世兄之姿質，與諸弟相等，遠不及周受珊黃子壽，而將來成就，何吳必更切實，此其故，諸弟能看書自知之，願諸弟勉之而已。此數子者，皆後起不凡之才人也。安得諸弟與之聯鑄並駕，則余之大幸也。

季仙九先生到京服闕，待我甚好，有青眼相看之意。同年會課，近皆懶散，而十日一會如故。余今年過年，尙須借銀百五十金，以五十還杜家，以百金用。李石樞到京，交出長郡館公費，即在公項借用，免出外開口更好。不然，則尙須張羅也。

門上陳升一言不合而去，故余作傲奴詩，現換一周升作門上，頗好。余讀易旅卦，喪其童僕，象曰：「以旅與下，其

義喪也。」解之者曰：「以旅與下者，謂視童僕如旅人，刻薄寡恩，漠然無情，則童僕亦將視主如逆旅矣。」余待下雖不刻薄，而頗有視如逆旅之意，故人不盡忠，以後余嘗視之如家人手足也。分雖嚴明，而情貴周通，賢弟待人亦宜知之。

余每聞摺差至，輒望家信，不知能設法多寄幾次否。若寄信，則諸弟必須詳寫日記數天，幸甚。余寫信亦不必代諸弟多立課程，蓋恐多看則生厭，故但將余近日實在光景寫示而已。伏維諸弟細察。（道光二十二年十一月十七日）

致諸弟（述修業以衛身）

四位老弟足下。九弟行程，計此時可以到家，自任邱發信之後，至今未接到第二封信，不勝懸懸，不知道上有甚艱險否。四弟六弟院試，計此時應有信，而摺差久不見來，竇深懸望。

予身體較九弟在京時一樣，總以耳鳴爲苦。問之吳竹如云：「只有靜養一法，非藥物所能爲力。」而應酬日繁，予又素性浮躁，何能著實靜養。擬搬進內城住，可省一半，無謂之往還。現在尙未找得，予時時自悔，終未能洗滌自新。九弟歸去之後，予定剛日讀經，柔日讀史之法，讀經常懶散不沈著，讀後漢書，現已丹筆點過八本，雖全不記憶，而較之去年讀前漢書，領會較深。

吳竹如近日往來極密，來則作竟日談，所言皆身心國家大道理。渠言有竇蘭泉者，雲南人，見道極精，當平實。竇亦深知予者，彼此現尙未拜往。竹如必要我予搬進城住。蓋城內鏡海先生可以師事，倭良峯先生竇蘭泉可以友事。師友夾持，雖懦夫亦有立志。予思朱子言：「爲學譬如熬肉，先須用猛火煮，然後用慢火溫。」予生平工夫，全未用猛火煮過，雖有見識，乃是從悟境得來，偶用工亦不過優游玩索已耳。如未沸之湯，遽用慢火溫之，將愈煮愈不熟矣。以是急思搬進城內，屏除一切，從事於克己之學。鏡海良峯兩先生亦勸我急搬，而城外朋友，予亦有思常見者數人，如邵憲西吳子序何子貞陳岱雲是也。憲西嘗言與周公瑾交，如飲醇醪，我兩人頗有此風味。故

每見輒常談不捨。予序之爲人。予至今不能定其品。然識見最大且精。嘗教我云：「用功譬若掘井。與其多掘數井而皆不及泉。何若老守一井。力求及泉而用之不竭乎。」此語正與予病相合。蓋予所謂掘井而皆不及泉者也。

何子貞與予講字極相合。謂我真知大源。斷不可暴棄。予嘗謂天下萬事萬理。皆出於乾坤二卦。即以作字論之。純以神行。大氣鼓盪。脈絡周通。潛心內轉。此乾道也。結構精巧。向背有法。修短合度。此坤道也。凡乾以神氣言。凡坤以形質言。禮樂不可斯須去身。即此道也。樂本於乾。禮本於坤。作字而優游自得。真力彌滿者。即樂之意也。絲入扣。轉折合法者。即禮之意也。偶與子貞言及此。子貞深以爲然。謂渠生平得力。盡於此矣。

陳岱雲與吾處處痛癢相關。此九弟所知者也。寓至此。接得家書。知四弟六弟未得入學。悵悵然。科名有無遲早。總由前定。絲毫不能勉強。吾輩讀書。只有兩事。一者進德之事。講求乎誠正修齊之道。以圖無忝所生。一者修業之事。操習乎記誦詞章之術。以圖自衛其身。

進德之事。難於盡言。至於修業以衛身。吾請言之。衛身莫大如謀食。農工商勞力以求食者也。士勞心以求食者也。故或食祿於朝。教授於鄉。或爲傳食之客。或爲入幕之賓。皆須計其所業。足以得食而無愧。科名。食祿之階也。亦須計吾所業。將來不至尸位素餐。而後得科名而無愧。食之不得。窮通由天作主。予奪由人作主。業之精不精。由我作主。

然吾未見業果精而終不得食者也。農果力耕。雖有饑饉。必有豐年。商果積貨。雖有壅滯。必有通時。士果能精其業。安見其終不得科名哉。即終不得科名。又豈無他途。可以求食者哉。然則特患業之不精耳。求業之精。別無他法。曰專而已矣。諺曰：「藝多不養身。謂不專也。」吾掘井多而無泉可飲。不專之咎也。

諸弟總須力圖專業。如九弟志在習字。亦不盡廢他業。但每日習字工夫。不可不提提神。隨時隨事。皆可觸悟。四弟六弟。吾不知其心有專嗜否。若志在窮經。則須專守一經。志在作制義。則須專看一家文稿。志在作古文。則

須專看一家文集。作各體詩亦然。作試帖亦然。萬不可以兼營並騫。兼營則必一無所能矣。切囑切囑。千萬千萬。此後寫信來。諸弟各有專守之業。務須寫明。且須詳問極言。長篇累牘。使我讀其手書。即可知其志向。識見。凡專一業之人。必有心得。亦必有疑義。諸弟有心得。可以告我共賞之。有疑義。可以告我共析之。且書信既詳。則四千里外之兄弟。不啻晤言一室。樂何如乎。

予生平於倫常中。惟兄弟一倫。抱愧尤深。蓋父親以其所知者。盡以教我。而吾不能以吾所知者。盡教諸弟。是不孝之大者也。九弟在京年餘。進益無多。每一念及。無地自容。嗣後我寫諸弟信。總用此格紙。弟宜存留。每年裝訂成冊。其中好處。萬不可忽略看過。諸弟寫信寄我。亦須用一色格紙。以便裝訂。兄國藩手具。（道光二十二年九月十八日）

致諸弟（己已戒煙欲作曾氏家訓勉勵自立課程）

諸位賢弟足下。九弟到家。徧走各親戚家。必各有一番景況。何不詳以告我。四妹小產。以後生育頗難。然此事最大。斷不可以人力勉強。勸渠家只須聽其自然。不可過於矜持。又聞四妹起最晏。往往其姊反服事他。此反常之事。最足折福。天下未有不孝之婦。而可得好處者。諸弟必須時勸導之。曉之以大義。

諸弟在家讀書。不審每日如何用功。余自十月初一日立志自新以來。雖懶惰如故。而每日楷書寫日記。每日讀史十葉。每日記茶餘偶談一則。此三事。未嘗一日間斷。十月廿一日立誓永戒吃水烟。消今已兩月不吃烟。已習慣成自然矣。予自立課程甚多。惟記茶餘偶談。讀史十葉。寫日記楷本。此三事者。誓終身不間斷也。諸弟每日自立課程。必須有日日不斷之功。雖行船走路。須帶在身邊。予除此三事外。他課程不必能有成。而此三事者。將終身行之。

前立志作曾氏家訓一部。曾與九弟詳細道及。後因採擇經史。若非經史爛熟胸中。則割裂零碎。毫無線索。至於採擇諸子各家之言。尤爲浩繁。雖鈔數百卷。猶不能盡收。然後知古人作大學衍義。衍義補諸書。乃胸中自有條

例。自有議論。而隨便引書以證明之。非翻書而徧鈔之也。然後知著書之難。故暫且不作曾氏家訓。若將來胸中道理愈多。議論愈實。仍當爲之。

現在朋友愈多。講躬行心得者。則有鏡海先生。良峯前輩。吳竹如。寶蘭泉。馮樹堂。甯經知道者。則有吳子序。邵蕙西。講詩文字。而藝通於道者。則有何子真。才氣奔放。則有湯海秋。英氣逼人。志大神靜。則有黃子壽。又有王少鶴。名錫振。廣西主事。年念七歲。張筱甫之妹夫。朱廉甫名琦。廣西乙未翰林。吳莘畬名尙志。廣東人。吳撫臺之世兄。龐作人名文壽。浙江人。此四君者。首聞予名。而先來拜。雖所造有淺深。要皆有志之士。不甘居於庸碌者也。

京師爲人文薈。不求則無之。愈求則愈出。近來聞好友甚多。予不欲先去拜別人。恐徒標榜虛聲。蓋求友以匡己之不逮。此大益也。標榜以盜虛名。是大損也。天下有益之事。即有足損者。寓乎其中。不可不辨。

黃子壽近作選將論一篇。共六千餘字。真奇才也。黃子壽戊戌年始作破題。而六年之中。遂成大學問。此天分獨絕。萬不可學而至。諸弟不必震而驚之。予不願諸弟學他。但願諸弟學吳世兄。何世兄。吳竹如之世兄。現亦學良峯先生寫日記。言有矩。動有法。其靜氣實實可愛。

何子真之世兄。每日自朝至夕。總是溫書。三百六十日。除作詩文時。無一刻不溫書。真可謂有恆者矣。故予從前限功課教諸弟。近來寫信寄弟。從不另開課程。但教諸弟有恆而已。蓋士人讀書。第一要有志。第二要有識。第三要有恆。有志則斷不敢爲下流。有識則知學問無盡。不敢以一得自足。如河伯之觀海。如井蛙之窺天。皆無識也。有恆則斷無不成之事。此三者。缺一不可。諸弟此時惟有識。不可以驟幾。至於有志有恆。則諸弟勉之而已。予身體甚弱。不能苦思。苦思則頭暈。不耐久坐。久坐則倦乏。時時屬望。惟諸弟而已。

明年正月。恭逢祖父大人七十大壽。京城以進十爲正慶。予本擬在戲園設壽筵。寶蘭泉及良峯先生勸止之。故不復張筵。蓋京城張筵唱戲。名曰慶壽。實則打把戲。蘭泉之勸止。正以此故。現作壽屏兩架。一架淳化箋。四大幅。係何子真撰文並書。字有茶碗口大。一架冷金箋。八小幅。係吳子序撰文。予自書。淳化箋係內府用紙。紙厚如錢。

光彩耀目。尋常琉璃廠無有也。昨日偶有之。因買四張。字真字甚古雅。惜太大。萬不能寄回。奈何奈何。書不能盡言。惟諸弟鑒察。凡國藩手草。（道光二十二年十二月二十日）

附課程表

- 一、主敬 整齊嚴肅。無時不懼。無事時心在腔子裏。應事時專一不雜。
- 二、靜坐 每日不拘何時。靜坐一會。體驗靜極生陽來復之仁心。正位凝命。如鼎之鎮。
- 三、早起 黎明即起。醒後勿沾戀。
- 四、讀書不二 一書未點完。斷不看他書。東翻西閱。都是徇外爲人。
- 五、讀史 廿三史每日讀十頁。雖有事。不間斷。
- 六、寫日記 須端楷。凡日間過惡。身過。心過。口過。皆記出。終身不間斷。
- 七、日知其所亡 每日記茶餘偶談一則。分德行門。學問門。經濟門。藝術門。
- 八、月無忘所能 每月作詩文數首。以驗積理之多寡。氣之盛否。
- 九、謹言 刻刻留心。
- 十、養氣 無不可對人言之事。氣藏丹田。
- 十一、保身 謹遵大人手諭。節慾。節勞。節飲食。
- 十二、作字 早飯後作字。凡筆墨應酬。當作自己功課。
- 十三、夜不出門 曠功疲神。切戒切戒。

致諸弟（講讀經史之法及求師友之注意點）

諸位老弟足下。正月十五日接到四弟六弟九弟十二月初五日所發家信。四弟之信三業。語語平實。責我待人。不恕。甚爲切當。嘗謂月月書信。徒以空言責弟輩。却又不能實有好消息。令堂上聞兄之言。疑弟輩羸俗庸碌。使

弟輩無地可容云云。此數語。兄讀之不覺汗下。我去年曾與九弟閒談云。「爲人子者。若使父母見得我好些。謂諸兄弟俱不及我。這便是不孝。若使族黨稱道我好些。謂諸兄弟俱不如我。這便是不弟。何也。蓋使父母心中有賢愚之分。使族黨口中有賢愚之分。則必其平日有討好底意思。暗用機計。使自己得好名聲。而使兄弟得壞名聲。必其後日之嫌隙。由此而生也。劉大爺劉三爺。兄弟皆想做好人。卒至視如仇讎。因劉三爺得好名聲於父母族黨之間。而劉大爺得壞名聲故也。」今四弟之所責我者。正是此道理。我所以讀之汗下。但願兄弟五人。各各明白這道理。彼此互相原諒。兄以弟得壞名爲憂。弟以兄得好名爲快。兄不能盡道。使弟得令名。是兄之罪。弟不能盡道。使兄得令名。是弟之罪。若各各如此存心。則億萬年無纖芥之嫌矣。

至於家塾讀書之說。我亦知其甚難。曾與九弟面談及數十次矣。但四弟前次來書。言欲找館出外教書。兄意教館之荒功謀事。較之家塾爲尤甚。與其出而教館。不如靜坐家塾。若云一出家塾。便有明師益友。則我之所謂明師益友者。我皆知之。且已夙夜熟籌之矣。惟汪覺庵師友。及滄溟先生。是兄意中所信爲可師者。然衡陽風俗。只有冬學要緊。自五月以後。師弟皆奉行故事而已。同學之人。類皆庸鄙無志者。又最好訕笑人。其笑法不一。總之不離乎輕薄而已。四弟若到衡陽去。必以翰林之弟相笑。薄俗可惡。鄉間無朋友。實是第一恨事。不惟無益。且大有損。習俗染人。所謂與飽魚處。亦與之俱化也。兄嘗與九弟道及。謂衡陽不可以讀書。總不可以讀書。爲損友太多故也。

今四弟意必從覺庵師遊。則千萬聽兄囑咐。但取明師之益。無受損友之損也。接到此信。立即率厚二到覺庵師處受業。其束修今年謹具錢十挂。兄於八月准付回。不至累及家中。非不欲從豐。實不能耳。兄所最慮者。同學之人。無志嬉遊。端節以後。放散不事事。恐弟與厚二效尤耳。切戒切戒。凡從師必久而後可以獲益。四弟與季弟。今年從覺庵師。若地方相安。則明年仍可從遊。若一年換一處。是即無恆者。見異思遷也。欲求長進難矣。六弟之信。乃一篇絕妙古文。排募似昌黎。拗很似半山。予論古文。總須有倔強不馴之氣。愈拗愈深之意。故於太

史公外。獨取昌黎半山兩家。論詩亦取傲兀不羣者。論字亦然。每蓄此意而不輕談。近得何子真。意見極相合。偶談一二句。兩人相視而笑。不知六弟乃生成有此一枝妙筆。往時見弟文。亦無大奇特者。今觀此信。然後知吾弟真不羈才也。歡喜無極。凡兄所有志而力不能爲者。吾弟皆爲之可矣。

信中言兄與諸君子講學。恐其漸成朋黨。所見甚是。然弟儘可放心。兄最怕標榜。常存闊然尙綱之意。斷不至有所謂門戶自表者也。信中言四弟浮躁不虛心。亦切中四弟之病。四弟嘗視爲良友。藥石之言。信中又言弟之牢騷。非小人之熱中。乃志士之惜陰。讀至此。不勝惘然。恨不得生兩翅忽飛到家。將老弟勸慰一番。縱談數日乃快。然向使諸弟已入學。則謠言必謂學院做情。衆口鑠金。何從辨起。所謂塞翁失馬。安知非福。科名遲早。實有前定。雖惜陰念切。正不必以虛名縈懷耳。

來信言看禮記疏一本半。浩浩茫茫。苦無所得。今已盡棄。不敢復閱。現讀朱子綱目。日十餘葉云云。說到此處。兄不勝悔恨。恨早歲不會用功。如今雖欲教弟。譬盲者而欲導人之大途也。求其不誤難矣。然兄最好苦思。又得諸益友相質證。於讀書之處。有必不可易者數端。窮經必專一經。不可泛鶩。讀經以研尋義理爲本。考據名物爲末。讀至有一耐字訣。一句不通。不看下句。今日不通。明日再讀。今年不通。明年再讀。此所謂耐也。讀史之法。莫妙於設身處地。每看一處。如我便與當時之人。酬酢笑語於其間。不必人人皆能記也。但記一人。則恍如接其人。不必事事皆能記也。但記一事。則恍如親其事。經以窮理。史以考事。舍此二者。更別無學矣。

蓋自西漢以至於今。識字之儒。約有三途。曰義理之學。曰考據之學。曰詞章之學。各執一途。互相詆毀。兄之私意。以爲義理之學最大。義理明則躬行有要。而經濟有本。詞章之學。亦所以發揮義理者也。考據之學。吾無取焉矣。此三途者。皆從事經史。各有門徑。吾以爲欲讀經史。但當研究義理。則心一而不紛。是故經則專守一經。史則專熟一代。讀經史則專主義理。此皆守約之道。確乎不可易者也。

若夫經史而外。諸子百家。汗牛充棟。或欲閱之。但當讀一人之專集。不當東翻西閱。如讀昌黎集。則目之所見耳

之所聞。無非昌黎。以爲天地間除昌黎集而外。更無別書也。此一集未讀完。斷斷不換他集。亦專字訣也。六弟謹記之。讀經讀史讀專集。講義理之學。此有志者萬不可易者也。聖人復起。必從吾言矣。然此亦僅爲有大志者言之。若夫爲科名之學。則要讀四書文。讀試律賦。頭緒甚多。四弟九弟厚二弟天資較低。必須爲科名之學。六弟既有大志。雖不科名可也。但嘗守一耐字訣耳。觀來信言讀禮記疏。似不能耐者。勉之勉之。

兄少時天分不甚低。厥後日與庸鄙者處。全無所聞。數被茅塞久矣。及乙未到京後。始有志學詩古文。并作字之法。亦苦無良友。近年得一二良友。知有所謂經學者。經濟者。有所謂躬行實踐者。始知范韓可學而至也。馬遷韓愈亦可學而至也。程朱亦可學而至也。慨然思盡滌前日之污。以爲更生之人。以爲父母之肖子。以爲諸弟之先導。無如體氣本弱。耳鳴不止。稍稍用心。便覺勞頓。每日思念。天既限我以不能苦思。是天不欲成我之學問也。故近日以來。意頗疏散。計今年若可得一差。能還一切舊債。則將歸田養親。不復戀戀於利祿矣。麤識幾字。不敢爲非。以蹈大戾已耳。不復有志於先哲矣。吾人第一以保身爲要。我所以無大志願者。恐用心太過。足以疲神也。諸弟亦須時時以保身爲念。無忽無忽。來信又駁我前書。謂必須博雅有才。而後可明理有用。所見極是。兄前書之意。蓋以躬行爲重。卽子夏賢賢易色章之意。以爲博雅者不足貴。惟明理者乃有用。特其立論過激耳。六弟信中之意。以爲不博雅多聞。安能明理有用。立論極精。但弟須力行之。不可徒與兄辯駁見長耳。

來信又言四弟與季弟從遊覺庵師。六弟九弟仍來京中。或肄業城南云云。兄之欲得老弟共住京中也。其情如孤雁之求曹也。自九弟辛丑秋思歸。兄百計挽留。九弟嘗能言之。及至去秋決計南歸。兄實無可如何。祇得聽其自便。若九弟今年復來。則一歲之內。恕去忽來。不特堂上諸大人不肯。卽旁觀亦且笑我兄弟輕舉妄動。且兩弟同來。途費須得八十金。此時實難措辦。六弟言能自爲計。則兄竊不信。曹西垣去冬已到京。郭筠仙明年始起程。目下亦無好伴。惟城南肄業之說。則甚爲得計。兄於二月間。准付銀廿兩至金竺虔家。以爲六弟九弟省城讀書之用。竺虔於二月起身南旋。其銀四月初可到。弟接到此信後。卽下省肄業。省城中兄相好的。如郭筠仙。凌笛

舟。孫芝房。皆在別處坐書院。賀蔗農。俞岱青。陳堯農。陳慶覃。諸先生。皆官場中人。不能伏案用功矣。惟聞有丁君者。名忠儼。號秋臣。長沙廬生。學問切實。踐履篤誠。兄雖未曾見面。而稔知其可師。凡與我相好者。皆極力稱道丁君。兩弟到省。先到城南住。齋立即去拜丁君。託陳季牧爲介紹。執贊受業。凡人必有師。若無師則嚴憚之心不生。既以丁君爲師。以外擇友。則慎之又慎。昌黎曰。「善不吾與。吾強與之附。不善不吾惡。吾強與之拒。」一生之成敗。皆關乎朋友之賢否。不可不慎也。來信以進京爲上策。以肄業城南爲次策。兄非不欲從上策。因九弟去來太速。不好寫信稟堂上。不特九弟形迹矛盾。即我稟堂上。亦必自相矛盾也。又目下實難辦途費。六弟言能自爲計。亦未歷甘苦之言耳。若我今年能得一差。則兩弟今冬與朱嘯山同來甚好。如六弟不以爲然。則再寫信來商議可也。

九弟之信。寫家事詳細。惜話說太短。兄則每每太長。以後裁長補短爲妙。堯階若有大事。諸弟隨去一人。幫他幾天。牧雲接我長信。何以全無回信。毋乃嫌我話太直乎。扶乩之事。全不足信。九弟總須立志讀書。不必想及此等事。季弟一切。皆須聽諸兄話。此次摺弁走甚急。不暇鈔日記本。餘容後告。(道光二十三年正月十七日)

致六弟(學詩習字之法)

溫甫六弟左右。五月廿九。六月初一。連接弟三月初一。四月廿五。五月初一。三次所發之信。并四書文二首。筆力實實可愛。信中有云。「於兄弟則直達其隱。父子祖孫間。不得不曲致其情。」此數語有大道理。余之行事。每自以爲至誠。可質天地。何妨直情徑行。昨接四弟信。始知家人天親之地。亦有時須委曲以行之者。吾過矣。吾過矣。香海爲人最好。吾雖未與久居。而相知頗深。爾以兄事之可也。丁秩臣王衡臣兩君。吾皆未見。大約可爲弟之師。或師之。或友之。在弟自爲審擇。若果威儀可則。淳實宏通。師之可也。若僅博雅能文。友之可也。或師或友。皆宜常存敬畏之心。不宜視爲等夷。漸至慢褻。則不復能受其益矣。

弟三月之信。所定功課太多。多則必不能專。萬萬不可。後信言已向陳季牧借史記。此不可不熟看之書。爾既看

史記。則斷不可看他書。功課無一定呆法。但須專耳。余從前教諸弟。常限以功課。近來覺限人以課程。往往強人以所難。苟其不願。雖日日遵照限程。亦復無益。故近來教弟。但有一專字耳。專字之外。又有數語教弟。茲特將冷金箋寫出。弟可貼之座右。時時省覽。並抄一付。寄家中三弟。

香海言時文須學東萊博議。甚是。弟先須用筆圈點一遍。然後自選幾篇讀熟。即不讀亦可。無論何書。總須從首至尾。通看一遍。不然。亂繙幾葉。摘抄幾篇。而此書之大局精處。茫然不知也。學詩從中州集入亦好。然吾意讀總集。不如讀專集。此事人人意見各殊。嗜好不同。吾之嗜好。於五古則喜讀文選。於七古則喜讀昌黎集。於五律則喜讀杜集。七律亦最喜杜詩。而苦不能步趨。故兼讀元遺山集。吾作詩最短於七律。他體皆有心得。惜京都無人可與暢語者。弟要學詩。先須看一家集。不要東翻西閱。先須學一體。不可各體同學。蓋明一體。則皆明也。凌笛舟最善爲詩律。若在舍。弟可就之求教。習字臨千字文亦可。但須有恆。每日臨帖一百字。萬萬無間斷。則數年必成書家矣。陳季牧多喜談字。且深思善悟。吾見其寄岱雲信。實能知寫字之法。可愛可畏。弟可從之切磋。此等好學之友。愈多愈好。

來信要我寄詩回南。余今年身體不甚壯健。不能用心。故作詩絕少。僅作感春詩七古五章。慷慨悲歌。自謂不讓陳臥子。而語太激烈。不敢示人。餘則僅應酬詩數首。了無可觀。頃作寄賢弟詩二首。弟觀之以爲何如。京筆現在無便可寄。總在秋間寄回。若無筆寫。暫向陳季牧借一枝。後日還他可也。兄國藩手草。（道光二十三年六月初六日）

致諸弟（喜述大考升官）

諸位老弟足下。三月初六巳刻。奉上諭於初十日大考翰詹。余心甚著急。緣寫作俱生。恐不能完卷。不圖十三日早。見等第單。余名次二等第一。遂得仰荷天恩。賞擢不次。以翰林院侍講升用。格外之恩。非常之榮。將來何以報稱。惟有時時惶悚。思有補於萬一而已。

茲因金竺虔南旋之便。付回五品補服四付。水晶頂二座。阿膠二封。鹿膠二封。母親耳環一雙。竺虔到省時。老弟照單查收。阿膠係毛寄雲所贈。最爲難得之物。家中須慎重用之。竺虔曾借余銀四十兩。言定到省卽還。其銀二十二兩爲六弟九弟讀書省城之資。以四兩爲買書買筆之資。以六兩爲四弟季弟衡陽從師束脩之資。以四兩爲買漆之費。卽每歲漆一次之謂也。以四兩爲歐陽太岳母奠金。賢弟接到銀後。各項照數分用可也。

此次竺虔到家。大約在五月節後。故一切不詳寫。待摺差來時。另寫一詳明信片付回。大約四月半可到。賢弟在省。如有欠用之物。可寫信到京。餘不具述。兄國藩手草。（道光二十三年三月十九日）

致諸弟（論孝弟之道）

澄侯叔淳季洪三弟左右。五月底連接三月初一。四月十八兩次所發家信。四弟之信。具見真性情。有困心衡慮。鬱積思通之象。此事斷不可求速效。求速效必助長。非徒無益。而又害之。祇要日積月累。如愚公之移山。終久必有豁然貫通之候。愈欲速則愈錮蔽矣。來書往往詞不達意。我能深諒其苦。

今人都將學字看錯了。若細讀賢賢易色一章。則絕大學問。卽在家庭日用之間。於孝弟兩字上。盡一分。便是一分學。盡十分。便是十分學。今人讀書。皆爲科名起見。於孝弟倫紀之大。反似與書不相關。殊不知書上所載的。作文時所代聖賢說的。無非要明白這個道理。若果事事做得。卽筆下說不出何妨。若事事不能做。並有虧於倫紀之大。卽文章說得好。亦祇算個名教中之罪人。

賢弟性情真摯。而短於詩文。何不日日在孝弟兩字上用功。曲禮內則所說的。句句依他做出。務使祖父母父母叔父母無一時不安樂。無一時不順適。下而兄弟妻子。皆諄然有恩。秩然有序。此真大學問也。若詩文不好。此小事不足計。卽好極亦不值一錢。不知賢弟肯聽此語否。科名之所以可貴者。謂其足以承堂上之歡也。謂祿仕可以養親也。今吾已得之矣。卽使諸弟不得。亦可以承歡。亦可以養親。何必兄弟盡得哉。賢弟若細思此理。但於孝弟上用功。不於詩文上用功。則詩文不期進而自進矣。

凡作字總須得勢。使一筆可以走千里。三弟之字。筆筆無勢。是以肩促不能遠縱。去年曾與九弟說及。想近來已忘之矣。九弟欲看余白摺。余所寫摺子甚少。故不付。

地仙爲人主葬。害人一家。喪良心不少。未有不家敗人亡者。不可不力阻。凌雲也。至於紡棉花之說。如直隸之三河縣。靈壽縣。無論貧富男婦。人人紡布爲生。如我境之耕田爲生也。江南之婦人耕田。猶三河之男人紡布也。湖南如瀏陽之夏布。祁陽之葛布。宜昌之棉花。皆無論貧富男婦人。皆依以爲業。并此不足爲駭異也。第風俗難以遽變。必至駭人聽聞。不如刪去一段爲妙。書不盡言。兄國藩手草。（道光二十三年六月初六日）

致諸弟（述求師友專）

四位老弟左右。正月二十三日。接到諸弟信。係臘月十六日在省城發。不勝欣慰。四弟女許朱夏四姻伯之孫。蘭姊女許賀孝七之子。人家甚好。可賀。惟蕙妹家頗可慮。亦家運也。

六弟九弟今年仍讀書省城羅羅山兄處。附課甚好。既在此附課。則不必送詩文於他處看。以明有所專主也。凡事皆貴專。求師不專。則受益也不入。求友不專。則博愛而不親。心有所專宗。而博觀他塗。以擴其識。亦無不可。無所專宗。而見異思遷。此眩彼奪。則大不可。羅山兄甚爲劉霞仙歐曉岑所推服。有楊生任光者。亦能道其梗概。則其可爲師表明矣。惜吾不得常與居遊也。

在省用錢。可在家中支用。銀三十兩。則够二弟一年之用矣。亦在吾寄一千兩之內。予不能別寄與弟也。我去年十一月廿日到京。彼時無摺差回南。至十二月中旬始發信。乃兩弟之信。罵我糊塗。何不檢點至此。趙子舟與我同行。曾無一信。其糊塗更何如。即余自去年五月底至臘月初。未嘗接一家信。我在蜀。可寫信由京寄家。豈家中信不可由京寄蜀耶。又將罵何人糊塗耶。凡動筆不可不檢點。

九弟與鄭陳馮曹四信。寫作俱佳。可喜之至。六弟與我信。字太草率。此關乎一生福分。故不能不告汝也。四弟寫信。語太不圓。由於天分。吾不復責。餘容續布。諸惟心照。兄國藩手具。（道光二十四年正月二十六日）

致諸弟（告身健及紀澤婚事）

四位老弟左右。正月廿六日發一家信。二月初十日。黃仙垣來京。接到家信。備悉一切。欣慰之至。所付諸物。已接脯肉一方。鵝肉一邊。雜碎四件。布一包。烘籠二個。餘皆彭兩着帶來。朱嘯山亦於是日到。現與家心齋同居。係兄代伊覓得房子。距余寓甚近。不過一箭遠耳。郭筠仙現尚未到。余已爲賃本胡同關帝廟房。使渠在廟中住。在余家火食。馮樹堂正月初六日來余家。擬會試後再行上學。因小兒春間怕冷故也。樹堂於二月十三日考國子監學正。題「而恥惡衣惡食者」二句。「不以天下奉一人策」。共五百人入場。樹堂寫作俱佳。應可必得。陳岱雲於初六日移寓報國寺。其配之柩。亦停寺中。岱雲哀傷異常。不可勸止。作祭文一篇三千餘字。余爲作墓誌銘一首。不知陳宅已寄歸否。余懶贖寄也。四川門生。現已到廿餘人。我縣會試者。大約可十五人。甲午同年。大約可念五六人。然有求於余者。頗不乏人。

余今年應酬更繁。幸身體大好。迥不似從前光景。面胖而潤。較前稍白矣。耳鳴亦好十之七八。尚有微根未斷。不過月餘可全好也。內人及兒子兩女兒皆好。陳氏小兒在余家乳養者亦好。

六弟九弟在城南讀書。得羅羅山爲之師。甚妙。然城南課似亦宜應。不應。恐山長不以爲然也。所作詩文及功課。望日內付來。四弟季弟從覺庵師讀。自佳。四弟年已漸長。須每日看史書十頁。無論能得科名與否。總可以稍長見識。季弟每日亦須看史。然溫經更要緊。今年不必急急赴試也。曾受恬自京南歸。余寄回銀四百兩。高麗參半斤。鹿膠阿膠共五斤。蘭墨廿部。不知家中已收到否。尚有衣一箱。銀五百兩。俟公車南歸帶回。同鄉湯海秋與杜蘭溪。子女已過門而廢婚。係湯家女兒及父母並不是。餘俱如故。周介夫囑營放安徽廬鳳道。其女兒欲許字紀澤。常南陔大庫升安徽臬臺。其孫女欲許字紀澤。余俱不甚願。季仙九師爲安徽學政後。升吏部右侍郎。廖老師名鴻荃。去年放欽差。至河南塞河決。至今未成功。昨革職。賞七品頂戴。在河工効力贖罪。黃河大工不成。實國家大可憂慮之事。如何。如何。餘容後陳。兄國藩三具。（道光二十四年二月十四日）

致諸弟（述濟戚族之故）

大弟九弟左右。來書言自去年五月至十二月。計共發信七八次。兄到京後。家人僅檢出二次。一係五月二十二日發。一係十月十六發。其餘皆不見。遠信難達。往往似此。臘月信有糊塗字樣。亦情之不能禁者。蓋望眼欲穿之時。疑信雜生。怨怒交至。惟骨肉之情愈摯。則望之愈殷。望之愈殷。則責之愈切。度日如年。居室如圓牆。望好音如萬金之獲。聞謠言如風聲鶴唳。又加以堂上之懸思。重以嚴寒之逼人。其不能不出怨言以相詈者。情之至也。然爲兄者觀此二字。則雖曲諒其情。亦不能不責之。非責其情。責其字句之不檢點耳。何芥蒂之有哉。

至於回京時有摺弁南還。則兄竄不知。嘗到家之際。門幾如市。諸務繁劇。吾弟可想而知。兄意謂家中接榜後所發一信。則萬事可以放心矣。豈尙有懸挂哉。來書辨論詳明。兄今不復辨。蓋彼此之心。雖隔萬里。而赤城不啻目見。本無纖毫之疑。何必因二字而多費唇舌。以後來信。萬萬不必提起可也。

所寄銀兩。以四百爲餽贈戚族之用。來書云。「非有未經審量之處。卽似稍有近名之心。」此二語。推勘入微。兄不能不內省者也。又云。「所識窮乏。得我而爲之。抑逆知家中必不爲此慷慨。而姑爲是言。」斯二語。毋亦擬阿兄不倫乎。兄雖不肖。亦何至鄙且好至於如此之甚。所以爲此者。蓋族戚中斷不可不有一援手之人。而其餘則牽連而及。

兄己亥年至外家。見大舅陶穴而居。種菜而食。爲惻然者久之。通十舅送我謂曰。「外甥做外官。則阿舅來作燒火夫也。」南五舅送至長沙握手曰。「明年送外甥婦來京。」余曰。「京城苦。舅勿來。」舅曰。「然。吾終尋汝任所也。」言已泣下。兄念母舅皆已年高。飢寒之况可想。而十舅且死矣。及今不一援手。則大舅五舅又能枯我輩之餘潤乎。十舅難死。兄意猶當卹其妻子。且從俗爲之延僧。如所謂道場者。以慰逝者之魂。而盡吾不忍死其舅之心。我弟以爲可乎。蘭姊蕙妹。家運皆舛。兄好爲識微之妄談。謂姊猶可支撐。蕙妹則過數年。則不能自存活矣。同胞姊妹。縱彼無缺望。吾能不視如一家一身乎。

歐陽滄溟先生。夙債甚多。其家之苦況。又有非吾家可比者。故其母喪。不能稍隆厥禮。岳母送余時。亦涕泣而道。兄贈之獨豐。則猶徇世俗之見也。楚善叔爲債主逼迫。入地無門。二伯祖母嘗爲余泣言之。又泣告子植曰。「入兒夜來猴注地。濕圍徑五尺也。而田貨於我家。價既不昂。事又多磨。嘗貽書於我。備陳吞聲飲泣之狀。」此子植所親見。兄弟嘗歎久之。

丹閣叔與寶田表叔。昔與同硯席十年。豈意今日雲泥隔絕至此。知其窘迫難堪之時。必有歛恨於實命之不猶者矣。丹閣戊戌年。曾以錢八千贖我。賢弟諒其景況。豈易辦八千者乎。以爲喜極。固可感也。以爲釣餌。則亦可憐也。任尊叔見我得官。其歡喜出於至誠。亦可思也。竟希公項。嘗甲午年。抽公項三千二千爲賀禮。渠兩房頗不悅。祖父曰。「待藩孫得官。第一件先復竟希公項。」此語言之已熟。特各堂叔不敢反唇相譏耳。同爲竟希公之嗣。而竟枯懸殊若此。設造物者一日移其斃於彼二房。則無論六百。即六兩亦安可得耶。

六弟九弟之岳家。皆寡婦孤兒。槁餓無策。我家不拯之。則孰拯之者。我家少八兩。未必遂爲債戶逼取。渠得八兩。則舉室回春。賢弟試設身處地。而知其如救水火也。彭王姑待我甚厚。晚年家貧。見我輒泣。茲王姑已歿。故贈宜仁王姑丈。亦不忍以死視王姑之意也。騰七則姑之子。與我同孩提。長養各舅祖。則推祖母之愛而及也。彭舅曾祖。則推祖父之愛而及也。陳本七鄧升六二先生。則因覺庵師而牽連及之者也。其餘餽贈之人。非實有不忍於心者。則皆因人而及。非敢有意討好。沽名釣譽。又安敢以己之豪爽。形祖父之刻齋。爲比奸鄙之心之行也哉。諸弟生我十年以後。見諸戚族家皆窮。而我家尙好。以爲本分如此耳。而不知其初。皆與我家同盛者也。凡悉見其盛時氣象。而今日零落如此。則大難爲情矣。凡盛衰在氣象。氣象盛則雖飢亦樂。氣象衰則雖飽亦憂。今我家方全盛之時。而賢弟以區區數百金爲極少。不足比數。設以賢弟處楚善寬五之地。或處葛熊二家之地。賢弟能一日以安乎。

凡遇之豐。齋順舛。有數存焉。雖聖人不能自爲主張。天可使吾今日處豐亨之境。即可使吾明日處楚善寬五之

境。君子之處順境。兢兢焉常覺天之過厚於我。我當以所餘補人之不足。君子之處齋境。亦兢兢焉常覺天之厚於我。非果厚也。以爲較之尤齋者。而我固已厚矣。古人所謂境地須看不知我者。此之謂也。來書有區區千金四字。其毋乃不知天之已厚於我兄弟乎。

兄嘗觀易之道。察盈虛消息之理。而知人不可無缺陷也。日中則昃。月盈則虧。天有孤虛。地闕東南。未有常全而不闕者。剝也者。復之機也。君子以爲可喜也。夫也者。姤之漸也。君子以爲可危也。是故既吉矣。則由吝以趨於凶。既凶矣。則由悔以趨於吉。君子但知有悔耳。悔者。所以守其缺。而不敢求全也。小人則時時求全。全者既得。而吝與凶隨之矣。衆人常缺。而一人常全。天道屈伸之故。豈若是不公平。

今吾家椿萱重慶。兄弟無故。京師無比笑者。亦可謂至萬全者矣。故兄但求缺陷。各所居曰求缺齋。蓋求缺於他事。而求全於堂上。此則區區之至願也。家中舊債。不能悉清。堂上衣服。不能多辦。諸弟所需。不能一給。亦求缺陷之義也。內人不明此義。而時時欲置辦衣物。兄亦時時教之。今幸未全備。待其全時。則吝與凶隨之矣。此最可畏者也。賢弟夫婦訴怨於房闈之間。此是缺陷。吾弟當思所以彌其缺。而不可盡給其求。蓋盡給則漸幾於全矣。吾弟聰明絕人。將來見道有得。必且聽余之言也。

至於家中欠債。則兄實有不盡知者。去年二月十六。接父親正月四日手諭中云。「一切年事。銀錢敷用有餘。上年所借頭息錢。均已完清。家中極爲順遂。故不窘迫。」父親所言如此。兄亦不甚了了。不知所究係何項。未完尙有何項。兄所知者。僅江孝八外祖百兩。朱嵐暄五十兩而已。其餘如未賜本家之帳。則兄由京寄還。不與家中相干。午冬甲借添梓坪錢五十千。尙不知作何還法。正擬此次稟問祖父。

此外帳目。兄實不知。下次信來。務望詳開一單。使兄得漸次籌畫。如弟所云。「家中欠債已傳播否。若已傳播而實不至。則祖父受吝齋之名。我加一信。亦難免二三其德之誚。」此兄讀兩弟來書。所爲躊躇而無策者也。

茲特呈堂上一稟。依九弟之言書之。謂朱嘯山曾受恬處二百落空。非初意所料。其餽贈之項。聽祖父叔父裁奪。

或以二百爲贈。每人減半亦可。或家中十分窘迫。卽不贈亦可。戚族來者。家中卽以此信示之。庶不悖於過則歸己之義。賢弟觀之。以爲何如也。若祖父叔父以前信爲是。慨然贈之。則此稟不必付歸。凡另有安信付去。恐堂上慷慨持贈。反因接吾書而疑沮。

凡仁心之發。必一鼓作氣。盡吾力之所能爲。稍有轉念。則疑心生。私心亦生。疑心生則計較多。而出納吝矣。私心生則好惡偏。而輕重乖矣。使家中慷慨樂與。則慎無以吾書生堂上之轉念也。使堂上無轉念。則此舉也。阿兄發之。堂上成之。無論其爲是爲非。諸弟置之不論可耳。向使去年得雲貴廣西等省苦差。並無一錢寄家。家中亦不能責我也。

九弟來書。楷法佳妙。余愛之不忍釋手。起筆收筆皆藏鋒。無一筆撒手亂丟。所謂有往皆復也。想與陳季牧講究。彼此各有心得。可嘉可喜。然吾所教爾者。尙有二事焉。一曰換筆。古人每筆中間。必有一換。如繩索然。第一股在上。一換則第二股在上。再換則第三股在上也。筆尖之著紙者。僅少許耳。此少許者。吾嘗作四方鐵筆用。起處東方在左。西方在右。一換則東方在右矣。筆尖無所謂方也。我心中常覺其方。一換而東。再換而北。三換而西。則筆尖四面有鋒。不僅一面相向矣。二曰結字有法。結字之法無窮。但求胸中有成竹耳。

六弟之信。文筆拗而勁。九弟文筆婉而達。將來皆必有成。但目下不知各看何書。萬不可徒看考墨卷。汨其性靈。每日習字不必多。作百字可耳。讀背誦之書不必多。十葉可耳。看涉獵之書不必多。亦十葉可耳。但一部未完。不可換他部。此萬萬不易之理。阿兄數千里外教爾。僅此一語耳。

羅羅山兄讀書明大義。極所欽仰。惜不能會面暢談。余近來讀書無所得。酬應之繁。日不暇給。實實可厭。惟古文各體詩。自覺有進境。將來此事當有成就。恨當世無韓愈王安石一流人。與我相質證耳。賢弟亦宜趁此時學爲詩古文。無論是否。且試拈筆爲之。及今不作。將來年長。愈怕醜而不爲矣。每月六課。不必其定作詩文也。

古文詩賦四六。無所不作。行之有常。將來百川分流。同歸於海。則通一藝。卽通衆藝。通於藝。卽通於道。初不分而

二之也。此論雖太高，然不能不爲諸弟言之。使知大本大原，則心有定向，而不至於搖搖無著。雖當其應試之時，全無得失之見，亂其意中。卽其用力舉業之時，亦於正業不相妨礙。諸弟試靜心領略，亦可徐徐會悟也。外附錄五箴一首。養身要言一紙。求缺齋課程一紙。詩文不暇錄。惟諒之。兄國藩手草。（道光二十四年三月二十日）

附錄五箴并序（甲辰春作）

少不自立，荏苒遂消今茲。蓋古人學成之年，而吾碌碌尙如斯也。不其戚矣。繼是以往，人事日紛，德慧日損，下流之赴，抑又可知。夫痲疾所以益智，逸豫所以亡身。僕以中材而履安順，將欲刻苦而自振拔，諒哉其難之。因作五箴以自劄云。

立志箴

煌煌先哲，彼亦猶人。藐焉小人，亦父母之身。聰明福祿，予我者厚哉。棄天而佚，是及凶災。積悔累千，其終也已。往者不可追，請從今始。荷道以躬，與之以言。一息尙活，永矢弗諼。

居敬箴

天地定位，二五胚胎。鼎焉作配，實曰三才。儼恪齋明，以凝女命。女之不莊，伐生戕性。誰人可慢，何事可弛。弛事者無成，慢人者反爾。縱彼不反，亦長吾驕。人則下汝，天罰昭昭。

主靜箴

齋宿日觀，天雞一鳴。萬籟俱息，但聞鐘聲。後者毒蛇，前有猛虎。神定不懼，誰敢余侮。豈伊避人，日對三軍。我慮則一，彼紛不紛。馳騫半生，曾不自主。今其老矣，始擾擾以終古。

謹言箴

巧語悅人，自擾其身。閒言送日，亦攪女神。解人不誇，誇者不解。道聽塗說，智笑愚駭。駭者終明，謂女實欺。笑者鄙女，雖矢猶疑。尤悔既叢，銘以自攻。銘而復蹈，嗟女既耄。

有恆箴

自吾識字。百歷消茲。二十有八載。則無一知。莫之所忻。閱時而鄙。故者既拋。新者旋徙。德業之不常。曰爲物牽。爾之再食。曾未聞或愆。黍黍之增。久而盈斗。天君司命。敢告焉。

養身要言（癸卯入蜀道中作）

一陽初動處。萬物始生時。不藏怒焉。不宿怨焉。（以上仁所以養肝也）

內而整齊思慮。外而敬慎威儀。泰而不驕。威而不猛。（以上禮所以養心也）

飲食有節。起居有常。作事有恆。容止有定。（以上信所以養脾也）

擴然而大公。物來而順應。裁之吾心而安。揆之天理而順。（以上義所以養肺也）

心欲其定。氣欲其定。神欲其定。體欲其定。（以上智所以養腎也）

求缺齋課程（癸卯孟夏立）

讀熟讀書十葉。（易經詩經）（史記明史）（屈子莊子）（杜詩韓文）看應看書十葉。（不具載）（習

字一百。數息百八。）記過隙。（即日記）記茶餘偶談一則。（以上每日課）

逢三日寫回信。逢八日作詩古文一藝。（以上每月課）

致諸弟（喜得會試房差）

四位老弟足下。三月初六日。蒙皇上天恩。得會試分房差。卽於是日始闈卷。十八房每位分卷二百七十餘。至廿三日頭場卽已看畢。廿四看二三場。至四月初四皆看完。各房薦卷。多少不等。多者或百餘。少者亦薦六十餘卷。余薦六十四卷。而惟余中卷獨多。共中十九人。他房皆不能及。十一日發榜。余卽於是日出闈。在場月餘。極清吉。寓內眷口。大小平安。出闈數日。一切忙迫。人客絡繹不絕。朱嘯山於四月十六日出京。余寄有紋銀百兩。高麗參一斤半。書一包。內子史精華六套。古文辭類纂二套。綏寇紀略一套。到家日查收。別有壽屏及筆等項。尙未辦齊。

待郭筠仙帶回。十四日新進士覆試。題「君子喻於義。賦得竹箭有筠。得行字。」我縣謝吉人中進士後。因一切不便。故邀來在余寓住。

十五日接三月初十日家信。內有祖父父親叔父手諭。及諸弟詩文並信。其文此次僅半日。忙不及改。准於下次付回。四弟之信。所問蓋竇牟竇庠竇鞏兄弟。皆從昌黎遊。去年所寫牟尼。竇誤寫尼字也。汪雙池先生燦係雍正年間人。所著有理學逢源等書。郭筠仙望臣兄弟。及荷樹堂。俱要出京。寓內要另請先生。現尙未定。草布一二。祈賢弟代稟堂上各位大人。今日上半天。已作一函呈父親大人。交朱嘯山。大約六月可到。兄國藩手草。（道光二十四年四月十五日）

致諸弟（託友帶歸各物）

四位老弟左右。前黃仙垣歸。託帶四川闡墨四十部。共二包。無家信。項歐陽小岑歸。託帶大皮箱一口。內銀五百十兩。衣服一單。單存箱內。又長包一個。內袍料及氈子諸物。亦有單存包內。有家信數行。外又有寄霞仙信一包。書一包。共十套。不知仙垣小岑二君到時。諸弟尙在省城否。

茲安化梁菴莊同年南還。又託帶四川闡墨四十部。共二包。有一包係油紙封的。內裝訂闡墨廿部。彭王姑墓誌銘一幅。龍翰臣寫散館卷三開。自寫白摺一本。又布包鹿膠一包。重三斤。又鄉試題名錄共一包。照收。並附大批單一紙。其進士題名錄及散館錄。隨後交摺差帶回。統俟後言詳述。兄國藩手草。（道光二十四年四月廿一日）

致諸弟（告應酬太忙及勿爲時文所誤）

四位老弟足下。自三月十三日發信後。至今未寄一信。余於三月廿四。移寓前門內西邊碾兒胡同。與城外消息不通。四月間到摺差一次。余竟不知。迨既知而摺差已去矣。惟四月十九歐陽小岑南歸。余寄衣箱銀物並信一件。四月廿四梁菴莊南歸。余寄書卷零物並信一件。兩信皆僅數語。至今想尙未到。四月十三黃仙垣南歸。余寄闡墨。並無書信。想亦未到。茲將三次所寄各物。另開清單付回。待三人到時。家中照單查收可也。

內城現住房共廿八間。每月房租京錢三十串。極爲寬敞。馮樹堂郭筠仙所住房屋皆清潔。甲三於三月廿四日上學。天分不高不低。現已讀四十天。讀至自修齊至平治矣。因其年太小。故不加嚴。已讀者字皆能認。兩女皆平安。陳岱雲之子。在余家亦甚好。內人身子如常。現又有喜。大約九月可生。

余體氣較去年略好。近因應酬太繁。天氣漸熱。又有耳鳴之病。今年應酬。較往年更增數倍。第一爲人寫對聯條幅。合四川湖南兩省。求書者幾日不暇給。第二公車來借錢者甚多。無論有借無借。多借少借。皆須婉言款待。第三則請酒拜客。及會館公事。第四則接見門生。頗費精神。又加以散館殿試。則代人料理。考差則自己料理。諸事允雜。遂無暇讀書矣。

三月廿八。大挑甲午科。共挑知縣四人。教官十九人。其全單已於梁萊莊所帶信內寄回。四月初八日發會試榜。湖南中七人。四川中八人。去年門生中二人。另有題名錄附寄。十二日新進士覆試。十四發一等廿一名。另有單附寄。十六日考差。余在場二文一詩。皆妥當。無弊病。寫亦無錯落。茲將詩稿寄回。十八日散館。一等十九名。本家心齋取一等十二名。陳啓邁取二等第三名。二人俱留館。徐棻因詩內敝字誤寫敝字。改作知縣。良可惜也。廿二日散館者引見。廿六七兩日考差者引見。廿八日新進士朝考。三十日發全單附回。廿一日新進士殿試。廿四日點狀元。全榜附回。五月初四五兩日新進士引見。初一日放雲貴試差。初二日欽派大教習二人。初六日奏派小教習六人。余亦與焉。初十日奉上諭。翰林侍讀以下。詹事府洗馬以下。自十六日起。每日召見二員。余名次第六。大約十八日可以召見。從前無逐日分見輪詹之目。自道光十五年。始一舉行。足徵聖上勤政求才之意。十八年亦如之。今年又如之。此次召見。則今年放差。大半奏對稱旨者居其半。詩文高取者居其半也。

五月十一日。接到四月十三家信。內四弟六弟各文二首。九弟季弟各文一首。四弟東皋課文甚潔淨。詩亦穩妥。則何以哉一篇。亦清順有法。第詞句多不圓足。筆亦平沓不超脫。平沓最爲文家所忌。宜力求痛改此病。六弟筆爽利。近亦漸就範圍。然詞意平庸。無才氣崢嶸之處。非吾意中之溫甫也。如六弟之天姿不凡。此時作文。當求識

翰縱橫，才氣奔放，作如火如茶之文，將來庶有成就。不然，一披半剔，意淺詞卑，即使獲售，亦嘗慚其文之淺薄不堪。若其不售，則又兩失之矣。今年從羅羅山遊，不知羅山意見如何。

吾謂六弟今年入泮固妙，萬一不入，則當盡棄前功，壹志從事於先輩大家之文。年過二十，不爲少矣。若再扶牆摩壁，役役於考卷搭截小題之中，將來時過而業仍不精，必有悔恨於失計者。不可不早圖也。余當日實見不到此，幸而早得科名，未受其害。向使至今未嘗入泮，則數十年從事於吊渡映帶之間，仍然一無所得，豈不醜顏也哉。此中誤人終身多矣。溫甫以世家之子弟，負過人之姿質，即使終不入泮，尙不至於飢寒，奈何亦以考卷誤終身也。

九弟要余改文詳批，余實不善改小考文。當請曹西垣代改。下次摺弁付回，季弟文氣清爽異常，喜出望外，意亦層出不窮。以後務求才情橫溢，氣勢充暢，切不可挑剔敷衍，安於庸陋，勉之勉之。初基不可不大也。書法亦有稽字筆意，尤爲可喜。總之，吾所望於諸弟者，不在科名之有無。第一則孝弟爲端，其次則文章不朽。諸弟若果能自立，當務其大者遠者，毋徒汲汲於進學也。馮樹堂郭筠仙在寓，看書作文，功無間斷。陳季牧日日習字，亦可畏也。四川門生留京約二十人，用功者頗多，餘不盡言。兄國藩草。（道光二十四年五月十二日）

致諸弟（論進德修業）

四位老弟左右。昨念七日接信，暢快之至，以信多而處處詳明也。四弟七夕詩甚佳，已詳批詩後。從此多作詩亦甚好，但須有志有恆，乃有成就耳。余於詩亦有工夫，恨當世無韓昌黎及蘇黃一輩人，可與發吾狂言者。但人事太多，故不常作詩，用心思索，則無時敢忘之耳。

吾人則有進德修業兩事靠得住。進德則孝弟仁義是也。修業則詩文作字是也。此二者由我作主，得尺則我之尺也，得寸則我之寸也。今日進一分德，便算積了一升穀。明日修一分業，又算餘了一分錢。德業並增，則家私日起。至富貴功名，悉由命定。絲毫不能自主。昔某官有一門生，爲本省學政，託以兩孫，當面拜爲門生。後兩孫歲考

臨場大病。科考丁艱。不入學。數年後。兩生乃皆入學。其長者仍得兩榜。此可見早遲之際。時刻皆有前定。盡其在我。聽其在天。萬不稍生妄想。六弟天分較諸弟更高。今年受黜。未免憤怨。然及此正可困心衡慮。大加以新營膳之功。切不可因憤廢學。

九弟勸我治家之法。甚有道理。喜甚慰甚。自荆七遣去之後。家中亦甚整齊。待率五歸家便知。書曰。「非知之艱。行之維艱。」九弟所言之理。亦我所深知者。但不能莊嚴威厲。使人望若神明耳。自此後當以九弟言書諸紳。而刻刻警省。季弟天性篤厚。誠如四弟所云。樂何如之。求我示讀書之法。及進德之道。另紙開示。餘不具。國藩手草。
(道光二十四年八月廿九日)

致諸弟(須立志猛進)

四位老弟足下。自七月發信後。未接諸弟信。鄉間寄信。較省城寄信百倍之難。故余亦不望。然九弟前信。有意與劉霞仙同伴讀書。出意甚佳。霞仙近來讀朱子書。大有所見。不知其言語容止。規模氣象何如。若果言動有禮。威儀可則。則直以爲師可也。豈特友之哉。然與之同居。亦須真能取益乃佳。無徒浮慕虛名。人苟能自立志。則聖賢豪傑。何事不可爲。何必借助於人。「我欲仁。斯仁至矣。」我欲爲孔孟。則日夜孜孜。惟孔孟之是學。人誰得而禦我哉。若自己不立志。則雖日與堯舜禹湯同住。亦彼自彼。我自我矣。何與於我哉。

去年溫甫欲讀書省城。我以爲離却家門。偏促之地。而與省城諸勝己者處。其長進當不可限量。乃兩年以來。看書亦不甚多。至於詩文。則絕無長進。是不得歸咎於地方之偏促也。去年余爲擇師。丁君敘忠。後以丁君處太遠。不能從。余意中遂無他師可從。今年弟自擇羅羅山。攷文。而嗣後杳無消息。是又不得歸咎於無良友也。日月逝矣。再過數年。則滿三十。不能不趁三十以前。立志猛進也。

余受父教。而余不能教弟成名。此余所深愧者。他人與余交。多有受余益者。而獨諸弟不能受余之益。此又余所深恨者也。今寄霞仙信一封。諸弟可鈔存信稿。而細玩之。此余數年來學思之力。略具大端。六弟前囑余將所作

詩鈔錄寄回。余往年皆未存稿。近年存稿者。不過百餘首耳。實無暇鈔寫。待明年將全本付回可也。國藩草。（道光二十四年九月十九日）

致諸弟（戒勿恃才傲物）

四位老弟足下。吾人爲學。最要虛心。嘗見朋友中有美材者。往往恃才傲物。動謂人不如己。見鄉墨則罵鄉墨不通。見會墨則罵會墨不通。既罵房官。又罵主考。未入學者則罵學院。平心而論。己之所爲詩文。實亦無勝人之處。不特無勝人之處。而且有不堪對人之處。只爲不肯反求諸己。便都見得人家不是。既罵考官。又罵同考而先得者。傲氣既長。終不進功。所以潦倒一生。而無寸進矣。

余平生科名。極爲順遂。惟小考七次始售。然每次不進。未嘗敢出一怨言。但深愧自己試場之詩文太醜而已。至今思之。如芒在背。當時之不敢怨言。諸弟問父親叔父及朱堯階便知。蓋場屋之中。只有文醜而僥倖者。斷無文佳而埋沒者。此一定之理也。

三房十四叔。非不勤讀。只爲傲氣太勝。自滿自足。遂不能有所成。京城之中。亦多有自滿之人。識者見之。發一冷笑而已。又有嘗名士者。鄙科名爲糞土。或好作古詩。或好講考據。或好談理學。矍矍然自以爲壓倒一切矣。自識者觀之。彼其所造。會無幾何。亦足發一冷笑而已。故吾人用力。力除傲氣。力戒自滿。毋爲人所冷笑。乃有進步也。諸弟平日皆恂恂退讓。第累年小試不售。恐因憤激之久。致生驕惰之氣。故特作書戒之。務望細思吾言而深省焉。幸甚幸甚。國藩手草。（道光二十四年十月廿一日）

致諸弟（看書須有恆）

四位老弟足下。前月寄信。想已接到。余蒙祖宗遺澤。祖父教訓。幸得科名。內顧無所憂。外遇無不如意。一無所缺矣。所望者。再得諸弟強立同心一力。何患名之不顯。何患家運之不興。欲別立課程。多講規條。使諸弟遵而行之。又恐諸弟習見而生厭心。欲默默而不言。又非長兄督責之道。是以往年常示諸弟以課程。近年則只教以有

恆二字。所望於諸弟者。但將諸弟每月功課。寫明告我。則我心大慰矣。

乃諸弟每次寫信。從不將自己之業寫明。乃好言家事及京中諸事。此時家中重慶。外事又有我照料。諸弟一概不管可也。以後寫信。但將每月作詩幾首。作文幾首。看書幾卷。詳細告我。則我歡喜無量。諸弟或能爲科名中人。或能爲學問中人。其爲父母之令子一也。我之歡喜一也。慎弗以科名稍遜。而遂謂無可自力也。如霞仙今日之身分。則比等閒之秀才高矣。若學問愈進。身分愈高。則等閒之舉人進士。又不足論矣。

學問之道無窮。而總以有恆爲主。兄往年極無恆。近年略好。而猶未純熟。自七月初一起。至今則無一日間斷。每日臨帖百字。鈔書百字。看書少須滿二十頁。多則不論。自七月起。至今已看過王荆公文集百卷。歸震川文集四十卷。詩經大全二十卷。後漢書百卷。皆硃筆加圈批。雖極忙。亦須了本日功課。不以昨日耽擱。而今日補做。不以明日有事。而今日預做。諸弟若能有恆如此。則雖四弟中等之資。亦當有所成就。况六弟九弟上等之資乎。

明年肄業之所。不知已有定否。或在家。或在外。無不可者。謂在家不好用功。此巧於卸責者也。吾今在京。日日事務紛冗。而猶可以不間斷。况家中萬萬不及此間之紛冗乎。

樹堂筠仙自十月起。每日看書十五頁。亦極有恆。諸弟試將朱子綱目過筆圈點。定以有恆。不過數月。即圈完矣。若看註疏。每經不過數月即完。切勿以家中有事。而間斷看書之事。又勿以考試將近。而間斷看書之課。雖走路之日。到店亦可看。考試之日。出場亦可看也。兄日夜懸望。獨此有恆二字告諸弟。伏願諸弟刻刻留心。兄國藩手草。(道光二十四年十一月廿一日)

致諸弟(詩之命意。結親之注意點。勸勿管家中事)

諸位老弟足下。十六早。接到十一月十二日發信。內父親一信。四位老弟各一件。具悉一切。不勝欣幸。四弟之詩。又有長進。第命意不甚高超。聲調不甚響亮。命意之高。須要透過一層。如說考試。則須說科名是身外物。不足介懷。則詩意高矣。若說必以得科名爲榮。則意淺矣。舉此一端。餘可類推。腔調則以多讀詩爲主。熟則響矣。

去年樹堂所寄之筆，亦我親手買者。「春光醉」目前每支大錢五百文，實不能再寄。「漢璧」尙可寄。然必須明年會試後，乃有便人回南。春間不能寄也。

五十讀書固好。然不宜以此就擱自己功課。女子無才便是德。此語不誣也。

常家欲與我結婚。我所以不願者，因聞常世兄最好恃父勢，作威福，衣服鮮明，僕從烜赫，恐其家女子有宦家驕奢習氣，亂我家規，誘我子弟好奢耳。今渠再三要結婚，發甲五八字去。恐渠家是要與我爲親家，非欲與弟爲親家。此語不可不明告之。

賢弟婚事，我不敢作主。但親家爲人何如，亦須向汪三處查明。若喫鴉片煙，則萬不可對。若無此事，則聽堂上各大人與弟自主之可也。所謂翰堂秀才者，其父子皆不宜親近。我曾見過，想衡陽人亦有知之者。若要對親，或另請媒人亦可。

六弟九月之信，於自己近來弊病，頗能自知。正好用功自醫，而猶曰終日泄泄，此則我所不解者也。

家中之事，弟不必管。天破了，自有女媧管。洪水大了，自有禹王管。家事有堂上大人管。外事有我管。弟輩則宜自管功課而已。何必問其他哉。至於宗族姻黨，無論他與我有隙無隙，在弟輩只宜一概愛之敬之。孔子曰：「汎愛衆，而親仁。」孟子曰：「愛人不親，反其仁。禮人不答，反其敬。」此刻未理家事，若便多生嫌怨，將來當家立業，豈不個個都是仇人。古來無與宗族鄉黨爲仇之聖賢，弟輩萬不可專責他人也。

十一月信言，現看莊子並史記，甚善。但作事必須有恆，不可謂考試在即，便將未看完之書丟下，必須從首至尾，句句看完。若能明年將史記看完，則以後看書，不可限量。不必問進學與否也。賢弟論袁詩，論作字，亦皆有所見。然空言無益，須多做詩，多臨帖，乃可談耳。譬如人欲進京，一步不行，而在空言進京程途，亦何益哉。即言之津，人誰得而信之哉。

九弟之信，所以規勸我者甚切。余覽之，不覺毛骨悚然。然我用功，實腳踏實地，不敢一毫欺人。若如此做去，不作

外官。將來道德文章。必屢有成就。上不敢欺天地祖父。下不敢欺諸弟與兒子也。而省城之聞望日隆。即我亦不知其所自來。我在京師。惟恐名浮於實。故不先拜一人。不自詡一言。深以過情之聞爲恥耳。

來書寫大場題及榜信。此間九月早已知之。惟縣考案首前列及進學之人。則至今不知。諸弟以後寫信。於此等小事。及近處戚族家光景。務必一一詳載。

季弟信亦謙虛可愛。然徒謙亦不好。總要努力前進。此全在爲兄者倡率之。余他無所取。惟近來日日有恆。可爲諸弟倡率。四弟六弟。總不欲以有恆自立。獨不怕壞季弟之樣子乎。餘不盡宣。凡國藩手具。(道光二十四年十二月十八日)

致諸弟(無師無友亦可成第一等人物)

四位老弟足下。去年十二月廿二日。寄去書函。諒已收到。頃接四弟信。雖前信小註中。誤寫二字。其詩比卽付還。今亦忘其所誤謂何矣。諸弟寫信。總云倉忙。六弟去年曾言南城寄信之難。每次至撫院齋奏廳打聽云云。是何其蠢也。靜坐書院三百六十日。日日皆可寫信。何必打聽摺差行期而後動筆哉。或送至提塘。或送至岱雲家。皆萬無一失。何必問了無關涉之齋奏廳哉。若弟等倉忙。則兄之倉忙。殆過十倍。將終歲無一字寄家矣。

送王五詩第二首。弟不能解。數千里致書來問。此極虛心。余得信甚喜。若事事勤思善問。何患不一日千里。茲另紙寫明寄回。家塾讀書。余明知非諸弟所甚願。然近處實無名師可從。省城如陳堯農羅羅山。皆可謂名師。而六弟九弟。又不善求益。且住省二年。詩文與字。皆無大長進。如今我雖欲再言。堂上大人亦必不肯聽。不如安分耐煩。寂處里閑。無師無友。挺然特立。作第一等人物。此則我之所期於諸弟者也。昔發源汪雙池先生。一貧如洗。三十以前。在鑿上爲人傭工畫碗。三十以後。讀書訓蒙。到老終身不應科舉。卒著書百餘卷。爲本朝有數名儒。彼何嘗有師友哉。又何嘗出里閭哉。余所望於諸弟者。如是而已。然總不出乎立志有恆四字之外也。

買筆付回。須待公車歸。乃可帶回。大約府試院試可待用。縣試則趕不到也。諸弟在家作文。若能按月付至京。則

余請樹堂隨到隨改。不過兩月。家中又可收到書。不詳盡。餘俟續具。兄國藩三草。（道光二十五年二月初一日）

致諸弟（論中表爲婚之不當）

四位老弟足下。二月有摺差到京。余因眼蒙。故未寫信。三月初三。接到正月廿四所發家信。無事不詳悉。忻喜之至。此次眼尚微紅。不敢多作字。故未另稟堂上。一切詳此書中。煩弟等代稟告焉。去年所寄銀。余有分餽親族之意。厥後屢次信問。總未詳明示悉。頃奉父親示諭云。『皆已周到。酌量減半。』然以余所聞。亦有過於半者。亦不及一半者。下次信來。務求九弟開一單告我爲幸。

受恬之錢。既專使去取。余又有京信去。想必可以取回。則可以還江岷山東海之項矣。岷山東海之銀。本有利息。余擬送他高麗參共半斤。掛屏對聯各一付。或者可少減利錢。待公車歸時帶回。父親手諭。要寄百兩回家。亦待公車帶回。有此一項。則可以還率五之錢矣。率五想已到家。渠是好體面之人。不必時時責備他。惟以體面待他。渠亦自然學好。蘭姊買田。可喜之至。惟與人同居。小事要看鬆些。不可在討人惱。

歐陽牧雲要我重訂婚姻。我非不願。但渠與其妹是同胞所生。兄妹之子女。猶然骨肉也。古者婚姻之道。所以厚別也。故同姓不婚。中表爲婚。此俗禮之大失。譬如嫁女而號泣。奠禮而三獻。喪事而用樂。此皆俗禮之失。我輩不可不力辨之。四弟以此義告牧雲。吾徐嘗作信覆告也。

羅莖皋於二月十八日到京。路上備嘗辛苦。爲從來進京者所未有。於廿七日在圓明園正大光明殿補行覆試。所帶小菜布疋茶葉。俱已收到。但不知付物甚多。何以並無家信。四弟去年所寄詩。已圈批寄還。不知收到否。汪覺菴師壽文。大約在八月前付到。五十已納徵禮成。可賀可賀。朱家氣象甚好。但勸其少學官款。我家亦然。嘯山接到咨文。上有祖母已歿字樣。甚爲哀痛。歸思極迫。余再三勸解。場後即來余寓同住。我家共住三人。郭二於二月初八日到京。覆試二等第八。上下合家皆清吉。余耳仍鳴。無他念。內人及子女皆平安。樹堂榜後要南歸。將來擇師尙未定。

六弟信中言功課在廉讓之間。此語殊不可解。所需書籍。惟子史精華家中現有。惟託公車帶歸。漢魏六朝百三家。京城甚貴。余已託人在揚州買。尙未接到。稗海及綬寇紀略亦貴。且寄此書與人。則幫人車價。因此書尙非吾弟所宜急務者。故不買寄。元明名古文。尙無選本。近來邵蕙西已選元文。渠勸我選明文。我因無暇。尙未選。古文選本。惟姚姬傳先生所選本最好。吾近來圈過一遍。可於公車帶回。六弟用墨筆加圈一遍可也。

九弟詩大進。讀之爲之距離三百。卽和四章寄回。樹堂筠仙憲城三君。皆各有和章。詩之爲道。各人門徑不同。難執一己之成見。以概論。吾前教四弟學袁簡齋。以四弟筆情與袁相近也。今觀九弟筆情。則與元遺山相近。吾教諸弟學詩無別法。但須看一家之專集。不可讀選本。以汨沒性靈。至要至要。

吾於五七古學杜韓。五七律學杜。此二家無一字不細看。外此則古詩學蘇黃。律義學義山。此三家亦無一字不看。五家之外。則用功淺矣。我之門徑如此。諸弟或從我行。或別尋門徑。隨人性之所近而爲之可耳。余近來事極繁。然無日不看書。今年已批韓詩一部。正月十八批畢。現在批史記三之二。大約四月可批完。諸弟所看書。望詳示。鄰里有事。亦望示知。國藩手草。(道光二十五年二月初五日)

致諸弟(帶物歸家)

四位老弟左右。四月十六日。曾寫信交摺弁帶回。想已收到。十七日。朱嘯山南歸。託帶紋銀百兩。高麗參一斤半。書一包。計九套。茲因馮樹堂南還。又託帶壽屏一架。狼兼毫筆廿枝。鹿膠二斤。對聯堂幅一包。內金年伯耀南四條。朱嵐暄四條。蕭辛五對一幅。江岷山母舅四條。東海舅父四條。父親橫披一個。叔父摺扇一柄。乞照單查收。前信言送江岷山東海高麗參六兩。送金耀南年伯參二兩。皆必不可不送之物。惟諸弟稟告父親大人送之可也。樹堂歸後。我家先生尙未定。諸弟若在省得見樹堂。不可不殷勤親近。親近愈久。獲益愈多。今年湖南蕭史樓得狀元。可謂極盛。八進士皆在長沙。黃琴塢之胞兄及令嗣皆中。亦長沙人也。餘續具。兄國藩手草。(道光二十

年四月二十四日)

致諸弟（喜述升詹事府右春坊右庶子）

四位老弟足下。初二早。皇上御門辦事。余蒙天恩。得升詹事府右春坊右庶子。次日具摺謝恩。蒙召見勤政殿。天語垂問。共四十餘句。是日同升官者。李齒升都察院左副都御史。羅惇衍升通政司副使。及余共三人。余蒙祖父餘澤。頻叨非分之榮。此次升官。尤出意外。日夜恐懼修省。實無德足以當之。諸弟遠隔數千里。必須匡我之不逮。時時寄書規我之過。務使累世積德。不自我一人而墮。則庶幾持盈保泰。得免速致顛危。諸弟能常進箴規。則弟即吾之良師益友也。而諸弟亦宜常存敬畏。勿謂家有人作官。而遂敢於侮人。勿謂已有文學。而遂敢於恃才傲人。常存此心。則是載福之道也。

今年新進士。善書者甚多。而湖南尤甚。蕭史樓既得狀元。而周荇農壽昌去歲中南元。孫芝房鼎臣又取朝元。可謂極盛。現在同鄉諸人。講求詞章之學者固多。講求性理之學者亦不少。將來省運必大盛。

余身體平安。惟應酬太繁。日不暇給。自三月進闈以來。至今已滿兩月。未得看書。內人身體極弱。而無病痛。醫者云。一必須服大補劑。乃可回元。一現在所服之藥。與母親大人十五年前所服之白朮黑薑方略同。差有效驗。兄女四人。皆平順如常。

去年寄家之銀兩。將次寫信。求將分給戚族之數目。詳實告我。而至今無一字見示。殊不可解。以後務求將賬目開出寄京。以釋我之疑。又余所欲問家鄉之事甚多。茲另開一單。煩弟逐一條對。是禱。兄國藩草。（道光二十五年五月初五日）

致諸弟（評論文章及書法）

子植季洪兩弟左右。四月十四日接子植二月三月兩次手書。又接季洪信一函。子植何其詳。季洪何其略也。今年以來。京中已發信七號。不審俱收到否。第六號第七號。余皆有稟呈堂上。言今年恐不考差。彼時身體雖平安。而癩疥之疾未愈。頭上面上頸上。並斑剝陸離。恐不便於陛見。故情願不考差。恐堂上諸大人不放心。故特作白

摺楷信。以安慰老親之念。三月初有直隸張姓醫生。言最善治癩。貼膏藥於癩上。三日一換。貼三次即可拔出膿水。貼七次即全愈矣。初十日。令於左脅試貼一處。果有效驗。廿日即令貼頭面頸上。至四月八日。而七次皆已貼畢。將膏藥揭去。僅餘紅暈。向之厚皮頑癬。今已蕩然平矣。十五六即貼遍身。計不過半月。即可畢事。至五月初旬。考差。而通身已全好矣。現在仍寫白摺。一定赴試。雖得不得自有一定。不敢妄想。而苟能赴考。亦可上慰高堂。諸大人期望之心。寓中大小安吉。惟溫前月底。偶感冒風寒。遂痛左膝。服藥二三帖不效。請外科開一針而愈。澄弟去年習柳字。殊不足觀。今年改習趙字。而參以李北海雲麾碑之筆意。大爲長進。溫弟時文。已才華橫溢。長安諸友多稱賞之。書法以命意太高。筆不足以赴其所見。故在溫弟自不稱意。而人亦無自稱之。故論文則溫高於澄。澄難爲兄。論書則澄高於溫。溫難爲弟。子植書法。鶻滌澄溫而上之。可愛之至。可愛之至。但不知家中舊有徐浩書和尙碑。及顏真卿書郭家廟否。若能參以二帖之沉着。則直追古人不難矣。狼兼毫四枝。既不合用。可以二枝送莘田叔。以二枝送茆菴表叔。正月間。曾在岱雲處寄半毫二枝。不知已收到否。五月。鍾子賓太守往湖南。可再寄二枝。以後兩弟需用之物。隨時寫信至京可也。

祖父大人囑買四川漆。現在四川門生留京者僅二人。皆極寒之士。由京至渠家。有五千餘里。由四川至湖南。有四千餘里。彼此路皆太遠。此二人在京。常半年不能得家信。即令彼寄信至渠家。渠家亦萬無便可附湖南。九弟須詳稟祖父大人。不如在省以重價購頂上川漆爲便。

做直牌匾。祖父大人係馳封中憲大夫。父親係誥封中憲大夫。祖母馳封恭人。母親誥封恭人。京官加一級請封。侍讀學士是從四品。故堂上皆正四品也。藍頂是暗藍。余正月已寄回二頂矣。書不宜盡。諸詳澄溫書中。今日身上數藥。不及爲楷。堂上諸大人。兩弟代爲稟告可也。(道光二十六年四月十六日)

致諸弟(述升內閣學士)

澄侯子植季洪三位老弟足下。五月寄去一信。內有大考賦稿。想已收到。六月二日。蒙皇上天恩。及祖父德澤。予

得超升內閣學士。顧影捫心。實深慚悚。湖南三十七歲至二品者。本朝尙無一人。予之德薄才劣。何以堪此。近來中進士十年得閣學者。惟王辰季仙九師。乙未張小浦。及予三人。而予之才地。實不及彼二人遠甚。以是尤深愧仄。

菴樹堂就易念園館。係予所薦。以書啓兼教讀。每年得百六十金。李竹屋出京後。已來信四封。在保定訥制臺贈以三十金。且留乾館與他。在江蘇。陸立夫先生亦薦乾館與他。渠甚感激我。考教習。余爲總裁。而同鄉寒士如蔡貞齋等。皆不得取。余實抱愧。

寄回祖父父親袍褂二付。祖父係夾的。宜好好收拾。每月一看。數月一曬。百歲之後。卽以此爲斂服。以其爲天恩所賜。其材料外間買不出也。父親做棉的。則不妨長著。不必爲深遠之計。蓋父親年未六十。將來或更有君恩賜服。亦未可知。祖母大人葬後。家中諸事順遂。祖父之病已愈。予之癘疾亦愈。且驟升至二品。則風水之好可知。萬萬不可改葬。若再改葬。則謂之不祥。且大不孝矣。

然其地予究嫌其面前不甚寬敞。不便立牌坊。起誥封碑亭。亦不便起享堂。立神道碑。予意乃欲求堯階相一吉地。爲祖父大人將來壽藏。弟可將此意稟告祖父見允否。蓋誥封碑亭。斷不可不修。而祖母又不可改葬。將來勢不能合葬。乞稟告祖父。總以祖父之意爲定。前問長女對袁家。次女對陳家。不知堂上之意如何。現在陳家信來。謂我家一定對渠。甚歡喜。餘容後具。兄國藩草。（道光二十七年六月十八日）

致諸弟（述現服清涼藥）

四位老弟足下。廿九日摺差到京。問之係七月十一日在省起行。維時諸弟正在省。想是府考將畢之時。岱雲之弟及各家皆有信來京。而我家無信來。何也。余自十四日接到澄侯六月廿三之信。不勝欣慰。日日望府考信到。乃摺差至而竟無信。殊不可解。

余在京身體如常。前日之病。近來請醫生姜姓名士冠。細看云。「是肺胃兩家之熱。發於皮毛。」現在自頭上頸

上以至腹下。無處無之。其大者如錢。小者如豆。其色白。以蜜塗之。則轉紅紫色。爬破亦無水。不喜蓋衣。蓋被。蓋燥象也。此外毫無所病。一切飲食起居。大小二便。並皆如常。據姜醫云。一須用清涼藥。使肺胃之熱退盡。然後達於皮毛。不可求速效。兩月內則可全好矣。一言之甚爲有理。余將守其說而不搖。

六弟之文。昨日始找出。樂道人之善一首。其文甚有識見道理。准於下次摺差帶回。此外諸弟尙有文在京者否。若有。須寫信來清出。汪覺庵師書文。今日始作就。付回查收。若有不妥處。即請覺庵師改正可也。鄧鐵松病勢不輕。於八月初五日起行回南。此人利心甚熾。余去年送大錢十千。今又送盤費十兩。渠尙快快有缺望。

王荆七自去年來。不常至我家。昨日因奉父親大人之命。故喚他來。許他倘我得外差。或外官。即帶他出京。他現歡天喜地。常來請安。然自此次懲戒之後。想亦不敢十分騁張也。今年縣試前列第二名。是葛二一之子。關一否。下次書來。乞示我。餘俟續布。兄國藩手具。○道光二十五年七月三十日○

致諸弟（不可與人大疏許配二女事）

澄侯四弟子植九弟季洪二弟左右。二月十一。接到第一第二號來信。三月初十。接到第三四五六號來信。係正月二十八廿二及二月朔日所發。而一次收到。家中諸事。瑣屑畢知。不勝歡慰。祖大人之病。竟以服沉香少愈。幸甚。然予絲疑祖大人之體本好。因服補藥太多。致火壅於上焦。不能下降。雖服沉香而愈。尙恐非切中肯綮之劑。要須服清導之品。降火滋陰爲妙。予雖不知醫理。竊疑必須如此。上次家書。亦曾寫及。不知曾與諸弟商酌否。丁酉年祖大人之病。亦誤服補劑。賴澤六爺投以涼藥而效。此次何以總不請澤六爺一診。澤六爺近年待我家甚好。即不請他診病。亦須澄弟到他處常常來往。不可太疏。大小喜事。宜常送禮。

堯階既允爲我覓妥地。如其覓得。即聽渠買。買後或遷或否。仍由堂上大人作主。諸弟不必執見。上次信言。予思歸甚切。屬弟探堂上大人意思何如。頃奉父親手書。責我甚切。凡自是謹遵父命。不敢作歸計矣。郭筠仙兄弟於二月二十到京。筠仙與其叔及江岷樵住張相公廟。去我家甚近。翌臣即住我家。樹堂亦在我家入場。我家又添

二人伏侍李郭二君。大約榜後退一人。只用一打雜人耳。

筠仙自江西來。述岱雲母子之意。欲我將第二女許配渠第二子。求婚之意甚誠。則年岱雲在京。亦會託曹西垣說及。予答以緩幾年再議。今又託筠仙爲媒。情與勢皆不可卻。岱雲兄弟之爲人。與其居官治家之道。九弟在江西。一一目擊。煩九弟細告父母。並告祖父。求堂上大人分付。或對或否。以便答江西之信。予夫婦現無成見。對之意有六分。不對之意亦有四分。但求堂上大人主張。九弟去年在江西。予前信稍有微詞。不過恐人看輕耳。仔細思之。亦無妨礙。且有莫之爲而爲者。九弟不必自悔艾也。

碾兒胡同之屋東。四月要回京。予已看南橫街圓通觀東間壁房屋一所。大約三月尾可移寓。此房係汪醇卿之宅。比碾兒胡同狹一小半。取其不費力易搬。故暫移彼。若有好房。當再遷移。黃秋農之銀已付還。加利十兩。予仍退之。周之佩。於三月三日喜事。正齋之子竟尙未歸。黃蕪卿。周韓臣。閩皆將告假回籍。蕪卿已定十七日起行。劉盛唐。得瘋疾。不能入闈。可憫之至。袁漱六。到京數日。卽下園子用功。其夫人生女僅三日。下船進京。可謂膽大。周符農。散館。至今未到。其膽尤大。曾儀齋正月廿六在省起行。二月廿九日到京。凌笛舟正月廿八起行。亦廿九到京。可謂快極。而澄弟出京。偏延至七十餘天始到。人事之無定如此。

新寧人覆試題。『人而無恆』二句。賦得倉庚鳴。得鳴字。四等十一人。各罰停會試二科。湖南無之。我身癩疾。春間略發而不甚爲害。有人說方。將石灰澄清水。用水調桐油搗之。則白皮立去。現二三日一搗。使之不起白皮。雖頭後不過微露紅影。雖召見亦無礙。除頭頂外。他處皆不搗。以其僅能濟一時。不能除根也。內人及子女皆平安。今年分房。同鄉僅怨皆。同年僅松泉與寄雲大弟。未免太少。余雖不得差。一切自有張羅。家中不必掛心。今日余寫信頗多。又係馮李諸君出場之日。實無片刻暇。故予未作楷信稟堂上。乞弟代爲我說明。澄弟理家事之間。須時時看五種遺規。植弟洪弟須發憤讀書。不必管家事。兄國藩草。（道光二十七年三月初十日）

致諸弟（勿占人便益。兒女婚事勿太急）

澄侯子植季洪三弟足下。自四月廿七日。得大考諭旨以後。廿九日發家信。五月十八又發一信。二十九又發一信。六月十八又發一信。不審俱收到否。二十五日。接到澄弟六月一日所發信。具悉一切。欣慰之至。發卷所走各家。一半係余舊友。惟屢次擾人。心殊不安。我自從己亥年在外把戲。至今以爲恨事。將來萬一作外官。或督撫。或學政。從前施情於我者。或數百。或數千。皆鈞鉅也。渠若到任上來。不應則失之刻薄。應之則施一報十。尙不足滿其欲。故自兄自庚子到京以來。於今八年。不肯輕受人惠。情願人占我的便益。斷不肯我占人的便益。將來若作外官。京城以內。無責報於我者。澄弟在京年餘。亦得略見其概矣。此次澄弟所受各家之情。成事不說。以後凡事不可占人半點便益。不可輕取人財。切記切記。

彭十九家烟事。兄意彭家發浪將盡。不能久於蘊蓄。此時以女對渠家。亦若從前之以蕙妹定王家也。目前非不華麗。而十年之外。局面亦必一變。澄弟一男二女。不知何以急急定婚若此。豈少緩須臾。即恐無親家耶。賢弟從事多躁而少靜。以後尙期三思。兒女姻緣。前生注定。我不敢阻。亦不敢勸。但囑賢弟少安無躁而已。

京寓中大小平安。記澤讀書。已至宗族稱孝焉。大女兒讀書。已至吾十有五。前三月買驢子一頭。頃趙炳坤又送一頭。二品本應坐綠呢車。兄一切向來簡樸。故仍坐藍呢車。寓中用度。比前較大。每年進項亦較多。其他外間進項。尙與從前相似。同鄉人皆如舊。李竹屋在蘇寄信來。立夫先生許以乾館。餘不一。兄手草。○道光二十七年六月二十七日）

致諸弟（述大女兒訂姻）

澄侯子植季洪三弟左右。八月十六日摺弁到京。係七月廿九日在省起行。維時植洪二弟正在省城。不解何無一字寄京。聞學院二十六日始考古。則二十九日我邑尙未院試也。

京中大小平安。予之癩疾。七月底較六月稍差。要無礙召見。弟之事。則亦聽之而已。六弟在國子監考課。各位堂官頗加青眼。上次蔡司業課古學經文一篇。經解一篇。賦一篇。詩一篇。六弟取第一。獎勵甚重。帖一套。佳墨八條。

內人近頗多病。不能健飯。現在服藥。當不緊要也。

紀澤讀書前四月間所請之湖北魏先生。渠八月中即回家。我家已於八月初七日換請一宋先生。帶德府丙午舉人。今年考取教習。係我門生。其人專嚴勤教。余有同人書札。亦交渠代寫。紀澤現已讀至梁惠王章句下。每日讀書。頗能領會。

大女兒與袁家訂姻。已於八月初六日寫庚書過禮。郭筠仙爲媒。即須出都。後年始能復來。故趁其在京時先行納采。袁家過禮來真金簪一對。真金耳環一對。鍍金手釧一副。金戒指二。紅綠綉縐各三丈。金花一對。我家回禮。袍褂料一套。靴一帽一。朝珠一。補子一。簪插一。扇插一。又女婿見面儀六兩。

陳家姻事。前接四弟信。知家中堂上大人甚歡喜。現在岱雲丁艱。自不能定庚。只好待渠服滿後。諸弟若與陳家昆仲見面時。亦不必道及姻事。岱雲之喪事。余已送贖儀三十兩。交郭筠仙帶歸。又有輓聯一付。京官向例不送外官銀兩。予送三十兩。則已爲重矣。諸弟若到省。只須辦香燭去行禮。不必再送情也。

王荆七現來要求再入我家。我家現在本用兩個跟班。目前有一個要去。擬仍叫荆七來。但不知高僧能久持行戒否。書不詳盡。餘俟續寄。兄國藩手草。（道光二十七年八月十八日）

致諸弟（欣聞兩次喜信）

澄侯子植季洪足下。九月重陽日。接到家信三封。內父親手諭二件。澄侯六月廿五在家發信一件。七月十五在省發信一件。十九又一件。八月十三又一件。子植七月十九發一件。八月十三又一件。季洪亦有七月十九一篇。子植府試文章。在此包內。題名錄二紙。蓋至是始識九弟案首入學之信。前八月摺舟到京。乃七月廿九在省起行者。計是時九弟府首喜信。已發交提塘矣。而渠不帶來。良可憾也。我與溫甫看一夜始完。兩次喜信。使祖大人病體大愈。此爲人子孫者之大幸也。

呈請晉封。仍須覃恩之年。辛亥年是皇上七旬萬壽。大約可以請晉封祖父母父母。並可臚封叔父母。且可誥贈

曾祖父母矣。然使身不加修。學不加進。而濫受天恩。徒覺愧悚。故兄自升官後。時時戰兢惕懼。近來身體甚好。耳又微聾。甲三讀書。先生極好。嚴而且勤。教書亦極得法。長女上論將讀畢矣。溫甫國子監應課。已經補班。寓中眷口俱平順。

荆七現又收在我家。於門上跟班之外。多用一人。以充買辦行走之用。即以荆七補缺。甚爲勝任。渠亦如士會選朝。蘇武返漢。欣幸之至。四弟可告知渠家也。

袁漱大因其幼女已死。現搬住湘潭館。訂庚之事。前已寫信告堂上矣。陳家姻事。堂上大人既欣然允許。余豈復有不滿意者。惟訂庚須稍遲。或俟岱雲起服。亦未可知。至姻事却有成言矣。會心齋會借銀八十與郭瑞田。渠現還百金。交余託轉寄毅然先生。目前尙無委便。一入他人手。又恐化爲烏有。故不得不慎重。弟可先作書告毅然。說我所以慎重之故。亦總在今冬明春寄到也。

九弟印卷費。須出大錢百千。乃爲不豐不齋。不被人譏議。或三股均送。或兩學較多。門斗較少亦可。但須今年內送去。不可捱至明年。教官最爲清苦。我輩仕官之家。不可不有以體諒之也。家中今年想尙可支持。至明年上半年。余必寄銀至家應用。

陳岱雲到省。四弟與郭三合辦呢帽。甚是委叶。余送渠奠分三十金。已交筠仙帶去矣。別有執聯。現尙未寄。梅劬生求我作書與鍾子賓。準在近日付去。唐書郊之信。屢次未回。則實以懶惰之故。渠託我代求各翰林法書。澄侯不在京。而欲我爲此等事。毋乃強人以難乎。

四弟以女許彭家。姻緣前定。斷不可因我前言而稍生疑心。九弟入學。家中材料可以做衣。若再久收。恐被蟲傷。做數套衣。兄弟易衣而出。最好。家中諸皮衣。年年須少買樟腦。好好收拾。否則必爲蟲傷矣。同鄉諸家如常。書不能盡。摺弁在京僅一日。故多草率。兄國藩手具。(道光二十七年九月初十日)

致諸弟(溫弟館事。述思歸省親之計)

澄侯子植季洪足下。正月十一日發一家信。是日予極不閒。又見溫甫在外未歸。心中懊惱。故僅寫信與諸弟。未嘗爲書稟堂上大人。不知此書近已接到否。

溫弟自去歲以來。時存牢騷抑鬱之氣。太史公所謂。「居則忽忽若有所亡。出則不知其往者。」溫甫頗有此象。舉業工夫。大爲拋荒。閒或思一振奮。而與致不能鼓舞。余深以爲慮。每勸其痛著祖鞭。併心一往。

溫弟輒言思得一館。使身有管束。庶心有維繫。余思自爲京官。光景尙不十分窘迫。焉有不能養一胞弟。而必與寒士爭館地。向人求薦。實難啓口。是以久不爲之謀。館。自去歲秋冬以來。聞溫弟婦有疾。溫弟羈留日久。牢落無偶。而叔父抱孫之念甚切。不能不思溫弟南歸。且余既官二品。明年順天主考。亦在可簡放之列。恐溫弟留京三年。又告迴避。念此數者。欲勸溫弟南旋。故上次信道及此層。欲諸弟細心斟酌。不料發信之後。不過數日。溫弟即定得黃正齋館地。現在既已定館。身有所管束。心有所繫屬。舉業工夫。又可漸漸整理。待今年下半年再看光景。如我或聖眷略好。有明年主考之望。則到四五月。再與溫弟商入南闈或北闈行止。如我今年聖眷平常。或別有外放意外之事。則溫弟仍留京師。一定觀北闈。不必議南旋之說也。坐館以羈束身心。自是最好事。然正齋家澄弟所深知者。萬一不合。溫弟亦難久坐。見可而留。知難而退。但能不得罪東家。好來好去。即無不可耳。

余自去歲以來。日日想歸省親。所以不能者。一則京帳將近一千。歸家途費。又須數百。甚難措辦。二則二品歸籍。必須具摺。摺中難於措辭。私心所願者。得一學差。三年任滿。歸家省親上也。若其不能。或明年得一外省主考。能辦途費。後年必歸。次也。若二者不能。只望六弟九弟。明年得中一人。後來得一京官。支持門面。余則告養歸家。他日再定行止。如三者皆不得。則直待六年之後。至母親七十之年。余誓具摺告養。雖負債累萬。歸無儲粟。亦斷斷不顧矣。然此實不得已之計。若能於前三者之中。得其一者。則後年可見堂上各大人。乃如天之福也。不審祖宗默佑否。

現在寓中一切平安。癘疾上半身全好。惟腰下尙有織痕。家門之福。可謂全盛。而余心歸省之情。難以自慰。因偶

書及。遂備陳之。

毅然伯之項。去年已至余寓。余始覓便寄南。家中可將書封好。即行送去。餘不詳盡。諸惟心照。兄國藩手草。（首光二十八年正月廿一日）

致諸弟（指導考試。勸勿告官）

澄侯子植。季洪三弟左右。澄侯在廣東。前後共發信七封。至郴州耒陽。又發二信。三月十一到家以後。又發二信。皆已收到。植洪二弟。今年所發三信。亦均收到。

澄弟在廣東處置一切。甚有道理。易念園莊生各處程儀。尤爲可取。其辦朱家事。亦爲謀甚忠。雖無濟於事。而朱家必可無怨。論語曰。「言忠信。行篤敬。雖蠻貊之邦行矣。」吾弟出外。一切如此。吾何慮哉。

賀八爺馮樹堂梁儂裳三處。吾嘗寫信去謝。澄弟亦宜各寄一書。即易念園處。渠既送有程儀。弟雖未受。亦當寫一謝信寄去。其信即交易宅。由渠家書彙封可也。若易宅不便。即託岱雲覓寄。

季洪考試不利。區區得失。無足介懷。補發之案。有名不去覆試。甚爲得體。今年院試。若能得意。固爲大幸。即使不獲。去年家中既薦一人。則今歲小挫。亦盈虛自然之理。不必抑鬱。植弟書法甚佳。然向例未經過歲考者。不合選拔。弟若去考拔。則同人必指而目之。及其不得。人必以爲不合例而失。且以爲寫作不佳而黜。吾明知其不合例。何必受人一番指目乎。弟書問我去考與否。吾意以科考正場爲斷。若正場能取一等補廩。則考拔之時。已是廩生入場矣。若不能補廩。則附生考拔。殊可不必。徒招人妬忌也。

我縣新官加賦。我家不必答言。任他加多少。我家依而行之。如有告官者。我家不必入場。凡大員之家。無半字涉公庭。乃爲得體。爲民除害之說。爲所轄之屬言之。非謂去本地方官也。

曹西垣教習服滿。引見以知縣用。七月動身還家。母親及叔父之衣。並阿膠等項。均託西垣帶回。去年內賜衣料袍褂。皆可裁三件。後因我進闈考教習。家中叫裁縫做。渠裁之不得法。又竊去整料。遂僅裁祖父

父親兩套。本思另辦好料。爲母親製衣寄回。因母親尚在制中。故未遽寄。

叔父去年四十晉一。本思製衣寄祝。亦因在制未遽寄也。茲託西垣帶回。大約九月可到。臘月服闋。即可著矣。紀梁讀書。每日百餘字。與澤兄正是一樣。只要有恆。不必貪多。澄弟亦須常看五種通規及呻吟語。洗盡浮華。樸實諳練。上承祖父。下型子弟。吾於澄弟實有厚望焉。兄國藩手草。（道光二十八年五月初十日）

致諸弟（述改屋之意。留心辦賊之態度）

澄侯溫甫子植季洪四弟左右。十二月初九。接到家中十月十二一信。十一月初一日一信。初十日一信。具悉一切。家中改屋。有與我意見相同之處。我於前次信內。曾將全屋畫圖寄歸。想已收到。家中既已改妥。則不必依我之圖矣。但三角邱之路。必須改於檀山嘴下面。於三角邱密種竹木。此我畫圖之要處。望諸弟稟告堂上。急急行之。家中改房。亦有不與我合意者。已成則不必再改。但六弟房改在爐子內。此係內外往來之屋。欲其通氣。不欲其悶塞。余意以爲必不可。不若以長橫屋上半節間。斷作房爲妥。（連間兩隔。下半節作橫屋客座。中間一節作過道。上半節作房。）內茅房在石柱屋後。亦嫌太遠。不如於季洪房外高墻打進七八尺。（即舊茅房溝對過之墻。若打進丈餘。則與上首栗樹處同寬。）既可起茅房澡堂。而後邊地面寬宏。家有喜事。碗盞菜貨。亦有地安置。不至局促。不知可否。

家中高麗參已完。明春得便即寄。彭十九之壽屏。亦準明春寄到。此間事務甚多。我更多病。是以遲遲。澄弟辦賊。甚快人心。然必使其親房人等。知我家是圖地方安靜。不是爲一家逞勢張威。庶人人畏我之威。而不恨我之太惡。賊既辦後。不特面上不可露得意之聲色。卽心中亦必存一番哀矜的意思。諸弟人人當留心也。徵一表叔在我家教讀甚好。此次未寫信請安。諸弟爲我轉達。同鄉周荇農家之鮑石卿。前與六弟交遊。近因在妓家飲酒。提督府捉交刑部。革去供事。而荇農荻舟尙遊蕩不戢法。真可怪也。

余近日常有目疾。餘俱康泰。內人及二兒四女皆平安。小兒甚胖大。西席龐公。擬十一回家。正月半來。將請李筆

峇代館。宋湘賓在道上撲跌斷腿。五十餘天始抵樊城。大可憫也。餘不一。國藩手草。（道光二十八年十二月初十日）

致諸弟（喜述補侍郎缺）

澄侯溫甫子植季洪四位老弟左右。正月十日會寄家信。甚爲詳備。二月初三接到澄弟十一月二十夜之信。領悉一切。今年大京察。侍郎中休致者二人。德遠村馮吾園兩先生也。余即補吾園先生之缺。向來三載考績。外官謂之大計。京官謂之京察。京察分三項。一二品大員及三品之副都御史。皇上皆能記憶其人。不必引見。御筆自下硃諭。以爲彰瘡。此一項也。自宗人府丞以下。凡三四五品京官。皆引見。有黜而無陞。前在碾兒胡同時。間壁學士奎光。即引見休致者也。此一項也。自五品而下。如翰林內閣御史六部。由各堂官考差。分別一二三等。一等則放府道。從前如勞辛階易念園。今年如陳竹伯。皆京察一等也。此一項也。

余自到禮部。比從前較忙。忙。恨不得有人幫辦。寓中瑣雜事。然以家中祖父之病。父叔勤苦已極。諸弟萬無來京之理。且如溫甫在京。余方再三勸誘。令之南歸。今豈肯再蹈覆轍。令之北來。江岷樵以揀發之官。浙江補缺。不知何時。余因溫弟臨別叮囑之言。薦鄧星階偕岷樵往浙。岷樵既應允矣。適徐芸渠請星階教書。星階即就徐館。言定秋間仍往浙依江。江亦應允。

鄒墨林自河南來京。意欲捐教。現寓園通觀。其爲人實誠篤君子也。袁漱六新正初旬。忽吐血數天。現已全愈。黃正齋竟爲本部司員。頗難爲情。余一切循嫌疑之道。欲破除藩籬。而黃總不免拘謹。余現尙未換綠呢車。惟添一驢。蓋八日一赴園。不能不養三牲口也。書不一。兄國藩草。（道光二十九年二月初六日）

致諸弟（寄歸銀兩物品）

澄侯溫甫子植季洪足下。茲乘喬心農先生常德太守之便。付去紋銀六十三兩零。共六大錠。外又一小錠。係內子寄其伯母。乞寄歐陽牧雲轉交。又鄧星階寄銀六兩。亦在此包內。並渠信專人送去。又高麗參一布包。內頂上

者一兩，共十四枝。專辦與祖父大人用。次等者三兩，共五枝。又次等者白參半斤，不計枝。今年所買參，皆擇其佳者。較往年略貴，故不甚多。又鹿膠二斤，共一布包。又一品補服四付，共一布包。前年所寄補服，內有打籽者，係一品服。合此次所寄，共得五付。補服不分男女。向來相傳鳥嘴有向內向外之分，皆無稽之言也。一品頂戴三枚。則置高麗參匣之內。望諸弟逐件清出，呈堂上大人。

喬太守要由山西再轉湖南。到長沙大約在閏四月底。此信不詳他事。容下次再詳也。國藩手草。（道光二十九年三月初一日）

致諸弟（不必重價買地）

四位老弟足下。九弟生子大喜。敬賀敬賀。自丙午冬葬祖妣大人於木兜冲之後，我家已祿三男丁。我則升閣學。升侍郎。九弟則進學補廩。其地之吉，已有明效可驗。我平日最不信風水。而於朱子所云「山環水抱藏風聚氣」二語，則篤信之。木兜冲之地，予平日不以爲然。而葬後乃吉祥如此。可見福人自葬福地，絕非可以人力參預其間。家中買地，若出重價，則斷斷可以不必。若數十千，則買一二處無礙。

宋湘賓去年回家，臘月始到。山西之館既失，而湖北一帶，又一無所得。今年因常南陔之約，重來湖北。而南陔已遷官陝西矣。命運之窮如此。去年曾有書寄溫弟，茲亦付去。上二次忘付也。

李筆峯代館一月。又在寓抄書一月。現在已搬出矣。毫無道理之人，究竟難與相處。庸省三在我家教書，光景甚好。鄒墨林來京捐復教官。在圓通觀住。日日來我家閒談。長沙老館。我今年大加修整。人人皆以爲好。瑣事兼述。諸惟心照。（道光二十九年三月廿一日）

致諸弟（癩疾愈見大好）

澄侯溫甫子植季洪足下。近一月餘，無摺弁來。以新撫臺尙未到任。五月十一。接澄弟四月八日並廿六日所發二信。而正月十七一信，至今未到。誠不可解。

京寓自四月以來。一切平安。癯疾經鄒墨林開方做藥丸。有附子黃芪等補陽之藥。愈見大好。而頭上。生人全看不出矣。紀澤兒近作史論。略成章句。茲命其臚兩首。寄呈堂上一閱。次兒之名。音與叔父名相近。已改名紀鴻。體甚肥大。尙不能行。不能說話。四女皆好。

閏四月初九日考差。題「士志於道一章。」經題「閏月則闔門左扉。」詩題「賦得歲豐仍節儉。得仍子。」澄弟岳陽樓記。擬交廣西主考帶去。大約七月初旬可到長沙。溫檀二弟到省以後。恐家中無人伺候。澄弟即不入闈亦可。宜稟堂上。問宜何如耳。

去年冬底。所寄各族戚家徵資。今年家書總未提及。不知竟一一如數交去否。乞示知。餘不詳盡。俟下次續具。兄國藩手草。（道光二十九年五月十五日）

致諸弟（託查遺失家信）

澄侯溫甫子檀季洪四位老弟足下。五月廿四日。由廣西主考孫渠田太史處發信。並澄弟監照戶部照二紙。又今年主考車順軌鄉試文一篇。徐元勳會試文三篇。共爲一包。不審何日到。孫太史於五月廿八在京起程。大約七月中旬可過長沙。待渠過去後。家中可至岱雲處接監照也。

京寓近日平安。癯疾服鄒墨林丸藥方。最爲有效。內人腹瀉七八天。亦服鄒所開方而效。昨日摺到後。又未接信。澄弟近日寫信。極勤且詳。而京中猶有望眼欲穿之時。蓋不住省城。則摺弁之或遲或早。無從去查問。正月十六之家信。至今尙未收到。予屢次以書告諸弟。又書告岱雲。託其向提塘並蕭辛五處確查。

昨岱雲回信內。夾有蕭辛五回片。寫明正月十六之信。已於廿一日交提塘王二手收。又言四月十四周副翁維新到京。此信已交京提塘矣。云。予接辛五來片。比遣人去京提塘問明。據答云。「周維新到京。並無此信。若有。萬無不送之理。且既係正月廿一交省提塘。則二月廿三有韓摺弁到京。三月十八有張摺弁到京。何以兩人俱未帶。而必待四月十四之周維新哉。」

今仍將辛五原片付回家中。望諸弟再到堤塘。細查正月廿一辛五到時。提塘會挂收信號簿否。並問辛五兄何所知。二月之韓弁。三月之張弁。俱未帶此信。而直待周維新始帶。且辛五片稱。四月十四信交京提塘門上收。係聞何人所言。何以至今杳然。一一查得水落石出。覆示爲要。予因正月十六之信。至爲詳細。且分爲兩封。故十分認真。若實查不出。則求澄弟再細寫一徧。並告鄧星階家會廚子家。道前信已失落也。

紀澤兒讀書如常。茲又付呈論數首。皆先生未改一字者。紀鴻兒體甚肥胖。前聞排行已列丙一。不知乙字一排。十人何以遽滿。乞下次示知。得毋以乙字不佳。遂越而排丙乎。予意不必用甲乙丙丁爲排。可另取四字曰甲科鼎盛。則音節響亮。便於呼喚。諸弟如以爲然。即可徧告諸再從兄弟。

山西巡撫王兆琛。欽差審明各款。現奉旨革職拿問。將來不知作何究竟。此公名聲狼籍。得此番鑄示。亦足寒貪吏之膽。袁漱六病尙未全好。同鄉各家如常。季仙九先生放山西巡撫。送我綠呢車。現尙未乘。擬待一二年後再換。餘不悉具。兄國藩手草。（道光二十九年六月初一日）

致諸弟（述修改長郡館）

澄侯溫甫子植季洪四位老弟足下。日內身體平安。內人自前腹泄後。至今尙服黃耆高麗參附片之類。自此可保安泰。紀澤兒讀書尙熟。詩經現讀至生民之什。古詩讀至左太仲詠史。綱鑑講至漢高祖末年。所作史論。較前月所作。意思略多。茲付回三首。次兒肥胖可愛。四女兒皆好。應省三教書甚爲得法。

宋湘賓在湖北落暑。光景頗好。昨有書來。致意溫弟。長郡館向來規模不好。人人不喜。今年我督工匠。大改規模。人人拍案稱奇。現在同鄉人請我將湖廣館亦改定規制。擬於八月興工。觀十月可畢役。

鄧筠仙家水勢不知如何。溫甫在省見之。可問明告我。渠欠漱六五十金。近已償去。若見筠仙翌丞。可即告之。不另寫信。岱雲寄程正柔信。亦已妥交。見岱雲時。即告知。寄莊心庠張禮度信各一件。到日即送去。餘不一。俟下次續具。兄國藩手具。（道光二十九年六月廿九日）

致諸弟（計劃設置義田）

澄侯溫甫子植季洪四位老弟足下。七月十三日。接到澄弟六月初七所發家信。具悉一切。吾於六月。共發四次信。不知俱收到否。今年陸費中丞丁憂。閏四月無摺差到。故自四月十七發信後。直至五月中旬始再發信。宜家中懸望也。祖父大人之病。日見增加。遠人聞之。實深憂懼。前六月念日所付之鹿茸片。不知何日可到。亦未知可有微功否。

予之癯病。多年沉痛。賴鄒墨林舉黃耆附片方。竟得全愈。內人六月之病。亦極沉重。幸墨林診治。遂得化險爲夷。變危爲安。同鄉找墨林看病者甚多。皆隨手立效。墨林之弟嶽屏四兄。今年會到京寓圓通觀。其醫道甚好。現已歸家。予此次以書附墨林家書內。求嶽屏至我家診治祖父大人。或者挽回萬一。亦未可知。嶽屏人最誠實。而又精明。卽周旋不到。必不見怪。家中只須打發轎夫大錢二千。不必別有所贈送。渠若不來。家中亦不必去請他。鄉間之穀。貴至三千五百。此互古未有者。小民何以聊生。吾自入官以來。卽思爲曾氏置一義田。以贍救孟學公以下貧民。爲本境置義田。以贍救念四都貧民。不料世道日苦。予之處境未裕。無論爲京官者。自治不暇。卽使外放。或爲學政。或爲督撫。而如今年三江兩湖之大水災。幾於鴻嗷半天下。爲大官者。更何忍於廉俸之外。多取半文乎。是義田之願。恐終不能償。然予之定計。苟仕官所入。每年除供奉堂上甘旨外。或稍有贏餘。吾斷不肯買一畝田。積一文錢。必經留爲義田之用。此我之定計。望諸弟體諒之。

今年我在京用度較大。借帳不少。八月嘗爲希六及陳體元捐從九品。九月榜後可付照回。十月可到家。十一月可向渠兩家索銀。大約共須三百金。我付此項回家。此外不另附銀也。率五在永豐。有人爭請。予聞之甚喜。特書手信與渠。亦望其忠信成立。

紀鴻已能行走。體甚壯實。同鄉各家如常。同年毛寄雲於六月念八日丁艱。陳偉堂相國於七月初二仙逝。病係中痰。不過片刻卽歿。河南浙江湖北皆展於九月舉行鄉試。聞江南水災尤甚。恐須再展至十月。各省大災。皇

上焦勞。臣子更宜憂惕。故一切外筭。皆絕不萌妄想。家中亦不必懸盼。書不詳盡。凡國藩手草。（道光二十九年七月十五日）

致諸弟（述派較射大臣）

澄侯溫甫子植季洪四位老弟足下。十月初二日接到澄弟八月廿六一書。具悉一切。是日又從岱雲書內。見南省題名錄。三弟皆不與選。爲之悵喟。吾家累世積德。祖父及父叔二人。皆孝友仁厚。食其報者。宜不止我一人。此理之可信也。吾邑從前鄧羅諸家。官階較大。其昆季子孫。皆無相繼而起之人。此又事之不可必者。

吾近於官場。頗厭其繁俗。而無補於國計民生。惟勢之所處。求退不能。但願得諸弟稍有進步。家中略有仰事之資。即思決志歸養。以行吾素。今諸弟科第略遲。而吾在此間。公私萬事叢集。無人幫照。每一思之。未嘗不作茫無畔岸之想也。

吾現已定計於明年八月。乞假歸省。後年二月還京。專待家中回信。詳明見示。今年父親六十大壽。吾竟不克在家叩祝。懷疚之至。十月初四日。奉旨派作較射大臣。順天武闈鄉試。於初五六馬箭。初七八步箭。初九十技勇。十一發榜。十二覆命。此八日皆入武闈。不克回寓。父親壽辰。並不能如往年辦麵席以宴客也。然予既定計明年還家慶壽。則今年在京。即不稱觴。猶與吾鄉重逢一不重晉十之例相合。

家中分贈親族之錢。吾恐銀到太遲。難於換錢。故前次爲書寄德六七叔祖。並辦百褶裙送叔曾祖母。現在廷芳守尚未起行。大約年底乃可到湖南。若曾希大陳禮元二家。必待照到。乃送錢來。則我家今年窘矣。

二家捐項。我在京共去京平足紋二百四十一兩六錢。若合南中漕平。則當二百三十六兩五錢。渠送錢若略少幾千。我家不必與之爭。蓋丁酉之冬。非渠煉蘊。則萬不能進京也。明年春間。應寄家用之錢。乞暫以會陳捐項用之。我上半年只能寄鹿茸。下半年乃再寄銀耳。皇清經解一書。不知取回否。若未取回。可專人去取。蓋此等書。諸弟略一涉獵。即擴見識。不宜輕以贈人也。

明年小考，須送十千。大場又須送十千。此等錢家中有人分領，便是一家之祥瑞。但澄弟須於在省城時，張羅此項，付各考者，乃爲及時。京寓大小平安。紀澤兒已病兩月，近日全愈。今日已上書館矣。紀鴻兒極結實，聲音洪亮，異常。僕婢輩皆守舊，同鄉各家，亦皆無怠。鄒墨林尙在我家。張雨農之子闡藝甚佳，而不得售。近又已作文數首，其勇可畏愛也。書不詳盡，寫此畢，卽赴武闈。十二始歸寓，餘俟後報。國藩手草。（道光二十九年十月初四日）

致諸弟（寄物，告在闈較射及江岷樵家遭難事）

澄侯溫甫子植季洪四弟左右。十月初四日發第十七號家信，由摺弁帶交。十七日發十八號家信，由廷芳字桂明府帶交，便寄曾希六陳禮元從九品執照各一紙，歐陽滄溟先生、陳開煦、換執照並批迴各二張，漆梓坪叔庶曾祖母百摺裙一條。曾陳二人九品補服各一副，母親大人耳帽一件，膏藥一千張，眼藥各種，阿膠二斤，朝珠二掛，筆五枝，鯨底子六十個。曾陳二人各對一付。滄溟先生橫幅篆字一副。計十二月中旬應可到省。存陳岱雲宅家中於小除夕前二日遣人至省走領可也。芳宇在漢口須見上司，恐難早到。然遇順風，則臘月初亦可到。家中或著人早去亦可。

余於十月初五起至十一止，在闈較射。十七出榜，四闈共中百六十四人，余闈內分中五十二人，向例武舉人武進士覆試，如有弓力不符者，則原闈之王大臣，每人各罰俸半年。今年僅張字闈不符者三名，王大臣各罰俸一年半。余闈幸無不符之人，不然則罰俸半年。去銀近五百金。在京官已視爲切膚之痛矣。

寓中大小平安。紀澤兒體已全復。紀鴻兒甚壯實。鄒墨林近由廟內移至我家住。擬明年再行南歸。袁漱六由會館移至虎坊橋，而錢貞齋榜後，本擬南旋，因憤懣不甘，仍寓漱六處教讀。劉鏡清教習已傳到，因丁艱而竟不能補。不知命途之舛，何至於此。凌荻舟近病內傷，醫者言其甚難奏效。黃恕皆在陝差旋，述其與陝撫殊爲冰炭。江岷樵在浙，暑秀水縣事。百姓感戴，編爲歌謠。署內一貧如洗，藩臺聞之，使人私借千金，以爲日食之資。其爲上司器重如此。其辦賑務，詳保甲，無一不合於古。頃湖南報到，新甯被齋匪餘孽煽亂，殺前令李公之闈家。署令萬

公亦被戕，焚掠無算。則岷樵之父母家屬，不知消息若何，可爲酸鼻。余於明日當飛報岷樵，令其即行言旋，以赴家難。

余近日忙亂如常，幸身體平安。惟八月家書，曾言及明年假歸省親之事。至今未奉堂上手諭。而九月諸弟未中，想不無抑鬱之懷。不知尙能自爲排遣否。此二端時時聖念，望澄侯詳寫告我。祖父大人之病，不知日內如何。余歸心箭急，實爲此也。

母親大人昨日生日，寓中早麵五席，晚飯三席。母親牙痛之疾，近來家信未曾提及。望下次示知。書不一一。餘俟續具。兄國藩手具。（道光二十九年十一月初五日）

致諸弟（迎養父母叔父）

澄侯溫甫子植季洪四位老弟足下。正月初六日接到家信三函。一係十一月初三所發。有父親手諭。溫弟代書者。一係十一月十八所發。有父親手諭。植弟代書者。一係十二月初三澄侯弟在縣城所發一書。甚爲詳明。使遊子在外。鉅細了然。

廟山上金叔。不知爲何事而可取騰七之數。若非道義可得者。則不可輕易受此。要做好人。第一要在此處下手。能令鬼服神欽。則自然識日進。氣日剛。否則不覺墜入卑污一流。必有被人看不起之日。不可不慎。諸弟現處極好之時。家事有我一人擔當。正當做個光明磊落神欽鬼服之人。名聲既出。信義既著。隨便答言。無事不成。不必受此小便宜也。

父親兩次手諭。皆不欲予乞假歸省。而予之意甚思日侍父母之側。不得不爲迎養之計。去冬曾以歸省迎養二事。與諸弟相商。今父親手示。不許歸省。則迎養之計更不可緩。所難者。堂上有四位老人。若專迎父母而不迎叔父母。不特予心中不安。即父母心中亦必不安。若四位並迎。則叔母病未全好。遠道跋涉尤艱。予意欲於今年八月初旬。迎父親母親叔父三位老人來京。留叔母在家。諸弟婦細心伺候。明年正月元宵節後。即送叔父回南。我

得與叔父相歡聚數月。則我之心安。父母得與叔父同行數千里到京。則父母之心安。叔母在家半年。專僱一人服侍。諸弟婦又細心奉養。則叔父亦可放心。叔父在家。抑鬱數十年。今出外瀟灑半年。又得與姪兒姪婦姪孫團聚。則叔父亦可快暢。在家坐轎至湘潭。澄侯先至潭雇定好船。伺候老人開船後。澄弟即可回家。船至漢口。予遣荆七在漢口迎接。由漢口坐三乘轎子到京。行李婢僕。則用小車。甚爲易辦。求諸弟細商堂上老人。春間即賜回信。至要至要。

李澤顯李英燦進京。余必加意庇護。入斗仲地。望繪圖與我看。諸弟自侍病至葬事。十分勞苦。我不克幫忙。心甚歉愧。

京師大小平安。皇太后大喪。已於正月七日二十七日滿。脫去孝衣。初八日係祖父冥誕。我作文致祭。卽於是日亦脫白孝。以後照常當差。心中萬緒。不及盡書。統容續布。兄國藩手草。（道光三十年正月初九日）

卷五

致諸弟（具奏言兵餉事）

澄溫植洪四弟左右。三月初四發第三號家信。其後初九日。予上一摺。言兵餉事。適於是日皇上以粵西事棘。恐現在彼中者。不堪寄此重託。特放賽中堂前往。以予摺所言甚是。但目前難以舉行。命將摺封存軍機處。待粵西定後。再行辦理。賽中堂清廉公正。名望素著。此行應可迅奏膚功。但湖南逼近粵西。兵差過境。恐州縣不免藉此生端。不無一番蹂躪耳。

魏亞農以三月十三日出都。向予借銀二十兩。既係姻親。又係黃生之姪。不能不借與渠。渠言到家後。卽行送交予家。未知果然否。叔父前信要鵝毛管眼藥。並礮砂膏藥。茲付回眼藥百筒。膏藥千張。交魏亞農帶回。呈叔父收存。爲時行方便之用。其摺底付回查收。

澄弟在保定。想有信交劉午峯處。昨劉有信寄子彥。而澄弟書未到。不解何故。已有信往保定去查矣。澄弟去後。吾極思念。偶自外歸。輒至其房。早起輒尋其室。夜或遣人往呼。想弟在路途。彌思我也。書不一。餘俟續具。兄國藩手草。(咸豐元年三月十二日)

致諸弟(摺奏直諫)

澄侯溫甫子植季供四位老弟足下。四月初三日發第五號家信。厥後摺差久不來。是以月餘無家書。五月十二日摺弁來。接到家中一信。乃四月一日所發者。具悉一切。植弟大愈。此最可喜。

京寓一切平安。癘疾又大愈。比去年六月更無形迹。去年六月之愈。已爲五年來所未有。今又過之。或者從此日退。不復能爲惡矣。皮毛之疾。究不甚足慮。久而彌可信也。

四月十四日考差。題「樂民之樂者。民亦樂其樂。」經文題。「必有忍。其乃有濟。有容德乃大。」賦得濂溪樂處。得「焉」字。二十六日余又進一諫疏。敬陳聖德三端。預防流弊。其言頗過激切。而聖量如海。尙能容納。豈漢唐以下之英主所可及哉。余之意。蓋以受恩深重。官至二品。不爲不尊。堂上則誥封三代。兒子則陞任六品。不爲不榮。若於此時。再不盡忠直言。更待何時。乃可建言。而皇上聖德之美。出於天衷。自然滿廷臣工。遂不敢以片言逆耳。將來恐一念驕矜。遂至惡直而好諛。則此日臣工。不得辭其咎。是以趁此元年新政。即將此驕矜之機關說破。使聖心日就兢業。而絕自是之萌。此余區區之本意也。現在人才不振。皆謹小而忽於大人。人人皆習脂韋唯阿之風。欲以此疏稍挽風氣。冀在廷皆趨於骨鯁。而遇事不敢退縮。此余區區之餘意也。

摺子初上之時。余意恐犯不測之威。業將得失稿福。置之度外。不意聖慈含容。曲賜矜全。自是以後。余益當盡忠報國。不得復顧身家之私。然後摺奏雖多。亦斷無有似此摺之激直者。此摺尙蒙優容。則以後奏摺。必不致或觸聖怒可知。諸弟可將吾意。細告堂上大人。無以余奏摺不慎。或以蠶直干天威爲慮也。

父親每次家書。皆教我盡忠圖報。不必繫念家事。余敬體吾父之教訓。是以公爾忘私。國爾忘家。計此後但略寄

數百金。償家中舊債。卽一心以國事爲主。一切升官得差之念。毫不挂於意中。故昨五月初七大京堂考差。余卽未往赴考。侍郎之得差不得差。原不關乎與考不與考。上年己酉科。侍郎考差而得者三人。瑞常花鈔納張詩是也。未考而得者亦三人。靈桂福濟王廣蔭是也。今年侍郎考差者五人。不考者三人。是日題「以義制事。以禮制心論。」詩題「樓觀滄海日。得濤字。」五月初一放雲貴差。十二放兩廣福建三省。名見京報內。茲不另錄。袁漱六考差頗爲得意。詩亦工妥。應可一得以救積困。

朱石翹明府初政甚好。自是我邑之福。余下次嘗寫信與之。霞仙得縣首。亦見其猶能拔取真士。劉繼振既係水口近鄰。又送錢至我家。求請封典。義不可辭。但渠三十年四月選授訓導。已在正月廿六恩詔之後。不知尙可辦否。嘗再向吏部查明。如不可辦。則當俟明年四月升祔恩詔。乃可呈請。若并升祔之時。推恩不能及於外官。則當以錢退還。家中須於近日詳告劉家。言目前不克呈請。須待明年六月。乃有的信耳。

澄弟河南漢口之信。皆已接到。行路之難。乃至於此。自漢口以後。想一路戴福星矣。劉午峯張星垣陳穀堂之銀皆可收。劉陳尤宜受之。不受反似拘泥。然交際之道。與其失之濫。不若失之隘。吾弟能如此。乃吾之所欣慰者也。西垣四月廿九到京。住余宅內。大約八月可出都。此次所寄摺底。如歐陽家汪家及諸親族。不妨鈔送共閱。見余忝竊高位。亦欲忠直圖報。不敢唯阿取容。懼其玷辱宗族。辜負期望也。餘不一。兄國藩手草。咸豐元年五月十四日。

致諸弟（擬爲紀澤定婚）

澄侯溫甫子植季洪四位老弟足下。五月十四日發一家信。內有四月廿六日具奏一疏稿。余雖不能法古人之忠直。而皇上聖度優容。則實有非漢唐以下之君所能及者。已將感激圖報之意。於前書內詳告諸弟矣。

五月廿六日。又蒙皇上天恩。兼署刑部右侍郎。次日具摺謝恩。卽將余感戴之忱寫出。茲將原摺付歸。日內京寓大小平安。癘疾大好。較去年澄弟在此時更好三倍。頭面毫無蹤影。兩腮雖未淨盡。不復足爲患也。同鄉周子佩

之母。病體不輕。下身不仁。恐成偏枯。

徐壽菴放四川主考。湖南放四川者。向極吉利。嘉慶辛酉之楊剛亭先生。庚午之陶文毅。道光甲午之李文恭。乙未之羅蘇篔。有成例矣。鄺鍾青陳俊臣兩人。皆已來京。陳挈眷而鄺則否。鄺富而陳寒。所爲似相反。然究以挈眷爲是。鄺一二年亦必悔之耳。林崑圃事。余爲寫知單。得百餘金。合之開弔共二百金。將來可以贍其七十四歲之老母也。漱大望差甚切。未知能如願否。現在已放一半。而實錄館當差人員。尙未放一人。唐鏡海於十八日到京。廿三日召見。垂詢一切。天顏有喜。極着儒儒晚遇之榮。現已召見五次。將來尙可入對十餘次。

羅山前有信來。詞氣溫純。似有道者之言。余已回信一次。頃又有信來。言紀澤未定婚。欲爲賀耦庚先生之女作伐。年十二矣。余嫌其小一歲。且耦庚先生。究係長輩。從前左季高與陶文毅公爲婚。余嫌其輩行不倫。余今不欲仍蹈其轍。擬敬爲辭謝。現尙未作書覆羅山。諸弟若在省見羅山兄。可將余兩層意思。先爲道破。余他日仍當回書告知一切。

余近思爲紀澤定婚。其意頗急切。夏階平處一說。本可相安。因其與黃子壽爲親家。余亦嫌輩行少屈。是以未就。黃蕘卿有女年十三。近託袁漱六往求婚。蕘卿言恐余升任總督。渠須迴避。不知渠是實意。抑係不願成婚。而託辭以謝也。故現未說定。弟可一一稟告堂上大人。又余意鄉間若有孝友書香之家。不必問其貧富。亦可開親。澄弟盍爲我細細物色一徧。然余將同邑各家一想。亦未聞有真孝友人家也。

余至刑部。日日忙冗異常。迥不與禮部工部兵部相同。若長在此部。則不復能看書矣。湖南副主考喬鶴儕。在部頗稱博雅。今年經策。必須講究古茂。曹西垣辦分發。本月可引見。七月可出京。朱石翹明府昨有信來。言澄弟四月底到縣。此次摺弁到京。石翹有信而澄弟無信。殊不可解。茲有書覆朱。家中封好送去。諸惟心照。餘俟續布。國藩手草。（咸豐元年六月初一日）

致諸弟（成就紀澤親事）

澄侯溫甫子植季洪四位老弟足下。八月初十摺差來京。接張湘紋書。計摺弁當於七月廿外起行。諸弟正在省城。而無家書何也。諸弟發家書交提塘後。往往屢次不帶。或一次帶數封。摺弁殊爲可惡。諸弟須設法與提塘略一往還。當面諄託。或稍有濟。否則每次整信。甚悶損人也。

京寓大小平安。前月內人病數日。近已全愈。

曹西垣於八月四日出京。之官安徽。張書齋於十一日出京。之官貴州。

今冬本欲寄銀到家。因澄弟前次書言。公車來京。家中儘可兌銀。是以予不另寄。除凹裏田價外。尙須送親族年例銀五十金。亦宜早早籌畫。共計若干。概向各處公車妥兌。免致年底掣肘。如無處可兌。即須閏八月寄信來京。以便另辦。然不如兌之爲便也。誥軸已經用寶。日內即可發下。九月即可到家。

鄉試題刻於京報上。詩題得摩字條。出係高宗御製。是題詩中句云。「卽此供吟眺。采煩事豁摩。」場中無人知之也。李子彥之文甚好。鏡雲文尙未見。宋湘賓教習已傳到。昨日專人告知。

李石樞身後恩典甚厚。乃七月末。翰林院撰祭文碑文進呈。硃批竟加嚴飭。謂其誇獎過當。詞藻太多。且貶其詞度乖方。功過難掩。歷任封疆。尤不足稱云云。飭令翰林院另行改撰。其復撰進呈。遂多貶詞。功名之際。難得終始完全也。

耦庚先生家親事。予頗思成就。一則以耦翁罷官。予亦內有愧心。思借此聯爲一家。以贖予隱微之愆。二則耦翁家教向好。賢而無子。或者其女子必賢。諸弟可爲我細訪羅羅山。下次信來詳告。若女子果厚重。則兒子十七歲歸家省祖父母叔祖父母時。卽可成喜事也。前託在鄉間擇婚。湖思吾邑讀書積德之家。如賀氏者。亦實無之。諸弟暫不必昌言耳。餘俟續布。兄國藩手草。(咸豐元年八月十三日)

致諸弟(詳述辦理巨盜及公議糧餉事)

澄侯溫甫子植季洪四位老弟足下。八月十七日。接到家信。欣悉一切。左光八爲吾鄉巨盜。能除其根株。掃其巢

穴。則我境長享其利。自是莫大陰功。第湖南會匪。所在勾結。往往牽一髮而全身皆動。現在刺軍程公。特至湖南。卽是奉旨查辦此事。蓋恐粵西匪徒竊竄。一入湖南境內。則楚之會匪。因而竊發也。左光八一起。想尙非巨賤入會者流。然我境辦之。不可過激而生變。現聞其請正紳保舉。改行爲良。且可捉賊自效。此是一好機會。萬一不然。亦須相機圖之。不可用力太猛。易發難收也。

公議糧餉一事。果出通邑之願。則造福無量。至於幫錢墊官之虧空。則我家萬不可出力。蓋虧空萬六千兩。須大錢三萬餘千。每都畿須派千串。現在爲此說者。不過數大紳士一時豪氣。爲此急公好義之言。將來各處分派。仍是巧者強者少出。而討好於官之前。拙者弱者多出。而不免受人之勒。窮鄉殷實小戶。必有怨聲載道者。且此風一開。則下次他官來此。既引師令之借錢辦公爲證。又引朱令之民幫墊虧爲證。或亦分派民間出錢幫他。反覺無辭以謝。若相援爲例。來一官。幫一官。吾邑自此無安息之日。凡行公事。須深謀遠慮。此事若各紳有意。吾家不必攔阻。若吾家倡議。萬萬不可。

且官之補缺。皆有呆法。何缺出輪何班補。雖撫藩不能稍爲變動。澄弟在外多年。豈此等亦未知耶。朱公若不輪到班。則雖幫墊虧空。通邑挽留。而格於成例。亦不可行。若已輪到班。則雖不墊虧空。亦自不能不補此缺。間有特爲變通者。督撫專摺奏請。亦不敢大違成例。季弟來書。若以朱公之實授與否。全視乎虧空之能墊與否。恐亦不盡然也。曾儀齋若係革職。則不復能穿補子。若係大計休致。則尙可穿。

季弟有志於道義身心之學。余閱其書。不勝欣喜。凡人無不可爲聖賢。絕不係乎讀書之多寡。吾弟誠有志於此。須熟讀小學及五種遺規二書。此外各書。能讀固佳。不讀亦初無所損。可以爲天地之完人。可以爲父母之肖子。不必因讀書而後有所加於毫末也。匪但四大古詩。可以不看。卽古文爲吾弟所願學者。而不看亦是無妨。但守小學遺規二書。行一句。算一句。行十句。算十句。賢於記誦詞章之學萬萬矣。

季弟又言願盡孝道。惟親命是聽。此尤足補我之缺憾。我在京十餘年。定省有關。色笑遠違。寸心之疚。無刻或釋。

若諸弟在家。能婉愉孝養。視無形。聽無聲。則余能盡忠。弟能盡孝。豈非一門之祥瑞哉。願諸弟堅持此志。日日勿忘。則兄之志可以稍釋。幸甚幸甚。書不一。餘候續具。兄國藩手草。(咸豐元年八月十九日)

致諸弟(勸除牢騷及論邑中勸捐事)

澄侯溫甫子植季洪四弟足下。日來京寓大小平安。癩疾又已微發。幸不爲害。聽之而已。湖南榜發。吾邑竟不中一人。沅弟書中言溫弟之文。典麗喬皇。亦爾被抑。不知我諸弟中將來科名。究竟何如。以祖宗之積累。及父親叔父之居心立行。則諸弟應可多食厥報。以諸弟之年華正盛。即稍遲一科。亦未遽爲過時。特兄自近年以來。事務日多。精神日耗。常常望諸弟有繼起者。長住京城。爲我助一臂之力。且望諸弟分此重任。余亦欲稍稍息肩。乃不得一售。使我中心無倚。

蓋植弟今年一病。百事荒廢。場中又患目疾。自難見長。溫弟天分本甲於諸弟。惟牢騷太多。性情太懶。前在京華。不好看書。又不作文。余卽心甚憂之。近聞還家後。亦復牢騷如常。或數月不搦管爲文。吾家之無人繼起。諸弟猶可稍寬其責。溫弟則實自棄。不得盡諉其咎於命運。吾嘗見朋友中牢騷太甚者。其後必多抑塞。如吳樞臺凌荻舟之流。指不勝屈。蓋無故而怨天。則天必不許。無故而尤人。則人必不服。感應之理。自然隨之。溫弟所處。乃讀書人中最順之境。乃動則怨尤滿腹。百不如意。實我之所不解。以後務宜力除此病。以吳樞臺凌荻舟爲眼前之大戒。凡遇牢騷欲發之時。則反躬自思。吾果有何不足。而蓄此不平之氣。猛然內省。決然去之。不惟平心謙抑。可以早得科名。亦且養此和氣。可以稍減病患。萬望溫弟再三細想。勿以吾言爲老生常談。不直一哂也。

王曉林先生在江西爲欽差。昨有旨命其署江西巡撫。余暑刑部。恐須至明年乃能交卸。袁漱六昨又生一女。凡四女。已殤其二。又喪其兄。又喪其弟。又一差不得。甚矣窮翰林之難當也。

黃麓西由江蘇引見入京。迥非昔日初中進士時氣象。居然有經濟才。

王銜臣於閏月初九引見。以知縣用。後於月底搬寓下窪一廟中。竟於九月初二夜無故遽卒。先夕與同寓文任

吾談至二更。次早飯時。訝其不起。開門視之。則已死矣。死生之理。善人之報。竟不可解。

邑中勸捐。彌補虧空之事。余前已有信言之。萬不可勉強勒派。我縣之虧。虧於官者半。虧於書吏者半。而民則無辜也。向來書吏之中飽。上則喫官。下則喫民。名爲包徵包解。其實當徵之時。則以百姓爲魚肉。而吞噬之。當解之時。則以官爲雉媒。而播弄之。官索錢糧於書吏之手。猶索食於虎狼之口。再四求之。而終不肯吐。所以積成巨虧。並非實欠在民。亦非官之侵蝕入己也。今年父親大人議定糧餉之事。一破從前包徵包解之陋風。實爲官民兩利。所不利者。僅書吏耳。卽見制臺留朱公。亦造福一邑不小。諸弟皆宜極力助父大人辦成此事。惟捐銀彌虧。則不宜操之太急。須人人願捐乃可。若稍有勒派。則好義之事。反爲厲民之舉。將來或翻爲書吏所藉口。必且串通劣紳。仍還包徵包解之故智。萬不可不預防也。

梁侍御處銀二百。月內必送去。凌宅之二百。亦已兌去。公車來。兌六七十金。爲送親族之用。亦必不可緩。但京寓近極艱窘。此外不可再免也。書不詳盡。餘俟續具。兄國藩手草。（咸豐元年九月初五日）

致四弟（自謂宦途風波。思抽身免咎）

澄侯四弟左右。頃接來緘。又得所寄吉安一緘。具悉一切。朱太守來我縣。王劉蔣唐往陪。而弟不往。宜其見怪。嗣後弟於縣城省城。均不宜多去。處茲大亂未平之際。惟當藏身匿跡。不可稍露圭角於外。至要。至要。

吾年來飽閱世態。實畏宦途風波之險。常思及早抽身。以免咎戾。家中一切。有關係衙門者。以不與聞爲妙。（咸豐六年九月初十日）

致九弟（勸宜息心忍耐爲要）

沅浦九弟左右。十二日申刻。代一自縣歸。接弟手書。具審一切。十三日未刻。文輔卿來家。病勢甚重。自醴陵帶一醫生偕行。似是瘟疫之證。兩耳已聾。昏迷不醒。間作譫語。皆憶記營中。余將弟已赴營省城。可籌半餉等事。告之四五次。渠已醒悟。且有喜色。因囑其靜心養病。不必望念營務。余代爲函告南省江省等語。渠亦卽放心。十四日

由我家雇夫送之還家矣。若調理得宜，半月當可痊愈。復原則尚不易易。

陳伯符十二日來我家。渠因負疚在身，不敢出外酬應。欲來鄉爲避地計。黃子春官聲極好，聽訟勤明，人皆畏之。弟到省之期，計在二十日。余日內甚望弟信，不知金八佑九何以無一人歸來。豈因餉來未定，不遽遣使歸與。

弟性褊急似余，恐拂鬱或生肝疾。幸息心忍耐爲要。茲趁便寄一緘，托黃宅轉遞。弟接到後，望專人送信一次，以慰懸懸。家中大小平安。諸小兒讀書，余自能一一檢點。弟不必聖心。（咸豐七年九月廿二日）

致九弟（注意綜理密微）

沅浦九弟左右。念二夜燈後，佑九金八歸，接到十五夜所發之信，知十六日已赴吉安。屈指計弟念四日當可抵營。念五六當專人歸來。今日尙未到家。望眼又復懸懸。吉字中營，尙易整頓否。

古之成大事者，規模遠大，與綜理密微。二者闕一不可。弟之綜理密微，精力較勝於我。軍中器械，其略精者，宜另立一簿，親自記注，擇人而授之。古人以鎧仗鮮明，爲威敵之要務。恆易取勝。劉峙衡於火器亦勤於修整。刀矛則全不講究。余曾派褚景昌赴河南探買白蠟桿子，又辦腰刀，分賞各將弁，人頗愛重。弟試留心此事，亦綜理之一端也。至規模宜大，弟亦講求及之。但講闊大者，最易混入散漫一路。遇事顛預，毫無條理。雖大亦奚足貴。差等不紊，行之可久。斯則器局宏大，無有流弊者耳。頃胡潤之中丞來書贊弟，有曰才大器大四字。余甚愛之。才根於器，夏焉知言。

湖口賊舟，於九月八日焚奪淨盡。湖口梅家洲，皆於初九日攻克。三年積憤，一朝雪恥。雪琴從此重遊浩蕩之宇。惟次青尙在坎窞之中。弟便中可與通音問也。潤翁信來，仍欲奏請余出東征。余頃復信，具陳其不宜，不知可止住否。

彭中堂復信一緘，由弟處寄至文方伯署，請其轉遞至京。或弟有書呈藩署，未添一筆亦可。李迪庵近有請假回籍省親之意，但未接渠手信。渠之帶勇，實有不可及處。弟宜常與通信。殷殷請益。弟在營須保養身體。肝鬱最傷。

人。余平生受累以此。宜和易以調之也。（咸豐七年十月初四日）

致諸弟（暫緩紀澤親事）

澄侯溫甫子植季洪四弟足下。九月廿六日發一家信。想已收到。十月初十日接到家中閏月廿八所發信。及九月初二九月十四所發各件。十二夜又於陳伯符處接得父親大人閏八月初七所發之信。係交羅羅山手轉寄者。陳伯符者。賀耦庚先生之妻舅也。故羅山託其親帶來京。得此家書四件。一切皆詳知矣。

紀澤聘賀家姻事。觀閏八月父親及澄弟信。已定於十月訂盟。觀九月十四澄弟一信。則又改於正月訂盟。而此間却有一點挂礙。不得不詳告家中者。京師女流之輩。凡兒女定親。最講究嫡出庶出之分。內人聞賀家姻事。即託打聽。是否庶出。余以其無從細詢。亦遂置之。昨初十日接家中正月訂盟之音。十一日內人即親至徐家打聽。知賀女實係庶出。內人即甚不願。余比曉以大義。以爲嫡出庶出。何必區別。且父親大人業已喜而應允。豈可復有他議。內人之意。以爲爲夫者。先有嫌妻庶出之意。則爲妻者。更有踰躅難安之情。日後曲折情事。亦不可不早爲慮及。求諸弟宛轉稟明父母。尙須斟酌。暫緩訂盟爲要。

陳伯符於十月十日到京。余因內人俗意甚堅。即於十二日夜請賀禮庚陳伯符二人至寓中。告以實情。求伯符先以書告賀家。將女庚不必遽送。俟再商定。伯符已應允。明日即發書。十月底可到賀家。但兄前有書回家。親事求父親大人作主。今父親歡喜應允。而我乃以婦女俗見。從而撓惑。甚爲非禮。惟婚姻百年之事。必先求姑媳夫婦相安。故不能不以此層上瀆。即羅山處。亦可將我此信鈔送一閱。我初無別見也。

夏階平之女。內人見其容貌端莊。女工極精。甚思對之。又同鄉陳奉會一女。相貌極爲富厚福澤。內人亦思對之。若賀家果不成。則此二處必有一成。明春亦可訂盟。余注意尤在夏家也。

京城及省城訂盟。男家必辦金簪金環玉鐲之類。至少亦須花五十金。若父親大人決意欲與賀家成親。則此數者亦不可少。家中現無錢可辦。須我在京中明年交公車帶回。七月間諸弟鄉試晉省之便。再行訂盟。亦不爲晚。

望澄弟下次信詳以告我。祖父佛會。既於十月初辦過。則父母叔父母四位大人。現已即吉。余恐尙未除服。故昨父親生日。外未宴客。僅內有女客二席。十一我四十晉一。則並女客而無之。

朱石樵爲官。竟如此之好。實可佩服。至於鈇砂傷其面。尙勇往前進。真不愧爲民父母。父親大人竭力幫助。洵大有造於我邑。諸弟苟可出力。亦必盡心相扶持。現在粵西未靖。萬一吾楚盜賊有乘間竊發者。得此好官。粗定章程。以後吾邑各鄉。自爲團練。雖各縣盜賊四起。而吾邑自可安然無恙。如秦之桃花源。豈不安樂。須將此意告邑之正經紳耆。自爲守助。

牧雲補稟。煩弟爲我致意道喜。季弟往四裏教書。不帶家眷最好。必須多有人在母親前。乃爲承歡之道。季洪十日一歸省。亦盡孝之道也。而來書所云。「寡慾多男之理。亦未始不寓乎其中。」甲五讀書。總以背熟經書。常講史鑑爲要。每夜講一刻足矣。李弟看書。不必求多。亦不必求記。但每日有常。自有進境。萬不可厭常喜新。此書未完。忽換彼書耳。兄國藩手草。（咸豐元年十月十二日）

致諸弟（決對紀澤親事）

澄侯溫甫子植季洪四位老弟足下。正月初八。接到十二月初旬父大人所發二信。皆係在縣城發者。不勝忻慰。紀澤兒定婚之事。予於十二月連發三信。皆言十月十二所發之信。言嫌賀女庶出之說。係一時謬誤。自知悔過。求諸弟爲我敬告父親大人。仍求作主。決意對成。以諧佳耦。不知此二書俱已到家否。細思賀家簪纓門第。恐聞有前一說。懼其女將來過門受氣。或因此不願對。亦未可知。果爾則澄弟設法往省城。堅託羅羅山劉霞仙二君。將內人性情。細告賀家。務祈成此親事。不敢陷我於不孝之咎。

澄弟與朱堯階成親。余甚歡喜。我朋友最初之交。無過於堯階者。蓋今日姻緣。已定於二十年以前矣。魏家亦我境第一詩書人家。魏棟尙未到京。容當照拂一切也。

植弟買筆事。總在春間寄南。以備科考之用。若科考不在前三名。則不宜考優。無使學政笑我家太外行也。關帝

覺世經刷五百張。須公車回南。乃可付詩。陰瀉文感應篇。亦須公車南去。乃可帶澄弟戒烟。正與阿兄同年。余以壬寅年戒烟。三十二也。澄弟去年亦三十二也。戒烟似可不必。三兩杯以養血。未始不可。但不宜多耳。

去年帶回父大人之干尖子皮褂。不知已做成否。若未做。可即做成。用月白緞子爲面。今年當更寄白風毛褂回家。敬送與叔父大人。若父叔二大人同日出門。則各穿一件。若不同出門。則薄寒穿干尖子。盛寒穿白風毛。予官至二品。而堂上大人衣服之少如此。於孝道則未盡。而彌足以彰堂上居家之儉德矣。

京寓大小平安。癘疾未發。文任吾先生於正月六日上學。其人理學甚深。今年又得一賢師。植弟勸我教澤兒學入股。其言甚切至有理。但我意要五經讀完。始可動手。計明年即可完經書。做時文。尙不過滿十四歲。京師教子十四歲開筆者甚多。若三年成篇。十七歲即可作佳文。現在本係蔭生。例不准赴小考。擬令照我之樣。廿四歲始行鄉試。實可學做入股者十年。若稍有聰明。豈有不通者哉。若十九二十。即行鄉試。無論萬萬不中。卽中得大早。又有何味。我所以決計命其明秋始學入股。廿四始鄉試也。九弟爲我稟告父大人。實不爲遲。不必里慮。

余近來常思歸家。今年秋間。實思挈眷南旋。諸弟爲我稟告堂上大人。春間卽望一回信。九弟進京之說。暫時不必急急。同鄉諸家如故。餘容後日續寄。兄國藩手草。（咸豐二年正月初九日）

致九弟（遣歸長夫多名）

澄溫植三弟左右。澄弟有病。卽可不必來此。此間諸事雜亂。澄弟雖來。亦難收拾。不如在家料理一切也。長夫來此者。至六十名之多。澄弟於此等處。不知節省。亦疎略也。茲一概遣歸。僅留十三名在此。如不好。尙須再遣回。昨夜褚太守帶三營水師。至靖江勦賊。不知能得乎否。塔周大勝仗歸來。余賞銀千兩。功牌百張。豬十口。酒五百斤。頗覺鼓舞。現淮鄧湘一營。難於收轄耳。餘不一一。（咸豐四年三月廿五日）

致諸弟（付回奏摺底稿）

澄候溫甫子植季洪四位老弟左右。十四日先後接到父大人手諭。及洪弟信。具悉一切。靖江之賊。現已全數開

去。竄奔下游。湘陰及洞庭皆已無賊。直至岳州以下矣。新牆一帶土匪。皆已撲滅。惟通城崇陽之賊。尙未勦淨。時有窺伺平江之意。湘潭之賊。在一宿河以上。被燒上岸者。竄至醴陵萍鄉萬載一帶。聞又裹脅多人。不知其盡竄江西。抑仍回湖南瀏平一帶。如其回來。亦易勦也。安化土匪。現就未勦盡。想日內可平定。

吾於三月十八發岳州戰敗請并部治罪一摺。於四月初十日。奉到硃批。另有旨。又夾片奏初五鄒國勝被火燒傷。初七大風壞船一案。奉硃批何事機不順若是。另有旨。又夾片奏探聽賊情各條。奉硃批覽。其片已存留軍機處矣。又有廷寄一道。諭旨一道。茲鈔錄付回。十二日。會同撫臺提臺。奏湘潭寧鄉靖江各處勝仗敗仗一摺。茲鈔付回。其摺係左季高所爲。又單銜奏靖江戰敗請交部從重治罪一摺。又奏調各員一片。均於十二日發六百里遞去。茲抄錄寄家。呈父叔大人一閱。

兄不善用兵。屢失事機。實無以對聖主。幸湘潭大勝。保全桑梓。此心猶覺稍安。現擬修整船隻。添招練勇。侍廣西勇到。廣東兵到。再作出師之計。而餉項已空。無從設法。艱難之狀。不知所終。人心之壞。處處使人寒心。吾惟盡一分心。作一日事。至於成敗。則不能復較計矣。

魏蔭亭近回館否。澄弟須力求其來。吾家子姪。半耕半讀。以守先人之舊。慎無存半點官氣。不許坐轎。不許喚人取水添茶等事。其拾柴收糞等事。須一一爲之。插田蒔禾等事。亦時時學之。庶漸漸務本。而不習於淫佚矣。至要。至要。千囑萬囑。(咸豐四年四月十四日)

致諸弟(儘可不必來營)

澄侯溫甫沅浦季洪四弟足下。昨寄去一函。諒已收到。十五日接父大人手諭。敬知一切。兄每日黎明看操。現已閱看四日。專看戈什哈及親兵二種。然有所表率。他營亦將興起。父大人命招湘鄉之原水手。趕緊前赴鄂省下遊。此時所患者。水手易添。船隻難辦。不特衡州新造之船。難以遽就。即在省之船。經屢次風波。屢次戰陣後。亦多有損壞者。修整難以遽畢。且廣西水勇。廣東水兵。皆於五月可到。不得不稍爲等候。整頓成軍。稍有把握。然後揚

帆東下。

余近來因肝氣太燥，動與人多所不合。所以辦事多不能成。澄沅近日肝氣尤旺，不能爲我解事。但爲我添許多唇舌爭端。軍中多一人，不見其益。家中少一人，則見其損。澄侯及諸弟以後儘可不來營。但在家中教訓後輩，半耕半讀，未明而起，同習勞苦，不習驕佚，則所以保家門而免劫數者，可以人力主之。整諸弟慎之又慎也。（咸豐四年四月十六夜書於長沙妙高峯）

致諸弟（廣東水師已到）

澄沅沅洪四弟左右。屢日發家信數次，想已收到。實收換部照，須造清冊一本，大非易事。現命孫蘭青經理此事，恐非二十日不能了。縱不能如請各部功牌冊之精妙，亦不宜太草率也。三月廿二所發一摺，頃於四月二十日，接奉硃批並廷寄，茲照鈔送回，呈堂上大人一閱。

廣東水師兵，已於廿一日到一百矣。洋礮亦到百尊。廣西水勇尙未到。衡州所造新船，聞甚不合用。頃有信與蕭可兄，令其略攻也。蔭亭兄到館，請其催蔣侯兄速來，並告貴州徐沅清韓超張禮度，並皆奏調來楚，均五月可到也。餘不一。（咸豐四年四月廿一日）

致諸弟（不能威猛由於不精明）

澄沅洪三弟左右。三十日奉到父大人手諭及三弟信件，具悉一切。長夫俱留在此。喫上頭飯，每日給錢百文。實無一事可勞其筋力，故不能不略減也。沅弟言我仁愛有餘，威猛不足。澄弟在此時亦常說及。近日友人愛我者，人人說及。無奈性已生定，竟不能威猛，所以不能精明。事事被人欺侮，故人得而玩易之也。

甲三之論，甲五之小講，已加批付回。科一科三科四之字俱好。科一請安稟，其字畫粗大，頗有乃父之風。季弟在益陽所領錢文，紳士文任吾等已料理清楚。在湘陰時，即在兄處領得實收，兄到岳州，忘告季弟耳。四月初一日，與中丞會銜奏請調貴州廣東兵，茲於廿六日奉到寄諭，鈔錄付回。餘不一。（咸豐四年五月初一日）

致諸弟（鄂兵久無餉銀）

澄溫季三弟侍右。初二日接奉寄諭。兄兩次請罪。尙止革職。不加嚴譴。飽提軍革職。卽以塔副將暑提軍任。聖鑑之公明。天恩之高厚。實令人感激無地。茲鈔錄付回。江采七於三月自廬州回。初三到省。千辛萬苦。或三日而僅得兩飯。或數夜而不得一眠。亂世行路之難。真奇難也。

在湖北時。得見魏召亭。光景甚窘。曾與采五言及。萬一城破。嘗由大東門去避。湖北官弁兵勇。久無餉銀。真不堪設想也。召亭家書一件付去。兄身體甚好。樹堂雲仙皆來此過節。專待衡州船到。廣西勇到。卽配齊東下。塔督亭於初八日先帶陸勇三千餘人。至岳州去。餘不一一。（咸豐四年五月初四日）

致諸弟（長夫皆令回里）

澄溫沉季四弟足下。昨發一信後。羅山卽於初三到省。是日二更得信。周鳳山李輔朝之勇。於廿九在龍陽得三勝仗。念九日夜。終宵鏖戰。不得休息。初一早一戰。卽已潰敗。蓋紮營城外沙洲之上。是夜漲水侵入營盤。初一早營內水深尺餘。賊船三面環攻。共二千餘號之多。此時逃出營外。途中無船可渡。淹斃至二三百人。軍器全失。周李皆健將。此番大挫。尤焦灼也。

家中長夫春二等。皆不願遠出。茲皆令其回里。其工錢每月三十日。並未扣一日耳。餘不一一。（咸豐四年六月初四日）

致諸弟（廣西水勇到省）

澄溫沉季老弟足下。昨寄一信。言周鳳山李相堂龍陽之敗。後接來稟。知周營千一百人中。實傷斃四十人。李營千人中。實斃九十人。尙不爲大挫。

胡詠芝初四由安化至桃源。一路勦賊。周李卽可同去。廣西水勇。李太守帶來。今日到省。若配齊船隻。尙須十餘日。乃可行也。餘不一一。（咸豐四年六月初四日）

致諸弟（湖北業已失守）

澄溫沅季老弟左右。湖北青撫臺於今日入省城。所帶兵勇均不准其入城。在城外二十里紮營。大約不過五六千人。其所稱難民數萬。在後隨來者亦未可信。此間供應數目。即給與途費。令其至荊州另立省城。此實未有之變局也。

鄒心田處。已有札至縣撤委。前胡維峯言鄒心田可勸捐。余不知其即至堂之兄也。昨接父大人手諭。始知之。故即札縣撤之。胡維峯近不妥當。亦必屏斥之。

余去年辦清泉甯徵義寧宏才一案。其卷已送回家中。請澄弟查出。即日付來爲要。湖北失守。李鶴人之父。想已殉難。鶴人方寸已亂。此刻無心辦事。日內尙不能起行。至七月初旬。乃可長征耳。餘不一。

諸弟在家教子姪。總須有勤敬二字。無論治世亂世。凡一家之中。能勤能敬。未有不興者。不勤不敬。未有不敗者。至切至切。余深悔往日未能實行此二字也。千萬叮囑。澄弟向來本勤。但敬不足耳。閱歷之後。應知此二字不可須臾離也。（咸豐四年六月十八日）

致諸弟（令子姪見軍旅）

澄溫沅季四位老弟左右。廿二日彭四到。接父大人手諭。及諸弟來信。欣悉一切。二十日摺差歸。聞京報。袁燾六於五月十三日引見。得御史。十五日。特旨放江蘇蘇州府遺缺知府。渠寫家信回。要其家專人至京。渠有多少事要交代。兄因各捐生事。亦欲造冊專人至京。如袁家人去。即與之同行也。余前摺奏捐事。部議已准。茲鈔付回。廣西水勇。於十八日殺死祁陽勇七人。日內嚴查。逼凶下手之犯。必須按律嚴辦。湖北青撫臺帶來之兵勇。大約二萬金。乃可了事。飢困之後。甚安靜不鬧事也。今擬於七月初六起行。甲三甲五二人。可令其來省送我。蓋少年之人。使之得見水陸軍旅之事。亦足以長見識。且子姪送我。亦至理之不可少者也。書不一。（咸豐四年六月廿三日）

致諸弟（述賊人數更多）

澄侯溫甫子植季洪四弟足下。安五至。接到家書。具悉一切。自十八日一戰後。念一日陸路開仗。小有挫衄。諸殿元陣亡。千總劉士宜陣亡。餘兵勇傷亡廿餘人。賊亦殲斃數十人。

二十六日賊從湖北糾集悍賊二萬人。由臨湘陸路前來。意欲撲塔周羅山等之營盤。陸路既得。水路自然失勢。拚死攻撲。滿山滿坑。無非黃旗紅巾。比三月初十人數更多。幸撲山之湘勇得力。將頭起殺退。以後如周鳳山之營。楊名聲之營。亦俱奮勇殺賊。共七八百名。此股賊來甚多。必有屢次血戰。東南大局。在此數日內可定。如天之福。陸路得獲大勝。水路亦可漸次壯盛也。帶水師者。有戰陣之險。有水波之苦。又有偷營放火之慮。時時提防。殊不甘心。幸精神尚好。照料能周耳。

霞仙定於本月內還家。渠在省實不肯來見。強之使來。兵凶戰危之地。無人不趨而避之。平日至交如馮樹堂郭雲仙等。尚不肯來。則其他更何論焉。現除李次青外。諸事皆兄一人經理。無人肯相助者。想諸弟亦深知之也。

甄甫先生去年在湖北時。身旁僅一舊僕。官親幕友家丁書差戈什哈。一概走盡。此亦無足怪之事。兄現在局勢猶是有為之秋。不致如甄師處之蕭條已甚。然以此為樂地。而請人人肯欣然相從。則大不然也。兄身體如常。癯疾不作。乞稟告父叔大人千萬放心。（咸豐四年七月廿七日）

致諸弟（述陸路大獲勝）

澄溫植洪四弟足下。初一日初二春二維五至。接父大人及諸弟手書。具悉一切。

自念六日陸路大獲勝仗之後。念八日陸路又大勝。念九日水路大勝。賊自湖北漢黃以下。盡糾其精銳來岳。以與我軍相抗。念八日鏖戰至五個時辰之久。塔軍門匹馬衝突。忽東忽西。全軍士卒。無一人不俯首咋舌。稱爲神勇。

念九日辰刻接仗。塔公打中路。鳳山打西路。羅羅山打東路。羅山之湘勇。此次最爲出力。竟能以少勝多。我軍猛

殺則賊退。敗退不過二里。輒迴戈相向。大殺一回。如是者三退三進。湘勇竟能抵住。不忙不亂。至第三次退去。賊亦不敢迴顧矣。周鳳山之勇。楊名聲之勇。皆極勇敢向前。一可當十。是日自辰至申。殺賊共計五百餘人。賊自敗奔。跌巖墜澗死者。其數尙多。

水師於未刻至。謹隆磯。適有賊船上來。開礮轟擊。賊舟奔退。乘勝追下。至擂鼓臺。燒賊船約二十餘號。奪獲賊船約二十餘號。殺斃溺斃之賊。約千餘人。蓋是日凶悍之賊。皆已上岸。每船僅留二三賊在船。餘皆被擄之水手。一見官兵開礮轟擊。賊與水手。紛紛撲水自溺。故我軍愈得勢也。三十初一日。水師皆出隊擊賊。三十日未甚交鋒。初一日李鶴人一營在前攻勦。擊斷陳鎮軍之舊拖罟船頭桅。斃賊十餘人。

陸營經廿六廿八九日三次血戰之後。二日內未開仗。現在陸營有六七分可靠。水營有四五分可靠。擬再備杉板數十號。小漁划一百號。出隊開仗時。散布滿河。拋擲火毯。以亂賊心。或更有濟。餘不一。即乞稟告父叔大人千萬放心。(咸豐四年閏七月初二日)

致諸弟(即日移營前進)

澄侯溫甫子植季洪足下。自初二日陸路連躡賊營。十三夜奪獲馬騾七八百匹。軍械二千餘件。是夜水師進追四十里。賊船捨命奔逃。初三日又追百餘里。賊棄舟登岸者甚多。初四日追至六溪口。追得賊船十餘號。開礮轟擊。賊僅放數礮抵拒。旋即登岸逃走。我軍入口內支河搜勦。得賊船百數十號。一見我軍開礮圍攻。即紛紛棄舟而去。軍士爭欲搶船。楊載福下令止許焚燒。不許搶奪。遂將百餘船一炬焚之。是夜將士搜河三十里。逼宵未睡。次早仍回新堤螺山駐紮。以小划探至金口。皆無賊船。自金口至武昌六十里。不知賊船尚存若干。此番若能乘勝直追下去。武漢竟易收復。可惜我水師尙須倭募。船礮亦未齊全。陸路之兵。尙無糧臺隨行。不能遽進。連日北風甚大。亦難東下。風稍息。余即進紮螺山也。茲遣人送回一信。即日移營前進。求堂上大人放心。餘不一。(咸豐四年閏七月初九日)

致諸弟（述賊不能水戰）

澄溫沉洪四弟左右。兄於初十日開船。十一日已刻至螺山。去岳州八十里。楊載種蕭捷山兩營。已下駐紮新堤。去螺山又四十五里。楊蕭於十一夜入倒口黃介湖內搜勦餘賊。賊僅開十餘礮。即紛紛登岸逃走。各哨官謹避。我不許搶貨之令。將六十餘號空船。一概焚燒。岸上百姓。焚香於辮頂。跪岸上歡迎。呼各勇爲青天大人。各勇每見一人如此。即得稱呼。高興之至。倒口湖內旣已搜勦。其下六溪口亦經搜勦。金口以上。已無賊蹤。自金口六十里至武昌。尙未探明。

大抵賊於水戰一事。極爲無能。渠所用者民船。每放一礮。全身震破。所擄水手。皆不願在賊中久住。又以所擄百姓。令其勉強打漿。勉強扶柁。皆非其所素習。即兩次得我之船。得我之礮。皆我兵勇自先上岸。情願將船礮丟棄。與他。是以大敗。若使我兵勇自願其船。不將船礮送他。渠亦斷不能攜來追我。此屢次打仗。衆勇所親見而熟知者。渠得我之戰船洋礮。並不作水戰之用。以洋礮搬於岸上紮營。而戰船或鑿沉江心。或自焚以逃。亦未收戰船之用。惟賊中所擅長制勝者。在漁划百餘號。每戰四出圍繞。迷目驚心。此次余亦辦得小漁划百廿號。行走如飛。以後我軍見賊小划。或不致驚慌耳。

衡州捐項。究竟何如。便中可一打聽。永豐大布。厚而不貴。吾意欲辦好帳房五百架。寬大結實。以爲軍士寒天之用。澄弟若可承辦此事。望與堯階細商。即在本邑捐項內支用。餘不一一。望敬稟父親大人。叔父大人。軍中匆忙。不及措稟也。（咸豐四年閏七月十四日）

致諸弟（宜注重勤敬和更宜注意清潔戒怠惰）

澄侯溫甫子植季洪四弟足下。久未遣人回家。家中自唐二維五等到後。亦無信來。想平安也。余於念九日自新堤移營。八月初一日至嘉魚縣。初五日自坐小舟。至牌洲看閱地勢。初七日即將大營移駐牌洲。水師前營左營中營。自閏七月念三日駐紮金口。念七日賊匪水陸上犯。我陸軍未到。水軍兩路堵之。搶賊船二隻。殺賊數十人。

得一勝仗。羅山於十八念三念四念六等日。得四勝仗。初四發摺。俱詳敘之。茲付回。初三日接上諭。寄余得賞三品頂戴。現具摺謝恩。寄諭並摺寄回。

余居母喪。並未在家守制。清夜自思。踟躕不安。若仗皇上天威。江面漸次肅清。即當奏明回籍。事父祭母。稍盡人子之心。諸弟及兒姪輩。務宜體我寸心。於父親飲食起居。十分檢點。無稍疎忽。於母親祭品禮儀。必潔必誠。於叔父處敬愛兼至。無稍隔閡。兄弟娣姒。總不可有半點不和之氣。凡一家之中。勤敬二字。能守得幾分。未有不與。若全無一分。無有不敗。和字能守得幾分。未有不與。不和未有不敗者。諸弟試在鄉間。將此三字於族戚人家。歷歷驗之。必以吾言爲不謬也。

諸弟不好收拾潔淨。比我尤甚。此是敗家氣象。嗣後務宜細心收拾。即一紙一縷。竹頭木屑。皆宜檢拾。以爲兒姪之榜樣。一代疎懶。二代淫佚。則必有晝睡夜坐。吸食鴉片之漸矣。四弟九弟較勤。六弟季弟較懶。以後勤者愈勤。懶者痛改。莫使子姪學得怠惰樣子。至要至要。子姪除讀書外。教之掃屋抹桌檯。收糞鋤草。是極好之事。切不可爲有損架子而不爲也。（咸豐四年八月十一日）

致諸弟（自述不願受官。注意勿使子姪驕佚）

澄溫沅季四位老弟左右。念五日著胡二等送家信。報收復武漢之喜。念七日具摺奏捷。初一日制臺楊威農滯到鄂相會。是日又奏念四夜焚襄河賊舟之捷。初七日奏三路進兵之摺。其日酉刻。楊載福彭玉麟等。率水師六十餘船。前往下游勦賊。初九日前次謝恩摺。奉硃批到鄂。初十日彭四劉四等來營。進攻武漢三路進勦之摺。奉硃批到鄂。

十一日武漢克復之摺。奉硃批廷寄諭旨等件。兄署湖北巡撫。並賞戴花翎。兄意母喪未除。斷不敢受官職。若一經受職。則二年來之苦心孤詣。似全爲博取高官美職。何以對吾母於地下。何以對宗族鄉黨。方寸之地。何以自安。是以決計具摺辭謝。想諸弟亦必以爲然也。

功名之地。自古難居。兄以在籍之官。募勇造船。成此一番事業。名震一時。人之好名。誰不如我。我有美名。則人必有受不美之名者。相形之際。蓋難爲情。兄惟謹慎謙虛。時時省惕而已。若仗聖主之威福。能速將江西肅清。蕩平此賊。兄決意奏請回籍。事奉吾父。改葬吾母。久或三年。暫或一年。亦足稍慰區區之心。但未知聖意果能俯從否。諸弟在家。總宜教子姪守勤敬。吾在外。既有權勢。則家中子姪。最易流於驕。流於佚。二字。皆敗家之道也。萬望諸弟刻刻留心。勿使後輩近於此二字。至要至要。

羅羅山於十二日拔營。智亭於十三日拔營。余十五亦拔營東下也。餘不一。乞稟告父親大人叔父大人萬福金安。(咸豐四年九月十二日)

致諸弟(告戰事情况及聘請明師)

澄侯溫甫子植季洪四位老弟左右。胡二等初一日到營。接奉父大人手諭及諸弟信。具悉一切。兄於二十日在漢口起行。二十一日至黃州。二十二日至堵城。以傘一豕一爲文祭。吳甄甫師。二十三日過江至武昌縣。二十四在巴河晤郭兩三之弟。知其兄觀亭在山西。因屬邑失守。草職。兩三現署兩淮鹽運使。二十九日至蘄州。是月水師大戰獲勝。

初一初四初五。陸軍在田家鎮之對岸半壁山大戰獲勝。初九初十水師在蘄州開仗小勝。十三日水師大破田家鎮賊防。燒賊船四千餘號。自有此軍以來。陸路殺賊之多。無有過於初四之戰。水路燒船之多。無有過於十三之役。現在前幫已至九江。吾尙駐田家鎮。離九江百五十里。陸路之賊。均在廣濟黃梅一帶。塔羅於念三日起行往勦。一切軍事之詳。均具奏報之中。茲並鈔錄寄回。祈敬呈父親大人叔父大人一覽。劉一良五於廿日至田家鎮。得悉家中老幼均安。甚慰甚慰。

魏蔭亭先生既來軍中。父大人命九弟教子姪讀書。而九弟書來堅執不肯。欲余另請明師。余意中實乏明師。可以聘請。日內與霞仙及幕中諸君子熟商。近處惟羅研生兄。是我心中佩仰之人。其學問俱有本原。於說文音學

輿地。尤其所長。而詩古文辭及行楷書法。亦皆講求有年。吾鄉通經學古之士。以鄉叔續爲最。而研生次之。其世兄現在余幕中。故請其寫家信聘研生至吾鄉教讀。

研兄之繼配陳氏。與耦庚先生爲聯襟。渠又明於風水之說。並可在吾鄉選擇吉地。但不知其果肯來否。渠現館徐方伯處。未知能辭彼就此否。若果能來。足開吾邑小學之風。於溫甫子植。亦不無裨益。若研兄不能來。則吾心中別無他人。植弟堅不肯教。則乞諸弟爲訪擇一師而延聘焉爲要。甲三甲五可同一師。不可分開。科一科三科四亦可同師。餘不一。諸侯續布。(咸豐四年十月廿二日)

致諸弟(帶歸卒歲之資及告軍中聲名極好)

澄侯溫甫子植季洪四位老弟足下。廿五日遣春二維五歸家。會寄一函。並諭旨奏摺二冊。廿六日水師在九江開仗獲勝。陸路塔羅之軍。在江北蘄州之蓮花橋。大獲勝仗。殺賊千餘人。廿八日克復廣濟縣城。初一日在大河埔大獲勝仗。初四日在黃梅城外。大獲勝仗。初五日克復黃梅縣城。該匪數萬。現屯踞江岸之小池口。與九江府城相對。塔羅之軍。卽日追至江岸。卽可水陸夾擊。能將北岸掃除。然後可渡江以剿九江府之賊。自至九江後。卽可專夫由武甯以達平江長沙。

茲因魏蔭亭親家還鄉之便。付去銀一百兩。爲家中卒歲之資。以三分計之。新屋人多。取其二以供用。老屋人少。取其一以供用。外五十兩一封。以送親族各家。卽往年在京寄回之舊例也。以後我家光景略好。此項斷不可缺。家中却不可過於寬裕。因處亂世。愈窮愈好。

我現在軍中聲名極好。所過之處。百姓爆竹焚香跪迎。送酒米豬羊來犒軍者。絡繹不絕。以祖宗累世之厚德。使我一人食此隆報。享此榮名。寸心兢兢且愧且慎。現在但願官階不再進。虛名不再張。常葆此以無咎。卽是持家守身之道。至軍事之成敗利鈍。此關乎國家之福。吾惟力盡人事。不敢存絲毫倣倖之心。諸弟稟告堂上大人。不必懸念。

揭樹堂前有信來。要功牌百張。茲亦交蔭亭帶歸。望澄弟專差送至寶慶。委交樹堂爲要。衡州所捐之部照。已交朱峻明帶去。外帶照千張。交郭雲仙。從原奏之所指也。朱於初二日起行。江隆三亦同歸。給渠錢已四十千。今年送親族者。不必送隆三可也。餘不一一。（咸豐四年十一月初七日書於武穴舟中）

致諸弟（軍事愈辦愈難）

前信已封。而春二於廿五到營。接奉父大人手諭及諸弟信。敬悉一切。曾祖生以本境團練派費之事。而必求救於百里之外。以圖免出資費。其居心不甚良善。劉東屏先生接得父大人手書。此等小事。何難一笑釋之。而必展轉辯論。拂大人之意。在尋常人尙不能無介於中。况大人兼三邊尊。而又重以世交。言不見信。焉能不介懷耶。望諸弟曲慰大人之意。大度含容。以順天和。庶使遊子出外。得以安心治事。所有來往信件。謹遵父諭。卽行寄還。吾自服官及近年辦理軍務。中心常多鬱屈不平之端。每效母大人指腹示兒女曰。『此中蓄積多少悶氣。無處發洩。』其往年諸事。不及盡知。今年二月在省城河下。凡我所帶之兵勇僕從。每次上城。必遭毒罵痛打。此四弟季弟所親見者。謗怨沸騰。萬口嘲譏。此四弟季弟所親聞者。自四月後。兩弟不在此。景况更有令人難堪者。吾惟忍辱包羞。屈心抑志。以求軍事之萬有一濟。

現雖屢獲大勝。而愈辦愈難。動輒招尤。倘賴聖主如天之福。殲滅此賊。吾實不願久居官場。自取煩惱。四弟自去冬以來。亦屢遭求全之毀。蜚來之謗。幾於身無完膚。想宦途風味。亦深知之。而深畏之矣。溫弟季弟來書。常以保舉一事。疑我之有吝於四弟者。是亦不諒我之苦衷也。

甲三從師一事。吾接九弟信。辭氣甚堅。卽請研生兄。以書聘之。今尙未接回信。然業令其世兄兩次以家信催之。斷不可更有變局。學堂以古老坪爲妥。研兄居馬托鋪鄉中。亦山林寒苦之士。決無官場習氣。至甲三天分本低。若再以全力學八股試帖。則他項學業。必全荒廢。吾決計不令其學作八股也。曾兆安歐雖銜。皆已保舉。致官。日內想可奉旨。（咸豐四年十一月廿七日）

致諸弟（水師陷入內河）

澄侯溫甫子植季洪四位老弟足下。久未專使回家。想家中極爲懸念。王芝三等到營。得悉家中大人稍安。闔宅平善。甚慰甚慰。我軍自破田家鎮後。滿灘九江不日可下。不料叛賊堅守。屢攻不克。分羅山湘營至湖口。先攻梅家洲堅壘。亦不能克。而士卒力戰於槍礮如雨之中。死傷甚衆。蓋陸路銳師。倏變爲鈍兵矣。

水師自至湖口。屢獲大勝。苦戰經月。傷亡亦復不少。臘月十二日。水師一百餘號。輕便之船。精銳之卒。衝入湖口小河內。該逆頓將水卡堵塞。在內河者不能復出。在外江之老營船隻。多笨重難行。該逆遂將小刘乘夜放火。燒去戰船民船四五十號之多。廿五日又被小刘偷襲。燒去捨去各船至二三十號之多。以極盛之水師。一旦以百餘號好船。陷入內河。而外江水師。遂覺無以自立。兩次大挫。而兄之座船被失。一軍耳目所在。遂覺人人惶愕。各船紛紛上駛。自九江以上之隆平武穴田家鎮。直至蘄州。處處皆有賊船。且有棄船而逃者。糧臺各所之船。水手盡行逃竄。此等情景。殊難爲懷。現率殘賊敗之水師。駐紮九江城外官牌夾。兄住羅山陸營之內。不知果能力與此賊相持否。

兄於廿五日蒙恩賞穿黃馬褂。並頒賜貂皮黃馬褂一件。四喜班指一個。白玉巴圖魯翎管一個。小刀一把。火鏢一個。廿六夜蒙恩賞福字一幅。大小荷包三對。又有奶餅菓食等件。頒到軍營。廿五夜之變。將班指翎管小刀火鏢失去。茲遣人送回黃馬褂一件。福字一幅。荷包三對。兄船上所失書籍地圖上諭奏章及家書等件。甚爲可惜。而兩年以來。文案信件如山。部照實收功牌賬目。一併失去。尤爲可惜。

莘田叔解戰船來。離大營止少一二日。竟不能到。軍家勝敗。本屬無常。而數年辛苦。難補涓埃。未免心結。廿九日羅山率湘勇渡江。勦小池口之賊。又見挫敗。士氣愈損。現准力加整頓。挽回元氣。不審能如意否。茲遣長夫自江西送信回家。當無梗阻。書不一一。諸惟心照。卽祈代稟堂上大人不必呈念。（咸豐五年正月初二日）

致諸弟（至江西整頓戰船）

澄侯溫甫子植季洪老弟足下。初二日遣人送信回家。想節後可到。初四日大風擊壞戰船三十餘號。水師自十二日百餘輕便之舟。二千精銳之卒。陷入內湖。外江老營。兩次被賊用小划燒襲。業已不能自立。終日惶惶。如坐針氈。又復遭此大風。遂全數開赴上游武漢等處。桅折楫摧。多不堪戰。不知回至上游。果尙足以禦賊否。

兄因小舟陷入江西內河者。皆向來能戰之船。不甘遽棄之無用之地。必須親至江西整頓。即於十二日自九江趕行。十六日至江西省城。官紳相待甚好。在內之百餘船。尙皆完好。再加大船數十號。另成一軍。即足自立。羅山所帶湘勇。自二十九日挫敗後。現在洵汰整頓。認真操練。塔公所帶之兵勇。亦日日操練。將來兄在江西另成之水軍。由湖口打出。與塔羅相依護。其外江新回武漢之水師。如果能重整勁旅。則兩路會合攻讐。如不能重整勁旅。則我專治內河之水師。亦自能獨立不懼。江西物力尙厚。供我水陸兩軍口糧。大約足支八個月。

兄身體甚好。惟左腰有寒氣作痛。癱疾亦尙未愈。想皆不久可痊。家中長夫。相住甚近。軍中危地。恐小有差失。反爲不妙。且送信行走極緩。在營又無事可幹。茲盡遣回家。以後若有家信。即用湘鄉縣官封。發至江西南昌府署中。可以必到。兼可速到。不似長夫專送之遲延也。慎勿再令長夫來營。兵凶戰危。我境之人。俱未歷過險難。幸田叔此次行二十里。竟不能見我之面。受盡千驚萬苦。實實可憫。嗣後族戚有願至營者。相勸不必前來。至要至要。書不一一。諸惟心知。其不詳者。長夫自能面述耳。(咸豐五年正月十八日書於江西省城)

致諸弟(認真操練水師)

澄侯溫甫子植季洪四弟足下。久未接家信。想堂上大人安康。家中老幼清吉。爲慰。自北省再陷。兄處一軍。反在下游。進退兩難。在內湖之水師。兄在江西駐紮兩月。造船添勇。已有頭緒。現在船近二百號。勇逾三千人。認真操練。可成勁旅。兄於十三日出省登舟。郭雲仙於十六日到營。曾莘田易敬臣兄弟。於十五日到營。羅雲臯於初旬到營。事機不順。而來者偏衆。可見鄉間窮苦也。陽陵雲初旬歸去。余送途費八兩。魏蔭亭尙未歸。塔軍門尙紮九

江。羅山於初十日進勦廣信饒州之賊。李次青忽然高興帶勇。於十一日起行赴南康府。實非其所長也。余辦內湖水師。卽以鄱陽湖爲巢穴。間或出江勦賊。亦不過以三分之一。與賊鏖戰。勦上游則在九江武穴田家鎮處游弋。不出湖口二百里之外。利則交戰。不利則退回鄱陽湖巢穴之內。勦下游則在彭澤望江安慶等處游弋。亦不出湖口二百里之內。利則交戰。不利則亦退鄱陽湖巢穴之內。如此辦理。則上游武漢之賊。與下游金陵之賊。中間江路。被我兵梗阻一段。其勢不能常通。亦足以制賊之命。特上游金口等處。我軍戰船。無人統領。常不放心耳。

近日吾鄉人心慌亂否。去年遷避。終非善策。如賊竄上游岳常等處。謠言四起。總以安居不遷爲是。

季洪弟盡可不必教書。宜在家中讀書。沉弟要方望傑姚姬傳文集。霞仙已代爲買得。可用心細看。能閱過一遍。通加圈點。自不患不長進也。紀澤兒記性平常。不必力求背誦。但宜常看生書。講解數徧。自然有益。入股文試帖詩。皆非今日之急務。盡可不看。不作。史鑑略熟。宜因而加功。看朱子綱目一徧爲要。紀鴻亦不必讀入股文。徒費時日。實無益也。修身齊家之道。無過陳文恭公五種遺規一書。諸弟與兒姪輩皆宜常閱看。吾之衣服有在家者。可交來人卽日送營。特袍褂不宜帶來。餘皆可送也。諸不一。惟祈心照。(咸豐五年三月二十日在江西省城七里港舟中書)

致諸弟(讀書不必求熟)

澄溫沅洪四弟足下。二十五日春二維五來營。接家書數件。具悉一切。乘敗仗之時。兵勇搶劫糧臺。此近年最壞風氣。向帥營中屢屢見之。而皆未懲辦。兄奏明將萬瑞書卽行正法。奉旨嚴飭駱中丞卽行正法。聞駱中丞不欲殺之。將附片奏請開釋。近日意見不合。辦事之難如此。

吾癯疾大發。幸精神尙足支持。羅山在廣信府大獲勝仗。殺賊三四千。塔軍門在九江平安。紀澤兒讀書。記性平常。讀書不必求熟。且將左傳禮記於今秋點畢。以後聽兒之自讀自思。勤惰成敗。兄當自省而圖自立焉。吾與諸

弟惟思以身垂範。而教子姪不在誨言之諄諄也。卽候近祺。(咸豐五年三月廿六日)

致諸弟(營中需才孔亟)

澄溫沉季四位賢弟左右。於十六日在南康府接父親手諭。及澄沉兩弟紀澤兒之信。係劉一送來。二十日接澄弟一信。係林福秀由縣送來。具悉一切。

余於十三日自吳城進紮南康。水師右營後營嚮道營。於十三日進紮青山。十九日賊帶礮船五六十號。小划船百六十號。前來撲營。鏖戰二時。未分勝負。該匪以小划二十餘號。又自山後攢出。襲我老營。老營戰船業已全數出隊。僅坐船水手數人。及僱民船水手。皆逃上岸。各戰船哨官見坐船已失。遂爾慌亂。以致敗挫。幸戰船礮位毫無損傷。猶爲不幸中之大幸。且左營定湘營尙在南康。中營尙在吳城。是日未與其事。士氣依然振作。現在大營三千人。同泊南康。與陸勇平江營三千人相依護。或可速振軍威。

現在余所統之六軍。塔公帶五千人。在九江。羅山帶三千五百人。在廣信一帶。次青帶平江營三千人。在南康。業已成爲三枝。人數亦不少。趙玉班帶五百湘勇來此。若獨成一枝。則不足以自立。若依附塔軍。依附羅軍。則去我仍隔數百里之遠。若依附平江營。則氣類不合。且近來口糧實難接濟。玉班之勇。可不必來。玉班一人獨來。則營中需才孔亟。必有以位置之也。

蔣益澧之事。唐公如此辦理甚好。密傳其人家詳明開導。勒令繳出銀兩。足以允我人心。面面俱圓。請蘋翁卽行速辦。但使探驪得珠。卽輕輕著筆。亦可以速辦矣。

此間自水師小挫後。急須多辦小划以勝之。但乏能管帶小划之人。若有實能帶小划者。打仗時並不靠他衝陣。只要開仗時。在江邊攢出攢入。眩賊之眼。助我之勢。卽屬大有裨益。吾弟若見有此等人。或趙玉班能薦此等人。卽可招募善駕小划之水手一百餘人來營。馮玉珂所繳水勇之槍銀。及各項應繳之銀。可酌用爲途費也。

奈在營平安。精神不足。惟癩疾未愈。諸事未能一一照管。小心謹慎。冀盡人事。以聽天命。諸不詳盡。統俟續布。

咸豐五年四月二十日書於南康城外水營

致諸弟（打單眼鏡數竿）

澄溫沅季四弟左右。二十二日齊三昂十到營。奉到父親大人手諭。並沅弟一信。廿三日接澄弟在縣官封一信。乃三月二十五日所發。比齊三等之信遲十六日。

水師自十九日小挫。日內未開仗。聞都昌有賊船。派船二十號前往搜剿。廿二日燒船八十餘號。廿三日燒三十餘號。皆賊所擄之民舟也。李次青所帶之平江陸勇。現紮南康。護衛水師。魏蔭亭回銜招小划水勇。請蕭可卿同辦。

吾鄉有三眼鏡。亦有單眼鏡。響振山谷。吾意單眼鏡。若裝子彈於內。盡可打賊。鄉間用木削尖。往往打得四五丈遠。請澄弟在吾鄉打單眼鏡數竿。用硬木爲把。試裝銅拍小石之類於內。是否可打半里路遠。如其合用。即可多打數十竿。或百竿。交魏蔭亭之水勇帶來。其錢由兄營寄回。

兄近日身體尙好。惟火氣甚旺。癩疾未愈。莘田在營。安靜謹慎。馮玉珂亦穩實也。餘不一一。容俟續具。（咸豐五年四月廿五日）

致諸弟（難以打出湖口）

澄侯溫甫子植季洪四位老弟足下。春二維五來營。接奉父親大人手諭。並諸弟信函。敬悉一切。此間自五月十三日水戰獲勝後。三十日該逆七十餘舟。上犯至青山一帶。我軍出隊迎敵。又獲勝仗。奪回余去年所坐之拖罟船外。又奪賊戰船五隻。軍心爲之一振。六月初七月初九夜兩次風暴。營中壞船十餘號。應修整者二十餘號。十三日派人至南康對岸之徐家埠。水陸搜剿。其地去湖口縣七十里。賊匪督率土匪。在該處收糧。誅求無度。民不聊生。因派水陸六百人搜剿前往。真賊十餘。率土匪三百人。與我軍接仗。僅開兩排槍。該匪即敗竄。追奔十餘里。焚賊館十餘所。焚輜重船百餘隻。擊斃十餘人。生擒七人。十四收隊回南康。十五日水師至湖口。探看賊營情

形。該匪堅匿不出。迨我軍疲乏將歸。遂船突出大戰。我軍未約定臨戰。人心忙亂。遂致挫敗。賊誘匪圍去大船。船一號。杉板船二號。三船共陣亡五十人。受傷二十餘人。軍士之氣。爲之一落。今年六月。河水師共調四仗。兩勝兩敗。湖口一戰。竟難遽行打點。不勝焦灼。塔軍門在九江。十三日打一勝仗。殺賊三百餘人。亦無益於大局也。

自義寧州失守。不待江西省城戒嚴。而湖南亦有東顧之憂。蓋義寧與平江。劉鴻英據賊。思由此路竄。何長沙。羅山。現回江西省。擬即日進攻義寧。以絕兩省腹心之患。若能急急克復。則桑梓有安枕之日。否則三面受敵。湖南亦萬難支持。大亂之禍。豈盡由人力。亦蒼蒼者有以主之耳。

余癯疾未愈。用心尤甚。夜不成寐。常恐耿耿微忱。終無補於國事。然辦一日事。盡一日心。不敢片刻稍懈也。陳竹伯中丞。辦理軍務。不憚人心。與余諸事亦多齟齬。凡共事和衷。最不易易。澄弟尚在外辦公事否。宜以余爲戒。杜門不出。謝却一切。余食祿已久。不能不以國家之憂爲憂。諸弟則盡可理亂不聞也。子姪輩總宜教之以勤。勤則百弊皆除。望賢弟留心。卽問四位老弟近好。(咸豐五年六月十六日)

致諸弟(朝彭雪琴來江)

澄侯溫甫子植季洪四位老弟左右。劉朝相來營。得植弟手書。具悉一切。內湖水師自六月十五日開仗後。至今平安。本擬令李次青帶平江勇。渡鄱陽湖之東。與水師會攻湖口。奈自六月底至今十日。大風不克東渡。初四日風力稍息。平江勇登舟。甫經解纜。狂飆大作。旋即折回。弁勇衣被帳棚。寸縷皆濕。天意茫茫。正未可知。不知湖口之賊。運數不宜遠滅乎。抑此勇渡湖。宜致敗挫。故特阻其行。以全此軍乎。現擬俟月半後。請塔軍渡湖會剿。羅山進攻義寧。聞初四日可止界上。初五六日當可開仗。湖南三面用兵。駱中丞請羅山帶兵回湘。業經入奏。如義寧能攻破。恐羅山須回湖南。保全桑梓。則此間又少一枝勁旅矣。內湖水師。船礮俱精。特少得力營官。現調彭雪琴來江。當有起色。

鹽務充餉。是一大好事。惟浙中官商。多思專利。邵位西來江。會議已有頭緒。不知渠回浙後。彼中任事人能允行

否。舍此一篲。則餉源已竭。實有坐困之勢。東安土匪。不知近日如何。若不犯邵陽界。則吾邑尙可不至震驚。帶軍之事。千難萬難。澄弟帶勇至衡陽。溫弟帶勇至新橋。幸託平安。嗣後總以不帶勇爲妙。吾閱歷二年。知此中搆怨之事。造孽之端。不一而足。恨不得與諸弟當面一一縷述之也。

諸弟在家。侍奉父親。和睦族黨。盡其力之所能爲。至於團練帶勇。却不宜。澄弟在外已久。諒知吾言之具有苦衷也。寬二弟去年下世。未嘗奠分。至今歉然於心。茲付回銀廿兩。爲寬二弟奠金。望送交任尊叔夫婦手收。

植弟前信言身體不健。吾謂讀書不求強記。此亦養身之道。凡求強記之者。尙有好名心。橫互於方寸。故愈不能記。若全無名心。記亦可。不記亦可。此心寬然無累。反覺安舒。或反能記一二處。亦未可知。此余閱歷語也。植弟試一體驗行之。餘不一一。即問近好。(咸豐五年七月初八日)

致諸弟(陸軍勢已不支)

澄侯溫甫子植季洪老弟足下。十四日。良五彭西回家。寄去一信。諒已收到。嗣羅山於十六日回勦武潭。霞仙亦即同去。近接武昌信息。知李鶴人於八月初二日敗挫金口陸營。被賊蹋毀。胡澗芝中丞。於初八日被賊蹋破。麥山陸營。南北兩岸陸軍皆潰。勢已萬不可支。持水師尙足自立。

楊彭屯紮沌口。計羅山一軍。可於九月初旬抵鄂。或者尙有轉機。卽鄂事難遽旋轉。而羅與楊彭水陸依護。防禦於岳鄂之間。亦必可回湘省北路之落籬也。內湖水師。自初八日以後。迄未開仗。日日操練。次青尙紮沌口。周鳳山尙紮九江。俱屬安謐。

葛十一於初八日在湖口陣亡。現在尋購尸首。尙未覓得。已奏請照千總例賜卹。將來若購得尸骸。當爲之送柩回里。如不可覓。亦必贖金寄卹其家。此君今年大病數月。甫經全愈。尙未復元。卽行出隊開仗。人勸之勿出。堅不肯聽。卒以力戰捐軀。良可傷憫。可先告知其家也。

去年臘月廿五夜之役。監印官潘兆奎與文生葛榮冊。同坐一船。均報陣亡。已入奏請卹矣。

頃潘兆奎竟回至江西。云是夜過漁船撈救得生。則葛元五或尙未死。亦未可知。不知其家中有音耗否。癘疾稍愈。今年七八兩月最甚。諸事廢弛。餘俟續布。順問近好。(咸豐五年八月廿七日書於南慶軍中)

致諸弟(喜九弟得優貢)

澄侯溫甫子植季洪四位老弟足下。廿六日王如一朱梁七至營。接九月初二日家書。廿九日劉一彭四至營。又接十六日家書。具悉一切。沅弟優貢喜信。此間廿三日彭山峴接家信。卽已聞之。廿七日得左季高書。始知其實。廿九日得家書乃詳也。沅弟寄信在省。來江西大營甚便。何以無一字報平安耶。十月初當可回家。爲父親叩祝大喜。各省優貢朝考。向例在明年五月。沅弟可於明年春間進京。若由浙江一途。可便道由江西至大營。凡處聚會。吾有書數十箱在京。無人照管。沅弟此去。可經理一番。

自七月以來。吾得聞家中事。有數件可爲欣慰者。溫弟妻妾。皆有夢熊之兆。足慰祖父母於九京。一也。家中婦女大小皆紡紗織布。聞已成六七機。諸子姪讀書尙不懶惰。內外各有職業。二也。圍境豐收。遠近無警。此間兵事平順。足安堂上老人之心。三也。今又聞沅弟喜音。意吾家高曾以來。積澤甚長。後人食報。更當綿綿不盡。吾兄弟年富力強。尤宜時時內省。處處反躬自責。勤儉忠厚。以承先而啓後。互相勉勵可也。

內湖水師。久未開仗。日日操練。夜夜防守。頗爲認真。周鳳山統領九江陸軍。亦尙平安。李次青帶平江勇三千在蘇垣渡。去湖口縣十里。頗得該處士民之歡心。茶陵州土匪。聞竄擾江西之蓮花廳。永新縣境內。吉安人心震動。頃已調平江勇六百五十人前往勦辦。又派水師千人往吉防堵。河道或可保全。

余癘疾迄未愈。幸精神尙可支持。王如一等來。二十四日始到。余怒其太遲。令其卽歸。發途費九百六十文。家中不必加補。以爲懶惰者戒。寬十在營住一個月。打發銀六兩。途費四千。羅山於十四日克復崇陽後。尙無信來。羅嶺山兄於今日到營。紀澤紀鴻登九峯山詩。文氣俱順。且無猥瑣之氣。將來或皆可冀有成立也。餘不一。(咸豐五年九月三日書於屏風水營)

致諸弟（擬募五百人）

澄侯溫甫子植季洪老弟足下。十月初一日寬十等歸。寄一函。縣城專差來。又寄一家信。想已收到。營中日內如常。周鳳山九江陸軍三千餘人。尙屬整頓。次青在湖口。因分去千三百人往勦吉安。刻擬募五百人以厚兵力。吉安之事。聞周桌台帶千人已至。或足以資勦辦。

羅山在牟樓峒廿六獲勝後。尙無嗣音。茲因春二患病。維五送之還家。復寄數行。以慰堂上老人懸念。羅山在岳鄂間。軍間單弱。余甚不放心家中。上面衡邨下面岳平均多可慮。望多送信幾次來大營也。（咸豐五年十月十九日書於屏風水營）

致諸弟（鹽務籌餉有二）

澄侯溫甫子植季洪四位老弟左右。十月廿八日在十等到營。接奉父親大人手諭。紀澤兒稟件。及姪兒外甥等壽詩。具悉一切。澄弟在朱亭帶勇十八九。可以撤營。欣慰之至。兵凶戰危。一經帶勇。則畏縮趨避之念。決不可存。兵端未息。恐非一二年所能掃除淨盡。與其從事之後。而進退不得自由。不如早自審度。量力後入。想諸弟亦必細心籌畫也。

南康水師。念八日開仗一次。失長龍船一號。九江陸軍相持如故。次青在湖口亦未必開仗。黃莘農先生今歲爲我兵辦理軍餉。已解者六十餘萬兩。未收者尙有二十餘萬。水陸兵勇自入江西境內。已用口糧百餘萬。此項捐款。實爲大宗。

目下捐款將次用畢。華翁又接辦鹽務。鹽務之可以籌餉者有二端。一則四月間奏請浙鹽三萬引。現在陸續運行。大約除成本外。可獲淨利十萬兩。一則於江西饒州吳城萬安新城四處設卡。私鹽遏境。酌抽稅課。大約每月得銀亦可萬餘兩。若此兩舉。刻期辦齊。則明年軍餉。竟可無慮。貴司寇之爲功於我軍者大矣。浙江鹽務。先須成本十餘萬。現請郭雲仙往浙一行。張羅本錢。雖未必有濟。姑試圖之。

羅山自入湖北內境。克復崇遠後。忽有壕頭堡之宣。旋於念六日初三日兩獲大勝。軍威大振。僞北王僑王俱上犯岳鄂之後。楚辜孔亟。乃十月初二早。廬州克復。賊殺近萬。官兵可即日擄安慶。上游之賊。均須回救安省。韋石二逆。或俱退回下游。兩湖之事。此日必可漸鬆。此吾省之福。而亦國家之厚澤。冥冥中巧爲布置。使悍賊不得逞志於兩湖也。

兄身體如常。癘疾未愈。昨日係先妣七旬。晉一冥壽。軍中不得備禮以祭。負罪愈深。華翁自省來營。商議鹽事。軍中亦無盛饌款之。故未將冥壽之事告之也。餘不一一。(咸豐五年十一月初四日書於南康水營)

致諸弟（細述鄂贛軍情）

澄侯溫甫子植季洪四位老弟左右。去年臘月初二。遵胡二佑七送家信。中途遇賊。搶去銀兩等件。仍回南康大營。嗣後未專人回家。想父親叔父及家中老幼懸望之至。以瑞臨尙未克復。長夫視爲畏途。故遲遲也。

自周鳳山至江西省城。人心爲之安定。十二月初四日大戰樟樹鎮。殺賊千餘。軍威頗振。其時即應留賊之浮橋。星夜修造。次日渡河。攻勦臨江。必可得手。周鳳山不敢渡河。而移勦上游六十里之新淦。失此機會。於是省城各大吏。有請其移兵吉安救援。以解重圍者。有欲其上勦峽江者。有求其留守新淦者。遷延商榷。遂踰二旬。

周鳳山以水師孤紮樟鎮。恐致疏虞。派辰勇常勇八百人。至樟樹護衛水師。正月初二日。賊匪渡河來撲。辰常二勇。人少敗挫。傷亡二百餘人。幸初三日大獲戰勝。軍威復振。蓋賊匪於初二日得勝後。即上竄新淦。撲周鳳山之營。而周鳳山於初二日開仗後。亦速回樟樹。爲辰常二勇之援。中途遇於瓦山。大戰。殺賊千餘。奪馬七十餘匹。軍械鍋帳無算。初七日彭雪琴水師又獲勝仗。折賊浮橋。奪賊新舟。水陸兩軍。目下仍緊扼樟鎮。江西省城。可保無虞。

青山至南康湖口水陸各營。自臘月初三青山戰勝後。未經開仗。李次青帶平江勇駐湖口。訓練不懈。日有起色。惟望羅山在湖北克復武漢。周彭在樟鎮克復瑞臨。大局方有轉機耳。

余身體如常。癩疾十愈八九。高雲亭於去年十月初二三來營。診視癩疾。但云可治。並未開方。去後寄二方來。云須服一百帖。今已服六十帖。大有效驗。不知果可斷根否。茲將二方抄回一覽。此間並湖北軍情。有寄羅山觀察一函。亦抄回一覽。茲專人由義甯平江長沙回家。不知可無梗阻否。年終奉聖恩賜福字一方。大小荷包三對。食物三件。於正月十六日接到。茲將軍機處原咨抄回。其賜件暫不敢寄。俟道途肅清。再行帶送。去臘初旬之函。茲一併附呈。餘不一一。卽問近好。(咸豐六年正月十八日書於南康水營)

致諸弟(述吉安府失守)

澄侯溫甫子植季洪四位老弟左右。正月十九日發去家信。交王發大劉照一送回。又派戈什哈蕭玉振同送。想日內可到。正月三十日二月一日。連接澄侯在長沙所發四信。具悉一切。唐四景三等正月所送之信。至今尙未到營。

江西軍事。日敗壞而不可收拾。周鳳山臘月四日。攻克樟樹。不能乘勢進取臨江。失此機會。在新淦遷延十餘日。正月五日復回樟鎮。因浮橋難成。未遽渡勦臨江。吉安府城。已於二十五日失守矣。周臬司陳太守等堅守六十餘日。而外援不至。城破之日。殺戮甚慘。

僞翼王石達開自臨江至吉安視戰。既破吉郡。自回臨江。而遣他賊分攻贛州。以通粵東之路。如使贛郡有失。則江西之西南五府。盡爲賊有。北路之九南饒。本係屢經殘破之區。九江早爲賊據。而僅東路數府耳。羅山觀察久攻武昌。亦不得手。現經飛函調其回江救援。但道途多梗。不知文報可達否。劉邛渠一軍。聞湘省將籌兩月口糧。計二月初啓行。不知袁州等處。果能得手否。

余在南康。身體平安。癩疾已好十之七。青山陸軍。正月十八日攻九江城一次。殺賊百餘人。水師於二十九日打敗仗一次。失去戰舟六號。湖口陸軍於初一日打勝仗一次。殺賊七八十人。省城官紳。請余晉省。就近調度。余以南康水陸不放心。尙未定也。

紀澤兒定三月念一日成婚。七日卽回湘鄉。尙不爲久。諸事總須節省。新婦入門之日。請客亦不宜多。何者宜豐。何者宜儉。總求父親大人酌定之。紀澤兒授室太早。經書尙未讀畢。上溯江太夫人來嬪之年。吾父亦係十八歲。然常就外傳讀書。未久就擢。紀澤上繩祖武。亦宜速就外傳。慎無虛度光陰。聞賀夫人博通經史。深明禮法。紀澤兒至岳家。須緘默寡言。循循規矩。其應行儀節。宜詳問諸習。無臨時忙亂。爲岳母所鄙笑。少庚處以兄禮事之。此外若見各家同輩。宜格外謙謹。如見尊長之禮。

新婦始至吾家。教以勤儉。紡織以事縫紉。下廚以議酒食。此二者。婦道之最要者也。孝敬以奉長上。溫和以待同輩。此二者。婦道之最要者也。但須教之以漸。渠係富貴子弟。未習勞苦。皆由漸而習。則日變月化。而遷善不知。若改之太驟。則難期有恆。凡此祈諸弟一一告之。江西各屬告警。西路糜爛。子植若北上。宜走樊城。不宜走浙江。或暫不北上亦可。優貢例在禮部考試。隨時皆可補考。余昔在禮部。閱卷數次。熟知之也。（咸豐六年二月初八日書於南康）

致諸弟（瑞州屢獲大勝）

澄侯沉浦季洪老弟足下。七月之季。遣劉一安五回家。寄呈家書。想已得達。

溫弟之病。日見愈痊。因盛暑行軍。過於勞苦。又誤服大黃太多。故到省後。以溫補而始奏效。再調養半月。卽可復原。仍回瑞州也。

瑞郡官軍屢獲大勝。軍威日振。賊勢日蹙。惟聞僞翼王石達開自鄂中東下。爲李迪安所敗。或當援來瑞州。不免大戰數場。果能創此巨勳。獻俘北闕。則江西省全局立轉。破竹之勢。易於著手耳。

七月下旬。有引豐敗匪。勾結江閩之交。界邊錢會匪。連陷南豐新城。瀘溪貴谿弋陽等縣。河口一鎮。廣信府城。十分危急。幸浙江防兵之在玉山者。逾境來援。信郡尙保無恙。一波特起。全省震盪。現抽撥次青撫州軍中四千人。往剿河口。未審能迅速撲滅否。閩兵尙在建昌。兵多賊少。克復久稽。粵兵在贛。得保要郡。差強人意。畢金科在饒

州。彭雪琴在吳城。均尙平安。

前三月間。澄弟在長沙。兌李仲雲家銀二百兩。刻下營中實無銀可撥。只得仍在家中籌還。前年所買衡陽王家洲之田。可仍賣出。以田價償李家之債可也。

余身體平安。癘疾略發。尙不甚爲害。（咸豐六年八月十八日）

致九弟（催周鳳山速來）

沅浦九弟足下。十七日李觀察遞到家信。係沅弟在省城所發者。黃南兄勸捐募勇。規復吉安。此豪傑之舉也。南路又來此一枝勁兵。則賊勢萬不能支。金田老賊。癸甲二年北犯者。既已隻輪不返。而會天養羅大綱之流。亦頻遭殛誅。現存悍賊。惟石達開章俊陳玉成數人。奔命於各處。實有日衰就落之勢。所患江西民風柔弱。見各屬並陷。遂靡然以爲天覆地坼。不復作反正之想。不待其迫脅以從。而甘心蓄髮助賊。希圖充當軍師旅帥。以訛索其鄉人。擄掠郡縣村鎮。以各肥其私囊。是以每戰動盈數萬人。我軍爲之震駭。若果能數道出師。擒斬以萬千計。始則江西從逆之民有悔心。繼則廣東新附之賊生疑貳。而江西之局勢必轉。粵賊之衰象亦愈見矣。

南袁能於吉安一路。出師合瑞。兄已列爲三路。是此間官紳士民所禱祀以求者也。卽日當先行具奏。沅弟能隨南翁以出。料理戎事。亦足增長識力。南翁能以赤手空拳幹大事。而不甚著聲色。弟當留心倣而倣之。夏憩兄前亦欲辦援江之師。不知可與南兄同辦一路否。渠係籌餉巨族。民望所歸。又奉特旨援江。自不能不速圖集事。惟與南兄共辦一枝。則衆擎易舉。若另籌一路。則獨力難成。沅弟若見憩翁。或先將鄙意道及。余續有信奉達也。周鳳山現在省城。余飛札調之來江。蓋欲令渠統一軍。峙衡龍一軍。一紮老營。一作游兵。不知渠已接札否。望沅弟催之速來。其現在袁州之伍化蛟黃三清。本係渠部曲。可令渠帶來也。（咸豐六年九月十七日）

致四弟（宜常在家侍父並延師事）

澄侯四弟左右。胡二等來。知弟不在家。出看本縣團練。吾兄弟五人。皆出外帶勇。季居三十里外。弟又常常他出。

遂無一人侍奉父親膝下。溫亦不克過請侍奉叔父。實於論語遠遊喜懼二章之訓相違。現余令九弟速來瑞州。與溫並軍。庶二人可以更番歸省。澄弟宜時常在家。以盡溫清之職。不宜干預外事。至溫至囑。

李次青自撫州退保崇仁。尙屬安謐。惟敗勇之自撫回省者。日內在中丞署中。鬧請口糧。與三年艾二村之局相似。實爲可慮。

明年延師。父大人意欲請會香海。甚好甚好。此君品學兼優。吾所素佩。弟可專人作書往聘。稍遲旬日。吾再手緘請之。其館金豐儉。則父大人酌定。吾自營寄歸可也。（咸豐六年十月初三日）

致九弟（不可久頓城下）

沅浦九弟左右。初六日覆去一緘。言弟與夏黃周軍並赴吉安。刻計尙未達也。初八日接來信。因次青撫州之挫。請撥周軍先至瑞州。中丞李兄慨然允許。周軍當以初二日成行。斯誠不失救拯飢溺迫切之忱。第余初六日業許援吉之行。初七日令周岐山還湘。歸併鳳營。亦以赴吉告之。不得因弟一信駁公一咨而遽變成說也。且夏黃可憂而分爲我籌餉。溫沅可與岐觀摩而奮興。弟與夏黃不來。而周軍獨來。難合瑞成之圍。徒增籌餉之慮。殊非余本意也。

茲以書達季高。悉遵渠之初指。送各批與梧岡。令其同赴吉安。如梧已行至瀏萬。可寄書令其折回醴陵小駐。以待弟至而同行也。周岐山自撫州敗後回湘。軍無鍋帳。弟可商之季翁。簞給之。到吉後。約以半月爲率。即速出擊。作游兵馳剿各處。不可久頓城下。若事機順手。兄弟年內相見。則幸耳。（咸豐六年十月初九日）

致九弟（急來瑞州更替）

沅浦九弟左右。初十日覆緘。並周梧岡批稟。亮得速達。十二日接初三來緘。藉悉近狀。黃夏與周同赴吉安。既盡於昨書所云。十一日附片奏請此軍頒發執照二千張。俾黃夏勸捐稍得應手。茲趁來卒帶往。

至札飭裕時兄接收捐款。專濟此軍一節。黃夏若果來瑞州。非中丞與季公初意。亦即非司道時石諸公僉同之

議強人所曲從吾說。不得不設法將捐款羅歸此軍。今既全數赴吉。則季公當能主持其事。捐款自爲此軍支用。不必更由余處下札。又多一重斧鑿痕也。至入吉以後。或速行掣動。或久頓城下。亦難預決。惟沅浦則以半月爲率。急來瑞州。俾溫甫得以更替歸省。此則家庭要事。弟嘗與南翁懇翁堅確訂約者耳。（咸豐六年十月十二日）

致四弟（不宜常常出門聯姻不必富室名門）

澄侯四弟左右。初六俊四等來營。奉到父大人諭帖。並各信件。得悉一切。弟在各鄉看團閱操。日內計已歸家。家中無人。田園荒蕪。堂上定省多闕。弟以後總不宜常常出門。至囑至囑。

羅家烟事。暫可緩議。近日人家一入宦途。卽習於驕奢。吾深以爲戒。三女許字。意欲擇一儉樸耕讀之家。不必定富室名門也。

楊子春之弟。四人捐官者。吾於二月念一日具奏。聞部中已議准。部照概交南撫。子春曾有函寄雪琴。似已領到執照者。請查明再行佈聞。

長夫在大營。不善抬轎。余每月出門。不過五六次。每出則搖擺戰栗。不合脚步。茲僅留劉一胡二盛四及新到之俊四馨六在此。餘俱遣之歸籍。以後卽雇江西本地轎夫。家中不必添派也。

此間軍務。建昌府之閩兵。昨又敗挫。而袁州克復。大局已轉。儘可放心。十月內餉項亦略寬裕矣。（咸豐六年十一月初七日）

致九弟（軍餉可望充裕）

沅浦九弟左右。初六日俊田等至。接廿八夜來緘。具悉廿五日業經拔營。軍容整肅。至以爲慰。吉安殷富。甲於江西。又得官紳傾城輸助。軍餉自可充裕。周梧岡一軍同行。如有銀錢。宜分多潤算。無令已肥而人獨瘠。樞岡關於大局。不能受風浪者。紮營放哨。巡更發探。打仗分仗。究係宿將。不可多得。

主事匡汝誥在吉安招募起團。冀圖襲攻郡城。聞湖南援吉之師。將別出一枝。起而相應。若與弟軍會合。宜善待。

之。袁州既克。劉肅等軍。嘗可進攻臨江。六起與普劉在瑞。聲威亦可日振。弟與夏黃諸兄到吉安時。或宜速行抽動。或宜久頓不移。亦當相機辦理。若周軍與桂茶諸軍。足以自立。弟率湘人助剿來江。兄弟年內相見。則余之所欣慰者也。軍事變幻無常。每當危疑震撼之際。愈當澄心定慮。不可發之大驟。至要至囑。(咸豐六年十一月初七日)

致四弟(看書不必一一求熟)

澄侯四弟左右。二十八日由瑞州營遞到父大人手諭。並弟與澤兒等信。具悉一切。六弟在瑞州辦理一應事宜。尙屬妥善。識見本好。氣質近亦和平。九弟治軍嚴明。名望極振。吾得兩弟爲幫手。大局或有轉機。

次青在貴谿尙平安。惟久缺口糧。又敗挫之後。至今尙未克整頓完好。雪琴在吳城。名聲尙好。惟水淺不宜舟戰。時時可慮。

余身體平安。癘疾雖發。較之往在京師。則已大減。幕府乏好幫手。凡奏摺書信批稟。均須親手爲之。以是不免有延閣耳。余性喜讀書。每日仍看數十頁。亦不免拋荒軍務。然非此則更無以自怡也。

紀澤看漢書。須以勤敏行之。每日至少亦須看二十頁。不必惑於「在神不在多」之說。今日半頁。明日數頁。又明日就擱間斷。或數年而不能畢一部。如煮飯然。歇火則冷。小火則不熟。須用大柴大火。乃易成也。

甲五經書已讀畢否。須速點速讀。不必一一求熟。恐因求熟之一字。而終身未能讀完經書。吾鄉子弟。未讀完經書者甚多。此後當力戒之。諸外甥如未讀完經書。當速補之。至囑至囑。(咸豐六年十一月廿九日)

致九弟(恐哨勇不老練)

沅浦九弟左右。元旦接去臘廿五日來函。初九又接除夕一函。均已閱悉。待賊遠出。庶可邀截。痛加剿洗一節。及但求固守營壘。以俟各軍之至等語。均係吾弟近日閱歷有得之言。吾亦於稟中批示矣。水師辦成。先燒江中賊船。自是絕接濟之一法。第哨勇恐未能老練。或以利器資敵。慎之慎之。

錢漕一粟。批語宜乾淨新截。此事急應由地方官以全力主持。乃爲切實不然。恐吾批愈結實。而人愈疑貳。此等處頗費斟酌。望吾南公壹志徑行。不恤其他。余擬日內赴瑞州軍營。吉安之行。必須至瑞後。乃能定議。（咸豐七年正月七日）

致九弟（軍事尙隱尙詭）

沅浦九弟左右。十八日烏山途次。接弟十一日所發一緘。具悉一切。兄於十七日卯刻出省。十八日至奉新。紳耆款留二日。廿一日率吳竹莊之彪營等四千人。同來瑞州。擬於東北隅築一大營。則四面合圍。接濟不斷。聲息可通。或易得手。近日省中因探報撫州之賊。意圖內犯。人心頗涉驚惶。而饒州畢都司一軍。因學於初二日在景德鎮敗挫。不知下落。其老營紛紛潰散。饒防自蹙。岌岌可危。

福將軍於臘月三十日至廣信。十三日坐舟赴省。月內應可抵章門。圍城之法。紮營不宜太近。一則開仗之勢太盛。一則軍事尙隱尙詭。不宜使敵人絲毫畢知也。余所刻實收。日內另專人送南翁處。南翁已復省垣。軍事當不至掣肘也。（咸豐七年正月二十二日）

致九弟（宜全神注陸路）

沅浦九弟左右。廿四日帶人至。接來信。知接戰獲勝。水師雖未甚如意。然已奪船數號。亦尙可用。水師自近日以來。法制大備。然其要全在得人。若不得好哨好勇。往往以利器資寇。弟處以全副精神注陸路。以後不必兼籌水師可也。

用紳士不比用官。彼本無任事之職。又有避嫌之念。誰肯挺身出力以急公者。貴在獎之以好言。優之以廢給。見一善者。則痛譽之。見一不善者。則渾藏而不露一字。久久不善者勸。而善者亦潛發而默轉矣。吾弟初出辦事。而遂揚紳士之短。且以周梧岡之閱歷精神爲可佩。是大失用紳士之道也。戒之慎之。余近發目疾。不能作字。率佈數行。諸惟心照。（咸豐七年正月廿六日）

致九弟（戒浪戰）

沅浦九弟左右。前信言牽率出隊之弊。關係至重。凡與賊相持日久。最戒浪戰。兵勇以浪戰而玩。玩則疲。賊匪以浪戰而猾。猾則巧。以我之疲。敵賊之巧。終不免有受害之一日。故余昔在營中。誠諍將曰。一寧可數月不開一仗。不可開仗而毫無安排算計。此刻吉安營頭太多。余故再三諍。

重九所發之摺。十二日奉到硃批。茲抄付一覽。聖意雖許。暫守禮廬。而仍不免有後命。進退之際。權衡實難也。（咸豐七年十月十五日）

致九弟（必須細偵賊情）

沅浦九弟左右。在吉安紮營。離城不宜太近。蓋地太逼。則賊匪偷營。難於防範。奸細混入。難於查察。節太短。則我軍出隊。難於分股。一經紮近之後。再行退遠。則少餒士氣。不如先遠爲之愈也。

牽率出隊之弊。所以難於變革者。蓋此營出隊之時。未經知會彼營。一遇賊匪接仗。或小有差挫。即用令箭飛請。彼營前來接應。來則感其相援。不來則怨其不救。甚或並未差挫。並未接仗。亦以令箭報馬。預請他營速來接應。習慣爲常。視爲固然。既恐惹人之怨憾。又慮他日之報復。於是不敢不去。不忍不去。

夫戰陣呼吸之際。其幾甚微。若盡聽他營之令箭。牽率出隊。一遇大敵。必致誤事。弟思力革此弊。必須與各營委曲說明。三令五申。又必多發哨探。細偵賊情。耳目較各營爲確。則人皆信從而前弊可除矣。（咸豐七年十月十六日）

致九弟（交人料理文案）

沅浦九弟左右。十一月初二日。春二甲四歸。接廿四夜來書。具悉一切。弟營中事機尙順。家中大小欣慰。帥逸齋之叔。號小舟者。於初二日來。攜有張六琴太守書牘。具告逸齋死事之慘。余具奠金五十兩。交小舟爲渠赴江西之旅資。又作書寄雪琴。囑其備戰船至廣西。迎護逸齋之眷口。由浙江來。又備舟至省城。迎護逸齋與其姪之靈。

極於南康。會齊同出湖口。由湖口段審至黃梅帥宅。不過數十里耳。

前此仙舟先生墓門。被賊掘毀。余曾寄書潤芝中丞。蓮舫員外。籌銀三四百兩。爲修葺之資。此次小舟歸里。可一併妥爲安厝。少有多餘資。卽以贍濟逸齋之眷口。然亦極薄。難以自存矣。

東鄉敗挫之後。李鎮軍周副將均退守武陽渡。聞香中丞緘致長沙。請夏憩亭募勇數千。赴江應援。不知確否。自洪楊內亂以來。賊中大綱紊亂。石達開下顧金陵。上顧安慶。未必能再至江西。卽使吳來赴援。亦不過多裏烏合之卒。悍賊實已無幾。我軍但稍能立脚。不特吉安力能勝之。卽臨江蕭軍。亦自可勝之也。

胡爵之將於初十日回省。家中以後不必請書啓朋友。韓升告假回家。余文案尙繁。不可無一人料理。望弟飭王福於臘月初回家交代後。卽令韓升回省度歲。韓於正月初赴吉營。計弟處有四十日無人經營文案。卽交彭椿年一手料理。決無疎失。韓升與王福二人。皆精細勤敏。無所軒輊。凌蔭廷於日內赴雪琴處。若弟處再須好手。亦可令凌赴吉也。（咸豐七年十一月初五日）

致九弟（訓練注重講辦）

沅浦九弟左右。二十四日王得一歸。接十六日信。具悉一切。以後有信。仍以帶人送歸爲妥。只須一人。不必兩人。擇棲足如會正七之類。更可迅速。鄧先生於初七日專人來訂今冬上學。因迎其十五入館。甲三於十八開課。廿三廿二改課文甚細心。甲五眼睛。近日已好十分之七八。右目能認寸大字。左目則能讀小注。每日靜坐二次。以助藥力之不及。鄧先生向來亦多病。得力於靜坐者深也。

弟所寄各件。代普將請餉。代黃太守上稟。均係顧全大局。卽使上官未必批准。亦不失緩急相顧之道。請獎一稟。尙欠妥洽。湘後營一軍。不知從何處籌餉。卽寶營亦自難支持。弟辭總理之任。極是極是。帶勇本係難事。但弟當約旨卑思。毋好大。毋欲速。管轄現有之二萬人。寧可減少。不可加多。口糧業得一半。此外有可設法更好。卽涓滴難求。亦自不至於脫巾潰散。但宜極力整頓。不必常以欠餉爲慮也。

打仗之道。在圍城之外。節太短。勢太盛。無變化。只有隊伍整齊。站得堅穩而已。欲靈機應變。出奇制勝。必須離城甚遠。乃可隨時制宜。凡平原曠野開仗。與深山窮谷開仗。其道迥別。去古城四十里。凡援賊可來之路。須令哨長隊長輪流前往該處。看明地勢。小徑小溪。一邱一窪。細細看明。各令詳述於弟之前。或令繪圖呈上。萬一有出隊迎戰之時。則各哨隊皆已了然於心。古人憂學之不講。又曰明辨之。余以爲訓練兵勇。亦須常講常辨也。家中四宅平安。不必挂念。(咸豐七年十一月廿五日)

致九弟(述無恆的弊病及帶勇之法)

沅浦九弟左右。十二日正。七有十歸。接弟信。備悉一切。定湘營既至三曲灘。其營官成章鑑。亦武弁中之不可多得者。弟可與之款接。來書謂意趣不在此。則與會索然。此却大不可。凡人作一事。便須全副精神。注在此一事。首尾不懈。不可見異思遷。做這樣。想那樣。坐這山。望那山。人而無恆。終身一無所成。

我生平坐犯無恆的弊病。實在受害不小。嘗翰林時。應留心詩字。則好涉獵他書。以紛其志。讀性理書時。則雜以詩文各集。以歧其趨。在六部時。又不甚實力講求公事。在外帶兵。又不能竭力專治軍事。或讀書寫字。以亂其志意。坐是垂老而百無一成。卽水軍一事。亦掘井九仞而不及泉。弟嘗以爲鑒戒。

現在帶勇。卽埋頭盡力。以求帶勇之法。早夜孳孳。日所思。夜所夢。舍帶勇以外。則一概不管。不可又想讀書。又想中舉。又想作州縣。紛紛擾擾。千頭萬緒。將來又蹈我之覆轍。百無一成。悔之晚矣。

帶勇之法。以體察人才爲第一。整頓營規講求戰守次之。得勝歌中各條。一一皆宜講求。至於口糧一事。不宜過於憂慮。不可時常發稟。弟嘗既得楚局每月六千。又得江局每月二三千。便是極好境遇。李希庵十二來家。言迪庵意欲幫弟餉萬金。又余有浙鹽贏餘萬五千兩。在江省。昨鹽局帶丁前來稟詢。余囑其解交藩庫充餉。將來此款。或可酌解弟營。但弟不宜指請耳。

餉項既不勞心。全副精神。講求前者數事。行有餘力。則聯絡各營。款接紳士。身體雖弱。卻不宜過於愛惜。精神愈

用則愈出。陽氣愈提則愈盛。每日作事愈多。則夜間臨牀愈快活。若存一愛惜精神的意思。將前將却。奄奄無氣。決難成事。凡此皆因弟與會索然之言而切戒之者也。弟宜以李迪庵爲法。不慌不忙。盈科後進。到八九個月後。必有一番回甘滋味出來。

余生平坐無恆流弊極大。今老矣。不能不教誡吾弟吾子。鄧先生品學極好。甲三八股文有長進。亦山先生亦請鄧政文。亦山教書嚴肅。學生甚爲畏憚。吾家戲言戲動積習。明年嘗與兩先生盡致之。

鎮江瓜洲。同日克復。金陵指日可克。厚庵放閩中提督。已赴金陵會剿。准其專摺奏事。九江亦即日可復。大約軍事在吉安撫建等府結局。賢弟勉之。吾爲其始。弟審其終。實有厚望。若稍參以客氣。將以敬志。則不能爲我爭氣也。營中哨隊諸人。氣尙完固否。下次祈書及。(咸豐七年十二月十四日)

致九弟(懃對江西紳士)

沉浦九弟左右。十九日亮一等歸。接展來函。具悉一切。臨江克復。從此吉安嘗易爲力。弟勉爲之。大約明春可復吉郡。明夏可復撫建。凡兄所未了之事。弟能爲他了之。則余之愧憾可稍減矣。

余前在江西。所以鬱鬱不得意者。第一不能干預民事。有剝民之權。無澤民之位。滿腹誠心。無處施展。第二不能接見官員。凡省中文武官僚。晉接有稽。語言有察。第三不能聯絡紳士。凡紳士與我營款恆。則或因而獲咎。坐是數者。方寸鬱鬱。無以自伸。然此只坐不宜駐紮省垣。故生出許多煩惱耳。弟今不駐省城。除接見官員一事。無庸議外。至愛民聯紳二端。皆宜實心求之。

現在餉項頗充。凡抽釐勸捐。決計停之。兵勇擾民。嚴行禁之。則吾夙昔愛民之誠心。弟可爲我宣達一二。吾在江西。各紳士爲我勸捐八九十萬。未能爲江西除賊安民。今年丁憂。奔喪太快。若翹然棄去。置紳士於不顧者。此余之所悔也。若少遲數日。與諸紳往復書問。乃妥。弟當爲余彌縫此闕。每與紳士書札往還。或接見暢談。具言江紳待家兄甚厚。家兄抱愧甚深等語。

就中如劉仰素甘子大二人。余尤對之有愧。劉係余請之帶水師。三年辛苦。戰功日著。渠不負吾之知。而吾不克始終與共患難。甘係余請之管糧台。委曲成全。勞怨兼任。而余以丁憂遽歸。未能爲渠料理前程。此二人皆余所慚。弟爲我救正而補苴之。余在外數年。吃虧受氣。實亦不少。他無所慚。獨慚對江西紳士。此日內省躬責己之一端耳。

弟此次在營。境遇頗好。不可再有牢騷之氣。心平志和。以迓天休。至囑至囑。承寄回銀二百兩。收到。今冬收外間銀數百。而家用猶不充裕。然後知往歲余之不寄銀回家。不孝之罪。上通於天。四宅大小平安。余日內心緒少佳。夜不成寐。蓋由心血積虧。水不養肝之故。春來當好爲調理。(咸豐七年十二月廿一日)

致九弟(公文不可疏懶)

沅浦九弟左右。初七初八連接二信。具悉一切。亮一去時。信中記封有報銷摺稿。來信未經提及。或未得見耶。廿六早地孔轟倒城垣數丈。而未克成功。此亦如人之生死。早遲時刻。自有一定。不可強也。總理既已接札。則凡承上起下之公文。自不得不照申照行。切不可似我疏懶。置之不理也。

余生乎之失。在志大而才疏。有實心而乏實力。坐是百無一成。李雲麟之長短。亦頗與我相似。如將赴湖北。可先至余家一敘再往。潤公近頗綜核名實。恐亦未必投洽無間也。

近日身體略好。惟回思歷年在外辦事。愆咎甚多。內省增咎。飲食起居。一切如常。無勞慮念。今年若能爲母親大人另覓一善地。教子姪略有長進。則此中豁然暢適矣。弟年紀較輕。精力略勝於我。此際正宜提起全力。早夜整刷。昔賢謂宜用猛火煮。慢火溫。弟今正用猛火之時也。

李次膏之才。實不可及。吾在外數年。獨覺慚對此人。弟可與之常通書信。一則稍表余之歎忱。一則凡事可以請益。余京中書籍。承漱大專人取出。帶至江蘇松江府署中。此後或易搬回。書雖不可不看。弟此時以營務爲重。則不宜常看書。凡人爲一專。以專而精。以精而散。詩子得一耳。不兩聽而聰。目不兩視而明。一子得一用。志不紛。

乃凝於神。」皆至言也。（咸豐八年正月十一日）

卷六

致九弟（待人注意真意與文飾順便周濟百姓）

沅浦九弟左右。十二日安五來營。寄一家信。諒已收到。治軍總須腳踏實地。克勤小物。乃可日起而有功。凡與人晉接周旋。若無真意。則不足以感人。然徒有真意。而無文飾以將之。則真意亦無所托之以出。禮所稱「無文不行」也。余生平不講文飾。到處行不動。近來大悟前非。弟在外辦事。宜隨時斟酌也。

聞我水師糧台。銀兩尚有贏餘。弟營此時不關銀用。不必往解。若紳民中實在流離困苦者。亦可隨便周濟。凡往日在營艱苦異常。營初不能放手作一事。至今追憶。若弟有宜周濟之處。水師糧台。尙可解銀二千兩前往。應酬亦須放手辦。在紳士百姓身上。尤宜放手也。（咸豐八年正月十四日）

致九弟（周濟受害紳民）

沅浦九弟左右。二十七日接弟信。并廿二史二十七套。此書十七史係汲古閣本。宋遼金元係宏簡錄。明史係殿本。較之兄丙申年所購者。多明史一種。餘略相類。在吾鄉已極爲難得矣。吾前在京。亦未另買有全史。僅添買遼金元明四史。及史漢各佳本而已。宋史至今未辦。蓋闕典也。

吉賊決志不寬。將來必與潯賊同一辦法。想非夏末秋初。不能得手。弟當堅耐以待之。迫庵去歲在潯。於開濠守邊之外。間亦讀書習字。弟處所攝長壕。如果十分可靠。將來亦有閒隙。可以偷看書籍。目前則須極力講求濠工。巡邏也。

周濟受害紳民。非泛愛博施之謂。但偶遇一家之中。殺害數口者。流轉羈徙。歸來無食者。房屋被焚。棲止靡定者。或與之數千金。以周其急。先星岡公云。「濟人須濟急時無。」又云。「隨緣佈施。專以目之所觸爲主。」即孟子

所稱是乃仁術也。若目無所觸，而泛求被害之家而濟之，與造冊發賑一例，則帶兵者專行沽名之事，必爲地方官所識。且有挂一漏萬之慮。弟之所見，深爲切中事理。余係因昔年湖州紳士受害之慘，無力濟之，故推而及於吉安。非欲弟無故而爲沽名之舉也。（咸豐八年正月廿九日）

致九弟（勉其帶勇須耐煩）

沅浦九弟左右。十四日接弟初七夜信，得知一切，貴溪緊急之說確否，近日消息何如。次青非常之才，帶勇雖非所長，然亦有百折不回之氣。其在兄處，尤爲肝膽照人，始終可感。兄在外數年，獨慚無以對渠。去臘遣韓升至李家省視其家，略送儀物。又與次青約成姻婚，以申永好。目下兒女兩家，無相管者。將來渠或三索得勇，弟之次女三女，可與訂婚。兄信已許之矣。在吉安望常與之通信，專人往返，想十餘日可歸也。但得次青生還，與兄相見，則同甘苦患難諸人中，尙不至留莫大之抱歉耳。

昔耿恭簡公謂居官以耐煩爲第一要義，帶勇亦然。兄之短處在此，屢次諄諄教弟亦在此。二十七日來書有云：「仰鼻息于傀儡醜態之輩，又豈吾心之所樂。」此已露出不耐煩之端倪。將來恐不免於齟齬。去歲握別時，曾以懲余之短相箴，乞無忘也。

李兩蒼於十七日起行赴鄂，渠長處在精力堅強，聰明過人，短處即在舉止輕佻，言語易傷。恐潤公亦未能十分垂青。溫甫弟於十一日起程，大約三月半可至吉安也。（咸豐八年二月十七日）

致九弟（論長傲多言爲凶德致敗者）

沅浦九弟左右。初三日劉福一等歸後來信，藉悉一切。城賊圍困已久，計不久亦可攻克。惟嚴斷文報，是第一要義。弟當以身先之。家中五宅平安，余身體不適。初二日住白玉堂，夜不成寐。

溫弟何日至吉安。古來言凶德致敗者，約有二端。曰長傲，曰多言。丹朱之不肖，曰傲。曰露訟，即多言觀也。歷代名公鉅卿，多以此二端敗家喪身。余生平頗病執拗，德之傲也，不甚多言，而筆下亦略近乎露訟。諍中默省我之愆。

尤處處獲戾。其源不外此二者。溫弟略與我相似。而發言尤爲尖刻。凡傲之凌物。不必定以言語加人。有以精神氣凌之者矣。有以面色凌之者矣。溫弟之神氣。稍有英發之姿。面色間有蠻狠之象。最易凌人。凡中心不可有所恃。心有所恃。則違乎面貌。以門第言。我之物望大減。方且恐爲子弟之累。以才識言。近今軍中鍊出人才頗多。弟等亦無過人之處。皆不可恃。只宜抑然自下。一味「言忠信。行篤敬」。庶幾可以遮護舊失。整頓新氣。否則人皆厭薄之矣。

沅弟持躬涉世。差爲妥洽。溫弟則談笑譏諷。要強充老手。猶不免有舊習。不可不猛省。不可不痛改。余在軍多年。豈無一節可取。只因傲之一字。百無一成。故諄諄教諸弟以爲戒也。（咸豐八年三月初六日）

致九弟（願共鑒誠長傲多言二弊）

沅浦九弟左右。二十四日胡二等歸。接弟十三日書。具悉一切。所譽兄之善處。雖未克嘗。然亦足以自怡。兄之鬱鬱不自得者。以生平行事。有初鮮終。此次又草草去職。致失物望。不無內疚。

長傲多言二弊。歷觀前世卿大夫興衰。及近日官場所以致稱藉之由。未嘗不視此二者爲樞機。故願與諸弟共相鑒誠。弟能懲此二者。而不能勤奮以圖自立。則仍無以興家而立業。故又在乎振刷精神。力求有恆。以改我之舊轍。而振家之丕基。弟在外數月。聲望頗隆。總須始終如一。毋怠毋荒。庶幾於弟爲初旭之升。而於兄亦代爲桑榆之補。至囑至囑。

次青奏赴浙江。令人閱之生氣。以次青之堅忍。固宜有出頭之一日。而詠公亦可謂天下之快人快事矣。弟勸我與左季高通書問。此次暫未暇作。准於下次寄弟處轉遞。此亦兄長傲一端。弟既有言。不敢遂非也。（咸豐八年二月廿四日）

致九弟（注重平和二字）

沅浦九弟左右。春二安五巋。接手書。知營中一切平善。至爲欣慰。次青二月以後。無信寄我。其眷屬至江西。不知

果得一面否。弟寄接到胡中丞奏伊入浙之稿。未知是否成行。頃得耆中丞十三日書。言浙省江山蘭溪兩縣失守。次青前往會剿。是次青近日聲光。亦漸漸膾炙人口。廣信衢州兩府不失。似浙中終無可慮。未審近事究復如何。

廣東探報。言洋人有船至上海。亦恐其爲金陵餘孽所攀援。若無此等意外波折。則洪楊股匪。不患今歲不平耳。九江竟尙未克。林啓榮之堅忍。實不可及。聞麻城防兵。於三月十日小挫一次。未知確否。弟於次青迫庵雪琴等處。須多通音問。余亦略有見聞也。

兄病體已愈十之七八。日內並未服藥。夜間亦能熟睡。至于子正以後則醒。是中年後人常態。不足異也。湘陰吳貞階司馬。於念六日來鄉。是厚庵囑其來一省視。次日歸矣。

余所奏報銷。大概規模一摺。奉硃批該部議奏。戶部旋於二月初九日覆奏。言會國藩所擬。尙屬妥協云云。至將來需用部費。不下數萬。聞楊彭在華陽鎮抽釐。每月可得二萬。係雪琴督同凌蔭廷劉國斌經紀其事。其銀歸水營楊彭兩大股分用。余偶言可從此項下設法籌出部費。貞階力贊其議。想楊彭亦必允從。此款有著。則余心又少一牽挂矣。

溫弟丰神較峻。與兄之伉直簡澹。雖微有不同。而其難於諧世。則殊途而同歸。余常用爲慮。大抵胸中抑鬱。怨天尤人。不特不可以涉世。亦非所以養德。不特無以養德。亦非所以保身。中年以後。則肝腎交受其病。蓋鬱而不暢。則傷木。心火上燠。則傷水。余今日之目疾。及夜不成寐。其由來不外乎此。故於兩弟時時以平和二字相勗。幸勿視爲老生常談。至囑至囑。

親族往。弟營者。人數不少。廣廈萬間。本弟素志。第善觀國者。觀賢者在位。則卜其將興。見冗員淨雜。則知其將替。善觀軍營亦然。似宜略爲分別。其極無用者。或厚給途費。遣之歸里。或酌賃民房。令住營外。不使軍中有情慢暄。壞之象。庶爲得宜。至頓兵城下。爲日太久。恐軍氣漸懈。如雨後已弛之弓。三日已腐之環。而主者妄然不知其不

可用。此宜深察者也。附近百姓。果有騷擾情事否。此亦宜深察者也。（咸豐八年三月二十日）

致九弟（宜以求才爲急）

沅浦九弟左右。四月初五日得一等歸。接弟信。得悉一切。兄回憶往事。時形交悔。想六弟必備述之。弟所勸譬之語。深中機要。素位而行一章。比亦常以自警。只以陰分素虧。血不養肝。卽一無所思。已覺心慌腸空。如極餓思食之狀。再加以憧擾之思。益覺心無主宰。怔忡不安。

今年有得意之喜兩端。一則弟在吉安。聲名極好。兩省大府及各營員弁。江省紳民。交口稱頌。不絕於吾之耳。各處寄弟書。及弟與各處稟牘信緘。俱詳實妥善。犁然有當。不絕於吾之目。一則家中所請鄧葛二師。品學俱優。勤嚴並著。鄧師終日端坐。有威可畏。文有根柢。而又曲合時趨。講書極明正義。而又易於聽受。葛師志趣方正。學規謹嚴。小兒等畏之如神明。此二者。皆余所深慰。雖愁悶之際。足以自寬解者也。

第聲聞之美。可恃而不可恃。兄昔在京中。頗著清望。近在軍營。亦獲虛譽。善始者不必善終。行百里者半九十。里譽望一損。遠近滋疑。目下名望正隆。務宜力持不懈。有始有卒。治軍之道。總以能戰爲第一義。倘圍攻半歲。一旦被賊沖突。不克抵敵。或致小挫。則令望墮於一朝。故探驪之法。以善戰爲得珠。能愛民爲第二義。能和協上下官紳爲三義。願吾弟兢兢業業。日慎一日。到底不懈。則不特爲兄補救前非。亦可爲吾父增光泉壤矣。

精神愈用而愈出。不可因身體素弱。過於保惜。智慧愈苦而愈明。不可因境遇偶拂。遽爾摧阻。此次軍務。如楊彭二季次青輩。皆係磨鍊出來。卽潤翁羅翁。亦大有長進。幾於一日千里。獨余素有微抱。此次殊乏長進。弟營趁此番識見。力求長進也。

求人自輔。時時不可忘此意。人才至難。往時在余幕府者。余亦平等相看。不甚欽敬。洎今思之。何可多得。弟當常以求才爲急。其關冗者。雖至親密友。不宜久留。恐賢者不願共事一方也。余自四月來。眠興較好。近讀杜佑通典。每日二卷。薄者三卷。惟目力極劣。餘尙足支持。（咸豐八年四月初九日）

致九弟（述憑濠對擊之法及捐銀作祭費）

沉浦九弟左右。十四日胡二等歸。接弟初七夜信。具悉一切。初五日城賊猛撲。憑濠對擊。堅忍不出。最爲合拍。凡撲人之濠。撲人之牆。撲者客也。應者主也。我若越濠而應之。則是反主爲客。所謂致於人者也。我不越濠。則我常爲主。所謂致人而不致於人者也。穩守穩打。彼自意興索然。峙衡好越濠擊賊。吾常不以爲然。凡此等悉心推求。皆有一定之理。迪菴善戰。其得訣在「不輕進不輕退」六字。弟以類求之可也。

洋船至上海天津。亦係恫喝之常態。彼所長者。船殼也。其所短者。路極遠。人極少。若辦理得宜。終不足患。報銷奏稿。及戶部覆奏。當日即緘致諸公。依弟來書之意。將來開局時。擬即在湖口水次。蓋銀錢所張。小山魏召亭李復生諸公。多年親友。該所現存銀萬餘兩。即可爲開局諸公用費。及部中使費。六君子不必皆到此局。但得伯符小泉二人入場。即可了辦。若六弟在潯較久。則可至局中照護周旋。若六弟不在潯陽。則弟克吉後。回家一行。仍須往該局爲我照護周旋也。至戶部承書。說定費資。目下筠仙在京。似可辦理。將來胡蓮舫進京。亦可幫助。筠仙頃有書來。言弟名遠震京師。盛名之下。其實難副。弟須慎之又慎。茲將原書抄送一閱。

家中四宅。大小平安。兄夜來漸能成寐。先大父先太夫人。尙未有祭祀之費。溫弟臨行。捐銀百兩。余以劉國斌之贈。亦捐銀百兩。弟可設法捐費否。四弟季弟。則以弟昨寄之銀兩。提百金爲二人捐款。合營業二處。每年可得穀六七石。起祠堂。樹墓表。尙屬易辦。吾精力日衰。心好古文。吾知其意而不能多作。日內思爲三代考妣作三墓表。慮不克工。亦尙憚於動手也。

先考妣祠宇。若不能另起。或另買一宅作住屋。即以腰裏新宅爲祠。亦無不可。其天家賜物。及宗器祭器等。概藏於祠堂。庶有所歸宿。將來京中運回之書籍。及家中先後置書。亦貯於祠中。吾生平不善收拾。爲各甚鉅。所得諸物。隨手散去。至今追悔不已。然趁此收拾。亦尙有可爲。弟收拾佳物。較善於諸昆從。此益當細心檢點。凡有用之物。不宜拋散也。（咸豐八四月十七日）

致九弟（勸捐銀修祠堂）

沅浦九弟左右。五月二日。接四月廿三寄信。藉悉一切。城賊於十七早。廿日廿二夜。均來撲我壕。如飛蛾之撲燭。多滅幾次。受創愈甚。成功愈易。惟日夜巡守。刻不可懈。若攻圍日久。而仍令其逃竄。則咎責匪輕。弟既有統領之名。自須認真查察。比他人尤爲辛苦。乃足以資董率。

九江克復。聞撫州亦已收復。建昌想亦於日內可復。吉賊無路可走。收功當在秋間。較各處獨爲遲滯。弟不必慌忙。但當穩固守。雖遲至冬間克復亦可。只求不使一名漏洩耳。若似瑞臨之有賊外竄。或似武昌之半夜潛竄。則雖速亦爲人所詬病。如九江之斬刈殆盡。則雖遲亦無後患。願弟忍耐謹慎。勉卒此功。至要至要。

余病體漸好。尙未全愈。夜間總不能酣睡。心中糾纏。時憶往事。愧悔憧擾。不能擺脫。四月底作先大夫祭費記一首。茲送賢弟一閱。不知尙可用否。此事溫弟極爲認真。望弟另謄一本。寄溫弟閱看。此本仍便中寄回。蓋家中抄手太少。別無副本也。

弟在營所寄銀回。先後均照數收到。其隨處留心。數目多寡。斟酌妥善。余在外未付銀寄家。實因初出之時。默立此誓。又於發州縣信中。以「不要錢不怕死」六字。明不欲自欺之志。而令老父在家。受盡窘迫。百計經營。至今以爲深痛。弟之取與。與塔羅楊彭二李諸公相仿。有其不及。無或過也。儘可如此辦理。不必多疑。

頃與叔父各捐銀五十兩。積爲星岡公。余又捐二十兩於輔臣公。三十兩於竟希公矣。若弟能於竟公星公竹亭三世。各捐少許。使修立三代祠堂。卽於三年內可以興工。是弟有功於先人。可以蓋阿兄之愆矣。修祠或腰裏新宅。或於利見齋另修。或另買田地。弟意如何。便中復示。公費則各力經營。祠堂則三代共之。此余之意也。

初二日接溫弟信。係在湖北撫署所發。九江一案。楊李皆賞黃馬褂。官胡皆加太子少保。想弟處亦已聞之。溫弟至安黃。與迪庵相會後。或留營。或進京。尙未可知。弟素體弱。比來天熱。尙耐勞苦否。至念至念。釜餽滋補。較善於藥。良方甚多。較善於專服水藥也。（咸豐八年五月初五日）

致九弟（喜保同知花翎）

沉弟左右。昨信書就未發。初五夜王六等歸。又接弟信。報撫州之復。他郡易而吉安難。余固恐弟之焦灼也。一經焦燥。則心越少佳。辦事不能妥善。余前年所以廢弛。亦以焦躁故爾。總宜平心靜氣。穩穩辦去。

余前言弟之疏。以能戰爲第一。義愛民第二。聯絡各營將士。各營官紳爲第三。今此云云。因弟體素弱。如不能兼顧。則將聯絡一層稍爲放鬆。即第二層亦不必認真。惟能戰一層。則刻不可懈。目下豫備究有幾道。其不挂可靠者。尙有幾段。下次詳細見告。

九江修壕大道。寬深各二丈。吉安可仿爲之否。弟保同知花翎。甚好甚好。將來克復府城。自可保升太守。吾不以弟得官階爲喜。喜弟之吏才更優於將才。將來或可勉作循吏。切實做幾件施澤於民之事。門戶之光也。阿兄之幸也。（咸豐八年五月初六日）

致九弟（克終爲貴）

沉浦九弟左右。正七歸。接一信。啓五等歸。又接一信。正七以瘴故。不能遽回營。啓五求於營新後始去。茲另遣人送信至營。以慰遠廬。

三代祠堂。或分或合。或在新宅。或另立規模。統俟弟復。由吉歸家料理。造祠之法。亦聽弟與諸弟爲之。落成後。我作一碑而已。

余意欲王父母父母改葬後。將神道碑立畢。然後或出或處。乃可惟余所欲。目下在家。意緒極不佳。回思往事。無一不懺。無一不彌淺。幸弟去秋一出。而江西湖南。物望頗隆。家聲將自弟振之。茲可欣慰。一塵不有。鮮克有終。望弟慎之又慎。總以克終爲貴。家中四宅。大小平安。念三四大水。縣城永豐。受害頗甚。我境幸平安無恙。弟寄歸之書。皆言本林氏續選古文雅正。雖向不知名。亦通才也。如有大學衍義衍義補二書。可買者買之。學問之道。能讀經史者爲根柢。如兩通兩衍義及本朝兩通。萃六經諸史之精。該內聖外王之要。若能熟此六書。或熟

其一、二。卽爲有本有末之學。家中現有四通。而無兩衍義。祈弟留心。

弟目下在營。不可看書。致荒廢正務。天氣炎熱。精神有限。宜全用於營事也。余近作賓興堂記。鈔稿寄閱。久荒筆墨。但有閒架。全無神意。愧甚愧甚。（咸豐八年五月三十日）

致九弟（赴浙辦理軍務）

沅浦九弟左右。初一日專人至吉營送信。初二夜接弟來信。論敬字義甚詳。兼及省中奏請援浙事。勸余起復。是日未刻。郭意城來家。述此事略中丞業出奏矣。初三日接奉廷寄。飭卽赴浙辦理軍務。與駱奏適相符合。駱奏廿五日發。寄諭廿一日自京發也。聖恩高厚。令臣下得守年餘之喪。又令起復。以免避事之責。感激之忱。匪言可喻。茲定於初七日起程。至縣停一日。至省停二三日。恐驛路迂遠。擬由平江義寧以至吳城。其張運蘭蕭啓江諸軍。約至河口會齊。將來克復吉安以後。弟所帶吉字營。卽由吉東行至常山等處相會。

先大夫少時。在南嶽燒香。抽得一籤云。一雙珠齊入手。光彩耀杭州。先大夫嘗語云。吾諸子嘗有二人官浙。一今吾與弟赴浙剿賊。或已兆於五十年以前乎。此次之出。約旨卑思。腳踏實地。但求精而不求闊。目前張蕭二軍。及弟與次青二軍。已不下萬人。又擬抬船過常玉山。山略帶水師千餘人。足敷剿辦。此外在江各軍。有餉則再添。無餉則不添。望弟爲我斟酌商辦。

辦文案者。彭椿年最爲好手。現請意城送我至吳城。或至玉山。公牘私函。意城均可辦理。請仙屏卽日回至吳城。與我相會。其彭椿年王福二人。弟隨留一人。酌派一人來兄處當差。亦至吳城相會。余若出大道。則由武昌下湖口以至河口。若出小徑。則由義寧吳城以至河口。許彭等至吳城。聲息自易通也。應辦事宜。及往年不合之處。應行改弦者。第一一熟思。詳書告我。（咸豐八年六月初四日）

致九弟（述自長沙起行）

沅浦九弟左右。十七日接弟一緘。知弟小有不適。比已全愈否。至念至念。余十九日自長沙起行。夜宿膏油望。二

十夜宿土星港。二十一宿岳州。二十二宿新隄。阻風半日。南風太久。恐北風不難遽止也。弟封還余寄書公一書。而另以一封附去。所論皆正大之至。弟能如是見理真確。兄復何患哉。惟吳某曾以一緘分訴於余。余許爲之關白。復書去僅二日。而自背其說。亦有未妥。當更詳之耳。弟前後兩信。所言皆極當。特余精力甚倦。不克力行。日日望弟來助我也。(咸豐八年六月廿三日自新隄舟中發)

致九弟(述寓武昌撫署)

沅浦九弟左右。在岳州曾寄一緘。不知到否。余於廿二日到新隄。廿四至武昌。寫胡中丞署內。商議一切。應酬數日。初一日可赴下游。李迪庵十九日自武昌赴麻城。廿五日拔營自蘄水前進。已約其在巴河等候會晤。巴河在黃州下四十里。去鄂垣二百廿里也。浙中之賊。次青六月初八寄胡中丞信言。衢州解圍。江山常山。茲已收復。不知其盡竄箇中。抑係分擾浙東。看來浙事亦易了耳。

余身體平安。到湖口時。大約在七月初八九。自家起行至岳。皆值酷暑。近數日稍涼。略覺漸爽。從此新秋益涼。或可日就安泰。弟七月上旬有信。可專人送至吳城饒州等處。(咸豐八年六月廿七日自武昌撫署發)

致九弟(過潯祭塔公祠)

沅浦九弟左右。久未接弟安報。不知近狀何如。余在蘭溪發一信。由湖北寄左季翁轉致。不知得到否也。

初九日與迪希別。十一日至九江。一祭塔公祠。十二日至湖口。厚庵近日體氣稍遜。雪琴則神采奕奕。在湖口新修水師昭忠祠。土木之工。一一皆親手經營。囑余奏明。迪庵在九江修塔公祠。亦囑余一奏。余擬會楊李銜奏之。迪庵又欲於湘鄉立忠義祠。亦將一會奏也。

胡中丞之太夫人。於十一日辰刻仙逝。水陸數萬人。皆仗胡公以生以成。一旦失所依倚。關係甚重。余擬送幛一聯。銀二百。皆書余與溫沅名。玉班兄丁艱。弟如何致情。望速示。(咸豐八年七月十四日自湖口水營發)

致四季弟(注重種蔬養魚猪等事)

澄季兩弟左右。兄於十二日到湖口。曾發一信。不知何時可到。胡蔚之奉江西書中丞之命。接我晉省。余因於二十日。自湖口開船入省。楊厚菴送至南康。彭雪琴徑送至省。諸君子用情之厚。罕有倫比。浙中之賊。聞已全省肅清。余到江。與書中丞省定。大約由湖口入閩。

家中種蔬一事。千萬不可忽。屋門首塘中養魚。亦有一種生機。養猪亦內政之要者。下首臺上新竹。過伏天後有枯者否。此四者可以規人家興衰氣象。望時時與朱見四兄熟商。見四在我家。每年可送束脩錢十六千。余在家時。曾面許以如延師課讀之例。但未言明數目耳。季弟生意頗好。然此後不宜再做。不宜多做。仍以看書爲上。余在湖口。臥病三日。近已全愈。但微咳嗽。癰疾久未愈。心血亦虧甚。頗焦急也。久不接九弟之信。極爲懸系。見其初九日與雪琴一信。言病後元氣未復。想比已全痊矣。（咸豐八年七月廿一日自江西省河下發）

致九弟（擬優保李次青）

沅浦九弟左右。八月初一日。羅逢元專丁歸。接得廿四日信。知弟病漸痊。愈復元。自長沙開船後。四十一日不接弟手書。至是始一快慰。而弟信中所云。「先一日曾專人送信來。兄處者。」則至今尙未到。不知何以就閣。若是。余廿五日自江西開船。廿六日至瑞洪。廿八日就謝弁之便。寄信與弟。八月初二日至安仁。初四日至貴溪。王人瑞張凱章及蕭浚川之弟蕭啓源。均在此相候。初六七可至湖口。沈幼丹李次青良驪不遠矣。

閩省浦城之賊。於七月上旬中旬。出犯江西。圍慶豐玉山兩城。次青以一軍分守兩縣。各力戰五六日夜。逆賊大創。解圍以去。現在廣信地方。次青勛名大著。民望亦孚。浙撫晏公。於全浙肅清案內。保舉次青以道員記名。遇有江西道員缺出。請旨簡放。將來玉山守城案內。余亦當優保之。苦盡回甘。次青今日得蔗境矣。

玉山之賊。竄至復興婺源一帶。將歸併於皖南蕪湖。余至湖口。擬留蕭軍守湖口。而自率張王朱品佐吳國佐進剿圍之。崇安賊勢日亂。尙或易於得手。（咸豐八年八月初四日）

致九弟（望來幫辦一切）

沉浦九弟左右。接弟信。知體氣尙未全愈。弟靈體弱。大費攻伐之品。非弟所堪。而誤服之後。則復原較難。吉宏克後。病嘗全去。元神尙虧。可至家中將養一月。仍來。兄處幫辦一切。或帶勇。或不帶。或多帶。或少帶。須聽弟之自便。但不可不來幫我。

我近來精神日減。此次之出。惡我者拭目以觀其後效。好我者關心而慮其失墜。意城在此幫助。頗稱水乳。手筆亦能曲達人意。但約定至玉山後。即當別去。專望弟來照料一切。外和軍旅。內檢瑣務。大小人才。悉心體察。庶可補余之短。弟決不可懷一不來之見也。

胡潤之中丞太夫人之處。余作乾聯云。「武昌居天下上游。看郎君新整乾坤。縱橫掃蕩三千里。陶母爲女中人傑。痛仙馭永辭江漢。感泣悲歌百萬家。」胡家聯句必多。此對可望前五名否。成章鑑極好。阿兄又當自調眼力之不謬。(咸豐八年八月初六日)

致九弟(述捐餉增學額)

沉浦九弟左右。八月十四日寄信。略言李次青捐餉增廣學額一事。茲特將稟稿專人送吉。細思吾弟若撤散各勇。則必給予現銀。以欠餉報捐。必非撤勇之所願。而此事又在營辦之例。現在長善陰澗潭禮六邑。皆已增至十名。湘鄉捐銀。不如六邑之多。此後自不能補捐。平江以勇丁欠餉。而捐府縣學額。至十五名。湘鄉何不可仿行之。必須賢弟仍帶勇不撤。多則一年。少則半載。此事必成無疑。弟之不願帶勇者。以久病體弱也。吾之不強弟以多帶全部勇來者。一則恐弟獨統一部。另紮一營盤。不克在幕內幫辦一切。一則恐餉項不繼。愈久愈難也。

近來因學額一事。反覆細思。若不趁此專務未竣。皇恩浩蕩之時。協力辦成。將來即捐銀十萬二十萬。欲求冷一名學額。恐不可得。湘鄉近年帶勇剿賊。立功各省極矣。而廣額反不如長善陰澗潭禮平江之多。不得謂非因典。弟病後雖體弱。然回家養息兩月。儘可復原。一張一弛。精神自可提振得起。吉安克復。或先送五百人來。或先送千人來。其餘各勇。或令休息兩月。將來隨弟同出。或竟行撤散。均聽弟自行裁酌。總之弟宜速到。爲阿兄計。並爲

學額計也。餉項本極艱窘，然只好放開手，使歸贖，復瞻前顧後，長首畏尾，吾弟以爲何如。（咸豐八年八月十七日）

致九弟（喜聞克吉安信）

沅浦九弟左右。二十二日未刻捷書至，知吉安於中秋夜克復，欣慰之至。自弟從軍以來，變故多出，危疑困乏，極難下手。弟內治軍旅，外和官紳，應酬周密，調理精嚴，卒能致此成功。余在江西數年，寸功未就，得弟隱忍成業，增我光華不少。

余至弋陽，已發兩信。張凱章十八日至安仁，十九日大戰獲勝，克復安仁縣城，殺老長毛悍賊四千餘人，闔之賊嘗以此枝爲最兇。二十日凱章收隊，吳翔岡追至萬年，與賊接仗，先勝後挫。劉隱霞殉難，幫辦死者三人，李雨蒼尙無下落。景德鎮現尙有賊，我軍爲所牽制，目下尙難入閩，看來弟歸不可久住，宜速來幫我也。（咸豐八年八月廿二日）

致九弟（荃卽來營小住）

沅浦九弟左右。吳翔岡萬年之挫，查羽實亡三十八人，幫辦劉隱霞之死，老湘勇人人痛之。余執以聯句云：「五載共千戈，地下知心王壯武，萬年歎俎豆，沙場歸骨馬文淵。」此外軍械失者甚少。

翔岡廿五日收隊，廿六日來弋陽，一見余，卽於廿七日拔營。張吳廿七日自黃溪拔營，約廿九三十日至陳坊取齊，由雲際關入閩也。聞吉安竄賊攻陷宜崇二邑，余軍行至陳坊時，再行察看，如建昌危急，或分兵往勦，亦未可知。然余職辦閩省軍務，未敢再遲也。張蕭各軍，病者甚多，半係瘧疫，許仙屏亦病，現留弋陽，不能從行。

次青意城，皆有假歸之意，余強留之。實則意城本約至玉山歸去，不願入浙閩，乃其初議。次青五年未歸，思母極切，亦至情耳。弟若可速歸，速出，則望於十一月中旬到營，以便於次青歸去過年。若目下不克速歸，到家後不克速出，則請卽日來營一次。小住二十日，俾次青得於九月歸省亦好。兩者在弟酌之。弟與次意三人者，有兩人在

余營。則余案無留牘矣。(咸豐八年八月廿七日)

致四弟季弟(述零匪難奏功)

澄侯季洪兩弟左右。張凱章廿四日披營後。中途各勇夫患病者極多。在資福橋小住調養。日內尙未入關。關中賊勢亦漸鬆矣。北路洋口之賊。已被周天培擊破。僅存順昌股匪。數不滿萬。南路汀州之賊。亦極散漫。所處空匪。不成大股。此勦彼竄。難於奏功耳。

江北賊勢復熾。張軍門自金陵帶兵渡江。於九月十六日克復揚州。大局尙可保全。天津夷務。聞和局已定。出銀六百萬。與該夷作軍資。見諸閩督來咨。餘條尙未盡悉。想廣州亦將退出矣。余身體平安。自九弟來此。日增慰快。營中疾病尙多。冬令氣斂。當漸愈耳。(咸豐八年十二月初三日)

致九弟(嘗報近日軍情)

沅浦九弟左右。十二日解纜。聞可行六十里。甚慰。至許灣後。嘗更順適矣。

余十二日游麻源。較麻姑山稍勝。日內嘗發一摺。報近日軍情。聲明暫駐建昌。不遠東也。溫弟處復信。十四日始行。江北六合。江南溧水。均於九月十八日失守。

沈幼丹信言金陵大營。退紮白兔鎮江一帶。頃接何制軍十月初三咨。無和帥移營之說。想不確也。黃東山太守十三日病故。余擬飭各處湊贖千金。以五百辦後事。及歸櫬貴州之資。以五百周其妻子。應俟新太守到。呼應乃靈耳。(咸豐八年十月十五日)

致諸弟(宜兄弟和睦貴行孝道又實行勤儉二字)

澄侯季洪沅浦老弟左右。十七日接澄弟初二日信。十八日接澄弟初五日信。敬悉一切。三河敗挫之信。初五日因家中尙無確耗。且縣城之內。毫無所聞。亦極奇矣。九弟於念二日在湖口發信。至今未再接信。實深懸系。幸接希庵信。言九弟至漢口後。有書與渠。且專人至桐城。三河訪尋下落。余始知沅浦弟安抵漢口。而久無來信。則不

解何故。豈余近日別有過失。沅弟心不以爲然耶。當初聞三河凶報。手足急難之際。卽有微失。亦當將皖中各事詳細示我。

今年四月。劉昌儲在我家請。卽判曰。「賦得偃武修文。得閒字。」（字謎敗字。）余方訝敗字不知何指。卽判曰。「爲九江言之也。不可喜也。」余又訝九江初克。氣機正盛。不知何所爲而云然。卽判曰。「爲天下卽爲曾宅言之。」由今觀之。三河之挫。六弟之變。正與「不可喜也」四字相應。豈非數皆前定耶。然禍福由天主之。善惡由人主之。由天主者。無可如何。只得聽之。由人主者。盡得一分算一分。撐得一日算一日。吾兄弟斷不可不洗心滌慮。以求力挽家運。

第一貴兄弟和睦。去年兄弟不和。以致今冬三河之變。嗣後兄弟當以去年爲戒。凡吾有過失。澄沅洪三弟各進箴規之言。余必力爲懲改。三弟有過。亦當互相箴規而懲改之。

第二貴體孝道。推祖父母之愛。以愛叔父。推父母之愛。以愛溫弟之妻妾兒女。及蘭蕙二家。又父母墳域。必須改葬。請沅弟作主。澄弟不必過執。

第三要實行勤儉二字。內間妯娌。不可多講鋪張。後輩諸兒。須走路。不可坐轎騎馬。諸女莫太癩。宜學燒茶煮飯。書蔬魚豬。一家之生氣。少睡多做。一人之生氣。勤者。生動之氣。儉者。收斂之氣。有此二字。家運斷無不興之理。余去年在家。未將此二字切實做工夫。至今愧憾。是以諄諄言之。（咸豐八年十一月廿三日）

致諸弟（溫甫尸無下落）

澄侯沅浦季洪三弟左右。初一日接澄弟信。知王四等於初十日到家。尙未接六弟確耗也。沅浦初九日在長沙所發之信。廿五日接到。甚慰甚慰。此次江行之速。爲從來所未有。在漢口所發之信。至今尙未接到。沅弟抵家後。不得溫甫實信。不知如何憂傷。吾派人至江北。至今未歸。沅弟所派三人。至三河桐城訪查者。想亦無真實下落已矣。尙何言哉。

吾去年在家。以小事爭競。所言皆錯。銖細故。洎今思之。不值一笑。負我溫弟。卽愧對我祖我父。悔恨何及。嘗極力作文數首。以贖余愆。求沉弟寫刻石碑。沉弟字有秀骨。宜日日臨帖作大楷。凡余文概請沉弟寫之。組田刻之。亦足少據我心中抑鬱愧悔之懷。

余近日體尙平安。張凱章初二日援營赴景德鎮。吳翔岡初四日起行。吾於新正亦當移營進紮鄱陽彭澤等處。與水師相聯絡。卽可爲江北之聲援。蕭軍現赴南贛。賊蹤已遠。大約回贛東矣。如江閩一律肅清。明歲並帶蕭軍至九江兩岸也。付回銀一百兩。寄送親戚本家。另開一單。不知可否。(咸豐八年十二月初三日)

致諸弟(述溫弟事變及家庭不可說利害話)

澄侯沉浦季洪老弟左右。十五日接澄沉冬月念九三十兩函。得悉叔父大人於二十七日患病。有似中風之象。吾家自道光元年。卽處順境。歷三十餘年。均極平安。自咸豐年來。每遇得意之時。卽有失意之事。相隨而至。壬子科。余典試江西。請假歸省。卽聞先太夫人之訃。甲寅冬。余克武漢田家鎮。聲名鼎盛。臘月念五甫奉黃馬褂之賜。是夜卽大敗。衣服文卷。蕩然無存。六年之冬。七年之春。兄弟三人。督師於外。瑞州合圍之時。氣象甚好。旋卽遭先大夫之喪。今年九弟克復吉安。譽望極隆。十月初七。接到知府道銜諭旨。初十卽有溫弟三河之變。此四事。皆吉凶同域。憂喜並時。殊不可解。現在家中尙未妄動。妥慎之至。余之意。則不免皇皇。所寄各處之信。皆言溫弟業經殉節矣。究欠妥慎。幸尙未入奏。將來擬俟湖北奏報後。再行具疏也。家中亦俟報到日。乃有舉動。諸弟老成之見。賢於我矣。

叔父大人之病。不知近狀何如。茲專法大歸送鹿茸一架。卽沉弟前次送我者。此物補精血。遠勝他藥。或者有益。迪公彼石之尸。業經收覓。而六弟無之。尙有一線生理。若其同盡。則六弟遺骸。必去迪不遠也。

沉弟信言。「家庭不可說利害話。」此言精當之至。足抵萬金。余生平在家在外行事。尙不十分悻悻。惟說些利害話。至今愧悔無極。(咸豐八年十二月十六日)

致諸弟（述六弟遺骸未尋得）

澄侯沅浦季洪老弟閣下。十五日接叔父患病之信。十六日專王法六送鹿茸回家。限年內趕到。十七早接澄弟兩信。沅弟一信。叔父病勢已愈。大幸大幸。

溫弟之事。日內計已說破。不知叔父與溫弟婦能少節哀否。溫弟婦治家最賢。而賦命最苦。不知天理何以全不可遇。

十八夜接希庵信。知六弁沅弟所派已回。皆未尋得。而迪菴遺骨。於初一日已搬至霍山縣。同一殉節。而又有幸。有不幸若此。

余又專五人去尋。中有二人。係賊中逃出者。言必可至三河故壘。其三人則楊名聲楊鎮南張淦也。能尋得遺骸。尙是不幸中之一幸。否則吾何面見吾祖考妣及考妣於地下哉。（咸豐八年十二月二十日）

致諸弟（述起屋造祠堂及改葬之注意點又述寫字之法）

澄侯沅浦季洪三弟左右。王四等來。得知叔父大人病勢稍加。得十三日優卹之旨。不知何如。頃又接十九日來函。知叔父病已略愈。欣慰欣慰。然溫弟靈柩到家之時。我家祖宗有靈。能保得叔父不添病。六弟婦不過節烈。猶爲不幸中之一幸耳。

此間兵事。凱章在景德鎮相持如故。所添調之平江三營。寶勇一營。均已到防。或可隱紮淩川。在南康之多城壘。打一勝仗。奪僞印四十三顆。僞旗五百餘面。皆解至建昌。甚爲快慰。惟石達開尙在南安一帶。悍賊亦多。不知究竟掃蕩否。吉中營以後常不離余左右。沅弟儘可放心。

起屋造祠堂。沅弟言外間謗議。沅弟自任之。余則謂外間之謗議不足畏。而亂世之兵變。不可不慮。如江西近歲。凡富貴大屋。無一不焚。可爲殷鑒。吾鄉僻陋。眼界甚淺。稍有修造。已駭聽聞。若太闊麗。則傳播招尤。苟爲一方首屈一指。則亂世恐難倖免。望弟再斟酌於豐儉之間。妥善行之。

改葬先人之事。將求富求貴之念。消除淨盡。但求免水蠶。以委先靈。免凶煞。以安後嗣而已。若存一絲求富求貴之念。則必爲造物鬼神所忌。以吾所見所聞。凡已發之家。未有續尋得大地者。沅弟主持此時。務望將此意拿得穩。把得定。至要至要。

紀澤姻事。以古禮言之。則大祥後可以成婚。以吾鄉舊俗言之。則除靈道場後可以成婚。吾因近日賊勢尙旺。時事難測。頗有早辦之意。紀澤前兩稟。請心壺抄奏摺。儘可行之。吾每月送脩金二兩。應抄之奏。不知家中有底稿否。抄一篇。可寄目錄來一查。注明日月。

紀澤之字。較之七年二三月間。遠不能遠。大約握筆宜高。能握至管頂者爲上。握至管頂之下寸許者次之。握至毫以上寸許者。亦尙可習。若握近毫根。則難寫好字。亦不久必退。且斷不能寫好字。吾驗之於己身。驗之於朋友。皆歷歷可驗。紀澤以後宜握管略高。縱低亦須隔毫根寸餘。又須用油紙摹帖。較之臨帖勝十倍。

沅弟之字。不可拋荒。溫弟哀辭墓志。及王考妣考妣神道碑之類。余作就後。均須沅弟認真書寫。賓興堂記首段未愜。待日內成就。亦須沅弟寫之。沅弟雖憂危忙亂之中。不可廢習字工夫。親戚中雖有數六雲仙書畫。余因家中碑板。不擬倩外人書也。(咸豐九年正月十一日)

致諸弟(奏溫甫殉難事)

澄侯沅浦季洪老弟左右。初十日接胡中丞信。迪庵及溫弟已奉旨優卹。迪公節終之典。至隆極渥。其靈柩廿五日到湖北。廿六日宣讀恩旨。廿九請官中堂題主。正月初三日起行還湘。備極哀榮。溫弟與之同一殉難。而遺骨莫收。氣象迥別。予於十一日具摺奏溫弟殉難事。蓋至是更無生還之望矣。勸哉家中此刻已宣布否。若尙未宣布。則請更秘一月。待二月間。楊鎮南等歸來。我摺亦奉批轉來。如實尋不得。則招魂具衣冠以葬。余上無以對祖考妣及考妣。下無以對姪兒女。自古皆有死。死節尤爲忠義之門。弈世有光。本無所憾。特以骸骨未收。不能不抱憾於終古。

沉弟近日出外看地否。溫弟之事，雖未必由於墳地風水，然而入斗屋後及周壁冲三處，皆不可用。子孫之心，實不能安。千萬設法，不求好地，但求平安。洪夏之地，余心不甚願。一則嫌其經過之處，山嶺太多。一則既經爭訟，恐非吉壤。地者鬼神造化之所秘惜，不經予人者也。人力所能謀，只能求免水蟻凶煞三事，斷不能求富貴利達。明此理，絕此念，然後能尋平穩之地。不明此理，不絕此念，則並平穩者亦不可得。沉弟之明，諒能了悟。余在建尚平安。惟心緒鬱悒，不能開懷。殊彌淺耳。（咸豐九年正月十三日）

致諸弟（尋獲溫甫弟遺骸）

澄侯沉浦季洪三弟左右。廿七日亥刻，接胡潤公專丁來信，知溫甫弟忠骸業經尋獲，是猶不幸中之一幸。惟先軫喪元，又幸中之一大不幸。計胡中丞亦必有專信，另達舍間。

沉弟此時自不便遠出，應覓地兩所。一面改葬先考妣，一面安厝溫弟。潤公待我甚厚，溫弟靈柩歸舟，想必妥爲照料。吾即派楊名聲等三弁送鄉也。墓誌銘作就，再專丁送歸。（咸豐九年正月廿八日）

致諸弟（邑中須有團練）

澄侯沉浦季洪三弟左右。自接沉弟十七日在省一信，至今七日未接長沙詞音，不知耒陽常寧安仁衡州近狀何如。至爲懸系。團練之法，余向不以爲然，而我邑此次却須有團練，以壯聲威。望澄弟盡心爲之，無以我言爲典要。此間新招三千餘人，余星煥等長寧軍千人。於初一日到營。張子衡平江勇千三百人，已將到齊。凌蔭廷接帶之義營千人，俱紮貴谿。侯練妥後，即日亦當來老營。淮彭山此之兵未到，到齊時，老營共七千餘人。將卒皆躍躍欲試，氣象頗好。似堪一戰。惜無好統領臨陣指揮之耳。

湘勇之在江者，多有回援湖南之意。吾令浚川由吉安回茶陵，已去二札一批。至今尙未回信。又派吳翎岡回援，翎岡之營，雖交凌蔭廷，尙留四百人。合新招之三百人，亦差足成軍。王鈐峯張凱章稟請回援。此時景鎮未克，張難撤退。廿四日鎮賊撲凱章所轄之祥字營，一擊即退。凱章近日已穩，但難期克復耳。

我日來鬱悶之懷。雖不能免。然癯疾已愈十分之八九。辦事精神。亦較六年略好。往年心中悔愧之事。與官場不和之事。近亦次第消融而彌縫之。惟七年在家。度量太小。說話太鄙。至今悔之。此外方寸尙泰然也。(咸豐九年三月初三日)

致諸弟(湖南協餉停解)

澄侯沉浦季洪三弟左右。溫弟靈觀於初十到縣。十五可到家。至以爲慰。又幸叔父能親筆寫字。得紀壽引見恩旨後。必可日就康強。尤爲家庭之福。

凱軍在景德鎮相持如故。十三日打一小勝仗。十六日二更。賊放火僞遁以誘我。我軍亦未受其害。老營氣象如常。湖南每月協餉三萬。因有事停解。余以蕭軍之二萬五千餘。請其發給。亦差足相當。吉營望沉弟甚切。四月能來爲妙。澄弟身常勞苦。心常安逸。最善最善。

余近日事亦平順。以心血大虧。故多憂疑。亟用自警。沉弟勸我規模宜闊。我可勉而幾也。其謂處事宜決斷。則尙有未能。用情之厚薄。惟李家賻餼略厚。以渠以盪濟我軍已二萬餘金。不可無以酬之。此外亦循舊規耳。(咸豐九年三月廿三日自撫州軍中發)

致四弟(述近况)

澄侯四弟左右。今年以來。賢弟實在勞苦。較之我在軍營。殆過十倍。萬望加意保養。祁陽之賊。或可不竄湘鄉。萬一竄入。亦係定數。余已不復懸系。余自去年六月再出。無不批之稟。無不復之信。往來之嫌隙。尤悔業已消去十分之七八。惟辦理軍務。仍不能十分盡職。蓋精神不足也。賢弟聞我近日在外。尙有錯處。不妨寫信告我。余派委員伍華瀚在衡州坐探。每二日送信一次。家中若有軍集報警。可由衡城交伍轉送也。(咸豐九年五月初六日)

致四弟(以壽序作格言)

澄侯四弟左右。蕭浚川又至寶慶。大局當不足慮。賊至十萬之多。每日需米食千石。需子藥數千斤。渠全無來源。

糧米撈盡，斷無不去之理。可不須大勝仗也。沅弟啓行後，日日大雨，甚爲辛苦。余右目紅痛，不能寫小字。前因賢弟夫婦四十壽辰，思寫紅紙屏一幅寄賀。即將平日所稱之祖父勤儉孝友書、蔬魚豬等語，述寫一篇，爲壽序也可。爲落言也可。茲因目疾，尙未及辦。待下次再寄也。

叔父處前年以大事未辦壽屏，明年叔母五十，一擬請漱六搗仙爲之。弟意以爲何如。在界嶺等處，弟亦太辛苦。須常常服補藥，保養身體。孝之大端也。（咸豐九年五月廿四日）

致四弟（責晏起）

澄侯四弟左右，賀常四到營，接弟信，言早起太晏，誠所不免。去年住營盤，各營皆畏慎早起。自臘月廿七稜寓公館，早間稍晏，各營皆隨而漸晏。未有主帥晏而將弁能早者也。猶之一家之中，未有家長晏而子弟能早者也。沅弟在景德鎮，辦事甚爲穩靠，可愛之至。惟據稱悍賊甚多，一時恐難克復。官兵有勁旅萬餘，決可無疑。季弟在湖北，已來一信，胡詠帥待之甚厚，家中儘放心。家中讀書事，弟宜常常留心。如甲五科三等，皆須讀書，不失大家子弟風範，不可太疎忽也。（咸豐九年六月初三日）

致四弟（述奉防蜀之旨）

澄侯四弟左右，寶慶久被長圍所困，心殊懸懸。景德鎮於十四日克復，十五日派隊跟追。聞浮梁賊尙未退，不知該逆別有詭計否。沅弟追賊約三日，回營後，即謀來撫。將歸里爲政葬事也。

前奉防蜀之旨，頃已復奏。言兵力太單，難以入蜀。且景德鎮未克，不能遽行抽動等因。已於十八日拜發。其時不知景鎮之卽復也。目下之計，大約帶兵由長沙上溯至荊州宜昌等處，防賊占荆宜，則兩湖俱難措手。若諭旨必令赴蜀，則須添至二萬餘人，太少無益也。（咸豐九年六月十八日）

致四九兩弟（必須略置墓田）

澄沅兩弟左右，寶慶解圍，團勇營撤，賊竄鄂衡。吾邑遂可弛防。予在湖口住十日，八月初一日至潯陽，就擱二日。

因阻風不克成行。好在上游無事。賊不入蜀。余行雖遲滯。尚不誤事。日內守風此間。可遊覽廬山近處勝境。朱品隆等各營。已由陸路先至黃州。季弟奉胡中丞札。募勇千人。聞初四日自黃州起行歸湘。吉字中營之餉。到黃州再派人起解。如已開船前來。則不起解亦可。

先考妣改葬之期已近。果辦得到否。須略置墓田。令守墓者耕之。凡墓下立雙石柱。方柱圓首。柱高而遠。不刻字者。爲之華表。柱矮而刻字者。謂之闕。四柱平立。上有橫石二條。謂之坊。凡神道碑。有上覆以亭者。有左右及後面皆以磚石貼砌。上蓋圓銅瓦者。有露立全無覆蓋者。三者隨弟斟酌。要之上用躡首。下用龜趺。則一定之式。不可改易。

公卿大夫之家。有隆禮者。於墓門之南。立墓表碑。又於極南處。立神道碑。稍簡者。僅立一碑。二者聽弟斟酌。要之宜立於墓門之外。江西立於墳堆之趾。湖南立於羅篋之頭。蓋非古法。不可學也。

至築墳結頂。上年周壁冲。結冲最合古法。今京師王公貝勒及品官之家。墳塋多用此式。勿以其爲吾鄉所創。見駭聞而不用也。吾之所見如此。望弟細心詳酌。吾於祖父墳墓祠廟。皆未盡心。實懷隱疚。今沉弟能力辦之。澄弟能玉成之。爲先人之功臣。卽爲余彌此缺憾。且慰且感。余此次在外。專了從前未了之事。而彌縫過失。亦十得七八耳。(咸豐九年八月初五日自九江舟次發)

致四弟(述楚軍難北征及湖南樊鎮一案)

澄侯四弟左右。沉弟到營。得聞家事之詳。近日婚嫁兩事。均已完畢。可少休息。

吾於二十八日自黃州歸。接奉寄諭。以湖北大舉征皖。恐其驅賊北竄。吾細察湘勇膽柔。實難北征。一渡淮水。共食麥麵。天氣苦寒。必非湘人所能耐。擬於日內復奏。陳明楚軍所以不能北行之故。

湖南樊鎮一案。駱中丞奏明湖南歷次保舉。一票至公。並將全案卷宗。封送軍機處。皇上嚴旨詰責。有一屬員從惠。劣幕要挾一等語。並將原奏及原案發交湖北。原封未動。從此湖南局面。不能無小變矣。

余身體平安。淮目疾久不全愈。精神意興日臻老態。所差堪自信者。看書看稿。猶能精細深入。每日黎明即起。不敢驢祖父之家風。足以告慰。(咸豐九年十月初四日自巴河軍次發)

致四弟九弟(述擒匪之猖獗)

澄侯沅浦兩弟左右。自余於巴河拔營。沅浦於次日登舟。計此信到家。沅弟亦抵里門矣。余拔營後。長行七日。十一月初三日。至黃梅。駐紮城外。距太湖百二十里。賊約三四千。被我兵萬五千人。四面環圍。城賊極爲窮蹙。所慮者。四眼狗率黨來援。或有變動。否則太湖年內可克。

余暫駐黃梅。細察地勢。再行前進。日內癘疾大作。目亦極蒙。幸精神如常。每日竭力支撐。不甚懈怠。河南擒匪。日以猖獗。皖南甯國。屢次敗挫。六合大營。被四眼狗攻陷。揚州近又被圍。氣機殊未轉耳。(咸豐九年十一月初二日)

致四弟九弟(頗慮統將乏人)

澄侯沅浦兩弟左右。十五日接弟信。知沅弟初一日移新宅。賀賀。吾弟以孝友之本。立宏大之規。氣魄遠勝阿兄。或者祖父之澤。得吾弟而門乃大乎。

日內警報頻聞。援賊四眼狗糾合擒匪龔瞎子。帶五六萬人來援。飽超紮小池驛禦之。已至太湖之前四十里。蔣之純紮龍家涼亭。麥都護紮新昌。相去各十里內外。廿二日開仗。我軍先獲大勝。窮追二十里。多因遇伏而小挫。太湖城外。留唐義渠一軍三千四百人。太形單薄。余派前幫十營六千人。前往助紮。派朱雲慶李申夫統領。不知前敵多飽等軍。果站得住否。

余在宿松。身邊僅四千三百人。除吉中吉字之外。均不甚可恃。心殊焦灼。蕭浚川奉旨調赴黔蜀。希庵亦以母病不來。統將乏人。不知所以爲計。余癘疾大發。爲十餘年所僅見。夜不成寐。幸溫書未甚間斷耳。(咸豐九年十二月廿四日)

致四弟九弟（問新屋形狀及述賊包圍鮑營）

澄侯沉浦兩弟左右。除夕接兩弟家書。并紀澤兒一稟。欣悉家中四宅平安。惟叔父病未全愈。至以爲念。沉弟移居後。新屋氣象。則尙宏敞。不知居之適意否。凡屋有取直光者。有取斜光者。有取反光者。聞新屋極高。而天井不甚闊。則所取皆直光矣。未申以後。內室尙不黑暗否。裝修及製品。殊不易易。頗有頭緒否。余在此望沉弟來甚切。而恐弟應辦之事。皆未辦妥。不敢遽催也。

多鮑蔣三軍。自臘月廿二大戰後。賊於廿四六等日。包圍鮑營。廿七日遂長圍鮑營。層層包裹。霆左營四面皆合。水米文報不通。幸定心堅守數日。廿九日賊解圍。少退五里以外。除夕日多都護另派精選前營。紮於霆左營之壘。而令霆左營弁勇暫入鮑之中軍。休息數日。從此前敵應稍安穩。

余自去冬以來。癘疾大發。目蒙異常。而應辦之事。未甚間斷。新年軍事緊急。少爲將息。除公事外。不敢多作一事也。

紀澤兒所論八分。不合古義。至欲來營省視。余亦思一見。沉弟來時。可帶紀澤兒來展謁一次。住營一月。專人送歸。（咸豐十年正月初四日）

致四弟九弟（述克復太湖縣）

澄沉兩弟左右。多都護於二十五日出隊誘賊。業已破賊三壘。賊以大隊猛撲。多部敗退。賊追十里。唐蔣各部。齊出接應。鮑亦猛進。多亦回殺。賊遂大敗。凶悍者傷亡二三千人。廿六日我軍乘勝進攻。五軍出滿隊。凡萬八千人。排列而進。破賊壘六十餘座。壘內火藥甚多。草棚甚密。火球所著。登時轟發。狂風旋轉。巨火燭天。山谷之間。人馬倉卒難逃。多被傷死。牲糧衣物。一炬焦土。殺賊亦實有三四千人。

僅有三壘未破。四眼狗於是夜逃去。三壘亦逃。太湖縣之賊亦逃。即將城池克復。此次大捷。實足褻賊膽而快人心。沉弟雖不在營。而中軍義字兩營。連破賊壘。亦極有功。季弟在太湖克復一城。志亦少紓。特此轉告。俾沉弟放

心可也。(咸豐十年正月廿八日)

致四弟九弟(痛悉叔父去世)

澄侯沅浦兩弟左右。接來信。痛悉叔父大人於十九日戌刻去世。哀痛曷極。自八年十一月。聞溫弟之耗。叔父即說話不圓。已虞其以憂傷身。叔父生平。外面雖處順境。而暗中亦極鬱抑。思之傷心。此次一切從豐。兩弟自有權衡。喪禮以哀為主。次以肅靜為主。余於聞訃之第二日。進公館設位成服。擬素食七日。素服十四日。仍行撒靈入營。

季弟擬請假回籍。余囑其來宿松靈前行禮。沅弟不敢再求愜意。自是知足之言。但濕氣一層。不可不詳密。若濕氣太重。人或受之。則易傷脾。凡屋高而天井小者。風難入。日亦難入。必須設法祛散濕氣。乃不生病。至屬至囑。(咸豐十年二月初八日)

致四弟九弟(聞克復杭城信及囑不必添營)

澄侯沅浦兩弟左右。自初十日聞浙江被圍之信。十三日聞失守之信。寸心焦灼。全軍爲之驚擾。一則恐有援浙之行。一則大局一壞。一木難支。所謂一馬之奔。無一毛而不動。一舟之覆。無一物而不沉也。茲幸於十八日接張筱浦先生來信。杭城於三月三日克復。欣慰無極。特帶人馳告家中。亦以慰陳作梅將母之懷。

前有信囑沅弟來營。或酌募一二營帶來。茲浙事既已平定。即不必添營。沅弟信中。意於今冬謀爲蟬蛻之計。尤可不必再行添募。蓋凡勇皆服原募之人。不甚服接帶之人。多一營頭。則蟬蛻時多一番糾結也。(咸豐十年三月十九日)

致四弟九弟(論進補藥及必須起早)

澄侯沅浦兩弟左右。接家信。知叔父大人已於三月二日安厝馬公塘。兩弟於家中兩代老人養生送死之事。備極敬誠。將來必食報於子孫。聞馬公塘山勢平衍。可決其無水蟻凶災。尤以爲慰。澄弟服補劑而大愈。幸甚幸甚。

吾平生頗講求惜福二字之義。送來補藥不斷。且蔬菜亦較奢。自愧享用太過。然亦體氣太弱。不得不爾。胡潤帥李希庵常服遠參。則其享受更有過於余者。家中後輩子弟。體弱學射。最足保養。起早尤千金妙方。長壽金丹也。
(咸豐十年二月廿四日)

致四弟九弟(尋地必求愜意)

澄侯沅浦兩弟左右。沅弟既與作梅意見相合。家中尋地。可留梅公多住一二月。以必得爲期。改葬本非好事。然既已屢改。則必求愜意而後止。余非欲求地以徵富貴者。惟作梅以三千里外至吾鄉。千難萬難。不可錯過。澄弟所跋對聯。甚爲妥洽。服補藥雖多。仍當常常靜坐。不可日日外出。一則保養身體。一則教訓子姪。至囑至囑。此間至今未得進兵。實爲遲滯。希庵至多公處。與之暢談。針芥契合。相得益彰。大約數日後即可移營。進逼桐城懷甯矣。浙江克復後。皖南又大震動。河南擒匪上竄。陝西及樊城戒嚴。四眼狗近拊全椒。思解金陵之圍。余身體平安。癘疾皆在隄以下。本是空閒地方。任其騷擾可也。
(咸豐十年閏二月十四日)

致四弟(治家八字訣)

澄侯四弟左右。念七日接弟信。欣悉合家平安。沅弟是日申刻到。又得詳問一切。敬知叔父臨終。毫無抑鬱之情。至爲慰念。

余與沅弟論治家之道。一切以星岡公爲法。大約有八字訣。其四字卽上年所稱書蔬魚豬也。又四字則曰早掃考寶。早者起早也。掃者掃屋也。考者祖先祭祀。敬奉顯考王考曾祖考。言考而妣可該也。寶者親族鄰里。時時周旋。賀喜弔喪。問疾濟急。

星岡公常曰。「人待人。無價之寶也。」星岡公生平於此數端。最爲認真。故余戲述爲八字訣曰。「書蔬魚豬。早掃考寶」也。此言雖涉諧謔。而擬卽寫屏上。以祝賢弟夫婦壽辰。使後世子孫。知吾兄弟家教。亦知吾兄弟風趣也。弟以爲然否。
(咸豐十年閏二月廿九日)

致四弟（述蘇錫失守信）

澄侯四弟左右。前寄一緘。想已入覽。近日江浙軍事大變。自金陵大營潰散。退守鎮江。旋退保丹陽。廿九日丹陽失守。張國樞陣亡。四月初五日和兩亭將軍何根雲制軍退至蘇州。初十日無錫失守。十三日蘇州失守。目下浙江危急之至。孤城新復。兵無餉。又無軍火器械。賊若再至。亦難固守。東南大局。一旦瓦裂。皖北各軍。必有分援江浙之命。非胡潤帥移督兩江。即余往視師蘇州。二者苟有其一。則目下三路進兵。大局不能不變。抽兵以援江浙。又恐顧此而失彼。賊若得志於江浙。則江西之患。亦近在眉睫間。吾意勸湖南將能辦之兵力。出至江西。助防江西之北岸。免致江西之糜爛。使湖南專防東南。則勞費多而無及矣。不知以吾言爲然否。

左季高在余營住二十餘日。昨已歸去。余尙肯顧大局。沅弟季弟新圖安慶。正得勢得機之際。不肯舍此而他適。余則聽天由命。或皖北。或江南。無所不可。死生早已置之度外。但求臨死之際。寸心無可愧憾。斯爲大幸。家中之事。望賢弟力爲主持。切不可日趨於奢華。子弟不可學大家口吻。動輒笑人之鄙陋。笑人之寒村。日習於驕縱而不自知。至戒至囑。余本思將書蔬魚。猶早掃考寶八字。作一壽屏。爲賢弟夫婦生日賀。因匆匆尙未作就。余目疾近日略好。有言早洗面水泡洗二刻即效。比試行之。諸請放心。（咸豐十年四月廿四日）

致四弟（囑紀澤來省觀）

澄侯四弟左右。余擬於十五日起行。帶兵渡江。駐紮徽州池州二府境內。其九弟所帶之萬人。現紮安慶城外者。仍不撤動。蓋以公事言之。余雖駐南岸。仍當以北岸爲根本。有胡中丞在北岸主持一切。又有多禮堂李希庵及沅弟三支大軍。則北岸穩。湖北穩。袁公之軍亦穩。余在南岸。亦可倚北爲聲援也。以私事言之。則余爲地方官。若僅帶一胞弟在身邊。則好事未必見九弟之功。壞事必專指九弟之過。嫌隙之際。不可不慎。

余定帶飽鎮超之霆字營六千人。朱品陞二千人。及現在宿松之馬步二千人。合萬人先行。餘在湖南陸續調集招募。足成三萬之數。左季高現奉旨以四品京堂候補襄辦余處軍務。所有應在湖南招募等事。即咨請季翁在

湘料理。近日得浙江王中丞信。蘇州之賊。尙未至浙境。浙江省城。有杭州將軍瑞。欽差大臣張。及王中丞三人。應可保全。但使保得浙江。保得江西。則此後尙可挽回全局。

紀澤兒若來省覲。則由長沙。或坐駁船。或坐民船。直下湖北。以至湖口東流。余紮營當在東流附近之地方。長江之險。夏月風濤無定。每遇極熱之時。須防暴風之至。下晚灣泊宜早。來營住一月。卽令其速歸也。望弟論紀澤沿途謹慎。不必求快。（咸豐十年五月初四日）

致四弟（述營中諸務叢集）

澄弟左右。五月四日接弟緘。一書蔬魚猪。早掃考寶。一橫寫八字。下用小字注出。此法最好。余必遵辦。其次序則「改爲考寶早掃。書蔬魚猪。」

目下因拔營南渡。諸務叢集。蘇州之賊已破。嘉興淳安之賊已至績溪。杭州徽州十分危急。江西亦可危之至。余赴江南。先駐徽郡之祁門。內顧江西之饒州。催張凱章速來饒州會合。又札王梅春募三千人進紮撫州。保江西卽所以保湖南也。又札王人樹仍來辦營務處。不知七月間可趕到否。

若此次能保全江西兩湖。則將來仍可以克復。安危大局。所爭只在六七八九數月。澤兒不知已起行來營否。弟爲余照料家事。總以儉字爲主。情意宜厚。用度宜儉。此居家鄉之要訣也。（咸豐十年五月十四日）

致九弟季弟（述楊光宗不馴）

沉弟季弟左右。出隊以護百姓收穫。甚好。與吉安散耕牛籽種。用意相似。吾輩不幸生當亂世。又不幸而帶兵。日以殺人爲事。可爲寒心。惟時時存一愛民之念。庶幾留心田以飯子孫耳。

楊鎮南之哨官楊光宗。頭髮橫而盤。吾早慮其不馴。楊鎮南不善看人。又不善斷事。弟若看有不妥洽之意。卽飭令仍回兄處。兄另撥一營與弟換可耳。

吾於初十日至歷口。十一日擬行六十里。趕至祁門縣。十二日先太太夫人忌辰。不欲紛紛迎接應酬也。寧國府一

軍緊急之至，吾不能撥兵往援，而擬少濟之以餽，亦地主之道耳。（咸豐十年六月初十日）

致季弟（講求將略，品行學術）

季弟左右，頃接沅弟信，知弟接行知，以訓導加國子監學正銜，不勝欣慰。官階初晉，雖不足爲吾季榮，惟弟此次出山，行事則不激不隨，處位則可高可卑，上下大小，無人不翕然悅服，因而凡事皆不拂意，而官階亦由之而晉，或者前數年抑塞之氣，至是將暢然大舒乎。易曰：「天之所助者，順也。人之所助者，信也。」我弟若常常履順思信如此，各位豈可限量哉。

吾湖南近日風氣，蒸蒸日上。凡在行間，人人講求將略，講求品行，並講求學術。弟與沅弟既在行間，望以講求將略爲第一義。點名看操等粗淺之事，必躬親之。練膽料敵等精微之事，必苦思之。品學二者，亦宜以餘力自勵。目前能做到湖南出色之人，後世卽推爲天下罕見之人矣。大哥豈不欣然哉。

沅弟以陳米發民夫挑擔，極好極好。此等事弟等儘可作主，兄不吝也。（咸豐十年六月廿七日）

致沅弟季弟（囑文輔卿二語）

沅弟季弟左右，探報闕悉，此路並無步撥，卽由東流建德驛夫送邪。建德令已死，代理者新到，故文遞遲延。弟以後要事，須專勇送來，三日可到，或逢三八專人來一次，每月六次，其不要緊者，仍由驛發來，則兄弟之消息常通矣。

文輔卿辦釐金甚好，現在江西釐務，經手者皆不免官氣太重，此外則不知誰何之人，如輔卿者，能多得幾人，則釐務必有起色。吾批二李詳文云：「須冗員少而能事者多，入款多而坐支者少。」又批云：「力除官氣，嚴裁浮費。」弟須囑輔卿二語，無官氣，有條理，守此行之。雖至封疆不可改也。有似輔卿其人者，弟多薦幾人更好。甲三起行時，溫弟婦甚好，此後來之變態也。（咸豐十年六月廿八日）

致沅弟季弟（隨時推薦正人）

沅弟季弟左右。輔卿而外。又薦意卿柳南二人。甚好。柳南之篤。余深知之。意卿亮亦不凡。余告我輔觀人之法。以有操守而無官氣。多條理而少大言爲主。又慮其求潤師左郭及沅薦人。以後兩弟如有所見。隨時推薦。將其人長處短處。一一告知阿兄。或告彼荃。尤以習苦爲辦事之本。引用一班能耐勞苦之正人。日久自有大效。季弟言出色之人。斷非有心所能做得。此語確不可易。各位大小。萬般由命不由人。特父兄之教家。將帥之訓士。不能如此立言耳。季弟天分絕高。見道甚早。可喜可愛。然辦理營中小事。教訓弁勇。仍宜以勤字作主。不宜以命字諭衆。

潤帥先發陳奏。以釋羣疑之說。亦有函來余處矣。昨奉六月二十四日諭旨。實授兩江總督。兼授欽差大臣。恩眷方溥。儘可不必陳明。所慮者。蘇常淮揚。無一支勁兵前往。位高非穩。恐徒爲物議之張本耳。余好出汗。沅弟亦好出汗。似不宜過勞。(咸豐十年七月初八日)

致九弟季弟(以勤字報君以愛民二字報親)

沅弟季弟左右。兄膺此鉅任。深以爲懼。若如陸阿二公之前轍。則貽我父母羞辱。卽兄弟子姪。亦將爲人所侮。禍福倚伏之幾。竟不知何者爲可喜也。默觀近日之吏治人心。及各省之督撫將帥。天下似無裁定之理。吾惟以一勤字報吾君。以愛民二字報吾親。才識平行。斷難立功。但守一勤字。終日勞苦。以少分宵旰之憂。行軍本擾民之辜。但刻刻存愛民之心。不使先人之積累。自我一人耗盡。此兄之所自矢者。不知兩弟以爲然否。願我兩弟亦常常存此念也。

沅弟多置好官。遴選將才二語。極爲扼要。然好人實難多得。弟爲留心採訪。凡有一長一技者。兄斷不敢輕視。謝恩摺今日拜發。寧國日內無信。聞池州楊七麻子將往攻甯。可危之至。(咸豐十年七月十二日)

致九弟季弟(問軍中柴米足否)

沅弟季弟左右。接專丁來信。下游之賊。漸漸蠢動。九月當有大仗。此賊慣技。好於營盤遠遠包圍。斷我糧道。弟

處有水師接濟。或可無礙。不知多李二營何如。有米有柴。可濟十日半月否。賊雖多。善戰者究不甚多。禮希或可禦之。弟既攝長濠。切不可過濠打仗。勝則不能多殺賊。敗則不能收隊也。營中柴尙多否。煤已開出否。紅單船下去後。吾擬札陳舫仙辦大通釐金。以便弟就近稽查。聞該處每月可二萬餘串也。

魏柳南宜辦釐乎。宜作吏乎。弟密告我。潘意卿何時可到。此間需才極急。浙事岌岌。請援之。審如麻。次青今日到祁門。其部下十四五可到。

季弟所言諸枉。聆悉。當一一錯之。不姑息也。（咸豐十年八月初七日）

致九弟（北援不必多兵）

沉弟左右。安慶決計不撤圍。江西決計宜保守。此外或棄或取。或抽或補。合衆人之心思共謀之。北援不必多兵。但即吾與潤帥二人中有一人遠赴行在。奔問官守。則君臣之義明。將師之識著。有濟無濟。聽之可也。（咸豐十年九月十四日）

致九弟（告戰事爲天雨所阻）

沉弟左右。接來緘。知營牆及前後濠皆倒。良深焦灼。然亦恐是挖濠時不甚得法。若容土覆得極遠。雖雨大。不至仍倒入濠內。庶稍易整理。至牆子則無不倒坍。不僅安慶耳。徽州之賊。竄浙者。十之六七。在府城及休甯者。聞不過數千人。不知確否。

連日雨大泥深。飽張不能進剿。深爲可惜。季高尙在樂平。余深恐賊竄入江西腹地。商之季高。無遽入皖。季高亦以雨泥不能速進也。

潤帥謀皖已大半年。一切均有成竹。而臨事復派人救援六安。與吾輩及希庵等之初議。全不符合。槍法忙亂。而弟與希庵皆有驕矜之氣。茲爲可慮。希庵論事。最爲穩妥。如潤帥有槍法忙亂之事。弟與希庵陳而切諫之。弟與希之矜氣。則彼此互規之。北岸當安如泰山矣。（咸豐十年九月廿一日）

致九弟季弟（戒傲情二字）

沉弟季弟左右。沉弟以我切責之。絨痛自引咎。懼蹈危機。而思自進於謹言慎行之路。能如是。是弟終身載福之道。而吾家之幸也。季弟信亦平和溫雅。遠勝往年傲情氣象。

吾於道光十九年十一月初二日。進京散館。十月二十八日早侍祖父星岡公於階前。請曰：「此次進京。求公教訓。」星岡公曰：「爾之官是做不盡的。爾之才是好的。但不可做。（滿招損謙受益。）爾若不做。更好全了。」遺訓不遠。至今尙如耳提面命。今吾謹述此語。誥誡兩弟。總以除傲字爲第一義。唐虞之惡人。曰丹朱。傲。曰象。傲。桀紂之無道。曰強。足以拒諫。辯足以飾非。曰謂己有天命。謂敬不足行。皆傲也。

吾自八年六月再出。卽力戒傲字。以做無恆之弊。近來又力戒情字。昨日徽州未敗之前。次青心中不免有自是之見。既敗之後。余益加猛省。大約軍事之敗。非傲卽情。二者必居其一。巨室之敗。非傲卽情。二者必居其一。

余於初六所發之摺。十月初可奉諭旨。余若奉旨派出。十日卽須成行。兄弟遠別。未知相見何日。惟願兩弟戒此二字。並戒後輩。當守家規。則余心大慰耳。（咸豐十年九月廿四日）

致九弟季弟（謝給紀澤途費）

沉弟季弟左右。日內不知北岸賊情何如。至爲系念。季弟賜紀澤途費太多。余給以二百金。實爲不少。余在京十四年。從未得人二百金之贈。余亦未嘗以此數贈人。雖由余交遊太寡。而物力艱難。亦可概見。

余家後輩子弟。全未見過艱苦模樣。眼孔大。口氣大。呼奴喝婢。習慣自然。驕傲之氣。入於膏肓而不自覺。吾深以爲慮。前函以做字箴規兩弟。兩弟猶能自省惕。若以做字誥誡子姪。則全然不解。蓋自出世來。祇做過大。並未做過小。故一切茫然。不似兩弟做過小。吃過苦也。（咸豐十年十月初四日）

致九弟季弟（告軍事失利）

沉弟季弟左右。接信知北岸日內尙未開仗。此間鮑張於十五日獲勝。破萬安街賊巢。十七日獲勝。破休寧東門。

外二壘。鮑軍亦受傷百餘人。正在攻勦得手之際。不料十九日未刻。石埭之賊。破牟棧嶺而入新嶺。桐林嶺同時被破。張軍前後受敵。全局大震。比之徽州之失。更有甚焉。余於十一日親登牟棧嶺。爲大霧所迷。目無所睹。十二日登桐林嶺。爲大雪所阻。今失事恰在此二嶺。豈果有天意哉。

目下張軍最可危慮。其次則祁門老營。距賊僅八十里。朝發夕至。毫無遮阻。現講求守壘之法。賊來則堅守以待。援師。倘有疎虞。則志有素定。斷不臨難苟免。

回首生年五十餘。除學問未成。尙有遺憾外。餘差可免於大戾。賢弟教訓後輩子弟。總當以勤苦爲勸。謙遜爲用。以藥驕佚之積習。餘無他囑。（咸豐十年十月二十日）

致四弟（述剿賊情形及憂心子弟驕奢佚）

澄侯四弟左右。此間於十九日。忽被大股賊匪。竄入牟棧嶺。去祁門老營。僅六十里。人心大震。幸鮑張兩軍。於念日念一日。大戰獲勝。克復黟縣。追賊出嶺。轉危爲安。此次之險。倍於八月廿五徽州失守時也。現賊中僞侍王李世賢僞忠王李秀成。僞輔王楊輔清。皆在徽境。與兄作對。僞英王陳玉成在安慶境。與多禮沉季作對。軍事之能否支持。總在十月十一月內。見大分曉。

甲三月初六之武穴。此時計將抵家。余在外無他慮。總怕子姪習於驕奢佚三字。家敗離不得個奢字。人敗離不得個佚字。討人嫌離不得個驕字。弟切戒之。（咸豐十年十月廿四日）

致四弟（述戰事並教子姪以謙勤）

澄侯四弟左右。自十一月來。奇險萬狀。風波迭起。文報不通者五日。餉道不通者二十餘日。自十七日唐廷生克復建德。而皖北沅季之文報始通。自鮑鎮廿八日至景德鎮。賊退九十里。而江西饒州之餉道始通。若左鮑二公。能將浮梁鄱陽等處之賊。逐出江西境外。仍從建德竄出。則風波漸平。而祁門可慶安穩矣。

余身體平安。此一月之驚恐危急。寶鼓之八月徽寧失守時。險難數倍。余近年在外。問心無愧。死生禍福。不甚介

意。惟接到英法美各國通商條款。大局已壞。令人心灰。茲付回二本。與弟一閱。時事日非。吾家子姪輩。總以謙勤二字爲主。戒傲情。保家之道也。(咸豐十年十二月初四日)

致四弟(不信醫藥僧巫和地師)

澄侯四弟左右。接弟手書。具悉弟病日就痊愈。至慰至幸。惟弟服藥過多。又堅囑澤兒請醫調治。余頗不以爲然。吾祖星岡公在時。不信醫藥。不信僧巫。不信地師。此三者。弟必能一一記憶。今我輩兄弟亦宜略法此意。以紹家風。今年做道場二次。禱祀之事。聞亦常有。是不信僧巫一節。已失家風矣。買地至數千金之多。是不信地師一節。又與家風相背。至醫藥則合家大小老幼。幾於無人不藥。無藥不真。迨至補藥喫出毛病。則服涼藥攻伐之。陽藥喫出毛病。則服陰藥清潤之。輾轉差誤。非大病大弱不止。弟今年春間。多服補劑。夏末多服涼劑。冬間又多服清潤之劑。余意欲勸弟少停藥物。專用飲食調養。澤兒雖體弱。而保養之法。亦惟在慎飲食。節嗜慾。斷不在多服藥也。

洪家地契。洪秋浦未到場押字。將來恐仍有口舌。地師僧巫二者。弟向來不甚深信。近日亦不免爲習俗所移。以後尙祈卓識堅定。略存祖父家風爲要。天下信地信僧之人。曾見有家不敗者乎。北棗公屋。余無銀可捐。己亥冬。余登山踏勘。覺其渺茫也。(咸豐十年十二月廿四日)

致四弟(教去驕情)

澄侯四弟左右。臘底由九弟處寄到弟信。具悉一切。弟於世事。閱歷漸深。而信中不免有一種驕氣。天地間惟謙謹是載福之道。驕則滿。滿則傾矣。凡動口動筆。厭人之俗。嫌人之鄙。議人之短。發人之覆。皆驕也。無論所指未必果當。即使一切當。已爲天道所不許。吾家子弟。滿腔驕傲之氣。開口便道人短長。笑人鄙陋。均非好氣象。賢弟欲戒子弟之驕。先須將自己好議人短。好發人覆之習氣。痛改一番。然後令後輩事事警改。欲去驕字。總以不輕非笑人爲第一義。欲去惰字。總以不晏起爲第一義。弟若能謹守星岡公之八字。三不信。又謹記愚兄之去驕去

情。則家中子弟。日趨於恭謹而不自覺矣。（咸豐十一年正月初四日）

致四弟（戒不輕非笑人）

澄侯四弟左右。弟言家中子弟。無不謙者。此卻未然。凡畏人不敢妄議論者。謙謹者也。凡好譏評人短者。驕傲者也。諺云。「富家子弟多驕。貴家子弟多傲。」非必錦衣玉食。動手打人。而後謂之驕傲也。但使志得意滿。毫無畏忌。開口議人短長。卽是極驕極傲耳。

余正月初四日信中。言戒驕字。以不輕非笑人爲第一義。望弟常常猛省。並戒子弟也。（咸豐十一年二月初四日）

致九弟季弟（宜以靜字勝賊）

沅季兩弟左右。官相既已出城。則希庵由下巴河南渡以救省城。甚是矣。希庵既已南渡。狗逆必回救安慶。風馳雨驟。經過黃梅宿松。均不停留。直由石牌以下集賢關。此意計中事也。

凡軍行太速。氣太銳。其中必有不整不齊之處。惟有一靜字可以勝之。不出隊不喊吶。槍礮不能命中者。不許亂放一聲。穩住一二日。則大局已定。然後函告春霆。渡江援救。并可約束多軍三面夾攻。吾之不肯令鮑軍預先北渡者。一則南岸處處危急。賴鮑軍以少定人心。二則霆軍長處甚多。而短處正坐少一靜字。

若狗賊初回集賢關。其情切於救城中之母妻眷屬。拚命死戰。鮑軍當之。勝負尙未可知。若鮑公未至。狗賊有輕視弟等之心。而弟等持以謹靜專一之氣。雖危險數日。而後來得收多鮑夾擊之效。却有六七分把握。吾兄弟無功無能。俱統領萬衆。主持劫運。生死之早遲。冥冥者早已安排妥貼。斷非人謀計較所能及。只要兩弟靜守數日。則數省之安危。胥賴之矣。至囑至要。（咸豐十一年二月廿二日）

致四弟（教子弟以三不信及八本）

澄侯四弟左右。上次送家信者。三十五日卽到。此次專人四十日未到。蓋因樂平饒州一帶有賊。恐中途繞道也。

自十二日克復休寧後。左軍分出入營。在於甲路地方小挫。退紮景鏡。賊幸未跟蹤追犯。左公得以整頓數日。銳氣尙未大減。目下左軍進剿樂平鄱陽之賊。鮑公一軍。因撫建吃緊。本朝渠赴江西省。先顧根本。次援撫建。因近日鄱陽有警。景鏡可危。又暫留鮑軍。不遽赴省。胡宮保恐狗逆由黃州下犯安慶。沉弟之軍。又調鮑軍救援北岸。其祁門附近各嶺。廿三日又被賊破兩處。

數月以來。竇屬應接不暇。危險迭見。而洋人又縱橫出入於安慶湖口湖北江西等處。并有欲來祁門之說。看此光景。今年殆萬難支持。然余自咸豐三年冬以來。久已以身許國。願死疆場。不願死牖下。本其素志。近年在軍辦事。盡心竭力。毫無愧怍。死即瞑目。毫無悔憾。

家中兄弟子姪。惟嘗記祖父之八個字。曰。『考寶早掃。書蔬魚豬。』又謹記祖父之三不信。曰。不信地師。不信醫藥。不信僧巫。余日記冊中。又有八本之說。曰。讀書以訓詁爲本。作詩文以聲調爲本。事親以得歡心爲本。養身以戒惱怒爲本。立身以不妄語爲本。居家以不晏起爲本。作官以不要錢爲本。行軍以不擾民爲本。此八本者。皆余閱歷而確有把握之論。弟亦嘗教諸子姪謹記之。無論世之治亂。家之貧富。但能守星岡公之八字。與余之八本。總不失爲上等人家。余每次寫家信。必諄諄囑付。蓋因軍事危急。故預告一切也。

余身體平安。營中雖欠餉四月。而軍心不甚渙散。或尙能支持。亦未可知。家中不必懸念。(咸豐十一年二月廿四日)。

致九弟(陸路萬難多運)

沉弟左右。余於十九日未刻。由休寧回至祁門。接弟十六日夜信。不勝焦慮之至。弟處日內援賊。將由梅宿而至桐城。廬江等賊。亦將大有舉動。乃以余前辦辦米之故。尙須分心辦南岸糧運事件。兄實不安之至。兄十一日信。言弟收三萬金。或酌量爲我辦米數千石。其時未聞東征局三萬有政解南岸之說。更未聞賊由梅宿竄下安慶之說也。厥後接弟信。東征局餉改解南岸。卽思酌改爲北二南一。

茲聞上游之賊，由梅宿竄懷，決計改爲北二南一。其南一之數，不必遽買多米，請先買千石，試運一次看何如。第一次不過運百石而已。口袋千個，已嫌太多。難於買辦，弟乃欲辦八千個，則是誤會兄意。陸運千難萬難，豈有一次運至千石之理。兄忙亂之中，公牘私函，俱欠細思。弟則但求竭力爲之，亦未細思也。

總之，援賊若未至石牌集賢關一帶，則弟試爲我運米一次，以百石爲率，或不運米而運火繩鉛子亦可。援賊若至，則弟可全不管南岸。其經理之人，則京流以張小山爲主，桃樹店以姚秋浦爲主。弟切不可令盛南表弟到東建。盛南是弟處最得力之人，援賊若到安慶，盛南可爲弟代一半之勞也。千萬，千萬。兄已派人往東建，囑盛南速歸矣。（咸豐十一年二月十九日）

致九弟（論人力與天事）

沉弟左右，接來書，具悉一切。昨日雨小而風大，今日風小而雨大。鮑軍勇夫萬餘人，縱能渡江，想初二尙未渡畢。初三則斷不能渡。凡辦大事，半由人力，半由天事。如此次安慶之守，濠深而牆堅，穩靜而不懈，此人力也。其是否不至以一蟻潰堤，以一蠅玷圭，則天事也。各路之赴援，以多鮑爲正，援集賢之師，以成胡爲後路纏護之兵，以朱奉爲助守牆濠之軍，此人事也。其臨陣果否得手，能否不爲狗賊所算，能否不爲狗賊逃遁，此天事也。吾輩但當盡人力之所能爲，國天事則聽之彼蒼而無所容心。弟於人力頗能盡職，而每稱擒殺狗賊云云，則好代天作主張矣。

至催鮑進兵，亦不宜太急。鮑之隊伍，由景德鎮至下隅坂，僅行五日，冒雨遄征，亦可謂極速矣。其鍋帳至今尙未到齊，以泥太深，小車難動也。弟自撫州拔營至景德鎮，曾經數日遇雨，試一回思，能如鮑公此次之迅速乎。潤帥力勸鮑公進兵不必太急，待狗賊求戰，氣竭力疲，而後徐起應之云云。與弟之見正相反。余意不必催鮑急進，亦不必囑鮑緩戰。聽鮑公自行斟酌可也。

多公調度，遠勝於鮑。其馬隊亦數倍於鮑。待多擊退黃文金後，再與鮑軍會勦集賢關，更有把握。

至狗賊雖凶悍。然屢敗於多李鮑之手。未必此次忽較平日更狠。黃文金於洋塘小麥鋪兩敗。軍器丟棄已盡。多鮑之足以制陳黃二賊。理也。人力之可知者也。其臨陣果否得手。則數也。天事之不可知者也。

來書謂狗部有馬賊二千五六百。似亦未確。係臨陣細數乎。抑係投誠賊供乎。聞賊探多假稱投誠者。弟宜慎之。
(咸豐十一年四月初三日)

致四弟（述安慶之得失）

澄侯四弟左右。余在休寧發一信。因皖南軍務棘手。信中預作不測之想。余自休寧回祁門。聞景德鎮克復。左季翁軍三次大獲勝仗。殺賊極多。僞侍王敗潰。鼠竄而去。景德鎮之賊退盡。所有鄱陽浮梁。凡祁門之後路。一律肅清。

余方欣欣有喜色。以爲可安枕而臥。忽聞四眼狗圍逼集賢關外。九弟季弟又十分緊急。不得已抽朱雲巖帶五百人。赴安慶助守於壕內。又調鮑春霖帶八千人。赴安慶助攻於關外。此次安慶之得失。關係吾家之氣運。即關係天下之安危。不知沅季能堅守半月。以待援兵否。

余身體平安。皖南自去冬以來。危險異常。目下大有起色。若安慶能轉危爲安。則事尙可爲耳。
(咸豐十一年三月廿四日)

致四弟（洋船濟賊油鹽）

澄弟左右。余自來東流。心緒略舒。安慶之賊。前紮九壘於中空之處。沅弟又紮六壘於賊之後。並九壘與城。皆以大圍包之。鮑軍亦紮於赤岡嶺。圍賊四壘。皆有可破之理。所慮者。洋船過安慶城。停泊一天。通送油鹽接濟。我雖辛苦圍攻。賊仍供應不斷耳。

四眼狗竄至桐城。恐日內又直竄上游。蹂躪完善之區。瑞州一股。盤踞如故。建德又新來一股。距東流僅四十里。自去年蘇常失守。金陵師潰。目下賊數驟多至數十倍。聞各處敗兵潰勇。多半投賊。故兇悍亦倍於往年。天意茫

茫。不知何日始有轉機也。

余身體平安。徧身生瘡。竟日作痒。自三月下旬至今。幾於無日不雨。自十五後。無日不大風。江水漲添一丈二尺。有奇。重棉猶覺畏寒。洋船上下長江。幾於無日無之。紀澤兒信。亦不爲無見。紀鴻文筆大方。可爲喜慰。（咸豐十一年四月廿四日）

致九弟季弟（須將外壕加挖）

沅弟季弟左右。鮑軍准用民夫。卽日當通行各縣。駭縣於初五日克復。左軍聞亦至景德鎮。或者天從人願。三縣竟可不棄乎。水大異常。於賊則處處不利。然江西兩湖。農不能收種。官不能安居。商不能貿易。口糧更從何處取出。真大憂也。

弟論兵貴精不貴多一段。實有至理。然弟處守外壕內壕。約計七十餘里。萬餘人尙嫌其少。如賊猛撲外內兩壕。地段太長。余深以爲慮。比之左公樂平野戰。迥乎不同。弟切不可存此心。謂人已太多。力已有餘也。若存此心。必致誤事。計外內并守。僅數一班站防。並不能兩班輪替。若賊來輪換猛撲。而守者晝夜不換。豈不可危。弟從此着想。並須將外壕加挖。至壕至壕。

添募本不易易。余令鮑朱唐添募。係探弟與希庵及諸公之言。實則三公均不宜將多也。（咸豐十一年五月初九日）

致九弟（宜作堅守之計）

沅弟左右。劫數之大。良可歎悼。然使堯舜周公。生今之世。亦不能謂此賊不應痛剿。援賊至。呂停驛。日內想已開仗。弟總作一堅守不戰之計。并預作一桐軍小挫之想。諒當足以禦之。

再狗會此次援皖。利在速戰。方今盛夏酷熱。若出隊站立烈日之中。歷二三個時辰之久。任是鐵漢子。亦將渴乏勞疲。若挂草河官軍作堅守之計。任賊誘戰挑戰。總不出隊與之交仗。待其曬過數日後。相機打之。亦一法也。多

禮節謀略最優。不知肯爲此堅忍之著否。弟試與商之。（咸豐十一年六月初六日）

致四弟（必須親往弔唁）

澄弟左右。舅母去世。紀澤往弔後。弟亦往弔唁否。此等處。兄弟中有親往者爲妙。從前星岡公之於彭家。並無厚禮厚物。而意甚懇懃。親去之時甚多。我兄弟宜取以爲法。

大抵富貴人家氣習。禮物厚而情意薄。使人多而親到少。吾兄弟若能彼此常常互相規誡。必有裨益。（咸豐十一年六月十四日）

致九弟（暫緩奏祀望溪）

沅弟左右。望溪先生之事。公私均不甚愜。公牘中須有一事實冊。將生平履歷。某年中舉中進士。某年升官降官。某年得罪。某年昭雪。及生平所著書名。與列祖褒贊其學問品行之語。一一臚列。不作影響約略之詞。乃合定例。望溪兩次獲罪。一爲戴名世南山集序。入刑部獄。一爲其族人方某呈名逆案。將方氏讐族。編入旗籍。雍正間始准赦宥。免隸旗籍。望溪文中所云。「因臣而宥及合族者也。」今欲請從祀孔廟。須將兩案歷奉諭旨。一一查出。尤須將國史本傳查出。恐有嚴旨礙眼者。易干駁詰。從前入祀兩廡之案。數十年而不一見。近年層見迭出。幾於無歲無之。去年大學士九卿等議。覆陸秀夫從祀之案。聲明以後外間不得率請從祀。茲甫及一年。若遽違新例而入奏。必駁無疑。右三者公事之不甚愜者也。

望溪經學。勇於自信。而國朝鉅儒。多不甚推服。四庫書目中於望溪。每有貶詞。最後皇清經解中。并未收其一冊一句。姬傳先生最推崇方氏。亦不稱其經說。其古文號爲一代正宗。國藩少年好之。近十餘年。亦別有宗尚矣。國藩於本朝大儒。學問則宗顧亭林。王懷祖兩先生。經濟則宗陳文恭公。若奏請從祀。須自三公始。李厚菴與望溪。不得不置之後圖。右私志之不甚愜者也。（咸豐十一年六月廿九日）

致九弟（述賊萬難持久）

沅弟左右。嘗此酷暑。賊以積勞之後。遠來攻撲。我軍若專守一靜字法。可期萬穩。多公亦宜用靜字法。此賊萬無持久之道。弟不必慮多軍之久困也。昔曹操八十萬人。自荊州東下。吳以五萬人禦之。而周瑜策其必敗者。一料曹兵不服水土。二料劉表水師新附。不樂爲用。三料暑熱久疲。其後赤壁之役。果不出周郎之所料。德安克復。雪琴專函來報。又言成蔣軍病人太多。不能全進。又聞鮑軍中病者極多。以此而推。狗輔之部。病必更多。故料其不能持久。(咸豐十一年七月十七日)

致九弟(聞安慶克復)

沅弟左右。郭弁到。接喜信。知本日卯刻克復安慶。是時恰值日月合璧。五星聯珠。欽天監於五月具奏。似爲非常祥瑞。今皖城按時應驗。國家中興。庶有冀乎。

此間銀不滿六千。欲湊萬金犒賞將士。弟處可設法辦得四千金否。(咸豐十一年八月初一日)

致九弟(述轅胡潤帥聯)

沅弟左右。調巡湖營由劉家渡拖入白湖之札。今日辦好。即派人送去。吾所慮者。水師不能由大江入白湖。白湖不能通巢湖耳。今僅拖七八丈寬堤。卽入白湖。斯大幸矣。若白湖能通巢湖。則更幸矣。

余昨日作轅潤帥一聯云。「浦寇在吳中。是先帝與蓋臣臨終憾事。薦賢滿天下。願後人補我公未竟勳名。」(咸豐十一年九月十四日)

致九弟(今專守廬江無爲)

沅弟左右。多公信來。日內嘔血甚多。此人勞苦太過。難於速愈。安慶克城。人人僥倖。惟多公尙嫌其薄。弟當以信函慰之。或能親往看視亦好。

李王二鎮水師。究竟堅勁可恃否。望弟細察。

選漕可乘機取。巢縣亦未始不可乘機攻取。吾意取之易而守之難。目下且專守廬江無爲。二處稍息兵勇之方。

亦稍抑其躁氣矜情。待水師肅清葉湖後。運漕棗縣皆囊中物耳。吾於水師實不放心也。（咸豐十一年九月廿五日）

致四弟九弟（莖來共商大計）

澄弟沅弟左右。得趙玉班寄季弟信。知沅弟十月廿八日自長沙還家。竟可趕上初三祭期。至慰至慰。此間軍事平安。三河之賊。無故自退。或與廬州賊目不和。或別有詭謀。均未可知。余令振宇開宇兩營移守三河僑城。而派竹莊之千三百人接守廬江。均札歸多都統就近調度。竹莊自安慶開差。可至廬邑。不知振開兩營。果能守三河要隘否。如守得堅定。則廬郡棗縣亦或易於得手。

浙江自紹興失守後。別無確信。聞寧波繼陷。杭城被圍。可危之至。余素請左宗棠由廣信衢州援浙。又調鮑春霆進攻寧國。寧國距杭僅三百里。亦可掣浙賊之勢。堅杭人之心。第目下均尙未拔行。不知趕得及否。江蘇上海來此請兵之錢調甫。即前任湘撫錢伯瑜中丞之少君也。久住不去。每次泣涕哀求。大約不得大兵同行。即不還鄉。可感可敬。余前許令沅弟帶八千人往救。正月由湘至皖。二月由皖至滬。實屬萬不得已之舉。務望沅弟於年內將新兵六千招齊。正月交盛南帶來。沅則扁舟先來。共商大計。吾家一門。受國厚恩。不能不力保上海重地。上海爲蘇杭及外國財貨所聚。每月可得釐捐六十萬金。實爲天下膏腴。吾今冬派員去提二十萬金。當可得也。

陳舫仙丁內艱。家無兄弟。本應給假回籍治喪。吾因運漕喫緊之地。批令待沅弟來再行給假。茲將原批暨信鈔閱。望沅弟正月到皖。則余不甚失信。至要至要。（咸豐十一年十月十四日）

致四弟九弟（但求保全上海）

澄弟沅弟左右。三河復後。余派振開兩營往守。吳竹莊團防營替守廬江。開營全赴三河。另札將吳羅程歸多都護調度。運漕等處。日內如故。以理揆之。環葉湖四面。廬郡及舒廬無棗五城。運漕東關三河三隘。入者官兵已占

其六。想賊并此二者。亦不能久守矣。推浙江危急。上海亦有唇齒之憂。務望沅弟迅速招勇來皖。替出現防之兵。帶赴江蘇下游。與少荃昌岐同去。得八千陸兵。五千水師。必能保朝廷膏腴之區。慰吳民水火之望也。

京師十月以來。新政大有更張。皇太后垂簾聽政。中外悚肅。余連接廷寄諭旨十四件。倚畀太重。權位太尊。虛望太隆。可悚可畏。漸事想已無及。但求沅弟與少荃二人。能爲我保全上海。人民如海。財貨如山。所裨多矣。慮某一克。余與弟中無梗隔。事局尙可爲也。（咸豐十一年十一月廿四日）

卷七

致九弟（注意訓練新軍及戒用人太濫）

沅弟左右。接弟臘月專丁一緘。具悉一切。

弟於十九日敬辦星岡公撥向事件。起行來營。月杪或可趕到。少荃准於二月杪赴鎮江。弟能早十日趕到。則諸事皆妥。除程學啓外。少荃欲再向弟處分撥千人。余亦欲許之。不知弟有何營可撥。渠赴鎮江。即日將有悍賊尋戰。新勇太多。實不放心。弟進攻巢縣和含一帶。不妨稍遲。待新軍訓練已成。再行進兵可也。

用人太濫。用財太侈。是余所切戒。阿弟之大端。李黃金本屬擬於不倫。黃君心地寬厚。好處甚多。而此二者。弟亦當愛而知其惡也。「在安慶未虐使兵士。未得罪百姓。」此二語。兄可信之。「拚命報國。側身修行。」此二語。弟亦當記之。余近日平安。幼丹撫江。季高撫浙。希庵撫皖。應不至大掣肘。（同治元年正月十四日）

致季弟（慰喪弟婦）

季弟左右。接家信。知季弟婦於二月初七日仙逝。何以一病不起。想係外感之證。弟向來襟懷不暢。適聞此噩耗。諒必哀傷不能自遣。惟弟體亦不十分強壯。尙當違觀節哀。保重身體。應否回藉一行。待沅弟至三山夾。與弟熟商。再行定奪。

長江數百里內，釐下太多。若大通再抽沿釐，恐商賈裹足。有礙大局，擬不批准。荻港釐局，分設爲數無多，擬批令改於華陽鎮分設，爲數較多。弟之所得較厚，又於外江水師，無交涉爭利之嫌，更爲妥善。諸國保重，至要。至要。同治元年二月廿一日。

致九弟季弟（籌辦粵省釐金）

沉弟季弟左右，覆奏朱侍御一疏，定於五日內拜發。請欽派大員再抽廣東全省釐金，余奏派委員隨同辦辦。粵蘇浙贛皖四省之餉，大約所得每月在二十萬上下。勝於江西釐務也。此外實無可生發。計今年春夏必極極窘，秋冬當漸優裕。

馬隊營制，余往年所定，今閱之，覺太寬而近於濫，如公夫長夫之類是也。然業已久行，且姑仍之。弟新立營頭，卽照此辦理。將來裁減，當與華字順字兩營並裁，另行新章也。

上海派洋船來接少荃一軍，帶銀至十八萬兩之多，可駭而亦可憐。不能不令少荃全軍均行，以順輿情。三月之內，陸續拔行。其黃昌岐水軍，則俟三四月之交，遇大順風，直衝下去。弟到暹，可告昌岐來此一晤也。（同治元年三月初三日）

致九弟（咨鄂協解火藥）

沉弟左右，火藥卽日咨請湖北協解五萬，不知見許否。凡與人交際，當求其誠信之素孚，求其協助，當諒其力量所能爲。弟每求人好闊大口，尙不脫官場陋習。余本不敢闊大口，而人亦不能一一應付。但略諒我之誠實耳。四十萬鐵，究竟有著落否。此時子彈亦極少也。

韓正國程學啓初七日開行，少荃初入早開行，輪船不過三四日，可抵上海。余令開字營號補皖勇改淮勇。程云：「必待沉帥緘諭，乃敢改換。」亦足見其不背本矣。廣東全省抽釐專供江浙軍餉一摺，本日拜發。大約秋冬以後，每月可添銀二十萬兩。春夏則苦不堪言耳。（同治元年三月初八日）

致九弟（辦事好手不多）

沅弟左右。接陳東友蔡東祥周惠堂稟。知雍家鎮於十九日克復。惜日內大雨。難以進兵。若跟蹤繼進。則裕溪口亦可得手矣。小泉赴粵。取其不聞罪於人。內端方而外圖融。今聞幼丹有出省赴廣信之行。小泉萬不可赴粵矣。丁雨生筆下條暢。少荃求之幕府相助。兩生不甚願去。恐亦不能至弟處。礙難對少荃也。南坡才大之處。人皆樂爲之用。惟年歲太大。且粵湘交涉事多。亦須留南翁在湘。通一切消息。擬派鶴汀前往。鶴與勞公素相得。待大江通行後。請南翁來此商辦鹽務。或更妥洽。

又接弟信。知巢縣含山。於一日之內克復。欣慰之至。米可以多解。子藥各解三萬。惟辦事之手。實不可多得。察覓得好手。請赴弟處。受山不樂在希帥處。即日當赴左帥大營。亦不便挽留也。（同治元年三月廿七日）

致九弟（抽本省之釐稅）

沅弟左右。接信知弟目下將操練新軍。甚善甚善。惟稱欲過江。斜上四華山紮營。則斷不可。四華山上逼蕪湖。下逼東梁。若一兩月不破此二處。則我軍無勢無趣。不得不退回北岸矣。

弟軍欲渡。總宜在東梁山以下。采石太平一帶。如嫌采石下形勢太寬。即在太平以上渡江。總宜奪金柱關。佔內河江面爲主。余昨言妙處有四。一曰隔斷金陵蕪湖之氣。二曰水師打通涇縣寧國之糧路。三曰蕪湖四面被圍。四曰擡船過東壩。可達蘇州。尤妙之小者耳。

又有最大者。金柱關可設釐卡。每月進數五六萬。東壩可設釐卡。每月亦五六萬。二處皆係蘇皖交界。弟以本省之藩司。抽本省之釐稅。尤爲名正言順。弟應從太平關南渡。毫無疑義。余可代作主張。其遲速則仍由弟作主耳。西梁上下兩岸。從三山起。至采石止。望弟繪一圖寄來。至要至要。（同治元年四月初六日）

致九弟（宜多選好替手）

沅弟左右。水師攻打金柱關時。若有陸兵三千在彼。當易得手。保彭杏南。係爲弟處分統一軍起見。弟軍萬八千

人總須另有二人堪爲統帶者。每人統五六千。弟自統七八千。然後可分可合。杏南而外。尙有何人可以分統。亦須早早提拔。辦大事者以多選替手爲第一義。滿意之選不可得。姑節取其次。以待徐徐教育可也。（同治元年四月十二日）

致四弟（紀鴻俸取縣首）

澄弟左右。紀鴻兒俸取縣首。詩文雖不甚穩愜。而其中多有精警之句。疏宕之氣。寅皆先生時雨之化。可敬可感。嘗略備微儀。以申鄙意。府院考皆當極熱之時。鴻兒體弱。不知能耐此酷暑否。今年鄉試。鴻兒即可不必入場。蓋工夫尙早。年紀太輕。本無望中之理。又恐鴻兒難熬此九日之辛苦也。

軍事平善。多將軍於十四夜攻克廬州府城。皖北數十州縣。爲粵匪所占。今皆克復。一律肅清。只餘二三城。爲捻匪苗逆所占。想亦易於就緒。四眼狗未經擒戮。北竄河南。殊爲後患。

沅弟由西梁山渡江南岸。進攻金柱關。季弟尙在魯港。鮑春霆進攻寧國府徽衢等處。賊皆退江西。今年得保平安。余身體平安。家中不必聖念。（同治元年四月廿四日）

致九弟季弟（注意清慎勤）

沅弟季弟左右。帳棚即日趕辦。大約五月可解六營。六月再解六營。使新勇略得却暑也。小擡槍之藥。與大砲之藥。此間並無分別。亦未製造兩種藥。以後定每月解藥三萬斤至弟處。當不致更有缺乏。王可陞十四日回省。其老營十六可到。到卽派往蕪湖。免致南岸中段空虛。

雪琴與沅弟嫌隙已深。難遽期其水乳。沅弟所批雪信稿。有是處。亦有未當處。弟謂雪聲色俱厲。凡目能見千里而不能自見其睫。聲音笑貌之拒人。每苦於不自見。苦於不自知。雪之厲。雪不自知。沅之聲色。恐亦未始不厲。特不自知耳。

會記咸豐七年冬。余咎駱文耆待我之薄。溫甫則曰。「兄之面色。每予人以難堪。」又記十一年春。樹堂深咎張

仲山簡傲不敬。余則謂樹堂面色亦拒人於千里之外。觀此二者。則沅弟面色之厲。得毋似余與樹堂之不自覺乎。

余家目下鼎盛之際。余忝竊將相。沅所統近二萬人。季所統四五千人。近世似此者。曾有幾家。沅弟半年以來。七拜君恩。近世似弟者。曾有幾人。日中則昃。月盈則虧。吾家亦盈時矣。管子云。斗斛滿則人概之。人滿則天概之。余謂天概之無形。仍假手於人以概之。霍氏盈滿。魏相概之。宣帝概之。諸葛恪盈滿。孫峻概之。吳主概之。待他人之來概而後悔之。則已晚矣。吾家方豐盈之際。不待天之來概。人之來概。吾與諸弟當設法先自概之。自概之道云何。亦不外清慎勤三字而已。吾近將清字改爲廉字。慎字改爲謙字。勤字改爲勞字。尤爲明淺。確有可下手之處。

沅弟昔年於銀錢取與之際。不甚斟酌。朋輩之譏議菲薄。其根實在於此。去冬之買犂頭嘴栗子山。余亦大不謂然。以後宜不妄取分毫。不寄銀回家。不多贈親族。此廉字工夫也。謙之存諸中者不可知。其著於外者。約有四端。曰面色。曰言語。曰書函。曰僕從屬員。沅弟一次添招六千人。季弟並未稟明。徑招三千人。此在他統領斷做不到者。在弟尙能集事。亦算順手。而弟等每次來信。索取帳棚子藥等件。常多譏諷之詞。不平之語。在兄處書函如此。則與別處書函更可知已。沅弟之僕從隨員。頗有氣餒。面色言語。與人酬接時。吾未及見。而申夫曾述及往年對渠之詞氣。至今餘憾。以後宜於此四端。痛加克治。此謙字工夫也。每日臨睡之時。默數本日勞心者幾件。勞力者幾件。則知宣勤王事之處無多。更竭誠以圖之。此勞字工夫也。余以名位太隆。常恐祖宗留貽之福。自我一人享盡。故將勞謙廉三字。時時自惕。亦願兩賢弟之用。以自惕。且即以自概耳。湖州於初三日失守。可憫可憐。同治元年五月十五日。

致九弟季弟（剛柔互用）

沅弟季弟左位。沅於人概天概之說。不甚措意。而言及勢利之天下。強凌弱之天下。此豈自今日始哉。蓋從古已

然矣。從古帝王將相，無人不自由強自立做出，卽爲聖賢者，亦各有自立自強之道。故能獨立不懼，確乎不拔。余往年在京，好與有大名大位者爲仇，亦未始無挺然特立，不畏強禦之意。

近來見得天地之道，剛柔互用，不用偏廢。太柔則靡，太剛則折，剛非暴虐之謂也，強矯而已，柔非卑弱之謂也，謙退而已。趨事赴公，則嘗強矯，爭名逐利，則嘗謙退。開創家業，則嘗強矯，守成安樂，則嘗謙退。出與人物應接，則嘗強矯，入與妻孥享受，則嘗謙退。若一面建功立業，外享大名，一面求田問舍，內圖厚實，二者皆有盈滿之象，全無謙退之意，則斷不能久。此余所深信，而弟宜默體驗者也。（同治元年五月廿八日）

致九弟季弟（述負李次青實甚）

沅弟季弟左右，湖南之米，昂貴異常，東征局無米解來，安慶又苦于碾碓無多，每日不能舂出三百石，不足以應諸路之求。

每月解子藥各三萬斤，不能再多，望弟量入爲出，少操幾次，以省火藥爲囑。

紮營圍閣悉，得幾場大雨，吟崑等營必日鬆矣。處處皆係兩層，前層拒城賊，後層防援賊，當可穩固無虞。少泉代買之洋槍，今日交到一單，待物到卽解弟處，洋物機括太靈，多不耐久，宜慎用之。

次青之事，弟所進箴規，極是，極是。吾過矣，吾過矣。吾因鄭魁士享當世大名，去年袁翁兩處，及京師臺諫，尙畧疏保鄭爲名將，以爲不防與李並舉。又有「鄭罪重，李情輕，暨王銳意招之」等語，以爲比前摺略輕。逮拜摺之後，通首讀來，實使次青難堪。今弟指出，余益覺大負次青，愧悔無地。余生平於朋友中，負人甚少，惟負次青實甚，兩弟爲我設法，有可挽回之處，余不憚改過也。（同治元年六月初二日）

致九弟季弟（須惜士卒精力）

沅弟季弟左右，接少荃信，知僑忠王在上海受創而返，卽日來援金陵，弟等濠牆已固，應足禦之。所慮者，夏月士卒多病，恐隊伍單弱，銀米子藥等事，吾必設法多解。竭平日之力辦之，援賊至金陵，大戰當在七月。

此外弟應需之物，速寫信來。七月初尙可趕到。此間能辦之件，亦必先儘弟營也。臨戰之際，預先愛惜士卒精力，以備屆時辛苦熬夜。猶考試者，場前靜養也。（同治元年六月初八日）

致九弟（望勿各逞己見，注意外間指摘）

沅弟左右。此次洋槍合用，前次解去之百支，果合用否？如有不合之處，一一指出。蓋前次以大價買來，若過於喫虧，不能不一一與之申說也。吾因近日辦事名望，關係不淺，以鄂中疑季之言相告，弟則謂我不應述及外間指摘吾家昆弟過惡。吾有所聞，自當一一告弟，明責婉勸，有則改之，無則加勉，豈可祕而不宣？鄂之於季，自係有意與之爲難，名望所在，是非於是乎出。賞罰於是乎分，卽餉之有無，亦於是乎判。去冬金眉生被數人參劾後，至鈔毀其家，妻孥中夜露立，此豈有萬分之惡哉？亦因名望所在，賞罰隨之也。衆口悠悠，初不知其所自起，亦不知其所由止。有才者忿疑謗之無因，而悍然不顧，則謗且日騰。有德者畏疑謗之無因，而抑然自修，則謗亦日息。吾願弟等之抑然，不願弟等之悍然。弟等敬聽吾言，手足式好，同禦外侮，不願弟等各逞己見於門內，計較其雌雄，反忘外患。

至阿兄忝竊高位，又竊虛名，時時有顛墜之虞。吾通閱古今人物，似此名位權勢，能保全善終者極少。深恐吾全盛之時，不克庇蔭弟等。吾顛墜之際，或致連累弟等。惟於無事時，常以危詞苦語，互相勸誡，庶幾免於大戾耳。（同治元年六月二十日）

致四弟（開用總督關防及鹽政之印信）

澄侯四弟左右。此間軍事，四眼狗糾同五僑王救援安慶，其打先鋒者，已至集賢關。九弟屢信皆言堅守後壕，可保無虞。但能堅守十日半月之久，城中糴米必難再支，可期克復矣。

徽州六屬俱平安。欠餉多者七個月，少者四五月不等。幸軍心尙未渙散。江西省城戒嚴，附近二三十里處，處處皆賊。余派鮑軍往救。湖北之南岸，已無一賊。北岸德安、隨州等處，有金劉與成大吉三軍，必可日有起色。余癘疾

未痊。日來天氣亢燥。甚以爲苦。幸公事勉強能了。近日無積閣之弊。總督關防。鹽政印信。於初四日到營。余卽於初六日開用。

家中雇長沙園丁已到否。菜蔬茂盛否。諸子姪無傲氣否。傲爲凶德。情爲衰氣。二者皆敗家之道。戒情莫如早起。戒傲莫如多走路。少坐轎。望弟留心。傲戒。如聞我有傲情之處。亦寫信來規勸。（同治元年七月十四日）

致九弟季弟（不服藥之利）

沉弟季弟左右。季弟病似瘧疾。近已全愈否。吾不以季弟病之易發爲慮。而以季好輕下藥爲慮。吾在外日久。閱事日多。每勸人以不服藥爲上策。吳彤雲近病極重。水米不進。已十四日矣。十六夜四更。已將後事料理。手函託我。余一概應允。而始終勸其不服藥。自初十日起。至今不服藥。十一天。昨日竟大有轉機。瘧疾減去十之四。呃逆各症。減去十之七八。大約保無他變。

希庵五月之杪。病勢極重。余緘告之云。「治心以廣大二字爲藥。治身以不藥二字爲藥。」并言作梅醫道不可恃。希乃斷藥月餘。近日病已全愈。咳嗽亦止。是二人者。皆不服藥之明效大驗。季弟信藥太過。自信亦太深。故余所慮不在於病。而在於服藥。茲諄諄以不服藥爲戒。望季曲從之。沉力勸之。至要至囑。

季弟信中所商六條。皆可允行。回家之期。不如待金陵克復乃去。庶幾一勞永逸。如營中難耐久勞。或來安慶閒散十日八日。待火輪船之便。復還金陵本營。亦無不可。若能耐勞耐煩。則在營久熬更好。與弟之名曰真。字曰恆者。尤相符合。其餘各條。皆辦得到。弟可放心。

上海四萬尙未到。到時當全解沉處。東征局於七月三萬之外。又月專解金陵五萬。到時亦當全解沉處。東局保案。自可照准。弟保案亦日內趕辦。雪琴今日來省。筱泉亦到。（同治元年七月二十日）

致九弟季弟（不可服藥）

沉弟季弟左右。久不接來信。不知季病全愈否。各營平安否。東征局專解沉餉五萬。上海許解四萬。至今尙未到。

皖。閱新聞紙。其中一條言。何根雲六月初七正法。讀之。悚懼悵惘。

余去歲臘尾。買鹿茸一架。銀百九十兩。嫌其太貴。今年身體較好。未服補藥。亦未吃丸藥。茲將此茸送至金陵。沅弟配置後。與季弟分食之。中秋涼後。或可漸服。但偶有傷風微急。則不宜服。余閱歷已久。覺有病時。斷不可吃藥。無病時。可偶服補劑。修理。亦不可多。吳彤雲大病二十日。竟以不藥而愈。鄧寅皆終身多病。未嘗服藥一次。季弟病時好服藥。且好易方。沅弟服補劑。失之太多。故余切戒之。望弟牢記之。弟營起極早。飯後始天明。甚爲喜慰。吾輩仰法家訓。惟早起務農。疏醫遠巫四者。尤爲切要。(同治元年七月廿五日)

致九弟季弟(金陵似可克復)

沅弟季弟左右。接沅信。排遞一紙。大儼禮神。以驅厲氣。而鼓衆心。或亦足以却病。余寸心憂灼。未嘗少安。一則以弟營與飽營病者太多。爲之心悸。二則各縣禾稼。前傷於旱。繼而蝗蟲陰雨。皆有所損。收成款薄。各軍勇夫七萬人。難於辦米。三則以秦禍日烈。多公不能遠了。袁李皆將去位。長淮南北。千里空虛。天意茫茫。竟不知果有厭亂之期否。

幸季弟瘴疾速愈。大爲欣慰。觀民心之思治。賊情之渙散。金陵似有可克之機。然古來成大功大名者。除千載一郭汾陽外。恆有多少風波。多少災難。談何容易。願與吾弟兢兢業業。各懷臨深履薄之懼。以冀免於大戾。東征局五萬。因此風太大。尙未到省。此月竟止解去五萬。下月必補足也。(同治元年七月廿八日)

致九弟(述保舉人爲難)

沅弟左右。所保各員。均奉允准。惟金安清明論不准調營。寄諭恐弟爲人聳動。蓋因金君經余兩次糾參。朝廷恐余兄弟意見不合也。大抵清議所不容者。斷非一口一疏所能挽回。只好徐徐以待其自定。

近世保人亦有多少爲難之處。有保之而旁人不以爲然。反累斯人者。有保之而本人不以爲德。反成仇隙者。余閱世已深。即薦賢亦多顧忌。非昔厚而今薄也。

景河發樂四卡。左帥業已歸還余處。上海四萬。余志在必得。恐不免大有爭論。霞仙升陝撫。先辦漢中軍務。聞李兩蒼係多帥所劾也。（同治元年八月初二日）

致九弟（述查參金眉生）

沅弟左右。小河西岸。盡爲我有。賊船萬不能過。且憑河爲守。又可當一道長壕。可慰之至。然城內有數十萬悍賊。上游黃胡古賴等。卽日下援金陵。窮寇有致死於我之心。抑又可懼之至。河之東岸。暫不必謀。少息兵力。以打援賊可也。

金眉生參者極多。二三年來。勝帥屢疏保之。升於九天。袁帥屢疏劾之。沉於九淵。余十一年冬。查參革職。勝帥又以一疏劾我。謂爲黨袁而不公。余偶與汪曜奎言之。汪以告勝。勝又寄函於我。自陳前疏之誤。卽如下游諸公。幸吳喬皆痛惡眉而不知其笑。郭又酷好眉而不知其惡。此等處弟須詳詢密查。不可憑立談而遽信其人之生平耳。

餉銀今日解去三萬。湖南又另解四萬於弟。節下當可敷衍。生日在卽。萬不可宴客稱慶。此間謀送禮者。余已力辭之。弟在營亦宜婉辭而嚴卻之。家門太盛。常存日慎一日。而恐其不終之念。或可自保。否則顛蹶之速。有非意料以能及者。（同治元年八月初五日）

致四弟（告軍中病疫）

澄弟左右。沅霆兩軍病疫。迄未稍愈。寧國各屬。軍民死亡相繼。道殣相望。河中積尸生蟲。往往緣船而上。河水及井水。皆不可食。其有力者。用舟載水於數百里之外。穢氣襲人。十病八九。誠宇宙之大劫。軍行之奇苦也。

洪容海投誠後。其黨黃朱等目復叛。廣德州旣得復失。金柱關常有賊窺伺。近聞增至三四萬人。深可危慮。余心所懸念者。惟此一處。

余體氣平安。惟不能多說話。稍多則氣竭神乏。公事積闕。恐不免於貽誤。弟體亦不甚旺。總宜好好靜養。莫買田

園莫管公事。吾所囑者。二語而已。「盛時常作衰時想。上場當念下場時。」富貴人家。不可不牢記此二語也。
同治元年閏八月初四日

致四弟（對本縣父母官之態度）

澄弟左右。沅弟金陵一軍。危險異常。僞忠王率悍賊十餘萬。晝夜猛撲。洋槍極多。又有西洋之落地開花礮。幸沅弟小心堅守。應可保全無慮。

鮑春霆至蕪湖養病。宋國永代統甯國一軍。分六營出剿。小挫一次。春霆力疾回營。凱章全軍亦趕至甯國守城。雖病者極多。而鮑張合力。此路或可保全。又聞賊於東壩拾船至甯郡諸湖之內。將圖衝出大江。不知楊彭能知之否。若水師安穩。則全局不至決裂耳。

來信言余於沅弟。既愛其才。宜略其小節。甚是甚是。沅弟之才。不特吾族所少。即當世亦不多見。然爲兄者。總宜獎其所長。而兼規其短。若明知其錯。而一概不說。則又非特沅一人之錯。而一家之錯也。

吾家於本縣父母官。不必力贊其賢。不可力詆其非。與之相處。宜在若遠若近。不親不疎之間。渠有慶弔。吾家必到。渠有公事。須紳士助力者。吾家不出頭。亦不躲避。渠於前後任之交代。上司衙門之請託。則吾家絲毫不可與聞。弟既如此。並告子姪輩常常如此。子姪若與官相見。總以謙謹二字爲主。（同治元年九月初四日）

致九弟（兵貴機局靈活）

沅弟左右。賊之來援金陵。羣酋大會二次。各路布置周妥而後來。賊處心積慮。以求遲於我。我輕心深入。以僥倖於不可得之城。弟之驟進。余之調度。皆輕敵而不能精密。此次經一番大驚恐。長一分大閱歷。如忠侍等酋解圍而去。弟當趁勢退兵。以傷病羸弱者。循江濱退至金柱關。選精銳者整隊追賊。追至大官圩小丹陽一帶。與鮑軍互爲聲援。待新募之卒到。認真整練。再行進兵。

弟由高郵東壩溧陽以進宜興。鮑由建平廣德以進長興。兩路排進。相去常在百里之內。水師棋布於丹陽石臼

南潯等湖。與陸軍相去常在數十里內。旌旗相望。弟以金柱爲後路根本。處處聯絡。庶無全局瓦裂之患。宜與長興兩城。皆在太湖西岸。陸軍到此作息停頓。待李朝斌水師辦成。駛入太湖後。陸軍再行前進。此大局所關。一年二年之軍勢。不可不早爲定計。

若長紮兩花臺。以二萬勁旅屯宿該處。援賊不來。則終歲清閒。全無一事。援賊再來。則歸路全斷。一蟻潰堤。此等最險之著。只可一試再試。豈可屢屢試之。以爲兵家要訣乎。望弟早早定計。賊不解圍。則忍心堅守。賊若解圍。則以追爲退。不蓋痕蹟。行兵最貴機局生活。弟在吉安安慶。機局已不甚活。至金陵則更呆矣。久晴之後。必若陰雨。下弦之後。夜必晦暗。不知弟處仍能否堅守否。縮壕恐長賊氣。即可定計不縮。營中米糧子藥。究竟尙可支若干日。我自能打算也。（同治元年九月廿一日）

致九弟（述器重杜小舫）

沉弟左右。接十五日十七日信。有畏慎而無拂鬱。極慰極慰。老弟之意量遠矣。先世之氣脈長矣。杜小舫文瀾。往年經郭兩三專函力保。去年又經晏彬甫函保。故余一見卽器重之。許以駐漢口辦督銷局務。近日與南坡亦極水乳。南亦請以漢口督銷局委之。其品望雖未必果翕輿論。然亦當稍優於金許也。許之條陳。多有可采。候與南坡商之。

楊守砲船一事。弟之公牘。甚爲緩遜。卽照弟所擬辦理。末世好以不肖之心待人。欲媒孽老弟之短者。必先說與阿兄不睦。吾之常常欲弟檢點者。卽所以杜小人之讒口也。何銑罪款。斷不放鬆。幸毋聽謠言而生疑。（同治元年九月廿二日）

致九弟（切忌全作呆兵）

沉弟左右。來信欣悉季弟之病。已愈六七分。能進飲食。爲之大慰。李世忠雖十分危迫。然渠始終親駐九洲洲行營。嘗非遽不能支之象。淮浦口官營。被賊攻撲。頗不可解。豈新開河業已乾涸。賊已徧行北岸耶。否則賊能渡大

江而至九嶷洲。不能遽渡。新開河而至北岸。若賊已徧行北岸。則和含巢窟。上至舒同潛太。處處可慮。余擬將希庵部下之駐壽州霍邱三河尖等處者。陸續抽出。移至六安廬州巢含等處。免致已復之城。盡墜前功。苗需霖前後所上僧郢之稟。痛詆楚師。令人闔之髮指。僧郢所與苗黨之札。亦袒護苗練而疏斥楚師。世事變化反覆。往往出乎意想之外。所謂道高一尺。魔高一丈。不飽歷世故。烏知局中之艱難哉。

弟信均接到。添募新營。儘可允許。不變換局面。則斷不能允許。前此向和以重兵株守金陵。不早思變計。以圖賊賊。吾嘗譏其全無智略。今豈肯以向和爲師。而蹈其覆轍乎。再添十營。從弟之請可也。金陵老營。永不拔動。從弟之計可也。

至以數萬人。全作呆兵。圖合長圍。則余斷斷不從。余之拙見。總宜有呆兵。有活兵。有重兵。有輕兵。缺一不可。以萬人爲呆兵。重兵。屯宿金陵。以萬人爲活兵。輕兵。進攻東壩。句容。二溧等處。以八九千人保後路。蕪湖。金柱。隨時策應。望弟熟審。以此次回信定局。(同治元年十月廿七日)

致九弟(擬接季弟靈柩)

沉弟左右。接得十八日辰刻信。知季弟溘逝。哀痛曷極。應商之事。條列如左。

一。余准於三日起行赴金陵。本月內准到。一則與弟商季弟後事。一則親接季弟靈柩。由金陵護送至安慶。載靈柩之船不必大。取其輕便易行者。余坐一長龍船。季樹載一民船。各用數號杉板拖帶。庶上水穩而且快。至安慶後。應否另換大船。俟與弟面商。

一。季弟請卹事。應請少荃出奏。上海現在有威林密輪船在此。廿六七日可過金陵。余信弟信。均可由該船帶滬。一。季弟部下五千人。自當歸併弟處統領。若另有可分統之人。俟余與弟相見後。再行下札。弟久勞之後。繼以憂傷。務當強自寬解。余于兄弟骨肉之際。夙有慚德。愧憾甚多。弟則仁至義盡。毫無遺憾。千萬莫太悲傷。

一。弟信須洋藥等物。余當帶洋藥萬斤。洋帽二十萬。洋槍四百桿。親交弟處。白齋文在上海大鬧。茲將筠仙信付

閱。該軍斷不來矣。只要春霆貼得住。軍務尙可支持也。（同治元年十一月廿二日）

致九弟（述季樞已到此）

沅弟左右。兩日未接弟信。不知金陵各營平安否。季弟觀到此已一日。外間譁聯頗多。無十分稱意者。余因書一聯云。「英名百戰總成空。猴眼看河山。憐余季保此人民。拓此疆土。慧業多生磨不盡。癡心說因果。來世再爲哲弟。並爲勳臣。」亦不稱意也。今日已漆一次。擬在此漆五次。二十日發引登舟。

少荃信來。欲爲季請諡請祠。請加銜立傳。恐已在官奏之後。茲將少荃信鈔閱。朱雲巖因前調青陽之檄。已棄旌德城而回徽。寧郡四面皆賊。深恐難支。（同治元年十二月初十日）

致九弟（作季弟執聯一副）

沅弟左右。昨寄絨後。學山恰到。道弟雖憂勞過甚。而精神完足。爲之少慰。

余在季公館三宿。今日仍回本署。至鹽河一看。新城已修十分之八。十五六可竣工矣。

九洲圖。迄無善本。余倩人畫一幅。以應恭邸之求。茲將副本寄弟一閱。果不甚差謬否。

春霆久無來信。懸系之至。

昨夕擬爲季弟作墓志。竟夜未成一字。卻又得執聯一副云。「大地干戈十二年。舉室效愚忠。自稱家國報恩子。諸兄離散三千里。音書寄綿猴。同哭天涯急難人。」或用弟名寫之。或不用寫。尙未定也。（同治元年十二月十一日）

致九弟（派送季樞歸里）

沅弟左右。季弟墓志作就。不甚稱意。唐鶴九所寄執聯極佳。云。「秀才肩半壁東南。方期一戰成功。挽回劫運。當世號滿門忠義。豈料三河灑淚。又隕臺星。」余欲改成功二字爲功成。改灑淚二字爲痛定。似更妥叶。

余僅派戈什哈一人送季樞。蓋以弟所派諸人。凡事皆有條理。不必更派文武委員。反致紛亂也。（同治元年十

二月十八日

致四弟（述爲季弟治喪並家中來接柩事）

澄弟左右。接弟來信。知已得季弟淪逝之信。將在荷葉宅內爲季治喪發引。季弟此次身後之事。沅在金陵。辦得十分整齊。余於初九日接進安慶。二十發引登舟。一切未敢稍忽。大致與七年先大夫之喪。禮儀規模。一一相似。亦係新製六十四人輿。新製高脚牌。輓聯稍少。祭幛則較七年更多。身後之虛榮。在季弟可稱全備。前沅弟意。季櫬到湘鄉後。不必更進紫田荷葉等屋。余意亦以爲然。望弟即照此辦理。將季櫬從北港徑至馬公塘山內。千妥萬妥。

古人云。「祭不欲數。數則煩。煩則不敬。」祭尙不可煩瀆。况喪禮而可煩瀆乎。余係一家之主。安慶係省會之地。又係季弟克復之城。一切禮儀。在此行之。即在此發引登山。想季弟之英靈。亦必默鑒。深以爲然。

再季弟靈柩。自金陵至安慶。七百里而走十六日。甚爲遲滯。此次二十日。自安慶開船。計程至湘潭二千里。應須四十餘日乃可到。當在二月十五後矣。然風信無定。或遇順風早到。亦未可知。自湘潭至北港。又須七八日。家中辦接柩事。總在二月初十以後。葬馬公塘則不進荷葉。不葬馬公塘則必進荷葉。二者聽弟一言決斷。余與沅相隔太遠。往返商酌。恐致誤事。不敢造斷也。

季弟升知府。贈按察使。兩次諭旨寄回。李中丞又奏請照二品例議卹。請諡請祠。恐更有後命。二十日業經題主。須政題耳。（同治元年十二月廿二日）

致九弟（述爲季弟請諡）

沅弟左右。少荃爲季弟請諡請祠。摺稿昨日寄到。茲鈔寄弟一閱。是否俞允。殊不敢必。但吾與弟將來若再立功。克復金陵。則請諡亦終可望允准。兩宮太后及恭邸。力求激揚揚清。賞罰嚴明。但患無可賞之實。不患無不次之賞。而罰罪亦毫不假借。如去年之誅二王一相。今年之戮林米與何。近日拿問勝帥。又拿問前任蘇藩司蔡映

斗進京。諭旨皆嚴切異常。吾輩忝當重任。不特無意外之罰。而特無可罰之實。少荃解銀四萬。吾暫不解弟處。且解飽張兩軍各二萬。爲度歲之資。弟處昨日解銀四萬。年內必到。其解錢二萬串。今日用民船解去。年內之能到與否。未可知也。澄弟昨有信來。言季櫛不宜附葬馬公塘。其言亦頗近理。余因相隔太遠。不敢遙決。請澄自行決斷。（同治元年十二月廿三日）

致九弟（整頓陳棟之勇）

沉弟左右。陳棟之勇。除已至金陵三營外。尙有九營。吾昨令營務處點名。共四千六百餘人。聞精壯者不甚多。可汰者占三分之一。余札撥二營與飽春雲。撥一營與朱雲巖。以大營歸弟處。若果汰去三分之一。則可挑存四營。其餘或令全坐原船遣歸。或酌留數百。作爲餘勇。聽弟裁度。

昨奉年終額賞。稻字荷包食物之類。聞弟有一分。春雲亦有一分。此係特恩。吾兄弟報國之道。總求實浮於名。勞浮於賞。才浮於事。從此三句切切實實做去。或者免於大戾。（同治二年正月十三日）

致九弟（申請辭退一席）

沉弟左右。疏辭兩席一節。弟所說甚有道理。然處大位大權。而兼享大名。自古曾有幾人。能善其末路者。總須設法將權位二字。推讓少許。減去幾成。則晚節漸漸可以收場耳。今因弟之所陳。不復專疏奏請。遇便仍附片申請。但能於兩席中辭退一席。亦是一妙。

李世忠處。余擬予以一函。一則四壩卡請歸余派員經收。其銀錢仍歸渠用。一則渠派人在西壩。封捆淮北之鹽。與搶奪無異。請其迅速停止。看渠如何回復。

本月接兩次家信。交來人帶寄弟閱。鼎三姪善讀書。大慰大慰。其眉宇本軒昂出羣。又溫弟鬱抑過甚。必有稍伸之一日也。弟軍士氣甚旺。可喜。然軍中消息甚微。見以爲旺。卽過驕機。老子云。「兩軍相對。哀者勝矣。」其義最宜體諒。（同治二年正月十七日）

致九弟（述彼此意趣之不同）

玩弟左右。左臂疼痛。不能伸縮。實深懸系。茲畀人送膏藥三個與弟。即余去年貼手臂而立愈者。可試貼之。有益無損也。

拂意之事。接於耳目。不知果指何事。若與阿兄間有不合。則儘可不必拂鬱。弟有大功於家。有大功於國。余豈有不感激不愛護之理。

余待希厚雲。靈諸君。頗自覺仁讓兼至。豈有待弟反薄之理。惟有時與弟意趣不合。弟之志事。頗近春夏發舒之氣。余之志事。頗近秋冬收蓄之氣。弟意以發舒而生機乃旺。余意以收蓄而生機乃厚。平日最好肯人「花未全開月未圓」七字。以爲惜福之道。保泰之法。莫精於此。曾屢次以此七字教誡春靈。不知與弟道及否。

星岡公昔年待人。無論貴賤老小。純是一團和氣。獨對子孫諸姪。則嚴肅異常。遇佳時令節。尤爲凜凜不可犯。蓋亦具一種收蓄之氣。不使家中歡樂過節。流於放肆也。余於弟營保舉銀錢軍械等事。每每稍示節制。亦猶本「花未全開月未圓」之義。至危迫之際。則救焚拯溺。不復稍有所吝矣。弟意有不滿處。皆在此等關頭。故將余之襟懷揭出。俾弟釋其疑而豁其鬱。此關一破。則余兄弟絲毫皆合矣。

再余此次應得一品廕生。已於去年八月咨部。以紀瑞姪承廕。因恐弟辭讓。故當時僅告澄而未告弟也。將來瑞姪滿二十歲時。紀澤已三十矣。同去考廕。同當部曹。若能考取御史。亦不失世家氣象。以弟於祖父兄弟宗族之間。竭力竭誠。將來後輩必有可觀。目下小忿。斷不爲害。但今年切不宜親自督隊耳。（同治二年正月十八日）

致九弟（述紀梁宜承廕）

玩弟左右。臂疼尙未大愈。至爲懸念。然治之之法。只宜貼膏藥。不宜服水藥。余日內當赴金陵看視。正月當成行也。

營奉寄諭。知少荃爲季弟請二品卹典立傳。予諡建祠。一一允准。但未接閣諭旨耳。陳棟之勇旣好。甚慰甚慰。記

樂宜靡一節。予亦思之再四。以其目未全愈。讀書作字。均難加功。弟且有功於家庭根本之地。不特爲同氣之冠。亦爲各族所罕。質諸祖父在天之靈。亦應如此。

九欲州北渡之賊。果有若干。吾意尙以南岸爲重。劉南雲王峯臣兩軍。幸勿遽調北渡。蓋北岸守定安合無慮。舒五城。此外均可挽救。南岸若失甯國。則不可救矣。（同治二年正月廿七日）

致九弟（論恬淡冲融之襟懷）

沉弟左右。弟讀邵子詩。領得恬淡冲融之趣。此是襟懷長進處。自古聖賢豪傑。文人才士。其志事不同。而其豁達光明之胸。大略相同。以詩言之。必先有豁達光明之識。而後有恬淡冲融之趣。自李白韓退之杜牧之。則豁達處多。陶淵明孟浩然白香山則冲淡處多。杜蘇二公。無笑不備。而杜之五律最冲淡。蘇之七古最豁達。邵堯夫雖非詩之正宗。而豁達冲淡。二者兼全。吾好讀莊子。以其豁達足益人胸襟也。去年所講「生而笑者。若知之。若不知之。若聞之。若不聞之」一段。最爲豁達。推之即舜禹之有天下而不與。亦同此襟懷也。

吾輩現辦軍務。係處功利場中。宜刻刻勤勞。如農之力穡。如賈之趨利。如篙工之上灘。早作夜思。以求有濟。而治事之外。此中却須有一段豁達冲融氣象。二者並進。則勤勞而以恬淡出之。最有意義。余所以令刻「勞謙君子」。抑章與弟者此也。

少荃已克復太倉州。若再克崑山。則蘇州可圖矣。吾但能保沿江最要之城隘。則大局必日振也。（同治二年二月廿四日）

致九弟（儘可隨時陳奏）

沉弟左右。弟之謝恩摺。尙可由安慶代作代寫代遞。初膺開府重任。心中如有欲說之話。思自獻於君父之前者。儘可隨時陳奏。奏議是人臣最要之事。弟須加一番工夫。弟文筆不患不詳明。但患不簡潔。以後從簡當二字上著力。（同治二年四月初一日）

致九弟（不必再行辭謝）

沅弟左右。辭謝一事。本可揮揮言之。但求收回成命。已請筱泉子密代弟與余各擬一摺矣。昨接弟咨。已換署新銜。則不必再行辭謝。吾輩所最宜畏懼敬慎者。第一則以方寸爲嚴師。其次則左右近習之人。如巡捕戈什幕府文案。及部下營哨官之屬。又其次乃長清議。今業已換稱新銜。一切公文體制。爲之一變。而又具疏辭官。已知其不出於至誠矣。

弟應奏之事。暫不必忙。左季帥奉專銜奏事之旨。厥後三個月始行拜疏。雪琴巡撫及侍郎後。除疏辭復奏二次後。至今未另奏事。弟非有要緊事件。不必專銜另奏。尋常報仗。仍由余辦可也。（同治二年四月十六日）

致九弟（營大事宜明強）

沅弟左右。來信亂世功名之際。頗爲難處。十字。實獲我心。本日余有一片。亦請將欽篆督篆。二者分出一席。另簡大員。吾兄弟常存兢兢業業之心。將來遇有機緣。即便抽身引退。庶幾善始善終。免蹈大戾乎。

至於擔當大事。全在明強二字。中庸學問。思辨行五者。其要歸於思必明。柔必強。弟向來倔強之氣。却不可因位高而頓改。凡事非氣不舉。非剛不濟。即修身齊家。亦須以明強爲本。某縣既克。和合必可得手。以後進攻二浦。望弟主持。余相隔太遠。不遑制也。（同治二年四月廿七日）

致九弟（欣悉家庭和睦）

沅弟左右。苦攻無益。又以皖北空虛之故。心急如焚。我弟憂勞如此。何可再因上游之事。添出一番焦灼。上游之事。千妥萬妥。兩岸之事。皆易收拾。弟積勞太久。用心太苦。不可再慮及他事。

弟以博文約禮獎澤兒。語太重大。然此兒純是弟獎借而日進。記咸豐七年冬。胡帥寄余信。極贊三庵一琴之賢。時溫弟在座。告余曰。「沅弟實勝迪希厚雪。」余比尙不深信。近見弟之圍攻百數十里。而毫無罅隙。欠餉數百萬。而毫無怨言。乃信溫弟之譽有所試。然則弟之譽澤兒者。或亦有所試乎。

余於家庭。有一欣慰之端。聞妯娌及子姪輩。和睦異常。有妻被同眠之風。愛敬兼至。此足卜家道之興。然亦全賴老弟分家時。布置妥善。乃克臻此。余俟江西案辦妥。乃赴金陵。弟千萬莫過憂灼。至囑至囑。(同治二年六月初一日)

致九弟(戰事宜自具奏)

玩弟左右。專丁送信。具悉一切。所應復者。仍條列如左。

一。摺稿皆軒爽條暢。儘可去得。余平日好讀東坡上神宗皇帝書。亦取其軒爽也。弟可常常取閱。多閱數十遍。自然益我神智。譬如飲食。但得一殺適口充腸。正不必求多品也。金陵戰事。弟自行具奏亦可。然弟總以不常奏事爲妥。凡督撫以多奏新事。不襲故常爲露面。吾兄弟在此鼎盛之際。弟於此等處。可略退縮一步。

二。鮑軍仍須有大勝關進孝陵衛。決不可由下面繞來。待過中秋後。弟信一到。余別咨鮑由南頭進兵。

三。弟驟添兵營。與余平日規模不符。故賊勢窮蹙之際。求合圍亦是正辦。余亦不敢以弟策爲非。憚中丞余曾保過。凡大臣密保人員。終身不宜提及一字。否則近於挾長。近於市恩。此後余與湘中函牘。不敢多索餉項。以避挾長市恩之嫌。弟不宜求之過厚。以避盡歡竭忠之嫌。

一。江西釐務。下半年當可略旺。然余統兵已近十萬。即半餉亦須三十萬。思之膽寒。弟處米除每月三千石外。本日又解四千石矣。(同治二年七月廿三日)

致九弟(在積勞二字上著九)

玩弟左右。接初五夜地道轟陷賊城十餘丈。被該逆搶堵。我軍傷亡三百餘人。此蓋意中之事。城內多百戰之寇。闕歷極多。豈有不能搶堵缺口之理。蘇州先復。金陵尙遙遙無期。弟切不可焦急。

古來大戰爭。大事業。人謀僅占十分之三。天意恆居十分之七。往往積勞之人。非即成名之人。成名之人。非即享福之人。此次軍務。如克復武漢九江安慶。積勞者即是成名之人。在天意已算十分公道。然而不可恃也。吾兄弟

但在積勞二字上着力。成名二字，則不必問及。享福二字，則更不必問矣。

厚庵堅請回籍養親侍疾。只得允准。已於今日代奏。苗逆於二十六夜擒斬。其黨悉行投誠。凡善州正陽潁上下蔡等城。一律收復。長淮指日肅清。真堪慶幸。弟近日身體健否。吾所嚮者二端。一曰天懷淡定。莫求速效。二曰謹防援賊。城賊內外猛撲。穩慎禦之。（同治二年十一月十二日）

致四弟（注意儉字）

澄弟左右。圍山背橋稍嫌用錢太多。南塘竟希公祠宇。亦儘可不起。沅弟有功於國。有功於家。千好萬好。但規模太大。手筆太廓。將來難平爲繼。吾與弟當隨時斟酌。設法裁減。此時竟希公祠宇。業將告竣。成事不說。其星岡公祠及溫甫事恆兩弟之祠。皆可不修。且待過十年之後再看。至囑至囑。

余往年選聯贈弟。有一儉以養廉。直而能忍。二語。弟之直。人人知之。其能忍。則爲阿兄所獨知。弟之廉。人人料之。其不儉。則阿兄所不及料也。以後望弟於儉字加一番工夫。用一番苦心。不特家常用度宜儉。即修造公費。周濟人情。亦有一儉字意思。總之愛惜物力。不失寒士之家風而已。吾弟以爲然否。（同治二年十一月十四日）

致四弟（勤儉首要）

澄弟左右。吾不欲多寄銀物至家。總恐老輩失之奢。後輩失之驕。未有錢多而子弟不驕者也。吾兄弟欲爲先人留遺澤。爲後人惜餘福。除却勤儉二字。別無做法。弟與沅弟皆能勤而不能儉。余微儉而不甚儉。子姪看大眼。吃大口。後來恐難挽。弟須時時留心。（同治三年正月十四日）

致四弟（宜勸諸姪勤讀）

澄弟左右。沅弟營中久無戰事。金陵之賊。亦無糧盡確耗。杭州之賊。目陳炳文。聞有投誠之信。克復當在目前。天氣陰雨作寒。景象亦不甚佳。吾在兵間日久。實願早滅此寇。俾斯民稍留子還。而觀此消息。竟未知何日息兵也。紀澤兄弟及王翊羅塔讀書。均屬有恆。家中諸姪。近日勤奮否。弟之勤。爲諸兄弟之最。儉字工夫。日來稍有長進。

否。諸姪不知儉約者。弟常常訓責之否。(同治三年三月初四日)

致九弟(毋惱毋怒以養肝疾)

沅弟左右。適聞常州克復。丹陽克復之信。正深欣慰。而弟信中有云。「肝病已深。痛疾已成。逢人輒怒。遇事輒憂等語。」讀之不勝焦慮。今年以來。蘇浙克城甚多。獨金陵遲遲尙無把握。又餉項奇絀。不如意之事機。不入耳之言語。紛紛迭乘。余尙溫鬱成疾。况弟之勞苦過甚。百倍阿兄。心血久虧。數倍於阿兄乎。

余自春來。常恐弟發肝病。而弟信每含糊言之。此四句乃露實情。此病非藥餌所能爲力。必須將萬事看空。毋惱毋怒。乃可漸漸減輕。蝮蛇螫手。則壯士斷其手。所以全生也。吾兄弟欲全其生。亦當視惱怒如蝮蛇。去之不可不勇。至囑至囑。

余年來愧對老弟之事。惟調撥程學啓一名。將有損於阿弟。然有益於國。弟不必過鬱。兄亦不必過悔。頃見少荃爲程學啓請卹一疏。立言公允。茲特寄弟一閱。

李世忠事。十二日奏結。又餉絀情形一片。卽爲將來兄弟引退之張本。余病假於四月廿五日滿期。余意再請續假。幕友皆勸銷假。弟意以爲何如。

淮北稟醫課釐兩項。每歲共得八十萬串。擬概供弟一軍。此亦鉅款。而弟尙嫌其無幾。余於咸豐四五六七八九等年。從無一年收過八十萬者。再籌此等鉅款。萬不可得矣。(同治三年四月十三日)

致九弟(心肝之病以自養自醫爲主)

沅弟左右。厚庵到皖。堅辭督辦一席。渠之赴江西與否。余不能代爲主持。至於具摺。則必須渠親自陳奏。余斷不能代辭。厚帥現擬在此辦摺。拜疏後仍回金陵水營。春霆昌岐聞亦日內可到。春霆回籍之事。却不能不代爲奏懇也。

弟病今日少愈否。肝病余所深知。腹疼則不知何症。屢觀明山脈案。以扶脾爲主。不求速效。余深以爲然。然心肝

兩家之病。究以自養自醫爲主。非藥物所能爲力。今日偶過稜臺店。見弟所寫對聯。光彩煥發。精力似甚充足。若能認真調養。不過焦灼。必可漸漸復元。(同治三年五月初十日)

致九弟(鬱怒最易傷人)

沅弟左右。內疾外症。果愈幾分。凡鬱怒最易傷人。余有錯處。弟儘可一一直說。人之忌我者。惟願弟做錯事。惟願弟之不恭。人之忌弟者。惟願兄做錯事。惟願兄之不友。弟看破此等物情。則知世路之艱險。而心愈抑長。氣反和平矣。(同治三年五月廿三日)

致四弟(教家中以勤儉爲主)

澄弟左右。余在金陵。二十日起行至安慶。內外大小平安。門第太甚。余教兒女輩。惟以勤儉謙三字爲主。自安慶以至金陵。沿江六百里。大小城隘。皆沅弟之所攻取。余之幸得大名。皆沅弟之所贈送也。皆高曾祖父之所留遺也。

余欲上不愧先人。下不愧子弟。惟以力教家中勤儉爲主。余於儉字做到六七分。勤字則尙無五分工夫。弟與沅弟。於勤字做到六七分。儉字則尙欠工夫。以後勉其所長。各戒其所短。弟每用一錢。均須三思。至。 (同治三年八月初四日)

致四弟九弟(述峻秦淮河及書信往來論文事)

澄沅兩弟左右。臘月初六接沅弟來信。知已平安到家。慰幸無已。少荃於初六日起行。已抵蘇州。余於十四日入闈寫榜。是夜二更發榜。正榜二百七十三。副榜四十八。闈墨極好。爲三十年來所未有。

韞齋先生與副主考亦極得意。士子歡欣傳誦。韞師定於二十六日起程。平景孫編修奏請便道回浙。此間公私送程儀約各三千有奇。各營挑浚秦淮河。已浚十分之六。約年內可以竣事。澄弟所勸大臣大儒致身之道。敬悉敬悉。惟目下精神。實不如從前耳。

鳴原堂論文鈔。東坡萬言書。弟閱之如尙有不能解者。宜寫信來問。弟每次問幾條。余每次批幾條。兄弟論文於三千里外。亦不減對床風雨之樂。弟以不能文爲此身缺憾。宜趁此家居時。苦學二三年。不可拋荒片刻也。（同治三年十二月十六日）

致九弟（講求奏議不遲）

沅弟左右。弟信言寄文每月以六篇爲率。余意每月三次。每次未滿千字者則二篇。千字以上者則止一篇。選文之法。古人選三之二。本朝人選三之一。不知果當弟意否。

弟此時講求奏議。尙不爲遲。不必過懊惱。天下督撫二十餘人。其奏疏有過弟者。有魯衛者。有不及者。弟此時用功。不求太猛。但求有恆。以吾弟攻金陵之苦力。用之他事。又何事不可爲乎。（同治四年正月廿四日）

致四弟九弟（述軍情）

澄沅兩弟左右。紀瑞姪得取縣案首。喜慰無已。吾不望代代得富貴。但願代代有秀才。秀才者。讀書之種子也。世家之招牌也。禮義之旂幟也。諄囑瑞姪從此奮勉加功。爲人與爲學並進。切戒驕奢二字。則家中風氣日厚。而諸子姪爭相濯磨矣。

吾自受督辦山東軍務之命。初九十三日兩摺。皆已寄弟閱看。茲將兩次批諭鈔閱。吾於廿五日起行登舟。在河下停泊三日。待遣回之十五營。一概開行。帶去之六營。一概拔隊。然後解維長行。茂堂不願久在北路。擬至徐州度暑。九月間准茂堂還湘。勇丁有不願留徐者。亦聽隨茂堂歸。總使吉中全軍。人人榮歸。可去可來。無半句閒話。惹人談論。沅弟千萬放心。

余舌尖蹇澀。不能多說話。諸事不甚耐煩。幸飲食如常耳。沅弟濕毒未滅。懸系之至。藥物斷難收效。總以能養能睡爲妙。（同治四年五月廿五日）

致四弟九弟（寄銀與親族三黨）

澄沅兩弟左右。余經手事件。只有長江水師。應撤者尙未撤。應改爲額兵者尙未改。暨報銷二者。未了而已。今冬必將水師章程出奏。并在安慶設局。辦理報銷。諸事清妥。則余兄弟或出或處。或進或退。綽有餘裕。

近四年每年寄銀少許與親屬三黨。今年仍循此例。惟徐州距家太遠。勇丁不能攜帶。因寫信與南坡。請其在鹽局匯兌。余將來在揚州歸款。請兩弟照單封好。用紅紙簽寫「菲儀」等字。年內分送。千里寄出毫毛。禮文不可不敬也。（同治四年十一月十六日）

致四弟（述養身五事）

澄弟左右。鄉間穀價日賤。禾豆暢茂。猶是昇平景象。極慰極慰。賊自三月下旬。退出曹鄆之境。幸保山東運河以東各屬。而仍蹂躪及曹宋徐泗鳳淮諸府。彼勦此竄。倏忽來往。直至五月下旬。張牛各股。始竄至周家口以西。任賴各股。始竄至太和以西。大約夏秋數月。山東江蘇。可以高枕無憂。河南皖鄂。又必手忙脚亂。

余擬於數日內。至宿遷桃源一帶。察看隄牆。卽於水路上臨淮而至周家口。盛暑而坐小船。是一極苦之事。因陸路多被水淹。雇車又甚不易。不得不改由水程。余老境日逼。勉強支持一年半載。實不能久當大任矣。因思吾兄弟體氣皆不甚健。後輩子姪。尤多虛弱。宜於平日講求養身之法。不可於臨時亂投藥劑。

養身之法。約有五事。一曰眠食有恆。二曰懲忿。三曰節慾。四曰每夜臨睡洗脚。五曰每日兩飯後。各行三千步。懲忿卽余篇中所謂養生以少惱怒爲本也。眠食有恆。及洗脚二事。星岡公行之四十年。余亦學行七年矣。飯後三千步。近日試行。自矢永不間斷。弟從前勞苦太久。年近五十。願將此五事立志行之。並勸沅弟與諸子姪行之。余與沅弟同時封爵開府。門庭可謂極盛。然非可常恃之道。記得己亥正月。星岡公訓竹亭公曰。「寬一雖點翰林。我家仍靠作田爲業。不可靠他吃飯。」此語最有道理。今亦當守此二語爲命脈。望吾弟專在作田上用工。輔之以「書蔬魚箔。早掃考寶」八字。任憑家中如何貴盛。切莫全改道光初年之規模。凡家道所以可久者。不恃一時之官爵。而恃長遠之家規。不恃一二人之驟發。而恃大衆之維持。我若有福。罷官回家。當與弟竭力維持。老

親舊眷。貧賤族黨。不可怠慢。待貧者亦與富者一般。嘗盛時預作衰時之想。自有深固之基矣。（同治五年六月初五日）

致九弟（宜在自修處求強）

沅弟左右。接弟信。具悉一切。弟謂命運作主。余所深信。謂自強者。每勝一籌。則余不甚深信。凡國之強。必須多得賢臣。凡家之強。必須多出賢子弟。此亦關乎天命。不盡由於人謀。至一身之強。則不外乎北宮黝孟施舍曾子三種。孟子之集義而慊。即曾子之自反而縮也。惟曾孟與孔子告仲由之強。略爲可久可常。此外關智鬪力之強。則有因強而大興。亦有因強而大敗。古來如李斯曹操董卓楊素。其智力皆橫絕一世。而其禍敗亦迥異尋常。近世如陸何蕭陳。皆予知自雄。而俱不保其終。故吾輩在自修處求強則可。在勝人處求強則不可。若專在勝人處求強。其能強到底與否。尙未可知。即使終身強橫安穩。亦君子所不屑道也。

賊匪此次東竄。東軍小勝二次。大勝一次。劉潘大勝一次。小勝數次。似已大受懲創。不似上半年之猖獗。但求不竄陝洛。即竄鄂境。或可收夾擊之效。

余定於明日請續假一月。十月請開各缺。仍留軍管刻一木戡。會辦中路勦匪事宜而已。（同治五年九月十二日）

致四弟（送銀共患難者及述星剛公之家規）

澄弟左右。余於十月廿五。接入觀之旨。次日寫信召紀澤來營。厥後又有三次信。止其勿來。不知均接到否。自十一月初六。接奉回江督任之旨。十七日已具疏恭辭。廿八日又奉旨令回本任。初三日又具疏懇辭。如果不獲命。尙當再四疏辭。但受恩深重。不敢遽求回籍。留營調理而已。余從此不復作官。

同鄉京官。今冬炭敬。猶須照常餽送。昨令李翥漢回湘。送羅家二百金。李家二百金。劉家百金。昔年曾共患難者也。前致弟處千金。爲數極少。自有兩江總督以來。無待胞弟如此之薄者。然處茲亂世。錢愈多則患愈大。兄家與

弟家。總不宜多存現銀現錢。每年足敷一年之用。便是天下之大富。人間之大福矣。家中要得興旺。全靠出賢子弟。若子弟不賢不才。雖多積銀積錢。積穀積產。積書積衣。總是枉然。

子弟之賢否。六分本於天生。四分由於家教。吾家世代皆有明德明訓。惟星岡公之教。尤應謹守牢記。吾近將星岡公之家規。編成八句云。「書蔬豬魚。考早掃寶。常設常行。八者都好。地命醫理。僧巫祈禱。留客久住。六者俱惱。」蓋星岡公於地命醫僧巫五項人進門便惱。即親友遠客久住亦惱。此八好六惱者。我家世世守之。永爲家訓。子孫雖愚。亦必使就範圍也。（同治五年十二月初六日）

致九弟（一悔字訣）

沉弟左右。鄂督五福堂有回祿之災。幸人口無急。上房無急。受驚已不小矣。其屋係板壁紙糊。本易招火。凡遇此等事。只可說打雜人役失火。固不可疑會匪之毒謀。尤不可怪仇家之奸細。若大驚小怪。胡想亂猜。生出多少枝葉。仇家轉得傳播以爲快。惟有處處泰然。行所無事。申甫所謂「好漢打脫牙和血吞。」星岡公所謂「有福之人善退財。」真處逆境者之良法也。

弟求兄隨時訓示申做。兄自問近年得力。惟有一悔字訣。兄昔年自負本領甚大。可屈可伸。可行可藏。又每見得人家不是。自從丁巳戊午大悔大悟之後。乃知自己全無本領。凡事都見得人家有幾分是處。故自戊午至今九載。與四十歲以前迥不相同。大約以能立能達爲體。以不怨不尤爲用。立者。發奮自強。站得住也。達者。辦事圓融。行得通也。

吾九年以來。痛戒無恆之弊。看書寫字。從未間斷。選將練兵。亦常留心。此皆自強能立工夫。奏疏公牘。再三斟酌。無一過當之語。自誇之辭。此皆圓融能達工夫。至於怨天本有所不敢。尤人則尙不能免。亦皆隨時強制而克去之。

弟若欲自做湯。似可學阿兄丁巳二年之悔。然後痛下鍼砭。必有大進。立達二字。吾於己未年。曾寫於弟之手卷

中。弟亦刻刻思自立自強。但於能遠處尙欠體驗。於不怨尤處。尙難強制。吾信中言皆隨時指點。勸弟強制也。趙廣漢本漢之賢臣。因星變而劾魏相。後乃身當其災。可爲殷鑒。默存一悔字。無事不可挽回也。（同治六年正月初三日）

致九弟（必須逆來順受）

沅弟左右。接李少帥信。知春霆因弟覆奏之片。言省二條與任逆接仗。霆軍係與賴逆交鋒。大爲不平。自奏傷疾舉發。請開缺調理。又以書告少帥。謂弟自占地步。弟當此百端拂逆之時。又添此至交齟齬之事。想心緒益覺難堪。然事已如此。亦只有逆來順受之法。仍不外悔字訣。硬字訣而已。

朱子嘗言。「悔字如春。萬物蘊蓄初發。吉字如夏。萬物茂盛已極。吝字如秋。萬物始落。凶字如冬。萬物初凋。」又嘗以元字配春。享字配夏。利字配秋。貞字配冬。凡意貞字即硬字訣也。弟當此艱危之際。若能以硬字法冬藏之德。以悔字啓春生之機。庶幾可挽回一二乎。

聞左帥近日亦極謙慎。在漢口氣象何如。弟曾聞其大略否。申甫閱歷極深。若遇危難之際。與之深談。渠尙能於惡風駭浪之中。默識把柁之道。在司道中。不可多得也。（同治六年三月初二日）

致四弟九弟（諭旨飭沅陸見）

澄沅兩弟左右。初二日接奉寄諭。飭沅弟迅速進京。陸見。茲用排單恭錄諭旨。咨至弟處。上年十二月。韞齋先生力言京師士大夫於沅弟毫無間言。余即知不久必有諭旨徵召。特不料有如是之速。余擬於日內覆奏一次。言弟所患夜不成寐之病。尙未痊愈。趕緊調理。一俟稍痊。即行進京。一面函商臣弟國荃。今將病狀詳細陳明云云。沅弟奉旨後。望作一摺。寄至金陵。附余發摺之便覆奏。

余意不寐屢醒之症。總由元二兩年用心太過。肝家亦暗暗受傷。必須在家靜養一年。或可奏效。明春再行出山。方爲妥善。若此後再有諭旨來催。亦須稍能成寐。乃可應詔急出。不審兩弟之意。以爲何如。筱荃來撫吾湘。諸事

尙不至大有更張。惟次山以微罪去官。令人懷恨。沅弟前函有長沙之行。想正值移宮換羽之際。難爲情也。（同治六年三月初四日）

致四弟（念及丁口繁盛）

澄弟左右。吾鄉兩水露足。甲五科三科九三姪婦。皆有慶熊之祥。至爲歡慰。吾自五十以後。百無所求。惟望星岡公之後。丁口繁盛。此念刻刻不忘。吾德不及祖父遠甚。惟此心則與祖父無殊。弟與沅弟望後輩添丁之念。又與阿兄無殊。或者天從人願。鑒我三兄弟之誠心。從此丁口日盛。亦未可知。且卽此一念。見我兄弟之同心。無論何房添丁。皆有至樂。和氣致祥。自有可卜昌明之理。沅弟自去冬以來。憂鬱無極。家眷擬不再接來署。

吾精力日衰。斷不能久作此官。內人率兒婦輩久居鄉間。將一切規模立定。以耕讀二字爲本。乃是長久之計。（同治六年五月初五日）

致四弟九弟（述爲學四要）

澄沅兩弟左右。屢接弟信。並閱弟給紀澤等諭帖。具悉一切。兄以八月十三出省。十三十五日歸署。在外匆匆。未得常寄函與弟。深以爲歉。小澄生子。岳松入學。是家中近日可慶之事。沅弟夫婦病而速痊。亦屬可慰。

吾見家中後輩。體皆虛弱。讀書不甚長進。曾以爲學四事勗兒輩。一曰看生書宜求速。不多讀則太陋。一曰溫舊書宜求熟。不背誦則易忘。一曰習字宜有恆。不善寫則如身之無衣。山之無木。一曰作文宜苦思。不善作則如人之啞不能言。馬之跛不能行。四者缺一不可。蓋閱歷一生而深知之。深悔之者。今亦望家中諸姪力行之。兩弟如以爲然。望常以此教誡子姪爲要。

兄在外兩月有餘。應酬極繁。眩暈疝氣等症。幸未復發。脚腫亦愈。惟目蒙日甚。小便太多。衰老相逼。時勢當然。無足怪也。（同治六年十月廿三日）

致四弟（兄弟同蒙封爵）

澄弟左右。初十日接奉恩旨。余蒙封侯爵。太子太保。沅蒙封伯爵。太子少保。均賞雙眼花翎。沅部李臣典子爵。蔣季泗男爵。殊恩異數。萃於一門。祖宗積累陰德。吾輩食此重祿。感激之餘。彌增歎悚。

沅弟至六月甚辛苦。近日濕毒。十愈其七。初十一十二等日。戲酒宴客。每日百餘席。沅應酬周到。不以爲苦。諺稱人逢喜事精神爽。其信然歟。余擬於七月下旬回皖。九月再來金陵。十一月舉行江南鄉試。沅弟擬九十月回籍。各營應撤二萬人。遺資尙無著也。(同治七年五月十四日)

致諸弟(四弟已經出京)

溫甫沅浦季洪三弟左右。二月初二日。接到二信。一係正月二十發。一係二月十二發。具悉一切。日內極挂念沅弟。得沅弟一紅紙片。甚欣慰也。

澄弟已於二月念六出京。誥軸須四月用寶。澄弟不能待。將來另託人帶歸。澄弟與安化張星垣衡山陳穀堂二大令。同行至保定。又約楊毓楠之弟同行。鵝毛管眼藥貼毒膏藥。澄弟未帶。將來託魏亞農帶歸。黃生之胞姪也。梁同年獻廷託請誥封之事。將來必妥辦妥。渠之銀。弟儘可收用。

京寓大小平安。癘疾微發。尙不爲害。陳岱雲之如夫人。歿於安徽。頃接其信。甚爲悽惋。同鄉周轉亭得御史常世兄勞世兄。兩廕生皆內用。將來爲光祿寺署正。可分印結。亦善地也。蘭姊多病。予頗憂慮。下次書來。尙乞詳示。父大人命予家中不必太瑣瑣。故不多及。國藩草。(咸豐元年三月初四日)

仿古字版

會文正公嘉言鈔

世界書局印行

曾文正公嘉言鈔

治身

師友夾持。雖懦夫亦有立志。予思朱子言。「爲學譬如熬肉。先須用猛火煮。然後用慢火溫。」予生平工夫。全未用猛火煮過。雖略有見識。乃是從悟境得來。偶用功。亦不過優游玩索已耳。如未沸之湯。遽用慢火溫之。將愈煮愈不熟矣。

君子之立志也。有「民胞物與」之量。有「內聖外王」之業。而後不忝於父母之所生。不愧爲天地之完人。故其爲憂也。以不如舜不如周公爲憂也。以德不修。學不講爲憂也。是故「頑民梗化」則憂之。「蠻夷猾夏」則憂之。「小人在位」「賢才否閉」則憂之。「匹夫匹婦不被己澤」則憂之。所謂「悲天命而憫人窮」。此君子之所憂也。若夫一身之屈伸。一家之飢飽。世俗之榮辱得失。貴賤毀譽。君子固不暇憂及此也。

余向來有無恆之弊。自此次寫日課本子起。可保終身有恆矣。蓋明師益友。重重夾持。能進不能退也。

士人讀書。第一要有志。第二要有識。第三要有恆。有志。則斷不甘爲下流。有識。則知學問無盡。不敢以一得自足。如河伯之觀海。如井蛙之窺天。皆無見識也。有恆。則斷無不成之事。此三者。缺一不可。諸弟此時。惟有識不可以驟幾。至於有志。有恆。則諸弟勉之而已。

凡盛衰在氣象。氣象盛。則雖飢亦樂。氣象衰。則雖飽亦憂。今我家方全盛之時。而賢弟以區區數百金爲極少。不足比數。設以賢弟處楚管寬五之地。或處葛藤二家之地。賢弟能一日以安乎。凡遇之豐富順舛。有數存焉。雖聖人不能自爲主張。天可使吾今日處豐亨之境。即可使吾明日處楚管寬五之境。君子之處順境。兢兢焉常覺天之過厚於我。我當以所餘補人之不足。君子之處裔境。亦兢兢焉常覺天之厚於我。——非果厚也。以爲較之尤賤者。而我固已厚矣。——古人所謂「境地須看不如我者」。此之謂也。來書有「區區千金」四字。其毋乃不

知天之已厚於我兄弟乎。兄嘗觀易之道。察盈虛消長之理。而知人不可無缺陷也。日中則昃。月盈則虧。天有孤虛。地闕東南。未有常全而不缺者。剝也者。復之幾也。君子以爲可喜也。夬也者。垢之漸也。君子以爲可危也。是故既吉矣。則由吝以趨於凶。既凶矣。則由悔以趨於吉。君子但知有悔耳。——悔者。所以守其缺。而不敢求全也。小人則時時求全。——全者既得。而吝與凶隨之矣。衆人常缺而一人常全。天道屈伸之故。豈若是不公平。今吾家椿萱重慶。兄弟無故。京師無比美者。亦可謂至萬全者矣。故兄但求缺陷。名所居曰。『求缺齋。』蓋求缺於他事。而求全於堂上。此則區區之至願也。家中舊債不能悉清。堂上衣服不能多辦。諸弟所需不能一給。亦求缺陷之義也。內人不明此意。時時欲置辦衣服。兄亦時時教之。今幸未全備。待其全時。則吝與凶隨之矣。此最可畏者也。賢弟夫婦訴怨於房闔之間。此是缺陷。吾常常思所以彌其缺。而不可盡給其求。蓋盡給。則漸幾於全矣。吾弟聰明絕人。將來見道有得。必且肆余之言也。

凡仁心之發。必一鼓作氣。盡吾力之所能爲。稍有轉念。則疑心生。私心亦生。疑心生則計較多。而出納吝矣。私心生則好惡偏。而輕重乖矣。

五箴

少不自立。荏苒遂洎今茲。蓋古人學成之年。而吾碌碌尙如斯也。不其戚矣。繼是以往。人事日紛。德慧日損。下流之赴。抑又可知。夫痲疾所以益智。逸豫所以亡身。僕以中材而履安順。將欲刻苦而自振拔。諒哉。其難之與。作五箴以自劄云。

立志箴

煌煌先哲。彼不猶人。藐焉小子。亦父母之身。聰明福祿。予吾者厚哉。棄天而佚。是及凶災。積悔累千。其終也已。往者不可追。請從今始。荷道以躬。興之以言。一息尙活。永矢弗緩。

居敬箴

天地定位。二五胚胎。鼎焉作配。實曰「三才」。儼恪齋明。以凝汝命。汝之不莊。伐生伐性。誰人可慢。何事可弛。弛事者無成。慢人者反爾。縱彼不反。亦長吾驕。人則下汝。天罰昭昭。

主敬箴

齋宿日觀。天雞一鳴。萬籟俱息。但聞鐘聲。後有毒蛇。前有猛虎。神定不懼。誰敢余侮。豈伊避人。日對三軍。我慮則一。彼紛不紛。馳騫半生。曾不自主。今其老矣。殆擾擾以終古。

謹言箴

巧語悅人。自擾其身。閒言送日。亦擾汝神。解人不誇。誇者不解。道聽途說。智笑愚駭。駭者終明。謂汝實欺。笑者鄙汝。雖矢猶疑。尤悔既叢。銘以自攻。銘而復蹈。嗟汝既耄。

有恆箴

自吾識字。百歷洎茲。二十有八載。則無一知。曩以所忻。闕時而鄙。故者既拋。新者旋徙。德業之不嘗。日爲物率。爾之再食。曾未聞或愆。黍黍之增。久乃盈斗。天君司命。敢告馬走。

養身要言——癸卯入蜀道中作——

一陽初動處。萬物始生時。不藏怒焉。不宿怨焉。

(右「仁」所以養肝也)

內而整齊思慮。外而敬慎威儀。泰而不驕。威而不猛。

(右「禮」所以養心也)

飲食有節。起居有常。作事有恆。容止有定。

(右「信」所以養脾也)

擴然而大公。物來而順應。裁之吾心而安。揆之天理而順。

（右「義」所以養肺也）
心欲其定。氣欲其定。神欲其定。體欲其定。

（右「智」所以養腎也）

大抵第一要除驕傲習氣。中無所有。而夜郎自大。此最壞事。

吾人只有進德修業兩事靠得住。進德則孝弟仁義是也。修業則詩文作字是也。此二者。由我作主。得尺則我之尺也。得寸則我之寸也。今日進一分德。便算積了一升穀。明日修一分業。又算餘了一文錢。德業並增。則家私日起。至於功名富貴。悉由命定。絲毫不能自主。

早遲之際。時刻皆有前定。盡其在我。聽其在天。萬不可稍生妄想。

今受折黜。未免憤怨。然及此正可困心積慮。大加「臥薪嘗膽」之功。切不可因憤廢學。

愧奮直前。有破釜沉舟之志。則遠遊不負。若徒悠悠因循。則近處儘可度日。何必遠行百里外哉。

人苟能自立志。則聖賢豪傑。何事不可爲。何必借助於人。我欲仁。斯仁至矣。我欲爲孔孟。則日夜孜孜。惟孔孟之是學。人誰得而禦我哉。若自己不立志。則雖日與堯舜禹湯同住。亦彼自彼。我自我矣。何與於我哉。

吾人爲學。最要虛心。嘗見朋友中有美材者。往往恃才傲物。動謂人不如己。見鄉墨。則罵鄉墨不通。見會墨。則罵會墨不通。既罵房官。又罵主考。未入學者。則罵學院。平心而論。己之所爲詩文。實亦無勝人之處。不特無勝人之處。而且不堪對人之處。只爲不肯反求諸己。便都見得人家不是。既罵考官。又罵同考。而先得者。傲氣既長。終不進功。所以潦倒一生。而無寸進也。

嘗名士者。鄙科名爲糞土。或好作詩古。或好講考據。或好談理學。囂囂然自以爲歷倒一切矣。自識者觀之。彼其所造。曾無幾何。亦足發一冷笑而已。故吾人用力除傲氣。力戒自滿。毋爲人所冷笑。乃有進步也。

此次升官。尤出意外。日夜恐懼修省。實無德足以當之。諸弟遠隔數千里外。必須匡我之不逮。時時寄書規我之

過。務使累世積德。不自我一人而隨。庶幾持盈保泰。得免遠致顛危。諸弟能常進箴規。則弟即吾之良師益友也。而諸弟亦宜常存敬畏。勿謂有家人作官。而遂敢於侮人。勿謂己有文學。而遂敢於恃才傲人。常存此心。則是載福之道也。

若非道義可得者。則不可輕易受金。要做好人。第一要從此處下手。能令鬼服神欽。則自然識日進。氣日剛。否則不覺墮入卑汙一流。必有被人看不起之日。不可不慎。諸弟現處極好之時。家事有我一人擔當。正好做個光明磊落。神欽鬼服之人。名聲既出。信義既著。隨便答言。無事不成。不必愛此小便宜也。

無故而怨天。則天必不許。無故而尤人。則人必不服。感應之端。自然隨之。

凡遇事騷欲發之時。須反躬自思。吾果有何不足。而蓄此不平之氣。猛然內省。決然去之。不惟平心謙抑。可以早得科名。亦且養些和氣。可以消滅病患。

吾惟盡一分心。作一日事。至於成敗。則不能復計較矣。

不能威猛。由於不能精明。事事被人欺侮。故人得而翫易之也。

諸弟不好收拾潔淨。比我尤甚。此是敗家氣象。嗣後務宜細心收拾。卽一紙一縷。竹頭木屑。皆宜檢拾伶俐。以爲兒姪之榜樣。二代疎懶。二代淫佚。則必有晝睡夜坐。吸食鴉片之漸矣。以後勤者愈勤。懶者痛改。莫使子姪學得怠惰樣子。至要。至要。子姪除讀書外。教之掃屋抹桌凳。收糞鋤草。是極好之事。切不可爲有損架子而不爲也。處茲大亂未平之際。惟當藏身匿迹。不可稍露圭角於外。至要。至要。古人云。「勞則善心生。佚則淫心生。」孟子云。「生於憂患。死於安樂。」吾慮爾之過於佚也。

世家子弟。最易犯一「奢」字。「傲」字。不必錦衣玉食。而後謂之奢也。但使皮袍呢褂。俯拾卽是。輿馬僕從。習慣爲常。此卽日趨於奢矣。見鄉人則嘖其樸陋。見雇工則顯指氣使。此卽日習於傲矣。書稱。「世祿之家。鮮克由禮。」傳稱。「驕奢淫佚。寵祿過也。」京師子弟之壞。未有不由於「驕」「奢」二字者。爾弟與諸弟共戒之。至

噫。至。噫。

蓋凡帶勇之人。皆不免稍肥私囊。余不能禁人之不苟取。但求我身不苟取。以此風示僚屬。

講閣大者。最易混入散漫一路。遇事顛預。毫無條理。雖大亦奚足貴。等差不紊。行之可久。斯則器局宏大。無有流弊者耳。

肝鬱最易傷人。余生乎受累以此。宜和易以調之也。

各處寫信。自不可少。辭氣須不亢不卑。平穩愜適。余生乎以懶於寫信。開罪於人。故願弟稍變塗轍。宜以真心相向。不可常懷智術。以相迎距。凡人以僞來。我以誠往。久之。則僞者亦共趨於誠矣。

一味渾厚。絕不發露。將來養得純熟。身體也健旺。子孫也受用。無慣習機械變詐。恐愈久而愈厚耳。

凡人作一事。便須全副精神注在此一事。首尾不懈。不可見異思遷。做這樣。想那樣。坐這山。望那山。人而無恆。終身一無所成。我生平坐犯無恆的弊病。實在受害不小。嘗翰林時。應留心詩字。則好涉獵他書。以紛其志。讀性理書時。則雜以詩文各集。以歧其趨。在六部時。又不甚實力講求公事。在外帶兵。又不能竭力專治軍事。或讀書寫字。以亂其志意。坐是垂老。而百無一成。即水軍一事。亦掘井九仞。而不及泉。弟當以爲鑒戒。現在帶勇。即埋頭盡力。以求帶勇之法。早夜孳孳。日所思。夜所夢。舍帶勇以外。則一概不管。不可又想讀書。又想中舉。又想做州縣。紛擾擾。千頭萬緒。將來又蹈我之覆轍。百無一成。悔之晚矣。

身體雖弱。卻不宜過於愛惜。精神愈用。則愈出。陽氣愈提。則愈盛。每日作事愈多。則夜間臨睡愈快活。若存一愛惜精神的意思。將前將卻。奄奄無氣。決難成事。

吾自信亦篤實人。只爲閱歷世途。飽更事變。略參些機權作用。把自家學壞了。實則作用萬不如人。徒惹人笑。教人懷憾。何益之有。近日憂居猛省。一味向平實處用心。將自家篤實的本質。還我真面。復我固有。賢弟此刻在外。亦急須將篤實復還。萬不可走入機巧一路。日趨日下也。縱人以巧詐來。我仍以含渾應之。以誠懸應之。久之。則

人之意也。論若鉤心鬥角，相迎相距，則報復無已時耳。至於強毅之氣，決不可無。然強毅與剛愎有別。古語云：「自勝之謂強。」曰「強制。」曰「強恕。」曰「強爲善。」皆自勝之義也。如不愼早起，而強之未明即起，不愼莊敬而強之尸坐立齋，不愼勞苦而強之與士卒同甘苦，強之勤勞不倦，是即強也。不愼有恆，而強之真恆，即毅也。舍此而求，以客氣勝人，是剛愎而已矣。二者相似，而其流相去霄壤，不可不察，不可不謹。

余生平之失，在志大而才疎，有實心而乏實力，坐是百無一成。弟年紀較輕，精力略勝於我，此際正宜提起全力，早夜整刷，昔賢謂：「宜用猛火煮，慢火溫。」弟今正用猛火之時也。

凡人爲一事，以專而精，以紛而散。荀子稱：「耳不兩聽而聰，目不兩視而明。」莊子稱：「用志不紛，乃凝於神。」皆至言也。

古來言凶德致敗者，約有二端。曰長傲，曰多言。丹朱不肖，曰傲。曰嚚訟，即多言也。歷觀名公鉅卿，多以此二端敗家喪身。余生平頗病執拗，德之傲也，不甚多言，而筆下亦略近乎囂訟，靜中默省，魯尤。我之處處獲戾，其原不外此二者。凡傲之凌物，不必定以言語加人，有以神氣凌之者矣。有以面色凌之者矣。稍有英發之姿，面色間有蠻狠之象，最易凌人。凡中心不可有所恃，心有所恃，則達於面貌，只宜抑然自下，一味言忠信，行篤敬，庶幾可以遮護舊失，整頓新機，否則人皆厭薄之矣。

「長傲」「多言」二弊，歷觀前世卿大夫與袁，及近日官場，所以致禍福之由，未嘗不視此二者爲樞機。故願與諸弟共相鑑誡，第能懲此二者，而不能勤奮以圖自立，則仍無以興家而立業。故又在乎振刷精神，力求「有恆」，以改我之舊轍，而振家之丕基。

溫弟丰神較峻，與兄之亢直簡澹，雖微有不同，而其難於諧世，則殊途而同歸。余常用爲慮，大抵胸多抑鬱，怨天尤人，不特不可以涉世，亦非所以養德。不特無以養德，亦非所以保身。中年以後，則肝腎交受其病，蓋鬱而不暢。

則傷木。心火上燦。則傷水。余今日之目疾。及夜不成寐。其由來不外乎此。故於兩弟。時時以「和平」二字相勸。幸勿視爲老生常談。至要。至要。

精神愈用而愈出。不可因身體素弱。過於保惜。智慧愈苦而愈明。不可因境遇偶拂。嗔爾摧沮。

日慎一日。以求其事之濟。一懷焦憤之念。則恐無成耳。千萬忍耐。「久而敬之」四字。不特處朋友爲然。卽凡事亦莫不然。至要。

遠生編六字訣。有時可施之行軍者。戲書以佐吾弟之莞爾。余向來雖處順境。寸心每多沈悶鬱抑。在軍中尤甚。此次專求怡悅。不復稍存鬱損之懷。視初爻所謂「裕无咎」者也。望吾弟亦從「裕」字上打疊。此心安穩穩。

吾生平頗講求「惜福」二字之義。近來補藥不斷。且菜蔬亦較奢。自媿享用太過。然亦體氣太弱。不得不爾。家中後輩子弟體弱。學射最足保養。起早。尤千金妙方。長壽金丹也。

此後總以戒酒爲第一義。起早亦養身之法。且係保家之道。從來早起之人。無不壽高者。吾近有二事法祖父。一曰。起早。二曰。勤洗脚。似於身體大有裨益。

天下古今之庸人。皆以一「情」字致敗。天下古今之才人。皆以一「傲」字致敗。

十月二十八早侍祖父星岡公於階前。請曰。「此次進京。求公教訓。」星岡公曰。「爾的官是做不盡的。爾的才是好的。但不傲。」蒲招損。謙受益。」爾若不傲。更好全了。」遺訓不遠。至今尙如耳提面命。今吾謹述此語。誥誡兩弟。總以除「傲」字爲第一義。唐虞之惡人。曰。丹朱。傲。曰。象。紂之無道。曰。強足以拒諫。辨足以飾非。曰。謂已有天命。謂敬不足行。皆傲也。吾自八年六月再出。卽力戒「情」字。以傲無恆之弊。近來又力戒「傲」字。昨日徽州未敗之前。次青心中不免有自是之見。既敗之後。余益加猛省。大約軍事之敗。非「傲」卽「情」。二者必居其一。巨室之敗。非「傲」卽「情」。二者必居其一。

澤兒雖體弱。而保養之法。亦惟在慎飲食。節嗜欲。斷不在服藥多也。

天地間惟「謙謹」是載福之道。驕則滿。滿則傾矣。凡動口動筆。厭人之俗。嫌人之鄙。譏人之短。發人之覆。皆驕也。無論所指。未必果當。即使一切當。已爲天道所不許。吾家子弟。滿腔驕傲之氣。開口便道人短長。笑人鄙陋。均非好氣象。賢弟欲戒子姪之驕。先須將自己好議論人短。好發人覆之習氣。痛改一番。然後令後輩事事警改。欲去「驕」字。總以不輕非笑人爲第一義。欲去「情」字。總以不晏起爲第一義。弟能謹守星岡公之八字（考寶早掃書蔬魚豬。）三不信（不信僧道。不信醫藥。不信地仙。）又謹記愚兄之去驕。去情。則家中子弟。日趨於恭謹而不自覺矣。

余自咸豐三年冬以來。久已以身許國。願死疆場。不願死牖下。本其素志。近年在軍辦事。盡心竭力。毫無愧怍。死即瞑目。毫無悔憾。

凡目能見千里而不能自見其睫。聲音笑貌之拒人。每苦於不自見。苦於不自知。

外間指摘吾家昆弟過惡。吾有所聞。自當一一告弟。明責婉勸。有則改之。無則加勉。豈宜祕而不宣。

衆口悠悠。初不知其所自起。亦不知其所由止。有才者忿疑謗之無因。而悍然不顧。則謗且日騰。有德者畏疑謗之無因。而抑然自修。則謗亦日熄。吾願弟等之抑然。不願弟等之悍然。願弟等敬聽吾言。手足式好。同禦外侮。不願弟等各逞己見。於門內計較雌雄。反忘外患。至阿兄忝竊高位。又竊虛名。時時有顛墜之虞。吾通閱古今人物。似此名位權勢。能保全善終者極少。深恐吾全盛之時。不克庇蔭弟等。吾顛墜之際。或致連累弟等。惟於無事時。常以危言苦詞。互相勸誡。庶幾免於大戾。

治心。以「廣大」二字爲藥。治身。以「不藥」二字爲藥。

危急之際。莫靠他人。專靠自己。乃是穩者。

傷寒而反覆者。每以服藥致誤。服補藥則更易誤。欲求病之有轉機。弟須堅持不復服藥。今年吳彤雲之病。余堅

持不服藥之說。果得痊愈。雖不可一概而施。然亦可見病情反覆之時。惟不服藥。而症乃有定象也。肝氣旺。最易傷人。余兄弟皆稟母體。本難強制。然不可不以靜坐制之。

余漸衰老。亦常有勃不可遏之候。但強自禁制。降伏此心。釋氏所貴降龍伏虎。龍即相火也。虎即肝氣也。多少英雄豪傑。打此兩關不過。亦不僅余與弟爲然。要在稍稍遏抑。不令過熾。降龍以養水。伏虎以養火。古聖所謂室慾。即降龍也。所謂懲忿。即伏虎也。釋儒之道不同。而其節制血氣。未嘗不同。總不使吾之嗜欲。害吾之軀命而已。至於「倔強」二字。卻不可少。功業文章。皆須有此二字貫注其中。否則柔靡不能成一事。孟子所謂「至剛」。孔子所謂「貞固」。皆從倔強二字做出。吾兄弟皆稟母德居多。其好處亦正在「倔強」。若能去忿慾以養體。存倔強以勵志。則日進無疆矣。

弟病在水不能生木。余亦夙有此疾。非藥物所能爲力。每日無論如何怕忙。總須略有抽閒之時。或靜坐。或渴睡。或散步。火不動。則水得所養矣。

心肝兩家之病。究以自養自醫爲主。非藥物所能爲力。今日偶過稜畫店。見弟所寫對聯。光彩煥發。精力似甚充足。若能認真調養。不過焦灼。必可漸漸復元。

何必全克而後爲策哉。各人又何必占天下之第一笑哉。名如弟必不求助於人。遷延日久。肝愈燥。脾愈弱。必成內傷。兄弟二人。皆將後悔。不如及今決計。不著痕跡。

弟以倔強之性。值久勞抑鬱之後。一見親人。泣涕一場。大鬧一場。皆意中所有之事。然爲弟爲鬧。皆可以發撼積鬱。皆可以暗調肝疾。

弟近年於阿兄忿激之時。輒以嘉言勸阻。即弟自發忿激之際。亦能有發有收。以此卜弟之德器不可限量。後福當亦不可限量。大抵任天下之大事。以氣。氣之忿積於中者厚。故倔強之極。不能不流爲忿激。以後吾兄勸氣之時。彼此互相勸誠。存其倔強。而去其忿激。斯可耳。

古來豪傑。吾家祖父教人。以「懦弱無剛」四字爲大恥。故男兒自立。必須有倔強之氣。惟數萬人困於堅城之下。最易暗銷銳氣。弟能養數萬人之剛氣。而久不銷損。此是過人之處。更宜從此加功。

古人稱立德立功立言爲三不朽。立德最難。自周漢以後。罕見以德傳者。立功如蕭曹房杜。郭李韓岳。立言如馬班韓歐李杜蘇黃。古今曾有幾人。吾輩所可勉者。但求盡吾心力之所能及。而不必遠希千古萬難攀躋之人。弟每取立言之萬難攀躋者。而將立功中之稍次者。一概抹殺。是孟子「鉤金與羽。食重禮輕」之說也。烏乎可哉。不若就現有之功。而加以讀書養氣。小心大度。以求德日進。言日醇。譬如築室。譬之立功。弟有絕大基址。絕好結構。以後但加裝修工夫。何必汲汲皇皇。茫若無主乎。

弟肝氣未痊。全靠自己以心醫之。弟若不知自愛。懷怒不已。剝喪元氣。則真太愚矣。

溼毒因太勞之故。肝疾則沉心太高之故。立此大功。成此大名。而猶懷鬱鬱。天下何一乃爲快意之事。何年乃是快意之時哉。

凡後天以脾爲主。脾以穀氣爲本。以有信爲用。望兩弟常告鼎三。每日多吃飯粥。少吃雜物。無論正餐及點心。守定一個時辰。日日不差。若有小小病症。堅守星岡公之教。不輕服藥。

吾閱歷極久。但囑家中老幼。不輕服藥。尤不輕服剋伐之藥。卽是善於養生之道。

養生之法。約有五事。一曰。眠食有恆。二曰。懲忿。三曰。節慾。四曰。每夜臨睡洗脚。五曰。每日兩飯後。各行三千步。懲忿。卽余篇中所謂「養生以少惱怒爲本」也。眠食有恆。又洗脚二事。星岡公行之四十年。余學行七年矣。飯後三千步。近日試行。自矢永不間斷。弟從前勞苦太久。年近五十。願將此五事立志行之。

謂自強者每勝一籌。則余不甚深信。凡國之強。必須多得賢臣。凡家之強。必須多出賢子弟。此亦關乎天命。不盡由於人謀。至一身之強。則不外乎北宮黝孟施舍曾子三種。孟子之「集義而慊」。卽曾子之「自反而縮」也。惟曾孟與孔子告仲由之強。略爲可久可常。此外關智關力之強。則有因強而大興。亦有因強而大敗。古來如李

斯曹操董卓楊素。其智力皆橫絕一世。而其禍敗亦迥異尋常。近世如陸何蕭陳。皆予知自雄。而俱不保其終。故吾輩在自修處求強則可在。勝人處求強則不可。若專在勝人處求強。其能強到底與否。尙未可知。卽使終身強橫安穩。亦君子所不屑道也。

余現在調養之法。飯必精鑿。蔬菜以肉湯煑之。鷄鴨魚羊豕。炖得極爛。又多辦醬菜。鹹菜之屬。以爲天下之至味大補。莫過於此。孟子及禮記所載養老之法。事親之道。皆不出乎此。豈古之聖賢皆愚。必如後世之好服參茸燕菜魚翅海參。而後爲智耶。

困心橫慮。正是磨鍊英雄。王汝於成。李申夫嘗謂余。樞氣。從不認出。一味忍耐。徐圖自強。因引諺曰。「好漢打脫牙。和血吞。」此二語。是余生平敲牙立志之訣。余庚戌辛亥間。爲京師權貴所唾罵。癸丑甲寅。爲長沙所唾罵。乙卯丙辰。爲江西所唾罵。以及岳州之敗。靖江之敗。湖口之敗。蓋打脫牙之時多矣。無一次不和血吞之。來信每怪運氣不好。便不似好漢聲口。惟有一字不說。敲定牙根。徐圖自強而已。

辛苦半身。不肯於老年博一取巧之名。巧被人竊笑也。

申甫所謂「好漢打脫牙。和血吞。」星岡公所謂「有福之人善退財。」真處逆境者之良法也。弟求兄隨時訓示申做。兄自問近年得力。惟有一「悔」字訣。

兄昔年自負本領甚大。可屈可伸。可行可藏。又每見得人家不是。自從丁巳戊午大悔大悟之後。乃知自己全無本領。凡事都見得人家有幾分是處。故自戊午至今九載。與四十歲以前。迥不相同。大約以能立能達爲體。以不怨不尤爲用。立者。發奮自強。站得住也。達者。辦事圓融。行得通也。吾九年以來。痛戒無恆之弊。看書寫字。從未間斷。選將練兵。亦常留心。此皆自強能立功。夫。奏疏公牘。再三斟酌。無一過當之語。自誇之詞。此皆圓融能達工夫。至於怨天。本有所不敢。尤人。則常不能免。亦皆隨時強制。而克去之。弟若欲自做惕。似可學阿兄丁戊二年之悔。然後痛下鍼砭。必有大進。「立達」二字。吾於己未年曾寫於弟之手卷中。弟亦刻刻思自立自強。但於能達處。

尙欠體驗。於不怨尤處。尙難強制。吾信中言。皆隨時指點。勸弟強制也。

趙廣漢本漢之賢臣。因星變而劾魏相。後乃身嘗其災。可爲殷鑒。默存一悔字。無事不可挽回也。

袁了凡所謂「從前種種譬如昨日死。從後種種譬如今日生。」另起鑪竈。重開世界。安知此兩番之大敗。非天之磨鍊英雄。使弟大有長進乎。諺云。「喫一塹。長一智。」吾生平長進。全在受挫折之時。務須咬牙勵志。蓄其氣而長其智。切不可茶然自餒也。

朱子嘗言。「悔字如春。萬物蘊蓄初發。吉字如夏。萬物茂盛已極。吝字如秋。萬物始落。凶字如冬。萬物枯凋。」又嘗以元字配春。亨字配夏。利字配秋。貞字配冬。兄意「貞」卽「硬」字訣也。弟當艱危之際。若能以「硬」字法冬藏之德。以「悔」字啓春生之機。庶幾可挽回一二乎。

余生平吃數大塹。——而癸丑六月不與焉——第一次。壬辰年發僧生。學臺懸牌。責其文理之淺。第二庚戌年。上日講疏內。畫一圖甚陋。九卿中無人不冷笑而薄之。第三甲寅年。岳州靖港敗後。棲於高峯寺。爲通省官紳所鄙夷。第四乙卯年。九江敗後。赧顏走入江西。又參撫臬。丙辰被困南昌。官紳人人目笑存之。喫此四塹。無地自容。故近雖忝竊大名。而不敢自詡。爲有本領。不敢自以爲是。俯畏人言。仰畏天命。皆從磨鍊後得來。

弟之手痛。尙未及遽成痼疾之年。只要弟心寬和。肝鬱稍紓。即可日就康復。古語云。「心病還須自心醫。」凡富貴功名。皆有命定。半由人力。半由天事。惟學作聖賢。全由自己作主。不與天命相干涉。吾有志學爲聖賢。少時欠居敬工夫。至今猶不免偶有戲言過動。爾宜舉止端莊。言不妄發。則入德之基也。

作人之道。聖賢千言萬語。大抵不外「敬」「恕」二字。仲弓問仁一章。言敬恕最爲親切。自此以外。如「立。則見其參於前也。在與。則見其倚於衡也。」「君子無衆寡。無小大。無敢慢。斯爲泰而不驕。」「正其衣冠。儼然人望而畏。斯爲威而不猛。」是皆言敬之最好下手者。孔言「欲立立人。欲遠遠人。」孟言「行有不得。反求諸己。以仁存心。以禮存心。有終身之憂。無一朝之患。」是皆言恕之最好下手者。

「涵」，「泳」二字。最不易識。余嘗以意測之曰：涵者如春雨之潤花。如清渠之溉稻。雨之潤花。過小則難透。過大則難披。適中則涵濡而滋液。清渠之溉稻。過小則枯槁。過多則傷澇。適中則涵養而勃興。泳者如魚之游水。如人之濯足。程子謂「魚躍於淵。活潑潑地。」莊子言「梁濠觀魚。安知非樂。」此魚水之快也。左太冲有「濯足萬里流」之句。蘇子瞻有「夜臥濯足詩」。有「浴罷詩」。亦人性樂水者之一快也。善讀書者須視書如水。而視此心如花。如稻。如魚。如濯足。則「涵」，「泳」二字。庶可得之於意言之表。

余生平有三恥。學問各塗。皆略涉其涯涘。獨天文算學。毫無所知。雖恆星五緯。亦不識認。一恥也。每作一事。治一業。輒有始無終。二恥也。少時作字。不能臨摹一家之體。遂致屢變而無所成。遲鈍而不適於用。近歲在軍。因作字太多。廢擱殊多。三恥也。

身體雖弱。處多難之世。若能風霜鍛鍊。苦心勞神。亦自足堅筋骨而長識見。洗甫叔向最羸弱。近日從軍。反得壯健。亦其證也。

余生平坐無恆之弊。萬事無成。德無成。業無成。已可深恥矣。遠辦理事。自矢靡他。中間本志變化。尤無恆之大者。用爲內恥。爾欲稍有成就。須從「有恆」二字下手。余嘗細觀星岡公儀表絕人。全在一重字。余行路容止亦頗重厚。蓋取法於星岡公。爾之容止甚輕。是一大病。以後宜時時留心。無論行坐均須重厚。早起也。有恆也。重也。三者皆最要之務。

余寸心坦坦蕩蕩。毫無疑怖。人誰不死。只求臨終心無愧悔耳。

每日飯後。走數千步。是養生家第一秘訣。爾每餐食畢。可至唐家鋪一行。或至澄叔家一行。歸來大約可三千餘步。三個月後。必有大效矣。

爾看書天分甚高。作字天分甚高。作詩文天分略低。若在十五六歲時。教導得法。亦當不止於此。今年已廿三歲。全靠爾自己紮掙發憤。父兄師長不能爲力。作詩文是爾之所短。卽宜從短處痛下工夫。看書寫字。爾之所長。卽

宜拓而充之。走路宜重。說話宜遲。常常記憶否。

余自從軍以來。卽懷見危授命之志。丙戌年在家抱病。常恐溘逝。屬下滄我初志。失信於世。起復再出。意尤堅定。此次若遂不測。毫無牽戀。自念貧窶無知。官至一品。壽逾五十。薄有浮名。兼秉兵權。忝竊萬分。夫復何懼。惟古文與詩二者。用力頗深。探索頗苦。而未能介然用之。獨闢康莊——古文尤確有依據——若遽先朝露。則寸心所得。遂成唐陵之散。作字用功最淺。而近年略有入處。三者一無所成。不無耿耿。至行軍本非余所長。兵貴奇而余太平。兵貴詐而余太直。豈而辨此滔天之賊。卽前次屢有克捷。已爲僥倖。出於非望矣。爾等長大之後。切不可涉歷兵間。此事難於見功。易於造孽。尤易於貽萬世口實。余久處行間。日日如坐鍼氈。所差不負吾心。不負所學者。未嘗須臾忘愛民之意耳。近來閱歷愈多。深諳督師之苦。爾曹惟當一意讀書。不可從軍。亦不必作官。

人生惟有「常」是第一美德。余早年於作字一道。亦嘗苦思力索。終無所成。近日朝朝暮寫。久不間斷。遂覺月異而歲不同。可見年無分老少。事無分難易。但行之有「恆」。一如種樹養畜。日見其大而不覺耳。

古之精相法。並言讀書可以變換骨相。欲求變化之法。總須先立堅卓之志。卽以余生平言之。三十前最好喫煙。片刻不離。至道光壬寅十一月廿一日立志戒煙。至今不再喫。四十六歲以前作事無恆。近五年深以爲戒。現在大小事均尙有恆。卽此二端。可見無事不可變也。

禮云。「道而不徑。舟而不遊。」古之言孝者。專以保身爲重。鄉間路窄橋孤。嗣後吾家子姪。凡遇過橋。無論騎馬。均須下而步行。

吾於凡事皆守「盡其在我。聽其在天」二語。卽養生之道亦然。體強者如富人。因戒奢而益富。體弱者如貧人。因節齋而自全。節齋。非獨食色之性也。卽讀書用心。亦宜檢約。不使太過。余八本篇中。言養生以少惱怒爲本。又嘗教胸中不宜太苦。須活潑潑地。養得一段生機。亦去惱怒之道也。旣戒惱怒。又知節齋。養生之道。盡其在我者矣。此外壽之長短。病之有無。一概聽其在天。不必多生妄想。去計較他。凡多服藥餌。求禱神祇。皆妄想也。吾於醫

藥禱祀等事。皆記星岡公之遺訓。而稍加推闡。教爾後輩。

張文端公英所著聰訓齋語。皆教子之言。其中言養生擇友。觀玩山水花竹。純是一片太和生機。

吾教爾兄弟不在多書。但以聖祖之庭訓格言（家中尙有數本）張公之聰訓齋語（莫宅有之。申夫有刻於安慶）。二種爲教。句句皆吾肺腑所欲言。以後在家則蒔養花竹。出門則飽看山水。環金陵百里內外。可以徧遊也。算學者。切不可再看。讀他書。亦以半日爲率。未刻以後。卽宜歇息游觀。古人以懲忿窒慾。爲養生要訣。懲忿。卽吾前信所謂少惱怒也。窒慾。卽吾前信所謂知節齋也。因好名好勝。而用心太過。亦慾之類也。藥雖有利。害亦隨之。不可輕服。切囑。

莊生云。「聞在宥天下。不聞治天下也。」東坡取此二語。以爲養生之法。熟於小學。試取「在宥」二字之訓。體味一番。則知莊蘇皆有順其自然之意。養生亦然。治天下亦然。若服藥而日更數方。無故而終年峻補。病輕而妄施攻伐。強求發汗。則如商君治秦。荆公治宋。全失自然之妙。柳子厚所謂「名爲愛之。其實害之。」陸務觀所謂「天下本無事。庸人自擾之。」皆此義也。東坡游羅浮詩云。「小兒年少有奇志。中宵起坐存黃庭。」下一存字。正合莊子「在宥」二字之意。蓋蘇氏兄弟父子。皆講養生。竊取黃老微旨。故稱其子爲有奇志。以後不輕服藥。自然日就壯健矣。

余近年默省之勤。儉。剛。明。忠。恕。謙。渾入德。曾爲澤兒言之。宜轉告與鴻兒。就中能體會一二字。便有日進之象。澤兒天質聰穎。但嫌過於玲瓏剔透。宜從「渾」字上用些工夫。鴻兒則從「勤」字上用些工夫。用工不可拘苦。須探討些趣味出來。

然老年篤畏天命。力求克去褊心。伎心。爾輩少年。尤不宜妄生意氣。著不得絲毫意見。切記。切記。爾稟氣太清。清則易柔。惟志趣高堅。則可變柔得剛。清則易刻。惟襟懷闊遠。則可化刻爲厚。余字汝曰劫剛。恐其稍涉柔弱也。教汝讀書。須具大量。看陸詩以導閒適之抱。恐其稍涉刻薄也。爾天性淡於榮利。再從此二字用功。則終身受用不

盡矣。

余生平略涉先儒之書。見聖賢教人修身。千言萬語。而要以不伎不求爲重。伎者。嫉賢害能。妒功爭寵。所謂「愈者能修。忌者畏人修」之類也。求者。貪利貪名。懷土懷惠。所謂「未得懷惠。既得患失」之類也。伎不常見。每發露於名業相侔。勢位相埒之人。求不常見。每發露於貧財相接。仕進相妨之際。將欲造福。先去伎心。所謂「人能充無欲害人之心。而仁不可勝用」也。將欲立品。先去求心。所謂「人能無穿窬之心。而義不可勝用也」。伎不去。滿懷皆是荆棘。求不去。滿腔日即卑汙。余於此二者。常加克治。恨尙未能掃除淨盡。

附作伎求詩二首錄後

歷覽有國有家之興。皆由克勤克儉所致。其衰也。則反是。余生平亦頗勤以字自勵。而實不能勤。故讀書無手鈔之冊。居官無可存之牘。生平亦好以儉字教人。而自問實不能儉。今暑中內外服役之人。廚房日用之數。亦云奢矣。其故由於前在軍營。規模宏闊。相沿未改。近因多病。醫藥之資。漫無限制。由儉入奢。易於下水。由奢反儉。難於登天。在兩江交卸時。尙存養廉二萬金。在余初意。不料有此。然似此放手用去。轉瞬卽已立盡。爾輩以後居家。須學陸梭山之法。每月用銀若干兩。限一成數。另封秤出。本月用畢。只准贏餘。不准短欠。衙門奢侈之習。不能不徹底痛改。余初帶兵之時。立志不取軍營之錢。以自肥其私。今日差幸。不負始願。然亦不願子孫過於貧困。低顏求人。惟在爾輩力崇儉德。善持其後而已。

伎求詩二首

善莫大於恕。德莫凶於妒。妒者妾婦行。瓊瓊奕比數。己拙忌人能。己塞忌人遇。己若無事功。忌人得成務。己若無黨援。忌人得多助。勢位苟相敵。長信又相惡。己無好聞望。忌人文名著。己無賢子孫。忌人後嗣裕。爭名日夜奔。爭利東西驚。但期一身榮。不惜他人好。聞災或欣幸。聞禍或悅豫。問渠何以然。不自知其故。爾室神來格。高明鬼神妬。天道常好還。嫉人還自誤。幽明叢詬忌。乖氣相倚伏。重者裁汝躬。輕亦減汝祚。我今告後生。悚然大覺寤。終身

讓人道。曾不失寸步。終身祝人善。曾不損尺布。消除嫉妒心。普天零甘露。家家獲吉祥。我亦無恐怖。（右不伎）
知足天地寬。貪得宇宙隘。豈無過人姿。多欲爲患害。在約每思豐。居困常求泰。當求千乘車。貴求萬釘帶。未得求
速償。既得求勿壞。芬馨比椒蘭。馨固方泰岱。求榮不知饜。志亢神愈振。歲煥有時寒。月明有時晦。時來多籌緣。運
去生災怪。諸福不可期。百殃分來會。片言動招尤。舉足便有礙。咸感抱殷憂。精爽日凋瘵。矯首望八荒。乾坤一何
大。安榮無遽欣。患難無遽愁。君看十人中。八九無倚賴。人窮多過我。我窮猶可耐。而況處夷塗。奚事中嗟憤。於世
少所求。俯仰有餘快。俟命堪終古。曾不願平外。（右不求）

日課四條

一曰。慎獨則心安。自修之道。莫難於養心。心既知有善。知有惡。而不能實用其力。以爲善去惡。則謂之自欺。
方寸之自欺與否。蓋他人所不及知。而已獨知之。故大學之誠意章。兩言慎獨。果能好善如好好色。惡惡如
惡惡臭。力去人欲以存天理。則大學之所謂自慊。中庸之所謂「戒慎恐懼」。皆能切實行之。卽曾子所謂
「自反而縮」。孟子所謂「仰不愧。俯不忤。所謂養心莫善於寡欲」。皆不外乎是。故能慎獨。能內省不疚。
可以對天地。質鬼神。斷無行有不慊於心。則餒之時。人無一內愧之事。則天君泰然。此心常快足寬平。是人
生第一自強之道。第一尋樂之方。守身之先務也。

二曰。主敬則身強。敬之一字。孔門持以教人。春秋士大夫亦常言之。至程朱則千言萬語。不離此旨。內而專
靜純一。外而整齊嚴肅。敬之工夫也。出門如見大賓。使民如承大祭。敬之氣象也。修己以安百姓。篤恭而天
下平。敬之效驗也。程子謂上下一於恭敬。則天地自位。萬物自育。氣無不和。四靈畢集。聰明睿智。皆由此出。
以此事天饗帝。蓋謂敬則無美不備也。吾謂敬字切近之效。就在能固人肌膚之會。筋骸之束。莊敬日強。安
肆日偷。皆自然之徵應。雖有衰年病軀。一遇壇廟祭獻之時。戰陣危急之際。亦不覺神爲之悚。氣爲之振。斯
足知敬能使人身強矣。若人無寡衆。事無大小。一一恭敬。不敢怠慢。則身體之強健。又何疑乎。

三曰。求仁則人悅。凡人之生。皆得天地之理以成性。得天地之氣以成形。我與民物。其大本乃同出一源。若但知私己。而不知仁民愛物。是於大本一源之道。已悖而失之矣。至於尊官厚祿。高居人上。則有拯民溺救民飢之責。讀書學古。粗知大義。即有覺後知覺後覺之責。若但知自了。而不知教養庶彙。是於天之所以厚我者。辜負甚大矣。孔門教人。莫大於求仁。而其最切者。莫要於「欲立立人。欲達達人」數語。立者。自立不懼。如富戶百物有餘。不假外求。達者。四通不悖。如貴人登高一呼。羣山四應。人孰不欲己立己達。若能推以立人達人。則與物同春矣。後世論求仁者。莫精於張子之西銘。彼其視民胞物與。宏濟羣倫。皆事天者性分當然之事。必如此。乃可謂之人。不如此。則曰悖德。曰賊。誠如其說。則雖盡立天下之人。盡達天下之人。而曾無善勞之足言。人有不悅而歸之者乎。

四曰。習勞則神斂。凡人之情。莫不好逸而惡勞。無論貴賤智愚老少。皆貪於逸而憚於勞。古今之所同也。人一日所著之衣。所進之食。與一日所行之事。所用之力相稱。則旁人聽之。鬼神許之。以爲彼自食其力也。若農夫織婦。終歲勤動。以成數石之粟。數尺之布。而富貴之家。終歲逸樂。不管一業。而食必珍羞。衣必錦繡。酣豢高眠。一呼百諾。此天下最不平之事。鬼神所不許也。其能久乎。古之聖君賢相。若湯之昧旦丕顯。文王日昃不遑。周公夜以繼日。坐以待旦。蓋無時不以勤勞自勵。無逸一篇。推之於勤則審考。逸則天亡。歷歷不爽。爲一身計。則必操習技藝。磨鍊筋骨。困知勉行。操心危慮。而後可以增智慧而長才識。爲天下計。則必己飢己溺。一夫不獲。引爲余辜。大禹之周乘四載。過門不入。墨子之摩頂放踵。以利天下。皆極儉以奉身。而極勤以救民。故荀子好稱大禹墨翟所行。以其勤勞也。軍興以來。每見人有一材一技。而耐艱苦者。無不見用於人。見稱於時。其絕無材技。不慣作勞者。皆唾棄於時。饑凍就斃。故勤則壽。逸則夭。勤則有材而見用。逸則無能而見棄。勤則博濟斯民。而神祇欽仰。逸則無補於人。而神鬼不敵。是以君子欲爲人神所覆依。莫大於習勞也。

余衰年多病。目疾日深。萬難挽回。汝及諸姪輩。身體強壯者。少。古之君子。修己治家。必能心安身強。而後有振興之象。必使人悅神欽。而後有駢集之祥。今書此四條。老年用自儆惕。以補昔歲之愆。並令二子各自龜勉。每夜以此四條相親。每月終。以此四條相稽。轉寄諸姪共守。以期有成焉。（以上家訓）

靜坐思。心正氣順。必須到「天地位。萬物育」田地。方好。

默坐思。此心須常有滿腔生意。雜念憧憧。將何以極。掃卻。勉之。

吳竹如言。「『敬』字最好。『予謂須添一「和」字。則所謂敬者。方不是勉強操持。卽禮樂不可斯須去身之意。」

誦養氣章。以有所會。願終身私淑孟子。雖造次顛沛。皆有孟夫子在前。須臾不離。或到死之日。可以仰希萬一心得語。一經說破。胸中便無餘味。所謂「德之棄」也。无無心得而有掠影之談乎。

易大壯卦象大衆正與養氣章通。

「靜」字全無工夫。欲心之凝定。得乎。

晉卦。「罔孚裕。無咎。」裕。難矣。中庸明善誠身一節。其所謂裕學乎。精神便常令有餘。於事則氣充。而心不散漫。凡事之須逐日檢點者。一日姑待。後來補救。則難矣。況進德修業之事乎。海秋言。「人處德我者。不足覺心術。處相怨者。而能平情。必君子也。」

讀書窮理。不辨得極虛之心。則先自窒矣。

「咸恆損益」四卦。可合之得虛心實心之法。

不能主一之咎。由於習之不熟。由於志之不立。而實由於知之不真。若真見得不主一之害。心廢學。便如食烏啄之殺人。則必主一矣。不能主一。無擇無守。則雖念念在四書五經上。亦只算游思雜念。心無統攝故也。

巽乎水而上水。頗悟養生家之說。

良峯前輩言。「無間景範。聖人之純一不已。顏子之三月不違。此不易學。即日月之至。亦非諸賢不能。」至「字煞宜體會。我輩但宜繼續。續求其時習而說。」

存心。則緝熙光明。如日之升。修容。則正位凝命。如鼎之鎮。內外交養。敬義夾持。何患無上達。

至岱雲處。看渠日課。岱雲近日志日堅。而識日卓越。閱之喜不可言。平日好善之心。頗有「若己有之」之誠。而前日讀翁仙詩。本日觀岱雲日課。尤中心好之也。

樹堂來。與言養心養體之法。渠言。「舍靜坐。更無下手處。能靜坐。而天下之能事畢矣。」因教我焚香靜坐之法。所言皆闊歷語。靜中真味。靜能領取。又言。「心與氣。總拆不開。心微浮。則氣浮矣。氣散。則心亦散矣。」此即孟子所謂「志壹則動氣。氣壹則動志」也。

「神明則如日之升。身靜則如鼎之鎮。」此二語可守者也。惟心到靜極時。所謂未發之中。寂然不動之體。畢竟未體驗出真境來。意者只是閉藏之極。逗出一點生意來。如冬至一陽初動時乎。貞之固也。乃所以爲元也。蟄之坏也。乃所以爲啓也。穀之堅實也。乃所以爲始播之種子也。然則不可以爲種子者。不可謂之堅實之穀也。此中無滿腔生意。著萬物皆資始於我心者。不可謂之至靜之境也。然則靜極生陽。蓋一點生物之仁心也。息息靜極。仁心之不息。其參天兩地之至誠乎。顏子三月不違。亦可謂洗心退藏。極靜中之真樂者矣。我輩求靜。欲異乎禪氏入定。冥然罔覺之旨。其必驗之此心。有所謂一陽初動。萬物資始者。庶可謂之靜極。可謂之未發之中。寂然不動之體也。不然。深閉固拒。心如死灰。自以爲靜。而生理或幾乎息矣。况乎其並不能靜也。有或擾之。不且憧憧往來乎。深觀道體。蓋陰先於陽信矣。然非資由體驗得來。終掠影之談也。

人必中虛。不著一物。而後能真實無妄。蓋實者。不欺之謂也。人之所以欺人者。必心中別著一物。心中別有私見。不敢告人。而後造僞言以欺人。若心中了不著私物。又何必欺人哉。其所以自欺者。亦以心中別著私物也。所知在好德。而所私在好色。不能去好色之私。則不能不欺其好德之知矣。是故誠者。不欺者也。不欺者。心無私著也。

無私著者。至虛者也。是故天下之至虛。天下之至誠者也。當讀書。則讀書。心無著於見客也。當見客。則見客。心無著於讀書也。一有著。則私也。靈明無著。物來順應。未來不迎。當時不雜。既過不戀。是之謂虛而已矣。是之謂誠而已矣。以此讀無妄咸中孚三卦。蓋扞格者鮮矣。

凡作文詩。有情極真摯。不得不一傾吐之時。然必須平日積理既富。不假思索。左右逢原。其所言之理。足以達其胸中。至真至正之情。作文時無鑄刻字句之苦。文成後無鬱塞不吐之情。皆平日讀書積理之功也。若平日醜醜不深。則雖有真情欲吐。而理不足以達之。不得不臨時尋思義理。義理非一時所可取辦。則不得不求工於字句。至於雕飾字句。則巧言取悅。作僞日拙。所謂修辭立誠者。蕩然失其本旨矣。以後真情激發之時。則必視胸中義理何如。如取如攜。傾而出之可也。不然。而須臨時取辦。則不如不作。作則必巧僞媚人矣。

在何宅聽唱崑腔。我心甚靜且和。因思古樂陶情淑性。其入人之深。當何如。禮樂不興。小學不明。天下所以少成材也。

竹如教我曰。「耐」。予嘗言竹如「貞」。足幹事。予所闕者「貞」耳。竹如以一「耐」字教我。蓋欲我鎮躁以歸於靜。以漸幾於能「貞」也。此一字。足以醫心病矣。

寫字時。心稍定。便覺安恬些。可知平日不能耐。不能靜。所以致病也。寫字可以驗精力之注否。以後卽以此養心。萬事付之空寂。此心轉覺安定。可知往時只在得失場中過日子。何嘗能稍自立志哉。

記云。「君子莊敬日強」。我日日安靖。日日衰齋。欲其強。得乎。譬諸草木。志之不立。本則撥矣。是知千言萬語。莫先於立志也。

唐先生言。「國朝諸大儒。推張楊園陸稼書兩先生。最爲正大篤實。雖湯文正猶或小遜。李厚庵方望溪。文章究竟優於德行。」

夜讀楊園先生集。中有數條。如破我伎求之私。當頭棒喝。

讀楊園近古錄。真能使鄙夫寬。薄夫敦。

因作字。思用功所以無恆者。皆助長之念害之也。本日因聞竹如言。知此事萬非疲輟人所能勝。須是剛猛。用血戰功夫。斷不可弱。二者不易之理也。時時謹記。朱子語類。「雞伏卵」及「猛火煮」二條。刻刻莫忘。

凡讀書。有爲人爲己之分。爲人者。縱有心得。亦已「的然日亡」。予於杜詩。不無一隙之見。而批點之時。自省更有爲人之念。雖欲蘊蓄而有味。得乎。

自戒懼而約之。以至於至靜之中。無少偏倚。而其守不失。則極其中而天地位。

此綿綿者。由動以之靜也。自謹獨而精之。以至於應物之處。無少差謬。而無適不然。而極其和。而萬物育。此穆穆者。由靜以之動也。由靜之動。有神主之。由動之靜。有鬼司之。終始往來。一敬貫之。

莊子曰。「笑成在久。驟而見信於人者。其相信必不固。驟而得名於時者。其爲名必過情。君子無赫赫之稱。無驟著之美。猶四時之運。漸成歲功。使人不覺。」則人之相孚。如桃李不言。下自成蹊矣。

有蓋寬饒諸葛豐之勁節。必兼有山巨源謝安石之雅量。於是平言足以與。默足以容。否則。嶢嶢易缺。適足以取禍也。雅量雖由於性生。然亦恃學力以養之。惟以聖賢律己。躬自厚而薄責於人。則度量閎深矣。

知己之過失。即目爲承認之地。改去豪無吝惜之心。乃最難事。豪傑之所以爲豪傑。聖賢之所以爲聖賢。便是此等處。磊落過人。能透過此一關。寸心便異常安樂。省得多少膠葛。省得多少遮掩裝飾醜態。

有義理之學。有詞章之學。有經濟之學。有考據之學。義理之學。即宋史所謂道學也。在孔門爲德行之科。詞章之學。在孔門爲言語之科。經濟之學。在孔門爲政事之科。考據之學。即今世所謂「漢學」也。在孔門爲文學之科。

此四者。闕一不可。予於四時。略涉津涯。天質魯鈍。萬不能造其奧窔矣。惟取其尤要者。而日日從事。庶以漸磨之久。而漸有所開。義理之學。吾之從事者。二書焉。曰四子書。曰近思錄。詞章之學。吾之從事者。二書焉。曰曾氏讀古文鈔。與曾氏讀詩鈔。二書皆尙未纂集成帙。然胸中已有成竹矣。經濟之學。吾之從事者。二書焉。曰會典。曰皇朝

經世文編。考據之學。吾之從事者。四書焉。曰易經。曰詩經。曰史記。曰漢書。此十種者。須要爛熟於心中。凡讀書者。能附於此十書。如室有基而丹雘附之。如木有根而枝葉附之。如雞伏卵。不稍歇而使冷。如織成筵。不見異而思遷。其斯爲有本之學乎。

天行健。君子以自強不息。地勢坤。君子以厚德載物。頤。君子以慎言語。節飲食。損。君子以懲忿窒慾。益。君子以見善則遷。有過則改。鼎。君子以正位凝命。此六卦之大象。最切於人。頤以養身。養德。鼎以養心。養賢。尤爲切要。座右爲聯語。以自箴云。「不爲聖賢。便爲禽獸。莫問收穫。但問耕耘。」

除卻進德修業。乃是一無所恃。所謂「把截四路頭」也。若不日日向上。則人非鬼賈。身敗名裂。不旋踵而至矣。可不畏哉。

治心之道。先去其毒。陽惡曰忿。陰惡曰慾。治身之道。必防其患。剛惡曰暴。柔惡曰慢。治口之道。二者交惕。曰慎言語。曰節飲食。凡此數端。其樂維何。禮以居敬。樂以導和。陽剛之惡。和以宜之。陰柔之惡。敬以持之。飲食之過。敬以檢之。言語之過。和以斂之。敬極肅肅。和極雍雍。穆穆綿綿。斯爲德容。容在於外。實根於內。靜動交養。醉面盎背。余生乎。雖頗好看書。總不免好名好勝之見。參預其間。是以無孟子深造自得一章之味。無杜元凱優柔參飲一段之趣。故到老而無一書可恃。無一事有成。今雖暮齒衰邁。當從「敬靜純淡」四字上痛加工夫。縱不能如孟子元凱之所云。但養得胸中一種恬靜書味。亦稍足自適矣。

處逆境之道。惟西銘「無所逃而待烹。申生其恭也。勇於從而順令者。伯奇也。」等句。最爲親切。偶作聯語。以自箴云。「禽真擾人。靜由敬出。死中求活。淡極樂生。」一本孟子夜氣章之意。一本論語蔬水曲肱章之意。以絕去枯亡營擾之私。

本朝博學之家。信多閎儒碩士。而其中爲人者多。爲己者少。如顧闈並稱。顧則爲己。闈則不免人之見者存。江戴並稱。江則爲己。戴則不免人之見者存。段王並稱。王則爲己。段則不免人之見者存。方劉姚並稱。方姚爲己。劉則

不免人之見者存——其遠而在上者，幸厚庵朱可亭秦味經，則爲己之數多，紀曉嵐阮芸台則不免人之見者存。學者用力，固宜於幽獨中，先將爲己爲人之界，分別明白，然後審端致力。種桃得桃，種杏得杏，未有根本不在而枝葉發生，而自鬻茂者也。

邵子所謂觀物，莊子所謂觀化，程子所謂觀天地生物氣象，須要放大胸懷，游心物外，乃能絕去一切繳繞鬱悞，煩悶不甯之習。

讀書之道，朝聞道而夕死，殊不易。聞道者，必真知而篤信之。吾輩自己不能自信，心中已無把握，焉能聞道。胸襟廣大，宜從「平」「淡」二字用功。凡人我之際，須看得平。功名之際，須看得淡。庶幾胸懷日闊。

傍夕，與子序登樓，論老年用功，不可有驕氣暮氣。

念不知命，不知禮，不知言三者，論語以殿全篇之末。良有深意。若知斯三者，而益之以孟子取人爲善，與人爲善之義，則將庶可爲完人矣。

聞子序談養氣章末四節，言孔子之所以異於伯夷伊尹者，不在高處，而在平處，不在隆處，而在汙處，汙者，下也。平者，庸也。夷尹之聖，以其隆高而異於衆人也。宰我之論堯舜以勳業而隆，孔子以並無勳業而汙。子貢之論百王以禮樂而隆，孔子以並無禮樂而汙。有若之論他聖人，以出類拔萃而隆，孔子以即在類萃之中，不出不拔而自處於汙，而汙下而同於衆人。此其所以異於夷尹也。此其所以爲生民所未有也。

爲人之道有「四知」。天道有「三惡」。三惡之目，曰天道惡巧，天道惡盈，天道惡貳。貳者，多猜疑也，不忠誠也，無恆心也。四知之目，卽論語末章之知命，知禮，知言，而吾更加以知仁，仁者，恕也。己欲立而立人，己欲達而達人，恕道也。立者，足以自立也。達者，四達不悖，遠近信之，人心歸之。詩云：「自西自東，自南自北，無思不服。」禮云：「推而放諸四海而準。」達之謂也。我欲足以自立，則不可使人無以自立。我欲四達不悖，則不可使人一步不行。此立人達人之義也。孔子所云：「己所不欲，勿施於人。」孟子所云：「取人爲善，與人爲善。」皆恕也。仁也。知此

則識大量大。不知此則識小量小。故吾於三知之外。更道知仁。

讀書之道。杜元凱稱若江海之浸。膏澤之潤。若見聞太寡。蘊蓄太淺。譬猶一勺之水。斷無轉相灌注。潤澤豐美之象。故君子不可以小道自域也。

與子序言聖人之道。亦曰。「學問闋歷。漸推漸廣。漸習漸熟。以至於四達不悖。」因戲稱曰。鄉人有終年賭博。而破家者。語人曰。「吾賭則輸矣。而賭之道精矣。」從來聖賢未有不由勉強以幾自然。由闋歷悔悟以幾成熟者也。程子解孟子苦勞。餓乏。拂亂動。忍等語曰。「若爲熟也。須從這裏過。亦與賭輸而道精之義爲近。」子序笑應之。

余近日常寫大字。微有長進。而不甚貫氣。蓋緣結體之際。不能字字一律。如或上鬆下緊。或上緊下鬆。或左大右小。或右大左小。均須始終一律。乃成體段。余字取勢。本係左大右小。而不能一律。故恆無所成。推之作古文辭。亦自有體勢。須篇篇一律。乃爲成家。辦事亦自有體勢。須事事一律。乃爲成章。言語動作。亦自有體勢。須日日一律。乃爲成德。否則載沈載浮。終無所成矣。

作書者宜臨帖摹帖。作文作詩。皆宜專學一家。乃易長進。然則作人之道。亦宜專學一古人。或得今人之賢者。而師法之。庶易長進。

德成以謹言慎行爲要。而敬。恕。誠。靜。勤。潤。六者闕一不可。學成以三經。三史。三子。三集爛熟爲要。而三者亦須提其要而鉤其元。藝成以多作。多寫爲要。亦須自闕門徑。不依傍古人格式。功成以開疆安民爲要。而亦須能樹人。能立法。能是二者。雖不拓疆。不澤民。不害其爲功也。四者能成其一。則足以自怡。此雖近於名心。而猶爲得其正。念天道三惡之外。又覺好露而不能揮。亦天之所惡也。

余復胡中丞信中有云。「惟忘機可以消衆機。惟懔懔可以戒不祥。」似頗有意義。而媿未能自體行之。凡人涼薄之德。約有三端。最易獨犯。聞有惡德敗行。聽之媮媮不倦。妒功忌名。幸災樂禍。此涼德之一端也。人受

命於天。如巨受命於君。子受命於父。而或不能受命。居卑辱。日夜自謀。置其身於高明之地。譬諸金躍冷而以
鑊錙干將自命。此涼德之二端也。

胸包清濁。口不臧否者。聖哲之用心也。強分黑白。過事激揚者。文士輕薄之習。優伶風切之態也。而吾輩不察而
效之。動輒區別善惡。品第高下。使優者未必加勸。而劣者幾無以自處。此涼德之三端也。余今老矣。此著。尙加戒
之。

君子有三樂。讀書聲出金石。飄飄意遠。一樂也。宏獎人才。誘人日進。二樂也。勤勞而後憩息。三樂也。

孔子所謂。一性相近。習相遠。上智下愚不移。一者。凡事皆然。即以圍棋論。生而得國手者。上智也。屢學而不知局
道。不辨死活者。下愚也。此外皆相近之資。視乎教者何如。教者高。則習之而高矣。教者低。則習之而低矣。以作字
論。生而筆姿秀挺者。上智也。屢學而拙如薑芽者。下愚也。此外則皆相近之資。視乎教者何如。教者鍾王。則衆習
於鍾王矣。教者蘇米。則衆習於蘇米矣。推而至於作文亦然。打仗亦然。皆視乎在上者一人之短長。而衆人之習
隨之爲轉移。若在上者不自咎其才德之不足以移人。而徒致慨上智之不可得。是猶執策而嘆無馬。真是無馬
哉。

李申甫黃州歸來。稍論時事。余謂當豎起骨頭。竭力撐持。三更不眠。因作一聯云。一餐活一團春意思。撐起兩根
窮骨頭。一用自警也。余生平作自箴聯句頗多。惜皆未寫出了。未年在家作一聯云。一不怨不尤。但反身爭個一
壁靜。勿忘勿助。看平地長得萬丈高。一曾用木板刻出。與此聯意相近。因附識之。今夜醒後。心境不甚恬適。於愛
憎恩怨。未能悉化。不如昨夜之清白坦蕩遠甚。夫子所稱。一日月至焉。一者。或亦似此乎。

近日之失。由於心弦太緊。無舒和之意。以後作人。當得一「鬆」字意味。日來每思吾身能於十三字者。用功。尙
不失晚年進境。十三字者。謂三經。三史。三子。三集。三寶。三忌。三薄。三知。三樂。三算也。三經。三史。三子。三集。三寶。余
在京師嘗以扁其室。在江西曾刻印章矣。三忌者。卽所謂天道忌巧。天道忌盈。天道忌貳也。三薄者。幸災樂禍。一

薄德也。逆命億數。二薄德也。臆斷皂白。三薄德也。三知者。論語末章所謂知命。知禮。知言也。三樂者。即前所記。讀書出金石。一樂也。宏獎人材。誘人日進。二樂也。勤勞而後憩息。三樂也。寡言養氣。寡視培神。寡欲養精。十三字者。時時省察。其猶失之東隅。收之桑榆者乎。

聖人所言。有所不言。積善餘慶。其所言者也。萬事由命不由人。其所不言者也。禮樂政刑。仁義忠信。其所言者也。虛無清靜。無爲自化。其所不言者也。吾人嘗以不言者爲體。以所言者爲用。以不言者存諸心。以所言者勉諸身。以莊子之道自怡。以荀子之道自克。其庶爲聞道之君子乎。

日來心緒總覺不自在。始孔子所謂「不仁者不可以久處約也。」軍中乃爭權鬻勢之場。又實非處約者所能濟事。求其貞白不移。淡泊自守。而又足以驅使羣力者。頗難其道爾。

孔子所謂「下學上達」連字中必自有一種「洞澈無疑」意味。即蘇子瞻晚年意思深遠。隨處自得。亦必有脫離塵垢。卓然自立之趣。吾因知勉行。久無所得。年已五十。胸襟意識猶未免爲庸俗之人。可愧也已。

此身無論處何境遇。而「敬」「恕」「勤」字無片刻可弛。苟能守此數字。則無入不自得。又何必斤斤計較得君與不得君。氣誼孤與不孤哉。

凡事皆有至淺至深之道。不可須臾離者。因欲各其堂曰。「入本堂。」其目曰。讀書以訓詁爲本。詩文以聲調爲本。事親以歡心爲本。養生以少惱怒爲本。立身以不妄語爲本。居家以不晏起爲本。居官以不要錢爲本。行軍以不擾民爲本。古人格言儘多。要之每事有第一義。必不可不竭力爲之者。覺之如探驪得珠。失之如舍根本而圖枝葉。古人格言雖多。亦在乎后人之慎擇而已矣。

九弟諫余數事。余亦教九弟「靜虛涵泳。蕭然物外。」

余身旁須有一胸襟恬淡者。時時伺吾之短。以相箴規。庶不使「矜心」生於不自覺。

憶八年所定「敬」「恕」「誠」「靜」「勤」「一」「潤」六字。諒心親身之法。實爲至要至賅。吾近於靜字欠

工夫耳。

東坡「守駿莫如跛」五字。凡技皆當知之。若一味駿快奔放。必有顛躓之時。一向貪美名。必有大污辱之事。余以「求闕」名齋。即求自有缺陷不備之處。亦「守駿莫如跛」之意也。

古人「修身」「治人」之道。不外乎「勤」「大」「謙」。勤若文王之不遑。大若舜禹之不與。謙若漢文之不勝。而勤謙二字。尤爲徹始徹終。須臾不可離之道。勤所以傲情也。謙所以傲傲也。能勤且謙。則大字在其中矣。千古之聖賢豪傑。卽奸雄。欲有立於世者。不外一勤字。千古有道自得之士。不外一謙字。吾將守此二字以終身。儻所謂「朝聞道夕死可矣」者乎。

勞謙二字。受用無窮。勞所以戒惰也。謙所以戒傲也。有此二者。何惡不去。何善不臻。

立身之道。以禹墨之「勤」「儉」。兼老莊之「靜」「虛」。庶於「修己」「治人」之術。兩得之矣。

周末諸子各有極至之詣。其所以不及孔子者。此有所偏至。卽彼有所獨缺。亦猶夷惠之不及孔子耳。若游心能如老莊之虛靜。治身能如墨翟之勤儉。齊民能如管商之嚴整。而又持之以不自是之心。偏者裁之。缺者補之。則諸子皆可師。不可棄也。

修己治人之道。止「勤於邦。儉於家。言忠信。行篤敬」四語。終身用之。有不能盡。不在多。亦不在深。

天下凡物。加倍磨治。皆能變換本質。別生精彩。何況人之於學。但能日新又新。百倍其功。何患不變化氣質。超凡入聖。

閔王而農所注張子正蒙。於盡性知命之旨。略有所會。蓋盡其所可知者。於己性也。聽其不可知者。於天命也。易繫辭「尺蠖之屈」八句。盡性也。「過此以往」四句。知命也。農夫之服田力穡。勤者有秋。惰者歉收。性也。焉稼湯世。終歸焦爛。命也。愛人。治人。禮人性也。愛人而不親。治人而不治。禮人而不答。命也。聖人之不可及處。在盡性以至於命。盡性猶下學之事。至於命。則上達矣。嘗盡性之時。功力已至十分。而效驗或有應不應。聖人於此淡然。

泊然。若知之。若不知之。若著力。若不著力。此中消息。最難體認。若於性分當盡之事。百倍其功以赴之。而俟命之學。則以淡如。泊如爲宗。庶幾其近道乎。

古聖人之道。莫大乎與人爲善。以言誨人。是以善教人也。以德薰人。是以善養人也。皆與人爲善之事也。然徒與人。則我之善有限。故又貴取諸人以爲善。人有善則取以益我。我有善則與以益人。連環相生。故善端無窮。彼此挹注。故善源不竭。君相之道。莫大乎此。師儒之道。亦莫大乎此。仲尼之學。無常師。即取人爲善也。無行不與。即與人爲善也。爲之不厭。即取人爲善也。誨人不倦。即與人爲善也。念忝竊高位。劇寇方張。大難莫平。惟有就吾之所見。多教數人。因取人之所長。遠攻吾短。或者鼓盪斯世之善機。因以挽回天地之生機乎。

處人處事之所以不當者。以其知之不明也。若巨細周知。表裏洞澈。則處之自有方術矣。吾之所以不能周知者。以不好問。不善問耳。

修己治人之道。果能常守「勤」「儉」「謹」「信」四字。而又能取人爲善。與人爲善。以禮自治。以禮治人。自然寡尤寡悔。鬼伏神欽。特恐言道不篤。間或客氣用事耳。

溫孟子弟類記出。寫於每章之首。如言心性之屬。曰。「性道至言。」言取與出處之屬。曰。「廉節大防。」言自况自許之屬。曰。「抗心高望。」言反躬刻厲之屬。曰。「切己反求。」

百種弊病。皆從頰生。頰則弛緩。弛緩則治人不嚴。而趣功不敏。一處遲則百處懈矣。

前以八德自勉。曰。勤。儉。剛。明。孝。信。謙。渾。近日於勤字不能實踐。於謙渾二字。尤覺相遠。悚愧無已。勤。儉。剛。明四字。皆求諸己之事。孝。信。謙。渾四字。皆施諸人之事。孝以施於上。信以施於同列。謙以施於下。渾則無往不宜。大約與人忿爭。不可自求萬全處。白人是非。不可過於武斷。此渾字之最切於實用者耳。

關劉石庵清愛堂帖。其起筆多師晉賢。及智永千文。用逆就之法。故能藏鋒。張得天之筆。多師褚顏兩家。用直來橫受之法。故不藏鋒。而聯絲縈帶。以發其機趣。二者其理六一貫。特逆就與直來橫受。形迹判然難合而爲一耳。

看劉文清公清愛堂帖。留得其自然之趣。方悟文人技藝。佳境有二。曰雄奇。曰淡遠。作文然。作詩然。作字亦然。若能含雄奇於淡遠之中。尤爲可貴。

作字之法。險字和字。二者缺一不可。本日閣王箬林謄語。亦於此二字三致意焉。

偶思作字之法。可爲師資者。作二語云。「時賢一石兩水。古法二祖六宗。」一石謂劉石菴。兩水謂李春湖程春海。二祖謂羲獻。六宗謂歐虞褚李柳黃也。

日內頗好寫字。而年老手鈍。毫無長進。故知此事須於三十歲前寫定規模。自三十歲以後。只能下一熟字工夫。熟極則巧妙出焉。筆意間架。梓匠之規矩也。由熟而得妙。則不能與人之巧也。吾於三四十歲時。規矩未定。故不能有所成人有恆言曰。「妙來無過熟。」又曰。「熟能生巧。」又曰。「成熟故知妙也。」巧也。成也。皆從極熟之後得之者也。不特寫字然。凡天下庶事百技。皆先立定規模。後求精熟。即人之所以爲聖人。亦係先立規模。後來精熟。即顏淵未達一間。亦只是欠熟耳。故曰。「夫仁亦在乎熟之而已矣。」

觀何廉舫書扇頭小字。個個權奇。自成風格。余年已五十。而作書無一定之風格。屢有遷變。殊爲可愧。古文一事。寸心頗有一定之風格。而作之太少。不足以自證自慰。至於居家之道。治軍之法。與人酬應之方。亦皆無一定之風格。傳曰。「君子也考。人之成名也。」又曰。「君子成德之稱。」余一無所成。其不足爲君子也明矣。

余往年在京。深以學書爲意。苦思力索。幾於困心衡慮。但胸中有字。手下無字。近歲在軍不甚思索。但每日筆不停揮。除寫字及辦公事外。尙習字一張。不甚間斷。專從間架上用心。而筆意筆力。與之俱進。十年前胸中之字。今竟能達之腕下。可見思與學不可偏廢。

作字之道。剛健婀娜。二者闕一不可。余奉歐陽率更。李北海。黃山谷三家。以爲剛健之宗。昔年於慎獨居敬等事。全未用功。至今衰老。毫無把握。悔之晚矣。

記性日壞。過目之事。頃刻即忘。因立記事冊。於應記者。逐日略記一二。從本日爲始。

古來聖哲胸懷極廣。而可達天德者。約有四端。如篤恭。修己。而生睿智。程子之說也。至誠感神。而致前知。子思之訓也。安貧。樂道。而澗身。辟面。孔顏曾孟之旨也。觀物。聞吟。而意適。神恬。陶白蘇陸之趣也。自恨少壯不知努力。老年常多悔懼。於古人心境。不能領取一二。反復尋思。嘆喟無已。

近年焦慮過多。無一日遊於坦蕩之天。總由於名心大切。俗見太重二端。名心切。故於學問無成。德行未立。不勝愧其。俗見重。故於家人之疾病。子孫及兄弟子孫之有無。堅否強弱。不勝縈擾。用是憂慚踟躕。如鷓自縛。今欲去此二病。須在一「淡」字上著意。不特富貴功名。及身家之順逆。子孫之旺否。悉由天定。卽學問德行之成立與否。一大半關乎天事。一概淡而忘之。庶此心稍得自在。

近來每苦心緒鬱悶。毫無生機。因思尋樂約有三端。勤勞而後憩息。一樂也。至淡以消伎心。二樂也。讀書聲出金石。三樂也。一樂三樂。是咸豐八年所曾有志行之。載於日記者。二樂則近日搜求病根。迄未拔去者。必須於未死之前。拔除淨盡。乃稍安耳。

闡理學宗傳中朱子陸子孫氏所錄。朱子之語。多取其與陸子相近者。蓋偏於陸王之途。去格闕甚遠也。將周易之象及常用之字。分爲條類。別而錄之。庶幾取象於天文。地理。取象於身。於物者。一目了然。少壯不學。老年始爲此蹇淺之舉。抑何陋也。

前曾以四語自儆。曰。慎獨則心安。主敬則身強。求仁則人悅。習勞則神敏。近日又添四語。曰。內訟以去惡。曰。日新以希天。曰。宏獎以育才。曰。貞勝以蒙難。真前此四語互相表裏。而下手工夫。各有切要之方。不知垂老尙能實踐一二否。

憶自辛卯年改號滌生。滌者。取滌其舊染之污也。生者。取明袁了凡之言。「從前種種譬如昨日死。從後種種譬如今日生」也。改號至今九年。而不學如故。豈不可歎。余今年已三十。資稟頑鈍。精神虧損。此後豈復能有所成。但求勤儉有恆。無縱逸欲。以喪先人元氣。困知勉行。期有寸得。以無失詞。臣謹面。日日自苦。不至俟而生淫。如種

岩然。斧斤縱尋之後。無使牛牟又從而牧之。如燕燈然。膏油欲盡之時。無使微風乘之。庶幾稍稍培養精神。不至自速死。誠能日日用功有常。則可以保身體。可以自立。可以仰事俯畜。可以惜福。不使祖宗積累。自我一人享用而盡。可以無愧詞臣。尙能以文章報國。

與小岑譚有不合處。自念一二知心。亦復見疑。則平日之不自修。不見信於人。亦可知矣。可不做懼乎。

三十年爲一世。吾生以辛未十月十一日。今一世矣。聰明日減。學業無成。可勝慨哉。語不云乎。「往者不可諫。來者猶可追。」自今以始。吾其不得自逸矣。

接家信。大人教以保身三要。曰。節欲。節勞。節飲食。又言。「凡人交友。祇見得友不是。而我是。所以今日管飽。明日秦越。」謂我與小珊有隙。是盡人歡。竭人忠之過。宜速改過。走小珊處。當面自認不是。又云。「使氣亦非保身體之道。」小子讀之悚然。小子一喜一怒。勞逸疴瘵。無刻不繫於大人之懷也。若不敬身。真禽獸矣。

自戒潮煙以來。心神徬徨。幾若無主。過欲之難。類如此矣。不挾破釜沈舟之勢。詎有孳哉。

寶蘭泉來。言理見商。余實未能心領其語意。而妄有所陳。自欺欺人。莫此爲甚。總由心有不誠。故詞氣虛憍。卽與人談理。亦是自文淺陋。徇外爲人。果何益哉。

馮樹堂來——渠近日養得好靜氣。迎人——談半時。盡余同至岱雲處久談。論詩文之業。亦可因以進德。彼此持論不合。反覆辯詰。余內有矜氣。自是特甚。反疑人不虛心。何明於責人而闇於責己也。

此刻下手工夫。除謹言。修容。靜坐三事。更從何處下手。每日全無切實處。尙曉曉與人說理。說他何益。是鄙夫之見。於應酬小處計較。遂以小故引伸成忿。徵之不暇。而更引之。是引盜入室矣。

所以須日課冊者。以時時省過。立卽克去耳。今五日一記。則所謂省察者。安在。所謂自新者。安在。吾誰欺乎。真甘爲小人。而絕無羞惡之心者矣。

早起吐血數口。不能靜養。遂以斲喪父母之遺體。一至於此。再不保養。是將限入大不孝矣。將盡之膏。豈可速之

以風。萌蘖之木。豈可牧之以牛羊。苟失其養。無物不消。况我之氣血素虧者乎。今惟有日日靜養。節嗜欲。慎飲食。寡思慮而已。

不敬身之罪大矣。高景逸先生云。「接教言。連日精神不暢。此不可放過。凡天理自然通暢和樂。不通暢處。皆私欲也。當時刻喚醒。不令放倒。」然則人之精神短弱。皆自己有以致之也。

凡辦公事。須視如己事。將來爲國爲民。亦宜處處視如一家一身之圖。方能親切。予今日愧無此見。致用費稍遲。又辦事有要譽的意思。此兩者。皆他日大病根。當時時猛省。

赴張雨農飲約。更初方歸。席間面諛人。有要譽意思。語多諧謔。便涉輕佻。所謂「君子不重則不威」也。歸途便至杜蘭溪家商事。又至竺虔處久談。多言不知戒。絕無所謂省察者。志安在邪。恥安在邪。

余體不舒暢。悶甚不適。高景逸云。「凡天理自然通暢。」予今悶擯至此。蓋身被私意私欲纏擾矣。尙何自拔哉。立志今年自新。重起爐冶。痛與血戰一番。而半月以來。暴棄一至於此。何以爲人。何以爲子。

日來居敬窮理。並無工夫。故聞人說理。聽來都是隔膜。都不真切。愧恥孰甚。飯後無所事事。心如懸而不降者。知其不能定且靜也久矣。

早在朝房言一事。謂無樣。予失言欲以口舌勝人。轉爲人所不服也。

孫高陽史道鄰皆極耐得苦。故能艱難馳驅。爲一代之偉人。今已養成膏粱安逸之身。他日何以肩得大事。

凡事豫則立。本日下午天。因明日有天壇興工。監視行禮。及製造神牌行禮等事。日內未經慮及。頗覺心中不定。懼致貽誤。皆不豫之故也。

是日因早間聞人言。刑部同堂諸君子。疑我去年所上摺。有參劾刑部之言。心不怡者一日。以平日不見信於人。遂招此羣疑衆謗也。

是日「忿」一慾「二念皆大動。竟不能止。恐遂成內傷病矣。

心生忿懣。蓋無養之故也。

子序之言。欲余捐除雜念。輕視萬事。淡泊明志。信良友之言。余今老矣。忿不能懲。慾不能窒。客氣聚於上焦。深用愧憾。古人所以貴於爲道日損也。

損忿之心。蓄於方寸。自各局量太小。不足任天下之大事。

心緒作惡。因無耐性。故刻刻不自安適。又以心中實無所得。不能輕視外物。成敗毀譽。不能無所動於心。甚愧淺陋也。

寫字略多。困倦殊甚。眼花而疼。足輒若不能立者。說話若不能高聲者。衰憊之狀。如七十許人。蓋體質本薄。而疾病憂鬱。多年纏綿。既有以撼其外。讀書學道。志亢而力不副。識遠而行不逮。又有以病其內。故不覺衰困之日逼也。

至老洲頭登大舟。舟係吳城船廠爲余新造者。極堅實。極華麗。因慨然曰。誦韋公「自慚居處崇。未觀斯民康」之句。爲之愧悚不已。」

恭讀硃批余之師心自用。余昔己亥年進京。臨別求祖父教訓。祖父以一「傲」字戒我。今上又以師心戒我。常刻圖書一方。記此二端。

與作梅圍棋一局。旋復鬯論人情之厚薄。讀書人之多涉於虛浮。作梅所陳。多見道之言。余所發。多有激之詞。比來每以說話微多。遂覺神氣疲。茶不支。甚矣。吾衰。身膺重任。大懼隕越。實深惴惴。

自省目病之源。在肝。肝病之源。則由於忮心。名心。不能克盡之故。在室中反復自訟。不能治事。

精神委頓之至。年未五十。而早衰如此。蓋以稟賦不厚。而又百憂摧撼。歷年鬱抑。不無悶損。此後每日須靜坐一次。庶幾等一概於湯世也。

夜洗澡。近製一大盆。盛水極多。洗澡後。至爲暢適。東坡詩所謂「澁槽漆斛江河傾。本來無垢洗更輕。」頗領略

得一一。

石芸齋言。「養目之法。早起洗面後。以水泡目。目屬肝。以水養之。以凝熱之氣。祛散寒翳。久必有効。」云云。而後漢書方術傳云。「愛畜精神。不極視大。」二語亦養目之法。

放翁每以笑睡爲樂。蓋必心無愧怍。而後睡夢皆恬。故古人每以此自諷也。

放翁胸次廣大。蓋與陶淵明。白樂天。邵堯夫。蘇子瞻……等。同其曠逸。其於減廢之意。養生之道。千言萬語。造次不辭。真可謂有道之士。惜余備員兵間。不獲於閒靜中。探討道義。夜睡頗成寐。當思玩索陸詩。少得裨補乎。

務觀言。「養生之道。以目光爲驗。」又言。「『忿』『怒』二字。聖賢亦有之。特能少忍須臾。便不傷生。」可謂名言至論。

養生家之法。莫大於「懲忿。窒慾。少食。多動」八字。

梁苴林中丞歸田瑣記言。「養生之道。不特食宜少。眠亦宜少。」可謂名言。

余少時每遇困乏。卽夢覺。道光十二年間。先大夫數數呼喚不醒。每以爲憂。今三十年矣。而此病如昔。精神亦似未甚衰減者。

癯癯異常。手不停爬。左腿已爬搔糜爛。皮熱作疼。夜用水晶界尺敷貼。取其寒而潤也。

養生之道。當於「眠」「食」二字。悉心體驗。食卽平日飯菜。但食之甘美。卽勝於珍藥也。眠亦不在多寢。但寢得神凝夢甜。卽片刻亦足攝生矣。

養生之道。莫大於眠食。眠不必甜寢。而後爲佳。但能淡然無欲。曠然無累。閉目存神。雖不成寐。亦尙足以養生。余多年不獲美睡。當於此加之意而已。

日來癯癯異常。偏身若有芒刺者然。數夜不能成寐。本日尤不耐煩。因服「歸脾湯」一帖。睡後竟能酣睡。至五更方醒。近數月所未嘗有也。

累年不能成寐之病。今春忽得痊愈。連宵多得美睡。殊不可解。豈俗所謂時好運好。百病除耶。抑憂勤變爲逸豫。清明變爲昏濁。爲衰耗之徵耶。

余自三十時。卽不能多說話。至數十句。便氣不接續。神尤困倦。今已三十餘年。故態不改。亦不加甚。故知身體之強弱。千態萬變。未可以一事之偶強。而遽信爲壽徵。一事之偶弱。而遽信爲敗徵也。

余少時讀書。見先君子於日入之後。上燈之前。小睡片刻。夜則精神百倍。余近日亦思法之。日入後於竹牀小睡。燈後治事。果覺清爽。余於起居飲食。按時按刻。各有常度。一一皆法吾祖吾父之所爲。庶冀不墜家風。

細思近日之所以衰頹。固由年老精力日衰之故。亦由圍棋太多。讀書太久。目光昏澀。精神困之愈困也。嗣後當戒圍棋。卽看書亦宜少減。每日靜坐時許。以資調攝。

因咳嗽勉強靜坐數息。果有效驗。可停一二刻不咳。靜坐良久。間以偃臥。直至燈時。覺咳痰微減矣。

近來因眼瞶。常有昏瞶氣象。計非靜坐。別無治法。作一聯以自警云。「一心履薄臨深。長天之鑒。長神之格。兩眼沐日浴月。由靜而明。由敬而強。」

日內因眼病日篤。老而無成。焦灼殊甚。究其所以鬱鬱不暢者。總由名心未死之故。當痛懲之。以資餘年。

閱范文正集尺牘。年譜中有云。「千古聖賢。不能免生死。不能管後事。一身從無中來。卻歸無中去。誰是親疎。誰能主宰。既無奈何。卽放心逍遙。任委來往。如此既心氣漸順。五臟亦和。藥方有效。食方有味也。只如安樂人忽有憂事。便吃食不下。何況久病。更憂生死。更憂身後。乃在大怖中。飲食安可得下。請寬心將息。」云云。乃勸其中舍三哥之書。余近日多憂。多慮。正宜讀此一段。

日內寸心憂灼。迄無寬舒之時。以是病愈難減。總由少壯不努力。老大悔憾甚多。致心境愁悶異常耳。

黃靜軒勸我靜坐凝神。以目光內視丹田。因舉四語要訣曰。「但凝空心。不凝住心。但滅動心。不滅照心。」又稱二語曰。「未死先學死。有生卽殺生。」有生。謂妄念初生。殺生。謂立予鏟除也。又謂此與孟子「勿忘勿助」之

功相通。吾謂與朱子致中和一節之法亦相通。

閣福壽金鑑。午正數息靜坐。仿東坡養生頌之法。而心粗氣浮。不特不能攝心。並使身不少動。搖而不能。酉刻服藥後。行「小週天」法。靜坐半時許。

丁兩生力勸余不看書。不寫字。不多閱公牘。以保將盲之左目。其言懇惻深至。余將遵而行之。

許仙屏送有瑪瑙。中空積水者。與空青相類。紀澤命匠以金剛鑽鑿之。取水點於余右目中。閉目少頃。傍夕小睡。吳竹如爲余診脈。渠謂余病在心肝。虛火上炎。宜靜坐以養之。非藥所能爲力。

聞翰仙言。何鏡海得靜坐之法。於熊榮隱。賀幼黼學之。目已瞽而復明。余亦思一試也。

楊芋庵寄信。言治目方。每早黎明未起時。以兩手掌之根擦極熱。加以舌尖之津。閉目擦八十一下。久則有效。日內試爲之。而初睡時擦一次。黎明又擦一次。不知果有益否。

近來每日圍棋二局。耗損心力。日中動念之時。夜間初醒之時。皆縈繞於楸枰黑白之上。心血因而愈虧。目光因而愈蒙。欲病體之漸痊。非戒棋不爲功。

有一守備馬昌明善於道家內功。云「能爲余治目疾。與余對坐。渠自運氣能發於吾身五臟」云云。因與對坐三刻許。

竹如處坐甚久。燈後歸。脚腫愈甚。常服之藥已不能入。肥而復瘦。且似已腫過膝上者。大約作文及看生書。俱嫌用心太過。有損於血。而氣不能運化。故至於此。以後嘗不作文。不看生書。

養生之道。「視」「息」「眠」「食」四字最爲要緊。息必歸海。視必垂簾。食必淡節。眠必虛恬。歸海。謂藏息於丹田氣也。垂簾。謂半視不全開。不苦用也。虛。謂心虛而無營。腹虛而不滯也。謹此四字。雖無醫藥丹訣。而足以

卻病矣。

日內眼蒙益甚。或謂調息養神。尙可補救。因試爲之。掉土而塞五津。深恐其無營也。(以上日記)

讀書之道。博學詳說。經世之才。徧采廣詢。自度智慧精神。終恐有所不逮。惟當謹守繩墨。不致以暴棄殆父母之遺體。其有所造。幸也。無所造。終吾身而已矣。

凡人材高下。視其志趣。卑者安流俗庸陋之規。而日趨污下。高者慕往哲盛隆之軌。而日即高明。賢否。智愚。所由區矣。

君子之立身。在審其所處。誠內度方寸。靡所於疚。則仰對昭昭。俯視倫物。寬然不忤。故治長無愧於其師。孟博不慚於其母。彼誠有以自伸於內耳。

君子之學道。尤病於近名。人稟氣於天地。受形於父母。苟官骸得職。作事有倫。雖一字不識。闕寂無聞。於我乎無損也。雖著述萬卷。譽滿天下。於我乎無加也。世士不察。乃欲舍此之由。急彼之驚。校經則漢宋分門。論文則奇偶異幟。小學。金石。算術。輿地之事。名目既繁。風尚日新。躑年而殫日。悴力儻身。則足以熾其好名爭勝之私已矣。豈篤於爲己者哉。僕之往歲。亦嘗馳逐衆說。昏庸作輟。百無一成。窮而思返。恍若有悟。乃知德性未尊。則問學適以助長。德性既尊。然後吾之知識。少焉而不足。恥。多焉而不足。矜。周公之材藝。孔子之多能。吾不如彼。非吾汝也。若其踐形盡性。彼之所稟。吾亦稟焉。一息尙存。不敢不勉。是以邇日業術雖無寸進。而心志大定。寤寐安恬。

曩昔欲有所鑽仰於作者之林。近亦知難而退。不敢復有意矣。惟思謹守大閑。不欲脂韋以規時利。寸心耿耿。獨此之執。

自度才能淺薄。不足謀事。惟有「不要錢不怕死」六字。時時自矢。以質鬼神。以對君父。即藉以號召吾鄉之豪傑。

君子欲有所樹立。必自「不安求人知」始。

古人謂齊桓葵邱之會。微有振矜。而叛者九國。亢盈悔吝之際。不可以不慎也。

我輩辦事。成敗聽之於天。毀譽聽之於人。惟在己之規模氣象。則我有可以自主者。亦曰「不隨衆人之喜懼爲

喜懼耳。」

貴精不貴多。積小以高大。戒維莠之莠莠。法桃李之不言。當茲艱貞之際。尤不能不進此迂拙之言也。

勳位並隆。務宜敬以持躬。恕以待人。敬則小心翼翼。事無巨細。皆不敢忽。恕則凡事留餘地以處人。功不獨居。過不推諉。常常記此二字。則長履大任。福祚無量矣。

鄙人在外。毀譽互見。然究係毀者少而譽者多。清夜自思。尙覺名浮於實十倍百倍也。吾輩互相砥礪。要當以聲聞過情爲切戒。

「敬」「恕」二字。細加體認。實覺刻不可離。敬則心存而不放。恕則不蔽於私。孟子之所謂「推」。所謂「達」。所謂「擴充」。指示至爲切近。中庸之十三章。論語之告子貢。告仲弓。皆以「恕」字爲開宗要義。大抵接人處事。於見得他人不是。極怒之際。能設身易地以處。則意氣頓平。故恕字爲求仁極捷之徑。來示以「致知」爲大頭腦工夫。鄙意。敬是平日涵養之道。恕是臨時應事之道。致知。則所以講求此敬講求此恕者也。

軍中稍暇。尙親書籍。不敢盡廢故業。又樂近正士。喜聞迂直之言。以自警。此二者尙頗兢兢。冀不終爲君子所棄。以至交而兼姻戚。尙不肯面進箴規。欲吐還茹。豈吾固拒人千里耶。愧甚。昌黎所謂。「中朝大官老於事。詎肯感激徒媵媵。」吾非大官。亦漸老於事。鋒鋇鈍矣。

巧言令色。足恭。三者有志學步。質既魯鈍。學又作輟。數月以來。毫無效驗。或勸先難後獲。宜再卑抑以俟大效。僕則抱七必不堪。仍將修吾初服。免使陳咸頭觸扉風耳。

惠箴不誠不敬之弊。敢不銘佩。惟頻年鬱結之懷。紙墨難罄。非少佐以談諧。則滿腔秋意。無復生機。張籍昔以此規退之。韓公亦以善戲不虛答之。

人言陰陽俱虧。須施峻補之劑。鄙意閣下春秋方盛。當非純補所能奏功。恐有風寒憂鬱夾雜其中。久病之後。自未可用克伐寒涼之品。何不概停百藥。靜養數月。徐察端倪。宜占勿藥之喜。

吾輩讀書，惟「敬」字「恆」字二端，是徹始徹終工夫。去歲擇別時，曾以「敬」字相勸。今年致芝生書，亦以有恆爲告。蓋鄙人生平欠此二字工夫。至今老而無成，深自悔憾。故凡友人有下問者，輒以己之所悔爲言，勸人及時自勉。

教舍沅弟於惡巧惡盈之外，又曰：「天道惡貳，貳者，多猜忌也，不忠誠也，無恆心也。」

趨時之效，茫如捕風，亦稍稍倦矣。歷年疚心之端，逐一補救，十已得其七八。

來示：「趨時者博無識之喜，損有道之真。」謹當書紳銘佩。吾齒髮已老，乃欲俛仰一效桔槔，所謂「未得國能，徒失故步」者也。自宜仍守吾拙，不妄悅人，以副同志期待之厚。

前緘所稱大處著眼，小處下手，閣下推廣其義，引朱子所謂「真正大英雄，須從臨深履薄做出，豈浩然之氣，斂然規矩準繩，不敢走作之中，鄙人殘陋，何足語此。惟閣歷日久，險艱備嘗，鑒心目中，所規畫以爲高遠者，畢竟手之所持，足之所踐，何嘗做得到三四分。」

草薄從忠，鄙意亦夙懷此志。特有天質本來之薄，有外物激之使薄。本來之薄，草之已極不易，激之使薄，尤覺旋革旋萌，毫無長進，深以爲愧。

古人謂「寡言養氣，寡視養神，寡思養精」。尊處勝友如雲，難以言寡。簿書如麻，難以寡視。或請寡思，以資少息乎。閣下尙能黎明即起，否不可間斷。一事有恆，則萬事皆可漸振。毋以爲小端而忽之。至囑。

英年秀挺，自以專心讀書，不染官場氣習爲妥。卽世態人情，亦不宜遽令識透。早透則腐其本質，而日趨於薄。既薄而返之醇厚，千難萬難。

居今之世，要以言遜爲宜。有過人之行，而口不自明，有高世之功，而心不自居，乃爲君子自厚之道。

國藩才知本細，今精力儘甚，忽膺此重任。六懼墮越，爲天下笑。爲鄉里羞。請閣下側聽清議，如有顯然過失，大拂輿情者，卽祈立刻飛緘詳示，如其力不能改，別徐圖之。若此心，則決不文過而懼改也。

位愈高則譽言日增。箴言日寡。望愈重則責之者多。怨之者少。閣下愛我。迫越恆俗。頗勿以藥石之言相繩。弟每日行事。有日記一冊。附家報中。閣下如有不謂爲然之處。卽懇逐條指示。不勝銘感。

凡沈痾在身。而人力可以自爲主持者。約有二端。一曰。以志帥氣。一曰。以靜制動。人之疲憊不振。由於氣弱。而志之強者。氣亦爲之稍變。如貪早睡。則強起以興之。無聊賴。則端坐以凝之。此以志帥氣之說也。久病虛怯。則時時有一畏死之見。撞撥於胸中。卽魂夢亦甚不安恬。須將生前之名。身後之事。與一切妄念。剷除淨盡。自然有一種恬淡意味。而寢定之餘。真陽自生。此以靜制動之法也。

方今天下大亂。人人皆懷苟且之心。出範圍之外。無過而問焉者。吾輩當自立準繩。自爲守之。並約同志者共守之。無使吾心之賊。破吾心之牆子。

再出視師。痛攻前此客氣用事之弊。以一勤字自勸。仰希仲山前夙夜匪懈。陶桓公分陰是惜之風。來云所引先勞之訓。蓋嘗有志焉而未逮。

常守「花未全開月未圓滿」之戒。不稍涉驕矜之氣。則名位日隆矣。

公生平最好用心。尤好用心於無可如何之地。莊子有言。「違命之情者。不務知之所無可奈何。」假如目下武漢江西。倏有大變。是雖知之而無可奈何者也。假如吾輩三日不汗。溢先朝露。是雖知之而無可奈何者也。願公於人力所能爲者。則略加思慮。於天命之無可奈何者。則冥然不顧。

近惡聞高言深論。但好庸言庸行。雖以作梅之襟實。亦嫌其立論失之高深。其論公之病。侍亦慮其過於幽渺。願公從庸處淺處著想。聖人言不逆詐不億不信。吾輩且嘗不逆。死不億不起。以爲養生之法。不逆敗。不億不壞。以爲行軍之法。(以上書札)

(勉強)孟子曰。「口之於味也。目之於色也。耳之於聲也。鼻之於臭也。四肢之於安佚也。性也。有命焉。」君子不謂性也。人性本善。自爲氣稟所拘。物欲所蔽。則本性日失。故須學焉而後復之。失又甚者。須勉強而後復之。喪

之衰也。不可以僞爲者也。然衰麻苦塊。覩物而痛創。自至蹙蹙號呼。變節而綿縵隨之。是亦可勉強而致哀也。祭之敬也。不可以僞爲者也。然自盥至薦。將之以盛心。自朝至晝。勝之以強力。是亦可以勉強而致敬也。與人之和也。不可以僞爲者也。然揖讓拜跪。人不得已則下之。筐篚豆籩。意不足而文則先之。是亦可以勉強而致和也。凡有血氣。必有爭心。人之好勝。誰不如我。施諸己而不願。亦勿施於人。此強恕之事也。一日強恕。日日強恕。一事強恕。事事強恕。久之則漸近自然。以之修身。則順而安。以之涉世。則諧而祥。孔子之告子貢仲弓。孟子之言求仁。皆無先於此者。若不能勉強。而聽其自至。以頑鈍之質。而希生安之效。見人之氣類與己不合。則隔膜棄置。甚或加之以不能堪。不復能勉強自抑。舍己從人。傲情彰於身。乖戾著於外。鮮不及矣。莊子有言。「刻核太甚。則人將以不肖之心應之。」董生有言。「強勉學問。則聞見博而知益明。強勉行道。則德日進而有大功。」至哉言乎。故勉強之爲道甚博。而端自強恕始。

（君子小人）陳容有言曰。「仁義豈有常。蹈之則爲君子。違之則爲小人。」大哉言乎。仁者。物我無間之謂也。一有自私之心。則小人矣。義者。無所爲而爲之謂也。一有自利之心。則小人矣。同一日也。朝而公正則爲君子。夕而私利則爲小人。同一事也。初念公正則爲君子。轉念私利則爲小人。惟聖罔念作狂。惟狂克念作聖。所爭祇在幾微。君子無終食之間違仁。造次必如是。顛沛必如是。一不如是。則流入小人而不自覺矣。所謂小人者。識見小耳。度量小耳。井底之蛙。所窺幾何。而自以爲絕倫之學。遠東之豕。所異幾何。而自以爲蓋世之勳。推以子子爲義。以硜硜爲信。以齷齪爲廉。此皆識淺而易以自足者也。君臣之知。須積誠以相感。而動疑主恩之過薄。朋友之交。貴積漸以相孚。而動怨知己之罕。其或兄弟不相容。夫婦不相信。父子不相亮。此皆量褊而易以滋疑者也。君子則不然。廣其識。則天下之大。棄若敝屣。堯舜之業。視若浮雲。宏其度。則行有不得。反求諸己。己所不欲。勿施於人。烏有所謂而私自利者哉。不此之求。而詡詡然號於衆曰。「吾君子也。」當其自詡君子。深信不疑之時。識者已嗤其爲小人矣。

（克勤小物）古之成大業者。多自克勤小物而來。百尺之樓。基於平地。十丈之島。一尺一寸之所積也。萬石之鍾。一銖一兩之所累也。文王之聖。而自朝至於日中昃。不遑暇食。周公仰而思之。夜以繼日。幸而得之。坐以待旦。仲山甫夙夜匪懈。其勤若此。則無小無大。何事之敢慢哉。諸葛忠武爲相。自杖罪以上。皆親自臨決。杜慧度爲政。纖密一如治家。陶侃綜理密微。雖竹頭木屑。皆儲爲有用之物。朱子謂「爲學須銖積寸累」。爲政者。亦未有不由銖積寸累。而克底於成者也。秦始皇石量書。魏明帝自棗行尙書事。隋文帝衛士傳餐。皆爲後世所譏。以爲天子不當親理細事。余謂天子。或可不親細事。若爲大臣者。則斷不可不親。陳平之問錢穀不知。問刑獄不知。未可以爲人臣之法也。凡陳功立事。必以目所共見者爲效。苟有車。必見其軾。苟有衣。必見其敝。苟爲博物君子。必見其著述滿家。抄撮累篋。苟爲躬行君子。必見其容色之晬盍。徒黨之感慕。苟善治民。必見其所居民悅。所去見思。苟善治軍。必見其有戰則勝。有攻則取。若不以目所共見者爲效。而但憑心所懸揣者爲高。則將以虛薄爲辯。而欺名檢。以望空爲賢。而笑勤恪。何晏鄧颺之徒。流風相扇。高心而空復。尊己而傲物。大事細事。皆墮壞於冥昧之中。親者賢者。皆見拒於千里之外。以此而冀大業之成。不亦悖哉。孔子許仲弓南面之才。而雍以居敬爲行簡之本。蓋必能敬。乃無廢事也。

（才德）司馬溫公曰。「才德全盡。謂之聖人。才德兼亡。謂之愚人。德勝才謂之君子。才勝德謂之小人。」余謂德與才不可偏重。譬之於水。德在濶下。才卽其載物溉田之用。譬之於木。德在曲直。才卽其舟楫棟梁之用。德若水之源。才卽其波瀾。德若木之根。才卽其枝葉。德而無才以輔之。則近於愚人。才而無德以主之。則近於小人。世人多不甘以愚人自居。故自命每願爲有才者。世人多不欲與小人爲緣。故觀人每好取有德者。大較然也。二者既不可兼。與其無德而近於小人。毋寧無才而近於愚人。自修之方。觀人之術。皆以此爲衡可矣。吾生平短於才。愛我者或謬以德器相許。實則雖曾任艱鉅。自問僅爲愚人。幸不以私智詭譎鑿其愚。尙可告後昆耳。

（誠神）大聖固由生知。而其平生造次克念精誠。亦迥異於庸衆。聞韶盡善。則亡味至於三月。讀易穿過。則草

纏至於三紀。文王則如見於琴。周公則屢入於夢。至誠所積。神奇應焉。故靡見郊而增感。風不至而興嘆。蓋其平日力學所得。自信爲天地鬼神所不違也。卽至兩極。憂奠之際。禱神爲臣之請。亦皆守禮循常。較然不欺。其後曾子易簣。誦戰兢之詩。而自幸知免。猶有聖門一息不懈之風。後世若邵子之終。馬程諸人咸集。朱子之沒。黃蔡諸子並臨。亦皆神明朗徹。不負所學。昔人云。「善吾生者。乃所以善吾死也。」若非精誠積於畢生。神志甯於夙昔。豈能取辦於臨時哉。

（兵氣）田單攻狄。魯仲連策其不能下。已而果三月不下。田單問之。仲連曰。「將軍之在卽墨。坐則織賁。立則仗鉞。爲士卒倡。將軍有死之心。士卒無生之氣。聞君言莫不揮涕奮臂而欲戰。此所以破燕也。當今將軍東有掖邑之奉。西有淄上之娛。黃金橫帶而騁乎淄澠之間。有生之樂。無死之心。所以不勝也。」余嘗深信仲連此語。以爲不刊之論。同治三年。江甯克復後。余見湘軍將士。卽驕盈娛樂。慮其不可復用。全行遣撤歸農。至四年五月。余奉命至河南山東勦捻。湘軍從者極多。專用安徽之淮勇。余見淮軍將士。雖有振奮之氣。亦乏憂危之懷。竊用爲慮。恐其不能平賊。莊子云。「兩軍相對。衰者勝矣。」仲連所言。以憂勤而勝。以娛樂而不勝。亦卽孟子「生於憂患。死於安樂」之旨也。其後。余因疾病疏請退休。遂解兵柄。而合肥李相國。卒用淮軍以削平捻匪。蓋淮軍之氣尙銳。憂危以感士卒之情。振奮以作三軍之氣。二者皆可以致勝。在主帥相時而善用之已矣。余專主憂勤之說。殆知其一。而不知其二也。聊志於此。以識吾見理之偏。亦見古人格言至論。不可舉一概百。言各有所當也。

（勉強）魏安釐王問天下之高士於子順。子順以魯仲連對。王曰。「魯仲連強作之者。非體自然也。」子順曰。「人皆作之。作之不止。乃成君子。作必不變。習與體成。則自然也。」余觀自古聖賢豪傑。多由強作而臻絕詣。惟南子曰。「功可強成。名可強成。」中庸曰。「或勉強而行之。及其成功一也。」近世論人者。或曰。「某也。向之所爲不如是。今強作如是。是不可信。」沮自新之途。而長偷惰之風。莫大乎此。吾之觀人。亦嘗有因此而失賢才者。追書以志吾過。

（忠勤）開國之際。若漢唐之初。異才畸士。大功德烈。騁譽雲與。蓋全係乎天運。而人事不得與其間。至中葉以後。君子欲有所建樹以濟世而康屯。則天事居其半。人事居其半。以人事與天事爭衡。莫大乎「忠勤」二字。亂世多尙巧僞。惟忠者可以韋其習。末俗多偷惰。惟勤者可以遏其流。忠不必有過人之才智。盡吾心而已矣。勤不必有過人之精神。竭吾力而已矣。能剖心肝以奉至尊。忠至而智亦生焉。能苦筋骨以捍大患。勤至而勇亦出焉。余觀近世賢哲。得力於此二字者。頗不乏人。余亦忝附諸賢之後。謬竊虛聲。而於「忠勤」二字。自愧十不逮一。吾家子姪。儻將來有出任艱鉅者。當勵忠勤以補吾之闕憾。忠之積於平日者。則自不妄語始。勤之積於平日者。則自不晏起始。

（才用）雖有良藥。苟不當於病。不逮下品。雖有賢才。苟不當於用。不逮庸流。梁麗可以衝城。而不可以窒穴。犛牛不可以捕鼠。騏驥不可以守閭。千金之劍。以之析薪。則不如斧。三代之鼎。以之墾田。則不如耜。當其事。則凡材亦奏神奇之效。否則鉏鋤而終無所成。故世不患無才。患用才者不能器使而適宜也。魏無知論陳平曰。「今有尾生。孝已之行。而無益勝負之數。陛下何暇用之乎。」當戰爭之世。苟無益勝負之數。雖盛德亦無所用之。余生平好用忠賢者流。今老矣。始知藥之多不當於病也。

（史書）史記敘韓信破魏豹。以木罌渡軍。其破龍且。以囊沙壅水。竊嘗疑之。魏以大將柏直當韓信。以騎將馮敬當灌嬰。以步將項它當曹參。則兩軍之數。殆亦各不下萬人。木罌之所渡幾何。至多不過二三百人。豈足以制勝乎。沙囊壅水。下可滲漏。旁可橫溢。自非與工嚴塞。斷不能築成大堰。壅之使下流竟絕。如其寬河盛漲。則塞之固難。決之亦復不易。若其小港微流。易塞易決。則決後未必遂不可涉渡也。二者揆之事理。皆不可信。敘兵事莫善於史記。史公敘兵。莫詳於淮陰傳。而其不足據如此。孟子曰。「盡信書。則不如無書。」君子之作事。既徵諸古籍。諏諸人言。而又必慎思而明辨之。庶不至冒昧從事耳。

（陽剛）漢初功臣。惟樊噲氣貫較粗。不能與諸賢並論。淮陰侯所差與爲伍者也。然吾觀其人。有不可及者二。

沛公初入咸陽。見秦宮室帷帳狗馬重寶婦女千數。意欲留居之。噲輒諫止。謂「此奢麗之物。乃秦之所以亡。願急還霸上。無留宮中。」一也。高祖即病臥禁中。詔戶者無得入羣臣。噲獨排闥直入。諫之以「昔何其勇。今何其憊。」且引趙高之事以爲鑒。二也。此二事者。乃不媿大人格君心者之所爲。蓋人稟陽剛之氣最厚者。其達於事理。必有不可掩之偉論。其見於儀度。必有不可犯之英風。噲之鵠門披帷拔劍割彘。與夫霸上還軍之請。病中排闥之諫。皆陽剛之氣之所爲也。未有無陽剛之氣而能大有立於世者。有志之君子。養之無害可耳。

（漢文帝）天下惟誠不可掩。漢文帝之謙讓。其出於至誠者乎。自其初至代邸。西鄉讓三。南鄉讓再。已款然不敢當帝位之尊。厥後不肯建立太子。增祀不肯祈禱。與趙佗書曰。「側室之子。」曰。「棄外奉藩。」曰。「不得不立。」臨終遺詔。戒重服。戒久臨。戒厚葬。蓋終始自覺不稱天子之位。不欲享至尊之奉。至於馮唐。衆辱而卒使盡言。吳王不朝而賜以几杖。句羣臣言朕過失。巨朕不逮。其謙讓發於中心惻怛之誠。蓋其德爲三代後僅見之賢主。而其心則自愧不稱帝王之職而已矣。夫使居高位者而常存愧不稱職之心。則其過必鮮。況大君而存此心乎。吾嘗謂爲大臣者。宜法古帝王者三事。舜禹之不與也。大也。文王之不遑也。勤也。漢文之不稱也。謙也。師此三者。而出於至誠。其免於戾矣乎。

（周亞夫）周亞夫剛正之氣。已關後世言氣節者之風。觀其細柳勞軍。天子改容。已凜然不可犯。厥後將兵不救梁王之急。不肯侯王信。不肯王匈奴六人。皆秉剛氣而持正論。無所瞻顧。無所屈撓。後世西漢。若蕭望之。朱雲。東漢。若楊震。孔融之徒。其風節略與相近。不得因其死於非命而薄之也。惟其神鋒太雋。瞻矚太尊。亦頗與諸葛恪相近。是乃取禍之道。君子師其剛而去其傲可耳。

（言命）孟子言治亂興衰之際。皆由人事主之。初不關乎天命。故曰。以齊王由反手也。曰。可使制挺以撻秦楚之堅甲利兵。皆以人謀而操必勝之權。所謂禍福無不自己求之也。董子亦曰。「治亂興廢。在於己。非天降命。不可得反。」與孟子之言相合矣。孔子曰。「天生德於予。桓魋其如予何。天之未喪斯文。匡人其如予何。」亦似深

信在己者之有權。然鳳鳥不至，河不出圖，有「吾已矣夫」之歎，又似以天命歸諸不可知之數。故答子服景伯曰：「道之將行，命也。道之將廢，命也。」語南宮适曰：「君子若人，尙德若人。」其隱然以天命爲難測。聖賢之言，微旨不同，在學者默會之焉耳。

（功效）苟有實，必能潤屋。苟有德，必能潤身。不必如孔子之溫良恭儉，孟子之晬面盎背，而後爲符驗也。凡盛德之君子，必有非常之儀範，是真龍，必有雲，是真虎，必有風，不必如程門之游楊尹謝，朱門之黃蔡陳李而後爲響應也。凡修業之大人，必有景從之徒黨，斯二者，其幾甚微，其效甚著，非實有諸己，焉可倖致哉。

一曰：慎獨則心安。自修之道，莫難於養心。心既知有善有惡，而不能實用其力以爲善去惡，則謂之自欺。方寸之自欺與否，蓋他人所不及知而已獨知之。故大學之誠意章，兩言慎獨。果能好善如好好色，惡惡如惡惡臭，力去人欲以存天理，則大學之所謂「自慊」，中庸之所謂「戒慎恐懼」，皆能切實行之。即曾子之所謂「自反而縮」。孟子之所謂「仰不愧，俯不忤」，所謂「養心莫善於寡欲」，皆不外乎是。故能慎獨，則內省不疚，可以對天地質鬼神，斷無行有不慊於心則餒之時。人無一內愧之事，則天君泰然，此心常快足寬平，是人生第一自強之道。第一尋樂之方，守身之先務也。

二曰：主敬則身強。敬之一字，孔門持以教人。春秋士大夫，亦常言之。至程朱，則千言萬語，不離此旨。「內而專靜純一，外而整齊嚴肅。」敬之工夫也。「出門如見大賓，使民如承大祭。」敬之氣象也。「修己以安百姓，篤恭而天下平。」敬之效驗也。程子謂：「上一於恭敬，則天地自位，萬物自育，氣無不和，四靈畢至，聰明睿知，皆由此出。」蓋謂敬則無美不備也。吾謂敬字切近之效，尤在能固人肌膚之會，筋骸之束，莊敬日強，安肆日偷，皆自然之徵應。雖有衰年病軀，一過壇廟祭獻之時，戰陣危急之際，亦不覺神爲之悚，氣爲之振。斯足知敬能使人身強矣。若人無衆寡，事無大小，一一恭敬，不敢懈怠，則身體之強健，又何疑乎。

三曰：求人則人悅。凡人之生，皆得天地之理以成性，得天地之氣以成形。我與民物，其大本乃同出一源。若但知

私己而不知仁民愛物。是於大本一源之道。已悖而失之矣。至於尊官厚祿。高居人上。則有拯民溺救民飢之責。讀書學古。粗知大義。即有覺後知覺後覺之責。若但知自了。而不知教養庶彙。是於天之所以厚我者。辜負甚大矣。孔門教人。莫大於求仁。而其最切者。莫要於「欲立立人。欲達達人」。數語。立者。自立不懼。如富人百物有餘。不假外求。達者。四通不悖。如貴人登高一呼。羣山四應。人孰不欲己立己達。若能推以立人達人。則與物同春矣。後世論求仁者。莫精於張子之西銘。彼其視民胞物與。宏濟羣倫。皆事天者性分當然之事。必於此乃可謂之人。不如此。則曰悖德。曰賊。誠如其說。則雖盡立天下之人。盡達天下之人。而曾無善勞之足言。人有不悅而歸之者乎。

四曰。習勞則神斂。凡人之情。莫不好逸而惡勞。無論貴賤智愚老少。皆貪於逸而憚於勞。古今之所同也。人一日所著之衣。所進之食。與一日所行之事。所用之方相稱。則旁人躋之。鬼神許之。以爲彼自食其力也。若農夫織婦。終歲勤動。以成數石之粟。數尺之布。而富貴之家。終歲逸樂。不營一業。而食必珍羞。衣必錦繡。酣蒙高眠。一呼百諾。此天下最不平之事。鬼神所不許也。其能久乎。古之聖君賢相。若湯之昧且丕顯。文王日昃不遑。周公夜以繼日。坐以待旦。蓋無時不以勤勞自勵。無逸一篇。推之於勤則壽考。逸則夭亡。歷歷不爽。爲一身計。則必操習技藝。磨鍊筋骨。困知勉行。操心危慮。而後可以增智慧而長才識。爲天下計。則必己飢己溺。一夫不獲。引爲余辜。大禹之肩乘四載。過門不入。墨子之磨頂放踵。以利天下。皆極儉以奉身。而極勤以救民。故荀子好稱大禹墨翟之行。以其勤勞也。軍興以來。每見人有一材一技。能耐艱苦者。無不見用於人。見稱於時。其絕無材技。不慣作勞者。皆唾棄於時。飢凍就斃。故勤則壽。逸則夭。勤則有材而見用。逸則無能而見棄。勤則博濟斯民。而神祇欽仰。逸則無補於人。而神鬼不歆。是以君子欲爲人神所憑依。莫大於習勞也。

格言四幅書贈李芋仙

身到。心到。眼到。手到。口到。

身到者。如作吏。則親驗命盜案。親查鄉里。治軍。則親巡營壘。親冒矢石是也。心到者。凡到苦心剖晰。大條理。小條理。始條理。終條理。先要學得開。後要括得攏是也。眼到者。著意看人。認真看公牘是也。手到者。於人之短長。事之關鍵。隨筆寫記。以備遺忘是也。口到者。於使人之事。警衆之辭。既有公文。又不憚再三苦口丁寧是也。余近與寮友論治事之法。錄貽芋仙共證之。

讀古書。以訓詁爲本。作詩文。以聲調爲本。事親。以得歡心爲本。養生。以少惱怒爲本。立身。以不妄語爲本。治家。以不晏起爲本。居官。以不要錢爲本。行軍。以不擾民爲本。

右八者。余庚申六月書於日記冊中。用以自警。厥後軍事無利。每於家書中錄此以誡子弟。芋仙屬書居官格言。因錄一通。此八者。後四語尤爲吃緊。或出或處。不可離也。

以才自足。以能自矜。則爲小人所忌。亦爲君子所薄。

老莊之旨。以此爲最要。故再三言之而不已。南榮遂羸糧至老子之所。老子曰。「子何與人偕來之衆也。」國藩每讀之。不覺失笑。以仲尼之溫恭儉讓。常以周公才美驕吝爲戒。而老子猶曰。「去汝之躬矜與容智。」雖非事實。而老氏之所惡於儒術者。舉可知已。莊生尤數數言此。吾最愛徐無鬼篇中語曰。「學一先生之言。則暖曖姝姝而私自悅也。」又曰。「以賢臨人。未有得人者也。以賢下人。未有不得人者也。」

古之善爲詩古文者。其工夫皆在詩古文之外。若尋行數墨以求之。索之愈迫。則去之愈遠矣。

余好讀歐陽公送徐無黨南歸序。乃知古之賢者。其志趣殊不願以文人自命。東坡讀少陵「許身稷契及舜舉十六相」等句。以謂此老胸中大有事在。大抵經論雷雨。關乎遭際。非人力所能強。至於襟期澹泊。遺外聲利。則學者人人可勉也。

書贈弟六則

（清）記曰。「清羽在躬。一吾人身心之間。須有一種清氣。使子弟效其和。鄉黨薰其德。庶幾積善可以致祥。欽

酒太多。則氣必昏濁。說話太多。則神必躁擾。弟於此二弊。皆不能免。欲葆清氣。首貴飲酒有節。次貴說話不苟。
(儉) 凡多欲者。不能儉。好動者。不能儉。多欲。如好衣好聲色。好書畫古玩之類。皆可浪費破家。弟向無癖嗜之好。而頗有好動之弊。今日思作某事。明日思訪某客。所費日增而不覺。此後講求儉約。首戒好動。不輕出門。不輕舉事。不特不作無益之事。即修理橋梁道路寺觀善堂。亦不可輕作舉動。多則私費大矣。其次。則僕從宜少。所謂「食之者寡」也。其次。則送情宜減。所謂「用之者舒」也。否則。今日不儉。異日必多欠債。既負累於親友。亦貽累於子孫。

(明) 三達德之首曰智。智。即明也。古來豪傑。動稱英雄。英。即明也。明有二端。人見其近。吾見其遠。曰高明。人見其粗。吾見其細。曰精明。高明者。譬如室中所見有限。登樓則所見遠矣。登山則所見更遠矣。精明者。譬如至微之物。以顯微鏡照之。則加大一倍十倍百倍矣。又如粗糙之米。再舂則粗糠全去。三舂四舂則精白絕倫矣。高明由於天分。精明由於學問。吾兄弟忝居大家。天分均不甚高明。專賴學問以求精明。好問若買顯微之鏡。好學若舂上熟之米。總須心中極明。而後口中可斷。能明而斷。謂之英斷。不明而斷。謂之武斷。武斷自己之事。爲害猶淺。武斷他人之事。招怨實深。惟謙退而不肯輕斷。最足養福。

(慎) 古人曰欽。曰敬。曰謙。曰虔。恭。曰謹。曰祗懼。皆慎字之義也。慎者。有所畏憚之謂也。居心不循天理。則畏天怒。作事不順人情。則畏人言。少賤。則畏父師長官長。老年。則畏後生之竊議。高位。則畏僚屬之指摘。凡人方寸有所畏憚。則過必不大。鬼神必從而原之。若嬉鬪牌等事。而毫無忌憚。壞鄰黨之風氣。作子孫之榜樣。其所損者大矣。

(恕) 聖門好言仁。仁。即恕也。曰富。曰貴。曰成。曰榮。曰譽。曰順。此數者。我之所喜。人亦皆喜之。曰貧。曰賤。曰敗。曰辱。曰毀。曰逆。此數者。我之所惡。人亦皆惡之。吾輩有聲勢之家。一言可以榮人。一言可以辱人。榮人則得名得利。得光耀。人尙未必感我。何也。謂我有勢。幫人不難也。辱人。則受刑受罰受苦惱。人必恨我刺骨。何也。謂我倚勢欺

人太甚也。吾兄弟須從「恕」字痛下工夫。隨在皆設身以處地。我要步步站得穩。須知他人也要站得穩。所謂立也。我要處處行得通。須知他人也要行得通。所謂達也。今日我處順境。預想他日也有處逆境之時。今日我以盛氣凌人。預想他日人亦以盛氣凌我之身。或凌我之子女。常以恕字自惕。常留餘地處人。則荆棘少矣。
(靜)靜則生明。動則多咎。自然之理也。家長好動。子弟必紛紛擾擾。朝生一策。暮設一計。雖嚴禁之而不能止。欲求一家之安靜。先求一身之清靜。靜有二道。一曰。不入是非之場。二曰。不入勢利之場。鄉里之詞訟曲直。於我何干。我若強爲剖斷。始則賠酒飯。後則惹怨恨。官場之得失升沉。於我何涉。我若稍爲干預。小則招讒物。大則挂彈章。不若一概不管。可以斂後輩之躁氣。即可保此身之清福。(以上雜著)

治學

子序之爲人。予至今不能定其品。然識見最大且精。嘗教我云。「用功譬若掘井。與其多掘數井而皆不及泉。何若老守一井。力求及泉。而用之不懈乎。」此語正與予病相合。蓋予所謂掘井多而皆不及泉者也。
天下萬事萬理。皆出於「乾」「坤」二卦。卽以作字論之。純以神行。大氣鼓盪。脈絡周通。潛心內轉。此「乾」道也。結構精巧。向背有法。修短合度。此「坤」道也。凡乾以神氣言。凡坤以形質言。「禮樂不可斯須去身」卽此道也。樂本於乾。禮本於坤。作字而優游自得。真力彌滿者。卽樂之意也。絲絲入扣。轉折合法者。卽禮之意也。吾輩讀書。只有兩事。一者進德之事。講求乎誠正。修齊之道。以圖無忝所生。一者修業之事。操習乎記誦。詞章之術。以圖衛其身。進德之事。難以盡言。至於修業以衛身。吾請言之。衛身。莫大於謀食。農工商。勞力以求食者也。士勞心以求食者也。故或食祿於朝。教授於鄉。或爲傳食之客。或爲入幕之賓。皆須計其所業。足以得食而無愧。科名者。食祿之階也。亦須計吾所業。將來不至尸位素餐。而後得科名而無愧。食之不得。窮通由天作主。予奪由人作主。業之精不精。則由我作主。然吾未見業果精而終不得食者也。農果力耕。雖有錢糧。必有豐年。商果積貨。

雖有壅滯。必有這時。士氣能精其業。安見其終不得科名哉。即終不得科名。又豈無他途衣食者哉。然則特患業之不精耳。求業之精。別無他法。曰「專」而已矣。諺曰。「藝多不養身。」謂不專也。吾掘井多而無泉可飲。不專之咎也。苟能發奮自立。則家塾可讀書。即曠野之地。熱鬧之場。亦可讀書。負薪牧豕。皆可讀書。苟不能發奮自立。則家塾不宜讀書。即清淨之鄉。神仙之境。皆不能讀書。何必擇地。何必擇時。但自問立志之真不真耳。

人不讀書則已。亦既自名曰「讀書人」。則必從事於大學。大學之綱領有三。明德。新民。止至善。皆我分內事也。若讀書不能體貼到身上去。謂此三項。與我身了不相涉。則讀書何用。雖使能文能詩。博雅自詡。亦只算得識字之牧猪奴耳。豈得謂之「明理有用」之人也乎。朝廷以制藝取士。亦謂其代聖賢立言。必能明聖賢之理。行聖賢之行。可以居官蒞民。整躬率物也。若以明德新民爲分外事。則雖能文能詩。而於修己治人之道。實茫然不講。朝廷用此等人作官。與用牧猪奴作官。何以異哉。然則既自名爲讀書人。則大學之綱領。皆己身切要之事。明矣。其條目有八。自我觀之。其致功之處。則僅二者而已。曰「格物」。曰「誠意」。格物。致知之事也。誠意。力行之事也。物者何。即所謂本末之物也。身心。意。知。家。國。天下。皆物也。天地萬物。皆物也。日用常行之事。皆物也。格者。即物而窮其理也。如事親定省。物也。究其所以當定省之理。即格物也。事兄隨行。物也。究其所以當隨行之理。即格物也。吾心。物也。究其存心之理。又博究其省察涵養以存心之理。即格物也。吾身。物也。究其敬身之理。又博究其立齊坐尸以敬身之理。即格物也。每日所看之書。句句皆物也。切己體察。窮究其理。即格物也。——此致知之事也。所謂誠意者。即其所知而力行之。是不欺也。知一句。便行一句。此力行之事也。此二者並進。下學在此。上達亦在此。

讀易旅卦。喪其童僕。象曰。「以旅與下。其義喪也。」解之者曰。「以旅與下者。謂視童僕如旅人。刻薄寡恩。漠然無情。則童僕亦將視主上如逆旅矣。」余待下雖不刻薄。而頗有視如逆旅之意。教人不盡忠。以後余當視之如家人手足也。分雖嚴明。而情貴周通。

課程

主敬 整齊嚴肅。無時不懼。無事時心在腔子裏。應事時專一不雜。

靜坐 每日不拘何時。靜坐一會。體驗靜極生陽。來復之仁心。正位凝命。如鼎之鎮。

早起 黎明即起。醒後勿沾戀。

讀書不二 一書未點完。斷不看他書。東緝西關。都是徇外爲人。

讀史 廿三史每日讀十葉。雖有事不間斷。

寫日記 須端楷。凡日間過惡。——身過。心過。口過。——皆記出。終身不間斷。

日知其所亡 每日記茶餘偶談一則。分爲德行門。學問門。經濟門。藝術門。

月無忘所能 每月作詩文數首。以驗積理之多寡。養氣之盛否。

謹言 刻刻留心。

養氣 無不可對人言之事。氣藏丹田。

保身 謹遵大人手諭。節欲。節勞。節飲食。

作字 早飯後作字。凡筆墨應酬。當作自己功課。

夜不出門 曠功疲神。切戒切戒。

兄意教館之荒功誤事。較之家塾爲尤甚。與其出而教館。不如靜坐家塾。若云一出家塾。便有明師益友。則我境之所謂明師益友者。我皆知之。且已夙夜熟籌之矣。同學之人。類皆庸鄙無志者。又最好訕笑人。其笑法不一。總之不離乎輕薄而已。四弟若到衡陽去。必以翰林之弟相笑。薄俗可惡。鄉間無朋友。實是第一恨事。不惟無益。且大有損。習俗染人。所謂「與鮑魚處。亦與之俱化」也。

凡從師必久而後可以獲益。四弟與季弟。今年從鬻菴師。若地方相安。則明年仍可從遊。若一年換一處。是即無

恆者見異思遷也。欲求長進難矣。窮經必專一經。不可泛濫。讀經以「研尋義理」爲本。「考據名物」爲末。讀經有一「耐」字訣。一句不通。不看下句。今日不通。明日再讀。今年不精。明年再讀。此所謂耐也。讀史之法。莫妙於設身處地。每看一處。如我便與當時之人。酬酢笑語於其間。不必人人皆能記也。但記一人。則恍如接其人。不必事事皆能記也。但記一事。則恍如親其事。經以窮理。史以考事。合此二者。更別無學矣。蓋自西漢以至於今。識字之儒。約有三途。曰義理之學。曰考據之學。曰詞章之學。各執一途。互相詆毀。兄之私意。以爲義理之學最大。義理明則躬行有要。而經濟有本。詞章之學。亦所以發揮義理者也。考據之學。吾無取焉矣。此三途者。皆從事經史。各有門徑。吾以爲欲讀經史。但當研究義理。則心一而不紛。是故經則專守一經。史則專熟一代。讀經史則專主義理。此皆守約之道。確乎不可易者也。若夫經史而外。諸子百家。汗牛充棟。或欲闖之。但當讀一人之專集。不當東翻西闖。如讀昌黎集。則目之所見。耳之所聞。無非昌黎。以爲天地間。除昌黎集而外。更無別書也。此一集未讀完。斷斷不換他集。亦「專」字訣也。讀經讀史。讀專集。講義理之學。此有志者。萬不可易者也。聖人復起。必從吾言矣。

近年得一二良友。知有所謂經學者。經濟者。有所謂躬行實踐者。始知范韓可學而至也。馬遷韓愈亦可學而至也。程朱亦可學而至也。悔然思盡滌前日之污。以爲更生之人。以爲父母之肖子。以爲諸弟之先導。無如體氣本弱。耳鳴不止。稍稍用心。便覺勞頓。每日思念。天旣限我以不能苦思。是天不欲成我之學問也。故近日以來。意頗疏散。計今年若可得一差。能還一切舊債。則將歸田養親。不復戀戀於利祿矣。蟲識幾字。不敢爲非。以蹈大戾已耳。不復有志於先哲矣。

功課無一定呆法。但須專耳。余從前教諸弟。常限功課。近來覺限人以課程。往往強人以所難。苟其不願。雖日日遵照限程。亦復無益。故近來教弟。但有一「專」字耳。

無論何書。總須從首至尾。通看一遍。不然。亂繙幾葉。摘鈔幾篇。而此書之大局精處。茫然不知也。學詩從中州集

入亦好。然吾意讀總集不如讀專集。此事人人意見各殊。嗜好不同。吾之嗜好於五古則喜讀文選。於七古則喜讀昌黎集。於五律則喜讀杜集。七律亦最喜杜詩。而苦不能步趨。故兼讀元遺山集。吾作詩最短於七律。他體皆有心得。惜京都無人可與暢語者。爾要學詩。先學看一家集。不要東繙西闕。先須學一體。不可各體同學。蓋明一體。則皆明也。

然吾所教爾楷法者。尙有二事焉。一曰換筆。古人每筆中間必有一換。如繩索然。第一股在上。一換則第二股在上。再換則第三股在上也。筆尖之著紙者。僅少許耳。此少許者。吾嘗作四方鐵筆。用起處。東方在左。西方向右。一換則東方向右矣。筆尖無所謂方也。我心中常覺其方。一換而東。再換而北。三換而西。則筆尖四面有鋒。不僅一面相向矣。二曰結字有法。結字之法無窮。但求胸有成竹耳。六弟之信。文筆拘而勁。九弟文筆婉而達。將來皆必有成。每日習字不必多。作百字可耳。讀背誦之書不必多。十葉可耳。看涉獵之書不必多。亦十葉可耳。但一部未完。不可看他部。此萬萬不易之道。古文詩賦四六。無所不作。行之有常。將來百川分流。同歸於海。則通一藝。即通衆藝。通於藝。即通於道。初不分而二之也。使知大本大原。則心有定向。而不至數搖搖無著。

吾所望於諸弟者。不在科名之有無。第一則孝弟爲端。其次則文章不朽。諸弟若果能自立。當務其大者遠者。毋徒汲汲於進學也。

年過二十。總以看書爲主。我境惟彭澤野先生看書格多。自後無一人講究者。大抵爲考試文章所誤。殊不知看書與考試。全不相礙。彼不看書者。亦仍不利考如故也。我家諸弟。此時無論考試之利不利。無論文章之工不工。總以看書爲急務。不然。則年歲日長。科名無成。學問亦無一可靠。將來求爲塾師而不可得。或經。或史。或詩集。文集。每日總宜看二十葉。

學問之道無窮。而總以「有恆」爲主。兄往年極無恆。近年略好。而猶未純熟。自七月初一起至今。則無一日間斷。每日臨帖百字。鈔書百字。看書少亦須滿二十葉。多則不計。雖極忙。亦須了本日功課。不以昨日耽擱。而今日

補做。不以明日有事。而今日預做。

四弟之詩。又有長進。第命意不甚高超。聲調不甚響亮。命意之高。須要透過一層。如說考試。則須說科名是身外物。不足介懷。則詩意高矣。若說必以得科名爲榮。則意淺矣。舉此一端。餘可類推。腔調則以多讀詩爲主。熟則響矣。

話衰詩。論作字。亦皆有所見。然空言無益。須多做詩。多臨帖。乃可談耳。譬如人欲進京。一步不行。而在家空言進京程途。亦何益哉。卽言之津津。人誰得而信之哉。

學詩無別法。但須看一家之專集。不可讀選本。以汨沒性靈。至要。至要。吾於五七古學杜韓。五七律學杜。此二家無一字不細看。外此則古詩學蘇黃。律詩學義山。此三家亦無一字不看。五家之外。則用功淺矣。

但須日日用功。萬不必作嘆老嗟卑之想。譬如人欲至京師。一步不動。而長吁短嘆。但曰。『京師之遠。豈我所能到乎。』則旁觀者必笑之矣。吾願吾弟步步前行。日日不止。自有到期。不必計算遠近。而徒長吁短嘆也。

諸弟讀書不可不多。用功不可不勤。切不可時時爲科第任宦起見。若不能看透此層道理。則雖巍科顯宦。終算不得祖父之賢肖。我家之功臣。若能看透此道理。則我欽佩之至。

每日所看之書。句句皆物也。切己體察。窮究其理。卽格物也。此致知之事也。所謂誠意者。卽其所知而力行之。是不欺也。知一句。便行一句。此力行之事也。此二者並進。下學在此。上達亦在此。吾友吳竹如。格物工夫頗深。一事一物。皆求其理。倭良峯先生。則誠意工夫極嚴。有日課冊。一日之中。一念之益。一事之失。一言之默。皆筆之於書。書皆楷字。三月則訂一本。自乙未年起。今三十本矣。蓋其慎獨之嚴。雖妄念偶動。必卽時克治。而著之於書。故所讀之書。句句皆切身之要藥。

凡人無不可爲聖賢。絕不係乎讀書之多寡。吾弟誠有志於此。須熟讀小學及五種遺規二書。此外各書能讀回佳。不讀亦初無所損。可以爲天地之完人。可以爲父母之肖子。不必因讀書。而後有所加於毫末也。匪但四六古

詩。可以不看。即古文爲吾弟所願學者而不看。亦自無妨。但守小學遺規二書。行一句。算一句。行十句。算十句。賢於記誦詞章之學萬萬矣。

紀澤兒讀書記性不好。悟性較佳。若令其句句讀熟。或責其不可再生。則愈讀愈蠢。將來仍不能讀完經書。請子植弟將澤兒未讀之經。每日點五六百字。教一遍。解一遍。令其讀十遍。不必能背誦。不必常溫習。待其草草點完之後。將來看經解。亦可求熟。若蠻讀。蠻記。蠻溫。斷不能久熟。徒耗日功而已。記弟必以兄言爲不然。吾閱歷甚多。問之朋友皆以爲然。兒姪輩寫字亦要緊。須令其多臨帖。臨行草字。亦自有益。不必禁之。

紀澤兒記性平常。不必力求背誦。但宜常看生書。講解數遍。自然有益。

紀澤兒讀書。記性平常。讀書不必求熟。且將左傳禮記於今秋點畢。以後聽兒之自讀自思。成敗勤惰。兒當自省。而團自立焉。吾與諸弟。惟以身垂範。而教子姪。不在誨言之諄諄也。

凡讀書有難解者。不必遽求甚解。有一字不能記者。不必苦求強記。只須從容涵泳。今日看幾篇。明日看幾篇。久久自然有益。但於已閱過者。自作暗號。略批幾字。否則歷久忘其爲已閱未閱矣。

讀書不求強記。此亦養身之道。凡求強記者。尙有好名之心。橫互於方寸。故愈不能記。若全無名心。記亦可。不記亦可。此心寬然無累。反覺安舒。或反能記一二處。亦未可知。

余在軍中。不廢學問。讀書寫字。未甚間斷。惜年老眼矇。無甚長進。爾今未弱冠。一刻千金。切不可浪擲光陰。

看漢書有兩種難處。必先通於小學訓詁之書。而後能識其假借奇字。必先習於古文辭章之學。而後能讀其奇篇奧句。爾於小學古文。兩者皆未曾入門。則漢書中不能識之字。不可解之句。多矣。欲通小學。須略看段氏說文。經籍纂詁二書。王懷祖（名念孫。高郵州人）先生有讀書雜誌。中於漢書之訓詁。極爲精博。爲魏晉以來。釋漢書者所不能及。欲明古文。須略看文選。及姚姬傳之古文辭類纂二書。班孟堅最好文章。故於賈誼。董仲舒。司馬相如。東方朔。司馬遷。湯雄。劉邦。匡衡。谷永諸傳。皆全錄其著作。即不以文章名家者。如賈山。鄒陽等四人傳。最動

朱買臣等九人傳。趙充國屯田之奏。韋元成議禮之疏。以及貢禹之章。陳湯之奏獄。皆以好文之故。悉載鉅篇。如買生之文。既著於本傳。復載於陳涉傳。食貨志等篇。子雲之文。既著於本傳。復載於匈奴傳。王貢傳等篇。極之充國贊酒箴。亦皆錄入各傳。蓋孟堅於典雅瓌璋之文。無一字不甄采。爾將十二帶紀闋畢後。且先讀列傳。凡文之爲昭明。暨姚氏所選者。則細心讀之。卽不爲二家所選。則另行標識之。若小學。古文二端。略得途徑。其於讀漢書之道。思過半矣。

余性喜讀書。每日仍看數十頁。亦不免拋荒軍務。然非此則更無以自怡也。紀澤看漢書。須以勤敏行之。每日至少亦須看十二頁。不必惑於在精不在多之說。今日半頁。明日數頁。又明日就擱間斷。或數年而不能畢一部。如袁飯然。歇火則冷。小火則不熟。須用大柴大火。乃易成也。甲五經書已讀畢否。須速點速讀。不必一一求熟。恐因求熟二字。而終身未能讀完經書。

在家無事。每日可仍臨帖一百字。將浮躁處大加收斂。心以收斂而細。氣以收斂而靜。於字也有益。於身於家皆有益。

作字大約握筆宜高。能握至管頂者爲上。握至管頂之下寸許者次之。握至毫以上寸許者亦尙可習。若握近毫根。則雖寫好字。亦不久必退。且斷不能寫好字。吾驗之於己身。驗之於朋友。皆歷歷可徵。紀澤以後宜握管略高。縱低亦須隔毫根寸餘。又須用油紙摹帖。較之臨帖勝十倍。

經義述聞。博洽精深。非初學所能看。目下不必看也。看注疏時有不能解者。偶一緝查則可耳。

澤兒問橫算硃法。如右手擲石以投人。若向左邊平擲。則不得勢。若向右邊往上擲。則與捺末之硃相似。橫末之硃亦猶是也。化度寺碑。硃法最明。家中無之。張猛龍碑同州聖教序。硃法亦明。可細閱。

習大字。總以間架緊爲主。寫成之後。貼於壁上觀之。則妍媸自見矣。

望溪經學。勇於自信。而國朝鉅儒。多不甚推服。四庫書目中。於望溪每有貶詞。最後皇清經解中。並未收其一冊。

一句。姬傳先生雖推崇方氏，亦不稱其經說。其古文號爲一代正宗。國藩少年好之。近十餘年，亦別有宗尙矣。國藩於本朝大儒學問，則宗顧亭林、王懷祖兩先生。經濟則宗陳文恭公。

弟平日寫信，條理清晰，而失之繁冗，往往於業經說明之事，再加一二層，反覺無當。此次一意承接，不漏不蔓，可喜之至。此後弟每動筆，不患其不明，患其太多。意盡則止，辭足則止，不必再添也。

弟讀邵子詩，領得「恬淡冲融」之趣。此是襟懷長進處。自古聖賢豪傑，文人才士，其志事不同，而其豁達光明之胸，大略相同。以詩言之，必先有「豁達光明」之識，而後有恬淡冲融之趣。如李白韓退之杜牧之，則豁達處多。陶淵明孟浩然白香山，則冲淡處多。蘇杜二公，無美不備，而杜之五律最冲淡。蘇之七古最豁達。邵堯夫雖非詩之正宗，而豁達冲淡二者兼全。吾好讀莊子，以其豁達足益人胸襟也。去年所講「生而笑者，若知之，若不知之，若聞之，若不聞之」一段，最爲豁達。推之即舜禹之有天下而不與，亦同此襟懷也。吾輩現辦軍務，係處功利場中，宜刻刻勤勞，如農之力穡，如賈之趨利，如篙工之上灘，早作夜息，以求有濟，而治事之外，此中卻須有一段「豁達冲融」氣象。二者並進，則勤勞而以恬淡出之，最有意味。余所以令刻「勞謙君子」印章與弟者，此也。弟之文筆，亦不宜過自菲薄。近於自棄，余自壬子出京，至今二十年，自問於公牘書函軍事應酬書法，無事不長進。弟今年四十，較我壬子之時，尙少三歲，而謂此後便無長進，欺人乎？自棄乎？弟文有不簡之處，無不暢之處，不過用功一年二載，便可大進。昔溫弟諫余曰：「兄精神並非不足，乃吝惜不用耳。」余今亦以此意諫弟也。余平日好讀東坡上神宗皇帝書，亦取其軒爽也。弟可常常取閱，多閱數十遍，自然益我神智，譬如飲食，但得一殺適口充腸，正不必求多品也。

鳴原堂論文鈔，東坡萬言書，弟閱之如尙有不能解者，宜寫信來問。弟每次問幾條，余每次批幾條。兄弟論文於三千里外，亦不減對牀風雨之樂。弟以不能文爲此生缺憾，宜趁此家居時，苦學二三年，不可拋荒片刻也。

所謂四象者，震度卽太陰之屬，氣勢卽太陽之屬，清韻少陰之屬，趣味少陽之屬，其中所選之文，頗失之過於高。

古勇若做此四門。而另選稍低者。平日所嗜者。鈔讀之。必有進益。但趣味一門。除我所鈔者外。難再多選耳。曾以爲學四字。勗兒輩。一曰。看生書宜求速。不多閱則太陋。一曰。溫舊書宜求熟。不肯誦則易忘。一曰。習字宜有恆。不善寫則如身之無衣。山之無木。一曰。作文宜苦思。不善作則如人之啞不能言。馬之跛不能行。四者缺一不可。蓋閱歷一生。而深悔之者。今亦望家中諸姪力行之。養生與力學。二者兼營并進。則志強而身亦強。或是家中振興之象。

讀書之法。看。讀。寫。作。四者。每日不可缺一。看者。如爾去年看史記。漢書。韓文。近思錄。今年看周易折中之類是也。讀者。如四書。詩。書。易經。左傳諸經。昭明文選。李杜韓蘇之詩。韓歐曾王之文。非高聲朗誦。則不能得其雄偉之概。非密詠恬吟。則不能探其深遠之韻。譬之富家后積。看書則在外貿易。獲利三倍者也。讀書則在家慎守。不輕花費者也。譬之兵家戰爭。看書則攻城略地。開拓土宇者也。讀書。則深溝堅壘。得地能守者也。看書。與子夏之「日知所亡」相近。讀書。與「無忘所能」相近。二者不可偏廢。至於寫字。真行篆隸。爾頗好之。切不可間斷一日。既要求好。又要求快。余生平因作字遲鈍。吃虧不少。爾須力求敏捷。每日能作楷書一萬。則幾矣。至於作諸文。亦宜在二三十歲立定規模。過三十後能長進極難。作四書文。作試帖詩。作律賦。作古今體詩。作古文。作駢體文。數者不可不一一講求。一一試爲之。少年不可怕醜。須有「狂者進取」之趣。此時不試爲之。則後此將不肯爲矣。離婁首章「上無道揆。下無法守。」我往年讀之。亦無甚警惕。近歲在外辦事。乃知上之人必揆諸道。下之人必守乎法。若人人以道揆自許。從心而不從法。則下凌上矣。愛人不親。章往年讀之。不甚親切。近歲閱歷日久。乃知治人不治者。智不足也。

凡作詩最宜講究聲調。余所選鈔五古九家。七古六家。聲調皆極鏗鏘。耐人百讀不厭。余所未鈔者。如左太冲江文通。陳子昂。柳子厚之五古。鮑明遠。高適。夫王摩詰。陸放翁之七古。聲調亦清越異常。欲作五古。七古。須熟讀五古。七古。各數十篇。先之以高聲朗誦。以昌其氣。繼之以密詠恬吟。以玩其味。二者并進。使古人之聲調。拂拂然若

與我之喉舌相習。則下筆爲詩時。必有句調湊赴腕下。詩成自讀之。亦自覺琅琅可誦。引出一稱與會來。古人云。「新詩改罷自長吟。」又云。「煨詩未就且長吟。」可見古人慘澹經營之時。亦純在聲調上下工夫。蓋有字句之詩。人籟也。無字句之詩。天籟也。解此者。要使天籟人籟。湊拍而成。則於詩之道。思過半矣。

作字。須講究墨色。古來書家。無不善使墨者。能令一種神光活色。浮於紙上。固由臨池之勤。染翰之多所致。亦緣於墨之新舊濃淡。用墨之輕重疾徐。皆有精意運乎其間。故能使光氣常新也。

凡作一事。無論大小難易。皆宜有始有終。作字時。先求圓勻。次求敏捷。若一日能作楷書一萬。少或七八千。愈多愈熟。則手腕毫不費力。將來以之爲學。則手鈔羣書。以之從政。則案無留牘。無窮受用。皆自寫字之「勻而且捷」生出。

凡漢人傳注。唐人之疏。其惡處在確守故訓。失之穿鑿。其好處在確守故訓。不參私見。釋謂爲勤。尙不數見。釋言爲我。處處皆然。蓋亦十口相傳之詰。而不復顧文氣之不安。如伐木爲文。王與友人入山。鴛壽爲明王交於萬物。同一穿鑿。朱子集傳。一掃舊障。專在涵泳神味。虛而與之委蛇。然如鄭風諸什。注疏以爲皆刺忽者。固非。朱子以爲皆淫奔者。亦未必是。治經之時。無論看注疏。看朱傳。總宜虛心求之。其慳愛者。則以殊筆識出。其懷疑者。則以另冊寫一小條。或多爲辨論。或僅著數字。將來疑者漸晰。又記於此條之下。久久漸成卷帙。則自然日進。

所臨隸書。孔宙碑筆太拘束。不甚靈活。想係執筆太近毫之故。以後須執於管頂。余以執筆太低。終身吃虧。故教爾趁早改之。

國朝大儒。於天文歷數之學。講求精熟。度越前古。自梅定九王寅旭。以至江戴諸老。皆稱絕學。然皆不講占驗。但講推步。占驗者。觀星象雲氣。以卜吉凶。史記天官書。漢書天文志是也。推步者。測七政行度。以定授時。史記律書。漢書律歷志是也。秦味經先生之觀象授時。簡而得要。

寫字之中鋒者。用筆尖著紙。古人謂之導鋒。如獅蹲。虎蹲。犬蹲之象。偏鋒者。用筆毫之腹著紙。不倒於左。則倒於

右。嘗將倒未倒之際。一提筆則爲蹲鋒。是用偏鋒者。亦有中鋒時也。

大抵寫字只有用筆結體兩端。學用筆。須多看古人墨蹟。學結體。須用油紙摹古帖。此二者。皆決不可易之理。小兒寫影。本肯用心者。不過學數月。必與其摹本字相肖。吾自三十時。已解古人用筆之意。只爲欠却間架工夫。便爾作字不成體段。平生欲將柳誠懸趙子昂兩家合爲一爐。亦爲間架欠工夫。有志莫遂。爾以後當從間架用一番苦功。每日用油紙摹帖。或百字。或二百字。不過數月。間架與古人逼肖。而不自覺。能合柳趙爲一。此吾之素願也。不能則隨爾自擇一家。但不可見異思遷耳。

不特寫字宜摹仿古人間架。卽作文亦宜摹仿古人間架。詩經造句之法。無一句無所本。左傳之文。多現成句調。揚子雲爲漢代文宗。而其太玄摹易。法言摹論語。方言摹爾雅。十二箴摹虞箴。長楊賦摹難蜀父老。解嘲摹客難。甘泉賦摹大人賦。劇秦笑新摹封禪文。諫不許單于朝書摹國策信陵君諫代韓。幾於無篇不摹。卽韓歐曾蘇諸巨公之文。亦皆有所摹擬。以成體段。

趙文敏集古今之大成。於初唐四家內。師虞永興而參以鍾紹京。以此上窺二王。下法山谷。此一徑也。於中唐師李北海。而參以顏魯公與徐季海之沈著。此一徑也。於晚唐師蘇靈芝。此又一徑也。由虞永興與朔二王。及晉六朝諸賢。世所稱南派者也。由李北海以溯歐褚。及魏北齊諸賢。世所稱北派者也。爾欲學書。須窺尋此兩派之所以分。南派以神韻勝。北派以魄力勝。宋四家蘇黃近於南派。米蔡近於北派。趙子昂欲合二派而匯爲一。爾從趙法入門。將來或趨南派。或趨北派。皆可。不迷於所往。

買書不可不多。而看書不可不知所擇。以韓退之爲千古大儒。而自述其所服膺之書。不過數種。曰易曰書曰詩曰春秋。左傳曰莊子曰離騷。曰史記曰相如子雲。柳子厚自述其所得。正者曰易曰書曰詩曰禮曰春秋。旁者曰穀梁曰孟荀。曰莊老。曰國語。曰離騷。曰史記。二公所讀之書。皆不甚多。

澤兒若能成吾之志。將四書五經及余所好之八種。一一熟讀而深思之。略作劄記。以志所得。以著所疑。則余歡

欣快慰。夜得甘寢。此外別無所求矣。至王氏父子以考訂之書二十八種。凡家中所無者。爾可開一單來。余當一一購得寄回。學問之途。自漢至唐。風氣略同。自宋至明。風氣略同。國朝又自成一種風氣。其尤著者。不過顧閻（百詩）戴（東原）江（慎修）錢（辛楣）秦（味經）段（懋堂）王（懷祖）數人。而風會所至。羣彥雲興。爾有志讀書。不必別標漢學之名目。而不可不一窺數君子之門徑。

阮文達公爲學政時。搜出童生夾帶。必自加細閱。如係親手所鈔。略有條理者。即予進學。如係請人所鈔。概錄陳文者。照例罪斥。阮公一代宏儒。則知文人不可無手鈔夾帶小本矣。昌黎之記事提要纂言鉤元。亦係分類手鈔小冊也。

書經注疏頗庸陋。不如詩經之該博。我朝儒者。如閻百詩姚姬傳諸公。皆辨別古文尙書之僞。孔安國之傳。亦僞作也。蓋秦燔書後。漢儒伏生所傳。歐陽及大小夏侯所習。皆僅二十八篇。所謂今文尙書者也。厥後孔安國有古文尙書多十餘篇。遭巫蠱之事。未得立於學官。不傳於世。厥後張霸有尙書百兩篇。亦不傳於世。後漢賈逵馬鄭作古文尙書注解。亦不傳於世。至東晉梅賾始獻古文尙書。并孔安國傳。自六朝唐宋以來承之。即今通行之本也。自吳才虎及朱子梅鼎祚歸震川。皆疑其爲僞。至閻百詩遂專著一書。以痛辨之。名曰疏證。自是辨之者數十家。人人皆稱僞古文。僞孔氏也。日知錄中略著其原委。王西莊孫獮如江良庭三家皆詳言之。（皇清經解中有江書不足觀。）此亦六經中一大案。不可不知也。

讀書記性平常。此不足慮。所慮者。第一怕無恆。第二怕隨筆點過一遍。并未看得明白。此却是大病。若實看明白了。久之必得些滋味。寸心若有怡悅之境。則自然記得矣。不必求記。却宜求個明白。

凡作文。末數句要吉祥。凡作字。墨色要光潤。

爾問五箴末句「敢告馬走」。凡箴以虞箴爲最古（左傳襄公）。其末曰。「獸臣司原。敢告僕夫。」意以獸臣有司郊原之責。豈不致直告之。但告其僕耳。馮子雲仿之作刺箴。冀州曰。「敢臣司冀。敢告在階。」揚州曰。「敢

臣司攝。敢告執筆者。荆州曰「牧臣司荆。敢告執筆。」青州曰「牧臣司青。敢告執筆。」徐州曰「牧臣司徐。敢告僕夫。」余之「敢告馬走。」卽此類也。走猶僕也。（見司馬遷任安書註。班固賓戲註。）朱子作敬箴曰。「告靈臺。」則非僕御之類。於古人微有歧誤矣。凡箴以官箴爲本。如韓公五箴。程子四箴。朱子各箴。范浚心箴之屬。皆失本義。余亦相沿失之。

「詩書文義真術。註疏勉強牽合。」二語甚有所見。左疏淺近。亦頗不免。國朝如王西莊（鳴盛）孫淵如（星衍）江良庭（聲）皆注尙書。顧亭林（炎武）惠定宇（棟）王伯申（引之）皆注左傳。皆刻在皇清經解中。書經則孫注較勝。王江不甚足取。左傳則顧惠王三家俱精。大抵十三經註疏。以三禮爲最善。詩疏次之。此外皆有醇有駁。

作字換筆之法。凡轉折之處。如「丁」之類。必須換筆。不待言矣。至並無轉折形迹。亦須換筆者。如以一直言之。須有三換筆。𠄎（末向上挑。所謂磔也。中折而下行。所謂波也。右向上行。所謂勒也。初入手。所謂「直來橫受」也。）以一直言之。須有兩換筆。𠄎（直橫入。所謂「橫來直受」也。上向左行。至中腹換而右行。所謂努也。）撇與橫相似。特末筆磔處更顯耳。𠄎（磔波直入。）撇與直相似。特末筆更撇向外耳。𠄎（橫入停。）凡換筆皆以小圈識之。可以類推。凡用筆須略帶欹斜之勢。如本斜向左。一換筆則向右矣。本斜向右。一換筆則向左矣。舉一反三。爾自悟取可也。

吾覺漢魏文人。有二章最不可及。一曰訓詁精確。二曰聲調鏗鏘。說文訓詁之學。自中唐以後。人多不講。宋以後。說經尤不明。詰訓。及至我朝鉅儒。始通小學。段茂堂王懷祖兩家。遂精研乎古人文字聲音之本。乃知文選中古賦所用之字。無不典雅精當。爾若能熟讀段王兩家之書。則知眼前常見之字。凡唐宋文人誤用者。惟六經不覩。文選中漢賦。亦不誤也。卽以三都賦言之。如「蔚若相如。儻若君平。」以一蔚字。該括相如之文章。以一儻字。該括君平之道德。此雖不盡關乎訓詁。亦足見其下字之不苟矣。至聲調之鏗鏘。如「開高軒以臨山。列綺窗而瞰

江。碧出萇宏之血。烏生杜宇之魄。洗兵海島。刷馬江洲。數軍實乎桂林之苑。饗戎旅乎落星之樓。等句。音響節奏。皆後世所不能及。看文選。能從此二者用心。則漸有入理矣。

「種種」二字。此字段茂堂辨論甚晰。種。爲蔬也。（猶吾鄉言栽也。點也。插也。）種。爲後熟之禾。詩之黍稷重穋（七月閏宮。）說文作種。種。正字也。重。段借字也。穆與稊異同字也。隸書以「種種」二字互易。今人於耕種概用種字矣。吾於訓詁詞章二端。頗嘗盡心。看書若能通訓詁。則於古人之故訓大義。引伸假借。漸漸開悟。而後人承訛襲誤之習可改。若能通詞章。則於古人之文格文氣。開合轉折。漸漸開悟。而後人硬腔滑調之習可改。

無論古今何等文人。其下筆造句。總以「珠圓玉潤」四字爲主。無論古今何等書家。其落筆結體。亦以「珠圓玉潤」四字爲主。世人論文家之說。圓而藻麗者。莫如徐（陵）庾（信）而不知。江（淹）鮑（照）則更圓。進之沈（約）任（昉）則亦圓。進之潘（岳）陸（機）則亦圓。又進而溯之東漢之班（固）張（衡）崔（駟）蔡（邕）則亦圓。又進而溯之西漢之賈（誼）鼂（錯）匡（衡）劉（向）則亦圓。至於馬遷相如子雲三人。可謂力趨險奧。不求圓適矣。而細讀之。亦未始不圓。至於昌黎。其志意直欲陵駕長卿子雲三人。冥冥獨造。力避圓熟矣。而久讀之。實無一字不圓。無一句不圓。於古人之文。若能從鮑江徐庾四人之圓。步步上溯。直窺卿雲馬韓四人之圓。則無不可讀之古文矣。——即無不可通之經史矣。

文中「雄奇」之道。雄奇以行氣爲上。造句次之。選字又次之。然未有字不古雅。而句能古雅。句不古雅。而氣能古雅者。亦未有字不雄奇。而句能雄奇。句不雄奇。而氣能雄奇者。是文章之雄奇。其精處在行氣。其麤處全在造句。選字也。余好古人雄奇之文。以昌黎爲第一。揚子雲次之。二公之行氣。本之天授。至於人事之精能。昌黎則造句之工夫居多。子雲則選字之工夫居多。

「敘事誌傳之文。難於行氣。」殊不然。昌黎如曹成王碑。韓許公碑。固屬千奇萬變。不可方物。即盧夫人銘。女誌。寥寥短篇。亦復雄奇倔強。試將此篇熟看。則知二大二小。各極其妙矣。

古人解經。有內傳。有外傳。內傳者。本義也。外傳者。旁推曲衍。以盡其餘義也。孔子繫易。「小象」則本義爲多。「大象」則餘義爲多。孟子說詩。亦本子貢之困貧富而悟切磋。子夏之困素絢而悟禮後。證餘義處爲多。韓詩外傳。盡餘義也。左傳說經。亦以餘義立言者矣。

用油紙摹字。若常常爲之。間架必大進。歐虞顏柳四大家。是詩家之李杜韓蘇。天地之日星江河也。有志學書。須窺尋三人門徑。

大抵有一種學問。即有一種分類之法。有一人嗜好。即有一人摘鈔之法。若從本原論之。當以爾雅爲分類之最古者。天之星辰。地之山川。鳥獸草木。皆古聖賢人辨其品彙。命之以名。書所稱「大禹主名山川」。禮所稱「黃帝正名百物」。是也。物必先有名而後有是字。故必知命名之原。乃知文字之原。舟。車。弓。矢。俎。豆。鐘。鼓。日用之具。皆先王制器以利民用。必先有器。而後有是字。故又必知制器之原。乃知文字之原。君臣。上下。禮樂。兵刑。賞罰之法。皆先王立事以經綸天下。或先有名而後有字。或先有事而後有字。故又必知萬事之本。而後知文字之原。此三者。物最初。器次之。事又次之。三者既具。而後有文詞。爾雅一書。如釋天。釋地。釋山。釋水。釋草木。釋鳥獸。蟲。魚。物之屬也。釋器。釋宮。釋樂器之屬也。釋親。事之屬也。釋詁。釋言。文詞之屬也。爾雅之分類。惟屬事者最略。後世之分類。惟屬事者最詳。事之中。又判爲兩端。曰。虛事。曰。實事。虛事者。如經之三禮。馬之八書。班之十志。及三通之區別門類是也。實事者。就史鑑中已往之事蹟分類纂記。如事文類聚。白孔六帖。太平御覽。及我朝淵鑑類函。子史精華等書是也。後世人事日多。史冊日繁。摘類書者。事多而器物少。乃勢所必然。

余久不作詩。而好讀詩。每夜輒取古人名篇。高聲朗誦。用以自娛。今年亦當間作二三首。與爾曹相和答。做蘇氏父子之例。爾之才思。能古雅而不能雄駿。大約宜作五言而不宜作七言。爾要讀古詩。漢魏六朝。取余所選曹阮陶謝鮑謝六家。專心讀之。必與爾性質相近。至於開拓心胸。擴充氣魄。窮極變態。則非唐之李杜韓白。宋金之蘇黃陸元八家。不足以盡天下古今之奇觀。

爾近來寫字總失之薄弱。骨力不堅勁。墨氣不豐腴。與爾身體向來輕字之弊。正是一路毛病。爾嘗用油紙摩顯字之郭家廟。柳字之琅琊碑。玄秘塔。以藥其病。日日留心。專從厚重二字上用功。否則字質太薄。卽體質亦因之更輕矣。人之氣質由於天生。本難改變。惟讀書則可變化氣質。

余觀漢人詞章。未有不精於小學訓詁者。如相如子雲孟堅。於小學皆專著一書。文選於此三人之文。著錄最多。余於古文。志在效法此三人。并司馬遷韓愈五家。以此五家之文。精於小學訓詁。不妄下一字也。爾於小學。既粗有所見。正好從詞章上用功。說文看畢之後。可將文選細讀一過。一面細讀。一面鈔記。一面作文以仿效之。凡奇僻之字。雅故之訓。不手鈔則不能記。不摹仿則不慣用。自宋以來。能文章者。不通小學。國朝諸儒。通小學者。又不能文章。余早歲歸其門徑。因人事太繁。又久歷戎行。不克卒業。至今用爲疾憾。

五言詩。若能學到陶潛謝朓一種和淡之味。和諧之音。亦天下之至樂。人間之奇福也。有志於科名祿位。但能多讀古書。時時暇書作字。以陶冶性情。則一生受用不盡。第宜束身圭壁。法王羲之陶淵明之襟懷。瀟灑則可。法嵇阮之放蕩名教。則不可耳。

余近年頗識古人文章門徑。而在軍鮮暇。未嘗偶作。一吐胸中之奇爾。若能解漢書之訓詁。參以莊子之叢詭。則余願償矣。至行氣爲文章第一義。卿雲之跌宕。昌黎之倔強。可爲行氣不易之法。宜先於韓公倔強處。揣摩一番。小學凡三大宗旨。以說文爲宗。古書惟大小徐二本。至本朝而段氏特開生面。而錢坫王筠桂馥之作。亦可參觀。言訓詁者。以爾雅爲宗。古書惟郭註邢疏。至本朝而邵二雲之爾雅正義。王懷祖之廣雅疏證。郝蘭皋之爾雅義疏。皆稱不朽之作。言音韻者。以唐韻爲宗。古書惟顧集韻。至本朝而顧氏音學五書。仍爲不刊之典。而江（慎修）戴（東原）段（茂堂）王（懷祖）孔（巽軒）江（晉三）諸作。亦可參觀。欲於小學鑽研古義。則三宗如顧江段邵王大家書。均不可不涉獵。而探討之。

四言詩最難有聲響。有光芒。雖文選章盡以後諸作。亦復爾雅有餘。精光不足。揚子雲之州箴。百官箴諸四言。刻

意摹古亦乏作作之光。淵淵之聲。余生平於古人四言。最好韓公之作。如祭柳子厚文。祭張署文。進學解。送窮文。諸四言。固皆光如皎日。響如春霆。即其他凡墓志之銘詞。及集中如淮西碑。元和聖德各四言詩。亦皆於奇崛之中。迸出聲光。其要不外意義層出。筆仗雄拔而已。外則班孟堅漢書敘傳一篇。亦四言中之最雋雅者。

凡詩文欲求雄奇矯變。總須用意有超羣離俗之想。乃能脫去恆蹊。爾前信讀馬妍督誅。謂其沈鬱似史記。極是。極是。余往年亦篤好斯篇。爾若於斯篇及蕪城賦哀江南賦九辨祭張署文等篇。吟詠不已。則生情自茂。文思汨汨矣。

韓公五言詩。本難領會。且先於怪奇可駭處。談諧可笑處。思心領會。可駭處。如詠落葉。則曰。「謂是夜氣滅。望舒實其圓。」詠作文。則曰。「蛟龍弄角牙。造次欲手挽。」可笑處。如詠登科。則曰。「儋輩妬且熱。喘如竹筒吹。」詠苦寒。則曰。「羲和送日出。恇怯頻窺覘。」從此等起用心。可以長才力。亦可添風趣。

余嘗怪國朝大儒。如戴東原。錢辛楣。段懋堂。王懷祖諸老。其小學訓詁。實能超越近古。直壓漢唐。而文章不能追尋古人深處。達於本而闕於末。知其一而昧其二。頗覺不解。私竊有志。欲以戴錢段王之訓詁。發爲班張左郭之文章。晉人左思郭璞。小學最深。文章亦逼兩漢。潘陸不及也。

營專心壹志。以精確之訓詁。作古茂之文章。由班張左郭。而上揚馬。而莊騷。而六經。靡不息息相通。下而潘陸。而任沈。而江鮑徐庾。則詞愈雜。氣愈薄。而訓詁之道衰矣。至韓昌黎出。乃由班張揚馬而上躋六經。其訓詁亦甚精當。試觀南海神廟碑。送鄭尚書序諸篇。則知韓文實與漢賦相近。又觀祭張藉文。平淮西碑諸篇。則知韓文實與詩經相近。近世學韓文者。皆不知其與揚馬班張一鼻孔出氣。能參透此中消息。則幾矣。

有氣則有勢。有識則有度。有情則有韻。有趣則有味。古人絕好文字。大約於此四者之中。必有一長。

紀澤於陶詩之識度。不能領會。試取飲酒二十首。擬古九首。歸田園居五首。詠貧士七首等篇。反覆讀之。若能窺其胸襟之廣大。寄託之遙深。則知此公於聖賢豪傑。皆已升堂入室。

間有一專長。是否須兼三者。乃爲合作。此則斷斷不能。韓無陰柔之美。歐無陽剛之美。況於他人而能兼之。凡言兼衆長者。皆其一無所長者也。鳩兒言此表範圖曲成。橫豎相合。足見善於領會。至於純熟文字極力揣摩。固屬切實工夫。然少年文字。總貴氣象崢嶸。東坡所謂蓬蓬勃勃。爲釜上氣。古文如賈誼治安策。賈山至言。太史公報任安書。韓退之原道。柳子厚封建論。蘇東坡上神宗書。時文如黃陶庵。呂晚村。袁簡齋。曹寅谷。墨卷如墨選。觀止。鄉墨選。鏡中所選。兩排三疊之文。皆有最盛之氣勢。爾嘗兼在氣上用功。無徒在揣摩上用功。大約偶句多。單句少。段落多。分段少。莫拘場屋之格式。或三五百字。長或八九百字。千餘字皆無不可。雖係四書題。或用後世之史事。或論目今之時務。亦無不可。總須將氣勢展得開。筆仗使得強。乃不至於束縛拘滯。愈緊愈呆。

四象表中。惟氣勢之屬太陽者。最難能而可貴。古來文人。雖偏於彼三者。而無不在氣勢上痛下工夫。近年在軍中閱書。稍覺有恆。然已晚矣。故望爾等於少壯時。卽從有恆二字。痛下工夫。然須有情韻趣味。養得生機盎然。乃可歷久不衰。若拘苦疲困。則不能真有恆也。

學柳帖琅琊碑。效其骨力。則失其結構。有其開張。則無其掙搏。古帖本不易學。然爾學之。尙不過旬日。焉能兼美畢備。收效如此神速。余昔學顏柳帖。臨摹動輒數百紙。猶且一無所似。余四十以前。在京所作之字。骨力間架。皆無可觀。余自愧而自惡之。四十八歲以後。習李北海嶽麓寺碑。略有進境。然業歷八年之久。臨摹已過千紙。

余於凡事皆用困知勉行功夫。爾不可求名太驟。求效太捷也。以後每日習柳字百個。單日以生紙臨之。雙日以油紙摹之。臨帖宜徐。摹帖宜疾。專學其開張處。數月之後。手愈拙。字愈醜。意與愈低。——所謂困也。——困時切莫間斷。熬過此關。便可少進。再進再困。再熬再奮。自有亨通精進之日。不特習字。凡事皆有極困難之時。打得通的。便是好漢。

凡作字。總要寫得秀。學顏柳。學其秀而能雅。學趙董。恐秀而失之弱耳。爾非下等資質。特從前無管講善誘之師。近來又頗有好高好速之弊。若求長進。須勿忘而兼以勿助。乃不致走入荆棘耳。

唐詩固宜專讀。唐文除韓柳李孫外。幾無一不四六者。亦可不必多讀。

唐文李孫二家。係指李翱。孫樵。八家始於唐荊州之文編。至茅鹿門。而其名大定。至儲欣同人而孫李兩家。御選唐宋文。亦從儲而增爲十家。以全唐皆尙駢儷之文。故韓柳李孫四人之不駢者。爲可貴耳。作文以思路宏闊。爲必發之品。意義層出不窮。宏闊之謂也。

凡大家名家之作。必有一種面貌。一種神態。與他人迥不相同。譬之書家。羲獻歐虞褚李顏柳一點一畫。其面貌既截然不同。其神氣亦全無似處。本朝張得天。何義門。雖稱書家。而未能盡變古人之貌。故必如劉石庵之貌異神異。乃可推爲大家。詩文亦然。若非其貌其神迥絕羣倫。不足以當大家之目。渠既迥絕羣倫矣。而後人讀之。不能辨識其貌。領取其神。是讀者之見解未到。非作得之咎也。讀古文古詩。惟當先認其貌。後觀其神。久之自能分別蹊徑。今人動指某人學某家。大抵多道聽塗說。扣槃捫燭之類。不足信也。君子貴於自知。不必隨衆口附和也。凡詩文趣味。約有二種。一曰詼諧之趣。一曰閒適之趣。詼諧之趣。惟莊柳之文。蘇黃之詩。韓公詩文。皆極詼諧。此外實不多見。閒適之趣。文惟柳子厚遊記近之。詩則韋孟白傳。均極閒適。而余所好者。尤在陶之五古。杜之五律。陸之七絕。以爲人生具此高淡襟懷。雖南面王不以易其樂也。——但不可走入孤僻一路耳。（以上家訓）

學問之事。以「日知月無亡」爲喫緊語。文章之事。以「讀書多。積理富」爲要。讀書之志。須以困勉之功。志大之學。

至鏡海先生處。問檢身之要。讀書之法。先生言。「嘗以朱子全書爲宗。」時余新買此書。問及。因道。「此書最宜熟讀——即以爲課程。身體力行——不宜視爲瀏覽之書。」又言。「治經宜專一經。一經果能通。則諸經可旁及。若遽求兼精。則萬不能通一經。」先生自言生平最喜讀易。又言。「爲學只有三門。曰義理。曰考核。曰文章。考核之事。多求粗而遺精。管窺而蠡測。文章之事。非精於義理者不能。至經濟之學。即在義理內。」又問。「經濟宜如何審端致力。」答曰。「經濟不外看史。古人已然之迹。法戒昭然。歷代典章。不外乎此。」又言。「近時河南倭

良峯——仁——前輩。用功最篤。每日自朝至寢。一言一動作。飲食。皆有劄記。或心有私欲不克。外有不及檢。皆記出。先生嘗教之曰。「不是將此心別借他心來把捉才提醒。便是『閑邪存誠。』」又言。「檢攝於外。只有『整齊嚴肅』四字。持守於內。只有『主一無適』四字。」又言。「詩文詞曲。皆可不必用功。誠能用力於義理之學。彼小技亦非所難。」又言。「第一要戒欺。萬不可捨著……」云云。聽之昭然若發矇也。

倭良峯前輩先生言。「研幾工夫最要緊。顏子之有不善。未嘗不知。是研幾也。」周子曰。「幾善惡。」中庸曰。「潛雖伏矣。亦孔之昭。」劉念臺先生曰。「卜動念以知幾。」皆謂此也。失此不察。則心放而難收矣。又曰。「人心善惡之幾。與國家治亂之幾相通。」諸生呈繳工課。余教以「誠」「勤」「廉」「明」四字。而勤字之要。但在「好問」「好察」云。兩事反覆開導。

夏穀甫言。「朱子之學。得之艱苦。所以爲百世之師。」二語深有感於余心。天下事未有不從艱苦中得來。而可久可大者也。

夜歸。與九弟言讀書事。九弟悔從前讀得不好。若再不認真教他。愈不能有成矣。余體雖虛弱。此後自己工夫尙可拋棄。萬不可不教弟讀書也。

岱雲來久談。彼此相勸以善。予言皆己所未能而責人者。陳岱雲言余第一要戒「慢」字。謂我無處不著急慢之氣。真切中肯也。又言予於朋友每相恃過深。不知量而後入。隨處不留分寸。卒至小者齟齬。大者凶隙。不可不慎。又言我處事不惠不精明。惠太刻薄。須步步留心。此三言者。皆藥石也。直哉。

果能據德依仁。即使游心於詩字雜藝。亦無在不可靜心養氣。如作詩之時。只是要壓倒他人。要取名譽。此豈復有爲己之志。

凡喜譽惡毀之心。卽鄙夫患得患失之心也。於此關打不破。則一切學問才智。適足以欺世盜名。言物行恆。誠身之道也。——萬化基於此矣。余病根在無恆。故家內瑣事。今日立條例。明日仍散漫。下人無常規。

可循。將來落衆，必不能信。作事必不能成，戒之。

數日心沾滯於詩，總由心不靜，故不專一。嘗力求主一之法，誠能主一，養得心靜氣恬，到天機活潑之時，卽作詩亦自無妨我。今尙未也，徒以浮躁之故，故一日之間，情志屢遷耳。

吾齒長矣，而詩書六藝，一無所識，志不立，過不改，欲求無忝所生，難矣。

日內不敬不靜，常致勞乏，以後須從「心正氣順」四字上體驗。

每日游思，多半是耍人說好，爲人好名，可恥，而好名之意，又自謂比他人高一層，此名心之連結於隱微者，深也。岱雲每日工夫甚多而嚴，可謂惜分陰者，予則玩泄不振。

日來自治愈疏矣，絕無瑟備之意，何貴有此日課之冊，看來只是好名，好作詩，名心也。寫此冊而不日日改過，則此冊直盜名之具也，亦既不克痛滿舊習，何必寫此冊。

唐先生言：「最是『靜』字工夫要緊。大程夫子是三代後聖人，亦是靜字工夫足。王文成亦是靜字工夫。所以他能不動心，若不靜，省身也不密，見理也不明，都是浮的，總是耍靜。」又曰：「凡人皆有切身之病，剛惡、柔惡，各有所偏，溺焉既深，動輒發見，須自己體察所溺之病，終身在此處克治。」余比告先生謂素有忿恨，不願氣習，偏於剛惡，既而自窺所病，只是好動不好靜，先生兩言，蓋對症下藥也。務當力求主靜，使神明如日之升，卽此以求其繼，繼續者，卽所謂緝熙也，知此而不行，真暴棄矣，真小人矣。

岱雲欲觀余饋貧糧本，予以雕蟲瑣瑣，深閉固拒，不欲與之觀，一時揜著之情，自文固陋之情，巧言令色，種種叢集，皆從好名心發出，蓋此中根株，深矣。

凡往日遊戲隨和之處，不能遽立崖岸，惟當往還漸稀，相見必敬，漸改徵逐之習，平日辨論誇誕之人，不能遽變，轉啞，惟當談論漸卑，開口必誠，力去狂妄之習。

朱廉甫前輩借惹西來，二君皆直諒多聞者，廉甫前輩之枉過，說欲引余爲同志，謂可與適道也，豈知余絕無改

過之寶。徒有不忤之言。竟爾盜得令聞。非穿窬而何。自立志自新以來。至今五十餘日。未曾改得一過。此後直須徹底盪滌。一絲不放鬆。從前種種。譬如昨日死。以後種種。譬如今日生。務使息息靜極。使此生意不息。

至岱雲處。與之談詩。傾筐倒篋。言無不盡。至子初方歸。此時自謂與人甚忠。殊不知已認賊作子矣。日內就著詩文。不從戒懼謹獨上切實用功。已自誤矣。更以之誤人乎。

菴樹堂來。因約岱雲來。三日暢談小酌。二君皆有節制。惟予縱論無閒。仍不出昨夜談讖。而往復自意。自謂忘於爲人。實以重外而輕內。且昧昌黎知名箴之訓。總之每日不外乎多言。不外乎要人說好。

考試之有得失。猶歲之有豐歉也。有耕而卽期大有。是貪天也。然絕不施耕耨之功。不已棄天平。我則身爲惰農。而翻笑穠蕪爲多事。慎孰甚焉。

蕙西面責予數事。一曰「慢」。謂交友不能久而敬也。二曰「自是」。謂看詩文多執己見也。三曰「僞」。謂對人能作幾副面孔也。直哉。吾友。吾日蹈大惡而不知矣。

季師意欲余致力於考試工夫。而余以身弱爲辭。豈欺人哉。自欺而已。暴棄至此。尙可救藥乎。

竹如言及渠生平交道。而以知己許余。且曰「凡閣下所以期許下走之言。信之則足以長自是之私。辭之而又恐負相知之真。吾惟有懼以終始而已。」云云。予聞此數語。悚然汗下。竹如之敬我。直乃神明內斂。我何德以當之乎。日來安肆如此。何以爲竹如知己。是汚竹如也。

處衆人中。孤另另若無所許可者。自以爲人莫予知。不知在己。本一無足知也。何尤人爲。今年忽忽已過兩月。自新之志。日以不振。愈昏愈頹。以至不如禽獸。昨夜痛自猛省。以爲自今日始。當斬然更新。

不終小人之歸。不謂雲階招與對弈。仍不克力却。日日如此。奈何。何丹陛請余爲是正文字。儼然自任。蓋矜心之內伏者。深矣。

日內沾滯於詩。明知詩文以積久勃發爲佳。無取乎強索。乃思之不得。百事俱廢。是所謂溺心者也。戒之。余在軍中。頗以詩文廢正務。後當切戒。

思人心所以擾擾不定者。只爲不知命。陶淵明白香山蘇子瞻所以受用者。只爲知命。吾涉世數十年。而有時猶起計較之心。若信命不及者。深可媿也。

闕日知錄。易經有曰。『易六十四卦。三百八十四爻。一言以蔽之曰。』不恆其德。或承之羞。』讀之不覺愧汗。此心褻急清介。殊非載福之道。當力移寬大溫潤一路。

寸衷微有鬱積。總由中無所得。下學而不克上達。故世俗之見。尙不免膠擾於懷中耳。

其所以然。便獲美譽。古之得虛名而值時艱者。往往不克保其終。思此不勝大懼。將具奏摺辭謝大權。不敢節制。四省恐蹈覆轍。負乘之咎也。

日內與張廉。腳屢談。渠學問又已大進。而余志學二十年。至今毫無進步。毫已及矣。

觀人有鈔冊。鈔余文頗多。自以無實而享盛名。忸怩不甯。

余日衰老。而學無一成。應作之文甚多。總未能發奮爲之。忝竊虛名。毫無實際。愧悔之至。老邁如此。每日辦官事。尙不能畢。安能更著述耶。

念生平所作事。錯謬甚多。久居高位。而德行學問。一無可取。後世將譏議交加。愧悔無及。

余回憶生魯。尤猶叢集。悔不勝悔。而精力疲憊。自問更無年晚之力。乃作一聯云。『莫苦悔已往。魯尤。但求此日行爲。無慚神鬼。休預怕後來災禍。只要暮年心氣。感召祥和。』余此生學問文章。一無所成。愧悔無已。

自二月杪。右目失明。至是四十餘日。不敢治事。每日暇逸。愧悔。身閒而心亂。蓋生平之一無所養。甚矣。

易經有聖人之道四。而朱子專重『以卜筮者尙其占』一句。似未的當。因言古人說經。多斷章取義。以意逆志。不必定符本義。

闕經義述聞。如「弗過遏之。弗過防之」等語。深有所會。余於本朝經學小學諸家。獨服膺王懷祖先生父子之精核。蓋以其於經文之虛神實訓。體味曲盡也。

擬闕校船山周易內傳。王氏說理之書。每失之艱深。而不能軒豁。與正蒙註相同。

今日看書經。見蔡傳訓詁。良多不諳。如以敷衍之語爲「敷衍之言」之類。宜致漢學家之指摘。

溫召誥。於古人「周情孔思」四字。若有所會。

溫書經無逸。用吳文正公纂言本。若有所會。

思書經呂刑。於句法若有所會。

呂刑篇。於後世古文家蹊徑最近。惜不能盡通其讀。

余所讀呂刑而苦不能盡通其讀。茲閱戴氏之說。有愜余心者。如「制百姓於刑之中。天齊於民。俾我一口。」豈

「非從惟從」等句。皆犁然有當於人心。欣賞無已。

讀顧命康王之誥。喜戴氏治經。與余所見多同。惜其生前未與鬯談。

溫盤庚上整庚中。因戴存莊兩探宋元。及本朝治漢學者之說。每多當人意處。故樂觀之。

邵位西言。「詩序。係孟子萬章之徒所作。大序與小序。不當分而爲二。所以記次第。非所以明章旨也。猶史漢法

言之有後序爾。」其言奇而頗確。

闕子序詩經說。學有根柢。其用意往往得古人深處。特證據太少。恐不足以大鳴於世耳。

自去年九月廿一日始讀儀禮。至是粗畢。老年能治此經。雖嫌其晚。猶勝於終不措意者。昔張蒿庵三十而讀儀

禮。至五十九歲而通此經。爲國朝有數大儒。余今五十七歲。略通此經。稍增秉燭之明。惟蒿庵以前名儒。窮儀禮

者絕少。能於荆棘荒蕪之中。獨闢康莊。斯爲大難。余生本朝經學昌明之後。窮此經者。不下數十人。有蒿庵之句

讀。張舉文之圖。康莊共由之道。而又有入以扶掖之。則從事甚易矣。

俞樾蔭甫所著羣經平議之十四卷。論考工記世室。重屋。明堂之制。駁正鄭注。思通鬼神。有超乎戴氏考工記圖者。

夜又批船山禮記二條。余闕此書。本爲校對譌字。以便修板。再行刷印。乃覆查全書。辨論經義者半。校出錯譌者半。蓋非校讎家之體例。然其中亦微有可存者。若前數年在安慶金陵時。則反不能如此之精勤。此軍營事簡。老年差可慰悅之境。而流寇縱橫。制敵無術。禮衰日昏。學問無成。則又可深爲憂灼之境也。

閩桐城張承華容侯所爲學庸應解三十四葉畢。其言大學文。須用古本。而不煩補傳義。須宗朱子。而不取陽明。與余平日之說相合。餘亦多獨得之見。

孟子所謂「善言德行者」。嘗爲後世理學諸家之源。「善爲辭令者」。嘗爲後世詞章諸家之源。孔子自謙不能辭令。而以善言德行自許。蓋在己者實有盛德至行。而後能自道其所得也。論語一書。乃善言德行之尤著者。因默誦學而爲政八佾三篇。

朱彬經傳考證。其訓詁考證。亦與王伯申先生相仿。其言書經大字。多語助辭。則前人所未發也。閩戴東原緒言。閩錢竹汀聲類。此書未刻於本集。其義例亦不分明。

錢辛楣先生聲類一書。分釋詁。釋言。釋訓。釋語。釋天。釋地。名號之異等目。皆因聲得義者。足見古人先有聲音。後有文字。余前有意爲是書而未果。錢氏此書。亦未成之書。故未編入潛研堂叢書中。

陳荔秋所送之陳蘭甫澧著聲律通考一種。漢書地理志水道圖說一種。略一繙閱。服其精博。樂律之不可不通。以其與兵事文章相爲表裏。

紀澤作音學考。約近五千字。於「考古」及「審音」二者。均有所得。爲之一慰。

澤兒呈所著分韻說文解字。略一繙閱。其法用廣韻之次第。佩文韻之字數。抄錄許氏注。及大徐翻切。其中有申明原注之說。則以夾行注之。其於注外則有陳說。則於翻切之下。夾圈以別異之。其佩文韻所有。說文所無者。則有

楷文而無篆文。仍用篇韻各說以注之。其佩文韻所無。說文所有者。則別爲補編。仍依翻切。以分東冬鍾江各韻。讀五代史。於歐公不僞梁一段。不以爲然。

閱周保緒所著書略。趙惠甫所寄來者。周名濟。荆溪人。著成於道光十八年。亦近世著作才也。

諸子中。惟老莊荀子。孫子。自成一家人之言。餘皆不免於剽襲。

王懷祖先生讀書雜誌。所校管子各條。似不如校他書之精實。

讀淮南子精神訓。至「大禹竭力以勞萬民」句。若有所感。

讀修務訓中功可強成。名可強立。若有所會。淮南子本道家者流。而此篇之旨。與荀子相近。大抵理之足以見極者。百家未嘗不相合也。

閱淮南子椒真訓。言「有道之士。亦須遇時。」爲之增感。

揚子法言究不如文中子之平實。蓋子雲文學中人。非道德中人也。

船山氏最推重正蒙一書。以余觀之。亦艱深而不能顯豁。其參兩篇。言天地日月五行之理數。尤多障礙。

正誼堂叢書凡五六十種。張清恪輯刻。吳竹莊所贈也。因取正誼堂中清恪公所輯程子二十篇讀之。至晡時讀

畢。凡十卷。取論語二十篇之意。編采二程粹言。略分門類。頗爲精當。

張清恪公所輯朱子七篇。每篇各分上下。仿孟子七篇之意。張公蓋以程配孔。以朱配孟也。

讀張文端公聰訓齋語。文和公澂懷園語。此老父子學問。亦以「知命」爲第一義。

閱羅羅山人極衍義。姚江學辨等書。服其見理甚真。所志甚大。信爲吾鄉豪傑之士。

鍾涵齋邇言。蓋理學之緒餘。而參以陰陽果報者。

聖武記又闕一徧畢。中有嘉慶川湖陝靖寇記八篇未閱。以昔年在京闈過。嫌此八篇敘事冗亂也。

閱曾香墅先生漫鈔及各種香墅。名廷枚賓谷之伯父也。其書仿困學紀聞。容齋隨筆之類。特根底不深耳。

莫子德交出何願船二信。內有張石洲蒙古游牧記四本。又朔方備乘凡例數頁。信爲當世積學之士。

古文之道。謀篇布勢。是一段最大工夫。書經左傳。每一篇空處較多。實處較少。旁面較多。正面較少。精神注於眉宇目光。不可周身皆眉。到處皆目也。綫索要如蛛絲馬跡。絲不可過粗。跡不可太密也。

古人文筆。有雲屬波委。官止神行之象。實從熟後生出。所謂「文入妙來無過熟」者此也。

古文之道。布局須有千巖萬壑。重巒複嶂之觀。不可一覽而盡。又不可雜亂無紀。

古文之道。亦須有奇橫之趣。自然之至。二者并進。乃爲成體之文。

古文之法。全在「氣」字上用功夫。

爲文全在氣盛。欲氣盛全在段落落清。每段分束之際。似斷不斷。似咽非咽。似吞非吞。似吐非吐。古人無限妙境。難於領取。每段張起之際。似承非承。似提非提。似突非突。似紆非紆。古人無限妙用。亦難領取。

奇辭大句。須得瑰璋飛騰之氣。驅之以行。凡堆重處。皆化爲空虛。乃能爲大篇。所謂「氣力有餘於文之外」也。否則氣不能舉其體矣。

吾嘗取姚姬傳先生之說。文章之道。分陽剛之美。陰柔之美。大抵陽剛者。氣文勢瀚。陰柔者。韻味深笑。浩瀚者。噴薄而出之。深笑者。吞吐而出之。就吾所分十一類言之。論著類。詞賦類。宜噴薄。序跋類。宜吞吐。奏議類。哀祭類。宜噴薄。詔令類。書牘類。宜吞吐。傳誌類。敘記類。宜噴薄。典志類。雜記類。宜吞吐。其一類中微有區別者。如哀祭類。雖宜噴薄。而祭郊社。祖宗。則宜吞吐。詔令類。雖宜吞吐。而檄文則宜噴薄。書牘類。雖宜吞吐。而論事則宜噴薄。此外各類。皆可以意推之。

類纂所選書牘。有不盡厭於吾心者。未知古人書牘何者最善。

古文中。惟書牘一門。竟鮮佳者。八家中。韓公差勝。然亦非書簡正宗。此外則竟無可采。諸葛武侯王右軍兩公書翰。風神高遠。最愜吾意。然患太少。且乏大篇。皆小簡耳。

閱駢體文鈔。將其所分類歸併於吾所分三門十一類之中。嫌其繁碎。不合古義也。

余所編經史百家雜鈔。編成後。有文八百篇上下。未免太多。不足備簡練揣摩之用。宜另鈔小冊。選文五十首鈔之。敬夕輒誦。庶爲守約之道。

往年余思古文有八字訣。曰雄。直。怪。麗。澹。遠。茹。雅。近於「茹」字似更有所得。而音響節奏。須一「和」字爲主。因將「澹」字改作「和」字。

文章陽剛之美。莫要於「字」。「湧」。「直」。「怪」四字。陰柔之美。莫要於「憂」。「茹」。「遠」。「潔」四字。惜余知其意而不能竟其學。

嘗慕古文之境之美者。約有八言。陽剛之美。曰「雄」。「直」。「怪」。「麗」。「陰柔之美。曰「茹」。「遠」。「潔」。「適」。「蒼」之數年。而余未能發爲文章。略得八美之一。以副斯志。是夜將此八言者。各作十六字贊之。至次日辰刻作畢。附錄如左。

(雄) 劃然軒昂。盡棄故常。跌宕頓挫。捫之有芒。

(直) 黃河千曲。其體仍直。山勢如龍。轉換無迹。

(怪) 奇趣橫生。人駭鬼眩。易玄山經。張韓互見。

(麗) 青春大澤。萬卉初葩。詩騷之韻。班揚之華。

(茹) 衆義輻湊。吞多吐少。幽獨咀含。不求共曉。

(遠) 九天俯視。下界聚蚊。寤寐周孔。落落寡羣。

(潔) 冗意陳言。類字盡芟。慎爾褒貶。神人共監。

(適) 心境兩閒。無營無待。柳記歐跋。得大自在。

偶思古文古詩。最可學者。占八句云。詩之節。書之括。孟之烈。韓之越。馬之咽。莊之跌。陶之潔。杜之拙。

雜騷三百二十四句誦畢。老年讀生書成誦。稍補少壯之缺陷。亦一樂也。

鄒陽獄中上梁王書。千古傳誦。余究不知其深處。太史公以鄒陽與魯仲連並列。余亦不知其所以相合之處。夜溫長楊賦。於古人行文之氣。似有所得。

輿中讀上林賦千餘言。略能成誦。少時所深以爲難者。老年乃頗能之。非聰明進於昔時。乃由稍知其節奏氣勢。與用意之所在。故略記之。

余近年最好揚馬班張之賦。未能迴環朗誦。偶一誦讀。如逢故人。易於熟洽。但衰年讀書。未必能久記耳。

漢魏人作賦。一貴訓詁精確。一貴聲調鏗鏘。

古文之道。與駢體相通。由徐庾而進於任沈。由任沈而進於潘陸。由潘陸而進於左思。由左思而進於班張。由班張而進於卿雲。韓退之之文。比卿雲更高一格。解學韓文。則可窺六經之閫奧矣。

二日內。始悟昌黎諸文。皆學書經。

二日內。因讀辛劉詞。又大悟韓文之妙。實從子雲相如得來。

二日內。覺於古文大有所得。乃悟韓文實從揚馬得來。而參以孔孟之義理。所以雄視千古。

韓文柳州羅池廟碑。覺情韻不匱。聲調鏗鏘。乃文章中第一妙境。情以生文。文亦以生情。文以引聲。聲亦足以引文。循環互發。油然而不能自已。庶漸漸可入佳境。

閱韓文送高閑上人。所謂機應於心。不挫於物。姚氏以爲韓公自道作文之旨。余謂機應於心。熟極之候也。莊子養生篇之說也。不挫於物。自謙之候也。孟子養氣章之說也。不挫於物者。體也。道也。本也。機應於心者。用也。技也。末也。韓子之於文。技也。進乎道矣。

讀原毀。伯夷頌。獲麟解。龍雜說。……諸首。岸然想見古人。獨立千古。確乎不拔之象。

韓公「周情孔思」四字。非李漢知之極深。焉能道得出。爲文者要須窺得此四字。乃爲知本。

韓文誌傳中有兩篇相配偶者。如曹成生王宏兩篇爲偶。柳子厚鄭羣兩篇爲偶。張翥張徹兩篇爲偶。推此而全集中可以爲偶者甚多。古人之文可爲偶者甚多。惜不能一一稱量而配合之耳。

溫韓文數篇。若有所得。古人之不可及。全在行氣。如列子之御風。不在義理字句間也。

柳子厚山水記。似有得於陶淵明冲淡之趣。文境最高。不易及。

夜闕古賦識小錄。深有味於柳子厚之囚山篇。

姚公謂蘇氏學莊子外篇之文。實則該諧處。不逮遠甚。

蘇子白謂東坡晚年。以文章爲鼓吹。真知文章中之樂境。余亦微知之。惜無寬閒歲月。竟其所學耳。

讀震川文數首。所謂風塵子讀之。一似嚼冰雪者。信爲清潔。而波瀾意度。猶嫌不足以發揮奇趣。

闕震川古文。遂并翻其四書文闕之。其渾灑流轉之氣。乃更勝於古文也。

闕湯文正集。惟傳狀碑銘之類。不愜吾意。餘如語錄。告諭。書牘之屬。皆有誠意挾正氣以行。學問本極淵博。講學又甚公允。不可及也。

程伯敷出示洪稚存上成親王書。卽嘉慶己未獲咎。發遣新疆者。當時直聲震於天下。今觀之。亦無甚觸忌諱之處。

闕梅伯言文集。歎其鑽研之久。工力之深。

至錢警石先生久談。得見其族兄衍石先生家書數十封。攜歸一閱。實嘉道間一碩儒也。

闕錢衍石先生。與其弟警石先生家信。服其學問精博。機趣洋溢。

闕陳秋舫吳偉卿所作應制賦。氣勢流利。古不乖時。今不同弊。心賞其能。而自愧弗如也。

吳竹如文集。方存之代。爲編出者。計十二卷。粗閱數十葉。於儒釋朱陸之辨。剖晰最精。

闕吳南屏梓湖文錄數十首。歎其少而能文。老而不倦。爲不可及。

左季高信內寄祭胡潤帥文稿一篇。情文并茂。殊爲傑構。

馮敬亭。名桂芬。寄校邨廬初稿二冊。共議四十二篇。粗讀數十篇。雖多難見之施行。然自是名儒之論。

寶蘭泉近作辨論十餘首。多闕歷之言。而文義未能入古。

與次青論古文之法。次青天分高。成就當未可量。

蔣琦齡所陳時政十二事。約計萬餘言。多可見之施行。文筆亦雅健暢達。末條請崇宋學而抑漢學。似與各條不類。

申甫在此暢談。言渠文筆所以不甚暢者。爲在己之禁令太多。難於下筆耳。余勸其破除禁令。一以條暢爲主。凡辦事者。先貴敷陳明暢也。

劉霞仙所作辨蔡壽祺誣劾一疏。置身甚高。辭旨深厚。真名作也。

閻邸抄。中見霞仙以本年覆奏一疏降調。如此名奏議。而反以獲譴。頗不可解。

張廉卿文有王介甫之風。日進不已。可畏可愛。

閻張廉卿近所爲古文。喜其入古甚深。因爲加圈批。

石芸齋所作房山石經山訪碑記。亦偉觀也。

思白香山陸放翁之襟懷澹宕。殊不可及。古文家胸懷雖淡泊。而筆下難於寫出。思一爲之。以寫淡定之懷。古所謂「一卷冰雪文」者也。

古文一事。平日自覺頗有心得。而握管之時。不克殫精極思。作成總不稱意。安得屏去萬事。酣睡旬日。神完意適。然後作文一首。以據胸中奇趣。

余於古文一道。十分已得六七。而不能竭智畢力於此。匪特世務相掇。時有未閑。亦實志有未專也。此後精力雖衰。官事雖煩。仍當篤志斯文。以卒吾業。

久不作文。機軸甚生。心思遲鈍。尙不能成篇。亦因見客太多。瑣事煩瀆。神智昏擾故也。

昔年每作一文。輒數日不能成寐。不知老年何以轉無此病。豈反健於壯歲耶。抑用心未能銘入耶。余生平稍致力於古文。思欲有所述作。今老憊而一無所成。深用自愧。

與兒子一論所作之文。考據與筆力。兩無可取。

每一作文。未下筆之先。若有佳境。既下筆則無一是處。由於平日用功浮泛。全無實際故耳。

作孫芝房芻論序一首。約九百字。至三更始畢。老年作文。愈覺吃力。而機勢全不湊泊。總由少作太生之故耳。

作莫猶人墓表。文筆平衍。無復昔年傲岸勁折之氣。蓋老境日增耳。

思作金陵官紳昭忠祠碑。而不能成。遂竟日昏睡。如醉癡。向來習憇如此。而數十年因循不肯苦學作文。至今已衰老。悔不及矣。

作苗君墓志銘畢。細閱竟無一字是處。昔余終年不動筆作文。而自度能知古人之堂奧。以爲將來爲之。必有可觀。不料今年試作數首。乃無一合於古人筆法。媿赧何極。

作唐公墓志。覆視無一是處。乃知青年自詭爲知文。而曾不一動筆爲之。不可恃也。天下事知得十分。不如行得七分。非閱歷何由大明哉。

郭壻銘辭作畢。全不合古人筆法。深以爲愧。

思作江甯府學宮記。苦探力索。竟不能成一字。固屬衰憊之象。亦由昔年本無實學。故枯竭至此。深爲歎愧。

作星岡公墓表。文成視之。無一當意之處。甚矣。余思之鈍。學之淺。而精力之衰也。余前有信寄筠仙云。「近世達宦。無如余也。荒陋者。」頃筠仙信。力雪此語之誣。余自知甚明。豈有誣乎。

紀澤所作擬莊三首。頗能善談名理。亦略通訓詁奇字之學。

余昔年鈔古文。分氣勢識度。情韻。味趣爲四屬。擬再鈔古近體詩。亦分爲四屬。而別增一機神之屬。機者。無心遇

之。偶然觸之。姚惜抱謂「文王周公繫易彖辭爻辭。其取象亦偶觸於其機。假令易一日而爲之。其機之所觸少。變能其辭之取象亦少異矣。」余嘗歎爲知言。神者。人功與天機相湊泊。如卜筮之有繇辭。如左傳諸史之有童謠。如佛書之有偈語。其義在可解不可解之間。古人所有託諷。如阮嗣宗之類。故作神語以亂其辭。唐人如太白之豪。少陵之雄。龍標之逸。昌谷之奇。及元白張王之樂府。亦往往多神到機到之語。卽宋世名家之詩。亦皆人巧極而天工錯。往路絕而風雲通。蓋必可與言機。可與言神而後極詩之能事。余鈔詩。擬增此一種。與古文微有異同。

是日思詩既選十八家矣。古文嘗選百篇。鈔置案頭。以爲揣摩。因自爲之記曰。「爲政十四門。爲學十五書。鈔文一百首。鈔詩十八家。」

余既鈔選十八家之詩。雖存「他樂不請」之懷。未免「足已自封」之陋。乃近日意思尤爲簡約。五古擬專讀陶潛謝朓兩家。七古擬專讀韓愈蘇軾兩家。五律專讀杜甫。七律專讀黃庭堅。七絕專讀陸游。以一二家爲主。而他家則參觀互證。庶幾用志不紛。然老境侵尋。亦只能長吟以自娛。不能抗手以入古矣。

五言古詩有二種。最高之境一種。比興之體。始終不說出正意。始知碩人但頌莊姜之美盛。而無子兆亂。已在言外。太叔于田。但誇叔段之雄武。而稱國兆亂。已在言外。曹阮陳張李杜往往有之。一種盛氣噴薄而出。跌宕淋漓。曲折如意。不復知爲有韻之文。曹鮑杜韓往往有之。余解此二境。而曾未一作此等詩。自愧亦自憾也。

夜闌陶公述酒詩。爲南宋鄱陽湯文清公漢所注。於陶公度詞微旨。盡得解釋。欣悅無已。

闌陶詩全部。取其太閑適者記出。將鈔一冊。合之杜韋白蘇陸五家之閑適詩。纂成一集。以備朝夕諷誦。洗滌名利爭勝之心。

闌文選雜擬。古人措詞之深秀。實非唐以後人所可及。特氣有騫翥駿邁者。亦有不盡然者。或不免爲詞所累耳。若以顏謝鮑謝之辭。而運之以子雲退之之氣。豈不更可貴哉。

批校太白樂府。每日僅校二十首或十餘首。蓋余於樂府向未用功。茲稍一措意。全無入處也。

日來讀杜詩。頗有小得。無事則心頭口頭不離杜詩。雖細加咀嚙。而究有爲人的意思。

杜詩韓文所以能百世不朽者。彼自有知言養氣工夫。惟其知言。故常有一二見道語。談及時事。亦甚識當世要務。惟能養氣。故無纖薄之響。

溫杜詩五古。觀其筆陳伸縮吐茹之際。絕似史記。憶古人有謂杜少陵似太史公者。不記是東坡之言乎。抑他人之言乎。

閻杜詩五古。古人妙處。只是造句之法。變幻無窮。故終身無一複句。猶之毛詩無相襲之調也。昔嘗以作古人宜用杜詩造句之法。近來久未溫習及此矣。

溫杜詩五古。愛其句法瘦勁。變化通於古文造句之法。憶吾能知之而苦于不能爲之耳。夜誦杜韓七古。頗多似有會於古人沈鬱頓挫之義。

閻白香山集。因近日胸襟鬱結不開。故思以陶白蘇陸之詩。及張文端公之言解之也。車中看義山詩。似有所得。夜繙樊川集證之。亦然。知何大復明月篇之有心得也。

與李眉生談詩。極佩杜牧之俊偉。

日內於蘇詩似有新得。領其冲淡之趣。灑落之機。

溫蘇詩。朗誦頗久。有聲出金石之樂。因思古人文章所以與天地不做者。實賴氣以昌之。聲以永之。故讀書不能求之聲氣二者之間。徒糟粕耳。

放翁七言絕句。實能道得空曠胸懷出。

將祁文端公詩集閱二三卷。昔年深不以公詩爲然。茲多閱數十百首。其中多可取者。朱伯韓詩。所詣在韓白之間。

至易念園處。觀渠所爲詩。宗法晚唐。頗有法度。予性好言詩。蕙西謂余於詩太自主張。不免自是。細思良然。吳南屏寄毛西垣詩。繙讀一過。信爲朋輩中所不可多得。宜南屏之亟稱之也。

何廉舫信附七律十六章。才人之筆。人人歎之不置。

作七律五首。和何廉舫詩次韻。同和者是李次青吳子序甘子大許仙屏等數人。而王霞軒鄧弼之何敬海等亦將和之。余見廉舫詩才軒舉。所著駢文樂府。皆有可觀。憫其闔家殉節。因欲和詩一二章以慰勞之。本無意次韻也。子序次青諸君皆次其韻。余亦遂勉爲之。

閩馮焯詩稿。焯。代州人。字釋華。其七世祖如京。官廣東左布政使。六世祖璽。以進士官至同知。五世祖光裕。以舉入官至湖南巡撫。四世祖祁官編修。曾祖均。以舉人廕生。官至湖北按察使。祖歲。以舉人官浙江知縣。焯爲潛山縣天堂巡檢。又署屯溪巡檢。刻詩四卷。清穩不俗。昨和余詩八首。今日問之程伯敷。始知其人。因取其詩披閱數十首。兼閱其曾祖及祖刻詩。乃知其世家淵源有自也。

觀李眉生詩。愛其俊拔而有情韻。將來必爲詩人。紀澤前後作次蕤字韻詩二首。韻整而脈清。吐屬亦尙名貴。將來或亦爲詩人。殊以爲慰。

趙蕙甫近作書懷五章。又錄舊作詞十調見示。皆才人之筆也。

海秋言七律須講究藻采聲調。不可專言上乘證果。反昧初開。切中予病。又盛贊予五律。

昔年每作一詩。輒不能睡。後遂闔筆不復爲詩。今試一爲之。又不成寐。豈果體弱不耐苦吟耶。抑機軸太生。成之艱辛耶。

作字之法。絲絲如蠶之吐絲。穆穆如玉之成璧。

作字之道。用筆貴勒貴努。而不可過露勒努之迹。精心運之。出以和柔之力。斯善於用勒用努者。寫字之道。如修脚匠之修脚。古人所謂撥鐙法較空靈。余所謂修脚法較平穩。

凡用之筆。未有十分合手者。往往有小毛病不稱人意。善書者於每用一筆。先識其病。卽因其病勢而用之。或筆之病。次日又有小變。又因其變症而用之。或者因病成妍。則善於用筆矣。

用狼筆寫新宣紙。悟古人頓挫之法。撲筆之法。只是筆不入紙。使勁撲下耳。

京中翰林善寫白摺者。相傳中有一絲牽貫於行間。作大字亦當知此意味。

作書之道。寓沈雄於靜穆之中。乃有別味。雄字須有長劍快戟。龍拿虎踞之象。鋒銜森森。不可逼視者爲正宗。不得以劍拔弩張四字相鄙。作一種鄉愿字。名爲含蓄深厚。舉之無舉。刺之無刺。終身無入處也。作古文古詩亦然。作人之道亦然。治軍亦然。

摹書譜不過。乃知藝之精。其致力全在微妙處。若人人共見共聞之處。必無通微合妙之詣。若一向在浮名時譽上措意。豈有是處。

作字之道。點如珠。畫如玉。體如鷹。勢如龍。四者缺一不可。不可體者。一字之結構也。勢者。數字數行之機勢也。

大抵作字。及作詩。古文。胸中須有一段奇氣。盤結於中。而達之筆墨者。却須遏抑掩蔽。不令過露。乃爲深至。若將絲毫求知見好之心。洗滌淨盡。乃有合處。故曰「七均斯無聲。五和常主淡」也。

因讀李太白杜子美各大篇。悟作書之道。亦須先有驚心動魄之處。乃能漸入證果。若一向由靈妙處著意。終不免描頭畫角伎倆。

作字之道。全以筆陣爲主。直以取勢。橫以出力。當少勝矣。

讀孫子「鷲鳥之疾。至於毀折者。節也」句。悟作字之法。亦有所謂節者。無勢則節不緊。無節則勢不長。

出筆宜顛腹互用。取勢宜正斜并見。用筆之顛。則取正勢。有破空而下之狀。用筆之腹。則取斜勢。有蹴躡躡躡之象。

夜寫零字頗多。略有所會。於昔年「體如鷹……」四句之外。又添四句曰。「點如珠。畫如玉。體如鷹。勢如龍。內

跌宕外拙直。鵝轉頸。屋漏痕。」

古來詩家文家書家皆有所謂筆陣者。厚著於陣之初。而不必究極於陣之終。陣將酣時。又已另作變態矣。作書思。偃筆多用之於橫。抽筆多用之於豎。豎法宜努抽並用。橫法宜勒偃並用。又首貴有俊拔之氣。後貴有自然之勢。

大約書法不外羲獻父子。余以師羲不可遽幾。則先師歐陽信本。歐陽不可遽幾。則先師李北海。師獻不可遽幾。則先師虞永興。師虞不可遽幾。則先師黃山谷。二路并進。必有合處。杜陵言書貴瘦硬。乃千古不刊之論。東坡駁之非也。

闕皇甫碑。識得歐字意思。知顏柳之硬。褚歐之瘦。學書者不可不領略也。

因寫零字。偶有所得。知歐虞用筆。與褚相通之故。書家之有歐虞褚及李北海。猶詩家之有李杜韓蘇。實不祧之祖也。

悟北海上取直勢。下取橫勢。左取直勢。右取橫勢之法。大約直勢本於秦篆。橫勢本於漢隸。直勢盛於右軍。豎東晉諸帖。橫勢盛於三魏諸碑。唐初歐公用直勢。褚公用橫勢。李公能兼用二勢。孫過庭書譜。稍得王大令之法。

余往歲好黃魯直書。深得晉人真意。而逸趣橫生。當更致力。

作書之法。劉石菴善用偃筆。鄭板橋善用蹲筆。王夢樓善用縮筆。惟努筆近人無善用者。古人惟米元章最擅勝場。吾嘗於此自極其思耳。

董香光專用渴筆。以極其縱橫使轉之力。但少雄直之氣。余嘗以渴筆寫吾雄直之氣耳。

作書之法。古人師歐李劉黃。今人師鄧鄭劉王。

作字之法。亦有所謂陽德之美。陰德之美。余所得之意象。爲陽德之美者四端。曰直。曰饒。曰勒。曰努。爲陰德之美

思白婀娜之致。庶爲成體之書。

余年始略解書法。而無一定規矩態度。仍歸於一無所成。今定以間架師歐陽率更。而輔之以李北海。丰神師虞永興。而輔之以黃山谷。用墨之鬆秀。師徐季海所書之朱巨川告身。而輔之以趙子昂天冠山諸種。庶乎其爲成體之書。

用狼毫筆。寫寸以外字。足以發據心中邁往之氣。爲之神怡。

久未作小楷。下筆輒重而不入。是日筆輕稍能入紙。乃悟輪扁甘苦疾徐之說。日內作書。常有長進。蓋以每日不間斷之故。

古之書家。字裏行間。別有一種意態。如笑人之眉目。可畫者也。其精神意態。不可畫者也。意態超人者。古人謂之韻勝。余近年於書。略有長進。以後嘗更於意態上著些體驗工夫。因爲四語。曰。執麪鷹視。撥鐙嚼絨。欲落不落。欲行不行。

近來作書。略有長進。但少蕭然物外之致。不能得古人風韻耳。

余作字不專師一家。終無所成。定以後楷書學虞劉李王。取橫勢以求自然之致。利在稍肥。行書學張歐黃鄭。取直勢以盡睨視之態。利在稍瘦。二者兼管並進。庶有歸於一條鞭之時。

日內作字。手甚喫力。擬用「跌」「欹」「注」「卷」四字訣爲之。用力輕勻。或轉可歷久不變。余近習字。非求字佳。老年手指硬拙。有如薑芽。借古帖使運動稍活耳。

習字一紙。似有所會。因就前所作詩二句。復增二句云。「側勢遠從天上落。橫波雜向弩端涵。刷如丹漆輕輕抹。換似龍蛇節節銜。」自此專從側橫刷換致力。不復以他妙雜繁吾慮矣。

子愚處觀宋高宗書幽風。字畫雅潔。圖亦工雅絕倫。

黎壽民送手卷。係劉石菴翁覃溪二公。乾隆四十八年在順天關中所寫。各臨蘭亭一本。又書詩跋甚多。余以其

物尤可珍貴。璧之。

李少荃贈以姚惜抱先生所書草字千卷。書蘇公登徑山詩中有缺脫。姚君學懷素書。不甚沈着。特字以人重耳。觀錢子密家藏書畫二種。一爲其太高祖母陳太夫人畫冊。凡十幀。內一幀畫一黑犬。一幀畫一蝶。未入花叢。時一幀畫一蝦。一蟹。二小魚。一幀花籃。一幀古柏。一幀梅花仙女。一幀修篁茂林。一幀楊梅。枇杷。二桃。一幀喜雀。一幀蘿蔔。白菜。皆清華名貴。秀絕人寰。每幀有其夫錢綸光廡江先生題詩二句。乾隆三十一年。其子文端公陳羣進呈御覽。高宗於每幀題七絕一首。并御題一跋於後發還。文端公及其子侍郎汝誠各作十詩。恭和元韻。而汝誠詳跋於後。以誌慶幸。遠乾隆四十七年。文端與侍郎皆歿。而高宗因閱錢選所畫烏犬。偶憶陳太夫人原冊。遣人回浙。取至京師。再呈御覽。高宗再題七律一首。長跋一幀。仍歸錢氏。信名蹟奇遇也。其一種爲直廬問寢圖。圖文端公早朝。先至其母陳太夫人所問安之象。爲王聲基所繪。亦非俗筆。子德以所藏董香光等尺牘。王孟津草稿。乞與一觀。諦觀之。非真蹟也。

錢子密出示其先世錢文端之母夜紡受經圖。高宗及諸名臣題詠甚多。觀玩甚久。信家寶也。

休甯瞿令福田送右軍帖一本。王夢樓跋斷爲淳化祖本。且定爲唐刻。考核未必確鑿。而神采奕奕。如神龍矯變。不可方物。實爲希世至寶。余行年五十有一。得見此奇。可爲眼福。瞿令又送趙待制仲穆所畫飛白竹。上有施愚山沈澤堂諸先生題跋。亦可寶也。余以世間尤物。不敢妄取。審玩片刻。仍爾璧還。去年黎令福疇送劉石菴翁單綵二公在閩中所書手卷。余亦璧卻。此三件。可稱祕門三寶。

莊思永帶來法帖多種。中有三希堂帖。又有宋拓皇甫碑。王虛舟跋。非真蹟也。又有大觀帖。王夢樓姚姬傳手蹟。賞玩片時。

劉伯山攜其所藏西岳華山廟碑。在世所傳三名本之外。三名本者。一長垣本。宋漫堂成親王等所遞藏。後歸劉燕庭者也。一四明本。全謝山及范氏天一閣所遞藏。後歸阮文達者。一華陰本。王山史朱笥河等所遞藏。後歸梁

芭林者也。劉氏本。則其父文淇孟瞻於揚州市肆得之。久不見稱於世。亦可寶也。

楊梅琴信。寄到湖南永州等處金石各種。及彙刻鄧石如篆隸。又集中與頌字爲聯見贈。展玩良久。楊以乙巳翰林。出守永州。性耽金石。新升鎮篁道者也。

在李小湖處借得宋搨閣帖。觀玩良久。

至李小湖處久談。觀其先人春湖先生所藏四寶中之丁道護碑。善法寺碑。又觀明刻本夏承碑。

李小湖所藏法帖。一曰。褚書孟法師碑。筆意似虞永興。而結體絕似歐陽率更。與褚公他書不類。一曰。丁道護書啓法寺碑。隋碑。而字體有類晚唐矮方而勻整。聞春湖侍郎以千金購之。蘇州陸恭家。一曰。宋搨虞廟堂碑。卽春湖侍郎曾經翻刻者也。一曰。善才寺碑。名爲褚河南書。實魏棲梧書。仿褚法耳。又有晉唐小楷共十一種。其中樂毅論東方贊絕佳。乃悟古人用筆之道。如強弩引滿。蓄而不發。歸途作詩二句云。一側勢遠從天上落。橫波旋向弩端涵。一

觀李小湖所藏法帖。一。唐搨虞書廟堂碑。一。褚書孟法師碑。一。丁道護書啓法寺碑。一。魏栖梧書善才寺碑。余於褚書尤愛不忍釋。又觀大觀帖三卷。亦唐搨也。展玩良久。

至李小湖處。看其所藏法帖。如歐書化度寺碑。褚書孟法師碑。虞書廟堂碑。皆天下之至寶也。又有魏棲梧書善才寺碑。丁道護書啓法寺碑。蔡伯喈書夏承碑。亦皆上品。

在李王叔處見陳香泉法帖。見其草書題畫一首。飛舞變化。賞玩無已。惜余老年學書。不復能副吾意之所至耳。莫子偁得唐人寫本說文。僅木部下半一百八十篆。自作校勘記。比較孫刻大徐本。初刻小徐本異同。其佳處不可勝舉。大喜。以爲天下之至寶也。

馬徵銘有影宋鈔本集韻。今東南亂後。僅存之本。可貴也。

至莫子偁處。觀樂近年所得書。收藏頗富。內有汲古閣開化紙初印十七史。天地甚長。又有白紙初印五禮通考。

其疎字。相傳係秦文恭公手校。又有通志堂另刻之禮記釋文。又有明刻千家注杜詩。均善本也。歸後子偁以杜詩本見貶。嘉靖丙申玉几山人校刻。竟莫知爲何人也。

至丁兩生家。喫飯之後。看渠所藏書。其富甲於江蘇之官紳。最精者。有宋刻世綵堂韓文。東都事略等書。渠欲以之饋余。余素不奪人之好。因取其次等者。如明刻內經。東雅堂韓文。笠澤叢書三種。攜之以歸。

汪梅村寄新刻皇朝中外一統輿圖。凡三十二冊。首冊序跋。凡例。中卷爲京師北二十度至俄羅斯北海止。南十度至越南國。大致以康熙乾隆兩朝內府圖。及近人李兆洛圖爲藍本。而增小地名頗多。亦鉅製也。

與劉開生同觀蘇松常鎮太五府州新圖。東西十九號。每號十格。南北十四排。每排十格。每格見方二里半。中國自有地圖以來。以此爲最精矣。

苗仙露。河間人。精六書諧聲之學。觀所藏君子館磚開元瓦詩冊。屬予題詩。

雷聲邨以誠送一硯。云係韓襄毅雍之硯。刻一瓶形。裏毅自題曰「韓瓶硯」。後歸王文成公。題硯背數十字。至本朝乾隆中。歸阿文成公。王蘭泉侍郎題硯匣百餘字。咸豐中。孔宥濶繼錄以贈雷侍郎。今雷又以詒我也。(以上日記。)

聞此間有工爲古文詩者。就而審之。乃桐城姚郎中鼐之緒論。其言誠有可取。於是取司馬遷。班固。杜甫。韓愈。歐陽修。曾鞏。王安石。及方苞之作。悉心而讀之。其他六代之能詩者。及李白。蘇軾。黃庭堅之徒。亦皆泛其流而究其歸。然後知古之道者。未有不明於文字者也。能文而不能知道者。或有矣。烏有知道而不明文者乎。古聖觀天地之文。獸迹鳥迹。而作書契。於是乎有文。文與文相生而爲字。字與字相續而成句。句與句相續而成篇。口所不能達者。文字能曲傳之。故文字者。所以代口而傳之千百世者也。伏羲既深知經緯三才之道。而畫八卦以著之。文王周公。恐人之不能明也。於是立文字以彰之。孔子又作十翼。定諸經以闡顯之。而道之散列於萬事萬物者。亦略盡於文字中矣。所貴乎聖人者。謂其立行與萬事萬物相交錯而曲當乎道。其文字可以教後世也。吾儒所賴

以學聖賢者。亦藉此文字以考古聖之行。以究其用心之所在。然則此句與句續字與字續者。古聖之精神語笑。胥寓於此。差若毫釐。謬以千里。詞氣之緩急。韻味之厚薄。屬文者一不慎。則規模立變。讀書者一不慎。則幽莽無知。故國藩籜。謂今日欲明先王之道。不得不以精研文字爲要務。三代盛時。聖君賢相。承繼熙洽。道德之精。淪於骨髓。而問學之意。達於閭巷。是以其時雖置兔之野人。漢陽之游女。皆含性貞嫺。吟詠若伊萊。周召。凡伯。仲山甫之倫。其道足文工。又不待言。降及春秋。王澤衰竭。道固將廢。文亦殆殊已。故孔子親獲麟曰。「吾道窮矣。」畏匡曰。「斯文將喪。」於是慨然發憤。修訂六籍。昭百王之法戒。垂千世而不刊。心至苦。事至盛也。仲尼既歿。徒人分布。轉相流衍。厥後聰明魁傑之士。或有識解。譔著。大抵孔氏之苗裔。其文之醇駁。一視乎見道之多寡。以爲差。見道尤多者。文尤醇焉。——孟軻是也。——次多者。醇次焉。見少者。文駁焉。尤少者。尤駁焉。自荀揚莊列屈賈而下。次第等差。略可指數。夫所謂見道多寡之分數何也。曰。深也。博也。昔者孔子贊易以明天道。作春秋以衷人事。之至。嘗可謂深矣。孔子之門有四科。子路知兵。冉求富國。問禮於柱史。論樂於魯伶。九流之說。皆悉其原。可謂博矣。深則能研萬事微芒之幾。博則能究萬物之情狀。而不窮於用。後之見道。不及孔氏者。其深有差焉。其博有差焉。能深且博。而屬文復不失古聖之誼者。孟氏而下。惟周子之通書。張子之正蒙。陸厚正大。龜焉寡儔。許鄭亦能深博。而訓詁之文。或失則碎。程朱亦且深博而指示之。語或失則隘。其他若杜佑。鄭樵。馬貴與。王應麟之徒。能博而不能深。則文流於蔓矣。游楊。金。許。薛。胡。之儔。能深而不能博。則文傷於易矣。由是有「漢學」「宋學」之分。斷斷相角。非一朝矣。僕竊不自揆。謬欲兼取二者之長。見道既深且博。而爲文復臻於無累區區之心。不勝奢願。譬若以蚊而負山。盲人而行萬里也。亦可哂已。蓋上者仰企於通書正蒙。其次則篤嗜司馬遷韓愈之書。謂二子誠亦深博。而頗窺古人屬文之法。今論者不究二子之識解。輒謂遷之書憤懣不平。愈之書傲兀自喜。而足下或不深察。亦偶同於世人之說。是猶觀盤詰之齧牙。而謂尙書不可讀。觀鄭衛之淫亂。而謂全詩可刪。其毋乃漫於一概而未之細推也乎。孟子曰。「君子所性。雖大行不加焉。雖窮居不損焉。」僕則謂君子所性。雖破萬卷不加焉。

雖一字不識無損焉。辭書籍而言道。則仁。義。忠。信。反躬皆備。堯舜孔孟非有餘。愚夫愚婦非不足。初不關乎文字也。卽書籍而言道。則道猶人心所載之理也。文字猶人身之血氣也。血氣誠不可以名理矣。然舍血氣則性情亦胡以附麗乎。今世雕蟲小夫。既溺於聲律。鑽藻之末。而稍知道者。又謂讀聖賢書當明其道。不當究其文字。是猶論觀人者當觀其心所載之理。不當觀其耳目言動血氣之末也。不亦誣乎。知舍血氣無以見心理。則知舍文字無以窺聖人之道矣。周濂溪氏稱「文以載道」。而以虛車譏俗儒。夫虛車誠不可。無車又可以行遠乎。孔孟沒而道至今存者。賴有此行遠之車也。吾輩今日苟有所見而欲爲行遠之計。又可不早具堅車乎哉。故凡僕之鄙願。苟於道有所見。不特見之。必實體行之。不特身行之。必求以文字傳之後世。雖曰不遠。志則如斯。其於百家之著述。皆就其文字以校其道之多寡。剖其銖兩而殿最焉。於漢宋二家。擣訟之端。皆不能左袒。以附一闕。於諸儒崇道貶文之說。尤不敢雷同而苟隨。極知狂謬焉。有道君子所深屏。然默而不宣。其文過囁甚。

來示甚以拋棄詩書爲慮。殊非所宜。將藉此以博取青紫。則未得之時。邛若神仙。既得之後。睨如敗屨。身外浮名。何足加損。若謂積軸在胸。烈芬在後。則傳人之目。談何容易。見有握槩懷鉛。窮老盡氣。當時自誇。沒亦汶汶。凡若此者。不勝數也。

凡僕之所志。其大者蓋欲行仁義於天下。使凡物各得其分。其小者則欲寡過於身。行道於妻子。立不悖之言。以垂教於宗族鄉黨。其有所成與。以此畢吾生焉。其無所成與。以此畢吾生焉。

昔石徂徠師事孫泰山。湯文正師事孫夏峯。皆以宏名碩學宦成之後。退然自居於弟子之列。賢者之意量。度越尋常萬萬也。

比歲以來。讀書之志愈篤。而力愈不副。人事愈雜。如瞎思語。外若石頭。中極了了也。

自孔孟以後。惟濂溪通書。橫渠正蒙。道與文可謂兼至交盡。其次如昌黎原道。子固學記。朱子大學序。寥寥數篇而已。此外。則道與文。竟不能不離而爲二。鄙意欲發明義理。則當法經說理窟及各語錄劄記。(如讀書錄居業

錄因知記思辨錄之屬。欲學爲文。則當掃蕩一副舊習。赤地新立。將前此所業。蕩然若喪其所有。乃始別有一番文境。望溪所以不入古人之閭奧者。正爲兩下兼顧。以致無可怡悅。輒妄施批點。極知無當。高深之萬一。然各有本師。未敢自誣其家法以從人也。

先哲經世之書。莫善於司馬文正公資治通鑑。其論古皆折衷至當。開拓心胸。如因三家分晉而論名分。因曹魏移祚而論風俗。因蜀漢而論正閭。因樊英而論名實……皆能窮物之理。執聖之權。又好敘兵事。所以得失之由。脈絡分明。又好詳名公巨卿。所以興家敗家之故。使士大夫怵然知戒。實六經以外不刊之典也。

作古文者。例有傲骨。淮歐陽公較平和。此外皆剛介倔強。與世齟齬。足下傲骨嶙峋。所以爲文之質。恰與古人相合。惟病在貪多。動致冗長。可取國朝二十四家古文讀之。參之侯朝宗。魏叔子。以寫胸中磊落不平之氣。參之方望溪。汪鈍翁。以藥平日浮冗之失。兩者並進。所詣自當日深。易以有成也。

閣下讀書。專取宋元人佳刻。僕意時代不足計。但取校刊尙精。刷印最初者爲妙。苟宋元明之板。而刷印於今日。猶漢唐碑帖。而今日搨之。剝落補湊。夫何足貴。苟有佳紙初搨。則官板如康熙之周易折中書畫譜。乾隆之十三經廿四史之類。私板如國初之汲古閣。近日之黃丕烈孫星衍秦恩復胡克家張敦仁諸影宋本。亦何嘗不可奉爲至寶。

早歲有志著述。自馳驅戎馬。此念久廢。然亦不敢遂置詩書於不問也。每日稍閑。則取班馬韓歐諸家文。舊日所酷好者。一溫習之。用此以養吾心而凝吾神。

吾鄉讀書。間斷時多。有恆者少。幸得名師誨導。祈於「有恆」二字加意。一暴十寒。聖賢所誠。足下爲古文筆力稍患其弱。昔姚惜抱先生論古文之途。有得於陽與剛之美者。有得於陰與柔之美者。二端判分。盡然不謀。余嘗數陽剛者約得四家。曰莊子。曰揚雄。曰韓愈。曰柳宗元。陰柔者約得四家。曰司馬遷。曰劉向。曰歐陽修。曰曾鞏。然柔和淵懿之中。必有堅勁之質。雄直之氣。運乎其中。乃有以自立。足下氣體近柔。望熟讀揚韓

各文。而參以兩漢古賦以救其短。何如。

學者於看。讀。寫。作。四者。缺一不可。看者。涉獵宜多。宜速。讀者。誦詠宜熟。宜專。看者。日知其所亡。讀者。月無忘其所能。看者。如商賈趨利。聞風卽往。但求其多。讀者。如富人積錢。日夜塗塗。但求其久。看者。如攻城拓地。讀者。如守土防隘。二者截然兩事。不可闕。亦不可混。至寫字不多。則不熟。不熟則不速。無論何事。均不能敏。以圖功。至作文。則所以滄此心之靈機也。心常用則活。不用則窒。如泉在地。不鑿汲則不得甘醴。如玉在璞。不切磋則不成令器。今古名人。雖韓歐之文章。范韓之事業。程朱之道術。斷無久不作文之理。張子云。「心有所開。卽便札記。不思。則窒塞之矣。」

國藩生平。坐「不敬」。「無恆」二事。行年五十。百無一成。深自愧恨。故近於知交門徒。及姻戚子弟。必以此二者相告。「敬」字。惟「無衆寡」。「無小大」。「無敢慢」三語。最爲切當。僕待人處事。向來多失之慢。今老矣。始改前失。望足下及早勉之。至於「有恆」二字。尤不爲言。大抵看書與讀書。須盡然分爲兩事。看書宜多。宜速。不速則不能看畢。是無恆也。讀書宜精。宜熟。而不能完。是亦無恆也。足下現閱八家文選。卽須將全部看完。如其中最好歐陽公之文。卽將歐文抄讀幾篇。切不可將看與讀混爲一事。尤不可曰看之無味。遂不看完。致蹈無恆之弊。

文章之事。究以精力盛時。易於進功。足下年力方強。志趣拔俗。宜趁此時。併日而學。絕塵而奔。雖未必遽躋作者。而看。讀。寫。作。四者兼營並進。亦自有一番之功效。

退之論文。先貴沈浸。讀郁。含英咀華。陸士衡劉舍人章。皆以骨肉停勻爲上。姬傳先生。亦以格律。聲色。與神。理。氣。味。四者並稱。閣下之文。有骨有肉。似宜於「聲色」二字。少加講求。

南屏不願在桐城。諸君子灶下討生活。真吾鄉豪傑之士也。而直以姚氏爲呂居仁之比。則貶之已甚。姚氏娶爲知言君子。特才力薄弱。不足以發之耳。其古文辭類纂一書。雖闖入劉海峯氏。稍涉私好。而大體固是有倫。其序

跋類。淵源於易繫詞賦類。仿劉歆七略。則不刊之典也。國藩之爲是紘。不過於伯宜處。略聞功甫生平之言論風指而縱筆及之。非謂時流諸君子者。果足以名於世而垂於後。不特不和之。且私獨薄之。南兄識得鄙意。曰：「侍郎之心。殊未必然。」所謂搔着癢處。固當相視而笑。莫逆於心也。

僕嘗稱古文之道。無施不可。但不宜說理耳。送人序。退之爲之最。且善。然僕意。宇宙間。乃不應有此一種文體。後世生日有壽序。還官有賀序。上梁有序。字號有序。皆此體濫觴。至於不可究詰。昔年作書歸熙甫文集後。曾持此論。譏世人不能糾正退之之謬。而逐其波而拾其腐。

尊書以弟所作歐陽生集序中。稱引並世文家。妄將大名臚於諸君子之次。見謂不倫。李耳與韓非同傳。誠爲失當。然贊未一語曰：「而老子深遠矣。」子長胸中。固非全無涇渭。今之屬辭連類。或亦同科。至姚惜抱氏。雖不可遽語於古之作者。尊兄至比之。呂居仁。則亦未爲明允。惜抱於劉才甫。不無阿私。而辨文章之源流。識古書之正僞。亦實有突過歸方之處。尊兄鄙其宗派之說。而并沒其篇古之功。揆之事理。甯可謂平。

清勁爲尊兄本色。所短者。乃在聲色之間。弟嘗勸人讀漢書文選。以日漸於腹潤。姚惜抱論詩文。每稱當從聲音證入。尊兄或可以此二義參證得失。弟夙昔好揚雄韓愈瓌璋奇崛之文。而近時所作。率傷平直。不稱鄙意。亦緣軍中日接俗務。不克精心營度耳。

尊書隸字。似不如草篆。少陵「瘦硬通神」。專爲隸字言之。東坡欲泛及於真草諸體。以爲未公不覆。非至論也。僕不解作字。昔年治說文。曾廣購漢魏各碑。討尋源流。如禮器碑。結體方雅。要爲隸家正範。張猛龍碑。將隸楷融成一氣。尤足津逮來學。唐隸稍肥。有乖大雅。敢爲足下陳一戒律。近姚伯昂先生。專師曹全碑。相沿成風。亦弊也。

四部之書。浩如淵海。而其中自爲之書。有原之水。不過數十部耳。經則十三經是已。史則廿四史暨通鑑是已。子則五子暨管晏韓非淮南呂覽……等十餘是已。集則漢魏六朝百三家之外。唐宋以來。廿餘家而已。此外入子

集部之書。皆質作也。皆剽襲也。入經史部之書。皆類書也。不特太平御覽事文類聚等。爲類書。卽三通。亦類書也。小學近思錄。衍義。衍義補。亦類書也。故嘗謬論修藝文志四庫書目者。嘗以古人自爲之書。有原之川。瀆另行編列。別白而定一尊。其分門別類。雜纂古人成書者。別爲一編。則蕩除廓清。而書之可存者日少矣。

凡讀書筆記。貴於得閒。戴東原謂。「閩百詩善看書。」以其能蹈瑕抵隙。能環攻古人之短也。近世如高郵王氏。凡讀一書。於正文注文。一一求其至是。其疑者非者。不敢苟同。以亂古人之真。而欺方寸之知。若專校異同某字。某本作某。則謂之考異。謂之校對。不得與精覈大義。參稽疑誤者同日而語。當時批寫書眉。本不以爲著述之事。後人概以滯入筆記之內。殆非薑塢及措抱之意。

古今書籍。浩如烟海。而本根之書。不過數十種經。則十三經是已。史。則廿四史暨通鑑是已。子。則十子是已。(五子之外。管。列。韓。非。淮南。鶡冠。)集。則文選百三名家。暨唐宋以來專集數十家是已。自斯以外。皆剽襲前人之說。以爲言。編集衆家之精。以爲書。本根之書。猶山之幹龍也。編集者。猶枝龍護砂也。

乾嘉以來。士大夫爲訓詁之學者。薄宋儒爲空疏。爲性理之學者。又薄漢儒爲支離。鄙意由博乃能返約。格物乃能正心。必從事於禮經。考覈於三千三百之詳。博稽乎一名一物之細。然後本末兼賅。源流畢貫。雖極軍旅。戰爭。食貨。凌雜。皆禮家所應討論之事。故嘗謂。江氏禮書綱目。秦氏五禮通考。可以通漢宋二家之結。而息頓漸諸說之爭。

古文者。韓退之氏厭秦魏晉六朝駢儷之文。而反之於「六經」。「兩漢」。從而名焉者也。名號雖殊。而其積字而爲句。積句而爲段。積段而爲篇。則天下之凡名爲文者一也。國藩以爲欲矚字之古。宜研究爾雅。說文。小學。訓詁之書。故嘗好觀近人王氏段氏之說。欲造句之古。宜倣效漢書文選。而後可矚俗而裁僞。欲分段之古。宜熟讀班馬韓歐之作。審其行氣之短長。自然之節奏。欲謀篇之古。則舉經諸子以至近世名家。莫不各有匠心。以成章法。如人之有肢體。室之有結構。衣之有要領。大抵以力去陳言。冥冥獨造爲始事。以聲調鏗鏘。包蘊不盡爲終事。

文選縱不能全讀。其中詩數本。則須全卷熟讀。不可刪減一字。餘文亦以多讀爲妙。蓋京都田獵。江海諸賦。雖難於成誦。而造字形聲訓詁之學。卽已不待他求。此外各文。則并無難成誦者也。（以上書札）

（禮）古今君子之所以盡其心養其性者。不可得而見。其修身齊家治國平天下。則一秉乎禮。自內焉者言之。舍禮無所謂道德。自外焉者言之。舍禮無所謂政事。故六官經制大備。而以周禮名書。春秋之世。士大夫知禮善說辭者。常足以服人而強國。戰國以後。以儀文之瓊爲禮。是女叔齊之所譏也。荀卿。張戴。兢兢以禮爲務。可謂知本好古。不逐乎流俗。近世張爾岐氏作中庸論。凌廷堪氏作復禮論。亦有以窺見先王之大原。秦蕙田氏輯五禮通考。以天文算學。錄入爲觀象授時門。以地理州郡。錄入爲體國經野門。於著書之例義。則或駁而不精。其於經世之禮之無所不賅。則未爲失也。

（赦）牧馬者。去其害馬者而已。牧羊者。去其亂羣者而已。牧民之道。何獨不然。諸葛武侯治蜀。有言公惜赦者。答曰。「治世以大德。不以小惠。」故匡衡吳漢。不願爲赦。先帝亦言。「吾周旋陳元方鄭康成間。每見啓告治亂之道悉矣。曾不語赦也。若劉景升季玉父子。歲歲赦宥。何益於治蜀。」人稱亮之賢。厥後贊禱秉政。大赦河南。孟光責贊禱曰。「赦者偏枯之物。非明世所宜有也。」國藩嘗見家有不幸之子。其父曲宥其過。衆子相率而流於不肖。又見軍士有失律者。主者鞭責不及數。又故輕黃之。厥後衆士傲慢。日常戲侮其管轄之官。故知小仁者。大仁之賊。多赦不可以治民。溺愛不可以治家。寬縱不可以治軍。

（世澤）士大夫之志趣學術。果有異於人者。則修之於身。式之於家。必將有流風餘韻。傳之子孫。化行鄉里。所謂「君子之澤」也。就其最善者。約有三端。曰。詩書之澤。禮讓之澤。稼穡之澤。詩書之澤。如韋玄成詩禮。王吉傳經。虞魏之昆。顧陸之裔。代有名家。不可殫述。我朝如桐城張氏。自文端公而下。鉅卿碩學。世濟其美。宣城梅氏。自定九徵君以下。世精算學。其六世孫梅伯言。郎中曾亮。自謂莫紹先緒。而所爲文章詩篇。一時推爲祭酒。高郵王氏。自文肅公安國以下。世爲名儒。而懷祖先生。訓詁之學。實集古今之大成。國藩於此三家者。常低回歎仰。以爲

不可及。禮讓之澤。如萬石君之廉謹。富平侯之敬慎。庠之河東柳氏。宋之藍田呂氏。門庭之內。彬彬焉有君子之風。余所見近時搢紳。未有崇禮法而不與。習傲慢而不敗者。稼穡之澤。惟周家闢國。幽風陳業。述生理之艱難。導民風於淳厚。有味乎其言之。近世張敦復之恆產瑣言。張楊園之農書。用意至爲深遠。國藩竊以爲稼穡之澤。視詩書禮讓之澤。尤爲可大可久。吾祖光祿大夫星崗公嘗有言曰。「吾子孫雖至大官。家中不可廢祖宗舊業。」懿哉至訓。可爲萬世法已。

（悔吝）吉凶。悔吝四者相爲循環。吉非有祥瑞之可言。但行事措之咸宜。無有人非鬼責。是卽謂之吉。過是。則爲吝矣。天道忌滿。鬼神害盈。日中則昃。月盈則虧。易爻多言吝。吝者。易之道。當隨時變易以處中。當變而守此不變。則貞而吝矣。凡行之而過。無論其非義也。卽盡善之舉。盛德之事。稍過則吝。隨之。余官京師。自名所居之室曰求闕齋。恐以滿盈致吝也。人無賢愚。遇凶皆知自悔。悔則可免於災戾。故曰。震无咎者存乎悔。動心忍性。斯大任之基。側身修行。乃中興之本。自古成大業者。未有不自困心橫慮覺。悟知非而來者也。吝則馴致於凶。悔則漸趨於吉。故大易之道。莫善於悔。莫不善於吝。吾家子弟。將欲自修而免於咎尤。有二語焉。曰。「無好快意之事。常存省過之心。」

（儒緩）論語兩稱「敏則有功」。敏有得之天事者。才藝贍給。我決如流。此不數數覩也。有得之人事者。人十己千。習勤不輟。中材以下。皆可勉焉而幾。余性魯鈍。他人目下二三行。余或疾讀不能終一行。他人頃刻立辨者。余或沈吟數時不能了。友人陽湖周穀甫騰虎嘗謂余儒緩不及事。余亦深以舒緩自愧。左傳齊人責魯君不答稽首。因歌之曰。「魯人之皋。數年不覺。使我高蹈。」惟其儒。書以爲二國憂。言魯人好儒術而失之皋緩。故二國與師來問也。漢書朱博傳齊部舒緩養名。博奮髯抵几曰。「觀齊兒欲以此爲俗耶。」皆斥罷諸吏。門下掾贛遂耆老大儒。拜起舒緩。博謂贛老生不習吏體。令主簿教之拜起。閑習。又以功曹官屬。多裘衣大貂。不中節度。敕令掾更衣。皆去地二尺。此亦惡儒術之舒緩不足了事也。通鑑鑑驃騎大將軍宋混曰。「臣弟澄。政事愈於臣。但恐

儒緩機事不稱耳。」胡三省注曰：「凡儒者多務者舒緩而不能應機以趨事赴功。」大抵儒術非病，儒而失之疏緩，則從政多積滯之事，治軍少可建之功。

（名望）知識愈高，則天之所以責之者愈深，名望愈重，鬼神之所以伺察也愈嚴。故君子之自處，不肯與衆人望量長短，以爲己之素所自期者大，不肯自欺其知識以欺天也。己之名望素尊，不肯更以鄙小之見貽譏於神明也。

（居業）古者英雄立事，必有基業。如高祖之關中，光武之河內，魏之兗州，唐之晉陽，皆先據此爲基，然後進可以戰，退可以守。君子之學道也，亦必有所謂基業者。大抵以規模宏大，言詞誠信爲本。如居室然，宏大則所宅者廣，託底者衆，誠信者置址甚固，結構甚牢。易曰：「寬以居之。」謂宏大也。「修辭立其誠。」所以居業，謂誠信也。大程子曰：「道之浩浩，何處下手。淮立誠，纔有可居之處，誠便是忠信。修省言辭，便是要立得這忠信。若口不擇言，逢事便說，則忠信亦被汨沒動盪，立不住了。」國藩按：立得住，即所謂居業也。今世俗言「興家立業」是也。子張曰：「執德不宏，信道不篤，焉能爲有，焉能爲亡。」亦謂苟不能宏大誠信，則在我之知識浮泛動盪，指爲我之所有，也不可，指爲我之所無，也亦不可。是則終身無可居之業。程子所謂「立不住」者耳。

（英雄誠子弟）古之英雄，意量恢拓，規模宏遠，而其訓誠子弟，恆有恭謹斂退之象。劉先主臨終，敕太子曰：「勉之，勉之，勿以惡小而爲之，勿以善小而而不爲。惟賢惟德，可以服人。汝父德薄，不足效也。汝與丞相從事，事之如父。」西涼李嵩手令戒諸子，以爲「從政者當審慎賞罰，勿任愛憎，近忠正，遠佞諛，勿使左右竊弄威福，毀譽之來，當研覈真僞，聽訟折獄，必和顏任理，慎勿逆詐僞必，輕加聲色，務廣咨詢，勿自專任。吾蒞事五年，雖未能息民，然含垢匿瑕，朝爲寇讎，夕委心膂，粗無負於新舊，事任公平，坦合無類，初不容懷有所損益，計近則如不足，經遠乃爲有餘，庶亦無愧前人也。」宋文帝以弟江夏王義恭都督荆湘等八洲諸軍事，爲書誡之曰：「天下艱難，國家事重，雖曰守成，實亦未易。隆替安危，在吾曹耳，豈可不幹尋王業，大懼負荷。汝性褊急，志之所滯，其欲必行，意

所不存。從勿回改。此最弊事。宜念裁抑。衛青遇士大夫以禮。與小人有恩。西門安於矯性。齊美關公。張飛任偏同弊。行己舉事。深宜鑒此。若事異今日。嗣子幼蒙。司徒當周公之事。汝不可不盡祇順之理。爾時天下安危。決汝二人耳。汝一月自用錢。不可過三十萬。皆能省此益矣。西楚府台。略所諸究。計嘗不須改昨日求新異。凡訊獄多法。當時難可逆慮。此實爲難。至訊日。虛懷博盡。慎無以喜怒加人。能擇善者而從之。笑歸自己。不可專意自決。以矜獨斷之明也。各器深宜懷情。不可妄以假人。昵近爵。猶應裁量。吾於左右。雖爲少忌。如謂外論。不以爲非也。以貴凌物物不服。以威加人人不厭。此皆違事耳。聲樂嬉遊。不宜令過。捕魚漁獵一切。勿爲供用。奉身皆有節度。奇服異器。不宜與長。又宜數引見佐史。相見不數。則彼我不親。不親無因得盡人情。人情不盡。復何由知衆事也。數君者。皆雄才大略。有經營四海之志。而其教誡子弟。則約旨卑思。斂抑已甚。伏波將軍馬援。亦曠代英雄。而其誡兒子書曰。『吾欲汝曹聞人過失。如聞父母之命。耳可得聞。口不可得言也。好議論人長短。妄是非政法。此吾所大惡也。甯死不願子孫有此行也。龍伯高敦厚周慎。口無擇言。謙約節儉。廉公有威。吾愛之重之。願汝曹效之。杜季良豪俠好義。愛人之器。樂人之樂。父喪致客。數郡畢至。吾愛之重之。不願汝曹效也。效伯高不得。猶爲謹敎之士。所謂『刻鵠不成尚類鶩』者也。效季良不得。陷爲天下輕薄子。所謂『畫虎不成反類狗』者也。』此亦謙謹自將。斂其高遠之懷。卽於卑近之道。蓋不如是。則不足以自致於遠大。藏之不密。則放之不準。蘇軾詩『始知真放本精微。』卽此義也。

（氣節）（傲）自好之士。多講氣節。講之不精。則流於傲而不自覺。風節守於己者也。傲則加於人者也。漢蕭望之初見霍大將軍光。不屑露素挾持。王仲翁譏之。望之曰。『各從其志。』魏孫資劉放用事。辛毗不與往來。子敬諫之。毗正色曰。『吾立身自有本末。就與孫劉不平。不過令吾不作三公而已。』宋顧覲之不屑降意於戴法興等。蔡與宗嫌其風節太峻。覲之曰。『辛毗有言。』孫劉不過使我不作三公耳。』人稟命有定分。非智力可移。』因命弟子原。著定命論以釋之。此三事者。皆風節之守於己者也。若汲黯不下張湯。宋璟不禮王毛仲。此自位高

望重。得行其志。已不得不以風節目之矣。然猶不可謂之傲也。以傲加人者。若寬饒之於許伯。孔融之於曹操。此傲在言詞者也。嵇康之於鍾會。謝靈運之於孟凱。此傲在神理者也。殷仲文之於何無忌。王僧虔之於路瓊。此傲在儀節者也。息夫躬歷詆諸公。登豔彈射百寮。此傲在奏議者也。此數人者。皆不得令終。大抵人道害盈。鬼神福謙。傲者內恃其才。外溢其氣。其心已不固矣。如蓋孔嵇謝殷王等。儘以加諸一二人。猶且無德不報。有毒必發。若息夫躬豈讎之徒。忤同列。安有幸全之理哉。

裴子野曰。「夫有逸羣之才。必思冲天之據。蓋俗之量。則債常均之下。其能守之以道。將之以禮。殆爲鮮乎。」大抵懷材負奇。恆冀人以異眼相看。若一概以平等視之。非所願也。韓信含羞於噲等。彭寵積望於無異。彼其素所挾持者高。誠不欲與庸庸者齊耳。君子之道。莫善於能下人。莫不善於矜。以齊桓公之盛業。蔡邕之會。微有振矜。而叛者九國。以關公之忠勇。一念之矜。則身敗於徐晃。地喪於呂蒙。以大禹之聖。而伯益贊之以清招損。謙受益。以鄭伯之弱。而楚莊王曰。「其君能下人。必能信用其民矣。」不自恃者。雖危而得安。自恃者。雖安而易危。自古國家。往往然也。故挾貴挾長。挾賢挾故。動勞皆孟子之所不答。而怙寵。怙俊。怙非。怙亂。皆春秋士大夫之所深譏爾。

一敬（整齊嚴肅。無時不潔。無事時。心在腔子裏。應事時。專一不雜。清明在躬。如日之升。）

二靜坐（每日不拘何時。靜坐四刻。體驗來復之仁心。正位凝命。如鼎之鎮。）

三早起（黎明即起。醒後勿寤戀。）

四讀書不二（一書未完。不看他書。東繙西閱。徒務外爲人。）

五讀史（丙申年講念三史。大人曰。「爾借錢買書。吾不惜極力爲爾彌縫。爾能圈點一遍。則不負我矣。」嗣後每日圈點十葉。間斷不孝。）

六謹言（刻刻留心。第一工夫。）

七養氣（氣藏丹田。無不可對人言之事。）

八。保身。(十二月奉大人手諭曰。『節勞。節欲。節飲食。時時當作養病。』)

九。日知所亡。(每日讀書。記錄心得語。有求深意是徇人。)

十。月無亡所能。(每月作詩文數首。以驗積理之多寡。養氣之盛否。不可一味耽著。最易溺心喪志。)

十一。作字。(飯後寫字半時。凡筆墨應酬。當作自己課程。凡事不可待明日。愈積愈難清。)

十二。夜不出門。(曠功疲神。切戒切戒。)

勸學篇示直隸士子

人才隨土風爲轉移。信乎。曰。是不盡然。然大較莫能外也。前史稱燕趙慷慨悲歌。敢於急人之難。蓋有豪俠之風。余觀直隸先正。若湯忠愍趙忠毅鹿忠節孫徵君諸賢。其後所詣各殊。其初皆於豪俠爲近。卽今日士林。亦多剛而不搖。質而好義。猶有豪俠之遺。才質本於土風。殆不誣與。豪俠之質。可與入聖人之道者。約有數端。俠者薄視財利。棄萬金而不哂。而聖賢則富貴不處。貧賤不去。痛惡夫播闢之食。豐斷之登。雖精粗不同。而輕財好義之迹。則略近矣。俠者。忘己濟物。不惜苦志。脫人於厄。而聖賢以博濟爲懷。鄒魯之汲汲皇皇。與夫禹之猶己溺。稷之猶己飢。伊尹之猶己推之溝中。曾無少異。彼其能力救窮交者。卽其可以進授天下者也。俠者輕死重氣。聖賢罕言及此。然孔曰成仁。孟曰取義。堅確不移之操。亦未嘗不與之同類。昔人譏太史公好稱任俠。以余觀此數者。乃不悖於聖賢之道。然則豪俠之徒。未可深貶。而直隸之士。其爲學當較易於他省。烏可以不致力乎哉。致力如何。爲學之術有四。曰義理。曰考據。曰辭章。曰經濟。義理者。在孔門爲德行。之科。今世目爲「宋學」者也。考據者。在孔門爲文學。之科。今世目爲「漢學」者也。辭章者。在孔門爲言語。之科。從古藝文。及今世制義詩賦皆是也。經濟者。在孔門爲政事。之科。前代典禮政書及當世掌故皆是也。人之才智。上哲少而中下多。有生又不過數十寒暑。勢不能求此四術。徧觀而盡取之。是以君子貴慎其所擇。而先其所急。擇其切於吾身心。不可造次離者。則莫急於義理之學。凡人身所自具者。有耳目口體心思。日接於吾前者。有父子兄弟夫婦。稍遠者有君臣。有朋友。爲義

理之學者。蓋將使耳目口體心思各敬其職。而五倫各盡其分。又將推以及物。使凡民皆有以善其身。而無憾於倫紀。夫使舉世皆無憾於倫紀。雖唐虞之盛。有不能逮。苟通義理之學。而經濟駭乎其中矣。程朱諸子。遺書具在。曷嘗舍末而言本。違新民而專事明德。觀其雅言雅聞。反覆而不厭者。大抵不外立志以植基。居敬以養德。窮理以致知。克己以力行。成物以致用。義理與經濟。初無兩術之可分。特其施功之序。詳於體而略於用耳。今與直隸多士約。以義理之學爲先。以立志爲本。取鄉先達楊越。趙孫。數君子者爲之表。彼能艱苦困餓。堅忍以成業。而吾何爲不能。彼能置窮通榮辱禍福。死生於度外。而吾何爲不能。彼能以功績稱當時。致澤膺後世。而吾何爲不能。洗除舊日曖昧卑污之氣。矯然直趨廣大光明之域。視人世之浮榮微利。若蠅蚋之觸於目而不留。不憂所如不稱。而憂節概之少貶。不恥凍餒在室。而恥德不被於生民。志之所向。金石爲開。誰能禦之。志既定矣。然後取程朱所謂「居敬窮理力行成物」一云者。精研而實體之。然後求先儒所謂考據者。使吾之所見。證諸古制而不謬。然後求所謂辭章者。使吾之所獲。達諸筆劄而不差。擇一術以堅持。而他術固未敢竟廢也。其或多士之中。質性所近。師友所漸。有偏於考據之學。有偏於辭章之學。亦不必遽易前轍。卽二途皆可入聖人之道。其文經史百家。其業學問思辨。其事始於修身。終於濟世。百川異派。何必同哉。同達於海而已矣。若夫風氣無常。隨人事而變遷。有一二人好學。則數輩皆思力進。先哲。有一二人好仁。則數輩皆思康濟斯民。倡者啓其緒。和者衍其波。倡者可傳諸同志。和者又可禮諸無窮。倡者如本之泉。放乎川瀆。和者如支河溝澮。交匯旁流。先覺後覺。互相勸誘。譬之大小水小水。互相灌注。以直隸之士風。誠得有志者導夫先路。不過數年。必有體用兼備之才。彬彬而四出。泉湧而雲興。余忝官斯土。自媿學無本原。不足儀型多士。嘉此邦有剛方質實之學。鄉賢多堅苦卓絕之行。粗述舊聞。以勸羣士。亦冀這才碩彥。告我昌言。上下交相勸勉。仰希古昔與人爲善。取人爲善之軌。於化民成俗之道。或不無小補云。(以上雜著)

仙石家

予生平於倫常中。惟兄弟一倫。抱愧尤深。蓋父親以其所知者。盡以教我。而我不能以吾所知者。盡教諸弟。是不孝之大者也。

余欲盡孝道。更無他事。我能教諸弟進德業一分。則我之孝有一分。能教諸弟進十分。則我孝有十分。若全不能教弟成名。則我大不孝矣。

聞四妹起最晏。往往其姑反服事他。此反常之事。最足折福。天下未有不孝之婦。而可得好處者。

爲人子者。若使父母見得我好些。謂諸兄弟俱不及我。這便是不孝。若使族黨稱道我好些。謂諸兄弟俱不如我。這便是不弟。何也。蓋使父母心中有賢愚之分。使族黨口中有賢愚之分。則必其平日有討好底意思。暗用機計。使自己得好名聲。而使其兄弟得壞名聲。必其後日之嫌隙由此而生也。

但願兄弟五人。各各明白這道理。彼此互相原諒。兄以弟得壞名爲憂。弟以兄得好名爲快。兄不能使弟盡道得令名。是兄之罪。弟不能使兄盡道得令名。是弟之罪。若各各如此存心。則億萬年無纖芥之嫌矣。

凡人必有師。若無師。則嚴憚之心不生。既以丁君爲師。此外擇友。則慎之又慎。昌黎曰。「善不吾與。吾強與之。附不善不吾惡。吾強與之。拒。」一生之成就。皆關乎朋友之賢否。不可不慎也。

信中有云。「於兄弟則直達其隱。父子祖孫間。不得不曲致其情。」此數語。有大道理。余之行事。每自以爲至誠。可質天地。何妨直情徑行。

若果威儀可則。淳實宏通。師之可也。若僅博雅能文。友之可也。或師或友。皆宜常存敬畏之心。不宜視爲等夷。漸至慢褻。則不復能受其益矣。

今人都將學字弄錯了。若細讀賢賢易色一章。則絕大學問。卽在家庭日用之間。於「孝」「弟」兩字上盡一

分。便是一分學。蓋十分。便是十分學。今人讀書。皆爲科名起見。於孝弟倫紀之大。反似與書不相關。殊不知書上所載的。作文時所代聖賢說的。無非要明白這個道理。若果事事做得。卽下筆說不出。何妨。若事事不能做。並有虧於倫紀之大。卽文章說得好。亦祇算個名教中之罪人。賢弟性情真摯。而短於詩文。何不日日在孝弟兩字上用功。曲禮內則所說的。句句依他做出。務使祖父。父母。叔父母。無一時不安樂。無一時不順適。下而兄弟妻子。皆藹然有恩。秩然有序。此真大學問也。若詩文不好。此小事不足計。卽好極。亦不值一錢。不知賢弟肯聽此語否。科名之所以可貴者。謂其足以承堂上之歡也。謂祿仕可以養親也。今吾已得之矣。卽使諸弟不得。亦可以承歡。可以養親。何必兄弟盡得哉。賢弟若細思此理。但於孝弟上用功。不於詩文上用功。則詩文不期進而自進矣。兒女聯姻。但求勤儉孝友之家。不願與宦家結契聯婚。不使子弟長奢惰之習。

兄妹之子女。猶然骨肉也。古者婚姻之道。所以厚別也。故同姓不婚。中表爲婚。此俗禮之大失。譬如嫁女而號泣奠禮而三戰。喪事而用樂。此皆俗禮之失。我輩不可不力辨之。

毫無學識。而官至學士。頻邀非分之榮。祖父母父母皆康強。可謂極盛矣。現在京官翰林中。無重慶下者。惟我家獨享難得之福。是以男慄慄恐懼。不敢求分外之榮。但求堂上大人眠食如常。閤家平安。卽爲至幸。

家中蒙祖父厚德餘蔭。我得忝列卿貳。若使兄弟妯娌不和睦。後輩子女無法則。則驕奢淫佚。立見消敗。雖貴爲宰相。何足取哉。我家祖父。父親。叔父三位大人。規矩極嚴。榜樣極好。我輩踵而行之。極易爲力。

溫弟天分本高。若能改去蕩佚一路。歸入勤儉一邊。則兄弟之幸也。合家之福也。我待溫弟。似乎近於嚴刻。然我自問此心。尙覺無愧於兄弟者。蓋有說焉。大凡做官的人。往往厚於妻子。而薄於兄弟。私肥於一家。而刻薄於親戚族黨。予自三十歲以來。卽以做官發財爲可恥。以宦囊積金遺子孫爲可恨。故私心立誓。總不靠做官發財。以遺後人。神明鑒臨。予不食言。此時事奉高堂。每年僅守些須。以爲甘旨之佐。族戚中之窮者。亦卽每年各分少許。以盡吾區區之意。蓋卽多寄家中。而堂上所食所衣。亦不能因而加豐。與其獨肥一家。使戚族因怨我而並

恨堂上。何如分潤戚族。使戚族戴我堂上之德。而更加一番欽敬乎。將來若作外官。祿入較豐。自誓除廉俸之外。不取一錢。廉俸若日多。則周濟親戚族黨者日廣。斷不蓄積銀錢。爲兒子衣食之需。蓋兒子若賢。則不靠官廩。亦能自覓衣食。兒子若不肖。則多積一錢。渠將多造一孽。後來淫佚作惡。必且玷家聲。故立定此志。決不肯以做官發財。決不肯留銀錢與後人。若祿入較豐。除堂上甘旨之外。盡以周濟親戚族黨之窮者。此我之素志也。至於兄弟之際。吾亦惟愛之以德。不欲愛之以姑息。教之以勤儉。勸之以習勞守禮。愛兄弟以德也。豐衣美食。俯仰如意。愛兄弟以姑息也。姑息之愛。使兄弟惰肢體。長驕氣。將來喪德虧行。是卽我率兄弟以不孝也。吾不敢也。我仕宦十餘年。現在京寓所有。惟書籍衣服二者。衣服則嘗差者必不可少。書籍則我生平嗜好在此。是以二物略多。將來我罷官歸家。我夫婦所有之衣服。則與五兄弟拈鬮均分。我所辦之書籍。則存貯利見齋中。兄弟及後輩。皆不私取一本。除此二者。予斷不別存一物。以爲官囊。一絲一粟。不以自私。此又我待兄弟之素志也。

吾細思。凡天下官宦之家。多只一代享用便盡。其子孫始而驕佚。繼而流蕩。終而溝壑。而慶延一二代者鮮矣。商賈之家。勤儉者能延三四代。耕讀之家。謹慎者。能延五六代。孝友之家。則可以縣延十代八代。我今賴祖宗之積累。少年早達。深恐其以一身享用殆盡。故教諸弟及兒輩。但願其爲耕讀孝友之家。不願其爲仕宦之家。

吾自入官以來。卽思爲曾氏置一義田。以贍救孟學公以下貧民。爲本境置義田。以贍救念四都貧民。不料世道日衰。余之處境未裕。無論京官者自治不暇。卽此外放。或爲學政。或爲督撫。而如今年三江兩湖之大水災。幾於嗷鴻半天下。爲大官者。更何忍於廉俸之外。多取半文乎。是義田之願。恐終不能償。然余之定計。苟仕宦所入。每年除供奉堂上甘旨外。或稍有贏餘。吾斷不肯買一畝田。積一文錢。必皆留爲義田之用。此我之定計。望諸弟皆體諒之。

鄉間若有孝友書香之家。不必問其貧富。亦可結親。

凡人一身。只有「墨善改過」四字可靠。凡人一家。只有「修德讀書」四字可靠。此八字者。能盡一分。必有一

分之慶。不盡一分。必有一分之殃。其或休咎相反。必其中有不誠。而所謂改過修德者。不足以質諸鬼神也。吾與諸弟勉之又勉。務求有爲善之實。不使我家高曾祖父之積累。自我兄弟而剝喪。此則余家之幸也。

子姪半耕半讀。以守先人之舊。慎無存半點官氣。不許坐轎。不許喚人取水添茶等事。其拾柴收糞等事。須一一爲之。插田時禾等事。亦時時學之。庶漸務本。而不習淫佚矣。

兒姪輩。總須教之讀書。凡事當有收拾。宜勤慎。無作欠伸懶慢樣子。至要。至要。吾兄弟中。惟澄弟較勤。吾近日亦勉爲勤敬。即令世運艱屯。而一家之中。勤則興。懶則敗。一定之理。願吾弟及兒姪等聽之。省之。

諸弟在家教子姪。總須有勤敬二字。無論治世亂世。凡一家之中。能勤能敬。未有不興者。不勤不敬。未有不敗者。至切。至切。余深海往日。未能實行此二字也。千萬叮囑。

家中兄弟子姪。總宜以勤敬二字爲法。一家能勤能敬。雖亂世亦有興旺氣象。一身能勤能敬。雖愚人亦有賢智風味。吾生平於此二字少工夫。今諄諄以訓吾昆弟子姪。務宜刻刻遵守。至要。至要。

諸子姪輩。於勤敬二字。略有長進否。若盡與此二字相反。其家未有不落者。若個個勤而且敬。其家未有不興者。無論世亂與世治也。諸弟須刻刻留心。爲子孫作榜樣。

諸弟及兒姪輩。務宜體我寸心。於父親飲食起居。十分檢點。無稍疎忽。於母親祭品禮儀。必潔必誠。於叔父處。敬愛兼至。無稍隔閡。兄弟娣姒。總不可有半點不和之氣。凡一家之中。勤敬二字。能守得幾分。未有不興。若全無一分。未有不敗。和字能守得幾分。未有不興。不和未有不敗者。諸弟試在鄉間將此二字。於族戚人家。歷歷驗之。必以吾言爲不謬也。

母喪未除。斷不敢受官職。若一經受職。則二年來之苦心孤詣。似全爲博取高官美職。何以對吾母於地下。何以對宗族鄉黨。方寸之地。何以自安。

仕宦之家。不蓄積銀錢。使子弟自覺一無可恃。一日不勤。則將有飢寒之患。則子弟漸漸勤勞。知謀所以自立矣。

紀澤兒授室太早。經書尙未讀完。上溯江太夫人來孀之年。吾父亦係十八歲。然常就外傳讀書。未久就閤。紀澤上擬祖武。亦宜速就外傳。慎無虛度光陰。聞賀夫人博通經史。深明禮法。紀澤至岳家。須緘默寡言。循循規矩。其應行儀節。宜詳問誥習。無臨時忙亂。爲岳母所鄙笑。

新婦始至吾家。教以勤儉。紡績以事縫紉。下廚以譏酒食。此二者。婦職之最要者也。孝敬以奉長上。溫和以待同輩。此二者。婦道之最要者也。但須教之以漸。渠係富貴子女。未習勞苦。由漸而習。則日變月化。而遷善不知。若改之太驟。則難期有恆。

新婦初來。宜教之入廚作爨。勤於紡績。不宜因其爲富貴子女。不事操作。大二三諸女。已能做大鞋否。三姑一嫂。每年做鞋一雙寄余。各表孝敬之忱。各爭織帶之工。所織之布。做成衣襪寄來。余亦得察閤門以內之勤惰也。近世人。一入宦途。卽習於驕奢。吾深以爲戒。三女許字。意欲擇一儉樸耕讀之家。不必定富室名門也。

余之第三女。卽另行擇壻。望弟詳稟父大人。可將此事中輟。縱已通女庚。亦可取還。緣羅子係恩賜舉人。恐人疑爲佳壻而爭之也。

家中種蔬一事。千萬不可怠忽。屋門首塘養魚。亦有一種生機。養豬亦內政之要者。下首臺上新竹。過伏天後。有枯者否。此四事者。可以規人家興衰氣象。

家中養魚。養豬。種竹。種蔬四事。皆不可忽。一則上接祖父來相承之家風。二則望其外而有一種生氣。登其庭而有一種旺氣。雖多花幾個錢。多請幾個工。但用在此四事上。總是無妨。

後輩子姪。總宜教之以禮。出門宜常走路。不可動用輿馬。長其驕惰之氣。一次姑息。二次姑息。三次姑息。以後驕慣難改。不可不慎。

去年在家。因小事而生嫌。竇吾度量不闕。辭氣不平。有以致之。竇有愧於爲長兄之道。千愧萬悔。夫復何言。去年我兄弟意見不和。今遭溫弟之大變。和氣致祥。乖氣致厲。斯言明徵。嗣後我兄弟當以去年爲戒。力求和睦。

事多做。一人之生氣。勤者。生動之氣。儉者。收斂之氣。有此二字。家運斷無不與之理。余去年在家。未將此二字。切實做工夫。至今愧憾。是以諄諄言之。

稱福由天主之。善惡由人主之。由天主者。無可如何。只得聽之。由人主者。盡得一分算一分。撐得一日算一日。吾兄弟斷不可不洗心滌慮。以求力挽家運。第一貴兄弟和睦。去年兄弟不和。以致今冬三河之變。嗣後兄弟當以去年爲戒。凡吾有過失。澄沅洪三弟。各進箴規之言。余必力爲懲改。三弟有過。亦當互相箴規而懲改之。第二貴孝道。推祖父母之愛以愛叔父。推父母之愛以愛溫弟之妻妾兒女。及蘭蕙二家。又父母墳域。必須改葬。請沅弟作主。澄弟不可過執。第三要實行「勤」「儉」二字。內間始煙不可懶怠奢華。後輩諸兒須走路。不可坐轎騎馬。諸女莫太艷。宜學燒茶煮菜。書疏魚豬。一家之生氣。

居家要勤儉。吾家後輩子女。皆趨於逸欲奢華。享福太過。將來恐難到老。嗣後諸男在家勤灑掃。出門莫坐轎。諸女學洗衣。學煮菜。燒茶。少勞而老逸。猶可。少甘而老苦。則難矣。至於家中用度。斷不可不分。凡吃藥染布。及在省在縣。託買貨物。若不明。則彼此以多爲貴。以奢爲尙。漫無節制。此敗家之氣象也。

運氣不來。徒然慳氣幫人。則委曲從人。尙未必果能相合。獨立則勞心苦力。尙未必果能自立。如真能受委曲。能喫辛苦。則家庭亦未始不可處也。

沅弟信言。家庭不可說利害話。此言精當之至。足抵萬金。余生乎在家在外。行事尙不十分悖謬。惟說些利害話。至今悔憾無極。

不求好地。但求平安。洪夏之地。余心不甚願。一則嫌其經過之處。山嶺太多。一則既經爭訟。恐非吉壤。地者鬼神造化之所秘惜。不輕予人者也。人力所能謀。只能求免水蠱。兇煞三事。斷不能求富貴利達。明此理。絕此念。然後能尋平穩之地。不明此理。不絕此念。則並平穩者亦不可得。

吾鄉僻陋。眼界甚淺。稍有修造。已駭聽聞。若太闊麗。則傳播尤過。苟爲一方首屈一指。卽亂世恐難倖免。

政葬先人之事。須將求富求貴之念。消除淨盡。但求免水蠱。免兇煞。以安後嗣而已。若存一絲求富求貴之念。則必爲造物鬼神所忌。以吾所見所聞。凡已發之家。未有續尋得大地者。家中一切。自沉弟去冬歸去。規模大備。惟書。蔬。魚。豬。及掃屋。種竹等事。係祖父以來相傳家法。無論世界之興衰。此數事不可不盡心。

凡屋高而天井小者。風難入。日亦難入。必須設法祛散溼氣。乃不生病。至囑。至囑。

余與沉弟論治家之道。一切以星岡公爲法。大約有八字訣。其四字。卽上年所稱「書。蔬。魚。豬」也。又四字。則曰「早。掃。考。寶」。早者。起早也。掃者。掃屋也。考者。祖先祭祀。敬奉顯考。王考。曾祖考。而妣可該也。寶者。親族鄉里。時周旋。賀喜。弔喪。問疾。濟急。星岡公嘗曰。「人待人。無價之寶也。」星岡公生平於此數端。最爲認真。故余前述爲八字訣曰。「書。蔬。魚。豬。早。掃。考。寶也。」

家中之事。望賢弟力爲主持。切不可日趨於奢華。子弟不可學大家口吻。動輒笑人之鄙陋。笑人之寒村。日習於驕縱而不自知。至戒。至戒。

照料家事。總以「儉」字爲主。情愆宜厚。用度宜儉。此居家居鄉之要法也。

當此大亂之世。與造過於壯麗。殊非所宜。恐劫數或有他慮。弟與邑中諸位賢紳熟商。去年沉弟起屋太大。余至今以爲隱慮。此事又鑿沉弟與弟作主。不可不慎之於始。弟向來於「盈虛消長」之機。頗知留心。此事亦當三思。至囑。至囑。

余在京十四年。從未得人二百金之贈。余亦未嘗以此數贖人。雖由余交遊太寡。而物力艱難。亦可概見。余家後輩子弟。全未見過艱苦模樣。眼孔大。口氣大。呼奴喝婢。習慣自然。驕傲之氣。入於膏肓而不自覺。吾深以爲慮。吾函以「傲」字箴規兩弟。兩弟猶能自省自惕。若以「傲」字誥誡子姪。則全然不解。蓋自出世以來。祇做過大。並未做過小。故一切茫然。不似兩弟做過小。吃過苦也。

教訓後輩子弟。總以「勤苦」爲體。「謙遜」爲用。以藥佚驕之積習。餘無他慮。

總怕子姪習於「驕」「奢」「佚」三字。家敗離不得個「奢」字。人敗離不得個「佚」字。討人嫌。離不得個「驕」字。

子姪須教一「勤」字。一「謙」字。謙者。驕之反也。勤者。佚之反也。「驕奢淫佚」四字。惟首尾二字。尤宜切戒。至諸弟中外家居之法。則以一「考寶早掃書蔬魚豬」八字爲本。千萬勿忘。

吾祖星岡公在時。不信醫藥。不信僧巫。不信地仙。此三者。弟必能一一記憶。今我輩兄弟。亦宜略法此意。以紹家風。

合家大小老幼。幾於無人不藥。無藥不貴。迨至補藥吃出毛病。則又服涼藥以攻伐之。陽藥吃出毛病。則又服陰藥以清潤之。展轉差誤。不至大病大弱不止。

地仙僧巫二者。弟向來不甚深信。近日亦不免爲習俗所移。以後尙祈卓識堅定。略存祖父家風爲要。天下信地信僧之人。曾見有一家不敗者乎。

凡畏人不致妄議論者。謙謹者也。凡好譏評人短者。驕傲者也。諺云。「富家子弟多驕。貴家子弟多傲。」非必錦衣玉食。動手打人。而後謂之驕傲也。但使志得意滿。毫無畏忌。開口譏人短長。卽是極驕極傲耳。余正月初四信

中。言戒「驕」字。有不輕非笑人爲第一義。戒「惰」字。以不晏起爲第一義。整弟常常猛省。並戒子姪也。家中兄弟子姪。惟當記祖父之八個字。曰。考。寶。早。掃。書。蔬。魚。豬。又謹記祖父之三不信。曰。不信地仙。不信醫藥。不信僧巫。余日記冊中。又有八本之說。曰。讀書以訓詁爲本。作詩文以聲調爲本。事親以得歡心爲本。養生以戒惱

怒爲本。立身以不妄語爲本。居家以不晏起爲本。作官以不要錢爲本。行軍以不擾民爲本。

家中無論老少男婦。總以習勤勞爲第一義。謙謹爲第二義。勞則不佚。謙則不傲。萬善皆從此生矣。大抵富貴人家氣習。禮物厚而情意薄。使人外而親到少。吾兄弟若能彼此常常互相規誡。必有裨益。

傲爲凶德。情爲衰氣。二者皆敗家之道。戒情莫如早起。戒傲莫如多走路。少坐轎。望弟留心。微戒。

日中則昃。月盈則虧。吾家亦盈時矣。管子云。「斗斛滿。則人概之。人滿。則天概之。」余謂天之概無形。仍假手於人以概之。霍氏盈滿。魏相概之。宣帝概之。諸葛恪盈滿。孫峻概之。吳主概之。待他人之來概。而後悔之。則已晚矣。吾家方豐盈之際。不待天之來概。人之來概。吾與諸弟當設法先自概之。自概之道云何。亦不外「清」「勤」「一」三字而已。吾近將「清」字改爲「廉」字。「慎」字改爲「謙」字。「勤」字改爲「勞」字。尤爲明淺。確有可下手之處。沅弟昔年於銀取與之際。不甚斟酌。朋輩之譏議菲薄。其根實在於此。去冬之賈犁頭。謁粟子山。余亦大不爲然。以後宜不妄取與。不寄銀回家。不多贈親族。此「廉」字工夫也。謙之存諸中者。不可知。其著於外者。約有四端。曰面色。曰言語。曰書函。曰僕從屬員。沅弟一次添招六千人。季強并未稟明。徑招三千人。也在他統領所斷做不到者。在弟尙能集事。亦算順手。而弟等每次來信。索取帳棚子藥等件。常多譏諷之詞。不平之語。在兄處書函如此。則與別處書函。更可知已。沅弟之僕從隨員。頗有氣餒。面色言語。與人酬接時。吾未及見。而申夫曾述及往年對渠之詞氣。至今抱憾。以後宜於此四端。痛加克治。此「謙」字工夫也。每日臨睡之時。默數本日勞心者幾件。勞力者幾件。則知宜勤王事之處無多。更竭誠以圖之。此「勞」字工夫也。余以各位太隆。常恐祖宗留詒之福。自我一人享盡。故將「勞」「謙」「廉」三字。時時自惕。亦願兩賢弟之用以自惕。且卽以自概耳。

夏田美宅。來人指摘。弟嘗三忌。不可自是。吾位固高。弟位亦實不卑。吾名固大。弟名亦實不小。而猶沾沾培墳墓。以永富貴。謀田廬以貽子孫。豈非過計哉。

弟晨起極早。飯後始天明。甚爲喜慰。吾輩仰法家訓。惟早起。務農。疏醫。遠巫四者。尤爲切要。

莫買田產。莫管公事。吾所囑者。二語而已。盛時常作衰時想。上場當念下場時。富貴人家。不可不牢記此二語也。爲兄弟者。總宜獎其所長。而兼規其短。若明知其錯。而一概不說。則非特一人之錯。而一家之錯也。吾家於本縣

父母官不必力贊其賢，不可力詆其非，與之相處，宜在若遠若近，不親不疏之間。渠有慶弔，吾家必到，渠有公事，須紳士助力者，吾家不出頭，亦不躲避。渠於前後任之交代，上司衙門之請託，則吾家絲毫不可與聞。弟既如此，并告子姪輩常常如此。子姪若與官相見，總以「謙謹」二字為主。

古人云：「祭不欲數，數則煩，煩則不敬。」祭尚不可煩，况喪禮而可煩，煩乎。

弟之志事，頗近春夏發舒之氣，余之志事，頗近秋冬收蓄之氣。余意以發舒而生機，乃旺，弟意以收蓄而生機，乃厚。平日最好以昔人「花未全開月未圓」七字，為惜福之道。保泰之法，莫精於此。會屢次以此七字教誡春甕，不知與弟道及否。星岡公昔年待人，無論貴賤老少，純是一團和氣。獨對子孫諸姪，則嚴肅異常。遇佳時令節，尤為凜凜不可犯。蓋亦具一種收蓄之氣，不使家中歡樂過節，流於放肆也。余於弟營保舉銀錢軍械等事，每每稍示節制，亦猶本「花未全開月未圓」之義。至危迫之際，則救焚拯溺，不復稍有所吝矣。

生日在即，萬不可宴客稱慶。此間謀送禮者，余已力辭之。弟在營亦宜婉辭而嚴卻之。家門太盛，常存日慎一日，而恐其不終之念，或可自保。否則顛蹶之速，有非意計所能及者。

余往年撰聯贈弟，有「儉以養廉，直而能忍」二語。弟之直，人人知之，其能忍，則為阿兄所獨知。弟之廉，人人料之，其不儉，則阿兄所不及料也。以後望弟於「儉」字加一番工夫，用一番苦心，不特家常用度宜儉，即修造公費，周濟人情，亦須有一「儉」字意思。總之愛惜物力，不失寒士之家風而已。吾弟以為然否。

弟家之漸趨奢華，即因人客太多之故。此後總須步步收緊，切不可步步放鬆。總之家門太盛，「有福不可享盡，有勢不可使盡」，人人須記此二語也。

余身體平安，合暑內外俱好。惟「儉」字日減一日。余兄弟無論在官在家，彼此常以儉字相助，則可久矣。

吾不欲多寄銀物至家，總恐老輩失之奢，後輩失之驕。未有錢多而子弟不驕者也。吾兄弟欲為先人留遺澤，為後人惜餘福，除卻「儉」「勤」二字，別無做法。弟與沅弟皆能勤而不能儉。余微儉而不甚儉。子姪看大眼，吃

大口。後來恐難挽回。弟須時時留心。

後輩兄弟。極爲和睦。行坐不離。共被而寢。亦是家庭興旺之象。

新正人客甚多。不似往年軍營光景。余雖力求節儉。總不免失之奢靡。日日以「儉」字誥戒妻子。現略知遵守。亦望吾弟常告內外周知也。

聞家中內外大小。及姊妹親族。無一不和睦整齊。皆弟連年籌畫之功。願弟出以廣大之胸。再進以儉約之誠。則盡善矣。

後輩體氣。遠不如吾兄弟之強壯。吾所以屢教家人崇儉習勞。蓋艱苦則筋力漸強。嬌養則筋力愈弱也。

儉之一字。弟言時時用功。極慰。極慰。然此事殊不易。由既奢之後而返之於儉。若登天然。卽如僱夫赴縣。昔年僅轄夫二名。挑夫一名。今已增至十餘名。欲挽回僅用七八名。且不可得。况挽回三四名乎。隨處留心。牢記有減無增四字。便極好耳。

弟軍今年餉項之少。爲歷年所無。余豈忍更有挑剔。况近來外侮紛至迭乘。余日夜戰兢恐懼。若有大禍卽臨眉睫者。卽兄弟同心禦侮。尙恐衆推牆倒。豈肯微生芥蒂。又豈肯因弟詞氣稍戇。藏諸胸臆。又豈肯受他人千言萬語。遂不容胞弟片語乎。老弟千萬放心。千萬保養。此時之兄弟。實患難風波之兄弟。惟有互勸互勗。互恭維而已。弟之聲名。卽余之聲名也。弟之性命。卽余之性命也。二者比較。究以保重身體爲大。弟自問。身體足以久磨久鍊。則余自放心矣。

余中廳懸「八本堂」匾。跋云。「養生以少惱怒爲本。事親以得歡心爲本。」弟久勞之軀。當極力求少惱怒。余於家庭。有一欣慰之端。聞妯娌及子姪和睦異常。有妻被同眠之風。愛敬兼至。此足卜家道之興。然亦全賴老弟分家時。布置妥善。乃克臻此。

余蒙先人餘蔭。忝居高位。與諸弟及子姪諄諄慎守者。但有二語。曰。「有福不可享盡。有勢不可使盡」而已。福

不多享。故總以「儉」字爲主。少用僕婢。少花銀錢。自然福福矣。勢不多使。則少管事。不斷是非。無感者。亦無怕者。自然悠久矣。

殊恩異數。萃於一門。祖宗積累陰德。吾輩食此厚報。感激之餘。彌增歎悚。

余欲上不愧先人。下不愧沅弟。惟以力教家中。「勤儉」爲主。余於「儉」字。做到六七分。「勤」字。則尙無五分工夫。弟與沅弟於「勤」字。做到六七分。「儉」字。則尙欠工夫。以後各勉其所長。各戒其所短。弟每用一錢。均須三思。

近日家中內外大小。勤儉二字。做得幾分。門第太盛。非此二字。斷難久支。

吾家子姪。人人須以「勤儉」二字自勉。庶幾長保盛美。觀漢晉霍光傳。而知大家所以速敗之故。取金日磾張安世二傳。解示後輩可也。

吾不望代代得富貴。但願代代有秀才。秀才者。讀書之種子也。世家之招牌也。禮義之旗幟也。

爲人與爲學并進。切戒「驕奢」二字。則家中風氣日厚。而諸子姪爭相磨矣。

余與沅弟同時封爵開府。門庭可謂極盛。然非可常恃之道。記得己亥正月。星岡公訓竹亭公曰。「寬一雖點翰林。我家仍靠作田爲業。不可靠他喫飯。」此語最有道理。今亦當守此二語爲命脈。望吾弟專在作田上用些工夫。輔之以「書疏魚豬早掃考寶」八字。任憑家中如何貴盛。切莫全改道光初年之規模。凡家道所以可久者。不恃一時之官爵。而恃長遠之家規。不恃一二人之驟發。而恃大衆之維持。我若有福。罷官回家。與弟當竭力維持。老親舊眷。貧賤族黨。不可怠慢。待貧者。亦與富者一般。當盛時。預作衰時之想。自有深固之基矣。

吾兄弟處此時世。居此重名。總以錢少產薄爲妙。一則平日免於覬覦。倉卒免於搶掠。二則子弟略見窘狀。不至一味奢侈。

吾自嘉慶末年。至道光十九年。見王考星岡公。日日有常。不改此度。不信醫藥。地仙和尙。師巫。禱祝等事。亦弟所

一一親見者。吾輩守得一分。則家道多保得幾年。

木器但求堅實。不尙雕鏤。漆水卻須略好。乃可經久。屋宇不尙華美。卻須多種竹柏。多種菜園。卽占去田畝。亦自無妨。

家中婦女庸多。外則講究種蔬。內則講究曬小菜。醃菜之類。乃是與家氣象。請弟倡之。

星岡公之家法。後世當守者極多。而其不信巫醫地仙。吾兄弟尤當竭力守之。

處茲亂世。錢愈多則患愈大。兄家與弟家。總不宜多存現銀現錢。每年足敷一年之用。便是天下之大富。人間之大福。家中要得興旺。全靠出賢子弟。若子弟不賢不才。雖多積銀積錢。積穀積產。積衣積書。總是枉然。子弟之賢否。六分本於天生。四分由於家教。吾家代代。皆有世德明訓。惟星岡公之教。尤應謹守牢記。吾近將星岡公之家規。編成八字句云。「書蔬魚豬。考實早掃。」常說常行。入者都好。地命醫理。僧巫祈禱。留客久住。六者俱惱。蓋星岡公於地命醫僧巫五項人。進門便惱。卽親友遠客。久住亦惱。此八好六惱者。我家世世守之。永爲家訓。子孫雖愚。亦必略有範圍也。

吾家現雖鼎盛。不可忘寒士家風味。子弟力戒傲情。戒傲以不大聲罵僕從爲首。戒惰以不晏起爲首。吾則不忘蔣市街賣菜籃情景。弟則不忘竹山凹掩碑草風景。昔日苦况。安知異日不再。書之。自知謹慎矣。

吾自五十以後。百無所求。惟望星岡公之後。丁口繁盛。此念刻刻不忘。吾德不及祖父遠甚。惟此心則與祖父無殊。弟與沅弟。望後輩添丁之念。又與阿兄無殊。或者天從人願。鑑我三兄弟之誠心。從此丁口日盛。亦未可知。且卽此一念。足見吾兄弟之同心。無論那房添丁。皆有至樂。和氣致祥。自有可卜昌盛之理。

內人率兒婦輩久居鄉間。將一切規模立定。以耕讀二字爲本。乃是長久之計。

吾兄弟叨忝簪賞。亦望後嗣子孫。讀書教品。略有成立。乃不負祖宗培植之德。吾自問服官三十餘年。無一毫德澤及人。且愆咎叢積。恐罰及於後裔。老年痛自懲責。思蓋前愆。望兩弟於吾之過失。時寄箴言。並望互相切磋。以

勤儉自持。以忠恕教子。要令後輩洗淨驕惰之氣。各說恭敬之風。庶幾不墜家聲耳。

細思吾兄弟三人之信。斷未有不互觀者。仍以共寫一封爲妥。兩弟信皆甚密。阿兄目病。而又懶惰。去信較稀。致弟殷殷懸盼。殊抱不安。

仕途巨細。皆關時運。余持此說久矣。然亦只可言於仕宦。若家事亦雖有運。然以盡人事爲主。不可言運也。（以上家書）

吾見家中後輩。體皆虛弱。讀書不甚長進。曾以養生大事勗兒輩。一曰飯後千步。一曰將睡洗脚。一曰胸無惱怒。一曰靜坐常有常時。一曰習射有常時（射足以習威儀。強筋力。子弟宜多習。）一曰黎明吃白飯一碗。不沾點菜。凡人多望子孫爲大官。余不願爲大官。但願爲讀書明理之君子。勤儉自持。習勞習苦。可以處樂。可以處約。此君子也。余服官二十年。不敢稍染官宦氣習。飲食起居。尙守寒素家風。極儉也可。略豐也可。太豐則我不敢也。凡仕宦之家。由儉入奢易。由奢返儉難。爾年尙幼。一切不可貪愛奢華。不可慣習懶惰。無論大家小家。士農工商。勤苦儉約。未有不興。驕奢倦怠。未有不敗。

爾嘗體我此意。於叔祖各叔父母前。盡些愛敬之心。常存休戚一體之念。無懷彼此歧視之見。則老盡內外必器愛爾。後輩兄弟姊妹必以爾爲榜樣。日處日親。愈久愈敬。若使宗族鄉黨。皆曰「紀渥之量。大於其父之量。」則余欣然矣。

我家高曾祖考。相傳早起。吾得見竟希公星岡公皆未明即起。冬寒起坐。約一個時辰。始見天亮。吾父竹亭公亦甫黎明即起。有事則不待黎明。每夜必起看一二次不等。余近亦黎明即起。思有以紹先人之家風。旣冠受室。當以早起爲第一先務。自力行之。亦率新婦力行之。

昔吾祖星岡公。最講治家之法。第一要起早。第二要打掃潔淨。第三誠修祭祀。第四善待親族隣里。凡親族隣里來家。無不恭敬款接。有急必周濟之。有訟必排解之。有喜必慶賀之。有疾必問。有喪必弔。此四事之外。於讀書種

菜等事。尤爲刻刻留心。故寫家信。常常提及「書蔬魚豬」四端者。蓋祖父相傳之家法也。

銀錢田產。最易長驕。驕氣情氣。我家中斷不可積錢。斷不可買田。爾兄弟努力讀書。決不怕沒飯吃。至囑。

吾教子弟。不離八本。三致祥。八者。曰讀古書。以訓詁爲本。作詩文。以聲調爲本。養親。以得歡心爲本。養生。以少惱

怒爲本。立身。以不妄語爲本。治家。以不晏起爲本。居官。以不要錢爲本。行軍。以不擾民爲本。三者。曰孝致祥。勤致

祥。恕致祥。吾父竹亭公之教人。則專重「孝」字。其少壯敬親。暮年愛親。出於至誠。故吾築墓誌。僅敘一事。吾祖

星岡公之教人。則有八字。三不信。八者。曰考。賢。早。掃。書。蔬。魚。豬。三者。曰僧。巫。地仙。醫藥。皆不信也。

虞茲亂世。銀錢愈少。則愈可免福。用度愈省。則愈可養福。爾兄弟奉母。除勞字儉字之外。別無安身之法。吾當單

專極危。輒將此二字叮囑一遍。此亦別無遺訓之語。

鄉間早起之家。蔬菜茂盛之家。類多興旺。晏起無蔬之家。類多衰弱。於省城菜園中。用重價雇人至家種蔬。或二

人亦可。

省雇園丁來家。宜廢田一二坵。用爲菜園。吾現在營。謀勇夫種菜。每塊土約三丈長。五尺寬。窄者四尺餘寬。務使

芸草及摘蔬之時。人足行兩邊溝內。不踐菜土之內。溝寬一尺六寸。足容便桶。大小橫直。有溝有滄。下雨則水有

所歸。不使積潦傷菜。四川菜園極大。溝滄終歲引水長流。頗得古人井田遺法。吾鄉一家園土有隙。斷無橫溝。而

直溝則不可少。吾鄉老農雖不甚精。猶頗認真。老圃則全不講究。我家開此風氣。將來荒山曠土。盡可闢墾。種百

穀雜蔬之類。知種茶亦獲利極大。吾鄉無人試行。吾家若有山地。可試種之。

居家之道。惟「崇儉」可以長久。虞亂世尤以「戒奢侈」爲要義。衣服不宜多製。尤不宜大鑲大緣。過於絢爛。

爾教導諸妹。敬聽父訓。自有可久之理。

古今文人學人。莫不有家常瑣事之勞其身。莫不有世態冷暖之擾其心。爾現當家門鼎盛之時。炎涼之狀。不接

於目。衣食之謀。不繫於懷。雖奔走煩勞。猶遠勝於寒土困苦之境也。

在家，卻不宜過露痕蹟。人所以稍顧體面者，冀人之敬重也。若人之傲情鄙棄，業已露出，則索性蕩然無恥，拚棄不顧，甘與正人爲仇，而以後不可救藥矣。大約世家子弟，錢不可多，衣不可多，事雖至小，所關頗大。

凡世家子弟，衣食起居，無一不與寒士相同。庶可以成大器。若姑染富貴氣習，則難望有成。吾忝爲將相，而所有衣服，不值三百金。願爾等常守此儉樸之風，亦惜福之道也。其照例應用之錢，不可過吝。

余每見嫁女，貪戀母家富貴，而忘其翁姑者，其後必無好處。余家諸女，當教之孝順翁姑，敬事丈夫，慎無重母家而輕夫家，效澆俗小家之陋習也。

吾家累世以來，孝弟儉勤，請臣公以上，吾不及見。竟希公星岡公，皆未明即起。竟日無片刻暇逸。竟希公少時，在陳氏宗祠讀書。正月上學，輔臣公給錢一百，爲零用之需。五月歸時，僅用去二文。尙餘九十八文，還其父。其儉如此。星岡公當孫入翰林之後，猶親自種菜收糞。吾父竹亭公之勤儉，則爾等所及見也。今家中境地，雖漸寬裕，姪與諸昆弟，切不可忘卻先世之艱難。有福不可享盡，有勢不可使盡。「勤」字工夫，第一貴早起，第二貴有恆。「儉」字工夫，第一莫着華麗衣服，第二莫多用僕婢雇工。凡將相無種，聖賢豪傑亦無種。只要人肯立志，都可做到的。

世家子弟，門第過盛，萬目所屬。臨行時，教以三戒之首末二條，及力去「傲情」二弊。當已牢記之矣。場前不可與州縣來往，不可送條子，進身之始，務知自重。

爾等奉母在寓，總以勤儉二字自惕，而接物出以謹慎。凡世家之不勤不儉者，驗之於內眷而畢露。余在家深以婦女之奢逸爲慮。爾二人立志，撐持門戶，亦宜自端內教始也。

吾近夜飯不用葷菜，以肉湯沌蔬菜一二種，令極爛如粥，味美無比。必可以資培養。（菜不必貴，適口則足養人。）試沌爾母食之。（星岡公好於日入時，手摘鮮菜，以供夜餐。吾當時侍食，實覺津津有味。今則加以肉湯，而味尙不逮於昔時。）後輩則夜飯不葷，專食蔬而不用肉湯，亦養生之宜。崇儉之道也。顏黃門（推之）顏氏家訓。

作於亂離之世。張又端莫聽詞。語話。作於承平之世。所以教家者極精。

仕宦之家。往往貪戀外省。輕棄其鄉。目前之快意甚少。將來之受累甚大。吾家宜力矯此弊。

吾家門第鼎盛。而居家親睦禮節。未能認真講求。歷觀古來世家長久者。男子須講求耕讀二事。婦女須講求紡績酒食二事。斯干之詩。言帝王居室之事。而女子重在酒食。是識家人卦。以二爻爲主。重在中饋。內則一篇。言酒食者居半。故吾屢教兒婦諸女。親主中饋。後輩視之。若不要緊。此後遷鄉居家。婦女縱不能精於烹調。必須常至廚房。必須講求作酒。作醢醢小菜之類。爾等可須留心於蒔蔬。魚。此一家與旺氣象。斷不可忽。紡績雖不能多。亦不可間斷。大房唱之。四房皆和之。家風自厚矣。

家之與衰。人之窮通。皆於勤惰卜之。澤兒習勤有恆。則諸弟七八人皆學稼矣。

吾家婦女。須講求作小菜。如腐乳。醬油。醬菜。好醋。倒筍之類。常常做些。寄與我吃。內則言事父母舅姑。以此爲重。若外間買者。則不寄可也。

家中外須講求蒔蔬。內須講求曬小菜。此足驗人家之興衰。不可忽也。

家中興衰。全係乎內政之整散。爾母率二婦諸女。於酒食紡績二事。斷不可不常常勤習。目下官雖無急。須時時作罷官衰替之想。

李申夫之母。嘗有二語云。「一。有錢有酒款遠親。火燒盜搶喊四鄰。」戒高貴之家。不可敬遠親而慢近鄰也。我家初移富垵。不可輕慢近鄰。酒飯宜鬆。禮貌宜恭。或另請一人款待賓客亦可。除不管閒事。不幫官司外。有可行方便之處。亦無吝也。

家中遇祭酒菜。必須夫人率婦女親自經手。祭祀之器皿。另作一箱收之。平日不可動用。內而紡績做小菜。外而蔬菜養魚。款待人客。夫人均須留心。吾夫婦居心行事。各房及子孫皆依以爲榜樣。不可不勞苦。不可不謹慎。讀書乃寒士本業。切不可有官家風味。吾於書籍及文房器具。但求爲寒士所能備者。不求珍異也。

率兒婦輩在家。事事須立個一定章程。作官不過偶然之事。居家乃是長久之計。能從勤儉耕讀上做出好規模。雖一旦罷官。尚不失爲興旺氣象。若貪圖衙門之熱鬧。不立家鄉之基業。則罷官之後。便覺氣象蕭索。凡有盛必有衰。不可不預爲之計。望夫人教訓子孫婦女。常常作家中無官之想。時時有謙恭省儉之意。則福澤悠久。余心大慰矣。

孝友爲家庭之祥瑞。凡所稱因果報應。他事或不盡驗。獨孝友則立獲吉慶。反是則立獲殃禍。無不驗者。吾早歲久宦京師。於孝養之道多疏。後來展轉兵間。多獲諸弟之助。而吾毫無裨益於諸弟。余兄弟姊妹各家。均有田宅之安。大抵皆九弟扶助之力。我身歿之後。爾等視兩叔如父。事叔母如母。視堂兄弟如手足。凡事皆從省儉。獨特諸叔之家。則處處從厚。待堂兄弟以德業相勸。過失相規。期於彼此有成。爲第一要義。其次則親之欲其貴。愛之欲其富。常常以吉祥善事。代諸昆季默爲禱祝。自當神人共欽。

治家貴嚴。嚴父常多孝子。不嚴。則子弟之習氣。日就佚惰。而流弊不可勝言矣。故易曰。「威如吉」。欲嚴而有威。必本於莊敬。不苟言。不苟笑。故曰。「威如之吉。反身之謂也。」

書味深者。面自粹潤。保養完者。神自充足。此不可以僞爲。必火候既到。乃有此驗。

吾祖父星岡公在時。不信醫藥。不信僧巫。不信地仙。卓識定志。確乎不可搖奪。實爲子孫者所當遵守。近年家中兄弟子姪。於此三者皆不免相反。余之不信僧巫。不信地仙。頗能謹遵祖訓。而不能不信藥。自八年起。常服鹿茸丸。是亦不能斷志之一端也。以後當漸漸戒止。並函誡諸弟。戒信僧巫。地仙等事。以紹家風。

家人上九曰。「有孚威如。」論語曰。「望之儼然。」要使房闔之際。僕婢之前。燕昵之友。常以此等氣象對之。方好。獨居則火滅修容。切記。切記。此予第一要藥。能如此。乃有轉機。否則墮落下流。不必問其他矣。

余德薄能鮮。忝竊高位。又竊虛名。已干造物之忌。恐家中老少習於驕奢佚三字。實深悚懼。(以上家訓)
吾平日以儉字教人。而吾近來飲食起居。殊太豐富。昨聞魁時若將軍言。渠家四代一品。而婦女在家。並未穿着

綢緞軟料。吾家婦女亦過於講究。深恐享受太過。足以折福。

與萬篋。軒僂談家常。渠家百萬之富。而日用極儉。其內眷終年不辦葷菜。每日書房先生所吃之葷菜。餘贖者。撒下則內室吃之。其母過六十後。篋野苦求。始準添葷菜一樣。今亂後而家不甚破。子孫俱好。皆省儉所積之福也。心緒撞撞。如有所失。念人生苦不知足。方整篋謂「漢文帝之終身常若自覺不勝天子之任者。」最爲善形容古人心曲。大抵人常懷愧對之意。便是載福之器。入德之門。如對天之待我甚厚。我愧對天。君之待我過優。我愧對君。父母之待我過慈。我愧對父母。兄弟之待我過愛。我愧對兄弟。朋友之待我過重。我愧對朋友。便覺處處皆有善氣相逢。如自覺我已無愧無怍。但覺他人待我太薄。天待我太高。則處處皆有戾氣相逢。德以積而損。福以驕而滅矣。此念願刻刻懷之。

昔年曾以居官四敗。居家四敗。書於日記。以自儆惕。茲恐久而遺忘。再書於此。與前次微有不同。居官四敗。曰。昏惰任下者敗。假很妄爲者敗。貪鄙無忌者敗。反覆多詐者敗。居家四敗。曰。婦女奢淫者敗。子弟驕怠者敗。兄弟不和者敗。侮師慢客者敗。仕宦之家。不犯此八敗。庶有悠久氣象。

余蓋屋三間。上爲擺設地球之用。不料工料過於堅緻。簷過於深。費錢太多。而地球仍將黑暗。不能明朗。心爲悔懣。余好以「儉」字教人。而自家實不能儉。傍以與紀澤談。令其將銀錢賬目自行經理。講求儉約之法。

紀官姪得取縣案首。縣令考試甚嚴。當可免於物議。甚以爲慰。吾每慮吾兄弟功名太盛。發洩殆盡。觀近年姪丁之漸多。子弟之向學。或者祖澤尙厚。方與未艾。且喜且惴惴也。

在京酒食應酬。雖不甚多。而每日疲精以徇物。遠不如外省之得自由。自問胸次。添出鄙俗之見。殊無謂也。余生平於酬酢之際。好察人情之順逆厚薄。京師勢利之藪。處處皆有冷暖向背之分。余老矣。尙存於心而不能化。甚矣。余之鄙也。

余以老年吃齋。風中行路。殊非所堪。又念百姓麥稼已失。稷梁不能下種。將成非常之災。又念紀澤兒在運河一

帶風大河淺。家眷各船。膠滯難行。又念施占琦運書箱在海中。恐有不測。種種憂念。不勝焦灼。

人而不勤。則萬事俱廢。一家俱有衰象。余於三四月內。不給一事。於居家之道。大有所損。愧悚無已。

至花園一覽。園在暑西。現在修工未畢。正值趕辦之時。偶一觀玩。深愧居處太崇。享用太過。余精神散漫已久。凡遇應了結之件。久不能完。應收拾之件。久不能檢。如敗葉滿山。全無歸宿。通籍三十餘年。官至極品。而學業一無所成。德行一無可許。老大徒傷。不勝悚惶。慙報。

萬化始於閨門。除「刑于」以外。無政化。除「用賢」以外。無經濟。

所貴乎世家者。不在多置良田美宅。亦不在多蓄書籍字畫。在乎子孫能自樹立。多讀書。無驕矜習氣。

聞溫弟信。國家事故。憂鬱填膺。不能辦一事。夜不成寐。

念溫弟不得歸骨。其賦命太苦。余於手足之間。抱愧多矣。

四弟所寫溫甫哀辭。字秀勁近古。刻工亦佳。家有賢子弟。爲之欣然。

沉弟專二人送信。勸我速移東流。建德情詞懇惻。令人不忍卒讀。余復信云。「讀出師表而不動心者。其人必不

忠。讀陳情表而不動心者。其人必不孝。讀沅季此信。而不動心者。其人必不友。」遂定於二十四日。移營東流。以

慰兩弟之心。

沉弟來久談。教以胸襟宜淡遠。游心虛靜之域。獨立萬物之表。又每日宜讀書少許。以擴識見。弟固安慶。前後皆

有強寇。人數甚單。地段甚廣。晝夜辛勤。事事躬親。雖酷暑大雨。而每日奔馳往返。常五六十里。余憐其太勞。故欲

其以虛靜養心也。

紀澤兒體氣清瘦。系念殊深。或稱其讀書太勤。用心太過。因教以遊心虛靜。雖有榮觀。晏處超然之義。

聞張清恪之子張懋。敬公師。載所輯課子隨筆。皆節鈔古人家訓名言。大約與家之道。不外內外勤儉。兄弟和睦。

子弟謙謹等事。敗家則反是。夜接周中堂之子文翕。謝余致賻儀之信。則別字甚多。字跡惡劣不堪。大抵門客爲

之。主人全未寓目。聞周少君平日眼孔甚高。口好雌黃。而喪事潦草如此。殊爲可歎。蓋達官之子弟。聽慣高議論。見慣大排場。往往輕慢師長。譏彈人短。所謂驕也。白驕而奢。而淫。而佚。以致於無惡不作。皆從驕字生出之弊。而子弟之驕。又多由於父兄爲達官者。得運乘時。幸致顯宦。遂自忘其本領之低。學識之陋。自驕自滿。以致子弟效其驕而不覺。吾家子姪輩亦多輕慢師長。譏彈人短之惡習。欲求稍有成立。必先力除此習。力戒其驕。欲禁子弟之驕。先戒吾心之自驕自滿。願終身自勉之。因周少君之荒謬不堪。旣以面諭紀澤。又詳記之於此。

接沅弟信。知紀官姪於正月初九日申刻生子。欣慰之至。吾兄共得五孫。丁口漸盛。只望兒姪輩讀書。少有所成。將來孫輩看作榜樣。便是世家好氣象。若兒姪輩不能發奮用功。文理不通。則榜樣太壞。將來孫輩斷難成立。此中關鍵。全在紀鴻紀瑞二人。吾家後輩之興衰。視此二人爲轉移也。

與紀澤一談。囑其看理學書。俾志氣日趨於剛大。心思日入於沈細。

鴻兒稟稱澄弟臨別。以火狐馬褂送我。蓋眉生述杜小舫之言。謂天下之最暖者。莫如火狐。勝如紫貂玄狐云。余曾兩次述此言與澄弟聽。或弟意疑我畏寒。遂解己所著衣以贈我耶。余本有貂馬褂。捨猓馬褂。而弟歸途少此禦寒之具。寸心十分不安。

接澄沅兩弟信。澄勸送眷回籍。沅擬以晚女許聶家。皆有肺腑顧恤之意。久宦於外。疾病相尋。如舟行海中。不得停泊。惟兄弟骨肉至親。能亮之也。（以上日記）

但求安先人之體魄。而無毫髮富貴之見者存。此人子心根上工夫。當與鬼神相質證者。此宜時時自省。舍間凡事費用。日趨奢靡。殊以爲慮。時蔬養魚二事。先人累代皆時時認真經理。敬求足下代我照料。各種書籍。亦求恆拂塵埃。勿令潮濕。卽賤兄弟在外。寄回信緘奏稿等件。亦宜聚置一處。免致散失。致人客來往。非房族。卽親友。切不可稍稍怠慢。求恭敬相待。雖舍弟等不在家。亦可款留酒飯也。

近來聞好友甚多。予不欲先去拜人。恐徒標榜虛聲。蓋求友以匡己之不逮。此大益也。標榜以盜虛名。是大損也。天下有益之事。即有足損者。寓乎其中。不可不辨。

凡有借我銀者。皆光景甚窘之人。此時我雖窘迫。亦不必向人索取。

凡與人交際。當求其誠信之素孚。求其協助。當亮其力量所能爲。弟每求人。好開大口。尙不脫官場陋習。余本不敢開大口。而人亦不能一一應付。但略亮我之誠實耳。

媚嫉傾軋。從古以來共事者。皆所不免。吾輩當「躬自厚而薄責於人」耳。

悠悠之口。本難盡信。然君子愛惜聲名。常存冰淵惴惴之心。蓋古今因名望之劣而獲罪者極多。不能不慎修以遠罪。吾兄弟於有才而無德者。亦當不沒其長而稍遠其人。

大抵清議所不容者。斷非一口一疏所能挽回。只好徐徐以待其自定。近世保人。亦有多少爲難之處。有保之而旁人不以爲然。反累斯人者。有保之而本人不以爲德。反成仇隙者。余閱世已深。即薦賢亦多顧忌。非昔厚而今薄也。

末世好以不肖之心待人。欲媒孽老弟之短者。必先說與阿兄不睦。吾之常常欲弟點檢者。即所以杜小人之讒口也。

用人極難。聽言亦殊不易。全賴見多識廣。熟思審處。方寸中有一定之權衡。

事至今日。惟有「小心安命。埋頭任事」二語。兄弟互相勸勉。舍此更無立腳之處。據寶蘭泉云。「大丹將成。衆魔環伺。必思所以敗之。」

凡官運極盛之時。子弟經手公事。格外順手。一倡百和。然閒言即由此起。怨謗即由此興。吾兄弟當於極盛之時。預作衰時設想。當盛時百事平順之際。預爲衰時百事拂逆地步。弟此後若到長沙衡州湘鄉等處。總以不干預公事爲第一義。

獨享大名。爲折福之道。與人分名。卽受福之道矣。

凡謔怒最易傷人。余有錯處。弟儘可一一直說。人之忌我者。惟願弟做錯事。惟願弟之不恭。人之忌弟者。惟願兄做錯事。惟願兄之不友。弟看破此等物情。則知世路之艱險。而心愈抑長。氣反愈平和矣。

天下之道。無感不應。無絀不伸。以吾心之且憐且敬。知外間必千呈應之。亦必憐弟敬弟。萬口同聲。弟少耐數月。以待之。而後知吾言之不謬也。

建非常之功勳。而疑謗交集。雖賢哲處此。亦不爲。於抑鬱牢騷。然蓋世之事業。旣已成就。寸心究可自怡而自慰。悠悠疑忌之來。只堪付之一笑。

吾常言。「天道忌巧。天道忌盈。天道忌貳。」若甫在譽用之際。而遽萌前卻之見。是貳也。卽與他人交際。亦須略省己之不是。

欲求學問文章之日進。又似宜在省會。多求良友。以擴充其識。而激發其志。二者利害參半。若不得良友。而親損友。則居省之利少矣。

藥能活人。亦能害人。良醫則活人者十之七。害人者十之三。庸醫則害人者十之七。活人者十之三。余在鄉在外。凡目所見者。皆庸醫也。余深恐其害人。故近三年來。決計不服醫生所開之方藥。見理極明。故言之極切。

天下事無所爲而成者極少。有所貪有所利而成者居其半。有所激有所逼而成者居其半。

竹如言。「交情有天有人。凡事皆然。」然人定亦可勝天。不可以適然者委之於數。如知人之哲。友朋之投契。君臣之遇合。本有定分。然亦可以積誠而致之。故曰。「命也。有性焉。君子不謂命也。」（以上家訓）

鏡丈言。「讀書有心得。不必輕言著述。注經者。依經求義。不敢支蔓。說經者。置身經外。與經相附麗。不肯可也。不必說此句。卽解此句也。」

今早友人見示一文稿。讀之使人忠義之氣。勃然而生。鄙私之萌。斬焉而滅。甚矣。人之不可無良友也。

盜虛名者。有不測之禍。負隱匿者。有不測之禍。懷忮心者。有不測之禍。

是夜思人之見信於朋友。見信於君父。見信於外人。皆絲毫不可勉強。猶四時之運。漸推漸移。而成歲功。自是不可欲速。不可助長。

室慾常念男兒淚。懲忿當思屬纊時。

讀東坡「但尋牛矢覓歸路」詩。陸放翁「斜陽古柳趙家莊」詩。杜工部「黃四孃東花滿蹊」詩。念古人胸次瀟灑曠達。毫無渣滓。何其大也。余鮑歷世故。而胸中猶不免計較將迎。何其小也。沈吟玩味久之。

思夫人皆爲名所驅。爲利所驅。而尤爲勢所驅。當孟子之時。蘇秦張儀公孫衍輩。有排山倒海。飛沙走石之勢。而孟子能不爲所播。真豪傑之士。足以振厲百世者矣。

夜闌荀子三篇。三更盡睡。四更即醒。又作一聯云。「天下無易境。天下無難境。終身有樂處。終身有憂處。」至五更。又改作二聯。一云。「取人爲善。與人爲善。樂以終身。憂以終身。」一云。「天下斷無易處之境遇。人間那有空閒的光陰。」

天下事一一責報。則必有大失所望之時。佛氏因果之說。不可盡信。亦有有因而無果者。憶蘇子瞻詩云。「治生不求官。讀書不求官。譬如飲不醉。陶然有餘歡。」吾更爲添數句云。「治生不求官。讀書不求官。修德不求報。爲文不求傳。譬如飲不醉。陶然有餘歡。中含不盡意。欲辨已忘言。」

安得一二好友。胸襟曠達。蕭然自得者。與之相處。砭吾之短。其次則博學能文。精通訓詁者。亦可助益於我。讀書之道。以胡氏之科條論之。則經義當分小學。理學。詞章。典禮四門。治事當分吏治。軍務。食貨。地理四門。凡做好人。做好官。做名將。俱要好師。好友。好榜樣。

當今之世。富貴無所圖。功名亦斷難就。惟有自正其心。以維風俗。或可補救於萬一。所謂正心者。曰「厚」。曰「實」。厚者。恕也。己欲立。而立人。己欲達。而達人。己所不欲。勿施於人。存心之厚。可以少正天下澆薄之風。實者。不

說大話。不務虛名。不行駕空之事。不談過高之理。如此可以少正天下浮僞之習。送人銀錢。隨人用情之厚薄。一言之輕重。父不能代子謀。兄不能代弟謀。譬如食水。冷暖自知而已。

「與爲人善。取人爲善」之道。如大河水盛。足以浸灌小河。小河水盛。亦足以浸灌大河。無論爲上爲下。爲師爲弟。爲長爲幼。彼此以善相浸灌。即日見其益。而不自知矣。

孟子光明俊偉之氣。惟莊子與韓退之得其彷彿。近世如王陽明亦殊磊落。但文辭不如三子者之跌宕耳。靜中細思古今億萬年。無有窮期。人生其間。數十寒暑。僅須臾耳。大地數萬里。不可記極。人於其中。寢處游息。晝僅一室耳。夜僅一榻耳。古人書籍。近人著述。浩如烟海。人生目光之所能及者。不過九牛之一毛耳。事變萬端。笑名百途。人生才力之所能辦者。不過太倉之一粟耳。知天之長。而吾所歷者短。則遇憂患橫逆之來。當少忍以待其定。知地之大。而吾所居者小。則遇榮利爭奪之境。當退讓以守其雌。知書籍之多。而吾所見者寡。則不敢以一得自喜。而當思擇善而守約之。知事變之多。而吾所辦者少。則不敢以功名自矜。而當思舉賢而共圖之。夫如是則自私自滿之見。可漸漸蠲除矣。

讀原毀。伯夷頌。獲麟解。龍雜說諸首。岸然相見。古人獨立千古。確乎不拔之象。

小珊前與予有隙。細思皆我之不是。苟我素以忠信待人。何至人不見信。苟我素能禮人以敬。何至人有慢言。且卽令人有不是。何至肆口慢罵。忿戾不顧。幾於忘身及親若此。此事余有三大過。平日不信。不敬。相恃太深。一也。此時一語不合。忿狠無禮。二也。齟齬之後。人反平易。我反悍然。不近人情。三也。

凡驟起於相疑。相疑由於自矜明察。我之於小珊。其如上九之於六三乎。吳氏謂合睽之道。在於推誠守正。委曲含宏。而無私意猜疑之弊。戒之。勉之。此我之要藥也。

客來示以時藝。讀數語不由中。余此病甚深。孔子之所謂巧令。孟子之所謂鉅。其我之謂乎。以爲人情好譽。非是不足以說其心。試思此求悅於人之念。君子乎。女子小人乎。且我誠能言必忠信。不欺人。不妄語。積久人自知之。

不說人亦不怪。苟有試而譽人。人且引以爲重。若日日譽人。人必不重我言矣。欺人自欺。誠忘信。喪廉恥。皆在於此。切戒。切戒。

竹如說理。實着謹嚴。言舍「敬」字。別無下手之方。總以嚴肅爲要。自問亦深知敬字是吃緊下手處。然每日自旦至夜。恣憫赫喧之意。曾不可得行坐自如。總有放鬆的意思。及見君子時。又偏覺整齊些。是非所以拚著者。卽於與人往還。最小處計較。意欲俟人先施。純是私意縈繞。克去一念。旋生一念。飯後靜坐。卽已成寐。神昏不振。一至於此。

早起心多游思。因算去年共用銀數。拋卻一早。可惜。

會客時。有一語極失檢。由忿字伏根甚深。故有觸卽發耳。

飯後語及小故。予大發忿語。不可遏。有忘身及親之忿。雖經友人理諭。猶復肆口謾罵。此時絕無忌憚。樹堂昨夜云。「心中根子未盡。久必一發。發則救之無及矣。」我自蓄此忿。僅自反數次。餘則但知尤人。本年立志重新。換一個人。才過兩天。便決裂至此。雖痛哭而悔。豈有及乎。真所謂「與禽獸奚擇」者矣。

車中無戒懼意。爲下人不得力。屢動氣。每日間。總是忿字。忿字。往往知而不克去。總是此志頹放耳。可憾。可恥。坐車中。頗生氣。雖下人。不甚能幹。實白愆忿。絕無工夫。遂至瑣細。足以累其心。

自去年十二月廿後。心常忪忪。不自持。若有所失。亡者。至今如故。蓋志不能立。時易放倒。故心無定向。無定向。則不能靜。不靜。則不安。其根。只在志之立耳。又有鄙陋之見。檢點細事。不忍小忿。故一毫之細。竟夕躡躑。一端之忤。終日怙戀。坐是所以忪忪也。志不立。識又鄙。欲求心之安。不可得矣。是夜竟不成寐。展轉千思。俱是鄙夫之見。於應酬小處計較。遂以小故引伸成忿。懲之不暇。而更引之。是引盜入室矣。

言多諧謔。又不出自心中之誠。每日言語之失。直是鬼域情狀。違問其他。觀人作應制詩。面諛之。不忠不信。何以爲友。聖人所謂「善柔便佞」之損友。我之謂矣。

年在壯歲而頽情稱病。可恥孰甚。今年譬已四十日矣。一事不成。晏安自甘。再不懲戒。天其殃汝。惕之。惕之。予對客有怠慢之容。對此良友。不能生嚴懼之心。何以取人之益。是將拒人於千里之外矣。况見賓如此。邊問開屠。火滅修容之謂何。小人哉。

作梅言。「見得天下皆是壞人。不如見得天下皆是好人。存一番慕陶玉成之心。使人樂於爲善。」云云。蓋諷余近日好言人之短。見得人多不是也。

洪琴西來。與之言風俗移人。凡才人皆隨風氣爲移。雖賢者不能自拔於風尚之外。因言。「余老無能有所樹立。但不欲開壞風氣。導天下以惡習耳。」

見隨觀察時。詞色大厲。令人難堪。退而悔之。

近來事有不如意者。方寸鬱塞殊甚。亦足見器量之不問。養氣之不深也。

寸心鬱鬱不自得。因思日內以金陵甯國危險之狀。憂灼過度。又以江西諸事掣肘。悶擯不堪。皆由平日於養氣上欠功夫。故不能不動心。欲求養氣。不外「自反而縮。行慊於心」兩句。欲求行慊於心。不外「清」「慎」「勤」三字。因將此三字各綴數句。爲之疏解。清字曰。無貪無競。省事清心。一介不苟。鬼伏神鎮。慎字曰。戰戰兢兢。死而後已。行有不得。反求諸己。勤字曰。手眼俱到。心力交瘁。困知勉行。夜以繼日。此十二語者。吾嘗守之終身。遇大憂患。大拂逆之時。庶幾免於尤悔耳。

五更醒。晨轉不能成寐。蓋寸心爲金陵甯國之賊憂悸者十分之八。而因僚屬不和順。恩怨憤懣者。亦十之二三。實則處大亂之時。余所遇之僚屬。尙不十分傲慢無禮。而鄙懷忿恚若此。甚矣。余之隘也。余天性褊急。痛自刻責。懲治者有年。而有觸即發。仍不可遏。殆將終身不改矣。愧悚何已。

古人辦事掣肘之處。拂逆之端。世世有之。人人不免。惡其拂逆爲必欲順從。設法以誅鋤異己者。權臣之行徑也。聽其拂逆而動心忍心。委曲求全。且以無敵國外患而亡爲慮者。聖賢之用心也。吾正可借人拂逆。以磨厲我之

德性。其庶幾乎。

近日心緒之惡。襟懷之隘。可鄙可恥。甚矣。變化氣質之難也。

光陰似箭。冉冉又過十年。念德業之不進。愧各位之久竊。此後當於「勤」「儉」「謹」「信」四字之外。加以「忍」字。「渾」字。痛自箴砭。以求益燭之明。作補牢之計。

近日常見得人多不是。鬱鬱不平。毋乃明於責人。而暗於責己乎。

何子貞來談詩文。甚知要得「藝通於道」之旨。子貞能自樹立者也。

樹堂至情動人。惜不得使舍弟見之。與感。又惜不得使霞仙見之也。說到家庭。誠有味乎言之。

看子貞所批圈古文及史記。信乎其能自立者。揚子雲云。「其人爲也。多暇日者。其過人也不遠矣。」自念如此。悠悠。何以自立者。子貞者。名不苟立。可敬也。

竹如兄與人交。雖人極濃厚。渠常冷淡。使人穆然與之俱深。真是可敬。

何子貞來。談及渠在國史館。每天手鈔書十頁。錄東華錄所不載而事有關繫者。約五千字。聞之服其敏而好學。予前冬入史館。而絕不供職。對之愧殺。

羅椒生來久談。有志之士。聞然日章。不勝欽服。

朱廉甫得福建道御史。有志獻納。得居言路。可喜也。讀廉甫詩數首。知其用力已深。其心血亦足。可以力戰不衰。予所不及。

吳子序言。「賢人言保國保天下。老氏言取國取天下。吾道只自守。老氏有殺機。」云云。其義甚精。好學深思。序不愧。

接霞仙書。懇懇千餘言。識見博大而平實。其文氣深穩。多養到之言。一別四年。其所造據臻此。對之慚愧無地。再不努力。他日何面目見故人耶。

劉蔭渠自新城來見。六年不面。一面即深相愛重。喜其與三十年在京相見無異。仍是襟訥書生氣象。未染軍營氣習。亦無官場氣習也。

孫芝房信。寄近作古文一本。夜闌論治六首。通達事理。文亦勁快。傑作也。

汪梅村。名士鐸。績學士也。江甯人。庚子舉人。出胡中丞門下。江甯城破。陷賊中。年餘後逃出。至績溪山中。去年胡中丞請之來鄂署。修韻史兵略一書。其學精於輿地。會稽蠶水經注圖。又精於小學。又曾任南北史補注。其師友爲胡竹莊培翬。胡雲莊承拱。陳頌甫。煥徐星伯。松張石舟。穆之。屬。又言胡墨莊六種。胡竹莊禮儀及蕉理堂琴經。宣室圖等書。最好。

馬徵麟。業師陳豐。乙未進士。曾任甘肅知縣。著有周易疏。及詩集。古文。馬韻書頗有淵源。會若三立明辯。立德。立功。立言三者。各集諸書。自爲條例。又有馬壽華。號小坡。馬復震。號星平。皆桐城人。在此投效。志趣亦不與鄧守之頗通小學。這其父完白先生與李中蒼先生。皆當代名宿。濡染較深也。

與季高次青。鬯談。夜又與季高久談。季高言。一凡人須從吃苦中來。收積銀錢貨物。固無益於子孫。卽收積書籍字畫。亦未必不爲子孫之累云。云。多見道之語。

羅澹村中丞。以乙未進士。屢官直隸湖北浙江等省。凡二十五年。家無一錢。舊屋數椽。極爲狹陋。聞前後僅寄銀三百兩到家。夫人終身未著皮襖。真當世第一清苦可敬也。

胡中丞熟商江南軍事。又言。凡事皆須精神貫注。心有二用。則必不能有成。余亦言軍事不日進則日退。斷無中立之理。二人皆許爲知言。

周破甫頗習夷務。所言亦曉暢事理。

賀宏勳。帶劉陽精於古樂者。邱慶籥……等六人來。邱係穀士先生之子。六人者。皆承穀士之教。講求古樂。帶來樂器。琴一。瑟一。鳳箏一。洞簫一。篳一。篪一。篴一。篥一。笛一。篳一。函令奏樂。以鼓節之。音節清雅。穆然令人想三代之盛。古昔

聖王脩己治人之術。其精者全存平樂。而後世人獨闕者。乃首在樂。余因古人治兵之說。作詩之法。皆與音樂相通。而懵然不知。深以爲恥。思訪尋覈士先生之徒黨。相與講求一二。故招集六人者。自瀏陽來院。見子紀。擇粗講音律。明年當令來營。究心茲事。

錢子密送其尊甫錢磐石先生泰吉文稿。泰吉爲香樹先生之曾孫。磐石先生之弟。爲海甯教官二十七年。在海甯爲山長九年。現避亂寓江西新建鄉間。生平最喜校書。所校各本題識。名曰曝書雜記。

嚴渭春中丞信。中。抄。字。渠。與。司。道。論。湖。北。軍。務。一。函。地。勢。之。熟。詞。氣。之。謙。均。不。可。及。

李少荃。段蘇州。學士。人。殊。爲。眼。明。手。辣。

李善蘭。王叔揚。現。山。來。坐。潘。陳。碩。甫。先。生。奩。片。一。紙。知。已。由。賊。中。逃。出。到。滬。言。將。來。院。年。八。十。二。歲。段。茂。堂。之。弟。子。東。南。之。精。於。經。學。小。學。巋。然。僅。存。矣。

李壬叔。帶來二人。一張新桂。浙江蕭山人。工於製造洋器之法。一張文虎。江蘇南匯人。精於算法。兼通經學。小學。爲阮文達公所器賞。

柳賓叔。名與恩。丹徒王辰舉人。七十大歲。精於段梁之學。曾在阮文達家。課讀十餘年。學術頗有家法也。單地山於席間。盛稱所作江忠烈神道碑。背誦如流。老輩好善。不可及也。

荷樹堂來久談。三十年前老友。自祁門一別。至是忽十餘年矣。暢敘一切。渠殊無老態。在。山。中。善。於。調。養。也。閩。靈。仙。近。年。所。作。詩。文。淵。懿。暢。達。較。昔。年。已。大。進。

邵蕙西。示以方世兄所作論。年方十五而才華如此。黃士壽來示以所作選將論。真奇才也。吳翔岡言。一識見高明者。特患踐履不平實。一高明則崇效天。平實則卑法地。因進之以腳踏實地。事事就平實上用功。

次青又作懷人詩十六首。再用何廉劬原韻。綿麗遒勁。才人之筆。鞠鄧彌之吳竹莊和詩。竹莊詩牢騷噴薄而出。不忍卒讀。蓋其中鬱抑深矣。

接何廉劬信。寫作俱佳。依戀之意。溢於言表。才士不遇。讀之慨然。

張康卿近日好學不倦。作文亦極精進。余門徒中蓋有成就者。端推此人。臨別依依。余亦驚愛不忍舍去。求爲其祖作墓志。近日當應之也。

陳大力來。與之言。「襟懷實宏大。世俗之功名得失。須看得略平淡些。」
趙惠甫上條陳一篇。識解闊遠。文辭通雅。逸才也。

劉仲忠庶常蒙章。廬江人。李少荃之門生。氣象崢嶸。志意沈著。美才也。

嚴仙劬信來。薦其內姪向師棟。果令器也。

郭兩三之胞弟用中。與其子階自東台來。談最久。階字慕徐。其業師爲揚州劉孟瞻文漢之子。經學已有師法矣。關慶秋農先器識而後文藝論。嚴係仙劬通政之子。樂園廉訪之孫。年十八。中咸豐丁巳舉人。今僅二十三歲。而史事爛熟。識見遠大。洵吾鄉英俊也。

與許仙屏談。氣節文章二者缺一不可。囑其勉於此。以與鄉人相切磋。

歛人汪宗沂者。王子懷之婿。呈所作禮樂一貫錄。雖學識尚淺。而頗有心得。

孫文川賈鍾麟。皆紳士之有才者也。

薛曉帆之子薛福成所遞條陳。約萬餘言。閱畢。嘉賞無已。

戴醕士之長子有恆。季子穗孫來見。尙能世其家學。穗孫新得優貢。器宇軒昂。可喜也。

蒙陰管縣令福曜。河南駐防。係倭良峯相國之胞姪。福新伯觀察咸之堂弟。字煥卿。雅飭有循吏風。

石琢堂之曾孫。名師鑄。字似梅者。自湖南來。筠仙有書薦之。盛稱其才。果俊才也。

雷州舉人陳喬森。談甚久。陳號逸山。許仙屏有書。極贊其文行不羣也。

監印委員莫祥芝。患病入城醫治。求一見。語言時明時昧。顛運可憫。

黎宗銘。零陵人。向在王璞山營。聰明警敏。字仿左季高。體絕肖。志趣高亢。方期漸進於誠實。遽以疾歿。殊爲可惜。成章鑑在吳城病故。不勝悲悼。成以武弁而知忠義愛民。謀勇兼優。方冀其繼塔楊而起。不意其遽逝也。夢江岷樵。如平生歡。多年未一入夢。茲忽夢之。不勝傷感。但不知溫甫弟果尙生存否。溫與岷亦至交也。

接孫芝房信。告病勢垂危。託以身後之事。並請作其父墓志。及刻所著詩十卷。河防紀略四卷。散文六卷。又請邵位西作墓志。亦自爲書別之。託余轉寄。又接意誠信。告芝房死矣。芝房於去歲六月。面求作其父墓志。余已許之。十一月。又寄作古文一本。求余作序。余因循未及卽爲。而芝房遽歸道山。負此良友。疚憾何極。芝房十三歲入縣學。十六歲登鄉舉。二十六歲入翰林。少有神童之目。好學勵品。同輩所欽。近歲家運極蹙。其胞弟蔡淵主事。叔孚孝廉。相繼下世。又喪其長子。次子。又丁母憂。又喪其妻。又喪其妾。皆在此十年之內。憂能傷人。遂以隕生。如此美才。天不假之。以年。倬成大器。可悲可憫。因憶道光二十八年劉芸雲將死之時。亦先爲一書寄京以告別。詩余爲作墓志。凡內傷病。神氣清明不亂。使生者愈難爲情耳。

子序寄其姪昌籙之文。因閱一過。識見卓越。有子序之風。惜其早死也。

袁漱大有志讀書。期至於古之作者。而竟百不能償其一二。良可深痛。今年六月。郭兩三親家陣亡。茲又聞漱六之喪。中年哀樂。觸緒生感。古人所云。一旣悲逝者。行自念也。一

胡宮保於八月廿八日亥時去世。哀痛不已。赤心以憂國家。小心以事友生。苦心以護諸將。天下甯復有似斯人者哉。

羅伯宜來談甚久。深歎黎壽民之敦厚。早逝爲可惜。

周破甫在滬淪逝。老年一膺薦牘。遠被參劾。抑鬱潦倒以死。悠悠毀譽。竟足殺人。良可憐傷。

趙景賢竹生以一在籍紳士。苦守孤城。四面援絕。至半年之久。城陷身殉。良可痛憫。擬爲一疏。歷敘其賢行勛績。而自請不能赴援之咎。

聞姚秋浦之喪。深以爲憂。姚自去年五月暑院南道。至今年餘。無日不在艱地困苦之中。茲於疫病。四日不起。可勝悲愴。

鄧守之子解字作卿。於本日寅正在公館內去世。完白先生之孫也。余派人料理殮殮。未刻昇出。其父曾諱託教訓培植。余以公私繁冗。久未一省視。不知其一病不起。有負重託。殊爲歎仄。

至楊樓巷處看病。觀其安閒淡定。視死如歸。不愧學道君子之自然。病則十分沉重。無可挽回矣。

袁午橋臨終有遺函寄余。中云。「勿以苗逆爲易剪。勿以長淮爲易收。」讀之悚動哀感。

李希菴於十月廿八日子刻棄世。苦戰多年。家無長物。忠盡廉介。可敬可傷。旋又聞錢警石先生仙逝。老成凋謝。彌深悵惘。

范雲吉於十二日戌刻棄世。仁厚正派。而有識見。方意其大有爲於時。而止於此。良可痛也。

聞張鍊渠沒於安慶。爲之泫然不釋。蓋鍊渠於微休鬪餉時。百計維持。大受毀辱。而余查辦之札。復過於嚴厲也。至塔軍門家直延入上房。具酒相待。其母八十歲。相對涕泣。其三弟咸豐四年已死。其次弟本年八月十三日亦死。其兩弟婦寡居。并出拜見。三弟皆無子。僅塔軍門一女。次弟阿陵布四女。親房無可承繼之人。實爲可慘。其妹其女。并出拜見。泣求提拔其婿等。（以上日記）

蓋嘗抉剔平生之病源。養癰藏癰。百孔雜出。而其要在不誠而已矣。竊以爲天地之所以不息。國之所以立。聖人之德業之所以可大可久。皆誠爲之也。故曰。「誠者。物之終始。不誠無物。」今之學者。言考據。則持爲駢辨之柄。講經濟。則據爲獵名之津。言之者不忤。信之者貴耳。轉相欺誣。不以爲恥。至如仕途積習。益尙虛文。奸弊所在。蹈之而不怪。知之而不言。彼此塗飾。聊以自保。泄泄成風。阿同駭異。故每私發狂議。謂。「今日而言治術。則莫若綜核名實。今日而言學術。則莫若取篤實踐履之士。」物窮則變。救浮華者莫如質。積弊之後。振之以猛。意在斯乎。方今時事孔棘。追究厲階之生。何嘗不歸咎於發難者。彼豈實見天下之大計。當痛懲而廓清之哉。豈預知今日

之變。實能自我收之哉。不過以語言欺人。思先登要路耳。國藩以茲內省。早歲所爲涉覽書冊。講求衆藝者。何一非欺人之事。所爲高談古今。嚶嚶自許者。何一非欺人之言。中夜以思。汗下如霰。頃視先生所爲楹帖。『道在存誠』……云云。旨哉其闡然君子之言乎。果存誠而不自欺。則聖學王道又有他哉。

君子之自處常嚴重而不可干。其待人也。以敬其身者敬之。道勝已者。抑志事之。僕雖蠢頑。亦頗識輕重之分。聞者。

緩急之求。無貴賤賢否皆有之者也。求人而甘言謝之。夫人而能也。德於人而責報。亦夫人而能也。至知道者。有進焉。其受人湯。中心敬之。不以口舌云報也。其忠於謀人。過輒忘之。彼德我。吾安焉。彼不德我。吾安焉。徐以觀其他。他行合義。友之如故。他行不義。而後絕之。終不相督責也。所謂『道濟萬物而不自居。施及後世而不伐』皆自於此。

君子有高世獨立之志。而不予人以易闕。有藐萬乘卻三軍之氣。而未嘗輕於一發。道之未光。忠信之未孚。而欲人之坦坦以相諒。蓋其難矣。

天下之道。非兩不立。是以立天之道。曰陰與陽。立地之道。曰柔與剛。立人之道。曰仁與義。乾坤毀則無以見易。仁義不明。則亦無所謂道者。傳曰。天地溫厚之氣。始於東北。而盛於東南。此天地之盛德氣也。此天地之仁氣也。天地嚴凝之氣。始於西南。而盛於西北。此天地之尊嚴氣也。此天地之義氣也。斯二氣者。自其後而言之。因仁以育物。則慶賞之事起。因義以正物。則刑罰之事起。中則治。偏而亂。自其初而言之。太和絪縕。流行而不息。人也。物也。聖人也。常人也。始所得者均耳。人得其全。物得其偏。聖人者既得其全。而其氣質又最清且厚。而其習又無毫髮累。於是曲踐乎所謂仁義者。夫是之謂盡性也。推而放之。凡民而準。推而放之。庶物而準。夫是之謂盡人性。盡物性也。常人者。雖得其全。而氣質拘之。習染蔽之。好不當則賊仁。惡不當則賊義。賊者日盛。本性日微。蓋學問之事。自此興也。學者何。復性而已矣。所以學者何。格物誠意而已矣。格物。則剖仁義之差等。而縷析之。誠意。則舉好惡。

之。嘗於仁義者而力卒之。茲其所以難也。吾之身。與萬物之生。其理本同一源。乃若其分。則紛然而殊矣。親親與民殊。仁民與物殊。鄉鄰與同室殊。親有殺。賢有等。或相倍蓰。或相什百。或相千萬。如此其不齊也。不知其分而妄施焉。過乎仁。其流爲墨。過乎義。其流爲楊。生於心。害於政。其極皆可以亂天下。不至率獸食人不止。故凡格物之事。所爲委曲繁重者。剖判其不齊之分焉爾。朱子曰。「人心之靈。莫不有知。」此言好惡之良知也。曰。「天下之物。莫不有理。惟於理有未窮。故其知有未盡。」此言吾心之知有限。萬物之分無窮。不究乎至殊之分。無以洞乎至一之理也。今王氏之說曰。「致良知而已。」則是任心之明。而遂曲當乎萬物之分。果可信乎。冠履不同位。鳳鷓鴣不同酒。物所自具之分殊也。簪履殺人。辜湯執之。辱負之。極極水。浮極之。焉忍之。物異我相際之分殊也。仁義之異施。卽物而區之也。今乃以卽物窮理爲支離。則是吾心虛懸一成之知於此。與凡物了不相涉。而謂皆當乎物之分。又可信乎。朱子曰。「知爲善以去惡。則當實用其力。務決去而求必得之。」此言仁義之分既明。則當舉吾好惡以既其事也。今王氏之說曰。「卽知卽行。格致卽誠意工夫。」則是任心之明。別無所謂實行。心苟明矣。不必屑屑於外之迹。而迹雖不仁不義。亦無損於心之明。是何其簡捷而易從也。循是說而不辨。幾何不肖天下而浮屠之趨哉。堯舜禹湯文武周公孔子之學。豈有他衷。卽物求道而已。物無窮。則分殊者無極。則格焉者無已時。一息而不格。則仁有所不熟。而義有所不精。彼數聖人者。惟息息格物而又以好色惡臭者竟之。乃其所以聖也。不如是。吾未見其聖也。自大賢以下。知有精粗。行有實不實。而賢否以次區焉。國藩不肖。亦謬欲從事於此。凡倫類之酬酢。庶務之磨礱。雖不克衷之於仁。將必求所謂藹然者焉。雖不克裁之於義。將必求所謂秩然者焉。日往月來。業不加修。意言意行。尤悔叢集。求付一物之當其分而不可得。蓋陷溺者深矣。自持此生縱能窮萬一之理。亦不過窮鑽奇零。無由底於達原之域。然終不敢棄此而他求捷徑。謂靈心一覺。立地成聖也。下愚之人。甘守下愚已耳。智有所不照。行有所不慊。故常緩焉。不敢取被說者廓清而力排之。愚者多柔。理有固然。屢覺味不奪。不自振厲。豆資輔車以自彊。故生乎於友誼。兢兢焉嘗自慮執德不宏。量既隘而不足以來天下之。

善。故不敢執一律求之。雖偏長薄善。苟其有裨於吾。未嘗不博取焉。以自資益。其有以讜言評論陳於前者。即不必有當於吾。未嘗不深感其意。以爲彼之所以愛我者。異於衆人泛然相遇之情也。

大抵事機之轉。其始賴一二人者。默運於淵深微莫之中。而其後人亦爲之和。天亦爲之應。

無兵不足深憂。無餉不足痛哭。獨舉目斯世。求一攘利不先。赴義恐後。忠憤耿耿者。不可亟得。或僅得之而又屈居卑下。往往抑鬱不伸。以挫。以去。以死。而貪饕退縮者。果襲首而上騰。而富貴而名譽。而老健不死。此其可爲皓嘆者也。

干戈之後。自縉紳先生。下逮廝役走卒。皆宜有怵惕劄痛之意。以懲前而毖後。若仍酣歌恆舞。辜過忘憂。漫無悔禍之意。而各違亡等之欲。則此閒之亂萌。尙恐未能遽息。

今日百廢莫舉。千瘡並潰。無可收拾。獨賴此精忠耿耿之寸衷。與斯民相對於骨嶽血淵之中。冀其塞絕橫流之人欲。以挽回厭亂之天心。庶幾萬有一補。不然。但就肩勢而論之。則滔滔者。吾不知其所底也。君子直道而行。豈肯以機械嶮巇與人相競禦哉。

國藩入世已深。厭聞一種寬厚論說。模稜氣象。養成不白不黑不痛不癢之世界。誤人家國。已非一日。

平昔有相信之素。則臭腐皆變芬芳。平昔有相疑之端。則見聞無非荆棘。

兩心炯炯。各有深信之處。爲非毀所不能入。金石所不能穿者。別自有在。今欲多言。則反以晦真至之情。古人所謂一窗樞愈多則愈蔽明一者也。

虹貫荆卿之心。而見者以爲淫氣而薄之。碧化萋宏之血。而覽者以爲頑石而棄之。古今同慨。我豈伊殊。屈原之所以一沈。而萬世不復返顧者。良有以也。僕之不能推誠與人。蓋有歲年。今欲矯揉而均均向人。是再僞耳。蟾蜍鱗沙而不行。於菟騰風而萬里。士各有志。不相及也。

吾鄉數人。均有薄名。尙在中年。正可聖可狂之際。惟當兢兢業業。互相箴規。不特不宜自是。並不宜過於獎許。長

友朋自是之心。彼此恆以過相疑。以等相礪。千里同心。庶不終爲小人之歸。

國家之強。以得人爲強。所謂「無競淮人」也。若不得其人。則毛羽未滿。亦似難以高飛。昔在宣宗皇帝亦嘗切齒發憤。履海和議而主戡守。卒以無良將帥。不獲大雪國恥。今欲罷和主戰。亦必得三數引重致遠折衝禦侮之人以擬之。若僅恃區區楚材。目下知名之數人。則「干將」「莫邪」。恐亦未必終不刃折。且取數太少。亦不足以分布海隅。

一高明。「平實」二義。張揚園先生嘗言之矣。大抵蒞事以「明」字爲第一要義。明有二。曰高明。曰精明。同一境。而登山者獨見其遠。乘城者獨覺其境。此高明之說也。同一物。而臆度者不如權衡之審。目巧者不如尺度之確。此精明之說也。凡高明者。欲降心抑志以遠趨於平實。度不易易。若能事事求精。輕重長短。一絲不差。則漸實矣。能實則漸平矣。

耿介人。類不耐事。從古已然。更與鮑諧世態。嘗無是慮。

莊生有言。「禮義法度者。應時而變者也。行周於魯。猶推舟於陸也。」古今之異。猶授狙之異乎周公也。來示謂「求才之效。不可必得。求才之道。仍須自盡」。自是破的之論。近好求筋力健整能吃苦苦之人。一藥吾黨荏弱之風。尙未遽見。

年來鮑嘗艱險。窮途白眼。所在多有。渠自賦詩有云。「沈舟轉側波濤裏。敗絮周旋荆棘中。」蓋實錄也。

惠書稱申夫有撓鬻澄清之志。只愧尺波不足以縱巨鱗。隨郭不足以發盛業。昔有巨盜發冢。椎掘方畢。棺中人忽欠伸起坐曰。「我乃伯夷。何爲見訪。」遂遠巡去。易一邱。方曰墜墓門。見前欠伸者。隨至曰。「此舍弟叔齊冢也。」今將施巨鉤。帶餌於蹄涔之水。是猶索珠補玉。押於伯夷之壙。多恐有辜薦賢之盛心。至於推誠揚善。力所能勉。不敢或忽。

手示敬悉。安樂棄予。世態之常。待去年過此。與今年情形迥異。所示「莫危於漸」。誠爲篤論。然此時只當用老

僧不見不聞法。天下惟忘機可以消豪情。黨憮懂可以被不祥也。萬事無成四字。是鄙人一生考語。公安得據而有之。

前曾語閣下以「取人爲善。與人爲善。」閣下默記。近數日內。取諸人者若干事。與人者若干事。大抵取諸人者。嘗在小處實處。與人者。嘗在大處空處。

昔邵子將天下萬事萬理。看成四片。近姚惜抱論古文之法。有陽剛陰柔兩端。國藩亦看得天下萬事萬理。皆成兩片。與友石所云「陽智陰智。」殆有同符。邵邵子四片之說。頗多安排附會。友石亦不免此弊。能進於自然。則幾矣。

既隸其麾下。尙祈忠於所事。無存歧異之見。古人有言。「行循路者不至。事兩君者不容。鏃而舍之。朽木不折。鏃而不舍。金石可鏃。其能一兮。心如結兮。」竊願以尸鳩之詩奉勸也。

閣下昔年舌端或有彈射。筆端亦頗刻誥。若禍生有胎。則亦不可不自省而斂抑也。

大抵亂世之所以彌亂者。第一在黑白混淆。第二在君子愈讓。小人愈妄。待不如往年風力之勁。正坐好讓。公之稍遜昔年。亦坐此耳。（以上書札）

（功效）天下之事。有其功必有其效。功未至而求效之遽臻。則妄矣。未施敬於民。而欲民之敬我。未施信於民。而欲民之信我。鹵莽而耕。滅裂而耘。而欲收豐稔十倍之利。此必不得之數也。在易恆之初六曰。浚恆貞凶。无攸利。胡瑗釋之曰。「天下之事。必皆有漸。在乎積日累月而後能成其功。」是故爲學既久。則道業可成。聖賢可到。爲治既久。則教化可行。善惡可至。若是之類。莫不由積日累久而後至。固非驟而及也。初六居下卦之初。爲事之始。責其長久之道。永遠之效。是猶爲學之始。欲亟至於周孔。爲治之始。欲化及於堯舜。不能積久其事。而求常道之深。故於真正之道。見其凶也。无攸利者。以此而往。心無所利。孔子曰。「欲速則不達」也。是故君子之用功也。如雞伏卵。不舍而生氣漸充。如燕營巢。不息而結構漸牢。如滋培之木。不見其長。有時而大。如有本之泉。不舍而

夜盈科而後進放乎四海。但知所謂功。不知所謂效。而效亦徐徐以至也。

嵇康曰：「夫爲稼於湯之世。偏有一溉之功者。雖終歸於焦爛。必一溉者後枯。然則一溉之益。固不可誣也。」此言有一分之功。必有一分之效也。程子曰：「修養之所以引年。國祚之所以祈天永命。常人之至於聖賢。皆工夫到這裏。則自有此應。」此言有真積力久之功。而後有高厚悠遠之效也。孟子曰：「宋人有閔其苗之不長而掘之者。謂其入曰：『予助苗長矣。』其子趨而往視之。苗則槁矣。」此言不候功候之至。而遽期速效。反以害之也。蘇軾曰：「南方多汲人。日與水居也。七歲而能涉。十歲而能浮。十五而能沒矣。北方之勇者。生之識水。聞於沒水。而求所以沒。以其言試之。未有不爛者也。」此言不知致功之方。而但求速效。亦反以害之也。（以上雜著）

治政

我自從己亥年在外把戲。至今以爲恨事。將來萬一作外官。或督撫。或學政。從前施情於我者。或數百。或數千。皆釣餌也。渠若到任上來。不應則失之。刻薄應之。則施一報十。尙不足以備其欲。故自庚子到京以來。於今八年。不肯輕受人惠。情願人占我的便宜。斷不肯我占人的便宜。

見可而留。知難而退。但不得罪東家。好去好來。即無不可耳。

事斷不可求速效。求速效必助長。非徒無益。而又害之。祇要日積月累。如愚公之移山。緣久必有豁然貫通之候。愈欲速則愈鈍。礙矣。

凡事皆貴專。求師不專。則受益也不入。求友不專。則博愛不親。心有所專宗。而博觀他途。以擴其識。亦無不可。無所專宗。而見異思遷。此眩彼奪。則大不可。

在外與居鄉不同。居鄉者緊守銀錢。自可致富。在外者有緊有鬆。有發有收。所謂大門無出。耳門亦無入。全仗名聲好。乃扯得活。若名聲不好。專靠自己收藏之銀。則不過一年。即用盡矣。

山向吉凶之說。亦未可盡信。山向之說。地理也。祖父有命而子孫從之。天理也。祖父之意已堅。而爲子孫者。乃拂違其意。而致卜他處。則祖父一怒。肝氣必鬱。病勢必加。是已大逆天理。雖得吉地。猶將變凶。而况未必吉乎。自今以後。不必再提改葬之說。或吉或凶。聽天由命。只要事事不違天理。則地理之說。可置之不論不議矣。

凡大員之家。無半字涉公庭。乃爲得體。爲民除害之說。爲所轄之屬言之。非謂云本地地方官也。

不貪財。不失信。不自是。有此三者。自然鬼服神欽。到處人皆敬重。此刻初出茅廬。尤宜慎之又慎。若三者有一。則不爲人所與矣。

澄弟每以我升官得差。便謂我是肖子賢孫。殊不知此非賢肖也。如以此爲賢肖。則李林甫盧懷慎輩何嘗不位極人臣。焉奔一時。詎得謂之賢肖哉。要令罷官家居之日。己身可以淡泊。雲子可以服勞。可以對祖父兄弟。可以對宗族鄉黨。如是而已。

予又思得一法。如朱子「社倉」之制。若能倣而行之。則更爲可久。朱子之制。先捐穀數十石。或數百石。貯一公倉內。青黃不接之月。借貸與飢民。冬月取息二分收還。（每石加二斗。）若遇小歉。則蠲其息之半。（每石加一斗。）大凶年。則全蠲之。（借一石。還一石。）但取耗穀三升而已。朱子此法。行之福建。其後天下法之。後世效之。今各縣所謂「社倉穀」者是也。其實名存實亡。每遇凶年。小民曾不得借貸顆粒。且並社倉而無之。僅有常平倉穀。前後任尙算交代。小民亦不得過而問焉。蓋事經官吏。則良法美政。後皆歸於子虛烏有。國藩今欲取社倉之法。而私行之我境。我家先捐穀二十石。附近各富家。亦勸其量爲捐穀。於夏月借與貧戶。秋冬月取一分息收還。（每石加一斗。）豐年不增。凶年不減。凡貧戶來借者。須於四月初間。告知經管社倉之人。經管人量穀之多。分佈於各借戶。令每人書券一紙。冬月還穀銷券。如有不還者。同社皆理斥議罰加倍。以後每年我家量力添捐幾石。或有地方爭訟理曲者。詞令量捐社穀少許。每年增加。不過十年。可積至數百石。則我境可無飢民矣。蓋夏月穀價昂貴。秋冬價漸平落。數月之內。一轉移之間。而貧民已大占便宜。受惠無量矣。

現在人才不振。皆謹小而忽於大。人人皆習脂韋唯阿之風。欲以此疏。稍挽風氣。冀在廷皆趨於骨鯁。而遇事不敢退縮。此余區區之餘意也。

鄉民可與謀始。難與樂成。恐歷時稍久。不能人人勇躍輸將。亦未必奏效無滯。我家信義。風示一邑。但期鼓舞風聲。而不必總攬全局。庶可進可退。綽綽餘裕耳。

余向來有無恆之弊。自此寫日課本子起。可保終身有恆矣。蓋羽師益友。重重夾持。能進不能退也。

向來書吏之中飽。上則吃官。下則吃民。名爲包徵包解。其實當徵之時。則以百姓爲魚肉而吞噬之。當解之時。則以官爲雉媒而播弄之。官索錢糧於書吏之手。猶索食於虎狼之口。再四求之。而終不肯吐。所以積成巨虧。並非實欠在民。亦非官之侵蝕入己也。

可珍之物。固應愛惜。卽尋常器件。亦當彙集品分。有條有理。竹頭木屑。皆爲有用。則隨處皆取措不窮也。

功名之地。自古難居。兄以在籍之官。募勇造船。成此一番事業。名震一時。人之好名。誰不如我。我有美名。別人必有受不美之名者。相形之際。蓋難爲情。兄惟謹慎謙虛。時時省惕而已。

但願官階不再進。虛名不再張。常保此以無咎。卽是持身守家之道。

名者。造物所珍重愛惜。不輕以予人者。余德薄能鮮。而享天下之大名。雖由高曾祖父累世積德所致。而自問總覺不稱。故不敢稍涉驕奢。家中自父親叔父奉養宜隆外。凡諸弟及吾姪。吾子吾姪。吾諸女姪女輩。概願儉於自奉。不可倚勢驕人。古人謂「無實而享大名者。必有奇禍。」吾常常以此儆懼。故不能不詳告賢弟。尤望賢弟時時教戒吾子吾姪也。

用紳士不比用官。彼本無任事之責。又有避嫌之念。誰肯挺身出力以急公者。貴在獎之以好言。優之以廩給。見一善者。則痛譽之。見一不善者。則渾藏而不露一字。久久。善者勸而不善者。亦潛移而默轉矣。

官場交接。吾兄弟患在政識世態。而又懷一肚皮不合時宜。既不能硬。又不能軟。所以到處寡言。曲應妙在全不

識世態。其腹中雖也懷些不合時宜。却一味渾含。永不發露。我兄弟則時時發露。終非戴福之道。

民宜愛。而刁民不必愛。紳宜敬。而劣紳不必敬。弟在外能如此調理分明。則凡兄之缺憾。弟可一一爲我彌縫。而匡救之矣。昨信言無本不立。無文不行。大抵與兵勇及百姓交際。則心雖有等差。而外之儀文。不可不稍隨。余之所以不獲於官場者。此也。去年與弟握別之時。諄諄囑弟。以效我之長。戒我之短。數月以來。視弟一切施行。果能體此二語。欣慰之至。惟作事貴於有恆。精力難於持久。必須日新又新。慎而加慎。庶幾常保令名。益崇德業。先星岡公云。「濟人須濟急時無。」又云。「隨緣布施。專以目之所觸爲主。」卽孟子所稱。「是乃仁術也。」若目無所觸。而泛求被害之家而濟之。與造冊發賑一例。則帶兵者專行沽名之事。必爲地方官所議。且有挂一漏萬之處。

昔耿恭簡公謂。「居官以耐煩爲第一要義。」帶勇亦然。兄之短處在此。屢次諄諄教弟亦在此。二十七日來書有云。「仰鼻息於傀儡羶臙之輩。又豈吾心之所樂。」此已露出不耐煩之端倪。將來恐不免於齟齬。去歲握別時。曾以懲余之短相箴。乞無忘也。

善規國者。親賢者在位。則卜其將興。見冗員淨雜。則知其將替。善規軍者亦然。似宜略爲分別。其極無用者。或厚給途費。遣之歸里。或酌賃民房。令住營外。不使軍中有情漫喧雜之象。庶爲得宜。聲聞之美。可恃而不可恃。兄昔在京中。頗著清望。近在軍營。亦獲虛譽。善始者不必善終。行百里者半九十。里。望一損。遠近滋疑。弟目下名望正隆。務宜力持不懈。有始有卒。

嘗常以求才爲急。其闕冗者。雖至親密友。不宜久留。恐賢者不願共事一方也。余在外。未付銀至家。竇因初出之時。默立此誓。又於發州縣信中。以「不要錢。不怕死」六字自明。不欲自欺其志。而令老父在家受盡窘迫。百計經營。至今以爲深痛。

現在上下交譽。軍民咸服。頗稱適意。不可錯過時會。當盡心竭力。做成一個局面。聖門教人。不外「敬」「恕」

二字。天德王道。徹始徹終。性功事功。俱可包括。余生乎於「敬」字。無工夫。是以五十而無所成。至於「恕」字。在京時亦曾講求及之。近歲在外。惡人以白眼藐視京官。又因本性倔強。漸近於懷。不知不覺。做出許多不恕之事。說出許多不恕之語。至今愧恥無已。弟於「恕」字。頗有工夫。天質勝於阿兄一籌。至於「敬」字。則亦未嘗用力。宜從此日致其功。於論語之九思。玉藻之九容。勉強行之。臨之以莊。則下自加敬。習慣自然。久久遂成德器。庶不至徒做一場話說。四五十而無聞也。

以精力極疲之際。肩輿大難勝之任。深恐竭蹶。貽笑大方。然好事如此。惟有勉力作去。成敗禍福。不敢計也。以私事言之。則余爲地方官。若僅帶一胞弟在身邊。則好事未必見九弟之功。壞事必專指九弟之過。嫌疑之際。不可不慎。

弟此次出山。行事則不激不隨。處位則可高可卑。上下大小。無人不翕然悅服。因而凡事皆不拂意。而官階亦由之而晉。或者前數年抑塞之氣。至是將暢然大舒乎。易曰。「天之所助者。順也。人之所以助者。信也。」我弟若常常履信思順。如此。名位豈可限量。吾湖南近日風氣蒸蒸日上。凡在行間。人人講求將略。講求品行。並講求學術。弟與沉弟。既在行間。望以講求將略爲第一義。點名看操等粗淺之事。必躬親之。練膽料敵等精微之事。必苦思之。品學二者。亦宜以力餘自勵。目前能做到湖南出色之人。後世即推爲天下罕見之人矣。大哥豈不欣然哉。

吾批二李詳文云。「須冗員少而能事者多。入款多而坐支者少。」又批云。「力除官氣。嚴裁浮費。」弟須囑輔卿二語。無官氣。有條理。守此行之。雖至封疆。不可改也。凡養兵。以爲民。設官。亦爲民也。官不愛民。余所痛恨。

默觀近日之吏治人心。及各省之督撫將帥。天下似無戡定之理。吾惟以一「勤」字報吾君。以一「愛民」二字報吾親。才識平常。斷難立功。但守「勤」一字。終日勞苦。以少分宵旰之憂。行軍本擾民之事。但刻刻存「愛民」之心。不使先人之積累。自我一人耗盡。

然不輕進人。卽異日不輕退人之本。不妄親人。卽異日不妄疏人之本。

爲平世之官。則兄弟同省。必須迴避。爲勤王之兵。則兄弟同行。愈覺體面。余近年在外。問心無愧。死生禍福。不甚介意。惟接到英法美各國通商條款。大局已壞。令人心灰。時事日非。吾家子姪輩。總以「謙」「勤」二字爲主。戒「傲」戒「惰」。保家之道也。

吾家兄弟帶兵。以殺人爲業。擇術已自不慎。惟於禁止擾民。解散脅從。保全鄉官三端。痛下工夫。庶幾於殺人之中。寓止暴之意。

凡說話不中事理。不擔斤兩者。其下必不服。故說文「君」字「后」字從口。言在上位者出口號令。足以服衆也。

近世所稱發督撫之榮。不外宦室衣服安富尊榮等事。而姪則受任於敗軍之際。奉命於危難之間。所居僅營中茅屋三間。瓦屋一間。所服較往歲在京。尤爲減省。自去冬至三月。常有賊黨十餘萬。環繞於衙門之左右前後。幾無日不戰。無一路不梗。糧無甘食。宵有警夢。軍士欠餉至五月六月之久。姪亦不忍獨處富饒。故年來不敢多寄銀錢回家。並不敢分潤宗族鄉黨者。非矯情也。一則目擊軍士窮窘異常。不忍彼苦而我獨甘。一則上念高曾以來。歷代寒素。國藩雖忝食舊德。不欲饗受太過。爲一己存惜福之心。爲闔族留不盡之澤。此姪之微意。十叔如訪得營中家中。有與此論不相符合之處。即請賜書詰責。姪當猛省懲改。

一門之內。迭被殊恩。無功無德。忝竊至此。慙悚何恆。惟當同心努力。仍說「拚命報國。側身修行」八字上。切實做去。

辦大事者。以多選替手爲第一義。滿意之選不可得。姑節取其次。以待徐徐教育可也。

勢利之天下。強陵弱之天下。此豈今日始哉。蓋從古已然矣。從古帝王將相。無人不由自立自強做鳥。卽爲聖賢者。亦各有自立自強之道。故能獨立不懼。確乎不拔。昔余在京。好與諸有各大名大位者爲仇。亦未始挺然特立不畏強禦之意。近來見得天地之道。剛柔互用。不可偏廢。太柔則靡。太剛則折。剛非暴虐之謂也。強矯而已。柔非卑

弱之謂也。謙退而已。趨事赴公。則當強矯。爭名逐利。則當謙退。開創家業。則當強矯。守成安樂。則當謙退。出與人
物應接。則當強矯。入與妻孥享受。則當謙退。若一面建功立業。外享大名。一面求田問舍。內圖厚實。二者皆有盈
滿之象。全無謙退之意。則斷不能久。

鹽務利弊。萬言難盡。然扼要亦不過數語。太平之世。兩語曰。「出處防偷漏。售處防侵佔。」亂離之世。兩語曰。「
暗販抽散釐。明販收總稅。」何謂出處防偷漏。鹽出於海濱場壩。商販赴場買鹽。每斤完鹽價二三文。交鹽丁收。
納官課五六文。交院司收。其有專完鹽丁之鹽價。不納院司之官課者。謂之私鹽。即偷漏也。何謂售處防侵佔。如
兩湖江西。均係應銷准鹽引之地。主持淮政者。即須霸住三省之地。只許民食淮鹽。不許鄂民食川私。湘民食粵
私。江民食閩私。亦不許川粵閩各販。侵我淮地。此所謂防侵佔也。何謂暗販抽散釐。軍興以來。細民在下游販鹽。
經過賊中金陵安慶等處。售於上游華陽吳城武穴等處。無引無票無照。是爲暗販。無論賊卡官卡。到處完釐。是
謂抽散釐也。何謂明販收總稅。去年官帥給票與商人和意誠號。本年喬公給票與商人和駿發號。目下余亦給
票與和駿發。皆令其在泰州運鹽。在運司納課。用洋船拖過九洲洲。在於上游售賣。售於湖北者。在安慶收稅。每
斤十文半。在武昌收九文半。售於江西者。在安慶每斤收十四文。在吳城收八文。此所謂明販收總稅也。

古來成大功大名者。除千載一郭汾陽外。恆有多少風波。多少災難。談何容易。願與吾弟兢兢業業。各懷臨深履
薄之懼。以冀免於大戾。

吾兄弟誓拚命報國。然須常存避名之念。總從冷淡處著筆。積勞而使人不知其勞。則善矣。

不帶勇則已。帶勇則死於金陵。猶不失爲志士。弟以季之歿於金陵。爲悔爲憾。則不可也。袁簡齋詩云。「男兒欲
報君恩重。死到沙場是善終。」當時以爲名句。

余三年以來。因位高望重。時時戰兢省察。默思所行之事。惟保舉太濫。是余亂政。不辦團。不開捐。是余管政。此外
尙不了了。

兩宮太后及恭邸力求激濁揚清。賞罰嚴明。但患無可賞之寶。不患無不次之賞。而罰罪亦毫不假借。如去年之誅二王一相。今年之戮林米何。與近日拿問勝帥。又拿問前任蘇藩司蔡映斗進京。諭旨皆嚴切異常。吾輩忝當重任。不特無意外之罰。而特無可罰之寶。

處大位大權。而兼享大名。自古曾有幾人能善其末路者。總須設法將權位二字。推讓少許。減去幾成。則晚節漸漸可以收場耳。

吾兄弟報稱之道。仍不外「拚命報國。側身修行」八字。至軍務之要。亦有二語曰。「堅守已得之地。多檄游擊之師」而已。

初膺閣府重任。心中如有欲說之話。思自獻於君父之前者。僅可隨時陳奏。奏議是人臣最要之事。弟須加一番工夫。弟文筆不患不詳明。但患不簡潔。以後從「簡嘗」二字上着力。

來信「亂世功名之際。尤為難處」十字。實獲我心。本日余有一片。亦請將欽篆督篆二者。分出一席。另簡大員。吾兄弟常存此兢兢業業之心。將來遇有機緣。即便抽身引退。庶幾善始善終。免蹈大戾乎。至於擔當大事。全在「明強」二字。中庸「學問思辨行」五者。其要歸於「愚必明。柔必強」。弟向來倔強之氣。卻不可因位高而頓改。凡事非氣不舉。非剛不濟。即修身齊家。亦須以「明強」為本。

無形之功。吾輩不宜形諸奏牘。並不必騰諸口說。見諸書牘。此是「謙」字之真功夫。所謂君子之所不可及。在人之所不見也。

凡有咨送摺稿到弟處者。弟皆視如學生之文。圈點批抹。每摺看二次。一次看其辦事之主意。大局之結構。一次看其造句下字之穩否。一日看一二摺。不過月餘。即可周知時賢之底蘊。然後參看古人奏稿。自有進益。

弟於吾勸誡之信。每不肯虛心體驗。動輒辨論。此最不可。吾輩居此高位。萬目所瞻。凡督撫是己非人。自滯自足者。千人一律。君子大過人處。只在「虛心」而已。不特吾之言當細心尋繹。凡外間有逆耳之言。皆當平心考究。

一番。故古人以居上位而不驕爲極難。

凡大臣密保人眞。終身不宜提及一字。否則近於挾長。近於市恩。此後余與湘中函牘。不敢多索協餉。以避挾長市恩之嫌。弟亦不宜求之過厚。以避盡歡竭忠之嫌。

江西自道光年間。從無銷足額引之事。亂後人口減少。即令全食淮引官鹽。亦不能銷至六萬大引之多。况引地被鄰私侵佔殆盡。焉能一一驟爾奪回。商人湊辦三萬引之成本四十餘萬。已極不易。二分之利。又不能動其涎羨之心。加以引地毫無把握。銷售難期暢旺。時日稍滯。獲利愈微。商利既薄。則所謂包繳釐金盈餘者。皆成拖欠展緩之局。

不特余之並未身臨前敵者。不敢涉一毫矜張之念。即弟備嘗艱苦。亦須知謀事在人。成事在天。勞績在臣。福祿在國之義。刻刻存一有天下而不與之意。存一盛名難副。成功難居之意。蘊蓄於方寸者深。則僥倖克成之日。自有一段謙光。見於面而盎於背。

大事實有天意與國運爲之主持。非吾輩所能爲力。所能自主者。「虛心實力勤苦謹慎」八字。盡其在我者而已。

余昨日具疏告病。一則以用事太久。恐中外疑我兵權太重。利權太大。不能不縮手以釋羣疑。一則金陵倖克。弟皆當引退。即以此爲張本也。

事事落人後著。不必後悔。不必怨人。此等處。總須守定「畏天知命」四字。金陵之克。千古之大名。全憑天意主張。豈盡關乎人力。天於大名。吝之惜之。千磨百折。艱難拂亂而後予之。老氏所謂不敢爲天下先者。即不敢居第一等大名之意。弟前歲初進金陵。余屢信多危悚儆戒之辭。亦深知大名之不可強求。今少荃二年以來。屢建奇功。肅清全蘇。吾兄弟名望雖減。尚不致身敗名裂。便是家門之福。老師雖久。而朝廷無貶辭。大局無他變。即爲吾兄弟之幸。只可畏天知命。不可怨天尤人。所以養身卻病在此。所以持盈保泰亦在此。千慮。千慮。無煎迫而深疾。

也。

弟肝氣不能平伏。深爲可慮。究之弟何必鬱鬱。從古有大勳勞者。不過本身一爵耳。吾弟於國事家事。可謂有志必成。有謀必就。何鬱鬱之有。

大凡才大之人。每不甘於岑寂。如孔翠灑屏。好自耀其文彩。林文忠晚年在家。好與大吏議論時政。以致與劉王坡制軍不合。復思出山。近徐松龕中丞。與地方官不合。復行出山。二人皆有過人之才。又爲本籍之官所擠。故不願久居林下。沅弟雖積勞已久。而才調實未能盡展其長。恐難久甘枯寂。不如兄弟盡力王事。各懷「鞠躬盡瘁。死而後已」之志。終不失爲上策。

吾兄弟受厚恩。享大名。終不能退藏避事。亦惟循前信所言。置鴛鴦殿於度外。坦然做去。行法俟命而已。弟此次赴鄂。雖不必效沈蔣之違道于譽。然亦不可如雲仙之讒侮紳士。動輒荆棘。大約禮貌宜恭。銀錢宜懸。背後不宜多着貶詞。縱不見德。亦可以遠怨矣。

督撫本不易做。近則多事之秋。必須籌兵籌餉。籌兵則恐以敗挫而致謗。籌餉則恐以搜括而致怨。二者皆具壞聲名。而其物議沸騰。被人參劾者。每在於用人之不當。沅弟愛博而輒。向來用人失之於率。失之於冗。以後宜慎選賢員。以救率字之弊。少用數員。以救冗字之弊。位高而資淺。貌貴而心謙。天下之事理人才。爲吾輩所不深知。不及料者。多矣。切勿存一自是之見。用人不率。冗。心存不自滿。二者本末俱到。必可免於咎戾。不墜今名。謝絕陋習。慎重公事。嚴密以防門內。推誠以待制府。數者皆與余見相合。聲譽亦必隆隆日起矣。

提鎮副將。官階已大。苟非有叛逆之實蹟實據。似不必輕言正法。如王清泉。係克復金陵有功之人。在湖北散營。欠餉尙有數成未發。既打金陵。則欠餉不清。不能全歸咎於湖北。余亦與有過焉。因欠餉不清。則軍裝不能全繳。自是意中之事。卽實缺提鎮之最可信爲心腹者。如蕭孚泗。朱南桂。唐義訓。熊登武等。若有意搜求其家。亦未必全無軍裝。亦難保別人不誣之爲哥老會首。余意凡保至一二三品武職。總須以禮貌待之。以誠意感之。如有犯

事到官。弟在家常常緩頰而保全之。即明知其哥老會。喚至密室。誠切勸諭。令其自悔。而貸其一死。惟柔可以制剛。很之事。惟誠可以化頑梗之民。即以吾一家而論。兄與沉弟帶兵。皆以殺人爲業。以自強爲本。弟在家當以生人爲心。以柔弱爲用。庶相反而適以相成也。

古稱郭子儀功高望重。招之未嘗不來。麾之未嘗不去。余之所處。亦不能不如此。

以後調度文書。以少爲好。昔胡文忠亦失之太多。多則未有不紛亂者。殄滅等字。不可輕用也。

嗣後奏事。宜請人細閱熟商。不可壹意孤行。是己非人。爲囑。弟克復兩省。勲業斷難磨滅。根基極爲深固。但患不能達。不患不能立。但患不穩適。不患不崢嶸。此後總從波平浪靜處安身。莫從掀天揭地處着想。吾亦不甘爲庸庸者。近來閱歷萬變。一味向平實處用功。非萎靡也。位太高。名太重。不如是。皆危道也。

少荃屢言。「疏語不可太堅。徒覺痕跡太重。而未必能即退休。即使退休。一二年而他處或有兵事。仍不免詔旨促行。尤爲進退兩難。」等語。皆屬切中事理。余是以反覆籌思。迄無善策。

大約凡作大官。處安榮之境。即時時有可危可辱之道。古人所謂「富貴常蹈危穢」也。紀澤臘月信。言宜堅辭江省。余亦思之爛熟。平世辭榮避位。卽爲安身良策。亂世僅辭榮避位。尙非良策也。

吾所過之處。千里蕭條。民不聊生。當亂世。處大位。而爲軍民之司命者。殆人生之不幸耳。弟信云。「英氣爲之一阻。」若兄。則不特氣阻而已。直覺無處不疼心。無日不懼禍也。

余意此時。名望大損。斷無遽退之理。必須忍辱負重。敲牙做去。待軍務稍轉。人言稍息。再謀奉身而退。處茲亂世。凡高位。大名。重權。三者皆在憂危之中。余已於三月六日入金陵城。寸心惕息。恆懼罹於大戾。弟來信。勸我總宜遵旨辦理。萬不可自出主意。余必依弟策而行。儘可放心。禍咎之來。本難逆料。然惟不貪財。不取巧。不沽名。不驕盈。四者。究可彌縫一二。

弟自任鄂撫。不名一錢。整頓吏治。外間知者甚多。并非全無公道。從此反求諸己。切實做去。安知大墜之後。無大

仲之日耶。

大局日壞。氣機不如辛壬癸甲等年之順。與其在任而日日如坐針氈。不如引退而寸心少受煎逼。亦未始非福。惟余辭江督。筠仙辭淮運司。均不能如願。恐弟事亦難必允准。至於官相入覲。第一日未蒙召見。聖眷亦殊平平。弟謂其受恩彌重。係閱歷太少之故。大抵中外人心。皆以弟之彈章多係實情。而聖意必留此公。爲旗人稍存體面。亦中外人所共亮也。

世局日變。物論日淆。吾兄弟高爵顯官。爲天下第一指目之家。總須於奏疏中加意檢點。不求獲福。但求免禍。諸事棘手焦灼之際。未嘗不思遁入眼閉箱子之中。昂然甘寢。萬事不視。或此今日人世差覺快樂。乃焦灼愈甚。公事愈煩。而長夜快樂之期。杳無音信。且又晉階端揆。任責愈重。指摘甚多。人以極品爲榮。吾今實以爲苦惱之境。然時世所處。萬不能置身事外。亦惟有「做一日和尚。撞一日鐘」而已。

閱歷數十年。豈不知宦途有夷必有險。有興必有衰。而當前有不能遽釋者。但求不大干咎戾。爲宗族鄉黨之羞足矣。

宦途險巇。在官一日。卽一日在風波之中。能妥貼登岸者。實不易易。（以上家書）

自以菲材。久竊高位。兢兢慄慄。惟是不貪安逸。不圖豐豫。以是報國家之厚恩。卽以是稍惜祖宗之餘澤。

凡經制之現行者。查典。凡因革之有由者。查事例。武職養廉。記始於乾隆四十七年補足名糧案內。文職養廉。記始於雍正五年耗羨歸公案內。爾細查武養數目。卽日先寄。又督提之官。見明史職官志。都察院條內。本與總督巡撫等官。皆係文職而帶兵者。不知何時改爲武職。

沿途州縣有送迎者。除不受禮物酒席外。爾兄弟遇之。須有一種謙謹氣象。勿恃其清介。而生傲情也。

余決計此後不復作官。亦不作回籍安逸之想。但在營中照料雜事。維繫軍心。不居大位享大名。或可免於大禍大謗。若小小凶咎。則亦聽之而已。

余自咸豐三年募勇以來。即自誓效命疆場。今老年病軀。危難之際。斷不肯吝於一死。以自負其初心。（以上家訓）

聞劉登香先生言。渠作外官。景况之苦。愈知我輩舍節儉。別無可以自立。若冀侍得一外官。以彌縫罅漏。缺病則無以自存。缺肥則不堪問矣。可不懼哉。

自正月以來。日日頽放。遂已一月。志之不立。一至於此。每觀此冊。不知所謂。可以爲人乎。聊存爲「告朔之餼羊」爾。

看書眼矇如老人。蓋安肆日偷。積偷之至。廢理都極懈弛。不復足以固肌膚。束筋骸。於是風寒易侵。日見疲輒。此不能居敬者之不能養小體也。又心不專一。則雜而無主。積之既久。必且歧求迭至。忿慾紛來。其究也。則搖搖如懸旌。皇皇如有所失。總之更「無主則己。而乃釀爲心病。此不能居敬者之不能養大體也。」是故吾入行父母之遺體。合居敬。更無別法。內則專靜純一。以養大體。外則整齊嚴肅。以養小體。如是而不自強。吾不信也。嗚呼。言出汝口。而汝則背之。是何肺腸。

見羅瞿江三縣令。因語言不合理。余怒斥之甚厲。頗失「爲人上者。泰而不驕。威而不猛」之義。

九弟信言。「古稱君有諍臣。臣有諍君。今兄有諍弟。」余近以居位太高。虛名太大。不得聞規諫之言爲慮。若九弟果能隨事規諫。又得一二嚴憚之友。時以正言相勸勉。內有直弟。外有畏友。庶幾其免於大戾乎。居高位者。何人不敗於自是。何人不敗於惡聞正言哉。

古人言。「晝課妻子。夜課夢寐。」吾於睡中夢中。總乏一種好意味。蓋猶未免爲鄉人也。

夜因武甯楊令與鄭奠互訐之案。頗爲鬱悒不平。繼思謙抑之道。凡事須力戒爭勝之心。痛自懲艾。身體若有病者。奄奄思睡。或以積摺文牘太多。此心歉然。若有所負。汝者而然與。

少荃論余之短處。總是儒緩。與往年周被甫所論略同。

誠中形外。根心生色。古來有道之士。其淡雅和潤。無不達於面貌。余氣象未稍進。豈嗜欲有未淡邪。機心未消邪。嘗猛省於寸衷。而取驗於顏面。

二日因作摺。將公事拋荒未斷。古人有兼人之材。余不特不能兼人。即一日兼治數事。尙有未逮。甚矣。余之鈍也。日內應酬繁多。神昏氣乏。若不克支持者。然後知高官巨職。足以損人之智。而長人之傲也。

古人云。「其爲人也。多暇日者。其出人也。不遠矣。」余身當大任。而月餘以來。竟日暇逸。不事事。公私廢擱。實深慚懼。惟當迅速投劾去位。冀免愆尤耳。

是日應辦奏稿。方不誤次日發報之期。一念之情。遂廢本日之常課。又愆奏事之定期。乃知天下百病。生於懶也。近日省察自己短處。每日怠玩時多。治事時少。看書作字。治私事時多。察人看稿。治公事時少。職分所在。雖日讀古書。其驥官廢弛。與廢於酒色游戲者。一也。莊子所謂「減穀所業不同。其於亡羊均也。」本無知人察吏之才。而又度外置之。對京察褒嘉之語。殊有愧矣。

日內鬱鬱不自得。愁腸九迴者。一則餉項太絀。恐金陵兵譁。功敗垂成。徽州賊多。恐三城全失。貽患江西。一則以用事太久。恐中外疑我擅權專利。江西垂罄之事。不勝則餉缺而兵潰。固屬可慮。勝則專利之名尤著。亦焉可慮。反復籌思。惟告病引退。少息二三年。庶幾嘗取其輕之義。若能從此事機日順。四海銷兵。不用吾引退。而長終山林。不復出而與聞政事。則公私之幸也。

戶部奏摺。似有意與此間爲難。寸心抑鬱不自得。用事太久。恐人疑我兵權太重。利權太大。意欲解去兵權。引退數年。以息疑謗。故本日具摺請病。以明不敢久握重柄之義。

自古高位重權。蓋無日不在憂患之中。其成致禍。禍則天也。

因念家中多故。紀澤兒病未全愈。心中焦慮之至。而天氣陰雨作寒。恐傷麥收。又不知兵事之變態。何如。甯覺憂皇。不能自甯。因集古人成語。作一聯以自箴曰。「彊勉行道。莊敬日強。」上句箴余近有鬱抑不平之氣。不能彊

勉以安命。下句箴余近有頹散不振之氣。不能莊敬以自奮。惜強字相同。不得因發音變讀。而易用耳。沉弟談久。稍發據其抑鬱不平之氣。余稍沮止勸解。仍令畢其說。以暢其懷。沉弟所陳。多切中事理之言。遂相與縱談。至三更。其諫余之短言。「虞兄弟骨肉之間。不能養其生機。而使之暢。遂深爲忠告曲盡。」

聞家中修整「富厚堂」屋宇。用錢共七千串之多。不知何以浩費如此。深爲駭歎。余生平以起屋買田爲仕宦之惡習。誓不爲之。不料奢靡若此。何顏見人。平日所說之話。全不踐言。可羞孰甚。李翁漢言。「照李希帥之樣。打銀壺一把。爲炖人參燕窩之用。費銀八兩有奇。深爲愧悔。」今小民皆食草根。官員亦多窮困。而吾居高位。驕奢若此。且盜廉儉之虛名。慚愧何地。以後當於此等處。痛下鍼砭。

初到直隸。頗有民望。今諸事皆難振作。恐虎頭蛇尾。爲人所笑。尤爲內疚於心。輾轉慚沮。刻不自安。日月如流。倏已秋分。學業旣一無所成。而德行不修。尤悔叢集。自願竟無湔除改徙之時。憂媿曷已。

夢在場中考試。枯澀不能下筆。不能完卷。焦急之至。驚醒。余以讀書科第。官躋極品。而於學術一無所成。亦不能完卷之象也。媿歎無已。

余年來出處之間。多可媿者。爲之踟躕不安。如負重疚。年若位高。豈堪常有咎悔之事。

到江甯任。又已兩月餘。應辦之事。全未料理。悠悠忽忽。忝居高位。每日飽食酣眠。慚愧至矣。閻溫公謹習疏。慨然有感。

隋開皇之十二年。有司家府藏皆滿。無所容。積於廊廡。曾不一紀。隋帝嗣位。東征高麗。南幸江都。遂至困窮。唐天寶之八載。帝觀帑藏。金帛充牣。古今罕儔。曾不數年。祿山反叛。九廟焚燬。六飛播遷。遂以大變。故國之富不足恃。獨恃人主有兢兢業業之一心耳。

李牧在趙。匈奴不侵。汲黯在朝。淮南寢謀。林肯爲相。閻鳳反。盧杞柄政。李懷光叛。反叛。非其本心也。故人君謹置左右之臣。其益於人國者。多矣。

陳湯斬郅支單于之首。匡衡抑其功。僅得封關內侯。郝豐荃得突厥默啜之首。宋璟抑其功。僅得授郎將。其後湯以非罪而流。靈荃以勸哭而死。宰相妨功。病能人之不得伸於其志者。多矣。

唐宣宗之立。不能平於李德裕。至毛髮爲之灑淅。此與霍光驂乘。而宣帝芒刺在背者。何以異。功高震主。或不無自伐之容。「公孫碩膚。赤烏几几。」此周公所以爲大聖也。

裴耀卿置諭場於河口。河口。卽汴水達於黃河之口也。南人舟運江淮之米。自汴以達河口。吳人不習海漕。便令輸米於河口之倉而去。則吳人便矣。三門。卽砥柱山。在洛陽之東。地最險。不可行舟。耀卿於三門之東西。各置一倉。又鑿山開車路十八里。以避三門之險。江淮之米。既輸於河口之倉矣。官爲別雇舟。舫河漕至三門之東。視水可通。則徑以舟過三門。水險。則由車路挽過三門。輸入三門以西之太原倉。然後入漕。以漕關中。自江淮至河口。自河口至三門。自三門入漕。至長安。凡三次轉搬。乃得達也。今天下之漕糧。概用長運。漕至袁浦。黃高於清。則百端營謀。行蠶塘渡舟之下策。虞黃倒杆。禍之巨患。種種敗壞。未知所底。故鄙意常欲行搬運之法。於袁浦置倉。楊莊各倉。亦修葺之。分天下之漕艘。半置河以南。半置河以北。每年各運兩次。爲河帥者。治河則不願淮。治淮則不願河。治運則不願河淮。庶幾易爲力乎。

天下之大事。宜考究者。凡十四宗。曰官制。曰財用。曰鹽政。曰漕務。曰錢法。曰冠禮。曰昏禮。曰喪禮。曰祭禮。曰兵制。曰兵法。曰刑律。曰地輿。曰河渠。皆以本朝爲主。而歷溯前代之沿革本末。衷之以仁義。歸之以易簡。前世所襲誤者。可以自我更之。前世所未及者。可以自我創之。其苟且者。知將來之必做。其至當者。知將來之必因。所謂「雖百世可知也。」

文官加養廉。始於雍正三年之耗羨歸公。武官加養廉。始於乾隆四十六年之補缺額名糧。王震軒來辭行。將以明日往南豐。余告以用紳士之法。宜少予以名利。而仍不訛破。以養其廉恥。震軒深以爲然。溫循吏傳。太史公所謂「循吏者。法立令行。能識大體」而已。後世專尙慈惠。或以煦煦爲仁者當之。失循吏之

義矣。思爲將帥之道，亦以法立令行，整齊嚴肅爲先，不貴照運也。

三代下不矯激，不足以得美名，不要結，不足以得民心。

人才以陶冶而成，不可眼孔甚高，動謂無人可用。

胡中丞言：「州縣辦上司衙門之差，所費不過百千，而其差總家丁開報，至三四千串之多。縣令無所出，則於錢糧不解，積爲虧空。皆天家受其弊，故湖北州縣，現無絲毫差事。如有向例，由州縣辦差者，皆由藩庫發實銀與州縣，令其發給，不使州縣賠墊分毫。其名則天家喫虧，其實則州縣無可藉口。錢漕掃數清解，爲天家添出數十倍之利。」信爲知言。

居高位之道，約有三端。一曰不與，若謂於己毫無交涉也。二曰不終，古人所謂日慎一日，而恐其不終，蓋居高履危，而能善其終者，鮮矣。三曰不勝，古人所謂「懷乎若朽索之馭六馬」，慄慄危懼，若將墮於深淵，蓋惟恐其不勝任也。「鼎折足，覆公餗，其形渥凶。」言不勝其任也。方望溪言：「漢文帝之爲君，時時有謙讓，若不克居之意。」其有得於不勝之義者乎。孟子謂：「周公有不合者，仰而思之，夜以繼日。」其有得於惟恐不終之義者乎。

盛世創業垂統之英雄，以襟懷豁達爲第一義，末世扶危救難之英雄，以心力勞苦爲第一義。

料理官事，摘由備查，一也。圈點京報，二也。注解摺拒，三也。此三者，夜間之功課，亦留心庶事之一法也。

沅弟信極論文士之涉於虛空，不可用其言，頗切當。

李次青赴徽州，余與之約法五章。曰戒浮，謂不用文人之好大言者。曰戒謙，謂次青好爲逾恆之謙，盛寵納侮也。曰戒濫，謂銀錢保舉，宜有限制也。曰戒反覆，謂次青好朝令暮改也。曰戒私，謂用人當爲官擇人，不爲人擇官也。委員之道，以四者爲最要。一曰習勞苦以盡職。一曰崇儉約以養廉。一曰勤學問以廣才。一曰戒傲情以正俗。紳士之道，以四者爲要。一曰保愚懦以庇鄉。一曰崇廉讓以奉公。一曰禁大言以務實。一曰擴才識以待用。九弟臨別深言：「馭下宜嚴，治事宜速。」余亦深知馭軍馭吏，皆莫先於嚴，特恐明不旁燭，則嚴不中禮耳。

治世之道。專以致賢養民爲本。其風氣之正與否。則絲毫皆推本於一己之身與心。一舉一動。一語一默。人皆化之。以成風氣。故爲人上者。專重修身。以下效之者。速而且廣也。

一省風氣。依乎督撫司道及首府數人。此外官紳。皆隨風俗爲轉移者也。

周致甫將赴上海催餉。余勉之以維持風教。勿自菲薄。引顧亭林日知錄「匹夫之賤。與有責焉。」一節以勸之。爲督撫之道。卽與師道無異。其訓飭屬員殷殷之意。卽與人爲善之意。孔子所謂誨人不倦也。其廣諮忠益。以身作則。卽取人爲善之意。孔子所謂爲之不厭也。爲將帥者之於偏裨。此皆以君道而兼師道。故曰「作之君。作之師。」又曰「民生於三。事之如一。」皆此義爾。

爲政之道。得人。治事。二者並重。得人不外四事。曰廣收。慎用。勤教。嚴繩。治事不外四端。曰經分。綸合。詳思。約守。操斯八術以往。其無所失矣。

近日公事不甚認真。人客頗多。志趣較前散漫。大約吏事。軍事。餉事。文事。每日須以精心果力。獨造幽奧。直湊單微。以求進境。一日無進境。則日日漸退矣。以後每日留心吏事。須從勤見僚屬。多問外事下手。留心軍事。須從教訓將領。屢閱操練下手。留心餉事。須從慎擇卡員。比較入數下手。留心文事。須從恬吟聲調。廣徵古訓下手。每日午前。於吏事軍事加意。午後。於餉事加意。燈後於文事加意。以一縷精心。用於幽微之境。縱不日進。或可免於退乎。

每日應辦之事。積擱甚多。當於清早。單開本日應了之件。日內了之。如農家早起分派本日之事。無本日不了者。庶積壓較少。

國家以生殺予奪之權。授之督撫將帥。猶東家以銀錢貨物。授之店中衆夥。若保舉太濫。視名器不甚愛惜。猶之賤售浪費。視東家之貨財不甚愛惜也。介之推曰「竊人之財。猶謂之盜。况貪天之功。以爲己力乎。」余則略改之曰「竊人之財。猶謂之盜。况假國家之名器。以市一己之私恩乎。」余忝居高位。惟此事不能力挽頹風。深爲

慚愧。

是日在途中。見麥稼爲旱所傷。高不過二二三寸。節氣已屆收刈。而吐穗極少。間有用人力施水灌溉者。高或六七寸。色青而穗亦可觀。嵇康所云「一溉者後亡」。信人力足以補天事之窮。然百分中不過二三分。餘則立見黃稿。縱三日之內大雨。亦無救矣。目擊心傷。不忍細看。

爲疆吏者。全仗年豐民樂。此心乃可以自恬。若事事棘手。則竟日如在桎梏中矣。

閱吳文節公集。觀其批屬員之稟。甚爲嚴明。對之有愧。吾今日之爲督撫。真尸位耳。

古聖王制作之事。無論大小精粗。大抵皆本於平爭。因勢善習。從俗便民。救敝。非此六者。則不輕於制作也。吾輩者志事。以老莊爲體。禹墨爲用。以不與不違。不稱三者爲法。若再深求六者之旨。而不輕於有所興作。則咎戾鮮矣。（以上日記）

蘇垣爲仕宦鱗萃之場。以弟所聞。大抵揮霍者蒙卓聲。謹守者沈散秩。生辣者鵠起。和厚者蟻伏。標榜者互相援引。務實者獨守岑寂。揆斯三者。於吾兄俱未爲諧叶。然君子之道。不汲汲於名望。

耐平不爲大府所器重。則耐冷爲要。新米或時迫窘。則耐苦爲要。聽鼓不勝其煩。翻應不勝其擾。則耐勞爲要。與我輩者。或以聲氣得利。在我後者。或以干請得榮。則耐閒爲要。安分竭力。泊然如一無所求者。不過二年。則必爲上官僚友所欽屬矣。此二年中。悉力講求捕盜之法。催科之方。此兩事爲江南尤急之務。一旦蒞任。則措之裕如。人見其耐也如此。又見其有爲如彼。雖欲不彪炳。其可得乎。

外吏之難。蓋十倍於京輦。大約佩章多休。佩弦多咎。而閣下尤爲要務。語曰。「察見淵中魚者不祥。」願閣下爲璞玉之渾含。不爲水晶之光明。則有以自全而亦不失已。

國家政體。當持其大端。不宜區區頻施周罔。遮人於過。卽清釐籍貫一事。亦謂宜崇寬大。未可操之太切。使人欲歸不得。欲留不許。進退獲尤。非盛朝宏采庶士之誼。

命數有定。李林甫、秦檜，自以爲得之人謀，而不知其縱不奔營，亦自得爲宰相。徒枉爲小人，叢詬罵也。

國藩近況本窘迫，然際此歲年，卽更得江浙試學差，尙忍於廉俸之外，絲毫有所取耶？外顧斯民，內顧身累，雖同一無可奈何，然當此之時，區區身家之困窮，奚足言哉？況困窮尙未甚耶。

自客春求言以來，在廷獻納，不下數百餘章，其中豈乏嘉謨至計，或下所司核議，輒以「毋庸議」三字了之，或者通諭直省，則奉行一文之後，已復高閣束置，若風馬牛之不相及，如足下所條數事，蓋亦不能出乎交議通諭之外，其究亦歸於簿書塵積堆中，而書生之血誠，徒以供胥吏唾棄之具，每念及茲，可爲憤懣。

國藩嘗私慮以爲天下有三大患，一曰人才，二曰財用，三曰兵力。

簪紱之榮，驕人之態，雖在不肖，猶能滌此腥穢，足下乃以銜版覓投，毋乃細人視我，而鄙爲不足深語，今亦不復相譬，但求捐此陋僞，而時以德言箴我，幸甚無量。

「有所畏而不敢言者，人臣貪位之私心也，不務其本而徒言其末者，後世苟且之學也。」四語，國藩讀之，尤復悚感。蓋古之君子，不鄙其君爲不可與語堯舜之道，不薄其友爲不足與言孔孟之學，不自菲其身，不可爲聖賢，而姑悠悠浮沈於庸衆之中，豈好爲高論哉？非此則不完其本然之量，是不敬其君，不敬其友，而自蹈其身於侮辱之途者也。

方今之務，莫急於勤辦土匪一節，會匪、邪教、盜賊、痞棍數者，在在多有，或嘯聚山谷，糾結黨羽，地方官明知之，而不敢嚴辦者，其故何哉？蓋搜其巢穴，有拒捕之患，畏其夥黨，有報復之懼，上憲勤轉，有文書之煩，解犯往來，有需索之費，以此數者，躊躇於心，是以隱忍不辦，幸其伏而未動，姑相安於無事而已，豈知一旦竊發，輒釀成巨案，劫獄戕官，卽此伏而未動之土匪也。然後悔隱忍柔慈之過，不已晚哉！自粵匪滋事以來，各省莠民，常懷不肖之心，狡焉思犯上而作亂，一次不懲，則膽大藐法，二次不懲，則聚衆橫行矣。

刻下所急，惟在「練兵」「除暴」二事，練兵，則猶七年之病，求三年之艾，除暴，則借一方之良，鋤一方之莠，故

急急訪求各州縣公正紳耆。佐我不逮。先與以一書。然後割切示諭之。

自知百無一能。聊貢此不敢畏死之身。以與城中父老。共此患難。

義不敢潛身顧私。以自鄰於退縮畏死者之所爲。

三四十年來。一種風氣。凡凶頑醜類。概優容而待以不死。自謂寬厚。載福而不知萬事墮壞於冥昧之中。浸漬以釀今日之流寇。豈復可閻弱寬縱。又令風子鋒起。

三四十年来。應殺不殺之人。充滿山谷。遂以釀成今日流寇之禍。豈復可姑息優容。養賊作子。重興萌蘖而貽大患乎。

二三十年來。應辦不辦之案。應殺不殺之人。充塞於郡縣山谷之間。民見夫命案盜案之首犯。皆得逍遙法外。回已藐視王章而弁髦官長矣。又見夫專匪之橫行。土匪之屢發。乃益囂然不靖。痞棍四出。劫搶風起。各霸一方。凌籍小民而魚肉之。鄙意以爲宜大加懲創。擇其殘害於鄉里者。重則處以斬梟。輕亦立斃杖下。戮其尤兇橫者。而其黨始稍戢。誅其尤害民者。而良民始稍息。但求於孱弱之百姓。少得安恬。即吾身得武健嚴酷之名。或有損於陰陽慈祥之說。亦不敢辭。

世風既薄。人人各挾不靖之志。平居造作謠言。幸四方有事。而欲爲亂。稍待之以寬仁。愈囂然自肆。白晝劫掠都市。視官長蔑如也。不治以嚴刑峻法。則風子紛起。將來無復措手之處。是以壹意殘忍。冀回頽風於萬一。書生豈解好殺。要以時勢所迫。非是則無以鋤強暴而安我孱弱之民。

保甲之法。誠爲善政。然刑定科條。散布鄉愚。求能行法之人。不肯斂於民間。蓋或百里而不得一賢焉。世教既衰。人人各逞其亡等之欲。魚肉孱民而刀匕之。官司布一甲令。徒以供若輩橫索暴斂之名目。故團練保甲爲今日之要務。而鄙人妄謂皆不可鹵莽以行。滅裂以舉。人心陷溺。固已抵此。獨嚴縛匪黨。動與磔死。差令鄉里善良。得以伸彼之氣而應吾之令耳。

集思廣益。本非易事。而施之於城會之內。尤易爲人欺蔽。日之抵吾門者。或上書獻策。或面陳機宜。大抵不出尊書三端之外。祈所謂「陽驕」者也。然因此而盡廢吐握之風。則又不可。要當內持定見。而六轡在公。外廣延納。而萬流赴壑。乃爲盡善。我思古人。殆應如此。而區區則未逮矣。

方今民窮財困。吾輩勢不能別有喫咻生息之術。計惟力去害民之人。以聽吾民之自學自活而已矣。

用法從嚴。非漫無條律。一師屠伯之爲。要以精微之意。行吾威厲之事。期於死者無怨。生者知警。而後寸心乃安。勸捐一事。此間亦自有落難過爾淺易。則小民有以朝廷之陋。而視名器爲無足重輕。捐輸本非民所樂從。卽奏請別樹一幟。徧札州縣委員守催。官樣愈多。去題愈遠。不若擇好友較多。地方較富之縣。以鄙人肫肫之意。宣布於人。精衛填海。杜鵑泣血。或者諒我寸誠。猶有一二起而應者。亦未可知。紳以通其情。官以助其勢。其并無交好。官亦隔閡之縣。則不復過而相問。非愛惜道學門面。亦實見官樣文章之不足集事。芻狗已陳。斯民之厭棄也久矣。

今大局糜爛至此。不欲復執守制不出之初心。能盡一分力。必須拚命效此一分。成敗利鈍。付之不問。

家有父兄。病勢沉重。衆子弟禱神求醫。晝夜拯治。不得謂子弟愚陋。遂不使與聞醫藥之事。亦不得令愚陋之子弟。擅膺專主。亂投誤劑。國藩亦子弟中之愚陋者也。擅膺亂投。則吾豈敢。若刳股和羹。籲誠請代之事。則亦嘗聞古人之風。跛者未嘗不思千里。眇者未嘗不慕離朱也。

二三十年來。士大夫習於優容苟安。揄修袂而養媮步。倡爲一種不白不黑不痛不癢之風。見有慷慨感激以鳴不平者。則相與譏其後。以爲是不更事。輕淺而好自見。國藩昔廁六曹。目擊此等風味。蓋已痛恨刺骨。今年承乏團務。見一二當軸者。自藩爾善。深閉固拒。若惟恐人之攘臂而與其間也者。欲固執謙德。則於事無濟。而於心亦多不可耐。於是攘臂越俎。誅斬匪徒。處分重案。不復以相關白。方今主憂國弱。僕以近臣而與聞四方之事。苟利民人。卽先部治而後上聞。豈爲一己自專威福。所以辱朝廷也。

國藩從官有年。飽閱京洛風塵。達官貴人。優容養望。與在下者輒熟和同之象。蓋已稔知之。而憤嘗之。積不能平。乃變而有慷慨激烈軒爽流弊之一途。思欲稍易三四十年來不白不黑不痛不癢牢不可破之習。而矯枉過正。或不免流於意氣之偏。以是屢蹈愆尤。叢譏取戾。而仁人君子。固不當責以中庸之道。且當憐其有所激而爲之之苦衷也。

大局糜爛至此。志士仁人。又豈宜晏然袖視。坐聽狂賊之屠戮生靈。而不一省顧耶。

僞軍師旅帥之怙惡者。鄙意誅其身。不必及其孥。戮其人。不必焚其屋。大江南北。陷入賊中。數十州縣。每縣污僞。命受僞職者。不下千家。每家皆有親黨。有仇怨。親黨則謂其被脅可憐。仇怨則言其從逆可誅。欲一一宥過刑辜。情真罪當。實非易易。

時事愈艱。則挽回之道。自須先之以戒懼惕厲。

討賊則可。服官則不可。義正辭嚴。何能更贊一語。惟今日受討賊之任者。不若地方官之確有憑藉。晉宋以後之都督三州四州六州八州軍事者。必求領一州刺史。唐末之招討使。統軍使。團練使。防禦使。處置應援……等使。遠不如節度使之得勢。皆以得治土地人民故也。

細澤孔子所稱。『從其利者。吾弗知也。』似苟非從其利者。聖人猶將許其舍福而行權。後世不講於死心之謀利與否。而概援一『權』字以自覆。往往爲吏氏所譏。或稱陰規起復。或稱風某某奏請起復。覆軌相尋。雖以安穩之賢。而彭古懸彈章。不能無登於青簡。

竊觀自古大亂之世。必先變亂是非。而後政治顛倒。災害從之。屈平之所以憤激沉身而不悔者。亦以當日是非淆亂爲至痛。故曰。『蘭芷變而不芳。荃蕙化而爲茅。』又曰。『固時俗之從流。又孰能無變化。』傷是非之日移日積。而幾不能自主也。後世如漢晉唐宋之末造。亦由朝廷之是非先紊。而後小人得志。君子有皇皇無依之象。推而至於一省之中。一軍之內。亦必是非不詭於正。而後其政績少有可觀。賞罰之任。視乎權位。有得行。有不得

行。至於維持是非之公。則吾輩皆有不可辭之任。顧亭林先生所稱。「匹夫與有責」焉者也。

國藩昔年銳意討賊。思慮頗專。而事機未順。援助過少。拂亂之餘。百務俱廢。接人應事。恆多怠慢。公牘私書。或未酬答。坐是與時乖舛。動多齟齬。此次再赴軍中。銷除「事求可。功求成」之宿見。虛與委蛇。絕去町畦。無不復之。緘吝。無不批之稟牘。小物克勤。訓應少周。藉以稍息浮言。

取利多而民怨。參劾多而官誅。有以此見告者。非不嘗自省。但不宜以鬱蓄心中耳。吾輩所慎之又慎者。只在「用人」二字上。此外竟無可著力之處。古人云。「若從流俗毀譽上討消息。必至站腳不牢。」待平日短處。亦只是在毀譽上討消息。近則思在用人當否上討消息耳。

邇來儀文彌加檢點。而真意反遜於前。將求一中之道而從事。又不可以遽幾。蓋曠然也。

宦途人情。薄本似紙。不獨蘇省爲然。即他省亦如出一轍。不獨節壽各例款爲然。即借出之項。賠出之款。一旦本官物故。便爾百呼罔應。

惟志所規。實不克踐。推之齊家治身讀書之道。何一不然。故弟近不課功效之多寡。但課每日之勤惰。來示企望鄙人於將來者。卽以此語卜之。自揣此後更無可望。但當守一「勤」字以終吾身而已。吾於「千鈞之裘。非一腋可成。大廈之傾。非一木可支。」今人心日非。吏治日壞。軍興十年至。而內外臣工。惕厲悔禍者。殆不多見。縱有大力匡持。尙恐瀾狂莫挽。况如弟之碌碌乎。

方今東南糜爛。時局多艱。吾輩當屏去虛文。力求實際。或者保全江西兩湖。以爲規復三吳之本。整躬率屬。黜浮崇真。想閣下亦有同情也。

三年之艾。不以未病而不蓄。九畹之蘭。不以無人而不芳。至要至要。

道光十九年。在漢口長沙會館見抽船釐。收者皆賣買微賤之人。坦然交易。無詐無虞。今雖以官抽濟餉。仍須帶幾分賣買交易氣象。不宜多涉官氣。牙帖尤賣買場中鄙瑣之事。尤不可經衙門人手。減冗員。裁浮費。二語似迂。

而關繫極鉅。批中所謂坐支者少。卽去浮費也。

楚材晉用。但當禮羅江西賢紳。兼進並收。不宜過示偏重。使豫章才俊有向隅之憾。其自湘來者。先給薪水。僞加禮貌。不必遽授以事。收之欲其廣。用之欲其慎。大約有操守而無官氣。多條理而少大言。本此四者以衡人。而於抽釐之道。思過半矣。

如有文可爲牧令。武可爲將領者。望無惜時時汲引。冀收「拔茅連茹」之效。若無實在出色之處。介乎有用無用之間。則可不必多薦。以不收則空勞往返。收之則漸成冗員也。大概觀人之道。以樸實廉介爲質。有其質而更傳以他長。斯爲可貴。無其質則長處亦不足恃。「甘受和。白受采。」古人所謂無本不立。義或在此。

軍興太久。地方糜爛。鄙意一面治軍剿賊。一面擇吏安民。二者斷斷不可偏重。擇吏之道。亦不外乎「有操守而無官氣。多條理而少大言」二語。

細觀今日局勢。若不從吏治人心上痛下工夫。滌腸盪胃。斷無挽回之理。

次青擅長過人處極多。惟弟與閣下知之最深。而短處。則患在無知人之明。於在高位者。猶或留心察看。分別貞邪。至於位卑職小。出己之下者。則一概援「善善從長」之義。無復覺有奸邪情僞。凡有請託。無不曲從。卽有詭狀發露。亦必多方徇容。此次青之短。將來位望愈高。終不免爲其所累。

吾輩均屬有志之士。亦忍辱耐苦之士。所差者。咬文嚼字。習氣未除。一心想學戰。一心又想讀書。所謂「鼯鼠五技而窮」也。

求人之道。須如白圭之治生。如鷹隼之擊物。不得不休。又如妹之有母。雉之有媒。以類相求。以氣相引。庶幾得一人。而可及其餘。大抵人才約有兩種。一種官氣較多。一種鄉氣較多。官氣多者。好講資格。好問樣子。辦事無驚世駭俗之象。語言無此防彼礙之弊。其失也。奄奄無氣。凡遇一事。但憑書辦家人之口說。憑文書寫出。不能身到。心到。口到。眼到。尤不能苦下身段。去事上禮察一番。鄉氣多者。好逞才能。好出新樣。行事則知己不知人。語言則顯

前不顧後。其失也一事未成。物議先騰。兩者之失。厥咎維均。人非大賢。亦斷難出此兩失之外。吾欲以「勞苦忍辱」四字教人。故且戒官氣。而姑用鄉氣之人。必取遇事體察。身到心到。口到眼到者。趙廣漢好用新進少年。劉晏好用土人理財。竊願師之。

公事知而不言。坐視成敗。自非所宜。閣下今補贛南實缺。尤不必過涉客氣。凡正話實話。多說幾句。久之人自能諒其心。卽直話亦不妨多說。但不可以訐爲直。尤不可背後攻人之短。除二戒外。概宜「知無不言。言無不盡」。大抵人才約有兩種。高明者好顧體面。恥居人後。獎之以忠。則勉而爲忠。許之以廉。則勉而爲廉。若是者。當以吾前信之。法行之。卽薪或稍優。誇許稍過。冀有一二人。才出乎其間。不妨略示假借。卑瑣者。本無遠志。但計錙銖。馭之以嚴。則生憚。防之稍寬。則日肆。若是者。當以來示之。法行之。俾得循循於規矩之中。以官階論。州縣以上。類多自愛。佐雜以下。類多算細。以釐務論。大卡總局。必求自愛之士。宜用鄧信之說。小卡分局。不乏算細之員。宜用來嘗熟思。袁紹之誅除宦豎。陳元禮之迫脅馬覓。雖一時快心之舉。然豈稍有儒生氣象者所能爲哉。又豈有儒生氣象者所應爲哉。

中興在乎得人。不在乎得地。漢遷許都而亡。晉遷金陵而存。拓跋遷雲中而興。遷洛陽而衰。唐明皇德宗再遷而皆振。信宗昭宗再遷而遂滅。宋遷臨安而盛昌。金遷蔡州而淪胥。大抵有憂勤之君。賢勞之臣。遷亦可保。不遷亦可保。無其君無其臣。遷亦可危。不遷亦可危。鄙人閱歷世變。但覺除得人以外。無一事可持。（以上書札）

（成敗無定）漢晁錯建議。削藩。厥後吳楚七國反。景帝誅錯而事以成。明齊泰黃子澄建議。削藩。厥後燕王南犯。建文誅齊黃而事以敗。我朝米思翰等議。削藩。厥後吳耿三叛並起。聖祖不誅米思翰而事以成。此三案者。最相類。或誅。或宥。或成。或敗。咸參差不一。士大夫處大事。決大疑。但當熟思是非。不必泥於往事之成敗。以遷就一時之利害也。

唐昭宗以王室日卑。發憤欲討李茂貞。賁宰相杜讓能專主兵事。杜讓能再三辭謝。言他日臣徒受冕錯之誅。不能弭七國之禍。厥後李茂貞進逼興平。禁軍敗績。京城大震。茂貞表請誅讓能。讓能曰。「臣固先言之矣。」上踴下不能禁。曰。「與卿訣矣。」是日貶讓能梧州刺史。尋賜自盡。斯則無故受誅。其差有甚於屍賈齊泰黃子澄。昭宗既強之於前。復誅之於後。此所以爲亡國之君也。國落在軍時。有一時與人定議。厥後挫敗。或少歸咎於人。不能無稍露於辭顏者。亦以見理未明之故耳。

後唐潞王慮石敬瑭之將反。李崧呂琦勸帝與契丹和親。薛文遇沮之。帝欲移石敬瑭鎮鄆州。文遇力贊成之。厥後敬瑭果反。引契丹大破唐兵。唐王見薛文遇曰。「我見此物肉顛。幾欲抽佩刀刺之。」大抵事敗而歸咎於謀主者。庸人之恆情也。

勸誠淺語十六條

勸誠州縣四條（上而道府下而佐雜以此類推）

一曰。治署內以端本。

宅門以內。曰上房。曰官親。曰幕友。曰家丁。頭門以內。曰書辦。曰差役。此六項者。皆署內之人也。爲官者。欲治此六項人。須先自治其身。凡銀錢一分一毫。一出一入。無不可對人言之處。則身邊之人不敢妄取。而上房。官親。幕友。家丁。四者皆治矣。凡文書案牘。無一不躬親檢點。則承辦之人不敢舞弊。而書辦差役二者。皆治矣。

二曰。明刑法以清訟。

管子荀子。文中子之書。皆以嚴刑爲是。以赦宥爲非。子產治鄭。諸葛治蜀。王猛治秦。皆用嚴刑以致入安。爲州縣者。苟盡心於民事。是非不得不剖辨。讞結不得不迅速。既求迅結。不得不刑惡人以伸善人之氣。非虐也。除莠所以愛苗也。懲惡所以安良也。若一案到署。不訊不結。不分是非。不用刑法。名爲寬和。實糊塗耳。嬾惰耳。縱姦惡以害善良耳。

三曰。重農事以厚生。

軍興以來。士與工商。生計或未盡絕。惟農夫則無一人不苦。無一處不苦。農夫受苦太久。則必荒田不耕。軍無糧。則必擾民。民無糧。則必從賊。賊無糧。則必變流賊。而大亂無了日矣。故今日之州縣。以重農爲第一要務。病商之錢。可取。病農之錢。不可取。薄斂以紓其力。減役以安其身。無牛之家。設法購買。有水之田。設法疏濬。要使農夫稍有生聚之樂。庶不至逃徙一空。

四曰。崇儉樸以養廉。

近日州縣廉俸入款。皆無著落。而出款仍未盡裁。是以艱窘異常。計惟有節用之一法。尙可公私兩全。節用之道。莫先於人少。官親少。則無需索酬應之繁。幕友家丁少。則減薪工雜支之費。官廚少一雙之箸。民間寬一分之力。此外衣服飲食。事事儉約。聲色淫煙。一一禁絕。不獻上司。不肥家產。用之於己者有節。則取之於民者有制矣。勸誠營官四條（上而統領下而哨弁以此類推）

一曰。禁騷擾以安民。

所惡乎賊匪者。以其淫擄焚殺擾民害民也。所貴乎官兵者。以其救民安民也。若官兵擾害百姓。則與賊匪無殊矣。故帶兵之道。以禁止擾民爲第一義。百姓最怕者。惟強擄民夫。強佔民房二事。擄夫則行者辛苦。居者愁怨。佔房則器物毀壞。家口流離。爲營官者。先禁此二事。更於淫搶壓買等事。一一禁止。則造福無窮矣。

二曰。戒烟賭以防惰。

戰守乃極勞苦之事。全仗身體強壯。精神完足。方能敬慎不敗。洋烟賭博二者。既費銀錢。又耗精神。不能起早。不能守衛。斷無不誤軍事之理。軍事最喜朝間。最忌暮氣。惰則皆暮氣也。洋烟癮發之人。涕淚交流。遍身癱軟。賭博勞夜之人。神魂顛倒。竟日癡迷。全是一種暮氣。久驕而不敗者。容或有之。久惰。則立見敗亡矣。故欲保軍士常新之朝氣。必自戒烟賭始。

三曰。勤訓練以禦寇。

訓有二端。一曰訓營規。二曰訓家規。練有二端。一曰練技藝。二曰練陣法。點名演操。巡更放哨。此將領教兵勇之營規也。禁嫖賭。戒游惰。慎語言。敬尊長。此父兄教子弟之家規也。爲營官者。待兵勇如子弟。使人人學好。個個成名。則衆勇感之矣。練技藝者。刀矛能保身能刺人。鎗礮能命中能及遠。練陣法者。進則同進。站則同站。登山不亂。越水不雜。總不外一熟字。技藝極熟。則一人可敵數十人。陣法極熟。則千萬人可使如一人。

四曰。尙廉儉以服衆。

兵勇心目之中。專從銀錢上著意。如營官於銀錢不苟。則兵勇畏而且服。若銀錢苟且。則兵勇心中不服。口中譏議。不特扣減口糧。缺額截曠而後譏之也。卽營官好多用親戚本家。好應酬上司朋友。用營中之公錢。謀一身之私事。也算是虛糜餉銀也。難免兵勇譏議。欲服軍心。必先尙廉介。欲求廉介。必先崇儉樸。不妄花一錢。則一身廉。不私用一人。則一營廉。不獨兵勇畏服。亦且鬼神欽伏矣。

勸誠委員四條（向無額缺現有職事之員皆歸此類）

一曰。習勤勞以盡職。

觀於田夫農父。終歲勤勞而少疾病。則知勞者所以養身也。觀於舜禹周公。終身憂勞而享壽考。則知勞者所以養心也。大抵勤則難朽。逸則易腐。凡物皆然。勤之道有五。一曰身勤。險遠之路。身往驗之。艱苦之境。身親嘗之。二曰眼勤。遇一人必詳細察看。接一文。必反覆審閱。三曰手勤。易棄之物。隨手收拾。易忘之物。隨筆記載。四曰口勤。待同僚則互相規勸。待下屬則再三訓導。五曰心勤。精誠所至。金石亦開。苦思所積。鬼神亦通。五者皆到。無不盡之職矣。

二曰。崇儉約以養廉。

昔年州縣佐雜。在省當差。并無薪水銀兩。今則月支數十金。則猶嫌其少。昔年舉貢生員。在外坐館。不過每月數

金。今則增至一兩倍而猶嫌其少。此所謂不知足也。欲學廉介。必先知足。觀於各處難民。徧地餓殍。則吾輩之安居衣食已屬至幸。尙何奢望哉。尙敢暴殄哉。不特當廉於取利。并當廉於取名。毋貪保舉。毋好虛譽。事事知足。人人守約。則氣運可挽回矣。

三曰。勤學問以廣才。

今世萬事紛紜。要之不外四端。曰軍事。曰吏事。曰餉事。曰文事而已。凡來此者。於此四端之中。各宜精習一事。習軍事則講究戰攻防守地勢賊情等件。習吏事則講究撫字催科聽訟勸農等件。習餉事則講究了漕釐捐開源節流等件。習文事則講究奏疏條教公牘書函等件。講究之法。不外「學」「問」二字。學於古則多看書籍。學於今則多見榜樣。問於當局則知其甘苦。問於旁觀則知其效驗。勤習不已。才自廣而不覺矣。

四曰。戒傲情以正俗。

余在軍日久。不識術數占驗。而頗能預知敗徵。大約將士有驕傲氣者。必敗。有怠惰氣者。必敗。不獨將士然也。凡委員有傲氣者。亦必僨事。有情氣者。亦必獲咎。傲情之所起者微。而積久遂成風俗。一人自是。將舉國予聖自雄矣。一人學起。將舉國俾晝作夜矣。今與諸君約。多做實事。少說大話。有勞不避。有功不矜。人人如此存心。則勦業自此出。風俗自此正。人材亦自此盛矣。

勸誠紳士四條（本省鄉紳外省客游之士皆歸此類）

一曰。保愚懦以庇鄉。

軍興以來。各縣皆有紳局。或籌辦團練。或支應官軍。大抵皆斂錢以集事。或酌量捐資。或按畝派費。名爲均分勻派。實則高下參差。在局之紳者少出。不在局之愚懦多出。與局紳有聲氣者少出。與局紳無瓜葛者多出。與局紳有風怨者。不但勒派多出。而且嚴催凌辱。是亦未嘗不害民也。欲選紳士。以能保本鄉愚懦者爲上等。能保愚懦。雖僞職亦尙可恕。凌虐愚懦。雖巨紳亦屬可誅。

二曰。崇廉讓以奉公。

凡有公局。卽有專管銀錢之權。又有勞績保舉之望。同列之人。或爭利權而相怨。或爭保舉而相軋。此不廉也。始則求縣官之一札以爲榮。繼則大柄下移。毫無忌憚。衙門食用之需。仰給紳士之手。擅作威福。藐視官長。此不遜也。今特申戒各屬紳士。以敬畏官長爲第一義。財利之權。歸之於官。賞罰之柄。操之自上。卽同列衆紳。亦互相推讓。不爭權勢。紳士能潔己而奉公。則庶民皆尊君而親上矣。

三曰。禁大言以務實。

以諸葛之智勇。不能克魏之一城。以范韓之經綸。不能制夏之一隅。是知兵事之成敗利鈍。皆天也。非人之所能爲也。近年書生侈口談兵。動輒曰克城若干。拓地若干。此大言也。孔子曰。『攻其惡。無攻人之惡。』近年書生。多好攻人之短。輕詆古賢。苛責時彥。此亦大言也。好談兵事者。其闊歷必淺。好攻人短者。其自修必疏。今與諸君子約。務務實之學。請自禁大言始。欲禁大言。請自不輕論兵始。自不道人短始。

四曰。擴才識以待用。

天下無現成之人才。亦無生知之卓識。大抵皆由勉強磨鍊而出耳。淮南子曰。『功可強成。名可強立。』董子曰。『強勉強問。則聞見博。強勉強道。則德日起。』中庸所謂。『人一己百。人十己千。』卽勉強工夫也。今士人皆思見用於世。而乏用世之具。誠能可信於載籍。問途於己經。苦思以求其通。躬行以試其效。勉之又勉。則識可漸進。才必漸充。才識足以濟世。何患世莫已知哉。

以上十六條。分之。則每一等人各守四條。合之。則凡諸色人皆可參觀。聖賢之格言甚多。難以備述。朝廷之律例甚密。亦難周知。只此殘近之語。科條在此。黜陟亦在此。願我同人共勉焉。咸豐十一年九月。曾國藩識。（以上雜著）

訓戒軍中要務。

一。營中吃飯宜早。此一定不易之理。即現在粵匪暴亂。爲神人所共怒。而其行軍。亦係四更吃飯。五更起行。營中起大星。吃飯太晏。是一大壞事。營規振刷不起。即是此咎。

一。紮營一事。男每苦口教各營官。又下札教之言。「築牆須八尺高。三尺厚。壕溝須八尺寬。六尺深。牆內有內壕一道。牆外有外壕二道或三道。壕內須密釘竹籤。」云云。岳州之潰敗。即係因未能紮營之故。嗣後當嚴戒各營也。

一。調軍出戰。不可太散。此後不可分散。然即合爲一氣。而我軍僅五千人。賊尙多至六七倍。擬募陸勇萬人。乃足以供分布耳。

一。破賊陣法。平日男訓戒極多。兼畫圖訓諸營官。二月十三日。男親畫賊之蓮花抄尾陣。寄交璞山。璞山並不回信。寄交季弟。季弟回信。言賊了無伎倆。並無所謂抄尾陣。寄交楊名聲。鄒壽璋等。回信言當留心。茲訓言當用常山蛇陣法。必須極熟極精之兵勇。乃能如此。昨日岳州之敗。賊並未用抄尾法。交手不過一個時辰。即紛紛奔退。若使賊用抄尾法。則我兵更膽怯矣。若兵勇無膽無藝。任憑好陣法。他也不管。臨陣總是奔回。實可痛恨。

一。拿獲可疑之人。以後必嚴辦之。斷不姑息。
大亂之理。豈盡由人力。亦蒼蒼者有以主之耳。

余食祿有年。受國厚恩。自當盡心竭力。辦理軍務。一息尙存。此志不懈。此事登場甚易。收身甚難。鋒鏑至危。家庭至樂。何必與兵事爲緣。兵猶火也。易於見滅。難於見功。紮營不可離城太近。甯先遠而漸移向近。不可先近而後退向遠。

多則不悍。悍則不多。蓋賊多。則中有裹脅之人。彼亦有生手。彼亦有破綻。吾轉得乘隙而入矣。軍中器械。其略精者。宜另立一簿。親自記注。擇人而授之。古人以鎧仗鮮明。爲威敵之要務。恆以取勝。

進兵須由自己作主。不可因他人之言。而受其牽制。非特進兵爲然。卽尋常出隊開仗。亦不可受人牽制。應戰時。雖他營不願。而我營亦必接戰。不應戰時。雖他營催促。我亦且持重不進。若彼此皆牽率出隊。視用兵爲應酬之文。則不復能出奇制勝矣。

余昔在營中。誠諸將曰。「甯可數月不開一仗。不可開仗而毫無安排算計。」

紮營不宜離城太近。蓋地太逼。則賊匪偷營。難於防範。奸細混入。難於查察。節太短。則我軍出隊。難於取勢。各營同戰。難於分股。一經紮營之後。再行退遠。則足餒士氣。不如先遠之爲愈也。牽率出隊之弊。所以難於變革者。蓋此營出隊之時。未經知會彼營。一遇賊匪接仗。或小有差挫。卽用令箭飛請彼營。前來接應。來則感其相援。不來則怨其不救。甚或並未差挫。並未接仗。亦以令箭報馬。預請他營來接應。習慣爲常。視爲固然。既恐惹人之怨憾。又慮他日之報復。於是不敢不去。不忍不去。夫戰陣呼吸之際。其幾甚微。若盡聽他營之令箭。牽率出隊。一遇大敵。必致誤事。弟思力草此弊。必須與各營委曲說明。三令五申。又必多發哨探。細偵賊情。耳目較各營爲確。則人皆信從。而前弊可除矣。

凡軍氣宜聚不宜散。宜憂危不宜悅豫。人多則悅豫。而氣漸散矣。營雖多。而可恃者。惟在一二營。人雖多。而可恃者。惟在一二人。如木然。根好枝好。而後枝葉有所託。如屋然。柱好椽瓦有所麗。遇小敵時。則枝葉之茂。椽瓦之美。儘可了事。遇大敵時。全靠根株培得穩。柱樑立得固。斷不可徒靠人數之多。氣勢之盛。倘使根株不穩。柱樑不固。則一枝折而葉葉隨之。一瓦落而葉瓦墮之。致如山崩。潰如河決。人多而反以爲累矣。

凡將才有四大端。一曰知人善任。二曰善覘敵情。三曰臨陣膽識。四曰營務整齊。吾所見諸將。於三者略得梗概。至於善覘敵情。則絕無其人。古之覘敵者。不特知賊首之性情伎倆。而并知某賊與某賊不和。某賊與僞主不協。今則不見此等好手矣。卽以此四大端察同寮及麾下之人才。第一。第二端。不可求之於弁目散勇中。第三。第四端。則弁中亦未始無材也。

打仗之道。在圍城之外。節太短。勢太促。無埋伏。無變化。只有隊伍整齊。站得堅穩而已。欲臨機應變。出奇制勝。必須離城甚遠。乃可隨時制宜。凡平原曠野開仗。與深山窮谷開仗。其道迥別。去城四十里。凡援賊可來之路。須令哨長隊長。輪流前往該處看明地勢。小徑小溪。一邱一壑。細細看明。各令詳述。或令繪圖呈上。萬一有出隘迎戰之時。則各哨隊皆已了然於心。古人憂學之不講。又曰明辨之。余以爲訓練兵勇。亦須常講常辨也。

氣浮而不斂。兵家之所忌也。偶作一對聯云。「打仗不慌不忙。先求穩當。次求變化。辦事無聲無臭。既要精到。又要簡捷。」

治軍總須腳踏實地。克勤小物。乃可日起而有功。凡與人看接周旋。若無真意。則不足感人。然徒有真意。而無文飾以將之。則真意亦無所託之以出。禮所稱「無文不行」也。余生平不講文飾。到處行不動。近來大悟前非。頓兵城下。爲日太久。恐軍氣漸懈。如雨後已弛之弓。三日已腐之饑。而主者安然。不知其不可用。此宜深察者也。附近百姓。果有騷擾情事否。此亦宜深察者也。

治軍之道。總以能戰爲第一義。倘圍攻半歲。一旦被賊冲突。不克抵禦。或致小挫。則令望墜於一朝。故探驪之法。以善戰爲得珠。能愛民爲第二義。能和協上下官紳爲第三義。願吾弟兢兢業業。日慎一日。到底不懈。則不特爲兄補救前非。亦可爲吾父增光於泉壤矣。

凡撲人之牆。撲人之壕。撲者。客也。應者。主也。我若越壕而應之。則是反主爲客。所謂「致於人」者也。我不越壕。則我常爲主。所謂「致人而不致於人」也。穩守穩打。彼自意興索然。

今年軍事。沅弟緘言。「穩紮穩打。機動則發。」良爲至論。然機事殊不易審。穩字尤不易到。未有主帥。而將弁能早者。猶之一家之中。未有家長。而子弟能早者也。

季弟言。「出色之人。斷非有心所能做到。」此語確不可易。名位大小。萬般由命不由人。特父兄之家教。將帥之訓士。不能如此立言耳。季弟天分絕高。見道甚早。可喜可愛。然辦理營中小事。教訓弁勇。仍宜以「勤」字作主。

不宜以「命」字諭衆。

卽挖長壕。切不可過濠打仗。勝則不能多殺賊。挫則不能收隊也。

賊初來之日。不必出隊與戰。但在營內靜看。看其強弱虛實。看得千準萬準。可打則出營打仗。不可打則始終堅守營盤。或有數分把握。

現講求守壘之法。賊來則堅守以待援師。倘有疏虞。則志有素定。斷不臨難苟免。回首生年五十。除學問未成。尙有遺憾外。餘差可免於大戾。

凡軍行太速。氣太銳。其中必有不整不齊之處。惟有一「靜」字可以勝之。不出隊。不吶喊。鎗礮不能命中者。不許亂放一聲。

吾兄弟無功無能。俱統領萬衆。主持刦運。生死之早遲。冥冥者早已安排妥貼。斷非人謀計較所能及。只要兩弟靜守數日。則數省之安危。胥賴之矣。至要。

凡辦大事。半由人力。半由天事。如此次安慶之守。濠深而牆堅。穩靜而不懈。此人力也。其是否不至以一蟻潰堤。以一蠅玷圭。則天事也。各路之赴援。以多飽爲正。援集賢之師。以成胡爲後。路纏護之兵。以朱章爲助。守牆濠之軍。此人事也。其臨陣果否得手。能否不爲狗酋所算。能否不令狗酋逃遁。此天事也。吾輩但營盡人力之所能爲。而天事則聽之彼蒼而無所容心。弟於人力。頗能盡職。而每稱「擒殺狗酋」云云。則好代天作主張矣。

凡看地勢。察賊勢。只宜一人獨往。所帶極多不得過五人。如賊來追抄。則趕緊馳回。賊見人少。亦不追也。若帶人滿百。賊來包抄。戰則吃賊之虧。不戰而跑回。則長賊之銳。兩者俱不可。故近日名將看地勢者。相戒不帶隊伍也。又兩相隔在五里以外。不可約期打仗。凡約期以號礮爲驗。以排鎗爲驗。以冲天火箭爲驗者。其後每每誤事。余所見帶隊百餘人。以看地勢。及約期打仗。二事致敗者屢矣。

攻城攻壘。總以敵人出來接仗。擊敗之後。乃可乘勢攻之。若敵人靜守不出。無隙可乘。則攻堅徒損精銳。

用兵人人料必勝者，中卽伏敵機。人人料必挫者，中卽伏生機。莊子云：「兩軍相對，哀者勝矣。」大凡紮險地，與久經紮定者，迥乎不同。久經紮定者，壕已深，牆已堅，鎗礮已排定，雖新勇亦可穩守。初紮險地者，雖老手亦無把握。久紮者千人守之而有餘，初紮者二千人守之而不足。凡軍事做一節，說一節，若預說幾層，到後來往往不符。

論兵事，宜從大處分清界限，不宜從小處割晰微芒。如鮑軍或打南岸，或留北岸，此大處也。往返動須兩月，調度不可錯誤。北岸或紮集賢關，或攻宿松，南岸或援江之瑞義，或援鄂之興冶，此小處也。往返不過十日，臨時尙可更改。

盛暑酷熱，若出隊站立烈日之中，歷二三個時辰之久，任是鐵漢，亦將渴乏勞疲。若挂車河官軍作堅守之計，任賊誘戰搦戰，總不出隊與之交仗，待其曬過數日之後，相機打之，亦一法也。

旣已帶兵，自以殺賊爲志，何必以多殺人爲悔。此賊之多擄多殺，流毒南紀，天父天兄之教，天燕天豫之官，雖使周孔生今，斷無不力謀誅滅之理。旣謀誅滅，斷無以多殺爲悔之理。

嘗此酷暑，賊以積勞之後，遠來攻撲我軍，若專守一「靜」字法，可期萬穩。多公亦宜用「靜」字法。此賊萬無持久之道，弟不必慮多軍之久困也。（余所諭靜者，不焦急耳。）昔曹操八十萬人，自荊州東下，吳以五萬人禦之，而周瑜策其必敗者，一料曹兵不服水土，二料劉表水師新附，不樂爲用，三料暑熱久疲，其後赤壁之役，果不出周瑜之所料。

布袋草把，此二者，皆余閱歷之事。余攻九江，辦布袋萬個，爲填壕之用，令每人裝土於袋，負之丟於壕中，乃十二月初日進攻，每袋僅一寸厚，千餘袋尙不能填得一丈寬，而千餘人斷不能站在一處，每處數十人，竟未能填一尺厚，是日傷人最多。此布袋之難用也。攻瑞州時，劉峙衡以稻草填壕，已填一丈寬，過壕十餘人矣。賊以火蛋拋出，稻草悉燃，燒死數十人。第二次峙衡用濕稻草，賊以鎗礮擊之，官兵亦不如前次之踴躍，遂不能過壕。瑞州壕

深不盈丈。尙且如此。此稻草之難也。

水師向本驕傲。又得數次小勝。則全是矜情踴氣。偶然小挫。則怯態畢露。欲調度水師。無但取其長而忘其短。總以看明支河小汊爲第一義。

機已靈活。勢已甜足。早進可也。否則。不如遲進。與其頓兵城下。白他處有變而退兵。不如在四外盤旋作勢。爲一擊必中之計。

剿崇兼施之法。須在軍威大振之後。目下各路俱獲大捷。賊心極換。本可廣爲招撫。第撫以收其頭目。散其黨衆爲上。收其頭目。准其略帶黨衆數百人爲次。收其頭目。准其帶所部二三千。如章軍者爲又次。若准其仍帶全部。并盤踞一方。則爲下矣。

暴戾險詐。最難馴馭。投誠六年。官至一品。而其黨衆尙不脫盜賊行徑。吾輩待之之法。有應寬者二。有應嚴者二。應寬者。一則銀錢慷慨大方。絕不計較。嘗充裕時。則數十百萬。擲如糞土。嘗窮窘時。則解囊分潤。自甘困苦。一則不與爭功。遇有勝仗。以全功歸之。遇有保案。以優寵獎之。應嚴者。一則禮文疏淡。往還宜穩。書牘宜簡。話不可多。情不可密。一則剖明是非。凡渠部弁勇。有與百姓爭訟。而適在吾輩轄境及來訴告者。必當剖決曲直。毫不假借。請其嚴切懲治。應寬者。利也。名也。應嚴者。禮也。義也。四者兼全。而手下又有強兵。則無不可相處之悍將矣。萬里長壕。大衆公守。最易誤事。一蟻蟹堤。全河皆決。

地方雖寬。分別極衝。次衝。究無多處。前圍城賊當衝者。不過數處。後拒援賊當衝者。亦不過數處。於極衝次衝之地。擇人守之。則他處雖有劣營。亦可將就支持。

臨戰之際。預先愛惜士卒精力。以備屆時辛苦熬夜。猶考試者場前靜養也。

大約選將以打仗堅忍爲第一義。而說話宜有條理。利心不可太濃。兩者亦第二義也。

凡籌將兵者。日中說將領。訓練士卒。遇有敵陣小挫。則於其將領責之戒之。甚者或殺之。或且泣且致。終日絮

聒不休。正所以愛其部曲。保其本營之門面聲名也。不善將兵者。不責本營之將弁。而妬他軍之勝。已不求部下之自強。而但恭維上司。應酬朋輩。以要求名譽。則計更左矣。

身居絕地。只有死中求生之法。切不可專盼多軍。致將卒始因求助而懈弛。後因失望而氣餒也。

待賊疲乏散漫之時。猛然出隊力戰。如用此法。總須籌於相機。第一要看賊散布在我營外最近之處。第二要看賊疲乏思歸之時。第三要辦得賊之強枝安在。弱枝安在。乃可交手。

凡用兵最重「氣勢」二字。此次弟以二萬人駐於該處。大不得勢。兵勇之力。須常留其有餘。乃能養其銳氣。縮地約守。亦所以蓄氣也。

既不能圍城賊。又不能破援賊。專圖自保。自以氣斂局緊爲妥。何必以多占數里爲美哉。及今縮攏。少幾個當衝的營盤。每日少用幾千斤火藥。每夜少幾百人露立。亦是便益。「氣斂局緊」四字。凡用兵。處處皆然。不僅此次也。

制勝之道。實在人而不在器。鮑春霆并無洋鎗洋藥。然亦屢當大敵。前年十月。去年六月。亦曾與忠酋接仗。未聞以無洋人軍火爲憾。和張在金陵時。洋人軍器最多。而無救於十年三月之敗。弟若專從此等處用心。則風氣所趨。恐部下將士。人人有務外取巧之習。無反己守拙之道。或流於和張之門徑而不可覺。不可不深思。不可不猛省。真笑人。不甚爭珠翠。真書家。不甚爭筆墨。然則將士之真善戰者。豈必力爭洋鎗洋藥乎。

凡危急之時。只有在己者靠得住。其在人者皆不可靠。恃之以守。恐其臨危而先亂。恃之以戰。恐其猛進而驟退。兵無常法。弟不可泥左之法。以爲法。拘左之機。以爲機。然亦可資參探。大約與巨寇戰。總須避其銳氣。擊其情氣。乃爲善耳。

凡長濠以內。總須主兵強於客兵。一切皆由弟作主。號令歸一。而後不至僨辜。至囑。至囑。凡兵勇須有甯拙毋巧。甯故毋新之意。而後可以持久。弟莫笑我爲老生迂談也。

一壘潰隄。此等最險之着。只可一試再試。豈可屢屢試之。以爲兵家要訣乎。望弟早早定計。賊不解圍。則忍心堅守。賊若解圍。則以追爲退。不著痕跡。行兵最貴機局生活。

吾兄弟既誓拚命報國。無論如何勞苦。如何有功。約定終始不提一字。不誇一句。如不知登聽之人。願不願登聽之天而已。審機審勢。猶在其後。第一先貴審力。審力者。知己知彼之切實工夫也。弟當初以孤軍進雨花臺。於審力工夫微欠。自賊到後。壹意苦守。其好處又全在審力二字。更望將此二字直做到底。古人云。『兵驕必敗。』莊子云。『兩軍相對。衰者勝矣。』不審力。則所謂驕也。審力而不自足。即莊子之所謂衰也。

我軍仍當以擡爲刀矛及劈山礮爲根本。營之子弟於經書入股之外。兼工詩賦雜藝。則佳。若借雜藝以拋棄經書入股。則淨矣。

凡行兵須蓄不竭之氣。留有餘之力。左傳所謂『再衰三竭。』必敗之道也。弟營現雖士氣百倍。而不肯浪戰。正所謂留有餘之力也。孤軍駐雨花臺。後無退路。勢則竭矣。吾欲弟於賊退後。趁勢追賊。由東壩進溧陽宜興。所謂蓄不竭之勢也。

凡行軍最忌有赫赫之名。爲天下所指目。爲賊匪所必爭。莫若從賊所不經意之處下手。既得之後。賊乃知其爲要隘。起而爭之。則我先著矣。

吾輩當一面順天意。一面盡人事。改弦更張。另謀活著。古人用兵。最重『變化不測』四字。

用兵之道。全軍爲上。保城池次之。弟自行默度。應如何而後保全本軍。如不退而後能全軍。不退可也。如必退而後能全軍。退可也。

凡讀文太多。而實無心得者。必不能文者也。用兵亦宜有簡練之營。有純熟之將領。陣法不可貪多而無實。

宜多用活兵。少用呆兵。多用輕兵。少用重兵。進退開合。變化不測。活兵也。屯宿一處。師老人頑。呆兵也。多用大礮。韜重。文員太繁。車船雜沓。重兵也。器械輕靈。馬賊韜重。不用車船。騎夫。親馳電掣。輕兵也。弟軍積習已深。今欲全

改爲活兵。輕兵勢必不易。姑且改爲半活半呆。半輕半重。亦有更戰互休之時。

大礮守牆。余嫌太笨。現造劈山礮。專爲守牆之用。弟以後宜少用笨重之物。此陸軍第一要訣。

余所以不願多立新營者。一則餉項極絀。明年恐有斷炊之虞。二則局面愈大。真氣愈少。和張晚年覆轍。只是排場廓大。真意消亡。一處挫敗。全局瓦裂。不可不引爲殷鑒。

兩花臺老營。須十分堅固。能於最衝地方。築石壘數處。宜以五百人守者。可以三百守之而無慮。宜用勁旅守者。可以次等守之而無妨。則臨分兵之時。便益多矣。

軍中消息甚微。見以爲旺。卽寓驕機。莊子云。一兩軍相對。衰者勝矣。一其義最宜體驗。

中外皆稱向兵爲天下勁旅。而余不甚以爲然者。以其不能從大處落墨。空處著筆也。弟用兵之規模。遠勝於和。而與向相等。查南甫成一枝活兵。而又急於調回。則空處全不著筆。專靠他軍。可盡恃乎。

只要水路無接濟進城。陸路縱有接濟文報。賊亦終無可久之道。若必圍得水洩不通。恐因獸猶將死鬥。一蟻潰隄。全局皆震。不可不防。

傍城而戰。例爲彼此殺傷相當之局。以後若非賊來撲營。似不必常尋賊開仗。蓋賊糧路將絕。除開仗別無生路。我則斷糧路爲要考。不在日日苦戰也。

凡辦大事。以識爲主。以才爲輔。凡成大事。人謀居半。天意居半。往年攻安慶時。余告弟不必代天作主張。牆壕之堅。軍心之固。嚴斷接濟。痛剿援賊。此可以人謀主張者也。克城之遲速。殺賊之多寡。我軍士卒之病否。良將之有無。損折。或倅他軍來助圍師。或減圍師分援他處。或功隳於垂成。或無心而奏捷。此皆由天意主張者也。譬之場屋考試。文有理法才氣。詩不錯平仄擡頭。此人謀主張者也。主司之取舍。科名遲早。此天意主張者也。若恐天意難憑。而廣許神願。若恐人謀未臧。而多方設法。皆無識者之所爲。弟現急求克城。頗有代天主張之意。願弟常存畏天之念。而慎靜以緩圖之。則善耳。

古人用兵。最貴變化不測。吾生平用兵。失之太呆。弟亦好從呆處著想。竊軍五月。從燕子磯南渡。本是呆著。挖地道則更呆。此際皖南危急。不能不調之使活耳。

大凡辦一事。其中常有曲折交互之處。一處不通。則處處皆窒矣。

蓋大致米糧難入。則城中強者可得。弱者難求。必有內變爭奪之事。若合圍大緊。水洩不通。無分強弱。一律顆粒難通。則反足以固其心。而無爭奪內變。投誠私逃之事矣。

古來大戰爭。大事業。人謀僅占十分之三。天意恆居十分之七。往往積勞之人。非即成名之人。成名之人。非即享福之人。

大礮守壘。只可偶一用之。多用則可不必。吾在水營多年。深知大礮之長短。凡礮火之利有二。曰及遠。曰命中。大礮之大子。可以及遠。而難以命中。謂其愈遠。則行愈遲慢。且有聲可以迴避。又往往自上落下。不能橫穿也。其羣子。則以命中。而難以及遠。包得合體。築得極緊。可及二三箭之遠。否則僅及一箭而已。羣子所能及之處。先鋒包亦幾能及之。軍與日久。各弁勇事事外行。徒慕大礮之名。見賊在二三里外。紛紛開大礮。大子擊之。喜其響之震。烟之濃而已。見賊不畏礮。而排進如故。則以爲凶悍無匹。而不知大子實不傷人。昔余在水營時。教將弁專用羣子。包得圓。築得緊。隔得近。三語者。內湖各營。罕能做到。外江間有做到者。便是無敵之將。

四五萬人。同時遣散。必無許多銀錢。而坐轎者願息。抬轎者不肯。其中又有許多人。情物理。層次曲折。勇退是吾兄弟一定之理。而退之中。次序不可凌亂。痕迹不可太露。

凡子弟生徒。平日懶惰。場文荒謬。而不售者。則當督責之。至平日勞苦。場文極佳。而不售者。則當獎勵之。弟所給諸將。皆勞苦佳文之生徒也。

擒匪長處。在專好避兵。不肯輕戰。偶爾接戰。亦復凶悍異常。好用馬隊。四面包圍。而正兵則馬步夾進。馬隊衝突時。多用大刀長棒。步隊冒烟衝突時。專用長鎗猛刺。我軍若能據此數者。則鎗砲傷人較多。究非擒匪所可及。劈

山砲尤爲捻匪所畏。

各軍得悉萃於西南山多田多之處。剿辦當稍易爲力。恐其半過沙河以南。半留沙河以北。則尤疲於奔命耳。百戰之寇。屢衰屢盛。卽僅存數十人。尙是鉅患。況數萬乎。人心日僞。大亂方長。吾兄弟惟勤勞謙謹。以邀神佑。選將練兵。以濟時艱而已。

此賊故智。有時疾馳狂奔。日行百餘里。遠數日不少停歇。有時盤於百餘里之內。如蟻旋磨。忽左忽右。賊中相傳秘訣曰。「多打幾個圍。官兵之追者自疲矣。」僧王曹縣之敗。係賊以打圍之法。凌之也。吾觀捻之長技。約有四端。一曰步賊長竿。於鎗子如雨之中。冒烟衝進。二曰馬賊。周圍包裹。速而且勻。三曰善戰。而不輕試其鋒。必待官兵找他。他不先找官兵。得粵匪初起之訣。四曰行走剽疾。時而數日千里。時而旋磨打圍。捻之短處。亦有三端。一曰全無火器。不善攻堅。只要官吏能守城池。鄉民能守堡寨。賊卽無糧可擄。二曰夜不紮營。散住村莊。若得善偷營者。乘夜劫之。協從者最易逃潰。三曰輜重。婦女驟騎。若善戰者與之相持。而別出奇兵。襲其輜重。必不受創。此吾所閱歷而得之者。

余與少荃皆坐視賊太輕。以致日久無功。弟則視賊尤輕。莊子曰。「兩軍相對。衰者勝矣。」咸豐三年以前。粵匪爲哀者。咸豐十年以後。官軍爲哀者。今肅匪屢勝。而其謹畏如故。官軍屢敗。其驕蹇如故。是哀者尙在捻也。可慮孰甚。

淮勇不足恃。余亦久聞此言。然物論悠悠。何足深信。所貴好而知其惡。惡而知其美。省三琴軒均屬有志之士。未可厚非。申夫好作識微之論。而實不能平心細察。余所見將才傑出者極少。但有志氣。卽可予以美名。可獎成之。傲爲凶德。凡當大任者。皆以此字致於顛覆。用兵者最戒驕氣。情氣。作人之道。亦惟驕情二字。誤事最甚。（以上家書）

凡用兵。主客奇正。夫人而能言之。未必臬能知之也。守城者爲主。攻者爲客。守營壘者爲主。攻者爲客。中途相遇。

先至戰地者爲主。後至者爲客。兩軍相持。先動喊放鎗者爲客。後吶喊放鎗者爲主。兩人持矛相格鬪。先動手殺第一下者爲客。後動手。卽格鬪而卽戰者爲主。中間排隊迎敵爲正兵。左右兩旁抄出爲奇兵。屯宿重兵。堅札老營。與賊相持者爲正兵。分出遊兵。飄忽無常。伺隙狙擊者爲奇兵。意有專向。吾所持以禦寇者爲正兵。多張疑陣。示人以不可測者爲奇兵。旌旗鮮明。使敵不敢犯者爲正兵。羸馬疲卒。偃旗息鼓。本強而故示以弱者爲奇兵。建旌鳴鼓。屹然不輕動者爲正兵。佯敗佯退。設伏而誘敵者爲奇兵。忽主忽客。忽正忽奇。變動無定時。轉移無定勢。能一一區而別之。則於用兵之道。思過半矣。

兵者。陰事也。哀戚之意。如臨親喪。肅敬之心。如承大祭。庶爲近之。今以半牛犬豕而就屠烹。見其悲啼於割剝之頃。宛轉於刀俎之間。仁者將有所不忍。況以人命爲浪擲輕擲之物。無論其敗喪也。卽使倖勝。而死傷相望。斷頭洞胸。折臂失足。血肉狼藉。日陳吾前。哀矜之不遑。喜於何有。故軍中不宜有歡欣之象。有歡欣之象者。無論或爲和悅。或爲驕盈。終歸於敗而已矣。田單之在即墨。將軍竄笮之心。士卒無生之氣。此所以破燕也。及其攻狄也。黃金橫帶。則騁乎淄澠之間。有生之樂。無死之心。魯仲連策其必不勝。兵事之宜慘戚。不宜歡欣。亦明矣。嘉慶季年。名將楊遇春。屢立戰功。嘗語人曰。「吾每臨陣。行間覺有熱風吹拂面上者。是日必敗。行間若有冷風。身體似不寒寒者。是日必勝。」斯亦肅殺之義也。

田單攻狄。魯仲連策其不能下。已而果三月不下。田單問之。仲連曰。「將軍在即墨。坐則織蓑。立則仗鍬。爲士卒倡。將軍有死之心。士卒無生之氣。聞君言。莫不揮涕奮臂而欲戰。此所以破燕也。當今將軍。東有夜邑之奉。西有淄上之娛。黃金橫帶。而騁乎淄澠之間。有生之樂。無死之心。所以不勝也。」余嘗深信仲連此語。以爲不刊論。同治三年。江甯克復後。余與湘軍將士。驕盈娛樂。慮其不可復用。全行遣散歸農。至四年五月。余奉命至山東河南。勦捻。湘軍從者極少。專用安徽之淮勇。余見淮軍將士。雖有揮奮之氣。亦乏憂危之懷。竊用爲慮。恐其不能平賊。莊子云。「兩軍相對。衰者勝矣。」仲連所言。以憂勤而勝。以娛樂而不勝。亦卽孟子「生於憂患。死於安樂」之

旨也。其後余因疾病，疏請退休，遂解兵柄。而合肥李相國卒用淮軍，削平捻匪，蓋淮軍之氣尙銳。憂危以感士卒之情，振奮以作三軍之氣。二者皆可以致勝。在主帥相時而善用之已矣。余專主憂勤之說，殆知其一而不知其二也。聊志於此，以識吾見理之偏。亦見古人格言至論，不可舉一概百。言各有所當也。

史記敘韓信破魏豹，以木罌渡軍，其破龍且，以囊沙壅水，竊嘗疑之。魏以大將柏直當韓信，以騎將馮敬當灌嬰，以步將項它當曹參，則兩軍之數，殆亦各不下萬人。木罌之刃，渡幾何，至多不過二三百人，豈足以制勝乎？沙壅壅水，下可滲漏，旁可橫溢，自非與工嚴塞，斷不能築成大堰。壅下使下流竟絕，如其寃河盛漲，則塞之固難，決之亦復不易。若其小港微流，易壅易決，則決後未必遂不可涉渡也。二者揆之事理，皆不可信。敘兵事莫善於史記。史公敘兵，莫詳於淮陰傳，而其不足據如此。孟子曰：「盡信書，則不如無書。」君子之作事，既徵諸古籍，諏諸人言，而又必慎思而明辨之，庶不至冒昧從事耳。

約期打仗，最易誤事。然期不可約，信則不可不道也。

治軍之道，以「勤」字爲先。身勤則強，佚則病。家勤則興，懶則衰。國勤則治，怠則亂。軍勤則勝，惰則敗。惰者，暮氣也。常常提其朝氣爲要。

凡打仗，一鼓再鼓，而人不動者，則氣必衰滅。凡攻壘，一撲再撲，而人不動者，則氣必衰滅。守城，繁非易事。銀米、子藥、油鹽，有一不備，不可言守備矣。——又須得一謀勇兼優者爲一城之主。

軍中須得好統領營官，統領營官，須得好真心實腸。是第一義。算路程之遠近，算糧仗之關乏，算彼己之強弱，是第二義。二者微有把握，此外良法雖多，調度雖善，有效有无效。盡人事以聽天而已。

兵者，不得已則用之。常存一不敢爲先之心，須人打第一下，我打第二下。

近年從事戎行，每駐紮之處，周歷城鄉，所見無不毀之屋，無不伐之樹，無不破之富家，無不欺之窮民。大抵受害於賊者十之七八，受害於兵者亦二三。目擊心傷，喟然私歎行軍之害民。一至此乎，故每於將官委員告戒，總以

禁止騷擾爲第一義。

軍專有驕氣。恃氣皆致氣也。孔子之「讓事而懼。」則絕驕之源。「好謀而成。」則絕情之源。無時不謀。無事不謀。自無情時矣。

古人有言曰。「作事威克厥愛。雖小必濟。」葉敬所謂「逆取順守。」亦此意也。軍管用民夫。其先則廣取之。虛役之。其後則體帥必周。給錢必均。法可隨處變通。總須用人得當耳。

洋烟爲壞營規之最。盡行汰去。不可稍存姑待之意。黎明點名。卯正辰初。即可點畢。嗣後每早。或查營。或點名。或看操。三者總行其一。不專行查營一事也。

練勇之道。必須營官晝夜從事。乃可漸幾於熟。如雞伏卵。如鎗鍊丹。未宜須臾稍離。戰陣之事。須半動半靜。動如水。靜如山。

軍事不可無悍驚之氣。而驕氣卽與之相連。不可無安詳之氣。而惰氣卽與之相連。有二氣之利。而無其害。有增君子。尙難養得恰好。況弁勇乎。

凡用兵之道。本強而故示敵以弱者。多勝。本弱而故示敵以強者。多敗。敵加於我。審量而後應之者。多勝。漫無審量。輕以兵加於敵者。多敗。

凡修壘以深深爲妙。木城及外牆。均有流弊。恐反爲賊遮蔽砲子也。

修砲之事。軍士四出征剿。有老家以爲基址。亦行軍一法也。擇地有兩法。有自固者。有阨賊者。自固者。據高山。擇要隘。阨賊者。擇平坦必經之路。擇淺水津渡之處。嗣後每立一軍。則修砲二十座。以爲老營。環老營之四面。方三百里。皆可往來梭剿。庶幾可戰可守。可奇可正。得四軍可靠者。則變化無窮。於景鎮作一榜樣。而他軍效法行之。

可得也。但不知何爲法術。亦可得見乎。

與李少荃許仙屏言團練之無益於辦賊。直可盡廢。如必欲團練。則不可不少假以威權。

近年馭將。失之寬厚。又與諸軍相距過遠。危險之際。弊端百出。然後知古人所云。「作事威克厥愛。雖小必濟。」反是。乃敗道也。

持之以敬。臨之以莊。無聲無形之際。常有懷然難犯之象。則人知威矣。孟子曰。「君子以仁存心。以禮存心。」守是二者。雖蠻貊之邦可行。又何兵勇之不洽哉。

帶勇之法。用恩莫如用仁。用威莫如用禮。仁者。即所謂欲立立人。欲達達人也。待弁勇如待子弟之心。嘗整其成立。望其發達。則人知恩矣。禮者。即所謂無衆寡。無小大。無敢慢。泰而不驕也。正其衣冠。尊其瞻視。儼然人望而畏之。威而不猛也。持之以敬。臨之以莊。無形無聲之際。常有懷然難犯之象。則人知威矣。守斯二者。雖蠻貊之邦行矣。何兵勇之不可洽哉。

余至武昌火藥局。看造火藥之法。以銅爲輪。以鐵爲輟。圍地爲大磨盤。以牛碾之。盤大徑二丈三尺。周圍七丈許。每盤用四牛。每牛速曳兩輪。盤外周圍溝槽。約寬八寸許。火藥在槽內。牛行槽外。馭牛之人行槽內。每牛以一人馭之。每兩牛四輪之後。則有鏟藥者一人。隨之執銅鏟。於槽內鏟動。庶輟過之後。火藥不患太緊也。又有小磨盤。磨礪與磨麥相似。僅用一人。又有檣篩礪。篩炭。其法絕精。非圖說不能明。

營務處之道。一在樹人。一則立法。有心人。不以不能戰勝。攻取爲恥。而以不能樹人立法爲恥。樹人之道有二。一曰知人善任。一曰陶鑄造就。

凡軍驕氣。則有浮淫之色。惰氣。則有疏滯之色。須時時察看。而補救之。

帶兵之道。「勤」「恕」「廉」「明」四字。缺一不可也。但兵以力作主。巧作客。軍務須從日用眠食上下手。

呂蒙誅取鏜之卒。魏絳戮亂行之僕。古人處此。豈以爲名。非是則無以警衆。窄路打勝仗。全係頭敵數人。若頭敵站不住。後面雖有好手。亦被人擠退了。

出青之法。卽漢書趙充國傳所謂就草。

天下之人稍有才智者。心思有所見。以自旌異於人。好勝者。此也。好名者。亦此也。同當兵勇。則思於兵勇。翹然而出其類。同當長夫。則思於長夫。中翹然而出其類。同當將官。則思於將官。中翹然而出其類。同爲主帥。則思於衆帥。中翹然而出其類。雖才智有大小。淺深之不同。其不知足。不安分。則一也。能打破此一副庸俗之見。而後可與言道。

古人以用兵之道。通於聲律。故聽音樂而知兵之勝敗。國之存亡。余生平於音律算法。二者一無所解。故不能知兵耳。

用兵之難。莫大於見人危急而不能救。

明戚繼光紀效新書中有立牌。卽古之盾也。有圓牌。卽今之藤牌也。統謂之曰攔牌。又有所謂剛柔牌者。其法以生漆牛皮蒙於外。而以湖綿搵成小團。及頭髮裝於內。蓋戚氏自以巧思製造。非有所師於古也。古之干盾。所以捍禦矢石。今之攔牌。所以捍禦礮子。礮子所嘗。無堅不破。豈矢石所可同年而語哉。國藩初辦水師時。嘗博求禦礮子之法。以魚網數層。懸空張挂。礮子一過卽穿。不能禦也。以絮被漬濕張挂。礮子一過卽穿。不能禦也。以生牛皮懸於船旁。以藤牌陳於船梢。不能禦也。又作數層厚牌。以竹鱗排於外爲一層。牛皮爲一層。水絮爲一層。頭髮爲一層。合而成牌。亦不能禦也。以此而推。戚氏之剛柔牌。不足以禦礮子明矣。烏鎗子。如梧子大者。或有法以禦之。拾鎗子。劈山礮子。凡大如黃豆以上者。竟無拒禦之法。近時楊軍門。載福等。深知礮子之無可禦。遂屏棄魚網。水絮。牛皮等物。一切不用。直以血肉之軀。植立船頭。可避者避之。不可避者聽之。而其麾下。水師弁勇。亦相率而植立直前。無所迴避。明於此義。而古來干盾。檣牌。諸器。皆可廢矣。友人劉騰鵠峙衡治軍。刁斗森嚴。凜不可犯。臨陣則伏根行首。堅立如山。有名將之風。惟過於自熹。在武昌時。嘗獨立城下。呼賊以礮子擊之。賊發十餘礮。不中。堅坐良久乃還。在端州時亦如是。卒以徇難殞我壯士。人百莫贖。此則剛毅太過。於好謀而成之道。少有違耳。

余初不解造羣子之法。以生鐵令鑄工鑄之。渣滓未融。經藥輒散。且多蜂眼。鳴而不能及遠。乃與吳坤修竹莊。商用熟鐵打造。其法以鐵先鍊成直條。每條燒紅其端。截出半寸。打成圓顆。又燒其端。又打成顆。——每顆如葡萄大——後至江西。商之姚鑲。以此法打造。姚君又作爲鐵模。半渦截鐵條之端。置之模中。宛轉錘鍊。圓滑可愛。於是及遠較多。一星有奇也。今湖南湖北江西三省。打造羣子。均用此法。每礮用百餘顆。多者或三四百顆。噴薄而出。如珠如雨。殆無隙地。嘗之輒碎。不仁之器。莫甚於此矣。然流疆尙未靖謐。此其亟宜講求者也。

行軍之道。有依次而進者。有越敵人所守之寨。而先攻他處者。姑以通鑑所紀兵事言之。朱明帝泰始二年。晉安王子勛之亂。袁顛相拒於濃湖。久未決。龍驤將軍張興世建議曰。「賊據上游。兵強地勝。我雖持之有餘。而制之不足。若以奇兵潛出其上。因險而壁。見利而動。使其首尾周遑。進退疑阻。中流旣梗。糧運自艱。此制賊之奇也。鐵溪江岸最狹。去大軍不遠。下臨洄湫。船下必來泊岸。又有橫浦。可以藏船。千人守岸。萬夫不能過。衝要之地。莫出於此。」沈攸之吳喜並贊其策。乃選戰士七千。輕舸二百。配與興世。興世率其衆。沂流稍上。尋復退歸。如是者屢日。賊將劉胡聞之。笑曰。「我尙不敢越彼。下取揚州。張興世何人。欲輕據我上。」不爲之備。一夕四更。值便風。興世舉帆直前。渡湖白。過鵲尾。胡旣覺。乃遣其將胡靈秀。將兵於東岸。翼之而進。戊戌夕。興世宿景洪浦。靈秀亦留。興世潛遣其將黃道標帥七十舸。徑趨錢溪。立營寨。己亥。興世引兵進。擄之。靈秀不能禁。庚子。劉胡自將水步二十六軍。來攻錢溪。將士欲迎擊。興世禁之曰。「賊來尙遠。氣盛而矢驕。驟旣易盡。盛亦易衰。不如待之。」令將士治城如故。俄而胡來。轉近船。入洄湫。興世命壽寂之任農夫。帥壯士數百擊之。衆將相繼並進。胡收兵而下。興世遂於錢溪立城。國藩按是時官軍在下游。藉圻。袁顛等在上遊之濃湖。劉胡等又在上遊之鵲尾。更上乃爲錢溪。越濃湖鵲尾兩寨而上。立城於錢溪。此險途也。厥後賊屢攻錢溪不勝。糧堙中梗。而鵲尾濃湖並以潰降。此越寨進攻。而得勝者也。

泰始三年。魏尉元上表言。「賊向彭城。必由清泗過宿豫。歷下邳。趨青州。亦由下邳沂水。經東安。此數者。皆爲賊

用兵之要。今若先定下邳。平宿豫。鎮淮揚。戍東安。前青冀諸州可不攻而克。若四鎮不服。青冀難拔。百姓狼顧。憤懷僥倖之心。臣愚以爲宜釋冀青之師。先定東南之地。斷劉瓛北顧之意。絕愚民南望之心。如此。則淮北自寧。晉勞永逸。一國藩按宋與魏歷世兵爭。宋有青州歷城徐州諸鎮。遠在海岱與魏接睦。而下邳宿豫沂水東安四城。乃在淮南去魏尙遠。魏越青州諸鎮。而進攻四城。此險途也。厥後四城破。而青州歷城徐州諸鎮相繼沒於魏。此越鎮進攻而勝者也。

梁簡文帝二年。侯景之變。鄆州刺史蕭方諸以徐文盛軍在西陽。不設備。西陽卽今黃州。侯景以江夏空虚。使宋子仙任約帥精騎四百。由淮內襲鄆州。丙午。大風疾雨。天色晦冥。子仙等入城。方諸迎拜。遂擒鮑泉。虜豫。送於景所。景因便風。中江舉帆。送越徐文盛等軍直上。入江夏。文盛衆懼而潰。國藩按侯景與徐文盛皆在黃州夾江築壘。乃越徐軍而上入江夏。此險途也。而江夏以無備而破。徐軍以失勢而潰。此越寨進攻而勝者也。

陳文帝天嘉元年。王琳屯西岸之柵口。侯瑱屯東岸之蕪湖。相持百餘日。旋均出江外。隔洲而泊。二月丙申。西南風急。琳引兵直趨建康。瑱等徐出蕪湖。躡其後。西南風翻爲瑱用。琳擲火炬以燒陳船。皆反燒其船。瑱發拍侯擊琳艦。又以蒙衝小船。擊其艦。琳軍大敗。軍士溺死什二三。餘皆棄舟登岸。國藩按王琳與侯瑱同屯蕪湖之上。琳乃越瑱軍而直下金陵。此險途也。而瑱軍自後躡之。反爲所破。此越寨進攻而敗者也。

唐貞觀十九年。太宗親征高麗。旣拔遼東蓋平諸城。至安市。將決戰。高麗靺鞨合兵爲陳。長四十里。江夏王道宗曰。高麗傾國以拒王師。平壤之守必強。願假臣精兵千。覆其本根。則數十萬之衆。可不戰能降。上不應。後攻安市。竟不能拔。降將請先攻烏骨城。衆議不從。遂自安市班師。國藩按道宗請越安市而進攻平壤。此雖險途。而實制勝之奇兵也。太宗不從。無功而返。此不能越攻而失者也。

安史之亂。李泌請命建寧王琬爲范陽節度大使。並寨北出。與李光弼南北犄角。以取范陽。泌欲使建寧自靈夏並豐勝靈朔之寨。直擣媯檀。攻范陽之北。光弼自太原取恆定。攻范陽之南。覆其巢穴。賊遠則無所歸。留則

不獲安然。後大軍四合而攻之，必成擒矣。上悅，已而不果行。國藩按是時大軍在扶風，郭子儀在馮翊，李光弼在太原，勢宜先取兩京。李泌欲先搗范陽賊巢，此亦制勝之奇兵也。事不果行，致史思明爲關洛之患，此亦不能越攻而失者也。

元和十二年，淮蔡之役，李祐言於李愬曰：「蔡之精兵皆在洄曲及四境拒守，守州城者皆羸老之卒，可以乘虛直抵其城，比賊將聞之，元濟已成擒矣。」愬然之。十月辛未，李愬李佑李忠義李進誠軍出，東行十六里，夜至張柴村，盡殺其戍卒及烽子，據其柵，命士少休，食乾糲，整羈勒，留義成軍五百人鎮之，以斷洄曲及諸竄橋梁。復夜引兵出門，時大風雪，旌旗裂，夜半雪愈甚，行七十里四鼓，愬至蔡州城下，無一人知者。李佑李忠義鑿其城爲坎，以先登，愬入居元濟外宅，以檻車送元濟詣京師。國藩按：元濟精兵盡在洄曲，董重質麾下，李愬越之而直入蔡州，此越寨進攻而勝者也。

朱梁均王四年，楚岳州刺史許德勳將水軍巡邊，夜分南風暴起，都指揮使王瓊乘風趨黃州，以繩梯登城，徑趨州署，執吳刺史馬鄴，大掠而還。德勳曰：「鄂州將邀我，宜備之。」瓊曰：「我軍入黃州，鄂人不知，奄過其城，彼自救不暇，安能邀我。」乃晨旗鳴鼓而行，鄂人不敢逼。國藩按：楚之岳州東北與吳爲隣，嘉魚陸口等處，吳必立寨設備，乃王瓊越之而直趨黃州，此越寨進攻而勝者也。

唐同光元年，後唐與朱梁相拒於楊劉德勝之間。時梁將段凝軍臨河之南，（卽瀘州，今開州。）王彥章進逼鄆州。（今東平府。）唐臣李紹宏等請秦鄆州與梁約合，帝獨召郭崇韜問之，對曰：「降者皆言大梁無兵，陛下若留兵守魏，固保楊劉，自以精兵長驅入汴，彼城中旣空虛，必望風自潰，苟僞主授首，則諸將自降矣。」帝曰：「此正合朕志。」冬十月壬申，帝大軍自楊劉濟河，癸酉至鄆州，甲戌圍中都城，破之，擒王彥章。帝召諸將問進退之計，諸將請先下東方諸鎮城，然後觀釁而動。康延孝李嗣源請亟取大梁，乙亥，帝發鄆州中都，丁丑至曹州，己卯至大梁，滅梁。壬午，段凝將其衆五萬，自滑州濟河入援，解甲請降。國藩按：郭崇韜之初議，直取大梁也。時梁將王

彥章軍在鄆州。段凝軍在河上。越兩寨而進攻。此險途也。厥後破中都。擒王彥章。而段凝猶在河北。越一寨而進攻。亦險機也。然段凝隔於河北。苦自白馬南濟。則阻於大河。若自下游直濟。則一阻於大河。再阻於新決之護駕水。勢難入援。遂得直取汴梁。以成大功。此越寨進攻而勝者也。

以上九事。張興世之據錢溪。朱子仙之取鄆州。許德勳之下黃州。皆水路越攻而勝。王琳之下金陵。以水路越攻而敗。尉元之取下邳四城。李勣之入蔡州。郭崇韜之策汴梁。以陸路越攻而得之。李道宗之策平壤。李泌之策范陽。以陸路不越攻而失之。成敗得失。固無一定之軌轍也。咸豐四年十月十一日。賊目陳玉成據蘄州。秦日綱據田鎮。我舟師越蘄州而直下。十三日。攻破田家鎮。十四日。蘄州之賊亦潰。此越寨進攻而勝者也。十一月。水陸各軍會於九江。時賊目林啟榮據九江。黃文金據湖口。石達開羅大綱等同在湖口。我舟師彭玉麟等。十六日。越九江而下攻湖口。陸軍羅澤南等。十二月初五日。下攻湖口。十二日。水師敗挫。二十四日。陸軍亦無利而歸。此越寨進攻而敗者也。咸豐六年五月初二日。武漢黃州未破。楊載福以舟師駛下。直至九江。七年九月二十八日。九江安慶未破。楊載福以舟師駛下。直至蘄縣。往來如飛。此越寨進攻而勝者也。故知一勝敗無常。視將才爲轉移一耳。當時越九江而下攻湖口之策。發於國藩。定於羅君澤山。劉君孟容二人。事敗之後。或深咎此策之失。且專歸罪於劉君者。非事實也。（以上日記）

疆場之役。所以磨練豪傑之資也。前代如王伯安孫高陽。其初亦不過講求地利耳。其後遂爲儒將。豈不貴乎閱歷哉。

壯勇貴精而不貴多。設局宜合而不宜分。湘潭寧鄉兩縣。各交界之所。不必另立練局。但在城內立一總局。兩處多設探報。賊至則風雨疾驅。仍可禦於境上。城內總局人數亦不必多。但得敢死之士四百人。則固可以一戰。要須簡擇精嚴。臨陣不至獸駭鳥散。則雖少亦決其有濟。

就現在之額兵。練之而化爲有用。誠爲善策。然習氣太盛。安能更鑄其面目。而盪滌其腸胃。恐岳王復生。半年可

以教成其武藝。孔子復生，三年不能變革其惡習。故鄙見竊謂現在之兵，不可練之而爲勁卒，新募之勇，却可練之使補額兵。

鄉村宜團而不宜練。城廂宜練而不宜多。如此立說，明知有日就懈散之弊。然懈散之弊尙少。若一意操切行之，則新進生事者，持札四出，詭索徭勒，無所不至，功無尺寸，而弊重邱山，亦良可深慮也。

今日將欲滅賊，必先諸將一心，萬衆一氣，而後可以言戰。而以今日營伍之習氣，與今日調遣之成法，雖聖者不能使之一心一氣，自非別樹一幟，改絃更張，斷不能辦此賊也。鄙意欲練鄉勇萬人，概求吾黨質直而曉軍事之君子將之，以忠義之氣爲主，而輔之以訓練之勤，相激相勵，以庶幾於所謂諸將一心萬衆一氣者，或可馳驅中原，漸望澄清。

今日之兵，概可傷恨者，在「敗不相救」四字。彼營出隊，此營張目而旁觀，峻口而微笑，見其勝則深妒之，恐其得賞銀，恐其獲保奏，見其敗則袖手不顧。雖全軍覆沒，亦無一人出而援手拯救於生死呼吸之頃者。以僕所聞，在在皆然。蓋練調兵之初，此營一百，彼營五十，徵兵一千，而已抽選數營，或十數營之多，其卒與卒已不相習矣。而統領之將，又非平日本營之官，一省所期若此，他省亦如之，卽同一營也。或今年一次調百人赴粵，明年一次調五十赴楚，出征有先後，赴防有遠近，勞逸亦遂乖然，不能以相入，敗不相救之故，半由於此。又有主將遠隔，不奉令箭，不敢出救者，又有平日構隙，雖奉令箭，故遲回不往救者，至於兵與勇遇，尤嫉恨刺骨，或且伴爲相救，而倒戈以害勇，翼蔽以縱賊。

「團練」二字，當分爲兩層。團卽保甲之法，清查戶口，不許容留匪人，一言盡之矣。練則養丁，請師製旗，造械爲費較多，鄉人往往疑畏不行。今練成擇人而舉，團則宜徧地興辦，總以清查本境土匪以絕勾引爲先務，遂設一審案局。

民間倡爲謠言，反謂「兵勇不如賊匪之安靜」，國藩痛恨斯言，恐民心一去，不可挽回，誓欲練成一旅，秋毫無

犯。以挽民心而塞民口。每逢三八操演。集諸勇而教之。反復開導至千百語。但令其無擾百姓。近時各營之兵。東調一百。西撥五十。將與將不和。卒與卒不習。勝則相忌。敗不相救。卽有十萬衆在我麾下。亦且各懷攜貳。離心離德。居今之世。用今之兵。雖諸葛復起。未必能滅此賊也。鄙意必須萬衆一心。諸將一氣。而後攻絃更張。或有成功之一日。

帶勇之人。第一要才堪治民。第二要不怕死。第三要不急急名利。第四要耐受辛苦。治民之才。不外「公」明「勤」三字。不公。不明。則諸勇必不悅服。不勤。則營務細鉅皆廢弛不治。故第一要務在此。不怕死。則臨陣營先。士卒乃可效命。故次之。爲名利而出者。保舉稍遲則怨。稍不如意則怨。與同輩爭薪水。與士卒爭毫釐。故又次之。身體羸弱者。過勞則病。精神缺短者。久用則散。故又次之。四者似過於求備。而苟闕其一。則萬不可以帶勇。故弟嘗謂。帶勇須智深勇沈之士。文經武緯之才。

帶勇之人。不苛求乎全材。宜因量以器使。然血性爲主。廉明爲用。三者缺一。若失軛軌。終不能行一步也。

古來名將得士卒之心。蓋有在於錢財之外者。後世將弁。專恃糧重賞優。爲牢籠兵心之具。其本爲已淺矣。是以金多則奮勇蟻附。財盡則冷落獸散。

練卒宜十分精強。器械宜十分精緻。乃可臥薪嘗膽。艱難百戰。不然。則不教之卒。廢敗之器。何省不可驟辦。而必出自湖南萬里長征多費餉項哉。

各勇不穿着輟料衣服。止許穿布衣。止許穿鞋。止許穿草鞋。哨長亦然。打仗同進同退。不許獨後。亦不許獨先。割首級。奪旗幟。亦無賞。

練勇之道。必須營官晝夜從事。乃可漸幾於熟。如鷄伏卵。如鑪鍊丹。未宜須臾稍離。前與璞山面議。每營有文武兼備之營官。始克照料一切。

此次募勇。成軍以出。要須臥薪嘗膽。勤操苦練。養成艱難百戰之卒。預爲東征不歸之計。若草率從事。驅不教之

士執虛脆之器。行三千里之遠。以當虎狼百萬之賊。未與交鋒。而軍士之氣固已餒矣。雖有一二主者忠義奮發。亦無以作其衆而貞於久也。

國藩立朝有年。更事孔多。曾不能以泛悠之毀譽。定倫類之優劣。財有軍務所關。不揆事理之當否。而徒貴耳賤目。逞我私慮乎。

陣法原無一定。然以一隊言之。則以「鴛鴦」「三才」「二陣」爲要。以一營言之。則一正兩奇。一捷應。一設伏。四者斷不可缺一。此外自爲變化。將多人以禦劇寇。斷不可無陣法也。

江中鏖戰之船。須二百號。其餘雇備民船。隨助聲勢者。須八百號。戰船之中。每號配水勇二十人。民船之中。凡煤米油鹽百貨之需。無不裝載。技藝工匠雜流之人。無不備具。船行中流。兩岸陸兵。夾江而下。兵勇所得之銀。換舟中之錢。所用之錢。即買舟中之貨。庶兵勇所至。無米鹽缺乏之患。無昂貴數倍之苦。而展轉灌輸。其銀錢仍不出乎水陸兩營之外。

兩岸陸路之勇。夾江而下。兵勇所得之口糧銀兩。即換舟中之錢。即用舟中之貨。庶無鹽米缺乏之患。無昂貴數倍之苦。而銀錢展轉灌輸。仍不出水陸兩營之外。否則陸勇數千。貿然一行。九江以下。千里蕭條。無食可買。無錢可換。雖有忠憤凌霄。亦祇得向江水而痛哭耳。是以國藩私計。總須舟載食物。水陸並進。

水勇佳者難得。然不難於放穢。而難於盪槳使舵。國藩之意。擬即專雇水手。蓋水師不可遽學爲水手。水手卻能即學爲水師。

水路有戰船。必須兩岸勁兵夾江護行。

岳王復生。或可換辱兵之筋骨。孔子復生。難遽變營伍之習氣。雖語涉諧謔。實痛切之言也。今欲圖謀大局。萬衆一心。自須別開生面。斬新日月。專用新招之勇。求忠義之士將之。不雜入營稍久之兵。不用守備以上之將。國藩數年以來。痛恨軍營習氣。武弁自守備以上。無一人不喪盡天良。故決計不用營兵。不用鎮將。

平昔嘗人出征遲滯。或咎人軍與浪費。及身膺斯責。則其遲滯尤久。而其浪費更多。履之後艱。於茲益信。紮營宜深溝高壘。雖僅一宿。亦須爲堅不可拔之計。但使能守我營壘。安如泰山。縱不能進攻。亦無損於大局。哨探嚴明。離賊既近。時時作敵來撲營之想。敵來之路。應敵之路。埋伏之路。勝仗追賊之路。一一探明。切勿孟浪。未經戰陣之勇。每好言戰。帶兵者亦然。若稍有閱歷。但覺我軍處處瑕隙。無一可恃。不輕言戰矣。進則爭前。退則散亂。三五人保住陣腳。卽是勁旅。無此三五人者。則其初每成先勝後敗之局。其後遂爲屢北不振之師。此蓋軍旅強弱之恆態。

衛青人奴。拜將封侯。身尙貴主。此何等時。又可以尋常行墨困。偪奇男子乎。

凡善弈者。每於棋危劫急之時。一面自救。一面破敵。往往因病成妍。轉敗爲功。善用兵者亦然。己無聲而後可以聽人之聲。己無形而後可以伺人之形。撫賊之備物太甚者。其中蓋有所不足也。以精心察之。冷眼窺之。無乘以躁氣。無淆以衆論。自能覷出可破之隙。若急於求效。闕以浮清客氣。則或泰山當前而不克見。以瓦注者巧。以鉤注者憚。以黃金注者昏。外重而內輕。其爲蔽也久矣。

用兵無他妙巧。常存有餘不盡之氣而已。孫仲謀之攻合肥。受劄於張遼。諸葛武侯之攻陳倉。受劄於郝昭。皆初氣過銳。漸就衰竭之故。惟荀彧之拔偃陽。氣已竭而忽振。陸抗之拔西陵。預料城之不能遽下。而蓄養銳氣。先備外援。以待內之自敝。此善於用氣者也。足下忠勇內蘊。邁往無前。惟猛進有餘。好謀不足。吾願足下學陸抗氣未用而預籌之。不願學荀彧氣已竭而復振之。願算畢而後戰。不宜具戰而徐算。

士卒不許有一人閒言閒語。稍觸別營。不特宜戡本營六營。兼宜小心和協別營之將領。兵猶火也。勿戢將自焚也。

軍事以氣爲主。淪去舊氣。乃能重生新氣。若不改頭換面。長守此堅壁。以日夜嚴防而不得少息。則積而爲陳腐之氣。如敗血之不足以養身也。

滾中之土宜覆於牆上不可覆於外壕宜壁立斗絕不可斜跛墮下

「日中則昃月盈則虧。」故古詩「花未全開月未圓」之句。君子以爲知道。自僕行軍以來。每介疑勝疑敗之際。戰兢恐懼上下怵惕者。其後常爲大勝。或當志得意滿之候。各路雲集。狂於屢勝。將卒矜慢。其後常有意外之失。

軍行。以水泉甘潔爲最難得之境。其無活水清泉之處。不可駐也。

用兵之道。與讀書同。不日進則日退。須「日知其所亡。月無忘其所能」爲妙。

目下賊氛正盛。我軍宜蓄銳以俟時。沈幾以觀變。如必須退兵。則不妨少退以蓄勢。待得機然後再進。兵法有進有退。古名將非全無退時也。望斟酌行之。

崖角嶺一冲太長。進冲甚易。退回甚難。此行兵者所忌也。此時審幾度勢。但宜穩紮。不宜輕進。名將以救敗爲第一難事。

凡兵勇太少則軍威不壯。太多則弱者間或反爲強者之累。弟之不肯輕用團勇。亦執是故。若能借其人多以助我之勢。而臨陣又不爲其所累。則有益而無損。到處鄉團皆可用矣。

國藩平日不善臨陣。故友人相戒。但宜在遠處調度。不宜至近處對敵。恐各統領營官分心以護衛鄙人。轉不能衝鋒應變。出奇制勝也。

連日各處募勇者甚多。應募者漸少。卒之擇將甚於將之擇卒。朝秦夕楚。輕去其主。辛苦教練。甫覺可用。轉瞬已失其所在矣。或在此營當散勇。則貪易一營以充什長。甫得什長。又思易一營以充哨長。若兵則壹列尺籍。終身不致。鄙意欲借兵呆板之風。稍變勇浮動之習。

吏治有常者也。可先立法而後求人。兵事無常者也。當先求人而後立法。求人以統領爲最難。營官亦頗不易得。耳不兩聽而聽。目不兩視而明。兵勇愚蠢。自須專習一途。以壹其心志。上岸殺賊。洗足上船之說。當築濡須塢時。

已知其不可行矣。

軍家之一勝一敗。其炎涼意態。往往出素所親愛之人。若更事稍多。亦自見慣不驚。

兩次挫失之後。弁勇心目中。不無輕疑主將之意。田單拜神人爲師。亦以勢弱恐下不我信也。望於士卒前少存不自足之懷。無當大股。無貪奇功。得小小勝仗數次。則士氣漸轉而可有爲矣。

防守之統領。已屬難得。游擊之統領。尤爲可遇而不可求。閣下靜能生明。專在人材上用心。猶爲費力少而收效多。何如。

將來賊平之後。勇則歸農。弁目之精強者。則得缺歸伍。亦銷患之一道也。

承詢選將一節。猥以湖湘俊彥朋與。推求汲引之原。鄙人瞽瞍。奚足以言銜鑿。風雲際遇。時或使之。生當是邦。會逢其適。於鄙鈍初無與也。抑又竊疑古人論將。神明變幻。不可方物。幾於百長并集。一短難容。恐亦史冊追崇之辭。初非當日預定之品。要以衡才不拘一格。論事不求苛細。無因寸朽而棄連抱。無施數罟以失巨鱗。斯先哲之恆言。雖愚蒙而可勉。

穩紮堅守。嚴紀律而愛百姓。尙屬人力之所能勉。行之不懈。亦再謗之一端也。古來義士仁人。行軍用兵之道。專重救人之急。解人之圍。是以義聲播於遐邇。

來教「分制援賊。包打勝仗」等語。無乃期許過奢。鄙人教練之才。非戰陣之才也。守黃梅。守石牌。或可竭力任之。拒援賊。則敬謝不敏。「人貴自知」。不敢不確陳其短耳。

近年軍中閱歷有年。益知天下事。當於大處着眼。小處下手。陸氏但稱先立乎其大者。若不輔以朱子銖積寸累工夫。則下梢全無把握。故國藩治軍。屏去一切高深神奇之說。專就粗淺纖悉處致力。雖坐是不克大有功效。然爲鈍拙計。則猶守約之方也。所最難者。近日調兵。接餉。察吏。選將。皆以應酬人情之道行之。不問事勢之緩急。論旨之寬嚴。苟無人情。百求罔應。卽舉劾賞罰。無人情則雖大賢莫薦。有人情則雖巨惡亦釋。故賊談雖已漸衰。而

人心殊未厭亂。每獨居深念。憾不得與閣下促膝密語。一據積懷。

凡臨敵觀氣色。有二可慮。驕氣。則有浮淫之色。（淫溢也大也漫也）情氣。則有晦滯之色。（晦晦也闇也）整體察而補救之。

驕氣情氣等語。卻不宜與人說及。此等默察之而默救之可耳。凡與諸將語。理不宜深。令不宜煩。愈易愈簡愈妙也。不特與諸將語爲然。即吾輩治心治身。理亦不可太多。知亦不可太雜。切身日日用得著的。不過一兩句。所謂「守約」也。

鄙意欲仿六年八月魯家港禦石逆之法。直待賊來撲營。堅壁不出。待其情歸而後出擊。亦不遠追。如是二日。彼之銳氣少沮。我之識力稍定。然後設法擊之。則真賊與裹者。情狀分明矣。

河淮以北之民。賦性剛勁。耐寒習苦。囊裹乾糲。且行且食。以該處之兵。辦本地之賊。必可得力。若做部皆銜湘之士。狃於南方風氣。不慣麵食。冬則風帽皮衣。炭盤手爐。刻不能離。羅李名將。亦不免於冬烘氣象。

凡兵勇與百姓交涉者。總宜伸民氣而抑兵勇。所以感召天和者在此。即所以要獲名譽者亦在此。望閣下實心行之。幸勿視爲老生常談也。至於戰勝攻取。雖無把握。若守之必固。則可以人力操其權。

軍事有驕氣情氣皆敗氣也。孔子云。「臨事而懼。」則絕驕之源。「好謀而成。」則絕情之源。平日無時不謀。無事不謀。自無情時矣。外間或言閣下好籠罩人。己所不知者。以言銛人使言之。人言未畢。則又以己意承接而引伸之。好以聰明細人而不至誠待人。國藩久聞此語。未便遽進箴規。今既受統領重任。務祈細己之聰明。貶己之智術。凡軍中大小事件。殷殷請教於朱雲崖。處處出於至誠。則人皆感悅而告之以善矣。

早夜站牆。日日操練。斷不可閒。勤字爲人生第一要義。無論居家居官行軍。皆以勤字爲本。黎明早起。勤字中之一端也。

用兵久。則驕情自生。驕情。則未有不敗者。勤字所以醫情。慎字所以醫驕。此二字之先。須有一誠字以立之本。立

志要將此事知得透辦得穿。精誠所至。金石亦開。鬼神亦避。此在己之誠也。人之生也。直與武員相交。接尤貴平直。文員之心。多曲。多歪。多不坦白。往往與武員不相水乳。必盡去歪曲私衷。事事推心置腹。使武人粗人坦然無疑。此接物之誠也。以誠字爲之本。以勤字慎字爲之用。庶幾免於大戾。免於大敗。

楚軍水陸之好處。全在無官氣。而有血性。若官氣增一分。則血性必減一分。八九兩年。余過湖口時。彼此皆不免有官氣。此次余與厚菴閣下。皆當力戒以挽風氣。

今大難之起。無一兵足供一割之用。實以官氣太重。心竅太多。竊樸散醇。真意蕩然。湘勇之興。凡官氣重心竅多者。在所必斥。歷歲稍久。亦未免沾染習氣。

軍事是極質之事。廿三史除班馬外。皆文人以意爲之。不知甲仗爲何物。戰陣爲何事。浮詞僞語。隨意編造。斷不可信。僕於通鑑中之不可信者。皆用筆識出矣。退菴若以編輯廿三史成書爲治軍之藍本。則門徑已差。難與圖功。閣下與之至交。須勸之盡棄故紙。專從事於點名看操。查牆子。諸事也。

鄙人近歲在軍。不問戰事之利鈍。但謀一己之勤惰。蓋戰雖數次。得利數十次。得利。曾無小補。不若自習勤勞。猶可稍求一心之安。

家世寒素。深知一粒一絲之匪易。近年從事戎行。每駐紮之處。周歷城鄉。所見無不毀之屋。無不伐之樹。無不破之富家。無不欺之窮民。大抵受害於賊者十之七八。受害於兵者亦有二三。喟然私嘆。行軍之害民。一至此乎。故每與將官委員告戒。總以禁止騷擾爲第一義。雖行之未必有效。差幸與閣下來示意趣相同。

主守則專守。主戰則專戰。主城則專修城。主壘則專修壘。切不可腳踏兩邊橋。臨時張皇也。

戰時無他謬巧。大約隊伍不錯亂。鎗礮不早發。二者即操可勝之權。賊若憑堅城而守。我軍仰攻。斷難得手。

大抵平日非至穩之兵。必不可輕用險著。平日非至正之道。必不可輕用奇謀。然則穩也。正也。人事之力行於平日者也。險也。奇也。天機之湊泊於臨時者也。

布置須四路照顧。不可擠在一處。賊若來時。當頭敵者。須擇一好手。窄路打仗。勝敗全係頭敵數人。若頭敵站不住。後面雖有好手。亦被人擠退了。

治軍之道。以勤字爲先。身勤則強。佚則病。家勤則興。頹則衰。國勤則治。怠則亂。軍勤則勝。惰則敗。情者。暮氣也。求閣下以身率之。常常提其朝氣爲要。

治軍以勤字爲先。實閱歷而知其不可易。未有平日不早起而臨敵忽能早起者。未有平日不習勞而臨敵忽能習勞者。未有平日不能忍飢耐寒而臨敵忽能忍飢耐寒者。微防禦眷擾民。習氣已深。實難挽回。吾輩當共習勤勞。先之以愧厲。繼之以痛懲。閣下若有志斯事。或零招一二哨苦心訓練。繩以敵處營規。盡變微防積習。如果可用。則逐漸增加。以是保衛珂鄉。卽以是共維大局。

凡打仗。一鼓再鼓而人不動者。則氣必衰滅。凡攻壘。一撲再撲而人不動者。則氣必衰滅。

擇地有兩法。有自固者。有扼賊者。自固者。擇高山。擇要隘。扼賊者。擇平坦必經之路。擇淺水津渡之處。嗣後每立一軍。則修碣二十座。以爲老營。環老營之四面方三百里。皆可往來梭剿。庶幾可戰可守。可奇可正。得四軍可靠者。則變化無窮。

凡用兵之道。本強而故示敵以弱者多勝。本弱而故示敵以強者多敗。敵加於我。審量而後應之者多勝。漫無審量。輕以兵加於敵者多敗。閣下常犯此二忌。嗣後望勤加訓練。不患無交戰之時。但患無能戰之具耳。

石壘之法。約二丈二尺高。在土內基址砌四尺。出土外者一丈八尺。厚如修敦仁碣之式。一丈以上安門。門上不過一二尺耳。大可容一哨人。合勇夫不過百二十人。斷不可再大。內作四艙。火藥艙。水艙。上不住人。子彈艙。米鹽艙。上可住人。牆不甚厚。則守壕者無子牆可站。宜於砌至丈五六尺時。用橫木砌於磚石之內。架板於橫木挑之上。如棧道然。以備站牆之用。

凡出隊。有宜速者。有宜遲者。宜速者。我去尋賊。先發制人者也。宜遲者。賊來尋我。以主待客者也。主氣常靜。客氣

常動。客氣先盛而後衰。主氣先老而後壯。故善用兵者。最喜爲主。不喜作客。或我尋賊去。先發制人。或賊尋我以主待客。總須審定乃行。切不可於兩層一無所見。貿然一出也。（以上書札）

三軍聽我苦口說。教你陸戰真秘訣。第一紮營要端詳。營盤選個好山岡。不要低窪潮濕地。不要一坦太平洋。後有退步前有進。一半見面一半藏。看定地方插標記。插起竹竿牽繩牆。繩子圍出三道圈。內圈略窄外圈寬。六尺牆腳八尺壕。壕要築緊牆要牢。正牆高要七尺滿。子牆只有一半高。爛泥碎石不堅固。雨後倒塌一缸糟。一營只開兩道門。門外逐驅閑雜人。周圍挖些好茅廁。免得熱天臭氣薰。三里以外把個卡。日日守卡夜夜巡。第二打仗要細思。出隊要分三大支。中間一支且紮住。左右兩支先出去。另把一支打接應。再要一支埋伏定。隊伍排在山坡上。營官四處好瞭望。看他那邊是來路。看他那邊是去向。看他那路有埋伏。看他那路有強將。那處來的真賊頭。那邊做的假模樣。件件看清件件說。說得人人都膽壯。他吶喊來我不喊。他放鎗來我不放。他若撲來我不動。待他疲了再接仗。起手要陰後要陽。出隊要弱收隊強。初交手時如老鼠。越打越強如老虎。打散賊匪四山逃。追賊專從兩邊抄。逢屋逢山搜埋伏。隊伍切莫亂分毫。第三行路要分班。各營隊伍莫亂參。四六隊伍走前後。鍋帳擔子走中間。不許爭先太擁擠。不許落後太孤單。選個探馬向前探。要選明白真好漢。每日先走二十里。一步一步仔細看。遇着樹木探村莊。遇着河水探橋梁。遇着岔路探埋伏。左邊右邊都要防。遇着賊匪來迎敵。飛馬回報不要忙。看定地勢并虛實。邊報一刻也不妨。前有探馬走前站。後有將官押尾幫。過了尾幫落後邊。插他耳箭打一千。第四規矩要肅靜。有禮有法有號令。哨官管兵莫太寬。營官也要嚴哨官。出營歸營要告假。朔日望日要請安。若有公事穿衣服。大家出來站個班。營門擺設杖和柳。閒人進來便鎖拿。不許吸煙并賭博。不許高聲太喧嘩。姦淫擄掠定要斬。巡更傳令都要查。起更各哨就安排。傳齊夫勇點名來。營官三夜點一次。哨官每夜點一回。任憑客到文書到。營門一閉總不開。衣服裝扮要料峭。莫穿紅綠惹人笑。哨官不許穿長衣。兵勇不許穿軟料。腳上草鞋緊緊穿。身上腰帶緊緊纏。頭上包布緊緊紮。英雄樣子都齊全。第五軍器要整齊。各人製件好東西。雜木杆

子溜溜圓。又光又硬又發縣。常常在手摸得久。越摸越熟越值錢。錯頭只要六寸長。要出楊家梨花鎗。大刀要輕。腰刀重。快電如閃白如霜。鎗礮鐵洗要乾淨。鉛子個個用合膛。生漆皮桶盛火藥。勤翻勤曬見太陽。鋤鐵鏟子要粗大。斧頭要嵌三分鋼。火毬都要親手製。六分淨硝四分磺。旂幟三月換一次。紅的印心白的鑲。統領八面營官。四隊長一面哨官雙。樹樹搖出似飛虎。對對走出如鴛鴦。第六兵勇要演操。清清靜靜莫號嘈。早習大刀並鎗子。晚習扒牆並跳壕。壕溝要跳八尺寬。牆子要扒七尺高。樹個靶子十丈遠。火毬石子手中拋。閒時尋個寬地方。又演跑隊又演鎗。鳥鎗手勁習個穩。擡鎗眼力習個準。擡起鉛子習打靶。翻山過水習跑馬。事事操習事事精。百戰百勝有名聲。這個六條句句好。人人唱熟是祕寶。兵勇甘苦我盡知。生怕你們喫了虧。仔細唱我得勝歌。保你福多壽又多。

三軍個個仔細聽。行軍先要愛百姓。賊匪害了百姓們。全靠官兵來救人。百姓被賊喫了苦。全靠官兵來作主。第一紮營不要懶。莫走人家取門板。莫拆民房搬磚石。莫踹禾苗壞田產。莫打民間鴨和鷄。莫借民間鍋和碗。莫派民夫來挖壕。莫到民間去打館。築牆莫攔街前路。砍柴莫砍墳上樹。挑水莫挑有魚塘。凡事都要讓一步。第二行路要端詳。夜夜總要支帳房。莫進城市占鋪店。莫向鄉間借村莊。人有小事莫喧嘩。人不躲路莫擠他。無錢莫扯道邊菜。無錢莫喫便宜茶。更有一句要緊書。切莫擄人當長夫。一人被擄挑擔去。一家啼哭不安居。娘哭子來眼也腫。妻哭夫來眼也枯。從中地保又訛錢。分隊各團并各都。有夫派夫無派錢。牽了驢馬又牽豬。鷄飛狗走都嚇倒。塘裏嚇死幾條魚。第三號令要嚴明。兵勇不許亂出營。走出營來就學壞。總是百姓來受害。或走大家訛錢文。或走小家調婦人。數些地痞做駁計。買些燒酒同喝醉。逢着百姓就要打。遇着店家就發氣。可憐百姓打出血。吃了大虧不敢說。生怕老將不自在。還要出錢去陪罪。要得百姓稍安靜。先要兵勇聽號令。陸軍不許亂出營。水軍不許岸上行。在家皆是做良民。出來當兵也是人。官兵賊匪本不同。官兵是人賊是禽。官兵不搶賊匪搶。官兵不淫賊匪淫。若是官兵也淫搶。便同賊匪一條心。官兵與賊不分明。到處傳出醜聲名。百姓聽得就心酸。上司聽得

皺眉尖。上司不肯發糧餉。百姓不肯賣米鹽。愛民之軍處處嘉。擾民之軍處處嫌。我的軍士跟我早。多年在外名聲好。如今百姓更窮困。願我軍士聽教訓。軍士與民如一家。千記不可欺負他。日日熟唱愛民歌。天和地和又人和。

莫打鼓來莫打鑼。聽我唱這解散歌。如今賊多有緣故。大半都是擄進去。擄了良民管長毛。個個心中都想逃。官兵若殺着從人。可憐冤枉無處伸。良民一朝被賊擄。喫盡千辛并萬苦。初擄進去就挑擔。板子打得皮肉爛。又要裹飯又搬柴。上無衣服下無鞋。看看頭髮一寸長。就要逼他上戰場。初上戰場眼哭腫。又羞又恨又懵懂。向前又怕官兵砍。退後又怕長毛斬。一年兩載髮更長。從此不敢回家鄉。一封家信無處寄。背地落淚想爺娘。被擄太久家太貧。兒子餓死妻嫁人。半夜偷逃想回家。層層賊卡有盤查。又怕官軍盤得緊。跪求饒命也不准。又怕團勇來訛錢。搶去衣服并盤纏。種種苦情說不完。說起閻王也心酸。我今到處貼告示。凡有脅從皆免死。第一不殺老和少。登時釋放給護照。第二不殺老長髮。一尺二尺皆遣發。第三不殺面刺字。勸他用藥洗幾次。第四不殺打過仗。丟了軍器便釋放。第五不殺做偽官。被脅受職也可寬。第六不殺舊官兵。被賊圍捉也原情。第七不殺賊探子。也有愚民被驅使。第八不殺細送人。也防鄉團細難民。人人不殺都胆壯。各各逃生尋去向。賊要聚來我要散。賊要擄來我要放。每人給張免死牌。保你千妥又萬當。往年在家犯過罪。從今再不算前帳。不許縣官問陳案。不許仇人告舊狀。一家骨肉再團圓。九重皇恩真浩蕩。一言普告州和縣。再告兵勇與團練。若遇脅從難民歸。莫搶銀錢莫剝衣。(以上雜著)

仿古字版

會文正公大事記

世界書局印行

會文正公大事記

道光十三年。

學使岳鎮南按臨。補廩學生員。

道光十四年。

甲午科鄉試。中式第三十六名舉人。時年二十四歲。

道光十八年。

戊戌科會試。中式第三十八名貢士。

道光二十年。

授檢討。旋派順天鄉試磨勘。

道光二十一年。

充國史館協修官。

道光二十二年。

爲四川正考官。後補翰林院侍講。是年冬回京充文淵閣校理。

道光二十四年。

充翰林院教習庶吉士。後轉滿翰林院侍讀。

道光二十五年。

乙巳科會試。充第十八房同考官。九月擢翰林院侍講

學士。十二月補日講起居注官。充文淵閣直閣事。

道光二十七年。

充考試漢教習閱卷大臣。十月充武會試正總裁。又擬

大事記

殿試讀卷大臣。

道光二十九年。

詔授禮部右侍郎。八月兼署兵部右侍郎。充宗室舉人

覆試閱卷大臣。九月充順天鄉試覆試閱卷大臣。十月

充順天武鄉試校射大臣。

道光三十年。

文宗咨以郊配廟祔大禮。公具疏條陳。上嘉納之。賜遺

念衣一件。玉佩一事。四月充庚戌科會試覆試閱卷大

臣。又派朝考閱卷大臣。八月充考試國子監學正學錄

閱卷大臣。九月充宣宗梓宮前恭捧冊室大臣。後兼署

兵部左侍郎。

咸豐元年。

疏陳簡練軍實以裕國用。上嘉納之。又上敬陳聖德一

疏。語多切直。朝士皆憂其獲譴。及優詔褒答。一時稱盛

事焉。五月兼署刑部左侍郎。十一月監視郊壇開工。十

二月上備陳民間疾苦一疏。奉旨教部議奏。監視募陵

隧道開工。

咸豐二年。

疏請寬免勝保處分。以廣言路。上嘉納之。充壬子科會

試搜檢大臣。六月詔公爲江西正考官。附奏試竣回籍。

一

殊批允之。行至安豐太湖縣。聞母江太夫人之訃。匍匐奔喪。八月抵家。九月葬江太夫人。時粵匪洪秀全等。由廣西竄長沙。圍攻三關。月不克。十月解圍去。掠船埠洞。庭湖而下。連陷岳州。漢陽武昌等處。大江南北。土徒蜂起。詔諭湖南巡撫張亮基傳旨。飭公協同辦理。本省國線。搜查土匪事宜。公以奉諱歸家。不宜與聞軍事。章疏辭卻。適庶吉士郭嵩燾至。力勸公出。公弟國荃亦贊之。於是始治兵於長沙。逐日操練。是為湘軍創立之始。

咸豐二年。

編查保甲設發省局。一時巨奸大惡。多被誅戮。盜賊屏息。莠民亦改而從善。各處土匪。逐漸剪除。粵匪洪秀全棄武昌。劫聚東下。壘陷沿江郡縣。又陷安慶省城。並據金陵為偽都。公遣軍與忠源會剿平之。旋又搗毀永桂等地之匪穴。四月安慶又陷。賊船上犯湖口。公檄忠源由湖陽赴江西。同去有夏廷樾郭嵩燾朱孫貽等。是為湘軍出境之始。七月湘軍抵南昌。南昌城外賊壘。悉舟居以犯。忠源嵩燾具疏。請開南湖北四川。各造戰艦數十。飭廣東製備船位。並交會國藩管帶部署。長江水師之議自此始。八月公疏稱衛承楨桂。匪徒聚集之數。乃移住衡州。命彭玉麟楊載福二人。各募水勇領一營。彭揚受命治水師自此始。南昌戒嚴。賊陷九江府。分股竄湖北。連陷黃州漢陽。北擾德安。南及興國。岳州戒嚴。公與湘撫詔乘章。嚴防堵。徵調援江西諸軍回湘。常寧

土匪攻陷縣城。連陷嘉禾藍山二縣。遣弟國葆及營攻射等討平之。十二月賊陷蘆州。巡撫江忠源死之。

咸豐四年。

初公在衡州。創立水師。前無成法。後乃稽仿廣東拖罟快蟹長龍之式。增置檣座。又檄廣西之同知諸侯。航夏鑾等分設一處於湘潭。既成軍。遣長沙黃冕觀之。冕言每營須添舢板十號。公大聽之。即日改定營制。公既聞忠源等殉節。乃經營東征。募水師五千人。分人領管。齊米謀鹽。及軍火器械。載民船百數十號。以行。員弁勇夫共一萬七千餘人。軍容於斯為盛。二月賊陷岳州。自湘陰趨靖港。陷寧鄉。官軍不能敵。公檄舟師而登岸擊賊。拔出城中軍民。退保長沙。因上疏自劾。後賊據靖港。分股由寧鄉陷湘潭。掠民船數百。塔齊布率師援助。大捷於湘潭。四月公親督師擊賊於靖港。西南風發。水勢迅急。為賊所乘。公自投於水。左右救之獲免。而水師之在湘潭者。連獲大捷。公回長沙。重整水陸各軍。及委湘潭靖港勝負各情。並上疏自劾。是時湖南郡縣。如岳州華容常德龍陽等城。多被賊陷。公整軍東下。水師分三起進攻。七月克岳州。又破賊於城陵磯。並平沿江兩岸賊壘。賊眾悉數東竄。公進駐廬山。上聞獲捷。乃賞給三品頂戴。公不受。楊彭等又克羊樓司崇陽縣咸寧等處。公進駐嘉魚。繼駐金口。魁王揚昌泗等軍五千人。亦會於此。諸將謀取武昌之策。羅澤南言洪山花園兩路。皆賊

重兵所在。花園鎮江環城。尤賊勢所注。賊壘九座。請與搭將軍分任之。供山花園賊破。武昌無自固之勢。公乃振兵二千以助之。不久九壘皆克。並克洪山。遂薄武昌城。於是賊壘悉平。漢陽賊亦遁。公乃統師東下。遣楊載福等破賊於蘄州。塔齊布克大治縣。羅澤南克與國州。隋次倒平。公進駐田家鎮。塔齊布等克廣濟黃梅等縣。又破賊於孔隴驛及小馳口。公進駐九江城外。水陸官軍合攻九江城。賊堅守不能下。賊以小艇夜襲公營。公坐船陷於賊。文卷蕩然無存。急掉小舟。馳入羅澤南營。以免。公欲以身殉國。草遺疏千餘言。羅澤南力諫乃止。因上疏自劾。

咸豐五年

公因九江未克。乃抵南昌。籌畫添製船礮之制。內湖水師。於是復振。公遣水師進駐康山。賊由都昌陷饒州府。分犯樂平景德鎮祁門徽州廣信等處。遣羅澤南由南昌繞出湖東。二三月羅澤南破賊於貴溪。克弋陽縣。又克廣信府。公進駐吳城鎮。繼駐南康。水師大捷於馬家壩。焚賊船百數十艘。五月又敗賊於青山。獲賊船甚夥。奪回拖罟大船。即前公所失船也。水軍又破賊於徐家壩。塔齊布亦破賊於破壩。羅澤南連破樂口乾坑鰲嶺龜鳴山等處。斬敵六千。塔齊布卒於軍。公赴九江。其眾未幾。公回駐南康。是時江西郡縣惟九江湖口未克。屬南謂湖口諸軍。但當堅守。不宜數攻。公悉從之。九

大事記

月公進駐吳山。疏籌師久無功。請交部嚴議。湖南援鄂之師。潰於牟樓司。羅澤南親督軍至該地。大破之。初賊會石達開。由崇通等縣竄江西。陷新昌縣。粵東匪徒竄言安者。連陷安福分宜萬載等縣。與石達開合。於是贛水以西。亂民響應。公檄周鳳山率九江全軍回南昌。以爲剿辦西路賊匪之計。彭玉麟前乞假回衡州。聞江西緊急。即抵南康。公見大喜。派領水師。赴蕪江扼剿。十二月周鳳山克樟樹鎮新塗縣。賊攻吉安。江西按察使周玉衡入城守之。

咸豐六年

彭玉麟大破賊船於樟樹鎮。轉攻蕪江賊壘。又破之。林恩源等擊賊於九江破之。於是賊陷吉安。周玉衡死之。周鳳山師潰於樟樹鎮。公急回省助守。人心始定。三月遣彭玉麟扼紮吳城鎮。鄧輔給林恩源進剿。蕪州。周鳳山畢金科等助之。楊載福率水師由鄂東下。搜毀沿江賊船。至九江城外而還。五月賊犯吳城。彭玉麟擊却之。六月入饒州府城。公弟國華自湖南聞開走武昌。乞師拯江西。國華率兵五千人。連克咸甯備折崇陽。四縣。轉戰而東。克新昌上高各城。遂抵瑞州府。公弟國荃赴長沙。長沙募勇二千人。號其軍曰「吉字營」。國荃以一軍立功天下自此始。九月公至瑞州。勞師不久。即回南昌。崇州賊出城撲營。國華攻之。累被官兵殺斃。劉騰構毀瑞州南城。築新壘二座。十一月公弟國荃克

福縣。進攻吉安。胡林翼派人東征。連克武昌。黃州。興國。大冶。蕪州。廣濟。黃梅各城。擄兵九江城外。十二月。赴九江。勞師。旋回南昌。

咸豐七年

正月十七日。公赴瑞州視師。二月初四日。公父竹亭封翁薨於里第。十一日。計至營。公與弟國華自瑞州奔喪。公弟自吉安奔喪。並奏陳丁憂回籍。得上給假三個月。所有公職。俟提督銜湖北陳陽鎮總兵楊載福就近統帶。四月。公奏請在籍終制。上不允。並促假滿回營。五月。葬竹亭封翁。六月。公疏仍懇請終制。上又不允。九月。公奏江西軍務。漸有起色。仍請在籍終制。上乃允之。先是國荃奔喪回籍。所部吉字營勇。交文襄陳湜統帶。王鑫破賊於廣昌。榮安賊回竄吉安。周鳳山軍潰敗。於時王鑫劉騰鴻相繼倫亡。湘軍連失健將。巡撫耆齡派公弟國荃為總統。公念國事方艱。勉弟遠行。國荃乃進兵吉安。適僑翼王石達開由鏡湖疾趨吉安。眾號數十萬。國荃與之擊。大破之。十二月。楚軍充陸江府。

咸豐八年

公弟國荃。李續賓。楊載福。張運蘭。王開化等。漸次肅清江西。賊竄入浙江。上令國藩馳驛浙紅辦理軍務。公即拾裝由湘鄉至長沙。奏報起程日期。七月。公由武昌歷九江。溯口。以達南昌。援浙諸軍。俱集於河口鎮。公由南昌發進徽口。八月。公抵河口營。聞賊竄擾廣豐。玉山兩

縣。官軍擊却之。公弟國荃。攻克吉安。江西全省肅清。九月。公駐建昌府。弟國荃率師來會。旋回湘。十月。李續賓偕公弟國華。戰歿於三河鎮。

咸豐九年

上謂會國華殉難。可憫可嘉。賞給伊父會驥雲從二品封典。以示褒獎。二月。蕭啓江攻克南安。收復崇義縣。是時閩省肅清。入移駐撫州。六月。公弟國荃至景德鎮。三戰皆捷。遂克景德鎮。七月。公弟國荃率師由撫州至南昌。公弟貞幹。(原名國荃)從軍於黃州。公疏稱擬先駐湖北武昌等縣。如賊果入川。再行酌量前進。八月。公至黃州。旋至武昌。胡林翼委公弟貞幹回湘募勇。九月。公同駐黃州之巴河。十月。公弟國荃率所部吉字營至巴河。請假回籍。公弟貞幹。領所招湘勇至鄂。公慮四路進兵之計。旋因目疾請假。上准在營休養。十一月。公由黃梅移駐宿松縣。十二月。胡林翼進軍英山。公弟貞幹從之。

咸豐十年

二月。公叔父高軒封翁訃至。公請假四十日。閏三月。公弟國荃自湘來營。率師攻安慶。駐紮集賢關。公疏薦左宗棠。剛明耐苦。曉暢兵機。請破格錄用。上乃令左宗棠襄會國藩軍務。是時蘇常相繼失守。公恐以圍攻安慶之師。命弟國荃任之。六月。公至祁門縣。上諭國藩派人分路進兵。規復蘇常。是時江浙遍地皆賊。紛紛請援。公

疏稱左宗棠李元慶等均未到皖。皖南極爲可危。何能屏蔽浙江。更何能規復蘇常。目下惟有急援寧國而已。八月賊陷寧國府。周天受死之。遣李元慶接辦任事。十日而城陷。賊趨祁門甚急。適左宗棠軍次南昌。公檄赴樂平婺源之間。以備截擊。十月賊由牟棧嶺陷黟縣。鮑超張運蘭擊走之。左宗棠軍次景德鎮。大破賊於貴溪。賊屢窺犯祁門。鮑超等擊於盧村。大破之。賊出牟棧嶺。公營始安。僑英王陳玉成。大舉援安慶。公弟國荃擊走之。

咸豐十一年

賊之窺祁門者。屢被官軍擊退。盜悉意犯景德鎮。冀絕官軍餉道。二月陷之。公度糧路已斷。惟急復徽州。可通浙江之米。三月親至休寧督攻徽城不克。仍回祁門。而賊之環攻者不已。誓以身殉國。自書遺囑寄其家。後由左宗棠三戰於賊皆捷。於是祁門之路始通。四月公移駐東流縣。八月公弟國荃攻克安慶省城。城中悍賊無編網者。至是安慶已陷九年矣。初十日接黃襄政務王大臣咨文。驚聞七月十六日。文宗顯皇帝賓天。揚載福等筋次擊平江西之賊。凡公部諸軍所向皆捷。九月公弟國荃進軍廬江縣。連克泥汊口神塘河東關等隘。軍威所至。勢如破竹。十月公弟國荃回湘募勇。十一月奉到大行皇帝頒賞遺念衣一箱。十二月鮑超破賊於青陽。朱品隆破賊於徽州。左宗棠破賊於大鶴嶺。上諭彭

玉麟爲安徽巡撫。王麟力辭。公疏稱玉麟素統水師。合舟登陸。用違其長。請仍領水師。

同治元年

上諭李鴻章所統水陸各軍六千人。催速赴鎮江。以弭江北聲勢。公疏稱李鴻章新募淮勇五營。另撥湘勇數營。二月可以成軍。擬由陸路赴鎮江。二月初九日。左宗棠克遂安縣。十五日公弟國荃率新募湘勇六千抵安慶。旋破賊於桐城關。三月李鴻章師上海。上諭李鴻章署理江蘇巡撫。公弟國荃真幹及鮑超等。悉破沿江北岸賊壘。左宗棠之軍。連獲勝於紅山常山之境。聲勢大振。四月公弟國荃克金柱關東梁山蕪湖縣。於時李鴻章初受兵事。令程學啓劉銘傳等進兵。匪縣之用備鐵爲北路。而英德兵自松江進金山。匯爲南路。洋兵被賊擊走後。賊之分股。已踰新橋十餘里。勢且逼上海。李鴻章自統七營往援。大破賊於徐家匯。斬首二千人。奪獲器械無算。於是弁人皆服李鴻章之英偉。鴻章因疏弁兵之難恃。舍滬赴鎮之非。便詔許之。七月鴻章之弟鶴章。連毀塘橋城外三賊卡。弁人華爾以輪船用礮助攻。遂拔其城。公疏陳大紅以南。疾喪感行。請派在京親信大臣馳赴江南。會辦軍務。以上難選其人爲復。是時士卒死亡大半。而僑處王李秀成率賊圍攻公弟國荃大營。用西洋落地開花炮。前後轟擊。歷十五晝夜。我軍以大砲火猛擊之。燒燬無算。抵死勿退。又僑侍王李世賢

自浙江率衆數十萬趨至。途月餘。我軍出境破賊壘數十處。賊悉棄奔備。自相殘殺。死者無算。十一月公弟真幹卒於軍。十二月行散至安慶。公指棺大號。入城受吊。上諭真幹立功甚多。予諡靖毅。並於本籍及死事地方建立專祠。

同治二年

正月二十八日公自安慶東下視師。約歷二十餘處。途二月二十八日。回至安慶。疏陳巡閱諸軍詳察觀賊勢情形。當公之東下視師也。賊攻常熱益急。李鴻章遣人力擊之。擒賊首李天義朱衣魁。當熱解圍。三月上諭會國荃爲浙江巡撫。公與國荃上疏懇辭。上不允。時出關北下竄之捻匪。自鹹水分爲兩股。聯成一片。公搜獲偽文。有由舒六而竄英霍分道援鄂之語。因疎陳逆謀甚狡。而規畫甚大。李鴻章克崑山縣。鴻章之圖崑山也。部將程學啓謂奪崑山。必據正義鎮。鴻章從其謀。命松林學啓攻正義。賊遁去。遂克崑。新兩縣。公弟國荃攻克甯花台。及聚寶門外石壘九座。皆下之。四月我軍分六路。偷攻石壘石壘未幾城賊大出。僑匿附郭屋舍以誘敵。我軍蓄銳不出。賊不得逞。遂據甯花台。我軍四面搏擊。賊卽負鎗鼠竄。奪獲炮械無算。賊勢從此衰矣。八月李鴻章遣軍攻江陰縣。屢戰未克。乃召郭松林會剿。破賊巢數處。賊方停河築木城自守。銘傳出兵誘賊。松林軍突自山嶺下。大呼曰。斬賊鋒傳益奮擊。賊大潰。遂克其

營。郭松林旋又大捷於無錫。奪賊船百餘艘。九月公弟國荃與諸將斬克博望。秣陵。開等隘。屢屢衝進。紮孝陵。衝經營城北。金陵一城。已爲面面布置矣。十月李鴻章克復蘇州省城。先是程學啓蘇州累月六克。鴻章親至學啓營。周察城南東。略知賊勢。十九日我軍出炸礮轟其壘。學啓援南岸。戈登援北岸。鴻章親督之。猶領十餘處。賊會秀成紹洪出而拒戰。於是我軍水陸夾攻。卒破之。遂收復蘇州省垣。上乃賞鴻章穿黃馬褂。十二月郭松林劉銘傳破賊軍牛鎮。是役也。以官軍四千摧得賊數萬。將士咸稱快焉。

同治三年

正月。公弟國荃。攻克天保偽城。李鴻章克宜興。荆溪兩縣。左宗棠亦克桐鄉縣。二月程學啓攻嘉興左廳中槍。皆絕昇歸營。其下益裹劍冒死爭進。賊始亂。備辦新率水陸登城。城乃破。學啓劍重歸蘇州旋卒。公聞而痛惜之。是月閩浙總督左宗棠。攻克杭州餘杭兩城。餘賊竄入湖州。三月鮑超克句容縣。劍橋漢王項大英偽列王方成宗等。李鴻章率松林等。大破三河口賊營。賊死甚衆。四月初六日。李鴻章攻克常州府。常州乃咸豐十年四月初六日陷。該四年而復。月日皆不爽。亦奇矣。常州餘賊竄徽州。公以徽州失利。自請嚴譴。奉旨寬免。僑德王陳炳文。先後由安徽分竄江西。公檄鮑超自句容赴援。而咨李鴻章遣軍代防。五月上諭。催李鴻章助攻金

陵公弟李鴻章任事最勇。此大稍涉遲滯。絕無世俗避
難之意。殆有讓功之心。臣亦便再三請催矣。又奏會國
基焦勞致疾。餉項奇窘等情。六月十六日。公弟國基及
蕭孚泗攻克金陵。僑都。奪獲僑王璽二金印二方。僑幼
主洪福瑱遁走。僑忠王李秀成及洪仁發伏誅。先是四
月二十七日。僑天王洪秀全見勢窮援絕。服毒身死。奉
會私極僑宮內。發不發喪。國基聽報。上諭賊據金
陵。已有十二年。一旦殲除。實由會國藩調度有方。謀勇
兼備。著賞加太子太保銜。錫封一等侯爵。並賞戴雙眼
花翎。會國基著賞太子少保銜。賞錫一等伯爵。並賞戴
雙眼花翎。又凡有功於職績者。均分別賞給。是月公由
安慶至金陵。慰勞將士。巡視省垣。又親訊僑宮婢黃氏。
始於僑宮中掘出洪秀全屍首。編體皆用繡龍黃袍包
裹。頭禿無髮。鬚已間白。因戮屍而焚之。公親訊盜會李
秀成等。秀成親供四萬餘言。歷述賊中與敗始末。公以
該盜罪大辭職之。因疏陳處治盜會情形。七月總巡破
賊於蕪州許驛。斬虜四萬。又克東鄉金谿兩縣。十三日
公札撤勇二萬五千人。留萬人防守金陵。留萬五千人
為皖南北游擊之師。後公回至安慶。左宗棠克吉安縣。
浙江平。是時江蘇亦平。公撤勇回籍。並為弟國基請病
假。奉旨均照所請。並賞給國基人參六兩。八月湖州賊
竄寧國。左宗棠擊賊於昌化淳安之境。大破之。餘匪挾
洪福瑱竄入江西之廣信境。九月初八日。公至金陵。二

十日公弟國基破賊於廣信。洪福瑱遁走石城。竄田
進擒洪福瑱。送南昌斬之。十月公弟國基回湘。時捻匪
擾及皖之六安英山太湖。公遣蔣凝學。劉連捷分道禦
賊。會僧格林沁等亦督師進剿。擒斬逆酋。皖省漸次肅
清。

同治四年

上諭公弟國基回湘半載。著公飭弟到京。陸見公疏稱
病尚未愈。三月李鴻章檄鄂松林赴福建。助剿漳州賊。
松林破賊於山東恆社倉等處。四月左宗棠督軍攻漳州府。
松林助剿。福建平。賊竄廣東。中興將帥。錫封侯伯
者。奉旨錫以美名。公曰毅勇侯。公弟國基曰威毅伯。官
文曰果威伯。左宗棠曰恪靖伯。李鴻章曰肅毅伯。十月
公疏稱病難速愈。請開協辦大學士兩江總督之缺。並
請另簡欽差大臣接辦。上諭賞假一月。在營安心調理。
十一月上諭會國藩將軍務交與李鴻章接辦。該督即
回兩江本任。辦理餉需。公疏稱體難勝重任。請仍在營
照料。上不允。力辭又不允。公乃疏稱遵旨暫接兩江總
督關防。駐紮徐州。御史穆振香劾公督師日久無功。
請量加譴責。上諭。一年給以來。會國藩所派將領。馳驅
東徵楚皖等省。不遺餘力。奮賊亦頗不少。雖未能遽蕪
厥功。亦豈貽誤軍情者可比。該御史所奏。著毋庸議。

同治六年

正月初六日自周家口啓行。十五日抵徐州。十九日接

欽差大臣李鴻章商兵餉大計。詔諭李鴻章爲湖廣總督。二月初三日。李鴻章赴河南督師。十六日。公自徐州赴金陵節署。臣民焚香結道以迎。十月公弟國荃奏請開湖北之缺。回籍調理。奉旨報可。上諭。大學士兩江總督一等毅勇侯曾國藩。著加恩加一雲騎尉世職。欽此。

同治七年

四月二十四日。公自金陵啓行。二十六日至揚州。查運庫。二十九日登金陵觀蘇文憲王公。爲詩記之。旋登焦山。四月初三日抵蘇州。初十日至上海。查閱鑄字廠工程。友回金陵。詔以詞補直隸總督。馬新貽詞補兩江總督。十一月初四日。公自金陵啓行。士民攀送。填塞街巷。爲詩歌以餞者數十百人。十三日抵京寓東安門外賢良寺。翌日進見皇太后。談話頗多。

同治八年

正月初一日寅刻趨朝。十六日長初二刻又趨朝。是日賜廷臣宴。十七日辰初二刻又趨朝。與皇太后談話頗久。所言是盡練兵吏治之事。二十日出都。二十一日巡視永定河堤工。二十七日抵保定省垣。二月初二日接筭視事。四月公疏稱直隸練兵。當參用東南募勇之法。仍須戶部籌餉。然後營務方有起色。奉旨報可。十二月公疏稱畿南各屬災歉較重。擬於來春以貨爲賑。請於天津存儲項下。撥餉錢十萬串。解至大名。預備散放。

同治九年

正月核練步軍馬隊章程。三月公左目失明。四月二十一日。公患感冒。請假一月調理。假滿而病未痊。又續假一月。是時天津民教相訐。適兩江總督馬新貽爲刺客張汝霖所害。詔以公調補。以李鴻章調補直隸總督。公辭懇辭。上不允。九月天津民教之案辦結。是年公壽六十。奉旨賜壽。二十六日入見皇太后。略述天津民情。並述自己目病。及馬新貽之事。二十七日又趨朝。蒙皇太后召見。述練兵情形。及教堂多事。十月初九日召見於養心殿。與皇太后敘述水師宜操練。及好將甚少。十月十一日。公六月初度。湖廣同鄉京官。稱謁於湖廣會館。十二月十日抵金陵。住巡道署。二十二日接筭視事。

同治十年

正月公與欽差鄭敦謹奏。結張汝霖行刺馬新貽一案。該犯實無主使。應凌遲處死。六月公泛舟城北玄武湖。游歷秦淮諸勝。七月公與李鴻章會奏。派刊部主事陳蘭彬江蘇同知容闈。選帶聰穎子弟赴泰西各國肄習技藝。八月出省大閱。十月十一日至吳淞口。校閱已畢。因演試輪船。凡四號。曰恬音。曰威埤。曰晉江。曰側海。皆公所命名也。十五日回金陵。十一月移居新修督署。卽僑天王府故址。

同治十一年

正月二十三日。公病肝風。右足麻木。良久乃愈。二十六

日前河道總督蘇廷魁過金陵。公出城迎候。與中背誦四書。忽手指戈什哈。欲有所言。口噤不能出聲。送回署。二月初二日。公方閱奏牘。執筆而手顫。欲言而口噤。有頃復愈。因告公子紀澤。「喪事宜遵古禮。勿用僧道。」初四日午後。公周歷署西花園。公子紀澤從。遊畢將返。忽呼足麻。扶掖至廳堂。端坐而斃。是日戌刻也。城中驚傳火起。救視無見。他處皆見大星墜於金陵城中。士民巷哭野祭。如喪慈母。事聞。上震悼。輟朝三日。奉上諭。「大學士兩江總督會國藩。學問純粹。器識宏深。秉性忠誠。持躬清正。由翰林蒙宣宗成皇帝特達之知。俸升臬貳。咸豐三年間。創立楚軍。剿辦粵匪。轉戰數省。迭著勳勞。文宗顯皇帝優加擢用。補授兩江總督。命爲欽差大臣。督辦軍務。朕御極後。簡任論罪。深資倚任。東南底定。厥功最多。江甯之捷。特加恩賞。給一等毅勇侯。世襲罔替。並賞戴雙眼花翎。歷任餘圻。於地方利病。盡心籌畫。老成碩望。實爲股肱心膂之臣。方冀克享遐齡。長承恩眷。茲聞遽逝。震悼良深。會國藩著追贈太傅。照大學士例賜卹。賞銀三千兩治喪。由江甯藩庫發給。賜祭一壇。派穆騰阿前往致祭。加恩予諡文正。入祀京師昭忠祠。賈夏祠。並於湖南原籍。江甯省城。建立專祠。其生平政績事實。宣付史館。任內一切處分。悉予開復。應得卹典。該衙門察例具奏。聖恩同籍時。著沿途地方官。妥爲照料。其一等侯爵。著伊子會紀澤承襲。毋庸帶領引見。其

餘子孫幾人。著何璟查明具奏。候旨施恩。用示篤念忠良至意。欽此。」四月二十八日又奉上諭。「大學士兩江總督會國藩。於本年二月間因病出缺。當降旨優予卹典。並於湖南原籍。江甯省城。建立專祠。生平政績事實。宣付史館。一等侯爵。即令伊子會紀澤承襲。其餘子孫幾人。令何璟查明具奏。候旨施恩。」旋據何璟英翰李瀚章先後臚陳會國藩歷年勳績。英翰李瀚章。並請於安徽湖北省城。建立專祠。又據何璟從查故督子孫。詳晰覆奏。披覽之餘。彌增悼惜。會國藩器識器人。盡瘁報國。嘗湘鄂紅皖軍務棘手之際。倡練水軍。矢志滅賊。雖屢經困阨。堅忍卓絕。會不稍渝。卒能萬衆一心。削平逆寇。功成之後。實畏小心。懼始愆罔。薦拔賢才。如恐不及。尤得以人事君之義。忠誠克效。功德在民。允宜迭沛恩施。以彰忠盡。會國藩著於安徽湖北省城。建立專祠。此外立功省分。並著准其一體建祠。伊次子附貢生會紀鴻。伊孫會廣鈞。均著賞給舉人。准其一體會試。會廣鈞著賞給員外郎。會廣銓著賞主事。均候及歲時。分部學習行走。何璟英翰李瀚章摺三件。均著宣付史館。用示眷念勳臣。有加無已至意。欽此。」

仿古字版

會文正公榮哀錄

世界書局印行

曾文正公榮哀錄

祭文

黃翼升

嗚呼我公。百世之師。文章可聞。性道難窺。文章之顯。乃在功名。破百萬賊。復數百城。拯民水火。胎民榮利。虞有餘糧。野有餘德。或俊而秀。日躔與序。普莪在祉。蘭芷升堂。公之勳德。詎焉罄詳。識其大者。衆口琅琅。翼升從公。戎事伊始。草屨布衣。枕戈而起。公謂汝能。俾整其旅。淮揚總兵。長江開府。屢擢於朝。不十年耳。翼升何人。當斯重任。倖免貽羞。持公成命。公在軍中。履傾於危。惟堅惟忍。實濟我師。公治江左。清靜無爲。一笑一嘆。化神若馳。公治畿疆。有嚴有翼。百吏奮興。頑廉嚚立。帝眷三江。還公於南。引疾不可。坐鎮其壘。民瞻公來。望塵而喜。祝公百年。長我孫子。豈期一疾。遽展靈輶。醫不及藥。巫不效靈。靈光燭天。微雨清塵。嗚呼哀哉。公之去來。蓋有所爲。既濟艱難。遂遣榮貴。所難堪者。宮府吏民。執綽上理。敢活斯人。矧在翼升。思同罔極。酸危陳詞。涕沾胸臆。嗚呼哀哉。

梅啓照

嗚呼。春黯江南。星沉箕宿。音集堂槐。望摧梁木。模範龜

榮哀錄 祭文

存。儼型空。萬禩難追。百身莫贖。中外心傷。軍民巷哭。細屬門牆。哀情彌篤。恭維夫子。蕭湘秀篲。衡嶽靈鍾。匡時良弼。當代舊宗。經綸滿腹。兵甲羅胸。德崇忠孝。學道精通。操持冰雪。氣度雲霞。謙以接物。儉以傳家。履仁蹈義。存誠闕邪。言坊行表。白璧無瑕。詞館翔翬。爭呼才子。文柄主持。羣稱得士。躋位卿貳。鴻翻高舉。應詔陳言。龍顏有喜。忽觀閔凶。杜門讀禮。髮逆猖獗。見義而起。創立楚軍。旌旗肅穆。天子知公。大事可屬。授鉞專征。焚香故卜。乃統鷹揚。次第規復。感恩圖報。殺賊亡身。大小百戰。用兵如神。十年飲血。千里無塵。東南重奠。爲國爲民。飲至策勳。黃扉正位。穆穆侯封。世襲罔替。日月雙輝。劍調孔翠。載進宮銜。推恩子弟。三江鎗鎗。首推渡公。一蒞再蒞。治理雍容。飾以甘霖。噓以和風。從躬何均。艾物何豐。偉哉元老。帝倚如山。馳驅南北。宏濟時艱。鞠躬盡瘁。力竭身靡。恨無靈草。可駐仙顏。膏澤所敷。罔不追憶。召伯之棠。株株凝翠。岷山之碑。人人墮淚。方之於今。其情豈異。純臣忠愛。惓惓君王。一封遺表。慮遠謀臧。身歸泉下。心在帝旁。皇謨說命。訓詞煌煌。九重知己。一代元良。師終令典。逾越尋常。易名晉秩。爲國寵光。有丈夫嗣。各秉義方。名登農部。譽噪膠庠。紹蟠淵澤。象笏盈牀。明德之

一

俊。百世其昌。惟予小子。受知最早。廿稔從遊。多會少
三載。株陵重親。道貌方冀。長依。握鐵鑄造。胡沾微疾。遽
返於天。所嗟永訣。竟無一言。代陳遺疏。哀更纏綿。楚些
空賦。位飾健體。嗚呼。毅雨凄凄。花風漠漠。淚染杜鵑。聲
一悲白鶴。嗟我哲人。芳型難作。敬奠椒漿。惟虔惟恪。有疏
載舉。有酒載酌。夫子有知。尙其來格。

二

孫依言

嗚呼。昔子瞻之祭歐陽文忠。其詞有曰。「民有父母。國
有君親。斯文有傳。學者有師。君子有所恃而不恐。小人
有所憚而不爲。譬如大川喬嶽。不見其變動。而功利之
及於物者。不可以數計而周知。」予嘗讀而偉之。以爲
此固子瞻之知言。而自古大臣。魁閣正直。非如歐陽公
者。誠不足以語斯。而又疑此鉅人之持出。殆將曠百世
而庶幾。不謂有我公之卓絕。及我生而得見。而又獲親
炙以追隨。嗚呼。自古聖賢與夫豪傑間出之士。其所以
有爲於世者。固欲符其志之所嚮。而其事之能濟與否。
則常視乎所遭之幸不幸。而非人力之能施。方公之以
兵部侍郎。督師鄉里。因糊糊之泉。用彭楊李羅之才。轉
戰十年。而遂以覆狐狸之窟穴。拯東南之孤孽。此其功
名之不世。固歐陽所未及爲。而其文章之恢奇浩澗。學
術之廣博精微。貫古今於懷抱。羅百家而兼該。以視歐
公。又可謂齊驅並驟。殊塗而同歸。於歐公當明道履歷
之間。雖亦嘗困於夏竦藍元震。遷謫而憂疑。而自仁宗

之末造。歷英宗之首基。由臺諫。登侍從。掌帝制。筮樞機。
其立朝執政。同嘗歷歲移時。而史亦稱其左右兩宮。坐
鎮四海。蓋白首而不衰。至其同時大臣。如杜富韓范皆
志同道合。左掣而右提。而石介會登蘇軾軾之徒。又
相與切磋以道義。揚厲其光輝。是其才未必果盡所用。
而其志可謂不謬所期。嗚呼。以公之大度偉略。深謀遠
規。使其所遇之幸若歐公。營六平之無事。虞密勿以論
息。則其所以引吾君於恭儉。挽俗世之浮瀆。收天下之
豪傑。謹安危之斷微。必有以光列聖神武之烈。爲萬年
深遠之隱。而又東西奔命。與兵終始。不敢告勞。遂至盡
瘁。名爲宰相。而不能日與朝廷之謨議。功侔周臣。而不
能盡如蕭曹之指揮。挺危蹤以孤立。恃聖主之獨知。彼
流俗之無識。或貌敬而心非。而殘夫之憤類。甚至於負
恩忘義。譴訕造謗而不自知。其爲翼轅而胎鱷。故世之
論公。以謂其皇皇若弗及。威威若不怡。由功高而志下。
亦道尊而氣卑。而我之窺公。則固知其內視一己。實有
未滿之素志。外觀斯世。尤有無窮之憂危。嗚呼。昔子瞻
之從文忠游也。有子由以與之偕。而我之得出於公門。
我弟方將使指而南馳。當文忠皇帝之初元。公方請復
講書之舊儀。而大臣有不然者。我弟獨密聽力爭。以爲
此忠臣之至慮。邇洽之綱維。及我弟爲小人所中。我方
從公於軍中。獨召語我而累歎。至於今已逾十年。我弟
方有以自得於山巖水澗。而公之捲捲不已。猶欲引而

置之殿墀。嗚呼！此其遺義之相契。亦何待於我几杖以趨。隨。類如予之無狀。視乎瞻固無能爲役。而飄搖江海。又一時所棄遺。豈爲公之推轂。屢再味其言之。雖舉世皆嫌其愚直。而公獨以爲無瞻顯而依違。嗚呼！越吳瘡痍。戎方擾敗。大東杼柚。極西鼓聲。大任側席。重華宵衣。何一老之不弔。又孤生之無依。然則予之所以爲公齋。亦歸瘼。亦何以易子瞻之詞曰。「上爲天下。而下以哭其私。」

四

錢應煒

岳嶽降神。實生申甫。衡山纓纓。濯靈湘楚。篤現我公。兼資文武。提挈綱維。奠此土宇。若士農工。爰及商賈。以引以翼。無不得所。滄海江深。恩岸德博。騎箕忽逝。幾哉千古。惟公一身。伊呂畢獲。二代而下。孰與等夷。湖自通籍。泊贊給廩。垂四十年。衆望咸歸。我錢大難。身繫安危。奇功偉烈。樹之豐碑。墓繪日月。莫費一詞。小子不敏。請言其私。庚戌之歲。款策上郡。大賢門下。幸獲步趨。詔我經術。折衷漢儒。曷我言行。執範程朱。自是道從。無間晨夕。邵袁寵契。嗜書成癖。容我參語。謬附促籍。期我遠到。金門射策。半公舞鶴。環錫鑄鼎。三載春明。迅駟鉤陳。公歸梓里。烽火連群。義於所樹。無避金革。我公容毫。樞垣奉職。屢讀公疏。姓詞竊聞。軍事成敗。驚心疊報。百折不回。躬自販賣。帳望衡雲。神馳形隔。會幾何時。春秋十易。曰惟庚申。吳越塵纒。軍書旁午。鐸音中斷。情急南歸。奉親

避亂。辛苦賊中。生死參半。涉海翻江。戩影私館。自分此生。草間適寬。忽奉公書。招赴戎幕。命司章奏。欣然有託。娛侍清堂。天倫至樂。烟湖京華。依然如昨。先子積學。校書萬卷。公夙神交。而未識面。比來皖江。歡然相見。躬造敝廬。傾談不倦。材官走卒。亦疑亦羨。及我巨憂。生芻來奠。溫語拊循。深情縉纆。至今思之。淚下如霰。上元甲子。大功告成。相從東下。卜居江城。追維曠昔。始盡更生。將挽銀珂。洗此甲兵。猶有餘靈。飯饘縱橫。皇帝曰咨。命汝北征。庸不遐暖。奉詔卽行。我乃隨侍。水驛山程。亦云負笈。匪曰詩緇。由徐達淮。是類是禱。舟師十萬。星夜裝艦。巨屨稽天。洪濤飄蕩。時維朱夏。雷騰龍下。森風忽起。黃河激射。船艦傾危。萬衆色譟。急視公舟。公猶整暇。共歎艱難。能以誠化。公曰不然。是殆天假。舍舟而陸。移師周口。惟此要區。擇險而守。賊衆如蟻。環環左右。公夜讀書。聲歷刁斗。萬柝聲。惡風兇走。琴書却敵。斯直新觀。帝眷南陽。資公坐鎮。治軍治民。同一忠盡。我違晨昏。二年缺訊。歸諗母氏。新霜添鬢。惟公錫類。伏公威信。遠游過歸。會無悔吝。畿輔重任。非公莫盛。建節重移。北門鎖鑰。我總庭闈。欲行又止。公體人情。坐語移晷。烈道猶然。味苦彈微。身滯江南。天未延企。手札時來。捧讀驚喜。自公之去。民望若霖。祝公之來。公果重臨。歡聲雷動。萬口一心。大裘庇蔭。冬日愛深。謂可永載。有如高岑。何圖一載。落聲望霄。樞鈴芸掩。珠斗光銷。悲用泣霑。長虹燭宵。街

循聚哭。薦芷焚椒。天胡此醉。福不為傲。遠出公門。歲星
兩周。親持几杖。十載勾留。涓埃徒矢。高厚莫酬。數公寮
幕。將相輩出。會不數年。書英騰寶。嗟我鷲下。半生秦箠。
願從公久。情誼專一。正論微言。窺公慎密。談諧談笑。樂
公率直。疏稿滿篋。黜竄塗乙。一字推敵。墨無旁溢。忍淚
檢尋。音容髣髴。公手扶雲。公心捧日。天鑒忠誠。新宮久
待。千秋萬祀。是主是宰。一瓣心香。告升鼎彝。警馬風車。
神令斯在。

五

陳艾

嗚呼。功破南服。績紀太史。德洽數省。飲人肌髓。走卒婦
孺。感愛沒齒。能言之流。掛偏無似。艾以狂狷。銜恩知己。
自述梗概。政辭身鄙。共遭時亂。避地祁門。敝衣孺躑。就
食城垣。先達說士。藹公行轅。草茅真率。寥寥數言。公喜
我樸。大笑解帶。時有專局。表公志魂。俾我尸之。紀述粉
著。月分康足。使市甕豚。上奉老母。下逮兒孫。餞者告飽。
塞者告怨。籌筆偕環。經史討論。教誨懇至。引入籬藩。譬
從酸飯。下就平原。公名奪誘。忘我庸昏。艾也不才。無干
時志。公謂此人。泊然名利。惜其少慧。或為質果。置之膏
腴。不備不辭。置之繁劇。不肯不嫻。果以狂愚。孤行己意。
公鑒其誠。屢易舍地。公委任使。艾實非器。我之疏直。宜
老江湖。屢塵荐轍。縮竹使符。自顧未信。勿敢匿等。公昔
入觀。弁辭樵蘇。通蒙加禮。遂其嗜鳥。公名知人。忘我之
禮。兒名異傳。去遠頭角。公謂美賢。資之使學。老師碩彦。

四

俾從商榷。金入於範。加以磨琢。頌短級長。負公先賢。公
名無私。私其樸懇。舉室銜恤。敢忘其翎。嗚呼哀哉。我一
書生。惟事丹鉛。就章服之。守敝比肩。執飲食之。有粥有
饈。執啓迪之。服膺僊先。茲母介弟。先於顛連。匪荷恩禮。
十有三年。我雖愚魯。敢忘膺拳。報德無日。攬鏡華巖。峻
門一瀉。公鑒其虔。

六

忠義局

天眷聖清。日月重光。星精垂曜。降於南湖。仰乎炳明。卓
上紫宮。風掃九萬。抑長翰射。儉德服土。權威不校。弁絡
之郊。燭漢之址。西玉南金。作貢天子。銘几儼辰。聖人有
喜。但佐亂民。盜兵橫池。擊師撥之。臣怒而嬰。公銜帝命。
為簡之師。退蒐衡陽。還劍溘漉。止則鉅防。逝則奔馬。風
震滿空。詢其來下。左視洪都。右拂江夏。使賊肝舌。恐焉
九野。士氣如劍。或浮或沈。公為歐冶。契台於浮。會有天
機。拔植高吟。管然位分。見者傾心。始述洞庭。喋血彭蠡。
欽承大符。斧賊懸脾。益陽飲之。合肥伏之。賊有心肝。介
弟削之。鼻巢獠穴。幡之膽之。瓊今遺黎。甘甬歸之。帝祚
偉烈。誓河苴茅。公開東閣。叱趕英豪。隣介在遠。憤不敢
媿。德量所極。島嶼畢包。網羅百里。定奠田植。神有秩祀。
藝有穀食。類宮翔羽。經宮鼓射。國應覽錄。書林畫式。萬
井皞皞。相忘帝力。大福不終。鞠凶吾人。春相同輟。銜恤
舊恩。聲皆徵天。淚皆徵泉。仰瞻箕尾。四顧超焉。中國有
葵。豈止其身。

嗚呼。公之生也。天固將以大任遺公。當其立朝而侃侃。人已知其不苟異不苟同。及專事之起。毅然舉義。雖屢謫交集。而自矢其孤忠。劍水師以剿賊。沿大江而逐東。歷百戰以至皖。屢瀕危險。而賊亦屢避其鋒。惟其推心以置腹。故自僚屬將帥。莫不踴躍而樂從。於是知師干之總。非公莫屬。此所以殫平吳越。而卒收其功。嗚呼。公雖有兼人之稟。固已披於戎行之十載。況又盤根錯節。無一日之息。而往來奔命於南北之衝。以紅南之艱鉅。當大創之後。維持補救。豈敢安坐鎮而自比於衰櫓。此其未臻於上壽也。蓋韜射盡瘁。而不由於六氣之珍。二豎之攻。嗚呼。公之器識度量。遠超乎世見之外。故其和氣謙德。實能自忘其功業之盛。與爵位之崇。其於文章學問。洞悉本末。每自視欲然。與人為善。而亦不敗於門戶之說。其接物也。靡義斷仁。而使之自化。其垂訓乎後嗣也。諄諄乎惟義利之辨。怯求之戒。而孝弟之是宗。此不特古來將帥所未有。即古來名人大儒。亦渺及其從容。固宜遺殊常之曠典。而特諡於九重。嗚呼。黃旆洶洶。西寇猶紅。陸有陌龍。辨有伏戎。假我數年。庶諸患息而元氣漸充。乃一朝而長逝。使天下感喟於無窮。嗚呼。公已往乎。彼野哭仰睇者。徒見光焰之燭空。其騎箕尾而上升乎。將臨照乎斗牛之分。全吳士庶。永託於焄燄。

嗚呼。我公之生。六十有二年。心憂勤而匪懈。法天德之乾乾。學惟日其不足。力以久而彌堅。宜百年之逢吉。何乃劍生之遺捐。嗚呼。公之道德。孔孟之亞。公之經緯。望敵並駕。公之憂樂。後先天下。公之文學。四科游夏。公之心志精神。全銷磨於戎馬。嘗夫義旗初建。公誓不還。開誠布公。延攬英雄。天下已定。自視欲然。彌給宇宙。公何加焉。及至元老北觀。犬戎內重。公曰和戎。實維全局。籌謀在握。眾口交非。公之精誠偉抱。不以物論移。然天下識與不識。至今無不服公之心。而畏公之感。嗚呼我公。天子是依。風雨飄搖。賴茲元老。旆李藩門。公是師表。羣疑衆難。待公而掃。譬猶日月經天。而邪枉無不照。又如華嶽鎮地。持重而天下不撓。維公之生。嶽嶽降神。及公之沒。天地晦冥。黃童白叟。嗟予誰父。天子曰咨。奪我良輔。聖哲開先。公啓厥後。有公則華。無公則陋。豈天不欲治平天下。何令我公之不壽。不肖侍公。歷年二紀。宦游京洛。伊誰知己。非受教於門牆。將抑鬱而誰語。胡千里以尋師。乃匍匐而哭吾夫子。吾不為一身而悲。恐天下之患。嘗從此始。

九

嗚呼。吹自炎劉。茫茫百代。光岳之精。銷鑠敗壞。挈往校今。百雁一隸。姚姒子姪。遠乎寧耳。孰謂並世。猷還我公。謝羣絕倫。奮起湘中。遠度千載。蹈古比隆。惟公懋學。三代與期。六經百家。窮源汎汎。尊達漢宋。繕快論事。於天

地人。靡莫不竊。炳為文章。靈雄詰唯。惟公經務。洞見治機。曰。惟五禮。哲王之道。及兵與食。國之大謀。古稽而合。今趨而宜。千聖之心。仰而思之。公之得人。為天下憂。文武鉅公。靡善旗旆。涼冠大帶。普彥會會。考遠擊遠。壹足褒者。若金蔚耀。容於一治。公之愈亂。再待九道。定獄鎮鎮。雲龍升扶。手提萬衆。摧驚凶暴。南掩揚越。北盡伏水。西指崑崙。東至於海。六高塞關。天地情說。老澤福號。絕蘇括起。凡公樹立。橫被八垓。極千萬億。橫目之民。若公若父。嚴公若神。豈謂我公。睇若浮雲。獨居深阻。莫眄其律。衆之所顧。公之所貽。啟公莫至。夢阜想變。壹臺其遺。戰戰其危。贊元脩診。簪運密移。天眷聖崇。庶其予回。款謂我功。我其敢知。孰謂我罪。我其敢辭。公乎卓哉。靈其在斯。徽烈之多。乃公操糗。人之不諫。云公倭迤。吁嗟近古。曷則躋茲。如何奄忽。天實凶亟。九重震悼。萬姓用位。矧我小子。靡所比例。薄陋拙滯。世之所棄。辱荷公知。區區文字。譬海細川。我乃涓澮。暇日請謁。公屢色喜。評權古今。往往移晷。嘉我誨我。我矧我砥。翼我彙我。昇我無已。我屬別公。昔冬季季。孰云幾日。遂隔萬世。天下之痛。一生之悲。哀來無端。歸賈如塵。公乎有知。其愁予悲。嗚呼哀哉。

一〇

趙烈文

月之二十日。驚聞吾師薨逝之信。五內摧裂。頃刻迷悶。傷哉奈何。自庚午冬。富驛莊送師南行。見師神氣哀頹。

心嘗憂慮。恐不得復侍顏色。是以頻年感槍。南望長息。屢欲奮飛而返。嗚呼。今幾何時。乃竟有此酷痛。傷哉。傷哉。吾師今年六十有二歲。壽未期盡。生平稟賦之強。盡以用之國家民生。在師功起德遠。浩然遺世。豈復有憾。師世事未寧。憂方大。朝廷奈何。予遺奈何。聞正怒之頃。吉祥善逝。安坐含笑。初無疾苦。吾師天人。完歸為樂。獨不念嗚嗚學首之德。北轉維特望之靈。職。失所依歸。講堂跬步耶。天不慈遺。胡寧大忍。傷哉奈何。烈江東一飯。饒蒙鄙之人。於師門無一線之藥。授自匪夫致之方州。兄弟甥姪。並受參差援極之恩。逾於大親。十年以來。言笑忘分。涉名理則發以治心。語應世則教之實踐。闔門常行。許其敦睦。治理薄效。謂為多才。下至小文曲藝。無不出入請頰。勸掖不置。嗚呼。烈所蒙被於師。豈一息未盡所得忘耶。古人心喪三年。獨居築室。而門生之於舉主。往往棄官奔走。千里行哭。烈生千載之下。形格勢禁。此志不可復遂。然心神散失。官骸塊然。嗟乎。縱能安存。亦墟莽之朴而已。尙何言哉。尙何言哉。靈旆在天。無遠勿履。屈伸哭寢之禮。輒寫哀誌。達之几筵。師其鑒之。謹告。

詩

一（病中哭師得三十韻）

吳坤修

一春噩夢多。奇險吁可怪。抑鬱困五衷。事恐關成敗。異

於二月初，我師募於位，倉皇駕輪舟，將棺盡哀思，回憶壬子冬，長沙甫隨侍，底節於駐武，治軍本初試，掃卻柱東塵，一軍分作二，志節援西江，壯武留重寄，我效哭素庭，如粵乞綱鑑，重九返衡陽，下游賊復熾，草草起異軍，岳陽敗塗地，慘澹圖振興，持籌事不易，破竹下武昌，參覺險人意，豈期到尋陽，兵機又復變，舟師陷蕪湖，岌岌如已棄，我速赴經營，隻身策草屨，就銷蘆壘城，師亦來駐營，茫茫一旅師，百折幸不墜，四塞盡陰霾，不獲通一字，我分武昌軍，立意籌臨端，與師歷艱辛，性命聯指臂，從此下江南，羣賢日紛萃，名王報生擒，費費次策議，媿我分寸勞，亦行忝省使，聞師撒手時，光陰獨世界，東南抵定攻，明詔予特諡，勛可史館書，像可凌烟畫，費盡一 lifetime，獨完千古事，皖省崇新祠，願師顯靈異，雲中甲馬來，椒醕飲一醉，若報知己恩，終身奉血淚，若念訓勗言，隨時肅膜拜。

二（送文正師振南歸泣賦）

吳坤修

人生重氣節，遠問生與殂，披擻衣冠族，昭耀與台軀，此借朝廷恩，乃娛勢利徒，若遇有志士，掩口先胡蘆，所重在心許，可恥是面談，一言如人骨，百折任贖膚，我憶廿年前，無端學奔趨，一登湘鄉門，從此無歧途，勉我繼南塘，或與崇虛俱，萬人紛如海，獨覺禮數殊，時忽遭羣吠，暗暗相提扶，卒令風波下，不為斧鉞誅，手書一一在，貴為君子儒，浮名不輕加，使人無詆誣，常舉鴻鳩詩，青紳

作良談，卽此師弟情，金石不能逾，一旦棄我去，趨焉等諸孤，辨香亭一角，遺像飄長鬚，我援心哀誦，晨夕慘號呼，本欲扶靈車，遠送度重湖，一官如繫腕，進退難自圖，况值焦爛後，神衰貌亦臞，金翅雲旗隨，紅風噴牆烏，一生知己恩，著想實難符，寸心隨所往，化作雙飛鳥，倘過古城南，往述尋一隅，辛苦不可說，吾師慘也無。

三（祠堂落成紀事）

吳坤修

皇帝御極初，辛酉八月朔，璧合於珠聯，祥瑞皆駢集，惟時老湘軍，國統加嚴急，卽於是日曜，城克賊就促，火燄露布聞，兵威誠卓卓，次第平東南，厥機在此著，今聞我師募，萬姓咸感泣，清以古雙蓮，立廟祀褒鄂，救民水火恩，權作銜環雀，我請建帝廷，輿情未可御，豈期甫定基，腦毒使總作，每於呻吟中，指畫嚴匠約，神工鬼斧併，頃刻起樓閣，師恩入人深，聚工頌賜墀，按版告成功，莊嚴復式廊，製曲將迎神，一一合禮樂，師會駐行臺，高樓樹一角，早晚坐其中，憑眺紅輿獄，靈旗指日來，此舉必必然，鬚髮動如生，清酒敬一爵，作詩告後來，有為亦咸若。

四（哭師）

李元度

一夕大星落，光茫薄海鷺，九重悲上相，萬里失長城，傳說騎箕尾，虎圍富甲兵，宗臣應稍裕，（公再造江山似）應援傳文忠，阿文成，張文和，例侑享大蒸，（天語極哀榮，獄獄擎天柱，南銜鎮上游，靈鐘蒼相國，地接蔣恭侯，（湘鄉自僕將蔣公疏誠，二千年乃生公，）名士無雙

略。僞臣第一流。早聞讜大禮。讜論已千秋。(宜廟賞配續帛。公有待見。)五管紛蛇豕。黃巾匝地橫。直隄萌渚嶺。趙石石頭城。宿將皆迴席。詞臣獨請纓。書生萬人敵。終作李西平。墨經登壇日。江心戰血紅。孤軍奔屢北。百折水仍東。妖霧迷銀嶺。弋船燒石鍾。蒼黃授遺檄。裹革誓完忠。(靖港之敗。公草遺疏遺檄各千餘言。手受元度。)自駐軍門節。重收劫後葦。代肩營局任。誰餉客軍飢。百騎摧鳩虎。長江劍水犀。匡盧峯萬丈。應續紀公碑。血戰規紅左。功成背水餘。出師讀葛表。委捷令公書。將相盈門下。爰夷閭起居。弟昆同錫土。褒鄂比何如。壁立門千仞。臣心水共澄。二難領鐵券。三度鎮金陵。薄侮未蘇息。整波尙勝隨。知公愛國淚。泉路尚沾膺。白髮門生在。荒江作幸民。平生數知己。當代一元臣。諧龍鏡天越。文章最替人。(蒙改削散體文十三首。)傷心博陽第。無復吐車茵。詎入元戎幕。吳西又皖東。追隨憂患日。生死笑談中。末路時多故。前期我負公。雷震與用露。一例是春風。慈母嗟投杼。遺釐解網仁。烏啼容反哺。影殿閱勞勩。公怡云非罪。會參未殺人。至今披疏稿。汗背泣沾巾。一別十三載。相思欲斷腸。偶蒙作元冥。猶似訟陳湯。(賜序先正事略。猶昭雪前事。)有約遊吳會。無緣拜後堂。因為效端木。築室獨居場。昭代五文正。惟公羸斗魁。孤忠能治國。天性最饒才。青史無遺議。蒼生競述哀。程門今已矣。立雪再生來。

五

張文虎

公薨五經月。痛定益哀思。天簡三朝翰。風濤百世師。緒忠無孺飾。寶惠奪因時。正有蒼茫感。人問未盡知。千秋論名士。未必古今同。遇勝李忠定。才餘韓魏公。及門多柱石。拔萃到嚙鋒。聲華無凡馬。知應冀北空。世人稱一得。方寸已張皇。學問融虛抱。勛名人坐忘。海波寬並背。秋月靜無芒。心法技求戒。能聲道自誠。(遺訓有技求詩二首。)十載江南北。侯門久簪等。多聞稱遺賢。寡欲許發德。(戊辰贈句云。多聞遠企劉中壘。寡欲差同徐偉長。又嘗謂有儒者氣象。)目斷啼丹旆。情深禁白駒。(去春辭庸堅阻。)湖山遺像在。和氣見眉鬚。(莫愁湖華嚴庵摹公遺像。笑貌如生。)

六

薛時雨

天教元老備哀榮。一夕台星殞石城。報國此身無缺陷。留公寰宇合澄清。人懷若實多私誅。帝比希文受大名。事業蓋棺方論定。熙朝信史有真評。唐宋中興事本殊。時艱端賴重臣扶。但教摧伐為羣賊。依舊車書拱帝都。諸將有才歸夾袋。先皇獨斷壹軍符。功成灑淚何人覺。一片孤忠念廟謨。擎天柱石鎮江南。鑒定終能大亂讎。萬姓瘡痍恩造再。十年休養節持三。郊衙戶稅銘遺愛。士女香花播美談。感世翻庸崇祀典。擲賢寶屨合同龕。(專祠擬建四松庵。庵為陶文毅公遺蹟。)

卽設小藝亦超倫。小隊頻過訪部民。蘭玉清芬同北面。
(公子果誠增陳松生。受業余門。)烟霞沈澗添西賓。
感奮勛德非私誼。張望乾坤少替人。我率孤寡八百士。
生芻莫罷一沾巾。

七

戴望

陽和變秋氣。衰木失雲陰。毒霧朝合日。流芒夜值心。千
秋衰遺愛。四野聽悲吟。不用明公出。東南久陸沉。
十載蚩尤亂。天戮力故平。勛猷垂故府。感痛有儒生。多
士忘矜式。中朝思典刑。更憐三百戶。婦孺涕交零。(公
設清節堂。以養孤嫠。薨之日。皆行哭失聲。)

南嶽天開運。如公首降存。威名况新建。清節擬汾陽。豈
特中興冠。豈爲昭代光。郁哉文字富。遺味溢篇章。
古稱三不朽。公舉足當之。欲寫長炳派。爲題頌德碑。九
原誰可作。一藝愧相知。總慙空堂上。論文憶昨時。

八

劉壽會

賤子戊戌生。公時登玉堂。東髮慕名賢。識公姓氏香。側
聞躋侍從。嘉議翊先皇。沃心丹展鏡。復有禮禮章。流傳
到家塾。展誦聲琅琅。大道無端倪。童稚味側量。先君有
雜訓。辟咤晴能忘。公如在慶屋。韓范富歐陽。癸丑丁喪
亂。烟塵倍縱橫。長江失天監。東淮如佛雲。聞公提義師。
間關起衡湘。又讀詩詠檄。其言激且慷。想公天人姿。冠
世真豪英。霄彌之梯接。景行不得望。幾年避黃巾。故園
他館荒。先君抱漆經。烟水關東隴。樵蘇資客授。往依郭

淮揚。淮揚甘說士。尺書遠寄將。公方勤師旅。禮辟有未
遑。妖氛纏皖中。淮揚轉職亡。先君爲字孤。負庶東海旁。
會壽益陽招。公歎風韻長。辛酉克蘇州。越歲書促行。公
時開東閣。延攬倒屣裳。賓席禮先君。儗宴華筵張。貴奇
到經術。師飯談吾鄉。謂承文達緒。驟斬江焦狂。九流辨
經渭。四庫森戈壁。貞因執純德。人物如西京。黃讀福宸
案。雅度何能能。或乃造寓廬。深語移三商。八籟立躊躇。
驚發到騎兵。爾時樓船兵。江漢歌稻流。介弟金陵師。連
捷雨花崗。功名爛銀虜。志晦用益明。草昧開經綸。文字
芽初萌。乃義闢儒館。魁碩交踴躍。雙警外史畫。抗迹願
與貴。敦仁兼復禮。公學能領頰。卷帙頗汗牛。沈疴二百
霜。校理屬先君。異同參毫芒。故錄刊謄書。落簡無迴更。
尙論爲紀年。志專昭貞剛。燈火精廬中。墓述鎗藜忙。二
元際甲子。吳會猶樓槍。旋收金陵城。感孤種天猷。議定
撫供禮。再睹民物康。賓佐皆從公。東下治征裝。投戈乃
修文。冬試開學場。賊子海蠻來。載筆意激昂。昂庭侍先
君。謁公聽騎航。行卷進素業。獎藉超恆常。更及制舉文。
謂可快榆枌。頗譽虎條勁。深盼驥足騰。風雲揚榜夕。華
燭瓊院光。岳故咸在列。據吏如堵牆。唱名及賤子。名副
鄉貢行。公聞有喜色。嗟惜不暇詳。鬱此愛土悅。驚坐衆
目眩。垂翹夫何言。結感迴中腸。明年公北征。合泐攝封
疆。置局刊經書。續錄甄國魂。句當屬先君。禮遇與公衡。
乃下金陵居。巷宅鄰青楊。賤子思請綴。從公涉徐方。眷

繼庭闈探。羣季益望。兄報知竟無由。此意今猶振。淵陰郭中丞。薦賢佐政。特奏先君名。教士宜上序。中丞乏雅故。采譽因公彰。推測不已出。編識就突印。丙寅公還治。惠化蘇波。再謁被溫言。嗟公鑿髮蒼。德業重勳勉。望繼公治良。會刊班范史。先君仍助勳。咨詢及政典。士畜兼推防。石城重寓公。舉似通德閩。承歡被僂厝。環堵羅酒漿。河潤及九里。公德難縷抗。旻天嗟不弔。餘民罹疢歎。痛憶丁卯秋。先君疾臥床。求獲荷公親。慈難起膏肓。計達公相驚。臨弔淚傾。茲視草土中。垂慈憫瘡。能購總伴成禮。窈窕安北。仍壽生計親。儒館職計儂。月分都府錢。饋貧資春糧。公曰汝家督。弟弱賴汝匡。好慰母氏心。門庭齋烝嘗。大業期不墜。家學宜續廣。勤廉二字箴。植躬在自強。館中英彥萃。善贊先德芳。講習有所資。追琢成瑤璋。此具高古人。誦義遍列。榮聲言昇兒。不嗟萬波涼。予子叔敖子。庶免負薪傷。仇書承先業。鑿檀珍縵。禮經考姬周。選舉探蕭梁。下逮肇域書。未云祛翳。公願登精舍。掃葉見術迹。則坐視燕閑。訓詞周勉。說經明緒言。講授石梯。朝駿駁鄭元。狀物稽毛。冀轉注瓶新義。段桂走且僵。筆札手降頻。師資裁簡在。己巳奉詔書。低釐觀殿。夢轅過江左。祖道紛進能。贈行製序文。分謂華實相。薄劣曷足珍。宏獎公意誠。殷勤語後政。勿謂召伯棠。交衣思鴻崖。西北浮雲。奏記訊起居。答教來郵。注適何稠。在遠念慈。祝公或再

來。南紀民斯慶。天監季象志。三節歲生庚。塗歌而。羣頌賢德。揚公意尤殷。為言視范范。恩命懷坐鎮。抑畏懼莫當。聞訊所校。遺集徵恩王。南朝廷壽史。討探業未央。瓊細及家事。變屈權推。永言傳先君。年前值禱。再拜乞佳傳。仗公鴻筆。公許政。為信。無時債。更及左氏。烈庭學未昌。公願望。補芬紅。莊念此。靈餘。才不中。精兵。六載資。公。位。獲支持。仲叔皆。學也。亦。家門。再。出谷。天。方。期。雲。水。葵。頓。午。何。大。星。隔。來。下。遊。幸。聞。哭。寢。門。雲。涕。紛。浪。浪。公。乎。歸。去。既。奠。神。張。張。鼻。藥。志。佐。虞。李。郭。功。與。唐。公。名。在。史。乘。稟。言。善。作。郎。無。特。賤。子。陳。蚺。驚。師。驚。風。報。德。今。無。階。禮。有。府。主。哀。陳。師。費。以。哀。輟。翰。心。傍。復。公。靈。其。鑿。諸。叫。雲。排。天。關。

聯

一

受業吳坤修

二十年患難相從。深知備極勤勞。兀矣中興元老。
五百里倉皇奔命。不獲瀝承色笑。傷哉垂暮門生。

二

受業梅啟照

武脚可擬。汾陽可擬。姚江亦可擬。蕭湘衛亂。腥氣獨鍾。
四十年中外傾心。如此完人空想像。

相業無雙。將略無雙。經術又無雙。蔣阜秦淮。大星忽願。
廿六載門牆回首。代陳遺疏。劇悲哀。

三

翔陳濟遠

貳室共趨庭。慈顏用露。雅訓冰清。配席前無限提撕。彷彿春風沂水。窮齡窮步。元老勤高。國殤骨冷。倘泉下有緣。晤語。淩涼明月江天。

四

浙江知縣王厚堂通判陶寶會

未職荷裁成。北斗山高。方放大廈瞻依。服教久欽文藻。勸躬真况瘁。南天星隕。遽失中流砥柱。傷心如喪武鄉侯。

五

紅蘇記名道江清讓

生民擬山海鳳麟。應五百年名世。歷廿四考中書。正學懋躬行。帝賴其勛高柱石。朔運際風雲。請虎。通天地人爲儒。立德言功不朽。救時安宇內。公誠無補金湯。

六

受業章騰麟

衡嶽雲興。大澤及天下。上台星隕。遺愛遍江南。

七

廣東候補道程桓生

修謁甫歸來。憶精神步履。矍鑠如前。何期變出須臾。半壁東南驚柱折。考終緣福備。况道德動名。昭垂不朽。獨念思承高厚。廿年依倚瀟山頹。

八

小門生薛福成

榮哀錄 聯

遵蕭曹郭李范韓而上。大勳尤在薦賢。宏獎如公。殷望

乾坤一蠹痕。

竊道德文章經濟之全。私淑亦兼親炙。迂疏似我。進隨南北感知音。

九

知府劉景堯

相業贊中興。海宇澄情。賴矢精勤廿一載。師模垂後世。廉勤砥礪。敢忘遺訓十三年。

一〇

晚生歐陽璣

偉略佐中興。元老壯猷無與匹。高文留信史。人倫師表定推公。

一一

紅蘇知府桂中行

勳塞寰區。神歸河嶽。天奪元老。世失人師。

一二

內弟歐陽秉鈞

舊雨相親。歎廿年琴韻書聲。頌成往迹。大星忽隕。合四海通才碩學。共哭元勳。

一三

江蘇知府張兆鹿

天祖有神靈。生公持挽中興局。乾坤試環顧。俯世爲難繼起人。

一四

受業劉翰清

有事君之小心。緯地經天。一代殊勳垂國史。惟六子能先覺。周情孔思。千秋絕業在遺文。

一五

門下晚生周世徵

功在社稷。澤在生民。盡瘁歷三朝。四海蒙庇。豈獨蒙陰

循南國。

歡其娛樂。恤其陵夷。敦交延兩世。十年飽德。從今葛屐
泣西華。

一六

門生黃翼升

地復荆揚。喜頻年物阜年豐。到處有賈祠樂社。

門多將相。悲此日撥傾柱折。何由仰北斗東山。

一七

江蘇按察使應寶時

舉世託安危。生而為英。死而為靈。痛此時白馬素車。後

復紅潮流日夜。

大儒作將相。先天下憂。後天下樂。看到處黃蕉丹荔。紛

紛俎豆薦春秋。

一八

民部薛時雨

一介臣休休有容。頻年變理餘閒。小隙出郊坵。慣向山

中招魏野。

萬戶侯錦繡勿替。當代元勳佐命。大名垂宇宙。豈徒紅

左誦夷吾。

一九

章心復章瑞垣章瑞鈞章兆起

將相本師儒。武緯文經。真見大名垂宇宙。

拾平出修省。先憂後樂。豈僅遺愛在東南。

二〇

吏部林鐘泉

其功業卓乎李郭之儔。其文章總乎韓歐之長。名世鍾

靈。一代棟梁宗岳麓。

用天下財家不豐於資。進天下才子不顯於秩。至仁忘

己。千秋俎豆配姚江。

二一

中湘歐陽兆熊

矢志奮天戈。憶昔旅雁傳書。道精衛填海。憑公移山。竟

歷盡水火龍蛇。成就千秋人物。

省身留日記。讀到獲麟絕筆。將汗馬勛名。問牛相業。都

看作糝糠塵垢。開拓葛古心胸。

二二

歐陽兆熊

平生風義兼師友。真古雲霄一羽毛。

二三

員外郎曹耀湘

天挺人豪。經文緯武。遺囑運往。生榮死哀。

二四

前湖北布政使厲雲官

待坐二十年。教砥行。教立名。真氣貫兩間。勳業文章稱

不朽。

抱病五六日。猶讀書。猶治事。大星隕一夕。民生士類痛

何依。

二五

郭用季

手挽乾坤。萬里橫流瞻上相。

身騎箕尾。九重都睇失總臣。

二六

募士孫芳與張燮昭

乘業佐中興。方功高畫日。名冠峻極。從教任席斯民。忽

見神光斂泰斗。

司箋陪末坐。槍前歲星虎。今茲柱折。檢點巾箱遺墨。幾

回腸斷泣春風。

二七

門人孫衣言

入聞論勳業。但謂如周召虎。唐郭子儀。豈知志在舉廢。別有獨居深念事。

天下語文章。殆不愧韓退之。歐陽永叔。却恨老來促軼。更無便坐雅談時。

二八

檀道王大經

二代下無此完人。道德勳名。學問文章。運世具全稱。立體祇從誠意積。

一霎間衰茲元老。朝野中外。僚屬士庶。呼天齊痛哭。傷心豈為感恩歎。

二九

熊其光

先帝知人。早屬東南大事。儒臣奮武。固應俎豆千秋。

三〇

候補蔡德澤史易榘車遊丹
李逢源康謙庭藍米錦

化成立道。綏動哀榮。在官在民。在鄉黨朝廷。此日同聲一哭。

學宗誠正。修齊平治。為儒為師。為元勳佐命。於公獨有千秋。

三一

記名提督譚碧璉

三朝數歷。百戰勳威。幾經盤錯艱危。弱成聖代中興業。九廟旂常。千秋帶礪。重以文章道誼。早立純儒歿世名。

三二

鄉晚生周開揚

中興將相出其門。合武鄉汾陽之功。併為一手。

半壁東南失所恃。問王尊謝安而後。幾見斯人。

三三

許長怡

昭代完人。處為大儒。出為元老。中興佐命。功在天下。澤在江南。

三四

湖北提督郭松林

偉業冠古今。滿而不溢。高而不危。統求國計民生。先憂後樂。

薦賢獨天下。功則歸人。過則歸己。若論感恩知己。異口同悲。

三五

夔州知府顧德模

公今與畢夔望敬同遊。繫古元勳齊俯首。我正溯江漢沱澱而上。每經遺壘輒傷心。

三六

兩淮運使方密頤

銜徽雲開天柱峻。大紅星隕石城寒。

三七

年晚生錢振倫

一貫愆心傳。是獨鍾衡徽英靈。湘水問氣。千秋昭定論。罔不讓贊皇宏業。新建奇勳。

三八

長江船務委員李泰源

憂榮在心頭。足燒希文事業。勳名垂宇宙。並傳丞相祠堂。

三九

晚生馮譽讓

一旅獨勤王。誓此身蕩平江樹。勳業終能酬志節。片言會論帥。記當日旂連詩酒。笑談早已識英雄。

四〇

候選郎中許星真

雷雨奮經綸。局啓東征。萬里金湯資鞏固。
勛名昭日月。神歸南岳。九重青瑣薦馨香。

四一

受業陳守和

今後儀型。吾將安仰。生前功德。民不能忘。

四二

晚生郭伯蔭

拔奇夷難。道德振民。史傳千秋無愧色。
偃革辭軒。銷金罷刃。輔星一夕忽韜光。

四三

受業李瀚章

隻手挽乾坤。至今日生榮死哀。公真無恨。
勛名震中外。願此後際。報肩銜。帝曰何人。

四四

二品卿銜老湘軍統領劉錦棠

五百年名世挺生。立德立功立言。鐘鼎旂常銘不朽。
數十載闔門銜感。教忠教義教職。紅淮河漢淚同流。

四五

知府范志顯

當代一人。是文路半儀汾。賜福福。
大名千古。有卑獎事業。歐柳文章。

四六

受業陳長慶

立志道千秋。何必論文魏韓歐。武選郭李。
慮思逾廿載。最難忘揚帆入德。持節導淮。

四七

同鄉張雲理

德冠鄰邦。岱山並茂。儒旒天壤。湘水同長。
四八 受業李鴻裔

位冠百僚。而勞謙自牧。威加四海。而盛德若愚。不震不

騰。隱几獨居。勩業外。年垂大耋。而神觀勿衰。病至彌留。而教堂靡思。如臨如

履。易簀猶在。戰兢中。

四九

知府李寶森

鶴譽備優隆。擢將相。黃珠恩。科名疊發。不為榮。所願在
丹扈陳謀。蒼生造福。

鈞衡資幹濟。作神仙。歸大暮。中外人民皆失色。豈惟是

梓鄉欽泣。槐府吞聲。

五〇

安徽壽素嶺郭寶昌

江左失元臣。沐德懷仁。同向甘棠掇雨淚。
嶺東慈往事。嗟枯吹朽。難將寸草報春暉。

五一

前山西布政使劉秉璋

天上大星沉。氣壯山河。身騎箕尾。
人間紛雨泣。功在社稷。俾被生民。

五二

門下留鼎新

一身繫天下安危。夷徵盛氣。未了暮年心事。
四海得英才教育。勳名德望。永為後世儀型。

五三

涼州鎮周感波

銜徽紀鍾英。忠勤智勇。發於天性。我公力挽乾坤。勩業
模千秋史冊。

紅南遺愛。寬厚和平。獨持政體。此日哀填。衡市。真靈
仰萬古雲霄。

五四

安徽官民

相業匡時。武功定亂。經術名家。上下千古。軼後超前。我公不朽。

九重震悼。百姓悲思。三軍涕泣。東南半壁。感恩懷德。吾晚尤深。

五五

晚生英翰

福藹武鄉侯。義率勳躬。百戰卒成中興業。壽輪報尙父。內憂外患。九原猶蒙老臣心。

五六

受業方駿謨

合志於華。同召之儔。僉稱翼勵時雍。允無慚德。受知在榮。利勛名之外。惟有修能自揚。用答深恩。

五七

門下士李善蘭

士傾廣廈。民失慈航。天胡不弔。勛震華夏。名垂宇宙。公實長存。

五八

侍館甥聶緝三

出師律以定中原。想百戰芒鉞。金甌再整。九重故卜。錫爵增榮。卅年來緯武經文。總歸夕惕維寅。吐握公處如一日。

五九

安徽知府劉奎光

登泰山而小天下。念銜烟地接。忝蔭桑榆。褒鄂門高。謬旆蘿繚。五嶺外御輪親迎。豈意早違半子。音容彷彿遠千秋。

文能措衆。武能威敵。將相規模往古備。

進思盡忠。退思補過。聖賢學問。近今稀。

六〇

鄉再控魏耆

不用口碑誦遺愛。實爲朝廷生異人。

六一

參將葉圻

用衆行師。偉略欲邁新建伯。集思廣益。虛懷宜體武鄉侯。

六二

私淑弟子歐陽利見

五百年名世間生。三朝碩輔。試問汾陽福傳。諸葛經綸。人能兼備厥躬。古今有幾。

數千里神州底定。一柱承乾。况復吐握賢勞。先後憂樂。天不慈遺一老。中外皆驚。

六三

門下士李鴻章

師事近三十年。薪盡火傳。築室忝爲門生長。威名震九萬里。內安外攘。曠代難逢天下才。

六四

門下晚生沈葆楨

威德遠才。多將相器。克己勵行。以功名終。

六五

淮揚四營營官

龍節起三湘。時雨飛來。牛壁山河重洗滌。犀軍分一隊。大星歸去。滿天風月助淒涼。

六六

直隸同知陳崇砥

惟公至性。過人。看武功文德。勳業懋昭。卒能弼亮三朝。終此身鞠躬盡瘁。

在我感恩猶後。惜外是邊防。謀猷未竟。蓋慈遺聯一老。

為當今宏濟艱難。

六七

萬戶領侯封。渣侯恩問半叔子。

千秋論相業。易名不愧范希文。

六八

公真一代名臣。挽東南已墜山河。百戰奇勛。論學行本

原。猶為餘事。

我是再傳弟子。憶京洛叨陪杖履。卅年老友。每從容講

貫。咸服先生。

六九

為東南撐半壁山河。冀大亂初平。長資柱石。

是國家第一流人物。胡中與彼親。遠陔台星。

七〇

披胸躍宿海。沈幾默運。大度能容。廿載相依廉孟子。

隻手挽銀河。陶鑄賢羣。廓清九服。千秋共仰武鄉侯。

七一

係安危之重。為社稷之臣。功名百世。將相一家。按診起

羣英。暮下同僚多節鉞。

出大賢之門。許急流之遠。憂患相從。勘平親視。晴箕驚

此日。風前老淚滿江湖。

七二

是名士。是名將。是名相。備於一身。衡岳翻鍾靈。天為中

興降申甫。

年治晚生黃振綱

門下晚生黃彭年

直隸候補道蔣春元

受業陳 鼎

受業葛啓琛

浙江候補道秦湘業

有立德。有立功。有立言。足以千古。紅流助悲嘆。人誰後

七三

起繼蕭曹。

喜惠士林。四部菁華皆授梓。

七四

周知民隱。百工技藝盡沾恩。

矮柱杖元侯。邊徼未安。竊聞泰岳將頽。絕筆不忘依北

闕。

儼規垂下吏。游蹤久戴。誰知彭城就藹。過門長此哭西

七五

州。

入正揆席。出總師干。以其身繫天下安危。真不愧元老

壯猷。名臣頌畫。

德耀畢襄。功逾管宴。所注意在民生休戚。恨未見蘆南

七六

解甲。灑右鎗兵。

再舉相業。德在安民。卸隨毬跨鑿彭越。亦休大賢惠政。

唐虞域世。歌止擊壤。論智名勇功助伐。請觀棹史成書。

七七

將相一身兼。恩眷方隆。驚看劍氣歸天。星芒墮地。

華夷同淚下。春光忽暗。愁見湘紅孺痕。銜椒理雲。

七八

海內外福宇借依。入樞廟算。出掃攬氣。幹旋拓中興。九

署廬州知府周金章

部民網緞機業

瀘州知府李炳燾

李光明等

黃祥麟

武允文資畫。

江西南管雲相望。我值懸瓠。公傷弭節。去來同寸晷。一生一死勸交情。

七九

受業舒卓元

聖朝養士二百年。得公輔翼中興。方為食報。史館書勛數萬字。似此鞠躬盡瘁。不愧封侯。

八〇

受業劉于傳

秉節歷三朝。門下屬僚多將相。連顏纔兩月。座中師傅竟神仙。

八一

晚生劉 鐸

雅望駐江城。膝圍會際。一瓣心香瞻殿戟。豐功紀廬阜。晚臺重擬。千秋淚墨儻遺碑。

八二

江西紳士劉鐸等

吳楚本聯疆。紀義旗初指。時雨飛來。特為生民救水火。匡廡咸失色。漲去謀復摩。大江東去。長留浩氣壯山河。

八三

紅蘇知縣唐煥章

其感德非下衷所及知。但看迴乾乾坤。陶成將相。惟貽謀待後人之朗事。方慰廿年吐握。四國鈞牂。

八四

通家晚生志 和

簪毫僻虎觀。振臂息鯨濤。文治武功。燕許汾淮齊俯首。星月躡湘潭。鳳雲慘紅樹。畏威懷德。蠻夷華夏共傾心。

八五

知縣薛元啟

廿載矢志勤。憂國方深。建計名垂竹帛。

榮哀錄 聯

三邊需保障。勞心未已。定知氣壯山河。

八六

安徽知府劉芳蕙

活國擬汾陽。形往神留。舉世傾心瞻北斗。感恩同越石。路修齒至。吳公有淚滿西州。

八七

江西知府王延長

盡瘁武鄉侯。千秋臣節。望隆新建伯。一代儒宗。維嶽降神。伯仲伊呂。秉觀作故。開歷山河。

八八

屬吏蔡匯檢

八九

年晚生何紹基

武鄉濬泊。汾陽撲處。定於公元輔。奇勛旂常特炳二三年。班馬史裁。蘇黃詩事。槍憶我詞垣。凱誼風雨深談四十年。

九〇

晚生張之萬

臨履揚冰淵。百世同悲會子贊。功勳益總落。千秋不數謝公墩。

九一

記名道刑部郎中潘會璋

開濟曆三朝。有三達尊三不朽。八表風清。再造勛名千古少。

九二

記名提督陳廣庸

威儀真百度。為百寮長百世師。一宵星殞。九重震悼萬民悲。

九二

記名提督陳廣庸

為國家肱股心膂之臣。再造勳名郭忠武。

鍾銜嶽嶺鬱鬱積之氣。二期知遇李長源。

九三

同里晚生楊昌齡

善道德臨文章。是銜淵問氣所鍾。一代宗風更誰嗣。以儒臣兼武略。平東南數省大難。中興事業獨公多。

九四

晚生馬恩燁

任兼將相翌贊中興。彤廷十六字褒忠。盡瘁鞠躬應自慰。

鑿拔英賢培成後進。幕府萬千人俯首。泰山北斗復安宗。

論交誼在師友之間。兼親與長。論事功在宋唐以上。兼德與言。朝野同悲惟我最。

考初出以奪情為疑。實贊其行。考戰績以水師為著。實主其議。艱難未預負公多。

九五

晚生左宗棠

謀國之忠。知人之明。自愧不如元輔。同心若金。攻錯若石。相期無負平生。

九六

刑部郎中倪文蔚

知我十年前。問客何能。門下簷竿常自誦。論才三代後。如公有幾。江南愛樹已難忘。

九七

張文虞 唐仁壽

廿年軍國久忘身。不愧千秋史冊。三省官民齊淚下。豈徒八百孤寒。

九八

世晚生許乃劍

惟大舉開。功高心愈下。是真澹泊。身沒志益明。

九九

晚南嶺潘鼎立

相節昔受征。志決匡時。每飯不忘天下計。蓋躬今盡瘁。精誠總閱。遺章難竟老臣心。

一〇〇

江西記名道董似巖

立德立功。超越古今名不朽。為將為相。又安中外職無虧。

一〇一

寶山知縣王鴻訓

於國有郭令再造之勳。規模非三代下苟且僥倖功名。尙友古人。尤矣方叔壯猷。召公維翰。

修身見顏子不違之用。緒餘兼四科中政事文學精蘊。師資後進。悲哉鄧侯入鼻。傳說屬箕。

一〇二

同知毛俊臣

功德在人間。實至名歸。相業千秋懷太傅。英靈返天上。山頽木壞。心香一瓣弔鄉賢。

一〇三

門人彭玉聲

為國家整頓乾坤。耗完心血。隻手挽狂瀾。經師人師。我侍希文壯載。

瀟湘城際逢函丈。永訣顏淵。鞠躬真盡瘁。將業相業。公是武鄉一流。

一〇四

襄鄴道歐陽正塘

武鄉侯學貫天人。功德象流。淮海橫流資手障。文中子門多將相。品題增重。山壞草木等心喪。

一〇五

受業年愚姪袁保恒

累世託通家。卅年來父子兄弟。幸為益友嚴師。一旦遽
製槩木痛。

中興推佐名。三代下流常竹帛。綜論武功文德。幾人能
並大名垂。

一〇六

同鄉張雪理

真偽事業今無匹。大匠裁成我最庸。

一〇七

寧國知府受業孫冀蔚

天誥悼殊深。方期橫航就道。干羽舞階。咨策老臣倡數
逝。

公歸悲不復。歷朔凄涼臨戎。江懶仗節。知名婦孺盡街
思。

一〇八

姻世姪朱式霖

幾輩共佐中興。論公柱石勛名。屈指誰堪呼伯仲。
祇今非無後勁。塊我湘山義舊。傷心再不荷臨陶。

一〇九

刑部主事朱壽禧

笑謔魂希文。一身愛樂關天下。
高門重元禮。三世淵源及不才。

一一〇

晚生喬松年

勛業佐中興。何期天柱俄傾。九陔改容聞太息。
謠歌遍南國。忍看江流不轉。千城雪涕失瞻依。

一一一

二書院秀才

先姓慶生還。教養兼施。十年絃誦聲聞。務本先教培士

榮哀錄 聯

氣。

斯文失宗主。典型猶在。八百孤寒淚下。傷心豈為感私
恩。

一一二

前輩泰階道金國琛

承國家二百年教養。聖贊中興。憐艱難。資倚界。樞槍迅
掃。瀛海胥恬。偉績炳千秋。錫爵允能隆帝眷。

救東南億萬姓瘡痍。維持元氣。崇節讓體。和。卿月重
來。大星忽殞。羣生同一哭。感恩況是受公知。

一一三

知縣讀家瑞

是豪傑。是聖賢。來一貢薪傳。親民明德。
有天爵。有良貴。歷三朝。竈遇。生榮死哀。

一一四

山東知縣胡鼎霖

神仙福分。將相經綸。更清操凜然。身後只餘黍八百。
佛子哀賜。書生面目。忽前修邈矣。心喪豈有容三千。

一一五

同知陳光烈

七省被恩膏。偉矣勛名滿天下。
三台望星象。爛然功業在人間。

一一六

姻姪姪郭 階

一德契宸衷。方資都睇廟堂。乍驚梁木遽摧。篤念蓋臣
應震悼。

十年從父執。竊幸追隨杖履。何意巫陽剗召。傷心拋陸
更誰依。

一一七

直隸州莊祖基

一九

德行言語政事文學。一身備聖教四科。又兼勳業崇高。李郭范韓誰與比。

令妻弟弟孝子順孫。六秩占人間全福。更羨君臣際遇。畢葵稷契祇如斯。

一一八

張復勝等

功高百辟。德被兆民。經濟本文章。名世間生成相業。祀享千秋。侯封萬禩。勛猷瀚鐘鼎。嗣庸異數荷天恩。

一一九

懸丞程 杜

大經濟從學問中來。當年整頓乾坤。實惟伊訓一篇。呂韜六策。

奇事業由艱難而至。此日推崇德望。允宜馨香百世。圖繪千秋。

一二〇

受業李偉勳

五百年篤生名世。武功文德。震耀古今。忽傳上相云亡。歎斯民誰為先聖。

二十載依德節門。北馬南船。奔馳壇址。痛哭春風頓歌。徵夫子吾將安歸。

一二一

世愚姪邵頌賢

任艱鉅以佐中興。學問勳猷。共仰表師。敦故舊而撫孤弱。飲食教誨。劇感恩施。

一二二

門人李與鏡

朔運仗元臣。蒿地神仙驚帝夢。任賢真宰相。曾天揚李哭春風。

一二三

無忝所生。病如考。很如妣。厥德有常。更如王父。孝友式家庭。千里奔馳空自位。

以古為鑑。文似歐。詩似杜。鞠躬盡瘁。殆似武侯。功名在天壤。九原可耐作人思。

一二四

世晚生許敏身

德澤被東南。十年來掃盡機權。位亞汾陽。名齊謗葛。大星流紅皖。千里外聞歸蓬島。心傷兩楚。哀動三吳。

一二五

晚生馮桂芬

武緯本文經。為漢唐後儒臣吐氣。中興旋開國。與頤康問元佐論勛。

一二六

(蔣春元)

出西州門迤邐而來。看桑麻佃野。花柳成蹊。十萬戶重踏昇平。遺愛難忘。白叟黃童齊墮淚。

與中山王後先相望。幸湖水波恬。石城烽靜。五百載允符運會。大名並峙。袞袞赤烏共圖形。

上諭

一

同治十一年二月十二日內閣奉上諭。大學士兩江總督曾國藩學問純粹。器識宏深。秉性忠誠。持躬端正。由翰林院蒙宣宗成皇帝特達之知。陞升御史。咸豐二年間。創立楚軍。剿辦粵匪。轉戰數省。迭著勦勞。文宗顯皇帝優加擢用。補授兩江總督。命為欽差大臣。督辦軍務。朕御極後。簡任給廩。深資倚任。東南底定。厥功最多。江寧之捷。特加恩賞給一等毅勇侯。世襲罔替。並賞戴雙眼花翎。歷任兼圻。於地方利病。盡心籌畫。老成碩望。實為股肱心膂之臣。方冀克享遐齡。長承恩眷。茲聞植逝。震悼良深。會國藩著追贈太傅。照大學士例。賜卹賞銀三千兩治喪。由江寧藩庫發給。賜祭一壇。派穆騰阿前往致祭。加恩予諡「文正」。入祀京師昭忠祠賢良祠。並於湖南原籍。江寧省城。建立專祠。其生平政蹟事實。宣付史館。任內一切處分。悉予開復。應得卹典。該衙門察例具奏。靈柩回籍時。著沿途地方官妥為照料。其一等侯爵。即著伊子會紀。承襲。毋庸帶領引見。其餘子孫幾人。著何璟查明具奏。候旨施恩。用示篤念忠良至意。欽此。

二

同治十一年二月十八日奉上諭。前據穆騰阿等並梅

榮哀錄 上諭

啓照同日奏到。會國藩因病出缺。當降旨優予卹典。並於湖南原籍江寧省城建立專祠。生平政蹟事實。宣付史館。一等侯爵。即著伊子會紀。承襲。其餘子孫幾人。令何璟查明具奏。候旨施恩。茲據何璟歷陳會國藩公忠體國。懋著賢勞。覽奏尤增悼惜。何璟原摺著暫行留中。即將該故督之孫何名。年歲若干。查明具奏。再降諭旨。欽此。

三

同治十一年四月二十八日奉上諭。大學士兩江總督曾國藩。於本年二月間。因病出缺。當降旨優予卹典。並於湖南原籍江寧省城建立專祠。生平政蹟事實。宣付史館。一等侯爵。即著伊子會紀。承襲。其餘子孫幾人。令何璟查明具奏。候旨施恩。茲據何璟英翰李瀚章先後隨陳會國藩歷年勦績。英翰李瀚章並請於安徽湖北省城建立專祠。又據何璟遵查該故督子孫詳晰覆奏。披覽之餘。彌增悼惜。會國藩器識過人。盡瘁報國。當湘鄂江皖軍務棘手之際。倡練水師。矢志賊。雖屢經困阨。堅忍卓絕。會不少渝。卒能萬眾一心。削平逆寇。功成之後。實畏小心。始終罔懈。其高拔賢才。如恐不及。尤得以及人事君之義。忠誠克效。功德在民。允宜迭沛恩施。以彰忠蓋。會國藩著於安徽湖北省城建立專祠。此外立功省分。並著准其一體建祠。伊次子瀚章生會紀。應伊孫會廣鈞。均著賞給舉人。准其一體會試。會廣鎔著

二一

賞給真外郎。會廣銓著賞給主事。均俟及歲時。分部學習行走。何璟英翰李瀚章摺三件。均著宣付史館。用示眷念勳臣。有加無已至意。欽此。

諭賜祭文

一
朕惟功懋懋賞。信主表延世之勳。思發褒裏。旌俎厚飾。終之典。爰申舉奠。用黃絲言。爾原任大學士兩江總督一等毅勇侯贈太傅會國藩。賦性忠誠。砥躬脩正。起家詞館。屢持節而捨才。旋陟寶曹。親上書而陳善。值皇華之載賦。閱風木而過歸。忽擲薊有關之頻驚。橫弛盜弄。懷戰陣無勇之非孝。墨經師與。奇功歷著於江淮。大名永光乎竹帛。俾正銜銜之位。仍兼軍府之尊。一等副庸。錫侯封於帶。雙輪曳羽。影翠影於雲霄。重鎗輪而在北門。百僚是式。還敬戒而惠南國。萬眾騰歡。方期碩輔之延年。豈意遺章之入告。老成忽謝。震悼良深。願厚禮於帑金。遣重臣而奠醊。特易名於上諭。贈太傅之崇階。列祀典於昭忠賢良。建專祠於金陵湘岸。舞章獻考。初祭特頒。於戲。天不慈遺一老。永懷切贊於元臣。人可贖今百身。用寄咨嗟於典冊。靈其不昧。尙克歆承。

二

朕惟位象將相。仗經文緯武之才。氣壯山河。懋崇德報功之典。爰陳芳奠。用獎成勞。爾原任大學士兩江總督

一等毅勇侯贈太傅會國藩。學有本原。器成遠大。忠誠體國。節勁凌霜。正直律躬。心清照水。初聯班於玉署。芸省贊聲。旋獻賦於蓬坡。芝坊晉秩。曼司文柄。先蜀郡而後供都。頻進謏言。因疾風而知勁草。脚階超擢。荷先朝特達之知。忘懼竊據。篤臣子靖共之誼。乃乘輅而奉使。旋持服以去官。值粵逆之紛來。遠楚軍之創立。援墨經從戎之義。俾移孝以作忠。勵丹心報國之誠。每出奇而制勝。選將不拘常格。募壯士於三科。分軍屢拔逆巢。隔長城於萬里。秩隆總制。節授專征。洎股費詐誕。膺皖江告捷。特晉鈞銜之位。仍持旄鉞之權。掃穴鴻渠。告成功於建業。副庸錫爵。膺懋賞於儲侯。懸翠羽以增輝。黃裳而耀采。未幾翕翕移節。藉修三接之儀。既因南服。方。仍繼兩江之任。方冀長承湛露。恩眷優隆。何期遽隕大星。老成彫謝。覽遺章之入奏。震悼良深。予卹典以從優。哀榮式備。諭重臣而致奠。給國帑以治喪。崇階贈太傅之銜。秩祀永賢良之譽。並專祠之分建。宜世裔之欽承。特佈丹綸。增光青史。諡為「文正」。九副嘉名。於戲。日贊黃扉。勳業永思。夫補袞。風樓丹旆。槍機倍切於麟箕。敬是茲芬。榮茲俎豆。

諭賜入祀賢良祠祭文

闕鼓聲而思將助。每深良稱之禮。洽馨香而感神人。用永明禋之報。崇祠載列。元祀攸隆。爾原任大學士兩江

總督一等毅勇侯贈太傅會國藩。學蔚儒宗。忠全令德。早入承明之選。玉尺提衡。俯辨卿貳之班。冰壺掣掇。歷華省而蘊言屢上。鸞禮制而正論無阿。迨幸諱以旋湘。迺盡哀而虛墓。值戎車之告警。奮集鄉兵。爰墨經以誓師。格違朝命。勇呼爪士。率長沙子弟。以先來。捷奏庸功。挽半壁河山而永定。拾屣懸髮。總制仍兼。雙輪揚上將之華。海增翠羽。一等錫通侯之貴。服稱黃註。延爵賞於後人。昇官銜於太保。節制甫資於北道。旌旄旋轉於南方。歌遠播而人望鴻飛。奠長江而民爭蟻伏。范希文以天下自任。志事終酬。李西平為社稷而生。身名俱泰。紅崖梳惠。草木知名。方倚元老以圖功。忽愷台星之斂耀。披章軫淵。厚禮飾終。晉太傅之崇封。易嘉名於上謚。念經天而偉地。斯謂之文。繫輔世而長民。爾身克正。允表賢良於京國。瞻懷耆舊於湖湘。廟貌革新。烝嘗罔替。有功德於民則祀。尙念典刑。惟俎豆之事嘗聞。載頌芬猷。昭茲休應。式克欽承。

御製碑文

朕惟台衡績懋。樹峻望於三公。鐘鼎動垂。播芳徽於百世。寵頒紫綬。色煥丹珥。爾原任大學士兩江總督一等毅勇侯贈太傅會國藩。秉性忠純。持躬剛正。闡程朱之精蘊。學茂儒宗。儲方召之勳猷。器推公輔。登本天而奏賦。清表風規。歷芸館而遷寮。誠孚日誥。屢持使節。兼校

榮哀錄 御製碑文 奏疏

春闈。俯擇御班。允諧宗伯。綢建言之直節。荷殊遇於先朝。凡茲靖獻之丹忱。早具忠貞之素志。乃突來夫粵匪。俾訓練。夫楚師。拔岳郡而克武昌。功如破竹。靖章江而平皖水。威振援袍。兩江尊制府之權。九伐重元戎之命。朕丕承基緒。眷念成勞。榮銜特昇。以青宮。峻秩更登。諸黃閣。辭節制於三省四省。顯見寅恭。精調度於湘軍淮軍。務嚴申令。聯蘇杭為犄角。聖恩同推。倚昆季為爪牙。邊巢直擄。金陵奏凱。慰皇考知人參任之明。玉詔酬庸。褒元老決勝運籌之略。既析圭而列爵。亦疊翠以影綴。既而載輸量移。因之闕廷展覲。彼歸近懃。實推社稷之臣。揚震厚遺。無慚清白之吏。惟是瘡痍未復。每慮念乎天南。續餉攸司。仍遣歸於江左。方謂功資坐鎮。柯期法鑿給租。贈太傅而階崇。祀賢良而譽永。專祠禘祭。世貴優頤。易名以表初終。嚴實允孚「文正」於戲。松楸在望。倍懷閭閻之遺。金石不磨。長荷鸞輪之錫。欽茲異命。時爾豐碑。

奏疏

紅蘇巡撫查明事蹟疏

紅蘇巡撫臣何璟跪奏。為督臣因病出缺。暫委藩司代拆代行。請旨迅賜簡放。并陳督臣歷年賢勞。籲懇恩施。仰祈聖鑒事。竊臣於同治十一年二月初六日。接據江寧布政使梅啓照稟稱。督臣會國藩正月廿六日。忽患

手職舌強。似有中風之症。延醫服藥。旋發旋止。仍視公事不輟。惟醫者診脈。均云：「心血過虧。」等語。正馳念間。旋於初八日接梅啓照續奏。初四日申刻。督臣前症復發。衆患足麻。卽於是日戌刻出缺。已由該司將各印信封存。弁於初五日將督臣遺摺。由驛馳遞奏明。請旨簡放遺缺。鈔錄奏稿到臣。臣接閱之下。不勝駭異。伏念大學士一等毅勇侯兩江總督臣會國藩。由翰林起家。以大考受宣宗成皇帝特達之知。侍蹟卿貳。道光三十年。在禮部侍郎任內。應詔陳言。彙摺呈覽。忠忱排闥。仰邀嘉獎。咸豐二年。典試江西。丁憂回籍。旋以專匪竄陷武昌。奉旨飭辦團練。數年之間。迭奉援鄂。授皖。授江西。移浙。援蜀之命。無日不在兵間。文宗顯皇帝硃批獎諭。鑒其孤忠。十年四月。遂以兵部右侍郎。簡授兩江總督。欽差大臣。皇上踐祚之初。倚任愈重。同治元年元旦。以克復安慶功。授協辦大學士。三年六月。以克復金陵功。錫封一等毅勇侯。其秉性之忠。學術之正。悉在聖明廟鑒之中。無俟微臣之贅錄。其歷年驍功政績。又有督臣自具奏報。及創定湘營。營制營規。水師。馬隊。各章程。內而咨存樞府。外而傳布各省。亦無俟微臣之表彰。此次因病出缺。想聖主篤念舊臣。凡屬卹飾終之典。自必從優恩施。亦無需微臣之籲告。臣之所不能已於言者。臣與會國藩相從日久。相知頗深。灼見其立功之偉。胥本於進德之勤。其生平盡瘁報國。克己省身。器識過人。堅

貞自矢。不待今世所罕觀。卽方之古賢臣。蓋亦未遑多讓。請敬爲聖主陳之。咸豐之初。會國藩以在籍侍郎。總辦團練。無尺寸之土地。無涓滴之餉源。餉之巨者。丁漕關稅。而職在軍旅。不敢越俎以代謀。餉之細者。勸捐抽釐。而身爲客官。州縣既不肯奉行。百姓亦恐難見信。慷慨募勇。又不得照綠營之例。按補實缺。空有保舉之名。而無履任之實。名器不虛。激勵尤難。方其初敗於岳州。再挫於九江。兵幾不振。窮且益堅。迨江西因陋之時。事勢非順。動多錮汙。一錢一粟。非苦心經營。則不能得一弁一勇。非苦口訓誡。則不能戰。於困苦難堪之中。立堅忍不拔之志。卒能練成勁旅。削平逆寇。上慰先帝在天之靈。輔佐聖世中興之業。雖曰疲疾可以成德術。動忍可以增智能。而艱難創造之初。固不敢自料有今日也。逮咸豐十年。初膺江督。進駐祁門。正值蘇常浙陷。浙省再陷。皖南皖北。十室九空。人煙稀少。軍餉則半菽難求。轉運則一夫難僱。自金陵以至蘇浙。八百餘里。無處無賊。無日無戰。徽州之方陷也。休祁大震。紅楚皆驚。或勸移營江西省城。以保餉源。或勸移營紅干州縣。以通糧路。而仍不出江督轄境。會國藩曰：「吾初次進兵。遇險卽退。後事何可言。吾去此一步。無死所也。」羣賊既至。晝夜環攻。飛礮雨集。會國藩手書遺囑。懷懸佩刀。猶復從容布置。不改常度。死守兼旬。直待鮑超率霆軍自山外來。始得以一騎驅賊出嶽。以十餘載稽誅之狂寇。會

國藩授錢四年。次第蕩平。皆以邪門初基不法。有以塞賊膽而壯士氣也。咸豐十一年八月。克復安慶。同治元年。水陸兩軍。並江而下。沿江兩岸。三千里名城要隘。皆爲我有。其弟會國荃。統得勝之師。直抵雨花臺。以瞰金陵。左宗棠統楚軍。以達浙境。李鴻章統淮軍。以達滬上。皆能深入虎穴。捷報頻聞。夏秋之間。兵機益大順矣。乃攻蜀甫利。而疾疫流行。上自蕪湖。下至上海。無營不病。不但守軍無勇。幾於炊爨無夫。楊岳斌會國荃總超諸統將。各抱重病。昔之勁兵。胥變羸卒。蘇浙賊會。方以此時大舉。以援金陵。圍攻雨花臺。四十六晝夜。更番不歇。南岸則寧國旌德同時吃緊。北岸則潁宿蒙亳捻匪出巢。正陽壽州苗逆復叛。髮賊又自紅牆上竄。然和巢合。亦復岌岌可危。數年以來。辛苦戰爭之土地。由尺寸而擴至數百里者。深恐一旦潰裂。盡隳前功。援浙救蘇保江三者。又須兼顧。時危事亟。軍情反覆。異議環生。有謂金陵進兵太早。必至師老餒殍者。有謂宜撤金陵之圍。以退各路援賊者。會國藩於羣言淆亂之時。有二軍不奪之志。枕戈臥薪。堅忍卓絕。卒能以寡禦衆。出死入生。搶事機大定之後。誥察友曰。昔人嘗言愛能傷人。吾此數月心膽俱碎矣。幸賴國宗鴻福。得以不死。然則今日之一病不起。豈其精力爲已瘁矣。會國藩戰勝之績。指不勝屈。惟此數年坎坷艱辛。當成就絕續之交。持茲往以爭命。當危疑震越之際。每百折而不回。蓋其所

志所學。不以死生常變易也。古之名臣。謀國效忠。惟以人事君爲急。會國藩昔官京朝。卽已留心人物。出事戎軒。尤勤訪察。雖一材一藝。罔不甄錄。而又多方造設。以成其材。其歷年薦達。與平日忠義相切劘者。如江忠源羅澤南李續賓劉騰鴻。死於戰陣。塔齊布李續宜蕭捷三江忠義死於勤勞。皆已載諸史傳。其幕府賓僚。偏裨卒伍。由書生而侏_三滌疆_折。由末職而侏_三磨重鎮。無愧漢亂之選。亦每錚在人耳目。無待臣言。其苦心孤詣。使兵事歷久而不敗。人材愈用而不窮者。則在以相勇之至。推行於維北漢泗劇動之風。爲國家干城之用。臣竊稽史籍。唐之李郭。亦僅收復兩京。宋之韓范。亦僅經略西夏一隅耳。我朝武功之盛。超轍前代。屢次戡定大難。然如嘉慶川楚之役。髮鬪不過四省。康熙三藩之役。髮鬪止及十二省。今髮捻回教諸匪。蹂躪竟及十七省。用兵已滿二十年。若專恃湘楚一軍與之角逐。而無進軍總起於其間。亦豈能南北分兵。次第削平禍亂。是其公忠偉略。推賢讓功。和衷共濟。尤足多者。臣昔在軍中。每聞談及安慶收復之事。輒推功於蒞於翼之籌謀。多隆阿之苦戰。其後金陵克復。則又推功諸將。而無一語及其弟國荃。談及曾親王劉檢之詩。習勞耐苦。輒自謂十分不及一二。談及李鴻章左宗棠一時輩流。非言自問不及。則曰謀略不如。往往形之奏牘。見之函札。非臣一人之私言也。嘗江皖糜爛之際。實仕宦所謂畏途。會國

請不辭遷按知兵之員。隨時保奏。以期同濟艱難。厥後大功底定。南服承平。朝廷延訪殷勤。猶復遷奉諍旨。令保封疆守節。會國諸則委。一疆吏既有征伐之權。不當更分治涉之柄。宜防外重內輕之漸。衆杜植黨樹私之端。其小心遠慮若此。宜其立功之後不自矜伐也。會國藩自督師以來。即有不期生還之志。是以經歷危險。屹然不可搖撼。精誠之至。部曲化之。手足化之。故湖軍陣亡文武官兵。可以按冊而稽者。多至萬餘人。咸豐八年。三河之戰。其胞弟會國華隨李續賓以軍騎衝賊死。同治元年。雨花臺之戰。其胞弟會真幹於賊退數日勞疾而死。可謂一門忠義矣。而與諸弟共在軍中。任事則督之爭先。論功則率之居後。蓋深見乎功名之際。終始之難。當以位高於衆。權重於人。懷大名不祥之懼。故遭非常之知遇。彌切爾位之靖共。其平日辦事不分畛域。江皖蘇浙兩湖之兵事。聯為一氣。兩江糧臺之軍火餉需。又不惜接濟鄰省。分應他軍。而於節制四省節制三省之命。則堅不敢屈。不渾一再陳情。期於得請而後已。蓋時念及報稱之難。不敢恃恩寵之厚也。其本身儉儉。一如寒素。官中廩俸。盡舉以充官中之用。未嘗置屋一廛。增田一區。蔬食菲衣。自甘淡薄。每食不得過四簋。男女婚嫁。不得過二百金。垂為家訓。有唐楊綰宋李沆之遺風。而鄰軍困窮。災民饑饉。與夫地方應辦之事。則不惜以祿俸之贏餘。助公用之不給。臣在皖時。固稔知

之。其立身平實。不求立異。守之甚嚴。而持之有恆者。一日不誑語。二日不晏起。朝端之委。親僚屬之咨。親友之函牘。就臣所見。固未嘗有缺斷矣。即外海遠人。內馭降將。亦必推誠布公。言皆實實。中外遠近。皆有以信其為人之不苟。在軍在官。夙夜未嘗少懈。雖風露雨晦。疾病憂鬱之時。率以雞鳴而起。夜分始息。蓋數十年如一日也。晚年不服珍藥。未嘗有臥病倚衾之日。前在兩江任內。封究文書。條理精密。無不手訂之章程。無不點竄之批牘。惟有舌塞心替之症。不能多見僚屬。前年回任。感激聖恩高厚。仍令坐鎮東南。自謂稍即息安。負疚滋重。公餘無客不見。見必博訪周諮。殷勤訓勵於僚屬之賢否。事理之源委。無一不默識於心。人皆服其老年進德之勤。其勉力在此。其致病亦在此。上年調兵回省。適臣行抵金陵。見其體貌尙如往年。而會國藩自言精力大衰。右目昏曠。臣與晤談數次。議論公事。娓娓不倦。會勦以節勞省神為國自愛。不意相距未及兩月。遽病不起。實由平日事無鉅細。必躬必親。殫精竭慮所致。兩江官紳士庶。聞其遠逝。無不同聲太息。則其功德及民。不可泯也。合行仰懇天恩。准於江南省城建立專祠。並飭於所在立功省分。一體建祠。以彰忠憲。並祈將臣奏章宣付史官。以備采擇。現在督臣身後之事。已經藩司梅啓照等。會同伊子會紀輝。妥為經理。查督臣有子二人。長即戶部員外郎會紀輝。次附貢生會紀鴻。孫三人。均

幼，皆隨侍任所。所有兩江總督衙門日行公事，除由臣
暫委梅啓照代拆代行外，所遺兩江總督員缺緊要，相
應請旨迅賜簡放，以重職守。理合將接據督臣因病出
缺緣由，並將其歷年賢勞實蹟，附陳恭摺，由驛五百里
馳奏，伏乞皇太后皇上聖鑒訓示，謹奏。

安徽巡撫請建祠疏

太子少保安徽巡撫奴才英翰跪奏，為督臣勳勞卓著，
輿情愛戴同深，籲懇天恩，俯准建立專祠，以彰忠藎。恭
摺奏祈聖鑒事。竊兩江督臣會國藩，因病出缺，荷蒙聖
慈，篤念盡臣，銓格矜卹，隆施曠典，業已至優極渥。原非
臣下所敢再瀆。卽該督臣平時武功政事，立品植學，諸
大端，仰荷天語之褒嘉，更有史館之撰述，久已宣布遐
邇，遠近周知。且會國藩綏靖南疆，奴才正轉戰淮北，雖
係皖中遠信，時承指示，然未得一日相從，一切事蹟，亦
無待奴才為縷述。惟是會國藩督師幾二十年，蕩平數
省，用兵以在皖為最久，功績亦以在皖為最多。當其由
紅羅轉戰而前，正值髮逆披猖，接連一片，江淮南北，幾
無完土。會國藩勵兵提將，推賢讓能，百折不回，堅忍不
拔。先平皖南，繼克安慶，旋復廬州，淮甯以南，大江上下，
同時底定。僧格林沁大軍，得以專力蕩平北路，無南顧
之虞。會國藩李鴻章左宗棠等，因而分道並進，肅清江
浙，克復金陵，殄除巨寇。是以論者僉謂克復安慶一役，
不特為平定金陵之基，亦實為南北廓清一大關鍵。安

樂哀錄 奏疏

慶克復後，會國藩督軍駐紮，整吏治，撫瘡痍，培元氣，訓
屬僚，若師弟，視百姓如家人，生聚教養，百廢具舉，閭閻
慶在席之安，父老忘亂離之苦。如是者又數年。迨至同
治五六年間，奴才帶兵剿捻，會國藩駐軍徐州，每有書
問皖事，猶諄諄以安民察吏為要務。至今皖中一切措
施，遵其規畫，皖民之安堵，實皆會國藩所留貽。故一聞
督臣出缺之信，士民奔走，婦孺感泣，爭赴奴才衙門，懇
請奏建專祠，以崇報饗。同聲籲懇，實出愛戴之誠。伏思
督臣中興戰績，列在簡冊，固可媲美古人，卽以遺愛而
言，則自昔疆臣，獨斌于成龍而後，亦未有若此感人之
深者。在朝廷褒功之厚，固已廣被無遺，而在皖民尸祝
之誠，又未敢壅於上達。可否仰懇天恩，俯准於安慶省
城建立專祠，以順輿情。而彰忠藎。出自鴻慈，至該督臣
立功省分甚多，可否一併建祠之處，恭候聖裁。奴才未
敢再為瀆請。所有督臣勳勞卓著，據情籲請各緣由，謹
恭摺具陳，伏乞皇太后皇上聖鑒訓示，謹奏。

湖廣總督請建祠疏

頭品頂戴湖廣總督臣李瀚章跪奏，為故大學士功德
在民，請於湖北省城建立專祠，並補陳賢勞實蹟，仰祈
聖鑒事。竊臣恭讀本年二月十二日上諭，「大學士兩
江總督會國藩學問淵懿，器識宏深，秉性忠誠，持躬清
正。著追贈太傅，照大學士例，賜卹賞銀三千兩，治喪賜
祭一壇，加恩予諡『文正』。」入祀京師昭忠祠賢良祠。

並於湖南原籍江寧省城建立專祠。其生平政績事實。宣付史館。」等因欽此。仰見聖主篤念忠良之至意。無任欽感。又准署兩江督臣何璟咨送摺稿到臣。所陳會國藩勞績。並其立身行政諸大端。均甚切當。其做咸豐十年以後軍情。亦極詳明。惟自咸豐初年創立水陸二軍。率以東征。及歷年在鄂在江艱危拮据情形。尙有未盡。蓋何璟與會國藩共事在咸豐十年以後。聞見有所未詳。其勢然也。臣於咸豐三年署彰化縣任內。經會國藩徵調從軍。前後近十年。知之較悉。欽奉諭旨。將其政績事實。宣付史館。則採擇不厭周詳。謹再為我皇上補陳之。咸豐二年。會國藩與敵江西。行入江境。聞計丁母憂回籍。時長沙解圍未久。武備總失。土匪蜂起。兵勇陸續闖境。騷擾民船。所在劫掠。會國藩奉旨幫辦團防。查匪事宜。因時局艱難。錢不容已。而奪情視事。又非其所安。比經奏明將來無論建立何項功績。均不敢仰冀。敵及抵長沙。立率擄船游勇。烏示河干。頒發鄉團族團執照。凡從賊勾賊各匪。責成團總戶族擄送。前後擒斬數百餘人。自後賊屢犯湘。各屬匪徒。無敢應者。皆其先機能斷之效也。由是延訪人才。按羅澤南王鑫李續賓張運蘭等。使練陸勇。拔彭玉麟楊岳斌黃翼升鮑超等。使練水勇。又以做營廢弛。奏參長沙協副將蔣德。特保辭。塔齊布等。均慮激思奮。力戰成名。皆其知人善任之

效也。咸豐三年。賊圍江西。會國藩命羅澤南等赴援。解圍後。因兩江總督奏請創立水師。為三省會戰。是年冬。親赴衡州。督造戰船。經費無出。惟以忠義激勵人心。籌捐濟用。四年二月。統率水陸兵勇六千人。行抵長沙。賊已由岳州竄臨湘陰寧鄉。會國藩派營擊退。追剿至岳州。會王鑫挫於蒲圻。岳州再失。賊仍由寧鄉竄臨湘。其時長沙西南北三面數十里外。賊蹤遍野。省城危急。會國藩令塔齊布率陸勇。彭玉麟楊岳斌率水師。上勦湘潭。而親率水師二營。陸勇一營。下勦靖港。四月初二日。靖港戰敗。會國藩自咎調度無方。投水三次。幕客親兵力救乃免。四月初五日。湘潭克復。盡焚賊舟。乃自劫靖港之失。跪請治罪。不以相厚同時大挫。矜自寬飾也。七月。整軍東下。克復岳州。廣東總兵陳輝龍水師敗於城陵磯。褚汝航等死之。會國藩堅持不勦。閏七月。塔齊布羅澤南擊敗陸賊。轉戰而前。八月二十三日。攻克武昌。十月十三日。大破田家鎮。戰績均詳奏摺。十二月。水師破街口賊卡。衝入鄱陽湖。盡焚賊艘。而老營之紮九江對岸者。被賊用小舟襲焚。事機危急。會國藩慨然曰。「大臣不可辱。」復欲投水。幕客親兵強披披紅衣。入羅澤南軍中。五年正月。入江西。重整水陸各軍。賊自北岸上竄。武備再陷。方其在江西也。以客軍當敵。挫之餘。呼應不靈。動多觸忤。會有三難之奏。然一聞賊陷弋陽廣信。即命羅澤南等力戰復之。七月。攻克義寧。又分

攻湖口。會塔齊布卒於九江。鄂事日急。復令羅澤南等赴援。與胡林翼會攻武昌。以全大局。是年冬。撥首石達開自崇通陷瑞臨。另股賊自廣東來會。江西八府五十餘州縣。皆倫於賊。湖南文報不通。乃分九江之軍。以援吉安。而自率州師。回駐省河。官民倚以爲固。六年春。吉安失守。周鳳山失利。樟樹鎮。其分攻撫建者。皆不能下。時餉源罄竭。枵腹轉戰。軍無怨言。皆會國藩志氣所感也。是年七月。胡林翼派會國藩劉騰鴻等援江西。進攻瑞州。賊乘章派劉長佑等進攻袁州。派會國藩進攻吉安。湖南之路始通。會撫州陸營失利。乃令移駐貴溪。以保浙東一線之餉路。七年三月。會國藩丁父憂回籍。八年夏。復奉命統軍援鄂。其時粵寇臨蕪。皆經湘軍克復。八月。會國藩克吉安。會國藩擬由建昌入浙。九年。移駐撫州。攻克景德鎮。旋奉入川之命。中途經官文胡林翼奏請改而援皖。駐宿松。克太湖。戰績均詳奏牘。至十年四月。補授江督。充欽差大臣。以後事蹟。均環所陳甚詳。臣亦由贛南道奏調廣東籌餉矣。竊維會國藩識力之堅毅。志慮之宏遠。持躬之謹慎。久在聖鑒之中。豈待微臣陳述。惟前後艱危。持摺情形。有非奏報所能詳者。似不妨合兩摺。以備史館之採擇也。臣聞會國藩初入翰林。卽與故大學士倭仁。太常寺卿唐鑑。徵事道何桂珍。講明程朱之學。克己省身。得力有自。遭值時艱。毅然以天下自任。忘身忘家。置死生禍福得喪。痛通於度外。其

大端則在以人事君。晉接士類。能佚其人之賢否。推誠布公。不假權術。故人皆樂爲之用。其過人之識力。在能堅持定見。不爲得譴所搖。進攻安慶江寧。則建三路進兵之議。劉辦捻匪。則建四面圍賊之議。其後成功。不外乎此。所創水師。尤能制賊死命。蓋賊自湖南竄踞金陵。盡掠沿江船隻。乘風日肆。數百里。飄忽無常。賴江各郡縣。一日驚驚。自會國藩水師東下。扼駐一處。卽能保全一處。當武漢再陷時。胡林翼以孤軍困守城下。而賊船不敢上。越金口一步。漢鎮貿易。均移至新隄。籌辦鹽釐捐輸。藉濟軍餉。胡林翼屢次奏稱。會國藩創立水師。其功甚大。蓋身在事中。故能言之深切。其後會國藩遣羅澤南。馳援武昌。惟時江西四面皆賊。且夕不能自保。祇以通籌天下大勢。非力爭上游。則金陵無可規復之理。是以自留江西。支持危局。而特遣勁旅。進攻武昌。此其深識遠慮。公爾忘私。尤有古人所不能及者。是會國藩慮定東南之功。尤以經營武昌爲一大關鍵。查羅澤南李德賓胡林翼官文。均經奉旨於湖北建立專祠。現在鄂中士民。聞會國藩德誼。莫不咨嗟感慕。籲請建祠。以崇報享。相應請旨。敕建會國藩專祠於湖北省城。以順輿情。而彰忠誼。所有請建專祠。並補陳賢勞實蹟。以備史館採擇各緣由。謹會同湖北監臣郭柏蔭。恭摺具陳。伏乞皇太后皇上聖鑒訓示。謹奏。

江西巡撫請建祠疏

頭品頂戴江西巡撫臣劉坤一跪奏。為紳民呈請建立已故督臣專祠恭摺仰祈聖鑒事。竊臣接據左藩三品京堂銜翰林院修撰劉鐸等呈稱。江西用兵十數年。幾與軍務相為始終。原任大學士兩江總督臣曾國藩之保衛江西。亦相為始終。咸豐二年賊圍江西省城。守兵已罄。軍糧而上游泰和縣土匪乘機起事。暗與髮逆勾通。勢殊岌岌。幸得曾國藩由湖南派羅澤南等各營來援。撲滅泰和之匪。省城髮逆勢孤。隨亦解圍而還。四年。曾國藩克復武昌。遂率得勝之師。順流而下。分攻九江。湖口。各軍失利。身軀於危。五年。以次進駐南康。南昌。分遣諸將。規復贛省。弋陽。義寧等處。人心倚以為固。會逆會石。遂開賴裕新胡以冕等大股竄入江西。復有另股自廣東來合。而曾國藩得力之將羅澤南等又先叛。援闕北。賊聚我寡。致江西八府五十餘州縣。先後淪陷。淫時餉源已竭。土氣不揚。會國藩內則籌給餉軍。以支危局。外則乞師鄰省。以通狂氛。其拮据之狀。堅忍之操。士民共見共聞。至今念之。莫不流涕。六年。闕南。闕北。各派楚師。分道入援。其瑞州一路。則其胞弟曾國華也。吉安一路。則其胞弟曾國荃也。此外諸將如劉長祚等。皆會國藩素所調拔之人。會國藩以援師大集。會同撫臣。左提右挈。指授機宜。並派李元度等駐紮貴溪。以通浙東約道。由是諸軍總聽用命。所向有功。六七八三年中。迭收全省肅清之效。九年。會國藩提師援浙。猶先分兵攻

克淳。梁縣。景德鎮地方。遂後攻安慶。下金陵。每聞江西風鶴之警。輒即派兵馳回援剿。同治三年。逆會幸其賢氣。亦接踵而至。岳建等府。遍地皆有賊踪。人情洶洶。懼蹈咸豐五年覆轍。時會國藩駐紮皖境。飛詔調起全軍赴援。羽檄頻催。急於星火。飽超兼程而進。遂大戰於許鵬。晝夜已逾二時。擒斬實以萬計。該逆士崩瓦解。隨即遣注廣東。安危利鈍之殺。聞不容髮。四年。髮逆蕩平。亦深資霆軍越勦窮追之力。江境得以解嚴。會國藩之有功於江西如此。至於援引士類。識拔人才。裁撤丁漕。撫卹黎庶。一切善政。不可殫述。夫感其節烈。朝廷已極優渥。而感其戴德。輿情願奉馨香。公懇奏請於江西省城建立專祠。俾士民得伸報享之誠。等情前來。臣查立功八人。均經奉旨於省城分建專祠。今督臣會國藩歷年保衛江西。厥功尤偉。士民進慕不忘。可否仰懇天恩。俯如該紳等所請。准於江西省城建立專祠。以慰輿情。而彰忠蓋。理合恭摺具奏。伏乞皇太后皇上聖鑒訓示。謹奏。軍機大臣奉旨。著照所請。該部知道。欽此。

直隸總督請建祠天津疏

太子太保大學士直隸總督一等伯臣李鴻章跪奏。為津郡紳民籲懇建立已故督臣曾國藩專祠恭摺仰祈聖鑒事。竊據天津道丁壽昌。天津府知府馬鍾武等計

稱。原任大學士兩江總督臣會國藩久任東南。勛勞懋著。同治八年。調任直隸。正歲畿匪擾之後。地方彫敝。下車伊始。即以治河。練兵。飭吏。三大端爲務。次第舉行。民賴以安。天津爲諸河下梢。海疆要地。利益尤多。辦理中外交涉事件。頗全大局。至今。咸鑒其苦衷。他如清釐錢糧。儉給役。勸農桑。嚴錮賭之刑。祛鹽務之弊。凡有裨於國計民生。無不盡心經營。實力興辦。委屬有功於民。據紳士沈兆鏞等聯名籲懇於津郡擇地建立專祠。以資報賽。由該道府轉詳請奏。聲明所需經費。另行集捐。等情前來。臣查會國藩前於兩江總督任內。因病出缺。疊荷恩施。至優極盛。並准於立功省分。一體建祠。仰見聖主眷念蓋臣。有加無已。欽感同深。其在直隸幾及兩年。政績實多可傳。今津郡紳民。追念舊德。籲懇祠祀。出於至誠。相應仰懇天恩。俯賜照准。以順輿情。理合恭摺具陳。伏乞皇上聖鑒訓示。謹奏。軍機大臣奉旨著照所請。該部知道。欽此。

直隸總督請建祠保定疏

太子太保大學士直隸總督一等伯臣李鴻章跪奏。爲已故督臣遺愛在民。據情奏懇恩准建立專祠。崇祀名宦。恭摺仰祈聖鑒事。竊據藩司孫觀。臬司范燾。清河道葉伯英會詳。據保定府紳士冀錫稱等稟稱。原任大學士兩江總督會國藩。自同治七年調任直隸。時值捻氛甫靖。該督臣苦心經理。燈徹官方。禮賢尚諒。選將練兵。

榮哀錄 神道碑

與舉水利。賑恤災荒。籌改班班。不可殫述。前津郡稟請建祠。業蒙奏准。省城爲首善之區。士民愛戴尤深。籲懇捐建專祠。春秋致祭。並據直省紳耆進士王振綱。翰林院庶吉士辛家彥等公呈。請將前督臣會國藩崇祀省城名宦祠各等情。請奏前來。臣查該故督臣調任畿輔兩年。舉賢任能。吏治爲之清肅。他如治河練兵。次第籌辦。皆有成效。於地方利弊。切實講求。綱紀頓立。廢墜具修。其在任時。清理通省訟獄積案數萬件。去任後。助天河水災賑銀二十萬兩。尤爲人所難能。功德在民。久而弗替。既據合詞。懇請。出於至誠。相應據情。籲懇天恩。准於保定省城。由該紳士等捐建前督臣會國藩專祠。由地方官春秋致祭。並准祀省城名宦祠。以順輿情。而彰盛德。理合恭摺具奏。伏乞皇太后皇上聖鑒訓示。謹奏。軍機大臣奉旨著照所請。該部知道。欽此。

神道碑

皇清誥授光祿大夫贈太傅武英殿大學士兩江總督一等毅勇侯會文正公神道碑

聖情受命二百年。有捐曰會公。始以儒業事宣宗皇帝。入翰林。七遷而爲禮部侍郎。文宗御極。正色直諫。多大臣之言。咸豐二年。以母憂歸。湘鄉。遂起鄉兵討賊。自宣宗時天下又安。內外弛備。於是西岸始通中國。海上多事。未幾而廣西羣盜起。大亂以興。及此年。放兵京出。攻

長抄不克。遂渡洞庭。陷武昌。循江而下。所遇摧靡。而是時天下兵大抵情竅。惟怯。不可復用。諸老將盡死。爲吏者不習戰陣。公旣歸。天子詔公治國。練長抄。公曰。金草之事。其政有避。因奏言。國練不食於官。緩急不可恃。請就其鄉。團丁千人。募爲勇營。教以兵法。束伍儼技。號曰「湘軍」。湘軍之名。自此始。明年益募人三千。解南昌之圍。是時賊已陷金陵。羅之掠民。幾巨萬。縱橫大江中。於是議劍舟師。制船鑄礮。選將練卒。教習水戰。天子嘉之。湘軍水師。由此起矣。四年。成軍。討初戰。再失利。未幾。大捷。湘輝。以師不全勝。上謫。自劾。已而克岳州。下武昌。大破田家鎮。斷橫江鐵鎖。乘勝圍九江。進窺湖口。當是時。湘軍威名震天下。會水師。陷入彭蠡湖。鄂帥襄師。武昌再失。公曰。武昌據長江上游。必爭之地也。急檄湖北按察使胡公林翼。率偏師西援。不克。則悉銳師繼之。而自留江西。督攻九江。已而悍賊石達開等。分道犯江西。破郡縣六十餘城。公上疏。自劾。卒以孤軍。堅拒死守。賊不得進。六年。胡公等復武昌。明年。拔九江。軍威復振。公治軍。謀定後動。折而不撓。堅如金石。重如山岳。諸將化之。雖難公遠出。皆遵守約束。不悞。自九江未拔。諸軍已定。定江西郡縣矣。公以父憂歸。累詔起復。視師不出。旣逾小祥。始奉命援浙。是時。公軍爲天下勁旅。四方有警。爭乞公赴援。南則浙閩。西則蜀。北則淮甸。皆遙恃公軍爲固。慮旌旗他指。天子亦屢詔公。規畫全

勢。視緩急。輕重去就之。公曰。金陵者。必據上游。法當舍枝葉。圖本根。遂建議。三道規皖。咸豐十年。蘇浙倫陷。朝廷憂之。以公總制江南。趨詔公東兵。而公卒不棄皖。以失上游。是年。西夷內犯。定和議。十一年。公克安慶。今上同治元年正月元日。授公。辦大舉士。於是分道出師。大舉東下。公弟。浙江巡撫。國荃。以湘軍。發大江。薄金陵。今陝甘總督。左公宗棠。以楚軍。抵衢州。援浙江。鴻章。以淮軍。出上海。規蘇常。水師中江而下。爲陸軍聲援。三年。蘇浙以次。蕪定。而公弟等。亦攻拔金陵。獨都。自公初出師。至是。十有三年。粵賊平。東南大定。論功。封一等毅勇侯。開國以來。文臣封侯。自公始。公既平定江南。威振方夏。名聞外國。會忠親王。僧格林沁。戰歿於苗。廷議。以公北討。旆趨。是時。公所部。湘軍。皆已散歸。經畫歲餘。功緒漸彰。會疾作。有詔。還鎮江南。中外大事。皆就決之。公所謀。慮慮深遠。進規中原。請築長牆。以制流寇。策西事。議清甘肅。而後出關。籌漢黔。議以蜀湘兩省。爲根本。皆初立一議。數年之後。事之成否。卒如其說。而馭夷。爲尤著云。初咸豐三年。金陵始陷。米利堅人。嘗謁江南帥。願以夷兵助戰。十一年。和議既成。俄羅斯。米利堅。皆請以兵來助。公議。以爲宜。嘉其效。願。而緩其師期。及同治元年。英吉利。法。德。西。又以爲請。公又難。以爲宜。申大義。以謝之。陳利害。以勸之。皆報可。廷議。購夷船。公力贊之。比船至。欲用夷賂。則議廢其事。其後。自募工。寫夷

船之制。近似之。遂譏開局製造。自是外洋機務輪舟夷
競。中國頗得其要領矣。六年。詔中外大臣。籌和議利害。
可許不可許。公議以爲其爭彼我之虛儀者許之。其奪
吾民之生計者。勿許也。移直隸總督。天津民有擊殺法
蘭西領事官者。法人訟之朝。天子慰解之。法人固爭。有
詔備兵以待。公曰。「百姓小忿。不足擊邊釁。」從之。而
密議備將練兵。設方略甚備。先是公已積勞成疾。至是
疾益劇。會江南開餉。上念南洋取夷事任絕重。非公不
可。遂命還江南臥治之。至則經營遠略益勤。既一年。疾
甚。同治十一年二月戊午。遂薨於位。官至武英殿大學
士。享年六十有二。遺疏入。天子震悼。贈賜有加。贈太傅。
諡「文正。」公諱某。字德生。世爲湖南湘鄉人。曾祖克
希。祖玉屏。父縣學生麟書。三世皆以公貴。封光祿大夫。
會祖妣彭氏。祖妣王氏。妣江氏。皆封一品夫人。夫人衛
陽歐陽氏。生男二人。紀輝庵生。戶部員外郎。錫爵爲侯。
紀燾附貢生。孫三人。廣鈞廣銓廣銓皆幼。公既歿。紀燾
廣鈞皆賜舉人。廣銓賜員外郎。廣銓爲主事。女五人。皆
適士族。公爲學研究義理。精通訓詁。爲文效法韓歐。而
精益求精。以漢賦之氣體。其學問宗旨。以禮爲歸。嘗曰。「
古無所謂經世之學也。學禮而已。」於古今聖哲自文
周孔孟。下逮國朝顧炎武秦蕙田姚鼐王念孫諸儒。取
三十有二人。圖其像而師事之。自文章政事外。大抵皆
禮家言。嘗謂。「聖人者。自天地萬物推極之至。一室米

鹽。無不備而理之。」又嘗擬古禮殘缺。無軍禮。軍禮要
自有專篇。細目。如威敬元氏所紀者。若公所定營制營
規。博稽古法。辨等明威。其於軍禮。庶幾近之。至其論議
刑罰。秩序井井。經緯乎萬變。調理乎鉅細。其素所蘊蓄
然也。喪歸湖南。營葬於善化縣某鄉。塋章少從公問學。
又相從於軍旅。與聞公謀國之大者。乃爲文刻其墓道
之碑。銘曰。於鑠皇清。世載聖武。高夷震疊。匪臣伊主。歷
載二百。極熾而屯。孰排其紛。厥維宗臣。功與時會。其成
則天。惟公之與。事乃異前。國有舊旅。雲屯星羅。公曰。茲
矣。汰之則邪。率我萌諫。敵愾同仇。舍其鉅變。來事戈矛。
厥初孤立。百挫不慍。天日可格。鬼神爲泣。持己所學。陶
鑄羣倫。雖培侵釐。爲國得人。孰任鉅艱。刑印使帥。孰以
節死。孰成孰敗。決之於微。卒險不交。朝廷乏人。取之公
旁。始詔求賢。江以薦起。繼才胡公。勝己十倍。陸軍諸將。
首塔羅王。二李繼之。水則彭楊。皆公所識。披於風塵。知
人之鑑。並世無倫。萬衆一心。貫虹食鼎。終奠九土。瘞此
在醜。事已大畢。乃謀於海。益我之長。奪彼所恃。動如雷
霆。靜守其雄。內圓自強。外羈厥之。默運方寸。極九萬里。
人謂公性。曰吾隨矣。式蛙嘗隱。以生以訓。大勳宜就。胡
棄而隕。道光季世。夷始恩我。內患乘之。燎原觀火。彼睨
吾旁。雖雉首尾。曰敵可乘。附耳同起。夷誓其外。寇訶其
內。不有我公。壘甚矣。德維昔相臣。佐治以文。武功之感。
則由聖人。留都開基。三藩定變。新疆外拓。川楚內奠。四

夷奔走。唯恐在後。皆秉聖譏。羣臣拱手。公起詞臣。以安以讓。天子虛己。曰。伊予臣。相業之隆。近古無有。開物成務。是謂不朽。退之有言。倘爲茲宗。扶輿磅礴。營積必鍾。後千百年。降神堯堯。我銘不訕。以記崇高。詔授光祿大夫。太子太保。武英殿大學士。直隸總督。一等肅毅伯。翁。騎都尉。世職。門下士。李鴻章頓首拜頌。

墓志銘

皇清誥授光祿大夫。贈太傅。武英殿大學士。兩江總督。一等毅勇侯。曾文正公墓志銘

同治十有一年二月。武英殿大學士總督兩江曾公薨於位。天子震悼。加贈太傅。諡「文正」。命儒臣議賜祭文。墓碑以葬。公子紀傳紀鴻以銘墓之文。屬之劉公蓉。未及葬。而劉公薨。檢其遺書。得所爲銘辭。而前敘闕焉。又明年。卜葬善化縣之平塘伏龍山。葬有日。而夫人歐陽氏薨。遂卽其地附葬。於是滿齋歸位。承劉公之意。而敘之。公諱國藩。字伯愷。號餘生。湘鄉人。咸豐初。寇發廣西。一陷之地。所至糜爛。盜踞金陵。十四年。盡隸江浙兩省地。披而有之。公以侍郎奉母喪歸。起鄉里討賊。奮其佔畢之儒。鉅擾之民。暨長江萬里。盛賊踣之。天下復覩又安。民用蘇息。已而合肥李公平捻逆於甯津。湘陰左公珍亂於關隴。皆用公薦擢。席其遺規。遂厥成功。於是江以南。搗亂尤深。公再督兩江。虛枯窮蹙。煦濡羣萌。

孤養有餐。僭宿有歸。斯應燔燭。幽之太和。故公功在天。下。而江南之於公。若引之以爲己私。公治爲翰林。窮極程朱性道之蘊。博考名物。熟精禮典。以爲聖人經世宰物。綱維萬事。無他。禮而已矣。幾凡可使之醇。微俗可使之與。而其精緻具存於古聖賢之文章。故其爲學。因文以證道。常言「載道者身也。而致遠者文。天地民物之大。典章制度之繁。惟文能達而傳之。俛焉日有莘莘。以求信於心。而當於古。」其平居抗心希古。以美教化育人才爲己任。而尤以知人名天下。一見能辨其才之高下。與其人賢否。滿洲塔齊布公。浙寧江公。忠烈。衛陽彭公玉麟。善化楊公岳斌。或從未弁及諸生。獎拔爲名臣。其於左公宗堂。趨向不同。而奇左公智術。以公義相取。左公亦以顯名天下。片長薄技。受公一顧。爭自致磨砥礪。敦尚名節。在軍必立事功。在官爲循吏。曰「吾不忍負會公。」而公歛退虛鞠。勤求己過。日夜憂危。如不克勝。自初仕及當天下重任。始終一節。未嘗有所寬假。及其臨大敵。定大難。從容審顧。徐厝之安。一無疑懼。此公道德勛名。被於天下。施之萬世。而其意量之闊濶。終莫得而罄其用。而窺其蘊也。公以戊戌科進士。改翰林院庶吉士。又明年。授檢討。五轉至禮部侍郎。文宗卽位。詔求直言。公疏陳本原。至計天下驚歎。以爲唐宋名臣所不及。典試江西。未至。丁母憂。會廣西賊團長。奉命幫辦湖南團練。治軍長沙。又治水師衡州。武昌再陷。命公

督師東征。再克之。轉戰江西。丁父憂歸。上初卽位。授大學士。總督兩江。節制四省。而公弟太子少保威毅伯圖基。以一軍特起。克復金陵。天子嘉勞。錫公一等毅勇侯。晉太子太保。旋調直隸總督。復調兩江。公生於嘉慶十六年辛未歲十月十一日。薨於同治十一年壬申歲二月初四日。年六十有二。會祖堯希。祖玉屏。父麟書。自公祖若父。皆名德著。及見公爲侍郎。受封光祿大夫。天下榮之。配歐陽夫人。衡陽縣貢生凝祉之共。勤儉有禮法。恩周於人。行飭於家。自文正公在軍。夫人嘗蔬食夜曉告天。乞早得生民之福。助成大功。慰天子憂勞。以同治十有二年八月十三日薨。年五十有九。子紀輝。戶部員外郎。襲封一等毅勇侯。紀鴻。賞給舉人。女五人。一適袁氏。江蘇松江府知府芳瑛之子秉植。一適陳氏。安徽池州府知府源堯之子遠濟。一適羅氏。浙江寧紹台道道。隨巡撫。忠節公之子堯升。一適員外郎郭嗣基。崇燾之冢子也。一字禹氏。廣東候補道爾康之子錫祺。孫四人。廣鈞舉人。廣鏞六部員外郎。廣銓六部主事。年皆幼。朝廷推恩賞官有差。廣鏞公壽後生。公論量恢闊。望而知其偉人。生平適合是非。求信諸心。不與人爲去就。而精鑿微識。一言一事。研覈無遺。尤務規其大。而見其遠。始出治軍討賊。以東南大勢在江險。不宜盡弛與賊。力請以水師自效。及爲欽差大臣。建三路進攻。以規江浙兩省之議。討捻寇。河南建合四省之力。蹙賊一隅之畿。

皆策之始受事之日。其後成功。一如公言。在軍戈鉞櫓。櫓。短長尺度。躬自省量。無或苟者。榮辱得失。無關其心。而未嘗一念不周乎天下。一事不盡乎民隱。傳曰。『爲仁由己。』公無愧焉。公學行功業。具見國史本傳。及合肥李公所撰神道碑。不復論著。其生平志節。關係天下之大者。藉於公之墓。而繫以劉公之銘。其辭曰。國有治亂。任賢者昌。惟聖御世。與時弛張。道光未造。亢極而僣。吏惰民偷。卒嬉於伍。曠徒乘之。揭竿起舞。天祚聖清。篤生元輔。重奠八荒。爲國肱股。始公通籍。黜翎披垣。顯皇初政。抗疏陳言。睿譔之風。帝心所簡。起公衰麻。戎符往綰。時瘴方張。百城橫亂。參湯於鼎。當者糜爛。公倡義旅。豪傑景從。虎飛龍窟。吐氣如虹。銳師東討。靡堅不攻。大紅南北。旄憲四通。利鈍無常。或傷衆毀。孤忠籲天。義位神鬼。亦或左次。敵兵邪門。射狐夜啼。星日晝昏。百憂所叢。不震不悚。一柱屹然。華嶽之重。李東大難。奮橫鷹揚。澹渠掃穴。寸磔梟狼。以義舉天。浴日於海。盪蕩垢汙。河山無改。帝勞相臣。建侯剖符。昇藩畿輔。再鎮三吳。民謠於野。絃歌載塗。公心廓然。與物無競。斂聚羣謀。慮己以臻。慮周六合。不耀其明。昭衷自揚。婦賢歸誠。琴瑟煌煌。拱籙高下。大匠陶鎔。歸諸一治。何材不植。何功不庸。片長思奮。大受以隆。公不自賢。厥心愈下。被寵若鶩。聞過則謝。退偃一室。仰思古人。尙友于載。遙契以神。發爲文字。怪偉縱橫。雷霆砰擊。金石鏗鳴。魁路百家。孤懷自賞。

跨宋鞅塵。近古無兩。德溢於位。功不償年。載其忠蓋。往
卽重泉。誰與土者。豈曰非天。北斗帝鄉。公魂攸寄。陵圯
谷墟。其誠不替。伐石勒銘。敢告萬世。誥授光祿大夫賜
進士出身二品頂戴前署理廣東巡按卅七級湘陰鄧
壽彝諱文。誥授資政大夫前陝西巡按湘鄉劉蔭製銘。
誥授光祿大夫太子少保前湖北巡撫一等威毅伯湘
鄉會國荃書丹。誥授光祿大夫賜進士出身太子太保
武英殿大學士直隸總督一等肅毅伯合肥李鴻章篆
蓋。



字大版活 圈加註廣

四部精華

註增生先翊 陸 本選生先藩國生傑會

經史子集 浩如煙海 讀者從何入手！

本書留四部之精華 集各家之名著

已替讀者——

打開門路 闢成大道

由此推進，不特國學得其捷徑，即整理國故，亦能抓住中心。數千年道術，學藝，文章之精華盡萃於斯。編者將四部書約繁為簡，汰蘊留精，而篇篇仍為國學之重心，歷代之名著，使讀者——

節時……省錢

角四元一價實冊三

行發局書界世

180 の277

十五年十月五日

該書店

中華民國二十五年八月初版



發行所

曾文正公全集 (全四冊)

實價國幣二元

(外埠酌加運費匯費)

出版者 國學整理社

發行者 世界書局

印刷者 上海大連路
世界書局

上海及各省 世界書局

